





Q

7













R. P. FRANCISCI  
SUAREZ

GRANATENSIS è Societate JESU,  
Doct̃oris Eximii,

D E


INCARNATIONE  
PARS PRIMA.

*Priorum viginti sex quæstionum tertiæ Partis  
D. Thomæ accuratam, & valde elaboratam  
expositionem complectens.*

OPERUM TOMUS DECIMUS SEXTUS.



230.24  
Sm 13



V E N E T I I S,  
APUD SEBASTIANUM COLETI.

MDCCXLV.

---

Superiorum Permissu, ac Privilegiis.




R. P. FRANCISCI  
SUAREZ

GRANATENSIS & SOCIETATIS IESU,  
DOCTORIS EXIMIUS,

INCARNATIONE  
PARS PRIMÆ.

Priorum viginti sex questionum tertie Partis  
D. Thomæ accuratam & valde elaboratam  
expositionem complectens.

OPERUM TOMUS DECIMUS SEXTUS.



V E N I T I S  
APUD SEBASTIANUM COLETTI  
MDCCLV.

Superiorum Permissu, ac Privilegio.



ILLUSTRISSIMO, ET REVERENDISSIMO

D. D.

# GASPARI DE QUIROGA,

S. R. E. CARDINALI,

Archiepiscopo Toletano, Hispaniarum Primati, ac Supremo Fidei  
Inquisitori, &c. veram felicitatem,




NULLIS rationibus adduci potuissem, Cardinalis Illustrissime, ut non minus difficilia, & abstrusa, quam sacra incarnati Verbi mysteria, quæ auditoribus meis explicaveram, ad communem omnium utilitatem in aspectum, lucemque proferrem, nisi me ii coegissent, quorum imperium recusare nec poteram, nec debebam. Nam, si arcana, reconditaque mysteria excipias, quæ nos Deum Opt. Max. natura unum, & simplicem, hypostasi vero trinum esse, docent, illa sunt nobilitate prima, difficultate maxima, utilitate singularia, quæ Dei Filium ita factum hominem pro humani generis salute declarant, ut ex duabus naturis, illius divina, & nostra mortali, mirabiliter una persona consistat. Sed quamvis huius argumenti dignitas cum summa difficultate conjuncta, propter ingenii mei tenuitatem, mihi jure timorem afferret, divini tamen amoris, in hoc immenso beneficio quasi effusi, frequens recordatio, ita me timentem, atque cunctantem, vel recreavit, vel incendit, ut cum de illo cogito, etiam ipsæ meditandi, scribendi, distandique molestiæ leves mihi esse videantur. Accessit, animosque addidit clarissimi nominis memoria tui, cui sine ulla deliberatione hunc meum laborem (qualiscumque ille sit) dicare constitui: neque enim me ita terret amplitudo tua, qua sacra purpura insignis fulges, qua Pontificia dignitate totius Hispaniæ primaria ornatus Toletanam Ecclesiam regis, qua demum summa potestate præditus Christianam religionem tueris, quam humanitas tua, & eximia in Societatem nostram benevolentia me jacentem erigit, ac timentem, dubitantemque confirmat. Offero igitur primos tibi meorum studiorum, ac lucubrationum foetus, auctoritate quidem tua fortasse non dignos, tuis tamen erga Societatem universam meritis, & officiis debitos. Quos si benigne susceperis, non erit quod hominum judicia, quibus expositus est, semperque fuit hic scriptorum labor, pertimescam; sed erit potius quod mihi ipsi gratuler, quod te patrono, tuique nominis splendore commendatum opus in lucem prodire, atque in omnium oculis, manibusque versari secure, audacterque possit. Quare, Præsul amplissime, munus hoc, ea benignitate prosequere, qua semper es prosecutus res omnes nostræ Societatis, quæ maximis tuis beneficiis devincta, non minus te ut parentem benignissimum amare, quam ut clarissimum Principem colere merito debet.

*Amplis. Tuae Illust. ac Reverend. perpetuus  
in Christo servus*

*Franciscus Suarez.*



# PIO LECTORI SALUTEM.



**D**U, multumque dubitavi, studiose Lector, an disputationes has, quibus auditoribus meis sacra incarnati Verbi mysteria explicavi, in publicum emitterem, an vero suppresserem, & apud me continerem. Nam primum quidem rei magnitudo, ac splendor, ingenii mei imbecillitatem perstringebat: deinde terrebant me, quæ a sapientissimis viris hoc de argumento subtiliter sunt hætenus disputata, doctissimeque conscripta, quibuscum si hæc nostra conferantur, tenuia fortasse, ac jejuna videbuntur. Postremo non ignorabam, quam periculosum sit hominum manibus, oculisque versari, qui levibus interdum maculis, aut nævis offenduntur. Atque iis quidem rationibus hoc opus premere decreveram, sed amici quidam mei eruditi, & prudenti, ac sincero judicio præditi, cum illud rogatu meo legissent, ac probassent, magnas utilitates agebant (si in lucem prodiret) posse omnibus Theologiæ candidatis afferre, in quibus haud esse eam commoditatem negligendam dicebant, quæ ex librorum excusorum copia percipi posset. Siquidem exiguo pecuniæ dispendio, quod temporis inutiliter in describendo magno cum labore sæpe consumitur, id totum in exquirenda ac pervestiganda veritate, & cujusque disputationis pondere expendendo, fructuosius collocari posset. Addebant præterea timendum esse, ne hæc ipsa concisus a me in scholis dictata, & mendose excepta a discipulis, & perscripta, ab alio evulgarentur aliquando, satiusque esse, ut a suo auctore enucleatius explicata, & limata, ad manus hominum pervenirent. Cum autem me neque tot rationibus, neque etiam precibus amici in suam sententiam possent adducere, accessit tandem eorum auctoritas, qui mecum agere obedientiæ jure possunt, & me bærentem, & inter varias deliberandi curas quasi fluctuantem, denique perpulit, ut banc tantam provinciam susceperem, & difficultates omnes, quæ plurimæ ac maximæ mihi ante oculos versabantur, in ea sustinenda devorarem. Quarum illa fuit certe non parva, quæ omni opera, studio ac diligentia conatus sum D. Thomæ sententias sic explicare, ut aperte ac dilucide intelligantur, quo in genere dedi operam, ut sacrarum literarum testimonia, Conciliorum decreta, & sanctorum Patrum monumenta diligentius evolverem, & quasi fontes ipsos, ex quibus D. Thom. hausit, demonstrarem. Ex quo factum est, ut nonnunquam disputationes postea prolixiores forte videantur, quod non tam jejune, quam in scholis sit, tractentur, sed allatis in medium sanctorum Patrum sententiis confirmantur, ac differantur. Nullam tamen (ni fallor) alienam quæstionem, & (ut ita dicam) peregrinam, e suis tanquam sedibus convulsam in meas hæc commentationes quasi in alienas sedes invitam, ac repugnantem transtuli, nullam redundantem, ac inani verborum copia exornavi, sed quod perspicue multa paucis vix dici possunt, & obsequendum fuit desiderio plurimorum, ipsa suscepti operis ratio nos fecit longiores. In aliorum opinionibus, vel confirmandis, vel refutandis D. Thomæ modestiam (quæ summa est) imitari studui. Itaque sic auctores ipsos profero, ut laus sua cuique tribuatur: sic sententias, eorum etiam, quos non probo, expono, ut quantum momenti, atque auctoritatis habeat cujusque sententia, Lector facillime dijudicare possit citra cujusquam vituperationem, atque injuriam. Nam sicut a viro Religioso ac modesto maxime abesse debet sui laudatio, sic etiam aliorum acerba reprehensio, ac vituperatio. In quibus rebus opinioni locus est, ipsius etiam Angelici Doctoris prudentiam, atque exemplum secutus, eum delectum habui, ut quæ pia, quæ grævia, quæ antiqua sunt, anteponerem iis, quæ a pietate, gravitate, antiquitate videntur abhorreret. Hæc habui, de quibus te admonerem, optime Lector. A te magnopere etiam atque etiam peto, ut si quid boni tibi (cum hæc legeris) occurrerit, id totum Deo Optimo Maximo acceptum referas, fontibus bonorum omnium: si quid vero, quod minus placeat, mihi id tribuas, & ignoscas.

## AD EUNDEM DE HAC POSTERIORI EDITIONE ADMONITIO.

**I**N bujus Operis editione priori veritus sum, ne longum id nimis, prolixumque videretur; postea vero multis, quibus credere par erat, plane intellexi, multa potius in eo concisiora visa fuisse, quam exigebat argumenti & gravitas & difficultas. Præterea post librum hunc in lucem editum alii prodierunt, qui doctis illis quidem, acutisque contra nostram doctrinam objectionibus, excitaverunt, impuleruntque nos, ut quæ prius scripseramus, vel explicaremus amplius, vel confirmaremus ac defendere. Quod utrumque in causa fuit, ut liber non parum excreverit: vix enim ulla in eo disputatio reperietur, non multo, quam edita primum fuerat, locupletior, ut non immerito novum aliudque opus possit & appellari, & existimari. Faxit Deus, ut quemadmodum prodit major, prodeat & melior atque utilior. Id unum constanter affirmare potero, eum mihi animum semper fuisse, eaque de causa nulli operi, nullique labori pepercissem, ut veritas ipsa cerneretur atque stabiliretur, nihilque contentions ergo aut olim statuisse, aut denuo confirmasse, sed solius amore veritatis: quæ eadem mente hos ab omnibus optamus legi libros. Neque vero mirari te vellem, Christiane Lector, cum auctores & Catholicos & pios, diversas sæpeque repugnantes sequi, tuerique sententias videris: in his enim, quæ certa fide non sunt stata, inter viros etiam sanctissimos eam fuisse opinionum varietatem & accepimus & legimus. Cumque idem omnium scopus sit, investigatio videlicet, inventioque veritatis, eam opinionum siue diversitatem, siue contrarietatem, aut Christianæ charitati officere, aut ex animorum dysfunctione provenire, putandum non est. Vale.



# INDEX QUÆSTIONUM ET ARTICULORUM DIVI THOMÆ, QUÆ IN HOC TOMO EXPONUNTUR.

*Prior numerus paginam, alter pagine columnam designant.*

## QUÆSTIO I.

**D**E convenientia Incarnationis, in sex articulos  
divisa. pag. 17. colum. 2

Articulus I. utrum conveniens fuerit Deum incarnari.  
*ibid.*

Articulus II. utrum necessarium fuerit, ad repara-  
tionem generis humani, Verbum Dei incarnari. 24.2

Articulus III. utrum si homo non peccasset, Deus in-  
carnatus fuisset. 101.2

Articulus IV. utrum principaliter Christi incarnatio  
facta fuerit ad tollendum peccatum originale, quam  
actuale. 105.2

Articulus V. utrum conveniens fuerit, Deum incar-  
nari ab initio mundi. 145.1

Articulus VI. utrum Incarnatio differri debuerit usque  
ad finem mundi. 146.2

## QUÆSTIO II.

**D**e modo unionis Verbi incarnati, in duodecim articu-  
los divisa. 152.2

Articulus I. utrum unio Verbi incarnati sit facta in  
natura. *ibid.*

Articulus II. utrum unio Verbi incarnati facta sit in  
persona. 155.1

Articulus III. utrum unio Verbi incarnati facta sit in  
supposito, vel hypostasi. 157.1

Articulus IV. utrum persona vel hypostasis Christi post  
incarnationem sit composita. 158.1

Articulus V. utrum sit facta aliqua unio animæ & cor-  
poris in Christo. 159.2

Articulus VI. utrum natura humana fuerit unita Ver-  
bo Dei accidentaliter. 160.2

Articulus VII. utrum unio naturæ divinæ & humanæ  
sit aliquid creatum. 175.1

Articulus VIII. utrum unio Verbi incarnati sit idem  
quod assumptio. 175.2

Articulus IX. utrum unio duarum naturarum in Chri-  
sto sit maxima unio omnium. 200.1

Articulus X. utrum unio duarum naturarum in Chri-  
sto sit facta per gratiam. 205.2

Articulus XI. utrum unionem Verbi incarnati aliqua  
merita præcesserint. 207.1

Articulus XII. utrum gratia unionis fuerit homini  
Christo naturalis. *ibid.*

## QUÆSTIO III.

**D**e modo unionis ex parte personæ assumentis, in octo  
articulos divisa. 232.2

Articulus I. utrum personæ divinæ conveniat assumere  
naturam creatam. 247.1

Articulus II. utrum divinæ naturæ conveniat assume-  
re. 248.1

Articulus III. utrum abstracta personalitate per intel-  
lectum, natura possit assumere. 253.2

Articulus IV. utrum una persona possit sine alia natu-  
ram creatam assumere. 255.2

Articulus V. utrum quælibet persona divina potuerit  
humanam naturam assumere. 256.1

Articulus VI. utrum plures personæ divinæ possint  
naturam creatam assumere. 257.1

*Summae Tom. XVI.*

assumere unam numero naturam. *ibid.*

Articulus VII. utrum una persona divina possit assu-  
mere duas naturas humanas. 257.2

Articulus VIII. utrum fuerit magis conveniens quod  
persona Filii assumeret humanam naturam, quam  
alia persona divina. 259.1

## QUÆSTIO IV.

**D**e modo unionis ex parte naturæ assumptæ, in sex arti-  
culos divisa. 266.2

Articulus I. utrum natura humana fuerit magis as-  
sumptibilis a filio Dei, quam aliqua alia natura.  
*ibid.*

Articulus II. utrum Filius Dei assumpserit personam.  
268.1

Articulus III. utrum persona divina assumpserit homi-  
nem. *ibid.*

Articulus IV. utrum Filius Dei debuerit assumere hu-  
manam naturam abstractam ab omnibus indivi-  
duis. 269.2

Articulus V. utrum Filius Dei naturam humanam  
assumere debuerit in omnibus individuis. 270.2

Articulus VI. utrum conveniens fuerit, quo Filius  
Dei humanam naturam assumeret, ex stirpe Adæ.  
271.1

## QUÆSTIO V.

**D**e modo unionis ex parte partium humanæ naturæ in  
quatuor articulos divisa. 278.2

Articulus I. utrum Dei filius debuerit assumere verum  
corpus. *ibid.*

Articulus II. utrum Dei filius debuerit assumere  
corpus terrenum, scilicet carnem & sanguinem.  
279.1

Articulus III. utrum Filius Dei assumpserit animam.  
*ibid.*

Articulus IV. utrum Filius Dei assumere debuerit in-  
tellectum. 280.1

## QUÆSTIO VI.

**D**e modo assumptionis quantum ad ordinem, in sex arti-  
culos divisa. 289.1

Articulus I. utrum Filius Dei assumpserit carnem me-  
diante anima. *ibid.*

Articulus II. utrum Dei Filius assumpserit animam  
mediante spiritu, sine mente. 290.2

Articulus III. utrum anima a Dei Filio prius fuerit as-  
sumpta quam caro. 291.2

Articulus IV. utrum caro Christi fuerit prius a Ver-  
bo assumpta, quam animæ unita. 292.1

Articulus V. utrum tota humana natura sit assumpta  
mediantibus partibus. 295.2

Articulus VI. utrum humana natura sit assumpta me-  
diante gratia. 296.1

## QUÆSTIO VII.

**D**e Gratia Christi, prout quidam singularis est homo,  
in tredecim articulos divisa. 307.1

Articulus I. utrum in anima Christi fuerit aliqua gratia  
habitualis. *ibid.*



# I N D E X

- Articulus II. utrum in Christo fuerint virtutes. 318.1  
 Articulus III. utrum in Christo fuerit Fides. 319.1  
 Articulus IV. utrum in Christo fuerit Spes. *ibid.* 2  
 Articulus V. utrum in Christo fuerint dona. 323.1  
 Articulus VI. utrum in Christo fuerit donum timoris. *ibid.* 2  
 Articulus VII. utrum in Christo fuerint gratia gratis data. 326.2  
 Articulus VIII. utrum in Christo fuerit Prophetia. 327.1  
 Articulus IX. utrum in Christo fuerit plenitudo gratia. 330.1  
 Articulus X. utrum plenitudo gratia sit propria Christi. 331.1  
 Articulus XI. utrum Christi gratia sit infinita. *ibid.* 2  
 Articulus XII. utrum gratia Christi potuerit augeri. 333.1  
 Articulus XIII. qualiter gratia Christi habitualis se habeat ad unionem. 334.1

## Q U Æ S T I O VIII.

- De gratia Christi, secundum quod est caput Ecclesie, in octo articulos divisa.* 341.1  
 Articulus I. utrum Christus sit caput Ecclesie. *ibid.*  
 Articulus II. utrum Christus sit caput hominum quantum ad corpora, vel solum quantum ad animas. 342.1  
 Articulus III. utrum Christus sit caput omnium hominum. *ibid.* 2  
 Articulus IV. utrum Christus sit caput Angelorum. 343.2  
 Articulus V. utrum gratia Christi, secundum quam est caput Ecclesie, sit eadem cum gratia habituali ejus secundum quod est quidam homo singularis. 344.1  
 Articulus VI. utrum esse caput Ecclesie sit proprium Christo. 345.1  
 Articulus VII. utrum diabolus sit caput omnium malorum. 349.1  
 Articulus VIII. utrum Antichristus possit etiam dici caput omnium malorum. *ibid.* 2

## Q U Æ S T I O IX.

- De scientia Christi in communi, in quatuor articulos divisa.* 350.1  
 Articulus I. utrum Christus habuerit aliquam scientiam præter divinam. *ibid.*  
 Articulus II. utrum Christus habuerit scientiam, quam habent beati vel comprehensores. 356.1  
 Articulus III. utrum Christus habuerit scientiam inditam vel infusam. *ibid.* 2  
 Articulus IV. utrum Christus habuerit aliquam scientiam acquisitam. 357.2

## Q U Æ S T I O X.

- De scientia beata anime Christi in quatuor articulos divisa.* 361.1  
 Articulus I. utrum anima Christi comprehenderit Verbum, sive divinam essentiam. *ibid.*  
 Articulus II. utrum anima Christi in Verbo cognoverit omnia. 362.1  
 Articulus III. utrum anima Christi in Verbo cognoverit infinita. 363.2  
 Articulus IV. utrum anima Christi videat Verbum, sive divinam essentiam, clarius qualibet alia creatura. 365.1

## Q U Æ S T I O XI.

- De scientia indita, vel infusa anime Christi, in sex articulos divisa.* 380.2  
 Articulus I. utrum secundum scientiam inditam vel infusam Christus omnia sciat. *ibid.*  
 Articulus II. utrum Christus hac scientia uti potuerit, non convertendo se ad phantasmata. 388.1  
 Articulus III. utrum hac scientia fuerit collativa. *ibid.* 2  
 Articulus IV. utrum hac scientia fuerit major scientia Angelorum. 389.1

- Articulus V. utrum hac scientia fuerit habitualis. *ibid.* 2  
 Articulus VI. utrum hac scientia fuerit distincta per diversos habitus. 393.1

## Q U Æ S T I O XII.

- De scientia anime Christi acquisita, in quatuor articulos divisa.* 380.2  
 Articulus I. utrum secundum hanc scientiam Christus cognoverit omnia. *ibid.*  
 Articulus II. utrum Christus in hac scientia profecerit. 398.2  
 Articulus III. utrum Christus aliquid ab homine didicerit. 399.2  
 Articulus IV. utrum Christus aliquid acceperit ab Angelis. 400.1

## Q U Æ S T I O XIII.

- De potentia anime Christi, in quatuor articulos divisa.* 405.1  
 Articulus I. utrum anima Christi habuerit omnipotentiam simpliciter. *ibid.*  
 Articulus II. utrum anima Christi habuerit omnipotentiam respectu immutationis creaturarum. 406.1  
 Articulus III. utrum anima Christi habuerit omnipotentiam respectu proprii corporis. 407.2  
 Articulus IV. utrum anima Christi habuerit omnipotentiam respectu executionis sue voluntatis. 408.1

## Q U Æ S T I O XIV.

- De defectibus corporis assumpti a Filio Dei, in quatuor articulos divisa.* 448.1  
 Articulus I. utrum filius Dei in humana natura assumere debuerit corporis defectus. *ibid.* 2  
 Articulus II. utrum Christus necessitatem his defectibus subjacendi assumpserit. 449.2  
 Articulus III. utrum Christus defectus corporales contraxerit. 450.1  
 Articulus IV. utrum Christus omnes defectus corporales hominum assumere debuerit. *ibid.* 2

## Q U Æ S T I O XV.

- De defectibus anime a Christo assumptis, in decem articulos divisa.* 456.2  
 Articulus I. utrum in Christo fuerit peccatum. *ibid.*  
 Articulus II. utrum in Christo fuerit fomes peccati. 449.2  
 Articulus III. utrum in Christo fuerit ignorantia. 464.2  
 Articulus IV. utrum anima Christi fuerit passibilis. *ib.*  
 Articulus V. utrum in Christo fuerit dolor sensibilis. 468.2  
 Articulus VI. utrum in Christo fuerit tristitia. 470.1  
 Articulus VII. utrum in Christo fuerit timor. 471.1  
 Articulus VIII. utrum in Christo fuerit admiratio. 472.1

- Articulus IX. utrum in Christo fuerit ira. *ibid.* 2  
 Articulus X. utrum Christus simul fuerit viator, & comprehensor. 474.2

## Q U Æ S T I O XVI.

- De consequentibus unionem, quantum ad ea, que conveniunt Christo secundum esse, & fieri in duodecim articulos divisa.* 475.1  
 Articulus I. utrum hac sit vera, Deus est homo. 480.2  
 Articulus II. utrum hac sit vera, homo est Deus. 483.2  
 Articulus III. utrum Christus possit dici homo dominicus. 484.1  
 Articulus IV. utrum ea, que conveniunt filio hominis, possint prædicari de Filio Dei, & e converso. 485.1  
 Articulus V. utrum ea, que conveniunt filio hominis, possint prædicari de divina natura, & de humana ea, que conveniunt Filio Dei. *ibid.* 2  
 Articulus VI. utrum hac sit vera: Deus factus est homo. 486.1  
 Articulus VII. utrum hac sit vera: homo factus est Deus. 487.2

Articu



## Q U Æ S T. E T A R T I C.

- Articulus VIII. utrum hæc sit vera: Christus est creatura. 489.1  
 Articulus IX. utrum hæc sit vera: iste homo, demonstrato Christo, incepit esse. 491.1  
 Articulus X. utrum hæc sit vera: Christus, secundum quod homo, est creatura. 492.1  
 Articulus XI. utrum hæc sit vera: Christus, secundum quod homo, est Deus. 493.1  
 Articulus XII. utrum hæc sit vera: Christus, secundum quod homo, est hypostasis, vel persona. *ibid.*2

### Q U Æ S T I O XVII.

- De pertinentibus ad unitatem in Christo quantum ad esse in duos articulos divisa.* 494.2  
 Articulus I. utrum Christus sit unum, vel duo. *ibid.*  
 Articulus II. utrum in Christo sit tantum unum esse. 497.1

### Q U Æ S T I O XVIII.

- De pertinentibus ad unitatem in Christo quantum ad voluntatem in sex articulos divisa.* 504.1  
 Articulus I. utrum in Christo sint duæ voluntates. *ibid.*2  
 Articulus II. utrum in Christo fuerit aliqua voluntas sensualitatis, præter rationis voluntatem. 505.2  
 Articulus III. utrum in Christo fuerint duæ voluntates quantum ad rationem. 506.1  
 Articulus IV. utrum in Christo fuerit liberum arbitrium. *ibid.*2  
 Articulus V. utrum voluntas humana Christi fuerit omnino conformis divinæ voluntati in volito. 507.2  
 Articulus VI. utrum in Christo fuerit contrarietas voluntatum. 518.2

### Q U Æ S T I O XIX.

- De pertinentibus ad unitatem Christi quantum ad operationem, in quatuor articulos divisa.* 525.1  
 Articulus I. utrum in Christo sit una tantum operatio divinitatis, & humanitatis. *ibid.*  
 Articulus II. utrum in Christo sint plures operationes humanæ. 527.1  
 Articulus III. utrum actio humana Christi potuerit esse sibi meritoria. 528.1  
 Articulus IV. utrum Christus aliis mereri potuerit. 545.2

### Q U Æ S T I O XX.

- De convenientibus Christo secundum quod patri fuit subiectus, in duos articulos divisa.* 565.1  
 Articulus I. utrum dicendum sit, Christum esse subiectum Patri. *ibid.*  
 Articulus II. utrum Christus sit subiectus sibi ipsi. 566.1

### Q U Æ S T I O XXI.

- De oratione Christi in quatuor articulos divisa.* 587.2  
 Articulus I. utrum Christo competat orare. *ibid.*  
 Articulus II. utrum Christo conveniat orare secundum suam sensualitatem. 588.2  
 Articulus III. utrum fuerit conveniens Christum pro se orare. 589.1  
 Articulus IV. utrum oratio Christi semper fuerit exaudita. 590.1

## Q U Æ S T I O XXII.

- De sacerdotio Christi, in sex articulos divisa.* 593.2  
 Articulus I. utrum Christo conveniat esse sacerdotem. *ibid.*  
 Articulus II. utrum Christus simul fuerit sacerdos & hostia. 594.1  
 Articulus III. utrum effectus sacerdotii Christi sit expiatio peccatorum. *ibid.*2  
 Articulus IV. utrum effectus sacerdotii Christi non solum ad alios pertineret, sed etiam ad se ipsum. 595.2  
 Articulus V. utrum Christi sacerdotium permaneat in æternum. 596.1  
 Articulus VI. utrum sacerdotium Christi fuerit secundum ordinem Melchisedech. *ibid.*2

### Q U Æ S T I O XXIII.

- De adoptione Christi, in quatuor articulos divisa.* 608.2  
 Articulus I. utrum Deo conveniat filios adoptare. *ibid.*  
 Articulus II. utrum adoptare conveniat toti Trinitati. 610.2  
 Articulus III. utrum adoptari sit proprium rationalis creaturæ. 611.2  
 Articulus IV. utrum Christus secundum quod homo sit Filius Dei adoptivus. 613.1

### Q U Æ S T I O XXIV.

- De prædestinatione Christi in quatuor articulos divisa.* 638.1  
 Articulus I. utrum Christo conveniat prædestinatum esse. *ibid.*2  
 Articulus II. utrum hæc sit falsa, Christus secundum quod homo, est prædestinatus, esse filius Dei. 639.1  
 Articulus III. utrum prædestinatio Christi sit nostræ prædestinationis exemplar. 640.1  
 Articulus IV. utrum prædestinatio Christi sit causa nostræ prædestinationis. *ibid.*2

### Q U Æ S T I O XXV.

- De adoratione Christi, in sex articulos divisa.* 645.2  
 Articulus I. utrum una & eadem adoratione sit adoranda divinitas Christi, & ejus humanitas. *ibid.*2  
 Articulus II. utrum humanitas Christi sit adoranda adoratione patriæ. 646.1  
 Articulus III. utrum adoratio patriæ sit exhibenda imagini Christi. 675.2  
 Articulus IV. utrum sit exhibenda cruci Christi. 705.2  
 Articulus V. utrum sit exhibenda matri ejus. 706.1  
 Articulus VI. utrum reliquiæ Sanctorum sint adorandæ. *ibid.*2

### Q U Æ S T I O XXVI.

- De hoc quod Christus dicitur Dei & hominum mediator in duos articulos divisa.* 712.1  
 Articulus I. utrum esse mediatorem Dei & hominum sit proprium Christo. *ibid.*2  
 Articulus II. utrum hoc ei conveniat secundum quod homo. 713.2



# I N D E X

## DISPUTATIONUM ET SECTIONUM , QUÆ IN HOC TOMO CONTINENTUR .

*Prior numerus paginam , alter pagine columnam designant .*

### DISPUTATIO I.

Contra Judæos .

- Messiam jam venisse . pag. 3. 1  
*Sectio prima . De testimonio Genes. 40. Non auferetur sceptrum , &c.* ibid.  
*Sectio secunda . Secundum testimonium contra Judæos ex Daniel. 9. Animadvertere , &c.* 6. 2  
*Sectio tertia . Tertium testimonium ex Aggei 2. Adhuc unum modicum , &c.* 11. 2  
*Sectio quarta . Quartum argumentum ex variis testimoniis , & signis de Adventu Messie .* 13. 1

### DISPUTATIO II.

- Christum esse verum Deum , & hominem contra infideles . 14. 2  
*Sectio prima . Ostenditur , Christum esse verum hominem .* ibid.  
*Sectio secunda . Ostenditur , Christum esse verum Deum contra hereticos .* 15. 1  
*Sectio tertia . Ostenditur , Messiam esse verum Deum , contra Judæos .* ibid. 1  
*Sectio quarta . Solvuntur objectiones .* 17. 1

### DISPUTATIO III.

- De existentia Incarnationis , ejusque convenientia . 29. 2  
*Sectio prima . Utrum Incarnationem esse possibilem , possit ratione probari .* 21. 1  
*Sectio secunda . Utrum Incarnationem esse factam possit contra infideles convinci .* 22. 2  
*Sectio tertia . Utrum Incarnatio fuerit per se conveniens .* 23. 2

### DISPUTATIO IV.

- De convenientia & necessitate Incarnationis ad reparationem hominis lapsi . 27. 1  
*Sectio prima . Utrum necessarium vel conveniens fuerit , Deum hominem lapsum reparare .* ibid.  
*Sectio secunda . Utrum ad reparandum genus humanum , necessarium , vel conveniens fuerit , Deum hominem fieri .* 28. 1  
*Sectio tertia . Utrum Christi opera fuerint sufficientis valoris , & efficacie ad condigne satisfaciendum pro peccatis hominum .* 30. 2  
*Sectio quarta . Utrum opera Christi fuerint infiniti valoris , & efficacie ad satisfaciendum .* 34. 1  
*Sectio quinta . Utrum in Christi satisfactione vera , & propria justitia interceserit .* 30. 1  
*Sectio sexta . Utrum in satisfactione Christi servatae fuerint leges omnes perfectæ justitiæ .* 64. 2  
*Sectio septima . Utrum purus homo potuerit esse sufficiens ad redimendos alios homines , ex perfectâ justitiâ .* 69. 2  
*Sectio octava . Utrum homo purus possit ita satisfacere pro culpa mortali propria , ut per suum actum se sanctificet , & a se peccatum expellat .* 77. 2  
*Sectio nona . Utrum homo purus possit ad æqualitatem satisfacere pro culpa mortali propria , ita ut ex vera justitiâ obtineat remissionem ejus , & divinam condemnationem .* 90. 2  
*Sectio decima . Utrum possit homo satisfacere pro culpa propria mortali saltem imperfecte .* 93. 2  
*Sectio undecima . Utrum saltem pro peccato veniali possit purus homo Deo satisfacere .* 97. 2

*Sectio duodecima . Utrum possit purus homo saltem , ut Christi membrum satisfacere Deo ex perfectâ justitiâ pro peccato suo .* 100. 1

### DISPUTATIO V.

- De primaria causa , propter quam incarnatio prædestinata , & facta est , sine qua non fieret . 107. 2  
*Sectio prima . Quomodo inter actus divinæ scientiæ , & voluntatis ordo prioris & posterioris secundum rationem intelligendus sit .* ibid.  
*Sectio secunda . Utrum voluntas Incarnationis antecesserit in Deo præscientiæ originalis peccati , vel subsequuta fuerit .* 117. 2  
*Sectio tertia . Utrum in primo signo rationis , in quo prædestinatus est Christus Deus homo , sit etiam prædestinatus Redemptor hominum per passionem & mortem suam .* 126. 2  
*Sectio quarta . Quæ fuerit Deo prima ratio seu motum Incarnationis faciendæ , ac prædestinandæ .* 130. 1  
*Sectio quinta . Utrum ex primaria Christi prædestinatione futura esset Verbi Incarnatio , etiamsi homo non peccasset .* 136. 2  
*Sectio sexta . Utrum Christus principalis venerit ad redimendum homines ab originali peccato , ita ut illo deficiente non esset venturus Redemptor .* 143. 2

### DISPUTATIO VI.

- De tempore quo facta est Incarnatio , ejusque convenientia . 147. 2  
*Sectio prima . Quo tempore facta sit Incarnatio .* ib.  
*Sectio secunda . Utrum convenienti tempore facta sit Incarnatio .* 151. 1

### DISPUTATIO VII.

- De termino Incarnationis , qui per illam producitur , seu resultat . 163. 1  
*Sectio prima . Utrum terminus resultans , seu productus per Incarnationem sit aliqua substantia .* ibid.  
*Sectio secunda . Utrum terminus hujus unionis fuerit aliqua substantialis natura .* 164. 1  
*Sectio tertia . Utrum terminus hujus unionis fuerit aliqua persona , & ita Incarnatio facta fuerit in persona .* 166. 2  
*Sectio quarta . Utrum terminus hujus unionis sit persona simplex , vel composita .* 169. 1  
*Sectio quinta . Utrum terminus hujus unionis sit aliquid creatum vel increatum .* 173. 2

### DISPUTATIO VIII.

- Quid Incarnatio sit . 177. 2  
*Sectio prima . Utrum Incarnatio sit actio tantum uniens humanitatem Verbo , vel etiam sit produciens ipsam humanitatem in rerum natura .* ibid.  
*Sectio secunda . Utrum Incarnatio sit substantialis unio , ex natura humana , & persona Verbi Dei .* 184. 1  
*Sectio tertia . Quid sit hæc unio in humanitate , seu quid per actionem uniendi , in humanitate , aut Verbo fiat .* 186. 2  
*Sectio quarta . Quomodo solvenda sint difficultates , quæ in hoc mysterio occurrunt .* 195. 2

### DISPUTATIO IX.

- De excellentia & perfectione hujus unionis , quæ est Incarnatio . 202. 2  
*Sectio*



## DISPUT. ET SECTIONUM.

*Sectio prima. Utrum hac unio in ratione unionis sit omnium maxima.* ib.  
*Sectio secunda. Utrum hæc unio incarnationis in genere entis, seu doni a Deo collati, sit omnium maxima.* 204.1

### DISPUTATIO X.

De causis incarnationis præsertim meritoria. 209.1  
*Sectio prima. Quæ sit, vel esse possit causa efficiens hujus mysterii.* ibid.  
*Sectio secunda. Utrum fuerit aliqua causa hujus unionis in genere dispositionis, seu causa dispositiva.* 211.1  
*Sectio tertia. Utrum humanitas Christi unionem suam ad Verbum mereri potuerit.* 216.2  
*Sectio quarta. Utrum Christus Dominus mereri potuerit Incarnationem suam.* 219.2  
*Sectio quinta. Utrum homines iusti, qui præcesserunt, de condigno mereri potuerint Incarnationem.* 223.1  
*Sectio sexta. Utrum homines iusti, qui Christum præcesserunt, de congruo meruerint Incarnationem, vel ejus accelerationem.* 224.1  
*Sectio septima. Utrum B. Virgo meruerit de condigno esse mater Dei.* 229.2  
*Sectio octava. Utrum saltem de congruo meruerit B. Virgo dignitatem matris Dei.* 231.2

### DISPUTATIO XI.

De divina existentia & subsistentia. 232.2  
*Sectio prima. Utrum sit in Deo unum esse existentia absolutum, & essentialiale.* ib.  
*Sectio secunda. Utrum in Deo sit triplex esse existentia relativum, seu an sint tres existentie relative.* 234.2  
*Sectio tertia. Utrum in Deo sit aliqua subsistentia absoluta, & essentialis.* 238.1  
*Sectio quarta. Utrum sint in Deo tres subsistentie relative.* 241.2  
*Sectio quinta. Utrum abstractis subsistentiis relativis intelligatur, relinquere tantum hæc Deitas, vel etiam hic Deus.* 245.2

### DISPUTATIO XII.

De persona assumente, & humanitati unita per Incarnationem, prout facta est. 249.1  
*Sectio prima. Utrum sola persona Filii fuerit incarnata & humanitatem assumpserit.* ib.  
*Sectio secunda. Utrum Verbum divinum terminaverit hanc unionem ratione alicujus proprietatis absolute, vel ratione relationis.* 251.2

### DISPUTATIO XIII.

De termino assumptionis, ex parte personæ assumentis, in quavis Incarnatione possibili. 259.2  
*Sectio prima. Utrum hic Deus, ut abstrahit a personis divinis, possit naturam creatam assumere.* ibid.  
*Sectio secunda. Utrum plures personæ divine possint simul assumere eandem naturam.* 261.2  
*Sectio tertia. Utrum una persona divina possit assumere plures naturas.* 263.1  
*Sectio quarta. Utrum persona creata possit hypostatice uniri alteri naturæ.* 264.1

### DISPUTATIO XIV.

Quid potuerit a Deo assumi per quamcunque unionem hypostaticam possibilem. 271.2  
*Sectio prima. Utrum natura existens in propria persona potuerit assumi.* ibid.  
*Sectio secunda. Utrum alia substantialis natura præter humanam sit assumptibilis a persona divina.* 274.2  
*Sectio tertia. Utrum partes substantiales possint hypostatice uniri divine personæ.* 276.2  
*Sectio quarta. Utrum forma accidentalis possit uniri Verbo hypostatice,* 277.2

### DISPUTATIO XV.

Quid Verbum assumpserit per Incarnationem, prout facta est. 281.1

*Sectio prima. Utrum Verbum assumpserit veram hominis naturam.* ibid.  
*Sectio secunda. Utrum Verbum assumpserit veram animam rationalem.* ib.2.  
*Sectio tertia. Utrum Christus assumpserit verum humanum corpus.* 282.2  
*Sectio quarta. Utrum assumpserit Christus corpus & animam inter se unita.* 283.2  
*Sectio quinta. Utrum assumpserit Christus partes omnes, quæ sunt de integritate corporis humani.* 284.1  
*Sectio sexta. Utrum Verbum divinum immediate, & secundum hypostasim assumpserit sanguinem ad subsistendum in sua personæ.* ib.2  
*Sectio septima. Utrum Verbum divinum assumpserit alios humores, ungues, dentes, & capillos immediate, & secundum hypostasim.* 288.1  
*Sectio octava. Utrum Verbum divinum in humanitate assumpserit accidentia.* ib.

### DISPUTATIO XVI.

De ordine assumptionis secundum realem durationem, seu temporis successionem. 293.2  
*Sectio prima. Utrum humanitas Christi simul ac cepit existere in rerum natura, fuerit Verbo unita absque ulla successione durationis.* ib.  
*Sectio secunda. Utrum anima Christi prius extiterit, quam fuerit Verbo, vel an prius fuerit unita Verbo, quam corpori.* 294.2  
*Sectio tertia. Utrum caro Christi prius fuerit concepta, quam assumpta; vel an prius fuerit assumpta, quam anima unita.* 295.1

### DISPUTATIO XVII.

De ordine naturæ in hac assumptione servato. 296.2  
*Sectio prima. Utrum anima rationalis fuerit prius naturaliter unita Verbo, quam carni.* ib.  
*Sectio secunda. Utrum caro Christi fuerit prius naturaliter unita Verbo, quam animæ rationali.* 298.2  
*Sectio tertia. Utrum caro sit prius natura unita Verbo quam anima, vel e contrario.* 300.1  
*Sectio quarta. Utrum caro sit assumpta mediante anima, & anima mediante spiritu.* ib.2  
*Sectio quinta. Utrum tota humanitas sit prius natura assumpta quam partes ejus, & consequenter an assumpta sit mediantibus illis, vel e contrario.* 302.2  
*Sectio sexta. Utrum humanitas prius natura sit assumpta, quam accidentibus informata.* 306.1

### DISPUTATIO XVIII.

De gratia sanctificante, seu iustitia creata animæ Christi. 308.2  
*Sectio prima. Utrum ad suam sanctificationem & justificationem indigerit anima Christi gratia creata sanctificante.* ib.  
*Sectio secunda. Qua certitudine tenendum sit animam Christi habuisse gratiam habitualement.* 312.1  
*Sectio tertia. Quando & quomodo data est anima Christi hæc gratia habitualis.* 313.2  
*Sectio quarta. Utrum præter gratiam habitualement fuerit anima Christi necessaria aliqua actualis gratia.* 316.2

### DISPUTATIO XIX.

De virtutibus moralibus animæ Christi. 321.1  
*Sectio prima. Utrum omnes virtutes morales & supernaturales fuerint infuse animæ Christi simul cum gratia.* ib.  
*Sectio secunda. Utrum virtutes suo genere acquisite fuerint Christi animæ infuse simul cum gratia.* 322.1

### DISPUTATIO XX.

De donis Spiritus Sancti animæ Christi collatis. 324.1  
*Sectio prima. Utrum dona Spiritus Sancti intellectum perficientia fuerint in Christo.* ib.  
*Sectio secunda. Utrum in Christo fuerint dona Spiritus Sancti pertinentia ad voluntatem, præsertim donum timoris.* ib.2



## DISPUTATIO XXI.

- De gratiis gratis datis animæ Christi. 327.2  
*Sectio prima.* Utrum in Christo fuerit prophetia, & si quæ  
 aliæ gratiæ gratis data ad cognitionem spectat. ib.  
*Sectio secunda.* Utrum aliæ gratiæ gratis datae, quæ ad  
 sermonem spectant, fuerint in Christo. 329.1

## DISPUTATIO XXII.

- De perfectione habitualis gratiæ Christi. 334.2  
*Sectio prima.* Utrum gratia Christi sit infinita. ib.  
*Sectio secunda.* Utrum gratia Christi fuit tam intensa,  
 & perfecta, ut non possit fieri intensior, & ideo Christus  
 plenus gratia esse dicatur. 338.2

## DISPUTATIO XXIII.

- De dignitate, & gratiæ capitis, quæ est in Christo.  
 345.2  
*Sectio prima.* Utrum Christus sit totius universi caput,  
 præsertim hominum & angelorum. 346.1  
*Sectio secunda.* Quæ fuerit in Christo gratia capitis.  
 348.1

## DISPUTATIO XXIV.

- De intellectu creato animæ Christi, & ejus actibus.  
 351.1  
*Sectio prima.* Utrum in anima Christi sit intellectus crea-  
 tus, & quante perfectionis sit. ib.  
*Sectio secunda.* Utrum fuerit in Christo homine actus in-  
 telligendi creatus, & ex quo tempore. ib.2  
*Sectio tertia.* Utrum omnis actus intelligendi animæ  
 Christi fuerit verus, certus, & evidens. 353.2  
*Sectio quarta.* Utrum in anima Christi fuerint habitus  
 intellectuales. 355.2

## DISPUTATIO XXV.

- De triplici scientia animæ Christi, quoad quæstionem  
 an est. 358.2  
*Sectio prima.* Utrum anima Christi a principio creationis  
 sue fuerit beata. ib.  
*Sectio secunda.* Utrum in anima Christi sit scientia con-  
 naturalis animæ humane. 359.2  
*Sectio tertia.* Utrum fuerit semper in anima Christi sci-  
 entia rerum in proprio genere supernaturalis, & per se  
 infusa. 360.1

## DISPUTATIO XXVI.

- De perfectione scientiæ beatæ animæ Christi. 366.1  
*Sectio prima.* Quid sit de ratione comprehensionis in-  
 tellectus objecti alicujus, præsertim divinæ essen-  
 tiæ. ibid.2  
*Sectio secunda.* Utrum secundum fidem anima Christi  
 non comprehendat divinam essentiam. 370.1  
*Sectio tertia.* Utrum anima Christi videat in Verbo  
 omnia possibilia, quæ in Deo eminenter continentur.  
 271.1  
*Sectio quarta.* Utrum anima Christi videat in Verbo  
 omnia, quæ Deus videt scientiæ visionis, atque adeo  
 infinita. 378.1

## DISPUTATIO XXVII.

- De objecto scientiæ infusæ animæ Christi. 381.1  
*Sectio prima.* Utrum res pertinentes ad ordinem naturæ  
 cognoscantur per hanc scientiam infusam. ibid.  
*Sectio secunda.* Utrum actus liberi, & contingentia fu-  
 tura cadant sub objecto hujus scientiæ. 382.2  
*Sectio tertia.* Utrum res supernaturales, seu mysteria  
 gratiæ contineantur sub objecto hujus scientiæ. 385.2  
*Sectio quarta.* Utrum omnes effectus possibiles divinæ  
 omnipotentia cadant sub hanc scientiam. 388.1  
*Sectio quinta.* Utrum Deus ut Trinus & unus cadat sub  
 objectum hujus scientiæ. 387.1

## DISPUTATIO XXVIII.

- De actibus scientiæ infusæ animæ Christi. 390.2  
*Sectio prima.* Utrum anima Christi potuerit semper esse  
 in actu secundo hujus scientiæ. ibid.  
*Sectio secunda.* Utrum actus hujus scientiæ sit per mo-  
 dum simplicis intelligentiæ, vel compositionis, & di-  
 scursus. 392.1

## DISPUTATIO XXIX.

- De habitu scientiæ infusæ animæ Christi. 393.2  
*Sectio prima.* Utrum species per se infusæ animæ Christi  
 fuerint universales, quam angelicæ. ibid.  
*Sectio secunda.* Utrum præter species intelligibiles re-  
 quiratur in hac scientia lumen, seu habitus infusus.  
 390.2  
*Sectio tertia.* Utrum hic habitus, vel lumen scientiæ  
 infusæ sit in se unum tantum. 396.2  
*Sectio quarta.* Utrum lumen hujus scientiæ distinctum  
 sit a lumine gloriæ. 397.1

## DISPUTATIO XXX.

- De perfectione scientiæ acquisitæ animæ Christi, & mo-  
 do quo illam obtinuit. 400.2  
*Sectio prima.* Utrum Christus per hanc scientiam cogno-  
 verit omnia, quæ naturaliter cognosci possunt ab ani-  
 ma humana, tam conjuncta quam separata. ibid.  
*Sectio secunda.* Utrum anima Christi habuerit hanc  
 naturalem scientiam infusam a Deo a primo instanti  
 creationis sue. 461.2

## DISPUTATIO XXXI.

- De gratia seu potestate animæ Christi data ad miracula  
 vel supernaturalia opera faciendæ. 408.2  
*Sectio prima.* Utrum omnipotentia Dei tota sit humani-  
 tati assumptæ communicata. ibid.  
*Sectio secunda.* Utrum ratione unionis data sit anima  
 Christi supernaturalis gratia seu virtus ad faciendæ  
 supernaturalia opera, seu miracula. 409.2  
*Sectio tertia.* Utrum hac potestas sit vere & physice effe-  
 ctiva gratiæ & supernaturalium operum. 411.1  
*Sectio quarta.* Utrum hac virtus efficiendi miracula, seu  
 gratiam, fuerit communicata humanitati tanquam  
 principali agentis, vel tanquam instrumento. 413.1  
*Sectio quinta.* Quid sit in humanitate Christi hac virtus  
 seu potentia, per quam operatur miraculose, ut instru-  
 mentum Verbi. 414.2  
*Sectio sexta.* An & quomodo in rebus creatis sit aliqua  
 vis activa obediens, ut eleveetur in divina instru-  
 menta. 417.1  
*Sectio septima.* Utrum hac virtus miraculorum Christi  
 se extendat ad effectus loco distantes. 441.2  
*Sectio octava.* Utrum hac gratia miraculorum se exten-  
 dat ad operandum effectus tempore distantes, seu ad  
 efficiendum per instrumentum actu non existens. 442.1  
*Sectio nona.* Utrum Christi humanitas efficere possit mi-  
 racula absque prævia actione, & consequenter: an po-  
 tuerit esse instrumentum creationis, aut annihilationis.  
 444.2

## DISPUTATIO XXXII.

- De perfectionibus, & defectibus corporis Christi. 451.1  
*Sectio prima.* Utrum assumpserit Verbum in corpore hu-  
 mano perfectiones corporis gloriosi, vel potius defectus  
 illis repugnantes, ut esse passibile, mortale, &c. ib.2  
*Sectio secunda.* Utrum assumpserit Verbum omnes perfe-  
 ctiones connaturales humano corpori, vel potius defe-  
 ctus aliquos illis repugnantes. 452.2  
*Sectio tertia.* Utrum hi defectus fuerint necessarii, vel  
 voluntarii Christo Domino. 453.2  
*Sectio quarta.* Utrum assumpserit Christus sui corporis  
 localem circumscriptionem, & mutationem. 454.2

## DISPUTATIO XXXIII.

- De defectibus gratiæ, & virtuti contrariis a Christo non  
 assumptis.  
*Sectio prima.* Utrum in Christo fuerit peccatum, vel se-  
 cundum ordinariam potentiam esse potuerit. 459.1  
*Sectio*



# DISPUT. ET SECTIONUM.

*Sectio secunda, utrum de absoluta potentia Dei possit esse peccatum in Christo, seu in humana natura Verbo unita.* 460.1

## DISPUTATIO XXXIV.

De appetitu sensitivo, & perfectionibus, vel defectibus convenientibus animæ Christi ratione illius. 465.2

*Sectio prima. Utrum in Christo fuerit appetitus sensitivus, & actus ejus.* ibid.

*Sectio secunda. Utrum in appetitu sensitivo Christi fuerit fomes peccati.* 466.2

*Sectio tertia. Utrum in Christo fuerint omnes actus, seu passiones appetitus sensitivi.* 468.1

## DIPSPUTATIO XXXV.

De communicatione idiomatum. 476.1

*Sectio prima. Quæ & qualis idiomatum communicatio ex mysterio Incarnationis consecuta sit.* ib.2

*Sectio secunda. Utrum hac communicatio idiomatum possit interdum fieri inter abstracta, vel tantum inter concreta.* 477.1

*Sectio tertia. Quomodo divina attributa in concreto prædicanda sint de Christo seu de homine.* 478.2

*Sectio quarta. Quomodo proprietates humanae seu create dicantur de Deo, seu Filio Dei in concreto.* 479.2

## DISPUTATIO XXXVI.

De esse existentiae Christi, & humanitatis ejus. 497.2

*Sectio prima. Utrum humanitas Christi formaliter, & intrinsece existat in rerum natura per existentiam increatam, vel per propriam & creatam.* ib.

*Sectio secunda. Utrum simpliciter dicendum sit Christum habere unum esse, vel plura.* 502.2

## DISPUTATIO XXXVII.

De voluntate humana Christi ejusque libertate. 506.1

*Sectio prima. Utrum in Christo fuerit voluntas humana.* 407.1

*Sectio secunda. Utrum voluntas Christi humana fuerit libera ad operandum.* ib.2

*Sectio tertia. Quomodo voluntas Christi existens impeccabilis ex unione potuerit esse libera.* 509.1

*Sectio quarta. Quomodo voluntas Christi ex necessitate diligens Deum, in reliquis actibus potuerit esse libera.* 514.2

*Sectio quinta. Quomodo Christus, videns semper in Verbo omnes actus suos, eos libere exercere potuerit.* 517.1

## DISPUTATIO XXXVIII.

De actibus voluntatis humanæ Christi, eorum diversitate & efficacia. 519.2

*Sectio prima. Utrum in humana voluntate Christi fuerit omnis varietas actuum, quæ in humana voluntate esse solet.* ib.

*Sectio secunda. Utrum in voluntate Christi fuerint actus efficaces, & inefficaces.* 520.1

*Sectio tertia. Utrum in humana Christi voluntate fuerint actus timoris, & tristitia.* 521.1

*Sectio quarta. Utrum voluntates Christi, interdum fuerint inter se contrariae, vel semper conformes.* 523.1

*Sectio quinta. Utrum humana Christi voluntas semper fuerit impleta.* 524.1

## DISPUTATIO XXXIX.

De merito Christi Domini absolute, & secundum se. 527.2

*Sectio prima. Utrum in Christo Domino fuerit meritum, seu conditiones omnes ad meritum necessariae.* ib.

*Sectio secunda. Per quos actus Christus Dominus meruerit.* 531.1

*Sectio tertia. Quo tempore Christus meruerit.* 534.2

## DISPUTATIO XL.

De iis, quæ sibi ipsi Christus Dominus meruit, 537.1

*Sectio prima. Utrum Christus mereri potuerit gloriam animæ suæ, & alia dona gratiæ, & scientiæ.* ib.

*Sectio secunda. Utrum Christus meruerit gloriam animæ suæ, & alia dona gratiæ, & scientiæ.* 538.2

*Sectio tertia. Utrum Christus meruerit gloriam sui corporis, sui que nominis exaltationem.* 543.2

## DISPUTATIO XLI.

De iis, quæ Christus Dominus hominibus meruerit, 545.2

*Sectio prima. Utrum Christus meruerit nobis primam gratiam, & gloriam, & remissionem peccatorum.* 546.1

*Sectio secunda. Utrum meruerit Christus nobis dispositiones ad gratiam, seu suorum meritorum applicationem.* 547.2

*Sectio tertia. Utrum Christus Dominus meruerit nobis omnia dona gratiæ, quæ post primam justificationem conferuntur.* 550.2

*Sectio quarta. Utrum Christus Dominus meruerit hominum electionem, & predestinationem.* 553.1

## DISPUTATIO XLII.

De iis, quæ Christus meruit Angelis. 560.2

*Sectio prima. Utrum Christus meruerit Angelis omnia dona gratiæ, & gloria.* ib.

*Sectio secunda. Utrum Christus redemerit Angelos, pro illisque mortuus fuerit.* 564.1

## DISPUTATIO XLIII.

De subiectione & obedientia Christi, & præceptis, quorum est capax. 517.1

*Sectio prima. Utrum Christus Dominus fuerit capax præcepti, cui esset subiectus.* 568.1

*Sectio secunda. Quibus legibus fuerit Christus subiectus, vel subjici potuerit.* 569.2

*Sectio tertia. Utrum habuerit Christus aliquod speciale præceptum divinum, cui fuerit subiectus.* 571.1

*Sectio quarta. Utrum simpliciter dicendus sit Christus subiectus Patri, vel solum cum illa determinatione, ut homo.* 572.2

## DISPUTATIO XLIV.

De servitute Christi. 572.2

*Sectio prima. Utrum Christus ut homo vere ac proprie sit, & dici possit servus Dei.* 573.1

*Sectio secunda. Utrum cum sola determinatione, ut homo, possit dici servus, vel etiam sine illa.* 586.1

## DISPUTATIO XLV.

De oratione Christi in via, & in patria. 590.2

*Sectio prima. Utrum Christus in via statu vere, ac proprie oraverit.* 591.1

*Sectio secunda. Utrum Christus Dominus nunc in calo existens vere ac proprie pro nobis oret.* 592.1

## DISPUTATIO XLVI.

De summo Christi sacerdotio & Pontificatu. 597.1

*Sectio prima. Utrum Christus vere & proprie fuerit sacerdos.* ib.2

*Sectio secunda. Utrum Christus Deus homo sit sacerdos in quantum Deus, vel in quantum homo, atque adeo, an idem sit sacerdos & víctima.* 598.2

*Sectio tertia. Utrum sacerdotium Christi fuerit ejusdem rationis cum sacerdotio legis naturæ, veteris, aut novæ.*

*Sectio quarta. Utrum Christus sit sacerdos secundum ordinem Melchisedech.* 600.2

## DISPUTATIO XLVII.

De potestate excellentiæ conveniente Christo ratione supremi sacerdotii, ejusque spiritali regno. 604.1

Sc-



## INDEX DISPUT. & SECTIONUM.

*Sectio prima. Utrum Christus tanquam summus Ecclesie Pontifex, & spiritualis Rex potestatem excellentie super illam habeat.* ib.  
*Sectio secunda. Utrum Christus, ut summus sacerdos habuerit potestatem ad ferendas leges.* 605.1

### DISPUTATIO XLVIII.

*De temporali regno Christi Domini.* 606.1  
*Sectio prima. Utrum Christus hereditario jure temporale regnum Judaeorum obtinuerit.* ib.  
*Sectio secunda. Utrum Christus Dominus habuerit dominium universale, & directum super universum orbem.* 607.1

### DISPUTATIO XLIX.

*De filiatione Christi in ordine ad Deum.* 613.2  
*Sectio prima. Utrum Christus in quantum homo vere ac proprie possit dici Filius Dei.* 614.1  
*Sectio secunda. Utrum Christus in quantum homo sit Filius Dei naturalis, an adoptivus.* 616.1  
*Sectio tertia. An sit de fide, vel quo gradu certitudinis tenendum sit, Christum, in quantum hominem, seu secundum humanitatem, non esse Filium Dei adoptivum, sed naturalem.* 625.2  
*Sectio quarta. Utrum Christi humanitas possit dici adoptata.* 634.2

### DISPUTATIO L.

*De modo loquendi circa praedestinationem Christi.* 640.2  
*Sectio prima. Utrum simpliciter verum sit, Christum aut Filium Dei ab aeterno esse praedestinatum.* 641.1  
*Sectio secunda. An dici possit Christus praedestinatus, ut sit filius Dei naturalis.* ib.2  
*Sectio tertia. Utrum Christus possit dici praedestinatus ad gloriam, vel alia supernaturalia dona gratiae.* 644.1  
*Sectio quarta. Utrum humanitas Christi possit dici praedestinata, vel simpliciter, vel ad aliquem terminum.* 645.1

### DISPUTATIO LI.

*De adoratione Christo ut Deo debita.* 646.2  
*Sectio prima. Quid sit adoratio, & cujus virtutis actus sit.* ib.  
*Sectio secunda. Utrum vera & propria Dei adoratio in sola actione exteriori, & corporali consistat.* 648.1  
*Sectio tertia. Quotuplex sit adoratio.* 655.1  
*Sectio quarta. Quomodo Christus ut Deus adorandus sit.* 657.1

### DISPUTATIO LII.

*De adoratione sanctis hominibus vel Angelis exhiben-*

*da.* 659.1  
*Sectio prima. Utrum sancti & beati Angeli, vel homines sint adorandi.* ib.  
*Sectio secunda. Quae adoratio, & propter quam causam sanctis tribuenda sit.* 660.2  
*Sectio tertia. Utrum cultus Sanctorum dici possit ad Religionem pertinere.* 661.2

### DISPUTATIO LIII.

*De adoratione Christo ejusque humanitati debita.* 663.2  
*Sectio prima. Utrum Christus Deus homo adorandus sit perfecta adoratione laetiae.* ib.  
*Sectio secunda. Utrum Christus in quantum homo adoretur adoratione laetiae, ita ut eadem adoratione colatur humanitas.* 664.1  
*Sectio tertia. Utrum humanitas Christi praecisa a Verbo posset adorari, & qua adoratione.* 667.1

### DISPUTATIO LIV.

*De usu & adoratione imaginum.* 676.1  
*Sectio prima. Utrum liceat, & expediat Ecclesiae Christi, & sanctorum hominum imaginibus uti.* ib.2  
*Sectio secunda. Utrum liceat uti Dei & Angelorum imaginibus,* 679.1  
*Sectio tertia. Utrum imagines Christi & Sanctorum sint adorandae.* 680.2  
*Sectio quarta. Utrum haec imagines eadem adoratione, qua exemplar adorandae sint.* 688.2  
*Sectio quinta. Utrum imago adorari possit, non adorato directe exemplari.* 692.2  
*Sectio sexta. Utrum hac adoratio imaginum, etiam in imaginibus Dei, & aliis sacris signis locum habeat.* 702.2  
*Sectio septima. Utrum hac adoratio imaginum non solum honesta sit, sed etiam sub precepto cadit.* 703.2  
*Sectio octava. Quantum inter hanc imaginum adorationem, & idolorum cultum interfit.* 704.1

### DISPUTATIO LV.

*De reliquiarum cultu & veneratione.* 707.1  
*Sectio prima. Utrum Sanctorum reliquia in veneratione, & honore habenda sint.* ib.1  
*Sectio secunda. Quae adoratio Sanctorum reliquiis tribuenda sit.* 709.1

### DISPUTATIO LVI.

*De usu & adoratione crucis.* 710.1  
*Sectio prima. An lignum crucis, in quo Christus pependit, sit adorandum laetiae.* ib.  
*Sectio secunda. Utrum crucis imago retinenda sit, & adoranda.* 711.1  
*Sectio tertia. Utrum liceat uti signo crucis in modum caeremoniae sacrae.* ib.2

## FINIS TABULAE.



# TERTIA PARS

## SUMMÆ THEOLOGIÆ ANGELICI

### DOCTORIS SANCTI THOMÆ AQUINATIS.

CUM COMMENTARIIS ET DISPUTATIONIBUS

P. Francisci Suarez e Societate Jesu.

#### PROLOGUS.

**Q**UIA Salvator noster Dominus Jesus Christus, teste Angelo, populum suum salvum faciens a peccatis eorum viam veritatis nobis in seipso demonstravit, per quam ad beatitudinem immortalis vitæ resurgendo pervenire possimus, necesse est, ut ad consummationem totius Theologici negotii, post considerationem ultimi finis humanæ vitæ, & virtutum ac viti-  
tiorum, de ipso omnium Salvatore, ac beneficiis ejus humano generi prælitis, nostra consideratio subse-  
quatur. Circa quam primo observandum occurrit de ipso Salvatore. Secundo, de Sacramentis ejus, quibus salutem consequimur. Tertio, de fine immortalis vitæ, ad quam per ipsum resurgendo pervenimus. Circa primum duplex consideratio occurrit. Prima est, de ipso Incarnationis mysterio, secundum quod Deus pro nostra salute factus est homo. Secunda de iis, quæ per ipsum Salvatorem nostrum, id est, Deum incarnatum sunt acta & passa,

#### PREFATIO COMMENTARIORUM.

**D**E Christo Salvatore nostro disputaturus D. Thom. illum statim in proœmio tanquam altissimum scopum, totiusque materiæ subiectum fundamentum proponit: cumque in eodem Redemptore nostro, divina & humana natura mirabili nexu jungantur, præclare certe ab ipsa utriusque naturæ conjunctione, quæ a Theologis Incarnatio dicitur, hujus operis, & nomen, & appellatio desumpta est. Non enim de omnibus, quæ in Deum, & hominem conveniunt, hoc loco disseritur (illud videlicet totius Theologiæ negotium est), sed de ipso ineffabili duarum naturarum consortio in Christo Jesu, deque proprietatibus, quæ ab ea unione singulari proficiunt. Quam ego rem, sicuti gravibus, ac perobscuris difficultatibus involutam esse non diffiteor: ita nobilitate ac splendore (augustissimæ Trinitatis mysterium semper excipio) cæteris totius Theologiæ quæstionibus antecellere judico. Conspirat in hanc sententiam Dionys. Areop. cum inquit: *Jesu in carne apparitio, & ineffabilis est sermo-  
ne omni, & omni ignota intelligentia, ipsi quoque anti-  
quissimorum Angelorum primati non satis perspecta.* Conspirat Damasce. qui mysterium hoc vocat, *Novum omnium novorum, & solum sub sole novum, per quod Dei apparuit infinita virtus, bonitas, & sapientia.* At B. Leo Pont. Max. cum esset ipse cardo & vertex totius Ecclesiæ, hoc sacramentum miraculorum quasi omnium cardinem & verticem celebravit. Cyril. autem Alexand. ad Reginas ait: *Hoc esse quasi anigma sacratissimum, quod summa potius veneratione susci-  
piendum est, quam humani judicii trutinâ subjiciendum.* Quis enim quæso explicare audeat, quomodo eadem persona fuerit sine mutatione bis genita? Quomodo increatus homo, ex hominis natura creata, Verbique persona fuerit sine imperfectione compositus? Ex patre sine matre ante sæcula genitus, quomodo ex matre sine patre fuerit in tempore procreatus? Quomodo denique terra virginea, nulla hominis opera exculta, sed Spiritus sancti virtute fecundata, integra, & incontaminata perseverans Deum absconditum humani generis conservatorem, ac vindicem germinavit? Quid igitur mortalis homo, de tanto mysterio proferre pos-

Suarez Tom. XVI.

sit, digne ut par est? At quo pacto ad tanti sacramen-  
ti investigandum modum, rationem, aut causam, accedere non perhorrescat? Quamobrem merito Agap. Pap. scriptum relinquit. *Solius fidei contemplatione  
cernendum esse, ad quæ provehatur humilitas carnis, ad quæ etiam inclinetur altitudo Deitatis, quid sit, quod caro sine Verbo non agit, & quid, quod verbum sine carne non efficit, quomodo Christus ita inter Deum, & hominem mediato apparuit, ut solita sublimaret in-  
solitis, & insolita solitis temperaret.* Quid igitur? in limine subsistemus? despondebimus animum, & a tanti mysterii investigatione desitemus, eorumve timebimus reprehensiones, qui in scholasticos Theologos invehantur, quod de tantis mysteriis subtiliter dis-  
putent, altiora se quærant, & plusquam oporteat, contra sapientis, & Apostoli præcepta sapere non timeant? minime vero, hæc enim ad eos spectant, qui uti infideli, & arroganti animo perferuntur divina, quamobrem divinitus sit, ut ab ea, quam non quærunt, divina gloria, & majestate potenter opprimantur. De quibus perinde merito dixit Athanasius, ideo in hoc pertractandos mysterio fuisse prolapsos, quod de illo, & quomodo, & quali modo fiat, curiosius inquirunt, a nobis vero ea potius mente hæc sacratissima mysteria tractanda, & inquirenda suscipiuntur, ut gratis animis summa Dei beneficia recolamus, piisque mentibus ab antiquorum patrum vestigiis, ne latum, ut ajunt, unguem, videamur discedere. Eamque ob rem licet in hoc divino mysterio, quæ tractantur, omnia supra sensum nostrum, supra rationem, supra cap-  
tum omnem sita sint, utpote divina: illud me tamen inter tot difficultatum scopulos consolatur, ac recreat, in tam immensa, tamque inacces-  
sa supernorum caligine tantam splenduisse divini luminis claritatem, tam apertam fidei regulam nobis esse propositam, tam luculenter, tam apte, tamque sapienter a sanctis Patri-  
bus, & Ecclesiæ doctoribus esse illustratam, tam denique purgatam erroribus, ut nisi in meridiana luce (quod ajunt) velimus cæcutire, atque a vera doctrina, quasi sponte deflectere, quæ de tanto mysterio scire nos convenit, consequi feliciter, juvante Deo, ejusque matre sanctissima intercedente, difficile non sit. Quod eo facilius atque securius me in hoc opere assequutu-  
rum confido, quo magis Angelici Doctoris placitis, ac sententiis inhærere, ejusque sensa omni industria, summaque diligentia rimari in animo est. Quippe ea est apud me ejus auctoritas, ut illius vestigiis insistent, nullos aut itineris errores, aut difficultatum nodos, vel demum inextricabiles argumentorum laqueos per-  
timeam.

Atque ex his, quæ de hujus doctrinæ materia a me dicta sunt, ejus dignitas colligi facile potest, quamque merito a Theologis disputetur: cum enim Theologia tribus fere modis, aut nominibus versetur circa Deum, vel ejus naturam contemplando, vel ipsius virtutem & bonitatem, qua suis se creaturis liberaliter communicat, vel ultimi finis rationem, ad quem omnia tendunt, in quove quiescunt, omnibus his modis seu rationibus præ-  
sens consideratio ad Theologum pertinet. Inprimis enim quædam Dei natura nobis in hac materia consi-  
deranda est, non quidem connaturalis & propria, sed as-  
sumpta: deinde de supremo, ac perfectissimo divino-  
rum operum dicendum: ac denique de certa & unica via, per quam homines ad beatitudinem pergunt, & præcipuo medio, quo finem ultimum consequuntur. At

A enim

Difficul-  
tas hujus  
disputa-  
tionis.

2. cap. de  
div. nom.  
Lib. 2. de  
fide c. 1.

Concio-  
nibus de  
Nativit.  
Cyril.  
Alexan-  
dri.

Epist. ad  
Anth. ad.

Eccles. 3.  
1. Tim. 2.3

P. 25.  
Athanas. in  
hoc, quod  
nunc sit  
Christus.

Triplex  
Theolo-  
giæ con-  
sideratio.



enim, dicet aliquis, cur igitur tam nobilis de Deo disputatio in postremum Theologiæ locum rejecta est? Si enim conjunctionem ad Deum consideres, videtur post tractationem de ipso Deo, qua unus & trinus est, collocanda: si vero rationem omnipotentis divinæ contempleris, esset omnibus operibus creationis anteposenda: si denique ratione finis ultimi attendas, nullum est medium ad eum finem assequendum, vel excellentius, vel efficacius, Christo Domino, qui & omnis gratiæ, & meriti fons est ac, origo, & secundum Deum ipse etiam finis noster est, & felicitatis nostræ pars quædam præcipua. Hac igitur etiam ratione, hæc disputatio cæteris Theologicis præferenda videretur; non est tamen difficile illius ordinis ac methodi, quam Theologi omnes sequuntur, probabilem rationem reddere. Est enim Christus Deus & homo, ex Deo & humana natura ineffabili modo compositus, quæ quidem conjunctio omnibus gratiæ & creationis operibus excellentior est; quia tamen nexus est quidam inter Deum & naturam creatam, idcirco oportuit de simplicibus extremis prius disputare, quam de illorum conjunctione tractaretur. Neque enim potest id, quod ex aliis rebus componitur, distincte agnosci, rebus ipsis, quæ in eam compositionem veniunt, ignoratis: sic enim propter similem causam D. Thom. in prima parte, prius de spiritali & corporea creatura, quam de homine, qui ex utraque constat, disputavit. Accedit, redemptionem hominum extitisse unam ex præcipuis causis, nobisque notioribus, propter quam hoc mysterium confectum est, quæ hominis creationem, & lapsum ab statu iustitiæ, in quo conditus fuerat, supponit. Cum ergo mysterium hoc, tamquam primum & commune remedium contra peccatum a Theologis consideretur, convenienti ratione, ut etiam in hoc proœmio D. Thom. scripsit, post ultimi finis, & humanæ libertatis ac gratiæ, virtutumque & vitiorum considerationem, illa de Christo subsequitur. Quo etiam factum est, ut post eam disputatio de rebus ab ipso Christo Domino gestis, & de sacramentis ab eo constitutis aptissime accedat, quibus nullus aptior in Theologia locus excogitari poterat.

Unde fit hæc ultimam Theologiæ partem in duas præcipuas a nobis esse dividendam, quarum prior, quam præ manibus habemus, de Christo Domino disputat, ejusque sanctissima matre: posterior vero de sacramentis erit, quam D. Thom. felici morte præventus absolvere non potuit. In ea tamen perficienda nostrum laborem & operam, Deo favente, proviribus impendemus.

Interrogabit fortasse quispiam, cum Aristotele teste, de rebus singularibus & individuis non possit esse scientia, quomodo de Christo Domino, quem nostræ speciei individuum quoddam esse aperte constat, doctrina instituat. Responderi facile potest de singularibus quidem contingentibus scientiam esse non posse. De necessariis autem, qualis Deus ipse est, optime posse: Christus vero consideratur in hac scientia sub revelatione divinâ, sub qua necessitas quædam, & infallibilis rerum connexio & veritas reperitur: & ideo mirum non est, quod de ipso propria scientia instituat. Sed illud præcipue considerandum est, quamquam Christus individuum quoddam sit, rationem tamen Incarnationis, quæ in ipso est, ex se universalem esse, & habere, ut ita dicam, naturam suam & communem essentiam causasque & effectus, & proprietates illam consequentes. Ex quibus aptissima materia efficitur, in qua scientia verari possit. Sunt vero res aliæ in hac materia, quæ ad historiam potius, quam scientiam pertinere videntur, ut sunt ea, quæ ad vitam Christi Domini, mortem, resurrectionem, & alia hujusmodi mysteria contemplanda referuntur, de quibus in Theologia sermo habendus est, tum propter eorum summam utilitatem: tum etiam, ut quod hujus sapientiæ munus est, ejus, quæ in nobis est, fidei convenientem rationem tradat. Quocirca partem hanc, seu totum hoc opus de Incarnatione in duas præcipuas partes subdividere possumus: ut altera, quæ in modum scientiæ perfectius traditur, mysterium ipsum præcise, ac secundum se, & proprietates ejus speculetur: quam D. Thom. a 1. usque ad 26. quæst. maxime persequi videtur: altera vero, quæ utique ad quæst. 59. protenditur: mysteria vitæ & mortis

Christi, simulque beatissimæ Virginis cognitionem tradat. Utraque vero istarum partium plures alias continet, quarum partitio, ac distributio in quæstionum, ac disputationum decursu convenientius fiet.

Supere est, ut de titulo, seu materiæ inscriptione pauca dicamus: neque enim desunt nonnulli nimium Latini, qui vocem ipsam incarnationis, quod Latina non sit, reprehendant; quin potius refert Athanasius sermone de sanctissima Deipara, inter dum Catholicos illa uti formidasse, ne divinum Verbum solam carnem sine anima sumpsisse cum Apollinari, & Ario sentire viderentur. Sed non est, quod vel vocis novitatem, vel periculum timeamus. Vulgare enim est illud Ciceronis, inventis novis rebus nova licere adinvenire vocabula, quæ tunc maxime omni reprehensione & periculo carent, cum & in re ipsa, & in usu sapientium fundamentum habent. Hæc autem incarnationis vox in ipso mysterio, quo Verbum caro factum est, & in his eisdem verbis, quibus Evangelista Joannes illud explicuit, fundata est. Nomen vero carnis tam in verbis Joannis, quam in voce incarnationis non excludit animam, sed ab ignobiliore parte integram humanam naturam significat, ut Ambros. & August. variis locis adnotarunt: & optime Cyrill. Alexand. lib. de Incarnatione Unigeniti cap. 24. & D. Thom. 4. contra gent. cap. 33. Et fundamentum habet in frequenti usu Scripturæ sacræ, in qua nomine carnis totus homo significari solet, ut constat Genes. 6. *Omnis quippe caro corrumperat viam suam*; & Luc. 3. *Et videbit omnis caro salutem Dei*; ad Rom. 3. *Ex operibus legis non justificabitur omnis caro coram illo*, & sæpe alias. Hac igitur ratione ad significandam humanæ naturæ assumptionem, antiquissimi, & linguæ Latinæ peritissimi Patres utuntur hac voce. Leo Mag. concione 2. de Nativit. Lactan. lib. 4. divinarum institutionum cap. 11. Cyprian. lib. 2. contra Judeos cap. 2. Augustin. 9. de Civit. cap. 17. & Hieronymus in id Marc. 1. *Non sum dignus solvere corrigiam calceamenti ejus*. Et eandem vim habet vox Græca *σάρκα*, qua utitur Cyrillus libro de Incarnatione Unigeniti, & Damascenus libro 1. de fide cap. 13. & libro 3. cap. 6. ubi etiam *ἐν σαρκὶ ὁσίων*, id est, inhumationem vocat. Hilarius vero in Prolog. Psalmorum corporationem, seu incorporationem appellat. Qua voce usus etiam est Isidorus ad Florentinam sororem cap. 6. & Tertullianus libr. de carne Christi circa principium. Denique in symbolo Concilii Nicæni habetur: *Et incarnatus est de Spiritu Sancto*, quæ vox aptissime ad hoc significandum mysterium accommodata est. Primum quoniam, quod difficilius videri poterat, ac remotius a Deo, illa voce indicatur hoc illum effecisse pro nobis, personam suam imperfectiori parti humanæ naturæ copulando. Propter quod 2. Timoth. 3. dictum est: *Magnum esse pietatis sacramentum, quod manifestatum est in carne*. Deinde notatum est illo nomine, Deum infirmitates nostras, & imbecillitates, quæ voce carnis significari solent, assumpsisse, ut homini, qui peccando spiritum amiserat, Verbum caro factum eundem spiritum restitueret. Et propterea de Christo loquens Paulus ad Hebræos quinto inquit: *Qui in diebus carnis sue*, &c. Ubi carnis nomine non quamcumque, sed passibilem carnem significari plane constat. Tertio denique quoniam vera caro animam in se amplectitur, cum carnem vivam animatam esse necesse sit. Et ideo Incarnationis nomine convenienter totius humanitatis assumptio significata est. Quam rationem indicavit Cyrillus in Epist. ad Nesto. quæ habetur in principio Concil. Ephesi. & Tertull. lib. de carne Christi cap. 6.

Reliquum est, ut nonnullos auctores, ac præcipuos fontes, ex quibus hæc de Incarnatione doctrina potest hauriri, designemus. Ex Conciliis præcipue adest Ephesin. quod in primo tomo Conciliorum imperfectum habetur, integrum vero, ac perfectum, & in sex tomos distributum noster Theod. Peltan. nobis illud restituit, in quo multa ex sanctis Patribus ad hanc materiam utilissima, scituque dignissima continentur. Ex generalibus præterea Conciliis: videnda sunt Chalcedonen. & Lateranen. sub Martino I. ex provincialibus Carthagin. 4. Toletan. 1. 4. 6. & 11. ut alia omittam, quæ obiter hoc attingunt, & cuilibet obvia facile esse possunt. Quin etiam hoc pacto

Quis ordo  
servetur  
in tracta-  
tione hu-  
jus partis.

Divisio  
partis  
tertiæ.

De singul.  
quomodo  
sic facien-  
tia.

Lib. 1.  
Academ.



pacto sancti Pontifices in suis epistolis decretalibus hac de re multa tetigerunt: sed dux notantur præcipue, altera Agapiti ad Antimum, altera Leonis ad Flavian. quæ est num. 10. de qua Gelasius Papa testatur illustre illud, anathemate damnandum esse, qui vel unum illius jota in dubium revocaret.

Patres & Doctores qui de Christi Incarnatione scripserunt.

Multi deinde sanctorum Patrum varia opera de hoc mysterio incarnationis nomine, aut alio simili conscripserunt. Athanasius præsertim, Fulgentius, Ambrosius, Cyrillus Alexandr. qui in explicando ac confirmando mysterio hoc fere totam operam consumpsit, thesaurum maxime librorum de fide ad Theodosium atque Reginas. Tum demum alia, quæ in Ephesin. Concilio referuntur. Cassianus scripsit septem libros contra Nestorium ad Leonem Papam. Legi etiam possunt homilia D. Bernardi sup. Misus est, & conciones D. Leonis de Nativitate & Passione. Et alii etiam Patres in similibus concionibus de Christo & Beata Virgine multa docuerunt, quæ in sequentibus latius percurreremus. Doctores scholastici cum Magistro hanc materiam tractant in 3. lib. sententiarum: nos vero in ea explicanda ordinem questionum, & articulorum D. Thom. quem exponendum suscepimus, observabimus. Hac tamen servata ratione & methodo, ut prius brevem expositionem, seu Commentarium literæ, si obscurum aliquid vel notatione dignum in illa occurrerit, præmittamus. Deinde proprias disputationes, earumque sectiones (hoc enim nomine ad vitandam confusionem utemur) subjiciemus. Denique singulæ disputationes textui D. Thom. accommodatæ omnes inter se ita connectentur, ut non modo intelligentiæ, sed etiam studio Lectori semper consulatur, in cujus gratiam duo proxima capita, tanquam firmissima totius reliquæ disceptationis fundamenta, ante expositionem D. Thom. duximus esse præmittenda.

Ordo Auditoris.

## DISPUTATIO I.

Contra Judæos, in quatuor sectiones distributa.

*Messiam jam venisse.*

**A**Cin primis quid nomine Messie significetur, explicandum est. In hoc enim nos cum Judæis convenimus, illo nomine appellari, quendam hominem ex gente Judæorum ducentem originem, a Deo, & Prophetis prædictum & promissum, in Regem & Salvatorem hominum, cujusmodi promissiones tam frequentes sunt, & apertæ in Scripturis sacris, ut supervacuum sit illas commemorare, præsertim quia ostendendo fuisse completas, necessario illas indicabimus: appellatus autem est Messias, ut pote futurus verus Rex, & Sacerdos, & Deus, & homo, oleo divinitatis unctus. Psalm. 44. Messias enim Hebraice idem significat, quod Græce Christus, Latine unctus, ut late Eugubinus lib. 3. de arcanis cap. 2.

Messias quid significet.

Hunc ergo Messiam promissum jam venisse, nullus qui Christiano nomine gloriatur, quantumvis hæreticus, negare potest, tum quia hoc potissimum distat Christiana fides ab Judæorum perfidia: tum etiam quia Christus desertis verbis id affirmavit Joan. 4. cum enim Samaritana dixisset: *Scio, quia Messias venit, qui dicitur Christus. Dixit ei Jesus: Ego sum, qui loquor tecum.* Et hanc veritatem inter alias confessus est Petrus illis verbis: *Tues Christus filius Dei vivi*, Matth. 16. Itaque solum contra Judæos ex veteri Testamento, quod ipsi dumtaxat admittunt, hæc veritas confirmanda est.

## SECTIO I.

*De testimonio Genes. 49. Non auferetur sceptrum de Juda, &c.*

**E**ST ergo celeberrimum testimonium, quod Judæis objici solet, sumptum ex Genes. 49. *Non auferetur sceptrum de Juda, nec dux de femore ejus, donec veniat qui mittendus est, & ipse erit expectatio gentium.* Quæ verba in Hebræo leguntur sic: *Non recedet sceptrum de Juda, & scriba legislator de medio pedum ejus, seu de inter pedes ejus, donec veniat Siloh.* Unde quoniam in Hebræo non est expressum nomen Messie, Hæ-

Suarez. Tom. XVI.

bræi in hoc eludendo testimonio divisi sunt. Nam quidam illorum, quamvis pauci, negant prophetiam hanc impletam esse, cum nondum tribus Juda sceptro suo, ac regno privata sit, adhuc enim in Babylone transmigrationis capita, ut ipsi loquuntur, & locum Regum tenent, atque in Judæos toto orbe dispersos potestatem dominandi. Sunt vero qui aliam rationem reddunt, scilicet, quia licet sceptrum ablatum fuerit a tribu Juda, non tamen est translatum ad aliam tribum. Hoc enim modo putant esse prophetiam intelligendam. Sed hæc irridenda potius sunt, quam impugnanda, quia in scriptura nusquam reperitur in adventu Messie transferendum sceptrum ad aliam tribum, sed solum tribum Judæ sceptro carituram; dicere ergo aliud esse spectandum & voluntarium, & vanum est: nec minus commentitium est fingere sceptrum nescio quod in civitate Babylonica, funditus enim eversa est, ut prædixit Isaias cap. 13. & 14. quod ibi bene Hieronymus advertit; & quamvis in ea provincia Judæi multi dispersi reperiantur, tamē nec principatum, aut regnum obtinent, nec illius in orbe terrarum ulla mentio aut fama circumfertur, aut certe vestigium invenitur.

Impugnatur Judæorum expositio.

Major igitur recentiorum Hebræorum pars, cum negare non possit Prophetiam hanc esse completam, negat tamen in ea esse sermonem de Messia. Siloh enim (ut ipsi ajunt) non personam aliquam, sed locum significat, in quo multo tempore mansit arca Dei, ut constat ex libro Regum 1. Unde quidam eorum de Saule intelligunt hunc locum, quia in Siloh unctus est in Regem, quod significari dicunt illo verbo, *Donec veniat Siloh.*

Alia Hebræorum expositio.

Sed errant aperte, nam per id tempus sceptrum regum a domo Juda minime defuit, quippe usque ad David illud nunquam obtinuit. Quod si non de regno, sed de alia potestate judicandi, vel regendi populum loquamur, multo ante Saulem, toto videlicet tempore Judicum, cruiuit hac dignitate tribus Juda: si autem tantum sermo sit de singulari quadam dignitate & nobilitate tribus Judæ inter omnes alias Judaici populi, ab hac non cecidit illa tribus, tempore Saulis, magis quam antea cecidisset. Præsertim quia verba Prophetiæ nullo modo possunt Sauli accommodari, ut statim de illo, aliisque dicetur. Denique sine scripturæ fundamentum dictum est Saulem unctum esse in Siloh, quia eo tempore arca Domini jam non erat in Siloh, sed in Cariathiar. 1. Reg. 7. unde cap. 9. Unctus dicitur in terra Suph, seu in Masphat.

Refutatio

Alii dicunt impletam esse Prophetiam tempore Jeroboam, quo tempore divisum est regnum: sed isti nec explicare possunt, cur tempore Jeroboam dicatur venisse Siloh, cum nec ille fuerit coronatus, aut unctus in Siloh, sed in Sichem 3. Reg. 12. nec alia verba prophetiæ Jeroboam, magis quam Sauli conveniant: adde eo tempore non fuisse ablatum sceptrum de Juda, licet fuerit aliquantulum imminutum. Alii denique referunt hoc vaticinium ad Nabuchodonosor, quando tempore Sedechiæ Regis captivum duxit populum in Babylonem, & regnum Judæorum extinxit, 4. Regum 25. quam evasionem ex Juliano apostata refert Cyrillus lib. 8. contra illum: sed eisdem fere modis refellitur, tum quia nulla ratio reddi potest, cur Nabuchodonosor dicatur Siloh, aut cur tempus regni ejus hac voce significetur: tum etiam quia (ut infra ostendetur) eo tempore sceptrum omnino ablatum non fuit, neque dux de Juda: tum denique quia nec Nabuchodonosor, nec Jeroboam, nec Saul, gentium expectatio dici unquam potuit, nec in illos cadunt verba, quæ subduntur statim, lavabit in vino stolam suam, & in sanguine vultus pallium suum, pulchriores sunt oculi ejus vino, & dentes ejus lacte candidiores.

3. Expos.

4. Expos.

Refutatio

Primum igitur omnium certum sit nomine Siloh significatum esse Messiam, ut omnes Catholici intelligunt, & Rabini etiam Christo antiquiores, ut Galatinus refert lib. 4. cap. 4. & Chaldaica paraphrasis, quæ apud illos magnæ auctoritatis est, expresse posuit, donec veniat Messias, & quæ antecedunt omnia, quæ sequuntur, aptissime illi conveniunt. Nam propter Messiam illa tribus cæteris prælata est. Quod significavit Jacob cum dixit: *Juda te laudabunt fratres tui*, & quæ sequuntur alia, quæ sine illo negotio de Christo intelliguntur. Imo accommodari alteri nullo modo possunt, ut bene exponit Iren. lib. 4. cap. 33. & Cyprianus epistol.

Vera expositio.

Messias & Siloh quid significet.

Judæorum ignorantia



epistol. 63. aliis lib. 2. epistol. 3. Justin. Mart. Dialog. contra Triphon. & auctor quaestionum ad Antiochum, quæ referuntur nomine Athanasii quaest. 103. Sed cur Messias nomine Siloh significatus est? Vulgatus interpret nomen Siloh a verbo Salah, quod, mitto, significat, deduxit, quo quidem missum seu mittendum significat, quod nomen in scriptura accommodatur Messiae, quasi per antonomasiam, ut quemadmodum ille singulariter promissus est, ita nomine venturi singulariter significetur. Verum est tamen aliis literis scribi apud Hebræos verbum Siloh, quando missum significat, quam in hoc loco Genesis habeatur, ut de nomine Siloh videre est Isai. 8. Fortasse tamen noster interpret eisdem literis scriptum invenit; sed & si scribatur eo modo, quo nunc habetur in Hebræo, abundantiam pacis significat, ut illius linguae periti testantur: & ita Siloh idem erit, quod pacificus seu pacem adducens. Quod de Messia Zachar. 9. & saepe ab Isaia prædictum est. Dicitur etiam vox illa significare specialiter filium mulieris. Unde Galatinus supra refert Hebræos etiam intellexisse eo verbo indicatum mysterium conceptionis Messiae ex femina sine opere viri. Quam interpretationem Cajetanus super Genesin commendat. Alii denique in duas partes dividendam censent dictionem illam Siloh, ut significetur, quod illi, aut cui illi. Quam lectionem, seu interpretationem sequuti videntur septuaginta, qui ad explicandam concisam loquutionem Hebraicam addiderunt, donec veniant reposita ei, seu donec veniat, cui repositum est; & sensus in idem redit, scilicet, non defecturum temporale sceptrum Judæ, donec veniat ille, cui æternum sceptrum reservatum est. Ut recte Athanasius lib. de Incarnatione Verbi in fine, & libro de cruce & Passione Domini in fine, & Hieronymus in Epitaphio Paulæ, seu epist. 27. tom. 1.

Possent quidem hæc, quæ de hoc testimonio dicta sunt, contra Judæos sufficere, quoniam ostensum est signum certum a Jacob prædictum ad Messiam tempus dignoscendum, impletum atque exhibitum esse. Sed ad majorem nostræ fidei confirmationem, oportet exponere quomodo signum illud in tempore adventus Christi Domini impletum sit. Est enim hoc explicatu difficile, cum videatur multo antea defecisse sceptrum a domo Judæ, scilicet, tempore Sedechiæ, & ultimæ Babylonicæ captivitatis. In qua difficultate solvenda, etiam Doctores nostri multum inter se dissentiunt. Sed ut sententiarum varietas intelligatur, & comprehendatur res tota, advertendum est, in illis verbis non auferetur sceptrum de Juda, unum explicari, scilicet non esse auferendum sceptrum, aliud implicari seu virtute prædici. Non poterat enim auferri sceptrum a Juda, nisi prius illud habuisset. Cum ergo illo tempore nullum regnum esset in domo Judæ, tacite prædicatur illis verbis fore aliquando, ut Juda regnaret: quinimo aliud etiam censetur implicite prædictum verbis illis, quod ex vi verborum explicite non affirmatur. Clare enim dicitur, non esse auferendum sceptrum a domo Judæ, donec Messias veniat: fore tamen post adventum ejus auferendum, nec expresse asseritur, nec illa particula, donec, habet in scriptura talem vim, ut satis constet ex Matth. 1. *Non cognovit eam, donec peperit*. Et Psalm. 109. *Donec ponam inimicos tuos, &c.* Quamquam vero id expresse non sit prædictum, tamen si in re ipsa ostenditur ablatum sceptrum a Juda, signum evidens est adventus Messiae. Unde licet vis verborum id non requirat, tamen considerata intentione Spiritus sancti ejusque Prophetæ, ut scilicet haberemus signum certum adventus Messiae, recte dici potest, hoc etiam in illa Prophetia implicite contentum. Tria ergo explicanda supersunt, scilicet, quando tale sceptrum Judæ datum fuit, ut obiter etiam intelligatur, qua ratione impleta fuit Prophetia illa ab eo tempore, quo dicta est, usque ad David. Secundo, qua ratione duraverit illud sceptrum in Juda usque ad Christum. Tertium, qua ratione illo ipso tempore ablatum sit. Et in his explicandis, præcipue in secundo, dissidium est ortum, tum ex varia intelligentia illius sceptri vel ducatus, tum ex varia etiam explicatione seu acceptione nominis Juda.

Prima ergo expositio non de regno, seu regimine temporali, sed de speciali quadam dignitate & prærogativa, quam tribus Juda habitura erat in suo populo pro-

pter spem Messiae ex illa venturi, intelligit hunc locum. Itaque solum ibi prædicatur tribum Juda fore digniorem inter omnes propter spem Messiae. Unde fit statim ab eo tempore, quo dictum fuit hoc vaticinium, incœpisse tribum illam habere sceptrum, & dignitatem hanc. Ita Cajetanus in Genes. qui addit juxta expositionem hanc in adventu Messiae non fuisse tribum Juda privandam illo sceptro, sed in illo potius confirmandam.

Unde videtur per sceptrum intelligere tantum spirituale regnum Christi in spe possessum, vel in re: sed hæc expositio in hoc sensu mihi non probatur. Nam juxta illam etiam nunc dicent Judæi se non esse privatos sceptro & dignitate, quia adhuc retinent illam spem ex illis venturi Messiae, & ita nullum ex hoc loco poterit sumi argumentum, aut signum adventus illius: quod est contra omnium patrum expositionem supponentium in adventu Messiae defecisse sceptrum a domo Juda. Et hoc putant esse signum certum adventus ejus, & ideo explicant, quomodo usque ad illud tempus in ea duraverit. Sit ergo certum nomine sceptri seu virgæ significari regiam potestatem, ut frequens est in scriptura juxta modum loquendi Hebræorum, ut Psalm. 44. *Virga aequitatis, virga regni tui*. Isai. 9. *Virgam humeri ejus & sceptrum ex auctoritate ejus superasti*. Et quamvis aliquando significare soleat spirituale regnum, tamen hoc loco, ut visum est ex communi patrum expositione, quæ apud antiquos etiam Hebræos communis fuit, ut Galatinus supra refert, significat temporale regnum illius populi, vel saltem generatim potestatem regendi & gubernandi populum, quæ etiam nomine ducis significata est; si hæc duo idem significant in hoc testimonio, siue res diversas, quod nunc non refert, & in sequentibus amplius exponetur.

Secunda ergo expositio est, hoc loco prædictum esse regnum Judæorum futurum fuisse in tribu Juda, & in illa permanfurum usque ad Christum. Et primum quidem non fuit impletum usque ad David, nec amplius requirit veritas hujus Prophetiæ, quia non dixit Jacob, statim dandum esse regnum illi tribui, sed solum aliquando futurum, ut sceptrum regni ad tribum Juda perveniret, atque in illa ex eo tempore usque ad Messiam adventum perseveraret. Hoc vero posterius, in quo consistit difficultas rei, quomodo a captivitate Babylonica usque ad Christum verum fuerit, ita explicatur, Nam etiam post trigessimum septimum annum captivitatis Jechoniæ, nomen & dignitatem Regis obtinuit, 4. Regum 25. & postea in reedificatione templi, tempore Cyri, Zorobabel princeps Juda, erat princeps & dux totius populi Aggæi 1. & Zachar. 1. & ut Hebræi tradunt, ut refert Genebrardus lib. 2. Chronog. ab illo usque ab Machabæos, nunquam defuerunt duces de tribu Juda, quamquam regio diademate propter Persas nunquam uterentur. Atque ita in historiis eorum successio & genealogia fere prætermissa est. Quia eo tempore major auctoritas in pontificibus residebat, ut Josephus ait lib. 11. antiquit. cap. 7. Postea vero Machabæorum tempore summa reipublicæ Judaicæ ad eos translata est, & in eorum successoribus usque ad Christum perseveravit. Hos autem Machabæos fuisse de tribu Juda, testes sunt Cyril. lib. 8. contra Julianum in principio, ubi sic ait: *Quomodo igitur cessasse dicitur regnum David in Sedechiæ, cum Zorobabel, post captivitatis tempus, in regni solio confederit, fueritque e tribu Juda & David, transmissumque sit sceptrum per posteros illius usque ad regnum Herodis, qui fuit ex parte alienigena?*

Idem sentit Hieronymus Sophoni. 1. Epiphanius contra hæreses in 29. prope ab initio. Et Augustinus lib. 18. de civitate cap. 45. & sumitur ex Josepho lib. 13. a cap. 15. usque ad lib. 18. & Nicephoro lib. 1. historiarum, cap. 9. & Galatinus supra refert idem ex Hebræorum traditione.

Quoniam vero constat ex libris Machabæorum, Machabæos fuisse sacerdotes, & summos Pontifices, & consequenter de tribu Levi, & familia Aaron, ideo communis sententia est, eos fuisse secundum lineam paternam ex tribu Levi, juxta maternam vero ex Juda: miscebantur enim illæ tribus, ut constat ex 1. Paralip. 2. & ex aliis vulgaribus scripturæ locis, & dicemus infra latius, agentes de Christi genealogia: solum invenio Gene-

Difficil-  
tas loci  
proponi-  
tur.

Donec  
quod si-  
gnificet.

Summa  
difficultas  
explican-  
dorum.

c. Expositio.

Refutatio

Sceptrum  
quod si-  
gnificet.

Expositio

Sceptrum  
quomodo  
invenitur  
in tribu  
Juda.



Genebrardum asserentem e contrario illos fuisse de tribu regia per lineam paternam: de sacerdotali vero per maternam. Quod sine probatione affirmat, solum fortasse, quod non satis illi visa est materna origo, ut posterius dicantur esse de tribu Juda, atque adeo nec ut ea ratione dicatur sceptrum in illa tribu permanisse. Unde etiam cap. 5. lib. 5. Machabæorum de Machabæis dicitur: *Et viri Judæi magnificati sunt valde*. Quamvis alia lectio habeat: *Viri Juda & fratres, &c.* Sed debuisset advertere Genebrardus multo minus posse sufficere maternam lineam ex tribu Levi, ut possent Machabæi esse sacerdotes. Paulus enim ad Hebr. 7. simpliciter negat, sacerdotium posse pertinere ad eos, qui erant de tribu Juda, quod simpliciter & absolute intelligendum est, id est, secundum paternam originem, nam per maternam lineam nihil obstat, quo minus sacerdotes descenderent de tribu Juda: & ideo, ut ipse fatetur, communis traditio Hebræorum est, Machabæos solam maternam originem habuisse ex Juda. Sed hinc oritur insinuata obiectio contra hanc expositionem, quia hoc non satis videtur, ut sceptrum dicatur durasse in domo Juda, alias pari ratione dici potuisset, sacerdotium fuisse semper in tribu Juda, & e contrario, regnum fuisse in domo Levi, ac denique eadem ratione dici posset, beatam Virginem, solum secundum lineam maternam, descendisse de tribu Juda, quia hoc satis erit, ut Christus dicatur fuisse de eadem tribu.

Refutatur  
expositio  
Genebr.

3. Expositio. Propter hæc non desunt, qui Prophetiam hanc: *Non auferetur sceptrum de Juda*, non absolutam, sed conditionatam esse intelligant, & per illam explicandam, quæ habetur Psalm. 88. & Psalm. 131. *De fructu ventris tui ponam super sedem tuam, si custodierint filii tui testamentum meum*. Et juxta orationem Salomonis, quæ habetur 3. Regum 8. *Conserva famulo tuo David patri meo, qualocutus es ei, dicens, non auferetur de te vir coram me, qui sedeat super thronum Israel: ita tamen si custodierint filii tui viam suam, &c.* Ad hunc ergo modum intelligi potest, quod Jacob ait, non discessurum sceptrum a domo Juda, si tamen testamentum Dei servaret.

Hanc expositionem refert noster Turrianus in libr. 2. contra Antonium Sadeclem cap. 3. ex Theophane Episcopo Nicæno in Symphonia veteris & novi Testamenti contra Judæos. Et hoc sensu facile intelligitur (quantum tribus Juda fuerit regno privata) nihil tamen actum esse contra hanc prophetiam, quia propter peccata & scelera sua privata est, ut constat ex Jeremia 25. & 2. Paralipom. 36. & 4. Reg. cap. 24. & 25.

Objectio. At enim dicit aliquis, expositionem hanc auferre totam vim huic testimonio contra Judæos: quia si prædictio tantum erat conditionata, ex eo, quod Judæi scepro ac regno privati sint, non recte interiri potest, Messiam venisse, sed solum illos peccasse. Propter hanc fortasse objectionem addit hic auctor, licet principatus Regis interruptus sit, vel ablatus a Juda propter peccatum, tamen principatum ducis semper durasse, ut secunda & communis expositio affirmat. Unde indicat priorem partem hujus Prophetiæ, quæ illis verbis continetur: *Non auferetur sceptrum de Juda*, conditionatam esse. Posteriores vero scilicet, *Et dux de femore ejus*, esse absolutam. Prævidens enim, inquit, Jacob sceptrum defuturum propter peccatum, addidit saltem ducem semper de Juda futurum. Et iterum hæc sententia multum distinguit inter sceptrum & ducem. Quomodo autem principatus ducis interruptus non fuerit, explicat probabili modo infra explicando.

Refutatio  
expositio  
tionis. In hac vero expositione illud in primis est valde difficile, quod voluntarie affirmat principatum regum potuisse interrumpi propter peccatum, non vero principatum ducis, cum ex verbis Jacob non magis colligi possit, alteram partem esse conditionatam, quam alteram. Et revera locutio illa, *Donec veniat, qui mittendus est*, in neutra parte commode admittit sensum conditionatum, quia si illa esset tantum quædam promissio conditionalis, impleta conditio, id est, non existentem idololatriæ peccatum non auferetur sceptrum propter solum Messiam adventum; existente vero conditio, etiam si nondum venisset Messias, ablatus esset; sine causa ergo dictum esset, *donec veniat, qui mittendus est*. Non fuit ergo illa promissio conditionata, sed prædictio absoluta eventus futuri.

Suarez. Tom. XVI.

Propter has difficultates exponi solet ab aliis hic locus non de scepro regni, sed de potestate judicandi, seu de concilio sapientum, quod ab Hebræis dicitur Sanhedrin, quod erat quasi supremus quidam Senatus & concilium regale, in quo principales causæ illius populi terminabantur, de quo plura judicia in Scriptura sacra reperiuntur. Incepisse enim creditur hoc Sanhedrin in illis septuaginta viris, quos Deus congregare fecit, deditque illis de spiritu Moysis, ut cum illo onus regendi populum sustinerent, & hi censentur esse illi septuaginta viri, quibus secretiora mysteria legis & Scripturæ sacræ committebantur 4. Regum 14. ut insinuant Hilarius Psalm. 2. & Origenes homil. 6. in Numer. Et de illis intelligi potest illud Deuteronom. 17. *Si difficile aut ambiguum apud te judicium esse perspexeris: ascende ad locum, quem elegerit Dominus, &c.* Et 1. Paralipom. 26. in qua parte domus erat seniorum concilium. Hoc vero Sanhedrin non fuit ablatum tempore captivitatis, ut sumi potest ex Daniel. 1. 3. ubi senes populi judicarunt Susannam. Ubi Glossa, & Lyranus advertunt, illos fuisse de tribu Juda. Et idem durasse usque ad tempora Christi Domini. Tunc vero tempore Herodis cessasse, & Judæis ablatam esse hanc supremam potestatem judicandi, referunt ex traditione Hebræorum Geneb. & Galat. supra, idque confirmant ex illo verbo Joan. 18. *Nobis non licet interficere quemquam*. Per legem enim licebat in causa justa, quia potestas illi non deerat, ut patet ex Deuteronom. 17. Ergo non licebat, quia Romani, vel Herodes illos potestate privaverant: sed quamvis hæc omnia licet non satis certa sint, vera esse concedam, non tamen ostensum est, nec ex sacra Scriptura, aut traditione aliqua probatur, hos septuaginta viros, aut majorem eorum partem, aut eorum ducem seu præsidem fuisse de tribu Juda, ut propterea perseverante hoc Concilio dicatur perseverare princeps seu dux de tribu Juda; Numerorum enim 11. simpliciter dicuntur illi septuaginta viri electi de senioribus Israel. Et illis eo tempore præfuit Moyses, ut ex eodem loco intelligitur, & Hebræi tradunt, & verisimile est semper illis præfuisse summos sacerdotes. Nam Deuteronom. 17. clare dicitur hoc judicium ad sacerdotes pertinuisse. *Ascendes, inquit, ad locum, quem elegerit Dominus Deus tuus. Veniesque ad sacerdotes Levitici generis; & infra. Qui autem superbiert nolens obedire sacerdotis imperio, &c.* Quamvis ergo Sanhedrin duraverit usque ad Christum, non inde fit durasse sceptrum in domo Juda.

Quamobrem Eusebius, quem alii sequuntur, existimavit Judam, cui promissa est possessio sceptri usque ad Christum, non esse intelligendam specialem tribum ab aliis undecim distinctam, sed totum Judaicum populum, ut in illa tribu maxime conservandus erat, & ab ea nominandus & nobilitandus. Sensus ergo est, Judaicum populum semper fuisse habiturum proprios duces & principes, per quos gubernaretur & judicaretur, donec Messias veniret. Et ita factum est usque ad Herodem, qui alienigena fuit, cujus tempore natus est Christus, & ab eo tempore semper gens illa caruit proprio duce & gubernatore, & externis principibus subiecta est. Ita Euseb. libr. 3. de demonstrat. cap. 2. Idem sentit Justin. Dialog. contra Triphon. & August. 18. lib. de Civitat. cap. 45. cum inquit, non ergo defecit Judæorum princeps ex Judæis usque ad Herodem. Et Ambros. lib. de Benedict. Patriar. cap. 4. similia fere verba habet, & Chrysost. homil. 67. in Genes. Sed nihilominus expositio hæc violenta nimis esse videtur. Quia omnes illæ benedictiones sigillatim ad singulos filios Jacob, & ad eorum posteritates pertinent, quod in omnibus aliis evidenter constat. Eodem autem modo in hac benedictione loquitur specialiter ad Judam, unde ad illum, & ad ejus posteros specialiter pertinent cætera, quæ in eadem benedictione continentur, ut est illud: *Judæ te laudabunt fratres tui. & adorant te filii patris tui*. Quod dictum est propter Christum, qui dignus est perfecta patriæ adoratione, quem statim catulum leonis vocat, per eam metaphoram explicans filii personam, ut patres exponunt, qui propterea hic intelligunt Christum fuisse prædictum de tribu Juda, ut patet ex Chrysostomo homil. 2. in Matth. igitur eadem ratione cum dicitur, *Non auferetur sceptrum de tribu Juda*, non de toto Judaico populo, sed de speciali tribu Juda intelligendum est, ut intelligunt

Concil.  
Sanhedrin.

5. Expositio.

Refutatio



Eucherius, Chrysostomus, Albinus Diodorus, & alii in Genes. & Epiphanius hæres. 20. Augustin. 22. contra Faust. cap. 45. & Orig. homil. 37. in Genes.

Authoris  
opinio.

Nota hæc  
duo.

Retuli tot annorum sententias, non ut eas impugnarem atque rejicerem, sed quoniam omnes majorem lucem huic testimonio asferre possunt, & ex singulis aliquid elici, quod ad majorem illius intelligentiam conducatur. Igitur illud in primis simpliciter verius existimo, nomine Judæ intelligendam esse specialem tribum, & intentionem Jacob fuisse, prædicere ex illa non defuturos principes aut duces populi Judaici. Sed recordari oportet tempore Roboam gentem illam in duo regna fuisse divisam, scilicet regnum Judæ, & regnum Israel. Regnum autem Israel, quod decem tribubus constabat, plusquam quingentis annis ante adventum Christi, ita fuisse vastatum a Salmanasar rege Assyriorum, ut nulla illius mentio ulterius habeatur, ut constat 4. Reg. 7. & 18. unde fit solum regnum Judæ permanisse usque ad Christum. Quod quidem fere solam gentem ex tribu Juda complectebatur. Dicitur enim 4. Reg. 12. solam tribum Juda secutam esse domum David, quia quamvis tribus etiam Benjamin infecuta fuerit tribus Roboam, tamen non fuit integra sicut tribus Juda, vel fere non habetur ratio ejus propter dignitatem & excellentiam tribus Judæ. Unde in loco citato ex 3. Regum, inter alia sic dicitur: *Iratusque est Dominus Israel, & abstulit eos a conspectu suo, & non remansit nisi tribus Juda tantummodo.* Unde notat Joseph. lib. 11. antiquit. Judæorum appellationem, tunc primum illigenti, & regioni fuisse inditam, quando ex Babylonica captivitate tempore Nehemiæ reversa est, propter hanc fortasse causam, quod sola tribus Juda illam regionem colere censebatur. Ex quo fit, fere idem esse mansisse sceptrum vel ducem in tribu Juda, & in populo Juda, quandoquidem totus ille populus fere ad solam illam tribum redactus est. Unde vix aut nullo modo fieri potuit, ut populus ille potestatem se gerendi aut judicandi retinuerit, quin vel omnino, vel magna ex parte ad tribum Juda pertineret.

Addere vero ad majorem explicationem oportet, nomine sceptri & ducis, vel non esse intelligendam dignitatem & potestatem regalem proprie & perfecte sumptam, vel certe non solam illam, sed quamcumque primariam, & principalem potestatem judicandi vel regendi populum: ita tamen, ut si utramque significari dicamus, alteram nomine sceptri, alteram nomine ducis, non sit necesse intelligere tribum Juda habituram fuisse utramque dignitatem usque ad Christum, seu, quod idem est, neutra fuisse carituram: sed sensus erit, non fuisse carituram utraque simul, atque adeo alteram saltem semper fuisse habituram; & hoc modo facile intelligimus dignitatem hanc & a principio fuisse in tribu Juda, & usque ad Christum in ea perseverasse. Post adventum autem ejus omnino ab hac dignitate cecidisse. Prius enim quasi in honore habebatur, quia germen vitæ suis in lumbis continebat; postquam vero illud protulit, & illo frui vel nescivit, vel noluit, merito sua dignitate privata est. Quod ita ut dictum est, evenisse, & ex Scriptura sacra, & ex eventibus ipsis facile declaratur. Ut enim omittam tempus illud, quo post hanc prædictionem Jacob populus Judæorum in Ægypto permansit, de quo neque in Scriptura sacra, neque in prophana historia aliquid scriptum reperio, statim ac populus discessit ab Ægypto, cepit illa tribus cæteris anteferri. Numerorum enim 2. & 7. prima acies ad Orientem tribui Judæ cum copiis suis tribuitur, & cap. 9. prima omnium castra movebat, & quasi agmen ducebat. Deinde num. 7. convenientibus principibus tribuum ad offerenda munera, prius offert Naafon princeps Judæ. Judicium etiam 1. jussu Dei suprema potestas ad hanc tribum delata est post Josue mortem. Et quodcumque genealogiæ tribuum referuntur, semper prima refertur Judæ posteritas 1. Paralipom. 2. & sæpe alias. Unde etiam facile credibile fit, in illo Concilio septuaginta virorum primarios judices fuisse de tribu Juda, quod præsertim, ac necessario dicendum est de eo tempore, quo regnum Judæorum fere ad tribum Juda redactum est. Unde fit hanc saltem dignitatem, usque ad Christi adventum in ea perseverasse. Accedit, præter hanc dignitatem a temporibus David habuisse supremam, ac

regiam potestatem: quæ licet non perfecte in ea duraverit usque ad Christum, quod necessarium non est, ut dixi, ad veritatem hujus Prophetiæ, non fuit tamen penitus illa privata: tum quia semper tribus illa ut regalis & præcipue honorata est: tum etiam, quia licet aliquando hæc potestas ad sacerdotes derivata fuerit, hoc factum est, ut Theophan. supra dicit, quatenus tribus Levitica per matrimoniorum conjunctionem una cum illa effecta est, ab illa particeps facta est regalis splendoris & nobilitatis. Hoc ergo modo principatus Judæorum in tribu Juda usque ad Christum continuatus est; in Christi autem adventu omnino cessavit non solum, quia Rex alienigena Herodes tunc regnare cepit in populo Judaico: & quia Concilium Sanhedrin sua potestate privatum est, & ab altero Herode, cujus tempore mortuus est Christus, penitus extinctum: sed etiam quia paulo post in eversione & captivitate Jerusalem a Romanis facta totus ille populus fere deletus est, & distinctio tribuum ita confusa, ut nulla dignitas, aut prærogativa tribus Judæ jam cerni aut fingi posset. Omnino ergo vanum & ineptum est adhuc ex illa tribu Messiam expectare.

Non prætermittam autem advertere, nonnullos Judæos hoc testimonio convictos, Messiam venisse falsos esse: illum tamen fuisse Herodem falso fuisse mentitos, ut notant Hieron. contra Luciferian. Tertul. de præscript. cap. 45. Epiphanius. hæres. 20. qui aperte eos convincit, quia neque Herodes fuit de tribu Juda, neque in eum conveniunt alia, quæ tam in hoc, quam in aliis locis scripturæ de Messia dicuntur. Denique tempore etiam Vespasiani nonnulli tentarunt Prophetias de Christo datas ad illum accommodare: in quem errorem inclinavit Joseph. lib. 7. de bello Judaico. cap. 12. confundens cum vero Messia ducem illum, quem ad evertendum sanctuarium, & civitatem venturum esse Daniel. c. 9. prædixerat. Tradunt enim historiæ, hunc Vespasianum Christi regnum affectasse, ideoque pacis templum erexisse, & per Magicas artes apparentia quædam prodigia effecisse, ut quæ de Christo scripta erant, in illo completa esse posset existimari. Sed non est, quod in hoc etiam explodendo errore inmoremur, ex eisdem enim principiis facile refellitur: quia Vespasianus nec Judæus fuit, neque ullo modo ex tribu Juda, aut familia David, quin potius, ut Euseb. refert lib. 3. cap. 11. omnes posteros David, magna diligentia conquisitos, interficiendos curavit, ut cætera omittam, quæ in istum convenire non posse manifestum est.

Vespasianus  
nitentem  
tas Christi  
regis  
affectu  
tis.

## SECTIO II.

Secundum testimonium contra Judæos.

Ex Daniel. 9. Animadverte, &c.

Secundum testimonium, sicut clarissimum; ita & vulgatissimum ad convincendos Judæos est, quod ex Daniel. 9. sumitur, ubi ortus Messiæ post septuaginta hebdomadas futurus prædicatur his verbis. *Animadverte sermonem, & intellige visionem, septuaginta hebdomada abbreviata sunt super populum tuum, & super urbem sanctam tuam, ut consummetur prævaricatio, & finem accipiat peccatum, & deleatur iniquitas, & adducatur justitia sempiterna, & impleatur visio, & prophetia: & ungatur Sanctus sanctorum. Scito ergo, & animadverte, ab exitu sermonis, ut iterum edificetur Jerusalem usque ad Christum ducem hebdomades septem, & hebdomades sexaginta due erunt: & rursum edificabitur platea, & muri in angustia temporum. Et post hebdomadas sexaginta duas occidetur Christus, & non erit ejus populus, qui cum negaturus est, & civitatem & sanctuarium dissipabit populus, cum duce venturo, & fine ejus vastitas, & post finem belli statuta desolatio; confirmabit autem pactum multis hebdomada una, & in dimidio hebdomadis deficiet Hostia, & sacrificium, & erit in templo abominatio desolationis, & usque ad consummationem & finem perseverabit desolatio.* Hæc tamen Gabriel ad Daniele. In quo testimonio primum omnium statuendum est prædici adventum Messiae post illas septuaginta hebdomadas, quod posteriores Hebræi pertinaciter negant, quia hoc admissio vitare non possent hujus testimonii vim. Utuntur vero ista conjectura, quia Daniel tunc non postulabat a Domina Messiae

Dignitas  
tribus  
Judæ.



Messie adventum, sed solum liberationem sui populi ab illa captivitate. Quæ conjectura levissima est: primum, quia utcumque explicent prophetiam hanc, vitare non possunt, quin multa contineat ad libertatem illius populi nihil pertinentia, ut ex falsis etiam eorum interpretationibus constat, quas referre omitto, quia per se futes sunt: & in glossa ordinaria tractantur fute, ac plane refelluntur. Deinde sæpe Deus, quæ illius liberalitas est, plus homini concedit, quam ipse petat, quamque desideret, atque Daniele ipsum verisimile est, non tantum temporalem populi libertatem, sed multo magis spirituale futuram per Messiam desiderasse. Quod satis indicavit Angelus, dicens: *Ego veni, ut indicarem tibi, quia vir desideriorum es.* Denique verba illa tam clara sunt & perspicua, ut conjecturis minime indigeant, qualia in primis sunt illa, *Ut consummetur pravaricatio, & finem accipias peccatum, &c.* usque ad illud, *Et ungatur sanctus sanctorum.* Quæ neque ad promissiones mere temporales & externas, nec ad aliquem purum hominem accommodari possunt. In Christum vero cadunt omnia mirifice: nam & Sanctus sanctorum est, & unctus oleo lætitiæ præ participibus suis. Psalm. 44. Ut enim bene notavit Euseb. lib. 8. de demonstrat. cap. 2. quamvis in Scriptura sacra multi nominentur sancti, nullus tamen homo purus Sanctus sanctorum dictus est; Christus vero cum per se sanctus sit, non ex accidenti, sed sanctificatus substantia ipsa & essentia sanctitatis, cumque sit principium sanctificationis totius, merito Sanctus sanctorum dicitur: ut illa reduplicatio, juxta proprietatem Hebraicæ linguæ, supremam dignitatem, & excellentiam indicet: quemadmodum cum dicitur Rex Regum, & Dominus dominantium. Et eadem de causa verbum illud: *Et adducatur justitia sempiterna*, uni Christo potest convenire, vel quia ipse est nostra justitia, sanctificatio, & redemptio, vel quia veram justitiam nobis attulit, & quod in ipso est peccatum delevit, dum ex perfecta justitia pro illo satisfecit. Quæ omnia præstitisse Christum evidenter ostendi non possunt, sed credenda sunt, tum propter ipsius facta, atque prædicationem, tum propter alia multa Scripturæ sacræ testimonia, id efficaciter comprobantia, tum denique quia evidens est, de nullo alio similia credi, aut affirmari posse. Sed quod in eadem prophetia Angelus addit, *Ut impleantur*, seu signetur, *Visio Prophetiæ*, post Christum impletum esse compertum est, ut recte Chrysost. orat. 2. contra Judæos, & Tertul. lib. contra eosdem cap. 8. notarunt. Ante Christum enim frequens, & quasi ordinariæ erant prophetiæ revelationes, cum nondum venisset Messias, quem cunctæ visiones prophetarum intuebantur: at vero post Christum verum Messiam, & antiquæ prophetiæ impletæ sunt, & novæ cessaverunt: unde etiam in Evangelio dicitur, *Lex, & propheta usque ad Joannem.* Addit præterea Angelus, *Ab exitu sermonis, usque ad Christum ducem, &c.* ubi etiam Christi nomen expressit, Judæi vero nomine Christi Cyrum intelligunt, qui Isai. 44. & 45. Christus appellatur. Sed, ut alia omit- tam, hoc stare non potest, quia Christus dicitur futurus post sexaginta novem hebdomadas, Cyrus autem jam diu præcesserat: & eodem modo facile refelluntur alia subterfugia vana, & sine fundamento. Miror autem Euseb. quod nomen Christi hoc loco de Hircano, seu de successione Pontificum Judæorum, usque ad ipsum Hircanum, quam per sexaginta novem hebdomadas durasse existimavit, interpretari ausus sit: primum omnino voluntarie, & contra vim verborum; quia *Christus dux*, quasi per antonomasiam de Messia dicitur, juxta illud Isaiæ 55. *Dedit ei in lucem gentium, ducem, ac præceptorem populis.* Et Mich. 5. *Ex te enim exiet dux:* & in Hebræo, ubi nos habemus, *Usque ad Christum ducem*, est vox significans, usque ad Christum principalem, quæ est singularis appellatio veri Messie. Deinde præcedentia verba non alium sensum patiuntur, & idem de sequentibus statim ostendemus, ut orittam rationem, & computationem temporum manifeste illi expositioni repugnare, ut ex sequentibus constabit. Unde, quod deinceps addit Angelus: *Et post sexaginta duas hebdomadas occidetur Christus:* multo magis de vero Christo intelligendum est; quod enim Judæi con- fingunt hunc Christum fuisse Herodem Agrippam, qui

temporibus Titi in secundi templi destructione occisus est, & falsum est, quia hic Herodes non fuit tunc a Romanis occisus, ut constat ex Josepho lib. 2. de bello Judaico cap. 16. & licet esset verum, tamen Christi appellatio non posset illi accommodari, qui nec gratia, nec oleo unctus fuit, nec alia, quæ continentur in illa prophetia, eidem convenire ullo modo possunt. Quin etiam Theodoretus graviter hoc loco lapsus est, qui hunc Christum occisum, Hircanum fuisse interpreta- tur, cum tamen Christum ducem fateatur esse Messiam: nam in primis hæc varietas, & multiplex ejusdem vocis significatio, in eodem contextu voluntarie, & sine fundamento confingitur. Deinde gratis plane existima- tur, mortem Hircani hoc loco ab Angelo prædictam esse, quod nec postulent antecedentia verba, neque sub- sequentia. Imo cum nec illius mors aliquam utilitatem hominibus attulerit, non ita multo ante prædicenda videbatur. Addo, ad computationem temporum, seu hebdomadarum, eam expositionem utilem nullatenus esse, ut ex inferius dicendis constabit satis. Denique mortem veri Messie ibi prædicti constat ex toto contextu; per eam enim mortem iniquitas deleta est, & sempiterna justitia consummata, in ea Judæorum populus Do- minum suum negavit, ob idque facinus tam atrox pœ- nas sustinuit, eversa funditus regia civitate, nunquam restauranda, ut eodem testimonio prophetatum est.

Demonstravimus testimonium hoc de Messie adven- tu necessario intelligendum esse: superest, ut septua- ginta hebdomadas transactas jam esse probemus: hinc enim evidenter constabit tempus adventui Messie ab Angelo definitum jam præterisse, atque adco, vel prophetiam falsam esse (quod Judæi non concedunt), vel certe (quod unum intendimus) Messiam adventasse. Sed ut hoc constet, indagemus prius hebdomadas significa- tum. In qua re fere omnes Hebræi, antiquiores præci- pue, nobiscum consentiunt, has hebdomadas esse qui- dem annorum, ut septem annos unaquæque complecta- tur; certum est enim dierum hebdomadas esse non posse, quæ spatio brevissimo disfluere; præter has autem vulgares hebdomadas invenimus in Scriptura hebdoma- das simplicium annorum, ut Gen. 29. Jac. dicitur imple- visse hebdomadam pro Rachel, & hebdomada transacta, illam suscepisse. Et Levit. 25. *Numerabis tibi septem hebdomadas annorum:* quin addo hebdomadas mensium, vel hebdomadarum, nec inveniri unquam in Scriptura, nec illi loco posse accommodari, quia tempore brevif- simo conficerentur, nec denique possunt ultra simplices annos extendi, ut videlicet una hebdomada septem denarios, vel centenarios annorum comprehendat, id quod Hebræorum quidam, quos Galatin. refert, dicere tentarunt, quorum errori non parum consentit Orige- nes tract. 29. in Matth. ubi unamquamque hebdomadam facit annorum septuaginta, procul dubio falso: primum quia talis modus hebdomadæ in Scriptura non legitur, & voluntarie confictus est. Deinde, quia si hæc licentia conceditur, nihil certi continere potest hæc prophetia: poterit enim unusquisque arbitrio suo facere hebdoma- das septingentorum, vel septem millium annorum, ut convinci non possit eas esse completas. Denique, quia ex eisdem verbis Angeli omnino constat, tempus illarum hebdomadarum jam esse transactum, utpote, cum hostia defecerit, & sacrificium Judæorum, eorum deni- que civitas, & sanctuarium vastata sint: quod transac- tis hebdomadis, vel earum finem fore prænunderat. Unde Origenes, ut finem hebdomadarum inveniret, earum initium ab ipsa creatione mundi desumpsit, extra rem profecto, & contra ipsiusmet verba prophetiæ, ut videbimus, neque adhuc quod intendit, assequitur: cum ab ipsa creatione mundi usque ad destructionem Je- rusalem sub Tito factam, non fluxerint ultra quatuor mille sexaginta anni, adhuc ergo decrant plusquam octingenti: ut impleantur ejus hebdomadæ. Sit ergo certum has hebdomadas septennales esse.

Magna vero contentione inter Catholicos auctores disputatur, quales debeant intelligi illi anni, ex qui- bus hebdomadæ constare dicuntur; & quanquam diver- sis in nationibus, pro diversitate etiam temporum, mul- tiplex, & varius fuerit anni usus, hic tamen solum est quæsitio, & opinionum dissensio, an illi fuerint anni lu- nares, an solares: quia certum est in Scriptura sacra, res.

Theodosius retineat.

Heldo- madae oon- nunc quid sit intelli- gendum.

Heldo- madae qui- bus annis constent.

Qui anni solares vel lunares.

Nominis Christi, non Cy- rus aut Hircanus intelligi- tur.



atque Hebræorum usu, non fuisse nisi annum solare, vel lunarem: constat autem Angelum hujus prophetiæ nuncium; cum ad Hebræum hominem, de rebus ad Hebræos ipsos pertinentibus, loqueretur, sic annos accepisse, uti ab illismet communiter accipiebantur. Differt autem hoc inter hos annos, quod solaris constat trecentis sexaginta quinque diebus cum quadrante: lunaris vero solum trecentis quinquaginta quatuor. Multis ergo visum est, hunc annum lunarem communem apud Hebræos, atque adeo Gabrielem de illo fuisse locutum. Cujus sententiæ videtur fuisse Ambrosius lib. 4. hexameron. cap. 4. in fine, & Basil. homil. 6. hexamer. prope finem, ubi etiam antiquos Græcos hujusmodi anno usos fuisse affirmat. Idem de Hebræis docet Rupert. lib. 1. de Trinitate. cap. 45. ubi annum lunarem dicit esse naturalem, solare vero artificialem: quia in hoc menses ad placitum divisi sunt, in illo vero, juxta naturalem, & integrum circulum lunæ distinguuntur. Sed pari, vel majori fortasse ratione dicere potuisset lunarem annum esse artificialem, quia nullo naturali motu cœli perficitur, sed solum ad placitum duodecim mensibus constat; solaris vero dicitur naturalis, quia unius astri naturali conversione, & integro motu mensuratur. De annis præterea lunaribus explicuit has hebdomadas Julius Africanus. ut Hieron. super Daniele refert, quem ibi secuti sunt Rupert. lib. 1. cap. 15. Albert. Carthusius & alii expositores, & Beda libro de ratione temporum cap. 7. & lib. 3. in Esdras cap. 16.

Sed inprimis dubitari non potest, quin Hebræi & veram solaris anni durationem cognoverint, & illo ad chronographias, & annorum rationes computandas usi fuerint; primum, quia quotiescumque Scriptura numerat annos, v. g. Adam vixisse tot annis, Hebræos fuisse in Ægypto quadringentis triginta annis, vel in captivitate Babylonica septuaginta, sine ulla controversia de annis solaribus intelligenda est. Alioquin omnis annorum computatio, quæ in Scriptura est, dubie constaret. Præterea certum est, Græcos & Romanos annis solaribus fuisse usos, Græcos autem veram anni solaris mensuram didicisse ab Ægyptiis, refert Strabo lib. 17. suæ Geographiæ, atque Ægyptios eandem anni mensuram habuisse, refert Herodotus lib. 2. suæ histor. prope ab initio: & credibile est eam anni durationem recepisse ab Hebræis, a quibus Astrologiæ, & astrorum observationes acceperunt, teste Josepho libro 1. antiquitatum cap. 16. & Eusebio lib. 9. de præparat. cap. 4. Unde Ficus Mirandulanus lib. 1. in Astrolog. cap. 9. Antiquissimos Hebræorum dicit divisisse annum in trecentos sexaginta quinque dies, & quartam alterius diei partem. Ad hæc, nisi Hebræi uterentur annis solaribus, non possent suos dies festos, præsertim Pascha, statutis temporibus celebrare, verbi gratia decimaquarta luna post Æquinoctium vernale: nam si tantum haberent rationem anni lunaris, cum ille sit plusquam undecim diebus minor solari, oportuisset singulis subsequenter annis per totidem dies celebritatem Paschæ antevertere. Unde necessario aliquando fieret, ut vel non celebrarent Pascha decimaquarta luna post æquinoctium vernale, vel certe non in mense primo Nisan, sed in quolibet alio. Et pari ratione non potuissent apud Hebræos 4. anni tempora mensibus evenire, sed essent in continua mutatione, sicut ipse annus: semper enim initium anni per illos undecim dies anteverteret illa tempora, quæ in solari anno immobilia sunt: consequens autem est falsum, semper enim Martius erat apud illos primus mensium, & rationem reddit Philo lib. 3. de vita Moysis, quia in eo incipiunt fructus maturefcere. Quocirca licet verum sit, ad celebranda nonnulla festa mobilia observasse Hebræos lunares annos, semper tamen illis curæ fuit, revocare & corrigere lunarem annum per solare intercalando tertio, & interdum secundo quoque anno mensem unum, atque in unico anno tredecim menses concludendo, ut hoc modo numerus annorum lunarium numero annorum solarium responderet, ut docent Basilii & Rupertus locis supra citatis; & ita ad mensurandas ætates, Regnorum durationes, ac denique ad omnes descriptiones temporum, lunari anno sic correcto, vel quod perinde est, anno solari pro mensura utebantur. Quapropter verisimilius videtur, Gabrielem Angelum de hu-

jusmodi annis, & de hebdomadibus ex eis compositis fuisse locutum: ut Eusebius lib. 8. de demonstr. cap. 2. & Chyloso. orat. 2. contra Judæos, & alii antiqui expositores interpretati sunt, quos secutus est Lyra Daniel. 9. Driedo lib. 3. de dogmatibus sacrae Scripturæ cap. 5. p. 4. Jo: Lucidus lib. 7. de emendat. tempor. Galat. lib. 4. c. 14. Genebrardus lib. 2. chronograph. circa finem.

At enim dicit aliquis: esto verum sit Hebræos numerum annorum lunarium ad numerum solarium revocare solitos dicta intercalatione, potuit tamen Angelus, ut prophetiam, & quasi ænigmaticum sermonem magis occultaret, illam intercalationem occulto præterire: quod quidem fecisse, & de brevioribus annis, & quasi concisis se loqui insinuasse videtur illo verbo, *septuaginta hebdomadæ abbreviate sunt*, ut auctores prioris sententiæ ponderarunt. Sed inprimis dictio illa, *Abbreviate sunt*, nihil, ut existimo, favet huic sententiæ; non enim indicatur illo verbo annos, ex quibus constant illæ hebdomadæ futuros fuisse breviores, sed solum diuturnam & longissimam Messias expectationem ad breve illud tempus septuaginta hebdomadarum reducendum; erat enim perbreve tempus illud cum superiori comparatum, imo etiam in familiari sermone, quando tempus ad aliquam actionem præscriptum finitur, jamjam dicere soleamus dies abbreviari, non quod minores fiant, sed quod pauci supersint: quomodo Marci 13. dicitur: *Nisi abbreviasset Dominus dies illos*, &c. Adde vocem Hebraicam ibi respondentem, tantum significare septuaginta hebdomadas fuisse præcisas, seu definitas. In aliis enim prophetiis, adventus Messias indefinite prædicebatur, hic vero limitatur, & definitur tempus: & hoc significatum est illo verbo, ut fere omnes expositores intelligunt.

Nihilominus non nego, potuisse Angelum hac obscuritate uti, & numerare hebdomadas ex annis lunariibus conflatas, & ad quandam brevitatem redactas, prætermittendo additione embolismi, aut anni intercalaris: certe si nulla alia ratione hebdomadæ istæ explicari possent, hoc vero modo possent accommodari, haud timerem illas ita accipere, quamquam Hieron. Osorius lib. 1. de vera sapientia dicat, nimis licenter, & inconsiderate hoc fecisse Julium Africanum. Sed excessit in ea censura, cum gravissimi viri eam sententiam secuti sint, nec desit illis probabilis conjectura, & aliquot in Scriptura fundamenta, maxime cum sæpe effectus explicet prophetiam, quæ antea per se satis intelligi non poterat, ut Irenæus dixit lib. 4. contra hæres. c. 43. Si tamen hebdomadæ illæ explicari possent accommodatè de annis solaribus, hoc esset sine dubio vero similis; existimandum est enim hæc plana & usitata significatio vocis illius, annus in Scriptura sacra. Nec facile credendum est, Angelum æquivoce fuisse illa voce usum, præsertim cum hoc non habeat sufficiens fundamentum, nec in verbis ejus, nec in Hebræorum consuetudine. Propter quod hæc est communior intelligentia tam Hebræorum, quam Græcorum, & Latinorum.

Ex his, quæ dicta sunt, evidenter concluditur, transactas jam esse septuaginta illas hebdomadas, atque adeo venisse Messiam. Superest, quomodo earum tempus in adventu Christi completum sit, unde ipsarum initium sit accipiendum, breviter aperiamus. Denique quis fuerit earundem terminus. Unde constabit, quomodo illi temporis accommodanda sit illa prophetia. Ubi primo statuendum est, illas hebdomadas septuaginta debere intelligi omnes æquales, & ejusdem rationis, & continua quadam successione fluentes. Hoc enim omnino necessarium est, ut tempus illud sit certum, & præfixum, ut significatum est illo verbo, *Abbreviate, seu concisæ sunt*. Quod etiam, ut prophetia certa sit, certusque ejus effectus omnino requiritur, quo uno fundamento excluduntur plane multe expositiones Origen. Hippol. Euseb. & aliorum, quos hic Hieronymus refert; errarunt enim dicentes, septuagesimam hebdomadam non esse continuam præcedentibus, sed sexaginta, vel septuaginta annis illis posteriorem: atque Euseb. cum alias hebdomadas septennes faciat, hanc fecit septuagenariam, sed utrumque refellitur facile ex dictis. Primum quidem, quia voluntarie, & sine fundamento confictum est, quia licentia disjungendi unam hebdomadam ab aliis, si uti liceret, pari

Opin.

Qui usi  
solaribus  
annis.



pari ratione posset quis dicere septem primas hebdomadas multum distare a sexaginta duabus sequentibus, imo suo arbitrio augere distantiam unius ab aliis: & Judæi dicerent illam septuagesimam hebdomadam nondum advenisse, quæ omnia evidenter sunt contra certitudinem hujus prophetiæ, atque verborum vim. Perinde enim fuit Angelum dicere intra septuaginta hebdomadas hoc eveniet, ac dicere intra quadringentos nonaginta annos; sed in rigore sermonis, qui hoc modo numerat annos, intelligit talem numerum annorum coherentium; idem ergo fuit sensus Angeli illo modo loquentis. Secundum vero ejusdem rationibus refellitur, scilicet, quia hebdomada septuagenaria nullum fundamentum habet in Scriptura, & voluntarie conficta est, & talis interpretatio ambiguum reddit prophetiam: quia unusquisque suo arbitrio poterit augere unam, vel plures hebdomadas, ut pro sua voluntate illas accommodet. Denique incredibile est, eandem vocem æquivoce sumi in eodem testimonio. Sit ergo certum, has hebdomadas debere sumi æquales, & continue decurrentes.

Secundo, ad assignandum principium & finem harum hebdomadarum, duo servanda sunt. Primum enim oportet, ut tale initium, vel finis fundamentum habeat in verbis Angeli: deinde ut chronologiæ ratio, ac temporum habeatur. De initio igitur hebdomadarum, dixit Angelus sumendum esse ab exitu sermonis, ut ædificetur Jerusalem. Unde excluditur error Hebræorum, qui a destructione templi initium sumpserunt: Angelus enim non a destructione, sed a reedificatione dixit: ipsi vero literam pervertunt, legentes non *ab exitu*, sed *de exitu sermonis*, ut illo verbo non significetur initium hebdomadarum, sed materia, seu objectum illius revelationis. Atqui hoc inprimis est contra vim verbi, & contra contextum, sic enim habetur: *Ab exitu sermonis usque ad Christum*, & cat. verbum enim illud, *usque ad Christum*, aperte significat terminum & finem: ergo per aliam particulam, *ab exitu*, significatum est initium. Denique quando Angelus nullam mentionem fecisset initii hebdomadarum, voluntarie assumeretur potius a destructione templi, quam aliunde, & ne incerta omnino fieret prophetia, sumendum esse ab eo tempore, quo Angelus loquebatur. Sit ergo certum, sumendum initium esse a tempore designato ab Angelo, per illud verbum, *Ab exitu sermonis, ut iterum ædificetur Jerusalem*: quod verbum, sicut varias patitur interpretationes, ita varia initia hebdomadarum assignantur.

Sciendum est enim prædictum fuisse per Jeremiam c. 29. fore, ut post captivitatem Babylonicam, & destructionem Jerusalem, fieret facultas Judæis in patriam redeundi, civitatemque suam ædificandi, quam promissionem hic etiam Gabriel Angelus confirmat, quæque diversis temporibus, & sub diversis Babyloniarum Regibus impleta est, vel omnino quidem vel ex parte, scilicet, vel sub Cyro, quando 1. anno Regni sui fecit facultatem Judæis redeundi in patriam, & templum erigendi, 1. Esdræ, vel a tempore Darii Histaspis, qui anno 2. Regni sui facultatem fecit Judæis reedificationem templi intermissam continuandi, Esdræ 6. vel ab Artaxerxe Longimano, qui septimo anno regni sui misit Esdram in Jerusalem cum magnis muneribus, & magna pecuniæ vi. Est autem verisimile, misisse illum ad reedificandam civitatem, vel templum, sicut est verisimile, hoc ipsum Esdram petiisse, dicitur enim Esdræ 7. Regem concessisse illi omnem petitionem. Vel ab eodem Artaxerxe anno 20. Regni sui, quando fecit expressam facultatem Nehemiæ iterum ædificandi Jerusalem, murosque ejus instaurandi. Nehemiæ 2.

Ex hac ergo varietate orta est etiam varietas sententiarum in assignando hebdomadarum initio; alii enim illud sumunt a tempore, quo Jeremias de hac reedificatione prophetavit, ut Lyræ. Burg. Gala. Alii ab ipso tempore, quo Angelus hæc loquebatur Danieli, ut Originem. quem refert Hieron. & Tertullian. contra Judæos c. 8. Alii a 1. anno Cyri, ut Clemens Alexandr. Alii a 2. anno Darii Histaspis, ut Euseb. & Cyrillus Hierosolym. catechesi 12. Alii a septimo, alii a 20. anno Artaxerxis. Et hæc ultima est communior sententia Julii Africanus, Theodo. Rupert. Bed. quos fere omnes posteriores Doctores secuti sunt, & sine dubio, si annorum computatio quadrat, illa est magis consentanea literæ: nun-

quam enim videtur proprie concessa facultas Judæis iterum ædificandi civitatem, ante illum annum Artaxerxis: cum prius solum de templo reedificando facta sit mentio, tam sub Cyro, quam sub Dario. Et Angelus non sit locutus de tempore, quo hoc vel prædictum est, vel promissum (aliis pari ratione posset inchoari a tempore, quo prophetavit Isaias c. 45.) sed de tempore, quo publicum edictum proferendum erat, seu facultas concedenda ædificandi Jerusalem. Quamquam in hoc etiam varietas sit, ut inferius attingemus. Et hæc de initio, quantum sumi potest ex verbis Angeli.

Tertio, finem seu terminum hebdomadarum assignavit Angelus illo verbo, *Usque ad Christum ducem hebdomades septem, & hebdomades sexaginta duæ erunt, & post hebdomadas sexaginta duas occidetur Christus*. Ubi Christus significat verum Messiam, ut supra vidimus. Ex quo juxta planum sensum literæ colligi videtur, terminum hebdomadarum in ipsa Christi morte futurum. Nam prius dicit, usque ad Christum ducem futuras sexaginta novem hebdomadas: quamquam non simpliciter, ita ut dictum est, sed dividendo eas per duos numeros, dicens: *Hebdomada septem, & hebdomada sexaginta duæ erunt*: tamen sensus idem est, & illa locutio dicitur esse juxta morem Hebraicum, & more etiam prophetico est aliquantulum ænigmatica. Deinde vero subjungit: *Et post sexaginta duas hebdomadas occidetur Christus*; intelligere autem videtur, post sexaginta duas, septem suppositis, quas prius numeravit; sensus ergo erit post sexaginta novem hebdomadas in septuagesima esse Christum occidendum: quia licet non dicat immediate post sexaginta duas hebdomadas Christum occisum iri: tamen revera hic est sensus, scilicet in hebdomada proxime sequenti id esse futurum, ut ex intentione prophetiæ satis constet, & ex his, quibus ostendimus, tempus harum hebdomadarum continuum, & sine interruptione esse sumendum.

Sed quæres, quomodo possit esse sexaginta novem hebdomada usque ad Christum ducem, per quod significatur adventus Christi, ejusque nativitas: & tamen quod mors ejus in Septuagesima hebdomada contingat, vel in dimidio illius; nullo enim modo hoc stare potest, nisi illa ultima hebdomada constet annis septuaginta. Dicendum est verbum illud, *usque ad Christum ducem*, non significare diem incarnationis, vel nativitatis Christi, sed tempus illud, quo cœpit hominibus manifestari, prædicare, docere, quod tempus a Christi baptismo inchoatum est, in quo testimonium accepit a Patre, *Hic est filius meus dilectus*, seu ab eo tempore, quo cœpit publica miracula edere in Cana Galilææ; post tres vero annos & tres menses, mortem obiit, ut inferius in proprio loco ostendemus ex Evangelio. Hoc ergo modo utraque illa particula, *usque ad Christum ducem*, & illa, *post sexaginta duas hebdomadas occidetur Christus*, intelligitur terminari & compleri in septuagesima hebdomada: sed altera in principio ejus, altera in medio, vel una in medio, & altera in fine. Dupliciter enim potest intelligi verbum illud, quod postea subjecit Angelus, scilicet: *Confirmavit autem pactum multis hebdomada una, & in dimidio hebdomadis, deficiet hostia, & sacrificium*: significatum enim est his verbis, Christum in dimidio hebdomadæ, id est, in tempore trium, vel quatuor annorum confirmaturum pactum suum, id est novum testamentum, & legem: confirmaturum, inquam, miraculis, & tandem morte ipsa, per quam sacrificia, & hostiæ legis veteris erant excludenda. Hæc itaque dimidia hebdomada dupliciter sumi potest, scilicet, vel ut sit prima dimidia pars septuagesimæ hebdomadis, vel ut intelligatur esse posterior dimidia pars, ita ut ultima hebdomada in duas dimidias partes dividatur, & in posterioribus tribus annis intelligatur futura confirmatio Evangelii, per Christi prædicationem, usque ad mortem ejus; & juxta priorem sensum hebdomada terminabatur aliquot annis post mortem Christi: juxta posteriorem vero in ipsa morte Christi; & uterque sensus est facilis & probabilis: & ille erit eligendus, cui ratio temporis medius accommodari poterit.

Solum videtur contra utrumque posse objici, quis simul Angelus prædixit, civitatem & sanctuarium dissipandum a populo, cum duce venturo, &c. quod non est impletum usque ad destructionem Titi, & Vespasiani,

Quæ ratio  
cognoscendi  
hebdomadas.

Error Iudeorum  
refutatur.

Origo  
difficultatis  
in hebdomadis.

Varie  
opiniões  
de initio  
hebdomadarum.

Objeccio.

Solutio.

Christi  
passio in  
media  
hebdomada.

Evangelii  
confirmatio.

Hebdomada  
dimidia  
bifariam  
sumitur.



ni, quæ quadraginta annis post mortem Christi subsecuta fuit; non sunt ergo impletæ hebdomadæ, usque ad illud tempus, quæ fuit sententia Chrysof. Euseb. Theodor. & aliorum, & est probabilis expositio: sequendo tamen eam, quam inchoavimus, quæque est satis consona textui, dicendum est, Gabrielem Angelum non affirmasse illud excidium futurum intra septuaginta hebdomadas. Hoc enim prius comprehendisse videtur ab illis verbis, *Septuaginta hebdomades abbreviate sunt*, usque ad illud, *Et ungetur Sanctus sanctorum*: & quoniam per mortem Christi delenda erat iniquitas, & terminandum testamentum vetus, & novum confirmandum, ideo hoc totum explicuit futurum in septuagesima hebdomada: ad maiorem vero confirmationem, & testimonium prophetiæ, attingit etiam supplicium, quod eventurum erat Judeis, propter peccatum negandi, & occidendi Christum: non vero dixit illud supplicium futurum intra illas hebdomadas; quin potius cum addidit verbum illud, *Et usque ad finem perseverabit desolatio*, indicavit illud supplicium longo post tempore duraturum. Nec refert, quod in sermone Angeli non omnia prædicantur eo ordine, quo postea facta sunt, hic enim modus loquendi communis est apud Prophetas, & ut occultentur mysteria, & nonnulla obscuritas affegetur. Et hæc quidem expositio, si numerus annorum, & chronologia temporum, illi potest accommodari, est per se satis expedita, & textui accommodata. Alia vero, quæ hunc terminum hebdomadarum protrahit usque ad destructionem Judæorum per Titum, rejicienda omnino non est: nam si computatio annorum aliter accommodari non posset, illa via non esset difficilis, ut videlicet omnia hæc, scilicet Christi adventus, prædicatio, & mors, & supplicium Judæorum destructio templo, & civitate, dicantur eventura intra septuaginta hebdomadas, vel inclusive, vel saltem exclusive, ita scilicet ut in fine, vel saltem in initio septuagesimæ hebdomadæ hæc omnia essent consummanda, hoc tamen modo & ordine, ut post sexaginta duas hebdomadas solas, ac præcisas, ita enim exponendum est in hac sententia, Christus esset occidendus, scilicet in sexagesima tertia in medio vel in fine illius juxta diversas expositiones supra positas: & deinde in aliis septem hebdomadibus, seu in fine earum, venturus esset dux cum exercitu, civitatem & sanctuarium vastaturus, &c. ut ab eo tempore prorsus hostia & sacrificium desideraretur, nimirum & illorum dissipato loco, & tempore, quo ipsa licebant, jam inde finito, quippe cum jam non mortua solum, sed mortifera essent futura. Et hæc expositio est sine dubio aliquantulum duriuscula, non tamen ut dixi omnino rejicienda, si ad computationem annorum ului esse posset: de quo jam breviter verbum unum subjiciendum est.

Quarto igitur, ut tantam rei difficultatem aperiamus, nec enim valebimus satis expedire, advertendum est, has septuaginta hebdomadas sine ulla controversia fuisse inchoatas durante Perfarum sceptro, continuatas vero toto tempore monarchiæ Græcorum, finitas tandem initio fere imperii Romanorum. Et hæc de ultima monarchia constat a principio ejus, usque ad Christi baptismum, quinquaginta novem annos interjectos quadraginta quatuor imperii Augusti, quindecim Tiberii, quo anno teste Luca Christus est baptizatus. De imperio autem Græcorum, quod ab Alexandro, vel proxime post Alexandrum incepit, communior sententia est durasse trecentis duobus vel tribus annis sub illis comprehendendo sex vel novem annos, quibus Alexander vixit post comparatam monarchiam. Ita sumitur ex Euseb. in Chron. Beda lib. de sex ætatibus, & aliis antiquis, quamvis a Joanne Annio, & posterioribus, qui illum sequuntur, longe aliter anni illius imperii numerentur. Sed illa historia Joannis Annii ex falsis auctoribus conficta est, & nullam jam habet auctoritatem. Unum vero est, quod hanc sententiam difficilem & suspectam reddit; supponunt enim, qui tot annos monarchiæ Græcorum tribuunt a principio ejus usque ad Hircanum, seu Joannem Simonis filium Judæorum Pontificem, pertransisse annos plusquam centum nonaginta quatuor, ut constat ex Euseb. in Chronic. ubi mortem Alexandri Magni notat in initio Olympiadis centesimæ decimæ quartæ, Pontificatum autem Hircani in fine

Olympiadis centesimæ sexagesimæ secundæ. At vero constat ex 1. lib. Mach. c. ult. a 1. anno imperii Græcorum usque ad Hircanum tantum fuisse centum septuaginta septem annos, cui scripturæ major fides habenda est, quam omnibus Olympiadibus. Est ergo in eis notandus hic error, nam fere viginti annos addunt hoc loco imperio Græcorum, quod alio etiam modo ita declaratur. Nam juxta Eusebium ab Hircano usque ad initium monarchiæ Augusti vix fluxerunt viginti quinque Olympiades, quæ vix efficiunt centum annos, qui additi supra centum septuaginta septem efficiunt ducentos septuaginta septem. Ergo ad summum monarchia Græcorum tot annis duravit, & non pluribus: imo si exacte computentur initia, & fines Olympiadum inveniantur pauciores. De monarchia denique Perfarum quantum duraverit, incertissima res est: nam ex Scriptura sacra nihil habemus certi, & inter auctores tanta est dissensio, ut alii minus quam centum annos, alii quinquaginta supra ducentos illi tribuant. Inter quæ duo extrema, alii centum octoginta, vel centum nonaginta, alii ducentos annos, & quidecim illi tribuunt. Juxta Olympiades autem Euseb. duravit plus minusve ducentis triginta: nam cœpit tempore Cyri, cujus imperii initium assignatur anno primo Olympiadis quinquagesimæ quintæ, & finita est sub Dario in fine Olympiadis centesimæ duodecimæ, quæ tamen assignatio supponit Cyrum post Babyloniam captam triginta annis regnavisse, quod a multis non sine causa in dubium revocatur. Nam, licet Cyrus triginta annis regnaverit, verisimile tamen est non omnes illos regnasse post captam Babyloniam. Atque adeo primum annum monarchiæ ejus, de quo fit mentio Esdræ 1. non fuisse primum regni ejus, ut probabiliter etiam sumitur ex c. 4. Esdræ, & ex Joseph. lib. 11. antiquitatum c. 2. & 3. quod si hoc ita est, destruitur fundamentum illius computationis, & omnis assignatio Olympiadum, quæ per Eusebium fit, præsertim in historia Perfarum, suspecta redditur. Unde facile colligere licet in tanta historiarum incertitudine, quam sit difficile veram septuaginta hebdomadarum, & annorum, ex quibus constant, computationem, illarum denique principium, & finem invenire. Quod facilius intelligetur notando breviter quatuor vel quinque dicendi modos, qui verisimiliores censentur, multis aliis prætermisiss.

Quidam igitur initium hebdomadarum sumunt a 1. anno Cyri, a quo primum exiit sermo de templo Jerosolymitano reedificando, sub quo intelligunt etiam civitatem esse comprehensam: quia non erat templum futurum desertum, nec quinquaginta millia hominum, qui ad illud ædificandum redibant, permanere poterant sine commoda habitatione: finem vero hebdomadarum faciunt in morte Christi Domini, vel paulo post illam. Juxta quam sententiam necessario dicendum est, regnum Perfarum tantum durasse centum quinquaginta annos paulo plus minusve. Nam si illis addamus ducentos octoginta annos imperii Græcorum, & Romanorum sexaginta, redduntur quater centum & nonaginta. Hæc tamen opinio incertissima est, quia nullus auctor illum numerum annorum tribuit imperio Perfarum.

Alii cum Eusebio initium sumunt ab anno 2. Darii Hystaspis, a quo, juxta multorum etiam sententiam, non fluxerunt ultra centum quinquaginta tres anni usque ad Alexandrum, a quo usque ad Hircanum sumuntur ex 1. lib. Machabæor. c. ult. centum septuaginta septem anni: ab Hircano autem usque ad Christi mortem fluxerunt juxta Euseb. quadraginta Olympiades, nam Hircani Pontificatus cœpit Olympiade centesima sexagesima secunda: Christus vero in fine Olympiadis ducentesimæ secundæ mortuus est: fluxerunt ergo ab Hircano usque ad mortem Christi centum sexaginta anni, qui omnes efficiunt dictos quadringentos nonaginta. Et hæc computatio videtur habere probabile fundamentum, quia partim in Scriptura, partim in rezeptis, & probatis historiis fundatur, & textui Scripturæ facile accommodari potest: quia credibile est etiam tunc datam esse facultatem ædificandi civitatem, ut dictum est in priori sententia. Et hanc sententiam inter recentiores sequuntur Driedo lib. 3. de dogma. c. 5. p. 4. & Cornel. Janfenius in c. 122. concord. Quæ quidem, quod in omnibus stare non possit cum computationibus

Euseb.

Monarchia Romanorum.

Monarchia Græcorum.

Varii modi computandi hebdomadas.



Euseb. rejicienda non est. Solum potest ob stare, vel quod ad sumendum initium hebdomadarum a tempore Darii non videtur haberi in Scriptura sufficiens fundamentum: vel quod in computatione annorum utitur variis opinionibus & chronologiis, aliquam partem temporis computando per Olympiades, aliquam vero juxta opinionem Joan. Annii, Joann. Lucid. & aliorum, quod & voluntarie & non satis constanter fieri videtur.

Aliorum igitur opinio est, sumendum esse initium hebdomadarum a vigesimo anno Artaxerxis Longimani, terminandas vero esse in morte Christi, vel paulo post, quæ fuit sententia Julii Africani, quem Beda, & alii postea secuti sunt. Et cum verbis Scripturæ quadrat optime hæc sententia, sed in computatione annorum difficultates patitur. Nam etiam si numerentur tres monarchiæ supradictæ juxta maximum numerum annorum, qui illis tribui solent, non inveniuntur quadringenti nonaginta anni a vigesimo anno Longimani usque ad mortem Christi, sed ad summum quadringenti octoginta: nam centum, & quindecim numerantur in monarchia Persarum ab illo anno Artaxerxis usque ad Alexandrum, & trecenti ab Alexandro ad monarchiam Augusti: & sexaginta quinque a principio monarchiæ Romanorum usque ad mortem Christi. Et ideo dicti auctores faciunt hos annos lunares, ut dictum defectum suppleant: quod quidem per se difficultatem habet, & non est admodum Scripturæ consentaneum, ut supra visum est. Tamen aliunde occurrit mihi difficultas in hac sententia, quam ab auctoribus illius omnino prætermisam video, eam tamen expedire non valeo, quia ut jam attigi propter expressum locum 1. Machab. ultimo, cogimur minuere illud imperium Græcorum viginti annis vel circa. Ergo non sunt ab illo Artaxerxis anno usque ad Christi mortem ultra quater centum & sexaginta anni, qui non explent sexaginta octo hebdomadas ex annis lunaribus confectas.

Alii igitur, ut hanc expediant difficultatem, anteverunt hoc initium usque ad septimum annum ejusdem Artaxerxis, quando misit Esdras in Jerusalem. cum magnis muneribus, & magna pecuniæ vi, ut dicitur 1. Esdr. 7. Sed hoc nec sufficiens fundamentum habet in Scriptura, quia tunc nullus exiit sermo de ædificanda Jerusalem: nec satisfacit difficultati tactæ, ut facile erit unicuique perspicere minutius annos computando. Alii denique propter hanc difficultatem inchoando hebdomadas ab eodem Artaxerxe, illarum finem differunt usque ad Titum, & Vespasianum; & ut melius quadret annorum numerus, dicunt non esse necessarium sumere initium ab ipso vigesimo anno Artaxerxis, quando primo exiit sermo de ædificanda civitate Jerusalem, sed ab eo tempore, quo perfecta fuit ædificatio, tunc enim dicitur etiam proprie sermo aliquis habere exitum, quando opere completus est: ille autem annus fuit trigessimus, vel trigessimus secundus ejusdem Artaxerxis, ut sumitur ex Nehemiæ. 13. Quam sententiam videtur multis insinuare Chrysostomus. 2. contra Judæos, quæ ita potest breviter ex dictis explicari juxta Olympiades Eusebii adjuncto citato loco ex 1. lib. Machabæ. nam juxta Eusebium a trigesimo secundo anno Artaxerxis Longimani usque ad Alexandrum fluxerunt centum tres anni. Alexander vero regnavit sex aut novem annis, qui monarchiæ Græcorum initium dedit, a quo ita intelligendo citatum locum ex 1. Machabæo. usque ad Hircanum fuerunt centum septuaginta septem anni: deinde ab Hircano usque ad finem ducentisimæ secundæ Olympiadis, in qua passus est Christus, fuerunt centum sexaginta anni, qui omnes efficiunt quadringentos quadraginta annos, ex quibus sexaginta tres hebdomadæ conficiuntur. Et ita juxta hanc computationem mors Christi accidit in hebdomada sexagesima tertia. Ita enim explicari potest verbum illud, & post sexaginta duas hebdomadas occidetur Christus. Deinde vero transactis aliis sex hebdomadibus, id est, post quadraginta duos annos dissipatum est sanctuarium, & civitas desolata ab exercitu, & duce Romano, & ita in initio septuagesimæ hebdomadæ completa est tota prophetia, ut hac etiam ratione possint dici abbreviatæ septuaginta hebdomadæ. Quæ expositio non est improbabilis, quamquam suis difficultatibus non caret; non enim facile accommodatur textui, & vix evitare po-

test, quin una redundet hebdomada. Utcumque tamen sit, in re tam difficili satis fuerit dubitasse, nam quod ad nostram fidem attinet, satis exploratum est tempus hebdomadarum effluxisse, atque adeo Danielis prophetiam impletam esse, quamquam propter humanæ historiæ incertitudinem, initium, & finem earum exacte explicare non possumus.

## SECTIO III.

*Tertium testimonium Ex Aggæi 2. Adhuc unum modicum, &c.*

**T**ertium testimonium ad hanc veritatem confirmandam sumitur ex verbis Aggæi 2. *Hæc dicit Dominus exercituum. Adhuc unum modicum est, & ego commovebo cælum, & terram, & mare, & aridam. Et movebo omnes gentes, & veniet desideratus cunctis gentibus, & implebo domum istam gloria. Dicit Dominus exercituum, meum est aurum, meum est argentum, dicit Dominus exercituum: magna erit gloria domus istius novissima, plusquam prima, dicit Dominus exercituum: & in loco isto dabo pacem.* In quo testimonio primum omnium statuendum est, sermonem esse, & promissionem de adventu Messiae, qui merito dicitur desideratus cunctis gentibus, utpote cunctis ipse salus & redemptio liberalissime futurus. Dices, potius dicendus esset desideratus cunctis Judæis. Gentes enim, quibus non affulserat fidei lumen, quo pacto possent illum desiderare? Propter quod August. 18. de Civit. 35. dicit hanc particulam hujus prophetiæ non esse implendam usque ad secundum adventum Christi. Sed non quadrat expositio, cum tota prophetia nisi de primo adventu intelligatur, ut statim dicemus. Respondetur ergo, Christum Dominum merito potuisse a Propheta vocari cunctis gentibus desideratum, etiam ante primum adventum: vel quia semper inter gentes fuerunt aliqui, qui Christi fidem, spem, & desiderium habuerunt. Vel certe, quia quamvis gentes, quæ Christum ignorabant, non desiderarent illum appetitu elicitio, tamen maxime indigebant adventu ejus: & ideo maxime illis erat desiderabilis: & quod hujusmodi est, solet etiam desideratum appellari, velut ipso pondere naturæ. Nam sicut terra arida dicitur desiderare pluviam, ita arentia corda Gentilium possunt dici desiderasse Redemptorem. Vel denique, quod mihi maxime probatur, Prophetæ ad indicandam certitudinem solent futura, ut præterita dicere. Quia ergo Christus amandus, & desiderandus erat a gentibus, ideo illum vocat Aggæus desideratum cunctis gentibus, alludens ad id Gen. 49. *Et ipse erit expectatio gentium.*

Nonnihil vero obscuritatis intulit translatio Septuaginta interpretum, qui non verterunt, *Veniet desideratus cunctis gentibus*: sed, *venient electi a omnium gentium*. Unde Hebræi exponunt solum ibi prædici multos Gentilium venturos fuisse ad videndum templum illud, & offerendum Deo optima, & pretiosa dona. Sed in primis rei eventus probavit hoc esse falsum: nullæ enim gentes templum illud adierunt causa pietatis, ut illud admirarentur, seu venerarentur, sed potius ad spoliandum & depeculandum illud. Hoc enim sæpius fecisse legimus, donec illud funditus eversum est. Solum Magnum Alexandrum in eo legimus hostias immolasse. Sed ut bene Augustin. 18. de civitate cap. 45. non vera pietate, sed impia vanitate id fecit, Deum Israël cum suis aliis falsis colendum putans. Neque in eum locum venit honoris causa, sed ut civitatem subjugaret: quia vero non sunt ausi ei resistere, ideo placatum facillime subditi receperunt. Deinde Hebraica veritas habet ut nostra vulgata, *Veniet desiderium cunctarum gentium*: & alii legunt, in plurali, *venient*, & in singulari, *desiderium*, quo dicunt significatam esse unitatem personæ Christi cum pluralitate naturarum: sicut e contrario cum Genes. 1. dicitur: *creavit Elobim*: significatur trinitas personarum in unitate naturæ. Letho vero Septuaginta interpretum facile eundem sensum reddere potest, sive ipsemet Christus dicatur *electa*, seu *desiderabilia* omnium gentium: quia omnia bona illis attulit: sive gentes ipsæ venturæ dicantur ad Christum: ita ut adventus Messiae in suo effectu, scilicet,

Messias  
cunctis  
gentibus  
desideratus.

Varia lectio loci  
Aggæi.



licet, conversione gentium, prædictus sit. Denique etiam antiquos Hebræos locum hunc de adventu Messie intellexisse, testis est Galat. lib. 4. cap. 9.

Hoc ergo posito, quod promissio hoc loco facta jam sit impleta, colligunt in primis multi ex verbo illo: *Ahuc unum modicum est*: cum enim jam sint transacta duo millia annorum, postquam Aggæus ista prædixit, nisi impleta essent, modicum tempus dici non posset. Sed argumentum hoc videri potest minus efficax, tum quia prophetico more etiam longissimum tempus dici solet in sacra Scriptura modicum, scilicet, ad æternitatem comparatum. Sic enim Paul. ad Hebr. 10. totum tempus usque ad diem Judicii futurum, modicum vocavit. Et Petrus 2. canonica. c. 3. mille annos dicit, apud Deum esse sicut diem unum. Tum etiam, quia Paul. ad Hebr. 12. hunc locum tractans non legit: *ahuc modicum*, sed, *ahuc semel*, & in ea, *ahuc semel*, vim sui argumenti constituit, ex ea colligens legem gratiæ esse postremam, Mosaica illa pereunte. Eandem lectionem habent septuaginta interpretes. Et vox Hebræa utramque permittit: Prophetaque ipse utrumque fortasse significare voluit, scilicet, & semel, & cito, id, quod prædixit fuisse futurum. Quocirca licet argumentum illud fundatum in sola illa dictione, *Modicum*, non omnino cogat: tamen considerata circumstantia temporis, & occasione, qua dicta fuit hæc prophetia, satis verisimile est Messie adventum fuisse ibi prædictum ut jam proxime instantem. Agebat enim ibi propheta de consolandis, ac erigendis Judæis, qui in secundo templo exedificando laborabant: erant enim tristes, dejectique animis, eo quod templum illud humilius videretur esse, quam primum. Ut igitur eos alacres, & promptos ad opus redderet, bonum nuntium affert Propheta de adventu Messie, quod non multum distaret, qui præsentia sua templum illud honoraturus esset, & gloria repleturus: ad hoc enim propositum, sermonem ibi interposuit de Messie adventu. Et hoc est, quod maxime urget in hoc testimonio: prædictur enim ibi, Messiam ingressurum templum illud, idque præsentia sua majori gloria nobilitaturum, quam primum templum unquam nobilitatum est: constat ergo & Messiam venisse, & templum illud ingressum esse: aliàs prophetia hæc non posset impleri, templo jam funditus everso.

Et cum hoc testimonio consonat illud Malach. 3. *Et statim venit ad templum sanctum suum Dominator, quem vos queritis, & Angelus testamenti, quem vos vultis*. Consonant etiam sequentia verba ipsius Aggæi: *Et implebo domum istam gloria*. Primum enim templum fuisse dicitur impletum gloria Domini, cum nebula, quæ Deum significabat, intra ipsum apparuit, 3. Reg. 8. gloria autem hujus posterioris templi tanto major futura dicitur, quanto veritas umbram antecellit: hoc est, quantum Deus ipse indutus carne nebulam ipsum significantem gloria superat, & maiestate. Unde nos impletum hoc esse existimamus, cum Christus infans in templo oblatas est: quo tempore domus illa vera Domini gloria cumulata est: atque si ita interpretari licet, pax hominibus annunciata est, dicente Simeone: *Nunc dimittis servum tuum Domine, secundum verbum tuum in pace*: sic enim exponunt locum hunc Hieron. Rupert. Lyra, & fere ceteri expositores, & Galati. Burgenf. & alii recentiores, qui contra Judæos scribunt. Judæi vero nullam rationem invenire possunt, ut declarent, quo pacto prophetia hæc in templo illo fuerit impleta.

Verum est, aliquos ex patribus interdum hunc locum exponere de templo spirituali Ecclesiæ, ut videre est in Aug. & Hiero. supra, & Ambr. lib. 3. epist. 12. ut sensus sit: hoc templum Ecclesiæ nostræ futurum gloriosius templo Synagogæ: qui sensus est optimus, sed spiritualis; non enim negari potest, quin ad literam Propheta loquatur de templo illo materiali, ad quod edificandum Judæos excitabat, quodque oculis videbat suis, & verbis designabat. *Quis* (inquiens) *in vobis est derelictus, qui vidit domum istam in gloria sua prima? & quid vos videtis hanc nunc?* Et de eadem domo postea concludit: *Veniet desideratus cunctis gentibus, & implebo domum istam gloria*.

Sed supersunt explicanda duo, quæ vim hujus testimonii enervare possunt. Primum est verbum illud: *Ad-*

*huc movebo cælum, & terram, mare, & aridam, & movebo omnes gentes*: hæc enim non videntur impleta in priori Christi adventu. Propter quod nonnulli, etiam ex Catholicis, hoc testimonium referunt ad secundum Christi adventum, quando cæli, & elementa omnia movenda sunt. Et eadem ratione dicere possent Judæi, totam prophetiam nondum esse completam. Sed si recte quæ diximus, ponderentur, sufficienter convincunt hanc expositionem de secundo adventu falsam esse: quia Christus non post secundum adventum, sed statim post primum ingressus fuit templum illud: nisi fortasse iterum sit ædificandum, ut in secundo adventu Christus illud ingrediatur, quod Judaicum est. Denique nec occasio, aut finis, propter quem dicta est hæc prophetia, illum sensum admittit, nec Paul. ad Hebræ. 12. ubi docet, ibi esse prædictam mutationem veteris legis in novam, & cessationem mutabilium umbrarum, & figurarum, per immobilem gratiam, & perpetuam, quæ mutatio in primo Christi adventu facta est. Et ita hunc locum intelligunt omnes allegati patres, & expositores.

Ad difficultatem ergo positam respondetur, etiam illa signa, quæ illis verbis indicantur, in primo Christi adventu exhibita fuisse, quo nimirum nascente, cæli moti sunt, cum Angeli, & sidera testimonium illi præbuerunt: & Angeli gloriam cecinerunt Deo: nox clarius splenduit, quam dies, stella Magos duxit ad præsepe: tres soles apparverunt in cælo, in unum postea coalescentes, quod historiæ referunt, quarum meminit etiam D. Th. hac 3. p. q. 36. art. 3. ad 3. & Galatin. lib. 4. c. 10. & Julius Obsequens lib. de prodigiis c. 128. ubi alia similia referuntur. Terra item mota est admiratione eorum, quæ in Christi honorem, & manifestationem facta sunt: hanc enim vim habet phrasis illa in Scriptura, ut Psal. 48. *Dedit vocem suam, & mota est terra; Dominus virtutum nobiscum*: Et Psal. 95. *Commoveatur a facie ejus universa terra, dicite in gentibus, quia Dominus regnavit*. Quæ duo testimonia etiam accommodari possunt ad Christum. Sic etiam Psal. 67. & 113. dicitur terra mota in egressu populi ex Egypto propter prodigia, quæ tunc facta sunt. Addit etiam Nazianz. oratione 37. quæ est 5. de Theologia, mundi conversionem, & mutationem ab idololatria ad Christum, posse terræ motionem appellari. Quomodo explicat August. verbum illud: *Et movebo omnes gentes*, scilicet ad suscipiendam fidem, atque idolorum cultum rejiciendum. Possunt denique dici terra, & mare commota bellis, & perturbationibus prope innumeris ante Christi nativitatem, donec pacato orbe Romanorum virtute, ut Christus nasceretur, pax promissa consecuta est. De qua etiam pace intelligi potest verbum illud: *Et dabo pacem in loco isto*. Quamvis verissime de spiritali pace, quæ ab Angelis annuntiata est, & per Christum perfecta intelligendum videatur. Hoc ergo modo dicta omnia signa in Christo Domino, primoque ejus adventu impleta sunt.

Secunda difficultas est, quia refert Josephus lib. 15. antiquitat. c. 11. & lib. 6. de bello Judaico. c. 8. templum illud tempore Aggæi edificatum non durasse usque ad tempus, in quo Christus advenit. Herodes enim decimo octavo anno Regni sui illud destruxit, & aliud loco illius ab ipsis fundamentis ædificavit. Non ergo in illud templum ingressus est Christus. Et augetur difficultas, quia tam multa dicit Josephus de templo illo ab Herode constructo, ut etiam in materiali pulchritudine, magnitudine, maiestate, & aliis ornamentis, & divitiis, Salomonis templum longe superasse videatur. Vel igitur illud templum reputatur unum, & idem cum templo, quod tempore Aggæi ædificabatur, vel diversum: si diversum, ergo nunquam impleta est prophetia Aggæi de illo suo templo, in quod nunquam ingressus est Christus: nec ullo alio nomine gloriosius fuit priori alio: quo etiam damus ansam Judæis evadendi, & expectandi templum aliud, in quo prophetia ista compleatur: si idem, ergo illud dici potest gloriosius primo, non propter ingressum in illud Messie, sed propter supra dicta ornamenta, quibus illustrius, ac magnificentius fuit.

Respondetur ad priorem partem, non ita fuisse templum illud solo æquatum, & aliud ab Herode constructum, quin eo modo, quo homines loquuntur, dici potuerit

Prophetia est de primo adventu Christi.

Varia prodigia in adventu Christi primo.

Impletur prophetia Aggæi, quando Christus offerretur in templo.

Herodes non omnino destruxit templum, sed auxit.



uerit absolute, & simpliciter idem templum. Quod manifeste vincitur ex hoc testimonio, ut ratio facta ostendit, & indicantur Judæi Joan. 2. dicentes, quadraginta sex annis fuisse ædificatum templum illud: cum tamen templum ab Herode constructum octo annis absolutum fuerit, teste Josepho dicto lib. 15. c. 4. quamquam non desint, qui usque ad Neronis tempora durasse ex eodem Josepho lib. 20. c. 8. affirmant. Dici autem potest esse unum, & idem templum, vel quia non omnino a fundamentis, & quoad omnes partes, totum templum destructum est, ut colligi potest ex eo, quod porticus Salomonis usque ad Christi tempora duravit: ut patet Joan. 10. Act. 3. & 5. & ex Josepho lib. 20. antiq. c. 8. vel quia non simul totum, sed paulatim, & per partes, nam propter continuam illam successionem, & præsertim quando per se non intenditur destructio, sed instauratio & amplitudo, solet juxta humanum loquendi modum censerī sufficiens, ut eadem domus, vel idem templum manere dicatur.

Templum  
prius po-  
steriori  
nobilius  
fuit.

Ad posteriorem partem respondetur, primum incertum esse, an tantus fuerit splendor ultimi templi, cum ab Herode ædificatum seu ornatum fuit, ut possit in ipsa materiali structura cum templo Salomonis comparari. Deinde quidquid de hoc sit, certum tamen est propter solam lapidum magnitudinem, aut pulchritudinem, aut propter divitias auri, & argenti non posse gloriam illius templi dici majorem, quam fuerit gloria templi Salomonis; tum quia, ut bene notavit Rupert. nunquam Deus gloriam domus suæ reputasset, quidquid homo funestus, & Rex impius operari posset: tum maxime, quia omnia, quæ præcipua erant in templo Salomonis, propter quæ gloriosum existimabatur, magis quam propter lapides, & aurum, ea, inquam, omnia huic posteriori templo defuerunt. Hujusmodi autem sunt arca fœderis, quæ 1. Reg. 4. gloria Israel dicitur, & propterea quando a Philisthæis capta est, gloria Dei translata ab Israel dicitur. Hæc autem fuit in priori templo, non in posteriori, ut prædictum fuerat per Jer. c. 3. Divina item responsa olim in propitiatorio accipiebantur, ut sumitur ex 1. Machabæor. 4. & alia similia, quæ bene prosequitur Chryso. oratione 3. contra Judæos, & Galatinus lib. 4. c. 17. Non potest ergo ulla ratione posterius hoc templum, gloriosius dici quam primum, nisi propter Messie præsentiam, ut optime nostri expositores, & Augustinus lib. 18. de civitate, c. 35. 45. & 48. Chryso. & alii citati patres interpretantur. Unde etiam fit, ut insanix convincantur Judæi templum aliud expectantes, in quo prophetia hæc impleatur. Tum quia, etiam si illud sperari posset, non esset vere unum, & idem cum illo, quod a Romanis penitus eversum est, sed omnino diversum: de quo proinde Aggæus loqui non potuit. Nihil enim illum referre poterat ad animandos Judæos, qui instauratōne secūdi templi laborabant; tum etiam quia revera expectari non potest, cum per Daniel. c. 9. prædictum sit, usque ad finem perfecturam desolationem, quod ipsa rerum evidētia, & experientia demonstravit Judæis. Cum enim sæpe tentaverint templum illud instaurare, Romano etiam Imperatore Juliano interdum juvante, nihil unquam proficere potuerunt, ipso etiam Deo prodigiis, & signis apertissimis, interdum resistente, ut videre est in Chryso. oratione 2. contra Judæos, Euseb. lib. 4. histor. cap. Rufino. lib. 1. cap. 37. Socrate. 3. cap. 17.

#### S E C T I O IV.

*Quartum argumentum ex variis testimoniis & signis de adventu Messie.*

Quoniam infinitum esset singula Prophetarum testimonia perferutari, unum, ac breve argumentum ex cæteris colligam, quod indicat Christus Matt. 11. quando nuntiis, a Joan. Baptista missis, ut ipsum interrogarent, *Tu es, qui venturus es, an alium expectamus?* respondit, *Cæci vident, claudi ambulant*: ac si aperte diceret, ut me esse Messiam promissum cognoscatis, in me, & per me impleta esse, quæ de Messia prædicta sunt, considerate. Prædictum enim erat, ortum Messie futurum esse ex Virgine Isai. 7. & tali loco, scilicet, Bethlehem. Mich. 5. & eo tempore, quo pax esset in universo orbe. Isa. 2. Mich. 4. Zach. 9. Rursus prænuntiatus est Johan. Baptista præcursor illius Malach. 3. Isai. 40. scriptum etiam erat Messiam prædicatu-

rum, *pauperibus, captivis, & contritis corde*: suamque doctrinam magnis miraculis confirmaturum, apertiendo oculos cæcorum, &c. Isai. 35. & 61. prædictum præterea fuit, futurum ipsum pauperem, & tamquam Regem ingressurum Jerusalem super asinam. Zachar. 9. Passio deinde, & mors ejus, & tenebræ, seu Solis defectio, & alia signa, quæ in ipsa contigerunt, ita a Prophetis scripta sunt, ut retulisse potius præterita, quam futura prænuntiasse plane videantur: ut constat ex Psal. 21. 40. 68. Isai. 53. Jer. 11. Amos. 9. Zach. 12. & 13. & sæpe alias, & Isai. 11. *Sepulchrum ejus futurum dicitur gloriosum*. Narratur deinde descensus ejus ad inferos, & libertas captivorum justorum, qui ibi morabantur. Eccle. 24. Zach. 9. Resurrectionem prædixit David. Psal. 3. & 15. Ascensionem vere. 67. *Ascendisti in altum*, &c. Et Mich. 2. *Ascendit pandens iter ante eos*. Inde vero missum Spiritum sanctum, Joel. significatum est. Denique vocatio gentium, & reprobatio Judæorum, sæpius a Prophetis dicta sunt: de priori enim dicitur Isai. 49. *Parum est, ut sis mihi servus ad suscitandas tribus Jacob, & fœces Israel convertendas: ecce dedi te in lucem gentium, ut sis salus mea usque ad extremum terre*. Et c. 66. *Mittam ex eis, qui salvati fuerint, ad gentes in mare, in Africam, & Lydiam tenentes sagittam, in Italiam, & Graciam ad insulas lonze: ad eos, qui non audierunt de me, & non viderunt gloriam meam*, &c. De posteriori vero dicitur Jerem. 19. *Sic conteram populum istum*, &c. Et similia sunt frequentia in Scripturis: ex quibus ita concluditur argumentum. Deus prædixit per Prophetas hæc omnia de Messia, ut per ea cognosceretur cum venisset: sed hæc omnia videmus esse completa in Christo: ille ergo est verus Messias, qui jam venit.

Major partim in superioribus probata est, partim ex collectis testimoniis est ita evidens, ut negari non possit, & eam late demonstrant scripturarum expositores, nobis enim non licet hoc loco latius singula persequi. Minor vero, præter Evangelistarum testimonia, ipsa rerum evidētia constat magna ex parte: nam ex Judæis fuisse natum Jesum Christum Dominum nostrum, eisquæ prædicasse, & mirabilia apud illos operatum esse, ab eis denique fuisse crucifixum, & mortuum, nec ipsi Judæi negant, nec negare possunt, cum res fuerint toto orbe notissimæ, quas etiam Josephus eorum Historiographus, memoriæ prodidit, lib. 18. antiquit. c. 8. ubi gravissimum de Christo Domino reddit testimonium. Deinde, vel invitati experiuntur delicti sui poenam, & perpetuam desolationem, a Daniele, Jeremia, & aliis Prophetis prænuntiata; quamquam enim sæpe propter peccata puniri sint a Deo, & hostibus traditi in servitutem, semper tamen præcedebant aliqua publica & communia peccata, præsertim Idololatriæ, vel necesse Prophetarum, & nihilominus captivitates, & poenæ brevi tempore finiebantur, atque in eis habebant prophetas, & sanctos viros, per quos Deus, & exhibuit aliqua benevolentiae signa, & præbuit semper evadendi spem: at vero nunc, ab eo tempore, quo venit Christus, nec coluerunt idola, nec habent graviora scelera moralia, quam antea haberent: tamen toto hoc tempore gravissime puniuntur, non solum temporali servitute, sed etiam spiritali quadam & divina desertione. Carent enim prophetis, carent miraculis, carent templo, sacrificio, sacerdotibus, signum profecto evidens, eos puniri propter gravissimum peccatum commissum in Christi morte, & incredibili quadam mentis cæcitate, & infidelitate confirmatum.

At enim objicere possunt Judæi, multa alia signa data esse a Prophetis de adventu Messie, quæ non apparent in Christo Domino completa esse: ergo ex his, quæ adduximus, non potest satis colligi illum esse verum Messiam. Antecedens probant variis testimoniis Scripturæ male intellectis, quæ brevitate causa prætermitto: nam ex dicendis facile expeditur, & videri possunt in Galatino, & aliis, qui contra Judæos scripserunt: ut Paul. Burgen. Lyran. Adrian. Finus. Porchetus, & alii. Solum sunt nonnulla observanda, ad detegendum Judæorum errorem, & falsam scripturarum intelligentiam. Primum Judæos sperasse, & adhuc sperare, Messiam temporalem Regem, & potentissimum: magnas item divitias temporales ipsis allaturum, ac denique orbem terrarum, sub ditione Judæorum subjugaturum: cum igitur hac spe nutriti essent, & Christum Dominum longe alia

Argumenti  
summa.



Conditio-  
nes Mes-  
siae, con-  
tra Ju-  
daeos.

ge alia ratione, quam sibi finxerant, natum esse mortuum-  
que conspicerent, haud quaquam persuadere sibi potue-  
runt, illum esse Messiam: propterea nobis obijciunt ea  
prophetarum oracula, quibus tempore Messiae magna  
felicitas Judaeis promittitur, Isai. 6. Joel. 3. Amos. 9. *Ecce dies veniunt, dicit Dominus, & comprehendet ara-  
tor messorem, & calcator vine mittentem semen, &  
stillabunt montes dulcedinem:* praedixerat autem paulo  
antea: *In die illa suscitabo tabernaculum David, quod  
cecidit.* Sed isti sensu carnis decepti sunt. Regnum enim  
Messiae, & felicitas per illum promissa, non caduca &  
materialis intelligenda est, sed spiritualis & aeterna:  
promissa sunt enim nobis per Christum ea bona, quibus  
non possunt esse aliqua meliora: quaeque salutem veram  
hominibus afferunt, & cunctis mortalibus aequae possunt  
esse communia: hujusmodi autem proprietates non pos-  
sunt convenire temporalibus bonis, sed spiritualibus,  
& aeternis. Deinde, idem Messias aliis prophetarum  
oraculis describitur, pauper, humilis, & vir dolorum,  
& sciens infirmitatem. Signum est igitur, abundan-  
tiam bonorum per ipsum futuram, non carnaliter, sed  
spiritualiter intelligendam esse, ut recte Hier. saepe docet  
super Prophetas, & Aug. lib. de spiritu & litera.

Hinc secundo errant Judaei, multa, quae de adventu  
Messiae metaphorice dicta sunt, juxta corticem literae  
intelligentes, quae cum illo modo impleta non videant  
in Christo, offenduntur. Exemplum est apud Isai. c. 11.  
*Habitabit lupus cum agno, & pardus cum haedo accu-  
babit, vitulus & leo, & ovis simul morabuntur, puer  
parvulus minabit eos, &c.* Quae omnia de feris & anima-  
libus brutis ad literam intelligunt. Aliud exemplum  
est Isai. 2. *Et erit in novissimis diebus preparatus mons  
domus Domini in vertice montium.* Unde colligunt in  
diebus Messiae Ierosolymitanum templum, & montem  
illum, in quo fundatum erat, supra omnes montes esse  
altius elevandum, ut Galat. supra refert. Similia sunt  
multa de bonis, & libertate per Messiam promissis:  
quia, saepe sub metaphora materialium rerum, spiri-  
tales promittuntur: ipsi vero literae, quae occidit inhæ-  
rentes, spiritum occidunt. Hunc errorem Judaeorum  
late persequitur Orig. lib. 4. Peri. cap. 2. a principio,  
ubi optimis exemplis utitur ad illos convincendos.  
Idem hom. 2. in Gen. saepe Euseb. libris de demonst.  
specialiter. lib. 7. cap. 8.

Duo Mes-  
siae facti a  
Judaeis.

Tertio denique errant Judaei non distinguentes duos  
Messiae adventus, alium ad salvandum, alium ad judi-  
candum, illum in humilitate, hunc in gloria, & ma-  
jestate. Hinc enim factum est, ut in conciliandis ora-  
culis de adventu Messiae multum laborent, & exitum  
non inveniunt: cum quaedam praedicent illum venturum  
pauperem, & humilem: alia vero venturum in claritate,  
& maiestate. Quo factum est, ut quidam eorum duos jam  
singant Messias, alium pauperem, alium divitem, quod  
vanum & fictitium est, & scripturae aperte repugnans.  
Hinc etiam facile expediuntur quaedam, quae nobis ob-  
ijciunt non esse in Christo impleta, ut est illud de Gog &  
Magog. Ezech. 38. & illud Malach. 4. *Ecce ego mittam  
vobis Eliam Prophetam, ante quam veniat dies Domini  
magnus, & horribilis.* Nam haec & similia manifeste de  
ultimo Judicii die intelliguntur. Notarunt hanc radicem  
Judaicae cecitatis Tertul. in Apologet. adversus gentes,  
cap. 21. & Cyprian. lib. de idolorum vanitate versus fini-  
nem. Iren. lib. 4. cap. 56. Origen. lib. 1. contra Celsum,  
non longe a fine. Anast. Nyen. lib. de quaestionibus sacrae  
scripturae, q. 52. & Rabbi Samuel in epist. de adventu  
Messiae cap. 9. & 10. tom. 5. Bibliothecae.

Tandem obijciunt nobis Judaei, quia in Scriptura dicitur  
Messias venturus novissimis diebus, id est, in fine mū-  
di: nos autē dicimus multo ante venisse, sed hanc locutio-  
nem explicabimus commodius infra Disput. 4. dubio. 2.  
Hac ergo sufficiant de priori principio, quod contra Ju-  
daeos probandum sumpsimus. Plura videri possunt in  
Tertul. Cyprian. Gregor. Nyen. Chrysost. August. & Juliano  
Archiepiscopo. Toler. libris, vel rationibus contra Judaeos.

#### DISPUTATIO II.

In quatuor Sectiones distributa.

*Christum esse verum Deum, & Hominem, contra infideles.*  
**T**Riplex est Infidelium genus, Haereticorum, Judaeorum,  
& Paganorum. Hoc igitur loco contra Haereticos, &  
Judaeos, qui Scripturas aliquas admittunt, potif-

simū disputandū est. Paganos enim de mysterio superna-  
turali, nec ratione vincere possumus, nec auctoritate di-  
vina, quā ipsi non admittunt. Unde Iren. lib. 4. contra He-  
ref. c. 41. propterea existimat dixisse Paul. *Plus omnibus  
laboravi:* quia cum esset gentium Apostolus, qui Scriptu-  
ras non admittebant, Christum esse Deum, & hominem  
difficilius persuaderi poterant. Possimus a. rationes illas  
hoc loco congerere, quibus haec veritates credibiles evi-  
denter ostenduntur, & secundum rectam rationem, & pruden-  
tiam omnino credendae. Sed haec generalia sunt toti  
Christianae fidei, quapropter ne materias confundamus, in  
tractatum de fide illa nobis rejicienda sunt. Unum hoc lo-  
co solum adnotabo, prophetas, scilicet, omnes, quibus  
mysteria Christi tanto antea praedicta sunt, & nunc cer-  
nuntur impleta, manifestum argumentum esse non solum  
contra Judaeos, sed etiam contra Paganos, ut fateri cogantur  
omnino credibile, imo credendum esse, hanc fidem a  
Deo esse profectam, quia nec subterfugere possunt negando  
libros, in quibus illae prophetiae continentur, antiquiores  
esse, quam Christianorum nomen: nec possunt suspi-  
cari a nobis fuisse confictos, cum evidenter contet a Ju-  
daeis nos illos recepisse, & hoc ipsum non solum Judaei,  
sed etiam gentes nobiscum fateantur. Urget eleganter lo-  
cum hunc Aug. lib. 18. de civit. c. 46. & Hiero. super c. 16.  
Isai. & Theodor. oratione 10. de providentia. Omisissis ergo  
Paganis contra alios Infideles breviter agemus.

#### SECTIO I.

*Ostenditur Christum esse verum hominem.*

**P**rimum omnium, Messiam promissum futurum fuisse  
verum hominem, non est, quod probemus contra Ju-  
daeos: nihil enim certius ab hominibus illis existimatum  
est, quippe omnes supradictae prophetiae evidenter hoc cō-  
tinent, & omnes aliae, in quibus dicitur Messias filius Da-  
vid, de semine Abraham, ex femore Jacob, & aliae similes:  
ac denique verba illa Moylis Deut. 18. expressa sunt. *Prophetam  
de gente tua, & de fratribus tuis, sicut me, suscitabit tibi  
Dominus, &c.* Quoniam vero nonnulli Haeretici, ut Manichaei,  
& alii, quos infra q. 2. referemus, hoc negare audent, brevissime ex  
Evangelio demonstrandum est. Ait enim Christus Joan. 8. *Quaeritis me  
interficere, hominem, qui veritatem vobis locutus sum.* Et ibidem se  
nominat filium hominis: & saepe alias. Et c. 9. caecus dixit:  
*Ille homo, qui dicitur Jesus, lutum fecit:* quem postea  
non correxit Dominus, sed ulterius petiit ab illo, ut crederet,  
se esse filium Dei. Et c. 10. Judaei dicebant. *De bono opere  
non lapidamus te: sed quia tu, homo cum sis, facis te ipsum Deum.*  
Christus vero primum admittens, se nihilominus Deum esse, &  
recte appellari confirmat. Unde Centurio a Deo illuminatus Marc. 15. ait:  
*Vere hic homo filius Dei erat:* & Joan. 11. & 18. Caiphas dedit  
consilium: *Expedi, ut unus moriatur homo, &c.* quod dixisse  
spiritu Prophetico, imo instinctu Spiritus sancti Evangelista  
declarat, cum subdit: *Illum hominem esse Jesum, qui moriturus  
erat pro gente, &c.* Et Joan. 1. & Actor. 2. Vir appellatur.  
Et frequentia sunt talia testimonia, quae vere, & proprie esse  
intelligenda tam certum est, quam certum nostram fidem esse  
credibilem, & certam: nam si in rebus, quae ad fidei  
fundamentum spectant, ambigue, & per metaphoras, vel  
secundum apparentiam scriptura loqueretur, omnia essent  
ambigua, & incerta, falsisque interpretationibus exposita.  
Deinde id convincit multitudo testimoniorum, & sermo ipse  
historicus, cujus syncera veritas alium sensum non permittit.  
Unde eam ob causam narratur Christi origo secundum carnem,  
conceptio ejus, & nativitas: dicitur filius Virginis, comedere,  
ambulare, obedire, loqui, mori, & alia, quae, vel falsa sunt,  
vel tantum in verum hominem conveniunt. Denique finis ipse  
Redemptionis hoc satis convincit: quo argumento passim utuntur  
patres, nam si non esset verus homo, nec exemplum attulisset,  
nec remedium. Unde tandem optimus locus est ad Rom. 5. *Sicut  
per unum hominem, &c.* & infra: *multo magis gratia Dei in  
gratia unius hominis Jesu Christi.* Tam ergo verus homo Christus,  
quam verus homo Adam.

Nec contra veritatem hanc aliquid possunt haeretici nobis  
objicere, nisi quod hinc fieri videtur, Christum non esse verum  
Deum, quia repugnat verum hominem simul esse verum Deum:  
de quo jam agendum est.

Argumentum ex  
prophetis contra  
Paganos.

Testimo-  
nia feri-  
pturae de  
Christo  
vero ho-  
mine.



*Ostenditur Christum esse verum Deum contra hæreticos.*

**E**X principio posito, Christum scilicet esse verum hominem, multi hæreticorum ipsum verum Deum esse negaverunt: ut Carpocrat. Cherint. Ebion, Basil. & omnes antiqui hæretici, quorum meminit Iren. lib. 1. c. 24. & sequen. Tert. lib. de præscript. hæret. circa finem, Epiph. hæref. 27. & seq. Aug. hæref. 6. & seq. Theod. lib. 1. de hæret. fabul. circa fin. & Euseb. lib. 3. hist. c. 27. & 28. & lib. 4. c. 8. & 22. Niceph. lib. 4. c. 2. & 3. quos postea secuti sunt Theodotianj a Theodoto, vel Theodotione derivati, ut patet ex Epiph. hæref. 54. August. hæref. 33. Nicepho. lib. 4. c. 20. & 21. Hoc denique imitati sunt Paul. Samosa. Photin. Artemon. & alij, ut videre est in Epiph. hæref. 65. & 71. Aug. hæref. 44. & 45. Niceph. lib. 6. c. 27. Euseb. lib. 1. c. 28. de quibus videri potest Prateol. sub eorum nominibus; Sander. lib. 7. de visib. monarch. hæref. 8. 13. & alijs, Castr. verb. Christus. hæref. 1. qui non satis conveniunt in temporibus, & successionibus horum hæreticorum describendis, quod præteribo, quia nihil ad causam refert. Ergo contra hos etiam Christum esse verum Deum ostendamus, & primo producamus testimonia Scripturæ sacræ, in quibus, quod alicubi tribuitur vero Deo, alibi asseritur de Christo homine. Primum, Psal. 67. de Deo dicitur: *Ascendisti in altum*, &c. quod de Christo homine exponitur ad Eph. 4. Secundo Isai. 6. de vero Deo dicitur: *Vidi Dominum sedentem*: quod de Christo exponitur Joan. 12. Tertio Isai. 40. præcursor prædicatur paraturus viam Deo, quod de Christo etiam exponitur Matth. 3. Joan. 1. Quarto Isai. 45. *Mihi curvabitur omne genu*, quod applicatur Christo ad Rom. 14. Quinto, Num. 21. populus murmurat contra verum Deum: & tamen Paul. 1. Corin. 10. dicit eam murmurationem fuisse contra Christum. Denique Exod. 20. Deus verus dicitur educere populum de Ægypto: & tamen Judas Apostolus in sua Canonica id fecisse dicit Jesum Christum Dominum nostrum: quem etiam ait, peccantibus Angelis non pepercisse.

Aliud documentum huic non dissimile potest sumi ex alijs sacræ Scripturæ locis, in quibus vel ipsemet Christus de se ipso, tamquam de vero Deo, loquitur, vel alij de ipso loquentes, quæ Dei propria sunt, eidem tribuunt. Primo enim Joa. 8. loquens hic homo Christus de se ait; *Ante quam Abraham fieret, ego sum*; & c. 2. *Ego, & pater unum sumus*. Et c. 20. eum adorans Tho. dixit; *Dominus meus, & Deus meus*; quam confessionem Christus ipse probavit dicens, ex vera fide profectum esse. 2. de eodem Christo Paul. loquens ad Colos. 1. ait: *Qui est imago Dei invisibilis primogenitus omnis creature*, &c. Et statim c. 2. *In eo habitat plenitudo divinitatis corporaliter*. Et ad Rom. 1. *De filio suo, qui factus est ei ex semine David secundum carnem*. Etc. 9. *Ex quibus est Christus secundum carnem, qui est Deus super omnia benedictus*. Et totum c. 1. & 2. ad Hebr. hanc veritatem confirmat. Tertio. 1. Joan. 5. Jesus Christus ex Deo natus dicitur, & in fine concluditur: *Hic est verus Deus*. Et Apoc. 4. idem Christus esse dicitur: *Qui est, & qui erit, & qui venturus est*. Denique omnia testimonia Evangelij, & novi testamenti, in quibus Christus dicitur Deus, & filius Dei verus, ac naturalis, hoc ipsum convincunt: sed hæc in materia de Trinit. latius expenduntur. Nobis illud unicum sufficit, quod præcipuum hujus materiæ fundamentum est, scilicet Joan. 1. ubi dicitur, *Verbum caro factum est*: quod Verbum, paulo antea Deus appellabatur. Nec permittendus est error Erasmi, qui negat inde probari Verbum esse Deum, quoniam cum prius dicitur Verbum esse apud Deum, additur in Græco articulus elevans significationem, ut denotetur significari verus Deus: ac si Latine dicatur, Verbum erat apud ipsum Deum: deinde vero, cum Verbum dicitur Deus, tollitur articulus; sed hoc nullius momenti est; tum quia non ubicumque est sermo de vero Deo, ponitur ille articulus; ut patet inferius eodem capite, cum dicitur: *Deum nemo vidit unquam*, vel, *Fuit homo missus a Deo*: tum etiam, quia alijs locis, cum dicitur Christus Deus, additur articulus, ut Joan. 20. ad Rom. 9. tum denique, quia illo loco non est facta repetitio articuli, ne videretur sermo esse de eadem persona, cum dicitur Verbum esse apud Deum,

Refellitur explicatio Erasmi.

& esse Deus: cum tamen in priori loco sit sermo de patre, apud quem dicitur semper fuisse filius seu Verbum. Ex his ergo satis contra hæreticos convincitur, quamquam Christus sit verus homo, simul tamen esse verum Deum; sed oportet hoc ipsum etiam contra Judæos demonstrare: quod recte fiet, si Messiam promissum in veteri testamento, fore verum Deum, ex eodem ostendamus. Ostenso namque Messiam esse Christum, quem ipsi fatentur fuisse verum hominem, aperte concluditur eundem etiam esse verum Deum.

## S E C T I O III.

*Ostenditur Messiam esse verum Deum contra Judæos.*

**P**aulus ad Hebr. 1. ex varijs Psal. testimonijs hoc confirmat: ut est illud Psal. 2. *Filius meus es tu, ego hodie genui te*: nam in eo Psal. sermonem esse de Messia adhuc Hebræi non ignorabant, ut refert Galatin. lib. 3. c. 7. & Paul. ad Hebr. scribens: & Act. 13. concionem habens Antiochiæ in Synagoga Hebræorum, illo in hoc sensu utitur: quod non fecisset, nisi ipsos Hebræos ita sentire satis intelligeret. Et Act. 4. hic sensus ponitur, ut communis & vulgaris in tota Ecclesia. Et quidem si recte verba ponderentur præsertim versus finem Psalmi, evidens est, nisi Messia, cuiquam aptari non posse: est ergo Messias, qui loquitur dicens: *Ego autem constitutus sum Rex ab eo super Sion montem sanctum ejus*. Et quoniam hoc sensum temporale non est, sed spirituale, subdit statim: *prædicans præceptum ejus*: additque deinde: *Dominus dixit ad me, Filius meus es tu*: utique verus & naturalis, & non tantum per adoptionem, vel participationem, ut patet tum ex proprietate vocis, tum ex singulari loquendi modo: *Filius meus tu*: quasi diceret: alij sunt filij improprij, & imperfecto modo: tu autem specialiter filius meus proprius, & naturalis. De quo etiam ibidem interpretatur Paul. illud 2. Reg. 7. *Ego ero illi in patrem, & ipse erit mihi in filium*; cui respondet illud Psal. 88. *Ipse invocabit me, pater meus es tu*. Hæc enim præcipue dicebantur de Christo, ut subjuncta verba declarant: *Et ego primogenitum ponam illum, excelsum præ Regibus terræ, & ponam in seculum sæculi semen ejus, & thronum ejus sicut dies cæli*. Et illud: *Semen ejus in æternum manebit*. Et illud: *Fidelis erit domus tua, & regnum tuum, usque in æternum ante faciem meam*. Hæc enim & similia de regno David prædicta esse non possunt, nec de temporali quidem ejus regno, nec de alio, quam de Christo, vera esse, quod etiam Hebræos omnes intellexisse satis significatum est Mar. 11. quando Christo acclamabant: *Benedictus, qui venit in nomine Domini, & Benedictus, quod venit regnum Patris nostri David*. Sicut ergo hæc omnia propter Messiam dicta intelliguntur, ita etiam ipse est, de quo singulariter Pater dicit: *Filius meus es tu, ego hodie genui te*. Quo posteriori verbo æterna generatio significatur, ut multi Patres exponunt; quia licet Paul. Act. 13. de resurrectione Christi explicet hunc locum, alij sancti de temporali ex matre generatione, omnes tamen hos sensus litera amplectitur: cum idem secundum divinam naturam ab æterno genitus, secundum humanam in tempore procreatus fuerit, ac a mortuis excitatus.

Declarant deinde Messia divinitatem verba in eodem Psal. subjuncta secundum Hebræicam veritatem: ubi nos legimus: *Apprehendite disciplinam*, Hebræa habent, *Osculamini filium*, cujus phrasis vim Hebræi hoc exemplo declarant. Ita enim intelligitur se gerere æternus Pater, sicut Rex, qui cum esset iratus civitati, eumque filius precibus placasset, civibus volentibus sibi gratias agere, responderet: *Mihi gratias agitis, imo agite filio meo*. Talis est enim, quod hoc loco dicit Pater: *Osculamini filium*, id est, adorate eum, eique gratias agite. Addit deinde Paul. id Psalm. 44. *Sedes tua, Deus, in seculum seculi; Virga æquitatis virga regni tui; dilexisti justitiam, & odisti iniquitatem, propterea unxit te Deus Deus tuus, &c.* Unde manifeste eundem vocat Deum æternum, qui dilexit justitiam, & odio habuit iniquitatem, & unctus est oleo lætitiæ præ participibus suis: quæ duo non possunt convenire nisi uni, & eidem, qui simul Deus, & homo sit. Et ideo non possunt hæc de Salomone intelligi, ut Judæi volunt: sed de Messia, cujus Typus & signa

Explicatur locus Psal. 2.

Explicatur locus Psal. 22.

Explicatur locus Psal. 44.



figura Salomon fuit. Unde paraphrasis Chaldaica Messiae nomen expressum habet, dicens. *Et tu Rex Messias cilexisti iustitiam*, &c. Adjungit præterea Paul. testimon. ex Psal. 101. *Initio tu, Domine, terram fundasti, & opera manuum tuarum sunt caeli*: loquebatur enim (ut Paulus indicat) David in eo Psal. ad Messiam, seu ad filium Dei, cujus incarnationem optabat, cum dicebat. *Tu exurgens Domine misereberis Sion, quia venit tempus miserendi ejus*. Unde eidem loquens dicit: *Initio tu Domine terram fundasti*. Et ad eundem modum de Christo explicat illud Psal. 96. *Et adorent eum omnes Angeli ejus*. Inde etiam ejus divinitatem stabiliens, quam plane totus ille psalmus evidenter prædicat, si ad Christum referatur, ut Paul. vult. Denique Psal. 109. habentur verba illa: *Dixit Dominus Domino meo, sede a dextris meis*, quæ de se ipso Christus interpretatus est Matt. 22. indicans significatam esse in illis divinitatem suam, quoniam David Dominum suum vocat eum, quem filium suum futurum esse sperabat. Et Paul. ex eisdem concludit Christum esse Angelis superiorem, quod ad dexteram Dei sedere dicitur, & paraphrasis Chaldaica, ut Galatinus refert lib. 3. c. 5. transtulit, *Dixit Dominus Verbo suo*. Et antiqui Hebræi omnes intellexerunt illum Dominum, ad quem Dominus loquitur, cum inquit *Sede a dextris meis*, esse Messiam, de quo inferius subdit, *Ex utero ante luciferum genui te*, quibus verbis æterna generatio descripta est. Est ergo Messias verbum Dei, & Deus ex Deo genitus.

Expositio  
per locum  
Isai. c. 9.

Secundo principaliter probatur hæc veritas testimonio Isai. Proph. quæ tam multa sunt, ut non possint omnia sine prolixitate congeri, quædam ergo breviter indicabo. Primum sit ex c. 9. *Parvulus natus est nobis, & filius datus est nobis, & factus est principatus ejus super humerum ejus, & vocabitur nomen ejus admirabilis, consiliarius, Deus, fortis, Pater futuri sæculi, Princeps pacis, multiplicabitur ejus imperium, & pacis ejus non erit finis, & super solium David sedebit in sempiternum*. Qui locus est satis expressus, licet quidam Hebræi ad Ezechiam illum detorqueant, sed facile convincuntur. Cur enim dicitur Ezechias pater futuri sæculi? aut quomodo dicitur princeps pacis, cujus non erit finis, cum multa bella gesserit cum Assyriis? aut quomodo regnum ejus sempiternum fuit, quod paulo post a Babylonis dissipatum est? unde Chaldaica expressum etiam habet hic, nomen Messias. Sed dicunt alii nomen Dei hoc loco non proprie sumi, sed nomen Hebraicum proprium est Dei. Septuaginta etiam ita verterunt, atque in Scriptura appellatio Dei simpliciter, & absolute sine ullo addito diminutione non tribuitur nisi vero Deo, & præsertim conjuncta cum appellatione Fortis, & cum aliis, quæ significant majestatem. Urgent bene hoc testimonium Euseb. lib. 7. de demonstr. cap. 4. & lib. 9. cap. 8. Chrysostomus hom. 5. de incomprehensibili Dei natura.

Expositio  
per locum  
Isai. c. 45.

Secundum testimonium sit ex c. 55. *Deus ipse venit, & salvabit nos, tunc aperientur oculi cecorum, &c.* ex quo constat Deum illum venturum ad salvandos nos, esse Messiam, cujus etiam sunt propria signa illa & miracula, quæ ibi prædicuntur, ut supra diximus. Nec ullus præter Christum illa perfecit, neque ea Judæi ab alio, quam a Messia possunt expectare, cum nec ante Isaiam, nec post illum, prophetarum ullus talia signa operatus sit; sermonem vero ibi esse de vero Deo, constat & ex absoluta appellatione, ut dixi, & ex articulo, *Deus ipse*, & ex verbis, quæ præcefferunt: *Ipsi videbunt gloriam Domini, & decorem Dei nostri, &c.* & ita hoc loco sæpe patres utuntur. Athan. lib. de incarnat. Verbi, satis post medium, & alio lib. de humanitate assumpta in fine, *Non nuncius*, inquit, *non legatus, sed ipse Deus*, idem lib. de communi essentia Patriæ & Filii. Cypri. lib. 2. contra Judæos c. 7. Iren. lib. 3. c. 22. Euseb. lib. 6. de demonstr. c. 21.

Explicatio  
per locum  
Isai. c. 45.

Tertium testimonium sit Isai. 45. *In te est Deus, & non est Deus absque te, vere tu es Deus absconditus, Deus Israel Salvator*; præmiserat autem, *Hæc dicit Dominus*, ut intelligatur in aliis citatis verbis non loqui prophetam ad Deum per apostrophem, vel admirationem, sed loqui patrem ad Christum, quod clarius significarunt Septuaginta, addendo causalem notam. Dixerat enim prius Deus ad Messiam, *Transibunt ad te, & adorabunt te, & in te orabunt*, & subdit: *Quia in te est Deus, & non est Deus præter te*, illa locutio, *In te est Deus*, Christo pro-

priissime accommodatur, vel quia Deus pater est in filio, ut exposuit Ambros. lib. 1. de fide c. 2. & Epiph. contra hæres. c. 57. & Athan. oratione in id, *Omnia mihi tradita sunt a Patre meo*; vel quia in Christi humanitate est divina persona, ut exposuit etiam Epiph. supra, & Cyril. lib. 1. in Joann. c. 15. Recte etiam dicitur filio: *Nō est Deus absque te*; propter unitatem naturæ, quia nec pater est Deus absque filio, nec est alius Deus a filio, ut recte exposuit Nazian. orat. 49. versus finem: & Hieron. ibi, qui addit merito Christum vocari etiam absconditum Deum, propter assumptæ humanitatis sacramentum: & Deum Israel Salvatorem, quod interpretatur Jesus: & ita exposuit hunc locum Tertull. contra Praxeam. e. 13. Euseb. lib. 5. de demonstr. c. 4. & Hilar. lib. 4. de Trin. circa finem, ubi dicit Paulum imitatum fuisse hunc locum Isai. cum dixit: *Erat Deus in Christo, mundum reconcilians sibi*.

Explicatio  
per locum  
Isai. c. 45.

Quantum testimonium sit ex eodem Propheta c. 52. ubi prius verum ipsum Deum sic loquentem facit: *Hæc dicit Dominus Deus, in Egyptum descendit populus meus in principio, &c.* & infra subdit: *Ego ipse, qui loquebar, ecce adsum*. Idem ergo Deus, qui antea per Prophetas loquebatur, quem populus Israel colebat, postea per incarnationem apparuit. Ut enim intelligatur sermonem esse de præsentia Dei per incarnationem, & adventum Messie, subdit Propheta: *Quam pulchri super montes pedes Evangelizantis pacem, annuntiantis bona*. Et infra: *Consolatus est Dominus populum suum, redemit Jerusalem, paravit Dominus brachium sanctum suum in oculis omnium gentium: & videbunt omnes fines terre salutem Dei nostri*. Ponderavit hunc locum Soter. Papa epist. 1. decretali. Chrysost. hom. 5. in Marc. Cyril. lib. de incarnatione Unigenit. c. 2. Euseb. lib. 6. de demonstr. c. 24. & optime Tertul. lib. 4. contra Marcionem cap. 13.

Tertio principaliter ex Jerem. c. 23. *Hoc est nomen, quod vocabunt eum, Dominus justus noster*: ubi habetur nomen Tetragrammaton, quod est proprium Dei, & manifeste est sermo de Messia, ut etiam Hebræi consentiunt, & bene Hieron. exponit, Et similia verba habentur c. 33. quamquam in ea sectione aliqua varietas sit. Hebræi enim legunt. Hoc est nomen, quod vocabit eum, Dominus justus noster. Tamen prior lectio frequentior est, & in Vulgata, & apud Septuaginta, & Chaldeum: & est textui magis consentanea in c. 23. ubi nulla reperitur varietas. Ac denique admissa illa lectio trahi potest in eundem sensum, scilicet: Salvabitur Juda, & Israel, & Dominus justus noster hoc nomine vocabit eam: scilicet salvatam, & redemptam: ille autem Dominus justus noster, Messias est venturus ad illam liberandam.

Explicatio  
per locum  
Jerem.  
cap. 23.

Confirmatur ex Baruch. 3. *Hic est Deus noster*, usque ad illud: *Et cum hominibus conversatus est*: ubi aperte loquitur de vero Deo Israel, qui legem dedit populo suo: quem postea dicit cum hominibus conversatum, scilicet, hominem factum. Nam nisi de hac speciali apparitione loqueretur, sed de alia forte, quæ mediis Angelis fieri solet in corporibus assumptis, vel per solam imaginariam aut sensibilem representationem, non diceret: *Post hæc in terris visus est*: multo enim ante legem datam fuerat illo modo in terris visus, & cum Abraham, Jacob, & aliis sanctis hominibus conversatus: loquitur ergo de singulari mysterio incarnationis, ut recte Nazian. orat. 36. quæ est 4. de Theologia circa medium, & orat. 39. non longe a fine. Cyprian. lib. 2. ad Quirinum, c. 6. Chrys. homil. 4. Christus sit Deus, & hom. 5. de incomprehensibili Dei natura. Euseb. lib. 6. de demonstr. c. 19. August. 18. de civit. c. 33. Lactant. lib. 4. de vera relig. c. 13. ubi alia etiam adducit testimonia, Verum est, Judæos non admittere hunc librum Baruch in canone scripturarum: nos autem de fide supponimus esse librum canonicum, quod alio loco probandum est.

Locus  
Zachar.  
cap. 2.

Quarto arguitur ex aliis Prophetis; primum testimonium sit ex Zach. 2. *Hæc dicit Dominus exercituum: post gloriam misi me ad gentes, quæ spoliaverunt vos*: & infra: *Lauda, & latere filia Sion, quia ego venio, & habitabo in medio tui, ait Dominus, & applicabuntur gentes multe ad Dominum die illa, & erunt mihi in populum, & habitabo in medio tui, & scies, quia Dominus exercituum misi me ad te*. Ubi Deus & Dominus exercituum missus dicitur a Deo exercituum, ad salvandas gentes, & congregandam Ecclesiam ex Judæis & gentibus, Est ergo apertus locus de divinitate Mes-



Messia: ut recte ibi Hieron. & Euseb. lib. 2. de demonst. cap. 2. demonst. 18. & lib. 5. cap. 25. & 26. lib. 6. cap. 17. Ambros. 2. de fide cap. 3. August. 20. de Civit. cap. ult.

Explicatur alius Iohes Zachar. c. 12.

Secundum testimonium sit ex eodem cap. 12. *Effundam super domum David, & super habitatores Jerusalem spiritum gratia, & precum; & aspicient ad me, & promittit se daturum spiritum suum; & tamen dicit se esse crucifigendum, ut bene exponit Cyprian. lib. 2. contra Judæos cap. 20. & Euseb. lib. 8. de demonst. 4. August. lib. 20. de Civit. cap. 30.*

Tertium sit ex eodem cap. 13. ubi in principio inquit: *Et erit in die illa, dicit Dominus exercituum, disperdam nomina idolorum de terra.* Et postea circa finem subdit: *Quid sunt plagæ istæ in medio manuum tuarum? & dicit: his plagatus sum in medio eorum, qui diligebant me:* quem locum notant ibi Hieronym. Rupert. & alii expositores: & D. Thom. in id Psal. 21. *Foderunt manus meas.*

Exponitur locus Mich. cap. ult.

Ultimum sumi potest ex Mich. 5. *Et ex te egredietur mihi Dux* (sermo est de Bethlehem) *qui sit dominator in Israel:* ubi clare est sermo de Christo, & Messia: ut etiam Pharisei Herodi responderunt, Matth. 1. & tamen de eodem statim subdit: *Egressus ejus ab initio a diebus æternitatis:* nimirum secundum divinitatem, & æternam generationem, ut eleganter ibi exponit Hieron. & Euseb. lib. 7. de demonst. cap. 4. dictio enim illa, *ab initio*, proprie dicta, & præsertim conjuncta cum alia particula, *a diebus æternitatis*, significat existentiam sine principio: sicut Eccles. 24. *Ab initio, & ante seculum creata sum.* Ad hæc testimonia variis modis conantur respondere Judæi, sed non oportet in eis confutandis immorari: tum quia nihil afferunt verisimile, aut probabile: tum etiam, quia, ubi tot sunt testimonia Scripturarum, quæ se mutuo juvant, & explicant, omnia simul consideranda, & proprietas verborum, quoad fieri possit, tenenda est, quibus observatis nullus tergiversari poterit, nisi aperte velit veritati resistere.

## S E C T I O. I V.

### Solvuntur objectiones.

Contra veritatem hanc obijci possunt in primis omnia, quæ contra veram divinitatem verbi divini Arriani solent obijcere. Sed hæc cum in materia de Trinitate proprium locum habeant, non sunt a nobis pertractanda. Deinde illa etiam argumenta obijci possunt, quæ probare contendunt, non posse eundem esse verum Deum, & hominem, & consequenter cum Messias sit verus homo, non posse etiam esse verum Deum. Sed hæc attingunt mysterium ipsum incarnationis, ac ejus modum: & ideo in quæst. 2. relinquenda sunt.

Obiectio Judæorum.

Unum ergo tantum video posse obijci a Judæis ex Deuter. 14. ubi sic dicitur: *Prophetam de gente tua, & de fratribus tuis, sicut me, suscitabit tibi Dominus Deus tuus:* quem Prophetam esse Christum interpretati sunt Petrus, & Stephan. Act. 4. & 7. imo ad eum locum videtur alluisse Christus, cum dixit Joan. 5. *Si credideritis Moysi, crederetis & mihi: de me enim ille scripsit,* ut notavit Cyprian. lib. 1. contra Judæos cap. 18. At vero ibi indicat Moyses Prophetam illum non esse futurum Deum: tum quia dicit sibi futurum similem, atque adeo purum hominem, sicut ipse erat: tum maxime quia subdit: *Ipsum audies, ut petisti a Domino Deus tuo in Horeb, quando dixisti, ultra non audiam vocem Domini Dei mei: & ait Dominus, bene omnia sunt locuti, Prophetam suscitabo eis similem tui, &c.* Ergo ille Prophetam non erat futurus Dominus Deus, nam populus petebat, ne sibi Dominus loqueretur, ac Deus admittit petitionem dicens, se daturum Prophetam, & per illum locuturum. Respondetur ex Tertull. lib. 4. contra Marcion. cap. 22. & Iren. lib. 3. cap. 12. Clem. Alex. lib. 1. pædago. cap. 7. Justin. q. 101. ad gentes, & August. 16. contra Faust. cap. 15. & 18. ibi solum dici Prophetam illum futurum fuisse verum hominem, Prophetam, legislatorem, & mediatorem inter homines ac Deum, & ita similem Moysi & in natura, & in officio; non vero oportet, ut in omnibus aliis conditionibus futurus esset omnino similis, aliàs nec fuisset Redemptor, nec

Suarez. Tom. XVI.

natus ex Virgine, nec in similibus perfectionibus Moysen superasset. Quamvis ergo ibi Moyses expresse non doceat, Prophetam illum futurum Deum, quia rudis populus capax non erat tanti mysterii, non tamen hoc negat; nam quod postea significat, Deum per se populo non esse locuturum, sensus est: non locuturum eo modo, quo antea quasi per divinitatem ipsam, & signis, ac prodigiis illam indicantibus, sed locuturum humana voce per humanam naturam, ex eorum genere assumptam; quo non excluditur, quin ille Prophetam, Deus simul futurus esset, & verus homo. Ex his ergo sufficienter ostensum relinquitur contra omnes infideles, incarnationis mysterium esse factum,

## Q U Æ S T I O. I.

De convenientia Incarnationis in sex articulos divisa.

Circa primum, tria consideranda occurrunt. Primo quidem de convenientia Incarnationis Christi. Secundo de modo unionis Verbi incarnari. Tertio, de his, quæ consequuntur ad hanc unionem.

Circa primum quærentur sex,

- Primo, *utrum conveniens fuerit Deum incarnari.*
- Secundo, *utrum fuerit necessarium ad reparationem generis humani.*
- Tertio, *utrum si non fuisset peccatum, Deus incarnatus fuisset.*
- Quarto, *utrum principalius sit incarnatus ad tollendum originale peccatum, quam actuale.*
- Quinto, *utrum conveniens fuerit Deum incarnari a principio mundi.*
- Sexto, *utrum ejus incarnatio differri debuerit usque in finem mundi.*

## A R T I C U L U S. I.

a Utrum conveniens fuerit Deum incarnari.

Ad primum sic proceditur. Videtur, quod non fuerit conveniens, Deum incarnari. Cum enim Deus ab æterno sit ipsa essentia bonitatis, sic optimum est ipsum esse, sicut ab æterno fuit: sed Deus ab æterno fuit absque omni carne. Ergo convenientissimum est, ipsum non esse carni unitum. Non ergo fuit conveniens, Deum incarnari.

3. d. 1. q. 1. art. 3. & 4. cont. gen. cap. 40. 49. 53. 54. & 55. Et op. 2. 2. 2. 5. & 6. & op. 3. cap. 107. & 208.

2. Præterea. Quæ sunt in infinitum distantia, inconvenienter junguntur: sicut inconveniens junctura esset, si quis pingeret imaginem, in qua humano capiti cervix jungeretur equina: sed Deus & caro infinitum distant, cum Deus sit simplicissimus, caro autem maxime composita, & præcipue humana. Ergo inconveniens fuit, quod Deus carni uniretur humane.

3. Præterea. Sic distat corpus a summo Spiritu, sicut malitia a summa bonitate. Sed omnino inconveniens esset, quod Deus, qui est summa bonitas, malitiam assumeret. Ergo non fuit conveniens, quod summus Spiritus increatus corpus assumeret.

4. Præterea. Inconveniens est, ut qui excedit magna, contineatur in minimo: & cui inninet cura magnorum, ad parva se transferat. Sed Deum, qui totius mundi curam gerit, tota rerum universitas capere non sufficit. Ergo videtur inconveniens, quod intra corpusculum vagientis infantie lateat, cui parum putatur universitas: & tam diu a sedibus suis absit ille Regnator, atque ad unum corpusculum totius cura mundi transferatur, ut Volusianus scribit ad Augustinum. \*

Epistol. 2. post m. d. illius to. 2 inter opera Aug.

Sed contra, illud videtur esse convenientissimum, ut per visibilia monstrentur invisibilia Dei: ad hoc enim totus mundus est factus, ut patet per illud Apostoli Romanorum 1. *Invisibilia Dei per ea, quæ facta sunt, intellecta conspiciuntur: sed sicut Damascenus dicit in principio tertii libri. \* Per incarnationis mysterium monstratur simul bonitas, & sapientia, & justitia, & potentia Dei, vel virtus. Bonitas quidem, quoniam non despectit proprii plasmatis infirmitatem. Justitia vero, quoniam homine victo, non alio, quam homine fecit vinci tyrannum, neque vi eripuit ex morte hominem. Sapientia vero, quoniam invenit*

Lib. 3. ortho. fid. c. 1. in medio illius

B

difficil-



difficillimipretii decentissimam solutionem. Potentia vero sive virtus infinita, quia nihil est majus, quam Deum fieri hominem. Ergo conveniens fuit Deum incarnari.

b Respondeo dicendum, quod unicuique rei conveniens est illud, quod competit sibi secundum rationem propriam nature: sicut homini conveniens est ratiocinari, quia hoc competit sibi, in quantum est rationalis secundum naturam suam. Ipsa autem natura Dei est essentia bonitatis, ut patet per Dionysium 1. cap. de divinis nominibus. Unde quicquid pertinet ad rationem boni, conveniens est Deo. Pertinet autem ad rationem boni, ut se aliis communit, ut patet per Dionysium 4. cap. de divinis nominibus. Unde ad rationem summi boni pertinet, quod summo modo se creatura communit: quod quidem maxime fit per hoc, quod naturam creaturam sic sibi coniungit, ut una persona fiat ex tribus, scilicet, verbo, anima, & carne: sicut dicit Augustinus 13. de Trinitate. Unde manifestum est, quod conveniens fuit Deum incarnari.

c Ad primum ergo dicendum, quod incarnationis mysterium non est impletum per hoc, quod Deus sit aliquo modo a suo statu immutatus, in quo ab eterno fuit, sed per hoc, quod novo modo se creatura univit, vel potius eam sibi. Est autem conveniens, ut creatura, que secundum rationem sui mutabilis est, non semper eodem modo se habeat. Et ideo sicut creatura incepit esse, cum prius non esset, ita conveniens, cum prius non esset unita Deo in persona, postmodum ei fuit unita.

d Ad secundum dicendum, quod uniri Deo in unitate persone, non fuit conveniens carni humana, secundum conditionem sue nature, quia hoc erat supra dignitatem ipsius: conveniens tamen Deo secundum infinitam excellentiam bonitatis eius, ut sibi eam uniret pro salute humana.

e Ad tertium dicendum, quod quilibet alia conditio, secundum quam creatura quocumque differt a creatore, a Dei sapientia est instituta, & ad Dei bonitatem ordinata: Deus enim propter suam bonitatem, cum sit increatus, immobilis & incorporeus, produxit creaturas mobiles & corporeas. Et similiter malum pene a Dei iustitia est introductum propter gloriam Dei: malum vero culpe committitur per recessum ab arte divine sapientie, & ab ordine divine bonitatis: & ideo Deo conveniens esse potuit assumere naturam creaturam, mutabilem, corpoream, & penalitatem subiectam: non autem fuit ei conveniens assumere malum culpæ.

f Ad quartum dicendum, quod sicut Augustinus respondet in epistola ad Volusianum, non habet hoc Christiana doctrina, quod ita sit Deus infusus carni humana, ut eam gubernande universitatis vel deseruerit, vel amiserit, vel ad illud corpusculum quasi contractam transtulerit: hominum enim est iste sensus, nihil nisi corpore a valentiù cogitare. Deus autem non mole, sed virtute magnus est: unde magnitudo virtutis eius, nullas in angusto sentit angustias. Non est credibile, si verbum hominis transiens simul auditur a multis, & a singulis totum, quod verbum Dei permanens simul ubique sit totum. Unde nullum inconveniens sequitur Deo incarnato.

#### COMMENTARIUS.

Conveniens late, & generaliter sumptum idem esse videtur, quod bonum, qua significatione quicquid est possibile, eo modo quo est, potest dici bonum, & conveniens vel actu, si re ipsa existat, vel potentia, si solum quatenus possibile est, consideretur; & hac significatione idem est querere, an aliquid sit conveniens, & an possibile sit, præsertim in Dei operibus, a quo nihil fieri potest, quod bonum non sit. Sed non videtur questio hæc de incarnatione hoc sensu à D. Thoma & Theologis disputari: hoc enim modo Deum assumere irrationalem naturam, vel similia opera facere, posset dici conveniens hoc ipso, quod impossibile non sit. In proposito ergo proprius videtur dici conveniens id, quod expedit, & decet, quodque non solum fieri non repugnat, verum etiam divine sapientie, & bonitati consentaneum est: quo modo non dicetur conveniens Deum fieri leonem, quamquam possibile sit, atque adeo bonum, prout bonum cum ente convertitur.

Sed tunc occurrit dubium, quod a Cajetan. positum est, cur D. Thom. questionem, que prior esse videbatur, omiserit, scilicet an incarnatio possibilis sit. Cujus rei duplicem causam reddit. Altera est, quia scientia supponit

scilicet subjectum esse: incarnatio autem hujus materie subjectum est. Altera, quia probando incarnationem esse convenientem, probavit esse possibilem. Neutra tamen videtur facere satis; non quidem prior, quia tunc scientia supponit subjectum esse, quando vel per se notum est, vel in superiori scientia demonstratur: incarnationem autem esse, aut esse possibilem, neque est per se notum, neque demonstratum, sed solum creditum: oportuisset ergo hanc fidem & rationem ejus explicare. Theologia enim, cum sit suprema sapientia, non petit ab alia rationem subjecti sui, sed ipsamet illud sibi proponit, & prout potest, juxta materie qualitatem illius rationem reddit, propter quam causam, licet totius Theologie subjectum Deus sit, idem nihilominus D. Thom. 1. p. q. 2. quæsit, an Deus sit. Et fere similem questionem de Trinitate deferuit in q. 32. ar. 1. Posterior item ratio falso videtur fundamento niti, quia (ut statim ostendam) ratio, qua D. Th. in hoc art. utitur, non probat, seu supponit incarnationem esse possibilem, & nisi id supponatur, illo discursu nihil effici posset. Existimo ergo ideo D. Thom. illam questionem prætermisisse, quia ratione ostendere non potuit possibile esse Deum fieri hominem; poterat autem argumenta dissolvere, quæ contra fidem hujus mysterii objici solent, ut hoc saltem modo ostenderet illud non esse, vel saltem non probari impossibile. Quod quidem solvendo argumenta, quæ in hoc articulo proposuit, ex parte fecit, ut videbimus: integram vero, & fusioem de hac re disputationem merito hoc loco omittendam putavit, quia nondum explicata ratione, & intellecto modo hujus unionis inter Deum, & hominem, difficultates, quæ ex illa nascuntur, neque satis intelligi poterant, neque dilucide expediri: quod tamen postea suo loco & tempore facillime fiet.

b. Probat igitur D. Thom. hoc mysterium fuisse conveniens duplici ratione. Prior est ex Damasc. desumpta lib. 3. c. 1. quia in hoc opere divina bonitas, sapientia, iustitia, & omnipotentia innotescunt excellenti modo: quam rationem in sequenti disputatione latius expendemus. Posterior ratio nititur in natura, & perfectione divine bonitatis: aliter tamen, quam alia superior: in illa enim consideratur hoc opus, ut supponit hominis lapsum, & ad misericordiam pertinet. Quo pacto oriri dicitur ex divina bonitate, quæ non desepit proprii plasmatis infirmitatem: hic vero fundatur ratio in propria ratione ipsius bonitatis, & consideratur hoc opus solum, ut ad beneficentiam spectat: summa rationis hæc est. Ad rationem boni pertinet, ut se aliis communit; ergo ad rationem summi boni, ut se summo modo communit. Deus autem summum bonum est; ergo ad rationem Dei spectat se summo modo communicare; per incarnationem autem se summo modo communicat; pertinet ergo incarnatio ad rationem Dei, seu divine bonitatis: quod autem alicui convenit secundum rationem propriæ nature, est illi valde conveniens; ergo incarnatio Deo conveniens est.

Ubi primo observandum est D. Thom. absolute quæsisse: An incarnatio sit conveniens: in responsione vero addidisse esse convenientem Deo. Potest autem dici aliquid alicui conveniens, vel quia est illi commodum, vel quia est consentaneum virtuti; seu propensione naturali ejus, quamquam ei nulla inde commoditas nascatur: Deo autem nihil potest esse conveniens propter ipsius commoditatem, quia suis creaturis non indiget, neque operibus suis perfici potest, cum sit purus actus, summeque perfectus, cui, sicut detrahi nihil potest, ita neque addi. Solum ergo potest dici aliquid Deo conveniens tanquam bonitati, vel sapientie, aut aliis perfectionibus ejus consentaneum, & hoc modo illi incarnatio recte dicitur esse conveniens. Quia vero id, quod hujusmodi est, non potest per se non maxime decere, & esse conveniens, & ideo perinde fuit D. Thom. concludere incarnationem esse Deo convenientem, ac simpliciter & absolute concludere convenientem esse.

Et juxta hæc intelligendum est principium illud, seu fundamentum D. Thom. rationis. *Ad rationem boni pertinet, ut se aliis communit.* Nam sermo esse potest, vel de interna quadam propensione, & aptitudine ad se communicandum, & hoc intrinsecum est; & essentiali ratione bonitatis; vel sermo esse potest de actuali communicatione, & hoc solum dici potest esse de ratione boni tanquam consentaneum nature, & propensioni ejus,

Solutio.

Quomodo ad rationem boni pertineat, ut se aliis communit.

3. d. 1. q. 1.  
art. 3. ad 3.  
& q. 2. a. 1.  
21. Et d. 4.  
q. 1. a. 1.  
q. 1. co. &  
2.

2. 1. a. med.  
illius.

cap. 4. c. 1.  
et primo.

Lib. 13. c. 17.  
non procul a  
prin. tom.  
3. Infra  
q. 2. art. 1.  
Et 3. d. 1.  
q. 1. 2. 1. 3.

Est ep. 3.  
aliquan-  
tulum a  
prin. p.  
tom. 3.

In eadem  
epist. ante  
q. 1. d. 1.

Cajetan.



eius, licet nec necessario illi conveniat, nec perfectionem addat: sed supponat potius, & signum illius sit. Et hoc sensu bene concluditur incarnationis opus esse conveniens Deo secundum rationem bonitatis ejus. Ac si diceretur conveniens esse homini liberali ratione liberalitatis bona sua cum aliis communicare. Quomodo dixit August. 10. lib. de civit. cap. 29. Incarnationem esse summum exemplum gratiæ, nec potuisse gratiam Dei gratius commendari, quam ut ipse Dei filius hominem indueret; & ad eundem modum dixit D. Thom. 1. contra gent. c. 93. ratione 6. liberalitatem esse virtutem maxime propriam ejus, qui bonus est, & quodammodo soli Deo convenire, quia solus ipse se communicat, quia ipsum communicare est ei conveniens, sicut fonti bonitatis, nulla inde expectata commoditate. Hic vero se statim insinuat quæstio, an ille actus, quo Deus se creaturæ communicat, aliquam perfectionem saltem liberam Deo afferat: sed quoniam hæc quæstio communis est omnibus operibus Dei, & in 1. part. q. 19. proprium locum habet, præmittenda est.

Ut vero hoc fundamentum D. Thom. magis intelligatur, & nonnulla, quæ hic objici solent, facile constet, observandum secundo est hanc bonitatis communicationem semper ad aliquod genus causæ revocari, & juxta varia causarum genera multiplicem esse posse. Primo enim omne bonum dici potest se se communicare in genere causæ finalis, quia allicit, & movet appetitum ad amorem sui: & hanc vocant Philosophi communicationem, seu causalitatem intentionalem, de qua exposuit D. Thom. 1. p. q. 5. art. 4. ad 2. illud Dionys. *Bonum est diffusivum sui, eo modo* (inquit D. Thom.) *est diffusivum, quo finis movet*. Aliter tamen est etiam bonum diffusivum sui communicatione reali, quia communicatio ipsius esse ex bonitate procedit, quæ movet agens ad efficiendum, propter quod etiam dicitur bonum esse diffusivum sui, ut idem D. Thom. explicuit 1. contra gent. cap. 37. Hæc vero communicatio realis esse potest, vel per effectum causæ efficientis, quæ seipsam, suamque perfectionem communicat producendo sibi similia. Qui modus communicationis satis perfectus est, quia qui se hoc modo communicat, supponitur in eo genere perfectus, & dum se communicat, non se, sed alium perficit sine ulla tamen suæ perfectionis diminutione, quomodo se Deus communicat per creationem. Alius vero modus communicationis realis esse potest (ut ita dicam) formalis seu intrinsecus, qualis est, quando una res alteri præbet seipsam, seu eandemmet individuum perfectionem, quam in se habet, & hic modus potest accommodari causæ materiali, & formali. Nam & materia communicat se ipsam formæ, & formæ materiæ, & utraque composito: & ad has revocari possunt aliæ similes communicationes. In quibus etiam considerandum est sæpe fieri propter perfectionem tam ejus, qui se communicat, quam alterius, cui communicatio fit, ut in forma, & materia videre est. Et talis modus communicationis non cadit in Deum, quia supponit indigentiam, & imperfectionem in eo, qui se communicat. Interdum vero fit hæc communicatio propter alterius perfectionem: includit tamen aliunde imperfectionem, quia is, qui se communicat, privat se illo bono, quod alteri communicat, quomodo in naturali generatione viventium pater communicat filio partem substantiæ suæ, & in moralibus dives sua bona communicat pauperibus se illis privando. Et hic modus procedit quidem per se loquendo ex recta & honesta propensione: supponit tamen imperfectionem tam in bono communicato, quod valde limitatum est, quam in modo communicationis, quæ adjunctam habet privationem boni, & ideo Deo convenire non potest. Et in rebus aliis, ut conveniens sit, modum & mensuram adhibere necesse est. Alio ergo modo intelligi potest hæc communicatio: ut videlicet neque sit propter perfectionem ejus, qui se communicat, neque illum privet perfectione sua, & hic modus communicationis suo genere optimus est, & cæteris paribus tanto præstantior, quanto præstantius communicatur bonum, & ad eum spectat naturalis illa communicatio, quæ in personis divinis reperitur. Ubi pater eandem numero naturam, & essentialem perfectionem filio communicat sine ulla privatione, vel diminutione sui, neque se communicat propter indigentiam, ut sibi per-

Suarez, Tom. XVI.

fectionem acquirit: sed ex perfectionis abundantia, & infinita quadam excellentia.

Ex quibus optime etiam intelligitur, quomodo per incarnationem dicatur Deus optimo, & perfectissimo modo se communicare creaturæ, liberali ac voluntaria communicatione, de qua sola in præsentī sermo est, omnibus enim supradictis modis id verum esse facile intelligi potest. Nam in hoc mysterio communicat Deus naturæ creatæ ipsammet increatam & infinitam perfectionem, quam in se habet, communicando illi divinam personam substantiali & personali communicatione, qua nulla major excogitari potest, quia essentialis communicatio divinitatis extra divinas personas fieri nullo modo potest, ut in prima parte ostenditur, & inferius quæst. 2. breviter attingemus.

Dices: in beatitudine videtur esse vel major, vel æqualis communicatio, quia divina essentia per seipsam conjungitur intellectui beati. Respondetur, non ita se communicare divinam naturam intellectui beati, ut per seipsum illum formaliter, ac vere perficiat, & cum illo unum aliquid vere componat: sed solum per modum objecti, & proximi principii dicitur per seipsam intellectui conjungi, quatenus ad visionem beatam per seipsam concurrat tum influendo, tum etiam terminando. Unde tota illa conjunctio, & communicatio accidentaliter est. At vero in hoc mysterio ita se Verbum communicat humanæ naturæ, ut vere & substantialiter illi copuletur, & illam per seipsum perficiat, & cum illa aliquid unum ineffabili modo componat. Propter quod dixit Augustin. lib. de prædestin. sanct. cap. 15. *Tantum, tam excelsum, & tam summam esse hanc humanæ nature subjectionem, ut quo attollatur, altius non habeatur*. Quæ omnia inferius quæst. 2. explicato modo hujus unionis intelligentur melius.

Ex his efficitur communicationem hanc etiam in genere causæ efficientis maximam esse. Quia hoc inter omnia opera divinæ omnipotentis videtur maximum, in quo nempe cuncta naturæ, gratieque operi super omnem naturæ ordinem mirabili modo conjunguntur, & quasi in summam rediguntur, juxta illud ad Eph. 1. *Recapitulare in Christo, quæ in cælis, & in terra sunt*. Ut Hieron. legit cum Græcis. Deinde res inter se maxime distantes summo quodam vinculo per incarnationem copulantur, actus scilicet purus cum pura potentia, & supremus spiritus cum infimo, imo & cum carne, increata denique persona cum natura creatæ: harum enim rerum infinita distantia non solum efficit, ut tanta eorum conjunctio, & communicatio impossibilis sit non sed potius exaggerat, & ostendit infinitam potentiam ejus, qui res ita diversas, ac diffitas in unum conjungere adeo mirabiliter potuit. Est ergo summa hæc communicatio etiam in ratione efficiendi. Legatur de hac ratione Augustin. serm. 3. & 15. de temp. Bernard. serm. 3. in Vigil. Nativit. & 1. ejus festi.

Denique in genere causæ finalis eandem perfectionem & excellentiam habet, tum quia in hoc genere ostendit vim, & energiam divinæ bonitatis, quæ ipsum Deum (ut ita dicam) impellit, & attrahit, ut hoc etiam modo se communicet: tum etiam, quia inter omnia divina opera nullum est, quod magis allicit, & moveat ad ipsius Dei amorem, quam hæc divina communicatio, ut eleganter differit Augustin. in manuali cap. 26. & 13. de Trinit. cap. 10. & 11.

Ex his explicata manet vis rationis D. Thom. & solutæ objectiones, quæ fieri solent: videtur enim ex hac ratione sequi tum incarnationem necessario debuisse fieri a Deo tanquam sibi convenientem: tum etiam illi addere aliquam perfectionem: neutrum tamen efficitur, ut ex dictis facile patet, quia conveniens hoc loco non dicitur, quod perfectionem affert Deo: sed quod est consentaneum bonitati & perfectioni ejus. Neque oportet, ut hoc modo conveniens sit necessarium: sed potest esse liberum, ut ipsa mundi creatio hoc modo Deo conveniens est, quæ tamen libere ab eo fit.

Unde etiam expeditur alia obiectio, scilicet, quia pari modo concludi posset conveniens fuisse omnes tres personas incarnari: imo non solum incarnari, sed etiam Angelicæ naturæ, aut aliis etiam rebus hypostatice conjungi. Respondetur enim ratione D. Tho. per se solum concludi unionem hypostaticam esse

B z conve-

Quomodo  
Deus se  
intellectui  
beati  
communicat.

Hæc communicatio  
per hoc rati-  
onem  
maxima  
in genere  
causæ effici-  
entis.

In genere  
causæ fi-  
nalis.

Quot mo-  
dis ali-  
quis dici  
possit dif-  
fusivum  
sui.



convenientem Deo: quod vero hæc fiat in hac natura, vel in hac persona, vis hujus rationis non postulat: sed aliunde convenientia, vel congruentia petenda est. Ubi recte etiam distingui solet dupliciter esse posse summam communicationem, scilicet intensive, & extensive. Primus modus est per se conveniens, & quasi necessarius ad complementum operum Dei, ad quem satis est, ut hæc communicatio fiat alicui naturæ in aliqua persona. Quod vero hæc unio communicetur multis, & quasi extensive fiat major, quasi accidentarium est, & siquidem Deus hoc fecisset, non deesset illi conveniens ratio: tamen per se, ac simpliciter non oportuit sic fieri: imo ad majorem mysterii æstimationem expediens fuit hoc opus esse unicum, & singulare, sicut etiam gratia & gloria paucis communicatur ad majorem ejusdem divinæ gratiæ commendationem.

Unio hypostatica non debuit communicari multis.

Ratio D. Thom. explicatur.

Ex quibus tandem intelligitur, quod in principio articuli dixi, rationem hanc D. Thom. supponere hanc personalem communicationem, quæ summa dicitur, esse possibilem, nec Deo imperfectionem asferre. Hoc enim ex vi hujus rationis probare non potest, ut satis constet: nec vero ratio procedit, nisi id supponatur. Exemplo res facile manifestatur: nam si quis vellet simili argumento concludere conveniens esse Deo producere creaturam, vel Angelum infinite perfectum, aut conferre beatis infinitam, seu comprehensivam visionem sui, quia hæc esset maxima quædam communicatio suæ bonitatis, respondendum, necessario esset illam communicationem esse prorsus impossibilem, & ideo non posse maximam dici. Sic ergo præsentī rationi D. Thom. posset quis respondere, nisi ex fide supponat hanc communicationem esse possibilem, imo decentem, ac congruentem suæ sapientiæ, quod ex parte humanitatis assumptæ inferius probandum est, cum de natura assumpta in particulari differemus, & tractatur optime ab Ambrosio libro de incarnationis Dominicæ Sacramento cap. 7. & hæc tenus de ratione articuli.

1. Argum.

Argumentum D. Th. partim conatur probare hoc mysterium esse impossibile, partim non esse conveniens.

c Primum argumentum hujusmodi est: conveniens est Deum ita se nunc habere, sicut antea, & sicut ab æterno fuit: sed antea fuit sine carne. Ergo conveniens fuit semper manere sine carne. Hoc argumentum non solum videtur probare hoc non esse conveniens: sed etiam aliud non esse possibile, si sensus primæ propositionis sit Deum debere semper manere immutatum. Hoc enim significat, quod ita nunc sit, sicut antea fuit, & hoc modo videtur intellexisse argumentum D. Thom. & ideo respondet negando consequentiam, quia Deum incarnari non est mutari: fit enim mysterium hoc per mutationem solius naturæ creatæ, ut latius quæst. 2. dicitur. Alio vero sensu posset hoc argumento probari non fuisse conveniens Deum in tempore incarnari: sed si carnem sumere voluit, debuisset illam sumere ab æterno, quia non docet Deum habere nunc aliquam naturam sibi unitam, quam ex omni æternitate non habuit: quod si hoc modo sumatur argumentum, respondendum est negando majorem, cujus rationem reddemus infra artic. 5. & 6.

Respons.

2. Argum.

d Secundum argumentum fundatur in hoc principio. Ea, quæ multum inter se distant, & proportionem non habent, non conjunguntur apte, nec convenienter: imo ex hoc principio solent infideles colligere hoc mysterium esse impossibile. Sed ad hoc est jam obiter responsum explicando rationem D. Thom. distantiam scilicet extremorum non facere impossibile eorum conjunctionem, si ex alio capite non oriatur repugnantia: quod vero saltem reddat illam minus congruentem, atque convenientem, videtur probari illo principio, explicato exemplo, quod D. Thom. hic utitur. Quia licet impossibile non sit corpori humano adungere cervicem equinam, est tamen incongruum & monstruosum. Multo ergo magis videri potest incommoda, inepta, & monstruosa compositio humanæ naturæ cum Deo. Huic objectioni D. Thom. non respondet in forma, sed solum dicit hoc non fuisse conveniens ex parte naturæ humane, sed ex parte divinæ personæ. Sed primum satisfaciamus argumento, & deinde videbimus, quomodo D. Thom. & verum respondeat, & ad argumentum accommodatæ. Respondetur ergo solam distantiam extremorum

non solum non reddere impossibile eorum unionem, verum etiam neque minus congruentem, aut monstruosam, si aliunde aliquam inter se servant proportionem. Deus autem & humana natura, quantumvis re ipsa, & perfectione distent, proportionem tamen inter se habent ad constituendum unam personam, quatenus natura apta est terminari per subsistentiam, ut inferius quæst. 2. latius dicitur: & hoc videtur sufficere ad satisfaciendum argumento. D. Thom. vero, ut radicem hujus proportionis explicaret, dixit hanc unionem non esse convenientem humanitati secundum conditionem suæ naturæ, sed Deo, quod tamen difficile videtur. Tum, quia si conveniens idem sit, quod connaturale, aut naturæ debitum, sic nec verbo, nec humanitati est debita incarnatio: si vero idem sit, quod aptum, vel accommodatum, seu proportionatum, sic ipsi humanitati est valde conveniens, quia est magna perfectio ejus. Tum etiam, quia in solutione ad primum dixerat D. Thom. incarnationem in tempore fieri fuisse conveniens non ex parte Dei, sed ex parte humanitatis. Dicendum vero est, sensum D. Thom. esse, in humana natura non esse aliquam proprietatem naturalem, quæ postulet hanc unionem, ut sibi convenientem. Ex parte autem verbi esse aliquam proprietatem naturalem, scilicet bonitatem ejus, ratione cujus illi convenit se se ita communicare: unde humanitati potest dici hæc unio conveniens solum secundum capacitatem obedientialem quasi passivam: at vero respectu verbi est conveniens secundum naturalem potestatem effectivam, & (ut ita dicam) terminativam. In Deo enim non est potentia obedientialis: sed quidquid in eo est, naturale est. Nec vero inde fit hanc unionem vel incarnationem esse simpliciter necessariam, id est, non libere factam, quia licet sit accommodata divinæ bonitati, & perfectioni, non tamen illa indiget ad suam consummatam perfectionem, vel beatitudinem, ut jam etiam dictum est. Neque etiam D. Thom. sibi repugnat in his duabus solutionibus: possumus enim loqui de incarnatione sub generali ratione, quatenus mutatio quædam est, & hoc modo solum potest convenire ex parte naturæ, quæ est subiectum mutationis, & ita loquitur D. Thom. in solutione ad primum; alio modo possumus loqui de incarnatione, quatenus est supernaturalis communicatio infiniti cujusdam boni, & hoc modo dicitur in hac solutione esse conveniens ex parte Dei.

Sensus D. Thom.

e In tertio argumento tangit D. Thom. difficultatem infra q. 15. late tractandam. Cur potuerit Deo esse possibile & conveniens assumere hominis naturam, non tamen culpam. Et in summa respondet naturam esse bonam simpliciter, & a Deo creatam, & ad ipsum tendere, & ideo posse illi apertissime conjungi: culpa vero est mala simpliciter, & neque est a Deo, neque propter Deum, & ideo non solum non est conveniens, verum nec possibile, ut Deo hypostatice, aut secundum hypostasim conjungatur.

f Quartum argumentum procedit ex falsa apprehensione cujusdam ethnici, quantum ex August. epist. 2. colligi potest. Existimabat enim ille nos dicere ita Deum fuisse carni conjunctum, ut in illa fuerit definitus, & quasi coarctatus, sicut anima definitur in corpore, & consequenter omnem Dei curam, & providentiam ad solum illud corpusculum fuisse translata, & totius universi gubernationem deseruisse. Quod quidem sine ulla controversia fieri non posset; nec ullo modo conveniret: sed hæc vana fuit infidelis hominis existimatio, sicut enim Deus unitus est carni, ut licet singulari modo in ea existat, nullibi tamen esse deserit, nec fuerit impeditus, quin res omnes repleat immensitate. Et similiter quamvis in illo corpore assumpto, & per illud propria quadam ratione operetur, illiusque specialem curam gerat, tanquam verum suppositum illius corporis naturæ, non tamen propterea eam providentiam reliquit, quia universali ac singulari sapientia sua cuncta gubernat, ut per se satis constat, & latius persequitur August. epist. 3.

### DISPUTATIO III.

In tres sectiones distributa.

*De existentia Incarnationis, ejusque convenientia.*

De subjecta materia primum inquirimus, an sit, tractaturi postea, quid sit Incarnatio, & quas habeat



habeat proprietates. Et quoniam existentia incarnationis ex voluntate Dei pendet, quæ optima ratione, & sapientissime & convenientissime omnia operatur, ideo D. Thom. in hac q. 2. hæc omnia complexus est, illaque ad quæstionem, an sit incarnatio, pertinere censuit, de quibus in hac & tribus sequentibus disputationibus differemus.

## SECTIO I.

*An incarnationem esse possibilem possit ratione probari.*

**L**icet D. Thom. hanc quæstionem prætermiserit propter rationem supra traditam: tamen ut aliquid demus communi consuetudini, & ut aliqua, quæ desiderari possunt, explicata maneant, illam attingemus, brevissime tamen, ne in ea incommoda, quæ D. Thom. vitare studuit, incidamus.

Dico primo, cum fides doceat incarnationem esse possibilem, non potest ratione aliqua ostendi evidenter impossibilem esse. Prior pars supponenda nunc est, ne eadem testimonia scripturæ repetamus: non enim aliter ex fide probari potest hoc mysterium esse possibile, nisi probando esse factum, quod in sequenti dubio diligenter præstandum est. Posterior vero pars ex priori evidenter sequitur. Tum quia mysteria nostræ fidei, quamvis supra rationem sint, non tamen contra rationem, ut recte ostendit D. Thom. 1. contra gent. cap. 7. non potest ergo ratio convincere aut falsa esse, aut impossibilia. Tum etiam, quia si incarnationem esse possibilem de fide est, ergo certum etiam, & omnino verum: ergo oppositum, scilicet, illam esse impossibilem, est falsum: non potest ergo demonstrari, quippe id solum est demonstrabile, quod verum, nam de ratione demonstrationis est, ut ex veris procedat: ex veris autem falsum inferri nullo modo potest. Et confirmatur ac declaratur hæc pars, quia nulla est ratio, quæ demonstrat, esse impossibile creatam naturam propria privari subsistentia, & aliena terminari, aut quæ probet repugnare divinæ personæ, vel aliquam imperfectionem esse, naturam creatam terminare, seu hypostatice asumere. Si enim aliqua esset, maxime quia nos non assequimur hoc mysterium, nec quomodo possibilis sit: at hæc ratio debilissima est, tum quia evidens est, plurima etiam naturaliter esse possibilia, quæ nos non assequimur; tum etiam quia etiam est evidens; divinam potentiam superare omnem nostram cognitionem & existimationem, sicut ejus natura & sapientia infinite excedit nostram. De quo argumento legi possunt ex Sacra Scriptura cap. 8. & 11. Ecclesiast. cap. 38. Job. cap. 57. Isai. Ex Patribus August. lib. 10. de Civit. cap. 29. lib. 21. cap. 2. lib. 22. cap. 4. Justin. in exposit. fidei. Euseb. Emis. homil. 1. de Symb. Basil. optime epistol. 168. ad Eunom. de qua re in materia de fide ex professo differitur; & de hoc mysterio manifestum constabit, cum solvemus objectiones, quæ contra illud fieri solent ab infidelibus, qui illud ut impossibile oppugnarunt, ut Porphyrius, Celsus, Julianus, & alii; contra quos scripserunt antiqui Patres, Cyrillus, Methodius, Origenes, & alii; de quibus videri potest Medina lib. 1. de recta in Deum fide: nunc enim eorum argumenta omitimus usque ad quæst. 2. D. Thom. quoniam hic satis intelligi non possunt, & sufficit ea delibasse, quæ in expositione literæ attigimus: an vero posterior hujus conclusionis pars sola fide teneatur, vel possit ratione probari, ex sequenti conclusione constabit.

Dico secundo non potest humana, vel angelica cognitione naturali evidenter cognosci, seu demonstrari incarnationem esse possibilem. Est communis Theologorum in 3. distin. 1. ubi late D. Thom. Durand. & Sot. quæst. 1. Marfil. quæst. 1. art. 2. dub. 2. & probatur primo ex modo loquendi sacre Scripturæ, & sanctorum. Paulus enim ad Ephes. 3. hoc mysterium vocat, *Investigabiles divitias Christi & Sacramentum absconditum a sæculis in Deo*. Et similiter ad Coloss. 1. vocat, *Mysterium absconditum a sæculis & generationibus*. Et 1. ad Corinth. 2. vocat, *Sapientiam in mysterio, quæ abscondita est, &c.* Propter quod multi censent Isai. cap. 45. vocasse Christum Deum absconditum. Quem sensum indicavit ibi Hieronymus dicens ita vocari

Suarez Tom. XVI.

Christum propter assumpti hominis sacramentum. Et eundem indicavit Eusebius 5. de demonstrat. cap. 4. & optime Ambros. in 2. cap. posterioris ad Corinth. ubi ita concludit. *Abscondita est ergo Dei sapientia, dum non in verbis, sed in virtute est, non humana ratione possibilis, sed spiritus efficacia credibilis*. Et ad eundem sensum accommodari potest illud Isai. 53. *Generationem ejus quis enarrabit?* Si de humana generatione intelligatur cum Leone Papa epistol. 10. & 11. & Chrysostom. homil. de sancto Joanne Baptista, quæ habetur tom. 3. post homilias super Joan. ubi inter alia inquit omnem creaturam hoc mysterium ignorare, nisi reveletur illi. Et eundem sensum bene persequitur Cyril. vel potius Chlitol. lib. 5. in Joan. cap. 2. Quin etiam Ambrosius lib. 1. de fide ad Gratianum cap. 5. cum prius de æterna generatione dixisset. *Mihi quidem impossibile est generationis scire secretum, mens deficit, vox silece non mea tantum, sed & Angelorum*. Subdit inferius: *Non sola admirabilis ex parte generatio Christi, admirabilis etiam ejus generatio ex Virgine*. Hinc August. epistol. 3. ad Volusian. de hoc mysterio loquens ita concludit. *Fateamur ergo Deum aliquid posse, quod nos fateamur investigare non posse*. Quæ verba usurpavit Concilium Toletanum XI. addens. *Si ratione ostendi posset, non esset mirabile, si exemplo non esset singulare*. Et ad eundem modum frequenter loquuntur Patres de hoc sacramento, ut Cyril. Alexander libr. de Incarnatione Unigeniti cap. 7. dicit: *Adunationem Verbi cum carne omni humana cognitione esse superiorem*. Gregor. homil. 7. in Evangel. mysterium vocat investigabile. Damasc. lib. 3. cap. 1. vocat: *Novum omnium novorum*. Quod prius dixerat apud Dionys. Hieroth. cap. 2. de divinis nomin. part. 2. *Verum quod est*, inquit, *novitatum omnium supereminens novitas in naturalibus nostris super naturam erat*. Et idem Dionys. epistol. 4. ad Cajum mysterium hoc dicit per negationem potius explicandum a nobis, quam per affirmationes, & similia multa videri possunt in Cyril. libro de fide ad Theodo. & Theodoret. in Dialogo Inconfusus, & Eusebius lib. 6. de demonstrat. Evang. cap. 1. & lib. 7. cap. 1. & optime August. 10. de Civitat. cap. 19. Chrysost. homil. 10. in Joan. & 2. in Marth. & homil. 4. in id, *Inventa est in utero*. Gregor. homil. 7. in Evang. Verum est hos Patres non semper expresse loqui de conclusione posita: sed interdum de cognitione tantum humana, interdum de cognitione perfecta, & comprehensiva, interdum denique de incarnatione non ut possibili, sed ut jam facta. Nihilominus tamen in ipso loquendi modo satis significant mysterium hoc ita esse excelsum, & admirabile, ut a nullo creato intellectu investigari possit, nedum possibile esse demonstrari.

Secundo principaliter arguitur rationibus. Prima sit, quia non potest intellectus creatus clare & per demonstrationem cognoscere, quidquid Deo possibile est, cum neque ipsius Dei omnipotentiam comprehendat, nec capacitatem obedientialem creaturarum omnium; ergo nec poterit evidenter cognoscere etiam ut possibile, id quod est maximum omnium operum, & miraculorum divinæ potentiae, cujusmodi est incarnatio, ut testantur Leo Papa serm. 8. de nativ. & D. Thom. 4. contra gent. cap. 27. & in superioribus ostensum est, nullo alio opere Deum magis se ipsum communicare. Secunda ratio. Hoc mysterium secundum se est omnino supernaturale, & nullo modo continentur in principiis, causis, & effectibus naturalibus, nec intellectus creatus habere potest propriam illius speciem propter eandem rationem. Ergo nullum est medium, quo possit naturalis ratio demonstrare illud esse possibile. Tertia ratio sumi potest ex naturali conjunctione inter naturam creatam, & propriam subsistentiam. Nam licet Angelus hæc comprehendat, & aliquo modo ex natura rei distincta esse cognoscat. Tamen cum se habeant tanquam res, & intrinsecus modus necessario connexus cum ipsa re ex natura sua: unde potuerit evidenter tueri talem rem posse separari a tali modo, & sine illo conservari? Sæpe enim accidit rem non posse conservari sine aliquo hujusmodi modo, ut quantitatem sine figura, multoque difficilius cognitu est hunc subsistendi modum per alienam subsistentiam, & rem omnino distinctam posse aliquo modo suppleri. Nam in aliis exemplis,



seu modis similibus id videtur fieri non posse, ut quantitatē affici & informari figura extrinseca, quæ non sit modus intrinsecus ejus, sed res omnino distincta, aut hominem sedere sessione simili. Nullum ergo est principium in assumpta natura, quo evidenter constet hoc mysterium esse possibile. Quarta ratio sumitur ex persona Verbi, quæ humano aut Angelico intellectu, & naturali lumine neque comprehenditur, nec prout in se est, cognoscitur. Quomodo ergo demonstrabitur, posse hanc personam sine sui mutatione, & imperfectione cum natura creata in compositionem venire? Quæ ratio procedit de quocumque intellectu creato, vel creabili. Qui sicut per vires naturales non potest intueri personam divinam, ita neque illud vinculum, & admirabilem unionem, quæ inter hanc personam & naturam creatam potest intercedere. Unde licet naturam creatam comprehendere possit, non tamen omnia, quæ juxta capacitatem obedientialem Deus potest in tali natura operari. Quin potius persuadere videntur hæc rationes, non posse intellectum creatum suis viribus relictum, etiam probabiliter assensu definite judicare incarnationem esse possibilem: sed vel nullam de tali mysterio cogitationem unquam habebit, vel certe, si fingamus eum in talem quæstionem incidere, & velle illam suo ingenio discutere, vel cohereret assensum, & dubius penderet, vel potius in errorem inclinaret, quia plura argumenta inveniret, quæ illum in talem assensum inducerent: ut clarius infra constabit, cum difficultates, quæ in hoc mysterio sunt, discutimus, nec mirum certe esset, si ita erraret, cum de mysterio, quod omnino naturam superat, per solam naturalem lumen judicare vellet.

**Objeccio.** Sed contra. Potest Angelus cognoscere naturaliter resurrectionem esse possibilem, vel accidens posse sine subiecto conservari; ergo & hoc mysterium esse possibile. Deinde posset saltem probabiliter hoc modo argumentari: Verisimile est, posse Deum, quicquid non demonstratur impossibile. Sed mysterium incarnationis non demonstratur impossibile (evidenter enim posset solvere argumenta omnia, quæ contra illud fiunt); ergo. Respondetur ad primum, antecedens in primis esse valde dubium: non enim facile invenietur naturali medio posse Deum per influxum causæ efficientis supplere dependentiam accidentis a subiecto, quæ ad genus causæ materialis revocatur. Deinde nec recte illud concluditur, multo enim altius est hoc mysterium, in quo Deus non solum separat res omnino distinctas, sed etiam modum prorsus intrinsecum, & illum supplet non per solam efficientiam, sed per intrinsecam, & mirabilem unionem. Unde (quod caput est) mysterium hoc Deum in se attingit, & ex hac parte minus cognosci potest, quam reliqua Dei opera.

Ad secundum respondetur, non posse ita solvi argumenta, ut convincantur falsum assumere, aut male inferre. Quia hoc deberet fieri per principia contraria, quibus constaret mysterium esse possibile: hæc autem nulla sunt; solum igitur solvi possunt (ut ajunt) negative, negando scilicet principia, quæ probari non poterunt. Quod satis est, ut non concludant, nec demonstrationes sint. Ex hujusmodi vero argumentorum solutione non potest inferri incarnationem esse possibilem, sed solum, vel id non demonstrari, vel saltem ignorari. Ex quo non fit, in re ipsa non repugnare, quia non quidquid impossibile est, evidenter est impossibile.

**Solutio.** Dico tertio, supposita fide, potest naturalis ratio ejusdem fidei lumine adjuncta, conjecturis, & exemplis uti, ut verisimile faciat hoc mysterium. Hoc præstant sancti primo variis exemplis, ut est illud desumptum ex conjunctione spiritualis animæ cum materiali corpore, & unius arboris alteri insitæ, & similitudine igniti, & candentis ferri, ut videre est in Theodor. Dialog. 2. de quibus similitudinibus plura infra disput. 7. sect. 2. & disput. 8. sect. 1. Secundo ex aliis fidei mysteriis argumenta sumuntur. Ut quia una divina natura est in tribus suppositis, possit etiam divina virtute fieri, ut plures naturæ in uno supposito conjungantur; sic enim fere argumentatur Bernard. serm. 3. in vigil. Nativ. Dom. & innumant Damasc. lib. 3. de fide cap. 1. August. lib. 3. de Trinit. cap. 17. Sic etiam, quia fecit Deus, ut accidens per se existat, cum natura sua non nisi in subiecto esse

possit, e contrario possit etiam facere, ut natura substantialis in alieno supposito existat, quamvis suæ naturæ relicta per se deberet subsistere. Quæ rationes supposita fide incarnationis probabiles sunt: per se tamen sumptæ non sufficerent, sicut de exemplo accidentis jam dictum est. De exemplo autem Trinitatis dici posset, licet absolute, & simpliciter majus mysterium sit, esse tamen magis consentaneum divinæ perfectioni, & propter hanc causam respondere posset aliquis mysterium incarnationis magis Deo repugnare: nihilominus tamen posita fide conjecturæ illæ satis congruentes sunt. Tertio illa etiam probabilis est, cum tota humana sapientia persuadere non potuerit hoc mysterium esse impossibile, credibile fieri illud esse possibile. Quia cum Deus sit omnipotens, quamdiu non probatur aliquid in se repugnare ex ipsamet Dei omnipotentia, verisimile sit ab ipso Deo fieri posse. Quarto, argumentatur Durandus, quia sustentare aliud perfectionis est, si rationem & imperfectionem potentia passivæ removeas; hoc autem fit in hoc mysterio, sustentat enim Verbum naturam humanam absque illa imperfectione potentia passivæ altiori quodam terminandi modo, quæ ratio sublata fide parum valeret. Negaret enim Philosophus esse posse talem sustentandi modum; ad declarandam tamen fidem admitti commode potest.

Dices, si, fide supposita, potest intellectus sua naturali vi mysterium hoc probabilibus rationibus confirmare ac suadere, ergo etiam absque ulla cognitione fidei posset saltem probabilibus rationibus hoc mysterium invenire, & possibile esse judicare. Respondetur negando consequentiam, primo, quia intellectus lumine fidei illustratus, & pro voluntatis affectu adiutus, plura potest, etiam suis viribus, investigare & invenire ad hanc veritatem confirmandam, quam posset his subsidiis destitutus. Secundo quia hæc eadem exempla ac conjecturæ, quibus nunc intellectus fide illustratus utitur, per se sola non sufficerent ad vincendam difficultatem & repugnantiam, quam lumen naturale habet circa hoc mysterium; & ideo, seclusa fide, non sufficerent ad ferendum iudicium etiam probabile, quod tale mysterium possibile sit; at vero postquam illa difficultas per fidem superata est, conferunt illa omnia ad probabiliter confirmandam creditam veritatem.

Dices ulterius, si, posita fide, potest intellectus probabiliter suadere hoc mysterium esse possibile; ergo posita visione Dei clara poterit hoc evidenter demonstrari. Respondetur, videndo clare Deum posse in ipso eadem claritate videri hoc mysterium, prout in se factum, aut possibile, quod sit eodem actu seu eadem formali visione, qua videtur Deus: si tamen illa visio solum concomitanter se habeat, aut tanquam principium extrinsecum, non potest ex illa, aut per illam inferri aliud cognitionis genus, quo mysterium hoc evidenter cognoscatur. Quia nullum est medium, quo ratio divinæ personæ, & illius supernaturalis modi, quo natura humana in illa persona esse potest, evidenter cognoscatur. Et ita nullum etiam est medium, quo possit inferri evidenter mysterium hoc esse possibile. Loquor autem de evidentia ipsius rei, quæ intrinseca dici solet, nam alia extrinseca, quæ dici solet in testificante, ad præsentem quæstionem non refert.

## SECTIO II.

*An incarnationem factam esse, possit contra infideles convinci.*

**H**ÆC quæstio ex superioribus expedita est, & ideo brevissime dicenda sunt duo: primum Incarnationem factam jam esse. Hoc est unum ex potissimis fundamentis nostræ fidei. Secundum est contra hæreticos hoc evidenter probari ex toto discursu novi Testamenti. Nunc sufficit illud Joan. 1. *Verbum caro factum est*. Et ad Philip. 2. *Non rapinam arbitratus est esse se æqualem Deo: sed semetipsum exinanivit formam servi accipiens*. Nec oportet plura contra hæreticos dicere. Tum quia nullus fere eorum simpliciter negat hoc mysterium esse factum: licet multi ita illud explicent, ut re ipsa tollant, quamvis verbis fateantur, contra quos infra q. 2. agendum est. Tum etiam, quia omnia, quibus supra



supra probavimus Christum esse Deum & hominem, hoc satis convincunt: & hoc idem argumentum esse debet contra Judæos. Non enim potest esse factum, ut idem Christus sit homo & Deus, quin aliqua unio facta sit inter humanam & divinam naturam: hanc vero unionem incarnationem appellamus. Contra alios vero infideles multo minus probari potest incarnationem esse factam, quam possibilem, quia hoc, præter totam difficultatem mysterii addit liberam Dei voluntatem, quæ non potest nisi per revelationem cognosci, cum ex nullo principio, aut effectu possit evidenter colligi. Non ergo possunt hi infideles ratione convinci: sed suadendi sunt, & ad hoc mysterium credendum trahendi, sicut ad reliqua nostræ fidei mysteria.

Sed quæret fortasse aliquis, an postquam factum est incarnationis mysterium, potuerit ex aliquo effectu, v. g. ex miraculis Christi evidenter cognosci illum hominem esse Deum, atque adeo mysterium incarnationis in illo esse perfectum. Hoc enim affirmare videntur Athan. lib. de humanitate Verbi, & Cyril. 8. contra Julian. & D. Thom. infra q. 43. & 44. Et augeri solet hæc difficultas. Quia saltem Angelus videns humanam naturam Christi privatam creatam subsistentia, poterat evidenter intelligere assumptam esse ad increatam.

Illud etiam in hac parte dubium est, quomodo mysterium hoc potuerit a nonnullis Gentilibus cognosci & prædici, antequam factum esset, si non poterat ratione naturali investigari. Illi enim fide carebant, & sola ratione naturali ducebantur. Quod vero ab illis fuerit præcognitum, satis constat ex prædictionibus Sibyllarum, quas refert Lactant. lib. 4. divin. instit. c. 15. & 18. Clemens Alexan. lib. 6. Strom. Cyril. lib. 8. contra Jul. & August. lib. 18. de civit. c. 23. & lib. 13. contra Faust. c. 27. & oratione contra Judæos, Paganos, & Arianos cap. 26.

Ad primam partem respondetur nulla opera vel effectus Christi Domini per se sumpta, & quatenus sub naturalem cognitionem cadere possunt, fuisse evidentiæ signa divinitatis hypostaticæ unitæ illi humanitati, si separantur ab illo testimonio, quo ipsemet Christus asserbat se esse Deum, in cujus confirmationem talia miracula faciebat: quia nullum fuit opus, nullum miraculum a Christo factum, quod non potuerit fieri a Deo per creaturam personaliter a se distinctam. Ut tamen illa miracula fiebant in confirmationem illius veritatis, qua Christus asserbat se esse Deum, sic erant sufficientia, & de se evidentiæ signa divinitatis Christi: sed illa non erat evidentiæ rei in se, sed in testificante, pendebat enim ex assertione, & testimonio ipsiusmet Christi.

Ad confirmationem illius difficultatis, quoniam ea ad materiam de Angelis spectat, & 1. p. q. 57. late tractatur, breviter hoc loco dicendum est, demonem, quamvis non videret in Christi humanitate subsistentiam creatam, non propterea vidisse, aut evidenter collegisse illam humanitatem per increatam subsistere; potuit enim dubitare, an illa natura humana omni esset privata subsistentia, vel an esset alicui supposito creato conjuncta. Quis enim scit, an evidenter cognoscat Angelus naturali cognitione, hæc duo implicare contradictionem? Vel certe dubitare potuit, an subsistentia illius humanitatis, quæcumque illa esset, sibi occultaretur a Deo propter specialem aliquam rationem providentiæ suæ. Denique fortasse improbable non est, potuisse in hoc demonem decipi, existimando Christi humanitatem non aliter subsistere, quam aliorum hominum naturas, quia quamdiu non videtur clare & in se conjunctio talis naturæ cum aliena persona, fortasse non aliter apparet existens, quam alia naturæ: quia carentia propriæ subsistentiæ intrinsece pendet ex modo, quo natura est in alieno supposito, unde fortasse videri non potest, nisi modus ille prius videatur.

Ad alteram partem respondetur, multo certius esse illas prædictiones Sibyllarum, & si quæ fuerunt aliarum similis, non potuisse ex sola naturali cognitione oriri, quia non solum erant de re omnino supernaturali, sed etiam de re futura, ex libera Dei voluntate pendente. Quare dicendum est, vel ipsas legisse propheticos libros, eisque fidem aliquam adhibuisse (ut in simili dixit August. lib. 10. de Trinit. cap. 29. de Platonis, qui de Verbi æterni generatione nonnulla in suis scriptis indicant); vel, quod verisimilius est, fieri potuit, ut gratia

Suarez Tom. XVI.

prophetiæ his hominibus vel mulieribus fuerit communicata, ut de Sibyllis indicat Clemens Alexand. lib. 1. Stromatum, & apertius docuit D. Thom. 2. 2. q. 2. art. 7. ad 3. Et de his, aliisque Philosophorum dictis, videri potest Clem. lib. 5. const. Apost. c. 8. Lactant. lib. 1. de falsa relig. c. 7. August. supra, & Euseb. lib. 1. de Præpar. c. 10. August. Eugub. fere toto lib. 1. de Peren. Philosoph. præsertim c. 25. & ult. Med. lib. 2. de Recta in Deum fide, c. 9.

## SECTIO III.

An Incarnatio fuerit per se conveniens.

DUOBUS modis, ut notat Clemens Alexand. lib. 1. Pædag. cap. 3. potest aliquod divinum opus esse conveniens: uno modo per se, tanquam propter se Deo amabile; alio modo propter aliquem, cui est necessarium, vel utile tale opus: de hoc posteriori modo dicemus cum D. Thom. artic. seq. prior vero modus hic explicandus est. Ratio autem convenientiæ in quadam habitudine, vel relatione consistit, vel sine illa explicari non potest: & ideo necesse est comparare hoc mysterium, & ad Deum ipsum, & ad humanam naturam non lapsam sed secundum se consideratam, & ad alias creaturas seu totum universum, ut explicemus, quomodo respectu singulorum fuerit hoc mysterium per se conveniens.

Dico primo, opus Incarnationis fuit per se conveniens ipsi Deo, id est, maxime consentaneum divinæ bonitati, & perfectioni, quamvis illi nullam commoditatem, vel perfectionem attulerit. Hæc conclusio satis explicata est circa litteram D. Thom. hanc enim ipse intendit, & hanc bene confirmat, & declarat ratione sua. Solum possumus hic addere verba ejusdem D. Thom. opusc. 60. quod est de humanitate Christi: *Congruebat, inquit, hoc opus Deo, quem decebat sapientiam suam ostendere, potentiam & bonitatem. Quid autem potentius, quam conjungere extrema summe distantia? magna enim potentia fuit in conjunctione disparium elementorum, major in conjunctione illorum ad spiritum increatum. Quid vero sapientius, quam quod ad complementum totius universi fieret conjunctio primi & ultimi, hoc est, verbi Dei, quod est omnium principium, & humane nature, quæ in operibus sex dierum fuit ultima omnium creaturarum? Quid benignius, & melius, quam quod creator rerum communicare se voluit rebus creatis? Quæ benignitas, magna fuit in conjunctione sui cum omnibus rebus per præsentiam, major, quia communicavit se bonis per gratiam, maxima, quia se communicavit Christo homini, & per consequens generibus singulorum, in unitate persone.* Hæc D. Thomas. Et idem discursus fieri potest, discurrendo per omnia fere Dei attributa. De quo legi possunt Damasc. lib. 1. de fide cap. 1. & 27. Leo serm. 1. de Nativ. Athan. lib. de corp. Christi, Chrysost. homil. in Joan. August. Bernar. Anselmus locis citatis.

Dico secundo, quamquam incarnatio sit supra debitum, & conditionem humanæ naturæ, fuit tamen illi valde conveniens, id est, magnum bonum, & perfectionem illi afferens. Conclusio fere per se nota est: declaratur tamen primo, quia per hoc mysterium factum est, ut verus homo sit verus Deus: unde fit consequens, ut quidam homo sit superior omnibus Angelis, & sit capax multarum perfectionum, quarum nulla pura creatura potest esse capax, ut infiniti meriti, perfectæ iustitiæ coram Deo, & aliarum similium. Unde Augustinus de prædest. sanct. cap. 25. dicit: *ita esse hoc mysterio sublevatam humanam naturam, ut quo altius attollatur, non habeat; & quamvis hæc dignitas illius individuae naturæ, quæ specialiter assumpta est, singularis esse videatur, tamen in totam naturam redundat.* Propter quod fortasse dixit Paulus 2. Corint. 2. prædestinasse Deum hoc mysterium ad gloriam nostram. Secundo, inquit Augustinus in Manuali cap. 26. *Ut familiarius diligeretur ab homine Deus, in similitudinem hominis Deus apparuit.* Fuit itaque conveniens homini beneficium hoc, ut ad majorem Dei amorem, majusque charitatis vinculum excitaretur. Unde Christus Luc. 12. inquit: *Ignem veni mittere in terram.* Est enim amor, & ostensio amoris causa efficacissime movens ad amandum: in hoc autem opere maxime ostendit Deus

Duplex ratio convenientiæ.

Incarnationis mysterium per se conveniens Deo.

Incarnatio humanæ nature valde conveniens.



amorem suum erga homines, juxta illud Joan. 3. *Sic Deus dilexit mundum, ut Filium suum unigenitum daret.* Nam teste Dionys. c. 4. de divinis nominibus amor est unitivus: sicut ergo per hoc mysterium Deus maxime unitur homini, ita maximam dilectionem suam erga illum ostendit. Unde Clemens Alexand. lib. 1. pædag. cap. 3. *Homo, inquit, a Deo diligitur. Qui enim fieri potest, ut non diligatur, propter quem Unigenitus a sinu Patris dimittitur?* Propter quod dicit ad Patrem Christus, Joan. 17. *Dilexisti eos, sicut & me dilexisti.*

Deinde similitudo est causa amoris. In hoc autem mysterio Deus in similitudinem hominum factus est, & habitu inventus ut homo, & ideo factus est hominibus maxime amabilis: de qua ratione videri potest August. supra, & lib. de catechizandis rudibus cap. 4. & Bernard. ferm. 20. in Cantic. nam licet, quæ ibi dicit potissimum propter redemptionem ab eo dicta sunt, optime tamen ad ipsum mysterium Incarnationis secundum se possunt applicari.

Tertia ratio sumitur ex Paulo 1. ad Corint. 1. ubi de Christo inquit: *Factus est nobis sapientia, justitia, & sanctificatio.* Nam hæc tria bona per se fuerunt humanæ naturæ convenientissima. Inprimis enim fuit valde utile homini doceri ab ipso Unigenito: *Qui lux vera est, quæ illuminat omnem hominem,* Joan. 1. & ideo Joan. 18. de se dicit Christus: *Ego in hoc natus sum, & ad hoc veni in mundum, ut testimonium perhibeam veritati.* Id est, ut veram beatitudinem, & optimam viam ad illam comparandam homines doceam. De qua ratione elegantissime August. de Civit. cap. 2. Deinde fuit homini convenientissimum, ut habere posset jus perfectæ justitiæ ad gratiam & gloriam comparandam. Quocirca quod Paulus ad Rom. 5. dicit, positum esse Christum in ostensionem justitiæ divinæ, non solum verum est de justitiâ vindicativa, quæ solum habet locum supposito peccato: sed etiam de distributiva, & suo modo de commutativa, quæ in distributione præmiorum, & remuneratione meritorum per se relucet. Denique magna hominum dignitas, & utilitas est, ut aliquis homo sit fons totius sanctitatis, & gratiæ, ut etiam per hoc mysterium effectum est. Juxta illud Joan. 8. *Ego veni, ut vitam habeant, & abundantius habeant;* & ad Ephes. 1. *Benedixit nos Deus omni benedictione spirituali in cælestibus in Christo.*

Quarta ratio sumitur ex August. tract. 80. in Joan. *Unus, inquit, natura sunt vitis & palmites, cum ergo esset Deus, cujus natura non sumus, factus est homo, ut in illo esset vitis humana natura, cujus nos palmires esse possemus.* Quod alio modo dicunt Theologi fuisse conveniens Deum fieri hominem, ut in genere gratiæ haberent homines caput homogeneum, & habet fundamentum in Paul. Colos. 1. & ad Ephes. 4. Et addi potest, cum una Ecclesia ex hominibus & Angelis constituatur, oportuisse, ut unum & idem sit caput Angelorum & hominum, 1. ad Corinth. 12. Voluit autem Deus hujusmodi caput potius hominem esse, quam Angelum, vel ut gratia Dei clarius cognosceretur; cum enim Angeli homini subduntur, constat id non perfectioni humanæ naturæ, sed gratiæ illi donatæ esse tribuendum; vel quia, cum homines, qui natura sua sunt inferiores Angelis, ad eandem gloriam & beatitudinem ordinentur, dequit, ut illa inæqualitas per gratiæ excellentiam, & personalem dignitatem unius hominis, quasi compensaretur, vel etiam superaretur.

Ultima ratio sumitur ex Cypr. lib. de Cardinalibus Christi operibus cap. de nativitate Christi, ubi dicit, Christum factum esse hominem, ut homo haberet in Deo, unde fieri posset plene beatus, in anima, videndo divinitatem, in corpore, videndo humanitatem, ut tota hominis conversio esset ad Christum. Quæ ratio fundamentum habere potest in verbo illo Joan. 17. *Hæc est autem vita æterna, ut agnoscant te solum verum Deum, & quem misisti Jesum Christum.* Et eandem rationem habet Augustin. lib. de spiritu & anima cap. 4. (si illius est opus) & optime in Manuali cap. 25. *Deus, inquit, propter homines factus est homo, ut uterque sensus hominis in ipso bevisficaretur, ut relictus esset oculus cordis in ejus divinitate, & oculus corporis in ejus humanitate, ut si ve egrediens, sive ingrediens in ipso pascua eveniret humana natura condita ab ipso.*

Dico tertio, etiam ad perfectionem, & quasi complementum universi fuit convenientissimum Incarnationis mysterium. Declaratur primo: requirit enim completa universi perfectio, ut constet omnibus rerum ordinibus, & hoc modo sit Deo quam simillimum: similiterque ostendi potest fuisse conveniens dari in rebus creatis quoddam esse spirituales, & intellectuales: similiterque ostendi potest fuisse conveniens dari in rebus creatis ordinem gratiæ & gloriæ præter totius naturæ ordinem. Eodem ergo modo concludimus unionem hypostaticam fuisse convenientem rerum universitati, ut esset omni ex parte perfecta.

Confirmatur, quia cum in omnibus substantiis creatis una natura integra sit in una persona, & in divina substantia una natura sit in pluribus personis, ut quinque differentie rerum invenirentur, conveniens fuit advenire modum, quo plures naturæ essent in una persona. Similiter colligit Leo Papa, conveniens fuisse dari productum hominem ex muliere sine viro, quia jam alii tres modi producendi hominem inventi fuerant, nempe ex viro sine foemina, ex foemina & viro, & abique viro & foemina, per productionem ex nihilo.

Ultimo ex hoc mysterio ad omnes creaturas quadam peculiaris dignitas redundavit, quia in naturâ hominis omnes res creatæ quodammodo continentur, & ideo assumendo illam naturam, omnes creaturas quodammodo Deus sibi specialiter copulavit, ut eleganter explicavit Damasc. orat. de Transfigur. Domini, sub finem dicens: *Benigna Patris voluntas in unigenito Filio universis salutem operata est, & rerum omnium connexionem effecit: nam, cum parvus mundus homo sit, ut qui essentia omnis, tum in aspectum cadentis, tum oculorum aciem fugientis, nodum ac vinculum in seipso ferat, atque hoc & illud sit, re vera benigna omnium rerum Domini, & creatoris, ac gubernatoris voluntas hoc tulit, ut in unigenito, & consubstantiali Filio suo divinitatis ac humanitatis, ac per eam conditarum omnium rerum connexio fieret, ut sit Deus omnia in omnibus.* Atque mysterium hoc multi existimant indicatum esse a Paulo, cum dicit ad Ephes. 1. omnia esse in Christo instaurata. Nam verbum Græcum capitulare significat, ut ibi Hieron. notavit: dicuntur autem omnia esse recapitulata in Christo, ut sentit etiam Iren. lib. 3. cap. 18. quia cum omnia in natura humana, quasi in summa contineantur, assumpta hac natura a Verbo, cæteræ res omnes veluti in summam redactæ, illi censentur conjunctæ. Hæc etiam ratione in Scriptura nomine universalitatis interdum homo significatur, ut notavit Gregor. 6. Moralium cap. 7. & 8. Damasc. lib. 2. cap. 12. ergo eadem ratione possunt dici omnia instaurata per hoc mysterium propter novam dignitatem & excellentiam omnibus collatam. Et propterea fortasse omnes creaturæ invitantur ab Isai. cap. 45. ad hoc mysterium perficiendum. *Rorate cæli desuper, &c.* Et Joan. 3. amor totius mundi idem mysterium tribuitur. Erad eandem rationem accommodari potest nomen, quo solent Patres Græci hoc mysterium appellare; vocant enim illud *œconomiam*, ut videre est in Nazianz. orat. 42. non longe a principio, & Justino in expositione fidei: est enim œconomia, quasi universalis dispensatio, per incarnationem autem toti universo provisum est, quia in totius cedit utilitatem. Quamquam hoc etiam ratione humanæ redemptionis veritatem habeat, quod dicti Patres magis videntur attendisse.

Tandem addendum est, Deum, cum voluit hoc perficere mysterium, prædictas rationes omnes, & infinitas fortasse alias intendisse: omnes enim sunt ex Scriptura & Patribus desumptæ, Deusque, qui omnia perfectissima ratione vult, atque decernit, eas rationes omnes habuit ante oculos. Denique August. 13. de Trinit. cap. 17. alia multa esse dicit, quæ in Christi incarnatione salubriter intuenda, & cogitanda sunt. Et S. Thom. 4. cont. gent. cap. 45. dicit pie considerantem hoc mysterium tantam invenire sapientiæ profunditatem, ut illius semper magis ac magis admirabiles rationes manifestentur.

#### ARTICULUS II.

Utrum necessarium fuerit ad reparationem generis humani verbum Dei incarnari.

**A**d secundum sic proceditur: Videtur, quod non fuerit necessarium ad reparationem humani generis. 3. d. 4. q. 3. art. 1. ad 2. & 4. d. 10. q. 2.



ar. 1. ad 3.  
& d. 43. ar.  
2. q. 3. ad  
2. & 4. cōt.  
a. 55. 2.  
Et Plal.  
43. cor. 6.  
p. p. q. 4.  
ar. 1. & 5.

verbum Dei incarnari. Verbo enim Dei, cum sit Deus perfectus (ut in primo habitum est) nihil virtutis per carnem assumptam accrevit. Si ergo Verbum Dei incarnatum humanam naturam reparavit, etiam absque carnis assumptione eam potuit reparare.

2. Præterea, ad reparationem humanæ naturæ, quæ per peccatum collapsa erat, nihil aliud requiri videbatur, quam quod homo satisfaceret pro peccato. Sed homo, ut videtur, satisfacere potuit pro peccato: non enim Deus ab homine plus requirere debet, quam possit: & cum prior sit ad miserendum, quam ad puniendum, sicut homini imputat ad pœnam actum peccati, ita imputare debet ad meritum actum contrarium. Non ergo fuit necessarium ad reparationem humanæ naturæ, Verbum Dei incarnari.

3. Præterea ad salutem hominis præcipue pertinet, ut Deum revereretur: unde dicitur Malach. 1. Si ego Pater, ubi honor meus? Si Dominus, ubi timor meus? Sed ex hoc ipso homines Deum magis reverentur; quod eum considerant super omnia elevatum, & ab hominum sensibus remotum: unde in Psalm. 112. dicitur. Excelsus super omnes gentes Dominus, & super cœlos gloria ejus: & postea subditur: Quis sicut Dominus Deus noster? Quod ad reverentiam pertinet. Ergo videtur non convenire humana salutem, quod Deus nobis similis fieret per carnis assumptionem.

Sed contra. Illud, per quod humanum genus liberatur a perditione, est necessarium ad humanam salutem. Sed mysterium divine Incarnationis est huiusmodi, secundum illud Joannis 3. Sic Deus dilexit mundum, ut Filium suum unigenitum daret, ut omnis, qui credit in ipsum, non pereat, sed habeat vitam æternam: ergo necessarium fuit ad humanam salutem Deum incarnari.

b. Respondeo dicendum, quod ad finem aliquem dicitur aliquid esse necessarium dupliciter. Uno modo, sine quo aliquid esse non potest: sicut cibus est necessarius ad conservationem humanæ vitæ. Alio modo, per quod melius & convenientius pervenitur ad finem: sicut equus necessarius est ad iter. Primo modo, Deum incarnari non fuit necessarium ad reparationem humanæ naturæ. Deus enim per suam omnipotentem virtutem poterat humanam naturam multis aliis modis reparare.

c. Secundo autem modo necessarium fuit Deum incarnari ad humanæ naturæ reparationem. Unde Augustinus dicit 13. de Trinit. cap. 10. Verum etiam ostendimus non alium modum possibilem Deo defuisse (cujus potestati omnia aequaliter subjacent), sed sananda miseria nostræ convenientiorem alium modum non fuisse.

Et hoc quidem considerari potest quantum ad promotionem hominis in bonum. Primo quidem quantum ad fidem, quæ magis certificatur ex hoc, quod ipsi Deo loquenti credit. Unde Aug. dicit 11. de Civ. Dei: Ut homo fidentius ambulet ad veritatem, ipsa veritas Dei filius homine assumpto constituit atque fundavit fidem. Secundo, quantum ad spem, quæ per hoc maxime erigitur. Unde Augustinus dicit 13. de Trinit. Nihil tam necessarium fuit ad erigendam spem nostram, quàm ut demonstraretur nobis quantum diligeret nos Deus: quid vero huius rei isto indicio manifestius, quam quod Dei filius naturæ nostræ dignatus est inire consortium? Tertio quantum ad charitatem, quæ maxime per hoc excitatur. Unde Augustinus dicit in lib. de catechizandis rudibus. Quæ major est causa adventus Domini, nisi ut ostenderet Deus dilectionem suam in nobis? Et postea subdit: Si amare pigeat, saltem redamare non pigeat. Quarto, quantum ad rectam operationem, in qua nobis exemplum se præbuit. Unde Aug. dicit in quodam serm. de Nativitate Domini. Homo sequendus non erat, qui videri poterat: Deus sequendus erat, qui videri non poterat. Ut ergo exhiberetur homini, & qui videretur ab homine, & quem homo sequeretur, Deus factus est homo.

Quinto, quantum ad plenam participationem divinitatis, quæ vera est hominis beatitudo & finis humana vitæ: & hoc collatum est nobis per Christi humanitatem. Dicit enim Augustinus in quodam sermone de Nativitate Domini. Factus est Deus homo, ut homo fieret Deus. Similiter & hoc utile fuit ad remotionem mali.

Primo. n. per hoc homo instruitur, ne sibi diabolus præferat, & ei veneretur, qui est author peccati. Unde Augustinus dicit 13. de Trinit. Quandoquidem sic potuit Deo conjungi humana natura, ut fieret una persona, superbi illi maligni spiritus, non ideo se audeant homini præponere,

quia non habent carnem. Secundo, per hoc instruitur quanta sit dignitas humane naturæ, ne eam inquinemus peccando. Unde Augustinus dicit in libro de vera religione. Demonstravit nobis Deus quam excelsum locum inter creaturas habeat humana natura, in hoc quod hominibus in vero homine apparuit. Et Leo Papa dicit in sermone de Nativitate. Agnosce o Christiane dignitatē tuā: & divine consortis factus natura, noli in veterē vilitatem degeneri conversatione redire. Tertio, quia ad præsumptionem hominis tollendam, gratia Dei in nobis nullis meritis præcedentibus in homine Christo commendatur, ut dicitur in 13. de Trinit. Quarto, quia superbia hominis, quæ maxime impedimento est, ne inhereatur Deo, per tantā Dei humilitatē redargui potest atque sanari, ut dicit Aug. ib.

d. Quinto, ad liberandum hominem a servitute peccati: quod quidem, ut Aug. dicit 13. de Trinit. fieri debuit sic, ut diabolus iustitia hominis Jesu Christi superaretur: quod factum est Christo satisfaciēte pro nobis. Homo autem purus satisfacere non poterat pro toto humano genere: Deus autem satisfacere non debebat: unde oportebat Deum & hominem esse Jesum Christum. Unde & Leo Papa dicit in sermone de Nativitate. Suscipitur a virtute infirmitas, a maiestate humilitas: ut quod nostris remediis congruebat, unus atque idem Dei & hominum mediator mori ex uno, & resurgere possit ex altero. Nisi enim esset verus Deus, non adferret remediū, nisi esset verus homo, non præberet exemplū. Sunt autem & aliæ plurimæ utilitates, quæ consequutæ sunt, supra apprehensionē sensus humani.

e. Ad primum ergo dicendum, quod ratio illa procedit secundum primum modum necessarii, sine quo ad finem perveniri non potest.

f. Ad secundum dicendum, quod aliqua satisfactio potest dici dupliciter sufficiens. Uno modo perfecte: quia est condigna per quandam adæquationem ad reparationem culpæ commissæ: & sic hominis puri satisfactio sufficiens esse non potuit pro peccato. Tum quia tota humana natura erat per peccatum corrupta, nec bonum aliquius personæ, vel etiam plurium poterat per æquiparantiam totius naturæ detrimentum recompensare. Tum etiam, quia peccatum contra Deum commissum, quandam infinitatem habet ex infinitate divine maiestatis: tanto enim offensæ est gravior, quanto maior est ille, in quem delinquitur. Unde oportuit ad condignam satisfactionem, ut actus satisfaciētis haberet efficaciam infinitam, utpote Dei & hominis existens. Alio modo potest dici satisfactio hominis esse sufficiens imperfecte, scilicet secundum acceptationem ejus, qui est ea contentus, quamvis non sit condigna. Et hoc modo satisfactio puri hominis est sufficiens. Et quia omne imperfectum præsupponit aliquid perfectum, a quo sustentetur, inde est, quod omnis puri hominis satisfactio efficaciam habet a satisfactione Christi.

Ad tertium dicendum, quod Deus assumendo carnem, suam maiestatem non minuit: & per consequens non minuitur ratio reverentiæ ad ipsum, quæ augetur per augmentum cognitionis ipsius. Ex hoc autem, quod nobis appropinquare valuit per carnis assumptionem, magis nos ad se cognoscendum attraxit.

# COMMENTARIUS.

Ostendit D. Th. art. præceden. mysterium incarnationis esse propter se conveniens: nunc docet etiam propter alium, seu propter extrinsecum finem, vel effectum expedire. Solum autem agit de fine, scilicet, redemptione hominis, quia hunc potissime nobis scriptura proponit, & nullus excogitari vel nobilior, vel tanto mysterio dignior potest. Denique, quia omnes alios fines in se comprehendit. Quærit autem non solum, an conveniens sit: sed etiam an sit necessarium, ut non tantum convenientiam, sed quoque & gradum ejus nobis declare: tum quia revera quidam necessitatis modus hic intercedit.

b. Respondet ergo D. Th. duplici assertionem. Prior est negans incarnationem fuisse simpliciter necessariam ad reparationem hominis, quia Deus (quæ illius est omnipotentia) posset aliis modis homini subvenire. Contra quam solum obijci potest argumentum, Sed contra, ipsius D. Th. quia in scriptura proponitur incarnatio, ut medium ad salutem necessarium. Neque. n. est aliud nomen datam hominibus, in quo oporteat nos salvos fieri. Ut dicitur Act. 4. Dicendum vero est, dupliciter dici posse aliquod medium necessarium ad nostram salutem,

c. 16. non  
procul a  
princip.  
tom. 1.

In ser. 5.  
post med.  
illius, in  
cipit huius  
sermo.  
Salva. oc  
nostr.  
Li. 13. c.  
17. ante  
med. to 3.

Eod. 1 b.  
& c. habetur  
post  
medium  
illius 1 b.  
13. c.  
Titi. c.  
13. tom. 3.  
In serm.  
post in e  
dij. illius.

Arist. 5.  
Metaph.  
sex. 6.  
tom. 3.

Lib. 13. c.  
10. non  
longe a  
princip. to.  
3.

Lib. 11. c.  
2. a med.  
tom. 5.

Lib. 13. c.  
10. non  
procul a  
princip.  
tom. 3.

Cap. 4. in  
prin. to. 4.  
Eod. lib.  
& c. 4. non  
procul a  
prin. to. 4.

In ser. 9.  
circa  
prin. c. il  
lus, & c.  
ser. 13. in  
ordine  
tom. 10.  
Lib. 3. ca.  
17. circa  
Princip.  
tom. 3.

Titulus  
a. c. ult.

Respon  
sionem.



uno modo ex institutione divina, & supposita Dei voluntate, & ordinatione: & hoc modo est nunc incarnatio medium necessarium ad salutem. Quia decrevit Deus in hoc viro omnes salvare, ut dicitur Actuum 17. Et hoc modo procedit argumentum factum. D. autem Th. hoc non negat. Alio modo potest dici medium necessarium simpliciter, & absolute, non quia Deus illud voluit: sed potius, quia ipsi divinæ voluntati necessarium fuit uti tali medio, supposita intentione talis finis. Et hoc modo procedit conclusio D. Th. & contra illam non procedit argumentum factum, quia scriptura non dicit incarnationem esse hoc posteriori modo necessariam, sed priori tantum. Unde obiter intelligitur, argumentum, Sed contra, D. Th. non probare necessitatem simpliciter, sed ex suppositione; probare tamen absolute convenientiam, quia medium illud, quod Deus voluit esse unicum, & necessarium ad reparationem nostram, non potest non esse tali fini accommodatissimum.

c Posterior assertio est, incarnationem ita esse convenientem ad nostram reparationem, ut nullum potuerit esse aptius, vel convenientius medium ad talem finem, atque adeo, ut dici possit necessaria ad melius esse, seu ad modum optimum reparationis nostræ. Hoc probat D. Th. decem rationibus sumptis ex sanctis Patribus, quæ per se satis claræ sunt. Solum est in eis observandum primo, quinque primas rationes, quæ sumuntur ex promotione hominis ad bonum, non solum procedere supposito lapsu humanæ naturæ, sed per se habere locum etiam in statu naturæ integræ. Nam in illo etiam homo esset capax fidei, spei, charitatis, participationis divinæ naturæ, & rectæ operationis, in quibus bonis omnibus posset per incarnationis mysterium plurimum juvari, ut per se constat. Simili modo ex quinque rationibus, quæ ex remotione mali sumuntur, quatuor priores non necessario supponunt lapsum naturam; quia duobus modis potest malum ab homine removeri, primo postquam inest homini, secundo præveniundo, ne in sit: quamquam ergo peccatum non esset, posset homo per incarnationem præveniri, ne illud committeret, nam ex tanto mysterio induci posset vel ad maiorem gratiæ divinæ æstimationem, vel ad maiorem humilitatem & subjectionem ad Deum, vel ad suæ naturæ commendationem, ne illam peccando maculare auderet, aut dæmoni subicere, quam ad tantam dignitatem evectam agnosceret. Sed licet verum sit, rationes has potuisse habere locum, etiam non existente peccato, magis tamen urgent, eoque maiorem necessitatem inferunt, quo humana natura debilior, ac infirmior per peccatum effecta, maioribusque indiget divinis auxiliis, ut in bono promoveatur, & a malo liberetur.

d Ultima vero ratio supponit necessario lapsum, ex quo orta est maxima necessitas tanti mysterii, ut remissio culpæ fiat servata perfectæ justitiæ æquitate, & intercedente condigna, & omnino iusta satisfactio. Quia purus Deus non est capax illius, purus autem homo est impotens ad illam, & ideo necessarius erat Deus homo, qui posset ex toto rigore justitiæ satisfacere. De qua ratione in sequenti disputatione fusius tractandum est. Hic solum ad intelligendam mentem D. Th. observandum videtur, ipsum distinguere hoc loco purum hominem ab homine Deo. Unde necessario sequitur non vocare purum hominem eum, qui habet puram seu nudam naturam humanam sine gratia Dei, sed eum, qui est persona creata, etiam si quamcumque gratiam creatam habeat: quod sic declaro, nam ex eo quod purus homo est impotens ad perfectæ satisfaciendum, infert necessitatem hominis, qui simul sit Deus. Hæc autem consecutio esset bona, nisi de puro homine in dicto sensu loqueretur: posset enim responderi, argumentum procedere ex puris particularibus, quia inter hominem purum in alio sensu, & Deum hominem daretur medium, scilicet homo sanctus, qui neque esset Deus homo, neque purus homo in illo sensu. Quod etiam aperte colligitur ex Leone Papa, cuius testimonio D. Th. suam sententiam confirmat, qui inter alia ait: *Nisi esset verus Deus, non afferret remedium*. Ergo homo purus, & impotens ad remedium ferendum dicitur omnis ille, qui non est verus Deus, & plura circa hoc notabimus in solutione ad 1.

e Primum argumentum D. Th. est: per assumptionem carnis nullam perfectionem, vel potentiam Ver-

bum acquisivit; sed Verbum incarnatum potuit hominem lapsum reparare; ergo & non incarnatum; ergo ad illum finem non fuit necessaria incarnatio. Respondet D. Th. hoc argumentum probare primam conclusionem. Sed contra, quia urgeri potest contra secundam, sic proportionem servata argumentando. Verbum incarnatum potuit ex perfecta iustitia hominem lapsum reparare; ergo & non incarnatum, quia nihil potestatis addidit illi caro. Respondetur tamen negando consequentiam. Ad illam vero propositionem, in qua est vis argumenti, scilicet per incarnationem Verbum non est factum potius, seu nihil potestatis illi additum est. Respondetur aliud esse, quod pertinet ad omnipotentiam simpliciter, quod nullam supponit imperfectionem in operante: aliud vero, quod pertinet ad efficientiam, seu modum efficiendi in aliquo genere, quod non pertinet ad omnipotentiam simpliciter, quia includit imperfectionem in operante. Verbum ergo per incarnationem nihil potuit efficere, quod sine carne non posset ex his, quæ pertinent ad omnipotentiam simpliciter; potuit autem aliquid facere in aliquo genere, quod sine carne non posset, ut potuit ambulare, comedere, & similia, & eodem modo potuit satisfacere & mereri; hæc enim non pertinent ad omnipotentiam simpliciter: & ex his intelligitur solutio D. Thomæ. Si enim loquamur de potestate absoluta reparandi hominem lapsum, quia illa non includit ullam imperfectionem, neque requirit actionem, quæ illam supponat, admisit D. Thomæ. potuisse Verbum sine carne reparare hominem, & eodem modo dixit non fuisse Verbo simpliciter necessariam carnem ad hoc efficiendum: at vero loquendo de potestate liberandi tali modo, scilicet per viam satisfactionis, quia hæc præter omnipotentiam simpliciter addit quandam potestatem secundum quid, ideo non valet argumentum a Verbo incarnato ad Verbum secundum se, nec sequitur incarnationem non fuisse necessariam simpliciter ad illum modum reparandi humanam naturam.

f Secundum argumentum D. Th. est contra ultimam 2. Argum. partem secundæ conclusionis, & est huiusmodi. Purus homo potuisset satisfacere pro culpa: ergo non fuit necessaria satisfactio; ergo neque incarnatio. Respondet distinguendo antecedens; purus homo potest satisfacere perfecte, id est, secundum quandam adæquatam rationem, & recompensationem offensæ, negatur antecedens; non enim potest purus homo hoc modo satisfacere, tum propter generalem offensionem, & maculam, quæ totam naturam humanam infecit; tum quia Deus offensus est persona infinita, cui ad æqualitatem satisfieri non potest, nisi per actum infinitæ satisfactionis, qui solum fieri potest ab homine Deo. At vero imperfecte posset purus homo satisfacere, & sic conceditur antecedens, & negatur consequentia. Quia oportuit, & decuit, ut satisfactio esset perfecta, in qua omnis alia imperfecta satisfactio fundaretur. Et ex hac doctrina probantur duæ propositiones, quæ in corpore articuli in ultima ratione assumptæ erant, & sola sententia Leonis Papæ confirmata, scilicet purum hominem non posse perfecte satisfacere, & Deum hominem posse, de quibus latissime in sequenti disputatione. Hic solum est iterum observandum (quia Cajet. corrumpit sensum D. Th.) purum hominem eodem modo sumi in hac solutione, quo explicatum est in corpore articuli. Neque enim sine causa & contra omnem rationem dicendum est, æquivoco D. Th. fuisse usum illa voce contra constantiam & firmitatem doctrinæ. Quod etiam aperte hic constat, quia argumentum procedit de puro homine, ut distinguitur ab homine Deo, & est persona creata, etiam si gratiam habeat; quia si purus homo, quantumvis gratus, posset perfecte satisfacere, recte concluderetur argumentum, propter hunc effectum non esse necessariam simpliciter incarnationem. Unde etiam in solutione, ex hoc quod purus homo hoc non potest, concludit D. Th. hoc modo: *Unde oportuit, ad condignam satisfactionem, ut actus satisfaciens habeat infinitam efficaciam, ut pote Dei & hominis existens*. Ergo evidenter supponit, omnem illum, qui non est Deus homo, esse purum hominem. Denique admittit D. Th. hoc loco, purum hominem posse imperfecte satisfacere; sed hoc non potest sine gratia; ergo etiam hominem



nam gratum vocat purum hominem. Tertium argumentum est moralis conjectura, quod clare & optime expedit D. Thom.

## DISPUTATIO IV.

In duodecim sectiones distributa.

*De convenientia & necessitate Incarnationis ad reparationem hominis lapsi.*

**P**ræfens disputatio supponit in primis, totum humanum genus per lapsum primi hominis corruisse, divinamque inimicitiam contraxisse. Quod principium fere omnes patres in initio hujus materiæ præmittunt: ut videre est in Athanas. lib. de incarn. Verbi, to. 1. & lib. de salutari Christi adventu tom. 2. Nazian. oratio. 42. & 51. Cyril. lib. 4. contra Julia. Damas. lib. 3. c. 1. Lactan. lib. 4. divin. institut. c. 10. & Ansel. in lib. cur Deus homo, & aliis patribus frequentissime: de quo in 1. 2. ex professo disputatur in materia de peccato originali. Secundo supponit hæc disputatio, Verbum factum esse hominem, ut homines a peccati morte liberaret. Hoc unum ex primis fundamentis nostræ fidei, quod in scriptura, præsertim in novo testamento, passim asseritur, & in discursu hujus & sequentis disputationis plura testimonia necessario afferemus, & inferius agentes de merito Christi idem late confirmabimus. Et hinc sufficienter concluditur, hoc medium fuisse accommodatum illi fini. Deus enim, qui prudentissime & sapientissime operatur universa, ad fines, quos intendit, non nisi proportionatis utitur mediis. Quæ quidem proportio, ac convenientia in hac disputatione explicanda est. Quia vero medium interdum esse potest utile & conveniens, interdum etiam necessarium, ideo utrumque in disputatione positum est: atque initium sumendum est ab ipso fine, quoniam necessitas vel convenientia mediæ necessitatem aut convenientiam finis præsupponit.

## SECTIO I.

*Utrum necessarium vel conveniens fuerit Deum hominem lapsum reparare.*

**D**ico primo, redemptionem lapsi hominis non esse opus ex necessitate a Deo factum, sed omnino liberè: itaque potuit sine ulla imperfectione aut indecentia lapsum hominem sine remedio relinquere. Conclusio est certissima, & sumitur ex omnibus Scripturæ locis, in quibus beneficium hoc tribuitur maxime Dei charitati & benevolentia. Joan. 3. *Sic Deus dilexit mundum, &c.* Joan. 15. *Majorem hac charitatem nemo habet, &c.* Ad Rom. 5. *Commendat autem charitatem suam Deus.* Ad Ephes. 2. *Deus autem qui dives est in misericordia, &c.* Si autem intervenisset necessitas, & non libertas, nullum fere esset beneficium. Unde Psal. 93. dicitur, *Deus ultionum Dominus, Deus ultionum libere egit.* Sapient. 12. *Nec timens aliquem venit ad dantes peccatis.* Et ideo in Scriptura Dei voluntati tribuitur, quod hominem salvare decreverit, & suo arbitrio salutem ejus dispensaverit. Ad Rom. 1. & 9. 1. Corinth. 1. 1. Isai. 4. Hier. 18. Et ratio evidenter hoc docet, suppositis principiis fidei. Si enim Deus in operibus suis liber est, cur non etiam in hoc opere redemptionis? Est enim eadem ratio. Si enim alia opera non sunt Deo necessaria ad illius bonum, & beatitudinem, ita neque lapsum hominum reparatio. Nihil enim minus beatus esset Deus, si homines in sua miseria relinqueret. Confirmatur, nam si creare homines non fuit necessarium Deo, cur esset redimere? Dices forte, ne opus relinqueretur imperfectum, aut ne gloriaretur dæmon, quod victoriam reportasset. Hæc tamen sunt congruentiæ debilissimæ ad necessitatem ostendendam. Nihil enim derogat Deo, quod ejus opus imperfectum maneat, non ex impotentia Dei, sed ex malitia hominum: præsertim quia potuisset Deus illud perficere, alios homines creando, & de peccatoribus vindictam sumendo; neque inde haberet dæmon justam aliquam gloriam, sed confusionem potius. Et hinc clare constat, etiam oblata occasione peccati, non fuisse necessarium Deo,

fieri hominem, ad reparandos homines: quia potuisset illos non reparare.

Contra hanc veritatem objici possunt verba Athanas. lib. de incarnat. Verbi, ejusque corporali ad nos adventu, parum a principio. *Indecorum, inquit, erat, eos, qui semel creati erant rationales, penitus extinguere: id enim indignum erat bonitate Dei, si quæ ab ipso creata essent, in interitum abirent, ob diaboli adversus hominem fraudem. Quin imo in lecentissimum erat, Dei artem in hominibus extinguere, vel per ipsorum injuriam, vel per demonis imposturam.* Et multa similia habet in sequentibus. Et ad eundem fere modum loquitur Anselm. lib. 1. Cur Deus homo c. 4. Id autem, quod est indecens, & indignum bonitate Dei, potest dici absolute impossibile. Respondetur, hæc & similia verba pie esse interpretanda: nonnullam enim exaggerationem continent. Non est ergo intelligendum, futurum fuisse indecens, ut ita dicam, contrarie, seu privative, si Deus nolisset humanum genus reparare: quia cum Deus ad hoc non teneretur, & sua creatura non indigeat, nihil faceret indebitum, aut contra id, quod cum facere decet, etiam si omnes homines sine remedio relinqueret debitis poenis cruciandos. Dicitur vero interdum hoc fuisse indecens negative, id est, non ita conveniens, neque divinæ bonitati satis consentaneum.

Dico secundo, fuisse valde conveniens, ut Deus humanam naturam lapsum repararet. Hoc constat ex ipso facto: sed quoniam Deus hoc beneficium cum hominibus, & non cum Angelis malis usus est, differentiæ rationem assignando probabitur facile conclusio. Prima sit, quia minor Angelorum pars peccavit: tota vero humana natura cecidit. Est August. in Enchir. c. 29. eamque amplectitur Magister in 2. dist. 21. quæ tamen non placet D. Thom. in 2. d. 7. q. 1. artic. 2. quia etiam multæ species Angelorum totæ corruerunt. Sed non est contemnenda ratio: tum quia probabile est, plures Angelos esse unius speciei, & ita non est necessarium, totam aliquam speciem Angelorum corruisse: tum etiam quia esto ita sit, tamen omnes Angeli propter similitudinem & propinquitatem, quam habent in natura, censentur unum gradum & ordinem rerum constituere, sicut omnes homines constituunt unum gradum inferiorum. Secunda ratio redditur, quia Angelus sua sponte & veluti sine occasione peccavit: homo vero fuit a muliere inductus, quæ prius a serpente decepta est. Indicat Bernar. ser. 1. de adventu, & eandem habet Gregor. 4. Moral. c. 9. quem refert D. Th. 1. p. q. 64. art. 2. argum. 4. in cujus solutione advertit, rationem non esse adequatam; ad summum enim procedit de supremo Angelo peccante. Alii enim eo suggerente ceciderunt; quod videtur sensisse August. lib. 1. de mirabilibus factis Scripturæ c. 2. Tertia huic annexa est, quia singuli Angeli propria voluntate peccaverunt; homines vero unius voluntate prolapsi sunt; decuit ergo, ut unius etiam beneficio liberarentur. Ita indicant Greg. & Bernard. Quarta additur, quia homo habet voluntatem facile mutabilem, & longum tempus viæ, in quo possit illum poenitere; Angeli vero voluntas quodammodo inflexibilis est, & natura sua requirit viam brevissimam, ut perveniat ad terminum, quæ ratio q. 63. & 64. 1. p. latissime tractatur. Quinta esse potest, quia ruina Angelorum potuit reparari per homines, sublevando homines ad illorum sedes, quæ veluti vacuæ manserunt; quod ita decuisse, & factum fuisse late persequitur Ansel. lib. 1. cur Deus homo c. 16. & 17. hominum vero lapsus non poterat convenienter suppleri, substituendo aliam naturam loco humanæ, quia nulla fortasse esse potest inferior humana & capax illius gloriæ. Creare vero de novo alios homines, fieri quidem poterat, non vero ita manifestabat divinam misericordiam, justitiam, & potentiam; & ideo, &c. Unde sumitur sexta ratio, nam si Deus utramque naturam lapsum, angelicam, & humanam sine remedio reliquisset, videretur aut vinci malo peccati, & superari misericordia ejus, aut certe non posse tanto malo medicinam adhibere. Unde oportuit septimo, hominem redimi, ne gloriaretur dæmon, quodammodo vicisse, & explevisse desiderium invidiæ suæ, scilicet, ut homines non assequerentur gloriam, quam ipse perdidit, & pro qua homini invidebat. Ita Leo ser. 2. de nativ. & epist.

Solutio.

Indecens contrarie, privative, & negative.

Cur Deus naturam humanam reparavit non angelicam.

Diviso mediū in utile & necessarium.



**Id. c. 3.** Athanas. lib. de incarnat. Verbi, non longe a principio. Octavo, quo humana natura imbecillior est, quam angelica, eo magis divinam provocat misericordiam, & Deus illius miserendo benignitatem suam manifestat. Denique addit Theod. lib. 6. de providentia divina contra Græcos, circa finem, rationem aliam, dicens: *Quoniam res universi, quæ sub sensum cadunt, propter hominem creatæ sunt, ideo non putavit contemnendum eum, cujus gratia cuncta creavisset,*

## SECTIO II.

*Utrum ad reparandum genus humanum, necessarium vel conveniens fuerit, Deum, hominem fieri.*

**D**upliciter intelligi potest Deus humanum genus reparare: uno modo ex misericordia, & liberalitate sola; alio modo, servata perfectæ justitiæ æquitate.

Dico ergo primo non fuit simpliciter necessarium, hominem liberari a malo culpæ & pœnæ, in quo jacebat, servato justitiæ rigore, & condignâ satisfactione interveniente: fuit tamen id convenientissimum. Totâ conclusio certa est, & communis Sanctorum & Theologorum, quos statim referam. Et probatur breviter prior pars, quia sicut non fuit Deo simpliciter necessarium, hominem redimere, ita neque punire, aut ullam satisfactionem offensæ ab illo repetere. Potuit enim in primis gratis omnia condonare. Cum enim sit supremus dominus, nulli faceret injuriam: cumque ipse potissimum fuerit per peccatum offensus, poterat juri suo cedere, & culpam condonare, ac denique cum sit supremus legislator, & judex, potuisset in lege contra peccatores lata dispensare. Deinde posset ab unoquoque hominum alicquam satisfactionem, vel pœnitentiam exigere, illaque esse contentus. Denique potuit alicui homini puro munus satisfaciendi pro aliis committere, etiam si talis homo nonnisi imperfecte præstare id posset. Neque enim tenetur Deus summum justitiæ rigorem semper servare. Tractat bene hanc partem Theod.

**Objectio.** d. lib. 6. de providentia, circa finem. Objici vero potest Athanas. lib. de incarnat. Verbi, in principio dicens, non potuisse Deum, integræ & illæsæ manente suæ veritate, ac justitiæ, gratis ac liberaliter peccanti homini pœnam relaxare, aut mortem remittere.

**Respond.** Athan. loqui in sensu composito, scilicet, supposita Dei absoluta prædictione, & post latam legem illam: *In quacumque die comederis, morte morieris.* Quia Deus neque mutari potest, nec mendax esse. Simpliciter tamen potuisset legem illam non ferre, vel ita ferre, ut non simul prædiceret venturum effectum, sed tantum statueret jus a se dispensabile, ut comminatio illa absoluta non esset, sed conditionata, scilicet nisi veller ipse pœnam remittere, vel in aliam commutare. Quo posito salva justitiæ, & veritate potuisset Deus tam pœnam quam culpam gratis remittere. Imo etiam nunc non constat, illam comminationem mortis temporalis ita fuisse absolutam, ut nullus ex privilegio vel Dei liberalitate fiat immunis. Altera conclusionis pars facile probatur, quia omnes viæ Domini misericordia & veritas. Unde quo hæ virtutes magis in opere nostræ redemptionis relucunt, eo altiori & convenientiori modo fit, magisque Dei virtutem, & sapientiam manifestat. Dices, fieri non posse, quin minuatur misericordia, si rigor justitiæ servetur; at vero misericordia ex suo genere est altior virtus quam justitiæ: ergo magis conveniens fuisset misericordiam augere, quam justitiæ exigere. Respondetur cum Damasc. lib. 3. de fide c. 1. hoc ipsum maxime ostendere divinæ sapientiæ rationem, quod rei perquam difficilis ac perplexæ congruentissimum exitum invenit, & in eodem opere summam justitiæ cum summa misericordia, quæ sibi contraria videbantur, ineffabili modo conjunxit. Ipsa ergo perfectio justitiæ misericordiam exaltat, quia non solum concessit homini tempus, & locum obtinendi veniam, sed etiam modum & potestatem præbuit satisfaciendi Deo. Quod sane infinitæ misericordiæ opus fuit. Unde etiam major quædam gloria homini accrescit, & quodammodo perfectior pax inter Deum & hominem constituitur, quia per satisfactionem condignam ad illius redit amicitiam. Et ideo specialiter

**Cur fuerit  
conveniens  
servari ri-  
gor, & ju-  
stitia.**  
**Objectio.**

**Respond.**

propter hoc beneficium dicitur Deus dives in misericordia, ad Eph. 2. & ad idem accommodat Bernard. serm. 1. de annun. verba illa Psal. 84. *Misericordia & veritas obviaverunt sibi, justitia & pax osculata sunt.* Sed instabit aliquis, quia ad majorem liberalitatem pertinere videtur, gratis condonare omne debitum, imo & ad majorem charitatem, nam qui plus amat, plus remittit, ut sumitur ex Lucæ 7. & inter homines opus majoris virtutis esse censetur, gratis remittere injuriam, quam satisfactionem postulare. Sed hæc fere eodem modo dissolvuntur: nam majoris charitatis, & liberalitatis est, donare vires & gratiam ad satisfaciendum. Ad idem vero propterea est, non decuisse, nec communi bono expedivisse, aliter fieri, ne delicta manerent impunita. Unde licet in privatis personis sæpe expediat gratuita & liberalis injuriarum remissio, non tamen in his, ad quos pertinet commune regimen, & vindicta delictorum. Deinde ipsis hominibus multis rationibus utilius hoc fuit, tum ut peccati gravitatem agnoscerent, quamque illud Deus odio prosequatur; tum quia ipsamet satisfactio, quæ ab homine exigitur, est magnum bonum ejus, & illius gloriam & virtutem extollit. Propter quæ diversa omnino est ratio de Deo offenso, & de hominibus. Nam homo, qui satisfactionem exigit injuriæ sibi factæ, vel id facit ex odio alterius, vel saltem ex amore proprii commodi & utilitatis: Deus autem non suum, sed nostrum commodum querit, dum justitiam vult in remittendis peccatis servare. Unde etiam inter homines, si contingat communi bono expedire, vindictam exigere per publicam potestatem de injuria suscepta, potest hoc esse majoris virtutis, quam gratis illam condonare.

Dico secundo, mysterium incarnationis non fuit simpliciter necessarium ad hominis lapsi reparationem. Conclusio est communis, & ita certa, ut negari non possit sine temeritate & fidei incommodo. Est D. Thom. hic, Magistri cum doctoribus, dist. 20. ubi Bonavent. Scot. Richar. Durand. Palud. Gabr. & alii. Alex. Alens. 3. p. q. 1. membr. 3. art. 4. Altifiodorenf. lib. 3. summæ, tract. 1. 1. c. 8. Guillel. Parisiens. lib. cur Deus homo. c. 7. c. 7. & probatur primo ex communi patrum sententia. Leo Papa serm. 2. de Nativit. c. 3. *Verax, inquit, misericordia Dei, cum ad reparandum humanum genus ineffabiliter ei multa suppetere, hanc potissimum consulendi viam eligit, qua ad destruendum opus diaboli non virtute introitur potentia, sed ratione justitiæ.* August. 13. de Trin. c. 3. 10. 13. & 18. & lib. de Agone Christi c. 11. *Sunt, inquit, stulti, qui dicunt, non poterat aliter sapientia Dei hominem liberare, nisi susciperet hominem.* Tractat bene Greg. 17. Moral. c. 18. & 24. Moral. c. 2. Hugo de S. Victor. lib. 1. de sacram. p. 8. c. 10. Secundo, ratione, quæ facile sumi potest ex præcedenti conclusione. Si enim propter aliquam causam posset esse incarnatio necessaria ad reparationem nostram, maxime ut ex perfecta justitiæ fieret: sed hoc non fuit simpliciter necessarium, ut ostensum est: ergo neque ipsa incarnatio fuit simpliciter necessaria. Nulla enim alia ratio necessitatis, aut connexio fingi potest inter incarnationis mysterium, ac humani generis reparationem. Et ex hac conclusione & ratione obiter infertur, Christi Domini mortem non fuisse simpliciter necessariam ad nostram redemptionem, sed solum ex divina ordinatione: quia supposita incarnatione, una Christi operatio ad satisfactionem sufficere poterat, vel ex se, vel ex acceptance divina, juxta ea quæ inferius tractanda sunt. Et ideo ad Hebræ. 2. non necessitatis, sed decentiæ fuisse dicitur hoc opus: *Decebat, inquit Paulus, eum, propter quem omnia, & per quem omnia, qui multos filios in gloriam adduxerat, auctorem salutis eorum per passionem consummari.*

Contra hanc vero conclusionem videtur sentire Ansel. fere toto lib. 1. & 2. cur Deus homo: hoc enim videtur præcipue toto illo opere voluisse convincere, repugnare inquam Deo, alia via aut ratione mundum reparare, utpote cum esset imperfectum opus, ac proinde minime decens Deum. Idem sentit Richard. de S. Victor. lib. de Incarnat. c. 8. favent verba Chrysost. homil. 10. in Joan. *Cecidit, inquit, natura nostra eo modo, ut restitui nullo pacto posset a quocumque, nisi ab illa omnipotentissima manu. Neque enim aliter restitui poterat, nisi qui in principio eam effinxit, manum porrexisset.* Et Vigil.

**Objectio.**

**Diluitur.**

**Testimo-  
rium.**

**Ratio.**

**Objectio.**



Vigil. lib. 5. contra Eutychet. circa finem dicit: *Non aliter fieri potuit nisi talis mediator existeret*, &c. Unde Proclus Cizicenus hom. de Christi nativ. quæ habetur in Concil. Ephes. tom. 6. c. 7. *Unica*, inquit, *hæc restabat mali solutio*. Cyril. 5. thesau. c. 7. *Quoniam imperfectum esse opus Dei non decuit, & non potuit aliter reparari, necessarium Deus homo factus est*. Ambros. etiam ad Hebr. 9. dicit: *Tantum fuit peccatum nostrum, ut salvari non possemus aliquando, nisi omnipotens filius Dei moreretur pro nobis*. Et Leo Papa epist. 81. *Quæ*, inquit, *reconciliatio esse poterat, quæ humano generi propitiaretur Deus, nisi omnium causam mediator Dei hominumque susciperet?* Sed primum exponi possunt de necessitate immutabilitatis, seu ex suppositione divinæ ordinationis, quia supposita divina voluntate, non poteramus aliter salvari, neque Deus poterat non conferre nobis hoc beneficium. Ita exponunt Anselmum Bonav. & Alenf. & indicatur ab ipso lib. 2. c. 5. & 17. ubi ait, in Deum non cadere alium necessitatis modum, & hunc modum non minuere rationem liberalitatis & gratiæ: aliis tamen locis plus videtur intendere Anselm. Secundo ergo exponi potest de necessitate ad melius esse, ita ut iddicatur necessarium, quod est convenientissimum, quodque omni ex parte damnum per peccatum illatum compensat: hoc enim modo, neque manet dedecus peccati sine decore iustitiæ, & penas sustinet homo, qui offendit, & satisfacit Deus, qui potest, ut dicit Glof. ad Hebræ. 2. circa illa verba, *decebat eum*, &c. Tertio exponi possunt de necessitate ad perfectum modum redemptionis, quam statim explicabimus.

Dico tertio, ad redimendum hominem ex perfecta iustitia necessaria simpliciter fuit hypostatica unio. Hæc conclusio est D. Thom. hic & communis in 3. dist. 20. & aliorum, quos paulo ante citavimus, & in sequentibus etiam referemus: imo universalis est Sanctorum Patrum traditio. Hoc enim sensu dicit Leo Papa serm. 14. & 10. de nativ. *Si non esset Deus, non offerret remedium, & similia habet serm. 7. & 8. de Epiphan. & serm. 8. Quadragesim. & serm. 1. & 12. de passion. & epist. 13. 81. & 95. quibus locis negat per hominem purum potuisse nos redimi. Quod non simpliciter & absolute intelligendum est, sed servato iure æquitatis & perfectæ iustitiæ, ut ex dictis patet in præceden. concl. Et eodem modo loquitur Agap. Pap. in epist. ad Antig. *Quæ reconciliatio*, inquit, *esse possit, quia humano generi repropitiaretur Deus, si hominis causam mediator Dei & hominum non susciperet?* Ac si diceret, non nisi imperfecta, & eodem sensu dixit Anaclet. Pap. epist. 2. decret. Deum factum esse hominem, ut virtutis suæ potentia nos liberaret, scilicet, perfecto modo. Et similiter Athanas. lib. de Incarnat. Verbi, circa principium. *Cum enim*, inquit, *Patris sit Verbum, & supra omnes, merito etiam solus omnia recuperare potuit, & idoneus fuit, qui pro omnibus pateretur, ac apud Patrem intercederet*. Idem Atha. lib. de humanitate Verbi. ante medium, & sermo. de cruce & passione Domini, ubi inter alia inquit: *Cum videret malitiam intolerabilem, neque mortale genus idoneum esse, quod morti resisteret, neque poenam suorum malorum persolveret: nam excessus malitiæ transcendebat omne supplicium: videntque simul Patris bonitatem, & quam ipse idoneus esset & potens, commotus fuit sua humanitate, & misertus est nostræ imbecillitati*. Cyril. Alexan. lib. 1. de fide ad Regin. c. Quod per Christi sanguinem redempti sumus, inquit. *Sint vulgaris homo concipiatur, quo modo illius corpus vita omnium estimationem ac dignitatem exæquat? aut quomodo Deus haberi non debet, qui suo sanguine credentes in ipsum emundat?* Et lib. 2. ad Regin. non longe a principio, exponens id ad Hebr. 2. *Decebat eum*, &c. dicit, ideo Verbum carnem induisse, quia superare mortem supra humanam erat facultatem. Ubi necesse est loquatur de omni facultate, cuiuscunque personæ humanæ creatæ, & de perfecto modo superandi mortem, & eodem modo sæpe colligit Christum esse Deum ex eo, quod potuit perfecte nos redimere, ut lib. de Incarnatione Unigen. cap. 21. & lib. 2. thesau. cap. 11. & lib. 4. de Trinit. circa princ. ubi negat Christum potuisse offerre condignum pretium pro nostra redemptione, nisi esset verus Deus. Et in Exegesi ad Valeria. quæ habetur Concil. Ephes. com. 6. cap. 17. circa medium, exponens verba Isai. 53. *Cujus**

*livore sanati sumus: quo pacto*, inquit, *unus pro omnibus mortuus iustum pro omnibus pretium exsolvere potuit, si perpeffionem illā puri cuiuspiam hominis fuisse dicamus?* Similia habet Iren. lib. 3. c. 20. & 22. Justin. in exposit. fidei. Cyril. Jerosol. cath. 13. Euseb. 4. demonstrat. c. 10. Theodor. dialog. 2. & Damasc. lib. 3. cap. 15. & 19. dicit actionem Christi & passionem ideo fuisse salutiferam, quia divina erat. *Neque enim*, inquit, *convenire poterat actioni humane, id est, puri hominis*. Basil. etiam super Psalm. 28. ad hoc accommodat verba illa, *Qui confidunt in virtute sua, & in multitudine divitiarum suarum gloriantur: frater non redimit, redimet homo? non*, inquit, *homo nudus, sed homo Deus Jesus Christus: quia nullus alius poterat condignum offerre pretium*. Et Chrysost. homil. 20. in Joan. *Cecidit natura nostra eo casu, ut restitui non possit, nisi ab illa potentissima manu*. Et Ambros. lib. 4. in Lucam circa princip. *Quis tantus esset dux, qui prodesset omnibus, nisi ille, qui supra omnes est? Quis me supra mundum constitueret, nisi qui major est mundo? Et supra omnes est, qui me supra mundum, &c.* Et August. in Enchir. c. 108. *Neque per ipsum liberemur mediatorem hominem Christum, nisi esset Deus*. Idem lib. 9. de Civit. cap. 17. & late serm. 8. de verbis Apostol. Cyprian. sermone de passione Domini. Hilar. lib. 9. de Trinit. multa ad propositum scribit. Et Fulgentius de Incarnat. & gratia cap. 4. & inter alia inquit: *Nullatenus humana natura ad auferendum peccatum mundi sufficiens, atque idonea fieret, nisi unione verbi Dei*: ad auferendum scilicet perfecto modo. Idem fere c. 7. & Vigil. lib. 5. contra Eutych. præsertim col. 10. & late Anselm. lib. 1. cur Deus homo a cap. 20. & Richard. de sancto Victore libro de incarnatione Verbi cap. 8. & in sequenti dubio, testimonia Scripturæ sacræ, & nonnulla alia ex sanctis Patribus indicabimus. Ratio vero, in qua hæc necessitas fundatur, est, quia tota ratio perfectæ iustitiæ, quæ in redemptione Christi inventa est, ita oritur ex dignitate divinæ personæ, ut nullo modo possit creatæ personæ communicari, aut convenire. Quomodo autem hoc verum habet, in sequentibus sectionibus late explicandum est. Solum est in hac conclusione advertendum, unionem hypostaticam, ut in conclusione dixi, non vero incarnationem in rigore sumptam, ut significat assumptionem humanæ naturæ, fuisse ad hunc effectum necessariam. Potuisset enim Deus assumendo naturam Angelicam, per eam nos redimere perfecto modo, sed cum eadem iustitiæ æquitate. Quia licet non posset mori, posset per internos & spirituales actus satisfacere: licet in hoc duriuscule loquatur Anselm. lib. 2. cur Deus homo cap. 6. & 21. indicans humanam naturam, quæ mori possit, omnino fuisse necessariam: sed per exaggerationem locutus est, & aliquo modo ex dictis in præcedenti conclusione oportet explicari.

Dico quarto, simpliciter & absolute fuisse convenientissimum medium ad nostram redemptionem, ut Deus assumeret humanam naturam, per quam pro nobis satisfaceret. Hæc est certissima, & clarissima, suppositis quæ dicta sunt. Nam in primis ex dictis sequitur, hypostaticam unionem cum natura intellectuali fuisse convenientissimum medium ad nostram redemptionem, quia convenientissimum fuit nos redimi ex perfecta iustitia, quæ nisi per hanc unionem servari non posset. Deinde fuisse etiam convenientissimum ad eundem finem, ut hæc unio fieret in natura humana, facile ostenditur. Primo, quia hoc pertinebat ad maiorem iustitiæ proportionem, ut scilicet idem esset satisfactor, qui fuerat offensor: offendit autem homo, debuit ergo satisfacere homo, non idem numero qui offenderat, non enim poterat perfecte & convenienter: debuit ergo esse saltem homo ejusdem naturæ & speciei. Secundo, pertinebat hoc ad maiorem hominum honorem & gloriam. Tertio, ad maiorem confusionem dæmonis, ut in eadem natura, quam vicerat, vinceretur. Quarto, ad maiorem divini amoris erga homines ostensionem. Et eisdem fere rationibus ostenditur fuisse conveniens naturam illam esse passibilem, ut per passionem & mortem redimeret nos, atque doctrina & exemplo convenientius doceret. Tum etiam, ut non solum bona sua nobiscum communicaret, sed etiam mala nostra in se susciperet, quantum honesta ratione fieri posset. Perfecta enim charitas, & amicitia tam bona, quam mala facit

Solutio  
5. Modi  
necessita-  
tis, qui-  
bus oportet  
verbum  
in-  
carnari.

Funda-  
mentum  
prædictæ  
necessita-  
tis.

Cur con-  
venientif-  
sima fuit  
unio cum  
natura  
humana.

Conve-  
nientif-  
sima fuit  
natura  
illam hu-  
manam  
esse passi-  
bilem.



## S E C T I O III.

*Utrum Christi opera fuerint sufficientis valoris, & efficacia ad condigne satisfaciendum pro peccatis hominum.*

**D**iximus in precedenti dubitatione, hypostaticam unionem fuisse simpliciter necessariam ad perfectum modum humanæ redemptionis; quæ necessitas duo includit; unum est, nullum nisi hominem Deum potuisse perfecte redemptionem hominum perficere, de quo postea dicendum est; alterum est, Christum Deum hominem hoc potuisse, quod nunc examinare & declarare incipimus. Et quia prima ratio, seu conditio, ex qua pendet æqualitas, & perfectio iustitiæ, est valor pretii seu operis, quod ad contractum consummandum, seu ad recompensandum injuriam offertur, ideo ad explicandam perfectionem iustitiæ, quæ in nostra redemptione servata est, primum omnium considerandus est valor, & dignitas actionum, & passionum Christi, per quas redempti sumus.

Observandum vero est, nunc non tractari de efficacia operum Christi ad obligandum (ut ita dicam) Deum ex iustitia; nec etiam disputari, an ad hanc iustitiam fuerit necessarium pactum, vel promissio ex parte Dei, de his enim postea dicemus: nunc vero solum agimus de valore ipsorum operum secundum se. Possunt enim intelligi habere valorem, etiam si Deus illa acceptare non teneatur: & e contrario posset Deus illa acceptare, etiam si secundum se sufficientem valorem non haberent.

In hac ergo questione variis modis erratum est. Infideles enim, seu hæretici negarunt, opera Christi habuisse valorem ad nos redimendum, tam ex se, quam ex divina acceptatione, vel ordinatione. In quo errore primum numerari possunt Judæi, qui non credunt, Messiam esse Redemptorem animarum, sed corporum: neque authorem spiritualium bonorum, sed temporalium. Quos facile est ex sacra Scriptura convincere. Daniel, enim 9. dicitur Messias venturus, ut finem accipiat peccatum; & deleatur iniquitas, & adducatur iustitia sempiterna, & Isai. cap. 9. vocat eum Patrem futuri sæculi, principem pacis, & regni æterni. Et c. 2. *Ecce Salvator tuus venit, &c.* & infra: *Vocabunt eos populus sanctus, redempti a Domino.* Denique constat ex scriptura Messiam non solum propter Judæos, sed etiam propter Gentiles salvandos venisse Isai. 60. Aggæi. 2. & sæpe aliis: ergo futurus erat Salvator animarum, potius quam corporum. Ex supra etiam tractatis multa contra hunc errorem sumi possunt, & ex Galat. lib. 6. cap. 4. & seqq.

Secundo, numerari possunt Pelagiani, qui negantes peccatum originale, & gratiæ necessitatem, consequenter negarunt, Christum nos redemisse, vel satisfecisse pro nobis, sed solum venisse, ut doctrina, & exempla homines doceret. Ex quo alium errorem intulerunt, scilicet, non venisse pro illis hominibus, qui ipsum præcesserunt, ut August. refert lib. 2. de gratia Christi, & peccat. origin. cap. 26. Sed fundamentum hujus erroris in materia de originali peccato ex professo impugnandum est, & videri potest August. libris contra Pelag. præsertim duobus illis de gratia Christi: & breviter sunt contra illum aperta scripturarum testimonia. Ad Rom. 5. *Sicut per unum hominem, &c.* & Actor. 4. *Non est aliud nomen datum hominibus.* Et de precedentibus hominibus dicitur expresse ad Rom. 3. *Quem proposuit Deus propitiationem propter remissionem precedentium delictorum.* Et ad Hebr. 9. *In redemptionem earum pravificationum, quæ erant sub priori testamento.* Et eodem sensu dicitur ad Rom. 3. *Omnes peccaverunt, & egent gloria Dei, justificati gratis per gratiam ipsius, per redemptionem, quæ est in Christo Jesu.* Et ibidem: *Quia ex operibus legis non justificabitur omnis caro coram illo: iustitia autem Dei per fidem Jesu Christi in nomine, & super omnes.* Et eodem modo dicitur ad Galat. 3. *Si ex lege iustitia, ergo gratis Christus mortuus est:* ut recte ibi Hier. annotavit; & 1. ad Corinth. 10. *Bibebant autem de spirituali consequentes eos petra, petra autem erat Christus.*

Tertio, numerari hic potest error Abaylardi, qui parum est a precedenti diversus: quamvis enim iste non negaverit originale peccatum, negavit tamen Christum

Varii errores contra satisfactionem Christi.

facit esse communia. Unde ultimo fit, hoc medium incarnationis fuisse omnium optimum, & convenientius quocumque possibili, etiam de potentia absoluta; quod plane sentiunt omnes citati Patres & Theologi, & sequitur manifeste ex dictis, quia nullum medium potest esse melius, quam illud, quod perfectam iustitiam cum perfecta misericordia conjungit: sed nullo alio modo id fieri poterat, ut ostensum est. Neque est inconveniens, Deum posse uti medio, quo nullum possit esse aptius, vel melius; quia licet in rebus omnino finitis & creatis quacumque facta possit facere meliorem, tamen in hoc mysterio communicando suam personam infinitam, communicavit bonum, quo nullum potest esse melius. Et propterea mirum non est, si talis communicatio sit etiam optimum medium ad reparationem nostram. De hac conclusione, & quæ circa illam dicta sunt, præter citatos Patres videri potest Leo Papa sermone 5. 12. & 24. de passione Domini, Irenæus lib. 5. cap. 1. August. 12. de Trinit. cap. 10. libro de vera religione cap. 16. & sermon. 13. de tempore. Anselm. lib. 2. cur Deus homo capit. 18. solum dicendum supererat, cur fuerit conveniens, mysterium hoc fieri potius in persona Verbi, quam in alia, sed de hoc dicemus infra quæst. 3.

**Obiectio.** Sed contra primo, nam videtur contra iustitiam, exigere satisfactionem ab innocente, & tradere illum in mortem propter salutem nocentium. Respondetur

**Solutio.** primum, non fuisse iniustitiæ, sed summæ misericordiæ opus, quod Deus a Christo homine postulaverit, ut hominum causam sumeret, & pro ipsis satisfaceret, & quod ipse sponte id officii susciperet: quod ita factum esse in hoc mysterio, constat ex ad Hebræ. 10. & Psal. 39. *Aures autem perfecisti mihi &c.* Postquam vero Christus fideiussor factus est, debuit satisfacere ex iustitia ad æqualitatem. Et ideo recte ad Christum accommodatur id Ecclesiast. 29. *Gratiam fideiussoris ne obliviscaris: dedit enim pro te animam suam.* Denique quidquid iniquitatis, & injuriæ fuit in Judæis occidentibus Christum, non fuit ordinatum a Deo, sed permissum. Passio vero ipsa, quæ bona fuit, & sancta, iuste & sancte ordinari potuit in nostram redemptionem. Dices: saltem videtur inordinatio quædam, infinitum illud bonum & vitam Christi, in creatum & finitum hominum bonum ordinare. Sed respondetur primum, hoc negotium non sistere in bono hominum, sed totum ad Dei gloriam referri, ad quam ipsa etiam vita & mors Christi ordinatur. Item ordinare id, quod perfectius est, ut adjuvet, & perficiat inferiora, non est inordinatum, sed frequentissimum in Dei ordinatissima providentia; præsertim quia ipsa vita Christi corporalis, licet propter unionem ad Verbum esset infiniti valoris, tamen statim erat recuperanda, ut gloria hominum esset æterna.

**Alia obiectio.** Dices tandem, esse repugnantiam in dictis: Deus enim semper ac necessario operatur in omnibus, quod convenientissimum est, ut ait Clemens Alexandr. 6. Stromat. August. 3. de libero arbitrio, in cap. 5. *Quidquid tibi vera ratione melius occurrerit, hoc scias fecisse Deum, tamquam bonorum omnium conditorem.* Idem lib. de quant. animæ c. 33. & lib. 1. contra advers. leg. & Prophet. cap. 14. *Usque adeo, inquit, desipiendum est, ut videat homo, melius aliquid fieri debuisse, & hoc Deum vidisse non putet, aut putet vidisse, & credat facere noluisse, aut non potuisse.* Respondetur, Deum neque semper, neque necessario operari, quidquid rebus creatis convenientius, aut melius est, alias nihil posset facere, quam quod fecisset. Quod est erroneum, ut contra Wicleph ostendit Waldens. lib. 1. doctrinalis fidei antiquæ capitul. 21. ubi multa congerit ex patribus. Et eandem rem tractat Hugo Viet. lib. 1. de sacram. cap. 11. Operatur ergo Deus omnia convenientissime, id est, sine ulla inordinatione, vel malitia, vel imprudentia. Quod maxime Augustinus intendit locis citat. agit enim contra Manich. qui Deum quendam faciebant malorum authorem. Facit etiam omnia convenientissime, juxta finem a se intentum, & secundum rationem divinæ suæ sapientiæ, non secundum rationem & finem, quia nobis agnoscere vel intendi potest,



nos liberasse a dæmonis jugo, & servitute; & consequenter etiam Christum nobis profuisse per modum redemptionis, vel satisfactionis, ut refert, & impugnat late Bernar. epist. 190. qui error fuit antiquior ejusdem Basi, ut ex Philastrio refert Castro verbo Christus, hæref. 8. & Prateol. in verbo Basus. Hic vero error eisdem Scripturæ testimoniis facile refellitur; & plura congerit Bern. supra, & August. libris contra Julia. præsertim in 1. & 6. a principio, & lib. de perfectione justitiæ in medio, & circa finem, & lib. 1. de peccatorum meritis, & remis. fere per totum, præsertim c. 17. Damnatur etiam ab Innocentio III. in rescripto ad Bernar. habetur inter epistolas Bernar. epist. 194.

Alia via aliqui Catholici non recte senserunt de valore operum Christi ad satisfaciendum pro nobis. Quamvis enim fateantur, quod fides docet, Christum vere satisfacisse pro peccatis hominum, negant tamen opera Christi de se habuisse valorem, & condignitatem ad hujusmodi satisfactionem, sed solum ex acceptione divina, quia scilicet voluit Deus illa sibi offerri, & promisit illis fore contentum, & propter illa remissurum peccata hominibus; ita opinatur Scot. in 3. d. 19. & 20. & in 4. d. 15. q. 1. & Gabr. eadem d. 19. q. 2. a. 1. not. 3. a. 2. c. 2. Almain q. 1. & Dur. similiter. in 3. d. 20. q. 2. & in 4. d. 15. q. 1. a. 6. & 7. & Medin. codic. de pœnitent. tract. 3. de satisf. q. 1. Fundamenta infra videbimus. Unde inferunt hi authores, quod attinet ad justitiæ æqualitatem, tantum valorem potuisse esse operibus puri hominis ad satisfaciendum pro peccatis humani generis, quantum fuit in operibus Christi; quia potuit Deus illa opera ad eundem effectum ordinare, & illa acceptare. Haberent ergo eundem valorem, quia tam opera Christi, quam puri hominis, tantum valent, quantum est bonum illud, ad quod Deus illa ordinat, & acceptat, & ex se in neutro habent dignitatem seu æqualitatem ad meritum, vel satisfactionem, ut idem authores tradunt in 2. dist. 27. Durand. q. 2. Gabr. q. unica art. 3. & in 1. dist. 17. q. 3. art. 3. dub. 2. & ibi Scot. q. 2. §. Hic potest dici. Addunt tamen congruum fuisse, Deum hominem, & non purum hominem pro nobis satisfacere. Primo, quia licet dignitas personæ non augeat valorem operis, confert tamen quandam dignitatem, & quasi decentiam moralem, ut imago a viro sancto depicta, licet in se non sit melior, quam depicta ab alio, tamen propter respectum ad personam, habet quandam moralem æstimationem. Deinde, quia deicit, ut solum Deum agnosceremus, & veneremur, ut Redemptorem & Dominum; quia, ut ait Anselm. lib. 1. cur Deus homo c. 5. *Quæcumque alia persona hominem a morte æterna redimeret, ejus servus idem homo recte judicaretur. Quod si esset, nullatenus esset restauratus in illam dignitatem, quam habiturus erat, si non peccasset, cum non nisi Dei servus esset.* Denique, quia oportuit, ut universalis Redemptor peccatorum omnino esset impeccabilis, quod esse non posset, nisi esset Deus; unde Fulgent. lib. 2. ad Transimundum Regem. cap. *Inquirendus fuit unus, cujus esset reformanda munere, scilicet, humana natura, informanda lumine, confirmanda virtute, ut æqualitas æterna justificaret impiam, instrueret insciam veritatis, virtus firmaret invalidam: quo autem modo, dicit inferius, beneficentia largitor universalis assisteret, quem alienæ opis indignum natura monstraret?*

Ut veram sententiam doceamus, ab his, quæ de fide certa sunt, initium sumendum est, & dicendum primo, Christum Dominum, quod in ipso est, sufficienter per sua opera satisfacisse, tam pro originali lapsu humani generis, quam pro universis peccatis hominum, quæ quovis tempore commissa sunt, aut committentur. Hoc unum est ex fundamentis nostræ fidei definitum in Concilio Trident. sess. 6. ubi c. 1. docet captivitatem generis humani, in secundo vero redemptionem per Christum, & can. 21. definit Christum datum nobis esse in Redemptorem, & legislatorem. Testimonia scripturarum sunt clarissima, & frequentissima. In primis sunt illa, in quibus Christo tribuitur munus Redemptoris; ad Tit. 2. *Dedit semetipsum pro nobis, ut nos redimeret ab omni iniquitate.* Apoc. 5. *Redemisti nos Deo in sanguine tuo.* Ad Heb. 9. *Christus assistens Pontifex futurorum bonorum per proprium sanguinem introivit semel in sancta æternæ redemptionis inventa.* Nomen enim redemptio-

nis, per quandam metaphoram satisfactionem significat. Homo enim per peccatum, quasi venditus est, & sub dæmonis potestate, & captivitate constitutus. Isai. 50. *Quis conditor meus, aut cui vendidi vos, ecce in iniquitatibus vestris venditi estis.* Christus autem suam pro illo satisfactionem offerens, in Dei amicitiam, & veram libertatem vindicavit: & ideo redemisse dicitur 1. Pet. 1. *Non corruptibilibus auro, & argento redempti estis, sed pretioso sanguine, quasi agni immaculati Christi, & incontaminati.* Interdum vero dicitur emisse 1. ad Corint. 6. *Empti enim estis pretio magno.* Et c. 7. *Pretio empti estis: nolite fieri servi hominum.* Ut enim notat Hieron. super c. 3. ad Gala. redimere dicitur, qui rem, quam prius possidebat, & casu aliquo illam amiserat, pretio dato iterum acquirit. Emere autem dicitur, qui rei dominium primum per pretium comparat: quia ergo ante peccatum eramus sub Dei potestate, & amicitia, per peccatum vero facti sumus inimici, & traditi potestati dæmonis, ideo Christus satisfaciendo pro nobis dicitur nos redemisse sibi ut Deo. Juxta illud Isai. 52. *Gratis venundati estis, & sine argento redimemini.* Emisse autem dicitur sibi ut homini, quia per eandem satisfactionem pro nobis oblatam specialem quoddam jus, & dominium in nos adquisivit: & ideo Psal. 2. dicitur: *Postula a me, & dabo tibi gentes hereditatem tuam.*

Secundo, hoc probant illa testimonia, in quibus Christus dicitur nos dilexisse, & lavisse a peccatis nostris, Apoc. 1. vel semetipsum pro nobis tradidisse: ut ad Ephes. 5. ad Galat. 3. & 1. Joan. 2. *Ipse est propitiatio pro peccatis nostris, non pro nostris tantum, sed etiam pro totius mundi.* & c. 3. *In hoc apparuit filius Dei, ut dissolvat opera diaboli.* Item illa, in quibus dicimur vivificati in Christo: ad Ephes. 2. *Cum essemus mortui peccatis, convivificavit nos Christo: cujus gratia estis salvati.* & infra: *Nunc autem in Christo Jesu, vos, qui aliquando eratis longe, facti estis prope in sanguine Christi: ipse enim est pax nostra, qui fecit utraque unum & medium parietem mœvierie solvens inimicitias in carne sua, &c.* Et ad Roman. 5. *Sicut per unius delictum, &c. ita per unius justitiam, &c.* Et ibidem constituitur differentia inter Christum & Adamum: quia judicium quidem ex uno in condemnationem: ab Adamo enim unum tantum peccatum originale contrahimus: gratia autem ex multis delictis in justificationem: quia per Christum multa, atque adeo omnia peccata remittuntur. Tertio, hoc confirmant illa testimonia, quibus per Christum dicimur liberari a potestate dæmonis. Isai. 49. *Nunquid tollitur a forti præda? aut quod captum fuerit a robusto, salvum esse poterit? quia hæc dicit Dominus, equidem & captivitas a forti tollitur, & quod ablatum fuerit a robusto, salvabitur.* & infra concludit: *Et sciet omnis caro, quia ego Dominus salvans te, & Redemptor tuus fortis Jacob:* & ad Colos. 1. *Qui eripuit nos de potestate tenebrarum, &c.* & c. 2. *Expolians principatus & potestates, &c.* Testimonia vero sanctorum Patrum & rationes asseremus inferius in postrema conclusione.

Dico secundo, Christus Dominus non solum pro peccatis hominum quoad culpam, sed etiam pro pœnis his peccatis debitis sufficienter satisfacit. Hæc conclusio est de fide, sicut præcedens, & probari potest. 1. ex illo Psal. 68. *Quæ non rapui, tunc exolvebam:* & Isai. 53. *Verè languores nostros ipse tulit, & dolores nostros ipse portavit.* Ad quod alludens Petrus epist. 1. c. 2. inquit: *Qui peccata nostra pertulit in corpore suo super lignum.* Pœnas autem peccatorum peccata vocavit. Hoc etiam confirmant supra citata testimonia, quibus asseritur, Christum nos liberasse a potestate dæmonis. Peccator enim dicitur esse sub dæmonis potestate, non quia dæmon ipsius dominium habeat, sed quia potestatem accipit illum puniendi, & in infernum deducendi. Christus ergo suam satisfactionem offerens Patri, qui jus habebat suas injurias vindicandi, pro pœnis nostris peccatis debitis satisfacit, & hoc modo eripuit nos de potestate dæmonis: ut bene Nazian. explicat, oratione 42. circa finem, & August. 13. de Trin. a. c. 12. & Anselm. 1. cur Deus homo c. 6. & Bernard. epist. 120. Quanquam alia etiam ratione dicatur Christus liberasse homines a potestate dæmonis, quia illum privavit veluti imperio quodam, quo per idololatriam in hoc mundo potiebatur, propter quod princeps mundi dicitur Joan. 14. & quia illum ligavit,



ne tam acriter in homines faviret: ut sumitur ex Matth. 12. Congerit circa hoc nonnulla Vega lib. 2. in Trident. c. 3. 4. & 5. Præterea conclusionem hanc confirmat, quod Theologi docent, Christum sua morte aperuisse hominibus januam regni coelestis, ut tradit D. Th. infra q. 49. art. 5. & dicemus latius q. 19. nam regnum celorum clausum esse hominibus propter peccatum, magna erat poena. Hanc ergo abstulit Christus meritis, & satisfactione sua, ut propterea dicatur aperuisse nobis januam regni. Præterea ex hoc principio dicitur Christus mortem superasse juxta illud Osee. 13. *Ero mors tua, o mors*; & 2. ad Timoth. 1. *Qui destruxit quidem mortem*; & 1. ad Corinth. 13. *Absorpta est mors in victoria*. Mors enim poena fuit per peccatum introducta: ad Rom. 5. Christus ergo satisfaciendo pro peccatis omnibus peccatis debitis, mortem etiam abstulit, non ita ut illam non subiremus; hoc enim licet potuerit ab eo fieri, non tamen oportuit; sed ita ut in ea non permaneremus, sed post illam ad vitam perpetuam resurgeremus: sicut etiam satisfecit pro peccatis omnibus, seu poenalitatis, quas propter originale peccatum contrahimus: noluit tamen statim auferri, neque ad hoc obtulit satisfactionem suam, sed pro eo tempore opportuno, & convenienti, ut recte August. 23. de civit. c. 4. Doctrinam hanc, quæ in his duabus conclusionibus continetur, Lutherus, & alii hæretici hujus temporis ita extollunt, & magnificant, ut propter eam doceant, nullam hominibus necessariam esse poenitentiam; nullam satisfactionem pro peccatis; quippe cum jam nulla peccata illis imputentur, cum Christus pro omnibus satisfecerit: sed hoc non est extollere satisfactionem Christi, sed magnam illi injuriam inferre, & occasionem præbere hominibus multiplicandi peccata, quo nihil magis contra intentionem Christi pro nobis satisfaciendis cogitari potest.

Dicendum est ergo: quamquam Christi opera ordinata fuerint a Deo, & ab ipso Christo ad satisfaciendum pro nobis, non tamen ita ut in nobis haberent effectum, nobis non agentibus, vel cooperantibus, quod ipsi etiam hæretici vel inviti fateri debent: alioquin neque baptizamus, nec fides esset necessaria, ut nobis satisfactio Christi applicaretur, quod ipsi non concedunt: immerito autem fidem requirunt, & non charitatem, vel poenitentiam, cum scriptura omnia hæc, ut necessaria proponat. Fuit autem hoc valde expediens primo ad bonum nostrum: quia ut dictum est, daretur licentia hominibus ad vitia & peccata multiplicanda, vel certe privandi essent libertate. Deinde nec vere justificarentur, si per solam imputationem extrinsecæ justitiæ, aut non imputationem peccati manentis in ipso homine, iusti existimarentur. Secundo, quia ad gloriam ipsius Christi spectat, ut homines non fiant participes meritorum ejus, nisi profitendo illius fidem, & obedientiam, & retractando priora delicta, juxta illud ad Hebræ. 5. *Factus est omnibus obtemperantibus sibi causa salutis æternæ*. Tercio, quia hoc ipsum magis extollit merita, & satisfactionem Christi, & ostendit ejus efficaciam, quia non solum satisfecit pro nobis, sed etiam nos facit cooperatores suos, vel ad nostram salutem, cum ad illam disponimur, & pro peccatis nostris satisfacimus per ejus gratiam, vel ad alienam, cum aliis applicamus sacramenta, vel satisfactiones, ut D. Thom. infra breviter tetigit q. 49. art. 1. ad 3. & in materia de gratia, & de fide, & de poenitentia latius tractandum est.

Dico tertio: Christi satisfactio non solum æqualis fuit, sed etiam superabundans, neque tantum ex divina acceptatione, sed ex proprio valore ipsorum operum Christi, quem habebant ex dignitate personæ operantis. Hæc est communis sententia Theologorum, quam docet D. Th. hoc art. 2. & infra q. 49. art. 8. & in 3. d. 20. q. 1. art. 1. & ibi communiter antiqui Doctores. Bonavent. q. 3. Ricar. q. 4. Palud. q. 2. art. 2. Capreol. conclus. 2. Alenf. 3. p. q. 1. membr. 7. q. 17. membr. 3. art. 2. membr. 5. art. 2. Marfil. in 3. q. 12. Altifod. lib. 3. summ. tract. 2. c. 8. Guiliel. Paris. lib. cur Deus homo c. 8. Abulens. paradoxa. 1. c. 41. & in prolog. super Matth. q. 27. & super c. 3. Matth. q. 19. Et eam latissime docet, & persequitur Ansel. toto lib. 1. & 2. cur Deus homo: Richardus de Sanct. Viar. lib. de Incarnat. c. 3. & illam existimo ita certam, ut contraria nec probabilis, nec pia, nec fidei satis consentanea videatur: & probatur ex Scriptura, & patri-

bus. 1. ex illo ad Rom. 5. *Sicut per unum hominem, &c.* Sicut ergo Adæ peccatum de se sufficiens fuit ad hominum damnationem, multo magis Christi opera de se habuerunt valorem ad condignam eorundem redemptionem. Addit enim Paul. *Sed non sicut delictum, ita & donum*: volens hoc multis titulis illud superare: & ideo concludit: *Si unius delicto multi mortui sunt, multo magis abundantiam gratiæ, & justitiæ accipientes, &c.* & infra: *Ubi abundavit delictum, superabundavit & gratia*. Ex quo testimonio colligunt Agapet. Pap. epist. ad Anti. & Leo Pap. epist. 81. 95. & ferm. 12. de passione, validius fuisse donum Christi ad libertatem nobis recuperandam, quam Adæ peccatum ad servitutem, unde & sanguinem Christi vocant divitem ad pretium: quæ vera esse non possunt, nisi delicta nostra satisfactionis Christi valor excedat. Et hæc est communis hujus loci intelligentia. Sed præcipue Chryf. hom. 10. in epist. ad Rom. ostendere dicit Paulum eo loco, quod non solum tantum nobis Christus profuerit, quantum nocuerat Adam, sed multo plus, & longe magis: quod elegantissime persequitur: atque inter alia hoc exemplo utitur: *Si quis propter debitum decem nummorum in carcerem conjiciatur, veniat autem alius, qui non solum solvat illos nummos, sed etiam innumera auri talenta largiatur, vinetumque in regalem aulam inducat, ita, inquit, & nobiscum factum est, &c.* Et cum prædictis Pauli verbis egregie consonant illa Isaia. c. 40. *Completa est malitia ejus, dimissa est iniquitas ejus, suscepit de manu Domini duplicia pro omnibus peccatis suis*. Ibi enim sermonem esse de Christo certa res est: illa autem verba in hunc sensum interpretatur Ambrosius in Psal. 37. & in Psal. 119. ferm. 19. & Justin. dialog. contr. Tryph. Similis & egregius locus est apud eundem Isaia. c. 63. *Ego qui loquor justitiam, & propugnator sum ad salvandam*; & infra: *Salvavi mihi brachium meum* &c. ubi lege expositores, præsertim recentiores. Secundo arguitur ex illo ad Rom. 9. ubi Paulus vel Christum, vel ejus fidem vocat verbum consummans, & abbrevians in æquitate: quod exponens Chryf. hom. 16. circa finem, ait esse sensum, tale esse Verbum in Christi redemptione abbreviatum, ut non solum salutem, sed etiam justitiam attulerit. Unde Isai. 10. cujus testimonio Paulus utitur: consummatio abbreviata inundabit justitiam; ubi Hieron. ait, sensum esse, plenam salvationem futuram sub Christo, nec licere aliter exponere, cum Paul. ita exposuerit. Ita etiam exponunt Anacletus epist. 2. Cyprian. lib. 1. cont. Judæos, Ambros. ad Rom. 9.

Tercio arguitur ex tota epist. ad Hebræ. ubi Paul. ex professo contendit probare, unicum Christi sacrificium sufficientissimum fuisse, ad nostram perficiendam redemptionem: & patet ex c. 7. 8. 9. & 10. ubi una Christi solutio, & sanctificatione dicit esse consummatam nostram redemptionem: quæ verba ponderans Cyprian. sermone de ratione Circumcisionis: *Tante dignitatis, inquit, Redemptoris nostri illa una fuit oblatio, ut una ad tollendum mundi peccata sufficeret, qui tanta auctoritate in sancta introivit in sanguine propria*. Ad quod etiam facit, quod Paul. iis locis ait, *Impossibile fuisse, sanguine taurorum, &c. satisfieri pro peccatis*: si autem esset sermo de remissione per acceptationem imperfectam, bene possent per illa sacrificia expiari peccata. Sanguini ergo & sacrificio Christi tribuit perfectam satisfactionem.

Quarto arguitur ex illo principio præcedenti dubio ex traditione. Patrum late confirmato, ad perfectum modum redemptionis nostræ, & æquitatem justitiæ servandam, necessariam omnino fuisse hypostaticam unionem. Hoc enim principium evidenter supponit, Christum Deum hominem potuisse hoc modo, & servata hac æquitate pro nobis satisfacere; nam si solum potuisset ex benigna Dei acceptatione, ad hunc justitiæ modum incarnatio non fuisset necessaria: nec ad hoc satisfaciunt congruentiæ, quæ superius pro Scoti & Duran. opinione allatæ sunt. Illæ enim bene declarant, propter alias rationes extrinsecas, & causas, potuisse expedire, ut Deus homo pro nobis satisfaceret, non vero fuisse hoc non solum expediens, sed etiam necessarium propter propriam rationem justitiæ, & propter æqualitatem inter injuriam, & satisfactionem. Sancti vero, non solum primum docent, sed etiam hoc postrimum, ut visum est. Hoc denique con-

Ratio confirm.



Concilii.  
Tribur.

confirmat, quod in Conc. Triburien. cap. 19. notatur, in consecratione calicis vinum, quod sanguinem Christi significat, in majori quantitate adhiberi, quam aquam, quæ significat populum, ut ostendatur, majorem esse majestatem sanguinis Christi, quam populi fragilitatem. Intelligit autem non solum de majestate in esse suppositali, sed in valore, & pretio.

Funda-  
menta ad  
præcipuâ  
rationem  
præceden-  
tium.

Ultimo, ut rationem a priori hujus veritatis explicemus, supponendum est, gravitatem injuriæ crescere ex dignitate personæ offensæ comparata ad offendentem: ita ut quo major fuerit impropor- tio, seu quo dignior fuerit persona offensæ, & vilior offendens, eo injuria gravior sit, valorem autem satisfactionis potissimum sumi ex dignitate personæ satisfaci- entis: utrumque autem horum sumi videtur ex communi judicio omnium prudentum, quod in re morali plurimum valet. Secundo habet fundamentum in Aris. 5. Ethic. c. 5. dicente repa- s- sionem non semper continere medium justitiæ. Nam si is, inquit, qui magistratum gerit, alium percussit, non est reperiendus, at si quispiam eum percussit, non solum reperiendus est, verum etiam supplicio afficiendus: ubi ex diversa proportionem offendentis & offensi diversam judicat esse tam offensionis, quam pœnæ gravitatem. Tertio, quia quo persona est dignior, eo major illi re- verentia debetur ab inferiori, & ideo e contrario inju- ria illi facta major est. Deinde, per offensionem, & injuriam quodammodo despici- tur, & quantum est in offendente destruitur dignitas personæ offensæ, & ideo ex hoc capite maxime crescit injuria. Denique cum offensa consistat in quadam inæqualitate, & impropor- tione, quanto illa impropor- tio inter personas est ma- jor in ordine ad ipsam offensionem, tanto offensa gra- vior fit. Unde, quia inter Deum & hominem est infi- nita quædam impropor- tio, ideo injuria, quæ fit Deo, in genere injuriæ summam quandam gravitatem habet. At vero e contrario ratio satisfactionis consistit in exhi- bitione cujusdam honoris; honor autem major cen- setur, quo a digniori persona exhibitus est, quia honor est in honorante 1. Ethic. c. 3. habet enim modum actio- nis, quæ rationem suam ab eliciente principio maxime sumit; unde etiam fit, ut honor exhibitus a persona infima parvus moraliter existimetur, præsertim si ad personam dignissimam referatur.

Ex his ergo conficitur ratio: nam sicut gravitas of- fensionis crescit ex dignitate personæ offensæ, ita satis- factionis valor & dignitas maxime sumitur ex persona satisfaci- ente; sed Christus, qui satisfecit Deo pro pecca- tis hominum, erat persona infinite dignitatis; id etiam, quod in satisfactionem obtulit, fuit vita & sanguis divinus, quæ erant res infiniti valoris. Quam ratio- nem amplius urgebimus statim; illa vero utuntur fre- quentissime Patres; & habet fundamentum in Paulo ad Hebræ. 5. *Et quidem cum esset filius Dei, exauditus est pro sua reverentia*: ut recte ibi notat Theophyl. & Cryl. hom. 8. vult ostendere, ejus esse magis effectum, quam gratiæ Dei: & tanta erat ejus reverentia, ut etiam propterea eum revereretur Deus. Cypr. seu potius Rufi. in expositione fidei, in articulo de Passione: *Si potuit, inquit, per unum hominem mors introire, quanto magis per unum hominem, qui & Deus erat, potuit vita restitui?* & sermone de ascensione inquit idem Cypr. *Intelligi voluit in pretio, quod pro eo da- tum est: & in eo, quod ipse dedit pro mundo, quanta fuerit dissimilitudo, ut dubium esse non possit, quin pretii magni- tudo superet negotium, nec æquari possit damnum, quod damnatio juste meruerat, obedientie Christi, quæ usque ad mortem progressa est, & ultro solvit, quod non debebat.* Et Athanas. lib. de Incarnatione paulo post princi- pium: *Corpus assumpsit, quod pro omnibus ad plenam satisfactionem sufficeret, & mortem in omnibus, quasi stipulam igni, consumeret suis meritis, & satisfactio- ne*: sicetiam Ambros. lib. de Incarn. c. 6. *Ex nobis ac- cepit, quod proprium offerret pro nobis, ut nos redime- ret ex nostro.* Ad declarandum vero, valorem illius ob- lationis sumi ex supposito, addit: *Et quod nostrum non erat, ex suo nobis divina largitate conferret: & se- cundum naturam igitur se obtulit nostram, ut ultra no- stram operaretur naturam.* Denique Cyril. lib. 1. de fide ad Reg. cap. Quod mors Christi mundo fuerit sa- lutaris: *Solus, inquit, sufficit, qui super omnes est,* Suarez Tom. XVI.

& Deus est, morte sue carnis a mundo depellens carnem.

Dices primo. Offensio est contra Deum, ut Deum; Obje-ctio.  
satisfactio autem licet sit a Deo, non tamen ut Deo, sed ut homine, qui non est tantæ dignitatis ac Deus; ergo non servatur exacta proportio, & æqualitas inter offensum, & satisfaci- entem. Confirmatur, quia pec- catum non minus displicet, quam placeat bonitas pro- pria; sed non tantum placent opera Christi Deo, quan- tum propria Dei bonitas; ergo, &c. Major patet, nam peccatum de se est destructivum divinæ bonitatis; quan- tum autem amatur res, tantum odio habetur, & displicet destruens illam. Respondetur, Christum, ut Chri- stum, dici minorem Deo, quasi diminuendo redupli- cationem illam, & designando præcise illud esse, quod habet Christus ab humanitate, non tamen sic satisfac- cit ut homo; quia licet humanitas sit formale princi- pium, quo efficitur actio satisfactoria, non est tamen totalis ratio, unde suum valorem habet satisfactio; sed hæc ex persona operante maxime oritur, ut sancti docent, & jam amplius probabitur. Unde simpliciter & absolute satisfacit hic homo, seu Deus homo, qui non est minor Deo. Ad confirmationem negatur ma- jor; neque enim tanta est malitia peccati, quanta bo- nitas Dei; neque peccatum vere destructivum est divi- næ bonitatis, sed solum secundum affectum & moralem quandam imputationem, dicitur ita se gerere pecca- tor, ac si Dei gloriam & majestatem velit destruere; in quo affectu, modo omnino contrario, superavit Christi voluntas omnes pravas hominum voluntates, magis amans & gaudens de divinis bonis, & ipso esse Dei, quam illi habuerint odio. Unde dubium non est, quin Christi opera gratiora Deo fuerint, quam displic- uerint peccata.

Sed hinc oritur secunda ob-je-ctio: nam si singula  
peccata mortalia cum singulis operibus Christi compa- remus, videntur tantum habere malitiæ, & injuriæ, quantum hæc habet bonitatis, & satisfactio- nis: si ve- ro cumulum operum Christi cum cumulo peccatorum, invenitur hic multo minor: non est ergo æqualitas ser- vata. Major probatur, nam sicut opus Christi ex ob- jecto bonitatem quandam infinitam habet, scilicet, ex Deo, ita peccatum, ut est aver- sio: & sicut peccatum ex parte personæ offensæ habet infinitatem in ratione injuriæ, ita satisfactio Christi tantum ex persona satis- faciente habet infinitatem, & aliunde videtur excede- re peccatum, si compareretur persona offendens cum per- sona, cui fit satisfactio; quod oportet etiam compara- re; nam inde fit infinitam esse impropor- tionem inter peccatorem & Deum, quæ non satis videtur com- pensari per æqualitatem inter Christum & Deum. Sicut enim peccator infinite distat a Deo, ita deberet satis- faciens Deum infinite superare, ut esset æqualis re- compensatio. Confirmatur illa ratione, nam si per impossibile Christus peccaret, non posset pro suo pec- cato ad æqualitatem satisfacere: ergo minus poterit pro alienis. De hac difficultate dicendum est late se- quenti sectione: nunc breviter dicitur, unum Christi opus in valore & efficacia satisfactionis, superasse non tantum singula, sed etiam omnia peccata: quia multo aliter persona satisfaciens dat valorem suo operi, scilicet, quasi per modum formæ intrinsecæ, quam perso- na offensa concurrat ad gravitatem offensæ, scilicet per modum intrinseci termini illius habitudinis, quam peccatum dicit ad ipsam. Unde ad dignitatem satisfac- tionis, & valoris, satis est considerare dignitatem per- sonæ satisfaci- entis in se, & absolute, præsertim si sit infinita, quia infinite dignificat. Quocirca illa impro- portio, quæ est inter peccatores & Deum, satis supe- rabundanterque compensatur per infinitatem personæ satisfaci- entis in se ipsa: quia non minus admirandum & æstimandum est, infinitam personam humiliari, & de- jici, etiam si id sit propter Dei gloriam, & honorem, quam sit horrendum & detestandum, vilem hominem injuriam inferre Deo, imo infinite illud hoc excedit, & est in altiori quodam gradu, & ordine satisfactio- nis. Addit vero Richard. Victo. lib. de Incarnat. non solum Deo, sed etiam hominibus se subdidisse Christum, & in manus peccatorum fuisse traditum, & factum op- probrium hominum, ut in illa disproportionem se- vare-

Solutio.

Obje-ctio.

Solutio.  
In quo  
ex dat  
solutio-  
ne Chri-  
sti ob-  
serva-  
tum ho-  
minum.



varetur forma æqualitatis: quia sicut per peccatum, infimum elevatur supra summum, ita per Christi satisfactionem, summum deprimitur subius infimum: totum tamen in Dei gloriam, & honorem: alioqui non esse rationabile obsequium; quæ omnia magis ex sequentibus patebunt. Ad confirmationem respondetur, conditionalem illam esse indignam, quæ assumatur, & esse impossibile, & ex ea sequi quodlibet. Nam si ponas Christum peccare, & durare unionem, ille homo posset satisfacere, quia infinite gratus Deo, & Deus ipse; & non posset, quia inimicus; si autem per peccatum destrueretur unio, iam non esset idem suppositum, quod peccavit, & satisfaceret, & ideo vere non posset satisfacere; sed ille non esset Christus, de quo modo loquimur.

Obje. 3.

Aliter obijcit Durandus, quia diis, & parentibus non possumus reddere æquivalens pro beneficiis susceptis, ut Arist. etiam docuit. 8. Ethic. cap. 13. Ergo neque Christus ut homo hoc potuit; multo ergo minus potuit pro alienis offensis reddere æquivalens Deo. Et confirmatur ex Scoto, quia Pater non tenebatur acceptare Christi satisfactionem: ergo totus valor fuit ex acceptatione gratuita. Sed hæc objectiones cum multis aliis fusiùs tractandæ sunt sectione 5. Nunc breviter ad argumentum responderi potest primo, non esse eandem rationem de offensa & beneficiis compensandis: nam fieri potest, ut beneficium sit multo majus in suo ordine, quam injuria in suo, & ideo non possit quis condignas agere gratias pro beneficio, possit condigne satisfacere pro offensa, ut videre est inter homines patrem & filium. Ita respondet Vega lib. 7. in Trident. c. 9. ex D. Thom. Palud. & Capreol. in 3. d. 20. quæ responsio est quidem sufficiens ad salvandam æqualitatem, considerata ratione, seu obligatione unius debiti tantum, non tamen si omnia simul debita pensentur, ut magis ex sectione 7. contabit. Et ideo aliter dicitur cum communi schola Thomistarum, quamvis persone creatæ non possint Deo reddere æquivalens pro beneficio suscepto: Christum tamen, qui persona increata est, propter infinitam dignitatem suam potuisse condignas gratias agere Deo pro beneficiis suæ humanitati collatis, simulque potuisse condignam pro peccatis nostris satisfactionem offerre. Adde, Aristotelem loqui de beneficio æquali ejusdem rationis: sic enim nemo potest parenti reddere æquale donum ei, quod ab illo recepit. Et hoc modo etiam Christus non potest reddere simile donum vel munus Deo; potest tamen condignas gratias agere, & totum illud bonum cum quadam æquali proportionem divino obsequio submittere. Ad confirmationem vero, quicquid sit de antecedenti, negatur consequentia: quia licet pretium oblatum sit condignum, & æquale rei, pro qua offertur, potest dominus rei non acceptare illud in pretium, si nolit rem vendere, nec cum alio contrahere. Valor ergo non pendet ex acceptatione, sed potius illi supponitur, ut iustitia possit intervenire perfecta.

#### SECTIO IV.

*Utrum opera Christi Domini fuerint infiniti valoris, & efficacia ad satisfaciendum.*

Opinio 1.

EX fine præcedentis dubitationis constare potest, exactam intelligentiam veritatis, quæ ibi tradita est, ex præfenti dubitatione pendere. Authores enim, qui negant operibus Christi sufficientem valorem, nisi ex acceptatione divina, consequenter, imo majori ratione, negant infinitum thesaurum satisfactionis ejusdem Christi. Unde Scot. non plus valoris censet esse in operibus Christi, quam sit bonum illud, ad quod a Deo ordinarentur & acceptantur: & quia de facto non referuntur, neque acceptantur ad aliquid infinitum, inde concludit, non habere valorem infinitum: quinimo addit ulterius Medina, magis esse infinitum peccatum hominis, quam satisfactionem Christi. Peccatum enim in ratione culpæ est infinitum, quia, quod in se est, destruit Deum (agimus enim de mortali), unde & poena illi respondens infinita est, saltem extensione, & duratione perpetua; at vero, Christus neque poenam per tulit obitum, aut æternam, nec aliquid operatus est, quo infinitum aliquod bonum inferret Deo.

Alii vero authores negare possunt Christo Domino infinitam satisfactionem, quia non videtur necessaria ad perfectam æqualitatem iustitiæ in nostra redemptione servandam. Omnia enim hominum peccata finita sunt simpliciter; ergo per opera etiam finiti valoris possunt ad æqualitatem compensari. Rursus licet peccata, quatenus contra Deum sunt infinitum, sint ipsa secundum quid infinita, tamen simpliciter eorum malitia & reatus finita sunt; poterunt ergo ad æqualitatem compensari, licet opera Christi tantum secundum quid sint infinita, quia habitudinem habent ad personam infinitam, a qua speciali modo proficiunt. Neque enim ex eo capite major infinitas oriri posse videtur; nec vero assignari potest aliud, ex quo oriatur.

Altorum sententia.

Nihilominus communis, vera, & sana doctrina habet, opera Christi Domini habuisse valorem absolute, & simpliciter infinitum ad satisfaciendum, & merendum apud Deum: obiter enim conjungo meritum cum satisfactione, quia licet aliis differant, quia meritum dicit ordinem ad mercedem, satisfactio ad injuriam recompensandam, illud respicit commodum ejus, qui meretur, hæc vero honorem, & recompensationem ejus, cui fit & offertur: tamen, quod ad propositum pertinet, ejusdem rationis sunt, & difficultates habent ita connexas, ut non debeant disputatione disjungi. Hæc ergo doctrina communis est antiquorum Theologorum, quos in assertione postrema præcedentis dubitationis allegavi. Inducatur etiam a D. Thom. infra quæst. 7. art. 1. ad 2. quæst. 46. art. 6. quæst. 48. artic. 2. quæst. 49. tota, apertius & optime quodlib. 2. a. 2. & Alex. Alenf. 3. par. quæst. 17. membr. 5. art. 2. Bonav. in 3. d. 3. artic. 1. quæst. 2. & Richard. ibi artic. 1. q. 2. & discipuli, D. Thom. communiter, Capreol. & Palud. supra, Cajetan. hic, Ferra. 4. contra gent. cap. 55. Sor. lib. 3. de natura & gratia cap. 6. & in 4. dist. 19. quæst. 2. artic. 2. Driedo de captivitate & redemp. generis hum. cap. 2. idem Vega lib. 7. in Trid. cap. 8. & 9. Jacob. Bil. in scholiis ad vitam Gregor. Nazian. num. 127. ubi dicit sanguinem Christi infinitis intervallis distare a sanguine martyrum: & idem sentit Anselm. lib. 1. cur Deus homo cap. 14. & 19. & sumi potest ex variis locutionibus sacræ scripturæ, & sanctorum: primo enim scriptura loquitur de sanguine Christi, & pretio nostræ redemptionis, ac de re infiniti valoris. Job. 6. *Utinam appenderentur peccata mea, & calamitas, quam patior, in statera, quasi arena maris hæc gravior appareret*: quæ verba ad Christum accommodat Greg. 7. moral. cap. 2. quamvis ad literam alium habeant sensum de persona ipsius Job, & magnitudine doloris ejus comparata ad peccata ejus, ut vulgata lectio præ se fert: vel ad significationem & demonstrationem afflictionis, quam exterius ostendebat, ut ex versione Septuaginta interpretum & Paraphrasi Chaldaica sumitur, & notavit Vatablinus, & antea Chrysost. & alii, quos ibi referunt Eusebius, & Petrus Comit. in Catena. Præterea facit id Psalm. 129. *Apud Dominum misericordia, & copiosa apud eum redemptio*: & 1. Corinth. 6. *Empti enim estis pretio magno*: & 1. Petr. 1. *Sed pretiosus sanguis*: & 1. Joan. 2. *Non pro nostris autem tantum, sed etiam pro totius mundi*. Quæ locutiones, licet non expresse infinitatem asserant, indicant tamen quandam inestimabilem valorem, & sine termino. Secundo tamen præcipue hoc confirmat definitio Clemens. 6. Extravagan. unigenitus, de poenit. & remis. ubi expresse dicit, Christum suis meritis & satisfactionibus acquisivisse infinitum thesaurum hominibus, quo qui usi sunt, Dei amicitia participes sunt effecti: & ideo dicit ibidem unam guttam sanguinis Christi fuisse sufficientem ad perfectam redemptionem nostram, propter unionem ad Verbum: quomodo loquitur Nazian. orati. 42. sub finem, ubi maximum miraculum passionis Christi dicit esse, quod exigua cruoris gutta orbem universum instauravit. Hinc etiam Basil. exponens verba illa Psalm. 48. *Frater non redimit, dicit, pretium hoc superare omnem valorem*: & Ambros. præfat. in Psalm. 35. *Bonum aurum sanguis Christi, dives ad pretium, profluit ad lavandum omne peccatum*. Tertio ab inconvenienti, quia alioqui vix, aut nulla ratione salvari potest perfecta iustitiæ æqualitas: primo, quia Christus satisfacit pro æterna poena debita omnibus homi-

Opera Christi sunt infiniti valoris.

Ratio.



hominibus: quæ cum quodammodo infinita sit, & alterius rationis ab omni pœna hujus vitæ, non posset illi æquari satisfactio per temporalem pœnam hujus vitæ, nisi aliunde haberet infinitatem. Secundo, vel satisfactio Christi de se valebat ad satisfaciendum iuste, & æqualiter pro quibuscumque peccatis, quantumvis in multitudine, & gravitate in infinitum augeantur, vel non: si hoc secundum dicatur; ergo tantum possent augeri, & multiplicari, ut ad satisfaciendum pro illis ad æqualitatem non sufficeret Christus, quod est contra modum loquendi scripturæ, & Patrum. Deinde, unde constaret nobis non ita multiplicari peccata hominum, ut non merito timeremus, ne exhauriretur thesaurus meriti, & satisfactionis Christi? & ideo merito Clem. 6. dicta Extravag. ex infinitate intulit, nihil esse quod timeamus. Si vero primum dicatur, ad id requiritur infinitas satisfactionis, seu valoris; sicut si esset pecunia tanti valoris, quæ sola sufficeret ad emendum quascumque res, quantumvis in modo & pretio crescerent, illa requireret infinitum valorem, & charitas, quæ immutata manens, potens esset elicere actus intensiores in infinitum, ipsa esset actu infinita.

Dices, hujusmodi discursus non semper inferre finitum, sed vel hoc, vel rem altioris ordinis; dici ergo poterit meritum Christi esse altioris ordinis; & ideo ad hæc omnia valere, tamen in re esse infinitum quid. Respondetur, si intelligatur esse finitum quid in genere entis, concedi posse, quia re vera non est ens physice infinitum: tamen in æstimatione morali recte concluditur valor infinitus, ut magis in sequenti ratione explicabitur.

Ratio eff.  
scax.

Quarto ergo argumentor: quia satisfactio crescit in valore ex dignitate personæ satisfaciendæ: sed persona satisfaciendæ in Christo est infinitæ dignitatis: ergo & opera ejus sunt infiniti valoris ad satisfaciendum. Major supra ostensa est, & tota ratio fundamentum habet in Patribus dicentibus, actiones Christi ex dignitate personæ operantis fuisse deificatas, & Deiviriles: ut dicit Dionysius epist. 4. ad Cajum, & c. 2. de divin. nominibus & Damasc. lib. 3. c. 15. & 19. ubi actionem Christi dicit esse salutaris, quia non tantum humana est, sed etiam divina: quod infra explicans, inquit esse deitate perfusam. Unde optime Theod. Ancvr. hom. de Nativit. Domini, quæ habetur in Concil. Ephes. t. 6. c. 10. dicit, Deum assumpsisse passiones, ut illæ Deificatæ victoriam adversus passiones nobis obtinerent: nam vim illis divinam tribuit: & quæ ibi late persequitur, & exemplo Regiæ dignitatis accommodatæ explicat: & similia fere habet in alia homilia ejusdem festi, eodem tom. 6. appendice 5. cap. 2.

Discussio:  
precedens  
ratio-  
nis.

Quorundam  
opinio circa  
infinitatē  
valoris  
operum  
Christi.

Quoniam vero hæc ratio fundamentalis est in hac materia, primum omnium verum illius sensum explicare necesse est; deinde objectionibus, quæ contra illam fieri possunt, satisfacere. Dixerunt ergo quidam, opera Christi habuisse hunc infinitum valorem ex eo, quod a persona divina non solum per voluntatem humanam, sed etiam per divinam proficiscebantur. Unde in operibus Christi compositionem, necio quam, ex actu voluntatis divinæ, & humanæ congebant: ita ut ex eis coalescat unus actus moralis infinitæ bonitatis, & valoris: & hanc putant esse operationem Theandricam, seu Deivirilem, de qua Patres paulo antea citati loquuntur; & eodem modo intelligunt Leonem Papam epist. 10. dicentem. *Unam naturam in Christo operari cum consortio alterius.* Et Nazianzen. orat. 2. de Filio, quæ est 4. de Theologia, dicit, *In Salvatore velle totum esse Deificatum:* Quæ dicta refert & approbat Agatho Papa in 6. Syn. act. 4. ep. 1. Et ratione declarant, quia ex utraque Christi natura bene componitur una persona: ergo ex utriusque actu etiam componitur una operatio. Sicut in homine, quia una persona componitur ex anima & corpore, ita operatio, quæ ab utraque parte procedit, una censetur, unumque moralem valorem haberet. Unde, sicut operatio corporis habet moralem valorem ab actu animæ, qui est veluti forma ejus, corpus autem est instrumentum animæ; ita operatio Christi humana accipit valorem suum ab actu voluntatis divinæ, quia etiam humanitas est instrumentum conjunctum divinitati; & voluntas divina est veluti forma omnium inferiorum actionum Christi.

Suarez Tom. XVI.

Hæc sententia & in se valde falsa est, & ad rem præsentem explicandam impertinens. Primum enim, qui illam compositionem fingunt valde favent hæreticis ponentibus in Christo unam tantum operationem, quorum error damnatus est in VI. Synodo, ubi Agatho Papa hæreticum esse dicit, unam tantum in Christo asserere operationem compositam, sicut & unam compositam naturam: quia operatio consequitur naturam; & absolute definit, duas esse in Christo operationes inconfusas, & impermixtas: & ita loquuntur communiter Patres, ut D. Thom. infra docet q. 19. art. 1. & 2. & attingemus d. 37. Ratione etiam demonstrari hoc potest, quia omissis aliis actibus humanitatis Christi, considerando solum actum liberum voluntatis humanæ, a quo pendeat totus valor meriti, & satisfactionis ejus, certum in primis est, illum actum fuisse realiter distinctum ab actu voluntatis divinæ; & illum fuisse entitatem creatam; hunc vero esse rem increatam: quo saltem sensu de fide est, ob prædictas definitiones, illos fuisse duos actus. Deinde est etiam de fide, hunc actum voluntatis humanæ Christi fuisse liberum propria libertate & in ordine ad ipsam voluntatem humanam, & liberam facultatem ejus, & non tantum per denominationem ab actu voluntatis divinæ: alioqui Christus in quantum homo non fuisset liber, & consequenter nec meruisset, nec satisfecisset. Et hoc latius ostendemus prædicta disput. 37. Interrogo ergo, quomodo ex his duobus actibus voluntatis divinæ & humanæ dicatur unus actus componi; aut enim id intelligitur de compositione physica, aut morali. Utrumque autem est in rigore falsum: ergo nullo modo. Probatur minor quoad priorem partem, quia vel illi duo actus dicuntur physice unum componere, quia habent inter se aliquam immediatam unionem & physicam compositionem; vel solum quia sunt in duabus naturis physice unitis & conjunctis in eadem persona. Primum esse evidenter falsum, tum quia nec fingi, nec cogitari potest, qualis sit illa compositio, tum etiam quia evitari non potest, quin illa compositio sit unius naturæ, seu secundum naturam: non enim esse potest unius personæ, quia nec quod unitur ex parte rei creatæ, natura substantialis est, sed actus accidentalis; neque ex parte Deidicatur esse subsistentia ut sic, sed actus voluntatis; imo nec de subsistentia id dici posset, quia, ut infra dicemus, non potest immediate uniri formæ accidentali: talis autem natura composita ex actu divino & creato quamnam esse potest? Neque enim erit natura substantialis, neque accidentalis: nec ille actus erit humanus, nec divinus; nec etiam explicari potest, quo genere unionis jungantur, & quis eorum ad alterum compareretur, ut potentia, vel subiectum. Tum denique, quia operatio sic composita, præsertim cum sit immanens, requirit unum principium proportionaliter compositum: & consequenter unam naturam compositam, quod Eutichianum est, ut in simili argumentatur Damascenus lib. 3. cap. 19. & D. Thom. infra quæst. 19. art. 1.

Secundum vero non minus falsum est, quia, quod actus sint in duabus naturis ejusdem suppositi, non satis est, ut unum actum physice componere dicantur, ut patet primo in actu voluntatis & appetitus ejusdem hominis, qui ex parte subiecti majorem unitatem habere videntur: quia non solum sunt in duabus naturis ejusdem personæ, sed etiam in duabus partibus ejusdem nature: & tamen non componunt physice unum actum vel operationem. Secundo duæ formæ accidentales, eo quod sint in uno subiecto, non componunt unam formam accidentalem: ergo similiter. Tercio & magis ex propriis, ac principiis fidei, duæ naturæ substantiales, licet physice uniantur in una persona, non componunt inter se unam naturam: ergo similiter duo actus voluntatis divinæ & humanæ, quamvis mediis naturis in una persona jungantur, non ununtur physice ad componendum unum actum. Quarto, ratio omnium est, quia quamvis sint in eadem persona, non tamen secundum idem, neque inter se habent illam immediatam unionem: & ideo non possunt inter se constituere unum actum, licet constituent eundem operantem utroque actu. Altera pars minoris, scilicet, de unitate seu compositione morali, probatur in hunc modum



dum, quia tunc ex duobus actibus physicis componitur proprie unus actus moralis, quando unus habet totam suam moralitatem ab alio; quod solum contingit, quando tota libertas unius est denominative, seu imperative ab alio, quomodo actus interior, & exterior hominis dicitur unus moraliter: sed actus voluntatis humanæ & divinæ Christi non hoc modo comparantur, sed uterque per se habet suam propriam libertatem, ut dictum est.

Evasio.

Dicetur fortasse, non tantum illo modo contingere, actum dici moraliter unum tamquam ex duobus moraliter compositum: nam intentio & electio dicuntur moraliter componere unum actum, quamvis uterque suam habeat propriam libertatem; imo actus ministri dicitur esse idem moraliter cum actu Domini imperantis: sic ergo actus Christi dicetur unus moraliter, quatenus actus voluntatis divinæ vel imperat, vel dirigit & gubernat actum voluntatis humanæ: & e converso hic est illi conformis & subordinatus. Sed in primis hæc unitas tantum est metaphorica, quæ potius est conformitas quadam voluntatum, quæ non excludit pluralitatem simpliciter, & ideo potius ita est absolute loquendum, maxime ad vitandum hæreticorum consortium. Ac denique (ut simul probemus alteram partem in principio positam) hic motus unitatis impertinens est ad explicandum valorem operationis humanæ Christi: nam, si voluntas divina consideretur ut regula vel lex voluntatis humanæ, sic pertinet ad valorem moralem humani actus, quantum ad honestatem, & bonitatem moralem ejus, per modum objecti: unde ab illo ut sic non potest sumi infinitas hujus valoris. Hoc enim modo, etiam nostri actus satisfactorii sunt unum cum voluntate divina unitate conformitatis, & illam respiciunt ut regulam, & inde ut primum objectum; & non propterea habent nostri actus valorem infinitum ex voluntate divina, aut ex habitudine ad illam. Si vero consideretur ut principium extrinsecum, & aliquo modo efficiens, aut dirigens & gubernans voluntatem humanam Christi, seu actus ejus, quibus pro nobis satisfacit, sic etiam non potest conferre illis infinitatem: quia nec valorem ullum moralem hoc modo illis immediate præbet: quia ut sic neque est objectum, neque circumstantia operationis, sed causa quasi extrinseca, quæ non aliter confert ad valorem actus, nisi in quantum dat virtutem, vel concursum ad efficiendum ipsum actum: & ideo ipsa ut sic non augeat, neque confert valorem præter eum, quem habet actus ex objecto suo, & circumstantiis. Et confirmatur primo; nam hoc modo etiam Pater & Spiritus sanctus præbent illud regimen per concursum voluntati humanæ Christi: quamvis enim persona Filii speciali titulo dicatur per voluntatem divinam gerere curam voluntatis humanæ, propter convenientiam in eodem supposito: nihilominus tamen, quidquid divina voluntas in eo actu agit, vel vult, necesse est, ab omnibus personis fieri, quia est una voluntas communis, propter quod opera ejus ad extra sunt indivisa: sed pater & Spiritus sanctus quatenus concurrunt ad illum actum non dant illi valorem infinitum: ergo actus Christi non habent hunc valorem ex aliquo concursu voluntatis divinæ. Confirmatur secundo, quia etiam Spiritus sanctus voluntate sua divina regit nostras voluntates, & eas meriti ac satisfacere efficit; tamen non confert illarum actibus valorem infinitum: imo nec aliter facit, eos habere valorem, quam dignificando & sanctificando personas, & concurrente ad substantiam, & modum intrinsecum ipsorum actuum: ergo nec per se confert valorem actibus humanis Christi, sed tantum concurrat ad illos, & dat auxilia gratiæ necessaria, personam autem non sanctificat, sed ex se sanctam supponit; & ab illa est valor infinitus, illorum operum.

Tandem præter hos modos non potest fingi alius, quo illa voluntas divina conferat valorem actui voluntatis Christi; solum enim superest alius, quo actus voluntatis potest dici conferre valorem moralem actui inferioris potentia, quia est forma moralis ejus; sicut actus nostre voluntatis potest dici conferre valorem actui appetitus, vel exteriori: hic autem modus non potest attribui actui voluntatis divinæ respectu actus voluntatis humanæ Christi, propter duo. Primum, quia ut actus voluntatis hoc modo conferat valorem inferiori actui, necesse est, ut sit forma ejus in esse liberi, sicut accidit

in exemplo allato de actibus nostris: quia alio modo non potest intelligi, quomodo sit forma; hoc autem modo non est actus divinus forma actus humani in voluntatibus Christi, ut visum est. Secundo, quia ut actus voluntatis hoc modo det valorem, oportet, ut ipse in se sit capax valoris, meriti, vel satisfactionis, ut illum communicet alteri, saltem per extrinsecam denominationem; sicut communicatur meritum actui exteriori per interiorum; vel certe ut cum illo constituat unum actum moralem ordinatum ad recompensandam injuriam alterius, ut est in satisfactione; hoc autem non potest convenire actui increato voluntatis divinæ, ut per se notum est. Et ideo non potuisset Verbum Divinum satisfacere per naturam irrationalem assumptam, nec per dolores, aut pœnas ejus, quia non posset per actum voluntatis divinæ actus talis naturæ moraliter informare, aut libertatem extrinsecam eis conferre ad meritum vel satisfactionem accommodatam.

Atque hinc solum relinquitur fundamentum contrariæ sententiæ, nam ex unitate personæ male inferitur unitas operationis, cum hæc naturam consequatur, ut Patres & Concilia docent. Neque est simile, quod de homine assertur, tum quia duæ naturæ in homine sunt partiales, & componunt unam naturam; tum etiam quia voluntas hominis per suos actus potest informare moraliter actus corporis seu inferiorum virium, quod non potest voluntas divina, ut dictum est. Quocirca aliter corpus est instrumentum animæ, & humanitas Verbi: quamvis enim in hoc convenient, quod utrumque est instrumentum substantialiter conjunctum, differunt tamen in modo; nam corpus non est instrumentum per se capax propriæ operationis moralis, nisi per animam, seu per denominationem ab actu animæ, humanitas vero per se est proprium principium operationis moralis, unde, si proprie loquamur de humanitate respectu propriarum operationum, non est proprie instrumentum, sed principium principale operandi. Quod si respectu verbi dicatur instrumentum, solum est, vel ut denotetur, non esse propriam verbi naturam, sed quasi alienam, quamvis per se & substantialiter conjunctam, vel magis proprie in ordine ad actiones supernaturales, & miraculosas, ut interpretatur D. Th. infra q. 19. art. 1. & adhuc talis actus supernaturalis, ut est a Verbo operante per humanitatem, non est compositus ex actu creato & increato; sed est unus & idem manans ab humanitate cum auxilio supernaturali Dei, ut quaest. 13. latius dicitur. Patrum autem sententiæ ibi citatæ ex dicendis intelligentur facile.

Secundo dixerunt alii humana Christi opera habere infinitum valorem ex eo, quod immediate ac physice procedunt a Divina Verbi personalitate, non tantum ut a sustentante & terminante naturam humanam, sed etiam ut per se ipsam immediate influente in ipsum actum voluntatis humanæ Christi. Quod ita esse solum probant ex illo principio, quod actiones sunt suppositorum: nam hoc significat, supposita ipsa habere proprium & per se influxum in actiones; nam si sola natura esset totum principium influens in actiones, potius esset actio naturæ attribuenda, quam supposito: sicut quando aqua calida calefacit, potius calori, quam aquæ tribuitur, quia calor est totum principium calefaciendi: & aqua solum se habet ut materialiter sustentans calorem. Unde illi per accidens tribuitur actio. Quod vero hoc sit necessarium ad infinitum valorem, patet, quia alias suppositivitas Verbi mere per accidens se haberet ad operationes Christi humanas: sicut aqua omnino per accidens se habet ad calefactionem, quæ a calore procedit: ex his vero, quæ sunt per accidens, nihil valoris vel dignitatis accrescit operi. Hæc vero opinio falsum aliquid confingit, & minime necessarium ad valorem operum Christi explicandum, ut bene docuit Scotus in 3. dist. 19. in quo illi consentit Capreol. in 3. dist. 18. ad 5. ipsius Scoti cont. 1. conclusion. Primum patet ex generali ratione substantiæ, quæ præcise & secundum suam rationem formalem non est proximum principium operandi; sed est tantum quidam naturæ terminus constituens suppositum, quod est principium per se operationum, tamquam id, quod operatur: formale autem principium quo est natura per se aut per potentias suas: sed personalitas Verbi unica est humani-

Fundamentum contrariæ opinionis solvitur.

Ratio convenientiæ &amp; differentie corporis respectu animæ, &amp; humanitatis Christi respectu Verbi divini.

Aliorum opinio circa infinitatem valoris operum Christi.

Rejicitur.



tati solum in ratione subsistentiæ, ut infra videbimus; ergo non unitur, ut sit principium per se & proximum operationum, ita ut ipsa sit proxima ratio agendi vel totalis, vel partialis. Major patet inductione in omnibus creaturis, ut ex Metaphysica constat, nam subsistentia solum est quidam modus terminans naturam in ratione existendi in se. Item in Trinitate, quamvis personalitates sint tres, quia natura & voluntas est una, actiones ad extra sunt indivisæ: quia tota ratio agendi est natura, non persona: e contrario vero in Christo, licet persona sit una, quia naturæ sunt duæ, operationes etiam sunt duplices; quia principium quo operationis est natura, ut ex Damasceno; & aliis Patribus, & Conciliis, trademus infra quæst. 18. & 19.

Unde argumentor secundo, quia hoc specialiter repugnat huic personalitati Christi; quia aliàs aliquam propriam efficientiam haberet ad extra relatio Verbi, quam non habent relationes Patris, & Spiritus sancti; consequens autem est omnino falsum; aliàs non omnis efficientia ad extra esset communis omnibus personis; sicut enim terminare naturam humanam non est commune omnibus, quia convenit Verbo per suam relationem, ut talis est; ita, si per illam effective influeret in opera humanitatis, illa efficientia non esset communis omnibus personis. Tertio ostendo sine causa confingi hanc efficientiam ad explicandum valorem satisfactionis Christi, quia persona confert valorem operi ut moralis circumstantia ejus; ut autem circumstantia moralis augeat bonitatem vel valorem operis, non semper requiritur proprius ac physicus influxus secundum eam rationem, qua circumstantia est, ut in hac ipsa circumstantia personæ videre licet: multorum enim opinio est, gratiam habitualement non influere physice in actus meritorios, quatenus est in essentia animæ, & tamen certum est, quatenus dignificat personam, gratamque Deo reddit, maxime conferre ad valorem morale operum in esse meriti, vel satisfactionis: & quamvis fortasse in aliquos actus per se influat physice, scilicet in eos, qui sunt supernaturales quoad substantiam; tamen verius est non solos illos esse meritorios, sed etiam actus morales virtutum acquisitarum, præsertim cum morali aliqua relatione caritatis: actus etiam externi satisfactorii sunt; & tamen valorem habent a gratia, quæ in illos non physice influat. Item dignitas regis, vel alia similis, augeat interdum valorem morale operis, quamvis non influat physice in opus, ut per se constat. Ita ergo Verbum divinum hoc ipso, quod constituit personam Christi Dei hominis, a qua opus satisfactorium simpliciter procedit, est sufficiens circumstantia moralis talis operis, ut ab illa possit valorem accipere: non est ergo necessarius ille influxus physicus illo modo explicatus.

Et per hæc satisfactum est fundamento contrariæ sententiæ. Actiones enim dicuntur esse suppositi, tamquam ejus, quod operatur, quia ipsum est, quod proprie & complete existit: operatio autem sequitur esse; & ideo simpliciter tribuitur ei, quod per se existit, scilicet supposito, ut iterum attingemus infra disp. 10. sc. & 2. & 3. ad hoc autem necesse non est, ut suppositum operetur per ipsam subsistentiam tanquam per rationem operandi, sed satis est, ut per naturam operetur tamquam per principium quo; subsistentia vero sit conditio per se necessaria ex parte operantis, ut completa sit, & ita operari possit. Exemplum autem, quod adducitur de aqua calefaciente, partim simile est, partim differens: calefactio enim per se est a calido ut sic, in quo includitur aliquid per modum subsistentis; & quoad hoc est similitudo. Quod autem illud calidum sit aqua, accidentarium est, quia etiam ipsi aquæ extraneum & accidentarium est, quod sit calida; & ideo quamvis ei possit attribui calefactio, ea ratione qua subsistit, & sustentat calorem, tamen respectu illius est per accidens, quia calor omnino ei accidit. At vero quod natura substantialis subsistentia terminetur, non est ei per accidens, sed per se: personæ etiam non accidit natura, sed per se illam constituit in tali ratione, & ideo actio per se attribuitur subsistenti in tali natura. Unde Pater, Filius & Spiritus sanctus per se dicuntur creare ex parte operantis, quamvis ex parte creationis non esset per se necessaria trinitas personarum.

Objecio. Dices, hinc potius sequi, Verbo divino, seu Deo Suarez Tom. XVI.

per accidens attribui humanas Christi actiones, etiam si huic homini Christo formaliter loquendo per se tribuantur: quia humanitas respectu Verbi est natura extranea: & quasi accidentario ei advenit. Respondetur primum, negando simpliciter sequelam: quia licet humanitas non sit connaturalis Verbo, in quo assimilatur calori ad aquam comparato, tamen per se illi unitur, in quo differt a calore: nam ex Verbo & humanitate vere ac propriissime confurgit una persona, & unum ens per se; & ideo illi personæ in eo statu constitutæ per se tribuantur, quæ secundum utramque naturam illi conveniunt, ut latius infra q. 2. & 16. explicabitur. Addo deinde, hoc nihil referre ad rem, de qua agimus: quia, ut dixi, ad rem moralem nihil refert, quod prædicatio sit aut per se, aut per accidens, logice vel physice loquendo, dummodo moraliter persona operans, & dignitas ab illa proveniens sit circumstantia operis: ad quod satis est, quod sit conditio dignificans personam operantem, quod non solum in præsentem reperitur, sed etiam quod illa dignitas est substantialis & intrinseca ipsi personæ operanti.

Atque ex his facile est, tertium modum dicendi rejicere, qui in præsentem excogitari posset, scilicet, actus humanos Christi esse infiniti valoris propter immediatam unionem, quem habent ad Verbum divinum, ratione cujus infinitam habent dignitatem. Itaque, sicut ex Eugenio supra referebamus, sanguinem Christi fuisse pretium infiniti valoris ad nostram redemptionem propter unionem ad Verbum, quod intelligendum est de immediata unionem, ut infra q. 4. ostendemus: ita posset quis existimare, actus ipsos esse infiniti valoris propter propriam & immediatam unionem ad Verbum, quia aliàs sola unio per accidens, media humanitate, vel sola emanatio non videtur posse sufficere. Primum patet, quia illa est valde extrinseca, & per se nihil confert ipsi actui. Item quia, si in sanguine est necessaria illa unio, cur non in singulis actibus? secundum etiam ostendi potest, quia creatura, vel creatio, etiam emanant a Deo secundum se, & tamen inde nullum specialem valorem, aut dignitatem accipiunt: & si intelligamus, per Christi actionem, aliquem effectum ad extra fieri, ex respectu illo ad Christum non conferetur habere infinitum aliquem valorem, & dignitatem. Sed hæc etiam sententia supponit falsum, & ad rem præsentem minime necessarium. Falsum est enim, divinum Verbum fuisse immediate unitum omnibus actibus & operationibus Christi, ut latius infra dicturi sumus q. 3. & 4. quia Verbum solum fuit unitum humanitati substantiali unionem, & ad supplendam subsistentiam humanæ naturæ. Unde solum ea sibi immediate univit, quæ subsistentiæ creatæ immediate uniuntur; accidentia autem non uniuntur immediate creatæ subsistentiæ, sed insunt naturæ subsistenti. Sic ergo in Christo accidentia humanitatis non aliter fuerunt unita Verbo, quam per humanitatem, scilicet, in quantum inhærebant animæ vel corpori Verbo unitis. Quod si alia accidentia non habent illam immediatam unionem, nec de actibus intellectus aut voluntatis id affirmari potest, tum quia magis intrinseca & inseparabilia sunt alia accidentia, quam hi actus; tum etiam quia, cum hæc unio non sequatur ex vi assumptionis humanitatis, esset miraculosa, etiam supposita Incarnatione; & ideo sine sufficiente autoritate, vel cogente ratione non est asserenda: tum maxime quia ostendimus infra, fieri non posse, ut accidentia immediate uniantur subsistentiæ divinæ, idque maxime repugnare accidentibus actu inhærentibus, ut erant actus vitales, seu operationes humanitatis Christi. Quod autem illa unio non sit necessaria ad hunc valorem, ostendi potest ex dictis contra præcedentem sententiam: quia cum hic valor non sit res physica, sed moralis, ad illum non est necessaria immediata unio physica ad Verbum, sed sufficit talis conjunctio, quæ secundum prudentem estimationem ad eam dignitatem, & valorem sufficiat: sicut D. Thom. art. 1. p. q. 25. art. 6. ad 4. ait Christi humanitatem habere ex unionem ad Verbum infinitam quandam dignitatem, & idem affirmat de B. Virgine, quatenus est mater Dei, nam licet illa dignitas sit longe inferior, tamen in sua ratione est infinita propter habitudinem seu affinitatem ad verbum, & infra quæstione

Aliorum circa idem opinio refellitur.



septima ostendimus, gratiam Christi, eo quod est gratia Verbi Divini, habere quandam infinitam æstimationem & dignitatem, quamvis non sit immediate unita Verbo, sed solum quia inest animæ Verbo unitæ. Sic ergo in præsentia, ut actus Christi habeant in suo ordine infinitum valorem, non est necesse, quod per se habeant immediatam unionem ad Verbum.

Infinitas  
valoris  
operum  
Christi  
considerari  
potest ex  
parte per-  
sonæ præ-  
cise ut  
operantis.

Dicendum igitur est in actibus voluntatis Christi ex triplici capite posse infinitatem considerari, primo ex parte personæ, præcise ut operans est, & eliciens illos actus per humanitatem sibi conjunctam: nam ex vi hujus respectus erant omnes illi actus aliquo modo divini, & speciali titulo proprii divinæ personæ: quod fere sensu intelliguntur Patrum testimonia, quæ prima sententia paulo ante citata afferebat: sic enim verum est, unam naturam in Christo operari cum consortio alterius, quia, quidquid per unam naturam Christus operatur, verè tribuitur eidem ut subsistenti in altera; sic enim & homo creat, & Deus obedit, quod satis est, ut verum etiam sit, totum velle Christi esse deificatum, ut ex Dionysio referebamus. Quomodo etiam omnis humana operatio Christi potest dici Theandrica, quia est a Deo homine, quamvis speciali etiam ratione hæc appellatio tribuatur actionibus miraculosis, quas Christus per humanitatem exercebat, ut sexta Synodus exponit, Act. 2. 8. & 9. & Agatho in d. epi. & D. Th. infra q. 19. art. 1. ad 1. Quod autem hic respectus ad personam operantem infinitam conferat ad valorem morale infinitum, probatur, quia persona operans moraliter est quasi forma propria actionis suæ, unde illam dignificat, & æstimabilem reddit, ut etiam exemplis moralibus supra declaratum est: ergo, ubi persona est infinita, confert valorem cujusdam infinitæ rationis & dignitatis. Neque contra hoc obstat exemplum de creatione, vel externo effectu a Christo producto; nam, si in his effectibus a Deo productis consideretur solum absolutum esse illorum, sic non habent specialem dignitatem ex eo, quod a Deo producti sint; si tamen consideretur productio illorum sub ratione actionis liberæ Dei, habet etiam per extrinsecam denominationem valorem quandam seu æstimationem infinitam in ratione doni aut beneficii, quia, nimirum, præcedit ab infinita voluntate libere se determinante & applicatur ad tale beneficium conferendum; & hoc modo actus voluntatis Christi, qui respectu Dei erat infinitum meritum, respectu nostri erat infinita misericordia, & infinitum beneficium.

Sumitur  
item infi-  
nitas va-  
loris in  
actibus  
humanis  
Christi,  
ex parte  
divinæ  
personæ  
ut termin-  
antis  
unionem  
eorum.

Secundo potest hæc dignitas considerari in his actibus ex parte personæ, cui uniuntur: sunt enim hi actus voluntatis immanentes, & ideo intrinsece postulant, ut maneat in eadem persona, a qua fiunt, mediante natura, per quam fiunt. Et ex hac unionem accipiunt actus inæstimabilem valorem, quia sunt Deitate perfusi, ut Damascenus loquitur. Unde hoc ipso, quod illi afficiunt personam Dei media natura, quam Deus, per unionem, suam fecit, ipse etiam Deus illos moraliter afficit atque dignificat; quæ dignitas, quamvis proveniat actionibus media unionem humanitatis, quæ est quid creatum in ipsa, tamen ab ea solum est tamquam a conditione necessaria: a persona autem Verbi sumitur formaliter, tamquam a persona, quæ per seipsam sanctificat, tam naturam, quam actus ejus, & consequenter confert illis valorem & dignitatem unicuique proportionatam, ut magis statim explicabitur.

Sumitur  
& hic va-  
lor ex  
parte ma-  
terię cir-  
ca quam  
actus hu-  
mani  
Christi  
versaban-  
tur.

Tertio potest hic valor infinitus considerari in his actibus ex parte materiæ, circa quam versantur, ut quando Christus voluntarie effundebat suum sanguinem pro hominibus voluntas illa versabatur circa rem infiniti valoris, quam offerebat in pretium; & ideo ex hac parte videtur etiam habuisse infinitatem, quamvis si illa materia, circa quam præcise consideretur in ratione objecti, non sufficeret ad infinitatem simpliciter moralis valoris, seu satisfactionis, ut statim explicabo. Ut ergo hic titulus conferat ad infinitatem simpliciter conjungendus est cum præcedentibus, vel etiam considerandus tamquam quodammodo in illis inclusus virtualiter, aut secundum quandam reflexionem: actus enim voluntatis Christi, quatenus est immanens, habet illa duo supra explicata, scilicet, quod est a persona, & in persona Divina; quatenus vero est intrinsece voluntarius ac liber factus in obsequium alterius, non solum ipsum actum, sed

etiam ipsum operantem, voluntarie submittit ac subjicit obsequio alterius: & hoc modo voluntas illi Christi habebat infinitum valorem ex hoc capite. Atque hinc facile constat, quid dicendum sit de aliis actionibus, vel passionibus externis a voluntate imperatis vel acceptatis: nam in ratione meriti non habebant infinitatem nisi per denominationem extrinsecam ab actibus voluntatis, quia meritum non est formaliter nisi in actu voluntatis, in exteriori vero actu est solum per denominationem extrinsecam ab illo: quantitas autem meriti non potest alicui actui convenire, nisi eo modo quo convenit meritum, quamvis non ab eodem principio seu radice proveniat. Unde secus est in ratione satisfactionis: nam quia hæc formaliter reperitur in actibus, vel passionibus externis, ideo exteriores etiam passionibus Christi in se habent infinitum valorem in ratione satisfactionis, non solum ex infinitate voluntatis, sed ratione suæ propriæ unionis, quia ipsæ fuerunt etiam deificatæ per unionem, ut supra ex Concilio Ephesino referebamus.

Sed ut hæc omnia amplius explicentur, nonnulla obijcere oportet, quibus hujus rationis vis magis discutatur & intelligatur: videtur enim primum niti hoc fundamentum, quod opus profectum a persona digniori coram Deo, id est, magis grata, cæteris paribus sit majoris valoris ad satisfaciendum. Quod fundamentum videtur falsum, ut in puris hominibus constat: quia si duo impares sint in habituali gratia, & actus efficiant ad satisfaciendum æquales in omnibus aliis conditionibus, non magis satisfacit per eum actum, qui majorem gratiam habet. Secundo videtur illa ratio ita colligere: opus factum a digniori persona est majoris valoris: ergo factum ab infinita persona est infiniti valoris: quæ collectio non videtur bona: nam ex simili forma argumentandi solum potest colligi infinitas secundum quid, non simpliciter, ut patet in simili forma. Visio perfectioris objecti est majoris perfectionis; ergo visio infiniti objecti est infinitæ perfectionis: vel offensa dignioris personæ est gravior: ergo offensa infinitæ personæ est infinita: in his enim tantum sequitur infinitas secundum quid. Tertio, ratio hujus defectus esse videtur, quia quantitas meriti, vel satisfactionis non oritur ex sola dignitate operantis, sed etiam ex aliis circumstantiis. Quando autem ad unum effectum præsertim moralem plura concurrunt, licet unum infinitum sit, si alia sint finita, effectus non erit infinitus simpliciter, sed finitus, quia limitatur ab aliis principiis finitis, & objectum vel persona infinita concurrente cum illis non potest infinito modo, sed finite influere, ut in exemplis positis videre est. Quarto confirmatur, quia illa persona solum finito modo erat unita humanitati; ergo solum etiam finito modo augebat valorem, & dignitatem operum, quia solum augebat media unionem ad humanitatem. Et tandem sicut actiones in suo esse limitantur ex principio operandi, ita in valore & satisfactione limitantur.

Discussio  
præceden-  
tis ratio-  
nis.

Ad primum responderi potest primo, non esse eandem rationem de quacumque dignitate personæ accidentaria, & quasi extrinseca, & de substantiali dignitate, qualis erat dignitas personæ Christi. Actiones per se sunt suppositorum, & personarum, & ideo substantialis dignitas, & perfectio ipsius personæ semper per se confert ad valorem & dignitatem ipsius operis, quia in suo genere influit in illud; at vero si perfectio personæ, vel dignitas accidentaria sit, non est necesse, ut influat aliquo modo in ipsum opus, sed potest solum concomitanter se habere; & ideo fieri potest, ut nihil conferat ad valorem operis. Secundo tamen addo, loquendo de dignitate gratiæ habitualis, illam per se conferre ad valorem moralem operis satisfactorii, & meritorii, atque adeo, cæteris paribus, opus factum a sanctiori persona esse majoris valoris moralis coram Deo: & ita ad objectionem factam negandum est totum id, quod assumit, de quo plura non dicam hoc loco, quia habet proprium in materia de gratia. Et quia, ut dixi, infinita satisfactio Christi non pendet ex illa questione de gratia habituali, sed ex hoc generali principio, quod illa dignitas personæ operantis, quæ est circumstantia operis, augeat valorem ejus, quod principium & per se notum est in materia morali, & supra etiam ostensum est.

Disso-  
luntur  
præceden-  
tes objec-  
tiones.

Ad secundum respondetur, quidquid sit, an consequen-



sequentia illa teneat ratione formæ, saltem tenere in proposito ratione materiæ. Fundatur enim in hoc, quod actus personæ Christi habent dignitatem quandam vere infinitam, & ideo habent etiam valorem infinitum, quantum in eo genere esse potest. Unde ulterius dicitur, servata formalitate illarum præmissarum, recte & formaliter deduci illud consequens, neque exempla in contrarium adducta esse similia. Utrumque declaro ex diverso modo, quo persona operans afficit suam operationem, & moraliter influit in illam, & quo objectum, seu extrinseca persona, quæ se habet veluti materia, circa quam versatur actio, ad illam concurret. Multo enim magis confert ad valorem moralem influxus personæ operantis; quod patet primo ex ipsis locutionibus: nam operatio facta a persona divina Theandrica dicitur, & divina; operatio autem, quæ fit circa Deum, tale dignitatis nomen non recipit; sicut operatio facta ab Angelo, est Angelica, non vero quæ fit circa Angelum. Secundo ex re ipsa, quia objectum & aliæ similes circumstantiæ solum terminant habitudinem actus ad ipsa, quæ habitudo finita est, etiamsi objectum, vel persona, ad quam terminatur, sint infinita; & ideo tota dignitas, vel bonitas actus inde orta, est in suo genere finita, at vero persona operans quodammodo per se ipsam informat moraliter suam operationem. Quod ita declaro, quia non tantum ipsa operatio in abstracto, sed ipse etiammet operans, in quo persona ipsa includitur, sese submittit, & offert in obsequium ejus, cui satisfacit: quod significavit Paulus ad Ephes. 5. dicens: *Tradidit semetipsum pro nobis oblationem, & hostiam Deo*: & ad Phil. 2. *Humiliavit semetipsum*; ubi Chry. hom. 7. *Quantum habuit*, inquit, *celitudinis, tantum humilitatis vicissim subiit*. Et hoc modo ait Cyril. 4. de Trin. circa principium, Christum posse nos salvare, quia est ipse Dei filius, indicans, ipsam personam per se ipsam conferre dignitatem operi, & valorem satisfactioni. Unde fit, ut hæc dignitas, & valor sit infinitus simpliciter in suo genere, quandoquidem ipsa persona est infinita simpliciter. Quod tertio ita declaro, quia unio hypostatica est quadam infinita dignitas humanitatis assumptæ, quia persona infinita simpliciter est illi humanitati realiter conjuncta, & per ipsam mirabili modo illam afficit, & sustentat: sed actus vel passionis illius humanitatis in tali persona habent similem quandam conjunctionem, quasi hypostaticam, cum eadem persona, quamvis mediante natura; ratione ergo hujus conjunctionis habebunt infinitam quandam dignitatem, & valorem moralem: quocirca sicut ad intelligendam infinitam illam dignitatem in humanitate assumptam, non oportet inesse ipsi humanitati rem aliquam physice, ut ita dicam, infinitam simpliciter distinctam ab ipso Verbo, ita neque in ipsis actibus Christi, ut alias objicit Scot. ut habeant infinitum valorem, oportet inesse entitatem aliquam physicam infinitam, sed solam dictam unionem ad Verbum, a quo illam habent dignitatem. Est tamen differentia inter humanitatem & actus ejus, quod humanitas immediate unitur Verbo, unde illa unio est proprius modus realis ipsius humanitatis, ut q. 2. dicitur; at vero actus solum per humanitatem uniuntur Verbo, quia scilicet inhaerent humanitati, seu sunt per humanitatem Verbo unitam. Unde hæc unio nulum realem modum ponit in ipso actu, respectu Verbi, præter modum unionis ipsius humanitatis: ab illo tamen participat moralem valorem, & æstimationem, ut explicatum est.

An sola dignitas gratiæ in persona operante sufficiat ad meritum.

Ad tertium respondetur, primum probabile esse, solam dignitatem gratiæ in persona operante sufficere ad valorem meriti, vel satisfactionis, si alias sit capacitas in actu, id est, si sit liber & bonus; sic enim multi existimant omnes actus bonos moraliter personæ gratæ esse meritorios propter statum & dignitatem talis personæ. Dico autem oportere supponi capacitatem in actu, quia opera non libera, etiam in ipso Christo, non habebant hunc valorem ad meritum, & satisfactionem, quia non erant capacia moralis dignitatis; sicut humanitas ex vi unionis sanctificatur, & illi debetur beatitudo, & tamen si natura leonis assumeretur, quamvis re ipsa haberet eundem modum unionis, & eandem maiestatem Verbi sibi conjunctam, non tamen proprie sanctificaretur, nec illi esset debita beatitudo, quia non esset ca-

Suarez Tom. XVI.

pax, & eadem ratione actus non liberi, vel actus non boni hominis grati, nullum valorem habent ab ipsa gratia habituali in ordine ad meritum, vel satisfactionem. Notanda vero est in hoc differentia inter habituales gratias, & gratiam unionis, quod illa, quando non per se concurret ad actum, influendo in illum per se, vel per auxilia sibi proportionata, non confert tantum valorem, quantum potest, nec secundum totam intensionem, quam in se habet, quia non per se influit, & concurret, ut supra dicebam: at vero gratia unionis, seu persona ipsa unita humanæ naturæ, per se concurret ad omnem actum talis naturæ, quia concurret ut substantiale suppositum operans, & ideo secundum totam dignitatem suam, quæ simplicissima est, illum informat, ejusque valorem auget, & ideo tantum auget, quantum potest. Addo præterea (ne videamur totam responsum fundare in opinione satis dubia, de sufficientia gratiæ habitualis ad rationem meriti) addo inquam, omnes alias condiciones ad hunc valorem requilatas minime sufficere sine personæ dignitate, ut suppono ex materia de gratia, & de satisfactione; & videri potest in primo actu contritionis, in quo reperiuntur omnes aliæ condiciones requisite ex parte ipsius actus: & nihilominus, nisi persona intelligatur grata, non intelligitur actus ille habere condignitatem ad meritum, vel satisfactionem. Statim vero ac persona fit grata, actus de se censetur habere valorem, quem potest, juxta capacitatem subiecti. Unde intelligitur, ipsam personæ dignitatem esse quasi ultimam formam dantem valorem actui, & in hoc genere esse quasi intrinsecam; unde fit, si hæc forma possit esse infinita simpliciter, & secundum se totam possit informare actum, posse etiam illi dare infinitum valorem, & dignitatem. Ita vero est in proposito, ut explicatum est. Et propterea hic valor limitatur ex parte ipsius actus finiti, & limitati, quia ipsa persona Verbi infinita per se ipsam est quasi forma dans valorem tali actui: ipse autem actus capax est totius illius valoris, & dignitatis, hoc ipso quod est capax unionis ad verbum secundum hypostasim.

Differentia inter habituales gratias, & gratiam unionis.

Ad quartum respondetur, Verbum per se ipsum, atque adeo secundum totam suam infinitatem, esse unitum humanitati, habitat enim in Christo omnis plenitudo divinitatis corporaliter. Unde ipsa unio licet, prout est modus humanitatis, sit quid finitum simpliciter, & tantum secundum quid infinitum; tamen ex parte personæ, & boni communicati ipsi humanitati, est res simpliciter infinita, ac propterea quod illa persona conferat valorem actibus Christi, quatenus unita est humanitati, est res infinita: ac rursus, quod illa eadem persona conferat valorem actibus Christi, quatenus unita est humanitati, nihil minuit de valore, & dignitate illarum actionum. Deinde dicitur, non esse parem rationem de limitatione actionis in esse entis, & in valore morali, seu in ratione satisfactionis: quia actus habet proxime totam suam entitatem physicam a principio agendi, & in principio agendi, si immanens sit: valor autem moralis immediate sumitur ab ipsa persona operante, quatenus moraliter informat ipsos actus, & denominat illos divinos.

Quomodo actio Christi habeat a persona infinitum valorem.

Unde fit, quod licet opera Christi offerentis, v.g. seipsum in cruce, videantur habere infinitatem ex parte offerentis, & ex parte rei oblatae, infinitas tamen meriti, ut supra dicebam, magis sumitur simpliciter ex parte illius personæ, ut offerens est, & persona operans, quam ut est objectum oblationis, vel actionis: ut cum beata Virgo offerebat filium pro nobis Deo, vel Simeon illum obtulit in templo, vel cum nunc sacerdos offert, considerando illam actionem tantum, ut est actio hujus personæ, in his omnibus dignitas actionis manet finita, quia in illis Christus tantum se habet per modum objecti, & quasi extrinsece dignificat actus: quia vero ipse offert seipsum per seipsum, intrinsece dignificat actionem suam, quomodo etiam, ut infra dicemus, ipsa passio Christi, ut erat actus ejus, habebat infinitam quandam dignitatem, ut vero a crucifigentibus, non habebat tantam malitiam, quia ut sic, tamquam objectum extrinsecum, ad eorum actus comparatur.

Sed hæc distinctio aliquibus non satis probatur, quia videmur duas infinitates in valore operum Christi distinguere. Unam simpliciter, & alteram secundum quid. Videmur etiam nimium minuere valorem sumptum ex re oblata in passione Christi, cum tamen Euge-

Quam ratione quidam habebant re fluxu aut propositum distinctionem.



nus Pontifex ea potissimum causa dixerit, redemptionem Christi fuisse infinitam, quia una gutta sanguinis ejuserat infiniti valoris. Putant ergo aliqui, utroque titulo valorem esse infinitum. Alii vero distinguunt in operibus Christi, seu in passione ejus quatuor illas rationes operandi, quas D. Thom. infra distinxit. q. 48. quatuor primis articulis, scilicet. per modum meriti, satisfactionis, sacrificii, & redemptionis pretii. Et ajunt, verum quidem esse, opera Christi in ratione meriti, satisfactionis, & sacrificii non habuisse infinitatem simpliciter, nisi ex persona operante, & se ipsam submittente in obsequium æterni Patris, seque in sacrificium offerente, ut præcipuam materiam interioris sacrificii, media humanitate assumpta, quæ erat proxima materia exterioris oblationis. Addunt tamen, sub his tribus rationibus, nihil valoris accepisse oblationem Christi ex re oblata, nam cum habuerit infinitum ex persona operante, nihil fuit reliquum quod acciperet ex re oblata. At vero considerando Christi oblationem in ratione pretii, ajunt, fuisse infinitam simpliciter ex re oblata, nulla habita personæ dantis tale pretium consideratione, quia in emptione ut sic non consideratur dignitas ementis, sed valor & æstimatione ipsius pretii; in præsentem autem sanguis Christi in pretium oblatus erat infiniti valoris, etiam in genere entis, propter Verbum unitum.

Oblationem Christi infinitam fuisse in ratione pretii ex parte rei oblata abstracto a persona operante, qui astruant. Horam sententia confutatur.

Sed hæc, ut dixi, neque solida sunt, neque vera. Et primo, omissa prima opinione, quæ cum secunda simul impugnabitur, quatenus a nobis discordat, in posteriori duas partes distinguamus. Prima est de valore operum Christi in illis tribus rationibus, meriti, satisfactionis, & sacrificii. Secunda est de pretio. In priori ergo parte verum quidem est, habuisse opera Christi infinitatem ex persona operantis. Nihilominus tamen negari non potest, quin opera Christi in eadem ratione meriti, satisfactionis & sacrificii magnum valorem seu dignitatem habuerint ex re oblata. Quod quidem de ratione sacrificii non obscure significavit Conc. Trid. sess. 22. c. 2. dicens: *Quoniam in divino sacrificio, quod in Missa peragitur, idem ille Christus continetur, & incruente immolatur, qui in ara crucis semel seipsum cruci obtulit, docet sancta Synodus, sacrificium illud vere propitiatorium esse, &c.* Aperte ergo Concilium supponit, sacrificium Crucis non solum ex offerente, sed etiam ex re oblata habuisse, quod propitiatorium fuerit: alioqui non recte ex illo capite colligeret, sacrificium missæ propitiatorium esse. Quod magis declarans, subdit: *Hujus quippe oblatione placatus Dominus, gratiam, & donum penitentiae concedens, crimina & peccata, etiam ingentia, dimittit: una enim eademque est hostia, idem nunc offerens sacerdotum ministerio, qui se ipsum tunc in Cruce obtulit, sola offerendi ratione diversa.* Igitur, ex mente Concilii, efficacia & valor sacrificii Crucis, non solum ex offerente, sed etiam ex hostia oblata desumitur. Atque hoc testimonium etiam probat, valorem illius sacrificii quoad satisfactionem sumptum esse, non tantum ex offerente, sed etiam ex re oblata: quia in tantum sacrificium propitiatorium est, in quantum est satisfactorium: imo illi duo modi, quibus passio Christi operata dicitur nostram redemptionem, per modum, scilicet, sacrificii & satisfactionis, non sunt ita in re distincti, ut possint mutuo seu ad invicem separari: non enim posset passio ex iustitia operari nostram redemptionem, si satisfactoria non esset, aut meritoria, etiamsi rationem sacrificii habere fingeretur: quamvis e contrario posset operari redemptionem ex iustitia, si satisfactoria esset, etiamsi non esset sacrificium, ut constat ex dictis præcedente sect. Cum ergo D. Thom. ait, Christi passionem operatam esse nostram redemptionem per modum satisfactionis & sacrificii, nihil aliud docere vult, quam Christi satisfactionem per opus sacrificii fuisse consummatam; & passionem Christi non solum esse satisfactoriam, ut opus charitatis, vel fortitudinis, sed etiam ut opus religionis & perfecti sacrificii. Si ergo dignitas & excellentia illius sacrificii, non ratione sacrificii, confurgit non tantum ex offerente, sed etiam ex re oblata, etiam valor satisfactionis ejusdem sacrificii ex utroque capite confurgit; & eadem ratio est de valore meriti; & inde etiam sumi potest argumentum ad reliqua Christi opera. Ratio autem omnium est, quia licet dignitas personæ operantis in Christo fuerit potissima circumstantia, ex qua

valor operum ejus confurgit; non est tamen dubium, quin illa sola non sufficeret, nisi aliæ concurrerent ad meritum, vel ad satisfactionem necessariae, ut libertas actionis, & honestas, ad meritum: & quod opus fuerit poenale ad satisfactionem.

Dicit fortasse aliquis, rationem meriti, vel satisfactionis insurgere ex aliis conditionibus, & ex objecto, & circumstantiis, quantitatem autem valoris in Christo ex sola circumstantia personæ sumptam esse. Sed quoniam hæc distinctio vulgaris est in hac materia, cavendum est, ne male intelligatur; quantitas enim meriti, & meritum, & quantitas satisfactionis, ac satisfactio, non sunt ita concipienda, aut distinguenda, ac si in re essent duo diversa, ita ut intelligamus prius confurgere rationem meriti & satisfactionis ex quodam capite, postea vero adjungi illi quantitatem ex alio. Est enim hic sensus falsus, primo, quia nec quantitas talis meriti, prout in re est, potest præcindi ab illo: neque e converso meritum, prout in re est, potest præcindi a sua quantitate, quæ non est quantitas molis, sed perfectionis, seu intensiois, vel æstimationis. Unde, sicut perfectio rei non est aliud ab ipsa re, neque e converso: ita neque in Christi merito valor ejus est aliquid distinctum ab ipso, sed est ipsummet cum tota perfectione, quam habet in ratione meriti, quod simul per modum unius confurgit ex omnibus, quæ ad illud concurrunt, & necessaria sunt; & non prius insurgit meritum, postea vero ei quasi adhæret quantitas ejus. Et hinc sumitur secunda ratio, quia neque meritum, neque satisfactio ut sic, quantumvis a valore præcindatur, possunt insurgere sine persona merente; in Christo autem non est persona, quæ mereatur, nisi persona infinita; ergo nec potest intelligi, quod in Christo sit meritum, nisi ad illud concurrat persona infinita; ergo illa persona non dat valorem, nisi dando simul cum aliis rationem meriti & satisfactionis; non ergo supponit satisfactionem & meritum, & eis adjungit valorem.

Sensus igitur verus illius distinctionis est, illa duo ratione distingui; quia posset esse meritum vel satisfactio sine tanto valore; & ideo ita distingui, ut attribuendo singula singulis, intelligatur quid ad unum sufficiat, & non ad aliud; & quæ sit propria radix unius cujusque rationis. In hoc ergo sensu verissimum est (imo hoc ipsum est, quod nos dicimus) infinitatem simpliciter operum Christi in ratione meriti, vel satisfactionis, ex persona operante esse desumendam: nihilominus tamen alias circumstantias aliquid contulisse absolute loquendo ad meritum vel satisfactionem, & consequenter ad valorem moralem illorum operum; quia etiamsi persona non esset infinita, opera illa haberent aliquem valorem, licet non infinitum; ergo etiam in Christo concurrunt ad valorem & æstimationem operis. Inter has autem circumstantias, una ex potissimis est res oblata, a qua multum valoris solet accipere sacrificium. Propter quod dicitur Deus respexisse non tantum ab Abel, sed etiam ad munera ejus. Unde si res oblata sit infinita, inde habet sacrificium quandam valorem in ratione sacrificii superantem omnem æstimationem cujusque sacrificii, in quo offertur res finita, etiamsi in infinitum augeatur, dummodo cætera sint paria ex parte personæ offerentis. Et hoc sensu dicimus habere sacrificium, in quo res infinita offertur, infinitatem quandam ex re oblata: quam sine dubio etiam habuit sacrificium Christi: habuit enim singularem quandam excellentiam, non solum ex eo quod fuit Christus, qui obtulit, sed etiam ex eo, quod seipsum obtulit, quæ non sunt duæ dignitates proprie loquendo, nisi fortasse secundum præcisionem rationis, sed est una eminens dignitas, quæ confurgit ex habitudine ad plura concurrentia per modum unius integræ causæ moralis, sicut in actibus moralibus dicitur confurgere una bonitas ex objecto, & circumstantiis. Et similiter non dicimus esse in sacrificio Christi duas infinitates satisfactionis, vel meriti, sed unam tantum confurgentem ex tali oblatione, ut est a tali offerente, & circa talem rem oblata. Dicimus tamen præcisè considerando has habitudines, infinitatem offerentis esse sufficientem ad infinitatem simpliciter, etiamsi reliqua omnia, quæ concurrant, & necessaria sunt, sint finita; infinitatem autem rei oblatae per se non sufficere ad infinitatem satisf-

Obiectio.

Solvitur.

Quomodo intelligenda distinctio quæ afferri solet inter meritum & quantitatem ejus.



Oblatio  
quævis a  
persona  
offerente  
in infinitate  
simpliciter  
fori-  
tur, secun-  
dum quid  
autem a re  
oblata.

satisfactionis, vel meriti, si persona offerens finita sit. Ad denique hoc sensu dicimus, ab infinita persona offerente satisfactionem & valorem sumere infinitatem simpliciter, a re autem oblata infinitatem tantum secundum quid. Et utrumque satis etiam probatum est. Primum quidem, quia quodlibet opus Christi fuit infinita satisfactionis. Et ratio est, quia persona operans per se ipsam informat opus moraliter loquendo, & se ipsam submittit obsequio alterius, cui satisfacit, & ideo dignificat opus infinite. Secundum autem probatum est exemplis, vel oblationis, qua B. Virgo, vel Simeon, obrulit Christum in templo; vel oblationis, qua sacerdos offert Christum, considerando illam, ut est a solo sacerdote; & idem fere est de oblatione interna, qua nos offerimus Deo Christi mortem, in his enim actionibus, ut sunt a persona finita, etiam si versentur circa rem infinitam, satisfactio est simpliciter finita; & solum est in huiusmodi actione ex re oblata quædam dignitas secundum quid; & ratio est, quia illa res oblata solum comparatur ad actionem, ut objectum, quod licet infinitum sit, non dat actui infinitatem simpliciter, ut satis explicatum est.

Quoad alteram vero partem de valore operum Christi in ratione pretii ad redemptionem, duo falsa mihi dici videntur in ea sententia, & utrumque ortum esse ex eo, quod volunt, metaphoricam locutionem in omnibus proprie æquiparare, cum non in omnibus similes sint. Primum ergo falsum est, in redemptione Christi infinitatem pretii non sumi ex persona redimente, quantumvis pretium sub ratione pretii, & redemptionis sub ratione redemptionis, & persona in ratione redimentis & offerentis pretium, considerentur. Probatur, quia in hac emptione seu redemptione pretium proprium & immediatum non est nisi satisfactio, aut meritum: ergo unde sumitur valor satisfactionis, sumitur valor pretii: ergo ex persona operante. Antecedens manifeste sumitur ex D. Thom. infr. q. 48. art. 4. ubi inde probat, Christum operatum esse salutem nostram per modum redemptionis, quia per peccatum eramus addicti servituti dæmonis, & tanquam servi pœnæ obnoxii: Christus autem per passionem suam obtulit sufficientem & superabundantem satisfactionem pro peccato, & reatu pœnæ generis humani: *Et hoc modo, inquit, ejus passio fuit æquale quoddam pretium, per quod liberati sumus ab utraque obligatione. Nam ipsa satisfactio, qua quis satisfacit, sive pro se, sive pro alio, pretium quoddam dicitur, quo se ipsum vel alium redimit a peccato, & a pœna, secundum illud Danielis 4. Peccata tua elemosynis redime.* Ergo ex sententia D. Thom. pretium redemptionis non est aliud, quam satisfactio ipsa. Ratio vero, quæ ex eodem D. Thom. sumitur, est, quia sanguis Christi non est pretium redemptionis, ut est res quædam physica, sed ut effusus per passionem, & secundum eum valorem moralem, quem habet illa effusio, vel ad liberandum nos a servitute, vel ad obtinendam nobis gratiam & gloriam; hic autem valor non est aliud, quam satisfactio, qua redditur æquivalens pro culpa aut pœna, vel meritum, quo de condigno quasi emitur gratia vel gloria; ergo sicut infinitas satisfactionis in ratione satisfactionis pendet præcipue ex persona offerente, ita infinitas operum Christi in ratione pretii & redemptionis principaliter pendet ex dignitate personæ redimentis.

Secundum hinc constat, falsum esse, & repugnantiam involvere, quod dicitur, pretium ut pretium in hoc genere emptionis seu redemptionis esse infinitum in ratione pretii ex vi rei oblatae præcise sumptæ, non autem in ratione satisfactionis, & meriti; nam ostensum est, hoc pretium proxime & immediate non esse aliud, quam ipsam satisfactionem vel meritum; ergo, si sub his rationibus non est infinitum ex illo capite, neque etiam in ratione pretii esse potest. Et confirmatur primo, quia, si illud pretium est infinitum in ratione pretii: ergo in vi & in virtute sanctificandi quoad sufficientiam; ergo & in ratione meriti & satisfactionis. Prima consequentia probatur, quia per hanc redemptionem eripimur a servitute peccati & dæmonis, & revocamur in libertatem, non quamcumque, sed filiorum Dei, in ejusque amicitiam; sed nihil horum consequimur, nisi per veram sanctitatem: ergo non potest esse pretium

sufficiens ad redemptionem, nisi quod est sufficiens ad satisfactionem, id est, ad emendam hominem (ut sic dicam) veram sanctitatem. Et hinc probatur secunda consequentia, quia vera sanctitas non emitur, nisi satisfactionibus, & meritis: ergo non potest esse pretium infiniti valoris ad hunc effectum, nisi ob infinitatem in ratione meriti & satisfactionis. Confirmatur tandem utrumque, quia alias sequitur, oblationem Eucharistie, ut est a sacerdote & ex opere operantis, esse infinitum pretium sufficiens ad redemptionem, idemque sequitur de oblatione Christi facta in templo, ut fuit a B. Virgine, aut a Simeone. Imo ulterius sequitur unionem hypostaticam factam in natura irrationali fuisse sufficientem, ut pretium nostræ redemptionis esset infinitum; ut si Verbum divinum assumeret naturam agni, hominibusque agnum illum donaret, ut pro suis peccatis in sacrificium, & pretium redemptionis ipsum offerrent, nihil enim ibi deesset ad infinitum pretium juxta prædictam sententiam.

Respondent aliqui, concedendo omnes has sequelas, si Deus ita ordinare voluisset. Addunt tamen in his casibus dari quidem infinitum pretium ad redemptionem, tamen deesse infinitam satisfactionem & meritum, & ideo non esse illa remedia simpliciter sufficientia, sicut fuit Christi oblatio. Sed hæc responsio in primis involvit repugnantiam, ut ostensum est, sanctis Patribus dicentibus, ad infinitam redemptionem fuisse necessariam infinitam dignitatem personæ redimentis. Ac deinde inauditum est, quod pretium in ratione pretii sit sufficiens ad emendandum seu redimendum, & tamen quod non sit sufficiens ad liberandum a culpa vel servitute: est ergo eadem ratio de pretio, quæ de satisfactione vel merito. Neque contra hoc obstat ulla ratio, quia quando pretium non proprie sumitur pro re aliqua habente ex impositione suam æstimationem vel valorem, sed pro morali opere habente moralem valorem, tunc valor pretii multum pendet ex persona operante, & ita contingit in redemptione per Christum facta. Unde quando sanguis ejus dicitur pretium, semper intelligitur in ordine ad effusionem & oblationem, quæ facta est ab ipsa persona Verbi.

Hactenus ad ea respondimus, quæ fundamentum propositæ veritatis impedire videbantur, nunc nonnullis objectionibus, quæ contra illam fieri solent, satisfaciendum est. Prima & vulgaris est, quæ Scotus est usus, quia omnis actio Christi est finita entitatis: quam confirmat, quia si esset aliquo modo infinita, infinite placeret Deo; tantum ergo placeret, quantum ipsimet actus increati suæ divinitatis: & eandem objectionem, prosequitur Gabriel in 3. d. 19. ostendens, actus Christi meritorios non fuisse infinite intensos. Sed, ut recte ibi Capreolus, & alii Thomistæ annotarunt, huiusmodi objectiones non sunt ad rem: non enim asserimus actus Christi fuisse infinitos quoad intensionem, imo oppositum verum esse supponimus ex his, quæ infra de Christi gratia tractabimus q. 7. eadem enim vel major ratio est de actibus, quæ est de habitibus. Nihilominus tamen prædicta argumenta facile dissolvuntur: potest enim actio Christi, quamvis physice in genere entis finita sit, moraliter in genere satisfactionis esse infinita, nam hoc non consistit in entitate physica, sed in morali dignitate proveniente ex conjunctione ad divinam personam.

Nec propterea recte comparatur actio humanitatis cum actu increato divinitatis; hic enim simpliciter, & in genere entis infinitus est, & ideo infinite placet Deo; non in genere satisfactionis, vel meriti (huiusmodi enim proprietates non dicunt perfectionem simpliciter, ut possint convenire in illum actum) sed ut infinite bonus per essentiam. Actus vero humanitatis est infinitus in genere meriti, & satisfactionis simpliciter, & absolute, tamen in genere entis tantum secundum quid; sicut ipsa humana natura ratione unionis habet infinitam dignitatem, non tamen ideo æqualis est cum ipsa natura divina; est etiam illa natura impeccabilis ex unionem ad Verbum, & mentiri non potest, sicut Deus ipse, non tamen propterea ejus bonitas, aut veritas æqualis est veritati, aut bonitati per essentiam ipsius divinitatis, quia hæc omnia habet solum ex conjunctione ad divinam personam.

Potest tamen alio modo urgeri hæc oblectio, quia non videtur

Evasio.

Rejicitur.

Oblectio  
ex finita  
ad hoc en-  
titate

Solutio.



Augetur  
circumstantia  
ex finita  
actus boni  
tatis.

videtur actus bonus, effectus a Christo Deo homine, posse habere infinitum valorem ad satisfactionem & meritum, nisi intrinsece infinitam entitatem habeat in se. Probatur primo, quia hic valor pertinet ad bonitatem moralem ipsius actus, sed bonitas moralis, præsertim in interiori actu voluntatis, non est extrinseca aliqua denominatio, sed est intrinseca differentia vel proprietas ipsius, quæ non potest augeri, nisi realiter mutetur ipse, vel illi aliquid addatur; & consequenter neque esse potest infinita, nisi ipse actus physice, & in entitate sua, aut intensive, aut extensive aliquo modo infinitus fiat: tum etiam quia, quamvis demus illum valorem distingui a bonitate, tamen argumentum augeri potest, sumpta proportionem ab una proprietate, seu conditione ad aliam, quia sicut augetur satisfactio ex circumstantia personæ operantis, ita & bonitas, quæ non tantum ex objecto, sed etiam ex circumstantiis sumenda est; ergo si infinita dignitas personæ operantis, infinite augeat satisfactionem, infinite etiam augebit bonitatem, atque entitatem actus: vel e contrario, si bonitatem non ita augeat, neque satisfactionem augebit.

Confirmatur  
priori.

Et confirmatur, & augetur difficultas, quia si satisfactio Christi simpliciter infinita est, ergo actus voluntatis ejus, quo volebat efficaciter satisfactionem, & illam offerebat Deo, erat infinite bonus, quia habebat infinitum objectum, & illud totum efficaciter volebat actu illi proportionato, & adæquato: sicut, si quis haberet actum voluntatis, quo posset efficaciter velle dare infinitas divitias in elemosynam, ille actus haberet infinitam bonitatem misericordiæ, ut patere potest utendo illo argumento communi, nam bonitas illa crescit ex quantitate objecti, seu elemosynæ, unde major est cæteris paribus, quo quantitas objecti major est, erit ergo infinita, si quantitas objecti est infinita; multo ergo magis illa voluntas Christi, quæ versatur circa satisfactionem infinitam, erit infinite bona.

Responsio.  
in qua declaratur  
quomodo  
valor distinctus  
a reali  
bonitate.

Ad argumentum respondetur, valorem hunc, quem habet actus in ordine ad satisfactionem, & meritum, esse quid distinctum a reali bonitate, quæ est differentia ipsius actus, prout constituitur in esse virtutis, vel in aliquo modo intrinsece inhæret; quod patet clare in exemplo supra posito de contritione, quia præintellecta ante gratiam habitualem intelligitur habere totam suam intrinsecam bonitatem moralem, & totam rationem actus virtutis, & tamen non intelligitur habere sufficientem valorem, & condignitatem ad meritum; statim vero ac intelligitur esse a supposito grato, intelligitur idem actus habere valorem, quamvis ejus bonitas intrinsece nec mutata, neque aucta sit. Hic ergo valor non dicit physicam entitatem inhærentem actui; sed supponit illam, & aliquas etiam denominationes extrinsecas, & libertatem, & habitudinem ad talem personam; & consistit in morali quadam ratione, & æstimatione ipsius actus; hac igitur ratione, quamvis omnes actus Christi in se fuerint finiti in entitate, atque adeo in bonitate morali intrinsece inhærente, nihilominus potuerunt esse infiniti valoris moralis, ex personæ dignitate provenientis. Ad priorem ergo partem argumenti in forma respondendo, negatur illa prima propositio assumpta; satisfactio, seu valor satisfactionis pertinet ad bonitatem actus; proprie enim non pertinet ad illam bonitatem, a qua actus dicitur bonus moraliter, & actus virtutis, de qua intelligendum est, cum dicitur, bonitatem esse intrinsecam actui, sed pertinet, ut dixi, ad quandam moralem æstimationem; quod si hæc vocetur etiam bonitas (potest enim ita vocari, quandoquidem est quædam dignitas, & in suo genere habet rationem entis moralis) sic negandum est omnem bonitatem actus esse realem entitatem ipsi inhærentem.

Ad posterio-  
riorem.  
Dignitas  
personæ  
aliter au-  
get boni-  
tatem actus  
quam va-  
lor satisfactio-  
nis.

Ad aliam vero partem argumenti respondetur, aliter circumstantiam, vel dignitatem personæ augere interdum propriam, & intrinsecam bonitatem actus, in ratione virtutis, aliter vero valorem satisfactionis, vel meriti; bonitatem enim non confert proxime, & immediate, quasi actum ipsum informando, sed quatenus aliquo modo redundat in objectum, & quodammodo afficit illud, augendo vel mutando objectivam bonitatem ejus; ut quando pauper facit elemosynam, illa circumstantia personæ augeat bonitatem, quia illud objectum comparatum ad talem personam, censetur difficilius, &

majoris quantitatis proportionalis, & sic de aliis; & hinc fit, ut hæc circumstantia personæ, etiam si infinita sit, non infinite augeat hanc bonitatem, sed limitetur ex habitudine, & modo, quo talis actus tendit in tale objectum sic affectum; quia, ut dictum est, non augeat hanc bonitatem, nisi quatenus aliquo modo redundat in objectum, & consequenter, non nisi juxta habitudinem realem, quam actus habet ad objectum talibus circumstantiis affectum: at vero alius valor, & dignitas in ratione satisfactionis, proxime & immediate sumitur ab ipsa persona, per seipsam moraliter afficiente, & dignificante actum, & ideo infinitus est a persona infinitæ dignitatis.

Ad confirmationem respondetur, solum concludere, illum actum habere infinitam bonitatem objectivam, non vero ipsum actum internum voluntatis habere infinitam bonitatem formalem, quæ consistit in habitudine ad illud objectum, quia ad objectum infinitum potest actus tendere per habitudinem realiter, & in sua entitate finitam simpliciter, quamvis secundum quid, & objective possit dici infinita. Quod ita facile declaratur, quia ille actus non habet infinitatem in essentiali differentia, ut constat, quia est finitæ perfectionis: tum quia hujusmodi perfectio major est in voluntate amandi Deum, nec habet infinitatem in intensione, ut suppono, quia nullus actus creatus potest fieri infinite intensus; neque in extensione, quia illam non habet, unica enim simplici, & indivisibili habitudine fertur in totum illud objectum, quamvis infinitum sit: & idem dicendum est in exemplo adducto in illa confirmatione, ut latius in 1.2. quæst. 18. tractari solet.

Secunda objectio est ab inconvenienti; nam si satisfactio Christi infinita est, sequitur vel unum infinitum esse majus alio in eo genere, in quo infinitum est, quod est contra rationem infiniti; vel unum opus Christi non esse majoris valoris, quam aliud, nec duo, quæ unum, quod videtur absurdum: tum quia totum est majus sua parte, tum etiam, quia unum opus Christi erat melius alio, & unus dolor major, quam alius, quod multum refert ad quantitatem satisfactionis: tum denique, quia inde fieret non magis redemisse nos Christum per passionem, & mortem, quam per alios actus vitæ suæ, quod est contra Scripturam, quæ passioni semper tribuit redemptionem nostram, ad Rom. 3.4. & 5. ad Gal. 3. ad Hebr. 2.9. & 11.

Respondetur, primum omnium fatendum esse opera Christi fuisse inæqualia in propria bonitate intrinseca, & essentiali, vel realiter inhærente ipsi actui, quia ut dictum est, tota hæc bonitas erat finita; poterat ergo esse major, & minor; & aliunde unum opus Christi erat melius objecti, quam aliud, & unum intensius alio, & sic de aliis circumstantiis; ergo erant, vel poterant esse inæqualia in hac bonitate. Nihilominus addendum secundo est, quodlibet opus Christi ex parte personæ operantis fuisse infiniti valoris, quia licet bonitas, & aliæ conditiones actus conferant interdum ad hunc valorem, tamen quia hæc dignitas infinitæ personæ extollit hunc valorem ad perfectissimum ordinem, & usque ad infinitum gradum, ideo tollitur omnis alia proportio: illa enim persona, cum in omni genere infinita sit, eminenter continet omnia alia bona, & ideo confert actui, quicquid valoris omnes aliæ circumstantiæ conferre possent. Quocirca totum id, quod erat in opere Christi ex parte ipsius actus, intelligendum est quasi materialiter se habere, personam vero esse quasi formam conferentem valorem, quæ omnes illos actus æqualiter informat, & ideo omnibus confert infinitum, atque adeo æqualem valorem. Exemplo explicari potest, si pecunia tali regio signo figurata tantum valeret, cujuscumque esset materiæ, ratione figuræ.

Dices, quamvis hæc ratio probet infinitatem meriti, provenientem ex dignitate personæ operantis esse æqualem in omnibus actibus Christi, non tamen probare, omne meritum, seu omnem rationem meriti in eis inventam, esse æqualem; quia valor infinitus proveniens ex persona operante non excludit valorem, quem actus habet ex intentione, duratione, & similibus circumstantiis: ergo non obstante æqualitate in uno valore infinito, potest esse inæqualitas in alio valore finito ex diversa radice proveniente. Respondent aliqui, concedendo totum, & consequenter ajunt, in uno actu Christi posse esse plus meriti, quam in alio, non secundum intensio-

Ad confir-  
mationem.  
Quid ha-  
beat actus  
ex ob-  
jecto in-  
finito.

1. Objectio.

Responsio.  
Quomodo  
sit equalitas  
meriti  
cum inæ-  
quali boni-  
tate.

Objectio.

1. Respon-  
sio.



nem, sed secundum extensionem seu multitudinem meriti, quia in uno actu possunt esse duo vel tria merita, unum infinitum, & reliqua finita, in alio autem esse vel unum tantum infinitum meritum, vel, si sit etiam aliquod finitum, illud esse minus. Juxta quem dicendi modum consequenter etiam additur, posse etiam unum actum meritorium Christi esse dignum aliquo premio, quod non cadat sub meritum aliorum actuum: quia illud meritum finitum est sufficiens per se ad aliquod premium distinctum ab omni premio correspondente valori infinito, etiam secundum aequalitatem. Sed hæc sententia, & tota objectio, procedunt ex falso principio: fingunt enim esse in eodem actu plures valores, seu plura merita, juxta varias ejus circumstantias, quod patet esse falsum ex his, quæ paulo superius dicebamus de infinitate sacrificii, ex re oblata, vel persona offerente, sumpta: ostendimus enim, re ipsa non esse duas, neque pertinere ad diversa merita vel satisfactiones: quia ratio meriti vel satisfactionis (sicut & ratio bonitatis) non confurgit ex singulis conditionibus actus per se sumptis, sed ex collectione omnium, hæc enim ratio etiam in præsentem procedit: nam intensio actus, vel objectum, aut persona operans per se singula non sufficiunt ad meritum, ut ex singulis distincta merita in actu oriantur, sed omnia simul, vel necessaria sunt, vel suo modo concurrunt ad unum meritum, & quantitatem ejus. Atque ita cessat objectio, nam si meritum actus tantum est unum, & illud est infinitum & æquale, nihil est meriti, in quo cerni possit inæqualitas. Neque est necesse, ut meritum proveniens ex dignitate personæ excludat meritum proveniens ex intensione, vel aliis circumstantiis, ut in argumento supponitur. Sed dicimus, hæc omnia concurrere ad unum & idem meritum, quod est infinitum simpliciter ex dignitate personæ operantis: & ideo nihil refert inæqualitas in aliis conditionibus actus, ut ejus meritum majus aut minus existat.

Hinc tertio fit, plura opera Christi esse quidem extensive plura merita, intensive tamen non esse plus valoris in multis, quam in uno; ut si essent plures calores infinite intensi, essent quidem plures, non tamen efficerent unum intensiorem: & pari ratione, si in uno opere Christi, quod successive per partes fiebat, partes cum toto comparemus, intensive tantus valor erat in qualibet parte, sicut in toto opere, & in uno momento, sicut in longo tempore, quia forma, a qua erat valor, tota erat in toto, & tota in singulis partibus. Dices; argumentum extensivum, seu multitudo meritorum æquivalere majori intensi, tres enim actus meritorii ut quatuor, tantumdem valent, quantum unus ut duodecim. Respondetur, illam re vera non esse intensiorem ipsius meriti, sed multitudinem, seu extensionem; in ordine tamen ad premium habere interdum eandem vim, quam haberet intensio, quod accidit in actibus finiti valoris, quia ratio, unde oritur quantitas meriti, est major in multis actibus finiti valoris, quam in singulis: in proposito autem non est ita, ut explicatum est: & hoc sensu dicunt communiter Theologi in 3. d. 18. & D. Thom. infra q. 34. art. 3. ad 3. non plus meruisse Christum Dominum per omnia opera vitæ suæ, quam in primo instanti meruerat, sed idem pluribus titulis: hæc enim & similia vera sunt, considerando opera Christi secundum valorem, quem ex se habent.

Addo quarto, si considerentur opera Christi, ut erant sub divina ordinatione, & sub relatione illius operantis, plus meruisse, vel satisfecisse toto vitæ suæ tempore, quam singulis operibus, & aliquid effecisse, seu obtinuisse se uno opere, & non alio: ita tenuit Soto in 4. d. 21. q. 1. art. 2. & bene explicat d. 1. q. 2. artic. 5. melius tamen D. Thom. quod lib. 2. art. 2. & sumitur ex eod. infr. q. 48. art. 1. ad argumenta, & ratio est, quia licet opera essent de se infiniti valoris, potuerunt tamen ita fieri, & ordinari, ut non per singula totum premium, nec jus ad totum illud vel ad remissionem omnium culparum, & poenarum acquireretur, sed certo modo, & ordine servato; hoc vero, quod fieri potuit, ita factum esse, ostendendum est late infr. q. 19. & secunda objectio facta illud declarat.

Ex hoc enim intelligitur quinto, quam obrem redemptio nostra passioni, & morti Christi specialiter tribuatur, cum non per se solam, sed per omnia opera, quæ in vita mortali Christus operatus est, nobis meruerit, & pro nobis satisfecerit. Ratio enim est, primo, quia illud

fuit præcipuum opus redemptionis nostræ, & maxime accommodatum ad satisfaciendum pro nobis. Secundo, quia in illo fuit consummata nostra redemptio, ex divina enim ordinatione, omnia merita Christi erant veluti in fieri, & non expiabantur per singula lapsus, & reatus humanæ naturæ, neque acquirebatur illi perfectum, & absolutum jus ad gloriam, donec per passionem consummarentur: ut sumitur ex Paulo tota epistola ad Hebr. præsertim c. 10. & d. q. 19. dicendum est latius. Hoc enim ita factum est, non quia singula opera per se non sufficerent, sed quia ita fuit ordinatum a Deo. Primo ad ostensionem charitatis suæ. Secundo, ut cognosceretur melius, quanta sit peccati gravitas. Tertio, ut gratia & remissio peccati majori in pretio ab hominibus haberetur. Quarto, propter exemplum, de quibus late Anselm. lib. 1. Cur Deus homo cap. 6. & sequentibus.

Quinta ratio addi solet, & tribui D. Thom. infr. q. 46. art. 6. & 48. artic. 2. scilicet, ut satisfactio Christi esset æqualis, non tantum ex dignitate personæ, sed etiam ex ipsorum operum, & dolorum magnitudine, quæ tamen ratio mihi non probatur, nisi sano modo explicetur. Primum enim non potest procedere de satisfactione pro culpa, nam hæc non potest intelligi æqualis, nisi ob dignitatem personæ, ut partim in superioribus visum est, partim in sequentibus dicitur. Deinde non potest procedere de satisfactione pro æterna poena, tum propter rationem factam, remissio enim hujus poenæ conjuncta est cum remissione culpæ, unde nullus potest satisfacere ad æqualitatem pro hac poena, nisi eodem modo satisfaciendo pro culpa; tum propter objectionem Medinæ in principio positam, quia nulla poena, vel dolor hujus vitæ est comparabilis cum dolore inferni, neque in duratione, neque in magnitudine, & ideo seclusa personæ dignitate, in doloribus Christi æqualitas esse cum illa æterna poena non potuit, ex dignitate a. personæ, non solum est æqualitas, sed infinitus excessus; majoris enim valoris est vel minimus dolor divinæ personæ, quam sit æstimabilis æternus cruciatus omnium hominum, & Angelorum.

Denique neque videtur id posse intelligi de satisfactione pro poena temporali, tum quia vix potest intelligi, cum qua poena temporali fiat comparatio, non est enim certa, ac definita poena temporalis, quæ interdum relinquitur post remissionem peccati, nonnunquam enim major est, interdum minor; tum etiam, quia vix est credibile, dolores Christi Domini per se sumptos, seclusa personæ dignitate, habuisse æqualitatem cum omnibus poenis temporalibus, quibus vel in hac vita, vel in purgatorio peccata hominum puniuntur, vel quibus omnia puniri possent, si omnia quo ad culpam remitterentur. Dicit ergo potest, non esse sermonem de æqualitate, sed de proportionione: nec D. Thom. unquam hujus æqualitatis meminit, sed proportionis tantum, sic enim inquit: *Quantitatem doloris assumpsit, quæ esset proportionata magnitudini fructus*. Potest autem proportio in hoc consistere, ut, sicut pro maximis culpis, & poenis satisfaciebat, ita per maximum dolorem, & poenam hujus vitæ satisfaceret: item ut quoniam peccatum delectationem includit in bono commutabili, summum dolorem suum tali delectationi opponeret: denique ut mortem nostram morte sua superaret. Secundo explicari potest de æqualitate poenæ in ordine ad satisfaciendum pro poena temporali hujus vitæ, in quam commutari posset poena æterna debita omnibus peccatis, quæ de facto omnes homines commissuri erant, si vellent ipsi sese disponere ad culparum remissionem obtinendam. Quod si hoc fortasse nimium videtur, aut non necessarium, quandoquidem ea res non erat habitura effectum, dici potest, saltem fuisse hanc æqualitatem inter dolores Christi, & omnes poenas temporales, quæ de facto erant hominibus remittendæ, quod pie quidem considerari potest, probari autem minime. Est ergo hic sensus incertus, prior vero clarus & facilis.

Tertia objectio est, quoniam ex hac infinita satisfactione, vel merito Christi sequitur, plus potuisse Christum mereri, quam Deus potuerit remunerare, quod videtur satis per se absurdum. Sequela patet, quia meritum infinitum non potest habere æquale premium, nisi sit etiam infinitum; hoc vero non potest conferre Deus: non enim potest conferre infinitam gratiam, aut infinitam visionem sui. Et confirmatur, nam si merita, & satisfactio-

Quinta ratio addi solet, & tribui D. Thom. infr. q. 46. art. 6. & 48. artic. 2. scilicet, ut satisfactio Christi esset æqualis, non tantum ex dignitate personæ, sed etiam ex ipsorum operum, & dolorum magnitudine, quæ tamen ratio mihi non probatur, nisi sano modo explicetur.

Refutatur

Vera responsio.

Objectio.

Solutio.

Quarta ratio non Christi in actibus inæqualitas meriti existit.

Cur redemptio nostra passioni & morti Christi specialiter tribuatur.



risfactiones Christi tanti valoris sunt, inconveniens, & quodammodo injustum esset tam paucis hominibus prodesse, præsertim cum plures ex peccato Adæ damnari, quam propter Christi meritum salvari videantur.

Dubium  
quam sit  
sufficiens  
ad præ-  
miū quod-  
libet opus  
meritorium  
Christi.

In hac objectionem nonnullæ insinuantur & petuntur difficultates. Prima, utrum meritum Christi sit sufficiens ad obtinendum quodlibet præmium, quod Deus potest conferre divisive sumptum & cum perfecta æqualitate. Et quidem si sermo sit de præmiis pure creatis, suppositis, quæ dicta sunt, nullum est dubium, quin ad quodlibet sit sufficiens meritum Christi, scilicet ad gratiam, vel gloriam in quocumque gradu signabili, etiam si in infinitum procedatur, & idem est de omnibus similibus; hoc enim ad minimum probant, quæ de infinitate operum Christi dicta sunt. Difficultas vero nonnulla est de præmiis, quæ includunt Deum ipsum, non tantum extrinsece per modum objecti, aut principii efficientis, ut gratiæ & gloriæ, sed etiam formaliter & intrinsece, ut est unio hypostatica, nam hujusmodi præmium videtur esse infinitum simpliciter in genere entis, & ideo non videtur posse meritum Christi esse æquale illi. Nec satis est, si quis respondeat unionem hypostaticam esse rem simpliciter finitam, quia solum est quidam modus humanitatis, ut postea dicemus; hoc (inquam) non satisfacit, quia licet ille modus unionis finitus sit, tamen per unionem hypostaticam, non ille solus confertur humanitati, sed ipsamet persona Verbi, quæ est bonum infinitum simpliciter; ergo non potest cadere ad æqualitatem sub meritum etiam ipsius Christi; quia infinitas meriti non potest esse tanta, quanta est infinitas illius boni. Secundo est difficultas de actibus divinæ voluntatis, prout dicunt liberam determinationem ad objecta creata, nam ut sic possunt cadere sub meritum, ut infr. q. 19. docebimus contra nonnullos modernos; hujusmodi ergo præmium videtur habere majorem infinitatem, quam meritum Christi, & ideo non posse hoc meritum esse æquale illi præmio. Assumptum probatur, nam actus divinæ voluntatis cum determinatione sua est simpliciter infinitus in genere entis; & si illa determinatio libera addit aliquam perfectionem ipsi Deo, illa est in suo ordine infinita simpliciter, & in re est ipsemet Deus: merita autem Christi non attingunt tantam infinitatem.

Opinio.

Propter hæc aliqui simpliciter concedunt, esse possibile aliquod præmium excedens totum valorem meritorum Christi, & consequenter non fuisse sufficientia omnia Christi merita ad merendum de condigno, & ad æqualitatem omne præmium possibile divisive, seu distributive: & nihilominus docent fuisse sufficientia Christi merita ad merendam unionem hypostaticam; quatenus est quid creatum in natura assumptum, & majori ratione, sufficere ad quemlibet effectum creatum procedentem a voluntate Dei, & hoc satis esse, ut meritum Christi sit simpliciter infinitum, quia hæc præmia, quæ sub illud cadere possunt, sunt infinita, seu in infinitum augmentabilia. Respondeo tunc Christi meritum sufficiens fuisse ad omne præmium possibile divisive sumptum. Probat primo, quia alias Christi meritum non esset infinitum simpliciter in genere meriti, nec facultas meritoria de condigno esset in Christo simpliciter infinita. Probat, quia non se extendit ad omne præmium possibile. Quod autem se extendat ad infinita in aliquo ordine, non indicat infinitatem simpliciter, sed secundum quid, seu perfectionem altioris ordinis. Sicut potentia activa, ut sit infinita simpliciter in ratione potentiae activæ, necesse est, ut extendi possit ad omne possibile: alioquin erit tantum infinita secundum quid, etiam si sub aliquo genere in infinitum extendi possit agendo. Dicitur fortasse, Christi meritum esse infinitum, quia se extendit ad omne præmium possibile, nam si aliquod præmium extendi non potest, id solum est, quia tale præmium non est possibile in ratione præmi. Sed contra primo; ergo simpliciter fatendum est, Christi meritum esse sufficiens ad omne præmium possibile: nam licet Christus non possit sibi mereri divinitatem, seu quod Deus sit, non ideo aliquod præmium superat meritum ejus, quia illud non est tale bonum, quod possit cadere sub meritum. Deinde illæ res, de quibus est controversia, non sunt ex his, quæ nullo modo possint sub meritum cadere, nam potius supponimus, & infra suis locis probabimus illa bona talem esse, quæ possint cadere sub me-

ritum, sicut possunt etiam impetrari: inquirimus autem, an possint cadere sub meritum æquale, & condignum; ergo si dicatur, hoc meritum simpliciter non posse dari, & ideo neque in Christo reperiri, hoc satis est, ut Christi meritum non sit infinitum simpliciter, sed tantum secundum quid, cum non sit adæquatum omni præmio possibili: nam impossibilitas æqualis meriti non oritur ex impossibilitate præmi, sed solum ex defectu facultatis ad tam insigne meritum.

Ratio.

Secundo argumentor, quia, ut meritum sit æquale præmio formaliter in ratione præmi & meriti, non est expectanda æqualitas physica seu entitativa inter res, quæ sunt meritum & præmium, sed sufficit æqualitas proportionis, & alicujus ordinis seu habitudinis connaturalis; sicut gratiarum actio, ut censeatur sufficiens, non est necesse, ut in genere entis sit actio æque perfecta beneficio suscepto, sed satis est, ut in valore morali, & in esse virtutis, & gratitudinis sit æqualis. Quod si inter aliquam intervenire debet physica æqualitas, satis est, ut inveniatur inter rem illam, quæ est præmium, & illam, quæ est radix, & quasi forma, a qua sumitur valor meriti: sed hoc modo est sufficientissimum meritum Christi ad omne præmium, etiam si aliquid increatum in eo includatur; ergo. Major constat ex communi ratione justitiæ distributiæ, & exemplo, quo Paulus utitur 1. ad Corinth. 9. de his, qui in stadio currunt, ut braviū, seu coronam accipiant; in nostris meritis de condigno id videre licet, nam si consideremus in actibus, quibus visionem beatam meremur, physicam seu entitativam perfectionem, non est sine dubio æqualitas inter actus, qui sunt meritum & præmium: quo sensu (inter alios) sumi potest, quod Paul. dixit ad Rom. 8. *Non sunt condigna passionibus hujus temporis ad futuram gloriam, quæ revelabitur in nobis.* Si tamen consideretur in eis debita proportio, & principium, a quo dimanant, & finis, ad quem tendunt, est in eis sufficiens æqualitas ad meritum de condigno, quia secundum moralem considerationem & æstimationem habent sufficientem valorem ad illud præmium. Et hæc est ratio a priori, in qua fundatur illa major propositio, scilicet, quod ratione meriti moraliter pensanda est secundum moralem valorem & proportionem, non juxta solam perfectionem physicam ipsarum entitatum.

Minor autem propositio declaratur, nam in primis in merito Christi ex parte principii est summa & infinita perfectio, quanta esse potest in quolibet præmio: atque hinc fit, ut etiam ex parte ipsius actus meritorii procedentis a tali principio, & quasi informati tali forma sit maxima proportio, & moralis valor, sufficiens ad æqualitatem meriti de condigno. Et confirmatur, nam in omni sententia Christi meritum habet sufficientem valorem ad merendam unionem hypostaticam, quantum ad illum modum creatum, quem in humanitate ponit; & tamen si conferatur illa unio cum actu meritorio quoad physicam entitatem, sine dubio non est inter ea æqualitas physica; non est ergo hæc necessaria ad meritum de condigno, sed sufficit æqualitas proportionis, qualis est inter actum procedentem ab infinita persona, & unionem terminatam ad similem, seu æqualem personam.

Et confirmatur, quia impossibile videtur mereri de condigno unionem ad personam, & non mereri per personam ut unitam, seu ut terminum unionis; quia qui meretur aliquid, meretur quicquid est cum illo necessario conjunctum, seu omne id sine, quo præmium haberi non potest, & ad illud non supponitur, sed vel consequitur, vel concomitanter se habet: hoc autem modo comparatur ad unionem personæ, quæ est terminus ejus, & quatenus talis est: ergo si potest Christus mereri de condigno & ad æqualitatem unionem hypostaticam, potest etiam mereri terminum talis unionis, seu (quod idem est) potest mereri, ut divina persona donetur nature creatæ in ratione termini unionis. Et idem fere argumentum fieri potest de voluntate Dei, quatenus libere terminatur ad aliquem effectum producendum ad extra; non enim potest aliquis mereri de condigno aliquem effectum vel donum, quod solus Deus conferre potest, quin simul mereatur, ut Deus habeat actionem vel voluntatem simpliciter necessariam ad talem effectum: est enim unum horum ab altero inseparabile: imo moraliter non sunt duo, sed unum præmium. Sicut mereri a Rege stipendium, & mereri, ut velit conferre illud, moraliter idem

Resolutio  
1. Ratio.



idem sunt. Ergo determinatio libera voluntatis divinæ ad effectum ad extra producendum cadere potest sub meritum de condigno creaturæ; multo ergo magis sub meritum Christi.

Tandem explicatur, & confirmatur, quia bonum increatum, quatenus in se est absolute, sub nullius meritum cadere potest, ut per se constat: quia ut sic est ens simpliciter necessarium, quæ ratione nemo mereri potest, ut Deus sit, neque ut Pater æternus Filium sibi æqualem producat, & similia: solum ergo potest bonum increatum cadere sub meritum, quatenus est libere communicabile creaturæ: hoc autem modo cadere potest sub meritum de condigno, in quo sit sufficiens equalitas in ratione meriti respectu præmii; ergo. Probatur minor, primo in nostro merito respectu æternæ gloriæ: non enim meremur solum visionem beatam, aut dona creata, quæ nobis inhaerent, sed etiam meremur Deum ipsum, qui est merces nostra magna nimis. Sicut enim proprium ac primum objectum spei nostræ est non solum visio creata, sed etiam Deus ipse, quatenus est bonum increatum nostrum, ita id quod meremur, non est tantum res creata, sed etiam bonum ipsum increatum: quia id, quod est præmium nostrorum meritorum, est primum objectum spei nostræ. Sic ergo in præsentia facile intelligi potest, idem bonum increatum, ut communicabile creaturæ per unionem hypostaticam vel sub quacunque alia ratione, posse cadere sub meritum de condigno Christi Domini. Nec enim refert, quod in beatitudine illud increatum bonum solum sit bonum nostrum objective, in mysterio autem incarnationis sit quodammodo formale & intrinsecum bonum humanitatis assumptæ; non (inquam) hoc obstat, tum quia etiam suppositum increatum non est proprie formale bonum humanitatis, quamvis magis intime, & substantialiter illi conjungatur ad unam personam constituendam; tum etiam, quia propter hanc differentiam necessaria est dignitas personæ increatæ, quæ conferat merito valorem talis ac tanti præmii, quam conditionem & dignitatem ad meritum gloriæ, tam formalis, quam objectivæ non requirimus. Quod autem illa dignitas personæ ad hoc sufficiat, patet, quia tanta est, quanta in præmio excogitari potest.

Et ex his facile respondetur ad objectiones in principio factas. Ad primam concedo, meritum Christi in esse entis non esse tam infinite perfectum, quam est persona divinæ, nihilominus tamen in esse meriti & præmii posse habere æqualitatem, seu proportionem sufficientem; quia, licet illud meritum in recto (ut sic dicam) non sit increatum bonum, dicit tamen illud in obliquo, quatenus est ab infinita personæ: & hoc sufficit ad prædictam æqualitatem, quia etiam divina persona non induit rationem præmii, ut in se est absolute & simpliciter, sed ut terminans creatam unionem humanitatis. Sicut autem est infinitum beneficium, quod persona increata terminet unionem creatam humanæ naturæ: ita est infinitum obsequium, quod persona increata sese submittat, ut meritorie operetur: hoc ergo satis est ad debitam proportionem & æqualitatem inter tale præmium & meritum. Ad secundum facilius est responsio, nam in primis libera determinatio actus divinæ voluntatis ad tale objectum nihil addit reale & intrinsecum ipsi divinæ voluntati; & ita ex hac parte non est aliquid excedens valorem meriti Christi: nam, qui meretur, ut Deus aliquid libere velit, non meretur ipsi Deo aliquid bonum, nec meretur, ut aliqua perfectio realis & increata in rerum natura sit: sed meretur solum, ut actus ille voluntatis increatus, & in suo esse necessarius, libere terminetur ad hoc vel illud objectum, quod non est bonum infinitum: imo nec videtur physice loquendo addere bonum distinctum a creato bono, quod ex tali voluntate in creatura resultat. Aut certe, licet illa determinatio interdum sit speciale beneficium, quod Deus conferat creaturæ, eligendo seu diligendo illam, tamen secundum moralem æstimationem, obsequium Christi tanti valoris est in ratione officii ac meriti, quantum est ille divinus amor in ratione beneficii seu præmii: quia (ut sæpe dictum est) hic valor & proportio ejus, non ex entitate actus, sed ex relatione ad personam operantem pensatur.

Secunda difficultas in eadem objectionem tacta est, an meritum Christi ob suam infinitatem sit sufficiens, & æquivalens cuilibet præmio possibili, non tantum divi-

nive, sed etiam collective sumpto. Neque inquirimus nunc de tota collectione bonorum, quam Deus ut possibilem agnoscit: illa enim licet dicatur possibilis syncretematische (ut ajunt) seu in singulis bonis seu effectibus, ex quibus conflatur talis collectio, non tamen est tota simul seu categorématique possibilis: hic autem agimus de collectione hoc posteriori modo possibili, qualis est nunc collectio omnium bonorum, naturæ, gratiæ, gloriæ, & unionis hypostaticæ, cui addi etiam possent multa alia bona, si Deus voluisset. Cum ergo constet ex precedente difficultate, potuisse Christum ad æqualitatem mereri quodlibet ex his bonis, declarandum superest, an potuerit etiam eodem modo mereri quolibet ex his bonis simul sumpta in quocumque gradu perfectionis, & in quavis multitudine sumantur. In qua re primo nulla est difficultas, si de solis præmiis pure creatis sermo sit, quia nullum præmium creatum potest esse adequatum merito Christi, quia hoc simpliciter infinitum est in ratione meriti, illud vero est simpliciter finitum; ergo, quantumvis hoc præmium imperfectione vel multitudine augeatur intra rationem præmii creati, semper erit inadequatum merito Christi, quia semper est simpliciter finitum. Difficultas ergo est, quando inter hæc præmia est aliquod vel aliqua infinita, ut est unio hypostatica unius personæ vel plurium. In qua est secundo certum, multiplicando actus meritorios, potuisse Christum ad æqualitatem mereri quæcumque hujusmodi præmia etiam simul sumpta, nam per unum solum actum meritorium potuit mereri quodcumque præmium per se sumptum, etiam si infinitum sit: sed hæc præmia tantum possunt simul conferri aut fieri in numero finito; ergo multiplicando actus meritorios in simili numero, & addendo alium actum propter cætera præmia pure creata, erit non solum æquivalens, sed etiam exuperans meritum.

Superest igitur difficultas de quantitate meriti singulorum actuum Christi, an scilicet tanta sit, ut sufficiat pro quibuscumque præmiis modo jam explicato. Nam videtur sane non esse, quia unum præmium infinitum, v.g. unio hypostatica personæ Patris, esset præmium sufficiens & adequatum cuilibet actui meritorio Christi; ergo, si per unum actum meritorium Christus tale præmium, non esset in illo actu valor ad alia præmia promerenda. Antecedens patet, quia illud præmium, ut minimum, est æque infinitum, ac quilibet actus meritorius Christi; ut ex dictis in superiori difficultate patet: ergo solum illud per se sumptum est præmium sufficiens, satisque æquale cuilibet actui meritorio Christi. Prima vero consequentia probatur, quia, si illi præmio alia adjungantur, ex illis omnibus confurget unum præmium majoris valoris, quam sit illud solum per se sumptum: quia comparatur ad illud tanquam totum ad partem: ergo non potest valor unius actus meritorii Christi esse equalis tali præmio, sed necessario debet esse minor: quia non potest eadem quantitas esse adequata minori, & majori quantitati; tunc etiam, quia si actus meritorius habet unum præmium æquale, nihil ultra illud potest ex justitia deberi aut exigi propter talem actum: quia justitia solum obligat ad æqualitatem faciendam. Secundo argumentor in hunc modum, quia plus meriti est in multis actibus Christi, quam in singulis: ergo plus etiam præmii respondere potest secundum æqualitatem multis actibus simul sumptis, quam uni; ergo potest dari præmium vel præmiorum collectio, quæ ita sit æqualis multis actibus meritoriis simul sumptis, ut singulorum valorem excedat: ergo non quilibet actus meritorius Christi per se sumptus est sufficiens ad quamlibet præmiorum multitudinem cum æqualitate promerendam. Omnes consequentiæ videntur per se satis manifestæ: primum vero antecedens probatur, quia meritum unius actus Christi comparatur ad meritum omnium actuum simul sumptorum, sicut pars ad totum: ergo plus meriti est in tota collectione, quam in uno actu. Item quia secundus actus est meritorius post primum: ergo addit aliquod meritum præter meritum primi actus: ubi autem est additio, est augmentum; est ergo majus meritum in illis duobus actibus, quam in altero eorum. Dicitur fortasse, extensive esse majus meritum in duobus actibus, quam in uno eorum, non tamen intensive. Sed contra hoc est primo, quod licet hæc distinctio in rebus physicis locum habeat, tamen in his moralibus non videtur recte applicari, quia multitudo meritorum

Rationes  
dubitandi.

Ad argu-  
menta.

2. Dubium  
circa ean-  
dem suffi-  
cientiam  
meritorii  
Christi.



torum ejusdem intensiōis moraliter æquivalēt intensiori merito, nam pluribus actibus ut decem potest aliquis tantumdem mereri, quantum alius meretur uno actu ut centum cæteris paribus. Secundo, sicut in merito distinguitur extensio vel multitudo ab intensiōe, ita potest distingui in præmio; ergo, quamvis Christus per plures actus simul sumptos non potuerit mereri intensius præmium, quam per singulos, potuit tamen mereri plura præmia, atque adeo non in quolibet actu Christi erit valor sufficiens ad obtinendam quancumque præmiorum collectionem, quod est intentum, sed aliquid potuit mereri per unum actum ultra id, quod meruit per alios. Tertio, quia excessus in multitudine seu extensiōe, quando unum in altero nec formaliter, nec eminenter continetur, est excessus simpliciter; ut omnis Hierarchia Angelorum simul sumpta simpliciter est quid perfectius, quam supremus Angelus; quia perfectio aliorum Angelorum, nec formaliter, nec eminenter, in primo Angelo continetur: at vero in præsentī unus actus meritorius Christi nec formaliter continet alios actus, vel eorum merita, ut per se notum est, neque etiam eminenter; quia nulla est ratio talis eminentiæ, neque explicari satis potest, in quo consistat: ergo simpliciter est majus meritum in pluribus actibus, quam in uno tantum. Hæ rationes videntur partem hanc probabilem reddere, quam posset aliquis sustinere dicendo, infinitatem meritorum Christi in hoc solum consistere, quod nullum præmium finitum potest esse adæquatum valori cujuscumque actus meritorii Christi, quod satis est ad perfectionem redemptionis nostræ. Neque est necesse, ut valor cujuslibet actus Christi exhauriat (ut sic dicam) omnem multitudinem præmiorum, quæ Deus simul conferre potest.

Vera resolutio.

Nihilominus probabilius existimo, meritum Christi ita esse valoris infiniti ob infinitam personæ dignitatem, ut in quolibet ejus actu sit sufficiens valor ad quancumque præmia cum æqualitate obtinenda, etiam si singula perfectissima sint, & in quocumque numero augeantur. Ita sentiunt frequentius discipuli & expositores D. Thom. & est magis consentaneum dignitati Christi & perfectioni ac excellentiæ redemptionis nostræ. Aliàs pari probabilitate posset quis dicere, non quemlibet actum Christi fuisse sufficientem ad satisfaciendum pro quacumque multitudine peccatorum, præsertim, si simul defendat, quodlibet peccatum mortale, ut est offensa Dei, habere infinitam malitiam & injuriam: nam juxta hanc sententiam eam proportionem servabit unum peccatum mortale ad unum actum satisfactorium Christi, quam servat unum præmium infinitum ad unum actum meritorium ejusdem Christi, quia remissio peccati est quasi præmium satisfactionis: ergo remissio unius peccati infiniti erit infinitum quoddam præmium: ergo exhauriet totum valorem unius actus satisfactorii Christi: ergo non per quemlibet actum potuit Christus ad æqualitatem satisfacere pro quacumque peccatorum multitudine, sed indiguit multiplicatione actuum. Ex quo fiet, ut tot possint multiplicari peccata, ut ad illa delenda non sufficiant merita Christi, quod est absurdissimum, ut supra visum est. Sed hæc ratio solum procedit ex hypothese, non tamen vera. Ideo aliter ostenditur prædicta sententia ex infinita perfectione meriti Christi, nam tota illa infinita perfectio reperitur in quolibet actu Christi: ergo sufficit ad promerenda quælibet præmia possibilis, non tantum divisive, sed etiam collective in sensu explicato. Antecedens supra probatum est, consequentia vero probatur, quia hoc pertinet ad rationem meriti simpliciter infiniti.

Et quoniam in hac ultima propositione consistit tota vis hujus rationis, probatur, ac declaratur variis modis. Primo, ex proportionem ad potentiam activam: nam potentia infinita simpliciter in agendo, vel movendo, non solum potest facere quancumque perfectissimum effectum in illo ordine, sed etiam potest facere quancumque effectum multitudinem; ergo & meritum simpliciter infinitum sufficiens est ad quodcumque præmium, etiam si ex collectione plurium confurgat: comparatur enim meritum ad præmium ad modum principii efficientis in suo ordine. Secundo, quia perfectio hujus meriti provenit præcipue ex dignitate personæ operantis: sed hæc dignitas tanta est, ut vel formaliter, vel emi-

nenter contineat, quidquid perfectionis est in quolibet præmio possibili, vel præmiorum collectione: ergo & meritum tam est perfectum in suo ordine, ut eminenter æquivalet cuicumque collectioni præmiorum, etiam si in infinitum procedatur.

Tertio, quia aliàs potuit unus actus meritorius Christi, ita exhausti uno præmio, ut, si ad aliquid aliud ordinaretur, non sufficeret ad illud ex justitia simul promerendum; ut v.g. si Christus unum actum dilectionis Dei ordinaret, ut per illum mereretur incarnationem Patris æterni, & ad hoc præmium acceptaretur, non posset Christus eodem actu promereri de justitia gloriam alicui homini. Consequens est falsum; ergo. Probo minorem: nam fingamus illum actum amoris esse ut duo, v.g. tunc sic: etiam si ille actus esset tantum ut unum, esset sufficiens ad merendam incarnationem Patris ad æqualitatem de justitia: ergo ille actus ut duo erat sufficiens ad illud præmium, & ad aliquid aliud ratione ulterioris gradus: & cum ille ulterior gradus esset etiam dignificatus a persona Verbi, per se etiam erat sufficiens ad quodlibet præmium, etiam infinitum. Et ita potest in infinitum procedi, quia & quilibet gradus intensiōis in infinitum divisibilis est, & quilibet actus secundum quamlibet minimam intensiōem, prout informatur a persona Verbi, habet infinitum meriti valorem, & est sufficiens ad infinitum præmium, ipsaque Verbi persona ita sanctificat, & dignificat totum actum, ut æque dignificet singulos gradus, vel partes ejus: est enim quasi tota in toto, & tota in qualibet parte. Quod si forte dicatur, perveniendum esse ad actum minimum in intensiōe, atque adeo indivisibilem, atque ita in eo non procedere argumentum factum. Respondetur in primis esse fortasse probabilius, etiam physice non dari minimum in hujusmodi intensiōe. Deinde saltem moraliter nunquam fit hujusmodi actus, præsertim in Christo, qui perfectissime operabatur. Ac denique fieri potest proportionale argumentum, variando speciem actus, vel individuum, & circumstantias ejus, in quibus potest in infinitum procedi: itaque si ponamus Christum meruisse incarnationem Patris per actum charitatis erga Deum, ad merendum idem præmium ad æqualitatem sufficeret actus amoris erga proximum, vel actus temperantiæ: ergo actus perfectior non solum est sufficiens ad idem præmium, sed etiam ad aliquid aliud cum illo conjunctum.

Quarto, hinc proportionaliter concludi potest, in uno actu Christi esse valorem ad præmium promerendum, quod duobus vel tribus, aut pluribus actibus Christus ipse promereri potest: quia ratione infinitatis personæ tantum valoris est in uno gradu, vel una parte actus, quantum est in toto: & ita, quidquid possunt obtinere plures actus, potest etiam unus habens plures partes: quia in singulis earum est infinitus valor, ut declaratum est. Idemque argumentum fieri potest de duratione actus: nam in Christo Domino quælibet minima duratio erat infiniti valoris propter infinitatem personæ. Itemque potest fieri simile argumentum de actu intensiori & remissiori, nam ad omne id, ad quod fuerit sufficiens intensus actus Christi, erit etiam sufficiens actus remissus, ut facile patebit applicando argumentum factum: ergo & unus actus erit sufficiens ad omne id, ad quod plures sufficiunt: quia & est eadem proportio, & unus actus intensus æquivalet multis remissis. Atque idem argumentum sumi potest ex eo, quod actus minus perfectus in specie a Christo factus, est sufficiens ad omne præmium, ad quod sufficit actus in specie perfectior: ergo & unus actus sufficit ad omne id, quod plures similes possunt promereri: nam per se loquendo non est minor, imo major excessus in perfectione specifica actus, quam in unitate vel multitudine. Ratio denique a priori est, quia id, quod confert ad Christi meritum entitas vel perfectio, aut intensio actus, comparatum ad dignitatem personæ, est quasi materiale, & dignitate Verbi informatum constituitur in altiori ordine meriti, in quo habet infinitatem simpliciter: & ideo quidquid perfectionis ex parte actus deest, compensatur ex dignitate personæ, in qua tota hæc sufficientia & perfectio eminenter continetur: & ideo sicut entitas remissa, vel minus perfecta ipsius actus non minuit valorem meriti Christi, etiam comparati ad quodlibet præmium, ita etiam neque unitas aut multitudo actus meritorii: ergo, quidquid potuit Christus pluri-



pluribus actibus mereri, potuit & singulis: ergo quolibet actu potuit mereri quamcumque multitudinem præmiorum, quia constat, pluribus actibus potuisse Christum mereri hujusmodi præmium.

Ultima  
probatio.

Ultimo tandem argumentor & confirmo discursum factum, nam, si tres personæ divinæ assumpsissent eandem humanitatem, & in illa actus meritorios exercuissent, actus elicitus a tribus personis per humanitatem non esset magis meritorius, nec plurium præmiorum, quam sit actus nunc elicitus a persona Verbi; ergo e converso plures actus elicitus ab una persona divina non sunt magis meritorii, aut plurium præmiorum, quam unus actus ab eadem persona elicitus: ergo quocumque actu possunt cum æqualitate obtineri omnia præmia, quæ possunt per plures. Antecedens videtur evidens, quia tres personæ divinæ non sunt quid perfectius, aut melius, quam una: ergo neque actus a tribus potest habere majorem valorem, quam ab una. Item hac ratione humanitas unita tribus personis non esset sanctior, neque venerabilior, quam sit nunc uni tantum conjuncta: ergo neque actus talis humanitatis in uno, vel alio statu, essent majoris vel minoris valoris, aut sufficientiæ ad quælibet præmia obtinenda. Prima vero consequentia probatur, quia plus confert ad valorem & quantitatem hujus meriti dignitas personæ, quam entitas actus: ergo, si plures personæ adjunctæ eidem actui, simpliciter non augent valorem, quem una sola confert, quia unaquæque continet formaliter vel eminenter quiddam perfectionis est in omnibus, etiam plures actus procedentes ab eadem persona simpliciter non augebunt valorem unius actus ab eadem persona elicitus: multo enim magis continet eminenter ipsa persona, quiddam ex entitate actus adiungi potest.

Ad argu-  
menta.

Ad primum ergo argumentum contrarium distinguendum est antecedens, cum dicitur, incarnationem, v.g. unius personæ esse adæquatum præmium unius actus meritorii Christi, nam intensive id verum est, ut probat ratio ibi facta, quod illud præmium habet infinitatem quandam proportionalem infinitati meriti, nec potest ordinari ad aliquod præmium intensive perfectius, neque etiam posset aliquod inferius meritum cum tali præmio habere condignam proportionem seu adæquationem; hoc ergo sensu dicitur illud præmium intensive adæquatum actui meritorio Christi. Unde, si Deus vellet solum illud præmium propter talem actum conferre, sufficiens æqualitas intensiōis & proportionis servaretur: habet enim meritum Christi ab unionē, seu potius a persona unita, quod infinitum sit: potest ergo satis compensari tale meritum per unionem personæ ejusdem seu æqualis dignitatis. Nihilominus tamen extensive, ac formaliter (ut sic dicam) non esset tale meritum præmiatum, quantum potest juste ad æqualitatem præmiari, quia ratione suæ eminentiæ & perfectionis valorem habet ad quælibet alia præmia, etiam si cum illo conjungantur, quia per hujusmodi additionem præmium non crescit intensive: in illo enim continetur eminenter, quiddam addi potest: meritum autem est intensive infinitum; & ratione principii, a quo illam infinitatem habet, eminenter in suo genere continet totam illam perfectionem extensivam, seu continet valorem ad ea omnia, ad quæ sufficit extensio, seu multiplicatio meriti. Atque eadem fere responsio est ad secundum, nam, licet plures actus Christi sint re vera plura merita, & hoc modo unus addat alteri, & uterque simul comparetur ad singulos tantum totum ad partes, nihilominus non efficiunt unum intensius meritum, neque unus addit valorem ad aliquod præmium, qui non sit in alio, ratione suæ eminentiæ & infinitatis. Ad primam autem replicam in contrarium respondetur, in meritis finitis verum esse, plura merita remissa æquivalere uni intensiori, sufficereque non solum ad plura præmia, sed etiam ad intensius præmium obtinendum. In infinito autem merito id locum non habet, quia ea ratione, qua infinitum est, intensive augeri non potest. Ad secundam replicam concedo, posse dari multitudinem præmiorum, sicut & meritorum, etiam in his, quæ in ratione præmii infinitatem habent; nego tamen, inde sequi, potuisse Christum plura præmia mereri per plures actus, quam per unum: quia infinitas meriti in singulis acti-

bustalis ac tanta est, ut tam ad intensiōem, quam ad extensiōem præmiorum sufficiat, ut ostensum est. Ad tertiam negatur minor, nam in merito cujuslibet actus Christi eminenter continetur valor quorumcumque aliorum actuum ejusdem Christi: hæc autem eminentia provenit ex infinitate personæ Verbi, in qua est omnis excellentia, vel conditio, a qua meritum potest tam extensive, quam intensive augeri.

Tertia difficultas, quæ in objectione facta tangitur, est, an simpliciter concedendum sit, plus Christum potuisse mereri, quam Deus possit præmiare: videtur enim id sequi ex dictis, nam quodlibet Christi meritum tanti valoris est, ut nullum possit ei respondere præmium omnino adæquatum illi, quodque illud prorsus exhauriat, tam intensive, quam extensive: ergo non potest Deus adæquatum præmium illi rependere: ergo plus potest Christus mereri, quam Deus possit præmiare. Propter rationem hanc aliqui ita simpliciter loquuntur: mihi tamen hujusmodi sententia omnino displicet. Primo, quia non potuit Christus mereri aliquid impossibile, esset enim mereri id, quod est omnino nihil; ergo neque potuit mereri plus, quam Deus possit facere, quia quiddam possibile est, potest facere Deus, & solum non potest, quod in se est impossibile: Christus autem similiter solum potuit mereri, quod possibile est, & quod est impossibile mereri non potuit. Secundo, quia Dei omnipotentia non minus infinita est, quam meritum Christi, nihil enim potest cadere sub hoc meritum, quod non possit etiam cadere sub illam potentiam. Tertio, quia vel est sermo de hoc merito secundum valorem suum, & secundum se, vel ut refertur ad præmium: si primum, sicut ipsum infinitum est, ita Dei potentia est infinita: si secundum, sicut fieri non potest præmium actu infinitum, ita nec per meritum Christi potest acquiri jus ad præmium pure creatum actuque infinitum: posset autem referre illud meritum ad præmium majus & majus in infinitum, quod facile fieri potest, & conferri a Deo.

3. Dubium  
de eadem  
sufficiētia  
meriti  
Christi.

R. Futatur  
falsæ rel-  
ponso.

Dicendum est ergo, aliud esse loqui de valore seu merito operum Christi secundum se, seu absolute considerato: aliud vero esse loqui de eodem merito, prout ab operante refertur ad præmium. Priori modo est verum, nullum esse præmium possibile, quod omnino exhauriat tam intensive, quam extensive valorem talis meriti, quia quocumque præmio dato posset majus, saltem secundum extensiōem & multitudinem, ei retribuui, quod non provenit ex impotentia Dei, sed ex incapacitate creaturæ. Unde neque infinitas talis meriti ad præmium comparata in hoc consistit, quod illi debeatur, aut deberi possit præmium simpliciter & actu infinitum intensive & extensive, quia id, quod est impossibile, non potest cadere sub meritum, ut dictum est, sed consistit in hoc, quod, signato quocumque præmio finito, est in eo valor ad majus præmium, vel ad plura præmia, etiam si in infinitum procedatur: in quo non excedit meritum Christi potentiam Dei, sed eam imitatur, & quodammodo ei adæquatur, quamvis in inferiori ordine & ratione. Solum videtur esse differentia, quia Christus potuit facere meritum simpliciter infinitum: Deus autem non potest facere præmium creatum simpliciter infinitum. Sed hæc differentia non est ex eo, quod plus possit Christus mereri, quam Deus præmiare; sed ex eo quod valor meriti non consistit in entitate physica, sed morali sumpta ex habitudine ad personam increatam, ideoque simpliciter infinitam: præmium vero creatum est res aliqua physica, quæ non potest esse actu infinita. Posteriori autem modo, quatenus scilicet meritum Christi est sub relatione operantis, sic semper necessario refertur ad finitum præmium: atque hoc modo dici potest opus Christi, ut est actuale meritum, id est, ut per illud acquiritur jus ad præmium, semper referri ad finitum, vel definitum præmium, & hoc modo semper Christi meritum potest habere adæquatum præmium, quia ut sic non meretur opus totum id, quod habet valoris, sed tantum id, ad quod refertur ex promissione, & conventionē, ut infra q. 19. latius explicabitur. Opus autem Christi ex Dei intentione, & promissione non potest referri, nisi ad certum & definitum præmium, quia ut sic refertur ad præmium eo modo, quo fieri, & convenienter fieri potest.

Dices,



**Obiectio.** Dices; ergo de facto meritum Christi non est dicendum infinitum, sed potius simpliciter finitum: probatur, quia meritum absolute dictum non dicitur opus secundum valorem, quem ex se habet, sed præterea requiritur, ut in promissione fundetur, & per illud aliquod jus acquiratur: qua ratione opera Christi in cælo nunc habent valorem, & non sunt merita, ut latius infra quæst. 19. Idem argumentum fieri potest de satisfactione; nam, vel Christus obtulit satisfactionem suam pro infinitis hominibus, & sic obtulit pro pluribus, quam prodesse posset, vel obtulit pro finitis tantum, & sic satisfactio proprie dicta est tantum finita, quia actualis satisfactio non dicit operationem solum habentem valorem ad satisfaciendum, secundum se sumptam, sed ut relatam ad satisfaciendum pro aliquo: nam licet ego in gratia existens exerceam opera poenitentia, si tamen neque ego satisfactione indigeo, neque pro aliis satisfacere volo, non dicar proprie satisfacisse. Unde idem argumentum fieri potest de omnibus hominibus, qui aliquando futuri sunt, nam vel Christus pro illis omnibus obtulit sua merita & satisfactionem, & sic omnibus proderunt, quia non potest ejus oblatio esse irrita, aut non accepta; vel non obtulit pro omnibus, sed pro prædestinatis tantum, & sic neque pro omnibus satisfecit, eritque ejus satisfactio nimis limitata & finita. Circa hoc duo extrema cavenda sunt. Unum est eorum, qui dicunt, Christum actu & re ipsa solum satisfecisse pro his hominibus, quibus de facto applicatur ejus satisfactio, nam, respectu aliorum, licet opera Christi de se satisfactoria fuerint, tamen proprie non fuerunt satisfactiones pro illis. Quæ sententia tribuitur Joanni Medinæ tractatu tertio de satisfactione quæstione prima. Sed re vera id non docet, neque ab ullo Catholicorum doceri potest, apud quos nota est distinctio satisfactionis quoad sufficientiam, & quoad efficaciam, & certum est Christum pro omnibus quoad sufficientiam satisfecisse, non solum quia opus de se satisfactorium exercuit, aliàs etiam pro dæmonibus quoad sufficientiam satisfecisset, sed vere & actu satisfecit pro omnibus hominibus, quia pro omnibus obtulit opera sua. Quæ oblatio, eo modo quo facta est, accepta fuit Patri, & non fuit irrita ex se, sed in quibuscum non habet effectum ex defectu eorum, quod non repugnat dignitati satisfactionis Christi, quia non est ab ipso oblata, ut prodesset aliter, nec per voluntatem omnino efficacem, sed generalem & antecedentem, quod satis est ad veram satisfactionem, sicut & ad veram redemptionem. Alterum extremum est quorundam dicentium, Christum obtulisse Deo satisfactionem suam secundum omnem ejus vim satisfactoriam, & ideo illam satisfactionem actu fuisse infinitam. Sed hoc etiam necessarium non est, neque verum, nam opera Christi, si valorem eorum spectemus, sufficientem habebant vim ad satisfaciendum, etiam pro peccatis dæmonum, & tamen nullo modo sunt pro illis, neque quoad efficaciam, neque quoad sufficientiam, oblata: ergo non sunt oblata secundum totam suam vim satisfactoriam. Item, habebant vim, ut prodesse, non tantum hominibus, qui aliquando futuri sunt, sed etiam aliis, qui esse possent, pro quibus certe non sunt oblata: fuisset enim superflua talis oblatio. Item habebant vim, ut efficaciter prodesse omnibus hominibus, & tamen non sunt hoc modo oblata: ergo non fuerunt oblata secundum totam suam vim.

**Varia responsio.** Fatendum est ergo, merita & satisfactiones Christi de facto solum fuisse oblata pro finitis hominibus, nam omnes, qui sunt futuri, finiti sunt: & adhuc pro illis non fuisse oblata secundum omnem vim, sed secundum mensuram ex divina sapientia & ordinatione præfixam, ut latius infra exponemus, agentes de his, quæ Christus nobis meruit disputat. 41. An vero hac ratione dicenda sint opera Christi esse infiniti meriti, & satisfactionis ad modum loquendi spectare videtur. Et forte melius dicetur, Christi opera habuisse infinitum valorem ad meritum & satisfactionem, tamen de facto quid finitum per illa meruisse: meruit enim, ut daretur gratia, & gloria hominibus usque ad certum gradum, nempe infra suam gratiam, & gloriam, & non ordinavit sui merita ad ulteriorem gradum gratiæ. Summi meritis seu pro pec-

catis hominum, & non dæmonum, non quia opera Christi de se ad id valere non possent, sed quia non sunt ad hunc effectum ordinata. Nihilominus in bono sensu dici potest, Christi meritum, & satisfactionem actu fuisse infinita, non solum ratione valoris, sed etiam ratione actualis meriti, ut cadentis sub divina ordinatione: quia licet in quantitate præmii non sint ordinata ad infinitum effectum, tamen ex parte modi requirunt quandam infinitatem, quia sine illa non posset esse satisfactio ad æqualitatem pro peccatis, ut supra dictum est: & quia Christo datum est propter meritum, ut posset sua voluntate instituire sacramenta, & dare illis virtutem conferendi gratiam, & ut per se posset illam efficere, meruit etiam ex perfecta iustitia, quæ omnia, saltem in modo, requirunt infinitatem.

In confirmatione illius tertie objectionis petitur alia gravissima difficultas, scilicet, cur, existente redemptione Christi tam copiosa & infinita, tam pauci homines salventur, eoque beneficio fruuntur. Sed hoc pertinet ad profundum prædestinationis mysterium, & ad altitudinem divitiarum sapientiæ, & scientiæ Dei, quam Paulus admiratur: non potest tamen alicui iniustitiæ divinæ attribui, cum per Deum non stet, quominus fructus satisfactionis Christi omnibus applicetur, unde nulla ipsis hominibus iniustitia sit: nec vero sit Christo, quia nec ipse voluit aliter sua merita hominibus applicari, nec ea obtulit, & ordinavit, ut alio modo homines ad æternam salutem perducerentur: nec etiam propterea superfluum fuit infinitus thesaurus satisfactionis Christi, quia ad perfectam iustitiam & misericordiam demonstrandam fuit necessarius. Deinde secundum intensionem, & perfectionem plura operatur in hominibus meritum, & satisfactio Christi, quam peccatum Adæ, ut per se notum est: secundum extensionem vero, & multitudinem plura peccata per Christum remittuntur, quam ex Adamo contrahantur: quo ad personas vero, pluribus communicatur peccatum Adæ, quam gratia Christi, illud enim communicatur per modum nature in ipsa naturali generatione, hæc vero requirit excellentiorem modum regenerationis spiritualis, quæ difficilius est. Altior vero hujus rei ratio est, quia Deus ita voluit permittere ad ostensionem iustitiæ suæ, & majorem suæ gratiæ commendationem, quæ eo magis æstimari debet, quo paucioribus communicatur. Addi etiam potest, in rebus per se primo intendi perfectionem intensivam, multitudinem vero esse quasi accidentariam.

Sed adhuc potest instare aliquis; nam, licet ad ostendam hominum fragilitatem & commendandam gratiæ sublimitatem, necessitatem seu indigentiam ejus ex parte hominum, & donationem mere gratuitam ex parte Dei, conveniens fuerit permittere, ut merita Christi in paucioribus hominibus habeant consummatum effectum, quam sit reproborum numerus: aliunde vero ad sufficientiam & consummationem redemptionis Christi maxime videtur oportuisse, ut vel plures, vel saltem tot homines per Christi meritum efficaciter redimantur & salventur, quot in statu innocentiae salvarentur, si ille perduraret: aliàs non tantum commodi attulisset nobis Christi redemptio, saltem in multitudine salvandorum, quantum damni attulit peccatum Adæ. Neque in hoc genere beneficii verum esset illud Pauli: *Ubi abundavit delictum, superabundavit & gratia*. Nec denique hominum ruinæ omnino essent per Christi redemptionem impletæ. Nec satisfaciet, qui sic dicat, quod licet numerus salvandorum imminutus fuerit per peccatum, tamen hoc damnum compensatur intensione gratiæ, & excellentia sanctitatis, quæ majoris momenti est, quam extensio seu multitudo, ut paulo antea diximus. Hoc (inquam) non satisfacit, tum quia gratis asseritur, pervenire homines ad excellentiorem gradum sanctitatis in hoc statu naturæ lapæ, quam in statu innocentiae pervenirent, loquendo de substantiali sanctitate, quæ in intensione gratiæ & charitatis consistit. Maxime, si verum est, quod articulo & disputatione sequentibus ostendemus, in eo etiam statu gratiam fuisse hominibus dandam ex meritis Christi. Imo D. Thom. 1. p. q. 95. art. 5. expresse dicit, si efficacia meriti attendatur ex quantitate gratiæ & ex absoluta quantitate operum, sic efficaciora futura fuissent

Quo sensu dici possit Christi meritum actu fuisse infinitum.

Quæstio dubitatio circa efficaciam meritorum Christi.

An tot homines per Christum salventur, quot in statu innocentie salvi fuerunt.



fuisse opera hominis ad meritum in statu innocentiae, quia tunc copiosior fuisset gratia; & homo majoris esset virtutis, & majora opera fecisset. Tum etiam quia; esto id esset verum, tamen etiam bonum multitudinis magni momenti esset, & interdum praefendum privatis commodis: ergo, quidquid sit de excessu in intentione, vel in aliis commodis, etiam illud bonum multitudinis debuit per Christi redemptionem efficaciter perfici, & totum illud damnum efficaciter reparari.

Propter hanc difficultatem negari potest, quod ob-  
 jectio ut certum assumit, nimirum plures homines sal-  
 vandos fuisse in statu innocentiae, quam nunc salven-  
 tur; quod aliqui in ipsamet utriusque status conditione  
 ita fundare student, ut existiment majorem occasionem  
 ruinae & perditionis habituros fuisse homines in statu  
 innocentiae, quam in natura lapsa; ideoque multo  
 plures in eo statu fuisse damnandos, quam salvandos;  
 hujusmodi autem occasionem futuram fuisse dicunt,  
 appetitum superbiae, cujus veluti nutrimentum est pro-  
 pria excellentia, & dignitas, ac ceterorum bonorum  
 abundantia. Hujus autem occasionis ruinae non leve  
 indicium sumitur ex lapsu primorum parentum, qui in  
 eo statu, & perfectione constituti, facillima tentatio-  
 ne per superbiam ceciderunt. Accedit etiam, quod dæ-  
 mon majori invidia exagitatus, videns homines in fe-  
 licissimo illo statu perseverantes, vehementius illos  
 ad peccandum induceret.

Sed hæc sententia in primis repugnat D. Thomæ  
 (quem in hoc ceteri Theologi sequuntur) in citato loco  
 1. part. ubi ait, copiosorem gratiam futuram fuisse tunc  
 in hominibus; & valde notanda est ratio, quam subdit,  
 dicens: *Nullo obstaculo in natura humana invento; & ex  
 eodem fundamento subinfert statim futuros fuisse tunc  
 homines majoris virtutis, & majora opera facturos:*  
*ejusdem autem rationis est, studiosius operari, & pec-  
 cata frequentius vitare: ergo ex vi conditionis utrius-  
 que status facilius vitarent homines peccata, simpli-  
 citer loquendo, in statu innocentiae, quam in natura  
 lapsa: & consequenter facilius, ac proinde plures sal-  
 varentur, quantum est ex conditione status. Unde in  
 solut. ad 3. subdit ibidem D. Thom. In hoc est differentia,  
 quia in primo statu nihil erat interius impellens ad ma-  
 lum, sicut modo est. Unde magis tunc poterat homo re-  
 sistere tentationi sine gratia, quam modo.* Et loquitur  
 de tentatione superbiae, ut aperte constat ex argumen-  
 to, & ex principio solutionis: ergo sentit facilius fuisse  
 homini in eo statu non cadere etiam per superbiam,  
 quam sit modo. Præterea dicta sententia levissimis uti-  
 tur conjecturis: & in primis omnes eodem modo appli-  
 cari possunt ad negotium angelorum, & in eo aperte de-  
 ficere invenientur: si enim naturæ & gratiæ excellen-  
 tiam, & aliorum bonorum abundantiam spectemus,  
 multo majora fuerunt hæc omnia in angelis, quam fuis-  
 sent in hominibus in statu innocentiae, ut per se notum  
 est: fuit ergo in angelis major superbiae occasio, quam  
 fuisset in hominibus in statu innocentiae; & tamen mul-  
 to plures angeli in innocentia persistenterunt, quam per  
 superbiam ceciderint: ergo idem credendum potius est  
 futurum fuisse in hominibus in statu innocentiae. Nunc  
 autem multo pauciores sunt, qui salvantur, quam qui  
 damnantur; ergo. Item, ex angelis cecidit primus  
 omnium, ut est probabilior sententia, & nihilomi-  
 nus nullum inde sumitur indicium, quod ex cæteris in-  
 ferioribus plures ceciderint, quam fuerint stabiles; ergo  
 nec ex casu primorum hominum potest sumi suffi-  
 ciens argumentum ad reliquos. Solum ergo concludi po-  
 test, idem potuisse accidere cæteris hominibus, quod  
 primis parentibus evenit, non tamen quod ita futurum  
 fuisset: sicut etiam contingere potuisset, ut omnes po-  
 steri, nullo dempto, per superbiam caderent, non  
 tamen est verisimile, ita futurum fuisse; ergo simili-  
 ter, licet sit possibile, non tamen est admodum credi-  
 bile id fuisse eventurum in majori hominum multitudine,  
 quia verisimilius est, naturam integram in pau-  
 cioribus defecturam. Unde etiam hæc conjectura po-  
 test in contrarium retorqueri; nam quia primi parentes  
 peccaverunt, & justitiam pro omnibus perdiderunt,  
 ideo plures sunt, qui illos imitantur; ergo, si e con-  
 trario illi tentationem superbiae vicissent, & innocen-  
 tiam ac integritatem pro omnibus servassent, plures

Suarez. Tom. XVI.

etiam eos in conservanda innocentia & praesertim in  
 superanda superbia, imitati fuissent.

Accedit, quod occasio superbiae non esset tanta in po-  
 steris, quanta fuit in parentibus, vel quia non recipient a  
 principio tam excellentia dona, sicut primi homines ac-  
 ceperunt, vel quia non essent tam singulares in eo felici  
 statu, qui omnibus esset communis; vel certe, quia  
 exemplo & instructione parentum juvari possent ad si-  
 milem tentationem superandam. Atque hinc etiam  
 magis apparet prioris rationis inefficacia, tum quia illa  
 occasio superbiae re vera non fuisset tanta, quanta fingi-  
 gitur; tum etiam, quia ex tota illa bonorum affluentia  
 nullus inordinatus motus superbiae ab intrinseco oriri  
 poterat in eo statu, in quo omnia ordinatissima erant,  
 sed solum per extrinsecam suggestionem, vel volunta-  
 riam objecti apprehensionem, ac representationem, po-  
 terat accidere hujusmodi lapsus: ex quo modica certe su-  
 perbiendi occasio resultare poterat. Unde fit, multo ma-  
 jorem esse occasionem peccandi in natura lapsa, quam  
 in integra fuisset, non solum quoad cætera peccata, quod  
 certissimum est, sed etiam quoad peccatum superbiae:  
 quia, licet in eo statu potiretur homo pluribus Dei do-  
 nis, tamen etiam haberet majus lumen, ad cognoscen-  
 dum illa esse a Deo, & in Deum esse referenda, & nul-  
 lum haberet intrinsecum inordinatum appetitum ma-  
 jora obtinendi: nunc autem & illa perfecta luce non ita  
 fruimur, & illum inordinatum affectum vehementer pa-  
 timur: propter quod omnes Theologi generatim de  
 omnibus peccatis docent, per peccatum originale con-  
 traxisse hominem facilitatem peccandi, ob ignorantiam  
 mentis, malitiam voluntatis, & infirmitatem appeti-  
 tus, ut videre licet in D. Thom. 1. 2. q. 85. art. 3.

Tandem, ultima congruentia de impugnatione dæ-  
 monis in statu etiam in dicto exemplo Angelorum: nam  
 etiam supremus angelus peccans, aliis, quantum potuit,  
 ut se imitarentur persuasit, & nihilominus pauciores  
 eum sequuti sunt. Deinde falsum est, quod assumitur:  
 nam in eo casu solum posset dæmon tentare per extrin-  
 secam suggestionem: nunc autem etiam utitur nostris  
 inordinatis affectibus, eos excitando & movendo ad nos  
 tentandum. Ac denique credibile est, in utroque statu  
 dæmonem pro sua malitia & invidia tentaturum homi-  
 nes, quantum potest, quantumque a Deo permittitur.  
 Igitur, si ex sola conditione utriusque status judicium fe-  
 rendum est, vel potius concipienda suspicio, credibilis  
 est, in statu innocentiae multo plures homines fuisse sal-  
 vandos, quam damnandos, quamvis in natura lapsa et-  
 iam per Christum redempta contrarium eveniat.

Hoc autem non obstante, posset aliquis alia ratione  
 sustinere, absolute loquendo plures homines salvari per  
 Christum redemptorem in statu naturæ lapsæ, quam in  
 statu innocentiae, quia credi potest, numerum omnium  
 hominum, qui in hoc statu ex Adamo generantur, ut  
 comprehendit reprobos & prædestinatos, majorem esse,  
 quam in statu innocentiae futurus esset; atque ita fieri  
 facile potest, ut quamvis in statu innocentiae plures  
 homines forent salvandi, quam damnandi, & e con-  
 verso in natura lapsa plures damnandi, quam salvandi;  
 nihilominus absolute comparando plures sint salvandi  
 in hoc statu, quam in illo futuri essent. Sicut in ange-  
 lis pauciores fuerunt reprobi, quam prædestinati: in ho-  
 minibus vero e contrario plures sunt reprobi, quam  
 prædestinati, & nihilominus absolute comparando for-  
 tasse major est numerus reprobos angelorum, quam  
 hominum, si numerus angelorum omnium multum  
 excedit omnium hominum multitudinem. Ratio autem,  
 vel conjectura, ob quam credi potest, numerum  
 hominum futurum fuisse minorem in statu innocentiae,  
 esse potest, vel quia homines tunc breviori tempore  
 viverent in statu viæ, sed paulo post usum rationis &  
 perseverantiam in bono transferrentur ad patriam, ad  
 modum angelorum, vel quia propter perfectionem il-  
 lius status non ita insisterent filiorum procreationi, sed  
 uno vel alio genito contenti essent. Vel certe quia nu-  
 merus prædestinatorum breviori tempore consumma-  
 retur, quia per pauci essent mali, & ita etiam genera-  
 tionum successiones breviori tempore durarent. Sed  
 hæc omnia incerta sunt, & quamvis probabiliter dicantur,  
 negari facile possunt.

Quocirca, si solum ex conditione status, vel aliis

D

inse-

Resolutio

1. Opinio  
affirmans  
plures  
nunc sal-  
vari.

Impugna-  
tur præ-  
cedens opi-  
nio.

Alius di-  
cendi mo-  
dus.



inferioribus rationibus hæc res consideretur, nihil in ea, quod firmum sit & conitans a firmari posse censeo. Si tamen ad divinam prædestinationem recurramus; probabile censeo non plures fuisse salvandos in uno statu, quam in alio. Opinor enim (ut inferius attingam) electionem seu dilectionem efficacem hominum salvandorum factam esse ante prævisum Adæ peccatum, & independentem ab illo, quantum ad infallibilem consecutionem illius finis. Quod dupliciter intelligi potest; uno modo tantum formaliter, quod nimirum decrevit Deus tantam hominum multitudinem ad gloriam perducere, quamvis singula individua non elegerit, usque ad prævisionem originalis peccati. Secundo modo intelligi potest etiam materialiter, scilicet, quia hos homines in individuo designatos, & in tanta multitudine dilexit Deus, ut cum Christo regnarent, etiam ante prævisum originale peccatum: & uterque modus ad rem præsentem sufficit: posterior tamen omni ex parte magis satisfacit, quia ita fit, ut iidem, qui absque peccato Adæ efficaciter salvandi essent, efficaciter etiam fuerint per Christum redempti. Imo hinc ratio reddi potest, ob quam Christus non obtulit efficaciter redemptionem suam pro pluribus, quia, scilicet, non plures fuerant a Deo electi. Et hic posterior modus dicendi & explicandi divinam prædestinatorum electionem, non solum propter difficultatem præsentem, sed per se, propter alias rationes mihi magis probatur, magisque consentanea perfectioni divinæ providentiæ videtur, quæ attingit a fine usque ad finem fortiter, & disponit omnia suaviter, & ita incipiens in intentione a consummata gloria prædestinatorum, ad eam consequendam ordinavit alia media, etiam ipsam permissionem originalis peccati. Ex quo consequenter dicendum est, ex vi illius decreti eosdem homines esse salvandos, etiamsi Adam non peccasset, per alia media, quæ tunc Deus ordinasset. Neque enim deesset illi via ac modus efficiendi, ut omnes illi homines prædicti naturaliter generarentur, etiamsi peccatum non intervenisset.

Alia responsio ad primam objectionem.

Tandem, si cui placuerit, prædictam questionem incertam evitare, dicere etiam potest ad difficultatem propositam, nihil referre ad perfectam Christi redemptionem, quod plures vel pauciores homines in uno statu, quam in alio salventur, quia sicut lapsus primo fuit in tota natura, ita satisfactio Christi per se primo pro toto genere humano oblata est; & ad hoc fuit sufficientissima, & quantum est ex se, efficax ad omnes. Quod vero non omnibus, sed paucioribus applicetur, non pendet primario ex sufficientia & infinitate illius, sed ex profundo mysterio divinæ prædestinationis, de quo latius in propria materia differendum est.

### S E C T I O V.

*Utrum in Christi satisfactione vera, & propria justitia intercesserit.*

Quæstio-  
nis diffi-  
cultas, ex  
duplici  
capite.

Duplex dubitandi ratio, & utraque sane gravis & difficilis occurrit in quæstione proposita. Prior est, quoniam vera, & propria justitia inter personas distinctas esse debet, nam justitia virtus est, quæ essentialiter alterum respicit, ut cum Aristotele 5. Ethic. cap. 1. cæteri docent: sed hoc non potest convenire proprie in satisfactionem Christi. Primo, quia Christus per se primo satisfecit Deo pro hominibus, ipse autem non est alter a Deo, cum Deus ipse sit; ergo ejus satisfactio non fuit ad alterum: nam illa vox, *ad alterum*, distinctionem suppositorum indicat, ut sentit D. Thom. 2. 2. q. 58. art. 2. Secundo, quia, si satisfactio Christi ad æternum Patrem comparetur, licet personaliter ab illo distinguatur, in ordine tamen ad propriam justitiam illa distinctio non sufficit, quia inter filium & patrem non intercedit propria justitia, teste Aristot. 1. Ethic. cap. 6. quia filius est aliquid patris, & quasi pars ejus, ut docet D. Thom. 2. 2. q. 58. artic. 4. Tertio, quia Christus non simpliciter in quantum Deus, sed in quantum homo satisfecit; at vero in quantum homo est creatura, & servus Dei, ac denique quicquid est, Dei est; sed inter servum, & dominum, hac ratione non intercedit propria justitia, teste Aristotele supra; ergo.

Posterior ratio dubitandi est, quia satisfactio Christi, nec ut ab ipso procedebat; & offerebatur patri, erga actus veræ, & propriæ justitiæ: nec ut ab ipso Deo, & æterno Patre acceptabatur; ergo nullo modo. Explico, & probō primam partem antecedentis: quia Christus non tenebatur ex justitia mori pro hominibus, aut satisfacere pro illis; poterat quidem teneri ex obedientia, vel ex charitate, si præceptum illi impositum esset, quod modo non disputo, tamen ex justitia non est, unde potuerit obligari; ergo illa satisfactio, ut ab illo procedebat, non erat actus justitiæ: repugnat enim esse actum justitiæ sine justitiæ obligatione. Dicitur fortasse, ex pacto aliquo, ut fidejussorem hominum, potuisset teneri ex justitia. Sed contra, quia ipsimet homines non tenentur ex propria justitia satisfacere Deo pro peccatis, sed ex poenitentia, vel religione; ergo quamvis demus, Christum in se suscepisse debitum, & obligationem hominum, non potest illud ad justitiam pertinere, quia non potest esse major obligatio fidejussoris, quam principalis debitoris. Et confirmatur, quia in Christo homine non fuit alia propria justitia, vel alterius rationis, quam sit in aliis hominibus; sed nulla propria justitia humana habet actum circa Deum, ut constat ex materia de Religione, & de Poenitentia, & patet breviter: quia si aliqua versaretur, maxime justitia commutativa; sed hæc non, quia proprie versatur in commutationibus dati, ac accepti, ut constat ex 5. Ethicor. cap. 2. & 4. unde proprie constituit æqualitatem in his rebus, quæ sunt unius, & non alterius, & inter eos, qui habent jura, & dominia condivisa, quique invicem utilitatem, vel damnum recipere possunt: quæ omnia non habent locum in ordine ad Deum.

Secunda.

Probatur jam altera pars antecedentis, scilicet, nec in Deo ipso fuisse actum justitiæ, satisfactionem Christi suscipere, vel acceptare; primo, quia nulla persona offensa tenetur acceptare satisfactionem ab alio, quam ab ipso offendente, ut patet ex communi sensu omnium hominum, qui prudenter, & secundum moralem estimationem de satisfactione judicant: & ratio sumi potest ex differentia inter satisfactionem, & restitutionem; restitutio enim respicit res ipsas, unde si reddatur res æqualis, nihil refert, quod ab uno, vel ab altero reddatur: at vero offensa, & similiter satisfactio, respicit actiones, & personas, & ideo nullus tenetur ad acceptandam satisfactionem, nisi ab eadem persona, quæ illum offendit, quia alias non videtur proprie resarci in proportio illa, vel in æqualitas, quæ inter personam offendentem, & offensam intercessit. Secundo & maxime, quia obligatio, vel debitum justitiæ, non habet locum in Deo, videtur enim quandam imperfectionem præ se ferre: unde A. nselm. in Prologio cap. 10. & 11. *Justus est, inquit ad Deum, non quia reddidit debitum, sed quia facit, quod decet.*

Propter hæc dici posse videtur, justitiam hanc, quæ satisfactio Christi tribuitur, non appellari justitiam, quia propriam; & veram rationem formalem justitiæ habeat, sed propter quandam analogiam, seu similitudinem, quam habet cum propria justitia, vel commutativa, quatenus in compensanda offensa divina servavit æqualitatem rei ad rem, vel vindicativa, quatenus peccata hominum in seipso condigne vindicavit. Cui dicendi modo favent Theologi, qui communiter negant, esse in Deo propriam justitiam ad alios, atque adeo etiam ad Christum, generaliter enim loquuntur, unde etiam fit, nec Christi ad Deum posse esse veram justitiam, hæc enim correlativa esse videntur: illam vero sententiam docent in 4. d. 46. Scot. Duran. & Palud. q. 1. fundari in hoc, quod inter Deum, & creaturam non potest æqualitas constitui; Bonav. autem ibi art. 2. q. 1. ad 1. secutus A. lenf. 1. p. q. 39. memb. 1. in eo fundatur, quod in Deum non cadit debitum proprium, quod tamen est de ratione propriæ justitiæ, ut ait D. Thom. ibid. q. 1. art. 1. q. 1. & 1. p. q. 2. art. 1. Ethicor. 1. Contra gent. cap. 93. negat, justitiam commutativam proprie esse in Deo, licet de distributiva aliud sentiat, de qua nunc non videtur reterre, quia in compensanda injuria, de qua modo agimus, non distributiva, sed commutativa justitia debuit intercedere: & eam sententiam sequuntur omnes Thomistæ, Capreol. Cajetan. Ferrar. citatis locis; sequitur etiam Richard. dicta d. 46. art. 1. q. 1.

Primus dicendi modus.

Nihilò-



Secunda  
& vera  
sententia,  
quod in  
satisfac-  
tione  
Christi  
fuit vera  
iustitia.

Rejiciatur  
Christus  
satisfacere  
tribus  
personis,  
ut sunt  
verus Deus

Nihilominus simpliciter, & absolute dicendum videtur, in Christi Domini satisfactione servatam esse propriam & veram iustitiam, tam ipsius ad Deum, quam Dei ad ipsum. Quæ sententia est magis consentanea D. Thom. hoc loco, & aliis superius citatis, & omnes ejus discipuli eam amplectuntur, illique plurimum favent omnia, quæ de efficacia, & valore satisfactionis Christi ex Scriptura, & Patribus a me adducta sunt. Ex quibus ad confirmandam veritatem hanc, hac sola ratione utor; nam quæ sacra Scriptura, & Patres nobis tradunt, præsertim cum proponunt, & docent mysteria Fidei, sunt in proprietate, & veritate, ac sine metaphoris intelligenda; nisi quidpiam ex hoc sequatur tam aperte absurdum, ut cogat nos ad metaphoras, vel improprias significationes confugere: sed sacra Scriptura nihil frequentius tradit, quam in hominum per Christum redemptionem fuisse iustitiam servatam, & apertissime demonstratam, ut constat ex cap. 3. ad Roman. & 5. & ex aliis multis supra allegatis, & aliis, quæ in sectione sequenti afferemus; ergo debet hoc intelligi de vera & propria iustitia, si absque inconveniēti aliquo, vel absurdo fieri potest. Solum superest, ut hoc ita fieri posse demonstremus, nam in reliquis ratio procedit ex certis principiis Theologicis: hoc vero nec brevius, neque commodius fieri potest, quam expediendo difficultates propositas.

Ut virtus  
aliqua  
Deo pro-  
prie tri-  
buatur,  
quod spe-  
ctandum  
sit.

Prius tamen, quam ad hoc accedam, notandum est, ut virtus aliqua, vel actus ejus dicatur proprie reperiri in Deo, non oportere, ut eodem modo, & cum omnibus imperfectionibus in Deo sit, quo in hominibus, vel inter homines reperitur. Nam si hoc esset necessarium, nec misericordia proprie esset in Deo, quia in eo non est compassio: nec liberalitas, quia non privatur eis bonis, quæ aliis communicat; nec vindictio, quia non se tuetur, vel servat incolumem alios puniendo: nec scientia, quia non discurret, neque assensum conclusionis colligit ex assensu principii. Denique hoc generali ratione constat, quia cum hæc attributa, virtutes & perfectiones non univoce, sed analogice dicantur de Deo, & nobis, quamquam in Deo sint proprie, & formaliter, tamen excellentiori modo esse necesse est: ut ergo virtus aliqua, quæ in hominibus est, dicatur proprie convenire Deo, sufficit, ut formalis ratio illius virtutis, formaliter, ac proprie in Deo, & in nobis reperitur: in nobis licet habeat adjunctam aliquam imperfectionem, quam non habet in Deo, ut in exemplis adductis de scientia, & misericordia videre est: tunc enim talis imperfectio non est de conceptu formali illius virtutis secundum se, sed solum illi convenit, prout in nobis est, cujus signum est, quia præcisa per intellectum illa imperfectione, intelligitur manere quædam ratio formalis virtutis, distincta secundum rationem ab aliis virtutibus, vel perfectionibus, quæ formaliter & proprie in Deum convenit, & in nobis etiam reperitur. Hoc enim modo, & nullo alio intelligere possumus, alias perfectiones, vel virtutes, quæ in nobis sunt, formaliter, & proprie in Deo reperiri, & ad eundem modum philosophandum est de divina iustitia. Quomodo autem id possit explicari, & persuaderi, in solutione secundæ difficultatis melius dicetur.

1. Respon.

Ad primam ergo difficultatem sunt nonnulli, qui ut propriam iustitiam in Christi satisfactione tueantur, dicunt, illum Patri, non autem suæ divinæ personæ satisfecisse, quod ex Scriptura confirmant, quæ frequenter ita loquitur, ad Ephes. 2. *Per ipsum habemus accessumambo in uno spiritu ad Patrem*; 1. Joan. 2. *Advocatum habemus apud Patrem*, & Joan. 14. 15. & 16. Sæpe Christus ad Patrem orat pro nobis, quo supposito facile expediunt objectionem, quæ fiebat de iustitia inter Patrem, & filium, cum enim Aristoteles negat inter Patrem, & filium intercedere veram iustitiam, aperte loquitur de filio, qui est sub cura paterna, & non habet propria bona, nec censetur habere aliam voluntatem præter voluntatem patris: at vero si inter homines etiam loquamur de filio jam emancipato, & habente propria bona, propriamque voluntatem, recte potest inter eum, & patrem vera ratio iustitiæ intercedere: in proposito ergo quamvis Christus, ut Deus, & Filius Dei naturalis non possit verum actum iustitiæ erga Patrem suum exercere, non quidem quia sit pars ejus, vel

sub cura ejus, hujusmodi enim imperfectiones non cadunt in Deum, sed quia est ejusdem substantiæ, & voluntatis cum ipso, tamen idem Filius in alia natura potest iustitiam ad Patrem suum exercere, quia est persona distincta, & habet naturam & voluntatem distinctam, per quam potest veros actus iustitiæ perficere.

Sed hic modus, quatenus negat, Christum & sibi, & toti Trinitati satisfecisse pro nobis, omnino mihi displicet; potius enim dicendum est, primo, ac per se satisfecisse Deo, & consequenter tribus personis, ut unus Deus sunt, quæ est aperta sententia Pauli 2. ad Corinth. 5. dicentis. *Erat Deus in Christo, mundum reconcilians sibi*; ubi sicut Deus dicitur esse in Christo ratione divinæ naturæ, ita ratione ejusdem dicitur reconciliasse mundum sibi. Et ita intelligunt ibi glossa & expositores, & August. serm. 120. de tempore. Unde ibidem dicitur: *Omnia ex Deo, qui nos sibi reconciliavit*. Sicut ergo omnia sunt ex Deo, ut sic, & a tota Trinitate, ut est unus Deus, ita Christus nos reconciliavit Deo, & toti Trinitati: notat vero ibi Chrysost. homil. 11. sicut per quandam appropriationem dicuntur interdum omnia esse a Patre, ita etiam nonnunquam tribui Patri, quod sibi reconciliet homines per Filium; & Ambros. 3. de Fide cap. 5. *Deus, inquit, erat in Christo mundum reconcilians sibi: hoc est sempiterna divinitas. Aut si Pater in Filio, sicut Filius in Deo Patre, & substantia utique, & operationis unitas non negatur*. Unde ad Ephes. 2. paulo ante verba, quæ supra citata sententia afferebat, ait Paulus. *Ipse enim est pax nostra, qui fecit utraque unum*; & infra: *ut duos condat in se ipso in unum novum hominem faciens pacem, & reconciliet ambos, in uno corpore, Deo*. Sic etiam 1. ad Timoth. 2. vocat mediatorem Dei, & hominum; Dei, scilicet, quatenus Deus est, ut late tractat Cyrill. lib. 12. Theaur. cap. 10. & attigit August. 9. de Civitat. cap. 15. clarius vero illa verba tractans August. Enarrat. 2. in Psalm. 29. interrogat: *Quid est mediator esse? inter Patrem, & homines? non, sed inter Deum, & homines: quid est Deus? Pater, & Filius, & Spiritus sanctus: inter illam Trinitatem, & hominum infirmitatem mediator factus est homo*: quæ verba transcripsit Beda 1. ad Timoth. 2. & Anselm. ibid. unde idem August. lib. 10. de Civit. cap. 20. *Cum in forma, inquit, Dei sacrificium magis voluit esse, quam sumere*. Et ad eundem modum Cyril. Alexan. in defens. 10. anathemat. ad Evoptium; *Non ut majori, inquit, offerat sacrificium, sed sibi ipsi & Patri*.

Ratione denique hoc sufficienter convincitur, quia satisfactio illi offertur, cui offensio facta est; sed offensio primario fit Deo, ut sic, & tribus personis consequenter, ut sunt unus Deus; quia ratione unius supremæ naturæ, ac voluntatis omnes tres personæ sunt unus Legislator, cujus præceptum peccator transgreditur; unus finis ultimus, a quo avertitur: unus Dominus, quem offendit: unus denique Deus, qui satisfactionem suscipit, & peccata remittit. Confirmatur: quia certum est, personam Filii fuisse offensam per peccatum Adæ; ergo, si illi factum satis non est, non fuit Christi sufficiens satisfactio, sed oportuisset Spiritum sanctum incarnari, ut Filio satisfaceret. Tandem non potest peccatum remitti, nisi a Deo condonetur: non potest autem peccatum a Deo condonari, quin æque ab omnibus tribus personis condonetur, quia opera Trinitatis ad extra sunt indivisa: ergo non potest satisfieri Deo pro peccato, quin æque omnibus tribus Personis satisfiat. Negabit fortasse aliquis illationem, quia licet remissio non possit esse, nisi ab omnibus Personis, tamen ab una, cui satisfactum esset, posset esse ex iustitia; ab alia vero gratis, cui satisfactum non esset. Sed hoc apertam involvit repugnantiam; tum quia tam opus iustitiæ, quam misericordiæ est necessario indivisum & commune omnibus personis, quia per se primo ab illis, ut sunt unus Deus, & una voluntate operantur; tum etiam, quia non potest uni personæ esse satisfactum, si non sit omnibus; non enim potest uni personæ esse satisfactum, nisi sit satisfactum Deo, ut Deus est; si autem satisfactum est Deo, ut Deus est, etiam Personis omnibus satisfactum esse necesse est. Dices: aliqua offensio potest directe esse contra unam personam & non contra aliam, ut blasphemiam vel hæresin contra Spiritum sanctum, vel contra Filium; ergo & satisfactio. Respondetur, opus, per



quod sit offensa, proprius & immediatus versari circa unam Personam ex intentione operantis, vel quatenus actio vel conversio ejus illam respicit, ut proximum objectum, tamen ratio offensa & aversionis primario est respectu Dei ultimi finis, & consequenter ac æque respectu omnium Personarum. Similiter ergo id, per quod fit satisfactio, potest circa unam personam, ut proximum objectum versari, ut est ratio ad Patrem, v.g. tamen ratio satisfactionis necessario est communis omnibus personis, quas respicit, ut sunt unus Deus.

**2. Responsio.** Alius modus respondendi est, non solum Verbum, sed humanitatem etiam ipsam satisfecisse, quæ cum distincta sit a persona Verbi, recte potuit inter ipsam & Verbum propria justitia intercedere. Hoc autem ita probatur, quia Christus ut homo satisfecit; ergo & humanitas. Secundo, quia humanitas est grata Deo, & totum principium suarum actionum, & passionum. Tertio, actiones sunt singularium 1. Metaph. cap. 1. sed humanitas est singularis res; ergo illa est, quæ operatur, & satisfacit; sic enim Augustin. præfatione ad enarrat. 2. in Psal. 29. quem imitatur Beda 1. ad Timot. 2. *Habes, inquit, majestatem, ad quam ores, habes humanitatem, quæ pro te oret.*

**Rejicitur.** Hæc tamen responsio & difficultatem non evacuat, & aliena est a modo loquendi, & sentiendi omnium Patrum. Primum constat, quoniam vel humanitas per se non sufficiebat ad talem satisfactionem; vel certe si ad hanc aliquo modo dicatur potens, id habere debuit a supposito, cui unita est, juxta ea, quæ in præcedenti dubio dicta sunt, & quæ inferius de satisfactione puri hominis dicuntur; semper ergo superest eadem difficultas, quomodo idem suppositum fuerit ratio satisfaciendi sibi ipsi. Secundum ex dictis etiam patere potest; omnes enim Patres in hoc maxime ponunt efficaciam satisfactionis Christi, quod ipsa persona divina est, quæ satisfacit, ipsa est hostia, & sacrificium, & infinitum pretium, ut supra sæpius citatum est, & Paulus ipsi filio tribuit, quod fuerit summus Pontifex, & dignum sacrificium obtulerit, & ideo causa salutis fuerit omnibus obtemperantibus sibi: ad Hebr. 5. ubi exauditus etiam dicitur pro sua reverentia.

**Ratione.** Neque secundum veram Philosophiam ille modus loquendi probatur; nam licet verum sit, totam rationem patiendi, vel operandi esse humanitatem, tamen quod operatur, non dicitur proprie ipsa humanitas, sed homo, vel persona, & suppositum, quia illi tribuitur operari, cui perfecte & simpliciter tribuitur esse, sed id, quod est simpliciter, tanquam perfecta & absoluta substantia est suppositum. Et ratio hujus propria est, quia cum operari sequatur esse, non intelligitur res completa ad operandum, donec intelligatur completa ad existendum: & ideo operatio non proprie tribuitur rei, prout incompleta est in existentia sua, quomodo significatur nomine humanitatis, sed prout absolute existit, ac per se, quomodo significatur nomine personæ, ut docuit optime Damasc. lib. 3. cap. 15. Et hoc ipsum voluit docere Aristoteles, cum dixit actiones esse singularem, vel enim in substantiis ipse non distinguit singularem naturam a supposito, ut videre est in prædicamentis cap. de substantia, & in 7. Metaph. ubi hoc latius disputatur; vel certe per rem singularem intelligit rem, prout a parte rei existit cum omnibus conditionibus existentia, quarum una est, ut vel subsistat, vel aliquo modo in alio insit. Et quidem si actio sit a re singulari subsistens, hoc est esse a supposito: si ab adiacente, vel quasi inhærente alteri, tunc sicut res illa non est simpliciter sua, sed alterius, ita non censetur operari, ut sua, sed ut alterius, & ideo ad hoc significandum non proprie dicitur ipsa, sed alterum per ipsam operari: & ad hunc sensum est explicanda illa locutio Augustini. non enim proprie humanitas orat, sed est, quia Verbum orat, ita enim loquitur scriptura. Quocirca licet Christus ut homo satisfaciat, non inde fit humanitatem satisfacere, non enim quidquid dicitur de Christo, ut homine, dicitur etiam de humanitate, ut per se patet.

**Responsio 1.** Dicendum ergo est, licet Aristoteles non cognoverit ejusdem personæ ad seipsam, secundum diversas naturas posse veram, ac propriam justitiam intervenire, quia non intellexit duas naturas, habentes voluntates liberas, & propria dominia suorum actuum, pos-

se in eodem supposito convenire: tamen supposito hoc mysterio, hanc distinctionem sufficere, ut idem Christus in quantum homo sibi ut Deo ex propria justitia satisfaciat, & ibi intervenire sufficientem rationem ad alterum, quia per diversas voluntates liberas satisfactio offertur, & acceptatur: quod ita verum esse variis modis explicatur. Primo, quia non minus obedientia, & religio est ad alterum, quam justitia; sed Christus ut homo veram & propriam obedientiam, & orationis, ac religionis cultum præstabat sibi ipsi ut Deo; ergo simili modo offerre poterat satisfactionem. Secundo Christus, ut Deus, est ultimus finis, & ut homo est mediator inter Deum & hominem; sed non videtur esse minus necessaria distinctio inter mediatorem, & eum, apud quem intercedit, quam in actu justitiæ sit necessaria; ergo. Tertio, hic homo Christus habet proprium dominium per voluntatem humanam eorum actuum, quos libere per talem voluntatem operatur, quod distinctum est a dominio proprio voluntatis divinæ, nam hoc est altius, & commune tribus personis, illud vero est inferioris rationis, & proprium Christi hominis: sed ubi sunt distincta dominia & jura, sufficit, ut possit intercedere justitia: ergo.

Quarto, si Christus per assumptam naturam peccare potest, veram injuriam faceret Deo, & toti Trinitati, vel si Angelus humanitatem assumeret (sive id fieri possit, sive non) inter humanam, & Angelicam voluntatem hujus personæ, posset esse discordia, & hic Angelus posset huic homini injuriam inferre: sed ubi est sufficiens distinctio, ut possit intercedere vera injuria, est etiam, ut possit intercedere vera justitia: ergo. Tandem, quamvis suppositum sit, quod operatur, tamen ratio & principium operandi est natura: subsistentia enim solum est, quasi complementum ad operandum requisitum; ergo ubi est distinctio naturarum, cum sit distinctio principiorum, quæ per se concurrunt ad actionem, licet subsistentia sit eadem, sufficit, ut intervenire possit vera ac propria justitia. Nec contra hoc aliquid objicitur in prima ratione dubitandi supra posita, quod difficultatem ingerat: quia licet Christus simpliciter non sit alter a Deo, quatenus his vocibus significatur, ipsum non esse Deum, tamen habet naturam alteram a natura divina: & hoc satis est ad rationem justitiæ, ut ostensum est.

Dices: actiones sunt suppositorum, & non naturarum: ergo non satis est naturarum divisio, nisi etiam sit suppositorum: aliàs cum suppositum sit, quod satisfacit, & cui fit satisfactio, idem satisfaceret sibi ipsi, quod videtur repugnans. Respondent aliqui, esse idem suppositum secundum rem, ratione tamen diversum, ut divinum & humanum, & hoc satis esse cum naturarum distinctione. Sed hæc distinctio rationis, si actualis & propria intelligitur, est impertinens, cum sit valde extrinseca; si autem fundamentalis & virtualis, nihil est aliud, quam quod eadem subsistentia terminet duas naturas, & per unam satisfaciat sibi, ut subsistenti in altera. Et hæc responsio est, quæ a nobis est data: hoc enim modo non repugnat, idem satisfacere sibi ipsi, ut est individuum ac suppositum diversarum naturarum. Neque hæc identitas suppositi minuit perfectionem justitiæ: quia solum illa distinctio necessaria est, quæ sufficiat ad essentialem rationem justitiæ, solumque requiritur, ut quadam conditio necessaria, ut ratio & habitudo justitiæ locum habeat, qua supposita, major vel minor perfectio justitiæ non est ex majori vel minori distinctione pendenda, sed ex objecto & aliis propriis ac positivis conditionibus justitiæ.

Dicit aliquis: Quædam peccata sunt contra Christum, non tantum ut Deum, sed etiam ut hominem; ergo pro illis saltem non potuit Christus plene satisfacere, nisi satisfaciendo sibi ipsi per eandem naturam. **Responsio.** Respondetur, propriam rationem peccati sumi ex injuria facta Deo, ut Deus est, & per aversionem ab eo ut sic, & ita pro peccato, proprie loquendo, Deo, ut Deus est, fit satisfactio. Rursus, quia Deus est supremus Judex, habens jus puniendi peccata, non solum ut sunt aversiones ab ipso, sed etiam secundum omnem malitiam, quam habent, ita etiam fit satisfactio Deo pro pena peccatis debita, & hoc modo satisfecit Christus pro



pro nostris peccatis coram Deo, etiam pro illis, quæ contra ejus humanitatem facta sunt: at vero considerando in illis peccatis malitiam, quam habent specialiter, ut sunt injuriæ factæ huic homini, sic non oportuit, ut Christus satisfaceret pro illis, sed quantum in se erat, liberaliter ea condonaret, sicut etiam non satisfecit Petro, aut Joanni pro injuriis illis factis a Paulo & Francisco: sed necesse est, ut vel illi remittant offensam, vel isti satisfaciant, si possunt.

Alia vero, quæ de filio & servo obijciuntur, facilia sunt; nam de filio verum est, quod dicebat prima sententia: de servo (non disputando nunc, an Christus inquantum homo sit servus) respondetur, triplici ex capite fieri, vel intelligi posse, ut servi ad dominum non sit perfecta justitia. Primum, quia servus nullius rei habet proprium dominium: & hoc modo verum est inter homines non intercedere justitiam commutativam inter servum, & dominum saltem quoad ea, in quibus servus non habet dominium. Sed hæc ratio non procedit in Christo, quia, ut infra videbimus, sufficienter habet aliquid proprium, quo possit ex perfecta justitia satisfacere, præsertim quia hæc justitia non est illa imperfecta commutativa, quæ consistit in datis & acceptis, sed potius pertinet ad illam, quæ est in deferendis honoribus, quæ non ita requirit proprietatem, & dominium distinctum, ut infra dicam. Secundum caput esse potest, quia servus propter indignitatem, vel vilem conditionem suam non potest reddere æquale: quam rationem reddit Aristoteles 7. Ethicorum capite ultimo, propter quam filius non potest patri reddere æquale, etiam in deferendis honoribus: sed hoc non habet locum in Christo, cujus persona nullo modo est inferior persona patris: unde licet admittamus, posse aliquo modo dici servum secundum humanam naturam, quantum ad conditionem naturæ creatæ, non tamen quantum ad conditionem servilem, nec quantum ad indignitatem personæ, & ideo potest reddere æquale, ut supra a nobis probatum est. Tertium caput esse potest ex ipsamet ratione servitutis, cui videtur repugnare omnis ratio justitiæ, quia quodammodo tollit perfectam distinctionem, & rationem ad alterum, quia servus est res quædam ipsius domini: sed hæc ratio etiam inter homines falsa est, quia in multis potest intercedere vera ratio justitiæ inter servum & dominum, si aliæ conditiones non deficient: & hæc de prima ratione dubitandi in principio posita.

Secunda difficultas duas habebat partes; alteram de actu justitiæ Christi ad Deum, alteram de actu justitiæ Dei ad Christum. Ad priorem dicitur primo, ad exercendum proprium actum justitiæ non semper esse necessarium operari ex propria & rigorosa obligatione justitiæ, sed interdum satis esse operari ad constituendum proprium, ac verum medium justitiæ, intuitu ipsius justitiæ, & æquitatis, etiam si absque obligatione fiat: nam in primis hoc ita esse fere in omnibus aliis virtutibus manifestum est, cur ergo in actu justitiæ inveniri non poterit? Deinde declaratur exemplo: Deus enim, cum punit peccatorem, actum justitiæ vindicativæ exercet, quæ propria justitia est, & ad commutativam pertinet, ut constat ex D. Thom. 2. 2. q. 108. art. 2. ad 1. & in specie de hoc actu divinæ justitiæ id docuit Soto in 3. lib. de justit. q. 5. art. ult. ad 1. & tamen Deus non punit peccatorem, quia ad hoc ex justitia teneatur, posset enim sine injustitia non ulcisci. Ratio denique hoc suadet, quia ut actus sit proprius alicujus virtutis, satis est, ut in objecto ejus reperiatur honestas illius virtutis, & quod intuitu illius honestatis fiat: quod totum fieri potest sine obligatione. Ut ergo in exemplo posito, voluntas, quæ Deus vult punire peccatores, ratione distinguitur ab aliis voluntatibus liberalitatis, aut beneficiæ, seu misericordiæ, & secundum propriam rationem honesta est, quia fertur in objectum propter æquitatem, quæ in illo est, & hoc est satis, ut sit actus justitiæ, nec potest concipi in Deo alia virtus, ad quam pertineat: ita ad hunc modum illa voluntas satisfaciendi Deo, quæ fuit in Christo homine, quamvis demus non fuisse ortam ex obligatione justitiæ, possumus intelligere habuisse honestatem justitiæ, quia per eam intendebat constituere inter Deum, & homines quandam æqualitatem recompenfando injuriam factam Deo, id-

Suarez, Tom. XVI.

que propter honestatem propriam talis objecti, quæ ad honestatem justitiæ pertinebat; ut si aliquis homo vellet pro alio debitum solvere, formaliter intendens, ne alius patiatur injuriam, & ut æqualitas illi servetur, re vera faceret actum habentem honestatem justitiæ, nam, licet verum sit, hujusmodi actus sufficienter fieri posse ex charitate, vel misericordia, & frequentius fortasse ita fieri, tamen ad salvandam proprietatem justitiæ satis est, in objecto esse honestatem, quam potest quis per actum justitiæ intendere, etiam si non teneatur.

Secundo dicitur non esse necessarium, ut intercedat vera & propria justitia inter duos, ut uterque operetur ex propria justitia, seu proprio & formali actu justitiæ; satis enim est operari, quantum in re necesse est ad æqualitatem justitiæ constituendam, licet non fiat ex formali actu justitiæ: declaratur exemplo; cum enim præmia sunt proposita hoc vel illud operantibus, qui operatur ad præmium consequendum, non necesse est, ut ex justitia operetur, potest enim operari propter suum commodum, sed tamen in re exhibet, quicquid necessarium est, ut præmium ex justitia donetur: & eodem exemplo etiam intelligitur, recte fieri posse, ut aliquis non operetur ex obligatione justitiæ, & tamen quod posita ejus operatione intercedat inter eum, & alium, circa quem operatur, propria ratio justitiæ. Sic ergo in proposito, quamvis demus voluntatem satisfaciendi in Christo nec fuisse ex obligatione justitiæ, neque etiam fuisse verum actum justitiæ, intelligi potest satisfecisse ex vera & propria justitia, quia talem satisfactionem exhibuit, cui ex perfecta æqualitate, & justitia debebatur remissio pœnæ, vel culpæ, pro qua satisfaciebat; sicut vere aliquis meretur ex justitia, quamvis neque ex justitia teneatur mereri, neque dum meretur, actum aliquem justitiæ operetur.

Et ex hoc obiter intelligitur, quod pro his, quæ dicemus, notandum est: ut inter duos intercedat propria & vera ratio justitiæ, non esse necessarium, ut ratio, vel obligatio justitiæ in utroque sit ita reproca, ut sit omnino ejusdem rationis; nam licet in justitia commutativa humana hoc reperiatur, quia extrema sunt ejusdem ordinis, & medium inter ea constituendum est ejusdem rationis, tamen hoc non est per se necessarium, ut in exemplis positis facile declarari potest: & in justitia distributiva, & legali potest bene intelligi: accidere enim potest, ut civis ex justitia legali teneatur pugnare pro Republica, & postquam pugnavit, Princeps ex justitia distributiva teneatur debitum præmium illi conferre. Et ratio est, quia fieri potest, ut extrema, & jura eorum sint diversarum rationum, ut magis etiam ex sequentibus constabit.

Tertio dicitur, propriæ justitiæ objectum esse jus, unde ubicumque invenitur verum, & proprium jus, potest habere locum vera & propria justitia, quæ inclinet ad servandum tale jus, vel si læsum fuerit, compenstandum. In Deo ergo respectu hominum est verum, & excellentissimum jus, ut illi satisfiat pro peccatis hominum: unde in ipsis hominibus est specialis virtus, quæ inclinat ad servandum Deo jus, a qua in peccatoribus nascitur obligatio, & voluntas satisfaciendi Deo, quæ quidem virtus ad justitiam pertinet, ut D. Thom. inferius docet quærit. 85. Et quantum ad jus divinum, quod respicit, & obligationem, quam inducit, perfectior virtus est, & fortius obligat, quam vulgaris justitia inter homines: solum deficit a ratione justitiæ, quia non potest reddere æquale Deo pro offensa in illum facta: nam si hoc haberet, verior, & perfectior justitia esset, quam justitia commutativa, quæ inclinat ad compenstandas injurias hominibus factas. Christus ergo Dominus, quamvis pro peccatis propriis nec habuerit, neque habere potuerit hanc obligationem justitiæ ad Deum, tamen ut constitutus fuit caput hominum, & suscepit onus satisfaciendi pro hominibus, dici potest subfuisse hanc obligationem, quasi ex pacto inter ipsum, & Deum; aliunde vero, quia propter dignitatem personæ suæ potuit ad æqualitatem satisfacere, nihil in illo defuit ad veritatem, & proprietatem justitiæ.

Sed difficultas est, quænam fuerit hæc justitia seu virtus, per quam Christus satisfactionem suam exhibuit æterno Patri suo pro peccatis hominum. Aliqui enim, ut ab hac difficultate facile se expedire videantur, dicunt non esse necessariam aliquam singularem

Ubi invenitur proprius ius, potest esse vera justitia.

A qua virtute Christus ista satisfactio elicitur, vel imperata fuerit.



virtutem, ad quam munus hoc satisfaciendi pertinuerit, sed hoc ajunt fuisse munus omnium virtutum Christi: satisfecit enim pro nobis per obedientiam; *Factus obediens usque ad mortem*; per humilitatem, dum *humiliavit semetipsum*, &c. per patientiam, quando *ut agnus mansuetus ductus est ad victimam*: & sic de alijs. Sed

1. Opinio  
repellit  
sur.

hoc nec declarat, neque expedit difficultatem propositam, quia, licet verum sit, actus exteriores seu imperatos satisfaciendi, seu executionem satisfactionis (ut sic dicam) per plures virtutes exerceri, tamen interior affectus & voluntas satisfaciendi, quæ dici potest imperium satisfactionis, & proprius actus immediate elicitus a virtute per se ac formaliter intendente satisfactionem: hic (inquam) singularem, ac propriam virtutem requirit, nam habet propriam & singularem honestatem, proprium ac singulare motivum, & formale objectum. Et confirmatur, nam propter has causas hujusmodi actus in nobis propriam virtutem postulat. Declarandum ergo superest, quæ nam fuerit hæc virtus in Christo Domino.

2. Opinio.

Dicunt ergo aliqui, fuisse in Christo specialem quandam virtutem, quam vocant propriam & perfectam justitiam ad Deum, quæ in ipso solo locum habuit, quia ex perfecta justitia potest Deo reddere æquivalens: alii vero homines, cum hoc non possint, non sunt talis virtutis capaces. Quam sententiam aliqui hæc ratione impugnant, quia nulla virtus creata ex vi suæ speciei potest operibus Christi conferre infinitam dignitatem, & valorem, ratione cujus potest Christus æquivalens Deo reddere. Neque etiam potest imperare actus aliarum virtutum, quatenus eundem infinitum valorem habent; ergo, vel impossibilis, vel superflua est in Christo hujusmodi specialis virtus, cum ex vi suæ non possit æquale reddere. Antecedens probatur, quia opera Christi non possunt habere infinitum valorem ab aliqua virtute creata, sed tantum ab increata persona Verbi. Sed hæc ratio non recte concludit, quia non est de ratione perfectæ justitiæ, ut ipsi conferat operi valorem illum, seu quantitatem, qua habet, ut æqualitatem constituat, sed satis est, ut aliunde supponat potestatem seu facultatem reddendi æquale, & quod inclinet voluntatem ad utendum illa potestate, & sit principium eliciendi actum, quo voluntas vult, seu imperat talem usum: ergo, quamvis in Christo non possit virtus creata conferre infinitum valorem, poterit voluntas ejus esse capax virtutis efficaciter intendendis actum talis valoris, quamvis facultas vel principium illius aliunde proveniat. Consequentia est evidens, quæ amplius in hunc modum declarari & confirmari potest: quia satisfactio infinita Christi, quatenus a persona Verbi habet infinitum valorem, est objectum per se amabile & eligibile secundum rectam rationem, ut medium aptissimum ad constituendam inter Deum & hominem æqualitatem: ergo sub ea ratione potest esse objectum alienius virtutis moralis, etiam si ipsamet virtus non conferat valorem, sed tantum inclinet voluntatem ad illum, & ad actum, in quo reperitur. Quod etiam humanis exemplis declarari potest, nam inter homines justitia commutativa inclinat ad reddendum æquale tam in restituendis rebus, quam in satisfaciendis injuriis, & tamen non dat ipsa justitia facultatem ad id præstandum, sed temporales divitiæ dant facultatem restituendi, & personæ dignitas vel auctoritas adjuncta aliis actionibus physicis, quibus honor redditur, vel injuria refarcitur, dant facultatem satisfaciendi: virtus autem solum inclinat voluntatem, ut velit ea uti facultate. Idem videre licet in satisfactione pro peccata temporali, quam nos possumus apud Deum exhibere: nam virtus poenitentia, v. g. est, a qua in nobis provenit per se ac formaliter affectus hujus condigne satisfactionis, & tamen valor, quem habet nostra actio poenalis, ut æquivalet temporali poenæ debitæ pro peccato, non provenit a virtute poenitentia, sed maxime a supposito grato, & a charitatis affectu, & quantitate doloris: sic ergo potest facile in Christo intelligi. Tandem, si illa ratio efficax esset, etiam probaret, nullam esse possibilem in Christo virtutem, quæ sit principium hujusmodi æqualis & justæ satisfactionis; imo etiam probaret, neque plures virtutes, simul aut divise sumptas posse hoc munus exercere: quia neque ulla virtus, neque omnes simul possunt conferre actui infinitum valorem: quia omnes sunt virtutes creatæ, & valor ille solum esse

potest ab increata dignitate; consequens autem est aperte falsum, ut partim ostensum est, partim ex dicendis constabit.

Rejicitur.

Nihilominus tamen propter alias rationes mihi displicet hæc sententia, nimirum, quia virtus per se ac formaliter non respicit facultatem, sed voluntatem, neque effectum, sed affectum, & ideo virtus hæc, qua Christus voluit Patri satisfacere, quantum ad habitum saltem, non est specie distincta ab omni virtute, quæ in puris hominibus esse potest, præsertim ab illa, quæ inclinat hominem ad conservandum illæsum divinum jus, vel reparandum illud, si læsum fuerit. Nam hujusmodi virtutes conveniunt in formali honestate ac motivo, solumque differunt in potestate, seu facultate operantis, quia Christus potest adæquate satisfacere divino juri, quod alii homines non possunt. Hoc autem non sufficit, ut virtutes sint specie diversæ, tum quia, ut dictum est, virtus per se non respicit effectum, sed affectum, affectus autem sumit rationem suam ex formali motivo, quod in præsentī est æqualitas circa divinum jus; tum etiam, quia ex illa differentia, ad summum, sequitur, Christum per illum habitum potuisse elicere perfectam & efficacem voluntatem satisfaciendi Deo ex perfecta justitia, quam nulla creatura habere potest, non ex defectu virtutis, sed ex defectu facultatis: potest tamen purus homo habere simplicem affectum ad illam satisfactionem, & voluntatem conditionatam, qua vellet ita perfecte satisfacere si posset: qui actus omnes ad eandem virtutem pertinent. Et confirmatur primo; nam etiam in gratitudine, seu gratiarum actione, reperitur hæc differentia inter nos & Christum, quod non possumus reddere Deo condignas gratiarum actiones pro beneficiis acceptis: Christus autem potest: & nihilominus gratitudo, seu religio, qua gratiæ aguntur Deo, non est distincta specie in Christo, & in nobis, quia illa æqualitas vel inæqualitas solum provenit ex circumstantia personæ operantis, quæ non variat substantiam habitus virtutis, quamvis conferat actui valorem seu æstimationem moralem. Atque idem est de cultu seu adoratione Dei, quæ in Christo est infiniti valoris, & æstimationis, & ideo in ratione cultus est quodammodo adæquatus excellentiæ divinæ, & tamen non propterea requirit virtutem religionis specie distinctam: ergo idem est de justa, seu equali satisfactione.

Et confirmatur secundo; quia unio ad Verbum non reddit animam Christi capacem alicujus moralis virtutis infusæ, cujus alii homines non sint capaces; ergo neque de facto est talis virtus specialis in Christo. Consequentia patet, tum quia nullum relinquitur fundamentum ad fingendam hujusmodi specialem virtutem; tum etiam, quia gratia habitualis, quam virtus & dona infusa comitantur, est ejusdem speciei in Christo & in nobis: ergo ex se, omnibus confert eandem virtutem, quarum sunt capaces. Antecedens autem probatur: primo quidem, quia in anima Christi ex unione ad Verbum non est aucta potentia obedientialis passiva, qua recipit virtutes infusas, ut per se notum videtur, quia hæc nihil aliud est, quam ipsamet anima cum potentiis ejus: unde æque invariabilis est, ac illæ. Et eadem ratione non augetur per unionem obedientialis potentia activa radicalis, & vitalis, maxime cum sola unio formaliter non conferat vim agendi, ut sæpe dictum est, & latius q. 13. dicitur. Et declarari hoc præterea potest, quia, si anima Christi separaretur a Verbo, posset conservare omnes habitus infusos, quos habet unita Verbo, ut per se notum videtur, quia illi habitus non habent immediatam dependentiam a personalitate Verbi, ut terminante unionem humanæ naturæ: neque ab ipsa unione, quia neque in genere causæ materialis ab his pendent, cum nec Verbo, neque unioni ipsi inhæreant; neque etiam in genere causæ efficientis, quia personalitas Verbi non habet per se ullam propriam activitatem, quæ non sit communis Patri & Spiritui sancto; igitur humanitas Christi per se & in proprio supposito existens esset capax omnium infusarum virtutum, quas habet unita Verbo, & eadem ratione ceteri homines eandem capacitatem habent, neque est ulla virtus, quæ in solo Christo Deo homine esse possit. Sed illi tantum singulare est & proprium, quod opera ejus habeant infinitum valorem ad meritum & satisfactio-

nem,



*nem*, quod non provenit ex virtutibus creatis, sed ex supposito. Neque oportet, objective esse intentum hunc valorem per actum alicujus virtutis, ut in re ipsa sit, sed sufficit, quod actus virtutis a divino supposito eliciatur, ut dictum est. Ex quo tandem confici potest argumentum; nam ad id, quod est proprium; & singulare in Christo, id est, ad efficienda opera infiniti valoris in merito & satisfactione, non est necessaria specialis virtus infusa: ergo ad nullum effectum necessaria est. Dices, esse necessariam, ut per eam hic valor infinitus sit objective ac efficaciter volitus, ac relatus in compensatione divinæ injuriæ. Sed contra, quia ad hoc etiam non est necessaria talis virtus specialis, quia motivum illud non est formaliter diversum a communi motivo servandi æquitatem ad Deum, aut jus divinum conservandi illæsum, quod motivum nobis commune est: unde etiam nos possumus velle, ut æquissima & iustissima satisfactio Deo fiat, quamvis per nos solos talem satisfactionem exercere non possimus, quod non est ex defectu moralis virtutis, sed ex impotentia, & imbecillitate personæ, & ideo hoc non variat rationem virtutis, ut ostensum est.

3. *Opinio.* Relinquitur ergo, voluntatem satisfaciendi Deo, quam Christus habuit, ortam esse in Christo ab aliqua ex his virtutibus, quas nobiscum habet communes. Sed quænam est illa virtus? Existimare quis potest, esse justitiam commutativam, cujus munus est, reddere æquale creditori; quod Christus fecit respectu Dei, quod non videtur variare rationem formalem, & specificam virtutis: sicut Durand. in 4. distin. 14. q. 2. dixit, virtutem, qua nos satisfacimus Deo pro peccatis, eo modo quo possumus, non esse aliam a justitia commutativa. Sed hæc sententia mihi non probatur, nam, ut latius dicam infra tractando de virtute poenitentiae, virtus, quæ nos inclinat per se ac formaliter ad jus divinum illæsum servandum, seu ad non faciendam Deo injuriam, & consequenter ad satisfaciendum Deo pro injuria facta, hæc (inquam) virtus distincta est a justitia commutativa, qua humana jura servamus, aut reparamus: harum autem virtutum distinctio non inde oritur, quod hominibus possumus reddere æquale, non tamen Deo (ut multi existimant), quia hæc diversitas non pertinet ad affectum, sed ad effectum; & ideo per se non variat virtutem, ut diximus. Item, quia illa ratio cessat in implenda promissione Deo facta, nam in hoc possumus æqualitatem servare, tantum scilicet faciendo, quantum promissimus; & nihilominus hoc non spectat ad justitiam, vel fidelitatem, quæ inclinant ad jura humana servanda. Ratio ergo, & distinctio harum virtutum ex eo oritur, quod jus divinum est altioris ordinis, quam sit jus humanum. Propter quam rationem gratitudo ad Deum, vel ad hominem, & fidelitas implenda promissione Deo facta, vel homini, sunt virtutes diversarum rationum, ut suppono ex 2. 2. q. 88. & sequentibus: idem ergo est de justitia. Hæc autem ratio æque procedit in Christo, ac in nobis, & ideo etiam in illo gratiarum actio Deo facta, & observatio promissionis seu voti Deo nuncupati, non erant ex gratitudine vel fidelitate humana, sed ex religione, vel alia simili virtute, quia obligatio ad Deum altioris ordinis est, quam ad homines, & jus ipsum divinum similiter majus est, & altius: ergo justitia etiam Christi ad Deum diversa erat a justitia commutativa ad homines, non quia non posset reddere æquale Deo, sed propter eminentiam divini juris.

4. *Opinio.* Secundus modus dicendi, seu quarta opinio esse potest, illam virtutem esse virtutem poenitentiae, quæ inclinat ad ordinem, & destructionem peccati, quatenus est injuria Dei, quod tamen non destruetur, nisi per satisfactionem Deo exhibitam; & ideo virtus exhibens, & per se primo intendens hanc satisfactionem, non videtur esse alia nisi poenitentia. Quæ sententia tribui potest Marfilio in 4. quæst. 10. ad sextum argumentum, ubi cum dixisset cum Durando virtutem poenitentiae non esse aliam in nobis a virtute justitiæ, consequenter dicit, eandem justitiam perfectissimam esse in Christo; & hoc ipsum in re affirmare cogitur Durandus cum negare non possit, justitiam commutativam erga homines esse ejusdem rationis in Christo & in nobis, & maxime cum ipse non ponat, justitiam Christi ad Deum fuisse

Suarez Tom. XVI.

se perfectam. Addit vero Marfilius supra hæc verba. *Sed in Christo non vocatur hæc virtus poenitentia, quia ille Deum offendere non potuit.* Oportet ergo, ut qui hanc sententiam tenuerit linguam cohibeat, ne poenitentiam simpliciter, & secundum illum conceptum, qui huic voci formaliter respondet, Christo tribuat; quod simpliciter loquendo falsum esset: nam poenitentia proprie dicit habitudinem ad peccatum præteritum commissum ab illo, quem talis peccati poenitet, quique pro illo satisfacit, vel satisfacere conatur; ut patet ex impositione illius vocis, & communi omnium sensu; significat enim poenitentia retractionem prioris facti, vel prioris voluntatis, quæ in Christo esse non potuit. Et ideo, quamvis sentire quis possit hanc virtutem, qua Christus formaliter intendebat satisfactionem, esse ejusdem substantiæ & speciei cum ea virtute, qua nos de peccatis dolemus, & satisfacere Deo cupimus, quæ in nobis merito poenitentia appellatur, non tamen simpliciter asserere debet, illam virtutem in Christo fuisse poenitentiam, quia sub hac ratione connotat ex parte materiæ seu subiecti imperfectionem Christo repugnantem, scilicet, vel peccatum, vel saltem capacitatem & potentiam peccandi, quæ in Christo non fuit.

Tertius modus dicendi, seu quinta opinio esse potest, illam virtutem in Christo non fuisse aliam a virtute religionis; sicut Cajetanus 3. part. quæst. 85. art. 2. dixit, poenitentiam in nobis esse eandem virtutem cum religione: nam hæc duo fere ejusdem rationis sunt: si enim nos inclinamur ad satisfaciendum Deo pro peccatis nostris, per virtutem religionis, cur non magis anima Christi per virtutem religionis volet sufficienter satisfacere Deo pro peccatis hominum? multo enim magis colitur & honoratur Deus satisfactione Christi, quam nostra: si autem munus satisfaciendi ad religionem spectat, solum est, quia est quidam divinus cultus, & divini honoris restauratio. Et confirmatur, quia satisfacere Deo nihil aliud est, quam reddere quippiam debitum Deo: sed proprium & adæquatum munus religionis est reddere debitum Deo, quodcumque illud sit; & ideo munera ejus sunt, colere Deum, implere votum, gratias ei agere, & similia, quia & honor est debitus Deo, & gratiarum actio, & id, quod promissum est. Similiter ergo recompensatio injuriæ divinæ, quatenus est Deo debita, ad religionem spectabit. Unde satisfactio Christi inter opera religionis in Scriptura sacra ponitur, ut Joan. 17. *Pro eis sanctifico me ipsum*, id est, in sacrificium offero, ut virtute ejus sanctificentur, juxta illud ad Hebr. 10. *Una oblatione consummavit sanctificatos*: Atque hæc opinio mihi videtur valde probabilis: sed ad exactam illius explicationem & examinationem oporteret, ex professo declarare naturam virtutis religionis, & quam unitatem habeat genericam, vel specificam, quod longum esset, & a præsentis instituto alienum: & ideo in aliud tempus & opus aliud remittimus.

Quocirca præcise ac formaliter respondendo interrogationi propositæ dicendum est, dari in hominibus specialem virtutem justitiæ ad Deum, cujus proprium munus est divinum dominium, & jus proprium ac rigorosum illæsum servare, vel, si fuerit læsum, reparare: quia & hoc objectum honestum est, & honeste intendi & amari potest ab homine, & ideo aliqua virtute indiget, quæ illud respiciat, quæ merito justitiæ ad Deum appellari potest, quia objectum justitiæ est jus, & ubi est specialis ratio juris & debiti, specialis etiam justitia intercedit: hæc ergo virtus etiam fuit in Christo, imo in illo perfectius operari potuit, quam in nobis: ab illa ergo formaliter ac per se procedebat iusta satisfactio, seu satisfaciendi affectus & intentio.

Dico autem, formaliter ac per se, quia aliæ etiam virtutes poterant non solum exercere, sed etiam intendere & imperare illam satisfactionem, non tamen sub ratione justitiæ & constituendi æqualitatem, sed sub aliis rationibus, ut charitatis sub ratione amicitiae ad Deum, vel ad proximum, juxta illud Joan. 14. *Ut cognoscat mundus, quia diligo Patrem*; & illud ad Ephes. 5. *Christus dilexit Ecclesiam, & tradidit semetipsum pro ea*; & Apoc. 2. *Dilexit nos, & lavit nos a peccatis nostris in sanguine suo*. Item obedientię sub propria ratione servandi præceptum, juxta illud Joan. 14. *Sicut mandatum dedit mihi Pater, sic facio*; & ad Phil. 2. *Factus obediens usque ad mortem*.

Vera sententia.



Sed hæc veluti materialia sunt, formalis autem ratio & honestas satisfactionis est in constituenda seu servanda æqualitate respectu Dei, & hoc dicimus pertinere ad justitiam erga Deum. Et huc spectat, quod alibi dixit D. Thom. poenitentiam esse partem justitiæ. Statim vero occurrebat hic quæstio, an hæc justitia in nobis respectu Dei dicenda sit propria ac perfecta justitia, nec ne, & an sit virtus a poenitentia distincta. Sed hæc tractanda sunt in materia de poenitentia. Rursus occurrebat quæstio tam ad nos, quam ad Christum pertinens, an hæc virtus sit distincta a religione, vel sit ipsamet religio, aut pars illius. Sed hoc in materia de religione disputandum est.

**Altera difficultas pars de justitia ex parte Dei.** Secunda pars prioris difficultatis erat, quomodo ex parte Dei inveniatur justitia, in acceptanda satisfactione Christi. Joannes enim de Medina secutus Scotum, & alios, propter hanc causam censent non posse satisfactionem hanc, veram rationem justitiæ habere, quia Deus non tenebatur acceptare illam.

Et ideo alii, ut Christi justitiam defenderent, dixerunt, non potuisse Deum non acceptare satisfactionem a Christo oblatam, propter personæ dignitatem, quæ tanta erat, ut posset inducere in Deo obligationem acceptandi, cum non possit divina voluntas ab humana divini suppositi discordare. Ita fere Soto in 4. d. 19. q. 1, art. 2. Ledesma 2. p. 4. q. 1. art. 2. dub. 1.

Sed licet verum sit, opera Christi non potuisse non esse grata Deo, & dignissima existimari, & sufficientissima ad satisfaciendum pro hominibus; hoc enim ita necessario illis convenit ratione unionis, ut non possit ab eis separari manente unione, sicut non potest humanitas unita non esse grata Deo: nihilominus tamen existimo potuisse Deum de potentia absoluta, & nulla interposita promissione, non acceptare illa opera in satisfactionem pro hominibus, quia non involvit contradictionem; non est enim, unde talis necessitas imponatur Deo, cum illa acceptatio nec cum ipso Deo, nec cum aliqua virtute habeat necessariam connexionem.

**De potentia absoluta non posita promissione, potuit Deus non acceptare opera Christi.**

Et declaratur, quia hæc necessitas, vel obligatio non oritur ex justitia, ut argumentum factum in principio probat, & infra quæst. 19. ostendemus, obligationem justitiæ non habere locum in Deo, non supposita ejus promissione: nec oritur (ut sic dicam) ex objecto ipso, seu ex infinito valore operum Christi, quia totus ille valor, etiam si ex conjunctione ad Verbum sumatur, in se quidem creatum est, & extrinsecum Deo; non ergo potest ex se ullam necessitatem inferre divinæ voluntati: imo est sub dominio ejus, ut libere possit illud non acceptare in satisfactionem, sed in alium, quem voluerit, usum ordinare. Nec oriri potest ex concordia voluntatum, quia si proprie loquamur, non divina voluntas humanæ, sed humana divinæ debet conformari: unde nunc ita fit, ut inter has voluntates sit summa concordia, quia Christus semper absolute vult, quod scit velle Deum, ut ipse velit. Si autem ad rem explicandam mente fingamus, non esse revelatum Christo homini, quid Deus suo æterno consilio decrevisset circa acceptanda ipsius Christi opera in satisfactionem pro hominibus, & Christum ex simplici affectu charitatis illa offerre, quamvis Deus illa non acceptaret, non esset proprie dissenso, aut contrarietas voluntatum, quia hæc solum est, quando voluntates discrepant in ratione volendi, ut dicitur infra q. 18. ergo posset Deus illa non acceptare. Nec vero fingi potest alia radix, unde hæc necessitas oriatur, quia licet propter dignitatem talium operum per se sit valde conveniens illa acceptare, tamen simpliciter non esset necessarium, quia (ut supra diximus) non cogitur Deus omne id velle, quod conveniens est, nec deessent illi infinitæ rationes ad non acceptandum, si hoc illi placuisset; sicut etiam est conveniens, ut Deus puniat peccatum, non est tamen necessarium. Denique potuisset Deus ab æterno ordinare, ne Christus offerret sua opera pro hominibus, & Christus deberet illi parere: ergo multo magis posset decernere illa non acceptare, etiam si Christus per humanam voluntatem hoc desideraret, nunquam enim posset hoc ita efficaciter, & absolute velle, quin voluntatem suam humanam divinæ subjeceret.

Dicendum est ergo, non posita illa promissione, aut pacto inter Deum & Christum, non fuisse necessa-

rium Deo satisfactionem Christi acceptare, ut rationes factæ satis ostendunt: quomodo autem hoc non repugnet cum vera ac perfecta justitia meritorum & satisfactionis Christi, explicandum superest.

Est ergo tertia sententia, quam significat Vega lib. 7. **Opinio.** in Trident. utramque partem amplectens, nimirum, & potuisse Deum, pro sua libera voluntate, non acceptare Christi satisfactionem, & ex mera liberalitate eam acceptasse, & nihilominus Christum ex perfecta justitia satisfecisse. Priorem partem non aliter probat, nisi quia Deus ad extra nihil ex necessitate vult, aut operatur. Sed ad hoc responderi potest, id verum esse, nulla facta hypotesi, tamen ex suppositione unius operis seu voluntatis posse Deum ad aliam necessitari. Urgeo tamen in hunc modum, nam vel hæc necessitas oriretur ex sola suppositione Incarnationis & voluntatis Christi offerentis satisfactionem suam pro nobis: & hoc est falsum, ut contra secundam opinionem probatum est. Vel oriretur ex suppositione alicujus promissionis divinæ (nulla enim alia suppositio excogitari potest); sed hæc etiam suppositio non tollit liberalem Dei acceptationem, sicut etiam digne oranti donat beneficium postulatum, & peccatori contrito remittit culpam; & utrumque facit ex certa promissione, & tamen ex liberalitate beneficium præstat, & culpam remittit. Vel certe, licet concedamus, aliquam necessitatem & obligationem intercedere, illa, ad summum, erit fidelitatis & veritatis, de qua Paulus 2. Timoth. 2. *Deus fidelis est, seipsum negare non potest*; non tamen transcendit hanc obligationem, neque attingit veram rationem justitiæ. Dicitur fortasse, ex simplici promissione tantum oriri prædictam obligationem, tamen ex promissione onerosa sub conditione alicujus operis æquivalentis rei promissæ, oriri obligationem justitiæ, quia includit pactum mutuum, cujus obligatio ad justitiam pertinet.

**Probatur primo prior pars huius sententiæ.**

Sed contra hoc incho primo, quia, licet inter homines habeat locum hæc distinctio, non tamen apud Deum, apud quem, moraliter loquendo, perinde est, quod simpliciter, vel sub conditione promittat, nec major obligatio ex una promissione oriri potest, quam ex alia. Quod ita ostendo: nam, quando Deus promittit aliquid sub conditione alicujus operis, quamvis videatur homini aliquod onus imponere, talem tamen habet in hominem potestatem, ut sine ulla promissione possit homini idem onus imponere; ergo non magis ea de causa obligatur sic promittendo, quam si simpliciter promitteret, nullum onus imponendo. Antecedens est certissimum, consequentia probatur, quia inter homines ideo ex promissione sub conditione onerosa oritur obligatio justitiæ impleta conditione, quia, qui sic promittit, non habet potestatem absolutam imponendi tale onus, sed alter voluntate sua illud acceptat, & ad illud se obligat propter tale stipendium vel præmium. Et confirmatur, ac declaratur primo, exemplo domini & servi; nam inter homines, licet dominus promittat servo aliquid, si servus illud obsequium ei præstet, quod aliàs exhibere tenetur, vel quod dominus posset iuste exigere sine ulla promissione, tunc certe, etiam si servus præstet tale obsequium, non tenetur dominus ex justitia implere promissionem, sed tantum ex fidelitate, propter rationem factam, & quia inter dominum & servum, ut sic, non potest vera justitia intercedere; ergo a fortiori idem dicendum est in præsentia. Secundo declaratur a signo; nam, quando promissio sub conditione operis inducit obligationem justitiæ, necessarium est, ut talis promissio, & conditio ejus sit cognita & acceptata ab illo, cui fit, quia voluntarie debet suscipere onus illud, & ad illud se obligare intuitu talis promissionis, ut in humanis pactis & promissionibus constat; at vero inter Deum & hominem, vel Christum, hoc non est necessarium, nam, sive homini constet de tali promissione, sive non, æque meretur, vel satisfacit apud Deum, ut constat in omnibus justis bene operantibus, & habentibus invincibilem ignorantiam talis promissionis: ergo signum est, obligationem ortam ex hac promissione non pertinere ad justitiam. Tertio declaratur in hunc modum, quia promissio sub conditione interdum requirit conditionem oppositam præcise sub ratione conditionis neces-



*necessaria*, quia sine illa non vult promittens obligari, & tunc obligatio promissionis impleta conditione non transcendit obligationem fidelitatis seu simplicis promissionis, ut cum æger promittit Deo peregrinationem, si salutem sibi concedat, impleta conditione non oritur obligatio ex iustitia, sed ex fidelitate ad Deum. Similiter si pater promittat filio, si studueris, aut honeste vixeris, hoc vel illud tibi donabo, vel si aliquis dicat infirmo, si comederis, hoc tibi dabo, in his & similibus casibus, impleta conditione solum oritur obligatio fidelitatis. Aliter vero potest fieri promissio sub conditione operis tamquam rei seu pretii, propter quod stipendium, vel præmium promittitur; & tunc quidem impleta conditione oritur obligatio iustitiæ, non tam ex promissione, quam ex æqualitate & valore ipsius rei vel operis exhibiti in utilitatem alterius, vel rei translatae in dominium ejus: hoc autem posterius obligationis genus non habet locum in Deo, tum propter dicta contra secundam opinionem, tum etiam, quia nihil ei donari potest, aut in ejus utilitatem cedere: solum ergo relinquitur prior obligatio simplicis promissionis.

2. Ratio. Secundo principaliter probatur eadem pars ex alio principio, quia obligatio proprie ex iustitia includit imperfectionem repugnantem Deo: Quod sic ostendo, quia non potest Deus obligari ex iustitia, nisi supponatur in creatura tale jus iustitiæ, ut ex vi illius, iustitiæ re-  
stitutio necessitet Deum ad aliquid dandum, vel faciendum circa creaturam, nam jus est objectum iustitiæ: sed non potest creatura habere tale jus sine imperfectione Dei: ergo. Probatur minor, quia omne jus, vel est in re, vel ad rem; neutro autem modo potest intelligi hujusmodi jus. Et de jure quidem in re patet, in primis, quia tale jus non habetur, donec res ipsa sub proprio dominio habeatur, & ita hoc jus supponit promissionem impletam, scilicet, quod Deus donaverit id, quod promisit v.g. remissionem peccati, aut gratiam, vel gloriam. Et deinde etiam in eo casu majus & perfectius dominium habet Deus in eadem rem, quam possit esse jus hominis, etiam Christi in illam: ergo non potest ullus homo habere tale jus in eam rem, quod minuat vel coarctet dominium Dei circa illam: ergo non potest ex vi talis juris obligari Deus ex iustitia ad dandum vel conservandum, vel non destruendum tale præmium, quia hæc esset magna coarctatio & imperfectio divini domini, ligaretur enim ad unum usum, & aliquo usu privaretur, quod est impossibile, quia illud dominium intrinsece & essentialiter supremum est: de ratione autem talis domini est, ut superior dominus possit sua voluntate disponere de re sua, nec possit a jure inferioris impediri. De jure autem ad rem probatur idem, quia omne jus ad rem, quod est jus iustitiæ, refunditur in personam, quæ rem talem donare debet, aut efficere, quam respicit ut debitricem, & ita quodammodo est jus in ipsam personam: sed repugnat, ut creatura, vel etiam Christus ut homo habeat hujusmodi jus in Deum, quia hæc est magna imperfectio; ergo. Probatur minor, primo, nam is, qui habet jus in personam alterius, quodammodo habet illum sibi subiectum, & inferiorem ex vi talis juris, & quantum est ex vi illius posset illum cogere ad solvendum, si alioqui vires seu potestatem haberet; igitur esse debitorem hoc modo, imperfectio est. Secundo, quia hinc etiam sequeretur diminutio seu limitatio divini domini, quod non esset sine imperfectione.

3. Ratio. Tertium argumentum esse potest, quia talis obligatio ad nullam speciem iustitiæ reduci potest. Primo non ad legalem, ut per se constat, quia hæc non est superioris ad inferiorem, sed potius e contrario, seu partis ad totum, aut privatæ personæ ad commune bonum. Secundo, non pertinet ad iustitiam commutativam, quia, cum hæc versetur in datis & acceptis, includit imperfectionem, & ideo proprie ac formaliter non habet locum in Deo, ut Doctores communiter sentiunt cum D. Thom. 1. p. q. 12. art. 1. 2. q. 14. art. 1. ubi Cajet. & Capreol. in 1. dist. 45. & Durand. in 4. dist. 46. q. 1. Tertio, non ad distributivam, tum quia talis obligatio non fundatur in promissione, vel pacto, sed tantum in re ipsa, seu communi bono, ex quo Deus per se obligari non potest; tum etiam, quia Deus in sua iustitia non servat proportionem inter multos, sed rei ad rem.

Secundam partem principalem suæ sententiæ probat

Vega, quia potest aliquis satisfactionem æqualem debito exhibere, ut ex iustitia satisfaciat, siue alius teneatur acceptare, siue non: sicut dicitur aliquis ex iustitia restituisse, si tantum quantum est debitum offerat creditori; siue creditor acceptet debitum, siue non; imo, si semel offerat satisfactionem, & alius non acceptet, non tenebitur iterum satisfacere, quia jam fecit, quantum debuit, & consequenter, quamvis alius non acceptet, satisfactio re ipsa fit, nec potest iuste imponi obligatio iterandi illam. Quod declaratur in satisfactio-  
ne, quæ communiter exhibetur per signa honoris, nam cum honor sit in honorante, etiam si alius nolit, neque acceptet, potest, qui injuriam ei intulit, honorare illum, ut tantum honoris restituat, quantum abstulit, quia hoc non pendet ex acceptatione alterius. Et similiter in infamatione, qui famam abstulit, potest eam restituere, etiam si alius non acceptet, imo licet prorsus ignoret: æqualitas ergo iustitiæ in hujusmodi compensationibus non requirit acceptationem, vel voluntatem ejus, cui fit compensatio; multo ergo minus in eo requirit obligationem ex iustitia ad acceptandam satisfactionem.

Hæc sententia est quidem valde verisimilis, præsertim quoad priorem partem, propter rationes in ejus confirmationem factas, quæ sine dubio difficiles sunt; tamen quia posterior ejus pars, & debiliter confirmata, & obscure proposita est, ab illa inchoandum est, & radicitus explicandum, quomodo satisfactio pendeat ex acceptatione Dei.

In quo primum considerandum est, ex injuria illata duplicem oriri obligationem, unam quasi activam, & aliam veluti passivam. Activam voco, obligationem satisfaciendi, seu restituendi. Passivam autem appello, eam, qua manet quis obligatus ad poenam, seu obnoxius poenæ. Unde prior obligatio est respectu illius, seu ad illum, qui injuriam passus est, posterior vero est respectu illius, seu sub illo, qui potestatem habet puniendi.

Secundo explicare oportet, quid sit acceptare satisfactionem, & ad quid, seu ad quem effectum acceptanda sit. Acceptare enim non videtur proprie significare solum actum intellectus, quo judicatur actio satisfaciendi sufficiens ad reparandum injuriam seu damnum, quod intulit, sed ultra hoc videtur etiam dicere actum voluntatis, quo aliquis vult esse contentus tali satisfactione, & nihil amplius a suo debitore exigere, & consequenter vult, vel remittere offensam, vel potius ut ablata sit: hoc enim totum vox ipsa acceptationis, & nihil aliud significare videtur. Unde non est de ratione hujusmodi acceptationis præcise ac formaliter sumptæ, ut is, qui injuriam intulit, alterum in suam amicitiam & benevolentiam acceptet; quamvis enim in satisfactione facta Deo pro culpa & in Dei acceptatione hoc semper sit conjunctum cum remissione injuriæ: tamen in universali loquendo, illa acceptatio ad amicitiam est extra rationem iustitiæ, unde non est per se debita, nec necessaria ad justam satisfactionem: igitur per se loquendo acceptatio solum est ad effectum tollendi illam obligationem, quam injuria relinquit: unde, si sit satisfactio pro injuria, seu culpa, seu pro damno illato, acceptatio erit ad remissionem seu carentiam culpæ, aut obligationis reparandi damnum: si vero sit satisfactio pro poenâ, erit acceptatio ad poenæ immunitatem, seu ad carentiam reatus poenæ.

Tertio observandum est, dupliciter posse intelligi auferri prædictas obligationes, quæ manent ex injuria illata, per actionem satisfactoriam. Primo ex vi ipsius actionis, prout a satisfaciente fit, præcisa quacunque voluntate ejus, cui fit satisfactio. Secundo requiri potest, ut cum actione satisfaciendi conjungatur voluntas ejus, cui fit satisfactio, quæ voluntas appellatur acceptatio, ut dictum est. Uterque modus in rebus humanis explicatur: nam si quis rem alterius abstulit, eamque postea eidem restituat, ipso facto manet liber ab obligatione restituendi, velit vel nolit alius. Atque idem est, si contumeliam intulit, vel honorem abstulit, qui non tam restitutione, quam satisfactio, reparandus sit. Est enim, ut supra tactum est, differentia inter satisfactioem & restitutionem, quod restitutio consistit in rebus, seu in æqualitate rei ad rem, satisfactio autem stricte sumpta, ut nunc loquimur, consistit

Duplex  
modus sa-  
tisfacien-  
di.  
In satisfac-  
tione ju-  
sta homi-  
ni facta,  
non se-  
per requi-  
ritur alte-  
rius accep-  
tatio.



in actione seu obsequio exhibito in honorem personæ offensæ ad compensandam injuriam illatam. Unde inter homines, si is, qui injuriam intulit, sufficienter sese submittat ei, cui injuriam intulit, vel petendo veniam, vel alio modo, qui æquivalet injuriæ judicio prudentum, etiam si alter nolit satisfactionem acceptare, satisfactio facta tenet, & debitor liber manet ab obligatione iterum satisfaciendi, quia ipsamet actio satisfactoria est efficax ad hunc effectum, etiam si alter nolit. Imo in hoc notari etiam potest differentia inter satisfactionem & restitutionem, quod satisfactio (ut supra tactum est) sit absque translatione alicujus dominii, per solum honorem exhibitum, qui non est in honorato, sed in honorante; & ideo, si actio aliqui sit sufficiens, nulla voluntas personæ offensæ necessaria est, ut satisfactio facta teneat, & debitor liber maneat ab obligatione iterum satisfaciendi: sed ex tali satisfactione ad summum consequetur in debitore obligatio acceptandi illam, quæ obligatio magis negative, quam positive intelligenda est: est enim obligatio ad non exigendam illam satisfactionem a tali debitore: non vero est obligatio ad aliquem actum positivum exercendum, cum nullus necessarius sit. Unde, cum dici solet, in eo casu teneri creditorem esse contentum tali satisfactione, vel est negative explicandum prædicto modo, vel certe quoad specificationem tantum, id est, quod, si aliquem actum exercere velit, acceptare debeat, & non spernere similem satisfactionem. Restitutio autem sæpe fit per novam dominii translationem. Unde, quoniam dominium voluntate acquiritur, ideo tunc necessaria est voluntas, quæ acceptetur restitutio, seu potius dominium illius rei, quæ restituitur; quæ tamen necessaria non est, quando per restitutionem non acquiritur novum dominium, ut quando res aliena furto sublata in eodem loco reponitur, unde sublata fuit, in scio domino. Imo in restitutione famæ etiam si dominium ejus acquiratur, nulla acceptatio, aut voluntas creditoris necessaria est, ut integra restitutio fiat; potest enim fama restitui homini prorsus ignoranti & suam infamationem, & suæ famæ recuperationem, quia famæ dominium etiam sine consensu positivo & formali propriæ voluntatis acquiritur, sed interpretativus sufficit, de quo alias. Ac denique, etiam in restitutione aliarum rerum, si quis nolit restitutionem acceptare, nec dominium rei sibi oblata, si tamen res, quæ offertur, re vera sit illa, quæ debetur, in numero, vel in specie, pro ratione debiti, satisfactio facta tenet, & debitor liber manet ab obligatione iterum restituendi. Nisi fortasse rem eandem apud se retineat absque donatione alterius, tunc enim ratione ipsius rei, tenebitur illam reddere domino, quando ille voluerit.

Alter modus satisfactionis erit inter homines, quandoque, vel res quæ restituitur, vel opus quo fit satisfactio, non est sufficiens per se ad æqualitatem constituendam, & liberandum debitorem ab obligatione satisfaciendi absque consensu & voluntate creditoris. Hoc autem contingere potest ex duplici capite; unum est, quando id, quod redditur, in re ipsa non est æqualis æstimationis & valoris, & tunc proprie non fit justa satisfactio etiam cum consensu creditoris, sed est partialis satisfactio admitta liberali remissioni, ut per se constat. Aliud caput est, quando id, quod redditur, licet fortasse in re sit æquale, non tamen est illud ipsum, quod debetur, vel in individuo, vel in specie, aut genere, pro ratione debiti, prout bene notavit Joan. Medina tract. 4. de satisfactione quæst. 1. Ut si quis furto sustulit equum, quamvis restituat æquale pretium, si dominus non acceptet, non tenet satisfactio, nec liberatur ab obligatione restituendi equum, si potest: acceptante vero domino erit sufficiens satisfactio dato æquali pretio. Idem est, si quis debeat triticum, & vinum æqualis valoris velit reddere: idemque in propria satisfactione reperiri potest; ut, si quis contumeliam intulit, & satisfacere velit, aut pecuniis, aut favore, aut aliare alterius ordinis. Atque hic posterior modus recompensationis habet locum inter homines in satisfactione pro peccata. Nam si quis sit mortis, aut flagellorum reus, peccatis, aut aliis rebus, vel actionibus compensare potest hanc poenam, consentiente Principe, aut iudice potestatem habente. Prior autem modus proprie loquen-

do nunquam habet locum in poenis: nihil enim potest efficere reus, quo se liberet a reatu poenæ per se & ex vi suæ actionis, absque acceptatione superioris potestatis, nisi solum subire seu solvere ipsammet poenam, quod non est proprie satisfacere, sed satis pati.

Ratio autem est, quia commutatio talis poenæ non potest fieri ex sola voluntate rei absque voluntate superioris potestatis: vel quia talis obligatio est ex se omnino personalis, vel quia in illa reus se habet ut patiens potius, quam ut agens: vel quia respectu illius est involuntaria: per voluntatem autem superioris definita est & imposita, & ideo sine voluntate illius mutari non potest.

Ex his ergo, quæ in genere dicta sunt, satis constat loquendo de iustitia in communi, quando & quomodo in condigna satisfactione requiratur acceptatio alterius: loquendo autem in particulari in ordine ad Deum, existimo necessariam esse in omni satisfactione acceptationem Dei. Et quidem in satisfactione pro poena ratio assignata est sufficiens, nam applicari facile potest ad poenam pro peccatis debitam coram Deo, qui est supremus peccatorum iudex, & illius poenæ sancitor. De satisfactione autem pro culpa ratio generalis est, quia nulla satisfactio ad Deum est per se expulsiua peccati, præsertim mortalis, nisi accedat Dei acceptatio & remissio offensæ. Probatur, nam aut satisfactio est pro culpa propria, aut pro aliena; si pro culpa propria, est inæqualis & insufficiens ad refarciendam injuriam, ut ostendam late sectione 8. & sequentibus. Si vero sit pro aliena, etiam non potest per se formaliter expellere culpam, quia cum sit extrinseca, per se non restituit hominem; & hac ratione ipsa etiam satisfactio Christi, quamvis in valore non solum adæquet, sed etiam excedat offensam, per se ipsam formaliter non excludit culpam ab homine, sed necesse est, ut acceptetur a Deo, & quod juxta illius acceptationem homini applicetur. Et hæc est etiam radicalis causa, ob quam Christi satisfactio licet sit sufficiens pro omnibus, non tamen est efficax in omnibus: quia, licet pro omnibus acceptetur, non tamen absolute, sed sub ea conditione, ut debito modo, & per convenientia media applicetur. Neque hoc derogat perfectioni iustitiæ, quia hæc acceptatio non exigitur, ut det valorem operi, vel æqualitatem satisfactioni, sed solum, quia satisfactio est extrinseca: & quia fieri debet per modum contractus, seu emptionis, aut redemptionis, in quo contractu necessarius est consensus contrahentis.

Sed tunc ulterius declarandum quarto loco occurrit, esto possit in aliqua justa satisfactione requiri alterius acceptatio, an saltem requiratur ad perfectionem iustitiæ, ut ille, ad quem ordinatur satisfactio, teneatur ex iustitia acceptare illam: hic enim est præcipuus punctus hujus difficultatis: nam videtur certe, non esse necessariam in rigore hujusmodi obligationem ad satisfactionem omnino justam, siue illa obligatio cadere in Deum possit, siue non possit, de quo statim dicam. Ratio a priori est supra tacta, quia hujusmodi acceptatio, præsertim in satisfactione Christi, de qua nunc agimus, non requiritur ad sufficientiam, vel valorem satisfactionis, sed requiritur, ut perficiatur contractus, sicut requiritur consensus contrahentis: sed ut contractus sit omnino justus, non est necesse, ut contrahens teneatur ex iustitia consensum suum præbere, sed potest libere contrahere, & tamen, quod in contractu utrinque fervetur perfecta iustitia: ergo illa obligatio acceptandi necessaria non est ad iustitiam satisfactionis. Exemplo humano res declaratur; nam si Rex habeat plures captivos, & alius oblato pretio æquali velit illos redimere, non tenetur Rex ex iustitia acceptare pretium, & contractum redemptionis perficere: potest tamen, si velit, acceptare, & tunc redemptio, si fiat pretio æquali, erit omnino justa, & alter, qui redemit, dicetur, ex vera & perfecta iustitia redemisse, quia ad rationem iustitiæ non est necesse, quod exercitium actus, ut sic dicam, sit ex obligatione iustitiæ, sed quod in eo fervetur integra ratio & æquitas iustitiæ. Et confirmatur, quia hac ratione supra dicebamus non esse necessarium ad iustitiam Christi, ut per se & vi suorum operum, & nulla supposita promissione ex parte Dei, possit illi necessitatem inferre, ut acceptet satisfactionem; ergo neque etiam est absolute necessaria obligatio acceptandi

In satisfactio-  
ne facta Deo,  
semper requiritur  
acceptatio.

Cum acceptatio  
necessaria  
est, an  
oporteat  
ex obligatione  
iustitiæ  
oriri.

Pars affirmans  
suadetur.



ptandi orta ex promissione, ita ut, quamvis concipiamus, Deum nihil promississe, sed simpliciter acceptasse satisfactionem propter valorem ejus, nihilominus sufficiens ratio iustitiæ intercedat. Patet consequentia, quia, sicut acceptatio est mere libera, quando non supponitur promissio, ita etiam quando promissio supponitur, ipsamet promissio fuit mere libera ab obligatione, & tamen id non obstat rationi & perfectioni iustitiæ: ergo neque etiam obstat, quod ipsamet acceptatio in se ac formaliter fiat sine obligatione: eadem enim ratio in utroque casu intercedit, scilicet, quia illa voluntas vel promittendi vel acceptandi non requiritur ad valorem pretii, sed tantum ad perfectionem contractus: solum est differentia, quod in casu promissionis voluntas illa radicaliter antecedit contractum in promissione ipsa, in alio vero casu non antecedit, sed includitur in ipso contractu, quæ differentia nil refert ad rationem iustitiæ, quia non fit major liberalitas in uno casu quam in alio: imo, si intercedit aliquis excessus, est quando intercedit promissio, nam major liberalitas videtur prius promittere & se obligare, & postea implere, quam simpliciter & sine obligatione aliquid facere.

Confir-  
matur  
pars ne-  
gati.

In contrarium autem objici potest, quia videtur involvi repugnantia, cum dicitur aliquis iuste satisfacere alteri, & alterum non teneri ad acceptandam satisfactionem, saltem in sensu negativo supra explicato, id est, ut non possit iuste exigere aliam vel maiorem satisfactionem, sicut repugnat dicere, debitum esse iuste solutum, & nihilominus creditorem posse novam solutionem exigere, nam satisfacere perinde esse videtur, quod debitum solvere. Declaratur; nam, si Christus satisfaciens, Pater non tenebatur acceptare, ponamus, Patrem non acceptasse, nam possibili posito in esse nullum sequitur inconveniens: in eo ergo casu perinde maneret debitor humana natura, ac si Christus ad liberandam illam nihil egisset: ergo vera Christus pro illa non satisfecisset. Dices, non satisfecisset efficaciter, tamen satisfecisset saltem quoad sufficientiam. Sed contra, quia satisfactio quoad sufficientiam requirit, ut si ex parte hominis non steterit, ei sit utilis ad remissionem culpæ vel poenæ: sed in casu positivo, quo Deus non acceptaret ullo modo satisfactionem Christi, opera Christi nullum haberent effectum in homine, etiam si ipsa vellet, & quantum in ipso est faceret, ad aliquem fructum ex ipsis capiendum, nam supponimus, Deum omnino non acceptasse ad ullum effectum opera Christi, prout facere poterat. Unde tam satisfactio quoad sufficientiam, quam quoad efficaciam, requirit acceptationem sibi proportionatam: in eo ergo casu neque quo ad sufficientiam Christus pro nobis satisfecisset. Dicitur forte, Christum quantum est ex se satisfecisse, si Pater acceptare vellet, tamen de facto in eo casu non satisfecisse, quia Pater non acceptavit. Sed contra, quia quod Christus, vel quivis alius, satisfaciens, necne, non pendet ex futuro, & quasi extrinseco eventu, qualis est, quod alius acceptet, vel non acceptet: quia hoc solum addit denominationem extrinsecam operi satisfaciens, ratio autem satisfactionis non consistit in extrinseca denominatione, sed in intrinseco valore, & efficacia operis & personæ satisfaciens, ratione cuius vel per se tollit offensam, vel moraliter cogit alterum, ut illam remittat: ergo quamdiu opus morale non habet hanc efficaciam, non potest dici satisfactio ex iustitia, sed ad summum dici poterit habere opus ex se, vel ex conditione personæ satisfaciens, sufficientem & condignum valorem, si aliæ necessariae conditiones concurrunt ex parte personæ, cui sit satisfactio. Confirmatur, ac declaratur secundo ex ratione meriti, quod, ut sit proprium meritum de iustitia, requirit hanc vim moralem cogendi alterum ad reddendum præmium: & ideo necessario præsupponit, ut tale præmium propositum sit operantibus, ut braviū seu corona ex condito pacto vel promissione, ut iterum dicturi sumus infra quæst. 19. Tandem propter hanc causam satisfactio nostra oblata pro animabus purgatorii non censetur ex iustitia, si supponatur non esse infallibile ex lege seu promissione, quod pro illis acceptanda sit. Est ergo necessaria talis promissio seu pactum, quo posito oriatur obligatio ex iustitia acceptandi satisfactionem.

In hac re potest esse varietas in modo loquendi, & ideo distinguere possumus; aliud enim est loqui de satisfactione in potentia proxima (ut sic dicam), aliud vero de satisfactione actuali. Priori modo satisfactionem voco opus, quod de se habet valorem, vel sufficientiam ad satisfaciendum, tamen neque ex sola rei natura, neque ex conventionem aliqua destinatum est, ut sit actualis & realis solutio debiti. Posteriori autem modo voco satisfactionem actualem opus illud, quo vere & realiter solvitur debitum, ita ut post illam solutionem exhibitam, nulla alia similis, seu in eo genere, iuste exigi possit. Dico ergo ad satisfactionem priori modo sumptam, seu melius, ad efficiendum opus de se satisfactorium, non esse necessarium, ut alter acceptet, vel teneatur acceptare. Hoc probant rationes priori loco factæ, & rationes in contrarium nihil contra hoc obstant, ut per se patet: imo exemplum illud de animabus purgatorii hoc confirmat; dicimus enim nos satisfacere pro animabus purgatorii, etiam si nobis infallibile non sit, opera nostra pro illis acceptari; quia, quantum est ex parte nostra, satisfactoria opera pro illis offerimus, in quibus, quatenus in gratia fundantur, condignitas est & valor ad satisfaciendum pro illis, si velit Deus acceptare. Ulterius vero addo ad propriissimam satisfactionem posteriori modo sumptam, necessariam esse prædictam moralem vim, quæ sit in opere satisfactorio, ut procedit ab operante, ad solvendum debitum, ut nulla alia satisfactio similis seu ejusdem rationis iuste exigi possit, si hoc sit ex natura rei, si ex conventionem & pacto seu promissione juxta varios modos satisfactionis supra explicatos. Et hoc probant rationes posteriori loco factæ.

Neque quicquam obstant priores rationes, solum enim probant, ad efficiendum opus de se satisfactorium non esse necessariam obligationem acceptandi satisfactionem, secus vero ad actualiter, & infallibiliter satisfaciendum. Et quoad hoc est quodammodo simile, quodammodo vero dissimile, exemplum de emptione iusta, quæ inter homines exercetur absque obligatione alterius partis: tenet enim similitudo in hoc, quod sicut potest quis offerre pecuniam vel rem aliam sufficientis valoris ad emendum aliquid, quamvis venditor non teneatur vendere, ita potest quis opus de se satisfactorium pro alio offerre, etiam si alter acceptare non teneatur; & consequenter erit in utroque casu similitudo in hoc, quod sicut, alio non acceptante, revera & actualiter non perficitur satisfactio, nec manet debitum solutum seu ablatum, ita si in casu emptionis alter nolit vendere, non perficitur emptio, nec pecunia, aut res oblata, subit rationem actualis pretii, (ut sic dicam.) Est autem consideranda dissimilitudo, nam in emptione aut venditione humana pecunia, quæ offertur in pretium, permanens est: unde quamvis non consummetur contractus, valorem suum retinet, semperque est apta, ut per illam possit eadem res vel alia æquivalens emi, manetque (per se loquendo) sub dominio & potestate prioris domini, qui illam obtulit in pretium, & ratione illius semper manet potens ad rem similem emendam, quoties alius velit contractum perficere. At vero in satisfactione, sicut opus, quo fit satisfactio, transitorium est, quia in actione vel passione consistit, ita valor satisfactionis cum ipso opere transit. Unde, si tunc, cum sit, non acceptetur, & consequenter non habeat effectum actualiter satisfaciendi, omnino perit & frustratur ejus valor, neque amplius potest operans per illum satisfacere, quia opus satisfactorium, & valor ejus, nec manet in se, neque etiam manet in acceptatione divina, seu alterius, cui sit satisfactio, cum supponatur opus a principio non fuisse acceptatum. Et hinc fit, ut in emptione & venditione, quæ fit ex rebus permanentibus, melius intelligatur, posse intercedere contractum iustitiæ, etiam si ex neutra parte sit obligatio acceptandi, seu contrahendi, quia unusquisque offert pretium seu rem suam sub ea conditione, si alter acceptare velit, & æqualem respondere, & altero non acceptante alter retinet bona sua integra & perfecta, sicut antea erant, nihilque alteri est simpliciter datum, aut in ejus commodum factum; unde fit, ut licet consensus vel acceptatio contractus semper sit spontaneus, tamen ex utraque parte sit

Ad ratio-  
nes in co-  
tractum.



fit cum onere reddendi æquale, & consequenter quod salvetur vera ratio iustitiæ. At vero in negotio satisfactionis, nisi antecedit obligatio acceptandi satisfactio- nem, seu non exigendi aliam, obligatio (inquam) ex natura rei orta vel ex aliquo præcedenti pacto, non ita videtur posse æquitas & mutua iustitia intercedere: nam, si unus offerat suum satisfactorium opus, & alter non acceptet, quantum ad rem præsentem attinet, omni- no amittit opus suum, quia neque effectum consequi- tur, neque valorem suæ satisfactionis retinet, sed in alium transfert, quoad potest, juxta materiæ capacita- tem. Unde fit, quod si in eo casu alter accipiat satisfac- tionem absque obligatione, magis exercet opus gratiæ & liberalitatis, quam iustitiæ, quia etiam si non acce- pteret, manebit opus satisfactorium in ejus honorem fa- ctum, nihilque amplius commodi aut honoris reportat acceptando, quam non acceptando satisfactionem: & ideo talis acceptatio mere gratuita ac liberalis censetur, & eadem ratione satisfactio sic facta non erit ex perfecta iustitia, quia, dum fit, & ex modo quo fit, non habet vim perficiendi opus iustitiæ. Et propter eandem cau- sam ut talis satisfactio (& idem est de merito, ut infra dicam) sit ex propria iustitia, necesse est, ut antecedit pactum vel promissio, in qua fundetur, ratione cujus habeat vim ita satisfaciendi, seu refarciendi injuriam, neque post illam possit iuste exigi alia satisfactio. Et ex his responsum est ad confirmationem difficultatis priori loco positi. Potestque hæc doctrina humana exemplo declarari, nam in omnibus contractibus, qui circa actiones humanas versantur, ut ratio iustitiæ locum ha- beat in talibus actionibus, necesse est, ut pactum & obligatio sub conditione operis antecedit, quæ illis verbis explicatur: facio ut facias. Unde, si abque tali pacto formali, vel virtuali, contingat aliquem laborare in utilitatem alterius, non censetur facere opus iusti- tiæ, sed gratiæ, vel liberalitatis. Quod si alter velit pro tali opere mercedem ad æqualitatem persolvere, simili- ter non censetur, opus iustitiæ facere, sed gratitudinis, vel alterius virtutis similis, ut misericordiæ, vel liberalitatis.

Ex his ergo omnibus concluditur, etiam in satisfac- tione Christi necessariam fuisse ex parte Dei non solum actualem acceptationem, sed etiam obligationem seu necessitatem acceptandi, facta oblatione suæ satisfac- tionis ex parte Christi: quia doctrina data generalis est, & ratio ejus æque procedit in iustitia ad Deum & ad homines. Unde, cum ostensum sit, hujusmodi nec- cessitatem non habere locum in Deo absolute & simpli- citer ex vi solius oblationis Christi, necessarium conse- quenter est, ut antecesserit pactum seu promissio Dei sub conditione talis operis, ut opus satisfactorium Christi fundatum in tali promissione haberet moralem vim ius- te satisfaciendi, ita ut non potuerit Deus post talem sat- isfactionem, aliam similem pro tota natura ab huma- no genere exigere. Potest quidem Deus post Christi sat- isfactionem oblatam expectare in singulis hominibus applicationem illius satisfactionis per media ab ipso met Deo & Christo ordinata & instituta, & similiter potest a singulis hominibus pro peccatis propriis actualibus propriam & personalem satisfactionem exigere, quia Christus non aliter, nec sub alia ratione satisfactionem suam pro nobis obtulit, nec Deus aliter illam accepta- vit, aut acceptare promisit; tamen eo modo, quo Chri- stus illam obtulit, nimirum ad satisfaciendum quoad sufficientiam pro toto genere humano, & ut esset veluti quædam causa universalis, quæ singulis appellari posset, & applicanda esset juxta divinæ dispositionis or- dinem, hoc (inquam) modo non posset Deus iuste aliam satisfactionem ab humano genere exigere, & con- sequenter nec posset Christi satisfactionem repudiare: & hoc sensu dicimus, necessarium fuisse illam accepta- re, eamque necessitatem ex præcedente promissione ortam fuisse. Quod autem hoc pactum seu promissio Dei ad Christum intercesserit, colligi potest ex illo Isaia 53. *Si posuerit pro peccato animam suam, videbit semen longævum, & voluntas Domini in manu ejus di- rigetur, pro eo, quod laboravit anima ejus, videbit & saturabitur*: Et infra. *Iniquitates eorum ipse portabit, ideo dispersiam ei pluvios, & cætera usque ad finem capitis*. De qua promissione & pacto multi Patres intel-

ligunt illud Psalm. 2. *Postula à me, & dabo tibi gentes hereditatem tuam, & possessionem tuam terminos terre*. In verbo enim illo, *Postula à me*, intelligitur significa- ta oratio Christi fundata in suis meritis, & satisfactio- ne, & in dignitate personæ suæ. Ex materia etiam de me- rito & satisfactione constat, hanc promissionem aliis hominibus esse factam; multo ergo magis ipsi Christo.

Sed jam sequitur, ut explicemus, quomodo potuerit in Deum cadere hæc necessitas vel obligatio acceptandi satisfactionem, præsertim ex ratione iustitiæ: hoc enim est, quod præcipue impugnant rationes, quibus priorẽ partem sententiæ Andreæ Vega confirmavimus. Propter quas multis incredibile videtur Deo attribuire ve- ram ac propriam rationem iustitiæ, eumque debitorem creaturæ vel etiam Christi constituere.

Nihilominus dicendum est, posita prædicta promif- sione, ex vera ac propria iustitia debuisse Deum Christi satisfactionem acceptare. Hæc assertio in primis con- sentanea est ex sacris Scripturis, ubicumque sermo est de meritis iustorum, & de præmio illis ex iustitia reddendo, nam, si respectu aliorum habet in Deo locum iusti- tia, multo magis respectu Christi. Quam consequen- tiam nemo negabit, tum propter maiorem excellen- tiam & perfectionem operum Christi, tum etiam quia, si quid est iustitiæ in nostris meritis, totum id fundatum est in iustitia Christi; tum denique quia, si Deo non repugnat hoc iustitiæ debitum respectu alicujus, neque etiam respectu Christi repugnabit. Quod si ex parte Dei non repugnat, neque etiam ex parte Christi deesse po- test aliquid ad tale debitum inducendum. Antecedens vero constat ex illis verbis 2. ad Timoth. 4. *Bonum cer- tamẽ certavi, cursum consummavi, in reliquo reposi- ta est mihi corona iustitiæ, quam reddet mihi Dominus in illa die iustus iudex*. Et 1. ad Corinth. 9. *Certus sum, quia potens est depositum meum servare in illum diem ius- tus iudex*. Et eodem modo fit sæpe in S. Scriptura meri- to iusti iudicii Dei 2. ad Thessal. 1. ad Rom. 2. Respon- deri potest, in his & similibus locis sumi iustitiam lato & improprio modo, seu per quamdam metaphoram. Sed hoc non videtur convenienter dici, ut enim docuit Aristotel. 5. Ethic. cap. 1. duobus modis iustitia dicitur, scilicet, generaliter, & specialiter. Priori modo significat omnem virtutem seu collectionem virtutum omnium, quomodo nos virum studiosum, iustum vocamus, & gratiam cum donis suis appellamus iustitiam. Poste- riori autem modo significat certam virtutis speciem. Quamquam ergo certum sit priori modo posse Deum iustum appellari: & hoc sensu dici posse iustitiam Dei esse generalem virtutem, per quam in omnibus opera- tur Deus, quod æquum est & bonum, quomodo potest intelligi, quod de Deo dicitur 2. Machab. 1. *Solus bo- nus, solus præstans, solus iustus, & omnipotens, & æternus*: licet (inquam) hoc ita sit, tamen dubitari non potest, quin etiam posteriori modo tribuatur iusti- tia Deo in Scriptura sacra: nam iustitia illa generalis non est unum aliquod speciale attributum Dei distin- ctum a cæteris, nimirum a misericordia, charitate &c: sed illa omnia comprehendit, tamquam totum quod- dam singula complectens, ex quibus constat. At vero Scriptura tribuit Deo iustitiam, ut speciale attributum, distinctum a misericordia, liberalitate, & similibus virtutibus. Psalm. 10. *Misericordia & veritas obviave- runt sibi, iustitia & pax osculata sunt*; & illud Psalm. 84. *Iustus Dominus, & iustitiam dilexit: æquitatem vidit vultus ejus*: & ex prioribus etiam testimoniis id constat, ut statim ostendam. Certum ergo est non solum iustitiam generalem, sed etiam specialem Deo tribui.

Quod autem non improprie, aut metaphorice, sed vere & proprie tribuatur, primum ostendi potest ex ge- nerali regula interpretandi Scripturam, scilicet, quan- documque potest absque incommodo proprie exponi, ita esse intelligendam, neque esse absque necessitate ad metaphoras recurrendum: quod enim hic possit sine in- convenienti ita intelligi, ostendemus in sequentibus, quia iustitia ut sic dicit perfectionem simpliciter, nul- lamque imperfectionem necessario involvit. Deinde id colligi potest ex multitudine locorum, in quibus divina Scriptura absolute ita loquitur absque ulla insinuatione metaphoræ, aut improprietatis. Imo tot nominibus ad propriam iustitiam spectantibus hanc virtutem Dei de- cla-

Quam-  
fuerit hæc  
necessitas  
ex parte  
Dei.

Necessitas  
illa fuit,  
ipsa iusti-  
tiæ recti-  
tudo.

Prima  
probatio  
ex Scrip-  
turis.

Christi  
satisfac-  
tionem  
Deus ne-  
cessario  
accepta-  
vit, ex  
supposi-  
tione.



declarat, ut per hoc ipsum satis videatur, omnem metaphoram excludere. Huc enim spectat nomen *mercedis*, *conventionis*, & *pacti* Matth. 20. *Voca operarios, & redde illis mercedem*; & infra: *Nonne ex denario convenisti mecum? Tolle quod tuum est, & vade. Merces enim imputatur ei, qui operatur, non secundum gratiam, sed secundum debitum*, ut ait Paul. ad Roman. 4. nomen ergo mercedis proprietatem iustitiæ indicat: unde est illud 1. ad Cor. 3. *Unusquisque mercedem recipiet secundum suum laborem*; & illud Apocalyp. ultimo: *Ecce venio cito, & merces mea mecum est, reddere unicuique secundum opera sua*. Et, ut constet, hoc negotium ad propriam iustitiam pertinere, aliis locis excluditur a Deo iustitiæ vitium, propriæ iustitiæ contrarium 1. Petri. 1. *Sine acceptione personarum iudicat, secundum uniuscuiusque opus*. Ad Hebr. 6. *Non est injustus Deus, ut obliviscatur operis vestri*. Ex his ergo testimoniis probabiliter colligitur, esse in Deo veram & propriam iustitiam, & consequenter etiam debitum iustitiæ posse aliquo modo in Deum convenire: nam, licet supra dixerimus, posse interdum accidere operari ex iustitia absque obligatione iustitiæ, tamen hæc operatio, quæ est reddere mercedem, intrinsece includit aliquam rationem debiti. Per hanc ergo virtutem reddit Deus unicuique, quod speciali iure illi debitum est, supposita promissione & pacto ipsius Dei.

Unde argumentor secundo testimoniis Patrum, qui hoc genus debiti in Deo recognoscunt, neque aliquid de perfectione ejus minuere existimant, quia cum supponat promissionem ejus & pactum, totum in eo nascitur, quasi ab intrinseco, & ex propria voluntate, quia, ut sæpe dixi, per nullam actionem alterius, ex vi illius solius potest obligari. *Quis enim prior dedit illi, & retribuetur ei?* Ad Rom. 11. tamen supposita gratia promissionis suæ sub conditione operum non repugnat ei, ut per talia opera debitor fiat. Sic Chrysostomus homil. 3. in Matth. *Tu salvari te Dei gratia confitere, ut se ille tibi debitorem fateatur, nec modo pro operibus tuis, verum etiam pro hac gratia, humilique sententia. Quando enim aliqua fecerimus, habemus eum proculdubio debitorem*. Cyprianus lib. de opere & eleemosynis in fine, de omni Christiano per gratiam Dei bene operante, inquit: *Promeretur Christum iudicem, & Deum computat debitorem*.

At dicet aliquis, hos Patres, non dicere, Deum esse debitorem ex iustitia, sed simpliciter esse debitorem, quod potest intelligi ex fidelitate ratione promissionis, ut expressius declaravit Augustinus super Psal. 83. tractans illud 2. ad Corinth. 4. *Reposita est mihi corona iustitiæ, quam reddet mihi Dominus in illa die iustus iudex. Quid (inquit) reddet? Quod tibi debet? Unde tibi debet? quid illi dedisti? Debitorem ipse se fecit, non accipiendo, sed promittendo*: & sermon. 16. de verb. Apostoli: *Debitor (inquit) nobis factus est Deus, non aliquid accipiendo, sed, quod ei placuit, promittendo*. Et in idem redit, quod inquit Fulgentius in præfatione librorum ad Monimum: *Seipsum sua largitate dignatus est facere debitorem*.

Sed in primis, cum prædicti Patres ea ratione dicant, esse Deum debitorem, ut exponant, quia ratione reddet iustus coronam iustitiæ, satis significant, se loqui de debito ex iustitia, quod ex promissione onerosa interdum nascitur, & ideo, quamvis promissionis meminerint, quoniam necessaria est, non propterea iustitiam excludunt. Quod potest aptissime declarari ex doctrina Pauli in epist. ad Rom. c. 11. dicentis: *Si autem gratia, non ex operibus, alioqui gratia, jam non est gratia*, id est, non gratis datur: docet ergo Paulus id, quod a Deo datur ex operibus, non dari gratis; ergo sentit, dari ex debito, non quocumque, sed ad iustitiam pertinente. Patet consequentia: quia dari gratis tantum huic debito directe opponitur: quod enim datur solum ex debito simplicis promissionis, gratis nihilominus datur. Imo, licet ad obtinendum rem simpliciter promissam requiratur aliquid opus, si non attingat propriam rationem condigni, & iusti meriti, adhuc gratis datur, licet intercesserit promissio: sic enim iustificatio & remissio peccati datur ex debito promissionis, supposita contritione, & nihilominus gratis datur, ut infra ostendemus; ergo juxta prædictam Pauli doctrinam, in his, quæ a Deo

non gratis dantur, sed ex operibus, intercedit aliquod genus ætioris debiti, quam sit simplicis promissionis. Hoc ipsum eleganter declaravit Bernard. tractatu de gratia & libero arbitrio, sub finem, dicens. *Quo pacto eam, quam sibi repositam præsumit (scilicet Paulus) coronam vocat iustitiæ? An quoniam iuste jam & ex debito requiritur, quodcumque, vel gratis, promittitur? Denique ait, scio, cui credidi, & certus sum, qui a potens est depositum meum servare. Dei promissum, suum appellat depositum, & quia credidit promittenti, fidenter promissum repetit. Promissum quidem ex misericordia, sed jam ex iustitia persolvendum. Est ergo, quam Paulus expectat, corona iustitiæ Dei, non sua: iustum quippe est, ut reddat, quod debet, debet autem quod pollicitus est. Infra vero exponit, hanc iustitiam ita appellari iustitiam Dei, ut tamen ejusdem iustitiæ voluerit Deus hominem habere consortem, eum faciendo ejusdem coronæ seu præmii promeritorem: eum operum, quibus erat illa repromissa corona, habere dignatus est coadjutorem. Et in eodem sensu dixit Petrus Chrysologus sermon. 25. ad finem. *Nonne homo homini exigua carthule obligatione constringitur, Deus tot & tantis voluminibus cavet, & debitor non tenetur? Sed dicis, esto quod debeat, quo exigente restituet? Se ipso: quia non potest ille mentiri: idem ipse est & executor & debitor*. Deinde, si debitum ex simplici promissione ortum Deo non repugnat, nec diminuit dominium ejus, neque aliquam aliam imperfectionem illi affert; cur dicetur omne iustitiæ debitum illi repugnare, aut imperfectionem afferre? Nulla certe est sufficiens ratio, ut ex solutionibus argumentorum, & ex sequente discursu magis constabit.*

Tertio igitur argumentor ratione, quia operari ex propria & formali iustitia, per se ac formaliter loquendo dicit perfectionem, & operari ex debito ejusdem iustitiæ non dicit imperfectionem, sed supponit potius perfectionem alterius virtutis, & includit sapientissimam rationem & dispositionem divinæ providentiæ: ergo utrumque cadit in Deum, & maxime respectu operum & satisfactionum Christi. Major per se nota videtur, quia iustitia ut sic virtus est perfectissima. Unde, si nihil aliud addatur, in illius affectu & voluntate nulla imperfectio includitur. Minor declaratur variis modis: primo ex D. Thom. 1. p. q. 21. art. 1. ad 3. ubi ait, in nomine debiti importari ordinem exigentiæ vel necessitatis: ergo non magis repugnat Deo debitum aliquid faciendi, quam necessitas: sed quamvis Deo repugnet simpliciter & absoluta, non tamen repugnat ei necessitas ex suppositione alterius voluntatis seu promissionis ejusdem Dei: ergo neque ei repugnabit debitum ex suppositione, quia, sicut necessitas ex suppositione non tollit libertatem, nec minuit illam, simpliciter loquendo, ita nec debitum ex suppositione promissionis liberæ ipsius Dei tollit, aut minuit perfectum dominium, quod potissimum consistit in libertate Dei omnipotentis conjuncta. Hinc vero addit D. Thom. citato loco & 1. & 2. q. 114. art. 1. ad 3. ex hoc debito non proprie denominari Deum debitorem nobis, sed sibi ipsi, in quantum debitum est ei, ut sua ordinatio impleatur; nec posset ex actione creaturæ sequi hoc debitum, nisi supposita divina ordinatione, quod magis explicans eadem 1. 2. q. 111. art. 1. ad 2. dicit, per hoc debitum non obligari Deum creaturæ, sed potius creaturam subjici Deo, ut in ea divina ordinatio impleatur, quæ observatio D. Thom. prudentissima est, & ad castum loquendi modum spectat, non vero repugnat doctrinæ, quam explicamus, sed potius eam supponit. Est etiam fundata in alia ratione optima, quam mox exponemus solvendo argumenta. Secundo declaratur idem; nam hoc debitum iustitiæ divinæ non oritur ex aliqua lege, neque ab extrinseco provenit (ob quam rationem, inter alias, recte dicitur, non obligari Deum hoc debito), sed oritur ex intrinseca & connaturali rectitudine ipsius divinæ voluntatis, cui naturalis est omnis perfectio, quo ad constantiam & rectitudinem voluntatis spectat; & ideo illi naturale est ac necessarium, ut postquam aliquid decrevit ac voluit, in ea voluntate immutabilis perseveret. Item, quamvis libere loquatur, tamen si loqui vult, necessarium est ei vera loqui. Sic etiam, quamvis libere promittat, tamen, quod semel promisit, necessario implet, non ex debito aut obligatione legis, sed ex naturali rectitudine fidelitatis. Ita ergo quamvis libere paciscatur, vel (quod idem est)

Secunda  
probatio  
ex Patri-  
bus.

Tertia  
probatio  
ex ratio-  
ne.



est) sub conditione onerosa promittat; tamen postquam semel paciscitur, necessario constat conventioni factæ, non ex extrinseca obligatione, aut debito, sed ex naturali rectitudine justitiæ: tale ergo debitum, sic declaratum, & ad justitiam applicatum, non importat imperfectionem, magis quam applicatum ad alia attributa.

Quod si quis dicat, hoc debitum justitiæ sic declaratum non excludi a Deo propter imperfectionem, sed solum non distingui etiam ratione a debito promissionis seu fidelitatis; contra hoc insto tertio, quia formaliter ac præcise secundum rationem loquendo, distinctum est fundamentum utriusque debiti seu necessitatis: unde distincta etiam est honestas in utriusque objecto & actu: ergo hoc debitum, de quo modo agimus, non pertinet formaliter ad fidelitatem: ergo spectat ad justitiam, non enim potest alia virtus excogitari, ad quam pertineat. Major declaratur, quia debitum fidelitatis oritur ex sola promissione Dei, & ex veritate ac constantia ejus: debitum autem, de quo modo agimus, quamvis requirat promissionem, & in ea potissimum fundetur, tamen & illa promissio diversæ rationis est, eo quod sit onerosa, & virtuale pactum includens; & non ex sola illa debitu nascitur, sed adjuncto opere, quod in homine ipsa promissio requirit; & ideo tale debitum operibus commensuratur, seu proportionatur, & in Scriptura sacra non soli Dei promissioni, sed ipsis etiam operibus ex gratia Dei factis, & in promissione fundatis, attribuitur. Juxta illud Psal. 65. Matth. 16. ad Rom. 2. Apocalypsis ultimo. *Reddet unicuique secundum opera sua*; & ad Galat. 6. *Qua seminauerit homo, hæc & metet*. 1. ad Corinth. 3. *Unusquisque mercedem accipiet secundum suum laborem*. Atque hinc etiam fit, ut in posteriori genere promissionis, seu debiti, majus quoddam jus intercedat ex parte hominis ad mercedem seu præmium, quam sit in simplici promissione ad rem promissam: quia illud acquisitum est per propria opera, per quæ operarius quodammodo facit suam, mercedem promissam; quia *dignus est operarius mercede sua*, Lucæ 10. & ideo dixit paterfamilias Matth. 20. *Tolle quod tuum est, & vade*. Et hoc ipsum est, quod Paulus dicebat: *Qua seminauerit homo, hæc & metet*. Est ergo distincta ratio honestatis in illo objecto, & in actu ejus.

Ultimo declaratur in hunc modum, nam Deus proprie, & vere exercet actum judicii, cum bonis præmium tribuit pro meritis, ut ex Matth. 25. & ex aliis frequentissimis Scripturis sincere intellectis satis constat; sed judicium est actus justitiæ, ut ex Philosopho 5. Ethicor. c. 4. declarat D. Thom. 2. 2. q. 60. art. 1. ubi tandem concludit, judicium pertinere ad justitiam, secundum quod est principaliori modo in Principe seu gubernatore, quod maxime in Deum convenit; ergo retributio præmiorum, & acceptatio satisfactionis justæ conveniunt Deo ratione justitiæ. Dices, convenire quoad formam, non quoad debitum justitiæ. Sed contra, nam ostensum est convenire ex honestate & æquitate justitiæ, quam judicium requirit. Ostensum etiam est, ita convenire, ut supposito pacto ex naturali rectitudine necessario habeat talem actum. Ostensum denique est, hoc debitum in præsentia nihil aliud esse, quam hanc naturalem rectitudinem seu necessitatem ex suppositione: ergo, si talis actus est ex rectitudine justitiæ, est etiam ex debito justitiæ. Tandem, quamvis hæc necessitas radicaliter habuerit originem a promissione, tamen formaliter jam est ex ipsa rectitudine justitiæ. Quod in hunc modum explico, quia, si mente fingamus Deum esse supremum judicem, & non supremum dominum, teneretur ex justitia ad reddenda præmia proportionata meritis, vel ad acceptandam satisfactionem condignam, & debito modo exhibitam; nunc autem, quamvis Deus simul sit dominus & judex, tamen ratione promissionis statuit, non uti in hoc negotio potestate dominantis, sed judicantis; ergo jam ex vi justitiæ necessario servat æquitatem in judicando. Et hoc amplius constabit ex solutionibus argumentorum.

Omnium igitur difficultatum solutio, quæ probando priorem partem tertie sententiæ tactæ sunt, potissimum pendet ex dubitatione, quæ in tertio argumento petitur, quænam sit justitia in Deo, ad quam pertinet hoc debitum accipiendi præmium satisfactionem, & (quod ejusdem rationis est) remunerandi iusta merita.

Ad quam breviter respondeo, formaliter ac proprie pertinere ad justitiam distributivam, continere autem eminenter, quidquid perfectionis est in justitia commutativa. Priorem partem sumo ex D. Thom. 1. p. q. 21. art. 1. ubi, cum inquirat, an in Deo sit justitia, in corpore respondet, non esse in Deo justitiam commutativam, esse autem distributivam; certum est autem, perfectionem justitiæ commutativæ eminenti modo, & seclusis imperfectionibus, reperiri in Deo, ut statim ex eodem D. Thom. ostendimus; ergo, cum negatur hæc justitia esse in Deo, intelligendum est secundum totam rationem formalem suam; ergo e contrario, cum justitia distributiva Deo tribuitur, intelligendum est, formaliter ac proprie, nam, si tantum esset eminenter, ac metaphorice, eodem modo, sicut de commutativa, de illa esset loquendum. Accedit, quod in solutione ad primum ibidem docet D. Thomas quasdam virtutes tribui Deo metaphorice & improprie, ut temperantiam, fortitudinem, & alias similes, quæ circa passionem versantur, alias vero, quæ versantur circa actiones, proprie tribui Deo, non ut versantur circa actiones civiles, sed ut versantur circa actiones Deo convenientes, & ponit exemplum in liberalitate, magnificentia, & justitia: ergo, ex sententia D. Th. aliqua justitia est proprie in Deo; ergo maxime distributiva: nam hæc est, quæ potissimum versari potest circa actiones Deo convenientes, quales sunt reddere præmia proportionata meritis, & remittere poenam vel offensam, si iusta, & æquivalens sit satisfactio.

Ratione etiam probatur hæc pars, primo ex dictis, nam omnia, quæ adduximus, ut minimum, probant hoc debitum justitiæ distributivæ, quod inter omnia justitiæ debita minimum est, & facilius potest absque ulla imperfectione intelligi, ut ex solutionibus argumentorum clarius constabit. Secundo a sufficienti partium enumeratione juxta partitionem, quæ in citato argumento tertia fit, cui concedimus ea omnia, quibus duo priora membra, scilicet justitia legalis & commutativa excluduntur. Quæ vero impugnant tertium de justitia distributiva, parvi momenti sunt, nam in primis non repugnat justitiæ distributivæ, ut supponat pactum & promissionem, quin potius id necessarium est, quando cumque princeps, aut aliquis alius, aliquid ex bonis suis liberaliter proponit ad certamen, ut detur in præmium, seu bravium vincenti. Quamvis enim tunc promissio liberalis sit & gratuita, tamen postquam illa facta est, & certamen est expeditum, ex justitia distributiva debetur præmium victori. Quod si interdum tenetur aliquis gubernator ex justitia distributiva aliquid dare absque propria promissione prævia, id est, quia non est dominus earum rerum, quas distribuit, sed dispensator, seu quia distribuit ex officio bona communia, a republica, vel a superiori principe ad id muneris deputata. Unde respectu superioris domini, vel reipublicæ, semper antecedit illa promissio vel expressa vel tacita: cum ergo Deus bona sua distribuat, & in præmium elargiatur, & injurias sibi factas, vel poenas a se tamquam a supremo iudice infligendas, remittat, non repugnat, imo valde consentaneum est, quod antecedit spontanea promissio, ut iusta distributio subsequi possit. Rursus nihil veritati hujus justitiæ repugnat, quod in ea servetur, non solum proportio geometrica, quæ est inter plura extrema & proportionem varias, ita ut, quantum merita unius excedunt merita alterius, tantum illius præmium hujus præmium superet: sed etiam proportio arithmetica, quæ est rei ad rem, id est, ut unusquisque habeat præmium æquale suis meritis: hoc enim potius spectat ad summam perfectionem illius justitiæ. Quod enim interdum contingit in humana justitia, ut servet æqualem proportionem inter multos, quamvis singulis non ad æqualitatem tribuat, quantum unusquisque meretur, ex imperfectione est, quia, scilicet, non potest singulis conferre, quantum absolute & simpliciter unusquisque meretur, nam si id fieri posset, sine dubio juxta æquitatem justitiæ ita faciendum esset, & inde etiam debita proportionalitas, seu æqualitas proportionis resultaret. Hanc ergo proportionem Deus in sua distributione servat; tamen, quia omnipotens est, & perfectissima bona distribuit, quæ licet crescant in multis, non diminuuntur in singulis, ideo cum prædicta proportionalitate servat in singulis perfectam æqualitatem.

Quænam sit Dei justitia, & quæ nascitur ex acceptatione satisfactionis Christi.



litatem. Et hinc etiam verum est, quod in conclusione subjunximus, habere hanc iustitiam divinam, eminenter perfectionem iustitiæ commutativæ, quia scilicet servat suo modo & sublati imperfectionibus æqualitatem rei ad rem. Quo sensu dixit D. Thom. 2. 2. q. 51. art. 4. ad 1. *Forma divini iudicii attenditur secundum rationem commutativæ iustitiæ, prout scilicet recompensat præmia meritis, & supplicia peccatis.*

Ad primam  
rationem  
in contra-  
rium.

His positis, facile est ad cætera argumenta respondere. Ad primum enim recte ibi responsum est, hanc necessitatem seu iustitiæ debitum esse tantum ex suppositione alicujus promissionis, non ejusdemque, sed illius, quæ est sub conditione operis æquivalentis, seu habentis sufficientem proportionem ad præmium, vel mercedem. Ad replicam vero ibi factam satis jam declaratum est, quantum differat hæc promissio & debitum, quod ex ea nascitur, a simplici promissione & debito fidelitatis. Neque refert, quod Deus posset absque promissione præcipere illud opus, propter quod mercedem promittit: falsumque est, in omnibus pactis, seu promissionibus humanis necessariam esse illam conditionem, ut obligatio iustitiæ oriatur. Pater enim potest absolute & sine promissione stipendii præcipere aliquid filio; & tamen, si vere promittat sub conditione operis, tenebitur postea stare promissis; & Princeps, vel respublica, posset interdum præcipere certamen, aut aliud opus absque promissione præmii, & tamen, quando illud proponit & promittit, tenetur illud reddere, & in eo distribuendo iustitiam distributivam servare. Et ratio utriusque est, quia licet posset uti alia potestate, non tamen vult, imò etiam promittit, se illa non usurum, sed lege iustitiæ.

Ad primam  
confirmationem.

Unde ad primam confirmationem, & exemplum de domino & servo, respondetur primo, quicquid sit de jure civili, tamen ex natura rei non repugnare intercedere tale pactum inter dominum & servum, dummodo deponat dominus quodammodo personam domini, & induat personam solius iudicis, aut gubernatoris, vel paciscentis: cur enim non potest id voluntate sua facere, vel etiam sponte sua ad id se obligare, aut juri suo cedere? Secundo dicitur, illud exemplum, ad summum, procedere de obligatione iustitiæ commutativæ: nam quia inter homines servus non fit dominus eorum, quæ acquirit, sed quicquid acquirit, acquirit domino, ideo non potest dominus integrum retinens totum jus, quod habet in servum, ex iustitia commutativa obligari ad reddendum illi hujusmodi bona, quia hoc nihil aliud esset, quam obligari sibi ipsi, cum servo donata statim in ipsum transferantur. Non tamen excludi potest ea ratione obligatio seu debitum servandi iustitiam distributivam facta promissione illi accommodata, & quantum ad id, cujus servus est capax, saltem quantum ad usum vel possessionem: hoc enim modo sumi debet exemplum, ut sit accommodatum ad rem, de qua agimus: nam, licet homo sit servus Dei naturali servitute, tamen est capax proprii domini, & uti vel frui potest bonis a Deo promissis ac donatis: & ideo, quamvis Deus etiam sit eorum bonorum supremus dominus, nihilominus potest propriam rationem iustitiæ in eis distribuendi necessario servare, supposita sua promissione.

Ad secundam  
confirmationem.

Ad secundam confirmationem in primis dicitur; quamvis inter homines necessarium sit, promissionem vel pactum acceptari ab altero, cui fit promissio, tamen respectu Dei id non esse necessarium, quia voluntas ejus est per se efficax ad perficiendum pactum & constituendam promissionem; & imponentem (si voluerit) homini obligationem suscipiendi onus impositum, sub cuius conditione præmium promittitur. Deinde dicitur, hanc conditionem non omnino prætermitti in hac iustitia divina: nam, si de Christo sit sermo, illi revelata est voluntas & promissio Dei, & voluntarie pactum acceptavit, & ad satisfaciendum pro hominibus, eisque promerendum se obtulit; si vero sit sermo de aliis iustis, etiam illis proposita est vita æterna tamquam merces ex ipsius Dei promissione, bonis ipsorum operibus, & meritis, fideliter reddenda, ut Concilium Trident. sess. 6. c. 16. dixit. Et hujus promissionis fides, certaque spes rei promissæ, sicut ad salutem, ita etiam ad meritum, omnibus est necessaria: quod si fortasse in aliquibus non fuerit adeo explicita, saltem implicita requiritur, &

sufficeret interdum potest, juxta illud Pauli ad Hebr. 11. *Accedentem ad Deum oportet credere, quia est, & inquirentibus se remunerator.* Denique dicitur, ad inducendam propriam obligationem iustitiæ commutativæ fortasse magis esse necessariam illam conditionem, quod pactum utrique parti proponatur, & ab utraque acceptetur, tamen ad debitum iustitiæ distributivæ id necessarium non esse. Et ratio differentiae assignari potest, quia rectitudo iustitiæ commutativæ fundatur maxime in dominio alterius comparato ad illud, qui superius dominium non habet, transactio autem hujusmodi domini non fit sine contrahentium consensu: at vero rectitudo iustitiæ distributivæ magis fundatur in decentia ipsius actionis, & conformitate, quam habet cum ipsa ratione, seu rationali aut intellectuali natura, sicut rectitudo, quæ est in implenda promissione, non semper fundatur in jure alterius, sed in ipsa rei decentia & convenientia: & ideo, sicut in promissionibus divinis necessarium non est, quod a nobis sint acceptatæ & cognitæ, sed satis est, quod a Deo sint factæ, ut necessarium sit, & suo modo debitum, Deum illas implere: ita in actionibus, quæ ad iustitiam distributivam pertinent, ut rectitudo in eis necessario servanda sit, necessarium non est, ut a nobis acceptentur promissiones seu pacta, in quibus fundantur: sicut etiam ad promerendum coram Deo necessarium non est operari intuitu mercedis, vel subformali intentione ex se, quasi obligandi illum ad dandum præmium, sed satis est, meritum opus cum debitis conditionibus exercere.

Ad ultimam  
confirmationem.

Atque eadem fere responsio est ad ultimam partem seu confirmationem illius argumenti: concedo enim, duplicem illum modum promissionis conditionatæ, unum, in quo conditio solum ponitur ad suspendendum consensum, seu obligationem, quæ non urget donec conditio impleatur; aliud, in quo opus conditione positum, ut condignum & æquivalens meritum postuletur; & hujusmodi esse dicimus promissiones & pacta Dei, in quibus hæc iustitia fundatur, ut ex modo loquendi Scripturæ satis ostendimus. Neque ad hujusmodi iustitiam necessarium est, ut opus, quod in promissione, exigitur, cedat in Dei utilitatem, aut quod novum aliquod dominium in illum transferat; hoc enim, ad summum, posset esse necessarium in promissionibus vel pactis, in quibus ex utraque parte propria & rigorosa obligatio iustitiæ commutativæ nascitur; nam iustitia commutativa proprie sumpta in datis & acceptis versatur: at vero ad rectitudinem & honestatem iustitiæ distributivæ satis est, ut fiat opus, quo voluntas promittentis impleatur, & quod opus ipsum habeat condignitatem, & moralem æquivalentiam cum re promissa. Quæ omnia locum habent respectu Dei absque ulla imperfectione.

Ad secundam  
confirmationem  
principalem.

Ad secundam rationem principalem primum in genere dicitur, totam procedere, & recte concludere de iustitia commutativa, quam fatemur proprie non habere locum in Deo propter imperfectiones, quas includit; de iustitia autem distributiva non procedit prædicta ratio: Unde ulterius, utendo nomine obligationis in bono sensu, non ut dicit vinculum morale ortum ex præcepto, seu lege superioris, sed ut dicit naturalem quandam rectitudinem, hoc (inquam) sensu concedo, Deum ex rectitudine iustitiæ ad aliquid obligari, seu necessitari ex suppositione; & consequenter assero, posse creaturam ratione sui operis facti ex gratia & sub promissione divina, habere aliquod jus, quod Deus infallibiliter & necessario servat ex rectitudine iustitiæ. Rursus addo, hoc jus proprie loquendo, esse non in re, sed ad rem: quod ita declaro, nam id, quod est debitum creaturæ ratione sui operis, considerari potest, vel ut nondum exhibitum, sed in futurum præstandum, sicut nunc debetur gloria iustis viatoribus; & tunc constat, nondum esse jus in rem ipsam acquisitum, cum nondum sit: vel considerari potest, ut jam exhibitum, ut est nunc præmium gloriæ in beatis, vel gratia & remissio peccati in iustis viatoribus, & jam tunc non habet locum ratio debiti, cum jam sit perfolutum; sed, si aliquo modo ibi considerari potest obligatio seu debitum, est, quatenus interdum bonum illud semel datum auferri non potest, quia ex promissione obligatur Deus ad perpetuo conservandum illud; & ita etiam formaliter.



ter loquendo illa conservatio consideratur, ut futura & nondum exhibita, & ideo etiam, ut jus ad illam potius habet rationem juris ad rem, quam in re. Quod si fortasse tale sit bonum illud, ut non indigeat nova conservazione, jam proprie nullum relinquitur jus, nec debitum in ordine ad illud: hujusmodi autem bonum non potest esse positivum & reale, quia nullum est, quod Dei conservazione non egeat, sed per modum carentiæ vel negationis intelligi potest, ut v. g. in remissione seu oblatione peccati; nam, postquam Deus illud abstulit, non est necesse, ut specialiter conservet carentiam illius peccati, imo nec facere potest, ut illud redeat, nisi homo voluntarie iterum peccet: & idem est de remissionis poenæ, nam postquam Deus abstulit reatum ejus, non potest illum reparare, imo nec poenam illam infligere, formaliter loquendo de poenâ; & ideo, si quis acquisivit jus justitiæ ad remotionem alicujus mali, si malum illud sublatum est, jus quidem justitiæ servatum est, in futurum vero nullum manet proprie jus, quia nihil amplius agendum superest, nec malum illud extrinsecus redire potest. Est igitur hoc jus creaturæ quoddam ad rem potius, quam in re, & ideo propriissime pertinet ad justitiam distributivam, ad quam proprie ac formaliter non spectat restituere alteri, quod suum est, vel erat; sed conferre id, ad quod habet aliquod jus, ratione alicujus dignitatis seu meriti.

hic justitia non minuit dominium domini.

Unde ulterius dicitur, hujusmodi jus creaturæ ad rem nec minuire perfectum Dei dominium, nec imperfectiorem aliquam in Deum inducere. Nam, vel hæc imperfectio proveniret ex jure illo, quod tribuimus creaturæ, vel ex necessitate illa ex suppositione, quam dicimus esse in Deo. Non primum, quia quod creatura habeat verum dominium rerum, non minuit supremum Dei dominium: ergo neque quod habeat jus meriti vel satisfactionis ad aliquid, minuit dominium Dei. Neque etiam secundum, quia illa necessitas non oritur proprie ac formaliter ex jure creaturæ, sed quasi objective tantum, formaliter autem provenit ex rectitudine divinæ voluntatis, suppositio ejusdem voluntatis libera promissione. Unde non est diminutio domini, sed determinatio ejus ad rectum ac perfectum usum, quæ optime stare potest cum pleno dominio, vel quoad specificationem, ratione honestatis actus, sicut determinatur libertas Dei ad dicendum verum, vel etiam quoad exercitium ex suppositione prioris liberæ voluntatis Dei, quæ, sicut non diminuit libertatem, ita neque dominium. Sicut etiam necessitas fidelitatis servandæ non minuit divinum dominium, quia non provenit ab extrinseco, sed ex suppositione propriæ libertatis, & intrinseca rectitudine. Tandem dicitur, hujusmodi jus ad rem pertinet ad justitiam distributivam tantum non refundi in personam, nec constituere illam proprie loquendo debitorem alteri habenti tale jus, sed potius sibi ipsi (ut dixit D. Thom.) quia scilicet, suis actionibus talem rectitudinem debet; & ideo hoc debitum nec cum perfecto dominio, nec cum suprema domini potestate repugnat: propter quod Fulgentius loco citato in hunc modum scribit: *Ecce qualis est dominus noster, ut donando debeat, & quanto magis cum debitorem esse non pigeat: in quantum enim gratis largitur, in tantum debitor invenitur: neque enim potest aliquis debitorem habere, nisi in eo, quod ipse dignatus fuerit, gratuita largitate conferre.*

Quomodo hæc justitia possit esse ex parte Dei distributiva, & ex parte Christi commutativa.

Sed instabit adhuc aliquis, nam sola hæc necessitas justitiæ distributivæ non satis est ad justitiam Christi stabilendam. Primo quidem, quia supponit liberalem promissionem acceptandi. Secundo, quia ratio justitiæ non est uniformis in utroque extremo, nam ex parte Christi est commutativa, ex parte vero Dei dicitur esse tantum distributiva, quæ est longe minor. Tertio addi potest, quod licet in meritis & præmiis magis appareat illa ratio justitiæ distributivæ, in satisfactione autem & remissione culpæ aut poenæ ægre potest id intelligi, quia satisfactio non respicit distributionem ullam præriorum, imo in hoc differt a merito. Ad primum respondetur, id non esse contra rationem justitiæ; non enim postulat vera justitia, ut unus possit alium cogere ad contrahendum, sed solum, ut servata in omnibus æqualitate possint voluntarie pacisci, & positum pactum ex justitia servandum sit, quod non solum in justitia distributiva, sed in omni iure iusta conventionem reperitur: quod variis exemplis, tam in hoc, quam in præcedente puncto declaratum

est. Ad secundum supra etiam dictum & probatum est, non oportere actum justitiæ esse ita reciprocum, ut sit ejusdem rationis in utroque extremorum, maxime quando extrema sunt diversi ordinis, & perfectionis.

Ad tertium.

Ad tertium suppono, per se ac formaliter non requiri ad actum distributivæ justitiæ, ut sit inter multos: quamvis enim fingeremus unum tantum hominem, vel angelum meruisse gloriam, ad justitiam distributivam pertineret, illi reddere præmium: licet ergo nomen distributionis ex ordine ad multos sumptum videatur, tamen justitia distributiva formaliter non hoc significat, sed virtutem, quæ servat jus quoddam ad rem, fundatum in merito ac dignitate actionis, vel personarum. Hinc ergo respondetur, quod, licet remissio vel acceptatio, quæ satisfactioni respondet, per se non respiciat multos, sed unum satisfaciendum, nihilominus potest in ea habere locum ratio justitiæ distributivæ, quia jus illud ad remissionem obtinendam per satisfactionem potest esse cum eadem proportionem & æqualitatem, quæ est inter meritum & præmium. Unde, licet satisfactio in multis differat a merito, ut in principio sect. præced. dictum est, & in eo præsertim, quod meritum per se respiciat mercedem, & commodum merentis, satisfactio autem recompensationem injuriæ, & honorem personæ offensæ; nihilominus ex satisfactione resultare potest commodum satisfaciendi, vel ei, pro quo satisfactio offertur, ut est remissio peccati aut poenæ; & quoad hoc sequitur ex satisfactione jus ad tale commodum, simile illi, quod est in merito, & ideo in hoc jure servando potest etiam justitia distributiva intercedere.

## SECTIO VI.

*Unum in satisfactione Christi servata fuerint leges omnes perfectæ justitiæ.*

Quamquam hæc questio videri possit ex superioribus definita: quoniam tamen interdum contingit, in aliquo merito vel satisfactione servari propriam & æqualem justitiam quamvis non undequaque perfectam, ideo merito in speciali dubitamus, an ita acciderit in Christi satisfactione. Præsertim cum non sit facile in hac satisfactione tueri conditiones omnes, quas multi putant ad perfectionem justitiæ esse necessarias, præter eas, quæ sunt essentielles, & de primaria ratione justitiæ, ut esse ad alterum, reddere æquale, vel jus alterius illæsum servare: hæc namque conditiones in ipsamet definitione justitiæ continentur, & in illius objecto ac munere, quod est, unicuique jus suum reddere. De quibus essentialibus conditionibus satis in superioribus dictum est. Aliæ vero, quæ ad perfectionem & rigorem justitiæ pertinere censentur, plures numerari possunt; tres vero existimantur præcipuæ, quantum ad satisfactionem spectat. Prima, ut sit ex bonis propriis satisfaciendi. Secunda, ut sit ex aliis indebitis. Tertia, ut non fundetur in gratia a creditore facta. Quartam addunt quidam, scilicet, ut satisfactio sit ab eadem persona, quæ offendit. Quinta etiam additur, ut, scilicet, satisfactio talis sit, quæ obliget creditorem ad illam acceptandam. Denique additur sexta, scilicet, ut sit inter æquales, quia justitia commutativa, de qua agimus, ex primaria intentione sua ad æquale tendit, & inter æquales versatur. Sed non est, quod in his ultimis conditionibus immoremur, nam de quarta, satis ex dictis sectione præcedenti colligitur, illam conditionem per se ac simpliciter loquendo non esse necessariam ad æqualitatem, & inde etiam fit, necessariam non esse ad perfectionem justitiæ. Hac enim ratione dicunt frequenter Theologi, non teneri eum, qui injuriam intulit, ad petendam veniam, nisi vel judicis, vel prudentum arbitrio illud sit necessarium medium ad condignam satisfactionem, alioqui satis est, quacumque via injuriam cum æqualitate relacire, quod notavit Cajet. 2. 2. q. 72. a. 3. Soto lib. 4. de just. q. 6. art. 3. in solut. 5. arg. Hoc autem communiter intelligendum censetur quoad satisfactionem, quæ ad commutativam justitiam spectat, nam satisfactio (ut sic dicam) personificatam poenam, quæ pertinet ad vindicativam justitiam, exigi potest ab eadem persona, per potestatem publicam. De qua re legi potest Covar. lib. 2. Variar. c. 10. Medina. C. de restit. q. 29. Cordu. lib. 1. q. Theol. q. 27. & in summ. Hispan.



q. 58. Sed, licet regulariter hoc verum sit, tamen potestas publica servata iustitiæ aequitate potest ita pœnam imponere, ut per alium sustineri, seu satisfieri possit, si ad satisfaciendum reipublicæ id sufficere censeatur, & maxime si sit ex lege & pacto antecedente remissionem pœnæ, seu talem satisfaciendi modum. Unde satis constat, ex vi hujus conditionis iustitiam satisfactionis Christi fuisse satis perfectam. Prasertim, quia hæc conditio non fuit omnino prætermissa, quia, sicut genus humanum offendit in uno individuo naturæ suæ, ita satisfecit per aliud. Quod autem illa individua diversa sint, materiale quid est, & non multum refert ad rationem offensæ & satisfactionis: maxime quia, sicut Adam offendit Deum, non tantum ut privata persona, sed veluti caput & principium virtute continens totam naturam, ita Christus satisfecit, ut caput omnium hominum, quæ dignitas illi fuit quasi connaturalis, propter personæ suæ dignitatem, in quo Adamum superavit. Denique, posita supra dicta promissione & pacto, per quod intelligitur Christus, quasi suscipere in se causam omnium hominum, facile intelligitur, quo modo vera ratio iustitiæ interveniat, etiam si unus pro alio satisfaciatur. De quinta etiam conditione satis dictum est sect. præced. paulo ante finem. Ubi offendimus, eam conditionem eo modo, quo necessaria esse potest, inventam esse in Christi Domini satisfactione. Qui autem existimant, Deum non accepisse ex iustitia satisfactionem Christi, ut nihilominus defendant, cum ex perfecta iustitia satisfecisse, negant, hanc conditionem esse necessariam ad perfectam iustitiam, ut præced. sect. satis dictum est. Denique, sexta conditio ab antiquis authoribus non assignatur, nec videtur ulla ratione fundata, si intelligatur de æqualitate simpliciter personarum, satisfaciens, & cui fit satisfactio, quia iustitia non intendit hanc æqualitatem, sed solum inter datum & acceptum, seu inter satisfactionem & injuriam: unde sola illa æqualitas vel proportio inter personas & dignitates earum necessaria est, quæ ad constituendam æqualitatem in rebus seu actionibus sufficit: quia nihil aliud exigi potest ex vi mediæ iustitiæ, & nullum est aliud principium, ex quo talis necessitas elici possit. Addo, etiam si gratis hanc conditionem admittamus, in Christo Domino inventam esse, cum sit verus Deus. Nec refert, quod in quantum homo satisfecerit, secundum quam rationem dicitur esse minor Patri, quia, licet ad satisfaciendum natura illa, secundum quam erat minor, fuerit necessaria, ut posset illa persona obedire, exhibere reverentiam, seu humilitatem, tamen etiam ipsum suppositum, quod æquale erat Patri, necessarium fuit ad talem satisfactionem, & ab illo sumptus est valor ejus ad perfectam iustitiam sufficiens, ut sect. 3. & 4. declaratum est. Igitur, omittis his conditionibus, de tribus primis dicendum est, quoniam difficile videtur, eas in Christi satisfactione salvare. Qua difficultate superati nonnulli Theologi supra citati sect. 3. scilicet Scotus, Durandus, Gabriel, Almainus, & latissime Joann. de Medina, cum conditiones has in Christi satisfactione defendere difficilius arbitrarentur, perfectam iustitiam in ea servatam esse negarunt. Alii breviter se expediunt dicentes eas conditiones iustitiæ fuisse servatas in Christo, eo modo, quo apud Deum servari possunt in eo, qui maxime perfecte potest illi satisfacere, non tamen eo modo, quo inter creaturas servantur: hoc enim repugnat Deo, cum sit supremus dominus omnium: ut hinc intelligamus, iustitiam Christi fuisse perfectam eo modo, quo potest esse iustitia apud Deum, non vero illo, quo est perfecta iustitia inter homines. Sed hic modus mihi non satisfacit, quia vel indicat iustitiam Christi comparatam ad iustitiam puræ creaturæ apud Deum esse perfectam, tamen simpliciter, & secundum se fuisse imperfectam, & secundum quid, quod falsum existimo. Si autem hoc non intendit, non satis explicat rei difficultatem.

Dicendum ergo est cum D. Th. hoc loco, & aliis authoribus supra cit. sect. 3. & 4. & Capreolo late in 4. dist. 15. q. unica art. 3. in hac Christi satisfactione servatas esse omnes leges perfectæ & (ut recentiores Theologi loquuntur) rigorosæ iustitiæ. Hoc enim magis consentaneum est modo loquendi scripturæ, & Patrum, & potest facile explicari, si per singulas conditiones discurremus.

Primum breviter probatur ex Paulo ad Rom. 3. *Quem proposuit Deus ad ostensionem iustitiæ suæ.* Certe ad

ostensionem imperfectæ iustitiæ non erat Christus necessarius: quare si imperfecte tantum satisfecit, gratis quodammodo mortuus est: unde ad Roman. 5. *Sicut per unius delictum, ita & per unius iustitiam.* Sed per peccatum Adæ ex toto rigore iustitiæ posterius ejus damnamur: ergo multo magis per Christum salvamur ex perfecta iustitia: cum ibidem subdatur: *Non sicut delictum, ita & donum.* Et ibidem ait, accipere nos per Christum abundantiam gratiæ, & iustitiæ, in qua vivamus Deo: quia potentior est Christus ad vivificandum, quam fuit Adam ad interficiendum: unde 1. Corinth. 1. dicitur, *Christus nobis factus iustitia & redemptio*, quæ nomina abstracta habent in scriptura vim significandi perfectionem ejus rei, quæ alicui tribuitur: & specialem etiam vim habet nomen redemptionis, vel emptionis, quod proprie dictum veram & perfectam iustitiam indicat: sicut etiam illud ad Coloss. 2. *Delens, quod adversus nos erat, chirographum*, &c. quasi jam ex perfecta iustitia debito soluto; & infra: *Expolians principatus, & potestates, traduxit confidenter palam triumphans eos in semetipso.* Accedunt loquutiones Patrum, quibus satis indicant, hoc eodem sensu scripturam intellexisse. Proclus Episcopus Cizice. homil. de Christi nativi. in Concil. Ephesic. 7. tom. 6. *Necessarium, inquit, erat, ut ejusmodi pretium penderetur, quod exactum debitum ad amissionem iustitiæ exaquaret.* August. in Ench. c. 40. *Ue diabolus veritate iustitiæ, non violentia potestatis oppressus, & victus, quoniam ipsum sine ullo peccati merito occiderat iniquissime, per ipsum iustissime amitteret, quos peccati merito derinebat.* Et 13. de Trinit. c. 13. *Non autem diabolus potentia Dei, sed iustitia superandus fuit.* Etc. 14. *Que est igitur iustitia, qua victus est diabolus? que, nisi iustitia Jesu Christi?* Greg. 17. Moral. cap. 18. vel secundum aliam impressionem 15. *Exhibuit peccatoribus victimam sine peccato, que humanitate mori, & iustitia mundare potuisset.* Multa etiam ad hoc propositum habet Leo Papa serm. 1. de nativitate. & 11. & 12. de Passione Theodoret. Dial. 2. cuius titulus est, Inconfusus. Et Patres supra citati sæpe hoc repetunt. Licet enim hanc terminis, perfectæ aut rigorosæ iustitiæ raro utantur, tamen ex modo, quo Christi iustitiam, & satisfactionem exaggerant, satis indicant eundem sensum. Ratione constabit hæc veritas ex sequentibus; pendet enim ex modo explicandi leges, seu conditiones perfectæ iustitiæ supra indicatas, & quomodo in Christi satisfactionem convenient.

Prima ergo conditio requiri solet, ut satisfactio non fundetur in gratia, seu liberalitate ipsius creditoris. Hanc ponunt communiter Thomistæ, Cajetanus hic. Sot. in 4. dist. 15. q. 1. art. 2. & lib. 3. de nat. & grat. c. 6. Ferrar. 4. contra gen. c. 54. ubi hinc colligit, repugnare perfectæ iustitiæ, & satisfactioni, quod bonitas adus, per quem fit satisfactio principaliter sit a satisfaciens, ex beneficio ejus, cui fit satisfactio, de quo statim dicitur. Ratio vero hujus conditionis reddi potest, quia iustitia, & gratia opponuntur juxta illud, *Si ex operibus, ergo non ex gratia.* Quantum ergo gratiæ miscetur, tantum videtur minui de perfectione iustitiæ. Jam vero tota Christi satisfactio videtur in gratia fundata, primo quia tota nititur in gratia unionis, quam Deus gratis contulit. Deinde, quia ipsamque bona opera, per quæ Christus satisfaciebat, erant dona Dei, data non tantum humanitati, sed etiam huic homini, indigebat enim hic homo Christus auxilio, vel concursu Dei, ad suos actus efficiendos, & Deus libere hoc præstabat. Quia licet esset quodammodo debitum, & connaturale ratione unionis, non tamen ex necessitate, sed mere libere conferebatur a Deo. Nulla enim vel apparenti ratione dici potest, Deum ex necessitate præbuisse auxilium suum illi humanitati, ad operandum etiam satisfactio Christi perfectæ iustitiæ. Verum conditio illa, ut vera sit, limitanda est, primo ut gratia hæc vel liberalitas formaliter aut virtualiter detur ad hunc finem, ut alias possit satisfacere. Secundo, ut per illam rem, quæ gratis a creditore datur, ut ab ipso datur, fiat recompensatio seu solutio debiti, ita ut gratia non omnino antecedat solutionem, sed in illa fiat, solutionique miscetur. Tertio, ut hæc

Conditio-  
nes perfe-  
ctæ iusti-  
tiæ in  
Christi  
satisfac-  
tione in-  
ventæ.

Arguitur  
ex prima  
conditio-  
ne contra  
perfectam  
iustitiam  
satisfac-  
tione  
Christi.



liberalitas fiat ab ipso creditore ei, qui debet satisfacere. Ratio horum est, quia hæc gratia, quæ supponitur iustitiæ, in tantum potest diminueri perfectionem ejus, in quantum est, quædam virtualis remissio debiti, gratis facta. Si enim nullo modo includat gratuitam remissionem, non est, cur diminueat perfectionem iustitiæ. At vero quando concurrunt illa tria, continet talis gratia in virtute remissionem liberalem debiti, non vero si illa deficient. Quod ita facile explicatur: nam si Petrus Paulo tribuat centum, ut sibi totidem solvat, quæ illi debebat, moraliter loquendo potius est libera remissio, quam iusta solutio. Quamquam enim, si prior donatio vera sit, & absoluta, possit subsequens solutio esse ex vera iustitia, tamen sine dubio est valde imperfecta, quia in toto illo facto moraliter includitur liberalis quædam debiti remissio. At vero, si donatio absoluta antecederet, non habito respectu ad finem solvendi debitum, major intelligeretur esse perfectio iustitiæ, etiamsi quis, ex re donata, eidem, qui donavit, aliud debitum solveret, ut exemplis humanis facile declarari potest. Et ratio differentię est, quia quando donatio & solutio sunt ita disjuncta, non solum tempore, sed etiam habitudine, quia videlicet una non ordinatur ad aliam, tunc non includunt etiam virtualiter illam moralem remissionem debiti. Deinde quavis antecedit liberalis donatio, vel absolute, vel in ordine ad solutionem debiti, si tamen solutio non fiat ex eadem omnino re, quæ dono accepta est, sed ex alijs acquisitis labore & industria debitoris, hoc non ita repugnat perfectioni iustitiæ, quia jam debitor aliquid de suo habet, quo debitum solvit. Ut, si quis centum Petro debeat, & ab illo accipiat decem, quibus negotiari possit, & lucrari, quidquid necessarium est ad solvendum debitum, tunc vere ex iustitia solvit: imo si tantum lucretur, ut possit etiam id, quod ad lucrandum accepit, persolvere, erit perfecta iustitia & æqualis, quia nec totum debitum, nec pars ejus, nec formaliter, nec virtute fuit gratis remissum, sed solum antecessisse videtur quædam mutatio, quæ non repugnat perfectioni iustitiæ, si postea compensetur. Denique, si supponatur gratia alteri facta, non tamen ei, qui solviturus est debitum, nihil hoc refert ad rationem iustitiæ, quia per hujusmodi gratiam nihil debitori remittitur, cum illi non fiat.

Ex his ergo facile intelligitur, ex defectu hujus conditionis nihil satisfactioni Christi defuisse de perfectione iustitiæ. Primum, quia, ut ego existimo, gratia unionis non est facta humanæ naturæ secundum ordinem divinæ prædestinationis primo & per se propter satisfactionem peccati, sed per se propter communicationem divinæ bonitatis, ut infra dicam: & ideo quod satisfactio ex hac gratia processerit, non derogat iustitiæ, quandoquidem non est primario facta propter solutionem debiti, quamvis ad hunc etiam finem ordinata sit. Deinde, Christus non formaliter satisfecit per ipsam gratiam unionis, sed hæc gratia antecessit satisfactionem, quæ postea subsecuta est per labores, & fructus, quos, ut ita dicam, ipse sibi comparavit: qui tanti fuerunt valoris, ut & ad condignam satisfactionem, & ad gratiarum actionem sufficientes fuerint: imo & ad ipsius incarnationis meritum, si aliunde non repugnaret, vel si ad eum finem ordinarentur, ut supra dictum est. Et hoc maxime locum habet in hac iusta satisfactione apud Deum, quæ non consistit in translatione alicujus dominii, sed in recompensatione, quæ fit per morales actiones secundum valorem earum, ut statim amplius explicabitur. Denique gratia unionis non est facta huic homini Christo, qui proprie satisfacit, sed humanitati, quæ non satisfacit, & ex hac etiam parte gratia hæc non derogat iustitiæ. Neque enim dici potest, Christum ut hominem accepisse hanc gratiam, est enim propria naturæ, ut natura est, quæ autem sic conveniunt naturæ, non possunt dici de supposito, etiam cum illa reduplicatione, sicut non vere dicitur, Christum ut hominem esse suam humanitatem, neque esse assumptum, aut unitum hypostatice Verbo. Et ex his sufficienter expedita est præcipua difficultas tacta de gratia unionis.

Ad aliam vero partem de ipsiusmet actibus, seu concursu, & auxilijs ad illos necessarijs ex parte Dei, dicitur in explicatione secundæ conditionis. Nunc solum dicam, hanc gratiam, seu liberalem donationem, qua-

lisumque illa sit, non tollere æqualitatem, & conditionem satisfactionis, & consequenter nec minuire perfectionem iustitiæ. Quia licet ad illos actus requiratur concursus Dei, tamen aliquem proprium concursum habet proximum operans, seu Christus Dominus circa illos, ratione cujus sunt proprii illius, & ut tales habent sufficientem valorem ad satisfaciendum ex dignitate personæ: sicut e contrario actus peccati, quo ostenditur Deus quoad suam entitatem physicam, etiam pendet ex concursu Dei, & ita in hoc etiam invenitur æqualitas, & proportio inter satisfactionem & offensam. Et quamvis concursus ad actum supernaturalem sit major, & altioris ordinis, tamen in illo met ordine est illi conaturalis, & in Christo domino tam actus, quam concursus ad illum necessarius, erat suo modo connaturalis ratione personæ, respectu cujus non fit proprie beneficium, seu gratia, sed solum respectu humanitatis.

Secunda conditio assignari solet, ut satisfactio non fiat ex bonis ipsius creditoris, sed ex bonis proprijs debitoris ipsius. Conditionem hanc præter authores citatos indicavit D. Th. in 4. dist. 15. q. 1. art. 2. ad 2. & 3. & clarius Richard. in 3. dist. 20. q. 4. & 5. Medina. C. de satisfact. q. 1. Ferr. 4. cont. gen. c. 54. Soto 3. de nat. & gratia c. 6. Et ratio esse videtur, quia alius non potest servari æqualitas. Nam si ego in satisfactionem tribuam alteri id, quod illius est, ille post satisfactionem non plus habebit, quam antea; ergo non major æqualitas restituta erit, quam antea erat, sed manebit eadem inæqualitas. Unde licet intelligi possit, id, quod offertur in satisfactione, per se consideratum secundum valorem suum esse tantæ æliminationis, quantæ est ipsum debitum, tamen hoc ipso, quod non est bonum proprium, sed ipsius creditoris, non potest valere ad satisfaciendum illi, maxime ex perfecta iustitia. Est autem considerandum in hac conditione non requiri a prædictis authoribus, ut satisfactio sit ex bonis, quæ nunquam fuerunt creditoris, sed ex bonis, quæ non sint ipsiusmet creditoris, quando fit satisfactio: fieri enim potest, ut antea fuerint, & postea donata sint debitori, & in ejus proprium dominium translata, quibus ille creditori postea satisfaciatur: tunc enim non repugnabit perfectioni iustitiæ donatio prius facta, præsertim si per se antecessit absque ulla connexionem, & ordinationem ad subsequentem solutionem, nam, si hæc intercessisset, fuisset potius virtualis quædam gratuita remissio, quam satisfactio, juxta dicta superius in prima conditione. Hæc vero conditio non videtur habere locum in satisfactione Christi. Primo quia, ut dictum est, totus valor illius satisfactionis proveniebat ex divino supposito, cui fiebat satisfactio: ergo proveniebat ex bonis ipsius creditoris. Secundo quia ipsamet opera, per quæ Christus satisfaciebat, magis erant sub dominio divino, quam sub humano ipsius Christi hominis, quia omnia erant res creatæ, & titulo creationis omnia sunt Dei: propter hoc enim purus homo non potest perfecte satisfacere, quia quicquid habet, magis est Dei, quam ipsius.

Ad priorem partem dici posset, in Verbo divino esse divinitatem & subsistentiam personalem ratione distincta, & Verbum esse creditorem, seu cui fit satisfactio, ratione divinitatis, quia ratione illius est finis ultimus, & supremus legislator: exhibet autem satisfactionem, quatenus subsistit in humana natura, quam terminat præcise, ac formaliter per subsistentiam personalem, a qua propterea provenit valor talis satisfactionis: & hoc modo proprie, ac formaliter valor hujus satisfactionis non provenit ex bonis ipsius creditoris, ut sic. Hæc vero responsio, quamvis nescio quid acuminis habere videatur, tamen revera non est solida, neque satisfacit. Primum, quia licet sit verum, peccatum per se primo esse contra Deum, ut Deus est, non tamen putandum est solam divinitatem ut sic offendi, & non etiam proprie & æqualiter omnes divinas personas, sicut omnes creant, omnes præciunt. Nam licet multitudo personarum per se necessaria non sit ad hujusmodi actus, & ideo tres personæ, quatenus multæ sunt, dicantur quasi per accidens ad hujusmodi effectus: singulæ tamen, quatenus personæ sunt, per se etiam ad illos concurrunt non minus, quam si una tantum in Deo esset persona. Unde sicut intellecta una tantum persona in Deo intelligere-

2. Conditio.

Per secundam conditionem oppugnat perfectam satisfactionem.

Primus modus respondendi.

Rejicitur.

Cum gratia unionis non minuat iustitiam satisfactio- nis Christi.



geretur, offensam esse contra illam (ut ita dicam) secundum se totam, & consequenter illi eodem modo fuisse offerendam satisfactionem, ita etiam nunc intelligendum est de omnibus personis, & de persona Verbi.

Quomodo  
eadem  
persona  
qui satisfit  
sit principium  
valoris satisf  
factionis.

Dices, verum esse personam offendi, & illi satisfacere, sed tamen ratione solius naturæ, cum tamen ratione personalitatis habeat rationem satisfaciendi in humana natura. Sed contra, quia licet persona primario sit capax injuriæ vel offensionis ratione naturæ intellectualis, tamen simpliciter redundat in totam personam, non solum quia in Deo natura & persona re ipsa sunt idem, sed etiam quia ipsa personalis dignitas auget objective ipsam injuriam. Unde sicut in Christo personalis dignitas considerata ex parte satisfaciendi auget, seu confert valorem satisfactionis, ita e contrario, considerata ut objectum injuriæ, & offensionis auget illam; est ergo eadem ratio.

Secundo, ex alio capite deficit etiam illa responsio, quia opera Christi non ita habent infinitum valorem ex præciso conceptu subsistentiæ personalis, ut excludatur divinitas. Docent enim omnes citati patres, valorem hunc provenire ex hoc, quod satisfaciens est Deus, & persona infinita simpliciter, atque adeo ex conjunctione divinitatis, quia persona non habet quod sit infinita simpliciter ex præciso conceptu relationis, nisi includat totam divinitatis perfectionem: hæc autem infinitas, tota necessaria fuit in persona satisfaciendi, ut esset æqualis personæ offensi. Adde, quod juxta veriore sententiam, licet relatio divina sit extra rationem essentialem divinitatis, & ideo possit mente præcindi natura divina a personalitate, & re ipsa alicui communicari divinitas, cui non communicatur relatio: e contrario tamen relationes non possunt ita præcindi ab ipsa natura, quin in eis essentialiter imbibatur, sicut transcendens in inferioribus suis: & ideo fieri non potest, ut alicui communicetur, vel uniatur divina personalitas, quin illi etiam uniatur divinitas, licet non primo ratione sui, sed ratione personalitatis, in qua includitur. Sic ergo ab ipsa divinitate est totus valor satisfactionis Christi, in re ipsa, licet formaliter non sit ab illa, ut sic, sed ut includitur in personalitate terminante & sustentante naturam humanam.

Dico ergo, verum esse, eandem personam, quæ offensa est, esse radicem, & quasi principium formale valoris, & dignitatis satisfactionis, non tamen quatenus subsistens in propria natura est, quo sensu est falsa illa reduplicativa, Deus ut Deus est principium satisfactionis, aut valoris ejus, sed quatenus alienam naturam sustentat, & illam & ejus opera nobilitat, & ut sic non habet rationem creditoris, nec personæ cui satisfacit; nam hoc habet per se primo ratione suæ propriæ naturæ, & quatenus in illa subsistit: habet ergo rationem satisfactoris eadem illa persona, quatenus in aliena natura subsistit, quod nihil minuit de perfecta iustitia, sed supponit gratiam factam humanitati assumptæ. Quod ita expono, nam licet opera hujus hominis habeant suum valorem ex dignitate personæ, tamen principaliter illa opera cum toto suo valore sunt sub proprio dominio hujus hominis, ut homo est, & non minus sunt honorifica Deo, & divino Verbo, quam si essent a supposito omnino distincto: sed tota ratio satisfactionis perfectæ hinc sumitur: ergo hoc omnino satis est, ut magis explicabitur.

Ad posteriorem partem responderi solet a multis, si contingat unam rem esse sub plurium dominio, ita ut tam perfecte sit singulorum in solidum, ac si non esset alterius, in eo casu recte fieri posset, ut aliquis ex perfecta iustitia satisfaciat alteri ex bonis suis, etiam si simul sint alterius; ita vero dicunt accidere in operibus Christi. Sed hæc responsio nec satis intelligi potest, nec convenienter proposito accommodari. Quanquam enim in tribus personis hoc reperiatur, ut omnes simul, & singulæ in solidum habeant perfectum dominium omnium rerum creaturarum, quia habent unicam voluntatem, per quam omnibus dominantur, & ita etiam habent unum dominium, sicut unam naturam; tamen in personis habentibus distinctas voluntates, & consequenter distincta dominia, intelligi non potest, uniuscujusque dominium ita esse perfectum, ac si illa sola haberet dominium. Hac enim ratione inter alias repugnat intelligere plures Deos, quia vel unius dominium ab alio penderet, & ita illud esset imperfectum, & non divinum, vel neutrum

SHARPEZ. Tom. XVI.

dependeret ab alio, & sic utrumque esset imperfectum, quia hoc ipsum habere dominii socium, qui a mea voluntate non pendeat, minuit perfectionem dominii. Et revera si in hominibus hoc consideremus; si plures fingantur ita domini unius rei, ut unusquisque possit illa uti suo arbitrio independenter ab alio, hoc ipso necesse est, unumquemque eorum esse minus perfecte dominum, quam si esset solus; poterit enim interdum invitus privari usu talis rei, si ab alio præveniatur. Unde concluditur, si alicui simpliciter debeantur decem, non posse illi perfecte satisfacere dando illi decem, quæ jam erant sub illius dominio, quantumvis simul esse fingantur debitoris, quia ut sic minoris æstimationis sunt, quam si denuo simpliciter solverentur.

Dices: multi possunt esse debitores in solidum, cur ergo multi domini simpliciter esse non possunt? Respondetur, quia multi debitores dicuntur in ordine ad solutionem ejusdem debiti, disjunctim (ut ita dicam), non copulatim, quia unusquisque tenetur solvere alio non solvente, si tamen unus solvat, ceteri liberi manent, nisi fortasse interdum astringantur ad rescindendam aliquam partem ipsi solventi juxta debiti modum & rationem: at vero si essent plures domini in solidum, ita ut unusquisque plenum jus, & dominium haberet ejusdem rei, oporteret simul habere tale dominium, quod in dominiis ejusdem rationis, & quorum unum non pendet ab alio, repugnantiam involvit, ut dictum est. Tandem quod illa responsio non possit satisfacere, patet: nam dominium, quod Christus ut homo habet in quacunque re, comparatum cum divino dominio, in solidum dici non potest, cum inferioris ordinis sit, & ab alio dependeat, quod negare esset omnino contra rationem, imo impossibile. Quia licet Christus sit suppositum divinum, tamen voluntas ejus creata subdita est Deo, ac pendet ab illo, & similiter operationes ejus, & consequenter omne dominium, quod in illis, aut per illas habet. Tum præterea quia licet Christus ut homo sit dominus suarum operationum, & illas offerat Patri in satisfactionem, non tamen præterea illi confert novum aliquod dominium, nec se privat proprio suo. Nihil ergo refert illa distinctio duplicis domini in solidum ad explicandam iustitiam hujus satisfactionis.

Alii respondent, simpliciter negando, satisfactionem Christi, ut sic, esse sub dominio Dei, vel actionem Christi ea ratione, qua infinitatem habuit, fuisse Deo debitam, aut ejus dominio subiectam. Dupliciter enim operatio satisfactoria Christi considerari potest; primo in facto esse, id est, ut quædam res creata & producta: & ut sic certum est, esse sub dominio Dei, quia cum sit omnipotens, est etiam supremus dominus omnis entis creati: hoc tamen nihil refert ad iustitiam Christi, quia satisfactio, ut sic, non est in operatione, ut est in facto esse, sed ut egreditur ab agente. Alio modo considerari potest operatio Christi satisfactoria, ut est in fieri, & quatenus sub ea ratione habet infinitum valorem moralem; & hoc modo negant esse sub dominio Dei, quia ut sic habuit valorem a divino supposito, vel quatenus ab eo egrediebatur, vel quatenus in ipsum quodammodo reflectebatur, quando Christus sese humiliabat, & subiciebat Patri: divinum autem suppositum sub nullius est dominio: ergo nec operatio ejus sub prædicta ratione, nec valor satisfactorius ejus: & ita nihil obstat divinum dominium, quominus in illa satisfactione sit perfecta iustitia.

Hæc tamen doctrina mihi valde displicet, quia omnino falsum videtur, actionem Christi creatam, quacunque ratione spectetur, non esse sub dominio Dei. Quod ita ostendo, nam, aut loquimur de divino Verbo, cum tota sua divinitate, quod est principium quodammodo procedunt illæ actiones; vel loquimur de actionibus ipsis, quæ a verbo per humanitatem & voluntatem creatam procedunt; vel loquimur de valore infinito talium actionum in ratione meriti & satisfactionis: tantum enim hæc tria hic intelligi possunt: nam de actibus increatis divinæ voluntatis nullam oportet facere mentionem, cum nec illi meritorii vel satisfactorii sint, neque ex illis sumatur ratio, aut valor meriti vel satisfactionis meritorum Christi, ut in superioribus visum est. Ex illis autem tribus certum est, Verbum divinum, & omne id, quod ad divinitatem ejus pertinet, sub nullius dominium

Non pos  
sunt per  
fecte esse  
mult  
ejusdem  
per d. mi  
in soli  
dum.

Differen  
tia inter de  
bitores &  
dominos  
respetu  
unius.

Alia re  
sponsio  
refellitur.

Refellitur  
quorundam  
responsio.

Adiones  
Christi,  
quæ  
ratione  
spectata,  
sub divi  
no erant  
dominio.



cadere, sed ipsum esse dominum omnium. Sed hoc nihil ad præsentem difficultatem refert, tum quia actio vel satisfactio Christi & valor ejus, nec sunt Verbum divinum, nec pertinent ad divinitatem ejus, sed sunt aliquid manans a Verbo divino: hæc autem justitia & æqualitas, de qua agimus, non constituitur immediate ac formaliter in persona Verbi, vel ejus divinitate, sed in actione habente valorem a persona Verbi, ut a principio & radice, seu extrinseca forma: tum etiam, quia, si ratio hujus justitiæ immediate fundanda esset in dignitate seu valore increato divini Verbi, ac si per illum formaliter solvendum esset debitum & constituenda æqualitas, magis impediretur veritas justitiæ ex eo, quod, licet Verbum non sit sub dominio Dei, est tamen ipsemet Deus, cui facienda erat recompensatio. Deinde de actione Christi, quamvis sit actio Verbi per humanitatem operantis, certum est esse sub dominio Dei, sive in facto esse, sive in fieri consideretur, quia sub utraque ratione est aliquid creatum; quod, quia de operatione in facto esse conceditur, probatur etiam de actione in fieri, tum quia essentialiter pendet a Deo præbente concursum suum humanitati; tum etiam quia est quid temporale, quod de novo incipit esse; tum denique, quia operatio Christi ut in fieri non est Verbum ipsum, imo neque est Christus ipse; sed in Christo nihil est increatum nisi verbum vel divinitas ejus: ergo operatio in fieri non est aliquid increatum: ergo creatum quid.

De tertio, scilicet, de valore illius actionis, potest similis ratio formari, quia supposita Incarnatione, totus valor & dignitas illius actionis creatum quid erat. Quod probo primo, quia ille valor aut dignitas non est ipsemet valor infinitus Verbi seu divinitatis, qui dici potest valor seu dignitas per essentiam, quia ille valor ut sic non est, qui formaliter & immediate confert operi rationem satisfactionis, aut infinitatem in eo genere, sed est ipsa infinitas in genere entis, & per essentiam, quam habet Verbum divinum, quam non communicat actui suæ humanitatis. Neque enim actus voluntatis creatæ Christi est infinitus per essentiam: nec est tantum bonum, quantum est Verbum ipsum: ergo valor talis actus est quid participatum ex unione & conjunctione ad Verbum: ergo est quid creatum, atque adeo sub dominio Dei. Secundo in ipsamet Christi humanitate, quamvis Verbum illi unitum sit simpliciter infinitum, nihilominus unio humanitatis ad Verbum est aliquid creatum & sub dominio Dei, quamvis in suo genere illa sit infinita dignitas talis humanitatis. Quod si quis dicat, hoc esse verum de unione illa, quatenus est physicus & realis modus humanitatis, non vero quatenus a Verbo unito sanctificatur illa humanitas, & habet quandam inestimabilem dignitatem moralem. Hoc est etiam sine dubio falsum, quia etiam illa sanctificatio est minor, quam sit sanctificatio per essentiam, quia illa humanitas, etiam ratione unionis & Verbi uniti, non redditur tam sancta, quam sit divinitas: illa ergo sanctificatio etiam est per participationem, atque adeo sub dominio Dei, multo ergo magis sanctificatio actuum Christi erit sub divino dominio.

Nec refert, quod hic valor seu dignitas morale quid sit, & non physicum, quia etiam ea, quæ moralia sunt, cadunt sub dominium humanum, ut homo est dominus jurisdictionis, quamvis jurisdictio tantum sit quid morale: ergo multo magis cadent sub dominium Dei: ergo etiam hic valor, quamvis morale quid sit, cadit sub dominium Dei. Unde nullius momenti est, quod quidam dicunt, his argumentis recte probari, totum illum valorem entitative esse sub dominio Dei, non tamen consideratum per respectum ad suppositum, a quo procedebat: est enim hæc aperta repugnantia, quia ille valor, sive physice, sive moraliter consideratus habet suum esse, suamque quantitatem, per respectum ad Verbum, & ideo non potest esse secundum suam entitatem sub dominio Dei, quin etiam sit secundum respectum ad Verbum. Præterea, hoc non repugnat, quia, licet Verbum sit infinitum simpliciter, tamen id, quod habet respectum ad Verbum, non est infinitum simpliciter, sed in genere satisfactionis vel meriti, quæ est ratio creata, & pendens a Deo: ergo totus ille valor, etiam ut moraliter infinitus per respectum ad Verbum, cadit sub dominium Dei. Atque hinc conficitur tertium efficax argumentum, nam operationes Christi etiam prout in fieri, &

secundum totum suum valorem cadunt sub dominium voluntatis creatæ Christi: ergo multo magis sub dominium voluntatis divinæ: nihil enim potest esse sub dominio creaturæ, quod non sit sub dominio Dei, præsertim si illud sit aliquid bonum. Antecedens patet, nam Christus ut homo per voluntatem creatam fuit dominus omnium meritorum suorum & satisfactionum: unde etiam fuit dominus illorum quatenus illa infinita sunt, imo non posset infinite mereri, nisi illud meritum cum tota sua quantitate & dignitate posset in voluntate ejus, quod est esse sub dominio ejus. Item Christus erat Dominus suæ gratiæ non tantum, ut erat qualitas quædam finita, sed etiam ut erat aliquo modo infinita per dignitatem moralem infinitam, quam habebat ex conjunctione ad Verbum, quia suo arbitrio poterat illa uti secundum totam illam dignitatem in omnem rectum usum.

Tandem ultimo, actio Christi, ut erat subjectio ad Patrem, erat debita Deo, vel ratione gratitudinis, vel obedientiæ, vel religionis, vel etiam justitiæ in satisfactionem pro humano genere: ergo illa actio cum toto valore suo erat quid subjectum divini dominio & imperio. Antecedens constat, quia supposita incarnatione hic homo Christus debebat Deo per humanitatem, obedientiam, reverentiam, & cæ.

Responderi potest, hujusmodi actus Christi, prout pertinebant ad humanitatem, eamque Deo subiciebant, fuisse debitos Deo, non tamen prout aliquo modo transibant ad Verbum: unde habebant infinitatem. Sed vix intelligitur, quid sibi velit hæc responsio: primo quidem, quia opera Christi, ut supra dicebam, non tam habent infinitatem absolutam in genere satisfactionis & meriti a persona Verbi, ut habet aliquo modo rationem objecti, seu materiæ, circa quam versabatur actus, quo Christus sese Patri offerebat & humiliabat, sed ut est persona operans, & per se sanctificans actionem.

Secundo ac præcipue, quia illa actio non transibat in Verbum secundum se, sed præcise quatenus erat suppositum humanitatis, & per denominationem ab illa, quia alias non fuisset actio conformis rationi. Verbum enim secundum se non est subieibile alteri, unde nec potest esse objectum seu materia, circa quam versetur rationabilis actus humilioris vel subjectionis; solum ergo poterat hic homo Deus subicere vel offerre se alteri, subiciendo vel offerendo suam voluntatem creatam, suum corpus, animam, &c. & quia hæc omnia sunt aliquid Verbi per unionem, ideo dicitur Verbum offerri & subdi per communicationem idiomatum; ergo illa actio Christi, quatenus per illam se humiliabat & subiciebat Deo, erat illi debita, omnibus titulis supra positis, & consequenter erat etiam sub dominio ejus.

Vera igitur responsio sumenda videtur ex differentia quadam inter satisfactionem & restitutionem. Restitutio enim versatur in rebus datis & acceptis, quia per eam reparatur damnum illatum alteri in bonis suis, satisfactio autem versatur in actionibus, quia per eam intenditur injuriæ recompensatio; hinc fit, ut in restitutione multum pendeat æqualitas ex dominio, quod restituens habet, vel in alterum transferre potest, ad satisfactionis vero æqualitatem hoc non est per se necessarium, sed sufficit illud dominium, quod est intrinsecum operi libero. Satisfactio enim non fit, nisi per opus liberum, cujus operans est dominus, quia ratio satisfactionis non consistit in translatione domini alicujus rei, sed in hoc solum, quod tantum reverentiæ & honoris impendatur, quantum injuriæ illatum fuit. Et ideo quod Deus habuerit dominium actionum Christi, non repugnat cum justitia perfecta illius satisfactionis. Dices, hoc ipsum, aliquem, scilicet, honorari rebus suis, videtur pugna-re cum æqualitate satisfactionis. Respondetur, actum proprie non esse satisfactionem ratione domini, quod Deus habet in illum, sed ratione domini, quod habet operans ipse, erat enim Christus verus Dominus suorum actuum, quos in Dei honorem & satisfactionem offerebat: & hoc sufficit ad optimam proportionem in hac satisfactione necessariam. Nam etiam actus peccati, quatenus res quædam est, est sub dominio Dei, ut vero est a proximo operante, qui suum etiam dominium in illum habet, cedit in injuriam Dei. Et eodem modo invenitur proportio inter meritum, & præmium, qui enim meretur, non donat aliquid ei, apud quem meretur, neque

Differentia inter satisfactionem & restitutionem.

Objectio.

Solvitur.



que hoc postulat meriti ratio, sed sufficit, ut operans habeat dominium suorum actuum, quos exercet, & quasi expendit in voluntate illius implenda, vel honorando illo, apud quem meretur, etiam si alius actus illi cadant sub dominium ejusdem, & eodem modo præmium respondens meritis ita datur a Deo ipsi merenti, ut semper tamen maneat sub dominio Dei.

3. Condi-  
tio.

Tertia conditio justitiæ perfectæ poni solet, ut solutio vel satisfactio fiat ex aliis indebitis. In hac etiam conveniunt omnes cit. authores cum D. Th. Scot. Durand. & aliis. Et eandem etiam habet Altisi. l. 3. summæ tract. 1. c. 8. & Guilel. Parisi. l. Cur Deus homo c. 7. & Anselm. l. 1. Cur Deus homo c. 20. hac potissimum ratione probat, purum hominem non potuisse juste pro hominibus satisfacere. Videtur autem eadem ratio habere locum in satisfactione Christi, quia etiam ipse debebat Deo, quidquid in honorem illius operari poterat, multis aliis titulis. Primum titulo gratitudinis, propter infinita beneficia sibi, ut homini, vel certe suæ humanitati collata. Cum enim esset verum illius suppositum, exercere debuit manus & obligationem veri suppositi, atque adeo gratias referre Deo pro beneficiis in illa natura susceptis, sicut legimus in Evangelio Christum dominum sæpe fecisse. Deinde titulo obedientiæ, posset enim Deus exigere a Christo homine omnia opera suæ humanitatis solum propter honorem suum, & ut suæ voluntati obtemperaret. Quod si nunc de facto non ita exegit, illa est quædam gratia ac liberalitas, quæ minuit justitiæ perfectionem.

Respondetur primum, conditionem hanc, ut vera & solida sit, debere intelligi de debito justitiæ, & respectu ejusdem ita, ut solutio debiti, ut justa sit & perfecta, debeat fieri ex iis, quæ non sunt debita eidem alio titulo justitiæ. Quod autem sint debita alio titulo gratitudinis, obedientiæ, aut misericordiæ inter homines, non minuit perfectionem justitiæ. Hoc patet primo humanis exemplis. Nam sæpe solvendo debitum justitiæ ad æqualitatem, implet homo præceptum: & posset simul verum & formale actum obedientiæ exercere, & misericordiæ, vel gratitudinis, sine necessitate vel occasio exerceundi has virtutes simul concurreret. Et ratio est, quia hujusmodi alii tituli, vel debita non minuunt æqualitatem justitiæ. Hæc vero conditio, de qua modo agimus, in tantum potest esse necessaria ad perfectionem justitiæ, in quantum ad perfectam æqualitatem potest requiri. At vero quando duo debita justitiæ concurrunt, maxime respectu ejusdem, non servatur perfecta æqualitas, si uno & eodem pretio solvantur: quia in bonis temporalibus, si multiplicentur debita justitiæ, augetur res ipsa, quæ debetur. Ut, si debeo alteri decem ratione mutui, & alia decem ratione alicujus venditionis, jam simpliciter debeo viginti ex justitia: & ideo non potest hoc modo uni debito perfecte satisfieri per rem debitam alio titulo justitiæ: & idem est, quoties multiplicatis titulis, vel rationibus debiti, augetur res ipsa, quæ debetur. Unde etiam fit hoc solum procedere, quando pretium, quod solvitur, & multis titulis justitiæ debetur, finitum est, quia tunc non videtur posse ad æquate respondere illi duplici debito. Quamquam, si contingeret rem omnino eandem multis titulis deberi, fieri posset solutio perfecte justa reddendo eandem rem, & per illam satisfaciendo omnibus illis debitis: quod in hominibus vix contingere potest respectu ejusdem: tamen respectu diversorum, potest intelligi casus, in quo hoc accadat. Ut si quis accipiat ab uno condignum stipendium pro aliquo labore, v.g. ut Romam eat, & nihilominus ab altero pro eodem labore stipendium accipiat, eadem actione utrique plene satisfaciatur, quia revera sufficienter exequitur omne id, ad quod ex pacto, vel propter stipendium tenetur, tam respectu utriusque, quam respectu singulorum. Et eodem modo potest quis ire, v.g. Romam solvendo debitum justitiæ, si ad hoc teneatur ratione mercedis acceptæ, & nihilominus eodem actu votum implere, si fortasse illud omiserat.

Dices; ergo non est major ratio de variis titulis justitiæ, quam de debito justitiæ conjuncto cum debito alterius virtutis, v.g. obedientiæ aut gratitudinis, quia utroque modo potest obligatio cadere in res, vel actiones diversas, & tunc non satisficit utrique obligationi una tantum re aut actione, ut si quis ex mutuo debeat decem, & alia decem ex voto eidem pio loco, non satisficit dando

Suarez. Tom. XVI.

decem. Utroque item modo potest obligatio cadere in eandem actionem & augere obligationem, & tunc satisficit utrique obligationi eodem actu, ut exemplis adductis, & aliis similibus facile ostendi potest. Respondetur, differentiam in his consistere: primo, quod obligationes justitiæ per se non conjunguntur in eadem actione, nec una proprie respicit aliam, ut materiam vel objectum, ut quando ex obedientia aut voto obligor ad justitiam servandam. Deinde obligationes justitiæ per se augent quantitatem debiti, moraliter loquendo; quod si interdum non ita contingit, est omnino per accidens, quia vel actio est indivisibilis, & multiplicari non potest, ut, si quis multis justitiæ titulis teneatur ducere aliquam in uxorem; vel quia respectu diversorum, tota actio est quasi indivisibilis, & est quasi tota in toto, & in singulis: quia ita est utilis singulis, ac si pro uno tantum fieret, ut in exemplo adducto de adveniente Romanam. At vero obligatio alterius virtutis adjuncta obligationi justitiæ, per se loquendo non auget debiti quantitatem, nisi forte per accidens, quando ex directa intentione formali & virtuali fertur in aliam materiam, ut in exemplo illo de voto & mutuo, nam si esset votum solvendi mutuum, unica solutione satisfaceret: si autem ex intentione voventis cadit votum in materiam liberam ab alia obligatione, tunc augetur quantitas materiæ, quia fertur obligatio ad rem diversam, non ex se & ex natura sua, sed ex intentione operantis: præterquam quod illa obligatio ex promissione habet quandam rationem justitiæ. Propter has ergo causas dicimus simpliciter, hanc conditionem per se habere locum in titulis justitiæ, & non vero in aliis.

In proposito ergo, primo dicendum est, quamvis Christus dominus ex obedientia, vel gratitudine ad Deum; posset illi debere actiones, vel passiones suas, non tamen ex debito justitiæ: & ideo debitum illud non pugnat se cum perfectione justitiæ. Quæ responsio sumi potest ex August. 13. de Trinit. c. 14. & Anselm. lib. 2. Cur Deus homo, c. 19. dicentibus, potuisse Christum per mortem suam juste satisfacere, quia non debebat illam: quomodo sæpe patres loquuntur: intelligi autem debet de debito justitiæ, non obedientiæ, vel gratitudinis. Secundo dicendum est, tam infinitum esse valorem operum Christi, ut sufficere possent ad solvendum omne debitum, etiam si infinitis titulis deberentur. Nam sicut propter infinitum valorem, tantum intensive valet unum opus, quantum omnia, ut supra dicebam, ita tantum valet pro multis debitis, quantum pro uno. Quod confirmatur & explicatur: nam unum opus Christi sufficere poterat ad gratiarum actionem pro omnibus beneficiis susceptis, & unum aliud opus ad satisfaciendum pro hominibus: sed tantum valoris habet quodlibet illorum, sicut omnia simul: ergo multiplex ratio debiti non potuit minuere perfectionem justitiæ Christi.

Et ex his tandem obiter intelligitur, quo modo etiam respectu hominum, qui Christum præcesserunt, fuerit satisfactio Christi omnino justa, quamquam illis fuerint remissa peccata, antequam esset exhibita satisfactio. Hujus enim ratio multiplex sumi potest ex dictis. Prima, quia totum hoc potuit condigne cadere sub infinito valore operum Christi, præsertim cum respectu præscientiæ Dei ita fuerint semper præsentia, ut possint dici exhibita. Secunda, quia hoc totum potuit venire in pactum, & contineri sub promissione salva integritate justitiæ. Tertia, quia illa solum fuit quasi quædam anticipata solutio, quæ, si respiciat rem æqualem, non minuit perfectionem justitiæ, ut patet in venditione, quæ pecunia credita sit. Et hæc tenus de justitia Christi.

Qualis  
fuerit  
Christi  
satisfac-  
tio re-  
spectu eo-  
rum, ut  
ipsum  
præcesse-  
runt.

## SECTIO VII.

*Utrum purus homo potuerit esse sufficiens ad redimendos alios homines ex perfecta justitia.*

Hæcenus ostensum est, incarnationem fuisse aptissimum & sufficientissimum medium ad perfectum modum humanæ redemptionis. Sed nondum constat fuisse necessarium, donec ostendamus nullum alium præter Deum hominem potuisse tantum opus perficere. Duo autem alii modi intelligi possunt, quibus id fieret. Prior est, si unusquisque posset pro seipso satisfacere: de quo



sektionem sequenti dicemus. Alter est, si unus homo purus constitueretur, qui pro omnibus satisfaceret, de quo in presenti dicendum est. Unde constat, purum hominem hoc loco significare personam creatam in quocumque statu, vel naturæ, vel gratiæ constitutam: ut quamvis de puro homine loquamur, tamen quæ dicenda sunt, de quacumque pura creatura eodem modo possint intelligi.

Primo ergo omnes Theologi conveniunt, non potuisse purum hominem, quantumvis innocentem, & gratum Deo, ex perfecta iustitia pro hominibus satisfacere: quæ etiam est communis Patrum sententia, ut ex dictis in præcedentibus quæstionibus facile constat. Sed in hac veritate explicanda, & ratione reddenda, valde dissentiunt inter se. Nam Scotus, Durandus, Gabriel, & Joannes de Medina, locis supra citatis sektionem 3. non aliam rationem reddunt, nisi quia omnis satisfactio apud Deum est ex sola acceptatione. Isti tamen authores fere nihil distinguunt inter satisfactionem possibilem puro homini & Christo, quantum ad valorem & rationem iustitiæ: in quo valde errant, ut dictum est, & dicitur.

Secunda opinio est, purum hominem non posse pro aliis ex perfecta iustitia satisfacere, quia eius opera non possunt prodesse aliis ex vera & propria iustitia, sicut non potest unus homo purus aliis mereri de condigno, quamvis possit sibi ipsi. Cujus ratio esse videtur, quia gratia creata non habet vim ex natura sua, ut per actus suos in alios efficiat, sed tantum ut seipsam perficiat, donec ipsam habentem perducatur ad ultimum finem. Est enim gratia creata semen gloriæ, respectu habentis ipsam, non respectu aliorum: & ideo de facto nulla pura gratia creata hoc habet, quia hoc non convenit illi ex natura sua. Ex hoc ergo fit, ut opera procedentia a sola huiusmodi gratia non habeant valorem, nec condignitatem ad satisfaciendum pro aliis, & consequenter, quod numquam in illis possit fundari vera iustitia. Nam licet Deus possit gratis illa acceptare, vel illis esse contentus ad remittendum aliis peccata, tamen hæc acceptatio non addit valorem operi: unde nec fundari potest in tali valore; non ergo esse potest ex iustitia.

Tertia opinio est, posse purum hominem in gratia constitutum pro aliis satisfacere ex iustitia, & ad æqualitatem rei ad rem, non tamen cum tota perfectione, seu rigore iustitiæ. Ita Cajet. hic, & idem sentit Palud. in 3. d. 20. q. 2. & Soto lib. 3. de nat. & grat. c. 6. & in 4. d. 1. q. 5. art. 4. dist. 19. q. 1. art. 2. ad 1. Indicat etiam Vega lib. 3. in Trid. c. 5. & lib. 7. c. 9. Fundamentum prioris partis est, quia opus bonum, præsertim charitatis, procedens a gratia sanctificante habet tantum bonitatis seu valoris ad satisfaciendum, sicut peccatum ad offendendum, quia sicut peccatum est contra Deum, ita hæc satisfactio placat Deum, & procedit a persona jam digna effecta per gratiam, quæ cum sit participatio divinæ naturæ, sufficiens principium esse videtur, ut tribuat actui sufficientem valorem ad compensandam divinam injuriam. Unde ulterius fit, si Deus conferret hanc gratiam puro homini, & illum constitueret, ut esset caput cæterorum, & nomine eorum satisfaceret, illum habiturum fuisse sufficientem vim & efficacitatem ad satisfaciendum ex iustitia. Non esset autem, inquit hi auctores, illa iustitia omnino exacta & rigorosa, quia desicerent illi tres illæ conditiones superiori dubitatione positæ, quia tota fundaretur in gratia, & fieret ex bonis ipsius creditoris, & aliis debitis. Et revera ab hac sententia nihil fere discrepant Scotus & alii in prima sententia citati, sed quod ad purum hominem attinet, idem fere dicunt, licet aliis verbis.

Suppono quæstionem hanc procedere de potentia absoluta, quia de lege ordinaria, & de facto certa res est, nullum præter Christum posse aliis mereri de condigno, nec pro illis similiter satisfacere, saltem quoad culpam: nam de satisfactione quoad poenam temporalem dubia res est, quæ ad propositum hoc non spectat, sed ad materiam de poenitentia. Hoc vero, quod supponimus, ex materia de gratia constat, & infra agentes de merito Christi, & de munere mediatoris, & redemptoris idem ostendemus. Et tractat bene August. lib. 1. de peccat. merit. & remiss. c. 14. & tractat. 4. & 5. in Joan. Suppono deinde, nullum hominem carentem gratia Dei posse condigne Deo satisfacere pro ullo peccato, præsertim mortali, quod de fide certum est contra Pelagium, ut

constat ex definitione Concil. Triden. sess. 6. & ex aliis multis, quæ in materia de gratia traduntur. Et quamvis hæc doctrina fidei proprie intelligatur de facto & de potentia ordinaria, tamen ex ea sequitur idem esse de potentia absoluta, quia ex illa habetur, hominem esse ad hoc insufficientem per vires naturales, quæ non possunt esse majores in homine, etiam de potentia absoluta. Implicat enim hominem elevari ad altiorum ordinem, vel potestatem superantem totum ordinem & potestatem naturæ, & tamen quod illam potestatem recipiat per vires naturæ. Et hoc a fortiori constabit ex iis, quæ dicemus de homine sanctificato per gratiam, de quo noster sermo est.

Dico jam primo, de potentia absoluta fieri posse, ut homo purus innocens & sanctus satisfaceret de iustitia, & aliquo modo de condigno pro peccatis aliorum, etiam totius generis humani. Hanc conclusionem præter authores citatos pro 1. & 2. sententia, indicat D. Th. hic, clarius infra q. 64. art. 4. idem in 4. dist. 15. Palud. in dist. 20. Soto in 4. dist. q. 5. art. 4. dist. 19. art. 3. l. 3. de natura & gratia c. 6. Vega lib. 3. in Trid. c. 15. Et idem sentit Cajet. hic, & alii authores infra citandi; & videtur probari sufficienter fundamento tertiæ sententiæ. Nam in primis nullam contradictionem implicaret, Deum constituere purum hominem iustum, qui esset caput hominum in ordine gratiæ, quam in alios posset aliquo modo influere. Quæ enim repugnantia, aut contradictio in hoc potest inveniri? Et secundo explicatur a simili: nam si solam naturam rei spectemus, etiam si Adam futurus esset pater, & fons omnium hominum in esse naturæ, non inde ex natura rei consequeretur, ut peccatum ejus ad posteriores derivaretur, ut ex materia de peccato originali constat, & per sese videtur satis perspicuum, & nihilominus fieri potuit ordinatione divina, ut omnium posterorum voluntates, in ejus arbitrio & voluntate moraliter ponerentur, & quoad hoc Adam esset caput cæterorum: & hac ratione illo peccante omnes in illo peccare censentur, & postea ab illo geniti, merito ac iuste illius culpam contrahunt: ergo pari ratione potuisset Deus facere aliquem hominem caput aliorum in esse gratiæ, & omnium voluntates in illo ponere, ut illo merente & satisfaciente, omnes in illo & per illum satisfacere existimarentur, sicut nunc dicuntur peccasse in Adam. Cur enim dicemus potuisse Deum efficere, ut unus purus homo posset nobis nocere, si vellet: & non ut alius simili vel fortasse majori gratia & auxilio præditus non posset nobis prodesse? Tercio, ratione ex re ipsa sumpta ita explicatur, quia posset Deus puro homini dare tantam gratiam & gloriam, quantam contulit animæ Christi, & cum eo pacisci, seu illi præcipere, ut se suasque omnes actiones ad bonum aliorum hominum referret, illisque mereretur, & pro illis satisfaceret, illique promittere, aliis propter ipsum se benefacturum, & remissurum peccata, si ipse bene se gereret, & conveniret gratiæ & muneris susceptis operaretur. Nam in hoc toto facto nihil est impossibile, nihil incongruum. Hoc autem posito facile intelligitur, opera illius hominis futura fuisse sufficientia ad merendum & satisfaciendum pro aliis ex aliqua iustitia: quia illa opera de se haberent aliquam proportionem cum illo effectu non quidem perfectam, ut statim dicam, sed nec omnino nullam, propter dignitatem gratiæ & charitatis. Rursus intercedebat promissio sub conditione talium operum, & antecedens ipsa opera, quæ tunc fierent fundata in tali promissione: ergo illis deberetur merces, seu effectus promissus, non ex simplici fidelitate, sed ex iustitia, ut dubio 5. in simili dicebam.

Et hæc ratio dissolvit facile fundamentum secundæ sententiæ. Nos enim non dicimus, solam acceptationem extrinsecam, quæ intelligitur sublevari opus ipsum, posse efficere, ut opus, quod aliis non sufficeret ad inducendam obligationem iustitiæ, propter talem acceptationem sufficiat, quia huiusmodi acceptatio, cum intelligatur supervenire operi, nec physice, nec moraliter mutat illud, sed quale illud est, tale ipsum acceptat, & illud supponit quasi objectum suum: sed loquimur de promissione & pacto, quod antecedit opus, & fit ab operante ianitante promissioni factæ sub conditione talis operis: huiusmodi enim promissio multum sine dubio conferre potest ad moralem efficaciam, & valorem operis: primo ratione generali, quia opus morale idem

Varia-  
dorum  
sententiæ.

1. Conclusio.

1. Ratio.

Ad fundam-  
entum  
secundæ  
sententiæ.



dem in substantia propter diversas circumstantias potest moraliter habere diversum valorem vel efficaciam: hæc autem circumstantia, de qua modo agimus, multum refert ad moralem operis æstimationem: quia hinc habet quis vim inducendi obligationem, & debitum ex iustitia, ut inter homines etiam patet. Nam si quis sine pacto aut legis autoritate in alterius vinea laboret, non potest ex iustitia obligare alium ad mercedem solvendam; potuisset autem, si laborasset ex conventionem vel legis autoritate, & ratio est, quia opus iustitiæ multum pendet ex simili circumstantia. Secundo hoc evidenter ostendit exemplum de peccato Adæ, qui condigne meruit omnibus posteris æternam damnationem ratione illius pacti, & legis divinæ, quam transgressus est, & propter conditionem etiam & statum personæ. Unde arguitur tertio, quia personæ dignitas multum confert ad valorem morale operis, tametsi illa dignitas extrinseca sit, & moralis potius quam physica, ut est, v. g. Regia vel Pontificia dignitas: & tamen potest intelligi illa dignitas capitis a Deo ipso donata: ergo opera personæ constituta in illa dignitate gratiæ, & facta sub illa promissione & pacto Dei, merito intelligerentur habere majorem valorem, & efficacitatem moralem. Et ita satis videtur demonstrata assertio posita. Nec video, quid amplius possit contra illam probabiliter objici.

2. Concil.

Dico secundo, nihilominus talis satisfactio puri hominis non esset æqualis offensæ divinæ, unde neque esset ex perfecta iustitia, nec posset cum satisfactione Christi in valore conferri. Conclusio hæc tres habet partes, inter quas postrema videlicet, huiusmodi satisfactionem puri hominis non posse in perfectione conferri cum Christi Domini satisfactione, omnino est certa ex his, quæ superius ex Scriptura, & patribus citavimus: & patet aperte, quia ostensum est, opera Christi esse infiniti valoris simpliciter in genere meriti & satisfactionis; opera vero illius hominis non possent habere tantam valoris quantitatem, cum persona operans non esset infinita simpliciter, & non sit aliud caput, ex quo infinitus valor possit oriri. Denique omnia, quæ dicemus, hanc partem fortiori ratione confirmabunt.

Secunda vero pars, scilicet in illa satisfactione puri hominis non potuisse perfectam iustitiæ rationem inveniri, communis etiam est, ut diximus, & præter citatos authores eam docent Abulensis in prologo Matth. q. 17. & in c. 34. Exod. q. 7. & Altisiodoren. lib. 3. summæ tract. 1. c. 8. Alensis 3. p. q. 1. memb. 6. art. 1. & 2. Bonav. in 2. distinct. 20. q. 3. & 4. Richardus q. 4. & 5. Driedo de captivitate & redemptione generis humani, tractatu 2. c. 2. p. 3. art. 6. in 4. sententia. Et sumitur ex illis testimoniis Patrum, quæ dubio 2. & 3. allata sunt ad confirmandam necessitatem incarnationis ad redemptionem ex perfecta iustitia. Non enim solum dicunt patres unum Christum potuisse hoc perfectius efficere, sed etiam negant aliquem alium hoc potuisse ex perfecta iustitia præstare. Addi vero in huius confirmationem possunt optima verba Adriani I. in Epistol. ad episcopos Galliæ & Hispaniæ, contra eos, qui Christum filium Dei adoptivum appellabant. *Quomodo per illius gratiam nos sumus adoptati, si ipse consors nobis in adoptionis gratia fuit? credatur ergo (quod dici nefas est) particeps etiam nobis in causa peccati. Nam sicut peccata nostra non tolleret, si ipse peccatum haberet: ita adoptionis gratiam nobis non tribueret, si ipse propter hominem, quem assumpsit sine sorde peccati, necessarium habuerit, ut gratiam adoptionis acciperet.* Cum ergo puro homini necessaria sit gratia adoptionis, non potest ille eandem gratiam aliis obtinere, utique ex perfecta iustitia, hoc enim modo necessario intelligenda sunt verba Pontificis, nam imperfecto modo dubium non est, quin filius adoptivus aliis possit adoptionem mereri. Atque eadem ratione, & in eodem sensu usi sunt postea Patres Concilii Francofordienfis in libro Sacrosyllabo dicentes. *Quo igitur pacto nobis adoptionem filiorum tribuit, si ipse necessarium eguit, ut sibi haberet?* Ratione argumentor primo ex conditionibus perfectæ iustitiæ supra tractatis. Satisfactio enim ex perfecta iustitia oportet, ut procedat ex propriis viribus, & ex propriis bonis satisfaciendis, & alio nomine non debitis: sed omnis satisfactio puri hominis necessario fundari debet in gratia, & esse ex bonis ipsius Dei, & per actus illi debitos multis aliis ti-

tulis: ergo repugnat esse ex perfecta iustitia. Hæc ratione utuntur Anselmus lib. 1. Cur Deus homo cap. 20. Guilielm. Paris. lib. Cur Deus homo c. 7. Altisiod. lib. 3. summ. tract. 1. c. 8. Sed quanquam hæc ratio probabilis sit, & sufficienter ostendat illas leges iustitiæ non tam perfecte posse servari in persona creata, sicut in Christo, non tamen videtur omnino convincere. Quia si considerentur ea, quæ de illis supra diximus, & quo pacto ad hanc iustitiam necessaria sint, probabiliter possent defendi, sufficienter posse in pura creatura servari, si aliis in operibus puri hominis posset aliquo modo reperiri sufficiens valor, & æqualis injuriæ Deo factæ per peccatum, quod unicuique plane manifestum erit, breviter discurrendo per singulas condiciones supra positas.

Cum enim primo dicitur, satisfactionem creaturæ necessario debere fundari in gratia, seu in gratuita acceptance, vel intelligitur de gratia, quæ se tenet ex parte personæ satisfaciendis, & est principium ipsius satisfactionis, vel de acceptance ex parte ipsius Dei, quæ intelligitur quasi subsequens operationem, quæ in satisfactionem offertur. Si hoc posteriori modo intelligatur, ut Cajetanus videtur exponere, non est verum, consequenter loquendo. Quia, si supposita gratia ex parte principii, & suppositi operantis, satisfactio est sufficientis & æqualis valoris, jam acceptatio illius non habet rationem gratiæ sed iustitiæ, quia jam servatur æqualitas. Et quamvis Deus absolute loquendo posset talem satisfactionem non acceptare, tamen supposito pacto & promissione, ex iustitia debet acceptare: & hoc satis est ex hoc capite ad perfectam iustitiam, ut in superioribus ostensum est. Si autem priori modo intelligatur, ut Scotus & alii intelligunt, verum quidem est, talem satisfactionem debere fundari in gratia, tamen non videtur hoc multum repugnare perfectioni iustitiæ, si aliis est sufficiens valor in ipso opere: quia tunc homo non satisfaceret formaliter per gratiam ipsam, quam gratis accepit, sed per fructus ipsius gratiæ, quos ipse sua etiam industria comparavit. Et quamvis isti fructus sint etiam dona Dei, tamen jam sunt connaturalia, & suo modo debita ratione primæ gratiæ: & deinde homo non satisfacit per illa, nisi prout est dominus suorum actuum: quod videtur sufficere ad hanc iustitiam. Nam fere idem necessario dicendum est de satisfactione Christi, quanquam sit nonnulla diversitas: tum quia personæ Christi non sit propriæ gratia, sicut sit personæ creaturæ; tum etiam quia omnia dona gratiæ, vel auxilia, magis sunt connaturalia Christo, quam puro homini; etiam supposita gratia.

Et idem fere est de alia conditione, ut scilicet satisfactio fiat ex propriis, quia etiam in puro homine satisfactio fieret per actus proprios ipsius, quorum ipse esset Dominus. Et licet Deus superius, & altius dominium habeat eorundem actuum, tamen hoc non videtur referre ad perfectionem justæ satisfactionis, ut explicatum est in satisfactione Christi, in qua, quoad hanc conditionem fere eadem est ratio: quia etiam humanitas Christi, & omnes actus creati illius hominis sunt sub divino dominio: quanquam in hoc etiam superet Christus purum hominem, quod in eo id, quod est radix valoris & dignitatis suæ satisfactionis, non cadit sub dominio alicujus, cum sit ipsa increata persona; & in hoc etiam, quod ipsummet dominium, quod per humanitatem habet, est quodammodo divinum, & illud quasi a seipso habet, propter dignitatem suppositi. Denique idem fere est de alia conditione, ut satisfactio sit ex non debitis: non quidem, quia talis homo posset interdum efficere opera consilii, quæ non videntur debita alio titulo, ut Scotus objicit in 4. distinct. 15. q. 1. hoc enim non videtur multum referre: tum quia quidquid ex consilio fit, posset a Deo præcipi: unde quod non præcipitur, atque adeo quod non debeatur, est ex quadam liberalitate ipsius Dei: tum etiam, quia debitum ex præcepto non derogat perfectæ satisfactioni, ut supra dictum est. Ratio ergo est, quia illa conditio intelligenda est, ut diximus, ex non debitis alio titulo iustitiæ. Homo autem purus, si esset innocens, non haberet aliud debitum iustitiæ, quamvis habere posset debitum obedientiæ vel charitatis, sicut etiam de Christo Domino dictum est. Quanquam in eo aliquo modo sit diversa ratio: nam revera potuisset Deus exigere a puro homine, titulo gratitudinis,



vel religionis; omnes bonos actus ejus, & imponere obligationem; vel debitum æquivalens debito justitiæ, vel etiam majus illo, quatenus debitum divinum majus est, quam debitum ex humana justitia: & tunc non posset homo ille utrique debito ad æqualitatem satisfacere, cum opera ejus essent finiti valoris; cum tamen Christus possit propter infinitatem suam, ut dictum est. Quocirca ex his conditionibus aliquo modo intelligitur, quomodo in eis justitia Christi superet omnem justitiam possibilem puri hominis, non tamen satis intelligitur, quomodo illa justitia puri hominis necessario sit dicenda imperfecta, nisi quatenus aliquo modo necessario futura esset inæqualis.

Probatur ergo ultimo hæc secunda pars assertionis ex prima, nam opera puri hominis non habent valorem sufficientem ad satisfactionem omnino æqualem: ergo non posset illius satisfactio esse ex perfecta justitia. Antecedens probatur a D. Thoma hic duplici ratione, desumpta ex D. Anselmo lib. 1. Cur Deus homo cap. 20. & sequentibus, & Richardo de S. Victore, libro de Incarnatione Verbi c. 8. & eis utuntur Alexander Alenfis, D. Bonaventura, Richardus, & alii supra citati. Prior procedit tantum de peccato Adæ, quo tota humana natura collapsa est. Fuit enim infinitum secundum quandam virtutalem extensionem, seu multiplicationem, quia de se sufficiens fuit ad infinitos homines, & inimicos Dei constituendos: at vero satisfactio puri hominis non videtur posse hoc modo esse infinita.

Hæc tamen ratio non videtur absolute concludere, quia dictum est, posse purum hominem fieri caput hominum in esse gratiæ, non minus quam Adam fuit veluti caput & principium peccati; hoc autem posito, satisfactio illius hominis non minus fuisset infinita extensive, quam fuit peccatum Adæ: esset ergo quoad hoc satisfactio æqualis, atque adeo in hoc etiam similis satisfactioni Christi, quamvis in hoc etiam Christi superet purum hominem, quod hæc dignitas capitis est connaturalis, & debita Christo ratione unionis, non tamen ita esset connaturalis puro homini quantumvis grato, sed oportuisset conferri ex lege Dei, vel pacto; hoc vero licet bene concludat majorem perfectionem in satisfactione Christi, non tamen concludit inæqualitatem simpliciter in satisfactione puri hominis, quia etiam illa quasi dignitas capitis, quæ fuit in Adam, non fuit illi connaturalis & debita, sed ex lege & pacto; servaretur ergo proportio.

Secunda ratio fundatur in infinitate, quam peccatum habet ex persona Dei offensa: unde procedit de omni peccato præsertim morali. Gravitas enim offensæ, ut supra dictum est, sumitur ex persona offensa: unde tanto est major, quanto illa persona est dignior: ergo quæ est contra personam infinitæ dignitatis simpliciter, erit infinita; ergo non potest ad æqualitatem compensari, nisi per infinitam satisfactionem, quam non potest exhibere persona finita quantumvis grata.

1. Objecti. Contra hanc rationem objici potest primo, quia ex personæ offensæ infinitate non habet peccatum infinitatem simpliciter, sed tantum secundum quid, scilicet objectivam, quæ in hoc consistit, quod sit malum quoddam, & injuria cujusdam altioris speciei, & ordinis, quam sit omnis injuria contra personam creatam & finitam; ergo hinc concludi non potest, necessariam esse satisfactionem infinitam simpliciter, sed tantum secundum quid, & hanc exhibere posset purus homo gratus, amando Deum super omnia, & pro illo patiundo, nam etiam hi actus habent, ex persona Dei, circa quam versantur, infinitatem quandam secundum quid, & objectivam, proportionatam, & adæquatam infinitati peccati.

Prior responsio. Ad hanc objectionem duo possunt esse respondendi modi. Prior est, negando assumptum, in quo tangitur illa quæstio, an peccatum mortale, ut est offensa divina, habeat infinitatem simpliciter in ratione mali seu demeriti. Et responsio data supponit partem affirmantem: ex qua recte sequitur, infinitam Christi satisfactionem fuisse necessariam simpliciter ad æqualitatem justitiæ constituendam. Et hæc sententia tribuitur Alenfi 3. p. q. 1. memb. 6. art. 2. ad 1. sed ibi solum dicit, peccatum habere infinitatem ex persona offensa; & ideo non posse ad æqualitatem recompensari, nisi a persona, quæ sit bonum infinitum: ex hoc vero non sequitur, peccatum habere gravitatem simpliciter infinitam. Tribuitur item

Bonavent. in 3. distin. 20. q. 3. & 4. Sed nihil plus dicit, quam Alenfis; nam priori loco ait, tam gravem esse offensam, quæ sit Deo, ob excellentissimam ejus dignitatem, quod nulla creatura potest recompensare aliquid ei æquale. Posteriori autem loco dicit, nullam creaturam posse satisfacere pro illa injuria, satisfactione plena, quia illa offensa & injuria omnino excedit puram creaturam. Quod ipsum docuit etiam hic D. Th. ad 2. Cajet. idem significat, & alii expositores communiter, & indicat etiam Richard. in 3. dist. 20. q. 4. & Rich. de Sanct. lib. de Incarnat. Verb. c. 8. Qui omnes solent in hanc sententiam adduci, cum tamen solum dicant peccatum habere gravitatem inadæquabilem per satisfactionem creaturæ: ex quo non sequitur habere infinitatem simpliciter, ut postea explicabo. Solum ergo Medina citato loco hanc sententiam expresse docet, quam pauci ex recentioribus secuti sunt.

Potest autem suaderi hæc sententia, primo, illa vulgari gradatione, quia offensa contra personam alicujus dignitatis finitæ est certe gravitatis finitæ, quod si offensa sit contra personam majoris dignitatis crescat etiam gravitas offensæ: & in universum quantum crescit dignitas personæ offensæ, crescit gravitas offensionis: ergo offensio contra personam simpliciter infinitam habebit etiam malitiam & demeritum simpliciter infinitum: alias non servaretur proportio, & fieri posset, ut offensa personæ finitæ haberet adæquationem cum offensa personæ infinitæ, juxta formam argumentandi Aristotelis in physicis. Unde potest aliter proponi argumentum, quia injuria contra Deum sine proportionem excedit omnem injuriam contra creaturam, etiam si in infinitum crescat; ergo. Et in idem redit argumentum, in quo modo versamur, quia illa injuria excedit omnem satisfactionem creaturæ, etiam si in sanctitate creata in infinitum crescat; & ideo persona Christi fuit necessaria ad æqualem satisfactionem, juxta sententias Sanctorum, quos hic & supra sect. 1. citavi; ergo signum est illam injuriam esse infinitæ gravitatis simpliciter.

Secundo, Peccatum, ut est offensivum Dei, non solum destruit in homine Deum, quod solum esset destruere bonum illud creatum, quo homo conjungitur Deo ut ultimo fini; sed etiam, quod in ipso est, destruit Deum in se, nam quoad affectum in hoc tendit, qui peccat; ergo hac ratione est infinitum malum simpliciter; nam destruere infinitum bonum simpliciter, non tantum respectu alicujus, sed absolute & in se, malum certe est simpliciter infinitum. Antecedens declaratur variis modis. Unus est, quia omnis intellectualis natura ut sic est una quoad perfectissimum gradum naturæ, in qua omnes conveniunt; ergo malum, quod est destructivum rectitudinis moralis in uno subiecto, implicite & virtualiter opponitur toti gradui naturæ intellectualis ut sic, & in eo destruit moralem rectitudinem, quatenus ille communis est omni intellectuali naturæ; ergo, quantum est in se, etiam in Deo illam rectitudinem destruit, quod est, Deum ipsum destruere. Alius modus est, quia qui offendit Deum, quantum est ex se, tollit illi honorem & dignitatem ultimi finis, quæ ablata non esset Deus. Alius est, nam qui offendit Deum, quantum est ex se, contristat ipsum: unde tollit ab illo beatitudinem, & consequenter divinitatem, quantum est ex affectu peccatoris. Tertium argumentum a posteriori sumi potest ex pœna, quæ infinita respondet peccato mortali, quia ipsum est infinitum. Dices illam pœnam solum esse infinitam in duratione. Sed contra quia non solum illa pœna est infinita eo quod perpetua sit, sed etiam quia, ut est pœna damni, est amissio infiniti boni simpliciter, ut ait D. Th. 1. 2. q. 87. art. 4. Quod ita explicari potest, quia illa pœna privat Deo, & omni visione possibili Dei, quæ in infinitum perfici potest: est ergo illa privatio infinita.

Nihilominus contraria sententia mihi magis probatur, quam significavit D. Th. hic ad 2. dicens, Peccatum habere quandam infinitatem ex infinitate divine majestatis: nam in hoc modo loquendi, & limitandi illam infinitatem satis indicat, non esse infinitatem simpliciter, sed tantum secundum quid, seu objectivam. Unde in 1. 2. q. 87. a. 4. dicit peccatum esse infinitum ex parte aversionis ab incommutabili bono, quod est infinitum: ubi solum assignat infinitatem objectivam, quod ex duobus colligi potest. Unum est, quia inferius eodem modo

Non habet peccatum malitiam simpliciter infinitam.

dicit



dicat poenam damni esse infinitam. Aliud est, quia statim agens de conversione, dicit peccatum ex ea parte esse finitum, tum ex parte objecti, quia bonum, ad quod convertitur voluntas, finitum est; tum etiam, quia ipsa conversio finita est: quod non ita dixerat de infinitate aversionis. Eandem sententiam tenet Scot. in 3. d. 20. q. 1. contra ea, quæ dicuntur. Ubi dicit, tantam esse infinitatem ex objecto in actu charitatis, quanta est in peccato, quod licet fortasse verum non sit, supponit tamen in peccato non esse infinitatem, nisi secundum quid & objectivam, sicut est in actu charitatis. Et idem docet expresse Palud. in 3. d. 20. q. 2. Soto in 5. d. 19. q. 1. art. 2. ad 1. & indicat D. Thom. in 4. d. 15. q. 1. art. 2. ad 1.

Potest autem hæc sententia probari primo, quia in peccato non est major malitia, quam sit bonitas, qua privatur; sed privat bonitate simpliciter finita, & tantum secundum quid infinita, scilicet, objective; ergo. Major patet, quia privationis quantitas ex positivo mensuranda est. Minor vero probatur, quia illa bonitas tanta est, quanta esse poterat, & debebat contrario actui charitatis: illa autem est sine dubio finita. Ad hanc vero rationem sufficienter responderi potest, recte quidem procedere de malitia morali, quæ opponitur virtuti contrarie, seu quæ privat illa bonitate, quæ inesse deberet illi actui humano, si studiose fieret. Præsens autem difficultas non est de hac malitia & quantitate ejus, sed de ratione injuriæ divinæ, quam habet actus peccati, & de quantitate, quam sub ea ratione habet. Est enim peccatum præsertim mortale vera ac propria injuria Dei, & ut sic non solum privat rectitudine charitatis, vel alterius similis virtutis, sed etiam continet quandam rationem injuriæ, quæ nullam habet proportionem cum quacumque bonitate, quæ convenire possit actui puræ creaturæ erga Deum. Quare nos etiam dicere cogimur, hanc injuriam in ratione mali esse majus & gravius malum, quam in ratione satisfactionis sit quilibet actus rectus puræ creaturæ: quod esse verum infra ostendemus. Unde consequenter dicendum est, vel hanc injuriam & quantitatem ejus non esse considerandam per modum privationis, sed per modum cujusdam moralitatis positivæ: nam, cum hæc moralitates non sint vera entia physica, & realia, non est inconveniens, quod in eis intelligatur aliqua ratio mali per modum positivi, id est, ad modum cujusdam nocimenti, quod voluntas peccatoris infert Deo quantum est ex se: sicut etiam meritum poenæ, quid morale est, habens rationem mali, & nihilominus intelligitur per modum positivi. Vel certe declarando illam rationem injuriæ per modum privationis, dici potest privare quidem rectitudine justitiæ, non quæ possit inesse actui honesto elicito a pura creatura circa Deum, sed longe altiori: illa, scilicet, rectitudine justitiæ, quæ divinæ majestati secundum se debetur, etiam si a pura creatura exhiberi prodignitate non possit: & hæc est infinitas hujus malitiæ, quam contraria sententia censet esse simpliciter infinitam. Neque est inconveniens dari privationem bonitatis, quæ inesse non potest actui puræ creaturæ: nam hæc privationes morales non habent exactam rationem privationis, sed magna ex parte negationes sunt, attribuntur autem & imputantur subjecto seu homini per modum privationum, propter debitum, seu obligationem, quam habent, vitandi actum habentem talem carentiam seu negationem adjunctam.

Aliter ergo probatur secundo hæc sententia, quia licet peccatum, ut est injuria Dei, sit in hoc supremo genere & ordine malitiæ, tamen in eo non habet summum gradum, summamve quantitatem; ergo neque infinitatem simpliciter: consequentia est clara, tum quia ultra infinitum non est majus, secundum eam rationem; tum etiam, quia illa malitia potest crescere in infinitum: ergo nunquam est infinita simpliciter. Unde probatur antecedens, quia licet peccator injuriam inferat Deo, non tamen summo affectu, & quamvis illum odio habeat, non tamen quantum potest odio habere; sicut qui amat Deum infinitum super omnia, non amat illum quantum amari potest, & ideo non infinite amat.

Dices: peccatorem odisse Deum quantum potest, non quidem ex parte sui conatus, sed ex parte Dei, quia vult inferre Deo summum malum, quod illi inferri potest: vel interdum etiam ex parte sui affectus, quia vellet habere odium Dei summum, quod esse, vel etiam excogi-

tari potest, atque adeo infinitum: totam enim hanc inordinationem habere potest, vel certe habet, saltem implicite, peccator in suo affectu: & in hoc longe diversa est proportio inter odium & amorem Dei, nam, qui amat Deum, neque in effectu amat Deum, quantum ipse amabilis est, quia non potest: neque etiam in affectu, quia ordinate & prudenter amat, esset autem inordinatus affectus creaturæ, si cuperet amare Deum, quantum ipse se ipsum amat, hoc enim nihil aliud esset, quam cupere esse Deum.

Sed hæc responsio non satisfacit, quia ex duobus modis, quibus dicitur peccator odisse Deum, quantum potest, prior, ad summum, indicat infinitatem quantum objectivam, quia cupit Deo summum malum; ex quo non recte infertur infinitas (ut sic dicam) formalis in ipso actu; sicut etiam dilectio Dei habet infinitatem objectivam, nam vult Deo summam bonitatem, & tamen ipsa in se non habet formalem infinitatem simpliciter. Posterior autem modus, licet fortasse in aliqua inordinatissima voluntate inveniri possit, non tamen est de ratione peccati mortalis ut sic, quia nec peccator habet formaliter hoc desiderium eliciendi odium Dei infinitum, neque etiam virtualiter seu interpretative tale desiderium includitur in mortali peccato, quia nulla est ratio hujusmodi interpretationis, etiam si excogitandi aut fingendi detur licentia. Imo etiam, qui formali & expresso actu, odio Deum prosequitur, non ideo desiderat intensius odisse, quam odit, sicut non omnis, qui amat, cupit intensius amare, quam amat. Addo deinde, etiam si admittamus in aliqua voluntate illud formale desiderium infinite odio habendi Deum, non refundi in illum actum totam malitiam objecti, id est, infinitam simpliciter; ideoque etiam in illo actu non esse formalem malitiam simpliciter infinitam, sed solum erit ille actus alia quadam speciali ratione infinitus objective, sicut, qui desiderat dare pauperibus infinitam pecuniam, non habet infinitam bonitatem simpliciter in eo desiderio, & sic de aliis.

Aliter potest ad rationem factam responderi, quodlibet peccatum, quatenus injuria Dei est, habere non solum supremam rationem malitiæ, sed etiam summum gradum in illa, & consequenter non dari magis vel minus, sed omnia peccata sub hac ratione esse æqualia formaliter & in seipsis, quamvis causæ habeant inæqualitatem, id est, in conversione ad commutabile bonum, ex qua nascitur aversio a bono incommutabili: sicut in aliis privationibus totalibus formaliter invenitur æqualitas, quamvis ratione causæ dicatur una esse major alia. Sed hæc doctrina nullo modo probanda videtur, sed plane dicendum est, malitiam peccati mortalis in ratione injuriæ divinæ esse in uno peccato formaliter & in se majorem, quam in alio. Quod a posteriori patet ex effectu demeriti, & poenæ, quæ major respondet uni peccato, quam alteri, etiam sub ea ratione consideratis. Aliàs sequeretur, quod, sicut quilibet actio Christi erat æqualis meriti simpliciter loquendo, quamvis ex hac vel illa circumstantia non essent omnes æquales, ita omnia peccata mortalia essent æqualis demeriti simpliciter ac pensatis omnibus, quia licet in his vel illis circumstantiis sint inæqualia, tamen ex aliquo capite omnia perveniunt ad infinitatem simpliciter, atque adeo ad æqualitatem in demerito: consequens autem est satis falsum & absurdum, ut constat ex 1. 2. q. 73. art. 2. & seqq. Imo hinc ulterius sequitur, peccato, ut est injuria Dei, in rigore deberi poenam infinite intensam, vel, si illa esse non potest, quod in infinitum cresceret & intenderetur, quia æternitas poenæ æternitati culpæ respondet: ergo alteri infinitati deberet respondere infinitas poenæ possibilis. Deinde sequitur tantum demeriti peccatorum per unum actum peccati mortalis, quantum meruit Christus per unum actum, quod est valde absurdum: alioquin etiam posset quis exultare, non satis fuisse unum Christi actum ad satisfaciendum pro omnibus peccatis, sed singulos pro singulis fuisse necessarios, quod quam sit falsum, constat ex supra adductis ex Scriptura & Patribus. Tandem confirmatur, nam peccatum, ut malum morale, eo est majus, quo fit major advertentia & libertate: ergo etiam ut est injuria Dei, est majus, quo fit ex majori advertentia ejusdem injuriæ: ergo etiam sub ea ratione unum peccatum est majus alio; atque adeo etiam sub ea ratione



omnia sunt finita. Imo etiam si (per impossibile) advertentia esset infinita, malitia non esset infinita, quia ex conatu & aliis circumstantiis esset limitata, sicut dilectio voluntatis ex finito conatu finita erit, etiam si (per impossibile) in intellectu esset advertentia infinita.

Ultimo ex his concluditur tertia ratio, nam peccatum non habet malitiam essentialiter infinitam, seu in propria specie; neque etiam habet infinitatem intensivam seu in individuo: ergo nullo modo est infinitum simpliciter: non enim potest excogitari alius infinitatis modus. Major probatur, quia illa est determinata species malitiæ distincta a reliquis, & non continet illas formaliter, aut eminenter: ergo est finita & limitata in specie malitiæ. Minor autem, & satis constat ex dictis, quia ostensum est illam malitiam recipere magis & minus in quantitate quasi intensiva: & probari etiam potest, quia peccatum non habet hanc infinitatem intensivam ab operante, neque a conatu voluntatis ejus, quia & finitus est operans, & finite conatur. Neque etiam habet ab objecto, quia nullus actus habet ab objecto intensiorem: neque objectum communicat actui totam bonitatem vel malitiam, quam potest, sed juxta mensuram vel modum ejus, ut inductione constat in cæteris actibus, & in omnibus motibus habentibus habitudinem ad suos terminos. Et ratio est, quia objectum non formaliter, sed tantum terminative communicat bonitatem actui, & ideo non semper communicat quantum potest, sed juxta modum quo tendit potentia in objectum per actum: unaqueque autem tendit juxta facultatem & capacitatem suam, & quia hæc finita est, ideo actus solum participat ab objecto infinito finitam intensiorem, vel potius terminat illam intensiorem, quam actus habet ex conatu potentiae, quæ finita esset.

Atque hæc sententia magis confirmabitur solutionibus argumentorum sententiæ oppositæ, quæ vel sunt infirma valde, vel eodem modo fieri possent de peccato veniali. Primum ergo argumentum solum probat, injuriam Dei esse altioris rationis in ratione injuriæ, supra omnem injuriam, quæ inferri potest puræ creaturæ, ideoque esse improporcionabilem illi, & satisfactioni possibili puræ creaturæ, ut infra explicabo. Unde quando D. Thom. hic & 1. 2. dicit, tanto graviores esse offensas, quanto major est persona, cui fit, non est intelligenda comparatio secundum æqualitatem, sed secundum proportionem; plus enim superat Deus angelum, quam injuria Dei injuriam angeli; est autem proportio, quod, sicut Deus est altioris ordinis, ita etiam injuria Dei est superioris rationis. Et hoc argumentum fere idem in peccato veniali fieri potest, nam etiam illud aliquo modo est offensio personæ infinitæ.

Ad secundum, illa vulgaris propositio, quod peccator, quantum est de se, vult destruere Deum, sano modo intelligenda est, nam, si sit sensus, peccatorem habere hunc virtutalem affectum, quia implicite vult Deum non esse, admitti potest: inde tamē nō sequitur infinita malitia simpliciter, sed objectiva, ut ostensum est. Si vero sit sensus, peccatum de se esse destructivum Dei, non est vera propositio, quia omnino repugnat hanc vim alicui actioni convenire. Et adhuc non sequitur intentum, nam, quod actio sit damnicativa, si de facto non est damnum illatura, & hoc prævidetur, non multum aggravat moralem actionem. Unde in primo modo ostendendi illud antecedens, falsum est, quod assumitur, scilicet, quod destruit perfectionem aliquam in uno subiecto esse destructivum ejusdem perfectionis in toto gradu, hoc enim etiam in affectu falsum est, alias qui vitam equi destruit, quantum est de se destruit in toto gradu animalis. Item, alias sequitur, peccatum veniale de se destruere Deum, quia destruit rectitudinem moralem in uno subiecto, scilicet homine, & consequenter virtute destruit in toto intellectuali gradu; igitur peccans solum in se destruit moralem rectitudinem, & non in toto gradu intellectuali, imo neque in tota humana natura, etiam quantum est de se. Alii vero duo explicandi modi solum declarant infinitatem objectivam & secundū quid.

Ad tertium recte ibi responsum est, poenam damni, præter infinitatem durationis, esse infinitam tantum secundum quid & objective, quia solum privat hominem perfectissimam participationem Dei. Nec refert, quod illa participatio possit in infinitum intendi; tum quia illa

privatio solum est carentia visionis Dei, ut sic abstrahendo ab intensione, sicut peccatum mortale per se privat gratia ut sic, non ut dicit intensiorem; tum etiam, quia in illa poena est magis & minus, non solum ratione tristitiæ, quod per se notum est, sed etiam ratione propriæ privationis, quia non tota illa carentia habet rationem poenæ, sed solum prout erat aliquo modo debita, ut latius in materia de poenitentia explicandum est. Hinc ergo solum concluditur infinitas objectiva peccati, ex æternitate autem poenæ solum colligitur peccatum esse humanis viribus irreparabile, atque ex se æternum quoad maculam, ut recte D. Thom. 1. 2. q. 87. art. 4. & 5.

Aliter ergo respondetur ad objectionem positam, rationem adductam non fundari in infinitate simpliciter ipsius peccati, sed in hoc, quod gravitas peccati eo modo, quo infinita est, non potest proportionem, & adequate compensari per satisfactionem exhibitam a persona finita. Hujus vero ratio sumenda est ex duobus principiis supra positis & probatis, scilicet, injuriam crescere ex dignitate personæ offensæ, satisfactionem vero ex dignitate personæ satisfaciens. Unde fit, ut satisfactio habeat proportionem æqualitatis cum injuria, oportere, ut dignitas personæ satisfaciens habeat eandem proportionem cum dignitate personæ offensæ; hanc vero habere non potest persona creata, quantumvis sancta & grata sit.

Quod ita confirmatur: quia ex eodem capite, ex quo crescit gravitas offensionis Dei, minuitur quodam modo proportio satisfactionis exhibitæ a puro homine, quia semper infinite distat a dignitate personæ, quæ injuriam passa est: quæ improporcion non potest suppleri per solam gratiam creatam: quia licet hæc sit divini ordinis, & participatio divinæ naturæ, tamen tota ejus dignitas finita est, & simpliciter infinite distans a dignitate personæ offensæ. Neque etiam refert, quod operationes hujus gratiæ principaliter sint ab Spiritu sancto inspirante, & moveante, qui est persona infinita simpliciter: quia si Spiritus sanctus consideretur, ut movens per gratiam & virtutes inherentes, sic non confert majorem dignitatem, quam sit dignitas ipsius gratiæ habitualis inherens: unde nec confert majorem valorem actibus, quam ab eodem intrinseco principio habere possint. Si vero consideretur Spiritus sanctus, ut proxime & immediate concurrens ad illos actus speciali auxilio, hoc non confert actui proprium valorem satisfactionis: quia, ut bene notavit Cajetanus agens de merito 1. 2. q. 114. art. 3. in fine, proportio, & æqualitas in hac justitia consideranda est inter retributorem, & proximum operans, non autem inter primam causam mercedis aut meriti: sic etiam in proposito justitiæ, & proportio intercedere debet inter personam offensam, & personam satisfaciens, & hæc est, quæ formaliter confert valorem satisfactioni, non autem Spiritus sanctus concurrens, tanquam causa principalis & prima.

Hinc constat, etiam si peccatum non sit infinitum simpliciter, sed solum secundum quid, & objective, nihilominus esse improporcionabile, & ut ita dicam, inadæquabile per satisfactionem exhibitam a persona finita: quia habent quantitates quasi diversarum rationum & ordinum. Et eadem ratione, non urget argumentum illud de actu charitatis, scilicet, quia actus amoris Dei habet quandam infinitatem secundum quid ex objecto infinito, ad quod tendit, ideo esse debere tanti valoris ad satisfaciendum, quantæ gravitatis fuit malitia peccati, & injuriæ contra Deum factæ. Dicendum est enim, sicut supra de actibus Christi dicebamus, aliud esse loqui de bonitate morali, & intrinseca ipsius actus, aliud vero de valore ad satisfaciendum. Loquendo enim de bonitate, fateor habere inter se proportionem malitiæ actus peccati, & bonitatem contrarii actus charitatis: quia illa malitia non est, nisi privatio bonitatis oppositæ, unde tanta est, quanta est bonitas, quæ deberet inesse actui. Loquendo vero de valore ad satisfaciendum, sic nego esse proportionem perfectæ æqualitatis inter actum charitatis, & actum peccati, quia hic valor non sumitur principaliter ex objecto, sed potius ex dignitate personæ satisfaciens; e contrario vero gravitas peccati in ratione injuriæ, & offensæ, sumitur præcipue ex dignitate personæ offensæ, & ideo sub hac ratione non habent sufficientem proportionem vel æqualitatem. Et hinc etiam intelligitur, quare possit actus procedens a gratia habere suffi-

Fundamentum rationis.

Satisfactio personæ finitæ adæquari non potest magnitudini offensæ Dei.



sufficientem proportionem, & moralem æqualitatem in ratione meriti in ordine ad consequendam gratiam & gloriam, non tamen possit inveniri tanta æqualitas in ordine ad satisfaciendum Deo pro injuria illi facta. Ratio enim est, quia meritum respicit præmium ejusdem ordinis, & connaturale ipsi gratiæ, quæ natura sua est semen gloriæ: at vero satisfactio respicit ipsummet Deum, qui est persona simpliciter infinita, cum qua non habet debitam proportionem persona finita, etiamsi per gratiam creatam sanctificata sit.

Ex qua ratione intelligitur, licet purus homo possit assumi ad merendum aliis de condigno, & ad satisfaciendum pro peccatis mortalibus eorum, majorem tamen proportionem posse habere in ordine ad meritum, quam in ordine ad satisfaciendum: nam in merito inveniretur sufficiens proportio, & æqualitas rei ad rem, qualis nunc reperitur inter opera iustorum & præmium gloriæ, quia simile esset meritum & præmium illius hominis; solum esset differentia in hoc, quod illud præmium daretur aliis ab ipso merente, quod certe ad æqualitatem iustitiæ & contractus non multum refert, dummodo ante meritum præcedat sufficiens promissio, ratione cujus possit meritum illud de condigno ad alios referri, eisque jus ad præmium acquirere. At vero in satisfactione multo minor esset proportio, quia per actum puri hominis, nunquam posset dari æquale pro culpa; esset tamen aliqua condignitas, eo quod satisfactio esset oblata ab amico, qui esset aliorum caput, & per actum supernaturalem gratiæ & gloriæ proportionatum. Et explicatur in hunc modum: nam pœna æterna etiam damni simpliciter non est equalis culpæ mortali, multo enim majus malum hæc est, quia est contra Deum in se, est tamen in ratione pœnæ proportionata, quamvis simpliciter dicatur esse infra condignum propter excessum culpæ: sic ergo bonum ipsum gloriæ, & a fortiori meritum ejus, quod a gratia creata procedit, licet inter se habeant æqualitatem & proportionem, tamen respectu culpæ mortalis ut sic habent improportionem, ut possint pro ea æquivalens reddere ad æqualitatem.

**3. Object.** Sed adhuc objici potest. Etiamsi concedamus non posse se hominem per unum vel alium actum æqualiter satisfacere pro peccato alterius, poterit tamen per multos actus, præsertim si intensioe & bonitate, & aliis circumstantiis actum peccati multum excedant. Cum enim illa improportio finita sit, poterit per aliquam additionem superari. Sicut in humanis, licet aurum ex specie sua excedat argentum, quoad valorem tamen moralem potest quantitate superari. Confirmatur adhuc amplius, quia aliis nec pro veniali peccato posset homo ad æqualitatem satisfacere.

**Solutio.** Ad argumentum respondetur, nulla etiam multitudine, vel intensioe actuum, nec gratiæ creatæ magnitudine posse illam improportionem, seu inæqualitatem ad perfectam æqualitatem redigi. Ratio est, quia illa res sunt diverforum ordinum: & in hujusmodi rebus, quantumvis una crescat, vel multiplicetur, nunquam pervenit ad quantitatem alterius; quomodo dicunt Theologi, injuriam factam in bonis superioris ordinis non posse per bona inferioris ad æqualitatem compensari, ut injuria in vita, vel fama per pecunias. Et in rebus naturalibus, multe species inferioris gradus non æquivalent uni superiori. Et similiter multa peccata venialia, quantumvis multiplicentur, non æquivalent uni mortali. Sic ergo illa improportio, quæ est inter divinam majestatem offensam, & personam offendentis, gravisque injuriæ, quæ ex illa nascitur, est altioris ordinis, nec vinci unquam potest quacumque multitudine, vel perfectione actuum personæ creatæ, quæ infinite semper distat a dignitate personæ offensæ. Quod si quis fingat personam creatam habentem infinitam gratiam. Respondeo, talem gratiam esse impossibilem, & ideo non mirum, si illa posita videatur sequi contradictio. Nam quia principium esset infinitum, videri potest satisfactio ejus infinita & æqualis: quia vero adhuc illa persona sic grata infinite distaret a dignitate personæ offensæ, ejus satisfactio esse deberet insufficiens. Ad confirmationem dicemus commodius sectione nona: nam quoad venialia peccata eadem, vel major ratio esse potest de homine satisfaciente pro seipso.

**3. Object.** Ultimo tandem objici potest. Quia iusta recompensa-

tio ibi tantum habet locum secundum æqualitatem rei ad rem, ubi reipsa damnum alteri infertur: ubi autem non est damnum, licet interveniat voluntas illius, obligatio propria ex iustitia non oritur: Deus autem revera nihil patitur damni ex nostra offensione, sed solum potest quasi in affectu peccatoris injuria Dei considerari, non in effectu: ergo iusta & æqualis compensatio non est attendenda in reipsa, quasi oporteat, ut ex satisfactione hominis aliquid Deo acquiratur, sed tantum in affectu hoc etiam erit considerandum: at in affectu potest esse æqualitas; ergo.

Respondetur primo, hoc argumento probaretur, nullam ex peccato oriri obligationem iustitiæ satisfaciendi Deo, quod est per se absurdum, & contra omnes Theologos; sequeretur etiam, purum hominem non tantum posse satisfacere Deo ad æqualitatem pro offensa, sed etiam ultra condignum, quia potest in illo affectu excedere, & hoc non tantum sequitur in homine iusto satisfaciente pro alio, sed etiam in peccatore satisfaciente pro seipso. Dico ergo, peccatorem vere committere injuriam contra Deum, & peccare contra honorem ex iustitiâ Deo debitum: & licet revera non inferatur Deo aliquid malum in seipso, nec damnum in bonis intrinsecis Dei, in bonis tamen extrinsecis, ut sunt honor, &c. revera læditur divinus honor. Deinde apud Deum, voluntas ipsa inferendi injuriam est maxima injuria, pro qua illi oportet condignam satisfactionem offerre, qualis non est contraria voluntas, seu affectus, quia non habet tantam vim & proportionem ad satisfaciendum, quantum ad offendendum, propter rationem factam. Urgebis, voluntas apud Deum pro facto reputatur: si quis ergo ex corde velit illi perfecte & ad æqualitatem satisfacere, jam id facit. Respondetur, antecedens esse verum hoc sensu, quod voluntas sola tantum valet apud Deum, quantum opus, quod ab ea proficisceretur, si illa voluntas posset in opus exire, non tamen hoc sensu, quod quandoque voluntas aliquid vult, tota perfectio, quæ est in objecto secundum se, refundatur in voluntatem, hoc enim non est verum, & tamen in eo sensu sumitur, ut patet. Nam si quis velit, & vere desideret multorum hominum salutem, vel infinite amare Deum, non ideo infinite meretur, & sic de aliis. Quæ doctrina ex 1.2.q.20. latius patet. In proposito ergo voluntas illa satisfaciendi perfecte & ad æqualitatem, non est de se effectiva illius objecti, sed affectiva tantum, & ideo non habet totam perfectionem, quæ est in objecto.

Respon.

In quo peccator lædat Deum.

## SECTIO VIII.

*Utrum homo purus possit ita satisfacere pro culpa mortali propria, ut per suum actum se sanctificet, & a se peccatum expellat, absque alia remissione Dei.*

**D**iximus sectione præcedente, non posse purum hominem pro alienis peccatis de iustitia satisfacere, ex quo videtur a fortiori sequi, nec pro seipso posse; tum etiam, quia respectu sui ipsius est purus homo; ex qua conditione oritur in præsentem defectus æqualitatis necessariæ ad iustitiam; tum etiam, quia ad liberandos alios a peccato supponi potest ipse gratus & innocens, ut autem se ipsum liberet, supponitur potius in peccato, & inimicus, ex qua conditione multum minuitur, vel omnino tollitur valor operum ad satisfaciendum. Quamvis autem hoc ita sit, nihilominus præsentem disputationi locus relinquitur propter majorem quandam proportionem, quæ est in actu hominis ad sanctificandum ipsum hominem operantem, quam alios: & consequenter ad liberandum illum a peccato, & satisfaciendum pro illo potius quam pro aliis: nam & juxta generales leges satisfactionis tunc maxime accommodata fit satisfactio, quando ille, qui offendit, se submittit alteri, quem offendit, ut ei satisfaciat, & similiter. Propria ratio satisfactionis postulat, ut fiat per proprios actus ejus, qui sanctificatur, quando est illorum capax. Ex his ergo differentiis inter actus puri hominis respectu sui, & respectu aliorum, ortæ sunt variae opinioniones Theologorum, quas oportet in hac & sequenti sectione tractare. Et versatur quæstio, non tantum de potentia Dei absoluta, sed etiam secundum legem ordinariam; quamvis enim nullus de facto possit a peccato liberari,

Declaratur propositio quæstionis.



berari, nisi per Christi redemptionem, & iustitiam, nihilominus dubitari adhuc potest, an supposita Christi redemptione, ipse etiam homo pro suo peccato satisfaciat, & ita ab illo liberetur; quod maxime fieri posse videtur per illum actum contritionis, & amoris Dei super omnia, qui est ultima dispositio ad gratiam & iustitiam; nam per alias imperfectas, & remotas dispositiones certum est non posse hominem condigne satisfacere pro peccato suo, quia non perfecte opponuntur divinæ offensioni. Unde fit, ut ex vi earum, aut illis positis, non statim sanctificetur homo, & a peccato liberetur: at vero, posita contritione & dilectione super omnia, statim sanctificatur homo, & expellitur peccatum, quia homo in Deum perfecte conversus est; & ideo de hoc actu potissimum tractatur questio, an ex vi illius homo satisfaciat Deo sese ab statu peccati liberando. Denique, ut distinctius procedamus, duplicem hujus questionis sensum distinguere oportet: duobus enim modis intelligi potest, hominem per suum actum satisfacere ad æqualitatem, vel liberari a peccato. Unus est, quod ipsemet actus hominis peccatoris, quo in Deum convertitur, sit æqualis solutio debiti, atque adeo sit ipsa formalis ratio expellendi peccatum ab homine, nulla alia a Deo remissione peccati expectata, quia necessaria non est. Alter sensus est, quod peccatoris actus, quantumvis supernaturalis, & dilectionis Dei super omnia, non possit per se expellere peccatum absque remissione Dei, sit tamen tanti valoris ad satisfaciendum Deo, ut homo per illum actum, quantum est ex se, condignam satisfactionem offerat ad huiusmodi remissionem obtinendam, eamque ita faciat sibi debitam, sicut per sufficiens meritum facit sibi debitum condignum præmium. De hoc posteriori sensu dicemus sectione sequente, in hac de priori disputamus; atque ita intelligendus est titulus in hac dubitatione propositus.

**Opinio**  
**affirmativa.** Est itaque prima opinio asserens, hominem per actum contritionis, seu dilectionis Dei super omnia, ita se ipsum formaliter sanctificare & peccatum mortale expellere, ut non solum non indigeat alia remissione culpæ, verum etiam & potentia absoluta repugnat, quod existente tali actu, homo adhuc in mortali peccato maneat; & hoc modo ajunt auctores hujus opinionis, illum actum esse æqualem satisfactionem, & condignam debiti solutionem: quia aliàs non esset ille actus sufficiens ad expellendam culpam: quia offensa non tollitur, quamdiu pro illa satisfactio non est, nisi gratis remittatur. Quam opinionem sic exposuit in nullo Scholasticorum Theologorum in terminis invenio. Videntur autem illi favere nonnulli moderni scriptores præsertim Jansenius in Cōcor. Evang. cap. 48. ubi sentit actualem Dei dilectionem non esse proximam dispositionem, ad quam justificatio consequatur, sed esse ipsam formam, qua remittuntur peccata. Verum est, hunc auctorem, quamvis in principio de dilectione loquatur, non tamen satis explicare, se loqui de dilectione actuali; sed potest de habituali intelligi, quia statim sic inquit: *Ecclesiastica vero communis habet, quod justificatio non sit motus diversus ab infusione gratiæ divinæ, quæ est charitas, vel saltem non est sine charitate, ita ut charitas neque se habeat, ut effectus consequens justificationem, neque ut dispositio præcedens, sed sit justificationis causa formalis, sic in ea se habens, quomodo caliditas in calefactione: hoc enim ipso quis est justificatus, quo illi per fidem infusa est charitas Dei, ex merito Christi.* Quæ verba optime de habitu charitatis intelliguntur; tota ergo illius sententia videtur ita exponenda: alioquin & ipse graviter errasset, negando, actum dilectionis esse dispositionem ad iustitiam, & inestimabilem veram & communem sententiam, ut peculiarem Pighii errorem retulisset: quæ omnia ex sequentibus constabunt. Pro eadem sententia citari potest Gaspar Casalius lib. 2. de Quadripart. Just. cap. 2. ubi sæpe repetit, dilectionem esse id, quo formaliter nascimur ex Deo, & in quo formaliter vivimus, & de morte ad vitam traducimur, ac vivificamur. Favet etiam Richard. art. 2. de lib. arbit. ubi dicit catechumenum ante baptismum sanctificari per actum dilectionis absque infusione habituum. In prædictam etiam sententiam inclinat idem Ruard. art. 8. pag. 66. & 67. & Hosius in Confess. Polon. cap. 70. & Stapleton. lib. 3. de Justit. cap. 8. ubi probabile censens, justificationem fieri formaliter per actum dilectionis. Sed, si attente hii auctores legantur, nihil in eis est,

quod huic sententiæ satis patrocinetur. Posset autem hæc sententia fundari primo, quia juxta veram, & sanam doctrinam, remissio peccati fit per infusionem alicujus formæ supernaturalis inhaerentis: ergo maxime per gratiam & charitatem: ergo non minus perfecte, & efficaciter fit per actualem charitatem, quam per infusionem habitus charitatis: ergo, qui elicit supernaturalem actum dilectionis super omnia, ex vi illius se sanctificat, & expellit peccatum & ad æqualitatem satisfacit. Primum antecedens constat, quia si remissio peccati non fieret per infusionem formæ inhaerentis, ergo fieret tantum per extrinsecum Dei favorem: hic autem est error hæreticorum hujus temporis, damnatus in Concil. Trident. sess. 6. can. 11. Prima vero consequentia per se nota est: secunda vero, in qua est tota vis argumenti probatur variis modis. Primo ex his, quæ Scriptura & sancti Patres tribuunt charitati, ut est illud Proverb. 10. *Universa delicta operit charitas;* & 1. Petri 4. *Charitas operit multitudinem peccatorum.* Hæc enim, & similia, potissimum intelliguntur de dilectione quoad actum, juxta illud 1. Joan. 3. *Translati sumus de morte ad vitam, quoniam diligimus fratres;* & *Qui non diligit, manet in morte;* & cap. 4. *Omnis, qui diligit proximum suum, ex Deo natus est;* ad Rom. 13. *Plenitudo legis est dilectio;* & ad Coloss. 3. eadem charitas dicitur *vinculum perfectionis;* ipsa ergo est, quæ maxime sanctificat, & remittit peccatum, juxta illud Luc. 7. *Remittuntur ei peccata multa, quoniam dilexit multum;* & ideo Joan. 14. aiebat Christus Dominus: *Si quis diligit me, sermonem meum servabit, & ad eum veniemus, & mansionem apud eum faciemus, &c.* Hinc August. omnem perfectionem iustitiæ & sanctitatis charitati tribuit. Unde est illud lib. de natur. & grat. art. 42. *Charitas est verissima, plenissima, perfectissimaque iustitia;* & cap. 70. *Charitas inchoata, inchoata iustitia est: charitas provelta, provelta iustitia est: charitas magna, magna iustitia est: charitas perfecta, perfecta iustitia est: sed charitas de corde puro, & conscientia bona, & fide non ficta, quæ tunc maxime est in hac vita, quando pro ipsa contemnitur vita.* Ex quibus verbis non obscure constat, ipsum loqui de actu. Item lib. 1. de Peccat. merit. & remiss. cap. 10. ait. *Justificari in Christo, qui credunt in eum, propter occultam communicationem, & inspirationem gratiæ spiritualis, qua quisquis adheret Domino, unus spiritus est.* Et lib. 1. de Gratia Christi cap. 30. explicat, hanc gratiam esse charitatem Dei diffusam in cordibus nostris per Spiritum sanctum, qui datus est nobis. In lib. autem de Spiritu & litera cap. 32. explicat, hanc charitatem, quæ per Spiritum sanctum diffunditur in cordibus nostris, esse dilectionem ipsam, non qua nos Deus diligit, sed qua nos facit dilectores sui. Quod late prosequitur cap. 36. & apertius lib. 3. de Doctr. Christi. cap. 10. definit, charitatem esse motum animi ad fruendum Deo propter ipsum: ergo omnes effectus, quos August. tribuit charitati, intelligendi sunt potissimum de actu. Unde 1. de Doctr. Christi. cap. 27. *Ille, inquit, iuste & sancte vivit, qui ordinatam dilectionem habet;* & multa similia habentur in ejusdem epist. 29. & lib. de moribus Eccles. cap. 11. & 15. & aliis locis. Favet etiam, quod Anselm. ait lib. de conceptu virgin. cap. 3. iustitiam nihil aliud esse, quam rectitudinem voluntatis propter se servatam: quæ rectitudo non potest esse nisi charitas, de qua eleganter Bernard. ferm. 83. in Cant. inquit, *anima reditum, esse conversionem ejus ad Verbum, reformatam per ipsum, & conformandam ipsi;* & subdit. *In quo? In charitate: ait enim. Estote imitatores Dei, sicut filii carissimi, & ambulate in dilectione, sicut & Christus dilexit nos. Talis conformitas maritat animam Verbo, cum, cui videlicet similis est per naturam, similem nihilominus ipsi se exhibet per voluntatem, diligens, sicut dilectus est: ergo si perfecte diligit, nupsit.* Et alia, quæ late prosequitur, tum ibi, tum etiam epist. 107.

Secundo principaliter probatur, quia perfectius inhaeremus Deo, ut fini ultimo, per actualem amorem, quam per ullum habitum: ergo per illum maxime liberamur a culpa, & in Dei amicitiam reducimur, quod est sanctificari. Consequentia probatur; tum quia, sicut præcipua malitia culpæ consistit in aversione a Deo fine ultimo, ita præcipua sanctitas consistit in unionione cum Deo, ut est ultimus finis noster; tum etiam, quia beatitudo vitæ futuræ consistit in perfecta conjunctione ad Deum, ut est

2. Prioris  
sententiæ  
fundamentum.

sum.



summum bonum: ergo perfecta sanctitas hujus vitæ in adhesionem perfectam ad Deum ultimum finem posita erit. Primum vero antecedens probatur, & in primis dubium non est, quin, comparando actum charitatis Dei ad reliquos, superet illos in sanctificando, & conjungendo animam Deo, juxta illud Pauli supra citatum; *Charitas est vinculum perfectionis*, & illud 1. ad Corinth. 12. & 13. *Amul amini charitatem meliorem, & adhuc excellentiorem quam vobis demonstro*. Et: *Major autem horum est charitas*, præsertim, cum amor actum fidei, & spei supponat, & sit illorum forma, secumque dolorem afferat, quo anima formaliter a peccato avertitur. Deinde, comparando actum ad habitum, probatur actum excedere. Primo ex generali regula, quod actus simpliciter est potior in voluntate, quam habitus, teste D. Thom. 1. 2. q. 71. art. 3. in corpore, & ad 1. ubi dupliciter id probat: primo, quia actus præeminet potentia, habitus autem magis accedit ad rationem, & imperfectionem potentia. Secundo, quia habitus est bonus, quia inclinat ad bonum actum; ergo magis bonum est actus, juxta illud, propter quod unum quodque tale, & illud magis. Nec refert (ait D. Thom.) quod habitus sit diuturnior actu: nam hic excessus est secundum quid, & per accidens, quia actus est in tali natura, quæ non potest semper operari. Nam actus de se diuturnus esse potest; quod si in nobis non ita est, est ex nostra imbecillitate, non ex ejus imperfectione. Unde, si actus ille semel a nobis elicitus semper in nobis duraret, nihil illi deesse videretur, ut habitum superaret, & nos perfectius Deo uniret, & sanctificaret, quam habitus: sed illa duratio nihil perfectionis illi addit, sed est perseverantia ejusdem perfectionis, quam in primo instante talis actus habuit, a qua perfectione provenire debet vis justificandi seu expellendi peccatum; sicut etiam si habitus illud expellat, id facit in primo instante, quo infunditur, ratione sue perfectionis, & non ratione futuræ perseverantiæ seu diuturnitatis.

Secundo probatur idem, quia hac ratione beatitudo ponitur potius in actu, quam in habitu: quia perfectius anima adheret Deo per actum, quam per habitum: unde, si daretur optio, potius esset eligendus actus sine habitu, quam habitus sine actu. Item, hac ratione censetur esse perfectior justificatio adultorum, quam parvulorum, quia fit per proprium eorum actum, ut D. Thom. docet infra q. 34. art. 2. ubi eam rationem adducit, quia ultima perfectio animæ non consistit in habitu, sed in actu. Denique a contrario id patet, quia culpa & injuria magis consistit in actu, quam in habitu; & ideo peccatum actuale gravius, cæteris paribus, censetur, quam originale.

Tertio principaliter argumentor, quia id, quod maxime Deus in hac vita in nobis intendit, est sanctificatio nostra, juxta illud 1. Corinth. 4. *Hæc est voluntas Dei, sanctificatio vestra*. Sed maxime etiam intendit in nobis, ut illum amemus; ergo, signum est, hanc sanctificationem potissime fieri actuali amore ejus. Minor probatur primo ex D. Thom. 3. cont. Gent. cap. 151. dicente, potissimum effectum gratiæ divinæ esse, ut nos faciat Dei dilectores; quia id, quod in nobis Deus maxime intendit, est sui ipsius dilectio. Secundo ex August. in Manual. cap. 20. ubi inter alia, quæ summa pietate de divino amore scribit, sic inquit. *Amat Deus, ut ametur. Cum amat, nihil aliud vult, quam amari, sciens, amore esse beatos, qui se amaverint*. Unde D. Thom. 2. 2. q. 27. art. 1. dicit, Charitati magis convenire amare, quam amari: quia illud per se primo ei convenit, quatenus talis virtus est. Cujus rei duplex signum adducit. Primum quia matres, quæ maxime amant, plus querunt amare, quam amari. Secundum, quia amici magis laudantur ex eo, quod ament, quam ex eo, quod amentur. Et Aristot. 8. Ethic. cap. 8. dicit, amicitiam magis consistere in amare, quam in amari. Ex qua doctrina hoc modo potest confici argumentum, quia id, quod Deus in nobis ponit, quo maxime nos amat, videtur esse gratia, unde dici solet, amari nos a Deo per gratiam, nos autem amare Deum per charitatem, & maxime per actualem; ergo nos magis perficimur & sanctificamur per actum, quo Deus amamus, quam per ipsum habitum gratiæ sanctificantis, qui inter omnes videtur plus conferre ad nostram sanctificationem, & ad expellendum peccatum: ergo solus ille actus est per se sufficiens ad hunc effectum expellendi peccatum, & sanctificandi hominem, & consequenter ad satisfaci-

dum Deo pro injuria illata.

Quarto principaliter argumentor, declarando rem ipsam, quia ipsa dilectio seu contritio est supernaturalis forma, & non minus est potens ad convertendum animam ad Deum, quam fuit peccatum ad avertendum; ergo talis actus vi sua restituit hominem ad pristinum statum, & ex averlo facit conversum ad Deum finem supernaturalem; ergo destruit in ipso totam Dei offensam & injuriam; & consequenter satisfacit Deo ad æqualitatem, quia alias non posset tollere ab homine rationem injuriæ & offensionis. Antecedens patet, quia sicut peccatum mortale avertit a Deo ultimo fine, & ideo illi summam injuriam irrogat, ita contritio actuali amore formata convertit ad Deum ut ultimum finem conversione efficiaci & perfecta: ergo hæc conversio formaliter excludit illam aversionem, & non est minus efficax ad hunc suum effectum, quam fuit peccatum ad suum. Nec refert, quod illa dilectio actualis physice & realiter, non semper in anima duret: nam etiam actualis culpa non semper manet, sed hoc solo, quod uno momento avertit animam a Deo, quamdiu non retractatur, semper relinquit hominem, quasi habitualiter aversum, & privat illum gratia & amicitia Dei; sic ergo etiam dilectio, quia in eo instante, vel tempore, quo est, convertit perfecte & supernaturaliter animam ad Deum, vi sua relinquit hominem habitualiter conversum secundum moralem statum, & æstimationem: ergo ipsa dilectio per se ipsam restituit hominem in Dei amicitiam, facitque illum æterna vita dignum, peccatumque expellit, non ex nova aliqua gratia, benevolentia, aut acceptance Dei, sed ex propria vi & potestate, quam habet contra peccatum: non est enim minus potens amor supernaturalis Dei ad sanandam animam, quam fuit peccatum ad illam lædendam, atque hoc modo fit Deo æquali satisfactio pro injuria per peccatum illata.

Atque ex hac sententia sic exposita & confirmata inferunt, & docent, qui illam defendunt, peccatori, quantum ad remissionem peccati spectat, nullum fieri gratiæ beneficium, præter gratiam donationem auxilii excitantis, & adjuvantis, sufficientis, & efficacis, necessariæ ad contritionis & amoris actum eliciendum. Dico, quantum ad remissionem peccati spectat, quia certum est, peccatori contrito non tantum remitti peccatum, sed etiam infundi gratiam, cum omnibus donis habitualis justitiæ, quæ distincta sunt, & nova gratiæ dona ac beneficia, & de potentia saltem absoluta separabilia a remissione peccati, quæ fit per actum; & certum est nunc de facto gratiæ infundi homini contrito, sive dicamus prius natura infundi ad contritionem habendam, sive posterius natura, ratione contritionis jam habitæ: tamen, seclusa habituali gratia, & præcise ac formaliter loquendo de remissione peccati, nullum Dei beneficium continet juxta hanc opinionem, præter donationem ipsius actus dilectionis, seu contritionis, qui donum Dei est ratione prædictorum gratiæ auxiliorum, quibus fit. Ratio hujus deductionis manifesta est ex dictis, quia posito actu dilectionis in anima, ille in sua intrinsece ac formaliter, & omnino connaturaliter expellit culpam, sicut lumen expellit tenebras: ergo, sicut posito lumine in aere nihil aliud ex parte luminis, aut Dei, est necessarium, ut expellantur tenebræ, imo nec Deus ipse impedire potest, quin expellantur, itante illa suppositione; ita stante contritione, nec impedire potest Deus, quin expellat peccatum, neque necessarium est, ut novi aliquid conferat, vel aliquid gratis remittat, ut peccatum expellatur, quia & secluso quocumque alio expelletur, & cum ipsa contritio sit ad æqualitatem sufficiens ad peccatum tollendum, superflua est omnis alia benevola acceptatio, seu gratuita remissio. Concluditur ergo, Deum gratis remittere peccatum homini contrito nihil aliud esse, quam gratis dare illi contritionem, seu auxilium gratiæ, necessariū ad illam habendam, sicut solem expellere tenebras ab aere nihil aliud est, quam illuminare illum, quantumvis hæc ratione distinguantur. Concluditur subinde, quando remittitur homini contrito peccatum, non alia ratione propter Christi meritum & satisfactionem remitti, nisi quia propter Christum datur totum auxilium gratiæ necessarium ad contritionem habendam, non vero quia propter Christum acceptetur ipsa contritio, & per illam, seu ratione illius, remittatur peccatum, quia nulla est

Itatio.  
Remissio  
nem pec-  
cati non  
est bene-  
ficium  
gratiæ a  
contritione  
distinctum.

Tertium  
prioris  
sententiæ  
funda-  
mentum

talis



talis nova acceptatio, neque hic est effectus gratiæ, sed intrinseca perfectio contritionis, & proprius ac connaturalis formalis effectus ejus, sicut quamvis propter Christum infundatur gratia habitualis parvulo baptizato, tamen, quod per gratiam illam tollatur peccatum originale, & anima illa reddatur proportionata ad gloriam, non est novus effectus distinctus ab infusione gratiæ.

Quæ omnia ita confirmari possunt ex dictis, quia si præter contritionem habitum necessarium est novum Dei beneficium, ut remittatur peccatum, vel illud est aliquid positivum, intrinsecum animæ, & illi inhærens; vel est aliquid privativum physicum ad reale; vel est extrinsecus Dei favor, aut qualibet alia extrinseca denominatio ab actu Dei increato: nihil autem horum dici potest, ut sigillatim ostendam. Primum patet, quia interrogo, quid sit illud positivum denuo infundendum præter actum, ut deleatur peccatum. Dices esse habitualem gratiam & justitiam, nihil enim aliud excogitari potest. Sed contra hoc sunt duo. Primum, quia juxta probabilem sententiam prius natura gratia infusa, quam habeatur contritio, & nondum intelligitur expulsum peccatum, sed expectatur contritio, ut expellatur; ergo, juxta illam saltem sententiam, non intelligitur expelli per aliquid infusum post contritionem. Secundum & magis apparet est, quia non est magis proportionatus talis habitus sic infusus ad expellendum peccatum, quam sit ipsemet actus, ut probatum est: ergo si per actum non tolleretur, nec per infusionem habitus tolleretur. Et hinc etiam constat nullam privationem physicam requiri, quia neque necesse est, privationem novam fieri, quia per remissionem peccati nihil positivum physicum ab anima expellitur, per se loquendo, cum peccatum ipsum in privatione consistat: neque etiam necesse est, aliam privationem tolli, præter privationem gratiæ, de qua eadem ratio est, quæ de ista forma. Probatur ergo alia pars illius antecedentis, quia alias remissio peccati formaliter fieret per extrinsecum favorem, seu non imputationem, contra Concilii Tridentini decretum. Sequela patet primo, quia reliqua non sufficere dicuntur sine hoc favore. Secundo, quia hic favor dicitur esse novum gratiæ beneficium: est ergo quid separabile ab actu: ponamus ergo separari, & peccatori habenti contritionem Deum non conferre hoc novum beneficium, manebit ergo in peccato, etiam stante contritione, & amore super omnia; ergo si adiuncto illo favore expellitur peccatum, signum est, per illum solum formaliter expelli, quod erat inconveniens illatum. Ac tandem sequitur, nihil posse facere hominem, etiam per gratiam Dei, quo necessario, necessitate absoluta, expellat a se peccatum, quod videtur valde absurdum & contra excellentiam gratiæ, ac divinam bonitatem; unde fieret, posse peccatum conservari in anima contra hominis perfectam voluntatem, ex sola Dei voluntate, quod est quodammodo Deo attribueretur peccatum, saltem quoad durationem & conservationem. Atque hæc videtur esse tota vis, seu verisimilitudo hujus sententiæ, in qua tam confirmanda, quam examinanda non possumus non miscere multa ex materia de gratia & justificatione: sed neque etiam potuimus ea omnino prætermittere, quia multum ex hac dependet intelligentia præsentis disputationis, de necessitate satisfactionis Christi, & quid nobis ad remissionem peccati obtinendam contulerit.

Contrariam sententiam omnino veram esse censeo: ut tamen eam ex his, quæ nobis notiora vel certiora esse videntur, declararem, incipiam ab hoc ultimo puncto, quem ex citata sententia inferebam. Dico ergo primo, simpliciter & absolute fatendum esse, hominem per actum contritionis supernaturalem, ac perfectum, & includentem absolutam dilectionem Dei super omnia, se disponere ad remissionem peccati obtinendam. Hæc assertio mihi tam certa est, ut existimem, non posse sine temeritate negari: est enim hæc communis sententia Theologorum, ut constat ex D. Thom. 1. 2. q. 13. art. 5. & 8. ubi inquit, Motum liberi arbitrii in Deum, & in peccatum ordine naturæ antecedere remissionem culpæ, tamquam dispositionem ad illam, & 3. p. q. 86. ubi in hoc sensu docet art. 1. per poenitentiam deleri peccatum, ut inferius latius explicabimus: & artic. 6. similiter docet actus poenitentis esse causam remissionis culpæ, vel dispositionem secundum se, seu prout sunt actus talium virtu-

tum, vel effective, prout sunt pars sacramenti; & in solut. ad 1. declarat, hanc dispositionem includere actum fidei formatam; & in solut. ad 2. magis explicat, esse actum fidei, charitatis, & poenitentiae; & in 3. d. 19. q. 1. art. 1. q. 1. dicit, gratiam esse, quæ formaliter delet peccatum, sicut albedo delet nigredinem; in quæst. autem 2. addit, ex parte nostra requiri, ut præparemur ad hunc effectum recipiendum per fidem intellectus, & charitatem affectus. Idem docet expresse q. 28. de verit. artic. 8. ad 1. 2. & seq. idem Scot. 4. d. 14. q. 2. art. 2. Duran. q. 1. Palud. q. 1. art. 1. Gabr. q. 1. art. 2. & alii communiter, tum ibi, tum d. 15. & in 3. d. 19. & 20. Idemque docent moderni scriptores, qui contra hæreticos hujus temporis scribunt, ostendentes, non solum fidem, sed etiam dilectionem & poenitentiam, esse dispositiones ad remissionem peccati obtinendam, ut videre licet in And. Veg. lib. 6. in Trid. cap. 28. 29. & 30. & in Bell. lib. 1. de justif. 13. Stap. lib. 1. de justif. Prolog. 1. & cap. 28. Albert. Pighi. contr. 3. & 9. qui varia congerunt Scripturæ testimonia, quæ infra ponderabimus. Nunc præcipue probatur hæc veritas ex Concil. Trident. sess. 6. cap. 6. ubi agens de conversione peccatoris, & dispositionem ejus describens, primum ponit fidem, deinde timorem, postea spem, quarto dilectionem, ac tandem odium, & detestationem peccati: postea vero cap. 7. subdit. *Hanc dispositionem justificatio ipsa consequitur*. Video tamen responderi posse, Concilium non esse locutum de dilectione perfecta, quæ non solum natura, sed tempore, potest justificationem antecedere. Quod etiam fundari potest in verbis illis: *Illumque* (id est Deum, vel Christum) *tanquam omnis justitiæ fontem diligere*, in quibus verbis videtur Concil. loqui de amore imperfecto: hoc enim indicat primo verbum illud, *incipiunt*, quod solum denotat inchoationem quandam actionis. Secundo verbum illud, *diligere*, absolute prolatum, & sine illa additione *super omnia*, commune est perfecto & imperfecto amoris: non ergo sine causa abstinuit Conc. ab illa adjectione *super omnia*, ut etiam Veg. d. cap. 3. notavit: sed potius id fecit, ut abstineret ab opinionibus Theologorum, & absolute de dilectione, sive perfecta, sive imperfecta loqueretur. Tertio, quia videtur Conc. potius loqui de amore concupiscentiæ, quam amicitiae Dei, ut patet ex connexionem præcedentium verborum. *Ad considerandam Dei misericordiam se convertendo, in spem eriguntur, fidentes, Deum sibi propter Christum, proprium fore, illumque tanquam omnis justitiæ fontem diligere incipiunt*; non ergo agit de amore Dei propter se ipsum, sed propter spem de illo conceptam, & quia est totius justitiæ fons, qui est amor concupiscentiæ. Quarto, Concilium ibi non agit de dispositione per veram contritionem: ergo neque de dilectione, seu charitate Dei super omnia. Antecedens patet primo ex illis verbis: *Ac propterea moventur adversus peccata per odium aliquod & detestationem*: illa enim particula, *aliquod*, diminuens esse videtur, quod magis declarant subjuncta verba: *Hoc est per eam poenitentiam, quam ante baptismum agi oportet*: constat autem, poenitentiam ante baptismum necessariam non esse contritionem, sed minus perfectam dispositionem sufficere. Et confirmari potest ex eo, quod Concilium loquitur de justificatione, quæ fit per baptismum, ut patet ex cap. 7. ubi baptismum dicit esse causam instrumentalem hujus justificationis, dispositio autem ab baptismum non necessario est per amorem perfectum: ergo.

Sed nihilominus hæc interpretatio aliena est a mente Concilii: nam licet probabile sit Concilium non limitasse, nec coarctasse doctrinam suam ad solam justificationem, quæ fit per dispositionem perfectam contritionis & dilectionis Dei super omnia, tamen certum etiam existimo, illam non exclusisse, sed comprehendisse potius, atque adeo doctrinam illam generalem esse ad omnem justificationem adultorum, sive fiat cum imperfecta dispositione, ope & efficacia alicujus sacramenti re ipsa suscepti, sive cum perfecta dispositione, absque reali susceptione sacramenti, & consequenter non loqui tantum de dilectione imperfecta, sed etiam de perfecta. Quod probabo primo, quia per se incredibile est, quod Concilium tradens integram, & dogmaticam doctrinam de justificatione, omiserit illam, quæ fit absque reali susceptione sacramenti, neque docuisse, quænam dispositio & præparatio ad illam adhibenda sit: sic enim diminutam doctrinam

1. Probatio ex Concil. Trident. sess. 6. c. 6. diligenter expenditur.

Verus Concil. sensus.

Probatum primo.

Gratia sententia declaratur ac confirmatur. Prima assertio.

Contritionem perfectam esse, ut patet ex D. Thom. 1. 2. q. 13. art. 5. & 8. ubi inquit, Motum liberi arbitrii in Deum, & in peccatum ordine naturæ antecedere remissionem culpæ, tamquam dispositionem ad illam, & 3. p. q. 86. ubi in hoc sensu docet art. 1. per poenitentiam deleri peccatum, ut inferius latius explicabimus: & artic. 6. similiter docet actus poenitentis esse causam remissionis culpæ, vel dispositionem secundum se, seu prout sunt actus talium virtu-



**Secundo**, *Arinam* tradidisset. Secundo, quia aliàs illa doctrina de justificatione, & de dispositione ad illam, non esset communis ad justificationem, quæ fiebat ante novam legem traditam, & sacramenta ejus instituta, & consequenter tota illa doctrina de gratia, & de iustitia inherente, non esset communis omni tempori, & in omni statu naturæ lapsæ, secundum communem justificationis rationem, quod nullus (ut arbitror) Catholicorum concedet. Quod si doctrina illa communis est, necesse est fateri, omnes illos actus eo capite numeratos, prout fuerunt necessarii & sufficientes ad remissionem peccati obtinendam ante sacramenta legis novæ, vel nunc etiam absque reali susceptione sacramenti, esse dispositiones ad remissionem peccati; certum est autem ad obtinendam hoc modo remissionem peccati, necessariam esse dilectionem charitatis, quam vocamus super omnia, quia sine charitate nihil prodesse potest, quantum est ex opere operantis, quæ est recepta Theologorum sententia, quam non obscure docuit idem Conc. sess. 14. cap. 4. eamque latius tractabimus infra tom. 4. Tertio, quia aliàs Concil. illo cap. 6. & 7. doctrinam incertam, autem saltem minus certam tradidisset, omisisset autem certam; docet enim, eam dispositionem, quam ibi describit, talem esse, ut ad eam statim justificatio, & remissio peccati consequatur: hoc autem certum est, si sub illa dispositione dilectio charitatis, & perfecta, contineatur. Si autem sit sermo de sola dilectione imperfecta, est res adhuc incerta, etiam de illa justificatione, quæ per sacramentum fit: nam, si sit sermo de justificatione extra sacramentum, non solum incerta, sed etiam falsa est doctrina: quia ad illam dispositionem imperfectam non sequitur justificatio extra sacramentum: utrumque autem est valde absurdum. Primum patet, quia quamvis probabilius, & verum sit, sacramentum, præcipue baptismi & poenitentiae, facere hominem ex attrito contritum, tamen adhuc hoc non est certum de fide, & consequenter neque est tam certum, quam est doctrina, quam ibi tradit Concil. ergo non est verisimile, agere tantum de dilectione imperfecta. Secundum patet, quia Concil. non dicit, ad illam dispositionem justificationem consequitur, suscepto sacramento, sed simpliciter ait: *Hanc dispositionem justificatio ipsa consequitur*: ergo necesse est, hoc verum esse, etiam si sacramentum re ipsa non suscipiatur. Et sine dubio maxime oportuit, ut Concil. describeret, & doceret dispositionem, quæ per se habet justificationem adiunctam. Quarto, si Concil. voluisset solum imperfectam dispositionem tradere, non oportuisset, amorem inter illos actus numerare, nam illa dispositio per solum attritionem habetur, attritio autem nullum amorem requirit, etiam imperfectum: utrumque enim constat ex eodem Concil. Trid. sess. 14. cap. 4. ubi & hanc imperfectam dispositionem in attritione constituit, & distinguens duos modos attritionis, nullam mentionem facit amoris. Et hæc assertio magna ex parte dissolvit objectiones contrarias, ut videbimus. Quinto, ex verbis ipsius Concil. nam in primis verba illius capitis optime & facile hunc sensum admittunt: quia dilectio Dei absolute dicta charitatis dilectionem significat, ut patet ex modo loquendi Scripturæ. Eccles. 2. *Qui timetis Dominum, diligite illum, & illuminabuntur corda vestra*; & Joan. 14. *Qui diligit me, sermonem meum servabit, & Pater meus diligit eum, &c.* Et deinde hoc amplius explicatur ab eodem Concil. statim can. 3. dicente. *Si quis dixerit, sine præveniente Spiritus sancti inspiratione, atque ejus adiutorio hominem credere, sperare, diligere, aut poenitere posse, sicut oportet, ut ei justificationis gratia conferatur, anathema sit.* Interrogo enim, an in hac definitione loquatur Concil. de dilectione charitatis? Existimo certe, neminem negaturum, alioquin ex vi hujus definitionis non esset de fide, ad dilectionem charitatis esse necessarium auxilium excitans & adjuvans: neque in tota illa doctrina sermo Concil. fuisset de illo actu, cum tamen sit omnium præcipuus & de illo maxime sit certa illa doctrina: nam, quod ad dilectionem imperfectam sint absolute necessaria illa specialia auxilia, non est ita certum. Si autem ibi loquitur Concil. de dilectione perfecta charitatis, signum est, de eadem fuisse locutum in cap. 6. nam hic canon illi capiti respondet, & doctrinam ibi traditam in summam redigit, & definit. Et in illo etiam canone aperte docet Concil. dilectionem Dei, de qua ibi loquitur, esse dispositionem ad justificationem, & remissionem pecca-

ti: hanc enim vim habet illa particula: *Ut de justificationis gratia conferatur*: illa enim dictio, *ut*, habitudinem indicat unius ad alterum, quæ hic esse non potest, nisi dispositionis ad formam. Sexto, ex locis Scripturæ, quibus Concil. suam doctrinam confirmat: nam, post doctrinam traditam de dispositione necessaria ad iustitiam, subdit: *De hac dispositione dictum est, Preparare corda vestra Domino*, ut omittam alia loca, quæ de aliis actibus adducit, testimonium hoc ultimum re vera intelligi non potest, nisi de præparatione perfecta, quæ per se sine sacramento tunc posset justificare. De qua etiam intelligitur, quod cap. 5. idem Concil. adducit ex Zach. 1. & Joel. 2. *Convertimini ad me, & ego convertar ad vos*, ut est per se manifestum, nam ibi promittit Deus gratiam suam, & benevolentiam, homini convertenti se ad ipsum, quæ tamen promissio non erat facta, nisi convertenti se perfecte per absolutam & efficacem dilectionem; hæc ergo est dispositio, de qua Concilium ibi doctrinam tradere incipit, quam cap. 6. perficit.

Neque contra hanc interpretationem quicquam obstant conjecturæ in contrarium adductæ. Primo enim verbum illud, *incipiunt*, non indicat imperfectionem essentialem (ut ita dicam) seu inefficacem dilectionem, sed indicat initium temporis, in quo peccator ex non diligente Deum, fit diligens: potest autem in primo instanti, in quo incipit diligere Deum, efficaciter & super omnia diligere illum; hoc autem verbum magis positum videtur in actu dilectionis, quam in actu fidei, spei, & timoris, de quibus Concilium locutum fuerat, quia illi necesse non est, ut simpliciter incipiant in instanti, in quo homo justificatur, quia possunt tempore antecedere justificationem, dilectio autem tunc incipit, quia non potest tempore antecedere; ex quo potius licet colligere, sermonem esse de dilectione perfecta, quia imperfecta non necessario tunc incipit, sed potest tempore antecedere. Nec videri debet novum, quod charitas actualis essentialiter perfecta & efficax, vocetur incipiens; cum etiam status charitatis nondum satis provectæ, ac conjunctæ cum exercitio virtutum, & mortificatione passionum, soleat vocari charitas incipiens, seu incipientium, ut legimus apud D. Thom. 2. 2. q. 24. art. 9.

Secundo, quamvis verbum illud, *diligere*, possit aliquo modo dici de dilectione imperfecta, tamen simpliciter & absolute prolatum potius perfectam significat, ut vidimus. Et Joan. 1. can. cap. 3. absolute ait. *Nos scimus, quoniam translati sumus de morte ad vitam, quoniam diligimus fratres*; & cap. 4. *Omnis, qui diligit ex Deo natus est*; & infra: *Qui diligit Deum, diligit & fratrem suum, nam si quis dixerit, quoniam diligo Deum, & fratrem suum oderit, mendax est*: ergo proprie & simpliciter non dicitur diligere Deum, nisi qui efficaciter eum diligit vero & obedientiali amore: nam, qui ita non diligunt, solum secundum quid diligunt, de quibus scriptum est: *Quid dicitis mihi Domine, Domine, & non facitis, quæ dico*. Sed licet demus, hoc verbum in illa doctrina Concilii non sumi cum tanto rigore, tamen neque etiam est, cur in ea improprietate sumatur, in qua solum significat dilectionem imperfectam; ergo, ut minimum, dicendum est, de quacumque dilectione Concil. loqui, quæ ad justificationem sufficienter disponat, sive in sacramento, sive extra illud.

Tertio, diligere Deum, ut omnis iustitiæ fontem, non est diligere amore concupiscentiæ; sed est diligere Deum, auctorem gratiæ & omnium supernaturalium bonorum, quomodo charitas diligit ipsum, etiam si propter se ipsum maxime diligit, sicut naturalis amor diligit Deum, ut creatorem, vel (ut ita dicamus) ut totius naturæ fontem, quod non est amare illum amore concupiscentiæ, sed naturali benevolentia, & propter eam bonitatem, quam ut auctor naturæ præ se fert: sic ergo diligere Deum, ut totius iustitiæ fontem, non est diligere ex concupiscentia, sed ex supernaturali benevolentia propter excellentem bonitatem, quam Deus habet, ut auctor est supernaturalium bonorum. Nec vero dicit Concilium, hunc amorem pertinere ad spem, sed potius supponere spem, & post conceptam spem, per eam erigi hominem, & quasi sublevari ad diligendum Deum, utique propter se ipsum; nam amor concupiscentiæ non sequitur proprie ex spe, sed ad illam potius supponitur, spes autem, quamvis per se & directe non sit principium amoris amicitiae, tamen alliecit animum ad eum amorem; aliud est enim amare benefacto-

Sexta probatio.

Solvuntur objectiones contra datam expositionem.

Canon. 3. Jo. 1. 6. ejusdem Concilii obiter exponitur.



nefactorem, aliud vero amare, ut beneficiat: hoc posterius est concupiscentiæ, illud vero potest esse amicitiae aut benevolentiae, quam beneficium susceptum, vel speratum conciliat.

Quarto, falsum est, Concilium non agere de perfecta dispositione, quæ per contritionem esse potest, quidquid sit, an tractet de sola illa, quod nobis necessarium non est: nam quod dispositio perfecta non sit excludenda ab illa doctrina, satis est a nobis probatum. Quod autem Concilium dicat, *per odium aliquod & detestationem*, nullum argumentum est, quod indicare voluerit imperfectam detestationem, seu secundum quid. Sed, vel ille est usitatus modus loquendi, nullum continens mysterium, vel, ad summum, indicare voluit, esse posse varios actus detestationis sufficientis, & alique illorum esse necessarium ad remissionem peccati obtinendam, præsertim quia, ut dixi, Concilium ibi non agit de sola justificatione per sacramentum susceptum vel in re, vel in voto, post promulgatum Evangelium, vel etiam sine sacramento (ut ante Evangelicam legem) ut cap. 4. ejusdem sessionis idem Concilium aperte declarat, & ideo indefinite dixit, *aliquod odium & detestationem*: quia non semper idem modus odii & detestationis in omni modo justificationis requiritur. Similiter nihil refert, quod Concilium loquatur de poenitentia, quam ante baptismum agere oportet: quia non tantum poenitentiam imperfectam, quæ est per attritionem, sed etiam perfectam oportet ante baptismum agere; & certe D. Petrus, quem Concilium in testem adducit, quando Actor. 2. dicebat: *Poenitentiam agite, & baptizetur unusquisque vestrum*, non tantum ad imperfectam poenitentiam, sed simpliciter ad poenitentiam, & maxime ad perfectam, auditores invitabat, hæc enim est simpliciter prædicanda & persuadenda populo; etiam si minor sufficere possit: & ideo Concilium non dixit, quam ante baptismum agere necesse est, sed *oportet*: quod verbum optime cadit in id, quod est melius, & securius, ac certius: eo vel maxime, quod Concilium non dicit, poenitentiam, quam in baptismo agere oportet, sed, *ante baptismum*, ut comprehendat etiam justificationem illam, quæ ante baptismum in re susceptum, per veram ac perfectam poenitentiam obtineri potest: quia, ut dixi, non agit de sola justificatione per baptismum in re, sed etiam in voto. Neque contra hoc obstat, quod cap. 7. inter causas justificationis numeret baptismum, quia non est necesse, ut sit talis causa, quæ in omni justificatione instrumentaliter operetur, sed quando applicari potest, ut debet, seu re ipsa applicatur. Et hoc ipsum significavit Concilium dicens: *Instrumentalis autem, sacramentum baptismi, quod est sacramentum fidei, sine quo nulli unquam contigit justificationem*. Ac si diceret, sine fide, utique per charitatem operante, nulli cōtingere justificationem, sine baptismo autem cōtingere: quia, licet sit instrumentum justificationis satis est interdum, quod per fidem vivam in voto habeatur.

Ex his ergo satis, ut arbitror, ostensum est, juxta doctrinam Concilii Tridentini, negari non posse, quin actus charitatis Dei, quem homo habet ex auxilio gratiæ, cum primum homo convertitur a statu peccati ad statum justitiæ, sit dispositio ad ipsam justitiam, quod etiam obiter testimoniis Scripturæ ab eodem Concilio adductis confirmatum est: & statim plura ex eadem Scriptura & Patribus afferemus.

Secundo ratione ita declaratur; nam aliqua est dispositio perfecta, per quam potest homo præparari ad remissionem peccati, ita ut, illa posita, statim remissio fiat, etiam sine reali susceptione sacramenti: sed hæc dispositio non est, nisi quæ includit actum dilectionis efficacis Dei: ergo, hic etiam actus est dispositio ad talem remissionem. Major videtur omnino certa ex illis Scripturæ locis, in quibus peccatori vere poenitentiam agenti, & se ad Deum convertenti, remissio peccatorum promittitur, quæ in materia de poenitentia latius tractantur, & statim ea attingemus; estque hoc omnino necessarium, ut certa aliqua via ac lege possit homo remissionem peccati obtinere, si velit, etiam si sacramentum suscipere non possit; quia nec Deus remittit peccatum homini adulto sine illius libera cooperatione & consensu, neque etiam denegat remissionem peccati ei, qui, quod in se est, facit eum divino auxilio, ut illam consequatur. Minor etiam est certa, & communis doctrina Theologorum, qui, li-

cet dubitent, an interdum per accidens sufficiat dilectio virtualis inclusa in dolore de divina injuria, qua talis est, tamen fere omnes conveniunt, illum actum esse per se necessarium ad consummatam dispositionem, veramque contritionem, quam propterea definiunt esse dolorem de peccato propter Deum summe dilectum. Cui sanæ doctrinæ satisfavet, quam ex Concilio Tridentino hæcenus declaravimus, & clarius, quam tradit idem Concilium sess. 14. cap. 4. dicens: *Contritionem aliquando esse charitatem perfectam, & tunc hominem reconciliare Deo, antequam sacramentum suscipiat*. Et ratio est, tum quia cum peccatum mortale sit aversio a Deo, & quoddam virtuale odium ejus, & injuria quadam ratione infinita, non est dispositio sufficiens ad illius remissionem, nisi actus continens perfectam conversionem ad Deum, quæ non fit, nisi per efficacem dilectionem; & ideo in Scriptura non promittitur hæc remissio, nisi ei, qui se totum in Deum convertit, & Deum diligit, Jo. 14. Joel. 2. & e contrario, qui non diligit, dicitur in morte manere 1. Joan. 3. quia re vera nondum facit, quod in se est, ut peccati remissionem consequatur.

Ad hanc vero rationem responderi potest, verum quidem esse, neminem consequi remissionem peccati mortalis, secluso sacramento, sine efficaci actu dilectionis Dei, per se loquendo, non tamen quia sit dispositio ad remissionem peccati, sed quia sit dispositio ad gratiam, & habitualement justitiam, sine cujus infusione non remittitur mortale peccatum. Itaque, juxta hanc solutionem distinctio fit inter infusionem justitiæ, & remissionem peccati mortalis, & ad illam dicitur dilectio esse dispositio, non vero ad hanc. Imo sunt, qui distinguunt inter justificationem & sanctificationem, & dicant, dilectionem esse dispositionem ad justificationem, ad sanctificationem vero minime, sed esse potius formam sanctificantem. Justificatio enim proprie dicit rectitudinem animæ habitualement, & permanentem, juxta doctrinam Aristot. lib. 5. Ethic. cap. 6. & lib. 10. cap. 3. actus autem est propria dispositio ad habitum, & ideo etiam actus dilectionis est ultima dispositio ad habitualement justificationem. Sanctificatio autem non requirit habitualement rectitudinem, sed quacumque ratione mundetur anima a peccato, & pura coram Deo reddatur, sanctificari dicitur: potest autem per actum mundari a peccato, & consequenter sanctificari, & ideo ad neutrum horum actus dilectionis est propria dispositio, sed causa formalis, per se formaliter justificans, & mundans a culpa, non tamen justificans, quia adhuc superest habitualis justitia infundenda animæ, ad quam ille actus disponit.

Sed mirum est, quod in re tam gravi sine cogente ratione vel auctoritate hujusmodi distinctiones multiplicentur, ad obscurandam potius, quam illustrandam fidei doctrinam. Nam in primis, quod attinet ad distinctionem de sanctificatione, & justificatione peccatoris, tam in sermone Concilii Tridentini, quam antiquorum Patrum & Theologorum, hæc duo idem sunt. Primum patet ex sess. 5. can. 1. ubi definit. *Adam, transgrediendo mandatum Dei, justitiam & sanctitatem, in qua constitutus fuerat, amisisse: In qua dicit, quasi in una & eadem, non in quibus, quasi in multis & distinctis. Et simili modo cap. 2. dicit, eam sanctitatem & justitiam, quam nobis Adam perdidit, Christum nobis recuperasse, factum nobis justitiæ, sanctificationem, & redemptionem, 1. ad Corinth. 2. Et sess. 6. cap. 7. justificationem ait esse, non solum peccatorum remissionem, sed & sanctificationem, & renovationem interioris hominis, juxta id 1. ad Corinth. 6. Hæc quidem suis, sed abluti estis sed sanctificati estis, sed justificatione estis. Præterea Basil. lib. de Spiritu sancto cap. 16. ait: Non facere sanctum, nisi Spiritum sanctum inhabitantem per gratiam corda nostra. Augustinus etiam, ubicumque loquitur de vera sanctificatione hominis, non aliam agnoscit, nisi quæ fit per veram justitiam, & inhabitantem gratiam: & e converso, remissionem peccati, sicut sanctificationem, ita & justificationem indifferenter appellat; sic lib. 3. quæst. super Levit. q. 84. distinguit sanctificationem visibilem ab invisibili, in hac posteriori dicit esse fructum omnium visibilium sacramentorum, & conferri per invisibilem Spiritus sancti gratiam, per quam dicit esse sanctificatos homines, qui sancti sunt. Et idem sumitur ex eodem lib. 2. de peccat. mer. & remiss. cap. 26. ubi varios sanctificationis modos distinguit: & eodem modo loquitur, ubicumque agit de sanctificatione*

Respons-  
detur.

Instatur.

Sanctifi-  
catio, &  
justifica-  
tio pecca-  
toris idem  
sunt.

Summa  
totius ar-  
gumenti.

Secunda  
probatio  
ex ratio-  
ne.



per baptismum, & alia sacramenta aliis vero locis eadem sanctificationem justificationem appellat; & specialiter epist. 120. de gratia novi testamenti cap. 20. justificare impium, ait, nihil aliud esse, quam ex impio facere pium. Et idem sentit lib. 2. contr. Julian. versus finem; & expressius in expositione inchoata epistolæ ad Rom. num. 22. est ergo aliena a sanctis Patribus illa distinctio. Ad denique, sicut datur justitia habitualis, ita & habitualis sanctitas; & per eam formalis remissio peccati, ut patet in parvulis, quos nemo negabit, & mundari a peccato, & justificari, & sanctificari; & e converso, sicut datur sanctitas actualis, quæ nihil aliud est, quam exercitium sanctorum actuum, vel etiam sanctificantium aliquo modo, ita etiam datur justitia actualis, quæ nihil aliud est, quam exercitium iustorum seu rectorum actuum, vel etiam justificantium aliquo modo; & sicut actus justitiæ non facit hominem simpliciter justum, nisi illum reddat habitualiter justum, & permanentemente rectum, ita neque actus sanctus sanctificat simpliciter hominem, nisi eum reddat habitualiter & permanentemente sanctum, & carum Deo. Quod si, ut actus simpliciter sanctificare dicatur, satis est, quod & peccatum expellat, & eam rectitudinem, quam actualiter confert, realiter ac physice existens, moraliter relinquat etiam si physice desinat esse, eadem ratione dicetur simpliciter justificare, eo quod justitiam actualem conferat, quæ transacto actu moraliter perseverat, etiam seclusis habitibus physicis. Nulla ergo est in præsentī distinctio illa de justificatione, & sanctificatione, quare August. citatis locis ita dicit; justificationem fieri per actus, sicut sanctificationem; & conc. 26. in Psalm. 118. ita distinguit justitiam actualem & habitualement, sicut sanctitatem & sumitur ex D. Thom. 1. 2. q. 113. art. 2. ubi etiam dicit, justificationem importare motum ad justitiam; & in nobis fieri per remissionem peccati, & gratiæ infusionem. Et eandem doctrinam significavit Cajetan. 1. 2. q. 111. art. 2. ad confir. 3. argum. & latius Ruard. artic. 8. cont. Luther. & Staplet. lib. 5. de just. proleg. 2. & 3. Bellarm. lib. 1. de just. cap. 1.

Illā ergo posteriori distinctione rejecta, juxta illam sententiam fatendum est, dari in nobis perfectam, & ultimam dispositionem ad satisfactionem & sanctitatem, sicut datur ad justificationem & justitiam. Quod si dispositio illa ad sanctitatem habitualement est vera sanctitas, vereque sanctificat per se ipsam, etiam ut intelligitur antecedere habitualement sanctitatem; eadem ratione dicendum est, esse veram justitiam, vereque justificare, ut ostensum est: ex quo ulterius sequitur, in illa sententia dispositionem hanc, de qua agimus, non esse dispositionem ad primam justitiam, seu ad primam sanctitatem, quia ante illam justitiam & sanctitatem habitualement, ad quam disponit, supponitur in nobis alia prior sanctitas, veraque sanctificatio, quæ formaliter fit per ipsummet actum, qui est dispositio ad habitum: hoc autem est alienum a modo loquendi omnium Theologorum, parumque consentaneum doctrinæ Concil. Trident. ut ex dictis constare potest, & amplius constabit ex dicendis. Nam ulterius ex dictis sequitur, nos nunquam disponi ad gratiam justificationis, ut a Conc. Trident. definitur, & a D. Thom. supra, & ab omnibus Theologis tractatur; consequens autem est contra idem Concilium, eundemque D. Thom. & ceteros Theologos. Sequela declaratur, & probatur in hunc modum, nam juxta prædictam doctrinam, noster actus solum est dispositio ad infusionem habitualis justitiæ, quæ supponit jam peccatum remissum per ipsum actum: ergo non est dispositio ad justificationem. Probatur consequentia, quia justificatio est translatio a statu peccati in statum gratiæ, ut idem Concilium definit, eadem sess. 6. c. 4. sed dicta infusio habituum non est translatio a statu peccati ad statum gratiæ, quia jam supponit peccatum remissum. Unde, solum est translatio a statu unius sanctitatis, scilicet, actualis, seu moralis ad alium statum sanctitatis habitualis, ac physice permanentis: ergo revera non est dispositio ad justificationem impii, quæ remissionem peccatorum includit, ut idem Concilium docet cap. 7.

Contritio non est tantum dispositio ad infusionem habituum, sed etiam ad remissionem culpæ.

Ex quo ulterius infero, omnino falsum esse dicere, dispositionem perfectam, quæ actum dilectionis includit, non esse dispositionem ad remissionem peccati, sed ad solos habitus. Primo, quia plane pugnat cum doctrina Conc. Trid. quod d. cap. 7. sic inquit. *Hanc dispositionem justificationis a consequitur, quæ non est sola peccatorum remissio, sed etiam dilectio, & amor Dei.*

Suarez Tom. XVI.

*missio, sed sanctificatio, & renovatio interioris hominis per voluntariam susceptionem gratiæ & donorum, unde homo ex injusto fit justus, & ex inimico amicus.* Ubi primo considerandum est, quod Concilium ait, justificationem includere remissionem peccatorum: ergo, quod est dispositio ad justificationem, necesse est etiam, quod sit ad remissionem peccati; actus autem dilectionis est dispositio simpliciter ad justificationem, ut in principio ejusdem capituli docet Concilium, & in progressu ejus, cum dicit, unicuique dari justitiam juxta ejus dispositionem, & cum justitia dari remissionem peccatorum, & can. 3. cum dicit, per illos actus fidei, spei, dilectionis, & penitentiae, præparari hominem, ut ei justificationis gratia conferatur. Et ita intellexerunt hanc doctrinam Concilii omnes moderni scriptores, ut patet ex Vega lib. 6. in Trident. cap. 28. & lib. 7. cap. 24. Soto lib. 2. de natur. & grat. cap. 13. & seqq. Staplet. lib. 5. de just. prolog. 1. Bellarm. lib. 1. de just. cap. 13. ut omittam esse hanc sententiam multo antiquiorem & communem Theologorum, qui non distinxerunt unquam inter dispositionem ad justitiam, & ad remissionem peccati: & ubicumque tractant de penitentia, illam maxime requirunt, ut detestationem peccati, penitentiam autem perfectam dicunt includere dilectionem Dei super omnia.

Unde secundo principaliter ad hoc probandum uti possumus alio testimonio ejusdem Concil. sess. 14. cap. 4. ubi agens de conditione, dicit fuisse omni tempore necessariam ad impetrandam veniam peccatorum, & præparare hominem ad eorundem remissionem: ergo contritio non est tantum dispositio ad habitualement gratiam vel justitiam, sed etiam ad remissionem peccati. Sed hic etiam dicere quisquam potest Conciliū ibi loqui de contritione imperfecta, quæ est attritio, ut patet ex definitione, quam præmittit: *Contritio est animi dolor & detestatio de peccato, cum proposito non peccandi de cetero.* Quæ tota definitio convenit attritioni. Sed si sit sensus, Concilium agere in principio illius capituli definite ac præcise de dispositione imperfecta, aperte falsum est; si autem sit sensus, Concilium ibi loqui indefinite de contritione in communi, verum quidem est; id tamen sufficit intentioni nostræ. Utrumque patet, quia inferius dividit Concilium illam contritionem, in contritionem perfectam, quæ includit veram dilectionem & in imperfectam, quæ attritio dicitur: ergo necesse est, ut in principio de contritione in communi loquutum fuerit; & ita definitio, quam assignat, utrique convenit; & neutrius propriam rationem declarat. Dices, esto ita sit, quomodo hinc inferri potest id, quod postea subdit Concilium, scilicet contritionem præparare ad remissionem peccatorum, verificari de contritione perfecta, & de dilectione, quam includit? nam quod generi attribuitur, satis est, quod de una specie verificetur. Responderetur, multis modis id manifeste colligi. Primum ex tenore verborum, quibus id docet Concilium, dicens: *Fuit autem quovis tempore ad impetrandam veniam peccatorum hic contritionis modus necessarius:* nam ante legem novam contritio necessaria ad remissionem peccatorum obtinendam, fuit contritio perfecta, & ex vero amore Dei perfecta; attritio vero, nec sufficiens fuit, ut est certissimum, nec per se loquendo, erat necessaria: nam poterat homo post recogitationem peccatorum statim ejicere perfectam contritionem, quæ esset sufficiens, etiam si attritio non præcessisset; & etiam nunc id verum est; alius non posset homo subito justificari. Ergo non possunt verba illa Conc. verificari, nisi de contritione perfecta. Unde statim subdit: *Et in homine post baptismum lapsa, ita demum præparat ad remissionem peccatorum, si cum fiducia divine misericordiae, & voto præstandi reliqua, conjunctus sit, quæ ad recipiendum sacramentum penitentiae requiruntur.* In quibus verbis aperte declarat, se loqui de præparatione ad remissionem peccatorum obtinendam, etiam ante realem susceptionem sacramenti; & loquitur manifeste de præparatione non remota, sed proxima, quæ statim habet conjunctam remissionem peccatorum. Quod tertio declaratur ex testimoniis sacræ Scripturæ, quæ adducit, in quibus aperte sermo est de perfecta contritione, ut est illud Isai. 38. *Recogitabo tibi omnes annos meos in amaritudine anime mee:* & illud Ezech. 18. *Projicite a vobis omnes iniquitates vestras, & facite vobis cor novum:* & Psalm. trigésimo. *Tibi soli*

Exp. inditur locus Concil. Trident. sess. 6. c. 7.

Alios ejusdem Concilii locos ex sess. 14. c. 4. diligenter exponitur



*foli peccavi, & malum coram te feci*, in quibus videtur David alludere ad illa, quæ responderat, ut refertur 2. Reg. 12. *Peccavi Domino*, quibus veram declarasse contritionem satis ostendit Propheta Nathan, dicens: *Domine quique transulit peccatum tuum a te*.

Quarto adjungitur ratio, quia aliàs nunquam extra sacramentum, contritio esset dispositio sufficiens ad remissionem peccati, consequens est falsum; ergo. Sequela patet, quia, vel contritio includit dilectionem formalem, aut virtutalem; & sic non dicitur esse dispositio ad remissionem peccati, sed solum ad infusionem habituum; vel non includit talem dilectionem, sed solum dolorem, & sic non est sufficiens dispositio ad remissionem peccati. Quod aliter in hunc modum explicatur: quia si non potest esse dispositio infallibiliter asserens formam secum, quæ formaliter expellit culpam, non potest dari dispositio sufficiens ad remissionem peccati; sed juxta prædictam sententiam sequitur, non posse dari contritionem, quæ sit dispositio sufficiens ad formam, qua expellitur peccatum: ergo neque ad remissionem peccati. Probatur minor, quia forma, qua expellitur peccatum in adultis, qui absque sacramento sanctificantur, dicitur non esse habitus infusus, sed actus ipse dilectionis, qui ad perfectam contritionem requiritur; ad illud vero actum nulla est dispositio sufficiens, ad quam infallibiliter consequatur, quia per se formaliter est actus liber, nec supponit alium priorem, cum quo habeat infallibilem connexionem, vel ex lege Dei, vel ex ipsa rei natura. Cum ergo Concilium doceat, in omni tempore & lege esse & fuisse aliquam contritionem, quæ sufficeret præparat hominem ad remissionem peccati obtinendam, necesse est intelligi, tam de contritione perfecta includente dilectionem Dei, pro his, qui sine sacramento in re suscepto veniam peccati consequuntur, quam de contritione imperfecta, quæ cum sacramento sufficiat, & hoc est, quod Concilium paulo inferius subdit, hanc contritionem aliquando esse perfectam charitatis, hominemque Deo reconciliare, nimirum eo modo, quem in principio capitis posuerat, scilicet sufficienter disponendo, ac præparando hominem ad prædictam reconciliationem. Tandem ex ipsa convenienti ratione tradendi doctrinam constat, Concilium in initio illius capitis non debuisse attribueri contritioni ut sic ea, quæ illi solum conveniunt ratione contritionis imperfectæ: esset enim hoc modo doctrina valde ambigua & particularis: cum ergo ait, contritionem præparare hominem ad remissionem peccati obtinendam, vel id potissimum intelligit de contritione perfecta, vel illa indefinita locutio æquivaleret universali, quod in propositionibus doctrinalibus commune est, & sic singulis membris accommodabitur distributione accommodata: nam contritioni perfectæ convenit sufficienter & proxime præparare ad remissionem peccati, etiam extra sacramentum, contritioni autem imperfectæ convenit, vel remote, vel cum sacramento.

Tertio principaliter confirmari potest hæc eadem pars, scilicet, contritionem, etiam ut includit dilectionem, esse dispositionem ad remissionem peccati ex variis locutionibus Scripturæ; nam in primis Scriptura loquitur de hac dispositione, ut de opere ipsius hominis cum auxilio Dei, de remissione autem culpæ, tanquam de opere solius Dei, & ubique ponit illam ut antecedentem, hanc vero ut subsequentem, quamvis ante ipsam dispositionem antecedit Dei excitatio & motio: ergo signum est, non fieri deletionem peccati per ipsum actum nostrum formaliter, aliàs nec antecederet remissionem, nec fieret a solo Deo, sed etiam a nobis, imo nec numeranda essent illa duo, ut diversa, ut statim latius dicemus. Assumptum patet ex illo Psalm. 31. *Dixi, confitebor adversum me iniquitatem meam Domino, & tu remisisti impietatem peccati mei*. Ubi sancti omnes intelligunt, illam confessionem fuisse anteriorem per veram contritionem, quam David distinguit a remissione peccati, solumque Deo hanc attribuit. Item ex illis supra adductis ex Zachar. 1. *Convertimini ad me, & ego convertar ad vos*, ubi certum est, sermonem esse de conversione profecta ex toto corde. Et diligenter considerandum est, in illo verbo, *Convertimini*, includi totum auxilium gratiæ necessarium, ut convertamur, de quo alibi dicitur, *Convertamur Domine & convertemur*, nam qui ad conversio-

nem invitat, offert, quicquid ex parte illius necessarium est ad conversionem, & tamen ultra id totum promittit Deus, se fore convertendum ad hominem se convertentem ad ipsum; est ergo illa conversio ad aliquod opus solius Dei, ad quod se præparat homo per conversionem suam, quod opus Dei non est aliud, quam remissio peccati, & integra justificatio peccatoris. Unde David Psalm. 6. postquam suam perfectam conversionem declaravit illis verbis, *Domine ne in furore tuo arguas me*, &c. subjungit, *Convertere Domine & eripe animam meam*, & Psalm. 84. prius dixit, *Convertite nos Deus salutaris noster*, & postea, *Deus tu conversus vivificabis nos*. Item Actor. 3. ait Petrus: *Pœnitementi & convertimini*, ut deleantur peccata vestra, ubi illa particula, *ut*, satis indicat distinctionem, & quod illa conversio sit dispositio ad hanc peccatorum deletionem; & clarius Actor. 26. Paulus narrans conversionem suam, ait missum se esse a Christo *Aperire oculos eorum*, scilicet, gentium, *ut convertantur a tenebris ad lucem, & de potestate Satanae ad Deum*, ut accipiant remissionem peccatorum, & sortem inter Sanctos, ubi eadem distinctio fit; & ponderandum est, quod tam remissionem peccati, quam sanctificationem inter se conjungit, & a conversione hominis distinguit, & utramque ratione illius dari dicit. Denique in Evangelio habemus duo egregia exempla hujus veritatis. Unum in parabola de filio prodigo Lucæ 15. quod paulo inferius expendemus. Aliud in historia de conversione Mariæ Magdalene Luc. 7. ubi Christus ita concludit; *Remittuntur ei peccata multa, quoniam dilexit multum*, ubi plane ponit remissionem peccati ut consequentem ad dilectionem; & ideo non dixit de præterito, remissa sunt ei, sed, *Remittuntur ei*, ut indicaret, non dilectionem ipsam vi sua id præstitisse, sed ipsum solum dilectione ejus motum, ex plena potestate & summa misericordia, illud beneficium contulisse. Unde, quamvis a parte rei eodem momento remissa fuerint Magdalene peccata, quo perfecte dilexit, tamen Christus Dominus ita locutus est ad indicandum, se solum tale beneficium præstare; quamquam ex parte peccatoris requiratur libera conversio. Unde Ambrosius ibi lib. 6. *Et tu* (inquit) *plurimum dilige, ut tibi remittatur plurimum; nam & Paulo remissa sunt peccata multa, quia ipse multum dilexit*. Unde in fine concludit: *Agnoscedo peccatum, veniam peto; curro ad pœnitentiam, gratiam consequor*. Ubi veniam peccati gratiam vocat, quæ fit pœnitenti, & eodem modo loquitur de eodem S. August. lib. 50. homiliarum homil. 23. optime, Gregor. homil. 8. super Ezech. Et hoc confirmat parabola, seu exemplum, quod Christus adduxit, de duobus debitoribus, quibus, cum non haberent, unde redderent, fenerator gratis remisit debitum, eamque remissionem tribuit liberalitati feneratoris, non alicui actioni debitorum; sic ergo significare voluit, Magdalenam, tametsi diligentem, non habuisse unde redderet, se tamen ei gratis condonasse delicta, quoniam fecit, quod potuit, diligendo multum. Ad hæc vero omnia excogitari potest quædam responsio, seu potius fuga, quam in tertia conclusione commodius refutabo.

Dico secundo, Remissionem peccati esse opus, & beneficium gratiæ distinctum a gratia contritionis etiam perfectæ per amorem Dei super omnia, sic enim de illa semper loquimur. Hæc conclusio non minus certa, quam præcedens videtur, cum necessario ex illa sequatur. Quia, si non esset hoc beneficium distinctum, non posset contritio ad remissionem disponere. Et hoc probant etiam testimonia Scripturæ, & Concil. Trident. paulo antea adducta. Sed præcipue sunt animadvertenda verba illa Conc. Trid. sess. 14. cap. 4. *Fuit autem quovis tempore ad impetrandam veniam peccatorum hic contritionis modus necessarius, & in homine post baptismum lapsa ita demum præparat ad remissionem peccatorum, &c.* nam, supposita expositione, quam confirmavimus, sunt efficacissima. Si enim remissio peccati non esset beneficium distinctum a contritione, nullo modo, etiam improprio, posset verificari, quod contritio præparat ad illam, vel illam impetrat, sicut contritio non impetrat, quod ego sim contritus, sed facit formaliter; si ergo eodem modo expelleret peccatum, non impetraret remissionem, maxime cum non dicatur impetrari, nisi quod ab alio est obtinendum, non vero id, quod propria

Assert. 2.

Remissio peccati diversum gratiæ beneficium est; ab ipsa contritione.

virtute



Expen-  
duntur lo-  
ca Conc.  
Trideat.

virtute sit) si ergo contritio impetrat remissionem peccati, non confert illam formaliter propria virtute, sed a Deo obtinet. In quo considero, Concilium Tridentinum eodem genere locutionis dixisse in fine illius capituli, contritionem imperfectam disponere ad Dei gratiam, & remissionem peccati in sacramento penitentiae obtinendam, ubi certissimum est, remissionem peccati esse beneficium distinctum ab attritione & sacramento: ergo eodem sensu accipienda sunt priora verba ejusdem canonis. Et illis etiam consentanea est doctrina ejusdem Concilii in sess. 6. cap. 6. & 7. supra tractata, & praesertim verba relata canonis tertii, in quibus aperte distinguit gratiam justificationis (quae remissionem peccati includit, ut de ea Concilium loquitur) ab omnibus actibus, etiam dilectionis supernaturalis, quibus homo se ad illam gratiam praeparat. Secundo ad eandem veritatem confirmandam afferre possumus alia Scripturae testimonia, in quibus ita Scriptura loquitur de contritione, & remissione peccati, ut Deus hanc promittat habenti contritionem, qui modus locutionis & promissionis non habet locum, nisi inter gratias & beneficia diversa; Sapientiae 11. *Misereris omnium, quia omnia potes, & dissimulas peccata hominum propter penitentiam*, ubi dissimulare, idem esse videtur, quod remittere seu condonare peccata, & hoc dicitur facere Deus propter penitentiam. Ubi particula *propter*, non potest significare, nisi causam dispositivam peccatoris, & motivam Dei ad remissionem peccati. Quem locum ita exponit Lyra, & juxta editionem Latinam satis quadrat; tamen, si Graecam attendamus, non multum urget hic locus, quia non habet, propter penitentiam, sed *eis ut a peccatis*, id est, *ad penitentiam*, ut sensus sit, Deum dissimulare peccata, hoc est patienter ferre, nec statim punire, ut det hominibus locum penitentiae. Quod alibi Paulus dixit: *Nescis, quia benignitas Dei ad penitentiam te adducit?* Ad Rom. 2. Clariora ergo testimonia sunt illa vulgaria Ezech. 18. *Si impius egerit penitentiam, vita vivet, omnium iniquitatum ejus, quas operatus est, non recordabor.* Et cap. 33. Si egerit penitentiam, omnia peccata ejus, quae peccavit, non imputabuntur ei. Ubi remissionem vocat non imputationem, quia loquitur de remissione poenae aeternae simul cum culpa; quae interdum vocatur non imputatio, quia jam Deus non destinat peccatorem ad talem poenam, postquam illi remittit culpam, ut notavit Divus Thom. super cap. 4. Epistolae ad Romanos. Hinc Ecclesiastici 17. dicitur. *Quam magna misericordia, & propitiatio illius convertentibus ad se;* & Jerem. 8. *Si penitentiam egerit gens illa a malo suo, agam & ego penitentiam a malo, &c.* Qui locus explicari solet de remissione poenae temporalis, seu de calamitatibus hujus vitae, quas Deus interdum propter peccata immittit, & propter penitentiam cessare facit. Sed non solum de his, verum etiam de malo aeternae damnationis, verum habet, & ita ab omnibus expositores intelligitur, imo de solo illo malo promissio illa infallibilis est. Sunt etiam optima verba illa Proverbiorum cap. 28. *Qui abscondit scelera, non dirigitur, qui autem confessus fuerit, & reliquerit ea, misericordiam consequetur.* Ubi certum est, loqui de confessione interiori, quae fit per contritionem: unde Psalm. 50. dicebat David. *Cor contritum & humiliatum Deus non despicies,* & Joel. 2. *scindite corda vestra, & convertimini ad Dominum Deum vestrum, quia benignus & misericors est, patiens & multae misericordiae, & exorabilis super malitia.*

Ad haec & similia testimonia nonnullae adhibentur expositiones, quae ad duas revocari possunt. Una est, in his locis non promitti remissionem peccatorum, tanquam novum aliquod beneficium, ab ipso actu contritionis, vel amoris Dei distinctum, sed declarari solum vim & efficaciam ipsius contritionis; sicut si Deus de ipso habitu gratiae ita loqueretur; Quem dono gratiae affecero, mundum etiam & liberum a peccato reddam, non faceret promissionem beneficii distincti ab infusione gratiae, sed declararet vim, quam gratia habet ad peccatum formaliter expellendum: sic ergo cum de contritione dicitur: *Peccator, qui penitentiam egerit, vita vivet*, non fit nova promissio, sed explicatur vis, quam contritio habet ad expellendum formaliter peccatum. Juxta quam responsionem pari ratione dicetur, alias locutiones Scripturae, quae videntur indicare in his acti-

Suarez. Tom. XVI.

bus causalitatem dispositivam, sufficienter intelligi posse de causalitate formali, ita ut cum de Magdalena dicitur: *Remissa sunt ei peccata multa, quoniam dilexit multum*, sensus sit formalis, ut si diceremus: Expulsa sunt tenebrae ab aere, quia illuminatus est, vel frigus ab homine, quia calore affectus est. Cui expositioni favent verba Gregorii homil. 33. in Evangelia. *Quid esse dilectionem credimus, nisi ignem? Et quid culpam, nisi rubiginem? Unde nunc dicitur, dimissa sunt ei peccata multa, quia dilexit multum, ac si aperte diceretur, Incendit plene peccata rubiginem, quia ardet valide per ignem amoris.* Sic fere loquitur Chrysostomus de charitate homil. 7. in 2. ad Timoth. dicens: *Sicut ignis, ubi sylvam occupaverit, omnia purgare consuevit, ita & charitatis fervor quocumque inciderit, omnia perimit.* De penitentia vero eodem fere modo loquitur Hieronymus epistol. 27. quae est epitaph. Paulae. *Quae peccata, inquit, stetit iste non purget? Quas inveteratas maculas haec lamenta non abluant?* Et Ephrem in libro de die judicii cap. 5. *Compunctio, sanitas animae est, illuminationis est;* & August. serm. 11. ad fratres in Eremito: *Suscipite compunctionem, quae sanitas est animarum, quia remissio peccatorum est:* & de Eccles. dogm. cap. 70. *Penitentia aboleri peccata indubitanter credimus:* & similiter Bernard. lib. de modo bene vivendi ad sororem cap. 10. *Compunctio cordis, sanitas est animae.* Huic etiam expositioni favet modus loquendi Scripturae, Ezech. 18. *Cum converterit se impius ab impietate sua, ipse animam suam vivificabit;* & infra. *Facite vobis cor novum, & Spiritum novum.* Et juxta eundem sensum possunt exponi illae locutiones: *Convertimini, ut deleantur peccata vestra:* & similes; recte enim potest illa particula, *ut*, sumi quasi intransitive, & indicare causam formalem; ut cum dicimus: Oportet illuminari aerem, ut expellantur tenebrae: praesertim quia verbum, *Convertimini*, & similia, significant actionem, quae ratione sui termini positivi potest formaliter expellere contrarium, vel privationem oppositam.

Sed haec expositio, licet apparens sit, & aliquibus locis Scripturae non repugnans; tamen dubitari non potest, quin in aliis fiat vera promissio remissionis peccati tamquam novae gratiae & beneficii distincti. Cujus signum apertum est primo, quia tale beneficium tribuitur benignitati & misericordiae Dei, quod non posset fieri, si intentio Scripturae solum esset declarare vim, & energiam actus charitatis, vel penitentiae ad expellendum peccatum: quia tunc non haberet ex misericordia & benignitate Dei talem effectum, sed natura sua. Antecedens patet Joel. 2. *Convertimini ad Dominum Deum vestrum: quia benignus & misericors est, & prestabilis super malitia;* & Eccles. 17. *Quam magna misericordia Domini, & propitiatio ipsius convertentibus ad se.* Neque dici potest, quod illa misericordia consistat in hoc solo, quod ipsa contritio ex misericordia detur. Nam (ut recte notavit Richard. art. 3. pag. 157. & in superioribus etiam tactum est) illa misericordia promittitur, ut quid consequens ad nostram penitentiam & conversionem; & ut quid efficiendum a solo Deo, ut patet ex illa partitione: *Convertimini ad me, & ego convertar ad vos;* & ex illis verbis David: *Cor contritum & humiliarum Deus non despicies.* Deus enim quatenus dat auxilium sufficiens & efficax ad contritionem, non potest dici, non despicere hominem contritum, sed potius non despicere hominem peccatorem, cum non obstante peccato illi conferat gratiam ad contritionem: hominem vero jam contritum dicitur non despicere, quia ei gratiam remissionis peccati infallibiliter impendit. Quod etiam aperte significavit David in aliis verbis Psalm. 31. *Dixi, confitebor adversum me in iustitiam meam Domino, & tu remisisti impietatem peccati mei.* Ubi Augustin. inquit concion. secunda. *Promittit se pronuntiaturum, & Deus jam dimittit.* Et Gregor. ibidem. *Attende quanta misericordia Dei commendatio, ut consentientis desiderium comiteretur venia.* Non ergo est misericordia tantum in eo, quod interior cordis motio gratis detur, sed etiam in eo, quod venia peccati illam comitatur. Et hoc etiam confirmant verba Isaiae primo, ubi postquam Deus veram hominis conversionem postulavit, subjungit.

Resellitur  
evasio.



*Et venite & arguite me dicit Dominus, si fuerint peccata vestra ut vermiculus, quasi nix dealbabitur.* Ubilegendus est Hieron. & latius Adamus, qui optime sententiam hanc declarat. Hoc præterea confirmant verba Concil. Trident. sess. 6. cap. 7. ubi enumerans causas justificationis & remissionis peccati, inquit. *Efficiens vero est misericors Deus, qui gratuito abluat, & sanctificat, signans & ungens Spiritu promissionis sancto.* Sentit ergo manifeste Concilium remissionem peccati esse opus divinæ misericordiæ, quod ex divina promissione homini perfecte disposito conceditur. Quod etiam manifeste confirmant verba illa ejusdem Concilii sess. 14. cap. 4. *Fuit autem quavis tempore ad impetrandam veniam peccatorum hic contritionis motus necessarius, & in homine post baptismum lapsio ita demum præparat ad remissionem peccatorum, si cum fiducia divinæ misericordiæ, & voto præstandi reliqua conjunctus sit.* Cum enim remissio peccati impetrari dicitur per contritionem, evidenter ostenditur esse opus & beneficium ab ipsa contritione distinctum: quia, si contritio per seipsam id conferret, non impetraret, sed faceret ablationem peccati: & in universum constat, ac per se notum videtur, impetrationem, dicere habitudinem & ad aliam personam, a qua fit impetratio, & ad alium effectum distinctum ab actu, quem impetrans facit ad impetrandum. Et, ut apertius constet, hunc effectum in præsentem esse distinctum beneficium, addit Concilium, conjungendam esse fiduciam divinæ misericordiæ ad illud obtinendum. Hæc autem fiducia, cum sit per spem Christianam, & certam, fundamentum habet in divina promissione: igitur prædicta Scripturæ testimonia intelliguntur de vera promissione facta homini vere penitenti. Et hæc est etiam communis expositio Sanctorum, ut infra ostendam, simulque explicabo testimonia adducta pro contraria expositione, quæ probant quidem, contritionem vel dilectionem esse in aliquo genere, causam remissionis peccati: quia est veluti stimulus, per quem Deus ad hominem inclinatur, ut ibidem August. dixit, *vel quia tunc peccata remittuntur, quando cum lachrymis ad memoriam reducuntur*, ut eodem etiam loco dixit Bernard. non vero quia remissio peccati non sit novum gratiæ beneficium ab ipsa contritione distinctum.

Evasio  
secunda

Alia expositio seu evasio ad dicta testimonia esse solet, ibi quidem fieri promissionem distinctam non tamen remissionis peccati, sed aliarum rerum. Unde quidam ajunt, promitti infusionem habituum gratiæ & justitiæ, quæ per se est distinctum beneficium, & absolute loquendo separabile ab actu amoris & contritionis. Addi etiam consequenter potest, promitti ablationem maculæ, quæ consistit in carentia nitoris a gratia & charitate habituali provenientes, quæ etiam ablatio maculæ est quid distinctum a remissione culpæ. Alii dicunt, illis locis solum promitti remissionem penæ, vel æternæ, vel etiam temporalis: posse enim Deus absolute loquendo, ablata culpa non remittere penam, etiam æternam; & ideo, quamvis per ipsum actum conversionis deleatur culpa, adhuc habet locum promissio remissionis penæ. Quod maxime verum habet de remissione penæ temporalis; & ideo in nonnullis ex prædictis sacre Scripturæ locis, cum sit illa promissio, additur hæc particula *forte*, quia videlicet remissio penæ temporalis non semper est certa. Unde Joëlis 2. *Convertimini ad me, & infra. Quis scit, si convertatur, & ignoscat Deus, & relinquat post se benedictionem?* & Actor. 8. ait Petrus ad Simonem Magum. *Penitentiam age ab hac nequitia tua, & roga Deum si forte remittatur tibi hæc cogitatio cordis tui.* Alii denique ajunt, promittere Deum his locis, non quidem remissionem peccati, aut aliquod aliud donum consequens ad veram conversionem, sed auxilium suum, & gratiam necessariam ad conversionem, si per hominem non steterit; cum enim ad conversionem requiratur & nostra cooperatio, & auxilium Dei, explicat Deus prædictis locutionibus & promissionibus se esse paratum ad juvandum hominem, ut vere peniteat, & a se peccata expellat, si ipse cooperari voluerit. Quam expositionem videtur confirmare D. Thom. 1. 2. q. 109. art. 7. ad 1. ubi ita videtur exponere verba Pauli ad Ephes. 5. *Exurge a mortuis, & illuminabit te Christus.* Ut scilicet illuminatio illa, quæ ibi promittitur, non sit donum gratiæ consequens ex eo, quod homo a peccato resurgat,

sed potius sit auxilium gratiæ, quod Deus homini offert, ut a peccato resurgat.

Sed quamquam verum sit, hæc omnia promitti homini a Deo in Scriptura sacra, tamen negari non potest, quin etiam promittatur peccatori bene penitenti remissio peccati etiam quoad culpam. Et, ut ab ultima parte, seu expositione incipiamus, aliud est, homini peccatori dari auxilium gratiæ ad penitendum; aliud vero est, homini peccatori jam penitenti dari remissionem peccati; & (ut notavit D. Thom. 3. part. quæst. 85. art. 1.) alius error est negans, peccatorem posse agere veram penitentiam de omnibus peccatis suis, alius vero est error negans, peccatori vere penitenti deleri omnia peccata, quantumvis maxima: *Nam primus error* (ait D. Thom.) *aut libertatem arbitrii tollit, aut efficaciam, vel sufficientiam gratiæ: secundus vero error derogat divinæ misericordiæ, & virtuti passionis Christi:* ergo similiter alia est promissio gratiæ ad conversionem, alia vero est promissio remissionis culpæ habenti veram conversionem & penitentiam. Imo, licet utrumque verum sit, scilicet & Deum paratum esse ad dandū auxilium ad conversionem, & ad remittendum peccatum vere penitenti, tamen multo est certius hoc posterius, quam illud prius; aliqui enim Catholici opinantur, Deum interdum deferere aliquos viatores, & negare illis auxilia sufficientia, ut convertantur: quod, licet sit falsum, non tamen est simpliciter hæreticum: nemo autem Catholicus negat, vere penitenti remitti peccata, quamvis maxima: est enim hæc hæresis Novati, ut statim dicam: signum ergo est, esse has distinctas promissiones, & hanc posteriorem esse evidentius expressam in sacra Scriptura, quam priorem. Nec D. Thom. citato loco aut alibi unquam intellexit, in hujusmodi locis promitti a Deo auxilium ad contritionem, sed potius exponens illa verba Pauli: *Exurge a mortuis & illuminabit te Christus:* intelligit promitti lumen gratiæ justificantis, ad quod recipiendum disponitur homo, quando per liberum arbitrium a Deo motum surgere conatur a peccato: unde per illud verbum, *Exurge*, intelligit D. Thom. ipsam conversionem, quam homo cum auxilio Dei facit, cum se disponit ad remissionem peccati, cui non promittitur illuminatio gratiæ antecedens per auxilium excitans, vel adjuvans, sed consequens per infusionem gratiæ, quæ conjunctam habet remissionem peccati. Unde confirmatur, nam aliud est, auxilium gratiæ ad contritionem habendam necessarium, aliud vero, remissio peccati: illud partim antecedit, partim comitatur contritionem, neque ad illam ullo modo subsequitur, hæc sequitur contritionem, & nullo modo antecedit illam; in prædictis autem Scripturæ locis promittitur remissio peccati, tanquam quid subsequens veram penitentiam & conversionem ad Deum, ut ex verbis adductis satis constat. Ex quibus Patres similes modos loquendi sumpserunt; Chrysostomus homil. 5. de Penit. *Minatur* (inquit) *peccantibus, penitentibus vero propitiationem promittit.* Et Tertull. lib. de Penit. cap. 4. *Qui omnibus delictis penam per judicium destinavit, idem veniam per penitentiam spondit, dicens ad populum: Penitere, & salvum faciam te:* & hoc sensu dicit inferius loquens de penitentia. *Hæc te peccatorem fluctibus mersum perlevabit, & in portum divinæ clementiæ protelabit.* Similiter August. de ver. & fal. penit. cap. 5. totam vim constituit in promissione, ut probet remissionem peccatorum vere penitentibus infallibiliter dari.

Quod autem in his & similibus, tam Scripturæ, quam Patrum, testimoniis sermo sit, non tantum de remissione peccati quoad penam, sed maxime quoad culpam, certo certius esse videtur tum ex proprietate verborum Scripturæ, tum ex circumstantiis, & modo loquendi ejus: ut Actor. 8. *Penitentiam age ab hac nequitia tua, & roga Deum, si forte remittatur tibi hæc cogitatio cordis tui, in felle enim amaritudinis, & obligatione iniquitatis video te esse.* Ubi non potuit malitiam culpæ clarioribus verbis describi. Et in illo loco 2. Reg. 12. cum David dixit, *Peccavi Domine*, suam contritionem declaravit; cum vero Propheta subjunxit, *Dominus quoque transulit peccatum tuum*, aperte de remissione culpæ loquutus est; ipsemet Regius Propheta alio loco declaravit dicens Psal. 31. *Dixi, Confitebor adversum me iniquitatem meam Domino, & tu remisisti impietatem peccati mei;* non dixit tantum penam, sed *impietatem peccati*, seu cordis

Refellitur  
secunda  
evasio



*cordis mei*, ut legit Hieronym. epist. 46. ubi, & epist. etiam 48. hæc & alia testimonia congerit, & in hunc modum exponit: nobis vero sufficiunt, quæ adduximus. Et confirmatur, nam si esset tantum sermo de pœna, vel illa esset æterna, vel temporalis; si æterna, illa non remittitur, nisi remissa culpa; nec potest aliter remitti, neque convertere, ablata culpa, potest non statim auferri æterna pœna, saltem ex lege, & ex natura rei, quidquid sit de potentia absoluta. Ridiculum enim est dicere Deum promittere ablata culpa mortali, se remissurum pœnam æternam, solum quia de potentia absoluta posset unum ab alio separare. Eo vel maxime, quod æternitas pœnæ proprie respondet æternitati culpæ, ut D. Thom. docet 1. 2. quæst. 87. art. 4. & 5. Ideo enim homo peccando contrahit reatum pœnæ æternæ, quia contrahit maculam, quam viribus suis a se expellere non potest; si ergo viribus & auxilio gratiæ potest a se expellere culpam seu maculam, nulla alia expectata, nec promissa a Deo remissione culpæ, eodem modo sese liberavit ex vi sui actus ab obligatione pœnæ æternæ, absque alia ejus remissione vel promissione: quia ablata culpa non manet in illo fundamentum æternitatis pœnæ. Et fortasse, licet Deus ut supremus dominus posset perpetuis tormentis affligere peccatorem jam a culpa liberum, non tamen proprie ut iudex & legislator, & puniendo peccatorem juxta leges a se statutas, juxta quas etiam intelligendæ sunt promissiones, sicut & comminationes, quæ in Scriptura peccatoribus fiunt. De pœna vero temporali possunt quidem nonnulla testimonia exponi, ut illud Joelis 2. & similia, non tamen omnia neque plura ex adductis: ut Ezech. 18. Isaia 30. Thren. 2. Psalm. 50. & alia, in quibus vere pœnitentibus infallibiliter promittitur remissio. Certum est autem, remissionem pœnæ temporalis non esse infallibiliter conjunctam cum qualibet vera contritione. Unde in illo loco ex secundo Regum, postquam Nathan dixit ad David, *Dominus transtulit peccatum tuum*, statim declaravit illi temporales pœnas, quas pro peccato luiturus erat: loquitur ergo præcipue Scriptura de remissione culpæ, ad quam Spiritus sanctus præcipue invitat.

Nec refert, quod in aliquibus locis addatur illa particula *forte*, nam ut sæpe notant Sancti Patres, præsertim Ambros. lib. 2. de Pœnit. cap. 2. Gregor. homil. 9. in Ezechiel. Hieronym. & Rupert. Joel. 2. hæc particula *forte* cum in Scriptura divina conjungitur cum divina scientia aut promissione, non indicat incertitudinem, sed aliquod mysterium, ut in præsentem ponitur ad exaggerandam rei difficultatem, magnitudinem beneficii, & incertitudinem, quæ esse potest in nostra pœnitentia, an ipsa vera sit & sufficiens, non vero, an consequatur effectum, si vera sit. Ex his sequitur, quid dicendum sit de alia expositione, quod hæc promissiones intelligantur de remissione peccati quoad maculam, nam fortasse macula peccati proprie sumpta non est aliud a culpa habituali ipsius peccati, ut in 1. & 2. latius disputatur: quod si hoc verum est, potius illa expositio nobis favet: quia, si remissio maculæ promittitur; ergo & remissio culpæ, nam sunt idem. Vel certe, si macula distinguitur aliquo modo a culpa habituali, reduci debet ad aliquam pœnam, eo, nimirum, modo, quo privatio gratiæ solet inter pœnas numerari, quia hæc macula nihil aliud esse potest, quam privatio gratiæ seu nitoris, quem gratia formaliter confert, sicut ostensum est, Scripturam sacram non loqui de sola remissione pœnæ, ita etiam constat non loqui de sola remissione maculæ hoc modo sumptæ. Eo vel maxime quod hæc pœna est infallibili lege conjuncta cum mortali culpa, & non tollitur, nisi illa remissa, & ideo eadem ratio de illa est, quæ de æterna pœna.

Atque hinc tandem probatum relinquitur, has promissiones non esse solum de infusione gratiæ & habituum, sed etiam de remissione culpæ; tum quia verba Scripturæ expresse id contineant, & Sancti ita declarant; tum etiam, quia illa infusio habituum pertinet ad remissionem maculæ, prout est quædam pœna, quia privatio gratiæ non potest tolli, nisi per gratiæ infusionem. Denique quia illud beneficium per has promissiones pollicetur, ad quod obtinendum, per contritionem & veram pœnitentiam se peccator disponit, ut constet ex forma loquendi Scripturæ; in qua hæc promissiones sunt conditionatæ, conditio autem, quæ postulatur, est vera pœni-

*SNAREZ* Tom. XVI.

tentia: postulatur autem ut dispositio, sicut supra probatum est. Probavimus autem, veram pœnitentiam & dilectionem Dei, esse dispositionem, non tantum ad infusionem gratiæ, sed etiam ad remissionem culpæ; ergo non solum infusio gratiæ, sed etiam remissio culpæ promittitur vere pœnitenti; ergo remissio peccati est distinctum Dei beneficium ab ipsa contritione, & ab omni auxilio gratiæ, quod ad eam habendam ipse præstat, quæ erat conclusio intenta. Hujus autem conclusionis ratio a priori est, quia actus peccatoris, quantumvis bonus & supernaturalis, non est per se sufficiens ad expellendam culpam; & ideo necessaria est superveniens Dei misericordia, quæ singulari beneficio illam remittat, cujus rationis vis ex dicendis conclusione & sectione sequentibus magis constabit.

Dico tertio. Peccator non ita satisfacit Deo pro culpa mortali, ut suo actu, quantumvis bono & supernaturali se sanctificet, & formaliter a se expellat peccatum sine alia Dei acceptione ac remissione. Sensus hujus conclusionis facilis est ex dictis; distingimus enim supra duplicem modum satisfactionis, unum, qui habet vim & efficaciam ex se, etiam si alter non acceptet; alium, qui requirit acceptionem alterius: dicimus ergo, in conversione peccatoris non intervenire satisfactionem prioris modi, de posteriori autem sectione sequente dicetur. Est autem hæc conclusio communis Scholasticorum, & Patrum, quos latius referam sectione sequente, nunc autem variis modis id declaro & simul assertionem confirmo. Primo, quia omnes Theologi disputant, an peccator per contritionem mereatur sibi remissionem peccatorum, in qua quæstione manifeste supponunt, contritionem ipsam per se non conferre formaliter remissionem peccati. Quis enim dubitaret, an contritio possit esse meritoria sui ipsius, & sui effectus formalis, præsertim physici & connaturalis? Unde cum omnes conveniant, non mereri de condigno hunc effectum, quidam admittunt meritum de congruo, qui aperte distinctionem supponunt, ut videri potest in Vega q. 6. & 7. de Justif. ubi refert alios, & in Bellarm. lib. 3. de Justif. cap. 2. r. ubi etiam refert Patres hoc modo loquentes, quorum nonnulla dicta attingemus sectione sequente: alii vero meritum etiam de congruo negant, sed non in eo fundantur, quod remissio peccati sit ipsamet contritio, vel per illam formaliter fiat, sed in hoc potius, quod remissio peccati tam gratis detur homini contrito, ut sub nullum meritum contritionis cadere possit, ut videre licet in Victor. quæst. 2. de potest. Eccles. num. 4. Soto lib. 2. de natur. & grat. cap. 4. & in his, quos refert.

Secundo idem explicatur ex duplici errore, qui circa remissionem peccatorum exortus est. Alter fuit Pelagii, qui dixit hominem viribus naturæ posse consequi remissionem peccati, eo quod vires liberi arbitrii sufficere conferret ad efficiendam contritionem, propter quam datur remissio peccati, quam non negabat, esse gratiam, quæ fit pœnitenti, ut patet ex omnibus libris Augustini contra illum; Augustinus autem semper admittit, quod Pelagius agebat, remissionem peccati esse gratiam, quæ fit pœnitenti, non tamen illam solam, sed etiam penitentiam ipsam, & eodem modo procedunt Concilia Milevitanum & Arausicanum: hæc autem doctrina aperte supponit, remissionem peccati non esse intrinsecum & connaturalem effectum formalem contritionis. Alter error fuit Novati, qui negavit eos, qui post baptismum mortaliter peccant, consequi remissionem peccati, quantumvis conterantur, cui respondent Patres, & Theologi omnes concedunt quidem, remissionem peccati non sequi ex contritione omnino naturaliter, sed necessariam esse divinam gratiam, & promissionem, ut infallibiliter detur, ut patet ex multis testimoniis Patrum, quæ habentur in decretis de penitentia, d. 3. quæ attingemus sect. sequente, & ex D. Thom. & rationibus, quibus hanc hæresim refellit infra quæst. 86. art. 1.

Tertio sequitur hæc assertio ex præcedenti, nam si remissio peccati est nova gratia a contritione distincta, & sub distinctam promissionem cadens; ergo contritio non expellit peccatum per se ipsam, vel per suam quasi physicam & connaturalem informationem. Patet consequentia; tum quia hoc totum non est aliquid distinctum ab ipsa contritione, ut est actus vitalis elicitus ab homine, qui conteritur; ergo non potest cadere sub pro-

Tertia assertio ac præcipue conclusio.

Prima probatio conclusio.

Secunda probatio conclusio.

Tertia assertio conclusio.



missione, quæ supponat contritionem, nam supponeret id, quod promittitur, seu promitteretur idem, quod supponitur; tum etiam, quia informatio actualis & connaturalis formæ, gratuito donatæ, non est nova gratia, aut donum distinctum a tali forma. Sicut in actu dilectionis Dei, quod me constituat actu diligentem, non est gratia, vel donum distinctum ab ipso actu, qui mihi infunditur, quia ille actus non aliter est gratia mihi facta, nisi quatenus in me, & mecum sit ex speciali auxilio: hoc autem ipso, quod in me & mecum sit, facit me actu diligentem, & ideo, sicut in re hæc non separantur, nec sunt distincta, ita neque in esse gratiæ aut doni distincta sunt: sic ergo in præsentem, si contritio & amor hoc ipso, quod in me & mecum sit, me facit vi sua sanctum & purum a peccato, non potest remissio peccati esse gratia distincta ab ipsa contritione; ostensum autem est esse gratiam distinctam; ergo signum est, non tollere illo modo peccatū.

Quarta  
probatio  
tertæ  
conclus.

Evangelio.

Impugna-  
tur.

Quarto sequitur eadem conclusio ex prima, qua ostensum est, contritionem perfectam esse ultimam dispositionem ad remissionem peccati, nam hinc aperte concluditur, contritionem non esse formam formaliter expellentem peccatum, quia non potest idem actus, vel eadem forma, esse dispositio ad seipsam, seu ad suum effectum formalem: quia dispositio etiam non disponit, nisi informando, quomodo ergo disponet ad suummet formalem effectum? Respondent aliqui, actum amoris vel contritionis esse dispositionem ad remissionem peccati, præcise ut est a libero arbitrio, tamen, ut est ab auxilio gratiæ, esse causam formalem remissionis peccati. Sed hæc doctrina, præterquam quod intelligi non potest, plus videtur, quam falsa in Theologia. Primo, quia falsum omnino est, liberum arbitrium ut sic, & quasi præcise sumptum, efficere dispositionem, præsertim ultimam, ad gratiam vel remissionem peccati, quæ est effectus ejus, & tamen supernaturale donum, sicut gratia: ergo non potest actus aliquis, ut est præcise a libero arbitrio, esse dispositio ad remissionem peccati, quia, ut sic, tantum consideratur concursus liberi arbitrii, & non gratiæ. Confirmatur ac declaratur, nam illa dispositio debet esse supernaturalis, cum sit proportionata supernaturali formæ: ergo ille actus non habet rationem dispositionis, nisi ut supernaturalis est; ergo non habet rationem dispositionis, nisi ut est a gratia excitante & adjuvante; & ideo Concilium Tridentinum sess. 6. cap. 4. §. 6. & 7. & can. 3. dispositionem ad justitiam divinæ gratiæ principaliter tribuit. Unde alii per aliud extremum dixerunt, actus nostros non esse dispositiones ad justitiam, ut sunt a libero arbitrio, sed præcise, ut sunt a gratia Dei. Quod quidem, si intelligatur cum simili præcisione exclusiva, falsum est; vel (quod idem est) si illa particula, *ut sunt a libero arbitrio*, sumatur specificative, vel causaliter in proprio & accommodato genere causæ: nam si reduplicative sumatur, verum est, actum non esse dispositionem ad gratiam, ut est a libero arbitrio, aliàs omnis actus existens a libero arbitrio esset dispositio: neque etiam causaliter causalitate adæquata & totali potest dici dispositio actus, ut est a libero arbitrio; in quo errabat prior sententia, quia solus influxus liberi arbitrii non sufficit ad rationem dispositionis: at vero specificative verum est, illum actum, ut est a libero arbitrio, esse dispositionem: id est, secundum illud esse, quod habet ex influxu liberi arbitrii: habet enim totum suum esse supernaturale per influxum liberi arbitrii, quamvis non ab illo solo. Et eadem ratione est verissima illa locutio, sumendo illam particulam causaliter, non causalitate adæquata, sed accommodata libero arbitrio in suo genere: est enim ille actus dispositio, ut vitalis est, & ut liber est; & tam essentialiter hæc requirit, ut sit dispositio, quam ut sit supernaturalis: sed illa non habet, nisi ut est a libero arbitrio: ergo, ut est ab illo, tanquam a propria causa in suo genere est dispositio. Et confirmatur, nam verissime, secundum fidem dicitur homo, se disponere ad remissionem peccati, vel ad gratiam, ut omnes Catholici loquuntur, & frequenter Concilium Tridentinum citato loco, non autem se disponit, nisi efficiendo in se dispositionem, & cooperando gratiæ, ut idem Concilium dicit: ergo et converso ille actus, ut est a libero arbitrio, est dispositio.

Dices, liberum arbitrium efficere illum actum, qui est dispositio, non tamen formaliter, ut dispositio est. Sed

hoc in nullo sensu verum esse potest; nam eo modo, quo liberum arbitrium facit actum, facit etiam illum, ut dispositio est. Nam, vel per hoc designatur aliquid rei, seu aliquid absolutum in actu; & ita illud etiam sit a libero arbitrio, quia nihil est in actu nostro, quod non fiat a nobis. Qua ratione dixit Augustinus. tit. 72. in Joannem. *Qui creavit te sine te, non salvabit te sine te*; id est, sine te, te disponente, ut exposuit D. Thom. quæst. 28. de veritat. art. 8. ad 6. Vel per illam particulam denotatur tantum aliqua habitudo actus: & sic etiam verum est, actum, ut dispositionem, esse a libero arbitrio, quia non est dispositio, nisi quatenus includit habitudinem ad liberum arbitrium, ut ad proximam causam vitalem & liberam: igitur adæquate ille actus est dispositio, ut est a libero arbitrio elevato, & operante cum gratia, vel e contrario, ut est a gratia operante per liberum arbitrium, ab ea excitatum & adiutum. Ac propterea dixi, distinctionem illam, non solum falsam doctrinam continere, sed etiam intelligi non posse. Actus enim non est dispositio, nisi quatenus voluntatem bene afficit, & convertit ad Deum: sic enim disponit hominem, ut Deus convertatur ad ipsum per justificantem gratiam & amicitiam: sed actus non habet hanc vim, ut præcise est a libero arbitrio, neque ut præcise est a gratia, sed ut est ab utroque simul, ut a causa adæquata, & ut est a singulis in suis generibus: ergo sub nulla ratione potest ille actus esse forma formaliter expellens peccatum. Et confirmari potest hæc ratio ex eo, quod Concilium Tridentinum dicit sess. 6. cap. 7. unicam causam formalem nostræ justificationis, & remissionis peccati esse justitiam, quam unicuique Spiritus Sanctus infundit, juxta ejus dispositionem: ostendimus autem supra, sub justificatione comprehendere Concilium remissionem peccati: distinguit ergo causam formalem hujus effectus ab ipso actu, nam distinguit illam a dispositione, quæ in actu consistit: & rursus dicit, illam causam formalem esse unicam: ergo, ex sententia Concilii, actus, qui est dispositio, non est causa formalis remissionis culpæ, nam illa causa unica non est actus, cum detur juxta proportionem actus. Item, illa causa unica (ut dicit idem Concilium) datur secundum hominis dispositionem per infusionem gratiæ & donorum, & instrumentaliter sit per baptismum, quæ omnia non possunt actibus accommodari. Item, hæc causa unica non solum est inhærens, sed etiam est permanens in homine, quamdiu per peccatum non expellitur, ut idem Concilium significat dicens: *Juberi, renatos hanc justitiam, quam ceu primam stolam receperunt, conservare, ut eam perferant ante tribunal Domini*: quod etiam non potest actui accommodari; at præter causam unicam non est alia: ergo actus nullo modo est causa formalis remissionis peccati. Et hæc est etiam communior sententia: & sumitur ex D. Thom. 1. 2. q. 113. art. 1. & seqq. & in 4. distin. 17. q. 1. art. 1. quæstiunc. 1. & q. 28. de veritat. art. 2. & 8. & 3. contra gentes cap. 150. & videtur posse sumi ex August. lib. de spiritu & litera cap. 30. Ex quibus omnibus facile ulterius concludimus, quod intendimus, actum peccatoris, quantumvis supernaturalem & perfectum, non expellere vi sua, & absque Dei remissione & acceptatione peccatum; quia aliàs oportet, ut hoc conferret formaliter, ex eo præcise, quod voluntatem hominis actualiter convertit ad Deum, quod facit, formaliter afficiendo ipsam.

Quinto argumentari possumus ex vi ipsius vocis, remissionis peccati, & ex proprietate illarum locutionum Scripturæ, quæ ubique dicit, solius Dei opus esse, remittere peccatum, nam, ut supra expendebam, prius a peccatore exigitur poenitentia & conversio cum divino auxilio: ac deinde soli Deo tribuitur, quod remittat peccatum, juxta illud: *Dixi, confitebor adversum me iniquitatem, &c. Et tu remisisti, &c. Psal. 31. Et illud: Peccavi Domino; Dominus quoque transtulit peccatum tuum, 2. Reg. 12. Et hoc est, quod in parabola de filio prodigo describitur, Luc. 15. ubi postquam hic ad patrem conversus est; Pater accurrens cecidit super collum ejus, & osculatus est eum, & illo dicente, Pater peccavi in cælum & coram te, pater statim subjungit, dicens: Cito ferte stolam primam, & induite eum, id est, Christianam justitiam, (ut Concil. Trident. explicuit) qua peccatum expellitur, quamque solus Deus infundit; ergo remissio peccati est aliquid, quod ex parte solius Dei se tenet, supposita in homine*

Quinta  
probatio  
3. conclus.



homine sufficiente dispositione; ergo actus non tollit peccatum se solo, absque superveniente remissione Dei, quam nos etiam acceptationem vocamus. Et hoc argumentum magis confirmabimus sectione sequente.

Sexto & ultimo, ratio a priori huius conclusionis ex duobus principiis reddenda est. Unum est, quod in conversione peccatoris non est valor æquivalens ad satisfactionem; non potest autem inæqualitas, quam injuria intulit, ex natura rei tolli per aliquem actum, & præsertim independentem ab acceptatione alterius, nisi supponatur talis actus æquivalens injuriæ illatæ, & sufficiens ad illam refarciendam, quia in hoc consistit tota ratio hujusmodi satisfactionis. Assumptum satis probatum est in sectione præcedente, & omnia ibi dicta habent hic majorem vim, quia peccator non solum est persona infinite inferior, quam sit persona offensa, scilicet, Deus: sed etiam, quatenus eliciens talem actum nondum est persona grata Deo. Quocirca, ut actus sufficiat ad expellendum peccatum, dicto modo intrinseco & connaturali, non est considerandum solum secundum naturam aut bonitatem moralem, & physicam conversionem, quam habet, secundum quas rationes formaliter opponitur actuali peccato, & illud excludit, sed considerandum est secundum valorem moralem, quem habet ad recompensandam injuriam, quatenus a tali persona procedit: & hoc modo non invenietur per se sufficiens ad tollendam formaliter maculam, & habitualement averfionem, quam peccatum relinquit, sed solus Deus potest illam auferre.

Alterum principium est, quod satisfactio, ut nullo modo requirat acceptationem alterius, oportet, ut fiat per actum, qui non sit ita aliis debitus, ut possit solo alio titulo exigi & acceptari. Nam, si creditor potest aliis nominibus exigere, & recipere bonum illud, quod in solutionem offertur: ergo, si id faciat, iuste potest aliam solutionem exigere pro tali debito: ergo signum est, non fuisse satisfactum illi per illam solutionem, neque posse illi satisfieri, ipso non acceptante, quamdiu illi liberum fuerit, solutionem illam in aliud debitum referre, & propter illud solum eam recipere. Potest autem Deus semper hoc modo se gerere circa peccatorem, qui omnia bona sua multis aliis titulis Deo debet, etiam ipsum contritionis actum. Quia, licet contritio non habeat proprie locum, nisi supposito peccato, & ideo non videatur debita, nisi ratione peccati, & in ejus satisfactionem, tamen & amor, a quo est præcipuus valor contritionis, per se debitus est, & post peccatum commissum potest ipsemet dolor esse debitus, vel in gratitudinem pro aliis beneficiis; postulat enim gratitudo non solum, ut benefactori gratias agamus, sed etiam ut de injuriis illi factis doleamus. Vel etiam potest esse debitus titulo cultus & venerationis, nam, licet talis dolor requirat peccatum, ut materiam, circa quam versetur, & ideo sine illa exigi non possit in cultum, tamen illa supposita, optime potest hoc solo titulo postulari & præcipi. Idemque de similibus titulis dici potest. Ex hoc ergo capite conclusit Anselm. lib. 1. cur Deus homo, non posse nos contritione nostra Deo pro peccato satisfacere, unde ex illo a fortiori concluditur, repugnare, quod in creatura sit talis modus satisfactionis respectu Dei, qui ab ejus acceptatione nullo modo pendeat. Sicut etiam supra diximus, non posse esse meritum seu debitum justitiæ respectu Dei, non supposita promissione & pacto ejus. Et confirmatur, nam in ipsa satisfactione Christi diximus non inveniri hanc conditionem, scilicet, ut nullo modo requirat Dei acceptationem: multo ergo minus inveniri potest in satisfactione seu conversione peccatoris.

Superest, ut argumentis contrariæ sententiæ respondeamus. Ad primum respondetur, concedendo antecedens, & negando consequentiam. Quamvis autem antecedens illud verissimum sit, nimirum, remissionem peccati fieri per aliquam formam inhærentem, & non tantum per extrinsecam condonationem Dei, non tamen existimo, simpliciter loquendo esse de fide, neque satis probari testimonio Concil. Trident. ibi citato: loquitur enim ibi Concilium de tota justificatione, & non de sola remissione peccati: hæc autem duo, quamvis sæpius pro eodem sumantur, quia non separantur in re, tamen per se & in rigore, plus includit justificatio, quam peccatorum remissio, ut idem Concilium eodem can. 1. non ob-

scure significavit, dicens: *Si quis dixerit, homines justificari vel sola imputatione justitiæ Christi, vel sola peccatorum remissione, anathema sit.* Ergo ex sententia Concilii, justificatio & remissio peccati non sunt idem; nam, si idem essent, verissime diceretur, justificationem esse solam peccati remissionem; justificatio ergo includit peccatorum remissionem, & aliquid amplius, nempe internam sanctificationem & rectitudinem ejus, qui justificatur, quæ sit per intrinsecam, & inhærentiam dona, ut Concilium ibidem subjungit. Unde concludit, atque definit, *gratiam, qua justificamur, non esse tantum favorem Dei.* Quamvis ergo quis sentiret, remissionem peccati fieri formaliter sola extrinseca condonatione Dei, nihil aperte diceret contra hanc Concilii definitionem, quia adhuc verissimum esset, gratiam, qua justificamur, non esse tantum favorem Dei, quia, licet includat illum, non tamen solum illum, sed etiam gratiam inhærentem, hanc ad rectificandum interius hominem, illum ad tollendum peccatum. Unde, si nomine sanctificationis vel justificationis utrumque includatur, verissime dicitur, non justificari hominem solo favore extrinseco, sed gratia inhærente; consequenter vero etiam e contrario dici posset, non sanctificari hominem sola gratia inhærente, sed oportere illi conjungi favorem Dei seu condonationem extrinsecam, quod videtur etiam consentaneum Concilio, damnantem eum, qui dixerit justificari hominem sola peccatorum remissione, seclusa gratia inhærente: ergo, qui dixerit, justificari hominem extrinseca peccatorum remissione & condonatione, simul cum gratia inhærente, non damnatur a Concilio. Quamvis autem in hoc dicendi modo nullus sit error, & fortasse, in aliquo bono sensu, veritatem possit habere, ut statim dicam, nihilominus verissimum censeo, ipsam inhærentem gratiam, simpliciter loquendo, esse causam formalem remissionis peccati. Quod (ut alia omittam, quæ ad materiam de gratia spectant) breviter declaro, ex discursu doctrinæ ejusdem Concilii dicta sess. 6. Nam cap. 4. definit, justificationem impii esse, *translationem ab statu peccati in statum gratiæ, & filiorum Dei.* Posterius vero cap. 7. hanc definitionem magis declarans dicit, justificationem non esse solam peccatorum remissionem, sed etiam sanctificationem, & renovationem interioris hominis; justificatio ergo ex doctrina Concilii utrumque includit, infusionem, scilicet, boni, & remotionem mali, & tamen inferius idem Concilium eodem cap. 7. docet, unicam causam formalem hujus justificationis esse gratiam inhærentem: ergo sentit, hanc esse formalem causam illorum duorum, quæ justificatio includit: quæ sunt, renovatio interioris hominis, & peccati depulsio: quomodo autem hoc intelligendum sit, statim declarabo.

Ad argumentum ergo, nego esse eandem rationem de actu charitatis vel contritionis, quæ est de infusa justitia habituali. Ad primam autem probationem respondetur, etiam si demus, omnia illa de actu charitatis intelligi, ea tamen omnia de illo dici, quia per charitatem consequimur veniam peccatorum: juxta illud. *Dimittuntur ei peccata multa, quoniam dilexit multum:* ut dixit D. Thom. infra quest. 49. art. 1. consequimur autem hanc veniam per charitatem, tanquam per dispositionem perfectam, ut idem D. Thomas attigit 1. part. quest. 21. art. 4. ad 1. Unde in 4. quest. 22. art. 1. ad 2. dicit charitatem operire peccata Deo, qui omnia videt; & ideo oportere, quod ea destruat, *non quidem faciens, ut actus non præcesserint, sed quod vim impediendi gratiam non habeant:* hæc autem est propriissima causalitas dispositiva. Secundum hanc ergo causalitatem intelligenda sunt multa, quæ in illis testimoniis charitati tribuuntur: exemplo res declaratur, nam etiam dicimur, *operibus justificari*, Jacobi secundo, quod maxime verum est de operibus ipsius charitatis seu fidei vivæ: quod de augmento justitiæ exposuit Concilium Tridentinum sess. 6. cap. 10. & tamen id non explicat in genere causæ formalis, ita ut ipsa opera charitatis nos formaliter reddant justiores, sed in genere causæ meritorie, quia actibus charitatis meremur augmentum justitiæ: ergo eodem modo, quamvis Sancti interdum dicant, dilectione hominem justificari, non est necesse, intelligi in genere causæ formalis, sed dispositive, aut meritorie de congruo, ut declarant etiam illa verba Christi. *Si quis diligit me, sermonem meum*

Gratia inhærens causæ formalis est remissionis peccati.

Sexta probatio 3. conclus.

Ad primum argumentum prioris sententiæ.



*servabit, & Pater meus diligit eum, & ad eum veniemus, & mansionem apud eum faciemus*, quod sit per gratiam justificantem. Adde præterea, multa ex illis tantum esse quædam encomia charitatis, quibus declaraturum excellentia perfectionis ejus, tum etiam regimen & imperium, quod habet supra omnes alias virtutes, ratione cujus dilectio dicitur adimpletio legis, & quædam perfecta justitia, nam qui diligit, necesse est, ut cætera præcepta servet. Denique addo, multa ex testimoniis Augustini ibi citatis recte posse declarari de charitate habituali, quæ dicitur esse justitia, quatenus est connexa gratiæ, & aliis donis, quæ illam comitantur.

An perfectius per actum, quam per habitum inhaeremus Deo.

Ad secundam probationem ejusdem consequentiæ, distinguenda est illa propositio, perfectius inhaerere nos Deo per actum, quam per habitum: nam est vera, quantum ad modum, non tamen quantum ad substantiam seu entitatem formæ. Nam per actum inhaeremus Deo vitæ modo, & secundum ultimum actum, qui hæc ratione dicitur esse perfectissimus, quia constituit hominem in perfecto statu, & ultimo actualitatis gradu, non quidem dando ultimam perfectionem illius status, sed ultimo complendo illam; & quantum ad hunc modum, actus dicitur esse melior, præsertim in esse moris, quam habitus: & propter eandem causam beatitudo in actu potius constituitur, quam in habitu. Denique hoc modo procedunt omnia, quæ in eo argumento dicuntur de excessu actus, respectu habitus. Nihilominus tamen quoad substantiam & entitatem formæ excellentior est habitualis justitia, per quam peccatum excludi dicimus, quam actus hujus justitiæ; & ideo altiori ratione, simpliciter loquendo, deificat, & sanctificat hominem. Hic autem excessus non solum in eo consistit, quod habitus est natura sua permanentior & durabilior (quamquam hoc etiam ipsum non parum confert, si attendamus ad naturam formæ, quæ ex intrinseca ratione sua id requirit, & non ad id, quod de facto, & quasi per accidens, contingit ex parte operantis), sed consistit præterea ille excessus in hoc, quod illa forma habitualis & permanens est primaria quædam participatio divine naturæ, & ideo illa est, quæ primo deificat hominem, & facit filium adoptivum seu per participationem; hæc autem forma est gratia ipsa, quæ in supernaturali ordine est veluti prima substantialis forma, constituens hominem, Deum participative, & ratione illius debentur homini omnia reliqua dona, quæ ad internam ejus rectitudinem & justitiam, necessaria sunt, & ab illis manant actus, qui dicuntur fructus justitiæ: & ideo illi etiam formæ ac justitiæ ex natura rei debetur expulsio peccati, tanquam propriæ formæ: actui vero, qui ordine naturæ interdum antecedit illam formam, solum hoc debetur tanquam dispositioni consentaneæ ad talem formam, & ad effectum ejus. Unde D. Thom. q. 27. de veritat. art. 5. dicit. *Actus non sunt ratio acceptationis divine, sed prius homo acceptatur per gratiam, deinde actus ejus*. Quod magis declarat Sol. ad 17. & artic. 2. ad 4. specialiter agens de actu amoris, & artic. 6. & 3. d. 27. q. 1. art. 3. & art. 4. q. 3. ad secundum. Potestque doctrina hæc confirmari exemplo illius vulgaræ quæstionis, quid sit melius, vel quod sit majus Dei donum, unio hypostatica, an visio beata, seu dilectio: nam si recte expendantur rationes omnes insinuatæ in illo argumento, æque probant, visionem beatam esse perfectiorem: probant autem esse perfectiorem tantum secundum quid, & quoad aliquem modum, non vero simpliciter & quoad substantiam, ut infra suo loco dicemus, & ideo unio hypostatica magis repugnat cum peccato etiam habituali, & de potentia Dei absoluta, quam quodlibet aliud Dei donum, vel actus supernaturalis, ut infra etiam dicitur: sic ergo intelligi potest in præsentī, proportionem servata.

Addo deinde, remissionem peccati formaliter non fieri per adhesionem hominis ad Deum, sed per conversionem (ut sic dicam) Dei ad hominem; ut enim ex divinis Scripturis ostendimus, peccati remissio non fit formaliter per respectum hominis ad Deum, sed per respectum Dei ad ipsum, id est, per eam formam, quam Deus ponit in homine, cum jam incipit illum diligere ut amicum, & filium: hæc autem forma proprie est ipsa gratia sanctificans, nam, licet actus etiam sit in nobis ex dilectione Dei; & ideo, quatenus Deus in nobis talem actum gratuito & supernaturaliter operatur, possit dici, converti ad nos, &

nos respicere, juxta illud: *Convertite nos Domine, & convertemur*; & juxta illud: *Non quasi nos prius dilexerimus, sed quia prius ipse dilexit nos*: tamen ex vi hujus actus præcise nondum diligit hominem ut amicum, sed movet illum, ut ad amicitiam perducatur, quæ in adoptione per gratiam & charitatem formaliter consummatur.

Hinc ad tertium argumentum respondetur, potius illud confirmare sententiam nostram; nam, si Deus magis nos amat per gratiam, quam per actum amoris, vel contritionis, quem in nobis operatur; ergo per illam potius remittit peccatum, quam per actum; ergo per illam, tanquam per formam, per hunc vero, tanquam per dispositionem. Patet utraque consequentia, quia præcipua voluntas Dei in nobis est sanctificatio nostra: ergo illa forma, qua nos maxime diligit, maxime nobis confert sanctificationem, & consequenter peccati expulsionem. Unde cum dicitur Deus maxime intendere in nobis dilectionem sui, & ad hoc possimum per gratiam suam tendere, ut nos faciat sui dilectores, intelligendum id est eo modo, quo Philosophi dicunt, res omnes esse propter suas operationes, tanquam propter finem, non quia operatio sit potior, quam operans, nec magis intenta, si præcise consideretur: quia ipsa operatio est etiam propter operantem, & ut illum perficiat: sed quia, ut paulo antea dicebam, perfectus status operantis est, cum actu operatur; sic ergo Deus in nobis intendit per gratiam dilectionem suam, non quia in nobis plus amet actum dilectionis, quam gratiam suam, sed quia hunc ipsum statum gratiæ vult in nobis esse perfectum per actum dilectionis suæ: sicut etiam in naturalibus Deus creat substantiam & potentiā angeli, intendens, ut ipsum cognoscat, & amet; neque inde fit, ut plus amet in angelo actum amoris, quam substantiam, vel potentiam, a quibus procedit; sed solum, quod plus velit substantiam illam & potentiā sub tali actu, quam in potentia tantum. Aliud exemplum esse potest, nam Deus etiam animam Christi sibi univit, ut ipsum Deum summe diligeret, & perfectius, quam omnes creaturæ, & ut per ipsam reliquæ omnes, & etiam angeli, ipsum diligerent, & nihilominus, præcise comparando, plus animam illam amat ratione unionis, & subsistentiæ, quam illi communicavit, quam ratione cujuslibet actus in ea existentis. Dicit fortasse aliquis, non voluisse Deum illam unionem propter dilectionem, sed propter se ipsam, ut se perfectissime communicaret. Sed hoc non recte dicitur, ut infra ostendetur: aliis eodem modo dici posset, Deum non creasse intellectualem substantiam, nec infundisse gratiam sanctificantem propter operationem, sed unamquamque naturam vel formam voluisse propter perfectionem ejus, & ut se tali modo communicaret. Quamquam ergo, loquendo de fine quasi intrinseco, vel proximo, verum sit, voluisse Deum hujusmodi res propter perfectiones suas, tamen, loquendo de fine extrinseco, remoto, aut ultimo, etiam verum est, voluisse hujusmodi res propter suas operationes, & maxime propter eas, quibus Deo uniuntur, ut, scilicet, ipsum ament, eoque fruantur. Atque hoc modo vult in nobis gratiam, ut per eam nos efficiat sui dilectores. Quamquam in hoc ulterius distinguere oportet de dilectione, qua tendimus ad justitiam, & de illa, quam in nobis efficit ipsa justitia. De hac posteriori vera sunt, quæ diximus. De illa vero priori verum potius est, illam nobis a Deo conferri propter justitiam, id est, ut per eam ad justitiam obtinendam disponamur; hæc autem est dilectio, de qua nunc loquimur: nam prior jam supponit nos justos, & peccato carentes.

Ad quartum distinguere oportet de aversione actuali, vel habituali, physica, vel morali: actus ergo dilectionis perfecte convertit animam ad Deum conversione actuali; & ita formaliter expellit seu secum non admittit actualem aversionem peccati; seu (quod idem est) peccatum mortale actuale, juxta veriorem sententiam; conversio autem habitualis animæ ad Deum proprie fit per habitum infusum, maxime secundum legem ordinariam & ex natura rei: imo & de potentia absoluta non potest illa conversio aliter fieri, loquendo de Deo ut supernaturali fine, ut nunc loquimur, & de conversione physica, ac realiter inhaerente animæ, nam moralis quædam conversio fieri quidem posset per actum, si nullum esset in subiecto impedimentum peccati, ut jam dicam. Peccatum autem, quod expelli debet, non tantum est actuale, sed etiam habi-

Ad tertium argum.

Ad quartum

Quomodo actus dilectionis convertit animam in Deum



habitualemente. Unde includit habitualemente averfionem a Deo, quæ nunc non tantum est moralis, sed etiam physica, & ideo non potest formaliter expelli per solum actum: nec quatenus physica privatio est, quia hoc solum tollitur per formam oppositam, quæ est habitus: nec quatenus moralis est in ratione injuriæ, & offensæ, quia quoad hoc non habet actus a tali persona elicitus, etiam si supernaturalis sit, tantam vim, tantumque valorem ad satisfaciendum, quantum habuit peccatum ad inferendam injuriam tali personæ, ut in superioribus declaratum est. Nec per hoc elevamus supernaturalium actuum dignitatem, sed divinam majestatem extollimus, quæ tanta est, ut nulla creata dignitas ad satisfaciendum illi secundum æqualitatem sufficiat pro gravi injuria ipsi illata. Quocirca quamvis si fingeremus, hominem, & peccato, & gratia carentem, elicere actum dilectionis Dei super omnia, Deumque pro sua absoluta potentia nullum ei infundere habitum, concedi posset, illum hominem post transactum actum manere moraliter conversum ad Deum, quamdiu illum actum non retractavit; nihilominus in homine existente in peccato mortali similis actus caritatis non habet moralem vim relinquendi hominem habitualiter, & moraliter conversum ad Deum supernaturalem finem, quia ille actus nec formaliter repugnat habituali averfioni, sicut in universum actus & habitus formaliter non repugnant, neque ex se habet sufficientem efficaciam ad introducendam illam conversionem in tali subiecto, ratione impimenti: & quia non potest in illo destruere contrariam averfionem, propter defectum valoris moralis ad satisfaciendum, ut explicatum est. Potestque hoc exemplo declarari; nam, si homo conditus in puris naturalibus, vel nunc habens invincibilem ignorantiam fidei, & supernaturalis ordinis, peccatum mortale committeret contra finem naturæ, quamvis postea super omnia diligeret Deum, ut finem naturæ, dilectione naturali, illa dilectio non esset per se efficax ad expellendum prius peccatum, nisi Deus benigne remitteret: & tamen actus ille converteret hominem ad Deum finem naturæ, a quo prius peccatum avertat, & servaret eandem proportionem ad tale peccatum, quam servat nunc actus supernaturalis caritatis ad peccatum contra Deum supernaturalem finem; in eo ergo casu necessario dicendum est, quod licet ille actus physice & actualiter converteret hominem, non tamen moraliter, & habitualiter: idem ergo nunc dicendum est. Unde hoc exemplum non solum declarat, sed etiam confirmat totam doctrinam traditam.

Actus naturalis dilectionis Dei, quomodo in peccatore esse possit.

Nec effugiunt difficultatem, qui propter hoc argumentum negant, posse hominem lapsum elicere actum naturalem dilectionis Dei finis naturæ super omnia ex solis viribus liberi arbitrii, quoniam aliàs (inquiunt) posset se a mortali peccato liberare suis viribus: non (inquam) hoc satisfacit, tum quia, si homo prius ante lapsum potest naturalibus viribus illum actum elicere, etiam post lapsum poterit, quia unum peccatum non diminuit naturales vires, quantum ad physicam efficientiam attingit, quia neque abstulit gratiam, neque justitiam originalem: agimus enim de homine in puris naturalibus, qui nullum ex his donis prius habebat. Neque etiam minuit physicas vires voluntatis aut intellectus, quia neque entitates harum potentiarum remittit aut minuit, nec privat eas aliquo reali principio operandi: neque in eis ponit habitum aliquem impediens, quia neque unum peccatum necessario generat habitum, neque habitus simpliciter impedit operationem, quamvis difficiliorem reddat. Si ergo manent eadem naturales vires, possunt in similem actum exire. Nec solum peccatum moraliter manens potest impedire, tum quia sola moralitas illa non posset impedire efficientiam physicam: tum etiam, quia tale peccatum solum se habet ad modum privationis, privatio autem non potest impedire introductionem formæ expellens formaliter illam, si aliunde in agente sunt vires sufficientes ad talem formam. Denique quidquid sit de naturalibus viribus, tamen non est dubium, quin ex speciali providentia possit homo lapsus hunc actum elicere, & tamen in illo non esset per se sufficiens ad expellendum peccatum: aliàs per actum mere naturalem satisfaceret homini Deo pro injuria illata, quod est satis absurdum.

Ad alia, quæ ex citata opinione inferebantur, respondere non oportet; admittimus enim illa omnia consequenter sequi: existimamus autem esse inconvenientia satis absurda, ex quorum consecutione impugnari dicta sententia potest, ut ex prima & secunda conclusionibus a nobis positis satis ostensum est. Ad confirmationem ergo ibi subjunctam respondetur, ad remissionem peccati post actum contritionis requiri novam gratiam, novumque Dei beneficium, ut ostensum est: hoc autem beneficium partim physicum est, & intrinsecum, partim morale, & extrinsecum. Physice enim ponit in anima sanctificantem gratiam, & oppositam privationem physicam excludit: moraliter vero remittit, & condonat offensam. Neque contra has duas partes procedunt objectiones ibi factæ. Ad primam enim contra priorem partem respondetur, in primis falsam esse illam sententiam, quam supponit, scilicet gratiam sanctificantem & habitus infusos ordine naturæ in aliquo genere causæ antecedere contritionem, quæ est dispositio ad illos: imo etiam, qui sic opinantur, quamvis dicant, habitus, qui sunt principia actuum, prius naturæ infundi, negant tamen prius naturæ recipi in anima, vel sanctificare animam; & hoc nobis satis est. Ad secundam, contra eandem partem jam declaratum est, cur forma gratiæ sit magis proportionata ad hunc effectum, quam actus contritionis vel caritatis: quia, nimirum, est prima & quasi substantialis forma in ordine gratiæ, quæ constituit hominem filium Dei adoptivum, Deum per participationem; & simpliciter Deo dilectum ut amicum.

Ad primum vero contra posteriorem partem respondetur, simpliciter negando sequelam, scilicet, peccatum formaliter remitti per extrinsecum favorem. Hoc autem dupliciter intelligi potest: uno modo juxta opinionem asserentem, tam esse intrinsecum & essentialiter habitui gratiæ & caritatis formaliter expellere peccatum, ut non possit etiam de potentia absoluta talis effectus impediri: nam juxta hanc sententiam nihil aliud extrinsecum ad expellendum peccatum requiritur præter infusionem horum habituum. Hujus autem sententiæ nullum hæcenus vidi sufficiens fundamentum, ut latius in materia de gratia disserui; solum videtur habere quandam pietatis speciem, nam videtur multum extollere excellentiam & dignitatem gratiæ habitualis: & omnino recedit a sententia hæreticorum, qui totum negotium justificationis & remissionis peccati ponunt in extrinseco favore. Nihilominus tamen est alius modus explicandi solidior & verior, scilicet, quod cum beneficio gratiæ inhærentis simul etiam requiratur divina condonatio & remissio injuriæ. Et hoc est magis consentaneum omnibus Scripturis, & Patribus, ac Theologis adductis, & quos sequenti sectione referemus. Item est magis consonum Concilio Tridentino, quod (ut supra notavi) hæc duo conjungit, dicens, justificationem non esse solam peccatorum remissionem, sed sanctificationem & renovationem interioris hominis. Item est magis consentaneum rationi, quia licet id, quod est privationis physice in peccato, formaliter & immediate tollatur per oppositam formam physicam, tamen id, quod est morale, non potest ita immediate tolli, sed aliquid morale adjungendum est, nam immediate opposita ad eundem ordinem pertinere debent: hoc autem morale non potest esse, nisi extrinseca condonatio Dei. Quod autem a posteriori declaratur, quia posset Deus de potentia absoluta conservare habitus physicos gratiæ & caritatis in homine peccante mortaliter, quæ est enim in hoc implicatio contradictionis? aut quid esset in peccato, quod omnino necessitet Deum ad suspendendam actionem, qua conservat gratiam? Si autem potest conservare, potest etiam denuo infundere qualitatem gratiæ peccatori in peccato manenti, seu etiam homini actu peccanti, nam hæc duo ejusdem rationis sunt: ergo quando nunc tollit peccatum infallibiliter infundendo gratiam, necesse est, ut præter infusionem ipsius qualitatis, aliquid aliud ex parte sua adjungat, quod ita est distinctum, ut sit etiam separabile: hoc autem nihil aliud esse potest, quam hæc moralis condonatio ac remissio. Sed est attente considerandum, quod, licet hæc condonatio sit distincta ab infusione gratiæ, est tamen cum illa ita necessario conjuncta, non tantum ex lege extrinsece & pacto Dei, ut Nominales putant, sed etiam extrinseco debito

Quam sit necessaria conjunctio remissionis peccati cum gratia infusione.

& na-



*Utrum homo purus possit ad æqualitatem satisfacere pro culpa mortali propria, ita ut ex vera iustitia obtineat remissionem ejus, & divinam condonationem.*

Sensus  
quæstio-  
nis.

Quæ sit  
forma ini-  
mediatæ  
expellens  
peccatum.

& natura talis formæ, ut propterea quasi unum & idem beneficium censeantur. Est enim tanta excellentia illius formæ, quæ est gratia sanctificans, ut ex natura sua nullum grave peccatum in subiecto admittat, neque moralem aversionem ab ultimo fine: eo quod intrinsece constituat filium Dei, & Deum per participationem, cui debita est illa puritas a tali peccato; & ideo debitum etiam est huic gratiæ, debito, scilicet, connaturalitatis, ut peccatum remittatur, & condonetur ei, cui ipsa infunditur; & ideo ipsa peccati expulsio formaliter attribuitur ipsi gratiæ, non quidem tamquam primarius effectus formalis, hic enim tamquam est positivus, realis, ac physicus, sed tamquam secundarius quasi privativus; & ideo etiam non repugnat de potentia absoluta, a forma hujusmodi separari. Atque hoc modo sufficientissime explicatur excellentia & dignitas hujus formæ, quæ est gratia sanctificans, nam illa alia, quæ est nullum admittere peccatum etiam habituale & de potentia absoluta in eodem subiecto, propria est divinitatis, seu divinæ personæ hypostatice unitæ naturæ creatæ, quia tale peccatum in ipsam personam divinam refunderetur, quæ ratio aut alia similis in gratia creata locum non habet.

Quod si inquiras, quænam sit forma, formaliter expellens immediatè peccatum; nam videtur ex dictis sequi esse ipsam extrinsecam remissionem. Respondeo, hujus effectus privativi nullam aliam formalem causam immediatam esse querendam, præter carentiam ipsam peccati, nam extrinseca condonatio potius se habet, ut causa moralis efficiens. Potest autem hoc totum exemplo physico declarari; quando enim per introductionem caloris formaliter expellitur frigus ab eodem subiecto, expulsio frigoris aliquid distinctum est ab introductione caloris, ac de potentia absoluta separabile; tamen, quia illa expulsio ex natura rei conjuncta est, & debita tali formæ, ideo physice totum illud censetur per modum unius totalis effectus illius formæ, quamvis præcisè singula comparando, id, quod est positivum, scilicet formalis calefactio, sit primarius effectus formalis, privatio autem frigoris sit tantum secundarius: neque illius privationis aliam immediatam causam formalem, præter ipsam carentiam talis formæ, assignare oportet, sed ipsa potius concipitur tamquam forma quædam. Necessè est autem intelligere, quod dum subiectum calefit, Deus suspendit influxum, quo frigus in illo subiecto conservabat, quæ est quædam causalitas privata, non in genere causæ formalis, sed efficientis. Juxta hanc ergo proportionem philosophamur de infusione gratiæ, & expulsionem peccati, & huic ultimæ causalitati, quam habet Deus in corruptione formæ contrariæ, respondet in proposito extrinseca condonatio & remissio culpæ, non quia culpa conservaretur a Deo, cum enim sit mala moraliter, sicut non fit, ita neque propriè conservatur a Deo, neque indiget tali conservatione, cum tantum sit morale quid; sed quia, cum consistat in injuria & offensione Dei, & cum pro illa non possit plene satisfieri, non potest, nisi illo condonante moraliter destrui. Neque est inconveniens, imo valde rationi consentaneum, quod creatura postquam Deum graviter offendit, nihil possit facere, quo expellat a se peccatum absque remissione Dei, vel quo necessitatem absolutam Deo inferat ad hujusmodi remissionem: tanta est enim divina majestas, ut omnem excellentiam pure creatam, quantumvis supernaturalem, & ad ordinem gratiæ spectantem, antecellat. Atque ita responsum est ad omnes rationes, quæ in probatione illius partis insinuantur.

Solum potest ultimo inquiri, cur hæc condonatio seu remissio, magis dicatur ex natura rei debita gratiæ sanctificantis, quam dilectioni seu contritioni, cum utraque sit forma supernaturalis, & valde perfecta. Sed ad hoc jam responsum est, constituendo differentiam inter has formas, & addi potest, utrique formæ esse debitam hujusmodi remissionem, debito proportionis, unicuique tamen modo sibi accommodato, contritioni tamquam dispositioni, gratiæ vero ut propriæ formæ; sicut, in Philosophia, dispositio ultima ad formam ignis, & ipsa etiam forma ignis possunt dici expellere ex natura rei formam aquæ, tamen diverso modo, illa dispositive, hæc vero formaliter: de qua re plura sectione sequente.

Sensus hujus dubitationis in principio sectionis præcedentis declaratus est; potest enim esse aliqua satisfactio æqualis & justa, indigens tamen acceptatione alterius, ad quam teneri potest ex pacto seu promissione, juxta doctrinam late traditam sectione quinta. Est autem ulterius supponendum, non versari quæstionem hanc de illis conditionibus, quæ ad perfectissimam justitiam requiruntur, ut quod satisfactio fiat ex propriis, & aliis indebitis, & quod gratiam creditoris non supponat: est enim, vel per se notum, vel de fide certum, non omnes has condiciones posse reperiri in satisfactione pure creaturæ, quamvis fortasse ex vi illarum, neque æqualitas, neque veritas justitiæ necessario tollatur. Quod enim hæc satisfactio non ita sit ex propriis, quin ea ipsa, per quæ sit, magis sint sub dominio Dei, cui satisfactio offertur, patet, quia ipsemet actus contritionis & amoris Dei est donum ipsius, & sub dominio ejus existit: quia vero etiam homo, qui amat, vel contrititur, est dominus sui actus per liberum usum ejus, ideo, altero Dei dominio non obstante, posset hoc hominis dominium ad æqualem satisfactionem sufficere, si alia necessaria concurrant, juxta doctrinam superius traditam, sectione sexta. Rursus, quod hæc satisfactio necessario sit ex debitis alio titulo, ostensum est sectione præcedente: quia vero illi alii tituli, vel ad justitiam non pertinent; vel certe quia per se non requirunt distincta opera, sed uno & eodem impleri possunt; ideo cum hujusmodi debito posset intelligi sufficiens æqualitas justitiæ, quamvis non perfectissima, nec tam rigorosa, qualis est justitia Christi, quia actus omnino finitus, seu finiti valoris, non ita potest exhaurire omnia illa debita, sicut infinitus actus Christi, ut eadem sectione sexta tractatum est. Tandem est de fide certum, neminem posse Deo satisfacere pro peccato nisi ex gratia, vel sanctificante, vel saltem movente & auxiliante, seu excitante & adjuvante, quod non oportet nunc contra Pelagium demonstrare: quia præsens quæstio non cum illo versatur, sed inter catholicos, quibus hæc veritas indubitata est. Qui unanimi etiam consensu docent, hujusmodi donum, quo peccator ad satisfaciendum pro peccato indiget, duplici titulo esse gratiam. Primo, quia est supernaturalis ordinis, & per se naturæ non debitum: quomodo, etiamsi homo esset innocens, indigeret gratia, vel ad efficiendum actum amoris, quo nunc satisfacit, vel ad satisfaciendum pro aliis, juxta dicta in sectione septima. Secundo, quia hujusmodi donum est supra debitum peccati, vel potius est contrarium ei, quod peccatum merebatur: homini enim, qui mortaliter peccavit, non solum non debetur hoc donum, verum potius ratione peccati meretur illo perpetuo carere. Quo fit, ut concessio hujus doni seu gratiæ sit aliqua ex parte remissio ipsius peccati, non quidem quoad culpam, sed quoad aliquam penam, seu debitum quoddam, quod homo peccando contraxit. Et ex hac parte necessario deficit satisfactio peccatoris ab integra perfectione justitiæ, & differt multum, non solum a satisfactione Christi, sed etiam ab ea, quæ in puro homine innocente ac justo esse posset respectu aliorum, juxta ea, quæ in sect. 7. tractata sunt. Quia vero peccator non ita satisfacit per hanc gratiam, quin ea supposita, aliquid etiam ipse operetur, & fructificet: ideo adhuc habet locum quæstio, an per opera procedentia a libero arbitrio hac gratia adjuto possit homo satisfacere ad æqualitatem pro culpa: sicut, supposita gratia sanctificante & remissa culpa mortali, potest satisfacere de condigno pro temporali poena.

Est ergo quorundam Catholicorum opinio, posse hominem peccatorem ex gratia Dei satisfacere de condigno, & ad æqualitatem pro culpa propria mortali, & per hanc satisfactionem obtinere & consequi remissionem ejus. Ita sentit Cajet. hic in 1. dub. circa solut. ad 2. & Palud. in 3. dist. 20. q. 2. & idem sentit Scotus in 4. dist. 15. q. 1. & indicat etiam Scotus in 4. dist. 19. q. 1. art. 2. ad primum; tenet etiam Ruard. art. 6. satis post medium p. 237. & nonnulli ex recentioribus expositoribus D. Th. tam

hic,

Prima  
opinio as-  
firmans.



Prima  
probatio.

hic, quam 1. p. q. 21. art. 4. Et Medina hic, quamvis ex professo impugnet sententiam Scoti, Cajetani, & aliorum, postea vero dissolvens argumenta Scoti plane ostendit, se in æquivoco laborare, & in re a cæteris non dissentire: nam concedit, supposita gratia reperiri in hac satisfactione condignitatem, & æqualitatem, solumque esse imperfectam, quia supponit gratiam, quam imperfectionem alii non negant. Et in solutione ad secundum argumentum Scoti concedit, actum caritatis adæquare infinitatem peccati, & quod si homo ex propriis viribus posset talem actum habere, posset perfecte satisfacere: nunc autem non posse, quia nullus potest gratiam & caritatem propriis naturæ viribus adipisci. Potest autem hæc sententia primo suaderi, quia remittere peccatum peccatori contrito est opus divinæ justitiæ: ergo fundatur in iusta satisfactione, aliàs potius esset remissio ex liberalitate, vel misericordia. Antecedens constat ex illo 1. Joannis 1. *Si confitemur peccata nostra, fidelis est & iustus, ut remittat nobis peccata nostra, & emundet nos ab omni iniquitate*. Facit etiam illud ad Hebr. 6. *Non enim iniustus Deus, ut obliviscatur operis vestri, &c.* Loquitur enim Paulus de his, qui gratiam & bona opera peccando amiserant. Unde D. Th. 1. p. q. 21. art. 4. ad 1. tractans illud Pl. 24. *Omnes via Domini misericordia & veritas*, dicit, *in justificatione impii apparere justitiam, dum culpas relaxat propter dilectionem, quam tamen ipse misericorditer infundit*; & ita exponit illud Luc. 7. *Dimittuntur ei peccata multa, quoniam dilexit multum*.

Secundo argumentor, quia in conversione peccatoris perfecta, & ex toto corde, ac Dei gratia reperiuntur omnia necessaria ad condignam iustam satisfactionem, tum ex parte ipsius actus, tum ex parte hominis satisfaciens, tum ex parte Dei, cui satisfactio offertur: ergo erit iusta satisfactio. Probo singulas partes antecedentis, primam quidem, quia actus ille est supernaturalis & divini ordinis; item est perfecta conversio ad Deum supernaturalem finem, a quo peccatum averterat: unde conficitur argumentum Scoti, in quo etiam Cajetanus & fere alij nituntur, quia quantum mali fuit in aversione, tantum boni est in conversione, & e contrario non potuit majus malum esse in aversione, quam sit bonum debiti conversioni. Denique, sicut malum aversionis ex se infinite displicet Deo, quia est offensa infiniti boni, ita ille actus dilectionis ex se infinite placet Deo, quia est divini ordinis, & ab ipso principaliter procedit per gratiam suam, & in ipsum perfecte tendit. Et hoc est quod significasse videtur D. Th. in 4. dist. 15. q. 1. art. 2. ad primum dicens, quod sicut offensa habuit quandam infinitatem ex infinitate divinæ maiestatis, ita & satisfactio accipit quandam infinitatem ex infinitate divinæ misericordiae, prout est gratia informata, per quam acceptum redditur, quod homo reddere potest: ex quibus verbis constat, loqui D. Th. de divina misericordia, non ut subsequente contritionem, sed ut antecedente, & dante gratiam, ad contritionem ipsam, & per eam gratiam ait reddi ipsum opus acceptum, id est, ex se dignum, ut acceptetur, dignitate quodam modo infinita & æquivalente illi malitiæ, quæ est in peccato. Et similem sententiam citat Cajet. hic ex eodem D. Th. in opusculo 3. quod est compendium Theologiæ in secunda parte illius cap. 16. correctiora tamen opuscula in ea parte solum decem capita habent, in quibus ille locus non reperitur.

Secunda pars, scilicet ex parte hominis satisfaciens, probatur, quia si res, quæ in satisfactionem offertur, ex se sit æqualis & sufficiens, ex parte personæ satisfaciens nulla alia conditio requiritur, nisi quod eam offerat voluntarie, tamquam dominus ejus; hæc autem conditio in peccatore reperitur: alia vero conditio, seu dignitas personæ, necessaria non est, nisi quatenus ad valorem actus seu rei oblatae in satisfactionem potest requiri: quod in præsentī dici non potest, quia ostensum est, actum ex se esse sufficientem. Et confirmatur primo, nam in eo actu homo non utcumque operatur, sed ut liberum instrumentum divinæ gratiæ, & ex hoc capite habet actus ille specialem quandam, & magnam dignitatem, & æquivalentem, ut declaratum est.

Secundo nam, siquid deesset, maxime quia persona satisfaciens non supponitur grata; sed hoc in primis juxta probabilem opinionem verum non est, quia gratia gratum faciens ordine naturæ antecedit contritio-

nem. Deinde juxta aliam opinionem facile intelligi potest id non esse necessarium ex ipsamet ratione, & intrinseco fine satisfactionis. Est enim quasi via quadam ad reconciliandum personas inter se diffidentes: ergo ex se non supponit jam factam amicitiam: ergo ut satisfactio sit condigna, non est, cur supponat gratiam & amicitiam Dei, sed potius debet ad illam terminari. Quod declarari potest ex differentia inter meritum & satisfactionem, nam meritum tendit ad commodum ejus, qui meretur, & ut aliquo modo faciat debitam mercedem; eumque, qui daturus est præmium, aliquomodo faciat debitorem: & ideo ut condignum sit meritum, supponit personam dignam & gratam Deo, quia inimicus Dei, cum indignus sit omnium bonorum, non potest Deum facere debitorem: satisfactio vero per se tendit in honorem, & quasi commodum alterius, & ut ei recompenset injuriam illatam, unde non constituit illum debitorem, sed potius illi debitum solvit: & ideo necessario non supponit amicitiam, sed potius ad illam tendit, & quodammodo terminatur.

Tertia pars de persona, cui fit satisfactio, probatur, quia ex parte hujus personæ solum potest requiri obligatio seu debitum, aut necessitas aliqua acceptandi satisfactionem: hæc autem est in Deo supposita promissione ejus: ergo. Unde confirmatur in hunc modum, nam ad meritum de condigno solum requiritur ex parte Dei promissio mercedis sub conditione operis: ergo ad condignam satisfactionem ex parte Dei solum erit necessaria promissio remissionis culpæ sub conditione talis operis in satisfactionem exhibiti: sed talis promissio sæpe facta est in Scripturis, ut patet ex adductis sectione præcedente: ergo. Atque hinc colligitur differentia inter hanc sententiam, & eam, quam præcedente sectione refutavi, nam juxta illam non requiritur Dei acceptatio, quam tamen hæc requirit, fundatam tamen in condignitate & æqualitate satisfactionis, & promissione Dei. Item juxta illam remissio fit formaliter per ipsam contritionem, non vero juxta hanc, sed satisfactorie, ut sic dicam, quod est genus quoddam efficientiæ moralis. Item juxta illam non posset Deus facere, etiam de potentia absoluta, quin contritio habeat efficaciam satisfactionis tollendo culpam: at vero hæc sententia id non concederet: quia, nulla facta suppositione, posset Deus non acceptare talem actum in satisfactionem, cum aliis infinitis titulis sit illi debitus, cumque ipse sit dominus omnium, tamen supposita promissione, non potest illum non acceptare. Unde ulterius illa prior sententia non censet, remissionem peccati esse novum gratiæ beneficium a contritione, & effectu formali ejus distinctum: hæc vero agnoscit esse distinctum, & de potentia absoluta separabile; debitum tamen nunc supposito pacto & condignitate satisfactionis.

Contraria sententia docet peccatorem non posse satisfacere ad æqualitatem pro morali culpa a se commissa; ideoque neque ex justitia posse consequi remissionem ejus; loquimur autem de justitia præcise considerata in ordine ad ipsum purum hominem, per gratiam operantem, & conantem surgere a peccato, non de illo, ut ejus operatio Christi satisfactione nititur, aut prout ei Christi meritum applicatur, nam de hoc dicitur in sect. ultima hujus disputationis. Hanc vero sententiam indicat magis D. Th. hic ad 2. ubi non loquitur de puro homine, id est, considerato in puris naturæ viribus, ut Cajet. male exposuit, sed de omni homine, qui non sit personaliter Deus, in quocumque statu consideretur, alioqui ex insufficientia puri hominis non recte intulisset Dei hominis necessitatem, ut in commentario articuli latius deduxi. Eandem sententiam docet D. Th. inf. q. 85. art. 3. in corpore & ad 2. ubi Cajet. respondens ad 3. dubium in eandem sententiam inclinare videtur. Idem D. Th. in 4. d. 14. q. 1. ubi loquens de poenitentia infusa dicit, non posse Deo reddere æquivalens pro offensa, sicut nec potest religio seu gratitudo pro beneficio. Item in loco supra citato ex dist. 15. aperte tribuit sufficientiam nostræ satisfactionis misericordiae Dei acceptantis illam, unde plane vult gravitatem peccati esse ex ipsomet, eo quod sit aversio a Deo infinito, valorem autem satisfactionis nostræ ex se revera non esse sufficientem, sed suppleri ex infinita misericordia Dei, qui vult illa esse contentus. Eandem sententiam tenet Bonav. in 3. d. 20. q. 3. ad 2. &

Secunda  
opinio.



q.4.&Richard. ibid. q.4. Durand. q.2. & in 4.d.15. q.1. ubi bene Capre. concl. 1. & ad argumenta contra illam, & Almain. q.1. Major. d.14. q.2. ad ultimum dubium Marfil. in 4.q.10. Alenf. 3.p. q.1. art.2. in corp. & ad secundum Ferr.4. contra gent. c.54. Soto lib.3. de natur.& grat. c.6. Med. Cod. de poenitent. tract.3. q.1. Vega lib.15. in Trident. c.4. circa finem. Et Sotus ac Gabr. supra cit. in re idem sentiunt; ut videre est in Scoto in 4.d.1. q.6. & d.15. q.1. & d.16. q.2. Gabr. d.14. q.1. art.1. in fine, & art.2. conclus. 3. quamvis, quia ipsi in nulla satisfactione agnoscunt valorem, nisi ex acceptatione extrinseca Dei, quia Deus acceptat actum hominis ad remittendum illi peccatum, vocant illam æqualem seu sufficientem satisfactionem, Sed errant, tam in fundamento, ut sup. dictum est, quam in eo, quod non distinguunt, aliud esse acceptare actum ut dispositionem sufficientem; aliud vero ut justam recompensationem: & aliquid posse acceptari a Deo ex misericordia, aliquid vero ex iustitia. Atque hæc sententia, sicut communis est, ita & omnino vera mihi videtur: in ea tamen probanda dicti auctores varii sunt, & ad illas fere conditiones recurrunt, quæ ad rigorosam iustitiam peti solent, ut scilicet. 7. vidimus: & aliqui rationes afferunt non satis efficaces; non vacat autem in eis examinandis nunc immorari: ut ergo eam confirmem, adverto, duobus modis intelligi posse, eum, qui peccavit, satisfacere pro mortali culpa commissa ad æqualitatem. Uno modo post receptam gratiam sanctificantem, atque adeo post culpam ipsam alia via jam gratis remissam; post (inquam) aut tempore, aut saltem natura. Alio modo potest intelligi per actum contritionis, ut priorem simpliciter & in omni genere causæ gratia sanctificante & remissione peccati, satisfacere condigne peccatorem pro sua culpa, & ideo veniam illius consequi. Ex auctoribus ergo in prima sententia citatis, quidam ut Palud. & Cajet. videntur priori modo loqui, alii ut Richard. modo posteriori. Deinde statuentium est, secundum fidem remissionem peccati absolute loquendo gratis donari homini peccatori, ut omnes Theologi docent, & ex divinis Scripturis definit. Concil. Trident. c.7. & 9. ubi ait, *necessarium esse credere, neque remitti, neque remissa unquam fuisse peccata nisi gratis divina misericordia propter Christum*, juxta illud ad Rom. 3. *Justificati gratis per gratiam ipsius*; in justificatione enim remissio peccatorum includitur, ut ex eodem Concilio supra diximus. Declarat autem idem Concil. c.8. ideo nos dici gratis justificari, *quia nihil eorum, quæ justificationem præcedunt, sive fides, sive opera, ipsam justificationis gratiam promeretur, si enim gratia est, jam non ex operibus: alioquin, ut idem Apostolus inquit, gratia jam non est gratia*. In quo Concilii testimonio verbum illud, *præcedunt*, non solum de antecessione temporis, sed etiam de ordine naturæ, atque adeo de ipsa met ultima dispositione ad justificationem, quatenus ipsam ordine naturæ antecedit, intelligendum est. Quod probo ex probatione, quam Concilium adducit, quia, si gratia esset ex operibus, jam non esset gratia: hæc enim ratio æque probat, sive sit ex operibus tempore antecedentibus, sive natura tantum: quia hoc nihil refert, quominus id, quod ex operibus datur, non gratis, sed ex debito detur. Unde utroque modo contingit aliquid dari ex operibus, ut gloria datur ex operibus tempore antecedentibus, augmentum vero gratiæ sæpe datur ex opere natura tantum antecedente: & in utroque verum est (quod Paulus ait) non esse meram gratiam, quia non gratis, sed ex debito datur: ergo e contrario, si justificatio gratis datur, quia non ex operibus præcedentibus, ut Concilium ait, necesse est, ut non sit, ex operibus tam natura, quam tempore antecedentibus. Quod si quis fortasse dicat, etiam si justificatio, seu remissio peccati detur ex merito alicujus operis ordine naturæ antecedentis, nihilominus esse gratiam, quia illud opus ex quo oritur, fundatur in gratia, seu etiam est gratia, quia gratis data: hoc facile refutatur, non solum ex communi doctrina Theologorum, sed ex hoc eodem loco Concilii Tridentini, quem tractamus: primo quidem, quia hoc modo etiam si justificatio daretur ex operibus tempore antecedentibus, id est, ex merito de condigno illorum, nihilominus posset illo modo appellari gratia: sicut juxta probabilem expositionem, vita æterna appellatur gratia, ad Rom. 6. Sequela patet, quia etiam opera, quæ

tempore antecedunt justificationem, sunt gratia & ex gratia, ut est fides, & aliæ dispositiones remotæ, quæ in illa fundantur, de quibus aperte Concilium loquitur: consequens autem manifeste repugnat expositioni Concilii: alioqui dicere debuisset remissionem peccati, ideo dici gratis dari, quia opera, propter quæ datur, procedunt a gratia aliqua, quæ gratis datur: non vero, quia non detur ex merito talium operum. Unde non satisfaciet, si quis respondeat, illa opera tempore antecedentia justificationem non habere sufficientem condignitatem cum tali præmio, & ideo non dari justificationem ex merito illorum. Hoc (inquam) non satisfaciet, tum quia idem verissime dicitur de opera, quod tantum ordine naturæ antecedit justificationem; tum maxime, quia esto illud sit verum propter alias rationes, tamen ex vi rationis Concilii, scilicet, quia aliàs justificatio non esset gratia: hoc enim re vera non sequitur in illo sensu, ut ostensum est.

Unde argumentor secundo, quia ex illa doctrina sequitur, remissionem peccati, & justificationem non esse in se ac formaliter gratiam, quantum ad hanc denominationem, quæ est gratis dari, sed tantum in radice, sicut de vita æterna dicebamus: consequens autem est aperte falsum, tum quia est contra mentem Concilii, ut eodem argumento probari potest, scilicet, quia non repugnaret remissionem peccatorum illo modo esse gratiam, & esse ex operibus: tum etiam, quia aliàs simpliciter concedi posset, remissionem peccati dari ex iustitia peccatori poenitenti & contrito, sicut datur gloria vel augmentum gratiæ iusto bene merenti: consequens est contra omnes patres, quos statim referam: imo & contra modum loquendi Scripturæ, in qua gloria sæpe vocatur merces & corona iustitiæ, nunquam vero similia dicuntur, vel dici possunt de remissione peccati: est etiam contra communem sententiam Theologorum, quos retuli. Et præterea tertio declaratur aliter, nam inde sequitur, primam gratiam sanctificantem non esse magis gratiam, seu gratis dari, quam augmentum gratiæ: consequens, est falsum; ergo. Sequela patet, quia eadem est ratio de remissione peccati, justificatione, & prima gratia, quia forma, qua fit justificatio, & remittitur peccatum est prima gratia: ergo, si remissio peccati, & justificatio solum in radice dicitur gratis dari, idem erit de prima gratia sanctificante: consequens est contra communem Theologorum sententiam, ut constat ex materia de gratia. Est etiam contra Concil. Trident. hoc eodem loco dicens: *Justificationem gratis nobis concedi, & non ex operibus*: justificatio autem fit per primam gratiam sanctificantem: ergo ex mente Concilii etiam prima gratia sanctificans gratis datur, id est, non ex merito cujuscumque operis, sive tempore, sive natura tantum antecedit talem gratiam. Nec dici potest, nomine justificationis intelligere Concilium totum negotium justificationis prout a prima gratia excitante inchoatur, & usque ad remissionem peccati procedit: nam expresse Concilium distinguit justificationem a fide & aliis operibus, justificatio autem in eo sensu suum exordium sumit ab initio fidei, & per dispositiones remotas progreditur usque ad ultimam, ut idem Concil. c.5.6. & 7. descripsit: ergo cum dicit, justificationem gratis dari, quia nec fides nec alia opera antecedentia illam promerentur, non loquitur de justificatione in eo sensu, sed prout dicit infusionem ipsius iustitiæ, & remissionem peccati.

Dicetur fortasse, neutro ex his modis sumi justificationem eo loco, sed media quadam ratione, scilicet, pro toto negotio justificationis, prout in instanti ultimo perficitur, & includit tam dispositionem ultimam, quam formam gratiæ & remissionem peccati: hæc enim acceptio non parum usitata videtur, ut colligere licet ex D. Th. 1.2.p.113. præsertim a.8. Sic ergo justificatio dicitur gratis dari, quia tota ipsa nullum meritum supponit, quamvis distinguendo ea, quæ in tali justificatione includuntur, unum, scilicet, remissio peccatorum, vel prima gratia sanctificans non gratis detur, sed ex merito ultimæ dispositionis, sicut prædestinatio absolute dicitur gratis conferri, quia tota nullum supponit meritum, quamvis prout terminatur ad unum effectum, posterior possit esse ex merito prioris. Sed hæc responsio, specie quidem verisimilis & apparens, aliena est a mente Concilii, & omnino falsa. Primum patet, quia Concilium

Non solum prima gratia excitans sed etiam sanctificans & habitualis gratis datur.

Evasio argumenti.

Urgetur argumentum.

Quomodo justificatio, & remissio peccati gratis detur.

Exponitur diligenter locus Concil. Trident. sess.6. c.8.



in eo capite octavo de ea justificatione loquitur, de qua c. 7. sermonem faceret, eam describendo, & ejus causas assignando: sed ibi non sumit justificationem hoc modo, sed pro infusione justitiæ seu gratiæ sanctificantis, & remissione peccati, ut evidenter patet ex illis verbis. *Hanc dispositionem justificatio ipsa consequitur, quæ non est sola peccatorum remissio, sed & sanctificatio, & renovatio interioris hominis, per voluntariam susceptionem gratiæ & donorum*; ubi condistinguit justificationem a dispositione, de qua locutus fuerat: ostendimus autem in superioribus locutum fuisse de dispositione ultima. Ubi etiam obiter ponderandum est verbum illud, *consequitur*: recte enim correspondet verbo capitis octavi, *præcedunt*, ejusque datam expositionem confirmat. Dicitur enim justificatio consequi dispositionem, quamvis non tempore, sed tantum ordine naturæ consequatur: ergo & e converso dispositio ultima dicitur præcedere, etiam si tantum ordine naturæ antecedit: ergo etiam respectu illius dicitur justificatio consequens, gratis dari. Secundo urgeo argumentum factum a paritate rationis: nam, si justificatio strictissime sumpta comparata ad dispositionem ultimam non gratis datur, eadem ratione nec dispositio ultima comparata ad præcedentes non gratis daretur, cujus oppositum docet Concilium, etiam juxta præcedentem expositionem. Sequela patet, quia, sicut remissio peccati seu justitiæ infusio, supponit dispositionem, quæ est gratia & ex gratia, ita dispositio ultima supponit remotam, quæ etiam est gratia & ex gratia; & inter eas potest considerari similis proportio, & promissio etiam, quæ bene utentibus prioribus auxiliis posteriora necessaria offeruntur, quomodo intelligitur axioma illud: *Facienti, quod in se est, Deus non denegat gratiam*. Tertio arguuntur illa ratione, quia alias prima gratia sanctificans non magis daretur gratis, quam augmentum illius, quod est alienum a doctrina Theologorum, & ejusdem Concilii c. 10. & can. 32. ubi dicit: *Justificatum per bona opera mereri augmentum gratiæ, vitam æternam, & illius consecutionem*; ipsam vero justitiam solum dicit infundi per Christi meritum, eamque præsupponi ad nostrum meritum proprium & de condigno. Sit ergo constans & certum, remissionem peccati, simpliciter & absolute gratis nobis dari respectu cujuscumque operis nostri, esseque vere gratiam non solum in radice, sed in se & formaliter, quia gratis datur. Obiterque ex hoc loco Concilii Tridentini notetur, cum dicitur prima gratia gratis dari, non solum id esse verum & certum de prima gratia vocante seu auxiliante, sed etiam de prima gratia sanctificante, & integro ac formali effectu ejus, sub quo remissio peccati includitur. Notetur etiam expositio ad loca Pauli, cum negat, gratiam, vel justitiam dari ex operibus, quia non solum excludit opera moralia seu legalia, quatenus per vires naturæ fieri poterant, sed etiam opera supernaturalia procedentia ab auxilio gratiæ, qualia sunt fides, & dispositiones ad justitiam, nam de his expresse loquitur Concilium, explicans eadem loca de prima justificatione: quod enim secunda, seu augmentum justitiæ fiat ex operibus, statim docet, & testimonio Jacobi confirmat c. 20.

Prima conclusio.

His suppositis dico primo. Homo non potest satisfacere ad æqualitatem pro peccato mortali proprio per actum contritionis, ut precedentem a gratia sanctificante, seu ut ab illa formatum. Probatur sive admittamus, actum contritionis elicitive & effective procedere ab habitibus gratiæ, sive contrarium, quod verius est, supponamus. Nam juxta priorem sententiam vel supponitur gratia, ad hos actus solum ut infusa ex parte Dei, & non ut recepta ex parte hominis, vel utroque modo. Si primum dicatur; ergo gratia ab illa, ut ab illa procedit contritio, non sanctificat hominem, neque expellit ab eo peccatum, quia non sanctificat, nisi ut recepta & informans, nondum autem intelligitur recepta: ergo ut sic non potest esse principium satisfactionis de condigno seu ad æqualitatem. Patet consequentia, quia ut a fortiori ex dicendis constabit, non potest esse satisfactio ad æqualitatem, nisi saltem supponatur persona grata, & a peccato munda. Et confirmatur, quia non solum gratiæ infusio, ut tenet se ex parte Dei, sed etiam ut recepta ex parte hominis, gratis illi donatur: ergo contritio, ut antecedit gratiam ut receptam, non potest esse condigna satisfactio pro culpa: alioqui gratis

daretur, ut postea dicam. Si vero dicatur receptio gratiæ etiam ut informantis hominem antecedere contritionem, rursus alio dilemmate utendum est; nam, vel simul cum gratia sic infusa & recepta supponitur etiam culpa remissa, vel non. Si non supponitur, adhuc non potest esse a tali persona æquivalens satisfactio, quia nondum est persona simpliciter grata & sancta, cum nondum sit illi culpa remissa. Si autem etiam ipsa culpa supponitur jam remissa: ergo omnino gratis, & sine ulla satisfactione remissa est: ergo jam nullus relinquitur locus satisfactioni pro tali culpa. Unde obiter colligitur, falso dixisse Richardum in 4. dist. 17. art. 1. q. 7. si actus contritionis, procedens a gratia, est prior natura, quam remissio peccati, peccatorem de condigno mereri remissionem peccati, quod censet probabile: constat enim ex dictis, consequens illud valde esse falsum, & illationem illam nullius momenti esse, quia, si peccatum nondum intelligitur ablatum, nondum persona intelligitur plene sanctificata, neque apta ad meritum de condigno; si vero culpa prius intelligitur gratis remissa, non potest in aliquo posteriori signo naturæ cadere sub meritum de condigno: quia principium meriti, seu quod supponitur ad meritum, non cadit sub idem meritum: alioqui etiam prima gratia sanctificans caderet illo modo sub meritum de condigno.

Et hinc facile convincitur ratio juxta aliam sententiam negantem, hos actus procedere ab habitibus, nam juxta illam, prius natura simpliciter in omni genere elicitur contritio per auxilia gratiæ, deinde in eodem instanti temporis, & posterius natura informatur gratia, quatenus per illam sanctificatur subjectum: ergo contritio, ut informat a gratia, sicut supponit ipsam gratiam gratis infusam, ita etiam supponit peccatum gratis remissum: ergo non habet jam locum satisfactio pro tali peccato. Probatur hæc ultima consequentia, quia satisfacere est solvere debitum; sed hic homo non solvit debitum, nec per solutionem condignam illius remissionem consequitur, sed gratis ei condonatur: ergo non satisfacit.

Dices: etiam si prius natura remissio peccati sit gratis concessa, potest idem homo jam justificatus per suum actum posterius natura satisfacere. Sed hoc dici non potest, nisi forte sit quæstio de nomine, quamvis enim ille actus, ut posterior natura gratia & remissione peccati, possit dici ex se satisfactorius, quia jam intelligitur habere valorem & sufficientiam ad illum effectum, nisi jam factum invenisset, tamen vel illa non est propria hujus vocis significatio, vel saltem non ita nunc de satisfactione loquimur, sed ut actu habet rationem & causalitatem satisfactionis, ita ut propter illam, tamquam propter solutionem condignam, remittatur peccatum: hoc enim sensu inquirimus, utrum homo possit satisfacere pro suo peccato, ita sc. ut mediante illa peccatum a se expellat, seu veniam illius obtineat. Et re vera non proprie dicitur satisfactio, quæ post remissionem debiti fit, sed quæ fit ad debiti remissionem. Est enim remissio debiti terminus satisfactionis, non principium, ut ex communi sensu omnium hominum conitat. Nec dici potest, eandem peccati remissionem, quæ facta fuit gratis ante satisfactionem, postea etiam fieri per satisfactionem, quia repugnat, idem debitum gratis jam remissum, iterum per justam solutionem remitti, sicut repugnat, eandem gratiam primam gratis datam, cadere sub meritum operis ab ipsa procedentis. Unde potest confirmari, quia, si homo per actum sic informatum satisfaceret ad æqualitatem pro culpa mortali, etiam mereretur remissionem ejus, quam consequentiam infra probabimus; sed non meretur remissionem, cum gratis illam acceperit: ergo nec satisfacit de condigno. Atque hæc rationes probant sufficienter non posse peccatorem per hujusmodi actum satisfacere de condigno, etiam illo modo imperfecto, quo homo justus & innocens potest satisfacere pro peccato alterius. Quod vero in tali actu non sit perfecta æqualitas ad injuriam culpæ probant, quæ sect. 7. diximus: quia non potest ille actus habere majorem valorem & vim ad satisfaciendum cum, perfecta æqualitate, quam actus puri hominis grati & sancti, de quo diximus, non satisfacturum Deo ad æqualitatem perfecte: nam rationes ibi factæ, procedunt etiam hic, cum non sit major dignitas, aut sanctitas unius personæ satisfaciens, quam alterius.

Dico secundo. Peccator, cum a peccato mortali resurgit, non satisfacit condignè Deo, seu ad æqualitatem,

Secunda conclusio.  
per



per actum contritionis seu dilectionis, ut est ei dispositio ad remissionem peccati, & prior natura illa, Probatur primo ex Scriptura in omnibus illis locis, in quibus remissio peccati, gratia appellatur, & negatur dari ex operibus, ad Ephes. 2. ad Titum 3. ad Rom. 3. nam, si esset de condigna satisfactione, re vera esset ex operibus. Item ex illis, in quibus benignitati & misericordiae Dei attribuitur, quod veniam peccatoribus tribuat, ut est illud. *Quia benignus & misericors est, & praevalens super malitiam.* Joelis 2. Et illud Isaia 55. *Revertatur ad Dominum & miserebitur ejus;* & Jerem. 3. 1. dicitur ex persona peccatoris: *Convertite me Domine & convertar: Postquam enim convertisti me, egi poenitentiam, &c.* Et subdit ex persona Dei: *Idcirco conturbata sunt viscera mea super eum, miserans miserebor ejus.* Et alia similia. Unde Jerem. 3. Conversio peccatoris comparatur reversioni adulterae ad virum suum, quam ille benigne suscipit, eique liberaliter injuriam remittit. Et hoc mysterium inter alia significari creditur, quando in his locis, & promissionibus additur particula forte, ut supra visum est. Secundo, ex Patribus, qui semper attribuunt misericordiae divinae, quod poenitentiam nostram acceptet, & propter illam peccata remittat, quamvis illa per se sufficiens sit ad tanti debiti solutionem. Sic Chrysost. hom. 62. in Matth. exponit parabolam c. 18. ubi Dominus multa talenta remisit debitori roganti. Et inter alia inquit. *Nam etsi prociat debitor, & rogavit, tamen ex causa indulgentiae universam rem Domino attribui videmus.* Idem habet idem Chrysost. eundem locum tractans hom. 2. in posterior. ad Corinth. in fine literae, ante partem moralem, & epist. 5. ad Theodor. lapsum, & refertur cum multis aliis in c. Talis est, de Poenitent. dist. 3. Item hom. 26. in Genes. versus finem, post longam exhortationem ad poenitentiam, ita concludit. *Tanta est Dei erga nos misericordia, nam ubi videris voluntatis nostrae firmum propositum, & ferventi nos desiderio ad se accedere, non tardat, neque differt, sed accelerat, suamque solitam liberalitatem exhibens dicit: Adhuc loquente te, dicam, Ecce adsum.* Isaia 65. Et elegantissime hom. 80. ad populum in principio sic scribit. *Num poenitentem licet salvari? Et maxime. Totam vitam in peccatis absumpsisti, & si poenitentiam egero, salvabor? Et maxime. Unde constat? Ex Domini Clementia. Ne tue confidas poenitentiae tuae namque poenitentia tanta nequit peccata deleo. Si sola foret poenitentia, jure timeres: sed postquam cum poenitentia commiscetur Dei misericordia, confide.* Et Cassianus collat. 20. c. 8. postquam multa remedia proposuit ad consequendam remissionem peccatorum, inter quae & charitatem & poenitentiam numerat, subdit. *Etiam si haec omnia fecerimus, non erunt idonea ad expiationem scelerum nostrorum, nisi celeritas Domini, clementiaque deleverit, qui exiguis parvosque conatus immensa liberalitate prosequitur, dicens. Ego sum, ego sum, qui deleo iniquitates tuas propter me, & peccatorum tuorum jam non recordabor.* Et de eadem re optime loquitur lib. 12. de institutione cœnobiorum, qui est de spiritu superbiae c. 11. & 14. Sic etiam Augustinus in Enchirid. c. 65. inquit. *Nique de magnis criminibus remittendis desperanda est mihi, misericordia Dei agentibus poenitentiam.* Idem lib. de vera & falsa poenitentia c. 3. ubi in hunc modum exponit parabolam de filio prodigo Luc. 15. ubi ponderandum est verbum illud. *Misericordia motus, non justitia,* & illud, *Epulari & gaudere oportebat,* quod verbum congruentiam tantum significat, non necessitatem. Considerandum etiam est osculum pacis ex misericordia profectum, quod reconciliationem significat, ut notavit Hieronym. epist. 64. ubi in hunc etiam modum exponit illud Isaia 3. 1. *Revertere ad me, & redimam te, quia ego Dominus.* Et subdit inferius. *Vide, quanta sit magnitudo fletuum, ut aquarum diluvio comparetur, quos qui habuerit, & dixerit cum Jeremia: Non sileat pupilla oculi mei, statim complebitur in illo: Misericordia & veritas obviaverunt sibi.* Et Michae 6. tractas verba illa: *Nunquid dabo primogenitum meum pro scelere meo? fructum ventris mei pro peccato animae meae,* ait, his verbis significari: Nihil esse dignum, quod Deo per peccato possit offerri, nullamque humilitatem maculas posse eluere delictorum. Eamque expositionem refert, & commendat Conc. Francoser. epist. ad Episcopos Hispan. Similia scribit Tharabius, epist. ad Joannem, quae habetur 3. tom. Conc.

ante septimam Synod. ubi hæc & alia testimonia scripturæ congerit, quæ longum esset referre. Multa de eadem re habet Ambrosius lib. 1. de poeniten. c. 4. & seq. inter alia. *Expectat, inquit, conversionem nostram, ut revertamur & ipsi ad gratiam, expectat lachrymas, ut profundat pietatem suam, sic in Evangelio viduae lachrymis compassus, filium ejus suscitavit.* Luc. 7. Hinc Fulgentius epist. 7. e. 7. *Sicut Deus, inquit, per justitiam damnat aversum, ita per misericordiam sanat conversum.* Sic denique intelligendum est, quod lib. de Ecclesiast. Dogmat. dicitur c. 80. *Poenitentia aboleri peccata, indubitanter creditur.* Et ratio redditur. *Quia, scilicet, propositum Dei, quod decrevit salvare quod perierat, stat immobile, & ideo, quia voluntas ejus non mutatur, venia peccatorum fideliter praesumatur ab illo, qui non vult mortem peccatoris, sed ut convertatur a perditione poenitendo, & salvatus miseratione Domini vivat.*

Tertio argumentor ratione, quia aliàs remissio peccati in se ac formaliter non gratis fieret, sed ex operibus, & ex justitia, quod esse falsum satis fuisse ostensum est. Sequela patet, quia debitum, quod per condignam solutionem solvitur, non gratis remittitur, sicut temporalis poena, pro qua justus ex condigno satisfacit, non potest dici, vere & in se gratis remitti. Dicitur fortasse, remissionem peccati ideo gratis fieri, quia non fit ex merito de condigno, licet fiat ex satisfactione condigna. Sed hoc non recte dictum est, primo quidem, quia ut aliquid non fiat gratis, non necesse est, ut fiat ex omnibus, vel multis justitiarum ritulis, sed satis est, quod vel ex uno justitiarum titulo fiat: sed non est minor titulus justitiarum in satisfactione condigna, quam in merito de condigno: ergo. Major atque etiam minor videntur per se notæ ex terminis, & comprobari possunt in Christi operibus, non enim minus perfectam justitiam continent, quatenus satisfactoria sunt de condigno, quam ut sunt meritoria; & ideo sicut respectu Christi non datur gratis, quod ex merito ejus datur, ita nec gratis remittitur, quod ex satisfactione ejus condonatur. Comprobari etiam potest totum hoc argumentum exemplo adducto de satisfactione nostra pro poena temporali, quæ non remittitur gratis, vel ex hoc præcise titulo, quod ob condignam satisfactionem remittitur, etiam si aliud meritum non intercedat. Secundo displicet illa responsio, quia licet ratio satisfactionis condignæ distincta sit a ratione meriti, tamen ex una ad alteram potest sufficiens argumentum sumi: quia nulla est ratio, ob quam peccator non possit de condigno mereri remissionem culpæ per contritionem, ut est prævia dispositio ad illam, si per illam potest pro culpa condigne satisfacere: nam in primis ratio justitiarum, quæ ex parte Dei intercedit in merito & satisfactione condignis, ejusdem rationis est, ut supra declaravi: nam, licet per satisfactionem non fiat Deus debitor ad aliquod bonum conferendum, fit tamen debitor ad non puniendum, seu ad deponendum odium contra peccatorem, & tollendum quidquid habet rationem culpæ. Deinde non minor, imo quodammodo major valor moralis requiritur ad satisfactionem condignam, quam ad meritum, majorque dignitas personæ satisfaciens, quia ab illa potissimum sumitur satisfactionis valor: si ergo hoc non obstante posset esse satisfactio condigna, nondum supposita gratia sanctificante & remissione peccati, posset etiam esse meritum de condigno. Tandem non repugnat, eundem actum esse satisfactorium, & meritorium, si aliunde cætera necessaria concurrant: sicut non repugnat simul esse poenalem & bonum, & simul cedere in honorem Dei, ipsumque respicere, ut injuria illius resarciatur, & simul etiam cedere in commodum operantis, quod habet non solum sub ratione meriti, sed etiam sub ratione satisfactionis, quia liberatio a culpa, etiam si ad divinum honorem pertineat, maximum commodum est satisfaciens: igitur, si in remissione peccati intervenit prædicto modo satisfactio condigni, interveniet etiam meritum de condigno.

Respondent aliqui Thomistæ, negando argumenti consequentiam, quia hæc æqualitas est inter remissionem peccati, & ultimam dispositionem, quatenus utrumque est opus Dei, & juxta ejus sapientiam habent inter se commensurationem: non vero quatenus ille actus est ab homine, quia ut sic non habet proportionem dispositionis, sed solum ut proficitur a gratia operante, a qua etiam

In satisfac-  
tione cō-  
digna tam  
vera justiti-  
a, quam  
in merito  
de condigno.



iam habet, quod sit iusta satisfactio. Et videtur hoc habere fundamentum in Cajetano hic ad primum dubium: indicat enim, actum peccatoris esse satisfactionem, ut est a gratia, non ut est a voluntate peccatoris. Sed hæc doctrina neque est vera, nec solvit argumentum factum. Primum constat ex dictis sect. præced. probando tertiam conclusionem, ubi ostendi, actum peccatoris esse dispositionem ad gratiam, non ut est a solo auxilio, neque ut est a solo libero arbitrio, sed ut ab utroque simul, quia utriusque conditiones essentialiter requirit ad rationem dispositionis: idem autem est de ratione satisfactionis, quia nec mente concipi potest, quod actus sit satisfactio, nisi ut est ab homine satisfaciente, & a voluntate ejus, licet non sola, sed divinis auxiliis adjuncta: ergo, si hæc iustitia divina attenditur ex satisfactione, necesse est, ut attendatur non tantum inter opera Dei, ut Dei sunt, sed inter opus Dei, & opus hominis cum Deo operantis, id quod ex sequentibus amplius confirmatur. Secundum patet, quia sicut satisfactio est opus gratiæ, ita & mereri: ergo, si hic servatur ratio iustitiæ respectu satisfactionis, quamvis sit opus Dei, etiam servabitur respectu meriti, quamvis sit opus hominis: quia neque hoc est solius hominis, sed etiam gratiæ, neque illud est solius gratiæ, sed etiam hominis cooperantis illi, & utroque titulo non erit gratis remissio peccati, sed ex operibus. Imo etiam sequitur, nihil prorsus remitti gratis peccatori præter debitum carenti auxiliis gratiæ necessariis ad contritionem. Imo, si proprie loquamur, neque debitum ipsum gratis remittitur, quia semper manet, quamdiu manet culpa: solum ergo gratis donabitur peccatori, quod hæc poena, scilicet carere talibus auxiliis non mandetur executioni: est autem valde absurdum concedere, Deum solam hanc poenam gratis remittere, & non ipsam culpam, ac poenam æternam, ut ex supradictis constat: alioqui etiam posset quis dicere peccatum solum remitti gratis, quia, cum ex se mereatur privationem etiam fidei & spei, Deus ex sua misericordia non exequitur hanc poenam, sed has virtutes conservat in peccatore, ut per eas converti possit. Alia vero evasio ad hanc rationem excogitari posset, dicendo, remissionem peccati fieri gratis, quia cum Deus de potentia absoluta posset hujusmodi satisfactionem non acceptare, libere & gratuito illam acceptet. Primum horum nos admittimus, & sequitur ex omnibus dictis, quia cum remissio peccati sit novum gratiæ beneficium, etiam supposita contritione, nihil est, quod absolute loquendo Deum necessitet ad illud præstandum, sicut Rex gravissime offensus non cogitur subito veniam concedere, etiam si summis precibus illam efflagitet: igitur hac ratione poterit Deus dici gratis remittere, quia satisfactio nem libere acceptat. Sed hæc responsio haberet utcumque locum, si hæc acceptatio esset omnino subsequens satisfactionem peccatoris, & non supponeret divinam promissionem ex parte Dei, & æqualitatem in opere peccatoris juxta prædictam opinionem, nam concurrentibus his duobus, intercedit propria ratio iustitiæ, ad quam sufficit, quod ex tali suppositione Deus non possit non acceptare, quamvis absque illa posset, ut late in superioribus dictum est, & ipsamet Christi satisfactio est declaratum, quia acceptatio hoc modo facta, non est gratia, quæ misceatur solutioni, & diminuat æqualitatem ejus, sed est solum libera quædam voluntas seu promissio antecedens contractum, æquivalens voluntati contrahendi, quæ iustitiam contractus non tollit.

Quarto & ultimo probatur a priori conclusio, quia contritio, ut est dispositio ad primam gratiam & remissionem peccati, procedit ab homine, ut nondum grato, nec libero a peccato: ergo ut sic non potest habere valorem ad satisfaciendum Deo ad æqualitatem: ostensum enim in superioribus est, solam gratiam creatam sanctificantem non esse sufficientem, ut actus ab ea procedens habeat valorem condignum ad satisfaciendum Deo pro culpa mortali: ergo a fortiori, persona ut prius natura carens hac gratia, & ultimo effectu ejus, qui est remissio peccati, non est sufficiens ad conferendum tantum valorem actui, cum nondum intelligatur sancta & iusta. Et confirmari potest hæc ratio exemplo supra adducto de homine creato in puris naturalibus, & peccante mortaliter contra Deum finem naturæ: ille enim, quamvis actu naturali amoris Dei, vel doloris de peccato, converteretur, non satisfaceret ad æqualitatem pro tali peccato:

ergo neque tunc satisfacit: est enim eadem proportio.

Ad argumenta contrariæ sententiæ facilis est ex dictis responsio. Ad primum respondetur, negando in justificatione peccatoris intercedere veram ac propriam iustitiam ex parte Dei respectu ipsiusmet peccatoris, cuius signum sufficiens est, quod in Scriptura sacra nunquam hoc opus iustitiæ tribuitur, sed misericordiae, ut vidimus: unde nunquam vocatur merces aut corona iustitiæ, vel aliis similibus titulis, quæ iustitiam indicent: unde peccator, quantumvis contritus sibi esse videatur, nunquam audebit dicere, debita mihi est remissio peccati, tanquam *corona iustitiæ, quam reddet mihi Dominus in illa die iustus iudex*, sed orabit semper: *Miserere mei Deus secundum magnam misericordiam tuam. Ep, propitius esto mihi peccatori*. Unde Augustinus tractans prædicta verba Joannis in expositione illius epistolæ de venialibus docet esse intelligenda, vel certe si ad mortalia extendantur, intelligenda sunt cum distributione accommodata: est enim Deus fidelis & iustus remittens nobis poenitentibus peccata nostra, fidelis nobis, iustus Christo, cui iustitia servatur, quando nobis propter eum peccata remittuntur. De qua iustitia posset etiam intelligi alter locus ad Hebræos 6, quamvis vera responsio sit, ibi non esse sermonem de remissione peccati, sed de mercede debita bonis meritis, quæ superveniente peccato mortificata fuerunt, quæ, si homo respiciat, illiusque peccati veniam obtineat, ex iustitia debetur, quamvis peccati remissio ex misericordia comparata sit. At vero non tam proprie ac stricte de iustitia loquendo, sed late, ut solum dicit quandam proportionem & decentiam bonorum operum, & debitum connaturalitatis unius rei ad aliam, sic verum est reperiri iustitiam in justificatione peccatoris, & sic loquitur D. Th. in citat. loco r. p. hæc enim est generalis ratio iustitiæ, quæ dicitur inveniri in omnibus operibus Dei; & idem solum voluit D. Th. accommodare ad opus justificationis. Servatur autem prædicta proportio, siue consideres illam dispositionem, seu dilectionem Dei secundum se: sic enim habet eam proportionem cum gratia seu caritate, quam actus cum proprio habitu; siue illam spectes ut opus Dei, sic enim magnam congruentiam ac proportionem habet, ut, cui Deus suam dilectionem infundit, peccata etiam remittat: siue denique ut est opus hominis: nam etiam est valde consentaneum, ut facienti homini quod in se est per divinam gratiam ad recompensandam injuriam, Deus non deneget illius remissionem.

Ad secundum negatur assumptum, præsertim quoad secundam partem. Et ratio in summa est jam tacta, quia deest illi actui valor necessarius ex parte personæ satisfaciæntis, ut satis declaratum est & responsum ad omnia, quæ ibi tanguntur, præter ultimum verbum de promissione divina; ad quod breviter dicitur, hanc promissionem non fundari in dignitate & æqualitate operis, prout est a tali operante; & ideo non continere pactum ad iustitiam pertinens, sed solum simplicem promissionem, seu decretum Dei immobile de hoc beneficio præstando peccatori poenitenti, in quo talis conditio requiritur, ut sit capax & dispositus ad tale beneficium recipiendum. Alioqui eodem argumento probaretur, posse hominem mereri primam gratiam per talem dispositionem, quia etiam de hac re facta est promissio. De quo legi potest Bellarmin. lib. 1. de justific. c. 21.

## SECTIO X.

*Utrum possit homo satisfacere pro culpa propria mortali, saltem imperfecte.*

Q Uæstio intelligitur per vires supernaturales gratiæ Dei, nam per solas naturæ vires certum est, non posse hominem satisfacere pro peccato in Deum commissio, etiam imperfecte, maxime pro illo peccato, quod est averio a Deo sine supernaturali, ut a fortiori constabit ex dicendis sectione sequente, & latius traditur in materia de gratia, ubi ostenditur, opera solius liberi arbitrii, quæ a gratia non proficiuntur, nullo modo esse dispositiones ad dona supernaturalia gratiæ; unum autem ex his operibus est remissio peccati; ergo talia opera nullo modo sunt dispositiones neque meritum hujus doni; ergo neque esse possunt satisfactio aliqua pro peccato; talis



talis enim satisfactio, quamvis imperfecta, aliqualis dispositio est, saltem imperfecta & remota, ad peccatum tollendum, Quoad hoc ergo in his etiam est verum illud Pauli 2. ad Corint. 3. *Non sumus sufficientes cogitare aliquid ex nobis*, scilicet, quod ad salutem animæ conferat.

Prima  
sententia.

De operibus ergo factis per auxilium gratiæ, & præsertim de illo opere, quod est ultima dispositio ad gratiam, quæstio præfens versatur, in qua nonnulli Theologi negant, posse peccatorem etiam hoc modo imperfecto satisfacere pro culpa sua, Quam sententiam mordicus hic defendit Medina; rationes autem omnes, quas adducit, magis procedunt de satisfactione perfecta, quam de imperfecta. Probat ergo primo ex illo principio, quod remissio peccati gratis datur, nam quod fit ex aliquali satisfactione, quamvis non sit omnino exacta, non fit omnino gratis; sed remissio peccati omnino gratis datur; ergo nulla præcedit satisfactio etiam imperfecta. Secundo, quia si nostra dispositio esset satisfactio, saltem imperfecta, etiam esset meritum imperfectum primæ gratiæ & remissionis peccatis, quod appellat meritum de congruo; consequens autem est falsum; ergo. Sequela patet ex supra dictis, ostendimus enim a satisfactione ad meritum, optimum sumi argumentum in præsentia materia. Minor late tractatur a Theologis, de gratia & merito disputantibus, & interim de illa legi potest Soto 2. de natur. & gratia c. 14. Et ratio breviter est, quia hæc dispositio ordine naturæ antecedit gratiam & charitatem, & ideo ut sic est informis; nihil ergo prodesse potest in esse meriti, vel satisfactionis, juxta illud 1. ad Corinth. 13. *Si charitatem non habuerim, nihil mihi prodest*. Unde Concil. Trident. tota sess. 6. & 14. solam rationem dispositionis agnoscit in nostris actibus respectu remissionis peccati, non vero ratione meriti, vel satisfactionis. Tertio, quia ubi intercedit alia satisfactio perfecta, non est necesse, ut aliquid aliud acceptetur in satisfactionem imperfectam; sed in justificatione impij intercedit, & applicatur perfecta satisfactio Christi, propter quam omne remittitur peccatum; ergo non est necesse, ut actus ipsius hominis acceptetur in satisfactionem imperfectam, sed solum ut dispositio ad hoc, ut justificatio voluntaria sit, & convenienti modo fiat.

Secunda  
sententia.

Contraria sententia, ut existimo, est communis Theologorum, nam in primis qui ponunt satisfactionem perfectam, a fortiori hoc sentiunt: deinde ex aliis autoribus D. Th. in 4. d. 14. q. 1. art. 1. q. 5. hac ratione dicit, poenitentiam virtutem esse partem justitiæ, quia reddit Deo debitum ex justitia, & quamvis non possit reddere æquale offensæ præcedenti, reddit, quod sibi est possibile; sed satisfacere nihil aliud est, quam recompensare injuriam: ergo hoc facit peccator per ultimam dispositionem, & perfectam peccati detestationem. Et hac ratione addit idem D. Th. eadem d. q. 2. art. 1. poenitentiam aliquo modo tollere efficienter peccatum per actum suum, quia aliquo modo tollit inæqualitatem, quod est satisfacere, & d. 14. q. 1. art. 1. expressius docet, satisfactionem actum hujus virtutis, & art. 2. sic ait: *Non potest homo satisfacere, si ly satis aequalitatem quantitatis importet, contingit autem, si importet aequalitatem proportionis, & hoc sicut sufficit ad rationem justitiæ, ita sufficit ad rationem satisfactionis*. Et in solutionibus argumentorum id apertius docet ac declarat, & infra hac 3. p. q. 83. art. 3. eandem doctrinam confirmat, & juxta eam recte intelligi potest alius locus supra tractatus ex 1. p. q. 21. art. 4. ad 1. quod nimirum hac ratione aliqualis ratio justitiæ licet imperfecta in justificatione peccatoris interveniat. Et Scholastici communiter in 4. d. 1. 14. 15. & 17. & in 3. d. 20. q. 2. ubi Richardus q. 4. conclus. 5. Medin. codic. de poenitent. tractat. 3. q. 1. Ferrar. 4. contr. gent. c. 54. huic favent sententiæ, neque aliquem ex antiquis expresse reperi, qui eam negaverit. Et nisi de vocibus tantum laboremus, non video, cur, aut quomodo negari possit. Primo ergo statuendum est, aliquam esse posse satisfactionem imperfectam, loquendo in genere de satisfactione, ut inter homines etiam intercedere potest; nam satisfactio consistit in recompensatione injuriæ, quæ ex parte satisfaciæntis, ut formalem rationem satisfactionis habeat, requirit, ut hoc animo & intentione fiat; ex parte vero ejus, cui fit satisfactio, ad summum requiri potest, quod talem actionem in recompensationem injuriæ exigat, vel ac-

ceptet, aut saltem acceptare teneatur modo in superioribus declarato. Quod si illa actio, ut a satisfaciænte progreditur, sit moraliter æquivalens injuriæ, erit æqualis seu perfecta satisfactio, prout nunc loquimur; si autem illa actio non adæquet injuriam, aliquam tamen proportionem, seu vim, licet imperfectam habeat ad illius recompensationem, erit imperfecta ad satisfaciendum. Non est tamen dubium, quin possit is, qui injuriam intulit illam, hanc intentionem exhibere, ut saltem prout potest recompenset injuriam, imo etiam ad hoc teneatur, quia, qui non potest integre restituere, tenetur saltem ex parte, si potest; ergo & injuriam recompensare, saltem imperfecte, si perfecte non potest. Atque eadem ratione potest creditor talem recompensationem exigere, vel ea contentus esse: est ergo talis satisfactio imperfecta possibilis, & qui inter homines hoc modo recompensat injuriam, sine dubio aequaliter satisfacere dicitur, quamvis imperfecte. Pari ergo ratione potest esse hominis ad Deum imperfecta satisfactio; nam & homo potest, quod in se est, facere ut recompenset injuriam, & Deus potest talem recompensationem exigere, & illa contentus esse: ergo in eam actionem hoc modo factam vere ac proprie convenit nomen & ratio imperfectæ satisfactionis. Solum superest probandum, ita contingere in contritione seu dispositione peccatoris: hoc autem facillime ostendi potest, nam in primis, quod actus contritionis, quamvis non sit exacta recompensatio injuriæ, tamen quantum est de se, habeat ad hoc munus aliquam proportionem, evidentissime ostendunt rationes factæ duabus sectionibus proxime præcedentibus, pro illis opinionibus, quæ satisfactionem æqualem huic actui attribunt, & res est per se adeo clara, ut necesse non sit rationes illas repetere, aut amplius urgere. Rursus quod peccator possit aut debeat hoc saltem modo recompensare divinam injuriam, cum non possit perfectiori, certissimum etiam est, ut constet ex modo loquendi Scripturæ, Michæ 6. *Indicabo tibi homo, quid Dominus requirat a te: utique facere judicium, &c.* Ezech. 18. *Si impius egerit poenitentiam, & fecerit judicium & justitiam, vita vivet; &c.* 33. *Si impius egerit poenitentiam a peccato suo, feceritque judicium & justitiam, vita vivet, &c.* similia testimonia passim reperiuntur in Scriptura, & supra citata sunt. Et proprium poenitentiae motivum, ut a caritate distinguitur, in hoc consistit, ut ad recompensandam injuriam & destruendam illam eo modo, quo potest, formaliter tendat, ut ex materia de poenitentia constat. Deinde quod Deus exigit a peccatore hunc modum recompensationis illi possibilem, ex eisdem Scripturæ locis satis constat. Imo proprium poenitentiae præceptum, prout a præcepto caritatis distinguitur, in his tantum testimoniis fundatur, & in intrinseca obligatione, quæ ex injuria nascitur ad recompensandam illam. Unde si ne causa dicunt aliqui, Deum exigere contritionem, solum ut dispositionem, per quam fiat voluntaria justificatio, & aliquo modo tollatur obex ex hominis affectu. Hoc enim voluntarie dictum est. Primo quidem, quia cum hæc ratio in hoc actu reperiatur, & sit illi maxime propria, sine causa dicitur, non exigi a Deo hoc titulo & ratione, præsertim cum nomine judicii & justitiæ exigatur. Deinde, quia hæc obligatio non est mere positiva, sed intrinsece nascitur ex ipsa injuria, Deus autem poenitentiam exigit, ut homo eam obligationem impleat, quam peccando contraxit: nam præceptum poenitentiae, quod scriptum est divino jure, non est aliud ab eo, quod ex natura rei oritur ex injuria in Deum finem supernaturalem commissa. Denique, quia si Deus solum exigeret illum actum, ut justificatio sit voluntaria, & ad tollendum obicem contrarii affectus, sufficeret exigere consensum in amicitiam divinam, & propositum non peccandi de cætero, vel, ad summum, attritionem, ut facit cum sacramento: nunc autem non ita fit, sed exigitur dolor, & amor super omnia: ergo signum est hæc peti in recompensationem; & ita etiam acceptari, quando fiunt. Ex his ergo recte concluditur, nihil deesse huic actui ad rationem satisfactionis imperfectæ. Unde potest sic formari ratio; qui non potest perfecte satisfacere, si recompenset injuriam eo modo, quo potest, & quo exigit & contentus est creditor, imperfecte satisfacit; sed ita se gerit peccator erga Deum: ergo

Quomodo  
ratio im-  
perfectæ  
satisfac-  
tionis in  
contritione  
peccatoris in-  
venitur.



Ad argu-  
menta  
prioris  
seutegia.

ergo satisfacit saltem imperfecte. Aut enim nulla est passibilis satisfactio imperfecta, aut hæc est talis censenda.

Nec rationes in contrarium quicquam obstant; ad primam enim respondetur, hanc imperfectam satisfactionem nihil ob stare, quo minus remissio peccati simpliciter & absolute gratis detur, quia illud *gratis* in toto rigore solum excludit, debitum de iustitia, cui opponitur; & ideo quod ex gratitudine, vel liberalitate fit, gratis fit: cum ergo hæc satisfactio imperfecta non inducat obligationem iustitiæ, non obstat, quominus gratis detur remissio peccati. Quod si fiat vis in illo verbo *omnino gratis*, respondetur, illud *omnino gratis* additum esse, nam in Scriptura & Conciliis non legitur, & sensum æquivocum facere potest: si enim illud *omnino* excludat proprium debitum iustitiæ, etiam est verum remissionem fieri omnino gratis; si autem excludat omnem diligentiam, vel cooperationem ex parte peccatoris, concedo non dari illi veniam omnino gratis, quia aliquid ab eo exigitur, & aliquid de suo cum divina gratia offerre debet, ut remissionem obtineat. Ad secundum, omissa nunc disputatione de merito de congruo, quæ non est huius loci, respondetur, si meritum de congruo existimetur tale esse, quod proprium debitum iustitiæ inducat, negandam esse sequelam; item si dicat congruitatem amicabilem, seu in mutua ac propria amicitia fundatam, clarum est non reperiri in contritione, ut est a peccatore nondum iustificato, quia nondum intelligitur amicus: si vero, quod magis habet usus, meritum de congruo latius pateat, prout ipsamet generalis significatio vocis exigere videtur, non requirit amicitiam in operante, nam peccator per actus morales ex gratia factos meretur de congruo aliqua maiora auxilia: satis ergo erit, quod actus habeat proportionem quamdam ejusdem ordinis, & decentiam ac congruitatem inter opus hominis, & donum Dei. Sicque concedenda erit sequela: neque est, cur quidam scholastici moderni ab hoc modo loquendi tantum abhorreant in actibus supernaturalibus, & maxime in perfecto actu contritionis, cum Sancti Patres frequenter eo modo loquantur. August. epist. 89. q. 4. de superbo divite dicit. *Licet mortuus apud inferos torqueatur, tamen si pauperis ulcerosi, qui ante januam ejus contemptus jacebat, misertus fuisset, mereretur & ipse misericordiam.* Et epist. 105. ad Sixtum col. 3. clarius dicit. *Neque ipsa remissio peccati sine aliquo merito est, neque enim nullum est meritum fidei, quia ille dicebat, Deus, propitius esto mihi peccatori, & descendit hic iustificatus.* Similiter Ambros. lib. 10. in Luc. 23. agens de lachrymis Petri: *Lavant*, inquit, *lachryma delictum, quod voce pudor est confiteri, lachryma non veniam postulant, sed merentur, & tu si veniam vis mereri, dilue culpam lachrymis tuis.* Et plures alios refert Bellarminus supra, qui hanc sententiam constanter defendit. Neque illi obstat locus Pauli, Si caritatem non habeam, nihil mihi prodest, tum quia intelligitur, nihil prodesse ad meritum vitæ æternæ, vel ad proprium meritum de iustitia; tum etiam quia non est omnino sine caritate, qui Deum jam super omnia amat. Concilium autem utens nomine dispositionis tamquam certiori, non excludit alias rationes morales, quæ in hac fere includuntur. Ad tertium respondetur, illo fere argumento uti hæreticos huius temporis ad excludendas nostras satisfactiones: sicut ergo satisfactio Christi non excludit nostram condignam, ubi talis esse potest, scilicet pro pœna, ita etiam non excludit imperfectam, ubi major esse non potest, scilicet pro culpa. Sed instabit fortasse aliquis, nam ex discursu facto non videtur solum probari satisfactio imperfecta, sed etiam perfecta: quando enim ab aliquo exigitur, quantum potest, summa satisfactio exigitur; & qui hoc modo satisfacit, perfecte satisfacere censendus est. Respondetur, perfectionem satisfactionis non attendi ex potestate satisfaciens, sed ex æqualitate rei ad rem, & ideo, licet talis homo possit dici perfecte satisfacere suæ obligationi, quia nemo ad impossibile obligatur, non tamen perfectam satisfactionem exhibere, quæ ad æqualitatem in re constituendam necessaria esset. Dices. Ergo hoc modo etiam homo per vires naturæ posset satisfacere imperfecte per naturalem dolorem & amorem, si Deus majorem non exigeret, nec vires gratiæ daret ad illum elicendum, & illo vellet esse contentus. Re-

Suarez Tom. XVI.

spondetur, posse Deum id facere de potentia absoluta, illam tamen vix mereri nomen satisfactionis, etiam imperfectissimæ, tum propter maximam improprietatem illius actus; tum etiam, quia non exigitur ab illo homine totum id, quod absolute posset præstare. Et ob eandem rationem in justificatione, quæ nunc fit per attritionem cum sacramento, non ita proprie dicta imperfecta satisfactio invenitur.

## SECTIO XI.

*Utrum saltem pro peccato veniali possit purus homo Deo satisfacere.*

**M**ateria hujus dubitationis proprium habet locum, & ex professo tractanda est inferius q. 87. hic tamen omnino præmitti non potuit, brevissime vero attingenda est, solum ut videamus, quomodo in hoc etiam superet satisfactio Christi satisfactionem puri hominis. Prima ergo sententia referri potest quorundam scholasticorum, qui non solum per gratiam, sed etiam per vires naturæ, affirmant, posse hominem satisfacere pro peccato veniali, & illud a se expellere, vel sustinendo proportionatam pœnam, ut sentiunt Scot. in 4. d. 21. q. 1. & Gabriel d. 16. q. 5. art. 1. vel per actum moraliter bonum, & peccato veniali contrarium, ut existimat Durand. in 4. d. 16. q. 2. & d. 21. q. 1. Sed hanc sententiam existimo valde falsam, & errorem sapere Pelagii: generaliter enim omnis peccati remissio in Scriptura sacra gratiæ Dei, Christoque tribuitur, ut patet ad Rom. 4. 1. Joan. 1. & 2. & idem sumitur ex Concil. Milevit. cap. 6. 7. & 8. & Arausic. II. cap. 14. & 22. & ex Trident. sess. 6. cap. 11. ubi dicit, illam esse iustorum vocem. *Dimitte nobis debita nostra*, quæ exponit esse peccata venialia, quæ iusti postulant a Deo remitti. Et ratio breviter est, quia sine divina gratia nihil potest homo facere, quod ad æternam vitam consequendam confert; certum est autem, remissionem peccati venialis multum conferre. Ac deinde ad quamcumque satisfactionem, vel meritum de condigno apud Deum, constat, necessariam esse gratiam sanctificantem, sine qua homo est inimicus Deo, & inimico nihil potest esse a Deo debitum de iustitia, ut supra dicebamus. Itaque certum hoc loco sit, alibi enim probabitur fufius, hominem purum, non iustificatum non posse condigne satisfacere pro peccato veniali. Procedit ergo quæstio de homine iusto, & de facto habet locum tantum in peccato proprio: nam de alieno certum est, non posse unum satisfacere pro culpa alterius, etiam veniali: posset tamen id quæri de potentia absoluta: ex his vero, quæ dicemus, adjunctis iis, quæ in sect. 7. dicta sunt, relinquetur definitum.

Secunda ergo opinio est, hominem iustum non posse satisfacere de condigno pro veniali peccato: quam tenet Petr. Soto in instit. sacerdot. lect. 18. de poenit. quam solum probat ex principio posito, quia remissio peccati venialis est opus divinæ gratiæ: & ita in oratione Dominica illam petimus, ut gratuito a Deo donandam, eum dicimus: *Dimitte nobis debita nostra*. Vim etiam facit in verbo remissionis, quod liberalitatem indicat: nam debitum, quod plene solvitur, non remittitur: & hanc sententiam tribuit D. Thom. 3. p. q. 87. art. 4.

Tertia vero sententia extreme contraria esse potest, hominem iustum posse ex iustitia rigorosa, & omnino perfecta satisfacere pro venialibus peccatis. Quia actus amoris Dei super omnia est ita perfectus, ut repugnet etiam peccatis venialibus, & procedens ab homine grato videtur esse non solum æqualis, sed etiam majoris valoris, quam sit totum debitum venialis peccati: aliunde vero homo gratus in se habet sufficiens principium, ratione cujus debentur illi omnia auxilia necessaria ad huiusmodi actum efficiendum, & valorem illi præstandum: quia propter peccatum veniale, nec privatur homo gratia, nec contrahit debitum carendi auxiliis necessariis, & sufficientibus ad huiusmodi actum: nihil ergo hic deest ad iustitiam non solum æqualem, sed etiam rigorosam. Nam licet hæc satisfactio supponat gratiam, tamen non supponit gratiam factam post contractum debitum peccati venialis, nec primario datam in ordine ad finem consequendi remissionem talis peccati: sed solum supponit gratiam ante obtentam per baptis-

G

mun



num vel aliam priorem dispositionem, seu aliud sacramentum: hoc autem nihil prorsus videtur derogare perfectioni iustitiæ: præsertim, cum homo non satisfaciat per ipsam gratiam quasi formaliter, sed per fructus iustitiæ, quos ipse homo sibi comparat, tamquam dominus suorum actuum, gratiæ Dei cooperando. Quod vero iustimet actus sint etiam ipsius Dei, & per auxilium speciale fiant, ac denique possint esse aliis modis debiti, non videtur magis derogare perfectioni hujus iustitiæ, quam iustitiam Christi minuere, in cuius actibus fere eadem inveniri possunt, ut sæpe in superioribus est dictum. Unde concludi videtur, quod attinet ad perfectionem iustitiæ, hunc effectum non minus exacte fieri posse a puro homine, quam ab ipsomet Christo.

Dico tamen primo, simpliciter & absolute posse hominem iustificatum satisfacere de condigno pro veniali peccato, atque adeo ex iustitia, & non mere gratis illius remissionem consequi. Hanc sumo ex D. Th. infr. q. 87. 3. ad 3. ubi simpliciter concedit remitti peccatum veniale virtute alicujus satisfactionis: neque in art. 4. dicit contrarium, sed solum dicit, ad hanc satisfactionem esse gratiam necessariam: & in 1. 2. q. 72. art. 5. dicit, peccatum veniale esse reparabile per virtutem intrinsecam: in quo potissimum differt a mortali, id est, per virtutem gratiæ, quam non tollit, sicut mortale: non est ergo reparabile per solam gratuitam remissionem: quia hæc non habet proprie intrinsecum principium in homine: sed per condignam satisfactionem, cujus principium est gratia, quæ in homine manet. Et eandem sententiam fortiori ratione docent Scot. Durand. Gabriel, & alii supra citati, & expresse Palud. in 4. d. 16. q. 1. n. 27. & sequentibus, & Richard. in 4. d. 17. art. 1. q. 7. Et probatur, quia opus contritionis, vel amoris Dei videtur ex natura sua opus maxime proportionatum ad huiusmodi satisfactionem, vel remissionem, quia nobiliori modo attingit Deum, & hominem ad illum convertit: peccatum enim veniale non est proprie contra Deum, ut ultimum finem, sed præter Deum: neque avertit ab illo, sed retardat. Denique non est proprie offensa, & injuria, sed valde analogice: unde unum solum mortale majorem rationem injuriæ habet, quam simul sumpta innumera venialia: at vero actus amoris, vel contritionis, attingit Deum ipsum, ut ultimum finem, & perfectio dono hominem ad illum convertit. Deinde persona operans est digna, quia supponitur iusta, & amica Dei: & aliunde non deest promissio Dei sub conditione talis operis; dicitur enim 1. Joan. 1. *Si confiteamur peccata nostra, fidelis est, & iustus, ut remittat nobis*. Loquitur autem præsertim de venialibus, ut ibi August. tract. 1. notavit, paulo enim antea dixerat: *Si dixerimus, quia peccatum non habemus*: quod propter venialia potissimum generatim de omnibus dictum est: nihil ergo hic deest ad condignam, & iustam satisfactionem, quam aliquo modo confirmant dicta verba Joannis, quibus fidelitati, & iustitiæ divinæ hunc tribuit effectum. Confirmatur, quia hæc leves offensæ, quæ humano modo vix possunt privari, secundum prudentem æstimationem moralem non sunt magni valoris, aut momenti, propter quod peccatis venialibus, per se loquendo, solum temporalis poena debetur; at vero actus charitatis hominis iusti, magni pretii, & valoris est apud Deum, & æternum præmium meretur; ergo, &c. Denique confirmatur, nam homini iusto debetur ex iustitia vita æterna, qua iuste privari non potest, si peccatum mortale non committat: sed per venialia peccata impeditur, ne hanc vitam æternam consequatur, quamdiu illi remissa non sunt; ergo potest aliquo modo non solum ex misericordia, sed ex iustitia consequi, ut tale impedimentum gloriæ auferatur: aliàs posset perpetuo privari beatitudine propter veniale peccatum absque iniustitia. Non est autem alius modus convenientior obtinendi ex iustitia remissionem venialis culpæ, quam per condignam satisfactionem.

Potest vero contra conclusionem hanc ex principiis supra positis formari ratio, quia gravitas injuriæ sumitur ex persona offensa, satisfactionis vero ex persona satisfaciente: sed etiam in culpa veniali, persona offensa est infinita, satisfaciens autem finita; ergo neque proportio, neque æqualitas servatur. Respondetur primum, negando peccatum veniale esse offensam simpliciter, sed secundum quid, ut dictum est. Deinde, cum hæc mo-

raliter sint consideranda, eadem ratio in offensione levi, & gravi censeri non potest, quia leves offensiones, quæ non proprie attingunt ipsas personas, sed solum versantur circa quædam quasi ipsis extrinsecæ, & adjacentiæ, moraliter non censentur magni ponderis esse, sed a persona etiam inferioris ordinis compensari possunt; huiusmodi autem est in proposito veniale peccatum, quod contra Deum proprie non est, nec circa eum in se ipso, sed circa mediæ ad illum potius versatur, ut D. Th. dixit in 1. 2. q. 88. art. 1. & 2. & ideo mirum non est, si per actum personæ finitæ compensari possit. Denique, etiam si in hoc non servetur omnimoda proportio & æqualitas, non propterea non erit satisfactio condigna, & de iustitia, quia sufficit proportio explicata, sanctitate, & gratia, dictisque aliis concurrentibus.

Dico secundo. Hæc satisfactio puræ creaturæ pro peccato veniali non est tam exacta, & perfecta, quin satisfactio Christi pro peccato veniali perfectior fuerit, si modo etiam intra rationem iustitiæ, ejusque perfectionem. Denique satisfactio Christi merito dici potest de rigore iustitiæ, non vero puræ creaturæ satisfactio. Probat ex omnibus supra adductis testimoniis, quibus soli Christo hæc perfecta iustitia tribuitur: universa enim loquuntur de omni iustitia apud Deum. Est etiam hoc magis consentaneum dignitati Christi Domini. Ratione vero explicari breviter potest ex supradictis; nam si in primis in solo Christo reperitur illa exacta, & perfectissima æqualitas, ut persona satisfaciens sit tam digna, quam persona offensa, deinde soli Christo, proprie loquendo, nulla gratia facta est, quamvis sit facta ejus humanitati. Præterea solus ipse habuit infinitum valorem in suis operibus, quo posset vincere, & superare debitum omne: at vero opera puræ creaturæ finiti valoris sunt, & possent fieri debita aliis modis, etiam debito rigorofo, & perfecto, ita ut revera non haberent sufficientem moralem valorem ad utrumque debitum perfolvendum. Denique si intelligeretur purus homo omnino innocens & sanctus satisfacere pro peccato veniali alieno, ultra omnia dicta superaretur a Christo, quod non esset illi connaturale & intrinsecum, esse caput aliorum, atque adeo nec posse satisfacere pro alieno peccato, etiam veniali, sicut est Christo; si vero intelligatur purus homo iustus satisfaciens pro suo veniali peccato, in hoc etiam multum deficit a Christo satisfaciente, quod non est persona innocens, & omnino sancta, atque adeo minus digna etiam ex hac parte ad satisfaciendum.

Sed objicit aliquis; ergo posset Deus servato toto rigore iustitiæ non acceptare satisfactionem hominis iusti pro peccato veniali proprio: ergo ex vi iustitiæ posset homo iustus perpetuo privari beatitudine pro solo peccato veniali: ergo peccatum veniale, quantum est ex se, in æternum privat beatitudinem & ultimo fine. Quod si nunc id non efficit, solum est ex divina misericordia. Ex quo ulterius concludi potest, nullum esse natura sua peccatum veniale, nam omnia de se afferunt mortem animæ, quæ in carentia ultimi finis, seu in aversione ab illo consistit. Sed ea, quæ nunc dicuntur venialia, solum erunt huiusmodi, quia Deus non vult ea ad mortem imputare; hæc autem sunt valde absurda, & erronea, ut constat ex prima secundæ q. 72. art. 5. & q. 88. art. 1. & 2.

Ad hanc objectionem dico: possunt esse respondendi modi extreme contrarii. Prior est, satisfactioem, quam homo iustus exhibere potest pro veniali peccato, talem esse, ut non pendeat ex divina acceptance, sed omnino naturaliter ac necessario fiat per illum actum, per quem iustus satisfacere dicitur pro culpa veniali: quia nimirum actus ille formaliter, & vi sua expellit talem culpam, ita ut de potentia absoluta non possint simul manere. Et hæc sententia videtur coincidere cum illa, quam refert Richard. in 4. d. 17. art. 1. q. 7. quod homo effective causat remissionem venialis peccati, efficiendo contritionem, per quam illud formaliter expellitur. Et est quidem minus improbabilis sententia, quam similis supra tractata sect. 8. de remissione peccati mortalis. Nihilominus tamen non censo esse veram, nec Richard. supra illam probat, & si considerentur, quæ tractando de satisfactione Christi, & in prædicta sect. 8. dicta sunt, ex eis constat, nullam esse posse satisfactionem hominis ad Deum, quæ divinam acceptancem non requirat, & ab ea non pendeat, saltem propter eam causam, quod nihil

Conclusio.

Obiectio.

An satisfactio condigna pro peccato veniali acceptancem requirat.

Obiectio.

Responsio.



nihil potest Deo in satisfactionem offerri, quod multis aliis titulis ei non debeatur, propter quos solos posset Deus actum illum exigere, vel acceptare sine ullo ordine ad satisfactionem. Quæ ratio etiam habet locum in peccato veniali, & communiter ab Anselmo, & aliis Doctoribus assertur ad excludendam perfectam iustitiam puræ creaturæ ad Deum, ut minimum tamen mihi probare videtur non esse possibile creaturæ satisfactionem ad Deum pro culpa, quam Deus non possit repellere & non acceptare. Deinde nullus apparet actus hominis iusti, qui de potentia absoluta esse non possit cum veniali culpa habituali. Nam, si quis esset, maxime dilectio Dei intensa & perfecta, aut formalis detestatio talis peccati: neutrum autem horum dici potest: ergo. Probat minor quoad priorem partem: quia actus amoris non habet formalem oppositionem cum veniali peccato, neque involvit ullam contradictionem, quod iustus retinens culpam venialem, quasi in habitu, eliciat talem caritatis actum, quia neque illa culpa destruit vires necessarias ad eliciendum talem actum; neque destruit objectum ejus: potest enim homo velle placere Deo in omnibus, & omni conatu, quamvis non possit a se expellere culpam venialem habitualement. Secunda vero pars minoris patet, quia homo existens in peccato mortali, & veniali simul, quamvis veniale peccatum detestatur propter malitiam ejus, nihilominus illud a se non expellit, neque est formalis repugnantia inter talem actum, & talem culpam: ergo idem erit de quacumque alia detestatione formali, etiam si sit ex altiori motivo, vel conjuncta cum gratia; nam, si quæ esset formalis repugnantia physica seu naturalis, oriretur potius ex modo tendentiæ, & conversione, seu aversione voluntatis, ad tale objectum, quam ex motivo, vel conditione personæ operantis: hæc enim non videtur quicquam conferre ad formalem repugnantiam physicam, sed solum ad perfectionem actus seu moralem altimationem ejus. Secundus modus respondendi est, concedendo remissionem peccati venialis pendere ex acceptatione divina, & consequenter peccatum veniale talis esse conditionis ac meriti, ut si Deus vellet, toto rigore suæ iustitiæ uti, possit iuste hominem iustum perpetuo excludere a beatitudine propter solum veniale peccatum.

An veniale peccatum ex iustitiæ rigore possit in æternum puniri.

Ex quo principio dixisse videtur quidam Doctor agens de influenza Christi capitis in animas purgatorii, ex misericordia Dei, respicientis ad merita Christi, factum esse, ut pœnæ purgatorii sint, & ut temporales sint. Nam, si vellet Deus toto rigore iustitiæ uti, posset ad nullum opus talium animarum respicere, nullamque satisfactionem, aut satisfactionem earum acceptare, sed propter veniales culpas, si quas secum deferunt, eas in perpetuum a regno exclusas detinere. Imo idem ait posse facere Deum propter solum reatum pœnarum temporalium, pro quibus iustus in hac vita non satisfecit: nam, licet hoc ad rigorem pertineret, non ad iniustitiam. Et declarat, se loqui, non considerando Deum ut dominum vitæ & mortis, sed ut legislatorem & gubernatorem. Fundamentum ejus est, quia, cum ipsæ animæ non se purgaverint sufficienter in statu viæ, cum possent ex vi gratiæ, & caritatis, & auxiliorum Dei, nulla eis irrogaretur injuria, si peracto viæ cursu, neque ad satisfaciendum, neque ad satisfaciendum, eis daretur locus, sed perpetuo exules a regno manerent. Verumtamen hæc sententia videtur plane incidere in illa incommoda, quæ in objectione facta illata sunt. Nam in primis ex ea sequitur, peccatum veniale ex se & natura sua æternam pœnam mereri, & esse irreparabile ab intrinseco: consequens est falsum, nam hæc est ratio propria peccati mortalis, ut D. Th. locis supra citatis docet. Sequela patet, quia Deus utens sola ratione gubernatoris seu iudicis posset iuste punire hominem existentem in gratia & peccantem venialiter privatione gloriæ æternæ: ergo peccatum veniale ex se meretur hanc pœnam. Rursus, peccatum veniale ex se meretur æternam privationem gloriæ: ergo meretur etiam externam privationem gratiæ; ergo, quantum est ex se, tollit principium intrinsecum, quo possit talis culpa expelli, & consequenter, quantum est ex se, tam irreparabilis culpa est, sicut mortalis. Prima consequentia probatur, quia gratia est semen gloriæ, & confert jus ad illam: si ergo peccatum veniale ex se meretur æternam gloriæ carentiam,

Sharex Tom. XVI.

ex se tollit omne jus ad gloriæ; & consequenter ex se meretur etiam privationem gloriæ.

Tandem, quia, si peccatum veniale ex se meretur privationem æternam gloriæ, prorsus deordinat hominem ab ultimo fine, quantum est ex se: nulla enim potest esse major deordinatio, quam debitum perpetuo carenti illo: ergo peccatum veniale ex natura sua mortale erat: quod si nunc non refert animæ mortem, misericordiæ Dei & meritis Christi attribuendum est, quia, scilicet, propter Christi merita Deus non ita imputat hæc peccata, quod repugnat sanæ doctrinæ, & in Lutheranum errorem multum inclinat.

Responderi vero potest, juxta prædictam sententiam **Evangelio**. hæc incommoda non sequi, quia peccatum veniale ex natura sua habet, ut saltem pro statu viæ relinquat in homine potestatem satisfaciendi, & purgandi se ab ipso, quod non habet mortale. Sed interrogo, an posset Deus utens toto rigore iustitiæ, non concedere homini hoc tempus viæ ad satisfaciendum pro culpa veniali, sed statim illum privare in æternum beatitudine, ita ut misericordiæ Dei, & meritis Christi tribuendum sit, quod homini iusto venialiter peccanti tempus satisfaciendi & se purgandi in hac vita concefferit. Vel necessarium fuit, ut Deus, servans rigorem iustitiæ hoc tempus concederet homini iusto ad satisfaciendum pro culpa veniali. Si primum dicatur, sequuntur omnia incommoda illata, quia jam Deus utens rigore iustitiæ, posset privare statim æterna gloria hominem iustum venialiter peccantem, nullum tempus ad se purgandum, vel satisfaciendum illi concedendo. Et consequenter fit, totum hoc mereri peccatum veniale ex se: ex quo sequuntur cætera inconvenientia illata. Si autem dicatur secundum, id in primis non dicitur consequenter, quin potius certius est, ad misericordiam Dei spectare, quod modum & rationem nobis concefferit satisfaciendi in hac vita pro pœnis debitis in futura; & hoc maxime attribuendum est Christi meritis.

Deinde, quia si illud est aliquo modo verum, ideo est, quia est debitum gratiæ ac iustitiæ, ut per venialia peccata non excludatur a subiecto, in quo est, & consequenter, ut nec subiectum sanctificatum per ipsam perpetuo excludatur ab hereditate & regno, quod illi respondet, hinc enim fit, ut gratiæ ipsi connaturale sit posse expellere a suo subiecto veniales culpas satisfaciendo pro illis. Si autem hoc ita est, ut revera est: ergo, quomodocumque sit anima cum gratia & peccato veniali, sive conjuncta sit, sive separata, semper est potens per gratiam ad expellendum venialem culpam satisfaciendo pro illa, vel merendo remissionem ejus: ergo, si consideretur natura gratiæ & venialis culpæ, & meritum unius, ac debitum alterius, non est, cur potius uno tempore, quam alio, possit per gratiam expelli talis culpa, aut e contrario propter talem culpam perpetuo privari gratia, ne fini suo jungatur: semper ergo culpa venialis est de se tantum temporale impedimentum, & non æternum.

Et confirmatur primo: quia aliàs etiam posset Deus utens rigore iustitiæ non concedere homini iusto, ut possit se a peccatis venialibus purgare, totum tempus hujus vitæ, sed tantum unum annum, v.g. vel mensem, vel diem, vel horam, quia, stando vel in legibus iustitiæ, nulla ratio differentiarum assignari potest: si autem id concedatur, pari fere ratione poterit idem dici de toto tempore vitæ nullam particulam ejus excipiendo, quæ enim est lex iustitiæ, quæ magis ad hoc obliget, quam ad illud? Unde confirmatur secundo, quia aliàs, stando in rigore iustitiæ, posset Deus privare gratia & caritate animam discedentem a corpore cum sola culpa veniali in pœnam illius: consequens est absurdissimum: ergo. Sequela patet argumento facto, quia non est major ratio de privatione gloriæ, quam de perpetua privatione gloriæ, imo una ad aliam consequitur. Minor vero patet, quia, si peccatum veniale mereretur ex se illam privationem gratiæ, posset Deus, statim ac homo venialiter peccat, eam pœnam inferre, non expectata aliqua satisfatione, quia nulla lex iustitiæ eum obligat ad eam expectandam. Tandem confirmo, quia peccatum veniale natura sua solum meretur temporalem pœnam voluntarie & in gratia sustinendam: ergo nullo modo potest intra limites iustitiæ pœna illa fieri æterna in homine grato, & voluntarie satisfaciente, seu satis patiente.

G 2

Re-



Responsio  
ad prio-  
rem ob-  
jectionem.

Respondetur ergo, dupliciter posse hominem justum considerari post commissum veniale peccatum. Uno modo, antequam ei talis culpa & poena ei respondens remissa sit. Alio modo, quod culpa jam sit remissa, non tamen poena. Rursus dupliciter posse considerari Deum respectu talis hominis, scilicet, vel ut absolutum dominum, vel tantum ut judicem vel gubernatorem supremum. Principio igitur dicendum est, ablata culpa, non posse Deum, ut judicem perpetuo punire hominem justum pro veniali peccato. Patet, quia illa poena, sive in hac vita, sive in futura infligatur, ex vi iustitiæ, & considerando merita talis causæ temporalis est. Unde obiter intelligitur, multo magis falsum esse, quod præcedens opinio agebat, non posse animas iustas satis pati in futura vita pro reatu poenæ temporalis, si Deus velit toto rigore iustitiæ uti, sed posse perpetuo illas beatitudine privare: hoc enim involvit repugnantiam, nam, cum remittitur culpa mortalis, absolute remittitur poena æterna & in temporalem commutatur: ergo stando intra limites iustitiæ, non potest illa poena rursus fieri æterna: maxime, quod illa poena per se est poena vitæ futuræ; quod vero per poenas huius vitæ tolli, seu satisfieri possit, est ex benigna Dei promissione propter Christi merita. Ulterius ergo dicendum est, connaturale esse gratiæ, ut per opera sua possit expellere peccata venialia. Et consequenter esse ei debitum debito connaturalitatis, ut opera ejus acceptentur in satisfactionem pro culpis venialibus. E converso autem esse intrinsecum veniali peccato, ut propter illud solum non possit homo iustus gratia privari: hæc enim omnia probant argumenta facta, & hæc satis sunt ad differentiam constituendam inter veniale peccatum & mortale; & ut verum sit, non posse hominem propter solum veniale peccatum privari æterna beatitudine ex vi solius iustitiæ. Nihilominus tamen, de absoluta potentia, posset Deus, ut dominus omnium, non acceptare satisfactionem hominis iusti pro peccato veniali, quia potuisset non promittere, cum hoc fuerit ei liberum, & seclusa promissione, nihil est, quod Deum necessitet ad acceptandum, sed tunc magis ageret ut Dominus, quam ut ut iudex, quia ageret præter naturam gratiæ, & præter debitum connaturale illi. Et hæc est vera & sufficiens solutio objectionis propositæ.

## SECTIO XII.

*Utrum possit homo purus, saltem ut Christi membrum, satisfacere Deo ex perfecta iustitia pro peccato suo.*

**H**ÆC quæstio videri potest huic disputationi non admodum necessaria, tamen ad materiæ complementum, & quia ab aliis authoribus hoc loco introducta est, & brevissime expediri potest, non putavi prætermittendam: præsertim, quia etiam ad explicandam convenientiam incarnationis Christi propter perfectam satisfactionem nostram, non solum ut ab ipso facta est, sed ut a nobis etiam exercetur, plurimum conferre potest.

Dux igitur possunt de quæstione hac referri sententiæ. Prior est, affirmans nostram satisfactionem, ut fundatam in satisfactione Christi, esse de rigore iustitiæ: ita sentit Cajet. hoc loco, & tom. 3. opusculi. tract. 10. c. 9. & Soto in 4. d. 19. q. 1. art. 2. concl. 3. Ledesm. in 4. 2. p. q. 11. art. 2. Hosius in confess. c. 73. & videtur illis favere D. Th. infra q. 48. art. 1. ubi inquit, ita se habere opera Christi capitis tam ad se, quam ad sua membra, sicut se habent opera alterius hominis in gratia constituti ad ipsum, & art. 2. ad 1. dicit caput, & membra esse quasi unam personam mysticam, & ideo satisfactionem Christi ad omnes fideles pertinere, sicut ad sua membra, & q. 49. art. 1. dicit totam Ecclesiam, quæ est mysticum corpus Christi, computari quasi unam personam cum suo capite Christo, in quo etiam fundata est illa regula Tychonii, quæ est apud August. li. 3. de doctr. Christ. c. 30. & 31. Actiones capitis tribui membris, & e converso, propter hanc mysticam conjunctionem; sicut ergo Christus satisfecit de rigore iustitiæ, ita membra ejus, ut illi conjuncta, poterunt eodem modo satisfacere. Quod aliqui confirmant ex illo ad Coloss. 1. *Adimpleo ea, quæ desunt passioni Christi in carne mea, pro corpore ejus, quod est Ecclesia.* Hoc tamen testimonium nihil ad præsentem quæstionem facit, quia ad literam non loquitur Paul.

de suis passionibus, vel laboribus, quatenus per illa satisfaciebat pro corpore Ecclesiæ, quoad sufficientiam (ut ita loquamur) quia quoad hoc nihil decrat passioni Christi, sed loquitur de appellatione, & de efficacia satisfactionis Christi circa corpus Ecclesiæ, ad quam ipse laborando, & patiando cooperabatur: de quo testimonio dicemus latius in materia de satisfactione. Potest vero hæc sententia confirmari, quia nostræ satisfactioni, ut fundatæ in Christo ex toto rigore iustitiæ debetur remissio peccati, juxta illud ad Rom. 8. *Deus, qui justificat, quis est, qui condemnet? Christus Jesus, qui mortuus est, qui etiam interpellat pro nobis, &c.* & 2. Corinth. 5. *Eum, qui non novit peccatum pro nobis peccatum fecit, ut afficiamur iustitia Dei in ipso.* Et ideo multi existimant dixisse Joan. 1. canonica c. 1. *Fidelis est & iustus, ut remittat nobis peccata nostra:* quia nobis in Christo satisfaciuntibus, ex iustitia debetur remissio peccati; peccato ergo in Christo satisfaciamus de rigore iustitiæ.

Secunda sententia negat, posse nos vere dici satisfacere de rigore iustitiæ, etiam ut Christi membra: quia si loquamur de satisfactione pro culpa mortali, homo non satisfaciunt pro illa, ut vivum membrum Christi; ergo non potest ullo modo dici satisfacere de condigno, nedum de rigore iustitiæ. Antecedens patet ex supra dictis; consequentia vero probatur, quia homo etiam, ut membrum Christi, nihil potest operari; quod apud Deum habeat condignum valorem ad meritum, vel satisfactionem apud Deum, si non fuerit vivum membrum Christi, juxta illud Joan. 15. *Sicut palmes non potest ferre fructum a semetipso, nisi manserit in vite, sic nec vos, nisi in me manseritis.* Manemus autem in Christo, quamdiu sumus membra ejus viva: ut recte ibi August. exposuit ex verbis ejusdem Christi, qui statim subiungit: *Si quis in me non manserit, mittetur foras, sicut palmes, & arefcet, & colligent eum, & in ignem mittent, & ardet.* Quod verum est de omnibus, qui in ipso per charitatem non manent, & ideo clarius infra subiunxit: *Manete in dilectione mea.* Et ratione patet ex dictis, quia, si homo non sit membrum vivum Christi, opera ejus non habent in se valorem moralem coram Deo; ergo, qui illa operatur, nullo modo potest vere dici satisfacere. Nisi fortasse quis dicat extrinsecam imputationem ad hoc sufficere, quod plane falsum est, & his temporibus male audit; aliàs pari ratione posset dici peccator mereri de rigore iustitiæ primam gratiam propter imputationem meritorum Christi, & parvulus, qui sine opere suo justificatur per Christum, posset dici satisfacere Deo de rigore iustitiæ per similem imputationem, quod nullus, qui bene sentiat, concedere audebit. Si autem loquamur de satisfactione pro culpa veniali, quæ exhibetur a vivo membro Christi, quamvis argumenta facta non eodem modo in ea procedant, possunt tamen proportionaliter applicari, quia sicut satisfactio exhibita ab homine nondum grato, ut a proximo operante procedit, non est condigna, & ideo neque efficitur condigna per relationem ad Christum, aut per extrinsecam imputationem meritorum ipsius: ita satisfactio procedens ab homine iusto in se non est de rigore iustitiæ: ergo neque per relationem ad Christum, & imputationem extrinsecam, potest dici de rigore iustitiæ, neque habere majorem condignitatem, quam habeat, ut est a proximo operante. Confirmatur, quia, si per illam mysticam conjunctionem propria perfectio satisfactionis Christi, quæ est rigor iustitiæ, membro Christi etiam vivo tribui potest, pari ratione posset dici membrum Christi infinite satisfacere, & una gutta sanguinis martyris ut membrum Christi posset dici infiniti valoris, sicut una gutta sanguinis Christi: quod tamen concedere absurdissimum est. Sequela vero patet, quia non est minus proprium Dei hominis de rigore iustitiæ satisfacere, quam infinite, ut ex superioribus satis constat.

In hac re ne fortasse in quæstione de nomine versemur, oportet primo rem ipsam explicare, deinde modum loquendi. Quod ad rem spectat, homo dicitur satisfacere ut membrum Christi, non quia illi imputetur satisfactio Christi, ut argumenta facta recte probant: sed quia revera ipse satisfaciunt per gratiam propter Christum acceptam, quam videlicet ipse Christus insuit tamquam caput in membra: & præterea, quia puri hominis satisfactio

Explic.  
locus  
Paul.

Quid sit  
satisfacere  
ut me-  
brum  
Christi.



factio in Christi meritis, & satisfactione, fundatur. Dicitur autem nostra satisfactio fundari in Christi meritis, & satisfactione, non solum quia fundatur in gratia habituali propter Christum data, sed etiam quia ipsamet actualia auxilia ad satisfaciendum propter Christum dantur: tum etiam quia nostra opera propter Christi iustitiam ex divina promissione acceptantur: ut Concil. Trident. sess. 14. cap. 8. aperte docuit: tum denique, quia si quid valoris, & dignitatis deest in nostra satisfactione, totum suppletur, & compensatur ex conjunctione ad satisfactionem Christi: ut latius ostendemus infra q. 19. agentes de merito: & in re non invenio, quo alio modo nostra satisfactio fundetur in Christo: aut quo alio modo nos dicamur, ut membra Christi satisfacere.

Ex hac vero re sic explicata videtur mihi proprie loquendo, & exclusis metaphoris, passive (ut ita dicam) recte posse dici, nos justificari, nobis remitti peccatum, nostras dispositiones, vel satisfactiones acceptari, ex perfecta, & rigorosa iustitia: active autem non posse nos vere, & proprie dici, satisfacere de rigore iustitiæ, præsertim pro mortalibus peccatis. Prior pars constat ex ipsius rei explicatione, quia Christus nobis ex perfecta iustitia meruit illa omnia, & pro nobis perfecte satisfecit, ut nobis peccata ex perfecta iustitia remitterentur: ex perfecta inquam iustitia ipsi debita, non nobis; quo sensu explicuit August. in Enchirid. c. 41. verba illa Pauli 2. ad Corinth. 5. *Eum, qui non noverat peccatum, pro nobis peccatum fecit, ut efficiamur iustitia Dei in ipso. Iustitia, inquit August. non nostra, sed Dei, nec in nobis, sed in ipso*: non quia, cum justificamur non vera, & formalis iustitia nobis infundatur, aut per extrinsecam iustitiam Dei, aut Christi justificemur: non enim de hoc agunt Paul. vel August. sed quod ipsa formalis iustitia non detur nobis ex debito nostræ iustitiæ, sed ex iustitia Dei, debita Christo. Unde recte Chrysost. homil. 11. in posteriorem ad Corinth. dicit, hanc vocari iustitiam Dei, quia non ex operibus nostris, esse autem iustitiam Dei in Christo, quia ex operibus Christi. Posterior pars videtur efficaciter probari argumentis in principio factis, & quia revera cum satisfacere active proprie sit veluti actus vitalis ipsius satisfaciens, non potest ipsi proprie tribui, nisi secundum eum modum, & perfectionem, quam habet, prout est ab ipso satisfaciens. Unde si purus homo proxime satisfaciens non habet in se gratiam, unde possit de condigno satisfacere, non potest vere dici, ut membrum Christi condigne satisfacere, quia Christus ut caput vere non influit in illo virtutem ad ita satisfaciendum, quamvis fortasse influat effectum suæ infinitæ satisfactionis: & ita contingit in satisfactione pro peccato mortali. At vero, si homo jam habeat gratiam ad satisfaciendum condigne, poterit dici hoc modo satisfacere, non tamen de rigore iustitiæ, eo modo, quo Christus: quia etiam Christus non influit in suum membrum virtutem ad satisfaciendum illo perfectissimo modo, & sibi proprio, sed alio inferiori: sicut etiam Christus satisfacit per modum causæ primæ in illo genere, id est, ut independens ab alio principali satisfaciens, non tamen communicat membro suo, ut hoc modo satisfaciatur.

Ad fundamenta contrariæ sententiæ.

Neque contra hoc urgent fundamenta prioris sententiæ, nam illæ locutiones, quibus actiones membrorum communicantur capiti, vel e contrario, metaphorice sunt, & improprie: sicut, cum in persona Christi dicitur Psalm. 2. 1. *Longe a salute mea verba delictorum meorum*: non proprie, sed metaphorice nostra delicta dicuntur Christi, quia obligationem suscepit satisfaciendi pro illis, ut non active, ut ita dicam, dicantur delicta Christi, quia ipse illa commiserit, sed quasi passive, quia in eo vindictæ, & pœnæ effectum habent: sic e contrario satisfactiones Christi dici possunt nostræ, non proprie & active, quasi nos satisfaciamus per ipsas, sed passive, quia nobis donatæ sunt, & in nobis habent effectum remissionis, ac gratiæ. Quod si urgeas, quia genus humanum recte & proprie dicitur satisfecisse Deo de rigore iustitiæ: ergo & quilibet homo, ut membrum Christi. Respondetur, si genus humanum sumatur, ut in se Christum includens, verum est per caput hoc suum satisfecisse de rigore iustitiæ, tamquam unum integrum corpus morale constans ex capite & membris: si autem sumatur genus humanum, ut a Christo condistinctum, non proprie sa-

Suarez Tom. XVI.

tisfecit de rigore iustitiæ, sed pro ipso potius a Christo de rigore iustitiæ satisfactum est; quando autem loquimur de singulis membris, illa plane a capite condistinguimus, etiamsi intelligantur habere influxum a capite, aliàs, non esset sermo de satisfactione ipsius membri, sed de satisfactione membri & capitis simul sumptorum.

## ARTICULUS III.

a *Utrum si homo non peccasset, Deus incarnatus fuisset.*

**A**d tertium sic proceditur. Videtur, quod si homo non peccasset, nihilominus Deus incarnatus fuisset. Manente enim causa, manet effectus. Sed, sicut August. dicit 13. de Trinit. \* alia multa sunt cogitanda in Christi incarnatione, præter absolutionem a peccato, de quibus dictum est. \* Ergo etiam si homo non peccasset, Deus incarnatus fuisset.

3. d. 1. q. 1.  
ar. 3. & 4. d.  
43. ar. 2. q.  
1. 2. & ve-  
rit. q. 29.  
ar. 4. ad 3.  
& 1. Ti. 3.  
cor. 1. fin.  
\* li. 13. ca.  
17. in prin.  
to. 3.  
\* ar. præ-  
ced.

2. Præterea. Ad omnipotentiam divine virtutis pertinet, ut opera sua perficiat, & se manifestet per aliquem infinitum effectum. Sed nulla pro creatura potest dici infinitus effectus, cum sit finita per suam essentiam. In solo autem opere Incarnationis videtur præcipue manifestari infinitus effectus divine potentiæ (per quam in infinitum distantia conjunguntur, in quantum factum est, quod homo esset Deus) in quo etiam opere maxime videtur perfici universum, per hoc quod ultima creatura, scilicet homo, primo principio conjungitur, scilicet Deo. Ergo etiam si homo non peccasset, Deus incarnatus fuisset.

3. Præterea. Humana natura per peccatum non est facta capacior gratiæ. Sed post peccatum capax est gratiæ unionis, quæ est maxima gratia. Ergo, si homo non peccasset, humana natura huius gratiæ capax fuisset, nec Deus subtraxisset humana nature bonum, cuius capax erat. Ergo si homo non peccasset, Deus incarnatus fuisset.

4. Præterea. Prædestinatio Dei est eterna. Sed dicitur Rom. 1. de Christo, Qui prædestinatus est filius Dei in virtute. Ergo etiam ante peccatum necessarium erat, filium Dei incarnari, ad hoc, quod Dei prædestinatio impleatur.

5. Præterea. Incarnationis mysterium est primo homini revelatum: ut patet per hoc, quod dixit: Hoc nunc os ex ossibus meis, &c. quod Apostolus dicit esse magnum sacramentum in Christo, & in Ecclesia, ut patet Eph. 5. Sed homo non potuit esse præsciens sui casus, eadem ratione, quæ nec Angelus: ut August. probat super Genes. ad litteram 4. Ergo, etiam si homo non peccasset, Deus incarnatus fuisset.

Lib. 11. c.  
18. tom. 3.  
In ser. 36.  
& de ver.  
Apost.  
ser. 8.

Sed contra est, quod August. dicit in lib. de verbis Domini \*, exponens illud, quod habetur Luc. 19. Venit filius hominis querere, & salvum facere, quod perierat. Ergo, si homo non peccasset Filius hominis non venisset. Et 1. ad Timoth. 1. super illud verbum, Christus venit in hunc mundum, ut peccatores salvos faceret, dicit glossa \*. Nulla causa veniendi fuit Christo Domino, nisi peccatores salvos facere. Tolle morbos, tolle vulnera, & nulla est medicina causa.

August.  
ser. 9. de  
verb.  
Apost. in  
pr. tom. 1.

b Respondeo dicendum, quod aliqui circa hoc diversimode opinantur. Quidam enim dicunt, quod, etiam si homo non peccasset, Dei filius incarnatus fuisset.

Alii vero contrarium asserunt. Quorum assertioni magis assentiendum videtur. Ea enim, quæ ex sola Dei voluntate proveniunt supra omne debitum creatura, nobis innotescere non possunt, nisi quatenus in sacra Scriptura traduntur, per quam divina voluntas nobis innotescit. Unde, cum in sacra Scriptura ubique Incarnationis ratio ex peccato primi hominis assignetur, convenientius dicitur Incarnationis opus ordinatum esse a Deo in remedium contra peccatum, ita quod, peccato non existente, Incarnatio non fuisset: quamvis potentia Dei ad hoc non limitetur: potuisset enim, etiam peccato non existente, Deus incarnari.

c Ad primum ergo dicendum, quod omnes aliæ causæ, quæ sunt assignatæ \*, pertinent ad remedium peccati. Si enim homo non peccasset, perfusus fuisset lumine divine sapientiæ, & iustitiæ rectitudine perfectus a Deo, ad omnia necessaria cognoscenda, & agenda. Sed quia homo, deserto Deo, collapsus erat ad corporalia, conveniens fuit, ut Deus carne assumpta etiam per corporalia ei salutis remedium exhiberet. Unde dicit August. super illud Joan. 1. \* c. Verbum caro factum. Caro te obcecaverat, caro te sanat, quoniam sic venit Christus, ut de carne, carnis vitia extingueret.

Arg. 1. &  
ar. præ.

Tract. 2. in  
Joan. cir-  
fin. tom. 9.



d *Ad secundum dicendum in ipso modo productionis rerum ex nihilo, divina virtus infinita ostenditur. Ad perfectionem etiam universi sufficit, quod naturali modo creatura ordinetur in Deum, sicut in finem: hoc autem excedit limites perfectionis naturæ, ut creatura uniatur Deo in persona.*

e *Ad tertium dicendum, quod duplex capacitas atrendi potest in humana natura. Una quidem secundum ordinem potentie naturalis, quæ a Deo semper impletur, qui dat unicuique rei secundum suam capacitatem naturalem. Alia vero, secundum ordinem divine potentie, cui omnis creatura obedit ad nutum: & ad hoc pertinet ista capacitas. Non autem Deus omnem talem capacitatem natura implet: alioquin Deus non posset facere in creatura, nisi quod facit: quod falsum est, ut in primo \* habitum est. Nihil autem prohibet ad aliquid majus humanam naturam productam esse post peccatum: Deus enim permittit mala fieri, ut inde aliquid melius eliciat, unde dicitur Roman. 4. Ubi abundavit delictum, superabundavit & gratia. Unde & in benedictione cerei Paschalis dicitur: O felix culpa, quæ talem ac tantum meruit habere Redemptorem.*

Pap. q. 105.  
art. 6.

f *Ad quartum dicendum, quod prædestinatio præsupponit præscientiam futurorum. Et ideo, sicut Deus prædestinat salutem alicujus hominis per orationes aliorum implendam, ita etiam prædestinavit opus Incarnationis in remedium humani peccati.*

g *Ad quintum dicendum, quod nihil prohibet, alicui revelari effectum, cui non revelatur causa: potuit igitur primo homini revelari Incarnationis mysterium, sine hoc, quod esset præsciens sui casus. Non enim quicumque cognoscit effectum, cognoscit & causam.*

#### COMMENTARIUS.

**H**ic articulus videri potest extra methodum hic interpositus, ubi de convenientia incarnationis differimus, non de modo, & ratione, qua Deus illam prædestinavit, ex qua præsentis q. pendet resolutio: sed considerandum est, duplici via ostendisse D. Th. hoc mysterium esse convenientem, scilicet per se, & propter reparandum hominum lapsum: hoc ergo loco has duas rationes inter se comparat in ordine ad divinam voluntatem, ut sciamus, quænam earum Deum primo moverit ad illud faciendum; & hanc comparisonem optime explicat per illam conditionalem, si homo non peccasset, an Deus incarnatus fuisset, quæ locutio licet sub conditione proponatur, aliquem tamen habet sensum absolutum, præsertim prout a D. Thom. tractatur: non enim considerat, quid Deus facere posset, si homo non peccasset, neque quid facturus esset instituendo novum modum, & ordinem prædestinationis, sed an ex vi illius modi, & intentionis, qua nunc voluit Incarnationem, illa futura esset, etiam si homo non peccasset.

b Respondet D. Th. magis esse credendum, si homo non peccasset, Deum non fuisse hominem futurum. Ratio ejus est, quia primarium motivum Incarnationem volendi fuit remedium peccati: ergo cessante necessitate hujus remedii Incarnatio non fieret. Consequentiam non probat D. Thom. sed, ut per se claram, supponere videtur ex eo, quod cessante prima ratione volendi cessat etiam voluntas, & consequenter etiam effectus ejus. Antecedens autem probat, quoniam ea, quæ ex sola Dei voluntate pendent, & sunt supra omne debitum creaturæ, per solam revelationem possunt nobis innotescere: sed in sacra Scriptura ratio Incarnationis semper assignatur ex peccato primi hominis: ergo ex illo lumpa est prima ratio, quæ divinam voluntatem movit ad hoc mysterium faciendum.

Hic discursus D. Th. valde probabilis est. De quo, & de tota sententia fufe dicam in seq. disp. nunc solum oportet recte explicare, & intelligere duas illas, quas assumit, propositiones. Prima est illa generalis: quæ ex sola voluntate Dei proveniunt supra omne debitum creaturæ, per solam revelationem innotescunt. Primum enim, licet D. Th. non per revelationem, sed per Scripturam dicat, sensus tamen illius idem est: nam sub Scriptura comprehendit omnem revelationem, seu omnem regulam infallibilem fidei, sive sit scripta, sive non scripta traditio, aut Ecclesiæ definitio. Deinde, oportet distinguere varios modos, quibus ea, quæ a sola voluntate Dei proveniunt, in Scriptura sacra, aut con-

Explicatur D. 1. h.

tineri possunt, vel non contineri. Primo fieri potest, ut de illis expresse revelatum sit, quid in eis divina voluntas facere decreverit, vel non facere, aut absolute & simpliciter, aut in eventu tali vel tali: & tunc cessat omnis quæstio, quia illud, quod Scriptura dicit, simpliciter credendum est. Secundo fieri potest, ut Scriptura sacra nihil de aliquo mysterio affirmet, aut neget, neque expresse quidem, neque ita, ut ex aliis, quæ docet, id colligi possit: & quando res sunt hujusmodi, vix potest humanum ingenium aliquid de illis conjectari, nedum certum aliquid, aut exploratum habere: interdum vero potest aliquid probabiliter suspicari, idque solum fere, quod in aliis rebus revelatis aliquid potest habere vestigium, seu fundamentum: ex folis namque rationibus humanis, naturalibusque, parum potest, aut nihil de supernis illis totumque naturæ ordinem superantibus indagari. Tertio fieri potest, ut res aliqua, licet in Scriptura sacra expresse, neque affirmetur, neque negetur, in aliis vero, quæ Scriptura docet, aliquo modo contineatur: in quo potest esse magna latitudo, quatenus in uno principio potest aliqua conclusio clarius, vel obscurius contineri: & in hujusmodi rebus judicandis interdum varia Scripturæ dicta inter se conferre necesse est, ne quod uni videtur consentaneum, ab altero discordet: interdum vero aliquid in hujusmodi rebus conferre potest humana ratio, vel conjectura. Principium ergo illud D. Th. præcipue, & per se intelligitur de cognitione certa, & consequenter de certa etiam revelatione: hinc vero fit, ut in rebus, & mysteriis supernaturalibus, de quibus non potest haberi certa cognitio, quia manifeste revelata non sunt, id debeat a nobis verisimiliter existimari, quod rebus manifeste revelatis magis videtur esse consentaneum. Quare in proposito, quamquam expresse revelatum non sit, primam rationem, quæ Deum movit ad carnem sumendum, fuisse remedium peccati, videtur tamen his, quæ revelata sunt, esse magis consentanea: quod D. Thom. probat, secunda propositione assumpta.

Secunda ergo propositio in D. Th. notanda est illa. *Nota. In sacra Scriptura ubique Incarnationis ratio ex peccato primi hominis assignatur.* In qua, si verbum illud, *ubique*, idem valeat, quod frequenter, & plurimum, res est obvia, & per se manifesta sacram Scripturam explorantibus: quod si ita exacte intelligatur, ut numquam omnino alia causa, vel ratio assignetur, difficilis creditu est. Dicitur enim ad Eph. 1. *Qui prædestinavit nos in adoptionem filiorum per Jesum Christum in ipsum secundum propositum voluntatis sue, in laudem gloriæ gratiæ sue, in qua gratificavit nos in dilecto filio suo:* ubi duo conjunguntur, scilicet, nos esse prædestinatos, idque per Jesum Christum: sicut ergo ibidem ratio nostræ prædestinationis non assignatur ex occasione peccati, sed per se, ut simus in laudem gloriæ, & gratiæ Dei: ita ratio prædestinationis nostræ per Christum, atque potiori jure ipsius Christi prædestinationis ex occasione peccati non sumitur, sed ex ipsius Dei gloriæ gratiæque ejus præstantissima manifestatione. Deinde vero subjungitur alius Incarnationis effectus: *In quo habemus redemptionem,* &c. Sic etiam 1. ad Corinth. 2. inquit Paul. *Loquimur Dei sapientiam in mysterio, quæ abscondita est, quam prædestinavit Deus ante sæcula, in gloriam nostram:* & aliis locis dicitur, *Deum dedisse filium suum ad ostensionem sue charitatis, bonitatis, &c.*

c Sed circa hoc observandum est, sub illa ratione, quæ occasionem peccati supponit, has omnes virtute etiam contineri; quia cum Deus incarnari voluit propter redemptionem nostram, etiam hoc ipsum voluit propter charitatem, & bonitatem suam ad ostensionem etiam gratiæ, & gloriæ suæ, in gloriam demum nostram, quæ omnia redemptio hominum satis complectitur. Ac proinde probabiliter dici potest, semper rationem Incarnationis assignari ex occasione peccati, quanquam interdum explicetur per varios effectus sub illa ratione comprehensos; & hanc difficultatem cum solutione ejus tetigit D. Thom. arg. 1. cum solut. Verum est tamen, non satis posse convinci, aut persuaderi id, quod hæc responsio supponit, videlicet omnes alias rationes Incarnationis non assignari, nisi ut contentas in redemptione; posset enim quis probabiliter dicere, illa per se esse sufficientes, & fuisse primarias in divina voluntate,

tate,



tate, & prædestinatione, & ut tales in Scripturâ proponi, quamvis ea, quæ sumitur ex redemptione hominum, frequentius inculcetur, tum quia statui lapsi hominis magis accommodata est: tum quia omnes aliæ in hac virtute continentur: tum denique, quia per illam non tantum ipsius Incarnationis, sed & modi ejus, & passionis Christi ratio, & causa sufficiens declaratur.

d Primum argumentum, & solutio ejus explicata sunt satis. Secundum vero per se facile est: quia licet in hoc mysterio infinita Dei virtus, magis quam in cæteris elucescat, tamen negari non potest, quin aliis etiam effectibus divinæ omnipotentiae manifestetur, & posset Deus, si vellet, alio modo manifestationis suæ potentiae, & perfectionis universi esse contentus. Cæterum difficultatem habet id, quod D. Th. ex hoc argumento occasione sumpta dicit in solutione; sic enim inquit: *Ad perfectionem universi sufficit, quod naturali modo creatura ordinetur in Deum, sicut in finem; quod vero creatura uniatur Deo in persona, excedit limites perfectionis naturæ.* Ex hac enim doctrinâ sequitur, vel rationalem creaturam naturali modo ordinari in Deum clare visum, tamquam in finem, quod videtur Pelagianum; vel sequitur totum ordinem gratiæ, & gloriæ, non fuisse necessarium ad perfectionem universi, quod videtur plane falsum, cum hæc perfectio universi potissimum a Deo intenta videatur, per eam efficitur enim universum ipsi Deo simillimum, in qua similitudine maxime ejus perfectio posita est. Quod aliter explico, interrogando, de qua perfectione universi loquatur D. Th. aut enim tantum de perfectione naturæ debita: & sic verum est, Incarnationem non pertinere ad naturæ perfectionem, hoc tamen modo, neque gratia neque gloria pertinet: unde in hoc sensu falsum videtur, solam eam perfectionem, quæ debita est naturæ, ad universalem & absolutam universi perfectionem pertinere. Si vero generalius de perfectione naturæ loquatur, non solum naturalibus, sed etiam supernaturalibus mysteriis natura perficitur: ergo non solum ordo gratiæ, sed etiam unio hypostatica ad naturæ perfectionem hoc modo pertinere dicenda est.

Fateor, hanc esse probabilem conjecturam, quæ recte ostendit, si voluisset Deus perficere universum, illudque complere ex illo triplici rerum ordine, naturæ, gratiæ, & unionis hypostaticæ per se propter absolutissimam suorum operum perfectionem, etiam sine ulla occasione peccati, id quidem aptissime & convenientissime potuisset. Non tamen satis probat argumentum, hoc de facto voluisse Deum, quia hæc ejus voluntas non satis nobis significata est, neque ex sola conjectura satis desumitur, quia non obstante quacumque convenientiâ ex parte creaturæ, potest Deus aliud, quod sibi magis placeat, ordinare. Quod vero ad litteram D. Th. attinet, sitenemus, in natura rationali esse appetitum naturalem ad Deum clare visum, & hunc esse finem naturalem ejus, facile propositam difficultatem expediremus, dicentes, ordinem gratiæ, & gloriæ licet in se supernaturalis sit, habere tamen quoddam quasi naturale vinculum, & connexionem cum natura, quatenus hæc innato impetu ad illum inclinatur: & ideo speciali ratione dici posset, totum illum ordinem pertinere ad perfectionem naturæ, non vero Incarnationem, quæ supra naturam omni modo est. Sed hæc responsio, uti ego existimo, & aliis locis latius ostendi, in fundamento falso, atque alieno a D. Th. fundata est. Secundo ergo concedi potest, hoc argumento D. Th. ejusque solutione concludi, nec hypostaticam unionem, nec ordinem gratiæ, & gloriæ fuisse simpliciter necessarium ad universi perfectionem: nihilominus tamen Deum voluisse per se addere gratiam, & gloriam naturæ, etiam absque occasione peccati, non vero hypostaticam unionem: quam voluntatem ex Scriptura colligimus, & multiplicem ejus rationem assignare possumus. Prima, quia totus ordo gratiæ est omnino creatus, unio vero hypostatica personam increatam includit, quam naturæ creatæ communicari sine magna occasione, & necessitate expediens non fuit. Secunda, quia per ordinem gratiæ, & gloriæ perficitur humana natura (ut ita dicam) non solum per additionem, id est, quia illi additur perfectio aliqua supra naturam, sed ipsis etiam naturalibus defectibus talis naturæ per gratiam subvenitur, & in ipsis naturalibus actionibus per eandem perficitur: at vero unio hypostatica, licet

Suarez Tom. XVI.

maximam quandam perfectionem & dignitatem naturæ addat, non tamen pertinet supradicto modo ad ejus perfectionem: quia, licet secum afferat nonnulla dona, quibus natura etiam in propriis actibus perficitur, tamen illa omnia secundum se pertinent ad ordinem gratiæ, & possent sine hypostatica unione communicari. Tertia, ipsa visio beata licet in se supernaturalis sit, tamen vere efficitur ab ipsa rationali natura divinitus quidem elevata, quodammodo tamen operante modo sibi proprio, & intrinseco, scilicet, cognoscendo, & amando vitaliter; qua ratione potest dici creatura ordinari naturali modo in Deum, sicut in finem, per ipsum ordinem gratiæ, & gloriæ: at vero per unionem hypostaticam proxime, & formaliter loquendo, natura nihil habet sibi naturale, neque modo aliquo sibi naturali, neque attingit suo modo suum ultimum finem: & ideo non ita pertinet hæc unio ad perfectionem naturæ, sicut ordo gratiæ, & gloriæ. Et juxta hæc responderi potest ad objectionem positam, negando paritatem rationis, & explicando D. Th. loqui non de perfectione tantum debita naturæ, nec de quacumque extrinseca perfectione, quæ illi superaddi potest, sed de illa, quæ necessaria est, ut natura in suis actibus, & modo operandi, & attingendi ultimum finem perfecta sit.

e In solutione tertiæ solum occurrit notandum, licet natura humana per peccatum non fuerit facta capacior gratiæ unionis, factam tamen esse indigentiorē illius, & consequenter factam esse aptiorē materiam, in qua Deus justitiam suam, simul cum misericordia patefaceret: est autem sermo de natura humana secundum se, seu in specie, non in individuo de illa natura, in qua perfectum est hoc mysterium: quia illa nullo modo nec per se nec per accidens fieri potuit per peccatum aptior ad hanc gratiam suscipiendam, quia peccatum cum tali gratia omnino in eadem natura repugnat.

f Solutio ad quartum argumentum indicat prolixam difficultatem in sequenti disputatione tractandam. Solum oportet hic explicare sensum D. Th. Videtur enim hoc loco docere, præscientiam futuri peccati Adæ antecessisse in Deo secundum rationem, prædestinationem & voluntatem Incarnationis. Sic enim arguit, Deus ab æterno prædestinavit Incarnationem, antequam esset peccatum: ergo, quamvis non fuisset peccatum, fuisset incarnatio, ut prædestinatio Dei impleretur. Et respondet negando consequentiam: & rationem reddit, quia prædestinatio supponit præscientiam futurorum: ac si diceret, prædestinationem Incarnationis præscientiam peccati supposuisse: & ideo, licet antecesserit ipsum peccatum, prout in tempore factum, non tamen ut ab æterno prævisum: & ideo non fit, non existente peccato, Incarnationem fuisse futuram: quia, si peccatum non fuisset in tempore committendum, neque etiam fuisset ab æterno prævisum, & si ipsum non fuisset prævisum, neque Incarnatio fuisset prædestinata. Aliunde vero est, quod cum hoc sensu non bene quadrat exemplum, quo D. Th. declarat illud principium, Prædestinatio supponit præscientiam futurorum: *Sicut Deus, inquit, prædestinat salutem alicujus hominis, per orationes aliorum implendam.* In quo exemplo, prædestinatio talis hominis non supponit præscientiam future orationis aliorum, ut propter eam prævisam Deus alium prædestinet: aliàs posset unus impetrare, aut mereri de congruo totam prædestinationem alterius, quod falsum esse suppono; quia potius tale meritum, vel oratio Stephani V. g. fuit effectus prædestinationis alterius, videlicet Pauli. Non ergo est mens D. Th. prædestinationem absolute supponere præscientiam futurorum, atque adeo nec Incarnationis prædestinationem supponere simpliciter præscientiam peccati. Potest ergo primo exponi de præscientia non absoluta, sed conditionata; præter illam enim scientiam futurorum contingentium, quæ intuitiva, seu visionis dicitur, quæ præsupponit aliquam voluntatem in Deo, vel prædestinentem bonam, vel mala permittentem, intelligimus in Deo aliam scientiam ratione distinctam, quæ omnem liberum suæ voluntatis actum antecedit: qua comprehendit quid unaquæque voluntas in quacumque opportunitate, & cum quocumque concursu, auxilio, tentatione, aut aliis similibus circumstantiis applicata ad operandum, suæque libertati relicta, operatura esset. De qua scientia (quoniam ad doctrinam de prædestinatione,

3. Argum.

4. Argum. Datum.

Alia dubitandi ratio.

Solutio.

Scientiæ visionis & Scientiæ conditionata.



Quid prædestina-  
tionis vox  
significat  
apud D.  
Thom.

& gratia magno usui futura est) specialem disputationem in 1. p. conficiam. Hoc ergo modo intelligimus facile, totam prædestinationem præsupponere præscientiam futurorum, non absolute, sed conditionate: quæ futura sic prævisa non sunt ratio ipsius prædestinationis, sed solum sunt media prævisa, ut possibilia ad exequendam ipsam prædestinationem, si Deus illis uti voluerit: & hoc modo antecedere potuit præscientia orationis Stephani totam prædestinationem Pauli: & eodem modo in proposito præcivit Deus, antequam voluisset creare Adam, vel permittere peccatum ejus, ipsum fuisse peccaturum, si in tali statu crearetur, & permetteretur tentari, & cum talibus auxiliis suæ libertati relinqui: & hanc præscientiam peccati præsuppositam esse prædestinationi Incarnationis, certum existimo: quod vero de hac sola loquatur D. Th. valde incertum est: tum quia ille raro, aut numquam hujus scientiæ meminit: tum quia hujusmodi conditionata scientia non solet simpliciter vocari præscientia futurorum. Ideo potest secundo dici, prædestinationem præsertim apud D. Th. non significare voluntatem efficacem, quæ antecedit omnia media, quæ sunt effectus prædestinationis, sed significare ipsam rationem mediorum omnium, in divino intellectu existentem. Quamquam ergo nec voluntas efficax, quæ est radix prædestinationis, nec tota ratio prædestinationis, supponat præscientiam futurorum, semper tamen secundum aliquid, id est, antequam completa intelligatur usque ad ultimum effectum, supponit præscientiam alicujus rei future: ut in exemplo posito, prædestinatio Pauli, quoad ipsam electionem, & quoad primum effectum suum, non supponit præscientiam orationis Stephani, sed hæc potius ad electionem consequitur: prout tamen prædestinatio Pauli omnium mediorum actionem includit, supponit præscientiam orationis Stephani: & juxta hunc sensum, optime argumento satisfacit, quia hoc satis est, ut res prædefinita infallibiliter futura sit, & tamen non sit futura sine alia, per quam efficienda præordinata est, cujus præscientia conjuncta est cum tali prædestinatione, & quodammodo illam consequitur, si consideretur prima radix prædestinationis, quodammodo vero illi supponitur in ordine ad completam prædestinationem, & executionem ejus. Et juxta hanc explicationem, non est necesse præscientiam absolutam peccati futuri præsupponi ante primam efficacem voluntatem Dei circa Incarnationem, atque adeo neque ante totam prædestinationem Incarnationis; sed satis est, si præsupponatur ante consummatam prædestinationem Incarnationis, secundum omnia media, per quæ erat executioni mandanda. Et hæc expositio notanda est pro iis, quæ disputatione sequenti dicemus; quia in se veram doctrinam continet, & non est aliena a mente D. Th. quamquam non satis constet, an hoc solum docere voluerit, vel simpliciter absolutam præscientiam peccati futuri antecessisse in Deo, secundum rationem, ipsam voluntatem sumendi carnem: hoc enim etiam possunt significare verba D. Th. & quamvis exemplum in hoc non teneat, non tamen oportet simile in omnibus esse.

Nota.

g In quinto argumento nonnulla notanda sunt, quæ multum futuræ disputationi deservient. Primum est, D. Th. in argum. sumere, & in solutione concedere, primum hominem ante lapsum, futuræ Incarnationis fidem, seu revelationem habuisse infusam: certe cum Deus in illum soporem immisit, ad Evam ex illius costa fabricandam, ut dicitur Gen. 2. statim enim ab illo somno excitatus dixit: *Hoc nunc os ex ossibus meis, &c.* quibus verbis significatum fuisse magnum sacramentum conjunctionis Christi cum Ecclesia, docuit Paul. ad Ephes. 5. Neque enim probabilis est eorum expositio, qui dicunt Paul. ibi non loqui de conjunctione Christi Dei, & hominis cum Ecclesia, quæ per Incarnationem facta est, sed solum de spiritali conjunctione Christi, ut est Deus cum Ecclesia per fidem, & charitatem. Huic enim expositioni repugnat vis nominis Christi, quod Deum hominem significat, de quo toto illo capite in hoc sensu Paulus loquitur: sic enim paulo ante dixerat, Christum esse caput, & sponsum Ecclesiæ, in eamque gratiam, & spiritalia dona influere. Secundo, metaphora illorum verborum: *Erunt duo in carne una*, optime quadrat in hoc mysterium propter conjun-

ctionem Dei cum humana natura: ad spiritualem vero unionem cum divinitate vix potest nisi durissime accommodari. Tertio, ita ibi exponunt Ambr. & Ansel. Chrysost. hom. 20. in illam epist. August. serm. 2. de Nativit. & tract. 9. in Joan. & Tertull. lib. 5. contra Marcion. c. 18. & alij Patres, quos statim referam, & bene Adamus eundem locum exponens. Neque etiam credibile existimavit D. Th. tam hoc loco, quam 2. 2. q. 2. art. 7. Adam verbis suis magnum sacramentum significasse, illud ignorantem & ideo Hieronym. ad Ephes. 5. dicit Adamum fuisse primum yatem, qui de Christo prophetavit, & idem docet August. lib. 9. Genes. ad lit. c. 19. cujus verba infra referam: & Epiphani. hæres. 48. dicit, Adam illis verbis vaticinatum fuisse de futuris. Constat autem verum prophetam, ea, quæ prædicit, cognoscere: & ideo Tertul. de anima c. 11. & 21. & lib. 3. contra Marcion. c. 5. dicit, Adam statim prophetasse magnum Christi sacramentum: *Quia accidentia*, inquit, *spiritus passus est, cecidit enim ecstasis super illum, & sancti Spiritus vis, operatrix prophetiæ*; & expresse Propter lib. 1. de promiss. & prædict. Dei p. 1. c. 1. *Sacramentum*, inquit, *magnum, quod promissum speravit, Adam, &c.* habuit ergo illius fidem, quæ fundamentum est sperandarum rerum, ut dicitur ad Hebr. 11. & eodem sensu Leo Pap. epist. 22. non longe a fine, ex eodem testimonio Pauli colligit, ab ipso principio generis humani, Christum in carne venturum, hominibus denunciatum esse; & similiter Bernar. serm. 6. in vigil. nativ. Domini, circa principium, dicit prophetias de Incarnat. ab ipso Adam in illis verbis initium duxisse: & optime ad hunc modum explicat illum Adæ soporē in serm. 2. Septuagesimæ.

Ex hoc ergo principio argumentatur D. Th. Incarnationem non fuisse per se primo ordinatam ad redimendum hominem lapsum, & consequenter futuram fuisse, etiam si homo non peccasset. Consecutionem probat, quia Adam præcivit Incarnationem futuram, & tamen non præcivit illam futuram propter suam redemptionem, quia non fuit præcius sui casus, ut August. docet lib. 11. in Gen. ad lit. c. 18. Respondet tamen negando consequentiam, quia potuit revelari Adæ Incarnatio, & non primarius finis, seu prima ratio illius: quæ responsio sufficienter solvit argumentum, ut propositum est.

Sed nonnulla explicanda supersunt. Primum est, quod licet non fuerit Adæ revelata hæc causâ Incarnationis, certe debuit aliqua alia illi proponi: quia non potest convenienter intelligi, Christum Deum hominem revelari Adæ per fidem credendum præsertim revelatione perfecta, & facta ab ipso Deo, quin consequenter intelligamus, illi ostendi rationem aliquam ex caritate, vel bonitate Dei desumptam, propter quam tantum beneficium hominibus conferre decrevit, & Christum ipsum supponi sub ratione capitis, a quo omnis gratia in humanum genus esset manatura; hoc enim, & ad Christi Domini dignitatem, & ad convenientem modum talis revelationis pertinebat, & mihi quidem ita credendum videtur: nam & D. Thom. 2. 2. quæst. 2. art. 7. dicit hominem ante peccatum habuisse explicitam fidem Incarnationis Christi, prout ordinabatur ad consummationem gloriæ, non autem prout ordinabatur ad liberationem a peccato per passionem, & resurrectionem. Ex quo loco bene perpenso colligitur cognovisse Adam Christum, ut viam, & medium, per quod erat beatitudinem consecuturus: docet enim D. Thom. in principio illius articuli, ideo fidem Christi necessariam esse ad salutem, quia Christus est, per quem homo beatitudinem consequitur: ac propterea per se pertinet ad objectum fidei: inferius vero docet etiam in statu innotentiæ oportuisse Christum esse fide creditum, tamquam per se pertinentem ad objectum fidei: ergo etiam in eodem statu credidit Adam in Christum, ut in eum, per quem erat beatitudinem consecuturus. Ex quo ulterius sequi videtur, credidisse etiam in eo statu Adam in Christum, tamquam in authorem gratiæ, & justitiæ sibi in eodem statu collatæ. Primo, quia fides Christo ideo est necessaria ad salutem, quia per Christum justitiam consequimur: sed hæc fides fuit Adæ necessaria ad salutem, teste D. Th. ergo per eam est justitiam affecutus. Secundo, quia Adam credidit in Christum tamquam in consummatorem gloriæ; ergo tamquam in authorem gratiæ, non enim ab aliquo speranda est gloria, qui non

Discuritur  
diligen-  
ter us doct.  
D. Thom.

Adam ante  
peccatum  
habuit fidem  
Incarnationis.

Obiectio  
quædam.



Gratia se-  
men glo-  
rie. j

non sit etiam auctor gratiæ, cum gratia nihil aliud sit, quam semen gloriæ. Dicitur fortasse, Adam prius tempore iustificatum fuisse, quam fidem Christi suscepit; gratiam enim, & iustitiam juxta veriore sententiam, in ipso momento suæ creationis suscepit, fidem autem Christi postea, quando Deus in illum soporem immisit: non est ergo necessarium, ut primam gratiam, & iustitiam acceperit per Christum, cujus fidem tunc non habebat, cum gratiam suscipiebat, postea vero in dicta revelatione agnovisse, per se Christum gloriam adepturum, licet viam, & modum ignoraret. Sed hoc nullo modo probari posse videtur. Primo, quia vix potest intelligi, Adam cognovisse Christum, ut auctorem gloriæ suæ, & non etiam gratiæ, cum hæc duo ita sint conjuncta, ut unum sit fundamentum, & semen alterius: & ut non negem, modum illum fuisse possibilem de potentia absoluta, certe tamen negari non potest, quin naturali connexioni, quæ est inter gratiam, & gloriam, non sit consentaneus, neque ipsius Christi dignitati. Secundo, quia si in illo statu, & revelatione, Adam credidit in Christum; ergo per illam fidem aliquo modo iustificatus est, sive iustitiam ipsam, sive augmentum ejus per eam fidem obtinendo; ergo pari ratione totam iustitiam per Christum obtinuit, quia non est credibile, aliquos gradus gratiæ habuisse per Christum, & alios sine Christo: alijs pari ratione aliquid gloriæ sperare deberet per Christum, & aliquid sine Christo, quod satis per se absurdum videtur. Quod circa, licet verum sit, illam singularem de Christo revelationem factam Adæ, fuisse tempore posteriorem, quam primam justificationem ipsius Adæ, nihilominus fieri potuit, ut primam iustitiam etiam per Christum acciperet, & per fidem ejus, vel explicitam licet minus perfectam, vel certe per implicitam, & in ordine ad explicitam paulo post obtinendam.

Secundo explicandum est in hac solutione D. Thom. unde constat, eam rationem vel causam Incarnationis, Adæ revelatam, non fuisse primariam & per se primo intentam in hoc mysterio. Cum enim D. Thom. negat revelatam esse Adæ causam Incarnationis, non est intelligendus de omni causa, ut ex eodem alio loco probabimus, sed de illa, quam ipse putat primariam, & sine qua non fieret Incarnatio. Sed cur, quæso, non posset alius pari ratione dicere, nobis quidem revelatum fuisse mysterium Incarnationis, illam vero causam, quæ frequentius nobis tradita est, esse nostro statui accommodatam, in se tamen non fuisse præcipuam atque primariam, sed potius illam, quæ Adæ significata est, fuisse primam, & potissimam rationem hujus mysterii, ac per se maxime sufficientem? & idem dici potest de Angelis, quibus in sua creatione hoc mysterium revelatum est, ut ex 1. p. q. 57. & 62. suppono. Et hæc ipsa interrogatio multum enervare videtur rationem, qua D. Thom. hoc articulo utitur. Falsum est enim, in omni revelatione facta de hoc mysterio, assignatam esse rationem ejus ex peccato primi hominis. In hac enim revelatione facta Adæ, & Angelis, assignata fuit ratio independens a peccato, ut declaratum est. Quod ita explico: nam si ipsi Adæ proposita esset hæc quæstio, quam D. Thom. modo versat, scilicet an eo non peccante, revelatio illi facta habitura esset effectum, sine dubio contrarium, quam D. Thom. ex simili ratione concluderet, hoc modo. Mihi revelata est voluntas divina de perficiendo hoc mysterio, propter rationem altissimam, quæ a peccato non pendet; ergo licet peccatum nunquam futurum sit, complebitur ista revelatio; quin potius certius crederet, Deum fuisse incarnandum non existente peccato, quam eo interveniente, quia non existente peccato, nullam rationem dubitandi inveniret: illo autem existente timere posset, ne suo peccato tantum Dei beneficium impediret.

Respon-  
detur.

Fateor, hæc esse improbatu difficilia, & satis concludere, & rem hanc esse incertam, & conjecturam D. Tho. esse probabilem, non tamen convincere: & solum video, dici posse, D. Thom. ideo eam partem elegisse, quia ejus discursus, & ratio nitebatur revelatione certa. Hæc autem, quæ diximus de revelatione facta Adæ, licet probabiliora sint, non tamen ita certa. Deinde, quia ille frequens modus loquendi Scripturæ, & ratio illa ex peccato sumpta toties repetita, & inculcata, multum indicant, illud fuisse primum motivum divinæ voluntatis ad hoc mysterium perficiendum, licet, postquam illud facere decrevit, etiam Adæ revelare voluerit, modo sta-

tui innocentie accommodato.

Tertio in eadem solutione explicandum occurrit, quomodo aliqui ex Sanctis allegatis significant, Adam in eo sopore cognovisse mysterium crucis. Hieronymus enim supra sic loquitur: *Primus pater Adam hoc de Christo & Ecclesia prophetavit, quod reliquerit Dominus noster atque Salvator, Patrem suum Deum, & matrem suam cælestem Jerusalem, & venerit ad terram, propter suum corpus Ecclesiam, & de suo eam latere fabricatus sit.* Quo ultimo verbo mysterium crucis significat: & Augustinus tractat. 9. in Joan. post medium, explicans sacramentum in verbis Adæ latens, dicit, Christum reliquisse Patrem, cum carnem sumpsit, matrem vero cum Synagogam repudiavit, & adhæsit Ecclesiæ, quæ formata est ex latere ipsius dormientis in cruce, & subdit: propterea immisit se Deum soporem in Adam, quando hoc præsignificabatur, quia prophetia illis temporibus futuro huic tempori dispensabatur: & lib. 9. Genes. ad lit. cap. 19. evidentius dicit, per illam ecstasim factum fuisse Adam participem tanquam Angelicæ curiæ, ut intrans sanctuarium Dei intelligeret novissima: & idem Leo Papa & nonnulli alii indicare videntur. Dicitur fortasse, illo facto & aliis verbis Adæ, hæc omnia fuisse allegorice significata, ipsum vero Adam non omnia illa mysteria intellexisse. Sed contra, quia pari ratione negari poterit, cognovisse ipsum mysterium Incarnationis, sed solum instinctu Spiritu Sancti locutum fuisse verba, quæ Prophetiam continerent, ad eum modum, quo Caiphas dixit; *oportet, ut unus moriatur homo pro populo.* Respondetur tamen, sine dubio Adam non fuisse præcium sui casus, & consequenter neque Incarnationem cognovisse, ut ad illius remedium ordinata est. Quod non aliter probo, quam Augustinus auctoritate supra citata; tum quia ab eodem sufficienter eo loco demonstratur: tum etiam, quia res est tam manifesta, ut nullus sit, qui contradicat. Cum ergo Sancti applicant significationem illorum verborum ad aliqua mysteria, quæ supponunt culpam, non intelligunt, Adamum omnia illa in particulari, & juxta proprium eorum modum cognovisse, sed solum mysterium ipsum quoad ejus substantiam, & quoad summam conjunctionem cum Ecclesia sua, quæ de latere ejus ædificanda erat; quod non oportet intelligi de latere Christi morientis in cruce, ita ut hoc totum Adam cognoverit, cum neque hoc per verba Adæ significatum sit, sed in communi potest intelligi de latere, id est, de amore, & de corde Christi. Et ad hunc modum cætera sunt exponenda, quæ difficultatem non habent. Quod vero ultimo dicebatur, non esse simile: quia si verba Adæ considerentur: *Hoc nunc os ex ossibus meis, &c.* tantum significant substantiam mysterii, & conjunctionem Christi cum Ecclesia, modum autem per se non significant, licet interdum ad hoc accommodentur, vel extendantur: pertinet autem ad perfectionem Adæ, ut ea intelligeret, quæ verbis suis significabat: & ideo a Sanctis non solum dicitur locutum fuisse spiritu prophetico, sed fuisse vere Prophetam. Non est autem necesse, ut intellexerit omnia mysteria, quæ in illis verbis possunt inveniri, seu ad quæ possunt accommodari, quod in omnibus fere prophetiis commune est.

Difficul-  
tas.

Versa so-  
lutio.

#### ARTICULUS IV.

a Utrum principalius Christi incarnatio facta fuerit ad tollendum peccatum originale, quam actuale.

**A**d quartum sic proceditur. Videtur, quod Deus principalius incarnatus fuerit in remedium actualium peccatorum, quam in remedium originalis peccati. Quanto enim peccatum est gravius, tanto magis humane salutis adversatur, propter quam Deus est incarnatus: Sed peccatum actuale est gravius, quam originale peccatum: minima enim poena debetur originali peccato, ut Augustinus dicit contra Julianum. \* Ergo principalius Incarnatio Christi ordinatur ad deletionem actualium peccatorum, quam ad deletionem originalis peccati.

2. Præterea, peccato originali non debetur poena sensus, sed solum poena damni, ut in secundo habitum est. \* Sed Christus venit pro satisfactione peccatorum, poenam sensus pati in cruce, non autem poenam damni, quia nullum defectum habuit divine visionis, aut fruitionis. Ergo prin-

3. d. 1. q. 1.  
art. 26. Et  
opus. 10.  
art. 28. &  
opus. 11.  
& art. 22.  
Et op. 35.  
art. 21.

Lib. 5. c. 8.  
circa fin.  
tom. 7.

Lib. 2.  
sect. d. 33.  
q. 2. art. 2.

prin-



principalis venit ad deletionem peccati actualis, quam originalis.

*Lib. 2. in serm. & mod. 10. 5.* 3. Præterea, sicut Chrysostomus dicit in 2. de compunctione cordis: *Hic est affectus servi fidelis, ut beneficia domini sui, que communiter omnibus data sunt, quasi sibi soli præstata reputet: quasi enim de se solo loquens Paulus ita scribit ad Galatas secundo: Dilexit me, & tradidit semetipsum pro me. Sed propria peccata nostra sunt actualia: originale enim est commune peccatum. Ergo hunc affectum debemus habere, ut existimemus, eum principaliter propter actualia peccata venisse.*

*Joan. 1.* Sed contra est, quod Joan. 1. dicitur: *Ecce Agnus Dei, ecce qui tollis peccatum mundi*, quod exponens Beda dicit: *Peccatum mundi dicitur originale peccatum, quod est commune totius mundi.*

*Haec in glo. ord. in hoc loco.* b. Respondeo dicendum, quod certum est, Christum venisse in hunc mundum, non solum ad delendum illud peccatum, quod traditum est originaliter in posteros: sed etiam ad deletionem omnium peccatorum, que postmodum superaddita sunt. Non quod omnia deleantur (quod est propter defectum hominum, quod Christo non inherent: secundum illud Joannis 3. *Venit lux in mundum, & dilexerunt homines magis tenebras, quam lucem*) sed quia ipse exhibuit, quod sufficiens fuit ad omnium peccatorum deletionem. Unde dicitur Roman. 5. *Non sicut delictum, ita & donum: nam iudicium ex uno in condemnationem, gratia autem ex multis delictis in justificationem.* Tanto autem principalius ad alicujus peccati deletionem Christus venit, quanto illud peccatum majus est. Dicitur autem aliquid majus dupliciter. Uno modo intensive, sicut est major albedo, que est intensior. Et per hunc modum majus est peccatum actuale, quam originale: quia plus habet de ratione voluntarii, ut in secundo habitus est.

*Joan. 3.* \* Alio modo dicitur aliquid majus extensive: sicut dicitur major albedo, que est in majori superficie. Et hoc modo peccatum originale per quod totum genus humanum inficitur est majus quolibet peccato actuali, quod est proprium singularis persone. Et quantum ad hoc Christus principalis venit ad tollendum originale peccatum, in quantum bonum gentis divinius & eminentius est, quam bonum unius, ut dicitur 1. Ethic. \*

*P. q. 8. 1. et 3.* Ad primum ergo dicendum, quod ratio illa procedit de intensiva magnitudine peccati.

*Lib. 2. Eth. q. 2. circa fin. tom. 5.* c. Ad secundum dicendum, quod peccato originali in futura retributione non debetur pena sensus: pœnalitates tamen, quas sensibiliter in hac vita patimur, sicut famem, sitim, mortem, & alia hujusmodi, ex peccato originali procedunt. Et ideo Christus, ut plene pro peccato originali satisfaceret, sensibilem dolorem pati voluit, ut mortem, & alia hujusmodi in seipso consumeret.

*Ideo in arg. cit.* d. Ad tertium dicendum, quod sicut Chrysost. ibidem dicit. Verba illa dicebat Apostolus, non quasi diminueret volens amplissima, & per orbem terrarum diffusa Christi munera, sed ut pro omnibus se solum indicaret obnoxium. Quid enim interest, si & aliis præstitit, cum que tibi sunt præstata, ita integra sunt, & ita perfecta, quasi nulli alii ex his aliquid fuerit præstitum? Ex hoc ergo, quod aliquis debet reputare sibi beneficia Christi præstata esse, non debet existimare, quod non sint aliis præstata: & ideo non excluditur, quin principalis venerit abolere peccatum totius nature, quam peccatum unius persone. Sed illud peccatum nature ita perfecte curatum est in unoquoque, ac si in uno solo esset curatum. Et ideo propter unionem charitatis, totum, quod omnibus est impensum, unusquisque debet sibi adscribere.

## COMMENTARIUS.

IN hoc titulo primum exponere oportet, quid significet illa particula, *principalis*, & in quo fiat comparatio. Potest enim Incarnatio dici principalis facta propter unum peccatum, quam propter aliud, vel quia remedium unius fuit prius intentum, quam alterius: vel quia fuit magis intentum, ut ita dicam, appetitive, hoc est, quia ita facta est Incarnatio propter remedium unius, ut sine illo non fieret: vel denique dici potest, principalis venisse propter unum, quam propter aliud, quia considerata necessitate, & indigentia humane nature, unum peccatum magis postulabat remedium, & magis misericordiam Dei excitabat, quam aliud: & juxta hos varios

sensus multa possunt hic queri: scilicet, an si non fuisset peccatum originale, Incarnatio fieret propter sola actualia, vel e contrario. D. Thom. autem nihil horum hic tractat, sed solum an Incarnatio fuerit facta propter utrumque peccatum tollendum, & propter quod principalis in ultimo sensu supra explicato, id est, ex quo peccato orta sit major necessitas in humana natura, ut hoc remedium indigerit; hunc enim esse sensum, patebit ex corpore articuli. Secundo, in illa comparatione advertendum est, peccatum originale necessario supponere aliquod actuale, quia cum originale peccatum sit per modum habitus, in solo actuali peccato potuit habere suam primam radicem, & fundamentum; non enim potuit, vel a Deo ipso solo, qui non est auctor mali culpæ, nec per bonum actum in humana natura introduci: quando ergo originale peccatum ad actuale comparatur, potest sub peccato originali comprehendi ipsum actuale peccatum Adæ, & Evæ, per quod tota natura lapsa est, & comparari ad actualia, quæ post modum addita sunt, & hunc sensum indicat D. Thom. in corpore articuli.

b. Respondet D. Thom. Christum venisse ad tollenda omnia peccata, sed principalis in remedium originalis; ita enim simpliciter colligenda est sententia D. Thom. ut ipse satis explicuit in solutione tertiæ: quamquam in corpore non simpliciter, sed cum addito concludere videatur, cum ait: *Et quantum ad hoc Christus principalis venit ad tollendum originale peccatum.* Sed illa particula, *Quantum ad hoc*, non est diminuens, aut limitans conclusionem, aliàs simpliciter, & absolute non satisfecisset quæstioni, se habet vim causalis, ac si diceret, & propter hoc principalis venit Christus propter originale peccatum: & ita est facilis litera articuli.

In quo observandum est primo, cum D. Thom. explicat Christum venisse ad omnia peccata tollenda, quia exhibuit, quod sufficiens fuit ad omnium peccatorum deletionem, intelligendum esse, non solum quia ipsa Christi opera secundum se sufficientem valorem habuerunt: hoc enim modo etiam possent dici sufficientia ad delenda Angelorum peccata, si Deus voluisset, ut ad hoc etiam ordinarentur: & tamen de fide est, Christum non venisse propter Angelorum peccata, ut infra q. 8. & 19. latius dicitur: intelligendum ergo est, de operibus Christi ut ab ipso ex Dei ordinatione, & beneplacito in hunc finem referebantur: venit igitur, ut operaretur, & quod in se est, sufficiens pretium offerret, ut omnia hominum peccata, tam originalia, quam actualia tollerentur.

Secundo, notandum est illud principium, quo fundatur ratio D. Thom. scilicet, tanto principalis ad alicujus peccati deletionem Christus venit, quo illud peccatum majus est: quod D. Thom. tanquam per se notum sine probatione sumit: cum tamen de vero sensu, & ratione illius, non satis constare videatur, quia cum tam operari mysterium Incarnationis, propter remedium peccati, quam efficere illud principalis propter hoc, quam propter illud, totum pendeat ex divina voluntate, & ex modo, quo prædestinavit hoc mysterium, non potest sola inæqualitate peccatorum colligi, principalis Deum intendisse per hoc mysterium unius remedium, quam alterius: sed hoc sumendum esset ex Scripturis, in quibus voluntas Dei est revelata; sicut in quæstione præcedentis articuli dicebatur. Est enim in utraque similis ratio. Sed dicendum est, ut explicando sensum tituli articuli dixi, D. Thom. solum comparare hæc peccata ex parte humane nature, quod nam scilicet illorum induxerit maiorem miseriam, maioremque redemptionis necessitatem, ut ex hac parte dicatur Deus principalis venisse propter unum peccatum, quam propter aliud, & hoc sensu per se manifestum est hunc excessum debere fundari in maiori peccati gravitate.

Tertio, cum D. Thom. compararet hæc peccata in intentione, & dicat actuale esse gravius intensive, intelligendum est ex genere suo, nam actuale peccatum sub se complectitur omnia mortalia, & quodlibet mortale gravius est, quam originale; si autem comparatio fieret de veniali cum originali, simpliciter majus malum est originale, quam veniale, quia licet hoc excedat in ratione voluntarii, tamen illud inducit veram amicitiam cum Deo, quæ sine dubio majus malum est, ut intra q. 27. iterum dicemus, & latius in 1. 2. tractatur.

Quarto circa comparationem extensivam horum peccato-

Quomodo intelligendum, Christum venisse ad omnia peccata tollenda.

Fundamentum D. Thom. declaratur.



catum bene notat Cajetan. debere intelligi per se, quia originale per se, & ratione sua inficit totam naturam, illamque a beatitudine deturbat; actuale vero per se tantum personam avertit, & ideo illud per se est gravius extensivè, atque adeo simpliciter majus malum, quia destruit commune bonum, quod divinius est. Neque obstat, quod omnia actualia peccata hominum in unum collecta videntur majorem Dei offensionem continere, atque adeo absolute majus malum esse, quam originale peccatum, etiam ut communicatum omnibus posteris Adæ, hoc enim est per accidens, nam per se solum originale ponit impedimentum toti naturæ, & ideo in ordine ad redemptionem dicitur majorem necessitatem inducere.

Ultimo observandum est, cum dicitur Christus principaliter venisse propter originale, sub illo debere comprehendere peccatum Adæ & Evæ, licet actuale fuerit, ut inter exponendum titulum indicavi. Neque enim existimandum est minus principaliter venisse Christum propter Adam & Evam, quam propter alios homines. Per originale ergo peccatum infectio totius nature significata est, quæ ad suam radicem est revocanda, & in illa, & cum illa tanquam quid unum consideranda: & quamvis hæc radix proprie fuerit peccatum Adæ, & non Evæ, non tamen propterea Eva excludenda est, quæ pars fuit humanæ naturæ corruptæ, propter quam totam redimendam Christus per se primo, ac principaliter venit.

c Secundum argumentum (omisso primo, in quo nihil occurrit notandum) est hujusmodi: Christus magis satisfecit pro actuali peccato, quam pro originali: ergo principaliter venit propter illud. Antecedens patet, quia peccato actuali debetur poena sensus, originali autem non, sed tantum poena damni; sed Christus assumpsit poenam sensus, & non damni; ergo principaliter satisfecit pro actuali, quam pro originali. Respondet D. Thom. negando primum antecedens. Ad probationem vero distinguit majorem, quia peccatum originale, licet non mereatur poenam sensus in futura vita, in præsentem tamen meretur sensibilem poenam usque ad mortem, & ideo Christus, ut pro illo plene satisfaceret, usque ad mortem in hac vita passus est. Huic vero solutioni addendum est primo, Christum Dominum non minus, immo magis principaliter satisfecisse pro poena damni, quam pro poena sensus, quod enim pro utraque satisfecisset de fide certum est, ut ex art. 2. satis constat; quod vero principaliter pro poena damni, constat, tum quia gravior est, & majus malum; tum etiam, quia hæc quodammodo proximius, & intimius conjuncta est cum culpa, pro qua Christus principaliter satisfecit. Neque vero ad satisfaciendum principaliter pro hac poena damni necessarium fuit, ut Christus eandem poenam in se susciperet; sicut neque ad satisfaciendum pro æterna poena sensus ignis inferni necessarium fuit, ut illam in se sustineret, sed per aliam poenam sensibilem hujus vitæ, secundum se quidem, & quasi physice consideratam, inferioris ordinis, moraliter tamen infiniti valoris, pro illa perfectissime satisfecit: ita per aliam poenam proportionatam, verbigratia voluntarie sustinendo carentiam gloriæ sui corporis, & quasi exilium a cœlesti patria, & privationem illius claritatis, & gloriosi nominis, quæ ratione unionis, & infiniti meriti sibi a principio conceptionis suæ debebantur, per hanc inquam, vel similem poenam perfectissime, & accommodatissime pro poena damni nobis debita satisfecit: nam licet illa poena secundum se sit inferioris ordinis, quam essentialis poena damni, tamen voluntarie suscepta a tali persona habet maximam proportionem, & superabundantem valorem ad illam satisfactionem. Secundo addi potest illi solutioni, licet peccatum originale in individuo, & prout contractum, non mereatur poenam sensus, tamen, ut peccatum originale dicit lapsus totius naturæ, etiam posse dici mereri aliquam poenam sensus, quia ut sic, includit actuale peccatum primi parentis. Neque improbabile est, si Deus toto rigore suæ justitiæ uti voluisset, potuisset punire peccatum originale poena sensus, etiam in futura vita; quod autem de facto id non faciat, fortasse merito, & satisfactioni Christi tribuendum est.

d Argumentum tertium cum solutione facilem, & optimam doctrinam continet, quæ in sequenti disputatione fusius explicabitur.

## DISPUTATIO V.

In sex Sectiones divisa.

*De primaria causa, & ratione, propter quam Incarnatio prædestinata, & facta est, & sine qua non fieret.*

Quamvis circa hanc q. 1. D. Thom. solum questionem, An est, seu de existentia Incarnationis disputemus, quia vero mysterium hoc non est per se necessarium, sed ex divina voluntate pendet, quæ non sine ratione aliqua, & sufficienti causa omnia operatur, ideo simul de causa, seu fine præcipuo, propter quem hoc mysterium factum est, necessario differimus: & quia propter eandem rationem, & causam Incarnatio facta est, propter quam est prædestinata, ideo, ut primam originem, & causam hujus mysterii investigemus, ordo etiam, & modus æterni consilii, & prædestinationis divinæ circa hoc præsertim mysterium inquirendus nobis est: quo invento & cognito, quæstiones a D. Thom. his articulis propositas facile expediemus. Nec vero tractanda sunt hoc loco omnia, quæ de Christi prædestinatione dici possunt, cum de hac re, proprium tractatum habeat D. Tho. infra q. 24. Sed ea solum attingemus, quæ ad explicandam rationem divini consilii, vel necessaria, vel opportuna videntur.

## SECTIO I.

*Quomodo inter actus divinæ scientiæ, & voluntatis ordo prioris & posterioris secundum rationem intelligendus sit.*

Priusquam de modo divini consilii in prædestinanda Incarnatione dicamus, præsentem dubitationem præmittere oportet, in qua nonnulla tractanda sunt, quæ ad præsentem materiam necessaria, ad plures vero alias utilia fore existimo. Primum est, quomodo in actibus divinæ voluntatis, vel intellectus ordo quidam secundum prius & posterius, seu signa quædam priora & posteriora a Theologis distinguantur, cum illi actus æterni sint, & omnino simul, imo in re ipsa prorsus idem. Propterea enim Gabr. in 3. d. 2. dub. 3. secutus Ocham in 1. d. 9. q. 3. omnino negat hæc signa, vel hunc ordinem in mente, & voluntate divina. Scotus vero in 3. d. 7. q. 3. & d. 19. q. 1. non solum hæc admittit, verum etiam dicit unum esse prius natura alio, ut illi tribuit Capreol. in 3. d. 1. q. 1. art. 3. in principio, eumque impugnat. Cum enim Scotus distinctionem quandam formalem admittat in Deo, fortasse etiam intellexit in re ipsa, & quasi ex natura rei inveniri etiam posse in divinis actibus hunc ordinem prioris, & posterioris, vel forte (quod magis credendum est) ordinem rationis fundatum aliquo modo in ipsa re, vocavit ordinem naturæ. Veritas ergo est, quamquam in actibus divini intellectus, & voluntatis secundum se, & in re ipsa vere ac formaliter nullus sit ordo prioris & posterioris, esse tamen (ut ita dicam) virtute, quatenus ibi est fundamentum, ut nos unum esse priorem alio secundum rationem concipiamus: quia licet Deus unico & simplicissimo actu omnia intelligat, & velit, tamen quia inter scientiam & voluntatem, & inter res ipsas cognitatas, vel amatas, est quædam connexio & dependentia, ad hanc explicandam concipimus nos unum in divina mente, vel voluntate, ut prius vel posterius alio, & hoc modo distinguuntur in his actibus signa priora & posteriora, non secundum rem, sed secundum rationem. Et hoc sensu explicatus ordo hic a nullo Theologorum negatur, & illo sæpe utitur D. Thom. 1. p. q. 14. 19. & hoc art. 3. ad 4. & alii Theologi in 2. d. 15. & 42. & Cajetan. late hic, & Ferra. 4. contra Gentil. 55. ad finem. Ubi, licet hæc signa impugnare videatur, tamen intelligit, si ex natura rei distinguantur, non vero secundum rationem; & eodem modo loquitur Capreolus supra. D. August. libris de prædest. & gratia sæpe hanc doctrinam supponere, & illa uti videtur, & lib. 5. Confess. cap. 9.

Sed tunc occurrit secundo loco explicandum, unde aut quomodo hic ordo, vel signa rationis sumenda nobis sint in scientia, vel voluntate divina, & in rebus, prout sub talem scientiam & voluntatem cadunt. Cajetan. enim hoc loco ex natura & ordine ipsarum rerum, quæ scientiam

Christum  
potius  
pro poena  
damni  
quam sen-  
su satis-  
fecisse.

Ordo  
prioris &  
posterioris  
in actibus  
intellectus,  
& voluntatis  
divinæ.

Dubium.

Cajetan.  
opinio.



scientiæ aut voluntati divinæ obijciuntur, hoc generaliter elicere conatus est. Distinguit enim tres ordines rerum, naturæ, gratiæ, & unionis hypostaticæ. Et primum ordinem dicit supponi secundo ut fundamentum ejus, & similiter secundum tertio. Unde concludit, omnia, quæ pertinent ad ordinem naturæ, in quo dicit contineri omnia peccata (etiam peccatum Adæ) omnia inquam illa prius prævideri a Deo, quam videantur, vel prædestinentur ea, quæ pertinent ad ordinem gratiæ, & loquitur Cajetanus aperte de scientia visionis, & non tantum de scientia simplicis intelligentiæ.

*Improprie  
dicitur* Sed hæc scientia alijs etiam discipulis D. Thom. non placet, & merito: multa enim involvit, quæ stare non possunt. Quod primo patet exemplis; mors enim prædestinati ad ordinem naturæ spectat, & tamen præscientia illius mortis non antecedit in Deo electionem talis hominis ad gratiam & gloriam, cum potius talis mors cum talibus circumstantiis sit effectus talis prædestinationis, & electionis. Deinde peccatum crucifigentium Christum pertinet ad ordinem naturæ, ut ipse dicit, quis autem intelligat antea prævidisse Deum peccatum crucifigentium Christum, quam Christum ipsum prædestinaverit? Similiter ipsum peccatum Adæ est deordinatio a fine supernaturali; ergo non potuit præsentia talis peccati præcedere voluntatem, seu præscientiam gratiæ. Neque distinctio, qua Cajetanus utitur, difficultatem expedit. Dicit enim peccatum, ut est contra ordinem naturæ, præcognosci in primo ordine naturæ: ut vero est privatio gratiæ, cognosci in secundo: hæc enim distinctio intelligi plane non potest, præsertim in his peccatis, quæ ex primario objecto suo sunt contra supernaturalem ordinem gratiæ, ut est, verbi gratia, peccatum infidelitatis, & fuit etiam peccatum Adæ, quod per se primo contrarium fuit divino præcepto positivo: & peccatum crucifigentium Christum, quod suam potissimam malitiam habuit ex dignitate divinæ personæ hypostatice unitæ humanitati. Secundo principaliter hic lapsus Cajetani ortus videtur ex variis causis: primo, quia non animadvertit, quamvis ordo naturæ supponatur gratiæ per modum subiecti, & fundamenti, non tamen quidquid pertinet ad ordinem naturæ habere connexionem aliquam cum ordine gratiæ; neque e contrario, quidquid est in ordine gratiæ, dependere, vel necessario supponere omne id, quod pertinet ad ordinem naturæ: ergo nulla est ratio, ob quam omnia, quæ pertinent ad ordinem naturæ, dicantur priora in cognitione, quam ea, quæ pertinent ad ordinem gratiæ, quia seclusa connexionem, & dependentiam ipsarum rerum inter se, nullum est fundamentum hujus ordinis, & idem est de ordine naturæ & gratiæ respectu unionis hypostaticæ. Quod exemplis etiam facile declaratur; si enim, ut Petrus justificetur, impertinens est, quod Paulus habeat naturalem pulchritudinem, vel scientiam, cur dicemus hoc necessario debuisse antea præfieri a Deo, quam illud? Et idem est de unionem hypostaticam, si comparatur ad res vel effectus naturales, qui ad illam omnino non pertinent. Secundo confundit Cajetan. ordinem executionis cum ordine intentionis, qui sunt valde diversi: & quod est prius in uno, potest esse posterius in alio, & ideo licet in executione natura supponatur gratiæ, tamen in intentione non est necesse. Unde quod Cajetan. & multi alii sentiunt ante electionem ad gloriam supponi præscientiam hominis prædestinati, ut jam producti in esse naturæ, revera non est necessarium; sicut in Christi humanitate non necesse est intelligere illam fuisse antea prævisam, ut existentem in esse naturæ, quam prædestinatam ad unionem hypostaticam; sed potius primo & per se ordinata est ad unionem, & ideo producta est, ut uniretur. Et idem videre est in gratia & gloria animæ Christi, non enim illa anima prius visa est gloriosa, quam unita; sed potius e contrario; quia quamvis gloria pertineat ad secundum ordinem, & unio ad tertium, tamen gloria data est illi animæ propter unionem, & ut proprietates consequens illam. Et in electione ad gloriam, & ad merita simile videre licet, est enim prior electio ad gloriam per modum intentionis, quamvis merita sint in executione priora.

Tertio non dirinxit Cajetanus in assignando hoc ordine scientiam simplicis intelligentiæ a scientia futurorum, quæ supponit voluntatem liberam Dei, quod tamen facere oportebat; quia licet respectu scientiæ simplicis

intelligentiæ, quæ omnino necessaria est, natura supponatur gratiæ saltem respectu ejusdem, quia est subiectum ejus; tamen respectu liberæ voluntatis hoc non est necessarium; potuit enim Deus priusquam rem aliquam naturalem futuram esse præsciret, libere velle gratiam & gloriam producere, & propterea velle creare res secundum esse naturale, ut in eo possit fundari etiam gratiæ & gloriæ, quod Deus per se primo voluit ordine intentionis: vel certe, quamvis Deus non velit gratiam & gloriam, nisi volendo simul personas gratiæ & gloriæ capaces, & ideo simul videatur velle ordinem naturæ propter ordinem gratiæ & gloriæ: non est tamen necesse, ut in aliquo signo intelligatur velle naturam per se & absolute, priusquam velit illam in ordine ad gratiam & gloriam obtinendam, sed simul vult illam propter hunc finem; & licet in genere causæ materialis possit dici natura prior gratia, tamen in genere causæ finalis gratia & gloria est simpliciter prior, & ideo non oportet, ut ante voluntatem dandi gratiam & gloriam supponatur præscientia rei secundum esse naturæ, loquendo, ut dixi, de scientia visionis, quæ supponit voluntatem. Unde tandem videtur lapsus Cajetanus, volens ita condistinguere hos tres ordines, ut cadunt sub divinam voluntatem, & præscientiam, ac si primus, scilicet ordo naturæ, quoad multos effectus non posset pendere in cognitione & præscientia a secundo, scilicet, ordine gratiæ, & uterque a tertio: quod tamen falsum est, quia isti ordines sunt ita inter se connexi, ut res naturales ordinentur, prout expedit ad effectus prædestinationis gratiæ & gloriæ, & effectus gratiæ & gloriæ, ad unionem hypostaticam, & e contrario, ut ex hac illi oriantur. Sic Beata Virgo prædestinata est ad tantam gloriam, quia mater Dei hominis futura erat, & cæteri omnes prædestinati sunt ad gloriam Christi, eisque gratia & gloria datur propter Christum & ejus merita, vita etiam hominis, licet in se naturalis sit, interdum sit supernaturali modo, & supponit unionem hypostaticam, ut patet in his, quos Christus suscitavit, & sic de alijs.

Aliter Scotus locis supra citatis distinguit hæc signa ex majori similitudine, vel propinquitate effectuum Dei cum ipso Deo, utens illo principio, ordinate volens prius vult id, quod est propinquius fini, quam ea, quæ magis distant: Deus autem, & ejus bonitas, & gloria est finis operum ejus, & ideo illud intelligitur esse prius in voluntate divina, quod est Deo ipsi propinquius, atque ad ipsius gloriam magis accommodatum. Sed hæc sententia Scoti neque sufficienter rem explicat, neque omnino vere, & utrumque patebit ex dicendis.

Dicendum est ergo hunc ordinem prioris & posterioris considerari a nobis posse, vel in intellectu divino respectu voluntatis, vel in ipsamet scientia Dei, seu inter res ipsas scitas: vel in voluntate, seu inter res, prout divinæ voluntati obijciuntur. Primo ergo modo, ratio prioris & posterioris petenda est ex naturali connexionem, quæ est inter intellectum & voluntatem, & utriusque actus, intellectus enim movet voluntatem proponendo objectum: & hac ratione intelligimus aliquem actum intellectus divini precedere actum voluntatis, quia voluntas non fertur, nisi in rem cognitam: voluntas vero est, a qua procedunt omnes actiones liberæ, & ideo principium est omnium rerum creaturarum, & omnium operum Dei in omni ordine naturæ & gratiæ, & unionis hypostaticæ: & propterea scientia istarum rerum, quatenus existentium vel futurarum in aliqua differentia temporis, intelligitur esse in Deo posterior, quam actus liberæ voluntatis: & hoc modo distinguitur in Deo duplex scientia, simplicis intelligentiæ & visionis, & illa antecedere dicitur voluntatem, hæc vero subsequi, quod intelligendum est respectu earundem rerum, & objectorum, respectu quorum habent ordinem supra explicatum; nam si ad diversa objecta & disparata comparentur, nullum habent inter se ordinem, ut magis ex sequentibus constabit. Sed hic oportet advertere, scientiam illam, quæ antecedit voluntatem Dei, quamquam simpliciter tantum sit de rebus possibilibus, tamen per eam cognoscere Deum, quid unaquæque causa effectura sit, si in esse producat, & cum his, vel illis circumstantiis ad operandum applicetur; quod non solum de causis necessario ac naturaliter operantibus, sed etiam de liberis voluntatibus verissimum existimo, ut in speciali tractatu de hac scientia divina

Unde sum-  
mendus  
sit ordo  
prioris &  
posterioris  
inter  
actus in-  
tellectus  
& volun-  
tatis di-  
vina.

Notitia  
futurorū  
conditionum  
pertinet  
ad scientiam  
simplicis in-  
telligentiæ.



vina demonstratum est. Ex quo ulterius fit, prius ratione quam Deus ab aeterno aliquid extra se producere voluerit præcognovisse innumeros & plane infinitos modos, quibus posset universum condere, & homines ac Angelos creare, & ad beatitudinem consequendam ordinare, cum diversissimis circumstantiis, cum his vel illis auxiliis, imponendo hæc vel illa præcepta, permittendo has vel illas tentationes, &c. & in omnibus cognovisse, quid eventurum esset, si hoc vel illo modo res crearentur, & disponderentur. Inter quos modos elegit hunc, quem per fidem cognoscimus executione mandasse. Ad hunc ergo modum scientia hæc non solum absoluta rerum possibile, sed etiam quasi conditionata rerum futurarum, antecedit voluntatem Dei, qua voluntate posita, vel prædefiniente, vel permittente, seu quæ est effectui accommodata, statim posterius ratione intelligitur Deus scire omnia futura, seu ea videre vel ut absolute futura, vel ut sibi æternitati præsentia.

Sed occurrit hoc loco difficultas de divina voluntate & scientia, ut versantur circa finem & media, utra sit altera prior. Et præsertim an intentio finis supponat scientiam mediorum. Et ratio dubitandi, quæ ex dictis oritur, est, quia scientia non supponitur voluntati, nisi quatenus illi proponit objectum: sed per scientiam mediorum ut sic non opponitur objectum intentioni finis: ergo non est, cur ad illam secundum rationem supponatur. In contrarium autem est, nam si quis velit finem, non præsciens mediorum, quibus illum consecuturus est, necesse est, ut vel inefficaciter illum intendat, vel certe, ut sese exponat periculo non assequendi finem intentum; & consequenter, ut talis intentio finis non sit ex se certa & infallibilis, sed potius temere seu imprudenter habita, aut saltem non ex perfecta & exacta prudentia. Propter has dubitandi rationes diversimode loquuntur nonnulli Theologi in hac re. Quidam enim simpliciter negant, scientiam mediorum supponi in Deo ante intentionem finis, propter rationem priorem. Alii vero id simpliciter affirmant propter posteriorem rationem. Utrique tamen minus distincte loquuntur, non satis distinguentes divinam scientiam & voluntatem. Supponimus ergo in primis, hanc difficultatem præcipue versari de fine, qui per media libera comparandus est, id est, per media, quæ sint actus liberi alicujus voluntatis create, vel ab illis pendeant; nam de cæteris, quæ vel a solo Deo immediate, vel per solas naturales causas efficienda sunt, nulla est difficultas, ut ex diendis clare constabit. Deinde oportet supponere ex dictis hic, & latius r. p. quæst. 14. quandam esse scientiam, qua cognoscuntur media ad aliquem finem, solum ut possibile & de se sufficientia, quæ ad scientiam simplicis intelligentiæ spectant: aliam vero esse scientiam, qua cognoscuntur media ut futura & non solum ut sufficientia, sed etiam ut efficacia: hoc autem contingit dupliciter. Uno modo, ut illa futura tantum sub conditione cognoscantur, id est, quod, si hoc fiat, illud sequetur, quæ ad scientiam simplicis intelligentiæ revocatur, & ab aliis media, seu conditionata appellatur: & in hac materia adeo est necessaria, ut nonnulli ob illius ignorationem, aut quia illam vel admittere, vel aperte confiteri verentur, confuse valde rem hanc pertractent. Alia est scientia mediorum absolute futurorum, sive ea sit in prædefinitione divinæ voluntatis, sive per modum intuitionis in præsentia æternitatis. Denique in voluntate distinguenda est duplex intentio finis; alia est omni ex parte absoluta & efficax, qua Deus omnino vult, talem finem re ipsa fieri seu obtineri, quomodo vult gloriam prædestinatis. Alia est intentio inefficax respectu finis ut in re ipsa obtinendi, quæ a Theologis vocatur voluntas antecedens, quomodo Deus vult, & intendit gloriam omnium hominum, etiam reproborum.

His ergo positis dicendum in genere est, omnem intentionem finis supponere aliquam scientiam mediorum, non tamen quamcumque, sed sibi proportionatam. Priorem generalem partem probat ratio dubitandi posteriori loco facta. Posteriores vero partem seu exceptionem probat altera ratio prior loco posita; & utraque sigillatim declaratur. Nam in primis intentio inefficax seu voluntas antecedens finis supponit scientiam mediorum, saltem ut possibile, seu sufficientium; quia Deum hoc modo velle aliquem finem nihil aliud est, quam velle, ut quantum est ex parte sua, talis finis obti-

neatur seu executioni mandetur: ergo non potest Deus habere hujusmodi intentionem, nisi præsciat, posse se adhibere sufficientia media, per quæ possit talis finis obtineri, & ex parte sua paratus sit ad talia media adhibenda ex vi illius intentionis: supponit ergo sine dubio hæc voluntas hujusmodi scientiam; non supponit autem scientiam alicujus medii ut futuri, quia cum ille finis non intendatur ut efficaciter in re ipsa ponendus, necesse non est, ut præcognoscantur media, efficacia, seu futura, quia hæc non sunt necessario adhibenda ex vi talis intentionis: ergo non est, cur ante illam talis scientia mediorum prærequiratur. At vero intentio efficax finis supponit necessario in Deo scientiam mediorum efficaciam & futurorum saltem conditionatam, quia ex vi talis intentionis infallibiliter applicanda sunt talia media: hoc autem fieri non posset, nisi eorum scientiam præsupponeretur; ergo, &c. Probatur minor, quia Deus non potest applicare talia media, nisi ex præscientia eorum, operatur enim per intellectum & voluntatem, & cum certitudine providentiæ: hæc autem præscientia non sequitur ex voluntate finis, quia ab illa nullo modo pendet. Imo talis intentio finis libera omnino est: hæc autem scientia est naturalis supposita veritate objecti: unde ex hac parte hæc est secundum rationem prior, & præterea quia, nisi hæc scientia præsupponeretur, non esset certa infallibilis efficacia talis intentionis suæ. Hoc autem in particulari melius declaratur: nam electio v. g. Petri ad gloriam supponit, Deum præscivisse media, quibus ipse valet, eum infallibiliter ad gloriam perducere, nimirum ita voluntatem ejus movendo ac regendo, ut sine periculo finalis lapsus ad gloriam transmittatur. Unde, si media, per quæ Petrus consecuturus est gloriam, libere ab eo sunt executioni mandanda, necessarium consequenter fuit, ut Deus præsciret illa media, non tantum ut possibile, sed etiam ut futura, seu ut infallibiliter ab ipso Petro volenda, si Deus hoc vel illud circa ipsum operetur, quia, nisi hoc modo essent præscita, non essent infallibilia, neque consentanea efficaci intentioni finis. Ex qua efficacia sumenda est tota ratio ac necessitas hujus præscientiæ. Quia absolutum Dei propositum tale est, ut eo posito, necessarium omnino sit fieri, quod vult, ita ut per nullam potentiam possit impediri, vel frustrari; ergo necesse est, ut Deus vel per hanc voluntatem & propositum suum immediate exequatur, quod intendit, & tunc non indiget aliis mediis; vel, si per alia media eam voluntatem executurus est, necesse est, ut illa habeat ita subiecta & subordinata suæ potentiæ ac motioni, ut infallibiliter faciant, quod ipse vult fieri: alioquin non erit effectus infallibilis ex vi prioris intentionis; talis autem subordinatio intelligi non potest sine prædicta scientia, cum Deus non operetur, nisi per scientiam & voluntatem. Et confirmatur, quia nisi intelligatur Deus ita præscius mediorum ante hanc intentionem, concipiendus esset tanquam intendens prius finem, & postea cogitans de mediis & illa inquirens; hoc autem involvit imperfectionem repugnantem Deo, quia talis modus volendi & intendendi finem, est valde præceptus & improvidus: unde etiam homo, qui cordatus est in volendo, priusquam definita voluntate statuatur aliquem finem consequi, cogitat de mediis, quibus potest talem finem comparare, juxta illud, quod Luc. 14. Christus Dominus dixit: *Quis ex vobis volens turrim adificare, non prius sedens computat sumptus, qui necessarii sunt, &c.* Est autem differentia inter nos & Deum, quoad hoc, quia nostra voluntas, quamvis sit omnino absoluta & definita ex parte nostra, tamen in effectu præstando, seu consequendo non habet infallibilem efficaciam, neque hoc est debitum perfectioni ejus: & ideo ut intra suum ordinem prudenter intendat aliquem finem, non est necesse, ut prius homo sit certus de futuro eventu mediorum; oportet tamen, ut saltem habeat probabile judicium, ex quo concipiat humanam spem consequendi finem per talia media, alioquin temere & imprudenter intenderet. Secus vero est in Deo propter infallibilem efficaciam voluntatis ejus, ad quam necessarium est, ut non ex probabili spe, sed ex certa scientia, ab intentione finis ad mediorum executionem procedat: hæc ergo scientia tanquam omnino naturalis Deo ac necessaria præsupposito objecto, supponenda necessario est in Deo ante efficacem voluntatem, seu intentionem finis.



Solvitur  
ratio du-  
bitandi.

Atque ita solvitur facile prima ratio dubitandi proposita, nam, licet per hanc scientiam mediorum formaliter ac præcise sumptam non proponatur objectum intentioni finis quantum ad rem illam, quæ ut finis cognoscitur & proponitur, deservit tamen hæc scientia, ut consecutio talis finis proponatur ut possibilis, vel etiam ut certo futura, si hæc vel illa media adhibeantur, intentio autem voluntatis fertur in finem ut consequendum, seu in consecutionem ejus, ut in re ponatur: & ideo ad talem intentionem finis, talis mediorum præscientia necessaria est. Unde etiam fit, quod voluntas mediorum virtualiter saltem includatur in intentione finis; & ex hac etiam parte prærequiritur scientia mediorum, ne intentio inefficax sit, aut impediri possit. Ultimo addendum est, absolutam scientiam mediorum ut futurorum non præsupponi in Deo ordine rationis, sed subsequi potius ad efficacem intentionem finis. Probatur, quia in primis talis scientia non est necessaria ad intentionem finis, sufficit enim alia, quæ a nobis explicata est; non est ergo cur præsupponatur. Deinde, quod talia media sint absolute futura, pendet ex divina voluntate: ergo talis præscientia supponit voluntatem ipsorum mediorum, & voluntas mediorum supponit voluntatem finis; ergo de primo ad ultimum, scientia absolute futurorum mediorum sublequitur potius, quam antecedit voluntatem finis.

Ex quo obiter colligitur, medium præcognitum, non posse esse rationem intendendi finem: nam, si præcognoscatur ut absolute futurum, potius intentio finis est ratio hujus præscientiæ; si vero præcognoscatur ut futurum, tantum scientia conditionata, licet hæc præsupponatur ad intentionem finis, non tamen ut proponens voluntati rationem tendendi in finem, sed ut proponens conditionem necessariam, sine qua non posset efficaciter intendere finem, ut in electione prædestinatorum ad gloriam, ut ad coronam & bravium, quamvis supponatur conditionata scientia meritum, id est, quod illi habebunt merita, si Deus eos moveat, &c. tamen illa merita non sunt ratio eligendi prædestinatos, sed conditio necessaria præconoscenda illo modo, ut voluntas divina possit eos efficaciter eligere. Et in illo exemplo Evangelico, non ideo aliquis turrim ædificat, quia habeat sufficientes sumptus ad ædificandam illam: non est enim hæc ratio intendendi talem finem, sed habitatio, aut defensio ab hostibus, vel securitas, aliquidve simile; est tamen præscientia sumptuum, conditio necessaria ad eam intentionem, ne temere habeatur, effectuque privari possit. Et ratio generalis est, quia finis non pendet a mediis, ut a ratione, propter quam amatur, sed potius e contrario: pendet tamen ab illis quoad executionem, quæ dependentia reducitur ad genus causæ efficientis; & ideo dicta præscientia mediorum supponitur ut conditio necessaria ad efficaciter intendendum finem. Hic igitur est ordo rationis, qui inter divinam voluntatem & intellectum a nobis potest excogitari.

Secundo in rebus ipsis, quæ sub scientiam vel voluntatem divinam cadunt, intelligimus ordinem prioris & posterioris, qui non potest fundari in ipsa scientia, vel voluntate secundum se, quia illa in se omnino una est, & simplicissima, & veluti generaliter indifferens ad omnia: debet ergo fundari in ipsis rebus, quæ scientiæ vel voluntati obijciuntur, prout inter se habent aliquam dependentiam, vel connexionem. Sed hoc aliter intelligendum est in scientia simplicis intelligentiæ, aliter in voluntate: in scientia enim simplicis intelligentiæ, quia illa est omnino necessaria, & quasi accommodata ipsis rebus, quæ ita intelliguntur, prout in se sunt, vel esse possunt, totus ordo prioris & posterioris inter res scitas sumendus est ex intrinseca & connaturali connexionem, vel dependentia ipsarum rerum inter se: qualis est, v.g. inter essentiam & passionem, inter subiectum & accidens, & sic de aliis. Quocirca in hac scientia illud intelligitur esse prius, a quo aliud pendet, illud vero posterius, quod pendet ab alio, quæ autem connexa inter se non sunt, non est unum alio prius vel posterius. At vero in voluntate, quæ libera est, si absolute & simpliciter loquamur, non potest sumi hic ordo prioris & posterioris ex solis rebus ipsis, prout habent inter se intrinsecam & connaturalem habitudinem, neque prout una est nobilior alia: quia liberum est voluntati avincere esse effectum minus nobilem

excellentiore prætermisso; sæpe etiam per voluntatem liberam unum effectum ordinat ad alium, qui inter se nullam habitudinem, aut ordinem postulabant, quæ omnia videntur per se manifesta. Sumendus ergo est hic ordo ex habitudine, quam inter se habent divini effectus in ordine ad divinam voluntatem ordinantem unum ad aliud, & volentem unum propter aliud, vel, ut proprie loquamur, volentem, ut unum sit propter aliud. Et juxta hæc, illud intelligitur esse prius in voluntate divina, quod est tanquam ratio & finis alterius: illud vero posterius, quod est propter aliud, licet in re ipsa prius intelligamus Deum exequi medium, quam finem.

Et hinc inferitur primo, licet, ut dixi, absolute & simpliciter ordo rerum, prout cadunt in divinam voluntatem, non sit sumendus ex rebus ipsis secundum se, sed prout voluntati obijciuntur; tamen supposita in Deo aliqua voluntate per modum intentionis finis recte ac consequenter intelligi aliquid prius cadere in voluntatem divinam, quam aliud, si ita sint essentialiter subordinata, ut unum ab alio pendeat: seu si unum per se sit propinquius fini, quem proxime attingit, & aliud non nisi remote, & mediante altero: ut supposita in Deo electione prædestinati, consequenter intelligitur Deus velle justificationem, & vocationem ejus: sed quia hæc media ita inter se sunt subordinata, ut vocatio proxime ordinetur ad justificationem, justificatione vero ad gloriam, inde intelligimus, prius Deum voluisse hunc justificare, quam vocare. Et hoc sensu est verum illud principium, quo Scotus utitur in hac materia: ordinate volens prius vult id, quod est fini propinquius. Dupliciter enim potest dici aliquid propinquius fini, quam aliud; uno modo, quia sunt media per se subordinata, ut explicatum est, & hoc modo est verissimum principium, quia proximum medium comparatur ad remotum per modum finis, & ideo intelligitur prius cadere in voluntatem; alio modo dici potest aliquid propinquius fini, quia est illi similis, vel quia videtur melius, vel accommodatius ad talem finem, & hoc sensu utitur Scotus illo principio: sed in eo neque necessarium est, nec semper verum. Primum patet, quia non est necesse, ut Deus velit id, quod est sibi similis, vel propinquius; ergo multo minus necessarium est, ut illud prius velit, quin potius supra ostendimus, non esse necesse, ut Deus semper eligat id, quod in se videtur utilius & convenientius. Secundum probatur, quia aliàs quo aliquis esset major in gloria & beatitudine, eo intelligeretur fuisse prior in electione divina, quia est Deo propinquior & similior; hoc autem falsum est, sicut licet cælum sit nobilior terra, non est necesse intelligere, Deum prius voluisse creare cælum quam terram, aut leonem quam equum, si fortasse leo nobilior est: quia ordo objectorum, vel mediorum in ordine ad voluntatem eligentis, vel amantis, non attenditur juxta mensuram perfectionis eorum, nec juxta similitudinem, vel propinquitatem, quam habent in esse rei (ut ita dicam) cum fine, sed ex dependentia, vel connexionem, quam habent inter se in ordine ad voluntatem amantis, vel eligentis. Nam si hanc non habeant, alia propinquitas in perfectione est accidentaria respectu hujus ordinis prioris & posterioris, quia potest voluntas libera omnino simul diligere id, quod magis vel minus perfectum est: & similiter potest eligere medium, quod in re ipsa est minus utile, vel minus conjunctum fini, quia mensura electionis non est finis, secundum quod in se est magis vel minus conjunctus cum hoc, vel illo medio, sed prout intentus est ab operante, fieri autem potest, ut operans pro sua libertate tali modo intendat finem, ut ad illum consequendum non indigeat optimo medio, seu propinquiori ad finem: & tunc non est necesse, ut ex vi talis intentionis illud eligat: ideoque pro libertate sua potest eligere medium minus accommodatum, quia illud sufficiens est ad implendam voluntatem suam. Quapropter ad assignanda hujusmodi signa prioris & posterioris in voluntate divina oportet considerare res, quæ sunt finis, & media, non solum juxta proportionem, vel similitudinem, quam a parte rei habent, sed multo magis in ordine ad eligentem.

Sed hic occurrit triplex difficultas. Prima est, quomodo possint res in divina voluntate habere aliam habitudinem finis & mediorum, quam ex natura sua habeant, quod in doctrina a nobis tradita plane supponitur: est autem

Quomodo  
se habet  
voluntas  
in electio-  
ne medio-  
rum ten-  
dentium  
in eundem  
finem.

Dubium  
primum.



Res seu  
media  
quomodo  
ordinate-  
tur a Deo  
in extrin-  
secos fi-  
nes.

Autem difficultatis ratio; nam, quando Deus dicitur vel-  
le aliquod medium propter aliquem finem extrinsecum,  
ad quem illa res, quæ est medium, natura sua non tendit,  
sed ordinatur tantum per extrinsecam intentionem a-  
gentis; tunc (inquam) vel Deus imprimit in illa re ali-  
quid, quo inclinatur, seu tendat in illum finem; vel nihil  
imprimit. Primum intelligi non potest, quia nequit in  
universum declarari, quid sit illud, quod tali rei intrin-  
sece additur, eo quod ordinetur in extrinsecum finem.  
Quod si aliquando id reperitur, jam res illa, ut sic affe-  
cta, non ordinatur in finem extrinsecum, sed intrinse-  
cum & connaturalem, ut verbi gratia homo ordinatur  
ad beatitudinem supernaturalem, ut ad finem, media  
gratia, & charitate, quibus ille finis intrinsecus, & con-  
naturalis est, quamvis respectu hominis dici potest ex-  
trinsecus, seu additus ex intentione extrinseci agentis.  
Si vero dicatur secundum, scilicet Deum ordinare me-  
dium in finem extrinsecum, nihil novum intrinsecum  
imprimendo ipsi medio, id etiam est difficile ad intelli-  
gendum: quia hæc ordinatio medii in finem nihil addit  
ipsi Deo, ut supponimus juxta veriore & fere certam  
opinionem, quod actus liberi nihil reale addunt volun-  
tati divinæ: ergo, si nihil etiam addit ipsi medio, non est  
unde sumatur illa denominatio, qua talis res, quæ est  
medium, dicitur ordinata in talem finem. Quod aliter  
in hunc modum explico; nam hæc denominatio vel est  
intrinseca, vel est extrinseca; extrinseca esse non potest,  
cum neque ab intrinseco manet, nec sit ei connaturalis,  
neque proveniat ab aliquo intrinsece superaddito, ut sup-  
ponitur. Quod autem neque extrinseca esse possit, pro-  
batur, quia nulla est forma, vel actus extrinsecus, a quo  
sumi possit: nam, vel illa forma est extra Deum, & hoc  
non, ut est per se notum, quia hic solum agimus de me-  
diis, ut a Deo in finem aliquem ordinantur: neque etiam  
potest esse in Deo, quia in eo realiter nihil est, nisi actus  
voluntatis, a quo, ut realiter in Deo existit, non potest hæc  
denominatio sumi, quia ut dictum est, tali actui ex eo,  
quod terminetur ad tale objectum, nihil reale additur, a  
quo possit hæc denominatio sumi. Unde hoc ipsum ali-  
ter confirmatur & declaratur, quia omnis nova & realis  
denominatio necessario supponit aliquam realem addi-  
tionem, vel mutationem, unde sumatur, quia intelligi  
non potest, quod, eisdem rebus eodem modo se habenti-  
bus, aliqua denominatio realis in eis reperiatur: sed hanc  
rem ordinari a Deo in talem finem extrinsecum est deno-  
minatio realis, non intrinseca & connaturalis tali rei,  
sed superaddita: ergo necessario debet oriri aut ex mu-  
tatione facta in ipsa re, aut ex additione facta ipsi Deo:  
sed hæc additio secluditur, ut supponimus: mutatio et-  
iam in re non fit, quia nihil ponitur intrinsecum in ipsa;  
nullo ergo modo intelligi potest talis ordinatio. Et con-  
firmatur, nam hac ratione intelligitur Deus velle ali-  
quid libere, nisi dando aliquod esse, vel mutationem ali-  
quam efficiendo in objecto voluto, quia, cum non velit  
per additionem vel mutationem, quæ in ipso Deo fiat,  
non potest dici volens, nisi ob mutationem vel additio-  
nem, quam in objecto faciat; ergo similiter, &c.

Respondetur, difficultatem hanc ex professo tran-  
scendam esse 1. part. quæst. 19. multum enim pendet ex illa  
difficili quæstione, quid addant actus liberi divinæ volun-  
tati. Nunc breviter dicitur, negari nullo modo pos-  
se, quin sæpe velit Deus unam rem propter aliquem finem  
sibi extrinsecum, ad quem natura sua non ordina-  
tur, quamvis enim hoc aliquibus obscurum videatur pro-  
pter difficultatem tactam, & ideo aliter loqui videantur,  
mihi tamen res, ut dixi, indubitata videtur, si recte ex-  
pendatur. Ut ergo declaretur, in primis statuendum est,  
nullum medium ordinari a Deo ad aliquem finem, quin  
sit accomodatam & utile ad illum consequendum; hoc  
enim in omni electione, seu voluntate prudenti neces-  
sarium est, & in hoc summam perfectionem habet vo-  
luntas divina. Rursus hæc proportio, seu utilitas medii  
ad finem, necesse est, ut conveniat medio secundum se,  
seu quod in eo supponatur objective, (ut sic dicam) seu  
in potentia ad electionem seu voluntatem, per quam in  
talem finem ordinatur. Patet, quia electio non dat me-  
dio utilitatem; ergo supponit illam. Antecedens proba-  
batur, quia medium non ideo est utile, quia eligitur, sed  
potius ideo eligitur, quia est utile: ergo ante electionem  
supponitur utile & proportionatum.

Utilitas  
medii ad  
finem ali-  
quo modo  
supponi-  
tur.

Dices; hoc esse verum in voluntate creata, non autem  
in divina; tum quia voluntas divina est efficax sui ob-  
jecti, quod non habet creata. Unde Deus extra se non vult  
aliquid, quia est bonum, sed potius volendo illud facit,  
ut sit bonum; tum etiam, quia sæpe Deus eligit medium  
ad finem ex se prorsus improporcionatum, quale fuit in-  
ungere luto oculos cæci nati ad visum illi præstandum,  
& eligendo illud fecit illud proportionatum, & utile ad  
illum finem.

Respo.

Ad priorem partem respondetur, illud esse verum de  
objecto divinæ voluntatis prout actualiter existente, si  
enim accipit bonitatem vel utilitatem a divina volun-  
tate quoad actualem existentiam, nihilominus tamen  
bonum illud seu medium secundum se, seu in esse essen-  
tiæ consideratum, & objective præcognitum ac volunta-  
ti propositum, necessario supponitur, ut ex se aptum in  
potentia ad talem finem, & hoc modo nos loquimur. Ut  
verbi gratia satisfactio vel meritum Christi, quamvis  
nunquam existeret, nec Deus vellet illud fieri, ex se, seu  
in esse possibili sue essentiæ consideratum, habet propor-  
tionem, valorem, & maximam utilitatem ad finem re-  
dimendi homines a peccato. Et hoc modo dicimus, ad  
electionem seu voluntatem talis medii (& simile est in  
reliquis) supponi proportionem seu utilitatem ad talem  
finem etiam in ordine ad divinam voluntatem secun-  
dum esse in potentia, quamvis secundum actualem exi-  
stentiam procedat ab ipsa voluntate.

Ad posteriorem partem dici posset, in illo exemplo &  
similibus, illud non fuisse medium ad efficiendum vel  
consequendum illum finem, sed ad significandum ali-  
quid, vel certe ad hoc, ut miraculum notius ac evidenti-  
us esset, dum apertius constaret, factum esse abique ullo  
medio naturali, imo cum majori subjecti repugnantia  
perfectum esse. Sicut, quando Elias, antequam ignem  
de coelo peteret, qui sacrificium consumeret, magnam  
aquæ copiam super sacrificium fudit, non est usus illo  
medio ad consumendum sacrificium, sed ad hoc solum,  
ut divina operatio notior fieret, ad hunc autem finem ta-  
le medium ex se habet proportionem & utilitatem. Ad-  
do vero ulterius, interdum Deum uti hujusmodi mediis,  
quæ ex se non solum videntur carere proportione, sed et-  
iam esse potius impedimenta, & fini contraria, ipsum  
vero Deum virtute sua uti eis, ut instrumentis, atque  
adeo ut mediis instrumentariis ad finem suum conse-  
quendum. Tunc vero dicendum est, in hujusmodi me-  
diis supponi saltem obedientialem potentiam, vel pas-  
sivam vel activam (de qua infra quæst. 13. longus sermo  
nobis futurus est) & ratione hujus potentiæ habent  
ex se, seu ut supponuntur voluntati divinæ, utilitatem seu  
proportionem obedientialem in ordine ad talem finem,  
ratione cujus apta sunt eligi vel amari propter illum.

Hinc vero (quod ad rem, de qua agimus, maxime spe-  
ctat) intelligitur, hanc utilitatem vel proportionem  
quam in medio supponi dicimus, etiam respectu divinæ  
voluntatis, non necessario consistere in aliqua reali ha-  
bitudine, quam ex se habet tale medium ad talem finem,  
neque in naturali inclinatione ad illum, sed interdum  
esse positam in aliqua capacitate vel potentia obedien-  
tiali, vel in aliqua proprietate, ratione cujus potest talis  
res commode ad talem finem ordinari; ut verbi gratia  
aurum vel argentum est ex se aptum, ut sumatur ut in-  
strumentum ad commutationes humanas, & in pretium  
seu pecuniam consignetur, quæ proportio in aliquibus  
proprietatibus naturalibus ejus fundamentum habet,  
quamvis non ponat in eo aliquam habitudinem, vel in-  
clinationem intrinsecam ad talem finem. Idem videre  
licet in aquæ ablutione respectu hujus finis. Ratio au-  
tem non est alia, quia hoc est sufficiens fundamentum ex  
parte objecti, ut voluntas libera tali re utatur in ordine  
ad talem finem.

Atque hinc tandem concluditur, quod intendimus,  
sæpe rem unam ordinari per divinam voluntatem ad fi-  
nem sibi extrinsecum, etiam si in ea nulla fiat mutatio,  
sed ordinatio sit prorsus extrinseca. Hoc probatur pri-  
mo manifestis exemplis, nam ordinavit Deus incarnati-  
onem, vel passionem Christi ad redemptionem nos-  
tram, qui finis omnino extrinsecus erat incarnationi;  
quæ tamen in se eadem omnino est, quæ esse posset sine  
ordinatione ad talem finem. Dices, aliquid peculiare  
additum esse incarnationi ex vi illius finis, scilicet, mo-  
dum

Voluntas  
Dei ordi-  
nans res  
in extrin-  
secos fi-  
nes, nihil  
in eis ne-  
cessario  
imprimit.



dum in carne passibili. Sed hoc nihil refert, quia non solum ille modus, sed ipsamet incarnatio ordinata est ad talem finem: imo illemet modus, & ipsa Christi passio potuit ordinari aut permitti a Deo sine tali fine propter alias causas, ita ut omnia, quæ in Christi passione contigerunt, eadem omnino fierent, solumque deesset ordinatio ad talem finem. Dices, semper in re ipsa seu ipsi medio aliquid peculiare addi ex vi talis intentionis & ordinationis ad talem finem, ut in prædicto exemplo additum est, quod Christus ipse obtulerit passionem suam propter redemptionem nostram; quod non potuit oriri nisi ex eo, quod Deus ordinaret passionem ejus in illum finem: & ita semper salvari potest, quod ordinatio divina unius rei ad extrinsecum finem causet in re aliquid speciale, quod non posset, nisi ex illo fine oriri. Sed quidquid sit de illo peculiari exemplo, an, scilicet, verum sit, non potuisse Christum in voluntate humana habere illum actum referendi passionem suam in nostram salutem, nisi divina voluntas eandem passionem in eundem finem præordinasset: nam fortasse potuit de potentia absoluta aliter contingere, ut patebit ex infra dicendis de humana Christi voluntate: quidquid (inquam) de hoc sit, nil obstat, quo minus ipsa Christi passio extrinsecus sit relata in finem redemptionis per divinam voluntatem priusquam per humanam: illa ergo relatio est prorsus extrinseca sine ulla mutatione, quæ in ipso medio fiat: imo illa alia relatio, quæ per specialem actum voluntatis humanæ Christi facta est, fuit quasi novum medium ex eodem fine redemptionis ac divina voluntate præordinatum.

Varia  
exemplis  
declaratur.

Addere etiam possumus alia exempla, in quibus ex parte causæ secundæ nihil peculiare fit, quo medium ordinetur ad finem a Deo intentum, sed solum divina ordinatio seu intentio intercedat, sine qua posset fieri totum id, quod in re fit, propter alium finem, ut v. g. cum Deus permittit peccatum in prædestinato, ut sit ei occasio majoris boni, illa permissio, seu carentia auxilii efficacis est medium ad salutem prædestinati, ad quem finem a nullo alio, nisi a Deo ordinatur, & tamen eadem omnino permissio esse posset sine tali fine. Similiter permittit Deus venditionem Josephi factam Ægyptiis a fratribus ejus ex intentione exaltandi Josephum, & per eum salvandi multos populos, ut dicitur Genes. 50. & ex intentione etiam repræsentandi in ipso venditionem Christi: ad quos fines fuit medium ordinatum tam permissio, quam etiam ipsa venditio, quoad actionem physicam & materiale, & tamen nullus ordinavit illum actum in talem finem, nisi Deus sua voluntate, nihilque in re ipsa fuit in tali actu, quod non posset esse sine ordinatione ad talem finem, aliaque exempla infinita ex divina Scriptura peti possunt, ex quibus certissime constat, posset ex voluntate divina habere rationem seu habitudinem medii & finis, quam ex natura sua non habent, absque eo quod, vel rei, quæ ut medium assumitur, aliquid in re addatur ex eo, quod fit propter talem finem, neque etiam finis aliter in re fiat, eo quod per illud remedium comparatur, cum possit per aliud medium idemmet finis obtineri.

**Ratio.** Ratione præterea declaratur hæc veritas primum a posteriori, quia voluntas humana potest hoc modo operari, & referre media ad finem: ergo multo magis hoc potest voluntas divina: antecedens constat, quia eandem actionem dandi aliquid potest voluntas humana velle & imperare ex intentione hujus vel illius finis, absque eo quod actio illa alia sit, vel aliter fiat in re ac physice, sed solum moraliter per denominationem ab actu voluntatis; consequentia autem probatur, quia hoc pertinet ad perfectionem divinæ voluntatis, ut eminentiori modo possit quidquid voluntas humana potest, quod imperfectionem non includat. Dices, hoc contingere in humana voluntate, quia elicit diversos actus, quibus exteriori actionem potest in diversos fines referre, & ita ab eis potest denominari exterior actus ordinatus in hunc vel illum finem, quod in voluntate divina non habet locum. Respondetur, in hoc consistere eminentiam divinæ voluntatis, ut sine his imperfectionibus possit, quicquid creata voluntas recte operans cum illis potest. Unde potest etiam talis ratio a priori, nam voluntas divina, eo quod & est summe libera & summe ac purissimus actus; summamque habet perfectionem tam in po-

testate & libertate volendi, quam in modo, simul potest & velle libere objecta creata, & tamen illa velle absque ulla sui mutatione, seu reali additione illi facta: ergo ex eadem summa perfectione, potestate, & libertate potest Deus velle hoc medium propter hunc vel illum finem extrinsecum pro suo arbitrio, & sine ulla mutatione, vel reali additione, quæ in ipso Deo fiat, quia hæc repugnant perfectioni ejus. Neque etiam est necesse, ut aliquid speciale addatur ipsi rei, quæ est medium præter ipsum esse ejus, quia hoc non requiritur ex vi solius ordinationis in extrinsecum finem, neque ad illam aliquid semper conducit.

Add difficultatem ergo in principio positam respondetur, eandem fieri posse in omni actu libero voluntatis Dei, nam ab hujusmodi determinatione libera denominatur Deus volens; hæc autem denominatio nec sumitur ab aliqua re, quæ addatur ipsi Deo, neque etiam sumitur ex mutatione, quæ in objecto fiat ex efficacia divinæ voluntatis; tum quia hæc denominatio volentis, cum sit perfecta & vitalis, non potest concipi, aut intelligi, quod sit omnino extrinseca; tum etiam, quia non ideo Deus vult creaturam, quia in illa facit mutationem, seu quia illa aliter se habet ex efficacia divina, sed potius e contrario, quia Deus vult creaturam, ideo illi dat esse, seu illam transmutat, nam operatur omnia secundum consilium voluntatis suæ: unde vere ac proprie ex amore libero creaturarum illas producit, juxta illud: *Sic Deus dilexit mundum, ut Filium suum unigenitum daret*: non ergo denominatur Deus amans libere creaturas ab intrinseca mutatione in creaturis facta, sed ab intrinseco amore, qui re vera in ipso Deo est. Tum denique, quia multæ voluntates Dei libere intelliguntur, quæ per se ipsas non faciunt mutationem in creaturis: hujusmodi est dilectio prædestinatorum, per quam infallibiliter destinantur ad vitam æternam, nam per eam ut sic non fit mutatio in prædestinatis, sed ex vi illius Deus habet voluntatem circa media & effectus prædestinationis, per quam facit mutationes in electis ad finem illum consequendum necessarias. Similiter voluntas, quæ Deus voluit homines redimere, quatenus ratione distincta est a voluntate Incarnationis, non facit mutationem in creaturis, sed solum est propositum quoddam efficax in Deo, ad quod consequitur voluntas mediorum, quibus executioni mandatur illud prius propositum. Imo juxta veriore sententiam non est divina voluntas, quæ immediate facit mutationes in creaturis, sed per voluntatem applicatur divina potentia executiva, a qua immediate profluunt creaturæ & mutationes earum. Prius ergo secundum rationem, quam ab executiva potentia Dei manet aliquid in creatura, vult Deus applicare suam potentiam ad id efficiendum: atque ita ante omnem creaturæ mutationem intelligitur Deus velle aliquid; sic ergo in præfenti potest Deus velle aliquid propter aliquem finem extrinsecum, etiam si in re volita nihil amplius efficiat, quam si propter alium finem, vel etiam sine ullo fine extrinseco, sed propter se ipsam tantum illam vellet. Quomodo autem hæc denominatio volendi libere intelligi possit in Deo absque reali additione intrinseca alicujus perfectionis liberæ, cum tamen non sit prorsus extrinseca, unum est ex divinis mysteriis, quod humana ratione nec comprehendere, nec declarari posse existimo. Sed non propterea tribuendum est Deo aliquid, quod sine imperfectione intelligi non potest, quale est, quod aut non sit volens creaturam per intrinsecum actum suum, aut quod sit volens per aliquid reale, ita adjunctum voluntati suæ ab æterno, quod simpliciter posset non esse. Sed fatendum est, tam esse eminentem & perfectum, simplicissimum illum actum voluntatis, quo Deus se necessario amat, ut per illum omnino realiter immutatum, vel augmentum possit velle vel nolle creaturas. Ex quo resultat, nostro modo intelligendi, terminatio talis actus ad tale objectum creatum per respectum rationis, qui non fundatur in mutatione creaturæ, sed potius est quasi prima radix & origo ex parte Dei mutationis ejus.

Hoc autem supposito, ad difficultatem in principio tactam respondendum est, rem a Deo volitam propter extrinsecum finem denominari ordinatam ad talem finem, non semper ab aliqua re, quæ intrinsece ei addatur, sed ab actu voluntatis divinæ, qui ad illam terminatur ratione talis finis. Neque ad hoc necesse est intelligere in Deo

Qualis sit  
denominatio,  
qua  
Deus dicitur  
volens, seu  
amans.

Solvitur  
ratio dubitandi.

Secunda  
ratio.



Deo mutationem, vel additionem realem, sed solum respectum rationis propter summam eminentiam & simplicitatem voluntatis ejus, ut dictum est.

Secundum  
dubium.

Quomodo  
si alius  
ordo in-  
tentionis,  
quam exe-  
cutionis  
in divina  
voluntate

Secunda difficultas circa eandem doctrinam est, quomodo in voluntate divina possit aliquid esse prius ordine intentionis, & non executionis, aut e converso. Et ratio difficultatis est, quia hæ voluntates non videntur in Deo distinguui, etiam secundum rationem. Probatur, quia voluntas Dei absoluta est efficax eorum, quæ vult; ergo si Deus habet intentionem efficacem alicujus finis, illammet voluntas est efficax illius finis: ergo est sufficiens ad exequendum illum: ergo est etiam voluntas executiva: ergo non distinguuntur in Deo illæ voluntates. Et confirmatur, quia respectu mediorum non distinguitur in divina voluntate electio ab usu: ergo nec respectu finis distinguitur intentio ab executione, quatenus est a divina voluntate, est enim eadem proportio & ratio, scilicet, quia Deus eadem determinatione voluntatis suæ, quæ eligit aliquod medium, exequitur illud.

Responsio.

Respondetur nihilominus doctrinam propositam sumptam esse ex communi modo sentiendi & loquendi Theologorum, qui, tractantes specialiter de nominum prædestinatione & electione, dicunt, Deum prius secundum rationem eligere seu diligere prædestinatum, quam prædestinet, seu ordinet media, per quæ salutem est consecuturus. Cujus rationem reddens D. Thom. 1. p. q. 23. art. 4. ait, eam esse, quia voluntas finis prior est, quam ordinatio mediorum, per quæ finis est consequendus; constat autem executionem finis esse posteriorem ordinatione mediorum, nam per ipsa media fit: ergo supponit illa doctrina, intentionem finis in Deo esse priorem ipsa executione. Unde iidem Theologi docent, hanc dilectionem prædestinati, quæ per modum intentionis, non esse ex meritis ejus, quamvis glorificatio sit ex meritis, quæ glorificatio est executio prioris intentionis, & ex parte Dei includit etiam voluntatem, ut conferentem gloriam, & ut exequentem id, quod per priorem dilectionem intentum ac prædestinitum erat. Nec solum circa ultimum effectum prædestinationis, sed etiam circa intermedios hæc distinguui possunt, quatenus in eis ratio finis proximi respectu alicujus medii reperitur. Sic enim Deus prius secundum rationem vult hunc hominem peccatorem hic & nunc justificare, & propterea consequenter vult, ut hic & nunc contritionem habeat: & ob hanc intentionem præbet illi vocationem, quam scit futuram efficacem, seu infallibilem, quam propterea Augustinus sæpe appellat vocationem secundum propositum gratiæ Dei, quia, scilicet, procedit ex intentione efficaci iustificandi talem hominem. Præcedit ergo secundum rationem hæc intentio, postea vero subsequitur voluntas exequens, qua Deus præbet in exercitio concursus actualem ad contritionem habendam, vel ad infundendam justitiam. Quod autem in his exemplis declaratum est, in aliis Dei voluntatibus, & effectibus simili modo & ex eadem causa & radice reperitur.

Ratio.

Ratio autem a priori est, quam significavit D. Thom. quia Deus propriissime & perfectissime operatur propter finem, seclusa imperfectione, quæ in hoc genere operandi seu causalitatis in nobis reperitur; quando enim voluntas nostra propter finem operatur, illud imperfectionis est, quod actus ipse volendi realiter a voluntate procedat, & unus actus ab alio, scilicet, electio ab intentione, quando distinctæ sunt: tamen ex parte objecti, quod finis sit ratio volendi media, ad perfectionem spectat, quia operari ex proposito, & ex cognitione finis ad perfectionem simpliciter spectat, ut constat ex 1. 2. q. 1. art. 1. Hoc ergo modo convenit Deo operari propter finem, & ita de ipso Scriptura loquitur: *Univerſus propter semetipsum operatus est Dominus, & propter nimiam charitatem suam, quæ dilexit nos Deus, Filium suum misit*. Ephes. 2. Ergo quamvis Deus unico & simplicissimo actu intendat finem, & velit media usque ad ipsam finis consequutionem, quod nos pluribus actibus facimus, nihilominus sicut in nobis secundum rem distinguitur ordo intentionis ab ordine executionis, ita in Deo distinguendi sunt secundum virtutem seu rationem.

Confirmatur ac declaratur primo, quia Deus ita vult unum propter aliud, ut ordinet unum in aliud, ut in finem ut recte docuit D. Thom. 1. p. q. 19. art. 5. quia aliàs non operaretur Deus perfecto modo; ergo vel ordinat Deus

Suarez. Tom. XVI.

mediū in finem a se intentum, vel non intentum: hoc posterius impossibile est, quia finis non est ratio volendi media, nisi ut amatus & intentus: ergo necesse est finem esse intentum prius secundum rationem, quam media in ipsum ordinentur; ergo etiam in Deo finis est prior ordine intentionis, quamvis in executione sit posterior. Denique declaratur exemplo intellectus, in quo, licet Deus unico & simplicissimo actu omnia intelligat; nihilominus secundum rationem prius concipitur ut intelligens essentiam rei, quam proprietates, & principia, quam conclusionem, quæ ex illis sequitur: quia ex parte objecti perfecta cognitio unius pendet ab alio, non vero e converso: sic autem se habet finis ad voluntatem sicut principium ad intellectum: ergo etiam in voluntate Dei prior est secundum rationem intentio finis, quam voluntas mediorum, & consequenter etiam est prior, quam ipsamet voluntas Dei, ut applicans media, vel causas, per quas finis intentus executioni mandatur.

Ultimo declaratur hoc ipsum, respondendo ad difficultatem propositam, quæ facilius expedietur, supponendo (quod supra tetigi) quamvis Deus omnia faciat, quæ absolute & efficaciter vult, quomodo dicitur omnia operari secundum consilium voluntatis suæ, non tamen immediate per voluntatem suam exequi, quod vult, sed per omnipotentiam suam, quam applicet ad opus, tanquam immediatum operandi principium. Ut docuit D. Thom. 1. part. quæst. 19. artic. 4. ad 4. Hoc ergo supposito, quamvis Deus uno simplicissimo actu voluntatis, & intendat aliquem finem, & applicet suam potentiam ad exequendum illum, nihilominus possunt facile in eadem voluntate hæc duo ratione distinguui, & unum etiam esse prius altero secundum rationem. Unde fieri potest, ut quoad intentionem voluntas divina ex se sola illam habeat, & intendat talem finem, in executione vero non sola ipsa, sed cum causa secunda illum efficiat; ut cum Deus intendit, ut Petrus sit beatus, ex se & per se solum habet illud propositum, quod tamen non per se solum exequitur, sed elevando & adjuvando voluntatem & intellectum Petri. Unde etiam intelligitur, in ipsis objectis harum voluntatum esse aliquam diversitatem, penes quam potest hæc distinctio rationis attendi; nam intentio finis versatur circa ipsum finem secundum se; ut obtineatur, seu ponatur in esse, & ut sic non includit media nisi virtute, neque etiam includit formalem applicationem omnipotentia divina ad operandum: voluntas autem exequens versatur circa media ut executioni mandanda, usque ad ultimam affectionem ad finem exequendum necessariam. Quod si nulla sint necessaria media, neque aliæ causæ præter divinam voluntatem, & potentiam, tunc ibi non erit propria intentio, quæ dicit habitudinem ad media: unde neque oportebit ibi distinguere ordinem intentionis ab ordine executionis, aut voluntatem intendentem ab exequente, nisi quis velit secundum rationem distinguere voluntatem divinam, ut terminatam ad existentiam ipsius rei, ab eadem voluntate, ut applicante suam potentiam ad dandum tale esse, quod certe non repugnat, quamvis nobis non sit necessarium.

Tandem hinc fit, ut intentio finis interdum nullam specialem rationem, vel dispositionem ex parte objecti seu creaturæ requirat, & tamen, quod voluntas exequens illum finem, huiusmodi rationem vel dispositionem supponat, ut in electione & glorificatione prædestinatorum videre licet. Sic enim expeditur illa vulgaris interrogatio, quomodo sine meritis velit Deus glorificare, quem gratis diligit, & eligit, cum in re non det gloriam, nisi propter merita, quandoquidem non aliter dat, quam dare voluit, & disposuit; responso enim est, voluntatem illam electivam, quæ rationem intentionis habet, non supponere merita tanquam rationem vel dispositionem in objecto seu persona prærequisitam, ut a Deo eligatur, sed potius esse effectum talis electionis: & hac ratione verum est, Deum non intendere salutem prædestinati propter merita ejus, quamvis ex vi illius intentionis velit, ut in re non habeat gloriam nisi per merita, & consequenter, ut ad voluntatem executivam gloriæ supponatur hæc ratio & quasi dispositio ex parte objecti, scilicet, quod habeat merita. Unde cavenda est æquivocatio illius particulæ *propter*, nam ut dicit causam finalem, seu rationem objectivam, propter quam Deus intendit talem finem,

Solvitur  
ratio du-  
bitandi.

Illatio  
nota.

H finem,



finem, sic Deus non vult gloriam prædestinati propter merita ejus; ut vero dicit rationem medii, & quasi dispositionis seu causæ moralis, sic vult Deus, ut prædestinatus habeat gloriam propter merita, seu per merita; & ad hunc modum philosophandum est in mysterio Incarnationis, ad explicandam primam rationem, quæ Deum movit ad illud volendum, seu intendendum, ut latius in sequentibus dicturi sumus.

Tertia difficultas circa prædictam doctrinam est, quia videtur in ea supponi, Deum velle finem sine dependentia a mediis: hac enim sola ratione potest dici in Deo voluntas finis prior electione mediorum, aut finis cadere prius in voluntatem Dei, quam media, quia est independens ab eis quoad intentionem; hic enim nulla alia ratio prioritatis excogitari potest. Hoc autem, quod in hac doctrina supponitur, videtur plane falsum, nam ille modus intendendi prius finem, quam media, imperfectiorem involvit. Nos enim ideo prius intendimus finem, & postea ad electionem mediorum procedimus, quia quando nobis finis proponitur, non habemus præsentia omnia media, nec judicamus, quod eorum convenientius & utilius sit; & ideo post intentionem consulimus, & ad consilium sequitur electio. Et simili ratione sæpe antecedit electio usum, quia cum eligimus, non statim judicamus de omnibus circumstantiis adhibendis in executione medii, & præsertim an hic & nunc expediat. At vero in Deo non est hæc imperfectio, nam simul habet præsentia, tam finem, quam media omnia, simulque comprehendit, ac judicat, quam sit utile unumquodque, vel conveniens, & cum quibus circumstantiis, & quomodo; ergo non oportet intelligere etiam secundum rationem, Deum intendere finem independentem a mediis, sed omnino simul intendere finem per hæc media. Unde confirmatur: nam cum duplex intelligi possit modus intendendi finem, unus absolutus a determinatione mediorum in particulari, sed virtute tantum & confuse illa includendo; alius determinando particularia media in ipsamet intentione finis, hic posterior est sine dubio perfectior, quia est simplicior, expressior, & magis comprehensivus: ergo hic est Deo attribuendus. At vero in hoc modo intentionis non est prior finis, quam medium, sed sunt omnino simul. Et confirmatur secundo, quia vel Deus potest velle finem & media hoc modo, scilicet, cum mutua dependentia, vel non. Hoc posterius dici non potest, quia in eo modo volendi nulla est implicatio contradictionis, nullave involvitur imperfectio, & alioquin voluntas Dei est libera & omnipotens; si autem potest ita velle, ita sane vult, quia hic modus magis consentaneus est perfectioni ejus, ut ostensum est.

Duplex  
confide-  
ratio a-  
lium d-  
vix vo-  
luntatis.

Declaratio hujus difficultatis magnam, ut existimo, lucem afferet huic disputationi, & omnibus, quæ in ea dicenda sunt, ne fortasse ob varium usum vocum in æquivoco laboremus, quod in hac questione multis vereor accidisse. Principio ergo considerandum est, aliud esse loqui de divina voluntate adæquate & secundum rem, aliud vero præcisè secundum abstractionem & considerationem rationis nostræ. Difficultas enim proposita videtur procedere de divina voluntate priori modo spectata, quo modo certissimum est, Deum simul & eodem omnino actu velle finem, ut exequendum per illa determinata media, per quæ in re ipsa illum exequitur, seu consequitur. Atque hoc & nihil aliud probant rationes adductæ. Quo sensu etiam est verum, intentionem finis habere connexionem cum electione talium mediorum in illo adæquato, & (ut ita dicam) integro actu voluntatis; & in eodem sensu est etiam verum, consecutionem finis sic intenti habere dependentiam a talibus mediis, quatenus ex vi dictæ voluntatis sine illis non obtinebitur; sicut etiam & contrario media pendent a fine, quia nisi ille esset intentus, ipsa non eligerentur, nec manderentur executioni ex vi talis voluntatis. Neque enim est inconveniens, inter finem & media esse hanc mutua dependentiam in diversis generibus causarum, nam media pendent a fine in suo genere causæ finalis, finis autem a mediis in genere causæ efficientis, vel dispositivæ. Nos autem fere in tota hac disputatione non hoc modo loquimur de divina voluntate: sic enim nihil est in illa prius, aut posterius, neque hujusmodi consideratio nobis deservit ad declarandas primas rationes divinæ providentiæ & prædestinationis: loquimur ergo

secundum præcisionem rationis nostræ: & hoc modo dicimus, unum motivum in Deo esse prius alio, aut unam voluntatem esse alia priorem, ut intentionem electione.

Ut hoc autem declaretur, est considerandum secundo non esse omnino idem, quod intentio sit ratione prior electione talium mediorum, & quod sit omnino independens ab illa, seu non habens cum illa necessariam connexionem (hic enim, brevitatibus causa, omnem connexionem necessariam inter duas res, dependentiam vocamus, & e converso carentiam prædictæ connexionis, appellamus independentiam); igitur aliquid esse prius alio secundum rem vel rationem latius patet, quam esse independens, quod est esse posse sine illo: anima enim prior est naturaliter suis potentiis, & materia sua quantitate, quamvis & anima cum potentiis, & materia cum quantitate sua, necessariam habeant connexionem naturalem, ita ut sine illis esse non possint. Unde Aristoteles in Prædicam. cap. 11. prioritatem naturæ, quæ in causalitate consistit, ab ea distinguit, quia dicitur prius id, quod non convertitur subsistendi consequentia; & illam ab hac separari posse affirmat, potest enim causa esse necessario conjuncta cum effectu, & finis cum medio unico ac necessario, sine quo obtineri non potest: non ergo repugnat aliquid esse prius alio, uno modo, quamvis aliunde habeant inter se ita necessariam connexionem vel dependentiam, ut illud, quod prius dicitur, non possit esse sine posteriori. Duobus ergo modis possumus intelligere in Deo intentionem finis esse priorem electione mediorum. Primo, solum ratione causalitatis, seu habitudinis, quam objecta inter se habent, quia unum est ratio volendi aliud, & non e converso. Secundo, ratione independentiæ, quia nimirum intentio finis possit optime esse, & ad effectum perducere sine talium mediorum electione. Priori modo in universum verum est, intentionem finis etiam in Deo esse ratione priorem electione, distinguendo ac præscindendo secundum rationem unam ab alia. Probatur, quia licet voluntas divina ex parte sui actus non habeat propriam causam, potest tamen habere rationem objectivam, ut supra dictum est, & constat ex 1. part. quæst. 19. art. 5. sed hoc modo finis est ratio volendi media, & non e converso, etiam in Deo: ergo secundum rationem prius est volitus finis, quam media. Imo etiam ex parte actus, distinguendo secundum rationem, voluntas finis potest dici ratio voluntatis mediorum, ad eum modum, quo unum attributum divinum dicitur ratio alterius, ut intellectus, verbi gratia voluntatis: sicut ergo hoc modo intellectus divinus dicitur esse prior ratione, quam voluntas, & scientia, quam amor, ita voluntas finis est prior ratione voluntate mediorum. Quia vero hæc prioritas non infert alteram, ut dixi, ideo non sequitur, neque est in universum verum, voluntatem finis ita esse priorem voluntate mediorum, ut possit esse sine illa, nam interdum est necessario cum illa conjuncta, seu illam secum necessario affert, quamvis non semper, neque in omnibus eodem modo, quod superest explicandum.

Aliud est,  
esse ratio-  
ne prius  
alio, aliud  
esse inde-  
pendentem  
ab illo.

Tertio ergo advertendum est, omnem intentionem finis includere aliquo modo media vel explicite, vel implicite, vel in communi, vel in particulari; cujus ratio est, quia intentio est efficax voluntas consequendi finem: consecutio autem dicit habitudinem ad media, per quæ comparandus est, & sine quibus obtineri non potest; finis autem prout intentus ab operante, interdum habet necessariam habitudinem ad determinatum medium, quæ connexio interdum oritur ex fine ipso secundum se; ut si quis hodie existens Salmanticæ, intendat post aliquod tempus esse Compluti, necesse est, ut velit iter agere, quia finis ille habet necessariam connexionem cum hoc medio: aliquando vero illa connexio oritur ex speciali modo adjuncto ipsi fini vel consecutioni finis ab operante seu intendente finem, ut in exemplo posito, si quis non tantum velit ire Complutum, sed etiam commode, &c. talis intentio habebit connexionem, non solum cum illo communi medio iter agendi, sed etiam cum tali medio, scilicet utendi curru aut equo ad iter agendum; vel, si in ipso fine adjungatur talis circumstantia temporis, verbi gratia existendi crastina die Compluti, necesse est, ut sit connexa non solum cum electione agendi quovis modo

Quomodo  
intentio  
finis me-  
dia com-  
prehendat.



modo iter, sed determinate velociter currendi. Ex quibus exemplis etiam intelligitur talem esse posse intentionem finis, ut non habeat connexionem necessariam cum electione hujus, vel illius medii, si nimirum, nec finis secundum se, nec ratione modi, quo intenditur, tale medium determinate requirat; tunc enim ex vi intentionis sequetur quidem electio alicujus medii, non tamen hujus potius, quam illius, sed id proveniet ex libertate eligentis, vel ex aliis rationibus, quas potest in mediis considerare, præter utilitatem finis. Ex his ergo constat, quando intentio finis sit prior, quam electio formalis & expressa determinati medii, non solum prioritatem causalitatis, sed etiam subsistendi consequentia, quando vero solum priori modo; si enim finis sic intentus omnino requirit hoc medium, tunc licet intentio ejus sit prior causalitate, non tamen subsistendi consequentia, quia non potest esse talis intentio, quin talem electionem secum afferat supposita sufficiente cognitione & judicio, prout in Deo supponitur: si vero finis sic intentus non limitatur ad hoc medium, sed variis modis ac viis obtineri potest, tunc, quamvis contingat, ex libertate operantis huic intentioni conjungi electionem talis medii determinate, nihilominus illa intentio ex se manet prior tali electione, non solum causalitate, sed etiam subsistendi consequentia, quia nihil repugnaret esse sine illa.

Hæc autem tota doctrina, quæ universalis est, ad Deum applicari potest, utendo nomine causalitatis late pro quacumque ratione: nam uterque intentionis modus explicatus potest intelligi in Deo absque ulla repugnantia vel imperfectione, quia liberum est Deo, velle quemcumque finem creatum, uno vel alio modo, prout sibi placuerit, & uno modo potest habere connexionem cum uno medio, & alio modo non habere illam, ut exemplis facile declarari potest, nam Deus intendens redemptionem hominum, potuit illam simpliciter & absolute intendere, nihil aliud addendo, & hoc modo non habet necessariam connexionem cum electione unionis hypostaticæ, quia potuit Deus per alia media homines redimere: potuit etiam in ipsa intentione adhibere modum, scilicet redimendi homines optimo modo, seu ex perfecta iustitia, & hæc intentio habet necessariam connexionem cum electione unionis hypostaticæ, quia non poterat alio modo talis redemptio perfici. Simile quid videre licet in ea intentione, qua Deus dilexit prædestinatos ad gloriam, potuit enim illis gloriam intendere, solum ut beatitudinem ab ipso præstandam, & ut sic non haberet talis intentio connexionem cum meritis, seu cum voluntate dandi merita prædestinatis; & si sola vis illius intentionis consideretur, verum est, quod posito illo decreto, prædestinati consequerentur beatitudinem, etiam si non haberent merita, quia, si Deus non elegisset hoc medium, providisset alium modum consequendi beatitudinem: nunc autem, quia Deus illi intentioni adjunxit electionem talis medii, scilicet meritorum, ideo respectu illius integræ voluntatis ac providentiæ verum est dicere, prædestinatum non consecuturum gloriam, nisi habeat merita. Alio vero modo potuit Deus habere decretum dandi gloriam, ut coronam iustitiæ, & hoc modo habet necessariam connexionem cum voluntate dandi merita, ita ut licet sit prior illa, non tamen possit esse sine illa. Constat igitur, interdum intentionem finis esse priorem electione mediorum subsistendi consequentia, interdum vero minime, sed habere necessariam connexionem cum illa, & quando, & quomodo utrumque contingat.

**Obiectio.** Dicit aliquis: qua ratione intelligi potest, cum decretum Dei sit æternum & simplex, quo vult finem consequi per hoc medium, v.g. gloriam Petri per martyrium, manere hoc decretum firmum & stabile circa finem, non existente tali medio? nam, si non existit tale medium, signum est, Deum non elegisse illud in suo æterno decreto: ergo necesse est omnino non manere illud decretum, quod Deus habuit: nam cum sit omnino simplex, non potest manere circa finem, si non manet circa medium.

**Responsio.** Respondeo, negando hoc ultimum. Nam, licet ille actus sit simplicissimus, nihilominus, ut est determinatio libera ad exteriora objecta, non est ex parte ejus seu ex simplicitate ejus necessaria connexio inter ipsum, ut terminatur ad unum objectum, & ut terminatur ad aliud, nisi inter ipsa objecta inter se ea connexio reperiatur.

*Suarez Tom. XVI.*

Quapropter, si finis nec ratione materialis objecti, seu rei intentæ, nec ratione motivi, nec ratione modi, quo intenditur, habet necessariam connexionem cum tali medio, neque etiam determinatio libera, quæ est in Deo ad finem per modum intentionis, habebit ex parte actus divini necessariam connexionem cum determinatione libera ejusdem actus ad tale medium. Quod quidem aliis innumeris exemplis declarari potest: nam licet Deus eodem decreto simplicissimo secundum rem voluerit creare omnes angelos, v.g. quos nunc creavit, nihilominus potest facile intelligi, voluntatem creandi unum angelum non habere necessariam connexionem cum voluntate creandi alterum, etiam secundum præsentem determinationem liberam, quam Deus habet, quia ex parte objectorum nulla est connexio, & ex parte solius divini actus esse non potest, quia non repugnat, manere eandem determinationem ad unum objectum, & non ad aliud: & idem est de voluntate, qua Deus voluit dare iustitiam Adæ, & permittere peccatum ejus, & de aliis similibus: alioquin fatendum esset, omnia, quæ Deus ab æterno voluit facere, aut permittere, talem habere connexionem in illo decreto divino, ut de quolibet sit verum dicere, si illud non eveniat, nihil ex omnibus aliis esse futurum ex vi præsentis decreti, quia ablato uno effectu aufertur decretum circa illud, si autem circa unum aufertur, consequenter auferendum est circa omnia alia, quia simplicissimum est. Quod si hoc est absurdum, ut revera est, & potest illud decretum, licet in se sit simplicissimum, retineri circa unum objectum, & non circa aliud, consequenter idem dicendum est, quotiescumque objecta secundum se non requirunt connexionem.

Ratio autem a priori est, quia determinatio libera nihil reale addit divinæ voluntati, sed idem omnino actus seipso terminatur libere ad hoc vel illud objectum, prout Deus vult, solumque ei additur respectu rationis; ergo etiam potest ille actus terminari ad unum objectum, vel solum, vel simul cum alio sine ulla adiectione, vel ratione reali; ergo, stante in Deo determinatione libera ad duo objecta inter se & ex se non connexa, potest & debet intelligi, quod determinatio ad unum nullo modo pendet ex determinatione ad aliud; & quod posset esse in Deo determinatio eadem, quæ nunc est ad hoc objectum, etiam si non esset ad aliud. Probatur hæc ultima consequentia, quia neque hinc sequitur variatio aliqua realis in actu Dei, ut patet ex principio posito; neque etiam variatio secundum respectum rationis, quia optime manere potest respectus rationis ad unum objectum sine respectu ad aliud; nulla enim probabilis ratio necessariæ connexionis inter hos respectus excogitari aut fingi potest ex parte solius Dei, si in connexione ipsorum objectorum non fundatur. Et confirmatur, nam actus divinæ voluntatis, quamvis simplicissimus, potest necessario terminari ad unum objectum, & libere ad alia; & ex hoc, quod illi actui, ut terminato jam ad objectum necessarium, addatur, nostro modo intelligendi, determinatio ad objecta libera, non variatur prior determinatio necessaria, sed modo nostro intelligendi, quasi extensive augetur, quamvis alio modo, scilicet libere. Unde etiam si hæc determinatio libera non adderetur, prior eadem omnino maneret: ergo similiter, quamvis intelligatur ille actus divinus libere terminatus ad unum objectum, postea secundum rationem terminari ad aliud, non propterea intelligitur prior determinatio variari, sed quasi extendi per additionem similis terminationis, quæ si non adderetur, nihilominus posset prior manere omnino eadem; & idem est, quamvis ille actus voluntatis intelligatur omnino simul terminari ad utrumque objectum liberum, quia illa simultas tantum est per concomitantiam, quæ non addit connexionem. Quod si quis contendat terminationem liberam aliquid reale addere divinæ voluntati, dicimus in primis illam sententiam neque esse receptam, neque veram, neque certe probabilem. Addimus deinde, etiam posita illa sententia, posse satis consequenter juxta illam explicari, quod diximus; nam, si actui necessario voluntatis divinæ, ut terminetur ab æterno ad aliquod objectum extra se, aliquod reale additum est, quidquid illud sit, sive absolutum, sive respectus; ergo, cum ille actus terminatur ad duo objecta extrinseca, & inter se non connexa, duplex additio illi

Eadem libera voluntas Dei posset manere circa unum objectum, sine aliis.



fiet: ergo, quamvis intelligatur ille actus terminatus ad unum obiectum, & non ad aliud, poterit manere in eo illud idem, quod ei additum est, ut terminetur ad unum obiectum, etiam si non sit ei addita terminatio ad aliud obiectum. Nec refert, quod huiusmodi terminationes, secundum quod ponuntur in Deo, dicantur inter se distinguui actualiter ex natura rei, vel tantum virtualiter; nam quod in hoc dictum fuerit de terminatione necessaria & libera inter se, dicendum erit de duplici terminatione libera, scilicet, quod simpliciter esse poterat una sine alia, quomodo cumque distinguantur, quamvis postquam semel ab æterno sunt posita, non possint amplius separari ob immutabilitatem divinæ voluntatis. Fateor juxta illam sententiam posse defendi contrarium eo modo, quem statim explicabo, sed nihil nostra refert, ut dixi.

Alia ob-  
jectio:

Sed obijci adhuc potest; nam, si verum est, ut D. Tho. interdum indicat, & multi sentiunt, voluntatem nostram posse eodem simplici, & indivisibili actu ferri in finem, & media, posito tali actu impossibile est, voluntatem cessare a volendo medio, quin cesset a fine, & e converso: quamvis illa ex se non habeant necessariam connexionem, sed voluntas, ex sola libertate sua, utrumque simul & eodem actu voluerit. Et ratio est, quia, si talis actus est indivisibilis, non potest per partes tolli; ergo necesse est, ut vel totus maneat, vel totus auferatur, si autem totus manet ad totum, & integrum obiectum terminatur, si vero totus auferatur, nihil jam erit per illum volitum; ergo, existente tali actu, non potest voluntas cessare a medio, quin cesset a fine: si autem vult cessare ab electione & perseverare in intentione, necessarium illi est, ut relinquat priorem intentionem, & eliciat novum actum, quo intendat finem solum, vel per aliud medium; ergo a fortiori idem dicendum est in Deo, cujus actus simplicior & indivisibilior est. Idem argumentum fieri potest de actu indivisibili, quo voluntas vel hominis, vel angelus vult plura objecta materialia distincta, quia non potest manere circa unum, quin maneat circa omnia, nec auferri circa unum, quin auferatur circa omnia propter eandem rationem: ergo idem dicendum erit de libera determinatione Dei ad plures res.

Prima re-  
sponso.

Ad hoc argumentum, qui existimant, hos actus intellectus vel voluntatis, qui terminantur ad plura objecta materialia, habere in se extensionem quandam realem & partium compositionem, facile respondebunt negando assumptum, quia potest ille actus manere secundum unam partem, & non secundum aliam, si alioquin non sit repugnantia ob dependentiam ortam ex connexionem obiectorum inter se: illa vero sententia, quamvis mihi aliquando placuerit, jam non probatur, ut latius dicam inferius quæst. 10. Et ideo aliter respondetur, negando consequentiam. Et ratio differentie est, quia unus actus creatus non potest sine reali sui mutatione terminari & non terminari ad aliquod obiectum, habet enim totam suam entitatem cum habitudine reali ad obiectum & dependentem ab illo; & ideo non potest actus realiter indivisibilis, non terminari ad totum obiectum suum, & consequenter simul etiam destrui circa totum, si realiter minuatur; at vero actus increatus voluntatis divinæ, idem omnino realiter manens potest terminari vel non terminari ad extrinseca objecta; & ideo potest etiam habere eandem terminationem liberam ad unum obiectum cum terminatione ad aliud, vel etiam sine illa, si in obiectis non est connexio.

Secunda  
& melior  
responso.

Quocirca, qui putant hanc terminationem liberam addere aliquid reale Deo, possent juxta proportionem argumenti facti facile dicere, hanc terminationem liberam divinæ voluntatis talem esse, ut unica tantum, & in se omnino indivisibilis sit, qua Deus se determinat ad volendum aliquid ad extra, quicquid illud sit, ita ut unica & indivisibili reali additione simul velit Deus, quicquid extra se vult. Et hoc posito, consequenter dicendum est, ablato quocumque obiecto partiali seu materiali, auferri cætera omnia ex vi præsentis determinationis: necessariumque esse, ut, si unum est futurum sine alio, vel si Deus fuit voliturus quædam, & non alia, haberet aliud decretum, aliamque determinationem liberam. Qui modus dicendi, ut verum fatear, efficaciter improbari non potest in illa sententia, quamvis neque etiam possit satis probari, aut persuaderi, cum ex illa non necessario consequatur, ut supra explicui; nec possit ab auctoribus

illius opinionis sufficiens reddi ratio, cur determinatio libera illius actus, non sit ita indivisibiliter idem cum determinatione necessaria, quin possit hæc omnino eadem manere sine illa; & tamen non possit eodem modo se habere una libera determinatio ad aliam, quando ex parte obiectorum est eadem ratio, scilicet, quod non est necessaria connexio inter ipsa. Adde denique, quod, licet juxta illam interpretationem variandum esset decretum voluntatis quasi materialiter, non tamen simpliciter, & quasi formaliter, id est, quatenus solum dicit determinationem voluntatis ad hoc obiectum, quia, si semper manet idem motivum, & non habet connexionem cum alio obiecto, quamvis tollatur actus, vel determinatio ad unum obiectum, ex hoc præcise ac formaliter non tollitur circa aliud. Quod si ex parte actus propter indivisibilitatem ejus variandus sit actus, illud erit quasi materialiter, & per accidens, nam ex vi prioris motivi semper manebit voluntas in eadem determinatione, etiam si actus, vel id, quod additur voluntati, variari intelligatur. Sed, quidquid sit de illa falsa sententia, quid juxta veram doctrinam dicendum sit, satis constat ex dictis.

Ad difficultatem ergo, in principio positam, si contra hanc ultimam assertionem procedat, negandum est, hunc modum intendendi finem independentem a mediis, provenire ex imperfectione, sed ex motivo, propter quod finis intenditur, & ex modo quo intenditur, quæ interdum talia sunt, ut non habeant necessariam connexionem cum tali medio, quod accidere potest sine ulla imperfectione ex parte ejus, qui intendit finem, aut eligit medium. Unde exemplum in illo argumento adductum ex nostro modo eligendi, & intendendi, non est ad rem, quia illa imperfectio nostra non consistit in sola independentia intentionis ab electione, sed etiam in temporis & actuum successione: nam, si fingamus, me simul habere perfectam cognitionem alicujus finis, & rationem omnium, propter quas est diligibilis, & omnium mediorum, per quæ obtineri potest absque necessaria connexionem cum uno illorum determinate, sed tantum confuse cum aliquo, tunc stante in intellectu huiusmodi actuali cognitione & judicio, posset simul voluntas determinari ad intendendum finem, & ad consequendum illum per hoc medium, illud simul eligendo, & ita cessaret imperfectio inquirendi media post intentionem finis, quæ in argumento proponitur, & nihilominus intentio illa, per se ac formaliter loquendo, independens est, & non necessario connexa cum electione talis medi. Unde ad primam confirmationem, cum dicitur, perfectiorem modum intendendi finem esse cum determinatione medi, respondetur id esse verum respectu actus adæquati, quo voluntas simul tendit in finem & media, quomodo jam declaravimus, Deum simul intendere finem, & certam media; respectu vero actus intentionis, ut præcise terminati ad finem consequendum, id non pertinet ad perfectionem ejus, imo neque est possibile, quia hoc ipso, quod consideratur actus præcise, abstrahitur a medio, ut expresse ac formaliter volito. Ex eo autem, quod motivum finis tale est, ut ex se non requirat hoc determinatum medium, abstrahitur etiam a determinata inclusionem ejus, etiam virtuali: perfectio ergo intentionis sic considerata solum in hoc consistit, quod per eam libere tendat voluntas in finem propter tale motivum, & quod ex vi illius determinetur ad media, vel omnino libere, vel necessario juxta connexionem, vel dependentiam, quam finis potest in executione habere a tali medio. Et hæcenus de ordine actuum divinæ voluntatis inter se.

Tertio facile ex dictis explicari potest ordo inter voluntatem & scientiam visionis, quando nimirum, aliquid intelligatur prius cadere sub scientiâ visionis Dei, quam sub voluntatem, vele contrario: nam si comparatio fiat in eadem re, seu in eodem effectu, sic prius intelligitur esse in voluntate, quam in hac scientia, ut dictum est. At vero respectu diversorum, tunc solum scientia visionis unius effectus præintelligitur antecedere voluntatem alterius, quando ex unius rei existentia sumpta est ratio, seu occasio ad volendam aliam; tunc enim, quia voluntas non potest moveri, nisi ex re cognita, si intelligitur excitari ad aliquid faciendum ex eo, quod aliquid aliud factum vel futurum est, consequenter necessario in-

Ad ratio-  
nem dubi-  
tandi in  
principio  
positam.

Quis ordo  
prioris sit  
& poster-  
ioris in-  
ter scienti-  
am vi-  
sionis &  
volunta-  
tem Dei.

telligi.



telligimus, hoc prius fuisse cognitum scientia visionis, quam aliud fuerit amatum seu electum: seclusa autem hac habitudine & connexionem, seu dependentia, nulla est ratio ordinis prioris & posterioris inter hanc scientiam visionis, & voluntatem Dei, respectu diversarum rerum, quia in re utraque est æterna, & omnino simul; ergo seclusa habitudine, vel dependentia objectorum inter se, non est unde intelligatur unam esse priorem alia.

**Obiectio.** Sed contra, quia voluntas creandi homines est prior quam scientia visionis, verbi gratia, Angeli futuri, & tamen illa duo objecta non habent inter se illam habitudinem, vel connexionem. Antecedens patet, quia voluntas creandi hominem & Angelum, sunt omnino simul; sed voluntas creandi Angelum est prior, quam scientia ejusdem Angeli futuri; ergo. Respondetur primum negando antecedens, & probationis consequentiam, quia cum hæc prioritas solum consistat in habitudine, vel dependentia, etiam si duæ res inter se comparatæ intelligantur esse omnino simul, quia una non pendet ab alia, nec supponit illam, neque e contrario: potest una earum habere habitudinem, vel connexionem cum alia tertia, & sic esse prior vel posterior illa secundum rationem: cum tamen altera non habeat cum illa eam habitudinem vel connexionem, & sic neque sit prior, neque posterior illa. Secundo, si quis velit concedere aliquem modum prioritatis inter illam scientiam & voluntatem, oportet, ut saltem remote & quasi secundario aliquem ordinem vel habitudinem consideret inter illa objecta: voluntas enim creandi hominem per se non habet habitudinem, nec prioritatem respectu scientiæ futuri Angeli: si tamen concipiat voluntatem creandi hominem & Angelum tanquam unicam & eandem, ea ratione intelligere poterit illam voluntatem, ut priorem, quia ut sic habet connexionem saltem ratione objecti adæquati.

**Dubium.** Sed occurrebat hic alia difficultas circa ea, quæ dicta sunt, scilicet, an scientia rei futuræ in Deo sit posterior, quam voluntas ejusdem rei, vel possit intelligi prior: sæpe enim in superioribus diximus voluntatem esse priorem. In contrarium vero est, quia ipsamet voluntas Dei potest prius ratione cognosci, ut futura, quam ut actu posita; ergo ex vi illius scientiæ poterit etiam effectus talis voluntatis præcognosci, ut futurus, priusquam intelligatur voluntas Dei actu velle illum. Sed hæc difficultas late tractata est in dicto opusculo de scientia conditionata futurorum contingentium. Nunc breviter dicitur, quidquid sit de modo, quo Deus intelligitur cognoscere actum liberum suæ voluntatis, semper tamen verum esse, nullam rem creatam posse cognosci a Deo, ut futuram, nisi prius videat voluntatem suam aliquo modo, ut præordinantem aut permittentem rem illam, sive hanc suam voluntatem cognoscat tantum, ut realiter præsentem, sive etiam objective, & per modum futuræ, quod nihil ad præsentem disputationem pertinet.

**Ordo prioris & posterioris in scientia visionis in Deo.** Ultimo tandem potest ex dictis facile colligi, an & quomodo in ipsa scientia visionis unum prius alio possit intelligi: cujus exacta cognitio pendet ex multis, quæ in prima parte traduntur. Nunc breviter ex iis, quæ ibi dicuntur, supponendum est res futuras dupliciter posse præcognosci a Deo, uno modo in prædefinitione, vel permissione suæ voluntatis; alio modo in seipsis, intuendo videlicet res futuras tanquam præsentem vel objective tantum, vel (ut multis placet) secundum realem existentiam. In priori modo cognitionis accommodatur hæc scientia ipsi voluntati, cum enim sequatur voluntatem, illud potest censeris prius in hac scientia, quod fuerit prius in voluntate, quia si prius intelligitur Deus aliquid prædefinire per modum intentionis finis, quam ordinare media, similiter intelligitur in eadem prædefinitione præscire illud futurum ante, quam videat ejus executionem, & hoc modo prius ratione scit Deus Petrum electum fore salvandum, quam sciat illum habiturum merita, per quæ salvandus est. In posteriori autem modo, qui est veluti per quandam intuitionem ipsarum rerum, signa priora & posteriora assignanda sunt ex naturali dependentia, & intrinseca connexionem ipsarum rerum inter se juxta modum dictum de scientia simplicis intelligentiæ, nam quoad hoc eadem est ratio de illa, & de scientia visionis, utraque enim est clara cognitio rei in se, vel ut possibilis, vel ut futuræ, seu potius existentis in tali differe-

Suarez Tom. XVI.

rentia temporis; in utraque ergo id intelligitur esse prius, a quo aliud pendet, illud vero posterius, quod pendet ab alio: quæ vero inter se non habent hujusmodi connexionem, non erunt prius, nec posterius scita.

## SECTIO II.

*Utrum voluntas Incarnationis antecesserit in Deo præscientiam originalis peccati, vel subsequuta fuerit.*

**H**æc quæstio eadem est cum illa, an Incarnationis opus per se primo intentum fuerit a Deo in primo actu, quo voluit ad extra se communicare, an vero solum fuerit ordinatum occasione sumpta ex lapsu humanæ naturæ præviso. Item coincidit cum illa, an Christus Deus homo fuerit præordinatus, & præelectus, & dilectus ante omnem creaturam, & an fuerit primus omnium prædestinatorum hominum & Angelorum, ac denique an prædestinatio Christi fuerit ante, vel post prævisum originale peccatum. Accommodatius autem visum est uti nomine voluntatis, quam prædestinationis, quia prædestinatio proprie, præsertim in doctrina D. Thom. significat rationem mediorum existentium in intellectu, quæ supponit in voluntate electionem, vel dilectionem, in qua radix hujus difficultatis posita est, & in ea melius explicatur.

Prima ergo sententia est, præscientiam originalis peccati antecessisse in Deo voluntatem Incarnationis. Quæ existimatur esse sententia D. Thom. hic art. 3. præsertim ad 4. ad hoc enim propositum dixit prædestinationem supponere præscientiam futurorum. Et ita exponit & sequitur Cajetan. hic, quævis radicem & causam hujus ordinis male declaret, ut ex his, quæ prænotavimus constat. Item docent fere omnes discipuli D. Thom. Capreol. in 3. distin. 1. quæst. artic. 1. conclus. 1. & ad argumentum contra illam, inclinant etiam in hanc sententiam Bonavent. Marfil. Richard. & antiqui alii, qui opinantur, si homo non peccasset, mysterium Incarnationis nullatenus futurum, quos infra referemus.

Fundamentum hujus scientiæ est, quia prima ratio & causa, quæ movit Deum, ut vellent Verbum fieri hominem, fuit remedium humanæ naturæ lapsæ; ergo illa voluntas hanc præscientiam præsupponit; consequentia patet ex supra notatis, ostensum est enim, tunc aliquid esse prius scitum, quam aliud sit amatum, quando ratio amandi illud est aliquid existens, vel futurum in alio, quod non potuit movere voluntatem nisi præcognitum. Antecedens vero variis modis probari potest, primo ex Scriptura, quæ semper rationem Incarnationis sumit ex hominum redemptione Matth. 18. Luc. 19. *Venit filius hominis querere, & salvum facere, quod perierat*; Joan. 3. *Sic Deus dilexit mundum, ut filium suum unigenitum daret, ut omnis, qui credit in ipsum, non pereat, sed habeat vitam æternam*. Ad Galat. 4. *Misit Deus filium suum factum ex muliere, factum sub lege, ut eos, qui sub lege erant, redimeret*. Et 1. ad Timot. 1. *Venit Jesus peccatores salvos facere, &c.* Et hoc significatum est Luc. 15. in parabola de pastore, qui relictis nonaginta novem ovibus venit ad quærendam ovem perditam. Et in veteri testamento variis modis hoc præfiguratum est, primo in Moyse misso ad liberandum populum dura servitute supposita. Exod. 3. Deinde in Jona misso in mare orta gravissima tempestate. Ac denique in Elia & Eliseo, euntibus ad suscitandos pueros mortuos. 3. Reg. 17. & 4. Reg. 4. ex quibus testimoniis sic concluditur: ubique & semper ratio Incarnationis in scriptura nobis traditur ex redemptione nostra, & nulla alia datur, quæ ad hanc non pertineat, vel in illa non contineatur: ergo hæc est prima causa, quæ movit Deum ad hoc mysterium; nec potest nisi voluntarie alia confingi, & ideo in symbolo posita sunt illa verba: *Qui propter nos homines, & propter nostram salutem descendit de cælis*. Ex Conc. Nicæn. Ephes. Chalced. & Toletan. VI. & XI. Dicitur fortasse hanc esse primam causam Incarnationis in carne passibili, non vero mysterii ipsius quoad substantiam ejus: & hoc satis esse ad veritatem Scripturæ, nam, licet Pater per se, & ante præscientiam peccati decreverit Filium suum fieri hominem, tamen præviso peccato voluit etiam, ut hic filius suus, quem incarnandum præviderat, veniret in mundum mortalis & passibilis, ut peccatores salvos faceret. Sed hæc



evasio primum non fugit illam licentiam fugiendi causam aliam priorem sine ullo fundamento. Deinde non satisfacit testimoniis; ex illa enim responsione fit, incarnationem non fuisse factam propter remedium peccati: sed tantum quandam ejus circumstantiam, quod est contra scripturam, & contra expressam definitionem symboli: & sequela patet, quia (ut dicitur) nostra miseria, & necessitas remedii peccati non movit Deum, ut fieret homo, sed ad summum potuit divinam voluntatem jam ad hoc determinatam amplius quasi excitare, & ad talem modum & circumstantiam etiam movere. Confirmatur, & explicatur ex vulgari exemplo, & usu loquendi; nam si quis dicitur ivisse Romam, ut amicum e carcere liberaret, omnes intelligemus illam fuisse causam primariam, & motivam; & si quis decrevisset ire Romam, ut sua negotia perficeret, & cognoscens postea amici necessitatem decerneret etiam illum liberare, & secum deferre pecuniam necessariam, non diceretur vere, causam motivam itineris ejus fuisse amici libertatem, nec simpliciter propter eam causam venisse, sed tantum pecuniam attulisse. Sic ergo, &c. Tandem est conjectura huc spectans, nam cum hoc mysterium sit fundamentum salutis nostræ, & fidei, & ideo reveletur nobis, ut Dei amorem erga nos, & beneficium agnoscamus, credendum est fuisse nobis revelatam primariam rationem, & causam illius, atque eam esse, quæ frequentissime, & passim in Scriptura reperitur.

Probatum secundo ex Patribus. Athan. lib. de human. Verbi, multa habet, & inter alia: *Ut scias ex causa nostra descensus illius occasionem, rationemque fuisse, pravaricationemque nostram Verbi acceperisse clementiam, ut ad nos descenderet, & appareret inter homines Deus*. Certe si divina voluntas & per se, & sine occasione peccati jam incarnationem decreverat, non appareret, quo modo nostra necessitas hanc benevolentiam a Deo eliceret. Unde idem Athanas. ferm. 3. contra Arian. latissime id persequitur exponens id Proverb. 8. *Dominus creavit me*. Ubi post multa concludit pag. 204. *Necessitatem indigentiamque nostram anteriorem esse, quam Christi nativitatem*. Et præmiserat illam esse causam propriam adventus illius. Quod amplius declarans subdit. *Quasublata* (scilicet, necessitate) *carnem non induisse*: Sic etiam Nazian. orat. 36. & 4. Theologiæ: *Humanitatis*, inquit, *suscepta causa nostra est: quid enim aliud causa esse potuisset?* Et orat. 38. quæ est de natali Domini, idem late persequitur. Ibi vero æque docet homines esse ad supernaturalem beatitudinem occasione peccati Angelorum ordinatos, sicut incarnationem occasione peccati hominum. Basiliius homil. in sanctam Christi nativit. *Disce*, inquit, *mysterium, propterea Deus in carne est, ut in ea mortem occidat; propterea Deus est in carne, quia oportebat maledictam hanc carnem sanctificari*, &c. Cyril. Alexand. 5. Thesau. cap. 8. *Sciebat nos mortales futuros propter peccatum, ac ideo ante sæcula constituit, ut Verbum suum homo fieret, renovaretque hominem*. Multaque habet similia lib. 8. contra Julian. Damasc. lib. 3. cap. 1. & lib. 4. cap. 4. *Quia nos melioris participes fecerat, & non custodivimus, assumpsit ipse id quod deterius, nostram dico naturam*, &c. Hanc etiam unicam incarnationis causam agnoscit Chrysost. homil. 2. & 3. in Matth. & proluxe satis ferm. 3. in Luc. idem homil. 1. in Psalm. habetur tom. 1. post expositionem ejusdem Psalm. Theod. etiam in Epitome divin. decret. cap. de Incarnatione: *Homo*, inquit, *factus est, ut a peccato corruptam naturam revocaret: neque enim divinitatis integumento utens suscepit naturam corporis, sed voluit naturam ipsam devictam superare adversarium, & referre victoriam*. In eandem sententiam multa sumi possunt ex Cyril. Jerosolym. catech. 6. Epiph. lib. 1. contra hæres. tom. 1. sub finem. Theophyl. Joan. 3. circa id: *Sic Deus dilexit mundum*, &c. Justin. lib. de vera fidei expositione Gregor. Nyss. lib. de sancto baptismo in principio, & copiose sermone quodam de Christi nativitate. Imo & Dionysius Areopagita cap. 3. de cœlest. hierar. pag. 3. non longe a fine. Ac tandem Iren. lib. 3. cap. 20. 21. & lib. 1. cap. 14. habet illa verba notanda: *Si non haberet caro salvari, nequaquam verbum Dei caro factum esset, & si non haberet sanguis iustorum inquiri, nequaquam sanguinem habuisset Dominus*.

Ubi plane sentit hanc fuisse unicam, & adæquatam

causam. Ex patribus Latinis Leo Papa frequenter sermonibus de nativitate & passione, totum negotium incarnationis in nostrum remedium, ut in primariam causam revocat; & ferm. 3. Pentecost. eandem rem tractans concludit: *Si homo in natura sua perfectione, & honore, in quo creatus est, permansisset, creator hominum creatura non fieret, neque æternus temporalitatem subiret, neque formam servi in similitudinem carnis peccati assumeret*. Idem August. conc. 1. in Psalm. 68. circa id: *Infixus sum in limo*, &c. Sed ibi non tam de incarnatione, quam de passione loquitur; conc. tamen 2. in Psalm. 36. *Si tu*, inquit, *o homo non desereres Deum, non fieret propter te homo Deus*; & ferm. 9. de verbis Apostoli: *Nulla causa fuit veniendi Christo Domino, nisi peccatores salvos facere*; & ideo ferm. 8. dixerat: *Si homo non periisset, filius hominis non venisset*; & lib. 1. de peccat. merit. cap. 26. post recitata multa Scripture testimonia concludit. *Quibus omnibus sufficienter apparet Dominum Jesum Christum non aliam ob causam in carne venisse, nisi ut per hanc dispensationem misericordissime gratia eos ad cape-sendum regnum cælorum vivificaret, liberaret, redimeret, qui prius fuissent in peccatorum morte*, &c. Verum est August. interponere hæc verba: *Non aliam ob causam in carne venisset, ac forma servi accepta factum obedientem usque ad mortem*. Sic etiam lib. 3. Hypognos. circa principium dicit: *Quid opus erat Deo, si status integer nature maneret humane, carnem suscipere nostram?* Sed addit statim: *Contumelias sustinere, mortem perpeti?* Gregor. lib. 4. in 1. Reg. cap. 1. nullam aliam esse incarnationis causam docet his verbis. *Nisi Adam peccasset, Redemptorem nostrum carnem suscipere nostram non oporteret*. Idem fere 17. Moral. cap. 18. Hieron. in cap. 7. Eccles. *Quia homo*, inquit, *infixus in limo peccati indiguit majorem auxilio, idcirco venit ipsa sapientia*. Ambros. lib. de Incarnat. Domini sacram. cap. 6. *Que erat causa incarnationis, nisi ut caro, que peccaverat, redimeretur?* Unde Tertul. lib. de carne Christi, quærens, cur Deus nostram, & non Angelorum naturam sumperit, hanc unicam assignat causam, quia nostra natura erat redimenda, non angelica, sentiens hanc unicam esse rationem tanti mysterii faciendi. Unde etiam Bernard. ferm. 1. in vigil. Nativit. *Quare*, inquit, *filius Dei factus est homo, nisi ut homines faceret filios Dei?* Idem sumi potest ex Cyr. ferm. de passione Domini, Prosp. lib. sent. August. 3. 14. Ansel. utroque libro, Cur Deus homo, & de concept. Virgin. cap. 17. Lactan. lib. 4. de vera sapient. cap. 24. & 25. Hi omnes nullam aliam causam agnoscunt; nec possunt hæc testimonia de adventu in carne passibili explicari, cum de ipsa incarnatione quoad substantiam ejus loquantur absolute, quin etiam multa excludunt expresse omnem aliam causam, hacque deficiente, assumptionem carnis simpliciter negant. Unde hoc sensu videtur canete Ecclesia Sabbato sancto: *O vere necessarium Ada peccatum*, &c. Quia nimirum, præbuit occasionem & causam ad tantum mysterium necessariam. Unde ibidem dicitur: *Quid enim nobis nasci profuit, nisi redimi profuisset?* Quasi indicans ablato commodum redemptionis supervacaneum fore tantum mysterium. Ultimo Petr. Chrysost. ferm. 150. *Si non impleisset*, inquit, *carnis ordinem, carnis in illo esset otiosa susceptio*: impleverit autem carnis ordinem, ut ibidem explicat, est passionibus carnis subijci, quasi dicat assumptionem carnis impassibilis futuram fuisse otiosam, & sine causa.

Tertio probatur hæc sententia ex effectibus, per quos etiam solet nobis innotescere divina voluntas. Si enim omnia, quæ Deus in hoc mysterio perficiendo servavit, considerentur, non obscure indicant primum motivum illud efficiendi fuisse hominum redemptionem. Primo, quod natura humana potius, quam Angelica assumpta est, ut supra Tertul. Secundo, quod filius potius, quam aliæ personæ carnem assumpsit, ut per eum homo redimeretur, qui est imago & similitudo patris, quia homo appetendo Dei similitudinem, & imaginem peccaverat, ut dixit Bernard. sermon. 1. de adventu, vel ut Athanas. ait libro de humanitate Verbi: *Ut per quem rerum naturam condidit Pater, per eundem quoque eam incolumem, & salvam præberet*. Tertio in circumstantiis temporis, loci, & modi, &c. omnia enim hæc, & similia fuerunt accommodata ad nostram redemptionem: ex circumstantiis enim



enim colligimus substantiam rei, & ex mediis finem. Quarto videmus statum innocentie institutum independentem a Christo, cujus signum est, quia in eo constitutus fuit Adam caput totius naturae humanae, si autem jam tunc Christus fuisset praedestinatus, quorsum praeter tantum caput aliud extitisset.

Quarto probari potest ex conjecturis & congruentiis, quia scilicet tantum opus non debuit ordinari, nisi magna urgente causa & necessitate, sic enim omnia divina attributa magis in eo relucent. Charitas, quae inimicis tantum contulit beneficium. Bonitas, quae ex tanto malo tanti boni sumpsit occasionem. Justitia & misericordia, quae per se patent ex supradictis. Liberalitas, quae suo tempore opportunissime bona communicat. Sapientia, quae daemonis astutiam non potentia solum, sed summa industria superavit. Denique ipsius Verbi majestas, nam cum sit supra totius creaturae ordinem, non debuit quasi in ordinem redigi, ut solum propter perfectionem universi conjungeretur creaturae, sed tantum propter sui patris injuriam vindicandam.

**Objecio.** Quod si contra hanc sententiam objicias, quia Christus dicitur esse causa finalis nostrae gratiae, & justitiae, ut in Trident. sess. 6. cap. 7. Unde fieri videtur in genere causae finalis fuisse prius in voluntate Dei, quam reliquos homines, nam alii propter ipsum potius amati sunt in ejusque gloriam, quam ipse propter alios; ergo multo magis voluntas Dei ad Christum, seu ad mysterium incarnationis antecessit voluntatem permittendi hominum lapsum, & consequenter praescientiam illius. **Respon.** Respondent distinguendo, nam aliud est considerare in Christo, quod sit Deus homo, & mereatur, ac satisfaciatur aliud vero est, quod ipse Christus honoretur & glorificetur ab hominibus. Sub priori ergo ratione finis incarnationis quoad esse, & mereri est remedium peccati, atque hominum bonum, sub posteriori ratione honor & gloria. Verbi incarnati est finis remedium peccati, & omnis gratiae hominibus datae, ut Tridentinum dixit, & hoc satis est, ut Christus dicatur finis nostrae justitiae, & redemptionis, ad hoc enim non est necesse nostram justificationem fieri, ut Christus sit, vel ut sit homo, sed ut honoretur & glorificetur; sicut etiam Deus est finis rerum, non quod talia fiant, ut Deus sit, sed ut Deus honoretur, non enim semper finis dicitur ille, qui per media, aut actionem fit, sed etiam ille, cui comparatur, vel in cuius utilitatem fit id, quod intenditur: ut medicinae finis est sanitas, & homo qui sanatur, illa ut finis factus, cujus gratia applicantur media, hic ut finis, propter cujus utilitatem sanitas intenditur, quo modo juxta veriore explicationem distinxit Aristot. 2. de anima, text. 35. & 37. duplicem finem, quo, vel cui, finis enim cui dicitur is, in cuius gratiam, vel utilitatem res fit. Finis vero quo est id, ob quod fit, quoque alius perficitur, vel honoratur: qui etiam dici solet, cujus gratia, his autem finibus saepe accidit, ut sint sibi invicem fines sub diversa illa ratione. Potentia enim est propter operationem, ut propter finem factum: ipsa vero operatio & res per illam facta est saepe propter ipsam potentiam, ut scilicet illam perficiat, & actuet. Et rex est propter regnum, ut illud regat, & in pace & ordine tueatur: ipse vero est, in cuius gloriam & honorem totius regni bonum redundat.

Denique si quaeris ab auctoribus hujus sententiae, cur veluti expectaverit Deus praescientiam peccati ad ordinandum & volendum tantum mysterium. Relicta sententia Cajetani supra impugnata, qui melius sentiunt, respondent non esse aliam rationem efficacem, nisi liberam voluntatem Dei, quae nobis in Scriptura significata est. Unde juxta opinionem hanc talis constituitur ordo in praedestinatione Christi respectu aliorum hominum. Primo voluit Deus creare homines (ut Angelos nunc omittamus) ut se fruerentur in aeterna, & supernaturali beatitudine. Secundo ut possent ad eam beatitudinem perducere, eamque mereri, voluit illis conferre justitiam & supernaturalia auxilia in Adamo. Tercio voluit permittere peccatum Adae. Quarto praevидit illud. Quinto voluit remedium adhibere. Sexto elegit incarnationem ut optimam, & accommodatissimam medicinam contra peccatum. Et juxta hunc ordinem noluit hoc bonum nisi occasione peccati, & hoc sensu dici potest occasionatum, ut Scotus loquitur, qui hoc infert tanquam inconueniens. Quod tamen in ri-

Suarez. Tom. XVI.

gore nullum est, non enim dicitur occasionatum, quia in se non sit maximum bonum, & per se amabile etiam occasione peccati: sed quia Deus noluit illud bonum, nisi oblata tali occasione, quod pro libertate sua facere optime potuit, ut de aliis operibus & mysteriis gratiae facile credi potest, ut de mysterio Eucharistiae, & similibus.

Secunda sententia affirmat, Christum Dominum fuisse praedestinatum, seu electum ante praescientiam originalis peccati, atque adeo voluntatem incarnationis antecessisse voluntatem permittendi peccatum Adae. Ita tenet Alexand. Alenf. 3. part. quaest. 2. membr. 13. Albert. in 3. distin. 10. art. 4. Scotus distin. 7. quaest. 3. distin. 19. §. In ista quaestione, ac fere alii, qui sentiunt, etiam si homo non peccasset, incarnationis mysterium fuisse futurum. Fundamentum hujus sententiae est, quia existimat Deum non voluisse primo incarnationem ob remedium peccati, seu oblata occasione peccati, sed propter seipsam, seu quia per se est aptissimum opus ad communicandam & manifestandam divinam bonitatem, quod fundamentum infra latius tractabimus. Modus autem explicandi hanc sententiam non est idem apud omnes. Scotus enim in tertio distin. 19. & distin. 32. quaest. unica artic. 3. post actum scientiae simplicis intelligentiae, primum actum liberum voluntatis divinae videtur ponere electionem praedestinatorum, quam dicit fuisse ante praescientiam originalis peccati. In secundo signo dicit Deum praevидisse peccatum, in tertio ordinasse redemptionem, Christum autem ponit primum praedestinatum in primo signo cum ceteris. Alii vero ut Catherinus primam voluntatem Dei dicunt fuisse communicare sese creaturis, & in secundo signo elegisse incarnationis opus, & tertio propter Christum voluisse creare reliqua omnia, & inter alia ipsos homines, & dare illis originalem justitiam. Quarto voluit permittere peccatum. Quinto praevидit illud. Sexto voluit redemptionem per Christum. Alii denique existimant Deum in primo signo suae liberae voluntatis voluisse se perfecte communicare condendo universum quoddam constans ex omnibus gradibus, & ordinibus rerum, naturae, & gratiae, & unionis hypostaticae: ita tamen, ut esset connexio, & ordo inter res omnes, ita ut inferiora superioribus ministrarent: superiora vero inferioribus praesentent: & ita in hoc primo signo voluit Christum tanquam caput totius universi. Secundo ad exequendam hanc intentionem voluit (ut alia omittam) producere humanum genus in Adamo, & illi conferre justitiam, &c. Tercio voluit permittere peccatum. Quarto praescivit. Quinto ordinavit redemptionem per Christum. Et inter hunc ac praecedentem modum forte res concepta eadem est, solum est diversitas in modo illam explicandi. Quid autem eligendum sit, dicemus inferius.

Inter has sententias duae aliae veluti mediae excogitari possunt. Tertia itaque sit, voluntatem incarnationis posse comparari, vel ad voluntatem permittendi peccatum Adae, vel ad praescientiam ejusdem peccati. Si voluntas ad voluntatem comparatur juxta opinionem hanc, non est una altera prior, sed omnino simul, quamquam mysterium incarnationis fuerit praedefinitum per primam illam voluntatem, qua voluit Deus perfectum universum condere, in quo convenit haec sententia cum praecedenti. Ratio vero hujus partis est, quia supposita praescientia simplicis intelligentiae supra explicata, qua Deus cognovit ut possibilia, creationem Angelorum & hominum, mysteria gratiae & unionis hypostaticae, & permissionem peccati, &c. non est necesse intelligere Deum prius unum voluisse, quam aliud, sed unica simplicissima voluntate haec omnia voluisse, quatenus ex eis totum universum quasi unum quid absolutum & perfectum coagmentatur. Confirmari hoc potest & explicari, quia voluntas incarnationis, & voluntas permittendi peccatum, non sunt ita inter se connexae, ut una aliam supponat, vel ab illa supponatur: neutra enim est causa, vel ratio alterius, quia nec voluntas incarnationis propter peccatum est, ut haec sententia supponit, nec voluntas permittendi peccatum propter incarnationem, ut per se notum videtur; neutra ergo est prior alia. At vero si illa voluntas ad praescientiam peccati comparatur, haec considerari potest dupliciter, primo per modum scientiae visionis, quae subsequitur voluntatem,



& sic est posterior, ut per se constat, vel per modum simplicis intelligentiæ, per quam cognoscuntur futura, vel sub conditione modo supra explicato, vel absolute, si ipsamet divina voluntas libera præsciri etiam intelligatur per modum futuræ, ut superius etiam explicatum est, & sic antecedit præscientiæ voluntatem; ex quibus satis etiam constat hujus sententiæ fundamentum.

Opinio

Quarta sententia est, mysterium unionis hypostaticæ fuisse præordinatum a Deo in illo primo signo, quo se voluit extra communicare; quia illud decretum fuit perfectum, & ideo comprehendit omnes gradus & ordines rerum: in quibus supremum locum tenet unio hypostatica, per quam fit summa divinæ bonitatis communicationis ut sic non fuisse in illo signo præordinatum, sed in alio posteriori signo post prævisum originale peccatum: nam unio hypostatica per se abstrahit & a persona Verbi, & a natura humana, quam incarnatio, ut hoc nomine significatur, includit: unde hypostatica unio secundum se prior est, quam incarnatio, & independens ab illa, & per se sufficiens ad completam Dei communicationem, quæ in primo illo signo intenta est: in illo ergo tantum fuit decretum, ut Deus assumeret intellectualem naturam, abstrahendo ab hac vel illa persona, & una aut pluribus, & a natura humana vel angelica; in inferioribus enim non erat decentia, ut in eis hæc unio fieret. Et hoc est fundamentum hujus sententiæ, scilicet quia motivum, ob quod Deus in illo primo signo potuit decernere seu definire hoc mysterium, non petebat hanc incarnationem, sed solum unionem hypostaticam, ut explicata est. Aliunde vero omnia motiva & rationes, ob quas Deus voluit hanc unionem hypostaticam in hac natura, & in hac persona potius, quam in aliis, sumpta sunt ex occasione peccati, & ex remedio ejus: ergo voluntas incarnationis quoad hanc determinationem non antecessit, sed subsecuta est, præscientiæ peccati. Sicut juxta Scoti sententiam, quamvis incarnatio quoad substantiam præordinata sit in primo signo ante præscientiam originalis peccati quoad passibilitatem vero definita est in posteriori signo post præscientiam ejusdem peccati, quia tota occasio & ratio passibilitatis orta est ex peccato: sic ergo loquitur hæc opinio non tantum de passibilitate, sed etiam de determinata ratione unionis hypostaticæ quoad talem naturam & talem personam. Ex quo infertur primo juxta hanc sententiam Deum quidem primo ac per se voluisse, ut Verbum fieret homo propter redemptionem hominum; quod tamen Deus assumeret naturam intellectualem ut sic, non primo fuisse volitum a Deo propter redemptionem, sed per se propter complementum universi. Atque Filium Dei venisse propter nos, & propter nostram salutem, & similiter factum esse hominem propter nos, Deum tamen neque venisse propter nos, neque assumpsisse intellectualem naturam ut sic propter nos. Secundo infert hæc opinio, Deum in volenda unionem hypostaticam nullum specialem amorem ad homines ostendisse, magis quam ad angelos, atque adeo primum decretum de unionem hypostaticam faciendam, nullo modo fuisse ortum ex speciali hominum amore, vel (ut proprius loquar) non fuisse specialem hominum amorem, sed hunc habuisse tantum locum in posteriori voluntate, qua voluit Deus illam unionem fieri in tali persona & natura ex illo speciali amore, quem ad homines jam lapsos habuit, cum voluit illos redimere. Tercio denique infert hæc opinio, quod si homo non peccasset, ex vi præsentis decreti, Deus quidem alicui naturæ intellectuali hypostaticæ uniretur, Verbum tamen non incarnaretur ex vi præsentis decreti. Sed oporteret aliud decretum habere Deum circa modum, quo hypostatica unio tunc esset perficienda. Quæ tres illationes pertinent quidem ad sequentes sectiones, quartam scilicet, & quintam: hic autem breviter tactæ sunt, ne oporteat sententiam hanc per partes referre & examinare, quam non invenio in antiquis auctoribus, sed a quodam recentiori excogitata esse videtur.

Corollaria hujus sententiæ.

In hac quæstione unum est, quod ad rem maxime pertinere videtur, scilicet, an hoc mysterium fuerit intentum a Deo in prima voluntate, qua voluit universum perfectum condere, sicut creatio angelorum & hominum, & justificatio, & æterna beatitudo per se intenta fuit: an vero solum quasi per accidens post permissum,

& prævisum peccatum; & ex hujus decisione pendent alia, quæ postea tractabuntur. Dico ergo primo, Deum primaria intentione, & prima voluntate, qua voluit se creaturis communicare, voluisse mysterium Incarnationis, & Christum Dominum Deum simul & hominem; ut esset caput & finis omnium divinatorum operum sub ipso Deo. Hanc conclusionem præter auctores citatos docuit elegantissime Rupertus Abbas lib. 3. de gloria & honore Filii hominis in Matth. & lib. 13. de gloria Trinitatis, & processione Spiritus sancti cap. 20. ubi inter alia inquit: *Religiose dicendum, reverenterque est audiendum, quia propter hunc hominem gloria & honore coronandus Deus omnia creavit*; & infra: *Rectius dicitur non hominem propter Angelos, sed propter quandam hominem Angelos quoque factos esse, & cætera omnia*. Et hoc confirmat testimoniis Proverb. 8. & ad Hebr. 2. Eandem opinionem sequitur Cyril. lib. 5. Thesau. cap. 8. Et pro eadem referri potest Irenæus libr. 3. cap. 33. & August. lib. 1. de nupt. cap. 21. quorum patrum verba, & sententias in sequentibus dubiis commodius tractabimus, & ex aliis patribus hoc ipsum confirmabimus. Refert etiam Galatin. lib. 7. de Arcanis cap. 2. & 4. esse communem traditionem Hebræorum Deum propter amorem Messie omnia creasse. Ac propterea Isaiæ 4. vocati germen, & Psalm. 67. vocari fructum terræ, quia sicut hæc sunt quasi finis, & pulchritudo arboris, ita Messias totius universi. Et quamquam in scriptura non habeatur expresse, potest tamen magna cum probabilitate colligi primo ex veteri testamento, Proverb. 8. *Dominus possedit me in initio viarum suarum*. Vel, ut septuaginta transtulerunt: *Dominus creavit me initium viarum suarum*. Hæc enim verba de sapientia incarnata exponunt fere omnes antiqui patres Græci & Latini. Clemens Romanus lib. 5. constit. Apostolic. cap. 19. & Concil. Hispanen. cap. 13. Justinianus Imperator in edicto fidei ad Joan. 2. ubi in eadem sententiam citat Basilium, qui eam habet libr. 4. contra Eunomium, & eandem habet Athanasius serm. 3. contra Arianos, & in expositione fidei, Gregor. Nazianz. orat. 36. circa principium. Cæsarius dialogo II. & Gregor. Nyssenus lib. de fide ad Simplicium. Et Cyril. Alexandr. lib. 5. Thesau. cap. 4. & 8. qui expresse inquit: *Querendum est, quis est, qui dixit, Dominus creavit me, & respondet, Christus jam homo factus*. Idem Chrysostomus serm. de Sancta Trinitat. & Damascenus lib. 4. cap. 19. ubi dicit quædam dici in Scriptura de Christo ante humanitatem assumptam vaticinandi modo, interdum ut futura, interdum vero ut præterita, ut est illud: *Dominus creavit me*: & illud: *Propterea unxit te Deus Deus tuus*. Ubi aperte sentit utrumque esse dictum ratione humanitatis. Idem docet Hieronym. lib. 2. in Mich. in principio, & super ad Ephes. 2. August. serm. 58. de verbis Domini, & lib. 1. de Trinitat. cap. *Secundum formam*, inquit, *Dei ante omnes colles genuit me, secundum formam servi Dominus creavit me initium viarum suarum*. Idem Hilarius 12. de Trinitat. & Ambros. 1. de fide, cap. 7. & Fulgentius lic. ad objectiones Arian. in responsione ad tertiam.

Denique Epiphanius in Ancorato, & hæres. 69. dicit, hanc esse expositionem magnorum Patrum, neque esse rejiciendam. Cum enim Ariani abuterentur hoc testimonio, ut probarent Filium Dei esse creaturam, Sancti respondebant illud fuisse dictum ratione humanitatis, secundum quam interdum creatus dicitur, ut notavit Idatius Clarus, libro contra Vatiman. Arian. tom. 5. Bibl. sanct. ex illo ad Ephes. 4. *Induite novum hominem, qui secundum Deum creatus est*. Et ad Hebr. 4. *Qui fidelis est ei, qui creavit illum*. Et quamquam vulgata non habeat Verbum, *creavit*, sed *possedit*. Et Hieronymus supra, & in epist. 139. ad Cyprianum in tom. 3. ita proprius ex Hebræo verti doceat: non tamen refert, quia etiam dicitur Deus possidere ea, quæ creat, imo illorum propriissime dicitur esse dominus, & ita ad hoc ipsum ponderavit Ambrosius verbum illud: *Dominus possedit me*. Si enim filius, ut Deus loqueretur, non dominum vocaret, sed patrem. Dicitur ergo Christus in quantum homo conditus ab æterno, *In initio viarum Dei*, non secundum rem, sed secundum propositum, & intentionem Dei; nec solum significatur utcumque fuisse æterno Dei consilio conditum (hoc enim commune est omnibus rebus, quæ in tempore creantur), sed singulari quodam modo,

Christus primus prædestinatus & finis omnium operum divinarum.



do, nimirum quia in ipsa mente Dei primatum habuit, & conditus est: *In initio viarum Dei*, quod inferius illis verbis declaratur: *Ab aeterno ordinata sum, & ex antiquis antequam terra fieret*. Voluit enim sapiens eo loco laudare hanc sapientiam incarnatam ab antiquitate & origine; & quia in re non prius producta est secundum humanitatem, quam aliae res creatae fuerint, ideo illam considerat in aeterno Dei consilio, in quo antequam quidquam factum esset, ipsa fuit initium viarum Dei. Verum est nonnullos ex citatis patribus, viarum nomine opera redemptionis intelligere; sed (ut rectius Athanasius intellexit) viarum nomine Dei opera intelliguntur; sicut enim via vestigiis efficitur, ita Dei effectus vestigia Dei & viae quaedam sunt, quae ad ipsum nos ducunt, & ideo Psalm. 144. dicitur: *Iustus dominus in omnibus viis suis*. Et statim exponitur: *Et sanctus in omnibus operibus suis*, Et Psalm. 24. *Universa via Domini dicuntur misericordia & veritas*, Quia in omnibus Dei operibus hae virtutes potissimum relucunt. Et ideo Sapiens quasi explicans has vias subdit; *Antequam quidquam faceret a principio, & antequam terra fieret*. Et cum hac expositione concordat similis locus Eccles. 24. *Ab initio & ante saecula creata sum*, &c. Ubi post similia verba tandem concludit: *Posuit David puero suo, excitare regem ex ipso fortissimum, & in throno honoris sedentem in sempiternum*, Quae verba de solo Christo intelligi possunt, de quo Isai. 2. dicitur: *Super regnum David, & super solum ejus sedebit usque in sempiternum*. Caetera ergo de Christo accommodatissime intelliguntur. Et quamquam non negem posse habere hae testimonia alias expositiones literae consentaneas: non est autem, cur hae rejiciatur, quae & literae quadrat, & ab antiquis patribus indicata est.

Secundo probatur ex novo testamento, praesertim ex Paulo ad Coloss. ubi de Christo homine Deo promiscue loquitur, & ut Deum vocat illum *Imaginem Dei invisibilis*, ut hominem vero, vocat *Primogenitum omnis creaturae*. Ita enim intellexit verbum illud Concilium Sardicense epistola ad omnes fideles, & sumitur ex Concil. Ephes. tom. 1. cap. 4. & 5. & tom. 4. cap. 26. ubi Christus dicitur unigenitus, ut Deus, primogenitus, ut homo. Quam expositionem habent eo loco Glossae, Anselmus, & Hieronymus, qui dicit vocari Christum primogenitum, non tempore, sed honore. Et Chrysost. homil. 15. circa id ad Rom. 8. *Ut sit ipse primogenitus in multis fratribus*; Hae, inquit, ita capias, ut de dispensatione illius dicta esse intelligas: nam secundum divinitatem unigenitus est, per humanitatem autem frater noster effectus est. Ut loquitur Nazianz. orat. 43. post medium. Et ideo Augustinus contra epistolam fundamenti cap. 27. dicit, *imperite & impie queri fratres Christo, nisi secundum quod homo apparere dignatus est*. Rationem autem, propter quam Christus ut homo est primogenitus omnis creaturae, subdit Paulus citato loco ad Coloss. 1. dicens: *Quoniam in ipso condita sunt universa, & ipse est ante omnes, & omnia in ipso consistant, & ipse est caput corporis Ecclesiae*. Ac denique concludit, *Ut sit ipse in omnibus primatum tenens*. Ubi (ut Chrysostomus, & alii intelligunt) plane loquitur de Christo ut homine, nam ut sic est caput ecclesiae, & primogenitus ex mortuis, ut ibidem dicitur: ergo ut sic primatum in omnibus habet etiam in aeterno consilio & mente Dei. Ac denique in eo etiam ut homine condita sunt universa. Ex quo verbo sumitur nova confirmatio, nam Christus, ut Deus homo, est finis, propter quem, & in cuius honorem Deus omnia creavit, hoc enim significat verbum illud: *In quo condita sunt universa*. Et eodem modo dicitur ad Hebr. 2. Christum esse eum propter quem omnia, ut supra notavit Rupert. & ibidem exponit Anselm. Et idem sumitur ex verbo illo 1. ad Corinth. 3. ubi Paulus ad iustos & praedestinatos loquens inquit: *Omnia vestra sunt, vos autem Christi, Christus vero Dei*. Dicuntur autem omnia esse electorum in ratione finis, quia propter eos omnia creata sunt, ut salutem & gloriam consequantur.

Eadem ergo ratione tam ipsi praedestinati, quam omnia alia, Christi esse dicuntur, propter quem tamquam propter finem proximum creata sunt omnia. Et ideo ad Hebr. 1. Christus dicitur *constitutus haeres universorum*, quod de Christo ut homine necessario intelligendum est, nam, ut Deus, non est haeres, sed natura sua dominus. Unde etiam quod subditur, *per quem fecit & saecula*,

eidem homini Christo, per quem Pater nobis locutus est, attribui videtur. Et ita Chrys. hom. 71. in Joan. dicit omnia operari Patrem propter gloriam filii, & inferius tam hic quam q. 24. ostendimus, Christum esse causam finalem nostrae praedestinationis. Ex quibus idonea satis ratio conficitur, quia finis est, qui primo cadit in voluntatem operantis; si ergo Christus est finis operum Dei, sane per primariam voluntatem amatus ac intentus fuit interea, quae ad extra Deus voluit operari. Et simile argumentum sumi potest ex ratione causae exemplaris, quod statim commodius explicabimus.

Tertio probari potest haec conclusio ex ipsis effectibus Dei, considerato in eis optimo & sapientissimo providentiae modo. Supponimus enim ex supra dictis, ante omnem liberam voluntatem esse in Deo scientiam, per quam cognoscit, quid unaquaque causa tam necessaria quam libera operatura est, si in hoc vel illo statu cum hac vel illa conditione creetur. Unde fit ante voluntatem incarnationis, vel creationis, vel permissionis peccati, praescivisse Deum, si creasset mundum, Angelos & homines cum tali gratia, &c. & permetteret peccatum, futurum fuisse, ut totum genus humanum in primo homine laberetur, sibi quae offerendam esse occasionem, ut optimo modo sapientiam, bonitatem, misericordiam, & iustitiam denique patefaceret. Jam ergo constituta in Deo scientia hac optime intelligitur, potuisse illum, primum omnium intendere non solum universi creationem secundum esse naturae gratiae & gloriae in hominibus & angelis: verum etiam secundum esse unionis hypostaticae in Christi humanitate, quamquam in re ipsa esset executurus hoc mysterium post oblatam occasionem peccati, quod totum est evidens supposita dicta praescientia, quoniam ordo intentionis antecedit ordinem executionis, ut supra declaratum est. Ergo intelligendum est Deum voluisse hoc mysterium, primo quia hoc modo conciliantur optime omnes scripturae. Quaedam enim significant Christum esse primo dilectum, & amatum tamquam finem omnium operum Dei. Aliae vero indicant Verbum sumpsisse carnem oblata occasione peccati: hae autem optime consonant, si priores ordinem intentionis, posteriores vero executionis explicuisse intelligantur, id est, si intelligamus in prioribus locis praecise declarari amorem Dei ad Christum, & intentionem ejus per modum finis aliarum rerum, in aliis vero locis explicari adaequatum decretum divinae voluntatis, etiam ut extenditur ad modum admirabilem exequendi tale mysterium. Secundo hoc ita explicatur; nam qui prudentissime operatur, non solum ex praescientia, sed etiam ex praevia intentione finis operatur: sed videmus in re ipsa oblata occasione peccati dedisse Christum in remedium ejus; ergo intelligendum est Deum non voluisse hoc mysterium solum, quia occasio peccati oblata est & praecognita, sed potius e contrario, ideo permisit peccatum, ut ex illo occasionem sumeret optimo modo se communicandi hominibus; ergo jam praedestinavit & voluerat hoc mysterium, & ex intentione illius voluit permittere peccatum. Exemplum sumere possumus ex scriptura, cum Deus Joseph constituit Principem Aegypti, utendo ad hoc bonum mala voluntate fratrum ejus, qui eum venderunt. Non est enim existimandum Deum solum post praevium illud peccatum futurum voluisse Joseph fieri principem Aegypti, sed e contrario potius, quia statuerat Deus eum facere principem Aegypti, ideo voluit permittere peccatum, & illo malo bene uti ad suum finem consequendum: est enim haec multo altior ratio providentiae, & magis digna Deo, quam in peccatis crucifigentium Christum, & interficientium martyres, & aliis similibus videre licet. Et hoc sensu docet frequenter August. Deum non permittere peccata, nisi ut eis bona eliciat, ut patet in Enchir. c. 96. & alias. Tertio potest hoc aliter explicari: quia videmus totius universi creationem, dispositionem, & gubernationem ad hoc tendere, ut numerus praedestinatorum impleatur, & tandem omnia terminentur stabilito regno beatitudinis perpetuo duraturo ex hominibus & Angelis composito, quorum princeps & caput sit Christus; ergo optimo & prudentissimo ordine intelligimus primam voluntatem & intentionem suam posuisse Deum in hoc felicissimo regno praedestinatorum, & propter illud prius fundandum, deinde pau-



paulatim augendum, ac tandem consummandum, voluisse conferre prius gratiam & iustitiam, deinde permittere peccatum, postea dare remedium, ac denique applicare illud his, quibus erit efficaciter conferendum. Consequentia patet ex illo principio, quod in prudentiori modo operandi executio respondet intentioni. Et quæ sunt postrema in executione, præsertim si sint per se amabilia, & in ipsa executione principaliter intenta (quod dico ut poenas damnatorum excludam) intentione priora sunt. Et confirmari potest, nam propter similem rationem docent cum Augustino fere omnes Theologi, electionem prædestinatorum ad gloriam esse priorem ipsa prædestinatione seu ratione mediorum, adeo ut permissio peccati, quæ aliquo modo confert ad executionem illius electionis, hac ratione censeatur posterior illa & effectus ejus. Et propter eandem rationem proportionaliter applicatam, supposita supra dicta scientia conditionata futurorum contingentium probabiliorum existimo communem sententiam Theologorum asserentium electionem hominum prædestinatorum antecessisse permissionem originalis peccati, quam licet D. Th. nunquam clare docuerit, in eam tamen magis inclinare videtur 1. p. q. 23. art. 3. 4. & 5. & clarius q. 6. de verit. art. 2. ad 9. Et ratio est clara ex dictis, quia permitiendo peccatum originale, veluti parabatur via, ut tales homines salvarentur infallibiliter supposita dicta providentia & præscientia Dei; ergo signum est totum hoc cecidisse sub dictam electionem hominum salvandorum, & fuisse effectum ejus, hæc est enim quædam ratio altior providentiæ. Et saltem de Adamo non videtur probabiliter negari posse, quin electio ejus ad gloriam antecesserit permissionem peccati ejus, imo & voluntatem dandi illi gratiam & iustitiam, in qua creatus est, nam in re ipsa hæc omnia fuerunt media, per quæ consecutus est salutem; ergo omnia fuerunt media prædestinationis, & electionis; in aliis autem prædestinatis omnibus, omnia media similia sunt effectus electionis eorum, cur ergo non multo magis idem erit in primo homine, quem Deus creabat, ut torius humani generis parens existeret? Ac denique de Angelis sanctis dubitari non potest, quin fuerint electi ante permissionem alicujus peccati, & fortasse permissionem peccati in malis Angelis fuisse effectum electionis bonorum, quatenus malorum peccatum fuit bonis occasio majoris meriti & gloriæ: quod totum credendum est cecidisse sub intentionem Dei, quia est altior ratio providentiæ, & magis consentanea sapientiæ ejus: ergo multo magis idem sentiendum est de Christi Dei & hominis electione seu prædestinatione: tum quia etiam per peccati permissionem veluti parata fuit via, ut efficax Christi electio ad effectum perduceretur; tum etiam quia non est, cur credamus, Deum in prima illa voluntate, qua æterno suo consilio statuit de regno beatitudinis fundando, de membris prius decreverit, quam de capite; tum denique quia ipsa ærum executio ostendit priorem intentionem, in Deo maxime, qui prudentissimo modo operatur. Videbimus autem omnes effectus gratiæ Dei, ipsam etiam permissionem peccati redundare in gloriam Christi; ergo signum est hanc fuisse primo intentam.

Et ex hoc discursu sumitur nova confirmatio, quæ potest esse quarta probatio conclusio, quia Christus Dominus causa exemplaris & finalis est prædestinationis & electionis aliorum; sed electio hominum, & prædestinatio intelligitur antecedere permissionem peccati, & per se pertinere ad eam voluntatem, qua Deus voluit seipsum hominibus communicare; ergo multo magis electio & prædestinatio Christi ad eandem voluntatem pertinet, & in ea primum locum obtinet, tamquam causa cæterorum. Majorem quoad utramque partem docet D. Th. infra q. 24. art. 3. & 4. sumitur ex illo ad Rom. 8. *Quos præcivit, & prædestinavit conformes fieri imaginis Filii sui, ut sit ipse primogenitus in multis fratribus*: quamquam enim D. Thomas, Adamus, & alii locum hunc de filio ut Deo interpretentur, quoniam filii adoptivi naturalem filium imitari debent, & ad illius similitudinem conformari: tamen de Christo ut homine exponunt Chryso. Hieron. Ansel. ac fere alii Græci & Latini, quoniam (ut dictum est) Christus non dicitur proprie primogenitus in multis fratribus, ut Deus, sed ut homo. Sentius ergo Pauli est omnes prædestinatos

electos esse, ut sint Christo homini conformes in gloria; ut ipse sit tanquam prima mensura cæterorum. Unde Orig. lib. 7. super ad Rom. per imaginem filii, animam Christi intelligit, quæ speciali ratione imago filii dicitur, quia eum in se integre suscepit, illumque perfectissime refert Ad hanc ergo imaginem dicit debere alios conformari juxta illud 1. Cor. 15. *Sicut portavimus imaginem terreni, portemus & imaginem cælestis*. Et de gloria corporis dicitur ad Phil. 3. *Reformabit corpus humilitatis nostræ configuratum corpori claritatis sue*. Nec vero dici potest prædestinatos fuisse electos, ut sint Christo conformes in gloria, solum quia in re ipsa hujusmodi conformitatem habaturi sint, & non quia talis conformitas fuerit per se intenta in prima eorum electione: hoc enim modo etiam possent dici prædestinati conformes in gloria angelo, vel B. Virgini; at vero Paulus aliquam specialem dignitatem Christi voluit illis verbis explicare, nimirum quod sicut est primum principium in genere gratiæ, ita est etiam primum exemplar, & metrum cæterorum, non quia indigeret Deus exemplari veluti extrinseco, quo in sua actione dirigeretur, sed quia ex parte objectorum voluit unum esse primum, ad cujus similitudinem alia formarentur. Imo non desunt, qui existiment, etiam in ipso esse naturali Christum ut hominem esse exemplar cæterorum hominum, ita exponentes illud Gen. 1. *Faciamus hominem ad imaginem & similitudinem nostram*. Quod indicavit Tert. lib. adversus Praxeam. cap. 12. & lib. de Resur. carn. c. 7. & significant Athan. q. 89. ad Antioch. Cyril. lib. 1. cont. Julian. Orig. hom. 1. in Gene. Irenæus lib. 1. con. hæc. c. 1. & lib. 4. c. 59. & alii, quos refert Lypom. in Caten. & tractant late Eub. in Cosmog. Oleast. & Cather. Genes. 1. Sed aliæ sunt veriores illius loci expositiones, quas iidem Patres attingunt, maxime Athanas. eodem lib. q. 88. Tertul. lib. de Baptis. c. 5. & lib. 2. cont. Marcion. c. 6. Chryso. Aug. Eucher. & alii ibi, & latius differitur 1. p. q. 93.

Altera vero pars de causa finali facile ex dictis constat, quidquid enim gratiæ & gloriæ hominibus collatum est, id totum in Christi gloriam & honorem refertur: sed quod est causa omnium effectuum prædestinationis est in eo genere causa prædestinationis & electionis, ut ex 1. p. q. 23. constat; ergo: Major quoad justificationem ipsam definita est in Trident. sess. 6. c. 7. & sub justificatione omnes dispositiones a prima vocatione comprehendit, ut constat ex contextu, unde Joan. 12. conversionem gentium ad fidem Christus vocat glorificationem suam dicens: *Venit hora, ut glorificetur filius hominis*, ut August. tractat. 51. & 52. notavit, & hoc modo ait: *Glorificari Christum in membris suis*. Deinde quod ipsamet glorificatio electorum cedat in gloriam Christi, patet ex Joan. 17. ubi Christus petens glorificationem suam, in hoc illam ponit: *Ut omne, inquit, quod dedisti ei, det illi vitam æternam*. Quia hoc totum ad gloriam ejus refertur, quod indicavit Cyril. lib. 11. in Joan. c. 15. Nec vero satisfacit, quod prima sententia supra indicabat, verum quidem esse omnes effectus gratiæ, qui sunt in nobis, referri in Christum tanquam in finem, hoc tamen non esse ex primaria intentione Dei, atque adeo neque ex prima ipsa electione prædestinatorum: sed quasi ex secundaria & superaddita relatione post oblatam occasionem peccati: hoc enim in primis (ut supra dicebam) non est consentaneum perfectissimo modo, & rationi divinæ providentiæ: deinde non consonat verbis Pauli Ephes. 1. dicentis: *Prædestinavit nos per Jesum Christum in ipsum*, ubi illæ duæ particulae, *per*, & *in*, diversas habitudines causæ indicant, scilicet meritoriam & finalem. Unde paulo superius dixerat: *benedixit nos in omni benedictione spiritali in cælestibus in Christo, sicut elegit nos in ipso ante mundi constitutionem*. Ubi significat propterea omnem benedictionem spirituales (per quam effectus gratiæ significantur) datam nobis esse in Christo, quia in eodem electi sumus: quod etiam significatum est a Paulo illis verbis primæ Corinth. tertio. *Omnia vestra sunt, vos autem Christi, Christus vero Dei*. Et illis ad Romanos octavo: *Ut sit ipse primogenitus in multis fratribus*. Ibi enim utramque causalitatem conjunxit, exemplarem & finalem. Ubi Anselmus inquit: *Ut sit primogenitus, id est, primatum habens in collegio sanctorum, & hereditatem patris jure suo obtinens, aliis fratribus distribuat*. Et eandem senten-

Christus  
fuit electio  
prædesti  
natorum  
omnium.

Electio  
prædesti  
natorum  
ante per  
missionem  
peccati  
originalis  
114.

Christus  
causa ex  
emplaris  
prædesti  
nationis  
aliorum.



tentiam indicat Chrysostom. hom. 66. & 71. in Joannem.

Ad hanc vero rationem respondent alii, ex doctrina Aug. electionem & prædestinationem hominum factam esse post prævisum originale peccatum; & ideo potuisse Christum esse exemplar & finem ejus, quamvis non fuerit in illo primo signo, ut nos dicimus, prædestinatus. Sed primo contra hoc paulo superius ostendimus, electionem prædestinatorum fuisse ante originalis prævisionem. Secundo saltem negari non potest, quin voluntas quasi generalis ordinandi homines ad beatitudinem supernaturalem, & gratiam & gloriam illis conferendi, originale peccatum antecesserit, & respectu etiam hujus voluntatis, seu objecti ejus Christum habuisse rationem exemplaris & finis; cur enim dicemus alium finem, vel exemplar habuisse Deum, quando in particulari elegit prædestinatos, quam cum homines omnes ad gloriam ordinavit? præsertim cum omnes etiam effectus, qui ab illa generali voluntate proveniunt, ut sunt illi, qui sunt in reprobis, ad Christum, ut ad finem, & exemplar referantur. Tertio denique quia saltem de Adam non potest verisimiliter negari, quin fuerit per se electus ante originale peccatum, ut supra ostensum est. Et hinc potest confirmari hæc ratio, quia, ut supra diximus exponentes literam D. Th. Adam etiam in statu innocentie habuit gratiam per Christum; ergo necesse est intelligere etiam pro illo statu in Dei mente Christi electionem & prædestinationem antecessisse. Quod argumentum variis modis conantur diluere, qui contrarium opinantur, sed eos omitto, quia ex supradictis in præcedenti dubio facile rejiciuntur, & quia in sequentibus iterum occurreret occasio amplius urgendi idem argumentum.

Secunda conclusio.

Unio hypostatica simul ratione definiti est ad Verbi incarnationem.

Dico secundo. In primo signo, & prima voluntate, qua Deus voluit unionem hypostaticam, voluit illam determinate in tali persona, & in tali natura, scilicet, in Verbo & hac humanitate. Hæc assertio est contra quartam sententiam super relatam; & est communis Theologorum, nam, licet differant in definiendo signo, & primo motivo volendæ incarnationis, nullus tamen eorum distinxit inter unionem hypostaticam & incarnationem, neque inter illam confusam voluntatem & determinatam. Et probatur primo, quia omnia testimonio Scripturæ sacræ, in quibus fundari potest hæc excellentia prædestinationis Christi, loquuntur non tantum de unionem hypostaticam in communi, sed de Verbo divino, seu sapientia Incarnata, ut patet ex Prov. 8. Eccles. 24. ad Rom. 8. & 1. ad Corinth. 3. ad Ephes. 1. & ad Coloss. 1. & ad Heb. 2. Cum ergo de divinæ providentiæ modo, & de primo decreto divinæ voluntatis, potissimum sit ex Scriptura judicandum, non potest probabiliter fundamentum dici, Deum prius secundum rationem voluisse unionem hypostaticam in ea abstractione, quam incarnationem divini Verbi. Secundo ille modus prædefinitionis abstractæ & confusæ non potest convenienter attribui divinæ voluntati; nam in primis imperfectionem involvere videtur, si in re ipsa aliquid habet fundamentum, quia talis modus voluntatis supponit in intellectu confusam cognitionem rationum universalium. Dicitur non tribui Deo hunc modum voluntatis propter fundamentum, quod in ipso habeat, sed propter nostrum modum concipiendi, & ut declarem in illa communi ratione unionis hypostaticæ abstractæ & præcise conceptæ esse aliquid motivum magis independens a peccato, quam sit in incarnatione propriæ & in particulari sumpta; sicut dicere etiam solemus, prius secundum rationem voluisse Deum sese ad extra communicare, quam hanc vel illam creaturam in particulari producere; & prius voluisse voluntate antecedente omnes homines salvare, quam in particulari aliquem efficaciter elegerit. Sed hæc responsio non satisfacit, repugnantiam enim involvit, quod illa voluntas confusa vere tribuatur Deo, & quod in re non habeat fundamentum, sed tantum in nostro modo concipiendi.

Aliud est enim, nos concipere divina, & de illis loqui modo nostro, in quo potest esse aliqua proprietas, quæ non est in re concepta; aliud vero est, objective concipere in Deo, eique aliquid attribuere, quod in re non sit. Primum enim verum est, & non reddit falsam conceptionem nostram; secundum vero non potest esse sine falsitate, quia conceptio non est conformis rei conceptæ, quo sensu verum est illud commune axioma, unumquod-

que debere concipi sicut est, ut vere concipiatur; ergo, quamvis nos confuse concipiamus ea, quæ sunt in Deo, tamen non possumus ei vere tribuere voluntatem objecti confusi, ut priorem etiam secundum rationem volitione objecti particularis. Et consequenter non potest bene intelligi, Deus prius secundum rationem voluisse personam divinam uniri hypostatice, quam hanc personam incarnari, aut e converso prius voluisse intellectuale naturam assumere, quam humanitatem. Alioquin non prius secundum rationem voluisset humanitatem in communi, quam hanc humanitatem, priusque vellet dare gratiam, quam hanc gratiam, & sic de aliis similibus. Quamvis ergo hæc objecta universalia dicantur priora subsistendi consequentia, seu prioritate independentiæ, aut quia in eis reperitur abstractio præcisiua, non propterea existimandus est Deus prius versari circa universalia, quam circa particularia, quia, cum prius omnia distinctissime intelligat, non incipit velle etiam secundum rationem ab universalibus & confusis, sed omnino distincte & in particulari vult, quidquid vult, & rationes universales vult in ipsis particularibus, sicut etiam rationes communes cognoscit distincte cognoscendo particularia, hic enim modus ad majorem perfectionem spectat, tam in intellectu, quam in voluntate.

Unde in exemplo illo de voluntate se communicandi ad extra falsum est, prius ratione Deum habuisse illam voluntatem confusam, sed solum nos intelligere possumus, illam voluntatem esse priorem consistendi consequentia secundum præcisionem & abstractionem nostram, non vero quod in aliquo signo rationis intelligatur Deus prius habere voluntatem illius objecti confusi, quam determinati. Quod potest exemplo humano declarari ac confirmari; quando enim homo intendit, dignitatem aliquam, seu cathedram, vel aliquid simile obtinere, ita in particulari determinando voluntatem suam ad hoc objectum, ut nullum aliud simile intendat, tunc non potest vere dici, hujusmodi hominem prius secundum rem vel rationem intendisse dignitatem in communi, quam hanc in particulari, quia neque voluit unquam illud objectum confuse sumptum, neque prius voluntatem suam determinavit ad rationem illam communem ex generalibus rationibus, & deinde speciales rationes excogitavit, propter quas ad hoc particulare objectum voluntatem suam inclinavit, sed simul sibi proposuit motivum volendi hoc particulare objectum, & rationem communem solum voluit ut in illo contractam: ita vero se habuit Deus in ea voluntate, qua sese voluit ad extra communicare, simul enim per scientiam simplicis intelligentiæ proposuit voluntati suæ omnes modos possibiles se se communicandi, distinctissime & in particulari cognitos, & per primam determinationem liberam voluntatis suæ hunc modum communicationis voluit, quem executioni mandavit. Quapropter in hujusmodi determinatione libera non possumus distinguere duos actus etiam ratione distinctos, ita ut per unum tendat Deus in objectum confusum, & per alium in objectum particulare, in quo est magna differentia inter hunc actum, & illum, quo Deus vult duo objecta particularia distincta, scilicet finem & media, quem recte concipimus & partimur in duos ratione distinctos, & consequenter concipere possumus unum ut priorem alio in aliquo signo rationis, quod in alio actu non recte concipitur, ut declaratum est, & pro tota hac materia diligenter est annotandum.

Et ex eadem doctrina declarandum est aliud exemplum, quod adducebatur de electione hominum in communi vel in particulari; non enim est intelligendum prius secundum rationem ordinasse Deum ad gloriam homines in communi, & postea hos in particulari, vel prius efficaciter decrevisse, ut aliqui salvarentur, postea vero in particulari hos elegisse; hic enim modus concipiendi divinam voluntatem, tribuendo Deo hujusmodi actus ratione distinctos, neque est verus, neque in re habet fundamentum, ut declaratum est. Potius ergo dicendum est, Deum voluisse ordinare speciem humanam ad gloriam, in his individuis, v.g. in Adamo & posteritate ejus, & similiter decrevisse efficaciter, ut aliqui salvarentur, non aliter, quam eligendo hos in particulari, & ita in nullo prioris rationis est confusio in illo objecto, prout ad illud libere terminatur divina vo-

In Deo voluntas confusa non antecedit determinationem.



luntas, quamvis nos per terminos confusos & universales illud explicemus. Unde etiam notari potest alia differentia in prædicto exemplo, nam in illo esse posset ali- quod fundamentum ex parte nostra ad ita loquendum, ibi enim est multitudo quædam objectorum, quam nos uno communi & confuso termino comprehendimus, & ita nos concipimus illud commune objectum ut prius, quia universaliora sunt modo nostro concipiendi priora, saltem secundum esse essentia seu possibile; at in præ- senti objectum est unicum & singulare tam ex parte na- turæ assumptæ, quam ex parte personæ unitæ; nullum ergo est fundamentum, etiam ex parte nostra ad concipi- endum illum ordinem.

Tertio argumentari possumus contra prædictam sen- tentiam, quia falso supponit, omnes rationes seu moti- va assumendi humanitatem potius, quam aliam natu- ram, & volendi unionem in Verbo divino potius, quam in alia persona, sumpta esse ex peccato, & præterea ma- le inde colligit, prius esse prædefinitam unionem hypo- staticam ut sic, quam incarnationem. Prior pars constabit late inferius q. 3. art. 8. & disp. 12. sect. 1. ubi ex mul- tis congruentiis, quas afferemus, ob quas persona Fi- lii, potius quam alia, incarnata est, plures sumuntur ex proprietatibus Filii, & procedunt independentes a peccato, & in superioribus etiam similes rationes ad- duximus, ob quas humana natura, potius quam alia, assumpta est; ut v. g. quod ipsa in se quodammodo con- tinet omnem creaturam. Quocirca omnes discursus su- pra facti ad ostendendum, Christum fuisse in primo si- gno prædestinatum, sumpti ex optimo modo providen- tiæ divinæ, & ex dispositione rerum omnium in mente Dei, & ex causa exemplari & finali, procedunt in par- ticulari de Christo Deo homine, & non tantum in com- muni de Deo naturæ intellectuali unito; ergo non est necessarium præintelligere motivum peccati, ut intelli- gamus rationem aliquam, ob quam Deus prædefiniverit in eo primo signo unionem hypostaticam, non tantum in communi, sed etiam in tali personæ & in tali natura. Posterior pars probatur; quia, licet ex parte rerum nulla esset ratio aut congruentia assumendi potius hanc naturam, quam aliam, Deus ex solo suo beneplacito potuisset hanc naturam præ aliis eligere absque alio ordine, & quasi progressu nostro modo intelligendi. Si- cut voluit Deus, incarnationem perficere in hac nume- ro humanitate potius, quam in aliis, non quia intelliga- mus, prius Deum voluisse assumere humanitatem, de- inde vero specialem congruentiam in hac humanitate, potius quam in aliis invenisse, & ideo eam præ aliis ele- gisse: hoc enim falsum est, nulla enim ratio aut con- gruentia ex parte talis naturæ præcessit, sed ex solo di- vino beneplacito præ aliis electa est, ut Augustinus dixit in libro de prædestin. Sanct. & inferius, q. 2. videbimus. Unde non prius voluit Deus humanitatem assumere, quam hanc humanitatem, licet non ex speciali moti- vo, sed ex arbitrio suæ voluntatis; ita ergo, licet ante præscientiam peccati nulla ex parte objecti præcessisset ratio ad assumendam potius naturam humanam, quam Angelicam, vel a persona Verbi magis, quam Patris, vel Spiritus Sancti, nihilominus potuit Deus sola sua voluntate utrumque statuere ac determinare, statim ac voluit unionem hypostaticam efficere.

Atque ex hac ratione expeditum est fundamentum il- lius sententiæ, falsum enim assumit, & non recte in- fertur, ut declaratum est. Exemplum autem, quod ibi af- fertur de voluntate Incarnationis absolute & in carne passibili, non est simile. Primo quidem, quia objectum prioris voluntatis non est abstractum vel confusum, sed determinatum & distinctum, nimirum, hæc unio in hac natura, & in hac persona, & cum his conditionibus, quæ per se & intrinsece conveniunt huic naturæ, seu per se intenduntur in illa per modum finis, & boni per se ac ultimitati intenti, conditio autem illa carni passibili pertinet potius ad ordinem executionis, & solum per accidens convenit occasione peccati. Unde sumitur alia ratio differentia, quia conditio hæc carnis passibi- lis non est ex his bonis, quæ Deus per se elegit & voluit, sed potius pertinet ad mala poenæ, quæ non ex solo li- bero beneplacito, sed ex iusto motivo Deus voluit, & ideo supponit necessario præscientiam peccati. Tria vero corollaria, quæ prædicta sententia inferebat, tam

sunt falsa, quam fundamentum, cui nitiuntur, & illo ablato, facile ruunt. Et re vera est parum consenta- neum Scripturis differentiam in hoc constituere inter Deum & Verbum, quod Verbum venerit propter nos & propter redemptionem nostram, non tamen Deus; aut quod in primo decreto unionis hypostaticæ non ostenderit Deus specialem amorem ad humanam natu- ram. Talis enim distinctio, aut vestigium ejus, nul- lum in scripturis habet fundamentum, sed semper eo- dem modo fit sermo de Incarnatione, & de hypostatica unione seu assumptione carnis vel humanitatis, imò numquam aliis verbis fit mentio hujus mysterii, nisi his, quæ habitudinem ad carnem seu humanitatem in- volvant: & pro eodem reputatur, quod Verbum, vel Deus venerit ad homines redimendos sanguine suo. Unde sancti omnes supra citati eodem modo loquuntur de Incarnatione Verbi, & unione Dei, & specialiter Leo Papa universalissimis terminis usus est, cum dixit: *Si homo in sua natura integritate mansisset, creator ho- minum, creatura non fieret*; non ergo consequenter lo- quuntur, nec sensum Sanctorum aut D. Th. declarant, qui in hac re aliter de Verbo, & aliter de Deo loquuntur.

Dico tertio. Licet Christus Dominus fuerit dilectus seu prædestinatus in primo signo, & primo decreto libe- ræ voluntatis divinæ, non tamen solus, sed simul cum ipso fuerunt præordinatæ aliæ creaturæ, quæ ad essen- tialem, & consummatam perfectionem universi perti- nent, tam in ordine naturæ, quam gratiæ. Explica- tur prius hæc assertio, & deinde probabitur. Duplici- ter enim concipere possumus, Deum voluisse Christum Deum hominem in illo primo signo, quo se voluit ad extra communicare. Primo ut nullum aliud objectum creatum in illo decreto fuerit comprehensum, ut sen- sisse videtur Catherinus, & Lychetus in 3. dist. 7. q. 3. vi- detur in hunc modum sententiam Scoti interpretari. Se- cundo, ut in illo primo decreto intelligantur etiam alia comprehendere, cum quibus habet Christus aliquam con- nexionem, non tam ex natura rei, quam ex intentione Dei, ita omnia disponentis, ut per modum integri ob- jecti voluerit hoc totum universum constans ex illo tri-plici ordine rerum, naturæ, gratiæ, & unionis hypo- staticæ, & similiter simul voluerit totum beatitudinis & prædestinatorum regnum, cujus Christus est caput. Dicimus ergo, hanc Christi prædestinationem non prio- ri, sed hoc posteriori modo esse intelligendam. Primo quidem, quia omnia testimonia Scripturæ, & sanctorum, quibus supra ostendimus, Christum habuisse primum locum in illo primo decreto divinæ voluntatis, eundem nobis proponunt ut principem & caput omnium, & ut authorem salutis & gloriæ prædestinatorum; ergo non fuit (ut ita dicam) solitarie prædestinatus & electus, sed cum habitudine & connexionem ad res alias.

Secundo, hic modus prædestinationis est magis con- formis divinæ sapientiæ & bonitati, magisque in Chri- sti gloriam cedit. Quod sic ostendo, nam communica- tio Dei ad extra per naturam, gratiam, & unionem hypostaticam, comparari potest ad Deum, seu ad ma- nifestationem divinæ gloriæ, tanquam medium ad fi- nem, vel tanquam finis proximus actionum seu ope- rum Dei. Si priori modo concipiatur, quamvis incar- natio sit opus, quo Dei sapientia & bonitas summe manifestatur intensive, ut sic dicam, tamen extensive & adæquate magis manifestatur in toto universo, illo tri-plici rerum ordine constante: ergo hoc adæquatum me- dium elegit Deus in illo primo signo juxta perfectam ra- tionem sapientiæ suæ ad manifestandam gloriam suam; si autem posteriori modo objectum illud concipiatur, sic etiam perfectior & exactior erit intentio illius finis, si in objecto illo hæc omnia comprehendantur, nam, qui perfecte & adæquate intendit aliquem finem, non solum substantiam finis, ut sic dicam, sed etiam acci- dentia, & debitas circumstantias, nimirum tempus, locum, modum & similia sub tali intentione compre- hendit. Sic ergo, licet Deus in illo signo voluerit Chri- stum ut finem aliarum rerum, tamen voluit illum cum angelorum & hominum societate, & imperio, & con- sequenter etiam voluit cœlestem locum, totumque universum, in quo perpetuo regnaret: atque hac ra- tione totum hoc cedit in majorem Christi gloriam, ma- gisque divinam sapientiam declarat.

Dices,

Non omnes ra- tiones ob- quas in- carnatio facta est in personæ Verbi, or- te sunt ex hominis sapientia.

Solvuntur fundamen- ta ul- timæ opi- nionis.



Dub. 1.

Responsio.

Quomodo  
Christus  
primus  
prædesti-  
natus in-  
telligitur.

Dices, quomodo ergo Christus dici potest primus prædestinatus, seu præordinatus ante omnem creaturam. Responderi potest, Christum appellari in eo ordine primum negative tantum, quia nullus ante ipsum, non tamen positive, quia cum eo fuerunt simul alii prædestinati: & æque primo voluit Deus omnes illos tres modos communicandi se per naturam, gratiam, & unionem hypostaticam, quia omnes sunt per se amabiles, & per se ac proxime ordinabiles ad manifestationem divinæ gloriæ. Adde deinde, Christum fuisse primo prædestinatum prioritatem finis, quamvis non sine connexionem cum rebus aliis; unde cum dicimus simul cum Christo fuisse res alias in eo decreto comprehensas, illa particula *simul*, excludit prioritatem in subsistendi consequentia, & indicat connexionem aliarum rerum cum Christo, non vero excludit prioritatem in ratione finis. Sine causa enim aliqui negant Deum in illo primo decreto formaliter & expresse retulisse omnia ad Christum, ut ad finem proximum, sub Deo, cæterarum rerum omnium, sed solum virtute & implicite: hoc enim neque ex parte Dei est necessarium, aut rationi consentaneum, quia perfectissime omnia habet præsentia, & omnia ordinat ac disponit, & ideo non est illi necessaria implicita ordinatio, cum simul possit explicite ac formaliter id præstare. Neque etiam ex parte Christi, aut aliarum rerum, id est necessarium, nam licet omnes potuerint immediate ad manifestationem divinæ gloriæ referri, tamen perfectius hoc fit cum habitudine & ordinatione ipsarum rerum inter se. Et maxime cum habitudine naturæ & gratiæ ad unionem hypostaticam ut ad finem, quia cum ipsamet divina persona in ea communicatione unionis hypostaticæ intrinsece comprehendatur, illi debetur est, ut cætera omnia ad illam ut ad finem referantur. Neque illa duo repugnant, scilicet, Christum esse primum in genere finis, & habere connexionem cum aliis, nam ut supra dixi, prioritas rationis in genere causæ finalis non semper infert prioritatem in subsistendi consequentia. Atque hinc confirmari potest assertio posita, quia aliàs sequeretur, ex vi præsentis decreti, Verbum Dei fuisse incarnandum, etiam si universum creandum non esset, neque homines vel angeli prædestinandi aut beatificandi: consequens autem est per se incredibile, & nullum habet fundamentum; melius ergo intelligimus Christum ita fuisse prædestinatum ut finem aliarum rerum, ut tamen sine illis non fuerit futurus ex vi talis decreti.

Obiectio.

Dices: hæc connexio non est nisi inter finem & media necessaria: at vero res aliæ, ut v.g. angeli vel homines prædestinati non comparantur ad Christum ut media ad finem, sed potius se habent, ut partes ejusdem finis, quatenus constituunt unum integrum regnum vel universum. Item obijci potest, quia Christus ordinatur ad alia ut ad finem, scilicet, ut ea perficiat, vel glorificet, &c. ergo etiam alia potuerint dici priora Christo in genere finis. Respondetur, sicut in humano corpore per se primo intenditur totum, & omnes partes ordinantur ad totum ut ad finem: & similiter partes ipsæ inter se secundum diversas rationes & munera possunt ad invicem ordinari; nihil enim obstat, quo minus hoc modo possint duo esse sibi invicem fines secundum diversos respectus, vel rationes, ut supra etiam declaratum est: simpliciter tamen omnes partes corporis ad caput ut ad finem præcipuum ordinantur: ita dicendum est de toto universo, in quo Christus Deus homo sub Deo est caput & finis præcipuus cæterarum rerum, quamvis simul ad eas perficiendas ipse ordinetur. Unde sub hac ratione res omnes, quatenus ad gloriam Christi ordinantur, media vocari possunt, quamvis habitudo ad finem latius extendi possit, quam medium proprie & in rigore sumptum: subjectum enim, quod finem fruitur, ordinatur ad illum, non proprie ut medium, sed ut recipiens finem formalem, & attingens finem objectum: & similiter pars ordinatur ad totum, non proprie ut medium, sed ut componens ipsum finem: sic ergo omnia possunt dici ordinari ad Christum, non quia sint proprie media, sed quia omnia Christo inserviunt, & in ejus gloriam & honorem cedunt; ipse vero ordinatur ad alia, ut ea perficiat potius, quam ut ab eis perficiatur; & ipsamet earundem rerum perfectio in ejusdem Christi gloriam tandem redundat;

& ideo ipse est simpliciter primus in genere finis.

Sed potest tandem obijci, quia ordo naturæ est prior essentialiter, quam ordo gratiæ, cum gratia naturam supponat, & uterque ob eandem causam est prior, quam unio hypostatica: ergo non possunt hæc omnia esse simul in illo primo signo rationis, quo voluit Deus se ad extra communicare. Patet consequentia, quia dictum est, per illam particulam, *simul*, excludi prioritatem in subsistendi consequentia; at vero in præsentia, ordo gratiæ infert ordinem naturæ, & non e converso, & similiter unio hypostatica infert ordinem gratiæ, & non e contrario. Quod si dicas hoc esse verum considerando hos rerum ordines secundum se, seu in esse possibilis, non vero ut cadunt sub talem intentionem agentis, nec ut futuri ex vi talis divini decreti: contra hoc est, quia etiam hoc modo gratia supponit naturam, non enim potest aliquid ordinari ad aliquem finem, quin supponatur, ut præexistens, vel prævolitum ante talem finem; sicut non potest intelligi, Deum aliquos homines eligere ad gloriam, nisi prius intelligatur præscire illos esse futuros, juxta illud: *Quos præscivit, hos prædestinavit*.

Respondetur, in primis, quod attinet ad ordinem gratiæ, & unionis hypostaticæ, illum nullo modo hunc supponi, neque ex natura rei, neque ex intentione Dei agentis, neque in eodem subjecto, neque in diversis, quin potius in eodem subjecto seu eadem natura unio hypostatica supponitur gratiæ sanctificanti, tam in ordine executionis, ut infra q. 2. videbimus, quam in ordine intentionis, ut ex dictis constat, quia gratia data illi naturæ ad unionem hypostaticam ut ad finem ordinatur, ut sit veluti decus, & ornamentum ejus; atque eadem ratione in diversis subjectis ordo gratiæ supponit etiam ordinem unionis hypostaticæ in genere finis, quia, ut dictum est, omnis gratia, tam angelorum, quam hominum ad Christum ut ad finem ordinatur, quamvis in ordine executionis ordo gratiæ in multis subjectis antecesserit unionem hypostaticam, non solum tempore, sed etiam per modum dispositionis, aut alicujus meriti, ut videbimus quæstione sequente.

Quod vero attinet ad ordinem naturæ, respectu ejusdem subjecti, unio hypostatica supponit quidem naturalem entitatem humanitatis assumendæ; respectu vero aliarum rerum esse naturalem illarum, vel per accidens se habet ad hypostaticam unionem humanitatis, vel, ad summum, requiri potest, ut ab eis talis humanitas aliquo modo causetur. Sed nihil horum obstat sententiæ a nobis propositæ, quia ex eis ad summum sequitur, in eodem primo signo, in quo fuit prædefinita incarnatio, fuisse etiam prædefinitam creationem vel productionem animæ, seu humanitatis assumendæ; & similiter fuisse simul præordinatos ordines naturæ & gratiæ, tam in Christi humanitate, quam in rebus aliis, præsertim quatenus cum hoc mysterio habent connexionem; non tamen est necesse, ut prædefinitio, aut præscientia ordinis naturæ antecesserit prædefinitionem hujus mysterii; sed satis est, quod in una prædefinitione habeant connexionem, ita ut sub eam altera cadat ut finis qui, seu cujus gratia, altera ut finis cui, seu ut subjectum quod ordinatur ad finem, aut alium similem modum connexionis habeant. Atque hinc fit, ut præscientia talis rei ut futuræ ad illam prædefinitionem non supponatur, sed potius consequatur. Unde cum dicitur, non posse aliquid ordinari ad aliquem finem, vel ad aliquod bonum, nisi supponatur vel præsciatur existens, si intelligatur de existentia possibili verum est, sed non ad rem; si vero intelligatur de existentia ut futura est falsum, quia satis est, quod ipsamet existentia subjecti simul ad talem finem ordinetur, quod quoad hoc habet cum illo necessariam connexionem in intentione agentis, imò habet quandam rationem finis, cui formalis & objectivus finis intenditur, quod idem est ac esse subjectum ordinatum ad finem obtinendum seu illo fruendum. Quocirca majorem connexionem habet subjectum cum fine assequendo, respectu intentionis agentis, quam habeat cum mediis, per quæ acquirendus est, quia finis non intenditur, nisi alicui subjecto, neque subjectum nisi in ordine ad talem finem, & ita quasi integrat unum finem, & adæquatum objectum illius intentionis ut sic, & expresse sub illam cadunt cum mutua habitudine inter se

Alii ob-  
i: dno.

Responsio.

Unio hy-  
postatica  
non sup-  
ponit or-  
dinem  
gratiæ.Ordo na-  
turæ an  
sit prior  
ordini  
gratiæ &  
unionis  
hyposta-  
ticæ.



se in ratione causæ materialis & finalis, seu in ratione finis, ut qui, seu cuius gratia, media vero magis extrinsece comparantur ad intentionem finis tamquam effectus ejus, & ideo non est necesse, ut in ea formaliter includatur, sed virtute tantum. Hac ergo ratione voluntas, qua aliquod subiectum ordinatur in finem, non necessario supponit etiam secundum rationem & præcisionem mentis præscientiam futuræ existentiae talis subiecti, aut aliam voluntatem, qua illius subiecti existentia præordinata sit, sed illi metæctu, quo ordinatur ad talem finem, ordinatur etiam ad existendum sub illo, ut in illo exemplo de dilectione prædestinatorum non est necesse, ut talis dilectio supponat prævisam existentiam eorum ut futuram, sed ut possibilem tantum, qui per illammet dilectionem ordinantur ad existendum sub tali fine, neque aliter est amata eorum existentia, quam propter talem finem. Eodem ergo modo in præsentem voluntas creandi mundum in esse naturæ non est prior simpliciter, quam voluntas perficiendi illum per esse gratiæ, vel quam voluntas exaltandi illum per unionem hypostaticam, sed hæc omnia habuerunt inter se connexionem, & constituerunt unum veluti adæquatum objectum illius primi decreti divini, ut explicatum est.

Voluntas  
incarnatio-  
nis  
prior per-  
missione  
peccati,

Atque hinc sequitur primo, si inter se conferamus voluntatem incarnationis & voluntatem permittendi peccatum, in genere causæ finalis voluntatem incarnationis fuisse priorem, quia licet comparando has voluntates ad totum universum (ut faciebat tertia opinio supra citata) id est, quatenus objecta illarum voluntatum ordinantur ad constituendum perfectum universum, in quo sint omnes rerum ordines, & omnes modi operandi, &c. licet inquam sub hac comparatione inter illas voluntates ordo non sit, imo se habeant ad modum unius simplicis voluntatis: tamen comparando inter se objecta talium voluntatum, ordinem inter se habent, ut hoc quasi finis sit, illud vero medium, hæc intentio, illa electio. Id quod satis inter probandum præcedentes conclusiones explicatum est, quia peccati permissio ad incarnationem ordinata est, quo altius fieret atque convenientius. Et confirmatur etiam ex dictis, quia voluntas dandi gratiam Adæ simpliciter est prior, quam voluntas permittendi peccatum. Hæc enim se habent (ut ita dicam) sicut habitus & privatio: sed voluntas incarnationis antecedit voluntatem conferendi gratiam ipsi Adæ, quippe cum in Christo & per Christum data est, ut ostendimus. Nec dici potest in re datam fuisse illam gratiam per Christum, tamen voluntatem dandi illam, quæ fuit per modum intentionis, non fuisse in Christo, quia ostensum est ipsam etiam electionem ad iustitiam fuisse per Christum, in cuius gloriam magis hoc cedit, perfectiorique modo explicat ipsius divinæ providentiæ rationem, quæ alio modo vix potest concipi, nisi fingendo multa voluntaria & sine fundamento. Et simile argumentum sumitur ex fide incarnationis data Adæ in statu innocentiae, nam illa fuit unum ex donis gratiæ, & iustitiæ collatæ illi in eo statu, unde in illo signo, in quo intelligimus voluisse Deum Adæ gratiam conferre, intelligimus voluisse conferre fidem hanc. Atque cum hæc fides incarnationem certo supponat, necessario fit, ut voluntas dandi gratiam Adæ supponat voluntatem incarnationis. Nec potest hoc solvi, nisi fingendo in quodam priori signo voluisse Deum dare fidem Adæ aliorum mysteriorum, & in alio posteriori voluisse quasi extendere illam in incarnationem, quod & gratis omnino dicitur, & ordinem ac modum divini consilii, & providentiæ non satis explicat, & quandam imperfectionem, & confusionem videtur attribuire divinæ voluntati, ut supra in simili declaratum est. Dicunt vero aliqui, licet verum sit in genere causæ finalis antecessisse voluntatem incarnationis permissionem peccati, tamen in genere causæ materialis permissionem fuisse priorem, quatenus illius voluntatis occasio fuit. Sed proprie nulla hic fingi potest ratio causæ materialis. Quia si peccatum fuisset occasio incarnationis, potius ad finalem causam esset revocanda, quia nihil aliud est esse occasionem, quam movere Deum ad misericordiam, & ad remedium tanti mali. Unde sit ipsum remedium peccati esse finem, peccatum vero ipsum sub hoc fine claudique tanquam occasionem ejus. Quod si vocetur materialis causa solum, quia est veluti materia, circa quam reme-

dium hoc versatur, non est contendendum, quia erit quæstio de modo loquendi, quamvis materia circa quam potius habeat rationem objecti, & objectum ad finem revocetur. An vero repugnet, incarnationem esse simpliciter primam in ratione finis, & nihilominus peccatum esse occasionem ejus & ita etiam præcedere aliquo modo in ea ratione, item an voluntas incarnationis ita sit prior voluntate permittendi peccatum, ut tamen sit cum illa necessario connexa, dicam in sequentibus.

Secundo ex dictis infertur, quid dicendum sit de ordine inter voluntatem incarnationis, & præscientiam peccati originalis; si enim loquamur proprie de præscientia futurorum, quæ est per scientiam visionis, qua videntur futura tanquam præsentia æternitati, clarum est ex dictis voluntatem incarnationis antecessisse præscientiam originalis peccati, quia hæc præscientia supponit voluntatem permittendi peccatum, quæ posterior est voluntate incarnationis. Si autem loquamur de præscientia illa quasi conditionata, certum etiam est hanc præcessisse ante voluntatem incarnationis, quia hæc (ut dictum est) omnem Dei liberam voluntatem antecedit. Quocirca si verum est per hanc scientiam non solum de aliorum voluntatibus, sed etiam de sua cognoscere Deum, quid amatura vel factura sit, prius ratione quam illam videat actu volentem: hoc (inquam) posito, consequenter fit, ante habitum liberum decretum de incarnatione facienda præcivisse Deum (hoc præscientiæ genere) lapsum eventurum in humano genere; sed huiusmodi præscientia non mutat ordinem voluntatis, nec rationem providentiæ procedentem nostro modo concipiendi ex intentione finis ad mediorum dilectionem, quia illa scientia generaliter omnia sub se comprehendit, & eodem modo præcivit Deus ante omne decretum liberum suæ voluntatis, fore, ut velit incarnationem, & permissionem peccati, & redemptionem humani generis, & alia similia, quæ tamen omnia præcivit futura eo modo & ordine, quo futura erant. Unde in hac eadem scientia prius ratione quam intelligamus Deum præcivisse peccatum futurum, intelligimus præcivisse prius, se illud permissurum; & rationes omnes, propter quas illud erat permissurus, & consequenter præcivisse prius se voliturum incarnationem per modum finis, ad quem erant cuncta referenda.

An vero hæc prioritas inter voluntatem incarnationis & præscientiam peccati sit etiam cum independentia unius ab alio, vel cum connexionem ad alia, quæ in tertia opinione tangebantur, in sequentibus sectionibus tractanda sunt, & ideo nihil de illa amplius dicere oportet, quia in reliquis a nobis non discordat. De quarta vero opinione satis dictum est. Fundamentum vero primæ opinionis solvendum est ex illa distinctione data, de ordine intentionis & executionis. Fatemur enim, Deum operatum esse mysterium incarnationis propter remedium peccati, quod solum probant omnia, quæ in suum favorem congerit illa sententia. Negamus tamen inde fieri ordine intentionis hanc fuisse primam rationem, quæ Deum moverit ad volendum seu prædestinandum incarnationis mysterium; quod quia specialem habet difficultatem, commodius in quarta sectione tractabitur, in qua distinctius omnibus argumentis illius sententiæ satisfaciemus.

### SECTIO III.

*Utrum in primo signo rationis, in quo prædestinatus est Christus Deus homo, sit etiam prædestinatus Redemptor hominum per passionem, & mortem suam.*

**D**ifficultas huius quæstionis oritur ex dictis in secunda dubitatione. Dictum est enim Christum esse prædestinatum Deum hominem ante permissionem originalis peccati: sed ante prævisum peccatum non indigebamus redemptore; ergo in illo signo non fuit prædestinatus redemptor. In contrarium vero est, quia prædestinatus versatur circa res singulares cum circumstantiis earum, & ita per eas definiuntur, ut futuræ sunt; sed Christus Deus homo futurus fuit passibilis & redemptor; ergo hoc modo fuit prædestinatus per illam primam voluntatem, per quam incarnationem primo intentam intelligimus,

Prima  
sententia.

Hæc



Hæc quæstio solum habet locum inter eos, qui ponunt Christi prædestinationem in primo signo rationis, ut a nobis explicatum est. Nam qui sentiunt illum fuisse prædestinatum post prævisionem, & permissionem originalis peccati, consequenter affirmant illum non prius fuisse prædestinatum hominem, quam passibilem vel redemptorem. At vero Scotus, & multi alii, qui priori modo constituunt hanc prædestinationem, dicunt pro illo signo nihil definisse Deum de redemptione vel passionem, sed solum de substantia mysterii; abstraxisse autem nostro modo intelligendi pro eo signo a modo passibili vel impassibili, & a munere redemptoris. Quod non specialiter in Christo, sed ita aliis prædestinatis videre licet: cum enim Deus elegit v.g. Sanctum Petrum ad gloriam, in primo signo, quo intelligitur elegisse illum, non est necesse intelligere decrevisse eum per mortem, & crucem ad gloriam perducere, neque summum Ecclesiæ Pontificem illum constituere. Et si verum est (ut ego existimo) prædestinatos fuisse electos ante peccatum originale prævisum & permissum, in eo signo non est definitum, an illi nascituri essent mortales, aut immortales, nisi fortasse sub conditione, scilicet si Adam peccasset nascituros mortales, si autem non peccasset, immortales; ergo idem dici poterit de Christo in primo signo electo vel prædestinato. Et potest hæc sententia confirmari primo, quia tota ratio, ob quam Christus prædestinatus est passibilis & redemptor, fuit peccatum & indigentia humanæ naturæ; ergo ante prævisum & permissum hunc lapsum non potest intelligi Christus passibilis prædestinatus, nam (ut dictum est) in voluntate Dei prius est finis, quam medium: permissio autem peccati non est finis passionis, aut mortis Christi, sed e contrario remedium peccati fuit unicus finis proximus passionis & mortis, alias non esset Christus prædestinatus passibilis propter remedium peccati, sed potius ideo peccatum esset permissum, ut Christus haberet, quod per suam passionem curaret, quod videtur nec scripturis, nec rationi satis consentaneum. Confirmatur secundo, quia hic modus incarnationis, scilicet in carne passibili, non est bonum propter se intentum. Ergo non cadit in primam voluntatem, quæ in genere causæ finalis habet primum locum in divina prædestinatione.

Secunda  
sententia.

Nihilominus esse potest alia sententia affirmans Christum in illo primo signo esse prædestinatum redemptorem, atque adeo passibilem & mortalem. Quæ sumi potest ex Irenæo, lib. 3. c. 33. ubi inquit: *Prædestinasse Deum primum animale hominem, ut a spiritali saluaretur, quia cum præexisteret salvans, oportebat, quod & saluaretur fieri, ut non vacuum sit salvans.* Unde de Christo loquitur, & significat prius prædestinatum fuisse salvatorem, & deinde ordinatos esse homines, qui salventur, ne ipse frustra esse videretur. Clarius Cyrillus, lib. 5. thesau. c. 8. in fine, ubi sic loquitur. *Præfundatur ante nos Christus, & in ipso nos omnes superedificamur, idque ante initium mundi in præscientia Dei, ut cum ordine divino benedictio maledictionem antecesserit, & damnationem in mortem vite pollicitatio, servitutem diaboli adoptionis libertas, & possit natura humana superatis malis, quæ interim acciderunt, in pristinam, per gratiam Christi (qui fundavit eam in bonis) dignitatem recurrere.* Quod deinde exemplo explicat de architecto, qui ædificaturus ædes regias, dubitans, ne quid procedente tempore structura patiatur, firmissimum jacit fundamentum, ut si quid superiora patiantur, possint rursus reparari fundamento servato. *Eodem modo, inquit, creator noster Christus nostræ salutis fundamentum, etiam ante initium mundi fundavit, ut si prævaricatione caderemus, in ipso rursus renovaremur.* Quibus verbis docere videtur Cyrillus, Christum a principio fuisse prædestinatum in eum finem, ut si humana natura caderet, per eum repararetur; & hoc sensu dicit paulo superius, Deum præscivisse futurum peccatum, & ideo totam humanam naturam in Christo fundasse, ut per eum reparari posset; loquitur enim de illa præscientia simplicis intelligentiæ, quæ antecedit omnem voluntatem, per quam Deus cognoscit, quid eventurum est in creaturis, si hæc vel illæ creentur.

Ratio autem pro hac sententia formari potest in hunc modum ex dictis in superioribus. Diximus enim, Christum Dominum ita habere primum locum in primo de-

creto libero divinæ voluntatis, ut, quamvis in ratione finis sit prior, non tamen excludat res alias, quæ ad ipsum ut ad finem ordinantur, imo in eo præintelliguntur ea attributa, quæ aliarum rerum consortium requirunt, ut sunt dignitas capitis, authoris gratiæ & gloriæ, & similia: ergo eodem modo intelligi potest præordinatus Christus in illo signo sub ratione redemptoris, & sub illa ratione habere connexionem cum permissione & præscientia peccati. Probatur consequentia, tum quia non est major ratio de una dignitate, quam de alia; tum etiam, quia ad hoc decretum hoc modo declaratum sufficit illa præscientia conditionata futurorum contingentium, quæ decretum liberum antecedit, nam, hoc ut stante illa scientia intelligimus, Deum simul voluisse omnes rerum ordines naturæ, gratiæ, & unionis hypostaticæ cum habitudine & connexionem eorum inter se, ita intelligere possumus simul ordinasse Christum in redemptorem, & voluisse permittere peccatum, quod esset occasio conferendi Christo illam dignitatem, & perfecte manifestandi summam iustitiam, misericordiam, & sapientiam in hoc mysterio perficiendo. Unde sumitur confirmatio; nam peccatum permissum est, ut Deo esset occasio manifestandi iustitiam & misericordiam, quod fecit per redemptionem; ergo in ordine finis fuit redemptio prius intentata: & e converso incarnatio in eo primo decreto & signo eo modo intentata est, qui magis ad Dei sapientiam, bonitatem, iustitiam, & misericordiam manifestandam deserviret, quod optime Christus perfecit exercendo munus redemptoris; ergo ad illud fuit in eo primo signo præordinatus. Et ad hoc confirmandum applicari potest discursus factus sectione præcedente in assertione prima. Et hæc sententia sic exposita est probabilis, & potest facile defendi; mihi tamen nunquam satis persuaderi potuit.

Ut ergo, quod verius iudico, breviter proponam, in memoriam revoco distinctionem supra positam de modo concipiendi actum divinæ voluntatis, vel ut terminatur adæquate ad totum objectum ad extra sibi per intellectum divinum propositum per modum unius, vel ut præcise a nobis conceptum, quatenus ad unam rem ut ad finem, & ad aliam ut medium, terminatur. Priori enim modo clarum est, sub illa voluntate, qua Deus voluit sese ad extra communicare, per naturam, gratiam, & unionem hypostaticam, cecidisse etiam permissionem peccati hominum non solum originalis, sed etiam actualium, & consequenter sub eadem voluntate cecidisse etiam Christi passibilitatem & redemptionem, tam ut ad peccatum originale tollendum, quam ut ad remissionem actualium, ordinata est, vel sufficienter respectu omnium, vel efficaciter respectu aliquorum. Unde, etiam sub ea voluntate comprehensa sunt omnia efficacia media, per quæ prædestinati salvantur, & permissiones peccatorum, propter quæ reprobi condemnantur, & ad salutem electorum cooperantur. Verumtamen huiusmodi consideratio divinæ voluntatis non est præsentis quæstioni accommodata, nam juxta illam nullus huic quæstioni relinquatur locus, cum constet, nihil in rebus fieri, quod sub illam voluntatem non cadat, & per illam ab æterno vel præordinatum sit, vel permissum absque ulla successione, vel distinctione, quæ in eo reperiatur, quia simplicissima est & immutabilis. Altera ergo consideratio divinæ voluntatis necessaria est, ut præsens quæstio locum habeat, quo modo supra diximus, intentionem finis in Deo interdum præscindere a particulari medio, & esse priorem illo secundum rationem. Et eodem modo facile intelligere possumus, voluntatem illius boni, quod Deus per se primo amat ut finem, præscindere a permissione peccati, quia Deus nullo modo vult permissionem peccati ut finem, sed tantum ut medium. Atque eadem ratione intelligi facile potest, illud decretum, quo Deus primo voluit prædestinatos creare aut salvare, præscindere ab illis proprietatibus, vel mediis, quæ passibilem carnem requirunt, ut sunt dolores, martyria, & similia, quia hæc non fuere per se primo intentata; hac enim ratione scriptum est. *Deus mortem non fecit.* In hoc ergo sensu melius videtur prior sententia procedere, quam posterior.

Dico itaque primo Deum non prius voluisse Christum venire passibilem & mortalem, quam voluerit permittere peccatum, illudque propria & absoluta scientia visionis præviderit. Hanc conclusionem probant sufficienter

Origo  
passibilitatis & mortalitatis in carne Christi ex Adæ peccato.



per omnia ætata supra sectione secunda pro prima sententia, & in hoc etiam omnes Theologi videntur convenire, quamquam enim differant in substantia ipsius mysterii, an fuerit per se amata ante vel post prævisionem peccati, de statu tamen passibili, & de passione & morte omnes docent non fuisse prædefinitam, antequam originale peccatum & permetteretur & prævideretur. Secundo, hoc est magis consentaneum scripturis, quæ docent Deum nec voluisse, nec fecisse mortem; quia videlicet a Deo per se intenta non fuit, sed solum occasione peccati introducta; ergo hoc multo magis de Christi morte existimandum est; non ergo fuit per se intenta, & ratione illius peccatum permissum est, ut Christus ad illud tollendum moreretur: sed e contrario potius prius est peccatum permissum & prævisum, & occasione illius mors Christi introducta. Unde argumentor tertio a priori. Nam hoc differt inter incarnationem & passionem, quod incarnatio fuit per se amabilis tanquam finis aliorum operum Dei, passio vero seu mors non per se amabilis fuit, sed solum ut medium ad redemptionem peccati. Diximus autem sectione 1. prius cadere in voluntatem medium illud, quod est tanquam finis respectu alterius; cum ergo passio sit medium ad tollendum peccatum, & e contrario permissio peccati non fuerit medium electum propter passionem & mortem Christi, necessario efficitur, prius Deum voluisse permittere peccatum, quam Christi passionem vel mortem. Quarto, quia Deus non prædefinit absolute voluntate mortem Adæ, & posterorum ejus, neque ut filii Adæ nascerentur passibiles, donec permisit, & prævidit peccatum, ut constat ex modo loquendi Scripturæ, & patrum, ac Theologorum omnium; non enim quia Deus voluit nos mortales, ideo permisit peccatum, sed solum quia vidit nos peccaturos, voluit, ut morte puniremur; ergo nec mortem Christi aliter prædefinit. Patet consequentia, tum quia est eadem vel major ratio, quia Deus prævidit scientia conditionata, vel simplicis intelligentiæ fore, ut si Adam tali modo crearetur, & tentari permetteretur, &c. esset peccaturus; ergo si propter hanc scientiam dicitur Deus prædefinivisse mortem Christi ante permissionem peccati, eadem ratione idem dici poterit de morte nostra, quia non minus mors Christi fuit poena peccati nostri, quam nostra mors: tum etiam quia ut Paulus dicit ad Hebr. 2. Christus ordinatus est passibilis & mortalis, ut nobis assimilaretur, & misericors fieret: unde sicut immortalitas Christi est exemplar nostræ immortalitatis, ita mortalitas nostra dici potest exemplar mortalitatis Christi, atque adeo prior quam illa in divina præscientia & voluntate. Quinto possumus hoc confirmare, quia quamvis Deus sæpe prædefiniat finem consequendum media permissione peccati, quando talis finis de se non necessario prærequirit peccatum, neque habet intrinsecam connexionem cum illo, ut videre est in electione prædestinati ad gloriam consequendam media permissione peccati, tamen quando finis talis est, ut omnino necessario supponat peccatum, non prædefinitur a Deo ante permissionem & absolutam prævisionem peccati. Quia talis prædefinitio videri potest quædam virtualis voluntas ipsius peccati, & hac ratione non prædefinit Deus poenam ut poenam, nisi prius culpam permittat, atque prævideat. Quæ ratio æque procedit de omnibus proprietatibus, imperfectionibus, aut perfectionibus rerum, quæ peccatum essentialiter aut necessario supponunt ex natura sua, ut actualis poenitentia proprie sumpta, & poena ut poena, vel quæ talis est ex ordinatione divina, ut sunt mors, & corruptio corporis humani, quæ Deus esse noluit, nisi in poenam; nam cum omnia supponant culpam, non possunt cadere sub absolutam, efficacem, ac præordinativam Dei voluntatem, nisi ex præsuppositione culpæ jam prævisæ, ne videatur Deus virtualiter saltem & implicite culpam ipsam præordinare, & non tantum permittere, quod ejus bonitati repugnat, & ideo contrarius ordo, vel est certe impossibilis, vel saltem minus consentaneus divinæ sapientiæ & bonitati.

Ultima probatio. Unde argumentor ultimo, quia aliàs dicendum esset, Deum in primo decreto libero suæ voluntatis, etiam per rationem nostram præcise considerato, voluisse Christum ut passibilem & mortalem, & subinde ideo voluisse permittere peccatum, ut passio & mors Christi locum

haberent; hoc autem falsum & absurdum videtur; ergo. Major est clara, quia permissio peccati, & passibilitas carnis Christi, non sunt a Deo volitæ mere concomitanter, id est, absque ulla habitudine & causalitate unius ad aliam, ut ex Scriptura constat, quia passio Christi propter peccatum destruendum volita est; si autem inter illa duo est aliqua habitudine causæ, vel passibilitas carnis Christi est aliquo modo causa permissionis peccati, vel non. Si non est causa; ergo nullo modo est prior in divina voluntate, quam permissio peccati, quia hæc prioritas non est, nisi secundum aliquam rationem causæ, ut supra declaratum est, præsertim cum non possit ibi intervenire prioritas in subsistendi consequentia, cum certum sit, non existente peccato Verbum non fuisse assumptum carnem mortalem: unde concluditur, quod intendimus, permissionem peccati fuisse aliquo modo priorem, cum fuerit ratio vel occasio volendi passibilitatem carnis Christi. Si autem passibilitas carnis Christi fuit aliquo modo causa permissionis peccati, id esse non potuit, nisi in genere causæ finalis, quatenus scilicet passio intenta movit Deum ad permittendum peccatum, quia nullum aliud genus causalitatis hic potest fingi aut excogitari. Minor autem, scilicet, hoc consequens falsum esse, probatur sufficienter omnibus rationibus adductis. Et declaratur amplius, quia passio fuit ordinata ut medium ad tollendum peccatum; ergo non potuit ordinari ut finis permissionis peccati, repugnat enim idem secundum idem esse finem & medium respectu ejusdem. Quod enim idem Christus secundum diversa, quæ in eo considerantur, sit finis & medium nostræ salutis, recte & facile intelligitur, nam secundum se, & secundum suam gloriam & honorem est finis nostræ justitiæ & sanctitatis, tamen secundum suam passionem dici potest medium ad nostram salutem; at vero quod eadem passio respectu peccati habeat rationem finis & medii non videtur posse intelligi.

Dicit aliquis, aliud esse permissionem peccati, aliud vero peccatum ipsum ac remedium ejus; aliud est enim peccatum fieri, aliud destitui: permissio autem respicit ipsum fieri, saltem per accidens seu negative, scilicet non impediendo, quo minus illud fiat, seu non dando auxilium, sine quo de facto infallibiliter fiet: remedium autem peccati tendit ad destructionem ejus. Sic ergo non videtur repugnare, quod idem secundum idem sit medium seu remedium ad destruendum peccatum, quod fuit finis permissionis ejus. Passio itaque Christi non fuit medium ad permissionem peccati, neque ut peccatum ullo modo fieret, sed ut tolleretur potius & destrueretur, & ideo recte potuit esse finis permissionis peccati. Quæ responsio est sane ingeniosa, & ratione formæ (ut sic dicam) impugnari satis non potest, quia ex terminis non repugnat idem esse finem & medium sub illis diversis rationibus, eadem enim virtus medicinæ potest esse finale motivum inducendi, vel permittendi aegritudinem, & esse medium ad tollendam illam. Nihilominus tamen ratione materiæ non probatur in præsentia illa distinctio, nam ex illa sequitur, primum motivum volendi incarnationem Christi in carne passibili non fuisse remedium peccati prævisi, quod esse falsum & alienum a Scriptura, ostendimus sect. sequente. Probatur sequela, quia remedium peccati non potuit movere Deum ad volendam passibilitatem carnis Christi ante ejusdem peccati permissionem & prævisionem; ergo, si permissio peccati processit suo modo ex prædefinitione Christi passibilis, scilicet, ut præberetur occasio perficiendi hoc mysterium in carne passibili, prout prædestinatum erat, necessario efficitur, Deum non primo voluisse passibilitatem Christi in remedium peccati, sed propter se, sicut incarnationem ipsam.

Dices potuisset carnem Christi passibilem prædefiniri in remedium peccati, etiam ante permissionem & prævisionem peccati, nam peccati remedium & curatio potuit in genere finis prius intendi, & ideo deinde permitti, ut occasionem daret curationis, ad ostendam virtutem medicinæ & infinitam medici sapientiam. Atque hoc modo potuit incarnatio in carne passibili primo prædestinari in remedium peccati, & nihilominus in genere finis præordinari ante permissionem & absolutam præscientiam peccati futuri: sicut etiam intelligi potest, Deum præordinasse & voluisse creare ignem inferni

Aliquorum solutio.

Improbatur.

Replicatio.



ferri in supplicium peccati, prius ratione, quam præviderit futurum peccatum. Sed hæc responsio ratione superius indicata refellenda est. Et, ut ab illo ultimo exemplo incipiam, recte intelligitur, ignem inferni fuisse præordinatum ante absolutam præscientiam peccatorum, ut esset aptum instrumentum ad supplicium peccatorum, si essent; non tamen intelligitur recte ipsam actualem & poenalem combustionem illius ignis fuisse absoluta voluntate beneplaciti præordinatam ante absolutam præscientiam alicujus peccati finalis futuri, sed solum voluntate antecedente, quæ per hanc conditionalem explicatur: volo peccatum puniri, si fiat. Et ratio differentia est, quia prior modus voluntatis, & præordinationis ignis inferni, non infert necessario peccatum futurum, imo vere & sine inconveniente dicitur, quod, ex vi talis præordinationis, ignis inferni esset, quamvis nullum esset peccatum futurum: possunt enim carcer & instrumenta supplicii præparari ad vindictam malefactorum, qui esse possunt, etiam si fortasse nulli futuri sint; & illud per se spectat ad offensionem divinæ justitiæ, & ad completam providentiæ rationem. At vero ordinatio supplicii posteriori modo concepta per voluntatem absolutam & beneplacite infert necessario ex vi sua peccatum futurum: quia actualis poena ut sic & sub ratione poenæ inferri non potest, nisi supposita culpa, & ideo non potest esse talis præordinatio supplicii, nisi ut consequens permissionem & prævisionem culpæ; quia Deus ex se solo (ut sic dicam) & tantum ex beneplacito suo, non vult absolute & efficaciter aliquid, quod ex intrinseca ratione sua peccatum requirat, sed tantum ex præsuppositione peccati, quia aliis videretur implicite & virtualiter velle ipsum peccatum, qui enim vult aliquid, vult quidquid etiam cum illo habet necessariam connexionem seu habitudinem, si illud non supponat. Sic igitur in præsentem facile intelligi potest, Deum in primo signo præordinasse mysterium Incarnationis, ut in eo esset sufficiens ac perfectum peccati remedium, si illius necessitas occurrat; tamen ea voluntas remedii peccati, prout in eo signo antecedit in genere finis, non potest intelligi ut absoluta, & efficax, sed tantum ut antecedens, si remedium peccati non solum aptitudinem dicat, & sufficientiam, sed etiam actualement curacionem per actualement satisfactionem & redemptionem; quia remedium peccati hoc modo sumptum, ex se, & ex intrinseca ratione sua dicit necessariam connexionem & habitudinem ad peccatum actu futurum, & ideo non potest esse efficaciter præordinatum ac volitum, nisi ex præsuppositione peccati futuri, & absoluta præscientia ejus, quæ permissionem etiam supponit; talis ergo prædefinitio remedii peccati non potuit esse in illo primo signo, quod in genere finis intelligitur antecedere permissionem & præscientiam peccati.

Unde ulterius concluditur, neque passibilitatem carnis Christi fuisse absolute prædefinitam in illo signo, quia illa non fuit ordinata, ut esset remedium peccati solum in actu primo (ut sic dicam) seu quoad valorem & sufficientiam remotam, alioquin ex vi illius prædefinitionis venturus esset Christus passibilis, etiam si peccatum non fuisset futurum, quod omnino falsum est: fuit ergo præordinata Christi caro passibilis, ut deserviret ad actualement solutionem & satisfactionem pro peccato, seu (quod idem est) ut in ea fieret quoddam actuale supplicium peccatorum humani generis, juxta illud ad Hebræos 10. *Corpus autem aptasti mihi*; & ideo illa voluntas habet ex vi sui objecti necessariam connexionem cum peccato futuro; non ergo recte attribuitur Deo ex solo beneplacito ejus, sed solum ex prævisione absoluta culpæ futuræ; nam quoad hoc eadem est ratio de hac poena, & de quacumque alia, nam, licet medicinalis sit, tamen necessario supponit culpam, & hac ratione non potest illam antecedere in genere finis, sed simpliciter illam supponere, ut materiam, circa quam versatur. Et ideo hanc causam censo esse veram, quia Deus prævidit peccatum futurum, ideo voluit, carnem Christi esse passibilem, hanc vero falsam, quia Deus voluit carnem Christi esse passibilem, ideo peccatum permittit. Quomodo autem nihilominus verum sit, Deum permisisse peccatum, ut mysterium incarnationis optimo modo perficeret, dicam commodius in sectione 3.

Dico secundo, ante permissionem, ac propriam & Suarez Tom. XVI.

absolutam prævisionem peccati Christus non fuit prædestinatus, ut redemptor hominum, sed solum post peccatum permittum, & prævisum. Potest quidem dici Christus in eo signo prædestinatus, ut iustificator, & ut glorificator hominum, atque adeo ut Salvator, quatenus hoc nomine significari potest author salutis, etiam si peccatum non intercedat, quomodo exponi potest Irenæus supra. Potest etiam Christus in eo signo dici prædestinatus redemptor quoad potestatem (ut ita dicam) & sufficientiam, quia tantæ dignitatis præordinatus est, & opera ejus sufficientissima esse possent ad remedium, si necessarium esset, quomodo loquitur Cyrillus supra. Non est tamen in eo signo absoluta voluntate a Deo prædefinitum, ut exerceret actualiter munus redemptoris, & hoc sensu sequitur hæc conclusio ex præcedenti, & ita eam docent iidem Theologi, quia prædestinari hoc modo in redemptorem, & in carne passibili, idem fere sunt. Docet etiam illam Rupert. supra ad illam accommodans illud ad Hebræos 2. *Decebat eum, propter quem omnia, qui multos filios in gloriam adduxerat, scilicet secundum divinam prædestinationem, in qua propter Christum decreverat Deus multos homines in gloriam adducere, Authorem salutis eorum per passionem consummari. Illud enim charitatis propositum* (inquit Rupertus) *non evacuavit ex adverso veniens peccatum, sed statim ac mortui sumus, ejus passio ordinata est, quoniam decebat eum non propter quem omnia, &c.* Ad hunc etiam modum intelligi potest illud Psal. 39. quod de Christo exponit Paulus ad Hebr. 10. *Sacrificium & oblationem noluit, corpus autem aptasti mihi*: non ergo aptavit Deus corpus Christi accommodatum passionibus, docet peccatum vidit, pro quo nullum aliud sacrificium sufficebat. Et confirmatur ratione supra indicata, nam si prius quam Deus permitteret homines labi in peccatum, lapsosve videret, absolute & efficaciter voluit, ut Christus esset redemptor, voluit etiam, ut homines indigerent redemptione, nam hæc duo correlativa sunt, & unum dicit ordinem intrinsece ad aliud: sed hoc est omnino falsum quia indigere redemptione est subesse peccato, & hoc numquam Deus voluit, ut prædefinit, sed voluit tantum permittere. Neque satis est dicere per illam præscientiam simplicis intelligentiæ præcognitum fuisse peccatum, antequam esset permittum, saltem scientia illa conditionata, quia talis præscientia non mutat ordinem voluntatis, nec potest efficere, quin unumquodque objectum sit amandum, prout amabile est, atque adeo ut id, quod omnino necessario supponit peccatum, & amabile non est, nisi ut poena vel satisfactio pro peccato, efficaciter intendi, aut definiri debeat, nisi supposita permissione, & absoluta prævisione peccati.

Et eadem ratione non satis est dicere per eandem scientiam simplicis intelligentiæ simpliciter præcognosci peccatum futurum, quatenus per eandem intelligentiam præcognoscitur, Deum permitturum illud; quia licet hoc concedamus, tamen hæc præscientia supponit voluntatem ipsam divinam, ut præsentem saltem objective; ergo supponit debitum ordinem in ipsa voluntate, atque adeo futuram voluntatem permittendi illud, ut priorem, quam efficaci voluntate puniendi illud tam in Christo, quam in nobis. Unde tandem confirmatur conclusio, quia non videtur posse negari, quin Deus in illo primo signo rationis potuerit prædefinire Incarnationem tantum quoad substantiam ejus, & eas proprietates, quæ per se illam consequuntur, & pertinent ad perfectionem simpliciter animæ assumptæ, quia totum hoc objectum est amabile, & independens a munere redemptoris, quamvis cum eo etiam stare possit. Ergo recte intelligitur, Deum ita voluisse incarnationem in eo signo, non vero passionem, atque redemptionem, donec peccatum prævisum est.

Et confirmari hoc potest, nam in mente Dei prius intelligimus intentionem finis, & deinde voluntatem exequendi illum per hæc, vel illa media: at vero in proposito munus redemptoris est veluti quoddam medium ad nostram salutem, & ad exaltationem & gloriam ipsiusmet Christi; ergo non oportet illud intelligere in primo signo, quo facta est electio prædestinatorum, & ipsiusmet Christi.

Ad fundamenta secundæ sententiæ fere patet responsio

In quo signo Christus prædestinatus, ut redemptor hominum.



Fende-  
mea se-  
cunde  
sententia  
distinguitur

Differen-  
tia inter  
attributa  
Redem-  
ptoris, &  
alia Chris-  
ti conve-  
nientia.

sio ex dictis, nam omnia videntur procedere de voluntate Dei integre seu adæquate concepta priori modo a nobis explicato. Quod si in alio sensu procedant, facile potest eis satisfieri, nam Patrum testimonia jam obiter declarata sunt. Ad rationem vero a nobis factam responderetur, non esse idem iudicium de attributo Redemptoris, & de cæteris, quæ peccatum non requirunt: nam hæc nihil involvunt Deo per se repugnans, nec supponunt aliquid, quod Deus ex se efficaciter velle non possit, attributum autem Redemptoris aliquid huiusmodi includit, vel potius supponit. Unde alia Christi attributa, ut supremi Regis, Capitis, Authoris gratiæ, & Consummatoris gloriæ, & similia, videntur esse quasi perfectiones simpliciter simplices, quæ ad perfectionem simpliciter per se pertinent, quia nec imperfectionem, nec culpæ defectum necessario involvunt, aut supponunt: dignitas autem Redemptoris, licet quoad radicalem sufficientiam (ut sic dicam) perfectionem simpliciter importet, & necessario Christo conveniat, tamen, quantum ad actuale usum, & exercitium illius muneris, quod in exhibenda satisfactione consistit, non pertinet ad satisfactionem simpliciter, sed solum ex præsuppositione peccati.

#### SECTIO IV.

*Quæ fuerit Deo prima ratio, seu motivum incarnationis faciendæ, ac prædestinandæ.*

Quæstio hæc intelligenda est de prima ratione, quæ ex parte ipsarum rerum movit divinam voluntatem ad incarnationem volendam, quia ex parte ipsius Dei certum est primam rationem, propter quam omnia operatur, esse bonitatem & gloriam suam: quia vero inter suos effectus, quosdam vult immediate ac proxime propter se, & quia in eis est sufficiens ratio, propter quam amantur, & in Deum immediate referantur, alios vero, quia ad alios effectus ordinantur, propter quos etiam amantur immediate, ut ex D. Th. sumitur 1. q. 19. art. 5. præsertim ad 3. ideo hoc sensu quærimus quæ fuerit prima ratio volendi incarnationem.

In quo est prima sententia sectione secunda relata, quæ affirmat primam rationem, quæ movit Deum ad volendam incarnationem, & prædestinandam illam, fuisse remedium peccati in humano genere prævisi. Hæc existimatur esse D. Thomæ, & eam sequuntur discipuli ejus, & alii authores, quos ibi indicavi, & fundamentum est ibi positum, quia scriptura & sancti hanc potissimum causam assignant.

Secunda sententia dicit Deum per se primo voluisse hoc mysterium propter seipsum, & propter ejus excellentiam, & ad universi complementum, consequenter vero, & quasi oblata occasione peccati, voluisse etiam illo uti in remedium peccati. Hanc tenent Alenf. Albert. Scot. & alii sectione secunda citati pro secunda sententia, quorum fundamentum fumendum ex ordine prædestinationis hujus mysterii supra explicato.

Tertia sententia media esse potest, quæ utramque positam quodammodo amplectatur, & primam rationem volendi hoc mysterium esse dicat, tam excellentiam ipsius mysterii, quam nostram redemptionem, ita ut in primo signo, quo Deus voluit hoc mysterium, ex utraque ratione, tanquam ex quodam completo motivo divina voluntas fuerit inclinata. Quam sententiam videtur docere Cyrill. Alexan. 5. thesau. c. 8. quem locum infra latius tractabimus. Favet etiam Nazian. orat. 38. in Natale Dom. Athan. ferm. 3. contra Arium, & lib. de huma. Verb. quorum verba supra adduxi. Et fundamentum hujus sententiæ esse potest, quia Scriptura significat Christum per se, & primo fuisse prædestinatum inter omnes creaturas, in quo indicat per se fuisse amatum ac propter se multo magis, quam angelos vel homines; deinde semper vel frequentius assignat rationem hujus mysterii ex redemptione nostra indicans hanc etiam rationem divinam voluntatem ad hoc mysterium volendum inclinasse; sed possunt hæc duæ rationes per modum unius completi motivi conjungi, & copulari in illa prima divina voluntate, qua hoc mysterium prædestinatum est; ergo ita videtur asserendum. Consequentia cum majori satis ex supradictis patet. Minor declaratur breviter ex dictis, quia ante illam voluntatem præscie-

bat Deus indigentiam futuram in humano genere propter peccatum (modo saltem explicato in fine præcedentis sectionis) & præsciebat hoc mysterium non solum in se esse dignissimum, & ad completam universi perfectionem aptissimum, verum etiam efficacissimum ad remedium peccati. Ergo optime intelligitur, Deum propter has omnes rationes simul, & per modum unius, fuisse inclinatum ad incarnationem volendam.

Ut quæstio hæc definiatur, præ oculis habenda est distinctio illa de duplici consideratione divinæ voluntatis, scilicet, ut adæquate terminatur ad res, & ad omnes effectus, quos in eis efficit, vel permittit; vel ut præcise terminatur ad quasdam res ut fines aliarum, & e contrario ad quasdam ut ad media ad aliarum commodum, utilitatem, vel honorem ordinata. Utroque enim modo considerari potest voluntas divina in ordine ad mysterium Incarnationis, & utroque etiam modo inquiri potest prima ratio ac motivum ejus; sed præcipue hic loquimur de priori modo, ubi primariam Christi prædestinationem investigamus. Unde ulterius considerandum est, variis modis posse aliquot motivum voluntatis esse & vocari, primum, scilicet, origine, & excellentia, efficacia & adæquatione. Supponit enim hæc comparatio (id quod verissimum est) posse eandem voluntatem ad idem objectum ex pluribus motivis ferri, sive id faciat pluribus actibus, aut realiter, aut ex natura rei distinctis, ut fortasse in nobis contingit, sive uno æquivalente pluribus, qui ratione nostra possit in plures distingui, ut in Deo videre licet: in nobis ergo contingere potest, ut ordine originis seu durationis unum tantum motivum prius moveat voluntatem, ita ut propter illud solum prius velit tale objectum, postea vero occurrat aliud motivum, vel æque, vel magis bonum & efficax, & quod propter illud etiam incipiat ferri voluntas, alterum non relinquendo; quod fuit quidem primum via generationis, fieri tamen potest, ut non sit primum excellentia, aut efficacia, tunc autem neutrum ex illis est adæquatum respectu talis voluntatis prout operantis ex utroque motivo simul, sed ex utroque coalescit integrum motivum talis voluntatis, respectu adæquatæ motionis ejus. Necesse est autem prædicta motiva esse ejusmodi, ut tota similia, seu ita movere voluntatem, ut quodlibet eorum de se sufficiat, & de facto ita moveat, ut propter illud solum ita moveatur voluntas, quod si aliud non adesset, etiam moveretur, nam de ratione causæ totalis est, ut ipsa sine alia sufficiat in suo genere ad effectum, & quod in eum influat, quantum in eo genere necesse est. Unde, si motiva talia sint, ut neutrum per se sufficiat, utrumque autem simul sumptum moveat voluntatem, neutrum erit totale motivum, sed partiale; & ex utroque unum sufficiens conficietur; si vero unum sit per se sufficiens, aliud vero minime, illud prius non solum est præcipuum, sed etiam illud solum est totale, immo solum id meretur nomen motivi terminantis voluntatem, nam aliud solum est veluti coadjuvans, magisque impellens, quo modo aliqui rationem priorem motivam vocant, posteriorem vero impulsivam. Si vero utrumque sit per se sufficiens, & unumquodque ita actu moveat voluntatem, ut, eo posito, voluntas moveatur independentem ab alio, tunc utrumque est totale motivum. Quod vero non repugnet, hoc modo moveri voluntatem ex pluribus motivis, experientia videtur notum, & ratione, quia possunt singula motiva habere sufficientem virtutem ad voluntatem movendam, & possunt simul representari: ergo voluntas pro sua libertate potest ex utroque moveri dicto modo, quia unum motivum non impedit, aut necessario excludit aliud. Nec propterea fit, ut ejusdem effectus sint proprie duæ causæ totales, quia licet effectus exterior, seu materiale objectum voluntatis sit idem, tamen ipsa motio, seu affectio voluntatis, secundum rem vel rationem est diversa.

In voluntate igitur divina, seclusa omni imperfectione, quæ in successione & multitudine actuum consistit, hæc omnia esse possunt, quæ a nobis juxta captum nostrum secundum ordinem seu distinctionem rationis considerantur. Atque hoc modo intelligimus, aliquod motivum voluntatis divinæ posse esse primum origine, non duratione, sed causalitate finis, seu ordine intentionis, & post hoc motivum intelligimus, posterius ratione posse adjungi aliud, quod non solum sit impulsivum seu



seu adjuvans, sed etiam vere motivum per se sufficiens, magis vel minus efficax pro objectorum vel motivorum varietate. Et a fortiori intelligi potest, simul & in eodem signo rationis determinari divinam voluntatem ad aliquid volendum propter plura motiva totalia, ac per se singula sufficientia ad inclinandam divinam voluntatem: nihil enim horum magis in divina voluntate repugnat, quam in nostra, neque aliquam imperfectionem includit. In præsentem ergo quæstionem in primis inquire oportet, an in volendo incarnationem Deus unum tantum, vel plura habuerit motiva, nam omnes opiniones citatæ videntur sentire, unicam tantum fuisse huiusmodi adæquatam rationem, quæ divinam voluntatem movit ad incarnationem volendam: & hoc sensu dicunt, illud motivum fuisse primum negative, id est, unicum, quia ante illud nullum fuit aliud, nec etiam post illud. Sed ut magis intelligatur opinionum diversitas, oportet distinguere substantiam mysterii a modo ejus, quod fieret in carne passibili, & in redemptionem hominum. Prima ergo sententia utrumque conjungit in uno veluti adæquato objecto materiali, & in una determinatione libera voluntatis divinæ, quam simul, etiam secundum rationem, Deus habuit, ejusque unicum adæquatum motivum fuit hominum redemptio. Secunda vero opinio illa duo distinguit tanquam diversa materialia objecta, quæ actibus secundum rationem distinctis, & insignis priori & posteriori secundum rationem Deus voluit, & ideo distinguit etiam motiva harum voluntatum, & mysterium quoad substantiam suam, & absolute dicit, fuisse amatum propter se, id est, quia in ipso per se sumpto divina bonitas maxime communicatur, & sapientia relucet, & ideo hoc vocat primum motivum divinæ voluntatis ad hoc mysterium, quia substantia mysterii prius necessario prædefinita est, quam modus supposita distinctione rationis, quam hæc opinio supponit. Immo, quantum ad hoc videtur hæc opinio sentire, hoc motivum fuisse unicum, quia redemptio hominum non fuit motivum respectu substantiæ incarnationis, sed tantum respectu modi, quia supponit jam voluntatem divinam, ad volendum ipsum mysterium secundum se satis determinatam, & ideo quoad hoc non censetur redemptio hominum fuisse ratio motiva, sed ad summum impulsiva, seu adjuvans. At vero tertia sententia convenit cum prima in hoc, quod totum mysterium, prout includit substantiam & modum, censet in eodem signo rationis fuisse definitum unico & indivisibili actu, etiam secundum rationem; differt tamen, tunc in assignando hoc instante seu signo rationis, juxta ea, quæ in secunda & tertia sectione tractata sunt; tum etiam (quod ad rem præsentem spectat) quia non vult proprium & adæquatum motivum hujus voluntatis esse solam hominum redemptionem, sed etiam rationes alias, quæ per se in ipso mysterio reperiri possunt absque occasione peccati, ita tamen ut nullam illarum censeat fuisse adæquatam, sed ex omnibus illis adæquatum motivum confurgere.

Dico tamen primo. Ratio seu motivum sufficiens & adæquatum volendi incarnationem non fuit unicum tantum, sed plura, non tantum partialia, & quasi constituentia unum adæquatum motivum, sed totalia & per se sufficientia. Hæc conclusio per se est rationi consentanea, & excellentiæ tanti mysterii, ac eminentiæ & comprehensioni divinæ naturæ, quæ perfectæ & exacto modo intelligitur velle ea, quæ vult. Primum ergo, quod in hoc mysterio plures rationes similes inveniantur, ex his, quæ diximus in comment. art. 1. & in disp. 3. sect. 3. & in toto art. 2. manifestum est. Et declaratur breviter, nam in hoc divino opere, sicut & in aliis, in primis considerari potest intrinseca ratio & motivum, deinde aliæ extrinsecæ. Quod ergo attinet ad intrinsecam rationem evidens est, hoc mysterium esse per se amabilius, quam sint angeli, vel homines, non solum in esse naturæ, sed etiam in esse gratiæ vel gloriæ considerati, quia illud opus est majus & excellentius, & quodammodo in virtute & eminentia continens reliqua. Itemque hoc opus per se consideratum est aptissimum omnium ad præcipuum finem operum Dei, qui est ipsius gloria, & manifestatio attributorum ejus; nam in hoc opere summe communicatur divina bonitas, & exercetur maxime omnipotentia ejus, & sic de cæteris attributis, ut supra dictis locis ostensum

Suarez Tom. XVI.

est. Rursus, quod attinet ad extrinsecas rationes, certissimum est, solam hominum redemptionem fuisse sufficientem rationem, ut propter eam solam Deus vellet hoc mysterium, ut satis patet ex dictis articulo secundo, & statim amplius declarabitur. Quod vero præter hanc rationem fuerint aliæ per se sufficientes, etiam si hæc deesset, patet etiam ex dictis dicta sect. 3. ubi plures rationes adduxi; potissimæ sunt autem, quæ pertinent ad sanctificationem hominum & angelorum ex perfectâ justitia, & ad exaltationem totius universi, quæ in Christo facta est. Denique, quod singulæ ex his rationibus per se fuerint sufficientes ad divinam voluntatem inclinandam, notius est per se, quam ut nostra probatione indigeat, nam in qualibet earum per se sumpta reperitur perfectissima ratio alicujus virtutis, aut liberalitatis, aut misericordiæ, aut justitiæ, & similium, vel plurium simul; & in qualibet earum per se ostenditur bonitas & sapientia Dei, & exercetur omnipotentia.

Solum superest, ut ostendamus huiusmodi motiva non solum ex se esse sufficientia, sed etiam de facto fuisse a Deo intenta, seu divinam voluntatem inclinasse ad incarnationem volendam. Ut enim voluntas ex aliquo motivo operetur, non satis est illud esse ex se sufficiens, quia, cum voluntas sit libera, potest ex uno motivo, & non ex alio operari, etiam si utrumque sit sufficiens. Unde in hoc magnam vim faciunt adversarii, præsertim nonnulli auctores primæ opinionis, quod de motivo seu ratione operandi divinæ voluntatis non possumus judicium ferre ex solis rationibus ipsarum rerum propter libertatem illius voluntatis, cujus usus seu determinatio solum ex ipsiusmet revelatione nobis potest constare: in divina autem Scriptura non sunt nobis revelata omnia hæc motiva, imo neque plura, sed unum tantum, nimirum nostra redemptio; ergo nullus potest cum fundamento, sed tantum divinando, affirmare habuisse Deum aliud motivum præter hoc ad incarnationem volendam, præsertim cum sancti Patres supra sect. 2. citati nullam aliam assignent, imo etiam interdum omnem aliam excludere videantur, ut significat illa interrogatio Gregorii Naz. orat. 36. *Humanitatis susceptæ causam nostram est, quid enim aliud esse potuisset?* Et expresse August. lib. de peccat. merit. c. 29. dicit. *Non ob aliam causam Jesum Christum in carne venisse, nisi ut nos redimeret.* Unde lib. 3. hypogn. interrogat. *Quid opus erat Deo, si status integer naturæ maneret humanæ, carnem suscipere nostram?* Similiaque ex Gre. Amb. Ber. & aliis, quos supra retuli: unde interdum addunt, parum fuisse Christum nobis nascendo profuturum, nisi redimendo profuisset, quasi dicant, nullam aliam tanti mysterii sufficientem rationem fuisse.

Nihilominus tamen probatur dicta conclusionis pars, Probatæ  
concl. nam in primis, quod attinet ad intrinsecum motivum, quamvis in Scriptura sacra, ex generalibus locutionibus, & ex ipsa rei natura posset sufficienter colligi: nam, licet divina voluntas sit libera, nihilominus intelligimus sapientissime & prudentissime omnia operari: & ideo, sicut universas res per se voluit propter perfectiones earum, & ad completam sui communicationem, ita multo majori ratione credendum est, hac ratione & modo hoc mysterium incarnationis voluisse; neque oportuit, hanc rationem specialiter in Scriptura declarari, sed satis fuit non excludi. In divina namque Scriptura oportuit extrinsecas rationes, vel motiva divinorum operum explicari: nam illa, cum sint extrinseca, & pertineant tantum ad finem operantis, non possunt aliter nobis innotescere; motivum autem intrinsecum, cum ex re ipsa manifestetur, satis est non excludi, quia nisi hoc specialiter revelatum sit, nulla est ratio cogitandi, Deum exclusisse tale motivum. Unde in cæteris Dei operibus, ut sunt cæli, angeli, & homines, in esse naturæ & gratiæ, numquam in speciali legimus, voluisse Deum creare singula ex his propter eorum perfectionem, universi complementum, & perfectam divinæ bonitatis communicationem, sed tantum in communi legimus, Deum propter se, & propter bonitatem suam omnia creare, ut omnibus seipsum communicaret; & in omnibus bonitatem suam, & quandam sui similitudinem aliquo modo perfectam intendisse. Ex quo principio concludit D. Thom. 1. p. q. 50. art. 1. Deum creasse aliquas creaturas in gradu intellectuali propter earum perfectionem & majorem cum Deo similitudinem. Quocirca quamvis in Scriptura interdum



declaretur aliqua extrinseca ratio creationis huiusmodi rerum, ut de angelis, quod sint in mysterium hominum, vel aliquid simile, semper supponi intelligitur illa intrinseca ratio sumpta ex gradu perfectionis uniuscuiusque rei. Cur ergo non licebit de hoc altissimo mysterio ita philosophari? Non ergo in hoc divinamus, sed proprias rationes rerum ex revelatis principiis investigamus. Secundo, quod pertinet ad motiva extrinseca, verum non est, omnia alia, præter redemptionem, esse in Scriptura sacra prætermissa. Quamvis enim sæpius inculcetur ratio sumpta ex redemptione nostra propter rationes infra tractandas, non tamen omnino alia prætermissa sunt; supra enim disp. 3. sect. 3. multa loca ex Scripturis citavimus, in quibus alia rationes huius mysterii explicantur, quæ a peccato vel redemptione non pendent, ut cum dicitur *Christus prædestinatus in gloriam nostram* 1. ad Corinth. 2. vel *ut sit nostra iustitia & sanctificatio* 1. ad Corinth. 1. vel, *ut sit caput omnium angelorum & hominum*, ad Ephes. 1. ad Coloss. 1. vel denique cum dicitur Deus dedisse Filium suum ex dilectione hominum vel totius mundi Joan. 3. Hæ namque rationes & similes peccatum non supponunt, nec ab illo pendent.

Sed ajunt, has omnes rationes in redemptione includi, per quam in Christo justificamur, & glorificamur, & ipse efficitur caput omnium, & universus mundus renovatur & exaltatur; & ideo has omnes rationes non censeretur a redemptione distinctas. Unde fere in omnibus illis locis Scripturæ, ubi illæ attinguntur, statim insinuaturs redemptionis, vel aliquid, quod ad eam pertineat, ut Joan. 5. cum dicitur: *Sic Deus dilexit mundum, ut Filium suum unigenitum daret*, statim additur: *Ut omnis, qui credit in eum, non pereat, sed habeat vitam æternam: non enim misit Deus Filium suum in mundum, ut iudicet mundum, sed ut salvetur mundus per ipsum*: & 1. ad Cor. 2. cum Paulus ait: *Quam prædestinavit Deus in gloriam nostram*, loquitur de sapientia abscondita, id est, de Christo Crucifixo.

Sed hæc omnia, ad summum, probant, rationes illas includi aliquo modo in redemptione, & per illam etiam executioni mandari, quod etiam declarant citata Scripturæ testimonia; non tamen hoc impedit, quominus rationes illæ sint distinctæ a redemptione, & priores illa. Potest enim aliquid in alio includi, & nihilominus ab eo distingui: sic enim mereri nobis liberationem a peccato, & remissionem æternæ poenæ, includit mereri nobis gratiam & gloriam, & nihilominus mereri gratiam & gloriam distinctum quid est, & prius per se loquendo, cum possit hoc sine alio inveniri. Meruit enim Christus angelis gratiam & gloriam, quibus remissionem culpæ aut poenæ non meruit. Divina ergo Scriptura non tantum assignat rationes illas ut in redemptione inclusas, sed etiam per se ac simpliciter, & ut sic distinctæ sunt, & a redemptione separabiles. Imo in rigore plus includunt, quam redemptio, ut est illud Pauli ad Ephes. 1. *Benedixit nos omni benedictione spirituali in cælestibus in Christo*: hæc enim verba non solum comprehendunt benedictiones cælestes ex redemptione manantes, sed etiam illas, quæ redemptionem præcedunt, quasque in statu innocentie in Adam recepimus: nam Paulus, *Omni benedictione*, nullam excludit: ergo ratio prædestinandi Christum in hunc finem necessario debet esse alia a redemptione, & universalior illa, quæ non incommode explicatur ex supra dicta revelatione huius mysterii, quæ in statu innocentie facta est Adam; illi enim simul cum mysterio aliqua ratio ejus revelata est, quæ ad ipsum pertineret: non est autem revelata ratio redemptionis, quia non oportuit, illum esse sui peccati præcium, ut recte Augustinus docet lib. 11. Genes. ad liter. c. 18. ergo fuit ei revelata alia ratio prior redemptione, & independens a morte Christi, qua ipse Adam tunc non indigebat, ut ait idem August. lib. de correct. & gratia c. 10. Quo ergo fundamento dici potest, illam rationem non fuisse per se intentam a Deo, sed solum prout in redemptione inclusam? maxime cum sub hac præcisa ratione non potuerit habere effectum in Adam ut in iustitia originali creato & existente. Et simile argumentum sumi potest ex revelatione incarnationis facta angelis in sua creatione, & ex effectibus gratiæ & gloriæ, quos Christi prædestinatio in eos habuit, ut infra videbimus.

Atque hic modus explicandi scripturas, & has incarnationis rationes, est consentaneus Paulo citato loco

Ephes. 1. ubi post illa verba. *Benedixit nos omni benedictione spirituali in cælestibus in Christo*, subdit: *Sicut elegit nos in ipso ante mundi constitutionem, ut essemus sancti & immaculati in conspectu ejus in charitate, qui prædestinavit nos in adoptionem filiorum per Jesum Christum in ipsum, secundum propositum voluntatis sue, in laudem gloriæ gratiæ sue, in qua glorificavit nos in dilecto Filio suo*. In quibus verbis altissima ratio & causa prædestinationis Christi, & nostræ in ipso continetur, abstrahens a redemptione, de qua postea additur: *In quo habemus redemptionem per sanguinem ejus*, &c. Quando ergo Sancti Patres supracitati solum redemptionem nostram, ut rationem & causam incarnationis assignant, necesse est, eos loqui de incarnatione, prout facta est, & passionem ac mortem includit, nam illius secundum id totum, quod includit, nulla est sufficiens ratio præter remedium peccati, & hoc sensu optime fiunt illæ interrogationes. *Quidenim aliud causa esse potuisset?* Nam si de incarnatione ipsa secundum se loquamur, quis dubitare potest, potuisse Deum plures alias illius causas & rationes habere? Et eodem sensu verum est, parum profuturam nobis fuisse Christi incarnationem, nisi nos redemisset, supposito, videlicet, nostro misero statu, & lapsu in peccatum, in quo si nos Christus reliquisset, quid nobis profuisset? Quomodo etiam dixit Leo Papa, *otiosam fore susceptionem carnis, si Christus non impleveret carnis ordinem*: loquitur enim contra quosdam hereticos, qui negabant veritatem mortis & passionis Christi; & ideo merito dicit, & in se futuram fuisse otiosam carnis passibilis susceptionem, si vera passio exercenda non fuisset, & nobis etiam fore otiosam, si per illam non fuisset redempti. At vero, si in hoc statu peccati non fuisset constituti, dubitari non potest, quin incarnatio Christi, absque morte & passione, potuisset, nec in se esse otiosa, sed ad magnam Dei & Christi gloriam, neque nobis inutilis, sed maxime profutura, non ad remissionem mali, sed ad boni promotionem, sicut nunc angelis profuit, ut supra disp. 3. sect. 3. late declaratum est.

Sed adhuc dicit aliquis, quamvis satis probabiliter persuasum sit supra dictas causas & rationes non solum esse ex se sufficientes quasi de possibili, sed etiam de facto omnes illas inclinasse divinam voluntatem: nihilominus tamen, nondum esse probatum, singulas ex his rationibus vim integri motivi & totalis respectu divinæ voluntatis, quatenus ad incarnationem volendam liberè determinata est: potuit enim Deus pro libertate sua ex his omnibus rationibus veluti conficere sibi unum integrum motivum, propter quod solum adæquate hoc mysterium voluerit, ut tertia opinio supra citata sentiebat. Respondetur, sicut negari non potest, potuisse Deum velle incarnationem propter illa motiva, quasi partialiter tantum eis utendo, ita etiam negari non posse, quin similiter potuerit Deus intendere, seu attendere ad hæc motiva eo modo, quo nos dicimus, scilicet, & ad omnia simul, & ad singula ut totalia & per se sufficientia: hoc enim esse possibile supra probatum est. Rursus, sicut alii auctores nobis obijciunt, nos non probare hunc posteriorem modum ex aliqua revelatione, ita nos ab eis vicissim interrogamus, ubi revelatum sit, eas rationes fuisse apud Deum motiva partialia, & non totalia, cum neque ex earum imperfectione, aut insufficientia, neque ex concursu omnium id colligi possit, neque video, qua ratione probabili id possit persuaderi.

Nos autem primum in rebus ipsis habemus sufficiens fundamentum ad id asserendum, id est in perfectione divinæ voluntatis, & ipsius mysterii, & uniuscuiusque motivi ex dictis. Supposito enim nobis constare, Deum aliquid velle propter aliquod motivum, ita credendum est uti illo, sicut motivum ipsum dignum est, seu promeretur: si ergo motivum ipsum de se est sufficiens & totale, verisimilius est, divinam voluntatem ita illud intendere, sicut est ipsum & consequenter, etiam si multa occurrant similia motiva, nihil propterea alicui eorum derogari. Nam divina voluntas pro sua perfectione & capacitate facillime potest hoc modo omnia & singula intendere, & ad majorem perfectionem ipsius operis, prout a tali voluntate progreditur, hoc spectat. Exemplis hoc declaratur, & confirmatur. Primum in humana voluntate, si quis simul jejundet propter satisfactionem pro peccatis, & propter honesta-

Alia ob-  
jectio.

Responsio  
prior.



neſtatem temperantiæ, & ut eleemoſynam faciat ex his, quæ ſibi ſubtrahit, longe perfectius operabitur, ſi hæc omnia & ſingula intendat ut totalia motiva, quam ſi ut partialia tantum, ut per ſe manifeſtum eſt. Item, ſi quis amico indigenti centum tribuat, hæc voluntate & animo, quod non ſolum propter ejus indigentiam, ſed etiam propter liberalitatem, & amicitiam, ac benevolentiam erga illum id faciat, ita ut ſingulas ex his rationibus exiſtinet ſibi ſufficientes, & hoc modo de facto ſingulis & omnibus moveatur, melius ſane & ſtudioſius erga illum ſe geret, quam ſi collectionem omnium illarum rationum requirat, eaque ſolum tanquam ſufficienti & totali cauſa moveatur ad id præſtandum.

Denique in divina voluntate accommodatum exemplum ſumo ex illa doctrina Tridentini ſeſſ. 6. c. 13. *vitam æternam juſtis proponi & tanquam gratiam & hæreditatem filiis Dei per Chriſtum Jeſum miſericorditer promiſſam, & tanquam mercedem ex ipſius Dei promiſſione bonis ipſorum operibus & meritis fideliter reddendam.* Nam in hoc opere ſeu voluntate divina non intelligimus, hos titulos ſeu rationes eſſe tantum partiales, ſed totales, ac per ſe ſingulos ſufficientes, & ita etiam intelligimus, Deum propter illos operari, & ad majorem perfectionem pertinere. Simile quid dicit poteſt de illo Pſal. 24. *Omnes viæ Domini miſericordia & veritas:* ita enim intelligimus, Deum in ſingulis operibus ſuis velle, juſtitiam & miſericordiam oſtendere ac ſervare, ut ſingulas ex his rationibus intendat ut ſufficientes & totales ad ſic operandum. Idemque dici poteſt de quacumque alia ratione pertinente ad aliquam virtutem, ſeu ad aliquod attributum Dei. Nec incongrue afferri etiam poteſt in exemplum illud, quod Joſeph dicit Genef. 50. *Deus convertit illud in bonum, ut exaltaret me, & ſalvos faceret multos populos:* melius enim hæc rationes ut totales, quam ut partiales, ſumuntur, ſicut autem Joſeph fuit Chriſti figura, ita verba illa optime Chriſto accommodantur.

Posterior  
reſpon.

Secundo reſpondetur, hæc motiva eſſe totalia, ſatis probabiliter poſſe ex Scripturis colligi, præſertim ſi omnia revocemus ad duo capita, & in uno comprehendamus excellentiam ipſius myſterii, & utilitates, quæ ex illo conſequentur, ſecluſo peccato, in alio vero ponamus redemptionem noſtram, & quidquid boni ex illa conſequitur, vel ad divinum honorem, vel ad noſtrum commodum ſpectans: de his autem duobus capitibus dicemus melius in aſſertionibus ſequentibus.

Secunda  
concl.

Dico ſecundo: Prima ratio, quæ divinam voluntatem inclinavit ad volendam incarnationem, fuit excellentia ipſius myſterii, & alia bona, quæ ipſum pro ſe conſequentur, abſque occasione vel remedio peccati. Hæc conclusio intelligenda eſt de prima ratione ordine originis, ſecundum ſigna rationis, quæ in divina mente a nobis conſiderantur. Duobus autem modis poteſt dici hæc ratio prima. Uno modo poſitive, quia eſt prior aliis, alio modo negative tantum, quia nulla alia ratio eſt prior iſta, quamvis fortaffe potuerint eſſe aliæ æque primæ. Et hunc poſtერიorem ſenſum amplectitur etiam tertia ſententia ſupra citata, & ad intentionem noſtram ſufficiet, dummodo ratio hæc non partialis tantum, ſed totalis eſſe intelligatur, juxta dicta præcedente conclusione. Tamen etiam in priori ſenſu exiſtimo eſſe veram hanc aſſertionem, cum ſecunda ſententia. Et in utroque ſequitur hæc aſſertio ex dictis in ſeſſ. 2. & 3. diximus enim, Deum prædeſtinare Chriſtum Deum hominem in primo ſigno, in quo aliquid in particulari extra ſe voluit, & nondum præviſa occasione peccati ut abſolute & ſimpliciter futura, neque volendo in Chriſto pro illo ſigno rationis eas corporis conditiones, quæ ſolum occasione peccati præordinatæ ſunt, ut ſunt dolores, paſſiones, &c. ergo ratio, quam in eo ſigno Deus habuit ad volendam incarnationem, non fuit remedium peccati; ergo nulla alia eſſe potuit ex parte ipſarum rerum, niſi excellentia ipſius myſterii, & quidquid bonum in ipſo eſt, vel ex eo per ſe ſequi poteſt. Hæc ergo fuit ratio, quæ primo inclinavit divinam voluntatem ad hoc myſterium volendum; & hoc ſenſu vocamus illam primam rationem viæ originis.

Varia cō-  
firmatio-  
nes concl.

Et confirmari poteſt primo, nam hæc ratio eſt independens a reliquis, aliæ vero omnes illam ſupponunt: ergo eſt ex ſe & natura ſua prior: ergo veriſimile eſt, etiam in divina voluntate fuiſſe primam, quia oſenſum eſt, Deum propter hoc motivum inter alia voluiſſe hoc

Suarez Tom. XVI.

myſterium; eſt autem per ſe valde credibile, Deum unumquodque amare, ſicut ipſum amabile eſt. Et hoc etiam confirmant teſtimonia ſacræ Scripturæ ſuperius adducta, quæ indicant, Chriſtum habuiſſe primum locum in mente ac voluntate divina, & ſimiliter fructus, qui ex illa per ſe ſequerentur, etiam ſi peccatum non interveniret, ut ſpecialiter ex Paulo, Ephes. 1. ſupra ponderavimus. Confirmat etiam hoc revelatio facta Adæ, nam credibile eſt, illi fuiſſe revelatam rationem Incarnationis, quæ prima omnium eſt, & maxime independens a peccato, ut v. g. Verbum futurum hominem, ut bonitatem ſuam ineffabili modo hominibus communicaret, & naturam humanam ſupra omnem angelorum dignitatem exaltaret. Unde hoc etiam confirmat ſimilis revelatio facta angelis, & quod nonnulli Patres dicunt, malos angelos occasione hujus myſterii per ſuperbiam & invidiam cecidiſſe, indigne ferentes tantam naturæ humanæ exaltationem, & Chriſto ſubjici recuſantes, eamque excellentiam naturæ ſuæ arroganter appetentes. Quod ſentiunt Baſilius ſerm. de Invid. & Cyprianus ſerm. de eadem re, & ſerm. de Sapient. Tertullianus lib. de Patient. Hæc enim & ſimilia ſupponunt, re vera incarnationis myſterium non minus, imo magis, per ſe ac propter ſe fuiſſe a Deo intentum, quam fuerit intenta creatio angelorum vel hominum, vel quam totus ordo naturæ, gratiæ, ac gloriæ. Atque hinc ſumitur alia confirmatio, nam prima ratio, quæ divinam voluntatem movit, ut vellet angelos aut homines creare, fuit perfectio talis naturæ, quod eſſet ad imaginem Dei, & capax talis ac tantæ communicationis ejus, quod de ſingulis creaturis juxta uniſcujuſque proportionem dici poteſt: ergo multo magis id dicendum eſt de ſumma ſuæ bonitatis communicatione, quam Deus in hoc perfecit myſterio, quod nimirum eam primo & per ſe adamaverit, ſeu prædeſtinaverit. Tandem confirmatur, quia Chriſti anima & ejus gloria magis a Deo diligitur, & majoris eſt valoris, quam omnes prædeſtinati, ut recte D. Th. ſentit 1. p. q. 20. art. 2. ad 1. & q. 13. art. 6. ad 4. ergo credibile eſt, magis fuiſſe per ſe electam & amatam, quam omnes angelos & homines. Et ad hoc afferri poſſent omnes congruentiæ, quibus ſupra oſenſum eſt, hoc myſterium fuiſſe per ſe conveniens. Accommodari hic etiam poſſunt verba Cyrilli lib. 5. Theſaur. c. 3. ubi contra Arianos ita argumentatur. Si (ut hæretici dicunt) ut nos produceret Deus, Filium produxit, erit ipſe propter nos factus, non nos propter ipſum: cur ergo nobis non aget gratias, qui propter nos eſt: erit etiam ipſe ſic gloria noſtra, ut ſcæmina viri: non enim vir creatus eſt propter ſcæminam, ſed ſcæmina propter virum; & infra: Si propter nos Filius factus eſt, primi nos erimus apud Deum, ſic enim Deus nos primo, deinde Filium propter nos, intendiſſe videbitur. Hæc omnia cenſet Cyrillus abſurda, & alia ſimilia, quæ ibidem refert contra Arianos. Quæ tamen æque ſequentur in propoſito, ſi ad Chriſtum ut hominem applicentur, & propter nos primario dicatur prædeſtinatus, nunquam ergo ita cenſuiſſet Cyrillus.

Tertia  
concluf.

Dico tertio: Remedium peccati ſeu redemptio noſtra fuit etiam ratio movens & inclinans divinam voluntatem ad volendam incarnationem, non ſolum quoad aliquas conditiones ejus, ſed etiam abſolute & ſimpliciter quoad ſubſtantiam illius, quamvis non fuerit hæc prima, ſed ſecunda ratio ordinationis. Hæc poſterior pars jam ſatis declarata eſt in præcedenti conclusione. Prior vero, propter quam hæc conclusio præcipue ponitur, probatur maxime argumentis adductis ſeſſione ſecunda in favorem primæ opinionis aſſerentis, Deum voluiſſe incarnari, præviſa occasione originalis peccati, & in remedium ejus: teſtimonia enim ibi adducta, & communis modus loquendi Scripturæ & Sanctorum, probant re vera hoc motivum redemptionis humanæ fuiſſe non tantum adjuvans ſeu impulſivum, ſed etiam vere motivum, & per ſe inclinans divinam voluntatem ad tantum opus efficiendum: & hoc modo cum proprietate ſalvantur illæ locutiones Scripturæ: *Veni Filius hominis querere & ſalvum facere quod perierat*, & ſimiles. Atque illud Symboli: *Qui propter nos homines, & propter noſtram ſalutem deſcendit de cælis*; & illud Athanaſ. *Ut ſcias, prævaricationem noſtram, Verbi acceſſiſſe clementiam, ut appareret inter homines Deus*: & ſimilia.

Prob.  
concl.



Evasio.

Dices hæc omnia sufficienter explicari de incarnatione, prout nunc facta est, quæ includit hoc totum, nempe, Deum fieri hominem in carne passibili, & usque ad mortem Crucis deijci: hæc autem incarnatio dicitur facta propter redemptionem hominum, quia sicut incarnatio includit illa omnia, ita redemptio includit non solum liberationem a peccato, sed etiam sanctificationem & glorificationem nostram. Recte ergo exponi potest, incarnationem esse propter redemptionem, ita ut, secundum quandam accommodationem, incarnatio secundum substantiam suam intelligatur prædestinata propter substantiam, ut sic dicam, nostræ sanctitatis, & gloriæ, ac exaltationis, ut significatur 1. Corint. 2. modus autem incarnationis, scilicet, in carne passibili, fuerat propter modum nostræ sanctificationis, scilicet, cum liberatione a peccato, juxta illud Roman. 4. *Traditus est propter delicta nostra, & resurrexit propter justificationem nostram.* Atque hoc modo non est necesse, ut ex motivo redemptionis secundum id, quod est proprium ejus, quodque addit ultra sanctificationem nostram, orta sit voluntas incarnationis quoad substantiam ejus, sed solum quoad modum in carne passibili.

Replica.

Sed hic modus dicendi ita declaratus re vera non salvat sufficienter proprietatem locutionis Scripturæ & Sanctorum, nam juxta illam expositionem non ita proprie diceretur Deus factus homo, ut nos a peccato liberaret, sed solum, factus passibilis, & mortalis. Deinde liberatio a peccato intrinsece includit sanctificationem nostram, ita ut, licet intelligeremus, ante hanc voluntatem nos redimendi, & a peccato liberandi, non habuisse Deum priorem voluntatem sanctificandi nos, nihilominus hoc vellet ex vi illius voluntatis, qua voluit nos liberare a peccato: ergo similiter in voluntate nos redimendi per Christum includitur non solum modus, sed etiam substantia, totumque incarnationis mysterium. Quamvis ergo in ordine ad actus voluntatis ratione præcisos locum habeat illa distinctio, quod substantia incarnationis est propter substantiam nostræ exaltationis, & modus propter modum, nihilominus tamen ab ea voluntate, per quam prædestinatus est modus incarnationis, non est excludenda substantia ejus, sicut nec a voluntate, qua est prædestinata nostra redemptio, excludi potest sanctificatio & exaltatio nostra; ergo absolute dicendum est, redemptionem fuisse motivum inclinans divinam voluntatem ad volendam incarnationem quoad substantiam & modum. Tandem negari non potest, quin hoc motivum sit de se sufficiens ad inclinandam voluntatem ad incarnationem, prout necessaria est ad optimum modum redemptionis: est autem necessaria non tantum ratione modi in carne passibili, sed maxime ratione sui ipsius, & suæ substantiæ, quia illud motivum ad hoc totum divinam voluntatem inclinavit.

Alia ob-  
jectio.

Dices: quamvis motivum ipsum de se sit sufficiens, tamen de facto non potuit divinam voluntatem inclinare, quia jam ipsa inclinata erat & determinata ex alio priori motivo. Unde hæc conclusio videtur repugnare præcedenti, nam, si voluntas divina, ante prævisionem absolutam peccati, ex alio priori motivo jam decreverat, ut Verbum homo fieret, non potuit hoc ipsum ex posteriori motivo discernere, sed id solum, quod huic decreto additum intelligimus in posteriori signo, intelligi etiam potest ortum habuisse ex alio posteriori motivo, scilicet, redemptione. Respondetur tamen in hoc nullam esse repugnantiam, quia, ut sæpe dixi, potest eadem voluntas ex diversis motivis totalibus idem objectum velle, vel pluribus actibus re distinctis, ut in nobis contingit, vel tantum ratione, ut in Deo; qui actus possunt intelligi, vel simul haberi, vel unus post alium, aut secundum realem durationem, ut in nobis, aut secundum signa rationis, ut in Deo. In his enim omnibus nulla difficultas aut repugnantia inveniri potest, imo videtur ipsa experientia constare, & humanis exemplis: nam, si quis habeat propositum efficax voluntatis eundi Romam propter aliquod commodum proprium, postea vero sciat amici aut filii necessitatem, quæ efficaciter movet voluntatem suam, potest ita velle ob eam causam ire, ut ex vi ejus idem esset voliturus, etiam si prius ire non decrevisset: hic enim modus volendi ex posteriori motivo oblato non repugnat priori voluntati, & tunc verissime dicitur, utramque ex illis rationibus inclinasse illam

voluntatem, & fuisse verum motivum ad eandem rem seu actionem volendam.

Cujus rei exemplum ex 1. Reg. 16. sumere possumus, ibi, cum Dominus præcepisset Samueli, ire Bethlehem, ut ungeret David in Regem, respondit Samuel: *Quomodo vadam, audiet enim Saul, & interficiet me?* Et dixit illi Deus: *Accipe vitulum, & dic, ad sacrificandum Domino veni:* ubi propositum eundi non fuit primo ortum ex motivo sacrificandi, sed alia prior ratio præcessit, scil. unctio David, & nihilominus vere dixit, se venisse ad sacrificandum, quia etiam propter illam rationem hoc voluit, & ad illam iter suum ordinavit. Atque hoc maxime habet verum, quando finis, seu ratio, quæ in executione additur priori intentioni, ita movet animam operantis, ut propter eam solum causam id esset facturus, etiam si priorem voluntatem vel intentionem numquam habuisset. Talis autem intelligi potest affectus Dei erga homines, quem in simili explicuit Paulus dicens ad Galat. 2. *Dilexit me, & tradidit semetipsum pro me.* Sic etiam ad Rom. 4. dicitur: *Christus surrexisset propter justificationem nostram,* cum tamen prima ratio volendi eam resurrectionem fuerit gloria & exaltatio ipsius Christi: & ad eundem modum ait Paulus ad Rom. 11. Gentiles fuisse vocatos ad fidem, eo quod Judæi ceciderant, quamquam non fuerit illa prima ratio volendi vocationem gentium, sed universalis Christi redemptio. Denique multi ex Patribus citatis, & Anselmus lib. 1. Cur Deus homo c. 16. & 18. Bernard. ferm. 2. in fest. omnium Sanct. dicunt, homines esse elevatos ad gloriam propter reparandas sedes angelorum: cum tamen nullatenus hæc sit prima ratio glorificationis, aut electionis hominum.

Declara-  
tur concl.  
exemplo  
accom-  
modato.

Sed quæres primo, quod nam ex his motivis fuerit præcipuum & efficacius respectu divinæ voluntatis: ut enim supra dixi, & in nobis sæpe contingit, fieri potest, ut motivum, quod prius est ordine rationis seu originis aut durationis, non sit prius dignitate ac excellentia. Respondetur, hæc duo motiva se habere ut excedens & excessum. Nam si tantum consideretur id, quod unumquodque ex his motivis præcise dicit, non includendo aliud, majus quidem est, & excellentius primum motivum, quam secundum, quia simpliciter major est excellentia ipsius mysterii secundum se, quam hominum redemptio: imo major est dignitas & gloria solius animæ Christi, quam cæterarum omnium simul: majusque Dei beneficium est incarnatio Christi, quam passio vel mors, si præcise, ut dixi, comparentur. Denique ex incarnatione ut sic sequitur fructus gratiæ & gloriæ, non solum hominum, sed etiam angelorum: si vero motivum redemptionis consideretur non solum secundum id, quod addit priori motivo, sed quatenus includit quicquid in illo est majus & excellentius, hac ratione dici potest hoc motivum esse majus, quia movet divinam voluntatem non solum ad volendum hypostaticam unionem, sed etiam ad admirabilem modum ejus. Item movet ad volendam non solum incarnationem Christi, sed etiam passionem & mortem ejus, quod censetur maximum Dei beneficium non præcise, sed quatenus incarnationem includit. Denique dici etiam potest efficacius motivum, quia majorem indigentiam & miseriam in humana natura supponit, ex qua major necessitas tanti mysterii, talisque remedii ac medicinæ orta est. Ex quo fit, ut sit etiam aptius ad Dei justitiam, misericordiam, & alia attributa manifestanda, quia includit omne id, quod est in incarnatione secundum se considerata, & addit plures alias rationes, quibus magis ostenduntur hæc attributa, supposito peccato, & necessitate redemptionis, quæ ex illo orta est, quam sine illis. Unde hæc comparatio similitudinem habet cum illa vulgari, qua solet quæri, quod sit majus Dei beneficium, præservatio a peccato, an remissio illius; & simplex sanctificatio, quæ peccatum non supponit, an justificatio a peccato: sicut enim hæc diversis rationibus sese excedunt mutuo, ita in præsentem dicendum est.

Atque eodem fere modo respondendum est, si quis interroget, quod nam ex his motivis fuerit majus respectu nostri, id est, in quo Deus magis ostenderit caritatem suam & amorem ad humanam naturam. Multis enim videtur motivum Redemptionis longe superare reliqua omnia, nam in reliquis potius videtur Deus de-

Dubio siq;  
evidenti  
satisfic.

Dubium  
aliud ex-  
peditur.

clarare



clarare specialem amorem ad Christi animam, quam ad alios homines vel humanum genus. Dico tamen, præcise comparando illa motiva, diversis rationibus sese excedere, & in utroque reperiri maximum quoddam amoris indicium: tamen, simpliciter loquendo, magis manifestari caritatem Dei erga nos, volendo incarnationem modo prædicto, & ex utroque motivo simul, quam ex altero eorum tantum. Declaro singula; nam in primis in priori motivo incarnationis secundum se ostenditur summa propensio divinæ bonitatis ad sese communicandum, unde etiam manifestatur amor non solum ad homines, sed etiam ad alias creaturas, quæ ex hoc mysterio nobilitantur, & præsertim ad angelos, qui fructum gratiæ & gloriæ ex illo receperunt, sed multo magis ad homines, quorum naturam cæteris omnibus Deus prætulit, non tantum ob peccati indigentiam, sed per sese ex sola sua caritate & beneplacito, quod decrevit habere delicias suas cum filiis hominum. Unde in hoc sine dubio motivum hoc excedit motivum redemptionis, quia non expectavit summam indigentiam hominum & necessitatem, ut Deus summo modo sese hominibus communicare vellet. Neque hic amor fuit ad solam illam singularem naturam, quam Deus assumere voluit, sed simpliciter ad humanam speciem, quam per se voluit per hoc mysterium exaltare, juxta id Psalm. 8. *Minuisti eum*, id est, hominem in tota specie sua paulo minus ab angelis: sed gloria & honore coronasti eum, & constituisti eum super opera manuum tuarum, scilicet, in Christo: *Omnia subjecisti sub pedibus ejus*. Quod de Christo exponit Paulus ad Hebr. 2. per quem hæc dignitas in totum humanum genus redundat, ut recte ibi exposuit Adamus, dicens: *Quia Christus caro nostra est, & os nostrum, idcirco, quod isti contingit, nobis contigisse dicitur, juxta id ad Ephe. 2. Consedere nos fecit in cælestibus in Christo*. Cum enim species abstracta ab individuis sumi non possit, necessarium fuit, aliquam individuum naturam eligere, ut in ea mysterium hoc perficeretur. In quo tandem ostendit Deus singularem benevolentiam ad Christi animam & humanitatem, quod ex solo suo beneplacito absque ullo singulari motivo, quod ex parte illius præcefferit, eam cæteris ad tantum bonum præelegerit. At vero motivum redemptionis, ut a nobis explicatum est, in hoc excedit, quod Deus ex vi illius, non tantum pro amicis, sed etiam pro inimicis, homo fieri voluit. Item, quod ex vi illius simpliciter loquendo, vel majora, vel plura beneficia contulit tali animo & voluntate, ut ea sola ratione & propter illud motivum ea omnia conferret, quamvis ex nullo alio tantum mysterium facere decrevisset. Atque hinc tandem constat, quomodo in his motivis simul sumptis magis divina caritas ostendatur, nam, si Deus ita voluisset innocentes homines sua incarnatione honorare & ditare, ut eisdem in peccatum lapsos nollet eadem incarnatione redimere, non sese ostenderet peccatores diligere, eorumve misereri. Imo, nisi hoc motivum indigentiae humanæ naturæ fuisset ab ipso existimatum sufficiens ad hoc beneficium hominibus præstandum, minorem se habere ad peccatores caritatem ostenderet. Similiter e converso, si Deus ita existimetur affectus ad humanum genus, ut non nisi ob extremam necessitatem & indigentiam illi esset hoc summum beneficium præstaturus, nec solam beneficentiæ rationem, & humanæ naturæ exaltationem existimaverit sufficiens motivum ad hoc tantum bonum naturæ humanætribuendum, nisi simul misericordia & sublevatio a summa miseria interveniret, minus quidem in hoc ostenderetur caritas Dei ad homines, quam si utroque statu intelligatur voluntas ejus propensa & inclinata ex vi utriusque motivi ad sese communicandum hominibus, eisque benefaciendum juxta eorum statum & capacitatem: sicut inter homines majorem amorem ostendit, qui omnia bona sua vult cum amico communicare, non solum ut eum ab aliqua miseria vel indigentia liberet, sed etiam ut eum in altiori ordine ac dignitate constituat, quam si ei tantum in extrema necessitate constituto subvenire velit.

Denique ex his, quæ circa hanc conclusionem dicta sunt, facile est respondere ad omnia testimonia Scripturæ & sanctorum, quæ in favorem primæ sententiæ adducta sunt in sect. præced. quatenus objici possent contra priorem conclusionem hic positam. Ut enim omnes illæ

locutiones in omni rigore & proprietate veræ sint, sufficit, quod remedium peccati fuerit verum ac proprium motivum divinæ voluntatis inclinans illam sufficienter ad incarnationem volendam: ita ut, quamvis nullum aliud fuisset motivum, hoc per se solum ita movit divinam voluntatem, ut propter hanc causam Deus fieret homo, etiam si aliæ deessent. Ex vi tamen illarum locutionum non est necessarium, quod motivum redemptionis fuerit omnino primum via originis, aut secundum signa rationis, quia neque sacra Scriptura aut Sancti id dicunt, neque alia motiva excludunt, ut declaratum est. Quod vero frequentius Scriptura hoc motivum inculcet, quam alia, non est indicium, quod hoc fuerit omnium primum, quia non semper, imo raro divina Scriptura explicat primas rationes divini consilii ac voluntatis, quia & altiores ac profundiores sunt, quam ut omnibus proponi debeant, & earum cognitio minus est nobis necessaria, ut, cum Scriptura tractat de glorificatione hominum, docet frequenter, per merita esse consequendam, proximam rationem glorificationis assignando, primam vero rationem prædestinationis hominum raro attingit, quia illius cognitio, neque tam accommodata, neque tam utilis est hominibus. Eo vel maxime quod Scriptura tractat de incarnatione Christi, prout in re facta est, & includit mysteria omnia passionis ac mortis ejus, quomodo redemptio nostra fuit quodammodo prima & adæquata ratio illius, ut statim dicemus. Exemplum sumi potest ex verbis illis Matth. 20. *Filius hominis non venit ministrari, sed ministrare, & dare animam suam in redemptionem pro multis*; ubi manifestum est, Christum loqui de adventu suo in carne passibili, & statu victoris, nam aliqui constat, Christum Deum hominem propositum esse a Patre, ut sit princeps omnium, & caput, cui tam homines, quam angeli, non solum ministrent, sed etiam eum perpetuo honorent, atque glorificent; sicut cum alibi dixit Christus: *Non sum missus, nisi ad oves, quæ perierunt domus Israel*, Matthæi 15. aperte locutus est de adventu suo ad prædicandum & docendum proprio ore, nam certum est, alia ratione ad omnes homines venisse, utique redimendos. Simili ergo modo, quamvis hac speciali ratione ad homines venerit, alia tamen priori venit ad angelos, venit ad omnes creaturas, veluti ad complementum earum, venit denique, ut in eo divina bonitas & gloria maxime ostenderetur.

Igitur ex illis testimoniis solum sumitur argumentum, primo, quod redemptio nostra fuerit ratio volendi incarnationem maxime propria hominum, quibus præcipue Scriptura loquitur. Secundo, quod hæc sit utilissima hominibus, tum ad exaggerandam peccati acerbiteriam, tum ad declarandum Dei amorem erga peccatores: omnes enim peccatores sumus, & egemus gloria Dei. Tertio, quod hæc ratio maxime declaret necessitatem incarnationis. Quarto assignatur hæc ratio, quia quodammodo complectitur reliquas eo modo, qui a nobis declaratus est. Quinto denique, quia hæc ratio non solum continet causam incarnationis, sed etiam modi ejus, & mysteriorum vitæ ac mortis Christi. Et hoc sensu dici solet hæc ratio proxima & immediata ordine executionis, non quia in prædestinatione ipsa non habuerit locum suum, & divinam voluntatem inclinaverit, ut declaratum a nobis est, sed quia executio incarnationis juxta exigentiam ac necessitatem hujus rationis facta est.

Et hoc ultimo modo frequentius loquuntur Sancti, quorum institutum non tam erat, subtiliter investigare primas rationes divini consilii, & omnia motiva divinæ voluntatis, & eorum ordinem secundum rationem, quam explicare mysterium, prout factum est, & causam ejus, vel ad instruendum fideles, vel ad satisfaciendum infidelibus, qui magis de modo, id est, de passione ac morte Christi, quam de substantia mysterii admirari solent: & ideo eam causam assignant, quæ ad satisfaciendum omnibus est magis accommodata & adæquata: & ita procedunt præcipue Lactant. l. 4. c. 12. Athan. ferm. 3. cont. Arianos, Nazianz. or. 36. & 37. Cyrill. lib. 5. Thesau. cap. 8. In quibus illud etiam est considerandum, quod non solum post peccatum primi parentis, sed etiam post infinitam hominum cæcitatem & malitiam, dicunt, decrevisse Deum in persona descendere ad salvandos homines, quod est signum, eos magis explicare

Explicatur sanctorum locutiones.

Explicatur motus locutionis.



decretum incarnationis secundum proximas rationes executionis ejus, quam secundum primarias rationes intentionis, quamvis has non omnino prætermiserint, & sacra etiam Scriptura sæpe illas indicet, ut ex aliis locis & testimoniis confirmatum est.

Dico quarto. Prima, unica, & adæquata ratio, propter quam Deus voluit incarnationem Christi fieri in carne passibili, fuit nostra redemptio, ac remedium peccati. Hæc conclusio est omnino certa, sufficienterque probatur ex dictis sect. præced. & eam etiam confirmant, quæ in sect. 2. in favorem primæ opinionis adducta sunt. Et inter alia est egregium testimonium Pauli ad Hebr. 2. ubi primum dicit, Christum fuisse paulo minus ab angelis minoratum, tempore, videlicet, hujus vitæ in carne passibili: *ut gratia Dei, pro omnibus gustaret mortem*. Deinde subjungit. *Quia pueri communicaverunt carni & sanguini, & ipse similiter participavit eisdem, ut per mortem destrueret eum, qui habebat mortis imperium, id est, diabolum, & liberaret eos, qui per totam vitam obnoxii erant servituti, nusquam enim angelos apprehendit, sed semen Abrahae apprehendit, unde debuit per omnia fratribus assimilari, ut misericors fieret*. Juxta quod testimonium recte advertit Adamus post D. Th. ibi, nomine carnis & sanguinis sæpe in Scriptura significari naturam humanam secundum se consideratam, Matth. *Caro & sanguis non revelavit tibi*; sæpius vero significari naturam humanam, obnoxiam miseriis & mortalitati 1. ad Corint. 15. *Caro & sanguis, regnum Dei non possidebunt*; & in hoc posteriori sensu sumitur a Paulo hoc loco, ut patet tum ex præcedentibus verbis: *Decebat enim eum, propter quem omnia, & per quem omnia, qui multos filios in gloriam adduxerat, autorem salutis eorum, per passionem consummare*: tum ex testimoniis, quæ præmiserat; *Ego ero, fidens in eum*; hæc enim verba (ut idem author advertit) adduxit Paulus, ut doceret, Christum naturam vere passibilem habuisse, & cui aliquid deesset, quod speraret se consecuturum tanquam proprium viatorem. Et idem significat in alio testimonio: *Ego, & pueri mei, quos dedit mihi Deus*: nam in illis verbis ostendit se Christum ejusdem conditionis eum aliis hominibus: & tamen statim subdit: *Quia pueri communicaverunt carni & sanguini* &c. Tum denique ex causa, quam sumit, ut per mortem destrueret mortis imperium: ad hunc enim finem non sufficiebat humana caro quomodocumque, sed passibilis & mortalis. Igitur, ex sententia Pauli, ideo assumpsit Christus carnem mortalem, quia cæteri homines mortalitatem peccando contraxerant: hæc ergo fuit Christo unica causa assumendi carnem passibilem. Quod amplius declaravit Paulus sequentibus verbis: *Debuit per omnia fratribus assimilari, ut misericors fieret, & repropitiaret delicta populi*. Ex quibus verbis aliqui colligunt Deum non voluisse incarnationem prius, quam humanæ naturæ lapsum, & miserum statum per peccatum introductum vidisset; neque ob aliam causam Christum hominem prædestinasse, nisi ut propitiaret hominis lapsum. Verum tamen ex hoc loco id non colligitur, sed solum hanc fuisse unicam causam assumendi carnem passibilem. Imo, si totus contextus expendatur, satis probabiliter potest ex eo colligi ordo prædestinationis Christi a nobis declaratus. Prius enim exposuerat Paulus Christi excellentiam, eo quod illi, etiam ut homini, Deus omnia subjecerit in prædestinatione sua, etiam angelos ipsos, sic exponens illud Psal. 8. *Minuisti eum paulo minus ab angelis, gloria & honore coronasti eum, & constituisti eum super opera manuum tuarum*. Hanc enim dignitatem accepit humanum genus in Christo, qui, licet pro statu passibili fuerit paulo minus ab angelis minoratus, tamen per eandem passionem gloria & honore coronatus est, omnemque potestatem in celo & in terra accepit Matth. ult. ut jam ei omne genu flectatur, cælestium, terrestrium, & infernorum, ad Philip. 2. Deinde declarat Paulus, cur decuerit, Christum per passionem ad eam exaltationem pervenire, nimirum, quia habebat fratres, quibus ipse author salutis futurus erat; & quoniam ipsi mortalitatem peccando contraxerant, ideo decuit eum fratribus assimilari, ut eis propitiaretur: non est autem Christus frater noster, nisi ratione humanæ naturæ; supponitur ergo inter Christum & nos similitudo in natura, & ratione illius adjuncta etiam fuit simi-

litudo in mortalitate, ut is, qui prædestinatus fuerat author salutis nostræ, etiam non interveniente peccato, fieret etiam author redemptionis, & propitiationis nostræ, accedente peccato. Igitur, quod Christus indiguerit passione, non fuit ob aliam causam, nisi propter hominum peccatum, & necessitatem redemptionis ex illo contractam. Omitto alia quamplurima Scripturæ testimonia, quæ hic facile accumulari possent, in quibus Christus dicitur: *mortuus propter delicta nostra, & traditus propter scelera nostra*. Et similia. Ratio vero conclusionis sumenda est ex dictis sect. 3. quia mors & passio non sunt a Deo per se intentæ in toto genere humano, nedum in Christo, sed tantum introductæ sunt in poenam peccati. Tota autem ratio alicujus poenæ est culpa. Vel aliter, quia passio Christi non est per se amata, sed solum ut medicina, usus autem medicinæ ut sic supponit ægritudinem, totaque ejus ratio ex illa sumitur.

Atque ex hac ratione solvendum est argumentum, si quis objiciat, juxta nostram sententiam non posse colligi ex citatis locis Scripturæ remedium peccati fuisse unicam causam mortalitatis Christi, quia Scriptura, licet hanc causam assignet, non excludit alias: ergo, sicut nos interpretamur, quod, licet Scriptura assignet hanc causam incarnationis, nihilominus potuit esse alia, & de facto fuit, vel prior, vel æque prima; ita dicere quis posset de prædicta ratione assumendi carnem passibilem. Imo simili ratione affirmari posset, quamvis in executione mors Christi assumpta fuerit propter causam redemptionis, nihilominus in intentione non fuisse hanc primam rationem illius decreti, quo voluit Deus, ut Christus assumeret carnem passibilem. Nam, si in aliis rebus ordo intentionis potest esse diversus ab ordine executionis, cur non etiam in hoc negotio? Respondetur, negando similitudinem: est autem ratio differentiae facilis & multiplex. Prima, quia Scriptura sacra, licet causam incarnationis assignet multis in locis ex nostra redemptione, tamen in aliis, & declarat alias causas, & nobis proponit Christum Deum hominem ut primo ac per se maxime dilectum, & omnia propter ipsum. De passione vero & morte ita loquitur, ut semper significet, omnino ac simpliciter assumptam fuisse occasione peccati, & propter redemptionem. Secundo, quia respectu mortalitatis non solum tacet Scriptura alias causas, sed etiam generatim docet, Deum non fecisse mortem, id est, non per se illam voluisse, sed solum ad peccatum puniendum vel curandum. Tertia, ex materia ipsa, quia incarnatio est maximum bonum & per se maxime amabile, & ad complementum divinum operum valde necessarium: & ideo recte intelligitur, quod licet & facta, & ordinata fuerit propter redemptionem, tamen etiam propter se fuerit amata. At vero mors & passio, præsertim Christi, non erant bona per se eligibilia, sed tantum ut poena vel medicina peccati; & ideo merito concluditur, hanc fuisse primariam rationem ejus, & unicum motivum illius decreti divinæ voluntatis, quo statuit, ut caro, a Christo assumenda, esset passibilis. Et in hoc objecto optime distinguitur ratio motiva & impulsiva, de quibus supra dictum est: redemptio enim a peccato fuit sola ratio motiva volendi carnem passibilem Christi: tamen, illa ratione supposita, etiam potuit illa passio ordinari, ut per eam Christus exaltationem sui nominis, siquæ corporis gloriam consequeretur; quod fuit quædam ratio coadjuvans, non tamen per se sufficiens; quin sine passione potuisset Christus consequi illa omnia bona, vel tanquam sibi connaturalia, vel per merita, quæ posset in corpore impassibili exercere, prout in statu innocentie fieret. Sic ergo constat, primariam ac totam intentionem motivam assumendi corpus passibile ex hominum peccato & redemptione ortum habuisse.

## SECTIO V.

*Utrum ex primaria Christi prædestinatione futura esset Verbi incarnatio, etiam si homo non peccasset.*

Sensus hujus questionis duplex esse potest; prior quodammodo absolutus, & de facto, scilicet, an ex vi illius decreti, quod Deus de facto habuit de incarnatione

Quarta conclusio.

Locus Pauli ad Hebr. 2. expositus.

Ratio conclusio.

Objectiones solvuntur.



zione facienda, esset carnem assumpturus, etiam si peccatum hominis non interveniret. Posterior omnino conditionatus, & veluti de possibili, scilicet, esto ex vi presentis decreti Deus non esset carnem assumpturus deficiente peccato, an credendum sit in huiusmodi eventu habiturum fuisse aliud decretum, quo vellet incarnari ex alio motivo & ratione, quam nunc voluit. Hic posterior sensus non est ita proprius, quia vix potest a nobis aliquid de illo definiri; attingemus tamen illum breviter in fine quaestionis. Prior ergo sensus proprius est, & in eo disputatur quaestio a D. Thom. & probatoribus Theologis. Et licet multum pendeat huius dubii decisio ex principiis positis in praecedentibus, non tamen caret nova difficultate, nam juxta omnes opiniones supra tractatas de Christi praedestinatione, in praesenti quaestione varie judicatur.

Prima sententia negat, peccato non existente, incarnandum fuisse Deum. Hanc tenet D. Thom. hic, & discipuli ejus locis supra citatis, dub. 2. idem D. Thom. 3. contra gent. cap. 5. & in 1. ad Timoth. *Venit Jesus, peccatores salvos facere*, & in 3. d. 1. q. 1. art. 3. & ibi Bonav. in 3. d. 1. art. 2. q. 2. Richard. art. 2. q. 4. Chart. q. 2. qui refert Taran. & alios: idem Argent. ibid. art. 4. Abulen. in cap. 24. Matth. q. 44. Joan. Arbore. lib. 3. Theosoph. cap. 8. inclinatur etiam Marsil. in 3. q. 1. art. 3. Gabr. d. 2. dub. 3. Hi auctores omnes fundantur in hoc, quod Incarnatio praedefinita fuit post praevium originale peccatum, & solum ex occasione ejus: unde formatur ratio hoc modo. Primum motivum, propter quod Deus voluit carnem sumere, fuit remedium peccati: ergo deficiente hoc motivo, deficeret in Deo voluntas sumendi carnem: ergo, si homo non peccasset, ex vi presentis decreti non incarnaretur Deus. Primum antecedens constat ex scripturis, & patribus supra citatis; constat enim Deum pro sua libertate potuisse ita velle Incarnationem; satis autem significavit nobis ita voluisse. Prima vero consequentia patet: quia hoc est de ratione causae motivae, ut illa deficiente desit voluntas, in quo differt a causa impulsiva, quae supponit voluntatem jam effectam ex priori motivo, & aliquo modo impellit, & juvat. Unde hoc valde confirmant testimonia Patrum supra citata, praesertim nonnulla, quae videntur expressa, quale est verbum illud Athanas. serm. 3. contra Arian. ubi praesertim pag. 204. agens de nostra indigentia, & necessitate, quare dicit esse anteriorem, & movisse Deum, ut carnem sumeret, subdit: *Qua, scilicet necessitate, sublata, carnem non induisset*: & illud Iren. lib. 5. cap. 14. *Si non haberet caro salvari, nequaquam verbum Dei caro factum esset, & si non haberet sanguis justorum inquiri, nequaquam sanguinem habuisset Dominus*: & illud Leo. Pap. serm. 3. in festum Pentec. *Si homo in natura suae perfectione, & honore, in quo creatus est, permansisset, neque creator hominum creatus fieret, neque aeternus temporalitatem subiret, neque formam servi in similitudinem carnis peccati assumeret*. Denique illud August. serm. 8. de verb. Apost. *Si homo non perisset, filius hominis non venisset*: citari etiam solet quaedam profa, quae ad Virginem dicit: *Peccatores non abhorres, sine quibus nunquam fores tanto digna filio*. Sed haec neque in usu Ecclesiae Romanae unquam fuit, neque habet auctoritatem.

Secundo confirmari potest illa ratio: quia si homo non peccasset, vel Deus assumpturus esset carnem passibilem, vel impassibilem. Primum dici non potest, quia, si homo non peccasset, alii homines non essent passibiles; multo ergo minus Christus Dominus. Neque secundum, quia ex vi presentis decreti non posset assumere carnem impassibilem, de facto enim non habuit Deus tale decretum, nam si habuisset, sine dubio impletum esset: ergo oporteret novum de hac re condere decretum; jam ergo non fieret Incarnatio ex vi presentis decreti, quod est contra sensum, quem tractamus. Haec sententia supponit, primam voluntatem, seu praedestinationem Incarnationis fuisse posteriorem permissione, & praescientia peccati futuri. Cujus contrarium verum esse sufficienter ostensum est: & ideo contra hanc sententiam sic explicatam non oportet plura dicere.

Secunda sententia convenit in conclusione cum praecedenti propter fundamenta adducta, differt tamen in principali fundamento sumpto ex praedestinatione Christi. Affirmat enim nunc de facto Christum fuisse pra-

destinatum ante permissionem, & praevisionem peccati, & nihilominus ait, Christum non venturum ex vi illius decreti, hominem non peccante, quia posita hac hypothese, vel conditione necessario tollitur illud decretum, quia licet sit prius, includit tamen aliquid, ratione cuius habet intrinsecam connexionem cum posteriori, id est, cum permissione, & praevisione peccati. Exemplo declaratur, quia licet Deus prius ratione eligat praedestinatum ad gloriam, quam velit, vel videat ejus merita: nihilominus ita vult illi gloriam, ut non velit illam habere sine meritis, ut verum sit dicere hunc hominem non habiturum gloriam, nisi habeat merita: sic etiam in proposito, ita est prius praedestinata, & amata Incarnatio, ut tamen non esset exequenda sine permissione peccati. Confirmatur, quia licet aliquid sit prius in uno genere, scilicet causae finalis, vel exemplaris, potest tamen pendere a posteriori tanquam ab efficiente, vel tanquam medio necessario, vel tanquam a modo, seu conditione, sine qua res esse non potest: ergo ita intelligi potest in proposito, & consequenter ita intelligendum est, cum hoc modo salventur melius omnia, quae Scriptura, & Sancti significant. Et confirmatur, & explicatur secundo, quia etiam juxta supradicta Christus Dominus in genere finis, vel exemplaris, prius est in mente, & voluntate Dei, quam alii homines, vel Angeli, vel totum etiam universum: & tamen non inde fit Christum fuisse venturum, etiam si homines, vel Angeli, vel aliae creaturae non fuissent, quia ita est in uno genere prius amatus, quam illae: ut tamen alia ratione sit amatus, etiam ut conjunctus cum illis, ita ut praedestinatio ejus habeat quandam connexionem cum ceteris rebus, quia non erat praedestinandus Christus, ut esset solus, &c. ergo similiter dici potest de praedestinatione Christi, & permissione peccati.

Haec sententia videtur, procedere ex fundamento extreme contrario, quam praecedens: supponit enim, Christum ante permissionem, & praevisionem peccati fuisse praedestinatum, non solum quoad substantiam Incarnationis, sed etiam quoad modum carnis passibilis, & quoad munus redemptionis, quod superius a nobis improbatum est. Quod vero hoc supponatur in hac sententia, patet, quia non potest alia ratione illa prima intentio, seu praedestinatio Incarnationis habere intrinsecam connexionem, vel dependentiam quoad executionem a permissione, & praescientia peccati, nisi quia includit etiam eas condiciones, quae omnino pendent ex peccato. Si enim intelligamus illam intentionem omnino abstrahere ab his conditionibus, nulla ratio fingi potest, ob quam executio illius intentionis pendeat a futuro peccato. Cum enim nihil includat, quod necessario illud praerequirat, posset aliis viis, & modis mandari executioni. Ut enim in superioribus dictum est, intentio finis nunquam ita pendet a medio, ut haberi non possit sine illo, nisi quando in ipso fine, ut intentus est, includitur aliqua conditio omnino requirens illud medium, ratione cuius in tali intentione saltem virtute est amatum tale medium; hoc enim si desit, nulla est ratio necessariae connexionis inter eam intentionem, & voluntatem medii, ut ostensum est. Et videri etiam potest in exemplis, quibus haec sententia utebatur; cum enim Deus eligit praedestinatum ad gloriam, non vult illi gloriam, ut beneficium gratis conferendum, sed ut coronam, & praemium, in qua intentione virtualiter includitur voluntas dandi illi merita, sine qua non posset stare prior intentio. Et similiter quando dicimus Deum praedestinasse Christum ante omnem creaturam, non praedestinavit illum tanquam solitarium, sed tanquam caput totius universi, & veluti cum quadam relatione ad totum universum, & ad alias partes ejus; ideoque recte intelligitur haec praedestinatio connexa cum voluntate creandi homines, & Angelos, & totum universum: at vero in proposito nulla est ratio talis connexionis, cum ostensum sit, condiciones Incarnationis, quae omnino supponunt peccatum, non fuisse praedefinitas ante praevisionem peccati.

Tertia sententia est, quae absolute affirmat, etiam si homo non peccasset, Deum futurum fuisse hominem ex vi illius voluntatis, & modi, quo nunc de facto voluit Incarnationem, quia illa voluntas fuit secundum se anterior permissione, & praescientia peccati, fundataque in ratione, & motivo ab eodem peccato independente, ut supra explicatum est. Ita tenent Alenf. & Scot. supra citati

Quomodo  
intentio  
finae pen-  
deat a  
medio.



citati dub. 2. Albert. in 3. d. 20. art. 4. quibus plures ex recentioribus consentiunt. Albert. Pighius lib. 8. de liber. arbit. cap. 1. art. 2. & 3. & lib. 20. cap. 1. & Cathar. opusc. de eximia Christi prædestin. Idemque sumitur ex Galatino lib. 7. de Arcanis cap. 2. Viguerio in institut. cap. 20. §. 1. vers. 4. Jacob. de Valent. Pfalm. 81. & 102. Jacob. Nacl. in epistolam ad Ephes. cap. 1. Claud. Taur. lib. de provident. q. 1. art. 2. Potest vero hæc sententia, præter fundamentum positum, juvari omnibus congruentiis, quibus supra ostensum est fuisse per se conveniens Deum incarnari; & aliis, quibus Scot. utitur: quia scilicet non est consentaneum, ut tantum bonum sit amatum cum dependentia a peccato, quacumque ratione hoc asseratur. Unde secundo potest confirmari auctoritate, & conjectura Ansel. lib. 1. Cur Deus hom. cap. 18. inde enim probat homines futuros fuisse beatos, etiam si Angeli non peccassent: quoniam alias gaudendum esset hominibus, quod peccaverint Angeli. Unde generaliter concludit, nullam animam esse in cælo, quæ sibi persuadeat sine peccato alterius se non fuisse gloria fruituram: ergo multo magis hoc diceret Anselm. de anima Christi: neque ergo illa in cælo ibi persuadet, nec nos credere debemus illam non fuisse deificandam per unionem sine alterius peccato. Cui rei optime concordat dictum Augustin. lib. de natur. & grat. cap. 25. *Non dicemus, ut esset causa misericordie Dei, necessarium fuisse peccatum.* Tertio confirmari potest auctoritate Ruperti locis supra citatis, & conjectura, quam ipse desumpsit ex August. lib. 14. de Civit. cap. 23. quam postea in simili probavit D. Thom. 1. p. q. 89. art. 1. *Si teste Augustino, inquit Rupertus, absurdum esset dicere Adam non peccante, generationes hominum non fuisse futuras, ac si propter homines, ut nascerentur, peccatum fuisset necessarium, quid de ista capite, & rege omnium electorum Angelorum, & hominum sentiendum, nisi quod & ipse, maxime omnium, necessarium non habuerit peccatum, ut homo fieret ex hominibus, delictis sue charitatis cum illis habiturus?* Confirmat autem D. Thom. citato loco conjecturam hanc his verbis: *Respondeo dicendum, quod in statu innocentie fuisset generatio ad multiplicationem humani generis, alioquin peccatum hominum fuisset valde necessarium, ex quo tantum bonum consecutum est.* Et postea addit aliam rationem, quod anima rationalis propter suam immortalitatem est per se intenta a natura, non tantum in specie, sed etiam in multiplicatione secundum numerum; & inde concludit, hunc numerum animarum fuisse futurum, etiam si non esset peccatum. Constat autem multo majus bonum esse Incarnationem, quam hominum propagationem; ostensum etiam est, animam Christi deificatam per unionem, multo magis esse per se intentam, quam omnes alias animas: ergo fortius in proposito procedit hæc ratio. Quarto confirmari potest argumento supra indicato de fide, & gratia per Christum collata Adæ in statu innocentie; quod possumus alio modo hic proponere; nam si homo non peccasset, vel etiam si non esset peccaturus, nihilominus ex vi illius propositi, quo Deus voluit creare illum in originali justitia, & gratia, haberet fidem, & gratiam; ergo haberet fidem Christi, & gratiam per Christum; ergo, etiam si homo non esset peccaturus, fuisset Christus. Major est certa apud Theologos, ut constet ex materia de statu innocentie, & de peccato originali, imo de fide videtur certa hæc condicionalis, si primus homo non peccasset, non solum ipse, sed omnes etiam posterius ejus haberent gratiam, & originalem justitiam, & immortalitatem; quæ intelligenda est ex vi illius propositi, vel providentie, quam de facto decrevit Deus habere cum hominibus; nam fingere aliam providentiam, seu aliud decretum, quod Deus esset habiturus, est divinare sine dædamento. Nam Scriptura non dicit, Deum habiturum fuisse aliud decretum, sed ex his, quæ dicit, colligimus ita futurum fuisse ex vi præsentis ordinationis ac providentie; quia sicut Deus tunc statuit, ut, si primus homo peccasset, posterius ejus morerentur, ita etiam tunc decrevit, ut, si non peccasset, justitiam sibi & posteris conservaret. Minor vero constat ex supra dictis, quia de facto ex vi præsentis decreti, & providentie gratia non est data fides & gratia Adæ, nisi in Christo, & per Christum; ergo non posset ex vi ejusdem providentie dari eadem gratia non existente peccato, nisi in Christo; quia si daretur sine Christo, jam esset aliud decretum, & aliud genus provi-

dentie. Et ad hoc confirmandum valet quod August. ait lib. 1. de nuptiis, cap. 21. *matrimonium in statu innocentie fuisse sacramentum conjunctionis Christi cum Ecclesia, & habiturum illud bonum in statu innocentie, si duraret.*

Ut veritas exacte intelligatur, advertendum est, quod supra dixi, aliud esse loqui de prima voluntate, seu proposito, quod Deus habuit faciendi hoc mysterium, aliud vero de tota voluntate, totaque prædestinatione, & ratione mediorum, per quæ decrevit exequi illam primam voluntatem: sunt enim hæc duo valde distincta, ut ex dictis constat, & ex materia de prædestinatione. Deinde est advertendum, posito primo decreto voluntatis divinæ absoluto, & efficaci, infallibile omnino esse, & necessarium in sensu composito, ut Incarnatio, vel quidquid aliud per tale decretum definitum est, fiat, quia Dei absoluta voluntas est efficax, & immutabilis. Hoc vero non est ita intelligendum, ac si propositum illud, vel intentio Dei habitura sit effectum sine mediis necessariis ad finem intentum, aut sine modo, vel aliis circumstantiis necessariis, ut res illa intenta ad effectum perducatur: hæc enim manifeste inter se pugnant: sed intelligendum est, propositum illud esse efficax, & infallibile, quia virtute continet omnia necessaria ad sui executionem, & impossibile erit in sensu composito illud poni, quin hæc consequenter ponantur. Unde e contrario vere etiam dicitur, si in re non fiat aliquid, quod necessarium est ad illius decreti executionem, necessarium esse, tale decretum tolli, seu non fuisse in Deo. Ex quo etiam consequenter fit, si aliquid sit medium utile ad illius decreti executionem, non tamen necessarium, tunc non esse inter ea talem connexionem, ut hoc ablato, illud necessario tollendum sit. Deinde adverto, aliquid medium posse necessarii connexionem habere cum intentione alieius finis, facta aliqua suppositione, qua sublata tollitur quidem necessitas illius medii, non tamen propterea necessarium est tolli finis intentionem. Exemplo res illustrabitur: si quis habeat absolutum propositum effundendi bona sua & divitias, illas a se abdicando, optimo, & honestiori modo, quo possit, stante hac intentione, si se offerant pauperes & indigentes, necesse est, ut ex vi illius intentionis in illos effundat divitias suas, qui talem intentionem habet; vel si id non faciat, necesse est, ut intentionem mutet, quia facta illa suppositione ille est honestior modus effundendi divitias, ut suppono. Si autem stante illo proposito non sese offerrent pauperes & indigentes, tunc, quamvis non possent divitiæ illo honestissimo modo communicari, non propterea necesse esset prius propositum tolli, quia in illo non determinate includebatur hic modus communicandi divitias per modum elemosynæ, sed honestissimo modo possibili juxta occurrentes circumstantias. Ad hunc modum ergo intelligendum puto primum illud propositum, quod Deus habuit, communicandi personam suam humanæ naturæ: decrevit enim id facere modo perfectissimo, seu apriori ad ostendenda sua attributa, præsertim illa quatuor, sapientiam, bonitatem, justitiam, misericordiam; quod in nulla sententia, ut existimo negari potest, quia & per se est consentaneum perfectioni divinæ providentie, & hoc ut minimum probant, quæ in confirmanda prima sententia, tam in hac sectione, quam supra in secunda allata sunt. Si ergo cum hoc proposito jungamus scientiam illam veluti conditionatam, quam per simplicem intelligentiam Deus habuit de lapsu generis humani, si illud tali modo crearet, & tentari ac labi permetteret, hoc inquam posito, evidenter fit, ut permissio peccati, & præscientia illius absoluta habuerit necessariam connexionem cum illo proposito: quia posita illa scientia jam hæc permissio erat medium necessarium ad exequendam Incarnationem, eo modo, quo per illud decretum intenta & amata fuerat: quia hoc modo magis manifestantur attributa Dei, quam ullo alio. Unde si stante illa scientia conditionata, nihilominus peccatum absolute non fuisset futurum, quia Deus nollet illud permittere, evidenter sequitur, hoc non posse stare cum priori decreto: & hoc modo est sine dubio verum, quod si homo non peccasset, Deus non fieret homo ex vi decreti, quod modo habuit. At vero, si cum illo proposito non jungamus illam scientiam conditionatam de peccato futuro, sed potius supponamus Adam creatum illo modo, & permis-



sum suæ libertati cum talibus auxiliis non fuisse peccaturum (quod sine dubio facere potuit), & consequenter intelligamus, Deum per illam scientiam conditionatam potius præcivisse, hominem ita creatum non fuisse peccaturum (hæc enim scientia futurorum talis est, quales res ipsæ sunt futuræ) hoc inquam posito, non esset necessarium, Deum exequi prius propositum de Incarnatione faciendâ, mediâ permissione peccati, seu supposito peccato, quia jam hoc medium non habebat necessariam connexionem cum illo proposito: quia neque illa intentio erat in se coarctata, & limitata ad hoc medium: neque hic modus in particulari fuit in illa contentus, absolute, & simpliciter loquendo, ut supra ostensum est; sed solum generatim intelligitur illa intentio, seu illud decretum definitum ad optimum modum exequendi illud, juxta occurrentes circumstantias, & capacitatem creaturarum. Posset autem esse alius modus optimus & convenientissimus, juxta capacitatem hominis in statu innocentie, etiam si non fuisset peccatum. Ex his ergo, quæ per se sunt satis probata, ac fere necessario coherrentia, supposita nostra sententia de prædestinatione Christi, colligitur, dupliciter posse intelligi illam conditionem, scilicet, *si Adam non peccasset*, poni inesse. Primo, quia Deus absolute præcivit, illum non fuisse peccaturum, etiam si illum cum talibus auxiliis, & tali tentatione suæ libertati relinqueret, alio modo, quia Deus præcivit quidem eum peccaturum, si illum relinqueret, noluit tamen ipse hoc permittere.

**Conclusio prima.** Dico ergo primo, etiam si homo suæ libertati relinquitur, & permissus dicto modo, non esset peccaturus; nihilominus propositum Dei de Incarnatione faciendâ consistere posset, & habere suum effectum, & hoc modo vera est sententia affirmans, etiam si homo non peccasset, Deum fore incarnandum. Hæc conclusio duobus modis defendi ac suaderi potest; primo, prosequendo sententiam, quam hætenus docuimus, scilicet, decretum divinum de Incarnatione faciendâ habuisse aliud motivum prius redemptione. Secundo etiam juxta aliam sententiam, quæ docet, Christum in primo signo rationis prædestinatum fuisse ut Redemptorem, & mortalem, & consequenter etiam primum illud decretum ortum fuisse ex motivo redemptionis. Prior via est nobis propria & facillima, & fere patet ex dictis, quia hoc modo decretum illud de Incarnatione non includit necessariam connexionem cum peccato futuro, nec dependentiam ab illo, ut satis probatum est: & hunc sensum intendunt sine dubio auctores tertiæ sententiæ, & sane nullus esse potest aptior modus explicandi, quo sensu vera esse possit illa conditionalis, si homo non peccasset, Deus carnem assumeret: non videtur autem posse negari, quin aliquo sensu illa vera sit, & admitenda supposito modo prædestinationis Christi supra tradito, ut patet ex similibus conditionalibus, quæ non videntur negari posse, ut sunt illæ, etiam si Adam non peccasset, vel non esset peccaturus, ipse creatus esset in justitia originali, & fuissent generationes hominum, & nascerentur homines in justitia & in corpore immortali. Hæc enim omnia videntur esse omnino certa, quia propositum Dei, quod antecessit permissionem peccati, & absolutam prævisionem ejus, hæc omnia virtute continebat, & secundum se, & abstrahendo illud a præscientia peccati etiam conditionata, fuit independens a peccato futuro, quamvis de facto, supposita illa præscientia, & considerato toto ordine providentiæ divinæ, voluntas dandi justitiam hominibus in Adam habuerit connexionem cum permissione peccati, & generationes hominum futuræ non fuerint sine peccato. Simile est in nostra sententia de hac conditionalis, etiam si Adam non peccasset, electi salvi fierent: quia ipsa electio secundum se abstrahit a peccato, quamvis de facto, & supposita illa præscientia, ita ordinata fuerit, ut effectum habere non potuerit, nisi supposito peccato. Et idem est de speciali electione cujuscunque prædestinati, qui non salvatur nisi mediâ permissione peccati: in his enim omnibus potest intelligi connexio, supposita præscientia conditionata. Quia tamen voluntatis propositum per se illam non requirit, manet semper vera illa conditionalis locutio. Et ratio generalis & a priori esse videtur, quia posita illa conditione, nihilominus manet integrum motivum illius voluntatis,

quod per se non postulat peccatum; manente autem motivo, & objecto ejus, manet eadem voluntas, quantum est de se: & hac ratione verum est dicere, fuisse Deum creaturam mundum, etiam si præcivisset, nulla in eo futura fuisse peccata, & similiter fuisse creaturam Angelos, qui peccarunt, etiam si præcivisset, illos non fuisse peccaturos: quia in his omnibus & similibus, motivum voluntatis manet integrum posita tali conditione. Posterior modus persuadendi hanc sententiam sumi potest ex dictis sect. præcedent. & procedit directe contra secundam sententiam supra citatam, & estque valde probabilis, quamvis nobis non sit simpliciter necessarius. Itaque, licet concederemus, Christum in eo primo signo rationis, in quo fuit prædestinatus Deus homo, fuisse etiam prædestinatum Redemptorem in carne passibili, non inde necessario sequitur, ex vi talis prædestinationis, Verbum non fuisse futurum hominem, etiam si peccatum Adæ non fuisset futurum, seu (quod idem est) non sequitur, non potuisse decretum illud manere firmum ac stabile, quoad incarnationem futuram, etiam si Deus præcivisset, Adamum conditum in tali statu, & talibus gratiæ auxiliis, talique libertate præditum, non fuisse peccaturum: sicut enim hoc fuit simpliciter possibile, ita etiam hujusmodi scientia absolute potuit esse in Deo, & juxta illam intelligendus est sensus præsentis quæstionis hypotheticæ, ut supra declaratum est. Quod ergo, data illa hypothesi non necessario auferatur decretum illud, probatur in hunc modum: quia, quando voluntas simul in eodem instante, & in eodem etiam signo rationis aliquid vult propter duo motiva totalia, cessante uno non sequitur voluntatem cessaturam ab eo objecto volendo, & exequendo quoad possit: sed, licet decretum divinum de Incarnatione tale fuerit in primo signo rationis, quale juxta prædictam sententiam explicatum est, tamen non habuit unum tantum motivum redemptionis seu remedium peccati, sed etiam aliud sumptum ex summa divinæ bonitatis communicatione, & excellentia ipsius mysterii cum omnibus fructibus, quæ per se illud consequuntur, quod motivum actu fuit sufficiens & totale, ut ex præcedente sectione constat, ubi ostendi, de facto habuisse Deum plura motiva totalia volendi incarnationem; ergo, si illa motiva simul secundum rationem, siue unum prius ratione, quam aliud, divinam voluntatem inclinaverint, ablato uno motivo, non sequitur omnino auferri decretum de incarnatione faciendâ, nam ex vi alterius stabile ac firmum mansisset. Major per se est evidens ex principiis Philosophiæ naturalis & moralis, nam causa totalis illa est, quæ in suo genere actu causat sufficiente & tota virtute necessaria in illo genere, ita ut, cessante quacunque alia causa non propterea cesset effectus, sed perseveret ex vi influxus illius causæ totalis: alioquin si causa in suo genere indigeret concursu, vel concomitantia alterius, jam non esset causa totalis, sed partialis: ergo idem est in causa finali, seu motivo voluntatis. Et declaratur humano exemplo, nam si quis velit dare eleemosynam ob honestatem misericordiæ, & ob satisfactionem pro peccatis, ita ut ab utroque motivo & a singulis voluntas ejus totaliter moveatur, quamvis deesset alterum ex his motivis, ut verbi gratia, si homo ille sciret, se nulla pro peccatis satisfactione indigere, nihilominus inde colligi non posset, voluntatem illam omnino fuisse cessaturam ab eo objecto volendo ex altero motivo misericordiæ, quandoquidem illud per se sufficiens, & de facto ponitur movisse voluntatem, ut integram rationem illius actus sibi proportionati. Quod si forte quis dicat, tunc non manere in voluntate eundem actum secundum rem vel rationem formalem, quam intelligitur habere actus ex vi alterius motivi; respondetur, hoc nihil referre ad effectum futurum ex vi talis voluntatis, nam, licet intelligatur voluntas ex diversis motivis habere actus re vel ratione diversos, tamen quodlibet eorum manente, ex vi illius sequeretur effectus, quia talis actus est absoluta & efficax voluntas illius, ut in dicto exemplo ex vi actus voluntatis manentis ex motivo misericordiæ fieret eleemosyna: ita ergo in præsentem, quamvis ablato motivo redemptionis non intelligatur manere in voluntate divina determinatio libera prout in tali motivo fundata, & terminata ad omnes illas conditiones.



ditiones Incarnationis, quæ ex illo motivo specialiter oriuntur, nihilominus maneret determinatio libera ut fundata in alio motivo, & ut terminata ad eas conditiones Incarnationis, quæ ex illo motivo sufficienter vel necessario oriuntur; & ex vi talis determinationis seu decreti sufficienter fieret incarnatio. Quocirca infirmum sit argumentum, cum ex defectu unius motivi colligitur non fuisse futurum in divina voluntate idem decretum de incarnatione, quod nunc est; & consequenter non fuisse Verbum incarnandum ex vi præsentis decreti: procedit enim hoc argumentum ex puris particularibus (ut sic dicam), distinguendumque ita est assumptum; nam si sit sensus ablati uno motivo, nullum omnino decretum liberum, quod nunc est, de incarnatione fuisse permanfurum in divina voluntate, sic falsum est assumptum: neque id sequitur ex vi antecedentis, seu hypothesis, nam maneret decretum liberum, prout est ex alio motivo divinæ bonitatis, &c. Si autem sit sensus, in eo casu non permanfurum omne decretum secundum omnem habitudinem seu determinationem liberam, sic, quamvis assumptum sit verum, male inde colligitur, incarnationem non fuisse futuram ex vi alicujus præsentis decreti, quia etiam si unum cessaret, prout in uno motivo fundatur, maneret aliud fundatum in alio, & illud sufficeret, ut ex vi ejus futura esset incarnatio, cum sit absolutum & efficax. Quod autem una libera determinatio divinæ voluntatis, prout ratione distincta ab alia, possit manere sine illa, superius sectione prima late demonstratum est. Potestque hic discursus tribus modis confirmari. Primo, conficiendo simile argumentum ex altero motivo redemptionis, seu remedii peccati, nam, si fingamus nullum aliud motivum occurrisse Deo ad incarnationem volendam præter redemptionem hominum, nihilominus verissimum est, ex vi illius solius incarnationem fuisse futuram, & decretum de incarnatione prout in illo motivo fundatum idem fuisse perseveraturum, solum quia illud motivum totale est: ergo eadem ratione idem dicendum est de quocumque alio motivo totali, etiam si alterum cesset. Secunda confirmatio est ad hominem, nam ut infra videbimus, fere omnes admittunt, quod si Adam peccasset, quamvis nulla essent alia peccata actualia & personalia, nihilominus ex vi præsentis decreti Verbum fieret homo propter redimendos homines a peccato originali; & tamen de facto incarnatus est Christus propter redimendos homines non tantum ab originali peccato, sed etiam ab aliis actualibus: & consequenter decretum liberum, quo Deus voluit incarnationem, non solum respexit ad remedium originalis peccati, ut ad motivum, sed etiam ad remedium actualium peccatorum, & nihilominus dicitur permanfurum illud decretum, ut terminatum ad remedium originalis peccati, etiam si non terminaretur ad remedium actualium: quæ doctrina verissima est; fundamentum illius est, quia remedium originalis peccati præcise sumptum est sufficiens motivum totale: ergo, ubicumque similis ratio intercesserit, verissime dicitur permanfurum decretum secundum unam rationem vel motivum totale, quamvis aliud motivum deesset. Tertia confirmatio declaratur exemplo, quod videtur indubitatum. Nam, quando Deus vult conferre aliquod bonum, vel aliquod premium propter plures titulos totales, ut multi censent contingere in merito & præmio actuum remissorum, & in actibus meritorii Christi id supra explicuimus, tunc enim verum est dicere, quod, licet alter titulus deesset, ex vi alterius Deus tale bonum vel premium conferret: alioquin titulus ille non esset totalis, sed partialis; ergo idem est in quibuscumque motivis; & idem exemplum declarat, determinationem liberam sub una ratione posse manere eandem, quamvis non esset sub alia.

Neque contra hanc conclusionem urgent, quæ in favorem primæ, & secundæ sententiæ adducta sunt. Ad fundamentum enim primæ opinionis, si per motivum intelligatur id, quod ordine intentionis primum movit, & inclinavit divinam voluntatem ad volendam Incarnationem, sic negatur, tale motivum fuisse remedium peccati, sed excellentiam ipsius mysterii secundum se, & bonum totius universi, ut supra explicatum est sectione præcedenti: neque ex sacra Scriptura potest aliud colligi, ut ibi etiam declaratum est. Si vero per motivum intelligatur id, quod revera allicit, & movet voluntatem,

sic concedo, remedium peccati fuisse vere motivum propter quod Deus voluit Incarnationem: hoc autem sensu non est universaliter verum, ablato motivo, etiam de se sufficiente, auferre voluntatis decretum, ut satis probatum est.

Ad primam confirmationem ex patribus, communis responsio est, eos loqui de Incarnatione in carne passibili: quæ responsio multis quidem potest accommodari, aliquibus autem verbis, illis præsertim, quæ in particulari citavimus, vix applicari posse videtur, nisi dicamus, aliud esse, quod pauca verba nude sumpta sonant, aliud, quod in toto contextu orationis intenditur: & ita ex antecedentibus, & consequentibus constare, eos loqui de toto mysterio, prout factum est, & idem apud eos esse carnem sumere, quod fieri in similitudinem carnis peccati, ut patet ex citatis verbis Leonis, & ex Augusti. lib. 1. de peccat. merit. cap. 38. ubi ita inquit: *Non fuisset caro Christi in similitudinem carnis peccati, nisi caro fuisset ista peccati.* Ubi supponere quidem videtur, futuram fuisse carnem Christi, sed non talem. Ipsum etiam nomen carnis, & sanguinis corruptionem indicat in usu sacræ Scripturæ, & patrum: qui sæpe etiam solum dicunt, deficiente peccato, non fuisse Incarnationem adeo necessariam, ut patet ex Gregor. lib. 3. Moral. cap. 11. & Chrysost. serm. 6. de Passione. Sed alium modum explicandi sententias patrum, qui fortasse magis satisfaciet, colligemus ex secunda conclusione.

Ad secundam confirmationem respondetur, posita illa hypothesis, & deficiente peccato, illo modo non fuisse futuram Incarnationem in carne passibili, quia neque alii homines habituri erant carnem passibilem. Nam, ut supra ostensum est, tota ratio hujus conditionis, & imperfectionis orta est ex peccato: futurus ergo esset Christus impassibilis, durante innocentie statu, vel quia statim in principio fuisset gloriosus corpore, & anima, vel eo modo, quo alii homines essent in eo statu impassibilis: de quo dicam infra quæst. 35. Cum autem queritur, ex vi cujus decreti Christus esset tunc impassibilis: respondetur, ex vi præsentis decreti, non quia per illud nunc absolute, & simpliciter decreverit Deus, ut Christus a principio esset impassibilis: hoc enim dici non potest, cum voluntas Dei efficax nec mutari possit, nec carere effectu, & talis voluntas non habuerit effectum: sed vel quia voluntate quasi antecedenti jam decreverat, ut Adam non peccante, omnes homines nascerentur impassibiles, & consequenter etiam Christus, vel quia ablata occasione peccati, ex vi illius decreti, quo Deus voluit incarnationem secundum se, voluisset modum ejus ipsi secundum se accommodatum.

Et hinc etiam optime respondetur ad illam interrogationem, quæ supra fiebat, an in eo primo signo voluerit Deus Incarnationem passibilem, vel impassibilem. Dici enim potest, voluntate antecedenti voluisse illam impassibilem, id est, nisi remedium peccati aliud postulasset: voluntas enim antecedens æquivalet conditionatæ, & ideo, non impleta conditione, potest non habere effectum, sine ulla mutatione: voluntate autem absoluta & efficaci voluisse Deum Incarnationem, tantum quoad substantiam mysterii, in hac persona, & in hac natura individua: modum autem ejus non definivisse, donec peccatum permisit, & prævidit, quia licet Deus non velit rem, nisi cum omnibus circumstantiis, & modis, quibus futura est, tamen secundum diversa signa rationis prius nos intelligimus interdum velle rem, quam modum, quam intelligimus ab aliquo fine, vel occasione pendere modum, a quo non pendet res secundum se, & ad explicandam hanc independentiam dicimus, unum esse prius in voluntate divina, quam aliud, quod in multis aliis necessarium est dicere, ut supra sectione tertia in principio declaratum est.

Sed urgent: nam prædestinatio est perfectissimus actus divinæ providentiæ; sed perfecta providentia statuit, & ordinat, non tantum in communi & in abstracto, sed in particulari cum omnibus circumstantiis; ergo si per illud decretum prædestinatus est Christus homo in primo signo, in eodem prædestinatus est passibilis, vel impassibilis, imo & in tali tempore, loco, &c. Confirmatur, quia aliàs ex vi talis decreti non posset fieri homo, quod est contra dicta. Sequela patet, quia non potest fieri homo, nisi inde terminato statu & circumstantiis, & hæc non sunt

Ad primam  
confirm.

Ad secundam  
confirm.

Signa rationis.

Ad argu.  
primæ, &  
secundæ  
sententiæ.



sunt definita ex vi illius decreti. Respondetur, argumentum esse sophisticum, & instari aperte in generationibus hominum ex Adamo: non enim negari potest, ante prævisum originale peccatum, decrevisse Deum, ut Adam filios generaret, cum dederit illi iustitiam pro se & sua posteritate, & tamen pro illo signo non absolute decrevit, an illi generandi essent mortales vel immortales, sed solum voluntate antecedente, quod etiam de Christo dici potest, ut visum est. Deinde argumentum ita procedit, ac si diceremus, totum negotium prædestinationis Christi, in illo primo signo rationis esse completum, quod falsum est, nam prædestinatio dicit in rigore rationem mediorum omnium, & ita non intelligitur completa, donec in divino intellectu expleta intelligatur tota ratio mediorum, per quæ effectus prædefinitus executioni mandandus est. Quamvis autem hæc ratio in re ipsa tota sit simul in divino intellectu, nos autem ad explicandum rerum ordinem ita illam dividimus per signa rationis, ac si successionem haberet: atque hoc modo concipimus prædestinationem ut inchoatam, priusquam ut consummatam, & consequenter concipimus prædestinationem inchoatam ante prævisum unum peccatum, consummari vero quoad aliqua media vel circumstantias post prævisum illud. Quod evidenter patet in prædestinatione, verbi gratia, Sancti Petri, aut Laurentii, & idem est de aliis. Prius enim secundum rationem intelligimus fuisse Petrum electum ad gloriam, & consequenter prædestinatum in dicto sensu, quam negatio ejus fuerit prævisa, & tamen ipsius prædestinatio quoad omnia media, verbi gratia, quoad poenitentiam & lachrymas ejus, non fuit consummata, donec peccatum negationis fuit prævisum. Similiter Laurentius prædestinatus est ante prævisum peccatum tyranni, qui ipsum interfecit, & tamen non fuerunt definita omnia media prædestinationis ejus, antequam peccatum illud esset prævisum. Et in hoc sensu, inter alios, verum est, quod hic D. Thom. dixit ad quartum, quod prædestinatio supponit præscientiam futurorum.

Sic ergo intelligendum est, Christum fuisse prædestinatum in primo signo ante prævisum originale peccatum, & tamen in illo non fuisse definita omnia media, & omnes circumstantias incarnationis, quia non fuit in illo signo completa tota prædestinatio. Unde, cum dicitur, prædestinationem esse perfectam providentiam, & perfectam providentiam descendere ad particularia, utrumque verum est de prædestinatione & providentia completa & absoluta, prout in re est: nam, prout concipitur tanquam inchoata, est quidem perfecta quoad id, quod de illa concipitur, seu quoad intentionem finis, vel aliquid hujusmodi, non tamen quoad totam executionem seu rationem mediorum & circumstantiarum. Unde ulterius dicitur, laborari in æquívoco in nomine prædestinationis, nam ut superius annotavi, hic non tam est sermo de prædestinatione, ut dicit rationem intellectus, quam de decreto divinæ voluntatis, quod est prima origo prædestinationis quoad totam efficaciam ejus, & proprie vocatur electio seu dilectio, & interdum non male prædestinatio seu prædefinitio. Et hoc sensu diximus, Christum hominem fuisse prædestinatum aut dilectum in primo signo rationis ante prævisum originale peccatum: hæc autem dilectio (quæ non est tam providentiæ pars, quam radix ejus) non intelligitur pro quovis signo rationis terminari ad rem cum omnibus mediis, seu circumstantiis ejus, nam prius intelligitur per modum intentionis finis, quam ut electio mediorum, ut supra dictum est. Unde, ad summum, pertinet ad perfectionem illius voluntatis, ut in illo signo decreverit Deus statum & perfectionem, ad quam Christus homo perventurus erat tanquam ad ultimum terminum & consummatam perfectionem suæ prædestinationis; voluit enim illi, ut in regno beatitudinis corpore & animo gloriosus perpetuo regnaret, quæ voluntas immutabilis permanfit, & completa est; per illam autem voluntatem ut sic non intelligitur aliquid statutum de via, per quam perventurus erat Christus ad talem terminum, & consequenter nec de modo humanæ generationis ejus, nec de statu passibili, vel impassibili in eadem generatione. Quod si hujus rationem inquiras, nulla est alia, nisi quia intentio finis est

prior, nostro modo intelligendi, ratione mediorum; & quia sæpe dispositio mediorum, ut perfecta & sapientissima sit, supponit scientiam aliquorum futurorum, quam non necessario supponit intentio finis. Unde hoc non est in Christo singulare, sed idem in omnibus electis & prædestinatis videre licet, ut facile constare potest exemplis adductis, & aliis similibus, quæ brevitatis gratia omitto. Ex quo patet solutio confirmationis propositæ, nam cum infertur, Christum non futurum hominem ex vi talis determinationis, simpliciter negatur sequela, nam ex vi illius decreti infallibiliter erit homo, quamvis sine ratione mediorum & particularium circumstantiarum, quæ necessaria sunt ad executionem illius voluntatis, neque enim per hanc rationem mutatur prædestinatio, sed completur. Unde ad majorem claritatem distingui potest illa particula, *ex vi talis prædestinationis*: nam, si intelligatur ex vi illius solius formaliter, conceditur sequela: si vero radicaliter, negatur sequela. Et hoc est, quod nos dicimus, nimirum decretum illud, quo Christus homo dilectus fuit ante prævisum originale peccatum, ita fuisse absolutum, ac per se efficax, ut ex vi illius Deus incarnandus esset, siue peccatum foret, siue non foret, non quia sine alia ratione mediorum incarnatio futura esset, sed quia ex vi illius decreti necessario adhibenda fuerit ratio mediorum & circumstantiarum necessaria, ut decretum illud mandaretur executioni, & accommodata statui humanæ naturæ, vel lapsæ, vel in innocentia perseverantis. Ad fundamentum secundæ sententiæ, quatenus huic etiam conclusioni repugnare potest, satis supra responsum est, cum illam tractaremus.

Dico ergo secundo: Supposita præscientia conditionali, quam Deus habuit de lapsu hominis futuro, si illum permetteret, verisimile est, non potuisse habere Deum illud decretum Incarnationis, prout nunc illud habuit, quin consequenter habuerit voluntatem permittendi peccatum, ut illa via exequeretur mysterium perfectissimo quodam modo suæ intentioni accommodato. Hoc constat satis ex dictis: explicatum enim est, quomodo, posita illa scientia, sit necessaria connexio inter illud decretum, & peccati permissionem. Dices: etiam in illo decreto, & intentione potest distingui substantia a modo, & intelligitur habere connexionem cum permissione quoad modum, non quoad substantiam suam: ergo adhuc cessante permissione posset manere decretum quo ad substantiam. Respondetur, ut in principio quæstionis dixi, nos non considerare, quid fieri posset, sed quid factum fuerit, & dicimus, decretum, quod nunc Deus habuit de incarnatione faciendâ, quod intelligitur per modum unius simplicis intentionis, non potuisse stare sine permissione peccati, supposita dicta præscientia conditionata. Quando enim intentio non solum fertur in finem, sed in modum ejus, cessante medio necessario ad modum cessat talis intentio: neque ex vi illius intenditur finis secundum se, nisi alia nova intentio poni intelligatur. Ut si quis intendat ire Romam commode, & sine magno labore, si non possit illo modo ire, ex vi illius intentionis cessabit omnino ab itinere, nisi aliud denuo statuat.

Juxta has duas conclusiones facile est in diversis sensibus illas duas propositiones conditionales, quæ oppositæ videntur, in concordiam redigere ac verificare, scilicet, licet Adam non esset peccaturus, Verbum Dei carnem assumeret ex vi præsentis decreti, cui alia condicionalis videtur opposita, scilicet, si Adam non peccasset, Verbum Dei carnem non assumeret; nam prior est vera, si illa hypothesis cadat in ipsammet præscientiam conditionatam Dei, seu in objectum ejus, ita ut sensus sit, quod, licet Deus prius ratione, quam habuisset decretum, quod nunc habuit de incarnatione faciendâ, præcivisset, Adam non fuisse peccaturum, etiamsi eum conderet cum eadem iustitia, libertate, gratia, & præcepto, & eandem tentationem in eo permetteret, quam nunc permisit, nihilominus haberet aliquod absolutum decretum de incarnatione faciendâ, quod nunc habuit, quia tale decretum, & motivum ejus, independens omnino fuit ab illa præscientia peccati, & in hoc sensu procedit nostra sententia, quam hætenus explicuimus, quamvis Scotus, & alii auctores, qui illam tuentur, non ita distincte illam declarent. Dices,



in ea hypothefi hoc modo declarata fupponi aliquid impoffibile, quomodo enim potuit Deus id non præfcire, qui neceffario eft omnium præfcius? Item, quia impoffibile eft, Deum permittere peccatum, & peccatum non fieri: illa autem hypothefis fupponit permissionem peccati: imò infra dicemus, hanc permissionem effe neceffario conjunctam cum illo primo decreto Incarnationis: ergo fieri non poteft, quin præfcientia conditionata futuri peccati præcefferit illud decretum. Respondetur in ea hypothefi nihil includi fimpliciter impoffibile, nam, ut fupra dicebam, abfolute poffibile fuit, ut Adam non peccaret, etiamfi eodem modo tentari permetteretur, quo a dæmone fuit in paradifo tentatus, & non reciperet majorem prævenientem gratiam, neque haberet paratam majorem adjuvantem, quam de facto habuit, quia his omnibus hoc modo habentibus libere peccavit: ergo fimpliciter potuit non peccare. Item, quia, fi indigniffet majori prævenienti auxilio, ut poffet non confentire tentationi, vel, fi non habuiffet in manu & potestate fua omne auxilium neceffarium ad non confentiendum, non etiam fuiffet in manu & potestate ejus non confentire, imò abfolute permiffus effet tentari fupra id, quod poffet: quæ omnia falfa funt, ut per fe conftat. Sicut ergo hoc fuit poffibile, ita etiam contingens fuit, hanc conditionalem effe veram, fi Adam fic conditus, & a Deo præventus & adiutus, a dæmone tentatur, non confentiet tentationi. Si autem hoc, quod contingens fuit, in re ipfa accidiffet, jam Deus non præfciffet ab æterno peccatum futurum in Adamo, fed potius præfciffet carentiam peccati, nam Deus, qui eft omnium præfcius, non præfcit futura, quæ futura non funt, fed potius tunc præfcit non effe futura: hæc enim fcientia futurorum contingentium, tam abfolute, quam conditionata, fine reali variatione in feipfa habet indifferentiam quandam ex parte objectorum, ut latius in 1. p. q. 14. Ad illam vero partem de permissione peccati respondetur, negando, in prædicta hypothefi fupponi aut includi permissionem peccati proprie dictam; aliud eft enim permittere tentationem cum fufficiente poffibilitate peccandi & confentiendi, aliud vero eft permittere peccatum feu confenfum in tentationem: fieri enim poteft, ut, licet aliquis tentetur, non fit confenfurus, & tunc, licet permittatur tentatio, non tamen peccatum, quia proprie non dicitur permitti, nifi id, quod futurum prævidetur, his vel illis caufis aut conditionibus pofitis. Unde, fi folum prævideatur occasio, vel periculum peccandi, non autem peccatum ipfum, fed prævideatur potius refiftendum effe occafioni & periculo, tunc permittitur quidem tentatio, vel poffibilitas peccandi, non tamen proprie peccatum ipfum, juxta communem ufum hujus vocis, tam in Scriptura facra, quam in Patribus & Theologis, qui fupponendus eft, ne de nomine fiat quæftio. In prædicta ergo hypothefi, præcife ac formaliter loquendo, tantum includitur permiffio tentationis; & proximæ poffibilitatis peccandi, cum qua permissione præcife ac fecundum fe considerata ftaret optime peccatum non fequi, ut declaratum eft; & ideo cum illa permissione fiat etiam illa præfcientia conditionata, quod, etiamfi Adam tali modo conderetur, & tentaretur, non effet peccaturus, & tunc proprie non effet peccatum permiffum; nunc vero, quia aliter in re ipfa futurum erat, habuit Deus præfcientiam contrarii effectus, qua fupposita, jam non folum permiffit tentationem & poffibilitatem peccandi, fed etiam peccatum ipfum.

Altera propositio conditionalis, fcilicet, fi Adam non effet peccaturus, Deus non fieret homo ex vi præfentis decreti, hunc habet fenfum verum, fcilicet; quia fi ftante prædicta conditionali fcientia de peccato adæ futuro, fi tali modo effet conditus & tentatus, Deus noluiſſet, illud peccatum permittere, fed impedire potius, vel non imponendo præceptum, vel non permittendo tentationem, vel creando Adamum cum majoribus gratiæ auxiliis, cum quibus præfciret Deus illum non confenfurum, tunc data hac hypothefi, ad eam recte confequitur Verbum non fuiffe incarnandum ex vi præfentis decreti, non quia hoc decretum intelligatur nunc pofitum poſt permissionem & abſolutam præfcientiam peccati futuri, propter ſolum motivum redemptionis, quod tunc deeſſet, ut multi exponunt &

defendunt ſententiam D. Thom. quam nos in hoc ſenſu tueri non poſſumus, ſed quia, quamvis decretum de incarnatione, quod nunc Deus habuit, ſecundum rationem anteceſſerit in genere cauſæ finalis, tale tamen fuit, ut ſecum habeat conjunctam permissionem peccati, & quodammodo neceſſario illam inferat, & ideo veluti a poſteriori recte colligitur, ſi peccatum non eſſet futurum, ex eo ſolum quod Deus nollet illud permittere, confequenter colligi, non fuiffe in Deo hoc decretum de incarnatione, quod nunc habuit, quia, ſi hoc fuiffet, neceſſario intuliſſet permissionem peccati, ſuppoſita prædicta præfcientia conditionata. Et hoc ſenſu explicata ſententia D. Thom. eſt vera, & juxta eundem ſenſum poſſumus multa verba ſanctorum interpretari. Quomodo autem præſens decretum de incarnatione, quamvis ſecundum rationem ſit prius, nihilominus habeat connexionem neceſſariam cum permissione peccati, dupliciter poteſt exponi. Primo, ſi dicamus, decretum illud non conſiderari, ut præciſum ſecundum rationem, ſed ut includit non ſolum voluntatem finis, ſed etiam rationem mediorum, & modum exequendi priorem intentionem; nam in hoc ſenſu plane verum eſt, ſine permissione & præviſione peccati, non fuiffe futuram incarnationem ex vi præſentis decreti, quia de facto ita ſtatutum eſt, ut incarnatio non niſi per hanc viam, & occaſionem, executioni mandaretur, ut in exemplo ſupra poſito de Joſepho dici poteſt, illum non fuiffe futurum principem Ægypti, niſi eſſet venditus a fratribus, quia nimirum conſiderata tota diſpoſitione rerum ita de facto fuit ordinatum, quamvis fortaſſe præcife conſiderando decretum illud, quo Deus prædeſtinavit, ut Joſephus in Ægypto regnaret, non eſſet neceſſaria venditio fratrum, ut haberet effectum, potuiſſet enim alia via impleri. Dices, juxta hujusmodi ſenſum pari modo eſſe concedendum, Adamum non fuiffe creandum, ſi non fuiffet peccaturus. Nec dæmones, niſi eſſent damnandi, nec multa alia bona, niſi ex eis oritura fuiffent multa mala. Imò nec Chriſtum ipſum fuiffe prædeſtinandum, niſi peccatum fuiffet futurum. Quæ tamen omnia videntur valde abſurda, & contra communem ſenſum. Sequela vero patet, quia, licet hæc omnia non ſint connexa in aliquo decreto divino præcife conſiderato, tamen adæquata voluntate ſeu ratione divinæ providentiæ illa omnia conjuncta ſunt & connexa inter ſe. Reſponderi poteſt, negando ſequelam, quia re vera in rigore non eſt eadem ratio; quavis enim hæc omnia concomitanter (ut ſic dicam) ſint conjuncta in divina voluntate, non tamen ſunt connexa ſecundum aliquam rationem cauſæ, quia nec eſt unum propter aliud, nec per unum paratur via, ſeu tenditur ad aliud, & ideo in illis rebus conditionales illæ locutiones in rigore non ſunt propriæ, nec veræ; ſecus vero eſt in præſente, nam incarnatio, & permiffio peccati, ita ſunt connexa, ut unum ſit propter aliud, & per unum paratur via ad aliud. Eſt ergo probabilis hic modus declarandi hanc connexionem, & non alienus a mente Sanctorum, qui non præcife ordinem intentionis, ſed etiam executionis ordinem in ſuis locutionibus involvunt, ut ſupra dixi; mihi tamen non omnino ſatisfacit, quia re vera non declarat connexionem peccati futuri & permissionis ejus cum decreto incarnationis ut ſic, ſed cum voluntate permittendi peccatum ad exequendam tali modo incarnationem. Addo igitur ulterius, etiamſi decretum Incarnationis præcife conſideretur, illud habere neceſſariam connexionem cum permissione peccati futuri, ſuppoſita dicta præfcientia conditionata ejusdem peccati: modus autem connexionis jam eſt a nobis expoſitus, ſcilicet, quia Deus decrevit incarnationem efficere optimo & ſapientiſſimo modo; ſuppoſita autem dicta præfcientia, nullus alius modus erat ita aptus ad Dei ſapientiam, & alia Dei attributa oſtendenda, ſicut hic, quia media permissione peccati locum habuit; & hæc etiam expoſitio poteſt facile accommodari dictis Sanctorum, & D. Thom. a quo aliquo modo inſinuatur in ſolutione ad quartum hujus articuli, ut ibi annotavi. Dices: ergo juxta hanc expoſitionem permiffio peccati ordinata eſt ad incarnationem, ut ad finem, ſcilicet, ut incarnatio optimo, & ſapientiſſimo modo fieret. Respondetur concedendo ſequelam, neque hoc eſt ullum inconueniens, ſed potius valde



consentaneum sapientissime providentiæ Dei, qui maxima mala non permittit, nisi propter majora bona. Unde, licet potuerit Deus propter alias causas malum illud permittere, sicut permisit in Angelis, qui redimendi per Christum non erant, scilicet, ut naturæ, & liberi arbitrii fragilitas ostenderetur, & gratiæ liberalitas ac efficacia, & similes, tamen multo est illustrior divinæ providentiæ ratio, si intelligatur voluisse, peccatum illud permittere, ut haberet occasionem ostendendi sapientiam suam & bonitatem in modo admirabili exequendi incarnationem, & conjungendi in hoc negotio perfectam justitiam cum infinita misericordia. Sic Chrysostomus homil. de Adam & Eva (vel quicumque fuit auctor illius): *Prævidit, inquit, per omnia Deus, quanta habuit facere bona de transgressionem hominis, & ideo illam permisit.* Sed urgebis, nam videmur incidere in ea incommoda, quæ in sectione tertia contra alios inferebamus, scilicet, quod Deus permiserit hominum culpam, ut Christus haberet, quod redimeret, &c. Quod si hæc conceduntur, eadem ratione dici poterit, Christum per primum decretum & in primo signo prædestinatum esse passibilem, & Redemptorem. Respondetur negando sequelam: est enim notandum discrimen inter hanc sententiam, quam nunc defendimus, & illam, quam sectione tertia impugnavimus: nam illa affirmat esse connexionem inter decretum de incarnatione & peccatum futurum ex vi objecti voliti per illud decretum, & motivi propter, quod volitum est, quia utrumque habitudinem intrinsecam dicit ad peccatum futurum, & hoc reputatur a nobis inconveniens propter virtutalem inclusionem peccati, quæ in tali voluntate prædefinitiva esse videtur, & hoc modo ac sensu inferuntur alia, ut incommoda. At vero in præsentem non existimamus absolute, & simpliciter esse connexionem inter decretum de incarnatione, & peccatum seu permissionem peccati ex vi objecti voliti per illud decretum, neque ex vi motivi, quia ex se abstrahit, & præscindit a peccato, & posset optime executioni mandari, etiam si peccatum intervenerum non fuisset; tamen supposita conditionali scientia, qua novit Deus, per peccatum offerendam esse occasionem tali modo exequendi incarnationem, mediante illa oritur connexio inter illud decretum & peccatum futurum, ac permissionem ejus, modo superius declarato: juxta quem evitatur facile prædictum inconveniens, quia in illo decreto voluntatis ut sic nullo modo peccatum includitur, neque virtute, neque implicite; secluso autem hoc incommodo nullum est inconveniens, quod Deus permittat culpam, ut occasionem habeat magis ostendendi justitiam & misericordiam suam, cæteraque attributa in hoc mysterio.

Juxta has ergo duas assertiones sic expostas, & conciliantur aliquo modo opiniones, & accommodantur recte omnes congruentiæ, quas discipuli Divi Thomæ, & Scoti pro suis opinionibus afferunt, illis contententibus fuisse congruentius Deum non incarnari, nisi oblata occasione peccati, ne videatur Verbum quasi in ordinem creaturarum redigi, si solum propter universi perfectionem, & propter Patris injuriam vindicandam, conjungeretur creaturæ naturæ; his vero e contra dicentibus non minus esse liberalitatis, ac misericordiæ opus exaltare innocentem naturam, quam jacentem sublevare. Illud enim primum verum est, supposita occasione peccati, & præscientia conditionata illius: qua posita congruentissimum fuit permittere peccatum, quod esset occasio tanta mysteria operandi: quo sensu potest intelligi dictum illud: *O vere necessarium Adæ peccatum, quo Christi sanguine deletum est!* Postremum autem verum esset, si occasio peccati nullo modo esset offerenda: quia ut bonitas se communicet, sufficienti ratione & opportunitate contenta est: quando major necessitas non occurrit. Nec propterea Verbum in ordinem creaturarum redigitur, sed ipsum potius creaturam suam supra omnem ordinem exaltat.

Ultimo, facile ex dictis expediri potest alter sensus quæstionis omnino conditionatus, scilicet, si supponamus, cessante peccato, Deum non fuisse incarnandum ex vi præfatis Decreti, juxta sententiam afferentem, hanc prædestinationem nunc factam esse post permissionem peccati, & præcise in remedium ejus: an (inquam) hoc posito, credendum nihilominus sit, deficiente peccato, Deum fuisse incarnandum ex alio decreto, & voluntate, quam tunc haberet: hoc enim modo videtur affirma-

re hanc sententiam Albert. in 3. d. 20. art. 4. propter congruentias, quæ in ipso mysterio inveniuntur, ut propter se fieri posset, non existente peccato. Alii vero auctores, ut Richardus, Major, & Gabriel, qui hoc sensu quæstionem disputant, dubiam illam relinquunt: quia cum, non obstantibus quibuscumque congruentiis, totum sit positum in Dei libertate, nullus potest definire, quid ipse esset facturus. Quis enim cognovit sensum ejus? & revera ita est. Quamquam alii auctores dicere possint, quamvis de futuro actu libero non possimus habere certam cognitionem, posse tamen habere probabilem conjecturam, supposita conditione operantis, & ratione objecti, & aliis circumstantiis. Quicquid ergo in hoc sensu quæstionis dicatur, nihil refert, quia facta illa suppositione, res est omnino incerta. Si tamen conjectura uti licet, & Deus non habuit nunc de facto absolutam voluntatem faciendi Incarnationem, nisi post prævisam occasionem peccati, potius hinc conjectari licet, non habuisse animum illud faciendi non oblata illa occasione. Quia cum mysterium sit per se excellentissimum, si in omni eventu illud esset facturus, non expectaret peccati prævisionem ad illud prædefiniendum.

## SECTIO VI.

*Utrum Christus principaliter venerit ad redimendum homines ab originali peccato, ita ut, illo deficiente, non esset venturus Redemptor.*

SUPPOSITIS his, quæ in superioribus dicta sunt, hæc quæstio præcipue habet locum de Incarnatione in carne passibili, & ad exhibendum hominibus beneficium redemptionis. Nam de Incarnatione secundum se jam dictum est, absolute loquendo fuisse futuram, etiam si peccatum non fuisset, quamquam de facto, prout res gestæ sunt, habuerit connexionem cum peccato. Explicandum ergo superest, cum quo peccato illam habuerit, an cum originali, an cum actuali. Et primo suppono, Christum venisse, ut nos redimeret ab utroque, & ab omni peccato, originali, actuali sive mortali, sive veniali: quod supra art. 2. satis probatum est ex Scripturis, & Patribus, & ex perfecto munere Redemptoris, qui venit, ut nos ab omni iniquitate mundaret, & faceret sibi populum acceptabilem, & non habentem maculam, neque rugam, ut dicitur ad Tit. 2. & ad Ephes. 5. & ita per sacramenta ab hoc Redemptore instituta omnia peccata tolluntur in sanguine ejus. Secundo suppono, per se, ac principaliter, venisse Christum propter tollendum peccatum, tam originale, quam actuale: quia & Deus ipse in totum hunc finem ordinavit hoc mysterium, & Christus ipse cum crebatur, & satisfacerebat, per se & directe in utrumque dirigebat suas actiones. Unde in Concil. Tolet. VI. cap. 1. sic dicitur. *Ex his tribus divinitatis personis solum filium fatemur ad redemptionem humani generis propter culpam debitam, quæ per inobedientiam Adæ originali-ter, & nostro libero arbitrio contraxeramus, resolvenda a secreto Patris arcano prodisse.* Tertio suppono, principaliter ordinatam esse Christi redemptionem in remedium originalis peccati, ut docuit D. Thom. artic. 4. & opusc. 10. art. 28. & opusc. 1. art. 23. & sumitur ex omnibus adductis art. 2. dub. 2. & 3. & ex dictis in hac disputatione dub. 2. opin. 1. & confirmari potest ex Scriptura ad Romanos 5. 1. ad Corinth. 15. ubi Christus opponitur Adæ, ut Redemptor totius naturæ, corruptori ejusdem. Sicut per unum hominem peccatum intravit in mundum, &c. & ideo fortasse Joan. 1. quasi per antonomasiam dixit Joannes: *Ecce agnus Dei, ecce qui tollit peccatum mundi:* ut in Græco legitur, & vertunt Biblia Complutensis, & ex Græcis legit Irenæus lib. 3. cap. 1. & Theophrastus super Joannem, & indicat Origenes homil. 10. in Num. quamvis in 24. in plurali legat, si Latine versioni fides adhibenda est. Ex Latinis vero in singulari etiam legit Cyprianus libro de duplici martyrio: & Augustinus lib. 12. contra Faustum cap. 30. Et quamvis cum vulgata, & aliis Patribus communiter in plurali legamus, idem potest retineri sensus, quatenus peccatum originale in virtute & radice continet omnia peccata: propter quod dicebat David Psalmo quinquagesimo: *Ecce in iniquitatibus conceptus sum.*

Denique hanc veritatem late confirmat Cajus Papa epistola



Ratio.  
D. Thom.

epistola ad Felicem Episcopum, & Leo Papa epist. 82. ad Palestinos Episcopos. 3. & epist. 97. ad Leonem August. cap. 2. Ratione hoc probat D. Thomas, ex hoc, quod peccatum originale inficit totam naturam, non autem actuale: quæ est bona congruentia, quamvis non omnino convincere videatur: quia licet non necessario, & per modum naturæ diffundatur in totam naturam actualem, sicut originale, tamen re ipsa fere totam illam infecturum erat; & quamvis hoc sit per accidens, considerata propensione rationalis naturæ, & libertate ejus, tamen moraliter est quasi per se, supposita corruptione naturæ: quia infallibiliter in pluribus sequitur, & aliunde peccata actualia sunt multo plura, & graviora: remedium autem peccati adhiberi debuit, prout moraliter & in re ipsa peccatum inest, sive per se, sive per accidens eveniat. Et ideo addendum est, peccatum originale ita esse malum commune totius naturæ, ut sit quasi radix, & fons omnium actualium, non solum quia avertit hominem a Deo, sed etiam quia privat hominem originali iustitia, & relinquit hominem inordinatum, & suis affectibus subiectum, & privatum, quantum est ex merito talis peccati omnibus auxiliis gratiæ, necessariis ad vitanda actualia peccata. Et hac ratione Christus principaliter venit propter tollendum originale, ut tanquam peritus medicus radici ægritudinis remedium adhiberet. Tandem ex modo prædestinationis divinæ potest hoc explicari: nam sicut intelligimus, peccatum originale prius fuisse in permissione, & prævisione divina, quam cætera actualia, quæ aliquando fuerunt, vel futura sunt in humana natura, quatenus illud est radix, & veluti causa cæterorum: ita ad prædefiniendam nostram redemptionem per Christum, per se solum intelligimus supponi permissionem, & prævisionem originalis peccati: ergo hæc fuit primaria ratio prædestinationis Christi, ut Redemptoris, & in carne passibili, &c. Et ad hoc confirmandum valent omnia, quæ superius sect. 3. adducta sunt.

Ex his colligitur, ex vi illius voluntatis, & decreti, quo Deus voluit redemptionem nostram, Christum venturum ad nos redimendum ab originali peccato, etiam si nullum aliud actuale esset committendum, vel permittendum in humana natura. Probatur ex dictis, quia hoc fuit primum motivum volendi, & prædestinandi redemptionem. Item, quia hæc prædestinatio secundum rationem antecedit permissionem aliorum peccatorum: quin imo stante decreto hujus redemptionis, potuisset Deus propter Christum prædestinatum in Redemptorem, velle tantam gratiam dare hominibus, ut nullum in eis permitteret peccatum actuale: quod clare ostendit, & permissionem aliorum peccatorum fuisse posteriorem, & prædestinationem Christi, ut Redemptoris, non pendere ex futuris peccatis actualibus, sed tantum ex prævisione peccati Adæ, & totius naturæ in ipso.

Objeçio.

Sed contra, quia licet hæc vera sint, considerando præcise primam illam voluntatem redimendi homines, propter prævisum originale peccatum, si tamen attendamus totum ordinem divinæ prædestinationis, & providentiæ circa salutem hominum, & circa permissionem peccatorum actualium, sic videtur ex supradictis sequi, si non fuissent actualia peccata, non fuisse futuram redemptionem, quia ita fuerunt connexa hæc in divina ordinatione, ut sine permissione peccatorum actualium non fuerit redemptio prædefinita. Quod confirmatur, quia adæquatam motivum, propter quod Deus voluit redemptionem, non fuit originale peccatum, sed omnia peccata futura prævisa scientia conditionata, vel absoluta, juxta diversas opiniones: ergo deficiente hoc motivo ex vi præsentis decreti non fieret Incarnatio. Confirmatur secundo, quia in primo signo, in quo prædestinatus est Christus ut Redemptor, prædestinata est passio ejus & mors, quæ in re futura non erat sine peccato interficientium ipsum: ergo saltem illo peccato non existente, non posset manere firmum primum decretum. Respondetur, hæc argumenta habere nonnullam difficultatem, juxta aliorum opiniones supra tractatas, in nostra vera facile dissolvi. Ad argumentum ergo respondetur, concedendo totum, quod assumit, in quo nullum est inconveniens, quia nihil aliud est, quam dicere, posita in Deo conditionali præscientia, & toto ordine voluntatis suæ, qua ordinavit redemptionem permittendo peccata, vel ad executionem, vel ad effectus ejus, non fuisse futuram redem-

ptionem, sine peccatis actualibus. Sed inde non fit, primam voluntatem incarnationis fuisse dependentem ab hujusmodi peccatis, seu ab illorum permissione. Ad primam confirmationem jam supra dictum est, posse esse unum primum motivum sufficiens, quo posito ponatur voluntas, etiam si alia desint, & nihilominus posse simul cum illo adjungi alia, vel simul, vel posterius ratione, quæ etiam habeant rationem motivi, quatenus propter illa vere afficitur, & movetur voluntas, & si hoc totum vocetur adæquatam motivum, quamvis illud desit, si maneat primum, manebit voluntas, & ita est in proposito.

Ad secundam confirmationem dici possent multa, quæ ad i. q. 14. pertinent. Nunc breviter dico, non prædefiniuisse Deum absolute, & efficaciter mortem & passionem Christi, quatenus a peccato necessario pendere possunt, nisi supposita permissione, & prævisione peccati.

Solum ergo superest, ut e contrario videamus, utrum, si non fuisset peccatum originale, futura autem fuissent actualia (suppono enim durante statu innocentiae, potuisset posteros Adæ peccare, sicut peccavit Adam), an in eo casu futura esset redemptio, vel in carne passibili, vel simpliciter juxta varias sententias. Ubi occurrunt curiose illæ interrogationes, quid scilicet facturus esset Deus, si futura essent venialia sine mortalibus? quid, si pauca mortalia, & in paucis hominibus? quid, si multa, & in pluribus, aut in omnibus, vel fere in omnibus hominibus essent futura? Quæ omnes intelligendæ sunt de mortalibus: nam sola venialia neque in statu innocentiae esse poterant, nec pro illis tollendis Christus pateretur, cum non avertant a Deo, neque gratiam tollant, per quam potest pro eis sufficienter satisfieri.

Respon.

Ad illa ergo breviter dicitur, esse tam incerta, ut vix nobis aliquid possit, vel probabiliter, definiri. Nam si consideremus voluntatem Dei, prout de facto voluit Christum venire in carne passibili, ut nos redimeret a peccatis actualibus, non possumus dicere, ex vi hujus voluntatis id fuisse futurum, si peccatum originale non fuisset, quia, ut supra dictum est, omnia peccata actualia, post peccatum Adæ, pendent a peccato originali, tanquam a radice: ergo & voluntas redimendi ab illis peccatis supponit necessario peccatum originale. Adde, si peccatum originale non fuisset, quamvis alia actualia futura essent, fortasse tamen non hæc ipsa, quæ modo in natura lapsa committuntur: ergo nec voluntas redimendi ab illis esset omnino eadem. Si quis autem dicat, nunc de facto habuisse Deum hunc animum redimendi nos ab actualibus peccatis, etiam si sola essent, oportet, ut aliquo fundamento hoc ostendat. Nam ex primo motivo, quo nunc Deus voluit nostram redemptionem, hoc non colligitur, sed potius posset colligi contrarium. Denique, si non loquamur de præsentis voluntate, sed de alia, quam Deus habiturus esset posita illa hypothese, hanc dicimus non posse fieri, immo nec sufficienti conjectura divinari. Unde quamvis possint hinc & inde congruentiæ afferri, mihi verisimilius est, si non fuisset lapsa tota natura, Christum non fuisse venturum passibilem ad redimendos homines, si qui forte peccassent, quia verisimile est, paucos homines, & in pauca peccata fuisse lapsuros, tum propter naturæ integritatem, tum quia pauciores essent occasiones peccandi, & illis posset adhiberi remedium fundatum in Christi merito, & satisfactione proveniente ex amore, non ex dolore aliquo: neque enim decebat, propter paucorum salutem, vel necessitatem, Christi sanguinem effundi. Quod si aliquis fingat, etiam in eo statu majorem partem hominum fuisse lapsuram per peccata actualia, fortasse pro illis Christus pateretur, & carnem passibilem assumeret, quia esset moraliter fere eadem necessitas, quæ nunc fuit.

Objici hic solet contra priorem partem, quia Christus ita dilexit singulos homines, & eo affectu passus est pro illis, ut paratus fuerit pro singulis id pati, si unus tantum illo remedio indigeret. Hunc enim affectum significasse videtur ipse Christus parabola illa de ove perditâ, & verbis illis: *Gaudium erit in caelo super uno peccatore penitentem iam agente*. Et eundem agnovisse videtur Paulus, cum ad Galatas 2. dicebat: *Dixit me, & tradidit semetipsum pro me*. Et idem indicatum est in revelatione facta sancto Carpo, quam refert Dionys. epist. 8. cui Christus Dominus dixit, paratum se esse ad moriendum iterum pro hominibus, si id opus esset. Respondetur, pri-

mum



Eximia  
Christi  
charitas.

num concedimus, Christum ut hominem habuisse illum affectum erga singulos homines: quod sine dubio credendum est de eximia Christi charitate: ita tamen, ut intelligamus, habuisse illum affectum subditum divinæ ordinationi: paratus erat enim id facere, si Deus ita ordinasset: nos autem dicimus Deum ad id non fuisse ordinatum, quia non expediebat, & quia charitas ordinem habet: & deinde, quia non fuisset necessarium. Neque hoc derogat beneficio redemptionis, quod singuli debemus agnoscere: quia singuli tam perfecte redempti sumus, ac si pro singulis tantum facta esset redemptio. Et hoc solum indicatum est a Paulo, ut ibi Chrysost. & Anselm. notant, & recte indicavit August. 14. cap. soliloquiorum, & idem significant verba illa Christi, de gaudio, quod sit in cælo super unius peccatoris penitentia: quamquam ovis illa perdit magis totam humanam naturam significat, ut ibi expositores communiter intelligunt, & Hil. can. 18. in Matthæum, Gregor. homil. 34. in Evangelia, August. in id Psalm. 8. *Oves & boves universas*. Revelatio autem illa, quæ etiam Sancto Petro facta legitur, solum charitatem Christi erga homines ostendit.

## ARTICULUS V.

2. *Utrum conveniens fuerit Deum incarnari ab initio mundi.*

1. 2. q. 98.  
art. 6. co.  
Et 3. d. 11.  
q. 1. art. 4.  
Et 11. d. 2.  
col. 1. &  
Galat. 4.  
col. 3. fin.

**A**D quintum sic proceditur. Videtur, quod conveniens fuisset, Deum incarnari a principio humani generis. Incarnationis enim opus ex immensitate divinæ charitatis processit, secundum illud Eph. 2. Deus, qui dives est in misericordia, propter nimiam charitatem suam, quæ dilexit nos, & cum essemus mortui peccatis, convivificavit nos in Christo. Sed charitas non tardat subvenire amico necessitate patienti: secundum illud Proverb. 3. Ne dicas amico tuo, *Vade & revertere*: cras dabo tibi, cum statim possis dare. Ergo Deus incarnationis opus differre non debuit, sed statim a principio per suam incarnationem humano generi subvenire.

2. Præterea 1. Timoth. 5. dicitur Christus venisse in hunc mundum peccatores salvos facere. Sed plures salvati fuissent, si a principio humani generis Deus incarnatus fuisset: plurimi enim ignorantes Deum in suo peccato perierunt in diversis seculis. Ergo convenientius fuisset, quod a principio humani generis Deus incarnatus fuisset.

Lib. 3.  
prof. 10.  
parum a  
princ.

3. Præterea, Opus gratiæ non est minus ordinatum, quam opus naturæ. Sed natura initium sumit a perfectis: ut dicit Boetius libro de consolat. \* ergo opus gratiæ a principio debuit esse perfectum. Sed in opere incarnationis consideratur perfectio gratiæ, secundum illud, Verbum caro factum est: & postea subditur, Plenum gratiæ & veritatis. Ergo Christus a principio humani generis debuit incarnari.

Est gloss.  
Ambr. in  
hunc locum  
tom. 5.

Sed contra est, quod dicitur Galat. 4. *At ubi venit plenitudo temporis, misit Deus filium suum factum ex muliere, factum sub lege*. Ubi dicit gloss. † quod plenitudo temporis est, quod prædefinitum fuit a Deo Patri, quando mitteret filium suum. Sed Deus sua sapientia omnia definit. Ergo convenientissimo tempore Deus est incarnatus. Et sic conveniens non fuit, quod a principio humani generis Deus incarnaretur.

Infr. q. 4.  
art. 1. & 2.  
q. 43 art. 3.  
3. & q. 14.  
art. 3. co.  
Et ver. q.  
30. art. 4.  
ad 5.

b. Respondeo dicendum, quod cum opus incarnationis principaliter ordinetur a preparatione humane naturæ per peccati abolitionem, manifestum est, quod non fuit conveniens a principio humani generis ante peccatum, Deum incarnatum fuisse: non enim datur medicina, nisi jam infirmis. Unde ipse Dominus Matth. 9. dicit: *Non est opus valentibus medico, sed male habentibus: non enim veni vocare justos, sed peccatores*.

Gloss. ord.  
ibid.

Sed nec etiam statim post peccatum conveniens fuit Deum incarnari. Primo quidem, propter conditionem humani peccati, quod ex superbia provenerat. Unde eo modo erat homo liberandus, ut humiliatus recognosceret se liberatore indigere. Unde super illud Galat. 3. *Ordinata per Angelos in manu Mediatoris*, dicit gloss. \* *Magno Dei consilio factum est, ut post hominis casum non illico Dei filius mitteretur*. Reliquit enim Deus prius hominem in libertate arbitrii in lege naturali, ut sic vires naturæ sue cognosceret: ubi cum deficeret, legem accepit, quæ data invaluit morbus, non legis, sed naturæ vitio: ut ita co-

Suarez Tom. XVI.

gnita sua infirmitate, clamaret ad medicum, & gratiæ quæreretur auxilium. Secundo, propter ordinem promotionis in bonum: secundum quem ab imperfecto ad perfectum proceditur. Unde Apostolus dicit 1. Corinth. 15. *Non prius quod spirituale est, sed quod animale, deinde quod spirituale*. Primus homo de terra terrenus: secundus homo de cælo cælestis. Tercio, propter dignitatem Verbi incarnati: quia super illud ad Galat. 4. *At ubi venit plenitudo temporis*, dicit gloss. \* *Quanto major iudex veniebat, tanto præconum series longior procedere debebat*. Quarto, ne fervor fidei temporis prolixitate teperesceret: quia circa finem mundi frigeret charitas multorum. Unde Luca 18. dicitur: *Cum filius hominis veniet, putas inveniet fidem in terra?*

\* August.  
tract. 31.  
in Joan.  
ante me-  
dium 10.9

c. Ad primum ergo dicendum, quod charitas non differt amico subvenire, salva tamē negotiorum opportunitate, & personarum conditione. Si enim medicus statim a principio agnitiois medicinam daret infirmo, minus proficeret, vel magis laderet, quam juvaret. Et ideo etiam Dominus non statim a principio, incarnationis remediū humano generi exhibuit, ne illud contemneret ex superbia, si prius suam infirmitatem non cognosceret.

Ad secundum dicendum, quod Augustinus ad hoc respondet in libro de sex questionibus Paganorum, \* dicens quest. 2. quod tunc voluit Christus hominibus apparere, & apud eos prædicari suam doctrinam, quando & ubi sciebat esse, qui in eum fuerunt credituri: his enim temporibus, & his in locis, tales omnes in ejus predicatione futuros esse præsciebat, quales non quidem omnes, sed tamen multi in ejus corporali præsentia fuerunt, qui nec in eum suscitatis ab eo mortuis credere voluerunt. Sed hanc responsionem reprobandi idem August. \* in libro de perseverantia dicit: *Nunquid possumus dicere Tyrios, & Sardonios talibus apud se virtutibus factis credere noluisse, aut credituros non fuisse, si fierent: cum ipse Deus attestetur eis, quod acturi essent magna humilitatis penitentiam, si in eis facta essent divinæ illa signa virtutū?* Proinde, ut ipse solvens subdit, sicut Apostolus ait: *Non est volentis, neque currentis, sed miserentis Dei*, qui his, quos prævidit, si apud eos facta essent, sui miraculis credituros, quibus voluit, subvenit, aliis autem non subvenit, de quibus in sua prædestinatione occulte quidem, sed aliud iuste iudicavit: ita misericordiam ejus in his, qui liberantur, & veritatem in his, qui puniuntur, sine dubitatione credamus.

In Ep. 40.  
q. 2. a med.  
tom. 2.

Cap. 9. nō  
procul a  
fine 10.9.

d. Ad tertium dicendum, quod perfectum quidem est prius imperfecto, in diversis quidem tempore, & natura (oportet enim, quod perfectum sit, quod alia ad perfectionem adducit) sed in uno, & eodem, imperfectum est prius tempore, et si sit posterius natura. Sic ergo imperfectionem naturæ humane, duratione præcedit æterna Dei perfectio: sed sequitur ipsam consummata perfectio ejus in unione ad Deum.

## COMMENTARIUS.

**P**ostquam D. Thomas de convenientia Incarnationis secundum se disputavit, in hoc articulo & sequenti rationem reddit temporis, in quo facta est, comparando in præsentis articulo tempus illud cum superiori, seu præterito tempore, in sequenti vero, cum futuro: non comparat autem cum tota æternitate, quærens an fuerit inconveniens ab æterno fieri, quia vel supponit, tantum fuisse factum occasione peccati, quod in tempore commissum est, vel certe, quia eadem est ratio de hoc, & de opere creationis, quod necessario incarnationi supponendum erat. Unde qua ratione non potuit, vel non oportuit creationem esse ab æterno, eadem neque incarnationem.

b. Respondet ergo D. Thomas, non debuisse Verbum carnem sumere ante peccatum, neque statim post illud. Priorem partem probat, quia Incarnatio principaliter ordinata est ad abolitionem peccati. Quæ ratio æque procedit, si dicamus, Incarnationem ex primo decreto, & intentione Dei, si in ipsa executione principaliter ordinata esse ad redemptionem peccati. Posterio-rem vero partem ostendit variis conjecturis, quæ in littera sunt satis claræ: & ideo non oportet plura addere usque ad sequentem disputationem.

c. Solutio ad primum clara est. In solutione secundi attingit Divus Thomas egregiam difficultatem in sequenti disputatione, dubitatione secunda tractandam.

K

Nunc



Nunc solum oportet notare vim & formam argumenti, & solutionem, quam D. Thom. eligere videtur. Argumentum ergo est. Si Christus antea venisset, plures salvarentur; debuisset ergo antea venire, cum venerit peccatores salvos facere. Respondet primo negando antecedens, quia Christus tunc venit, quando prævidit plures in se credituros, juxta quandam Augustini doctrinam. Sed quia idem Augustinus illam retractavit, respondet secundo, licet obscure, negando consequentiam: non quod antecedens concedere vel affirmare intendat: hoc enim nunquam expressit, sed quod transire permittat. Sive enim verum sit, sive falsum, consecutio non sequitur propter altissimam, & occultissimam Dei prædestinationem. Venit enim Christus peccatores salvos facere, quoad sufficientiam quidem omnes, & hoc quodlibet tempore præstare potest; quoad efficacem vero, non omnes, neque plures, sed electos, unde eo tempore venit, quod ad salutem electorum convenientissimum fuit. Cur autem in tanto numero, & non in majori electi fuerint, quis cognovit sensum Domini? & O altitudo divitiarum! Dicemus plura de hoc in sequenti disputatione. Notari tamen potest, hoc loco D. Thom. admittere in Deo illam scientiam conditionatam actuum liberorum, quam ex Augustin. refert, & admittit, scilicet cognovisse Christum, qui essent credituri, vel non credituri, his vel illis circumstantiis positis.

d Tertium argumentum D. Thom. est hujusmodi: natura initium sumit a perfectis, & gratia; sed in opere incarnationis est gratia in sua summa perfectione: ergo ab illo debuit initium sumi. Major sumpta est ex Boetio in lib. de consolat. prosa decima in principio, quam bene D. Thom. in solut. exponit, non esse illius sensum naturam in operationibus suis initium sumere a perfectis, nam potius procedit ab imperfecto ad perfectum, sed in esse & constitutione ipsius naturæ initium sumptum esse ab aliquo perfecto. Produxit enim Deus unamquamque rem perfectam in sua natura, & specie, & individuo, ut ita a perfectis ad minus perfecta procederet naturæ propagatio. Quem sensum ipse etiam Boet. evidenter expressit, & illo supposito respondit D. Thom. in forma negando consequentiam, quia imperfectionem naturæ humanæ duratione præcedit æterna Dei perfectio. Sed non videtur certe solutio satisfacere: eadem enim ratione dici posset, non oportere naturam inceptam a perfectis, quia auctor naturæ omnes creatas naturas antecedit, & potest semper perfectiores producere, vel eandem magis ac magis perficere. Vel e contrario arguitur, quia licet Deus sit primum principium naturæ, quia tamen voluit, & decuit perfectionem naturæ, quibusdam creaturis per alias communicare, ideo oportuit in initio producere naturam perfectam in aliquibus individuis, a quibus alia perfectionem participarent: sed eodem modo in ordine gratiæ voluit, & decuit, ut perfectio gratiæ ab uno primo fonte & capite, ad alios redundaret, quod caput non tantum esset Deus, sed Deus homo: ergo non satis est, quod perfectio Dei ut Dei duratione, præcedat, sed oportuit hoc caput, in quo gratia est perfecta, & tanquam in suo fonte, a principio produci. Respondetur, negando consequentiam: quia influxus naturæ est physicus, & per veram effectorem principalem in suo genere, scilicet causarum secundarum: at vero proprius & principalis influxus gratiæ semper ac necessario est ab ipsomet Deo: & ideo dixit D. Thom. satis esse, ut ante omnem gratiæ perfectionem existat perfectio Dei. Christus autem est supremum caput gratiæ in genere meriti: quod solum requirit influxum morale, & ideo necesse non fuit, ut in ordine temporis ante omnes existeret, sed satis est, quod in mente & prædestinatione divina fuerit omnium primus. Ad influxum enim morale, & per modum meriti hoc sufficit. Sed urgebis; nam Verbum incarnatum etiam est causa efficiens gratiæ, ut D. Thom. sumit articulo sequenti, ut inde concludatur, non debuisset Christi incarnationem differri usque ad finem mundi. Si quid autem concludit, potius est debuisset fieri a principio mundi: & hoc ipsum videtur concludi ex quodam principio, quod ponit articulo sequenti ad secundum terminum Incarnationis non solum esse considerandum, ut terminum motus de imperfecto ad perfectum, sed etiam ut principium perfectionis in humana natura. Sed dicendum est breviter,

quamquam verum sit, Verbum incarnatum per humanitatem efficere gratiam, illam tamen solum esse instrumentariam efficientiam, quæ non fuit a principio necessaria, quia non est debita, aut connaturalis ipsi gratiæ, sicut naturalis efficacia est debita, & connaturalis ipsi naturæ. Debit autem communicari humanitati assumptæ, propter perfectionem ejus, & ad hoc satis fuit, ut pro aliquo convenienti tempore, secundum ordinem divini sapientiæ, communicaretur.

## ARTICULUS VI.

Utrum Incarnatio differri debuerit usque ad finem mundi.

**A**D sextum sic proceditur. Videtur, quod Incarnationis opus differri debuerit usque in finem mundi. Dicitur enim Psalm. Senectus mea in misericordia uberi, id est, in novissimo: ut gloss. \* dicit. Sed tempus Incarnationis est maxime tempus misericordiæ, secundum illud Psalm. Quoniam venit tempus miserendi ejus. Ergo Incarnatio differri debuit usque in finem mundi.

Locis sup. art. 5. cit.

Gloss. ord. super illud ab insurgentibus, in med.

2 Præterea. Sicut dictum est, perfectum in eodem tempore est posterius imperfecto: ergo illud, quod est maxime perfectum, debet esse omnino ultimum in tempore. Sed summa perfectio humane naturæ est in unione ad Verbum, quia in Christo complausit, omnem plenitudinem divinitatis inhabitare, ut Apostolus dicit ad Colossenses primo. Ergo Incarnatio differri debuit usque in finem mundi.

Art. præced. ad 3. argum.

3 Præterea. Non est conveniens fieri per duo, quod per unum fieri potest. Sed unus Christi adventus sufficere poterat ad salutem humane naturæ, qui erit in fine mundi. Ergo non oportuit quod antea veniret per Incarnationem. Et ita Incarnatio differri debuit usque in finem mundi.

Sed contra est, quod dicitur Abac. 3. In medio annorum notum facies. Non ergo debuit Incarnationis mysterium, per quod mundo innotuit, usque in finem mundi differri.

a Respondeo dicendum, quod sicut non fuit conveniens Deum incarnari a principio mundi, ita non fuit conveniens, quod Incarnatio differretur usque in finem mundi. Quod quidem apparet primo ex unione divini & humane naturæ. Sicut enim dictum est, \* perfectum uno modo tempore præcedit imperfectum alio modo, & converso imperfectum tempore præcedit perfectum. In eo enim, quod de imperfecto fit perfectum, imperfectum tempore præcedit perfectum: in eo vero quod est causa perfectionis efficiens, perfectum tempore præcedit imperfectum. In opere autem Incarnationis utrumque concurrat, quia natura humana in ipsa Incarnatione est perfecta ad summam perfectionem. Et ideo non decuit, quod a principio humane generis incarnatio facta fuisset. Sed ipsum Verbum incarnatum est perfectionis humane naturæ causa efficiens, secundum illud Joan. 1. De plenitudine ejus non omnes accepimus. Et ideo non debuit Incarnationis opus usque in finem mundi differri: sed perfectio gloriæ, ad quam perducenda est ultimo natura humana per Verbum incarnatum, erit in fine mundi. Secundo ex effectu humane salutis. Ut enim dicitur in lib. de quæst. veteris & novi Testamenti \* in potestate dantis est, quando vel quantum velit misereri. Venit ergo quando & subveniri debere scivit, & gratum futurum beneficium. Cum enim languore quodam humane generis, abolere cœpisset cognitio Dei inter homines, & mores immutarentur, eligere dignatus est Abraham, in quo forma esset renovata Dei & morum: & cum adhuc reverentia seignior esset, postea per Moysen legem litteris dedit. Et quia eam gentes spreverunt, non se subjicientes ei, neque hi, qui acceperunt, eam servaverunt, motus misericordia Dominus misit filium suum, qui data omnibus remissione peccatorum, Deo Patri illos iustificatos offerret. Si autem hoc remedium differretur usque in finem mundi, totaliter Dei notitia & reverentia & morum honestas abolita fuisset in terris. Tercio apparet hoc fuisse conveniens ad manifestationem divina virtutis, quæ pluribus modis homines salvavit, non solum per fidem futuri, sed etiam per fidem presentis & præteriti.

Art. præced. ad 3.

Augustin. lib. 2. q. ex nov. test. q. 83. circa princip. tom 4.

Ad primum ergo dicendum, quod Glossa illa exponit de misericordia perducende ad gloriam. Si tamen referatur ad misericordiam exhibitam humano generi per incarnationem Christi, sciendum est, quod sicut Augustinus dicit in lib. retract. \* tempus incarnationis potest comparari

Lib. 1. cap. 26. non multum ante med. tom 1.



rari juventuti humani generis, propter vigorem fervorem, que fidei, que per dilectionem operatur: senectuti autem, que est sexta ætas, propter numerum temporum, quia Christus venit in sexta ætate. Et quamvis in corpore non possit simul esse juvenis & senectus, potest tamen simul esse in anima, illa propter alacritatem, ista propter gravitatem. Et ideo in lib. 83. quæstionum alicubi dicit Augustinus, \* quod non oportuit divinitus venire Magistrum, cujus imitatione humanum genus in mores optimos formaretur, nisi tempore juventutis. Alibi autem dicit, \* Christum in sexta ætate humani generis tanquam in senectute venisse.

Ad secundum dicendum, quod opus Incarnationis non solum est considerandum, ut terminus motus de imperfecto ad perfectum, sed etiam ut principium perfectionis in humana natura, ut dictum est. \*

Ad tertium dicendum, quod sicut Chrysostomus dicit super illud Joannis: \* Non misit Deus Filium suum in mundum, ut judicet mundum: duo sunt Christi adventus. Primus quidem, ut remittat peccata: secundus, ut judicet mundum: si enim hoc non fecisset, universi simul perirent, omnes enim peccaverunt, & egent gloria Dei. Unde patet, quod non debuit adventum misericordie differre usque in finem mundi.

## COMMENTARIUS.

**H**ic articulus & per se clarus est, & simul cum precedenti fere est explicatus. Respondet ergo D. Thom. non fuisse conveniens, differri Incarnationem usque ad finem mundi. Ex qua conclusione, simul cum conclusione articuli præcedentis, vult D. Thom. docere, sufficienter concludi, Incarnationem convenienti tempore factam, quia nec plus nec minus dilata est, quam oporteret. Probat autem D. Thom. assertionem suam tribus rationibus. Quarum prima in præcedentis articuli fine explicata est. Secunda vero moralis est, & pro materiæ capacitate sufficiens: scilicet, ne si adventus Christi amplius differretur, & Dei cognitio, & morum honestas prorsus abolerentur. Tertia est congruentia, quæ conclusionem hujus & præcedentis articuli complectitur. De solutione ad primum, dicemus statim disputatione sequenti. Solutio vero ad secundum, superiori articulo explicata est. Circa solutionem autem tertii de duplici Christi adventu, nonnulla superius contra Judæos dicta sunt: plura vero infra quæst. 59. tractabimus, ubi de potestate iudicandi Christi Domini disseremus.

## DISPUTATIO VI.

In duas Sectiones distributa.

*De tempore, quo facta est Incarnatio, ejusque convenientia.*

**N**ON possumus convenienter expedire quæstionem his articulis a D. Thom. propositam, nisi prius, quo tempore Incarnatio facta est, statuamus. Quomodo enim iudicabit aliquis, an convenienti tempore Incarnatio sit facta, tempus ignorans, in quo facta sit. De hoc igitur primo loco dicemus breviter attingentes solum computationem temporum a creatione mundi usque ad Christum: hæc enim ad Scholasticum institutum sufficit, & prætermitti non debuit, cum ejus cognitio, & per se jucunda, & Theologis maxime necessaria sit.

## SECTIO I.

*Quo tempore facta est Incarnatio.*

**D**E annorum numero ab orbe condito usque ad Christum tot sunt fere sententiæ, quot scriptores. Cum enim ex Scriptura sacra numerum certum non habeamus, & humanæ historiæ, ex quibus hæc computatio magna ex parte pendet, multum inter se discordent, nihil firmum & indubitatum affirmari potest. Unde alii plusquam quinque mille annos numerant, alii quater mille ducentos, alii quater mille centum, alii quater mille: quibus nonnulli viginti, aut triginta superadadunt, alii demunt. Ut ergo breviter, quod veritati propinquius videtur, eliciam, præmittam prius vulgarem divisionem, qua tota mundi duratio per sex ætates, se-

eundum notabiles variationes in universo factas, distribui solet, & quantum unaquæque duraverit, indicabo. Distribuantur autem illæ ætates hoc modo, ut videre est apud Augustinum de Civit. cap. ultim. & primo libr. de Genesi contra Manichæ cap. 23. Prima ab Adam usque ad diluvium, secunda, usque ad Abraham, tertia, usque ad David, quarta usque ad captivitatem Babylonicam, quinta, usque ad Christum, sexta vero a Christo inchoata est, & usque ad finem mundi protenditur.

Prima ergo ætas duravit mille sexcentis quinquaginta sex annis. In quo nulla est controversia inter Catholicos: quoniam id clare sumitur ex Genes. 5. & 7. juxta Hebraicam veritatem, & vulgatam editionem. Græci vero secuti Septuaginta interpretes, sex centos annos addunt huic ætati. Sed decepti sunt errore Græcorum exemplarium, quibus hac in parte fides non est adhibenda. Secunda ætas duravit solum trecentis viginti duobus annis, quia licet ex Genes. 11. juxta Hebraicam, & Latinam vulgatam editionem, solum ducenti nonaginta duo anni colligantur, tamen ibi prætermissa est generatio Caynam, quam Septuaginta addiderunt, & S. Lucas cap. 3. probavit: & ideo illi numero addendi sunt triginta anni, quibus Caynam vixit, antequam filios generaret; hic vero idem est error apud Græcos, & Septuaginta interpretes, qui notatus est in prima ætate, addunt enim centum annos singulis ætatibus, & ita fere octingentos annos huic ætati superadadunt. Sed numerus positus jam est omnino certus ex auctoritate vulgatæ & Hebraicæ editionis.

In assignando numero tertiæ ætatis est major difficultas, quia ex Scriptura sacra non satis constat, & pendet ex illa celebri quæstione, quo modo computandi sint quadringenti triginta anni, quibus semen Abraham dicitur habitasse in Ægypto, Exod. 12. Quidam enim eos computant a tempore, quo fuit venditus Joseph, & quadringentos numerant a descensu Jacob propter locum Genes. 15. cap. & quia non videtur paucioribus annis fieri potuisse, ut ille populus in Ægypto usque ad multitudinem tantam multiplicaretur, ut sexcenta millia armatorum hominum, absque parvulis & mulieribus exierint de Ægypto, cum Septuaginta tantum animæ ingressæ fuerint, Genes. 46. quam sententiam tenet Eugubini. Exod. 12. & Genebrard. lib. 1. Chronog. Communis vero & recepta opinio est, illos quadringentos triginta annos computandos esse a promissione facta Abraham, quando primum egressus est de terra sua, & cognatione sua, Gen. 12. quadringentos vero annos, de quibus fit mentio Genes. 15. esse numerandos a nativitate Isaac, quia ibi semen Abraham dicitur peregrinum futurum fuisse super terram quadringentis annis: cæpit autem esse semen Abraham in Isaac, qui natus est viginti quinque annis a prima promissione facta Abraham: ut constat ex Gen. 12. & 21. prætermittuntur autem quinque anni in illis quadringentis, ut ponatur solum numerus perfectus, & absolutus, juxta communem phrasim Scripturæ. Et ita etiam conciliatur locus Act. 7. & Galat. 3. nam in priori ait Stephanus semen Abraham peregrinatum esse quadringentis annis; in posteriori vero ait Paulus Abraham dictas esse promissiones, & post quadringentos triginta annos datam esse legem: & hanc fere sententiam docuit August. lib. 2. quæstionum in Exod. q. 47. & optime lib. 16. de civit. cap. 24. Eucherius lib. 2. in Genes. cap. 20. Eusebius in Chron. & eandem supponit lib. 10. de præparat. cap. 3. cum ait, a primo anno vitæ Abraham usque ad Moysen fluxisse quingentos quinque annos: intelligit autem usque ad principatum Moysis, qui octogenarius erat, cum populum eduxit de terra Ægypti, ut sumitur ex Deuter. ult. quia quadraginta annis dicitur duxisse populum per desertum, & centesimo vigesimo anno vitæ suæ mortuus esse. Eandem sententiam habent Epiphanius in Anchorato non longe a fine: ubi multa miscet, quæ mihi non probantur: sed in eis examinandis non licet immorari: tenet etiam Oecumenius ad Galat. 3. & ibi alii multi expositores: quamvis D. Hieron. ibid. quæstionem insolutam relinquere videatur: & hæc mihi videtur verior sententia, quam statim ex sacra Scriptura confirmabo.

Hac ergo supposita facile colligitur, hoc tertium mundi sæculum durasse nongentis quadraginta uno annis. Quem numerum ita supputamus: nam ab ortu Abraham usque ad primam promissionem illi facta fluxerunt septua-



ginta quinque anni, Genes. 12. ab illa autem promissione, usque ad finem captivitatis populi in Ægypto, seu usque ad legem datam (quod idem est, nam post tres menses egressiois data est lex) fluxerunt quadringenti triginta anni, ut dictum est. Et potest ita minutatim breviter declarari: nam a dicta promissione Abraham usque ad ortum Isaac fuerunt viginti quinque anni: ab ortu autem Isaac usque ad ortum Jacob fluxerunt sexaginta, Genes. 25. Jacob autem ingressus est in Ægyptum anno ætatis suæ centesimo trigesimo, Genes. 47. qui omnes efficiunt ducentos quindecim annos. A descensu autem Jacob usque ad mortem Joseph fluxerunt septuaginta, vel uno amplius, quos Augustinus supra ita colligit, quia triginta annorum erat Joseph, quando præpositus est terræ Ægypti, Genes. 41. Postea vero ante descensum Jacob transacti sunt septem anni ubertatis, & duo vel tres anni famis, Genes. 41. 42. & 43. Joseph autem centenarius mortuus est, Genes. ultim. Superfunt ergo dicti septuaginta & unus: qui si addantur supradictis ducentis quindecim, efficiuntur ducenti octoginta sex: his vero addendo octoginta annos vitæ Moysis, colliguntur trecenti sexaginta sex. Solum ergo superest computandum tempus a morte Joseph usque ad mortem Moysis: de quo tempore Scriptura nihil expresse loquitur. Ex dicta autem sententia, quam sequimur, intelligimus, solum fuisse sexaginta quatuor, aut sexaginta quinque annos: totidem enim superfunt ad complendum dictum numerum quadringentorum triginta annorum. Quod autem non plures fuerint, potest duplici conjectura ex Scriptura confirmari. Prima est, quia inter Levi, & Moysen, tantum duæ generationes intercesserunt, Cahat, & Amram, Exod. 6. Ergo satis est, quod intercesserint eo tempore dicti sexaginta quatuor anni. Secunda est, quia mater Moysis fuit filia Levi proavi Moysis, quæ nata est illi in Ægypto, ut dicitur Num. 26. Unde evidenter fit, non posse quadringentos annos computari ab ingressu populi in Ægyptum, quia oporteret, matrem Moysis habuisse ætatis fere trecentos annos, cum illum peperit. Cum nostra autem supputatione optime quadrat, quod fuerit triginta, vel quadraginta annorum, & nata ipsa fuerit post viginti quatuor aut triginta quatuor annos descensus Levi in Ægyptum. Et ex hac sententia sequitur, propriam captivitatem Ægyptiacam, quæ incepisse videtur a morte Joseph, ut recte notavit Augustinus, solum durasse centum quadraginta annos: vel si numeremus a descensu Jacob, sequitur, durasse ducentis quindecim annis. *Necque est mirum (ait D. August.) tam parvo tempore, usque ad tantam multitudinem fuisse augmentum illum populum, fecunditate hominum in eo tempore considerata, qui & diuturno tempore vivebant, & omnes generationi vacabant, & pluribus uxoribus utebantur.* Et Augustin. addit, id factum esse, adjuvante illo, qui eos voluit valde multiplicari.

Nec contra dicta obstant loca Genes. vel Exodi. Nam facile primus exponitur: sic enim habetur in Genesi. *Scito prænoscent, quia peregrinum futurum sit semen tuum in terra non sua, & subicient eos servituti, & affligent quadringentis annis.* Ex quo non potest sumi, servitutem solum duraturam quadringentis annis, sed omnia illa, peregrinationem & afflictionem, fuisse quadringentis annis terminanda. Et ex hoc loco explicandus est locus Exodi, cujus verba difficiliora sunt. Sic enim habet: *Habitatio autem filiorum Israel, qua manserunt in Ægypto, fuit quadringentorum triginta annorum.* Sed non est sensus, omnes illos annos transactos fuisse in Ægypto, sed ibi fuisse completos. Et ad hoc explicandum addiderunt Septuaginta particulam illam: *Et in terra Canaan.* Itaque in Ægypto, & in Canaan habitavit populus quadringentis triginta annis. Et hanc expositionem sequuntur fere omnes expositores Exod. ut in catena Lippom. videre est. Et juxta hanc sententiam intelligitur obiter locus Actuum 13. ubi Paulus numerat quadringentos quinquaginta annos usque ad divisionem terræ promissionis, incepisse enim videtur numerare ab ortu Isaac: a quo, ut diximus, fluxerunt quadringenti anni, usque ad exitum populi ex Ægypto: quibus si addamus quadraginta, quibus populus fuit in deserto, & decem, vel paulo fortasse plures, quibus imperavit Josue usque ad illud tempus, quo promissionis terram distribuit dictus numerus annorum efficitur.

Habemus ergo ex dictis, ab ortu Abraham usque ad legem datam effluxisse tempus quingentorum quinque annorum: ut bene dixit Eusebius, dicto loco de præparat. Evangel. A lege autem data usque ad initium Regni David fuerunt quadringenti triginta sex anni, ut evidenter sumitur ex lib. 3. Reg. cap. 6. ubi a lege data usque ad initium templi Salomonis numerantur quadringenti octuaginta anni, coepit autem Salomon ædificare templum anno quarto Regni sui, ut ibidem dicitur. David autem quadraginta annis regnavit 3. Regum 2. demptis ergo his quadraginta quatuor annis, ab illo numero quadringentorum octoginta annorum, superfunt dicti quadringenti triginta sex, qui additi supra quinque & quingentos efficiunt dictum numerum nongentorum quadraginta unius annorum, quibus hanc tertiam ætatem durasse diximus.

Quarta ætas, qua Regnum Judæorum duravit ab initio Regni David, usque ad captivitatem Babylonicam, facilius computari potest ex lib. 3. Reg. 2. 11. 22. & seqq. & lib. 4. cap. 8. & seqq. addendo nonnulla ex 2. Paral. 12. & 22. Ex quibus locis simpliciter omnia computando, prout in Vulgata habentur, quadringenti septuaginta anni colliguntur, quibus hanc ætatem durasse dicimus.

Tres autem difficultates circa computationem hujus ætatis expedire oportet. Prima est, quia hic numerus annorum ex duplici capite videri potest diminutus. Primo, quia numerati sunt Reges, qui sibi invicem successerunt: contingit autem sæpe interregna interponi, & hæc non sunt numerata, nec supputata. Secundo & difficilius, quia in ea supputatione solum numeramus annos, quos Scriptura sacra unicuique Regi attribuit, & tamen non videtur semper numerare omnes: cujus exemplum manifestum est in Saule, de quo 1. Reg. cap. 13. dicitur duobus annis regnasse, cum tamen Paulus Act. 13. quadraginta annos illius regno tribuat: & in hoc sæculo de quo agimus, Joram dicitur regnasse octo annis, & coepisse regnare trigesimo secundo anno ætatis suæ 4. Reg. 11. Unde fit, illum fuisse mortuum in quadagesimo anno suæ ætatis, quod omnino stare non potest, quia filius ejus Ochozias, qui illi immediate successit, regnare coepit quadagesimo secundo anno suæ ætatis 2. Paral. 22. esset ergo natus duobus annis ante patrem suum, si Joram octo tantum annis regnasset. Et ideo Hebræi dicunt, illum regnasse viginti octo annis: numerari autem tantum octo, quia in reliquis pessime regnavit, quod sequuntur Glossa, & Lyra. qui addunt, ad hoc indicandum dictum esse 4. Reg. 11. Ochoziam coepisse regnare 22. anno ætatis, cum tamen 2. Paralip. dicatur coepisse regnare anno quadagesimo secundo, ut illi viginti anni regni paterni supplerentur, ne in computatione annorum error accideret. Aliud exemplum esse potest de Amos, qui 4. Reg. 21. & 2. Paralip. 23. dicitur regnasse duobus annis: & Euseb. in Chron. secutus, ut ipse ait, septuaginta, illi tribuit duodecim annos: & idem refert Beda in lib. de sex ætatibus, & alii recentiores.

Ad primam tamen respondetur, in dicta supputatione ex sacra Scriptura desumpta successionem Regum semper fuisse continuatam sine intermissione: quod si aliqua aliquo tempore facta est, ut tempore Athaliæ, illius meminit sacra Scriptura: & ita tempus illud etiam numeratum est. Sicut e contrario, cum interdum accidit, filium simul cum patre regnare, ne iidem anni bis numerarentur, parenti solum tribuuntur, ut expresse videre est in Joatham, qui simul regnavit cum Azaria patre suo, 4. Reg. 15.

Ad secundam respondetur: quando sacra Scriptura obiter mentionem facit Regni alicujus, non semper numerare integre, & absolute numerum annorum, quibus ille regnavit, ut videre est in Cyro, Balthasar, Dario, & similibus. Nam cum Scriptura sacra non tractet horum Regum historiam, sed attingat solum, quantum ad texendam suam sacram historiam expedit, solum illorum annorum mentionem facit, qui ad hunc finem pertinent. Unde non fit, hujusmodi Reges non plures annos regnasse, quam in Scriptura contineantur, ut per se satis videtur clarum, & notavit Hieronymus super 11. cap. Danielis. At vero in hac historia Regum Juda, & Israel, quam Scriptura sacra per se intendit, & absolute tractat, sine dubio intelligendum est, semper ponere integrum annorum numerum, quibus unusquisque Rex imperavit:



peravit: præsertim a tempore Davidis, & saltem eo modo, qui necessarius erat ad chronologiam Regum sine errore texendam. Neque in hac parte tutum, aut firmum videtur, a Scripturæ litera discedere, nisi aliunde ex eadem Scriptura aliud aperte constet, ut in exemplo illo de Saul, nam locus Pauli explicuit locum Regum. In quo etiam satis indicatum est, non sine aliqua metaphora locutam fuisse Scripturam; prius enim dicit filium unius anni fuisse Saul, cum regnare cœpit, scilicet quoad animi candorem, & eodem modo subdit duobus annis regnasse, scilicet sancte, & iuste. Quamquam fortasse intelligi potest, totum tempus Regni Saul, quo regnavit etiam vivente Samuele, fuisse quadraginta annorum: post mortem autem Samuelis tantum regnasse duobus annis, sive in illis quadraginta annis computetur totum tempus, quo iudicavit Samuel, ut multi volunt, sive sit omnino distinctum: ad nostram enim computationem hoc nihil refert: nam totum hoc tempus pertinet ad tertiam ætatem.

Ad aliud vero exemplum de Joram respondetur cum Eusebio, & aliis, quos Genebrar. lib. 1. sequitur, illos viginti annos nullo modo addi posse Regno Joram, vel Ochoziæ. Primo quidem, quia computando annos Regum Israel, qui eodem tempore regnarunt, scilicet Joram, Jehu, & Joachaz 4. Reg. 3. & 10. est evidens, non posse addi illos viginti annos: tum etiam, quia sine ullo fundamento dicitur, viginti annos Regni Joram fuisse prætermisos, solum quia inique regnavit: hac enim ratione complures alii fuissent prætermittendi. In conciliandis autem citatis locis difficillimis multa dicuntur ab auctoribus, quæ nunc examinare non est necesse. Mihi breviter occurrit, dici posse Joram quidem cœpisse regnare trigésimo secundo anno ætatis, ut Scriptura aperte dicit, & regnasse viginti octo annis, viginti autem simul cum patre suo Josaphat. Nam 4. Reg. 8. dicitur cœpisse regnare quinto anno Regni Josaphat: & tamen 3. Reg. ult. dicitur, regnasse Josaphat viginti quinque annis: regnavit ergo viginti simul cum Josaphat, post illum vero regnavit octo annis, qui soli numerantur, quia illi solum pertinebant ad chronologiæ computationem. Unde fit, Joram mortuum fuisse sexagenarium, nec Scriptura unquam dixit, illum mortuum fuisse quadragenarium. Ad conciliandum autem alia duo loca, oportet similiter dicere, Ochoziam cœpisse regnare simul cum patre, vigésimo secundo anno ætatis, ut dicitur 4. Regum, & cum eo regnasse viginti annis: post mortem vero patris tantum regnasse uno anno, cum jam esset quadraginta duorum annorum, ut dicitur in Paralip. Et ita solum unus pertinet ad chronologiam: & ideo solus ille numeratur. Ad ultimam de Amos respondetur, tantum regnasse duobus annis, ut in vulgata expresse habetur. Neque est ulla ratio eam aliter interpretandi: nec Septuaginta, prout habemus in Complutensi, aliter habent.

Secunda difficultas est, quia in supputatione horum annorum, semper sumimus annos, quos Scriptura sacra singulis Regibus tribuit, tamquam integros & completos, cum tamen usitatus in huiusmodi historiis sit, ut annus inchoatus pro completo numeretur; ex quo fit, ut idem annus, vel integer, vel quo ad magnam ejus partem, bis numeretur, ita ut verisimile sit uniuscujusque Regis ætati dimidium annum ultra veritatem addi, si omnia bene moraliter computentur. Et hæc eadem difficultas locum habet in computatione annorum facta in primo, & secundo sæculo: nam quod hic dicimus de tempore, quo singuli Reges regnarunt, habet locum in temporibus, seu ætatibus, quibus singuli homines vixerunt, quorum successio in illis prioribus ætatibus computatur. Imo, ut quod est fateamur, hæc difficultas in omni chronologica supputatione locum habet: nec video, quid responderi possit nisi solum, in his rebus non esse exactam certitudinem requirendam, sed contentos nos esse debere, numerando & supputando annos eo modo, quo in historiis & præcipue in sacra Scriptura numerantur. Præsertim, quia fortasse non semper annus inchoatus pro completo ponitur, sed interdum inchoatus tanquam imperfectus omittitur, & numerus integer ac perfectus ponitur, quod sæpe esse in Scriptura usitatum docuerunt Epiphanius in Anchorato, & Augustinus lib. quest. in Exod. quest. 47. & in proposito fieri potest conjectura: quia 3. Reg. 2. David dicitur regnasse quadraginta annis, quos

SHARER. Tom. XVI.

tantum ego in dicta annorum summa computavi: & tamen ex 2. Reg. 5. sumi potest, illum regnasse quadraginta annis, & sex mensibus. Athalia etiam dicitur regnasse sex annis 4. Reg. 11. & 2. Paralip. 22. & tamen regnasse etiam aliquam partem septimi anni, ex eisdem locis desumitur. Itaque si alicubi fortasse pars alicujus anni bis numeratur, alibi pars alia omittitur: & hoc modo unus error ex alio compensatur, neque in re tam lubrica potest esse certior supputatio.

Tertia difficultas est de termino hujus ætatis, diximus enim, ad captivitatem Babylonicam terminari. Fuit autem triplex hæc Babylonica captivitas, ut constat ex 4. Reg. 24. & 25. Et ideo dubium esse potest, de qua illarum hoc intelligendum sit. Sed hæc difficultas tangit aliam statim in sequenti ætate tractandam; nunc breviter dicitur, hanc ætatem computari usque ad undecimum annum Regis Sedechiæ, in quo ultima captivitas, & propria desolatio, & finis proprii Regni Judaici in Jerusalem acciderunt.

Quinta ætas omnium difficillima est ad verum annorum numerum, quo duravit, supputandum, tum quia ex Scriptura sacra parum, aut fere nihil sumi potest; tum etiam, quia pendet ex duabus gravissimis difficultatibus, quarum altera est de principio & fine septuaginta hebdomadarum Danielis, quam supra fere indecisam reliquimus propter historiæ incertitudinem; altera est de initio & fine septuaginta annorum Babylonicæ captivitatis, quam prædixit Jeremias cap. 25. 29. 52. Unde factum est, ut auctores in varias sententias divisi sint, nam Genebr. lib. 2. Chronog. in fine solum tribuit huic ætati annos quingentos viginti unum, Beda autem in libr. de sex ætatibus tribuit quingentos sexaginta, Driedo lib. 3. de dogmatibus cap. 5. quingentos nonaginta sex, ex Eusebio autem in chronico sumuntur anni quingenti octoginta quinque. Nam ipse ponit captivitatem illam accidisse Olympiade quadragésima septima, anno secundo cum Clemen. Alexan. lib. 1. Stromat. ortum autem Christi Domini certum est evenisse Olympiade centésima nonagésima quarta, anno tertio, ut ipse etiam inferius scribit. Duravit ergo hæc ætas centum quadraginta quinque Olympiades, & annum unum, quæ ad annos redactæ efficiunt dictum annorum numerum. Sed hæc supputatio Eusebii supponit, ab initio hujus ætatis, seu desolationis Jerusalem, usque ad reedificationem templi inchoatam sub Cyro tantum intercessisse annos triginta, quod multis aliis non fit credibile. Habet etiam hæc sententia aliam difficultatem supra tactam, dum exponeremus hebdomadas Danielis, quia plures annos tribuit imperio Græcorum, quam veritas Scripturæ patiatur. Quæ difficultas procedit in omni sententia, quæ per Olympiades colligit numerum annorum hujus ætatis. Unde etiam fit hoc negotium magis ambiguum, & incertum, quia verisimilior omnium rationum computandi hæc tempora existimata est hæc, quæ sumitur ex numero Olympiadum: quæ tamen ex Scriptura convinci videtur in hac parte continere errorem.

Ut ergo in re tam incerta aliquid dicamus, statuamus primo ab undecimo anno Regni Sedechiæ, usque ad initium Regni Cyri in Babylone intercessisse septuaginta annos, ut est communior sententia ex Josepho lib. 11. antiquit. in princip. & Julio Africano lib. 5. de ratione temporum, quam indicant etiam Lactant. lib. 4. cap. 5. & Cyril. lib. 8. contra Julian. quos sequuntur Joan. Lucidus lib. 2. de rat. temp. cap. 11. & Cano lib. 11. de locis cap. 5. & argum. 9. & Benedictus Pererius libr. 11. in Daniel q. 4. & 5. Et sumitur breviter ex Scriptura: nam Jeremias prædixit desolationem Jerusalem, & captivitatem Judæorum in Babylone duraturam septuaginta annis, ut constat ex citatis locis, & ex cap. 9. Danielis. Certum est autem ex 1. Esdræ cap. 1. illos septuaginta annos completos esse in initio Regni Cyri, quando Judæorum captivitas solvi cœpit, & illis facultas data est revertendi in terram suam, ut prædictum fuerat Isai. 44. & 45. Hoc aperte patet ex verbo illo Esdr. *In anno primo Cyri Regis Persarum, ut compleretur verbum Domini ex ore Jeremiæ, suscitavit Dominus spiritum Cyri, &c.* Tum ergo completi sunt septuaginta anni captivitatis, prædicti a Jeremia. Quod vero hi anni inchoati fuerint ab undecimo anno Regis Sedechiæ, constat, quia tunc, & non antea fuit templum omnino



dirutum, & Jerusalem incensa & destructa, & tota regio Judæorum vastata, & desolata, ut constat ex 4. Reg. 13. in aliis enim captivitatibus licet populus captivus ductus sit magna ex parte, non tamen fuit templum eversum, nec regio desolata: Prædixerat autem Jeremias septuaginta illos annos non tantum transmigrationis, & captivitatis, sed etiam desolationis: sic enim ait cap. 25. *Et erit terra in solitudinem, & in stuporem, & servient Regi Babylonis septuaginta annis.* Et ideo Dan. 9. dicitur. *Intellexi numerum annorum, de quo factus est sermo Domini ad Jeremiam Prophetam, ut complerentur desolationis Jerusalem 70. anni.* Et similia habentur. 2. Par. 36.

**Objeçtio.** Dices: Hoc argumentum probaretur, non fuisse desolationem terminatam tempore Cyri, quia licet ipse jufferit, templum instaurari, non tamen id factum est usque ad Darium. Respondetur, licet templum non fuerit sub Cyro perfectum, fuit tamen inchoatum, & altare erectum, & sacrificia inceperunt offerri, & terra inhabitari, & ideo jam non poterat dici terra desolata, neque durasse adhuc sublatum, ut Scriptura supra loquitur, id est, cessationem a sacrificiis, & aliis legalibus caeremoniis in eo loco perficendis, & ideo recte dicitur completos esse tunc septuaginta annos desolationis.

**Objeçtio 2<sup>a</sup>.** Non desunt tamen contra hanc sententiam, quam ut veriore supponimus, gravissimæ difficultates ex sacra Scriptura desumptæ, quas persequi non est nostri instituti. Indicabimus tamen eas, tres præsertim, quæ præcipuæ sunt. Prima sumitur ex verbis illis Zachar. 1. *Iste jam septuagesimus annus est,* quibus significatur, septuaginta annos impletos esse tempore Zachariæ, qui prophetavit anno secundo Darii Hytaspis, qui multis annis fuit post Cyrum. Secunda est, quia si tot anni fluxissent a desolatione Jerusalem usque ad Cyrum, Mardocheus vixisset plusquam ducentos annos, quod incredibile est. Tertia sumi potest ex chronologia, addito testimonio Jeremiæ, cap. 27. Nam regnum Chaldæorum ante imperium Cyri solum duravit post Nabuchodonosor in filio, & nepote ejus, scilicet Evilmerodach, & Balthasare, qui post vastationem Jerusalem regnarunt quinquaginta duos annos: viginti sex, quibus supervixit Nabuchodonosor, ut sumitur ex 4. Reg. 24. & 25. viginti tres, quos historiæ tribuunt Evilmerodach, & Balthasari tres, ex Daniel. 8. qui complent dictum numerum.

Ad primam, propter illa verba multi existimant, alios esse septuaginta annos captivitatis, de quibus loquitur Zacharias, & alios, de quibus locutus est Jeremias. Isti enim completi sunt initio imperii Cyri, ut ostensum est: illi vero secundo anno Darii Hytaspis: & ideo dicunt, annos a Jeremia prædictos non incepisse in tertia captivitate Sedechiæ, sed in prima Joachim, vel secunda Jechoniæ. Annos vero, de quibus Zacharias loquitur, incepisse in ultima captivitate. Sed hoc stare non potest cum iis, quæ diximus, neque cum chronologia a gravioribus auctoribus probata: quia inter primam & ultimam captivitatem, tantum interfuerunt decem & novem anni, & inter secundam & tertiam undecim, ut patet ex 4. Reg. 24. & 25. At vero a primo Cyri usque ad secundum Darii Hytaspis interfuerunt quadraginta, vel plures anni, ut est communior sententia: cui favet illud Joan. 2. *Quadraginta sex annis edificatum est templum hoc.* Adde, hos duplices septuaginta annos nullum habere fundamentum in Scriptura: nam Angelus, qui Zachar. 1. dixit illa verba: *Iste jam septuagesimus annus est,* non attulit novam prophetiam, aut revelationem, quod postrema illa captivitas esset septuaginta annis duratura, sed alludit sine dubio ad prophetiam Jeremiæ, & interpellans Deum, ut miseretur Jerusalem, & urbium Juda, alligat septuaginta annos Jerusalem prædictos jam esse impletos. Nec dicit affirmando, illum annum, in quo loquebatur, fuisse septuagesimum, sed per interrogationem dicit: *Iste septuagesimus annus est?* quasi diceret jam diu septuaginta anni dicti a Jeremia impleti sunt, & Jerusalem, ac urbes Juda nondum electam receperunt libertatem, &c. Et hanc expositionem indicavit Hieron. & aperte Lyranus, & alii.

Ad secundam, omissis multis, quæ dici possunt, respondetur, Mardocheum non fuisse in persona sua (ut ita dicam) translatus ab Jerusalem in Babylonem, tempore captivitatis factæ sub Jechonia, sed in parentibus suis, ipse vero ortus est in Babylone, neque aliud colligitur ex

lib. Esther cap. 2. & ita facile omnia conciliantur.

Ad tertiam respondetur, juxta communior sententiam Berosi, quem refert & sequitur Josephus lib. 1. contra Apionem, & lib. 10. antiquit. cap. 12. & Beda lib. de sex ætatibus, & alii, post Nabuchodonosor usque ad Cyrum minimum, regnasse quatuor Reges Chaldæorum, scilicet, Evilmerodach, Nighsarus, Labossardachum, & Nabonidum: & huic ultimo tribuunt decem & septem annos, quamquam in nominibus horum Regum, & in numerandis annis, quibus regnarunt, mira sit varietas in auctoribus. Ex loco autem Jerem. 27. nihil in contrarium probatur: tum quia ibi non excluduntur alii: tum etiam quia illa phrasis, scilicet: *Dedi regnum ei & filio ejus, & filio filii ejus,* tantumdem valet, ac si dictum esset, & filius ejus: non ergo significatum est, tantum per duas generationes duraturum fuisse regnum illud.

Habemus ergo septuaginta annos hujus ætatis usque ad Cyrum: reliqui usque ad Incarnationem numerandi sunt, aut per hebdomadas Danielis, & hæc fuisset certissima supputatio, si constaret satis de initio illarum: sed quantum hoc habet ambiguitatis, tantum est incerta hæc ratio supputandi; aut per imperia supputando annos, quibus durarunt imperia Persarum, & Græcorum, nam de imperio Romanorum certissimum est, Christum Dominum incarnatum, vel natum fuisse anno quadagesimo primo imperii Augusti Cæsaris, qui fuit trigessimus monarchiæ Romanorum. Quam vero sit incerta duratio utriusque monarchiæ, tam Persarum, quam Græcorum, satis constat ex supra dictis de hebdomadibus Danielis. Aut denique numerare possumus hos annos per Olympiades, quæ videtur mihi omnium probabilissima ratio, nisi locus ille lib. 1. Machab. mihi scrupulum iniecisset. Nam constat apud omnes Incarnationem, seu ortum Domini contigisse in Olympiadis centesimæ nonagesimæ quartæ anno tertio aut quarto: Cyrum vero cœpisse regnare initio Olympiadis quinquagesimæ quintæ. Ita enim ponit Eusebius, & fere omnes in hoc conveniunt. Juxta quam computationem constat, ab initio Cyri seu a septuagesimo anno Babylonicæ captivitatis expleto, usque ad incarnationem interfuisse fere centum triginta novæ Olympiades, quæ continent quingentos quinquaginta quinque annos, quibus si addantur septuaginta captivitatis, efficiuntur sexcenti viginti sex anni. Sed ab his sunt sine dubio aliqui tollendi propter citatum locum Machabæorum, præterquam quod incertum est id, quod sumitur de initio regni Cyri. Quia licet frequentius afferatur triginta annis regnasse, non tamen constat, imo valde dubium est, an omnes illos regnaverit post captam Babyloniam, quia verisimile est prius aliquos annos regnasse in Perside. Unde sit etiam dubium, an initium regni ejus in principio Olympiadis quinquagesimæ quintæ intelligendum sit simpliciter de regno ejus in Perside, vel post captam Babyloniam. Quocirca in hac re nihil invenio, quod possim secure affirmare, nisi hoc solum, a prima reedificatione Templi sub Cyro durasse ut minimum quadringentos quinquaginta quinque annos, quia certum est, initium hebdomadarum Danielis non posse sumi ante illam reedificationem factam sub Cyro; quibus si addamus septuaginta annos captivitatis, efficiuntur quingenti viginti quinque, qui ut minimum tribuendi sunt huic ætati. An vero plures fuerint, mihi non constat. Verisimilius tamen existimo plures fuisse, quia hoc magis indicant graviores, & antiquiores historiographi; quod autem plures fuerint, etiam me ignorare confiteor, quia ipsimet auctores graves inter se dissident. Si autem divinare licet, & veluti media via inter extrema incedere, demus huic ætati sexcentos annos, parum enim ab hoc numero discrepare potest, si bene omnia compenseantur.

Ex quibus omnibus licet colligere, incarnationem factam esse circa quater millesimum annum a creatione mundi, ut facile patebit computando omnes ætates supra numeratas. An vero fuerint illi impleti, vel nondum perfecti, non credo posse usque ad numerum omnino certum designari: sed solum, ut dixi, parum ab illo numero diitare. Illud vero, quod supra diximus, quoniam ad plures quæstiones inferius disputandas necessarium erit, pro certo statuendum est, scilicet, juxta computationem Græcorum incarnationem factam esse Olympiadis centesimæ nonagesimæ quartæ anno secundo. Juxta computationem vero Romanorum factam esse anno quadra-

Summa  
socius  
præceden-  
tis suppu-  
tationis.



quadagesimo primo imperii Augusti, ut conveniunt Eusebius in Chron. & lib. 1. histor. cap. 5. Epiphanius in Anchorato & in libro de ponderibus & mensuris aliquantulum a principio, & hæref. 51. & 78. & Beda libro de sex ætatibus: qui omnes docent natum fuisse Christum anno quadagesimo secundo inchoato imperii Augusti. Quod expressius ponit Clemens Alexand. lib. 1. Stromat. a quibus non diffident Irenæus lib. 3. cap. 25. & Tertul. libr. contra Judæ. cap. 8. dicentes, natum fuisse Christum anno quadagesimo primo imperii Augusti: intelligendi enim sunt, id est, post illum completum. Unde fit ex omnium sententia, incarnationem, quæ novem mensibus nativitate antecessit, anno quadagesimo primo imperii Augusti perfectam fuisse.

**Dubitatio** Sed quæret tandem aliquis, quo anni mense facta sit incarnatio; non enim defuit quidam Matthæus Beroaldus, qui lib. 4. suæ Chronog. cap. 2. dicere ausus fuerit, Christum natum esse mense Septembri, in æquinoctio autumnali, unde fit incarnationem factam esse in medio mensis Decembris. Sed est temeraria sententia contra universalem Ecclesiæ Latinæ traditionem & consuetudinem, quæ habet, Christum fuisse natum die 25. Decembris, & incarnationem fuisse factam die 25. Martii. Hoc satis patet ex sensu & usu Ecclesiæ, quem fuisse antiquissimum constat ex August. lib. 4. de Trinit. cap. 5. & ferm. 18. de nativ. & ex Clem. Alexand. lib. 1. Stromat. & Niceph. lib. 1. hist. cap. 12. Chrysost. hom. 1. in Luc. & homilia sequenti, quæ est de Natali Domini, qui advertit conceptionem & nativitatem Christi Domini cum conceptione & nativitate Jo: Baptiste ita fuisse per omnia quatuor anni tempora distributas, ut singulis primis mensibus uniuscujusque temporis anni, alterutra cadat conceptio vel nativitas: videlicet primis mensibus veris & hyemis incarnatio & nativitas Christi, primis autem mensibus autumnii & æstatis conceptio & nativitas Joannis Baptiste.

## SECTIO II.

*Utrum convenienti tempore facta sit incarnatio.*

**Q**uæstio hæc ex eo capite nonnullam difficultatem habet, quod tantum Dei beneficium non videbatur tot annis & seculis differendum, quam difficultatem objecit Augustino quidam Porphyrius paganus in epist. 49. de sex questionibus contra paganos quæst. 2. eamdemque quotidie interrogant Gentiles, cum primum illis Evangelium prædicatur. Nam si Deus (inquiunt) propter salutem & amorem hominum, homo factus est, cur non antea venit, ne tanta hominum multitudo periret? & eamdem attingens Chrysost. hom. 27. super ad Rom. circa illud cap. 14. *Juxta revelationem mysterii temporibus æternis taciti*, inquit: *Si quæseris, qua ratione etiam tandem apparuit, periculosam rem facies, mysteria Dei curiose examinans, & rationem illorum exigens; neque enim talia curiose inquirenda, sed diligenda sunt, & amplectenda; obedientiam enim fides exigit, non curiositatem.* Et ad simile propositum dixit Irenæus lib. 4. contra hæref. cap. 67. *Non tu Deum facis, sed Deus te. Si ergo opera Dei es, manum artificis tui expecta opportune etiam facientem.* Sed hæc dicunt patres ad eos, qui animo curiofo, & ad impugnandam fidem hæc interrogant. Nobis vero necessarium est, aliquam rationem reddere ejus, quæ in nobis est, fidei. Cum enim omnia, quæ a Deo fiunt, ordinate, & convenienter fiant, non deerit aliqua sufficiens ratio ad hanc fidem explicandam.

**Tacite  
objectioni  
responsio  
datur.**

**Concl. 1.  
explic.**

Dico ergo primo non oportuisse, hoc mysterium statim in initio mundi fieri, sed convenienter tot seculis & temporibus dilatum esse. Advertendum est non dici ita conveniens, quin si Deus aliud facere voluisset, & mysterium hoc multo ante perficere, potuisset etiam illud esse conveniens juxta rationes & fines, quos Deus vellet intendere: sed dicitur esse conveniens in primis, quia simpliciter potuit bene & honeste ita fieri absque ulla indecentia; & deinde quia considerata magnitudine mysterii, & causis, & rationibus, propter quas a Deo fiebat, expediens fuit tanto tempore differri: & hoc sensu est omnino certa hæc veritas, quæ sufficienter auctoritate Dei id facientis comprobata est: omnia enim sapientissime providet, & in numero, pondere, & mensura disponit.

**Rationes.**

Ratione præterea declaratur, nam primo si loquamur de initio hominis in statu innocentie ante peccatum, Suarez Tom. XVI.

non fuit conveniens tunc fieri hoc mysterium, præter rationem D. Thom. supra, quia oportuit tantum mysterium prius fide teneri ab Angelis & hominibus, & Christum ita creditum ab eis adorari & sperari, ut auctorem suæ salutis. Secundo, si loquamur post peccatum commissum, similiter fuit conveniens ex parte ipsius mysterii, propter fidem & venerationem ejus, ut prius multis temporibus esset prædictum & præfiguratum, ut facilius crederetur, & post longam expectationem majori affectu & veneratione susciperetur. Sic August. tractat. 31. in Joan. inquit. *Multi dicunt, quare non antea venit Christus? Quibus respondendum est, quia nondum venerat plenitudo temporis, moderante illo, per quem facta sunt tempora. Sciebat enim, quando venire deberet. Primo per multam seriem temporum, & annorum prædicandus fuit, non enim aliquid parvum venturum fuit, diu fuerat prædicandus, semper tenendus: quanto major index veniebat, tanto præconum longior series præcedebat.* Secundo ex eodem August. lib. 83. qq. q. 43. quia oportuit universum paulatim perfici, & in singulis ætatibus habere decorem suum: sicut homo in ipsa corporis ætate paulatim progreditur ab infantia usque ad senectutem: *Et quicumque*, inquit Augustinus, *ad certam sapientiam pervenerunt, non nisi ab eadem veritate suarum sigillatim ætatum opportunitate illustrati sunt. A qua veritate ut populus sapiens fieret, ipsius generis humani opportuna ætate homo susceptus est.*

Unde sumitur tertia ratio ex parte ipsorum hominum, quos oportuit prius disponi ad tantum mysterium suscipiendum. Duobus autem modis tanta successione temporum dispositi sunt: primo directe prius per naturalem legem, & generalem promissionem & spem mediatoris: postea per legem scriptam, & expressiores prophetias, & plures cæremonias & sacrificia: quæ omnia Christum promittebant, & præfigurabant. Secundo, quasi indirecte permittendo, ut Paulus ait ad Rom. 11. & ad Galat. 3. omnes fere homines sub peccato & incredulitate concludi, ut suam fragilitatem agnoscerent, & humiliores fierent ad tantam Dei gratiam agnoscendam, & suscipiendam. Unde etiam factum est, ut dilato beneficio & necessitate crescente, desideria Salvatoris crescerent. Quæ omnia D. Thom. hic attigit, & latius Irenæus lib. 4. contra hæref. cap. 75. Theodor. lib. 6. de curationibus Græcorum ad finem. Chrysost. homil. 4. ad Coloss. colum. 4. & homil. 9. ad populum, ubi inter alia ait: *Non si aliquid utile est, ideo statim dari debet, nam etiam solidus cibus utilis est, non tamen datur in principio.* Et Euseb. lib. 1. histor. cap. 2. & Nicephorus lib. etiam 1. cap. 3. & optime Leo Papa ferm. 3. de Nativ. cap. 4. Gregor. Nyss. orat. de natali Domini. Et Bernard. ferm. 1. de adventu Ambr. & expositores circa illa verba ad Gal. 3. *Lex pedagogs noster fuit in Christo.* Et circa illa cap. 4. *Cum essemus parvuli, sub elementis hujus mundi eramus servientes.* Et Theophyl. super ad Hebr. 9. exponens illa verba: *Nunc autem semel in consummatione seculorum ad reprobationem peccati per victimam, sui ipsius manifestatus est.* Ubi ex Gregor. Nyss. hæc verba refert: *Quomodo infiniti medici intus adhuc febri corpus suburgante, cum per morbum facientes causas adhuc accenditur, nullum adhibent agroto ex cibis auxilium, expectantes tantisper, dum malum hoc ad summum increverit, & sic nobiscum actum est. Expectavit animarum medicus, donec universa malitia agritudo panderetur, &c.*

Quarto addi potest, explicando magis superiorem rationem, quia si Christus Dominus in principio mundi venisset, pauci tunc essent homines, qui ejus præsentia fruerentur, & doctrinam ab ejus ore susciperent, & abundantiam gratiæ in ejus adventu communicatam, unde exiguus etiam esset numerus hominum, quibus Christi Evangelium, vel ab ipso, vel a discipulis prædicari posset. Ex quo rursus fieret, ut paulatim procedentibus temporibus, fidei & charitatis fervor languerent. Hæc est enim hominum conditio, ut non multum in officio virtutis ferventer perseverent, sicut & ante Christi adventum in ipsa Dei cognitione, & honestate morum visum est: & post ejus prædicationem in Ecclesiæ discursu, quæ ab illo primo charitatis fervore statim declinare cœpit. Si ergo Christus in principio mundi venisset, ille primus fervor doctrinæ & gratiæ ejus, brevi tempore, & in paucis hominibus durasset: postea vero quando



Solutio  
objectio-  
nis.

genus humanum plenius propagatum esset, & major hominum multitudo tanto remedio indigeret, iam fides huius mysterii plurimum obscurata esset: unde fieret, ut pauciores illius gratia & beneficiis fruerentur. Quam rationem significasse videtur Theodoret. supra, cum dixit: *Si in principio mortem subisset, quando peccatum non perinde effusum fuisset, nemo deinde credidisset.* Et ex hac ratione solvitur obiectio supra tacta, scilicet, quod si antea venisset Christus, plures salvi fierent. Quamquam enim non sit contemnenda responsio Augustini ex prædestinatione Dei desumpta, scilicet, tunc venisse, quando agnovit electis suis magis profuturum ejus adventum, ut circa literam D. Thom. adnotavimus, & summi potest ex eodem libro de bono perseverantia cap. 9. & libro de prædestinatione Sanctorum cap. 9. Responderi tamen potest etiam ex dictis, considerata hominum conditione, & ordinario modo divinæ providentiæ, plures homines fuisse salvandos per mysterium incarnationis factum post multa tempora, quando jam mundus erat quasi perfectæ ætatis, quam si in principio fieret.

Concl. 3.

Dico secundo: Conveniens fuit, mysterium hoc non differri usque ad finem mundi, sed multo etiam ante illum fieri. Hæc conclusio adeo est per se clara, ut nullus de illa unquam dubitaverit, eamque a fortiori probant objectiones & rationes dubitandi in principio positæ. Probant etiam rationes factæ pro superiori conclusione, si bene accommodentur. Sicut enim pertinuit ad dignitatem mysterii, ut aliquandiu expectaretur, & prædicaretur, ita maxime pertinet, ne tanta esset dilatio, ut jam & mores essent omnino corrupti, & fides ejus profus amissa, & spes quasi desperata, quod certe timendum fuisset, si amplius dilatum esset. Quod facile credet quicumque corruptionem morum, tam in lege naturæ, quam in lege scripta factam, cum ad fines suos devenerunt, consideraverit. Ac denique si statim post incarnationem mundi duratio finiretur, quibus profuisset tantum mysterium, aut pro quibus sacramenta fuissent instituta? itaque in hoc nulla relinquitur dubitandi ratio.

Obi. 2. 18.

Sed obijciatur, quia in Scriptura sacra dicitur venturus Messias in novissimis diebus, ut patet Genes. 49. Isai. 2. & Mich. 4. & Daniel. 2. hoc autem videtur significare, id est, in ultimis temporibus, seu in fine mundi. Responderetur breviter, totum hoc tempus novi Testamenti vocari tempus novissimum, ut patet prima Canonica Joan. cap. 2. *Filioli jam novissima hora est.* Et 1. Corinth. 10. vocatur finis seculorum. Potest autem sic appellari, vel quia in hoc tempore data est lex gratiæ, quæ fuit ultima, post quam alia non speratur: vel quia in hoc tempore complentur omnes prophetiæ, & prædictiones Dei: quæ fortasse ratione dicitur ad Galat. 4. *Plenitudo temporum.* Vel quia distinguendo durationem mundi per ætates, ut supra fecimus, hæc est ultima: quæ licet diuturnior sit, tamen una semper censetur, quia non fit in ea notabilis aliqua mutatio, per quam solent distingui huiusmodi ætates, sed durat semper, & duratura est eadem Ecclesia, idem modus regiminis in ea, & eadem gratiæ communicatio. Ad quem modum exponitur a Patribus parabola illa de ultimo loco vocatis, Matth. 20. Sic etiam Orig. homil. 8. in Josue vocat hoc tempus mundi vespem. Et Ecclesia in quodam hymno canit, *Vergente mundi vespere*: & in alio dicit: *Deus creator omnium, homo in fine temporum*, & ad hunc modum loquuntur frequenter Patres, & videre est in Athana. epist. ad Antioch. tom. 1. & in Cyril. Alexand. in epist. ad Orientales, quæ legitur & probatur in Concil. Chalcedon. actione 1. circa actionem septimam Concil. Constantinopolitani, & ejus verba usurpat Justinianus Imperator in edicto ad Joannem 2. Denique August. 1. Genes. contra Manich. cap. 23. hoc tempus vocat mundi senectutem, quia duratione est ultimum, quamquam lib. 83. quæst. q. 44. juventutem mundi illud appellet, propter vigorem gratiæ, ut ipse se exposuit 1. lib. retract. cap. 26. Addi ultimo potest, locutionem illam Prophetarum: *Et erit in novissimis diebus*, sæpe tantumdem valere, ac si dicerent, erit post hæc tempora. Et potissimum ita loquuntur, quando prædicant aliquid futurum in tempore valde distanti: quod potest dici ultimum respectu præcedentis, licet simpliciter non sit absolute ultimum, ut Act. 2. referens Petrus locum Joel. 2. inquit: *Et erit in novissimis diebus, effundā de spiritu meo.* Et tamē in Propheta habetur: *Et erit post hæc, effundā, &c.*

Respon.

Dico tertio: Mysterium Incarnationis convenienti tempore factum est. Hæc sufficienter probata est ex dictis: & confirmari ab aliquibus solet, quia convenientius fuit Christum venire in medio durationis mundi, ut quoad fieri posset minus ab omnibus distaret, ut omnibus commodius subveniret. Unde Abac. 3. dicitur: *In medio annorum notum faciet; & Domine opus tuum in medio annorum vivifica illud.* Sed non propterea credendum est, tantum duraturum mundum post Christi adventum, quantum antea duravit. Hoc enim profus incertum est, & tam incognitum, quam est ignoratus dies judicii. Et locus ille Abac. magis per accommodationem, quam juxta sensum, & veram expositionem ad hoc citatur. Quoad hoc ergo solum est probabilis hæc conjectura, quod fuit conveniens Christum venire eo tempore, quo minus distaret ab extremis, quoad commode fieri posset, suppositis alijs circumstantiis, vel conditionibus necessariis. Ultimo tandem confirmatur, quia Christus venit eo tempore, quo magis mundus indigebat ejus adventu. Jam enim non tantum lex naturæ, sed etiam lex scriptæ pene extincta, & abolita erat. Quæ ratione utuntur scriptæ Patres supra citati, & indicatur a Christo Matth. 21. in parabola de patrefamilias, qui plantavit vineam, & sæpe misit servos, & tandem filium, ut ibi Chrysost. hom. 69. Anselmus, & alii expostores notarunt, & late expone Irenæus lib. 4. cap. 70.

## Q U Æ S T I O II.

De modo unionis Verbi incarnati, in duodecim articulos divisa.

**D**einde considerandum est de modo unionis Verbi incarnati. Et primo, quantum ad ipsam unionem. Secundo, quantum ad personam assumptam. Tertio, quantum ad naturam assumptam. Circa primum queruntur duodecim. Primo, utrum unio Verbi incarnati sit facta in natura. Secundo, utrum sit facta in persona. Tertio, utrum sit facta in supposito, vel hypostasi. Quarto, utrum persona vel hypostasis Christi post incarnationem sit composita. Quinto, utrum sit facta aliqua unio animæ & corporis in Christo. Sexto, utrum natura humana fuerit unita Verbo accidentaliter. Septimo, utrum ipsa unio sit aliquid creatum. Octavo, utrum sit idem quod assumptio. Nono, utrum unio duarum naturarum sit maxima unio. Decimo, utrum unio duarum naturarum in Christo fuerit facta per gratiam. Undecimo, utrum eam aliqua merita præcesserint. Duodecimo, utrum gratia unionis fuerit homini Christo naturalis.

**D**ocuit D. Thom. an Incarnatio sit, & propter quid præcipue facta sit. Nunc explicare aggreditur, quid ipsa sit, ita enim intelligendus est huius quæstionis titulus. Non enim proponit investigandum modum quasi accidentarium huius unionis: sed modum essentialem, quod est querere illius propriam essentiam & quidditatem: quoniam vero hoc explicari non potest, nisi intellecto prius termino ex ipsa unionem resultantem, ideo de his duobus differit in tota quæstione, præsertim usque ad articulum nonum. Nam in reliquis tribus, præsertim in undecimo, nonnulla miscet, quæ potius ad extrinsecas causas huius mysterii videntur pertinere.

## A R T I C U L U S I.

Utrum unio Verbi incarnati sit facta in natura.

**A**d primum sic proceditur. Videtur, quod unio Verbi incarnati sit facta in natura. Dicit enim Cyrilus, & inducitur in gestis Concilii Chalcedon. \* Non oportet intelligere duas naturas, sed unam naturam Dei Verbi incarnatam. Quod quidem non esset, nisi unio fieret in natura. Ergo unio Verbi incarnati facta est in natura.

Infr. art. 2. & 6. q. 1. & 12. ad 1. & q. 50. art. 2. Et 3. d. 1. q. 2. art. 1. & d. 5. q. 1. art. 2. & 3.

2. Præ.



Et 4. con.

e. 35. 37. &amp;

41. Et veri.

q. 30. art. 1.

80. Et unig.

ar. 1. &amp; opo.

3. c. 211.

312. &amp; 225.

\* Actio. 1.

post epist.

Cyrilli ad

Joan. ep.

Apostol.

non mul.

tum pro.

sul

\* In sym.

bolo fidei

sue Na.

zian. in

epist. 1. ad

Cledoniu.

ante med.

\* lib. 3.

orth. fidei

c. 6. 7. &amp;

med.

In symb.

fid. lib. po.

sio, repe.

ries id. to.

1. conc. 4.

generalis

Colonie

impresso.

ri, Anno

Dom. 1539

Lib. 2.

phys. tex.

3. tom. 3.

In 3. p. 3.

princ. lib.

Artic. 6.

hujus

quest.

P. 1. q. 9.

art. 14.

2. *Preterea, Athanasius dicit: \* Sicut anima rationalis, & caro unus est homo, ita Deus & homo unus est Christus: sed anima rationalis & caro conveniunt in constitutione unius nature humane. Sic ergo Deus & homo conveniunt in constitutione alicujus nature: ergo unio facta est in natura.*

3. *Preterea, duarum naturarum una non denominatur ex altera, nisi aliquo modo in invicem transmutentur. Sed divina natura & humana in Christo ab invicem denominantur: dicit enim Cyrillus, divinam naturam esse incarnatam. Et Gregorius Nazianzenus dicit \* humanam naturam esse deificatam, ut patet per Damasc. \* Ergo ex duabus naturis videtur esse facta una natura. Sed contra est, quod dicitur in determinatione Concilii Chalcedonen. † Confitemur in novissimis diebus Filium Dei unigenitum in duabus naturis inconfuse, immutabiliter, indivise, inseparabiliter agnoscendum, nunquam sublata differentia naturarum propter unionem. Ergo unio non est facta in natura.*

b. *Respondere dicendum, quod ad hujus questionis evidentiam oportet considerare, quid sit natura. Sciendum est ergo, quod nomen nature a nascendo est dictum: unde primo est impossibile hoc nomen ad significandum generationem viventium, quia natiuitas vel pullulatio dicitur, ut dicatur natura quasi nascitura. Deinde translaturum est nomen nature ad significandum principium hujus generationis. Et quia principium generationis in rebus viventibus est intrinsecum, ulterius derivatum est nomen nature ad significandum quodlibet principium intrinsecum motus: secundum quod Philosophus dicit in 2. Physic. \* quod natura est principium motus in eo, in quo est per se, & non secundum accidens. Hoc autem principium vel forma est, vel materia: unde quandoque natura dicitur forma, quandoque vero materia. Et quia finis generationis naturalis est in eo, quod generatur speciei essentia, quam significat diffinitio: inde est, quod hujusmodi essentia speciei vocatur etiam natura. Et hoc modo Boetius naturam diffinit in libro de duabus naturis, dicens: Natura est unamquamque rem informans specifica differentia: quae scilicet complet definitionem speciei. Sic ergo nunc loquimur de natura, secundum quod natura significat essentiam, vel quod quid est, sive quidditatem speciei. Hoc autem modo accipiendo naturam, impossibile est unionem Verbi Incarnati esse factam in natura.*

c. *Triplex enim aliquid unum ex duobus vel pluribus constituitur. Uno modo ex duobus integris, perfectis remanentibus. Quod quidem fieri non potest nisi in his, quorum forma est compositio, vel ordo, vel figura, sicut ex multis lapidibus absque aliquo ordine adunatis, per solam compositionem fit aceruus: ex lapidibus autem, & lignis secundum aliquem ordinem dispositis, & etiam ad aliquam figuram reductis, fit domus. Et secundum hoc posuerunt aliqui unionem esse per modum confusionis, quae scilicet est sine ordine: vel per modum commensurationis, quae scilicet est cum ordine. Sed hoc non potest esse. Primo quidem, quia compositio, vel ordo, vel figura non est forma substantialis, sed accidentalis. Et sic sequeretur, quod unio incarnationis non esset per se, sed per accidens, quod infra improbat. \* Secundo, quia ex hujusmodi non fit unum simpliciter, sed secundum quid: remanent enim plura actus. Tercio, quia forma talium non est natura, sed magis ars, sicut forma domus. Et sic non constitueretur una natura in Christo, ut ipsi volunt.*

d. *Alio modo fit aliquid unum ex perfectis, sed transmutatis, sicut ex elementis fit mixtum. Et sic aliqui dixerunt, unionem incarnationis esse factam per modum complexionis. Sed hoc non potest esse. Primo quidem, quia natura divina est omnino immutabilis, ut in prima parte dictum est. † Unde nec ipsa potest converti in aliud, cum sit incorruptibilis, nec aliud in ipsam, cum ipsa sit ingenerabilis. Secundo, quia id, quod est commixtum, nulli miscibilium est idem specie: differt enim caro a quolibet elementorum specie. Et sic Christus non esset ejusdem nature cum Patre, nec cum matre. Tercio, quia ex his, quae plurimum distant, non potest fieri commixtio: solvitur enim species unius eorum, puta, si quis guttam aquae amphorae vini apponat. Et secundum hoc cum natura divina in infinitum excedat humanam naturam, non potest esse mixtio, sed remanebit sola natura divina.*

e. *Tercio modo fit aliquid ex aliquibus non permixtis,*

*vel permutatis, sed imperfectis: sicut ex anima & corpore fit homo, & similiter ex diversis membris unum corpus constituitur. Sed hoc dici non potest de incarnationis mysterio. Primo quidem, quia utraque natura est secundum rationem suam perfecta, divina scilicet & humana. Secundo, quia divina natura & humana non possunt constituere aliquid per modum partium quantitativarum, sicut membra constituunt corpus, quia natura divina est incorporea. Neque per modum formae & materiae, quia divina natura non potest esse forma alicujus, praesertim corporis. Sequeretur enim, quod species resultans esset communicabilis pluribus: & ita essent plures Christi. Tercio, quia Christus non esset humana nature, neque divina nature. Differentia enim addita variat speciem: sicut unitas numerum, sicut dicitur in 8. Metaphysicorum 4.*

Ad primum ergo dicendum, quod auctoritas illas Cyrilli exponitur in quinta Synodo \* sic: Si quis unam naturam Verbi Dei incarnatam dicens, non sic accipiat, sicut Patres docuerunt, quia ex divina natura & humana, unione secundum subsistentiam facta unus factus est Christus: sed ex talibus vocibus naturam unam, sive substantiam divinitatis & carnis Christi introducere conetur: talis anathema sit. Non ergo sensus est, quod incarnatione ex duabus naturis sit una natura constituta: sed quod natura Verbi Dei, carnem univit sibi in persona.

Ad secundum dicendum, quod ex anima & corpore constituitur in unoquoque nostrum duplex unitas natura & persona. Natura quidem, secundum quod anima unitur corpori, formaliter perficiens ipsum, ut ex duobus fiat una natura, sicut ex actu & potentia, vel materia & forma. Et quantum ad hoc non attenditur similitudo: quia natura divina non potest esse corporis forma, ut in primo probatum est. \* Unitas vero personae constituitur in eis, in quantum est unus aliquis subsistens in carne & anima. Et quantum ad hoc attenditur similitudo: unus enim Christus subsistit in divina natura & humana.

Ad tertium dicendum, quod sicut Damascen. \* dicit: Natura divina dicitur incarnata, quia est unita carni personaliter, non quod sit in naturam carnis conversa. Similiter & caro dicitur deificata (ut ipse dicit) non per conversionem, sed per unionem ad Verbum, salvis suis proprietatibus naturalibus, ut intelligatur caro deificata, quia facta est Dei Verbi caro, non quia facta sit Deus,

## COMMENTARIUS,

Divus Thomas non quaerit, an haec unio facta sit in natura divina, sed absolute in natura, quia non agit de termino, cui unita est humana, sed de termino ex unione resultante. Non ergo quaeritur, an ratio terminandi hanc unionem fuerit divina natura (hoc enim infra quaerit. 3. disputandum est) nec, an divina ipsa natura humanae vere ac proprie unita sit, quod potius supponitur, cum ipsa incarnatio facta supponatur. Sed quaestio est, an divina & humana natura, ita unitae fuerint, ut ex utraque una sola natura resultaverit, quod aliis verbis disputari solet a Patribus, an Christus non solum ex duabus, sed etiam in duabus naturis subsistat. Nomen autem naturae (omissis aliis significationibus, quae Philosophis notae sunt, & a D. Thom. in corpore articuli indicantur) tam in hac quaestione, quam in tota fere materia, integram ac perfectam alicujus rei, seu substantiae essentiam significat.

b. Respondet ergo D. Thom. impossibile esse duas naturas humanam & divinam ita inter se connecti, ut coalescant in unam. Et in argumento Sed contra utitur testimonio Concil. Chalced. quod habetur 2. tom. Concil. actione 5. in secunda fidei definitione, at in corpore articuli eam probat hoc modo. Tripliciter fingi potest duas naturas in unam concurrisse: primo per modum compositionis, vel ordinis, manentibus scilicet ipsis naturis in se integris & perfectis, ita tamen inter se ordinatis, vel conjunctis, ut unam component. Secundo per transmutationem vel alterutrius naturae in alterutram, vel utriusque in aliquam ab utraque distinctam. Tercio per compositionem unius perfectae naturae ex duabus imperfectis.

c. Primum modum excludit D. Thom. satis clare & distincte. Solum occurrit advertendum, illum modum Nestorii potius pertinere ad errorem Nestorii, & aliorum asserentium, unionem hanc esse accidentalem duarum personarum,

Le 8. 10.

In Con-. Constant. can. 8. tunc istud Concil. 5. generale.

1. p. 9. art. 8.

Lib. 3. or. theod. fid. cap. 6.

Concil. Chalced.

Nestorii error.



sonarum, quam eorum, qui dicunt unionem factam esse in natura, quia illa unio duarum perfectarum naturarum tantum esse potest accidentaria, & ideo necessario supponit naturas, non solum perfectas in ratione naturarum, sed etiam in propriis personis, seu suppositis subsistentes: sicut in compositione domus, vel in insitione arboris non solum naturæ perfectæ, sed etiam supposita distincta supponuntur: & ideo unio proxime fit non inter naturas ut sic, sed inter supposita: & idem est in unionem duarum rerum perfectarum, quæ solum est secundum quendam ordinem, ut contingit in exercitu, aliisque similibus, quia hoc ipso, quod naturæ sunt integræ & perfectæ, afferunt secum necessario sua supposita, nisi in aliquo uno supposito jungantur; & ita sunt clara omnia, quæ D. Thom. circa hanc partem docet. Solum posset quis urgere interrogando, cur non possint duæ naturæ integræ & perfectæ immediate conjungi substantialiter ad componendam unam naturam, ex qua veluti mediate resultet unum suppositum, seu persona. Sed hujus rei ratio sumenda est ex tertio membro, ut statim patebit.

d Secundum modum excludit D. Thom. rationibus fatis perspicuis, præsertim prima, quæ fundatur in immutabilitate divinæ naturæ. Sed objicit Cajetanus, quia ex hac ratione bene quidem convincitur, hanc unionem non potuisse fieri per conversionem divinæ naturæ in humanam, vel in aliam tertiam, quia quod convertitur, necesse est mutari vel plusquam mutari, oportet enim, ut esse definat; at vero e contrario non videtur sequi hanc mutationem non potuisse fieri per conversionem humanæ naturæ in divinam, quia hoc sine mutatione divinæ naturæ fieri potuisset, nimirum per transubstantiationem. Respondet autem Cajetanus, hic non esse sermonem de conversione per transubstantiationem, sed per transmutationem. Sed non placet, primo, quia plane petit principium, secundo, quia reddit mutilam, & imperfectam doctrinam D. Thom. qui tamen absolute, & simpliciter omnes modos, qui falso fingi possent, nititur impugnare. Tertio, quia Cajetanus admittit id, quod in argumento sumitur, cum tamen falsum sit: ex Dei enim omnimoda immutabilitate evidenter efficitur, nihil posse in ipsum converti etiam per transubstantiationem. Quoniam si aliquid in aliud convertitur, necesse est, ut illud, in quod fit conversio, aliquod esse, vel aliquem novum modum, vel certe novam dependentiam antiqui esse acquirat; quia cum conversio sit vera actio non destructiva tantum, seu privativa, sed positiva, ac tendens in aliquem terminum, impossibile est, quin aliquid novum ponat in termino, ad quem tendit, quia hoc est de intrinseco conceptu hujusmodi actionis: hoc autem totum non fit sine aliqua mutatione ejus, ad quem terminatur conversio, ut in corpore Christi, quando in illud convertitur panis, ponitur nova præsentia vel dependentia, & ideo sine dubitatione ulla aliqua mutatio in illo fit. Loquor autem generaliter de mutatione, vel definitione rei in aliquo reali esse simpliciter, vel secundum quid (immutabilitas enim Dei omnem hujusmodi modum mutationis excludit); & eodem sensu dicitur Deus ingenerabilis, & incorruptibilis, tam simpliciter, quam secundum quid, & tam ex natura sua, quam de potentia Dei absoluta, corpus autem Christi Domini, etiam gloriosum non potest hoc modo ingenerabile aut immutabile dici, & ita nullum est fundamentum, quo Cajetan. nitebatur. Adde, etiam si fieri posset, ut aliqua natura converteretur in divinam sine divinæ mutatione, incarnationem tamen per hujusmodi conversionem fieri non posse, quia quando aliquid ita convertitur, non manet, & ideo illud, in quod fit conversio, non fit id, ex quo fit conversio, nec manet ejusdem naturæ cum illo, ut constat ex conversione, quæ fit in Eucharistia: Christus enim non fit vere ac proprie panis, nec substantia panis manet in Christo: at vero per incarnationem Deus factus est homo, & humana natura vere mansit in Deo. Et huc tendit secunda ratio D. Thom. quæ sumpta est ex Damasc. lib. 3. cap. 3. quia si hæc unio facta esset per transmutationem alterius, vel utriusque naturæ, Christus aut Deus non esset, aut homo, aut neque Deus, neque homo. Tertia vero ratio D. Thom. solum probat unionem hanc non esse factam per transmutationem utriusque naturæ, quia videlicet natura divina, quæ potentissima est, conve-

nisset in esse humanam (sic enim intelligenda est illa propositio in hac ratione sumpta, scilicet, Ex his quæ plurimum distant, non potest fieri commixtio) non enim est sermo de sola distantia in perfectione vel natura, sed in virtute & efficacia, nam si unum est longe potentius, aliud consummetur.

Tertium modum aperte vincit D. Th. in proposito locum habere nullatenus posse, quia natura divina & humana non sunt partiales & imperfectæ, sed perfectæ & integræ. Et hoc confirmat D. Th. in secunda ratione hujus partis, quia nec mente concipi potest hæc compositio, nisi fingendo naturam divinam & humanam, ut partes substantiales unius naturæ; & hoc implicat, tum quia esse naturam completam & perfectam, & esse partem naturæ, manifesta est repugnantia, quia unus terminus includit negationem alterius: tum quia aut essent partes integrales, seu quantitativæ, aut essentiales per modum materiæ & formæ; atqui utrumque repugnat divinitati, quæ incorporea est, & ideo pars quantitativa esse non potest, & actus purissimus, prorsusque immutabilis, unde nec materiæ nec formæ rationem habere. Quam rationem tetigit Athanasius apud Euthy. 2. par. Panopl. tit. 15. ubi differentiam constituit inter compositionem hominis ex anima & corpore, & Christi ex duabus naturis. *Quod corpus & anima ex se (inquit ille) habent imperfectum esse, quo fit, ut tunc etiam cum esse incipiunt, a se invicem dependentiam habeant: at Dominus Jesus non ex imperfectis rebus existendi initium accepit, sed naturarum perfectarum in se initium ostendit; atque illic quidem hominis partes sunt anima, & corpus, hic autem nec Verbum pars carnis est, neque caro pars Verbi, horum enim utrumque prius, quam conjungatur, perfectam naturam ostendit.* Addit D. Th. aliam rationem, nam si ex divina & humana resultaret in Christo una natura composita tanquam ex materia & forma, illa esset communicabilis pluribus, perindeque plures etiam Christos haberemus, quæ ratio sumpta est ex Damasc. lib. 3. c. 3. ut bene cum D. Th. explicat infra art. 5. ad secundum, & ex eodem sumit aliam confirmationem, quam addit hic, scilicet, quia quando una natura componitur ex multis tanquam ex partibus, denominatio suppositi non sumitur a singulis partibus, sed ab una duntaxat resultante natura, quod in Christo longe aliter accidit. Non enim ab una natura quasi ex duabus constante, sed a singulis divina, inquam, & humana, & homo nominatur, & Deus.

Sed circa hæc dubitat Cajetanus primo, quia non repugnat divinitati esse formam, utpote cum sit forma intellectus beati. Secundo, illa consequentia, quod talis natura composita esset multiplicabilis secundum speciem, si intelligatur quoad eam partem, quæ est quasi materialis, nullum est inconveniens: si vero quoad divinitatem ipsam, quæ ponitur esse forma, non sequitur, ut patet in exemplo adducto de beatis, ubi licet multiplicentur intellectus, qui se habent ad modum materiæ, & subiecti, non tamen divinitas, quæ se habet ad modum formæ. Tertio, illa consequentia, ergo essent plures Christi, si intelligatur de facto, nulla est, quia potest natura esse communicabilis pluribus, quæ actu non communicetur: de possibili vero nullum est inconveniens.

Ad primum respondet Cajetanus, divinitatem non posse esse formam realem & physicam: posse tamen esse formam (ut ipse loquitur) in esse intelligibili, & ideo putat addidisse D. Th. cum dixit naturam non posse esse formam alicujus, particulam illam, *præsertim corporis*. Sed veritas est vere ac proprie divinitatem non posse esse corporis formam, aut spiritus, quia ratio formæ semper includit imperfectionem partis, & alicujus dependentiæ. Et licet ex parte subiecti imperfectioris & extensi magis repugnet, ut divinitas corpus informet, tamen aliunde magis repugnat, ut informet spiritum, quia corpus forma substantiali affici nihil obstat, spiritus autem tantum accidentali, cujus ratio magis repugnat divinitati. Neque est verum in beatitudine divinam essentiam esse proprie formam intellectus beati, quia revera non informat: sed solum supplet efficientiam formæ intelligibilis, & hac ratione dicitur habere vicem formæ, non quoad rationem informandi, sed quoad vim efficiendi.

Dubium.

Divinitas non potest esse forma alienius.

Quomodo divina essentia sit forma intellectus beati.



Ad secundum & tertium Cajet. dicit, illam illationem D. Th. fundatam esse in Arist. 1. de celo tex. 92. 93. & debere intelligi per se, quia ex accidenti contingit aliquam naturam per se communicabilem multis, actu non communicari, quia scilicet, in illa natura est tota materia suae speciei; & quia in natura, ex qua constat Christus, non est tota materia, ex qua potest similis natura constare, ideo fit, ut illa possit numero multiplicari. Et praeterea quia illa natura corruptibilis est secundum se, ideo sequitur etiam debuisse multiplicari. Sed qui fingeret in Christo naturam compositam & humanitate & divinitate, tanquam ex materia & forma, evertere posset hoc fundamentum explicando Arist. de naturis compositis ex illa materia & forma, quae intrinsece & essentialiter tales sunt; omnis enim forma, quae natura sua est forma materiae, est multiplicabilis numero: at vero si sit aliqua forma, quae licet natura sua non sit destinata, & condita ad informandam materiam, tamen voluntarie & supernaturaliter ad informandum inclinatur, non inde fit posse multiplicari secundum numerum, si aliam infinita sit, prorsusque abstracta: atque ita est in proposito; non ergo recte infertur, illam Christi naturam, si composita esse fingatur ex divinitate, debere esse multiplicabilem numero, nam id non sequitur saltem ex parte divinitatis, quae secundum se semper manet incorruptibilis, & una existens posset informare plures humanitates.

Forma non  
a quacumque  
si subiecti  
sibi propor-  
tionata  
sum.

Respondetur tamen, rationem D. Th. supponere id, quod est verissimum, nullum actum posse vere informare aliquam materiam, vel subiectum, nisi natura sua sit forma ejus habens naturalem proportionem cum tali subiecto. Quare non tantum implicat naturam divinam informare, sed etiam angelicam vel humanam, atque aliam quamcumque perfectam ac integram, quae de se, & natura sua physica, forma non sit; uti enim repugnat aliquid fieri album formaliter per id, quod natura sua albedo non sit, aut calidum per id, quod non sit calor: ita informatum nisi per actum, qui rationem formae essentialiter habeat, ut hinc verum sit illud axioma Theologorum, effectum causae formalis sine causa formali fieri non posse. Videlicet cum haec sit omnino intrinseca causa, influxusque ejus, seu causalitas, requirit effectum quoddam proportionatum atque coaptatum alteri, cum quo quasi se ipsam formaliter, & intime praebendo talem effectum constituere debet. Ad replicam ergo ultimam concedo, contrarium errorem (si semel fingatur) eludere illationem D. Thom. quae fundatur in principio contrario illi suppositioni impossibili; quod certissimum & verissimum est, ut diximus.

Formalis  
non fit  
ne causa  
formali.

Argumenta D. Thom. sumpta sunt ex quibusdam divinis Sanctorum, quae a nobis tractanda sunt late, partim disputatione sequenti, partim quaest. 16. ubi de communicatione idiomatum differemus. Et ideo nihil hic notare oportet, quoniam quae ad mentem D. Thomae pertinent, perspicua sunt.

## ARTICULUS II.

Utrum unio Verbi incarnati facta sit in persona.

8.  
Locis su-  
pra art. 1.  
inductis.

Ad secundum sic proceditur. Videtur, quod unio Verbi incarnati non sit facta in persona. Persona enim Dei non est aliud a natura ipsius, ut habitum est in primo. \* Si ergo unio non est facta in natura, sequitur, quod non sit facta in persona.

P. p. q. 3.  
art. 8.

2. Praeterea. Natura humana non est minoris dignitatis in Christo, quam in nobis: Personalitas autem ad dignitatem pertinet, ut in primo habitum est. Cum ergo natura humana in nobis propriam personalitatem habeat, multo magis habuit propriam personalitatem in Christo.

P. p. q. 26.  
art. 3.

3. Praeterea sicut Boet. dicit in lib. de duab. natur. \* Persona est rationalis natura individua substantia. Sed Verbum Dei assumpsit naturam humanam individuum, natura enim universalis non subsistit secundum se, sed in nuda contemplatione consideratur: ut Damascen. dicit. \* Ergo humana natura habet suam personalitatem in Christo. Non ergo videtur, quod sit facta unio in persona.

Aliquam-  
tulum a  
prin. lib.  
videlicet  
in 3. pag.

Lib. 3. c. 1.  
& lib. 1. c.  
11. ad sen-  
sum saltē.  
Habetur  
in c. 11. 1.  
Ephesi. in  
epi. Syno-

Sed contra est, quod in Chalcedonensi Synodo legitur: Non in duas personas partitum, aut divisum, sed unum & eundem filium unigenitum Deum Verbum Do-

minum nostrum Jesum Christum confitemur. Ergo facta est unio in persona.

b Respondeo dicendum, quod persona aliud significat, quam natura. Natura enim, ut dictum est, significat essentiam speciei, quam significat definitio. Et si quidem his, quae ad rationem speciei pertinent, nihil aliud adiunctum inveniri posset, nulla necessitas esset distinguendi naturam a supposito naturae, quod est individuum subsistens in natura illa: quia unumquodque individuum subsistens in natura aliqua, esset omnino idem cum sua natura. Contingit autem in quibusdam rebus subsistentibus inveniri aliquid, quod non pertinet ad rationem speciei, scilicet, accidentia & principia individuantia (sicut maxime apparet in his, quae sunt ex materia & forma composita) & ideo in talibus etiam secundum rem differt natura & suppositum: non quasi omnino aliqua separata: sed quia in supposito includitur ipsa natura speciei, & superadduntur quaedam alia, quae sunt praeter rationem speciei: unde suppositum significatur ut totum habens naturam sicut partem formalem & perfectivam sui: & propter hoc in compositis ex materia & forma, natura non predicatur de supposito: non enim dicimus, quod hic homo sit sua humanitas. Si quae vero res est, in qua omnino nihil aliud est praeter rationem speciei vel naturae suae (sicut est in Deo) ibi non est aliud secundum rem suppositum & natura, sed solum secundum rationem intelligendi, quia natura dicitur secundum quod est essentia quaedam: eadem vero dicitur suppositum, secundum quod est subsistens. Et quod est dictum\* de supposito, intelligendum est de persona in creatura rationali vel intellectuali: quia nihil aliud est persona, quam rationalis natura individua substantia secundum Boetium. † Omne igitur quod inest alicui personae siue pertineat ad naturam ejus siue non, unitur ei in persona; si ergo humana natura Verbo Dei non unitur in persona, nullo modo ei unitur: & sic totaliter tollitur incarnationis fides, quod est subvertere totam fidem Christianam. Quia ergo Verbum habet naturam humanam sibi unitam, non autem ad suam naturam divinam pertinentem, consequens est, quod unio sit facta in Verbi persona, non autem in natura.

di ad Ne-  
storum, &  
etiam in  
Inco. cit.  
art. praeci-  
in argum.  
Sed contra  
Art.  
praeced.

In istomem  
art.

In l. b. de  
duab. natu-  
ris, ali-  
quantu-  
lum a  
principio.

In corp.  
art.

Ad primum ergo dicendum, quod licet in Deo non sit aliud secundum rem natura & persona, differt tamen secundum modum significandi (sicut dictum est\*) quia persona significat per modum subsistentis. Et quia natura humana sic unitur Verbo, ut Verbum in ea subsistat, non autem ut aliquid addatur ei ad rationem suae naturae, vel ut ejus natura in aliud transmutetur: ideo unio humanae naturae ad Verbum Dei facta est in persona, non in natura.

Ad secundum dicendum, quod personalitas in tantum pertinet ad dignitatem alicujus rei & perfectionem, in quantum ad dignitatem alicujus rei & perfectionem ejus pertinet, quod per se existat: quod in nomine personae intelligitur. Dignius autem est alicui, quod existat in aliquo se digniori, quam quod existat per se. Et ideo ex hoc ipso humana natura dignior est in Christo, quam in nobis, quod in nobis quasi per se existens propriam personalitatem habet, in Christo autem existit in persona Verbi. Sicut etiam esse completivum speciei pertinet ad dignitatem formae, tamen sensitivum nobilius est in homine propter conjunctionem ad nobiliorem formam completivam, quam sit in bruto animali, in quo est forma completiva.

Ad tertium dicendum, quod Verbum Dei non assumpsit humanam naturam in universali, sed in aeterno, id est, in individuo (sicut Damascenus dicit\*) alioquin oporteret, quod cuilibet homini conveniret esse Dei Verbum: sicut convenit Christo. Sciendum est tamen, quod non quodlibet individuum in genere substantiae etiam in rationali natura habet rationem personae: sed solum illud, quod per se existit, non autem illud, quod existit in alio perfectiori. Unde manus Socratis quamvis sit quoddam individuum, non tamen est persona: quia non per se existit, sed in quodam perfectiori, scilicet, in suo toto. Et hoc etiam potest significari in hoc, quod persona dicitur substantia individua: non enim manus est substantia completa, sed pars substantiae. Licet ergo haec humana natura sit quoddam individuum in genere substantiae: quia tamen non per se separatim existit, sed in quodam perfectiori, scilicet in persona Dei Verbi, consequens est, quod non habeat personalitatem propriam. Et ideo facta est unio in persona.

Lib. 3.  
orth. c. 11.

COM-



## COMMENTARIUS.

**D**iligenter notandi sunt termini in hoc titulo positi; non enim querit simpliciter de unione hypostatica, sed definite de unione Verbi incarnati, supponit enim ex fide solum Verbum esse incarnatum, & de hac unione prout facta est, D. Th. quaestionem movet, unde cum querit, an facta sit in persona, de eadem persona intelligendum est, scilicet de persona Verbi. Uniri autem in persona, quantum ex litera articuli, & praecipue ex ultimis verbis solutionis ad tertium colligi potest, nihil aliud est, quam uniri alicui personae, non constituendo novam personam distinctam ab ea, cui aliquid unitur, qua ratione humanitas potest dici uniri suae substantiae in persona, & partes toti. Querere ergo, an unio Verbi facta sit in persona, idem est, ac querere, an humana natura ita sit unita Verbo Dei, ut ex illa unione non resultaverit nova persona, sed humana natura personae praexistenti copulata sit.

Dices: hoc non est investigare terminum resultantem ex unione, quod hic fuerat propositum, sed querere terminum, cui est conjuncta humana natura, quod ad quaestionem tertiam potius videtur pertinere. Respondetur, ita esse haec inter se connexa, ut non possint omnino sejungi: formaliter tamen, ac directe non hic agitur, an id, cui proxime conjuncta est natura, sit persona, sed solum an ita fuerit humana natura unita divinae, ut per unionem hujusmodi non resultaverit nova alia persona, sed eadem praexistens divina fuerit incarnata.

**b** Hoc ergo sensu respondet D. Th. unionem factam esse in persona. Ad cuius probationem multa supponit de distinctione suppositi a natura in rebus creatis, quae nunc fusius explicare non oportet, quam ab ipso tradita sunt. Sufficit enim nobis ex mente D. Th. aliquam distinctionem ex natura rei esse constituendam inter suppositum creatum, ejusque naturam; qualis vero sit haec distinctio, & quid suppositum supra naturam addat, non solum in corporalibus naturis, sed etiam in spiritualibus, in propria quadam disputatione sunt explicanda, quam alio loco tractandam reliquimus, ne disputatione Metaphysica inter explicandum Theologica mysteria impediamur. Probat ergo D. Th. assertionem suam hac brevi ratione: si humana natura non unitur Verbo Dei in persona, nullo modo ei unitur; consequens est contra fidem incarnationis; ergo. Sequelam probat, quia quidquid inest alicui, siue pertineat ad naturam ejus, siue non, unitur ei in persona. Quod principium, licet fundamentum sit totius rationis, a D. Th. supponitur, & non probatur, cum tamen nec per se notum, nec semper verum appareat, vestis enim unitur homini, & non in persona. Sed responderi potest ex Cajetano illud principium intelligi, quando unum vere unitur alteri, ita ut intrinsece illi insit, & conjugatur, ut hoc modo excludantur ea, quae cum extrinsecus adiaceant, veram unionem inter se non habent. Quo sensu clarissimum videtur, ac per se notum, id omne, quod alicui unitur personae, in ipsa uniri persona, ut constet ex dicta terminorum expositione. Et propterea fortasse D. Th. usus est illo modo loquendi, *Quidquid inest alicui*, ut excluderet extrinsecus adjacentia, quae vere non insunt. Et eandem ob causam humanae duae personae, quantumvis affectu, vel alio quovis vinculo copulentur, numquam tamen ita intrinsece uniuntur, ut una inesse alteri dici possit, unde neque uniri alteri in eadem persona.

**Obiectio.** Sed urgebis; quia licet hoc principium illo sensu expositum verum sit, unde tamen constat humanam naturam ita esse unitam Verbo, seu divinae naturae, ut illi aliquo modo insit, vel intime jungatur? Hoc enim negaret Nestorius, qui dixit tantum esse unitam accidentaliter per singularem affectum, vel favorem, &c. Respondetur, hoc sumpsisse D. Th. tanquam de fide certum, quia humana natura ita est conjuncta Verbo, ut illud hominem constituat, quod intelligi non potest sine vera & intima unione, quod quia iterum explicaturus erat art. 6. ubi querit, an haec unio sit substantialis, ideo hoc loco nec plura dixit, nec retulit errorem Nestorii, nec distincte impugnavit. Posset etiam illa sequela D. Th. scilicet si humanitas non est unita Verbo in persona, nullo modo est ei unita, intelligi hoc modo, id est, nullo proprio & speciali modo esse Verbo unita, sed solum im-

proprio & communi modo, quo etiam potest dici unita Patri vel Spiritui Sancto, scilicet per praesentiam, per operationem, &c. & hoc sensu evidentius ratio concludit, quia manifestissime id sequitur, & illo admissio destruitur incarnatio, ut explicabitur in disputatione.

**Dabim.** Aliam dubitationem movet in fine articuli Cajet. quia discursus D. Th. videtur supponere, omnem unionem naturae creatae ad Deum debere esse, aut in natura, aut in persona: hoc autem suppositum falsum est, quia posset fieri unio in hoc Deo, quae neque esset in natura, neque in persona, cujus occasione multa dicit de substantia essentiali, & de unione, quae in ea fieri potest, quae a nobis in q. 3. commodius tractabuntur. Ad objectionem vero factam quatuor modis respondet, sed duo primi supponunt, vel non esse in Deo substantiam communem, vel in illa non posse fieri substantialem unionem, quae nobis vera non videntur, ut citato loco videbimus. Quarta etiam responsio, quae Cajet. placet, sumit falsam doctrinam dicto etiam loco examinandam, videlicet hunc Deum abstractum a tribus personis, esse aliquo modo personam, & ideo unionem in illo factam, esse unionem in persona. Responsio ergo tertia est, quae aliis etiam discipulis D. Th. probatur; scilicet, D. Th. hic non agere absolute de unione ad Deum: sed definite de unione ad Verbum, & de hac vere dicitur non posse esse nisi in natura vel in persona: nam si qua fieret unio in hoc Deo; illa non unio Verbi magis, quam Patris vel Spiritus Sancti.

**Obiectio.** Sed contra, quia loquendo hoc modo de unione ad Verbum, illa neque in natura esse potest, sed tantum in persona, quia si per impossibile fieret unio in natura, illa etiam non esset unio ad Verbum magis, quam ad Patrem, vel ad Spiritum Sanctum. Respondetur, re vera ita esse: tamen quia aliqui haeretici posuerunt illam unionem in natura, necessarium fuisse D. Th. de illa distincte disputare. Praesertim, quia ipse in hoc articulo solum intendit concludere unionem factam esse in persona Verbi, quia illi est unita nostra natura. An vero simul unita fuerit substantiae essentiali, necne, & an primario illi, vel relationi, hoc non tractat, quia ad praesentem disputationem non pertinebat.

**Respon.** In primo argumento proponit D. Th. difficultatem communem multis rebus, seu locutionibus divinis, videlicet cum in Deo persona, & natura in re non distinguantur, quomodo potuerit unio haec fieri in persona, quin sit facta etiam in natura. Et respondet, distinctionem rationis inter personam & naturam, seu diversum modum significandi ad hoc sufficere, quod potest multis exemplis similibus confirmari. Nam per intellectum generatur filius, & non per voluntatem, per paternitatem constituitur Pater & non per spirationem, quamvis haec in re non distinguantur, & quod est omnino simile, Pater generat, & natura divina non generat. Et universalis ratio est, quia licet Deus sit quiddam simplicissimum, tamen vere ac proprie in se habet perfectiones multas, quae in nobis distinctae sunt, & singulorum actus exercet, quatenus unamquamque in se formaliter continet, & propterea quamvis in Deo natura, & persona re non distinguantur, tamen in illa re simplicissima vere invenitur, quidquid spectat ad rationem naturae, & quidquid spectat ad rationem personae, vel substantiae, & id, quod illi unitur, non conjungitur illi, ut habet rationem naturae, sed ut habet rationem subsistendi. Sicut quamvis eadem res in Deo sit, a qua procedit remissio, & punitio peccati, tamen remissio procedit ab illa, ut continet perfectionem misericordiae, punitio vero, ut habet rationem iustitiae; & quia nos significamus res, prout illas concipimus, & rem eandem concipimus diverso modo, scilicet prout in se complectitur diversas perfectiones, hinc est, ut diversus modus significandi & concipiendi sufficiat, ut illi rei diversis modis & vocibus significatae diversa praedicata tribuantur, & quaedam affirmantur sub uno conceptu, & non sub alio, quia per hujusmodi formales conceptiones & locutiones, non solum quid conveniat rei, sed etiam sub qua ratione aut perfectione conveniat, explicamus. Sic ergo unio in persona facta esse dicitur, quia facta est ad subsistendum incommunicabiliter in hac persona, & non in aliis, quod formaliter pertinet ad rationem personae; non vero dicitur facta in natura, quia nullo modo facta est ad constitutionem, vel transmutationem naturae; & juxta haec

Diversus  
modus si-  
gnificandi  
sufficit ad  
varianda  
praedica-  
ta.



hæc intelligenda sunt, quæ hic Cajetan. notat, & satis commendat & exaggerat.

Hinc vero obiter intelligitur sæpe in divinis rebus, seu terminis, quædam de se mutuo prædicari, quamvis diverso modo significantur, & nihilominus, non quidquid prædicatur de uno, de alio prædicari, ut in proposito dicitur Verbum simpliciter esse sua divinitas, & tamen unio dicitur facta in Verbo, & non in divinitate, Verbumque ipsum generari dicitur, divinitas vero nequaquam. Ratio ex dictis sumenda est; illæ enim propositiones, in quibus abstracta vel de concretis, vel de se mutuo prædicantur, revera sunt improprie ex modo significanti: admittuntur tamen in sensu identico, quia extrema sunt in re omnino idem, quando ex hujusmodi prædicatione non sequitur, nec per eam indicatur quiddam aliud falsum vel absurdum. At vero aliæ prædicationes faciunt sensum formalem, & in eis significatur aliquid convenire Deo secundum eam rationem, secundum quam vere non convenit; unde fit, ut ex eis aliquid falsum, & divinæ naturæ repugnans consequatur, ut ex illa propositione, deitas generatur, sequitur deitatem distinguere a persona generante; & ex illa, unio facta est in natura divina, sequitur & divinitatem mutatam esse, & unionem tribus personis esse communem. Solutiones ad secundum & tertium per se sunt satis claræ, quæstiones vero, quæ in illis indicantur, inferius in propriis locis tractandæ sunt.

## ARTICULUS III.

Utrum unio Verbi incarnati facta sit in supposito vel hypostasi.

**A**d tertium sic proceditur. Videtur, quod unio Verbi incarnati non sit facta in supposito sive in hypostasi. Dicit enim Augustinus in Enchirid. \* Divina substantia & humana, utraque est unus Dei filius, sed aliud propter Verbum, & aliud propter hominem. Leo Papa etiam dicit in epist. ad Flaviam. \* unum horum coruscet miraculis, aliud succumbit injuriis. Sed aliud & aliud differunt supposito: ergo unio Verbi incarnati non est facta in supposito.

**2** Præterea, hypostasis nihil aliud est, quam substantia particularis, ut Boetius dicit in lib. de duabus naturis. Manifestum est autem, quod in Christo est quedam alia substantia particularis præter hypostasim Verbi, scilicet corpus & anima & compositum ex eis. Ergo in ipso est alia hypostasis præter hypostasim Verbi.

**3** Præterea, hypostasis Verbi non continetur in aliquo genere, neque sub specie, ut patet ex his, quæ in prima parte dicta sunt: \* Sed Christus secundum quod est factus homo, continetur sub specie humana: dicit enim Dionysius 1. cap. de divinis nominibus: Intra naturæ nostræ terminos venit, qui omnem totius naturæ ordinem supereminenter excedit. Non autem continetur sub specie humana, nisi sicut hypostasis quedam humane speciei. Ergo in Christo est alia hypostasis præter hypostasim Verbi Dei. Et sic idem quod prius.

Sed contra est, quod Damascenus dicit in 3. lib. \* In Domino Jesu Christo duas naturas cognoscimus, unam autem hypostasim.

Respondeo dicendum, quod quidam ignorantes habitudinem hypostasis ad personam, licet concederent in Christo unam solam personam, posuerunt tamen aliam hypostasim \* Dei, & aliam hominis, ac si unio sit facta in persona, non in hypostasi.

Quod quidem apparet erroneum tripliciter. Primo ex hoc, quod persona super hypostasim non addit nisi determinatam naturam, scilicet rationalem, secundum quod Boetius dicit in libro de duabus naturis, \* quod persona est rationalis natura individua substantia, & ideo idem est attribuire propriam hypostasim humane nature in Christo, & propriam personam. Quod intelligentes sancti Patres utrumque in Concilio quinto apud Constantinopolim celebrato damnaverunt, dicentes: Si quis introducere conatur in mysterio Christi duas subsistentias, seu duas personas, anathema sit: nec enim adjectionem persone vel subsistentie suscepit sancta Trinitas, incarnato uno de sancta Trinitate, Deo Verbo. Subsistentia autem idem est quod res subsistens, quod est proprium hypostasis, ut patet per Boetium in libro de duabus naturis. \*

**b** Secundo, quia si detur, quod persona aliquid addat super hypostasim, in quo possit unio fieri, hoc nihil aliud est

quam proprietas ad dignitatem pertinet: secundum quod a quibusdam dicitur, quod persona est hypostasis proprietate distincta ad dignitatem pertinente. Si ergo facta sit unio in persona, & non in hypostasi, consequens erit, quod non facta sit unio nisi secundum dignitatem quandam. Et hoc est approbante Synodo Ephesina damnatum a Cyrillo \* sub his verbis: Si quis in uno Christo dividit subsistentias post adunationem, sola copulans eas conjunctione, quæ secundum dignitatem quandam, vel autoritatem est, vel secundum potentiam, & non magis concursu secundum adunationem naturalem, anathema sit.

Tertio, quia tantum hypostasis est, cui attribuntur operationes & proprietates nature, & ea etiam, quæ ad naturæ rationem pertinent in concreto: dicimus enim quod hic homo ratiocinatur, & est risibilis, & est animal rationale. Et hac ratione hic homo dicitur esse suppositum, quia scilicet supponitur his, quæ ad hominem pertinent, eorum prædicationem recipiens. Si ergo sit alia hypostasis in Christo præter hypostasim Verbi, sequitur, quod de aliquo alio quam de Verbo verificentur ea, quæ sunt hominis, puta esse natum de Virgine, passum, crucifixum, & sepultum. Et hoc etiam damnatum est approbante Concilio Ephesino sub his verbis: \* Si quis personis duabus vel subsistentiis eas, quæ sunt in Evangelicis & Apostolicis scripturis, partitur voces, aut de Christo a Sanctis dictas, aut ab ipso de se: & quasdam quidem velut homini præter illud ex Deo Verbum specialiter intellecto applicat, quasdam vero velut Deo dignas, soli ex Deo Patre Verbo, anathema sit. Si ergo patet esse hæresim olim ab Ecclesia damnatam, dicere, quod in Christo sunt due hypostases, vel duo supposita: sive quod unio non sit facta in hypostasi vel supposito. Unde in eadem Synodo legitur: Si quis non constituitur carni secundum subsistentiam unitam ex Deo Patre Verbum, unumque esse Christum cum sua carne eundem scilicet Deum & hominem, anathema sit.

**c** Ad primum ergo dicendum, quod sicut accidentaliter differentia facit alterum, ita differentia essentialis facit aliud. Manifestum est autem, quod alteritas, quæ provenit ex differentia accidentali, potest ad eandem hypostasim vel suppositum pertinere in rebus creatis: eo quod idem numero potest diversis accidentibus subesse: non autem contingit in rebus creatis, quod idem numero subsistere possit diversis essentiis vel naturis; sed unus & idem Christus subsistit in duabus naturis. Unde sicut quod dicitur alterum & alterum in creaturis non significat diversitatem suppositi, sed solum diversitatem formarum accidentalium: ita quod dicitur Christus aliud & aliud, non importat diversitatem suppositi vel hypostasis, sed diversitatem naturarum. Unde Gregorius Nazianzenus dicit in epistola ad Didimum: \* Aliud & aliud sunt ea, ex quibus Salvator est, non autem alius: dico vero aliud & aliud e contrario, quam in Trinitate habet: ibi enim alius & alius dicimus, ut non subsistentias confundamus, non autem aliud & aliud.

**d** Ad secundum dicendum, quod hypostasis significat substantiam particularem, non quocumque modo, sed prout est in suo complemento. Secundum vero, quod venit in unionem alicujus magis completi, non dicitur hypostasis, sicut manus vel pes. Et similiter humana natura in Christo quamvis sit substantia particularis, quia tamen venit in unionem ejusdem completi, scilicet totius Christi, prout est Deus & homo, non potest dici hypostasis vel suppositum. Sed illud completum, ad quod concurrat, dicitur esse hypostasis vel suppositum.

**e** Ad tertium dicendum, quod in rebus creatis res aliqua singularis non ponitur in genere vel in specie ratione ejus, quod pertinet ad ejus individuationem, sed ratione naturæ, quæ secundum formam determinatur, cum individuat magis sit secundum materiam in rebus compositis. Sic ergo dicendum est, quod Christus est in specie humana, ratione naturæ assumptæ, non ratione ipsius hypostasis.

## COMMENTARIUS.

**H**ic articulus nulla indiget expositione, est enim idem re ipsa cum superiori, solum diversis vocibus & nominibus propositus ad confundendos quosdam hæreticos, qui vel vocem propriam ignorantes, vel errorem suum nominibus variis involventes duas personas in Christo negaverunt, duo supposita, vel duas hypostases admittentes, in quo pugnantia plane dicebant, quo-

In Ephes.  
1. can. 3.  
tom 1.  
Conc.

In Ephes.  
Synod. 1.  
can. 4. to.  
1. Concil.

In can. 8.  
Synod. quæ  
fuit una  
ex 4. principalib.

In epist. 1.  
ad Clodionium  
inter principia  
& med. incipit,  
Honorandis  
simo.

Infr. ar. 6.  
co. & q. 6.  
art. 1. c.

In 2. pag.  
princip.

In Conc. 2.  
Constant.  
quod est  
generale  
can. 5. to. 1.  
Concil.

In 3. pag.  
princip.  
lib.



quoniam utrumque illorum suppositorum, si duo essent, subsisteret in natura rationali, seu intellectuali, divina, scilicet & humana, unde duæ personæ essent, ut recte D. Th. in sua prima ratione concludit, quia persona supra suppositum nihil addit, nisi quod in naturali natura subsistat. Et hoc modo contra hunc errorem procedunt omnia dicta articulo præcedenti. Item testimonia & rationes, quæ contra hæreticos fiunt, qui duas personas in Christo posuerunt, ut D. Thomas bene argumentatur, præsertim in ratione tertia.

b Solum circa secundam rationem oportet notare vim ejus consistere in hoc, si persona supponit propriam hypostasim humanæ naturæ, solumque dignitatem aliquam illi addit, necessario effici illam non posse esse substantialem dignitatem, sed accidentalem; & hoc modo sequitur ex illo errore hanc unionem solum esse factam secundum quandam dignitatem, nimirum extrinsecam & accidentalem, quod in Ephesino Concilio damnatum est. Quod ideo adverto, quia si loquamur de vera personali dignitate, quæ substantialis est & intrinseca, sic vere dici potest hanc unionem factam esse secundum quandam dignitatem, quia per illam elevata est humana natura ad subsistendum in persona Verbi; subsistere autem in digniori persona ad perfectionem & dignitatem naturæ humanæ pertinet, ut articulo superiori ad secundum D. Thomas dixit.

c In argumento primo cum solutione attingit D. Thomas dubium, an Christus possit dici alius, & alius, vel aliud, & aliud. Et idem tetigit infra q. 17. art. 1. ubi disputandum est tanquam in proprio loco.

d Secundum argumentum idem est cum argumento tertio articuli præcedentis, & solutio in re eadem est, licet verba sint diversa, in quibus immorari non oportet, quando res constat: constat autem humanitati Christi deesse propriam subsistentiam, seu personalitatem creatam, & ideo non esse personam, nec suppositum, nec primam substantiam completam, atque adeo nec substantiam individuum, prout in definitione personæ ponitur, cum dicitur: *Persona est rationalis natura individua substantia*. Et ita locutus est D. Th. art. præcedenti ad tertium; utendo autem latius nomine substantiæ, prout significat rem quamcumque generis substantiæ, etiam si in illo completa non sit, hoc modo dici potest humanitas Christi substantia particularis, & individua, non tamen persona, quia non habet complementum substantiæ. Et hoc modo locutus est D. Th. in hac solutione.

e In argumento tertio tractari posset quæstio, an Christus sit univoce homo cum aliis hominibus, sed hæc supponit multa in sequentibus tractanda, & habet proprium locum infra quæstione 16.

#### ARTICULUS IV.

*Utrum persona vel hypostasis Christi post incarnationem sit composita.*

10. 3. d. 6. q. 2. art. 3. art. 2. P. p. q. 3. art. 3. P. p. q. 3. art. 7. & per totam quæst.

**A**D quartum sic proceditur. Videtur, quod persona Christi non sit composita. Persona enim Christi non est aliud, quam persona vel hypostasis Verbi: ut ex dictis patet: \* Sed in Verbo non est aliud persona & natura, ut patet ex dictis in prima parte. † Cum ergo natura Verbi sit simplex (ut in primo \* ostensum est) impossibile est, quod persona Christi sit composita.

2 Præterea. Omnis compositio videtur esse ex partibus. Sed divina natura non potest habere rationem partem: quia omnis pars habet rationem imperfecti. Ergo impossibile est, quod persona Christi sit composita ex duabus naturis.

3 Præterea. Quod componitur ex aliquibus, videtur esse homogeneum eis: sicut ex corporibus non componitur nisi corpus. Si ergo ex duabus naturis aliquid sit in Christo compositum, consequens erit, quod illud non erit persona, sed natura: & sic in Christo erit facta unio in natura: quod est contra prædicta.\*

Art. 2. Lib. 3. or. tho. 2. d. c. 3. q. 4. & 5.

Sed contra est, quod Damasc. dicit in 3. libro. In domino Jesu Christo duas naturas cognoscimus, unam autem hypostasim ex utraque compositam.

b Respondeo dicendum, quod persona, sive hypostasis Christi, dupliciter potest considerari. Uno modo secundum illud, quod est in se: & sic est omnino simplex, sicut

#### ARTIC. IV.

& natura Verbi. Alio modo secundum rationem personæ vel hypostasis, ad quam pertinet subsistere in aliqua natura, & secundum hoc persona Christi subsistit in duabus naturis. Unde licet sit ibi unum subsistens, est tamen ibi alia & alia ratio subsistens, & sic dicitur persona composita, in quantum unum in duobus subsistit.

Et per hoc patet responsio ad primum.

c Ad secundum dicendum, quod illa compositio personæ ex naturis non dicitur esse ratione partium, sed potius ratione numeri, sicut omne illud, in quo duo conveniunt, potest dici ex eis compositum.

d Ad tertium dicendum, quod non in omni compositione hoc verificatur, quod illud, quod componitur, sit homogeneum componentibus, sed solum in partibus continui. Nam continuum non componitur nisi ex continuis: animal vero componitur ex anima & corpore, quorum neutrum est animal.

#### COMMENTARIUS.

**I**N articulis præcedentibus conclusit D. Thomas terminum hujus unionis esse personam, & ideo merito consequenter quærit, an hujusmodi terminus sit persona simplex, vel composita.

b Respondet autem D. Thom. quæstioni sic propositæ non satis clare; dicit enim, personam Verbi secundum se non esse compositam, tamen secundum rationem personæ, ad quam pertinet subsistere in aliqua natura ut sic, esse personam compositam, quia in ea est alia, & alia ratio subsistendi. Ex quibus obscuris verbis hæc clara responsio elicienda est. Quamvis Verbum divinum secundum se simplex sit, nihilominus terminum resultantem per hanc unionem, seu ipsum Verbum ut incarnatum quid compositum esse, seu personam compositam. Quomodo autem hoc ex verbis D. Thomæ eliciatur ex dicendis constabit.

Dubitatur enim primo Cajetanus circa divisionem a D. Thoma propositam de persona Verbi secundum se, aut prout subsistit in aliqua natura, quia hæc membra non videntur opposita, quia etiam persona Verbi secundum se in aliqua natura subsistit, scilicet in divinitate, ex quo fit falsum esse simpliciter personam illam ut subsistentem in aliqua natura compositam esse.

Dubitatur secundo, quomodo in persona Verbi incarnata dicatur esse duplex ratio subsistendi, cum ratio subsistendi nihil aliud, quam subsistentia, vel personalitas, esse videatur, & in Christo tantum sit unica subsistentia. In quibus dubiis explicandis prolixum habet commentarium: sed brevius & clarius possunt expediri. Dico ergo, personam secundum se appellari Verbum ipsum, ut persona divina tantum est, & in propria natura tantum subsistit habens solum ea, quæ sibi intrinseca & connaturalia sunt, & hoc modo de fide certum est, personam Verbi simplicem esse: habet tamen ulterius persona Verbi incarnata, ut subsistat in natura aliena & extranea, sibi unita, & ita jam non habet solum ea, quæ secundum se illi conveniunt, sed etiam aliquam aliam naturam, in qua subsistit, & hoc modo dicitur considerari posse, ut subsistit in aliqua natura, id est, secundum absolutam rationem subsistendi in natura, quam de facto habet, quamque ratio hypostasis absolute & simpliciter admittit, seu quod idem est, secundum specialem habitudinem, vel unionem, quam habet cum aliqua natura non propria, sed (ut ita dicam) adventitia, & ut sic dicitur persona Verbi composita, quia ut sic subsistit in duabus naturis, propria & extranea. Et ex hac explicatione sumitur aperte responsio quæstionis supra explicata, quia persona Verbi non est terminus hujus unionis secundum se, sed prout unita extraneæ naturæ.

De duplici autem ratione subsistendi aliqui propter objectionem factam negant hunc modum loquendi D. Th. ut videre est in Carthusi. in 3. dist. 6. q. 8. Sed solum potest esse dissensio in vocibus, nam res clara est. Primum enim duplex Christi natura, potest dici duplex ratio subsistendi, non simpliciter, sed in tali specie. Itaque subsistentia est ratio subsistendi simpliciter sine addito, & hæc tantum est una in Christo, ut recte D. Th. 4. contra Gent. c. 49. ubi hoc sensu docet in Christo tantum esse unam personam subsistentem simpliciter & absolute: & traditur aperte in V. Synod. const. 8. can. 7. Natura vero

Quomodo in persona Verbi incarnata dicatur duplex esse ratio subsistendi.



vero potest dici ratio subsistendi in tali specie humana, quia natura constituit personam, non formaliter in ratione personæ, sed in ratione individui talis speciei, vel essentia, & sic duplex natura Christi potest dici duplex ratio subsistendi in esse personæ divinæ & humanæ, seu in esse Dei & hominis. Et hoc sensu est facilis ratio D. Thomæ; oportet tamen huiusmodi loquendi modo caute uti, & non sine sufficienti explicatione. Secundo, potest dici duplex ratio subsistendi ex parte ipsius personalitatis, & hoc modo unica Christi subsistentia, quæ in se increata est, & divina, dicitur esse duplex ratio subsistendi non secundum rem, sed secundum rationem, quia in quantum terminat naturam divinam, est subsistentia divina: in quantum vero terminat humanam, potest dici personalitas humana, ut loquuntur multi Theologi, Marfilius in 3. q. 6. art. 3. dub. 3. Cajet. art. sequenti, Palac. in 3. 6. q. 1. & Sancti vocant personam Verbi, personam hominis, vel carnis, ut videre licet in Ambrosio epist. 40. Damasc. lib. 3. de fide cap. 11. lib. 4. cap. 5. Et quamvis hæc distinctio in ipsa subsistentia sit tantum rationis, quia tamen sumitur per ordinem ad duas naturas realiter distinctas in illa unica subsistentia conjunctas, ideo ex hac duplici ratione subsistendi recte intulit D. Thomas, Verbi personam ut subsistentem utrique naturæ esse compositam. Ex hac vero expositione, qua dicimus hanc duplicem rationem subsistendi tantum ratione distingui, colligunt aliqui rationem subsistendi in natura divina esse relationem realem, rationem vero subsistendi in humana, dumtaxat relationem rationis. Quod non potest esse verum, quia relatio rationis non potest esse ratio subsistendi, quia subsistere vel simpliciter, vel in tali natura est realis effectus; ergo ratio subsistendi debet necessario esse ratio realis in rebus ipsis existens: relatio autem rationis in re nihil est. Ac præterea, quatenus per intellectum concipitur, vel fingitur, habet se, ut consequens ad humanitatem jam subsistentem in Verbo, seu ad Verbum ut subsistens in humanitate; ergo hac etiam ratione non concipitur, ut ratio subsistendi, sed ut consequens illam. Denique aliud est distinguere rationem, aliud est esse relationem rationis, sæpe enim extrema sunt realia, & distinctio est rationis, ut constat in attributis divinis: sic ergo quamvis ipsamet personalis ac realis subsistentia Verbi ratione distinguatur a nobis, prout terminat humanitatem, vel divinitatem: tamen ipsa ut realis subsistentia est, est ratio subsistendi utrique naturæ. Quamquam in bono sensu dici possit, personalitati Verbi, ut est personalitas humana, non addi præter realem relationem filiationis Verbi, nisi relationem rationis, seu unionis Verbi ad humanitatem.

Argumentum primum facillimum est, secundum vero difficile, & solutio D. Thomæ obscura. Argumentum est. Omnis compositio est ex partibus; sed divina natura non potest esse pars; ergo non potest in compositione venire. Respondet hanc compositionem personæ ex naturis non esse ratione partium, sed ratione numeri. Unde in forma intendit negare majorem, & docere compositionem per se ac necessario non requirere partes, sed solum, ut multæ res ad unum constituendum conveniant. Et hoc est, quod dicit *ratione numeri*: quia omne illud, inquit, in quo duo conveniunt, potest dici ex eis compositum; sive illa conveniant per modum partium, sive alia ratione. Circa quam responsum considerandum est, aliquos non dubitare, nomine partium in hac compositione uti Justinian. Imper. in Edicto fidei suæ in principio: *Cum compositionem* (inquit) *dicamus, necesse est & partes in tota esse confiteri, & totum in partibus cognosci.* Et Nicetas in orationem 42. Nazianzeni, quæ est 2. in Pascha. §. Proinde agnus, &c. divinitatem vocat *partem, qua humanitas unita est.* Melius tamen D. Thomas negavit, hanc compositionem esse ex partibus. Potestque amplius explicari, quia etiam apud Philosophos, non quidquid componit, est pars, linea enim suo modo componit superficiem simul cum aliis partibus, quamvis illa non sit pars. Et substantia cum natura componit personam, quamvis non sit pars, sed modus vel terminus naturæ. Sic ergo in proposito, nec divinitas, nec Verbum potest dici pars Christi, quia nomen partis ex vi suæ significationis dicit quid incompletum & imperfectius toto, & dependens

aliquo modo ab alia parte. Unde Augustinus lib. 3. contra Maximin. c. 10. *Christus, ait, una persona est gemina substantia, nec tamen Deus pars hujus persone dici potest, aliqui filius Dei, antequam acciperet formam servi, non erat totum.* Dices. Hoc compositum Christus est quoddam totum; ergo constat ex partibus. Item, humana natura est una pars ejus; ergo divinitas erit altera. Respondetur, totum uno modo sumi, ut dicit relationem ad partes, & sic Christus, ut constans ex humanitate & divinitate non est aliquod totum, quamvis ut homo possit dici totum, in quantum constat ex partibus essentialibus, vel integralibus humanitatis. Alio modo dicitur totum, id est, quid completum, & perfectum, quo modo Damascen. lib. 3. de fide c. 7. inter totum & perfectum non distinguit; & sic Christus est quoddam totum perfectum sine relatione ad partes, neque humanitas potest proprie dici pars, sed est una integra natura hujus compositi, altera vero est divinitas: & utraque appellari potest vere componens Christum, ut Patres loquuntur, & infra explicabo, nam componens latius patet, quam pars, & non includit eas imperfectiones, quas nomen partis indicat, ut declaratum est, & latius in disputatione dicetur.

Tertium argumentum D. Thom. est: omne compositum est homogeneum ex componentibus; sed in Christo duæ naturæ componentur; ergo compositum erit aliqua natura, non persona. Respondet negando majorem, homo enim componitur ex anima & corpore, & tamen neque est anima, neque corpus. Sed potest urgeri argumentum, quia saltem ex naturis non videtur posse componi nisi natura, quia naturæ, ut sic, nihil dicunt quod pertineat ad constitutionem personæ; sed hic naturæ sunt, quæ componentur; ergo. Hoc argumentum propono ad explicandam amplius illam minorem, & hanc compositionem. Advertendum est enim proxime ac formaliter non esse factam compositionem hanc ex una natura cum alia, sed ex subsistentia Verbi cum humana natura, ut latius in disputationibus dicemus: quia vero ipsa subsistentia Verbi intime ac simplicissime in se includit naturam divinam, consequenter factum est, ut illæ duæ naturæ manserint conjunctæ in illa subsistentia, & e contrario ut persona Verbi ex duabus naturis composita permaneret. Hinc ergo ad argumentum respondetur distinguendo majorem; quando enim duæ naturæ inter se, & una cum alia proxime uniuntur ad quidpiam constituendum, tunc verum est proxime ac formaliter ex eis componi naturam, ut patet in compositione humanitatis ex anima & corpore: hoc autem modo numquam uniuntur perfectæ naturæ, & ideo Christus non hoc modo componitur ex duabus naturis: at vero quando duæ naturæ uniuntur in una subsistentia, tunc non est necesse, ut eis resultet una natura, sed una persona. Sed potest quis retorquere argumentum: quia quando compositio non est ex homogeneis, numquam terminus compositionis est ejusdem rationis cum altero componentium, ut patet in dicto exemplo de humanitate composita ex corpore & anima, & idem est in omnibus similibus; sed in hac compositione proxima componentia sunt persona Verbi, & natura humana, quæ non sunt homogenea, ut constat; ergo, terminus resultans non erit persona. Respondetur negando majorem, & falsa ostenditur in compositione ex linea, & punctis, & similibus. Solum ergo sequitur personam non eodem modo venire in compositionem, & resultare ex compositione: componit enim ut simplex, & subsistens in sola natura divina; resultat autem composita, & in duplici natura subsistens.

## ARTICULUS V.

*Utrum sit facta aliqua unio animæ & corporis in Christo.*

Ad quantum sic proceditur. Videtur, quod in Christo non fuerit unio animæ & corporis. Ex unione enim animæ & corporis in nobis causatur persona vel hypostasis hominis. Si ergo anima & corpus fuerint in Christo unita, sequitur, quod fuerit ex unione eorum aliqua hypostasis constituta; non autem hypostasis Verbi Dei, quæ est æterna. Ergo in Christo erit aliqua persona vel hypo-

Objeçtio.

Respõsio.

Objeçtio.

Respõsio.

Perfectæ naturæ numquam uniuntur ad constitutionem alterius.

Relatio rationis non potest esse ratio subsistendi.

Respõsio.

Compositio non necessario requirit partes.

II. Inf. q. 16. art. 1. c. Et 3. d. 6. q. 3. art. 1. Et 4. contr. 37. & 41. co. 2. Et op. 2. & 22.



Art. 2. & 3.  
præced.  
Lib. 3. Or-  
thod. c. 1.  
circamed.

hypostasis præter hypostasim Verbi: quod est contra prædicta\*.

2. Præterea. Ex unione animæ & corporis constituitur natura humana speciei. Damascenus autem dicit in 3. lib. 4. quod in Domino Jesu Christo non est communem speciem accipere. Ergo in eo non est facta anima & corporis unio.

3. Præterea. Anima non conjungitur corpori, nisi ut vivificet ipsum: sed corpus Christi poterat vivificari ab ipso Verbo Dei, quod est fons & principium vite. Ergo in Christo non fuit unio animæ & corporis.

Sed contra est, quod corpus non dicitur animatum nisi ex unione animæ. Sed corpus Christi dicitur animatum secundum illud, quod Ecclesia\* cantat: Animatum corpus sumens, de Virgine nasci dignatus est. Ergo in Christo fuit unio animæ & corporis.

Respondetur dicendum, quod Christus dicitur homo univoce cum aliis hominibus, ut pote ejusdem speciei existens, secundum illud Apostoli Philip. 2. In similitudinem hominum factus. Pertinet autem ad rationem speciei humane, quod anima corpori uniatur, non enim forma constituit speciem, nisi per hoc quod sit actus materie, & hoc est, ad quod generatio terminatur, per quam natura speciem intendit. Unde necesse est dicere, quod in Christo fuerit anima corpori unita, & contrarium est hæreticum: utpote derogans veritati humanitatis Christi.

Ad primum ergo dicendum, quod ex hac ratione moti videntur illi, qui negaverunt unionem animæ & corporis in Christo, ne per hoc scilicet cogerentur personam novam, vel hypostasim in Christo inducere: quia videbant, quod in puris hominibus ex unione animæ ad corpus constituitur persona. Sed hoc ideo in puris hominibus accidit: quia anima & corpus sic in eis conjunguntur, ut per se existant. Sed in Christo uniuntur ad invicem, ut adjuncta alteri principaliori, quod subsistit in natura ex eis composita: & propter hoc ex unione animæ, & corporis in Christo non constituitur nova hypostasis, seu persona, sed advenit ipsum conjunctum persone, seu hypostasi præexistenti. Nec propter hoc sequitur, quod sit minoris efficacie unio animæ & corporis in Christo, quam in nobis, quia ipsa conjunctio ad nobilius non adimit virtutem, aut dignitatem, sed aget: sicut anima sensitiva in animalibus constituit speciem, quia consideratur ut ultima forma, non autem in hominibus, quamvis in nobis sit virtuosior & nobilior: & hoc propter adjunctionem ulterioris & nobilioris perfectionis, scilicet animæ rationalis, ut etiam supra dictum est\*.

Ad secundum dicendum, quod verbum Damasc. 4. potest intelligi dupliciter. Uno modo, ut referatur ad humanam naturam: quæ quidem non habet rationem communis speciei, secundum quod est in uno solo individuo, sed secundum quod est abstracta ab omni individuo, prout in nuda contemplatione consideratur: vel secundum quod est in omnibus individuis. Filius autem Dei non assumpsit humanam naturam, prout est in sola consideratione intellectus, quia sic non assumpsisset ipsam rem humane nature: nisi forte diceretur, quod humana natura est quedam idea separata, sicut Platoni: i\* posuerunt hominem sine materia: sed tunc filius Dei non assumpsisset carnem contra illud, quod dicitur Luca ultimo. Spiritus carnem & ossa non habet, sicut me videtis habere. Similiter etiam non potest dici, quod filius Dei assumpsit humanam naturam, prout est in omnibus individuis ejusdem speciei, quia sic omnes homines assumpsisset. Relinquitur ergo, ut Damascen. \* postea dicit in eodem libro, quod assumpsit naturam humanam in atomo, id est, in individuo: non quidem in alio individuo, quod sit suppositum, vel hypostasis illius nature, quam in persona filii Dei. Alio modo potest intelligi dictum Damascen. \* ut non referatur ad naturam humanam, quasi ex unione animæ & corporis non resultet una communis natura, quæ est humana: sed est referendum ad unionem duarum naturarum, divinæ scilicet & humane, ex quibus non componitur aliquid tertium, quod sit quedam natura communis, quia sic illud esset natum prædicari de pluribus: \* & hoc ibi intendit. Unde subdit: Neque enim generatus est, neque unquam generabitur alius Christus, ex Deitate & humanitate, in deitate & humanitate Deus perfectus, idem & homo perfectus.

Ad tertium dicendum, quod duplex est principium vi-

te corporalis. Unum quidem effectivum, & hoc modo Verbum Dei est principium omnis vite. Alio modo est aliquid principium vite formaliter: cum enim vivere viventibus sit esse (ut dicit Philosophus 2. de anima\*) sicut unumquodque formaliter est per formam suam: ita corpus vivit per animam, & hoc modo non ponitur corpus vivere per Verbum, quod non potest esse corporis forma.

## COMMENTARIUS.

**H**ic Articulus videtur præter ordinem hoc loco insertus, potius enim spectabat ad q. 4. & 5. ubi de veritate assumptæ humanitatis tractandum est, hæc enim unio animæ cum corpore ad veritatem humanitatis ipsius maxime pertinet. Ibi etiam disputat D. Th. an in Christo vera anima fuerit, verumque corpus: non poterat ergo juxta ordinatam methodum definiri, has partes in illo convenisse, nisi extitisset quidem in eodem primum ostenderetur. Prius enim esse, quam uniri. Igitur D. Th. solum quasi oblata occasione hoc loco movit quæstionem hanc: tum quia de compositione personæ Christi disputabat, ad quam explicandam hæc compositio animæ, & corporis pertinere videbatur: tum etiam, quia Magister dist. 6. dum ageret de modo unionis ipsius, inter alias sententias refert illam, quæ, ut in Christo unitatem personæ salvaret, ex anima, & corpore compositionem negabat, quam non ut hæresim, sed ut opinionem Magister retulit: quare arrepta occasione D. Th. & discutit opinionem hanc, & illam opinionem, sed hæresim vocat, ut fuit re vera etiam Magistri temporibus, quidquid ibidem Scot. existimet, q. 3. ut pote cum veritatem incarnationis prorsus everteret: quod evidenter D. Th. ostendit in articulo, cujus litera clarissima est. Solutiones etiam argumentorum eandem doctrinam continent, quæ inter solvenda argumenta articuli secundi, & tertii data est, & ideo circa hanc literam non oportet amplius immorari. De re autem ipsa dicemus infra disputatione tertia: sed locus Damasceni, qui a D. Th. tractatur in argumento secundo, cum solutione, sufficienter expositus supra est art. 1. quæ vero Cajet. notat, necessaria non arbitror. Denique de illa quæstione, quam hic etiam D. Th. definit, Christum scilicet esse univoce hominem nobiscum, dicemus q. 16.

## ARTICULUS VI.

2. Utrum natura humana fuerit unita Verbo Dei accidentaliter.

**A**d sextum sic proceditur. Videtur, quod humana natura fuerit unita Verbo Dei accidentaliter. Dicit enim Apostolus Philippens. 2. de filio Dei, quod habitu inventus est ut homo. Sed habitus accidentaliter advenit ei, cujus est: sive accipiatur habitus, prout est unum de decem predicamentis, sive prout est species qualitatis. Ergo humana natura accidentaliter unita est filio Dei.

2. Præterea. Omne, quod advenit alicui post esse completum, advenit ei accidentaliter: hoc enim dicimus accidens, quod potest, & adesse, & abesse alicui præter subjecti corruptionem. Sed natura humana advenit ex tempore filio Dei, habenti esse perfectum ab æterno. Ergo advenit ei accidentaliter.

3. Præterea. Quicquid non pertinet ad naturam, seu essentiam alicujus rei, est accidens ejus: quia omne, quod est, aut est substantia, aut accidens. Sed humana natura non pertinet ad essentiam, vel naturam divinam filii Dei, quia non est facta unio in natura, ut supra dictum est. \* Ergo oportet, quod natura humana accidentaliter filio Dei advenerit.

4. Præterea. Instrumentum accidentaliter advenit. Sed humana natura in Christo fuit divinitatis instrumentum. Dicit enim Damascen. \* in 3. libro: quod caro Christi instrumentum divinitatis existit. Ergo videtur, quod humana natura fuerit filio Dei unita accidentaliter.

Sed contra est, quod illud, quod accidentaliter prædicatur, non prædicat quid, sed quantum, vel quale, vel aliquo alio modo se habens. Si ergo humana natura accidentaliter adveniret, cum dicitur, Christus est homo, non prædicaretur quid, sed quale, aut quantum, aut aliquo alio modo se habens. Quod est contra decretalem Alexandri

Pape

Lib. 3.  
text. 37.  
a. 2.

Art. 1. hu-  
jus quæst.

Lib. 3. or-  
thod. c. 13.  
post. m.

In festo  
circum-  
cisionis  
domini in  
laudibus  
3. d. 2. q. 1.  
a. 3. q. 3. &  
d. 7. q. 1. ar.  
a. c. princ.

Art. 2. hu-  
jus q. ad 2.  
Quæstionem  
in arg.

Ut patet  
in Arist. 1.  
met. text.  
6. & 25. per  
multos  
textus.

Lib. 3. c. 11.

Lib. 3. c. 11.

Lib. 3. c. 13.  
in medio.



Pape dicentis. Cum Christus sit perfectus Deus, & perfectus homo, qua temeritate audent quidam dicere, quod Christus secundum quod est homo, non est quid.

b Respondeo dicendum, quod ad hujus questionis evidentiam sciendum est, quod circa mysterium unionis duarum naturarum in Christo, duplex hæresis insurrexit: sicut Eutychetis & Dioscori, qui posuerunt, quod ex duabus naturis est constituta una natura, ita quod confitentur, Christum esse ex duabus naturis, quasi ante unionem distinctis: non autem in duabus naturis, quasi post unionem, naturarum distinctione cessante.

Alia vero fuit hæresis Nestorii, & Theodori Mopsuesteni, separantium personas: posuerunt enim aliam esse personam filii Dei, & filii hominis, quas dicebant sibi invicem esse unitas. Primo quidem secundum inhabitationem: in quantum scilicet Verbum Dei habitavit in illo homine, sicut in templo. Secundo per unitatem affectus, quantum scilicet voluntas illius hominis est semper conformis voluntati Verbi Dei. Tercio secundum operationem, prout scilicet dicebant hominem illum esse Verbi Dei instrumentum. Quarto secundum dignitatem honoris, prout omnis honor, qui exhibetur filio Dei, cohibetur filio hominis propter conjunctionem ad filium Dei. Quinto secundum equivocationem, id est communicationem nominum, prout scilicet dicimus, illum hominem esse Deum, & filium Dei. Manifestum est autem, istos omnes modos accidentalem unionem importare. Quidam autem posteriores magistri, putantes se has hæreses declinare, in eas per ignorantiam inciderunt. Quidam enim eorum concesserunt unam Christi personam, sed posuerunt duas hypostasies, sive duo supposita, dicentes, hominem quandam compositum ex corpore & anima a principio sua conceptionis, esse assumptum a Dei Verbo. Et hæc est prima opinio, quam Magister ponit in 6. dist. 3. lib. Sententiarum\*. Alii vero volentes servare unitatem personæ, posuerunt Christi animam non esse corpori unitam: sed hæc duo separata ab invicem, esse unita Verbo accidentaliter; ut sic non cresceret numerus personarum. Et hæc est tertia opinio, quam Magister ibidem\* ponit. Ultraque autem harum opinionum incidit in hæresim Nestorii. Prima quidem, quia idem est ponere duas hypostasies, vel duo supposita in Christo, quod ponere duas personas, ut supra dictum est\*. Et si fiat vis in nomine personæ, considerandum est, quod etiam Nestorius utebatur unitate personæ propter unitatem dignitatis & honoris. Unde etiam sexta Synodus definivit anathema cum t, qui dicit unam personam secundum dignitatem & honorem, & adorationem, sicut Theodorus & Nestorius infantes conscripserunt. Alia vero opinio incidit in errorem Nestorii, quantum ad hoc, quod posuit unionem accidentalem: non enim differt dicere, quod Verbum Dei unitum est homini Christo, secundum inhabitationem, sicut in templo suo (sicut dicebat Nestorius), & dicere quod unitum fuit Verbum Dei homini, secundum induritionem, sicut vestimento: sicut dicit tertia opinio, quæ etiam pejus dicit aliquid, quam Nestorius, scilicet, quod anima & corpus non sunt unita. Fides autem Catholica medium inter prædictas positiones tenens, non dicit unionem factam Dei & hominis, secundum essentiam vel naturam, neque etiam secundum accidens: sed medio modo secundum subsistentiam, seu hypostasim. Unde in VI. Synodo\* dicitur. Cum multis modis unitas intelligatur, qui iniquitatem Apollinarij & Eutychetis sequuntur, interemptionem eorum, quæ convenerunt ponentes (id est interimentes Utramque naturam) unionem secundum confusionem dicunt: Theodori autem & Nestorii sequaces, divisione gaudentes, affectualem unitatem introducunt. Sancta vero Dei Ecclesia, utriusque perfidia impietatem rejiciens, unionem Verbi Dei ad carnem, secundum compositionem confitetur: quod est secundum subsistentiam. Sic ergo patet, quod secunda trium opinionum, quas Magister t ponit, quæ asserit unam hypostasim Dei & hominis, non est dicenda opinio, sed sententia Catholica fidei: similiter etiam prima opinio, quæ ponit duas hypostasies, & tertia, quæ ponit unionem accidentalem, non sunt dicende opiniones, sed hæreses in Conciliis ab Ecclesia damnate.

Ad primum ergo dicendum, quod sicut Damascenus t dicit in 3. lib. non necesse est omnifariam & indefectively assimilari exempla: quod enim est in omnibus simile,

Suarez Tom. XVI.

idem utique erit, & non exemplum, & maxime in divinis; impossibile enim est simile exemplum invenire in omnibus, & in Theologia, id est in deitate personarum, & in dispensatione, id est in mysterio incarnationis. Humana ergo natura in Christo assimilatur habitui, id est vestimento, non quidem quantum ad accidentalem unionem: sed quantum ad hoc, quod Verbum videtur per humanam naturam, sicut homo per vestimentum. Et etiam quantum ad hoc, quod vestimentum mutatur: quia scilicet formatur secundum figuram ejus, qui induit ipsum, qui a sua forma non mutatur propter vestimentum. Et similiter humana natura assumpta a Verbo Dei est meliorata, ipsum autem Verbum Dei non est mutatum, ut August. exponit in lib. 83. quest.

d Ad secundum dicendum, quod illud quod advenit post esse completum, accidentaliter advenit, nisi trahatur in communionem illius esse completi: sicut in resurrectione corpus advenit animæ præexistenti, non tamen accidentaliter, quia ad idem esse assumitur, ut scilicet corpus habeat esse vitale per animam; non est autem sic de albedine: quia aliud est esse albi, & aliud est esse hominis, cui advenit albedo. Verbum autem Dei ab æterno esse completum habuit secundum hypostasim, sive personam: ex tempore autem advenit ei natura humana, non quasi assumpta ad unum esse prout est natura, sicut corpus assumitur ad esse animæ, sed ad unum esse prout est hypostasis, vel personæ. Et ideo humana natura non unitur accidentaliter filio Dei.

e Ad tertium dicendum, quod accidens dividitur contra substantiam. Substantia autem (ut patet 5. Meta.)\* dupliciter dicitur. Uno modo pro essentia sive natura: alio pro supposito sive hypostasi. Unde sufficit ad hoc, quod non sit unio accidentalis, quod sit facta unio secundum hypostasim, licet non sit facta unio secundum naturam.

f Ad quartum dicendum, quod non omne, quod assumitur ut instrumentum, pertinet ad hypostasim assumptis, sicut patet de securi, & gladio; nihil tamen prohibet, illud quod assumitur ad unitatem hypostasis, se habere ut instrumentum: sicut corpus hominis vel membra ejus. Nestorius ergo posuit, quod natura humana est assumpta a Verbo solum per modum instrumenti, non autem ad unitatem hypostasis. Et ideo non concedebat, quod homo ille vere esset filius Dei, sed instrumentum ejus. Unde Cyrillus dicit in Epist. ad Monachos Aegypti: Hunc Emanuele, id est Christum, non tanquam instrumenti officio assumptum dicit Scriptura, sed tanquam Deum vere humanatum, id est hominem factum. Damascen.\* autem posuit naturam humanam in Christo esse, sicut instrumentum ad unitatem hypostasis pertinentem.

#### COMMENTARIUS.

Dupliciter in nobis contingit uniri aliquid alicui personæ, scilicet accidentaliter, & substantialiter. Dicitur autem substantialiter uniri, quod conjungitur ad componendum aliquid unum in genere substantiæ: accidentaliter vero, quando id, quod resultat ex tali unionem, non est aliquid per se unum in genere substantiæ: cum igitur ostensum sit, hanc unionem factam esse in persona, merito quaeritur, an substantialiter, vel accidentaliter sit facta.

b Divus Thom. igitur, ut questionem respondeat, late prius refert errores Eutychetis, Nestorii, & aliorum, quos articulis præcedentibus re ipsa jam impugnaverat, & ex eorum confutatione, & definitione Conc. secundi Constant. can. 4. concludit, unionem Verbi Dei ad carnem fuisse secundum compositionem, quod est secundum subsistentiam, & hinc ulterius infert hæresim esse existimare hanc unionem esse accidentalem. Quocirca summa rationis D. Th. videtur esse hæc. Unio hæc est compositio secundum subsistentiam, ut definitum est in dicto Concilio; ergo est substantialis, quam consequentiam D. Th. relinquit line probatione, ut manifestam, cum tamen non ita clara esse videatur; quia uniri secundum subsistentiam, nihil est aliud; quam uniri in persona; sed non omnis unio in persona substantialis est; ergo neque omnis unio secundum subsistentiam. Respondetur tamen consequentiam esse optimam, & intellectus terminus per se satis claram, quia unio secundum subsistentiam non dicit qualemcumque unionem in persona, sed illam, quæ est ad componendam, & constituendam ipsam personam: & hoc sensu dixit Conc. Constantinopol. unionem Verbi ad

Li. 3. q. 9.  
73. non  
longe a  
fin. tom. 4.

Li. 5. met.  
text. 15.  
tom. 3.

Li. 3. Or.  
fid. c. 15. a  
med.

Dist. 6. §.  
2. lib. 3.  
Sent.

In l. d. 1.  
& c.

Art. 3. hu-  
jus quæst.

Habetur  
in Synod.  
2. Const.  
can. 4.

Habetur  
in con. 2.  
Constant.  
can. 4.

Li. 3. sen.  
d. 6.

Li. 1. Or. h.  
nd. a. 16.



carne[m] esse secundum compositionem, quod est secundum substantiam: at vero compositio ipsa personae est substantialis, cum sit ad componendam, & constituendam substantiam: accidentia autem dicuntur uniri in persona, quatenus adveniunt personae jam constitutae, illique adherent: non tamen adveniunt in compositionem, quae est secundum substantiam, & propterea de illis est diversissima ratio. Et hunc sensum confirmat optime ratio, quae D. Th. utitur in argumento sed contra, quae ita formanda est: Per hanc unionem Verbum non solum dicitur humanatum, sed vere dicitur factum. Ergo illa unio non est accidentaliter, sed substantialiter, quandoquidem ratione illius praedicatur de Verbo aliquid substantiale, & per modum substantiae, & non tantum per modum accidentis. Quando enim unio est accidentaliter, vel per modum accidentis, quo unitur, etiam si in se sit substantia, non praedicatur per modum substantiae, sed per modum accidentis, ut homo dicitur vestitus, non vestis; & hoc sensu ait D. Thom. humanam naturam non praedicari de Christo, ut quantum, vel quale, sed tanquam quid, ut patet ex ipsa forma praedicationis, & ex definitione Alexandri Papae, quam D. Thom. citat, de qua dicemus plura in disputatione sequenti, dubio primo.

c Primum argumentum D. Th. sumitur ex illo Pauli ad Philip. 2. *In similitudinem hominum factus, & habitus inventus, ut homo.* D. Th. nomine habitus vestem intelligit cum August. lib. 83. quaestionum q. 73. ut sensus sit, Deum fuisse indutum, & quasi vestitum humanitate, ut exposuit etiam Cyrillus lib. 1. i. in Joan. c. 14. quo sensu videtur significari, unionem esse accidentalem. Respondet autem D. Thom. unionem hanc significatam esse per metaphoram habitus, non quia accidentaliter sit, sed vel ad significandum factam esse permutationem humanitatis sine Verbi mutatione, sicut potest aliquis indui veste per vestis mutationem ipso quiescente; vel quia, sicut homo saepe per vestem videtur, ita Verbum per humanam naturam apparuit.

Quae responsio optime satisfacit supposita expositione dicti testimonii Pauli. Sed alius videtur esse sensus literalis, ut ex Graeca voce, & Graecorum expositione sumitur. Graece enim est vox *ἵκεν* quae figuram, formam, seu speciem significat: ut sensus sit Christum inventum esse in forma, in specie, & figura hominis. Dixerat enim Paulus, factum esse in similitudinem hominum, & quasi rationem reddens ait, quia in forma hominis inventus est, quod Chrysostomus etiam sequuti Theophyl. & alii de figura, & forma corporis exponunt. Ambrosius vero (licet non adeo proprie) de forma & modo exterioris conversationis, quia scilicet Christus inventus est dormiens, comedens, bibens sicut alii; sed Theodor. per formam hominis totam hominis naturam intelligit, qui addit, particulam illam, *ut homo*, non diminueret veritatem humanae naturae; significat tamen minueret rationem & veritatem hominis respectu Verbi. *Etenim* (inquit) *convenit illud, ut homo: suscepta enim natura vere hoc erat, ipse autem hoc non erat, sed hoc induerat.* Quae verba aut corrigenda sunt, videntur enim ex antiquo errore, cui Theodoretus aliquando adhæsit, processisse; aut pie exponenda, ut videlicet, non negetur, Verbum divinum post incarnationem vere fuisse hominem, sed de se non fuisse, sed induisse, id est, factum fuisse. Ad dicit Chrysostomus per illam particulam significatum esse Christum non esse purum hominem, neque de multis unum, sed inter multos singularem, exterius autem ita apparuisse, ac si unus de vulgo hominum esset. Quam expositionem Ambrosius etiam sequitur: quare addi potest Christum habitu fuisse inventum, ut hominem, quia ex conversatione vitae, actionibus, atque passionibus apparuit verus homo, sicut Joannis primo dicitur: *Vidimus gloriam ejus, gloriam quasi unigeniti a Patre*, ubi illa particula, *quasi*, quae in Graeco est eadem cum particula, ut, non minuit veritatem unigeniti, sed potius significat Christum se ostendisse vere esse unigenitum a Patre, ostendendo gloriam, gratiam, & veritatem suam.

d Secundum argumentum difficile est, atque solutio non minus obscura. Argumentatur enim sic. Verbum est ens completum: ergo natura humana illi advenit accidentaliter, quod enim advenit enti in actu, advenit accidentaliter. Respondet, negando consequentiam, & ad probationem, assumptum distinguendo: quod enim

advenit enti in actu, si novum esse illi afferat, accidentaliter unitur, si vero trahatur ad idem esse, non advenit accidentaliter: in propositione autem posteriori modo fit, cum ad unum esse cum Verbo humanitas trahatur. Ex qua solutione colligunt discipuli D. Th. Christi humanitatem non habere existentiam creatam, sed per unionem assumptam esse ad existendum ipsamet increata existentia Verbi Dei. Neque aliter putant salvari posse unionem illam esse substantialem. Sed quidquid sit tam de re ipsa, quam de aliis locis D. Th. ex hoc tamen id colligi non potest, sed fortasse potius contrarium: expresse enim D. Th. ait humanam naturam advenire Verbo, non ut assumptam ad unum esse, prout est naturae, sicut corpus assumitur ad esse animae: sed ad unum esse, prout est hypostasis, & ideo non advenire accidentaliter, ubi, ut aperte constat ex principio solutionis, & ex toto literarum progressu, sermo est de esse existentiae, & hoc distinguit in esse, prout est naturae, & prout est hypostasis, & negat humanitatem habere a Verbo esse existentiae, prout est naturae, sed tantum, prout est hypostasis. Unde sentit procul dubio humanitatem secum asferre aliquod esse existentiae, prout est naturae. Mens ergo D. Th. in ea distinctione applicata ad solutionem argumenti positi est, quod advenit alicui praexistenti, si assumatur ad constituendum cum illo unum esse personale, non advenire accidentaliter, sed substantialiter; si autem supponat rem perfecte constitutam in esse personali, & afferat novum esse, quod ad constitutionem personae nullo modo pertinet, accidentaliter advenire.

Et hæc solutio ita potest amplius explicari (ne pluribus circa hoc argumentum postea sit opus); nam si hæc unio ex parte humanitatis consideretur, invenietur illa natura esse quid incompletum in genere substantiae, & ideo potest substantialiter alteri rei uniri, ut subsistat in illa. Si vero consideretur ex parte Verbi, licet Verbum secundum se sit ens actu completissimum, atque perfectissimum in suo proprio esse: tamen humanitas non ita illi advenit, ut illud proprie informet, nec tantum, ut mere extrinsece assistat, sed ut ab illo sustentetur, & in illo subsistat, & ita Verbum tantum se unit illi in ratione, & per rationem subsistendi, quae ita accommodatur humanitati, ut modo ineffabili unam personam eum illa constituat.

e Tertium argumentum fundatur in hoc principio, quidquid non pertinet ad essentiam, vel naturam alicujus, est accidens ejus. Responsio autem in forma negat hoc principium: tum, quia præter essentiam, seu naturam est substantia, & personalitas, quae non est accidens, sed ipsius substantiae complementum, & ita Verbum non est accidens humanae naturae, sed substantialis terminus illius: tum etiam, quia hinc fit, ut aliqua substantia possit esse natura alicujus suppositi non essentialis illi, & intrinseca, sed per substantialem unionem conjuncta: neque ut accidens, sed tanquam vera natura substantialis ad subsistendum assumpta.

f Quartum argumentum fundatur in autoritate Damasceni lib. 3. c. 16. ubi humanitatem vocat, *Organum, seu instrumentum divinitatis*, quae locutio videtur indicare unionem accidentalem. Sed explicanda est ex Cyrillo epistola prima ad Monachos Aegypti, ubi fere eandem doctrinam habet, quam D. Thom. hic, & 4. contra gentes cap. 41. per illum enim loquendi modum non explicatur proprie, ac formaliter hæc unio, quae immediate ac formaliter ad agendum non est, sicut unio instrumenti, ut sic: sed est ad subsistendum. Tamen, quia nos per operationes percipimus esse rei, ideo a posteriori explicatur hæc unio per rationem instrumenti, ut dicitur caro Verbi organum, non quaecumque, sed conjunctum substantialem, ut corpus organum animae, & manus, hominis dici potest. Ex hac vero doctrina D. Th. licet colligere, quamvis humanitas, vel caro Christi in eo sensu instrumentum Verbi possit appellari, Christum tamen ipsum, seu hunc hominem nullo modo posse hanc appellationem fortiri, ut recte Cyrillus supra contra Nestorium notavit. Ratio clara est, quia Christus, & hic homo dicit ipsum suppositum, quod neque assumptum est, neque instrumentum esse potest, sed ipsum primum operans; caro autem, vel humanitas dicit naturam assumptam, per quam suppositum operatur, & ideo in illam convenire talis deno-



denominatio potest. Unde ultimo hic notetur multo aliter posse humanitatem dici organum Verbi, quam Patris, vel Spiritus sancti, quia sicut per unionem facta est illa humanitas natura ipsius Verbi, & non Patris, nec Spiritus sancti, ita speciali modo est organum ipsius Verbi: quo fit, ut propriæ, & vitales actiones humanitatis vere, ac propriè tribuantur Verbo; at vero respectu aliarum personarum non nisi communi, ac generali ratione potest dici instrumentum ad eum modum, quo omnes formæ creatæ, sive omnes causæ secundæ, instrumenta primæ causæ vocari possunt: legatur de hac comparatione Cajetan. tom. 3. opusc. tractat. 1. orat. 2. ad Alexand. Sextum.

## DISPUTATIO VII.

In quinque Sectiones distributa.

*De termino Incarnationis, qui per illa produ-  
citur, seu resultat.*

**I**N his articulis disputavit potissimum D. Th. de termino hujus unionis, & ideo de hac re præsentem disputationem instituo, quæ convenienti methodo in hunc locum, ut enim actiones aliæ universaliter, ita Incarnatio, vel unio ad terminum ex ipsa resultantem habitudinem dicit, imo & ab illo videtur rationem fumere, Quamobrem ad explicandum, quid sit hæc unio, commodo ab ipso termino exordium sumemus. Oportet autem (quod sæpe notavi) distinguere terminum terminantem humanitatem a termino resultante ex unione. Nam de hoc posteriori agemus, non de priori, nisi quatenus ad alium explicandum necessarium sit. In quo etiam intelligere possumus vel id, quod per hanc unionem, seu per actionem unitivam, vel id, quod se habet, ut formalis terminus illius actionis, sicut in resurrectione, v. g. quæ est actio unius animæ corpori; adæquatus terminus ejus est, hic homo, qui resurgit, terminus autem formalis dicitur ipsa anima, ut reunita corpori. Hic ergo præcipue explicabimus terminum totum, & integrum. Nam de illo, qui est quasi formalis, commodius sequenti disputatione differetur.

## SECTIO I.

*Utrum terminus resultans, seu productus per  
Incarnationem sit aliqua substantia.*

**V**isum est hanc questionem præmittere, antequam attingamus errores, quos D. Th. his articulis impugnat, ut ab universalioribus procedamus; quanquam hoc loco referri posset error Nestorii, qui duas in Christo constituens personas, vel hypostasies solum accidentaliter unitas, necessario negare debuit terminum incarnationis esse aliquam substantiam, vel (quod idem est) incarnationem esse actionem alicujus substantiæ productivam, sed vel nullam actionem esse, sed solum extrinsecam denominationem, ut est per amorem, seu favorem extrinsecum, vel tantum esse productionem alicujus accidentis, quo aliquo modo substantiæ & personæ distinctæ conjungantur. Sed hic error & tractandus est dubio tertio, & late refellendus. Secundo referri potest sententia asserens, incarnationem nullum habere terminum per illam productum, neque accidentalem quidem, neque substantialem, sed tantum terminum terminantem humanam naturam, illumque substantialem esse, scilicet ipsum Verbum. Sed hoc plane falsum est, & impossibile, quia incarnatio est actio realis, quæ in tempore incepit esse; ergo necesse est habere terminum realem per illam productum, quia hoc est de intrinseca ratione talis actionis. Ergo ille terminus non potest esse Verbum ipsum secundum se, quia ut sic non est in tempore productus; oportet ergo aliquem alium terminum assignare.

Dico ergo primo, terminum adæquatum incarnationis esse Deum hominem, seu Verbum ut subsistens in humanitate, seu hunc hominem Christum, ut est unum quid constans ex persona divina, & humana natura. Hæc est doctrina communis Theologorum, cum D. Th. hic, præfertim art. 6. & clarius in 3. dist. 2. q. 2. art. 2. q. 3. Cajet. hic art. 8. dub. 5. & omnium Thomist. Palud. dist. 5. q. 1.

Suarez Tom. XVI.

art. 3. & quamvis Durand. & Scot. soleant in contrarium citari, tamen revera non aliud sentiunt: ut videre est in Scot. dist. 1. q. 1. & Durand. ibid. & dist. 5. q. 2. & dist. 6. q. 2. Neque inter Catholicos potest in hoc esse dissensio, quia hæc est assertio fidei; hoc enim sensu definiunt Concilia, Incarnationem terminatam esse ad unitatem Verbi Dei, secundum compositionem ad carnem animatam anima rationali, ut dicitur in V. Synod. act. 8. can. 3. & in idem recidit, quod dicunt, Christum ex divinitate, ac humanitate constantem, esse vere unum quid, quod beata Virgo genuit, ut dicitur in Concil. Toletan. 6. & 11. in confessionibus fidei; hoc etiam est, quod in Concil. Francoford. in lib. sacrosyllabo dicitur: *Quis eum adoptasse in filium credatur, cum tota sancta Trinitas hominem Christum in utero Virginis optata sit.* Hoc etiam sensu definitur sæpe in Conciliis Græcis hanc unionem factam esse secundum hypostasim, seu subsistentiam, ut videre est in 2. anathematismo Cyrilli. & in epist. 8. ejus, receptis in Concil. Ephesino, tom. 1. can. 12. & 14. sensus enim est, hanc unionem talem esse, ut ex ea resultet una hypostasis Christi in duplici natura subsistens. Denique cum Scriptura dicit, Verbum esse factum carnem, aut Deum factum esse hominem, satis aperte docet hunc fuisse terminum hujus unionis; idem autem terminus, qui illis verbis complexe significatur, declaratur simpliciter, & incomplexe per illum terminum, hic homo Christus, ut Deus homo. Ratione etiam patet, quia in omni unione terminus adæquatus ex ea resultans est ipsum compositum, vel quasi compositum ex rebus unitis, ut patet in exemplo supra posito de resurrectione, & idem est in omnibus similibus; ergo simpliciter in hac unione terminus est illud unum, quod resultat ex rebus unitis; sed hoc nihil est aliud, quam Christus Deus homo; ergo. Et confirmatur, quia hic homo Christus, ut subsistit in duabus naturis, est vere unum quid, ut traditur late in Concil. Ephesino, & Chalcedonensi act. 1. ubi multa ex Patribus referuntur, & in Symbolo Athanasii expresse habetur, Sicut anima rationalis, & caro unus est homo, ita Deus, & homo unus est Christus; & infra q. 17. hoc latius dicitur: sed hoc unum ante hanc unionem non erat, & per illam resultavit, tanquam quid per se primo intentum per illam; ergo est adæquatus terminus ejus.

Dico secundo, primum, & adæquatum terminum incarnationis esse substantialem, seu quandam individuum substantiam. Hæc assertio sequitur aperte ex præcedenti: quia hic homo Christus quædam individua substantia est; sed ille, quatenus Deus homo est, est terminus hujus unionis; ergo. Et confirmari hoc potest ex capite Cum Christus, extra de hæreticis, ubi Alexand. Papa definit Christum, secundum quod est homo, esse aliquid; quam definitionem aliqui explicant, ut solum sit contra Manich. qui negando veram in Christo humanitatem, consequenter dicebant, Christum, ut hominem, non esse aliquid, sed potius nihil, quia non fuit verus homo, sed apparens. Ita exponit Franciscus Penna in scholiis ad directorium inquisitorum 2. p. lib. 2. scholio. 3. & videtur favere ratio, quæ in textu subjungitur, sc. quia sicut Christus verus est Deus, ita verus est homo ex anima rationali, & humana carne subsistens. Sed difficile creditur est, hunc esse sensum illius definitionis, quia ut constat ex Concilio Lateranensi sub eodem Alexand. III. pag. 49. c. 20. illa definitio edita est contra aliquos Parient. & Rhemenf. Doctores, qui eo tempore ita loquebantur. Non est autem credibile eos fuisse locutos in sensu Manichæorum: sed fortasse negabant, Christum, ut hominem, esse aliquid, scilicet substantialem, & absolutum, & ita intellexit D. Th. hanc definitionem hic art. 6. in argumento sed contra, & alii scholastici, & expositores omnes. Et confirmatur: quia (ut infra disputatione sequenti ostendemus) hæc unio substantialis est: sed terminus actionis, vel unionis substantialis ad substantiam per se primo terminatur; ergo. Sed dicere potest aliquis. **Objeccio.** terminari hanc unionem ad ipsam humanitatem, vel secundum se, vel prout existentem in Verbo, & illam ut sic esse terminum hujus unionis, non vero hunc hominem, vel substantiam aliquam perfectam. Qui modus dicendi solet tribui Durando. Sed licet humanitas, ut unita Verbo, possit dici veluti formalis terminus hujus unionis propter rationem dictam, quam latius explicabimus disputatione sequenti, non tamen dici potest totalis,



& integer terminus, quia substantialis actio unitiva, quamvis proxime versetur circa extrema, quæ unit vel utrumque, vel aliquod illorum immutando, & modificando; tamen per se primo non tendit, nisi ad totum ipsum, quod resultat ex unione extremorum, ad illud enim tendit tota actio, vel immutatio, quæ fit in extremis, quæ unijuntur; ergo illud est totalis, & adequatus terminus per se primo intentus per talem actionem, vel unionem: hoc autem in proposito non est humanitas ipsa, nec secundum se, nec prout unita: sed hoc totum Christus Deus homo. Neque contra hanc resolutionem occurrit specialis aliqua difficultas præter eas, quæ communes sunt huic mysterio, quas paulatim in dubijs sequentibus expediemus.

## SECTIO II.

*Utrum terminus hujus unionis fuerit aliqua substantialis natura.*

**I**N hac quaestione tractandus est error Eutychetis: qui ut intelligatur, advertendum est varios errores extitisse illorum, qui unam in Christo naturam posuerunt. Negarunt enim quidam veram unionem inter utramque naturam divinam & humanam, tribuentes Christo vel solam divinam, ut Manichæi, & alii antiquiores hæretici, vel solam humanam, ut Paulus Samosat, & alii. Sed hic error non pertinet ad præsentem disputationem; est enim in prima disputatione confutatus. Alii ergo errarunt, ponendo in Christo unam naturam constatam, seu resultantem ex unione duarum naturarum, divinæ, & humanæ, juxta quem errorem terminus hujus unionis est aliqua natura substantialis. Qui error variis modis intelligi potest. Primo, ut hæc unio facta sit per confusionem, mixtionem, & transmutationem duarum naturarum in unam tertiam, sicut contingit in productione mixti ex simplicibus substantialiter transmutatis, ut tenuit quidam Polemius, ut Theodoret. refert lib. 4. hæreticarum fabularum, quin & errorem Eutychetis ita multi patres explicarunt, quos statim citabo. Et eundem secuti sunt Jacobitæ apud Niceph. lib. 18. c. 45. & Acephali duce Severo, ut sumitur ex VII. Synodo, Act. 1. circa finem in fragmento vitæ sancti Sabbæ, quorum sit mentio in V. Synodo, Act. 1. in libello Monachorum ad Menam, & in alio ad Synodum, & aliis locis ejusdem actionis, & Concil. Hispal. II. c. 12. & Damasc. contra hos scripsit librum de natura composita, ex cujus discurfu, & rationibus constat hos hæreticos posuisse compositionem unius naturæ in Christo per veram mixtionem, sicut mixtum dicitur componi ex elementis. Refert etiam Nicephor. l. 18. c. 45. hos vocatos esse Acephalos, quia sine Episcopis degebat, qui sunt capita Ecclesiarum, quod etiam notavit Sanderus lib. 7. de visio. Monach. hæref. 106. melius, quam Castro, qui verbo, Christus, hæref. 4. dixit dictos esse Acephalos, quia duce caruerunt, quod falsum esse constat ex dictis.

Acephali  
hæretici.

Secundo modo ab aliis assertus est hic error, quod scilicet hæc una natura resultaverit per conversionem humanitatis in divinitatem. Hic fuit error Eutychetis, quantum ex Leone Papa colligitur, epist. 1. ad Flavianum, & ex epistolis Flaviani ad ipsum, quæ ante illam habentur inter epist. Leonis: ubi tamen dicitur, Eutychetem excitasse errorem Valentini, & Apollinaris. Sed intelligendum est quantum ad unitatem naturæ, nam in modo aliter erravit. Virgilius etiam lib. 1. & 2. contra Eutychet. Eodem modo explicat hunc errorem, & evidentissime August. hæref. 90. Ambrosius lib. de Incarnatio. c. 6. ubi mutationis & conversionis etiam mentionem fecit, tacito tamen nomine Eutychetis. Ita etiam refert hunc errorem Nicephor. lib. 18. c. 45. Theodoret. lib. 4. hæret. fabular. & confutat illum in dialogo Inconfus. & immutab. Hac etiam ratione dixit Eutyches Christum subsistere ex duabus naturis, non in duabus, quia censuit duas naturas unione facta non permanisse. Ideo etiam dicebat divinitatem passam fuisse, & crucifixam & Theodoret. supra refert lib. 4. c. ultimo, & Sanderus lib. 7. de visio. Monach. hæref. 102. quia illam naturam non compositam, sed veram unam, & eandem omnino fuisse existimabat. Unde Damasc. lib. 3. c. 3. hunc errorem tractans ait posuisse unam naturam, vel simplicem per transmutationem unius in aliam, vel compositam

per simplicium transmutationem eo modo, quo corpus hominis ex elementis componitur. Denique in hoc sensu damnatur clare hæc hæresis toto Concil. Chalcedonensi, & aliis infra citandis. Hunc errorem secutus est Dioscorus, ut patet ex Concil. Chalcedonensi. act. 1. & 16. & Act. 3. in epist. ad Martian. de damnatione Dioscori, & ex Liberato in breviario c. 12. & 13. & Niceph. lib. 15. c. 4. 8. & 30. Idem error tribuitur Euseb. Cæsariensi in VII. Synodo act. 5. & 6. circa finem, ubi ex Athanasio & Cyrillo aliqua contra illum referuntur. Refert etiam Nicephorus Petrum Gnaphæum hunc errorem fuisse secutum, atque ita totam Trinitatem passam fuisse asseverasse, aiebat enim unam naturam Christi tribus personis communem vere passam fuisse. Itaque in illo Trisagio: *Sanctus Deus, sanctus fortis, sanctus immortalis*, dicebat addendam illam partem, *qui passus est pro nobis*, ut etiam retulit Niceph. lib. 15. c. 18. Damasc. lib. 3. c. 10. & epist. de Trisagio, & ab hoc orti sunt hæretici dicti Theopascitæ, & Patripassiani, ut Prateol. supra, & Sander. hæref. 104. Philoponus etiam, aliàs Joannes Grammaticus huic errori adhæsit, ut Niceph. l. 18. c. 46.

Tertio modo errarunt alii e converso, ponendo unam naturam in Christo, per conversionem divinitatis in humanitatem. Ita Apollinar. qui non totam divinitatem, sed quandam ejus particulam ab illa decisam dixit conversam fuisse in humanitatem, vel (quod idem est) humanitatem factam esse ex divinitate. Ita refert August. hæref. 55. & Epiph. hæref. 76. ubi contra hunc errorem refert epist. Athanas. ad Epiet. idem Euthym. 2. p. Panopl. tit. 15. & Niceph. lib. 11. histor. c. 12. & Socrat. lib. 5. Tripart. c. 44. sæpe tamen in historiis, seu authoribus antiquis hi errores ex diverso explicandi modo confunduntur, & eisdem authoribus tribuuntur, quoniam, ut ex Cyrill. epist. 30. constat, & ex eodem Cyrill. refertur in citato loco ex VII. Synod. perinde existimabant dicere Verbum in humanitatem esse conversum, vel e contrario humanitatem in Verbum. Ac denique hos errores fuisse antiquissimos in Ecclesia etiam ante Eutychetem, vel Apollinarem constat ex Irenæo, in expositione fidei, ubi sic inquit: *Vos, qui ad baptismum aspirare fingitis, qui, ut tollatis duas naturas, quæstiones tales proponitis, qui mixturam, confusionem, & mutationem in deitatem ex corpore, ut hæc confundatis, comminiscimini, qui nunc in carnem Verbum verum asseritis, nunc carnem in Verbi essentiam, & hæc mentis depravatione nihil vos sapere ostenditis.* &c. Sed & novos hujus temporis hæreticos hæc Eutychiana hæresis fuisse infectos referunt Lindanus dialogo 2. sui Dubitantii, & Eckius contra confessionem Zuinglii; isti enim (ut inferius latius q. 16. videbimus) eam unionem inter humanitatem, & divinitatem somniant, ut alterius naturæ attributa omnia, alteri naturæ etiam in abstracto communicentur, quod sine confusione, vel unius naturæ in aliam transmutatione, ne concipi quidem potest.

Quarto modo declarari potest hic error, ut non per transmutationem alicujus naturæ in aliam, sed per compositionem una natura ex duabus resultaverit, utraque in suo esse integra manente, solumque in unione mutatione facta, ad eum modum, quo ex anima, & corpore una natura confurgit. Hujus erroris sic explicati meminit Justinianus Imperat. in edicto fidei ad Joan. II. & Castrus verbo, Christus, hæref. 4. suspicatur Eutychetem hoc sensu errorem suum asseruisse propter quædam verba Gelasii Papæ, lib. de duabus naturis contra Eutychetem circa medium 11, qui habetur tom. 5. Biblioth. Sanct. sed nihil ex eo colligi potest, nam, licet dicat Eutychetem explicare suum errorem illo exemplo animæ, & corporis, non tamen ait eundem modum unionis posuisse, quin potius in principio libri aperte significat Eutychetem, eum sensum in suo errore, quem nos supra explicuimus, tenuisse, & aperte Euthym. lib. 2. Panopl. tit. 15. ex Athanas. refert tam hæreticos, quam Catholicos illo exemplo animæ, & corporis in explicando hoc mysterio usos fuisse, diversa tamen ratione illos ad divinitatis mutationem, & eversionem humanitatis, nos vero solum ad ostendendum fieri posse, ut duarum rerum una solum persona sit. Huc etiam spectat error eorum, qui veram animam in Christo negaverunt, asserentes Verbum loco animæ in Christi carne fuisse, hi enim consequenter asserere debebantur unam naturam fuisse ex Verbo, & carne com-



compositam. Sed contra hunc errorem dicemus quæ 3. Fundamentum omnium istorum errorum fuit, quia non intelligebant unam personam esse posse nisi unius naturæ, nihil enim inter personam, & individuum naturam distinguebant; quia ergo in Christo unam personam confitebantur, divinam & humanam, inde ferebant unam in eo esse naturam, aliquo modo ex divina, & humana conflata. Ita colligitur ex Concil. Chalcedon. actione 1. & ex Patribus supra citatis. Præsertim ex Vigilio, Theodor. Damasc. & ex eodem Damascen. lib. 3. c. 3. & Gregor. Nyssæ. lib. de differentia essentia, & hypostasis, & D. Th. 4. contra gentes c. 33.

Dico primo, in Christo Domino post incarnationem duas permanisse naturas integras, & inconfusas, divinam videlicet & humanam. Est conc. de fide definita in Concil. Ephesi. I. & Chalcedon. præsertim act. 5. in 2. fidei definitione, in V. Synodo præsertim act. 1. & collatione 8. can. 8. & in VI. Synodo act. 11. 23. & 18. & Lateran. sub Martin. I. consultat. 5. a can. 4. usque ad 9. & in Lateranens. sub Innocent. III. quod habetur in c. firmiter extra. de sum. Trinitat. & fid. Catholi. & in Florent. in literis unionis, & in Toletan. 4. 5. & 11. & in Hispal. II. c. 13. ubi plura scripturæ testimonia congeruntur, & optime ex Leone Pap. Epist. 10. ad Flavian. & recipitur tanquam dogma fidei in citato edicto Justiniani Imperat. Secundo hanc veritatem probant late, & defendunt patres supra citati præsertim Gelas. Athanasius, Vigil. Justinus, Epiph. Damascenus & Theodor. in dialogo Inconfusus, qui plures refert, & Boet. lib. de duabus in Christo naturis contra Eutychæ. & Nestor. & Fulgent. lib. 1. ad Trasimundum. Tertio probatur breviter ex principiis supra positis in 2. disputat. nam filius Dei, seu Christus Dominus post incarnationem permansit verus Deus; mansit ergo in illo integra, & perfecta divinitas. Similiter permansit etiam verus homo; igitur veram, & integram humanitatem conservavit, quia verus homo vera humanitate constitui debet.

Et confirmatur ad hominem contra hæreticos. Illi enim fatentur, quia Christus est Deus, & homo, necessarium esse, ut ex duabus naturis subsistat. Sed essentialis ratio hominis, & Dei non minus requirit subsistere in vera divinitate, & humanitate, quam ex illis, quia homo, vel Deus, & univérse omnis substantia non constituitur, & denominatur talis essentialiter a natura, ex qua facta est, sed a natura, in qua subsistit, & quæ in re ipsa manet, quæ est quasi forma, & ratio, ut talis sit. Et ad hoc confirmandum est optimum testimonium Pauli ad Philip. 2. *Qui cum in forma Dei esset, id est, cum in divina natura subsisteret: Non rapinam arbitratus est esse se æqualem Deo, sed semetipsum exinanivit, non quidem amittens naturam Dei, sed formam servi accipiens, id est, naturam humanam, per quam est, in similitudinem hominum factus, & habitu inventus, ut homo.* Confirmari etiam hoc potest illis testimoniis, in quibus aliquando tribuuntur Christo proprietates, quæ illi conveniunt ratione divinitatis, ut esse imaginem, & figuram paternæ substantiæ, esse unum cum Patre, esse principium Spiritus sancti, & similia. Et illis, in quibus tribuuntur ea, ex quibus vera humanitas constat, ut caro, anima, sanguis, & similia, de quibus infra suo loco. Confirmant hoc etiam testimonia, in quibus nunc Christus dicitur æqualis Patri, nunc minor; hæc enim propter diversas naturas dici necesse est, quia per eandem naturam non potest esse minor, & æqualis, & ideo nunquam Spiritus sanctus dicitur minor Patre, aut Filio, quia nullam habet inferiorem naturam. Tandem Divinitas Christi sæpe variis miraculis, & testimoniis Angelorum, & ipsius Dei patris declarata est, vera autem humanitas passione, & morte, & aliis humani corporis defectibus satis est comprobata. De hac probatione legatur Hilarius qui eleganter illam persequitur lib. 2. de Trinit. Ultimo arguitur ratione, quæ inter explicandum articulum D. Thom. sufficienter tradita est, & iterum in sequenti conclusione indicabitur.

Dico secundo: Terminus hujus unionis non fuit aliqua substantialis natura ex humanitate, & divinitate constituta. Est de fide, & probatur facile ex dictis. Primo, quia non potuit illa natura resultare ex duabus aliquo ex tribus primis modis in tribus primis erroribus indicatis. Primo, quia si utraque, vel altera natura esset

Suarez Tom. XVI.

in aliam commutata, Christus aut non esset verus Deus, aut non esset verus homo, aut neutrum esset. Imo nec Patri, nec nobis consubstantialis intelligi posset. Secundo, quia necessarium esset divinam naturam fuisse aliquo modo mutatam, ut circa literam D. Th. declaratum est. Tertio, quia Christus passus fuisset, & mortuus in illa unica natura, atque adeo non minus in divinitate, quam in humanitate. Quarto, quia non minus Pater, & Spiritus sanctus fuissent incarnati, quam Verbum, quia illa mixtio, vel confusio facta esset in natura communi omnibus tribus personis; hanc rationem tetigit Concil. Toletanum 6. in confess. fidei, cujus verba, prout in communibus exemplaribus habentur, mendosa sunt, & vix possunt intelligi, ex antiquo vero codice manu scripto sic emendari debent. *Solus filius suscepit humanitatem in singularitate personæ, non in unitate divina naturæ, id est, in eo, quod proprium est Filii, non quod commune est Trinitati, nam si naturam hominis, Deique, alteram in alteram confudisset, tota Trinitas corpus assumpsisset, quoniam constat naturam Trinitatis esse unam, non tamen personam.* Ultimo argumentatur Leo Papa, quia oportuisset humanitatem præstitisse ante unionem, quomodo enim aliter humanitas in divinitatem converti potuisset? Nec vero potuit illa una natura resultare ex duabus modo indicato in quarto errore, scilicet per compositionem, ut constat ex conciliis supra citatis, & ex iis, quæ statim afferemus solvendo ultimam objectionem, & ex rationibus sufficienter circa literam D. Th. explicatis.

Ad fundamentum errorum dicendum est late in sequentibus. Nunc breviter dicitur, naturam distingui aliquo modo a supposito, & ideo licet in Christo sit tantum unum suppositum, posse nihilominus illud in duplici natura subsistere. Sed contra primo. Quia Joan. 1. dicitur, *Verbum caro factum est*: sed hoc significat conversionem Verbi in carnem, sicut cum Joan. 2. dicitur, *aquam fuisse vinum factam*, significatur aquam fuisse conversam in vinum. Respondetur simili argumento probari posse Verbum conversum esse in peccatum, seu in maledictum, quia 2. ad Corinth. 5. dicitur, *eum, qui non noverat peccatum, pro nobis peccatum fecit*. Et ad Galat. 3. dicitur: *Factus pro nobis maledictum*. Sicut ergo inquit Athanas. epist. ad Epictet. dicitur pro nobis factum peccatum, id est, hostia pro peccato, non quia in peccatum conversum sit, sed quia carnem assumpsit in similitudinem carnis peccati, in quo hostiam offerre posset pro peccato: ita dicitur Verbum caro factum, non quia in carnem transit (*hoc enim impetratis est ultimum*, ut recte Chrysost. super Joan. dixit) sed quia carnem sibi in unitatem personæ copulavit, nam in universum loquendo, ut aliquod suppositum dicatur aliquid aliud fieri, non oportet, ut in illud mutetur, sed satis est, ut sibi uniat, vel acquirat formam, vel naturam. Sicut dicitur homo fieri sanus, non quia in sanitatem convertatur, sed quia sanitatem acquirit. Et Gene. 2. dicitur *homo factus in animam viventem*, & ad Hebr. 7. dicitur Christus *factus pontifex*, ac denique ad Philip. 2. dicitur factus *homo formam servi accipiens*: sic ergo (ut recte dixit Gregor. lib. 9. epist. 61.) *Verbum carnem dicimus factum, non immutando, quod erat, sed suscipiendo, quod non erat, nostra auxit, sua non minuit*. In illo autem loco Joan. 2. ex ipsa re, de qua agitur, & ex antecedentibus, & consequentibus colligitur aquam factam esse vinum per conversionem. Ex quo non fit, omnem similem locutionem eodem modo explicandam esse. Et juxta hæc obiter explicanda est, aliquorum Patrum locutio, quæ nobis hoc loco objici posset, quoniam videntur interdum dicere, ita Verbum carnem esse factum, sicut in Eucharistia panis fit Corpus Christi; sic enim Justinus Martyr Apologia. 2. pro Christianis inquit. *Quemadmodum per Verbum Dei caro factus Jesu Christus servator noster, carnem, & sanguinem pro salute nostra habuit, sic etiam per verbum precationis, & gratiarum actionis sacramentum ab ipso alimentum, quæ mutata nutrit nostras carnes, & sanguinem, illius incarnati Jesu carnem, & sanguinem esse didicimus*. De quo testimonio, & aliis dicemus late agentes de Eucharistia: nunc breviter comparatio in hoc solum posita est, quod sicut Verbum incarnatum veram carnem & sanguinem habuit, ita sub speciebus panis, & vini per consecrationem est vera caro, & sanguis Jesu Christi,

Obje. 1.

Locutio sanctorum.



ut ipsa Justinī verba manifeste declarant, unde similitudo in modo unionis, seu mutationis posita non est.

Objec. 3.

Sed contra secundo, quia sancti sæpe comparant hanc unionem cum conjunctione animæ, & corporis, ut videre est in Symb. Athanas. & in Leone Pap. epist. 11. ad Julian. Justinio Mart. in exposit. fidei, & Cyrill. epist. ad Monach. Ægypti. August. epist. 3. & 57. & tractat. 47. in Joan. circa finem: at vero anima, & corpus, ita conjunguntur, ut ex eis resultet una natura. Respondetur ex Damascen. lib. 3. c. 26. Cyrillo lib. de Incarnat. cap. 7. Athanas. Just. & aliis sanctis supra citatis, in exemplis, quibus hoc mysterium explicatur, non esse in omnibus exactam similitudinem quærendam, nulla enim reperiri potest, aliàs mysterium hoc singulare non esset, ut August. dixit epist. 3. ad Volusian. Quin potius ait Hila. lib. 10. de Trin. exempla, quæ ad hoc mysterium explicandum afferri solent, in pluribus esse dissimilia, quam similia. In exemplo ergo adducto in duobus tenet similitudo, primo, quod sicut corpus, & anima, quamvis diversæ animæ sint, in una persona conveniunt; ita divina, & humana natura quamvis distinctæ sint, in una persona copulantur; est tamen in hoc differentia, nam illæ sunt naturæ imperfectæ, & essentielles partes, & ideo non tantum unam personam, sed etiam unam naturam componunt, natura vero divina & humana sunt integræ, & perfectæ, quæ non possunt ad componendam unam naturam inter se immediate conjungi. Secundo tenet similitudo in hoc, quod sicut anima operatur per corpus, tanquam per organum sibi substantialiter conjunctum, ita divinitas per humanitatem; de qua similitudine in expositione art. 6. satis dictum est.

Objec. 3.

Sed contra tertio, quia Cyril. epist. ad Successum ita loquitur: *Non oportet intelligere duas naturas, sed unam naturam Verbi Dei Incarnatam*, quam locutionem comprobatur auctoritate Athanas. ut retulit Eustathius Beriti Episc. in Conc. Chalce. act. 1. circa finem, post ultimam Cyrilli epist. ibi recitatam, & ideo Dioscorus, cum a Catholicis Episcopis recederet, dixit in ultimis verbis illius actionis, se sequi sanctos patres Cyrillum, Athanas. & Greg. qui semper unam naturam Verbi incarnatam, & non duas post adunationem docuerunt. Respondetur breviter duas esse partes in illa locutione. Prima est absolute negans in Christo duas naturas, & hæc nunquam est apud Cyril. sed ab hæreticis vel imposita illi est, vel male intellecta, passim enim Cyril. in suis operibus duas naturas prædicat sine confusione, ut videre est lib. de Incarn. unigeniti c. 12. & epist. 1. ad Success. & epist. 28. ad Joan. Antioch. quæ in dicta actione prima Concilii Chalcedonensis recitatur, & in ea indicat Cyril. quoddam hoc sibi imposuisse, quos insanire dicit. Unde, cum aliquando Cyril. duas videtur negare naturas, non absolute, sed cum adjectione negat, scilicet, ita ut sint personaliter disjunctæ, sive ita, ut *constituant alium, & alium, hominem & Deum*, ut ipse loquitur epist. 2. ad Success. & eodem sensu loquitur Athanas. lib. de incarnatione Christi & idem in Cyril. epist. 30. ad Eulogium, Sic etiam lib. 1. de fid. ad Reg. circa principium negat duas, alteram, quæ adoratur, & alteram, quæ non adoratur, semper enim in hujusmodi locis contra Nest. agit. Altera pars illius locutionis Cyrilli est affirmans unam naturam Verbi Dei incarnatam, & hæc reperitur interdum apud Cyril. citatis locis, & epist. 29. ad Acacium, & 30. ad Eulogium, ubi inquit. *Una est natura Verbi, sed illam dicimus incarnatam*. Et primo exponitur in illo edicto Justiniani Imperatoris, naturam ibi pro substantia sumptam esse, pro qua expositione citantur verba Cyrilli. epist. 1. ad Success. dicentis. *Quantum ad videndum oculis animæ, quemadmodum incarnatus est unigenitus, duas naturas dicimus: unum autem filium Dominum Deum Verbum incarnatum*. Clarius hoc indicat idem Cyril. in lib. ad Evoptium in defensione secundi anathematismi cum enim Theodo. ipsum reprehenderit, quod unionem secundum substantiam posuerit, quia videtur significasse mixturam divinitatis, & carnis factam esse, respondet Cyril. per unionem secundum substantiam, nihil aliud se significare voluisse, quam hoc solum: *Verbi naturam*, hoc est, substantiam, quæ est ipsum Verbum, vere humanæ naturæ unitam esse, citra ullam conversionem, &c. & aliis locis citatis eandem expositionem indicat. Unde Damasc. lib. 3. c. 6. cum

Cyrl.  
sententia  
de termino  
no unionis  
hypo-  
stasice.

ex sententia Cyrilli & Athanasii Verbi naturam incarnatam esse dixisset, subdit: *Cum Verbi naturam dicimus, Verbum ipsum significamus*. Idem tamen Damascen. infra cap. 11. hanc expositionem rejicit ex verbis ejusdem Cyril. epist. 2. ad Success. ubi Cyril. se defendit ab his, qui ipsum calumniabantur eo, quod unam Verbi naturam incarnatam diceret, quia non absolute unam, sed incarnatam dixerat, ut alteram, quæ incarnata est, alteram, quæ incarnata est, distingueret. Ex quo colligit Damascenus naturam non sumpsisse pro persona, quia, si de persona esset sermo, & simpliciter una dici posset, & non posset in alteram, & alteram distingui. Idque confirmat Damascen. qui naturam Verbi incarnatam dicimus, non autem passam, non ergo naturam pro persona accipimus, quia personam etiam passam dicere possumus, Secundo ergo exponitur, ut sensus sit, Verbi naturam propriam videlicet, & essentialem esse unam, illam vero post unionem esse incarnatam, id est, carni unitam, quod aliàs ipse dicit esse unam, tanquam incarnati Verbi, nam quia illa una natura idem est cum Verbo, non potuit Verbum uniri carni, quin natura illa manserit carni unita, & in hunc modum imposuit illam locutionem quinta Synod. collat. 8. can. 8. ubi per eam vocem, *Unam naturam incarnatam*, unionem naturarum secundum substantiam significatam esse dicit. Idem Concilium Lateranense sub Martin. can. 5. & Gelasius Pap. in lib. de duabus naturis, & Maxent. in professione suæ fidei, quæ habetur tomo 5. Bibliothec. Sanctorum, & Damascen. supra, qui in eandem sententiam refert Leontium Byzantium, & constat satis ex verbis, & locis Cyrilli. supra citatis, qui eodem modo loquendi usus est, ut Nestorium refelleret, qui abutebatur termino duarum naturarum, ut introduceret duo supposita, & ita ponebat duas naturas, non solum distinctas, sed etiam distinctas, & propria supposita constituentes. Quo sensu dixit etiam Athanas. lib. de Incarnat. Christi ante finem. *Neque duæ præfectitudines* (sic enim loquitur) *seorsum sunt constituendæ, neque secundum rationem augeſcentis virtutis, sed secundum rationem existendi sine defectu, ut unus utrumque sit per omnia Deus, & homo*: sic etiam Damascen. lib. de composita natura, & lib. 3. de fide c. 5. & 8. dicit in Christo multiplicari naturas secundum quantitatem discretam, licet persona una sit. Denique, quamvis de sensu Cyrilli satis constet, tamen quod ad usum illius locutionis pertinet, vitanda est assertio unius naturæ, nam licet propria natura Verbi, seu divinitas possit dici incarnata, ut ex dictis patet, & latius dicemus infra q. 3. art. 2. tamen unam naturam Verbi esse incarnatam, seu Verbum habere unam naturam incarnatam, simpliciter asserendum non est, nisi præmissa prius sufficienti explicatio- ne jam dicta.

### ARTICULUS III.

*Utrum terminus hujus unionis fuerit aliqua persona & ita incarnatio facta fuerit in persona.*

IN hoc tractandus est secundus principalis error hujus materiæ, qui duas in Christo constituens personas, vel hypostases, consequenter negavit unionem hanc terminatam esse ad aliquam personam, sed ad accidentalem unionem Dei ad personam Christi, seu personæ Christi ad personam Verbi. Hic fuit error Nestorii, qui hanc unionem dixit factam esse per singularem effectum, & excellentissima dona gratiæ, ratione quorum Christus singulari modo vocatur templum Dei, & filius Dei, ac Deus, non per essentiam, seu substantiam, sed per singularem quandam participationem, ut constat ex Concilio Ephesino, & variis epistolis, quæ in eo referuntur. Refert etiam Augustinus hæres. 89. & Damasc. lib. de hæresibus circa finem, Theodoret. lib. 2. hæret. fabul. cap. penul. Vincentius Lirinens. lib. contra prophanas vocum novitates, Liberatus in Breviario c. 4. Evagrius lib. 1. historiæ c. 4. Socrat. lib. 7. c. 32. Nicephor. lib. 14. cap. 31. Et ante Nestorium docuit hunc errorem Theodorus Mopsuestienus, teste D. Thom. 4. contragent. capite trigesimo quarto, & colligitur ex V. Synodo, collat. 4. 5. ubi referuntur libri Cyrilli

Error Nestorii, & aliorum.



Cyrilli contra hunc Theodorum, & posteriori fragmento ex lib. 2. id expressè afferitur, & in his, quæ referuntur ex libellis porreptis a presbyteris. Idem sumitur ex Joanne Maxentio: Professi fidei in tomo quinto Bibliot. & ex Damasceno lib. 3. cap. 3. Niceph. lib. 14. cap. 30. & 32. lib. 17. cap. 27. Imo ante hos semina hujus erroris jece-  
runt hæretici, qui Christum purum hominem esse dixe-  
runt, ut constat ex Athanasio in 1. tom. orat. quod unus sit Christus, ubi hunc errorem impugnat, & Irenæo lib. 1. c. 24. & 25. & Epiphano hæres. 28. & Ambrosio epist. 40. & lib. de incarnat. Dominicæ sacramento c. 6. ubi eundem refellit errorem. Item ex Eusebio lib. 4. hist. c. 7. Theod. lib. 2. hæret. fabul. a principio. Hos secuti sunt Artemon. Montanus & Theod. Byzantius, ut constat ex Niceph. lib. 4. c. 20. & 21. Euseb. lib. 5. c. 28. ubi addit Paulum Samo-  
satenum, & addere etiam possumus Photinum, Marcio-  
nem & similes, de quibus legi possunt Epiph. August. Damasc. Philastrius, & alii in Catalogo Hæret. Huic etiam hæresi adhæsit aliquando Theodo. ut ex actis Conci-  
lii Ephesini, & ex 5. Synod. act. 5. constat & ex objectio-  
nibus Theodo. contra anathemata Cyrilli, postea vero resipuit, ut patet ex Concil. Chalced. act. 1. post. epist. Theodosii, & Valentiniani ad Dioscorum, & ex eodem Theodoro lib. 4. hæret. fabular. c. penult. Ad hunc etiam errorem declinasse Petrum Gnapheum colligitur ex Damasceno lib. 3. c. 10. dicit enim eum addidisse quartam Trinitati personam, scilicet Christi hominis, & ideo addidisse in Trisagio illam partem, *qui crucifixus est pro nobis*, ut hunc divideret ab omnibus tribus personis. Addit vero Damascenus hunc etiam dixisse totam Tri-  
nitatem passam fuisse, & crucifixam, quod potius ad Nestorianam hæresim pertinere videtur, ut art. 1. nota-  
vimus; & ex multis, quæ in V. Synod. act. 1. referun-  
tur, videtur colligi in utrumque errorem declinasse prius forte in unum, & postea in alterum, ut videtur indicari in epist. Felicis Pap. Tertii ad Acacium, ubi illum de-  
ponit eo, quod hujus Petri errorem secutus est: fuit autem ille Eutychianus. Vel fortasse hic hæreticus simul dixit, Deum non vere ac substantialiter fuisse homi-  
nem, eo tamen modo, quo homo factus dicitur, & pro nobis passus, æque omnibus personis convenire. Hunc errorem secuti sunt postea Bonosiaci, sic dicti a Bonoso, ut refert Philastrius, & Prateol. & sumperunt ex Isidoro lib. 8. originum cap. 5. ubi tantum refert hos asseruisse, Christum esse filium Dei adoptivum, non naturalem, ex quo plane sequitur persoparum distinctionio. Unde idem Prateol. verb. Felix 2. eodem modo explicat Felicianam hæresim, quam Elipandus etiam locutus est, qui dixit Christum esse filium Dei adopti-  
vum, posuitque, ut ait Prateol. in Christo duas hypostas-  
es. Et eodem modo Jonas Aurelianus lib. 1. de cultu imaginum in principio, horum errorem reprehendens, ait, illius auctorem fuisse Nestorium, quem isti imitati sunt, & eodem modo explicant hunc errorem Anton. 2. par. titu. 14. cap. 1. §. 6. & Galisardus Arelatenf. in sua Chronogra. Anni 816. in Carolo Magno ait, in Con-  
cilio Francoford. damnatum fuisse Elipandum, qui personam Christi in duas dividebat, & tandem hoc tempore hunc excitasse errorem Lucam Sternberger Prateol. refert libro 10.

Secundo alii hæretici, ut invidiam superioris erroris evitarent, dixerunt, in Christo tantum esse unam personam, duo tamen supposita, vel hypostas. Ita refert D. Th. hic art. 3. & 4. contr. Gentil. c. 38. & alii schola-  
stici in 3. d. 6. qui nullum certum auctorem hujus erroris referunt; sunt vero qui existiment ipsummet Nestorium, qui prius palam locutus fuerat, postea hoc modo dissimulasse, vel occultasse errorem suum. Quod ita esse colligitur ex Justiniano in edicto fidei suæ ad finem in 2. tom. Concil. ubi ait, Concilium Ephesinum damnasse, Nestorium dicentem unam personam, non tamen unam substantiam; & Joan. Maxentius in responsione ad epistolam, nomine Hormisdæ P. conscriptam, hunc errorem tribuit Dioscoro, eumque late declarat, nam quia Christus repræsentabat Verbi personam, & quia persona nomen est dignitatis, dicebat in Christo esse unam personam, quia fuit in illo una dignitas Verbi homini Christo communicata, quamquam Christus, & Verbum duo sint supposita, vel hypostas. Et fortasse Felix & Elipandus paulo antea citati, in hunc errorem  
Suares Tom. XVI.

lapsi sunt; nam, ut fertur, illi unam personam in Christo non negabant, sed aiebant, *hominem in una eadem-  
que Dei persona deglomeratum, atque carnis indumen-  
to indutum*: hæc enim verba in quadam confessione Elipandi leguntur in libro Gothico manuscripto, qui in Toletana Bibliotheca servari dicitur: unde, si verum est, Elipandum posuisse in Christo suppositum creatum, ut citati authores referunt, videtur sane prædicta Nestoriana fraude usus. Alii vero, ut idem Joan. Maxent. refert in 5. tom. Biblioth. in 1. suæ fidei professione, aliis verbis occultarunt hunc errorem, dicentes in Christo unam esse personam, & unam hypostasim, quas tamen inter se distinguebant & substantiam, vel hypostasim dicebant esse Verbi, personam vero hominis; forte, quia per accidentalem unionem dicebant Verbum quasi induisse personam hominis, vel quia in illa humanitate dignitas personæ Verbi repræsentabatur.

Poterant vero e converso substantiam homini tribue-  
re & personam Verbo, quia principalis dignitas erat Verbi. Fundamentum omnium istorum errorum fuit illud idem, quod in præcedenti dubio indicavimus. Cum enim omnes isti hæretici non distinguerent inter personam, & naturam, & in Christo crederent esse duas naturas integras, & perfectas, necessarium existima-  
runt duas in illo ponere personas, vel hypostas.

Dico primo: In Christo Domino, vero Deo, & homine, tantum est una persona ex duabus, & in duabus naturis subsistens. Est de fide definita præcipue in Concil. Ephesino ad hoc maxime congregato, & postea in Concil. Chalcedonenf. act. prima, & in V. Synod. collat. 8. can. 2. & in omnibus aliis supra citatis, & in Symbolo Athanas. ubi dicitur: *Perfectus Deus, perfectus homo ex animarationali, & humana carne subsistens*; & infra: *sicut anima & caro unus est homo, ita Deus & homo unus est Christus*; unde in consecratione Episcoporum, cum ab eis petitur professio fidei, interrogantur: *Credis filium Dei Christum in duabus naturis, & ex duabus naturis subsistentem?* Et respondent, *credo*, ubi per priorem particulam in duabus naturis fit professio fidei contra errorem Eutychetis, per posteriorem vero, scilicet, *ex duabus naturis*, fit contra hunc errorem Nestorii, qui ex sola humana natura Christum subsistere dicebat; & ita ubicumque Concilia, aut patres alterum errorem reprehendunt, alterum etiam condemnant, ut videre est in omnibus supra citatis, præsertim in Leone Papa, & in illo edicto Justiniani, & in Cyrill. fere toto 4. tomo suorum operum, maxime in 12. anathematismis, & in eorum defensionibus, Damascen. lib. 3. fidei c. 3. 4. 12. & aliis. August. lib. 1. de Trini. c. 13. lib. 13. c. 17. & in Enchiridio c. 35. & 36. *Christus* (inquit) *Deus & homo, Deus, quia Deus erat Verbum, homo, quia in unitatem personæ accefferit Verbo anima rationalis, & caro*; & epist. 120. c. 4. explicat, quam sit Christus altiori modo filius Dei, quam nos, cum ille sit naturalis, nos vero adoptivi: & hujusmodi testimonia & passim reperiuntur in patribus, & in sequentibus frequenter occurrunt. Præcipuum vero hujus fidei fundamentum sumitur ex illis Sacræ scripturæ locis, in quibus unus, & idem a parte rei existens dicitur verus Deus, & homo, & quæ in uno loco Scripturæ dicuntur de vero Deo, in alio dicuntur de vero homine. Ac denique per has particulas, *Hic, ille, ego, qui*, & similes demonstratur in indivi-  
duo idem Deus, & homo: hæc autem vera esse non possunt, nisi de eadem persona, quæ sub utraque natura subsistat: sed hujusmodi testimonia indicata jam sunt in secunda disputatione. Nunc sufficiat illud Joan. 1. *Verbum caro factum est*. Verbum enim quoddam singulare suppositum significat, & illud ipsum dicitur factum caro, quod non potest dici propter solam inhabitationem in carne tanquam in templo, nec propter aliquam specialem gratiam, vel favorem, quam ipsum Verbum carni concefferit, sicut non dicitur Spiritus sanctus fieri mulier, vel mater Dei, licet in ea singulari quodam modo habitaverit, illamque specialiter dilexerit; dicitur ergo *Verbum caro factum*, quia carnem suæ substantiæ univit. Explicatur amplius vis horum testimoniorum, nam cum verbigratia Apocalyp. 1. dicit Christus: *Ego sum a, & o*, vel Joann. 8. Antequam Abraham fieret ego sum, illud, *Ego*, ex vi significationis suæ accipitur pro supposito, quod est, hic homo; ergo idem suppositum, quod ante Abraham existerat in pro-

In Chri-  
sto una  
tantum  
persona in  
duabus  
naturis  
subsistens.



pria natura, nunc est hic homo, & cum priorem naturam non amiserit, fit, ut idem in duabus naturis subsistat. Et confirmatur secundo, nam cum in Scriptura hic homo Christus dicitur Deus, vel Deus sumitur improprie, & participatione quadam, & hoc est manifeste contra scripturam, ut in superiori loco ostensum est; vel Deus sumitur pro vero Deo, tamen copula, *Est*, sumitur abusive, ut sensus sit: *Est Deus*, id est, conjunctus vero Deo, vel habet in se Deum, aut alius similis, & hoc modo exponere est evertere fidem, sic enim, cum Spiritus sanctus, aut Verbum dicitur esse Deus, posset illa copula abusive exponi dicto modo. Deinde quilibet homo iustus posset dici verus Deus, unde in hoc non esset differentia inter Christum, & alios sanctos homines, vel angelos, nisi fortasse secundum aliquam majorem affluentiam divinorum donorum, cum tamen Paul. ad Heb. 2. singulariter dicat, filium Dei, non Angelos, sed semen Abraham apprehendisse. Deinde, cum idem Christus, aut Verbum dicitur homo in Scriptura sacra, posset etiam id abusive exponi: nam cum utrumque scilicet Deus, & homo æque de illo in Scriptura dicantur, absurdum, & voluntarium est, alterum abusive, alterum proprie intelligere. Quod si etiam concedatur Christum, aut Verbum improprie dici hominem, ruit nostra fides, sic enim dici etiam posset Christum non esse vere hominem, sed apparere, & e contrario Verbum posset dici non solum homo, sed etiam humanitas, abusive explicando, quia habet humanitatem.

Unicus ergo superest verus sensus, ut scilicet proprie idem Christus dicatur Deus, & homo, quod non potest esse verum, nisi ratione unius personæ ex duabus, & in duabus naturis subsistentis. Quod explicatur, & confirmatur tertio, quia duæ formæ, quæ in abstracto non prædicantur de se invicem, neque etiam prædicantur in concreto, nisi propter conjunctionem in eodem supposito, ut in calore, & luce videre est; sic autem se habet in proposito humanitas, & divinitas, quia una non est altera, & tamen Deus est homo, & homo Deus; ergo id est propter conjunctionem talium formarum, seu naturarum in eadem persona. Et simile argumentum est, quod duæ substantiæ integræ accidentaliter unitæ non se denominant substantialiter, sed denominative tantum, ut homo dicitur vestitus, non vestis; at vero in proposito, denominatio est substantialis, dicitur enim Deus homo, & non tantum humanatus; & homo Deus, & non tantum Deifer, ut Nestorius dicebat. Quam rationem cum alijs explicuimus circa litteram D. Th. art. 2. Ultima ratio sumitur ex alio principio fidei, scilicet solum Dei Verbum factum esse hominem, non vero Patrem, nec Spiritum sanctum, quod esse verum non posset, si per consensionem tantum voluntatum unio facta esset, aut per eximiam aliquam gratiam, aut solam conjunctionem causæ vel organi ad miracula efficienda, aut alio simili modo, cum omnes hæ uniones includant æqualem habitudinem ad omnes tres divinas personas, a quibus efficiuntur hæ omnia per naturam, & voluntatem omnibus communem.

Fortasse tamen diceret Nestorius Incarnationem tribui peculiariter Verbo, quod videlicet ille homo Christus speciali ratione ipsum representaret, sicut Patres communiter dicunt, interdum Verbi personam peculiariter antiquis patribus apparuisse humana specie, quia apparitiones illæ ad representandum Verbum ipsum potissimum fiebant, licet efficientia esset communis toti Trinitati. Sed hoc in primis evertit veritatem Incarnationis, & illam in sola quadam representatione constituit. Deinde solum secundum quandam appropriationem accommodat Incarnationem Verbo, non vero secundum veritatem, & proprietatem, cum tamen re vera solum Verbum caro factum sit. Denique, si in antiquis illis apparitionibus fiebat singularis Verbi representatio, id fuit, quia significabant Verbum in carne venturum esse; ipsa ergo Verbi Incarnatio, jam non in representatione aliqua, sed in rei veritate atque proprietate consistit.

Dico secundo: Sicut in Christo una est persona ex duabus, & in duabus naturis, ita & una hypostasis, seu suppositum unum. Conclusio est de fide, solumque eget vocum explicatione; olim enim dubitatum fuit inter Latinos de nomine hypostasis, an naturam, vel suppositum significaret, ut videre est in Hieronym. tomo 2. epist. 57. ad Damasum; postea vero satis constitit significare sup-

positum, ut ex Concilio Alexandrino refert Nicephorus, lib. 10. histor. c. 15. Socrates lib. 3. c. 7. tractatque late Basil. epist. 49. & Greg. Nyssenus lib. de differentia essentiarum & hypostaseos, Acatius in epist. ad Cyrill. quæ est 15. inter epistolas Cyrilli, & optime Nazianz. orat. 21. circa finem, ubi refert Athanasius ita vocem hypostaseos explicasse, eandemque esse Damasi definitionem dixit Flavian. apud Nicephorum lib. 12. histor. c. 4. & colligitur ex professione fidei ejusdem Damasi ad Paulinum, quam idem Nicephorus refert lib. 12. c. 18. ubi enim Latine est vox *subsistentia*, Græce habetur *ὑπόστασις*. De qua voce, & etymologia ejus plura traduntur in disputationibus metaphysicis, quas propediem in lucem dabimus. Ex hac ergo nominis expositione constat, hanc conclusionem eidem testimoniis, & definitionibus, quibus prima, esse probandam quia persona idem est, quod suppositum, vel hypostasis, solumque addit, quod sit in natura rationali; unde si in Christo essent duo supposita, cum utrumque esset rationalis naturæ, duæ plane personæ essent, ut recte D. Th. argumentatus est. Ad definiendam igitur expressius hanc veritatem, atque errorem supra citatum repellendum, Concilia addunt unionem factam esse, non secundum dignitatem, sed secundum subsistentiam, quæ Græce *ὑπόστασις* dicitur, & specialiter in canon. 4. Concilii Ephesini sicut una persona, ita una subsistentia seu hypostasis definitur, & canone secundo dicitur unio facta secundum subsistentiam. Idem V. Synod. collat. 8. can. 5. & 8. Neque oportet alias probationes, vel rationes multiplicare, cum ex dictis tam hic, quam circa litteram S. Thom. satis hæc consistat.

Ex quibus satis etiam constat, ita esse Christo unam personam, & unum suppositum, ut illa inter se numquam distinguantur, sed unum, & idem sint; nam si persona est, necessario debet esse suppositum, quod si suppositum, idque in natura humana, vel divina, necessario etiam erit persona: sicut ergo personæ, vel supposita in Christo non multiplicantur, ita neque suppositum, & persona distinguuntur. Solum est advertendum Sanctum Bonavent. in 3. distinct. 6. art. 1. q. 1. explicare sententiam distinguentem in Christo suppositum a persona, ut nomine suppositi non intelligat id, in quo substantiatur totum esse rei (ut ipse loquitur), sed id, quod subicitur generi, vel speciei, ut hoc modo humanitas possit dici suppositum. Sed hic est abusus nominum: nam suppositum formaliter, & proprie subsistentiam communicabilem significat, quæ in Christo distincta non est personalitate divina; imo si proprie de genere, & specie loquamur, quod in Christo subicitur speciei, & generi, est ipsa persona incarnata, non enim humanitas est homo, sed Christus, seu persona.

Dico tertio: terminus hujus unionis est aliqua persona. Hæc assertio aperte ex præcedentibus sequitur, estque omnium communis, & omnino certa, quam colligit Cajetan. infra art. 1. ex verbis Angeli Luc. 1. *Quod ex te nascetur sanctum, vocabitur filius Dei*, quod enim Beata Virgo concepit, & peperit, id est terminus resultans per incarnationem: concepit autem, & peperit personam filii Dei, ut subsistentem in humanitate: illa ergo persona, ut sit, fuit terminus hujus unionis. Ratio vero probatur. Primo, quia ostensum est terminum resultantem ex hac unionem esse substantiam aliquam, & non fuisse aliquam naturam; ergo necesse est fuisse personam, supponimus enim unionem hanc esse propriam Verbi, atque ita in essentiali subsistentia factam non esse. Secundo per hanc unionem resultat Christus, quia nec Verbum per se, nec humanitas per se potest dici Christus, & ex unionem horum extremorum resultat hic homo, scilicet Christus: sed hic homo Christus dicitur quandam personam divinam, & humanam, id est, in utraque natura subsistentem; ergo hæc persona, ut sic, est terminus resultans per hanc unionem. Denique, terminus in nobis resultans ex conjunctione naturæ cum sua subsistentia, est persona, vel suppositum; sed hæc unio fuit in Christo loco illius, quæ in nobis est inter naturam, & subsistentiam creatam; ergo.

Contra hanc vero conclusionem sentit Durand. in 3. d. 5. q. 2. quia terminus, inquit, actionis non præexistit actioni. Sed persona Christi supponitur incarnationi, non est ergo terminus. Et ideo ipse non agnoscit alium terminum præter unionem naturæ assumptæ ad personam assumptam. Sed quamvis fortasse in modo lo-

Personæ  
& suppo-  
situm in  
Christo  
idem.

30 Christi  
una tan-  
tum hy-  
pothesis.



loquendi a nobis differat, temere tamen loquitur, & sine fundamento: nam eadem persona, quæ secundum se, & ut subsistit in una natura, supponitur assumptioni, ut terminans aliam naturam, & ut constituens eum illa hunc hominem, vel potius hic homo, ut est persona constituta ex humanitate, & personalitate divina, resultat per unionem. Quin potius fieri non potest, ut per actionem incarnationis sit facta nova unio, quin illa ultimo terminetur ad aliquid unum, quod in proposito est aliquid subsistens incommunicabiliter in humana natura, quod est esse personam: Denique contra veritatem Catholicam his conclusionibus definitam obijci possunt multa, quæ pertinent ad difficultates hujus mysterii explicandas, quæ commodius tractabuntur disputatione sequenti, ubi magis etiam explicabimus, quomodo hæc unio substantialis, & personalis sit,

## SECTIO IV.

*Utrum terminus hujus unionis sit persona simplex, vel composita.*

**R**atio dubii oritur ex fine præcedentis sectionis, quia simplex persona Verbi supponitur ad hanc unionem; non ergo ut sic, potest esse terminus resultans per illam. In contrarium vero est, quia si aliqua persona composita esse debet terminus hujus unionis, oportet, ut illa ex Verbo & humanitate componatur. Hoc autem videtur impossibile, repugnat enim Verbo, venire in compositionem, hoc enim imperfectionem includit, quia componentia habent rationem partium, & seque invicem perficiunt, sunt tamen natura sua ordinata ad totum componendum. Adde, quod esse totius compositi ex componentibus resultat, quæ quidem Verbo divino convenire non possunt; ergo,

In hac re Theologi communiter recusant concedere simpliciter, & absolute terminum hujus unionis esse personam compositam, aut unionem hanc esse veram, & propriam compositionem, ut videre est in Magistro 3. distin. 6. in D. Thom. q. 2. art. 3. Bonavent. art. 1. q. 2. Richard. art. 2. q. 3. Scot. q. 3. Gabr. q. 1. artic. 3. Durand. q. 3. Almain. q. 1. concl. 2. Marfil. q. 6. artic. 3. dub. 3. Alexand. Alenf. 3. p. q. 6. memb. 2. art. 5. Cajetan. hic art. 4. & 1. p. q. 3. art. 8. qui sentiunt compositionem absolute dictam in suo formali conceptu dicere imperfectionem in utroque componente, atque ideo repugnare Verbo divino. Addit Cajetan. si non sit sermo de compositione simpliciter, sed aliquid addatur, quo denotetur imperfectionem excludi, sic posse concedi, ut si dicamus esse personam ineffabiliter compositam, vel aliquid simile. Sed fortasse de modo loquendi est tantum controversia, nam res inter Catholicos facile constare potest,

**Terminus unionis hypostaticè non est omnino simplex.** Primum enim certum est, terminum hujus unionis, scilicet, qui per illam resultat, non esse omnino simplicem, sicut est persona Verbi secundum se sumpta. Hoc evidenter probat ratio dubitandi in principio posita, quia hic terminus non est persona Verbi secundum se, nec pro ut subsistit in sola divinitate, in Christo autem nihil aliud est omnino simplex, nisi ipsa persona Verbi secundum se. Et confirmatur, nam terminus hujus unionis ut sic resultavit, seu incepit esse in tempore. Sed nihil, quod hujusmodi est, est omnino simplex; ergo. Denique hic terminus resultat ex unione plurium rerum distinctarum; ergo non potest esse omnino simplex. Si enim sola significatio vocis consideretur, ipsum nomen unionis opponitur perfectæ simplicitati, si proprie de unione sit sermo, tum quia quæ uniuntur, non sunt idem, tum etiam, quia minus esse unita, quam esse unum, ut circa literam D. Thom. expositum reliquimus.

Secundo hinc evidenter fit, terminum resultantem per hanc unionem esse aliquid unum constans, vel constatum ex multis. Hoc patet ex dictis, & præterea explicatur, quia ille terminus est hic homo Christus, ut sic. Sed hic homo, seu Christus includit humanitatem, & subsistentiam Verbi, utramque intrinsece, & aliquo modo constituentem ipsum, scilicet subsistentiam tantem esse hypostasis, vel personæ, & humanitatem tandem esse hominis; ergo. Unde in Symbolo Athanas. Christus dicitur esse unus constans ex divinitate, & humanitate, sicut homo est unus constans ex corpore, & anima. His

ergo in re ipsa existentibus certis solum superesse videtur quæstio de modo loquendi, an hic terminus, qui est unus per adunationem plurium rerum, sit dicendus simpliciter compositus.

Dico tertio, absolute dicendum esse, terminum resultantem per hanc unionem personam compositam esse. Hæc est sententia D. Thom. hic art. 4. & videtur expresse diffinita in V. Synod. Act. 8. can. 4. *Si quis non confitetur unionem secundum compositionem, &c.* & infra. *Unam subsistentiam compositam.* Idemque repetit can. 7. & in VI. Synod. Act. 4. epist. 1. Agath. hæc definitio probatur in Act. 11. epistol. Sophronii, & Act. 13. cap. 6. & Concil. Lateran. sub Mart. 1. consult. 4. ubi confirmantur Synodi Ephesinæ, & quintæ Synodi, & consult. 5. cap. 17. condemnat eos, qui ea, quæ de Christo in iis Conciliis sunt definita, negant proprie, & secundum veritatem dicta esse; & ibidem can. 6. definit proprie, & secundum veritatem: *In duabus, & ex duabus naturis subsistere*, qui modus loquendi frequens est in dictis Conciliis, & patribus infra citandis: illa vero particula, Ex, plane designat compositionem. Secundo ita loquuntur etiam patres: Dionys. cap. 1. de divin. nom. ante medium: *Ex qua*, inquit, *ineffabiliter est compositus*; & cap. 3. de Eccles. Hierar. part. 3. circa finem: *Unum*, inquit, *illud & simplex ad compositum, atque visibile sine immutatione sui per summam clementiam, benignitatemque processit*. Damascenus lib. 3. cap. 3. 4. 5. & 7. sæpe id repetit, Gregor. Homil. 38. in Evang. Athanas. id ut clarum supponit oratione, Quod unus sit Christus, circa principium. Petrus Diacon. de Incarnatione, & gratia, cap. 3. *A sanctis*, inquit, *Patribus adunatione divinitatis & humanitatis, Christus Dominus compositus predicatur*. Quod dicit fuisse definitum in Concil. quodam Antioch. contra Paul. Samosat. cujus fragmentum habetur 1. tom. Concil. ex Euseb. lib. 7. cap. 22. Alii patres, licet non aperte utantur nomine compositionis, aliis tamen, quæ perinde esse videntur, utuntur, ut adunationis, copulationis ex duobus, conjunctionis, ut est apud Chrysost. hom. 10. Joan. Justin. lib. de vera fidei expositione circa finem, Cyrill. epist. ad Nestor. & sæpe alii, Nazian. orat. 24. non longe a principio commissionem etiam vocat, & orat. 42. vocat novam mixturam, & admirandam temperationem. Sic etiam Tertul. de carne Christi dicit, in Christo esse hominem mistum Deo. Idem fere Hilar. lib. 2. de Trinit. circa fin. & August. epist. 3. ad Volusian. *Sicut homo*, inquit, *est mixtura corporis, & anime, ita, &c.* & 4. de Trinitat. cap. 13. inquit: *Dei Verbo ad unitatem commissus homo est*. Quæ tamen locutiones, quæ mixturam indicant, seu missionem, non sunt extendendæ, sed pie explicandæ: a Patribus enim solum sunt usurpatæ ad explicandam veritatem hujus compositionis. Ultimo ut oratione sumpta ex dictis, & ex Basil. lib. 2. cont. Eunom. circa finem, ubi definit compositum esse, quod ex diversis rebus constat; sed Christus Dominus, quatenus est terminus resultans per hanc unionem, est vere unus constans ex multis rebus; ergo vere compositus. Confirmatur primo; quia terminus hujus unionis non est simplex, ut ostensum est; ergo compositus: nam hæc duo immediate, & contradictorie opposita sunt. Secundo confirmatur, quia magis compositus est Christus, ut est hic homo, quam sola humanitas, quia Christus intrinsece includit humanitatem, & aliquid aliud; ergo.

Tertio, quia terminus hujus unionis est aliquid unum, ut ex ipsa nomine unionis per se notum est; & non est unum simplex, quia hoc repugnat unioni: ergo compositum: & non per accidens, quia est unum simpliciter, ut infra, quæst. 17. late dicitur, & constat ex V. Synodo Act. 8. can. 1. & sequentibus; est ergo unum compositum per se ac substantiale, & non est una natura: ergo una persona composita.

Dico quarto. Hæc compositio proxime intercedit inter subsistentiam Verbi, & humanitatem, & consequenter est compositio duarum naturarum in una persona. Declaratur & probatur prior pars, nam per incarnationem, quæ unica est actio, & per se unitiva unius cum alio, proxime & immediate unitur humanitas subsistentiæ Verbi: ergo compositum, quod per illam resultat, ex his duobus extremis proxime & immediate componitur: ergo compositio ipsa proxime intercedit inter humanitatem & subsistentiam Verbi. Sed dicunt aliqui subsistentiam

Compositio h. q. inter subsistentiam divinam & humanitatem immediate unitur naturam humanam & divinam mediatam est. Quorundam mens.



nam Verbi præcise & in abstracto sumptam non esse alterum extremum, cui humanitas unitur, sed esse quasi formale medium, quo humanitas trahitur ad personam Verbi. Unde ajunt, proprius & verius dici, hanc compositionem fieri immediate ex Verbo & humanitate, quam ex subsistentia Verbi & humanitate, quia Verbum revera est alterum extremum quod hujus unionis, quæ hypostatica est, & ideo immediate fit in persona Verbi, & non in natura divina, nisi quatenus Verbum in illa subsistit; & ideo Verbum ipsum est, cui altera natura immediate conjungitur; & ideo dicitur esse unum extremum quod hujus compositionis: personalitas autem Verbi non est extremum quod, seu cui humanitas unitur, sed est quasi vinculum seu medium, quo humanitas trahitur ad personam Verbi; & ideo non dicitur propria compositio esse ex subsistentia Verbi, & humanitate. Sicut albedo, v. g. dicitur inherere quantitati ut quo, quia per illam inheret substantiæ; & ideo non fit proprie compositio ex albedine & quantitate, sed ex albedine & substantia.

*Improbatur.* Sed hæc falsa sunt, & sine fundamento dicta, nulla est enim ratio distinguendi in hoc negotio inter Verbum, & subsistentiam Verbi. Primum quidem, quia re sunt non solum idem ut Verbum & divinitas, sed etiam adæquate & convertibiliter idem, ita ut neque inter se distinguantur, neque in re unum distingui possit ab alio, a quo alterum non etiam distinguatur: ergo non potest in re unio fieri ad Verbum tanquam propria ejus, quin fiat proxime ad subsistentiam Verbi, neque e converso, quia hic agimus de compositione, prout in re facta est. Nec modus noster concipiendi personam Verbi in concreto, vel personalitatem in abstracto quicquam refert, ut unum potius quam aliud concedatur; imo, si formalissime loquamur, subsistentia ipsa relativa Verbi fuit proxima ratio terminandi hanc unionem, ut infra ostendemus; & illi formalissime & proxime facta est unio. Neque est verum, illam subsistentiam ita esse vel potius considerari secundum rationem, ut medium quo respectu Verbi, quin etiam sit vere unita & conjuncta humanitati, & solo ea ratione non tantum sit quo, sed etiam quod unitur: sicut punctum continuans partes lineæ non solum est, quo illæ uniuntur, sed etiam ipsum est, quod unitur utrique extremo tam vere ac proprie, sicut punctum terminans lineam unitur illi: sic ergo divina & humana natura uniuntur inter se media subsistentia, quatenus humanitas ipsi subsistentiæ vere unitur, & hoc est, quod indicant Concilia, cum dicunt, hanc unionem esse secundum subsistentiam. Imo, etiam generatim loquendo, nullum est medium quo conjungens duo extrema, quod non sit unitum ipsis extremis, nisi fortasse sit ipsa formalis unio: subsistentia autem Verbi non est formalis unio, ut per se constat, & infra dicitur: ergo non potest concipi, ut vinculum uniens duas naturas, seu Verbum cum humanitate, nisi quatenus ipsa per se ipsam proxime unita humanitati concipitur. Major inductione facile ostendi potest, & ratione, quia, seclusa unione formali, omne aliud uniens duo extrema non potest esse aut concipi, nisi ut quoddam tertium, in quo illa uniuntur, & consequenter necesse est, ut prius & quasi propinquius secundum rem vel rationem illi uniantur. Exemplum autem de quantitate secundum veram doctrinam potius confirmat, quod dicimus, nam albedo, verbi gratia, ita inheret substantiæ media quantitate, ut cum illa faciat realem unionem & compositionem; ut latius infra in materia de Eucharistia declarabimus, nam ex illo mysterio sumitur sufficiens hujus rei argumentum, nam, sublata substantia, manet albedo unita quantitati, veramque compositionem cum illa facit, cum tamen nec novam acquirat, nec immutet, quam antea habebat. Idemque dicendum est de visione, verbi gratia, intellectione, & similibus, quæ per potentias suas dicuntur inesse substantiæ, nam proxime & immediate uniuntur ipsis potentiis, easque informant. Qui autem contenderet, quantitatem ita esse medium, quo qualitas inest substantiæ, ut non sit id, cui immediate albedo unitur, consequenter dicere deberet, quantitatem non esse proprium ac formale vinculum, seu medium esse veluti dispositionem prærequiritam in substantia, ut possit qualitatem recipere, qua dispositione supposita, qualitas & substantia inter se immediate uniuntur per formalem unionem eis superadditam; sicut, qui dicunt,

quantitatem vel alias dispositiones prærequiri in materia, ut recipiat formam substantialem, non dicunt eas dispositiones esse vinculum, quo uniuntur materia, & forma, sed illas præsupponi, ut hæc inter se proxime uniantur. In hoc autem sensu exemplum illud nihil præsentis negotio deserviret, quia negari non potest, quin subsistentia Verbi sit vinculum utriusque naturæ, & quo formaliter Verbum humanitati copulatur; est ergo hæc compositio proxime ex subsistentia Verbi & humanitate, sive nomine subsistentiæ hypostasim intelligamus juxta frequentiore usum Conciliorum, sive formaliter & abstracte ipsam rationem subsistendi Verbi: nam de utrisque etiam, ut ratione distinguuntur, est vera locutio, de uno, scilicet de Verbo, ut extremo totali; de altero, scilicet personalitate, ut extremo formali, quod tamen vere etiam unitur humanitati.

Posterior pars conclusionis facile ex dictis declaratur, *Probat* nam persona Verbi per se & essentialiter includit divi- *ultima* nam naturam; & subsistentia Verbi, quantumvis abstra- *conclu-* ctæ & præcise concipitur, re ipsa intrinsece & essentiali- *tionis* ter includit totam divinitatem, & ideo hoc ipso, quod *pari.* Christus proxime componitur ex subsistentia Verbi & humanitate, fit etiam compositus ex duabus naturis unitis in eadem subsistentia, cujus compositionis extrema sunt duæ naturæ, quæ distinctæ manent, & inconfusæ, vinculum autem est ipsa subsistentia, ut explicari potest exemplo supra adducto de arbore, in cujus radice vel trunco duo rami uniuntur. Est tamen differentia notanda in hoc exemplo, & in omni alio simili, quia in omni compositione duorum extremorum in uno tertio, quodlibet extremorum per se sumptum facit compositionem cum tertio, quia ab illo distinguitur: at vero in hac compositione sola humanitas distinguitur a persona verbi, & ideo in hoc mysterio non est alia compositio præter eam, quæ proxime fit ex humana natura & subsistentia Verbi: conjunctio autem duarum naturarum in una persona non addit aliam compositionem, sed solam simplicem unitatem personæ Verbi cum sua propria natura.

Hinc facile solvitur, si quis objiciat, nam tres personæ divine, licet inter se realiter distinctæ sint, & uniantur in eadem natura, non propterea aliquid unum componunt: ergo e contrario, licet duæ naturæ uniantur in una persona, non inde resultabit aliquid compositum. Negatur enim similitudo, divinæ enim personæ non proprie uniuntur in natura, sed sunt prorsus idem cum sua natura, & in ea sunt unum, & ideo in ea non faciunt compositionem, neque inter se uniuntur, ut aliquid component, ut recte August. 1. 1. de Trinitat. cap. 10. At vero in hoc mysterio duæ naturæ non sunt unum cum persona, altera enim natura, scilicet humana, distincta est, quæ per compositionem unitur personæ, & ita resultat persona composita ex duabus naturis subsistens.

Dices: cur ergo Concilia frequentius explicant hanc compositionem per extrema duarum naturarum, semper enim dicunt, Christum esse compositum ex duabus naturis in una subsistentia, cum compositio hæc non proxime inter naturas, sed inter Verbum seu subsistentiam Verbi & naturam humanam versetur? Respondetur, Concilia utroque modo solere hujusmodi compositionem declarare, quia & in re una tantum est, ut diximus, & uterque modus illam explicandi deservit ad confutandos illos errores huic mysterio contrarios, quod facere intendunt Concilia. Unde in V. Synod. collat. 8. can. 3. sic legitur. *Si quis non confiteatur unitatem Verbi Dei ad carnem animatam anima rationali & intellectuali, secundum compositionem, sive secundum subsistentiam factam esse, sicut sancti Patres docuerunt, anathema sit.* Et inferius dicitur, Eutychem posuisse unionem secundum confusionem, Nestorium tantum secundum affectum: *Sancta vero Ecclesia (dicitur) utriusque impietatem rejiciens, unionem Dei Verbi ad carnem secundum compositionem confiteatur.* In quibus verbis plane explicatur hæc compositio inter Verbum seu subsistentiam Verbi & humanitatem: infra vero can. 7. dicit Synodus, Christum esse compositum ex duabus naturis, & can. 8. utroque modo compositionem declarat.

Ex dictis inferre possumus primo contra Durandum in 3. d. 6. q. 3. hanc compositionem non solum esse unius cum alio, sed etiam unius ex multis. Distinguit enim ibi Durandus duplicem compositionem, unam vocat *Primum* *hujus*

*Probat*  
*ultima*  
*conclu-*  
*tionis*  
*pari.*

*Occurrit*  
*ur objec-*  
*tioni.*

*Replicat*  
*ur satis.*

*Constat*  
*ria ali-*  
*quot.*



*hujus ex his*, ut est humanitatis ex anima & corpore; aliam appellat, *hujus ad hoc*, ut est accidentis ad subiectum: subiectum enim non confurgit ex compositione accidentis, sed accidens cum illo componitur, seu illi adjungitur. Ait ergo, personam Christi non esse compositam priori modo, sed tantum hoc posteriori, quia, quod est priori modo compositum, pendet ex componentibus, & est posterius illis, quod de persona Verbi non potest. Sed nihilominus negari non potest, quin in hoc mysterio interveniat compositio hujus ex his: expresse enim Concilia dicunt, Christum esse compositum ex duabus naturis, unitatemque ejus esse per compositionem unius Dei hominis ex Verbo & carne, cui unitur; & Athanasius in Symbolo dixit: *Sicut anima & caro, unus est homo; ita Deus & homo, unus est Christus*: sed homo est unus per compositionem hujus ex his: ergo & Christus, Præterea, in omni vera compositione necesse est, adæquatum terminum per illam resultantem esse compositum ex extremis, quæ inter se uniuntur, ut etiam in compositione accidentis cum subiecto videre licet: nam ipsum concretum, verbi gratia, album, est suo modo unum ex his: ergo idem necesse est, in præsentem compositionem reperiri. Quocirca illa distinctio Durandi magis videtur secundum habitudinem aut considerationem rationis, quam secundum rem, quia in re nulla potest esse compositio unius cum alio, quin etiam compositio unius ex duobus, nimirum ex illis, quorum alterum cum altero componitur: quia, si componitur cum altero; ergo unitur illi: nihil enim aliud esse potest componi cum alio vel ad aliud, nisi conjungi, & uniri illi, talisque erit compositio qualis fuerit unio: si autem unum alteri unitur, necesse est unum aliquid ex utroque fieri, nam ut suppono, unum non sit alterum, sed utrumque manet, alioquin non esset unio, sed confusio: ergo necesse est, ut ex utroque resultet unum ab utroque distinctum, & ex utroque constans; nam omnis unio ad aliquam unitatem tendit, quæ in præsentem mysterio est unitas personæ compositæ, ut composita est, quæ est Christus Deus homo. Quod ergo Durandus ait, personam Christi non esse hoc modo compositam, dupliciter potest intelligi. Primo quasi materialiter de persona Christi secundum se; & hoc modo verissime dicitur, illam non esse compositam, nam potius est unum extremum hujus compositionis, & terminus ad quem fit hæc compositio seu unio; & eodem sensu recte procedit ratio Durandi. Secundo autem id potest intelligi formaliter de Christo, ut Christus est; & hoc modo falsum est, illum non esse personam compositam tanquam quid unum ex his, id est, ex Verbo & humanitate, ut ostensum est. Neque contra hoc procedit ratio Durandi, quia Christus ut sic revera pendet ex utroque componente: quia nec Verbum sine humanitate erit Christus, quia non erit homo; nec humanitas sine Verbo, quia neque esset persona, neque divinitate uncta.

**Secundū.** Atque hinc obiter infero secundo, valde errasse quosdam, qui in persona Verbi subsistente in duabus naturis, nescio quam finxere compositionem, in qua non intrinsece includatur humana natura ut alterum illius extremum, sed solum extrinsece tanquam terminus habitudinis, vel relationis unionis, quam Verbum habet ad ipsam humanam naturam, ita ut ipsa persona Verbi intelligatur composita, solum quatenus subsistentia ejus, ut terminans duas naturas, dicitur esse duplex ratio subsistendi. Sed hoc impossibile est, quia nisi includamus ipsam naturam humanam ut extremum compositionis, intelligi nequit ulla compositio in persona Verbi: aliàs oporteret, ipsam esse in se mutata, & aliquid denuo accepisse præter humanitatem, cum quo, vel ex quo intelligeretur facta compositio. Nam illa distinctio duplicis rationis subsistendi, nisi includamus ipsas naturas, non facit compositionem, cum solum sit distinctio rationis, vel secundum quandam denominationem & habitudinem ad diversas naturas, ut supra dictum est: tota ergo compositio consistit in adunatione Verbi ad carnem, seu carnis ad verbum, ut Concilia & Patres supra citati loquuntur: qui propterea ad explicandam hanc compositionem semper conjungunt duas naturas realiter distinctas, humanitatem & divinitatem, ex quibus realiter Christus constat.

**Tertiū.** Tercio intelligitur ex dictis, in hac compositione, quæ est inter Verbum & humanitatem, non solum reperiri

duo extrema realia & realiter distincta, quorum alterum ad esse alterius elevatur, & assumitur, sed etiam inveniri unum ex duobus constans, cujus oppositum novus quidam scriptor sine fundamento docuit, dicens, ad veram compositionem satis esse, quod unum extremum aliquid ab altero accipiat, & e converso, quamvis ex utroque unum non resultet, ut in præsentem humanitas accipit a Verbo subsistentiam, Verbum autem accipit ab humanitate, quod sit verum humanum suppositum. Et (quod mirum est) fatetur ille auctor, in compositione Christi ex duabus naturis reperiri non tantum duo extrema realiter distincta, sed etiam unum quasi tertium ex illis resultans, scilicet, persona Christi composita, quæ ut talis est, a singulis naturis in re ipsa aliquomodo distinguitur. Sed hæc doctrina nec vera est, nec sibi constans, nam in primis hæc compositio, sive dicatur esse ex duabus naturis, sive ex Verbo & humanitate, eadem est omnino in re ipsa: ergo quacumque ratione explicetur, necesse est, in ea dari non tantum extrema realia realiter distincta, sed etiam unum quid ex eis resultans. Probatur consequentia, tum quia, ut contra Durandum ostensum est, hoc est de ratione cujusque compositionis realis: nec potest unum extremum aliquid ab alio accipere per veram unionem cum illo, nisi quatenus ex eis unitis aliquid unum resultat: alioquin, etiam si unum aliquid ab alio accipiat, non erit per veram & intrinsecam unionem, sed per aliquam aliam magis extrinsecam dependentiam; tum etiam, quia cum compositio ex duabus naturis, & ex Verbo & humana natura sit eadem, nulla potest reddi ratio, cur, explicando illam per priorem habitudinem, detur in ea unum resultans ex utroque extremo, non vero explicando illam sub posteriori habitudine: nam, sicut persona Christi, ut composita, distinguitur a singulis naturis, ex quibus componitur, ita etiam distinguitur a Verbo secundum se, & ab humanitate secundum se, quia plus includit illa persona ut composita, quam solum Verbum vel humanitas; & e converso, sicut persona Christi, secundum se & quasi materialiter sumpta, non distinguitur a Verbo, licet ab humanitate distingatur, ita etiam non distinguitur ab altera natura, scilicet divinitate. Quin potius, si ratio illa quidquam efficere potest, magis probat ex duabus naturis non resultare unum tertium compositum, quam ex Verbo & humanitate: quia naturæ permanserunt inconfusæ, & quatenus naturæ sunt, non sunt inter se immediate unitæ: ergo ex eis proprie non resultat unum, quod sit verum compositum distinctum a componentibus. Quo argumento utitur Scotus supra, ut probet hanc non esse veram compositionem, & probat recte, hanc dispositionem non esse factam proxime & immediate inter ipsas naturas, quia ex eis ut sic non resultat aliquid unum a singulis distinctum, quod est de ratione omnis compositionis realis, quæ sit ex aliquibus immediate inter se conjunctis non vero probat, inter Verbum & humanitatem non intercessisse proxime & immediate veram & realem compositionem: aut ex eis immediate non resultare unum aliquid a singulis componentis distinctum, quod est Christus ut sic. Proprius ergo & immediatus verificatur, quod ex Verbo & humanitate resultat unum ex duobus constans, quam ex duabus naturis: nam hoc est verum ratione illius, & non e converso. Tandem omnia, quibus circa tertiam conclusionem probavimus, dari unam personam compositam, resultantem ex hac unionem, probant, illam componi ex Verbo & humanitate, quæ sunt immediata extrema hujus compositionis.

Quod si objiciatur, quia Christus, qui est terminus hujus compositionis, non est distinctus a Verbo, quod est alterum extremum hujus compositionis, quia & Verbum de Christo, & Christus de Verbo affirmatur. Respondetur, Christum simpliciter dictum stare materialiter, ut dialectici dicunt, supponit enim pro ipso supposito Verbi absolute & secundum se, & hoc modo non distinguitur a Verbo, & ideo vere unum de altero prædicatur: tamen non hoc modo est terminus hujus compositionis, sed quatenus formaliter & intrinsece includit humanitatem: & hac ratione distinguitur a Verbo aliquo modo, quia plus includit, quam Verbum, scilicet, humanitatem: & hoc satis est ad veram compositionem, propriumque terminum ex illa resultantem, quamvis, quia Verbum per se est integrum suppositum, cui humanitas sub-

Cujusdam placium.

Refutatur.

Diluitur obiectio.

stantia-



stantialiter copulatur, ab illa vere & prædicatur homo. Sicut, quando homo fit albus, terminus ex illa actione resultans est aliquid compositum, scilicet, hoc album, distinctum aliquo modo a supposito quod albesit, de quo nihilominus vere prædicatur.

Serius  
circum-  
plexusque  
modus.

Sed adhuc explicanda superest obscura difficultas, nam interrogare quis potest, quale sit illud unum ex Verbo & humanitate constans, & per hanc unionem resultans: cum enim hæc unio substantialis sit, necesse est, ut illud unum sit una aliqua substantia composita; ergo, vel una natura, vel una persona, non enim potest aliquid tertium excogitari; sed una natura esse non potest, ut constat ex principiis fidei, erit ergo una persona, erit ergo in Christo aliqua persona distincta a persona Verbi, & consequenter erunt in Christo alia & alia persona, quod est contra fidem. Sequela patet, quia diximus, illud unum, quod resultat ex hac compositione esse distinctum a Verbo, tanquam totum compositum ab uno componente, & tamen illud unum est una persona; ergo est persona distincta a persona Verbi. Et confirmatur, nam persona realiter composita, & persona omnino simplex distinctæ personæ sunt; sed Verbum secundum se est persona omnino simplex, illud autem unum, quod resultat, est persona composita; ergo distinctæ personæ sunt. Huic difficultati putant aliqui se satisfecisse, dicendo esse quidem in Christo duplicem personam, non tamen secundum rem, sed secundum rationem distinctam. Sic enim V. Synod. collat. 8. can. 7. significatur, in Christo Deum & hominem sola ratione separari, nam cum Christus vere sit suppositum divinum & humanum, necesse est, ut saltem ratione duplex suppositum in eo distinguatur, non vero secundum rem, quia suppositum humanum Christi non est, nisi ipsummet divinum, prout terminat humanitatem.

Qui dicit  
soluisse  
modum  
quidam  
putant.

Refuta-  
tur.

Sed hæc responsio non satisfacit difficultati propositæ, quæ non procedit de supposito Verbi, ut præcise terminat humanitatem, & ab illa terminatione denominatur humanum, sed procedit de toto Christo homine, ut intrinsece includit humanitatem tanquam formam intrinsece constituentem ipsum in ratione huius hominis, huiusque personæ humanæ. At vero illa responsio procedit de supposito Verbi solum priori ratione spectato: si enim verum est, suppositum divinum & humanum in Christo tantum ratione distingui: quo etiam sensu explicuimus supra in commentario artic. 4. quod Divus Thomas ibidem ait, esse in Christo duplicem rationem subsistendi. Unde hæc consideratio & responsio non refert ad præsentem difficultatem, quia suppositum Christi, sub hac ratione consideratum, non est terminus adæquate resultans per incarnationem, nec est persona composita ut paulo antea dicebam, quia persona composita intrinsece includit naturam & subsistentiam realiter distinctas, ex quibus constat: sed persona sic composita est terminus resultans per hanc unionem, de quo procedit difficultas posita: hoc enim modo persona illa composita & humana, plusquam ratione distinguitur a persona Verbi, ut divina persona est, nam distinguitur ut intrinsece includens naturam realiter distinctam a divina persona: hæc autem distinctio maior est, quam rationis, & inter reales a Metaphysicis numeratur, vocationeque includentis, & inclusi: sic enim Christus & humanitas absolute dicuntur realiter distingui, quia Christus, præter humanitatem, includit rem aliquam ab humanitate distinctam: ergo pari modo Christus, ut dicit totum compositum, realiter distinguitur a Verbo, quia præter Verbum includit rem aliquam a Verbo realiter distinctam: ergo erunt in Christo duæ personæ realiter distinctæ, saltem ea distinctione includentis, & inclusi. Et explicatur exemplo, nam supponendo, animam rationalem informantem corpus ibi esse subsistentem, verum erit dicere, aliud subsistens esse animam & aliud hominem, atque ita esse in homine duo subsistentia realiter distincta, saltem ea distinctione includentis & inclusi: sic ergo in præsentem, &c.

Aliqua  
difficultas  
est eod-  
em  
modo.

Propter vitandam ergo hanc difficultatem, videtur convenienter dici, ex Verbo & humanitate non resultare unam personam, sed solum humanitatem trahi ad esse personale præexistentis personæ: ex quo fit, ut illa eadem persona maneat magis composita, non tamen, quod inde resultat, una persona: sicut, quando accidens

unitur supposito, quamvis cum illo unum quid componat, non tamen ex ea compositione suppositum resultat, quia accidens trahitur ad esse præexistentis suppositi. Et confirmari hoc potest, quia aliàs daretur in Christo persona facta & ex tempore producta, quia illud compositum factum est, & in tempore productum: & consequenter daretur etiam persona, quæ non esset Deus, nec Verbum, quia illud compositum formaliter sumptum non est Deus, neque Verbum, cum ab eo realiter distinguatur: & ideo non possint magis de se prædicari, quam totum de parte. Sed neque hæc solutio omnino satisfacit, quamvis recte explicata aliquid verum contineat; licet enim verum sit, per hanc unionem non resultare novam, seu aliam personam a persona Verbi, ut statim explicabo, non videtur tamen posse negari, quin illud unum, quod ex hac compositione resultat, ut intrinsece constat ex utroque componente, sit vere persona. Probatur argumento facto, quia illud compositum est vere ac formaliter unum per se ac substantialiter juxta principia fidei, ut satis in superioribus visum est: & non est unum tanquam una natura: ergo est unum tanquam una persona: non potest enim in una substantia composita alius modus unitatis excogitari. Et hoc ipsum confirmant, quæ in fine præcedentis sectæ dicta sunt circa conclusionem tertiam; & quæ in prima assertionem huius sectionis adduximus ad probandum, Christum esse personam compositam, nam hoc proprie verificatur de Christo, ut Christus est, & hic homo: ergo ut sic est persona composita: ergo ut sic est persona: nam, quod sit composita, non minuit rationem personæ simpliciter. Unde D. Thom. infra quæst. 16. art. 12. quærens, utrum Christus, secundum quod homo, sit persona, respondet non esse personam constitutam personalitate causata ex principiis humanæ naturæ, esse tamen personam altiori modo constitutam, quatenus ut sic est subsistens in humana natura, quæ rationalis est. Quæ doctrina est communis Theologorum, & consentanea definitioni Alexandri 3. in cap. cum Christus, de hæreticis, ut in allegato D. Thomæ loco videbimus, nec video, quomodo negari possit, si considerentur ea, quæ de hac mirabili compositione a Conciliis sunt tradita & definita.

Expendi-  
tur.

Neque contra hoc quidquam refert, quod humanitas trahatur ad esse præexistentis personæ, nam, cum non trahatur accidentaliter, sed substantialiter, potius inde fit, ita trahi & uniri, ut illud etiam unum, quod ex tali unionem confurgit, una vere sit persona composita. Quapropter non est simile, quod ibi assertur de accidente, quod advenit hypostasi substantiali jam constitutæ, advenit enim illi accidentaliter; & ideo illud unum, quod inde componitur, formaliter, & ut sic, non est persona, quia neque est substantia, neque aliquid per se unum, sicut est in præsentem. Accommodatius esset exemplum de parte substantiali, quæ advenit præexistenti supposito, quæ ita ei unitur, ut unum suppositum cum illo constituat, quia illi substantialiter unitur, & secundum hypostasim, quamquam exemplum non potest esse in omnibus simile: quia huiusmodi pars non tantum in persona, sed etiam in natura unitur: sed in hoc mysterio non est quærendum exemplum, quod per omnia quadret: quia, si illud haberet, non esset singulare, ut Augustinus dixit.

Respon-  
datur vi-  
tim dic-  
di modi  
rationi-  
bus.

Ad difficultatem ergo propositam concedo, hoc compositum, quod per hanc unionem fit, esse personam: nego tamen inde sequi, esse aliam personam a persona Verbi. Et ad argumentum, quia illud compositum ut sic est in re ipsa aliquo modo distinctum a persona Verbi, ratione alterius naturæ, quam includit: ergo est distincta persona; respondetur in forma, negando consequentiam, sed tantum sequitur, esse eandem personam subsistentem in altera natura. Et ratio a priori est, quia id, quod formaliter constituit personam, non est natura, sed personalitas: hæc autem non multiplicatur in Christo, quamvis naturæ multiplicentur; & ideo nec persona multiplicari potest, quia in substantivis non fit multiplicatio, nisi forma constituens multiplicetur, ut latius traditur 1. part. quæst. 39. Et possumus a contrario sumere exemplum ex mysterio Trinitatis, in quo, licet Pater habeat aliam personalitatem a Filio, non tamen est alius Deus, sed est alia persona

Nodna  
propositi-  
tus recte  
xitar.

In Chris-  
to nulla  
præcedit  
Verbi  
personæ  
liant.



**Exemplum.** in eadem deitate subsistens, seu idem Deus in alia persona: & similiter, quando intelligimus, per æternam Fili generationem addi (nostro modo loquendi) divinitati personalitatem distinctam ab ea, quam habet priorem origine generatione Filii, licet Filius genitus sit Deus, non tamen propterea alius Deus, sed alia persona, quæ est idem Deus. Sic ergo contingit e contrario in præsentem mysterio, nam, licet personæ Verbi adjunctur per unionem hypostaticam nova natura, & id quod inde resultat, sit persona, non tamen est alia persona, sed eadem subsistens in alia natura; quia constitutum formale personæ idem omnino semper manet.

**Replicæ  
satisfic.**

Quod si instetur & urgeatur argumentum, quia hoc compositum est persona, & hoc compositum est aliquo modo distinctum a Verbo componente: ergo est distincta persona: negatur consequentia, quia (ut Sophistæ dicunt) variatur appellatio: distinguitur enim ratione alterius naturæ, non ratione personalitatis: solum ergo sequitur, quod distinguatur in esse (ut sic dicam) individui alterius naturæ. Et eadem ratione falsæ sunt omnes illæ locutiones, in Christo est persona facta, aut temporalis, aut quæ non sit Verbum, quia his omnibus significatur, ipsam personam seu subsistentiam esse factam, seu temporalem. Unde licet compositum, ut sic, factum sit, quia natura humana & unitio ejus est facta, non tamen persona, quia illa simpliciter est increata. Maxime, quia illa persona, ut supponitur huic unioni, est completa, & per adventum humanitatis non completur in ratione personæ, aut subsistentis, sed solum in ratione individui humani. Denique eodem modo respondendum est ad confirmationem, in qua dicitur, personam compositam distingui a simplici: non enim oportet distingui in unitate personæ, sed solum in pluralitate naturarum. Et hoc ipsum est, quod Patres & Theologi aliis verbis dicere solent, in Christo non esse alium, & alium, esse tamen aliud, & aliud, ut videre licet in D. Thom. hic art. 3. ad 1. & infra q. 16. art. 1. ubi latius explicabitur, quia priores termini significant distinctionem suppositorum; posteriores vero naturarum seu essentiarum.

Ad rationem dubitandi in principio positam respondetur, illa omnia ibi sumpta procedere in compositionibus aliis, in quibus componentia ex natura sua instituta sunt, & ordinata ad componendum; in illis enim componentia se invicem perficiunt, & compositum est perfectius singulis componentibus, & ideo talis modus compositionis imperfectionem dicit: at vero in hac mirabili compositione Verbum non est natura sua ad hanc, vel ad ullam aliam compositionem ordinatum, hoc enim repugnat Deo, ut 1. part. quæst. 3. demonstratur, tamen ex gratia sese accommodat ad componendum hunc hominem, in quo neque ipsum perficitur, sed humanitas; nec tamen a sua cadit perfectione, quia nec mutatur, nec aliquid sui esse, seu perfectionis amittit, ut inferius latius explicabimus disputatione sequenti. Ac propterea hoc compositum simpliciter, seu intensive non est perfectius alteri componentium, scilicet Verbo, quia illud est simpliciter infinitum, in se continens eminenter, quicquid perfectionis est in humanitate: extensive autem includit formaliter aliquam perfectionem, quam non includit solum Verbum. Ac denique eodem modo, quamvis esse Verbi secundum se non resultat ex Verbo, & humanitate, tamen esse hujus hominis ut sic ex unionem utriusque resultat, ut explicatum est. Itaque de ratione compositionis, seu compositi solum est, ut sit vere unum ex plurium rerum reali unionem resultantem. Et hæc ratio formalis compositionis non dicit imperfectionem in utroque componente, sed ad summum in altero. Aliæ vero conditiones, quæ ad compositionem requiri solent, & numerantur a Cajetan. 1. p. q. 3. art. 8. ut imperfectionem dicunt, non sunt de ratione compositionis ut sic; sine imperfectione vero accommodari possunt ad hoc mysterium, quia & Verbum aliquo modo se habet ut actus, & humanitas ut potentia, ut infra dicam, & in redistinguuntur, ac conjunguntur in uno composito vere ac realiter uno. Sed oriebatur hic alia difficultas, quia compositum est sua componentia simul sumpta, Christi autem non est sua divinitas, & humanitas. De qua locutione, an admitenda sit, dicemus infra quæst. 16. art. 5.

**Quid sit  
de ratio-  
ne com-  
positi.**

Quæret tandem aliquis, an simpliciter, & sine addito Christus, seu Verbum possit nunc dici persona composita. Quæ interrogatio dupliciter intelligi potest. Primo, ex parte prædicati, id est, an hæc compositio simpliciter, & sine ulla determinatione, vel declaratione vocari possit, & de hoc sensu hætenus diximus, per se loquendo, & veritatem rei considerando sine ulla limitatione, vel adiectione illam esse veram compositionem, quamquam non displiceat consilium Cajetan. scilicet addendum esse aliquid, quo perfectio ejus & excellentia significetur, ut esse ineffabilem, &c. ne similis alii habeatur, quod fere semper a patribus observatum est, & fortasse scholastici antiquiores nihil aliud docere voluerunt. Alius sensus illius interrogationis ex parte subjecti est, an Verbum, vel Christus simpliciter, & sine illa determinatione, in quantum homo, possit dici persona ineffabiliter composita, & in hoc sensu pendet responsio ad hanc interrogationem ex iis, quæ de communicatione idiomatum in q. 16. dicenda sunt. Ideo nunc breviter solum dico, consultius, & securius esse addere determinationem, quia Verbum secundum se non est persona composita, sed solum, ut subsistit in humana natura, & cum illa componit hunc hominem. Item, quia hoc prædicatum potest convenire interdum ratione naturæ, interdum ratione personæ, si generaliter loquamur, & ideo ad tollendam ambiguitatem expedit addere illam determinationem, præsertim cum hæc denominatio personæ compositæ non sumatur formaliter a sola humanitate, sed ab utroque extremo compositionis, ut conjunctis, & unitis, & hoc maxime verum habet, si loquamur de Verbo, aut de filio Dei sub his, vel similibus nominibus significantibus solum ipsam personam divinam secundum se. Si autem loquamur sub nomine Christi, quamvis idem dici possit, quia (ut Dialectici loquuntur) subjecta stant materialiter, & ita Christus simpliciter dictus stat pro supposito, non est tamen omnino eadem ratio, nec tanta necessitas, quia nomen Christi formaliter significat ipsum compositum, & sæpe subjecta formaliter stant juxta exigentiam prædicatorum: exemplo facile declaratur. Nam si Petrus sit albus, recte posse dici videtur hoc album esse compositum ex hoc supposito, & albedine, non tamen ita posset simpliciter dici Petrus compositus ex substantia sua, & albedine. Sic ergo dici posset in proposito, ut in simili dubio sequenti dicemus.

**Dubium.**

**Utrum  
Christus  
possit sim-  
pliciter  
dici per-  
sona com-  
posita.**

## SECTIO V.

*Utrum terminus hujus unionis sit aliquid creatum, vel increatum.*

**N**ON est hoc loco disputandum cum hæreticis Ariamis, qui affirmarunt, Verbum esse personam creatam, ex quo plane fiebat terminum hujus unionis esse creatum. Contra hos enim in materia de Trinitate disputatur, & in superioribus dictum a nobis sufficienter est, quantum præsens materia postulabat. Certum ergo sit in primis, personam Verbum incretam esse: secundo illam personam incretam esse, in qua utraque Christi natura subsistit, ut probant omnia, quæ sect. 3. contra Nest. dicta sunt. Præterea, quia non posset una persona esse utriusque naturæ divinæ, & humanæ, nisi ratione incretæ subsistentiæ. Creatæ enim non potest terminare divinam naturam, quamvis e contrario increta possit humanam: hoc enim nec imperfectionem dicit, nec dependentiam in persona terminante, illud vero & imperfectionem, & dependentiam dicit in natura terminata; tum etiam, quia subsistentia creata nullam aliam naturam terminare potest, ut infra dicitur; denique, quia natura divina non potest se jungi a suis conaturalibus subsistentiis, neque alium subsistendi modum acquirere præter sibi intrinsicum & connaturalem sine mutatione. Ex quo fit primo, terminum, ad quem fit hæc unio utriusque naturæ, esse incretum: secundo, terminum resultantem ex hac unionem esse compositum ex persona increta, & natura creata, quare merito controvertitur, creatus ne, an potius incretus dici debeat. Quidam enim ex discipulis D. Thom. existimant esse incretum quid, tribuuntque Cajetan. infra art. 7. ubi ait unitatem, quæ est inter naturam humanam & personam filii Dei non esse aliquid creatum, sed creatorem. Et ratio-



rationem subdit, quia illud esse, in quo natura humana conjungitur Verbo Dei, increatum est, & ab illo habet hoc totum resultans, quod sit ens; ergo, quod sit unum; ergo, quod sit unum ens increatum. Et confirmari potest, quia hoc compositum non potest dici creatum, quia non est factum ex nihilo; ergo increatum. Aliis autem videtur potius dicendum esse illud compositum simpliciter creatum. Quod aperte sentit Cajetan. infra art. 10. circa solutionem ad primum dicens gratiam unionis quoad substantialem conjunctionem personalitatis cum natura, donum creatum esse. Et ratio esse potest, quia quidquid in tempore sit per veram realem actionem, creatum est, hujusmodi autem est hic terminus, ut per se patet. Aliis denique videtur nec creatum, nec increatum dicendum esse; sed ex utroque mistum propter utrasque rationes factas. In hoc dubio prius explicabimus rem ipsam, deinde modum loquendi, in quo solo videtur esse posse diffensio inter Catholicos: nam suppositis principiis fieri res per se satis clara videtur, si supponamus dupliciter aliquid posse dici creatum. Primo, quia secundum se totum, & omnino est ex nihilo factum. Secundo, quia per veram actionem factum est, & incipere potest esse, & finire.

Dico ergo primo, terminus hujus unionis non est creatus priori modo, id est, ex nihilo factus. Hoc sequitur evidenter ex principiis fidei, nam ille terminus est quoddam compositum ex Verbo increato, & humanitate creata; ergo non potest tale compositum ex nihilo produci, quia necessario supponit Verbum increatum.

Dico secundo, terminus hujus unionis, id est, ex ea resultans, seu per eam productus, est quid factum in tempore per veram realem actionem, & hoc sensu quid creatum est. Hoc etiam adeo est evidens, ut a nemine negari possit, quia ille terminus, ut sic, est quoddam compositum ex Verbo, & humanitate; sed hoc compositum nunc est, & antea non fuit; ergo est quid factum, atque adeo creatum in dicto sensu. Et confirmatur primo, quia hoc mysterium Incarnationis factum est per veram & realem actionem, & effectiorem totius Trinitatis, ut est per se notum. Ergo illa effectio habet aliquem terminum factum per eam, & dependentem ab illa. Ergo ille terminus non est increatus, repugnat enim increatum, ut sic, fieri, & dependere. Est ergo creatum, sensu supra explicato. Confirmatur secundo, quia hoc compositum potest dissolvi, & ejus unitas, quæ ab ipsis componentibus distincta est, potest destrui; ergo.

**Objeçtio.** Dices; si unum componentium creatum est, & alterum increatum, cur totum compositum, magis creatum, quam increatum dicendum est? Respondetur primo, quia compositum non denominatur a partibus secundum se, sed prout unitis, seu ab unione earum, vel ab unitate, quæ inde resultat. Secundo, quia increatum includit negationem omnis efficientiæ, seu dependentiæ, quam creatum affirmat. Sicut homo, quamvis corpore, & spiritu constet, corporeus nihilominus simpliciter dicitur, & non spiritus, quia spiritus includit negationem materiæ, & in exemplo, quo Cajetan. utitur, si anima vel materia essent æterna, in tempore vero unirentur ad componendum hominem, talis homo simpliciter esset temporalis, & factus in tempore, licet partes secundum se essent æternæ.

**Responso ad argu.** Et ex his facile solvuntur fundamenta aliarum opinionum. Prima enim opinio, aut saltem Cajetan. qui pro illa refertur, non consideravit terminum adæquate resultantem ex unione, nec loqui videtur de illo composito, quod proxime constat ex Verbo, & humanitate, sed consideravit solum unionem duarum naturarum in substantia Verbi tanquam in quodam tertio, & illam substantiam vocavit unitatem, in qua uniuntur illa extrema, quæ substantia sine dubio increata est: sed non est terminus productus per hanc unionem, sed est terminus terminans humanitatem, ut sæpe dictum est. Unde improprie dicitur esse unitas eorum, quæ in ipsa uniuntur, seu unitas totius Christi. Nam unitas illius substantiæ est omnino simplex; unitas vero Christi est per compositionem secundum substantiam, ut Concilia loquuntur. Unde, si non sit sermo de illa substantia secundum se, sed prout composita, sic non est terminus, in quo uniuntur naturæ: sed est quid compositum ex illo termino, & ex utraque natura, & ut sic dicimus esse terminum resul-

tantem ex hac unione, atque adeo factum, & creatum dicto sensu. Et ad argumentum Cajetan. si contra hunc sensum fiat, scilicet, quia illud esse, in quo uniuntur naturæ, est increatum, respondetur facile, licet substantia Verbi increata sit, tamen non totum esse existentiæ hujus compositi esse increatum; componitur enim ex entitate creata humanitatis, & substantia increata Verbi, & ideo totum compositum non est increatum, sed aliquo modo creatum, ut dictum est. Haberet tamen argumentum illud nonnullam difficultatem, si humanitas creata Christi nullam haberet existentiam creatam, sed per ipsum esse increatum Verbi existeret. Sed nihilominus etiam in ea sententia solvendum esset argumentum; neque enim ipsa humanitas dici potest increata, etiam ab iis auctoribus, qui dicunt ipsam existere per solam existentiam increatam, quia, secundum eos, includit entitatem essentiæ, quæ certa est. Eandem autem includit ipsum compositum, quod est terminus unionis, & ideo non sequitur ipsum esse increatum propter existentiam increatam. Et cum Cajetan. inquit, unum nihil addere supra ens, dicendum esset consequenter loquendo in ejus sententia de existentia humanitatis, ens includere entitatem essentiæ, & existentiam, & unum, utramque entitatem includere, & hoc satis esse, ut si altera earum entitatum sit creata, unitas ex eis resultans creata sit, etiam si demus unum nihil addere supra ens, ut utramque simul entitatem includit. Reliqua fundamenta aliarum opinionum solum confirmant conclusiones positas.

Ex his vero obiter colligitur, si ens creatum sumatur priori modo, scilicet, quod est productum ex nihilo; sic non omne ens posse dici creatum, vel increatum, nec divisionem illam esse adæquatam: datur enim aliquod ens, quod increatum non est, nec creatum illo modo, & hoc sensu verum dicebat tertia sententia. Creatum ergo, quod immediate opponitur increato, ut fiat adæquata divisio entis, sumi debet posteriori modo, scilicet pro ente facto, & dependente, etiam si non omnino ex nihilo fiat. Verum est, omne hujusmodi ens includere aliquid factum ex nihilo. Verum est etiam extra hoc mysterium omne ens creatum uno modo, esse creatum vel creabile alio modo, quia extra hoc mysterium nullum est ens, in cujus constitutionem seu compositionem Deus ipse ingreditur.

Hæcenus explicata res est. Jam de modo loquendi inquiri potest, an persona Christi, vel unitas ejus dicenda sit creata, vel increata. In quo dicendum est breviter sub his nominibus, & sub omnibus similibus, quæ significant ipsam personam divinam secundum se, ut est nomen Verbi, & filii Dei, sub his, inquam, nominibus dicendam esse personam increatam: quia, ut sic, non significatur illa persona, ut est terminus resultans per unionem; sed potius ut est terminus præsuppositus uniioni, & ad quem fit unio, & illa persona est increata. Sed quæri potest rursus, an sub nomine Christi, & similibus possit dici, illum esse quid creatum. Hoc tamen spectat ad quæst. 16. Nunc breviter respondetur, si subiectum sit formaliter pro toto composito, & creatum sufficienter explicetur juxta supradicta, sic vere esse quid creatum, quo sensu ab omnibus sine controversia admittitur illa propositio: *Christus, in quantum homo, est creatura*. An vero oporteat semper addere hanc determinationem ex parte subiecti, in citato loco dicitur.

## ARTICULUS VII.

*Utrum unio nature divine & humane sit aliquid creatum.*

**A**d septimum sic proceditur. Videtur, quod unio nature divine & humane, non sit aliquid creatum. Infr. ar. 8. Nil enim creatum in Deo potest esse: quia quidquid est in Deo, Deus est. Sed unio est in Deo: quia ipse Deus est humane nature unitus. Ergo videtur, quod unio non sit aliquid creatum.

**Præterea.** Finis est potissimum in unoquoque. Sed finis unionis est divina hypostasis, sive persona, ad quam terminata est unio. Ergo videtur, quod hujusmodi unio maxime debeat judicari secundum conditionem divine hypostasis, quæ non est aliquid creatum. Ergo nec ipsa unio est aliquid creatum.



3 *Præterea. Propter quod unumquodque tale, & illud magis, ut dicit Philosoph. Sed homo dicitur esse creator propter unionem. Ergo multo magis ipsa unio non est aliquid creatum, sed creator.*

*Sed contra. Omne, quod incipit esse ex tempore, est creatum. Sed unio illa ab eterno non fuit, sed incipit esse ex tempore: Ergo unio est aliquid creatum.*

b *Respondeo dicendum, quod unio, de qua loquimur, est relatio quedam, quæ consideratur inter divinam naturam & humanam, secundum quod conveniunt in una persona filii Dei. Sicut autem in prima parte dictum est, \* omnis relatio, quæ consideratur inter Deum & creaturam, realiter quidem est in creatura (per cuius mutationem talis relatio innascitur), non autem est realiter in Deo, sed secundum rationem tantum, quia non innascitur secundum mutationem Dei. Sic ergo dicendum est, quod hæc unio, de qua loquimur, non est in Deo realiter, sed secundum rationem tantum: in humana autem natura, quæ creatura quadam est, realiter est: & ideo oportet dicere, quod sit quiddam creatum.*

*Ad primum ergo dicendum, quod hæc unio non est in Deo realiter, sed secundum rationem tantum, dicitur enim Deus unitus creatura, ex hoc quod creatura est realiter unita Deo absque ejus mutatione.*

c *Ad secundum dicendum, quod ratio relationis sicut & motus dependet ex fine vel termino, sed esse ejus dependet a subiecto. Et quia unio talis non habet esse reale, nisi in natura creata (ut dictum est\*), consequens est, quod habeat esse creatum.*

d *Ad tertium dicendum, quod homo dicitur creator, & est Deus propter unionem, in quantum terminatur ad hypostasim divinam: non tamen sequitur, quod ipsa unio sit creator, vel Deus: quia quod aliquid dicatur creatum, hoc magis respicit esse ipsius, quam rationem.*

## COMMENTARIUS.

**A**D intelligendum tam hunc articulum, quam sequentes, quid ista vox *unio* significet, explicandum est; interdum enim est nomen, interdum verbum, quod conjungere, vel copulare significat, & hoc modo significat aliquam actionem, ut exercitum. D. Thom. autem hoc loco illa voce utitur, prout nomen est, & sic dicit significare relationem, & quamvis fortasse interdum alias habeat significationes, ut in sequenti disputatione dicetur, tamen ab ipso D. Thom. in sola illa usurpatur, & juxta illam explicandi sunt tam hic articulus, quam sequentes.

b Respondet igitur, unionem hanc in humanitate esse aliquid creatum, quia est relatio realis ad Verbum, in Verbo autem nihil esse creatum, quia est sola relatio rationis. Supponit enim D. Thom. ex doctrina tradita 1. p. q. 13. Deum non referri realiter ad creaturas, quamvis creaturæ realiter referantur ad Deum: non enim est capax talium relationum, quia nullum esse reale etiam relativum potest esse in Deo novum, vel a creatura dependens. Unum vero manet in hac litera obscurum, an scilicet D. Thom. docere volerit, nihil aliud creatum de novo fieri in humanitate per actionem uniendi præter hanc relationem, aut si hoc non intendit, cur solius relationis meminerit? Sed hoc late tractandum est disp. seq. Nunc breviter dicendum, non esse mentem D. Thom. excludere omne aliud præter relationem in humanitate factum per actionem unitivam, quia neque illa actio potest proxime, & formaliter tendere ad relationem, eum ad relationem non sit per se actio, aut motus; neque illa relatio esse potest sine fundamento creato distincto aliquo modo ab humanitate, illique superaddito. Nam sola humanitas per se non est sufficiens fundamentum, quia ex illa non resultat statim relatio, etiam si Verbum, quod est terminus, existens supponatur: oportet ergo, ut aliquid fiat in humanitate, per quod ipsa mutetur, & ex quo resultet relatio, illud autem nihil aliud est, quam ipsa substantialis unio humanitatis ad Verbum; quia ergo D. Thom. de hac unionem seu substantiali conjunctione artic. præced. jam disputaverat, hic solum de relatione quasi-avit, & ideo de sola illa in hoc artic. mentionem facit.

c Argumentum secundum (omisso primo, quia clarum est) hujusmodi est. Verbum est finis hujusmodi unionis, quia ad Verbum terminata est unio, & ideo habet rationem finis; ergo unio magis sequitur conditio-

nem Verbi, quam humanæ naturæ, quia finis est potissimum in unaquaque re; ergo potius est increata, sicut Verbum, quam creata, sicut humana natura. Respondet negando primam consequentiam, quia relatio, licet speciem sumat a termino, vel a fine, esse tamen suam a subiecto habet; quia ergo subiectum hujus unionis est creatum, scilicet humana natura, ideo etiam ipsa unio quiddam creatum est. Addi vero potest finem proximum hujus unionis proprie non esse Verbum, sed vel ipsam humanitatem ut unitam, & sustentatam a Verbo, vel potius hunc hominem Deum constantem ex persona divina, & humana natura. Hoc enim compositum proxime intentum est per hanc unionem, & similiter intenta est perfectio humanæ naturæ, non Verbi. Quocirca aliud est, esse terminum, seu extremum, ad quem fit unio; aliud vero esse finem, forma enim unitur materiæ, & ita materia est terminus illius unionis, non tamen est finis, quia forma non unitur materiæ propter ipsam materiam, sed vel propter suam perfectionem, vel propter compositum. Dices. Cur hæc D. Thom. non distinxit? Respondeo: Quia de relatione loquebatur, quæ proprie non habet alium finem a suo termino, quia non est per se intenta, sed aliunde resultat, & ideo non curavit D. Thom. hoc loco finem a termino distinguere, sed solum juxta propriam relationis naturam argumento satisfacere.

d Argumentum tertium est per se facile, sed litera solutionis D. Thom. non nihil obscura est. Argumentum enim erat hujusmodi. Hic homo est creator propter unionem; ergo magis ipsa unio erit creator, & non creatura: Quia propter quod unumquodque tale, &c. Et respondet primum hunc hominem dici creatorem propter unionem, quatenus unio terminatur ad hypostasim Verbi. Secundo dicit non inde sequi unionem esse creatorem, quia quod aliquis dicatur creator, vel creatum, magis respicit esse ipsius, quam rationem. Horum autem primum difficile est, quia pari ratione posset dici creatura creator, quatenus relatio creaturæ terminatur ad creatorem. Secundum autem est valde obscurum, neque apparet, quomodo satisfaciatur argumento. Dicendum vero est D. Thom. locutum fuisse juxta subiectam materiam, unde sensus illius est, illam communicationem idiomatum inter hunc hominem, & creatorem non fundari in esse proprio ipsius unionis, sed fundari in propria conditione personæ, in qua fit unio, quæ est increata, & creator; unio vero est quasi conditio necessaria ad illam communicationem idiomatum, quatenus terminatur ad hypostasim Verbi, non quomodocumque, sed tanquam ad personam, in qua subsistit humanitas, & ideo non est simile de relatione creaturæ, & ita optime satisficit argumento. Facilius tamen dici potest hunc hominem dici creatorem per communicationem idiomatum, quia supponit pro supposito, quod est creator: hæc vero communicatio non habet locum respectu ipsius unionis in abstracto sumptæ, quia non supponit pro eadem persona. Deinde illa maxima, propter quod unumquodque tale, &c. male applicatur: procedit enim in propriis causis, quæ formaliter sunt tales; at vero unio non est propria causa, propter quam hic homo est creator: sed solum explicat conditionem ex parte humanitatis necessariam, ut possit hic homo pro creatore supponere.

## ARTICULUS VIII.

*Utrum unio Verbi incarnati sit idem, quod assumptio.*

**A**DOCTAVUM sic proceditur. Videtur, quod idem sit unio, quod assumptio. Relationes enim sicut & motus specificantur secundum terminum. Sed idem est terminus assumptionis & unionis, scilicet divina hypostasis. Ergo videtur quod non differant unio & assumptio.

2 *Præterea. In mysterio Incarnationis idem videntur esse uniens & assumens, unitum & assumptum. Sed unio & assumptio videntur sequi actionem & passionem uni-entis & uniti, vel assumptis, & assumpti. Ergo videtur idem esse unio, quod assumptio.*

3 *Præterea, Damasc. 4. dicit in 3. lib. Aliud est unio, aliud Incarnatio: nam unio solam demonstrat copulationem: ad quem autem facta est copulatio, non adhuc: humanatio autem & Incarnatio determinat, ad quem sit facta copulatio. Sed similiter assumptio non determinat, ad quem facta sit copulatio. Ergo videtur unio idem esse, quod assumptio.*



*Sed contra est, quod divina natura dicitur unita, non autem assumpta.*

**Art. præc.** *b Respondeo dicendum, quod sicut dictum est, unio importat relationem quandam divinae naturae & humanae secundum quod conveniunt in una persona. Omnis autem relatio, quae incipit esse ex tempore, ex aliqua mutatione causatur: Mutatio autem consistit in actione & passione.*

*Sic ergo dicendum est, quod prima & principalis differentia inter assumptionem & unionem est, quod unio importat ipsam relationem, assumptio autem actionem, secundum quam dicitur aliquis assumens, vel passionem, secundum quam dicitur aliquid assumptum.*

*c Ex hac autem differentia accipitur secundo alia differentia: nam assumptio dicitur sicut in fieri, unio autem sicut in facto esse: & ideo uniens dicitur esse unitum, assumens autem non dicitur esse assumptum. Natura enim humana significatur, ut in termino assumptionis ad hypostasim divinam, per hoc quod dicitur homo: unde vere dicimus, quod filius Dei, qui est uniens sibi humanam naturam, est homo. Sed humana natura in se considerata, id est in abstracto, significatur ut assumpta: non autem dicimus, quod filius Dei sit humana natura.*

*d Ex eadem etiam sequitur tertia differentia, quod relatio praecipue aequiparantia non magis se habet ad unum extremum, quam ad aliud; actio autem & passio diversimode se habent ad agens & patiens, & ad diversos terminos. Et ideo assumptio determinat terminum a quo, & ad quem: dicitur enim assumptio, quasi ab alio ad se sumptio. Unio autem nihil horum determinat: unde indifferenter dicitur, quod humana natura est unita divinae, & e converso. Non autem dicitur divina natura assumpta ab humana, sed e converso: quia humana natura adjuncta est ad personalem divinam, ut scilicet persona divina in humana natura subsistat.*

*Ad primum ergo dicendum, quod unio & assumptio non eodem modo se habent ad terminum, sed diversimode, sicut dictum est.*

*In corp. art.*

*Ad secundum dicendum, quod uniens & assumens non omnino sunt idem; nam omnis persona assumens est uniens, non autem e converso. Nam persona Patris univit naturam humanam Filio, non autem sibi: & ideo dicitur uniens, non assumens, quasi ad se sumens. Persona autem filii, quae sibi humanam naturam univit, est uniens & assumens: & similiter non est idem unitum & assumptum: nam divina natura dicitur unita, & non assumpta.*

*e Ad tertium dicendum, quod assumptio determinat, cui facta est copulatio ex parte assumptis, in quantum assumptio dicitur quasi ad se sumptio, sed Incarnatio & humanatio ex parte assumpti, quod est caro vel natura humana. Et ideo assumptio differt ratione & ab unionem, & ab Incarnationem seu humanationem.*

#### COMMENTARIUS.

**I**n hoc articulo D. Thom. significationem quarundam vocum potius, quam rem aliquam novam intendit explicare; in re enim, ut ipse supponit in principio corporis articuli, tantum est una relatio unionis in humanitate, & una actio, & passio, per quam mutatur humanitas, & conjungitur Verbo, ex qua mutatione dicta relatio consurgit; sed quia haec diversis vocibus significantur, ideo oportet propriam uniuscujusque significationem exponere, ut variae locutiones, quae inde resultant, bene intelligantur. Oportet autem advertere, quod art. præced. dixi, D. Thom. non agere de hac voce *unio*, ut est verbum, sic enim proprie deberet comparari cum verbo *Assumo*: sed agere tantum de nominibus unionis, & assumptionis, quoniam fortasse credidit hac intellecta differentia, facile posse aliam intelligi. Et hoc oportet præ oculis habere ad intelligendam litteram articuli, quae alioquin difficilis est, & Cajetano negotium facessit.

Respondet ergo, tres esse differentias inter unionem, & assumptionem. Prima, quia unio significat relationem, ut præced. art. dictum est, assumptio vero significat actionem, per quam fit mutatio, ex qua illa relatio consurgit; quod probatur, quia ab assumptione dicitur aliquid assumens, quae est denominatio agentis ab actione sumpta, & aliud denominatur assumptum, quae est denominatio passionis. Sed contra, quia etiam ab unionem dicitur aliquis uniens, & aliud unitum, unde idem D. Thom. hic ad secundum

concedit, quod pater est uniens, quia facit unionem; ergo etiam unio significat actionem. Respondet Cajet. concedendo unionem, prout significatur per verbum, *unio*, significare actionem, non quomodocumque, sed quatenus ex illa resultat relatio unionis, & hoc modo inquit unionem semper significare relationem, vel ut in fieri, vel ut jam factam, in quo differt ab assumptione, quae significat actionem non ut ex illa resultat relatio, sed precise, ut infert mutationem, seu passionem. Dicit etiam potest, verbum *unio* significare actionem, & in proposito eandem actionem significare, quam verbum, *assumo*; & quamquam fortasse differant dicto modo a Cajetan. explicato, magis tamen propria differentia illorum est, quod verbum *assumo* involvit principium, & aliquo modo terminum unionis, & connotat duplicem habitudinem, seu rationem principii & termini in eodem extremo; significat enim ad idem suppositum terminari unionem, a quo est actio uniendi, quia assumere idem est, quod ad se sumere: at vero verbum *unio* non includit hujusmodi terminum, & ideo Pater, & Spiritus S. dicuntur unire, non tamen assumere: Verbum autem utrumque dicitur. At vero vox *unio*, ut est nomen, non denominat unientem, sed unitum; & hoc modo loquitur D. Thom. in corpore artic. ut dixi.

Secunda differentia est, quia *unio* significat veluti in facto esse: *assumptio* autem, velut in fieri, cujus signum, ait D. Thom. est, quia uniens dicitur esse unitum, id est, potest ita denominari, quamvis non semper sit necessarium, ut Cajetanus notat: sed tunc solum, quando uniens sibi aliquid unit: assumens vero nunquam dicitur assumptum, etiam si aliquid ad seumat. Ratio enim hujus est (ut D. Thomas indicat) quia *assumptio* significat actionem, & ideo denominat rem assumptam, ut supponitur assumptioni, & ideo haec denominatio non transit ullo modo in assumptam: at vero vox *unio* significat relationem resultantem ex actione, vel potius ex termino actionis, & ideo denominat extrema unita, prout jam in termino sunt, seu prout intelligitur jam ex eis aliquid unum effectum, ac propterea denominatio uniti potest in ipsum unientem redundare, si aliud sibi uniat. Quod a simili explicuit D. Thom. nam humanitas, inquit, in abstracto non denominat Verbum humanitas, quia humanitas ut sic supponitur assumptioni: at vero homo in concreto recte dicitur de Verbo, quia ut sic significat humanitatem, ut jam existentem in termino assumptionis, & ut Verbo unitam; & hoc modo mihi videtur haec littera intelligenda, quae alioquin satis obscura visa est. Sed dicit aliquis, unionem etiam significare rem, prout est in fieri. Respondet Cajetan. valde obscure, in modo significandi ita esse, tamen in re significata semper significare relationem, quae non habet esse, nisi postquam jam terminata est actio uniendi, & propterea dici, significare rem, prout in facto esse, saltem ex parte rei significata, & in hoc differre ab assumptione; sed non satis hoc intelligo. Unde concedo verbum, *unio*, significare rem prout in fieri non solum in modo significandi, sed etiam in re significata, quia revera significat actionem, unde prius natura denominat unientem, quam intelligatur unio terminata. Ad D. Thomam vero respondeo ipsum non esse locutum de verbo uniendi, sed de nomine unionis. Quocirca signum illud, quo D. Thomas probat hanc secundam differentiam, non videtur satis efficax, nam etiam inter Verbum *unio*, & *assumo* reperietur eadem differentia, licet utrumque significet prout fieri; & ratio illius alia assignari potest, scilicet, quia verbum *assumo*, propter relationem, quam involvit, connotat distinctionem inter rem assumptam, & assumptem, & ideo assumens non potest dici assumptum, quia non distinguitur a se ipso; at vero verbum *unio* absolute significat actionem non involvendo unum extremum, ad quod terminatur unio, magis quam aliud, & ideo indifferenter denominare potest etiam ipsum unientem, si aliquid aliud sibi uniat. Est & alia ratio huius diversae locutionis, nam verbum *Unio* generatim significat actionem uniendi, quocumque modo fiat; at vero *assumptio* magis explicat, & determinat modum ipsius actionis, & indicat id, quod assumitur, ita conjungi alteri, ut in eo sustentetur, & subsistat, & ideo sola natura assumpta dici potest.

*d Tertia differentia est, quia unio significat relationem aequiparantiam, & ideo indifferenter denominat extrema*



trema unita, non sic autem *assumptio*, quia significat actionem, vel passionem, quæ distinctas habitudines dicunt ad agens, vel ad passum, & ad terminos a quo, vel ad quem, & ideo non eodem modo denominat extrema assumptionis. Unde fit, ut divinitas dicatur unita humanitati, sicut humanitas divinitati, non tamen dicatur assumpta a divina persona, vel ad conjunctionem cum humanitate, sicut humanitas denominatur assumpta; & hujus differentiae ratio a priori sumenda est ex dictis in fine præcedentis differentiae, natura enim humana tracta est ad subsistentiam divinam, & non e contrario, illa autem habitudo significata est nomine assumptionis, non autem nomine unionis, ut dixi. Advertit autem Cajetanus in 3. dub. cum relatio unionis dicitur relatio æquiparantiae, intelligendum id esse formaliter, seu quoad denominationem, non quoad entitatem; nam relatio unionis in humanitate est realis, in Verbo tantum rationis, unde quoad entitatem relationis non est ejusdem rationis in utroque extremo: & hoc modo D. Th. in 3. d. 5. q. 1. art. 1. qu. 1. ad 2. dixit relationem unionis in creatore & creatura non esse æquiparantiae, quod docet Scot. d. 2. q. 1. & Gab. ibi. qu. 1. notab. 4. corol. 2. At vero quoad rationem formalem a nobis conceptam, seu quoad denominationem, vel (prout alii loquuntur) quo ad ipsum *esse ad*, dicitur esse æquiparantiae, quia eodem modo denominat utrumque extremum, & illa relatio rationis, quæ concipitur in Verbo, concipitur ad eundem modum, ac si esset relatio realis ejusdem rationis. Alii reddunt aliam rationem, scilicet, quia ab eadem relatione unionis, quæ est in alio extremo, denominatur Verbum unitum: sed hoc satis non est, quia eodem modo dici potest, a relatione creaturæ terminatæ ad Deum, denominari Deum creatorem, & nihilominus relatio creatoris non est æquiparantiae. Unde inter ipsas relationes non mutuas inter Deum & creaturam, quædam formaliter concipiuntur, ut relationes æquiparantiae, seu ejusdem rationis, & denominationis, aliæ ut dissimilantur, seu diversæ rationis, quia vel concipiuntur ad modum similium relationum inter creaturas, & ita illas imitantur in modo denominandi, vel certe quia quædam intelliguntur habere fundamentum diversæ rationis in utroque extremo, ut sunt relatio creatoris, & creaturæ, quæ suo modo fundantur in actione, & passione, vel quasi passione, aliæ vero intelliguntur habere fundamentum ejusdem rationis in utroque extremo formaliter loquendo. Et hujusmodi est relatio unionis, quæ solum intelligitur fundari in conjunctione ipsa, quatenus per eam fit, ut tam vere, & proprie Deus conjunctus sit creaturæ, sicut creatura Deo.

Dices: in materia, & forma unitis, relatio unionis est diversæ rationis, etiam si in generali denominatione unionis conveniant; quod patet, quia proxima fundamenta sunt diversarum rationum, quia substantialis modus, quo materia unitur formæ, vel forma materiæ, diversus est, quia unus pertinet ad causalitatem formalem, alius ad materiale: ergo multo magis in proposito, quia humanitas unitur, ut sustentata a Verbo, verbum autem ut sustentans humanitatem. Respondetur, argumentum concludere hanc relationem esse ejusdem rationis, & denominationis generice, & non specificæ, sicut relatio unionis in humanitate respectu verbi, & in anima respectu corporis, conveniunt in generica, non in specifica ratione unionis. Ex his ergo satis constat differentia inter unionem, & assumptionem quoad significationem supradictam. Quod si utamur nomine unionis, ut multis in usu est, ad significandam actionem, quam alii unionem vocant, facile ex dictis intelligi potest, quomodo etiam differant *assumptio*, & *unio* in hac significatione; conveniunt enim, quatenus eandem actionem omnino significant, differunt vero, sicut dictum est de verbo uniendi, quoniam *unio* absolute, & quasi abstracte significat illam actionem, *assumptio* vero connotat, & in principio talis actionis habitudinem termini, ut scilicet ad se sumat, & in re, circa quam versatur, ut trahatur ad subsistendum in alio, & inde oriuntur variae locutiones supra explicatæ.

Et ex his sufficienter explicatæ sunt solutiones argumentorum D. Th. præterquam solutio ad tertium, in qua explicat D. Th. duos alios terminos, scilicet *Humanatio*, & *Incarnatio*. De quibus breviter dicendum est, eandem actionem significare, quam *assumptio*, vel *unitio*,  
Suarez Tom. XVI.

differre vero in modo significandi, seu in connotatis, quia *assumptio*, ut dictum est, indicat naturam, quæ ad subsistendum in alio assumitur, & connotat terminum assumptionis ex parte personæ agentis, seu assumptis: *Incarnatio* autem, vel *humanatio*, potius connotat aliud extremum unionis ex parte naturæ assumptæ, quatenus ab illa denominatur persona assumens; *unio* vero, seu *unitio* ab utroque abstrahit; & hinc fit, ut Verbum dicatur Incarnatum vel humanatum, humanitas vero non dicatur incarnata; dicitur autem humanitas assumpta, non vero Verbum, utrumque vero dicitur utrique unitum. Et simile suo modo est de hac voce *Deificatio*, quæ in hac materia Patres uti solent, cum dicunt carnem, vel humanitatem fuisse *Deificatam*, id est, deitatu unitam. Et ita significat eandem actionem unitivam, explicando tamen deitatem, ut terminum illius unionis, & *humanitatem*, ut subiectum, contrario scilicet modo, quam *humanatio*, quæ dicit eandem actionem significando humanitatem (ut notavit Dam. l. 3. c. 11.) tanquam terminum illius unionis, Verbum autem ut subiectum, non quidem inhæSIONIS, sed denominationis, quia licet tota mutatio sit in humanitate, denominatio tamen redundat in ipsum Verbum.

Ultimo in eadem solutione ad tertium notanda sunt illa verba, *assumptio differt ratione ab unionem, Incarnationem, & humanationem*. Circa quæ Cajet. movet quartum dubium, quo modo in re differant *unio*, & *assumptio*, nam hætenus de significatione vocum tantum dictum est: sed non est, quod in hoc immoremur, quia, si loquamur de actione ipsa, prout significatur per diversas voces, tantum ratione, & modo significandi, & concipiendi distinguuntur, ut Cajet. concedit, & per se satis constat. Si autem loquamur de relatione unionis comparando illam ad actionem, vel mutationem, seu fundamentum proximum, quodcumque illud sit (de hoc enim dicemus disp. seq.) sic coincidet quæstio hæc cum generali quæstione metaphysica de distinctione relationis a suo fundamento, quæ nō est hoc loco disputanda. Ego vero sentio esse quidem distinctionem aliquam ex natura rei, nō quidem tanquā rerū omnino distinctarum, sed tanquā formalium rationū diversarum, seu tanquam modi, & rei, cujus est modus.

## DISPUTATIO VIII.

In tres sectiones distributa.

*Quid incarnatio sit.*

EX præcedente disputatione duo sumere licet, quæ ad essentiam incarnationis explicandam conferent. Primum est, incarnationem esse quandam actionem realem, vel certe in hoc perficiendo mysterio hujusmodi actionem intervenisse, quod est per se evidens; quia, cum in hoc mysterio sit in rerum natura novum aliquid, quod antea non erat, necesse est, per aliquam actionem esse factum, nam si Verbum caro factum est, aliqua certa actione factum est, quam appellant Concilia unionem carnis ad Verbum, ut constat ex Concilio Ephesino cap. 13. & V. Synodo colla. 8. cap. 4. & 8. Secundum est, hanc actionem seu unionem esse duarum substantiarum conjunctionem, Verbi scilicet & humanæ naturæ, ex quibus componitur hic homo Christus. Ex quo colligitur, hanc actionem non posse esse per veram inhæSIONem actualem unius ex prædictis extremis ad alterum, quia neurrum potest alteri proprie inhærere, etiam si cum illo possit realiter uniri. Superest ergo declarandum, qualis sit hæc unitio, & quem terminum formalem habeat, ad quem tendat, & quem terminum a quo, quidve per eam ipsis extremis addatur, quæ inter se uniuntur, & hinc tandem satisfiet difficultatibus, quæ circa hoc mysterium occurrere solent.

## SECTIO I.

*Utrum Incarnatio sit actio tantum uniens humanitatem Verbo, vel etiam sit producens ipsam humanitatem in rerum natura.*

TRIBUS modis intelligi potest, actionem aliquam unire duo extrema. Primo, producendo totum compositum simulque cum illo comproducendo  
M utrum-

Quo modis unio fieri queat.



utrumque extremum componens totum, huiusmodi est creatio cœli, per quam tam materia, quam forma cœli concreantur, & inter se uniantur. Secundo potest actio ita unire unum extremum alteri, ut unum eorum supponat, & non producat, alterum vero non solum uniat, sed etiam producat, seu comproducat, producendo totum compositum, ita ut producendo uniat, & uniendo producat. Huiusmodi est calefactio, per quam & calor de novo fit, & unitur subiecto, quod sit calidum. Similiter actio, qua educitur forma materialis de potentia materiæ, productiva est, & unitiva talis formæ in materia, & cum materia. Tertio potest esse actio tantum uniens & neutrum extremorum producens in rerum natura, sed solum compositum, quod ex utriusque conjunctione confurgit, qualis est resurrectio. In præsentem ergo certum est, actionem, quæ in incarnatione intervenit, non esse primi generis, quia Verbum, quod est alterum extremum huius unionis, non potest per huiusmodi actionem produci, sed supponitur esse per æternam generationem a Patre. De aliis ergo duobus generibus actionum difficultas non parva est, in quo illorum constituenda sit hæc actio.

Prima  
pinio.

Prima sententia est, incarnationem non esse actionem mere unitivam, sed productivam etiam humanitatis, non in se, sed in Verbo. Hanc opinionem non invenio apud Div. Thomam, aut aliquem antiquum Theologorum, sed quidam moderni Thomistæ eam hoc tempore defendunt, ut facilius ab humanitate Christi existentiam creatam excludant, & quasi coacti vi argumentorum, quæ contra illam sententiam fieri solent. Potestque hæc sententia suaderi primo ex Leone Papa epist. 11. ad Julianum dicente: *Natura nostra non sic assumpta est, ut prius creata, post adsumeretur, sed ut ipsa assumptione crearetur.* Quibus verbis satis formaliter & expresse declaravit, eandem omnino esse actionem, qua humanitas & assumpta est, & creata; fuit ergo illa actio non solum unitiva, sed & productiva animæ seu humanitatis. Et similia videntur verba Fulgentii lib. de Incarnatione & gratia cap. 3. cum enim dixisset, Deum in Virgine & ex Virgine naturam, secundum quam temporaliter conciperetur, & nasceretur, formasse & accepisse, subdit: *Ipsa quippe acceptio carnis fuit conceptio virginis: conceptio autem virginis fuit humanitatis productio; fuit ergo illa eadem actio cum assumptione seu unitione ad Verbum.* Unde inferius aperte subdit: *Una quippe fuit in utero Mariæ Virginis conceptio divinitatis & carnis, & unus est Christus Dei Filius in utraque natura conceptus.* Secundo argumentor ratione sumpta ex prædictis verbis Fulgentii, nam si actio productiva, & unitiva humanitatis essent distinctæ, illa quidam esset prior natura, quam hæc, quia sicut uniri supponit esse, ita productio supponitur ad unionem, quando sunt actiones distinctæ: ergo conceptio humanitatis esset prior natura, quam assumptio, quia humanitas non nisi per cōceptionem producta est: ergo formaliter ac proprie loquendo non esset conceptus Deus ex Virgine: quod est contra fidem. Patet consequentia, quia conceptio prius natura terminata esset ad humanitatem, & non ad Deum, quandoquidem in illo priori humanitas non est unita Deo. Et confirmatur a simili: nam quia actio, per quam creatur anima, est distincta ab ea, per quam unitur corpori, & illi supponitur, ideo per illam actionem non producit homo, sed sola anima: e contrario vero, quia calor eadem actione, qua producit, unitur subiecto, ideo illa actione, non tam fit calor, quam calidum: si vero calor prius natura fieret actione distincta, & postea uniretur, certe illa actio non fieret calidum, sed solus calor: ergo similiter in præsentem, si conceptio humanitatis est actio distincta, & prior, quam assumptio, per illam concipitur humanitas sola, & non Deus homo, & ita non esset Deus conceptus ex Virgine, nec Virgo esset mater Dei. Tertio, quia si humanitas vel anima Christi actione distincta & prius natura crearetur, quæ assumeretur, prius etiam ratione existeret, quam assumeretur: consequens est falsum, ergo. Sequela patet, quia actio productiva, vel creativa terminatur ad existentiam rei. Minor vero probatur, quia juxta probabilem sententiam in anima Christi non est alia existentia ab existentia Verbi increata; quod si hoc verum est, impossibile est intelligere illam animam existentem prius natura, quam unitam

Verbo; ergo nec intelligi potest, prius natura creata, quam unita. Unde confirmatur, quia creatio non potest esse actio distincta ab ea actione, qua essentia unitur existentia; sed incarnatio est actio, per quam essentia animæ & humanitatis unitur existentia, per quam actu existit; ergo illa eadem est creatio ipsius animæ.

Secundo probatur eadem minor, quia, quamvis demus, humanitatem Christi habere propriam existentiam, tamen illam habet dependentiam a Verbo; ergo non potest prius natura existere, quam sit Verbo unita. Antecedens patet, quia in hoc consistit substantialis unio humanitatis ad Verbum, scilicet quod ad ipsum dependentia humanitatis terminatur, hoc enim modo omnes Theologi unionem illam declarant; ideo enim dicitur per hanc unionem Verbum uniri humanitati tanquam sustentans illam, quia, nimirum, humanitas in existendo pendet in hoc genere a Verbo tanquam a sustentante. Nam, si in existendo non pendet, quam ratione ab ipso sustentatur? aut in quo pendere potest? erit ergo per se existens, atque adeo subsistens.

Dices, pendere in unionem. Sed hoc non sufficit, ut per se non existat, nisi media unionem pendeat in sua entitate & existentia, sicut non dicitur anima rationalis pendere a corpore, quia in existendo non pendet, etiam si unio ejus a corpore pendeat. Prima vero consequentia probatur, quia, si humanitas prius natura existit, quam uniatur Verbo, ergo in illo priori non pendet in existendo a Verbo, ergo hoc enim signo colligimus, animam rationalem non pendere in existendo a materia, quia prius natura existit, & creatur, quam uniatur materiæ; & e converso, quia forma materialis, vel accidentalis pendet in existendo a subiecto, inde colligimus pendere etiam in fieri, & consequenter non prius natura fieri, quam uniatur subiecto, nec e converso. Tertio probatur eadem minor, quia anima rationalis, verbi gratia, non est prius creata, seu existens, quam subsistens; ergo neque anima Christi prius natura creata est, quam unita Verbo, & consequenter non alia actione creata est, quam unita. Consequentia est evidens, quia unio seu assumptio fuit in Christi anima loco substantiæ propriæ, quæ est in aliis animabus. Unde eundem ordinem habuit illa unio ad existentiam vel creationem illius animæ, quem habet substantia propria ad creationem & existentiam propriam aliarum animarum, ut latius infra quæst. 6. dicturi sumus. Antecedens probatur, nam creatio propriæ ac formaliter terminatur ad rem subsistentem, ut docet D. Thom. 1. part. qu. 45. art. 4. quia illud creatur, quod proprie existit; hoc autem proprie convenit rei subsistenti: ergo non intelligitur aliquid proprie terminare creationem, donec subsistat; ergo non potest in anima intelligi prius natura creata, quam subsistens. Et confirmatur primo, quia hinc colligunt Theologi, animam rationalem subsistere, quia per creationem fit: si autem creatio præcise terminaretur ad existentiam prius natura quam ad substantiam, nulla esset ratio, qua probaretur animam rationalem prius natura subsistere, quam uniatur corpori, nam satis esset, quod prius natura existeret; ergo signum est, creationem formaliter terminari ad rem subsistentem ut sic, & consequenter in Christi anima creationem ejus formaliter terminari ad unionem, per quam illi substantia divina communicata est. Confirmatur secundo, quia forma materialis & accidentalis non prius natura fit, quam uniatur subiecto, quia naturaliter postulat modum inherentiæ, ut existere possit; ergo & e converso forma subsistens non prius natura fit existens quam subsistens, quia, ut existat, tam naturaliter postulat modum subsistendi, & ab illo pendet, sicut materialis forma modum inherendi, ergo similiter in anima Christi non prius natura fit existentia, quam modus unionis ad Verbum, qui illi est loco substantiæ propriæ.

Quarto argumentor, nam unio animæ rationalis ad Verbum non potest esse actio ex præsupposito subiecto; ergo non potest esse actio a creatione ipsius animæ distincta. Probatur consequentia, quia creatio propriæ est actio, quæ fit sine concursu subiecti ex virtute tantum causæ efficientis, Antecedens probatur: quia nihil potest esse subiectum actionis, nisi quod est subsistens, & ideo materia prima ut generationi supponitur, dicitur esse subsistens, quia est actionis seu mutationis subiectum.

Secun-



Secunda  
opinio.

Secunda sententia affirmat, incarnationem esse actionem mere unitivam, & ex natura rei esse distinctam a creatione rationalis animæ & productione humanitatis. Hæc opinio sumitur ex D. Thoma hac 3. part. qu. 4. art. 2. ubi ait, illud, quod assumitur, debere præintelligi assumptioni, sicut, quod movetur localiter, præintelligitur motui: & quæst. 6. art. 3. sentit, animam Christi eodem modo, & eodem genere actionis esse creatam, quo aliæ animæ rationales. Et ita etiam indicat, quamvis eodem instante fuerit creata & assumpta, prius tamen natura, & diversa actione fuisse creatam: & eadem qu. art. 4. ad 3. dicit, carnem prius natura uniri animæ, quam verbo unione personali. Unde sentit, conceptionem humanitatis esse priorem & distinctam actionem ab unione humanitatis ad Verbum, quod in illa quæstione sæpius repetit, ut ibi videbimus. Idem sentit in 3. dist. 5. qu. 3. art. 1. ad 2. ubi affirmat, quod assumitur, præexistere assumptioni, non tempore, sed natura, seu secundum modum intelligendi. Idem tenet Alex. Alenf. 3. p. qu. 8. memb. 2. ubi dicit, conceptionem esse natura priorem assumptione, & esse carnis prius esse naturaliter assumptione carnis. Ibidem etiam distinguit creationem animæ, & dicit esse priorem assumptione. Expresse id docet Durandus in 3. dist. 15. qu. 2. n. 4. ubi dicit, has actiones esse distinctas, & posse eam, quæ prior est, scilicet creationem animæ, vel formationem humanitatis, eandem esse, vel conservari sine unione. Eandem sententiam supponit Gab. cum Ocham. in 1. dist. 30. qu. 4. ubi ita distinguit creationem animæ Christi ab unione ad Verbum, sicut ab unione ad corpus, quas constat esse distinctissimas actiones. Idem Gabr. cum eodem Ocham. in 3. d. 1. qu. 1. art. 1. & dist. 3. art. 1. Scot. dist. 1. qu. 1. Et primo probari potest, quia actiones, ut ex Philosophia constat, distinguuntur ex terminis: ergo ubi termini sunt in re ipsa distincti, oportet actiones esse distinctas; sed in præsentē termini sunt distincti, nam substantia animæ, vel materiæ & humanitatis, est in re ipsa distincta ab unione ad Verbum, ut inferius constabit: ergo & actio, per quam fit anima, & per quam unitur Verbo, sunt distinctæ. Sed hæc ratio non videtur efficax, nam in eadem forma fieri potest in forma accidentali & materiali, & unione illius ad subiectum, nam etiam entitas vel substantia talis formæ distinguitur ex natura rei ab unione: ergo pari ratione concludendum esset, fieri per diversas actiones, quod tamen est falsum, quia cum huiusmodi forma non fiat, nisi per educationem de potentia subiecti, non potest alia actione fieri, & alia uniri: nam vel illa actio, qua fit, est cum materiali concursu subiecti, vel non: si non; ergo est creatio, quia est actio ex nullo subiecto, atque adeo ex nihilo: si vero fit cum materiali concursu subiecti: ergo illa met actio, quantumvis præcise ac formaliter sumpta pendet essentialiter a subiecto, illique unitur: ergo ex vi illius, terminus ejus fit in subiecto, & unitur illi; ergo non est necessaria actio uniens distincta. Sic ergo in præsentē dici potest, etiam si substantia humanitatis vel animæ sit distincta ab unione ad Verbum, nihilominus per eandem actionem fieri, quia fit dependenter a Verbo, & non prius in se, quam in Verbo.

Probat  
prædicta  
ratio.

Sed nihilominus amplius declarari & urgeri potest ratio illa in hunc modum: nam, licet verum sit, unam & eandem esse actionem, qua accidens fit, & unitur subiecto, tamen, sicut in accidente in facto esse distinguimus entitatem accidentis ab actuali inhærentia seu unione, ita necesse est, ut in ipsa actione distinguamus illam actionem, ut tendit ad entitatem, vel ad unionem accidentis, quia actio nihil aliud est, quam fieri ipsius rei, ut est ab agente, res autem in fieri & in facto esse servant inter se proportionem, & ideo, si in facto esse est distinctio, erit etiam in fieri. Unitas ergo illius actionis productivæ & unitivæ accidentis in subiecto consistit in hoc, quod licet illa duo ex natura rei distinguantur, tamen in ipsa actione se habent quasi partialiter, nam ita componunt unam actionem, ut essentialiter illam compleant, & illa met actio, ut terminatur ad entitatem rei, essentialiter pendeat a tali modo actionis, quo fit in subiecto, & ex subiecto, & consequenter includat, quidquid necessarium est in actione ad uniendum formam subiecto. Quamvis enim illa actio una sit propter rationem factam, quæ est urgens, non tamen concipienda est, ut omnino indivisibilis, nam, cum terminus non sit indivi-

Suarez Tom. XVI.

bilis, sed aliquo modo compositus ex entitate formæ & modo unionis, non potest actio ipsa, quæ cum termino identificatur, esse indivisibilis; est ergo suo modo composita ex fieri entitatis, & ex fieri unionis, utrumque essentialiter includens, atque ita pendens & connexum unum cum alio, ut non possint in re separari, prout per talem actionem fiunt. Ex quo fit, ut quamvis entitas formæ, secundum se, seu secundum cognitionem aut subsistendi consequentiam sit prior, quam unio ad subiectum, ut tamen fit per illam actionem, non sit prior ex natura rei, quam unio ad subiectum. Hæc autem doctrina, licet vera sit in dicto exemplo, non videtur tamen posse ad præsens mysterium accommodari. Primo quidem, quia entitas naturæ humanæ, seu animæ, & unio ad Verbum, non solum distinguuntur ex natura rei, sed etiam sunt distincti ordinis, nam entitas animæ est naturalis, modus autem unionis est omnino supernaturalis: unde non est inter hæc duo illa naturalis connexio, quæ est inter formam accidentalem seu materialem, & unionem ejus ad subiectum: ergo actio, qua fit entitas animæ & unio ejus ad Verbum, non potest esse una, nec per modum simplicissimæ actionis, cum terminus non sit simplex, sicut de alia actione productiva & unitiva formæ dicebamus. Neque per modum actionis compositæ, saltem cum essentiali dependentia illius actionis, ut terminatur ad entitatem naturalem, ab alia veluti parte illius actionis, quæ terminatur ad modum supernaturalis unionis, quia non potest id, quod naturale est, ita essentialiter dependere ab eo, quod est supernaturale, vel fatendum erit, ipsam entitatem naturalem animæ Christi fieri in rerum natura per actionem & modum omnino supernaturalem, quod inauditum est. Unde argumentor secundo, nam ex opposita sententia sequitur, animam rationalem Christi non fieri per creationem, quod est plane falsum, & contra modum loquendi Theologorum & Sanctorum: ergo. Sequela patet, tum quia creatio rei naturalis est actio ad ordinem naturæ pertinens, anima autem Christi dicitur facta per actionem alterius ordinis; tum etiam, quia creatio est actio, quæ fit ex nihilo per efficaciam agentis sine adminiculo alterius: anima autem Christi non ita facta est, sed cum actuali dependentia a Verbo tanquam a sustentante. Dicitur fortasse, creationi tantum repugnare, quod sit actio ex præsupposito subiecto, non vero quod sit actio ex præexistente supposito, ut sic dicam, seu cum actuali & essentiali dependentia a supposito terminante naturam factam per illam actionem: & hac ratione consequenter dicetur, animam Christi factam esse per creationem, quia, quoad entitatem suam non est facta ex præsupposito subiecto, sed ex nihilo, non tamen per puram creationem, sed per creationem simul unitivam sui termini ad hypostasim Verbi. Sed contra hoc est in primis, quia ad rationem creationis non satis est, ut non sit ex præsupposito subiecto: transubstantiatio enim non est actio ex subiecto, & tamen, quia est ex præsupposito termino, censetur esse actio distincta rationis a creatione: ergo consequenter idem posset in præsentē probabiliter dici. Deinde saltem sequitur, animam Christi non factam esse per creationem ejusdem speciei, seu rationis, cum creatione aliarum animarum: consequens est falsum: ergo. Sequela patet, quia actio unionis hypostaticæ essentialiter distincta est ab actione, qua creatur anima nostra; & hæc creatio nullo modo pendet, nec pendere potest essentialiter ab actione, qua fit illa unio: ergo, si creatio animæ Christi est eadem omnino actio cum unione, & quatenus terminatur ad entitatem illius animæ, pendet essentialiter ab unione cum Verbo, seu ab ipso Verbo ut terminante, necesse est, ut ratione creationis, seu productionis animæ sit actio essentialiter distincta a creatione aliarum animarum: consequens est contra communem sensum Theologorum omnium, ut supra ex D. Thoma visum est, & sumitur ex Augustino, epist. 99. ad Evodium dicente; *Ita sibi creavit animam Dei Filius, ut ceteris creat, quod etiam docuit Hieronymus apol. 2. cont. Ruff. & Leo Pap. epist. Nativitas* (inquit) *Domini secundum carnem, quamvis habeat quadam propria, quibus humana conditionis initia transcendit, non alterius tamen naturæ erat ejus caro, quam nostra, nec alio illi, quam ceteris hominibus, anima est inspirata principio.*

Secunda  
sententia  
probatio

Obiectio.

Dissolvitur.



Inconveniens  
est ex  
opinione  
opposita  
deducere,

Et confirmatur primo, quia alias sequitur, si anima rationalis relinqueretur a Verbo, non posse conservari in rerum natura, nisi Deus nova actione ex se creativa, & naturaliter conservativa, illam inciperet conservare: consequens est sine fundamento dictum, & præter omnium sententiam. Et similiter sequitur ad assumendam materiam corporis Christi necessarium fuisse, ut Deus desineret conservare materiam illa antiqua actione, qua prius eam conservabat, ut inciperet illam conservare per actionem, qua illam Verbo uniebat: & e converso, quando per continuam nutritionem aliquæ partes corporis Christi ita resolvebantur, ut prorsus dimitterentur a Verbo, quia non erant amplius assumenda, sequitur, vel materiam illam fuisse annihilandam per suspensionem actionis conservativæ unionis ejus ad Verbum, quia per eandem dicitur conservari in rerum natura: vel certe necessariam esse novam Dei actionem, per quam conservetur. Imo ulterius sequitur, etiam generationem Christi humanam quantum ad formationem humanitatis & unionem animæ cum corpore non fuisse actionem ejusdem rationis cum actione, qua generantur alii homines: est enim eadem ratio de tota humanitate, quæ de creatione animæ: nam, ut infra dicam, tota humanitas assumpta, est immediate, non solum ratione partium, sed etiam ratione totius. Unde tota etiam humanitas concepta seu formata est dependenter a Verbo: erit ergo concepta & unita per eandem actionem, atque adeo per actionem alterius ordinis. Rursus sequitur, resurrectionem Christi fuisse actionem alterius ordinis ab illa, per quam resurgent alii homines, nam per illam actionem reproducta est Christi humanitas, non in se, sed in Verbo. Et explicatur apertius in hunc modum: nam in aliis hominibus, in quibus anima habet subsistentiam propriam, actio, qua anima unitur corpori, sive in generatione, sive in resurrectione, unit non solum entitatem animæ entitati materiæ, sed etiam subsistentiam animæ partiali subsistentiæ materiæ, ut ego opinor, vel essentiam materiæ secundum alios. At vero in anima Christi, quæ loco subsistentiæ propriæ habuit unionem ad Verbum, quando entitas animæ unita est entitati materiæ, non subsistentia propria, quæ nulla erat, sed unio hypostatica partialis ipsius animæ, fuit unita unioni hypostaticæ partiali ipsius materiæ, ut ita ex utraque composita sit una integra hypostatica unio totius naturæ, quæ omnia infra quæstione sexta late declarabuntur. Si autem eadem est actio, qua formatur humanitas, sive in conceptione sive in resurrectione, & qua unitur Verbo, necesse est, illam actionem habere vim uniendi partiales uniones hypostaticas, & hoc modo uniendi etiam totam naturam Verbo: hæc autem actio longe altioris rationis est ab actione naturali, quæ solum potest unire animam propriæ naturalis subsistentiæ. Hæc autem omnia neque multiplicanda sunt, sive convincente ratione, neque sunt consentanea modo loquendi Scripturæ & Sanctorum, qui eodem modo loquuntur de resurrectione nostra & Christi, & de conceptione quantum ad substantialem formationem corporis & animæ, licet in principio efficiente, & in modo, & subita formatione corporis fuerit alterius rationis. Imo in modo loquendi interdum indicant, formationem humanitatis antecedere assumptionem, quod saltem de naturæ ordine intelligendum est. Sic in Concilio Ephesino canone 13. dicitur, *Verbum copulasse sibi carnem animatam animam rationali*: & inferius dicitur, quod, *Verbum sustinuit generationem, carnis suæ naturam, suam faciens*. Et similia multa in eo decreto, quod sumptum est ex ep. Cyrilli ad Nestorium, leguntur, in quibus satis significatur, formationem humanitatis esse distinctam, & ordine naturæ antecedere ad unionem. Et idem sumi potest ex Sophronio in sua ep. quæ refertur in VI. Synodo act. 11. & Damasc. lib. 3. ca. 22. Fulg. & Leone, locis supra cit. & aliis Patribus, quos refert Canisius lib. 3. de B. Maria c. 22. dicentibus, simul ac creata fuit anima, vel formata humanitas, fuisse unita Verbo. Denique nomen ipsum *assumptionis*, ut D. Th. recte notavit denotat id, quod assumitur, non fieri rerum natura per eam actionem, qua assumitur, sed supponi; quando enim aqua calida se reducit ad frigiditatem, non dicitur proprie assumere frigiditatem, sed illam in se producere.

Ut, quod in hac quæstione verum esse censeo, exponam, præmitto, illam non pendere (ut aliqui existimant) ex illa quæstione, an in humanitate Christi sit aliqua existentia creata præter existentiam Verbi, nam licet, qui negant, hujusmodi creatam existentiam magis consequenter loquantur, asserendo, eadem actione produci animam seu humanitatem Christi in rerum natura, & uniri Verbo, tamen multi etiam qui de existentia Christi ita opinantur, distinguunt actiones, & dicunt, creationem vel productionem terminari ad entitatem essentiam, unionem vero ad communicationem existentiam, & subsistentiam, quod tamen commode sustineri, aut intelligi non potest, ut latius infra dicam q. 17. Unde e converso non est dubium, quin opinio distinguens hæc duas actiones, aptior sit ad ostendendum, esse in humanitate Christi existentiam creatam, quia creatio re vera necessario terminari debet ad rem existentem ut sic, nihilominus tamen neque illa opinio in hac fundatur præcipue: certius enim existimo, esse in humanitate Christi existentiam propriam, quam actiones has distinguunt, ut suo loco ostendam. Neque omnino illa opinio ex hoc pendet, nam etiam, qui affirmant, hanc actionem esse unam, possunt defendere esse in humanitate existentiam propriam, quæ per hanc actionem sit dependenter a Verbo. Sicut accidens habet existentiam propriam distinctam ab existentia subjecti, quam eandem retinet, quando separatur a subjecto & conservatur: & nihilominus per eandem actionem fit, & unitur, quia per illam recipit existentiam suam dependenter a subjecto.

Hinc colligo & adverto secundo, supposita illa opinione de existentia creata humanitatis Christi, resolutionem præsentis quæstionis maxime pendere ex modo dependentiæ, quem humanitas existens in Verbo habet a subsistentia Verbi; nam si existentia humanitatis ita pendet ab unione ad Verbum, ut ex vi illius actionis, qua nunc recipit existentiam, non possit illam recipere, nisi cum concursu Verbi in ratione terminantis, sic necesse est fateri, actionem productivam & unitivam esse eandem: si autem non est tanta dependentia, sed existentia illa conservari potest per eandem actionem absque unione, consequenter dicendum est actiones esse diversas, cum realiter separari possint. Hujus autem quæstionis resolutio pendet ex alia, quomodo, scilicet, existentia naturæ creatæ pendeat a subsistentia, per quam terminatur, quia, cum unio hypostatica suppleat vicem propriæ subsistentiæ, necesse est, ut suppleat vicem, quam entitas creata habet a propria subsistentia, & ideo talem dependentiam habebit existentia humanitatis a Verbo, media hypostatica unione, qualem habet existentia alterius hominis seu humanitatis ejus a propria subsistentia seu personalitate.

Quocirca, qui existimant (ut Cajetanus, & alii) subsistentiam propriam naturæ esse priorem existentia, & comparari ad illam, ut potentiam ad actum, consequenter dicent, substantialem existentiam pendere a subsistentia ut a sustentante, seu complente proprium receptaculum talis existentiam, & similiter dicent, naturam pendere in esse simpliciter a subsistentia, quia sine illa non est naturaliter capax existentiam: & proportionem servata, dicent, humanitatem simpliciter pendere in esse simpliciter ab unione ad Verbum, quia sine illa non est capax existentiam simpliciter, præsertim, si verum est solum existere per existentiam increatam Verbi. Sed fundamentum hujus sententiæ mihi non probatur, quia supponit, existentiam naturæ esse rem distinctam ab ipsa natura, esseque posteriorem subsistentia, & hanc esse veluti medium seu rationem conjungendi existentiam cum essentia, quæ mihi non sunt intelligibilia, ut in Metaphysica latius disputavi: & in præsentem materiam supponit illa sententia, unionem humanitatis ad Verbum, vel fuisse non tantum ad subsistendum, sed etiam ad existendum per existentiam increatam: vel etiam si in humanitate Christi admittatur existentia creata, ante hanc ordine naturæ præcedere unionem ad Verbum, ut illa natura jam personata capax sit existentiam; utrumque autem horum existimo falsum, ut latius dicam qu. 17. quia non potest unio realis fieri, nisi ad actualem entitatem realem, in qua intrinsece & absque ullo medio includitur existentia; hic ergo modus dependentiæ naturæ a subsistentia, vel unione, verus non apparet, nec ratione illius

Notabilis

Secundum



alius credi potest unam esse actionem, qua humanitas unita est Verbo, & in rerum natura producta.

Est ergo alia sententia, affirmans, subsistentiam propriam esse terminum existentie, & quasi complementum naturæ existentis. Et juxta hanc sententiam sustineri potest, naturam pendere in esse simpliciter e sua subsistentia, quia non potest naturaliter existentiam recipere, nisi terminatam, & cum suo complemento. Ex quo fit, ut per eandem indivisibilem actionem producat res subsistens cum sua existentia, & subsistentia. Quod facilius intelligitur, si supponamus, subsistentiam naturæ non fieri per resultantiam ab ipsa natura existente, sed immediate fieri ab ipso agente, seu creante naturam: nam proprie non creat naturam, sed personam vel suppositum: unde una indivisibili actione illi communicat existentiam terminatam subsistentia. Quod potest exemplo declarari in existentia accidentis, & inhæensione ejus in subiecto: nam actualis inhæsiō non est prior existentia accidentis, sed potius est ordine naturæ, aut saltem intellectu posterior, nam actualis inherētia est modus illius existentie & quasi ultimus terminus ejus: & nihilominus illa existentia ita pendet ab actuali inhærentia, ut neque fieri, neque esse possit naturaliter sine illa, unde oritur, ut talis inherētia non resultet a tali existentia, sed utraque simul & per modum unius, & per unam & indissolubilem actionem fiat ab agente ex præsupposito subiecto: ita ergo, illa proportionē servata, philosophari quis potest de existentia & subsistentia naturæ substantialis. Estque hic modus dicendi satis probabilis, nam cum subsistentia sit ultimus terminus naturæ, nulla est repugnantia, quod ab illa tanquam ab ultimo actu naturaliter pendeat. Et juxta hanc opinionem consequenter dicendum videtur, hanc dependentiam naturæ existentis a sua subsistentia, suppleri in Christo per unionem ad Verbum, & consequenter in suo fieri pendere a Verbo. Ac denique propter hanc causam eadem actione fieri & uniri Verbo.

Sed nihilominus hic dicendi modus mihi non satis persuadetur, primo, quia probabilissimum mihi est, ut infra dicam, subsistentiam non immediate attingi ab extrinseco agente influxu creativo, vel generativo, sed resultare ex natura terminante formaliter creationem, ut generationem ex vi intrinseca ejus, & ideo dici concreari, sicut propriæ passiones concreari dicuntur, quod magis proprie convenit subsistentiæ, quia est de consummatione substantiali ipsius naturæ; & eodem modo dicitur creatio, tendere seu terminari ad rem subsistentem, quia vi sua facit rem independentem a subiecto, & ideo ex natura rei attingit rem, quæ necessario per subsistentiam completur, necessario resultantem ex esse per creationem communicato. Juxta hanc ergo sententiam non potest proprie existentia pendere a subsistentia, sed potius hæc pendet ab illa, utpote ab ea resultans. Secundo, quia subsistentia solum est quidam modus existentie, per quam ita terminatur, & in se fit existens, ut ei repugnet in alio subsistere; nulla est autem ratio, ob quam res pendeat in esse aut fieri a modo suo, qui est posterior ipsa, & nullum proprium genus causalitatis habet in ipsa. Unde in hoc non est simile, quod de accidente afferebatur, accedens enim non tam pendet ab actuali existentia, quam, mediante ipsa, pendet a subiecto, quod est propria causa ejus in genere causæ materialis: ipsa ergo actualis inhæsiō est actualis dependentia accidentis a subiecto, tam in fieri, quam in esse: res autem subsistens, ut sic, est independentens a subiecto, & ideo subsistentia non potest habere rationem dependentiæ ab alia causa, neque ipsa etiam habet propriam aliquam rationem causæ, a qua existentia dependeat. Unde ob hanc etiam specialem rationem non videtur humanitas Christi posse dependere in suo esse simpliciter ab unionē hypostatica, seu a Verbo, media unionē, quia non videtur posse intelligi talis dependentia sine aliquo proprio influxu, & propria causalitate Verbi in humanitatem, & in naturalem entitatem ejus: quod tamen dici non potest, quia omnis causalitas Verbi ad extra, etiam in humanitatem, est tantum effectiva & communis omnibus personis.

Nec satisfaciet, qui dixerit, habere Verbum aliquem proprium influxum terminativum, qui non est propria causalitas, quamvis ad modum ejus a nobis explicetur, & ideo non repugnare esse proprium Verbi: hoc (in-

quam) non satisfacit, quia, licet respectu unionis verum sit pendere hoc speciali modo a Verbo tanquam a proprio termino, quia dicit intrinsecam habitudinem & relationem transcendentalem ad ipsum: tamen respectu naturæ humanæ, quantum ad suam entitatem absolutam, non potest intelligi ille specialis influxus & causalitas, quam Verbum habeat in talem entitatem, nam respectu illius non habet locum ratio termini, quia natura ut sic non dicit illam intrinsecam habitudinem, nec potest terminari ipsa a Verbo, nisi media unionē, & ratione illius tantum: & ideo Doctores numquam tribuunt humanitati dependentiam in entitate sua a Verbo, sed dependentiam suppositalem.

Quod si quis fortasse objiciat, naturam substantialem non posse naturaliter esse sine sua subsistentia, & ideo necessarium esse, ut naturaliter etiam pendeat ex illa, responderi uno verbo posset, negando consecutionem: aliud est enim, unum connecti necessario alteri, aliud pendere ex illo; nam hoc posterius significat, quod sit effectus illius, aut quod per suum esse formaliter respiciat illud; potest autem esse connexio sine aliquo istorum, solum quia unum dimanet ab altero, sic enim non potest esse quantitas sine figura, nec corpus sine ubi, nec anima sine intellectu, & tamen, nec quantitas pendet a figura, nec corpus ab ubi, nec anima ab intellectu, & in universum idem dici potest de quacūq; essetia & proprietate illā consequente.

Majoris tamen claritatis gratia, & quia conferet ad rem, de qua agimus, distinguere possumus duplicem modum dependentiæ. Unus est, quo una res pendet ab alia tanquam a propria & per se causa influente in illam illud esse, in quo pendere dicitur ab illa, & hæc est propriissima & rigorosa dependentia.

Alio tamen modo potest una res dici dependere ab alia, quia ita est connexa cum illa, ut, quamvis ab illa proprie non accipiat esse, tamen ita illam requirat ad existendum, ut sine illa neque naturaliter esse possit, neque illi debeat conservatio in esse, si tali re careat, nisi supernaturaliter suppleatur. Possunt fortasse præter hos alii modi dependentiæ excogitari, sed præsentī negotio hi sufficiunt. Et prior quidem expositione non indiget, cum per se sit satis clarus, quomodo verius existimo naturam creatam quoad suum esse seu existentiam simpliciter non pendere a propria subsistentia, neque humanitatem Christi ab unionē cum Verbo, quod mihi satis probant rationes parum antea factæ. Posterior autem modus dependentiæ declaratur primū exemplis: illo namque modo dici potest sine improprietate pendere materiam a quantitate, non quod quantitas influat esse in materiam, cum potius (juxta probabiliorē sententiam) quantitas sit passio consequens materiam; sed quia quantitas est talis dispositio, & tam intrinseca materiæ, ut omnino præter naturam ejus sit sine illa conservari, ita ut, si quantitas ab illa separaretur, consequens sit illam definire esse, quia debitum ei non est, hoc modo conservari in esse. Atque hoc modo censent multi in consecratione Eucharistiæ materiam panis definire esse ex vi actionis, qua separatur quantitas panis ab ipsa, quia non est naturaliter debitum illi conservari in tali statu, ut infra suo loco dicitur. Et fortasse dependentia materiæ a forma est ejusdem rationis, quia cum materia habeat esse per creationem, non videtur posse forma directe influere in actionem, qua fit materia, & consequenter neque in esse illius. Solum ergo requiri potest, ut illa sit, tanquam quidam actus & complementum ejus, quo si omnino vacua reperiatur, non debetur illi conservatio in esse: sicut nec debetur fieri, nisi ut actu sit sub aliqua forma.

Ad hunc etiam modum videtur reduci dependentia, quam naturale compositum habet ex materia & tali forma, seu unio harum partium inter se a dispositionibus accidentalibus, nam dispositiones non habent aliquem directum influxum in ipsam unionem: quia non habent effectivum, ut suppono: loquor enim de illis dispositionibus, quæ effective manant a forma: illæ enim dispositiones, cum supponant in genere causæ efficientis formam in materia, non possunt illam efficere. Neque etiam habent influxum formalem, quia hoc modo solum reddunt subiectum calidum, aut siccum, &c. causalitas vero dispositiva solum videtur in hoc consistere, quod illud compositum talis est naturæ, quod ad

Impugnatio refellitur.

Quot & quales dependentie modi.

Occurrit, cui obiectum.



naturalem statum solum postulat, talibus dispositionibus esse affectum, quibus sublatis, ei debita non est conservatio in esse. Et alia similia exempla hujus connexionis & dependentiæ afferri possent. Ratio autem a priori non est alia, nisi quia hic modus connexionis & dependentiæ non involvit repugnantiam, & aliunde est consentaneus indigentia & imperfectioni rerum creatarum, quæ ut esse naturaliter possint, non solum proprias ac per se causas, sed etiam plures condiciones, dispositiones, aut intrinsecos modos requirunt. Item quia substantia creata sine accidentibus omnino esset frustra, ut anima sine potentis, quia non esset apta ad aliquam operationem, nec ad aliquem finem, & ideo, sublatis hujusmodi necessariis proprietatibus, non debetur illi esse, nec influxus ille, quo in esse conservatur. Et hoc modo nulla est substantia creata, quantumvis incorruptibilis, quæ per actionem positivam destrui non possit, separando scilicet ab ea intrinseca accidentia, seu proprietates, sine quibus naturaliter esse non potest. Neque hoc est contra incorruptibilitatem talium rerum, nam ad hanc satis est, ut illa actio nulla vi agentis naturalis sit possibilis, sed sola virtute divina, operante supra naturas rerum. Atque hac sola ratione potest convenienter defendi, hujusmodi res, & substantias incorruptibiles; & simplices posse converti in alias, ut latius in 3. to. disputabimus.

De hoc ergo genere dependentiæ facile concedam, naturam creatam pendere naturaliter a propria substantia, quia sine illa nec naturaliter esse potest, neque ei debetur, ut in tali statu conservetur in esse, nisi aliunde supernaturaliter suppleatur substantiæ defectus.

Differentia inter duos assignatos dependentiæ modos.

Est autem in hoc notanda differentia inter hunc modum dependentiæ & priorem, quod res, quæ priori modo dependet a pluribus causis, non potest concipi simpliciter existens, priusquam dimanet ab omnibus illis, & a qualibet earum in suo genere: & hac ratione actio causæ secundæ non potest intelligi ut existens priusquam dimanans a causa secundæ & prima, quia ab utraque per se & essentialiter pendet; & similiter forma accidentalis non potest naturaliter prius esse existens, quam procedens tam ab agente, quam a subiecto aut materia, quia ab utroque simul per se pendet. At vero in posteriori genere dependentiæ res, quæ ab alia pendere dicitur illo modo, præintelligi potest ut prius natura simpliciter existens, quia non pendet ab illa ut ab influente directe ipsum esse. Et hinc etiam fit, ut non obstante hoc genere dependentiæ possit id, quod dependet, esse principium efficiens ejus, a quo pendere dicitur, quia supponitur jam habere esse, per quod possit illud causare, & non pendet ab illo, nisi ut a conditione consequente suum esse, suamque entitatem, & afficiente ipsam: hoc autem in priori genere dependentiæ fortasse repugnat, quia, cum efficere supponat esse simpliciter, non potest intelligi, quod aliquid sit vera & propria causa efficiens alicujus propriæ causæ sui esse, sed hoc spectat ad longiorem physicam disputationem. Denique hinc fit, ut licet in priori modo dependentiæ una interveniat actio, per quam effectus sit dependenter ab omnibus suis causis per se, ut videre licet, & explicatum est in educatione formæ dependentis in esse & fieri a materia, tamen in posteriori modo dependentiæ præter actionem, per quam res manat a propriis causis suis, fere semper intervenit alia actio, vel dimanatio, per quam fit ea rei conditio vel proprietas, a qua res illo modo pendere dicitur, sicut patet in dictis exemplis: nam in creatione animæ cum suis potentiis, intelligitur creatio terminata ad substantiam animæ, & deinde dimanatio potentiarum ab ipsa anima: & idem communiter censetur de ultima dispositione dimanante a forma, nam supponit generationem terminatam ad substantiam, & addit denominationem distinctam, sive enim illa vocetur propria actio, sive non (quod ad quæstionem de nomine spectat), non potest tamen negari quin sit influxus distinctus, & separabilis a priori actione, imo interdum contingit impediri & postea expediri, ut patet in aqua calida reducens se ad pristinam frigiditatem. Atque idem fortasse est de materia & quantitate, supponitur enim creatio materiæ, & deinde resultat quantitas, sive resultat mediante forma, ut quidam volunt, sive ab ipsa entitate materiæ, ut est probabile, vel ut alii volunt,

immediate a Deo confertur creante materiam, & dante illi proprietatem connaturalem & debitam ex principio passivo potius quam activo; & tunc etiam necessaria est propria actio, vel quasi actio, qua fiat quantitas, nam creatio materiæ ut sic ad solam substantiam terminatur, & de potentia absoluta posset præcise fieri sine adjectione quantitatis: ergo, cum nunc additur quantitas, nova effectio est, quæ solet concreatio vocari, quia cum creatione ex natura sua conjuncta est, te tamen vera ex illa & creatione non componitur una propria actio, sicut ex substantia materiæ, & quantitate ejus non fit unum per se proprie, sed per accidens.

Ex hac ergo doctrina definiendam esse censeo præsentem quæstionem: & in primis de humanitate seu anima, & substantia propria censeo fieri per actiones vel effectiones aliquo modo in re distinctas & separabiles. Et quidem, si verum est, substantiam resultare effective a natura, res est clara, quia illa resultantia quoddam genus effectiois est distinctum ab ipsa creatione, cum & sit a distincto principio proximo, & tendat ad terminum ex natura rei distinctum, & de potentia absoluta suspendi & impediri possit, manente creatione & termino ejus. Si autem substantia non manat active a natura, sed sit etiam a solo creante vel generante, sic etiam distincta erit effectio, quamvis principium agens vel creans non sit distinctum, quia & termini sunt distincti, & unus ad alterum simpliciter præsupponitur ordine naturæ, denique etiam hoc modo est prior effectio a posteriori de potentia absoluta separabilis. Et ratio sumitur ex dictis, quia natura non pendet a substantia, ut a propria causa vel principio, sed ut a conditione consequente ipsam, & ideo per distinctam effectionem consequitur vel jungitur illi, licet propter naturalem concomitantiam dicantur fieri per modum unius. Quod si quis contendat, ex effectione naturæ & substantiæ una actionem consurgere, sicut ex natura & substantia una substantia componitur, contra hoc non admodum disputabo: est enim probabilis dicendi modus, quia actio imitatur naturam sui termini, in quo facile potest constitui differentia inter hanc effectionem substantiæ, & dimanationem propriarum passionum, quia per has non completur substantialiter terminus creationis, sicut per illam. Hoc autem censeo probabile, dummodo non negetur, illam actionem esse compositam, & non omnino simplicem: & ea, ex quibus componitur, ex natura rei esse distincta, scilicet, effectionem naturæ, & effectionem modi seu termini aut substantiæ ejus; sic adeo, ut in re ipsa separabiles sint, ut antea dicebam: & ideo superius non simpliciter dixi, has esse distinctas actiones, sed aliquo modo in re ipsa distingui, sive ut duas actiones, sive ut partes ejusdem actionis compositæ, sive ut substantiam & essentiam unius actionis, & modum quandam & complementum ejus, separabilem ab ipsa, sicut essentia naturæ est a substantia separabilis. Quinimo, etiam si quis contendat, illam actionem ita esse unam, ut etiam de potentia absoluta sit, ut ita dicam, indissolubilis, ita ut non possit manere eadem numero actio, quæ est effectio naturæ, si suspendatur effectio substantiæ: præterquam quod hoc gratis, & sine fundamento dicet, quod non levibus argumentis & incommodis impugnatum est, adhuc eo posito negandum non est, illam actionem esse compositam, sicut est terminus ejus, in quo sunt entitas naturæ, & modus substantiæ, ex natura rei distincta, & in actione reperitur productio entitatis naturæ & comproductio, & quasi additio substantiæ; unde necesse est, ut per illam actionem aliquod esse reale fiat in natura, distinctum ex natura rei ab ipsa substantia; unde cum actio identificetur realiter cum termino tantum fieri ejus, necesse est, ut ubi terminus est compositus, actio etiam composita sit, sive sit indivisibilis, seu indissolubilis, ut etiam de potentia absoluta non possit manere secundum aliquid sui, nisi etiam sit secundum totum suum complementum; sive, quod verius est, de potentia absoluta possit esse illa actio præcise, ut est productio, vel creatio naturæ, etiam si non sit comproductio, vel concreatio substantiæ.

Ultimo ex dictis omnibus colligitur resolutio præsentis quæstionis: dicendum est enim primo, distinctas esse in re ipsa actiones, quibus anima v.g. Christi creatur, & Verbo unitur, vel quibus formatur humanitas, & Verbo

Anime effectio ab ejusdem substantiæ effectione distincta est in re.

Creatio anime Christi & unio ejus ad Verbum distinctæ sunt actiones.



bo copulatur: nam quod effectiones sint aliquo modo distinctæ, evidenter sequitur ex dictis. Primo, quia effectio substantiæ propriæ est in re distincta ab effectione naturæ: ergo multo magis effectio unionis hypostaticæ est distincta ab effectione naturæ, quæ unitur: nam multo magis peregrina est (ut sic dicam) & extrinsecus adjuncta unio, quam substantia propria. Secundo quia effectio animæ Christi v.g. est vera creatio, ejusdem rationis essentialis & specificæ cum actione, qua produci-tur substantia cujuslibet alterius animæ rationalis, ut & testimoniis & rationibus satis probatum est: effectio autem unionis non est creatio, quia non est actio ex nihilo, sed ex præsupposito subjecto, scilicet, humanitate, quæ ex non unita fit per illam actionem unita Verbo: recte enim potest humanitas, quamvis non supponatur subsistens, esse subjectum hujus effectionis, quia per illam eo tendit, ut in alio subsistat. Unde fit tertio, ut prior effectio ad ordinem naturæ pertineat, posterior vero sit in supremo ordine supernaturalium rerum, qui est gradus unionis hypostaticæ. Quarto tandem fit, ut prior effectio interdum sit per modum conservationis, ut in materia, interdum per veram creationem, ut in anima Christi in primo instante incarnationis, interdum vero per modum cujusdam naturalis mutationis, ut in formatione seu conceptione humanitatis Christi, nam, licet illa quoad modum fuerit supernaturalis, tamen quantum ad substantiam, id est, quantum ad unionem animæ cum corpore fuit naturalis mutatio. At vero posterior effectio essentialiter est quædam mutatio maxime supernaturalis in sua essentia & specie. Neque hærendum est in nomine mutationis, eo quod incarnatio simul tempore cum creatione animæ & formatione humanitatis facta sit: & mutatio dici non soleat, nisi illa, qua res aliter se habeat, quam priori tempore se habuerit: nam nec certum est, hunc esse solum usum illius vocis, ut quamvis admittatur, per illum nihil additur in significatione illius vocis ultra effectiorem positivam ex subjecto, nisi denominationem quædam extrinsecam, vel habitudo ad tempus præteritum, quæ non variat essentiam mutationis quoad id, quod est reale & positivum in ipsa: illuminatio enim ejusdem rationis est, sive fiat in subjecto, quod prius tempore fuit tenebrosus, sive in eo quod prius tenebrosus non fuit, sed simul esse incipit, & illuminari: hoc ergo modo unionem hanc, mutationem vocamus, quæ respectu materiæ primæ, etiam illo rigoro modo, mutatio fuit, nam materia prius tempore aliter existit: respectu vero animæ & humanitatis, quantum est ex se, potuisset eodem modo esse mutatio, de facto vero vocatur mutatio, quia est actio ex præsupposito subjecto, quod ex vi talis actionis aliter se habet, quam prius natura se habebat, vel aliter quam ex natura sua existere posset. Hujusmodi enim mutationis genus in hoc mysterio, necessarium fuit: nam, cum illa duo extrema, Verbum, scilicet, & humanitas, ex se & ex vi suarum entitatum unita non sint, non possent incipere esse unita, nisi saltem alterum extremorum aliter se haberet: nam, si utrumque omnino immutatum maneret, eodem modo se haberent, atque ita semper non unita relinquerentur. Ex his ergo differentiis, & rationibus satis constat, has effectiones in re distinctas esse.

Quod autem sint vere ac proprie duæ actiones distinctæ, eisdem fere rationibus facile colligi potest; nam illæ duæ effectiones ad genus actionis pertinent, & non sunt partes unius actionis, cum sint diversorum ordinum, & plusquam specie differant: neque etiam una resultat ex alia: ergo sunt actiones distinctæ. Et confirmatur, nam creatio animæ, & unio ejus ad corpus, sunt actiones distinctæ: ergo multo magis creatio humanitatis, & unio ejus ad Verbum: nam major est diversitas inter has actiones, & inter terminos earum, minorque connexio inter illas ex natura rei. Posset autem aliquis excogitare & dicere, quod, sicut Christus est compositus ex Verbo & humanitate, licet hæc duo extrema sint res diversorum ordinum, ita potest esse una actio composita ex creatione vel productione naturæ & unionem ad Verbum, quamvis sint diversorum ordinum. Sed hoc in primis gratis est dictum & sine fundamento; neque exemplum illud quicquam juvat, nam inter Verbum & humanitatem intercedit vera unio: unde, licet sit res diversorum ordinum, habent inter se aliquam proportionem naturæ &

Suarez. Tom. XVI.

subsistentiæ, ratione cujus possunt inter se uniri: at vero inter illas actiones nulla est similis proportio, nec vera unio, sed solum subordinatio quædam, quatenus una alteram supponit, qualis reperitur inter creationem animæ & unionem ejus ad corpus: in quo exemplo nullus dicit, ex illa duplici effectione componi unam actionem, cum tamen eadem sit utrobique ratio. Si quis tamen diceret, illam unionem ad Verbum fuisse quasi quoddam complementum creationis animæ, vel conceptionis humanitatis Christi, posset facile in bono sensu ejus sententia admitti: nam illa unio ad Verbum supplet vicem substantiæ propriæ: substantia vero est veluti ultimum complementum creationis seu productionis rei subsistentis, & ideo unio dici potest hujusmodi locum tenuisse in hoc mysterio.

Dico secundo: Incarnatio proprie & in rigore est actio unitiva, non vero productiva alicujus extremi eorum, quæ per eam uniuntur, sed solum unionis eorum inter se, seu totius compositi, ut tale est. Hæc assertio sequitur plane ex dictis, eamque præcipue intendunt auctores secundæ sententiæ. Et quantum ad rem spectat, probatum satis est, dari in hoc mysterio hujusmodi actionem. Quod vero nomine incarnationis illa actio significetur, ad usum vocis magis, quam ad novam rem pertinet: hic autem usus tam evidens est ex omnibus Patribus, & verbis illis: *Verbum caro factum est*, & similibus, ut supervacaneum sit, in hoc confirmando immorari. Legantur, quæ de hac voce in principio hujus materiæ dicta sunt & in com. art. 8. hujus questionis.

Ad argumenta primæ sententiæ facilis est ex dictis responsio. Ad testimonia enim Leonis & Fulgentii dicitur, sine causa in præsentem quæstione adduci, nam illi non disputant de metaphysica distinctione vel unitate actionum, sed solum contra hereticos contendunt, non prius tempore fuisse Christi animam, aut creatam, aut carni unitam, quam Verbo. Hoc patet ex antecedentibus & subsequentiis verbis Leonis: *Arbitror (inquit) talia loquentem, hoc habere per suum, quod animam, quam Salvator assumpsit, prius in cælis sit commorata, quam de Virgine nasceretur, eamque sibi verbum in utero copularet: sed hoc Catholica mentes, auresque non tolerant*: & ad hoc propositum subdit infra, animam ipsa assumptione fuisse creatam; id est, in eodem instanti, quo est assumpta. Similiter Fulgentius proxime antè citata verba dixerat: *Non est igitur aliquod intervallum temporis existimandum inter conceptam carnis initium, & concipiendam Majestatis adventum*. Addo deinde Leonem prædictis verbis insinuare (quod supra dicebamus) assumptionem ita fuisse cum creatione animæ conjunctam, ut quodammodo illam compleverit, sicut in aliis similibus per concreationem substantiæ propriæ compleri solet. Fulgentius vero ultra hoc significat, conceptionem carnis, non tantum ipsi carni seu humanitati, sed etiam Verbo ratione unionis, & per communicationem idiomatum esse tribuendam. Unde ad primam rationem respondetur, negando sequelam, quia ut B. Virgo dicatur concepisse Deum, satis est, quod ejus actio vel conceptio in eodem instante ad Deum terminata sit, quia conceptio & generatio sicut & creatio denominat ultimum terminum, & proprie attribuitur rei subsistenti; præsertim quia (ut infra dicam) unio prius natura facta est ad corpus & animam, quam ad totam humanitatem: & ideo ex vi unionis talis animæ ad tale corpus, necessarium omnino fuit, ut Deus fieret homo, quod est, Deum concipi seu generari humana generatione. De qua re iterum dicendum erit sequente tomo disput. 2. sect. 1.

Ad tertiam concedo sequelam, scilicet animam Christi prius natura extitisse, quam assumpta fuerit a Verbo. Et ad primam probationem nego, animam Christi formaliter existere per existentiam increatam Verbi, sed subsistere tantum per substantiam Verbi, existere autem formaliter per propriam entitatem creatam: de qua re dicetur iterum qu. 17. Ad secundam probationem jam declaratum est, quomodo anima, vel humanitas Christi pendeat a Verbo; non enim pendent ut ab influente existentiam mediante unione, sed ut a supplente vicem substantiæ propriæ, sine qua esse non potest; & ideo ex natura rei ab illa pendere aliquo modo dicitur, tanquam a conditione ex natura rei necessaria ad existendum, ut supra declaratum est: quia ergo Verbum media

Incarnatio unitiva actio est, non alicuius unitivis productiva.

Ad prioris opinionis rationes solutio.



Dependē-  
tia huma-  
nitatis, si  
a Verbo  
div. Here-  
gur, substi-  
tencia  
creatatur  
in nativitate  
beret, ut  
humani-  
tas in esse  
conservetur.

unionem supplet hanc necessitatem subsistentiæ propriæ, ideo dici potest humanitas ab illo pendere. Nec vero ob hanc causam necesse est concedere, quod si humanitas dimitteretur a Verbo, desineret esse simpliciter in rerum natura: id enim non sequitur ex natura rei, nam dissoluta unionem posset perseverare actio creativa & conservativa humanitatis. Unde potius Theologi dicunt, quod in eo casu inciperet humanitas subsistere in propria persona. Solum ergo inferri potest, si humanitas dimitteretur a Verbo, necessarium esse dependentiam illius terminari per aliam subsistentiam, ut posset conservari in esse. Et consequenter etiam erit verum dicere, quod si aliunde non terminaretur illa dependentia, desineret humanitas esse simpliciter: sic enim etiam in propria dependentia effectus a causa, non sequitur, ablata causa auferri effectum, si loco illius, alia succedat; sequitur tamen, si nulla alia succedere supponatur. Ad tertium, falsum est, animam rationalem non prius natura creari, & existere, quam subsistat: per creationem enim per se primo ac formaliter datur existentia ex nihilo, subsistentia vero tanquam complementum existentiae substantialis; & hac ratione dicitur, creationem esse rei subsistentis; & hinc recte colligitur, animam rationalem in sua creatione statim subsistere, ut in prima parte, latius tractatur, & infr. q. 6. attingemus. Nec est similis ratio dependentiæ animæ rationalis a sua subsistentia, quæ est formæ accidentalis ab inhærentia in subiecto, ut superius declaravimus; & ita responsum est ad utramque confirmationem ibi positam. Ad quartum vero jam etiam declaratum est, quomodo unio sit ex præsupposito subiecto, quamvis non supponat humanitatem subsistentem, quia nimirum illa actio tendit ad unionem cum subsistentia: nam, sicut hæc unio non supponit utrumque extremum subsistens, sed satis est, quod existat, ita etiam actio potest esse in subiecto tantum ut existente.

## SECTIO II.

*Verum incarnatio sit substantialis unio ex natura humana, & persona Verbi Dei.*

**H**æretici, qui duas in Christo posuerunt personas, vel hypostases, consequenter asseruerunt inter eas solum intercessisse accidentalem unionem, vel per affectum, ut est inter amicos, vel secundum operationem, ut inter Regem, & ministrum, seu inter principale agens, & instrumentum, vel secundum aliam similem habitudinem, ut est inter maritum, & uxorem, aut inter vestem & vestitum, aut inter templum & personam; sic enim quidam ex Nestorianis (ut Cyrill. refert in defensione primi anathematis) dixerunt, Christum esse templum Verbi, & Deum incarnari esse habitare in carne; tanquam in templo. Hæretici etiam huius temporis hanc unionem ponunt, non substantiali aliqua compositione, sed in quadam reali communicatione attributorum divinitatis humanitati facta: sed quoniam eorum sententia, vel in Nestorianam, vel in Eutychianam incidit, & ad materiam de communicatione idiomatum magis spectat, usque ad 16. quæst. missam faciamus. Ex Catholicis vero Durandus in 3. dist. 5. q. 4. quem Palud. sequitur 1. art. 2. quamvis fateatur in Christo unum suppositum, nihilominus dici posse existimat humanitatem advenire Verbo accidentaliter, quatenus advenit enti perfectio, & completo; quod enim sic advenit substantiæ completæ, accidentaliter advenit.

Dico tamen primo, incarnationem esse substantialem unionem & ita esse simpliciter appellandam. Est communis Theologorum D. Thom. hic art. 6. Magist. & aliorum in 3. distinct. 6. ubi Bonavent. art. 1. q. 3. Richard. art. 3. qu. 2. & quoad rem, quam significare intendimus, est de fide, & (ut existimo) etiam quoad locutionem. Primum patet ex illis Conciliorum locutionibus, in quibus definiunt hanc unionem factam esse, *secundum subsistentiam*, quæ citavimus disputatione præcedenti, sectione 1. & aliquando dicunt factam esse, *secundum substantiam*, ut patet in 1. Tom. Conc. in Concil. Ephes. can. 2. & in epist. 8. Cyrill. ibidem citata dicitur factam esse *substantialiter*, quamquam verba Græcæ idem significant, quod *secundum subsistentiam*, vel *hypostasim*, tamen his omnibus modis vertitur, quia res eadem est.

Unde Concil. Lateranens. sub Martino consultat. 3. cap. 6. can. 6. naturæ esse dicit, *substantialiter unitas*, & cap. 8. vocat *substantialem unionem*, quamvis in antiquioribus editionibus Conciliorum legatur, *secundum hypostasim*. Sicut etiam Damascenus lib. 3. c. 3. *substantialem* appellat, juxta Fabri versionem, Jacobus enim Billius *essentialem* vertit, quia verbum Græcum *εὐσιώδης*, utrumque admittit, & in idem redit, ut infra dicam. Denique Joannes Maxent. to. 5. Biblioth. in confess. fidei, inquit: *Secundum traditionem Patrum duas naturas confitemur substantialiter unitas*. Et in ea sententia refert Athanasium, Nazianzenum, Cyrillum, & alios; & idem sentiunt Patres, qui hanc unionem vocant *essentialem* & *naturalem*, ut infra etiam exponemus. Et ratio ex dictis sumitur, quia unio substantialis nihil aliud est, quam conjunctio quarum rerum substantialium, per quam resultat una substantia composita vere, ac proprie una. Quæ definitio, & ex terminis per se nota videtur, & ex communi omnium conceptione, & ex propria ratione substantiæ compositæ, quæ per se una est, atque adeo intra proprium genus, seu rationem substantiæ composita, sed secundum fidem in hanc unionem Incarnationis tota illa definitio convenit, ut patet ex disputatione præcedenti. Et confirmatur, quia duæ substantiæ non uniuntur accidentaliter nisi medio aliquo accidente, aut saltem secundum aliquam relationem accidentalem, ut patet discurrendo per omnes accidentales uniones; & quia alio modo nec concipi potest talis unio inter substantias, cum enim de se non sint accidentaliter unitæ, ut uniantur hoc modo, oportet, ut inter eas intercedat aliquod accidentale vinculum, quod esse non potest sine aliquo accidenti. At vero in proposito extrema huius non uniuntur medio aliquo accidenti, nam si considerentur duæ naturæ, divina & humana, terminus, in quo uniuntur, substantialis est, scilicet, subsistentia Verbi. Si vero considerentur Verbum ipsum, & natura humana, ut inter se proxime uniuntur, non fit unio medio aliquo accidenti, ut Concilia docent, quæ negant fieri per affectum, vel per dignitatem aliquam, aut relationem, ut supra sæpe allegatum est; nulla enim talis unio posset esse sufficiens, ut Deus vere fieret homo, & homo vere diceretur Deus, quod magis in sequenti sectione confirmabimus. Denique confirmatur illo exemplo unionis animæ & corporis, quo sancti explicant hanc unionem in hoc maxime ponentes similitudinem, quod sicut illa est unio substantialis, ita & hæc.

Et hinc quoad modum loquendi inferitur, non esse dicendum, humanitatem advenire Verbo accidentaliter, nec Verbum humanitati, sed substantialiter, nam non advenit Verbum humanitati, nec humanitas Verbo nisi mediante unionem; si ergo unio non est accidentaliter, nec potest dici, unum advenire alteri accidentaliter, aut e contrario, si accidentaliter adveniret, accidentaliter uniretur. Et confirmatur primo, quia quod advenit accidentaliter, tantum denominative, & accidentaliter prædicatur; at vero humanitas non tantum prædicatur de Verbo denominative, sed substantialiter: quia Verbum & est humanatum, & est homo. Denique confirmatur, quia repugnat advenire in unitatem suppositi, seu personæ substantialiter compositæ, & advenire accidentaliter, quia advenire accidentaliter est advenire secundum aliquod esse accidentale, advenire autem in unitatem substantialem suppositi, est unionem fieri secundum aliquod esse substantiale. Fundamentum vero Durand. qui contrarium sensit a D. Thom. positum est, & solum art. 6. ubi solutio illius sufficienter explicata est. Quod si quis urgeat, quia humanitas est omnino extra rationem Verbi, ergo accidit illi, seu accidentaliter advenit. Respondetur, si accidere sumatur logice, verum est, humanitatem respectu Verbi in hoc imitari accidentia, quod non est de essentia Verbi secundum se, quomodo potest dici extrinseca illi, & suo modo posse adesse, & abesse illi, nihilominus tamen illa unio physice, & re ipsa considerata, non est per modum accidentis, neque ad componendum unum per accidens, seu genere accidentis, & ideo neque illa unio accidentaliter est, nec simpliciter dicendum est humanitatem accidentaliter advenire Verbo, sicut etiam anima logice dici potest extra rationem materiæ, & accidentario illi advenire, quia mate-

Humanitas non advenit accidentaliter Verbo, nec Verbo humanitati.

Obiectio.

Responsio.



materia potest esse sub hac, & sub alia forma, nihilominus in re ipsa unio illarum substantialis est, & anima substantialiter, & non accidentaliter dicitur advenire materię. Sed contra: nam sancti sæpe explicant hanc unionem per accidentales uniones, ut Damascenus lib. 3. cap. 11. Basil. hom. 25. ex variis, quę est de humana Christi generatione, & Origen. 2. Periar. cap. 6. comparant cum unione, quę est in ferro candente inter calorem & ferrum. Alii comparant arbori alteri insitę, quę comparatio tribuitur Basilio supra, & Leoni sermone 1. de Nativitat. apud quos eam non invenio, sed ea utuntur Theologi in 3. dist. 1. & A lens. 3. par. qu. 7. memb. 1. art. 1. & ad eam accommodat illud Jacob. 1. *Suscipite insitum Verbum*. Pręterea ad Ephesios 5. comparatur conjunctioni viri cum uxore, ut nonnulli exponunt ex Scholasticis, ut Bonavent. in 3. dist. 6. art. 2. quęst. 2. Et habet fundamentum in parabolis nuptiarum, quas Christus posuit Matthęi 22. Marc. 9. Joannis tertio, & in Patribus, quos circa citatum testimonium ad Ephes. 5. retuli supra quęst. 1. in commen. art. 3. Alii comparant unioni plurium accidentium in uno subiecto, ex August. epist. 99. Sed ibi pauca dicit. Magis utuntur hoc exemplo quidam scholastici, ut Scotus, & Gabr. in 3. dist. & Ocham ibi qu. 1. Denique Joan. 2. dicit Christus: *Solveite templum hoc*, loquebatur autem, ut Evangelista dixit, *De templo corporis sui*. Sed ad hęc, & similia supra dictum est, non afferri, quia in omnibus, vel in pluribus similia sint: sed ut per ea manuducatur intellectus ad perfectiones, & proprietates hujus unionis explicandas, ut per ferrum candens declaratur, quomodo humanitas illustretur a divinitate, & vim agendi accipiat. Per arborem insitam explicatur aliquo modo, quia ratione rei subsistendi aliqua substantia diversę naturę adjungi possit. Per conjunctionem viri, & uxoris magis explicatur unio effectuum, & quomodo humanitas assumpta est a Verbo, ut ab illo regatur, & dicitur. Sicut enim sponsę communicantur tituli & insignia sponsi, ita per incarnationem communicantur humanitati seu homini Verbi attributa. Per unionem plurium accidentium in eodem supposito declaratur solum unitas personę in Christo sub duabus naturis, etiamsi altera extranea sit, non tamen declaratur modus unionis, qui nullo exemplo declarari potest, ut dixi disp. præced. sect. 2. & in commentario ar. 6. declarando alia exempla de veste & instrumento. Denique per templum vere explicatum est, quomodo Verbum singulariter habitat in illa humanitate, in eaque excellentius adoretur, & colatur, quam in omni alio loco. Sed quia omnes istę uniones accidentarię sunt, additur exemplum unionis animę, & corporis, quo substantialis unio explicetur, & ideo discipuli D. Tho. contendunt cum D. Th. 4. contra gent. cap. 41. & Cajet. hic ar. 6. & orat. supra citata ad Alexandrum Sextum esse hoc exemplum omnium aptissimum ad hoc mysterium explicandum: Quibus ego facile assentior, quia revera habet majorem convenientiam, & in pluribus similitudinem, præsertim si unio ipsarum naturarum in una persona consideretur, nam si loquamur de immediata conjunctione inter naturam, & suppositum, alia est unio in creaturis huic similior, ut jam dicam.

Dico ergo secundo. Hęc unio substantialis est per modum compositionis ex natura, & supposito, unde propriissime hypostatica vocatur. In hac conclusione explicamus totam rationem hujus unionis per suum genus, & differentiam, quantum a nobis explicari potest. Quę ita breviter declaratur; ostensum enim in superioribus est, hanc esse unionem, & compositionem substantialem: substantialis autem compositio quadruplex intelligi potest. Prima est, ex partibus materialibus, seu integrantibus, & hęc sufficienter exclusa est art. 2. quia Verbum, cum sit summe spirituale, non potest hoc modo uniri substantię creatę. Adde, hanc unionem non solum factam esse in corpore, sed etiam in anima, quę non est capax hujus compositionis. Denique humanitas Christi de se, & ut supponitur assumptioni, habet integrum complementum harum partium; illę enim ad quandam integritatem naturę pertinent.

Secunda compositio est essentialis, quę duplex distingui solet, altera metaphysica ex genere, & differentia. Et hęc non est ad propositum, cum sit compositio secundum rationem. Altera physica ex materia, & for-

ma, & hęc etiam exclusa est sufficienter art. 1. quia proxime ordinatur ad compositionem unius naturę, hęc autem unio incarnationis non est terminata ad unam naturam, ut ostendimus. Deinde, quia etiam probatum est, Verbum non posse esse formam, & multo minus potest esse materia, quę majorem imperfectionem dicit; compositio ergo ex materia & forma supponitur huic mysterio in ipsa humana natura, ipsa vero incarnatio, hujus generis unio esse non poterit.

Tertia compositio substantialis poni solet ex esse, & 3. Compositio, quam discipuli D. Thomę existimant esse ex rebus distinctis, & unionem incarnationis putant esse illius rationis, quia existimant humanam naturam in Christo non habere entitatem existentię creatę, sed tantum essentię, assumptam vero esse per incarnationem ad existendum ipsamet existentia increata Verbi Dei. Ex quo fit, hanc compositionem esse ex essentia humanitatis, & existentia Verbi. Sed ego suppono contrarium fundamentum, tanquam verius scilicet, in creaturis existentiam non esse rem distinctam ab essentia actualiter existente, atque adeo humanitatem Christi non existere formaliter in rerum natura per existentiam increatam Verbi, quod infra q. 17. ar. 1. disputandum est. Unde concluditur hanc unionem incarnationis non esse formaliter ex essentia, & existentia. Quod ita breviter declaratur, quia illa compositio, vel nulla est propria & realis, vel certe non est ex duobus extremis ita inter se distinctis, ut utrumque prout ab altero cōdistinctum, habeat in rerum natura veram entitatem actualem: sed solum potest unum extremum, scilicet essentia, concipi quasi ens potentiale in potentia objectiva, & aliud scilicet existentia per modum actus, seu tanquam modus constituens ens actu in rerum naturę, quę omnia in disputationibus Metaphysicis jam prælo mandandis, late tractanda sunt. At vero hęc compositio non potest intelligi hujusmodi, quia humanitas, ut mente concipitur distincta a Verbo, sicut re vera est, habet propriam entitatem actualem distinctam ab entitate Verbi per veram creationem, vel generationem effectam, secundum quam supponitur assumptioni: non ergo unitur, ut per unionem constituatur in esse entis actualis, atque adeo non unitur ut essentia existentię.

Quarta ergo compositio substantialis est, ex natura, & 4. Compositio, & subsistentia, seu supposito, de qua, prout in creaturis ex natura rei reperitur, satis in Metaphysica multa dicta sunt. In hoc ergo genere compositionis est hęc unio necessaria constituenda. Primo a sufficienti partium enumeratione, quia hęc compositio non est ex partibus integralibus, aut ex essentia & existentia; ergo. Secundo, quia humana natura in Christo non habuit propriam personam creatam, nec vero mansit expers hypostasis, ut recte dixit Damasc. lib. 3. can. 9. assumpta ergo est ad subsistentiam divini Verbi, & ex utraque composita est una persona humana, & propterea Concilia vocant hanc unionem *secundum hypostasim, vel subsistentiam*, ut supra citatum est, & eodem sensu dicitur unio hęc *hypostatica*, ut est in usu omnium, & sumitur ex epistola Sophronii in sexta Synodo, act. 11. Differt tamen multum inter hanc compositionem, & compositionem ex natura, ut subsistentia connaturali, quia illa est naturalis, id est, debita unicuique naturę; hęc vero est omnino supernaturalis creaturis. Primo, quia est supra omne debitum naturę creatę, nec potest ulli creaturę connaturalis esse: propter quod recte dicit Nicet. lib. 3. Thesaur. c. 3. duas naturas in Christo non fuisse naturaliter conjunctas: *Sed admirabili quadam, & ineffabili ratione, non lege naturę, sed ineffabili dispensatione*. Secundo quia compositio illa naturalis, non est ex rebus omnino realiter cōdistinctis, sed ex re, & modo; hęc autem ex natura creata, & Verbo divino, quę sunt res omnino cōdistinctę, licet substantialiter conjunctę. Tertio, quia in naturali compositione, & natura perficitur per subsistentiam, a qua terminatur, & ipsa etiam subsistentia a natura pendet, & consequenter ab illa in suo genere perficitur; at vero in hac supernaturali compositione, natura quidem humana perficitur per subsistentiam divinam, & ab illa suo modo pendet: subsistentia autem divina non perficitur in se, nec mutatur per naturam humanam, sed simpliciter terminat illam sine ulla sui mutatione. Quocirca, quanquam incarnatio dicatur esse unio

Unio hypostatica verisimilis apparet ex aliis unionibus creaturarum.

Compositio substantialis, quadruplex 1. Compositio

a. Compositio



unio substantialis per modum compositionis ex natura & supposito: nihilominus secundum specificam rationem diversa est ab illa compositione naturæ, & suppositi, quæ connaturalis est rebus creatis; imo fortasse non univocam, sed analogam cum illa convenientiam habet in ratione unionis, & compositionis. Quamquam hoc ultimum facile in utramque partem disputari possit, quod facere omitto, quia dialecticum potius videtur negotium, quam Theologicum. Ut ergo ratio, seu descriptio hujus unionis concludatur, addamus illam esse substantialem, & supernaturalem compositionem, ex natura creata vel humana, & supposito divino, seu substantia Verbi.

**Objeccio.** Contra hanc vero doctrinam objici possunt quædam dicta Patrum, in quibus hanc vocant *naturalem seu essentiali unionem*. Petrus Damianus, de Incarnatione, & gratia, c. 3. dicit, *Verbum essentialiter carni unitum*; & refert Nazianzenum epist. ad Chelidonium, aliàs, orat. 51. ubi dicit humanitatem esse divinitati copulatam κατὰ φύσιν, quod Joannes Maxent. in confessione fidei vertit *substantialiter*, sed proprie significant, *secundum essentiam*, ut ibidem vertit Billius, & in Damascen. 1. lib. 3. fidei, ca. 3. idem Nicetas lib. 3. Thesau. c. 3. & 38. Unde prædictus Joan. Maxent. in respon. ad epistol. sub nomine Hormisdæ Papæ scriptam, sub finem ait: *juxta divina eloquia & Sanctorum Patrum traditiones, Christum filium Dei, quem in duabus naturis essentialiter, sive juxta compositionem unionis & inconfusionis docet fides Catholica, confitemur*. Cyrillus vero epist. 10. & anathematismo 3. *unionem hanc, naturalem* vocat. Et eodem modo loquitur Sophron. dicta sexta Synodo, act. 11. & Cyrus Alexand. act. 13. ejusdem Synod. can. 4. & 7. qui, licet aliàs sit hæreticus, tamen in hoc loquitur ex sententia Cyril. idem Nicet. & Joan. Maxent. supra, & Petr. Diacon. lib. de Incar. & grat. c. 3.

**Responsio.** Respondetur tamen breviter, non esse Patrum sensum vocare hanc unionem essentiali, vel naturalem, quia sit compositio essentiarum, vel naturarum, quia hoc ipsi in hæreticis improbant. Nec dicitur naturalis, quia non sit supernaturalis, neque quia ex necessitate, & non libere facta (ut male intellexit Theodoret. impugnando tertium anathema. Cyril.) sed dicitur naturalis, ut ipse Cyrillus se defendendo exposuit, quia est vera, & realis, & non ficta, sicut solemus dicere esse unionem physicam, & realem sicut enim res naturalis in suo ordine habet suam naturam, & essentiam, ita & hæc unio in suo genere habet veram, & realem rationem unionis, & ad hoc explicandum dicitur naturalis: & eodem sensu dicitur essentialis, ut exposuit Damascen. lib. 3. cap. 3. & ex illo Nicet. lib. 3. Thesau. ca. 3. *Conjunctionem, inquit, essentiali dicimus, hoc est, veram, & non phantasticam, seu commentitiā*. Et specialiter Nazianzenus cum vocat *unionem secundum essentiam*, explicare intendit hanc unionem esse talem, ut ratione ejus Deus non accidentali aliqua denominatione, sed vere & secundum essentiam, dicatur de homine, quod ipse disertis verbis explicat, dicens esse unionem secundum essentiam, quia divinitas non secundum gratiam aliquam vel affectum, sed secundum essentiam est unita humanitati. Denique potest dici naturalis, & essentialis unio, quia substantialis est, atque adeo unio simpliciter, & quod inde resultat, est vere, ac per se unum. In his tamen locutionibus, quamvis sint veræ & propriæ, propter ambiguitatem tamen vocis observandum est, ne absolute usurpentur, nec sine sufficienti explicatione, ut omne scandali, & erroris periculum auferatur.

### SECTIO III.

*Quid sit hæc unio in humanitate, seu quid per actionem uniendi in humanitate, aut Verbo fiat.*

**U**T difficultas hujus quæstionis intelligatur, oportet distinguere omnia, quæ interveniunt in hoc mysterio. Primum est humanitas. Secundum est Verbum. Tertium est actio seu passio, vel mutatio, per quam hæc unita sunt (hæc enim nunc pro eodem sumimus, licet aliàs ratione formali distinguantur.) Quartum est, terminus ultimus resultans per hanc actionem, scilicet hic homo. Quintum est relatio unionis inter extrema unita. Et sextum addi potest id, quod est fundamentum pro-

prium hujus relationis, seu id, quod fit in humanitate per illam actionem, qua copulatur Verbo, seu quod idem est, ipsa substantialis conjunctio, quæ intelligitur esse in termino illius actionis, ut per illam hic homo resultare possit. Ex his autem omnibus, tria priora, vel per se, vel ex supra dictis satis clara sunt. Nam & de Verbo, & humanitate nihil nunc est, quod dicamus, nam qu. 3. & 4. de illis agendum est. De termino vero totali, & adequato hujus mysterii in præcedenti disputatione sectione prima, diximus satis. De relatione vero unionis, an propria relatio sit, & prædicamentalis, præter ea, quæ dicta sunt exponendo litteram D. Thom., pauca infra dicentur, de fundamento ejus, nihil tractandum superest. Denique de actione uniendi non est, quod modo disputemus, an sit ipsemet actus divinæ voluntatis, quo tota Trinitas perficit hoc mysterium, an vero sit aliquid in creatura receptivum; hæc enim quæstio communis est de omni actione Dei ad extra, & nobis satis nunc est ipsum fieri Incarnationis esse aliquid extra Deum, & in creatura receptum, quod, ut est a Deo, potest dici actio ejus, prout vero recipitur in creatura, est passio, vel mutatio illius. Hæc enim non potest esse in Deo, neque in Verbo, ut constat; necesse est ergo esse in humanitate, & eam nunc solum dicimus esse ipsam incarnationem in fieri, clariorem enim intelligentia hujus mutationis pendet ex cognitione illius rei, seu modi, qui per illam in humanitate fit, nam illud ipsum prout in fieri est hæc mutatio, & prout a Deo, est actio Dei. Unde obiter intelligitur, istam actionem, seu unire activè humanitatem Verbo, non esse terminare humanitatem. Nam hoc terminare est proprium Verbi, & non consistit in aliqua effectione, aliàs esset commune Trinitati, imo in nulla causalitate consistit, ut seq. sect. explicabimus. Est ergo actio hæc a terminatione distincta, consistens in vera efficientia, & communis est toti Trinitati. Unde etiam intelligitur, male quosdam dicere hanc actionem esse ipsum subsistere increatū communicatum in tempore naturæ humanæ, quia licet per hanc actionem fiat, ut subsistere increatum communicetur humanitati, non tamen potest talis actio esse ipsum subsistere increatum, quia illa est vere creata, & recepta in humanitate, & vel est accidens, vel habet se per modum accidentis humanitati inhærentis, quæ non possunt convenire ipsi subsistentiæ increatæ. Et licet fingeretur hæc actio, ut existens in Deo ipso, non esset propriæ, & formaliter ipsum subsistere Verbi, quod non est commune toti Trinitati, sed esset actus divinæ voluntatis de incarnatione faciendæ, qui unus existens, communis est tribus personis.

Difficultas ergo superest de sexto illo membro supra posito, & oritur ex dictis de actione unitiva, quæ vera est effectio, & proxime versatur circa humanitatem, quam immutat, & in qua recipitur, necessarium ergo videtur, per illam aliquid fieri: & hoc inquirimus quid sit.

Prima ergo opinio esse potest per hanc actionem nihil fieri in humanitate, sed solum fieri hoc compositum, seu hunc hominem, ut disput. præced. explicatum est. Ita sentit Greg. in 1. dist. 28. qu. 2. in resp. ad 17. & 18. argu. inclinant Ocham in 1. dist. 30. qu. unica ad 2. Bacon. in 3. dist. 1. qu. 1. ar. 1. & dist. 2. qu. 2. ar. 2. Et fundamentum est, quia nihil aliud fingi potest, quod in humanitate fiat magis, quam in Verbo, neque est necessarium, quia uni actioni sufficit assignare unum terminum adequatū per illam productum, & sicut Verbum per se ipsum immediate unitur humanitati nulla additione illi in se ipso facta, ita e contrario humanitas eodem modo unitur Verbo proxime, ac formaliter per se ipsam, & quidquid addatur, non confert ad unionem. Quæ sententia videtur placere aliquibus Thomistis, & Cajet. infra ar. 10. circa ad primum videtur illam indicare, cum ait conjunctionem humanæ naturæ cum persona filii Dei nihil aliud esse, quam utriusque indivisionem in esse personali filii Dei: & infra ait in hoc mysterio nullum ens reale intervenisse præter extrema, & mutationem, ac relationem inde resultantem, de qua statim. Nec multum ab hac sententia discrepat Aureol. ut refert Capreol. in 3. d. 5. q. 5. ar. 2. nam dicit hanc unionem solum addere indivisionem quandam inter Verbum & humanitatem, ratione cujus unum componunt; & magis hoc indicat Capreolus in responsionibus ad argumenta Aureoli concedens intervenire hanc indivisionem, sed illam non esse nisi

1. Gen. eos.



Per effecti-  
onem  
incarna-  
tionis ne-  
cesse est  
aliquem  
terminum  
fieri.

nisi unitatem personæ, aut existentia creatæ, quæ est in Christo. Sed hæc sententia intelligi nullo modo potest: quia, ut ostensum est, tota hæc actio unitiva recipitur, & versatur in humanitate, & illam immutat, neque aliter eam unit Verbo, quam immutando illam; ergo necesse est, ut aliquid in ipsa humanitate faciat, quia omnis actio, seu passio, vel mutatio facit aliquid in subiecto, in quo recipitur, hoc enim est de intrinseco conceptu ejus: hoc autem non est ipsa humanitas ut sic, ut ostensum est, præsupponitur enim ad hanc actionem, ut subiectum ejus; neque est ipsa subsistentia Verbi, quia actio, vel mutatio realiter, seu identice nihil aliud est, quam id ipsum, quod per eam proxime, & quasi formaliter fit, prout est in fieri, & respicit agens, vel passum; sed hæc actio non potest hoc modo identificari cum ipsa subsistentia increata Verbi, ut per se datum est, & supra etiam probatum; ergo non potest subsistentia ipsa Verbi esse id, quod proxime per hanc actionem fit. Rursus neque illud esse potest totum compositum, scilicet hic homo: tum propter eandem rationem, quia fieri illius compositi non potest adæquare identificari cum toto illo, quia in illo includitur subsistentia ipsa increata, cum qua nullo modo, neque ex parte, neque in totum mutatio ipsa identificatur: tum etiam, quia illud compositum est totalis, & adæquatus terminus, qui resultat, præter quem oportet intelligere terminum quo, seu quasi formalem, per cuius effectum vel mutationem illud compositum resultat; quia, ut dictum est, non possunt duo extrema ita conjungi, ut ex eis unum aliquid resultat, nisi saltem alterum illorum aliter se habeat, & ratione illius, in quo aliter se habet, compositum resultat: & ita in proposito humanitas, non secundum se, sed prout unita, est formalis terminus hujus mutationis; & hoc inquirimus, quid scilicet addat illud, prout unita, supra ipsam humanitatem. Et confirmatur, nam humanitas ut unita aliquid dicit præter humanitatem, ut per se constat, & aliquid etiam præter subsistentiam Verbi, quia concipi potest aggregatum ex humanitate & subsistentia Verbi, etiam si humanitas non sit unita; ergo humanitas ut unita aliquid dicit præter subsistentiam Verbi. Sic etiam hic homo Christus aliquid dicit præter Verbum, humanitatem, & aggregatum ex utroque, quia hæc omnia intelligi possunt, & esse, etiam si Verbum non sit homo: ergo aliquid aliud addendum est, & hoc inquirimus quid sit. Nec vero dici potest per illam actionem non fieri aliquid positivum in illa, sed solum privativum, privatur enim propria personalitate, & statim illi Verbum per se ipsum quasi formaliter conjungitur. Hoc, inquam, non satis est; tum quia, etiam ipsa humanitas secundum se, & ut prior natura sua propria personalitate, non est per se ipsam unita Verbo; sed est quasi capax propriae personalitatis, vel personalitatis Verbi; ergo humanitas ut sic etiam, ut nondum existens sub propria personalitate, & Verbum ut sic præintelligitur, antequam ex illis resultat aliquid compositum; ergo, ut illud intelligatur resultare, non satis est intelligere illam privationem, sed aliquid aliud positivum intervenire oportet: tum etiam, quia illa actio est positiva, & implicat actionem positivam non inducere terminum positivum, quia (ut dictum est) realiter, seu identice ab illo non distinguitur, & ad illum per se primo tendit, non ad privationem. Unde per hanc actionem non privatur humanitas sua personalitate propria, quæ est quidam modus sibi connaturalis, nisi quatenus inducit aliquid formaliter impossibile illi modo, & hoc investigamus, quid sit. Tum denique, quia si, humanitatem esse unitam Verbo, nihil adderet, nisi carentiam propriae subsistentia, hoc ipso, quod illa careret formaliter ac præcise, necessario esset unita Verbo, quod per se constat, quam falsum sit.

Secunda sententia est, per hanc actionem fieri in humanitate qualitatem quandam supernaturalem, quæ gratia unionis dicitur, quæ natura sua vim habet uniendi humanitatem Verbo. Ita sentit Gabr. in 1. dist. 30. qu. 4. & in 3. dist. 1. qu. 1. & qu. 2. art. 2. qui Ocham allegat, cum tamen ille in 3. qu. 1. contrarium doceat. Citat etiam Alenfem 3. part. qu. 7. memb. 2. ar. 1. cuius sententia longe alia est, ut disp. 8. videbimus. Fundamentum hujus authoris nullum aliud esse potuit, nisi quia nihil aliud invenit, quod commodius dici posse existimaret. Sed est sententia omnino falsa, & improbabilis, contra omnes

doctores in 3. dist. quam specialiter impugnatur Bonaven. dist. 2. ar. 3. qu. 2. & dist. 6. ar. 2. qu. 1. & sumitur ex Alenf. 3. part. qu. 7. memb. 1. ar. 1. & D. Thom. infra ar. 10. & Albert. dist. 2. putat hanc sententiam pertinere ad errorem Nestorii; neque immerito: nam V. Synodus collat. 8. canon. 4. damnat dicentes hanc unionem factam esse secundum gratiam. Et impugnatur breviter; quia hæc opinio non ponit illam qualitatem, ut dispositionem ad unionem. Hoc enim non pertinet ad præsentem questionem, sed disput. 8. tractandum est. Nam etiam si admitteremus illam dispositionem, illa esset prævia ad actionem unitivam. Unde adhuc superesset inquirendum, quid per illam actionem fiat in humanitate. Ponit ergo istam qualitatem, ut formale vinculum ipsius unionis, & ita facit unionem ipsam accidentalem; nulla enim magis proprie accidentalis est, quam illa, quæ formaliter per aliquod accidens fit.

Dices: partes integrales substantia materialis uniuntur per quantitatem formaliter, & tamen uniuntur substantialiter. Respondetur, falsum esse antecedens: sed non est hic locus illud examinandi; quod si admitteretur, consequenter illa unio dicenda esset accidentalis. Deinde intelligi non potest, quod aliqua qualitas ex natura sua formaliter sit impossibilis cum personalitate propria illius naturæ, cui inhaeret; tum quia sunt diversorum ordinum, tum quia omnis qualitas de se potius supponit suppositum constitutum, in quo sustentetur. Ergo ex natura sua non potest habere oppositionem formalem cum aliqua subsistentia. Unde multo minus intelligi potest, qualitatem aliquam natura sua formaliter efficere, ut aliqua natura hypostatice sit unita Verbo Dei, quia illa unio pertinet ad constitutionem substantia, & hæc est supra rationem accidentis; tum etiam, quia nihil repugnare videtur, ut Deus conservet in humanitate separata a Verbo omnem qualitatem, quæ inhærebat unitæ; non potest autem conservari ipsa unio, seu id, quod proxime fit per actionem unitivam, facta separatione, ut per se constat, nam in humanitate sic separata, & habente illas qualitates, posset fieri iterum actio unitiva, & rediret questio, quid per illam fieret. Denique, si illa qualitas est omnino absoluta, inhærebit quidem in ipsa natura, non vero faciet ipsam naturam substantialiter existentem in aliquo supposito, quia qualitas absoluta respicit subiectum, in quo est, & nihil aliud, & maxime quia ille effectus formalis est supra totum ordinem accidentis. Si vero est accidens respectivum, vel reducitur hæc opinio in aliam statim tractandam, vel certe non intelligitur, quo modo qualitas possit respicere suppositum tanquam intrinsecum terminum sibi vere & realiter unitum, cum non respiciat illud tanquam subiectum, quia accidens, quod non sit mera unionis relatio, non respicit hoc modo aliquid nisi subiectum suum.

Quarta ergo opinio, ponit per hanc actionem nihil fieri in humanitate, nisi relationem unionis. Ita sentit Scot. distinct. 1. quæst. 1. & Ocham in 1. distinct. 30. & in 3. quæst. 1. Durandus dist. 5. quæstio. 2. & sunt, qui tribuant Div. Thom. quia hic art. 7. nihil aliud creatum dicit fieri in humanitate præter relationem, & sæpe aliàs dicit hanc unionem factam esse sine mutatione Verbi, quia tantum facta est secundum unionem, quæ relationem importat, ut videre est infra, quæstio. 16. ar. 1. ad 4. & ar. 6. ad 2. indicat etiam hic art. 7. ad 3. sed illum locum ibi breviter, clare exposuimus, omittis multis, quæ Cajetanus obscure notavit. Fundamentum vero hujus opinionis est simile præcedenti, scilicet, quia nihil aliud absolutum intelligi potest, quod fiat in humanitate. Quod si objicias, quia actio per se primo non tendit ad relationem. Respondet Scot. illud esse verum in relationibus intrinsecus advenientibus, non vero in illis, quas vocat extrinsecus advenientibus, in quo genere hanc relationem constituit. Durandus vero respondet illud esse verum in relationibus prædicamentalibus, quas ipse in sola denominatione extrinseca constituit, præter quas dicit esse alias intrinsecas, & reales, inter quas hanc unionem numerat, & has dicit per se primo posse fieri per actionem aliquam.

Obje-  
ctio  
Respon-

Hanc



Hanc opinionem Thomistæ vehementer impugnant, ut videre licet in Cajetano hic art. 8. Palud. in 3. dict. 5. q. 1. art. 3. & Capreol. ibi ad argumenta Durandi & aliorum; non enim minus ex illa, quam ex præcedenti sequi videtur hanc unionem non esse substantialem, sed accidentalem, quia illa relatio accidens quoddam est, atque unio secundum illam solam dicitur facta, & ideo in V. Synodo collat. 8. ca. 4. expresse negatur unionem hanc factam esse secundum relationem. Sed fortasse dicerent auctores contrariæ sententiæ relationem hanc non esse vinculum humanæ naturæ, & subsistentiæ divinæ, neque ab illa denominari Christum, aut Verbum hominem, sed ab humanitate, quæ a Verbo immediate terminatur, & cum illo constituit vere hunc hominem, qui est adequatus terminus substantialis actionis unitivæ, nihilominus tamen dicerent solam relationem creatam addi ipsi humanitati præter subsistentiam increatam. Et hoc modo hæc sententia parum differt a secunda opinione supra tractata, neque habet plus erroris, aut periculi quam illa; falsa tamen est, sicut illa, quia si relatio non est vinculum humanitatis cum Verbo, ergo ordine naturæ prior est substantialis conjunctio, & unio inter humanitatem, & Verbum, quam ipsa relatio, quæ ex illo vinculo resultat. Illa autem conjunctio, seu vinculum illud aliquid est præter humanitatem, & Verbum, ut sæpe probavimus, quia fit per ipsam actionem unitivam, & quia ex vi Verbi, & humanitatis ut sic non sequitur illa unio. Et confirmatur primo, quia Christus, ut est hic homo, est substantia per se una, & in se includit non solum humanitatem, & Verbum, sed etiam eorum unionem. Sed in conceptu suo substantiali non includit relationem, quia non includit accidens: ergo illa substantialis conjunctio aliquid est præter relationem. Et confirmatur secundo, quia hæc relatio necessario supponit aliquam mutationem factam in aliquo extremorum, non enim potest insurgere relatio unionis inter duo extrema, inter quæ antea non erat (sive successione temporis, sive ordine naturæ), nisi aliquid additum sit, vel mutatum in aliquo extremorum; ut duo corpora existentia in duobus locis non possunt novam relationem propinquitatis acquirere, nisi prius aliquod illorum loco mutetur. Sic igitur in proposito, hæc relatio unionis supponit mutationem aliquam factam in humanitate, per quam necesse est aliquid in ea fieri præter relationem. Quæ rationes concludunt sine dubio, si loquamur de vera relatione accidentali, & prædicamentali, quia non potest illa esse formalis terminus actionis substantialis, nec pertinere formaliter ad constitutionem substantiæ, nec demum esse propria ratio, propter quam duæ naturæ substantiales, divina & humana substantialiter de eodem prædicentur, & de se invicem in concreto. Sed Durandus, & Scotus non sunt locuti de hac relatione, ut satis ipsi explicuerunt, præsertim Durandus. Nec D. Thomas in citatis locis intendit favere huic sententiæ in illo sensu: cum enim dicit, Verbum denominari hominem propter relationem, non est sensus, quod a relatione denominetur homo (sic enim non esset vere, nec substantialiter homo), sed sensus est, quod ut Verbum incipiat esse homo, non oportet aliquid novum in illo fieri, quod in ipso inhaereat, sed solum in illo resultat relatio rationis, & ita concludit D. Thomas, potuisse Verbum fieri hominem sine mutatione sui. Propria vero veluti forma, a qua Verbum denominatur homo, est ipsa humanitas, ut subsistens in Verbo, ut idem D. Thomas explicat infra qu. 16. art. 1. & 2. quo in loco, & in omnibus citatis, id latius explicabimus.

Rejctis igitur aliorum sententiis, dicendum videtur primo, per hanc actionem aliquid factum esse in humanitate, ab illa distinctum ex natura rei, quod definere esse in illa, si a Verbo separaretur. Hoc satis ex dictis probatum est. Dico secundo, hoc quod fit, non esse aliquid accidentale, sed substantiale. Hoc etiam contra citatas sententias satis ostensum est. Dico tertio, hoc quod fit, esse modum quendam substantialem ipsius humanitatis, quo intelligitur existere in Verbo. Hæc assertio ex omnibus dictis satis etiam concluditur. Primo, quia nihil aliud commode intelligi potest, quia neque est materia, neque forma, neque humanitas ex illis composita, ut probatum est, neque est nova res omnino ab illis distincta, & superaddita humanitati, quia illa non posset esse nisi accidens aliquod, cum non esset materia ne-

que forma substantialis, & quidquid esset, secundum entitatem suam, posse esse a Verbo separatum; non ergo esset ipsa formalis unio: ergo nihil aliud esse potest, quam modus aliquis substantialis humanitatis. Secundo, explicatur exemplis, nam cum anima unitur corpori in resurrectione, necesse est, ut aliqua mutatio in illa fiat, vel in corpore, vel in utroque, nam ex illis præcise consideratis secundum entitates suas non resultat homo; ergo oportet aliquid addere, secundum quod in eis fiat aliqua mutatio; illud autem nihil est aliud, quam modus substantialis conjunctionis. Proportionale exemplum est de accidente inherente subjecto; nam illa inherencia, præter entitatem accidentis, quæ conservari potest in accidente separato, est modus quidam ipsius accidentis, scilicet unio ad subjectum, proportionatus tamen illis, & ideo modus accidentalis, & imperfectus: sic ergo in hoc mysterio, cum unitur humanitas Verbo, fit in ea aliquis modus unionis, seu existentiae in Verbo, qui, quoniam est intrinsecus modus substantiæ, & ad compositionem substantiæ, seu cujusdam personæ humanæ pertinet, substantialis est, & non est per modum inherentiæ, nec per modum informationis, sed alio supernaturali, & ineffabili modo, qui a nobis dicitur modus unionis hypostatice. Tertio idem explicatur, quia subsistentia creata modus substantialis est naturæ creatæ, omnino tamen absolutus, & in se terminatus, vel potius ultimo terminans ipsam naturam: hic autem modus exclusus est ab humana Christi natura, ex vi unionis ad Verbum. Ergo recte intelligitur per illam unionem factum esse in illa humanitate alium substantialem modum priori formaliter impossibilem, non ultimo terminantem naturam in se, sed constituentem illam in Verbo, ut in ipso terminetur. Et ita recte etiam intelligitur, hoc terminare, nihil addere ipsi Verbo in se, sed solum esse denominationem ortam ex hoc, quod humanitas tali modo ponitur, & substantialiter jungitur Verbo, a quo pendet in ratione subsistendi. Et ab hac sententiæ sic explicata nihil in re discrepat Durandus supra, ut ex dist. ejus supra citata constat, & ex eodem in 1. dist. 30. q. 2. num. 14. 15. & 16. hunc enim modum vocat relationem, quia omnino pendet a supposito Verbi, ad quod dicit intrinsecam, & essentialem habitudinem, quam alii vocant relationem transcendentalem, seu secundum dici, nam etiam Durandus fatetur non esse relationem accidentalem, & prædicamentalem. Et fortasse eandem rem aliis verbis explicuit Scotus, & D. Thomas in his articulis, & in sequenti art. 9. (ubi ibidem in principio Cajet. notat) distinguit conjunctionem substantialem ab ipsa unionis relatione inde resultante, & idem ex professo docet in 3. dist. 2. q. 2. art. 2. quæstiunc. 3. hæc autem conjunctio sine dubio aliquid est, non solum in fieri per modum actionis, sed etiam in facto esse per modum termini formalis & ita existimo omnes discipulos D. Th. in re non discrepare ab hac sententiæ, quæ non eisdem verbis explicet, neq. ita distincte. Et ad eam confirmandam valida sunt argumenta Aureoli, quæ refert Capreolus in 3. dist. 5. qu. 1. in argumentis contra primam conclusionem, quæquæ ad excludendam realem relationem nihil efficiant.

Objeçtio.

Sed objiciet aliquis, quia hæc sententiæ videtur eas habere difficultates, quas contra tertiam objiciebamus, hic enim modus etiam est res creata, & minus perfecta, quam ipsa humanitas. Ergo non videtur posse habere hanc veluti connaturalem vim, ut per se ac formaliter uniat humanitatem Verbo. Deinde, cum sit res absoluta, poterit Deus illam conservare in humanitate separata a Verbo. Denique, si humanitas, quia unitur Verbo, indiget modo, ut uniatur illi modo, indigebit alio, & cum modus etiam uniatur, ad hoc similiter erit alius necessarius, unde procedetur in infinitum. Denique ut natura creata uniatur propriæ subsistentiæ, non indiget modo alio distincto ex natura rei ab ipsa, & a subsistentia propria; ergo nec in præsentem est necessarius ille modus. Sed hæc facile expediri possunt, nam licet hic modus sit res creata, tamen est ipsamet quasi formalis conjunctio humanitatis ad Verbum, unde habet intrinsecam & essentialem habitudinem transcendentalem ad personam Verbi. Neque hoc est admiratione dignum in hoc modo unionis, nam proportionaliter idem reperitur in omni unione, quod scilicet sit modus intrinsecus ejus rei, quæ per sui mutationem alteri unitur, & sit illi proportionatus,

Responsio.



natus, & intrinsecam habitudinem & dependentiam dicat ad illam rem, cum qua sit unio, & ideo non est simile de hoc substantiali modo, & de quocumque alio accidenti. Unde ad secundam partem negatur, hunc modum posse conservari in humanitate separata a Verbo, quia dicit actuale dependentiam ab illo, sicut impossibile est, actuale modum inhaerentiae conservari in accidente separato a subiecto. Et idem reperietur in omni modo unionis: imo servata proportionem in omni modo actualis dependentiae. Ad tertiam vero partem negatur processus ille, quia hoc differt res omnino distincta a modo rei, quia res non unitur alteri rei omnino distinctae, nisi intercedat aliquis modus unionis, saltem in altero extremorum. At vero id, quod est modus, per se ipsum unitur rei, quia realiter non habet aliam entitatem ab ipsa re, & eius formalitas consistit in actuali modificatione ipsius rei, & illi uniri nihil aliud est, quam illam modificare actualiter. Unde quamvis possit res conservari a parte rei sine tali modo destruendo illum, tamen non potest ille modus conservari in rerum natura, quin actu afficiat, & sit conjunctus illi rei, cuius est modus, ut videre est in figura, sessione, & omnibus similibus. Et in hoc differt hic modus a qualitate, vel alia re omnino realiter distincta, quae non ita essentialiter requirit actuale conjunctionem cum alia. Quod est manifestum signum, huiusmodi actuale conjunctionem esse modum superadditum rei, quae alteri distinctae unitur, cum dependentia ab illa, & aliqua mutatione sui: in ipso vero modo non esse aliquid illi superadditum, sed esse intrinsecam essentiam eius. Et per haec patet responsio ad ultimam partem: negatur enim consequentia, quia subsistentia connaturalis & propria non est omnino res distincta a natura, sed modus eius, per se ipsum illam afficiens actualiter, subsistentia autem Verbi est res omnino ab humanitate distincta, ut per se constat. Aliae difficultates hic tangi poterant, videlicet, an hic modus sit naturalis, vel supernaturalis, materialis vel spiritalis, divisibilis, vel indivisibilis, sed in sequentibus disputationibus occurrent propria loca, in quibus haec commodius tractabuntur.

Ex his facile definiri possunt nonnulla dubia ad praesentem quaestionem spectantia. Unum est, quis sit terminus formalis huius actionis seu incarnationis; disputatione enim praecedente explicuimus terminum integrum, quem Philosophi appellant terminum ut quod, seu qui fit, quem diximus esse compositum ex Verbo & humanitate. Nunc ergo explicandum superest, qui horum sit terminus formalis, seu ut quo. Quidam enim existimant esse Verbum ipsum. Quae sententia tribui potest Capreolo in 3. d. 5. q. 1. ubi nullum alium assignat terminum praeter Verbum: unde potius videtur loqui de termino humanitatis, prout unita Verbo ad subsistendum, quam de termino actionis unitivae. Et revera de eodem loquitur Cajetanus hic art. 8. quando in fine eius Verbum appellat terminum ad quem assumptionis: sicut etiam D. Thom. ibi insinuat illum loquendi modum, quia Verbum assumit naturam ad se, id est, ut eam suam faciat; sed nunc non hoc modo loquimur de termino ad quem, sed in ordine ad incarnationem, ut est realis & physica actio: & in hoc sensu nullum pro illa sententia auctorem invenio. Probari autem potest primo, quia ille est terminus formalis alicuius actionis, qui est praecipuus, & per modum actus, atque adeo maxime intentus in termino totali: sed haec omnia conveniunt Verbo potius, quam humanitati: ergo Verbum, seu subsistentia Verbi est terminus formalis huius actionis. Major ex Philosophia constat; minor declaratur, nam in Christo, ut ex Verbo & humanitate componitur, Verbum est id, quod principalius ac dignius est, ut per se constat. Deinde subsistentia Verbi comparatur ad humanitatem ut actus eius: illam enim perficit, eiusque dependentiam terminat, & ideo per modum actus se habet respectu illius. Denique, quod maxime intenditur per hanc unionem est, quod divina persona humanitati communicetur, & quod hic homo sit Deus: ergo Verbum non secundum se, sed ut elevans ac perficiens humanitatem, est terminus maxime intentus per hanc unionem. Et confirmatur primo, exemplo resurrectionis, quae consistit in unione animae ad corpus, in qua unione formalis terminus est anima, qua unitur corpori, ut illud actuet; & ut illi suum subistere communi-  
get, ut multi volunt; ergo pari ratione in hac unione ter-

minus formalis erit Verbum divinum, quatenus sua subsistentiam communicat humanitati. Tandem confirmari potest ex ipso nomine Christus, quod unctum significat: unde de formali significat unguentum, quo unctus est: est autem Christus unctus oleo divinae personae seu subsistentiae: ergo de formali significat subsistentiam Verbi; haec ergo est formalis terminus huius unionis.

Secunda opinio esse potest, formalem terminum esse humanitatem. Quae suadetur primo, quia ille est terminus formalis actionis, quo formaliter constituitur totalis terminus ejusdem actionis, ut talis est; sed terminus totalis huius actionis constituitur formaliter humanitate: ergo haec est formalis terminus huius actionis. Minor probatur, nam terminus integer huius actionis est Christus, ut est hic homo: hic autem homo formaliter constituitur hac humanitate. Unde natura integra dici solet a Metaphysicis forma totius respectu suppositi, quod comparatione illis quasi materialiter se habet. Et confirmatur ac declaratur; nam formalis terminus non est attendendus ex eo, quod in re principalius est, aut aequalius, nam cum calidum fit, in re quid principalius est subiectum caloris, quam calor, & nihilominus non est terminus formalis calefactionis. Neque etiam est attendendus ex intentione extrinseca agentis, sed ex intentione (ut sic dicam) intrinseca ipsius actionis. Sed in hac actione, quod intrinsece & per se intenditur, est, ut Deus fiat homo; haec ergo actio ex natura sua supponit Deum, & induit illum humanitate: est ergo humanitas formalis terminus ejus. Quod potest declarari exemplo actionis, qua homo vestem induit, nam, licet adaequate terminetur ad vestitum esse, & in ipso composito ex homine & veste praecipuum sit homo, tamen quia ipse supponitur actioni, & vestis est, quae illi adjungitur, ideo formalis terminus illius actionis est vestis, non secundum se, sed ut actu induens, & quasi informans hominem. Tandem confirmatur; quia Verbum secundum se non est terminus formalis, ut per se constat, nec per aliquid, quod ipsi addatur, quia hoc nihil est praeter humanitatem: unde nec Verbum ut unitum potest habere rationem termini formalis, quia illa reduplicatio, ut unitum, nihil addit Verbo ipsi in se, nisi vel relationem rationis, quae non potest esse terminus actionis realis, vel denominationem ab unione, quae est in humanitate; denominatio autem non potest esse terminus formalis actionis realis, nisi ratione formae denominantis; ergo formalis terminus potius erit humanitas, a qua Verbum denominatur humanatum, quod est esse humanitati conjunctum.

Tertia opinio esse potest, nec Verbum, nec humanitatem esse proprie terminum formalem huius actionis, sed modum illum unionis, qui in humanitate fit, ut Verbo copuletur, quae merito tribui potest Scoto in 3. d. 1. q. 1. Durand. d. 5. quest. 2. & aliis, qui hoc sensu ajunt, hanc actionem terminari ad relationem, nam re vera non loquuntur de relatione praedicamentali, sed transcendentali. Ratio reddi potest, quia terminus formalis actionis non supponitur actioni, sed est natura posterior ipsa: sed Verbum & humanitas supponuntur huic actioni, modus autem non supponitur, sed per illam resultat. Major constat, quia actio, cum sit quoddam fieri, formaliter terminatur ad id, quod proxime per illam fit, quod autem supponitur actioni, non fit per illam; quod vero fit per illam, est ordine naturae posterior illa. Unde etiam fit, ut tam humanitas, quam Verbum, possint esse sine illa actione: modus autem unionis non possit esse sine illa actione: terminus autem formalis est ille, qui proxime & immediate pendet ab actione. Denique, quod Verbum non sit formalis terminus, satis probatum videtur in secunda opinione; quod autem humanitas non sit terminus, patet, quia est proximum subiectum, in quo, & ex quo fit.

In hoc nihil potest certa ratione definiri, nisi prius inter disputantes conveniat, quid nomine termini formalis significetur; nam, si unus per terminum formalem intelligat id, quod praecipuum est, & maxime actuale in toto composito, quod est terminus totalis; alius vero contendat, terminum formalem esse, qui constituit totalem terminum in tali esse specifico: alius denique affirmet, formalem terminum esse id, quod abstracte ac praecise sumptum de quo fit, different quidem in forma loquendi, &

Dubia  
aliquot  
probandur.

Primum.

2. Opinio.

2. Opinio.

3. Opinio.



in significatione vocis, tamen in re non sibi contradicent. Et hoc modo videntur procedere opiniones recitatæ: quæ solum differunt, quia in definiendo termino formali non conveniunt: ejus autem definitio magis ex usu vocis, quam ex aliis principiis pendet. Et ideo tertia opinio simpliciter videtur probabilior, quia revera terminus formalis actionis ut sic est id, quod proxime per illam inducitur, & fit in rerum natura: hic enim est

Non Verbum, non humanitas, sed unionis modus est incarnationis terminus formalis.

ex ipsa ratione termini, quæ in hoc consistit, ut ad ipsum tendat actio; actio autem maxime tendit ad id, quod per ipsum proxime fit. Atque hoc censeo esse simpliciter verum; si quis autem velit omnibus satisfacere, potest sub distinctis considerationibus varios terminos formales assignare: considerando enim hanc actionem sub ratione divinæ communicationis, sic divina subsistentia potest dici formalis terminus ejus, non secundum se, sed ut communicata humanæ naturæ, & ut illam maxime perficiens. Si vero consideretur, ut est humanatio Dei, sic formalis terminus est humanitas, non secundum se, sed ut conjuncta Verbo: unde nunquam potest ab hoc formali termino unio separari, formaliter ut conditio necessaria, ut per humanitatem formaliter Deus homo constituatur. Si autem illa actio solum consideretur, ut est unio quædam talium extremorum, ex qua hoc compositum Deus homo resultat, ejus formalis terminus est modus unionis in facto esse sumptus. Et hæc ultima consideratio est maxime physica, magisque absoluta respectu hujus actionis.

Secunda dubitatio est, quam Cajet. movet hic art. 8. scil., quis sit terminus a quo hujus actionis; in qua ipse docet, terminum a quo esse humanitatem ipsam, & putat esse sententiam D. Tho. quoniam ibi vocat humanitatem terminum assumptionis: non est autem terminus ad quem: erit ergo terminus a quo. Et probatur, quia terminus a quo supponitur actioni: sed hic nihil supponitur nisi Verbum & humanitas: Verbum autem non est terminus a quo, ut per se constat, erit ergo humanitas.

Reici. ut. Sed hæc opinio merito reicitur etiam ab aliis discipulis D. Tho. quia humanitas, ut supra vidimus, potius est subjectum hujus actionis, sicut est in generatione materia, præterquam Aristoteles in Philosophia alium terminum a quo illius actionis & inquisivit & docuit. Deinde est hic eadem ratio, quia terminus a quo non manet, imo est impossibilis cum termino ad quem; humanitas autem non est impossibilis cum termino ad quem hujus unionis, sed sub illo manet, & per illum afficitur, & perficitur. Nec D. Tho. ibi vocat humanitatem terminum actionis, sed solum dicit, naturam humanam significari ut in termino assumptionis, cum dicitur Deus factus homo: esse autem in termino assumptionis non est esse terminum a quo talis actionis, sed potius est esse aliquid manens in termino integro resultante ex assumptione. Dicit præterea D. Tho., nomine assumptionis indicari terminum a quo & ad quem talis actionis, quia assumptio (inquit) quasi ab alio ad se sumptio, non tamen declarat, quis sit terminus a quo in hac assumptione: neque ex illis verbis colligi potest, quod sit humanitas, sed potius aliquid aliud ab humanitate, a quo ipsa sumatur. Ratio etiam facta pro illa sententia ex dicendis facile expediatur.

Secunda sententia est, terminum a quo hujus actionis fuisse subsistentiam creatam humanæ naturæ. Quam opinionem significare videtur D. Thom. citatis verbis: *assumptio est ab alio ad se sumptio*, & per illam particulam *ab alio*, ait indicari terminum a quo: constat autem, naturam humanam Christi non esse assumptam ab alio, nisi a proprio supposito, non in quo fuit, sed in quo futura esset, nisi assumeretur. Et ratione probatur, quia terminus a quo est qui formaliter excluditur per terminum ad quem: sed subsistentia propria formaliter excluditur per unionem hypostaticam: ergo. Quod si objicias, quia subsistentia propria nunquam fuit in illa humanitate; terminus autem a quo debet præcedere, ut ferebat præcedens opinio. Respondetur non oportere, terminum a quo actu præcedere, seu præexistisse, sed satis esse, quod existeret, nisi talis actio interveniret, per quam impediretur. Et hic modus dicendi est probabilis, nam cum terminus a quo possit dupliciter assignari, scil., positive & privative seu negative, si in præsentia est positive assi-

gnandus, nullus alius excogitari potest. Sed nihilominus verius & proprius dicitur, hanc actionem non habuisse terminum a quo positivum; non est enim hoc de ratione omnis actionis, vel mutationis, sed *interdum fit ex subjecto in subjectum, interdum vero ex non subjecto in subjectum* (ut Aristotelis terminis utar). Non fit autem proprie actio, vel mutatio ex termino positive opposito, nisi quando actu & realiter talis terminus præcessit in eodem subjecto: si enim aqua a principio creetur calida, non dicitur proprie, ex frigida facta fuisse calidam: neque aqua, si creata sit aut genita in superiori regione aeris, dicitur, ex inferiori loco in eo fuisse constituta, neque homo creatus in magna quantitate dicitur ex parvo factus esse magnus, solum quia terminus a quo positivus non præcessit: nam inde fit, ut non sit ab illo facta mutatio: sic ergo in præsentia non est a persona creata facta assumptio, cum illa non præcesserit. Unde, cum D. Th. ait, assumptionem esse ab alio, non est necesse intelligi, ab alia persona, aut ab alio termino positivo, sed ab alio statu, seu termino saltem privativo vel negativo. Cum autem dicitur terminus a quo formaliter excludi per terminum ad quem, ut quasi adæquate explicetur ratio termini a quo, intelligendum est, non tantum aptitudine, sed actualiter, quia non est satis ut terminus ad quem natura sua aptus sit ad expellendum terminum a quo, vel ut illum impediat, sed oportet, ut actu illum expellat a subjecto, in quo ante erat.

Tertia ergo sententia est, terminum a quo in præsentia actione solum esse privativum, seu negativum, illumque esse carentiam ipsius termini ad quem: sic enim Aristot. 1. Physicor. dixit, terminum a quo generationis esse privationem formæ, quæ per generationem inducitur: unde si consideremus hanc actionem, quatenus per illam humanitas unitur Verbo, terminus a quo illius erit carentia talis unionis, quia ex vi hujus actionis humanitas ex non unita fit unita Verbo. Si vero consideretur hæc actio, quatenus per illam communicatur Verbo subsistentia divina, terminus a quo illius erit carentia subsistentiæ divinæ, nam humanitas Christi ex non habente divinam subsistentiam per hanc actionem fit habens illam. Si denique talis actio consideretur, ut per eam humanitas quodammodo communicatur Verbo, & fit Deus homo, terminus a quo illius est, Deum non esse hominem. Fundamentum hujus sententiæ est, quia exclusis aliis, nullus præter hunc relinquitur terminus a quo, qui assignari possit: & hic est maxime proportionatus huic actioni.

Sed superest solvenda eadem objectio, quæ contra præcedentem sententiam facta est; nam hic terminus re ipsa non præcessit in humana Christi natura, nunquam enim caruit unioni ad Verbum: diximus autem, hanc conditionem esse requisitam in termino a quo positivo; erit ergo eadem ratione necessaria in termino a quo privativo. Responderi potest primo, illam carentiam unionis humanitatis ad Verbum re vera tempore antecessisse ipsam unionem: nam ante instans incarnationis toto tempore præcedente humanitas Christi non fuit unita Verbo. Nec verò necesse est, ut illo etiam priori tempore extiterit humanitas, sed satis est, quod non fuerit unita, sive extiterit, sive non: ita enim anima rationalis per hominis generationem unitur corpori, cui antea non erat unita, sicut per resurrectionem, quamvis in resurrectione supponatur existens, non vero in generatione. Unde juxta hunc respondendi modum hic terminus a quo non est assignandus per modum privationis, sed tantum per modum simplicis negationis, nisi forte respectu materiæ primæ, nam privatio cum sit carentia in subjecto re vera non est, nisi quando subjectum est actu carens forma: humanitas vero vel anima Christi nunquam hoc modo extiterunt: materia autem corporis ejus prius tempore extitit carens unioni ad Verbum. Nec videtur hic modus dicendi alienus ab usitato more loquendi: aer enim, si a principio creetur lucidus, non dicitur ex tenebroso factus lucidus, quia nunquam tenebrosus fuit; dicitur tamen ex non lucido factus lucidus, quia priori tempore, quo non extitit, etiam non fuit lucidus. Sed hæc responsio, licet considerando res, prout factæ sunt, satisfacere videatur, tamen absolute & secundum se, & in omni eventu rem considerando, non satisfacit adæquate, quia simpliciter non est necessarium, ut terminus a quo, etiam

non eadem am-plectatur.

Tertia opinio.

Objectio.

Prima responsio.

Improbatur.



iam negative sumptus, tempore præcedat actionem: fingamus enim (quod mihi probabilius est fuisse possibile) animam Christi ab æterno assumptam & unitam Verbo, tunc illa actio eundem haberet terminum a quo, quem nunc habet; & tamen negatio unionis non antecessisset duratione illam actionem. Item tunc anima simpliciter esset producta ex nihilo, quia esset creata, quamvis nihilum non antecessisset duratione creationem: ergo non est de ratione termini a quo negativi, ut tempore antecedit actionem. Dicendum est ergo sufficere, ut carentia termini ad quem ordine rationis, seu naturæ antecedit, & quod in re ipsa extitisset suo modo, nisi per talem actionem exclusus fuisset.

Responsio  
satisfaciens  
objectioni.

Insurgit  
alia diffi-  
cultas

Sed tunc superest, ut aliquam rationem differentie reddamus inter terminum positivum & negativum, nam in illo diximus, necessarium esse, ut tempore præcederet, quod tamen nunc negamus in termino negativo. Et augetur difficultas, nam, quod non est, non potest dici prius natura præcedere: nam esse prius natura supponit esse: sed illa negatio non est necesse, ut prius duratione suo modo sit: neque etiam quod aliquando fuerit: ergo neque etiam necessarium est, ut ordine naturæ præcederet. Et eadem ratione dici non potest, quod in instanti incarnationis prius natura fuit illa humanitas non unita, quam unita: quia in illo signo fuit non unita: quia in illo instanti pro nullo signo fuit non unita: non enim possunt duo contradictoria de eodem pro eodem instanti verificari, solum propter diversa signa naturæ. Respondetur ab hoc ultimo incipiendo, negationem non dici ordine naturæ præcedere secundum actualem existentiam, quam suo modo habere potest, ut argumentum supponere videtur, sed solum secundum ordinem, aut præcisionem mentis, quia, nimirum, humanitas prius natura intelligi potest existens, quam unita: & ut sic intellecta, antequam intelligatur in ea facta aliqua mutatio, vel actio, non intelligitur ab illa humanitate exclusa negatio unionis hypostaticæ aut subsistentiæ increatæ; & ideo humanitas in illo priori sic concipitur, ac si careret unionem, non conceptu negativo, qui falsus esset, sed conceptu præcisivo, in quo non est falsitas, statim vero ac in secundo signo naturæ intelligitur fieri unio in tali natura, intelligitur etiam excludi carentia unionis. Et hoc satis est ad rationem termini a quo privativi. Et hinc assignatur differentia inter hunc terminum privativum, & positivum, quia terminus positivus, si non præcedit secundum durationem, neque secundum naturæ ordinem, neque secundum quamcunque præcisionem intellectus, antecedit, quia in illo priori, quando concipitur humanitas ante incarnationem, quamvis præcise concipiatur sine subsistentia increata, non tamen concipitur cum subsistentia creata, sed ut prior utraque, tam propria, quam aliena; id est, ut præciscens ab utraque, & ideo tunc nulla relinquitur antecessio in termino positivo, quæ ad rationem termini a quo sufficiat, relinquitur autem in termino privativo.

Dubium,  
de funda-  
mento  
proximo,  
ex quo  
relatio  
unionis  
inter Ver-  
bum &  
humani-  
tatem re-  
sultat.

Tertia dubitatio, quæ expeditur ex dictis est. Quod nam sit fundamentum proximum, ex quo resultat relatio unionis inter humanitatem & Verbum. In qua Scotus & Durandus, locis supra cit. nullum fundamentum ad hanc relationem requirunt præter ipsam humanitatem, quia non putant, hanc relationem resultare ex aliquo fundamento posito termino, sed per se ac directe fieri per actionem positivam. At vero Cajet. dicit, fundamentum hujus relationis esse unitatem subsistentiæ utriusque naturæ, quia in omni relatione unionis fundamentum relationis est illud, in quo extrema conveniunt. Sed in primis considerandum est (quod sæpe dixi) hos autores licet verbis inter se pugnent, tamen revera non loqui de eadem re; & si quæ est inter eos contradictio, non tam esse in explicando fundamento relationis, quam in ponenda vel auferenda vera relatione prædicamentali. Scotus ergo & Durandus loquuntur de ipso modo unionis substantiali, qui proxime intercedit inter humanitatem & Verbum, & hunc vocant relationem propter habitudinem transcendentelem, quam habet ad Verbum cum actuali dependentia ab illo tanquam a suo termino. Et quidem loquendo de hoc modo, sive proprie sive improprie nomine relationis significetur, verissimum est, nullum habere fundamentum, nec resultare ex positione alterius, sed per propriam actionem

fieri, ut in superioribus satis ostensum est. Præter hunc autem relationis modum Durandus (& idem videtur sentire Scotus) non ponit in hoc mysterio aliam relationem prædicamentalem realem humanitatis ad Verbum; & ideo mirum non est, quod nullum aliud requirat relationis fundamentum. At vero Cajet. & multi Thomistæ, præsertim recentiores, ponunt in humanitate relationem prædicamentalem & realem unionis ad Verbum; & ideo merito illius fundamentum inquirunt; & quoniam vix ullam mentionem faciunt modi unionis substantialis, quem nos absolutum cum habitudine transcendentali esse diximus, ideo magnam difficultatem inveniunt in hoc assignando fundamento.

Ex his colligere licet, duplicem hic posse questionem tractari. Prima est simplex & absoluta, scilicet an detur in humanitate talis relatio prædicamentalis unionis ad Verbum distincta aliquo modo ex natura rei a substantiali modo unionis. Secunda quæstio est hypothetica, nimirum, si talis relatio est, quod nam sit illi assignandum fundamentum. Et ab hac posteriori incipiendo, quia ex dictis facillime resolvitur, sententia Cajet. nullo modo probanda videtur. Et in primis non videtur Cajetanum assignasse fundamentum relationis unionis, quæ proxime est humanitatis ad Verbum, seu ad subsistentiam Verbi, sed illam, quæ est inter naturas divinam & humanam, quatenus in una subsistentia uniuntur, ut patet ex ratione, in qua fundatur, scilicet, quia fundamentum relationis unionis est id, in quo extrema uniuntur: loquitur ergo de unione extremorum in uno tertio, non autem de relatione eorum, quatenus immediate inter se uniuntur: nos autem præcipue loquimur de relatione humanitatis ad subsistentiam Verbi, nam, ut videbimus, hæc sola relatio realis potest hic considerari, nam inter naturas inter se vel non est nova relatio, sed denominatio, quasi mediata ab hac relatione, vel est tantum relatio rationis, ut statim explicabo.

Loquendo igitur de relatione, quæ proxime est humanitatis ad Verbum, cui per se primo unitur, non potest illius fundamentum esse subsistentia Verbi increata. Primo; quia illa subsistentia est terminus hujus relationis, non ergo potest esse fundamentum illius: fundamentum enim & terminus relationis opponuntur potius inter se, quam possint in idem coincidere. Secundo, relatio proxime afficit fundamentum, seu est in illo non ut res omnino ab illo distincta, sed ut modus vel relatio quædam formalis ejus, & eo mediante afficit subiectum; sed hæc relatio nullo modo afficit subsistentiam Verbi, neque est in illa, neque est modus ejus, sed res omnino distincta, & in humanitate inhærens: ergo non est subsistentia Verbi fundamentum illius relationis, sed aliquid creatum existens in humanitate. Tertio, posita humanitate in rerum natura & subsistentia Verbi, si nihil aliud addatur, non resultat hæc relatio, quamvis in illis includatur terminus hujus relationis: ergo signum est in eis præcise sumptis non includi fundamentum relationis, alioquin posito fundamento & termino resultaret relatio. Dices, subsistentiam divinam, non utique, sed ut est una subsistentia duarum naturarum esse fundamentum hujus relationis. Sed contra, nam hinc colligimus, non ipsam subsistentiam, sed id, quod additur per hoc, quod illa subsistentia, quæ in se una est, & unius naturæ, sit simul subsistentia alterius naturæ, illud (inquam) quod additur, esse proximum fundamentum hujus relationis quia illo posito, statim resultat relatio; illud autem quod additur, non est aliquid reale in Verbo, neque subsistentia Verbi, sed est modus existendi additus humanitati, a quo Verbum denominatur humanitati unitum, & subsistentia ejus denominatur subsistentia humanitatis; ergo hoc fundamentum ex parte humanitatis potius assignandum est, quam ex parte subsistentiæ Verbi: nam fundamentum relationis realis est aliquid reale, & non denominatio, quæ resultat in Verbo, nisi fortasse per eam explicetur id, a quo talis denominatio sumitur; quod coincidet cum sententia, quam statim exponemus. Respondent aliqui, per subsistentiam Verbi intelligi totum hoc, scilicet, Deum esse hominem, & hoc esse fundamentum hujus relationis, quia posito illo totali termino hujus actionis necessario resultat relatio. Sed hoc valde confuse & improprie dictum est, quia in illo toto composito includitur tam subiectum, quam fundamentum, & etiam

Evasio

Improbatur.



iam terminus relationis, quæ sicut distincta sunt, ita etiam distincte assignari debent. Unde perinde est, ac si diceretur, duo alba simul posita in rerum natura esse fundamentum similitudinis. Denique licet in illo toto composito includatur terminus relationis, non dicitur ipsum totum esse terminum, sed Verbum, & licet in eodem includatur subjectum relationis, non ipsum totum, sed humanitas dicitur esse subjectum ejus: ergo neque ipsum totum est fundamentum, sed aliquid aliud conveniens, seu existens in subjecto relationis, nam relatio a fundamento realiter non distinguitur, saltem ut res a re; agimus enim de fundamento proximo & permanente (ut sic dicam), non de actione seu occasione, ex qua resultavit relatio, quæ interdum appellatur ratio fundandi, & solet esse transiens, quamvis relatio maneat, ut est generatio respectu paternitatis.

Dicendum est ergo, fundamentum proximum hujus relationis esse substantialem modum unionis humanitatis ad Verbum; ille enim proxime ac formaliter fit per actionem incarnationis, seu mutationem humanitatis, & ita illi conveniunt omnia, quæ ad rationem fundamenti proximi desiderari possunt, & in nullo alio reperiuntur. Hoc posterius satis patet ex dictis contrariæ sententiæ, & ex argumentis, quibus Durand. & Scot. utuntur ad negandum aliud fundamentum hujus relationis. Ac denique, quia quomodocunque inductio fiat, nihil aliud invenietur, quod omnes fundamenti conditiones habeat. Illud autem prius probatur, nam in primis ille modus est aliquid creatum, quia de novo fit, & ex hac parte non repugnat illi affici, vel modificari per relationem realem. Rursus est aliquid in humanitate, in qua esse debet relatio. Deinde est quid realiter distinctum a Verbo, ad quod terminari debet relatio. Denique sine illo modo impossibile est resultare hanc relationem, & illo posito impossibile est, quin resultet, quia terminus necessario præsupponitur. Ergo habet omnia requisita ad rationem fundamenti. Solum potest obijci, quia ille modus substantialis est, & ad complementum cujusdam substantiæ pertinet, substantia autem non potest esse proximum fundamentum relationis. Respondetur tamen, negando minorem, nam substantia, prout habet aliquam unitatem, vel ad unitatem confert, potest fundare relationem, ut patet de relatione identitatis specificæ inter duas substantias, & de relatione unionis inter materiam & formam substantialem, quo exemplo confirmari potest sententia proposita, nam ita est in illo necessario philosophandum, & idem est de quolibet simili.

Atque ex his facile constare potest, quid dicendum sit de relatione unionis duarum naturarum divinæ & humanæ inter se: aliud est enim loqui de relatione unionis propriæ dictæ, aliud vero de relatione unitatis: unio enim solum indicat conjunctionem eorum, quæ distincta sunt, unitas vero dicit identitatem. Relatio ergo unionis nulla est propria inter illas duas naturas, nisi ea, quæ est inter humanitatem & subsistentiam Verbi, & quæ fingi potest inter eandem subsistentiam & divinitatem, quæ potius est identitas, quia illæ duæ naturæ non habent conjunctionem immediatam inter se, sed in subsistentia, & ita neque inter se referuntur immediata relatione unionis, sed denominantur unitæ a relatione vel unionem, quam habent ad subsistentiam Verbi. Potest autem cogitari inter has duas naturas quædam relatio convenientiæ & quasi similitudinis, vel potius unitatis & identitatis, quatenus una & eadem subsistentia terminantur; sicut tres personæ divinæ, quatenus sunt unum in natura, referuntur relatione similitudinis seu identitatis, & simile esset in duobus hominibus, si eandem numero haberent albedinem. Et de hac relatione optime dicitur fundamentum ejus esse unitatē subsistentiæ utriusque naturæ. Verumtamen, si res attente consideretur, hæc relatio non est realis, sed rationis, quia fundamentum est idem in utroque extremo. Sicut relatio similitudinis aut æqualitatis inter personas divinas, vel inter duos homines habentes eandem numero albedinem, vel quantitatem, est relatio rationis juxta cōmuniorem sententiam, nam, licet res, quæ denominantur his relationibus, sint distinctæ, tamen id, in quo referuntur, & ratione cujus possunt fundare & terminare relationem, est omnino idem, & ita est hæc veluti quædam relatio identitatis numericæ. Sed dicunt aliqui, quod licet duæ naturæ, quatenus sunt

unum supposito, referantur tantum relatione rationis, tamen quatenus utraque intelligitur habere subsistentiā Verbi, non referuntur relatione identitatis, sed convenientiæ, & ideo talis relatio, saltem ex parte humanæ naturæ, est realis. Sed non satis intelligo, quomodo talis relatio possit esse realis & ab alia distincta, si vere sit relatio convenientiæ. Nam habere subsistentiam divinam in communi loquendo, nihil aliud est, quam terminari subsistentia divina: aut ergo convenientia est in forma (ut ita dicam) seu in subsistentia, & hæc non est alia, nisi unitas seu identitas ejusdem subsistentiæ in utraque natura, & ita est relatio rationis eadem cum relatione identitatis. Vel convenientia est in terminatione seu modo terminandi, & in hoc non est convenientia inter illas naturas, sed summa differentia, quia divinitas terminatur illa subsistentia per summam identitatem: humanitas vero solum per realem unionem ad illam: ergo hinc non potest oriri relatio convenientiæ nec realis, nec rationis, sed, si quæ oritur, potius est relatio diversitatis: illa vero etiam ex parte humanitatis non erit realis, sed rationis; quia non habet propriæ positivum fundamentum reale, sed negativum, sicut de relatione distinctionis inter divinas personas dicendum est. Quod si quis dicat illam convenientiam non esse in modo terminandi, sed in hoc communi conceptu habendi subsistentiam increatam, advertat oportet, per hanc vocem potius significari rationem analogam seu proportionem quandam, quam veram convenientiam, præsertim univocam. Probat, quia humanitatem habere subsistentiam Verbi, nihil aliud est, quam esse unitam illi, & consequenter, quod subsistentia sit in illa intime terminando unionem seu dependentiam ejus: divinitatem autem habere subsistentiam Verbi est intime & essentialiter includi in ipsa tanquam in ultimo & incommunicabili termino: ergo illud habere neque est ejusdem rationis, nec significat aliquam rationem communem utrique naturæ, in qua possit illa relatio realis fundari. Igitur inter duas naturas Christi, divinam & humanam, nulla intervenit realis relatio unionis, vel unitatis, quæ requirat fundamentum distinctum a modo unionis humanitatis ad Verbum. Imo, etiam si inter illas duas naturas consideretur relatio effectus ad causam, quæ potius est inter Christum ut hominem, & Deum ut Deum, quatenus Deus est principium efficiens unionis humanitatis ad Verbum, quamvis (inquam) hæc relatio ex parte humanitatis realis sit, & distincta a relatione unionis, quia non fundatur formaliter in formali unionem ut sic, sed in indepēdētia effectiva, nec terminatur ad Verbum ut terminans unionem hypostaticam, sed ad totam Trinitatem, ut est unus Deus efficiens ad extra, nihilominus tamen realiter idem modus unionis, qui, ut est quasi formale vinculum ad Verbum, fundat relationem unionis, ut est effectus Dei, seu terminus formalis illius actionis, quæ fit incarnatio, est fundamentum relationis effectus ad causam.

Sed hæc omnia procedunt ex illa hypothesi, quod in hoc mysterio resultat relatio prædicamentalis, præter modum substantialem unionis; superest vero quæstio absoluta, an revera detur talis relatio, resultans ex modo unionis, respectu cujus ille sit proximum fundamentum. Sed hæc quæstio vel generalis est de omnibus relationibus, quæ confurgere existimantur ex simultanea existentia plurium rerum habentium inter se aliquam proportionem & denominationem, vel certe saltem est communis ad omnes illas res, quæ ad alias habent habitudines reales transcendentales, & ideo quæstio hæc Dialecticis, vel Metaphysicis remittenda est. Solum adverto, aliquos existimasse, probabiliter posse negari in hoc mysterio talem relationem, quamvis in aliis rebus non negetur, quia modus ipse unionis hypostaticæ tam intime includit in suo conceptu duo extrema, quorum est nexus, ut in illo conceptu essentialiter includatur relatio substantialis & transcendentalis, præterquam aliam fingere formaliter distinctam, non solum superfluum apparet, verum etiam vix concipi posse videtur. Assumptum patet ex omnibus dictis de modo unionis, & ex Divo Thoma hic art. 9. dicente, unionem esse conjunctionem duorum. Unde multi putant, D. Thom. in his articulis usum esse nomine relationis eodem sensu, quo Scotus & Durandus, cum vocat unionem, relationem præ-

Fundamentum proximum relationis, quæ humanitas refertur ad Verbum, & denominatur illi unitas, est modus unionis.

Objeçtio.



Qui relationes  
prædicamentales  
admittit  
realem  
unionis  
ex parte  
humanitatis  
ad  
Verbum  
admittat  
necesse  
est.

præsertim, cum art. 8. significet, unionem dicere terminum actionis in facto esse: videtur ergo loqui de relatione substantiali & transcendentali, non vero de prædicamentali. Verumtamen hæc sententia, licet absolute & in se fortasse sit satis probabilis, tamen quatenus differentiam constituit inter hanc relationem & alias prædicamentales, quæ communiter poni solent, ut hæc potius neganda sit, quam aliæ, non video sane quo fundamento satis probabili defendi possit. Et in primis, si ratio supra insinuata, efficax est, negandæ consequenter sunt omnes relationes prædicamentales omnium realium unionum, ut inter materiam & formam, inter subiectum & accidens, & similes, quia in his omnibus intervenit modus unionis, includens intrinsece relationem transcendentalem, quæ sine extremis esse & concipi non potest. Simili ratione neganda est omnis relatio prædicamentalis fundata in habitudine transcendentali, præsertim quando illa talis est, ut existentiam utriusque extremi requirat, ut verbi gratia creaturæ ad creatorem nulla erit relatio prædicamentalis realis, ex parte creaturæ, quia ex parte ejus est actualis dependentia a Deo, quæ non est prædicamentalis relatio, sed vera actio, vel fieri rei, quod vel ad prædicamentum sui termini revocatur, vel ad genus actionis pertinet: optime vero nomine dependentiæ significatur; & essentialiter includit habitudinem transcendentalem, quæ sine extremis neque, esse neque concipi potest: ergo eadem ratione nulla erit relatio prædicamentalis, quæ ex tali dependentia resultat. Idemque argumentum fiet de quacumque relatione fundata in actione actuali, & in actu vitali, prout dicit habitudinem ad suum objectum, & sic de aliis. Tandem, si in omnibus his negantur relationes reales prædicamentales, majori ratione negandæ erunt aliæ, quæ fundantur in unitate, ut similitudinis, æqualitatis, propinquitatis, & similes: nam licet in his non antecedit relatio transcendentalis inter extrema, sed sint omnino absoluta, ut sunt duæ albedines, inter quas intercedit similitudo, quæ est respectiva, tamen hinc non satis colligitur, illum respectum esse aliquid ab extremis distinctum, sed esse ipsamet extrema aliter concepta, scilicet, ut simul existentia, & sese invicem denominantia; solumque erit differentia, quod hic modus concipiendi non est ita conjunctus necessario cum re absoluta, sicut est conjunctus cum re includente transcendentalem habitudinem. Et confirmatur, nam qui est credibile, inter duas res propter solam propinquitatem loci oriri relationem realem prædicamentalem, quam vocant propinquitatis, vel præsentiae, & inter duas res non solum loco, sed etiam realiter conjunctas in aliquo esse non resultare aliquam similem & perfectiorem relationem? Itaque eo modo, quo admittuntur aliæ relationes reales prædicamentales, non dubito, quin etiam hæc relatio unionis admittenda sit, de qua dixit hic D. Thom. esse rationis in Verbo, & realem in humanitate, & quod sit prædicamentalis & non per se primo terminans actionem, sed resultans, quod clarius expressit in 3. d. 2. quæst. 2. art. 2. quæst. 3. Quæ autem sit necessitas admittendi has relationes, & si admittantur, quomodo sint distinguendæ a fundamentis & terminis, an ex natura rei vel ratione tantum, seu formaliter (ut alii loquuntur) in Metaphysica fuisse tractatur. Non omit-

Unicatio  
unionis  
ex parte  
humanitatis  
ad  
Verbum  
admittenda  
est, quæ  
humanitatem  
&  
unitatem  
&  
sustentantiam  
terminatam  
que deno-  
minare  
sufficiat.

ticulares, esset in infinitum progredi. Item quis dicat aliam esse relationem formæ ad materiam, quatenus illi unitur, & aliam, quatenus informat illam, cum ipsa informatio omnino essentialiter includat unionem. Itaque licet unio ut sic non indicet causalitatem, vel dependentiam; sustentare autem aut terminare, modum aliquem causalitatis aut imitationem ejus importare videtur; tamen quando causalitas vel dependentia talis est, ut essentialiter ac formaliter includat unionem, non est distincta relatio unionis, & terminationis dependentiæ, vel sustentationis, sed est eadem diversimode concepta ac declarata: atque ita est in præsentia. Nec refert, quod decebatur de relatione æquiparantiæ vel disquiparantiæ, nam eadem relatio sub communi aliqua ratione potest esse relatio æquiparantiæ, & sub specifica disquiparantiæ, quia duo extrema secundum communem rationem possunt eandem denominationem recipere, & diversam secundum propriam, ut pater & filius denominantur relata seu correlativa secundum communem rationem, licet secundum propriam denominationem causa & effectus, & exemplar ac imago sunt conformia seu proportionata secundum communem denominationem, licet secundum propriam se habeant ut mensura & mensuratum: sic ergo in præsentia Verbum & humanitas secundum communem rationem denominantur unita, secundum propriam vero dicuntur terminans & terminatum, seu sustentans & sustentatum. Unde ad hanc relationem attendens secundum propriam rationem ejus dixit D. Thom. in 3. d. 5. quæst. 1. art. 1. quæstiunc. 1. ad 2. relationem hanc non esse æquiparantiæ, quamvis in alio sensu ibi loquatur, scilicet, quia in uno extremo est realis, & in alio rationis: quo sensu idem affirmat Gabr. in 3. d. 1. q. art. in corol. 2. & Scotus ibi. q. 1. art. 1.

Atque ex his, quæ in fine præcedentis dubii dicta sunt, expeditur facile dubium aliud, quod hic tractari potest, Quæritur  
dubium. quomodo prædicta unio, quam diximus esse substantialem modum unionis humanitatis ad Verbum, se habeat ad dependentiam respectu Verbi, an, scilicet, sint omnino idem, vel sint res aut modi ex natura rei distincti. Quidam enim censent, illa duo esse ex natura rei distincta, quia dependentia ut sic non est modus substantialis, sed accidentalis; nam, vel est actio, vel se habet ad modum actionis: est enim fieri rei prout est a causa, sine qua esse non potest, unio autem est modus substantialis; ergo. Secundo declaratur, quia in persona creata aliud est subsistentia, aliud dependentia naturæ a propria subsistentia; nam subsistentia dicit substantialem terminum naturæ, dependentia vero est veluti quid medium inter naturam, & suum terminum, unde se habet ad modum actionis seu causalitatis cujusdam, & videtur esse quid accidentale; ergo similiter in præsentia dependentia humanitatis a Verbo, quæ aliam dependentiam supplet, accidentale quid est & distinctum a modo substantiali unionis. Tertio sic declaratur, nam, si Deus conservaret humanitatem absque propria persona, & absque unione ad aliam personam, per aliquam actionem suppleret dependentiam a subsistentia, quæ actio accidens quoddam esset, quia esset propria actio causæ efficientis, & tamen per illam actionem suppleretur dependentia, quam nunc habet humanitas a Verbo; ergo etiam hæc dependentia est quoddam accidens, quia quod sit dependentia, ut ab efficiente, vel ut a termino, non sufficit tantam varietatem conferre, ut una sit accidentalitas, & altera substantialis. Quarto tandem unio & dependentia, ut minimum, formaliter differunt, nam unio ut sic ordinatur ad componendum unum, dependentia autem ordinatur ad esse rei, unde & potest dari unio sine dependentia, ut patet in anima rationali respectu corporis, & dependentia sine unione, ut in lumine respectu solis.

Hæc sententia vel laborat in æquivoco, vel est plane falsa, aut res aut modos reales multiplicat sine necessitate. Quod ut declarem, adverto, nomine dependentiæ humanitatis a Verbo plura in præsentia significari posse. Primum est, indigentia, quæ est ex parte humanæ naturæ, ut sustentetur a Verbo, quo possit in esse conservari, quæ non est proprie dependentia actualis, sed potius est necessitas dependentiæ, quam constat non esse unionem, sed priorem unionem, convenit enim illa indigentia humanitati secundum se prius quam intelligatur unita. Unde neque etiam dicit rem aliquam positivam, aut



modum realem ab humanitate distinctum, sed in primis dicit capacitatem obedientialem, quam habet, ut uniatur Verbo, & ab illo pendeat: deinde addit carentiam propriæ substantiæ, ratione cuius indiget illa natura unionis ad Verbum, ac tandem includit intrinsecam limitationem & imperfectionem illius naturæ, ratione cuius indiget proprio vel alieno termino substantiæ, ut conservari possit in esse: de hac ergo dependentia non est in præsentī sermo. Secundo per dependentiam significari potest emanatio a causa efficiente, de qua verum censeo esse modum ex natura rei distinctum a termino suo, ut ex Metaphysica suppono, unde in particulari loquendo de hoc mysterio, dependentia propria incarnationis est emanatio illius vinculi, & conjunctionis, quæ inter humanitatem & Verbum facta est, quæ nihil aliud est, quam actio totius Trinitatis, qua hoc mysterium perficit, quam supra diximus esse in humanitate, & secundum rem non est entitas omnino distincta a modo unionis, prout est in facto esse, est enim quasi via ad illum: via autem non est res distincta a termino, cum sit ipsum fieri ejus: est tamen aliquid ex natura rei distinctum, cum sit quid separabile a termino, ut constat ex communi ratione dependentiæ activæ, quam ex Metaphysica suppono. Et hoc, ad summum, probant rationes dubitandi propositæ.

Tertio per dependentiam intelligere possumus personalem influxum (si ita loqui licet) vel potius terminationem humanitatis a substantia Verbi, quæ frequentius Theologorum vocari solet dependentia personalis seu suppositalis humanitatis a Verbo, & de hac proprie intelligitur dubitatio præfens, & de eadem dicimus, falsam esse relata sententiam: nam revera non potest huiusmodi dependentia distingui secundum rem, vel ex natura rei a modo substantiali unionis. Quod primum constat ex communi sententia Theologorum in 3. distincti. prima, qui non aliter explicant unionem hanc, nisi per hanc dependentiam, & in ea censent formaliter consistere; supponunt ergo non habere in re distinctionem. Deinde argumentor ratione primo, quia est superflua, & sine ulla necessitate talis distinctio, nam Verbum, ut Verbum, & quatenus est persona humanitatis, non habet in illam influxum activum, sed terminativum tantum, seu (ut ita dicam) sustentativum: hunc autem habet respectu unionis, ut unio est, quia unio, ut unio formaliter & per seipsam ad Verbum terminatur; & implicat illam esse, quin ad Verbum terminetur, ut ad suppositum naturæ unitæ; ergo respectu illius habet Verbum influxum personalem sufficientem ad suppositandam humanam naturam absque alia dependentia media: ergo ex hac parte non est necessaria. Rursus e contrario, si intelligatur modus unionis efficiens humanitatem, & mente etiam præscindatur vel negetur omnis alia dependentia humanitatis a Verbo ut a supposito, ex vi illius, necessario intelligitur humanitas existens in Verbo ut in supposito, nam intelligitur unita illi, & non nisi ut supposito; ergo ex vi illius formaliter pendet personaliter a Verbo, quia nihil aliud est hoc modo pendere ab illo, nisi esse in illo, ut in persona: ergo neque ex hac parte necessaria est alia dependentia, immo nec satis potest mente concipi, aut distingui. Quod declaro tertio, nam in primis certum est, quod sicut unio, ita etiam dependentia hæc nihil novum & reale ponit in Verbo, quod in ipso inest, quia alias mutaretur Verbum, sicut de unionis dicitur, & attingeret sequentem. Si ergo illa dependentia aliquid reale est, & aliquid in humanitate existens, necessario debet ab illa distingui saltem ex natura rei, quia potest esse in humanitate, & potest etiam ab illa tolli, quod est certum signum distinctionis ex natura rei, ut in Metaphysica late docui. Rursus hæc dependentia aut est aliquid per modum fieri, aut viæ, & hoc non, alias necesse esset ad aliquem terminum tendere, seu aliquid per illam effici, per omne enim fieri necesse est aliquid fieri, cum fieri non sit propter se, sed propter id, quod fit; omitto enim opinionem afferentem in actibus immutentibus dari fieri sine facto esse, tunc quia falsa est, tum etiam, quia saltem in actione transeunte, qualis esse posset illa, de qua agimus, nullus ita opinatus est. Interrogo ergo, quid fiat per hanc dependentiam, si enim solum fit ipse modus unionis in facto esse, aut (quod in idem redit) Deum esse hominem, hoc ipsum fit per activam

dependentiam, quam secundo loco declaravimus, & ita, si hæc alia distincta ab illa ponitur, superflua est: si vero est eadem cum illa, non est, de qua disputamus, quia illa non est dependentia suppositalis, sed activa. Aut illa dependentia est aliquid in facto esse, seu aliquis modus factus in humanitate, nihil enim aliud excogitari potest (quia supponimus non esse relationem prædicamentalem.) Unde rursus inquiram, an sit modus substantialis, vel accidentalis: accidentalis esse non potest, quia nec pertinet ad genus qualitatis, ut per se notum est, neque ad genus actionis, ut probatum est, quia non est aliquid fieri, de aliis vero generibus accidentium nulla potest esse suspicio; erit ergo modus substantialis; ergo non potest esse, nisi modus unionis: quia non potest aliud munus habere, neque sub alio respectu humanitatem efficere aut respicere Verbum. Denique, quia illa dependentia non est a Verbo, ut ab efficiente & principio extrinseco: ergo ut a termino extrinseco conjuncto: ergo per illammet dependentiam conjungitur humanitas Verbo: sicut enim effectus causæ efficientis suo modo connectitur illi per dependentiam, quam habet ab illa, ita humanitas conjungitur supposito per dependentiam, quam habet ab illo: ergo non potest vera distinctio cogitari inter unionem & suppositalem dependentiam a Verbo. Tandem confirmatur, quia in unionis accidentis cum subiecto dependentia illius a subiecto non est aliud ab inhærentia ejus, & idem est in dependentia formæ materialis a materia, non enim pendet, nisi media unionis, qua illi suo modo inhæret, & ab ea sustentatur: ergo idem est in præsentī dicendum.

Ad argumenta in contrarium: ad primum, falsum est, hanc dependentiam suppositalem non esse substantialem modum, aut esse actionem vel per modum actionis: nam potius est per modum informationis, & intimæ unionis, & ideo tam est modus substantialis, quam unio. Ad secundum respondetur, in persona creata dependentiam naturæ a propria substantia in re non distingui a substantia ipsa, quatenus natura creata ex necessitate conjungitur illi, eamque postulat, ut complete existere possit; illa enim substantia, quia non est res omnino distincta, sed modus naturæ, non per aliam unionem, sed se ipsa immediate conjungitur naturæ, & natura illi, ideoque nihil inter eas mediat, quod possit esse dependentia unius ab altera, sed dependere in eis nihil aliud est, quam unam non posse esse sine altera. Unde illa dependentia mutua est secundum diversas rationes, ob quas illa duo naturaliter inter se connectuntur: hæc autem dependentia & connexio non est aliquid distinctum ab ipsis extremis, quæ per se immediate uniuntur ex vi suarum rationum formalium. Unde fit, exemplum illud quoad aliquod esse simile, quoad aliquid vero dissimile præsentī mysterio, nam humanitas Christi pendet a Verbo divino, ut a persona realiter distincta, & non connaturali, & ideo necesse est, ut inter ipsam & talem personam intercedat unio, qua illi conjungatur & ab illa pendeat, nam, licet res & modus immediate seipsis uniantur, res autem omnino distinctæ non uniuntur, nisi medio aliquo modo unionis, & in hoc est dissimilitudo. Tamen, si comparemus humanitatem non ad Verbum, sed ad ipsam unionem, quamvis non tam proprie dicatur ab illa pendere, quam per illam pendere a Verbo, tamen quatenus sine illa esse non potest, dici etiam alicqualiter potest pendere ab illa, & quoad hoc erit similitudo, quia, nimirum, eo modo, quo ab illa pendet, seipsa pendet, & non per aliud, quia illa unio est modus naturæ & immediate per se ipsam conjungitur illi: sicut etiam ipsamet unio potest dici pendere a Verbo, quatenus sine illo esse non potest, & tamen non pendet per aliam dependentiam, sed seipsa; sicut actio etiam pendet ab agente non media alia actione, sed se ipsa, ne procedatur in infinitum, & quia unio ex vi suæ rationis formalis & essentialis per se & immediate respicit terminum, ad quem fit. Ad tertium respondetur in primis procedere ex hypothesi impossibili, scilicet, quod humanitas existat sine ulla substantia, propria vel aliena, illa tamē posita, dupliciter intelligi potest id fieri, primo quod illa humanitas creatur, vel conservetur in esse per actionem distinctam ab illa, quæ nunc creatur, vel conservatur, ut nimirum, illa alia actio sit efficacior, & independens a substantia, & hoc modo supplens absentiam ejus; sicut dici solet de actio

Ad argumenta in oppositū respondetur.



qua conservatur accidens in subiecto: & extra illud ex hoc tamen conservationis modo solum potest inferri, quod actio creativa humanitatis sit distincta tam a suo termino immediate, id est, ab humanitate ipsa, quam a substantia vel unione ejus; an vero illa actio creativa sit dicenda substantialis, vel accidentalis, non est hic differendum, tamen, licet accidentalis dicatur, potest per eam suppleri dependentia suppositalis, quamvis hæc sit per modum substantialem, quia est per intrinsecum modum, quo una substantia integra constituitur. Alius modus facilius erit, si dicamus, Deum in eo casu conservare naturam per eandem omnino actionem continuatam, qua illam in supposito conservabat, & miraculum solum in hoc consistere, quod Deus illam actionem conservat, non conservando substantiam, vel unionem suppositalem, cum tamen illa duo ex natura sua petant ita conjungi, ut secundum naturæ ordinem non possint, nec debeant separari; sicut enim supra dicebamus, dependentiam naturæ a substantia solum in hoc consistere, quod naturæ non debetur esse, nisi ut conjunctum cum aliqua substantia, quamvis ipsa substantia non habeat proprium influxum in illud esse, vel in actionem, qua illud sit, ita, ut Deus conservet existentiam sine substantia, non est necessarius novus influxus, quo Deus suppleat absentiam substantiæ, sed sufficit, ut Deus non operetur juxta legem & debitum naturæ, sed supra illud, unum sine alio conservando, sicut si Deus vellet conservare animam sine intellectu (supponendo id esse possibile) non esset necessaria nova actio, sed solum, quod suspenderet influxum in intellectum, continuando actionem, qua animam creaverat, & conservaverat. Et juxta hunc modum non procedit argumentum, quia tunc non suppletur dependentia suppositalis per aliquam actionem, sed solum conservatur unum sine alio.

Ad quartum concedo, secundum abstractionem intellectus aliud esse conceptum unionis, & alium dependentiæ in communi, & ita potest dari aliqua unio distincta realiter ab aliqua dependentia, & e contrario: tamen in hac unione & dependentia suppositali, de qua modo agimus, hæc sola ratione differunt, & denominatione, nam dependentia dicitur, quatenus requiritur ad conservationem seu existentiam ipsius naturæ: unio vero, quatenus ex ea unum resultat, vel unum alteri conjungitur, tamen in re hæc ipsa unio, qua natura supposito conjungitur, est id quod requiritur, ut ipsa sit, atque ita est ipsamet suppositalis dependentia a Verbo.

## SECTIO IV.

*Quomodo solvenda sint difficultates, quæ in hoc mysterio occurrunt.*

Explicata tota ratione, & essentia hujus unionis, superest, ut objectiones, quæ fieri solent, ut impossibilem eam probent esse, dissolvamus. Hoc enim a principio hujus materiæ usque ad hunc locum distulimus, & quoniam D. Thom. in discursu præcedentium articulo- rum, & questionum, multa in argumentis tetigit, quæ ibi explicata sunt, & in sequentibus etiam questionibus, præsertim 3. & 4. alia similia circa illius literam sunt explicanda, ideo breviter attingemus duo, vel tria capita, ad quæ difficultates hujus mysterii revocantur.

1. Obiect. Primum sumitur ex parte assumptæ naturæ, cui repugnare videtur, ut per substantiam Verbi subsistat. Primo, quia in natura substantiali completa, & integra in sua specie, idem est existentia, & substantia, quia talis existentia esse debet substantialis; ergo existentia per se: ergo substantia. Sed non potest humana natura privari sua existentia propria, & creata, & ad existendum per alienam assumi; ergo idem fieri repugnat in substantia. Et confirmatur primo, quia substantia creata, & propria humanitatis, est accidens, vel substantia; non primum, ut constat, quia pertinet ad substantialem compositionem hominis. & quia aliàs multo minus posset suppleri a Verbo. Si autem est substantia, pertinebit ad complementum hominis; ergo non potest deesse humanitati Christi, aliàs Christus non esset completus homo. Nihil ergo potuit Verbum supplere in illa humanitate, atque adeo, neque potuit illi substantialiter uniri. Confirmatur secundo, quia Christi humanitas nullam dependentiam habet a Verbo magis, quam a Patre, & Spiritu

Suarez Tom. XVI.

sancto; ergo nullam specialem unionem potest habere cum illo: in omni enim vera unione oportet, ut saltem alterum extremorum habeat aliquam dependentiam ab altero. Antecedens probatur, tum quia omnis dependentia a Verbo debet pertinere ad aliquod genus causæ, quod in proposito non potest esse aliud, nisi efficientis: hoc autem commune est toti Trinitati; tum etiam, quia, etsi intelligeremus humanitatem dimitti a Verbo, ita conservaretur in esse, sicut nunc conservatur, sine nova efficientia.

Exacta hujus dubii expositio pendet ex tribus metaphysicis questionibus, quas, ne hujus materiæ cursum impederent, in proprium Metaphysicæ scientiæ opus remittendas duximus, quod brevi, ut spero, in lucem edemus, in eoque omnia metaphysica principia, quæ tam in hoc, quam in aliis Theologicis libris supponimus, declarare, & persuadere conabimur. Ideoque hic solum supponam, quod in eis verum esse sentio. Prima quæstio est, quomodo in rebus creatis existentia distinguatur ab essentia. Et suppono in re non distingui, si sumatur essentia, quatenus entitas actualis est, habens aliquod esse extra causas suas, quia in eo statu intelligitur constitui formaliter per ipsam existentiam; & hinc concedo difficultati propositæ, impossibile esse rem aliquam existere in rerum natura per entitatem realiter ab illa distinctam; imo nec per aliam existentiam, quam per sibi intrinsecam, & conaturalem, sicut non potest ulla entitas formaliter constitui in esse talis entitatis, nisi per seipsam. Unde secundo etiam conceditur difficultati propositæ, in humanitate Christi fuisse aliquam existentiam creatam, & substantialem, non quidem omnino completam, qualis est existentia personæ, sed aliquo modo incompletam, qualis est existentia solius naturæ præcise sumptæ. Secunda quæstio, quæ supponitur, est, in personis creatis quid addat suppositum supra naturam creatam. Et suppono addere positivum modum, quo perfecte terminatur talis natura, ut in se, & per se sit, neque indigeat alio sustentante. Qui modus ex natura rei distinguitur ab ipsa creata natura ad eum modum, quo inhærentia actualis distinguitur ab ipsa entitate formæ accidentalis. Tertia quæstio est, quomodo substantia creata distinguatur ab existentia ipsius naturæ substantialis, ut sic. Et dicendum est consequenter juxta definitionem præcedentis quæstionis, substantiam esse modum naturæ existentis, ut existens est, atque adeo existentia ipsius. Nam ex vi existentia solum intelligitur natura esse extra causas suas, & apta, ut in se, & per se sit, per substantiam vero actu terminatur, & quasi formaliter constituitur in modo per se essendi, sicut proportionem servatâ intelligitur in exemplo dato de inhærentia accidentis, quæ est modus existentia accidentalis. Nam ex vi illius solum constituitur forma accidentalis extra causas suas apta ad existendum in alio, per modum autem inhærentia terminatur, ut actualiter in alio existat.

Ex his ergo ad difficultatem propositam respondetur, negando existentiam naturæ, ut natura est, esse omnino idem cum substantia, quia licet existentia naturæ substantialis sit, non tamen includit in suo formali, & essentiali conceptu modum illum, quo actualiter per se existit; sed solum petit illum ex natura sua, seu constituit naturam aptam ad per se existendum, ita ut si miraculose non impediatur, statim ab illa manet, vel illi conjunctus sit ille modus per se existendi, qui substantia dicitur, & in hoc consistit, quod existentia naturæ substantialis sit. Sicut e contrario in accidenti, quod existentia ejus accidentalis sit, non consistit in hoc, quod per illam existentiam actualiter inhæreat, sed in hoc, quod per illam taliter existat, ut illi debeat actualis inhærentia, qui est modus ab illa distinctus. Et juxta hoc intelligendus est difficilis locus, qui habetur in VII. Synodo act. 6. tom. 3. circa finem, ubi Epiphanius inquit: *Ideo errasse hæreticos in hoc mysterio, quia nihil aliud agunt, quam ut ostendant, naturam & hypostasim idem esse, quæ sane inter se differre veri Ecclesiæ Catholice alumni cognoscunt, & subdit: Hypostasim enim cum proprietatibus substantiam dicimus ab eo, quod est ὁ ὢν, hoc est subsistere, ὁ ὢν vero, id est, naturam, rem per se existentem, non indigentem altera, ut subsistat.* Cum enim dicit, naturam esse rem per se existentem, exponendus est juxta dicta, per se, id est, non alio tanquam in subiecto inhæ-



sonis, vel *per se*, id est, substantialiter in sensu explicato: vel denique *per se*, non actu, sed aptitudine, & quasi radicaliter. Et eodem sensu intelligendum est, quod subditur: *Non indigere alterare, ut subsistat*, quia natura substantialis de se non postulat, ut sustentetur ab alia: sed secundum se assert suam subsistentiam, quamvis hæc sit modus ab illa distinctus. Et hinc fit, ut, sicut in accidente potest conservari existentia accidentalis sine modo actualiter inhærendi: ita in natura substantiali possit conservari actualis entitas ipsius naturæ, seu (quod idem est) existentia substantialis ipsius naturæ sine subsistentia actuali, & ita factum est in hoc mysterio. Et ita intelliguntur alia obscura verba Concil. Francoford. in epistola ad Episcopos Hispan. satis post medium, sumpta ex Paschasio lib. 2. de Spiritu S. cap. 4. quæ sic habent: *In Deo homine gemina substantia est, non gemina persona. Nam persona per se quam consumere potest, non substantia substantiam, quia persona res juris est, substantia res nature.* Ubi nomen substantiæ pro essentia, vel natura sumptum est. Et hoc modo dicitur unam substantiam non consumere aliam, quia una non repugnat alteri, nec necessario excludit illam ab eodem supposito, & ita vocat substantiam *rem naturæ*, non eo modo, quo suppositum solet *res naturæ* vocari, ut constat ex D. Thom. 1. p. q. 29. art. 2. dicitur enim suppositum *res naturæ*, quatenus supponitur communi, & specificæ naturæ, seu quasi habens naturam. Substantia vero eo loco dicta est *res naturæ*, id est, res, quæ est natura, seu entitas naturæ. Persona vero dicitur ibi, *res juris sui*, quia per se est, & non innititur alteri. Dicitur autem persona consumere personam, non quia in altera natura prius fuerit aliqua persona, quæ postea consumpta fuerit: sed quia impedita est illa natura, ne in propria persona subsisteret, & ita dicitur consumi persona, non quoad totum compositum ex natura & personalitate, sed quoad formale constitutum persone, quod est subsistentia, seu personalitas. Et ad hunc modum exponit D. Thom. simile dictum Innocen. infra q. 5. art. 2. ad 3.

Respon.  
ad 1.

Ad primam confirmationem respondetur, subsistentiam non esse accidens, sed substantialem quandam modum, ut dictum est, qui quidem pertinet ad complementum hominis in ratione suppositi, & personæ, non tamen ad complementum humanæ naturæ, nec hominis, ut homo est, formaliter enim constituitur & essentialiter, humanitate. Unde fateor deesse humanitati modum hunc, non tamen Christo deesse aliquid, ut sit perfectus homo, quia perfectam habet humanitatem, & altiori subsistentia subsistit, & hoc modo dicunt Damasc. 3. de fide cap. 6. & alii patres, *Verbum assumpsisse totum, quod in nostra natura plantavit, quia quod in assumptibile est, est incurabile*, quia perfectissimam humanitatem sibi univit, non tamen illum modum, qui non est de essentia hominis, ut homo est.

Respon.  
ad 2.  
Humanitas Christi a Verbo pendet in subsistendo.

Ad secundam confirmationem, negatur assumptum, pendet enim humanitas a Verbo in subsistendo, quo modo non pendet a Patre, & ab Spiritu sancto, quia illo modo non pendet a Verbo tanquam ab efficiente. Omnis enim efficientia est per voluntatem seu naturam divinam; hæc vero dependentia formaliter terminatur ad ipsam relationem seu subsistentiam Verbi. Non ergo ut ad principium efficiens, sed ut ad substantialem terminum intime conjunctum illi naturæ. Non oportet autem intelligere humanitatem ita pendere a Verbo in suo esse simpliciter, ut si ab illo dimitteretur, statim corrumpenda foret; sed satis est, quod mutaret modum essendi, & propriam subsistentiam statim acquireret.

Dubium.

Solent vero hic obiter multa inquiri, primum an illa natura separata a Verbo inciperet habere novam subsistentiam per novam efficientiam, vel sine illa. Non enim defunt, qui negent, requiri novam efficientiam, quia sufficere putant, ut Deus auferat impedimentum, non conservando unionem ad Verbum; illo enim ablato ex vi prioris generationis, qua illa humanitas producta fuit, incipiet habere suam subsistentiam, quia si in principio non fuisset positum impedimentum, illa prior generatio fuisset sufficiens ad conferendam hanc subsistentiam; ergo & postea sufficit ablato impedimento, neque est necessaria nova aliqua efficientia. Sed hæc sententia impossibilis est, nisi fortasse in modo loquendi differat. Nam subsistentia humanitatis est aliquis modus realis, qui nunc non est in humanitate Christi, & si separaretur

Humanitas a Verbo separata non inciperet habere novam subsistentiam sine nova efficientia.

a Verbo, inciperet esse in illa; sed impossibile est novam rem, vel novum modum rei realem, & positivum incipere esse in re sine aliqua causa efficiente; ergo. Et confirmatur primo, quia ibi esset nova mutatio, non tantum privativa, sed positiva; ergo nova actio; ergo nova efficientia. Confirmatur secundo, quia impossibile est accidens semel separatum a subjecto sine nova actione iterum uniri; ergo impossibile est naturam substantialem separatam a propria subsistentia incipere habere illam sine nova actione, non enim minus intrinseca est inhærentia actualis formæ accidentali, quam subsistentia naturæ substantiali. Denique fundamentum contrariæ sententiæ nihil probat. Primo, quia actio generativa præterita, quamvis per accidens fuerit impedita, tamen jam non est; ergo non poterit per seipsam jam efficere, etiam si tollatur impedimentum. Deinde, quia si perspicacius res consideretur, generatio naturalis, quæ non impeditur, sed attingit ulque ad productionem proprii suppositi vel subsistentiæ, revera habet aliquem modum, quem non habuit generatio, quæ impedita est, ne per illam propria subsistentia fieret, quia subsistentia facta per priorem generationem, etiam habuit suum fieri, & manavit ab aliquo agente; ergo illud ipsum habuit rationem actionis, quia naturaliter totum id conjunctum fuit cum generatione, licet non censeatur actio distincta, sed modus ipsius generationis: quando ergo hic modus impeditur in prima generatione, ibi deest aliquid actionis. Unde si postea tollatur impedimentum, necesse est de novo poni illum influxum activum, qui jam ponitur per modum novæ actionis distinctæ, quia separatus fuit, & non unitus cum priori generatione. Exemplum esse potest (quo etiam auctores contrariæ sententiæ utuntur, quamvis non sit omnino simile) nam quando ignis generatur, ex vi ipsius generationis substantialis censeatur fieri calidus, & ibi dicitur esse una actio, non quia fieri caloris distinctum non sit a fieri substantiæ, sed quia per se una est actio, ad quam per se cætera consequuntur. Si autem intelligamus produci ignem, & impediri emanationem caloris, postea vero auferri impedimentum, intelligemus per se requiri novam actionem & productionem caloris; quod si hæc negetur esse nova, solum quia ablato impedimento naturaliter manat a principio posito per priorem actionem, hoc dico pertinere solum ad diversitatem in modo loquendi, atque hunc a communi omnium sensu esse satis alienum. Quis enim neget esse novam actionem, ubi est nova passio, nova mutatio, & novus modus aliter se habendi? Et præsertim, quia non est ita certum subsistentiam sic se habere ad humanitatem, ut jam dicam in quæstiuncula tertia hujus difficultatis.

Secundo enim hic quæri solet, an separata humanitate a Verbo, necessarium omnino sit statim per se subsistere, an vero possit manere privata tam propria subsistentia, quam omni unionem ad alienam subsistentiam. Sed hoc dubium tractavi sufficienter in dictis quæstionibus Metaphysicis. Et ideo illud omitto, sentiq. enim fieri non posse, ut natura careat omni modo subsistendi in se, vel in alio: quia isti modi involvunt immediatam contradictionem, sicut rectum & obliquum respectu linearum, & hæc vel illa figura respectu quantitatis, aut hoc vel aliud ubi, respectu corporis.

Tertio quæri hic solet circa eandem difficultatem, *Dubium.* an separata humanitate a Verbo, statim active resultaret propria subsistentia ab ipsa humanitate, an vero necessarium esset conferenda per extrinsecam effectiorem primæ causæ. Videtur enim hoc secundum dici probabilius, quia subsistentia est modus intrinsecus ipsius existentia; sed in natura non est principium intrinsecum, a quo possit manare propria existentia, quia omnis efficientia, vel naturalis emanatio, supponit existentiam sui principii, quia supponit in illo aliquam entitatem actualem. Unde ipsa rei productio per se primo terminatur ad existentiam; & ideo immediate est a causa extrinseca agente, & non medio aliquo principio intrinseco ipsius rei, ut recte dixit D. Thom. q. 27. de veritat. art. 1. ad 3. & clarius opus. de ente, & essentia cap. 3. ergo idem dicendum est de subsistentia, nam licet hæc videatur esse posterior natura, quam existentia, & ideo posse manere ab illa; tamen hoc non videtur necessarium, nec consentaneum naturis rerum: quia cum res naturali modo produ-



producitur, non videtur prius produci in existentia a solo agente, & posterius natura recipere subsistentiam tanquam manantem a propria existentia: sed immediate recipere utrumque ab agente, a quo res ipsa cum modo sibi connaturali fit. Quemadmodum cum fit accidens in subiecto, non intelligitur habere ab agente extrinseco immediate solam existentiam, & ab hac manare active inherrentiam actualem; sed utrumque esse proxime & immediate ab ipso agente. Unde sumitur confirmatio, nam si intelligamus accidens semel separatum a subiecto, licet Deus tolleretur ab illo modum per se essendi, non intelligeremus statim manare ab illo inherrentiam ad subiectum, sed oporteret ab aliquo agente extrinseco uniri; ergo similiter. Quin potius hoc exemplo declaratur non posse alterum horum modorum, scilicet existendi per se, vel in alio, auferri, nisi posito alio formaliter incompossibili. Itaque si accidens est separatum divina virtute, & per se existit, non potest, conservata existentia illius, privari illo modo, nisi iterum subiecto uniatur, ita ut per actualem inherrentiam excludatur modus per se essendi, quia isti modi sunt ita immediate oppositi, ut unus non possit, nisi per alium excludi; ergo idem dicendum esse contrario de humanitate semel unita Verbo, quod non possit illo modo unionis privari, nisi formaliter per propriam subsistentiam illi datam. Unde, sicut non potest ipsa humanitas effective concurrere, ut separetur a Verbo: ita neque ut suam recuperet subsistentiam. Quod si hoc verum est, ipsa quaestiuicula proposita falsitatem, & repugnantiam involvit, scilicet quod prius auferatur impedimentum unionis, & postea fiat subsistentia, nam potius causa veluti formalis, & intrinseca, dissolvens unionem deberet esse subsistentia, & ideo non videtur esse posse ab intrinseco principio, sed tantum ab intrinseco agente.

Separata  
humani-  
tate a  
Verbo  
statim ac-  
tive re-  
sultaret  
propria  
subsisten-  
tia ab ipsa  
humani-  
tate.

Contrarium nihilominus sententiam videntur communiter sequi, & docere discipuli D. Thom. quibus ipse favere videtur infra qu. 16. artic. 12. in corpore, & ad primum, ubi docet propriam, & creatam personalitatem humanæ naturæ causari ex principiis intrinsecis ejusdem naturæ, quod non videtur posse intelligi, nisi de causalitate per modum principii activi, seu quasi activi per naturalem quandam resultantiam. Quod etiam indicat in hac quaestione artic. 5. ad 1. Et potest ratione confirmari, quia hic modus subsistentiæ habet intrinsecam connexionem cum ipsa natura multo magis, quam propriæ passionis cum forma vel essentia; ergo posita natura, naturaliter ab illa resultat hic modus multo magis, quam proprietas dimanet ab essentia. Et confirmatur, quia nullo alio signo melius intelligimus hanc naturalem resultantiam unius ex alio, quam ex naturali connexionem, quæ est inter rem & intrinsecum modum ejus, seu inter essentiam & proprietatem; ergo, &c. Deinde non est simile, quod supra de accidente objiciebatur, quia actualis inherrentia accidentis pendet a subiecto, & ideo non potest dimanare ab ipso accidente, nisi subiectum concurrat: si tamen fingamus, accidens semel separatum ita applicari subiecto, ut ablato impedimento extrinseco statim possit illud informare, tunc non videretur necessaria alia extrinseca efficientia, ut inhaereat. Sicut in Eucharistia, quando ex hostia consecrata generatur vermis, in instanti generationis, in quo materia supponitur accidentibus, ut intelligatur illa quantitas iterum uniri materiæ, solum oportet intelligere, ut Deus suspendat illum peculiarem concursum, quo quantitatem separatam conservabat, statim enim illa quantitas ex naturali aptitudine, & impetu suæ naturæ unitur materiæ sibi sufficienter applicatæ. Et ita potest retorqueri argumentum, quod cum subsistentia naturæ substantialis sit modus omnino absolutus, & independens a subiecto, & aliàs sit intrinsecus & connaturalis, & ad eum natura intrinsecam habeat aptitudinem & propensionem, ablato impedimento ab illa naturaliter resultat. Unde falsum etiam est non posse Deum auferre illud impedimentum, cum possit suspendere illum specialem concursum, quo conservat unionem humanitatis cum Verbo, quia enim ille concursus potentior est, illo stante impeditur natura, ne ab illa resultat propria subsistentia, & ita illo suspenso tollitur impedimentum. Et ita hoc posterius videtur in hac quaestiuicula asserendum. Quamquam enim non sufficienter convincatur (possent enim non difficulter solvi, quæ

Suarez Tom. XVI.

pro hac parte adducta sunt) est tamen magis philosophicum, magisque tam rationi, quam aliorum sententiis consentaneum.

Sed hinc oritur quarta quaestiuicula, quæ potest esse nova difficultas circa hoc mysterium, nam ex præcedenti sequitur humanitatem Christi violenter esse in divino supposito, utpote privatam propria personalitate, ad quam habet naturalem appetitum. Quam difficultatem late tractat Cajetan. infra q. 4. artic. 2. Nam videtur quidem humanitas retinere appetitum naturalem ad suam personalitatem, quia hic appetitus nihil aliud est, quam ipsa naturalis capacitas connaturalis, & debite perfectionis. Nam quia hæc capacitas natura sua est ordinata ad suam perfectionem, metaphorice dicitur amare illam, & quasi quiescere & gaudere sub illa, si eam habet, vel si non habet, appetere: at in humanitate Christi manet naturalis capacitas respectu propriæ personalitatis, hæc enim auferri non potest a natura sua, ipsa manente: sicut forma actuando materiam non potest tollere capacitatem naturalem ejus ad alias formas. Et quamvis maxime perfecta sit, non tollet privationes aliarum, quia non confert formales effectus earum. Sic etiam humanitas Christi caret connaturali personalitate, & illa capacitas manet privata termino proprio. Personalitas enim Verbi alterius rationis cum sit, hanc privationem auferre non potest: manet igitur appetitus, qui nihil aliud est (ut dixi) quam hæc naturalis capacitas perfectionis non obtentæ. Nec refert, quod personalitas Verbi sit excellentior, ut tollatur hic appetitus. Quia naturalis appetitus tendit ad perfectionem proportionatam naturæ, & personalitas Verbi, licet sit excellentior, non tamen terminat, nec reddit illam per se subsistentem eo modo, quo propria & connaturalis personalitas, ut inferius etiam latius dicemus. Quod explicatur a simili, quia intellectus licet habeat supernaturalem scientiam, & visionem beatam, quæ excellentior est, nihilominus habet naturalem scientiam sibi connaturalem.

Dubium.  
Utrum  
humani-  
tas Chri-  
sti violen-  
ter sit in  
divino  
supposito.

Dices non esse simile, quia in intellectu possunt illæ scientiæ esse simul: in humanitate vero non possunt simul esse personalitas divina, & humana, ut dicemus. Sed contra, nam hoc conferret aliquid in appetitu elicitu, qui ex cognitione oritur & variari potest, at vero in appetitu naturæ id nihil refert, quia nihil discernit, neque maturatur, sed est immutabilis proprietas naturæ, quam diu natura manet. Et ideo non refert, quod nobiliori actu terminetur, quia illud est secundum potentiam obedientialem, non naturalem, & quia hoc non obstante illa humanitas nunc habet modum essendi in alio, & non in se, ideo non obstante unionem, videtur retinere appetitum ad proprium & connaturalem existendi modum. Et hæc opinio sic probata solet Scoto attribui quodlib. 19. art. 3. sed ibi nihil clare dicit, imo nec consequenter asserere potuisset, supposita ejus opinione, quod personalitas propria in solis negationibus consistat, quia ad solam negationem non terminatur per se appetitus naturalis, quod bene notavit Ocham in 3. q. 1. ad 16. negans hunc appetitum in humanitate ex prædicto fundamento, quod personalitas in negatione consistat. Supposita vero contraria sententia, quod personalitas dicit positivam perfectionem, placet multis junioribus contraria sententia, scilicet esse in Christi humanitate appetitum naturalem ad connaturalem subsistentiam. Juxta quam opinionem ad difficultatem responderi potest negando sequelam, scilicet, quod humanitas tunc maneat violententer in Verbo. Cujus ratio primo reddi posset, si teneremus naturam non habere vim activam respectu suæ personalitatis, quia ad statum violentum non satis est carere perfectione connaturali debita potentiæ, seu capacitati passivæ; sed necesse est privari propria perfectione, vel actione, contra internum impetum activum, ut indicat Arist. 3. Ethic. cap. 1. & lib. 2. ad eundem post medium. Sed hæc responsio procedit ex duobus principiis vel falsis vel valde incertis, quia in primis ostensum est, aut verum aut probabilius esse, humanitatem habere impetum etiam activum respectu propriæ personalitatis. Et deinde Arist. nunquam dixit tale appetitum requiri ad violentiam, sed solum quod sit a principio extrinseco passo non conferente vim: non confert autem vim, si sit contra appetitum ejus tam activum, quam passivum, ut si ponamus celo esse naturalem motum ab Oriente in Occidentem propter

Violentia  
quid.



principium passivum, quamvis nō activum, certe si moveretur motu contrario, violenter moveretur, quamvis non moveretur contra appetitum activum, sed passivum.

Humani-  
tas Chri-  
sti non  
manet  
violenter  
in Verbo.

Aliter ergo responderi potest, solam carentiam alicujus naturalis perfectionis non sufficere ad violentiam, sed ulterius requiri, ut id proveniat ex actione contraria, & repugnante ipsi appetitui naturali: at vero in hoc mysterio, quamvis humanitas privetur aliquo modo, vel perfectione naturali, non tamen per formam contrariam ipsi naturæ, sed per supernaturalem modum existendi, cum quo nec natura habet repugnantiam, nec connaturalem proportionem, sed dicitur esse in potentia obedientiali respectu illius. Hoc exemplis declaratur; nam in primis materia, cum privatur aliqua forma sibi connaturali, non patitur violentiam, quia privatur per aliam formam sibi etiam connaturalem, & manus hominis, licet gravis sit, non patitur violentiam, cum sursum movetur ab anima, quia aliunde ille motus est magis connaturalis. E contrario vero, cum aqua calefit, patitur violentiam, sive habeat principium actuum suæ frigiditatis, sive non, quia privatur sua connaturali dispositione per formam ejusdem ordinis sibi disconvenientem, & disproportionatam. At vero si contingeret subiectum affici quadam forma superioris ordinis, quæ melius ipsum disponderet, & conservaret in esse suo, licet consequenter privaretur aliqua naturali dispositione inferiori, non posset proprie dici pati violentiam, sed elevari ad aliquem statum supernaturalem, vel perfectionem, quia licet secundum quid, scilicet ex parte privationis esset contra appetitum naturæ; non tamen simpliciter, scilicet ex parte positivæ formæ, quæ non est contra, sed supra naturam.

Objeccio.

Dices: esse per se & uniri alteri sunt modi intrinsece, & formaliter repugnantes; ergo, si carentia unius est contra appetitum naturæ, præsentia alterius erit etiam repugnans eidem appetitui, & ita ipsamet unio erit non solum supra, sed etiam contra appetitum naturæ. Nec satis est dicere non esse contra naturam, quia est ex potentia obedientiali, aut non esse violentum, quia est a solo Deo. Quia violentia non attenditur ex causa extrinseca, quod scilicet sit hæc vel illa, sed ex repugnantia, quæ est in passo, quod licet interdum obediat actioni Dei, tamen hæc ipsa obedientia potest esse contra impetum naturæ, & ex hac parte violenta. Respondetur tamen, quod licet substantia propria, & modus unionis habeant intrinsecam repugnantiam, ut non possint simul esse in eadem natura, tamen in ordine ad perficiendam ipsam naturam nō proprie repugnant, quia uterque perficit naturam, & ipsa unio licet supernaturalis sit, magis perficit, quam propria substantia; & ex hac parte dicitur non esse forma contraria, nec repugnans ipsi naturæ, & ideo neque esse violenta, sed supernaturalis.

Respon.

R. spōsio  
ad dubiū.

At vero Cajetan, quem fere alii discipuli D. Thom. sequuntur, ex his eisdem principiis docet humanitatem assumptam non appetere propriam personalitatem, sed perfectissimo modo quiescere in Verbo, quia licet non habeat formaliter suam personalitatem naturalem, habet illius perfectionem in ipso Verbo eminentiori modo, & ideo nobiliori termino & actu contenta est. Et confirmari ac explicari potest ista sententia hoc modo. Nam hæc denominatio appetitus naturalis metaphorica est, & ideo non significat capacitatem in quocumque statu; sed significat illam ita vacuum suam perfectione, ut neque illam habeat, nec loco illius aliam eminentiorem, quæ vicem ejus supplere possit: hæc enim metaphora sumpta est ex appetitu elicitō recte instituto, cui proportionari censetur appetitus naturæ; appetitus autem elicitus, & recte ordinatus non desiderat perfectionem inferiorem, quando loco illius habet altiore, & utramque simul habere non potest. Unde sumitur etiam confirmatio, quia non est dicendum, humanitatem Christi appetere separationem a Verbo; appeteret autem illam, si suam personalitatem appeteret.

Humani-  
tas Chri-  
sti habet  
naturale  
capacita-  
tem ad  
propriam  
persona-  
litatem,  
non tamē  
appetitū.

Et placet mihi consentire cum Thomistis in hoc modo loquendi, quia videtur satis accommodatus rationi, & communi modo concipiendi, nam in re non video hic esse posse differentiam ullam, nam sine dubio in humanitate eadem capacitas manet, & eadem proportio connaturalis cum sua propria personalitate: manet etiam formalis privatio propriæ personalitatis, quia unio ad

Verbum non confert illam formalem perfectionem, illumque formalem modum, in quo naturalis personalitas consistit. An vero hæc capacitas in eo statu existens dicenda sit appetitus, nec ne, pro eo statu, quæstio est de nomine. Et fortasse vocari posset appetitus per modum simplicis affectus vel amoris, qui non respicit absentiam vel præsentiam rei, sed bonitatem, in quam simpliciter tendit, etiam si non affectet consecutionem ejus. Negari autem potest appetitus per modum desiderii, quod respicit consecutionem boni non habiti, nam hic pugnare videtur cum quæta possessione alterius boni alteri repugnantis, & illud virtute continentis, illiusque vicem suppletis.

Ratio autem reddi potest, non quia personalitas Verbi tollat capacitatem propriæ personalitatis, nec quia formaliter illam actuet, aut repleat: hoc enim satis improbat prioribus rationibus, & quia unio hæc non respicit naturalem potentiam, sed obedientialem, sed ratio reddenda est solum ex metaphora appetitus recte instituti, qui non desiderat minus bonum repugnans majori bono, quod possidet. Dices; materia prima, etiam si habeat animam rationalem, appetit alias formas minus perfectas. Respondetur, pro tunc non proprie appeteret, sed cum primum tali forma privatur, vel si dicenda sit appetere, est sub conditione, pro eo tempore, quo caruerit præsentia forma. At vero neque hic modus appetitus attribui potest humanitati, quia unio ad Verbum perpetua est: unde pro nullo tempore potest esse humanitati conveniens propria personalitas.

Secundum caput difficultatis est ex parte Verbi, quia non videtur potuisse uniri humanitati sine sui mutatione. Quod ita explicatur primo, quia nunc est homo, & antea non erat homo; ergo aliter se habet, nam hæc denominatio non est extrinseca, ut possit denuo advenire per solam mutationem alterius. Secundo, quia ut humanitas constituat Verbum hominem, oportet, ut afficiat ipsum per modum formæ totius suppositi, alias concipi non potest, quo modo humanitas det Verbo esse hominem, si illud in aliquo genere causæ non afficit. Tertio, quia e contrario non potest Verbum per se ipsum dare humanitati, ut subsistat, quin ipsam etiam afficiat, & informet, vel certe per modum materiæ, & subiecti sustentet illam. Quæ omnia videntur includere imperfectionem, nec posse fieri sine aliqua ipsius Verbi mutatione. Denique si Deus uniret hypostatice humanitatem angelo, necessarium esset non solum humanitatem, sed etiam angelum mutari; ergo similiter, &c.

Secunda  
objeccio  
ex parte  
Verbi.

Respondetur, hæc esse potissimam difficultatem huius mysterii, quæ vix potest humano ingenio satis explicari, quamvis possint argumenta utcumque dissolvi. Dicimus ergo, Verbum nullo modo fuisse mutatum, quia nihil novi in seipso suscepit quasi inhaerens, cum ipsum talis impressionis capax non sit. Deinde sine hac mutatione potest intelligi unio per mutationem humanitatis, quia nec Verbum de se ordinatum est ad hanc unionem, nec ipsa unio ad Verbi perfectionem, sed totum id, & in humanitate factum est, & propter commodum humanitatis. Præterea humanitas non intelligenda est informare Verbum, aut aliam causalitatem circa illud exercere, quod totum perfectioni Verbi prorsus repugnat. Imo ad hoc ipsa etiam humanitas improporionata est, quæ neque inhaerere potest, cum sit substantia, nec proprie informare, cum ipsa ex materia & forma componatur; & licet integra natura dicatur metaphysice forma totius, non est, quia vere informat, sed quod tota essentia sit, per quam res in tali specie constituitur. Est igitur humanitas in Verbo, solum quia in illo subsistit, & ab illo terminatur, & quasi sustentatur, & hinc etiam Verbum denominatur homo, quia terminat dependentiam ejus, & in illa subsistit. Ad difficultatem ergo negatur assumptum, sed tota mutatio circa humanitatem facta est, quæ veluti est insita Verbo, ipso quidem manente unito, sed immutato. Nec valet argumentum, quod unitur, mutatur; Verbum unitur, ergo mutatur. Major enim neganda est, si universaliter sumatur, vel distinguenda. Est enim vera de illo, quod per se primo unitur per proprium modum unionis: non vero de illo, quod solum unitur, quia alterum sibi conjungit, quod fortasse in nulla alia unione reperitur. Sed non refert, quia hoc mysterium singulare est & admirabile, extrema enim aliarum mutationum, vel ejusdem ordinis sunt, & natura-

Respon-  
sio.  
Unio hy-  
postatica  
facta sine  
ulla Verbi  
muta-  
tione.



naturalem proportionem habent, mutuaque habitudinem, vel ad invicem se perficiunt, aliquod proprium causalitatis genus ad invicem exercendo; at vero in hac unionem, Verbum omnino est alterius ordinis, & nullo modo perficitur, neque exercet aliquam propriam causalitatem.

Addunt aliqui, Verbum ex se, & propter infinitatem suam præhabere unionem ad humanitatem, quam in se retinet, etiam si humanitas illi non sit unita: unde & ab æterno illam habet, etiam si non denominetur unitum, donec humanitas illi uniatur. Quæ responsio, si intelligatur de continentia eminentiali, est probabilis, & coincidit cum præcedente, nam Verbum ob suam infinitatem, & immutabilitatem, ex se habet, quidquid necessarium est, ut sit unitum, si alterum extremum ipsi uniatur. Si autem intelligatur responsio de formali continentia, ita ut in Verbo ex se & ab æterno sit formalis unio, est falsa & improbabilis. Primo, quia est contra omnes Theologos. Secundo, quia involvit repugnantiam, quod sit actualis unio, & non denominet unitum, nec actu faciat unum cum alio, cum in hoc ejus formalis ratio & effectus formalis consistat. Tertio, quia ratio unionis est imperfecta, dicit enim connaturalem habitudinem ad componendum aliquod tertium, sine quo vel esse non potest, vel saltem non modo connaturali; hæc autem imperfectio non potest formaliter in Deo reperiri. Quarto aliàs etiam in persona Patris & Spiritus S. essent similes uniones æternæ, quod dicere ridiculum esset. Est ergo tota unio in humanitate, & in ea de novo fit per mutationem ejus, terminatur autem ad Verbum sine illius mutatione.

**Ad 1.** Ad primam vero probationem, seu explicationem difficultatis respondetur, hanc denominationem hominis respectu Verbi, non posse dici intrinsecam eo modo, quo in creaturis denominatio a forma inhærente, vel a modo intrinseco, & quasi identificato ipsi rei solet dici intrinseca. Nec vero potest dici extrinseca, quia revera sumpta est a quadam natura intime & substantialiter Verbo conjuncta; est ergo veluti media, nam quia est a natura realiter distincta, videtur extrinseca, quia vero est a natura intime conjuncta, videtur intrinseca, & ita potius est appellanda. Quia vero unio, ex qua oritur hæc denominatio, sine mutatione Verbi facta est, ideo potuit Verbum incipere sic denominari sine sui mutatione. Sed hic incidebat quæstio, an saltem per communicationem idiomatum possit Verbum dici mutari ratione mutationis, quæ fit in humanitate. Sed hoc disputandum est in quæst. 16. nunc solum dicitur, ex vi hujus mutationis, quæ tendit ad unionem, non posse sic denominari, quia mutatio, quæ fit in humanitate, antecedit ordine naturæ terminum unionis, ut circa litteram artic. 8. indicatum est, & in citato loco latius dicitur.

**Ad 2.** Ad secundam rationem dubii jam dictum est, quomodo humanitas constituat Verbum hominem non informando, nec causalitatem aliquam in ipsum exercendo: sed potius e contrario, quia Verbum ipsum terminat humanitatem, & in illa subsistit. Ad tertiam vero similiter negatur, Verbum formam esse, vel subjectum humanitatis, sed purum terminum, sicut nec subsistentia propria habet rationem materiæ, aut formæ, compositio enim hæc ex natura & subsistentia alterius rationis est a compositione ex materia & forma, & subjecto & accidente. Natura enim jam plene composita ex materia & forma per subsistentiam terminatur. Neque refert, quod in modo denominandi subsistentia imitetur formam. Dicitur enim quis per subsistentiam subsistere, sicut per scientiam scire, quia sæpe modus causæ, vel actus in re est diversus, licet similibus vocibus explicetur. Dicitur enim homo mortalis, seu materialis e materia, & rationalis ab anima, licet modus causæ diversus sit. Quo circa ratio actus, vel termini latius patet, quam ratio formæ, sicut e contrario capacitas vel aptitudo generalius quiddam est, quam propria potentia passiva, est enim de ratione formæ, ut sit ens incompletum natura sua ordinatum ad complendum unam essentiam integram, vel perficiendum aliquod subjectum, cum quo postulat uniri, ut existat modo suæ naturæ accommodato. Unde etiam fit, ut sit principium per quod res operatur, præcipue si forma perfecta sit; at vero ratio actus vel subsistentiæ, in suo conceptu non includit hujusmodi imperfectiones. Quamvis enim subsistentia creata imperfecta sit: tamen hæc imperfectio non est de formali conceptu subsistentiæ ut sic, sicut aliæ imper-

Suarez Tom. XVI.

fectiones sunt de conceptu formæ, ut sic. Cujus signum est, quod in Deo reperitur formalis subsistentia, non vero propria forma. Denique informare, ut sic, dicit aliquo modo esse in alio, quod imperfectionem dicit; terminare autem naturam, vel subsistere in illa, potius est quasi sustentare illam, quod perfectionem indicat seclusa imperfectione subjecti. Non ergo hic intervenit aliquod proprium causalitatis genus, neque enim omnis dependentia postulat veram causalitatem, ut patet in relatione pendente a suo termino; reductivè vero potest hæc terminatio revocari ad aliquod genus causæ vel materialis, quia est per modum sustentantis, vel formalis, quod magis placet, quia est per modum actus perficientis. Causalitas autem efficiens propria Verbi, ut terminantis, hic nulla intervenit, quia non influit propria actione in ipsam entitatem humanitatis, vel unionis, sed tantum exhibet se ipsum tanquam terminum unionis; omnis enim alia efficientia communis est toti Trinitati, ut dicitur late infra q. 3. Quare supra etiam diximus non pendere humanitatem a Verbo in existentia sua, ut a causa per se influente, sed ut a conditione necessaria. Et ita fere explicant rem hanc Theologi in 3. d. 1. ubi specialiter videri possunt Scotus & Gabriel q. 1. Et ex his facile improbari potest error Joan. de Ripa, qui dixit essentiam divinam posse vere ac proprie informare naturam vel materiam creatam, & in hoc mysterio divinitatem esse veram formam humanitatis, quod Eutychianam hæresim sapit. Refert istius auctoris plura argumenta, & solvit Capreol. in distin. 5. quæst. 2.

Ad quartam respondetur primum procedere ex hypothese impossibili, ut infra dicam. Secundo illa data, potest negari assumptum, dicendo posse Deum ponere humanitatem in Angelo, sine Angeli mutatione, quia etiam ibi non requireretur informatio, nec perfectio Angeli nova. Ultimo tamen negatur similitudo, quia suppositum Angeli, cum finitum sit, & in se, & in omni modo essendi suo est intrinsece terminatum ad suam naturam, & ad modum subsistendi sub illa, & ideo si uniretur alteri naturæ, acquireret alium novum essendi modum, vel relationem realem unionis, quia est res ejusdem ordinis, & capax illius. At vero Verbum propter suam infinitatem de se, & intrinsece est ita dispositum, ut ex vi sui naturalis modi essendi sine ulla additione, vel mutatione possit esse sub quacumque natura, quæ illi uniatur, & ideo novo modo, vel relatione reali potest uniri.

Tertium caput difficultatis sumitur ex parte totius compositi, seu ex improportione, & infinita distantia rerum tam diversarum, ut sunt Deus & creatura. Si enim ex substantia & qualitate non potest fieri unum per se, quia genere distant, quomodo fiet ex Deo & creatura, inter quæ infinite major distantia est? Sed hæc difficultas tacta est a D. Thom. supra art. 1. hujus materiæ, & inter explicandum ejus litteram sufficienter expedita. Et ideo dicitur breviter, distantiam in genere entis inter extrema non impedire unionem eorum, si aliunde habeant sufficientem proportionem: inter Verbum autem & naturam humanam est quidem aliqua proportio, non naturalis, sed obediens, seu non repugnantia. Quia in Verbo reperitur ratio subsistentiæ, & in humanitate capacitas naturæ, & ideo major est proportio inter hæc extrema ad componendum unum per se, quam inter substantiam, & qualitatem, quia licet in perfectione magis distant, tamen in ratione substantiæ, atque adeo in ordine ad unionem substantialem majorem convenientiam habent.

Unum vero superest circa hunc punctum difficile, quia ipsamet realis distinctio Verbi & humanitatis videtur repugnare compositioni ex natura & subsistentia, quia hæc compositio tantum est ex re & modo: compositio autem, quæ talis est, etiam de potentia absoluta ex rebus distinctis fieri non potest. Quod ita explicatur, quia modus rei nunquam potest suppleri per aliquem actum, vel formam omnino realiter distinctam, quia hoc repugnat naturæ modi, ut inductione etiam constare potest, nam quia figura est modus quantitatis, impossibile est figurari quantitatem per realitatem distinctam, & idem est de sessione respectu sedentis, & de similibus.

Respondetur, in nostra sententia verum esse naturalem compositionem ex natura & subsistentia esse tantam ex re & modo. Negatur autem inde fieri non potuisse.



potuisse in hoc mysterio ex rebus omnino distinctis con-  
surgere unam personam compositam per veram & ines-  
cibilem compositionem ex natura & supposito; quia li-  
cet hæc unio in hac generali ratione conveniat cum na-  
turali compositione ex natura & subsistentia, non est ta-  
men ejusdem rationis & modi, ut in præcedenti sectione  
dictum est, & nunc amplius explicabitur. Ad aliam enim  
partem, in qua sumitur, modum rei numquam posse sup-  
pleri per entitatem omnino distinctam, respondetur in  
primis non esse eandem rationem de subsistentia, & de  
aliis imperfectis modis, quales sunt illi, qui in argumento  
sumuntur, quia subsistentia dicit perfectionem simplici-  
ter, quæ formaliter in Deo est; ita ut ipsa personalis sub-  
sistentia Verbi sit per se ens perfectissimum, & ipsa persona  
quæ subsistit: unde fit, ut possit per se ipsam uniri naturæ  
creatæ, & illam in se sustinere. Alii vero modi semper ad-  
hærent alicui entitati, quam consequuntur, & ideo effe-  
ctus, vel quasi effectus eorum formalis, non potest fieri  
per distinctam realitatem. Secundo potest dari, modum  
non expelli formaliter, nisi per modum, vel per privatio-  
nem, & ita in præsentis mysterio modus per se essendi,  
quem deberet habere humanitas Christi, non expellitur  
formaliter per Verbum, sed per modum adhesionis, vel  
unionis, quem humanitas illa habet in Verbo, ut jam di-  
ctum est. Similiter verum est, modum non posse suppleri  
per rem distinctam ita, ut maneat effectus, vel quasi effe-  
ctus modi omnino ejusdem rationis: si autem diversa ra-  
tione fiat, potest suppleri, ut in proposito humanitas sibi  
relicta subsistat per se, & in se subsisteret; nunc autem ita  
subsistit, ut sit in alio, scilicet Verbo, cumque suo modo  
componit unam personam, & ita nunc habet illa huma-  
nitas modum omnino diversum ab eo, quem haberet se-  
parata, inter quos modos est differentia, quod ille, qui est  
connaturalis, scilicet personalitatis propriæ, est omnino  
absolutus, & quasi in se manens: ille autem, quem tunc  
habet, est veluti respectivus, & innitens alteri rei distin-  
ctæ, scilicet Verbo; & inde fit, quod naturalis compositio  
ex natura & personalitate propria tantum est ex re &  
modo, compositio autem, quæ nunc est in persona Christi,  
potuit esse ex rebus distinctis medio illo modo, quo aliter  
se habet nunc humanitas. Neque oportet compositionem  
hanc esse omnino similem compositioni naturali in di-  
stinctione, vel qualitate componentium; sed in hoc solū,  
quod ex ea resultat quiddam incommunicabiliter sub-  
sistens in tali natura. Aliquale exemplum est in accidente,  
v.g. in quantitate dum inhæret, habet modum proprium  
in re distincta, scilicet substantia, cum qua unum compo-  
nit; tamen separata habet alium modum in se existendi  
sine actuali inhærentia ad rem distinctam. Dices; ergo  
nunc humanitas Christi non subsistit proprie, quia non  
est in se, sed in alio. Respondetur, non subsistere tanquam  
id, quod subsistit, sed proprie Verbum in illa subsistit, &  
illa dicitur in Verbo subsistere, quia illius subsistentia  
terminatur, & quasi sustentatur.

## A R T I C U L U S IX.

*Utrum unio duarum naturarum in Christo  
sit maxima unio.*

**A**d idem sic proceditur. Videtur, quod unio duarum  
naturarum in Christo non sit maxima unio.  
Unio enim deficit in ratione unitatis ab eo, quod est  
unum, eo quod unitum dicitur per participationem, unum  
autem per essentiam. Sed in rebus creatis aliquid dicitur  
simpliciter esse unum: sicut patet de unitate ipsa,  
quæ est principium numeri. Ergo huiusmodi unio, de qua  
loquimur, non importat maximam unitatem.

2. Præterea. Quanto ea, quæ uniuntur, magis distant,  
tanto minor est unio. Sed ea, quæ secundum hanc unionem  
uniuntur, maxime distant, scilicet natura divina & hu-  
mana; distant enim in infinitum. Ergo huiusmodi est mi-  
nima unio.

3. Præterea. Per unionem fit aliquid unum. Sed ex unio-  
ne anime & corporis in nobis fit aliquid unum in persona  
& naturæ; ex unione autem divina & humana natura fit  
aliquid unum solum in persona. Ergo maior est unio ani-  
me ad corpus, quam divine nature ad humanam: & sic  
unio, de qua loquimur, non importat maximam unitatem.  
Sed contra est, quod Augustinus dicit primo de Trin. quod

*homo potius est in Filio Dei, quam Filius in Patre. Filius  
autem est in Patre per unitatem essentia, homo vero est in  
Filio per unionem incarnationis. Ergo maior est unio in-  
carnationis, quam unitas divine essentia, quæ tamen est  
maxima unio. Et sic per consequens unio Incarna-  
tionis importat maximam unitatem.*

b Respondeo dicendum, quod unio importat conjunctio-  
nem aliquorum in aliquo uno. Potest ergo unio incarna-  
tionis dupliciter accipi. Uno modo, ex parte eorum, quæ con-  
junguntur; alio modo ex parte ejus, in quo conjunguntur.  
Et ex hac parte, huiusmodi unio habet præminentiam in-  
ter alias uniones: nam unitas persone divine, in qua uni-  
untur due nature, est maxima. Non autem habet præmi-  
nentiam ex parte eorum, quæ conjunguntur.

c Ad primum ergo dicendum, quod unitas divine per-  
sonæ est major, quam unitas numeralis, quæ scilicet est  
principium numeri. Nam unitas divina persona est uni-  
tas increata, per se subsistens, non recepta in aliquo per  
participationem. Est etiam in se completa, habens in se  
quidquid pertinet ad rationem unitatis: & ideo non com-  
petit sibi ratio partis, sicut unitati numerali, quæ est pars  
numeri, & quæ participatur in rebus numeratis. Et ideo  
quantum ad hoc, unio incarnationis præeminet unitati  
numerali, ratione scilicet unitatis divine persone, non  
autem ratione nature humane, quæ non est ipsa unitas di-  
vine persone, sed est ei unita.

d Ad secundum dicendum, quod ratio illa procedit ex  
parte conjunctorum, non autem ex parte persone, in qua  
est facta unio.

e Ad tertium dicendum, quod unitas divine persone  
est major unitas, quam sit unitas, & persona & natura in  
nobis. Et ideo unio incarnationis est major, quam unio  
anime & corporis in nobis.

f Quia vero illud, quod in contrarium obijciatur, falsum  
supponit, scilicet quod maior sit unio incarnationis, quam uni-  
tas personarum divinarum in essentia, dicendum est ad  
auctoritatem Augustini, quod humana natura non est magis  
in Filio Dei, quam Filius Dei in Patre, sed multo minus:  
Sed ipse homo quantum ad aliquid, est in Filio magis, quā  
Filius in Patre: in quantum scilicet idem supponitur in hoc,  
quod dico homo, prout sumitur pro Christo, & in hoc quod  
dico, Filius Dei: non autem est idem suppositum Patris &  
Filii.

## C O M M E N T A R I U S.

**Q**uestio hæc non videtur proprie intelligi posse de re-  
latione unionis, quia non potest in illam conveni-  
re, ut maxima sit, nisi fortasse dicatur maxima, id est, ma-  
xime perfecta inter relationes unionis; quod licet verum  
quidem sit, non tamen videtur hic proprius illorum ver-  
borum sensus, & ideo Cajetan. exponit hic sumi unionem  
pro ipsa conjunctione substantiali, quod videtur consen-  
taneum D. Thom. quia licet in præced. artic. unionem  
tantum pro relatione sumperit: in principio tamen præ-  
sentis articuli declarat unionem significare conjunctio-  
nem. Vel ad æquivocationem vitandam dici posset, D.  
Thom. movere quiddam questionem de relatione, non ta-  
men ratione ipsius, sed ratione fundamenti. Nam quod  
relatio unionis, vel unitatis, aut similitudinis sit major  
vel minor, tantum potest illi convenire ratione funda-  
menti, & sic res eodem revolvitur, licet verba sint diversa.  
Dicitur autem maxima unio, quantum ex corpore arti-  
culi, & solutione ad primum licet colligere, illa, quæ ad  
unitatem maximam terminatur; est enim unio quasi via  
quædam tendens ad unitatem, seu modus, ex quo aliqua  
unitas resultat, & ideo formaliter ac proprie maxima erit  
unio illa, quæ maxime unum fit. Observare autem opor-  
tet variis modis aliqua posse uniri, primo inter se & im-  
mediate, secundo in aliquo tertio resultante ex illis, si-  
cut anima & corpus dicuntur vel inter se uniri, vel in  
humanitate, quæ ex eis resultat, unde hi duo modi in  
eundem coincidunt.

Aliter vero possunt duo aliqua uniri, non inter se im-  
mediate, sed in aliquo tertio, ut duo rami ejusdem arboris  
in trunco. In Christo ergo omnes hi modi unionum con-  
siderari possunt. Uniuntur enim proxime inter se Verbū  
& humanitas, & ex eis resultat hic homo, in quo etiam il-  
la duo extrema uniuntur. Duæ etiam nature divinitas &  
humanitas copulantur in subsistentia Verbi, tanquam in  
termino aliquo modo ab eis distinctio, realiter scilicet ab hu-  
mani-

Lib. 1. c.  
10. ante  
medium  
tom. 3.

Postam  
in argum.  
sed contra.

Unio ma-  
xima quæ-



manitate, & ratione a divinitate. Et hoc ultimo modo consideravit D. Th. hanc conjunctionem in hoc articulo, ut ex titulo & ex corpore satis constat, Obiter tamen omnia definit, quia non potest unus modus unionis sine alio in Christo explicari, ut ex dicendis patebit.

*b* Non videtur D. Th. absolute respondere quaestioni, sed sub disjunctione. *Conjunctio enim*, inquit, *duorum in aliquo uno considerari potest, vel ex parte eorum, quæ uniuntur, vel ex parte ejus, in quo uniuntur.* Et deinde addit, hanc unionem esse maximam ex parte personæ, in qua duæ naturæ uniuntur, quia illa persona est maxime una. Ubi licet obiter notare, considerare D. Th. illam personam, ut est veluti quoddam tertium, in quo duæ naturæ uniuntur, sic enim illa est simplicissima, & maxime una: non vero loqui de illa persona, ut est composita resultans ex unione, sic enim non est maxime una. Et licet inter personas compositas fortasse sit maxime una, ut infra explicabitur; tamen hoc D. Th. non assumeret, ut per se notum sine explicatione, vel probatione, At vero ex parte ipsarum naturarum dicit D. Th. hanc unionem non esse maximam, quod sine probatione relinquit, ut per se notum, quia illæ naturæ sunt inter se valde distinctæ, & ut naturæ sunt, non uniuntur inter se. Propter quod idem D. Th. in 3. dist. 5. q. 1. art. 1. quaestiuicula 2. dicit, inter naturas, ut sic, non solum non esse maximam unionem; sed neque unionem esse, quia ut sic, non componunt aliquid, sed potius maxime inter se distant, ut hic etiam ad secundum dicitur.

**Objeçtio.** Sed objicitur contra distinctionem, & responsionem D. Th. quia ut unio duorum in tertio sit maxima aliquo modo, non satis est illud tertium in se esse maxime unum, sed oportet ulterius considerare modum conjunctionis, quod D. Th. facere omisit, & ideo insufficienter distinxisse videtur, & non recte collegisse, aliàs eodem modo posset colligere tantam esse unionem duarum in una persona Verbi, quanta est unio trium personarum naturarum in una natura, quia tanta est unitas illius personæ, in qua sit unio duarum naturarum, quanta est unitas essentiae, in qua uniuntur tres personæ. Et similiter unio iustorum omnium per gratiam, vel per affectum, quo in Deo uniuntur, esset maxima, quia Deus, in quo uniuntur, est maxime unus. Recte ergo potest aliquid in se esse maxime unum, & tamen non maxime unire ea, quæ in ipso uniuntur.

**Respon.** Respondetur ex Cajetano, sensum distinctionis dictæ non esse, quem objeçtio indicat, scil. unionem posse considerari vel ex parte extremorum, quæ uniuntur, vel ex parte ejus, in quo uniuntur secundum se, & prout in se unum est; nam hoc non est satis ad colligendam unionem extremorum, ut recte probat objeçtio: sed sensus est, debere hæc considerari, prout concurrunt ad unionem & conjunctionem, ita ut considerare unionem ex parte extremorum sit considerare illa, non prout in se talia sunt, sed prout apta sunt conjungi, & actu conjunguntur. Et similiter illud unum, in quo conjunguntur, non solum debet considerari, prout in se unum est, sed prout conjungit, & copulat extrema. Et quamvis D. Th. non hæc omnia ita aperte distinxerit: tamen juxta subjectam materiam ea subintelligenda putavit. Supponit enim qualitatem, & naturam hujus unionis superioribus articulis explicatam, quibus ostensum est, illam esse substantialem ac personalem ex duabus naturis in quadam simplicissima subsistentia. Supposito enim hoc genere unionis recte colligit D. Th. conjunctionem illarum naturarum inter se, quatenus, scilicet, immediate inter se comparari possunt, sic (inquam) unionem non esse maximam, imo nec proprie esse unionem, quia ex illis ut sic nihil unum componitur, sicut ex materia & forma componitur una natura, quod notavit idem D. Th. in 3. dist. 5. q. 1. art. 1. quaestiuicula 2. Colligit subinde idem D. Th. hic ex maxima unitate illius personæ, in qua illæ naturæ uniuntur, unionem ipsarum in tali persona esse maximam, quia cum altera natura non solum unitur, sed etiam omnino idem est, cum altera vero intime & substantialiter unitur. Quæ omnia ex dicendis in sequenti disputatione melius intelligentur.

*c* Argumentum primum ad formam redactum tale est. Hæc unio non refert maximam unitatem; ergo non est maxima unio. Antecedens patet, quia magis unum est, quod per se est unum ratione suæ unitatis, quam quod

est unum ex eo solum, quod multa in illo conjuncta sunt, quia esse unitum deficit a ratione unius. Quia unitum dicitur per participationem, unum vero per se, & quasi per essentiam. Sed in rebus creatis est aliquid per se unum, scilicet ipsa unitas, quæ est principium numeri; ergo. D. Th. in solutione videtur in forma distinguere primum antecedens, ex parte enim humanæ naturæ concedit hanc unionem non esse maximam, nec superare unitatem numeralem, quia humana natura non est, inquit, unitas divinæ personæ, sed est ei unita; ex parte autem personæ Verbi dicit hanc unionem esse maximam, quia divina persona est simplicissima, & multo magis per se una, quam sit ipsa unitas, quæ quidem est principium & caput totius numeri.

Sed hæc responsio videtur incidere in difficultatem tactam circa literam corporis articuli; non enim satis est, ut ipsa persona, in qua sit unio, sit maxime una, sed ulterius oportet, ut conjunctio in illa sit maxima, atque adeo ut id, quod resultat ex tali conjunctione, sit maxime unum. Hoc autem in proposito non est persona simplicissima ut sic, & ut per se una, sed ut composita, & solum una, quatenus in ea multa unita sunt. Unde mihi concedendum videtur, non solum unitatem personæ Verbi secundum se, & ut simplicissima est, esse majorem unitate numerali, sed etiam unitatem personæ compositæ Christi Dei & hominis resultantem ex unione esse majorem unitate numerali. Nec exilimare possum D. Th. hoc voluisse negare, sed solum designasse primam radicem & causam excellentiæ hujus unionis, quæ ex simplicissima Verbi unitate, & non ex humanæ naturæ conditione sumenda est. Hoc autem, quod dicimus, verum esse, præter ea, quæ sequenti disputatione dicemus, facile ostendi potest. Quia sicut hæc unitas Christi resultat ex rebus distinctis unitis, & non est per se omnino simplex, ita unitas, quæ est principium numeri, ex partibus continui unitis resultat, hanc enim vocamus unitatem, quæ est principium numeri; non est ergo omnino simplex, neque in hoc excedit hanc unionem, vel unitatem Christi: aliunde vero hæc unio in multis superat, quia est substantialis, & altioris ordinis, & sit in re vel cum re simplicissima per intimam conjunctionem sine ullo medio.

**Objeçtio.** Quod si urgeatur argumentum in unitate transcendentali puncti, v.g. vel alterius rei simplicis. **Respon.** Respondetur, illam non esse unitatem resultantem ex unione, sed (ut ita dicam) ex simplici identitate: hic autem loquimur de unione; & de unitate, quæ ex illa resultat, & hanc dicimus superare omnes uniones, atque adeo omnes unitates ex unionibus resultantes, non vero ipsam identitatem, seu unitatem rei simplicis.

*d* Secundum argumentum D. Th. est. Inter ea, quæ maxime distant, non est maxima unio, sed natura divina & humana maxime distant; ergo. Cui argumento solum respondet D. Th. probare quidem ex parte naturarum, quæ uniuntur, non esse unionem maximam, non vero ex parte personæ, in qua uniuntur. Sed contra; nam de ipsa divina persona, & natura humana potest fieri idem argumentum, quia etiam illa inter se maxime distant; ergo unio inter illa non est maxima, etiam si unitas ipsius personæ secundum se maxima sit. Respondetur distinguendo illam argumenti propositionem: *Quæ maxime distant, non maxime uniuntur.* Si enim sit sermo de sola distantia in perfectione, seu in genere entis, falsa est. Potest enim Deus hujusmodi res ita distantes, quæ aliunde inter se habent proportionem, vel non repugnantiam, maximo quodam vinculo copulare, ut in fine disputationis præcedentis, & supra q. 1. art. 1. dicebamus. Si autem sit sermo de distantia non tantum in perfectione, sed etiam in proportionem, seu (ut ita dicam) in ratione unibilium, sic admitti potest illa propositio, & in eodem sensu verum est naturas divinam & humanam, ut naturæ sunt, maxime distare, quia ut sic omnino inproportionatæ sunt, ut ex eis fiat unum. Et in hoc sensu procedit solutio D. Thomæ: hoc autem modo natura humana, & persona Verbi non maxime distant, quia licet in perfectione distent, quandam tamen proportionem servant quasi actus, & potentiæ, seu termini, & terminabilis, & ideo hæc possunt inter se maxime uniri.

*e* Tertium argumentum sumitur ex unione animæ & cor-



corporis, quæ videtur major, quia ex illa resultat non tantum una persona, sed etiam una natura. Solutio autem est, solum inde probari terminum illius unionis esse pluribus modis unum; non vero esse magis unum. Ubi considerare oportet in homine aliam esse naturæ unitatem, & aliam personæ propriæ & creatæ: hæc namque unitates ita distinctæ sunt, ut una sit separabilis ab alia, ut in Christi humanitate videre licet. Ibi enim reperitur unitas naturæ humanæ sine unitate personæ creatæ. Et hinc aperte colligitur, quando ex anima & corpore resultat homo unus in natura & in persona, licet in specie videatur esse una unio, re tamen vere esse duas, quarum altera est inter partes naturæ ut sic, quæ inter se conveniunt ad componendam unam naturam, quæ unio inventa est inter animam & corpus Christi Domini; altera vero est totius naturæ cum sua subsistentia, vel fortasse etiam singularum partium essentialium cum suis partialibus subsistentiis. Unde recte intelligitur, hanc compositionem, seu unitatem hominis extensive (ut ita dicam) excedere hanc unionem incarnationis, quia hæc est tantum una, illæ vero sunt duæ, & hoc est, quod D. Th. dixit, illud esse pluribus modis unum. Hoc tamen non obstante fieri potest, ut illa unica incarnationis unio intensive sit major quacumque alia. Quomodo autem hoc verum sit, tractabitur jam disput. sequenti.

f. Ultimo tandem in argumento, *Sed contra*, & solutione ejus comparat D. Th. hanc unionem cum unionem trium personarum in divina essentia, & dicit hanc posteriorem esse longe majorem, quod per se evidens est; quin potius dicendum videretur, comparisonem esse impropriam, & abusivam, quia illa Trinitatis non est unio, sed unitas & identitas. Unde licet absolute diceremus hanc unionem incarnationis esse maximam, hoc non esset contra supremam conjunctionem trium personarum in una essentia, quia licet illa revera sit major, non tamen unio, sed unitas est.

Objicit tamen D. Thomas ex Augustino li. 1. de Trinit. c. 10. dicente, hominem potius esse in Filio, quam Filium in Patre. Et respondet, si hoc dictum de humanitate intelligatur, falsum esse, quia magis est Filius in Patre, quam humanitas in Filio; hic enim est in Patre simplicissimo modo per unitatem essentiae, humanitas autem in Filio solum per unionem, & compositionem: si autem hoc dictum intelligatur de hoc homine, illud est verum ratione suppositi, nam hic homo dicit personam Filii, qui magis in seipso est, quam in Patre. Ubi primum circa rem ipsam oportet hinc colligere, quod licet unitas, per quam Filius est in Patre, sit maxima quædam, & simplicissima unitas, est enim unitas ipsius personæ divinæ, quatenus in re omnino est idem cum personis, nihilominus unitas, per quam persona divina intelligitur esse in se ipsa, vel potius idem sibi, censetur major; unitas enim ex propria ratione unitatis excludit distinctionem, & si simplicissima sit, excludit compositionem: qua ratione igitur unitas essentiae divinæ simplicissima est, nulla potest esse major, qua vero ratione unitas personarum in essentia admittit distinctionem ipsarum personarum inter se, ex hac parte unitas uniuscujusque personæ ad seipsam est major, quia nullam in ipsa persona admittit distinctionem respectu sui ipsius; & hoc modo dicitur una persona divina magis esse in se, quam in alia; ad quem modum dici etiam potest, unamquamque relationem magis esse idem sibi ipsi, quam essentiae, non quia in re ipsa aliquo modo distinguatur ab essentia, sed quia non ita adæquate est idem illi sicut sibi ipsi; ita enim est idem sibi, ut non possit distingui ab aliquo, quod cum ipsamet identificetur, ita vero est idem essentiae, ut tamen possit realiter distingui ab alia persona, quæ identificatur cum essentia. Deinde quoad mentem Augusti. observari potest, videri potius ipsum loqui de humanitate, quam de homine, sic enim ait: *Cum filius sit Deus & homo, alia substantia Deus, alia substantia homo*, & subdit: *Homo potius in Filio, quam Filius in Patre*; videtur igitur loqui de natura ipsa, nam si de supposito loqueretur, falso diceret: *Alia substantia Deus, & alia substantia homo*. Quod si admittatur hic sensus, adhuc exponi posset humanitatem dici potius in Filio, quam Filium in Patre, non propter majorem, nec æqualem unitatem, sed quia humanitas quodammodo immediatius est in Filio, & cum illo com-

ponit unum hominem, Filius autem est in Patre tantum ratione naturæ, unde ex unione eorum inter se non resultat aliquid unum, sed solum ex unione, quam habent cum natura; & ad hoc videtur tendere exemplum, quod statim subdit August. scilicet, quod anima mea magis videtur esse una cum anima alterius, quam cum corpore meo, & tamen magis est in corpore meo, quam in anima alterius. Recte tamen & fortasse melius exponitur August. cum D. Thom. ut de persona hujus hominis, & Filii loquatur; cum autem dicit: *Alia substantia Deus, alia substantia homo*, sensus est, quod licet idem sit Deus, & homo, alterius tamen essentiae sit, in quantum Deus, & alterius, in quantum homo; sicut licet caro, & anima sint una persona, tamen alia substantia est anima, & alia corpus; tamen quia unus, & idem Filius est utriusque substantiæ humanæ, & divinæ, ideo homo dicitur magis esse in Filio, quam Filius in Patre.

## DISPUTATIO IX.

In duas Sectiones distributa.

*De excellentia, & perfectione hujus unionis, quæ est Incarnatio.*

Post explicata essentiam, seu quidditatem hujus unionis convenienti ordine sequitur, ut gradum perfectionis explicemus, quod dupliciter fieri potest. Primo considerando formaliter perfectionem unionis in ratione unionis. Alio modo considerando perfectionem hujus unionis in genere entis, vel in perfectione gratiæ; recte enim fieri potest, ut unio sit imperfecta in genere entis, quia ex imperfectis rebus sit, & quod ex illa resultat, est imperfectum ens, & tamen quod in genere unionis sit perfecta, quia videlicet perfecte unit extrema, ita ut unum per se, ac perfecte component; quomodo unio, v.g. inter materiam, & formam cœli in genere entis minus perfecta est, quam unio animæ rationalis, & corporis, quamvis in genere unionis perfectior sit; & idem e converso accidere potest, & interdum etiam potest unio utroque modo esse perfectior, vel minus perfecta, ut facile potest exemplis demonstrari. Utrumque igitur de hac unione sigillatim, ac breviter inquirendum est.

## SECTIO I.

*Utrum hæc unio in ratione unionis sit omnium maxima.*

Loquimur in hoc dubio de unione, quæ proxime sit inter humanitatem, & subsistentiam Verbi, nam illa cognita, & perfectione ejus, facile constabit, quid de unione duarum naturarum in una persona dicendum sit. Durandus ergo in 3. dist. 5. q. 3. negat, hanc unionem esse maximam, putat enim unionem materiæ, & formæ, seu animæ, & corporis esse majorem. Primo, quia major est unitas essentiae, quam unitas personæ; ex materia autem, & forma fit una essentia, non autem ex Verbo, & humanitate. Secundo, quia materia, & forma ita uniuntur, ut non possint separari salva utriusque consuetudine; Verbum autem, & humanitas ita uniuntur, ut etiam si separentur, optime possint consistere. Tercio addi potest materia, & formam natura sua coaptari per modum actus, & potentiae, & ideo majorem habere proportionem, ut intimus, ac perfectius uniri possint, quam Verbum ad humanitatem. Quarto denique ex materia, & forma, seu anima, & corpore resultat duplex unio, naturæ & personæ, quæ non solum extensive, sed etiam intensive videntur excedere, tum ex parte unitatis essentiae propter dicta, tum ex parte unitatis personæ creatæ, quæ inde resultat, cum enim illa non componatur ex rebus distinctis, sicut persona Christi ut humana, sed tantum ex re & modo, videtur esse magis una; ergo omni ratione illa unio videtur major.

Nihilominus dicendum est cum communi sententia, hanc unionem esse maximam formaliter, & in ratione unionis; intelligendum vero est comparisonem fieri inter proprias uniones, seu compositiones ex rebus realiter distinctis, quod inferius explicabitur. Hanc vero sententiam docuit D. Th. hic, & clarius in 3. d. 5. q. 1. art. 3. q. 2. quem ibi sequuntur Palud. q. 3. art. 3. Capreol. q. 1. conc. 3. & in illius defensione. In eandem inclinatur Scot. d. 6. q. 1. ad argumenta, & Bonav. q. ult. qui tamen variis utitur

Unio hypostatica in ratione unionis omnium maxima.

Conjunctionem trium personarum in essentia non unio, sed unitas est.

Objectio August. Respondet.

Unitas ut sic distinctionem excludit.

Quomodo relatio in divinis magis sit idem sibi ipsi, quam essentiae.

Dictum Augustini.



utitur distinctionibus, & multum confundit comparationem in dignitate, & in vinculo unionis; clarius id docuit Alenf. 3. p. q. 7. n. 2. art. 3. & Marf. in 3. q. 2. art. 1. conclus. 4. clarius q. 3. art. 2. p. 4. ubi tamen non bene explicat D. Th. sententiam. Citatur pro hac sententia Bernard. lib. 5. de considerat. ad Eugen. post. medium, ubi solam unitatem trium personarum in divina essentia dicit superare hanc unionem, sed Durandus illum explicat de dignitate unionis propter perfectionem personarum, non propter perfectionem vinculi & conjunctionis. Sed Bernardus aperte de conjunctione loquitur, ideo enim dicit unitatem Trinitatis esse majorem, non quia natura divina dignior est, sed quia personae sunt ipsa natura. Et hanc unionem probat esse majorem ceteris, non quia persona Verbi dignior est, sed quia est maxime una, & simplex. Citari etiam potest Leo Pap. ferm. 17. de passione Domini. Ubi tamen solum habet haec verba: *In tantam unitatem, Dei & hominis natura convenit, ut nec supplicio potuerit dirimi, nec morte disjungi.* His tamen verbis tacite indicat, hanc unionem majorem esse unioni animae & corporis, quae morte dissolvi potuit, quo argumento frequenter utuntur Theologi, & quatenus non videatur omnino urgens, quia id fieri potuit ex omnipotente voluntate Dei, quamvis unio in se non esset maxima. Et interdum fieri potest, ut unio dissolvi non possit, quia forma caret contrario activo, quamvis unio in se non sit major, ut unio caloris cum suo subiecto non est minor, quam unio alterius accidentis, licet propter oppositionem contrarii facilius dissolvatur ejus unio. Nihilominus non est contemnenda illa ratio, quia cum aliis conjuncta, potest ad excellentiam hujus unionis explicandam conferre, praesertim hoc modo explicata, quod haec unio, quia est superioris, & excellentioris ordinis, requirit infinitam virtutem, & influxum causae agentis adeo perfectum, ut a nullo alio vinci, aut superari possit; & hinc fit, ut non habeat formam contrariam, aut repugnantem sibi, per quam dissolvi possit, atque adeo, ut natura sua, & non solum ex beneplacito Dei sit indissolubilis, & perpetua, quod multum refert ad perfectionem unionis ut sic. Potest etiam pro hac sententia citari Cyrill. lib. de Incarnat. Unigenit. c. 7. ubi hanc unionem praefert unioni animae & corporis, quamquam non de propria ratione unionis, sed de eminentia, & supernaturali modo ejus loqui videtur. Ratio vero potest esse, quia illud compositum, quod resultat ex hac unione, est magis unum, quam omne aliud compositum ex rebus realiter distinctis; ergo & unio est maxima. Consequentia patet ex dictis, & antecedens declaratur, quia in primis illud est magis unum, quam omne compositum ex substantia, & accidente, quia illud tantum est unum per accidens, terminus vero resultans ex hac unione est unus per se. Deinde hic terminus est quid simplicius seu minus compositum, quam omne aliud compositum substantiale ex rebus distinctis, cujusmodi est vel natura constans ex materia, & forma, vel totum constans ex partibus integralibus; & de hoc posteriori non videtur posse esse dubium, quia compositio ex partibus integralibus, vel est quantitativa, vel valde similis illi, unde non fit nisi aliquo medio uniente extrema; & quodammodo includit quandam infinitam compositionem partium, quae tantum copulantur secundum aliquem extremum terminum, & non secundum se totas. De priori vero, scilicet natura composita ex materia, & forma, ita declaratur, primo quia tam materia, quam forma est minus simplex, quam Verbum divinum, & actus minus perfectus; at vero actus, quo perfectior, & simplicior, eo potest perfectius, & intimius conjungi alteri extremo, & ceteris paribus major unitas, & simplicitas componentis confert sine dubio ad majorem unitatem compositi. Secundo unitas suppositi, quae resultat ex compositione naturae cum substantia, ex suo genere major est, quam unitas, quae resultat ex materia, & forma, cujus signum est tum quod illa unitas, & compositio suppositi, reperitur etiam in angelis, tum etiam quod illa compositio in rebus creatis tantum est ex re, & modo intrinseco, quae ex suo genere minor est, quam ex rebus distinctis: at vero haec unio pertinet ad compositionem ex natura & substantia; ergo ex hac parte etiam est major. Quod etiam ex eo declarari potest, quia cum substantia creata tantum sit modus naturae, divina substantia tam intime copulatur illi naturae, ut impediatur illum modum, & quodammodo

vicem ejus suppleat, ut dictum est. Et confirmari potest ex locutionibus, quae ex hac unione sequuntur, nam per eam factum est, ut Verbum sit homo proprie, ac substantialiter, quod in nulla alia unione simile reperitur; illud enim, quod Averroi tribui solet: *Ex intellectu, & intelligibili fieri maxime unum, quia intellectus sit ipsum intelligibile*, magis per metaphoram, quam ex re ipsa & veritate dictum est: hic autem verissime, & propriissime Verbum factum est homo per intimam humanitatis conjunctionem.

Et ex his aperte concluditur unionem duarum naturarum in persona Verbi esse maximam omnium inter omnes uniones duarum rerum in aliquo tertio. Probat ex dictis, quia illud unum, in quo ununtur istae naturae, est in se maxime unum, & indivisibile, & alteri naturae non solum unitur, sed est unum cum ipsa, alteri vero maxime unitur, ut ostensum est; ergo.

Ad fundamenta Durandi facile respondetur. Ad primum nego unitatem essentiae compositae ex materia, & forma, esse majorem unitate personae formaliter, ac praecise loquendo; quod ideo addo, quia, si sumatur unitas, vel compositio personae, quatenus supponit, vel interdum includit compositionem naturae, sic potest dici quodammodo minus, quia includit in se plures compositiones: sic autem non recte fit comparatio, ut per se constat; si autem praecise fiat, ostensum est compositionem personae ut sic esse minorem, seu e converso unitatem inde resultantem esse majorem.

Ad secundum respondetur; in primis illud esse posse accidentarium, nam quod extrema separata non possint conservari, potest esse ex imperfectione eorum, & mutua dependentia, non vero ex majore unione. Fortasse enim magis potest conservari una pars integralis separata ab alia, quam sine ultima dispositione sua, & tamen inde non fit majorem unionem intercedere inter substantiam, & dispositionem accidentalem, quam inter partes substantiales inter se; & deinde non constat, materiam, & formam posse consistere dissoluta unionem; materia enim, si ab una forma separatur, indiget alia, ut permaneat in esse; & in hoc par est ratio de humanitate, nam si separaretur a Verbo, indigeret alia substantia, ut consisteret; forma vero separata a materia naturaliter conservari non potest, nisi sola rationalis, cui hoc singulare est, quia est forma subsistens. Et ita etiam est singulare in Verbo divino: ut licet sit unitum humanitati, habeat nihilominus substantiam omnino ab illa independentem, quod non refert, ut propterea unio minus perfecta censenda sit; sicut anima rationalis non minus perfecte unitur materiae, quam aliae formae, quamvis separata consistere possit.

Ad tertium respondetur, inter materiam, & formam esse majorem proportionem naturalem; quam respicit naturalis unio; at vero humanitas habet proportionem obedientialem respectu substantiae Verbi, quam respicit supernaturalis unio quae altioris ordinis est, & hoc sufficit, ut unio possit esse major. Ad ultimum, partim responsum est, partim dicitur, compositionem creatam ex humanitate, & substantia propria, ex ea parte, quae extrema non distinguuntur omnino realiter, sed tantum res & modus, includere quandam identitatem inter extrema, & quoad hoc non debere, nec posse comparari cum hac unione, quia ut sic non est unio, sed unitas; & propterea dixi hanc comparisonem debere fieri cum unionibus ex rebus distinctis; quatenus vero illa substantia creata est quidam modus distinctus a propria natura, sic exceditur in simplicitate, & unitate, & in aptitudine, seu potius virtute terminandi quamcumque naturam, tam propriam, quam alienam, a substantia Verbi, quae infinite perfecta est, tam in genere substantiae, quam in ratione actus purissimi; & ex hac parte superat haec unio etiam ipsam compositionem ex natura, & substantia creata, sicut unio formae substantialis ad materiam ex ea parte, quae substantialis est, superat unionem modi accidentalis, verbi gratia, sessionis cum subiecto suo, quamvis in ratione talis identitatis major possit esse unitas inter modum, & subiectum, quam sit inter materiam & formam. Solet vero hic inquiri, cum qua naturali unione seu compositione unio haec majorem similitudinem habeat. Sed de hac re sufficiunt dicta superius disputatione praeced. sect. 1. in solutione objectionis contra primum dictum.

Responso.

Compositio ex part. integralibus qualis.



*Utrum unio Incarnationis ingenere entis, seu doni  
a Deo collati sit omnium maxima.*

**I**N hoc dubio unum est, de quo a nemine dubitatur, nec dubitari potest, videlicet terminum adæquatam resultantem per hanc unionem esse rem perfectiorem quamcumque alia creata; est enim hic terminus (ut supra ostendimus) hic homo Christus, constans ex persona Verbi, & humanitate; includit ergo in se infinitam perfectionem Verbi, superat ergo omnia alia, quæ finita sunt. **Objc.** Dices hoc argumento probaretur hunc terminum esse tam perfectum, sicut Verbum ipsum secundum se, atque adeo sicut Patrem ipsum, vel Spiritum sanctum, quod videtur contra Verba Christi Joan. 14. dicentis: *Pater major me est*, ubi loquitur de se ipso, ut homine, atque adeo, ut termino hujus unionis. Respondetur, si in hoc termino consideretur totum id, quod includit, verum est, esse simpliciter infinite perfectum, quia includit totam perfectionem Verbi, & humanitatis, sicut omne compositum includit totam perfectionem componentium; si autem hic terminus consideretur formaliter, ac præcise, ut constituitur per humanitatem, sic dicitur minor Patri.

Quod ergo in quæstionem venire potest, solum est, an considerando id, quod per hanc unionem confertur humanæ naturæ, illud sit majus, & excellentius quocumque alio ente creato, vel quocumque dono Dei. **Durand.** Durandus enim in 3. dist. 2. q. 1. dicit perfectiorem esse, & digniorem unionem beatitudinis, atque adeo esse excellentius Dei donum, quia reddit formaliter beatum, & explet omne desiderium. Idem Richardus ibi art. 2. q. ult. ad fin. Gabr. dist. 1. q. 2. art. 3. dubit. 4. ad 2. videtur sentire hanc gratiam unionis pertinere ad majorem dignitatem, tamen q. 2. art. 2. ad 2. ad finem in contrariam partem inclinat. Idem Marsil. q. 3. art. 2. ad 2. Scotus vero dist. 2. q. 1. dicit hanc unionem esse perfectiorem in ratione actus primi, illam vero, quæ est in visione beata, esse perfectiorem per modum actus secundi, simpliciter vero negat esse comparabiles, quia sunt diversarum rationum. Sed cum ratione doni, & perfectionis conveniant, in ea comparari poterunt, imo non solum cum perfectione visionis, sed etiam cum perfectione gratiæ habitualis potest hæc unio comparari. Et potest fundari hoc modo hæc opinio, quia per hanc unionem duo possunt intelligi conferri humanitati, scilicet modus ille creatus, qui fit in humanitate, & persona Verbi (omitted enim prædicamentalem relationem unionis, hæc enim & parvam perfectionem affert, & ex suo fundamento judicanda est) modus autem unionis videtur in se esse quid valde imperfectum, quia realiter, seu identice est idem cum ipsa humanitate, & ita ex hac parte non videtur excedere ordinem naturæ in entitate sua, imo videtur esse quid minus perfectum, quam ipsa substantia humanitatis, gratia vero, vel visio beata est res omnino supernaturalis in entitate, & substantia sua, Verbum autem est quidem in se infinite perfectum, tamen sicut persona Verbi donatur aliquo modo humanitati per hanc unionem, ita persona Spiritus sancti, & tota Trinitas donatur homini per gratiam; ergo in hoc æquales sunt, omnibus ergo pensatis, perfectior, vel dignior videtur illa unio. Et confirmatur primo, quia donum communicabile indifferenter naturis rationalibus, & irrationalibus, minoris excellentiæ, & dignitatis esse videtur, quam donum, quod solis rationalibus creaturis communicari potest; sed hæc unio est prioris generis, ut patebit infra quæst. 4. visio autem beata, & etiam gratia habitualis est posterioris generis; ergo, Secundo confirmatur, quia gratia habitualis sanctificat animam, & visio Dei replet omne gaudio, ac denique ipse amor Dei ad summum bonum animæ præferendum cujus alii; ergo non videtur hæc unio cum his omnibus bonis comparanda, nec præ illis eligenda. Tercio confirmatur, quia per mysterium Eucharistiæ confert nobis Deus ipsummet Christum, qui est infinitum bonum; ergo ex hac parte non minus beneficium, seu donum est, quam ipsa incarnatio, aliunde vero superat, quia non uni tantum humanitati, sed omnibus datur, & non semel tantum, sed sæpissime; ergo, &c.

Nihilominus dicendum est cum communi sententia,

hanc unionem esse supremum ac perfectissimum opus gratiæ, per quod Deus communicat creaturæ aliquid excellentius, & melius, quam per omnem aliam actionem communicet. Hæc est sententia D. Th. art. sequenti, ad 1. art. 11. in corpore, & infra q. 4. art. 1. ad 2. ubi tenet Cajetanus, & alii. Idem supponit D. Th. supra q. 1. art. 1. ubi late explicuimus, quomodo communicatio bonitatis divinæ sit major in hoc opere, quam in omni alio, quod idem fere docet Albertus, in 3. dist. 2. & Bonavent. ibi art. 1. q. 2. in prioribus argumentis, quorum conclusionem postea concedit. Idem sumitur ex Alexan. Alen. 3. p. q. 11. & 12. art. 1. membr. 1. & ex Henri. quodlib. 6. q. 6. & quodlib. 13. q. 5. & alii authores infra citandi, qui negant gratiam unionis posse communicari creaturæ irrationali, hanc sententiam tanquam manifestam supponunt. Denique Scotus hoc tandem docuit in 4. dist. 49. q. 2. §. ad istam secundam quæst. Et probari primo potest ex August. lib. 13. de Trinit. c. 9. & 13. dicente, Deum factum esse participem nostræ mortalitatis, ut nobis persuaderet futuros participes immortalitatis ejus & gloriæ, & ideo Joannem Evangelistam cap. 1. cum dixisset: *Dedit eis potestatem filios Dei fieri*, statim addidisse: *Et verbum caro factum est*, ut ab eo, quod majus est, suaderet quod incredibile videbatur. Itaque censet multo majorem esse gratiam, Deum fieri hominem, quam homines per gratiam adoptionis fieri Dei filios, & hæredes, quo argumento fere usus est Paulus ad Rom. 8. dicens: *Qui proprio filio suo non pepercit, quomodo cum illo non omnia nobis donavit?* eodem modo loquitur August. tractat. 2. in Joan. & ideo lib. de prædestinat. sanct. c. 15. hanc gratiam unionis vocat: *Excellentissimam, tantamque naturæ humanæ subjectionem, ut quo altius attolleretur, non haberet*. Idem sumi potest ex Chrysost. hom. 10. in Joan. Ratione breviter claratur primo, quia, si consideremus omnia, quæ in hac unionem interveniunt, non tantum collatum est humanitati aliquod donum creatum, sed ipsamet persona increata filii Dei, quæ est infinitum bonum. Nec vero cum hoc dono conferri potest, quod ipsis iustis datur per gratiam ipsa persona Spiritus sancti, aut Beatis ipsa essentia divina, quia in illis unionibus accidentalibus non datur ipse Deus, ut per se ipsum quasi formaliter perficiat, vel actuet, seu terminet ipsum esse creaturæ suæ, neque ut cum illa unum ens vere componat: sed dicitur dari speciali modo, quia singulari ratione censetur esse præsens, aut per modum objecti, aut per modum principii supernaturaliter efficientis, & perficientis animam, aut certe secundum quandam præsentiam, vel unionem ex speciali amicitia profectam. At vero per hanc unionem ipsamet persona Verbi per se se conjungitur humanitati, illamque perficit, & terminat dependentiam ejus. Ac denique cum illa unam substantiam vere, ac ineffabiliter componit. Quanto ergo major est persona divina, quam ejus participatio, & filiatio naturalis, quam adoptiva, tanto donum collatum per hanc unionem conjuncta alia videtur superare. Quod argumentum totum fundamentum habet in Paulo ad Heb. 1. dicente de Christo: *Tanto melior Angelis effectus, quanto differentius præ illis nomen hæreditavit*; & infra id confirmat ex illo Psal. 44. *Dilexisti iustitiam, & odisti iniquitatem, propterea unxit te Deus, Deus tuus oleo lætitiæ præ participibus tuis*, quæ de Christo Deo & homine intelliguntur, in quo humanitas divinitate uncta est, ut sancti exponunt, quos infra q. 78. & 15. afferemus. Quod a signo confirmari potest, tum quia humanæ nature ratione hujus unionis debetur major reverentia, & honor, quam debeat illi personæ creatæ propter quamcumque excellentiam gratiæ, aut gloriæ; ergo gratiam est hanc dignitatem esse majorem, sicut enim colligere videtur Paul. ad Hebr. 1. cum ait, *& adorent eum omnes Angeli ejus*; tum etiam quia ipsi humanitati ratione hujus unionis debetur omnis excellentia gratiæ & gloriæ, & ut sit prorsus impeccabilis, ut infra dicitur, nonnullum etiam signum est, quod hoc bonum, quod est præstantius, eo est rarius, unde soli uni naturæ communicatum est. Secundo confirmatur, seu explicatur exemplo, quia sicut corpus humanum per substantialem conjunctionem cum anima rationali, efficitur veluti organum conjunctum illius, & participat quodammodo spiritualem & rationalem perfectionem ejus, qui status est major perfectio

Unio hypostatica perfectissimum opus gratiæ & donum Dei excellentissimum.

Differentia inter unionem hypostaticam, & beatificam, & unionem per gratiam.



corporis, quam omnis alia creata: ita humanitas per hanc unionem substantialem fit vere, ac proprie natura ipsius Verbi divini, & instrumentum conjunctum illius, & ideo illi debitum est, ut participet perfectiones ipsius Verbi, & ut ab illo dirigatur, & gubernetur tanquam a propria hypostasi; est ergo hoc bonum sine ulla comparatione, major perfectio illius humanitatis, quam omnis alia perfectio creata aut creabilis; ergo.

Secundo, si consideremus ipsum modum unionis, in primis excedit in hoc omnia alia entia creata, quod est in altiori ordine rerum, quam reliqua omnia: sicut enim gratia quamvis comparata ad substantiam animam, sit fortasse in esse physico, & in entitate minus perfecta, quia est accidens, anima vero substantia, tamen secundum gradum, vel ordinem rerum, constituitur in altiori ordine divino, quia est quædam participatio divinitatis ejusque perfectionum, seu operationum, eo modo, quo sunt propriae Dei, & non possunt esse connaturales substantiæ creatæ: ita hæc unio, licet in se tantum sit quidam modus creatus, tamen quatenus attingit Deum ipsum in se, & illi intime, & substantialiter conjungit naturam creatam, & facit, ut ille, qui est verus homo, sit etiam verus Deus, non per participationem, sed personaliter, & per essentiam, hac ratione pertinet ad quandam altiorem ordinem rerum, quam sit ordo naturæ, vel gratiæ adoptionis; cujus signum etiam est, quia hæc unio non debetur naturæ, nec secundum se, neque etiam ut habenti gratiam creatam quantumcumque perfectam, at vero gratia habitualis, & beatitudo ipsa, licet non debeatur naturæ secundum se, debetur tamen naturæ; ut habenti hunc modum unionis ad Verbum. Et hoc docuit optime D. Th. infra q. 7. art. 13. ad 3. ubi dicit, gratiam unionis, non esse in genere gratiæ habitualis, sed esse supra omne genus, sicut ipsa divina perfectio, quod satis est, ut illa unio sit excellentius donum Dei, quam omne aliud creatum, quamvis fortasse in entitate sua non excedat ipsam substantiam humanitatis, sicut etiam donum sanctificationis per gratiam est majus, quam ipsa creatio substantiæ, quamvis fortasse ipsa entitas gratiæ physice non sit perfectior, quia excellentia horum donorum magis pensanda est ex modo, quo per illa Deus ipse communicatur, quam ex physica tantum entitate. Et confirmatur, quia hic modus non solum est supernaturalis, ut supra ostendimus, verum etiam est majus opus Dei, quam opus creationis, vel glorificationis, quia, ut supra q. 1. late dictum est, divina omnipotentia, atque alia attributa, in illo magis ostenduntur.

**Solutio argumenti.** Et ex his facile est fundamentis contrariæ sententiæ respondere, quoad principale enim fundamentum jam declaratum est, quomodo Incarnatio, tam ratione unionis, quam Verbi uniti, excedat omnia alia dona Dei. Unde solum addendum est, hunc modum unionis simpliciter dicendum esse supernaturalem multo magis, quam gratiam, vel visionem beatam, quia multo minus potest esse connaturalis creaturæ, & altiori modo conjungit illam Deo, supra totum debitum illius, ac denique magis in eo agitur supra omnes leges naturæ. Nec refert, quod hic modus non sit entitas distincta omnino realiter a substantia humanitatis, satis enim est, totum illud esse, quod habet, ut est modus, esse omnino supernaturale, non tantum quia supernaturaliter fit, sed quia in se est quid supernaturale. Quod vero gratia aut visio habeant proprias entitates supernaturales distinctas omnino ab entitate substantiæ, non arguit in eis majorem supernaturalitatem, sed in hoc modo majorem quandam perfectionem, quia non pertinet ad modum accidentis, sed substantiæ. Et inde etiam colligi potest, hunc modum esse magis supernaturalem, imo constitui (ut ita dicam) in supremo gradu supernaturalitatis; substantia enim omnino supernaturalis, si esset possibilis, altior esset, quam accidens supernaturale; quia vero talis substantia omnino creata esse non potuit, solum mediante hoc modo unionis potuit aliquo modo constitui, illa enim substantia composita ex Verbo & humanitate maxime supernaturalis censenda est.

**Ad 1. confirmat.** Ad primam confirmationem negatur assumptum, ratio enim substantiæ perfectior est, quam ratio sensibilis, quamvis illa communicari possit inanimatis; hæc vero solis animantibus; imo ex illa ratione sequeretur majorem perfectionem esse habere sensum, quam sit unio hypostatica, quia hæc communicari potest lapidi, illa vero non. Illud ergo, ut Cajetanus notavit, ad summum pro-

cedit in perfectionibus connaturalibus, quæ oriuntur ex propriis rerum principiis; imo addendum est, oportere, ut sint perfectiones ejusdem ordinis, & maxime in iis, quæ non sunt perfectiones simpliciter, sed includunt imperfectionem; generaliter autem loquendo, sæpe universalior perfectio est major ex suo genere, quia est simpliciter simplex: ita vero est in proposito, quia constitutio suppositi est perfectio simpliciter, & substantialis, & ideo ex suo genere major est, licet possit pluribus rebus communicari, quam visio, quæ accidentalis perfectio est. Concedi tamen potest visionem ex ea parte, quæ est actus vitæ actusque secundus quoad modum esse secundum quid magis perfectam, quam unio hypostatica, per se sumpta & ex hac parte solum posse communicari creaturæ rationali, sicut nutritio simpliciter non est perfectior, quam ratio substantiæ vel suppositi, & tamen propter modum non potest esse nisi a principio vitæ.

**Ad 2. confirmat.** Ad secundam confirmationem respondetur posse potius retorqueri in confirmationem veritatis, quia per hanc unionem excellentiori modo sanctificatur anima, & deificatur, quam per omne aliud donum creatum, imo non solum anima, sed etiam corpus, quæ est alia excellentia hujus unionis, quæ animam, & carnem immediate conjungit Deo, unde sine dubio est bonum præ omnibus eligendum. Quod vero ex illa præcise non sequatur gaudium, nisi media aliqua cognitione, hoc pertinet ad excessum secundum quid, quia provenit ex modo vitaliter operandi. Et hinc etiam posset obiter solvi dictum Aug. quod hic afferri solet, quod *Mater Dei felicius fuit concipiendo mente, quam ventre*; non est enim comparabilis illa conceptio cum hac unione, quia non fuit ita formaliter sanctificata, & deificata Beata Virgo per conceptionem corporalem filii Dei, sicut ipsa humanitas per unionem, quamquam dictum illud suam habeat intelligentiam, infra suo loco tractandam. Et hinc ad ultimam confirmationem dicitur, nullam esse comparationem sumptam ex mysterio Eucharistiæ, quia ibi non datur Christus secundum unionem personalem, sed solum secundum quandam realem præsentiam, & unionem accidentalem ad effectus gratiæ creatæ & accidentalis ordinatam.

## ARTICULUS X.

2. *Utrum unio duarum naturarum in Christo sit facta per gratiam.*

**A**D decimum sic proceditur. Videtur, quod unio Incarnationis non sit facta per gratiam. Gratia enim est accidens quoddam, ut in secundaparte habitum est\*. Sed humana natura unio ad divinam, non est facta per accidens, ut supra ostensum\*. Ergo videtur quod unio Incarnationis non sit facta per gratiam.

2. *Præterea, Gratiæ subjectum est anima. Sed sicut dicitur Col. 2. in Christo inhabitavit omnis plenitudo divinitatis corporaliter: ergo videtur, quod illa unio non sit facta per gratiam.*

3. *Præterea, Quilibet Sanctus Deo unitur per gratiam. Si igitur unio Incarnationis fuit per gratiam, videtur, quod non aliter dicatur Christus esse Deus, quam alii Sancti homines.*

*Sed contra est, quod August. dicit in lib. 2. de Præd. Sanctorum, eam gratia sit ab initio fidei sue homo quicumque Christianus, quæ gratia homo ille ab initio factus est Christus. Sed homo ille factus est Christus per unionem ad divinam naturam. Ergo unio illa fuit per gratiam.*

b. *Respondeo dicendum, quod sicut in secundaparte dictum est\*, gratia dupliciter dicitur. Uno modo ipsa voluntas Dei gratis aliquid dantis: alio modo ipsum gratuitum donum Dei. Indiget autem humana natura gratuita Dei voluntate ad hoc, quod eleveatur in Deum cum hoc sit supra facultatem sue nature. Elevatur autem humana natura in Deum dupliciter. Uno modo per operationem, quæ scilicet Sancti cognoscunt & amant Deum. Alio modo per esse personale. Qui quidem modus est singularis Christo: in quo humana natura assumpta est ad hoc, quod sit in persona filii Dei. Manifestum est autem quod ad perfectionem operationis requiritur, quod potentia sit perfecta per habitum; sed quod natura habeat esse in supposito suo, non sit mediante aliquo habitu.*

Sic

Ad 2. confirmat.

16.  
Inf. q. 6. a.  
6. Et ver.  
q. 29. art. 2.  
Et 3. d. 13.  
q. 3. art. 1.  
P. sec. q.  
10. art. 2.  
& 5  
A. 2. 6. hujus  
quæst.

c. 15. ante  
med. 10. 7.

3. d. 13. q. 3.  
2. 1. p. 2.  
q. 110. a. 1.



*Sic ergo dicendum est, quod si gratia accipiatur ipsa Dei voluntas gratis aliquid faciens, vel gratum seu acceptum aliquem habens, unio Incarnationis facta est per gratiam: sicut & unio Sanctorum ad Deum per cognitionem & amorem. Si vero gratia dicatur ipsum gratuitum Dei donum, sic ipsum quod est humanam naturam esse unitam persone divine, & potest dici quadam gratia, in quantum nullis precedentibus meritis hoc est factum, non autem ita quod sit aliqua gratia habitualis, qua mediante talis unio fiat.*

*c Ad primum ergo dicendum, quod gratia, que est accidens, est quadam similitudo divinitatis participata in homine. Per Incarnationem autem humana natura non dicitur participasse similitudinem aliquam divine nature, sed dicitur esse conjuncta ipsi divine nature in persona filii: majus autem est ipsares, quam similitudo ejus participata.*

*d Ad secundum dicendum, quod gratia habitualis est solum in anima: sed gratia, id est, gratuitum Dei donum, quod est uniri divine persone, pertinet ad totam naturam humanam, que componitur ex anima & corpore. Et per hunc modum dicitur plenitudo divinitatis in Christo corporaliter habitasse: quia est unita divina natura non solum anima, sed etiam corpori. Quamvis etiam possit dici, quod dicitur habitasse in Christo corporaliter, id est non umbraliter sicut habitavit in sacramentis veteris legis, de quibus ibidem subditur, quod sunt umbra futurorum; corpus autem est Christus, prout scilicet corpus contra umbram dividitur. Dicunt etiam quidam, quod divinitas dicitur in Christo habitasse corporaliter, id est, tribus modis, sicut corpus habet tres dimensiones. Uno modo, per essentiam, presentiam, & potentiam: alio modo, per gratiam gratum facientem, sicut in sanctis: tertio modo, per unionem personalem, quod est proprium sibi.*

*Unde patet responsio ad tertium: quia scilicet unio Incarnationis non est facta solum per gratiam habituatam, sicut alii sancti uniuntur Deo, sed secundum subsistentiam sive personam.*

#### COMMENTARIUS.

**E**xplicuit hactenus D. Th. perfectionem essentialem hujus unionis, & veluti physicam naturam ejus. In his autem tribus ultimis articulis docet, quid sit hec unio in genere gratiæ, seu quomodo sit hoc opus gratiæ gratuito collatæ humanæ naturæ, & obiter declarat nonnullas causas, præfertim extrinsecas Incarnationis. Ad intelligendum ergo titulum præsentis articuli advertendum est, tribus modis posse existimari hanc unionem factam esse per gratiam, scilicet effective, dispositive, & formaliter, alia enim genera causarum in præsentem locum non habent, ut per se constat. Rursus gratiam distinguunt D. Th. in corpore articuli uno modo significare gratuitam Dei voluntatem, alio vero quodlibet gratuitum donum Dei. Unde fit etiam, ut hæc gratia in increatam, & creatam distinguatur, & juxta varias significationes, variæ quæstion. sub hoc uno titulo comprehendere possunt, quas omnes videtur D. Th. complexus, omnibus enim illis satisfacit.

*b. Dicit ergo primo, hanc unionem esse per gratiam, quæ est gratuita Dei voluntas, quia est supra facultatem totius naturæ, & supra omnia merita, in qua conclusione assignat causam efficientem, quam dicit esse solam divinam voluntatem, non utcumque operantem, sed ut elevantem naturam, supra totum debitum, & meritum suum, sub qua ratione voluntas, gratia vocatur, & in hoc genere causæ dici potest unio hæc facta per gratiam increatam.*

*c. Dicit secundo, non esse factam hanc unionem per aliquam gratiam habituatam, & inhaerentem ipsi humanitati. Ratio est, quia hæc unio non est aliqua operatio, sed est communicatio ipsius esse personalis filii Dei: at vero gratia habitualis ordinatur ad operationem: ergo. In qua conclusione intendit D. Th. excludere hanc gratiam, quoad omne genus causæ, pro certo enim supponit, non posse esse formalem, quia est accidens, quod supra etiam disputatione sexta probatum est, quod vero non sit efficiens, vel disponens, optime probat ratione adducta, quia habitus solum ad operationem disponit, & solam illam efficit. Et confirmat hoc, argumento proportionali, nam in nobis natura non est in supposito suo, medio aliquo habitu; ergo neque in Christo. Quod argumentum*

videri potest non omnino efficax, quia hæc unio in Christo non fit eodem prorsus modo, ac in nobis. Sed quomodo in hoc teneat proportio in sequenti disputatione latius ostendemus. Ultimo est in hac conclusione advertendum, quamvis D. Th. specialiter locutus fuerit de gratia habituali, sub eâ tamen comprehendisse, non solum habitum existentem in essentia animæ, sed etiam habitus potentiarum, imo addo extendi hoc debere ad actus, & ad omne auxilium creatum ad operationem ordinatum, de his enim omnibus ratio D. Th. procedit, quia hæc omnia ordinantur ad operationem, ut dispositiones vel principia earum, vel si sint operationes ipsæ, multo minus possunt ipsæ concurrere ad constitutionem suppositi, cum ab illo procedant, ut in nobis etiam videre est.

*Dicit tertio, hanc unionem esse gratuitum Dei donum, seu quandam gratiam, in quantum gratis a Deo facta est, nullis præcedentibus meritis, quo sensu, vel etiam juxta primam conclusionem locutus videtur August. lib. de prædest. Sanct. c. 15. quem hic affert D. Th. in argumento sed contra. In qua conclusione Cajet. advertit non dixisse D. Th. unionem factam esse per gratiam, sed ipsam esse gratiam, quod verissimum est, loquendo de ipsa substantiali unione, quæ ut supra diximus est modus supernaturalis omnino gratis collatus humanæ naturæ, non per aliam gratiam, ipsa enim unio est veluti formalis ratio conjunctionis humanitatis cum Verbo: unde si loquamur de humanitate, dici potest unita Verbo per gratiam, non dispositive, sed quasi formaliter, scilicet per ipsam unionem, quæ gratia quædam est. Addo relationem etiam unionis posse dici gratiam factam per ipsam conjunctionem substantialem, tanquam per fundamentum suum, quanquam relatio non debeat censi distincta gratia ab ipso fundamento, ex quo naturaliter resultat. Denique Verbum ipsum potest dici gratia collata humanitati, quia ut supra dictum est, illi est datum, ut terminus substantialis dependentiæ illius, unde per se ipsum illam sanctificat: & hoc modo potest dici facta hæc unio per gratiam, non tanquam per formam, aut per aliam causam propriam, sed tanquam per terminum ipsius unionis, quanquam verum sit, illam particulam, *per*, non proprie ad hanc significationem accommodari.*

Sed contra hanc conclusionem sic expositam potest objici ratio illa facta pro secunda conclusione, quia in nobis non unitur natura suo supposito per aliquid, quod mediet inter ipsam & suam subsistentiam, neque etiam per modum medium; ergo neque in hac unionem requiritur. Sed hæc obiectio supra expedita est, negando consequentiam, quia in nobis subsistentia non est res distincta, sed modus intrinsecus naturæ; at vero in hac unionem, subsistentia Verbi est res omnino distincta a natura, & ideo necesse est, ut modus unionis inter illa intercedat. Itaque ratio illa fuit efficax ad secundam conclusionem, quia ibi excludebatur gratia accidentaliter, non vero urget contra hanc tertiam, quia gratia, de qua sermo est in hac conclusione, est substantialis.

*c Argumentum primum D. Th. est facile, & recte concludit unionem hanc non esse factam per aliquam gratiam, quæ sit accidens animæ. D. Th. autem in solutione, non est contentus hoc concedendo, sed voluit etiam illud probare, quia per gratiam accidentalem solum communicatur homini quadam participata similitudo divine naturæ: per incarnationem vero confertur ipsa persona filii Dei. Unde concludit hanc gratiam esse altioris ordinis ab omni gratia accidentali, & consequenter non fieri per illam.*

*d In secundo argumento explicat D. Th. illum locum Pauli ad Col. 2. In quo habitat omnis plenitudo divinitatis corporaliter, & tres adhibet expositiones, quarum tertiam non affirmat, sed refert tantum, quia non est expositio, sed metaphorica quadam accommodato, illo enim modo etiam posset dici Deus habitare in rebus omnibus corporaliter, quia sicut corpus habet tres dimensiones, ita Deus est in omnibus rebus, per essentiam, presentiam, & potentiam; duæ vero priores expositiones sunt optimæ, & literales. Prima, ut corporaliter significet, id est, vere, & non per figuras, aut umbram. Secunda, ut illa voce significatum sit Verbum non tantum in anima, sed etiam in carne Christi habitasse per hanc unionem, & utraque est August. epist. 57. ad Dardanum circa finem, ubi posterio-  
ita*



ita explicetur, quod plenitudo divinitatis dicatur fuisse in Christo corporaliter, quia ex verbo divino, & humana natura corporea, una ineffabilis substantia corporalis composita sit; sicut anima potest dici habitare corporaliter in homine, non quia in corpus conversa sit, sed quia ita est unita corpori, ut cum illo unam personam corpoream componat; & hoc modo dicit Aug. per illud *corporaliter*, idem significatum esse, quod illis verbis, *Verbum caro factum est*: & Theodor. ibi. *Corporaliter*, inquit, id est tanquam in proprio corpore, non enim singulari aliquam gratiam accepit, ut Moyses, Deus enim est & homo, & id, quod videtur, unitam habet unigeniti divinitatem: & Theoph. *Habitavit*, inquit, in eo corporatus. & una substantia cum eo, quod assumpsit; quod explicat exemplo animæ, & corporis, quod ex Cyrill. refert, & hoc testimonio in hoc sensu utitur Gelas. Pap. lib. de duabus naturis circa medium. Aliam vero expositionem seu potius amplificationem primæ expositionis supra posita habet Prosper lib. sententiarum Aug. sententia 293. ubi inquit divinitatem dici habitare in Christo corporaliter, quia in illo implentur omnia, quæ in antiquis umbris figurata sunt: *Ut sic quodammodo* (inquit) *umbrarum precedentium ipse sit corpus*, id est, figurarum illarum ipse sit veritas.

## ARTICULUS XI.

a Utrum unionem Verbi incarnati aliqua merita præcesserint.

**A**D undecimum sic proceditur. Videtur, quod unio Incarnationis fuerit aliqua merita subsequuta: quia super illud Ps. 32. *Fiat misericordia tua super nos, quemadmodum, &c.* dicit gl. \* *Hic insinuat desiderium Prophetæ de Incarnatione, & meritum impletionis. Ergo Incarnatio cadit sub merito.*

2. Præterea. Quicumque meretur aliquid, meretur illud, sine quo illud haberi non potest, sed antiqui Patres merebantur vitam æternam, ad quam pervenire non poterant, nisi per incarnationem, dicit enim Greg. \* in lib. 13. Moral. Hi qui ante Christi adventum in hunc mundum venerunt, quantumlibet iustitie virtutem haberent ex corporibus educti, in sinum cœlestis patriæ statim recipi nullo modo poterant: quia nondum ille venerat, qui iustorum animas in perpetua sede collocaret. Ergo videtur quod meruerint Incarnationem.

3. Præterea. De beata Virgine cantatur, quod Dominum omnium meruit portare. Quod quidem factum est per Incarnationem. Ergo Incarnatio cadit sub merito.

Sed contra est, quod Augustinus dicit in libro \* de prædest. Sanctorum. Quisquis in capite nostro præcedentia merita singularis illius generationis invenerit, ipse in nobis præcedentia merita multiplicata regenerationis inquirat. Sed nulla merita præcesserunt regenerationem nostram: secundum illud ad Titum 3. Non ex operibus iustitiæ, quæ fecimus nos, sed secundum suam misericordiam salvos nos fecit per lavacrum regenerationis. Ergo nec illam Christi generationem aliqua merita præcesserunt.

b Respondeo dicendum, quod quantum ad ipsum Christum, manifestum est \* ex præmissis, quod nulla eius merita potuerunt præcedere unionem. Non enim ponimus, quod ante fuerit purus homo, & postea per meritum bonæ vitæ obtinuerit esse filius Dei, sicut posuit Photinus: sed ponimus, quod a principio conceptionis ille homo vere fuerit filius Dei, ut pote non habens aliam hypostasim, quam Dei: secundum illud Lu. 1. Quod ex te nascetur sanctum, vocabitur filius Dei. Et ideo omni operatio illius hominis subsequuta est unionem. Ergo nulla eius operatio potuit esse meritum unionis.

c Sed neque etiam opera alterius cuiuscunque hominis potuerunt esse meritoria huius unionis ex condigno. Primo quidem, quia opera meritoria hominis proprie ordinantur ad beatitudinem, quæ est virtutis premium, & consistit in plena Dei fruitione. Unio autem Incarnationis cum sit in esse personali, transcendit unionem beatæ mentis ad Deum, quæ est per alium fruētis. Et ideo non potest cadere sub merito.

Secundo, quia gratia non potest cadere sub merito, quia est merendi principium. Unde multo minus Incarnatio cadit sub merito, quæ est principium gratiæ: secundum illud Joan. 1. Gratia & veritas per Jesum Christum facta est.

Tertio, quia incarnatio Christi est reformativa totius humanæ naturæ: & ideo non cadit sub merito alicujus ho-

minis singularis: quia bonum alicujus puri hominis non potest esse causa boni totius naturæ.

d Ex congruo tamen meruerunt sancti Patres Incarnationem, desiderando & petendo: congruum enim erat, ut Deus exaudiret eos, qui ei obediebant.

Et per hoc patet responsio ad primum.

Ad secundum dicendum, quod hoc est falsum, quod sub merito cadit omne illud, sine quo premium esse non potest: quidam enim sunt, quæ non solum requiruntur ad premium, sed etiam præexiguntur ad meritum, sicut divina bonitas, & eius gratia, & ipsa hominis natura. Et similiter Incarnationis mysterium est principium merendi: quia de plenitudine Christi omnes accepimus, ut dicitur Joa. 1.

e Ad tertium dicendum, quod beata Virgo dicitur meruisse portare Dominum omnium; non quia meruit ipsum incarnari: sed quia meruit ex gratia sibi data illum puritatis & sanctitatis gradum, ut congrue posset esse mater Dei.

## COMMENTARIUS.

**Q**UONIAM dictum est unionem hanc esse gratiam, id est, gratuitum donum, quod merita excludit, ideo D. Th. quætionem hanc hoc loco movet, quæ de omni merito tam de condigno, quam de congruo, & tam ipsius Christi, quam cuiuscunque alterius intelligitur. Quod autem D. Th. interrogat, an præcesserint merita, non intelligit de tempore, aut duratione, sed an præcesserint tanquam ratio, & causa huius unionis.

b Respondet autem tribus assertionibus; prima est, non potuisse Christum mereri incarnationem suam; ratio est, quia operatio meritorum Christi subsequuta est unionem; ergo non præcessit illam ut meritum ejus. Quæ ratio supponit unum principium fidei, sc. humanitatem Christi non prius tempore fuisse conceptam, quam unitam, quod inferius tractandum est; supponit etiam meritum debere antecedere præmium, de quo dicemus latè disputat. seq.

c Secunda conclusio est, nullum alium hominem potuisse mereri de condigno hanc unionem. Primo, quia meritum hominis ex se solum ordinatur ad beatitudinem; hæc vero unio est bonum alterius ordinis. Secundo, quia omne tale meritum fundatur in gratia, cuius principium, & fons est incarnatio. Tertio, quia nullus homo potuit mereri de condigno reparationem totius generis humani, & consequenter nec incarnationem, per quam ipsum reparatur. Ex quibus rationibus 1. & 3. sunt perspicuæ, & habent locum etiam respectu Angelorum, ad quos hæc conclusio extendenda est, & mea sententia etiam principia, in quibus fundatur secunda ratio; communia sunt Angelis; habet vero speciale difficultatem ratio illa, quam in sequenti disputatione commodius tractabo.

d Tertia conclusio est, de congruo sanctos Patres meruisse incarnationem desiderando, & petendo illam, quia congruum erat, ut Deus exaudiret homines sibi amicos, & obediētes, & juxta hanc conclusionem explicat in solutione ad primum glossam super id Psal. 32. *Fiat misericordia tua Domine super nos, sicut speravimus in te*, dicentem, ibi insinuari desiderium Prophetæ de incarnatione, & meritum impletionis, quod non invenio expresse in aliqua glossa: sumi vero potest ex Glossa ordinaria conjuncta cum interlineari, quæ ex Aug. desumpta est super illum Psalmum.

e In solutionibus argumentorum sola solutio ad tertium est valde notanda, nam specialiter de Virgine inquirat, an meruerit incarnationem, vel concipere Deum: Et respondet D. Th. non meruisse Virginem, ut Deus fieret homo, sed meruisse illum puritatis & sanctitatis gradum, ut congrue posset esse mater Dei. Quæ responsio indiget longa expositione, & disputatione statim tractanda.

## ARTICULUS XII.

a Utrum Gratia unionis fuerit homini Christo naturalis.

**A**D duodecimum sic proceditur. Videtur, quod gratia unionis non fuerit homini Christo naturalis. Unio enim incarnationis non est facta in natura, sed in persona: ut dictum est\*: sed unumquodque denominatur a termino. Ergo gratia illa magis debet dici personalis, quam naturalis.

2. Præterea, Gratia dividitur contra naturam: sicut gratuita quæ sunt a Deo distinguuntur contra naturalia, quæ sunt a principio intrinseco. Sed eorum, quæ ex opposito dividuntur, unum non denominatur ab alio: Ergo gratia Christi non est ei naturalis.



3 *Præterea. Naturale dicitur quod est secundum naturam. Sed gratia unionis non est naturalis Christo secundum naturam divinam (quia sic conveniret etiam aliis personis) nec etiam naturalis est ei secundum naturam humanam: quia sic conveniret omnibus hominibus, qui sunt ejusdem naturæ cum ipso: igitur videtur, quod nullo modo gratia unionis sit Christo naturalis.*

*Sed contra est, quod Aug. dicit in Enchirid. \* in humana natura susceptione fit quodammodo ipsa gratia illi homini naturalis, quia nullum possit admittere peccatum.*

*b Respondeo dicendum, quod secundum Philosophum in quinto Metaphys. \* natura uno modo dicitur ipsa nativitas, alio modo essentia rei, unde naturale potest aliquid dici simpliciter: uno modo, quod est tantum ex principiis essentialibus rei, sicut igni naturale est sursum ferri: alio modo dicitur esse homini naturale, quod ab ipsa nativitate habet: secundum illud Eph. 2. Erasmus natura filii iræ. Et Sap. 12. Nequam est natio eorum, & naturalis malitia ipsorum.*

*c Gratia igitur Christi sive unionis, sive habitualis non potest dici naturalis, quasi causata ex principiis humane naturæ in Christo. d quavis possit dici naturalis, quasi proveniens in naturam humanam Christi, causante divina natura ipsius.*

*e Dicitur autem naturalis utraque gratia in Christo, in quantum eam a nativitate habuit: quia ab initio conceptionis fuit natura humana divina persona unita, & anima ejus fuit munere gratiæ repleta.*

*Ad primum ergo dicendum, quod licet unio non sit facta in natura, est tamen causata ex virtute divine naturæ, quæ est vere natura Christi: & etiam convenit Christo a principio sue nativitatis.*

*Ad secundum dicendum, quod non secundum idem dicitur gratia & naturalis: sed gratia quidem dicitur, in quantum non est ex merito: naturalis autem dicitur, in quantum est ex virtute divine naturæ in humanitate Christi ab ejus nativitate.*

*Ad tertium dicendum, quod gratia unionis non est naturalis Christo secundum humanam naturam, quasi ex principiis humane naturæ causata: & ideo non oportet quod conveniat omnibus hominibus. Est tamen naturalis ei secundum humanam naturam, propter proprietatem nativitatis ipsius, prout sic conceptus est ex Spiritu sancto, ut esset idem naturalis filius Dei & hominis. Secundum vero divinam naturam est ei naturalis, in quantum a divina natura est principium activum hujus gratiæ. Et hoc convenit toti Trinitati, scilicet hujus gratiæ esse activum principium.*

#### COMMENTARIUS.

**Q**uoniam esse gratiam, & esse naturalem unionem videntur inter se pugnantia, cum dictum sit, unionem hanc esse gratiam, omnino gratis concessam, ideo D. Th. inquit, an hoc non obstante, possit hæc gratia esse Christo naturalis. Notandi vero sunt singuli termini in tit. positi. In primis enim gratia unionis variis modis sumi potest; primo extrinsece potest dici gratia unionis, quæ effective facit unionem, scilicet divina voluntas, quæ acceptione non est propria, neque usitata. Secundo potest etiam extrinsece dici gratia unionis, omnis gratia resultans ex unione, seu debita ratione unionis, & hoc modo ipsa gratia habitualis Christi, quatenus illi data est ratione unionis, posset gratia unionis appellari, tamen hoc etiam improprium est, & præter consuetudinem, unde nec de hac gratia movetur hæc quæstio, quamquam propter connexionem doctrinæ D. Th. etiam de illa responderit. Tertio ergo gratia unionis proprie, & intrinsece dicitur ipsa unio substantialis; quia vero in hac unione interveniunt, seu donantur humane naturæ, & modus unionis, quo ipsa est in Verbo, & subsistentia increata Verbi, quæ terminat dependentiam ejus, ideo hoc nomen gratia unionis utrique solet accommodari: nam & ipsa Verbi persona potest dici gratia unionis, quia est donum gratuitum humanitati concessum, ut sumitur ex D. Th. inf. q. 6. art. 6. & q. 7. art. 11. & ex hac parte solet interdum gratia unionis dici infinita, & increata: ipsa etiam unio, seu modus unionis proprie vocatur gratia unionis, ut constat ex eodem D. Th. infra q. 7. art. 13. & hoc modo potissimum sumitur in hoc art. ut constat ex corpore ejus, & solutione ad tertium, ubi dicitur, gratiam unionis esse activam a tota Trinitate.

Alius terminus in titulo positus est, Christus homo, de quo Cajet. advertit, non sine causa quæsitum esse de Christo homine, & non de Christo absolute, ut denotetur, sermonem esse de supposito divino non secundum se, sed subsistente in humanitate; Christus enim non existit simpliciter per unionem, sed per eam constitutus est Deus homo, & de illo sic constituto quæritur, an sit illi hæc unio naturalis.

*b* Et hic est tertius terminus hujus tituli, quem D. Th. in corpore distinguit: dicitur enim aliquid naturale, quia manet ex principiis naturæ, sub quo membro cōprehendi potest, quidquid est naturæ debitum, aut quidquid est consentaneum, aut proportionatum viribus naturæ, sive semper conveniat, sive non; quo fit, ut naturale hic non sumatur, prout distinguitur contra liberum, quare D. Th. hoc loco acceptionis illius non meminit. Alio vero modo dicitur naturale, quod a principio nativitatis inest, quod posterius membrum Cajet. subdividit, nam interdum aliquid convenit a nativitate solum concomitanter secundum durationem, quomodo gratia dicitur concreata angelis, vel Adæ, vel cæcitas dicitur conjuncta cæco a nativitate; aliquando vero cōvenit aliquid a nativitate, & ex vi ipsius nativitatis, quomodo dicitur homo nasci in peccato originali, & esse natura filius iræ, ad Eph. 2. D. Th. a. in artic. indifferenter videtur uti hac voce, & ita simpliciter quærit, an visio sit aliquo modo naturalis Christo homini.

*c* Respondet tribus assertionibus; prima est, Gratia unionis non potest dici naturalis homini Christo, tanquam proveniens ex principiis humane naturæ. Hanc non probat D. Th. quia per se nota est ex supra dictis; intelligit autem non provenire ex principiis humane naturæ, non solum quia ab illis non causatur, sed etiam quia nullo modo illi debita est.

*d* Secunda conclusio est. Hæc unio dici potest naturalis Christo homini, tanquam proveniens in humanam naturam, causata a divina natura ipsius Christi; dicitur enim naturale alicui, quod per proprias vires suæ naturæ facit. Et hanc conclusionem extendit D. Th. ad gratiam etiam habitualement Christi Domini. Nec refert, quod hæc gratia non proveniat a divinitate in humanitatem necessitate naturæ, sed libere, ut Durand. & alii obijciunt; quia, ut jam dixi, hic non sumitur naturale, ut distinguitur a libero, actus enim amoris Dei viribus naturæ a voluntate nostra factus dicitur ei naturalis, quamvis libere fiat. Est vero notanda nonnulla differentia inter gratiam unionis & habitualement, gratia enim unionis, cum sit prima omnium in Christo, licet in dicto sensu possit dici naturalis, quia virtute naturali divinitatis fit, non tamen potest dici naturalis, tanquam aliquo modo debita homini Christo, quia nec debetur humane naturæ, nec divinæ, ut per se constat; at vero gratia habitualis, quia in Christo supponit aliam, non solum est naturalis dicto modo, sed etiam quia debetur humanitati jam unitæ: & idem est de omnibus gratiis, quæ supponunt Christum constitutum Deum hominem.

Tertia conclusio est, hanc gratiam posse dici naturalem, quia ab initio conceptionis fuit collata humanitati, quæ etiam extenditur ad habitualement gratiam. Sed circa hanc conclusionem est advertendum, aliud esse loqui de Christo homine, aliud de humanitate ipsa; si enim de Christo homine loquamur, potest dici illi connaturalis hæc gratia, non solum concomitanter, sicut potest dici connaturalis gratia angelis, sed etiam quia ex vi illius actionis, per quam fuit homo productus, habet hanc gratiam. Et ratio est, quia hæc gratia unionis non supponit Christum in esse Dei hominis, sed constituit illum tanquam terminum suum proprium, & intrinsecum; unde sicut unaquæque res dicitur habere ex vi suæ generationis id, quod habet per illam, quatenus per illam producitur: ita Christus dicitur habere hanc unionem ex vi suæ conceptionis. At vero oportet distinguere in ipsa conceptione Christi ipsam actionem effectivam humanitatis ab actione unitiva. Nam quod dictum est, procedit de actione unitiva: ex vi cujus convenit huic composito, quod est Christus, unio humanitatis ad Verbum, quæ est de intrinseca ratione illius, & hoc modo dicitur ei naturalis. Secus vero est respectu actionis productivæ humanitatis, nam ex vi ejus, etiam si intelligatur esse ab Spiritu sancto, & ex Virgine, non habet Christus gratiam unionis, nisi tantum concomitanter, quia data est simul cum illa, non

Christus homo.

Naturale multipliciter dicit.

1. Concl.

2. Concl.

3. Concl.

Gratia unionis multipliciter dicitur.



ex vi illius, neque ex debito illius, aliàs humanitati sic formatæ, seu effectæ, ex vi talis productionis debita esset unio, quod est omnino falsum, quia illæ duæ actiones non habent inter se naturalem colligantiam, ita ut priori debeat posterior, sed de facto habuerunt ex voluntate Dei. Unde fit, ut respectu humanitatis non possit dici hæc unio illi connaturalis, eo quod a principio conceptionis illi data sit, nisi tantum concomitanter, eo modo, quo gratia fuit connaturalis Adæ, vel Angelis, qui est modus satis improprius; at vero gratia habitualis, & Christo homini, & humanitati ipsi unitæ potest dici connaturalis tanquam utriq; debita ex vi talis conceptionis totalis, & integræ, ut includit duplicem actionem supra dictam.

**Dubium.** Sed quares, quomodo simpliciter loquendum sit, tota enim hæc quæstio videtur esse de modo loquendi, nam res ipsa constat, & D. Th. non respondit simpliciter, sed tantum sub distinctionib. & eodem modo procedunt alii Theologi, A lens. 3. par. q. 8. memb. 3. art. 4. Bonavent. in 3. dist. 4. art. 2. q. 3. Richard. art. 3. q. 2. ubi Duran. q. 3. tam gratiam unionis, quam habitualement, negat proprie dici posse naturales Christo, quia non ex necessitate naturæ, sed mere gratis communicantur. Sed jam dictum est non hic sumi naturale, ut distinguitur contra liberum. Et fortasse ad tollendam æquivocationem esset melius non loqui simpliciter, sed cum aliquo addito, vel explicatione. In rigore tamen dicendum videtur, aliquid dici posse naturale, vel simpliciter, & absolute, quia est in se ens pertinet ad ordinem naturæ, vel relative, seu respectu allicujus, quomodo gloria potest dici naturalis gratiæ; unio ergo, seu gratia unionis non potest simpliciter, & absolute dici naturalis, sed supernaturalis, ut supra sepe demonstratum est. Neque ut dicatur simpliciter naturalis sufficit, ut Deo sit connaturale efficere illam, aliàs etiam justificatio, vel gratia ipsa posset dici res naturalis. At vero relative, seu respectu Christi potest dici hæc gratia illa naturalis, duplici illo modo a D. Th. explicato, & prior solum tribuitur huic homini secundum quandam communicationem idiomatum, quia enim hic homo est Deus, & Deus per vires nature suæ facit hanc unionem, ideo dicitur connaturalis huic homini. Posterior autem modus proprie convenit Christo Deo homini, ut est terminus resultans per hanc unionem.

## DISPUTATIO X.

In octo Sectiones distributa.

*De causis incarnationis præsertim meritoria.*

**1. Concl.** Diximus de essentia & excellentia hujus mysterii, ubi etiam ostendimus, quomodo supernaturale sit, & ad ordinem gratiæ superiori quodam modo pertineat: sequitur jam, ut de illius causis dicamus. Ex quatuor autem causis, quæ ad effectum aliquem concurrere possunt, materialis & formalis proprie non habent locum in hac unionem, quia non fit in ea compositio materiæ & formæ, ut dictum est, quanquam extrema compositionis, scilicet humanitas & Verbum, possint tanquam causæ, vel principia ejus considerari, ut Verbum sit tanquam actus & forma, humanitas vero tanquam subjectum seu materia, quæ actuatur: de quibus agendum est cum D. Th. q. 3. & 4. De causa autem finali hujus mysterii, latissime dictum est supra in q. 1. Solum ergo superest dicendum de efficiente, quæ in physicam, seu proprie efficientem causam, & meritoriam distingui potest, & de utraque dicemus. Et addeamus etiam aliquid de causa dispositiva, tum quia conjuncta quodam modo est cum causa meritoria, tum quia D. Th. in his artic. præsertim 10. & 11. has tres causas indicavit.

## SECTIO I.

*Qua sit, vel esse possit causa efficiens hujus mysterii.*

**D**ico primo: Deus, & tota Trinitas est causa principalis efficiens hoc mysterium: est conclusio de fide definita in Concil. Lateran. sub Mart. prim. can. 2. & in Conc. Later. sub Innoc. III. & habetur in cap. firmiter de summa Trin. & fide Cathol. in Conc. Tolet. VI. & XI. in confessionibus fidei, & tradit illam frequenter August. 1.

Suarez Tomo XVI.

de Trin. c. 4. in Enchirid. c. 38. tr. 10. & 12. in Joan. passim alii patres de hoc mysterio disputantes, & sumitur ex Scriptura sacra, in qua ipsi Filio tribuitur humanæ naturæ assumptio, ad Heb. 2. *Non angelos apprehendit, sed semen Abraham apprehendit.* Ad Phil. 2. *formam servi accipiens;* assumere autem includit efficere unionem, ut supra dictum est. Patri, propter efficientiam tribuitur, quod miserit filium suum, ad Gal. 4. *miserit Deus filium suum factum ex muliere.* Denique Spiritui sancto appropriatur hoc opus Luc. 1. & Matth. 1. Ratio vero est, quia omnia opera Trinitatis ad extra sunt indivisa, procedunt enim a tribus personis, ut sunt unum in natura, & voluntate, atq; adeo in actione & operatione, juxta illud Joan. 5. *Pater meus usque modo operatur, & ego operor;* & Joan. 10. *quæ Pater facit, hæc & Filius similiter facit;* ut bene explicat Damasc. lib. 3. fidei c. 14. & 15. At vero hoc mysterium, ut effective procedat a Deo, est unum ex operibus, quæ ad extra fiunt; ergo.

Dico secundo: Deus solus est proxima causa principalis hujus mysterii, nec potuit creatura ulla ad illud concurrere per modum causæ principalis proximæ. Voco autem principalem causam proximam, eam, quæ per propriam virtutem intrinsecam operatur, etiam si sit causa secunda dependens a Deo. Et ita est conclusio certa, & sequendo de facto videtur de fide, ex illis locis Luc. 1. *Spiritus sanctus supervenit in te;* & Matth. 1. *Quod enim in ea natum est, ex Spiritu sancto est;* ubi solus Deus assignatur, ut causa proxima, & immediata hujus mysterii. Et idem sumitur ex modo loquendi Conciliorum omnium, & Patrum de hoc mysterio tractantium. Ratione vero etiam de possibili convinci potest, aliter fieri non potuisse. Primo quidem, quia hæc unio facta est ad personam divinam; nulla autem creatura potest habere virtutem principalem, & propriam, ut faciat Deum subsistere in aliena natura, nam hoc esset quodammodo subicere Deum virtuti creaturæ. Et confirmatur, quia nulli naturæ creatæ potest esse connaturale esse unitam hypostatice personæ divinæ; ergo multo minus potest esse naturalis virtus efficiendi hanc unionem. Dices. Possit esse virtus supernaturalis, tamen sufficiens, & principalis. Sed contra, quia talis virtus deberet esse superaddita, & infusa substantiæ creatæ, quia substantia creata per se ipsam nihil habet supernaturale, esset ergo virtus accidentaria; ergo non posset esse principalis virtus ad efficiendam hanc unionem substantialem, quæ est altioris ordinis, quam omnis qualitas supernaturalis, ut supra ostensum est.

Ex his rationibus concluditur, si per impossibile posset persona creata terminare alienam naturam, nihilominus tamen unionem inter illa, etiam non posse fieri ab illa creatura, ut a causa efficiente & principali, quia talis unio esset supra omnem naturalem ordinem rerum; nulla autem creatura potest sua virtute, ut principalis causa, immutare hunc ordinem, sicut non potest fingi creatura, quæ virtute sua principali separet accidens a subiecto, illudque ita separatū conservet. Vel sicut etiā non potest persona creata, per solā vim naturalem suæ subsistentiæ terminare alienam naturam, quia non minus est efficere hanc unionem, quā terminare illam, vel separare accidens a subiecto.

Sed quæri hic potest, an saltem per modum instrumenti divini possit creatura efficere hanc unionem, vel an de facto illam effecerit. Quoad priorem partem nonnulli negant id esse possibile, unde a fortiori negant factum esse. Ratio est, quia creatura non potest esse instrumentum creationis; ergo neque hujus unionis: patet consequentia, sicut per creationem communicatur rei ipsum esse existentia, ita per hanc unionem communicatum est ipsum esse existentia divinæ, quod altius est. Sed hæc ratio & sumit antecedens dubium, & fortasse falsum, ut suo loco dicitur, & male infert; tum quia falsum etiam est, per hanc unionem communicari naturæ, ipsum esse existentia, nam potius supponitur, & naturæ existenti communicatur subsistentia divina, unde supra ostendimus, animam Christi fuisse vere creatam, prius natura quam assumptam, vel humanitatem ejus fuisse prius natura formatam, vel conceptam, quam unitam. Tum etiam, quia juxta omnium sententiam, hæc actio est per modum immutationis ex præsupposito subiecto, sive illud includat existentiam, sive sit entitas essentia, quæ juxta aliam opinionem est aliqua entitas actualis distincta ab existentia, & prior natura, quam illa: hæc ergo

2. Concl.



entitas supponitur huic unioni juxta hanc sententiam; illa ergo esset subiectum illius actionis, vel mutationis, per quam fit hæc unio, & consequenter non esset actio ex nihilo: posset ergo creatura esse instrumentum illius, quamvis non posset esse instrumentum creationis, quia cessat ratio, propter quam D. Tho. dicit, creationis, scilicet, quia est actio ex nihilo.

Alii vero propter aliam rationem negant etiam hoc esse possibile, scilicet, quia virtus unitiva etiam instrumentalis debet habere virtutem super utrumque extremum, ut utrumque conjungat: sed impossibile est, ut creatura habeat virtutem etiam instrumentalem supra divinam personam; ergo neque ut efficiat hanc unionem. Confirmatur, ac declaratur, quia creatura non potest communicare ipsum esse divinum personale, quod per hanc unionem communicatur. Atque ita videtur sentire Medina infra, q. 3. art. 4. Prædicta vero ratio in primis non probat de unione ad personam creatam, si ex parte termini illa esset possibilis. Sed neque de præsentī unione ad Verbum mihi videtur efficax ratio, quia hæc unio non fit per actionem, vel mutationem circa utrumque extremum, sed circa alterum tantum, scilicet humanitatem; ergo non est necesse, ut instrumentum habeat directe, & per se virtutem supra ipsam personam divinam, sed solum supra humanitatem, ipsa divina persona concurrente principaliter, & ut ita dicam, admittente ad se fieri unionem extrinsecæ naturæ. Quod ita declaratur & confirmatur, quia loquendo de virtute effectiva, nec Pater, nec Spiritus sanctus habent virtutem supra personam Verbi, imo neque ipsum Verbum supra seipsum, sed solum habet voluntatem liberam, ut efficiat in humanitate unionem ad seipsum, & quia est eadem voluntas Patris & Spiritus sancti, eadem est in eis potestas; ergo pari ratione potest esse liberum Deo, uti creatura ut instrumento ad efficiendam unionem alicujus naturæ ad seipsum: nec enim per hoc subditur Deus virtuti instrumenti, quando quidem tota ejus actio versatur circa extrinsecam naturam, & usus vel elevatio ejus pendet ex voluntate assumentis.

Et in hoc est maxima differentia inter instrumentum, & causam principalem; hæc enim agit per virtutem sibi connaturalem, quæ natura sua est definita & determinata, & ideo impossibile est, ut sit talis virtus potens unire creaturam Deo, quia hoc esset quodammodo subjicere Deum suæ actioni naturali, non quia posset agere in ipsum, sed quia posset, naturam quandam in ipso ponere, ut ita dicam, non ex determinatione voluntatis ejus, sed ex naturali efficacia, & determinatione virtutis suæ, quod repugnat divinæ excellentiæ. At vero instrumentum divinum agit tantum per potentiam obedientialem, & influxus ejus, vel actio definitur juxta voluntatem Dei libere elevantis, & utentis tali instrumento: & ideo nihil repugnat, quod Deus illo utatur ad hujusmodi unionem, eo modo terminando actionem sui instrumenti, sicut terminat actionem suam, actio enim instrumenti, & principalis agentis, una & eadem est. Unde eodem modo non repugnat, creaturam esse instrumentum ad communicandum divinum esse personale, trahendo creaturam ad personam Dei, quia talis actio versatur in natura creata efficiendo in illa unionem, quæ terminatur ad personam Dei, quæ se ipsam quasi formaliter communicat sine alia actione. Sicut etiam per gratiam & visionem beatam suo modo unitur anima Deo, & tamen illæ formæ fieri possunt per actionem creaturæ, quia tota actio versatur circa formam creatam, quæ ad Deum ipsum terminatur. Sic ergo est in præsentī, servata proportione.

Alii denique negant, hanc unionem fieri posse a creatura solum, quia in natura creata non est nisi potentia obedientialis ad illam, ut videre licet in Gabr. in 3. dist. 1. q. 2. art. 2. dub. 5. Scoto, & Ochamo ibi, quos ipse refert. Sed vel hoc intelligendum est de causa naturali, tam principali, quam instrumentali, de qua procedit optime ratio facta, vel procedit ex generali principio, quod nulum esse potest instrumentum divinum, elevatum ad immutandam creaturam secundum potentiam obedientialem, quod ostendam esse falsum infra q. 13.

Quocirca, loquendo de possibili, existimo non repugnare Deum eo modo sumere creaturam, ut instrumentum ad hanc unionem, sicut ad alios effectus supernatu-

rales, verbi gratia, transubstantiationem, vel justificationem, quia neque ex parte modi, neque ex parte termini actionis est major repugnantia. Et quamquam opus hoc sit altius, & excellentius, tamen instrumentaria virtus creaturæ quodammodo infinita est, quia non est naturalis potentia, sed obedientialis, cujus efficacia possibilis non mensuratur ex naturali perfectione creaturæ, sed ex infinita virtute omnipotentis Dei, supposita non repugnantia ex parte actionis, vel effectus. At vero loquendo de facto, & de hoc mysterio, quatenus primo factum est in utero Virginis, unum est certum, scilicet nullam creaturam a Virgine distinctam sumptam fuisse ut instrumentum ad hanc unionem, quia de nulla suspicari potest, quod Christum effecerit hominem: nulli enim Scriptura vel Sancti hoc tribuunt, & temerarium, ac erroneum esset, de aliquo alio hoc affirmare, nam etiam ipsius angeli Gabrielis præsentia, in sola annunciatione, & propositione mysterii, & petitione virginis consensus terminata est.

De ipsa autem Virgine, quæ Deum concepit, ac peperit, dubitari non immerito potest, an effective attigerit ipsam unionem hypostaticam humanitatis ad Verbum: videri enim potest hoc probabile. Primo, quia non repugnat, ut dictum est, & pertinet ad quandam majorem Virginis dignitatem, & ut verius, ac proprius dicatur concepissee Deum. Secundo quia Deus uti solet suis creaturis, ut instrumentis, quando commode potest, & præsertim quando instrumentum est tam accommodatum, & quasi propinquum effectui intento; pertinet enim hoc ad suavem Dei providentiam, majoremque divine omnipotentis manifestationem. Tertio, quia hoc consentaneum est locutionibus sanctorum; Helychius enim homil. 2. de B. Virgine, tom. 7. Bibliothec. sanct. Virginem vocat instrumentum incarnationis ejus, qui omnia produxit; & Ambrosius epist. 82. *Per hominem, inquit, & mulierem caro ejecta est de paradiso, per Virginem juncta est Deo.* Et oratio, de obitu Theodosii: *Ille fecit, inquit, ut inter homines, ut Deus, videretur;* & ad eundem modum loquitur Bernardus, hom. 4. in Missus est, & libro 5. de consid. circa finem. Virginem dicit fuisse mulierem illam, quæ tria illa sata Evangelica, carnem scilicet, animam, & divinitatem tam bene fermentavit, ut nec divisione quidem facta carnis, & animæ caro vel anima a Verbo divideretur. Est quidem hoc pium, & probabile, non tamen necessarium, præsertim si verum est, ut infra dicemus qu. 6. hanc unionem prius naturam factam esse in anima, & materia secundum se, quam unitis, seu quam in tota humanitate ut sic. De qua re, quia specialem difficultatem attingit ad illum locum pertinentem, ibi dicemus; ex illo tamen principio videtur fieri valde probabile, non fuisse Virginem assumptam ut instrumentum ad hanc efficientiam, sicut nec fuit assumpta, ut instrumentum ad creationem ipsius animæ Christi, etiam si concedamus id fuisse possibile, quia illa creatio antecedit informationem, circa quam versatur maternus concursus; sic enim etiam anima ut subsistens antecedit unionem ad corpus; ergo ad illam sic subsistentem non concurrat B. Virgo; subsistebat autem anima Christi in illo priori per subsistentiam Verbi; ergo B. Virgo non concurrat ad unionem illius animæ cum subsistentia Verbi. Et simile argumentum proportionaliter fieri potest ex parte corporis, seu materiæ. Unde confirmatur, quia aliæ matres non attingunt per specialem efficientiam ad ipsam subsistentiam ut sic, sed supponunt animam prius naturam creatam, & subsistentem, & similiter materiam, & illarum unionem efficiunt, & ita producit homo; ergo similiter dicendum est de B. Virgine, quia nec Scriptura, nec Sancti illi tribuunt majorem concursum, quam necessarius sit, ut sit vere mater Dei & hominis, ad quod hæc instrumentalis efficientia necessaria non est, imo neque aliquid confert, ut B. Virgo fuerit vere mater Dei, quia concursus matris non est instrumentalis, sed principalis in suo genere. Quocirca loquendo de prima effectione hujus mysterii verisimilius est a solo Deo fuisse factam, nulla media creatura, quæ principaliter, vel instrumentaliter attingeret ipsam actionem supernaturalem, quæ facta est unio humanitatis ad Verbum, & B. Virginem solum concurrisse ad unionem naturalem animæ, & corporis, & hac ratione esse matrem Dei, & hominis, ut infra suo loco dicetur latius.

Num Beata Virgo effective attigerit incarnationem ipsam.



Num Christi  
si huma-  
nitas in  
sua nutri-  
tione effi-  
cit ut  
gerit u-  
nionem  
partium  
materiæ  
ad Verbi  
subsisten-  
tiam.

Dixi semper, sermonem esse de prima effectione hujus mysterii propter duo dubia, quæ hic incidere possunt. Primum est de unione partium materiæ ad subsistentiam Verbi, quæ per nutritionem facta est a principio conceptionis Christi Domini, usque ad finem vitæ mortalis illius, illa enim unio hypostatica erat, quamvis partialis ex parte rei assumptæ, nam ex parte Verbi tota subsistentia divina cuilibet parti materiæ unita est, unde de illa quasi continua unione, & successiva dubitari non immerito potest, an fieret immediate a Deo, an per humanitatem tanquam instrumentum. In quo nihil certum definire possum; video enim utrumque modum esse possibilem, & nullum habeo principium, quo alterutram partem satis definiam; quia quod humanitas habuerit hanc instrumentalem actionem, absolute non est necessarium, ut Christus potuerit se modo naturali, & vitali nutrire, & augere: quia ad hoc satis est, quod propria virtute sua disponderet materiam alimenti, & converteret illam in substantiam suam, quamvis in instanti conversionis, & fortasse prius natura, quam materia alimenti informaretur anima per actionem solius Trinitatis illa materia uniretur hypostatice subsistentiæ Verbi, in quam Christus statim in eodem instanti inducebat formam suam. Quæquam vero hoc necessarium non sit, cum tamen non repugnet, hanc instrumentalem vim communicatam esse humanitati Christi, non est improbable illâ habuisse, cum in hoc genere habuerit summam quandam participationem divinæ omnipotentia, ut infra q. 13. dicemus.

Num verba con-  
secrationis  
possint ha-  
bere effi-  
cientiam  
circa u-  
nionem  
hypostati-  
cam.

Alterum dubium erat, propter verba consecrationis, suppono enim ut probabilem sententiam, verba illa habere vim instrumentariam ad efficiendum corpus Christi, non tantum quoad præsentiam, sed etiam quoad ipsam substantiam corporis. Ex hac enim sententia sequitur per illa verba fieri ipsum corpus prout est in rerum natura, atque adeo prout unitum est Verbo: unde fit, per illa verba etiam fieri ipsam unionem, non quidem primo, sed secundo, quia juxta hanc sententiam non repugnat idem semel factum etiam si existat iterum fieri. Quod ita etiam declaratur, quia ex vi verborum ita fit corpus sub speciebus, ut per concomitantiam specialiter ibi etiam existat persona Verbi, ut subsistens in tali corpore; ergo ex vi verborum ponitur ibi corpus, ut unitum personæ Verbi; ergo ex vi verborum efficitur ipsa unio eo modo, quo efficitur ipsum corpus. Et ita mihi videtur esse consequenter in ea sententia dicendum, quam vero illa probabilis sit in materia de Eucharistia dicemus.

## SECTIO II.

*Utrum fuerit aliqua causa hujus unionis in genere dispositionis, seu causa dispositiva.*

Dispositio  
ad unionem  
striplex.

**T**ripliciter intelligi potest aliquam dispositionem ad unionem concurrere: uno modo tanquam ex natura rei ita necessariam, ut unio habeat cum illa naturalem connexionem, scilicet, ut posita tali sufficienti dispositione, statim veluti necessario, & ex natura rei unio consequatur, quomodo intelligere possumus, ultimam dispositionem humani corporis concurrere ad unionem animæ cum ipso; atque ita referuntur quidam dicentes, fuisse necessariam aliquam dispositionem in humanitate, ut Verbo jungeretur; indicat Gabriel in 3. dist. 2. imo opinio ejus supra tractata disp. 6. sect. 2. videtur ad hoc alludere. Sed in hoc sensu est hæc sententia omnino improbabilis, quamquam non possit, ut hæretica vel erronea damnari, quia etiam illa posita, posset salvari vera unio substantialis, & quidquid fides docet de hoc mysterio. Ratio vero contra illam est, quia in genere loquendo, ad compositionem ex natura, & supposito, nulla concurrat dispositio hujusmodi, ut per se evidens est; nec specialiter in hac unione potest, vel reddi ratio cur talis dispositio necessaria sit, vel fingi qualis sit, quia talis dispositio deberet esse accidentalis, & consequenter inferioris ordinis, quam sit hæc unio. Deinde, quando forma, & dispositio ita se habent, ut ad ipsam dispositionem unio formæ naturaliter consequatur, necesse est, ut & forma, & dispositio sint aliquo modo ejusdem ordinis, & ut forma ipsi connaturalis sit unio ad subiectum sic dispositum, ut patet discurrendo per omnes uniones ac similes dispositiones: at vero in proposito Verbum

est alterius rationis in ratione subsistendi, ab omni forma accidentali, & non postulat ex natura sua hanc unionem cum natura creata, quomodocunque illa disposita sit: ergo. Denique multa ex argumentis supra factis contra Gabrielem possunt hic applicari: quia scilicet nulla accidentalis forma inhærens humanitati potest necessitare Verbum ad hanc unionem, ut per se videtur evidens, neque etiam humanitatem ipsam, quia talis forma non habet repugnantiam cum subsistentia creata ipsius humanitatis, unde quantum est de se manere posset in humanitate existente in proprio supposito: ergo ex natura sua non infert hanc unionem.

Alio modo intelligi potest hæc dispositio, tanquam omnino necessaria ad unionem, non quia ex illa necessario sequatur, sed quia illam necessario præsupponat; & hoc modo videtur asserere hanc sententiam Alenf. 3. part. q. 7. memb. 2. art. 1. quæst. 11. memb. ult. q. 12. memb. 1. & eandem tribuit supra Gabriel illis auctoribus, qui tenent, solam naturam rationalem esse capacem hujus unionis, sed immerito, quia non necessario unum sequitur ex alio. Fundamentum hujus sententiæ esse potest, quia natura de se non est apta ad hanc unionem; ergo debet elevari, & fieri apta per aliquam dispositionem, quam Alensis vocat gratiam unionis; & interdum indicat esse gratiam habituales, ut ordinatam ad unionem, interdum vero esse aliquam aliam superiorem qualitatem. Sed hæc sententia etiam est improbabilis & sine fundamento, quia nulla qualitas accidentalis potest reddere naturam capacem hujus unionis, si capax ipsa de se non sit. Primo, quia subsistentia divina uniri debet immediate cum ipsa substantia humanitatis; ergo in illa secundum se debet esse capacitas ad unionem. Deinde, quia unio non fit immediate tantum cum anima, sed etiam cum ipsa carne, nulla autem gratia fingi potest, quæ sit forma accidentalis, & materiæ inhærens, quæ conferat illi hanc capacitatem. Denique, quia ut dictum est nulla forma accidentalis excludit propriam subsistentiam ipsius humanitatis; ergo nulla constituit illam capacem alterius subsistentiæ. Et hic possunt accommodari alie rationes supra factæ, quod hæc compositio ex natura, & supposito, neque ex communi ratione sua fit per dispositionem vel capacitatem accidentalem, neque ex speciali ratione, & perfectione hujus unionis ad Verbum, potest medio accidenti hæc capacitas dari. Sicut ergo ipsa unio substantialis est, ita capacitas ad illam est immediate in ipsa natura substantiali per se ipsam, est tamen obedientialis, & non naturalis, sicut etiam capacitas animæ ad gratiam est immediate in ipsa substantia animæ, vel ad charitatem in ipsa voluntate.

Quod si anima per se ipsam est capax hujus unionis, nulla fingi potest necessitas, cur gratia habitualis ad illam requiratur. Quia neque illa necessitas oriri potest ex communi ratione potentia obedientialis, & actus supernaturalis: aliàs ad ipsam etiam gratiam habituales esset necessaria simpliciter alia dispositio prævia in substantia animæ; & de illa quæram, an sit naturalis, an supernaturalis. Nam, si naturalis est, est impertinens, & tantum per obedientialem capacitatem poterit ad supernaturalem formam cooperari. Si vero est supernaturalis, ad illam erit necessaria alia dispositio; & ita procedetur in infinitum; nec inchoari poterit unio inter potentiam obedientialem, & actum supernaturalem, nisi inter aliqua immediate fiat sine prævia dispositione. Et hæc ratio de habitu charitatis etiam procedit, ac de fide, & de lumine gloriæ, ac similibus. Neque etiam potest illa necessitas oriri ex speciali ratione hujus unionis, quia licet superior sit reliquis, tamen nulla ratio assignari potest, cur talem dispositionem requirat. Imo nec declarari potest, quid hæc dispositio conferat, cum ex natura sua non ordinetur ad unionem hypostaticam, ut per se notum est; neque augeat capacitatem obedientialem, quæ ex se immutabilis est. Maxime cum ostensum sit, unionem hanc ad subsistendum, ex genere suo nullam dispositionem postulare: & hancmet unionem sine tali dispositione cum materia fieri.

Tertio modo potest hæc dispositio poni solum ut congruum ornamentum humanitatis Verbo uniendæ, juxta quem modum talis dispositio non est proprie Physice attingens ipsam unionem, sed est quasi ex de-



centia quadam prærequisita, & hoc modo ponunt hanc dispositionem, quam dicunt esse ipsam gratiam habitualement perfectissimam, graves Theologi in 3. dist. 2. D. Thom., qu. 2. ar. 2. Bonaventura ar. 3., qu. 2. Paludanus qu. 2. ar. 3. Gabriel qu. unica, ar. 2., Chartus. qu. 5. Marsil. qu. 10. ar. 1., ad 1. dubium; & eandem indicat Alenf. 3. par. q. 4. memb. 5. Fundamentum esse potest, quia optime fieri potuit, ut humana natura, prius natura quam assumeretur, per gratiam vel alias bonas qualitates ornaretur, & hoc decuit; ergo ita factum est, quia de se ac nude sumpta, videtur non esse decenter præparata ad excellentem unionem. Propter quam causam licet in proprio supposito, cui per se est proportionata, illam non requirat, hic tamen est specialis ratio propter excellentiam divini suppositi. Major probatur, quia humanitas prius natura exstitit, quam assumeretur, & fuit capax actionis, & passionis seu mutationis in ordine ad hanc unionem; ergo & dispositionis. Et confirmatur primo, quia ex parte corporis possumus intelligere pulchritudinem, vel optimam ejus informationem antecessisse per modum congruæ dispositionis; ergo ex parte animæ idem intelligi potest de pulchritudine spiritali, quæ per gratiam fit. Confirmatur secundo quia gratia, præsertim quæ est in essentia animæ, non ordinatur immediate ad operationem, sed ad conferendum animæ quoddam esse divinum, simile divinæ naturæ, cujus ipsa est participatio; sed per esse naturæ, seu per participationem ejus optime disponitur res ad esse personale; ergo, &c. Tandem confirmatur, quia vel implicat contradictionem, hujusmodi dispositionem præcedere, vel non. Primum horum a nemine asseritur; quæ est enim repugnantia? Si autem non implicat, dicendum videtur ita factum esse, quia hoc est decentius, & quia in hoc mysterio mensura operandi est potestas facientis.

Unio hy.  
pothetica  
sine me-  
dia d. f.  
positio-  
ne  
facta est.

Nihilominus dicendum est, hanc unionem non esse factam media aliqua dispositione proprie dicta, quæ fuerit causa illius. Hæc sententia sumitur ex D. Thoma hic ar. 10. & infra qu. 6. ar. 6. & qu. 7. ar. 13. Scoto in 3. dist. 2. qu. 2. Richardo ar. 2. qu. 3. Durando qu. 3. Et eadem tenent Capreol. Cajet. & omnes Thomistæ. Et probatur primo hæc conclusio, quia hæc dispositio, vel debuit præcedere in anima, vel in corpore; neutrum dici potest; ergo. Consequentia probatur, quia licet aliqua dispositio possit præintelligi in humanitate, tamen necessario debet in ea esse, vel ratione animæ, vel ratione corporis, & ita omnis dispositio, quæ fingi potest sub illo duplici membro comprehenditur, præsertim cum supponamus, unionem prius natura factam esse ad partes, quam ad totum, seu ad totum mediis partibus. Probat ergo minor, & de anima quidem probatur primo, quia talis dispositio non potuit esse nisi aliquis habitus infusus, vel essentia, vel potentiis animæ; sed hoc esse non potuit, quia habitus, cum sit accidens, supponit esse simpliciter, illa autem anima ante assumptionem non habuit esse simpliciter, cum per unionem fuerit ad hoc esse assumpta. Hac ratione utuntur Thomistæ, sed juxta eorum opinionem non videtur multum efficax, quia ipsi concedunt, dispositiones prius natura præparare materiam ad formam, quamvis per formam detur materiæ esse simpliciter; ergo similiter dici posset in præsentia. Deinde juxta nostram sententiam, videri potest infirma hæc ratio, quia ponimus per creationem prius natura habuisse animam illam existentiam substantialem, quam fuerit unita ad subsistentiam; ergo per illam existentiam potuit esse capax hujus dispositionis.

Nihilominus hæc ratio videtur mihi sufficiens, quam ita explico, quia anima rationalis ex natura sua prius natura subsistit, quam accidentaliter perficiatur; ergo etiam anima Christi prius natura subsistit in Verbo, quam accidentaliter perficiatur; ergo per nullam accidentalem formam potest disponi, & præparari ad illam unionem. Antecedens patet, primo, quia subsistentia est modus magis intrinsecus formæ subsistenti, quam omne accidens ejus, unde si ab illa resultat, ut sup. diximus, prius natura resultat, quam omnis passio, vel perfectio accidentalis, quia pertinet ad complementum ipsius substantiæ. Si vero sit ab ipso agente generante vel creante, etiam illius actio non intelligitur omnino completa, & terminata, donec attingat ipsam subsistentiam, quia illa actio tendit primo ad producendam substantiam suo modo com-

pletam in suo genere. Secundo, quia nulla dispositio accidentalis est causa ipsius subsistentiæ, seu naturalis compositionis ex natura, & subsistentia, quia cum talis subsistentia solum sit modus intrinsecus ipsius naturæ, qui per se intime illi conjungitur, nullo mediante alio modo unionis, non potest magis intelligi dispositio medians inter naturam, & subsistentiam, quam inter quantitatem & figuram suam. Jam ergo ex hac parte nulla dispositio est prior ipsa subsistentia. Aliunde vero subsistentia est aliquo modo causa accidentalium perfectionum, quatenus substantia est subiectum earum, & subsistentia est complementum substantiæ, atque adeo conditio prærequisita in tali subiecto. Prima vero consequentia probatur, tum quia cum per hanc unionem anima sit assumpta ad subsistendum, debuit eo ordine naturæ uniri, & assumi, quo de se deberet subsistere proprio termino, nam sicut modus propriæ subsistentiæ est maxime intrinsecus, ita modus existendi in alieno supposito, est maxime intrinsecus, & substantialis. Tum etiam, quia prius natura est impedita subsistentia propria in anima Christi, quam intelligatur perfecta per gratiam accidentalem, quia cum illa subsistentia ex natura sua sit prior, si non fuisset impedita, etiam de facto antecessisset; sed non impeditur nisi per unionem ad verbum; ergo hæc unio in eodem signo naturæ facta est, in quo deberet esse propria subsistentia, & ideo impossibile est, ut aliqua dispositio accidentaliter ordine naturæ antecesserit. Et confirmatur quia si habitualis dispositio potuisset præcedere, eadem ratione etiam potuisset actualis, quæ est per operationem; ergo posset illa anima mereri saltem de congruo suam unionem, quod statim ostendimus esse falsum.

Secundo principaliter probatur hæc sententia, quia si aliqua potuisset esse hæc dispositio, maxime gratia habitualis; nulla enim est excellentior qualitas, nec magis ornans animam; sed hæc non, quia data est ratione unionis, ut proprietates consequens illam, juxta illud Joan. 1. *Vidimus gloriam ejus, gloriam quasi Unigeniti a Patre, plenum gratia & veritatis.* Quod dupliciter declaratur, primo, ex modo loquendi per causales propositiones. Christi enim humanitas non ideo fuit assumpta, quia fuit tam grata, sed potius e contrario, quia assumpta fuit, ideo tanta gratia ornata est. Secundo, propter hanc causam gratia habitualis Christi non est gratia adoptionis, quia datur ratione unionis, non tanquam extranea, & intrinseca, sed tanquam proprietates debita ratione unionis.

Dices: non repugnat eandem qualitatem esse proprietatem manantem ex forma, & disponentem ad illam, atque adeo posteriorem in genere causæ efficientis, & priorem in genere causæ materialis; ita ergo posset dici in proposito. Respondent aliqui, antecedens esse verum in qualitatibus, quæ simul sunt proprietates, & passibiles, ut est calor, verbi gratia, gratiam vero non esse passibilem qualitatem. Sed hæc ni fallor est petitio principii, nam gratia de se etiam non est proprietates manans ex aliqua forma, seu ex aliqua priori gratia, unde quatenus per propriam actionem per se primo fieri, potius habet modum passibilis qualitatis, quam proprietatis, quando vero conjungitur cum gratia unionis dicitur proprietates ejus, quia ratione illius datur; cur ergo negatur esse passibilis qualitas? Certe si ratio hujus redditur, solum quia non disponit ad unionem, principium petitur, nam hoc est, quod agimus. Si vero ratio detur, quia est proprietates, contra hoc procedit ratio facta. Respondeo ergo, duplicem esse dispositionem formæ, alteram aptantem subiectum ad formam, & prius tempore vel natura præparantem illud, & de hac dispositione hic agimus, quam nego esse posse proprietatem consequentem formam, quod Div. Thomas, dicta quæst. 7. art. 13. ad secundum indicavit, dicens. In iis, quæ in instanti fiunt, proprietates consequentes formam non intelligi naturam illam antecedere. Hoc ergo modo gratia habitualis est proprietates gratiæ unionis, & non dispositio ad illam. Alio tamen modo potest dici dispositio, non præparans subiectum ac formam, sed ornans subiectum informatum, & perficiens, ut melius se habeat, vel ut melius operetur, & hoc modo potest proprietates manans ex forma dici dispositio, & sic etiam gratia habitualis potest quodam modo dici dispositio humanitatis unitæ Verbo, non ad unionem, sed ex unionem, quomodo D. Thomas, infra, q. 7. ar. 12. in corp.

& ad



& ad 2. dicit, hanc gratiam in Christo ordinari ad unionem, ut ad finem, non cuius gratia (sic enim ordinatur ad operationem), sed ut ad finem cui, quia scilicet deservit, & congruit unioni, quo modo etiam, q. 8. ar. 5. ad 3. dicit gratiam habitualemente efficere congruitatem ad unionem, non antecedenter, sed consequenter; sicut si Rex ducat uxorem vilis conditionis, & ideo illam ornet cultu regio; vel sicut pulchritudo est dispositio corporis humani perficiens, & ornans, non præparans. Idem habet D. Thom. q. 29. de verit. ar. 2.

Ultimo probatur, quod neque ex parte corporis potuerit præcedere propria aliqua dispositio ad unionem. Primo quidem propter rationem factam de substantia, quæ ordine naturæ antecedit formas accidentales, illa enim etiam in materia locum habet. Secundo quia omnis dispositio, quæ potuit antecedere in corpore Christi, præsertim possibili (quale fuit assumptum) est inferioris ordinis, & mere naturalis, unde non proprie potuit esse dispositio proxima ad unionem. Dices. Saltem potuit esse dispositio ad talem formam rationalem. Constat enim corpus, seu materiam, ex qua humanitas Christi concepta fuit, non fuisse unitam Verbo, nisi quatenus erat corpus humanum, id est, & organicum, & ultimo dispositum ad talem animam rationalem; ergo necesse est in illa materia, vel corpore antecessisse aliquas dispositiones non quidem præparantes proxime illam materiam ad unionem hypostaticam, sed ad formam rationalem, quia non propter se assumebatur materia, ut sic, sed ut pars humanitatis, quæ includit prædictas dispositiones. Si autem ratio illa sumpta ex parte substantiæ, quod debeat ordine naturæ antecedere dispositiones accidentales esset efficax, etiam istæ dispositiones materiæ ad formam non potuissent natura antecedere unionem.

Obiectio.

Responsio

Respondetur, si loquamur de accidentibus, seu qualitatibus, quæ toto tempore antecedunt ante instantis generationis, illæ optime potuerunt tempore præcedere in materia, ex qua formatum fuit corpus Christi, quia toto illo tempore subsistebat substantia creata sub forma sanguinis: si vero loquamur de dispositionibus ultimis, quæ sunt in instanti generationis, sic loquendo consequenter, philosophice dicendum est has dispositiones simpliciter non præcessisse ordine naturæ in materia corporis Christi ante unionem, sed illam materiam in illo instanti fuisse assumptam, ut in eodem vel ultimo disponeretur ad formam rationalem, & consequenter in eodem instanti ea informaretur: vel e contrario ut per formam rationalem etiam Verbo unitam informaretur, ad quam statim ordine naturæ consequenter dispositiones ultimæ conservantes, seu perficientes compositum ex materia & forma, juxta varias Philosophorum opiniones de ordine causalitatis & naturæ, qui inter formam & ultimam dispositionem servatur. Et hoc satis est; ut dicatur corpus Christi assumptum ut humanum, ut infra q. 6. latius dicturi sumus. Dices: dispositiones ultimæ juxta probabiliorem Physicam opinionem sunt eadem numero qualitates cum dispositionibus remotis: ergo cum hæc prius tempore inhærerent materiæ, necesse est, ut in instante conceptionis Christi manserint in eadem materia, etiam pro quolibet signo naturæ prius quam assumeretur a Verbo. Respondetur negando consequentiam, quia prout conservantur in illo instanti, ordine naturæ supponunt unionem ad Verbum, ut latius dicam inferius, qu. 6. disp. 17. sect. 6.

Ad fundamentum tertiæ sententiæ ex dictis facilis est responsio. Nam quia humana natura nude sumpta non est per se sufficienter ornata, prout decet personam Verbi, ideo congruentissimum fuit, ut haberet optimas dispositiones, & perfectiones consequentes unionem. Quod autem illæ ordine naturæ in humanitate præcesserint, & vix fieri potuit (ut ostendimus) & non oportuit, nam potius decuit, ut substantialis conjunctio Verbi ad humanitatem antecederet omnem accidentalem influxum, ut ipsum Verbum esset fons totius boni manantis in humanitatem illam. Nec refert, quod prius natura humanitas, seu anima extiterit, quia oportet, ut substantia prius natura antecedit, ut ostensum est. Neque etiam est argumentum simile de actione, vel mutatione, quæ fit ipsa unio, quia hæc est veluti via ad subsistendum in alieno supposito, & ad impediendam pro-

Suarez Tomo XVI.

priam subsistentiam, & ideo propter hunc intrinsecum ordinem, necesse est, ut ratione vel natura sit prior, quam unio in facto esse. Aliæ vero actiones, vel qualitates accidentales non habent hunc ordinem ad unionem, vel subsistentiam, sed potius ex natura sua illam supponunt, & propter hanc causam non potest esse similis ratio.

Et per hæc ad confirmationes alias satis responsum est, præterquam ad ultimam, in qua inquiritur, an de potentia absoluta potuerit gratia habitualis (& idem est de similibus qualitatibus) ordine naturæ antecedere unionem tanquam dispositio ad illam: nam discursus factus vel efficax non est, vel absolute procedit de quacunque potentia, quia fieri nullo modo potest, quin substantia sit magis intrinseca naturæ, quam accidentia. Nec fieri etiam potest, quin accidentia, quantum est ex se, substantiam præsupponant; qui ordo immutari non potest, quia natura substantiæ & accidentium semper eadem manet; & in eo ordine solo consistit, quod unum sit prius natura alio. Et confirmatur præterea ex dictis, nam, si Deus potuit facere, ut gratia habitualis esset dispositio ad unionem; unde constare potest, id non fecisse? Pendet enim ex ejus libera voluntate: non potest autem efficaci ratione ostendi, qualis illa voluntas fuerit, quia nullus est effectus, qui necessario illam ostendat. Si autem congruentius utendum est, non minus efficaces asserri possunt ad suadendum, voluisse Deum ordinare gratiam Christi habitualemente, ut esset conveniens dispositio ad gratiam unionis. Primo, quia, licet gratia habitualis ex natura sua non sit dispositio ad superiorem gratiam; tamen ei non repugnat ad hoc munus ordinari ex intentione extrinseci agentis: ergo hoc ipso, quod Deus tanquam supremum agens voluit, utramque gratiam habitualemente & unionis humanitati Christi conferre, pertinuit ad sapientiam ejus, eas veluti conjungere, seu subordinare omnibus modis, quibus id convenienter fieri posset; est autem valde conveniens, ut inferior gratia ad superiorem ordinetur tanquam dispositio ad formam. Secundo, quia in B. Virgine ordinavit Deus gratiam habitualemente, ut dispositionem convenientem ad conceptionem Filii Dei: imo omnis gratia & favores seu privilegia gratiæ concessa priscis Patribus, & præcipuis progenitoribus Christi, imo & universo populo Israelitico, fuit veluti quadam dispositio & præparatio ad Christi incarnationem: ergo multo magis credendum est, ipsammet humanitatem assumendam a Verbo fuisse ornatam ac præparatam illa perfectissima dispositione, si hoc fuit possibile. Tertio tandem declaratur humano exemplo; nam, si Rex ducturus esset uxorem inferioris conditionis, prius quam illam duceret, eam, quantum posset, ornaret ac nobilitaret: sic ergo Verbum assumpturum humanitatem, credendum est, prius illam deificasse per gratiam sanctificantem, si id fieri potuit: ergo e contrario, si id factum non est, non est alia ratio prætermisum, nisi quia fieri non potuit: vel (ut proprius loquamur) quia humanitas, ut prior substantia propria & unione, quæ illam impediatur, seu suppleat vicem ejus, non est capax talis dispositionis, præparantis illam ad unionem. In contrarium autem est primo, quia videtur novum & inusitatum dicere, hoc esse impossibile; quæ est enim in hoc implicatio contradictionis? Secundo, a simili declaro nullam esse, nam, cum gratia unionis & gratia habitualis in eodem instanti collatæ sint animæ Christi, nulla est repugnantia, quod per gratiam habitualemente tanquam per instrumentum Deus effecerit gratiam unionis: suppono enim ex dictis sect. præc. non repugnare assumi creaturam ut instrumentum Physicum ad hunc effectum: quod si aliis non repugnat, nec repugnat gratiæ habituali secundum se: quia non est illa magis inepta vel improporcionata, quam aliæ res vel qualitates: imo, quo propinquior est supremo ordinis, eo videri potest magis apta, vel minus repugnans. Quod si gratiæ ut sic non repugnat, nec gratiæ illi, quæ animæ Christi infusa est, repugnavit in instanti incarnationis, cum in illo habuerit existentiam & entitatem suam. Potuit ergo de potentia absoluta esse prior natura, quam gratia unionis; ergo eadem ratione potuit esse dispositio ad illam, vel ad substantiam Verbi ut communicandam humanitati: nam juxta principia etiam Philosophica causalitas dispositiva & effectiva non repugnant simul convenire eidem formæ: imo dispo-

Dubium;  
an de po-  
tentia ab-  
soluta  
possit  
gratia  
habitua-  
lis esse  
dispositio  
ad unionem  
hypostaticam.



sitio prævia, si sit ultima, communiter creditur esse instrumentum ad introducendam formam. Quod si potest Deus, utramque causalitatem simul conferre gratiæ habituali respectu unionis, poterit etiam illam ordinare per modum dispositionis sine causalitate effectiva, quia nulla est necessaria connexio inter illas causalitates: & quia, si non repugnat gratiam accidentalem esse priorem naturæ subsistentia, seu substantiali unionem, non est cur repugnet habere hanc prioritatem solum in genere causæ dispositivæ. Tertio declaratur a simili, quia causæ dispositiva non est semper Physica, sed interdum moralis, ut patet de actu contritionis, qui est in voluntate respectu gratiæ habitualis, quæ in essentia animæ infunditur: & tamen ille ordo vel habitudo moralis sufficit ad prioritatem naturæ, sic adeo ut multi existiment, non posse actum contritionis effectivè procedere ab habitu, ad quem disponit, solum propter prioritatem naturæ, quam in genere dispositionis habet respectu illius: ergo similiter in præsentī, quamvis gratia habitualis non sit Physica dispositio ad gratiam unionis, ut re vera non est, quod maxime videntur convincere rationes superius factæ in confirmationem nostræ sententiæ, nihilominus poterit Deus ea uti tanquam congruente dispositione morali, ut humanitas sit decenter præparata ad unionem: & hoc fati erit ad quandam naturæ prioritatem.

*Implicat, si sit ultima, communiter creditur esse instrumentum ad introducendam formam. Quod si potest Deus, utramque causalitatem simul conferre gratiæ habituali respectu unionis, poterit etiam illam ordinare per modum dispositionis sine causalitate effectiva, quia nulla est necessaria connexio inter illas causalitates: & quia, si non repugnat gratiam accidentalem esse priorem naturæ subsistentia, seu substantiali unionem, non est cur repugnet habere hanc prioritatem solum in genere causæ dispositivæ. Tertio declaratur a simili, quia causæ dispositiva non est semper Physica, sed interdum moralis, ut patet de actu contritionis, qui est in voluntate respectu gratiæ habitualis, quæ in essentia animæ infunditur: & tamen ille ordo vel habitudo moralis sufficit ad prioritatem naturæ, sic adeo ut multi existiment, non posse actum contritionis effectivè procedere ab habitu, ad quem disponit, solum propter prioritatem naturæ, quam in genere dispositionis habet respectu illius: ergo similiter in præsentī, quamvis gratia habitualis non sit Physica dispositio ad gratiam unionis, ut re vera non est, quod maxime videntur convincere rationes superius factæ in confirmationem nostræ sententiæ, nihilominus poterit Deus ea uti tanquam congruente dispositione morali, ut humanitas sit decenter præparata ad unionem: & hoc fati erit ad quandam naturæ prioritatem.*

In hac difficultate certum in primis videtur, non posse fieri, etiam de potentia absoluta, ut gratia vel ex se, vel ex aliqua elevatione divina, sit dispositio Physica & quasi naturalis ad unionem hypostaticam. Hoc constabit facile, si declaratur, in quo consistat ratio huiusmodi Physicæ dispositionis præviæ ac præparantis subiectum ad formam (de hac enim loquitur.) Non enim consistit in hoc solū, quod ipsa sit forma Physice ac realiter actuans subiectum ac perficiens illud (hoc enim habet etiam dispositio moralis); sed ultra hoc requiritur, ut inter illam & formam sit intrinseca, realis, ac naturalis connexio, ut supra etiam dictum est. Ita ut, si illa dispositio sit ultima, ut est illa, de qua agimus, nec sine illa possit servata rei natura, introduci forma, neque etiam possit, illa posita, non introduci forma, quæ ob naturalem connexionem debetur subiecto ex vi talis dispositionis. Quæ descriptio physicæ dispositionis non aliter probatur, quàm ex communi usu Philosophorum, ex quo huiusmodi descriptiones petendæ sunt, quia potius sunt explicationes terminorum, quam rerum. Nec posset facile alia ratio physicæ dispositionis excogitari. Constat autem, gratiam habitualement ex se non habere realem connexionem cum gratia unionis, ut probant manifeste rationes factæ. Et amplius declaratur, quia gratia habitualis, in quantacunque intensione existat, est inferioris ordinis a gratia unionis, & natura sua composibilis est cum subsistentia creata: ergo ex natura sua nec determinat subiectum, in quo inest, ad unionem hypostaticam; neque illi debetur debito connaturalitatis. Et confirmatur, quia gratia habitualis ex vi suæ specificæ naturæ non ordinatur ad gratiam unionis, sed ad visionem beatam, qua consecuta, dicitur consummata, quia jam est in suo proprio & connaturali statu: ergo ex se non est connaturalis dispositio postulans gratiam unionis. Rursus e contrario gratia unionis talis est, ut non requirat physicam dispositionem in subiecto, propter rationes supra factas, scilicet, quia illa dispositio nec conferre potest ad removendum impedimentum contrariæ formæ, vel dispositionis, quia nullum est tale impedimentum, nisi fortasse subsistentia propria naturæ assumenda, quæ per nullam accidentalem dispositionem excludi potest. Neque etiam conferre potest ad præparandam physicæ naturam hypostaticè uniendam, quia illa natura ex se habet capacitatem obedientialem, quæ neque augetur, neque immutatur propter dispositiones accidentales, quæ non possunt etiam physicæ deservire ad ipsum actuale vinculum inter naturam & personam, tum quia hoc vinculum est omnino substantiale; tum etiam quia unio, cum substantialis sit, non potest immediate recipi in gratia accidentali, sed in ipsa substantia naturæ. Unde confirmatur tandem, quia unio hypostatica natura sua non pendet a gratia habituali: sicut nec subsistentia propria pendet ab aliqua prævia dispositione naturæ. Atque hinc tandem concluditur, non potuisse Deum adungere his gratiis hoc vinculum seu habitudinem dispositionis physicæ &

formæ: quia non potest immutare earum naturas, seu essentias, in quibus nulla talis connexio vel habitudo reperitur. Item, quia vel Deus id faceret addendo aliquid gratiæ habituali, vel nihil addendo. Neutrum dici potest. Primum probatur, tum quia intelligi non potest, quale esse posset illud additum, nisi fortasse aliqua magna & excellens intensio, de qua ita procedunt rationes factæ, sicut de ipsa gratia; tum etiā quia, si aliquid aliud esse fingatur, præter intensiōem, jam illud non esset gratia habitualis, sed aliqua alia dispositio, contra quam poterunt applicari eadem rationes, quia etiam illa esset accidentalis dispositio, & inferioris ordinis. Altera pars probatur, quia gratia eodem modo se habens, eodem modo disponit subiectum. Dices: cur potest Deus per qualitatem aliquam, nihil ei addendo, physicè aliquid efficere, quod illa qualitas ex natura sua facere non poterat, & similiter non poterit per aliquam qualitatem eodem modo se habentem, & nihil ei addendo, physicè disponere subiectum ad aliquam formam, quamvis illa qualitas ex natura sua non possit eum effectum conferre in eo genere causæ? Respondetur, rationem differentiæ esse claram; nam forma non disponit physicè nisi informando subiectum cum tali proportionem ad aliam formam, effectus autem formalis, cum sit maxime intrinsecus, non potest variari, forma invariata manente, effectus autem in genere efficientis cum sit extrinsecus, variari potest. Unde ad effectum formalem non est in rebus potentia obedientialis, sed naturalis tantum, secus vero est ad efficiendum, ut infra quæst. 13. videbimus. Existente autem eadem forma, & eodem effectui formali, necesse est, ut sit etiam eadem proportio ad aliam formam, quia hæc nihil aliud est, quam relatio quædam, vel ad modum relationis, quæ necessario confurgit, posito fundamento & termino: unde his eodem modo se habentibus, illam etiam eodem modo se habere necesse est. Hac ergo de causa nullo modo fieri potest, ut gratia habitualis sit Physica dispositio ad unionem.

An vero alio modo potuerit esse dispositio quasi moralis, videndum superest. Quibusdam enim videtur non repugnare, quod per extrinsecam ordinationem agentis gratia potuerit esse dispositio præparans animam ad unionem, solum, quia Deus voluerit ita unam gratiam ad aliam ordinare. Primo, quia in hoc nulla apparet implicatio contradictionis, ut argumenta supra facta declarant; & quia sicut Deus libere confert hæc dona, ita etiam liberum ei est unum eorum ad aliud ordinare, prout ipse voluerit. Secundo quia aliàs neque etiam posset Deus conferre Christo gratiam habitualement, ut proprietatem consequentem unionem; maxime si supponamus, quod ostendimus infra, gratiam habitualement non manere Physicè a gratia unionis. Sequela autem patet, quia gratia habitualis ex se & ex natura sua non postulat, ut sit proprietas gratiæ unionis, neque unquam est proprietas Physicæ: ergo, si Deus sua voluntate facit, ut sit proprietas moralis, poterit etiam facere, ut sit moralis dispositio: vel, si hoc non potest, neque illud poterit. Tertio in hunc modum declaratur, nam, licet gratia unionis Physicè non pendeat a gratia habituali, Deus tamen potuit facere, ut moraliter pendeat quasi per denominationem ab extrinseca voluntate agentis, quia potuit hac lege velle, humanitati conferre gratiam unionis, si esset ornata tanta gratia habituali, & non aliàs: nulla est enim in hoc repugnantia: hoc autem genus dependentiæ ad dispositionem pertinet. Quarto, potuisset Deus, humanitatem Christi creare in propria persona, & ordinare, ut suis actibus tantam gratiam obtineret, qua se disponderet ad unionem hypostaticam tali tempore vel momento recipiendam, quod omnes admittunt, quia nulla est repugnantia, ut infra sect. 5. patebit: ergo in uno instanti potest Deus sua voluntate hanc gratiam cum hoc ordine dispositionis conferre. Ultimo, quamvis hoc sit possibile, non sequitur ita factum esse, quia alius ordo est magis consentaneus naturis rerum, ut rationes superius factæ probant, & quas D. Thom. adducit infra qu. 7. art. 13. tam ex parte Verbi, quod, cum sit lumen per essentiam, antecedere debet participationem luminis, quod est gratia, sicut solis præsentia antecedit illuminationem aeris; & quia cum sit secunda Trinitatis persona, prior origine, quam persona Spiritus sancti, ejus missio, quæ est per gratiam unionis, antecedere debet



debet missionem Spiritus sancti, quæ est per gratiam sanctificantem. Tum ex parte ipsius gratiæ, quæ cum sit accidentalis, supponit substantialem, & cum ordinetur ad actionem, supponit suppositum constitutum, quia, sicut actiones sunt suppositorum, ita etiam proxima principia agendi. Tum ex parte ipsius humanitatis, cujus magna dignitas, maximumque privilegium est, quod primum donum ei collatum fuit ipsum Verbum, & unio ad illud: ex quo dono tantum ex primo fonte cætera gratiæ dona in illam profluxerunt.

Nihilominus, seclusa efficientia Physica inter has duas gratias, de qua dicam in solutione argumentorum, existimo nullo modo immutari potuisse hunc ordinem naturæ, quem inter gratiam sanctificantem & unionis fuisse ostendimus; & consequenter gratiam habitualement non potuisse esse dispositionem præviæ præparantem humanitatem ad unionem, sed solum consequentem & ornantem humanitatem jam unitam. Probatur primo, quia, si Deus immutaturus esset hunc ordinem, quid quæso aliter esset facturus, quam nunc fecit? Nam, si nihil aliter faceret, neque habitudo moralis in ratione dispositionis, alia esset. Si vero aliquid esset aliter operaturus, declararetur, quid illud sit: quod certe fieri non poterit. Quod alio modo sic declaro: nam, vel illa nova ratio, seu habitudo dispositionis moralis conveniret gratiæ ex aliqua intrinseca proprietate ejus; vel solum per denominationem extrinsecam ex intentione Dei ordinantis unum ad aliud. Primum dici non potest, ut facile potest ostendi argumentis supra factis de dispositione Physica, quæ procedunt de quacunque qualitate, cujuscunque naturæ vel proprietatis sit, & quia gratia habitualis non potest habere aliam intrinsecam naturam vel proprietatem, quam nunc habet, sed tantum majorem vel minorem intensionem, quæ non refert. Et denique quia nunc non agimus nisi de hac gratia habituali, quæ Christus habet, nulla interveniente mutatione intrinseca in entitate ejus. Secundum etiam dici non potest; primo quidem, quia sola extrinseca intentio agentis potest variare denominationem finis & medii, ut actu voliti & electi propter talem finem, quia hæc habitudo convenit medio per solam extrinsecam denominationem: non potest tamen variare habitudinem in ratione dispositionis præviæ, vel consequentis; quia hæc non est posita in sola ordinatione agentis, sed in aliqua alia causalitate, vel physica, vel morali, quæ non ad causalitatem finis, sed vel ad materialem, aut unam ex aliis revocatur. Potestque hæc causalitas in hunc modum declarari, etiam in morali dispositione, quæ aliquo modo sumenda sit in ordine ad agens extrinsecum, & ad intentionem seu voluntatem ejus; nam, quod ordinatur ad finem ut mediū, non præsupponitur ut existens, vel futurum, ut sic ordinetur, seu sit volitum; sed potius, quia est sic volitum, futurum est; per illam enim voluntatem, quæ Deus ordinat illud ad finem, ordinat etiam illud ut sit. At vero dispositio, sive Physica sit, sive moralis, si consideretur in ordine ad agens, licet in ratione medii sit ex præordinatione agentis, tamen ut exercet munus præviæ dispositionis, non movet agens ad inducendam formam, nisi ut præexistens in subiecto; & ita in ordine ad agens naturale præviæ dispositio Physica necessitat illud, ad talem formam inducendam: in ordine vero ad agens liberum inducit illud, & quantum est; ex se determinat, quod etiam suo modo participat dispositio moralis & nisi hoc habeat, non potest ulla ratione dispositio præviæ seu præparans appellari. Quod declaratur exemplo contritionis; ideo enim est dispositio ad gratiam vel remissionem peccati, quia illa ut posita in homine, seu ut exercita, movet, & quantum est de se determinat Deum ad conferendum effectum gratiæ & remissionis peccati; cujus signum etiam est, quia juxta mensuram contritionis infunditur gratia, & fit peccati remissio: hæc ergo ratio & causalitas dispositionis non consistit, nec consistere potest in hoc solum, quod ab extrinseco agente ordinetur ad aliam formam, sed in hoc potius, quod ratione illius talis forma infundatur, & secundum aliquam commensurationem ad illam, quomodo vere dicimus B. Virginem, ratione talis sanctitatis, humilitatis, aut virginatis, factam esse digne capacem maternitatis divinæ, & inclinasse Deum, ut sibi talem dignitatem conferret.

Atque hinc fit, quod ut aliqua sit vera dispositio, ne-

cesse est, ut ex se præsupponi possit secundum existentiam ad id, ad quod esse dicitur dispositio, ut sic movere possit, seu determinare agens ad inducendam formam. Hunc autem modum præsuppositionis non potest habere gratia habitualis respectu gratiæ unionis, quia ante illam non habet subiectum accommodatum, in quo possit inherere, neque extrinseca ordinatio Dei potest hoc mutare, non conferendo subsistentiam, quia ille ordo naturæ est intrinsecus ipsis rebus, quæ omnino eadem & eodem modo manent: ergo ex sola extrinseca ordinatione non potest esse unum prius natura alio in ratione dispositionis, nisi in ipsis rebus secundum se sit sufficiens fundamentum talis ordinis. Unde omnes nunc fatemur, Deū ordinasse gratiam sanctificantem Christi ad gratiam unionis, non ut ad finem, qui acquiritur, sed ut ad finem, cui inserviat: quomodo proprietates ordinantur ad essentiam, a qua dimanant, ut ad finem, & tamen non concedimus ordinari illam gratiam ad unionem ut dispositionem præparantem ad formam, quia non intelligimus illam ut determinantem Deum ad inducendam talem formam, neque etiam ipsam unionem intelligimus fieri secundum aliquam commensurationem ad talem gratiam habitualement, sed e contrario potius gratiam intelligimus conferri proportionatam unioni, juxta illud Joan. 1. *Vidimus gloriam ejus, gloriam quasi Unigeniti a Patre*. Ex his ergo omnibus concluditur ratio, quia gratia habitualis, ex sola voluntate Dei extrinseca, non potest inducere rationem dispositionis, nisi ejus causalitatem aut Physicam, aut moralem participet. Sed non potest Physicā participare, ut ostensum est. Nec moralem, quia, ut dictum est, non potest Deus determinari ad conferendam unionē huic humanitati, eo quod videat ipsam tali gratia affectam, quia, ut illam tali gratia afficiat, necesse est, ut prius illam efficiat subsistentem in se, vel in alio: quia hic modus intrinsece præsupponitur ex parte subiecti ad accidentalem unionem. Et confirmatur hæc ratio, nam, si Deus vellet dare humanitati Christi gratiam habitualement ut dispositionem præviæ ad unionem, quo alio modo illam conferret, quam modo contulit? Certe nullus alius excogitari potest, neque ex parte effectus, neque ex parte Dei. Non quidem ex parte effectus, quia, ut supponitur, etiam tunc daretur utraque gratia in eodem instante, & accidentaliter gratia necessario supponeret substantialem, quia esset actu inherens, & ut sic ab intrinseco supponit subiectum existens & subsistens in se, vel in alio, & e converso gratia unionis ex se & natura sua non magis penderet a gratia sanctificante, quam nunc pendet: ergo ex parte effectus nihil excogitari potest, propter quod tunc magis haberet gratia rationem dispositionis præviæ, quam nunc habet. Neque etiam ex parte Dei, quia talis Dei voluntas in effectu manifestanda esset, nec potest variare inter res ipsas modum causalitatis, nisi variet etiam dependentiam vel habitudinem. Dices: posset velle, ut gratia unionis penderet a gratia sanctificante, ita ut non aliter vellet unionem facere, nisi in anima habente talem gratiam. Respondetur; si per dependentiæ nomen solum intelligamus illam mutuam connexionem inter illas duas gratias in ordine ad voluntatem Dei operantis, concedo, posse Deum facere has gratias cum hac connexionē, imo verisimile est ita nunc voluisse ac fecisse, quia non nisi optimo & decretissimo modo voluit hoc mysterium operari: sed ex hac connexionē non sequitur, gratiam habitualement fieri dispositionem præviæ ad unionem, quia potest illa connexio esse, non tanquam dispositionis præviæ, sed tanquam proprietatis necessario consequentis. Nec poterat aliter esse volita illa connexio, quia aliunde illa proprietas gratiæ necessario supponit unionem. Sicut substantia animæ necessario est connexa cum potentia intellectiva, & ut sic dici potest aliquo modo pendere ab illa, ut supra explicatum est, non tamen propterea dici potest intellectus dispositio præviæ ad animam, neque ullus Philosophorum ita loquitur: sed est proprietas & dispositio consequens & ornans animam. Et Deus, qui, ut author naturæ vult illam connexionem, non potest aliter illam velle, supposito, quod vult, intellectum non esse, nisi inherentem ipsi animæ.

Ad ultimam ergo confirmationem concedo, hujusmodi causalitatem esse impossibilem gratiæ habi-

Habitudo  
lia gratia  
ad hypo-  
stasticam  
unionem  
ordinata  
est, ut ad  
finem, ad  
quem a li-  
quo mo-  
do con-  
fere.

Objeccio.

Solutio.



Acciden-  
taria per-  
fectio ad  
substan-  
tiale com-  
plementū  
dispositio  
esse ne-  
quit.

Non im-  
plicat ab-  
solute  
gratiam  
habitu-  
alem esse  
instrumē-  
tum Phy-  
sicum ad  
efficiendā  
unionem  
hypostati-  
cam, se-  
cus, si si-  
mul natu-  
ra ambæ  
gratiæ  
produ-  
cantur.

Ad 3. fœ-  
ludio.

Rationi-  
bus oppo-  
sitæ sen-  
tentia: si  
fatis.

tuali respectu gratiæ unionis propter intrinsecam & inseparabilem habitudinem, seu ordinem, quo secundum propriam rationem, seu ordinem naturæ illam præsupponit in ea natura, quæ non habet substantiam propriam, sed impeditam per unionem; sicut est impossibile, ut in natura habente propriam substantiam gratia, aut alia forma accidentalis sit dispositio prævia, vel Physica, vel moralis ad ipsam substantiam, propter rationem sæpe factam, quod substantiale complementum natura sua præsupponitur ad accidentarias perfectiones, qui ordo est inseparabilis a rebus, quia ab ipsis non distinguitur; & quia ante substantiam non intelligitur natura habere statum, in quo possit accidentia sustentare: hic autem ordo est directe repugnans ordini dispositionis præviæ, ut satis declaratum est.

De Physica autem efficientia (quod in secunda probatione in contrarium inquiritur) varii possent esse dicendi modi; tamen, consequenter loquendo, dicendum videtur, quod licet simpliciter non repugnet, Deum uti gratia habituali ut instrumento Physico ad efficiendam unionem hypostaticam, ut argumentum recte probat; nihilominus tamen repugnare, ut, quando utraque gratia simul confertur eidem naturæ, gratia unionis fiat effectiva a gratia habituali: quia causa efficiens simpliciter præsupponitur in extendendo ordine naturæ ad suū effectum, nec potest illum simpliciter præsupponere, quia efficere supponit esse: gratia autem habitualis inhærens naturæ unitæ Verbo, necessario supponit ordine naturæ unionem, ut ostensum est: ergo. Et confirmatur ac declaratur illo simili; nam Deus, creando animam substantem affectam intellectu & voluntate, non potest illomet intellectu uti ut instrumento ad efficiendā ipsam. met animam, in qua inhæret, vel substantiam ejus: ergo similiter, &c. Ratio denique explicatur in hunc modum, quia ut accidens inhærens efficiat simpliciter supponi debet sustentatum in suo esse a subiecto, in quo inhæret, quia non aliter existit, neque per aliam actionem, nisi quæ est ex subiecto; non potest autem subiectum sustentare accidens, nisi vel ipsum subsistens sit, & quasi se ipsum sustentans, vel sustentatum ab alio, tanquam subsistens in illo: ergo de primo ad ultimum, non potest accidens inhærens alicui naturæ esse principium substantiæ ejus, vel unionis, quæ est ad subsistendum.

Ad tertium concedo, posse dari causam dispositivam moralem cum aliqua prioritate naturæ in eo genere causæ respectu sui effectus, nego tamen inde sequi hujusmodi causalitatem, posse communicari gratiæ respectu unionis: imo, quia hæc causalitas, quamvis moralis, prioritatem aliquam requirit & præsuppositionem in existendo, ideo repugnat hujusmodi causalitatem gratiæ habituali communicari, ut declaratum est.

Ad alias rationes contrariæ sententiæ facilis etiam est responsio. Ad 1. concedo, posse Deum, hæc dona conferre, unum ad aliud ordinando in ratione medii aut finis, quod pendet ex voluntate operantis; non tamen posse aliquem ordinem causalitatis inter ipsas res instituire, quæ non solum in eis non habeat fundamentum, verum etiam repugnet modo existendi earum, & intrinseco ordini, quem inter se habent. Ad secundum, quia infertur non posse gratiam habitualement dari ut proprietatem consequentem gratiam unionis, negatur sequela, non enim est, similis ratio: nam licet gratia habitualis non requirit ex natura sua gratiam unionis, nec petat esse proprietatem ejus, tamen e converso gratia unionis, quando est, postulat gratiam habitualement, sive ut proprietatem Physicam, sive ut moraliter debitam: & ad hoc causalitatis genus nulla est in rebus ipsis repugnantia, sed maxima proportio, quia, ubi hæc duæ gratiæ conjunguntur, unio simpliciter præsupponitur, & est natura prior. Ad tertiam jam responsum est, nam est magna deceptio, ex connexion rerum in ordine ad voluntatem agentis, inferre causalitatem præviæ dispositionis. Ad 4. concedo, naturam præexistentem in propria persona posse disponi per gratiam, vel actus ejus ad unionem posteriori tempore factam in illa natura: illa tamen esset dispositio quasi remota, non proxima. Unde, considerando illammet gratiam & actus ejus, ut sunt vel conservantur in eodem instante, in quo in alia natura perficitur unio hypostatica, ut sic non haberent rationem dispositionis, sed tantum proprietatem vel effectum conse-

quentium unionem, quia ut tunc existunt, vel confervantur, omnino præsupponunt unionem, ut in simili explicabimus latius infra q. 6. disp. 17. sect. 6. Ultimum argumentum non eget responsione: admittimus enim omnes illas congruentias, ut de facto gratia habitualis non sit dispositio ad unionem. Ulterius vero addimus etiam hoc repugnasse. Estque valde probabile, quod si illa causalitas non repugnasset cum alio ordine naturæ, quo unio præsupponitur ad gratiam, non esset de facto exclusa, quia cum ea simul conjungi posset alia habitudo, secundum quam gratia est proprietas debita unioni, quæ supponit: excluditur ergo, quia repugnat cum illo ordine; & hanc existimo esse mentem D. Thom. quando illa ratione usus est: aliàs non fuisset efficax probatio.

Ad primam confirmationem jam explicatum est, quomodo ex parte corporis possit antecedere aliqua dispositio; pulchritudo vero, de qua ibi est sermo, potius est dispositio consequens, & ornans, quam præparans, nisi fortasse, quatenus fundamentum habeat in perfecta corporis complexione, & organizatione, quæ antecedit, ut dispositio ad ipsam animam, ut dictum est.

Ad secundam confirmationem respondetur, etiam gratiam habitualement ordinari aliquo modo ad operationem, ut principium quasi principale, & primum: & deinde etiam, ut confert esse participatum divinæ naturæ, non est congrua dispositio præparans ad unionem substantialem in substantia divina, non participata, sed vera & increata. Quia illud esse, quod confert, accidentale est, quod supponit esse substantiale: & in Christo supponit ipsā unionem tanquam radicem, a quo suo modo dimanat.

### SECTIO III.

*Verum humanitas Christi unionem suam ad Verbum mereri potuerit.*

Expeditis breviter aliis causis, dicendum jam est de causa meritoria, in qua potissimum hæc disputatio versatur. Hæc autem causa intelligi potest, aut intra ipsum Christum existens, aut extra, & de utraq; dicendum est. In ipso autem Christo distinguimus humanitatem (sub qua animam comprehendimus, ut natura antecedit unionem) ab ipsomet Christo, quoniam in singulis est specialis difficultas. Supponimus autem, humanitatem Christi non prius tempore extitisse in rerum natura, quā fuerit unita Verbo, atque adeo Christum ipsum non prius fuisse hominem, quam Deum, ne modo disputare cum illis hæreticis necesse sit, qui dixerunt Christum prius fuisse purum hominem, & deinde meruisse suam unionem ad Deum; illi enim supponebant, vel animam Christi extitisse ante incarnationem, ut Origenes, vel ut Photinus & Nestorius, etiam hunc hominem prius fuisse, quam fuerit Deus, seu Deo unitus: ac denique non veram incarnationem, sed unionem tantum accidentalem meruisse dicebant. Sed hoc jam refutatum est; aliud vero fundamentum infra disp. 16. ex professo improbitur, ubi hoc, quod nunc supponimus, ostendemus.

In hac ergo questione varii dicendi modi esse possunt. Primus est, quod Christi anima, seu humanitas de condigno, vel saltem de congruo meruerit assumptionem suam. Quem modum videntur consequenter debuisse asserere auctores præcedenti sectione citati, qui dicebant præcessisse in anima vel humanitate dispositionem gratiæ habitualis. Nam inde fit potuisse etiam præcedere operationem talis gratiæ; ergo per illam potuit illa anima se præparare ad unionem; quod si potuit, ita factum est, quia perfectissimus modus recipiendi dona Dei est per propriam recipientis dispositionem, & credendum est omnia dona gratiæ, etiam ipsam unionem, perfectissimo modo collata fuisse Christi humanitati. Rursus omnis dispositio per actum supernaturalem, & procedens a subiecto informato gratia, est aliquo modo meritoria, saltem de congruo, illius boni, ad quod est dispositio, etiam si statim in eodem instanti conferendum sit, quia non est de ratione meriti, ut in tempore, sed natura tantum antecedit præmium, ut in merito de congruo patet in antica dispositione ad primam gratiam, & in merito de condigno in augmento gratiæ, & ejus merito. Et confirmatur, quia non est necesse omnes operationes esse suppositorum, vel substantiarum; possunt enim esse a quacunque re, seu forma individua existente. Arist. enim 1. Metaph.



*Aristot. Metaph. Actio non necessario est supposita.*  
 c. 1. non dixit actiones esse suppositorum, sed singularem. Et forma caloris, si intelligatur existens, intelligitur sufficiens ad calefaciendum, etiam si neque inherens, vel subsistens intelligatur: sed anima rationalis Christi singularis & individua prius natura existit, quam uniaur. Potuit ergo etiam prius natura operari, & per illam operationem suam unionem mereri. Imo etiam si secundum Thomistam supponeretur prius natura, tantum secundum esse essentiae, verum tamen & reale, & actuale, potest contra eos procedere argumentum, nam ipsi concedunt animam secundum illud esse, esse sufficiens principium, a quo manat existentia; ergo etiam esse potest sufficiens principium operationum. In nostra vero sententia fortius urget argumentum, tum quia anima, ut existens, est sufficiens principium suae subsistentiae, ut supra dictum est: tum etiam quia ipsa subsistentia non videtur per se requisita ad operationem, ut necessario prius natura supponenda sit.

Secundus modus dicendi sit, de potentia quidem absoluta potuisse humanitatem, vel animam Christi mereri unionem suam, non tamen de potentia ordinaria, atque adeo nec de facto meruisse. Fundamentum esse videtur: quia de potentia ordinaria operatio supponit constitutionem personae, vel rei subsistentis: non tamen de potentia absoluta. Hunc modum tenet Cajet. hic ar. 11. cuius fundamentum fortasse aliud fuit, existimat enim ille ex natura rei, naturam prius personalitate terminari, quam existat, quem ordinem dicit esse servatum in humanitate Christi, & illo stante, non existimo diceret Cajetanus potuisse etiam de potentia absoluta antecedere meritum in illa humanitate. Dicit tamen idem Cajetanus infra qu. 4. art. 2. de potentia absoluta posse inverti hunc ordinem, atque adeo humanitatem, ut sic posse existere prius non solum natura, sed etiam tempore, quam aliqua personalitate terminetur; illam ergo humanitatem sic existentem videtur dicere potuisse mereri de potentia absoluta suam unionem.

In hac redistingamus in primis inter ipsam unionem & divinam electionem, seu praedestinationem, qua illa humanitas vel anima praedeterminata fuit ab aeterno ad hanc unionem. Est enim de his diversa ratio, quia difficilius multo est mereri praedestinationem, quam effectum ejus: imo potest hic cadere sub meritum, quamvis illa non cadat. Supponamus deinde nos loqui de incarnatione, prout facta est simul tempore cum creatione ipsius animae, & compositione seu formatione humanitatis, ut omittamus errorem Photini & aliorum, qui dixerunt Christum prius tempore extitisse, & per sua merita meruisse unionem illam, quam illi ponebant, scilicet accidentalem; & Origenis, qui 2. Periarch. c. 6. dixit, animam Christi prius fuisse creatam, & per bona opera moralia meruisse incarnationem, ut latius infra q. 6. dicam. Ultimo suppono duplicem hic posse esse questionem, scilicet, vel de merito fundato in operibus, quae natura antecedant unionem, vel de merito fundato in operibus, natura vel tempore posterioribus unionem (meritum enim fundatum in operibus illius animae & tempore prioribus unionem, nullum esse potuit, ut constat ex secunda suppositione); hic solum agimus de merito priori modo fundato in opere antecedenti, nam si quod fundari posset in opere subsequenti, illud non jam esset meritum solius humanitatis, sed Christi, & ita de illo erit sermo in sectione sequenti.

Dico primo: Christi anima vel humanitas nec meruit, nec mereri potuit praedestinationem, seu electionem suam ad hypostaticam unionem. Haec est certa & communis omnium, quos in sequenti assertionem citabo, & a fortiori probatur, quia nulla persona angelica, vel humana potest mereri totam suam praedestinationem ad gloriam; ergo multo minus potuit haec anima mereri praedestinationem ad unionem hanc. Patet consequentia, quia ex parte termini est multo major repugnantia, quia est multo perfectior, & altior: ex parte vero ipsius praedestinationis est eadem ratio, quia sicut in ceteris praedestinationibus est ratio omnis boni supernaturalis, a quo meritum proficiscitur; ita & in Christi anima vel humanitate. Confirmatur, & a priori explicatur ratio, quia meritum necesse est, ut antecedit praemium, vel in re ipsa secundum existentiam, vel saltem in praescientia Dei, secundum praescientiam objectivam, seu (ut alii volunt) secundum

existentiam in aeternitate. Cum enim meritum sit causa, vel ratio praemii, necesse est, ut aliquo modo illud antecedit: non potest autem intelligi, nisi alterutro ex dictis modis: sed non potuit meritum in anima Christi antecedere electionem suam secundum realem durationem, ut per se constat, quia illa electio fuit aeterna, & meritum in tempore sit: neque etiam potuit antecedere secundum praescientiam, quia praescientiam talis meriti antecedit voluntas dandi gratiam, qua fit tale meritum, quae gratia in anima Christi vel est gratia unionis, vel saltem manans ex unionem, vel ordinata ad unionem juxta varias sententias. Unde illa voluntas vel est electio ad unionem, vel supponit illam; ergo est ante praescientiam meritorum; ergo illa merita nullo modo antecedunt, & consequenter neque possunt esse ratio talis electionis. Ex hoc sensu explicanda est illa vulgaris ratio in hac materia, ut sit efficax; scilicet, electio Dei est increata, & aeterna; ergo non potest cadere sub meritum. Universaliter enim haec consequentia non est bona, quia aliqua electio Dei, licet sit increata & aeterna, tamen quia est actus liber, & terminatus ad creaturam, ut sic potest interdum habere aliquam rationem ex parte alicujus meriti ab aeterno praevisi, ut infra quaestione 19. latius dicam. Solum ergo tenet in electione, & merito respectu ejusdem, quia ipsa electio est radix ipsius meriti tam ut existens, quam ut praevisi ab aeterno.

Dices: quamvis absoluta praescientia meriti in tali humanitate non antecesserit electionem ejusdem, tamen praescientia conditionata antecessit, praescivit enim Deus, quod si assumeret humanitatem, in illa futura erant merita. Quod argumentum magis de ipso Christo, quam de humanitate procedit. Respondetur, hanc praescientiam sufficere ad rationem causae finalis, non vero ad causam meritoriam, ut fumitur ex D. Thom. q. 29. de verit. art. 6. Quod a posteriori patet in omnibus praedestinatis. Nam de omnibus praevidet Deus, quid sint acturi, si hanc vel illam gratiam conferat; unde si vult conferre, non ideo est, quia habituri sunt illa merita, quod significat habitudinem causae meritoriae, sed ut illa habeant, quod significat habitudinem causae finalis. Signum etiam hujus est: quia de omni humanitate possibili habuit Deus illam conditionalem scientiam, quaecumque enim assumeretur, in illa habere posset infinita merita. Ratio vero est, quia causa finalis movere potest, ut fiat, & ideo non supponit necessario suum esse, ut absolute existens in se, vel in praescientia; sed solum supponit esse cognitum, ut possibile, vel ut futurum sub conditione id est, si haec, vel illa merita applicentur: at vero causa meritoria movet, ut existens saltem in praescientia praemiantis, quae moraliter aequivaleat reali existentiae, quia participat aliquo modo rationem causae efficientis saltem moralis, & ideo requirit aliquam existentiam. Causa enim meritoria censetur aliquid conferre ad effectum, & quasi de suo aliquid ponere, & est quasi medium ad comparandum finem. Adde, illam etiam conditionatam praescientiam non haberi de humanitate ipsa, sed de homine ex illa constante, quia (ut jam dicam) humanitas meriti capax non est, atque ita non praescivit Deus, si assumeret humanitatem, merita ipsam habituram, sed Christum in humanitate; & per humanitatem meritum.

Et hinc facile solvitur alia obiectio, scilicet, quia potuit humanitas Christi praedestinari prius ad gratiam & gloriam creatam, & in illa sic praedestinata potuerunt praevideri merita, propter quae ad unionem hypostaticam praedestinetur. Respondetur enim, argumentum primo supponere humanitatem esse capacem meriti, quod falsum est. Deinde praedestinatio illius animae ad gloriam non antecedit praedestinationem ad unionem personalem, sed potius subsequitur. Nam sicut illa gloria est velut proprietas hujus unionis: ita praedestinatio Christi vel ejus animae ad illam gloriam est, tanquam ad proprietatem consequentem incarnationem, unde supponit praedestinationem incarnationis. Ac denique meritum incarnationis, praesertim in pura creatura intelligi non potest, nisi supposita ordinatione, & praedestinatione talis unionis, quia ex natura rei nullum tale meritum esse potest (ut infra ostendam), sed tantum supposita ordinatione divina; omnia ergo meritum hujusmodi necessario supponit voluntatem Dei de incarnatione futura, & propterea volentis talia merita. Et consequenter non



potest tale meritum esse de tota Incarnationis prædestinatione. An vero illa voluntas, quæ supponitur ad prædestinationem, debeat esse efficax, & beneplaciti, vel possit sufficere voluntas inefficax, & antecedens, non est huius loci explicare: satis est in proposito, Incarnationem, & merita, quæ in Christo, & ejus humanitate fuerunt, supposuisse absolutam & efficacem Dei voluntatem, tam Incarnationem ipsam, quam Christi merita prædefinientem, ut infra q. 18. & 19. & 24. explicabimus.

Dico secundo. Anima Christi, vel humanitas non meruit suam unionem, seu assumptionem. Conclusio est D. Thomæ hic, & in ea conveniunt Cajetanus, & omnes Thomistæ, Alensis 3. par. q. 8. memb. 3. art. 2. Scotus, Durandus, & alii præcedenti sectæ citati, qui negant, in humanitate dispositionem aliquam ad unionis gratiam præcessisse, consequenter, & a fortiori meritum omne negare debent, tum quia si in humanitate non potuit antecedere habitus, multo minus actus: tum quia si non antecessit gratia, non fuit ullum meriti fundamentum. Et probatur primo ex Scriptura sacra, in qua mysterium hoc, & beneficium Incarnationis soli divinæ misericordiae, & charitati tribuitur. Joan. 3. *Sic Deus dilexit mundum, &c.* Luc. 2. *Perviscera misericordiae Dei, &c.* ad Ephes. 2. *Propter nimiam charitatem, &c.* 1. ad Timot. 3. dicitur, *Magnum pietatis sacramentum.* Et ad Tit. 3. *Apparuit gratia Dei, &c.* & c. 3. *Apparuit benignitas & humanitas &c.* Quæ testimonia non satis probant hanc conclusionem de fide (ut quidam censent), quia revera non loquuntur de Incarnatione respectu humanitatis Christi, sed respectu nostri, ut est beneficium nobis collatum ad nostram redemptionem, sic enim datum est sine meritis nostris, ut probant dicta testimonia: quod vero respectu humanitatis Christi nullum ibi intervenerit meritum, non satis ex illis locis colligi potest, sed solum probabile argumentum: cum enim semper Scriptura istud beneficium simpliciter & absolute revocet in Dei misericordiam & liberalitatem, videntur omnia merita simpliciter exclusa. Sumi etiam hoc potest ex illo Ps. 8. *Quid est homo, quod memoretur ejus &c.* usque ad illud. *Constituisi eum super opera manuum tuarum.* Quibus verbis satis indicatur id factum esse sine merito hominis sic exaltati: ea tamen verba de Christo interpretatur Apostolus ad Heb. 2. ubi inter alia ait: *Eum autem, qui medico, quam Angeli, minoratus est, videmus Jesum propter passionem mortis, gloria & honore coronatum.* Ubi indicatur, illam exaltationem humanitatis supra omnes Angelos ante omne meritum esse: at vero gloriam & honorem, quem postea per passionem adeptus est Christus, ex merito fuisse consequutum. Hinc etiam Joan. 1. hoc mysterium *gratia* vocatur, non nobis tantum facta, sed simpliciter, quia non ex operibus data est.

Secundo, hanc veritatem expressius, quam alii patres, docuit August. de prædest. sanct. c. 15. ubi primum de natura ipsa humana expresse interrogat, quibus meritis hoc sibi comparavit? deinde de ipso homine Christo, & tandem concludit in hoc esse similem illam gratiam unionis in Christo primæ gratiæ, quæ nobis confertur, quod sicut illa ex nullis præcedentibus meritis Christi hominis, & humanitatis ejus collata est, ita hæc sine nostris meritis datur. Idem repetit de bono perseverantiæ c. ult. & de correptione & gratia c. 11. videtur dicere hoc esse de fide: *Neque enim quisquam, ait, tanta rei hujus & fidei cæcus est ignorantia, &c.* Sed ibi plane loquitur contra Photinum & alios, asserentes Christum justum hominem, ac sanctum prius extitisse, atque bonis suis operibus meruisse conjunctionem specialem cum Deo: qui in duobus errant contra fidem, tum quod incarnationem negabant factam a principio conceptionis Christi, ex quo inferebant cecidisse sub meritum; tum quod illam Incarnationem non veram hypostaticam unionem cum Deo, sed accidentalem dicebant, ut Nestoriani. Et ex quolibet horum principiorum asserere Christum, vel humanitatem ejus meruisse suam Incarnationem, est sine dubio contra fidem. At vero Aug. solum ex eo colligit, humanitatem non fuisse assumptam ex meritis, quia non prius tempore extitit, quam fuerit assumpta. Quæ consequentia licet bona sit ratione materiæ (ut statim dicam) non tamen per se sufficit ad faciendam conclusionem de fide. Eandem tamen sententiam repetit Aug. in Ench. c. 36. & 40. & 13. de Trin. c. 17. & tract. 2. in Joan.

Ultimo arguitur ratione illa communi, quæ ita explicatur. Quia meritum debet antecedere præmium saltem ordine naturæ: sed in Christi humanitate non præcessit ordine naturæ aliquod opus meritorium ante assumptionem, ergo. Major supponitur ex materia de merito, & ex supra dictis explicando sensum hujus dubii, in quo versamur. Minor probanda est ex dictis in sectione præcedenti, quia operatio animæ est quoddam accidens ejus; sed ostensum est, nullam formam accidentalem, præsertim extrinsecam, seu non habentem intrinsecam & necessariam connexionem cum ipsa substantia, antecedere ordine naturæ propriam subsistentiam, atque adeo neque hanc hypostaticam unionem; ergo idem dicendum est de operatione, atque adeo de merito, quod in operatione fundatur. Et hoc sensu optime procedit illa ratio, quæ in eandem incidit: quod scilicet actiones sunt suppositorum, seu subsistentium: sed humanitas, seu anima prius natura, quam uniretur, non fuit suppositum, nec subsistens; ergo neque capax operationis, nec meriti. Major habetur ex communi consensu Philosophorum, & ex Arist. in citato loco Metaphys. qui (ut ego existimo) pro eodem duxit naturam singularem & suppositum, & ex dictis ita explicanda est, & probanda, quia licet subsistentia non sit formale principium operandi, tamen est conditio ex natura vel prærequisita in operante propter illam rationem, quia complementum rei in proprio esse substantiali secundum naturæ ordinem operationem antecedit. Quod a simili explicatur in forma accidentali, in qua etiam ex natura rei distinguitur actualis inhærentia ab ipsa existentia, & tamen ex natura rei loquendo, accidens prius natura intelligi debet non solum existens, sed etiam inhærens, quam actu operans, quia prius constitui debet in suo naturali modo essendi, quam operetur. Et hinc etiam fit, quod si per Dei potentiam accidens sine subiecto conservetur, prius intelligetur esse suo modo per se existens, quam operans, quia cum inhærentia sit magis intrinseca accidenti, quam actio, & ex natura rei prius illi conveniat, ea impedita per alium modum per se existendi, necesse est, ut talis etiam modus actionem antecedat atque universaliter, ut forma in re prius habeat unum vel alium determinatum modum essendi, quam agat: sic ergo in proposito subsistentia propria, tanquam modus maxime intrinsecus naturæ, ex natura rei antecedit operationem, & ideo quando per hanc hypostaticam unionem impeditur, etiam talem unionem antecedere operationem necesse est.

Et hac ratione solvitur facile fundamentum prioris sententiæ. Concedo enim consequenter loquendo ita potuisse probabiliter, imo & probabilius dici in illa opinione, quæ ponebat dispositionem gratiæ antecedentem in ipsa humanitate. Sed propterea illam rejecimus, & ab inconvenienti, hoc eodem argumento illam impugnavimus. Ad confirmationem, sunt, qui propter illam concedant potuisse in humanitate præcedere aliquam operationem liberam ordine naturæ ante unionem: sed hanc non potuisse esse meritoriam, quia non procedebat ex gratia. Hoc vero mea sententia inconstanter dicitur. Quia si operatio libera & moralis, seu virtutis acquisita, potuit in humanitate antecedere unionem, cur non etiam supernaturalis? vel cur non etiam habitus infusus? vel saltem operatio supernaturalis procedens ab auxilio? Si enim dicatur, hæc dona supernaturalia ratione unionis conferri, principium petitur. Hoc enim controversitur, nam quamvis unio semel habita sufficiens ratio sit, ut hæc omnia auxilia præbeantur, tamen etiam possunt ex voluntate Dei per se concedi cuicumque naturæ illorum capaci, atque adeo possent dari naturæ humanæ, ut per illa se actualiter disponeret ad unionem, & aliquo modo mereretur illam, si illorum esset capax. Aliter ergo ex dictis respondendum est, etiam si prius natura anima supponatur existens: non tamen potuisse prius natura operari, quam subsistat propria subsistentia, vel subsistentia verbi, cujus ratio satis explicata est.

Ex quibus tandem dico tertio, etiam de potentia absoluta fieri non potuisse, ut humanitas mereretur suam Incarnationem, eo modo, quo nunc agimus. Nam in primis suppono, humanitatem separatam ab omni supposito proprio & alieno non posse existere in rerum natura, & consequenter in illa ut sic hujusmodi meritum esse non posse. An vero in proprio supposito prius existente

Subsistentia conditio requisita ad operationem.

Unio hypostatica respectu Christi & hominum mera Dei gratia.

esse



esse potuerit, dicitur sect. 5. Deinde cum ex natura rei sit prior subsistentia, quam operatio, nulla ratione potest hic ordo immutari, quia est prorsus intrinsecus & quasi essentialis. Quod ita declaro, quia non potuit Deus facere, ut humanitas in proprio supposito prius natura operaretur, quam subsisteret, quia non potest facere, quin subsistentia sit magis intrinseca, & ex natura sua anterior operatione. Deinde non potuit hæc subsistentia propria impediri per unionem ad Verbum alio modo, quam de facto impedita est; ergo, si de facto non intelligitur talis ordo naturæ, quo operatio humanitatis præcedat unionem, nulla ratione est illa possibilis. Denique rationes in præcedente sectione factæ in præsentem casum procedunt.

**Aliquorū  
segmentū.** Præter hos autem modos nullus alius excogitari potest, quo humanitas per opera ordine naturæ antecederet hypostaticam unionem mereatur. Dicunt vero aliqui, potuisse humanitatem existere per existentiam Verbi, & ut sic existentem mereri unionem ad hypostasim seu subsistentiam Verbi. Nam licet unio ad subsistentiam (ut ajunt) naturaliter sit prior, quam ad existentiam, posset tamen Deus hunc ordinem immutare. Addunt vero meritum illud non fore omnino perfectum, & de condigno, eo quod non esset ab infinita persona, sed a natura, quæ licet per infinitam existentiam existeret, illa tamen existentia non ita dignificaret operationem, sicut persona. Sed mirum est, quot falsa principia in hac imaginatione seu fictione includantur. Primum, posse naturam existere per alienam existentiam, de quo infra q. 17. Secundum, posse intelligi unionem substantialem cum Deo, & non esse in hypostasi, nec subsistentia: illa enim unio cum existentia substantialis est, & tamen non ponitur esse in hypostasi, nec ad subsistendum: relinquitur ergo, ut talis unio sit in natura, quia juxta doctrinam Conciliorum supra traditam non est aliud genus unionis substantialis inter duas substantiales naturas. Et ex eadem doctrina constat, quam sit falsum illud consequens, constabitque amplius ex dicendis infra q. 2. Tertium, posse esse realem naturæ ordinem inter unionem ad existentiam, & non ad subsistentiam Verbi. Qui enim hoc concipi potest, cum existentia illa & subsistentia in re nullo modo actualiter distinguantur? Ubi enim non est in re distinctio, nec realis ordo naturæ esse potest. Quod magis declaratur ex parte humanitatis; aut enim in illa sunt duo modi unionis ex natura rei distincti, unus ad existentiam, & alius ad subsistentiam divinam, aut est unus tantum. Primum per se apparet valde absurdum. Cur enim distinguuntur in re uniones, cum neque in re, quæ unitur, neque in re, ad quam unitur, reperiatur talis distinctio ex natura rei? Adde etiam, quod neque illæ uniones sunt separabiles, aliàs posset manere humanitas existens divina existentia in propria persona: quod nemo (credo) prudens affirmabit. Nullum ergo est principium aut signum distinctionis ex natura rei inter illas. Quod si unio est in re eadem in se ipsa; & existentia cum subsistentia Verbi in re est idem: non potest ordo naturæ in illa unionem excogitari, neque est distinctum donum Dei illa unio, ut terminatur ad existentiam, vel ad subsistentiam: non ergo potest tale meritum intercedere inter illas duas uniones, etiam si eas admittamus, & demus ratione distinguere, quia hæc distinctio non satis est, ut inter eas, vero ordine naturæ & causalitatis, quasi interponatur seu intercedat. Sed de hac re iterum redibit sermo infra q. 17.

**Quot la-  
horret de-  
finitio.**

**Substan-  
tialis unio  
ad exi-  
stentiam  
Verbi, ad  
subsisten-  
tiam ip-  
sius termi-  
netur, ne-  
esse est,**

Quartum denique absurdum, quod involvitur in prædicta assertionem, est suppositis his principiis non habere operationem, infinitam dignitatem moralem ab existentia divina, sicut habet a subsistentia. Quænam enim differentiarum ratio reddi potest? Numquid minoris perfectionis aut dignitatis est existentia divina, quam subsistentia? Non sane, cum sit infinita in genere entis. Aut fortasse existentia minus influit in operationem, quam subsistentia? Non certe, nam secundum verioremetaphysicam existentia naturæ per se influit, natura, enim non influit nisi ut actualis entitas: & in omni opinione existentia est conditio magis necessaria ad agendum quam subsistentia. Aut fortasse differentia in hoc consistit, quod suppositum sit, quod operatur, non natura, etiam existens? At vero, licet hoc in se verum sit, tamen nec inde sequitur, naturæ dignitatem nihil conferre ad valorem meriti, sicut confert gratia, licet non sit ipsa, quæ operatur, sed principium operandi. Neque in ea hypothesi, in qua

proceditur, id dicitur consequenter; asseritur enim humanitas existens in eo casu mereri unionem hypostaticam: consequenter ergo asserendum est, illam esse, quæ operatur, non enim meretur, nisi operando: ergo, cum illa non operetur nisi existens, neque etiam meretur nisi existens: ergo, si existeret existentia infinitæ dignitatis, ex habitudine, & conjunctione ad illam, haberet opus infinitum valorem, sicut etiam humanitas haberet infinitam dignitatem & sanctificationem non minus quam ex unionem ad subsistentiam. Est ergo hic dicendi modus (judicio quidem meo) nec sibi constans, nec absolute verisimilis aut probabilis.

## SECTIO IV.

*Utrum Christus Dominus mereri potuerit Incarnationem suam.*

**H**ÆC quæstio non habet locum, ut ex supra dictis constat in merito fundato in operibus tempore vel natura præcedentibus ipsam unionem. Quia Christus solum antecedit unionem ut Deus, ut sic autem meriti capax non est (ut suppono), sed ut Deus homo, & ut sic resultat per unionem, ut posterius saltem natura sequitur operatio. Quamobrem instituitur tota ista quæstio de merito in posterioribus operibus fundato.

De quibus secundo certum est, non potuisse per illam Christum Dominum mereri prædestinationem Incarnationis, per quam ipse ut homo prædestinatus est, ut esset filius Dei naturalis. Hoc enim probant adducta superiori sectione pro prima conclusione, quia scilicet illa merita neque in duratione, neque in præscientia potuerunt antecedere hanc prædestinationem, cum ab illa proficiscantur. Nam quod cognoscantur merita possible, non refert, ut sint ratio volendi incarnationem, nisi fortasse per modum finis, quia causa meritiorum (ut dixi) cum habeat moralem quandam efficientiam, supponi debet secundum actualem existentiam saltem in prævisione præmiantis. Et eadem ratione non sufficit præscientia conditionata eorundem meritorum, ut dictum est sect. præced. Atque hinc ulterius colligitur, primam futuritionem (ut sic dicam) incarnationis non potuisse sub meritum Christi cadere, id est, non potuisse Christum mereri, ut sua incarnatio esset futura. Probatur primo ex proposita assertionem, quia hoc ipso, quod incarnatio Christi prædestinata est, seu prædefinita, ut in tempore fieret, fuit infallibiliter futura; sed non potuit Christus mereri prædestinationem incarnationis: ergo nec quod simpliciter futura esset. Secundo quia non potuit aliquid esse ex meritis Christi, nisi illa supponantur vel prævideantur, saltem ut futura, sed merita futura supponunt incarnationem futuram: ergo non possunt esse causa meritiorum, ob quam simpliciter sit futura incarnatio, sed necessario supponi debet, quia ante omne tale meritum futura sit incarnatio, ita ut sicut de possibili non potest esse vera hæc causalis, quia merita Christi sunt possible, ideo incarnatio est possible, sed potius e converso, ita de futuro, non ideo futura est incarnatio, quia merita Christi sunt futura, sed e contrario, quia incarnatio erit, ideo ab illa erunt merita.

Difficultas ergo superest, an ipsa Incarnatio potuerit in re ipsa fieri propter merita prævisa ipsius Christi jam prædestinati. Et ratio dubii est, quia gratia antiquorum patrum propter merita Christi prævisa, multo ante tempore illis data est; ergo quamvis Incarnatio ordine temporis vel naturæ eadem merita præcesserit, nihilominus propter illa prævisa potuit exhiberi. Si enim in genere loquendo ad rationem meriti satis est, ut in præmiantis scientia præmium antecedit, cur non hic etiam sufficeret? Dicitur fortasse rationem esse, quia ipsa Incarnatio totius meriti principium est, non autem gratia patrum antiquorum. Sed contra, primo, quia Incarnatio non ut exhibita, sed tantum prævisa, meriti etiam prævisi principium intelligitur; ergo licet Incarnatio illa, ut prædestinata, non potuerit cadere sub tale meritum, tamen ut re ipsa facta, optime potuit. Quod ita explicatur, quia postquam Deus prædestinavit & prævidit Christum habiturum infinita merita, potuit non exequi illam Incarnationem, nisi intuitu illorum meritorum, quia libere operatur, & potest, prout vult, sua dona conferre. Nam ex eisdem



eisdem meritis eodem modo prævisis paravit viam Incarnationi exequendæ, & dedit gratiam Virgini, qua esset condigna mater Incarnati Dei.

Sufficiens  
valor in  
operibus  
Christi ad  
merendam  
hypostasi-  
cam u-  
nionem.

In hac quæstione non dubitamus, quin in operibus Christi Domini fuerit sufficiens valor, ut gratiam unionis mererentur in genere de illa loquendo, quia (ut supra q. 1. art. 2. demonstratum est) illa valorem infinitum habuerunt. Unde si ordinasset merita, ut Pater, vel Spiritus sanctus incarnaretur, vel si assumpisset prius naturam Angelicam, & per illam operaretur ordinando merita ad assumptionem hujus humanitatis, sine dubio illam mereri de toto rigore iustitiæ posset, ut ibi dictum est, quia nulla conditio ad meritum necessaria illi deesset. Difficultas ergo tantum est de hac numero Incarnatione, ut obtinenda per opera & merita exequenda per humanitatem assumptam per eandem Incarnationem. Et hoc modo multorum opinio est, implicare contradictionem Christum meruisse hanc Incarnationem, propter illam rationem, quia impossibile est, principium meriti sub meritum cadere. Quæ variis modis confirmatur: primo quia aliàs quilibet homo primam gratiam mereri sibi posset, per opera, scilicet, ab ipsamet prima gratia procedentia. Secundo, quia aliàs idem esset causa sui ipsius in eodē genere; Incarnatio enim in genere efficientis est causa meriti, & meritum causa Incarnationis, quod genus causæ ad efficientem quoque revocatur; ergo & incarnatio erit causa sui ipsius, & duo erunt sibi invicem causæ in genere efficientis, quæ est aperte repugnantia. Tertio, quia aliàs posset cadere sub meritum, ipsum etiam esse, & creari, quæ videntur absurda & contra omnium sententiam.

Hæc sententia est probabilis. Nihilominus tamen de potentia absoluta loquendo, fateor me non videre tam apertam contradictionem, & ideo valde probabile existimo hoc fieri potuisse. Quod ratio dubitandi in principio posita multum persuadet, cum replicis etiam adhibitis. Quæ amplius confirmantur, quia non implicat contradictionem velle Deum ita conferre humanitati gratiam unionis, ut non omnino absolute donet, sed quasi sub conditione & dependenter a futuris operibus, & in præmium eorum, atque adeo, ut licet tempore, vel natura antecederet unio, non sit per modum gratiæ gratis datæ, sed per modum anticipatæ solutionis; ut si Rex tribuat militi arma, & equum in stipendium futuri laboris & militiæ & quasi in præmium meritorum, eodem equo & armis futurorum. Quod exemplum variis modis vitatur ab iis, qui tuentur contrarium, sed vix unquam satisfaciunt. Deinde quia argumenta in contrarium non cogunt, quod in his quæstionibus, quæ pertinent ad potentiam Dei absolutam, satis fere est, ut non existimetur impossibile, quod non probatur.

Ad funda-  
mentum  
præceden-  
tis senten-  
tiæ respo-  
sio prima.  
Secunda  
responsio.

Ad fundamentum enim respondetur primo, principium meriti ex natura rei, & prout de facto confertur, non posse cadere sub meritum, ut statim explicabimus; secus vero de potentia absoluta. Secundo respondetur, principium meriti secundum eam rationem vel conditionem, qua principium meriti est, non posse cadere sub idem meritum, quatenus causa meritoria est, seu ratio aliquid faciendi: easdem tamen res sub alia ratione, seu sub alio statu, posse cadere sub meritum. Declaratur, nam merita Christi non dicuntur posse concurrere ad hoc præmium, nisi ut futura: ut sic autem principium eorum est Incarnatio ut prædestinata tantum, non ut jam executioni mandata: est autem præmium, prout in tempore executioni mandatur, & ut sic est principium meritorum ut actu existentium, & ita sub alia & alia ratione est principium & præmium meritorum. Unde potest retorqueri argumentum, quia merita ut futura, & ut prævisa, antecedunt incarnationis executionem: ergo nihil repugnat, quin Deus intuitu horum meritorum illam exequatur.

Obiectio.

Dices: repugnat Christum ordinare sua merita ad obtinendam incarnationem, cum necessario supponatur habens illam; hoc autem videtur necessarium ad meritum, scilicet, ut is, qui meretur, ordinet & referat suam actionem in præmium. Respondetur. Satis est, quod Deus ita ab æterno ordinaverit, & quod in tempore quasi hac lege incarnationem fecerit, & quod Christus postea legem acceptarit, & sua opera retulerit ad implendam voluntatem Patris. Denique non est necesse, ut sua merita

referat ad obtinendam incarnationem, sed potest referre quasi ad perfolvendam illam, quod est satis. Cum idem dicendum necessario sit de modo, quo Christus antiquis Patribus gratiam meruit. Dices: Deus absque meritis Christi præordinavit Verbi incarnationem, nec potuit aliter fieri, ut dictum est: ergo non potuit illam efficere ex meritis Christi, quia non potest aliter fieri, quam præordinata est. Et eadem ratione non potuit Deus ordinare merita Christi ad incarnationem, quam sine ordine ad merita jam præordinaverat. Respondetur, idem fere argumentum fieri posse de omnibus prædestinatis: negatur ergo utraque consecutio, quia Deus, qui sine prævisis meritis gratis voluit incarnationem, potuit etiam simul velle post jam prævisa merita futura, illam perficere, & exequi intuitu illorum: hæc enim non sunt opposita, quia prædestinatio seu potius prædefinitio, & executio, diversa sunt: unde, licet illa sit absque meritis, hæc potest fieri intuitu meritorum: & licet incarnatio non possit nisi gratis prædestinari, potest tamen non omnino gratis fieri, quia ante præordinationem incarnationis nullo modo supponitur Christus, aut merita ejus, nec ut existentia, nec ut futura, ante executionem vero supponuntur saltem ut futura & prævisa, ex vi efficacis decreti, quo gratis prædefinita est incarnatio; atque ita incarnatio gratis prædestinata potest non omnino gratis fieri, sed intuitu meritorum, quamvis non possit nisi gratis prædestinari.

Atque hinc constat ad exempla adducta de prima gratia, & de aliis similibus: quamvis enim de facto non possit prima gratia cadere sub meritum juxta rerum naturas, & juxta legem meriti a Deo statutam, ut infra attingemus, & in materia de gratia latius tractatur, tamen de potentia absoluta non repugnet, Deum non uti his legibus, sed intuitu futuri meriti, & ratione illius, primam gratiam conferre, sicut de incarnatione dictum est. Adde vero, in his omnibus negari non posse, quin in hoc genere seu modo præmiandi merita, aliqua liberalitas intercedat, quia hoc ipsum, scilicet, dare aliquid per modum præmii ante exhibitum meritum liberalitas est: tamen quia hæc liberalitas non repugnat cum ratione iustitiæ, & meriti, ideo non videtur simpliciter implicare contradictionem, quod hæc omnia dentur propter futura merita prævisa, sicut supradictum est de gratia data antiquis Patribus propter merita Christi, & de omni pacto iustitiæ, in quo datur anticipata solutio ante merces exhibitas, vel acceptas. Ex quo patet ad primam & tertiam confirmationem.

Ad secundam vero simpliciter negatur sequela, sicut non sequitur, meritum est causa finalis Incarnationis, & Incarnatio est causa efficiens meriti, ergo est causa sui ipsius, quia sicut hic mutatur genus causæ, ita ibi: causa enim meritoria, & finalis licet in aliis differant (ut dictum est) tamen in hoc conveniunt, quod sicut finis causat, antequam sit: ita causa meritoria potest suo modo causare, antequam in re ipsa existat, si sit in mente ejus, qui collaturus est præmium. Et hujus ratio est, quia sicut finis causat movendo causam agentem, ita meritum non causat immediate influendo in præmium, sed movendo voluntatem alterius ad reddendum illud. Et hinc est, quod sicut finis interdum movet ad productionem, vel consecutionem sui ipsius, ita meritum possit movere, seu esse ratio, propter quam Deus conferat id, quod ipsius meriti principium est: ita ut idem simul sit ejusdem meriti solutio, & satisfactio. Incarnatio ergo est causa suo modo efficiens physica operis meritorii; meritum autem est causa moralis, & quodammodo metaphorica præmii, & ideo non videtur implicare, quod sint sibi invicem causæ, nec propterea sequeretur idem esse causam sui ipsius, genere causæ mutato.

Analogia  
inter cau-  
sam finem  
lem, & m-  
eritoriam.

Sed quidquid opinemur de implicatione contradictionis, de facto tamen sine ullo dubio dicendum est Christum Dominum non meruisse Incarnationem suam. Assertionem hanc aliqui existimant esse de fide, quod est verum in sensu contrario errori Photini, Origenis, & aliorum, ut dictum est, scilicet, quatenus per eam excludit meritum, quod in eadem natura tempore antecesserit incarnationem, tamen ut excludit meritum, vel naturam prius, vel solum prævisum, non est expresse de fide, cum non sit in Scriptura aperte proposita, neque ab Ecclesia definita, aut declarata, est tamen ita certa, ut contraria sit temeraria, & periculosa. Primo, quia sacra Scrip-  
pturæ

Christus  
non me-  
ruit incar-  
nationem  
suam.



pturæ testimonia sect. præced. citata plurimum illi favent. Secundo, propter testimonia Sanctorum, præsertim Augustini ibidem allata. Tertio, propter communem consensum Scholasticorum hic & in 3. d. 4. Ratio vero reddi potest primo, quia meritum natura sua postulat, ut antecedit præmium, ad quod, ut via ad terminum, comparatur, vel ut medium ad finem, & ideo hic ordo in uno, & eodem nunquam immutatur. Imo neque in diversis, nisi quando congruenti ratione alio modo fieri non potest, ut contingit in gratia antiquorum patrum, in qua etiam suo modo hic ordo servatus est; nam saltem in prævisione Dei fuit prius meritum Christi, propter quod illa data est, quam ipsa gratia: at vero idem Christi meritum non potuit etiam in prævisione Dei esse prius, quam Incarnatio.

Secundo, si admittamus esse possibile principium meriti sub diverso statu sub meritum cadere, ut id fieri possit, necesse est, ut illud a principio non absolute, & simpliciter detur, sed quasi sub conditione futurorum meritorum, & dependenter ab illis, sicut necessario dicendum est de gratia antiquorum patrum, quia alias non posset ibi intercedere ratio iustitiæ, atque adeo neque ratio meriti: at vero hic modus est imperfectus, neque in Christo Domino locum habuit: sed a principio habuit gratiam unionis, perfectissime & simpliciter, & ideo neque in illo talis modus meriti locum habuit. Unde confirmatur tertio, nam propter hanc causam gratia simpliciter prima sub meritum non cadit, quia non datur imperfecto modo & dependenter a futuro opere, sed absolute & simpliciter, & alias non perfecte haberet rationem gratiæ. Dico autem gratia simpliciter prima, quia prima gratia habitualis, sicut est prima in ordine ad meritum de condigno, ita non cadit sub illud, tamen non est simpliciter prima, sed supponit aliam excitantem, & adjuvantem, quæ (ut est probabile) potest esse principium meriti de congruo, ideo gratia prima habitualis potest fortasse cadere sub hoc meritum, non ut consequens illam, sed ut antecedens: tamen ipsa prima gratia excitans vel adjuvans, quæ est simpliciter prima, sub nullum meritum cadit: pertinet enim ad convenientem, & liberalem providentiam Dei, & consentaneam naturis rerum, gratis donare principia operandi, ipsa vero bona opera ad alia congruentia præmia ordinare; sed gratia unionis in Christo est omnium prima, & radix omnis meriti; ergo. Denique quia maxime decens fuit, ut summum Dei opus, & quod est fundamentum totius meriti, non fuerit fundatum in merito, sed sola Dei liberalitate.

Quæstio  
hic satis.  
Quos &  
quales in  
caroatio-  
nis cir-  
cumstan-  
tiæ.

Sed quæres, an idem dicendum sit de circumstantiis incarnationis. Respondeo breviter cum communi & probabiliori sententia, idem esse dicendum. Ut vero hoc & recte intelligatur, & probetur efficaciter, advertendum est, circumstantias proprie dici, quæ comitantur incarnationem, ut sunt quod tali tempore fiat, tali loco, tali modo, opere scilicet Spiritus Sancti, & similes: possunt vero etiam circumstantiarum nomine comprehendere quædam, quæ incarnationem antecedunt, ut annuntiatio angelica, consensus Virginis Beatissimæ, ejusque dispositio ac cooperatio. Item quædam alia, quæ incarnationem subsequuta sunt, possunt etiam circumstantiæ appellari, ut angelorum laudes & cantus, pastorum & Magorum adorationes. De primis ergo circumstantiis præcipue intelligitur communis sententia. Quam aliqui ex eo probant, quod hæ circumstantiæ ad divinam prædestinationem pertinent, & non cadunt sub libertatem Christi hominis, sed ante illam fuerunt a Deo, suo arbitrio, & juxta divinam ipsius sapientiam, præordinatæ. Sed hæ rationes & similes non cogunt, nam ea, quæ a Deo prædestinata sunt sola ejus voluntate, possunt cadere sub meritum, licet eorum prædestinatio sub meritum non cadat, ut patet, nam Deus præordinavit Petrum ad tantam gloriæ intensionem sola sua voluntate, quam Petrus postea meretur. Item etiam non cecidit sub libertatem Christi humanam, quod Beatæ Virginis tanta gratia sit data; nam priusquam ipse fieret homo, data est illi, & nihilominus eam ipse meruit, quasi solvendo quod datum jam erat. Ratio ergo solum est illa, quia hæ circumstantiæ, sicut & executio Incarnationis, antecedunt meritum saltem naturæ ordine, & ideo ex natura rei non cadunt sub illud, nec sunt multiplicanda miracula sine necessitate. Item quia hæ circumstantiæ per modum unius conjun-

guntur cum ipso mysterio, & (ut ita dicam) tenent se ex parte illius, quatenus cum illo conjunguntur ad constituendum in rerum natura Christum in statu, in quo possint operari & mereri, nam ad hoc necessaria sunt, & ideo non magis cadunt sub meritum ejus, quam ipsamet incarnatio.

Et hæ rationes procedere videntur a fortiori de aliis circumstantiis, quæ tempore antecesserunt incarnationem, quia sunt multo anteriores merito. Sed in his considerare oportet, aliud esse loqui de illis formaliter, ut circumstantiæ Incarnationis sunt, & ad illam dicuntur habitudinem: & hoc modo applicari ad eas potest doctrina data. Aliud vero erit, si de his loquamur quasi materialiter, ut per se consideratæ possunt esse talis naturæ ac conditionis, ut juxta ordinariam Dei providentiam non dentur sine alicujus merito, ut gratia & auxilia B. Virginis, ut sese præpararet ad conceptionem Filii Dei, quatenus ordinata sunt ad incarnationem, circumstantia ejus dici possunt, quæ reduci potest ad illas, quas Philosophi morales vocant, *quomodo, vel quibus auxiliis*, & nihilominus Christus meruit eam gratiam, & auxilia Beatæ Virginis, non eo titulo quod circumstantiæ suæ incarnationis sunt, sed quia sunt res pertinentes ad sanctificationem perfectam ipsius Virginis, quæ sanctificatio nulli datur absque Christi merito. Et hæc ratio procedit de gratia antiquorum Patrum, quatenus fuit quedam dispositio & præparatio ad Christi adventum. Itaque generalis regula erit, Christum non meruisse ea, quæ suam incarnationem antecesserunt, nisi talis fuerint, quæ ad homines sanctificandos pertinerent, propter rationem factam, quæ magis ex sequenti sectione constabit.

De circumstantiis autem tertii generis dicendum est, Christum illas meruisse, quia in eis non procedit ratio facta, cum sint posteriores incarnationi, & non est alia, quæ obstat, de qua re dicemus latius infra qu. 19.

Sed contra, primo, nam Apocal. 5. dicitur: *Dignus es agnus, qui occisus es, accipere divinitatem*, &c. Illa autem particula: *Qui occisus es*, habet vim notæ causalis, id est, quia occisus es. Sicut paulo antea dicitur: *Dignus es Domine accipere librum, & aperire signacula ejus, quoniam occisus es*. Et Psalm. 44. dicitur: *Dilexisti justitiam, & odisti iniquitatem, propterea unxit te Deus*, &c. Quod de unctione humanitatis per divinitatem exponit ibi Augustinus & Anselm. ac Beda ad Hebræ. 1. Respondetur ad primum testimonium ibi esse sermonem de manifestatione divinitatis, quam Christus sua passione meruit. Ita Rupertus. S. Thom. Chartus. Lyra, & alii. Secundum vero testimonium primo exponi potest de unctione gratiæ gratum facientis, ut videtur exponere Athanasius oratio. 2. contra Arianos 4. fol. ante finem, ubi hoc exponit de sanctificatione per Spiritum sanctum, qua ipse Christus se ipsum, ut hominem sanctificavit juxta illud Joa. 17. *Ego sanctifico me ipsum*, quam sanctificationem dicit factam esse in Jordane quoad nos, quia scilicet tunc nobis manifestata est, & propter nos in eum descendisse Spiritum Sanctum declaratum est. Quam expositionem secutus Hilarius libro 15. de Trinitate circa medium expresse dicit hanc unctionem fuisse in Christo ex merito, & ita exponit illam particulam: *Dilexisti justitiam propterea*, &c. Sed hæc expositio tangit quætionem aliam, scilicet, an Christus meruerit suam gratiam habitualement, de quo infra.

Secundo ergo Hieronymus in 3. tom. epist. 149. ad Principiam, particulam, *propter*, de causa meritoria exponit, tamen unctionem illam intelligit de *oleo exaltationis*, quo in resurrectione unctus est, & de exaltatione, & regno, quod suis meritis obtinuit. Et hæc expositio habetur nomine ejusdem Hieron. super Psalm. 44. Nec multum ab ea distat Ambrosius ad Hebr. 1.

Tertio tamen, si per unctionem intelligamus ipsam unionem ad Verbum, ut multi Patres intelligunt, ut dicemus infra qu. 7. illa particula *propter*, non de causa meritoria, sed de finali intelligenda est, ita ut sensus sit, quia alii homines declinaverunt & defecerunt, ut tu odisses iniquitatem, & justitiam in omnibus diligeres: *Propterea unxit te Deus Deus tuus*. Et ita exponunt supra citati, Augustinus, Anselm. & Beda, & Cyrillus Alexand. lib. 8. thesaur. c. 1. circa finem.

Sed quæret aliquis, esto non meruerit Christus incarnationem suam, ut in principio facta est, an saltem meruerit,

De dispositionibus ad incarnationem prævias ut sic Christus non est meritis.

Incarnationem subsequenter circumstantias meritis est Christus. Obiectio.



ruerit, vel continuationem & perseverantiam illius unionis, vel quasi extensionem ejus ad omnes partes materiæ, quas paulatim per nutritionem acquirebat, vel quasi restitutionem ejus, quæ in resurrectione facta est. Cum enim in triduo non fuerit humanitas, nec fuit unio ad humanitatem, & in resurrectione iterum restituta est; hæc enim omnia videntur esse posteriora incarnatione, ut in principio facta, atque adeo respectu illorum posse salvari omnes conditiones ad meritum necessarias, & cessare omnes rationes supra factas.

Dici tamen potest ad primam interrogationem hanc gratiam unionis de se esse perpetuam, & ut talem a principio dari, & ideo in illa non esse quid distinctum continuationem a prima donatione, præsertim cum dona Dei ex parte ejus irrevocabilia sint, quamdiu creatura non ponit impedimentum; quod in hoc mysterio locum non habet, quia humanitas semel unita non potest divinæ gratiæ impedimentum ponere: quod simile est in beatitudine, & ideo in illa idem est mereri beatitudinem, & mereri perpetuam ejus conservationem; sic ergo in hac gratia unionis idem fuit gratiam ipsam gratis dari, & perpetuam durationem ejus. Et quamvis fortasse non implicet contradictionem hanc gratiam, solum pro ut intelligitur coexistere uni instanti, gratis dari, & ut perseverantem & durantem esse præmium meritorum, tamen id nec videtur consentaneum naturæ ejus, cum de se perpetua sit, nec modo communicationis divinæ gratiæ, cujus dona (ut diximus) sunt sine penitentia.

Hinc ad secundam interrogationem dici potest, non oportere ponere meritum illius, quasi extensionis, quia illa unio partium materiæ quodammodo sequitur ex vi primæ unionis, qua Deus factus est homo integer & perfectus. Nam hæc unio requirit, ut omnes partes humanæ naturæ eadem Verbi substantia subsistant.

Ad tertiam vero interrogationem dici potest, meruisse quidem Christum resurrectionem suam, atque adeo unionem animæ ad corpus, non tamen propterea necessarium esse, ut meruerit aliquam unionem humanitatis ad verbum, quia hæc in re ipsa non fuit dissoluta, sed mansit in anima & corpore, quæ licet inter se separata fuerint per mortem, non tamen a Verbo. Unde postea eo ipso, quod inter se unita fuerunt, mansit tota humanitas ad Verbum unita, non per novam unionem, sed per solas uniones partium quasi inter se conjunctas & unitas. Quod clarius patebit infra qu. 6.

**Responsio** Hæc responsio probabilis est, & quidem quod attinet ad tertium punctum, id pendet ex hoc, quid addat unio totius humanitatis ad Verbum supra uniones partiales animæ & corporis simul sumptas. Si enim nihil addit præter unionem animæ & corporis inter se, recte responsum est: si autem aliquid addit, illud sine dubio fuit Christo restitutum propter merita ejus, quia non est major ratio de resurrectione ipsa, quam de hac unione, si aliquid addit, & quia totum hoc pertinet ad exaltationem Christo debitam propter mortem suam, an vero aliquid addat, infra quæst. 6. dicendum est. Quoad secundum vero punctum, licet verum sit illam unionem partium materiæ, quæ per nutritionem acquirebatur, fuisse debitam Christo ex vi unionis: non video tamen, cur negari debeat etiam rationem meriti potuisse deberi, & fuisse debitam, sicut de gloria corporis dicimus, nam hoc ipso, quod aliquod donum supernaturale obtinendum sit post aliqua merita, quæ possunt esse digna illo præmio, potest cadere sub meritum, etiam si alio titulo debitum sit, ut jam non solum per modum proprietatis naturalis, sed etiam ex justitia debeatur. Et hinc in primo puncto non est impossibile (quamvis hæc res sit mihi magis dubia) meruisse Christum perpetuam conservationem hujus unionis, sicut Gabr. in 3. dist. 18. dub. 3. circa finem dixit meruisse Christum perpetuam fruitionem animæ suæ, quamvis ipsam fruitionem non meruerit. Quanquam enim hæc duo physice non distinguantur, quia per conservationem nulla res additur rei permanenti, & de se æterna, tamen moraliter considerata, & in ordine ad libertatem causæ conservantis multum distant, ut per se constat. Et ita etiam explicatur, quia si perpetua conservatio non deberetur ex merito, sicut Deus gratis dedit unionem, ita ex mera libertate sua posset illam non conservare sine læsione justitiæ, vel alterius virtutis: at vero si intercedat meritum, jam ex justitia illam conservat, nec

potest magis eam tollere, quam negare seipsam. Et confirmatur, quia cur non potuit mereri Christus, ut post mortem suam anima & corpus Verbo unita permanerent? Aut cur negabimus hoc meruisse, cum sub valore operum ejus, & totum contineri possit, & non videatur a Deo debitum aliis titulis? Quanquam licet esset debitum, non esset negandum propter eam causam, ut dictum est. Item Christus meruit, ut perpetuo glorificaretur tanquam Deus homo, hoc enim sensu dicitur dignus divinitate Apoc. 5. (ut dictum est); ergo etiam meruit, ut ea dignitas perpetuo conservaretur in humanitate sua. Itaque hæc pars mihi videtur probabilior.

Contra hanc vero sententiam obijciunt aliqui, quia perpetua conservatio est ex natura rei debita tali mysterio & unioni. Item, quia est imperfectio habere rem dependentem a meritis, sicut supra de unione ipsa dicebamus. Tertio, quia aliàs etiam dici posset, meruisse Christum, intensionem gratiæ & virtutum, quia hæc etiam esse poterat major, & in merito fuit valor sufficiens. Quarto quia esto hoc præmium sit possibile, tamen non constat Christum ordinasse sua merita ad tale præmium, neque ullus sanctorum aut Doctorum id docuit, neque est necessarium, cum jam satis constaret Christo voluntas Patris de conservanda perpetuo unione. Denique cum illa conservatio sit infinitum bonum, tali præmio ita exhauriretur meritum Christi, saltem quoad primum actum, ut nihil per illum posset nobis mereri.

Sed hæc & similia faciliorem habent solutionem. Et in primis sumo, quod recte conceditur, potuisse Christum hanc conservationem mereri, quod intelligendum est, servatis omnibus legibus connaturalibus merito, absque ulla dispensatione (ut sic dicam), quia potest actus meritorius Christi, non solum naturæ ordine, sed etiam duratione, saltem per instans antecedere conservationem incarnationis ut sic. Nam, licet conservatio sit eadem actio cum prima effectione, connotat tamen perseverantiam, seu coexistentiam ad aliquam durationem successivam veram, seu imaginariam, aut mente conceptam; quod satis est, ut conservatio & sit posterior, quam actus meritorius, qui in primo instante fit, & ut ex hac parte habeat sufficientem habitudinem ad illam, ut quantum est ex hoc capite, possit connaturali modo sub meritum talis actus cadere. Ex alio vero capite nihil deficit in Christo, ut per se manifestum est. Nam quod hæc conservatio sit connaturalis, & quod, secluso merito, Deus ex se haberet voluntatem absolutam conservandi perpetuo illam unionem, non obstat, ut patet in gloria corporis, & in resurrectione. Unde infra qu. 19. generatim ostendemus, Christum sibi meruisse quidquid ex supernaturalibus bonis connaturali modo mereri potuit, quia hoc est majoris perfectionis, & non est, cur ei denegetur.

Per hæc ergo satisfactum est primæ objectioni, nam debito connaturalitatis adjungi potest debitum justitiæ. Ad secundam dicitur, in his, quæ tempore, vel natura antecedunt meritum, imperfectionem esse dependentiam a subsequente merito, quia tunc non videntur a principio perfecte obtineri, & possideri, in his vero, quæ jam supponunt actum meritorium, nulla est imperfectio, quin potius major perfectio. Ad tertiam negatur similitudo de intensione, quia hæc a principio, & ante omne meritum data est, nec fuit conveniens, ut in ea fieret aliqua mutatio, ut qu. 7. late dicitur: conservatio autem nec data est, nec dari potuit in primo instante, proprie de conservatione loquendo. Ad quartam non oportet, ut de singulis meritis & præmiis Christi speciali revelatione aut auctoritate constet, sed sufficit, ut in generali aliquo principio, Scripturæ, Patribus, & rationi consentaneo continentur: hujusmodi autem est, Christum meruisse quidquid connaturali modo potuit: de quo dicam latius disp. 40. sect. 2. item principium illud, quod Christus gloriam sui corporis meruit, potest, ad hoc colligendum probabiliter conferre, quia, si meruit illam gloriam, meruit æternam conservationem ejus: ergo & aliorum bonorum, quæ ad illam supponuntur. Neque est timendum, quod hoc præmium exhauriatur aliquod meritum Christi, nam in eo est sufficiens infinitas ad hæc omnia præmia, ut supra disp. 4. ostensum est, nec non dicta disp. 40. dicitur iterum. Et ex sequenti propositione, quam nemo negare potest, apertissime constabit.

Sed dices tandem: Ergo etiam homo purus, cum justifi-

Al quæ  
contra  
prædictam  
sententiã  
insurgunt  
quibusdam  
objectionibus.

Notabile.

Singulæ  
tunc sit  
tis supra  
objectionibus.



Propo-  
nis ob-  
jecto.

Respon-  
detur

sihæatur, potest mereri suæ gratiæ conservationem: unde & merebitur illam, sicut meretur primam gloriam, ut est probabile; id autem dici non potest, alioqui mereretur perseverantiæ donum, quia conservatio gratiæ includit perseverantiæ donum. Respondeo, quoad aliquid esse similitudinem, non vero quoad omnia. Itaque sicut probabile est mereri hominem per contritionem primam gratiam, ita est probabile posse mereri, post ipsam adeptam, conservationem ejusdem: quia dum meretur primam gloriam, meretur illam ut æternam: ergo & perpetuam gratiæ conservationem, sine qua gloria esse non potest. At vero sicut non meretur gloriam ut absolute dandam, sed sub ea conditione, quam Conc. Trident. sess. 6. adhibuit, videlicet, si in gratia decesserit, ita non meretur conservationem gratiæ ut absolute dandam, sed sub conditione, si homo ipse nihil commiserit gratiæ contrarium. Itaque debetur tali homini ex iustitia, & ex vi meriti, ut non privetur gratia habituali, nisi mortaliter peccet: non est autem illi debitum, quod ei detur, ut non peccet, quia hoc non spectat ad intrinsecam & physicam gratiæ conservationem, de qua modo agimus, sed ad speciale donum perseverantiæ, quod nullam conditionem includit, sed per illud absolute & simpliciter datur homini, ut gratiam non amittat, quod non cadit sub tale meritum. Et in hoc est magna differentia inter Christum & purum hominem: nam in Christo supponitur illa conditio ut connaturalis ac necessaria, quia ex se nihil poterat committere repugnans unioni, & ideo sine ulla conditione aut limitatione conservationem prædictam mereri potuit.

Ultimo igitur addendum est, etiam meruisse Christum, ut hæc unio hypostatica non quidem multiplicaretur, sed ut eadem quasi iterum atque iterum in rerum natura poneretur, quod per mysterium Eucharistiæ supra fieri diximus. Quod quidem mysterium ex meritis Christi profectum esse, & in virtute illorum quotidie perfici certissimum est, sicut & ipsa sacramenta, ut infra q. 62. art. 5. D. Thomas docet, & ibi dicemus.

## SECTIO V.

*Utrum homines iusti, qui præcesserunt, de condigno mereri potuerint incarnationem.*

**H**ÆC quæstio de omni pura creatura Angelica & humana generaliter procedit, sed claritatis gratia, de antiquis patribus tractatur a Doctoribus, quia in eis potest esse aliqua ratio dubitandi, & resolutio quæstionis & ratio ejus eadem est de omnibus aliis. Ratio autem dubitandi esse potest, quia in illis hominibus videntur fuisse omnes conditiones ad meritum de condigno requisitæ. Nam primum erat gratia sanctificans, deinde erat oratio procedens ex fide & spe hujus mysterii, & ex charitate ad Deum, & ad genus humanum, denique erat motio Spiritus sancti, & ordinatio divina; ad hoc enim illis conferebantur gratia & auxilia, ut se disponerent ad hoc mysterium suscipiendum, atque impetrandum. Breviter tamen hæc quæstio tam de facto, quam de possibili definiri potest.

Dico ergo primo. Nullus hominum meruit de condigno Incarnationem filii Dei. Est certa & communis Theologorum, quos sequenti sectione referam. Et ex Scriptura & Patribus probanda est testimoniis in tertia sectione adductis. Illa enim non tantum ipsius Christi, sed simpliciter omnia merita de condigno, & ex iustitia excludunt. Quibus addi potest Irenæ. lib. 5. contra hæres. c. 2. ubi inquit respectu peccati redemisse nos Christum summa iustitia, respectu vero nostri, summa benignitate, quia nihil illi antea dederamus. Rationes, quibus ad hoc probandum D. Thom. utitur, præsertim prima & tertia sunt efficacissimæ, quas in sequenti conclusionem magis urgebimus. Et confirmari potest primo, quia merita antiquorum Patrum habuerunt condignum præmium in gloria, & gratiæ augmento illi respondente; ergo non merebantur de condigno altius præmium, quale est Incarnatio. Antecedens patet, quia respectu nostrorum meritorum hoc est condignissimum præmium, sed non erant altioris ordinis merita priorum hominum, neque enim ex perfectiori gratia operabantur. Secundo confirmatur, quia unus homo non meretur alteri homini pri-

am gratiam de condigno; ergo multo minus potuerunt homines mereri Christo gratiam unionis, quæ prima in illo fuit. Tertio, quis dicat aliquid altius, & majus meruisse primos homines, quam ipsum Christum? Si ergo ipse Christus non meruit de condigno Incarnationem, multo minus alii homines. Et hæc rationes convincunt, antiquos patres non tantum non meruisse incarnationem de condigno quoad substantiam ejus, verum neque quoad accelerationem ejus, seu alias circumstantias, ut patebit facile applicando rationes factas. Quanquam contrarium hujus illationis sentiant Richardus, Bonaventura, Gabriel, Marfilus, Alexander A lensis, statim sectione sequenti citandi. Sed sine fundamento, quia etiam acceleratio (si tamen illa potest cadere sub meritum) & aliæ circumstantiæ Incarnationis ad altioris gratiæ ordinem pertinent, qui non debetur operibus precedentibus a gratia creata, sed hæc in suo ordine habent condignum præmium, & ideo nihil extra illum, vel supra illum de condigno merentur.

Dico secundo: nulla pura creatura potuit de condigno proprie & perfecte mereri Incarnationem; etiam si intercederet Dei promissio quamvis in illa posita esset aliquis ratio meriti, aliquam similitudinem habens cum merito de condigno. Hæc conclusio est solum probabilis, & est consentanea D. Tho. & aliis Theologis citatis. Et explicatur breviter, & probatur primo, quia si considerentur gratia creata, & opera, quæ ab illa procedunt secundum se tantum, & intrinsecam suam naturam, solum habent naturalem proportionem, & condignitatem cum gloria, cujus semen est gratia, quæ cum unione hypostatica nec proportionem habent, nec condignitatem, cum gratia nec semen ejus sit, sed inferioris cujusdam ordinis, neque ex natura sua ad illam ordinetur. Secundo, si constituuimus huic gratiæ superaddi divinam promissionem sub conditione operis, tunc esset quidem aliquod vestigium meriti de condigno, quia homini sic operanti sub tali promissione debitum esset præmium Incarnationis, & quia illa opera ex divina ordinatione, & facta sub fide, & spe illius promissionis antecedentis habent quendam majorem valorem pertinentem quodammodo ad ordinem unionis hypostaticæ.

Tertio, quod posita hac promissione adhuc non esset in illis operibus meritum proprie, ac simpliciter de condigno, habens, seu inducens veram rationem iustitiæ, ita declaro. Quia quamvis promissio sub conditione operis ad perfectum meritum de condigno necessaria sit: non tamen sufficit, nisi opus, sub quo fit promissio, pensatis omnibus sufficientem valorem habeat, & respectu præmii moraliter condignum: at vero meritum puræ creaturæ, quantumvis in se perfectum, & factum sub illa promissione, semper est omnino inæquale in valore respectu præmii Incarnationis, quia semper illud meritum manet finiti valoris intensive: Incarnatio autem est præmium infiniti valoris simpliciter: sunt ergo prorsus inæqualia, imo illud meritum est quasi nihil respectu tanti præmii, & ideo promissio sub conditione illius non inducit veram, ac propriam iustitiam.

Dices: ergo saltem hoc modo concedendum est, meruisse Patres antiquos de condigno incarnationem. Probatur sequela, quia illi habuerunt promissionem incarnationis propter sua bona opera a gratia precedentia, ut patet ex illo Genes. 22. Benedicentur in semine tuo omnes gentes, quia obedisti voci meæ. In semine tuo, ait, quod scilicet, *Est Christus*, ut exposuit Paulus ad Galat. 4. & Psalm. 131. ad David dicitur: *Juravit Dominus David veritatem, & non frustrabitur eum, de fructu ventris tui ponam super sedem tuam*. Respondetur, has promissiones non fuisse antecedentes merita, & sub conditione operum factas, ut merita, quæ illis inniterentur, majorem aliquam vim habere possent, vel majorem obligationem inducere; sed fuisse consequentes, ex Dei benignitate & misericordia, quod satis patet ex forma ipsarum promissionum, & ex verbis, quibus fiunt. Quando vero promissio vel collatio stipendii est tantum subsequens opus, non immutat ullo modo obligationem seu meritum, quantum est ex vi operis, ut in rebus humanis satis constat; & infra tractantes de Christi merito latius explicandū est.

Ex dictis tamen obiter expediri potest quæstiuncula incidens, an homo purus possit de condigno mereri assumptionem suæ propriæ naturæ, scilicet, existens, prius tem-

Pura creatura Incarnationem de condigno mereri non potuit.

Obje.

Responsio

Dubium;



tempore in proprio supposito, habensque gratiam, & divinam promissionem, quod assumenda sit ejus natura, dummodo hoc, vel illud operetur. Quidam enim existimant tale meritum impossibile esse: tum quia qui meretur, sibi meretur: at vero tale suppositum sibi mereri unionem non posset, cum non possit suppositum assumi: tum etiam, quia tale suppositum suam potius destructionem mereretur, nam si ejus assumatur natura, suppositum ipsum creatum e medio tolli necesse est.

Mihi tamen videtur, hoc meritum de condigno proprium, & inducens veram rationem justitiæ, non esse possibile propter rationem factam; tamen eo modo imperfecto, quo dixi posse unum hominem mereri Incarnationem in alia natura, existimo etiam posse in propria, quia opus alicujus non est magis efficax ad merendum bonum alterius naturæ, quam propriæ. Neque Incarnatio facta in propria natura est majoris valoris, quam facta in aliena, & promissio Dei potuisset eodem modo intercedere. Nec ratio facta de destructione proprii suppositi efficax est: nam licet suppositum sit, quod operatur, & meretur: tamen tota ratio operandi est ipsa natura, cujus bonum potest suppositum per talem operationem intendere, præsertim, quia solum dicitur destrui suppositum quo ad modum subsistendi: tota vero natura, & simpliciter idem homo maneret sub meliori modo subsistendi, & ideo destructio illius modi nihil obstat, quominus hoc meritum possibile sit.

#### SECTIO VI.

*Utrum homines iusti, qui Christum præcesserunt, de congruo meruerint Incarnationem, vel ejus accelerationem.*

Quatuor dicendi modos invenio esse posse circa questionem istam. Primus est, affirmans antiquos Patres meruisse de congruo accelerationem Incarnationis, vel alias circumstantias, ut v.g. quod ab ipsis descenderet Christus, non vero ipsam incarnationem. Ita opinantur Bonavent. in 3. d. 4. art. 2. q. 1. Gabr. art. 3. dub. 3. Richard. art. 3. q. 1. Almain. q. 1. dub. 3. Marfil. q. 5. art. 2. concl. 3. & 4. art. 3. dub. 1. concl. 1. & Alex. Alenf. 3. p. q. 8. memb. 3. art. 2. Verum est tamen aliquos ex his magis videri loqui de merito de condigno, quam de congruo, & ideo negare illud respectu Incarnationis, admittit vero respectu circumstantiarum, ut sectione præcedenti tetigi. In hanc vero sententiam de merito congrui inclinant D. Thom. in 3. d. 4. q. 3. artic. 1. ad 4. Scot. in 4. d. 2. q. 1. ad 3. Sot. lib. 2. de just. & jur. q. 1. art. 3. conc. 3. Et probatur prima pars affirmans, quia Patres antiqui erant iusti, & amici Dei, & postulabant non quidem Incarnationem ipsam (jam enim erant certi futuram illam) sed accelerationem ejus; ut patet ex illo Psal. 78. *Cito anticipent nos misericordia tua;* & ideo Psal. 111. dicitur: *Propter misericordiam inopum, & gemitum pauperum nunc exurgam:* ubi per particulam illam, *Nunc*, circumstantia temporis, & acceleratio significatur. Illi ergo Patres merebantur exaudiri saltem de congruo, quia congruum est, ut Deus amicos suos exaudiat iusta petentes: & ideo, quasi satisfaciens Deus eorum desideriis, interdum accelerationem hanc promittebat, ut Isai. 51. *Cito veniet salus tua;* & Abac. 2. *Veniens veniet, & non tardabit;* & Daniel. 9. *Septuaginta hebdomadae abbreviate sunt,* &c. ubi illud verbum præmittitur, *Quia vir desideriorum es.*

Alter pars negans hujus opinionis probatur ratione secunda D. Thom. hic art. 11. quia principium meriti non cadit sub illud meritum, cujus est principium, ut est commune axioma Theologorum, quod & in merito de condigno, & de congruo proportionaliter verum est, si utrumque cum suo principio conferatur, in utroque enim est eadem ratio proportionalis; scilicet, quia unumquodque meritum in suo genere supponit principium suum; sed Incarnatio est principium, & radix totius meriti antiquorum Patrum, tam de congruo, quam de condigno: sicut ergo hac ratione intulit D. Thom. illos Patres non potuisse mereri de condigno incarnationem, eadem ratione concluditur, nec de congruo mereri potuisse. Et confirmari hoc potest variis modis, quos infra in tertia sententia, & respondendo argumentis commodiori loco proponemus.

Secundus modus huic contrarius esse potest, meruisse antiquos Patres de congruo Incarnationem; non tamen temporis accelerationem. Fundamentum prioris partis

est, quia illi Patres non postulabant a Deo solam accelerationem, sed ipsam etiam executionem Incarnationis; ut constat ex eorum verbis Isai. 45. *Rorate cæli desuper, & nubes pluant justum;* cap. 64. *Utinam dirumperes cælos, & descenderes;* Psal. 84. *Salutare tuum da nobis;* & in 105. *Visita nos Domine in salutare tuo;* Genes. 49. *Expectabo salutare tuum Domine.* Hæc autem oratio meritoria erat saltem de congruo, ut patet ex ratione facta pro superiori sententia: congruum est enim, ut Deus coope- retur hominibus iustis, facientibus quod in se est, præsertim ad ea bona consequenda, quæ ad salutem necessaria sunt. Nec vero huic orationi obstat, (quod Alexand. & Richard. supra insinuabant) illos Patres fuisse certos de futura Incarnatione, quia sæpe Deus prædestinat aliquid fieri, quod vult per hominum orationes impetrari, ut recte tractat Gregor. dialog. cap. 8. & explicari potest in ipso Christo, qui orabat pro salute electorum, quos sciebat fore salvandos ex vi divinæ prædestinationis, per media tamen convenientia, & a Deo definita; quorum unum erat illa oratio: sic ergo illi antiqui Patres, licet fidem certam haberent de Christo venturo, merito tamen intelligebant Deum etiam velle, ut ipsi aliquid facerent, & se disponent ad tantum beneficium recipiendum: atque adeo, ut suis orationibus, & desideriis illud obtinerent. Fundamentum posterioris partis negantis est, quia illi Patres antiqui non potuerunt impetrare, atque mereri accelerationem Incarnationis, quia impossibile fuit talem accelerationem fieri, Deus enim, prædefiniendo ab æterno Incarnationem, simul prædefinivit, quo tempore esset futura, illud autem tempus expleri potuit juxta illud ad Galat. 4. *Quando venit plenitudo temporis,* &c. ad quod non fuerunt necessaria orationes, quia ipsum tempus natura sua fluit: at vero immutari, seu accelerari, aut differri non potuit, quia decretum Dei est immutabile, & contrarium hujus a Deo petere esset impium; ergo non potuit hoc cadere sub meritum: sed solum, ut illud ipsum, quod a Deo prædefinitum fuerat, eodem tempore, & modo, quo fuerat dispositum, propter merita, & orationes iustorum mandaretur executioni.

Tertius modus esse potest, negans simpliciter antiquos Patres meruisse tam accelerationem Incarnationis, quàm ipsam Incarnationem. Fundamentum est, quia nulla operatio procedens a gratia creata potest mereri etiam de congruo unionem hypostaticam, nec circumstantias, seu accelerationem ejus, quia sunt diversorum ordinum. Quod ita proportionaliter explicatur, quia magis distat ordo gratiæ creatæ ab ordine unionis hypostaticæ, quam ordo naturæ ab ordine gratiæ; sed non potest homo purus per opera facta viribus naturæ mereri etiam de congruo gratiam, vel auxilium, vel ut citius vocetur, neque aliquid simile; ergo nec potest homo iustus per opera procedentia a gratia creata mereri etiam de congruo incarnationem, vel accelerationem: quam proportionem optime confirmant verba August. de prædest. Sanct. cap. 15. *Ea gratia fit omnis homo Christianus, quæ ab initio ille homo factus est Christus;* sicut ergo non potuit homo mereri de congruo, ut Christianus fieret, neque ut citius fieret, ita neque ut Christus fieret homo. Et confirmatur omnibus supra citatis testimoniis, quibus Incarnationis meritum absolute negatur. Quibus adjungi potest glossa in id Psal. 73. *Respice in testamentum tuum,* dicens, *Meminit promissionis, quia merita defecerunt:* aliàs exhibitio incarnationis non fuisset simpliciter gratia respectu antiquorum Patrum, quia non esset omnino gratis data: sed ex operibus saltem meritoris de congruo; sic enim August. & Concilia damnant Pelagium dicentem, primum gratiæ auxilium dari ex bono usu liberi arbitrii, quia jam non esset gratia, sed ex operibus, cum tamen ille non diceret dari ex iustitia, sed ex quadam congruitate, & bona dispositione. Denique addi possunt pro hac sententia testimonia Scripturæ, quæ in contrarium citantur, non sufficere ad probandum meritum: nam licet antiqui Patres facerent, quod in ipsis erat, ut impetrarent a Deo remedium peccati, non tamen inde meritum inferitur, quod separari potest ab impetratione, ut D. Thom. docet 1. 2. quæst. 1. 14. artic. 9. ad 1. quia plus requiritur ad meritum, quod aliquali iustitiæ operantis innititur, quam ad impetrationem, quæ nititur bonitate, & promissione Dei. Unde impetratio non requirit certam proportionem inter opus petentis, & rem impetrandam:



trandam: meritum vero illam requirit, & hæc deest in proposito, ut declaratum est. Illud vero quod ex Ps. 111. afferri solet: *Propter miseriam inopum, & gemitum pauperum, nunc exurgam, dicit Dominus*, & similia, facile expediuntur in hac sententia, ut illud *propter* non dicat causam meritoriam, sed finalem, miseria enim obiectum est misericordiæ, & movet ad beneficium conferendum: & ita August. illo loco dicit *Patrem misisse filium ad consolandos gemitus pauperum*.

Quartus modus dicendi esse potest affirmans utrumque, scilicet antiquos Patres meruisse de congruo, & Incarnationem, & (quod fere idem est) temporis circumstantiam, seu accelerationem; & hæc sententia bene explicata mihi videtur amplectenda; sed notandum est prius (ut supra in simili dixi) aliud esse loqui de prædestinatione, seu prædefinitione Incarnationis, aut circumstantiarum ejus, aliud loqui de ipsa executione.

Dico ergo primo: Antiqui Patres non potuerunt mereri de congruo prædestinationem Incarnationis. Hæc est communis, & certissima, & convincitur fundamento secundæ sententiæ, seu ratione secunda D. Th. in art. 11. nam prædestinatio Incarnationis est prior omni gratia, & bono motu antiquorum Patrum, & est radix illius; ergo non potest esse ex illorum meritis ullo modo. Confirmatur primo, quia omne meritum antiquorum Patrum fundabatur in fide Christi venturi; ergo supponebat venturum Christum; ergo prædestinatum. Deinde ipsi non petebant, ut prædestinaret Christum, sed ut Deus Christum jam prædestinatum exhiberet.

Atque hæc quidem rationes satis convincunt, de potentia ordinaria hoc aliter fieri non potuisse. Probant etiam, supposito modo & ordine, quo Deus statuit, ut omnia hominum merita, in gratia ex Christi meritis profecta, fundarentur, etiam de absoluta potentia fieri non potuisse, quin præordinatio Christi prævisionem meritorum antiquorum Patrum antecederet, & consequenter ut omnino gratis & non ex meritis hominum fieret. At vero, si Deus aliter res disponere voluisset, fortassis non implicaret contradictionem, ut ex meritis aliquorum hominum prævisis Deus incarnationem fieri præordinaret ac prædestinaret. Ut si aliquibus hominibus gratiam absolute, & sine ordine ad Christi merita, dare statueret, eosque videret per eam bene operaturos, & ex illis operibus prævisis ad volemdam incarnationem moveretur. In hoc enim ordine disponendi ac volendi res nulla est repugnantia, neque indecentia, quæ rectitudini alicujus virtutis simpliciter opposita sit; & cum alioqui Deus libere operetur, potest, prout voluerit, operari, ac disponere omnia. Dices: quamquam hic modus providentiæ non sit impossibilis, & eo posito, electio seu dilectio Christi Dei hominis niteretur in meritis aliorum hominum prævisis, vel de congruo, vel etiam de condigno imperfecto, si promissio antecessisset; nihilominus absolute tota Christi prædestinatio etiam in eo casu non esset fundata in talibus meritis, quia præordinatio & ipsa merita essent medium ad exequendam incarnationem Christi, quæ tamen merita supponerent necessario gratiam aliquam gratis collatam, & non ex meritis, ac propterea tota illa prædestinatio non posset in meritis fundari. Hac enim ratione omnes, qui recte sentiunt de aliorum prædestinatione, docent non posse cadere sub merito, licet præordinatio efficax ad gloriam cadere possit, maxime de potentia Dei absoluta. Respondetur, duplici modo posse intelligi hanc providentiam, & ordinationem divinam. Primo ut grata collata hominibus ad efficienda opera, quibus aliquo modo imperfecto incarnationem merentur, detur eis ex intentione faciendi incarnationem, ex intentione (inquam) non per voluntatem absolutam & efficacem, aliàs nec talis voluntas posset fundari in talibus meritis, sed per voluntatem antecedentem & simplicem, quæ conditionalis vocatur; sicut nunc omnis gratia data hominibus, qui salvandi non sunt, oritur ex voluntate & intentione dandi eis gloriam, non absolute & efficaciter, sed antecedenter, ea scilicet voluntate, qua vult Deus, omnes homines salvos fieri. Et in eocasu concedo, non totam prædestinationem Christi futuram fuisse fundatam in talium hominum meritis, ut ratio facta concludit. Alio tamen modo intelligi posset gratiam, & merita illis hominibus collata, nullo modo oriri ex voluntate incarnationis, nec beneplaciti, nec

Suarez Tom. XVI.

antecedente, sed tantum ex voluntate salvandi ipsos homines: Deum vero, visis talium hominum meritis, occasione illorum veluti excitari & moveri ad volendum incarnationem & disponendum de mediis, quibus posset executioni mandari. Posito autem hoc providentiæ modo tota prædestinatio incarnationis niteretur in illis meritis, quia illa prior gratia, quæ ad illa merita antecedit, nullo modo videtur ad prædestinationem Incarnationis pertinere: quia non esset medium ad illam exequendam, cum nullo modo esset ex voluntate seu intentione ejus profecta. Hic autem modus non videtur absolute loquendo contradictionem implicare, nec esse impossibilis, propter rationem supra factam fundatam in libertate divina: esset tamen hic modus parum consentaneus divinæ perfectioni & sapientiæ, ad quam spectat nunquam operandi animum ex prævisa occasione aliqua sic arripere, quin ipsa occasio aut prævolita sit seu præordinata propter finem talem, si bona sit, aut certe permissa, si sit mala. Unde loquendo secundum legem ordinariam & quasi connaturalem, simpliciter dici potest non posse prædestinationem incarnationis cadere sub hominum merito, etiam imperfecto.

Dico secundo: Non potuerunt antiqui Patres mereri de congruo prædestinationem Incarnationis quoad circumstantias ejus. Loquor autem de potentia ordinaria, non absoluta: & explicatur; dupliciter enim intelligere possumus, Deum prædefinivisse, seu prædestinasse has circumstantias. Primo, ex meritis prævisis antiquorum Patrum ita, ut prius secundum rationem prædestinaverit mysterium ipsum a circumstantiis abstrahendo: deinde vero providerit in hominibus justis talem dispositionem, vel orationem, & propter eam voluerit mittere Christum potius hoc tempore, quam alio, vel ex hominibus his, potius quam ex aliis, & juxta hunc ordinem essent homines causa meritoria de congruo talium circumstantiarum, non solum ordine executionis, sed etiam ordine prædestinationis. Sed hic modus mihi videtur falsus, & improbabilis. Unde potius e contrario dicendum est, Deum antequam prævisa omnium hominum merita prædestinasse, & Incarnationem fieri, & tali tempore, & ex tali gente fieri, & ideo ita res disposuisse, ut illo tempore, & in illa gente esset opportuna dispositio ad tale mysterium suscipiendum. Et probatur; nam quis dicat, meruisse Beatam Virginem etiam de congruo suam electionem, ut esset Mater Dei, vel Joannem Baptistam, ut esset præcursor, vel Abraham, & David, ut essent Christi progenitores? Si hoc enim dicere licet, pari ratione de populo Hebræorum dici posset, meruisse, ut Deus ipsum eligeret in populum peculiarem contra illud Deut. 9. *Neque enim propter justitias tuas, &c.* Deinde hoc constat ex ipsis effectibus gratiæ: nam Abraham verbi gratia, aut Joannes Baptista, aut Beata Virgo fuerunt ante omnia merita vocatione quadam, aut gratia specialissima præventi, quæ sine dubio ex speciali eorum electione processit; ergo illa electio antecessit omnia merita, & fuit causa ipsorum meritorum. Rursus, per illam specialem gratiam ordinabantur, ut congrue se disponerent ad Incarnationem, id est Abraham, ut illi fieret specialis promissio Christi, & B. Virgo, ut congrue disponeretur ad concipiendum Deum; ergo illa gratia supponebat electionem ad hæc munera, quæ sunt circumstantiæ Incarnationis; ergo hæc electio non cecidit sub merito de congruo; sed potius ipsum meritum ab illa processit. Simile autem argumentum fieri potest de temporis circumstantiis, nam non se disposuerunt homines ad suscipiendum mysterium Incarnationis tali tempore potius, quam alio, nisi per auxilium gratiæ cuncta merita præcedens; sed quod hoc auxilium tali tempore, & modo datum fuerit potius, quam alio, ex sola Dei voluntate processit; ergo prima temporis prædefinitio, quo Christus incarnandus fuit, non fuit ex meritis hominum prævisis, sed ex voluntate Dei, ut patet reducendo electionem mediorum ad intentionem finis: nam Deus contulit hoc tempore, verbi gratia, specialem gratiam Abraham, David, vel aliis, ut se disponerent ad Christum suscipiendum, & illum impetrarent, & ut saltem tali tempore veniret; ergo voluntas dandi illam gratiam erat ex intentione, & voluntate Incarnationem tali tempore faciendi; sed illa voluntas antecessit omnia merita; ergo multo magis hæc intentio, seu prædefinitio talis circumstantiæ

Qualiter prædestinatio incarnationis sub puri hominis merito cadere possit.

P

Incar-



Incarnationis. Neque enim dici potest, illam circumstantiam tantum esse prius intentam voluntate antecedenti, & non absoluta, & prædefiniente, tum quia intentio, & electio sunt proportionata, electio autem meliorum erat efficax, seu media electa erant efficacia, seu infallibilia; ergo intentio etiam erat efficax, & prædefinitiva: tum etiam, quia hæc ratio providentiæ est multo perfectior, & conformior divinæ sapientiæ; alia vero nullo nititur fundamento, nec ratione probabili.

Dico tertio, Antiquos Patres meruisse de congruo executionem, seu exhibitionem Incarnationis, quoad substantiam ejus. Hæc est sine dubio sententia D. Th. in hoc art. 11. eodem enim modo affirmat illos Patres meruisse de congruo Incarnationem, quo negat de condigno; hoc autem non solum negat de circumstantiis incarnationis, sed etiam de ipsa Incarnatione; illud ergo affirmat de ipsa etiam Incarnatione, & ita eum & intelligunt, & sequuntur omnes ejus discipuli. Et probatur primo, quod homo iustus sit sufficiens ad meritum hoc, si aliunde non sit repugnantia, quia licet gratia creata (ut tertia opinio dicebat) sit inferioris ordinis, quam unionis gratia, & ex natura sua illam non petat; tamen supposito, quod illa unio futura est ex divina ordinatione, habent inter se aliquam proportionem, quatenus nulla potest esse convenientior via, aut dispositio ad executionem Incarnationis, quam per iustitiam coram Deo, & orationes, ac bona opera ab illa procedentia; sicut in ipsomet Christo gratia habitualis fuit congruentissima dispositio ad gratiam unionis, non antecedens, sed consequens, & ornans, ut supra dictum est: in patribus vero, qui Christum præcesserunt, potuit esse tanquam remota dispositio antecedens, seu tanquam via quædam, ut convenienti modo obtineretur Incarnatio; bona autem dispositio supernaturalis, & in persona grata, ad effectum supernaturalem, meretur illum saltem de congruo, ad quod non requiritur tam exacta proportio, sed sufficit aliqualis, partim fundata in ordinatione divina, partim in ipsis rebus, quatenus ad gratiam unionis nulla altior dispositio ordinari poterat, ut dictum est, & quatenus per fidem, spem, & petitionem, & supernaturalem amorem hujus mysterii elevatur homo quodammodo, & unitur ipsi Christo, in quo differt multum ordo gratiæ creatæ, ab ordine naturæ, quia natura non potest viribus aut actibus suis attingere perfecto modo supernaturalem ordinem, etiam objective, id est credendo, & amando: at vero gratia potest saltem hoc modo attingere ipsam unionem hypostatice, & hoc sine dubio satis superque est ad meritum de congruo, præsertim suppositis alijs, scilicet iustitia operantis, & ordinatione divina.

Secundo, quod hoc meritum esse potuerit in antiquis Patribus, etiam si gratiam habuerit ex meritis Christi prævisis, probatur primo, quia non est minus perfecta, & efficax illa gratia, & opera ab illa procedentia, quam si omnino gratis data esset, & non ex meritis Christi prævisis: sed si hujusmodi esset, posset homo per illam mereri de congruo Incarnationem; ergo. Secundo, quia id, quod est prædestinatum a Deo sine ullo merito, potest non mandari executioni, nisi propter meritum, ut constat in gloria prædestinatorum; ergo quamvis Deus prædestinaverit prius Christum, & propter merita futura, & prævisa in Christo sic prædestinato dederit gratiam antiquis Patribus, potuerunt ipsi nihilominus mereri saltem de congruo Incarnationis executionem. Cujus rationis vis magis infra constabit, cum solvemus fundamentum primæ sententiæ; nunc vero vel ad hominem, vel ex principiis, quæ nemo negare potest, ita declaratur, quia negari saltem non potest, quin Patres antiqui orando impetraverint a Deo executionem Incarnationis: quia in orationibus eorum supra indicatis concurrant omnes conditiones requisite ad orationis efficaciam, quod præsertim de orationibus B. Virginis passim in Patribus reperitur; sed non minus habet efficaciam oratio ex Christo, quam meritum, nam gratia, & auxilium ad digne orandum, & acceptatio orationis, & fides, quæ niti debet, ut accepta sit, totum est ex Christo: sicut ergo Christus est principium, & fundamentum omnis meriti, ita & omnis bonæ orationis, & impetratiæ; impetrabant ergo illi Patres principium, & fundamentum, quod dabat valorem orationi suæ: quid ergo mirum, quod meruerint de congruo principium sui meriti?

neque enim unum, quam aliud, aut magis repugnant, aut magis absurdum est. Simile argumentum fit de dispositione: disponebantur enim illi sancti Patres, ut Christum suspicerent, & præsertim Beâtissima Virgo: & tamen principium, & fundamentum illius dispositionis erat Christus; disponebantur ergo, ut principium suæ dispositionis re ipsa susciperent. Sic ergo, & illud de congruo mereri poterant, quia re vera hoc meritum non est nisi per modum cujusdam convenientis dispositionis, seu præparationis, ut D. Thom. supra dixit, & in 3. d. 4. q. 3. art. 1. in fine corporis.

Dico quarto, Antiqui Patres etiam meruerunt de congruo aliquas circumstantias Incarnationis, & aliquo modo dici possunt meruisse ejusdem accelerationem. Hæc conclusio præsertim quoad priorem partem sequitur a fortiori ex præcedenti, & inductione probatur, quia quod Incarnatio fiat ex tali fæmina, circumstantia quædam est incarnationis; sed hoc meruit B. Virgo de congruo merendo maternitatem divinam, ut insequentibus dicetur. Et similiter Abraham meruit de congruo, ut ex illo Christus descenderet, quæ est etiam circumstantia Incarnationis, juxta illud Genes. 22. *Benedicentur in semine tuo omnes gentes, quia obedisti voci meæ*. Deinde de S. Simone insinuat Luc. 2. propter sua merita obtinuisse, ut *Non videret mortem, nisi prius videret Christum Domini*, quod est aliquo modo mereri circumstantiam temporis Incarnationis. Et similiter Amb. lib. 2. in Luc. dicit de Anna vidua: *Talibus fuisse moribus, ut digna fuerit Salvatore omnibus nunciare*. Ac denique Daniel. 9. indicatur, illum suis precibus, & desideriis obtinuisse, ut tempus redemptionis ultra septuaginta hebdomadas non differretur. Ex quo declaratur ultima pars, cum enim dicitur Patres meruisse accelerationem Incarnationis, non est sensus, potuisse mereri, ut Deus mutaret decretum suum, quod in prima prædefinitione habuit, hoc enim impossibile est, ut recte probat secunda sententia; sed est sensus ita Deum in sua prædestinatione disposuisse executionem hujus mysterii, ut voluerit ipsos homines ita disponi, & præparari ad hoc beneficium suscipiendum, ut per eam dispositionem mererentur de congruo, ne hoc beneficium amplius differretur. Ad hunc enim modum dixit Gregorius circa id Psalm. 50. *Redde mihi latitiam salutaris tui*: timuisse David, ne propter peccatum suum impediretur promissio sibi facta de Christo; ex suo semine venturo, & postulasse dictis verbis, ne hæc poena afficeretur, quod non existimo ita intelligendum, ut David dubitaverit de certitudine prioris promissionis, sed quod existimaverit peccatum suum esse dignum illa poena, & medium conveniens, ut promissio Dei impleretur, fuisse poenitentiam, & humilem orationem. Ad eundem etiam modum Cajet. Genes. 27. dicit, propter peccatum filiorum Jacob dilatatam fuisse Incarnationem, non quidem per mutationem divini propositi, sed quia homines peccando meruerant illam dilationem, quam Deus jam prædefinierat. Unde intelligitur explicato hoc modo, hoc meritum accelerationis in re fere coincidere cum merito exhibitionis ejusdem Incarnationis, & cum merito circumstantiæ temporis, nam totum hoc nihil aliud est, quam mereri, ut Incarnatio promissa re ipsa exhibeatur, nam in hoc includitur, ut tali tempore fiat, & amplius non differatur.

Dico, fere in idem coincidere, quia in rigore non sunt omnino idem, neque in se, ut est apertum, neque in ordine ad meritum. Potuisset enim Deus ita res ordinare, ut circumstantia temporis esset ex meritis, non vero executio Incarnationis quoad substantiam suam, & e converso, nulla est enim in hoc repugnantia: nam cum hæc & mente & in re præcendi possint, liberum est Deo, in uno respicere ad merita, & non in alio, vel ad unum ordinare merita, & non ad aliud. Nihilominus assero de facto hæc fuisse fere idem, quia per modum unius intendebantur, & petebantur, & quia moraliter separari vix possunt. Qui enim instanter petit aliquid fieri, sane non tempus tantum, sed ipsum opus etiam petit, idque non abstrahere, sed definire, ut statim vel cito fiat, & hoc modo petiisse Patres antiquos Incarnationem, constat ex superius adductis. Unde eandem proportionem habebat eorum dispositio ac petitio ad utrumque per modum unius impetrandum, & ex parte Dei erat eadem ratio, & ideo illa duo per modum unius moraliter facta sunt.

Antiqui Patres aliquas circumstantias Incarnationis, de congruo meruerunt.

Quo pacto antiqui Patres Incarnationis accelerationem meruerint.



**Sunt intuitu meritorum & precum antiquorum Patrum.**

Quæstionem  
proponi-  
tur, ipsi  
que resp-  
detur.

Sed quæres tandem, an hæc dispositio, & meritum, licet fuerit de congruo juxta divinam ordinationem, fuerit simpliciter necessarium, ita ut sine illo, vel non fieret incarnatio secundum executionis ordinem, vel non tali tempore fieret. Respondetur hoc a nemine sciri posse, nisi ab ipso Deo, quia utroque modo fieri potuit, & liberum fuit Deo alterutro modo id ordinare, & revelatum hæcenus non est, quo modo hæc disposuerit, aut quid ipse facturus esset, si in hominibus tale meritum vel dispositio non præcessisset. Sicut Deus, quando peccatori sese imperfecte disponenti dat ulteriora auxilia, ut sese perfecte disponat, potest interdum ita expectare priorem remotam dispositionem, ut sine illa non det ulteriorem: interdum vero sine remota dispositione prævia dat statim perfectam. Unde, si interrogetur, quid esset facturus Deus, si Petrus v.g. non bene usus fuisset prioribus auxiliis, an daret illi perfectum: nihil certo responderi potest, quia hoc totum pendet ex libera dispositione gratiæ suæ; sic ergo fere in præsentem contingit. Supposito tamen ordine providentiæ nobis revelato, dicendum est, cum hæc dispositio & meritum antiquorum Patrum in Christi honorem ordinata sint, verisimilius esse, ita fuisse a Deo disposita & ordinata, ut sine illis non mandaretur executioni incarnatio. Sicut etiam est verum dicere, Deum non assumpturum fuisse carnem ex femina, nisi ex virgine humili & sancta. Denique si recte considerentur supra dicta de certitudine divinæ præscientiæ conditionalis, cum quæ & per quam hæc omnia disponit, quæ ex libertate hominum pendet, ex illis constat, ita Deum hæc omnia disposuisse, ut infallibiliter fierent, & consequenter ut in re unum sine alio non fieret, id est, ut non fieret hoc mysterium sine dispositione prævia congruente ex parte hominum, & eo tempore, quod magis deceret ad ipsius reverentiam; juxta supra dicta disp. 6. section. 2. & hac sectio. & quæ in sequentibus dicentur. Si autem fingamus, Deum præcivisse, non fuisse habituros homines dispositionem hanc, & hæc merita, non licet inde inferre, cessaturum fuisse Deum ab opere incarnationis exequendo, sed solum quod non fieret incarnatio eo providentiæ modo, quo nunc facta est; tamen adhuc maneret integrum decretum de incarnatione secundum se, ex vi cujus Deus præordinasset alia media, vel aliam dispositionem hominum, ut decensissime fieret, juxta infinitas rationes, & modos, quos divina sapientia novit, & disponere potuit.

Responsio  
ad id

Ad fundamenta aliarum opinionum facile est ex dictis respondere. Ad primum enim dicendi modum, admittimus probationes prioris partis, quibus ostenditur Incarnationis accelerationem Patres meruisse; nam illæ hoc solum probant. Ad fundamentum autem alterius partis, varie responderi solet. Primo, negatur meritum de congruo fundari in meritis Christi; sed in bono usu liberi arbitrii. Sed hæc responsio primum falsa utitur doctrina, nam sine gratia Dei, & Christi nullum est meritum de congruo, præsertim boni alicujus supernaturalis, & maxime tanti & tam excellentis boni: & hanc doctrinam, ut omnino veram, & indubitatam suppono ex materia de gratia. Deinde male illam applicat, quia illi actus, quibus antiqui Patres merebantur de congruo Incarnationem, erant sine dubio actus supernaturales, ad quos erat necessarium auxilium gratiæ, quod nulli unquam datum est, nisi propter Christum. Hujusmodi enim erant actus fidei, spei, & orationis, vel desiderii Incarnationis; definit enim Conc. Arausic. can. 3. & 4. efficax desiderium salutis, vel remissionis peccati, aut orationem debito modo factam ad impetrandum aliquod donum gratiæ, non posse haberi sine gratia Christi; multo ergo magis oratio efficax ad impetrandam Incarnationem ipsam haberi non poterat sine gratia. Et confirmatur, quia hoc meritum de congruo Incarnationis ut minimum supponebat gratiam sanctificantem; quis enim dicat homines existentes in peccato mortali meruisse de congruo Incarnationem? cum nec ipsum etiam auxilium gratiæ mereantur, nec possint sibi ipsis propriam sanctificantem gratiam de congruo mereri, nisi fortasse per ultimam dispositionem, quæ haberi non potest, nisi ex auxilio gratiæ, & ejus meritum (si quod est) non se extendit ultra propriam formam, ad quam disponit. Unde nullus est Theologus, qui hoc meritum de congruo Incarnationis tribuat nisi iustis; at ve-

Suarez Tom. XVI.

ro gratia sanctificans fundata fuit semper in meritis Christi; ergo & meritum.

Dicent fortasse, illam gratiam fuisse necessariam quasi concomitanter ad excludendum impedimentum peccati, non vero tanquam proprium meriti principium. Sed hoc est falsum, quia licet daremus illud meritum fuisse fundatum in operibus bonis moraliter factis ex libero arbitrio ab homine grato; tamen valoreorum, seu efficacia, aut congruentia in esse meriti, non esset sumenda ex libero arbitrio, sed ex gratia, quia (ut dictum est) opera pure humana, & naturalia per sese, nullo modo possunt esse meritoria alicujus doni supernaturalis.

Aliter alii respondent, ipsamet opera supernaturalia, quæ ex gratia sunt, posse considerari, ut sunt a gratia, & ut sunt a libero arbitrio, ut in simili dicit D. Th. 1. 2. q. 114. art. 6. & priori modo non esse meritoria Incarnationis propter argumentum factum; sed tantum posteriori, & ut sic non fuisse fundata in Incarnatione. Sed etiam hæc responsio falsa est, quia si quod erat meritum in his operibus antiquorum Patrum, illud erat, in quantum illi erant iusti, & fundati in fide Christi, aliàs nulla esset proportio, nec sufficiens ratio meriti in illis operibus, ut supra tractatum est. Non debent ergo illa duo principia, gratia, & liberum arbitrium ita sejungi, ut alterum per se sufficiat ad valorem meriti: quia sine libero arbitrio opus non esset humanum, & morale, & sine gratia non haberet proportionem, ut expresse D. Th. dicit in citato loco ex 1. 2. in fine corporis, loquendo de merito de congruo; necesse est ergo fateri omne meritum antiquorum Patrum, & præsertim hoc de Incarnatione, fuisse fundatum in gratia Dei; & consequenter in meritis Christi; quia suppono esse omnino certum, & infra probandum q. 19. nullum supernaturale bonum fuisse datum hominibus, præsertim post lapsum Adæ, nisi ex meritis Christi, qui enim dicunt Christum fuisse causam finalem gratiæ antiquorum Patrum, & non meritoriam, omnino errant, ut ibi probabitur, & hic D. Th. supponit art. 11. ratione 2. Quod vero quidam dicunt, illammet gratiam, quæ per Christum data est antiquis Patribus, posse considerari vel secundum se, vel prout fundatam in merito Christi, & priori modo fuisse principium hujus meriti de congruo, & non posteriori: hoc, inquam, & falsum est, & nullius momenti, quia illa gratia non fuit principium meriti, nisi prout in re data est, & similiter opera non fuerunt meritoria, nisi prout in re facta sunt; sed in re illa gratia non fuit data nisi propter merita Christi prævisa, & illa opera in re non sunt facta, nisi per auxilia data per Christum; ergo totum illud meritum in Christo fundatum est.

Dicendum est ergo, gratiam, & auxilia data esse antiquis Patribus, propter merita Christi prævisa in divina prædefinitione, & prædestinatione, nondum autem re ipsa exhibita: ipsos autem Patres per hanc gratiam non meruisse prædestinationem Incarnationis, sed ejus exhibitionem, & ideo hæc inter se non pugnare: quia licet merita Christi prævisa antecesserint, tamen executio Incarnationis subsecuta est gratiam, & opera antiquorum Patrum, & ideo potuit sub diversis rationibus esse principium, & aliquo modo præmium illorum meritorum. Sicut variis exemplis de dispositione, & impetratione supra ostensum est. Et potest declarari, quia negari non potest, quin bona opera antiquorum Patrum, & B. Virginis, ut verbi gratia consensus, quem præbuit Angelo nuncianti mysterium Incarnationis, fuerint medium ad executionem ipsius Incarnationis, & tamen ille consensus fuit datus Virgini propter merita Christi prævisa; idem ergo actus fuit medium ad executionem sui principii in genere meriti: quid ergo mirum, quod fuerit etiam meritum de congruo executionis, seu exhibitionis ejusdem principii. Simile etiam est, quod B. Virgo fuit realis, & physica causa Christi Dei hominis, quatenus fuit vera mater ejus; & tamen ex meritis Christi habuit, quod fuerit condigna mater ejus, & quod debito modo munus illud exercuerit: & si fortasse habuit aliquem supernaturalem concursum in filii conceptione, etiam ille datus est ex meritis Christi prævisis: sic ergo fieri potuit in proposito. Unde principium illud, principium meriti non cadit sub meritum, licet formaliter verum sit de principio, prout habet rationem principii, tamquam



claritatis gratia distingui potest, nam principium meriti, quod supponitur actu existens prius, quam fundet meritum, illud non cadit sub merito; & huiusmodi est in nobis prima gratia, vel prima vocatio, quia non solum est principium quasi morale, sed physicum, quod in re ipsa debet antecedere effectum: at vero quando principium meriti est quasi morale, & non causat, ut actu existens, sed ut prævisum tantum, potest secundum realem exhibitionem cadere sub merito, quia ut sic non supponitur, sed subsequitur.

**Obiectio.** Sed contra; nam hinc enervatur secunda ratio D. Th. in art. 11. & sequitur antiquos Patres potuisse mereri de condigno exhibitionem Incarnationis, etiam si habuerint gratiam fundatam in Incarnatione prævisa. Respondetur

**Respon.**

**Differen-**  
**tia inter**  
**meritum**  
**de condi-**  
**gno, & de**  
**congruo.**

argumentum probare ex hoc solo capite, hoc non fuisse impossibile; nihilominus ex natura rei, seu ex lege ordinaria loquendo, est in hoc dispar ratio inter meritum de condigno, & de congruo; quia meritum de condigno per se ordinatur ad præmium, cum quo habet naturalem proportionem, & ad illud natura sua fertur tanquam in terminum, & ideo ex natura rei, seu secundum legem ordinariam non ordinatur hoc modo ad suum principium, quia non respicit illud tanquam terminum: at vero meritum de congruo non fundatur in naturali proportionem inter actum, & terminum ejus; sed adjungitur secundario, & concomitanter, vel ex relatione, & intentione operantis, vel ex divina ordinatione, & hinc fit, ut quodammodo in suum principium reflecti possit. Quod declaratur exemplo, ait enim D. Th. 1. 2. q. 114. art. 9. perseverantiam non cadere sub merito de condigno, quia non comparatur ad gratiam, ut terminus, sed potius, ut principium; & tamen certum est, posse cadere sub merito de congruo. Et hinc etiam est, quod idem actus, quo meremur de condigno præmium, & quasi connaturale præmium, potest concomitanter esse meritorium de congruo alterius rei, ad quam veluti extrinsece ordinatur.

**Obiectio.** Sed adhuc possunt contra solutionem istam multa incommoda objici. Primo, quia sequitur aliquid excellentius meruisse antiquos Patres saltem de congruo, quam ipse Christus ullo modo meruerit. Secundo, quia sequitur Christum ipsum meruisse Incarnationem, quia, quod est causa causæ, est causa effectus ejus. Tertio, sequitur in eodem genere causæ meritoria fuisse sibi invicem causas Incarnationem, & gratiam antiquorum Patrum. Quarto, quia aliàs Christus magnum beneficium ab antiquis Patribus accepisset, sicut Paulus ab Stephano, qui sibi de congruo vocationem meruit. Quinto, quia aliàs meruissent antiqui Patres sibi primam gratiam, quia meruerunt principium, & causam ejus. Sexto denique potius sequitur meruisse de congruo totius humani generis reparationem, & omnem gratiam, non tantum sibi, sed etiam aliis collatam, quæ inconvenientia licet potissimum videantur sequi ex merito ipsius Incarnationis, tamen magna ex parte proportionaliter inferri possunt ex merito accelerationis.

**Respon.**

Respondetur tamen ad primum, illud non esse inconveniens, quia non sequitur ex majori dignitate operum antiquorum Patrum, sed solum ex ordine, seu antecessione in temporis duratione; sicut non est inconveniens antiquos Patres impetrasse Incarnationem, quam Christus non impetravit, vel Virginem se præparasse ad suscipiendam Incarnationem, ad quam Christus non se præparavit, hoc enim meritum de congruo non est, nisi per modum cujusdam præparationis, ut D. Th. dixit,

Ad secundum negatur sequela, quia meritum Christi non antecessit tempore, nec natura Incarnationem, sicut merita antiquorum Patrum; unde neque fuit præparatio ad Incarnationem, sicut illud: meritum autem ex natura rei debet antecedere præmium, secunda dispensatione, quæ semper habet admixtam aliquam imperfectionem, & asserenda non est sine aliqua sufficienti causa, vel necessitate, ut supra dictum est: hic autem nulla fuit ad mutandum hunc naturalem ordinem; quin potius speciali ratione necessarium fuit, ut hoc meritum de congruo re ipsa antecederet incarnationem, quia erat quasi via, & medium ad ejus executionem, & per modum cujusdam impetrationis, & dispositionis. Illa autem propositio; *Quod est causa causa, est causa effectus*, non est vera loquendo de causa per se, & maxime si mutatur modus causandi, ut hic fit.

Ad tertium ex hoc patet solutio, quia in iis, quæ habent diversum modum causandi, id non est inconveniens; ita vero est in proposito, nam meritum Christi est causa gratiæ antiquorum Patrum, ut prævisum tantum, & fuit veluti principium per se dans valorem illorum operibus. At vero meritum Patrum solum fuit per modum cujusdam dispositionis in ordine ad executionem Incarnationis. Ad quartum respondetur, non tam fuisse Christo collatum beneficium ab antiquis Patribus, quam debitum obsequium, aliàs idem argumentum fieri posset de B. Virgine: denique quidquid habuerunt gratiæ, & meriti, a Christo, & per Christum habuerunt. Ad quintum negatur sequela, nam omnino ante hoc meritum de congruo receperunt primam gratiam, & non meruerunt Incarnationem, ut fuit principium ejus, id est, ut prævisum; sed solum quoad exhibitionem, quæ fuit posterior, ut dictum est. Ad ultimum respondetur, in redemptione considerari posse, vel sufficientem causam nostræ redemptionis, quæ fuit Christi Incarnatio, & passio, vel operatio; & hoc modo concedo meruisse de congruo illos Patres redemptionem nostram; vel potest considerari redemptionis quoad omnes effectus ejus, & sic non potuit tota cadere sub illud meritum de congruo, quia sub his effectibus includitur prima gratia, quam mereri non potuerunt, ut dictum est; & quia ipsi non petebant, nec se disponebant ad omnes effectus redemptionis, sed ad ipsam Incarnationem.

Atque ex his intelligitur, ad dicendum sit, Patres antiquos meruisse aliquo modo omnia merita Christi. Item, an meruerint omnes effectus meritorum Christi, & quidquid ille meruit. Item an meruerint, quod Deus impleverit promissionem, quam fecerat de mittendo Messia, & incarnatione filii sui faciendæ: & similes interrogationes facile fieri possunt, quæ ex harum responsionibus poterunt nullo negotio dissolvi. Ad hæc ergo omnia & similia primum in genere dicendum est, Patres antiquos nihil horum de condigno meruisse præter eos effectus incarnationis, qui sunt vel augmentum gratiæ, vel beatitudo, vel aliquid pertinens ad beatitudinem uniuscujusque meritis, reliqua enim omnia sunt extra proportionem gratiæ creatæ ac personalis, & hoc probant omnia in superiori proxima sectione adducta. Hoc autem dixerim propter quosdam Theologos, qui dixerunt, meruisse antiquos Patres de condigno incarnationem, quoad illum effectum, qui fuit aperiri regni januam toti humanæ naturæ. Quomodo loquitur Bonav. in 3. d. 4. a. 2. q. 2. Sed est improbabilis sententia, quia nemo potuit de condigno mereri illum effectum, nisi qui pro peccato totius naturæ potuit de condigno satisfacere, ut supra visum est. Item quia tale meritum de condigno pertinuit ad gratiam capitis, quam nemo ex illis Patribus habuit. Item quia, vel illi Patres meruissent de condigno illum effectum immediate & in se, & sic dandus fuisset antequam Christus veniret: vel meruissent de condigno, ut Christus illum effectum mereretur: & hoc dici etiam non potest, quia non potuerunt mereri Christum ipsum, neque ejus infinita merita, ac rigorosam satisfactionem, hæc enim omnia sunt bona altioris ordinis, & includunt infinitatem quandam excedentem valorem condignum meritorum puræ creature. Tandem tunc Christus nostram redemptionem consummavit, quando januam regni toti nostræ naturæ suis meritis aperuit: id autem non fecit ex debito justitiæ, sed ex summa charitate & misericordia, ut dicitur ad Titum 3. ad Rom. 5. & 9. & aliis locis supracitatis.

At vero loquendo de merito de congruo, fere omnibus illis interrogationibus affirmative respondendum est. Dico autem, fere, ut excipiam illos effectus gratiæ, qui in ipsis antiquis Patribus antecederant eorum merita, ac erant principia talium meritorum: etenim illos mereri non poterant, etiam de congruo, cum tamen etiam illi essent effectus meritorum Christi. Quocirca, ad singula in particulari respondendo, primo concedendum est, meruisse de congruo omnia merita Christi, tum in radice, merendo incarnationem, quæ fuit illorum meritorum radix, tum etiam in seipsis, quia non solum petere poterant, ut veniret Christus, sed etiam ut sanaret humanam naturam, quod non nisi suis meritis & satisfactionibus effecturus erat. Non est autem necesse, ut in particulari meruerint, quod Christus tot ac tanta opera meritoria exerceret, aut quod per has

Quæ incarnationis effectus antiqui Patres de condigno meruerint.



aut illas passiones nos redimeret, quia non omnia hæc illis erant revelata, nec singula in particulari petebant, aut petere audent, sine Dei speciali revelatione aut instinctu. Satis ergo est, quod in communi merita Christi & satisfactiones postularent, quibus curari aut redimi possent. Probabile etiam est, illustriores ex illis Patribus, qui notitiam de modo redemptionis Christi habuerunt magis expressam & distinctam, in particulari etiam meruisse de congruo Christi passionem & mortem, quia credebant, ita esse a Deo nostram præordinatam redemptionem, ut non nisi hac via perfici posset, & ideo illam desiderabant ac petebant, non ut erat malum Christi, sed ut erat medium necessarium ad nostram redemptionem, & beneficium generi humano præstandum. Unde, sicut nos pro illo suscepto gratias agimus, ita ipsi poterant illud desiderare, petere, & consequenter etiam de congruo promereri.

Qualiter de congruo meritorum Christi generales effectus antiqui Patres sint promeriti.

Quare effectus particulares omnes meritorum Christi antiqui Patres non meruerint.

Secundo dicendum est, Patres antiquos meruisse de congruo aliquos effectus generales meritorum Christi, non immediate propter ipsorum meritum efficiendos, sed impetrando & merendo de congruo Christi Domini adventum, ejusque passiones, satisfactiones & merita in ordine ad tales effectus: & sic verum est, meruisse de congruo redemptionem ipsam, prout est generale remedium totius naturæ, & quatenus per illam tollendum erat impedimentum totius naturæ, & janua cæli aperienda: quia hoc maxime postulabant, & ad hoc consequendum sese disponebant. Certum est autem non meruisse omnes effectus particulares, quia vel non poterant, ut constat de illis effectibus, qui in ipsis præcesserunt, ut mereri possent, quales sunt eorum sanctificatio, remissio peccati, auxilia gratiæ ad ipsa meritoria opera efficienda. Vel certe quia non ordinabant sua opera ad illos effectus, neque illos petebant, ut per se manifestum est in aliis innumeris effectibus gratiæ, qui in singulis hominibus propter Christi meritum fiunt. Quin potius nec meruerunt quosdam effectus meritorum Christi, qui non sunt generales ad totum humanum genus, etiam si sint generales in lege gratiæ, ut sunt institutiones sacramentorum, sanctificantium & similes, quia vel de his non erit promissio expresse facta, vel, etiam si de aliquibus esset facta revelatio, ad eos non pertinebat tales effectus postulare, sicut ad illos se disponere, neque ad eos obtinendos sua opera specialiter ordinabant.

Tertio dicendum est, Patres illos etiam de congruo meruisse, ut Deus re ipsa exequeretur, quod facere statuerat, seque facturum promiserat. Nam, licet ex suppositione necessarium esset id fieri, quod Deus facere decreverat, aut promiserat, nec necessarium esset meritum, ut hoc esset infallibile, tamen Deus ipse, qui hoc voluit ac promisit, simul ordinare potuit, ut ejus voluntas ac promissio per tale medium, taleve meritum ad effectum perveniret. Sive Deus statuerit & ordinaverit illam dispositionem seu meritum de congruo ut necessariam dispositionem, sine qua non faceret quod decreverat, sive tantum eam ordinaverit, veluti ad melius esse, & ad majorem decentiam, de quo supra dictum est. An vero asserendum sit, Patres illos formaliter meruisse beneficium incarnationis & redemptionis, ut erat complementum divinæ promissionis, vel tantum quasi materialiter meruisse rem illam, per quam implebatur divina promissio, questio parvi momenti mihi videtur, & distinctio parum necessaria. Neque enim est, cur negetur utroque modo rem illam meruisse, quia non solum possumus a Deo petere rem promissam quasi materialiter, sed formaliter ut impleat, quod promisit: possumus ergo illud ipsum de congruo mereri. Etsi enim Deus propter rectitudinem suam non possit id non implere, hoc tamen non obstat, quominus simpliciter libere impleat, & consequenter possit nostris operibus amplius inclinari ad illud ipsum implendum; sed hoc, ut dixi, parum refert, & ad modum loquendi magis, quam ad rem spectat.

Ad fundamenta secundæ opinionis, concedimus omnes probationes prioris partis, probant enim tertiam conclusionem nostram. Ad probationes vero secundæ partis jam declaratum est, quomodo intelligendum est, accelerationem Incarnationis cadere sub meritum sine mutatione divinæ voluntatis. Ad fundamentum tertiæ opinionis, jam est assignata differentia inter opera mere naturalia comparata ad ordinem gratiæ, & inter opera procedentia a gratia sanctificante comparata ad unio-

Suarez Tom. XVI.

nem hypostaticam. Augustini vero comparatio, seu proportio sumpta ex lib. de prædest. sanct. in hoc expresse ab ipso ponitur, quod sicut nullus sibi meretur etiam de congruo, ut Christianus fiat: ita nec Christus sibi meruit incarnationem: at vero, sicut unus potest alteri mereri de congruo fidem, seu primam vocationem, ita potuerunt antiqui Patres mereri de congruo Christi incarnationem. Neque contra hoc obstant testimonia, in quibus incarnatio tribuitur gratiæ vel misericordiæ Dei, quia meritum de congruo tunc solum repugnat gratiæ, quando non fundatur in gratia, quomodo procedit August. contra Pelagium; hoc autem meritum antiquorum Patrum fundatur in gratia, ut dictum est, imo & aliquo modo in incarnatione ipsa; & ideo incarnatio simpliciter ex gratia data est.

## SECTIO VII.

Utrum B. Virgo meruerit de condigno esse mater Dei.

Hoc dubium proponitur hoc loco propter explicandam solutionem ad tertium D. Th. in art. 11. & quia connexionem habet cum præcedentibus. Dixerunt ergo quidam B. Virginem meruisse de condigno esse matrem Dei, & consequenter, ut in ea, & ex ea Deus homo fieret, & nasceretur. Ita Gabr. in 3. dist. 4. q. 1. art. 3. dub. 3. Almain. q. 1. dub. 3. Major. q. 4. in fi. Abulen. Parado. 1. c. 34. & 38. Fundamentum hujus sententiæ sumi potest ex variis sententiis Patrum, quos infra referam, asserentium fuisse Virginem condignam matrem Dei. Ex quo sic arguitur. B. Virgo erat sancta, & se disposuit condigne ad dignitatem matris Dei, ad quam ex divina ordinatione, & motione se disponebat; ergo concurrunt in hac dispositione omnia necessaria ad meritum de condigno, scilicet gratia ex parte personæ operantis, ordinatio divina, & proportio.

Alii dixerunt, meruisse B. Virginem de digno maternitatem divinam, licet non de condigno. Ita Marfil. in 3. q. 5. a. 3. dub. 3. concl. 2. & 3. Bonav. d. 4. a. 2. q. 2. ubi Richard. art. 3. q. 1. idem dicit, quamvis addat hoc meritum digni non distinguere a merito de congruo: nec multum dissentiunt Richard. & Bonav. ut magis ex dicendis patebit. Reliqui ergo authores omnes simpliciter negant hoc meritum, D. Th. dicta solut. ad 3. d. 4. q. 3. a. 1. ad 6. & omnes Thomistæ, Sot. lib. 2. de justit. q. 2. a. 3. Vega q. 4. de justit. a. 1.

Advertendum est, aliud esse mereri de condigno formam, seu dignitatem aliquam, aliud vero mereri dispositionem in subiecto requisitam, ut digne, decenterque recipiat talem formam, vel dignitatem: possunt enim hæc duo separari, præsertim quando dispositio, & dignitas non sunt inter se necessario, & quasi Physice connexa, sed solum secundum quandam decentiam moralem, & proportionem; tunc enim fieri potest, ut licet aliquis sit digne dispositus ad formam, vel dignitatem fuscipiendam, nihilominus illi ex justitia non debeat, atque adeo, ut neque illam de condigno mereatur; hoc enim meritum, vel non est, vel si est, annexam habet obligationem justitiæ, ut nunc suppono.

Dico ergo primo: Beatissima Virgo fuit condigne disposita, ut esset mater Dei. Ita docet D. Th. hic, neque ab aliquo recte, & pie sentiente negari potest. Est enim communis Patrum sententia, Ambros. lib. 2. de virginibus, parum post principium: *Quid, inquit, in singulis major quæ digna fuit, ex qua filius Dei nasceretur*: Basil. hom. de humana Christi generatione: *Digna, inquit, Unigeniti divinitati conjungi, fuit*: ubi tamen magis loquitur de carne Christi ex Mariæ sanguinibus formata, sed est eadē proportionalis ratio de Virgine, de cujus condigna dispositione multa etiam ibi loquitur. Chrysost. hom. 49. in Gen. *Quomodo, inquit, fiet istud, quoniam virum non cognosco? atqui propter hoc ipsum fieret: nam si cognovisses virum, non fuisses habita digna, ut huic ministerio deservires*. Epiph. hæc. 78. circa principium: *Quomodo audent impetere impollutam Virginem, quæ digna facta est habitaculum fieri filii Dei, & electa ex multis millibus, quovis, & habitaculum dignum esset, &c.* ubi de hac dignitate multa prosequitur. Damascenus lib. 4. c. 15. Mariam, *Sanctam, admirabile, ac summo Deo dignum templum* appellat. Bernard. ferm. 1. de assumpt. *Nec in terris locus dignior uteri Virginalis templo, in quo filium Dei Maria suscepit, nec in cælis regali solio, in quo Mariam filius*

Virgo condigne disposita ut mater Dei esset.



eius sublimavit & serm. 4. *Quæ vel Angelica puritas virginitati illi audeat comparari, quæ digna fuit Spiritus sancti sacrarium fieri, & habitaculum filii Dei?* & serm. de Nat. Mariæ: *Plena est gratia, & adhuc gratiam invenit, digna prorsus invenire, quod querit.* Ecclesia denique in quadam oratione de Virgine sic ait: *Ut dignum invenit habitaculum effici mereretur, &c.* & alibi: *Quæ sola digna fuit portare Regem cælorum, & Dominum.* Ratio vero per se nota est, quia ad divinam sapientiam, & bonitatem spectabat, convenienter, digneque ordinare, ac disponere personam, cui talem dignitatem conferebat, & se ipsum in verum, ac proprium filium præbebat. Nisi fortasse quis putet impossibile esse tali dignitati condignam dispositionem invenire. Sed nunc non loquimur de æqualitate dispositionis cum dignitate matris; de qua suo loco dicemus, sed de proportionem, & convenientia secundum rerum capacitatem, & ordinem divinæ providentiæ, sicut Christus homo dicitur *plenus gratia, & veritate*, tanquam Unigenitus & humanitas ejus dicitur ornata donis gratiæ, digna Deo, cui erat unita.

Dico secundo: Beatissima Virgo consecuta est hanc dispositionem, partim ex sola divina gratia eam præveniente, partim per opera sua, & merita de condigno. Hæc conclusio facile probatur, notando hanc condignam dispositionem matris Dei multâ comprehendisse, seu ex variis donis gratiæ conflata fuisse. Primum omnium fuit habitualis gratia, & eximia sanctitas, qua præventa fuit a primo instanti conceptionis suæ cum omnibus donis, & habitibus infusus, & hæc illi gratis data est absolute loquendo: nam si dicamus illam fuisse sanctificatam per propriam dispositionem, atque adeo meruisse de congruo illam sanctificationem, tamen ad eam dispositionem præveniri debuit omnino gratis, eximia quadam, & excitante gratia, & adjuvante. Secundo, huc accedunt singularia quadam privilegia perpetuæ innocentiae, carentiæ fomitis, & similibus, quæ in prima sanctificatione omnino gratis ei collata sunt, quamvis postea in decursu vitæ suæ ad conservationem, & executionem eorum, scilicet perpetuæ innocentiae, aut virginittatis, suis actibus cooperata fuerit. Tertio, considerari potest augmentum gratiæ, & virtutum, quas usque ad conceptionem filii consecuta est, quo magis, ac magis quotidie disponebatur, & hoc adepta est suis meritis de condigno, ut per se constat: nisi forte gratiam aliquam est consecuta veluti ex opere operato, vel (ut melius loquamur) præter meritum proprium in aliquo sacramento antiquæ legis, illo scilicet, quo justificabantur foeminae ab originali, sicut masculi circumcissione, quod nihil attinet ad propositum. Quarto ad complendam hanc dispositionem cooperata est B. Virgo aliquibus actibus suis, præcipue illo, quo ultimum assensum præbuit Angelo, ut mater Dei fieret, & hanc dispositionem non proprie meruit, sed effecit illam libera sua voluntate, divinæ gratiæ singulariter excitata, & adjuta; & ex hac explicatione etiam probata manet conclusio, cuius brevis ratio intelligi potest: quia non potuit B. Virgo suis tantum viribus mereri totum gratiarum cumulum, qui ad dignitatem Dei matris requirebatur: erat enim inferioris naturæ, & de se obnoxia originali culpæ; debuit ergo gratis multis gratiis præveniri, quibus acceptis per sua opera, & merita etiam de condigno potuit cooperari ad complendam hanc condignam dispositionem, & hoc ipsum ad perfectionem illius dispositionis pertinebat. Unde juxta hanc conclusionem, nonnulla Sanctorum dicta recte intelliguntur, nam propterea, quæ gratis illi donata sunt, dicit Hieron. dialog. 1. contra Pelag. circa medium. *Adverte, quod beatam se sic dicat non proprio merito, atque virtute, sed Dei in se habitantis clementia.* Bernar. serm. de Nativit. Mariæ col. 2. *Quarant alii meritum, nos invenire gratiam studeamus. Maria non prætendit meritum, sed gratiam quarit.* Fulgent. de Incarn. & grat. c. 7. in initio inquit: *Ipsam Deum hominem factum, non humanis meritis, sed concepti, nascentisque ex ea summi Dei dignitate promeruit:* ubi etiam excludit humana merita, sine gratia scilicet facta, & ideo divinam dignitatem adjungit, & merita ex illa profecta. Unde Aug. serm. 10. de Nativ. qui est 14. de tempore. *Talis eligitur Virgo, quæ tantum haberet meritum, ut Dei filium in se susciperet* & Greg. lib. 1. Reg. c. 1. *Incomparabilibus illustrata meritis, Dei Unigenito, in quo recumberet, sa-*

*crum præparavit uterum.* Petr. Damianus set. 2. de assumptione: *Singularis ejus sanctitas, & gratia hoc promeruit, quod susceptione Dei singulariter judicata est digna.*

Dico tertio: B. Virgo non meruit de condigno esse mater Dei. Hæc sententia est communior inter Theologos: fundamentum ejus sumi debet ex prima ratione D. Th. 2. 2. 1. nam gratia creata, & opera, quæ ab illa manant, natura sua solum tendunt ad consummationem ipsius gratiæ, usque ad consecutionem beatitudinis, quam respiciunt, ut condignum, & proportionatum præmium; sed hæc proportio est requisita, quasi ex natura rei ad meritum de condigno.

Dices: Posset tamen hoc suppleri per divinam ordinationem, opera autem Virginis ordinata sunt ad hunc finem, ut digno modo consequeretur esse mater Dei. Respondetur, aliud est querere, an B. Virgo potuerit mereri de condigno hanc dignitatem de potentia absoluta loquendo, aliud an ex vi intrinseca ipsius gratiæ, & quasi ex natura ipsius gratiæ, atque adeo ex lege ordinaria possit esse hoc meritum. Loquendo de potentia absoluta (quidquid alii sentiant) ego non dubito, quin possit intercedere hoc meritum de condigno, si intercederet pactum, seu promissio de tali præmio conferendo, hoc, vel illud operanti: quia quamvis opera gratiæ creatæ ex natura sua non tendant ad hoc præmium; tamen re vera habere possunt valorem sufficientem & dignitatem proportionatam tali præmio, nam hæc dignitas matris non est tam infinita, sicut ipsa unio hypostatica; imò aliquibus videtur minoris æstimationis moralis, quam filiatio adoptiva, ut indicatur ab Aug. lib. de S. virginitate; ergo si Deus faceret illam promissionem sub conditione operis, interveniret in eo merito vera ratio justitiæ; esset ergo de condigno; neque enim est essentialiale huic merito, ut opus, in quo fundatur, ex natura sua tendat in præmium; sed sufficit quæcumque proportio, & condignitas in æstimatione morali suppositis aliis conditionibus, & præsertim illa promissione, & lege, quod etiam in humanis premiis, seu praviis videre est, & latius tractatur in materia de merito. Sed licet hoc sit possibile de potentia absoluta, tamen non est connaturale ipsi gratiæ, & operibus ejus, & ideo secundum legem ordinariam merita procedentia ab hac gratia non ordinantur ad hoc præmium, neque illis facta est hæc promissio: non est ergo hoc asserendum de B. Virgine, nisi speciale pactum, vel promissio illi facta ostendatur: nulla vero talis est nam licet in Scriptura sæpe facta sit revelatio absoluta, quod B. Virgo futura esset mater Dei, ut Isai. 7. & 1. & alia; tamen, quod hoc sit promissum sub conditione alicujus operis, nullibi ostendi potest. Et confirmatur, quia Abraham facta est expressior promissio, Genes. 12. *Benedicentur in te omnes cognationes terræ,* & c. 15. 17. & 22. David etiam est facta Psalm. 131. *Juravit Dominus, &c.* & isti Sancti suo modo sese condigne disposuerunt, ut essent condigni progenitores Christi: & tamen nullus audebit dicere eos meruisse de condigno, ut ex illis Christus descenderet: quia est bonum alterius ordinis, ad quod gratia natura sua non ordinatur, & quodam modo est infinitum bonum excedens proportionem meriti puræ creaturæ. Confirmatur secundo, quia quod aliqua gratia, vel opera ejus ordinantur a Deo, ut sint, seu efficiant convenientem dispositionem ad aliquam dignitatem, non satis est, ut talia opera sint meritoria de condigno illius dignitatis, quia etiam Joannes Baptista prædictus sæpe fuerat futurus præcursor Domini, Isai. 40. & Malach. 3. ut exponitur Joan. 1. & Matth. 11. & ille præventus est magna gratia, ut digne ministerium illud impleteret, & postea ipse per propria merita ab illa gratia procederet, veluti consummavit condignam dispositionem requisitam in præcursores Christi; & tamen nullus dicet meruisse de condigno hanc dignitatem. Simile argumentum sumitur ex D. Petro, qui etiam fuit electus, ut primus Christi Vicarius & supremus pastor Ecclesiæ constitueretur, & ad hoc munus magnam gratiam suscepit, tanquam convenientem dispositionem, quam ipse propriis etiam actibus perfecit; & consummavit, ut sumitur ex illo Joan. 21. *Simon Joannis diligis me?* & nihilominus dici non potest illum de condigno meruisse Ecclesiæ primatum. Et ratio horum omnium est, quia hæc dispositio, quamvis sit ex ordinatione divina, non tamen est per modum proprii meriti, & præmii, quia non supponit promissionem

Virgo non meruit de condigno dignitatem matris,

Respondetur,



sub conditione operis, in qua fundetur, & consequenter, neque inducit rationem iustitiæ, quam dicit meritum de condigno. Solum ergo est hæc ordinatio per modum cuiusdam convenientis providentiæ aptantis, & disponentis unamquamque rem ad eum finem, ad quem ordinatur. Confirmatur tertio, quia merita Virginis habuerunt condignum præmium gratiæ, & gloriæ; ergo non respondebat illis etiam de condigno aliquid nullo modo per se ordinatum ad gratiam, & gloriam; maternitas autem divina est alterius omnino rationis, & per se connexa non est cum gratia, & gloria; ergo. Et ex hoc retorqueri potest contra Gabrielem argumentum, quo ipse utitur. Sic enim arguit. Beata Virgo meruit de condigno aliquid excellentius maternitate divina; ergo & ipsam maternitatem: quæ consequentia invalida est per se, & formaliter, quia in iis, quæ sunt diversarum rationum, potest aliqua facultas in id, quod est perfectius, quamvis non possit in id, quod est minus perfectum, ut in simili materia patet, nam potest quis mereri de condigno argumentum gratiæ, & non scientiæ, licet illud sit majus. Sed præter hoc retorqueo argumentum; quia majus quid est hoc totum simul gloria & maternitas divina, quam gloria sola; ergo licet B. Virgo meruerit gloriam, non inde fit, ut meruerit utrumque; imo quia meritum Virginis erat finitum, illi respondebat unum adæquatum, & condignum præmium ex iustitia; hoc autem fuit gratia, & gloria; ergo.

Respons.  
ad 1. sent.  
fundamē-  
tali.

Ad fundamentum primæ sententiæ jam responsum est, defuisse operibus Virginis promissionem & pactum, & connaturalem proportionem cum divina maternitate, & divinam ordinationem non esse ejusdem rationis respectu omnium operum; sed aliam esse ad modum dispositionis, & aliam per modum meriti, & hanc in operibus Virginis fuisse priori modo, & non posteriori: qua vero ratione hi modi differant, jam explicatum est. Ad alios auctores ponentes meritum de condigno, non est, quod respondeamus, nam fortasse in modo loquendi differunt ab iis, qui ponunt meritum de congruo, ut sequenti sectione dicemus. Et quia ut ex materia de merito constet, in re nullum est medium inter meritum de congruo, & de condigno. Si enim inducit obligationem iustitiæ, & habet meritum proportionem æqualitatis cum præmio, est meritum de condigno; si vero hæc desint, erit meritum de congruo, si tamen aliquod meritum sit.

Dubium.

Sed quæret aliquis primo, qua certitudine tenendum sit B. Virginem non meruisse de condigno maternitatem divinam. Quidam existimant ita certum, ut contrariam sententiam tanquam erroneam, vel temerariam damnent, propter quod Scriptura semper in solam divinam gratiam, & benignitatem refert beneficium incarnationis, & promissionem Christi, non tantum secundum se simpliciter, sed etiam ut venturi ex semine Abrahæ, ut constat ex ad Rom. 3. & 4. nam eadem est ratio de Christo, ut nascitur ex utero Virginis. Respondetur tamen conclusionem a nobis positam esse quidem magis probabilem, & simpliciter veram, contrariam vero sententiam nulla nota esse dignam, præterquam minoris probabilitatis, & falsitatis, quia neque ex Scriptura, vel Patribus convinci satis potest, imo non est omnino aliena a modo loquendi Patrum, & eam tenent auctores graves non sine probabili conjectura. Illa vero testimonia ex epistola ad Romanos sumpta primo solum inducuntur a paritate rationis, cum tamen hæc facile negari possit, quia multo fuerunt excellentiora gratia, & opera Virginis, quam Abrahæ, David, & aliorum. Deinde ex illis locis potissimum probatur, electionem Abrahæ, & illius populi fuisse ex divina gratia; an vero supposita electione, & prima gratia intercesserit aliquod meritum in executione divinæ promissionis, hoc ex illis locis neque definiri potest, nec satis improbari.

Dubium.

Ultimo hic quæri potest, an potuerit B. Virgo mereri de condigno maternitatem divinam, non merendo de condigno incarnationem. Videtur enim hoc posterius in illo priori includi necessario, nam si B. Virgo meruit de condigno, ut esset mater Dei; ergo, ut Deus ex illa homo fieret; ergo, ut homo fieret, vel aliter, meruit esse mater Dei; ergo & Christum Deum hominem in rerum natura producere; ergo meruit, ut hoc compositum Christus Deus homo, in rerum natura esset. In contrarium vero est, quia supra diximus, potuisse Virginem de potentia saltem absoluta mereri de condigno vere ac proprie, id est, Suarez Tom. XVI.

cum vera æqualitate, ac iustitia maternitatem divinam, negavimus autem prius, puram creaturam posse hoc modo mereri incarnationem; ergo meritum incarnationis non includitur necessario in merito maternitatis divinæ. Deinde, maternitas divina est dignitas distincta ab unionis hypostatica, illaque inferior; ergo potest cadere sub aliquod meritum, sub quod illa non cadit.

Respondetur ergo, dupliciter posse intelligi hoc meritum, primo absolute, & simpliciter sine ulla suppositione, & hoc modo necessario tale meritum includit meritum incarnationis, quia si beata Virgo suis meritis posset ex iustitia obligare Deum, ut ex illa fieret homo, & hoc absolute, & nulla facta suppositione, necessario deberet illum obligare, ut fieret homo, quia hoc in illo continetur: unde si non supponitur ante meritum, necesse est, ut per ipsum meritum efficiatur: & ideo existimo non esse possibile puræ creaturæ, ut recte probat argumentum supra factum. Secundo potest intelligi hoc meritum solum quasi sub conditione, seu facta suppositione, quod Deus sit futurus homo, & hoc modo præscindi potest meritum maternitatis a merito incarnationis, quia præsupponit illam futuram, & aliunde potest meritum habere æqualitatem cum illa dignitate præcise sumpta, & non cum incarnatione, ut bene etiam probat argumentum factum. Et potest exemplo declarari, nam si Princeps venturus ad civitatem sit, & civis aliquis impetret, ac mereatur, ut potius in suam, quam alterius domum divertat, recte intelligitur, non mereri adventum simpliciter, & nihilominus mereri circumstantiam, quæ illum necessario præsupponit.

Respon.

## SECTIO VIII.

*Utrum saltem de congruo meruerit Beata Virgo dignitatem matris Dei.*

**R**atio dubii esse potest, quia soli gratiæ, & benevolentiae divinæ tribui solet a patribus, B. Virginem potius, quam aliam foeminam sibi in matrem delegisse, quod ipsamet Virgo confessa est, Luc. 1. dicens: *Quia respexit humilitatem ancille sue; & Quia fecit mihi magna qui potens est, &c.* Resolutio tamen est facilis, distinguendo (ut supra in simili fecimus) prædestinationem, seu electionem Virginis ad eam dignitatem, a dignitate ipsa, seu ab illius consecratione.

Dico ergo primo. B. Virgo non meruit etiam de congruo, ut prædestinaretur, seu eligeretur in Dei matrem. Hanc cenfeo esse certam, eamque propterea Theologos omnes supponere potius, quam disputare. Et probari potest ex omnibus adductis in sectione 6. quidquid enim meriti fuit in B. Virgine, duxit originem ab hac electione, supposuitque illam, quia ipsa prima gratia Virginis, ex qua omne meritum secutum est, ex hac electione precessit, ideo enim tanta, & tam excellens gratia, tamque maturo tempore illi data est, ut esset accommodata dignitati matris, ad quam erat electa. Quin potius ipsamet electio ad gloriam in Virgine supposuit electionem ad dignitatem matris, quia B. Virgo non prius electa est ad gloriam, quam ad tantam, & tam excellentem gloriam, ad hanc autem fuit electa, quia decebat matrem Dei supra omnes puras creaturas in excelsis gloriæ throno collocari, ut infra suo loco probabitur: ergo cum non potuerit mereri de congruo electionem suam ad tantam gloriam (ut nunc suppono) multo minus potuit mereri electionem suam ad divinam maternitatem.

Potest vero contra hoc objici dictum Ambrosii epistola 82. aliquantulum a principio: *Quid, inquit, loquar, quanta sit virginitatis gloria, quæ meruit a Christo eligi, ut esset etiam corporale Dei templum?* Respondetur, vel uti late verbo eligendi ad significandum potius ipsum usum, vel executionem, quam ipsam internam electionem per modum intentionis; vel certe Ambrosium ibi non agere proprie de merito, ut est in actione operantis, sed late, ut dicere potest rei dignitatem, vel perfectionem, laudat enim ipsius virginitatis excellentiam, quam inde colligit, quia Deus amavit eam in matre sua. Itaque non elegit Mariam in matrem, quia virgo futura, sed potius elegit eam, ut esset virgo, quia puritas virginitatis Dei matrem in primis decebat.

Obiectio.

Respon.

Dico secundo: Meruit de congruo B. Virgo, ut esset mater



Virgo de  
congruo  
merito  
esse ma-  
ter Dei.

mater Dei. Hæc conclusio recipitur ab omnibus Theologis supra citatis, quam Clichtov. lib. 2. de venerat. sanctorum, bene his verbis expressit: *Meruit esse digna, & idonea, Dei munere, & sua dispositione*; & sumitur ex dictis sanctorum præcedenti sectione citatis, & præterea ex August. lib. de nat. & gratia c. 36. *Concipere meruit, & parere, &c.* idem lib. de S. virginitate, & Gregorius 1. Regum c. 1. *Meritorum verticem usque ad solium divinitatis erexit*, licet hæc verba alium possint habere sensum. Hieronymus tom. 1. epist. 22. de custodia virgin. fere in fin. *Propone tibi Mariam, quæ tanta exitit puritatis, ut mater Domini esse mereretur*. Anselmus de laudib. Virg. c. 8. *Sanctissima puritas, & purissima sanctitas pectoris ejus, omnis creaturæ puritatem, & sanctitatem transcendens incomparabili sublimitate hoc promeruit, ut reparatrix perditæ orbis plenissime fieret*. Idem Eusebius Emis. hom. in fer. 4. post Domin. 3. Adven. Petrus Damian. ferm. 3. de Nativ. Mariæ, Petrus Chrysol. ferm. 143. D. Maxent. dialog. 1. c. 14. in fine tom. 6. Biblioth. sanct. *Fide plena*, inquit, *Deum concipere meruit*; licet enim nomen meriti interdum improprie sumatur, ut significat congruitatem quandam vel dignitatem, vel necessitatem, quomodo dicitur, *Felix culpa, quæ tantum meruit habere redemptorem*; & gemitus infantis dicantur promereri Dei misericordiam a Cypriano lib. 3. epist. 8. tamen cum tribuitur personæ sanctæ, & sanctis operibus ejus, propriam habet significationem. Ubi tandem notandum est singulare dictum Bernardini Senen. ferm. 51. ait enim, Virginem eo actu, quo consensit Angelo nuncianti, plus meruisse, quam omnes Angelos, & homines omnibus suis actibus: quod non videtur alia ratione verum, nisi quia illo meruit maternitatem: unde intelligitur hoc meritum maxime fuisse positum in illo actu, qui fuit veluti ultima dispositio ad illam formam, quæ cum esset proportionata, & a persona grata, erat meritoria saltem de congruo: & hinc sumitur ratio conclusionis, quia B. Virgo per suos actus dignissime se disposuit, ut Filium Dei in suo utero susciperet; ergo per eos saltem de congruo meruit illam conceptionem. Confirmatur primo, quia supposita Dei ordinatione de sumenda carne ex muliere, ex nulla alia poterat ita congruenter, supposita illius dispositione. Confirmatur secundo, quia Abraham meruit saltem de congruo, ut Christus ex illo descenderet juxta illud Genes. 22. *Quia fecisti rem hanc &c.* Ergo & B. Virgo, nam licet modus, quo Christus natus est ex Virgine, longe fuerit dignior, quam modus, quo descendit ex Abraham, tamen etiam dispositio Virginis fuit longe excellentior, quam dispositio Abraham, & ita servata proportionem eadem fere ratio est, aut fortasse major. Denique rationes, quibus supra probavimus antiquos Patres meruisse de congruo incarnationem, & aliquas ejus circumstantias, hanc veritatem satis confirmant.

Objeccio

Sed objici potest, quia ante omnia merita Virginis non solum existentia, sed etiam prævisio, fuerunt merita Christi præsentia Dei in æternitate; ergo & ipse Christus fuit prius prævisus, ut existens, atque adeo ut conceptus, seu ut concipiendus ex Virgine, quam fuerint præordinata merita Virginis; ergo nullo modo potuit B. Virgo mereri, ut Christus ex ea nasceretur. Dicunt quidam, ante merita Virginis fuisse prævisum Deum hominem ut sic, non vero, ut hunc hominem. Sed falsum hoc est, quia (ut recte dixit D. Th. infra q. 4. art. 4.) merita non sunt in humanitate in communi, sed in hac, vel illa humanitate, alias B. Virgo non fuisset sanctificata ex meritis Christi prævisis, sed ex meritis hominis in communi. Alii dicunt fuisse Christum prævisum, ut est hic homo in hac humanitate subsistens, non tamen ut nasciturus ex B. Maria, quia hoc quid posterius est, quia hic homo non pendet essentialiter ex hac matre. Sed melius dicitur, illo argumento ad summum probari, Virginem non fuisse electam, ut esset mater Dei propter sua merita prævisa: non tamen probari, in executione non potuisse mereri illam dignitatem, quia in re prius habuit gratiam, & bona opera, quam ex ea Deus incarnationem, quamvis illammet gratiam, & bona opera habuerit ex meritis ejusdem filii sui prævisis in divina prædefinitione.

Objeccio. Sed urgetur, quia si ante omnia merita Virginis præordinavit Deus incarnationem in hac humanitate; ergo in corpore ex hac individua materia formata: sed non meruit Virgo habere illam individuum materiam ita sibi

conjunctam, ut necessarium erat ad filii conceptionem; quia hoc potius pertinebat ad ordinem naturalium effectuum, & causarum, quam ad rationem meriti. Respondet primum, dici posse non fuisse necessarium hoc mereri, sed potius præsupponi ad meritum, sicut natura supponitur gratiæ. Itaque omnes causæ naturales ita fuerunt dispositæ, ut tandem fieret, quod illa pars materię esset sub forma purissimi sanguinis, quo supposito ipsa promeruit, ut ex suis purissimis sanguinibus Deus carnem assumeret. Deinde dici potest, sicut temporalia possunt cadere sub meritum in ordine ad spiritualia, ita Virginem potuisse mereri, ut illammet materia, ex qua Christus erat formandus, prius esset materialis pars sui corporis, seu sanguinis.

Ref. 660.

### Q U Æ S T I O III.

De modo unionis ex parte personæ assumentis, in octo articulos divisa.

**D**Einde considerandum est de unione ex parte personæ assumentis.

Et circa hoc queruntur octo.

Primo: utrum assumere conveniat personæ divinæ.

Secundo, utrum conveniat naturæ divinæ.

Tertio, utrum natura possit assumere abstracta personalitate.

Quarto, utrum una persona possit assumere sine alia.

Quinto, utrum quælibet persona possit assumere.

Sexto, utrum plures personæ possint assumere unam numerum naturam.

Septimo, utrum una persona possit assumere duas numeros naturas.

Octavo, utrum magis fuerit conveniens de persona Filii Dei, quod assumpsit humanam naturam, quam de alia persona divinæ.

**E**xplicata essentia hujus unionis seu incarnationis, incipit D. Th. de extremis agere, quæ ad hanc mirabilem conjunctionem convenerunt, & in hac q. tractat de persona assumente, in sequenti vero de natura assumpta. Et quamvis præcipue intendat explicare mysterium, prout factum est, ut perfectius tamen, & exactius ratio ejus intelligatur, alios modos inquirat, quibus de potentiam absoluta fieri posset, & hæc sunt duo præcipua capita, de quibus in hac q. disputandum est. Quoniam vero totius materiæ hujus intelligentia pendet ex cognitione subsistentiæ, vel existentia divinæ, quæ formaliter est terminus hujus unionis, ideo operæ pretium duco ante expositionem literæ D. Th. disputationem præmittere, in qua quid utraque harum sit, breviter tradamus.

### DISPUTATIO XI.

In quinque Sectiones distributa.

De divina existentia, & subsistentia.

**S**UPponimus in primis ex iis, quæ in disputationibus Metaphysicis, de existentia, & subsistentia creaturarum dicuntur, communem rationem, seu significationem horum nominum, quia licet analogice de Deo & creaturis dicantur, tamen ratio nominum eadem est. Itaque nomine existentia intelligimus illud est, quod res habet, ut sit aliquid in actu, seu actualis entitas distincta ab ente, quod tantum est in potentia objectiva, actu vero non est, seu nihil est, nomine vero subsistentia intelligimus modum per se existendi. Supponimus deinde id, quod nostræ fidei fundamentum est, in Deo quidem tres personas, unā vero naturam, seu essentiam reperiri, unde in disputatione nunc adit, pertineat ne existentia, & subsistentia in Deo ad unionem essentia: an contra ad Trinitatem personarum, vel demum ad utrumque. Quæ disputatio quamvis revera materiæ de Trinitate sit propria, quia tamen mysterium, de quo agimus, sine illa intelligi non potest, ab hoc loco aliena censenda non est, cum præsertim a Theologis magna ex parte hoc loco discutitur.

### SECTIO I.

Utrum sit in Deo unum esse existentia absolutum, & essentialiale.

**R**atio dubitandi sit, quia in natura substantiali idem est formaliter etiam, & secundum rationem, existentia, & subsistentia, quia de intrinseco conceptu existentia



sententiæ substantialis est, ut sit ipsum esse per se, quod est esse subsistentiam; sed non est in Deo unum esse subsistentiæ absolutum, ut infra tractabitur; ergo. Propter hanc rationem novi quidam Theologi de re ista coeperunt dubitare, non quidem quod essentia divina in re distinguatur a sua existentia saltem realiter, est enim de fide certum apud Catholicos, & inter Philosophos evidens in Deo non esse compositionem ex esse, & essentia, atque adeo in re essentiam Dei esse suum esse, ut in 1. part. latius tractatur: sed quia cum hac simplicitate, seu identitate stat in Deo unum esse absolutum, & alterum respectivum, ut patet de essentia, & persona, ideo isti Theologi auli sunt dubitare, an ita se habeant divina essentia & existentia; imo quidam eorum auli sunt ita sentire, & docere, & consequenter negare in Deo absolutum esse existentiam, & solum ponere tres existentias relativas, ita ut sicut aliquorum opinione humanitas in Christo non habet propriam existentiam creatam, sed formaliter existere dicitur per existentiam Verbi divini, ita divina natura secundum rationem præcisa, & abstracta a relationibus non intelligatur habere existentiam increatam, sed in unaquaque persona existere per propriam illius relationem. Quæ quidem sententia non minus est falsa, quam nova.

Dico igitur, in Deo esse unum esse existentiam absolutum, & essentiale commune tribus personis. Quæ veritas tam certa mihi videtur, ut sine temeritate, & fortasse etiam sine errore negari non possit; nam primum in ea conveniunt omnes Theologi, statim sect. 3. & 4. citandi, & præsertim D. Thom. in ea est frequentissimus, nihil enim frequentius docet, quam ipsum esse, seu existere, esse ipsam essentiam Dei, & loquitur non identice, sed formalissime, ut idem sit dicere esse essentiam, seu esse de essentia, seu esse prædicatum essentiale Dei, quod egregie probat 1. p. q. 3. art. 4. & ex hac perfectione colligit fere alias divinas perfectiones, ut videre est eadem 1. p. q. 4. art. 2. q. 6. art. 3. q. 7. art. 1. & in aliis sequentibus, & in q. 13. art. 11. hinc probat nomen, *Qui est*, esse maxime proprium Dei, quia formaliter significat ipsum esse, quod est ipsa essentia Dei, & alia plura testimonia in sequentibus sectionibus citabo simul cum aliis Scholasticis. Nunc sufficienter probatur hæc veritas ex hoc eodem nomine, *Qui est*, seu, *Ego sum*, *Qui sum*, quod Deus sibi imposuit Exod. 3. adjunctis dictis, & expositionibus sanctorum, nam illud nomen, *Qui est*, est nomen essentiale significans tres personas, ut sunt unus Deus, ut recte docet Dionys. cap. 2. de divinis nominibus, dicens, illud *Ego sum*, *Qui sum*, de tota Deitate dictum esse, sicut illud, *Tu autem idem ipse es*, Psal. 101. & illud, *Qui est, qui erat, & qui venturus est, omnipotens*, Apocal. 1. August. lib. 3. contra Maximi. Episc. Arianorum cap. 26. & in opusc. circa ea verba, *Ego sum*, *Qui sum*, tom. 6. in fine, & lib. 2. de moribus Manich. c. 1. quibus locis ait, hoc esse nomen *immutabilitatis*, quia omnia, quæ mutantur, aliquo modo desinunt esse, & *æternitatis*, quia illud est, & *sum*, idem valet, inquit, quod *æternus sum*, in quo nihil fuit, nec futurum est, sed tantum est, unde concludit illo verbo significari naturam divinam in se incommutabiliter manentem; est ergo nomen essentiale conveniens personis ratione unius essentiae. Unde recte Rupert. lib. 1. in Exod. cap. 14. dicit Deum illo loco Exod. 3. duplex sibi imposuisse nomen, alterum naturæ, scilicet, *Qui est*, alterum dignationis, & gratiæ, scilicet, *Deus Abraham, & Deus Isaac* &c. Ex quo licet colligere argumentum ab hoc posteriori nomine ad illud prius: nam sicut secundo nomine significata est tota Trinitas per ordinem ad effectum, seu gratiam ab illa manentem, ut est unus Deus; ita per primum nomen significata est per naturalem & essentialem proprietatem convenientem illi, ratione unius nature, & essentiae: sed illud nomen, *Qui est*, perinde significare, ac, qui existit, seu existens, tum ex vi ipsius vocis constat, nam *est* absolute dictum, seu secundum adiacens (ut Dialectici dicunt) idem significat, quod existit: tum ex omnibus citatis patribus, qui dicunt illo nomine significatam esse Dei æternitatem, quæ semper eodem modo existit, æternitas enim sine existentia nec mente concipi, aut fingi potest. Dicunt etiam illo nomine significatam esse differentiam inter Deum, & creaturas, nam istæ neque de se, nec semper, ac necessario habent esse, neq; in illo sunt immutabiles, sicut Deus, quæ differentia non est, nisi in esse existentiae. Unde August. ex hoc nomine colligit sepe, ipsum esse, esse quodam-

modo Deo proprium, nihilque intimius illi convenire, nihil denique illi esse contrarium magis quam non esse, unde lib. de vera relig. cap. 49. *Æternitas*, inquit, *tantummodo est, quare ipsa sola dicere potuit, ego sum, qui sum*; idem fere lib. de fide, & symbolo cap. 4. sic etiam Gregor. lib. 18. Moral. cap. 33. *Solus*, inquit, *veraciter est, quia solus incommutabilis est*; & Bern. lib. 5. de consider. parum post princip. *Nil competentius æternitati, quæ Deus est, quam hoc nomen, Qui est; si bonum, si magnum, vel quidquid tale de eo dixeris, in hoc verbo insinuat*. Quod est; & infra: *Per hoc quodammodo solus est ipse, qui suum ipsum est & omnium esse*. Ambr. etiam epist. 63. idem nomen explicans, inquit: *Hoc est verum nomen Dei, esse semper*, id est existere; & Chrys. hom. 14. in Joan. inquit: *Hoc verbum, Qui est, sempiternum, & sine principio, & vere, ac proprie esse significat*. Et eodem modo interpretatur Euseb. lib. 11. de præpar. cap. 6. & 7. id est, qui necessario, ac eodem modo semper existit, ubi etiam refert sententiam Pythagoræ, & Platonis, qui hoc nomine Deum appellandum docuerunt: & ex Plutarcho refert ita explicasse verbum Græcum, quod in templo Delphico erat scriptum, ut qui illuc ingrederentur, eo verbo veluti salutarent, seu confiterentur Deum, dicentes, *Es*.

Ex his ergo sic concluditur argumentum: nomen, *Qui est*, est essentiale; ergo significat proprietatem absolutam communem tribus personis; significat autem existere, seu existentiam; ergo existentia est proprietas absoluta, & maxime essentialis. Hanc rationem fecit D. Thom. q. 2. de potent. art. 1. differentiam constitutens inter naturam creatam, & divinam, quod natura creata non est suum esse: sed ipsum esse Dei est ejus natura & quidditas, & inde est, quod proprium nomen ejus est, *Qui est*, quia sic denominatur, quasi a propria sua forma. Unde Basil. apud Lippomanum in catena super Exod. cap. 3. exponens illud nomen, *Ego sum. Qui sum*, recte dixit: *Istud, Qui sum, unam eandemque, ac communem essentiam significat*; & Nazian. orat. 36. quæ est secunda de Filio, & 4. de Theologia, dicit, inter omnia nomina Dei, *Ens* & *Deus*, esse maxime propria, & inter hæc duo proprius esse nomen Entis: *Quia nos*, inquit, *naturam ejusmodi exquirimus, quæ ipsum esse per se habet*; & hoc significat illud nomen est, seu, *Qui est*; & idem docuit Damasc. lib. 1. de fide c. 12. & Athanas. epistol. ad Orthodox. de Synodis Arimini & Seleuciæ congregatis versus finem, seu fol. 8. inquit: *Cum audis, Ego sum, Qui sum, non aliud quippiam, sed ipsam simplicem, & beatam, & incomprehensibilem ejus, qui est, essentiam intellige*. Et oratione in hoc dictum, inquit, *Ex Deo, Deus est Verbum*, inquit: *Quemadmodum unum principium, & unus Deus, ita plane una est essentia, quæ dicitur: Ego sum, Qui sum*. Et eodem fere modo Gregor. Nyssen. orat. de infantibus, qui præmature arripiuntur, nullam rem ait præter Deum, ex sese habere essentiam, sed unam esse Dei naturam, cui hoc proprium est; nomine autem essentiae intelligit naturam existentem, ut aperte constat ex contextu; sic enim August. 5. de Trinit. cap. 2. dicit essentiam Dei dictum esse, *Ab esse*, & sumit *esse* pro existere, ut clare constat ex litera; & eodem modo 12. de Civit. cap. 2. dicit Deum esse, *Summam essentiam, quia Summe est*; & Ambr. lib. 1. de fide contra Arianos c. 4. hinc etiam concludit. *Hoc ipsum, quod est, esse substantiam Dei*; & Hilar. 1. de Trinit. circa princip. tractans illud, *Ego sum qui sum*, inquit: *Admirandum plane tam absolutam de Deo significationem, quæ naturæ divine incomprehensibilem cognitionem, aptissima ad intelligentiam humanam sermone loqueretur, non enim aliud proprium magis Deo, quam esse intelligitur*. Denique Hieron. tom. 2. epist. 57. ad Damasum: *Una, inquit, est Dei, & sola natura, quæ vere est*; & propterea subdit inferius, *Solum Deum esse, qui essentiae nomen vere tenet*.

Videbor fortasse plura sanctorum testimonia congerere, quam materia postulabat, oportuit tamen initiis ob stare, & pullulantem errorem prorsus obruere, illumque non sine sufficienti fundamento, temeritatis, & erroris damnatum ostendere. Reliquum vero est, ut etiam ratione, sententiam positam demonstremus. Prima sumi potest ex omnibus allegatis testimoniis, quia in Deo una est æternitas absoluta, & essentialis, juxta illud Athanas. in symbolo. *Non tres æterni, sed unus æternus*; ergo similiter est una existentia absoluta, & essentialis: patet consequentia, quia, ut ex 1. part. constat: æternitas est ipsa duratione

In Deo una existentia absoluta & essentialis.



ratio Dei necessaria, & omnino eodem modo semper permanens; duratio autem, vel idem omnino est cum ipsa existentia, non solum re, sed etiam ratione: vel certe intrinsece supponit illam, & est tamquam proprietas illius. Secunda ratio huic similis sumitur ex attributo immutabilitatis; est enim hoc attributum essentialiter conveniens Deo ratione suæ naturæ infinitæ; sed esse immutabilem includit essentialiter esse, seu existere, nam secundum rationem necessario existere, supponit existere, immutabilitas autem inter illa dicit necessitatem existendi, quia necessaria permanentia in esse est primum, ac præcipuum in immutabilitate; si ergo hæc necessitas existendi formaliter est ex absoluta, & essentiali perfectione Dei, multo magis ipsum existere. Tertio, quia esse, seu existere, est perfectio simpliciter, ut videtur per se notum, quia sine dubio in qualibet re est melius ipsum, quam non ipsum; sed omnis perfectio simpliciter in Deo est absoluta, & essentialis (ut ex 1. part. constat,) tum quia necessario esse debet communis omnibus personis: tum etiam, quia de ratione entis summe perfecti est, ut includat formaliter omnem huiusmodi perfectionem, Deus autem essentialiter est ens summe perfectum; ergo esse, seu existere est absoluta, & essentialis perfectio Dei. Et confirmatur, nam D. Thom. ubique docet ipsum esse non solum esse perfectionem simpliciter, sed etiam esse omnium perfectissimum, quia est omnium actus, ut patet 1. part. q. 4. art. 1. ad 3. & art. 2. ad 3. ubi ex Dionys. cap. 5. de divin. nom. ait ipsum esse, esse perfectius, quam vitam, vel sapientiam, si considerentur, prout ratione distinguuntur, quod idem repetit 1. 2. q. 7. art. 3. ad 2. quibus locis etiam ait, ipsum esse Dei in sua perfectione includere perfectionem vitæ, sapientiæ, &c. Est ergo sine dubio hæc perfectio maxime absoluta, & essentialis. Quarto potest hoc ita explicari, quia impossibile est, etiam per intellectum nostrum præscindere essentialiam Dei ab existentia actuali; ergo talis existentia est de essentiali ipsius Dei. Antecedens est tamquam principium per se notum apud Philosophos, & Theologos, quia hæc est prima differentia, quam nos apprehendimus inter essentialiam Dei, & creaturæ, quod hæc, quia non essentialiter, ac necessario existit, potest intelligi, abstrahendo ab actuali existentia per modum entis potentialis, seu in potentia objectiva: essentialia vero Dei non potest hoc modo concipi, aliis non est essentialia Dei, quia non concipitur, ut purus actus, & quia, quod concipitur, ut ens in potentia, concipitur ut recipiens esse ab alio, quod repugnat Deo.

**Obje. 1.** Dicitur fortasse hinc tantum probari esse Dei in re non distinguui ab essentialia ejus, quod verum erit, etiam si existentia sit tantum relativa. Sed hoc falsum est, quia mens nostra concipit essentialiam Dei, etiam præcis relationibus: non potest autem illam concipere existentia præcisa: quod aperte patet, quia quando nos concipimus divinitatem præcis relationibus, non concipimus illam tamquam entitatem potentialem, sed tamquam actuale, & purissimum ens ex se existens, qui conceptus non est falsus, sed verissimus; & similiter quando concipimus, quod pater communicet per generationem Filio, vere intelligimus illi communicare eandem rem singularem, & individuum, quam in se habet, in qua necesse est includi eandem individuum existentiam, quia illa res, seu natura, quæ communicatur, secundum actuale entitatem, quæ habet, communicatur. Quinto declarari hoc potest, quia creaturæ manant a Deo, prout unus est, unde præcipue participant esse divinum, prout essentialiter est, & absolutum, ac commune tribus personis; sed quod creaturæ primo, & per se participant ex Deo, est ipsum esse existentia, ad quod creatio terminatur, propter quod dixit Dionys. cap. 1. de divin. nom. versus finem, *Deum ipso esse suo, esse omnium subsistentium causam*; & Gregor. loco supra citat. *Ut ergo, inquit, in participatione illius essentialia aliquid simus, cognoscamus nosmetipsos, quia proprie nihil simus*: illud ergo esse divinum, quod creaturæ per se primo participant, est esse absolutum, & essentialiter. Ultimo, quia in naturis creatis verius est, etiam si existentia non dicatur essentialis creaturis, sicut Deo, nihilominus esse de intrinseco conceptu essentialiter, ut est actualis entitas, & ideo in humanitate Christi impossibile est, quin habeat aliquam existentiam distinctam a personalitate Verbi, quia est ipsa actualis entitas distincta a Verbo; ergo multo magis in Deo ipsa natura divina, sicut est una actualis

entitas absoluta communis tribus relationibus, ita est una existentia absoluta. Quinimo etiam in opinione eorum, qui in creaturis distinguunt realiter existentiam ab entitate essentialiter, non habet locum alia sententia, quia, qui ita sentiunt de creaturis, id faciunt, ut illas distinguant ab essentialia Dei, quam vere dicunt per se ipsam essentialiter habere illam rationem entitatis actualis, quam essentialiter creaturæ intelligitur habere per actum existendi: in nulla ergo probabili sententia habet verisimilitudinem ille opinandi modus.

Ad rationem ergo dubitandi respondetur, duo principia falsa assumere; alterum est, existentiam substantialem, & subsistentiam esse idem secundum rationem formalem, seu conceptum: in creaturis enim hæc ex natura rei distinguuntur (ut sæpe dictum est,) & in Deo possunt ratione distinguui: alterum est, in Deo non esse aliquod subsistere essentialiter, & absolutum, de quo inferius disputandum est.

### SECTIO II.

*Utrum in Deo sit triplex esse existentia relativum, seu an sint tres existentia relative.*

**H**anc quæstionem non invenio ex professo seu in terminis disputatam ab antiquis Theologis, quamvis obiter videantur eam indicasse Scotus in 1. d. 11. q. 1. ad 1. & Cajetanus 1. part. q. 28. art. 2. ubi ante nonnullos annos, dum illam materiam tractarem, fuisse illam disputavi, & partem affirmantem docui, quam alii postea secuti sunt: alii vero contrariam.

Prima igitur sententia esse potest in Deo nullum dari esse existentia relativum, sed tantum illud unicum absolutum, de quo hactenus egimus. Quæ videtur esse sententia D. Thom. in multis locis; infra q. 17. art. 2. ad 3. expresse dicit: *In personis divinis non esse aliud esse personæ præter esse naturæ, & ideo tres personæ non habere, nisi unum esse*; & 1. part. q. 30. art. 2. ad 2. dicit, *Personas divinas non distinguui in esse, in quo subsistunt*; expressius q. 2. de potent. art. 1. in corpore inquit: *Quia essentialia divina est suum esse, non accepit esse per supposita*; & art. 6. supponens, esse existentia in Deo tantum esse absolutum dicit: *Non est concedendum, quod aliquid absolutum in divinis multiplicetur, sicut quidam dicunt, quod in divinis est duplex esse, essentialiter, & personale, omne enim esse in divinis essentialiter est, nec persona, nisi per esse essentialiter*; & q. 9. de potent. artic. 3. ad 19. ait. *Nullomodo concedendum esse, quod in divinis sit, nisi unum esse, cum esse semper ad essentialiam pertineat, cujus esse est sua essentialia, relationes vero non addere aliquod esse, quia aliis illud esset accidentale, & faceret compositionem*: idem expresse in q. 8. art. 2. ad 11. & q. 1. de veritat. art. 5. ad 18. & hanc sententiam videtur ubique defendere Capreol. in 3. d. 1. q. unica art. 3. ad 2. contra 2. concl. & indicat ad argum. Durand. contra 4. concl. & d. 5. q. 2. art. 3. in fine solutionis, ad 2. & in solut. ad quintum principale indicat etiam Cajetan. 1. part. q. 28. art. 2. ubi differentiam constituit inter relationem, & essentialiam divinam, & existentiam essentialiter, & relationis, nam hanc dicit omnino esse eandem re, & ratione, quamvis illæ ratione distinguantur, unde concludit unam esse existentiam omnium relationum, quamvis ipse inter si realiter distinctæ sint. Citantur etiam Durand. & alii, qui ponunt in Deo subsistentiam absolutam, & negant relativam: sed non est eadem ratio de existentia, & subsistentia, ut ex supra dictis sumi potest, & ex dicendis amplius constabit. Videtur huic sententia favere August. 5. de Trinit. cap. 9. & 10. & lib. 6. cap. 10. ubi omnia prædicata, quæ ad se dicuntur, negat multiplicari in Deo, ut æternitatem, bonitatem, omnipotentiam, magnitudinem: inter hæc autem videtur numerare ipsum esse Dei, quod ait esse ipsum intelligere, quod est maxime absolutum: idem autem est esse, quod existentia. Item lib. 7. de Trinit. cap. 4. in fine, esse, & subsistere, indicat non posse esse relativa, unde sic inquit: *Aliud est Deo, esse, aliud Patrem esse, quod enim est, ad se dicitur, Pater autem ad Filium*; & ibidem ait, quod sicut non dicuntur tres essentialia Dei, ita nec tria esse, sicut nec dicuntur tres sapientiæ: *Quia unum est sapere in Deo, quia scilicet in ipso hoc est esse, quod sapere*. Hieron. etiam nonnihil faveret in illa epist. ad Damasum. 57. 2. tom. inquit enim: *Quisquis tria esse, tres & si as dicit,*



*dicat, & tres naturas conatur asserere. Rationes, quæ pro hac sententia afferri possunt, commodius inferius proponentur.*

Secunda sententia affirmat esse in Deo tria esse existentia relativa. Hanc secuti sunt moderni commentatores D. Thom. tam in hac, quam in 1. p. Sed (ut quemadmodum sentio, loquar) ipsi non consequenter loquuntur, magisque constanter procedunt Capreol. Cajetan. & alii Thomistæ; ipsi enim sentiunt in unaquaque re substantiali existentiam esse unicum simplicem actum totius suppositi, & naturæ, quam dicunt in creaturis esse entitatem distinctam ab essentia, cuius est actus. Et ita in uno supposito tantum ponunt unum esse, per quod tam suppositum, quam natura existit: unde ex creaturis ad divina ascendendo, quamvis esse divinum differat a creato, quia est ipsa essentia, & natura Dei: tamen in ratione, & (ut ita dicam) in perfectione actus debet excellentiori modo habere, quidquid habet esse creaturæ: ergo sicut unicum esse simplex est sufficiens actus, per quem existit persona creata, & ejus natura, ac personalitas, ita illud unicum esse absolutum, & infinitum Dei, erit sufficiens ratio existendi, tam naturæ divinæ, quam omnibus personis. Deinde in creaturis, quamvis quod quid est relationis, sit respectivum, tamen juxta horum opinionem, qui distinguunt existentiam realiter ab essentia, existentia relationis non est respectiva, sed est vel existentia ipsius fundamenti, vel est quidam actus, seu terminus essentia, quam respicit, & non terminum, ad quem ipsa refertur; sic ergo multo magis intelligi posset in divinis relationibus, quamvis distinguantur quasi in ratione formali respiciendi terminum, nihilominus posse unam existentiam existere. Denique posito illo fundamento de distinctione essentia, & existentia, non potest ex distinctione entitatum colligi distinctio existentiarum, ut constat, quia etiam in creaturis, anima & corpus distinguuntur realiter, & tamen dicuntur habere eandem indivisibilem existentiam. Cujus ratio est, quia juxta illam sententiam existentia non est de intrinseco conceptu cuiusque entitatis, vel modi, aut rationis realis actualis, unde neque ex distinctione subsistentiarum relativarum potest distinctio existentiarum colligi, quia, sicut in creaturis existentia, & subsistentia ex natura rei distinguuntur, ita in divinis possunt ratione distingui; & sicut in creaturis, licet subsistentia sit quid distinctum a natura, nihilominus existentia naturæ est existentia ipsius subsistentia, & e contrario, ita in divinis intelligendum esset proportionaliter, ut dictum est. Quia hoc potius pertinet ad perfectionem ipsius esse. Quocirca, si verum esset illud principium, seu ille modus sentiendi de existentia, contraria sententia mihi probabilior videretur; quia tamen existimo, existentiam in omni re tam divinam, quam creatam nihil aliud esse, quam uniuscujusque rei actuale entitatem, ideo huic sententia adhæreo, sicut semper adhæsi. Sed oportet eam convenienter explicare. Advertendum est enim dupliciter posse in Deo poni existentiam relativam, uno modo, ut natura divina nostro modo intelligendi per illam existat, alio modo, ut ipsa relatio, seu persona divina, secundum id, quod est illi proprium, intelligatur per illam existere.

**Deus tamen existit per suum esse absolutum.** Dico ergo primo. Divina natura tantum existit per suum esse absolutum, neque potest ullo modo vere dici, existere per existentiam relativam, unde ad hoc non esset necessarium ponere existentias relativas in Deo. Hæc conclusio videtur mihi certa, & eam existimo potissimum intendere D. Tho. in multis ex citatis locis, quam præsertim explicuit in illa q. 2. de potentia art. 1. dicens. *Quia ipsa essentia est suum esse, non accipit esse per se posita, in quibus est unde per unum & idem esse, est in communicante, & in eo, cui communicatur, & sic manet eadem secundum numerum in utroque.* Et ratio est clara, tum ex dictis, tum ex posito fundamento, primum, quia essentia divina, ut præcisa relationibus se ipsa, seu, quod idem est, sua existentia absoluta perfectissime, & essentialiter existit, unde ad existendum non indiget alia existentia, etiam ratione distincta. Deinde, quia existere per existentiam nihil aliud est, quam esse actuale entitatem; sed nulla entitas præsertim simplicissima constituitur etiam secundum rationem in esse entitatis actualis, nisi se ipsa; ergo multo minus divinitas.

Dico secundo. Unaquæque relatio divina, ut sic, exi-

stet propria existentia relativa ratione tantum distincta ab existentia absoluta; unde sit, ut in tribus personis sint tres existentia relativa realiter inter se distincta. Hanc conclusionem necessario asserere debent omnes, qui sentiunt existentiam uniuscujusque rei nihil aliud esse, quam actum entitativum, seu actuale entitatem ejus, & ita illam indicavit Scot. in 1. distin. 1. r. q. 2. ad 1. argumentum. 2. opinionis; ex antiquis vero auctoribus, eam invenio expresse in Richard. de S. Victor. lib. 4. de Trinit. cap. 16. ubi distinguit in divina natura existentiam, quæ est pluribus communis, & existentiam omnino incommunicabilem, & illam dicit esse unicam, & propriam divinæ naturæ, in cap. vero 17. ostendit existentias incommunicabiles multiplicari juxta numerum personarum, quod sequentibus capitibus late prosequitur. Ratio vero est, quia unaquæque relatio intelligitur habere propriam actuale entitatem relativam ratione distinctam essentia, & realiter a relatione opposita; sed in conceptu uniuscujusque entitatis actualis includitur existentia, imo in re sunt omnino idem, quamvis nostro modo concipiendi existentia sit formale constitutum actualis entitatis; ergo necesse ita distingui, vel multiplicari existentias, sicut distinguuntur, vel multiplicantur entitates, quia impossibile est aliquid multiplicari, seu distinguere secundum aliquam rationem, & non multiplicari, & proportionaliter distingui in proprio constitutivo illius rationis; ideo enim tres personæ divinæ non multiplicantur, nec distinguuntur in esse Dei, quia formale constitutum Dei, quod est Deitas, in eis non multiplicatur, nec distinguitur. Sicut ergo essentia, & relatio in re sunt una entitas, ita in re unica existentia existunt; tamen sicut intelligimus relationem distinguere ratione ab essentia, & aliquid entitatis includere, quod essentia non dicit, scilicet reale respectum, qui in re suam actualitatem, & realitatem habet, ita necessario intelligendum est existentiam relationis eodem proportionali modo distinguere ab existentia essentia. Et pari modo, sicut tres personæ sunt tres res relativæ, habentes entitates actuales relativæ realiter distinctas, ita necesse est habere existentias distinctas relativæ, quæ nihil aliud sunt, quam ipsæmet entitates. Confirmatur, & explicatur hoc ex creaturis: nam in persona creata, in qua natura, & subsistentia in re distinguuntur, necessario intelligimus aliam esse existentiam naturæ, & aliam subsistentia, & sicut persona componitur ex subsistentia, & natura, ita completum esse personæ constare ex ipso esse, seu existentia naturæ, & subsistentia; unde in humanitate Christi, sicut deest subsistentia creata, ita deest completum esse, seu existere personæ creatæ, quia deest illud esse, seu illa entitas, aut ille realis modus, quem subsistentia creata importat. Sic ergo in persona divina, quamvis natura, & personalitas tantum ratione distinguantur, tamen eodem modo intelligendæ sunt habere existentiam ratione distinctam, quia etiam ibi personalitas saltem secundum rationem intelligitur addere aliquid reale actuale, quod est formale constitutum personæ. Secundo idem confirmatur, quia relatio realis in creaturis eo modo, quo est reale aliquid actu ponens aliquid in subiecto, in quo est, ita necesse est, ut includat existentiam actuale eo modo distinctam ab existentia subiecti, seu fundamenti, quo ipsa relatio ab eis distinguitur, cum enim relatio realis perditur, aliquid reale actuale tollitur a subiecto; ergo aliquid existentia: quia hæc duo, ut sæpe dictum est, in re sunt idem. Et similiter, cum relatio advenit subiecto, & fundamento, dat illi aliquid esse, quia est in illo nova forma realis, & illud esse est existentia, quia est actuale, & non est tantum esse essentia, prout intelligitur esse in potentia objectiva: & idem argumentum potest applicari ad divina, quia paternitas dat esse Patris, quod non dat essentia ut sic, & illud esse existentia, quia est actuale, & extra nihil: ergo in Patre est esse existentia ratione distinctum ab illo esse, quod dat essentia ut sic. Et eodem argumento potest concludi esse in Patre aliquid esse existentia relativum realiter distinctum ab opposito esse relativo, quod est in Filio.

Dico tertio. Nihilominus absolute, & simpliciter dicendum est, tres divinas personas existere eodem esse, & solum cum addito dicendum est, relative existere per distincta esse relativa, & simili modo simpliciter dicendum est, esse in Deo unum esse, triplex autem esse non est.

In Deo tres existentia relative realiter inter se distincta, ratione ab existentia absoluta distincta.

Relatio in creaturis habet existentia distincta ab existentia subiecti.

Personæ divinæ relative existunt per distincta esse relativa.



est nisi cum addito concedendum, scilicet relative. Hæc conclusio licet magis explicet modum loquendi, quam rem novam, nihilominus in hac materia est magni momenti, quia in illa facile est ex inordinatis locutionibus in errorem, vel certe in erroris suspicionem incidere. Ad confirmandum autem hunc loquendi modum multum valet auctoritas D. Thom. locis supra citatis, quæ in August. & Hieronym. fundata est, quia modus loquendi in unaquaque materia ex sermone sapientum sumendus est. Ut vero ratione explicetur, advertendum est, divinis personis, seu relationibus tribus modis posse aliquid convenire. Primo præcise ratione essentia, ut esse Deum, esse intellectualem, esse incomprehensibilem, esse increatum (quæ sunt exempla Gregor. Nyssen. lib. de differentia essentia, & hypostaseos), & hæc non multiplicantur proprie, & substantive loquendo, quia forma, a qua hæc prædicata sumuntur, est omnino eadem in divinis personis. Alia conveniunt personis præcise ratione relationis, ut esse incommunicabilem, esse personam, esse aliud, & hæc quamvis secundum specificas rationes relativas non multiplicentur, quia non sunt plures paternitates, nec plures patres, &c. tamen sub rationibus communibus, in quibus secundum rationem conveniunt, multiplicantur proprie, & substantive, quia in re multiplicatur forma, seu rationes formales, a quibus talia prædicata sumuntur, & hoc modo sunt tres personæ incommunicabiles, tres relationes, &c. Alia denique absolute quidem, & simpliciter conveniunt personis ratione essentia, tamen secundum determinatum modum conveniunt ratione relationum, quod præsertim contingit in prædicatis aliquo modo transcendentalibus, & huiusmodi est, esse, seu habere entitatem, aut realitatem, nam unicuique personæ divinæ simpliciter, & absolute convenit esse ratione essentia; ratione autem relationis tantum convenit esse tali modo, scilicet respiciendo terminum, quin potius, etiam si de relatione divina in abstracto loquamur, non habet esse simpliciter nisi ab essentia, quia entitas relationis intime, & essentialiter includit entitatem essentia, ita ut ab illa præscindi non possit, nec omnino condistingui, ut bene notavit Henr. quodlib. 1. art. 1. & in materia de Trinit. 1. latius dixi, quia ipsum esse essentialiter est de intrinseco conceptu singularum relationum divinarum, aliàs necessario fieret, essentiam, & relationem divinam formaliter, & essentialiter distinguere. Prædicata ergo, quæ sunt huius tertii generis, simpliciter, & absolute non multiplicantur; sed tantum sub nominibus importantibus relationem, quia forma, a qua sumuntur, est una in omnibus personis, & solum multiplicatur quoad determinatum modum incommunicabilem, seu relativum. Quia igitur (ut dictum est) esse, seu existere est prædicatum huius tertii generis, ideo simpliciter dicendum est unum; triplex vero non, nisi cum addito relativi.

Ex hac conclusione, & ratione ejus, & explicata manent testimonia pro sententia priori adducta, quatenus contra secundam conclusionem facere possunt, & expectantur facile difficultates nonnullæ, quæ ex illa confurgunt. Prima est, quia sequitur in Deo esse tres essentias, quia existentia (juxta nostram sententiam) nihil aliud est, quam ipsa essentia rei, ut intelligitur habere entitatem actualem; seu potius est id, quod constituitur in esse entitatis actualis; si ergo sunt tres existentia, erunt etiam tres essentia. Et confirmatur, nam existere est prædicatum essentialiter Dei (ut ostensum est sectione præcedenti); ergo nullo modo multiplicatur, aliàs pari ratione multiplicarentur sapientia, vel omnipotentia, saltem cum illo addito relativi. Respondetur, argumentum primum aliquibus visum esse ita difficile, ut non vereantur propter illud admittere tres essentias, quia essentia, seu quidditas etiam est prædicatum transcendens abstractum ab essentia absoluta, & relativa; habet enim relatio, ut relatio suam essentiam, scilicet, *esse ad*; sed relationes divinæ in hac essentia relationis distinguuntur, quia ut sic habent rationes formales, & quasi specificas distinctas; ergo est in Deo distinctio essentiarum, atque adeo multitudo, unde D. Thom. in 1. distin. 33. q. unica art. 1. ad 1. inquit, quod: *Quatenus esse significat quidditatem, quam explicat definitio, sic essentia, & relatio non ununtur in esse*; unde fit, ut in hoc esse personæ distinguantur, atque adeo in aliqua quidditate, & essentia. Cajetan.

etiam 1. part. q. 28. artic. 2. distinguit inter, quod quid est relationis, & quod quid est natura divina, & idem a fortiori docet Scot. supra: habet ergo relatio suam quidditatem, & essentiam, & hoc modo erunt multæ essentia in Deo, sicut multæ existentia. Sed hic modus loquendi absolute & simpliciter est vitandus, ut omnino falsus, & erroneus: prima enim confessio fidei est, in Deo tantum esse unam essentiam, & tres personas unius naturæ, & essentia. Et ratio est, quia essentia rei simpliciter dicitur illa, qua res constituitur in suo esse simpliciter, & a posteriori potest a nobis explicari per hoc, quod est principium omnium operationum; unica est autem natura, qua divinæ personæ habent suum esse simpliciter, & quæ in eis est principium omnium operationum, unde Basil. epistol. 80. *Operationis similitudo in Patre, & Filio, & Spiritu sancto, eandem in illis esse naturam manifeste declarat*: dicitur etiam essentia illa, in qua supposita aliquus naturæ conveniunt, ut Gregor. Nyssen. supra notavit, inde concludens hanc esse unam in tribus personis; modus autem incommunicabiliter subsistendi, quamvis in se diversus sit, formaliter non pertinet ad rationem essentia individui substantialis, ut in homine, quamvis personalitas creata distinguatur a natura humana in sua ratione formali, & quasi essentiali, nihilominus essentia hominis una est, simpliciter tota est posita in ipsa natura, propter quod Christus homo, & alius homo purus sunt individua ejusdem specificæ essentia humanæ, quamvis personalitates habeant prorsus distinctas. Sic ergo multo magis tres personæ simpliciter sunt unius naturæ, & essentia, imo etiam relationes ipsæ simpliciter dicendæ sunt unius essentia, quia (ut dictum est) in omnibus essentialiter includitur, & ab illa magis habent esse simpliciter, quam ex propriis conceptibus: cum addito autem, & secundum quid possunt dici distinguere in formali, & quidditativa ratione relationis.

Ad argumentum ergo simpliciter negatur sequela, Respondetur quia jam dictum est, etiam existentia simpliciter, & sine addito, non esse dicendas plures; tum etiam, quia existentia generatim loquendo non respicit tantum propriam naturam, & essentiam rei, sed quamcumque entitatem, & quemcumque modum rei, ita ut tot sint modi existentia, quot sunt modi entitatis actualis. Sed urgebis interrogando, an saltem cum addito sint concedendæ in Deo tres essentia relative, sicut tres existentia? Respondetur, licet sit quæstio de nomine, nam inter Catholicos jam res constat, mihi tamen non videtur illa locutio usurpanda, quia essentia idem est, quod natura, unde sicut non dicuntur proprie tres naturæ relative in Deo, ita nec tres essentia; significat enim essentia, vel natura Dei, id, quo formaliter constituitur in esse Dei, & hoc nullo modo neque relative etiam multiplicatur; poterunt ergo dici tres rationes reales relative, non tamen proprie tres essentia. Neque est idem de existentia, quia existentia vel magis respicit suppositum, quam solam naturam, vel certe indifferenter significat quemcumque actum entitativum. Ad confirmationem respondetur ex doctrina D. Thom. 1. part. q. 39. art. 3. ad 3. nomina transcendentalia posse de Deo dici essentialiter, & personaliter; seu absolute, & relative: huiusmodi autem est esse, & ideo non est eadem ratio de illo, & de aliis attributis essentialibus.

Sed hinc oritur secunda difficultas, quia saltem sequitur esse admittendas in Deo tres durationes realiter distinctas, sicut admittuntur tres existentia: patet sequela, quia duratio vel est idem formaliter, & secundum rationem, quod existentia, vel certe sequitur ex illa; ergo necesse est multiplicari durationes, sicut multiplicantur existentia. Quod confirmatur primo, quia duratio nihil aliud est, quam permanentia ipsius esse, seu ipsius entitatis in esse; sed sicut unaquæque res per suam entitatem intrinsece existit, ita per eandem intrinsece, & formaliter, durat; ergo. Confirmatur secundo ex relationibus creatis, quæ sine dubio habent durationem ex natura rei distinctam a suo fundamento, interdum enim finitur duratio relationis, & non fundamenti; ergo in Deo duratio relationis distinguetur saltem ratione a duratione absoluta; ergo & ipsæ durationes relative distinguuntur inter se realiter.

Videtur sane ita esse consequenter concedendum, quia hoc prædicatum videtur quoad hoc esse ejusdem rationis cum

In Deo  
sunt tres  
essentia.

Obje. 10.

Obje. 10.

Respon.  
In Deo  
tres dura-  
tiones re-  
lative.

Divinis  
relationi-  
bus, alia  
prædicata  
simplici-  
ter, alia  
relativa  
tantum  
conve-  
niunt.



cum transcendentalibus, neque illud consequens videtur, aliquid absurdi, vel incommodi posse ferre. Sed oportet idem observare in durationibus, quod in existentibus, ut non simpliciter, sed cum addito, & explicatione tres durationes relativæ dicantur. Sed adhuc oportet difficultatem urgere, sequitur enim hinc esse admittendas in Deo tres æternitates, quod est contra Athan. dicentem in symbolo: *Non tres æterni, sed unus æternus*, quod substantivè intelligendum est, ut D. Thom. supra dixit: si autem essent tres æternitates, etiam substantivè essent *tres æterni*, sicut sunt tres personæ, propter tres personalitates; sequela patet, quia illas tres durationes oportet esse (ut ita dicam) in aliqua specie durationis, & non nisi in ratione æternitatis, quia nulla illarum est instans, aut ævum, aut tempus; unaquæque ergo est æternitas; sicut ergo sunt tres durationes, ita tres æternitates.

Respon.

Dici potest primo totum esse verum, loquendo cum illo addito scilicet, *relative*, Athanasium vero locutum fuisse simpliciter de æternitate, quæ absolute dicta significat attributum essentialē. Sed quia in hac materia oportet cautissime loqui, mihi magis placet negare hanc secundam sequelam, quia ratio durationis abstractior est, quam ratio æternitatis, unde ex vi sui conceptus non dicit tantam perfectionem, quantum dicit æternitas, & ideo intelligi potest multiplicari in ratione relativæ durationis, quia ut sic convenit relationi ex vi proprii conceptus, & propriæ existentie relativæ: at vero æternitas dicit perfectissimam rationem durationis, quam nulla relatio habet, ex eo quod relatio est: sed ratione divinitatis, quam essentialiter includit, & ideo nullo modo recipit illam determinationem, scilicet æternitatis relativæ, nec sub illa multiplicatur, propter hanc enim causam non sunt tres sapientie relativæ, &c. Quod aperte videtur probari ex attributo immutabilitatis, quod æternitas intime in se claudit, & tamen dici non possunt esse in Deo tres immutabilitates relativæ, quia tota ratio immutabilitatis simpliciter est essentialis. Quocirca, licet omnis duratio relationis divinæ, ut sic, sit æterna essentialiter, atque adeo æternitas, quia est duratio increata, & ab intrinseco necessaria, & immutabilis, tamen hæc ratio æternitatis convenit illi, in quantum intime, & secundum proprium etiam conceptum includit ipsum esse per essentialiam absolutum, & essentialē, a quo habet infinitatem simpliciter, immutabilitatem, & æternitatem.

Et juxta hanc doctrinam solvenda sunt alia similia argumenta, quæ hic fieri possunt, ut quod sequatur esse in Deo tres actus puros, quia existentia ut sic ex proprio conceptu dicit ultimum actum, & ex eo, quod in Deo sit, non potest habere admixtam potentiam: si ergo sunt in Deo tres existentie, sunt etiam tres actus puri. Item pari ratione concedendæ essent tres infinitates, & similia. Hujusmodi vero argumentandi ratio est re vera fallax, & inefficax in hoc mysterio. Similia enim argumenta fieri possunt, ut probetur, non esse in Deo tres res, tres entitates, tres rationes formales reales, quin etiam hæc in Deo sunt purus actus & infinitus. Notetur ergo generalis regula, quando nomen aliquod quippiam significat sub ratione aliqua, quæ requirit, aut importat infinitatem simpliciter in genere entis, tale nomen, seu talis ratio per illud significata, non potest multiplicari in Deo, quia unitas simpliciter ab una essentia provenit: hujusmodi est nomen actus puri, & similia; & ideo negandæ simpliciter sunt illæ sequelæ. Quando autem nomen non dicit ex se infinitatem simpliciter in genere entis, & alioquin est transcendens, vel habet vim transcendentis, tunc multiplicari potest ratione trium relationum: hujusmodi autem est nomen existentie, & similia; quamvis etiam in his, quia potest esse ambiguitas, optimum sit distinguere, vel cum determinatione loqui, ut dictum est.

Aliquot respondetur obiectis.

1. Obiecto.

Tertia difficultas sit, quia existentia absoluta est simpliciter infinita, & perfectissima; ergo per illam quælibet persona, & quidquid in personis est, sufficientissime existit; sicut, si in Deo tantum esset una persona absoluta, tantum intelligeretur habere unum esse simplicissimum secundum rationem, per quod tam natura, quam personalitas ejus existeret; ergo etiam nunc non oportet distinguere etiam ratione, esse naturæ divinæ ab esse relationis, quæ est personalitas ejus. Et confirmatur primo, quia esse absolutum intime & essentialiter includitur in relatione, ut relatio est; ergo per illud sufficienter existit,

etiam quatenus relatio est; ergo non est necessaria alia existentia ratione distincta: imo nec videtur intelligibilis, quia, ut res existat, satis est unica existentia, quæ rem totam quasi penetret, & actuet. Secundo confirmatur, nam illud esse absolutum est completum, & substantiale; ergo si aliquid esse intelligitur illi addi, etiam secundum rationem, adderetur accidentaliter.

Respondetur breviter, eandem rationem, ut sæpe dictum est, esse de existentia, quæ de entitate actuali; sicut ergo divinitas, ut præcisa a relationibus, est res infinita simpliciter, & nihilominus secundum hunc præcisum conceptum non est formaliter relativa, neque essentialiter, sed tantum absoluta, quia relativa perfectio formaliter non pertinet ad infinitatem ejus simpliciter, quamvis in ea eminenter contineatur, ita ipsum esse essentialē est quidem infinitum, sed ut sic tantum formaliter absolutum; & ideo, quamvis per illud, ut sic perfectissime existat natura absoluta, non tamen relatio, ut relatio est, & ideo oportet, ut relatio secundum rationem addat aliquid esse, quo formaliter in esse entitatis actualis relativæ constituitur. Quapropter non est simile quoad hoc, si in Deo tantum esset una persona, quia illa esset absoluta, & ideo tota entitas ejus, & totum esse ejus, essent absoluta.

Ad primam confirmationem respondetur, existentiam non esse actum aliquem quasi actuantem rem, & distinctum ab ipsa, præsertim in Deo, sed esse ipsammet entitatem uniuscujusque rei; & ideo existentiam absolutam Dei, licet includatur in relatione, formaliter, & secundum præcisionem rationis non actuare relationem in esse relationis; ita enim in illa includitur, ut relatio aliquid addere intelligatur, quod propriam habeat actualitatem, & secundum eam, propriam etiam existentiam. Ad secundam confirmationem respondetur primum, esse essentialē esse completum, & perfectum, quantum esse potest esse alicujus naturæ, non vero per seipsum præcise sumptum ultimo terminatum ad esse personæ; & ideo esse relationis non advenire accidentaliter, sed personaliter, ad constituendam scilicet personam. Deinde quamquam intelligeretur persona jam completa, tamen quia in re est omnino idem esse relationis cum esse absoluto, hoc satis est, ut non sit esse accidentale, sicut videre est in inspiratione activa, quæ intelligitur advenire Patri, & Filio jam personaliter constitutis, & non est accidens propter simplicitatem, & indistinctionem.

Ultima difficultas sumi potest ex relationibus creatis, in quibus existentia relationis non videtur esse respectiva, sed absoluta, quia est ipsum inesse relationis, quod dicit ordinem ad subjectum, & non ad terminum, relatio autem ut relatio respicit terminum, & non subjectum, quia non potest bis referri, seu duo simul respicere, scilicet fundamentum, & terminum, ut Cajetan. loco supra citato ex prima parte contra Scotum objicit. Vel potest aliter explicari, quia relatio secundum suam naturam respicit terminum; ergo non secundum existentiam, alias bis respiceret. Sed hæc difficultas solum procedit in sententia distinguente realiter essentialiam ab existentia; non in sententia facile ex dictis expeditur, nam existentia relationis nihil aliud est, quam ipsa actualis entitas relationis, unde tam respectiva est, quam ipsa relatio, quæ secundum se totam, & prout relatio est, respicit subjectum, quod suo modo informat, & terminum, ad quem ultimate tendit, seu ad quem refert ipsum subjectum, in quo est, & hoc modo non est inconveniens, ut respiciat duo subordinate, sicut habitus respicit potentiam, quam informat, & objectum, ad quod illam inclinat. Neque hic respectus est distinctus in essentiali, & existentia relationis, quia ipsa essentialis, & existentia non sunt nisi una entitas actualis.

Sed instabit aliquis, quia inhærentia hujus relationis creatæ in suo subjecto, vel fundamento tantum est quidam modus unionis, qui non videtur respectivus, sed absolutus, ut est inhærentia cujuscumque accidentis. Respondetur, ipsam relationem non inesse, vel uniri subjecto, seu fundamento tanquam entitatem distinctam, sed tanquam modum, & ideo in illo non distingui modum unionis ab entitate, vel existentia ejus, quæ, si existit, necesse est, ut actualiter inexistat, & uniatur suo fundamento, aut subjecto. Et ideo tota illa unio, seu inexistentia relativa est, sicut ipsa forma.



## S E C T I O III.

*Utrum in Deo sit aliqua subsistentia absoluta, & essentialis.*

**R**atio dubitandi esse potest, quia subsistentia est ultimus terminus naturæ, constitutivus personæ; sed in Deo non est una persona absoluta; ergo neque una subsistentia. Major constat ex ipso usu, & significatione ipsius nominis subsistentiæ, unde apud Græcos idem significatur nomine hypostasis, quod apud nos nomine subsistentiæ. Et in Conciliis hæc voces, *Subsistentia, hypostasis, suppositum & persona*, pro eodem sumuntur loquendo in divina natura. Ad quod alludens D. Thom. infra in hæc q. 3. art. 3. ad primum ait: *Quod est subsistens in divina natura, consequens est, ut sit persona; & 1. p. q. 29. art. 2. dicit subsistentiam, & suppositum idem significare; & q. 9. de potent. art. 3. & 5. dicit, ex hoc quod aliquid est subsistens habere, ut non possit de pluribus prædicari. Et ratione probari potest ex differentia inter existentiam, & subsistentiam, quæ nulla alia esse potest, nisi quod existentia præcise dicit actualitatem essendi, subsistentia vero dicit ultimum terminum existentiam, quo res sit omnino incommunicabilis. Denique, si daretur hæc subsistentia absoluta, ergo præcisus per intellectum relationibus intelligeretur manere deitas tanquam substantia individua, & singulari habens intellectualem naturam, seu in illa subsistens; esset ergo persona, quia hæc est personæ definitio.*

In hac re, prima sententia negat esse in Deo subsistentiam essentialem, seu absolutam. Hanc tenet Alexand. Alenf. 3. part. q. 2. memb. 3. & q. 7. memb. 1. art. 3. & idem licet obscure docet in 1. part. q. 57. membr. 2. & 3. Bonavent. idem sentit in 3. distin. 1. art. 1. q. 3. & distin. 5. art. 1. q. 4. & Marfil. in 3. q. 2. art. 3. dub. 3. ad finem. Henr. quodlib. 5. q. 8. ad finem, licet non sub nomine substantiæ, sed sub nomine suppositi absoluti, & communis tribus personis questionem hanc disputet, idem in 1. part. summæ art. 56. q. 4. Richard. etiam in 3. distin. 5. artic. 1. q. 2. eandem sententiam supponere videtur, quam etiam indicat in 1. distin. 27. art. 1. q. 1. ad 2. Huic opinioni videtur multum favere modus loquendi Conciliorum, ubique enim negant, tres personas esse unam subsistentiam, unde in VI. Synod. act. 1. *Sabelliana pravitas dicitur tres personas in unam colligere, vel confundere subsistentiam; & idem sumi potest ex V. Synod. collat. 8. canon. 1. & ex aliis, quas infra citabimus, quæ ubique definiunt in Deo tres subsistentias, & consequenter negant unam. Fundamentalibus autem ratio huius sententiæ in principio tacta est, quam inferius, & in sect. sequenti magis urgebimus explicando ejus difficultatem, quæ sine dubio magna est.*

Contraria sententia est communis aliorum Theologorum, qui sentiunt divinam naturam, sicut essentialiter ex vi suæ perfectionis absolute existit, ita etiam subsistere, neque emendicare (ut ita dicam) subsistentiam a personis. Ita tenet expresse Scot. in 3. d. 1. q. 2. §. ad questionem igitur, & d. 5. q. 1. & in 1. d. 7. q. unica in principio, & in fine, & d. 26. ad 4. tertiæ viæ. Eandem tenet Durand. in 3. d. 1. q. 2. & Richard. art. 1. q. 2. ad 1. juncta q. 2. Gabr. q. 1. art. 3. dub. 4. Almain. quæst. 1. art. 3. dub. ult. & Okam. in 3. q. 1. In eadem sententia conveniunt discipuli D. Thom. cum Capreol. in 3. d. 1. art. 3. ad argum. contra 4. concl. & Paludan. ibid. q. 2. in fine illius, & Cajetan. supra q. 2. art. 2. & in hac q. 3. art. 3. & 1. p. q. 3. art. 3. & q. 26. artic. 4. Qui pro se citant D. Thom. variis in locis, præcipui sunt, quos citavi sectione præcedenti in principio, quibus addi potest, in omnibus locis, ubi ait Deum esse ipsum esse per essentiam, eodem modo dicere, esse ipsum esse subsistens, ut videtur est in locis citatis sect. 1. sentit ergo utrumque esse absolutum, & essentialē, & 1. contra Gentil. cap. 38. 42. & 43. Item 1. p. q. 39. art. 4. dicit, hoc nomen *Deus* supponere pro essentia, nisi ex adjuncto determinetur supponere pro persona, & in hoc ponit differentiam inter hos terminos *Deus & homo*; nulla autem esset, si divinitas per se non esset subsistens, etiam ut abstracta a personis; & q. 8. de potent. art. 3. ad 7. dicit relationes divinas habere, quod subsistant ab essentia, & non e contrario, quod evidentius repetit q. 9. artic. 5. ad 13. est etiam expressus locus in 1. d. 21. q. 2. art. 1. ubi dicit, natu-

ram divinam in se esse habentem esse subsistens, etiam præcisam & abstractam a tribus personis, atque adeo Deum, ut prædicatur de tribus personis, esse quid subsistens, commune illis. Idem docet in 3. d. 6. q. 2. art. 2. ad 2. citatur etiam pro hac sententia Augustin. 7. de Trinit. cap. 4. & 5. ubi dicit: *Divinam naturam ad se subsistere*, id est, absolute: *Nam omnis, inquit, substantia ad seipsam subsistit, quanto magis Deus?* omnis autem substantia, præter Deum, subsistentia absoluta subsistit; sentit ergo August. eodem modo subsistere naturam divinam. Denique huic sententiæ videtur favere Agatho Papa in epist. decretali, quæ habetur in VI. Synod. act. 4. & incipit. Piissimis dominis, ubi non longe a principio sic inquit: *Conitemur Deum Patrem, Deum Filium, Deum Spiritum Sanctum non tres Deos, sed unum Deum, non trium nominum subsistentiam, sed trium subsistentium, seu personarum* (ut alia litera habet) *unam subsistentiam*, quæ verba quamvis non contineant fidei definitionem, tamen, cum a Pontifice cum toto Concilio scripta sint, magni ponderis esse videntur, præsertim, quia cum a Latinis sint scripta, videntur in proprietate sermonis Latini scripsisse, atque subsistentiam propriæ, & non tantum pro essentia sumpsisse. Verum est tamen in nova editione Conciliorum facta a Surio non legi unam subsistentiam, sed unam substantiam, quæ lectio improbari non potest, & videtur certe magis usitata: quamvis antiquiora Concilia priori modo habeant.

Ratione probatur hæc sententia a Cajetan. quia tres personæ sunt unus Deus; ergo hic Deus; ergo datur hic Deus communis tribus personis; sed hic Deus dicit hanc deitatem subsistentem; ergo datur etiam subsistentia communis tribus personis. Et confirmatur primo, quia hæc Deitas est quid absolutum commune tribus personis; ergo & hic Deus, nam in Deo propter summam simplicitatem idem est, quo est, & quo est. Confirmatur secundo, quia in Deo absoluta sunt priora relativis, ut sæpe D. Thom. docet, præsertim 1. part. q. 3. art. 3. ad 1. sed hic Deus est quid absolutum; ergo est prius relationibus, atque adeo per se subsistit, & non tantum formaliter per solas relationes. Sed hæc rationes non sunt efficaces, ut patebit ex dicendis in fine dubii.

Ut ergo explicemus veritatem, & aperiāmus, in quo possit esse dissensio in re, supponamus, quid nomine subsistentiæ significetur; potest enim hoc nomen sumi vel ut concretum, vel ut abstractum; priori modo significat id, quod per se existit, posteriori vero modo significat illum formalem modum, a quo res habet, ut per se subsistat, qui potest dici ratio per se existendi. Rursus subsistentia priori modo significare potest vel simpliciter, & absolute id, quod per se subsistit, vel specialiter id, quod incommunicabiliter, & quasi ultimate subsistit, in qua ultima significatione communiter sumitur in Conciliis, & significatur nomine *hypostasis*, quæ est quasi fundamentum, quod subest ipsi naturæ, & omnibus communibus prædicatis, ut constat ex supra notatis q. 2. artic. 5. & ex Basilio epist. 43. & Gregor. Nyssen. orat. de differ. essentia, & hypost. Et sic etiam proportionaliter distingui potest subsistentia sumpta in abstracto, potest enim significare rationem per se essendi simpliciter, vel rationem incommunicabiliter subsistendi.

Rursus, quoniam suppositum includit hæc tria, primo, existere, est enim aliquod ens actu, & in rerum natura existens; secundo, per se existere, est enim id, quod est; tertio, incommunicabiliter existere per se, nam in hoc completur ratio suppositi, seu personæ, si sit in natura intellectuali. In creaturis, ut supra disput. 8. sect. 3. tetigit, magna est opinionum varietas in explicando, quomodo hæc tria tam inter se, quam in ordine ad naturam & suppositum comparentur, de quibus hic agere non possumus, quia ad Metaphysicum institutum spectant. Nunc ergo suppono primo, naturam, etiam in rebus creatis, non habere suum proprium existere a subsistentia, neque formaliter, ut Capreol. & alii volunt, neque aptitudinaliter, ut Cajetanus & alii, sed per suam propriam entitatem actualem habere ipsum existere naturæ, ut natura est, quod in prædicta disput. 8. est tactum, & infra q. 17. latius tractabitur disputando de existentia humanitatis Christi. Ac denique, quidquid sit de creaturis, quod ad præsens attinet, in divina natura hoc mihi est certissimum ut ex sectione prima constat.

Quorūque  
ve includi  
das sup-  
positum.

Prima  
suppositio.

Deinde



**Secunda.** Deinde præmittito, illam communicabilitatem, quam suppositum includit, neque in Deo, neque in creaturis provenire formaliter ab ipsa natura, aut ab existentia ejus, neque esse solum negationem, sed provenire formaliter ab aliqua ratione positiva, quæ vel secundum rem, vel secundum modum nostram concipiendi intelligitur addi naturæ, ut natura est, etiam actu existens. Quod, licet in rebus creatis sit tantum probabilius, in divinis tamen videtur esse certissimum: quia divina natura, ut præcisa a personis, licet essentialiter sit existens, non tamen est incommunicabilis omnino, prout ad rationem suppositi necessarium est, ut constat ex fide, alias tres personæ essent unum suppositum: imo præter illud suppositum, non posset in Deo esse plura supposita, quibus illud communicaretur, quia hoc est contra suppositi incommunicabilitatem. Et aliunde etiam est certum, proprias rationes, quas habent divinæ personæ, in quibus inter se non communicant, sed distinguuntur, positivas esse & reales, alias non essent in Deo tria positiva realiter distincta; quod est contra fidem. Imo intelligi non posset, in quo esset illa incommunicabilitas, si non esset in aliqua re positiva, quæ incommunicabilis denominetur, & sit.

**Multi-  
plex com-  
muni-  
cationis  
modus, &  
oppositæ  
incommu-  
nicabili-  
tatis.**

Sed ad intelligendum melius hanc incommunicabilitatem observandum est multiplicem esse communicationem, cui potest incommunicabilitas opponi. Quædam est communicatio superioris ad inferiora secundum abstractionem rationis, quæ dici potest communicatio rationis, quia res, quæ sic communicari dicitur, non est vere in re una, nec distincta ex natura rei ab inferioribus: unde incommunicabilitas, quæ huic communicationi opponitur, non refert ad propositum, nam generalis est tam supposito, quam naturæ in singulari, & in individuo, prout nunc loquimur. Alia est ergo communicatio realis, qua una res singularis communicat se ipsam alicui, vel aliquibus. Hæc autem communicatio duplex intelligi potest, una per identitatem perfectam, & quasi intimam inclusionem (ut sic dicam) ejus rei, quæ communicatur, in illa, cui communicatur. Alia sine identitate, quæ necessario esse debet media aliqua reali unionem. Prior modus communicationis reperitur in sola divina natura, attributis ejus, & spiratione activa: non autem in re creata, neque etiam in divina persona, ut persona est. Primum est certum de fide, & ratio ejus nulla alia a nobis reddi potest, nisi quia hoc pertinet ad infinitatem divinæ naturæ & ad summam simplicitatem ejus ac divinarum personarum. Tertium etiam de fide est, ut de se constet, ratio autem sumitur ex oppositione relativa vel originis divinarum personarum, ut ex materia de Trinitate suppono. Hinc vero obiter intelligitur, hanc saltem incommunicabilitatem esse necessariam ad rationem personæ respectu rerum distinctarum, id est, ut non possit hoc modo multis communicari per identitatem: imo, si hoc habeat, & alioquin sit res subsistens, integra & completa, erit necessario suppositum, quamvis absolute illa incommunicabilitas non sufficiat, nam quælibet entitas creata illam habet, ut in secundo membro dicebam. Quod etiam est certissimum, & ratio ejus est limitatio entitatis finitæ & creatæ, quæ non potest una vere ac realiter existens cum multis realiter distinctis, & cum singulis realiter identificari absque ulla distinctione actuali, quam in re ipsa cum illis habeat: si autem uni rei tantum hoc modo identificaretur, illa non esset propria communicatio, sed adæquata identitas.

Posterior autem communicationis modus, cum sit per unionem realem unius rei ad aliam vel ad modum ex natura rei distinctum, attribui potest rebus omnibus, quæ cum aliis uniri possunt: sic enim materia dicitur communicari formæ, & forma materiæ, & utraq; composito, & in universum pars dici potest communicari compati & toti. Sumendo autem communicabilitatem, ut excludit communicationem in tota hac amplitudine, non est de ratione suppositi seu rei subsistentis ut sic: nam res subsistens communicari potest alteri, ut forma materiæ, retento suo subsistendi modo, si ita informet, ut non inhæreat, nec in suo esse pendeat a subiecto, ut de anima rationali probabilius est; & similiter potest res subsistens communicari alteri ut subiectum formæ, ut est etiam probabilius de materia prima: idemque suo modo in partibus substantialibus integrantibus totum videre licet. Denique hoc modo, sicut natura communicatur personæ, ita

persona potest communicari naturæ, ut in mysterio incarnationis persona Verbi communicata est humanitati, & personalitas creata sese communicat, & juxta probabilem opinionem posset etiam communicari pluribus de potentia absoluta. Igitur incommunicabilitas personæ præter negationem communicationis per identitatem respectu rerum distinctarum, solum excludit communicationem ad alterum, ut ad ultimum terminum existentia, qui terminus in rebus creatis censetur necessarius ad complementum existentia, propter quod in eis dici solet hæc incommunicabilitas esse ad alterum ut ad sustentantem, quia hic terminus complere solet, id quod proprie ac per se existit, tanquam id quod simpliciter esse & operari dicitur: & hoc est, quod per talem terminum redditur incommunicabile prædicto modo, scilicet ipsum suppositum, quod in rebus creatis est compositum ex natura, & modo illo seu termino existentia, & in Deo proportionali modo secundum constitutionem simplicem seu rationis sine compositione. Natura autem, quæ est in supposito non fit ipsa incommunicabilis per talem modum seu terminum existentia, vel saltem hoc non est de ratione supposititalitatis ut sic: an vero id conveniat suppositi creatæ ex limitatione sua, infra tractabitur. Et hæc nunc sufficiant de incommunicabilitate ad rationem personæ vel suppositi necessaria, quæ ad intelligenda omnia, quæ dicemus, diligenter annotanda sunt.

Tertio suppono, in rebus creatis per se existere, vel (ut clarius id exprimam) perfectitatem existendi non convenire naturæ formaliter per se ipsam, seu per existentiam suam, sed per aliquid reale, & in re ipsa ab illa & ab ejus existentia distinctum, sive illud sit entitas omnino realiter distincta a natura, & ab existentia ejus, sive tantum sit modus ex natura rei distinctus. Et hoc satis nobis manifestavit mysterium incarnationis, in quo reperitur humanitas in rerum natura absque propria perfectitate existendi, quam ex se habeat, sed solum est in Verbo, a quo sustentatur, & quasi substantificatur. Hinc enim recte colligimus, in propria hypostasi creata, id, quod est ratio per se essendi, esse aliud ab entitate actuali ipsius naturæ, & per id non proprie naturam ipsam seu humanitatem per se esse, sed compositum ex illa & ratione per se essendi, quæ est personalitas seu supposititalitas, ut statim dicam. Ne vero in termini ambiguitate decipiamur, oportet advertere illud per se, seu perfectitatem essendi, hi, non sumi, ut distinguitur contra esse in alio, ut in subiecto sustentante: hæc enim significatione esse per se omni naturæ substantiali præsertim completæ, essentialiter convenit, & significat potius aptitudinem subsistendi, quam actua-lem modum per se essendi, qualem declaravimus, quo modo etiam humanitas Christi, prius natura, quam assumatur a Verbo, considerata, potest dici per se existens, quia hoc per se nihil addit supra existentiam substantialem, sed est quasi differentia: sumitur ergo hic per se, ut dicit complementum quoddam existentia substantialis, seu modum existendi, quo constituitur id, quod proprie est in se sine adhesionem ad aliud ut ad sustentans, & terminans existentiam naturæ, quod recte a nobis explicatur per negationem unionis in hypostasi seu ad hypostasim: per hanc enim perfectitatem redditur natura incapax talis unionis, quatenus sic terminata est, ad hoc ut ipsemet terminus ulterius terminetur, seu alteri termino uniatur: hoc enim directe repugnat rationi termini, & huic perfectitati essendi. Hanc ergo perfectitatem dicimus convenire substantiis creatis non per se ipsas, nec per suas existentias seu actuales entitates, sed per modum positivum essendi ex natura rei ab eis distinctum.

Quarto suppono, in rebus creatis per eundem omnino terminum seu modum positivum substantialis naturæ constitui rem per se existentem, & omnino incommunicabilem, & consequenter personam vel suppositum. Itaque illa ratio per se essendi est etiam ratio incommunicabiliter existendi, nec in re hæc distinguuntur in tali modo seu termino, etiam si ratione a nobis præcendantur. Ratio autem est, quia ille terminus, ut est ratio per se essendi, confert incommunicabilitatem ad alterum ut hypostasim, seu terminum hypostaticæ unionis, & quoniam alias terminus ille creatus, esse supponitur & finitus, est etiam intrinsece incommunicabilis aliquibus per identitatem cum illis, & ita habet omnem incommunicabilitatem, quæ ad rationem suppositi necessaria est, & ideo

**Ad perso-  
nam sive  
ad suppo-  
situm es-  
sentialiter  
distinctum,  
quæ incommu-  
nicabili-  
tas neces-  
saria.**

**Tertia  
suppositi-  
tio.**



ideo in rebus creatis illemet terminus naturæ, qui constituit rem subsistentem, seu per se existentem, constituit etiam suppositum vel personam, estque subsistentia & suppositivitas seu personalitas.

Ex his ergo omnibus clare & sine vocum equivocatione perspicitur potest, in quo sit punctus præsentis controversiæ. Nam in primis constat ex dictis sect. 1. dari in natura divinam propriam & essentialem essentiam absolutam, quæ in ea manere concipitur, etiam si ab ea mente præseindamus omnes relationes. Quo fit, ut, licet intelligamus relationes advenire essentia divinæ, & cum ea aliquid unum constituere, scilicet personam vel quoddam relativum, nunquam tamen intelligendum est illam relationem advenire essentia, ut rationem existendi, seu tanquam id, per quod formaliter existit; nam in omni re hoc tantum unum est, & esse potest, sed intelligitur solum advenire talis relatio ut constituens personam, & consequenter ut complens existentiam personæ in sua ratione, scilicet tanquam ultimi termini, & quasi formæ ejus. Secundo, constat ex fide non dari in natura, seu existentia divina essentiali aliquam rationem positivam absolutam & essentialem, quæ reddat illam omnino incommunicabilem, quia nihil est in Deo absolutum & essentialiale, quod per summam identitatem non sit communicabile tribus personis. Et ideo dixi, omnino incommunicabilem, quia natura divina ex vi suæ essentialis perfectionis est quidem incommunicabilis rei a se distinctæ, per aliquam unionem hypostaticeam, qua ipsa, ut natura uniatur alteri tanquam termino suæ existentia, id enim plane repugnat cum perfectione essentiali talis naturæ: non tamen est illa natura ex vi suæ existentia, vel alicujus modi sui absoluti incommunicabilis per identitatem multis rebus inter se distinctis, nam in hoc mysterium Trinitatis consistit. Quocirca, si per subsistentiam absolutam intelligamus rationem per se essendi omnino incommunicabilem, certissimum est, non esse in Deo talem absolutam subsistentiam. Sicut etiam est certum non dari in Deo unam subsistentiam absolutam, prout significat in concreto id, quod incommunicabiliter subsistit, & hoc probant Concilia citata pro priori sententia, quia tres personæ nec sunt una persona, nec unum suppositum, & quia in divinis nihil absolutum est incommunicabile, & ad hoc etiam valent, quæ supra Henr. citato quodlib. adducit, & Duran. in 1. d. 26. q. 1.

Controversia ergo nunc superest de re quidem, an sit in Deo subsistentia absoluta in alio sensu, sive in concreto, sive in abstracto sumatur, id est, an sit aliqua ratio, & perfectio absoluta, qua constituitur aliquid, ut in se, & per se existens, licet non incommunicabiliter; de modo autem loquendi erit quæstio, si datur hæc per se existentia, an sit illa dicenda subsistentia, necne. Est itaque proprius quæstionis sensus, an existentia divinæ naturæ habeat perfectiorem essendi a solis proprietatibus relationis, vel ex se ipsa, & per suam rationem absolutam. Et consequenter an divina natura non solum ut existens, sed etiam ut per se existens sit communicabilis multis, an vero hoc ipso, quod concipitur ut per se existens, seu esse id quod est, intelligatur etiam incommunicabilis, & persona.

Dico primo: existentia divina absoluta & essentialis, ex vi suæ absolutæ perfectionis præcise sumpta, est non tantum ratio existendi, sed etiam existendi in se, & per se, ita ut divinitas, ut per illam existit modo perfectio, intelligatur per se existere, & non indigere aliquo sustentante, neque aliquo alio modo, re aut ratione distincto, ut in se, ac per se existat. Denique in hoc sensu ipsum esse divinum absolutum & essentialiale ex vi suæ præcise perfectionis absolutæ, est esse per se, & essentialiter subsistens, & non solum est, quo aliquid existit, sed etiam quod existit. In sensu hujus conclusionis existimo secundam sententiam omnino veram, quam primum ita declaro. In humanitate Christi (juxta probabilem sententiam) fuit existentia creata, imperfecta tamen, & separata a proprio modo per se existendi, quia existentia naturæ creatæ non includit modum illum in suo conceptu formali, & essentiali, & illo ablato manet imperfecta, & quasi in potentia, ut per modum potius existentia, quam per se existentia afficiatur, seu terminetur; quamvis ergo existentia absoluta divinitatis non possit re ipsa separari a suis personalitatibus, quia ex natura rei non est ab illis distincta, sicut existentia naturæ creatæ distinguitur a sua persona-

litate: tamen etiam quatenus ratione potest præscindi a suis personalitatibus, non est concipienda eo modo imperfecto, quo concipitur existentia naturæ creatæ ut sic, hoc enim videtur aperte repugnare infinitæ perfectioni simpliciter ipsius esse per essentiam. Et hoc esse debet fundamentum hujus conclusionis. Quod breviter ita concluditur: illud esse ut sic conceptum est simpliciter, & in genere entis infinite perfectum; ergo includit in suo formali, & essentiali conceptu non solum existere, sed etiam modum in se, & per se existendi. Antecedens probatur, quia ex vi illius esse habet tota Trinitas, & quolibet persona illius, ut sit ens simpliciter, ac infinite perfectum in tota latitudine entis, nam relationes ut sic non addunt perfectionem, quæ formaliter pertineat ad infinitatem simpliciter. Unde nihil valet responsio dicentium esse divinum sic conceptum esse infinitum in ratione cujusdam naturæ infinitæ, non tamen simpliciter in ratione substantiæ, vel entis completi, quia vel illa infinitas in ratione naturæ est infinitas simpliciter in tota latitudine, & perfectione entis, vel tantum secundum quid. Hoc secundum est contra infinitatem Dei: nam ex illo infinito secundum quid, & relatione non fieret infinitum simpliciter, quia relatio vel non addit perfectionem (ut aliqui volunt), vel non perfectionem simpliciter, neque ex proprio conceptu infinitam, nisi in genere relationis, & ita nulla persona esset simpliciter infinita: vel illa infinitas est infinita simpliciter in tota latitudine, & perfectione entis, & ita non solum est infinitas naturæ ut sic, sed etiam substantiæ ut sic, & entis ut sic, & omnis alterius prædicati similis, quod ex vi sui conceptus dicat perfectionem simpliciter.

Probatur vero prima consequentia. Primo, quia ens simpliciter infinitum non potest concipi, ut essentialiter quid incompletum, & tanquam, quo aliquid est, & non tanquam, quod est, & idem est de substantia infinite perfecta in ratione substantiæ: unde Concilia, quæ definiunt tres personas esse unam perfectam, & infinitam substantiam, videntur mihi, docere sufficienter hanc veritatem; quomodo enim erit substantia simpliciter infinita in genere substantiæ, si non est completa substantia? illa autem una substantia, quæ sunt Pater, & Filius, & Spiritus sanctus, omnino absoluta est. Secundo, quia si illud esse per essentiam ex se est infinitum ens simpliciter; ergo est Deus, & non tantum deitas; ergo est in se & per se existens; de natura enim abstracta, nisi intelligatur per se existens, non potest concretum prædicari: hac enim ratione humanitas non est homo. Tertio, quia non videtur posse negari, quin ille modus in se, & per se existens sit perfectio simpliciter simplex, & consequenter debere formaliter includi in conceptu essentiali entis simpliciter infiniti, quia formaliter pertinet ad complementum entis, & substantiæ, nam sine illo non intelligitur esse substantia completa, nec quod est, sed tantum quo aliquid est, ut patet in Christi humanitate. Et confirmatur, quia perfectio simpliciter dicitur, quæ in quolibet ente ut sic melior est ipsa, quam quolibet illi incompossibilis; hujusmodi autem est hic modus, seu potius (ut ita dicam) hoc complementum ipsius esse, scilicet in se, ac per se esse.

Dici potest, hanc perfectionem repugnare cum alia majori perfectione divinæ naturæ, quæ est esse communicabilem tribus personis. Sed hæc evasio tangit fundamentum contrariæ sententiæ, quod infra solvemus ostendendo hæc duo non sibi repugnare. Unde retorquetur argumentum, nam ex dictis saltem convincimus, si perfectus hic modus per se essendi essentialiter non repugnat cum communicabilitate divinæ naturæ, non esse illi negandum; ostendamus autem hæc duo non repugnare inter se, ergo. Quin potius addo, si formaliter ac præcise concipiuntur hæc duo, per se esse tanquam ipsum esse per essentiam infinite perfectum, & completum, & esse communicabilem tribus, magis illud pertinere ad infinitatem simpliciter, quam hoc secundum. Et illud esse veluti quiddam prius, hoc vero esse veluti consequens infinitatem simpliciter; non est ergo verisimile hæc duo inter se pugnare.

Dicunt aliqui, non pertinere ad perfectionem, & infinitatem simpliciter, ut in formali, & essentiali conceptu ipsius esse includatur hic modus, sed satis esse, ut ipsum esse sit tam perfectum, ut secum afferat personalitates, quæ

In Deo 1. d. 26. q. 1. est substantia absoluta incommunicabilis.

Modus per se existendi perfectio simpliciter simplex in Deo.

Objeccio.

Responsio.

Deus ex vi suæ absolutæ existentia habet subsistere.

Objeccio.



**Respon.** quæ in re ab ipso non distinguuntur, per quas formaliter habeat hunc modum per se essendi. Hoc vero non satisfacit, quia perfectio simpliciter non tantum identice, sed omnino essentialiter est de ratione entis infinite simpliciter, ut nunc ex 1. part. suppono, & ex dictis patere potest; & ita explicatur in proposito, quia si divinitas cum suo esse per essentiam ex vi illius non intelligitur sufficiens ad existendum in se, & per se; ergo non intelligitur ut actus omnino perfectus, sed quasi in potentia, & indigens ad suum complementum ulteriori actu: quomodo ergo ut sic concipi potest tanquam infinite perfecta? pertinet ergo ad perfectionem ipsius esse per essentiam, ut per se, & ex vi sua perfectissimo modo sit, quia est abstractissimum & purissimum, abstrahens ab omni potentialitate. Quod confirmatur secundo, quia si intelligeremus in Deo unam tantum personam absolutam, intelligeremus ipsum esse per essentiam cum tota hac actualitate, sed nunc non debet concipi minus perfectum essentialiter.

**Obiectio.** Aliter vitari posset vis harum rationum, concedendo, hunc modum per se essendi esse de essentiali conceptu Dei, nihilominus tamen non convenire illi nisi per relationes, quatenus conveniunt in ratione communi substantiæ, vel quatenus eadem perfectio, quæ in Patre est paternitas, in Filio est filiatio. Sed hoc stare non potest, quia (ut suppono ex 1. part.) licet relationes non distinguuntur ab essentia, non tamen sunt de essentiali conceptu ejus: præcisè ergo relationibus, & quidquid per eas intelligitur formaliter conferri, intelligitur manere tota perfectio essentialis Dei; ergo si in illa perfectione includitur hic modus, non confertur formaliter per relationes. Deinde quia quidquid est essentielle in Deo, est idem numero in omnibus personis, aliàs non esset tota essentia Dei eadem numero in omnibus personis; id autem, quod confertur formaliter per relationem, non est idem numero formaliter in omnibus personis, sicut neque ipsa relatio; unde sicut ratio personæ, ut sic, non est eadem numero in omnibus personis, sed tantum per rationem communem nostro modo concipiendi, ita ille modus per se essendi, si tantum per relationes ipsas formaliter conferretur, non esset idem numero in omnibus personis, atque ita non esset essentialis.

**Respon.** Quod vero quidam distinguunt inter substantiam, & perfectionem substantiæ, ut dicant, satis esse perfectionem substantiæ esse eandem numero in omnibus personis, licet non sit eadem numero substantia: hoc (inquam) intelligi non potest in perfectionibus simpliciter, quæ formaliter esse debent eadem numero in omnibus personis; sicut enim non est aliud perfectio sapientiæ, quam ipsa sapientia formalis, & idem de justitia, & similibus, ita non est aliud perfectio substantiæ, seu per se existentia (de hac enim nunc loquimur) quam ipse formalis modus per se existendi: tum præterea, quia perfectio, quam formaliter confert relatio, ut sic, non est eadem numero formaliter in omnibus personis, quia est perfectio relativa, ut ex 1. part. constat: necesse est ergo, si perfectio hæc essentialis per se essendi est eadem numero communis tribus personis, ut sit absoluta, & consequenter, ut conveniat Deo ex vi essentialis conceptus ipsius esse per essentiam.

**Obiectio.** Sed dicit tandem aliquis: his rationibus probaretur, si essent efficaces, divinitatem ut sic debere esse & constitui personam ex vi sui esse absoluti & essentialis, proportionaliter enim possunt applicari omnia dicta. Respondetur tamen negando sequelam, quia persona dicit modum per se essendi, & quoad hoc pertinet ad complementum entis, & substantiæ, & ad perfectionem simpliciter, quia esse in se, & per se, est quasi esse independens omnino, & sibi sufficiens ad existendum, & sic procedunt omnia dicta. Sed dicit ulterius persona, ut ille modus incommunicabilis sit, & hoc nec pertinet ad perfectionem simpliciter, nec ad complementum substantiæ; sed in personis creatis hoc provenit ex limitatione, in divinis vero ex oppositione relativa, & ideo quoad hoc non procedunt rationes factæ.

**Obiectio.** Dico secundo. Existencia absoluta, & essentialis, quatenus est ratio per se existendi, potest convenienter dici substantia, & Deitas, ut sic per se existens potest dici subsistens. Hæc conclusio, cum solum pertineat ad modum loquendi, inde sufficienter probatur, quod omnes

**Existencia absoluta in Deo est vere substantia.**

Suarez Tom. XVI.

Theologi fere ita loquuntur, & qui admittunt rem ipsam, non aliis vocibus illam explicant; & ex vi ipsius vocis declaratur, ut enim D. Thom. dixit 1. part. q. 29. art. 2. *Res dicitur subsistere ex eo, quod per se existit*. Ergo ex vi hujus impositionis incommunicabilitas omnimoda non est de ratione substantiæ; potest ergo hoc nomen tribui existentia per se, etiam si communicabilis sit. Et hoc sensu dixit D. Thom. q. 9. de potent. art. 5. ad 13. *Divinam essentiam esse secundum se subsistentem*: qui modus loquendi etiam apud antiquos patres reperitur. Hilar. enim 7. de Trinit. fere in ultimis verbis, de Patre, & Filio loquens, inquit: *Natura virtute uterque in se est, & neuter sine altero est*; & infra: *Non est corporalium naturarum ista conditio, ut infiniti sibi invicem, & substantia natura habeant perfectam unitatem*; & infra: *inesse autem non aliud in alio, ut corpus in corpore, sed ita esse, ac subsistere, ut in subsistente insit, ita vero inesse, ut & ipsa subsistat*. Hieronym. d. epist. 57. ad Damasum, *una est Dei*, inquit, *& sola natura, que vere est id enim, quod subsistit, non habet aliunde, sed suum est*; ubi quod prius dixerat, *vere esse*, postea vocat *subsistere*, & inde postea concludit in solum Deum essentia nomen vere convenire; aperte ergo sentit essentiam illam, sicut essentialiter est, ita essentialiter subsistere. Unde infra subdit: *quia illa sola natura est perfecta, & in tribus personis Deitas una subsistit, que vere est, &c.* Augustini verba satis sunt expressa citato loco de Trinit. dum inquit: *Hoc est Deo esse, quod subsistere, sicut hoc est Deo esse, quod sapere*. Favet etiam Dionys. cap. 1. de div. nomin. versus finem, dum ait: *Bonitatis substantiam, ipso esse suo, esse omnium substantiarum causam*; & infra significat divinam bonitatem hoc ipso, quod est, subsistere. Et Gregor. Nyss. in enar. vitæ Moysis fol. 6. circa finem, ubi prius inquit: *Deum esse, quod vere est, & quod natura sua est*; & infra hoc declarans inquit. *Præter supremam essentiam, nihil vere subsistere, quia per se, & per naturam suam nihil aliud subsistit*. Neque aliæ locutiones adductæ inter referendam primam sententiam, sunt huic conclusioni contrariæ, quia non loquuntur de substantia, prout nos loquimur, sed loquuntur de hypostasi, quæ vox, ut expresse docet Basil. epist. 43. quæ est eadem cum oratione Gregor. Nyss. de differ. essentia & hypost. & Damas. lib. 3. de fide c. 4. imposita est ad significandam personam, prout constitutam per proprietatem, quia ab alia discernitur, & hoc modo includit in suo conceptu incommunicabilitatem. Unde quando Latinus interpres pro hypostasi vertit substantiam, sumpsit vocem in hac eadem significatione, loco cujus interdum ponit vocem personæ interdum vero retinet nomen hypostasis, ut videre est in citato loco ex VI. Synod. act. 11. & in omnibus similibus.

Ad rationem vero dubitandi in principio positam facilis est solutio ex dictis; primo enim negatur, incommunicabilitatem esse de intrinseca ratione substantiæ, aut esse veluti effectum formalem ejus proprium, sed solum esse rationem per se essendi, & compleve substantiam in suo existendi modo. Et quamvis in creaturis ex hoc modo existendi sequatur omnimoda incommunicabilitas ob limitationem earum, non est necesse, eam sequi ex ratione subsistendi ut sic, sed ex tali modo & ratione subsistendi. Addo secundo, ut hoc magis explicetur, ad omnem perfectiorem essendi sequi aliquam incommunicabilitatem, sed non semper eandem, aut omnimodam. Divina enim natura ex suo modo essendi per se, quem substantiam absolutam appellamus, habet, ut nulli alteri personæ a se distinctæ realiter seu actualiter in re ipsa possit communicari per modum compositionis, aut hypostaticæ unionis, & ita potest simpliciter dici incommunicabilis alteri, & in hoc convenit cum qualibet persona; tamen non habet ex vi illius modi, quod sit incommunicabilis per identitatem, quod non est proprie communicari alteri, sed multis, cum quibus est idem, & in hoc differt a persona ut sic, nec talis communicatio necessario excluditur per substantiam ut sic, quod sectionibus sequentibus latius declarabitur.

## SECTIO IV.

An sint in Deo tres substantia relative.

**H**OC dubium maxime pertinet ad explicandum Incarnationis mysterium, & propter illud fere cetera tracta.



tractata sunt. Multi ergo ex Theologis negant esse in Deo subsistentias relativas, sed unam tantum absolutam: quamvis enim fateantur tres personas, ac tria supposita, per relationes constituta, & distincta, negant tamen habere, quod subsistant, a relationibus, sed ab essentia. Cum enim de ratione suppositi duo sint, scilicet, esse subsistens, & incommunicabile, primum dicunt convenire ratione essentiae, secundum rationem relationis, ita ut, licet ipsa relatio divina substantialis, & subsistens, tamen hoc ipsum habet ex essentia, quam includit, ex se vero solum referri. Hanc sententiam sic explicatam tenet Duran. in 1. d. 13. q. 2. d. 23. q. 1. & in 3. d. 1. q. 2. Marfi. in 1. q. 29. art. 1. d. 1. q. 30. art. 4. Ferr. 4. cont. gent. cap. 26. Cap. & Palu. supra citati, & Capr. in 1. d. 26. q. 1. art. 1. concl. 3. & art. 3. defendendo eandem conclusionem, & indicat Scot. citatis locis, præsertim in 3. d. 1. q. 2. dum negat, essentiam habere aliquod esse a personis, ac fere alii auctores citati dubio præcedenti pro secunda sententia, paucis exceptis, hoc idem sentiunt. Et favet multum D. Thom. in aliquibus locis supra citatis, præsertim q. 2. de potent. art. 1. ubi dicit *essentiam divinam non accipere esse per supposita*; & q. 8. art. 3. & 7. ubi distinguit illa duo, quæ sunt de ratione hypostasis, scilicet subsistere, & esse incommunicabilem, & subdit, quod *relationes, in quantum relationes, non habent, quod subsistere faciant*. Quod repetit in q. 9. art. 5. ad 13. & 1. p. q. 40. art. 2. ad 2. negat personas distinguere in esse, in quo subsistunt, & idem sumi potest ex 1. p. q. 28. art. 2. & q. 29. art. 4. & ex aliis locis supra cit. Fundari etiam solet hæc sententia in loco sæpe cit. ex August. 7. de Trinit. c. 4. & 5. ubi revera non videtur agnoscere aliquid posse subsistere, nisi per absolutam, ut sic, & ideo ait: *Quidquid subsistit, ad se subsistit*; & ideo 5. de Trin. c. 8. sic ait: *Illud præcipue teneamus, quidquid ad se dicitur, præstantissima illa, & divina sublimitas, substantialiter dici, quod autem ad aliquid, non substantialiter, sed relative; & infra: quidquid ad se dicitur, non pluraliter, sed singulariter dici*. Rationes vero pro hac sententia possunt plures sumi ex supra dictis, quas infra attingemus.

**3. Sententia.** Contrariam sententiam tenent necessario omnes, qui negant subsistentiam, ut Alex. Bonav. &c. Ex his vero, qui ponunt subsistentiam absolutam, tenent hoc Cajet. locis supra citatis, & eam defendunt communiter recentiores Thomistæ & juxta eam loquitur etiam Scot. quodl. 4. art. 2. quodl. 3. art. 5. videtur omnino vera. Supposita ergo varia significatione nominis subsistentiæ supra posita,

**Tres in Deo subsistentiæ.** Dico primo, in Deo esse tres subsistentias realiter inter se distinctas, ut subsistentia significat per modum cōcreti id, quod subsistit. Hæc conclusio est de fide quoad rem ipsam, quia nihil aliud est, quam dicere in Deo esse tres personas, quoad modum autem loquendi reperietur sæpe in antiquis conciliis, Ephesino, can. 4. in epistola Patrum Concilii Constantinopolitani, ad Damasum cum Concilio Romano, quæ in 1. tom. Concil. refertur ante Concil. Constant. 1. ex Theodor. lib. 5. hist. cap. 9. & Niceph. lib. 12. cap. 16. ubi expresse dicitur, *In tribus subsistentiis, sive in tribus personis*, item ex Concil. Chalced. act. 16. & Constantinopol. V. consult. 8. can. 1. Constantinopol. 6. act. 11. & in aliis patribus; tamen (ut jam admonui) in his locis, semper Græce habetur nomen, *ὁπρὸς αὐτὸς* & Latinus interpres interdum retinet illam vocem, interdum vero utitur nomine subsistentiæ, vel personæ, vel utriusque. Ex Latinis vero Conciliis usum est illa locutione Concil. Later. sub Mart. 1. consult. 4. can. 1. quamvis eam etiam referat ex V. Synodo. Infra vero consult. 5. in propria definitione fidei can. 5. eandem locutionem imitatur; Concil. etiam Wormarcien. cap. 5. *In tribus subsistentiis dicitur unam substantiam esse*, quod refert ex Gregor. lib. 1. regist. epist. 41. ubi tamen habetur, *In tribus personis*, utraque vero lectio notatur de consecrat. d. 4. cap. De trina. in Decreto Gregor. Sic etiam accipi potest, quod in Concil. Floren. in literis unionis dicitur, *Filium esse principium subsistentiæ Spiritus sancti*. Nam Concilium propter Græcos ita loquitur, & Græce dicitur scriptum. Hieronymus etiam (si tamen ejus est epistola) in to. 9. epist. 17. quæ continet explanationem Symboli ad Damasum, dicit, *Tres personas, & hypostases*, id est, subsistentias, *confitemur*. Et Richard. de S. Victor. lib. 1. de Trinitat. cap. 11. & lib. 4. cap. 16. 17. & sequentibus. Ratione non oportet uti, quoniam supposito Trinitatis mysterio nominum significatio ex usu petenda est.

Dico secundo. In Deo sunt tres subsistentiæ relative, ea voce in abstracto utendo, id est, tres rationes subsistendi. Hæc sequitur ex præcedenti: & potest aliquo modo sumi ex VI. Synod. act. 11. ubi dicitur, quod *Sanctissima Trinitas est numerabilis personalibus subsistentiis*; videtur enim substantia sumi pro ipsa relatione, qua distinguantur personæ: similiter in VII. Synod. act. 3. in Ep. Synodali Theodori Patriarchæ Jerosolymitani, quam probat Synodus, dicitur: *Trinitatem divisam esse numerariis subsistentiis, & personalibus alteritatibus numeratam, substantiæ vero, & naturæ identitate unitam*; & similis locutio reperietur in edicto Justiniani Imper. de fidei confessione ad Joannem Papam II. Ubi Trinitatem dicit distinguere proprietatibus, seu subsistentiis. Possunt quidem hæc juxta præcedentem conclusionem exponi, & ideo tantum præ se ferunt quandam probabilitatem, ex forma, & modo locutionum. Præterea quandocumque concilia tam Græca, quam Latina dicunt Incarnationem factam esse *Secundum subsistentiam propriam Verbi*, videtur hac voce in hac significatione uti, & Concilium Florentinum in Decret. Eugen. §. 2. distincte dixit, non esse sublatam differentiam naturarum propter unitiōnem in unam personam, atque subsistentiam concurrentem. Alia citavimus supra disput. 5. & plura de hoc dicemus disput. seq. Ratione vero arguitur ex præcedenti conclusione. Primo, quia tres divinæ personæ sunt tres subsistentes, non tantum adjective, sed etiam substantive, & ad hoc denotandum dictæ sunt tres subsistentiæ; ergo habent tres subsistentias distinctas, nam per subsistentias constituuntur formaliter in esse subsistentium; non multiplicantur autem in Trinitate concreta, seu constituta substantive sumpta, nisi multiplicatis formis, quibus constituuntur, & ideo non sunt nisi unus Deus, quia est una tantum Deitas; sunt vero tres personæ, quia sunt tres personalitates, ut ait D. Thom. 1. p. q. 39. art. 3. & 4. Secundo, quia relatio divina, quæ est proprietas personalis, vel quatenus constituit personam, constituit subsistens, vel supponit subsistens, & quasi adjacet subsistenti ad eum modum, quo spiratio activa intelligitur se habere ad Patrem & Filium; hoc posterius dici non potest, alias non posset intelligi, quo modo tres relationes constituerent tria supposita distincta, quia solum se haberent, ut formæ quasi adjacentes eidem subsistenti; debet ergo dici primum, & ideo dixit Gregor. Nazianz. orat. 12. quæ est prima de pace circa finem: *Nec tria tanquam unum accipientes: nec enim ejusmodi sunt hæc nomina. ut per se non subsistant, aut de una tantum persona predicentur*. Nam revera, si paternitas, filiatio, &c. per se non afferrent suum subsistere, non posset intelligi, nisi ut eidem personæ advenientes, Et propterea etiam D. Thom. 1. p. q. 40. ad 3. dixit: *Proprietates personales non intelligi advenire hypostasibus divinis tanquam formas subiecto, sed ferre secum supposita*; & ad 2. ait: *Paternitate non solum Pater, sed etiam est quis, sive hypostasis*. Et de potent. q. 9. art. 4. dicit, *personam divinam significare distinctum subsistens in natura divina*; & 1. p. q. 29. art. 1. dicit, *personam in divinis significare relationem, ut rem subsistentem in natura divina, & ideo esse in Deo tres res subsistentes, sicut sunt tres personæ*: nō potest autem intelligi relationē ut relationē constituere subsistens distinctū ab alio subsistente, nisi ipsa esset subsistentia distincta ab alia. Tertio (& fere in idem redit) quia si in Deo esset tantum una subsistentia, & non triplex, esset unum tantum habens Deitatem, & non triplex, quia per subsistentiam naturæ unitam, seu terminantem naturam intelligimus constitui id, quod dicitur habere naturam; & ideo in Christo est unicum habens divinam, & humanam naturam, quia est una subsistentia utriusque naturæ; sed hoc repugnat distinctioni personarum, nam quot sunt personæ, tot sunt habentes naturam, tam adjective, quam substantive. Quarto, personalitas nihil aliud est, quam subsistentia incommunicabilis; sed sunt in Deo tres personalitates realiter distinctæ; ergo & tres subsistentiæ.

Dicitur fortasse (& hæc est evasio generalis ad omnes rationes factas) relationes quidem esse subsistentias incommunicabiles, tamen quidquid est subsistentiæ, habere a subsistentia communi, ex propriis vero solum incommunicabilitatem; & quia personalitas formaliter dicit hoc ultimum, ideo proprie dici tres personalitates, & eodem sensu posse dici tres subsistentias; tamen si præcise loqua-

Tres in Deo rationes subsistentiæ relative.

Objeccio.



Respon.

loquamur de subsistentia, ut dicit rationem per se existentiam, juxta tractata sectione præcedenti, ut sic totam rationem subsistendi esse ab essentia, & hoc modo non posse dici tres subsistentias, sed unam, juxta principia posita in sect. 2. Et propter hanc evasionem non est hæc conclusio de fide. Mihi tamen nullo modo satisfacit, quia non satis concipio, quid sit, vel in quo sit illa incommunicabilitas, quod pertineat ad rationem, & constitutionem suppositi, si non sit aliqua subsistentia positiva personalis, & propria: quia nihil aliud est unam personam esse incommunicabilem alteri, nisi habere subsistentiam ab illo distinctam. Quod ita etiam explicatur, nam incommunicabilitas non est mera negatio, aut privatio, sed est aliquid positivum ex proprio conceptu distinctum ab aliis, terminans naturam, & ita cum illa constituens personam, hæc autem est propria ratio subsistentiæ incommunicabilis. Quod tandem aliter confirmatur & explicatur, quia dictum est supra relationem addere proprium esse relativum, quod licet in se includat esse absolutum, tamen illud quasi modificat, & terminat, hoc autem esse relativum non intelligitur quasi adveniens alteri: sed quasi in se manere, & per se stare, quamvis simul ex se habeat, unde ab alio distinguatur; ergo est esse ex proprio conceptu subsistens, seu quod est ratio subsistendi. Quocirca, quamvis essentia sit veluti radix totius subsistentiæ relativæ, non tamen est ipsa formalis ratio totius subsistentiæ personalis, quæ est in divinis personis. Et juxta priorem sensum possent fortasse exponi verba Augustini supra citata, & aliquæ locutiones D. Thom. quamvis (ut existimo) Augustinus illis locis non loquitur de ratione subsistendi, sed de substantia absolute, & essentialiter: sic enim relatio etiam divina præcise & ex propriis, non tam est substantia, quam modus substantiæ: quod autem ipsamet relatio sit in re ipsa perfectissima, & integra substantia, hoc non habet nisi ab ipsa essentia, quam includit.

s. Object.

Sed objicitur primo. Quia in divinis perfectionibus simpliciter non multiplicantur in personis, ut patet de sapientia, iustitia, &c. Dictum est autem subsistentiam dicere perfectionem simpliciter. Dices simile argumentum solutum est supra de existentia. Sed contra, quia non videtur eadem ratio, quia existentia est prædicatum transcendens, non sic autem subsistentia; debet ergo sequi conditionem perfectionum non transcendentium, quæ non multiplicantur. Confirmatur, quia videtur repugnare relationi ut sic esse rationem subsistendi, quia tota ratio relationis est ad aliud, ratio vero subsistentiæ est ad se & in se. Confirmatur secundo, quia aliàs etiam spiratio activa, quia intelligitur addere suum proprium esse relativum, esset subsistens, seu subsistentia.

Respon.

Respondetur rationem subsistendi dicere perfectionem simpliciter, rationem vero subsistendi incommunicabiliter non dicere perfectionem simpliciter; sicut ratio substantiæ dicit perfectionem simpliciter, non vero ratio substantiæ creatæ: & ideo rationes subsistendi incommunicabiliter possunt in Deo multiplicari, licet subsistentia communis una sit, sicut dictum est de existentia. Nec refert, quod ratio existentia videatur esse magis transcendentalis, quam ratio subsistentiæ, quia respectu personalitatis ratio subsistentiæ est quasi transcendentalis, & omnino intrinseca; omnis enim personalitas non tantum secundum rationem communem, sed etiam secundum propriam, includit in suo conceptu rationem subsistentiæ, & ideo, quia in Deo sunt tres personalitates, sunt etiam tres subsistentiæ incommunicabiles: at vero nihilominus est una subsistentia communis, quia hæc ratio subsistentiæ abstracta ab incommunicabilitate includitur non tantum in conceptu personæ, sed etiam in conceptu substantiæ perfectæ, & quæ per se habet esse. Cavendus est tamen loquentium abusus, qui hunc vocant quartam subsistentiam, ac si tres relative, & una absoluta essent quatuor subsistentiæ, quod est omnino falsum: quia cum absoluta non distinguantur in re a relativis, non augeat numerum; sicut, licet essentia sit res absoluta, non est tamen quarta res a personis; sunt ergo tria, quæ unum sunt, non tamen quatuor. Et hinc obiter intelligitur ratio de modo loquendi, cur magis absolute, & simpliciter concedamus tres subsistentias, quam tria esse; ratio enim est, quia subsistentia formaliter magis significat modum ipsius esse, & juxta frequentiore usum significat ratio-

Suarez. Tom. XVI.

nem incommunicabilem; & quia relationes divinæ ex propriis habent esse incommunicabiles, & esse veluti quosdam modos terminantes naturam divinam, ideo simpliciter dicuntur tres subsistentiæ: at vero existentia absolute dicta significat totum esse ipsius rei, quod in Deo principaliter est ab essentia.

Objectio.

Sed urgebis, quia saltem sequitur tres subsistentias esse tres perfectiones distinctas, quia ratio subsistentiæ, prout in unaquaque reperitur, perfectionem dicit. Neque obstat, quod non dicant rationem subsistentiæ absolute, sed quasi contractam, seu modificatam ad rationem subsistentiæ incommunicabilis, ut visus est respondere Cajet. 1. p. q. 29. art. 3. quia si subsistentia ut sic dicit perfectionem, impossibile est, quin omnis subsistentia, quomodocumque in se contrahat, & modifcet illam rationem, non dicat aliquam perfectionem, esto illa non sit simpliciter simplex, ut sic contracta, vel modificata. Concedo ergo illas tres subsistentias dicere tres perfectiones relativas distinctas, atque adeo posse aliquam perfectionem relativam esse aliquo modo in una persona, quæ non est in alia, quamquam absolute nihil perfectionis sit in una persona, quod non sit in omnibus, quod jam pertinet ad aliam questionem de perfectione, quam dicit relatio divina, quæ in materia de Trinitate disputatur.

Respon.

Ad primam confirmationem respondetur; sicut relationes accidentales habent in esse, etiam secundum esse ad, quæ illud esse in, est veluti transcendens, intime inclusum in omni modo accidentis (ut supra etiam sect. 2. indicatum est); ita relatio divina, etiam secundum esse ad, est subsistens, quia quod in creatis est, inesse, in illis est subsistere, unde sicut inesse accidentis non est omnino absolutum, sed abstrahens ab absoluto, & respectivo: ita ratio subsistendi eodem modo abstracta est, recte enim intelligitur posse rem aliquam omnino esse in se, & per se, & nihilominus respicere alium, ut terminum, non ut subiectum, vel suppositum, quod suum esse sustentet. Alii fortasse responderent distinguendo de relatione concepta, vel ut exercita, seu de relatione ut refert, aut constituit personam. Sed ego explicui rem ipsam, nam reliqua omnia, solum existimo pertinere ad conceptus nostros, & solum explicare eandem rem confuse, vel distincte conceptam, de quo latius 1. part. quæst. 40.

Ad secundam confirmationem respondetur, primum, etiam si id concedatur de spiratione activa, asserre scilicet secum suam subsistentiam incommunicabilem, non esse magnum inconveniens. Melius tamen negatur sequela, non enim est par ratio, relationes enim personales asserunt secum sua supposita, quæ constituunt: spiratio autem activa supponit personam constitutam, & advenit illi per modum adjacentis; & solum substantialis est, quia in re non distinguitur a personis, non quia ex proprio conceptu sit subsistens, de quo plura, 1. p. q. 36.

Secundo & difficilius objicitur, quia non videtur posse intelligi, quomodo inter se cohereant relativa subsistentia, & absoluta, salva in utraque vera ratione subsistentiæ. Et ratio difficultatis est, quia de ratione subsistentiæ est, ut ipsa sit terminus nature, ut natura est, & quasi sustentet illam, seu faciat per se esse, & consequenter, ut ipsa non terminetur ab alio isto modo, quia repugnat id, quod per se est, ut sic, si ex propria ratione tale sit, per aliquid aliud accipere, ut per se sit, propter quod infra dicemus repugnare suppositum ut suppositum assumi; sed repugnat subsistentiam absolutam, & relativam conjungi in eadem persona, quin saltem secundum rationem una intelligatur tanquam terminus alterius; ergo hoc repugnat rationi subsistentiæ, quia illa, quæ terminatur, non erit subsistentia, quandoquidem non per se, sed per aliud intelligitur habere rationem per se essendi: hoc enim est terminare, nam hoc addit subsistentia supra existentiam, ut supra dictum est: vel e contrario, illa, quæ terminat, non erit subsistentia, quia non terminat naturam ut naturam, sed quid per se existens, unde non est ratio per se essendi, neque se habet ad modum sustentantis, quæ omnia sunt contra rationem subsistentiæ.

Objectio. Quomodo sit subsistentia absoluta in Deo est relativis.

Et hæc difficultas videtur ostendere illa duo repugnare, scilicet subsistentiam esse communicabilem multis subsistentiis, sicut repugnat esse in se, & esse in alio ut in supposito. Et confirmatur, seu explicatur aliter difficultas, quia vel relationes divinæ intelliguntur advenire essentia, ut subsistenti, & ita non adveniunt tanquā sub-



sententiæ sed tanquam affectiones rei subsistentis, nec divinitas intelligitur illis communicari, ut forma, & natura, sed potius per modum subjecti, quod in se existit, & in se illas recipit; vel intelliguntur illæ relationes terminare naturam præcise ut existentem, & quasi per illam constituere, & si ita est, jam in illa natura non datur subsistentia absoluta, quia relatio divina intelligitur terminare totum id, quod est absolutum in Deo, & e contrario quidquid est absolutum, intelligitur includi in ipsa relatione, ut ibi terminatur. Et confirmatur, quia vel subsistentia absoluta includitur essentialiter in relativis, vel non: hoc posterius dici a nobis non potest: existimamus enim totam divinam essentiam includi essentialiter in relationibus, quantumvis præcise & abstracte concipiatur. Si autem dicatur prius, sequitur non posse esse tres subsistentias, quia tota ratio subsistendi in omnibus illis relationibus erit essentia in eis intime & essentialiter inclusa. Nec potest intelligi, quo modo ratio subsistentiæ, si est una in omnibus relationibus, & de essentia earum, nihilominus multiplicetur in singulis. Nam essentia ipsa est formaliter subsistentia: ergo facit subsistere omne id in quo formaliter includitur: sed includitur in relationibus intime usque ad ultimas rationes earum: ergo non est, in eis alia ratio subsistendi, quia non solum superfluum, sed etiam impossibile videtur, ad eundem quasi effectum formalem duplicem rationem in eadem re intime reperiri.

Hæc difficultas non procedit in eorum sententia, qui in divina essentia ponunt existentiam absolutam & essentialem, non tamen subsistentiam absolutam, & e converso negant existentias relativas, & ponunt subsistentias: illi enim consequenter dicunt, de ratione subsistentiæ non esse, ut det existere, sed solum ut det per se existere, non quoad totum in hoc prædicato inclusum, sed quoad perfectatam existendi. Atque ita fieri posse, ut divina essentia det relationi, ut existat, relatio autem det essentia, ut per se existat. Et ita tres relationes erunt tres subsistentiæ, quia sunt tres rationes per se essendi ipsæ divinæ essentiæ, seu tres perfectates existentia absolute, licet ipsæ non conferant novum existere, imo neque in existentia ipsa inter se distinguantur. Hæc tamen fundamenta a nobis rejecta sunt.

Suppositis ego, quæ diximus de subsistentia, & existentia essentiali divinæ naturæ, responderi potest primo, non repugnare illi naturæ infinitæ pluribus subsistentiis, vel re, vel ratione distinctis, immediate subsistere, ac suo modo terminari: sicut enim natura illa propter infinitam capacitatem suam potest simul terminari tribus subsistentiis realiter inter se distinctis, licet non ab ipsa natura, ita potest simul terminari subsistentia absoluta, & relativa, ratione tantum distinctis: terminari (inquam) quantum ad modum per se essendi ac subsistendi, licet non quantum ad omnimodam incommunicabilitatem per identitatem, quod provenit ex diversitate, quæ in Deo est inter absolutam, & relativam, quod illa communicabilia sunt propter identitatem, & quia non habent oppositionem: hæc vero sunt incommunicabilia propter oppositionem. Hæc vero responsio, licet probabilis sit, non mihi satisfacit, quia procedit, supponendo personalitates relativas advenire essentiæ divinæ, ut natura est præcise, & non ut est subsistens; & consequenter quod divina natura per relationes personales per se existit, licet non per illas solas, sed etiam ex se & per subsistentiam absolutam. Hoc autem mihi non probatur, tum quia existimo divinam essentiam ita esse per se & essentialiter subsistentem, seu per se ita esse, ut illi repugnet accipere perfectatam essendi per aliquid additum ratione distinctum ab illa, & extra essentialem rationem illius, ut sunt relationes omnes personales. Tum etiam, quia non potest natura divina terminari relationibus, nisi ut existens est: ipsa ergo existentia essentialis est, quæ formalissime videtur personalitate terminari: ergo necesse est, ut illa existentia terminetur prout in se est, & secundum ultimam rationem suam essentialem, secundum quam, ut ostendimus, est per se existentia: ergo necesse est, ut sic terminari, & quasi conjungi relationi non possit: imo non potest intelligi aliter fieri, cum hæc conjunctio non sit nisi per summam identitatem, & intimam inclusionem totius divini esse essentialis in relatione personali, quod est per se esse & subsistens ex vi suæ rationis essentialis, & propter hanc eandem rationem illi repugnat, ut per aliquid

quod est extra rationem suam essentialem habeat per se esse, seu perfectatam essendi.

Propter hanc ergo causam dicunt aliqui, relationem divinam terminare subsistentiam essentialem proxime ac formaliter, non tamen dando illi per se esse, sed solum dando illi incommunicabilitatem quandam: hoc enim est id, quod est ultimum in constitutione personæ. Sed, licet hoc ex parte verum sit, tamen vel incidit in priorem sententiam refutatam, vel non sufficienter rem declarat, nec solvit difficultatem tactam. Quia relatio, ut supra dicebam, non dat incommunicabilitatem tantum per modum alicujus privationis, sed dando aliquid esse positivum incommunicabile: interrogo ergo, an illud esse sit subsistens, necne. Dicit quidem non potest non esse subsistens: alioquin non erit ratio subsistendi, quia in Deo idem est, quo est & quod: quod si non est ratio subsistendi, non erunt in Deo tres subsistentiæ personales modo a nobis declarato. Si autem est subsistens, rursus interrogo, an ex proprio conceptu & per se hoc habeat, vel solum ex subsistentia absoluta in eo inclusa. Si hoc posterius dicatur, inciditur in priorem sententiam, & manifeste sequitur non esse in omnibus tribus personis, nisi unam rationem subsistendi omnino absolutam, a qua habent omnes relationes, ut subsistant. Si autem dicatur prius, necessario sequitur, illud esse relativum, & incommunicabile, sive vocetur esse existentia, sive esse personale, sive esse entitativum quasi essentialia aut formale; illud (inquam) esse non quomodocumque esse incommunicabile, sed ut per se existens in propria ratione vel perfectione: quia alias illud triplex esse relativum, intelligeretur tanquam adveniens eidem rei subsistenti, & ita neque intelligi posset, quomodo sit triplex ratio subsistendi, aut quomodo tres personas constituat: neque in præsentī mysterio intelligi posset, quomodo illud esse sit proxima ratio terminandi humanitatem, quia terminus humanitatis esse debet propria ratio per se essendi. Ergo tres subsistentiæ relativæ ita dant incommunicabilitatem, ut dent etiam per se esse seu perfectatam essendi. Confirmatur ac declaratur amplius, nam, quando hæc relationes dicuntur dare incommunicabilitatem, cui quæso dant illam? an essentiæ, ut essentia est, quatenus terminat illam, vel constituto per talem relationem? Non quidem essentiæ ut essentia est: nam, licet divina essentia intelligatur in Patre quasi terminata paternitate, adhuc ipsa manet communicabilis Filio, & sic de aliis personis. Igitur incommunicabilitas illa est respectu constituti: illud enim, quatenus tale est, est incommunicabile per identitatem secundum id, quod sibi proprium est: ideo enim sunt tres subsistentes, ut ostendimus: ergo personalitates divinæ secundum illud esse, in quo conferunt incommunicabilitatem, conferunt etiam per se esse, & cui unum præstant, tribuunt etiam aliud.

Dicendum est ergo, subsistentiam Dei relativam dare quidem esse incommunicabile & per se, non tamen ipsi naturæ divinæ, nec huic Deo ut sic, sed constituto per ipsam, scilicet divinæ personæ, & hoc modo dicuntur terminare divinam existentiam essentialem, non quidem dando illi ut per se sit, hoc enim ex se habet, sed determinando illam ad hanc vel illam personam, quasi adjungendo illi quoddam esse etiam per se & subsistens, quo talis persona formaliter constituitur, ita ut persona ipsa, secundum totum esse quod includit, intelligitur per se existens ac subsistens tam secundum esse absolutum Dei, quam secundum esse relativum Patris, aut Filii, aut Spiritus Sancti, & hoc est maxime consentaneum divinæ perfectioni, & nullam difficultatem aut repugnantiam involvit.

Ad difficultatem enim propositam dicendum est, eam proponi ac procedere, ac si constitutio personæ divinæ, & terminatio naturæ per relationem, esset eodem modo, quo in creaturis fit hujusmodi constitutio; cum tamen sit magna differentia, ex qua difficultatis solutio petenda est; natura enim creata sua personalitate ita terminatur, ut intime in illa non includatur, sed personalitas intelligatur veluti affixa ipsi naturæ, & ita ex utraque resultare suppositum; unde fit, ut talis natura ex vi propriæ existentia, quam habet, ut natura est, non habeat per se esse, sed ut cōjuncta, & terminata sua personalitate: cujus signum est, quia præcisa illa personalitate (ut potest non solum mente, sed etiam re ipsa præcindi) natura ipsa

Aliorum solutio.

Rejicitur.

Quorumdam responsio.

Refutatur.

Vera responsio.

Quid interstiti inter constitutionem divinæ personæ & suppositi creati.



ipsa manet veluti indifferens, & capax unionis ad suppositum distinctum. At vero divina natura ita terminatur sua personalitate, ut in illa intime includatur, quantumvis præcise & abstr. Æte ipsa personalitas consideretur; & ideo personalitas hæc non debet intelligi quasi affixa naturæ, sed quasi intime habens esse per ipsam naturam, ut recte D. Thom. 1. p. q. 28. art. 2. & sæpe alijs. Et propter hanc causam facile intelligi potest, etiam si natura divina ex vi sui esse absoluti in se, & per se sufficienter esse possit, nihilominus posse terminari tribus relationibus, seu personalitatibus. Quod enim illa ex vi sua per se sit, præcisè illis relationibus, ex contrario signo colligi potest, quam in natura creata, scilicet quia, etiam si præscindamus relationes, nunquam intelligimus illam naturam ut capacem unionis ad suppositum a se distinctum, seu alienum, sed cum ea unione formalem repugnantiam habere, non solum ratione relationum, sed ex vi perfectionis sui esse absoluti, quia hoc pertinet ad perfectionem illius esse, ut supra explicatum est: quod signum bene declarat, quid addat hæc per se existentia secundum rationem supra existentiam ut sic, etiam præcisa ratione incommunicabilitatis.

Unde etiam fit, eam naturam non communicari tribus relationibus propter indigentiam (ut ita dicam) vel imperfectionem, scilicet, quia illis egeat, ut per se sit, vel ut ab illis sustentetur, quomodo natura creata intelligitur indigere personalitate, vel alieno supposito, sed illis communicatur ex infinitate sua, ut illis det esse. Unde consequenter fit, ut in illis, aut per illas terminari dicatur, non quia ab illis sustentetur, neque quia ab illis, ut sic, primo, & per se accipiat modum per se essendi, sed quia ipsum esse essentiae ita includitur in singulis relationibus, ut cum unaquaque constituat rem quandam simplicissimam, & incommunicabilem, ac per se subsistentem, ut nec per identitatem possit jam amplius secundum eam rationem communicari.

Ad argumentum ergo in forma respondetur, distinguendo minorem, scilicet repugnare subsistentiae terminari; si enim intelligatur de termino, qui sit prima ratio per se essendi, vel qui se habeat proprie per modum sustentantis naturam, sic concedo hoc repugnare subsistentiae: nego tamen de ratione personalitatis esse terminare hoc modo, qui est proprius naturæ creatæ, natura enim increata altiori modo terminatur sua personalitate, ut explicatum est. Si autem sensus argumenti sit, etiam hoc modo repugnare subsistentiae terminari; respondeo in rebus creatis ita esse, quia repugnat subsistentiam, vel naturam creatam intime includi in rebus, vel suppositis distinctis, quod non repugnat subsistentiae absolutæ, & increatæ. Quamvis autem subsistentia sit ratio per se essendi ipsi constituto per ipsam ut sic, non tamen oportet, ut sit prima ratio per se essendi ipsi naturæ, quam terminat, præsertim secundum rationem: quia non terminat illam imperfecto modo, & quasi affixa illi, sed intime recipiendo esse ab illa: unde hæc terminatio potius intelligenda est per modum cuiusdam modificationis, seu determinationis, quæ per modum sustentationis naturæ terminatæ. Et propterea etiam hic modus communicationis non est per modum unionis ad aliud, nec per modum essendi in alio, qui repugnet modo essendi per se, sed est per modum intimæ inclusionis, & quasi penetrationis, ut ita dicam, cum summa identitate, ratione cuius quamvis subsistentia absoluta communicetur multis, non tamen est in alio, quia illa multa non sunt aliud ab ipsa.

Ad confirmationem eadem solutio applicanda est, quia est eadem difficultas; relationes enim divinæ intelliguntur addi essentiae, ut per se esistenti, & in hoc sensu ut subsistenti, & nihilominus intelliguntur addi tanquam rationes subsistendi, non ipsius naturæ primo & per se, sed constituti. Ad ultimam confirmationem respondetur, subsistentiam absolutam intime ac essentialiter includi in relativis secundum rem, & secundum omnem rationem formalem, quæ ut ratio realis in ipsa relatione concipitur: nam licet mens nostra possit præcise concipere rationem relativam paternitatis vel filiationis, non concipiendo expresse ac formaliter esse aliquod absolutum in eis inclusum, non potest tamen ita præscindere, quin in illa re concepta, seu in objectivo conceptu, qui respondet illi formali, implicite & secundum rem contineatur essentialiter totum esse absolutum Dei: neque et-

iam potest mens nostra aliqua abstractione negativa vera separare absolutum a relativo, de hoc illud negando, vel saltem negando includi in eo essentialiter in re ipsa, aut concipiendo esse relativum in aliquo, in quo concipiat non esse, esse absolutum, quod secus accidit in esse relativo respectu absoluti, nam potest ab eo præscindi, & aliquo modo etiam negative abstrahi, saltem ea ratione, quæ esse absolutum potest in aliquo esse, in quo non sit tale vel tale esse relativum, ut latius in materia de Trinitate tractatur. Quamvis autem subsistentia absoluta in relativis includatur, non repugnat multiplicari secundum rationes proprias, sicut non repugnat res vel entitates relativæ multiplicari, etiam si essentialiter sint una res, vel entitas absoluta: nam, ut dicebam, quoad hoc eadem est ratio subsistentiæ, quæ aliorum transcendentium, quia perfectas existentias, quæ complet rationem subsistentiæ, ut nunc de illa loquimur, intime includitur in tali esse, seu tali existentia. Unde, sicut esse vel existere ad rationes transcendentales spectat, ita etiam & per se esse. Denique licet subsistentia absoluta in relationibus personalibus includatur, non sequitur, quod eas reddat formaliter subsistentes secundum propria: sed tantum secundum quod esse divinum absolutum includunt. Nam, licet divina essentia in relationibus includatur, nihilominus relatio divina aliquod proprium habet, quo veluti determinat, aut modificat divinam naturam, non per modum compositionis, sed per intimam inclusionem cum summa identitate, ac simplicitate. Illud ergo proprium, quod relatio addit, ex se & ex propriis, est subsistens, & non proprie ac formaliter ex inclusione essentiae, sicut supra dicebamus de existentia; est enim eadem fere ratio. Unde eodem modo dicendum est, subsistentiam absolutam non includi in relatione, ut id, quo relatio subsistit, quatenus relatio est, sed ut id quo est subsistens ipsamet natura & essentia Dei, quæ in relatione includitur, eo quod ipsamet relatio essentialiter Deus est.

## SECTIO V.

*Utrum abstractis subsistentiis relativis intelligatur relinquere tantum hæc deitas, vel etiam hic Deus.*

Hoc dubium præcedentibus annexum est, fereque in illis explicatum, tamen propter nonnullas difficultates, & opiniones explicandas, ad ea, quæ de incarnationis mysterio dicenda sunt, necessarium duxi, seorsum proponere. Quod ergo tres personæ sint hic Deus, seu individuum deitatis, nullus Catholicorum negat, cum de fide certum sit tres personas esse unum Deum, non in specie seu similitudine naturæ, sed in individuo, & identitate naturæ hunc singularem Deum, juxta illud, *Non tres dii, sed unus est Deus*. Duobus autem modis intelligi potest tres personas esse hunc Deum, seu hunc Deum esse in tribus personis, & in singulis earum. Primo, quia hic Deus formaliter significat hanc individuum deitatem, ut subsistentem in uno, vel in pluribus suppositis: & hoc modo hic Deus ut sic non dicit hanc subsistentiam, sed solum hanc naturam, subsistentiam vero veluti connotat; unde ad suam unitatem non requirit unitatem, seu singularitatem ejusdem subsistentiæ; & hoc modo hic Deus est quid commune tribus personis, realiter quidem ratione naturæ formaliter significatæ, secundum rationem autem in personalitate, seu subsistentia connotata, quatenus omnes personæ divinæ conveniunt in ratione subsistendi in hac natura. Secundo modo possumus intelligere hunc Deum esse quid commune tribus personis, non solum ratione naturæ, & personalitatis confuse conceptæ, sed etiam ratione subsistentiæ communis.

Dico ergo primo, hic Deus ex vi sui conceptus, seu ad suam unitatem non requirebat subsistentiam communem, & absolutam. Hoc suppono ex 1. part. quæst. 36. & 39. ubi ostenditur, ad unitatem substantivi sufficere unitatem formæ, de quo etiam infra disputat. 13. dicemus, ostendendo tres personas fore hunc hominem, si eandem humanitatem assumerent, etiam si immediate illam per relativæ subsistentias terminarent, & non per absolutam; & idem constat in Patre, & Filio, quatenus sunt unum principium Spiritus Sancti, & hic spirator, non propter specialem subsistentiam, sed propter eandem virtutem spirandi, & eandem relationem.



Et hinc intelligitur, propter quid supra dixerim, rationes Cajetani sumptas ex unitate Dei, seu ex hoc quod tres personæ sunt hic Deus, esse inefficaces ad concludendam subsistentiam absolutam, quia in simili forma inveniuntur deficere in similibus exemplis adductis de hoc spiratore, vel hoc homine; & eodem defectu peccant omnes rationes, quæ sumuntur vel ex communibus, seu essentialibus operationibus, ut creare, justificare, &c. quæ primario dicuntur convenire huic Deo, vel ex ratione abstracti, & concreti, quia scilicet cuicumque individua naturæ in abstracto significata debet correspondere suum individuum concretum; hæc enim, & similia solum probant, vel operationes primario convenire personis ratione naturæ communis, vel unam formam constituere unum individuum, etiam si in pluribus suppositis subsistat.

Dico secundo. Nihilominus verum est, abstractis & præcis per intellectum subsistentiis relativis, adhuc intelligi manere hunc Deum realiter existentem, & subsistentem. Intelligo autem abstractis subsistentiis relativis, non tantum secundum distinctos conceptus earum, sed etiam secundum communem, & confusam rationem personalitatis: & hoc sensu sequitur conclusio ex dictis in præcedentibus, quia abstractis relationibus abstractione etiam, ut vocant, formali, seu præcisiva, adhuc intelligitur manere deitas, non tantum existens, sed etiam subsistens; ergo non tantum intelligitur manere hæc deitas, sed etiam hic Deus: quia Deus ut hic nihil aliud significat, quam subsistens in hac deitate, & hoc idem significat habens deitatem, quamvis alio modo, scilicet adjective, Deus autem substantive. Et hinc intelligitur sibi contradicere, qui vel admittendo subsistentiam absolutam negant hunc Deum posse hoc modo abstrahi a personis, vel e contrario negando subsistentiam communem, hunc modum abstractionis admittunt: quia sola existentia naturæ ut sic, si non includat per se existentiam, atque adeo subsistentiam, sufficit quidem ad constituendam naturam abstractam in ratione entitatis actualis, non vero ad constituendum concretum naturæ, ut patet in humanitate Christi, mente abstracta a Verbo.

Et ratio constat ex dictis, & ex ipsa vocum significatione, nam concretum significat id, quod est, seu quod habet naturam, in quo conceptu intrinsece includitur, ut per se sit: & ideo si non datur subsistentia, seu per se existentia absoluta, nullo modo potest concipi hic Deus, nisi relationes saltem confuse concipiuntur: at vero e contrario si abstractis personalitatibus adhuc intelligitur manere divinitas per se existens, & subsistens, negari non potest, quin maneat verus conceptus hujus Dei, quia non est de ratione illius subsistentia incommunicabilis, cum neque hæc individua subsistentia relativa sit de conceptu illius, ut dictum est, sed solum in hac divinitate subsistere. Et hanc sententiam sic expositam tenent Scotus, Cajetanus, & alii supra citati.

Contra eam vero solent multa obijci, quæ in re difficultia non sunt, sed oportet solum castum loquendi modum servare. Primum sit, quia sequitur dari in Deo unam personam, seu unum suppositum absolutum, quia suppositum nihil aliud est, quam substantia individua completa, & subsistens, & si addatur in natura rationali, persona fit. Secundum, quia D. Thom. infra art. 3. ad 1. dicit, quidquid est in Deo subsistens, esse personam; sed hic Deus, ut abstrahens a relationibus est subsistens; ergo persona. Tertium, quia si in Deo tantum esset una persona absoluta, abstracta personalitate a natura, intelligeretur divinitas ut sic, & non ut hic Deus; ergo idem nunc est dicendum; quinimo etiam nunc possumus abstracte concipere divinitatem, præscindendo subsistentiam absolutam; ergo ut sic concepta non erit hic Deus: sed eodem modo illam concipimus, quando abstrahimus relationes, quia non intelligimus magis perfectam, vel infinitam divinitatem uno modo, quam alio. Quartum, quia si maneret hic Deus abstractis proprietatibus personalibus; ergo posset intelligi operans per se prius, quam intelligeretur esse in personis, & consequenter etiam generans, vel hic Deus prius ratione creans, quam Pater generans. Quinto denique, quia in rebus creatis non reperitur subsistens in natura aliqua, nisi suppositum vel persona.

Ad primum, olim non defuerunt, qui sequelam admitterent, quorum errorem recte Henric. & Durand. supra

citati impugnarunt. Cajetanus vero quadam adhibita moderatione concedit hunc Deum ut sic esse suppositum, vel personam incompletam: sed cavendus est hic loquendi modus, ut pote alienus a modo loquendi Conciliorum, Patrum, & Theologorum, qui nullo modo admittunt tres personas esse unam personam, vel suppositum, quamvis admittant esse unam substantiam: negatur ergo sequela, quia ut supra ex Basil. Gregor. Nyssen. & Damasc. diximus, suppositum dicit non quodcumque subsistens, sed incommunicabile, quodque ita est sub alio positum, ut sub illo nihil ponatur, & hoc ipsum in naturali dicitur persona; & ita est intelligenda illa particula definitionis Boetii, qua persona dicitur, *Individua substantia*; quia ergo hic Deus abstracte conceptus ita subsistit, ut communicetur multis, qui illi suo modo subsunt; ideo non est suppositum, neque complete, ut per se constat, neque incomplete, cum desit illi ultimum, & quasi formale constitutum suppositi, sicut leo quamvis sit animal, non dicitur incomplete homo.

Ad secundum respondetur, ex illo loco D. Thom. posse hoc modo nostram sententiam confirmari, nam, ut ibi videbimus, ipse procedit ex hypothese impossibili, videlicet, si intelligeremus naturam divinam permanere in re existentem sine relationibus divinis, quid esset, vel quid posset; & inter alia respondet, primum naturam fore subsistentem, & rationem reddit, quia divinitas ex proprio conceptu, quibuscumque aliis præcis, est subsistens, & in hoc confirmat nostram sententiam. Quod vero subdit, consequens esse, ut sit persona, intelligitur posita hypothese, & abstractione relationum, non tantum in mente, sed etiam in re: sic enim subsistens jam esset incommunicabilis, & per consequens persona.

Ad tertium respondetur divinitatem dupliciter posse abstrahi nostro modo intelligendi a personalitate, seu subsistentia; uno modo omnino ex parte conceptionis nostræ, qua concretum concipimus per modum abstracti, quamvis revera nihil intelligamus includi ex parte rei conceptæ in ipso concreto, quod non includatur in abstracto, quo modo concipimus paternitatem, ut formam Patris, & deitatem ut formam Dei, in qua sic concepta essentialiter includitur subsistentia, sicut sapientia, vel alia attributa, quamvis in illo modo concipiendi, vel significandi non exprimatur: & tantum hoc modo posset abstrahi deitas a sua personalitate, si intelligeremus habere unam tantum personalitatem absolutam, quia tunc illa esset de conceptu essentiali ejus. Alio vero modo intelligimus abstrahi nunc essentiam divinam a proprietatibus relativis, non solum in modo concipiendi, sed aliquo modo ex parte rei, abstractione quodammodo negativa, non quia in re sit distinctio inter essentiam, & personalitates, nec quia possit separari ab illis, sed quia non includit illas in conceptu essentiali, unde potest concipi tota perfectio essentialis Dei, excludendo relationes: & hoc modo potest concipi non tantum in abstracto hæc deitas, sed etiam in concreto hic Deus, abstractis relationibus.

Ad quartum respondetur breviter, in hoc Deo, ut intelligitur prior ratione, quam persona, posse etiam præintelligi actus intelligendi, & amandi, ut essentielles sunt, ut recte probat argumentum: actus vero notionales, ut generandi, non possunt in illo præintelligi, quia connotant relationem, requirunt enim principium distinctionis inter generans, & genitum, quod intra Deum non est nisi relatio. Actus vero liberi, ut sunt creare, prædestinare, &c. etiam non possunt præintelligi personis secundum veram prioritatem, etiam rationis, quia constitutio personarum non habet dependentiam ullam, nec supponit ullo modo hos actus: alioquin vero, quia ipsæ personæ, & relationes, quibus constituuntur, & actus notionales, per quos una ab alia manat, sunt connaturales Deo, ideo secundum rationem supponuntur actibus liberis, juxta supra dicta quæst. 1. art. 3.

Ad quintum negatur consequentia, in rebus enim creatis omnis subsistentia est intrinsece limitata, & propterea est omnino incommunicabilis, & ideo in rebus creatis subsistentia, & personalitas, & ultimus terminus naturæ semper in idem incidunt; at vero in divina subsistentia fecus est propter infinitam ejus perfectionem, ut dictum est.



Utrum persone divine conveniat assumere naturam creatam.

q. d. 5. q. 2.  
art. 1.

**A**d primum sic proceditur. Videtur, quod persona divina non conveniat assumere naturam creatam. Persona enim divina significat aliquid maxime perfectum: Perfectum autem est, cui non potest fieri additio. Cum igitur assumere sit quasi ad se sumere, ita quod assumptum addatur assumenti: videtur, quod persone divine non conveniat assumere naturam creatam.

q. p. q. 29.  
art. 1.

2. Preterea. Illud, ad quod aliquid assumitur, communicatur quodammodo ei, quod in ipsum assumitur: sicut dignitas communicatur ei, qui in dignitatem assumitur. Sed de ratione persone est, quod sit incommunicabilis: ut in prima parte dictum est\*. Ergo persone divine non convenit assumere, quod est ad se sumere.

In lib. de  
fi. ad Pet.  
c. 1. a m.  
tom. 3.

3. Preterea, persona constituitur per naturam. Sed inconveniens est, quod constitutum assumat constituens: quia effectus non agit in suam causam. Ergo persona non convenit assumere naturam.

Sed contra est, quod Augustinus dicit de fide ad Petrum\*. Formam, id est, naturam servi, in suam accepit Deus, ille scilicet Unigenitus, personam. Sed Deus unigenitus est persona. Ergo persone competit accipere naturam, quod est assumere.

q. p. q. d.  
art. 1. & 2.

b. Respondeo dicendum, quod in verbo assumptionis duo importantur, videlicet principium actus & terminus: dicitur enim assumere quasi ad se sumere. Huius autem assumptionis persona est, & principium, & terminus. Principium quidem, quia persone proprie competit agere: huiusmodi autem sumptio carnis per actionem divinam facta est. Similiter etiam persona est huius assumptionis terminus: quia sicut supra dictum est\*, unio facta est in persona, non in natura. Et sic patet, quod propriissime competit persone assumere naturam.

In epist. 1.  
syn. Eph.  
ad Nest.  
circamed.  
illius.

c. Ad primum ergo dicendum, quod cum persona divina sit infinita, non potest ei fieri additio. Unde Cyrillus dicit in epist. synodali Eph. concil. Non secundum appositionem conjunctionis intelligimus modum. Sicut etiam in unione hominis ad Deum, que est per gratiam adoptionis, non additur aliquid Deo, sed illud, quod divinum est, apponitur homini. Unde non Deus, sed homo perficitur.

d. Ad secundum dicendum, quod persona dicitur incommunicabilis, in quantum non potest de pluribus suppositis predicari: nihil tamen prohibet plura de persona predicari. Unde non est contra rationem persone sic communicari, ut subsistat in pluribus naturis: quia etiam in personam creatam possunt plures nature concurrere accidentaliter: sicut in persona unius hominis invenitur quantitas, & qualitas. Hoc autem est proprium divine persone, propter eius infinitatem, ut fiat in ea concursus naturarum: non quidem accidentaliter, sed secundum subsistentiam.

q. 2. art. 3.

c. Ad tertium dicendum, quod sicut supra dictum est\*, natura humana non constituit personam divinam simpliciter, sed constituit eam secundum quod denominatur a tali natura. Non enim ex natura humana habet Filius Dei, quod sit simpliciter, cum fuerit ab eterno: sed solum quod sit homo. Sed secundum naturam divinam constituitur persona divina simpliciter. Unde persona divina non dicitur assumere divinam naturam, sed humanam.

#### COMMENTARIUS.

**S**ensus questionis est, non tantum, an possit assumere, sed utrum assumpserit, & non queritur de sola persona Filii, sed indefinite de persona, quia reliqua in sequentibus articulis tractanda sunt.

Respon.

b. Assertio D. Thom. est, persone divine propriissime hoc convenire. In qua ponderat Cajetan. additam esse illam particulam, propriissime, quia alio modo minus proprio, etiam natura potest assumere, ut articulo sequenti D. Thom. ipse exposuit. Ratio autem D. Thom. est facilis, quia persona est principium, & proprius terminus Incarnationis; sed Verbum, assumere, hanc duplicem habitudinem proprie significat; ergo.

1. Argum.

c. Primum argumentum D. Thom. est: divine persone nihil potest addi, quia est infinita, ac summe perfecta; sed quod assumitur, additur assumenti; ergo non potest hoc convenire divine persone. Quod argumentum D. Thom. in responsione non solvit, sed potius confirmat

Suarez Tom. XVI.

probando illud principium, divine persone non posse additionem fieri, tum auctoritate Cyril. tum exemplo filiationis adoptivæ, quam Deus homini communicat, illum sibi per gratiam uniendo, per quam tamen unionem nihil addatur Deo, sed ipsi homini: quo exemplo videtur indicare D. Tho. idem esse dicendum in presenti mysterio.

Testimonium Cyril. sumptum videtur ex epistola Concilii Alexandrini, cui ipse Cyrillus præfuit ad Nestorium, quæ habetur 3. tom. Concil. in Concil. Ephes. & in alio Concil. Ephes. tom. 1. cap. 14. ubi sic dicitur: Nec rursus appositione, vel quadam quoque contiguatione, aut conglutinatione eam unitatem metimur: quibus verbis solum videtur doceri hanc unionem non fuisse accidentalem; an vero dici possit per hanc unionem aliquid additum esse Verbo, non ut accidentali modo, sed substantiali illi conjunctum sit, hoc non videtur illo loco negari. Deinde exemplum de filiatione adoptiva non videtur simile, quia cum Deus unit sibi hominem per gratiam, non fit Deus homo, sed homo efficitur Deus participatione; & ideo nil mirum est, quod in ea unione hominis ad Deum nihil Deo addatur, sed homini: at vero in hoc mysterio Deus vere fit homo, & natura humana vere efficitur natura cuiusdam persone divine; ergo necesse est, ut illi addatur. Denique argumentum factum fundatum in vi verbi assumendi solutum non est, quia sumere est aliquid ad se sumere; ergo est aliquid sibi adjungere, vel addere.

Dicendum est, quoniam res ipsa satis per se constat, D. Thom. solum docere voluisse debitum loquendi modum. Primum enim constat aliquid vere, & realiter esse unitum verbo, quod ante non erat, & si hoc solum significet Verbum addendi, negandum non est aliquid additum esse Verbo: nihilominus tamen certum est, simpliciter & absolute nihil perfectionis esse additum Verbo: tum quia ipsum per se eminenter continebat, quidquid est perfectionis in humanitate: tum etiam, quia humanitas non se habuit in hoc mysterio, ut forma perficiens Verbum, sed potius (si aliquid habuit modum formæ) Verbum ipsum fuit quasi forma humanitatis: quamquam nec vere forma fuerit, sed solum terminus, aut actus perfectissimus. Unde tandem fit, quod ad modum loquendi spectat, potius dicendum esse aliquid esse additum humanitati, quam Verbo, quia Verbum immutatum mansit, humanitas vero est, quæ perficitur, & a Verbo pendet, & in hoc solum simile est exemplum, quod D. Thom. adducit.

d. Secundum argumentum D. Thom. est: Persona est incommunicabilis: ergo non potest aliquam naturam ad se sumere, quia non potest illam ad se sumere, nisi se illi communicando. Responsio consistit in distinctione antecedentis, est enim persona incommunicabilis aliis personis, non aliis naturis. Circa quam movet Cajetan. duo dubia. Alterum est circa distinctionem datam, sed non videtur necessarium, quia res est satis clara, advertendo, de ratione omnis rei individue esse, ut sit aliquo modo incommunicabilis, non tamen simpliciter, & omni ratione, sed accommodate: unde de ratione individue nature est, ut sit incommunicabilis pluribus naturis, quia in hoc consistit ejus singularitas, seu determinatio, & ideo contradictionem implicat individuum naturam, etiam divinam, hoc modo communicari; potest tamen esse communis multis suppositis, quia hoc non pugnat cum singulari, & individua ratione ejus, sicut repugnat formæ substantiali communicari alteri formæ, non vero materiæ. At vero e contrario de ratione suppositi est, ut non possit communicari alteri supposito, quia hoc pugnat cum singulari modo ipsius suppositi, quia dicit quiddam ultimo terminatum, sub quo non est aliud; huic autem modo non repugnat, ut suppositum communicetur multis naturis, quia licet ultimus terminus non possit ultra terminari, possunt tamen multa eodem termino ultimo terminari, ut in lineis, & puncto videre est. Alterum dubium Cajetan. est, an communicari multis naturis possit convenire supposito creato, quandoquidem non pugnat cum ratione suppositi ut sic. Sed hoc tractabitur infra disput. 13. sect. ultima.

e. Tertium argumentum est: Persona constituitur per naturam; ergo non assumit illam, quia effectus non agit in causam suam; nullus enim potest agere in eam formam, per quam constituitur, ut illam veluti trahat ad se



constituendum. Responsio consistit in distinctione antecedentis, persona enim Verbi simpliciter non constituitur per humanitatem assumptam, sed per propriam divinam naturam, per humanitatem vero constituitur homo: & hoc est, quod D. Thom. ait, solum constitui secundum quod denominatur a tali natura, hæc enim denominatio non est accidentaliter, vel extrinsece, sed substantialis & intrinsece, quamvis non sit Verbo secundum se cōnaturalis. Quia ergo persona supponitur constituta simpliciter, ideo operari potest, ut se constituat hominem humanam naturam assumendo. Dicitur autem, natura constituere personam constitutione (ut ita dicam) essentiali, non personali, est enim natura veluti integra forma constituens individuum in propria specie, & hoc modo Christus humanitate constituitur in specie humana, divinitate vero est essentialiter Deus: in ratione autem personæ, formaliter ac proprie relatione sua, ac substantia incommunicabili constituitur.

## ARTICULUS II.

*Utrum divine nature conveniat assumere.*

**A**d secundum sic proceditur. Videtur, quod nature divine non conveniat assumere: quia, sicut dictum est \*, assumere dicitur quasi ad se aliquid sumere. Sed natura divina non sumpsit ad se humanam naturam, quia non est facta unio in natura, sed in persona: sicut supra dictum est \*. Ergo natura divina non competit assumere naturam humanam.

2. Præterea, Natura divina communis est tribus personis. Si ergo nature convenit assumere, sequitur, quod conveniat tribus personis. Et ita Pater assumpsit naturam humanam, sicut & Filius: quod est erroneum.

3. Præterea, Assumere est agere, Agere autem convenit personæ, non nature, quæ magis significatur ut principium, quo agens agit. Ergo assumere non convenit nature.

Sed contra est, quod August. dicit in lib. de Fide ad Pet. \* Illa natura, quæ semper genita manet ex Patre, id est, quæ est per generationem æternam, accepta a Patre, naturam nostram a matre sine peccato suscepit.

b. Respondeo dicendum, quod sicut dictum est \*, in Verbo assumptionis duo significantur, scilicet principium actionis, & terminus ejus. Esse autem assumptionis principium, convenit nature divine secundum seipsum, quia ejus virtute assumptio facta est. Sed esse terminum assumptionis non convenit divine nature secundum seipsam, sed ratione personæ, in qua consideratur. Et ideo primo quidem, & propriissime persona dicitur assumere: secundario autem potest dici, quod etiam natura assumpsit naturam ad sui personam. Et secundum etiam hunc modum dicitur natura incarnata: non quasi sit in carnem conversa, sed quia naturam carnis assumpsit: Unde Damascenus dicit \*: Dicimus naturam Dei incarnatam esse, secundum beatos Athanasium † & Cyrillum. \*

Ad primum ergo dicendum, quod ly se, est reciprocum, & refert idem suppositum. Natura autem divina non differt supposito a persona Verbi: & ideo in quantum natura divina sumit naturam humanam ad personam Verbi, dicitur eam ad se sumere. Sed quamvis Pater sumat naturam humanam ad personam Verbi, non tamen propter hoc sumit eam ad se: quia non est idem suppositum Patris & Verbi, & ideo non potest dici proprie, quod Pater assumat naturam humanam.

Ad secundum dicendum, quod illud, quod convenit nature divine secundum se, convenit tribus personis: sicut bonitas, sapientia, & hujusmodi. Sed assumere convenit ei ratione personæ Verbi, sicut dictum est \*. Et ideo soli illi persone convenit.

c. Ad tertium dicendum, quod sicut in Deo idem est, quod est, & quo est: ita etiam in eo idem est, quod agit, & quo agit: quia unumquodque agit, in quantum est ens: Unde natura divina est illud, quo Deus agit, & est ipse Deus agens.

## COMMENTARIUS.

Sensus quæstionis est de Incarnatione jam facta, sicut artic. præced. diximus; an ratione illius, prout facta est, possit vere dici divina natura humanam assumpsisse: & quamvis Cajetan. intelligat quæstionem moveri de di-

vina natura, tam significata nomine abstracto Deitatis, quam significata nomine hujus Dei; existimo tamen D. Thom. præcipue intendere quæstionem priori sensu tradere, nam de hoc Deo, ut abstrahit a personis modo supra explicato, nihil D. Thom. differuit, ut vero supponere potest pro personis, nulla restabat difficultas, cum constet, quidquid convenit personæ convenire huic Deo supponenti pro personis: quia vero divinitas hoc modo significata, ex modo significandi non videtur supponere pro persona, ideo de illa sub hac ratione est specialis difficultas, quam D. Thom. explicare intendit.

b. Responsio est, nature divine convenire assumere, non primario, sed secundario: ad quam confirmandam affert D. Thom. in argumento sed contra, testimonium August. seu potius Fulgen. lib. de fide ad Pet. c. 2. ubi sic ait. *Natura, quæ semper genita ex Patre, naturam nostram a matre sine peccato suscepit*; cujus locutionis prior pars est improprie, & in rigore falsa, quia divinitas non est genita: & ideo D. Thom. illam pie explicat hoc modo, natura per generationem accepta, quæ expositio vera est: sed illa, vel alia simili admissa, sit inefficax hoc testimonium ad posteriorem partem confirmandam, nam pari ratione exponi poterit in sensu improprio: dici enim potest ibi naturam genitam sumptam esse improprie pro persona, ut littera etiam contextus indicare videtur.

Omissa ergo auctoritate, ratio, qua D. Thom. confirmat conclusionem, est evidens. Quia ex duabus habitudinibus, quas verbum assumendi includit, altera, quæ est habitudo principii, convenit primo & per se nature, quia illius est virtus agendi; altera vero, scilicet habitudo termini, quamvis per se primo non conveniat nature, quia non est natura immediate alteri nature copulata, convenit tamen ratione personæ, in qua sibi naturam conjunxit. Hinc ergo concludit D. Thom. non solum posse dici naturam divinam humanam assumpsisse, sed etiam fuisse incarnatam, id est carni conjunctam, quamvis non in illam conversam.

Et hanc locutionem fuisse ab antiquis Patribus usitatam constat ex iis, quæ supra adduximus disput. 7. sect. 2. in fine, quibus addi possunt Fulgen. q. 2. ad Ferrandum, & Pet. Diacon. lib. de Incarnat. cap. 2. & Augustin. 1. de Trinit. cap. 7. & 11. ubi dicit formam Dei assumpsisse formam servi, & in Enchir. cap. 34. dicit corpus fuisse a divinitate susceptum, & epist. 57. dicit divinitatem fuisse participem factam nostræ mortalitatis: & eodem sensu Nazian. orat. 1. dicit divinitatem fuisse exinanitam, & orat. 51. corpus esse cum divinitate, a qua susceptum est: & fere eodem modo loquitur Leo Pap. epistol. 10. & alia sumi possunt ex Niceta lib. 3. Theop. cap. 34. & 35.

Solum est observandum D. Damasc. lib. 3. Fid. cap. 11. non videri admittere illam locutionem simpliciter, sed cum addito aliquo quasi restringente, vel definiente illam ad personam Verbi, negat enim divinitatem esse incarnatam, quamvis concedat naturam Verbi esse incarnatam, quia cum divinitas ex modo significandi non supponat pro persona, si absolute incarnata dicatur, significatur ipsam primario, & adæquate, atque adeo in omnibus personis fuisse incarnatam, quod falsum est: addendo vero naturam Verbi, seu divinitatem in Verbo fuisse incarnatam, jam significatur non secundum se, sed in una persona fuisse carni unitam. Propter quod Nicet. lib. 3. Theop. cap. 11. absolute dicit: *Errone non caret si naturam divinam incarnatam esse dicamus, vel si carnem a natura divina assumptam fuisse dixerimus*. Gab. vero in 3. d. 5. concl. 4. & 5. admittit, naturam divinam esse incarnatam, & univisse sibi naturam humanam, non tamen eam assumpsisse. Sed cum res constet, & modus loquendi D. Thom. sit communis sanctorum, non est, quod in illo timeamus: & Damasceni quidem admonitio non displicet, tamen ubi jam non est erroris periculum, non est adeo necessaria, præsertim quia in rigore sermonis, sicut divinitas simpliciter dici potest unita carni, ita dici potest incarnata, nam idem est sensus. Notetur tamen obiter ex D. Thom. discursu, incarnatam esse, vel assumpsisse humanitatem, non eodem modo dici de Verbo, & de divinitate: de Verbo enim dicitur, ut de proprio termino, ad quæ unio facta est, de divinitate vero solum quia eidem termino unionis, seu Verbo conjuncta est. Sed de hac locutione, & de aliis, quæ ex illa sequuntur, dicemus latius infrag. 16. art. 5. rem vero ipsam magis disp. seq. explicabimus.

Solu-



Solutiones ad primum & secundum satis ex dictis sunt expositæ. Solutio etiam ad tertium clara est: quia vero in illa dicit D. Th. naturam divinam esse, & qua Deus agit, & Deum ipsum agentem; inde colligit Cajet. D. Th. non solum hic quæstionem tractare de deitate, sed etiam de hoc Deo; colligit deinde hunc Deum, prout abstrahit a personis, esse primum principium assumptionis, licet non sit primarius terminus. Sed neutrum colligitur ex D. Th. quia potius supponit ipsi Deo convenire efficere, ut inde concludat propter summam simplicitatem etiam posse tribui deitati, quia in Deo idem est, quod est, quod est: quod est verum de essentia, & persona, etiam si non admitteretur hic Deus abstractus a personis, ut Cajet. opinatur: & ideo nihil quod ad illam quæstionem pertineat ex hac solutione sumi potest, quidquid de re ipsa sit,

## DISPUTATIO XII.

In duas sectiones distributa.

*De persona assumente, & humanitati unita per Incarnationem, prout facta est.*

Tota hujus quæstionis materia in duas partes supra divisa est, & ita duabus disputationibus illis partibus respondentibus eam comprehendemus: quarum altera pertinebit ad Incarnationem jam factam; altera ad possibilem. In præsentis disputatione de priori parte agendum est, in qua duo tantum occurrunt consideranda. Primum est quasi materiale, scilicet quæ persona divina fuerit incarnata: alterum est quasi formale, scilicet quæ fuerit ratio terminandi naturam assumptam.

## SECTIO I.

*Utrum sola persona Filii fuerit incarnata, & humanitatem assumpserit.*

Quod persona Filii incarnata fuerit nullus hæreticorum unquam negavit, ut satis in superioribus ostensum est, cum Christi divinitatem, & humanitatem probaremus. Quod vero non tantum Filius, sed etiam Pater, & Spiritus Sanctus, incarnati fuerint, affirmarunt in primis Sabelliani, cum enim personarum distinctionem negarent, consequens illis fuit, ut Filium sine Patre incarnari posse negarent, quia non re, sed nomine tantum illos distinguebant, ut ex August. sumitur lib. de hæres. in 36. & 41. Petrus etiam Gnaphæus fertur in hunc incidisse errorem, de quo satis in disp. 7. sect. 2. & 3. diximus. Refert item Socrates lib. 2. histor. cap. 19. fuisse coactum Concilium quoddam contra hæreticos dictos Patripassianos, qui totam Trinitatem incarnatam fuisse dicebant. Denique tempore D. Anselm. hic error excitatus est, & in Concilio quodam Rhemenfi damnatus, ut ipse refert lib. de Incarnat. Verbi, quem contra illum errorem scripsit.

Dico tamen primo. Ex divinis personis sola persona Filii incarnata est, & humanitatem assumpsit. Est de fide definita in quinta Synodo, collat. 8. can. 4. & 10. & Conc. Lateran. sub Mart. 1. consult. 5. can. 4. & 10. & Concil. Lateranens. sub Innocen. III. & habetur in cap. Firmiter. de summa Trinit. & Fide Cathol. & in Concil. Tolentan. VI. & XI. in confessione Fidei, & Carthag. V. cap. 1. & Wormatiens. in professione Fidei. Et sumitur ex omnibus Scripturæ locis, in quibus Filius Dei specialiter dicitur incarnatus, quod numquam de Patre, vel Spiritu sancto asseritur: eodem modo dicitur Patrem dedisse nobis Filium, & tradidisse in mortem, & alia similia. Item ex illis, quibus dicitur, Filius minor Patre ratione assumptæ naturæ, hoc enim verum non esset, si Pater etiam esset homo. Præterea, quia Scriptura sacra ita distinguit Christum a Patre & ab Spiritu sancto, sicut Filium, seu Verbum; ergo sentit Christum, ut subsistentem in humanitate, & divinitate (hoc enim nomen Christi significat) personaliter distingui a Patre, & ab Spiritu sancto: denique arguit Felix I. epist. 1. decretali, quia Filius specialiter dicitur visibilis, seu visus in terris propter mysterium Incarnationis.

Traditionem sanctorum Patrum referre non oportet, quia est notissima, statim vero tam in hac, quam in sect.

sequ. varia illorum testimonia necessario indicabimus. Ratione non potest simpliciter demonstrari hæc veritas, cum ex divina pendeat voluntate, traduntur tamen a Patribus variæ rationes congruentes, propter quas conveniens fuit Filii personam, potius quam alias incarnari. Prima ut idiomatica essent, quantum fieri posset, similia, id est, ut qui ab æterno erat Filius Dei, in tempore fieret filius hominis, & nomen Filii Patri, vel Spiritui sancto nullo modo communicaretur. Ita Damasc. lib. 4. c. 4. Anselm. dicto lib. de Incarnat. Verbi c. 4. & lib. 2. Cur Deus homo c. 9. Secunda, quia Verbum est exemplar, & sapientia, per quam facta sunt omnia, & ideo decuit, ut per eandem sapientiam incarnatam omnia instaurarentur, & ad excellentiorem quandam dignitatem proveherentur, juxta illud Paul. ad Ephes. 1. *Instaurare omnia &c.* Ita Damasc. supra, & indicat August. tract. 17. in Joan. circa illa verba. *Pater meus usque modo operatur & ego operor.* Tertia ut naturalis Filius filios adoptivos honoraret, & sibi faceret similes. Quarta, pertinuit enim ad Filium, Patris injuriam vindicare, & filios adoptivos reparare. Quinta quia homines perierant appetendo scientiam, & similitudinem Dei, conveniens fuit, ut per ipsum Verbum, quod est sapientia, & imago Patris, a quo quodammodo fuerat sumpta occasio humanæ ruinæ, redimerentur: ut late Bernard. ferm. in Dom. 1. Adv. Sexta, quoniam demon primatum appetierat, qui Filio debetur, decuit, ut per ipsum Filium expugnaretur, August. lib. Quæst. veteris, & novi testam. q. 113. Septima, quia persona incarnata oratura erat ad Patrem pro hominibus, optime hoc munus accommodatum est personæ Filii. Ita Ansel. supra. Octava, Filius est quasi persona media inter Patrem, & Spiritum sanctum, procedit enim a Patre, & producit cum illo Spiritum sanctum, ideo decuit, ut etiam esset mediator inter Deum & homines. Aliæ rationes similes facile sumi possunt ex Athanas. libris de Incarn. Verbi, & de corporali ejus advent. August. de Eccl. dogmat. c. 2. Fulgent. de fide ad Petrum. c. 2. Bernard. ferm. 1. de Nativit. & super Missus est. Leone P. ferm. 4. de Nativit. Rich. de S. Vict. lib. de Incarn. Verbi c. 9. & sequen. & D. Thom. infra hac q. art. 8. & 4. contra gent. cap. 42. & Alex. Alen. 3. p. q. 2. memb. 5. & aliis Theologis in 3. d. 1. & 5.

Sed objicitur, quia impossibile est unam personam operari Incarnationem sine alia; ergo & incarnari sine alia: probatur consequentia, quia non est major ratio in uno, quam in alio; nam per Incarnationem, duplicem dependentiam intelligitur habere humanitas a persona; altera est a causa efficiente, & conservante unionem; altera est, ut a termino, seu a supposito unionem terminante: sed quamvis personæ distinguantur realiter, nihilominus prima dependentia, seu relatio non potest esse ad unam personam sine alia; ergo nec secunda. Confirmatur, quia non potest una persona objective terminare visionem claram sui sine alia; ergo nec potest terminare humanitatem. Ad argumentum solutio pendet ex dicendis sect. sequent. ideo breviter negatur sequela; & ratio est, quia ratio efficiendi Incarnationem est una, & eadem in omnibus personis, quæ nihil efficiunt ut distinctæ, sed ut unum, & ideo nihil potest una efficere, quod non faciat alia: ratio vero terminandi est relatio, quæ realiter distinguitur ab aliis, & ita una persona terminat, ut distincta ab aliis, & ideo potest terminare sine illis.

Et declaratur, nam unaquaque relatio divina terminat ipsam essentiam divinam terminatione distincta ab aliis relationibus, & ideo per se constituit distinctam personam divinam ab aliis: ergo quælibet etiam per se potest terminare naturam humanam terminatione distincta ab aliis: ergo & sola potest terminare sine aliis. Probatur ultima consequentia: reliqua enim omnia clara sunt, quia respectu humanitatis non habent relationes divinæ eam connexionem, quam habent respectu divinitatis: hæc enim connexio duplex est. Prima ex parte ipsius divinitatis, quæ natura sua, & ob suam infinitatem, postulat terminari a tribus, & non potest esse in statu præternaturali, & ideo non potest terminari ab una persona, quin simul terminetur ab aliis; humanitas vero nec petit terminari a pluribus personalitatibus absolute loquendo, nec illi est connaturale, ut divina relatione terminetur, sed supernaturale; & ideo ex hac parte omnino est liberum Deo, quod una vel alia relatione humanitas



terminetur. Secunda connexio est ex parte ipsarum relationum: habet enim inter se necessariam habitudinem originis vel respectus; & ideo non potest esse una sine aliis; & ideo non potest una terminare divinam essentiam, quin simul aliæ terminent, quia non possunt esse extra divinam essentiam: at vero respectu humanitatis non ita se habent, quia non sunt idem illi, sicut divinæ essentiae, nec necessario sunt unitæ illi; & ideo nulla est necessaria connexio inter illas quo ad hanc unionem; nec vero una potest indigere alia ob insufficientiam, ut per se constat: esset enim hæc magna imperfectio: ergo.

Sed urget Gabr. in 3. d. 1. q. 1. art. 3. dub. 2. inquirendo, cur relatio ut sic non possit esse ratio efficiendi, sicut terminandi: quia etiam ut relatio habet propriam perfectionem, quæ est major, quam omnis perfectio creaturæ; ergo per illam ut sic erit sufficiens principium agendi, sicut terminandi. Respondet primo ex aliorum opinione, relationem, ut relationem nullam dicere perfectionem, & ideo non posse esse rationem, quæ: quam solutionem ipse merito improbat: tum, quia relatio divina re vera dicit propriam perfectionem relativam infinitam in suo genere: tum etiam, quia si illa ratio esset vera, nec posset esse ratio terminandi, quia ad hoc requiritur magna perfectio substantiæ, ut ex supra dictis patet. Ideo ipse respondet, nullam a nobis posse reddi rationem, ob quam possit relatio divina esse ratio terminandi unionem, & non efficiendi, sed hoc sola fide teneri.

Non est tamen adeo difficile, hujus rei rationem reddere; in omni enim re principium agendi, & operandi est ipsa natura, & in re intellectuali, qualis est Deus, omnis operatio procedit aliquo modo ab intellectu, & voluntate: quia ergo in tribus personis una est natura, idemque intellectus, & voluntas, ideo una est illius omnipotentia; cum ergo Incarnatio sit maximum omnipotentia opus, non potest relatio ex præcisa ratione relationis esse principium ejus, sed ex omnipotentia, quæ illi convenit ratione essentia: & eadem ratione omnis alia effectio est communis omnibus personis, sicut voluntas & intellectus. Quo circa quamvis relatio, ut relatio, dicat aliquam perfectionem, tamen quia illa non pertinet ad perfectionem naturæ, ideo non habet ex propriis, ut sit principium, seu ratio agendi, sed ut constituat suppositum, a quo actio procedit: habet tamen ex propriis, ut possit esse ratio terminandi, quia ex se est incommunicabilis substantia, ut supra dictum est.

Ad confirmationem primo responderi potest, visionem Dei per se primo terminari ad essentiam, & ideo non posse non consequenter terminari ad omnes personas. Sed hoc non omnino satisfacit, cur enim persona divina per suam relationem non poterit per se primo terminare visionem sui ipsius, cum ipsa relatio ut sic, & ex propriis, immaterialis sit, atque adeo actu intelligibilis, & visibilis? Quod si dicatur, posse quidem per se primo videri, tamen quia essentialiter includit essentiam, ideo visa una persona necessario essentiam videri, & consequenter alias personas; contra hoc replicabitur argumentum, cur non idem sit in unionem hypostaticam? Respondetur ergo, ea, quæ inter se habent mutuam habitudinem, majorem connexionem inter se habere in ordine ad claram, seu quidditativam cognitionem, quam in ordine ad realem unionem, seu physicam. Exemplis hoc patet in rebus creatis; relatio enim accidentaliter paternitatis non potest cognosci sine filiatione, & tamen potest realiter uniri alicui subiecto, cui non unitur filiatio: & similiter scientia non potest cognosci sine objecto scibili, & tamen in reali conjunctione vel unionem potest ab illo separari: quia ergo hæc unio hypostatica est realis, & physica, ut supra explicatum est, & relationes divinæ inter se realiter distinguuntur, potuit hoc genere unionis relatio Filii uniri humanitati, non unitis aliis relationibus: objici autem visioni non potest sine alia relatione, quia cum illam respicit ut terminum, nostro modo loquendi ex hac habitudine speciem sumit, & non potest res clare videri, & quidditative cognosci sine his, cum quibus habet intrinsecam connexionem in sua specificatione. Quod ita potest amplius explicari, nam cum relatio realiter unitur, solum conjungitur secundum quod in se est, atque adeo ad modum absoluti (sicut dici solet in materia de constitutione divinarum personarum); at vero cum relatio videtur, cognoscitur secundum quod exer-

cet habitudinem ad suum terminum, & ideo videri non potest sine illo.

Dico secundo. Per Incarnationem, prout facta est, divina natura fuit vere, & realiter unita naturæ humanæ in persona Verbi. Hæc est æque certa, ac præcedens, & sumitur ex eisdem testimoniis Scripturarum, & conciliorum. Et sunt optima verba illa Pauli ad Colof. 2. *In quo habitat plenitudo divinitatis corporaliter*, quæ supra q. 2. art. 10. ad 2. in hoc sensu explicata sunt: & illa 2. ad Corint. 5. *Erat Deus in Christo mundum reconcilians sibi*. Omnia etiam, quæ supra diximus de compositione Christi ex duabus naturis, hanc veritatem confirmant: docent enim Concilia, & patres ibi citati hanc compositionem consistere in substantiali unionem duarum naturarum in una substantia. Denique hoc ipsum confirmant, quæ circa litteram art. 2. hujus q. & supra disp. 7. sect. 2. adduximus de illa propositione; divinitas est incarnata.

Ratione declaratur, quia natura divina intime, & essentialiter includitur in proprietate personalis Filii Dei, cum perfecta simplicitate & unitate, quam cum illa habet; ergo non potuit illa proprietas uniri naturæ humanæ, quin ipsa etiam divinitas illi maneret conjuncta. Et confirmatur, quia conjunctio duarum naturarum in uno supposito substantialis est, natura autem humana unitur divinæ in eodem supposito; ergo. Sed in hoc est advertenda differentia inter divinam naturam, & quamcumque aliam; nam si Verbum assumeret naturam angelicam, & humanam, illæ essent quidem substantialiter conjunctæ in eodem supposito, non tamen ita proxime & intime, sicut nunc divinitas & humanitas copulantur: utraque enim illarum naturarum esset distincta a Verbo; natura autem divina, quia est idem cum persona Verbi, & in illa intime includitur, intime ac proxime unitur humanæ naturæ per proprietatem Verbi personalem. Sumitur ex D. Th. infra art. 7. ad 3.

Dices. Ergo pari ratione persona Patris, & Spiritus sancti erunt unitæ substantialiter, & realiter humanæ naturæ Christi, ratione divinitatis, a qua in re non distinguuntur. Respondetur negando sequelam, certum enim de fide est, personas Patris & Spiritus sancti nullo modo fuisse incarnatas, nec per se, nec per aliud, re aut ratione distinctum, cum tamen divinitas in aliquo sensu vere dicatur incarnata, ut supra circa litteram explicatum est. Ratio vero hujus explicabitur melius sectione sequenti: nunc solum dicitur, ea, quæ conveniunt naturæ ratione unius personæ, aliis personis non necessario communicari, hujusmodi autem esse unionem hanc. Et hæc sufficiunt de re ipsa, nam de modo loquendi satis dictum est circa litteram D. Thom. & plura dicemus quæst. 16.

Sed occurrit hic gravis difficultas, an Pater & Spiritus sanctus ratione hujus unionis habeant specialem modum existendi in humanitate unita, quanquam illi uniti non sint. Quod dubium non invenio in terminis tractatum a Theologis in hoc mysterio, sed contenti sunt absolute negando unionem factam esse ad has personas, quo videntur significare negantem partem, potius quam affirmantem. D. Th. 1. p. q. 43. ar. 3. dicit Deum non existere novo modo in aliqua natura rationali, præter illos tres universales per essentiam, præsentiam, & potentiam, nisi per gratiam gratum facientem. Hugo vero Cardinalis, qui agens de mysterio Eucharistiæ simile dubium tetigit in tractatu, qui inscribitur Speculum Ecclesiæ, in §. qui incipit: Post hæc igitur incipit sexta pars: definit Patrem vel Spiritum sanctum nullo speciali modo esse sub speciebus sacramentalibus, etiam per concomitantiam: quod non posset esse verum, si speciali modo essent in humanitate Christi. Unde a posteriori sumi potest argumentum, nam si illæ personæ essent speciali modo in Christi humanitate, essent per concomitantiam sub speciebus consecratis, consequens videtur falsum, nam Concilium Tridentinum sessione 13. c. 3. soli divinitati hoc tribuit (scilicet inter res divinas) propter hypostaticam unionem, quæ ad alias personas non extenditur.

Nihilominus dicendum mihi videtur sine ulla dubitatione, Patrem, & Spiritum sanctum esse in illa humanitate ratione hujus unionis, singulari & altiori modo, quam in omnibus creaturis sint; quam sententiam necessario supponunt, qui dicunt has personas esse specialem modo sub speciebus panis & vini consecratis, nam illud non potest esse verum ex vi illius mysterii solius, nisi in

An Pater & Spiritus sanctus speciali modo sint in Christo.

Respondetur affirmative.

quan-



quantum hoc supponit, ut per se constat: tenet autem illam sententiam Gabr. lect. 42. super san. conclus. 2. & Viguer. in instit. Theol. c. 16. §. 3. vers. 4. Et eam mihi sumo ex August. serm. 3. de tempore, ubi sic ait: *Filius suscepit carnem, & non deseruit Patrem, nec se divisit a patre, suscepit (inquam) Filius carnem in proprietate, sed tamen Pater & Spiritus sanctus non defuit maiestate: in divinitate equalitas, in carne sola Filii proprietate, non tamen ab eo Patris, aut Spiritus sancti recessit aliquando divinitas. Cum ergo una sit deitas, una sit divinitas, implevit quidem carnem Christi & Pater, & Spiritus sanctus, sed maiestate, non susceptione. Vis scire quia cum eo fuit & Pater, non sum, inquit Dominus Jesus Christus, solus, sed Pater mecum est. Audi de Spiritu sancto, quia cum eo erat; Evangelista refert, quia Jesus plenus Spiritu sancto regressus est a Jordane: ecce sic solus Jesus Christus suscepit carnem, & tamen Pater, & Spiritus sanctus non defuit maiestate.*

Neque obscurius indicavit eandem sententiam Cyril. Alexan. lib. 9. in Joan. c. 47. ubi exponens verba illa Joan. 14. *In illo die vos cognoscetis, quia ego in Patre meo, & vos in me, & ego in vobis.* Dicit hæc verba esse impleta per mysterium Incarnationis, quo factum est, ut nos simus in Verbo, quia naturam nostram assumpsit, & consequenter, ut ipsum Filium in nobis habeamus, & Patrem per Filium. Tertul. etiam lib. contra Praxeam c. 29. & 30. impugnans eos, qui dicunt, Patrem esse passum, aut compassum cum Filio, dicit non potuisse quidem Filium pati, nisi Pater esset in natura, in qua Filius patiebatur, non tamen propterea ipsum passum, vel compassum fuisse: *Sicut & nos, inquit, pati pro Deo non possumus, nisi Spiritus Dei sit in nobis; non tamen ipse patiens, sed pati posse præstans.* Quod autem hi patres non loquantur de communi modo; quo Deus existit in rebus per essentiam, præsentiam & potentiam, constat, quia non fundatur in sola immensitate divinarum personarum, sed in speciali connexionione, quam habent propter unitatem naturæ, & operationis.

Unde duplici ratione, aut modo potest explicari, & probari quod dicimus, primo ex connexionione, quæ est inter divinas personas, quo ad præsentiam realem propter unitatem in natura, quam recte explicuit Basiliius epist. 43. *Quemadmodum, inquit, in catena, qui unius annuli summam apprehendit, hoc ipso simul alterum inferum attrahit: ita & hic, qui Spiritum trahit, per ipsum Filium & Patrem una simul attrahit: & si quis vere Filium apprehenderit, habebit & ipsum utrinque, hinc Patrem illius, illinc Spiritum sanctum una compactum: neque enim a Patre abscindi poterit, qui simul est cum Patre, neque a proprio Spiritu sejungetur unquam, qui in ipso omnia operatur.* Et potest hæc connexionio per hanc conditionalem explicari, quia si per impossibile intelligeremus Patrem, Filium, & Spiritum sanctum non esse in omnibus rebus per essentiam, præsentiam, & potentiam, & fieret unio hypostatica inter Verbum & humanitatem, ex vi illius necessarium esset Patrem & Spiritum sanctum intime fieri præsentem humanitati, quamvis illi hypostatice non unirentur, quia non possunt a Filio dividi, vel sejungi.

**Objeçtio.** Dices: possunt disjungi in hypostatica unione, quia hæc fieri potest cum Verbo, & non cum aliis; cur ergo non poterunt disjungi etiam in præsentia, quantum est ex vi talis unionis? **Respon.** Respondetur, quia necessaria connexionio in præsentia præcise sequitur ex unitate naturæ, ex qua fit, ut licet una persona non sit alia, tamen necessario una sit in alia, & ubicunque est alia, & ideo non potest una persona fieri præsens alicui naturæ, ex vi alicujus vinculi, vel unionis cum illa, quin omnes personæ fiant illi præsentem, licet non unitæ illo genere unionis. Exemplum est facile in anima nostra, quæ per unionem ad corpus fit præsens omnibus partibus ejus: unde fit consequenter, ut intellectus, qui comitatur animam, sit præsens ubicunque est anima, quamvis non habeat illam unionem cum partibus corporis, quam habet anima: sic ergo in humanitate, cui unitur Verbum, ex vi talis unionis intime adest Pater & Spiritus sanctus, licet non uniantur illi hypostatice, & hoc vocavit Augustinus implere carnem Christi patrem & Spiritum sanctum maiestate, non susceptione.

Secunda ratio seu modus explicandi est, quam Augustinus eodem loco explicuit ab illis verbis: *Adhuc cū ha-*

*ram respice, &c.* Quia ubi Deus singulari modo operatur, dicitur etiam esse singulari modo, propter quod dicitur esse speciali modo in justis, & habitare in illis tanquam in templo suo: sed in Christi humanitate singulari modo operatur tota Trinitas, & eam sanctificat, & efficit templum suum excellentiori modo, quam per gratiam habitualem; ergo.

Dices: hoc argumento probaretur per hanc unionem uniri humanitatem Patri & Spiritui sancto, quia in unionem per gratiam, vel alia simili, in qua Deus dicitur singulariter adesse propter singularem modum operandi, omnes personæ uniuntur. Respondetur negando consequentiam, quia in omni alio effectu unio creaturæ ad Deum est accidentaliter, & sicut effectus aequaliter fit a tota Trinitate, ita dicit eandem habitudinem ad Deum vel ut ad objectum, vel ut ad ultimum finem, cujus naturam participat, vel alio simili modo: at vero in hoc effectu, quia est unio substantialis ad unam personam, quamvis efficientia sit communis toti Trinitati, & ideo præsentia, quæ requiritur præcise ex vi efficientiæ, eadem sit in omnibus personis: tamen ipsa unio dicit specialem habitudinem ad personam Filii, tanquam ad terminum suum, cum quo solo fit, licet concomitanter requirat præsentiam Patris & Spiritus sancti, duplici ratione explicata.

Sed quæres tandem, quidnam sit hæc præsentia, vel quid addat ipsi humanitati, aut personis divinis? Respondetur, certum est nihil reale addere ipsis personis, neque humanitati præter ipsam unionem ad Verbum, quia personæ immutabiles sunt, & nihil eis addi potest: in humanitate vero præter ipsam unionem, & relationes, quæ inde consequuntur, nihil fingi aut excogitari potest. Solum ergo explicatur per hunc specialem modum, quo dicuntur Pater & Spiritus sanctus esse in humanitate, natura & vis illius unionis ad Verbum, quæ ex se postulat specialem titulum intimam præsentiam aliarum personarum, quæ propter talem unionem denuo fieret, si non supponeretur ratione immensitatis.

## SECTIO II.

*Utrum Verbum divinum terminaverit hanc unionem ratione alicujus proprietatis absolute, vel ratione relationis.*

**D**urandus in 3. dist. 2. affirmat primam rationem terminandi unionem hanc esse aliquid absolutum, scilicet subsistentiam essentiali, & absolutam divinæ naturæ. Fundamentum ejus est, quia in Trinitate est una tantum subsistentia absoluta, qua & divina natura, & omnes divinæ personæ subsistunt; sed prima ratio terminandi humanitatem est subsistentia divina, nam assumpta est ad subsistendum; ergo prima ratio terminandi est aliquid absolutum. Unde fatetur Durandus hanc unionem factam esse per se primo ad deitatem, seu hunc Deum ut sic: ne vero cogatur dicere inde sequi omnes tres personas fuisse incarnatas, addit secundum, ex vi hujus unionis præcise nullam personam esse incarnatam, aut hominem. Et probat, quia ex vi unionis naturæ humanæ cum subsistentia essentiali non necessario sequitur unio cum proprietatibus personalibus; ergo nec sequitur Incarnatio omnium personarum, atque adeo neque quod sint homines, seu homo: antecedens patet, quia paternitas v.g. subsistit illa subsistentia absoluta, & inde non sequitur, quod sit unita personaliter filiationi, vel e contrario, alias sequeretur confusio personarum; ergo ex vi unionis cum subsistentia essentiali non sequitur unio cum omnibus personis; ergo nec cum aliqua determinata. Addit ergo tertio Durandus, ut Filius specialiter fuerit incarnatus, factam esse specialem unionem humanitatis ad personalitatem Verbi, ratione cujus Verbum factum est homo, & non Pater, nec Spiritus sanctus.

Hanc opinionem Durandi impugnant vehementer Thomistæ, & merito: multi tamen re ipsa in eandem incidunt, ac verbis tantum differunt. Capreol. dist. 1. concl. 4. dicit contra Durandum rationem terminandi fuisse proprietatem Verbi. Postea vero solvendo argumenta Durandi ponit quasi duplicem dependentiam humanitatis a Verbo, aliam in subsistendo, aliam in existendo; illam dicit esse priorem secundum rationem, & formaliter terminari personalitate Verbi, hanc vero per existentiam & subsistentiam essentiali: quod necessario fateri tenentur omnes Thomistæ, qui in Trinitate tantum agnoscunt



scunt unicum esse existentia absolutum, & essentiale, & dicunt humanitatem Christi non existere existentia creata, sed divina. Unde solum possunt differre a Durando, vel in ordine unionis, seu dependentiæ humanitatis a proprietate relativa, & absoluta, vel in nominibus, quia hi vocant dependentiam in existendo, ille in subsistendo.

Est vero secunda sententia, quæ negat rationem terminandi esse proprietatem relativam, vel absolutam, sed ut ita dicam, totam entitatem Verbi secundum se totam, quæ utramque rationem includit. Tenet Ocham in 3. q. 1. art. 2. nec displicet Gabr. d. 1. notab. 5. sumi etiam potest ex opinione Gregorii dicentis personas divinas seipsis & non aliquibus proprietatibus constitui: ratio enim est eadem, quia scilicet persona divina est simplicissima, & in ea non distinguuntur in re ipsa relatio & essentia. Nec multum ab hac opinione differt ea, quæ dicitur fuisse multorum Thomistarum, scilicet proximam rationem terminandi fuisse subsistentiam Verbi: & quoniam putabant in Trinitate tantum esse unam subsistentiam essentialem, qua omnes tres personæ subsistunt, aiebant consequenter rationem terminandi esse illam subsistentiam, non secundum se, & ut communem, sed ut accommodatam Verbo per relationem, ita ut proxima ratio terminandi sit ipsa personalitas Verbi, in quantum est ratio incommunicabiliter subsistendi, in cuius conceptu formaliter includitur id, quod absolutum est, & quod relativum: & supposito illo principio, quod subsistentia in Deo est tantum absoluta, hi authores optime omnium loquebantur.

Formalis  
ratio termi-  
nandi  
quævis.

Dico primo. Formalis ratio, per quam Verbum primo ac per se terminat humanitatem, est proprietas ejus relativa. Hæc est sententia D. Th. hic in his duobus articulis, ideo enim dixit propriissime convenire personæ assumere, naturæ autem non nisi ratione personæ, quoad rationem terminandi: ita cum eo sentit tota ejus schola. Idem docet Alexand. Alenf. 3. p. q. 4. memb. 1. Bonav. in 3. d. 1. art. 1. q. 2. & d. 5. art. 1. q. 1. & ibidem etiam Scot. q. 1. & d. 1. q. 5. §. in ista q. & in solution. ad 2. & ibi Gabriel. q. unica art. 1. Richar. art. 1. q. 2. Palud. q. 2. art. 3. & 4. Marfil. q. 2. art. 1. in fine, cui aliqui Thomistæ falso tribuunt ultimam opinionem supra citatam. Et est sententia ita certa, ut contraria nullo modo probabilis existimanda sit, primo quia fere expressè habetur in Concil. Tolet. VI. & XI. in principio, ubi sic dicitur, *Solus Filius assumpsit humanitatem in eo, quod proprium est Filii, non quod commune est Trinitati*. Quid clarius? alterum enim affirmat, & alterum aperte negat. Hinc etiam in sexta Synodo action. 8. sub finem dicitur solum Verbum esse incarnatum: *Quia Pater, & Spiritus sanctus nihil in incarnatione habent commune, nisi benignissimam voluntatem*. Quorum verborum sensus manifestus est, effectiorem Incarnationis esse communem tribus personis, quia per aliquid omnibus commune illam efficiunt, scilicet per voluntatem, incarnari vero non esse commune, quia non ad aliquid commune terminatur. Et ad hoc confirmandum citatur dictum Dionys. quod habetur c. 2. de Divin. nom. p. 1. post medium, ubi mysterium hoc ad discretam Theologiam pertinere dicit, quod eodem modo tractat Damasc. lib. 3. de fide c. 6. & Nicet. lib. 3. thes. c. 34. & Elias Creten. in oration. § 1. Nazian. §. At inquit: & simili modo Anselm. lib. de Incarn. Verb. c. 4. unionem probat non esse communem, quia non est facta in natura communi, qua ratione utitur etiam D. Th. infra art. 4.

Et hinc sumitur prima ratio, qua potissimum solet impugnari sententia Durand. quia si hæc unio per se primo terminata est ad subsistentiam essentialem; ergo qui primo factus est homo, fuit hic Deus ut sic, ut abstrahit a personis, & est quid commune illis; ergo ex vi hujus unionis tam Pater, quam Spiritus sanctus est homo.

Respondet primo Durand. simpliciter non sequi, quia ex vi illius unionis proprietates Patris, & Spiritus sancti humanitati unitæ non sunt, unde neque ex vi illius unionis solum Verbum est homo, tamen cum addito addit in q. 4. posse concedi Patrem in quantum hunc Deum, esse hominem. Quæ responsio primo duo admittit omnino aliena a modo sentiendi Conciliorum & Sanctorum. Primum est facta esse a Deo aliquam unionem hypostaticam, ex vi cuius Deus factus sit homo, & non Verbum, neque enim agnoscunt Patres aliam unionem præter illam, qua primo & per se Verbum caro factum est. Secundum est, Patrem posse ulla ratione dici hominem, etiam

cum illo addito, in quantum Deus, præsertim, cum inde possit facile inferri, etiam sine illo addito, idem sequi, nam, quod Patri convenit, in quantum est Deus, simpliciter potest de illo prædicari, & sine illo addito, ut patet in his locutionibus: *Pater creat, Pater sanctificat*, quæ non asseruntur de illo, nisi quatenus Deus est.

Quocirca, licet propter specialem unionem ad propriam relationem posset dici, Verbum speciali modo factum esse hominem, tamen prior unio ad hunc Deum etiam sufficeret, ut quælibet persona simpliciter homo dicitur; primo quia quidquid convenit Patri, ut est Deus, convenit simpliciter, quia illa non est conditio diminuens, sic enim (ut dicebam) creare convenit Patri in quantum est Deus, id est ratione divinitatis, tota enim ratio, per quam creat, est divinitas, & non relatio, & nihilominus simpliciter verum est Patrem creare: ergo similiter si per subsistentiam essentialem terminat humanitatem, simpliciter ipse terminat; ergo simpliciter est incarnatus, & est homo. Secundo id ostenditur arguendo hoc modo: hic Deus est hic homo, tam secundum se, quam in omni persona, in qua existit; sed Pater est hic Deus; ergo Pater est hic homo. Tertio explicatur vis hujus consequentiæ, nam posita illa unione, tam quid commune esset hic homo, quam hic Deus; ergo cuicumque communicatur hic Deus, communicatur hic homo; ergo sicut Pater ratione hujus communicationis est hic Deus, etiam est hic homo.

Quarto, Pater est hic Deus, quia est hoc subsistens in hac divinitate; sed etiam est hoc subsistens in hac humanitate; ergo etiam est hic homo. Quinto, quia si ratio terminandi est subsistentia essentialis, ergo persona Patris & humana natura substantialiter uniuntur illa communi subsistentia, tanquam substantiali nexu, sicut nos dicimus cum omnibus Patribus, duas naturas esse unitas proprietate relativa Filiis, quia nihil aliud est substantialiter uniri, nisi habere terminum substantialem communem, & utrique extremo substantialiter conjunctum: sed incarnari nihil aliud est, quam substantialiter uniri carni; ergo saltem eo modo, quo divinitas dicitur incarnata, quia unita carni in persona Verbi, ita Pater poterit dici incarnatus, quia unitus carni saltem in hoc Deo.

Ultimo arguitur ratione ostensiva, quia hæc unio facta est per modum compositionis unius personæ humanæ ex humana natura, & personalitate increata, ut supra ostensum est; ergo quod ex parte Verbi formaliter terminavit dependentiam humanæ naturæ, & cum illa conjuncta est ad hanc mirabilem compositionem, fuit personalitas Verbi, per quam impedita est in humanitate propria personalitas. Et confirmatur, nam hæc personalitas est sufficientissima ad hoc munus terminandi, cum sit infinita subsistentia relativa, ut supra ostensum est: est etiam accommodatissima, quia sicut incarnatio fuit propria Verbi, ita fieri debuit in eo, quod est proprium Verbi, sicut e contrario, quia creare est commune, ratio seu principium creandi commune est. Confirmatur secundo, nam in Christo persona divina & humana est una, & eadem; ergo eadem proprietate constituitur in ratione personæ sub utraque natura; sed illa proprietas, per quam constituitur in ratione personæ, est, ad quam formaliter terminatur humanitas unita, quia hæc unio per se tendit ad constitutionem personæ: ergo.

Dico secundo. Hæc unio per se primo in nullo absoluto facta est, sed tantum in relativo, in absoluto vero solum quatenus includitur in relativo. Hæc conclusio fere sequitur ex dictis, & ad eam confirmandam possunt accommodari rationes factæ. Ex illa vero excluditur primo sententia asserentium factam esse unionem in existentia communi, & absoluta ut sic, quia vitari non potest, quin ratione talis unionis Pater habeat substantiale vinculum, & nexum cum carne, atque adeo ut aliquo modo incarnatus sit. Sequitur etiam vel illam unionem esse hypostaticam, quod est in Durandi opinionem coincidere, vel certe esse unionem substantialem inter naturam creatam & divinam in absoluta existentia ipsius naturæ, quæ non sit hypostatica, sed alterius modi, quod inauditum est in Conciliis loquentibus de incarnatione, ut facta est, talis enim unio esset potius in natura, quam in persona. De qua sententia plura infra q. 17. Secundo excluditur sententia Gabrielis & Okam, quia licet in Deo absoluta, & relativa in re non distinguantur, nihilominus tamen abso-



absolutum est ratio creandi, & non relativum: & e contrario relatio constituit personam, & non absolutum, & in absoluto personæ sunt unum, & in relativo distinguuntur; ergo simili modo in hoc mysterio potuit fieri unio in relativo, & non æque primo in absoluto, sed solum prout in relativo includitur: præsertim quia, si æque primo fieret in absoluto, vix posset vitari, quin ex eo capite unio esset communis. Tertio excluditur alia Thomistarum sententia, quatenus falso fundamento nititur negando subsistentiam relativam: & revera, si id, quod est incommunicabile in relatione Filii, non esset subsistentia, nec ratio subsistendi, vix posset intelligi, quo modo secundum propria posset uniri hypostatice humanitati, quia illa non potest uniri, ut referat humanitatem; ergo tantum potest uniri in ratione subsistendi; ergo si hoc modo unitur, illa ut sic est primarius terminus unionis, vel si hoc modo non unitur, nullo modo unitur. Et hæc ratio optime accommodari potest contra Dur. Et e converso, ratio facta contra illum potest facile contra hanc sententiam applicari. Quia, si subsistentia absoluta secundum se est propria ratio terminandi unionem aliquam, necessario fit, illam esse communem Patri & Spiritui S. & secundum illam esse hominem, etiamsi ultra hanc ponatur specialis unio ad personalitatem Verbi, nam inde solum fiet, Verbum esse speciali modo personam humanam, non vero vitabitur aliud inconveniens, quod aliæ personæ sint homo sub aliqua ratione. Neque ad hoc refert, quod unio ad personalitatem Verbi ponatur ratione prior, aut posterior, quam unio ad subsistentiam absolutam: nam hic ordo rationis non tollit, quin illa unio ad subsistentiam absolutam, in quocumque signo rationis fieri intelligatur, sit communis omnibus personis, & sufficiens, ut omnes maneant incarnatæ, & humanæ. Et ita solum relinquitur fundamentum Durandi, & aliarum opinionum.

Objeçio.

Sed supersunt breves difficultates: prima est contra præcipuam rationem factam contra Durandum, & alios, quia in Patre tota ratio, seu principium generandi est essentia, & tamen non sequitur, generare esse commune omnibus personis, quia paternitas est conditio necessaria ad generandum: ergo simili modo, quamvis ratio terminandi unionem in Filio esset essentia, posset unio non esse communis, quia est etiam necessaria unio cum relatione. Et confirmatur, quia quamvis dicamus naturam divinam esse unitam humanæ media relatione, tamen revera fuit tota unita, & nihilominus non sequitur Patrem esse unitum; ergo idem intelligi posset, etiam si ipsa divina natura immediate per suam subsistentiam essentialem esset unita. Respondetur in primis, Concilium Toletanum non solum dicere, proprietatem Verbi esse conditionem necessariam ad hanc unionem, sed esse id, quo facta est unio: & ab aliis Conciliis propter eandem causam dicitur hæc unio facta in hypostasi Verbi. Deinde exemplum adductum nihil favet Durando, quia revera non est simile, nam generatio est actus notionalis connotans relationem necessariam in principio generante; at vero illa unio, quam ponit Durandus, est quasi essentialis, seu ex vi proprietatis essentialis tantum, nec requirit unionem cum proprietate, ut conditionem necessariam, sed potius eam ponit & secundario, & quasi per accidens adjunctam. Deinde hic Deus, ut abstrahit a personis, non generat, sed solum ut est Pater: at vero Durand. ponit hunc Deum, ut abstrahit a personis, per se uniri. Adde contra alios, actum notionalem ideo esse proprium personæ producentis, & non productæ, quia est ab una persona, ut origine antecedit aliam, & ideo requiri, ut conditionem necessariam in persona producente, relationem quæ importet hanc prioritatem originis: at vero omnis communicatio divini esse, quæ est extra Deum, supponit personas constitutas, & per se non requirit ordinem originis, & ideo si talis communicatio fiat per essentiam, & non per relationem, non est, cur requirat relationem ut conditionem necessariam, vel cur non se habeat indifferenter ad omnes. Confirmatur, quia alias pari ratione dici posset, unam personam posse efficere incarnationem sine alia, gratis fingendo relationem esse conditionem necessariam ad illam effectum. Denique in generatione æterna ideo essentia est principium generandi, quia illa est, quæ per generationem communicatur; ergo si in hac unione illa est principium terminandi, illa erit, quæ communi-

catur; omnis autem communicatio essentia divina est ab omnibus personis divinis, quæ supponuntur constitutæ ante talem communicationem; ergo. Ad confirmationem respondetur negando consequentiam, quia nunc vinculum unionis est proprium Verbi, & non commune, & subsistentia absoluta ut sic non terminat naturam humanam, sed tantum unitur illi, media relativa, ut inclusa & modificata in illa: & ideo sicut subsistentia relativa Filii terminat naturam divinam, & non terminat personas alias; ita unit illam naturam humanam, & non alias personas. At vero si unio fieret in aliquo essentiali, jam vinculum unionis esset commune, & in illo uniretur humana natura cum omnibus personis.

Secunda difficultas est, quia relatio divina ut sic non dicit perfectionem; ergo non continet eminenter personalitatem creatam; ergo non potest supplere vicem ullius; ergo non potest esse terminus hujus unionis. Scot. supra q. 1. & 4. propter argumentum concedit personalitatem divinam, quam putat secundum propriam rationem nullam dicere perfectionem, non continere eminenter personalitatem creatam, repugnat enim hic modus continendi sine aliqua perfectione: unde ad argumentum negat hoc esse necessarium, ut una personalitas suppleat vicem alterius. Quam sententiam impugnatur Cajetanus hic art. 1. sed cum ipse cum Scoto sentiat relationem ut sic nullam dicere perfectionem, vix potest vitare, quin vel relatio habeat vim terminandi formaliter a perfectione absoluta, quam habet ratione essentia, quod videtur incidere in opinionem Durandi; vel certe quin relatio terminet, prout nullam perfectionem dicit, quod Scotus intendit. Respondetur ergo negando majorem, nam ut supra dixi, relatio divina ex proprio conceptu includit subsistentiam relativam, quæ ex proprio conceptu dicit infinitam perfectionem, etiam relativam, ut docet etiam Gabr. in 3. dist. 1. q. 1. art. 3. dubio 2. Mirum est enim, quod personalitas creata dicat aliquam perfectionem, & tamen quod personalitas divina, in quantum personalitas est, nullam dicat. Non igitur ita est, sed dicit infinitam, ratione cujus habet vim, ut possit supplere vicem subsistentia creatæ; & hoc modo potest dici continere illam eminenter, quia continet quiddam perfectionis est in illa, & in ratione termini potest vicem ejus supplere, quamvis in ratione principii activi non contineat illam, nisi ratione essentia, quod nihil refert ad rationem terminandi, de qua agimus.

Tertia difficultas est, quia non videtur, quomodo humanitas Christi possit terminari per relationem, quin Christus ut homo referatur ad patrem per illam relationem. Et confirmatur, nam sequitur Christum esse analogice personam cum aliis hominibus. Respondetur, Christum ut subsistentem in humanitate esse personam relativam, formaliter loquendo de ratione personæ, quamquam ut est individuum quoddam humanæ naturæ, sit aliquid absolutum: & ideo ex hac unione non sequitur humanitatem, vel hunc hominem referri ad Patrem, sed solum id sequitur de hac persona; sicut quamvis relatio terminet deitatem, non tamen refert deitatem ipsam, nec hunc Deum, ut sic ad Patrem, sed personam illam, ut secundum se talis est. Denique illa relatio non unitur per modum formæ informantis, sed solum per modum termini quasi sustentantis naturam, & ideo non oportet, ut referat ipsam naturam ad aliud. Ad confirmationem respondetur Christum esse univoce hominem nobiscum, quia in ratione hominis humanitate constituitur, ut iterum dicetur quæst. 17. at vero in ratione personæ reperitur inter ejus personam, & personas creatas analogia, tum quia ejus persona relativa est, alias sunt absolutæ: tum maxime quia ejus persona est infinita, & increata, alias vero sunt creatæ & finitæ.

## ARTICULUS III.

*Utrum abstracta personalitate per intellectum, natura possit assumere.*

**A**D tertium sic proceditur. Videtur, quod abstracta personalitate per intellectum, natura non possit assumere. Dicitur enim, quod natura convenit assumere ratione personæ: sed quod convenit alicui ratione alicujus, remoto eo non potest ei convenire: sicut corpus, quod

Objeçio.

Responsio.

Objeçio.

Responsio.

Distingue inter actus notionales & uniones.

21.  
3. dist. 5. q.  
2. art. 2.  
Ans. præcedent.



quod est visibile ratione coloris, sine colore videri non potest. Ergo abstracta personalitate per intellectum, natura assumere non potest.

Art. 1. hujus quæst. 2 Præterea: Assumptio importat terminum unionis, ut dictum est\*. Sed unio non potest fieri in natura, sed solum in persona. Ergo abstracta personalitate, natura divina non potest assumere.

3 Præterea: In prima parte dictum est\*, quod in divinis abstracta personalitate nihil manet. Sed assumens est aliquid. Ergo abstracta personalitate, non potest divina natura assumere.

Sed contra est, quod in divinis personalitas dicitur proprietas personalis, quæ triplex est, scilicet paternitas, filiatio, & processio: ut in prima parte dictum est\*. Sed remotis his per intellectum, adhuc remanet Dei omnipotentia, per quam est facta incarnatio: sicut Angelus dixit Luc. 1. Non erit impossibile apud Deum omne Verbum. Ergo videtur, quod remota personalitate, natura divina possit assumere.

b Respondeo dicendum, quod intellectus dupliciter se habet ad divina. Uno modo ut cognoscat Deum sicuti est: & sic impossibile est, quod circumscribatur per intellectum aliquid a Deo, & quod aliud remaneat: quia totum, quod est in Deo, est unum, salva distinctione personarum: quarum tamen una tollitur sublata alia, quia distinguuntur solis relationibus, quas oportet esse simul. Alio modo se habet intellectus ad divina non quidem quasi cognoscens Deum, ut est, sed per modum suum, scilicet multipliciter & divisim, id, quod in Deo est unum. Et per hunc modum potest intellectus noster intelligere bonitatem & sapientiam divinam, & alia hujusmodi, quæ dicuntur essentialia attributa, non intellecta paternitate, vel filiatione, quæ dicuntur personalitates. Et secundum hoc, abstracta personalitate per intellectum, possumus adhuc intelligere naturam assumentem.

c Ad primum ergo dicendum, quod quia in divinis idem est quo est, & quod est, quicquid eorum, quæ attribuntur Deo in abstracto, secundum se consideretur, aliis circumscriptis, erit aliquid subsistens, & per consequens persona, cum sit in natura intellectuali. Sicut igitur nunc positis proprietatibus personalibus in Deo dicimus tres personas: ita exclusis per intellectum proprietatibus personalibus, remanebit in consideratione nostra, natura divina, ut subsistens, & ut persona. Et per hunc modum potest intelligi, quod assumat naturam humanam ratione suæ subsistentiæ vel personalitatis.

Ad secundum dicendum, quod etiam circumscriptis per intellectum personalitatibus trium personarum, remanebit in intellectu una personalitas Dei, ut Judæi intelligunt, ad quam poterit terminari assumptio, sicut nunc dicimus eam terminari ad personam Verbi.

d Ad tertium dicendum, quod abstracta personalitate per intellectum, dicitur nihil remanere per modum resolutionis: quasi aliud sit, quod subijcitur relationi, & aliud ipsa relatio: quia quicquid consideratur in Deo, consideratur ut suppositum subsistens. Potest tamen aliquid eorum, quæ dicuntur de Deo, intelligi sine alio, non per modum resolutionis, sed per modum jam dictum.

#### COM M E N T A R I U S.

Duplex potest esse sensus hujus quæstionis; prior est conditionatus ex hypothesi impossibili, per quam abstrahuntur relationes, non tantum ab actu incarnationis, sed etiam ab ipsa divinitate, ut Cajet dicit: ut quæstio sit, an si in re ipsa intelligatur divina natura esse sine relationibus, possit assumere. Et hoc modo licet abstractio hæc fiat per intellectum, tamen ex hypothesi ponitur in re ipsa ad modum abstractionis negantis unum ab alio, & non tantum præcindentis.

Secundus sensus esse potest absolutus, abstrahendo relationes ab actu incarnationis, & non a divinitate, ut sensus sit: an nunc existente natura divina conjuncta relationibus, possit nihilominus assumere per ea, quæ præcise illi conveniunt, ut a relationibus abstrahitur. Et quidem si titulum articuli nude consideremus, potius videtur indicare posteriorem sensum, in quo natura abstrahitur ab omni personalitate: cui favet verbum illud, *An natura possit assumere*, quod indicat sensum absolutum, nam in quæstione conditionata potius esset dicendum, an posset assumere posita hypothesi. Et tam argumentum, Sed contra, quam corpus articuli optime qua-

drant cum in hoc sensu, in solutionibus autem argumentorum satis explicuit D. Th. se loqui in priori sensu, ut videbimus.

Et ideo ambiguum manet, quem sensum D. Th. intenderit in toto articulo. Et potest quidem facile sustineri, D. Th. esse locutum in sensu hypothetico & conditionali, scilicet, si Deus esset absque personalitate relativa, an posset assumere, quia in hoc tantum sensu D. Th. videtur suæ assertionis rationem reddere, & argumenta in contrarium solvere. Nihilominus, altior videtur sensus, si dicamus, D. Thom. absolute & simpliciter quæstionem proposuisse sub his verbis, quæ utrumque sensum comprehenderent, & ita etiam respondisse, ut utrique satisfaceret, atque ita utrumque sensum intendisse. Primum patet sufficienter ex verbis tituli, quæ communia sunt utrique sensui, ut per se patet: & ponderandum est illud verbum, *natura abstracta per intellectum*, nam abstractio ut sic dicit præcisionem, vel negationem unius, & non dicit alicujus rei additionem. Unde, cum quaeritur, an natura abstracta personalitate posset assumere, non est sensus, an, ablata personalitate relativa, & addita alia absoluta posset assumere; quia illa non esset abstractio tantum, sed esset abstractio unius, & additio alterius. Proprius ergo sensus est, an abstracta seu præcisa personalitate relativa, natura divina ex his tantum, quæ essentialiter & per se includit, sit sufficiens ad assumendam aliam naturam, seu ex se habeat, unde possit alteram naturam terminare. Sicut, cum quaerimus, an, abstracta quantitate a substantia materiali, sint partes in ipsa substantia, sensus proprius est, an talis substantia per se habeat partes præcisa quantitate, & absque additione alterius rei: & similiter, cum quaerimus, an in divinis Filius, abstracta spiratione activa, distinguatur ab Spiritu sancto, sensus est, an ex se habeat, unde distinguatur, præcisa spiratione activa, & nulla alia addita; unde in his quæstionibus non solum includitur sensus hypotheticus & conditionalis, scilicet, an, si in re substantia maneret, sine quantitate haberet partes, vel, si Filius non spiraret Spiritum sanctum, an distingueretur ab illo; sed etiam includitur sensus absolutus scilicet, an nunc de facto substantia sub quantitate existens habeat ex se partes, & non a quantitate; & an Filius, licet de facto spiraret Spiritum sanctum, non per spirationem activam, sed per suam filiationem ab illo distinguatur. Sic ergo in præsentem titulum hujus articuli ex vi illorum verborum utrumque sensum comprehendit. Neque est verisimile D. Thom. difficiliorem omisisse, & illum, in quo nulla fere erat difficultas, attigisse. Præsertim, cum proprie & quasi ex intrinsicis principii, sensus hypotheticus ex absoluto diffiniendus sit. Quod enim divinitas, si in re ipsa ab ea separarentur relationes, posset assumere, non est judicandum ex eo, quod in eo casu adderetur divinitati, quia illa, ut dixit, jam non esset abstractio, sed transmutatio; sed judicandum est ex eo, quod divinitas nunc ex se habet; & ita plane procedit D. Thom. in corp. artic. & in solut. argumentorum, ut statim explicabitur.

b Respondet D. Th. affirmans posse naturam assumere abstractis personalitatibus, quod explicat, dicens abstractionem hanc non habere locum in cognitione, quæ videtur Deus, prout in se est, sed solum in nobis, qui cognoscimus Deum ad modum nostrum, scilicet multipliciter & divisim apprehendentes id, quod in Deo unum est: & hoc modo, inquit, abstrahendo naturam a relationibus, adhuc intelligimus illam ut aptam & potentem ad assumendum. In hoc autem discursu explicat quidem D. Th. & affirmat conclusionem suam, nullam tamen probationem subungere videtur, ut apparebit corticem literæ legenti; solum enim concludit: *Et secundum hoc, abstracta personalitate per intellectum, possumus intelligere naturam assumentem*. Existimo tamen probationem & rationem conclusionis (quam numquam solet D. Th. omittere) positam esse in illis verbis: *Et per hunc modum potest intellectus noster intelligere bonitatem & sapientiam divinam, & alia hujusmodi, quæ dicuntur essentialia attributa, non intellecta paternitate & filiatione, quæ dicuntur personalitates*. In quibus verbis primum considero condistinguere D. Th. essentialia attributa a relationibus, quia hæc revera non sunt essentialia divinitati aut Deo ut sit, ut alibi latius ostensum est, & ea ratione, inquit, essentialia posse abstrahi, & præcindi a personali-

In corpore articuli.

Titulus articuli.



libus, quia sunt propria illis secundum rationem seu essentiali inclusionem. Deinde considero, cum ex hoc immediate inferat D. Th. naturam sic abstractam cum solis essentialibus posse intelligi assumentem, virtualiter subsumpsisse seu subintellexisse in essentialibus attributis includi subsistentiam, ratione cuius divina natura sic abstracta potest intelligi assumens: & hoc magis explicuit D. Th. in solutione ad 1. dicens, naturam sic abstractam intelligi posse assumentem, quia in divinis idem est, quod est, & quod est: ac si diceret, ad essentialia attributa divinitatis pertinere, ut non sit tantum id quo est, sed etiam quod est, in quo subsistentia includitur: & hoc magis circa illam solutionem explicabimus.

Nunc circa corpus articuli videtur animadversione dignum, distinctionem illam D. Th. de cognoscendis Deum prout in se est, aut solum imperfecto modo, esse quidem veram quoad hoc, quod in illa visione clara non potest videri aliquid in Deo, quin omnia videantur, quæ in illo formaliter sunt, in cognitione autem abstractiva potest unum ab alio secundum rationem separari. Quod vero ad præsentem questionem attinet, non videtur multum referre hæc differentia, nam qui videt Deum, & Deus ipse se comprehendens, cognoscit veritatem illius conditionalis, si natura divina existeret sine relationibus posset assumere, vel illius propositionis, natura divina per subsistentiam absolutam potest terminare aliam naturam; unde etiam in vidente Deum, potest esse sufficiens abstractio ad præsentem questionem necessaria, quia hæc non requirit cognitionem unius sine alio, sed cognitionem propriam huius unionis, & ejus termini formalis. Et licet non videat naturam sine personis, videt tamen quid sit proprium naturæ, quid personæ; sicut etiam videt nunc, Verbum terminare naturam per relativum, non per absolutum, & eodem modo potest videre, an natura possit terminare per absolutum non terminando per relationem. Hoc ergo modo potest dici esse in vidente Deum sufficiens abstractio, ad utrumque sensum questionis, quia illa etiam non consistit in cognitione unius sine alio, sed in distincta cognitione absoluti, & relativi. Nihilominus tamen existimo, D. Thomam non sine causa hanc distinctionem hoc loco præmississe, ut in solutione ad tertium explicabo.

c Primum argumentum D. Th. est, naturæ convenit assumere ratione personæ; ergo abstracta persona non posset assumere naturam. Respondet negando consequentiam, quia si abstraheretur a natura divina relationes, jam id, quod maneret in Deo, esset persona, quia esset subsistens. Unde etiam potest applicari solutio distinguendo antecedens, nunc enim convenit naturæ assumere ratione personæ relativæ, si autem abstraherentur relationes, maneret persona absoluta, & ita ratione illius fieri posset assumptio.

In qua solutione considerandum est id, quod D. Th. ait, quod Deo in abstracto tribuitur, si secundum se consideretur, aliquid esse subsistens, applicatum ad præsentem questionem dupliciter intelligi posse: uno modo, quod si natura divina intelligeretur existere sine relationibus, consequenter intelligeretur habere aliquam subsistentiam, quam nunc non habet, per quam esset subsistens, & per consequens persona: sicut dicere solemus de humanitate Christi, si separaretur a Verbo, fore subsistentem, non quidem per subsistentiam, quam nunc habet, sed quia propriam statim reciperet, non enim potest separata, omni subsistentia carere. Et hic sensus sufficit sine dubio ad solvendum argumentum: sed non videtur adeo consentaneus sensui, & verbis tituli articuli, ut explicatum est, nec etiam rationi, quam reddit D. Th. scilicet quia in Deo idem est, quod est, & quo est.

Unde est alius sensus, quod si natura divina intelligeretur existere sine relationibus, intelligeretur manere subsistens ex se, & ex vi modi essendi, quem nunc habet, etiamsi non intelligeremus illi addi subsistentiam, in quo superat humanitatem a Verbo, separatam. Ratio est, quia si humanitas separaretur a Verbo fieret subsistens per naturalem consecutionem (quippe in rerum natura sine aliquo existendi modo consistere non potest), non quia formaliter ex vi sui conceptus subsistens sit: at vero natura divina non solum hac ratione maneret subsistens, sed quia ex se non tantum est quo est, sed etiam quod est: quæ ratio a D. Th. reddita in hoc sensu favet multum

supra tractatæ opinioni de essentiali subsistentia. Quod vero addidit naturam sic subsistentem fore personam, intelligendum est secundum eam fictionem, quæ ponit illam in re ipsa abstracte subsistentem sine aliis personalitatibus, atque adeo incommunicabilem. Et ex his explicata manet solutio ad secundum, quæ eandem continet doctrinam.

d Tertium argumentum est, abstracta personalitate nihil manet; ergo nihil esset, quod posset assumere. Respondet breviter, & obscure, antecedens esse verum de abstractione per modum resolutionis, non tamen de abstractione secundum modum jam dictum. In qua solutione explicanda multum laborat Cajet. inquirendo, quid sit abstractio per modum resolutionis. Sed ne immoremur in re non admodum necessaria, mihi breviter videtur, abstractionem per modum resolutionis vocasse D. Th. illam, quæ vere unum ab alio separatur, vel distinguitur, & hæc dicit non habere locum inter essentialiam, & relationes divinas, ut patet ex distinctione data in corpore articuli, quam ad hunc finem D. Th. præmisit. Ex quo fit, ut simpliciter & absolute impossibile sit naturam divinam, abstractam re ipsa a proprietatibus relativis, assumere posse, quia simpliciter impossibile est naturam sic esse abstractam, & esse eandem naturam, quæ nunc est, ut recte probat hoc tertium argumentum. Nihilominus tamen ex hypothese posita per intellectum, quæ præscindit unum ab alio, vel qui fingit unum manere sine alio, etiamsi in re non distinguantur, vera est illa propositio, quod si natura esset sic abstracta, posset assumere; & hoc modo est facilis argumenti solutio.

## ARTICULUS IV.

Utrum una persona possit sine alia naturam creatam assumere.

**A**D quartum sic proceditur, Videtur, quod una persona non possit assumere naturam creatam, alia non assumente. Indivisa enim sunt opera Trinitatis, ut dicit Aug. in Enchirid. sicut autem trium personarum est una essentia, ita & una operatio. Sed assumere est operatio quedam. Ergo non potest convenire uni personæ divinæ, quin conveniat alii.

2 Præterea: Sicut dicimus personam Filii incarnari, ita & naturam: tota enim divina natura in una suarum hypostasum incarnata est: ut dicit Damasc. in 3. lib. Sed natura communis est tribus personis: ergo & assumptio.

3 Præterea: Sicut humana natura in Christo assumpta est a Deo, ita etiam & homines per gratiam assumuntur ab ipso, secundum illud Rom. 14. Deus illum assumpsit. Sed hæc assumptio communiter pertinet ad omnes personas: ergo & prima.

Sed contra est quod Dionys. 2. c. de Divi. nom. in incarnationis mysterium dicit pertinere ad discretam Theologiam: secundum quam scilicet aliquid distinctum dicitur de divinis personis.

a Respondeo dicendum, quod (sicut dictum est) assumptio duo importat, scilicet actum assumentis, & terminum assumptionis. Actus autem assumentis procedit ex divina virtute, quæ communis est tribus personis, sed terminus assumptionis est persona, sicut dictum est: & ideo id, quod est actionis in assumptione, commune est tribus personis: sed id, quod pertinet ad rationem termini, convenit ita uni personæ, quod non alii. Tres enim persone fecerunt, ut humana natura uniretur uni personæ Filii.

b Ad primum ergo dicendum, quod ratio illa procedit ex parte operationis. Et sequeretur conclusio, si solam illam operationem importaret absque termino, qui est persona.

Ad secundum dicendum, quod natura dicitur incarnata, sicut & assumens, ratione personæ, ad quam terminata est unio (sicut dictum est), non autem prout est communis tribus personis. Dicitur autem tota natura divina incarnata, non quia sit incarnata in omnibus personis, sed quia nihil deest de perfectione divine nature personæ incarnatæ.

Ad tertium dicendum, quod assumptio quæ fit per gratiam adoptionis, terminatur ad quandam participationem divine nature secundum quandam assimilationem ad bonitatem illius: secundum illud 2. Pet. 1. Ut divina consortes nature, &c. Et ideo huiusmodi assumptio

22.  
1. d. 1. q. 2.  
art. 1.

Enchir. c.  
38. a med.  
tom. 83.

Lib. 3.  
orth. fidei  
c. 6.

Cap. 2. p. 1.  
a medio &  
ante me-  
dium.

Art. 1. hu-  
jus quest.

Art. 1. hu-  
jus quest.

Art. 1. hu-  
jus quest.



communis est tribus personis, & ex parte principii, & ex parte termini. Sed assumptio, quæ est per gratiam unionis, est communis ex parte principii, non autem ex parte termini, ut dictum est.

## COMMENTARIUS.

Art. 1. hujus quæst.

**H**ic articulus potest intelligi non solum de possibili, ut sonat, sed etiam de facto, ut D. Th. respondet incarnationem factam esse: optime etiam & a fortiori concludens esse possibile, quandoquidem factum est. Et ita hic articulus est sufficienter expositus ex supra tractatis.

**b** In responsione ad primum, quoniam D. Th. ait in verbo assumptionis importari nunc terminum unionis, qui est persona, colligit Cajet. sentire D. Th. posse dari aliquem terminum hujus unionis, qui non sit persona, quia non sine causa addidit illam restrictionem: *Qui est persona*. Sed revera D. Th. hoc loco nihil illi sententiæ favet, quia illud non est additum per modum restrictionis, sed ad explicandum, cur ex parte termini possit unio esse propria, & non communis omnibus personis, videlicet, quia ille terminus est persona. Cætera clara sunt.

## ARTICULUS V.

*Utrum qualibet persona divina potuerit humanam naturam assumere.*

23.  
3. dist. 1. q.  
2. art. 3.

**A**d quintum sic proceditur. Videtur, quod nulla alia persona divina potuerit humanam naturam assumere, præter personam Filii. Per hujusmodi enim assumptionem factum est, quod Deus sit filius hominis. Sed inconveniens esset, quod esse Filium hominis conveniret Patri vel Spiritui sancto: hoc enim vergeret in confusionem divinarum personarum. Ergo Pater vel Spiritus sanctus carnem assumere non potuit.

**2** Præterea per incarnationem divinam, homines afsecuti sunt adoptionem filiorum, secundum illud Roman. 8. Non accepistis spiritum servitutis iterum in timore, sed spiritum adoptionis filiorum. Sed filiatio adoptiva est participata similitudo filiationis naturalis, quæ non convenit nec Patri, nec Spiritui sancto: unde dicitur Rom. 8. Quos præscivit, & prædestinavit conformes fieri imaginis Filii sui. Ergo videtur, quod nulla alia persona potuerit incarnari, præter personam Filii.

**3** Præterea: Filius dicitur missus & genitus nativitate temporali, secundum quod incarnatus est. Sed Patri non convenit mitti, quia etiam est innascibilis: ut in prima parte habitum est\*: ergo saltem persona Patris non potuit incarnari.

**Sed contra** est, quod quicquid potest Filius, potest Pater & Spiritus sanctus: alioquin non esset eadem potentia trium personarum: sed Filius potuit incarnari. Ergo similiter Pater & Spiritus sanctus.

**Respondeo** dicendum, quod sicut dictum est\*, assumptio duo importat, scilicet ipsum actum assumptis, & terminum assumptionis: principium autem actus est virtus divina, terminus autem est persona. Virtus autem divina communiter & indifferenter se habet ad omnes personas: eadem etiam est communis ratio personalitatis in tribus personis, licet proprietates personales sint differentes. Quandoquidem autem virtus aliqua indifferenter se habet ad plura, potest ad quodlibet eorum suam actionem terminare: sicut patet in potentiis rationalibus, quæ se habent ad opposita, quorum utrumque agere possunt. Sic ergo divina virtus potuit naturam humanam unire persone Patri vel Spiritui sancti, sicut univit eam persone Filii. Et ideo dicendum, quod Pater vel Spiritus sanctus potuit carnem assumere, sicut & Filius.

**Ad primum** ergo dicendum, quod filiatio temporalis, quæ Christus dicitur filius hominis, non constituit personam ipsius, sicut filiatio æterna: sed est quiddam consequens nativitatem temporalem. Unde si per hunc modum nomen Filiationis ad Patrem vel Spiritum sanctum transferretur, nulla sequeretur confusio divinarum personarum.

**Ad secundum** dicendum, quod filiatio adoptiva est quædam participata similitudo filiationis naturalis: sed fit in nobis appropriate a Patre, qui est principium naturalis filiationis, & per donum Spiritus sancti, qui est amor Patris & Filii: secundum illud Galat. 4. Misit Deus Spiritum Filii in corda nostra clamantem, Abba pater. Et ideo sicut, filio incarnato, adoptivam filiationem ac-

cepimus ad similitudinem filiationis naturalis ejus: ita, Patre incarnato adoptivam filiationem reciperemus ab eo, tanquam a principio naturalis filiationis, & a Spiritu sancto tanquam a nexu communi Patris & Filii.

**Ad tertium** dicendum, quod Patri convenit esse innascibilem secundum nativitatem æternam, quod non excluderet nativitas temporalis. Mitti autem dicitur filius Dei secundum incarnationem, eo quod est ab alio, si ne quo incarnatione non sufficeret ad rationem missionis.

**T**am quæstio ipsa, quam litera D. Thom. perspicua est, neque aliquid addendum occurrit.

## ARTICULUS VI.

*Utrum plures persona divine possint assumere unam numero naturam.*

**A**d sextum sic proceditur. Videtur, quod due persone divine non possint assumere unam & eandem numero naturam. Hoc enim supposito, aut essent unus homo, vel plures. Sed non plures: sicut enim una natura divina in personis pluribus non patitur esse plures Deos, ita una natura humana in pluribus personis non patitur esse plures homines. Similiter etiam non possent esse unus homo: quia est iste homo, unus homo, qui demonstrat unam personam: & sic tolleretur distinctio trium personarum divinarum, quod est inconveniens. Non ergo due aut tres persone possunt accipere unam naturam humanam.

**2** Præterea: Assumptio terminatur ad unitatem persone: ut dictum est†. Sed non est una persona Patris & Filii & Spiritus sancti. Ergo non possunt tres persone assumere unam naturam humanam.

**3** Præterea, Damasc.† dicit in 3. lib. & Aug. in 1. de Tri.\* quod ex incarnatione Filii Dei consequitur, quod quicquid dicitur de Filio Dei, dicitur de filio hominis, & e converso. Si ergo tres persone assumerent unam naturam humanam, sequeretur, quod quicquid dicitur de qualibet trium personarum, diceretur de illo homine: & e converso, quæ dicerentur de illo homine, possent dici de qualibet trium personarum. Sic ergo id, quod est proprium Patris scilicet generare filium ab æterno, diceretur de illo homine: & per consequens diceretur de Filio Dei, quod est inconveniens. Non ergo est possibile, quod tres persone divine assumant unam naturam humanam.

**Sed contra**: Persona incarnata subsistit in duab. naturis divina scil. & humana. Sed tres persone possunt subsistere in una natura divina. Ergo etiam possunt subsistere in una natura humana, ita scil. quod sit una natura humana a tribus personis assumpta.

**b** Respondeo dicendum, quod sicut supradictum est†, ex unione anime & corporis in Christo non fit neque nova persona, neque nova hypostasis: sed fit una natura assumpta in personam vel hypostasim divinam. Quod quidem non fit per potentiam naturæ humanæ, sed per potentiam divine persone. Est autem talis divinarum personarum conditio, quod una earum non excludit aliam a communione ejusdem nature, sed solum a communionem ejusdem persone. Quia igitur in mysterio incarnationis tota ratio facti est potentia facientis (ut Aug. dicit in Epist.† ad Volusian.) magis circa hoc est judicandum secundum conditionem divine persone assumptis, quam secundum conditionem nature humanæ assumptæ. Sic ergo non est impossibile divinis personis, ut due vel tres assument unam naturam humanam. Esset tamen impossibile, ut assumerent unam\* hypostasim, vel unam personam humanam: sicut & Ansel.\* dicit in lib. cur Deus homo, quod plures persone non possunt assumere unum eundemque hominem: scilicet in unitatem persone.

**c** Ad primum ergo dicendum, quod hac positione facta, scil. quod tres persone assumerent unam humanam naturam, verum esset dicere, quod tres persone essent unus homo, propter unam naturam humanam. Sicut enim nunc verum est dicere, quod tres persone sunt unus Deus propter unam divinam naturam, sic verum esset dicere, quod essent unus homo propter unam naturam humanam. Nec ly unus importaret unitatem persone, sed unitatem in natura humana. Non enim posset argui ex hoc, quod tres persone sunt unus homo, quod essent unus simpliciter: nihil enim prohibet dicere, quod homines, qui sunt plures simpliciter, sint unus quantum ad aliquid: puta unus populus. Et sicut Aug.† dicit 6. de Trin. diversum est natura Spiritus Dei

24.  
3. dist. 1. q. 2.  
art. 4.

Art. 2. hujus quæst.

Damasc. li. 3. c. 3. & 4.  
Lib. 1. ex c. 11. 12. & 13. colligit tom. 3.

2. p. q. 43.  
art. 5. & q. 32. art. 3.

Art. 1. hujus quæst.

q. 2. art. 5.  
ad 1.

Est epist. 3. non multum ante medium to. 2.

Lib. 2. cur Deus homo c. 9. circa principium.

Lib. 9. c. 3. ante medium to. 3.



*Dei & spiritus hominis, sed inherendo fit unus Spiritus secundū illud 1. Cor. 6. Qui adheret Deo, unus spiritus est.*  
*d Ad secundum dicendum, quod illa positione facta, humana natura esset assumpta in unitatē, non unius personae, sed in unitatem singularum personarum: ita scilicet quod sicut divina natura habet naturalem unitatem cum singulis personis: ita natura humana haberet unitatem cum singulis per assumptionem.*

*c Ad tertium dicendum, quod circa mysterium incarnationis fit communicatio proprietatum pertinentium ad naturam: quia quaecunque conveniunt naturae, possunt predicari de persona subsistente in natura illa, cujuscunque naturae nomine significetur. Prædicta igitur positione facta de persona Patris poterunt predicari, & ea quae sunt humanae naturae, & ea quae sunt divinae, & similiter de persona Filii & Spiritus sancti. Non autem id quod conveniret personae Patris ratione propria personae, posset attribui personae Filii aut Spiritus sancti propter distinctionem personarum, quae remaneret. Posset ergo dici, quod sicut Pater est ingenuus, ita homo esset ingenuus, secundum quod ly homo supponeret pro persona Patris. Si quis autem ulterius procederet, Homo est ingenuus, Filius est homo, ergo Filius est ingenuus: esset fallacia figurae dictionis vel accidentis. Sicut & nunc dicimus Deum esse ingenuum, quia Pater est ingenuus: nec tamen possumus concludere, quod filius sit ingenuus, quamvis sit Deus.*

## COMMENTARIUS.

Titulus  
art. culi.

**D**Uobus modis intelligi potest, plures personas assumere unam naturam, primo terminando illam per aliquam communem & absolutam proprietatem: secundo terminando proxime, & immediate per proprias relationes; hunc posteriorem sensum disputat D. Thom. priorem nunquam expresse attigit, nos postea expresse attingemus.

Respond.

*b* Affirmat igitur primo D. Thom. posse duas, vel tres personas eandem numero naturam simul assumere. Ratio est, quia ex parte divinarum personarum non est repugnantia, cum ab ejusdem naturae consortio non se excludant necessario, neque ex parte naturae assumendae, cum hæc assumptio non fiat juxta conditionem, seu capacitatem naturalem illius, sed juxta omnipotentiam facientis, & capacitatem obedientiae in natura assumenda. Secundo addit D. Th. in fine articuli nō posse plures personas divinas assumere unam personam, vel hypostasim humanam, quia divinae personae excludunt se a communione ejusdem personae. Et juxta hanc conclusionem explicat D. Th. Anselmum, qui l. 2. Cur Deus homo, c. 9. visus est priorem conclusionem negare, dicens non posse plures personas unum, eundemque hominem assumere.

In qua secunda assertionem, quod ad rem attinet, nihil est difficultatis, quod vero attinet ad Anselmum, difficultatem patitur D. Th. expositio: ut enim Durand. in 3. d. 1. q. 3. obiicit, ita negat Anselmus eo loco plures personas unum, eundemque hominem assumere posse, ut tamen affirmet posse unam personam illum assumere; loquitur ergo de assumptione naturae, & non personae, quia si esset sermo de assumptione personae, neque in una persona fieri posset. Quod vero Cajet. respondet, aliud esse assumere hominem; aliud assumere unum, eundemque nomen, non video, quid ad rem, vel ad literam Anselmi faciat, cum ille sermonem non variet, sed eodem modo de una, & de omnibus personis loquatur, concedendo uni, quod pluribus negat. Quin potius impertinens videri posset hoc specialiter negare pluribus personis, si sermo esset de assumptione personae; hoc enim si pluribus repugnat, sane ideo est, quia repugnat singulis, seu quia persona creata assumptibilis non est: unde si per impossibile persona divina creatam posset assumere, plures quidem personas eandem assumere nihil repugnaret, propter rationem prioris conclusionis, quae tunc pari modo convinceret: atque illa hypothesi constituta, quamvis tres personae a consortio ejusdem increatae personae excludant sese, quippe cum illa non sit assumptibilis, tamen ab ejusdem creatae personae communione haud sane excluderentur, cum illa e contra assumptibilis fingatur; si ergo nunc se excludunt, ideo est, quia singulae personae excluduntur a communione, seu terminatione.

Quocirca existimo mentem Ansel. non obicere colligi posse ex ejus verbis: quærit enim ibi, in qua persona Deus hominem assumpserit, id est, homo factus fuerit, &

Suarez Tom. XVI.

& subdit rationem dubitandi, dicens: *Plures enim personae nequeunt unum, eundemque hominem assumere in unitatem personae, quare in una persona tantum id fieri necessesse est*: loquitur ergo Anselmus supposita fide incarnationis jam factae, qua credimus Christum unum, eundemque hominem personaliter fuisse, & inde infert ejus humanitatem non pluribus, sed uni tantum personae fuisse conjunctam: & ideo non simpliciter, sed cum addito negavit tres personas posse eandem humanitatem assumere, scilicet in unitatem personae: hoc autem modo bene potest una persona assumere humanitatem in unitatem personae, juxta quam expositionem auctoritas Ansel. nihil obstat priori conclusioni D. Tho. Et ita intellexit Bonav. in 3. d. 1. art. 1. q. 3. & Richard. ar. 1. q. 4. & expositio D. Tho. fortasse non est ab hoc sensu aliena, nam quia tres personae non possent assumere hominem in unitatem personae, nisi assumendo personam ipsam, cum ipsae personae inter se confundi non possint, ideo pro eodem duxit uno, vel alio modo Anselmum exponere, ut Cajet. etiam indicavit.

In solutione ad primum tangit D. Tho. quæstionem, si tres personae assumerent unam naturam, an essent unus homo, quam postea verfabimur; nunc solum est explicanda sententia D. Tho. quoniam Cajetan. illam detorquet. Primum enim affirmat D. Tho. in eo casu tres personas tam absolute, & simpliciter unum hominem fore propter unam humanam naturam, sicut sunt unus Deus propter unam divinitatem; subjungit vero deinde, in eo casu non fore tres personas unum simpliciter, unde Cajetan. colligit non fore tunc simpliciter unum hominem, quod si verum esset, D. Thom. paucis verbis sibi repugnaret, vel certe sentiret tres personas non esse simpliciter unum Deum, sed secundum quid. Deinde est aperte contra mentem ejus, sic enim dicit: *Nec posset argui ex hoc, quod tres personae sunt unus homo, quod essent unus simpliciter*; ubi non negat esse unum hominem simpliciter, sed quod essent unus absolute, & sine addito; & ratio (quam D. Th. etiam tetigit) est, quia unus homo etiam absolute, & simpliciter dictus, non dicit unitatem personae, sed naturae: at vero unus absolute dictus dicit unitatem personae, sicut tres personae dicuntur unus Deus, non tamen unus absolute; aliud est ergo esse unum hominem simpliciter, aliud esse unum simpliciter. Primum affirmat D. Tho. secundum negat. Et ita facile patet tota litera hujus solutionis, & exemplum, quod adducit, accommodare intelligendum est, quantum ad hoc explicandum conferre potest, non quia in omnibus sit simile, ut facile cuicumque consideranti patebit.

*d* Secundum argumentum D. Th. est: assumptio terminatur ad unitatem personae, sed in eo casu non ita posset terminari, ut dictum est, ergo. Respondet D. Th. in eo casu assumptionem in singulis personis ad unitatem personae terminari, seu naturam humanam in unitatem assumi, non unius personae tantum, sed singularum personarum: sensus est, in eo casu esse tres assumptiones, tresque uniones, atque earum singulas ad unitatem personae terminari: & hoc tantum esse de ratione assumptionis, vel unionis.

*e* In solutione ad tertium explicat D. Tho. qualis esset in eo casu idiomatum communicatio, tam inter Deum & hominem, quam inter personas inter se. Et litera est satis clara, pendet vero ex iis, quae traduntur in 1. p. q. 39. & quae infra dicemus, qu. 16. itaque in communibus & essentialibus esset communicatio idiomatum, tam inter hunc Deum & hunc hominem, quam inter personas: in notionalibus vero, seu personalibus esse posset inter hunc hominem, & singulas personas, quia pro singulis posset hic homo supponere, non tamen inter personas inter se, quia nunquam una pro alia supponit.

## ARTICULUS VII.

*a* *Utrum una persona divina possit assumere duas naturas humanas.*

**A**D septimum sic proceditur. Videtur, quod una persona divina non possit assumere duas naturas humanas. Natura enim assumpta in mysterio incarnationis non habet aliud suppositum præter suppositum personae divinae: ut ex

1. d. 1. q. 3.  
art. 5.

R

su-



Ar. præc.  
& q. 1. a. 1.  
huius q. &  
ar. 2. & 3.

supradictis patet\*. Si ergo ponatur esse una persona divina assumens duas humanas naturas, esset unum suppositum duarum naturarum ejusdem speciei, quod videtur implicare contradictionem: non enim natura unius speciei multiplicatur, nisi secundum distinctionem suppositorum.

2. Præterea. Hac suppositione facta, non posset dici, quod persona divina incarnata esset unus homo: quia non haberet unam naturam humanam. Similiter etiam non posset dici, quod esset plures: quia plures homines sunt supposito distincti, & ibi esset tantum unum suppositum. Ergo prædicta positio est omnino impossibilis.

L. 3. Orth.  
fid. c. 7

3. Præterea. In incarnationis mysterio tota natura divina est unita toti nature assumptæ, id est, cuilibet parti ejus: est enim Christus perfectus Deus, & perfectus homo, totus Deus, & totus homo: ut Damasceus\* dicit in 3. lib. Sed due humane nature non possent totaliter sibi invicem uniri: quia oporteret, quod anima unius esset unita corpori alterius, & quod etiam duo corpora essent simul, quod confusionem induceret naturarum. Non ergo est possibile, quod una persona divina duas humanas naturas assumat.

Sed contra est, quod quicquid potest Pater, potest Filius. Sed Pater post incarnationem Filii potest assumere naturam humanam aliam numero ab ea, quam Filius assumpsit: in nullo enim per incarnationem Filii est diminuta potentia Patris vel Filii. Ergo videtur, quod Filius post incarnationem possit aliam humanam naturam assumere præter eam, quam assumpsit.

b. Respondeo dicendum, quod illud, quod potest in unum & non in amplius, habet potentiam limitatam ad unum. Potentia autem divina persona est infinita: nec potest limitari ad aliquid creatum. Unde non est dicendum, quod persona divina ita assumpsit unam naturam humanam quod non potuerit assumere aliam. Videretur enim ex hoc sequi, quod personalitas divinæ nature esset ita comprehensa per unam naturam humanam, quod ad ejus personalitatem alia assumi non posset, quod est impossibile: non enim increatum a creato comprehendere potest. Patet ergo, quod siue consideremus personam divinam secundum virtutem, quæ est principium unionis, siue secundum suam personalitatem, quæ est terminus unionis, oportet dicere, quod persona divina præter naturam humanam, quam assumpsit, possit aliam numero naturam humanam assumere.

Ad primum ergo dicendum, quod natura creata perficitur in sua ratione per formam, quæ multiplicatur secundum divisionem materie. Et ideo si compositio materie & forme constituat novum suppositum, consequens est quod natura multiplicetur secundum multiplicationem suppositorum: sed in mysterio incarnationis unio forme & materie, id est anime & corporis, non constituit novum suppositum, ut supra dictum est, & ideo posset esse multitudo secundum numerum ex parte nature propter divisionem materie absque distinctione suppositorum.

Ar. præc.

c. Ad secundum dicendum, quod posset videri dicendum, quod prædicta positio facta sequeretur, quod essent duo homines propter duas naturas absque hoc, quod essent ibi duo supposita: sicut & converso tres persone dicerentur unus homo propter unam naturam humanam assumptam, ut supra dictum est. Sed hoc non videtur esse verum: quia nominibus est utendum secundum quod sunt ad significandum\* imposita: quod quidem ex consideratione eorum, quæ apud nos sunt. Et ideo oportet circa modum significandi & consignificandi considerare ea, quæ apud nos sunt: in quibus nunquam nomen ab aliqua forma impositum pluraliter dicitur, nisi propter pluralitatem suppositorum. Homo enim, qui est duobus vestimentis indutus, non dicitur duo vestiti, sed unus vestitus duobus vestimentis: & qui habet duas qualitates, dicitur singulariter aliqualis secundum duas qualitates. Natura autem assumpta quantum ad aliquid, se habet per modum indumenti, licet non sit similitudo, quantum ad omnia, ut supra dictum est†: Et ideo si persona divina assumeret duas naturas humanas, propter unitatem suppositi, diceretur unus homo, habens duas naturas humanas. Contingit autem, quod plures homines dicuntur unus populus, propter hoc, quod conveniunt in aliquo: non autem propter unitatem suppositi. Et similiter si duo persone divine assumerent unam numero humanam naturam, dicerentur unus homo (ut supra dictum est†) non unitate suppositi, sed in quantum conveniunt in aliquo uno.

Qu. 2. ar. 6.  
2. d. 1.

Qu. 2. ar. 6.  
2. d. 1.

d. Ad tertium dicendum, quod divina & humana natu-

ra non eodem ordine se habent ad unam personam divinam, sed per prius comparatur ad ipsam divinam naturam, utpote quæ est unum cum ea ab aeterno. Sed natura humana comparatur ad personam divinam per posterius utpote assumpta ex tempore a divina persona: non quidem ad hoc quod natura sit ipsa persona, sed quod persona Dei in humana natura subsistat: filius enim Dei est sua deitas, sed non est sua humanitas. Et ideo ad hoc quod natura humana assumatur a divina persona, requiritur, quod divina natura unione personali uniatur toti nature assumptæ, id est secundum omnes partes ejus. Sed duarum naturarum assumptrarum esset uniformis habitudo ad personam divinam, nec una assumeret aliam. Unde non oporteret, quod una earum totaliter alteri uniretur, id est omnes partes unius omnibus partibus alterius.

#### COMMENTARIUS.

Titulus est clarus, & quamvis in litera limitetur ad humanas naturas, tamen sensus ad quascunque naturas assumptibiles extenditur, siue sint ejusdem, seu diversæ speciei, nam eadem est ratio de omnibus, & sensus est, an possint ita assumi, ut simul maneant unitæ.

Titulus articuli.

b. Affirmat igitur D. Tho. posse unam divinam personam duas naturas assumere, atque cum non limitet numerum, intelligit plane in quovis numero finito hoc posse fieri, etiam si in infinitum augeatur, quod totum probat illius ratio, scilicet quia personam divinam tam ut principium efficiens, quam ut terminus hujus unionis est simpliciter infinita, & ad hunc effectum sufficientissima: supponit vero D. Tho. ut per se notum, ex parte naturarum repugnantiam esse non posse: quia licet secundum naturalem capacitatem se se excludant a consortio ejusdem personæ, & connaturalis, tamen secundum capacitatem obedientialem non se excluderent a consortio ejusdem personæ infinite, & superioris ordinis: si enim nunc natura divina, & humana, quæ multo magis inter se distant, quam omnes creatæ nature, non se excludunt a communione ejusdem divinæ personalitatis, multo minus se excluderent nature creatæ inter se. Et hoc docuit etiam in solutione ad primum, quæ ex dictis sufficienter exposita est.

c. In solutione ad secundum definit, in eo casu unam personam habentem plures humanitates unum hominem fore, quod solum ex usu & significatione nominum colligit, de qua re inferius disputabimus.

d. Solutio ad tertium nonnulla continet notatione digna: primum enim querit D. Tho. an in eo casu nature assumptæ ita essent inter se unitæ, uti nunc humana divinaque, & respondet multo esse majorem unionem inter naturam divinam, & quamcunque assumptam, quam inter assumptas inter se, propter majorem unitatem divinæ nature cum Verbi personalitate, quæ doctrina sufficienter explicata est superiori disputatione, sectione secunda, conclusione secunda. Querit secundo, an in eo casu posset dici una humanitas prius assumpta aliam assumere, sicut nunc dicitur divina natura assumere humanitatem: Et respondet optime negando, tum quia una humanitas non esset principium assumendi aliam, tum quia non esset terminus assumptionis ejus; nunc enim divina natura propter summam unitatem, quam habet cum Verbo, dicitur ad se sumere, quia sumit ad personam Verbi, quæ est idem quod ipsa: at vero humanitas, licet esset unita Verbo, non tamen est ipsum Verbum, & ideo quod assumitur ad Verbum ipsum, non potest dici assumi ad humanitatem, præsertim cum dictum sit, unam naturam assumptam non uniri alteri, sicut divinitatem ipsam.

Addit tertiam quæstiunculam Cajetan. an esset tunc communicatio idiomatum inter naturas assumptas, verbi gratia inter angelum & hominem, & respondet negando: itaque si ille homo moreretur, non esset verum dicere angelum mori, sicut nunc est verum dicere Deum mori. Sed hæc sententia mihi videtur falsa, loquendo de propria communicatione idiomatum inter naturas in concreto significatas, quia hæc communicatio non fundatur nunc (ut ipse putat) in hoc, quod divinitas & persona verbi sunt omnino natura, sed in hoc, quod una & eadem persona sub utraque natura subsistit, & pro ea supponunt nomina, naturam ipsam in concreto significantia, ut videre etiam est inter duas formas accidentales existentes in eodem supposito, & expositorio syllogismo convinci potest; recte enim sequitur, hic homo patitur,

Communicatio idiomatum effectus in naturas assumptas



titur; ergo Verbum patitur: rursus sed Verbum est hic Angelus (suppono enim simul assumptisse naturam angelicam); ergo hic angelus patitur. Medina negat ultimam consequentiam, quia significatur, inquit, in illo consequenti hunc angelum pati in propria natura: sed contra, quia subiecta præsertim in concreto significata, pro materiali accipi solent; alias hæc esset falsa in illo casu, hic angelus creat, vel hic homo est genitus ab æterno; & ideo merito D. Th. admittit hanc communicationem idiomatum in eo casu, in 3. d. 1. q. 2. art. 5. quem sequuntur Gabr. ibi. q. 2. ar. 3. dub. 4. Marfil. in 3. q. 2. art. 3. dub. 3. Dixi, loquendo de propria communicatione in concreto, nam aliquæ prædicationes, quæ interdum fiunt in abstracto respectu divinæ naturæ, propter unitatem ejus cum sua persona, non possent extendi ad naturas assumptas; ut verbi gratia, hic homo dicitur esse sua divinitas, non tamen posset dici esse sua Angelica natura, vel quid simile.

An vero sicut dicitur natura divina incarnata, ita etiam posset dici natura angelica, vel e contrario natura humana angelizata (si ita loqui licet), controverti potest. Dicendum vero est, non posse dici naturam angelicam incarnatam, eodem modo quo divinitas, quia ut dictum est, non esset eodem modo unita carni; posset tamen alio modo dici, quatenus unita esset carni in eodem supposito.

## ARTICULUS VIII.

*Utrum fuerit magis conveniens, quod persona Filii assumeret humanam naturam, quam alia persona divina.*

**A**D OCTAVUM sic proceditur. Videtur, quod non fuerit magis conveniens Filium Dei incarnari, quam Patrem, vel Spiritum sanctum. Per mysterium enim incarnationis, homines ad veram Dei cognitionem sunt perducti secundum illud Jo. 18. In hoc natus sum, & ad hoc veni in mundum, ut testimonium perhibeam in veritati. Sed ex hoc, quod persona Filii Dei est incarnata, multi impediti fuerunt a vera Dei cognitione, ea, quæ dicuntur de Filio secundum humanam naturam, referentes ad ipsam Filii personam, sicut Arius, qui posuit inæqualitatem personarum propter hoc, quod dicitur Jo. 14. Pater major me est. Qui quidem error non provenisset, si persona Patris incarnata fuisset: nullus enim estimasset Patrem Filio minorem. Magis ergo videtur fuisse conveniens, quod persona Patris incarnaretur, quam persona Filii.

2. Præterea, incarnationis effectus videtur esse creatio quadam humane naturæ: secundum illud Galat. ult. In Christo Jesu, neque circumciso aliquid valet, nec præputium sed nova creatura: sed potentia creandi appropriatur Patri. Ergo magis decuisset Patrem incarnari, quam Filium.

3. Præterea incarnatio ordinatur ad remissionem peccatorum: secundum illud Matthæi primo. Vocabis nomen ejus Jesum; ipse enim salvum faciet populum suum a peccatis eorum. Remissio autem peccatorum attribuitur Spiritui sancto secundum illud Joan. 20. Accipite Spiritum sanctum, quorum remis. peccata, remit. eis. Ergo magis congruebat personam Spiritus sancti incarnari, quam personam Filii.

**Sed contra est, quod Damascenus dicit in 3. lib. \* In mysterio incarnationis manifestata est sapientia & virtus Dei: sapientia quidem, quia invenit difficillimi solutionem pretii quam decentissimam virtus autem, quia victum fecit rursus victorem. Sed virtus & sapientia appropriantur Filio: secundum illud 1. Cor. 1. Christum Dei virtutem & Dei sapientiam. Ergo conveniens fuit personam Filii incarnari.**

Respondeo dicendum, quod convenientissimum fuit personam Filii incarnari: Primo quidem ex parte unionis. Convenienter enim ea, quæ sunt similia, ununtur. Ipsi autem persone Filii, qui est Verbum Dei, attenditur uno quidem modo communis convenientia ad totam creaturam, quia verbum artificis, id est, conceptus ejus, est similitudo exemplaris eorum, quæ ab artifice fiunt. Unde Verbum Dei, quod est æternus conceptus ejus, & similitudo exemplaris totius creaturæ. Et ideo sicut per participationem hujus similitudinis creaturæ sunt in propriis speciebus insituta: sed mobiliter: ita per unionem Verbi ad creaturam.

Suarez Tomo XVI.

turam, non participatam, sed personalem, conveniens fuit reparari creaturam in ordine ad æternam & immobilem perfectionem. Nam & artifex per formam artis conceptam, quæ artificiatum condidit, ipsam, si collapsum fuerit, restaurat. Alio modo habet convenientiam specialiter cum humana natura, ex eo quod Verbum est conceptus æternæ Sapientie, a qua omnis sapientia hominum derivatur. Et ideo per hoc homo in sapientia perficitur, quæ est propria ejus perfectio, prout est rationalis, quod participat Verbum Dei, sicut discipulus instruitur per hoc, quod recepit verbum magistri: unde Eccle. 1. dicitur, Fons sapientie verbum Dei in excelsis. Et ideo ad consummatam hominis perfectionem conveniens fuit, ut ipsum Verbum Dei humane nature personaliter uniretur.

Secundo potest accipi ratio hujus congruentiæ ex fine unionis, qui est impletio prædestinationis, eorum scilicet, qui præordinati sunt ad hereditatem celestem, quæ non debetur nisi filiis: secundum illud Rom. 8. Si filii, & hæredes. Et ideo congruum fuit, ut per eum, qui est filius naturalis, homines participarent similitudinem hujus filiationis secundum adoptionem: sicut Apostolus ibidem dicit. Quos præscivit & prædest. conf. fieri ima. filii sui. Tercio potest accipi ratio hujus congruentiæ ex peccato primi parentis, cui per incarnationem remedium adhibetur. Peccaverat enim primus homo, appetendo scientiam: ut patet ex verbis serpentis promittentis homini scientiam boni & mali. Unde conveniens fuit, ut per Verbum veræ sapientiæ homo reduceretur in Deum, qui per inordinatū appetitū sc. etiā recefferat a Deo.

Ad primum ergo dicendum, quod nihil est, quo humana malitia non possit abuti: quando etiam ipsa Dei bonitate abutitur secundum illud Romanorum 2. An divitiis bonitatis ejus contemnitis: Unde etiam si persona Patris fuisset incarnata, potuisset ex hoc homo alicujus erroris occasionem sumere: quasi Filius sufficere non potuisset ad humanam naturam reparandam.

Ad secundum dicendum, quod prima rerum creatio facta est a potentia Dei Patris per Verbum. Unde & recreatio per Verbum fieri debuit a potentia Dei Patris, ut recreatio creationi responderet: secundum illud Cor. 5. Deus erat in Christo mundum reconcilians sibi.

Ad tertium dicendum, quod Spiritui Sancto proprium est, quod sit donum Patris & Filii. Remissio autem peccatorum fit per Spiritum Sanctum tanquam per donum Dei. Et ideo convenientius fuit ad justificationem hominum, quod incarnaretur Filius, cujus Spiritus Sanctus est donum.

**D**E hac re jam disputatum est, & litera nulla indiget expositione.

## DISPUTATIO XIII.

In quatuor sectiones distributa.

*De termino assumptionis ex parte persone assumptis, in quavis incarnatione possibili.*

**A**D tria capita potest revocari disputatio, scilicet ad naturam divinam, ad personas divinas, & ad personas creatas: de natura enim creata, suppositis iis, quæ de natura divina dicemus, nihil dicendum supererit. Rursus personæ assumptæ comparari possunt, vel plures personæ ad unam naturam, vel una persona ad plures naturas, præter has nulla cōparatio aut quæstio videtur possibilis.

## SECTIO I.

*Utrum hic Deus, ut abstrahit a personis divinis, possit naturam creatam assumere.*

**H**Æc quæstio non eo modo pertractanda est, quo a D. Thoma disputatur art. 3. in sensu conditionato ex hypothesi impossibili, nam illa nullam habet difficultatem, & sufficiunt, quæ Sanctus ibi docuit; sed versabitur in alio sensu in litera subnotato, scilicet, an hic Deus pro ut nunc est divinis personis quiddam commune, naturam creatam per proprietatem absolutam, & communem terminare possit. Dupliciter autem intelligo, fieri id posse; uno modo, ut uno fiat primo & per se ad hunc Deum, ita præcise, ut non fiat ad proprietates relativas ut sic, nisi tantum ratione absoluti, ad eum modum, quo nunc tres personæ divinæ uniuntur in substantia absoluta, sed non in relativis. Secundo modo, ut licet unio primo fiat in absoluto, consequenter tamen fiat etiam



in omnibus personalitatibus relativis : hoc secundum pendet ex alia questione infra tractanda, ubi decidetur . De priori igitur instituitur disputatio .

In qua est prima sententia negans esse possibilem talem modum unionis . Alenf. 3. p. q. 2. memb. 3. & q. 7. mem. 1. art. 3. Bonaven. in 3. d. 1. art. 1. q. 3. & d. 5. ar. 1. q. 4. Fundantur in hoc, quod ipsi negant subsistentiam absolutam in Deo : non potest autem intelligi unio naturæ humanæ ad divinam, nisi in aliqua subsistentia. Quæ opinio supposito illo fundamento optime procedit, atque in Conciliis & Patribus fundamentum habent, quia non agnoscunt aliam unionem substantialem inter naturam divinam, & creatam, nisi secundum subsistentiam, quia in unam naturam conjungi non possunt, ut supra ostensum est: aliud autem genus unionis substantialis nec a sanctis Patribus est cognitum, nec facile fingi potest. Verum tamen absoluta subsistentia immerito negatur Deo, ut supra late probatum est: sed Capreolus in 3. d. 1. q. 1. ad argumenta contra quartam conclusionem, quamvis admittat subsistentiam absolutam, negat tamen hanc unionem esse possibilem: existimat enim illam subsistentiam ut sic non posse esse sufficientem rationem terminandi naturam creatam, sed oportere, ut sit quasi modificata, & constituta in esse incommunicabili per relationem; & in hoc est probabilis hæc sententia, cujus fundamenta infra videmus, & favet illi D. Th. indicans naturæ divinæ non convenire assumere nisi ratione personæ, ut videre est hic ar. 2. & ar. 3. ad 1. & 2. & q. seq. ar. 5. ad 1. In alio tamen videtur Capreolus, non satis consequenter loqui: ponit enim, ut supra vidimus duplicem dependentiam naturæ creatæ assumptæ a persona divina, alteram, quatenus per ejus personalitatem subsistit, alteram quatenus per illius existentiam essentialem, & absolutam existit; quanquam ergo prior dependentia terminari non possit, nisi ad relationem immediate, cur non posset fieri secunda sine illa priori? Atque adeo assumi natura humana, non ad subsistendum, sed ad existendum per ipsum esse essentialem divinæ? Et hæc obiectio procedit contra omnes Thomistas, qui dicunt humanitatem assumi, non tantum ad subsistendum, sed etiam ad existendum. Sed fortasse aliquo modo respondere possent, ut jam dicam.

Dico ergo primo: Natura divina abstracta a relationibus, si præcise consideretur, ut natura, seu tanquam forma nullam habens propriam, & singularem subsistentiam, non potest ut sic intelligi assumere naturam creatam. In hac omnes fere Theologi conveniunt, & eam convincunt Alexand. & Bonaventura, tum quia talis unio naturarum non posset esse, nisi in natura, quia ex naturis ut sic, immediate inter se unitis, & non in aliqua natura, vel subsistentia, quid posset resultare, nisi natura? cum non posset resultare persona, nec aliquid subsistens; tum etiam, quia nihil posset natura divina ut sic communicare humanæ naturæ, quia non posset illam informare, neque essentialiter constituere in esse entis talis speciei, vel rationis, quod est munus naturæ ut sic.

Dices: Natura divina sic concepta intelligitur habere esse existentialem; ergo posset illud communicare naturæ creatæ, & trahere illam ad existendum suo esse. Ego facile respondeo hoc genus unionis omnino implicare contradictionem, quia impossibile est, ut aliqua entitas realis existat per existentiam, vel entitatem realiter a se distinctam, sicut impossibile est, ut aliqua entitas per entitatem a se distinctam in esse entitatis constituatur; quia, ut sæpe dixi, nihil aliud est per existentiam constitui, quam formaliter fieri entitatem actualem. Thomistæ vero respondere possent, vel sequendo opinionem Cajetani dicentis constitutionem suppositi esse priorem existentia, quia per personalitatem fit persona capax existentia: hinc enim fieri videtur naturam creatam non esse capacem existentia divinæ, nisi præintelligatur personata personalitate divina, aliàs deberet præintelligi personata personalitate propria, & consequenter inassumptibilis, & incapax existentia alienæ; vel sequendo opinionem Capreoli, scilicet in creaturis personalitatem esse existentiam ipsam substantialem, nam inde fieri videtur, non posse impediri sub ratione existentia, nisi impediat sub ratione personalitatis, atque adeo non posse trahi naturam creatam ad existentiam alienam, nisi simul trahatur ad aliquam personalitatem.

Dico secundo: Natura divina, ut intelligitur abstracta a tribus personis, & esse hic Deus subsistens propria & singulari subsistentia absoluta, & essentiali, potest immediate assumere naturam creatam, illam terminando per subsistentiam essentialem præcise. Hæc est communior sententia Theologorum, in 3. dist. 1. Sco. q. 2. §. Ad q. igitur. Durandus, q. 2. Richard. ar. 1. q. 4. Gabr. qu. 1. art. 3. dub. 4. Okam q. 1. Cajetan. hic art. 3. quem recentiores Thomistæ sequuntur. Ratio vero est, quia, posita illa subsistentia, quam supra esse probavimus, nulla est ratio, cur non possit esse sufficiens terminus assumptionis, quia in ratione subsistendi non est minus perfecta, quam subsistentia relativa; neque est ulla ratio, ob quam necessario requiratur incommunicabilitatem, ut possit esse ratio terminandi, vel sustentandi naturam creatam, ut constabit solvendo omnem apparentem repugnantiam, quæ hic potest consingi.

Prima est, quia cum hæc subsistentia absoluta sit omnino idem cum relativis, non videtur posse communicari, & uniri humanæ naturæ, quin uniantur relativæ; sicut si in Deo esset una tantum persona, non posset assumere naturam ad subsistentiam, quin assumeret ad personalitatem, quia esset omnino idem; sed non sunt nunc minus idem: sicut etiam e contrario, non potuit nunc uniri subsistentia relativa Verbi humanæ naturæ, quin consequenter fuerit unita natura, quæ est idem cum illa. Sed ex hoc capite nulla sine dubio ostenditur repugnantia, nam quamvis esse absolutum, & relativum in Deo, & in unaquaque persona Trinitatis, sint idem in re ipsa, nihilominus communicat Pater Filio esse absolutum, & non suum proprium esse relativum, & similiter Pater & Filius Spiritui sancto; ergo simili modo non repugnabit tres personas communicare suam subsistentiam absolutam naturæ assumptæ, non communicando relativam ut sic. Unde non esset eadem ratio, si intelligeremus in Deo esse tantum unam personam, quia tunc subsistentia ipsa esset essentialiter incommunicabilis alicui personæ, & ideo non posset communicari naturæ assumptæ, nisi prout in re esset, scilicet ut incommunicabilis: at vero nunc revera datur in re ipsa subsistentia communis multis personis, quæ in suo essentiali conceptu non includit incommunicabilitatem, & ideo ut sic potest communicare naturæ creatæ.

Quocirca licet nunc hæc subsistentia, & relatio ita idem sint, quemadmodum essent, si persona Dei tantum una, & absoluta reperiretur, tamen non eodem modo: tunc enim essent adæquate idem, & convertibiliter, quia cum quocumque esset idem natura, esset idem persona, & e contrario; nunc vero non ita est, sed cum aliquo est idem natura, & non persona, & ideo alicui potest etiam communicari subsistentia communis naturæ, cui non communicetur persona. Denique ex mysterio incarnationis, prout factum est, potius confirmari potest, quod dicimus, quia licet subsistentia absoluta, & relativa sint idem, nihilominus relativa est ratio terminandi, & non absoluta ut sic, sed solum ut includitur in relativa. In quo etiam est inter illas notanda differentia deserviens proposito, nam absoluta includuntur essentialiter in relativis, relativa autem non ita essentialiter includuntur in conceptu absoluti, & ideo facilius intelligi potest subsistentiam absolutam uniri naturæ creatæ, non unitis relativis, ut sic, quam e contrario.

Secunda ratio repugnantia sumi potest ex parte subsistentia absolute, quatenus communicabilis est; videtur enim impossibile, esse naturam a parte rei subsistentem, & non esse ultimam terminatam per subsistentiam incommunicabilem: tum quia aliàs daretur hic homo a parte rei, qui non esset persona, quod non videtur intelligi posse; tum etiam quia talis subsistentia, cum personalitas non sit, propriam personalitatem humanæ naturæ impedire non posset: tum præterea, quia humana natura tantum videtur capax personalitatis ut sic, quia tota dependentia ejus est in subsistendo personaliter, & incommunicabiliter; tum denique quia aliàs daretur unio media inter unionem in natura, vel in persona, quod non solum est contra D. Thomam in tota hac materia, sed etiam contra communem modum loquendi Patrum, & Conciliorum, ut videre est in Conciliis Toletan. VI. & XI. in principio, & aliis supra citatis, unde Ansel. lib. de incarnat. Verbi c. 4. arguens contra eos, qui asserbant, si Verbum incarnatum esset, necessario sequi, alias

Deus per  
subsistentiam  
absolutam  
potest  
assumere.

Obiectio 1.  
ex  
identitate  
subsistentia-  
rum.

Responsio.

Obiectio 2.  
Responsio.

Responsio 2.

Obiectio 2.  
ex  
com-  
muni  
ca-  
bilitate.

per-



personas esse incarnatas, dicit eos necessario ponere unionem factam esse in natura, sentiens non posse esse aliam unionem tribus personis commune m.

**Responsio** Sed hæc omnia nullam repugnantiam sufficienter ostendunt, quia cum illa subsistentia absoluta vera sit, & realis, imo perfectiori modo includat modum essendi in se & per se, quam omnis alia subsistentia, non est, cur negetur ex propria ratione absoluta sine consortio relativo, ad terminandam & sustentandam alienam naturam sufficientem esse, nam licet ipsa non sit incommunicabilis, tamen in re semper ac necessario est communicata personis incommunicabiliter subsistentibus, & ideo sicut non repugnat hunc Deum realiter communicabilem multis personis subsistere a parte rei communicabili subsistentia, in re tamen non distincta a persona incommunicabiliter subsistente, ita non est, cur repugnet hunc hominem esse a parte rei subsistentem per communicabilem subsistentiam, existentem tamen in eisdem personis incommunicabiliter subsistentibus.

Unde ad primam difficultatem respondetur, hunc hominem in eo casu, non esse quidem personam ex vi illius subsistentiæ, qua præcise humanitas terminatur, sicut neque hic Deus, ut sic, est persona, ut supra dictum est, tamen in re ipsa esset Pater, & Filius, & Spiritus sanctus, & quælibet harum personarum ex vi hujus unionis esset homo (ut præcedenti disputatione contra Durand. dictum est) quia illa subsistentia communis intime includitur in omni persona, & ita in rigore nullum daretur individuum humanum, quod non esset persona.

Ad secundam difficultatem respondetur, per unionem humanitatis terminandam ad hujusmodi subsistentiam, necessario impediri seu excludi formaliter personalitatem propriam, quia hic modus existendi in alio, tanquam in sustentante, formaliter repugnat cum propria subsistentia. Neque ad hoc refert, quod subsistentia illa, ad quam terminatur hic modus unionis, sit communicabilis aut incommunicabilis: quia illa repugnantia non provenit ex incommunicabilitate subsistentiæ, ad quam fit unio, sed ex ipso modo unionis, & veluti existentia in alio, præsertim quia ratio subsistendi prior est, quam ratio personæ, seu quam ratio incommunicabiliter subsistendi, & ideo impedita subsistentia creata sub priori ratione subsistentiæ consequenter impeditur sub ratione personalitatis, & prout in re ipsa existit. Unde ad tertiam difficultatem respondetur, verum esse humanitatem naturam suam, seu secundum capacitatem naturalem non esse capacitatem subsistentiæ communicabilis, tamen inde non fit, per potentiam obedientialem non esse capacitatem illius, quia aliàs illius subsistentiæ divinæ esset capax, quia naturaliter illam non postulat; cum ergo humanitas per capacitatem obedientialem terminabilis sit subsistentia infinita, & hic non appareat specialis repugnantia, erit etiam terminabilis hac subsistentia, quæ dicitur supplere vicem propriæ personalitatis, quoad rationem subsistendi, non vero quoad modum incommunicabilem, sed altiori modo, intime scilicet se communicando tribus personis incommunicabiliter subsistentibus.

Ad quartam difficultatem respondetur, hanc unionem esse ad modum illius, quam vocant Sancti in persona, quia est in subsistentia, ut ipsi etiam loquuntur, & quia per illam quælibet persona divina fieret homo, & subsisteret in duplici natura; hanc enim vocant Sancti, unionem in persona, quia loquuntur de hoc modo unionis, prout factus est: factus est autem in substantia incommunicabili. Denique hæc unio non fit ad componendam unam naturam, sed potius ad componendum unum aliquid cum singulis personis, licet non secundum personalia, sed secundum subsistentiam communem illis. Ad Anselmum vero specialiter respondetur (quanquam non oporteat omnes rationes esse formales, & efficaces) vim tamen illius rationis esse hanc, ex unione in subsistentia non posse inferri esse communem omnibus personis, quia talis unio ex genere suo fieri potest in proprietate personali, & ideo non posse ex eo solum, quod unio sit substantialis, inferri esse communem omnibus personis, nisi supponatur talis unio esse essentialis, seu in natura, & hoc sensu recte Anselm. contra hæreticos concludit.

Alia difficultas offerebat se hic ex eo, quod essentia non potest videre sine personis. Sed hæc expedienda est eodem modo, quo similem resolvimus disp. præc. sect. 1.

Suarez Tomo XVI.

## SECTIO II.

*Utrum plures persone divine possint simul assumere eandem naturam.*

**S**uppono, quamlibet personam posse assumere naturam creatam, de hoc enim nulla potest inter Catholicos esse controversia, supposita fide incarnationis, quia non est major ratio de una persona, quam de aliis. Deinde sumo ex præcedenti sectione, tres personas posse assumere eandem naturam, terminando illam aliquo termino, seu subsistentia communi, quia non posset hic Deus assumere, quin omnes tres personæ saltem hoc modo assumerent, ut ostensum est. Quæstio ergo superest, an tres personæ possint assumere eandem naturam, terminando illam proxime & immediate per subsistentias relativas, sive illam simul terminent per subsistentiam absolutam, sive non: hoc enim nihil potest variare quæstionem, suppositis quæ in superioribus dubiis dicta sunt.

Est ergo prima sententia negans posse hoc modo eandem naturam assumi a pluribus personis. Tenet Scot. dist. 1. q. 2. §. Ad quod igitur Rich. ar. 1. q. 3. Albertus, q. 1. a. 10. Palud. vero q. 3. a. 2. æque probabilem esse putat hanc & contrariam sententiam, & citatur pro hac sententia Anselmus, de cujus sensu circa literam D. Th. satis dictum est, citatur etiam Bonaventura in 3. d. 1. a. 2. q. 3. Sed ut constat ex fine illius quæstionis, potius ibi docet contrarium, & in reliqua parte quæstionis solum explicat, & confirmat sensum Anselmi. Fundamentum hujus sententiæ esse debet, quia implicat contradictionem, quæ vero esse possit hæc contradictio, infra videbimus.

Dicendum tamen est, posse plures personas assumere eandem naturam, & terminare illam propriis subsistentiis relativis. Hæc est communior sententia Theologorum. cum D. Th. hic Anselm. 3. p. q. 2. memb. 4. Altiſod. l. 3. sum. tr. 1. c. 1. q. 6. Henr. quodl. 6. q. 7. Marſ. in 3. q. c. a. 3. Okam. q. 1. a. 3. Gabr. dist. 1. q. 1. a. 3. dub. 3. Almai. q. 1. a. 3. consentiunt Capreolus, Cajet. & omnes Thomistæ. Durand. etiam dist. 1. q. 3. eandem tenet sententiam, quam bene tractat, & confirmat: sed in hoc singularis est, quod affirmat non posse tres personas assumere hoc modo eandem naturam, nisi prius intelligatur assumere illam hic Deus, ut abstrahit a personis: sed nititur falso fundamento, nam idem putat dicendum de quacumque unione, facta etiam in una persona tantum, & ideo, ut supra vidimus, idem affirmat de incarnatione, prout facta est. Sed hoc sufficienter in superioribus est confutatum. Illo ergo omisso, fundamentum hujus sententiæ est illud, quod D. Tho. attulit in a. 6. quod sufficientissimum est, & ibi satis explicatum, sed attingo breviter: tres enim personalitates divinæ, quantum est ex parte earum, possunt terminare eandem naturam, ut patet in natura divina; sed ex parte naturæ assumendæ nulla est specialis repugnantia; ergo.

Dicitur fortasse, esse repugnantiam ex parte naturæ humanæ, quia finita est: nam divina propter infinitatem est capax trium subsistentiarum, & ideo natura finita non videtur habere tantam capacitatem, sicut personalitas divina potest terminare plures naturas, tamen quia hoc convenit illi ex infinitate sua, creatæ personalitati convenire non potest, ut infra dicitur. Respondetur, divinam essentiam ex se, & ex natura sua, tria supposita postulare, hocque illi ex infinitate convenire: similiter ita esse in illis, ut cum singulis eorum omnino idem sit cum perfectissima unitate, & simplicitate, & ideo neutrum horum posse convenire naturæ creatæ. Si autem tres personæ assumerent eandem naturam creatam, neque illa natura esset idem cum personis assumentibus, sed substantialiter conjungeretur illis: nec ille modus subsistendi esset illi connaturalis, sed per gratiam, & omnipotentiam assumentis communicatus, ipsa natura non repugnante, quia cum ipsa sit in potentia obedientiali ad quancunque personalitatem divinam, & alioqui inter ipsas personalitates divinas in ordine ad subsistendum, vel terminandum naturam, formalis repugnantia non sit, aut oppositio, eadem ratione erit in potentia obedientiali ad omnes illas personalitates, etiā simul terminantes: neque est ulla ratio, cur ad hoc infinita perfectio, seu capacitas requiratur. De illo vero exēplo, quod adducitur de personalitate finita, & infinita suo loco dicemus,

R 3

nunc



nunc paritas negatur, tum quia cum personalitas sit actus naturæ, maior perfectio requiritur ex parte personalitatis, ut terminare possit, quam ex parte naturæ, ut possit terminari: tum etiam quia ex parte personalitatis creata est specialis repugnantia, ut non possit esse terminus alienæ naturæ, ut infra videbimus. Unde personæ infinitæ proprium est, non solum terminare plures naturas, quia plures sunt, sed etiam quia proprium illius est, naturam extraneam terminare.

**Obiectio.** Sed obijcit secundo Scotus, quia repugnat ejusdem effectus dari plures causas totales, simul concurrentes; ergo repugnat eandem naturam simul dependere a multis personis, quia dependeret ab unaquaque, tanquam a toto, & adæquato termino. Respondet Cajet. negando consequentiam, quia dependentia a termino alterius est rationis, quam dependentia effectus a causa: & hæc est prioris generis, & non posterioris, in illo autem genere dependentiæ a termino, non repugnat unum æque dependere a multis, sic enim una relatio interdum respicit plures terminos. Sed hæc responsio fundatur in opinione quadam satis dubia, nam fortasse magis repugnat unam relationem pendere, seu respicere plures terminos, quam unum effectum pendere a multis causis totalibus, quia illa dependentia est magis intrinseca & essentialis, & quasi formalis: magis autem repugnat, eundem effectum constitui pluribus formis adæquatis, & ejusdem rationis, quam pendere a multis efficientibus.

**Natura a tribus personis necessario per tres uniones assumere cur.** Deinde quod ad præsentem quæstionem attinet, constat non posse eandem naturam creatam ita assumi a tribus personis proxime, & immediate, ut nunc loquimur, ut per eandem indivisibilem unionem omnibus uniatur, aut per eandem relationem unionis ad omnes referatur; quod probatur aperte, quia unio ad unam personam non penderet ab unionem ad aliam, neque e converso, & unaquæque earum intrinsece penderet a suo termino; essent ergo diversæ. Item si nunc Pater assumeret eandem humanitatem, quæ est in Verbo, necessarium esset humanitatem illam mutari, quia non potest fieri nova unio sine nova alicujus extremi mutatione, sed humanitas non mutaretur, nisi quia reciperet novum modum unionis, & consequenter novam relationem, quæ sequitur posito novo fundamento: quia nullum aliud genus mutationis ibi intervenire potest, neque est necessarium ad effectum intentum. Denique non potest unum corpus constitui in duobus locis, quin in eis habeat diversos modos existendi, seu diversas præsentias, vel relationes, nec potest una anima uniri distinctis corporibus, quin ad illa habeat diversas uniones; ergo similiter, &c.

**Responsio.** Ex hoc ergo petenda est propria solutio argumenti, quidquid enim sit de antecedenti (de quo disputare nolo, quia philosophicum est, quanquam ego falsum illud esse existimo, de potentia absoluta loquendo) male tamen proposito applicatur, quia humanitas assumpta in sua entitate non pendet proprie a persona assumente, tanquam ab influente in illam propriam entitatem, quam habet, ut quædam natura realis est, sed ad summum pendet modo explicato, q. præced. tanquam a conditione vel termino requisito; nihil autem repugnat, quod natura simul habeat plures conditiones singulas per se sufficientes, seu plures terminos in ordine ad plures uniones. Quocirca hæc dependentia a persona assumente ut a termino propriissime est in unionem, & subsistentiam; unde si eandem humanitas assumeretur a multis, licet natura esset una, tamē proprius effectus assumptionis, & dependentiæ, quæ inde oritur, non esset una, sed multiplex, essent enim tres uniones diversæ, quarum unaquæque a suo termino penderet. In quo est etiam magna differentia inter causam efficientem respectu sui effectus, & terminum hujus assumptionis; nam si tres causæ totales efficienter eundem effectum, darent illi idem esse, & ideo proprie esset unus effectus a tribus causis: hic autem tres personæ assumentes communicarent eidem humanitati tria esse, seu tres subsistentias diversas, mediis tribus unionibus distinctis. Et ideo in hoc revera non est simile, quod assertur: magis vero simile esset, si Deus eandem albedinem in diversis subiectis poneret, in quibus haberet diversas uniones, & diversas inhaerentias, quod sane non videtur magis repugnare, quam constituere duo corpora in eodem loco, ubi quamvis locus sufficienter repleatur uno corpore, Deus tamen facit, ut simul, & æque suffi-

cienter repleatur ab alio, ubi non proprie est idem effectus ab utroque corpore, quia proprius modus existendi in tali loco, seu replendi tale spatium, distinctus est in unoquoque corpore.

Et ex hac solutione obiter colligitur primo, quod si humanitas assumeretur ab hoc Deo præcise, juxta modum dictum in præcedenti sectione, modus unionis existens in humanitate esset distinctus a modo unionis, quem nunc habet humanitas in persona Verbi, & ab omni modo, quem haberet unita cuilibet personæ. Hoc patet ex dictis, quia isti modi unionis sunt re ipsa separabiles inter se; nunc enim habet humanitas unionem ad Verbum, & non propriam illam unionem ad hunc Deum, ut supra contra Durandum ostendimus; & e contrario, si hic Deus præcise assumeret humanitatem, non esset in illa ille modus unionis ad Verbum, qui nunc est in humanitate Christi, quia unio esset indifferens, & æque communis omnibus personis: cujus signum est, quia relationes habent terminos diversos, quia alia terminatur ad unam personam ut sic, alia vero ad omnes, ut sunt unus Deus. Ex quo fit secundo, quod si una humanitas assumeretur immediate, & proxime a tribus personis, non necessario haberet illum specialem modum unionis, quem potest habere ad hunc Deum secundum se, quia hic modus non necessario sequitur ex unionem ad personam, ut nunc patet in persona Verbi; neque ergo sequeretur ex unionem, seu potius ex unionibus ad omnes tres personas, quia omnes sunt ejusdem rationis. Tertio tandem licet ex dictis colligere, quamvis hoc non sit necessarium, posse tamen ita fieri, quia sicut una humanitas potest simul terminari a tribus personis, ita etiam ab hoc Deo, ut sit simul cum ipsis personis, quia non magis, imo minus repugnat eandem naturam terminari subsistentia absoluta, & relativa, quam terminari pluribus relativis.

Tertia & major difficultas in hac sententia est, quia ex illa sequi videtur humanitatem semel terminatam posse iterum assumi, priori termino conservato, unde fiet consequens, ut possit etiam assumi humanitas existens in propria persona. Sed hæc difficultas tractanda est infra disput. sequenti in propria disputatione de hac re, & ideo hic solum respondeo humanitatem terminatam ut sic non posse iterum assumi, quod est dicere, personam ipsam non posse assumi, seu terminum ultimum naturæ non posse iterum terminari, quod est per se clarum, ut infra etiam dicemus: at vero humanitas semel terminata potest secundum se iterum assumi, & terminari, præsertim quando ille terminus est extrinsecus, quia licet sit per unionem conjunctus, semper tamen manet omnino distinctus a natura, & ita potest ipsa natura assumi, non assumpto termino. An vero in hoc sit specialis repugnantia, quando terminus est intrinsecus, seu personalitas connaturalis, dicemus citato loco.

Dices. Ex parte ipsius unionis videtur esse repugnantia, quia cum unio sit modus naturæ in illa existens, non videtur posse assumi natura unita alteri personæ, conservata unionem, quin assumatur ipsa unio, quod aperte repugnat, unde inter ipsas uniones ad terminos distinctos videtur esse repugnantia formalis. Respondetur, licet unio sit modus naturæ, tamen ex natura rei ab illa distingui, & ideo non oportere, ut assumendo naturam assumatur ipsa unio, & ideo non est tanta repugnantia formalis inter ipsas uniones, ut contradictionem involvat in eandem naturam simul convenire: sicut si corpus existens in uno loco constituatur in alio, licet modus existens in uno loco sit in ipso corpore, nihilominus ille met modus non constituitur in alio loco, sed ipsum tantum corpus: quod etiam videre est in modo sacramentali, quem corpus Christi habet in Eucharistia, nam licet idem numero corpus Christi constituatur sub diversis speciebus consecratis, non tamen idem numero modus existendi, quem habet sub his speciebus, sub aliis ponitur.

Quarta difficultas est, quia in eo casu tres personæ nec essent plures homines propter unitatem humanæ naturæ, neque unus propter trinitatem personarum. Ad hoc quidam utrumque concedunt, ut Richard. in 3. dist. 1. ar. 1. q. 4. ad 2. Durand. q. 3. & ad 3. sed essent, inquit, utrumque secundum quid. Sed non placet, quia cum unum & multa adæquate dividant ens, potest quodlibet ens sub quacunque ratione, aut unum, aut multa simpliciter appellari. Alii dicunt in eo casu fore tres personas tres homi-

**Obiectio.****Responsio.****Obiectio 4**



homines. Ita tenent Nominales, & Marfil. in 3. q. 2. ar. 3. dub. 2. Gabr. supra, quos Cajet. hoc loco art. 6. imitatur, male interpretans D. Thom. ut ibi notavi. Sed hoc magis displicet, aliàs tres personæ non essent simpliciter dicendæ unus Deus. Respondent Nominales, non esse eandem rationem, quia divinitas ita est una in tribus personis, ut sit omnino idem cum singulis; humanitas vero, quamvis esset in tribus personis, non esset idem cum ipsis. Sed hoc, licet referat ad prædicationes in abstracto, ut videlicet possint tres personæ dici una divinitas, non tamen una humanitas, ad prædicationem tamen in concreto, parum videtur referre: quia unaquæque persona non est Deus præcise ac formaliter, quia est sua deitas, sed quia habet deitatem, sicut Verbum est homo, quia habet humanitatem, licet non sit sua humanitas; ille ergo modus prædicationis per se ac formaliter non requirit illam identitatem: sic ergo tres personæ sunt unus Deus, non quia sunt una Deitas formaliter ac præcise loquendo, sed quia habent unam deitatem; ergo similiter essent unus homo, si haberent unam humanitatem.

Aliter respondet Cajet. tres personas esse unum Deum non propter quamcunque unitatem Deitatis, ut natura est, sed propter unitatem subsistentis communis, id est, quia sunt unum, & idem habens hanc Deitatem. Sed in primis responsio non procedit, si constituamus unionem ejusdem humanitatis factam esse, & in hoc Deo & in tribus personis, tunc enim tres personæ essent unum & idem habens humanitatem. Deinde quod tres personæ sint unus Deus, non pendet ex illa opinione de subsistentia communi, sed ex vi unius naturæ sunt unus Deus, ut omnes Patres loquuntur: aliàs si unitas naturæ non sufficeret, quamquam posita subsistentia essentiali possent dici unus Deus, quatenus sunt unum habens Deitatem, sub alia ratione possent dici tres dii, quatenus sunt plures habentes deitatem, sicut dicuntur fore tres homines in dicto casu. Denique Pater, & Filius, sunt unus spirator, & unum principium Spiritus sancti, ut constat ex 1. p. q. 3. 6. art. 4. idque propter unam virtutem, & unam relationem spirandi, quamvis sub ea ratione non habeant unam subsistentiam communem.

Respons.

Dicendum est ergo, in eo casu fore tres personas unum hominem: ita tenet expressè D. Thomas hic ar. 6. ad 1. ut ibi notavi, & in 3. dist. 1. q. 2. ar. 4. ad 6. & in hoc magis inclinatur Durand. supra, & Bonav. Alenf. & alii supra citati, & Altisiod. lib. 3. Sum. tractat. 1. c. 1. q. 6. Capreol. & Hispal. in 3. d. 1. q. 1. Ferr. 4. cont. Gent. c. 12. Et ratio est, quia ad unitatem termini substantivi sufficit unitas formæ, ut optime docuit D. Thom. 1. p. q. 3. 6. ar. 4. & qu. 39. ar. 3. quia terminus substantivus, ut homo, formaliter significat formam seu naturam, ut in habente illam, & ideo ut simpliciter dicatur unus homo, sufficit unitas naturæ. Nec refert, quod illa natura sit intrinseca, & connaturalis, vel adventitia, ut est humanitas respectu Verbi, quia hoc non variat rationem nominis, nec modum significandi illius. Et confirmatur, nam Christus absolute est unus homo specie cum aliis hominibus, propter unitatem specificam naturæ, quamvis supposita pluraquam genere differant; ergo pari ratione tres personæ erunt unus homo numero, propter unitatem numericam naturæ, etiam si personæ distinctæ sint. Contra hanc vero sententiam sunt hic a Thomistis multa argumenta, quæ sophistica mihi videntur, & parvi momenti, ideo prætermitto, tum quia si quid in eis est difficultatis, in sequenti sectione fortassis attingetur.

### SECTIO III.

*Utrum una persona divina possit assumere plures naturas.*

IN hoc dubio, quod ad quæstionem de re pertinet, facillime expediri potest, sine controversia enim conveniunt Theologi omnes, hoc esse possibile, quia neque ex parte naturarum est repugnantia, cum utraque supponatur assumptibilis, & inter eas non sit formalis repugnantia respectu ejusdem personæ; nulla enim potest fingi ratio hujus repugnantiae, vel contradictionis, etiam si alioqui ipsæ naturæ fingantur habere formas contrarias, vel repugnantes, quia illa repugnantia formarum est respectu ejusdem subiecti, at vero si diversæ naturæ assume-

Suarez Tom. XVI.

rentur ab una persona, formæ talium naturarum manerent in diversis materiis, & subiectis, ut omittam posse Deum etiam contrarias formas simul in eodem subiecto collocare: nec vero potest esse repugnantia, vel insufficientia ex parte personæ, cum illa infinita sit, atque adeo vim habeat infinitam terminandi.

Dices, Pater æternus habet infinitam vim generandi, & tamen non potest generare nisi unam personam; ergo. Respondetur illam potentiam veluti expleri uno actu perfecto, & adæquato, cui etiam unus terminus totus, & adæquatus respondet: at vero Verbum assumens infinite naturas assumptas excedit. Sed contra, nam ex hac responsione fieret, Verbum nullam naturam posse terminare præter divinam, quia in hoc habet actum perfectum, & adæquatum, quo videtur ejus virtus expleri. Respondetur negando consequentiam, sed solum fit, ut non possit terminare aliam naturam illo modo, scilicet, ut adæquatam, connaturalem, & secum habentem necessariam conjunctionem seu unitatem: non vero impeditur, quin possit libere se communicare modo minus perfecto inferioribus naturis, sicut voluntas divina amando seipsam, amat bonum sibi adæquatum naturali quadam necessitate, & nihilominus libere potest alia amare, & se illis communicare: & eodem modo essentia divina, quæ in patre est principium naturalis generationis, est in omnibus personis virtus seu potentia creandi: Deus enim, quia est simpliciter & in omni ratione infinitus, & intra se habet omnem perfectionem, & virtutem sibi connaturalem, omni modo completam, & perfectam, & simul habet infinitam vim communicandi se creaturis omni modo communicationis possibilis. Et hæcenus de quæstione de re.

Major controversia est in quæstione fere de modo loquendi, an in eo casu illa persona subsistens in pluribus humanitatibus unus homo, vel plures diceretur. Richard. enim in 3. dist. 1. ar. 1. q. 5. idem dicit, quod in simili dubio, præcedenti sectione tractato, scilicet simpliciter, neque esse unum, neque plures homines, sed utrumque secundum quid. Aliorum vero sententia est, in eo casu simpliciter dicendum esse, unam personam habentem plures humanitates simpliciter esse plures homines. Ita tenuit D. Tho. in 3. dist. 1. q. 2. art. 5. ad 2. & 3. Scot. q. 3. & in 2. dist. 1. 2. q. unica circa finem, & Durand. supra, Altisiod. li. 4. Summæ tract. 1. c. 1. q. 5. Fundamentum sumitur ex dictis sectione præcedenti, quia ad unitatem substantivi sufficit unitas formæ; ergo & ad pluralitatem sufficit pluralitas, nam oppositorum eadem est ratio. Item quia tres personæ dicuntur unus homo propter unam humanitatem, quia homo significat humanitatem in habente ipsam, & ita cum dicitur unus homo, solum numeratur una humanitas in habente; ergo habens plures humanitates non potest dici unus homo, quia etiam tunc formaliter numeraretur humanitas, & significaretur tantum habere unam humanitatem: e contrario vero possunt dici plures homines, quia in hoc modo dicendi solum numerantur tres humanitates in habente ipsas. Dices: Non solum numerantur humanitates, sed etiam habentes humanitates. Sed contra, nam per terminum unitatis non numerantur habentes, sed sola humanitas in habente, si ve illud sit unum, si ve plura; ergo & simili modo per terminum multitudinis numerantur formæ, & non supposita seu habentes ipsas. Denique individuum humanæ naturæ constituitur per individuum naturam, sicut homo in specie constituitur per specificam naturam; ergo ubi sunt plures individue naturæ humanæ, erunt plura individua, atque adeo plures homines. Hæc sententia est valde probabilis. Nihilominus D. Th. hoc loco ar. 7. sententiam retractavit, & docuit in eo casu hujusmodi personam esse unum hominem; sequitur Marfil. in 3. q. 2. art. 3. dub. 2. Almainus, d. 1. q. 2. dub. 3. Gabr. q. 2. ar. 3. dub. 4. Cajet. hic Ferr. 4. cont. gent. c. 1. 1. & omnes Thomistæ, & quoniam hæc controversia magis est de modo loquendi, quam de re, & hæc ultima sententia magis consentanea est communi modo loquendi, ideo simpliciter mihi magis probatur: in eo enim casu ex omnibus illis naturis constitueretur una persona humana, ut per se constat, & unum suppositum: ut vero juxta communem modum loquendi, nullum suppositum dicitur simpliciter plures sub aliqua appellatione, seu forma, etiam si habeat plures formas, seu rationes, a quibus possit illa denominatio sumi.

Objeçio.

Respons.

Objeçio

Respons.

Objeçio.

Respons.



In con-  
cretis  
quid unū  
& quā-  
plura; di-  
cuntur.

Antecedens inductione constat, nam unus homo est unus artifex, vel unus pater, etiam si habeat plures artes, vel paternitates: & æternus Pater est unum principium Filii & Spiritus sancti, quamvis habeat plures proprietates seu relationes, ut docuit D. Th. 1. par. q. 36. ar. 4. ad 2. Denique Christus Dominus, quamvis habeat duas naturas substantiales, simpliciter est una substantia, & non plures: ex qua inductione colligimus, juxta communem modum concipiendi, & loquendi, has voces numerales, quæ significant multitudinem, applicatas terminis concretis, semper implicite dicere multitudinem suppositorum, ut Div. Th. supra dixit de termino significante unitatem non ita est, sed potius licet supposita sint plura, dicuntur aliquid unum, quatenus in aliqua forma, vel ratione conveniunt, & ita licet plures personæ dicantur unus homo, propter convenientiam in una humanitate, una tamen persona non poterit dici plures homines propter plures humanitates.

Ratio vero aliqua ex re ipsa reddi potest, quia multitudine divisionem significat, divisio autem significat negationem unionis, seu unitatis, e contrario vero unitas formaliter significat unionem, seu indivisionem, unde ut aliqua sint unum sub aliqua ratione, sufficit, ut sub illa ratione uniantur, at vero ut sint plura, requiritur, ut absolute & simpliciter dividantur, & non uniantur ad componendum unum; quia ergo plures humanitates assumptæ ab eadem persona, conjunguntur in illa ad componendum unum, ideo non possunt dici ex illis resultare tres homines, sed unus homo. Quod confirmatur, quia plures homines illi sunt, quorum unus non est alius; sed si Verbum assumeret duas humanitates, & sub una vocaretur Jesus, & sub alia Joannes, verum esset dicere, Jesus est Joannes: sicut est verum dicere, Verbum est Jesus; ergo hic homo non esset alius ab illo, quia unus esset alius; ergo non essent plures. Et hoc argumento ostendit per hanc vocem *plures* significari non tantum plures formas, sed etiam plura supposita, quia illa vox simpliciter distinguit unum hominem ab alio. Et confirmatur denique, quia illa persona subsistens in pluribus naturis, est unus simpliciter & sine addito, & unum ens per se absolute & sine addito; ergo & unus homo. Unde ad argumentum in contrarium respondetur, hunc terminum unitatis non semper numerare unam formam solam, seu excludendo aliam, ut patet in exemplis supra adductis de uno artifice, &c. Requirit ergo vel unitatem formæ, vel saltem unionem formarum in eodem supposito.

Et ex his facile intelligitur, quid dicendum sit, si omnes tres personæ assumerent tres humanitates, ita ut quilibet earum assumeretur ab omnibus, tunc enim diversis respectibus essent tres homines, comparando scilicet distinctas personas ad distinctas humanitates, & unus homo, comparando tres personas ad eandem humanitatem, vel plures humanitates ad eandem personam. Secundo sequitur, quod si Verbum dimitteret humanitatem, quam nunc habet, & eam assumeret Pater, nihilominus maneret idem homo, quia licet non maneret eadem persona humana, maneret tamen subsistens in eadem humanitate: e contrario vero, si Verbum dimitteret hanc humanitatem, & assumeret aliam, nihilominus maneret idem homo, sicut etiam si Petrus acquirat unam albedinem, & amittat quam habebat, manet idem albus, & idem est in omnibus mutationibus, quæ fingi possunt: quia ratio eadem est, si intelligantur plures naturæ seu formæ simul esse in eodem supposito, sive successive. Tertio sequitur fieri posse, ut hic homo dicatur quiescere moveri, generare & generari, & similia, quæ per communicationem idiomatum nullum est inconveniens dici de eodem supposito propter diversas naturas. Et aliqua etiam possent interdum dici de eodem individuo naturæ, propter diversas personas, ut hic Deus dicitur generare & generari, & ex his principiis facile solventur omnia sophismata, quæ hic fieri solent.

#### SECTIO IV.

*Utrum persona creata possit hypostatice uniri alteri naturæ.*

NON est quæstio de unione quoad vim efficiendi illam, de hoc enim satis dictum est disp. 10. sect. I.

sed solum de ratione terminandi, an possit Deus unire hypostatice suppositum creatum cum aliena natura. Prima sententia affirmat hoc fieri posse, quam tenet Ocham in 3. q. 1. dub. ult. ad 14. ut refert Gab. diit. 1. qu. 2. dub. 5. qui dubiam reliquit sententiam suam, sicut etiam Scot. q. 4. licet in hanc partem magis inclinet, quam tenuit ibi Mai. q. 5. Bafol. q. 6. Almain. q. 2. dub. ult. Palacios q. 5. utramque reputat probabilem. Marsil. vero q. 2. dub. 3. difficile ait esse invenire implicationem, unde in hanc partem etiam inclinat. Fundamentum est, quia id non implicat contradictionem, non enim ex parte naturæ, cum illa separabilis sit a proprio supposito, & consequenter de se sit in potentia obedientiali, ut uniatur cuivis potenti illam terminare: nec vero ex parte suppositi creati, ad hoc enim virtus aut perfectio infinita minime requiritur, cur enim? namque non adeo nobilis est hic effectus terminandi, ut illam requirat: quam rationem melius urgebimus examinando implicationem, quam affert contraria sententia. Posset vero opinio hæc confirmari auctoritate eorum, qui putarunt, non solum hoc esse possibile, sed etiam esse factum: refert enim Hieron. in præf. ad Malach. & Aggæi 1. circa illud; & dixit Aggæus nuncius Domini, aliquos sensisse, Malachiam, Aggæum & Joannem fuisse Angelos in assumptis corporibus, eo modo, quo Christus est Verbum in corpore assumptum: & subdit Hieron. *Nec mirum hoc de Angelis credi, cum pro salute nostra Filius Dei corpus nostrum assumpserit.* De Melchisedech etiam ita quosdam sensisse videbimus infra q. 22. Et sequente tomo referam aliquos similiter dixisse, Antichristum futurum dæmonem incarnatum. Tertullianus lib. de carne Christi c. 4. & 6. & lib. 3. contra Marcionem cap. 9. Angelos dicit veram carnem assumpsisse, cum apparuerunt Abraham, & sæpe aliis, & indicat assumpsisse hypostatice, nam ex ea assumptione probat, fuisse possibilem Verbi Incarnationem. Denique interdum Sancti dicunt, potuisse Deum redimere homines per Angelum, & non censent id fuisse possibile tantum per naturam Angelicam, sed per naturam humanam, quod non posset esse sine unione hypostatice humanitatis ad Angelum; sentiunt ergo illam fuisse possibilem.

Secunda opinio negat illa ratione fieri posse, ut suppositum creatum alienam naturam terminet, seu hypostatice sustineat. Hæc censetur esse D. Tho. supra ar. 1. ad 2. ubi dicit esse proprium divinæ personæ propter ejus infinitatem, ut fiat in ea concursus naturarum secundum subsistentiam, ubi Cajet. & alii Thomistæ hoc tenent, & Dura. d. 1. q. 5. Palud. q. 1. a. 2. Sot. in 4. d. 9. q. 2. a. 2. Henri. quodl. 1. q. 10. Picus Mirand. in Apol. q. 4. & 6. Sed fundamentum, & implicatio contradictionis facile assignatur. Durandus supra ita arguit, quia ut subsistentia aliqua terminet aliquas naturas indiget aliqua perfectione & virtute; nam licet actu terminare non sit nova perfectio suppositi assumentis naturam, tamen posse terminare perfectionem dici: sed subsistentia creata nec habet vim naturalem ad terminandam aliam naturam, quæ sibi cōnaturalem, nec capax est illius, ut scilicet supernaturaliter illam accipiat a Deo; ergo. Probatur prima pars minoris. Primo, quia unaquæque subsistentia creata cum limitata sit, & finita, est adæquata suæ naturæ, ad quam solum terminandam ex natura sua ordinata est; ergo ad hunc tantum effectum habet naturalem vim: sicut e contrario natura creata ad propriam subsistentiam tantum creatam habet naturalem aptitudinem. Secundo, quia si potestas terminandi alienam naturam esset naturalis supposito creato, etiam actus terminandi esset illi naturalis, & ordo naturalis postularet agens, quo illa potentia posset in actum revocari; esset ergo tota illa unio hypostatice naturalis, & non miraculosa.

Secunda pars minoris probatur, quia vis & potestas suppositi creati nullo modo augeri potest virtute divina, neque enim per intensionem, quia cum personalitas sit ultimus & indivisibilis terminus substantialis, non est intensibilis: neque per additionem alicujus entitatis, quia talis entitas non posset esse nisi accidentalis, quæ nihil refert ad suppositandum, quia hic est proprius actus substantiæ, ut substantia est: nec vero posset suppositualitas creata in se immutata elevari ad terminandam naturam, quam naturaliter non potest terminare, nam licet hoc intelligatur esse possibile in instrumeto causæ efficientis, quia ibi principalis causa est, quæ primario agit, & ele-

Ratio Durand. ex eo quod virtus subsistentiæ creata non possit augeri.



& elevat instrumentum, tamen in hac suppositione non videtur posse intelligi, quia hic principalis ratio istius effectus, vel quasi effectus, scilicet sustentationis naturæ assumptæ, esse debet ipsa supposititas; neque in eo munere potest se gerere ut instrumentum, cum nihil aliud sit ibi, quod principaliter in hoc genere concurrat; & in hac ratione videtur niti illa, qua Cajetanus hic utitur, scilicet, quia si suppositum creatum posset elevari ad sustentandas duas naturas, ergo & ad tertiam & plures in infinitum; hoc autem videtur perfectionem infinitam in illo requirere.

**Rejicitur.** Sed hæc ratio, ut verum fatear, non convincit, quia si cut sustentare vel terminare naturam est alicujus perfectionis, ita e contrario informare subjectum est alicujus perfectionis in forma ipsa, ut vivificare corpus in anima, & sustentare accidens in substantia: sed non augendo substantiam animæ potest facere Deus, ut informet majus corpus, quam naturaliter posset, vel etiam duo corpora, & ut eadem albedo immutata formaliter reddat alba duo corpora, & ut idem corpus sustineat in se duo & plura accidentia, quæ naturaliter non posset recipere, nec sustentare. Item potest ponere in cælo accidens, cujus naturaliter non est capax, & idem corpus in duobus locis: & in his omnibus non proprie utitur Deus his rebus, ut instrumentis, sed utitur potentia obedientiali earum ad dictos effectus, constituendo virtute sua rem tali modo, ut possit illum effectum efficere, ut v.g. non separando a me meam albedinem, eam realiter conjungit Petro, & tamen quia informare nihil aliud requirit quam conjunctionem illam, supposita aliis naturali aptitudine formæ ad informandum, ideo statim etiam informat illum sine augmento virtutis: quia ibi non augetur effectus intensive, sed extensive, & ad hoc satis est multiplicatio seu positio ejusdem formæ in diversis subjectis, quia ille effectus nihil aliud est, quam dare se ipsum: & hac ratione non videtur difficile intellectu, quod idem numero punctum terminet plures lineas loco etiam distantes, si in omnibus illis constituatur: sic ergo posset Deus substantiam unius naturæ unire etiam alteri naturæ, & tunc per se ipsam terminaret illam sine ulla additione, & eadem ratione posset uniri tribus & pluribus in infinitum, quia ad hoc non requirit in se majorem virtutem, sed eandem pluries unitam. Et juxta hanc responsionem diceretur, personalitatem creatam de se, & natura sua esse limitatam ad propriam naturam, & ad eam tantum terminandam habere veluti capacitatem & inclinationem naturalem: nihilominus posse divinæ virtutis uniri aliis naturis, & consequenter ipsam esse veluti in potentia obedientiali ad eam unionem, quæ propterea est supra naturam rerum & miraculosa: recte enim intelligi potest duas entitates esse naturales, & tamen earum unionem esse supernaturalem, & ita ad illam tantum esse in potentia obedientiali, ut si calor uniretur cælo, vel quid simile.

**Implicat uno modo plura modificari.** Quocirca si personalitas creata est entitas realiter a natura distincta, ut res a re, fateor me nullam invenire rationem, quæ hanc sententiam persuadeat: supposito tamen personalitatem tantum esse modum naturæ, videtur hæc satis sufficiens ratio, quia scilicet modus unius rei ab illa realiter indistinctus non potest nisi rem illam modificare, minime vero rem aliam distinctam. Quod primum inductione patet, nam una figura impossibile est ut aliam quantitatem afficiat præter eam, cum qua identificatur, nec sessio nisi sedentem ipsum, a quo non distinguitur, ut res a re, nec relatio, &c. Ex qua inductione colligitur hanc esse conditionem essentialiorem modi, ut realiter sit ipsa res, quam modificat, & cum ea habeat intrinsecam adæquationem in præstando suo effectu, vel quasi effectu formali, quia revera modus ipse nihil est aliud, quam res ipsa, cujus est modus, taliter se habens, vel sic terminata; quod etiam illo exemplo valde confirmatur, nam intelligi non potest, inhærentiam unius accidentis esse alteri accidenti rationem formalem inhærendi, seu modum inhærentionis, præterquam illi, cum quo identificatur, cujus nulla alia ratio reddi potest, nisi quia inhærentia tantum est modus.

**Objeſſio.** Dices hanc rationem nimium probare, videtur enim idem concludere de persona increata. Respondetur, non ita esse, ut ex supra dictis q. 2. patet, nam personalitas divina non tantum est modus, sed est etiam per se ipsa perfectissima res & actus purissimus, & hinc habet, quod pos-

sit terminare alienam naturam: & quia hoc convenit illi ratione suæ infinitatis, merito D. Th. dixit, ea ratione hoc esse proprium illius, & hoc modo verum etiam est, requiri infinitam perfectionem ad terminandum alienam naturam. Confirmatur & declaratur hæc sententia, nam si personalitas creata esset entitas distincta a sua natura, posset certe conservari a Deo separata ab eadem natura, nulla enim potest reddi ratio implicationis: nam ex fide constat, quod potest separari; ergo si res distincta, cur non etiam separata poterit conservari? Rursus. Ergo posset Deus eam ponere in alia natura, v.g. personalitatem, quæ deberet esse in humanitate Christi, in natura Joannis, impediendo ibi personalitatem Joannis; sic ergo non posset negari in illa sententia, quin natura creata posset terminari personalitate creata aliena, saltem per separationem a propria natura, ut dictum est: tunc enim non procedit ratio de augmento virtutis, vel similes, quia effectus ille non esset major: quod si hoc concedatur, facile fiet credibile etiam sine separationem a propria natura id fieri potuisse. At vero ut nos præcedimus, facile intelligitur id esse impossibile, quia modus nunquam potest ita separari a re, cujus est modus, ut sine illa conservetur in esse. Alia etiam explicatio est, quia si personalitas esset res distincta, facile intelligi posset affixa diversis naturis, etiam si illæ loco distent, solum per hoc, quod eadem entitas diversis in locis constituatur tota in toto, & tota in qualibet parte, quod facile etiam intelligitur non implicare. Si vero est tantum modus, nequit intelligi, quod rem distinctam modificet, nisi illa prorsus penetret rem aliam, imo nisi idem cum illa fiat.

Non desunt tamen, quibus hæc omnia exempla nihil persuadeant, sed potius existiment, illa omnia esse possible, nimirum, unum accidens realiter distinctum ab alio posse inhære subjecto per inhærentiam alterius accidentis. Et me posse esse præsentem loco per ubi alterius corporis. Et sedere per eandem numero sessionem, quæ est in alio homine: & sic de aliis similibus. Item posse modum rei in alio loco constitui, quamvis in eo res ipsa non ponatur, ut v.g. figuram hujus quantitatis constitui Romæ, quamvis ipsa quantitas Romæ non sit, quia, licet talis modus essentialiter pendeat a suo subjecto, nec sine illo possit in rerum natura conservari, satis est, quod in uno loco habeat eam unionem vel identitatem cum subjecto suo, qua supposita non est contra essentialiam ejus, ut in pluribus locis constituatur, quam subjectum. Multa enim alia fecit Deus his mirabiliora, ut maxime in mysterio Incarnationis & Eucharistiæ videre licet, & illa non admiramur, quia facta sunt: ergo neque illa omnia & similia sunt neganda, in quibus non apparet evidens contradictio, neque aliquid, quod perfectioni Dei repugnet: his enim principiis utuntur Sancti Patres ad probandum posse Deum uti suis creaturis prout voluerit, & ad confirmanda mysteria supernaturalia, quæ per fidem credimus esse a Deo facta, ut de miraculis Christi dicemus infra q. 13. & de Resurrectione in sequente tomo, & de Eucharistia in 3. & interim legi possunt Augustinus 25. de Civit. c. 3. & sequent. & lib. 6. Genes. ad lit. c. 13. & sequ. & lib. 9. c. 17. Basil. lib. 2. & 3. contra Eunom. Euseb. Emis. homil. 1. de Symbolo. Tertul. lib. 2. & 3. cont. Marcion. & alia, quæ congerit Claud. repet. 4. de Euchar. c. 4. Sed qui ea omnia in prædictis exemplis adducta, aut mente concipere, aut sibi persuadere potuerit, non mirum si credat, posse Deum unionem hypostaticam efficere inter naturam & personas creatas. Mihi tamen contradictionem implicare videntur ea omnia, supponendo, illas non esse res omnino distinctas; sed essentialiter unam esse modum alterius, quod idem nunc de substantia supponimus. Sicut enim id, quod est modus tantum, essentialiter includit actualem unionem per se ipsum cum re, cujus est modus, & ideo existere non potest in rerum natura, quin illam actu efficiat, ita essentialiter determinat sibi talem modum afficiendi per realem identitatem & actualem ac essentiali conjunctionem cum re, quam afficit, & ideo implicat contradictionem, ut extra hunc modum afficiendi extrahatur; non ergo potest afficere rem a se distinctam, nec uniri ad dandum suum effectum formalem, vel quasi formalem per unionem realiter vel ex natura rei a se distinctam. Et confirmatur, nam hac ratione forma, quæ ex natura sua habet modum informandi tanquam entitas distincta a subjecto, non potest elevari, ut actuet



actuet tanquam modus intrinsecus subiectum, quia hoc esset mutare essentiam, fieret enim essentialiter inseparabile a subiecto, quod ex vi suæ entitatis erat separabile: ergo etiam e contrario repugnat, ut id, quod essentialiter est modus, actuet aliam rem omnino distinctam per novam & distinctam unionem. Præterea repugnat, accedens informare subiectum non inhærendo illi, quia, licet informatio ut sic in genere abstrahat ab inhærentia, ut patet in informatione animæ rationalis, tamen accedens, quod essentialiter est talis forma, essentialiter etiam sibi determinat talem informationem, extra quam non potest extrahi, aliis etiam posset effectus formalis fieri sine causa formali, & materia prima elevari posset ad informandum, quamvis natura sua ad hoc apta non sit. Quod si hoc est impossibile, ut re vera est, fatendum est, nullam formam vel modum aut actum intrinsecum extrahi posse a suo connaturali, & specifico, ac essentiali modo actuandi; sed hæc duæ rationes actuandi, scilicet ut forma realiter distincta, vel tantum ut modus intrinsecus, ex natura rei specificæ & substantialiter sunt diversæ; & id quod est tantum modus, ex natura sua essentialiter determinat sibi talem modum afficiendi, & ideo ab illa extrahi non potest, neque actuare rem a se distinctam. Neque enim potest ita poni in rebus inter se realiter distinctis, ut idem numero manens cum utraque illarum ita identificetur, ut ab utraque sit essentialiter inseparabilis. Repugnat igitur, ut extrahatur ad actuandam rem aliam præter eam, quam essentialiter afficit. Denique hanc repugnantiam, quæ est in rebus, satis indicat repugnantia, quæ est in intellectu ad concipiendum alterum sedentem per sessionem, quæ est in me; aut unam virgam esse rectam per rectitudinem alterius, & similia, quæ statim per se proposita incredibilia apparent, quia hi effectus tales sunt, ut per entitates distinctas fieri non possint, & ipsi modi tales sunt, ut non nisi seipsis absque ulla unionem media afficere possint. Ex hac ergo ratione sic explicata facile solvuntur objectiones omnes: est enim in hoc specialis contradictio, quamvis in aliis mysteriis, quæ maiora videntur, non inveniatur. Atque ita etiam responsum est ad fundamentum prioris sententiæ.

Illam vero, quæ de facto afferebantur, nullam habent probabilitatem, nam fere certum est, Deum hæcenus nullam hypostaticam unionem fecisse præter Incarnationem: est enim hoc mysterium singulare & sine exemplo, ut Sancti sæpe dicunt. Nec decuit tam magnum miraculum fieri, nisi in divina persona, & ut perpetuo duraturum ad magnam Dei gloriam, & perfectionem operum ipsius. In angelorum vero apparitionibus, quamvis esset possibilis, nunquam fuit necessaria hypostatica unio, cum solum ad breve tempus & ad quandam representationem, vel alios sensibiles effectus corpora assumant, quæ non solum eis substantialiter non uniuntur, verum etiam nec semper talia sunt, qualia apparent: & ideo dicebat Angelus Tobie, cap. 12. se non vere comedis, nec bibisse. Cum ergo Patres dicunt potuisse Deum nos redimere per Angelum, nunquam dicunt id fuisse possibile redimendo per humanam naturam, sed per angelicam: similiter homines illi, qui dicuntur interdum Angeli in scriptura sacra, vel ab officio nuncii, vel a puritate vitæ sic appellantur, non a substantia. De Antichristo vero certissimum est non futurum dæmonem, nam esto Deus posset facere illam unionem, non illam faceret ad tam pravam finem; dæmon autem ipse non potest eam facere, nec Ambrosius 2. ad Thessalon. 2. aliud indicat, tantum enim dicit Antichristum futurum instrumentum dæmonis, & hunc pædagogum illius; & eodem modo est intelligendus Theodor. in epitome divino decret. c. de Antichristo, de quo late sequente tomo disp. 14. sect. 1. Tertul. denique ibi citatus, licet interdum indicet, Angelos cum apparebant in forma humana, verum corpus carneum assumpsisse, nunquam tamen explicuit modum illius assumptionis, nec de hypostatica unionem quidquam dixit, imo nec priorem sententiam constanter affirmat, quod illa fuerit vero caro, sed quasi per exaggerationem interdum ita loquitur, cum aliis locis id neget, ut annotavit Pamel. in principio operum, Tertul. Paradox. 2. & 19.

Pamelius,

De modo unionis ex parte naturæ assumptæ, in sex articulos divisa.

**D**einde considerandum est de unionem ex parte assumpti. Circa quod primo considerandum occurrit de his, quæ sunt a Verbo Dei assumpta. Secundo, de coassumptis, quæ sunt perfectiones & defectus, Assumpsit autem Dei Filius humanam naturam & partes ejus.

Unde circa primum triplex consideratio occurrit. Prima est quantum ad ipsam naturam humanam. Secunda est quantum ad partes ipsius. Tertia quantum ad ordinem assumptionis.

Circa primum queruntur sex.

Primo, utrum humana natura fuerit magis assumptibilis a Filio Dei, quam aliqua alia natura.

Secundo, utrum assumpsit personam.

Tertio, utrum assumpsit hominem.

Quarto, utrum fuisset conveniens, quod assumpsisset naturam humanam a singularibus separatam.

Quinto, utrum fuisset conveniens, quod assumpsisset humanam naturam in omnibus ejus singularibus.

Sexto, utrum fuerit conveniens, quod assumeret humanam naturam in aliquo homine ex stirpe Adæ progenito.

**A**git D. Thomas in hac quæstione de altero extremo hujus unionis, sc. de natura assumpta, & fere in tota quæstione solum tractat de mysterio, prout factum est, obiter tamen indicat aliquid de possibili, in quas duas partes hanc & sequentem quæstionem dividemus, sicut in præcedenti quæstione fecimus. Præmittenda vero esset hoc loco disputatio de subsistentia, seu personalitate creata, quam Cajetanus art. 2. latissime tractat, nisi de hac re, ut in superioribus dixi, in disputationibus Metaphysicis tractatum esset.

## ARTICULUS I.

Utrum natura humana fuerit magis assumptibilis a Filio Dei, quam aliqua alia natura.

**A**d primum sic proceditur. Videtur, quod humana natura non fuerit magis assumptibilis a Filio Dei, quam quælibet alia natura. Dicit enim Augustinus in Epist. ad Volusianum. In rebus mirabiliter factis, tota ratio facti est potentia facientis: sed potentia Dei facientis Incarnationem, quæ est opus maxime mirabile, non limitatur ad unam naturam, cum potentia Dei sit infinita. Ergo natura humana non est magis assumptibilis a Deo, quam aliqua alia creatura.

27.  
3. d. 2. q. 1. r.  
1. & 4. con.  
tr. o. 53.  
tertium &  
quartum.  
In ep. 3. o. 6  
multum eni  
se med. to.

2. Præterea. Similitudo est ratio faciens ad congruitatem Incarnationis divina personæ: ut supra dictum est; sed sicut in creatura rationali invenitur similitudo imaginis, ita in creatura irrationali invenitur similitudo vestigiis. Ergo creatura irrationalis assumptibilis fuit, sicut humana natura.

q. præc.  
art. 8.

3. Præterea, in natura angelica invenitur expressior Dei similitudo, quam in natura humana: sicut Gregorius dicit in homil. de centum ovibus, introducens illud Ezechielis 28. Tu signaculum similitudinis: invenitur enim in Angelo peccatum, sicut in homine: secundum illud Job. 4. in Angelis suis reperit pravitatem: ergo natura angelica fuit ita assumptibilis, sicut natura hominis.

Est hom.  
34. in E.  
vang. anie  
medium  
illius.

4. Præterea. Cum Deo competat summa perfectio, tanto magis est Deo aliquid simile, quanto est magis perfectum sed totum universum est magis perfectum, quam partes ejus, inter quas est humana natura; ergo totum universum est magis assumptibile, quam humana natura.

Sed contra est, quod dicitur Proverbiorum 8. ex ore Sapientie genita: Delitæ meæ sunt esse cum filiis hominum. Et ita videtur esse quedam congruentia unionis filii Dei ad humanam naturam.

**R**espondeo dicendum, quod aliquid assumptibile dicitur quasi aptum assumi a divina persona. Quæ quidem aptitudo non potest intelligi secundum potentiam passivam naturalem, quæ non se extendit ad id, quod transcendit ordinem naturalem, quem transcendit unio personalis creaturæ ad Deum. Unde relinquitur, quod assumptibile aliquid dicatur, secundum congruentiam ad unionem prædictam. Quæ quidem congruentia attenditur secundum duo

duo



duo in humana natura, scilicet secundum ejus dignitatem & necessitatem. Secundum dignitatem quidem, quia humana natura, in quantum est rationalis, & intellectualis, nata est attingere aliquantulum ipsum Verbum per suam operationem, cognoscendo scilicet, & amando ipsum. Secundum necessitatem autem, quia indigebat reparatione, cum subiaceret originali peccato. Hæc autem duo soli humane nature conveniunt: nam creatura irrationali deest congruitas dignitatis: nature autem angelicæ deest congruitas prædictæ necessitatis. Unde relinquitur, quod sola natura humana sit assumptibilis.

Ad primum ergo dicendum, quod creatura denominatur aliquales ex eo, quod competit eis secundum proprias causas; non autem ex eo, quod convenit eis secundum causas primas & universales: sicut dicimus aliquem morbum esse incurabilem, non quia non potest curari a Deo, sed quia per propria principia subiecti curari non potest. Sic ergo dicitur aliqua creatura non esse assumptibilis, non ad subtrahendum aliquod potentia divinæ, sed ad ostendendum conditionem creaturæ, quæ ad hoc aptitudinem non habet. c Ad secundum dicendum, quod similitudo imaginis attenditur in natura humana, secundum quod est capax Dei scilicet ipsum attingendo propria operatione cognitionis & amoris. Similitudo autem vestigiæ attenditur solum secundum representationem aliquam, ex impressione divina in creatura existentem: non autem ex eo quod creatura irrationalis in qua est sola talis similitudo, possit Deum attingere per solam suam operationem. Quod autem deficit a minori, non habet congruitatem ad id, quod est majus: sicut corpus, quod non est aptum perfici anima sensitiva, multo minus est aptum perfici anima intellectiva. Multo autem major & perfectior est unio ad Deum secundum esse personale, quam quæ est secundum operationem. Et ideo creatura irrationalis, quæ deficit ab unione ad Deum per operationem, non habet congruitatem, ut uniatur ei secundum esse personale.

Ad tertium dicendum, quod quidam dicunt, Angelum non esse assumptibilem: quia a principio sue creationis est in sua personalitate perfectus, cum non subiacet generationi & corruptioni. Unde non posset in unitatem divinæ persone assumi, nisi ejus personalitas destrueretur: quod neque convenit incorruptibilitati nature ejus, neque bonitati assumptis, ad quam non pertinet, quod aliquid perfectionis in creatura assumpta corrumpat: sed hoc non videtur excludere totaliter congruitatem assumptionis Angelicæ nature: potest enim Deus producendo novam Angelicam naturam, copulare eam sibi in unitate persone: & sic nihil præexistens sibi corrumpatur. Sed, sicut dictum est, deest congruitas ex parte necessitatis: quia et si natura angelica in aliquibus peccato subiacet, est tamen ejus peccatum irremediabile, ut in prima parte habitum est.

Ad quartum dicendum, quod perfectio universi non est perfectio unius persone, vel suppositi, sed ejus quod est unumpositione, vel ordine, cujus plurimæ partes non sunt assumptibiles, ut dictum est. Unde relinquitur, quod sola natura humana sit assumptibilis.

## COMMENTARIUS.

Ad intelligendam mentem D. Th. oportet advertere, dupliciter naturam aliquam assumptibilem denominari posse, primo denominatione extrinseca ab omnipotentia Dei, cui ex parte creaturarum solum respondet potentia obedientialis, seu non repugnantia: de qua ratione assumptibilis D. Th. nec quæstionem movit, nec mentionem fecit in toto articulo, ut ex sequent. cõtabit.

Alio modo potest hæc denominatio esse intrinseca aliquo modo, id est, sumpta ex aliqua intrinseca proprietate rei, & hoc modo sumitur in hoc titulo, & eodem sensu dicitur in corpore articuli, dupliciter posse naturam dici assumptibilem, scilicet vel secundum potentiam passivam naturalem, vel secundum aliquam congruentiam fundatam in aliqua proprietate, vel conditione ipsius rei: quæ divisio non esset sufficiens, nisi D. Th. in dicto sensu loqueretur. Et eodem sensu negat D. Tho. in solutione ad primum naturam irrationabilem esse assumptibilem, scilicet secundum intrinsecam congruentiam, & propterea in eadem solutione præmittit, creaturam denominari talem, ex eo quod competit ei secundum propriam causam, & non ex denominatione ab omnipotentia Dei, quando ex hujusmodi causis diversis sumi possunt denominationes aliquo modo oppositæ, ut Cajetanus adnota-

vit, & D. Th. optime explicuit exemplo morbi, qui dicitur curabilis, vel incurabilis, non per denominationem ab omnipotentia Dei, sed secundum aliquam intrinsecam conditionem ejus. Et eodem modo in solutione ad quartum negat totum universum fuisse assumptibile, scilicet secundum intrinsecam congruentiam, nam secundum extrinsecam omnipotentiam Dei, licet totum universum non sit unum suppositum, non tamen repugnaret assumi in uno supposito Verbi, ut patet ex dictis disput. præcedenti.

b. Respondet ergo D. Th. humanam naturam fuisse maxime assumptibilem non quidem secundum capacitatem naturalem (hoc enim modo nulla natura assumptibilis est) sed secundum congruentiam ad unionem, quæ ex duplici capite confurgit, primum ex dignitate intellectualis seu rationabilis nature, quæ sit capax ipsius Dei, & operationem ipsam attingat: deinde ex necessitate & indigentia redemptionis, quæ duo in sola humana natura ita concurrunt, ut reddant eam maxime assumptibilem.

Sed dubitabit aliquis, quia ad congruentiam simpliciter hujus assumptionis sufficit dignitas intellectualis nature, quia indigentia redemptionis non est simpliciter necessaria, ut supra q. 1. a. 3. dictum est; sed illa dignitas multo major reperitur in angelica, quam in humana natura, adeo ut licet necessitas redemptionis aliquid conferat ad hanc congruentiam, magis conferre videatur excessus perfectionis, & dignitatis angelicæ nature, quia hæc dignitas per se magis confert ad hanc congruentiam. Et confirmatur, quia in angelis etiam reperitur necessitas, & indigentia ex peccato contracta. Sed hoc ultimum facile expeditur, peccatum enim angelicum non facit congruentiam ad unionem, quia juxta modum providentiæ consentaneum illi nature, & considerata intrinseca conditione ejus, peccatum illius est irreparabile. Ad priorem vero partem respondetur, D. Thom. in hoc discursu supponere hanc congruentiam ad unionem confurgere ex utroque illo capite simul sumpto, præsertim loquendo de congruentia, quæ movit Deum ad perficiendum hoc mysterium, & ideo deficiente altera conditione, negat esse congruentiam simpliciter, etiam si alia in suo genere major sit.

Dices. Ergo juxta sententiam D. Tho. sic explicatam, natura angelica simpliciter dicenda est inassumptibilis, sicut irrationalis natura, in utraque enim absolute loquendo deest intrinseca congruentia, quanquam in altera tantum ex uno capite, in altera vero ex duobus. Respondetur ex D. Th. solutione ad tertium (& est explicatio solutionis prius datæ) ad congruentiam simpliciter, non esse omnino necessarium, ut duplex illa ratio congruitatis supra posita simul concurrat, quia utraque per se confert aliquam congruitatem, diversæ tamen rationis: nam dignitas nature præcise confert congruitatem quandam, indigentia vero redemptionis confert quodammodo congruentiam necessitatis, quia ergo prior ratio convenit angelicæ nature, ideo potest simpliciter denominari assumptibilis, in quo differt a natura irrationali: humana vero natura dicitur simpliciter assumptibilior, id est, pluribus titulis & rationibus, quam aliqua alia natura. Qui tituli cum sint diversarum rationum, ut dictum est, non sunt proprie inter se comparabiles, neque excessus in uno potest exæquare alium, & ita facile procedit discursus D. Tho. de ipsa vero re latius infra dicemus. Solutiones ad primum, tertium, & quartum argumentum ex dictis explicatæ sunt.

c. Argumentum secundum difficultatem non habet, quod vero D. Tho. occasione illius respondet, explanatione indiget: probat enim in creatura irrationali non esse congruentiam ad hanc unionem, quia quod deficit a minori, non habet congruitatem ad id, quod majus est; sed creatura irrationalis deficit ab unione ad Deum per operationem, quæ minor est, quam per unionem personalem: ergo non potest habere congruitatem ad hanc unionem. Ex quo discursu statim insurgit difficultas, nam eadem forma, & proportionem applicando argumentum, concluderetur in natura irrationali non esse capacitatem, nec obedientialem ad hanc unionem, quia quod deficit a majori, sicut non habet congruitatem ad id, quod majus est, ita nec capacitatem, nulla enim est major ratio de una, quam de alia. Unde exemplum, quo D. Thom. confirmat hoc principium, non solum de congruitate sed

in corpore  
re artic.

1. p. q. 64.  
art. 2.

In corpore  
re artic.

Duobus  
modis di-  
citur na-  
tura as-  
sumptibi-  
lis.

Objeçtio.

Responsio

Objeçtio 2

Responsio

Objeçtio 3



sed de capacitate procedit: Sicut corpus, inquit, quod non est aptum perfici anima sensitiva, multo minus aptum est perfici anima intellectiva.

**Respon.** Respondetur, illud principium, quod non potest in minus, nec potest in majus, solum habere locum in iis, quæ sunt subordinata, non vero in reliquis, ut constat ex Philosophia, & potest breviter exemplis declarari: materia enim elementalis non est capax formæ cœlestis, & est capax superioris formæ, scilicet rationalis, & homo non potest generare leonem, potest tamen generare hominē, quod majus est. Fieri autem potest, ut quædam sint per se subordinata quoad capacitatem, alia vero solum quoad congruitatem, ut cognitio & amor sunt per se subordinata quoad capacitatem, quia nullus est capax unius, qui nō sit alterius: at vero visio Dei & unio personalis sunt per se ordinata quoad congruitatem, nō quoad capacitatem, & ideo qui deficit a minore unione, quæ est per operationē, non habet congruitatem ad majorem unionem, scilicet personalem, ut D. Th. arguit. Nec in objectionē facta de capacitate est eadem proportio, quia illa duo non sunt, per se ordinata quoad capacitatem, sed tantum quoad congruitatem, sepe enim accidit defectum minoris perfectionis facere incongruitatem quandam ad majorem perfectionem suscipiendam, quamvis non faciat incapacitatem, ut mulier ignobilis non habet congruitatem, ut fiat uxor Regis, non tamen propterea habet incapacitatem.

## ARTICULUS II.

### Utrum Filius Dei assumpserit personam.

**A**d secundum sic proceditur. Videtur, quod Filius Dei assumpserit personam. Dicit enim Damasc. in 3. l. quod Filius Dei assumpsit humanam naturam in atomo, id est, in individuo. Sed individuum rationalis nature est persona: ut patet per Boet. lib. 2. de Duab. natur. Ergo Filius Dei personam assumpsit.

**2.** Præterea, Damasc. dicit, quod Filius Dei assumpsit ea, quæ in natura nostra plantavit: Plantavit autem ibi personam. Ergo Filius Dei assumpsit personam.

**3.** Præterea, nihil consumitur, nisi quod est. Sed Innocentius III. dicit in quodam Decret. quod persona Dei consumpsit personam hominis. Ergo videtur, quod persona hominis fuerit prius assumpta.

**Sed contra** est, quod Augustinus dicit in libro de fide ad Petrum, quod Deus naturam hominis assumpsit, non personam.

**Respondeo** dicendum, quod aliquid dicitur assumi ex eo, quod ad aliquid sumitur. Unde illud, quod assumitur, oportet præintelligi assumptioni, sicut illud, quod movetur localiter, præintelligitur ipsi motui. Persona autem non præintelligitur in humana natura assumptioni, sed magis se habet ut terminus assumptionis, ut supra dictum est. Si enim præintelligeretur, vel oporteret quod corrumpere-  
**Exp. 12.**  
**eo. 3.**

tur: & sic frustra esset assumpta: vel quod remaneret post unionem, & sic essent due persone, una assumens, & alia assumpta, quod est erroneum, ut supra ostensum est. Unde relinquitur, quod nullo modo Filius Dei assumpsit humanam personam.

**Ad primum** ergo dicendum, quod naturam humanam assumpsit Filius in atomo, id est, in individuo: quod non est aliud a supposito increato, quod est persona Filii Dei. Unde non sequitur, quod persona sit assumpta.

**Ad secundum** dicendum, quod natura assumpta non deest propria personalitas propter defectum alicujus, quod ad perfectionem humana nature pertineat: sed propter additionem alicujus, quod est supra humanam naturam, quod est unio ad divinam personam.

**Ad tertium** dicendum, quod consumptio ibi non importat destructionem alicujus, quod prius fuerat, sed impeditionem ejus, quod aliter esse posset. Si enim humana natura non esset assumpta a divina persona, natura humana propriam personalitatem haberet: & pro tanto dicitur persona consumpsisse personam, licet improprie: quia persona divina sua unione impedivit, ne humana natura propriam personalitatem haberet.

## COMMENTARIUS.

**T**ribus modi dici potest assumi persona, primo, proprie & formaliter, ut si ipsamet personalitas, atque adeo persona, ut persona intelligatur assumi, atque ite-

rum terminari. Secundo, minus proprie, & tantum concomitanter, ut si assumatur natura existens in propria persona, conservata propria ejus personalitate.

Tertio adhuc minus proprie, & solum quasi extrinsece, ut si assumatur natura existens in propria persona, ita tamen ut per assumptionem in illa esse desineret, & propriam personalitatem amitteret, tunc dici posset assumi persona quasi extrinsece, quia esset terminus a quo præexistens assumptioni: sicut per transubstantiationem dicitur panis vel vinum consecrari, tanquam materia, ex qua fit transubstantiatio. In hoc ergo titulo omnes hos sensus videtur D. Tho. complecti, omnibus enim in corpore articuli satisfacit, quamvis primus sensus tanquam magis proprius potissimum intendi videatur.

**Respon.** Respondet ergo D. Tho. Filium Dei non assumpsisse personam. Probat, quia hæc assumptio non supponit personam, sed ad illam potius terminata est; ergo non fuit assumpta persona. Antecedens probat, quia si in Christi humanitate præcederet persona creata ante assumptionem, vel illam personalitatem amitteret per assumptionem, vel eam retineret; si primum dicatur sequitur non potuisse humanitatem illam in eodem instanti assumi, in quo fuit creata, quia non potuit in eodem instanti habere personalitatem propriam, & illa carere: si vero dicatur secundum, sequitur in Christo esse duas personas, creatam, & increatam, quod est contra fidem: quæ ratio probat personam creatam nec formaliter, nec concomitanter mansisse facta assumptione. Primam vero consequentiam argumenti probat D. Th. quoniam id, quod assumitur, supponitur assumptioni: quæ propositio est valde notanda in hac materia, quam adeo per se notam D. Th. existimavit, ut nulla probatione, sed sola terminorum explicatione indigere putaverit, sicut quod movetur, inquit, præintelligitur motui, est enim assumptio mutatio quædam ejus nature, quæ assumitur, & ideo eam supponit, sicut mobile motui.

In solutionibus argumentorum nihil notandum occurrit, tum quia per se claræ sunt, tum quia similia argumenta sæpe in superioribus tractavimus.

## ARTICULUS III.

### Utrum persona divina assumpserit hominem.

**A**d tertium sic proceditur. Videtur, quod persona divina assumpserit hominem. Dicitur enim in Psalmo 64. Beatus, quem elegisti & assumpsisti. Quod glossa exponit de Christo: & Augustinus dicit in libro de Agone Christi, quod Filius Dei hominem assumpsit, & in illo humana perpeffus est.

**2.** Præterea, hoc nomen homo, significat naturam humanam: sed Filius Dei assumpsit humanam naturam. Ergo assumpsit hominem.

**3.** Præterea, Filius Dei est homo: sed non est homo, quem non assumpsit; quia sic esset pari ratione Petrus, vel quilibet alius homo. Ergo est homo, quem assumpsit.

**Sed contra** est auctoritas Felicis Pape & martyris, quæ introducitur in Ephesina Synodo. Credimus in Dominum nostrum Jesum Christum de Virgine Maria natum; quia ipse est Dei sempiternus Filius & Verbum: & non homo a Deo assumptus, ut alter sit præter illum; neque enim hominem assumpsit Dei Filius, ut alter sit præter ipsum.

**Respondeo** dicendum, quod sicut supra dictum est, illud, quod assumitur, non est terminus assumptionis, sed assumptioni præintelligitur. Dictum est autem, quod individuum, in quo assumitur humana natura, non est aliud quam divina persona, quæ est terminus assumptionis. Hoc autem nomen homo, significat humanam naturam, prout nata est in supposito esse: quia, ut dicit Damasc. sicut hoc nomen Deus significat eum, qui habet divinam naturam: ita hoc nomen homo significat eum, qui habet naturam humanam; & ideo non est proprie dictum, quod Filius Dei assumpsit hominem, supponendo (sicut rei veritas se habet) quod in Christo sit tantum unum suppositum, & una hypostasis, sed secundum illud, qui ponunt in Christo duas hypostases, vel duo supposita convenienter & proprie dici posset, quod Filius Dei hominem assumpsisset. Unde & prima opinio, quæ ponitur in 6. dist. tertii lib. Sentent. concedit hominem esse assumptum: sed illa opinio erronea est, & supra dictum est.



*e* Ad primum ergo dicendum, quod huiusmodi locutiones non sunt extendende tamquam propriae: sed pie sunt exponende ubicumque a sacris Doctoribus ponuntur: ut dicamus hominem assumptum, quia eius natura est assumpta, & quia assumptio terminata est ad hoc, ut Filius Dei sit homo.

*d* Ad secundum dicendum, quod hoc nomen, homo, significat naturam humanam in concreto, prout scilicet est in aliquo supposito: & ideo sicut non possumus dicere, quod suppositum sit assumptum: ita non possumus dicere, quod homo sit assumptus.

*Ad tertium dicendum, quod Filius Dei non est homo, quem assumpsit, sed cuius naturam assumpsit.*

#### COMMENTARIUS.

**I**N hoc articulo non tractat D. Thomas rem novam, sed illum proposuit ad explicandas nonnullas Sanctorum locutiones, quæ interdum non adeo propriæ & rigorosæ inveniuntur.

**Respon.** *b* Respondet igitur, non proprie dici Deum assumpsisse hominem, quam assertionem in argumento. Sed contra, probat testimonio Felicis Papæ, quod habetur, inquit, in Conc. Ephesino: ubi notandum est, neque in Conc. Ephesino, quod habetur 1. to. Conciliorum, neque in alio Concilio Ephesino nuper edito reperiri hoc testimonium Felicis, tamen in Concilio Chalcedonensi Actor 1. pa. 8 r. post fidem Synodi Nicenæ, referri varia Patrum testimonia, quæ recitata fuisse dicuntur in Concilio Ephesino, & octavo loco ponitur hoc testimonium. In quo tamen est ulterius observandum, illum non simpliciter negare Verbum assumpsisse hominem, sed verba ejus sunt: *Credimus in Dominum nostrum Jesum Christum ex Maria Virgine natum, quoniam ipse est æternus Dei Filius & Verbum, & non homo a Deo susceptus, ut alter esset præter ipsum: neque enim hominem assumpsit Dei Filius, ut esset alter præter ipsum.* Quibus verbis non videtur simpliciter negare illam propositionem, sed cum illo addito, ut esset alter præter ipsum; quanquam dici possit, hoc verbum non esse additum ad limitandam illam locutionem, sed potius ad indicandam rationem, quare Christus non possit dici homo assumptus, quia in hac locutione significatur, Christum esse alterum ab assumente, quia assumptus est alter ab assumente.

Quam rationem indicavit Cyrillus anathematismo 8. recepto in Conc. Ephesi. can. 8. ubi damnantur, qui hominem assumptum, una cum Dei Verbo adorandum dicunt, tanquam alterum in altero existentem. Et defendendo illum anathematismum ab objectione Orientalium, dicit idem Cyrillus non esse factam connexionem hominis cum Deo: & in defensione ejusdem contra Theodor. dicit: *Non hominem assumptum dicimus a Deo Verbo, & copulatum illi secundum habitudinem quandam, quæ extrinsecus intelligatur, sed hominem factum esse dicimus.* Et eandem rationem indicat B. Joannes Maxen. dialog. 1. contra Nestorium to. 5. Bibliot. circa finem dicens: *Ego a Deo susceptum hominem nullatenus dicere audeo, sed Deum factum hominem fateor, ne si susceptum a Deo hominem dixero, duas videar predicare personas.* Et ad hanc tendit etiam ratio D. Th. in articulo, quia homo significat humanitatem ut subsistentem; sed Christus non assumpsit humanitatem ut subsistentem; ergo neque hominem: minorem probat: quia quod assumitur, supponitur assumptioni, sed humanitas ut subsistens non supponitur assumptioni; sed potius per assumptionem trahitur ad subsistendum; ergo. Quæ ratio ita etiam explicatur, quia quod assumitur, terminatur subsistentia Verbi, non terminatur autem homo, sed humanitas, quia homo significatur ut subsistens, & ut persona.

*c* In primo argumento objicit D. Th. testimonium August. ex lib. de Agone Christi. c. 11. ubi ita loquitur: *Filius Dei hominem assumpsit*, quæ locutio frequens est apud illum, ut videre est l. 9. de civit. c. 17. & 21. & l. 10. c. 22. & 29. & ep. 66. & enarratione Psalmi. 4. & 29. & sæpe alias, quem imitata sunt Conc. Tolet. VI. & XI. in confessionibus fidei, & Anselm. lib. de Incarn. c. 5. citari etiam solet hæc locutio ex Concilio Ephes. & ex VI. Synod. Act. 11. sed male, in illis enim locis non reperitur. Indicat autem eam locutionem Irenæ. lib. 3. contra hæres. c. 1. & Damasc. l. 3. c. 6. Ac denique in Cætico, Te Deum laudamus, quod ab universa Ecclesia receptum est, dicitur: *Tu ad liberandum suscepturus hominem, non horruisti Virginis uterum.*

Propter quæ nonnulli, & inter eos Ludovicus Vives

9. de civit. c. 17. reprehendunt D. Thom. qui negat eam locutionem in rigore, & proprietate sermonis esse veram. Sed D. Tho. sententia communis est Theologorum in 3. d. 6. & eundem sequitur Alensis. 3. p. q. 4. mem. 7. ad finem, & sufficientissime probata est, & ideo ad August. (& idem est de aliis Patribus) respondet D. Tho. in hac solutione, eam locutionem, ubi inventa fuerit, non esse extendendam, sed pie explicandam. Adhibet vero duas explicationes: prima est, ut homo dicatur assumptus, quia ejus natura assumpta est, & hanc indicavit supra Anselmus, qui tamen addit hanc esse veram, Deus assumpsit hominem, quia terminus communis solam naturam significat: hanc vero falsam, Deus assumpsit hunc hominem, quia jam designatur persona. Quæ tamen differentia non videtur admodum necessaria, quia in proprietate sermonis etiam homo significat naturam, vel subsistentiam, si autem improprie loquamur, etiam hic homo potest significare hanc humanitatem. Secunda explicatio D. Tho. est, ut Deus dicatur assumpsisse hominem, quia assumptio terminata est, ut Deus sit homo: in qua significatione Verbum assumendi non significat actionem, ut est mutatio rei assumptæ, sed ut est veluti productio termini resultantis ex unione. Aliæ expositiones adhiberi solent, sed illas omitto, utpote non ita proprias.

*d* Alia argumenta, & solutiones eorum claræ sunt, & a Cajet. sufficienter explicantur. Collige tamen obiter ex solutione ad secundum, cum expositione Cajet. magis improprie esse hanc locutionem, homo assumptus est a Verbo, quam hanc, Verbum assumpsit hominem, quia subjecta magis stant materialiter, quam prædicata, & ideo magis in priori locutione significatur suppositum, vel personam hominis esse assumptam, quam in posteriori hoc indicetur, si proprie Verbo assumptionis utamur, quod in rigore supponit, ut subjectum, totum id, quod assumi dicitur.

#### ARTICULUS IV.

*Utrum Filius Dei debuerit assumere humanam naturam abstractam ab omnibus individuis.*

**A**D quartum sic proceditur. Videtur, quod filius Dei debuerit assumere humanam naturam abstractam ab omnibus individuis. Assumptio enim humane naturæ facta est ad communem omnium hominum salutem: unde dicitur primo ad Timot. 4. de Christo, quod est Salvator omnium hominum, maxime fidelium. Sed natura, prout est in individuis, recedit a sua communitate. Ergo filius Dei debuit humanam naturam assumere, prout est ab omnibus individuis abstracta.

*2* Præterea in omnibus, id, quod est nobilissimum, est Deo attribuendum: sed in unoquoque genere, illud quod est per se, potissimum est. Ergo filius Dei debuit assumere hominem per se. Qui quidem secundum Platonicos \* est ipsa humana natura ab individuis separata. Hanc igitur debuit filius Dei assumere.

*3* Præterea: Humana natura non est assumpta a filio Dei, prout significatur in concreto per hoc nomen homo, ut dictum est. \* Sic autem significatur, prout est in singularibus, ut ex dictis patet †. Ergo filius Dei assumpsit naturam humanam, prout est ab individuis separata.

Sed contra est, quod dicit Dam. \* in 3. lib. Deum Verbum incarnatum non eam, quæ nuda contemplatione consideratur, naturam assumpsit: non enim Incarnatio hoc, sed deceptio & fictio Incarnationis esset. Sed humana natura prout est ab individuis separata vel abstracta, in nuda contemplatione cogitatur: quia secundum seipsam non subsistit, ut ibidem Damascen. \* dicit. Ergo filius Dei non assumpsit humanam naturam, secundum quod est a singularibus separata.

*b* Respondeo dicendum, quod natura hominis vel cujusque alterius rei sensibilis, præter esse, quod in singularibus habet, dupliciter potest intelligi. Uno modo quasi per seipsam esse habeat præter materiam, sicut Platonicis posuerunt. Alio modo sicut in intellectu existens, vel humano vel divino. Per se quidem subsistere non potest, ut Philosophus probat in 7. Metaphys. † quia ad naturam speciei rerum sensibilium pertinet materia sensibilis, quæ ponitur in ejus definitione: sicut carnes & ossa in definitione hominis. Unde non potest esse, quod natura humana sit præter materiam sensibilem.

Sup. p. 3.  
art. 2. ad 4.  
& 5. ad 2.  
& q. 4. ar. 3.  
ad 1. & 3.  
c. & 3. d. 5.  
q. 3. art. 3.  
ad 1. & 2.  
6. q. 1. ar. 2.  
q. 3. ad 1.

Ut patet  
ex Arist. 2.  
metaph.  
tex. 6. &  
25.

Ar. præ-  
ceden.  
Art. præ-  
ceden.  
Li. 3. or. 8.  
¶ q. 1. r. cir-  
ca prin.

Loco nūc  
citato.

L. 7. metaph.  
tex. 26 &  
27. tom. 3.



Si tamen esset hoc modo subsistens natura humana, non fuisset conveniens, ut a Verbo Dei assumeretur. Primo quidem, quia assumptio ista terminatur ad personam: hoc autem est contra rationem formæ communis, ut sit in persona: quia in persona individuatur. Secundo, quia naturæ communi non possunt attribui, nisi operationes communes & universales, secundum quas homo non meretur, nec demeretur. Cum tamen illa assumptio ad hoc facta sit, ut Filius Dei naturæ assumptæ nobis mereretur. Tercio, quia natura sic existens non est sensibilis, sed intelligibilis. Filius autem Dei assumpsit humanam naturam, ut hominibus in ea visibilis appareret secundum illud Baruch. 2. Post hæc in terris visus est, & cum hominibus conversatus est. Similiter etiam non potuit assumi humana natura a filio Dei secundum quod est in intellectu divino: quia sic nihil aliud est, quam natura divina, & per hunc modum ab æterno esset in filio Dei humana natura. Similiter non convenit dicere, quod filius Dei assumpsit humanam naturam, prout est in intellectu humano; quia hoc nihil aliud esset quam quod intelligeretur assumere naturam humanam. Et sic si non assumeret eam in rerum natura, esset intellectus falsus. Nec esset aliud ista naturæ humana assumptio, quæ fictio quædam incarnationis; ut Damas. dicit.\*

Ad primum ergo dicendum, quod Filius Dei incarnatus, est communis omnium Salvator, non communitate generis, vel speciei, quæ attribuitur naturæ ab individuis separate: sed communitate causæ, prout Filius Dei incarnatus est universalis causa salutis humanæ.

Ad secundum dicendum, quod per se homo non invenitur in rerum natura, ita quod sit præter singularia, & ut Platonici posuerunt\*. Quamvis quidam dicant, quod Plato non intellexit hominem separatim esse, nisi in intellectu divino. Et sic non oportuit, quod assumeretur a Verbo, cum ab æterno sibi affuerit.

Ad tertium dicendum, quod quamvis natura humana non sit assumpta in concreto, ut suppositum præintelligatur assumptioni; sic tamen assumpta est in individuo, quia assumpta est, ut sit in individuo.

#### COMMENTARIUS.

Cajetanus exponit, in hoc titulo non quæri, an hoc fieri potuerit, sed an fuerit expediens, unde explicando literam articuli dicit, propterea D. Tho. non tantum docuisse fuisse impossibile humanitatem sic abstractam assumi, sed etiam non debuisse ita assumi, etiam si fuisset possibile. Sed ego existimo D. Th. voluisse docere illum modum incarnationis, & secundum se fuisse impossibile, & ad finem incarnationis, qui est redemptio nostra, esse ineptum, & disconvenientem, & ideo titulum articuli sub illis verbis proposuisse.

Ex qua tituli intelligentia, tam clara relinquitur responsio D. Th. ut fere nulla indigeat expositione. Quoniam vero Cajetanus quædam circa illam commentatur parum vera, minus utilia, valde autem obscura, ut ea intelligatur, & non sit deceptionis occasio, pauca notanda sunt, præsertim circa primam ejus dubitationem. Probat enim D. Thom. hanc conditionalem propositionem, etiam si natura humana esset separata ab individuis, non esset conveniens, ut a Verbo assumeretur, quia assumptio terminatur ad personam; est autem contra rationem formæ communis, ut in persona sit. Sed contra inquit Cajet. quia si talis forma existeret, necessario esset individua, & non esset universalis in essendo, sed in causando, seu in ratione causæ exemplaris; ergo non esset contra rationem ejus, ut assumeretur in persona. Quod confirmat exemplo formæ angelicæ, quæ licet sit forma separata, nihilominus est in persona. In quo dubio & solutione ejus supponit Cajetanus in naturis perfectis seu completis & spiritualibus, existere naturam specificam quasi separatam, & abstractam, & nihilominus esse terminatam per subsistentiam, seu personalitatem, quod dicit repugnare materiali naturæ: fortasse quia existimat in rebus materialibus individuum naturam addere aliquid supra naturam specificam, non vero in spiritualibus. Unde concludit, rationem D. Tho. non probare esse impossibile, formam separatam assumi in persona, sed solum non esse conveniens, quamquam statim videatur contrarium docere; constituit enim differentiam inter naturam humanam abstractam, & naturam angelicam, quia in angelis, inquit, licet natura sit abstracta, tamen in eis non tantum est natura, sed etiam habens naturam; si autem

humanitas esset abstracta, esset solum natura & humanitas, & non posset respectu illius esse aliquid habens naturam, & ideo esset impossibile assumi. Quæ responsio, ut dixi, videtur contraria priori, & omnino voluntaria, nam qui fingit speciem humanam existere abstractam ab individuis, non tantum fingeret humanitatem, sed etiam hominem abstracte existere.

Dicendum est ergo D. Thomam in hac parte articuli voluisse ostendere, impossibile esse assumptionem talis naturæ abstractæ, non solum quia impossibile est, naturam illam sic existere (hoc enim jam egerat in prima parte articuli); sed etiam quia haberet specialem repugnantiam cum assumptione, quia natura in communi, etiam si fingatur existens, tantum posset esse subsistens subsistentia in communi, & non certa & determinata personalitate: quia in persona individua non potest esse nisi natura individua, assumptio autem terminata est ad certam & determinatam personam. Neque contra hunc sensum procedit dubitatio Cajetani, nam posita hypothese, illa natura esset universalis, non tantum in causando, sed etiam in essendo, & prædicando, & consequenter, licet sequatur fore individuum, quia existentem, tamen etiam sequitur non fore individuum, quia abstractam, & universalem: hæc enim implicatio sequitur ex illa hypothese & ex posteriori membro sequitur, illam naturam ut sic non esse assumptibilem, nec personabilem, nec principium operationum particularium, &c. Denique contra hoc nihil facit objectio de angelica natura, supponit enim falsam doctrinam, cum illa revera non existat separata seu abstracta a singularibus, sed sit quædam individua, & singularis natura, non minus quam hæc humanitas, quo ad hoc enim nulla est differentia inter naturam spiritualement, & materialem, ut in alio loco latius disputandum est.

#### ARTICULUS V.

Utrum filius Dei naturam humanam assumere debuerit in omnibus individuis.

Ad quantum sic proceditur. Videtur, quod Filius Dei humanam naturam assumere debuerit in omnibus individuis. Illud enim, quod primo & per se assumptum est, est natura humana. Sed quod convenit per se alicui naturæ, convenit omnibus in eadem natura existentibus: ergo conveniens fuit, ut natura humana assumeretur a Dei Verbo in omnibus suis suppositis.

2. Præterea, Incarnatio divina processit ex divina charitate, unde dicitur Joa. 3. Sic Deus dilexit mundum, ut filium suum unigenitum daret. Sed charitas facit, ut aliquis se communicet amicis, quantum est possibile. Possibile autem fuit Filio Dei ut plures naturas hominum assumeret (ut supra dictum est\*) & eadem ratione omnes ergo conveniens fuit, quod Filius Dei assumeret naturam humanam in omnibus suis suppositis.

3. Præterea, Sapiens operator perficit opus suum breviori via, quæ potest. Sed brevior via fuisset, si omnes homines assumpti fuissent ad naturalem filiationem, quam quod per unum filium naturalem multi in adoptionem filiorum adducantur, ut dicitur Galat. 4. Ergo humana natura debuit a Filio Dei assumi in omnibus suppositis.

Sed contra est, quod Damas. dicit in 3. lib. quod Filius Dei non assumpsit humanam naturam, quæ in specie consideratur: neque enim omnes hypostases ejus assumpsit.

Respondeo dicendum, quod non fuit conveniens, quod humana natura in omnibus suis suppositis a Verbo assumeretur. Primo, quia tolleretur multitudo suppositorum humanæ naturæ, quæ est ei connaturalis. Cum enim in natura assumpta non sit considerare aliud suppositum præter personam asumentem (ut supra dictum est\*), si non esset humana natura, nisi assumpta, sequeretur, quod non esset nisi unum suppositum humanæ naturæ, quod est persona assumens. Secundo, quia hoc derogaret dignitati Filii Dei incarnati, prout est primogenitus in multis fratribus secundum humanam naturam, sicut est primogenitus omnis creaturæ secundum divinam: essent enim tunc omnes homines equalis dignitatis. Tercio quia conveniens est, quod sicut unum suppositum divinum est incarnatum: ita unam solam naturam assumeret, ut ex utraque parte unitas inveniat.

Ad

circa  
princ. lib.  
3. c. 11.

Apud A-  
rist. lib. 1.  
Met. 10.  
6. & 13.

Sup. q. 2.  
art. 5. ad 1.  
& 3. 1. 2. q.  
1. art. 2. q.  
1.

9. 1. 1. 7.

li. 3. c. 11.  
in princ.

art. 7. hujus  
quæst.



Ad primum ergo dicendum, quod assumi convenit secundum se humane nature, quia scilicet non convenit ei ratione persona, sicut nature divine convenit assumere ratione persona. Non autem convenit ei secundum se, sicut pertinet ad principia essentialia ejus, vel sicut naturalis ejus proprietas: per quem modum conveniret omnibus ejus suppositis.

Ad secundum dicendum, quod dilectio Dei ad homines manifestatur non solum in ipsa assumptione humane nature, sed precipue per ea, que passus est in humana natura pro aliis hominibus: secundum illud Roma. 5. commendat autem Deus suam charitatem in nobis: quia cum inimici essemus, Christus pro nobis mortuus est: quod locum non haberet, si in omnibus hominibus naturam humanam assumpsisset.

Ad tertium dicendum, quod ad breviteriam via, quam sapiens operator observat, pertinet, quod non faciat per multa, quod sufficienter potest fieri per unum. Et ideo convenientissimum fuit, quod per unum hominem omnes alii salvarentur.

## COMMENTARIUS.

**L**itera non eget explicatione, de ipsa vero re sufficienter dictum est supra, disputatione prima.

## ARTICULUS VI.

*Utrum conveniens fuerit, quod Filius Dei humanam naturam assumeret ex stirpe Ade.*

**A**d sextum sic proceditur. Videtur, quod fuerit conveniens, ut Filius Dei naturam humanam assumeret ex stirpe Ade, dicit enim Apostolus ad Hebr. 5. 7. Talis decebat, ut esset nobis Pontifex segregatus a peccatoribus. Sed magis esset a peccatoribus segregatus, si non assumpsisset naturam humanam ex stirpe Ade. Ergo videtur, quod non debuerit de stirpe Ade naturam humanam assumere.

2. Præterea, in quolibet genere principium nobilius est eo, quod est a principio. Si igitur assumere voluit humanam naturam, magis debuit eam assumere in ipso Adam.

3. Præterea, Gentiles fuerunt magis peccatores, quam Judæi, ut dicit glossa. \* ad Gal. 2. super illud: Nos natura Judæi, & non ex Gentilibus peccatores. Si ergo ex peccatoribus naturam humanam assumere voluit, debuit eam magis assumere ex Gentilibus, quam ex stirpe Abrahæ, qui fuit iustus.

Sed contra est, quod Luc. 3. Generatio Domini reducitur usque ad Adam.

Respondetur dicendum, quod sicut Augustinus dicit in 13. de Trinitate. \* Poterat Deus hominem aliunde suscipere, non de genere istius Ade, qui suo peccato obligavit genus humanum: sed melius judicavit, ut de ipso, quod victum fuerat, genere assumeret hominem Deus, per quem generis humani vinceret inimicum.

Et hoc propter tria. Primo quidem, quia hoc videtur ad iustitiam pertinere, ut illi satisfaciatur, qui peccavit: & ideo de natura per peccatum corrupta debuit assumi id, per quod satisfactio erat implenda pro tota natura. Secundo, quia hoc etiam pertinet ad maiorem hominis dignitatem, dum ex illo genere victor diaboli nascitur, quod per diabolum fuerat victum. Tercio, quia per hoc etiam Dei potentia magis ostenditur, dum de natura corrupta & infirma assumpsit id, quod in tantam virtutem & dignitatem est promotum.

Ad primum ergo dicendum, quod Christus debuit esse a peccatoribus segregatus quantum ad culpam, quam venerat destruere: non quantum ad naturam, quam venerat salvare: secundum quam debuit per omnia fratribus assimilari: ut idem Apostolus dicit ad Heb. 2. Et in hoc etiam mirabilior est ejus innocentia, quod de massa peccato subiecta natura assumpta tantam habuit puritatem.

Ad secundum dicendum, quod (sicut dictum est) oportuit eum, qui peccata venerat tollere, esse a peccatoribus segregatum, quantum ad culpam, cui Adam subiacuit, & quem Christus a suo delicto eduxit: ut dicitur Sapient. 10. Oportebat autem eum, qui mundare omnes venerat, non esse mundandum, sicut & in quolibet genere motus, primum movens est immobile secundum illum motum, sicut primum alterans est inalterabile. Et ideo non fuit conveniens, ut assumeret humanam naturam ab ipso Adam.

Ad tertium dicendum, quod quia Christus maxime debebat esse a peccatoribus segregatus, quantum ad culpam quasi summam innocentie obtinens, conveniens fuit, ut a

primo peccatore usque ad Christum perveniretur, mediis quibusdam iustis, in quibus præfulgerent quedam insignia future sanctitatis. Et propter hoc etiam in populo, ex quo Christus erat nasciturus, instituit Deus quedam sanctitatis signa, que inceperunt in Abraham, qui primus promissionem accepit de Christo, & circumcisionem in signum fœderis consummandi, ut dicitur Genes. 17.

## COMMENTARIUS.

**R**espondet D. Tho. affirmando, & congruentiam, quas adducit, sunt optimæ. Argumenta autem in contrarium facilia sunt, & ideo nihil in explicanda litera immorari oportet. Rem vero ipsam tractabimus infra, quæstio. 31. ubi de Christi genealogia, ejusque conceptione differitur.

## DISPUTATIO XIV.

In quatuor sectiones distributa.

*Quid potuerit a Deo assumi per quamcunque unionem hypostaticam possibilem.*

**Q**uoniam ea, quæ pertinent ad naturam assumptam per incarnationem jam factam, & facilia sunt, & cum his connexa, quæ sequenti quæstione tractat D. Th. ideo illorum disputationem differimus, & hanc de possibili præmittimus, quæ non nihil etiam conferat ad intelligendum ea, quæ jam facta sunt. Quatuor vero sunt quæ hic possunt in disputationem venire. Primo, suppositum creatum, seu natura in proprio supposito existens. Secundo, natura integra substantialis. Tercio, partes ejus. Quarto, accidentia: præter hæc enim nihil est in rebus creatis; de quo hic disputari possit. De natura autem, vel persona increata nihil dicendum est, cum per se notum sit non posse assumi.

## SECTIO I.

*Utrum natura existens in propria persona potuerit assumi.*

**S**uppositis variis sensibus hujus quæstionis, quos circa articulum secundum D. Th. explicavimus, duo sunt certa. Primum est, personam creatam formaliter, & ut persona est, non esse assumptibilem, in quo conveniunt omnes Doctores in 3. d. 1. & 5. Scotus in quodlib. qu. 19. ar. 3. Aureol. apud Capreol. in 3. d. 5. art. 2. in arg. con. 2. conclusionem. Est enim clara implicatio contradictionis, quia vel persona in suo conceptu formaliter includit negationem existendi in alio ut supposito, ut Scot. & alii volunt; vel certe includit modum per se existendi incommunicabiliter, ex quo modo immediate oritur illa negatio: & ideo illi modo directe repugnat in alio esse, seu ab alio terminari, est enim manifesta implicatio contradictionis: sicut in accidenti, quamvis possit Deus accipiens per se constituere, tamen quod ipsa actualis inhærentia accidentis in subiecto per se sit, est manifesta repugnantia, quia ille modus inhærentiæ includit formaliter vel radicaliter negationem modi essendi per se; & hac ratione dicitur personalitas ultimus terminus nature, quia in suo conceptu includit, ut persona per illam constituta in se & per se sit, cui directe repugnat, quod ab alio sustentetur, vel assumatur. Præterea hac ratione non potest esse unio substantialis inter duas personas, quia non potest steri ex illis una persona, & ideo etiam neutra potest aliam assumere. Confirmatur, quia, ut supra dicebam disp. 11. sect. 3. de ratione personalitatis est incommunicabilitas, imo ad hoc potissimum poni videtur, ut ita terminet naturam, quod eam sic terminatam reddat incommunicabilem, & ideo dicitur esse ultimus nature terminus: ergo est aperta implicatio, talem terminum amplius terminari, seu constitutum per talem terminum alteri hypostatice uniri. De ratione enim hujus termini, ut supra dicebam, non est, quod sit incommunicabilis nature ut sic: nam potius est modus ac terminus ejus: est ergo incommunicabilis persone, interminabilis altero simili termino. Sicut etiam linea non potest terminari alia linea, nec punctus alio puncto, nec unum ubi formaliter alio ubi, nec una actio alia actione: & in universum una forma non potest suum veluti formalem effectum per aliam formam recipere, ut calor fieri nequit calidus alio calore.

Infra q. 31.  
a. 1. & 3. d.  
2. q. 1. ar. 2.  
q. 2. & o.  
p. 1. c. 3. c. 2.  
224.

glossin-  
terl.

L. 13. c. 18.  
in princ.  
tom 3.

In solut.  
p. 1. c.



re:ita ergo nec personalitas ut sic potest alia personalitate personari seu terminari.

Secundo est certum, naturam præexistentem in propria persona posse assumi, si per assumptionem, & unionem ad aliam personam, privetur propria personalitate: hoc videtur per se evidens, quia non involvit majorem repugnantiam, si assumatur natura præexistens in propria persona, privetur personalitate propria, quā quod a principio assumatur, impediendo personalitatem propriam; illa enim unio, quæ impedit personalitatem propriam, potest etiam formaliter expellere præexistentem: virtus autem Dei, cum sit infinita, non minus potest effective expellere præexistentem personalitatem, quam, ne sequatur, impedire. Et confirmatur, nam potest Deus accidens prius inherens in subiecto privare modo inherentiæ, & per se cōstituire, & humanitatē jam existentē in Verbo posset privare modo unionis: & propriam personalitatē illi conferre; ergo & e contrario. Neque ullam rationem video, quare possit de hoc dubitari: quanquā D. Th. 4. contra gent. c. 4. videtur contrarium indicare, dicens non posse naturam humanam in propria persona præexistentem assumi, nisi per corruptionem talis personæ, & ideo, inquit, oportuisset illum hominem corrumpi, quia unioni præexistisset, & per consequens humanam naturam in eo existentem. Sed hæc ratio parum concludit, oportuisset enim personam corrumpi, seu definire esse formaliter quoad modum personalitatis, inde tamen non fit, ipsam humanitatem quoad substantiam suam corrumpi, sed mutare tantum modum existendi: sicut e contrario, si Verbum nunc dimitteret humanitatem, destrueretur in humanitate modus unionis, non tamen substantia ipsius naturæ. Unde etiam proprie, & in rigore non sequitur necessarium fore, tunc corrumpi hunc hominem, sed tantum hanc personam humanam, ut ex supra dictis disputationibus 13. constat. Et ita existimo D. Tho. hic art. 2. mutasse sententiam, non enim dixit impossibile esse humanitatem præexistere in propria persona, sed dicit frustra id futurum fuisse.

Tertio est certum, ad humanitatis assumptionem ex natura rei sequi, ut propria personalitate privetur, & hoc, ut minimum, probabunt rationes statim adducendæ. Quod etiam sufficienter persuadet incarnationis mysterium. Cur enim privata fuisset Christi humanitas propria personalitate, nisi id saltem ex natura rei ad assumptionem esset consecutum? Tandem humanitas ipsa, cum limitata sit, propria personalitate adæquate terminatur: ergo saltem ex natura rei non admittit aliam: ergo hoc ipso, quod ei datur alia, ex vi illius actionis consequitur, ut altera privetur.

Quartum ergo disputandum relinquimus, utrum natura terminata propria personalitate possit assumi conservata propria personalitate, ita ut nec personalitas assumatur, sed sola natura, nec tamen corrumpatur, sed concomitanter maneat terminans eandem naturam. Sicut natura divina, cum per æternam generationem communicatur Filio, in illo terminatur propria Filii personalitas, non amittendo personalitatem Patris: vel sicut, si eadem humanitas, quæ nunc est assumpta a verbo, conservata unione assumeretur etiam a Patre. Et hoc exemplum est, quod difficilem reddit hanc quæstionem, quia eadem natura existens in una persona aliena, potest assumi & terminari in alia, non amittendo priorem personalitatem; ergo eadem ratione natura existens in propria persona potest assumi, & terminari ab aliena persona, conservata propria personalitate. Quam illationem ita constantem existimavit Scot. in 3. d. 1. qu. 2. ut ne concederet consequens, negaverit antecedens, & ex contradictorios antecedentis intulerit contradictorium consequentis. Alii vero, qui nullam etiam sufficientem rationem differentię assignari posse existimant, de præsentī quæstione opinantur, non esse impossibile eandem naturam simul esse in supposito proprio & alieno, sicut non repugnat simul esse in duobus alienis, vel sicut eadem natura divina simul esse potest in tribus propriis, nulla enim hic specialis contradictio assignari potest. Quam sententiam non invenio apud aliquem auctorem, solum audi vi doctos aliquos viros ita sentientes, & publice docentes, & re vera non possunt ratione convincente impugnari.

Contraria vero sententia est communis Theologo-

rum, supponentium eam magis, quam probantium, ut videre est in Scoto supra, & Dur. 1. q. 3. ad 2. Palud. q. 3. ar. 2. Mar. in 3. q. 2. a. 3. dub. 1. ad 5. Capr. d. 1. ad 1. Scoti cōtra secundam concl. Cajet. supra q. 3. ar. 6. Palacios in 3. d. 1. disp. 3. ad finem, Henr. quodl. 6. q. 7. qui tamen in assignanda ratione, & implicatione cōtradictionis multum inter se discrepant. Prima sumitur ex Scot. quia natura creata non potest simul esse in multis personis, vel quia finita est, vel quia pendet a multis, in quibus existit, & non potest simul pendere a multis. Sed hæc ratio supponit falsum, & supra soluta est, cum definivimus eandem humanitatem posse simul assumi a duabus personis divinis, cujus contrarium illa ratio probaret, si efficax esset. Et ideo alii auctores conantur repugnantiam ostendere, assignando differentiam inter naturam terminatam propria personalitate, & assumptam a Verbo.

Secunda ergo ratio ex Cajetano fit, quia natura assūpta terminatur ab aliena persona intensive, non tamen extensive: at vero per propriam personalitatem terminatur intensive, & extensive, & ideo hæc personalitas propria nō admittit consortium alterius personalitatis. Sed hæc ratio, nisi aliud addatur, potius est petitio principii, quam probatio, per illa enim verba nihil aliud fit, quam obscurius repetere ipsam conclusionem: dicere enim naturam terminari personalitate propria intensive, & extensive, nihil aliud est, quam dicere ita terminari, ut non possit simul ab alia persona terminari: hæc autem est assertio, cujus rationem indagamus. Addit ergo Cajetanus naturam existentem in propria persona constituere illam vi sua, quia secum affert propriam personalitatem, velut a se manantem: & ideo non potest hoc modo constituere, nisi unā personā: unde fit consequens, ut dum ita subsistit, non possit ab alia persona assumi, quia sequitur implicatio cōtradictionis, nimirum, quod esset una persona, & nō esset una persona cum assumente. Sed neq; vim hujus rationis fatis percipio, quia ex illa solum habetur, naturam creatā solum posse constituere unam personam, tanquam propriam, & connaturale principium, atq; adeo ut sibi intrinsicam, & connaturalem. Quod vero natura constituens hoc modo unam personam, non possit assumi ut alio modo componat cum assumente aliam personam humanā, non potest illa ratione concludi: quia hoc posito non sequitur illa contradictio, sed tunc esset una persona cōnaturalis, & alia assumens, & persona assumens esset una & eadem cum persona composita resultante ex unione, seu assumptione, quod solum est de intrinseca ratione unionis hypostaticæ, non tamen esset una & eadem cum persona, quæ concomitanter tantum supponitur assumptioni; quod non videtur esse contra rationem unionis hypostaticæ, ut suo modo patet in casu supra posito de natura assumpta a duobus personis.

Et ideo addit ulterius Cajet. ex illo modo, quo humanitas terminatur propria personalitate, sequi, ut, dum sic terminata est, non possit assumi, quin assumatur talis personalitas, propter naturalem connexionem, quam inter se habent: hoc tamen non sequitur, quando natura est terminata in aliena persona, quæ est quodāmodo extrinseca, & non connexa cū ipsa natura. Sed adhuc non cogitatio, quia cum personalitas sit, vel res, vel modus ex natura rei distinctus, nihil videtur repugnare humanitatem assumi, quæ est capax assumptionis, manente personalitate non assūpta, quia est incapax talis assumptionis: sicut supra dicebamus naturā unitā uni personæ posse assumi ab alia, non assumpto modo unionis cum priori persona, quia ille modus est inassumptibilis, & licet sit in ipsa natura, tamē distinguitur ab illa ex natura rei. In Trinitate etiā videmus, eandem naturā ultimo terminatā in persona Patris, rursus terminari per relationem Filii, quamvis una personalitas non terminet personaliter aliā: ad hunc ergo modum potest facilius intelligi, Verbum assumere, & terminare naturam personatam, & non personalitatē ejus, cum inter hæc sit distinctio ex natura rei, quæ non reperitur inter essentiam, & personalitates divinas.

Præterea, licet in eodem Christi corpore sit præsentia localis in cælo, & sacramentalis in Eucharistia & unaqueque afficiat Christi corpus, illudq; faciat alicubi præiens, tamen neutra afficit alteram, neque facit præsentem, quia & ex natura rei distinguuntur a corpore, & inter se habent oppositionem, neque una est capax effectus formalis alterius: atque idem erit, quotiescumq; opposita, vel dispa-



disparata in eodem tertio conjuncta fuerint, ut si albedo & nigredo essent in eodem subiecto, illud quidem efficerent, inter se autem nihil communicarent quoad suos effectus formales: sic ergo esset in presenti casu, si subsistentia propria & aliena eamdem naturam terminarent, non ideo sequi, quod una alteram afficeret, aut terminaret. Ratio denique a priori est, quia posset natura pendere a pluribus & singulis personalitatibus, licet una personalitas ab alia non penderet: quia neque una personalitas indigeret alia, neque haberet influxum ullum vel habitudinem ad illam, sed mere concomitanter se haberent.

Quare addit ultimo Cajetanus, personam divinam esse infinitam, & supra capacitatem naturæ humanæ, personalitatem autem creatam esse finitam, & quasi adequatam ipsi humanitati. Sed hoc nihil ad præsentem questionem referre video; quanquam enim humana natura existens in propria persona sufficienter, & adæquate terminetur, ita ut neque natura sua appetat aliam personalitatem, neque habeat naturalem capacitatem ejus, non inde fit, implicare contradictionem, ut supra naturam excellentiori modo terminetur per infinitam personam Verbi. Cur enim non dicemus hoc posse Verbum propter infinitatem suam? Etenim cum persona Verbi non solum adæquate, sed etiam excellenter terminet naturam humanam, & nihilominus possit simul terminari ab alia persona, cur eadem natura, licet adæquata terminetur propria personalitate, non poterit simul terminari ab excellentiori persona?

Tertia ergo ratio sumitur ex Durando & Capreolo, scilicet, quia una natura non potest simul terminari duabus personalitatibus, quæ non tantum in propria ratione personalitatis, & incommunicabilitatis, sed etiam in ratione subsistendi distinguuntur, quia non potest una natura, nisi unica subsistentia subsistere: & ideo natura divina potest tribus relationibus terminari, quia illæ non distinguuntur in ratione subsistendi, sed in sola incommunicabilitate; & propter eandem causam potest eadem natura creata eisdem relationibus divinis simul terminari, non vero potest simul terminari propria personalitate, & divina, quia hæc non solum in incommunicabilitate, sed in ratione subsistendi distinguuntur. Sed hæc ratio primum supponit falsum, quia relationes divinæ revera distinguuntur in propria ratione subsistendi; & quamvis conveniant in communi, & absoluta subsistentia, possunt tamen proxime & immediate assumere eandem naturam, & terminare illam, solum per proprias subsistentias. Deinde non ostendit repugnantiam, cur non posset eadem natura pluribus subsistentiis subsistere, vel propriis, vel alienis, vel altera propria, & altera aliena, sicut potest ignis simul esse calidus duplici calore, altero innato, altero adventitio.

Quarta ratio sit, quia natura existens in propria persona, existit existentia creata, in persona autem Verbi existit existentia increata, repugnat autem eadem naturam simul existere per creatam & increatam existentiam. Sed hæc ratio, & falsum supponit, quia natura nunquam existit extra causas, nisi per existentiam creatam: & illo admissio non ostendit, cur repugnet, eandem naturam illis duabus existentis simul existere; vel enim repugnaret solum, quia duæ sunt, & hoc non, aliàs nec posset eadem natura simul existere duabus existentis relativis increatis: vel repugnat, quia una est creata, & altera increata, & oporteret ostendere specialem implicationem, quæ hinc sequatur, nulla enim apparet.

Quinta ratio additur a quibusdam, quod personalitas propria est intrinseca; & ideo non secum cõpatitur aliam extrinsecam; duæ autem personalitates connaturales & intrinsecæ, ut sunt in natura divina, vel duæ etiam extrinsecæ, ut essent respectu humanitatis duæ personæ divinæ, si illam assumerent, non habent prædictam repugnantiam. Sed hæc ratio ex hoc præcise, quod una sit intrinseca, & alia extrinseca, nullam sufficientem repugnantiam declarat. Nam, si intrinsecum dicatur, quod est intime conjunctum, etiam persona assumens naturam est intime conjuncta, & unio ad illam est maxime intrinseca. Unde inter uniones ad plures personas esset eadem repugnantia. Item hoc modo duæ formæ inhærentes sunt intrinsecæ subiecto, & duo ubi seu duæ præsentia, & tamen Deus conjungit hæc, etiam si aliqui disparata sint, vel opposita in eodem subiecto. Si autem intrinsecum dicatur, quod est connaturale, extrinsecum vero, quod ad-

ventitium est, sicut Deus conservat in eodem subiecto duas formas, vel duo ubi præter naturalia, & extrinseca, ita potest conservare unum naturale, & aliud adventitium. Neque hoc refert quicquam ad repugnantiam, si alioqui inter effectus formales talium formarum vel modorum non declaretur repugnantia.

Sexta ratio sumitur ex Paludano, & Durando, quia personalitas relativa non excludit consortium alterius personalitatis relative ab eadem natura; at vero personalitas absoluta excludit conjunctionem, seu consortium cujuscumque alterius personalitatis: quia ergo personalitas propria est absoluta, ideo natura, quæ per illam terminata est, non potest per illam personalitatem simul terminari; quia vero natura assumpta ab una persona divina solum per relativam personalitatem terminata est, ideo potest simul ab alia persona divina assumi. Hæc ratio est probabilis, tamen non satis ostendit, cur implicet contradictionem, personalitatem absolutam simul conjungi in eadem natura cum relativa: quia licet verum sit, personalitatem absolutam esse limitatam, & natura sua non admittit aliam, non tamen inde sequitur, hoc non posse fieri virtute divina. Nam etiam una forma natura sua non admittit aliam in eodem subiecto, & tamen Deus potest facere, ut simul existant. Et confirmatur: quia si fieri posset, ut suppositum creatum, v. g. Angelicum terminaret humanam naturam, illo posito, natura humana terminata ab Angelo, posset simul assumi a Verbo, & tamen personalitas Angeli absoluta est. Antecedens quamvis a Palud. consequenter negetur, videtur per se satis clarum, & contrarium non esse verisimile, supposito quod eadem natura potest esse in duplici supposito alieno, quia non potest ibi ostendi specialis repugnantia.

Responderi potest ex Henrico supra, personalitatem relativam non excludere consortium alterius relative personalitatis ab eadem natura per identitatem cum illa, quæ non potest esse cum personalitate absoluta. Sed hoc non videtur referre, nam illa duo supposita relativa realiter distinguuntur ab humanitate, quam terminare simul possunt: ergo, quod in alia natura sint idem, nihil refert, cum non terminent per id, in quo sunt idem, sed in quo distinguuntur. Item illa ratio ad summum probat, duas personas absolutas, vel absolutam & relativam, non posse esse connaturales eadem naturæ, non vero, quod de potentia absoluta non possint illam terminare, quia ad hoc non est necessaria identitas personæ terminantis vel assumptis cum natura terminata vel assumpta; ergo omnis alia identitas est impertinens & per accidens.

Ultima ergo ratio, quæ mihi maxime satisfacit, est, quia propria, & creata subsistentia solum est modus quidam intrinsecus per se existendi; hic autem modus habet formalem, & immediatam repugnantiam cum illo modo unionis, quem habet natura assumpta in alieno supposito, quia esse per se, & in alio, sunt modi ita repugnantes inter se, ut unus proxime includat negationem alterius. Quod exemplo sumpto ex aliis modis similibus bene explicari potest: fieri enim non potest, quod eadem virga simul sit recta, & curva; quia illi modi licet positivi sint, includunt immediatam repugnantiam. Et simili ratione idem accidens non potest simul per se esse, & actualiter inhære, & sic de aliis. Et ex hac ratione facile sumitur ratio differentia, cur eadem natura possit simul esse in duabus personis extrinsecis, non vero in propria & aliena: quia scilicet magis repugnant inter se existendi per se & in alio, quam duo modi existendi in alio, quia illi duo modi ita se habent, ut unus includat negationem alterius, isti vero minime, sed sunt prorsus disparati; sicut idem accidens potest simul esse in duobus subiectis, non tamen simul per se, & in alio. Et eadem ratione intelligitur facile, cur possit eadem natura divina esse in tribus personis, scilicet, quia in omnibus illis est per se, & omnes illæ personalitates sunt veluti modi per se existendi, & non dicunt unionem ad extrinsecam personam: modi autem per se existendi inter se comparati non includunt illam repugnantiam & negationem mutuam, quam includunt modi per se, & in alio.

Dices. Etiam humanitas assumpta Verbo per se existit in Verbo, quia in illo subsistit. Cur enim magis dicetur esse per se per propriam subsistentiam, quam per alienam, cum ab utraque distinguatur, & in utraque suo modo ni-



tatur, vel sustentetur? Nam quod alteri uniatur per modum distinctum, alteri vero non, videtur nihil referre. Respondetur, longe aliter esse naturam in propria persona, & in aliena, nam in propria est quasi sibi ipsi innitens, in aliena est quasi sustentata ab illa, & ideo modus propriæ subsistentiæ oppositam omnino rationem habet cum modo unionis. Ac denique in hoc sensu natura assumpta non est proprie per se, nec subsistit in se, sed in alio, quod proprie dicitur subsistere in illa.

Potest denique hæc ratio, & simul communis hæc Theologorum sententia confirmari ex doctrina, & modo loquendi Conciliorum, & Sanctorum de hoc mysterio: quia enim in Christo Domino facta est substantialis unio hypostatica inter humanam naturam, & divinam personam, definiunt omnes esse in Christi humanitate unicam tantum personam increatam, & divinam, illamque solam in illa humanitate subsistere: sentiunt ergo illum modum unionis humanitatis ad Verbum repugnare cum persona creata, illamque formaliter excludere: quomodo inter dum Sancti dicunt, personam consumpsisse personam, ut supra vidimus. Dicitur fortasse, ex natura rei verum esse illos duos modos inter se repugnare, & hoc satis esse, ut in Christi humanitate non permanerit personalitas creata, non tamen necessarium esse, ut contradictionem implicet. Sic enim in materia de Eucharistia ex præsentia corporis Christi sub speciebus inferunt Concilia absentiam substantiæ panis, quia ex natura rei sequitur, licet oppositum non repugnet. Sed hoc mihi non satisfacit, quia cum hoc mysterium omnino sit supernaturale, & in eo tota ratio facti sit potentia facientis, si de potentia absoluta fieri potuit, ut humanitas assumeretur sine privatione suæ personalitatis, non esset ratio sufficiens ad negandum ita factum esse, cum illud non repugnet alicui perfectioni Christi, vel hujus unionis. Et deinde, quia si illi duo modi ex natura rei repugnant, inde fit (non ratione formæ, sed saltem ratione materiæ) ut simpliciter, & de potentia absoluta repugnent; scilicet, quia illi duo modi non repugnant ut formæ contrariæ, sed ut modi proxime includentes negationem mutuam, seu contradictionem, ut explicatum est.

Neque exemplum de Eucharistia est ad rem: quia Concilia non colligunt absentiam panis ex naturali repugnantia cum præsentia corporis Christi, quæ fortasse nulla est, sed colligunt ex veritate verborum, quibus fit consecratio, ut suo loco dicitur. Cum qua veritate, supposita significatione verborum, quam propriam & genuinam esse intellexit ac declaravit Ecclesia, omnino repugnat substantiam panis manere cum corpore Christi. Sic ergo in præsentie ex locutionibus Scripturæ, quibus de Christo Deo homine loquitur ut de una & eadem persona, intellexit Ecclesia non esse in Christo Domino personam humanam creatam: ergo intellexit veritatem illarum locutionum non posse consistere cum persona creata. At vero, si esset possibile, humanitatem assumptam simul subsistere in propria persona, illæ omnes locutiones essent veræ, etiamsi in Christo esset duplex persona: non ergo habuisset Ecclesia sufficiens fundamentum, ex quo veritatem personæ Christi colligeret. Non ignoro conjecturam hanc posse habere probabilem responsionem, nimirum ex illis locutionibus immediate inferri, personam ipsam increatam in humanitate subsistere, quia in Scriptura vel tota fidei doctrina nulla fit mentio alterius personæ in illa humanitate subsistentis, hanc esse virtuale exclusionem seu negationem alterius personæ, sicut quia non revelantur nobis nisi tres personæ Trinitatis, ibi virtute revelatur non esse quatuor. Sic ergo Scriptura cum nobis tantum revelet unam Christi personam, virtute negat plures esse in Christo personas. Et ad hoc etiam conducit naturalis repugnantia, etiamsi de potentia absoluta non esset. Quare etiam oppositam sententiam censeo probabilem, quam video doctis viris non displicere: ratio etenim a nobis facta non est demonstratio, sed solvi etiam potest. Nihilominus sententia proposita magis probanda videtur, tum quod communis sit, tum etiam quod existat apud fidei mysterium declarandum; tum demum quod ratione satis probabili suadeatur.

Una vero superest difficultas, quia hæc ratio facta ad summum probat, humanitatem, in uno & eodē loco existentem, non posse simul habere illos duos modos existendi: tamen si constituamus humanitatem esse in duobus

distinctis locis, nulla videtur repugnantia, quod in uno habeat personalitatem propriam, & per se existat, in alio vero illa careat, & existat in Verbo. Dici potest primo, humanitatem ita uniri Verbo, ut ex vi illius unionis necessario maneat illa unita, ubicumque existit, idque propter summam Verbi simplicitatem, & ineffabilem modum illius unionis, quæ abstrahit ab hoc & illo loco, & fit ad ipsum Verbum secundum se: propter hanc enim causam, quamvis Christus secundum humanitatem localiter moveatur, ipso Verbo secundum se immutato manente semper humanitas, ubicumque existit, manet eodem modo unita Verbo ex vi ejusdem unionis. Et in mysterio Eucharistiæ, per quod humanitas Christi quodammodo in multis locis constituitur, in omnibus est unita Verbo ex vi ejusdem unionis.

Sed nihilominus hoc mihi non satisfacit, quia licet ex natura rei verum sit, humanitatem unitam Verbo, ubicumque constituitur, ferre secum suam unionem, quia est intrinsecus modus ejus, & a loco non pendens: tamen cum hic modus ex natura rei ab ipsa humanitate distinguatur, non videtur implicare contradictionem, ut existente humanitate unita in uno loco, constituitur in alio quoad substantiam suam, & non quoad modum unionis: sicut non videtur contradictionem involvere, quod eadem anima, quæ in uno loco est unita corpori, in alio ponatur sine corpore, & sine modo unionis: & similiter quod idem accidens alicubi inhæreat subjectio, alibi vero sine subjecto sit. Admisso ergo hoc casu, ut possibili, non videtur inconveniens concedere totum id, quod argumentum intendit: quia illi duo modi non repugnant, nisi respectu ejusdem subjecti, ut habet rationem unius; at vero humanitas constituta in duobus locis, habet vicem, seu modum duplicis subjecti. Deinde contradictio, seu repugnantia, quæ includitur illis modis, solum est servatis omnibus circumstantiis ad contradictionem requisitis, & consequenter requiritur, ut sit in eodem tempore, & loco: unde sicut pro diversis temporibus non sibi repugnant, ita nec pro diversis locis videntur pugnare. Quod denique exemplis supra positis declaratur, quia unum accidens potest in uno loco inhære, & in alio per se esse, & una linea in uno loco esse recta, & in alio curva. Neque contra hoc video, quod obijci possit, argumentum enim supra factum ex unitate personæ Christi, & locutionibus Sanctorum, contra hoc non procedit, loquuntur enim de mysterio, ut factum est; nunc autem humanitas Christi, ubicumque est, est unita Verbo, non quia contrarium implicet contradictionem, sed quia ubicumque est hic homo, est verus Deus: & quia facta unione hoc est illi debitum, & connaturale, & maxime pertinens ad perfectionem ejus. Sicut etiam ubicumque nunc est caro Christi, est unita animæ, non quia contrarium implicet contradictionem, sed quia hoc pertinet ad majorem perfectionem, & est magis connaturale.

Alia hic posset esse quasi inculca, an possit Deus eandem naturam conservare in duplici persona, non aliena, sed propria: faciendo videlicet ut natura habeat duos proprios modos subsistentiæ. Et ratio dubii est, quia in eis non procedit repugnantia posita, nam per eos non esset per se & in alio, sed per utrumque esset per se: ergo ex hoc capite non est repugnantia. Nec vero ex sola pluralitate, quia non repugnat has subsistentias multiplicari in eadem natura successive; posset enim Deus subsistentiam, quam nunc habeo, a me auferre, vel aliquo tempore impedire, aliamque loco illius tribuere: ergo etiam simul posset utramque ponere in mea natura. Tandem accidenti posset simul conferre duplicem inhærentiam, vel in diversis, vel etiam in eodem subjecto. Nec vero hinc sequitur infinitas in natura, tum quia non esset ille modus subsistendi in pluribus suppositis, propriis connaturalis, nec debitum, tum etiam, quia non esset per identitatem in illis, sed per unionem. Fateor, me nunc non invenire in hoc repugnantiam, nec inconveniens aliquod, sed fortasse in Metaphysica pressius dubitationem hanc examinabo. Hoc enim loco, non expedit in ea diutius immorari.

## S E C T I O II.

*Utrum alia substantialis natura præter humanam sit assumptibilis a persona divina.*

**H**ic non agimus de natura assumptibili solum ex intrinseca congruentia, sed simpliciter de potentia obe-



obedientia; seu non repugnantia: neque agimus de humana natura, satis enim ex mysterio facto constat, assumptibilem esse. Neque audiendus est error Wicleph, quem refert Walden. lib. 1. Doctrinalis Fidei antiquæ c. 44. qui asseruit, nullam aliam humanitatem fuisse a Verbo assumptibilem, præter eam singularem, & individuum, quam assumpsit. Est enim hoc plane absurdum, & sine fundamento dictum, quia non est major ratio, vel repugnantia in una, quam in alia, cum in substantia, & specie ejusdem rationis sint, & consequenter eandem capacitatem habeant substantialem, ut Verbo uniantur. Et ideo August. 13. de Trinit. c. 18. ut per se notum supponit, potuisse Verbum assumere humanitatem aliunde, quam ex stirpe Adæ, & ideo de Prædest. Sanct. c. 15. dicit, ex sola Dei gratuita electione, & non ex alicujus meritis factum esse, ut illa potius humanitas, quam alia Verbo jungeretur. Itaque in hoc nullus unquam Catholicus dubitare potuit.

Omissa ergo humana natura, quæstio esse potest vel de natura superiori, ut est Angelica, vel de inferiori, ut est irrationalis, vel insensibilis natura.

Prima sententia esse potest, negans, Angelicam, seu spirituales naturam esse assumptibilem. Ita tenet Albertus in 3. dist. 2. art. 2. Et fundamentum esse potest, quia in natura immateriali suppositum nihil addit supra naturam ipsam; sed ipsa natura per se ipsam formaliter est quo est, & quod est: inde enim fit, non esse magis assumptibilem talem naturam, quam suppositum. Quod fundamentum videtur doceri a D. Th. 4. contra gent. c. 55. ad 4. & 1. part. q. 3. ad 3. ubi generaliter dicit, in separatâ materia non distingui suppositum a natura.

Secunda sententia negat, irrationalem naturam esse assumptibilem, nisi aliquem ordinem habeat ad rationalem. Hæc tribuitur Alexand. Alens. 3. p. q. 2. memb. 7. & Bonav. in 3. dist. 2. art. 1. q. 1. Sed his locis non agunt de possibili simpliciter, sed de eo, quod maxime decet. Magis hoc insinuat idem Alensis q. 11. memb. 1. & quæst. 12. memb. 1. artic. 1. Et sequitur ex alia ejus doctrina in q. 7. memb. 2. art. 1. scilicet naturam non esse assumptibilem, nisi mediante gratia habituali, cujus cum irrationalis natura capax non sit, sequitur neque hujus unionis esse capacitatem. Expressius tenuit hanc sententiam Henric. quodlib. 13. q. 5. Carthus. dist. 2. q. 2. art. 3. Picus Mirandul. in Apolog. conclus. 4. & eam ut probabilem defendunt Richard. dist. 2. art. 1. q. 2. Gabriel. dist. 2. q. 2. Marsil. in 3. q. 3. Fundamenta infra videbimus.

Dico primo, potuisse Deum assumere, sibi que hypostatice unire naturam Angelicam. Hæc est D. Th. hic art. 1. ad 3. & 4. contra gent. cap. 55. ad 3. & 4. quibus locis Cajet. Ferrar. & alii Thomistæ id docent: & est communior sententia Doctorum in 3. dist. 2. & sumi potest ex verbis Pauli ad Hebr. 2. *Nusquam Angelos apprehendit, sed semen Abrahe apprehendit*; quæ verba clare supponunt, utrumque fuisse possibile, gratiam vero Dei erga humanum genus in hoc commendari, quod in hac unionem humanam naturam Angelicæ prætulit: & hoc modo expositores, omnes & Sancti hæc verba interpretantur. Et confirmatur, quia anima separata mansit unita Verbo hypostatice: ergo pari ratione, &c. Ratio vero a priori sumenda est ex fundamento illi contrario, quod prima sententia sumebat, scilicet etiam in naturis spiritualibus suppositum ex natura rei a natura distingui, quod in Metaphysica, tractando de natura & supposito, sufficienter disputatum est. Unde quod Ferra. citato loco dicit, quamvis in Angelis non sit distinctio naturæ a persona, non sequi esse impossibile assumi naturam Angelicam, & privari sua personalitate, sed solum non esse congruum, non video quomodo intelligi possit. Nam si persona Angelus non distinguitur a natura; ergo personalitas Angeli nihil est præter ipsam naturam, quomodo ergo illa privari potest? Denique si ad hanc assumptionem non esset necessaria distinctio suppositi a natura, numquam propter hoc mysterium sancti Patres, & Theologi hanc distinctionem docuissent, & quoad hoc non est major ratio de natura Angelica, quam humana: & ideo melius Cajet. hinc colligit etiam in Angelis personalitatem distingui a natura.

**Objectio.** Dices. Ergo posset nunc Deus assumere naturam Angeli corruptendo personam ejus: quod videtur repugnare, quia persona Angeli est incorruptibilis. Respondet Suarez Tom. XVI.

tur, concedendo primo, posse Deum assumere naturam Angeli præexistentem in propria persona, juxta supra dicta sectione præcedenti. Secundo necessarium esse, talem naturam privari personalitate, & consequenter eandem personalitatem, seu personam ut sic, desinere esse juxta dicta etiam sectione præcedenti: An vero illa desitio dicenda sit corruptio, quæstio est de nomine; magis vero proprie diceretur mutatio quædam in modo existendi salva substantia ipsius naturæ: sicut quando accidens separatur a subiecto, mutat modum existendi, non tamen proprie corrumpitur: quod si inhærentia ipsa, vel in nostro proposito ipsa personalitas corrumpi dicatur, non propterea persona Angelica dicenda est corruptibilis, quia ex natura sua non est subiecta huic mutationi, sed solum per divinam potentiam, illam potest suscipere.

Dico secundo. Simpliciter loquendo, non implicat contradictionem, naturam irrationalem, vel insensibilem uniri Deo hypostatice. Hæc est sententia communior Theologorum in 3. dist. 2. ubi D. Th. q. 1. art. 1. & Scot. q. 1. art. 2. Palud. q. 1. Durand. q. 1. Almai. q. 2. Marsil. q. 3. art. 1. Okam. q. art. 3. & 9. Capreol. Cajet. & omnes Thomistæ. Et videtur aperta sententia August. lib. de vera relig. c. 16. tom. 1. ubi ait, per hoc mysterium demonstrasse Deum, quam excelsum locum inter creaturas habeat humana natura: quod non solum visibiliter: *Nam id, inquit, poterat in aliquo æthereo corpore, ad nostrorum aspectum tolerantiam temperato, sed etiam hominibus in vero homine apparuit: ipsa enim natura suscipienda erat, quæ liberanda.* Idem sentiunt Tertullianus & Gregorius Nyssen. infra citandi. Et ex his, quæ facta sunt, potest hæc sententia suaderi, primo, quia corpus humanum, & terrenum Verbo unitum fuit. Dices, fuisse unitum mediante anima, sine qua uniri non posset, ut expresse affirmat Origen. 2. Periarch. c. 6. dicens: *Non enim possibile erat Dei naturam corpori sine medio, scilicet anima, misceri.* Sed contra, nam licet anima dicatur medium ut quo, seu in ordine intentionis, non tamen fuit medium physice, ut ita dicam, seu in ordine executionis, ut q. 6. explicabitur. Verbum enim ipsum immediate fuit unitum corpori, & materia secundum se, quamvis in ordine ad animam, & propter animam. Deinde in triduo mansit corpus sine anima, & tamen vere ac substantialiter mansit unitum hypostatice Verbo; ergo informatio animæ non erat simpliciter necessaria ad hanc unionem. Unde illa verba Origenis vel rejicienda sunt, vel pie explicanda secundum quandam congruitatem. Sed respondent alii, etiam corpus fuisse unitum mediante anima, per dispositionem, quæ in illo mansit. Sed hoc nihil refert, quia in corpore non manent, nisi vel accidentia, quæ per se non referunt ad unionem hypostaticam, ut ex supra dictis patet, vel ordo aut habitudo ad animam, quæ in corpore fuit, & postea iterum futura erat per resurrectionem, quæ potius est habitudo rationis, vel denominatio extrinseca, quam aliquid intrinsecum ipsi corpori; ergo intrinsece ipsum corpus ratione suæ substantiæ fuit capax hujus unionis; ergo pari ratione quælibet natura substantialis habet eandem capacitatem. Tertio hoc suadetur, quia sanguis, & alii humores, ut infra dicitur, sunt uniti Verbo hypostatice, cum non informantur anima juxta probabiliorē sententiam; ergo eodem modo poterat assumi quælibet alia substantialis natura inanimis. Quod si dicatur, sanguinem esse assumptum, ut partem pertinentem ad veritatem humanæ naturæ: hoc quidem referre potest ad congruitatem, seu decentiam unionis, non vero ad capacitatem simpliciter, quia hæc est intrinseca ipsi substantiæ, quæ unitur, & proxime oritur ex hoc, quod est natura capax subsistentiæ. Unde arguitur quarto (& hæc est propria ratio conclusionis) quia unio hypostatica proxime, & per se terminatur ad subsistentiam; sed quælibet natura substantialis est capax subsistentiæ; ergo est capax hujus unionis. Denique nulla contradictio, vel repugnantia potest vel probabiliter ostendi, ut parebit objectionibus satisfaciendo.

Prima objectio est, quia irrationalis natura non est apta ad constituendam personam; ergo non potest in divina persona subsistere. Respondetur, personam & suppositum non differre in modo incommunicabiliter subsistendi, sed solum differre in dignitate naturæ, quia persona dicit illum modum subsistendi, quasi extrinsece limitatum, & contractum ad naturam rationalem. Quo

Respon.

Objectio.

Respon.



circa respectu hujus unionis hypostaticę nihil refert, quod terminus per illam resultans denominetur suppositum, vel persona, hoc enim pendet ex conditione tantum naturę assumptę: per se vero solum necessarium est, ut sit unio in subsistentia: & ideo omnis natura capax subsistentiæ est capax hujus unionis. Ex quo expeditur facile, quod a quibusdam quæri solet, si Verbum uniretur naturę irrationali, an uniretur in ratione personę, ut Okam supra contendit, vel tantum in ratione suppositi, ut alii volunt. Dicendum est enim, quod Verbum in eo casu uniretur tali naturę per suam personalitatem, sicut nunc unitur sanguini, vel sicut uniebatur cadaveri in triduo: compositum tamen resultans ex illa unione, licet esset suppositum talis naturę ut sic, tamen non denominaretur persona, quia illa natura non esset rationalis, sicut cadaver Christi ut sic non erat persona, quamquam illud idem suppositum, ut subsistit in natura divina, persona sit.

**Objeçtio.** Secunda, & communis objeçtio est; quia natura irrationalis non est capax unionis divinę, neque alicujus operationis divinę; ergo nec divini esse, quod per hanc unionem communicatur: cum enim esse sit propter operari, teste Arist. quod est incapax operationis alicujus naturę, est etiam incapax esse, seu subsistentiæ talis naturę. Unde Damasc. lib. 3. de Fide c. 17. dicit, carnem Christi simul cum divina substantia actiones divinas participasse. Et c. 18. *Mens, inquit, sapientia, & operatione destituta, nulla unquam esse queat, nam si torpida, atque immobilis est, nec quidem omnino est.* Respondetur negando consequentiam:

**Responsio.** quia visio beata non est propria operatio consequens hanc unionem, communicatur enim sine illa, & per se, ac ex natura sua solum in gratia fundatur: est enim gratia participatio divinę naturę, cui respondet participatio divinę operationis. Unio vero hypostatica, si proprie ac physice loquamur, non habet operationem hoc modo propriam, quia gratia unionis non est formalis communicatio ipsius naturę divinę, quę est principium operationum divinarum: sed est communicatio subsistentiæ divinę, quę constituit personam operantem, non vero est principium formale operandi. Debetur autem naturę assumptę, ratione hujus unionis, perfectus modus operandi juxta ipsius naturę capacitatem, & consequenter debetur gratia creata, & visio Dei, si natura sit capax ejus: non tamen sunt hæ perfectiones accidentarię, simpliciter necessarię ad hanc unionem, ut supra q. 2. dictum est: & in seqq. sæpius dicitur. Cum ergo dicitur esse communicari propter operationem, proprie, & formaliter intelligendum est de esse naturę seu essentiali, & de esse existentiæ, quod est proprium operationis naturę: esse autem subsistentiæ, proxime, & intrinsece solum est propter subsistendum, remote vero, & extrinsece potest ordinari ad operandum, juxta naturę capacitatem: & ita posset Deus, si assumeret irrationalem naturam, illam elevare ad actiones miraculosas, quas Dionysius, & Damasc. divinas vocant: quamvis hoc etiam extrinsecum sit ipsi unioni, & ex voluntate Dei pendeat. Cur autem irrationalis natura sit capax hujus unionis, non autem visionis beatę, cum tamen illa sit major perfectio, quam hæc, tractatum est supra disp. 9. sect. 2. Ratio enim est, quia hæc unio ordinatur ad quandam substantiæ seu subsistentiæ compositionem, & ideo capacitas ejus solum fundatur in communi ratione naturę substantialis: visio vero est operatio vitę, cujus sola natura intellectualis est capax per facultatem, quę non consequitur naturam substantialem ut sic, sed certum gradum ejus. Tertia objeçtio est, quia natura irrationalis est incapax sanctificationis, propter quod est etiam incapax gratiæ habitualis. Respondetur, in hac voce sanctificationis posse multa includi, quę faciunt sensum ambiguum, & æquivocum: ut infra q. 7. latius exponam. Si ergo nomine sanctificationis intelligitur rectitudo aliqua, & perfectio in actibus studiosis, vel meritoriis, seu liberis, non est de ratione hujus unionis, ut conferat hanc sanctificationem cuicumque naturę, sed solum naturę liberę, & capaci illius: non est enim hic effectus quasi formalis hujus unionis, sed solum ex illa resultat juxta naturę capacitatem. Si autem nomine sanctificationis intelligitur deificatio quędam naturę assumptę, per intimam unionem, & præsentiam divinę personę, sic omnis natura unita Verbo Dei, etiam si irrationalis sit, est deificata, & sanctificata: unde & speciali adoratione digna est ratione unionis, & ut dictum

est, illi debetur perfecta operatio juxta suam capacitatem.

**Objeçtio.** Quarta objeçtio, quia videtur per se indignum, & indecens divinam personam, ut his imperfectis, & inferioribus naturis uniatur: quod autem hujusmodi est, absolute repugnat fieri a Deo, qui summa prudentia, & sapientia omnia operatur. Quę ratio fundata est in Ansel. lib. 2. Cur Deus homo c. 4. & 5. Respondetur 1. solum probari hoc argumento, quod D. Th. supra dixit, non esse in natura i rationali intrinsecam congruentiam, ut assumatur, & ideo Deus numquam aliquid hujusmodi assumpt, nisi in ordine ad rationalem naturam. Secundo vero dicitur, quamvis naturę irrationali desit hæc congruentia, non tamen propterea esse vere, ac proprie indecens, ut assumatur, quia si Deus hoc faceret, contra nullam virtutem faceret, nec deesset illi modus & ratio, propter quam decenter, & sapienter id faceret: ad ostendendam verbi gratia potentiam suam, & sapientiam humanam confundendam, ut in simili dixit Tertul. in lib. de carne Christi c. 4. arguens contra Marcion. qui Deo indignum judicabat, ut de scemina carnem assumeret: *Hoc enim, inquit Tertul. ita videbitur, si res humano sensu ponderetur, non autem si divino, quia stulta mundi elegit Deus, ut confundat sapientes. Et idem esse, inquit, si de lupa, seu de vacca prodire voluisset.* Et ad eundem modum loquitur Greg. Nyss. in oratione magna catechetica c. 27. ubi inquit, posse Deum sine indecentia quamcumque naturam sumere, quia omnes a Deo infinite distant, unde respectu illius fere nihil inter se distant. Quamvis negandum non sit, in una natura majorem congruentiam reperiri, quam in alia; ut diligenter consideranti non appareat obscurum.

Ultima, & obscurior difficultas in hac sententia est, an hæc unio ad irrationalem naturam sit possibilis ratione solius materię, vel etiam ratione formę, seu totius naturę compositę ex materia, & forma. Et est ratio dubitandi, quia forma hujusmodi naturę non est forma subsistens, cum in suo esse pendeat a materia, tanquam a sustentante: ergo illa non est capax hujus unionis, quę tantum est ad subsistendum; ergo unio solum potest fieri in materia, ratione cujus istę res materiales subsistunt, ut sumitur ex D. Th. infra q. 6. art. 1. ad 2. & clarius q. 2. de potent. Dei art. 1. Hęc dubitatio pendet ex Metaph. qu. de modo subsistentiæ harum naturarum, quę ex materia & forma materiali constant, an sit idem cum sola materia, seu illam tantum proxime, & immediate afficiat, & ab illa denominetur totum compositum; an vero sit idem cum tota natura constante materia & forma, & illam adæquate afficiat, atque adeo veluti partialiter identificetur realiter cum materia, & forma, & utramque efficiat. De qua re dixi in disputationibus Metaph. agens de natura & supposito, & infra in q. 6. iterum occurrit. Supponendo ergo posteriorem modum tanquam probabilior, dicendum consequenter est, naturam irrationalem ita esse assumptibilem a Verbo, ut per unionem Verbum proxime, & immediate uniatur & toti naturę, & materię, & formę ipsi: quamvis formę non uniatur secundum se, sed solum ut componit totam naturam. Ita enim omnino censendum est fuisse totum sanguinem, & de cadavere Christi in triduo est id probabilius, quamvis non sit ita certum, quod pertinet ad unionem ipsius formę cadaveris: ratio vero est, quia tota natura est, quę trahitur ad subsistendum, & non tantum materia.

**Objeçtio.** Neque obstat quod forma hujus naturę non sit subsistens, inde enim solum habetur, non uniri secundum se, sed prout componit una naturam aptam ad subsistendum; differt autem inter formam unitam secundum se, vel solum ratione totius naturę, quod quando priori modo unitur, ex vi illius unionis manebit unita Verbo, etiam si intelligatur non componere totam naturam: quomodo dicemus infra uniri animam rationalem, quia est subsistens: at vero quando unitur ratione totius, habet modum unionis pendentem a toto, & ideo non unitur, ut quod subsistit, sed solum, ut quo tota natura constituitur, & est apta ad subsistendum.

### SECTIO III.

*Utrum partes substantiales possint hypostatice uniri divinę personę.*

**Q**uæstio hæc intelligi debet de partibus præcisę sumptis, an assumi possint absque unione totius naturę,



re, nam de unione ipsarum in toto satis dictum est in precedenti sectione. Versari autem potest quæstio de partibus integralibus, vel essentialibus Physicis: Metaphysicæ enim partes nihil ad rem pertinent, quia cum illæ in re non habeant distinctam entitatem nec inter se, nec a toto, non aliter possunt assumi, quam in tota natura.

Materia prima dupliciter per se assumptibilis sine forma.

Dico primo: Materia prima per se assumptibilis est sine forma, atque adeo sine natura integra, & completa. Duobus modis potest intelligi hoc fieri, primo conservando materiam existentem in rerum natura sine ulla forma, & hoc modo uniendo illam Verbo: & hic modus supponit illam quæstionem Physicam, an materia possit conservari sine forma, in qua ego sentio, multo probabilius esse, posse hoc fieri: quia revera nulla est repugnantia, nec probabilis contradictio, quod breviter declaro: quia materia prima omni forma substantiali carens, licet non habeat actum formalem, & hoc sensu dicitur pura potentia, habet tamen suum actum entitativum, & partialem existentiam, in qua potest conservari sine forma, quia licet fortasse secundum ordinem naturæ a forma pendeat, non tamen pendet ab ipsa, ut causa intrinsece, ac formaliter constituyente entitatem ejus. Et ideo potest Deus effective supplere illam dependentiam, sicut supplet in accidente dependentiam a subiecto, quando separatum illud conservat. Posito autem hoc casu, per se evidens est, materiam sic existentem posse uniri hypostatice Verbo, quia talis materia esset subsistens, quamvis subsistentia partiali; hoc autem satis est, ut possit hypostatice assumi, sicut anima rationalis separata assumi potuit, quia subsistens est, licet per modum partis. Imo non desunt, qui putent ita factum esse in corpore Christi in triduo, quod ego non probo, ut suo loco dicam.

Secundo modo posset intelligi casus hujus conclusionis de ipsa materia existente in toto, & actu informata per formam, ita ut quamvis materia sit actualiter pars alicujus naturæ, nihilominus Deus uniatur soli materiæ, & non immediate ipsi formæ, nec toti naturæ ut sic, sed tantum ratione materiæ. Et hoc etiam existimo esse possibile, quia materia, etiam cum actu componit totum, & informatur formæ, est entitas subsistens propria subsistentia partiali, quam semper retinet, quamvis forma varietur: sicut retinet suam partialem existentiam, quæ non est existentia in alio sustentante, sed in se & per se; talis enim modus existendi fuit necessarius ipsi materiæ, ut posset eadem subitare transmutatione formarum: cum ergo materia sit distincta a forma, etiam si sit illi conjuncta, nulla est repugnantia, quod Deus solam materiam assumat ad subsistendum, non assumpta forma, & consequenter non assumpta tota natura. Quin potius in corpore Christi in triduo existimant aliqui non improbabiler, ita factum esse: quia non videtur illis necessarium, ut forma cadaveris imperfectissima, & quæ statim abjicienda erat, immediate uniretur hypostasi Verbi Dei, sed tantum ratione materiæ, de quo infra dicetur.

De assumptione formæ sine materia.

Dico secundo. Forma substantialis separata a materia uniri potest hypostatice Verbo Dei. Hæc conclusio explicari potest illis duobus modis, quibus præcedens explicata est. Primo, ut forma substantialis actu informans materiam præcise assumatur, non assumpta materia proxime, & immediate, & consequenter nec tota natura: & hic modus est quidem possibilis in anima rationali, quia est forma subsistens, etiam cum actu informat corpus, ut infra dicam, & ita procedit illa ratio superius facta de materia: at vero in aliis formis materialibus est res difficilius, & videtur certe probabile, non posse ita assumi, quia, cum non sint per se subsistentes, non possunt per se assumi ad subsistendum, nisi per se constituentur separata a materia, ut infra dicam: quamdiu autem sunt unitæ materiæ, non videntur capaces subsistentiæ, quia ille modus unionis, & informationis intrinsece, & essentialiter includit dependentiam formæ informantis a materia, tanquam a sustentante, & ideo non potest forma materialis simul ita informare materiam, & per se subsistere, sicut supra dicebam non posse accidens simul per se esse, & inhaerere: pari ergo ratione hæc forma actu informans non videtur per se capax propriæ unionis hypostatice, sed tantum in toto, seu ratione totius naturæ. Et hæc sententia est satis probabilis, quamvis opposita etiam possit probabiliter defendi, eo modo, quem statim subijciam.

Secundo ergo potest conclusio intelligi de forma sub-

stantiali, separata a materia, & per se constituta, & sic de anima rationali omnino certum, & de fide est, separatam posse uniri hypostatice Verbo: ita enim in triduo factum est, quia illa, natura sua, est per se subsistens; quod vero illa non subsistat, ut perfecta natura, sed ut pars tantum, & consequenter quod ejus subsistentia naturalis imperfecta sit, & quasi partialis, non impedit, quin Verbo uniri possit, quia illa imperfectio est per accedens ad rationem subsistendi ut sic, & solum se tenet ex parte ipsius naturæ. Et hinc probabilius concluditur, idem fieri posse de potentia absoluta in quacunque forma substantiali, si per se conservetur extra materiam, ut omnes fieri posse concedunt, multo facilius quam accidentia conservantur extra subiectum. Et ratio est, quia forma substantialis sic separata haberet modum per se existendi, qui modus substantialis esset, atque adeo ejusdem rationis cum subsistentia: quamvis ergo hæc forma natura sua non sit subsistens, tamen de potentia absoluta separata est capax veræ subsistentiæ; ergo eadem ratione posset uniri hypostatice Verbo. Et hinc fit, si eadem forma in diversis locis constituitur, posse in uno actu informare materiam, in alio vero per se esse, vel hypostatice assumi. Addo denique, quia forma vel natura assumpta non omnino per se est, sed habet modum unionis ad personam assumentem, ideo probabile esse, hanc unionem non ita repugnare cum actuali informatione materiæ, sicut repugnat modus per se essendi; & ideo probabile est, hanc formam hoc ipso, quod capax est hujus unionis hypostatice, posse ad illam assumi, etiam si actu informet, quamvis fortasse propriam subsistentiam, seu per se existentiam habere non possit, dum actu informat, in eodem scilicet tempore, & loco, &c. Sic enim supra dicebamus, non posse eandem naturam simul per se esse, & uniri alteri personæ, quamvis possit simul duabus personis uniri: & hoc modo potest facile defendi prior sensus hujus conclusionis.

Dico tertio. Pars integralis, ut cor, caput, &c. assumi potest sine aliis partibus. Hæc conclusio intelligi debet de parte actu unita, nam si sit actu divisa, jam non est pars, seu aliqua completa natura, unde non est dubium, quin possit assumi. Probatur ergo conclusio, quia hæc pars subsistit in toto, saltem partialiter, habet enim suam partialem modum per se essendi, qui solum propter continuationem cum alia parte non est integra subsistentia; ergo potest illa pars uniri Verbo, & amittere illum partialem modum per se essendi: & Verbum poterit terminare, & quasi sustentare partem illam, non terminando reliquas. Neque propterea Verbum esset pars, sicut nec dicitur esse anima, aut sanguis, quia denominatio partis non est denominatio suppositi, sed naturæ incompletæ. Neque etiam subsistentia Verbi denominaretur partialis, quia ipsa non continuaretur, nec per se uniretur cum subsistentia aliarum partium; sed solum esset subsistentia unius partis, quæ continuaretur, & uniretur cum aliis partibus, ad componendam unam naturam, non ad componendam unam subsistentiam. Contra has conclusiones nullas video objectiones alicujus momenti, & ideo prætermitto nonnullas, quæ hic inculcari possent; sunt enim parum utilia, & non difficile expediri possunt perceptis his, quæ dicta sunt.

## SECTIO IV.

*Utrum forma accidentalis possit uniri Verbo hypostatice.*

Duobus modis intelligi possunt accidentia assumi, uno modo proxime, & per se, ita ut vel immediate existant per ipsammet existentiam personæ assumentis, vel saltem ipsum Verbum per se terminet aliquo modo immediate & proxime existentiam ipsorum accidentium. Secundo modo possunt assumi tantum mediate, quia videlicet insunt in natura assumpta, quamvis non habeant immediatam aliquam unionem cum Verbo: & hic modus vocari potest, ut supra q. 2. dicebamus, unio in hypostasi, prior vero secundum hypostasim: de unione ergo in hypostasi non est dubium, quin sit possibilis, quia de facto ita fuit in Christo, ut infr. dicetur: quæstio ergo hic est de unione secundum hypostasim, & communiter tractatur de accidente separato a subiecto, & hoc sensu prius definiatur, & inde facile constabit, quid dicendum sit de accidente actu inhaerente.

Duplex ratio unionis, secundum hypostasim & in hypostasi.



Prima ergo sententia affirmat, posse Deum sibi hypostaticè unire accidens separatum a subiecto. Ita tenet Marfil. in 3. q. 3. art. 1. quamvis sub dubio. Idem Almain. dist. 2. q. 2. Major. q. 3. Gabriel. dist. 1. q. 2. art. 2. ad 7. dicit, si Deus potest assumere irrationalem naturam, posset etiam assumere accidentalem. Fundamentum est, quia accidens separatum habet modum per se essendi, similem subsistentiæ; ergo potest Deus accidens sibi unire ad supplemendum illum modum, non per inhaerentiam, sed per modum hypostaticæ unionis; sic enim sustentare accidens, nullam imperfectionem dicit in sustentante, sed supponit potius perfectionem. Nec potest facile assignari repugnantia, vel implicatio, quam hic modus involvat. Et confirmari hoc potest in opinione eorum, qui existimant hanc unionem fieri ad existendum: si enim Deus facit, ut anima existat existentia increata, cur non poterit facere, ut eadem albedo existentia existat? Neque enim propterea existentia divina fieret accidentalis, sicut neque fit existentia creata, aut materialis, etiam si formam creatam, vel materialem assumat. Nec sequitur in eo casu Deum denominari album, vel quid simile, sicut nec denominari animam, etiam si animam hypostaticè unitam habeat, quia illa denominatio sumitur à forma, ut informante, vel inhaerente, non ut subsistente. Neque etiam diceretur albedo, quia hoc est nomen naturæ, non suppositi, sicut supra in simili dicebamus.

Nihilominus probabilius mihi videtur, formam accidentalem non posse uniri hypostaticè Verbo. Hanc sententiam tenet Basolis in 3. dist. 2. q. 1. art. 2. & Palacios q. 1. qui afferunt plures rationes, quibus omisiss, ita breviter illam probō; quia in primis non potest forma accidentalis assumi ad existendum existentia Verbi, quia hic modus unionis omni naturæ repugnat, tam accidentali, quam substantiali, ut infra q. 17. late probabitur: quamquam fortasse quoad hoc non sit specialis repugnantia in forma accidentali, ut quædam confirmatio supra facta probabiliter ostendit. Deinde accidens existens non potest quoad modum existendi terminari subsistentia divina: quia quamvis accidens separatum per se aliquo modo constituatur, tamen ille modus per se essendi non est vera subsistentia, sed est modus in se accidentalis, quia entitas accidentalis non est capax modi substantialis; ergo forma accidentalis est omnino incapax subsistentiæ, & consequenter etiam est incapax substantialis unionis; ergo non potest ad illam fieri unio secundum subsistentiam, quæ intrinsece, & essentialiter substantialis est. Et confirmatur, & explicatur variis modis. Primo, quia accidens non potest uniri ad componendum unum per se, & multo minus ad componendam unam personam: at vero unio cuiuscunque naturæ creatæ cum Deo tantum esse potest per modum unius subsistentiæ, vel personæ. Secundo, quia substantia non potest ulla ratione poni in alio per modum inhaerentis, quia hoc pugnat cum natura substantiæ, quæ omnino est incapax talis modi essendi; (& ideo licet humanitas sit in Verbo divino, non tamen inhaerendo, sed alio modo accommodato subsistentiæ; ergo pari ratione natura accidentalis non potest trahi ad subsistendum. Tertio intelligi non potest, punctum immediate terminare corpus, & superficiem, quia non est proportio, nec capacitas; ergo simili modo, &c. Et per hæc satisfactum est fundamento contrariæ sententiæ, jam enim ostensum est hypostaticam unionem repugnare accidenti, quia non est capax substantialis unionis. Quod autem ibi dicitur sustentare pertinere ad perfectionem, respondetur hoc esse quoddam commune, & analogum, quod in re poni non potest, nisi in aliqua specie, seu particulari modo sustentandi: si ergo unum sustentat aliud per modum subiecti, imperfectum quid, & potentiale esse necesse est, & ideo non potest hic modus convenire divinæ personæ: si autem subsisteret per modum suppositi, est quidem hic perfectus modus, excedit tamen imperfectam naturam accidentis, quæ non est capax illius; alius autem modus sustentandi, qui sit per veram unionem, & intrinsecam, nec intelligi, nec fingi potest.

Et ex his a fortiori colligitur, accidens actu inhaerens subiecto multo minus posse immediate uniri personæ divinæ, quia & ratione imperfectæ naturæ non est capax huius unionis, ut dictum est, & ratione actualis inhaerentiæ habet maiorem quandam repugnantiam cum huiusmodi unionem.

De modo unionis ex parte partium humanæ naturæ, in quatuor articulos divisa.

**D**einde considerandum est de assumptione partium humanæ naturæ.

Et circa hoc quaruntur quatuor.

Primo, utrum filius Dei debuerit assumere verum corpus. Secundo, utrum assumere debuerit corpus terrenum, scilicet carnem & sanguinem.

Tertio, utrum assumpserit animam.

Quarto, utrum assumere debuerit intellectum.

**R**es tota, quam in hac quæst. D. Th. tractat, fere explicata fuerat quæstione præcedenti, solum enim ostendit partes phyficas, & essentielles humanæ naturæ assumptas fuisse a Verbo, quod fere ex superioribus constabat; quia non poterat humana natura assumi, nisi constans ex partibus essentialibus; tamen D. Th. ad refellendos aliquos errores, & uniuscuiusque rei propriam rationem reddendæ, hanc quæstionem movet: quæ adeo clara est, ut circa literam nihil fere commentari oporteat.

### ARTICULUS I.

Utrum Dei filius debuerit assumere verum corpus.

**A**d primum sic proceditur. Videtur, quod filius Dei non assumpserit verum corpus. Dicitur enim Philip. 2. quod in similitudinem hominum factus est. Sed quod est secundum veritatem, non dicitur esse secundum similitudinem. Ergo Filius Dei non assumpserit verum corpus.

2. Præterea: Assumptio corporis in nullo derogavit dignitati divinitatis: dicit enim Leo Papa in sermone de Nativitate, quod nec inferiorem naturam consumpsit glorificatio, nec superiorem minuit assumptio. Sed hoc ad dignitatem Dei pertinet, quod sit omnino a corpore separatus. Ergo videtur, quod per assumptionem non fuerit Deus corpori unitus.

3. Præterea: Signa debent respondere signatis. Sed apparitiones veteris Testamenti, quæ fuerunt signa apparitionis Christi, non fuerunt secundum corporis veritatem, sed secundum imaginariam visionem: sicut patet Isai. 6. Vidi Dominum sedentem, &c. Ergo videtur, quod etiam apparitio Filii Dei in mundo non fuerit secundum corporis veritatem, sed solum secundum imaginationem.

Sed contra est quod dicit Augustinus\* in lib. 83. quæst. Si phantasma fuit corpus Christi, fefellit Christus: & si fefellit, veritas non est. Est autem veritas Christus. Ergo non fuit phantasma corpus ejus. Et sic patet, quod verum corpus assumpsit.

Respondendo dicendum, quod sicut dicitur in lib. de Ecclesiasticis\* dogmatibus, natus est Dei filius, non putative, quasi imaginatum corpus habens, sed corpus verum.

Et huius ratio potest triplex assignari. Quarum prima est ex ratione humanæ naturæ, ad quam pertinet verum corpus habere. Supposito igitur ex præmissis\*, quod conveniens fuerit Filium Dei assumere humanam naturam, consequens est, quod verum corpus assumpserit. Secunda ratio sumi potest ex his, quæ in mysterio incarnationis sunt acta. Si enim non fuit verum corpus ejus, sed phantasticum; ergo nec veram mortem sustinuit, nec aliquid eorum, quæ Evangelistæ de eo narrant secundum veritatem gessit, sed solum secundum apparentiam quandam. Et sic etiam sequeretur, quod non fuerit vera salutis hominis subsequuta: oportet enim effectum causæ proportionari. Tertia ratio potest sumi ex ipsa dignitate personæ assumptis: quæ cum sit veritas, non decuit, ut in ejus opere aliqua fictio esset. Unde & Dominus hunc errorem per se ipsum excludere dignatus est, Lucas ultimo, cum Discipulis conturbati, & conterriti putabant se spiritum videre, & non verum corpus: & ideo se eis palandum præbuit, dicens, Palpate & videte, quia spiritus carnem & ossa non habet, sicut me videtis habere.

Ad primum ergo dicendum, quod similitudo illa exprimit veritatem humanæ naturæ in Christo, per modum, quo omnes, qui vere in natura humana existunt, similes specie esse dicuntur: non autem intelligitur similitudo phantastica. Ad cuius evidentiam Apostolus subiungit, quod factus est obediens usque ad mortem, mortem autem crucis, quod fieri non potuisset, si esset sola similitudo phantastica.

83.  
Infra ar. 8.  
c. & q. 14.  
ar. 1. c. & 3.  
d. 2. q. 1. a.  
3. q. 1. c. &  
q. 2. c. 7. 4.  
contra ea.  
29. 30. &  
34. prima.  
& 35. c. 6. &  
p. q. 6. ar.  
7. corpo. 1.  
& op. 1. 5.  
c. 213. &  
227.  
In serm. 1.  
post med.  
illius: in-  
cipit hic  
ser. salva-  
tor noster

1. 83. q. 14  
in pri. 10. 4

Capit. 2. 2  
mo. ha-  
betur in-  
ter opera  
Aug. 10. 3.

Quæst. 1. 1  
ar. 1. 1.

Accidens  
separatū  
quamvis  
per se sit,  
non sub-  
sit neque  
assumi  
potest.



Cap. 2. d.  
clio ad  
sua tom. 3.

Quæst. 2.  
art. 2.

Lib. 3. c.  
26. circa  
sua.

Ad secundum dicendum, quod per hoc, quod filius Dei verum corpus assumpsit, in nullo est ejus dignitas diminuta. Unde Augustinus. \* dicit in libro de fide ad Pe. Exinanivit se ipsum, formam servi accipiens, ut fieret servus: sed formæ Dei plenitudinem non amisit. Non enim Filius Dei sic assumpsit verum corpus, ut forma corporis fieret, quod repugnat divinæ simplicitati & puritati. Hoc enim esset assumere corpus in unitatem naturæ, quod est impossibile, ut ex supra dictis patet. Sed salva distinctione naturæ assumpsit corpus in unitatem personæ.

Ad tertium dicendum, quod figura debet responderere rei quantum ad similitudinem, non quantum ad rei veritatem. Si enim secundum omnia esset similitudo, jam non esset signum, sed ipsa res: ut Damascenus. \* dicit in 3. lib. Conveniens ergo fuit, ut apparitiones veteris Testamenti essent secundum apparentiam, quasi figure: apparitio autem Filii Dei in mundo esset secundum corporis veritatem, quasi res figurata per illas figuras. Unde dicit Apostolus 2. Col. 2. Quæ sunt umbra futurorum, corpus autem Christi.

Hic articulus clarus est, & nulla expositione indiget.

## ARTICULUS II.

Utrum Dei Filius debuerit assumere corpus terrenum, scilicet carnem & sanguinem.

Ad secundum sic proceditur. Videtur, quod Christus non habuerit corpus carnale sive terrestre, sed cæleste: dicit enim Apostolus prima ad Corinth. 15. Primus homo de terra terrenus: secundus homo de cælo cælestis. Sed primus homo, scilicet Adam fuit de terra, quantum ad corpus, ut patet Genes. 1. Ergo etiam secundus homo scilicet Christus fuit de cælo, quantum ad corpus.

2. Præterea, prima ad Corinth. 15. dicitur, Caro & sanguis regnum Dei non possidebunt. Sed regnum Dei principaliter est in Christo. Non ergo in ipsa est caro & sanguis, sed magis corpus cæleste.

3. Præterea: Omne, quod est optimum, est Deo attribuendum. Sed inter omnia corpora nobilissimum est corpus cæleste. Ergo tale corpus debuit Christus assumere.

Sed contra est, quod Dominus dicit Luca ultimo. Spiritus carnem & ossa non habet, sicut me videtis habere. Caro autem, & ossa non sunt ex materia cælestis corporis, sed ex inferioribus elementis. Ergo corpus Christi non fuit corpus cæleste, sed carneum & terrenum.

Respondeo dicendum, quod eisdem rationibus apparet, quare corpus Christi non debuit esse cæleste, quibus ostensum est, quod non debuit esse phantasticum.

Primo enim, quia sicut veritas humane nature non salvaretur in Christo, si corpus ejus esset phantasticum (ut posuit Arianus), ita etiam non salvaretur si poneretur cæleste, sicut posuit Valentinus. Cum enim forma hominis sit quedam res naturalis, requirit determinatam materiam, scilicet, carnes & ossa, quæ in hominis definitione poni oportet: ut patet per Philosophum 7. Metaph.

Secundo, quia hoc etiam derogaret veritati eorum, quæ Christus in corpore gessit. Cum enim corpus cæleste sit impassibile & incorruptibile (ut probatur in 1. primo de Cælo) si Filius Dei corpus cæleste assumpsisset, non vere esset, nec sitisset, nec etiam passionem, & mortem sustinisset. Tertio etiam hoc derogaret veritati divine. Cum enim Filius Dei se hominibus ostenderit, quasi corpus carneum & terrenum habentem, fuisset falsa demonstratio, si corpus cæleste habuisset. Et ideo in lib. de Ecclesiasticis \* dogmatibus dicitur: Natus est Dei filius Carnem ex Virginis corpore trahens, & non de cælo secum afferens.

Ad primum ergo dicendum, quod Christus dicitur de cælo descendisse dupliciter. Uno modo ratione divine nature, non ita, quod natura divina in cælo esse desierit, sed quia in infimis novo modo esse cæpit, scilicet secundum naturam assumptam: secundum illud Joannis 3. Nemo ascendit in cælum, nisi qui descendit de cælo filius hominis, qui est in cælo. Alio modo ratione corporis: non quia ipsum corpus Christi secundum suam substantiam de cælo descenderit, sed quia virtute cælesti, id est, Spiritu sancto, est ejus corpus formatum. Unde Augustinus. \* dicit ad Origenem, exponens auctoritatem inductam: Cælestem dico Christum, quia non ex humano conceptus est semine. Et hoc etiam modo Hilarius exponit in libro de Trinitate.

Ad secundum dicendum, quod caro & sanguis non accipiuntur ibi pro substantia carnis & sanguinis, sed pro corruptione carnis & sanguinis. Quæ quidem in Christo

non fuit quantum ad culpam: fuit tamen ad tempus quantum ad penam, ut opus nostre redemptionis expleret.

Ad tertium dicendum, quod hoc ipsum ad maximam Dei gloriam pertinet, quod corpus infirmum & terrenum ad tantam sublimitatem provexit. Unde in Ephesina synodo legitur Verbum sancti Theophili dicentis: Qualiter artificum optimi non in pretiosis tantum materiis artem ostendentes, in admiratione sunt, sed vilissimum lutum & terram dissolutam plerumque assumentes, suæ disciplinae demonstrantes virtutes, multo magis laudantur: ita omnium optimus artifex Dei Verbum, non aliquam pretiosam materiam corporis cælestis apprehendens, ad nos advenit, sed in luto, magnitudinem suæ artis ostendit.

## COMMENTARIUS.

Tota litera D. Th. est perspicua. Solum sunt duo breviter observanda. Primum est, D. Th. suis rationibus directe concludere, corpus Christi Domini non fuisse confectum ex materia, seu substantia cælesti: sed ex illa materia, quæ cætera corpora humana constare solent: consequenter vero quamvis diserte non dicat, convincit corpus Christi fuisse mixtum, & ex quatuor elementis coagmentatum: hoc enim intellexit in titulo, nomine terreni corporis. Pari etiam ratione concludit, habuisse corpus illud quatuor humores: quos in titulo, nomine sanguinis indicavit, in rationibus vero articuli, sub nomine corporis carni illos complexus est, quia non est vera ac viva caro sine sanguine: cui alij humores admixti sunt. Secundo est observandum, rationibus D. Th. recte quidem effici, Christi humanitatem constituisse hujusmodi corpore, & in illo fuisse sanguinem, & alios humores: quomodo autem hæc omnia fuerint unita Verbo, an scilicet immediate & proxime, seu secundum hypostasim, an vero tantum mediate, seu in hypostasi, ex his, quæ D. Thom. tradit, solum hoc potest convinci, hæc omnia ita fuisse unita Verbo, ut necessarium est ad hoc, ut Verbum vere factum sit caro, & homo, ex quo recte concluditur fuisse proxime & immediate unita, ut disputatione sequenti latius explicandum est: & ibidem tractabimus locum primæ ad Corinth. 15. quem in solutione ad primum D. Thomas explicavit.

## ARTICULUS III.

Utrum Filius Dei assumpsit animam.

Ad tertium sic proceditur. Videtur, quod filius Dei animam non assumpsit. Joannes enim incarnationis mysterium tradens, dixit: Verbum caro factum est, nulla facta de anima mentione. Non autem dicitur caro factum, eo quod sit in carnem conversum, sed quia carnem assumpsit. Non ergo videtur assumpsisse animam.

2. Præterea anima necessaria est corpori ad hoc, quod per eam vivificetur. Sed ad hoc non fuit necessaria corpori Christi, ut videtur: quia ipsum Verbum Dei est, de quo dicitur Psalm. 35. Domine apud te est fons vitæ. Superfluum ergo fuisset animam adesse, Verbo presente. Deus autem & natura nihil frustra faciunt: ut etiam Philosophus dicit in primo de Cælo. Ergo videtur, quod Filius Dei animam non assumpsit.

3. Præterea: Ex unione anime ad corpus, constituitur natura communis, quæ est species humana. In Domino autem Jesu Christo non est communem speciem accipere, ut Damascenus. \* dicit in 3. libro. Non igitur assumpsit animam.

Sed contra est, quod Augustinus. \* dicit in libro de Agone Christiano: Non eos audiamus, qui solum humanum corpus dicunt esse susceptum a Verbo Dei: & sic audiunt quod dictum est, Verbum caro factum est, ut negent, illum hominem, vel animam, vel aliquid hominis habuisse, nisi carnem solum.

Respondeo dicendum, quod sicut dicit Augustinus. \* in lib. de heresibus, opinio fuit primo quidem Arii, & postea Apollinaris, quod Filius Dei solum carnem assumpsit absque anima, ponentes quod Verbum fuerit carni loco anime. Ex quo sequebatur, quod in Christo non fuerint due nature, sed una tantum: ex anima enim & carne, una natura humana constituitur.

Sed hæc positio stare non potest propter tria. Primo quidem: quia repugnat auctoritati Scripturæ, in qua Dominus de sua anima facit mentionem Matth. 26. Tristis est anima mea usque ad mortem, & Joan. 10. Potestatem habeo ponendi animam meam. Sed ad hoc respondebat Apollinaris,



linaris, quod in his verbis anima metaphorice sumitur: per quem modum in veteri Testamento Dei anima commemoratur, Isai. 1. Kalendas vestras & solemnitates vestras odiovit anima mea. Sed sicut dicit August. \* in lib. 83. q. 9. Evangelista in Evangelica narratione narrat, quod miratus est Jesus, & iratus & contristatus, & quod esset. Que quidem ita demonstrant eum veram animam habuisse, sicut ex hoc, quod comedit, & dormivit, & fatigatus est, demonstratur eum habuisse verum corpus humanum. Alioquin si & hac ad metaphoram referantur, cum similia legantur in veteri Testamento de Deo, peribis fides Evangelice narrationis. Aliud enim est, quod Prophetice nuntiatur in figuris, aliud, quod secundum rerum proprietatem ab Evangelistis historice scribitur. Secundo derogat prædictus error utilitati incarnationis, quæ est liberatio hominis. Ut enim argumentatur August. \* in libro contra Felicianum: Cur accepta carne animam dispensatio mediatoris omisit? Nisi forte aut innoxiam sciens medicina indigentem esse non credidit, aut a se alienam putans redemptionis beneficio non donavit, aut ex toto insanabilem iudicans, curare nequivit, aut ut vilem, & quæ nullis subus apta videretur, abiecit. Horum duo blasphemiam importat in Deum, quomodo enim diceretur Omnipotens, si curare non potuit desperatam? aut quomodo omnium Deus, si non ipse fecit animam nostram? Duobus autem aliis, in uno anime causa nescitur, in altero meritum non tenetur. An intelligere causam putandus est anime, qui eam ad accipiendam legem, habitu in se rationis instructam, a peccato voluntarie transgressionis nititur separare? Aut quomodo ejus generositatem novit, qui ignobilis vitio dicit esse despectam? Si originem attendas, pretiosior est anime substantia: si transgressionis culpam, propter intelligentiam, peior est causa. Ego autem Christum, & perfectam sapientiam dico & scio, & piissimum esse non dubito, quorum n. primo meliorem & prudentiam capacem non despectit: secundo, eam, quæ magis fuerat vulnerata, suscepit. Tercio vero hæc positio est contra ipsam incarnationis veritatem: caro enim & ceteræ partes hominis per animam speciem sortiuntur: Unde recedente anima non est os, aut caro, nisi æquivoce, ut patet per Philosophum in 2. de Anima & 7. Metaphys. \*

Ad primum ergo dicendum, quod cum dicitur Verbum caro factum est, caro ponitur pro toto homine: ac si diceretur: Verbum homo factum est: sicut & Isai. 40. Videbit omnis caro pariter, quod os Domini loquutum est. Ideo autem totus homo per carnem significatur, quia, ut dicitur in autoritate inducta, \* per carnem Filius Dei visibilis apparuit. Unde subditur: Et vidimus gloriam ejus. Vel ideo, quia ut August. \* dicit in lib. 83. q. 9. in tota illa unitate susceptionis principale Verbum est, extrema autem atque ultima caro. Volens itaque Evangelista commendare pro nobis dilectionem humilitatis Dei, Verbum & caro nominavit, omittens animam, quæ est Verbo inferior, carne præstantior. Rationabile etiam fuit, ut nominaret carnem, quæ propter hoc, quod magis distat a Verbo, minus assumptibilis videbatur.

Ad secundum dicendum, quod Verbum est fons vite, sicut prima causa vite effectiva. Sed anima est principium vite corporis tanquam forma ipsius: forma autem est effectus agentis. Unde ex præsentia Verbi magis concludi posset, quod corpus esset animatum: sicut ex præsentia ignis potest concludi, quod corpus, cui ignis adheret, sit calidum.

Ad tertium dicendum, quod non est inconveniens, imo necessarium dicere, quod in Christo fuerit natura, quæ constituitur per animam corpori advenientem: Damasce-nus \* autem negat, in Domino Jesu Christo esse communem speciem, quasi aliquid tertium resultans ex unione divinitatis & humanitatis.

Itera hujus articuli est facilis, atque ideo illum explicare necessarium non est.

#### ARTICULUS IV.

Utrum Filius Dei assumere debuerit intellectum.

Ad quartum sic proceditur. Videtur quod Filius Dei non assumpserit mentem humanam sive intellectum. Ubi enim est præsentia rei, non requiritur ejus imago: Sed homo secundum mentem est ad imaginem Dei, ut August. \* dicit in lib. de Trin. Cum ergo in Christa fuerit præsentia ipsius divini Verbi, non oportuit ibi esse mentem humanam. 2. Præterea: Major lux offuscat minorem. Sed Verbum Dei, quod est lux illuminans omnem hominem in ve-

nientem in hunc mundum (ut dicitur Joannis 1.) comparatur ad mentem, sicut lux major ad minorem: quia & ipsa mens lux quadam est, quasi lucerna illuminata a prima luce. Proverbiorum 20. Lucerna Domini spiraculum hominis. Ergo in Christo, quia est Verbum Dei, non fuit necessarium esse mentem humanam.

3. Præterea: Assumptio humane nature a Deo Verbo dicitur incarnatio ejus. Sed intellectus sive mens humana neque est caro, neque est actus carnis, quia nullius corporis actus est, ut probatur in 3. de Anima \*. Ergo videtur, quod Filius Dei humanam mentem non assumpserit.

Sed contra est, quod August. \* dicit in libro de fide ad Petr. Firmissime tene, & nullatenus dubites, Christum Filium Dei habere veram nostri generis carnem & animam rationalem, qui de carne sua dicit, Palpate, & videte, quia spiritus carnem & ossa non habet, sicut me videtis habere. Lucæ ultimo: Animam quoque se habere ostendit dicens: Ego pono animam meam, & iterum sumo eam. Joan. 16. Intellectum quoque anime ostendit se habere dicens: Discite a me, quia mitis sum, & humilis corde. Matth. 11. Et de ipso per Prophetam Deus dicit: Ecce intelliget puer meus, Isa. 52.

Respondeo dicendum, quod sicut August. \* dicit in libro de hæresibus, Apollinarista de anima Christi a Catholica Ecclesia disenserunt, dicentes sicut Ariani, Deum Christum carnem solam sine anima suscepisse. In qua questione testimoniis Evangelicis victi, mentem defuisse anime Christi, sed pro hac ipsum Verbum in ea fuisse dixerunt. Sed hæc positio eisdem rationibus convincitur, sicut & prædicta. Primo enim, hoc adversatur narrationi Evangelice, quæ commemorat eum fuisse miratum, ut patet Matth. 8. Admiratio autem absque ratione esse non potest: quia importat collationem effectus ad causam: dum scilicet aliquis videt effectum, cuius causam ignorat, & querit: ut dicitur in principio Metaphysicæ \*. Secundo repugnat utilitati incarnationis, quæ est justificatio hominis a peccato. Anima enim humana non est capax peccati, nec gratie justificantis, nisi per mentem. Unde præcipue oportuit mentem humanam assumi. Unde dicit Damasce. \* in 3. lib. quod Dei Verbum assumpsit corpus & animam intellectualem & rationalem. Et postea subdit: Totus intuitus est, ut toti mihi salutem largiretur: quod enim inassumptum est, incurabile est. Tercio hoc repugnat veritati incarnationis: cum enim corpus proportionetur anime, sicut materia proprie forme, non est vere caro humana, quæ non est perfecta anima humana, scilicet rationali. Et ideo si Christus animam sine mente habuisset, non habuisset veram carnem humanam, sed bestialem: quia per solam mentem anima nostra differt ab anima bestiali. Unde dicit August. \* lib. 83. q. 9. quod secundum hunc errorem sequeretur, quod Filius Dei belluam quandam cum figura humani corporis suscepisset: Quod iterum repugnat veritati divine, quæ nullam patitur fictionis falsitatem.

Ad primum ergo dicendum, quod ubi est ipsa res per sui præsentiam, non requiritur ejus imago ad hoc, quod suppleat locum rei: sicut ubi est imperator, milites non venerantur ejus imaginem. Sed tamen requiritur cum præsentia rei imago ipsius, ut perficiatur ex ipsa rei præsentia, sicut imago in cera perficitur per impressionem sigilli, & imago hominis refulget in speculo per ejus præsentiam. Unde ad perficiendam mentem humanam, necessarium fuit, quod eam sibi Verbum Dei uniret.

Ad secundum dicendum, quod lux major evacuat lucem minorem alterius corporis illuminantis, non tamen evacuat, sed perficit lucem corporis illuminati: ad præsentiam enim Solis stellarum lux obscuratur, sed aeris lumen perficitur. Intellectus autem seu mens hominis est quasi lux illuminata a luce divini Verbi, & ideo per præsentiam Verbi non evacuat mens homini, sed magis perficitur.

Ad tertium dicendum, quod licet potentia intellectiva non sit alicujus corporis actus: ipsa tamen essentia anime humane, quæ est forma corporis, requiritur, quod sit nobilior ad hoc, quod habeat potentiam intelligendi: & ideo necesse est, ut corpus melius dispositum ei respondeat.

#### COMMENTARIUS.

Hujus articuli titulus intelligi potest, vel de potentia ipsa intellectiva, quæ est accidens anime superadditum, vel de ipsa substantiali anima, prout attingit gradum rationalem, seu intellectualem, & interdu nomine intellectus significatur, ut idem D. Thomas docuit prima parte q. 79. art. 1. qui non satis explicat, quo sensu hanc

Lib. 13. q. 9.  
q. 20. a  
med. 10. 4.

Cap. 13.  
post med.  
nom. 6.

Lib. 3. de  
anima  
sex 9. lib.  
7. meta.  
sex. 35.  
sine medio  
20. 2. & 3.  
In hujus  
solu. prin.  
li 83 qq 9.  
80 paulo  
post prin.  
som. 4.

Loco in  
art. citato.

1. 3. ext. 6.  
6. & 12.

Cap. 14. in  
prin. 10. 3.

Cap. 55 in  
prin. 10. 6.

1. r. Met.  
c. 2. in  
med. 10. 3.

1. 3. Ori. 6.  
c. 9. cit.  
med.  
Eod. l. 6.  
& c. nunc  
dictis.

Lib. 83. q.  
q. 60. non  
procul. 2  
prin. 10. 4.

Infra q. 9.  
art. 1. ad 2.  
& 3. d. 11.  
q. 1. a. 1. ad  
3. & d. 14.  
2. 1. q. 1.  
ad 2.



hanc questionem moveat: nec de errore Apollinaris satis constat, quo sensu mentem seu intellectum Christo negaverit. Ea vero, quæ D. Thom. adducit in corpore articuli, ad utrumque sensum facile applicari possunt: nam duæ primæ rationes, quibus probat in Christo fuisse intellectum, scilicet, quia admirabatur, & quia fuit capax meriti, de potentia intellectiva immediate procedunt. Tertia vero ratio, scilicet, quia aliàs caro Christi non esset vere humana, sed bestialis, solum probat de substantia, & essentia animæ rationalis. Quo circa videtur D. Tho. hoc potissimum intendisse in hoc articulo, præsertim cū hoc loco non tam de accidentibus, quam de substantia nature assumptæ sermo sit: quamquam quoniam substantia rei ex accidentibus, & operationibus recte cognoscitur, merito in prima & secunda ratione, ex operationibus colligit facultatem, ut ex facultate etiam ipsa substantia animæ rationalis Christo non defuisse intelligatur, quod argumentum præsertim ex operationibus vitæ efficacissimum sumitur: quia hæc operatio inseparabilis est a suo principio intrinseco, tam proximo, quod est potentia, quam principali, quod est ipsa animæ substantia. Cætera clara sunt.

## DISPUTATIO XV.

In octo sectiones distributa.

*Quid Verbum assumpserit per incarnationem, prout facta est.*

**I**N præced. disputat. diximus, quid sit assumptibile per quamcumque unionem hypostaticam possibilem: hic dicendum sequitur, quid assumpserit Verbum divinum per unionem hypostaticam, quæ facta est. Possimus autem ex his, quæ ibi dicta sunt, hic sine nova disputatione sumere, quid Verbum non assumpserit. Primum est, Verbum non assumpsisse aliquam aliam naturam præter humanam, & partes ejus, quod certum de fide est, quia Deus factus est homo, & non aliud. Unde in Scriptura sacra hoc prædicatur, tanquam singulare beneficium humanæ naturæ collatum: & de solo Christo dicitur, esse Principem & caput omnium, constitutum super opera manuum Dei, quia soli humanitati ejus concessa est tam ineffabilis gratia: unde nullus alius subsistens in creata natura, potest secundum fidem dici verus, & naturalis Deus, nisi solus Christus. Denique de Angelicis naturis expresse dicitur ad Hebr. 2. *Non Angelos apprehendit*, quod tanquam manifestius, & clarius supponitur de inferioribus naturis. Hujus vero rei supra tradidimus congruentias disput. 3. Secundo certum est, Verbum non assumpsisse personam creatam, nec naturam habentem personalitatem creatam. Hoc etiam est de fide, ut sufficienter explicatum est circa literam D. Thom. & disput. 7. late contra Nestorium probatum est: dictum etiam est disputatione præcedenti hujusmodi assumptionem vel unionem esse impossibilem; satis ergo constat non esse factam. Superest ergo dicamus, quid Verbum assumpserit: & prius dicemus de tota natura, deinde de partibus ejus, tam essentialibus, quam integrantibus.

## SECTIO I.

*Utrum Verbum assumpserit veram hominis naturam.*

**O**missis erroribus, tam supra disput. 7. tractatis, quam statim sectionibus sequentibus tractandis, dico primo, Verbum divinum assumpsisse veram, & essentialiter perfectam humanam naturam. Est de fide, quæ sufficienter probatur ex illo principio, supra disput. 2. late probato, Christum esse verum Deum, & verum hominem: ex quo disput. 7. conclusimus, in Christo esse duas naturas, veram scilicet divinitatem, & veram humanitatem, ex quibus, & in quibus subsistit, & hinc tandem concluditur, veram assumpsisse humanitatem, quia per hanc assumptionem factum est, ut in illa subsistat.

Dico secundo: Hæc humanitas a Verbo assumpta est unica, individua, & singularis. Ita docent omnes Theologi cum Damasc. lib. 3. cap. 1. & est de fide certum, quatenus de fide certum est, Christum esse quandam singularem hominem ab aliis numero distinctum, non tantum ratione personæ, sed etiam ratione nature humanæ. Ratio vero est facilis, quia humanitas abstracta ab individuis, ut sic,

non est res apta ad existendum; debuit ergo necessario assumi individua natura: quod autem in una tantum, & non in omnibus, neque in multis facta fuerit hæc unio, constat de fide ex iis, quæ in principio hujus disput. diximus.

Sed contra primo, quia fructus hujus unionis futurus erat communis omnibus hominibus; ergo debuit natura communis omnibus sumi. Propter hoc fertur, quendam Doctorem Parisiensem asseruisse, assumptam esse humanitatem in communi. Sed est hæretica, & intelligibilis sententia, & fundamentum ejus frivolum: ex quo potius concludi potest contrarium, nam fructus hujus unionis, qui est gratia, & gloria, & remissio peccatorum, fuit universalis causalitate, & operatione, & ideo fuit necessaria singularis, & individua natura, quæ talium operationum principium esse posset.

Sed contra secundo, quia suppositum supra naturam specificam, & communem non addit, nisi principia individuantia; sed individua natura includit hæc principia; si ergo Christus assumpsit individuum naturam, assumpsit suppositum. Qui majorem propositionem admittunt, dicunt humanitatem Christi per assumptionem factam esse hanc, seu individuum. Sed hoc est impossibile, tum quia, quod assumitur, supponitur assumptioni, assumitur autem hæc natura: tum etiam, quia si dimitteretur a Verbo, eadem numero maneret: tum denique, quia nulla res potest formaliter constitui hæc, seu individua, per aliam rem a se distinctam, ut ex Metaphysica suppono, quia non potest esse res vera, & actualis, nisi sit singularis & individua. Respondetur ergo negando majorem, nam principia individuantia potius pertinent ad constitutionem hujus naturæ, suppositum vero addit specialem modum per se existendi. Hic vero sese offerebat quæstio, an propter assumptionem humanitatis possit etiam verbum dici hominem assumpsisse: sed hæc sufficienter circa literam D. Th. explicata est.

Dico tertio. Verbum assumpsit hanc humanitatem, non omnino denuo creatam, sed ex ipsis hominibus a stirpe Adæ descendentibus. Est de fide, ut constat Matth. 1. & Luc. 3. de illa tractat D. Thom. infra q. 3. 1. & 3. 2. nonnullæ vero congruentiæ illius supra disput. 3. & 4. adductæ sunt, & alias adduxit D. Thom. q. 4. artic. 6. summa omnium est, quia expediens fuit, ut per eandem naturam dæmonem vinceret, quam ipse in Adam vicerat.

Dices. Hæc ratione probaretur, debuisse ipsam Adæ singularem naturam sumere. Respondetur, id non fuisse conveniens, tum quia illa natura jam fuerat peccato maculata; tum etiam, quia jam erat terminata in propria persona: ac denique, quia ex Adam generandi erant homines secundum carnem, quod non decebat Christum, maxime, cum ab eodem Adam originale maculam tracturi essent. Lege D. Thom. in 3. d. 2. q. 1. art. 2. q. 3.

## SECTIO II.

*Utrum Verbum assumpserit veram animam rationalem.*

**P**rima hæresis fuit Arianorum negantium in Christo fuisse veram animam, dicebant enim Verbum illi fuisse loco animæ. Ita refert Epiph. hæres. 69. & August. in 49. Nazianz. orat. 51. post medium, Cyril. Alexand. ep. 9. & 29. & in VII. Syn. act. 6. tom. 5. non longe a fine, idem error tribuitur Eusebio Cæsariensi, & aliis Arianis.

Secundus error fuit Apollinaris, qui in principio dicitur sensisse cum Arianis, postea vero quibusdam scripturæ testimoniis coactus, dixit in Christo esse animam sentientem, non tamen mentem. Ita refert Epiph. hæres. 77. ubi Epistolam Athanasii ad Epictetum contra hanc hæresim citat. August. heref. 55. Vincent. Lirin. in suo libel. contra hæres. c. 17. Nazianz. orat. 46. quæ est epist. ad Nectar. Cyril. hom. 5. Ephes. dicta, Rufinus lib. 1. 1. hist. c. 20. & Socrates in Tripartita lib. 5. c. 44. Quid autem nomine mentis Apollinaris intellexerit, an scilicet potentiam intellectivam vel ipsam substantiam rationalis animæ, non satis aperte explicant dicti auctores: quamquam August. & fere Epiph. & Rufinus non obscure indicent, eum non de sola accidentali facultate, sed de substantia ipsius animæ fuisse locutum: sic enim August. ait: *Negavit mentem, quæ est rationalis anima hominis*. Epiph. vero refert, se interrogasse hæreticos, quid nomine mentis intelligerent, ipsosque respondisse, esse substantiam, seu spiritum.

Ex



Ex quo fit consequens, eos negasse partem quandam humanæ naturæ. Quo sensu hæretici dicti Dimeritæ, quorum auctor fuit quidam Timotheus, postea dixerunt, ex tribus partibus humanæ naturæ, corpore, anima, & mente, Verbum duas priores tantum assumpsisse, ut constat ex Epiphanio supra, & heres. 78. & ex epistolis Damasii, quas refert Niceph. lib. 12. hist. cap. 17. & 18. & ex parte habentur tom. 2. Conc. & apud Theodor. lib. 5. histor. cap. 10. & 11. quibus locis Damasius contra hunc hæreticum definit, assumpsisse Christum veram animam rationalem, non obscure indicans hoc negasse prædictum hæreticum, & in hoc fuisse secutum Apollinarem. Verum est tamen, Epiphanium supra primum contendere, mentem non esse spiritum ex illo loco 1. Cor. 14. *Psallam spiritui, psallam & mente*: deinde velle, non esse substantiam, quia *alias*, inquit, *multiplex esset homo*: ac tandem asserere, mentem non esse substantiam, sed humanæ substantiæ functionem, seu actionem (ait ipse) *ex Deo nobis datam*. Sed prior locus parum cogit, nam ibi nomine *spiritus* non significatur anima hominis, sed vel donum spiritus, linguarum videlicet donum, de quo ibi sermo est, vel certe aer, aut vox, quæ in aere formatur; unde est illud, quod ibi præmittitur. *Si orem lingua, spiritus meus orat*, id est, vox vel lingua mea, mens autem mea sine fructu est: & deinde subiungit, *Orabo spiritu, orabo & mente*, hoc est, non tantum verba proferendo, sed etiam animo & mente concipiendo. Unde etiam potest ibi nomine *spiritus* affectus orandi significari, hic autem, cum mens dicitur esse spiritus hominis, *spiritus* pro animæ substantia sumitur. Unde, quod in 2. dicto Epiphanium inferebat, solum probat, mentem non esse substantiam ab homine separatam, eique assistentem, quia sic homo non esset unus, sed multiplex, hoc vero non sequitur, dicendo, mentem esse substantiam rationalis animæ cum corpore unum hominem componentem. Quod denique 3. loco ait, mentem esse actionem, fortasse interdum hæc vox ita usurpatur. Apollinaris tamen non in hac tantum significatione de mente est locutus: nec nomine mentis sola actio ejus, sed etiam principium ipsius, vel proximum, vel principale & radicale, significari potest, & solet, ut declaratum est, & amplius constabit ex his, quæ infra q. 6. art. 2. in ejus commentario ostendemus. In hoc ergo sensu hæc hæresis hoc loco refutanda est, de potentia namque intellectiva inferioris suo loco q. 9. tractabimus.

Dico ergo Christus Dominus assumpsit veram animam rationalem, ejusdem speciei cum animabus aliorum hominum. Est de fide, quæ sufficienter probari posset ex principio posito sect. præced. quia sine vera anima rationali vera humanitas esse non potest, nec verus homo, cum per illam formaliter & essentialiter constituatur. Probari etiam potest sufficienter ex principio posito supra disput. 7. sect. 2. ubi ostendimus unionem hanc non esse factam in natura. Sed præterea probatur ex propriis. Primo, ex Scriptura, Jo: enim 12. dicit Christus, *nunc anima mea turbata est*, & Matth. 26. *Tristis est anima mea*; ubi non potest nomine animæ Verbum intelligi tum propter verborum proprietatem, tum quia illi affectus non possunt ipsum Verbum afficere, sicut solent afficere animam: aliis oporteret Verbum ipsum esse passibile, quod Ariani facile concederent, quia negabant esse verum Deum: contra quos sufficienter supra disputatum est, & q. 2. ostendimus, Christum non esse passum, nec mutatum in sua divinitate. Deinde non possunt illa testimonia exponi de anima sentiente tantum. Primo, quia non est sermo de quacunque passione tristitiæ, sed de tristitia rationali, & voluntaria, ut patet ex Verbo illo: *Non mea voluntas, sed tua fiat*: & ex eo quod ex voluntaria consideratione, & meditatione excitavit in se illam tristitiam, ut argumentatur VI. Synod. act. 18. in edicto Constantini, in quo antiqui Græci Patres contra hunc errorem referuntur. Denique Joan. 10. ait Christus; *Ego pono animam meam, ut iterum sumam eam; nemo tollit eam a me, sed potestatem habeo ponendi animam meam, & iterum sumendi eam*; ex quibus verbis satis constat, illam Christi animam habuisse libertatem arbitrii, & fuisse immortalem: unde de illa dictum est Psalm. 15. *Non derelinques animam meam in inferno*, ut ab Apostolo Petro explicatur Act. 2. & ideo Matth. 26. & Luc. 23. eadem anima *spiritus* dicitur. Ex quibus locis etiam constat, in Christi morte hanc animam fuisse a corpore separatam, cum tamen Ver-

bum nunquam fuerit a corpore disjunctum.

Secundo principaliter definita est hæc veritas a Damaso Pap. cum Conc. Romano, in professione fidei, quæ habetur inter decreta ejus, & refert etiam Theodor. lib. 5. hist. cap. 9. 10. & 11. & lib. 9. Tripart. c. 15. & Niceph. lib. 12. hist. c. 18. idem habetur in Conc. Ephes. in Epist. Cyril. ad Nest. quæ ibidem can. 3. approbatur: idem Conc. Calcedon. act. 1. V. Syn. sess. 8. can. 4. & 11. VI. Syn. act. 11. in Epist. Sophronii, & sess. 18. in citato edicto Constantini, & Conc. Carthag. IV. c. 1. & Conc. Tolet. I. IV. & XI. in confessionibus fidei. Tradit etiam Leo Pap. epist. 11. 82. 95. Cyril. supr. & lib. de fide ad Theodof. August. libr. de agone Christiano c. 10. & 21. & optime libro contra Felicianum Arianum cap. 13. ubi dicit, prætermisiss scripturis, se velle ratione contendere: & prima ac potissima, qua utitur, sumitur ex fine incarnationis, tum quia sine rationali anima non potuisset Christus orare, mereri, nec satisfacere: tum etiam, quia cum incarnatus fuerit ad redimendum hominem lapsum, assumere debuit id, quod potissimum in homine ceciderat, quodque maxime redemptione indigebat; hoc autem est rationalis anima. Quæ ratio frequens est apud Patres, ut patet ex citato edicto Constantini, & ex Nazianz. orat. 51. & 52. Damasc. lib. 3. cap. 6. & Ambros. lib. de incarnat. Domin. sacram. cap. 7.

Ultimo afferri possunt rationes Philosophicæ. Prima, quia non potest Deus fieri forma corporis, ut supra etiam disput. 7. declaratum est. Secunda, quia esto posse aliquo modo informare, tamen natura composita ex tali forma, non esset humanitas, & ita nec Christus esset verus homo, quia non potest Deus supplere effectum causæ formalis. Tertia specialis contra Apollin. quia in homine non est anima sensitiva distincta a rationali: unde si Christus assumpsisset animam sensitivam sine rationali, necessario assumpsisset naturam alicujus bruti, aut embrionis. Neque contra hanc veritatem aliquid ex Scriptura, vel Patribus objici potest. Unde fundamentum hæreticorum solum erat, ut Athan. refert lib. de incarnat. Verbi prope finem, & Ambr. supra, quia si Christus habuisset animam rationalem, peccati capax extitisset: sed dicendum, illam animam, quæ sibi relicta fuisset capax peccati, per unionem impeccabilem evasisse, ut q. 15. explicabitur. Est autem hoc loco advertendum, conclusionem esse intelligendam de unionem immediata: hic enim est clarus sensus Cōciliorum & Patrum, & est evidens per sese, nam aliquid debuit necessario immediate assumi: ergo maxime anima. Dices. Tota humanitas. Sed contra, quia non potest tota humanitas immediate assumi, nisi essetiales partes, quibus constat, immediate assumantur: quia entitas totius humanitatis non est alia ab entitate partium simul sumptarum & unitarum. Confirmatur, quia in triduo mansit anima unita immediate, & tamē non est facta nova unio, sed ex vi præcedentis; de qua re plura infra q. 6.

### SECTIO III.

*Utrum Christus assumpsit verum humanum corpus.*

Primus error negavit Christum verum corpus assumpsisse, sed solum phantasticum & apparens. Ita erravit Marcion, contra quem multa scripsit Tertull. libris contra illum, & lib. de carne Christi: referunt etiam Justinus Martyr. Apolog. 2. pro Christianis, non longe a fine, Epiphani. heres. 42. & August. heres. 22. Irenæ. lib. 1. cap. 29. qui ait propterea hunc hæreticum prima capita Lucæ, quæ sunt de humana Christi generatione expunxisse. Eundem errorem secutus & Lucanus quidam, & Cerdon, ut refert Tertull. lib. de Præscript. hæret. circa finem, & Epiphani. heres. 41. August. in 21. item Manichæi, ut constat ex Epiphani. heres. 66. & August. in 46. item Proclianæ apud August. heres. 60. seu Prodanitæ, ut est apud Philatrium lib. de hæresibus: ac denique Priscillianistæ, ut refert Leo Pap. epist. 93. cap. 4. & 17.

Secundus error fuit, habuisse Christum verum corpus, sed non ejusdem rationis cum nostro, in quo fuit varietas, quidam enim dixerunt fuisse formatum ex elementis, ut Apelles apud August. heres. 23. Alii habuisse corpus cœleste, ut Valentinus, teste August. heres. 11. & Tertull. lib. de Præscript. hæret. & Gnostici apud Iren. lib. 1. cap. 5. Alii denique dixerunt habuisse corpus divinum, consubstantiale divinitati, vel certe ex ipsa formatum, ut Apollinar. referen-

Quid nomen  
ne intel-  
ligat si-  
gnificari  
Epipha-  
nium.

Ejus sen-  
tentia  
perpendi-  
tur.

Conclu-  
sio de fide  
secunda.



referent. Iustino Martyre, Apolog. 2. ad fid. de quo satis multa dicta sunt supra disp. 7. sect. 2.

Dico primo: Verbum divinum assumpsit verum corpus. Est de fide, quæ sufficienter probatur ex veritate Incarnationis, supra late probata, & simul cum sequenti evidenter ostendetur: infra etiam quæst. 14. ex professo probandum est, Christum assumpsisse verum corpus passibile, & non tantum apparenter. Nunc sufficit illa ratio, quia si Christus non habuit verum corpus, nulla est veritas in mysteriis vitæ ejus: quia nec vere mortuus est, nec vere resurrexit; vana erit ergo fides nostra, ut aliàs Paul. argumentatur 1. ad Corinth. 16. & in hunc finem persequitur August. lib. 83. quæst. 14.

Dico secundo assumpsisse Verbum corpus humanum ejusdem materiæ, & rationis cum nostro. Est de fide, & probari potest illis principiis generalibus, quod Christus est verus homo, conceptus ex muliere, de quo dicitur suo loco. Nunc probatur ex propriis, primo ex Scriptura, Joan. 1. *Verbum caro factum est*, scilicet per assumptionem & unionem, juxta illud ad Hebr. 1. *Semen Abrahæ apprehendit*, & cap. 2. *Qui a pueri communicaverunt carni, & sanguini, & Filius Dei participavit eisdem*, ad Roman. 1. *Qui factus est ei ex semine David secundum carnem*. 1. Petr. 4. *Christo igitur passo in carne, & vos eadem cogitatione armamini*. Secundo definiunt hoc omnia Concilia citata sect. præced. & specialiter traduntur circa hoc multa in Concil. Hispalen. II. cap. 13. & in Bracharen. I. cap. 4. & in decretis Eutychiani, Liberii, & Damasi Pontificum, & a Leone Pap. in citatis epistolis, & aliis Patribus citatis, præsertim Tertul. lib. de carne Christi, & Ambros. lib. de incarnationis Domini sacramento cap. 7. & August. epist. 146. ubi ponderat verba, quæ Christus post resurrectionem dixit Luc. 24. *Videte, quia Spiritus carnem, & ossa non habet, sicut me videtis habere*. Sunt etiam aperta illa Scripturæ testimonia. *Verbum caro factum est*, Joan. 1. *Factus est ex semine David secundum carnem*. Roman. 1. *Qui a pueri communicaverunt carni & sanguini, & Filius Dei participavit eisdem*. Hebr. 2. & similia, quæ frequentia sunt. Ultimo sunt rationes. Prima, quia etiam corpus humanum de essentia hominis est. Secunda, quia tale corpus fuit necessariū ad finem redemptionis, quia in nostro corpore pati debuit, & exempla virtutum nobis ostendere, & quia corpus nostrum debet configurari corpori claritatis ejus. Unde sumitur tertia ratio, quia Verbum non tantum erat redempturum animas, sed etiam corpora. Quarta denique, quia aliàs non fuisset Christus vere conceptus ex Virgine, nec verus filius hominis, contra Evangelicam historiam. De qua re plura in sequenti tomo. Est autem hæc conclusio eodem sensu intelligenda, quo conclusio præcedentis sectionis, scilicet, de unione immediata, propter eadem testimonia & easdem rationes. Quibus addi potest, quod in propria persona habet corpus immediatam unionem cum subsistentia: Verbum autem supplet perfectissime propriam subsistentiam: ergo unitur immediate corpori. Et hoc a fortiori confirmabunt, quæ sect. 5. & 6. dicuntur; & inq. etiam 6. idem roborabitur.

Fundamentum Manichæorum fuit, quia putabant corpora esse mala ex natura sua, & a malo principio. Sed hoc processit ex stulto errore, qui in 1. part. ex professo refutatur, & videri potest Athanas. lib. 3. de incarnat. Christi, aliquantulum a principio. Irenæus lib. 1. cap. 29. lib. 3. cap. 18. & 32. & D. Thom. 4. contragent. cap. 30.

1. Object.

Fundamentum illorum hæreticorum sumitur ex aliquibus Pauli testimoniis. Primum est illud 2. ad Corinth. 5. *Et si cognovimus Christum secundum carnem, sed jam non novimus*; quæ Faustus Manichæus ita exposuit, ut diceret, Paulum in principio existimasse Christum habuisse veram carnem, postea vero mutasse sententiam. Et adjugebant illud ad Phil. 2. *In similitudinem hominum factus*, id est, non in veritate. Respondetur, impiam esse illam Fausti expositionem, si enim ita licet sentire de Paulo, nihil est firmum in verbis ejus. Sensus ergo duplex esse potest. Primus, ut Paul. de se loquatur pro eo tempore, quo Christum persequabatur, & dicat: etsi aliquando, *Secundum carnem*, id est, carnaliter judicantes, indignam æstimationem habuimus de Christo, sed jam non ita novimus, seu existimamus. Vel secundo, ut loquatur de conditione carnis passibilis, in qua cognovimus Christum, dum hic viveret, sed nunc jam non novimus: quæ expo-

Respon.

positio traditur in VII. Synod. act. 6. tom. 4. ad finem. Et confirmatur auctoritate Chrysost. & Cyril. & est etiam August. lib. 11. contra Faust. a principio, & est consentanea verbis, quæ Paulus postea subjungit; *Uti qui vivunt, jam non sibi vivunt, sed ei, qui pro illis mortuus est, & resurrexit*. De illo vero testimonio ad Philip. 2. jam supra q. 2. diximus illam particulam, *in similitudinem*, non excludere veritatem: sicut patet Gen. 5. cum dicitur: *Adam genuit filium ad imaginem & similitudinem suam*: & ad hunc modum dixit Clemens Alexan. lib. 1. de Pedag. c. 2. venisse Filium Dei in figura hominis. Vel si gratis demus illam similitudinem excludere veritatem, referenda est non ad homines ut homines, sed ad homines ut peccatores, ut Chrysost. ibi & alii notarunt: quomodo de Christo dicitur ad Rom. 8. habuisse carnem, *in similitudinem carnis peccati*, quamvis non habuerit carnem peccati.

Secundo objicitur illud 1. ad Corinth. 15. *Primus homo de terra terrenus, secundus homo de cælo cælestis*, volunt enim Christum dici cælestem hominem propter cæleste corpus. Sed non intelligit Paul. qui statim etiam eos vocat homines cælestes, qui Christum imitantur. Primo ergo exponunt Patres, Christum dici cælestem hominem, quia cælestem vitam vixit, seu quia impeccabilis fuit: Adam vero dicitur terrenus, utpote subditus peccato, cui quadrat, quod statim Paul. subjungit: *Qualis terrenus, tales & terreni, qualis cælestis, tales & cælestes*. Ita Tertull. libr. de Carne Christi cap. 8. & Beda in eum locum referens Augustinum.

Secundo dicitur Christus homo cælestis propter gloriam, quam a principio habuit; quamvis enim in corpore illam non habuerit, usque ad resurrectionem, illi tamen erat debita, & connaturalis; primus vero homo dicitur terrenus propter mortalitatem ex peccato contractam. Ita fere Chrysost. hom. 42. in 1. ad Corinth. & August. 13. de Civit. cap. 23. Tertull. lib. de Resur. carnis cap. 49. & seqq. Tertio dicitur Christus *homo cælestis*, ratione divini & cælestis suppositi, qua ratione etiam solet dici homo, *qui de cælo descendit*, Joan. 3. & 6. ita fere Nazianz. d. orat. 51. circa medium, & indicat Augustin. epist. 57. ad Dardanum q. 2. Quarto dicitur cælestis propter ineffabilem modum conceptionis, supra totum naturæ ordinem, cælesti quadam virtute effecta; juxta Ambr. 1. ad Corinth. 15. & Hilar. lib. 10. de Trinit. non longe a principio, August. Dialogo 65. quæst. ad Orosium q. 4.

Dices. Hac ratione etiam Adam dicendus esset homo cælestis, quia ab ipso Deo immediate creatus fuit. Respondetur primum, Adam fuisse productum eo naturali modo, quo species humana in primo suo individuo produci poterat, Christum vero modo omnino supernaturali fuisse genitum. Secundo, in Christi conceptione non solum, neque præcipue considerari corporis formationem, sed multo magis assumptionem, & inde vocari cælestem, unde Augustin. supra: *Cælestem dico, quia non ex humano conceptus est semine, sed ex Maria Virgine pro nostra salute assumptus a Filio Dei*.

#### SECTIO IV.

*Utrum assumpsit Christus corpus & animam inter se unita.*

Hanc brevem dubitationem supra q. 2. art. 5. huc remissimus, quoniam præcedentes supponit, & de illa fuit olim inter scholasticos dubitatum, quibuldam negantibus assumpsisse Christum has duas partes inter se unitas, quia necessario consequi videbatur, ex unione earum resultare personam humanam creatam: quam sententiam tanquam Scholasticam opinionem refert Magist. in 3. d. 6. & Hugo de S. Victor. lib. 1. de Sacramentis part. 2. & Scot. in illa d. 6. q. 3. dicit non fuisse hæreticam, donec ab Alexand. III. damnata est in cap. Cum Christus, extra de hæreticis. Et eodem modo de illa sententia loquuntur alii Scholastici antiqui.

Dicendum vero est, Christum Dominum assumpsisse corpus & animam inter se unita ad componendam unam humanitatem. Est de fide, & contraria sententia semper fuit hæretica, tanquam directe repugnans substantiæ mysterii incarnationis. Unde in Concil. Ephes. can. 13. & Conc. Chalced. act. 1. & 5. & in VI. Synod. act. 1. in epist. Sophron. & act. 13. cap. 4. definitur, Christum assumpsisse carnem animatam anima rationali, quod perinde est ac dicere assumpsisse carnem unitam animæ: & eodem modo

Christus  
quo pater  
dicatur  
cælestis  
homo.



modo loquuntur Concilia supra citata, & alia, quæ docent, Christum assumpsisse carnem mediante anima, quæ disput. 27. tractabimus. Item quæ docent, Christum constare ex corpore & anima, ut Lateranense, quod habetur in cap. Firmiter de sum. Trinit. & Athanas. in symbolo. Et ita sentit aperte de certitudine hujus veritatis Damascen. lib. 3. de Fide cap. 2. August. epist. 3. D. Thom. 4. contra gent. cap. 37. & loco supra citato. Ratio autem est, quia unio animæ & corporis est de essentia humanitatis, & hominis. Verbum autem, & veram humanitatem assumpsit, & vere factus est homo. Deinde nisi corpus & anima fuissent unita, non potuissent per mortem separari, unde nec Christus vere mortuus fuisset: & simili ratione, nec vere resurrexisset, nisi post mortem iterum conjuncta fuissent, nec a principio esset genitus ex matre, quia generatio formaliter terminatur ad unionem animæ cum corpore. Ad fundamentum autem contrarii erroris jam ex supra dictis patet responsio: per unionem enim animæ & corporis immediate resultat hæc natura, & per hypostaticam unionem impediri potest, ne resultet hæc persona.

Occurrebat hoc loco difficultas, an corpus & anima aliter fuerint unitæ verbo ratione totius humanitatis, seu quatenus unitæ erant ad illam componendam, aliter vero secundum se, seu secundum entitates suas. Sed hæc dubitatio supponit nonnulla tractanda disputat. 17. & ideo usque in illum locum differenda est.

**An Christus dicendus sit ex tribus naturis compositus.** Ex dictis vero expeditur facile aliud dubium, quod ad modum loquendi pertinet, an Christus dicendus sit compositus ex tribus naturis, divinitate, anima, & carne, an vero ex duabus tantum, divinitate scilicet, & humanitate: nam Damascen. lib. 3. cap. 16. ita posteriorem hunc modum loquendi eligit, ut priorem non probet, quem imitatur Paulinus Aquilejen. in libel. Sacrosyllabo, qui refertur in Concil. Francofordien. & habetur etiam in 5. tom. Biblioth. sanct. quoniam videtur illo modo loquendi significari, ita fuisse disjuncta inter se animam & corpus, sicut a divinitate, seu non magis fuisse unita inter se ad componendum unam naturam, quam cum divinitate. Item, quia anima & corpus non sunt proprie duæ naturæ, cum sint partes unius naturæ. Nihilominus prior loquendi modus est valde a Patribus usitatus; illo enim utitur Gelas. Pap. lib. de duab. natur. circa finem, & Conc. Toletan. XI. ex August. 13. de Trinit. cap. 17. ubi utramque locutionem conjungit dicens: *Ex duabus substantiis una persona, ac per hoc jam ex tribus, Deo, anima, & carne;* & Bernard. ferm. 3. in Vigil. Nativit. Domini, & lib. 5 de considerat. ad Eugenium, ubi ait: sicut in Trinitate sunt tres personæ in una natura, ita per hoc mysterium factum esse, ut sint tres naturæ in una persona. Et eodem modo loquitur Innoc. lib. 4. de myst. altaris cap. 11. Indicat etiam Leo Pap. epist. 11. dicens, Verbum, carnem, & animam, unum esse Christum. Et quamvis magis proprie dicatur Christus constare ex duabus naturis, tamen alius modus loquendi non est rejiciendus, nam est in rigore verus, & introductus est ad explicandum, si verum corpus, & veram animam Christum assumpsisse: ut enim purus homo dicitur ex duplici natura constare, corporali scilicet & spirituali, cur non poterit dici Christus constare ex tribus? Regulariter vero nos priori modo loqui debemus, quia est proprius, magisque explicat, Verbum non assumpsisse corpus & animam, ut duas naturas distinctas, sed ut unam componentes. Posterior autem modus ad refutandas expresse hæreses contrarias usurpatus est a Patribus, & eodem modo possumus nos loqui, adhibita sufficiente declaratione.

### SECTIO V.

*Utrum assumpserit Christus partes omnes, quæ sunt de integritate corporis humani.*

**D**ico primo, Verbum divinum assumpsisse corpus integrum, & omnibus suis partibus constans. Hæc conclusio est omnino certa, & in ea conveniunt omnes Theologi & Patres, qui de hac materia loquuntur; & fundamentum est, quia Christus non est tantum homo verus, sed etiam perfectus & integer, & neque mancus, aut mutilus, neque monstruosus: quanquam enim hoc ultimum non habeatur expresse in Scriptura, tamen cum si-

des doceat, Verbum factum fuisse hominem, assumendo nostram naturam, quam in Adamo plantavit, satis indicat, & docet, sicut creavit Adam integrum quoad omnes partes, ita etiam perfectam, & integram humanitatem assumpsisse: ut bene explicuit Leo Papa ferm. 7. de Nativ. cap. 2. & Damasc. lib. 3. de Fide cap. 3. & 6. & idem est communis sensus omnium Patrum, & totius Ecclesiæ: ac denique hoc intendunt definire Concilia supra citata, cum statuunt assumpsisse Verbum nostrum corpus perfectum, quale creavit in Adam. Ratio vero facilis est, quia ita decebat & majestatem Verbi Dei, cujus illud corpus erat futurum, & omnipotentiam Spiritus Sancti, cujus virtute corpus illud fabricatum est, & excellentiam ipsius operis, quod sicut est maximum omnium, quæ a Deo perfecta sunt, ita debuit integro ac perfecto modo fieri.

Dico secundo: Verbum divinum assumpsit omnes partes corporis humani, eas præsertim, quæ anima rationali informantur, non tantum mediate, & in hypostasi, sed etiam immediate, & secundum hypostasim. Explicatio horum terminorum jam supra tradita est. Conclusio vero communis est, & certa: ut vero explicetur, & probetur, advertendum est, in corpore humano multa ad illius integritatem concurrere, ut ossa, carnem, sanguinem, & alios humores, dentes, ungues, capillos, barbam, &c. quæ omnia fuisse in corpore Christi, indubitatum est ex dictis in præcedenti conclusione: quia corpus illud erat perfectum, & integrum, & naturali modo vivebat, & nutrebat, &c. Unde consequenter fit, hæc omnia fuisse assumpta in hypostasi Verbi, de quo jam quæstio esse non potest: an vero fuerint etiam assumpta secundum hypostasim, illud potest in quæstionem venire. Secundo observandum est ex philosophia, quædam esse inter hæc, quæ integrant corpus humanum, de quibus certum est informari ipsa anima rationali, ut sunt partes omnes organicæ, & ossa, caro, &c. Alia vero sunt, de quibus dubitatur, ut sunt dentes, ungues, capilli, humores. De hoc posteriori genere partium nunc non agimus, postulat enim longiorem disputationem. De priori ergo partium genere probatur conclusio, quia corpus humanum unitum fuit Verbo immediate, & secundum hypostasim, neque enim sola anima immediate assumpta est, sed tota humanitas, sicut in propria humana persona, non sola anima subsistit, sed totus homo, seu tota humanitas; Verbum enim divinum totam subsistentiam creatam humanitatis, impedivit, & per se ipsum illam terminavit: sicut ergo assumpsit animam immediate, & secundum hypostasim, ita & corpus, ut magis q. 6. declarabitur. Sed non potuit assumere corpus secundum hypostasim, nisi assumendo partes, ex quibus corpus constat, quia ipsum corpus non est quiddam aliud a suis partibus; ergo assumpsit saltem illas partes, quæ informantur anima rationali: tum quia hæc sunt, ex quibus maxime substantialiter, & quasi essentialiter componitur humanitas; tum etiam, quia omnes hæc partes in propria persona subsistere solent subsistentia totius naturæ, quæ in Christi humanitate fuit ipsa subsistentia Verbi: ac denique quia anima, quæ informantur omnes hæc partes, assumpta est; ergo & omnes hujusmodi partes corporis, quia fere eadem est ratio de omnibus, neque ulla probabilis ratio dubitandi hic occurrit.

### SECTIO VI.

*Utrum Verbum divinum immediate, & secundum hypostasim assumpserit sanguinem, ad subsistendum in sua persona.*

**R**atio dubitandi est, quia sanguis non est pars corporis humani, neque anima rationali informat, ut est communis Theologorum, & multorum Philosophorum sententia, quæ fundamentum habet in Aristot. lib. 2. de part. animal. cap. 3. ubi sanguinem dicit esse alimentum ultimum, & esse in venis tanquam in vase; & cap. 10 negat esse partem; & lib. 3. cap. 5. ubi dicit sanguinem esse materiam totius corporis, & esse quasi irriguum per venas; constat autem ex eodem Aristot. lib. 2. de gener. text. 27. & 38. & lib. 3. de Anima text. 45. alimentum esse aliterius substantiæ a vivente, quia nutritio est substantialis conversio, quæ non habet locum inter res ejusdem formæ: unde cum alimentum incipit informari anima viventis, jam desinit esse alimentum, & incipit esse pars, cum



cum ergo sanguis sit ultimum alimentum, non informatur anima, sed ex illo fit proxima conversio, & animæ informatio: quomodo intelligi possunt verba, quæ ex Arist. citari solent 3. de historia animalium cap. 19. ubi dicit, sanguinem semper animari, & fervere, quamquam hæc in Codicibus Græcis non habeantur. Habet etiam hæc sententia fundamentum in D. Thom. infra q. 3. art. 5. ad 1. ubi dicit, sanguinem non esse actu partem, & ideo quævis corpus Christi fuerit ex sanguine Virginis formatum, nihil fuisse ablatum ex corpore Virginis, quod actu esset pars ejus. Et 1. p. q. 109. art. 1. ad 3. dicit sanguinem nondum accepisse naturam speciei, sed adhuc esse in via, ut vivat: & alia similia testimonia refert Capreolus, qui hanc defendit sententiam in 2. d. 15. artic. 3. ad 3. contra 3. concl. & in 4. d. 10. q. 2. art. 3. ad 4. Scoti contra 1. concl. ubi etiam Scot. q. 1. art. 2. idem affirmat, & Soto q. 1. art. 2. & d. 44. art. 3. ubi etiam Bonaven. art. 1. q. 1. ad 2. & Richard. art. 1. q. 2. Durand. q. 2. ad 2. Palud. q. 1. art. 2. n. 18. Alensis 2. part. q. 26. membr. 6. & medici etiam in eadem conveniunt sententiam cum Galeno lib. 4. de usu partium. Rationes omitto, tum quia facile ex dictis sumi possunt, tum quia res est aliena.

Ex hoc vero principio sequi videtur, Verbum non fuisse immediate sanguini unitum, primo quia Verbum non assumpsit corpus, nisi mediante anima, ut infra q. 6. cum D. Thom. & antiquioribus Patribus dicemus; ergo, &c. Secundo, quia Verbum tantum assumpsit unam naturam, una autem natura constat una materia, & forma ultima: nam cum sanguis habeat suam propriam formam, ad gradum inanimatorum pertinentem, distincta natura est a natura animata; assumpsisset ergo Verbum duas naturas. Tertio, quia in aliis hominibus substantia creata humanitatis tantum terminat eas partes corporis, quæ informantur anima rationali: neque enim potest sanguis illa substantia terminari, cum sit substantia re ipsa prorsus distincta ab humanitate. Quarto, quia partes, quæ non informantur anima, non sunt de integritate humanitatis; ergo nec assumptæ sunt a Verbo immediate: antecedens patet, quia humanitas est substantia per se una; ergo unicam habet formam; ergo. Quinto, quia nunc in cælo non habet Verbum sibi unitas, nisi eas partes corporis, quæ informantur anima rationali; ergo signum est eas tantum a principio assumpsisse: patet antecedens, quia solas eas partes corporis assumpsit in resurrectione, cujus signum est, quod sanguinem non assumpsit; dicitur enim adhuc manere separatum a Verbo. Sexto aliàs sequeretur incommoda, scilicet Verbum esse sanguinem, & per communicationem idiomatum sanguinem esse hominem, quia Verbum est homo, & Verbum est sanguis, ergo sanguis est homo, sicut dicebamus, quod si Verbum assumpsisset duas naturas, esset inter illas in concreto communicatio idiomatum: unde ulterius dici posset, Verbum, vel, Christum effusum in passione, & adhærens cruci, &c.

Propter hæc est prima quorundam Theologorum sententia, quæ simpliciter negat, sanguinem Christi fuisse immediate unitum hypostatice Verbo. Ita tenet Durandus in 4. d. 10. q. 1. n. 16. Franciscus de Maironis d. 43. & serm. qui incipit, Memoriam fecit, &c. Gab. in Canonem lect. 53. & Supplem. Gab. in 4. d. 44. q. 1. circa finem, indicat Richard. in 3. d. 2. art. 2. q. 1. ubi negat sanguinem Christi in triduo fuisse adorandum latria, *Quia non fuit, inquit, essentialis pars corporis*; & Abulensis paradox. 2. cap. 2. 40. & sequentibus dicit, in triduo non fuisse sanguinem unitum Verbo: de sanguine vero existente in corpore vivo non expresse id negat, sed potius dicit fuisse consequenter assumptum, quomodo etiam loquitur de omnibus partibus humanitatis.

Secunda sententia distinguit duplicem sanguinem, alterum nutrimentalem, qui non informatur anima, neque est plene decoctus, aut dispositus, nec per se requiritur ad componendum integrum corpus, sed solum ad alendum illud: alterum perfectum, & per se requisitum ad integritatem humani corporis, & non solum, ut sit alimentum, quamvis etiam possit ad hoc deservire secundum quandam accidentalem transmutationem, per condensationem, vel alio simili modo: nam substantialiter totus hic sanguis dicitur informati anima. Quæ distinctio fundamentum habet in D. Thom. quodlibet. 5. art. 5. & ea utitur Cajetan. infra q. 54. art. 2. & Sylvest. in Rosa au-

rea q. 31. Qua distinctione supposita dicit hæc sententia Christum non assumpsisse hypostatice priorem sanguinem, scilicet nutrimentalem, propter fundamenta primæ sententiæ: assumpsisse vero posteriorem, ac perfectum sanguinem, propter generales rationes sectione præcedenti factas, & propter multa alia, quæ statim afferemus. Et hæc videtur esse sententia Cajetan. hic q. 5. art. 2. juncto alio loco supra citato, & indicat etiam Sylvest. supra. Qui consequenter duplicem in Christo sanguinem distinguit, & alium vocat salubrem, quia ex vi propriæ unionis habet infinitum valorem: alium tantum salubriter effusum, quia licet ex se non sit ita efficax, quia non est unitus, tamen effusio ejus propter dignitatem suppositi fuit ejusdem valoris, sicut lachrymarum effusio.

Tertia sententia affirmat, sanguinem Christi fuisse assumptum proxime, & immediate, propter testimonia Sanctorum statim citanda: dicit tamen non fuisse assumptum ex vi assumptionis humanæ naturæ integræ, & perfectæ, idque propter fundamenta primæ sententiæ; unde concludit hoc factum esse ex peculiari Dei ordinatione, ut esset condignum pretium nostræ redemptionis. Pro hac sententia nullum invenio auctorem, quamvis in multorum ore feratur.

Dico primo; Sanguis Christi Domini proxime, & immediate fuit unitus Verbo Dei. Hæc conclusio est hoc tempore ita certa, ut contraria non possit sine errore defendi. Eam sentit D. Thom. hic art. 2. in corpore, juncta solutione ad 2. ubi eodem modo loquitur de assumptione carnis, & sanguinis. Clarius id docet dicto quodlibet. 5. art. 5. Capreol. supra, & in 4. d. 1. q. 1. art. 3. ad 5. contra 1. concl. Soto d. 10. q. 1. art. 2. Major. in 3. dist. 3. q. 2. Albert. Mag. tract. de Sacrific. Missæ, Turrecr. in cap. Invitat. de Consec. d. 2. Nicol. de Lyr. ad Hebr. 9. exponens illa verba, *Quanto magis sanguis Christi*, & Remigius, & alii in eundem locum, late Syl. in rosa aurea tract. 3. qu. 30. & seq. Dominicus de Dominicis in lib. de Sanguine Christi, & in Direct. Inquisit. 2. p. q. 10. refertur mandato Clemētis VI. fuisse retractatam ut hæreticam, sententiam cuiusdam, qui Barcinonæ asserbat, in triduo non fuisse sanguinem Christi unitum Verbo, ipsumque assertorem fuisse ab Inquisitoribus damnatum: quæ historia a Sylvestro, & Dominico de Dominicis late refertur, qui refertur etiam Pium II. illam sententiam damnavisse.

Et primo probari solet hæc sententia ex illis locis Scripturæ, in quibus nostra redemptio tribuitur sanguini Christi, tanquam condigno pretio, ad Ephes. 1. ad Colos. 1. ad Roman. 3. *Per fidem in sanguine ipsius*, ad Hebr. 9. *Quanto magis sanguis Christi*, 1. Petr. 1. *Non corruptibilibus auro, & argento, sed pretioso sanguine*, &c. 1. Joan. 1. *Sanguis Jesu Christi filii ejus emundat nos ab omni peccato*, & Apoc. 7. dicuntur Sancti dealbasse stolas suas in sanguine Agni, & Luc. 22. ait Christus: *Hic est calix novum testamentum in sanguine meo, qui pro vobis effundetur*.

Sed responderi potest, sanguinem Christi habuisse hanc efficaciam, quia effusus fuit a persona infinita, & consequenter dicentur eamdem vim habuisse lachrymæ, & quæcumque alia opera Christi; tamen specialiter redemptionem tribui sanguini, sicut tribuitur passioni, quia statuit Deus redemptionem nostram passionem suam, & effusione sui sanguinis consummare, sicut si statuisset fiendo tantum nos redimere, dici posset de lachrymis Christi omnia, quæ de sanguine dicta sunt. Unde August. 13. de Trinit. cap. 15. in dignitatem suppositi hoc refert dicens. *Sanguis ille, quoniam ejus erat, qui nullum habuit omni no peccatum, ad remissionem nostrorum fusus est peccatorum*; & Leo Papa serm. 12. de Passione cap. 3. *Effusio sanguinis iusti tam potens fuit ad privilegium, tam dives ad pretium*, &c. eodem fere modo loquitur Bernar. serm. 3. de Circumcis. Sed quamvis hæc testimonia, nude sumpta, possent hoc modo vitari, tamen adjunctis aliis, & consideratis omnibus circumstantiis, satis in eis indicatur, non solum effusionem propter dignitatem patientis, sed ipsummet sanguinem propter personam illi immediate conjunctam, fuisse infiniti valoris: præsertim cum Christus Dominus, eodem modo suo corpori, & sanguini tribuat, quod data sint in remissionem peccatorum. Unde August. enarrat. in Psal. 65. circa id, *Terribilis est super omnes Deos: Quæritis, inquit, quid emerit? Videte, quid dederit, & invenite quid emerit; sanguis Christi pretium est, tanti quid valeat? quid, nisi totus orbis, quid, nisi omnes gentes?*



tes? & ferm. 128. de Tempore: *Pretium vite nostre sanguis est Domini, & totius mundi incolunitas sempiterna: pecunia illa, totius mundi copiosa possessio est.* Sed optimum testimonium ad hoc confirmandum est illud ad Hebr. 2. *Quia ergo pueri communicaverunt carni, & sanguini, & ipse similiter participavit eisdem.* Loquitur autem de Filio Dei, & de carne, & sanguine, ut significant substantiam humanitatis, juxta id Matth. 16. *Caro, & sanguis non revelavit tibi;* nam corruptio culpæ, quæ interdum nomine carnis, & sanguinis significari solet, ut 1. Cor. 15. *Caro & sanguis regnum Dei non possidebunt,* in Christo locum non habuit: quamvis si illa corruptio significet solam penam, seu corporis passibilitatem, sic etiam de Filio Dei dici potest, sumpsisse carnem, & sanguinem, id est naturam humanam, non in quocumque statu, sed in statu passibili, & mortali: & hic est sensus Pauli, ut patet ex verbis subjunctis, *Ut per mortem destrueret, &c.* ait ergo Paulus, Dei Filium participasse, seu communicasse, carni, & sanguini, per unionem scilicet hypostatice, quia Verbum nullo alio modo communicavit nostræ naturæ, & tamen hoc modo æque dicit, *Carni & sanguini participasse:* sicut ergo carnem proxime sibi unit, ita & sanguinem. Sic interpretantur hunc locum ibi Chrysost., Theoph., Theodor., Ambr., Ansel., & apertius D. Thom. & OEcumen. qui ex Cyrillo illam refert. Quam Cyril. significat in quadam homil. de eo, quod Verbum factus sit homo: & lib. de Incarn. unigen. circa finem, & lib. 1. de Fide ad Reg. longe post medium, ubi hæc verba tractans inquit: *Verbum ex Deo, particeps factum est carnis, & sanguinis;* & lib. de Fide ad Theod. circa princ. & epist. 8. ad Nestor. circa finem, ita exponit illud Joan. 1. *Verbum caro factum est: Nihil aliud est,* inquit, *quam quod in carne, & sanguine nobiscum communicaverit.* Ex quo licet colligere, ubicumque Scriptura dicit, Verbum sumpsisse humanitatem, carnem, & sanguinem completi, ex quibus constat humanitas.

Secundo principaliter probatur conclusio auctoritate Conciliorum. Nam Conc. Ephes. can. 5. dicit, Verbum æque ac nos communicasse carni, & sanguini: & in epist. Cyril. cum Concil. Alexand. quæ habetur, & probatur in Ephes. tom. 1. cap. 14. dicitur, verum, naturalemque Deum, carnem & sanguinem assumpsisse: & hæc omnia referuntur, & confirmantur in V. Synod. generali aet. 6. longe a medio: & in Conc. Chalced. aet. 1. pag. 33. ad finem refertur, & approbatur illa explicatio Cyril. *Verbum caro factum est,* id est, *Carnem & sanguinem sumpsit;* & VI. Syn. aet. 16. damnatur quidam hæreticus, qui dicebat carnem, & sanguinem in cruce fuisse dimissum, ubi Patres omnes illius Concilii satis sentire indicant, utrumque fuisse eodem modo assumptum: & in aet. 8. ejusdem Synodi habentur hæc verba in professione fidei cujusdam Macarii: *Factus est in assumptione carnis & sanguinis, mansit tamen, quod erat.* Verum est, illum Macarium fuisse hæreticum, quia negabat duas in Christo voluntates, ejus tamen professio in hoc solum rejicitur, non in aliis. Et confirmatur ex definitione Clemen. VI. in extravag. Unigenitus, de Pœnit. & remis. ubi dicit, unam guttam sanguinis Christi fuisse sufficiens pretium redemptionis nostræ, propter unionem ad Verbum: & loquitur aperte de unionem ipsius sanguinis, non corporis, ita ut pretium fuerit infinitum ex parte rei oblatæ, & non tantum ex dignitate offerentis, Unde in principio illius Extravagantis præmittit, *Dei Filium nostræ mortalitatis substantiam divinitati sue conjunxisse;* ut haberet unde hominem redimeret, & Deo satisfaceret: ubi per *Substantiam nostræ mortalitatis,* carnem, & sanguinem plane intelligit. Et hac ratione intelligi potest dictum fuisse a Petro 1. epist. cap. 1. *Non corruptibilibus auro & argento, sed pretioso sanguine quasi agni immaculati.* Quo testimonio usos fuisse quosdam Theologos, de hac re disputantes coram Pio II. refert Sylvest. supra, ex eoque collegisse, vocari Christi sanguinem non solum pretiosum, sed etiam incorruptibilem propter unionem ad Verbum. Quo etiam modo Dionys. Alexand. in epist. con. Paul. Samosat. dixit, Sanguinem Christi non posse corrumpi, quia est sanguis Dei vivi. Refert ejus Verba Turrian. lib. 4. pro epistolis Pontific. cap. 19.

Tertio afferri possunt testimonia Sanctorum. Præter citatos Leo Pap. epist. 10. cap. 5. multa dicit de infinito valore sanguinis Christi, & postea exponens illud 1. Joan. 5. *Hic est, qui venit in aqua, & sanguine Jesus Christus,* di-

cit, per hæc significari divinitatem, quæ ab humanitate non separatur: & Nazianz. orat. 50. *Verbum,* inquit, *caro factum est, non putative, sed vere,* quod explicans subdit rationem; *Quia assumpsit corpus ex carne, ossibus, & sanguine constans.* Beda explicans illud Aet. 20. *Quam acquisivit sanguine suo,* dicit, sanguinem Dei dici propter unionem duarum naturarum in una persona: expressiora sunt verba Cyril. homil. 5. Ephes. dicta, ubi ait, Verbum carnem & sanguinem assumpsisse. Similiter Epiphani. hæres. 77. prope finem ait, Verbum Dei non tantum animam humanam, sed etiam carnem & sanguinem participasse, id est, assumpsisse; & ibi longam refert epistolam Paulini, post epist. Athanasii ad Epiet. ut ostendat, Verbum assumpsisse perfectam humanitatem, & corpus omnibus partibus constans, inter quas sanguinem numerat.

Quarto confirmari hoc potest ex mysterio Eucharistie, nam Verbum divinum non minus est per concomitantiam sub speciebus vini, quam sub speciebus panis; ergo non minus est unitum sanguini, quam corpori: patet consequentia, quia aliàs, cum ex vi verborum consecrationis calicis tantum sit sanguis sub speciebus vini, si sanguis ille non esset immediate unitus Verbo, non esset Verbum sub illis speciebus per concomitantiam, saltem immediate, sed ad summum media carne, & anima. Atque adeo si in triduo consecraretur sanguis, non esset ibi Verbum per concomitantiam: quod videtur omnino falsum, nam Christus Joan. 6. æque de carne, & sanguine dixit: *Caro mea vere est cibus, & sanguis meus vere est potus, qui manducat meam carnem, & bibit meum sanguinem, in me manet, & ego in eo;* ergo quodcumque ex vi consecrationis sanguis est sub illis speciebus, ibi est suppositum divinum: & ideo semper est idem, qui offert, & quod offertur, quod totum est propter immediatam unionem ad Verbum.

Dices: Concilium Tridentinum sess. 13. cap. 3. solum dicere, divinitatem esse per concomitantiam in Eucharistia ex vi unionis ejus cum anima & corpore. Respondetur, sub corpore sanguinem comprehendisse: loquitur enim de corpore humano integro & perfecto, quod sanguinem complectitur, ut statim declarabo.

Quinto, reddenda est ratio propria, quam statim in conclus. 3. melius proponemus.

Dico ergo secundo, totus sanguis, qui fuit in corpore Christi, quique ab illo pro nobis effusus est, fuit immediate unitus Verbo hypostatice. Hæc conclusio non est tam certa, sicut præcedens, sed mihi videtur omnino vera, & contraria, neque pia, neque secuta est. Primum, quia Scriptura sacra, Concilia, & Patres citati, indefinite loquuntur de Sanguine Christi, & in doctrinalibus locutionibus indefinita æquivalere universali. Deinde, quia si non totus sanguis, qui fuit in corpore Christi fuit unitus, scilicet sanguis nutritivus; ergo neque totus sanguis, qui fuit effusus, fuit unitus: nam sine dubio magna, vel major pars ejus fuit nutritivus: & ita Cajetan. fatetur de sanguine effuso in horto, & idem dicere posset de sanguine Circumcisionis, & de aliis effusionibus: nam primus sanguis, qui videtur egredi e corpore, quando fit divisio, est sanguis nutritivus. Consequens autem est valde falsum, tum quia totus sanguis effusus a Christo ejusdem valoris censetur in Scriptura, & Patribus omnibus: tum etiam, quia Clemens VI. definit, quamlibet guttam sanguinis effusi fuisse infiniti valoris propter unionem. Confirmatur, nam ex vi verborum consecrationis calicis, totus sanguis Christi ponitur sub speciebus: nam verbum illud, *Sanguis meus,* totum includit; sed ubicumque est sanguis Christi, vel aliqua pars ejus, ibi est per concomitantiam totum suppositum Christi, ut probatum est.

Denique illa secunda sententia, quæ contrarium asserbat, falso nititur fundamento, etiam philosophico; quia non est verisimile, esse in sanguine ipso substantialem varietatem, quamvis quoad accidentalem perfectionem possit esse magis, vel minus purus: quia illa substantialis distinctio nullo probabili signo colligi, aut discerni potest: quia quoad exteriora accidentia, totus sanguis est ejusdem modi, & rationis; totus etiam est in corpore continuus; nullus est etiam usus, ad quem unus sanguis possit deservire, cui non videatur utilis etiam alius: nam sanguis nutritivus, & nutritio, & actionibus animalis vitæ deservit, & eo melius, quo purior est. Denique cum Scriptura, & Sancti de sanguine Christi loquuntur, certe nomine sanguinis significant id, quod omnes homines gene-



generaliter hac voce intelligunt: omnes autem nomine sanguinis intelligunt nutrimentalem sanguinem, qui est in *vepis* tamquam in vase; hic ergo sanguis fuit unicus Verbo Dei hypostatice: sicut cum dicitur Christus conceptus ex purissimis sanguinibus Beatissimæ Virginis, de sanguine nutrimentali id intelligitur, ut ex D. Thom. supra manifeste colligitur, unde D. Thom. nunquam in partibus ea distinctione duplicis sanguinis usus est.

Dico tertio, Verbum assumpsisse sanguinem, non solum ob extrinsecam rationem, scilicet, ut esset pretium condignum, sed etiam ob intrinsecam rationem, pertinentem ad perfectam, & integram assumptionem totius humanitatis. Hæc conclusio est contra ultimam sententiam supra citatam, & explicat propriam, & intrinsecam rationem hujus assumptionis: quæ non est fundanda in hoc, quod sanguis est actu pars rationali anima informata, illa enim sententia philosophica, vel est falsa, vel certe valde dubia, unde non videtur certa fidei veritas ad illas angustias redigenda. Præsertim cum Aristot. lib. 7. Physic. text. 11. aliquas partes animantis fateatur esse animæ expertes; potest ergo esse pars, licet non informetur anima. Fundatur ergo conclusio in hoc, quod sanguis vere ac proprie pertinet ad veritatem, & integritatem humanæ naturæ, ut docet D. Thom. infra q. 54. art. 2. ad 3. & 76. art. 1. ad 2. & quodl. 5. art. 5. & in 4. d. 44. q. 1. art. 2. q. 3. ad 3. ubi omnes Theologi propter hanc causam docent, sanguinem futurum esse in corporibus resurgentium: imo Concil. Trident. sess. 13. cap. 3. videtur vocare sanguinem partem corporis, dum dicit sanguinem Christi esse sub speciebus panis, *Ex vi illius connexionis, qua partes corporis inter se copulantur*: quin etiam Aristot. lib. 2. de Partibus animal. cap. 2. & 8. sanguinem inter partes animalis numerat. Idem lib. 1. de histor. animal. cap. 1. & lib. 3. cap. 2. Gal. lib. 2. de elem. in principio, ut latius quæst. seq. dicitur, & Seneca lib. 1. Quæst. natural. vocat illum quasi partem, quia pertinet ad veritatem humanæ naturæ, quia sine sanguine non solum integer homo esse non potest, sed neque omnino naturaliter esse potest.

Hanc etiam ob causam solet in sacra Scriptura totus homo, *Caro & sanguis* appellari, Matth. 16. *Caro & sanguis non revelavit tibi*. Idem ad Galat. 1. ad Ephes. 6. ad Hebr. 2. videlicet per synecdochen a parte totum nominando, ut Anselmus, D. Thomas, & alii ibi notarunt, Supponitur ergo his locis, sanguinem esse partem. Imo, cum *caro & sanguis* conjunguntur, per *sanguinem* anima significari solet, ut expositores advertunt; & Philo, de eo quod deterius potiori insidietur, non quia sanguis sit præcipua pars, sed quia quoddammodo vivificat corpus, & ab eo maxime vita pendet. Ex quo etiam aliqui ita errarunt, ut sanguinem putaverint esse animam, ut refert Clemen. Alexand. lib. 1. Pædag. cap. 6. & Aristot. 1. de anim. cap. 2. Et Levit. 17. dicitur anima esse in sanguine, id est, vita, quæ ab illo pendet, ut August. exposuit q. 17. in Levit. Ex quo signo intelligitur, sanguinem non solum requiri per modum nutrimenti convertendi in substantiam aliti, sic enim posset animal, saltem brevi aliquo tempore conservari sine sanguine: non autem ita est, sed simpliciter requiritur ad consistentiam corporis, & quasi ad fovendum omnia membra, & conservandum naturalem calorem, maxime vitæ necessarium. Deinde est veluti quoddam generale organum ad operationes animæ præstandas, præsertim ad effectus, ut sunt ira, audacia: & ad conservationem spirituum vitalium, & animalium, qui ad vitæ conservationem, & usum sensuum maxime necessarii sunt. Et hæc omnia procedunt, siue sanguis informetur anima, siue non.

Quoniam ergo Verbum divinum factum est homo, quantum ad naturam spectat, ejusdem perfectionis, veritatis, & integritatis, qua nos sumus, ideo assumpsit sanguinem ex vi hujus perfectæ, & integræ assumptionis humanæ naturæ. Et hoc significavit Paulus cum dixit, ideo Filium Dei assumpsisse carnem, & sanguinem, quia alii homines carne, & sanguine constant: & idem significat Concil. Ephes. cum Cyril. & aliis Patribus, cum dicunt, in Scriptura sacra, quando dicit, Verbum carnem factum esse, nomine carnis sanguinem comprehendit, quia significatur tota humanitas, quæ utrumque complectitur. Idem denique significant reliqui Patres, cum ajunt, assumpsisse Verbum verum & integrum humanum corpus, quale a principio in nostra natura plantavit, ut patet ex Epiph.

Nazianz. & aliis in locis citatis, & Damasc. lib. 5. cap. 6. August. lib. 10. de Civit. c. 27. & sunt optima verba Leonis serm. 8. de Nativit. *Utriusque nature in suis proprietatibus permanentis tanta est unitatis facta communio, ut quidquid ibi sit deitatis, non sit ab humanitate disjunctum, quidquid autem est hominis, non sit a Deitate divisum*: constat autem ex dictis, sanguinem aliquid esse hominis. Non ergo ex sola ratione extrinseca, seu quasi ex privilegio, sed quasi naturali concomitantia assumptus est sanguis, simul cum aliis partibus humanitatis. Quod ita explicatur, quia sicut hoc ipso, quod de aliquo dicitur, esse verum hominem, dicitur habere carnem & sanguinem: ita cum dicitur, Verbum assumpsisse humanitatem, hoc ipso dicitur sanguinem assumpsisse. Denique si tantum ex privilegio esset sanguis assumptus, sequitur, factas esse duas uniones hypostaticas, physice non connexas, sed tantum subordinatas ex intentione agentis: sicut si Verbum assumpsisset lachrymas, vel aliquid simile: quod esset sine ratione, & fundamentum dictum, nam ad solam dignitatem, seu valorem pretii sufficeret unio mediata, seu in hypostasi, nisi intrinseca ratio perfectæ assumptionis aliud requireret. Et rationes etiam pro prima sententia factæ urgent contra has duas uniones, hoc modo explicatas, quæ tamen in nostra sententia facile solvi possunt.

Ad primum respondetur, Verbum assumpsisse carnem mediante anima, sub carne autem sanguis comprehenditur, ut dictum est: intelligendum autem est illud axioma, corpus assumptum esse ratione animæ, ut infra dicitur, siue talis anima informet omnes partes assumptas, siue non. Et hoc modo etiam sanguis est assumptus mediante anima, quia licet concedamus non informari ab ipsa, tamen est propter ipsam, quæ in corpore conservari non potest sine sanguine: & sanguis etiam ipse natura sua postulat conjunctionem aliquam ad animam, seu ad corpus humanum, sine quo esse, aut diu conservari non potest.

Ad secundum respondetur, sanguinis naturam esse veluti incompletam, & ex natura sua ordinatam ad cōplementum humani corporis, cuius aliquo modo est: & ideo Verbum assumendo carnem & sanguinem, non est dicendum assumpsisse duas naturas, sed unam completam.

Ad tertium respondetur, in puris hominibus, eo modo quo natura est una, ita & subsistentiam esse unam; natura vero ita una est, ut non sit omnino simplex, sed multa cōplectatur, ad sui veritatem & integritatem pertinentia. Eodem ergo modo subsistentia illius naturæ est una, & subsistentia sanguinis respectu illius est veluti partialis. Verbum ergo divinum in humanitate Christi totam illius subsistentiam supplevit, ablata imperfectione, & compositione ipsius subsistentiæ: quidquid enim creata subsistentia, composita ex multis partibus, intelligitur terminare, perfectiori modo terminavit Verbum sua simplici subsistentia.

Ad quartum respondetur, sanguinem esse de integritate humanitatis, siue informetur anima, siue non: qui autē negant informari, consequenter dicent, corpus humanum esse per se unum, non mathematico modo, per continuationem perfectam, sed modo physico, & per quandam quasi continuationem physicam, quatenus omnes illæ partes sunt ita conjunctæ, & subordinatæ, prout ad earum conservationem necessarium est, & prout expedit, ut anima possit illis uti, ad sua munera exercenda.

Ad quintum respondetur, certissimum esse, in resurrectione sanguinem iterum fuisse conjunctum corpori, & nunc etiam esse in Christi corpore glorioso: quia vero sanguis, quem Christus habuit in toto vitæ tempore, potuit excedere quantitatem sanguinis, quæ simul necessaria est ad conservationem, & veritatem corporis humani; ideo fieri potuit, ut non omnem sanguinem, quem in vita habuit, & quem aliquando effudit, in resurrectione iterum assumeret, ut infra in materia de Resurrectione Christi latius dicitur. Ubi etiam cōstabit sanguinem in passione effusum, & in resurrectione recuperatum, nunquam fuisse a verbo dimissum, & ita quoad unionem hypostaticam, non fuisse vere reassumptum, cum nunquam fuerit a Verbo disjunctum: solum igitur quoad conjunctionem cum corpore, dici potest, iterum in resurrectione esse sumptum.

Ad sextum, quamquam illa incommoda sint magis de modo loquendi, quam de re, negatur tamen eorum consecutio, quia sanguis est pars; & ideo ab illo non sumitur communicatio idiomatum.



## SECTIO VII.

*Utrum Verbum divinum assumpserit alios humores, ungues, dentes; & capillos immediate, & secundum hypostasim.*

**I**N hoc dubio omnia sunt minus certa, quam in præcedenti. Dico tamen primo, probabilius mihi videri, alios etiam tres humores immediate fuisse unitos Verbo Dei, ut multi ex auctoribus citatis sentiunt, præsertim Cajetan. Syl. Soto. Et sumi potest ex Innoc. III. in cap. in quadam, extra de Celebr. Missar. ubi dicit, de latere Christi exiisse sanguinem, & aquam, ut esset signum, corpus illud constare ex quatuor elementis, & habere quatuor humores, quod est de ratione, & compositione veri corporis humani, quale Verbum assumpsit. Damasc. etiam lib. 2. de Fide cap. 12. dicit, corpora animalium ex quatuor humoribus constare, & ita solent hi omnes humores nomine sanguinis comprehendere, quia in corpore humano fere semper sunt misti, & sese mutuo juvant, ad conservationem corporis, & vitæ operationes.

Unde August. Epist. 146. dicit: *Quatuor humoribus naturam carnis temperari, etiam medicina disciplina testatur.* Et ideo etiam lib. de Spirit. & anima cap. 15. & 33. dicit, humanum corpus quatuor humoribus constare. Quod expresse etiam docet D. Thom. in 4. d. 44. q. 1. art. 2. quæst. 3. in corp. & ad 3. & ibi reliqui Theologi. Idemque sentiunt Philosophi supra citati, præsertim Galen. lib. 2. de elem. in principio, ubi quatuor humores vocat *elementa corporis humani*; dixerat autem ipse lib. 1. *elementum* vocari partem rei minimam. Item lib. 1. de Anatom. & lib. de natur. hom. ubi Hippocratem in eandem sententiam refert. Lege Scaligerum exercit. 280. cap. 2.

Ex his ergo sumitur ratio conclusionis, nam isti humores sunt etiam de veritate humanæ naturæ, & per se requisiti ad convenientem statum corporis humani, & ideo etiam in corporibus resurgentium permanebunt. Nec refert, quod Arist. interdum hos humores excrementa vocat, sic enim de bile loquitur lib. 4. de part. animal. c. 2. & de pituita primo de Gener. an. c. 18. non enim vocantur excrementa, quia per se non sunt necessarij corpori humano, sed quia non per se ordinantur ad nutritionem, sicut sanguis. Vel certe, quia magna ex parte solent esse superflui, & tanquam excrementa: per se vero necessarij sunt ad debitum temperamentum ipsius corporis, & ut sanguis ipse sit liquidus, fluens, & humidus, ac debite temperatus.

**Objecio:** Dices. Ergo pari ratione spiritus vitales, & animales fuissent assumpti, pertinent enim ad veritatem humanæ naturæ, cum necessarij sint ad operationes vitæ, & ad naturalem statum, & conservationem humani corporis: unde etiam erunt in corporibus resurgentium. Respondetur primo, non esse omnino eandem rationem, quia humores habent substantiam magis stabilem, & consistentem, atque adeo magis intrinsece necessariam corpori humano: spiritus autem sunt quasi in continua successione, & facillime transmutantur, & ita magis videntur esse extra humanæ naturæ integritatem. Secundo responderi potest satis pie, & probabiliter concedendo sequelam, quia nullum habet incommodum, & quia veritas & integritas humani corporis hos spiritus requirit: unde non defunt, qui putent, eos esse animatos. Ac denique, licet in vita mortali variantur per continuam actionem, & reactionem, tamen in corpore glorioso iidem perpetuo manebunt incorruptibiles. Sed quid de illis substantiis mediis inter cibum seu alimentum, & sanguinem, quæ vocantur Ros, & Cambium? cibis enim prius quam in sanguinem, vel in glutem convertatur, in has substantias convertitur, per quas paulatim transmutatio fit. Respondetur, has substantias non fuisse assumptas, quia non sunt de veritate humanæ naturæ, nec per se requisitæ ad perfectam consistentiam ejus, & vitæ operationes. Et majori ratione non fuerunt assumptæ lachrymæ, saliva, sudor, & similia excrementa, quæ nullo modo ad humanæ naturæ integritatem spectant.

Dico secundo. Probabilius etiam videtur, ungues, dentes, & capillos assumptos fuisse secundum hypostasim Verbi Dei. Et quidem de dentibus, & unguibus fere nil dubitatur, quia valde probabile est, informari animam rationali, & augeri vitali modo: tum etiam, quia sunt de integritate humani corporis, & per se necessarij, non to-

lum ad ornamentum, sed etiam ad nonnullas actiones humanas. De capillis vero res est magis dubia, sumitur tamen ex Ambrosio. lib. de Incarn. Dom. sacram. cap. 6. & Athanasio. Epist. ad Epictet. quam refert Epiph. hæres. 77. qui dicunt, eos hæreticos, qui affirmabant divinitatem, & carnem Christi esse ejusdem substantiæ, consequenter fuisse dicturos, Verbum in carnem, capillos, sanguinem, & ossa conversum esse. In quibus verbis manifeste supponunt, Verbum eodem modo fuisse unitum capillis, quo carni, sanguini & ossibus. Præterea pertinent capilli ad quoddam complementum, & ornamentum corporibus resurgentium, teste August. 22. de Civit. cap. 19. & in Enchirid. cap. 88. cum quo sentiunt omnes Theologi in 4. d. 44. ubi D. Thom. q. 1. art. 2. q. 3. ad 3. etiam sentit, illos informari animam rationali, quod etiam indicat 1. p. q. 27. art. 2. ergo eadem ratione credibile est, unitos esse Verbo Dei, præsertim cum in hoc nullum sit incommodum, & ad majorem quandam Christi dignitatem, & majorem perfectionem hujus unionis pertineat. Dices, hæc omnia facillime transmutari, & resolvi. unde fit, fere continue factam esse novam unionem ad Verbum, & novam separationem: atque adeo magnam materiæ quantitatem fuisse temporis successione Verbo unitam, & postea omnino dimissam. Quod videtur inconueniens, & contra illud commune axioma: quod semel assumptum, nunquam dimisit, quod ex Damasceno sumptum est lib. 3. cap. 27. Respondetur hoc nullum esse incommodum; ita enim necessario dicendum est accidisse in continua nutritione, & resolutione partium omnium, etiam perfectarum, & præsertim ipsius sanguinis. Illa ergo, quæ per se fuerunt sumpta, scilicet anima, & corpus, nunquam fuerunt dimissa: partes vero corporis materiales, quæ continue resolvuntur, dimitti potuerunt, præsertim quoad illam materiam, quæ in corpore Christi resurgentis futura non erat necessaria, ut latius in materia de Resurrectione Christi dicemus.

## SECTIO VIII.

*Utrum Verbum divinum in humanitate assumpserit accidentia.*

**S**upposita distinctione supra data, de assumptione in hypostasi, vel secundum hypostasim,

Dico primo, assumpsisse Verbum in sua hypostasi, media humanitate formas accidentales. Est certa, sumitur ex illis locis Scripturæ, quæ dicunt Christum fuisse hominem visibilem oculis corporeis, manducasse, bibisse, tristem fuisse: ac denique ex illis, in quibus dicitur habitu inventus ut homo. Ex quibus sumunt Concilia assumpsisse naturam nostram perfectam, & quidquid in ea plantavit, & per omnia fuisse nobis similem sine forde peccati, ut loquitur Concil. Chalced. act. 5. in 2. definitione Fidei, & VI. Synod. act. 4. & 11. & frequentissime sancti Patres Leo serm. 8. de Nativit. Damascus Epist. 1. ad Paul. Cyril. Epistol. 25. Epiph. hæres. 77. August. lib. 10. de Civit. cap. 17. & Præfat. ad enarr. 2. Psalm. 29. Nazianz. orat. 51. & 52. Damasc. lib. 1. de Fide cap. 14. & lib. 3. cap. 6. 22. 23. Ambrosio. de Incarnat. Domini. sacram. cap. 5. & 7. Fulgent. lib. de Incarn. & grat. cap. 6. Ex quibus sumitur ratio, quia habere formas accidentales pertinet ad naturalem statum, conservationem, & perfectionem humanæ naturæ, ut per se evidens est: sed Christus assumpsit perfectam humanitatem, verumque corpus humanum, quod naturaliter posset esse, operari, videri, pati, &c. ergo. Et hæc conclusio, quæ hic tantum in generali posita est, inferius evidentijs constabit, cum agemus in specie de omnibus perfectionibus, & defectibus in humanitate assumptis.

Dico secundo. Verbum non assumpsit accidentia immediate, & secundum hypostasim, sed tantum in hypostasi mediante natura. De hac conclusione nihil fere dicunt expresse Theologi, omnes tamen eam ut manifestam supponunt. Probatur autem ex principio posito disput. præced. sect. ultim. quia accidens non est immediate assumptibile, & præsertim dum in actu inhæret, & non subsistit: formæ autem accidentales, quæ erant in Christo, actu inhærebant corpori, vel animæ ejus; non ergo immediate terminabantur subsistentia Verbi.

Sed contra, quia Concilia eodem modo, & contextu, **Objecio.** dicunt assumpsisse Verbum animam, & operationes; ergo intelligunt omnia immediate assumpsisse: alijs etiam cum



**Respon.** cum dicunt assumpsisse sanguinem, possent intelligi mediate, & in hypostasi. Respondetur, necessario intelligendum esse, assumptionem esse factam accommodatè, juxta capacitatem uniuscujusque rei, & ideo tota substantia, quæ capax est substantiæ intelligitur immediate assumpta, accidentia vero, ut afficientia substantiam. **Objeſſio.** Sed contra secundo, nam accidentia in Christo existunt ipsa existentia increata Verbi Dei; ergo sunt illi immediate unita. Antecedens patet, quia in aliis hominibus accidentia existunt eadem existentia, qua existit ipsa natura, cujus sunt; ergo & in Christo: sed natura ejus existit existentia Verbi; ergo & accidentia. **Respon.** Respondetur, argumentum procedere ex duobus falsis principiis, quia neque in Christo humanitas existit existentia increata Verbi, neque in ipso, aut in aliis hominibus accidentia existunt eadem existentia, qua existit substantia, sed habent propriam existentiam accidentalem.

## Q U Æ S T I O V I.

De modo assumptionis quantum ad ordinem, in sex articulos divisa.

**D**einde considerandum est de ordine assumptionis prædictæ. Circa quod quaruntur sex.

*Primo, utrum Filius Dei assumpserit carnem mediante anima.*

*Secundo, utrum assumpserit animam mediante spiritu, sive mente.*

*Tertio, utrum anima Christi fuerit prius assumpta a Verbo, quam caro.*

*Quarto, utrum caro Christi fuerit prius a Verbo assumpta, quam anima unita.*

*Quinto, utrum tota humana natura sit assumpta mediantibus partibus.*

*Sexto, utrum sit assumpta mediante gratia.*

**Q**uoniam humana natura ex multis partibus constat, quæ & perfectione inæquales sunt, & in ratione causarum quendam inter se ordinem servant: ideo Theologi in hac humanæ naturæ assumptione quendam ordinem considerant, cujus cognitio confert, tum ad perfectius intelligendum modum hujus unionis cum tota natura, & singulis partibus ejus, tum ad assignandam propriam rationem, propter quam unumquodque assumptum est. De hoc igitur ordine D. Thomas disputat in hac questione; quæ ad duo capita revocari potest: ut unum sit de ordine temporis, seu durationis: aliud de ordine naturæ, & in utroque comparari possunt partes, vel ad totum, vel inter se. Agitur vero præcipue de partibus essentialibus, ut sunt corpus, & anima: nam integrales in hoc ordine fere nihil speciale habent, & si quid occurrerit, obiter attingetur.

## ARTICULUS I.

*Utrum Filius Dei assumpserit carnem mediante anima.*

**A**d primum sic proceditur. Videtur, quod Filius Dei non assumpserit carnem mediante anima. Perfectior enim est modus, quo Filius Dei unitur humanæ naturæ, & partibus ejus, quam quo est in omnibus creaturis. Sed in creaturis est immediate per essentiam, potentiam, & præsentiam. Ergo multo magis Filius Dei immediate unitur carni, & non mediante anima.

2. Præterea, anima, & caro unita sunt Verbo in unitate hypostasis, seu personæ. Sed corpus immediate pertinet ad personam, sive hypostasis hominis, sicut & anima: quinimo magis videtur se de propinquo habere ad hypostasis hominis corpus, quod est materia, quam anima, quæ est forma: quia principium individuationis, quæ importatur in nomine hypostasis, videtur esse materia. Ergo Filius Dei non assumpsit carnem mediante anima.

3. Præterea, remoto medio separantur ea, quæ per medium conjunguntur: sicut remota superficie, cessaret color a corpore, qui inest corpori per superficiem. Sed separata per mortem anima, adhuc remanet unio Verbi ad carnem: quod infra patebit\*. Ergo Verbum non conjungitur carni mediante anima.

Sed contra est, quod Augustinus dicit in Epistola ad Volusianum, ipsa magnitudo divine virtutis, animam sibi rationalem, Suarez Tom. XVI.

& per eandem corpus humanum, totumque omnino hominem in melius mutandum coaptavit.

**b** Respondeo dicendum, quod medium dicitur respectu principii & finis. Unde sicut principium & finis important ordinem quendam, ita & medium. Est autem duplex ordo; Unus quidem temporis; alius autem nature. Secundum autem ordinem temporis non dicitur in mysterio Incarnationis aliquid medium: quia totam humanam naturam simul sibi Verbum Dei univit: ut infra\* patebit. Ordo autem nature inter aliqua potest attendi dupliciter. Uno modo secundum gradum dignitatis, sicut dicimus Angelos esse medios inter homines & Deum. Alio modo secundum rationem causalitatis: sicut dicitur media causa existere inter primam causam, & ultimum effectum. Et hic secundus ordo aliquo modo consequitur primum: sicut enim dicit Dionysius, 13. cap. de Divin. nom.\* Deus per substantias magis sibi propinquas agit in ea, quæ sunt magis remota. Sicut ergo, si attendamus gradum dignitatis, anima media invenitur inter Deum & carnem; & secundum hoc potest dici, quod Filius Dei univit sibi carnem mediante anima. Sed & secundum ordinem causalitatis ipsa anima non est aliquo modo causa carnis uniende Filio Dei: non enim esset assumptibilis, nisi per ordinem, quem habet ad animam rationalem, secundum quam habet, quod sit caro humana. Dicitur enim supra\*, quod natura humana præ ceteris est assumptibilis.

**c** Ad primum ergo dicendum, quod duplex ordo considerari potest inter creaturam & Deum. Unus quidem, secundum quod creatura causatur a Deo, & dependet ab ipso, sicut a principio sui esse: & sic propter infinitatem sue virtutis Deus immediate attingit quamlibet rem, causando & conservando. Et ad hoc pertinet, quod Deus immediate est in omnibus per essentiam, præsentiam, & potentiam. Alius autem ordo est, secundum quem res reducuntur in Deum, sicut in finem. Et quantum ad hoc invenitur medium inter creaturam, & Deum: quia inferiores creature reducuntur in Deum per superiores, ut dicit Dionysius, in lib. Cælest. hierarch. Et ad hunc ordinem pertinet assumptio humanæ naturæ a Verbo Dei, quod est terminus assumptionis: & ideo per animam unitur carni.

**d** Ad secundum dicendum, quod si hypostasis Verbi Dei constitueretur simpliciter per humanam naturam, sequeretur, quod corpus esset ei vicinius: cum sit materia, quæ est individuationis principium: sicut & anima, quæ est forma specifica, propinquius se habet ad naturam humanam. Sed quia hypostasis Verbi est prior & altior, quam humana natura, tanto id, quod est in humana natura propinquius ad eam se habet, quanto est altius: & ideo propinquior est Verbo Dei anima, quam corpus.

**e** Ad tertium dicendum, quod nihil prohibet, aliquid esse causam alicujus, quantum ad aptitudinem & congruitatem, quo tamen remoto, illud non tollitur: quia et si fieri alicujus dependet ex aliquo, postquam tamen est in facto esse, ab eo non dependet. Sicut si inter aliquos amicitia causatur aliquo mediante, eo recedente, adhuc amicitia remanet: & si aliqua in matrimonium ducitur propter pulchritudinem, (quæ facit congruitatem mulieri ad copulam conjugalem) tamen pulchritudine cessante, adhuc durat copula conjugalis. Et similiter separata anima remanet unio Verbi Dei ad carnem.

## COMMENTARIUS.

**I**n hoc articulo comparantur anima & corpus secundum ordinem naturæ, sic enim distinguendus est hic articulus a tertio; unde licet in principio hujus articuli D. Th. distinguat de ordine temporis vel naturæ, id tamen facit ad majorem doctrinæ perfectionem, sensus enim tituli sine dubio est de ordine naturæ, ut explicatum est.

**b** Respondet ergo D. Thom. carnem esse assumptam, mediante anima. Probat, quia hæc ratio medii attendi potest, vel in majori perfectione, vel in ratione causæ: anima vero, & perfectione excedit corpus, & est ratio propter quam corpus assumatur, quod nisi ratione animæ non esset assumptibile; ergo. Ex qua ratione colligitur, mentem D. Thom. solum esse, animam esse rationem, seu ut alii loquuntur, esse medium quo, & suo modo esse finem, propter quem assumptum est corpus; an vero fuerit medium prius natura assumptum, etiam ut quod assumitur, D. Thom. hic nihil dicit, videbimus autem postea.

**c** Primum argumentum D. Thomæ est; Deus immediate est in anima, & in carne, per essentiam, præsentiam,

T &



& potentiam, & non in una mediante alia; ergo similiter Verbum est unitum immediate utrique, & non uni media alia: patet consequentia, quia perfectiori modo est Verbum in his partibus per unionem, quam sit per essentiam, &c. Respondet creaturam habere duplicem ordinem ad Deum. Primo, ut ad principium a quo manat, & quia omnis creatura immediate pendet a Deo, ideo in hoc ordine non reperitur medium: & ad hunc ordinem spectat ille communis modus, quo Deus est in creatura per essentiam, præsentiam, & potentiam. Secundo, quatenus omnes creaturæ reducuntur in Deum, sicut in finem, & hoc modo est medium inter creaturam & Deum, quia Deus reducit ad se inferiores creaturas per superiores: & ad hunc ordinem pertinet hæc assumptio animæ & corporis; & ideo merito dicitur assumpsisse Verbum partem inferiorem, media superiori. Itaque in forma videtur D. Thom. concedere antecedens, & negare consequentiam. Sed difficultatem patitur hæc responsio; quia, ut diximus, hic solum est sermo de medio quo, quatenus videlicet unum est ratio alterius; nulla ergo potest assignari differentia inter corpus, & animam, comparatam ad creationem, vel assumptionem, sub hac consideratione: quia etiam in ordine ad creationem anima est dignior corpore, & est ratio, propter quam corpus creatur, seu formatur, ut sit illius organum; ergo hoc modo dici potest corpus creari mediante anima, sicut assumi. Rursus sicut hæc ratio medii non obstat, ut Deus in ratione primi principii sit per se ipsum immediate in anima, & corpore, quia utrique per se, & immediate dat esse: ita in hac unionem, non obstante illa ratione medii, Verbum proxime, & immediate unitur corpori, sicut animæ; nulla ergo videtur esse differentia. Et sane quo ad rem mihi ita esse videtur, & hoc modo satis clare solvi argumentum, tamen D. Thom. responsio non propterea improbanda est, optimam enim doctrinam continet: & specialiter videtur voluisse insinuare, hunc modum loquendi de medio melius accommodari præsentī mysterio, quam creationi, quia tota hæc ratio medii videtur pertinere ad ordinem finis, seu dignitatis; & agens non dicitur proprie efficere unam rem mediante alia, solum quia sit dignior, vel quia unam efficiat propter aliam: at vero hoc mysterium pertinet ad conjunctionem creaturæ cum Deo, sub speciali ratione subsistentiæ, seu personæ, in qua maxime attenditur id, ex quo habet naturam, ut sit adsumptibilis ad talem unionem.

**Objecio.** Sed difficultatem patitur hæc responsio; quia, ut diximus, hic solum est sermo de medio quo, quatenus videlicet unum est ratio alterius; nulla ergo potest assignari differentia inter corpus, & animam, comparatam ad creationem, vel assumptionem, sub hac consideratione: quia etiam in ordine ad creationem anima est dignior corpore, & est ratio, propter quam corpus creatur, seu formatur, ut sit illius organum; ergo hoc modo dici potest corpus creari mediante anima, sicut assumi. Rursus sicut hæc ratio medii non obstat, ut Deus in ratione primi principii sit per se ipsum immediate in anima, & corpore, quia utrique per se, & immediate dat esse: ita in hac unionem, non obstante illa ratione medii, Verbum proxime, & immediate unitur corpori, sicut animæ; nulla ergo videtur esse differentia. Et sane quo ad rem mihi ita esse videtur, & hoc modo satis clare solvi argumentum, tamen D. Thom. responsio non propterea improbanda est, optimam enim doctrinam continet: & specialiter videtur voluisse insinuare, hunc modum loquendi de medio melius accommodari præsentī mysterio, quam creationi, quia tota hæc ratio medii videtur pertinere ad ordinem finis, seu dignitatis; & agens non dicitur proprie efficere unam rem mediante alia, solum quia sit dignior, vel quia unam efficiat propter aliam: at vero hoc mysterium pertinet ad conjunctionem creaturæ cum Deo, sub speciali ratione subsistentiæ, seu personæ, in qua maxime attenditur id, ex quo habet naturam, ut sit adsumptibilis ad talem unionem.

**Respon.**

c Secundum argumentum D. Thomæ est: materia in proprio supposito æque proxime, vel certe propinquius se habet ad hypostasim, quam anima, quia est principium individuationis, quæ nomine hypostasis importatur; ergo etiam in hac unionem caro fuit æque, vel magis propinque unita, quam anima; ergo non est unita mediante anima. Respondet D. Thomas negando primam consequentiam, quia propria persona simpliciter constituitur per humanam naturam, persona autem Verbi non ita, sed est altior & dignior; & ideo in hac unionem illud propinquius unitur, quod est etiam dignius. In quo argumento primum obscura est illa propositio, quam D. Thom. admittit: propria hypostasis propinquior est materiæ, quam formæ in rebus materialibus: quæ duplici ratione explicari potest. Primo, quia in materiali natura subsistentia vel omnino vel primario videtur convenire ratione materiæ, quæ cum subsistat formæ, videtur esse prima ratio, seu radix per se essendi: & hoc sensu est satis verisimilis hæc propositio in aliis hypostasibus præter humanam, in humana enim non habet locum dicta ratio, quia anima de se est subsistens perfectius, quam materia, quicquid Cajetanus hic dicat. Unde non videtur D. Thom. hoc sensu loqui, & ideo solum fundatur in hoc, quod materia est individuationis principium. Secundo ergo explicari potest illa propositio, quod hypostasis materialis naturæ includit rationem individui talis naturæ: unde personalitas, seu subsistentia oritur ex hac natura, ut individua est: quia ergo materia est individuationis principium, & radix, ideo dicitur propinquius se habere ad propriam hypostasim, quam forma. Quod si quis negaret materiam esse magis individuationis principium, quam formam, posset aliter expedire argumentum dicendo, ordine executionis, & in re ipsa materiam, quam formam immediate, & proxime uniri supposito, præsertim in homine, quia utraque termina-

tur subsistentia: at vero ordine dignitatis, & in ratione causæ, formam esse simpliciter priorem, quia & est perfectior, & quia materia est propter formam, & si aliquomodo subsistit, solum est, ut sit subiectum formæ: & hoc sensu dici etiam posset in proprio supposito materiam uniri illi mediante forma.

Ex hac vero solutione colligit Cajetanus in hac assumptione humanæ naturæ, partes non servasse eundem ordinem ad hypostasim Verbi; quem habuissent in proprio supposito ad subsistentiam propriam: & idem dicit infra art. 5. in responsione ad ultimam rationem Scoti, hoc extendens non tantum ad ordinem intentionis, sed etiam executionis. Sed hoc ex D. Thoma hic sumi non potest, quia non loquitur de ordine executionis, nec de medio, quod prius assumptum sit, sed de ordine perfectionis, & de medio quo, seu quod est ratio assumendi: & differentiam inter propriam hypostasim, & alienam solum in hoc ponit, quod una oritur ex principii naturæ, & non alia. Neque doctrina Cajetani in se vera est; supra enim disput. 8. sect. 3. ostendi, cum propria subsistentia non impediatur, nisi per unionem ad alienam, necesse esse eodem ordine naturæ assumi naturam ad alienam subsistentiam: quod principium verissimum existimo, præsertim de ordine executionis, & illud docuit Scotus in 3. distin. 2. Nec ratio Cajetani aliquid obstat, ait enim, personam assumentem esse alterius ordinis, quam propriam. Sed hoc quid refert ad rem, de qua agimus? Inde enim solum potest colligi, divinam personam altiori modo, & sine imperfectione terminare, non vero quod non servet eundem ordinem naturæ in terminando, quem servaret in subsistendo, nam hoc nullam includit imperfectionem, & aliunde est magis consentaneum rebus ipsis, imo & necessarium, ut propria subsistentia impediatur.

d Ex solutione ad tertium duo principia colliguntur, quæ postea magno usui futura nobis sunt. Primum est, ita fuisse Verbum unitum animæ, & corpori inter se unitis, ut dissoluta unionem eorum inter se manserit eadem omnino unio eorum ad Verbum. Hoc enim sensu procedit argumentum, & in eodem illud admittit D. Thomas, ut bene Cajetan. intellexit: inde etiam recte colligens, animam non ita fuisse medium ad assumendam carnem, ut non fuerit caro ipsa secundum se proxime, & immediate unita, independentem ab animæ informatione, sed esse medium tantum ut quo, seu ut rationem, sicut diximus. Secundum principium est, animam fuisse medium congruitatis ad sumendam carnem: quod intelligendum est de anima actu informante: nam si sit sermo de anima, prout terminat habitudinem corporis humani ad ipsam, sic potest quodammodo dici medium necessitatis de facto seu secundum legem ordinariam, considerato fine incarnationis, & providentia, quam circa hoc mysterium Deus habere decrevit. Quo sensu etiam in triduo potest corpus dici assumptum mediante anima, quia propter habitudinem, quam ad ipsam retinuit, fuit assumptibile.

## ARTICULUS II.

*Utrum Dei Filius assumpserit animam mediante spiritu, sive mente.*

**A**d secundum sic proceditur. Videtur, quod Filius Dei non assumpserit animam mediante spiritu: idem enim non cadit medium inter seipsum & aliquid aliud: sed spiritus, sive mens non est aliud in essentia ab ipsa anima: ut in prima parte habitum est\*. Ergo Filius Dei non assumpsit animam mediante spiritu, sive mente. Locis sup. art. 1. notat. p. 9. 77. art. 1. ad 1.

2 Præterea, illud, quo mediante facta est assumptio, videtur esse magis assumptibile: sed spiritus sive mens non est magis assumptibilis, quam anima: quod patet ex hoc, quod spiritus Angelici non sunt assumptibiles, ut supra dictum est\*. Ergo videtur, quod Filius Dei non assumpserit animam mediante spiritu. q. 4. art. 1.

3 Præterea. posterius assumitur a primo mediante priori. Sed anima nominat ipsam essentiam, quæ est prior naturaliter, quam ipsa potentia ejus, quæ est mens. Ergo videtur, quod Filius Dei assumpserit animam mediante spiritu sive mente.

Sed contra est, quod Augustin. dicit in libro de Agone Chri-



*Christiano\*. Invisibilis & incommunicabilis veritas, per spiritum animam, & per animam corpus accepit.*  
 Ex cap. 18  
 19. 20. &  
 21. colligitur to. 3  
 art. prae.

b Respondeo dicendum, quod sicut dictum est\*, Filius Dei dicitur assumpsisse carnem animam mediante, tum propter ordinem dignitatis; tum etiam propter congruitatem assumptionis. Utrumque autem horum invenitur, si comparemus intellectum, qui spiritus dicitur, ad ceteras anime partes: non enim anima est assumptibilis secundum congruitatem, nisi per hoc, quod est capax Dei ad imaginem ejus existens: quod est secundum mentem, quae spiritus dicitur: secundum illud Ephes. 4. Renovamini spiritu mentis vestrae. Similiter etiam intellectus inter ceteras partes animae est superior, & dignior, & Deo similior. Et ideo Damasceus dicit in 3. libro\* unitum est carni per medium intellectus Verbum Dei: intellectus enim est quid anima purissimum, sed & Deus est intellectus.

c Ad primum ergo dicendum, quod etsi intellectus non sit aliud ab anima secundum essentiam, distinguitur tamen ab aliis partibus animae secundum rationem potentiae. Et secundum hoc competit sibi ratio medii.

Ad secundum dicendum, quod spiritui Angelico non deest congruitas ad assumptionem propter defectum dignitatis: sed propter irreparabilitatem casus, quod non potest dici de spiritu humano: ut patet ex his, quae in prima parte\* dicta sunt.

Ad tertium dicendum, quod anima (inter quam, & Dei Verbum, ponitur medium intellectus) non accipitur pro essentia animae, quae est omnibus potentiis communis: sed pro potentiis inferioribus, quae sunt omni animae communes.

#### COMMENTARIUS.

IN hoc articulo est eadem ambiguitas, quae in praecedenti quaestione art. 4. notata est, an scilicet per mentem intelligatur potentia intellectiva, vel ipsa substantia animae rationalis: nam D. Thom. in corpore articuli videtur de potentia intellectiva loqui; in solutione vero ad primum, & secundum potius de substantia; in solutione autem ad tertium significat, per animam intelligi potentias sensitivas, & per mentem potentias intellectivas, & hunc sensum amplectitur Cajetanus. Et potest quidem quaestio omnibus his modis tractari, & definiri, & in re sunt ita connexi, ut unus fere sequatur ex alio: si tamen sanctorum Patrum sensum attendamus, qui hanc locutionem contra Apollinarem introduxerunt, existimo proprie moveri quaestionem de ipsa substantia animae rationalis, quae, ut confert gradum sentiendi, vocatur anima, ut autem confert gradum rationalem, vocatur mens, seu spiritus. Et ita explicat Alenf. 3. p. q. 4. memb. 5. Durand. in 3. d. 2. q. 2. nu. 13. & patet, nam ut superius dixi, hoc sensu negavit Apollinaris, Christum assumpsisse mentem. Quamquam enim haec vox interdum potentiam, vel etiam actionem ipsam intelligentis significat, ut Epiphanius. haer. 77. docet, & significat Cyril. lib. 10. in Joan. cap. 1. tamen etiam sumi solet pro ipsa anima: quo modo August. seu author libri de Spiritu, & anima cap. 9. & 10. dicit, eandem rem esse in homine animam, seu spiritum, seu mentem; vocari vero animam, prout vivificat corpus, spiritum autem, aut mentem, quatenus est intelligentiae capax; & 9. de Trinit. cap. 4. & lib. 10. cap. 11. aperte dicit August. mentem substantiam esse.

Item nomine spiritus humani non solet significari sola potentia, sed substantia, ut etiam Epiphanius supra fateatur. At Patres dicunt, assumpsisse Verbum animam mediante spiritu, ut patet ex VI. Synod. act. 18. & August. lib. de agon. Christian. cap. 18. quod autem hi Patres afferunt, mediante spiritu, alii dicunt, mediante mente, ut patet ex Damasc. lib. 3. cap. 6. est ergo mens idem quod spiritus, ut hic etiam D. Thom. ait ex illo ad Ephes. 4. Renovamini spiritu mentis vestrae. Id est, in eo spiritu, qui est mens vestra, ut exposuit August. 14. de Trinit. cap. 16. & lib. de spirit. & anima cap. 10. Anselm. Beda & alii expostores ibi: sicut ergo nomine spiritus substantia animae nuncupatur, & non tantum potentia, ita etiam mentis nomine. Imo videtur haec locutio Sanctorum fundata in illa partitione, qua usus est Paul. 1. ad Thessalon. 5. Ipse autem Deus pacis sanctificet vos, ut integer spiritus vester, & anima, & corpus sine querela in adventum Domini nostri Jesu Christi servetur: ubi certum est nomine spiritus non potentiam significari, sed substantiam. Unde Concilium Francoford. in lib. Sacrosyllab. hunc locum tractans, ait: Nunquid aliud est spiritus, & aliud

Suarez Tom. XVI.

anima? Non divisit substantias, sed dignitatem distinguit: nam est & homo animalis, & est spiritualis, non per substantiam, sed per meriti qualitatem: animalis quippe ab anima, spiritualis vero ab spiritu nuncupatur. Sic igitur sensus quaestiones erit, an Verbum assumpsit animam sensitivam, seu gradum sensibilem, medio rationali: quamquam vero sensus quaestiones hic sit, interdum tamen explicatur a posteriori per potentias, quia cum haec duae animae in homine re non distinguantur, horum graduum distinctio, per ordinem ad diversas actiones, vel potentias explicatur. Et ad hunc sensum facile possunt accommodari omnia, quae dicit D. Thom.

b Respondet igitur, Verbum assumpsisse animam mediante spiritu. Quae assertio facile juxta dicta declaratur hoc modo: quia licet eadem res sit in homine anima, & spiritus, seu anima sensitiva, & rationalis, tamen per se primo assumpta fuit illa anima, quia rationalis est; ut sensitiva vero, solum quia hic gradus necessario erat cum alio conjunctus. Ac si diceremus, Verbum factum esse animal mediante homine, quia per se primo factus est homo, animal vero solum prout continetur in homine. Et ex definitione quaestiones in hoc sensu facile definitur in aliis: si enim potentias inter se comparemus, etiam potest dici sensus assumptus medio intellectu, quia propter illum assumptus est, & ex conjunctione ad intellectum habet, quod sit aliquo modo assumptibilis. Comparando vero totam substantiam animae ad potentiam intellectivam, non adeo proprie dicitur anima assumi medio intellectu, nisi fortasse praetelligatur intellectus in anima, tanquam congrua dispositio ad unionem: quod tamen ego verum non existimo, ut infra dicam. Solum ergo posset hoc dici aliquo modo in ratione finis, quatenus anima assumpta est propter propriam operationem intellectivam, atque adeo quatenus capax est facultatis ad intelligendum, qui sensus fere cum primo coincidit.

c In solutione ad primum dicit D. Thomas intellectum non esse aliud ab anima, & videtur loqui de potentia, nam subdit, distingui ab aliis partibus animae secundum rationem potentiae: hoc autem videtur esse contrarium ipsi D. Thomae, qui ubique distinguit intellectum ab anima. Sed sensus D. Thomae sumendus est vel ex eadem 1. part. quaest. 77. art. 1. ad 1. vel ex quaest. 79. artic. 1. ad 1. in priori enim loco ait, animam respectu suarum potentialium esse totum potestativum, quod secundum totam suam essentiam adest cuilibet parti, seu potentiae: & hoc sensu interdum dici, intellectum non esse aliud essentialiter ab anima, quia tota anima secundum totam essentiam adest intellectui. Quomodo loquitur interdum August. ut lib. 10. de Trinit. cap. 11. & alibi saepe. In posteriori autem dicit, intellectus nomine interdum significari ipsam substantiam animae, & hoc modo dicere aliquando August. mentem esse spiritum, vel essentiam: & hoc modo verissimum est, intellectum non esse aliud ab anima secundum essentiam. Dicitur autem distingui ab aliis partibus, seu gradibus animae, secundum rationem potentiae, id est, secundum gradum seu differentiam, quae per ordinem ad potentias explicatur.

#### ARTICULUS III.

*Utrum anima a Dei Filio prius fuerit assumpta quam caro.*

AD tertium sic proceditur. Videtur, quod anima Christi fuerit prius assumpta a Verbo, quam caro. Filius enim Dei assumpsit carnem mediante anima: ut dictum est\*: Sed prius pervenitur ad medium, quam ad extremum. Ergo Filius Dei assumpsit prius animam, quam corpus.

2 Præterea. Anima Christi est dignior Angelis, secundum illud Psalm. 69. Adorate eum omnes Angeli ejus. Sed Angeli creati sunt a principio, ut in primo habitum est. Ergo & anima Christi, quae non fuit antecreata, quam assumpta: dicit enim Damasceus in tertio libro\*, quod nunquam neque anima, neque corpus Christi propriam habuerunt hypostasim, præter Verbi hypostasim. Ergo videtur quod anima fuerit ante assumpta, quam caro, quae est concepta in utero Virginis.

39.  
 Inf. art. 4.  
 & q. 33. ar.  
 1. ad 2. & 3  
 & q. 35. ar.  
 4. Et 3. ad  
 2. q. 3. & 3.  
 & d. 3. q. 5.  
 art. 2. & 4.  
 cont. c. 33.  
 44. & 45.  
 1. ar. 1. hu-  
 jus quaest.  
 1. p. q. 46.  
 agtic. 3.  
 Lib. 3. c. 2.



3 Præterea, Joan. 1. dicitur, *Vidimus eum plenum gratia & veritatis: & postea subditur, quod de plenitudine ejus nos omnes accepimus, id est, omnes fideles quocumque tempore: ut Chrysostomus exponit.* \* Hoc autem non esset nisi anima Christi habuisset plenitudinem gratia & veritatis ante omnes Sanctos, qui fuerunt ab origine mundi, quia causa non est posterior causato. Cum igitur plenitudo gratia & veritatis fuerit in anima Christi ex unione ad Verbum, secundum illud quod ibidem dicitur, *Vidimus gloriam ejus quasi unigeniti a Patre, plenum gratia & veritatis: consequens videtur, quod a principio mundi anima Christi fuerit a Verbo Dei assumpta.*

Sed contra est, quod Damascenus dicit in quarto libro \* *Non, ut quidam mentiuntur, ante eam, quæ est ex virgine incarnationem, intellectus est unitus Deo Verbo, & ex tunc vocatus est Christus.*

Respondeo dicendum, quod Origenes posuit in suo *Perrarchon* \*: omnes animas a principio fuisse creatas, inter quas etiam posuit animam Christi creatam. Sed hoc quidem est conveniens, si ponatur, quod fuerit tunc creata, sed non statim Verbo unita: quia sequeretur, quod anima illa aliquando habuisset propriam subsistentiam sine Verbo: & sic cum fuisset a Verbo assumpta, vel non esset facta unio secundum subsistentiam, vel corrupta fuisset subsistentia anime præexistens. Similiter etiam est inconueniens, si ponatur, quod anima illa fuerit a principio Verbo unita, & postmodum in utero Virginis incarnata: quia sic ejus anima videtur esse non ejusdem nature cum nostris, quæ simul creantur, dum corporibus infunduntur. Unde Leo Papa dicit in Epistola ad \* Julianum, quod non alterius nature erat caro Christi, quam nostra: nec alia illi quam ceteris hominibus anima est a principio inspirata.

Ad primum ergo dicendum, quod sicut supra dictum est, anima Christi dicitur esse medium in unione carnis ad Verbum secundum ordinem nature: non autem oportet ex hoc, quod fuerit medium ex ordine temporis.

Ad secundum dicendum, quod sicut Leo Papa in eadem Epistola dicit \*, anima Christi excellit nostras animas non diversitate generis, sed sublimitate virtutis: est enim ejusdem generis cum nostris animabus, sed excellit etiam Angelos secundum plenitudinem gratia & veritatis. Modus autem creationis respondet anime secundum proprietatem sui generis, ex quo habet, cum sit corporis forma, ut creetur simul, dum corpori infunditur & unitur. Quod non competit Angelis, qui sunt substantia omnino a corporibus absolute.

Ad tertium dicendum, quod de plenitudine Christi omnes homines accipiunt secundum fidem, quam habent in ipsum: dicitur enim Rom. 3. quod iustitia Dei est per fidem Jesu Christi in omnes, & super omnes, qui credunt in ipsum. Sicut autem nos in ipsum credimus, ut in jam natum: ita antiqui crediderunt in ipsum ut in nasciturum: habentes enim eundem spiritum fidei credimus: ut dicitur 2. ad Corinth. 4. Habet autem fides, quæ est in Christum, virtutem justificandi ex proposito gratia Dei secundum illud Rom. 4. Ei, qui non operatur, credenti autem in eum, qui justificat impium, fides reputatur ad iustitiam secundum propositum gratia Dei. Unde quia hoc propositum est æternum, nihil prohibet per fidem Jesu Christi aliquos justificari, etiã antequam ejus anima esset plenagratia & veritate.

#### COMMENTARIUS.

**T**itulus hujus articuli de ordine temporis, seu durationis intelligendus est, ut ex corpore, & ex supra dictis artic. 1. constat. Et sic intellectus non indiget expositione, nam quæ Cajetanus in fine tractat circa efficaciam rationis D. Thomæ, & per se clara sunt, & sufficienter ab eo dicuntur. Thomæ vero notate de subsistentia anime rationalis inferius disputabuntur.

#### ARTICULUS IV.

*Utrum caro Christi fuerit prius a Verbo assumpta, quam anime unita.*

**A**d quartum sic proceditur. Videtur quod caro Christi fuerit prius a Verbo assumpta, quam anime unita. Dicit enim Augustinus in lib. de Fide \* ad Petr. Firmissime tene, & nullatenus dubites, non carnem Christi sine divinitate conceptam in utero Virginis, priusquam susciperetur a Verbo. Sed caro Christi videtur prius fuisse concepta, quam anime rationali unita: quia materia vel dispositio

prior est in vi generationis, quam forma completiva. Ergo prius fuit caro Christi assumpta, quam anime unita.

2 Præterea. Sicut anima est pars nature humanæ, ita & corpus: sed anima humana non habuit aliud principium sui esse in Christo, quam in aliis hominibus, ut patet ex auctoritate Leonis Pape supra inducæ \*. Ergo videtur, quod nec corpus Christi aliter habuerit principium essendi, quam in nobis. Sed in nobis ante concipitur caro, quam adveniat anima rationalis: ergo etiam fuit in Christo. Et sic caro prius fuit a Verbo assumpta, quam anime unita.

3 Præterea, sicut dicitur in libro de Causis \*, causa primæ plus insit in causatum, & prius unitur ei, quam causa secunda: sed anima Christi comparatur ad Verbum, sicut causa secunda ad primam. Prius ergo Verbum est unitum carni, quam anime.

Sed contra est, quod Damascenus dicit in tertio libro \*. Simul Dei Verbi caro, simul animata a caro rationalis & intellectiva. Non ergo unio Verbi ad carnem præcessit unionem ad animam.

b Respondeo dicendum, quod caro humana est assumptibilis a Verbo, secundum ordinem, quem habet ad animam rationalem, sicut ad propriam formam. Hunc autem ordinem non habet antequam anima rationalis ei adveniat: quia simul dum aliqua materia sit propria alicujus forme, recipit illam formam: unde in eodem instanti terminatur alteratio, in quo introducitur forma substantialis. Et inde est, quod caro non debuit ante assumi, quam esset caro humana, quod factum est anima rationali adveniente. Sicut igitur anima non est prius assumpta, quam caro, quia contra naturam anime est, ut prius sit, quã corpori uniatur: ita caro non debuit prius assumi, quam anima: quia non prius est caro humana, quã habeat animam rationalem.

Ad primum ergo dicendum, quod caro humana sortitur esse per animam. Et ideo ante adventum anime non est caro humana, sed potest esse dispositio ad carnem humanam. In conceptione tamen Christi, Spiritus sanctus, qui est agens infinite virtutis, simul & materiam disposuit, & ad perfectum perduxit.

c Ad secundum dicendum, quod forma actu dat speciem: materia autem quantum est de se, est in potentia ad speciem. Et ideo contra rationem forme esset, quod præexisteret natura speciei, quæ perficitur per unionem ejus ad materiam: non autem est contra naturam materie, quod præexistat natura speciei. Et ideo dissimilitudo, quæ est inter originem nostram, & originem Christi secundum hoc, quod caro nostra prius concipitur, quam animatur, non autem caro Christi, est secundum illud, quod præcedit natura complementum, sicut & quod nos concipimur ex semine viri, non autem Christus. Sed differentia, quæ esset, quantum ad originem anime, redundaret in diversitatem nature.

d Ad tertium dicendum, quod Verbum Dei per prius intelligitur unitum carni, quam anima per modum communem, quo est in ceteris creaturis per essentiam, potentiam, & presentiam. Prius tamen dico, non tempore, sed natura: prius enim intelligitur caro, ut quoddam ens, quod a Verbo habet, quam ut animata, quod habet ab anima. Sed unione personali prius secundum intellectum oportet, quod caro uniatur anime, quam Verbo: quia ex unione ad animam habet, quod sit unibilis Verbo in persona: præsertim quia persona non invenitur, nisi in rationali natura.

#### COMMENTARIUS.

**H**ic articulus etiam de ordine temporis est exponendus, ut Cajetanus notat, & ex toto progressu S. Thomæ satis colligi potest. Quæstio vero hic proposita, videtur aliam supponere, scilicet, an caro Christi fuerit prius tempore concepta, seu formata saltem secundum remotas dispositiones, quam fuerit anime unita, hinc enim pendet alia quæstio proposita. Nam si aliquo tempore caro Christi fuit prius concepta, quam animata, consequens videtur esse, ut fuerit etiam prius Verbo unita. Hanc vero posteriorem quæstionem D. Thom. non tractat, pertinet enim ad materiam de conceptione Christi ex Virgine, infra quæst. 33. disputandam. Supponit tamen in solutione ad primum, Carnem Christi eodem momento fuisse conceptam, & perfecte formatam ac dispositam, & animatam: quia non successu temporis, sed subito, infinita Spiritus sancti virtute fabricata, & consummata est.

b Respon-

Hom. 13.  
in Joan.  
aliquan-  
tulum a  
prin. 10.8.

Lib. 4. c. 6.  
in princ.

Lib. 7. c. 1.  
& 8. 10.4.

Est Ep. 11  
ad Jul. E-  
pisc. Coen-  
sem non  
multum  
ante hinc.  
Art. 1. hu-  
jus quæst.

Ad Julian.  
Episc. non  
multum  
ante hinc.  
illius &  
est ep. 11.

Iosfr. q. 68.  
art. 1. ad 1  
Et 3. d. 14.  
art. 1. q. 2.  
1. & 2. &  
veri q. 29.  
art. 4. 9.

40.  
Locus sup.  
art. 3. cit.

Cap. 18.  
prin. 10.3.

In artic.  
preced. 10  
fin. corp.

In prop.  
habetur  
hic liber  
inter op.  
Arist. 10.3

L. 3. orth.  
fid. cap. 2.



**b** Responsio est, non prius tempore carnem Christi fuisse unitam Verbo, quam animæ rationali, quia non prius fuit assumpta, quam fuerit humana caro, non est autem prius caro humana, quam uniatur animæ rationali. Sed objicit primo Cajetanus, quia materia prius efficitur propria alicujus formæ, quam informetur illa: quia non informatur usque ad instans intrinsecum generationis, & tamē in tempore immediato ante illud instans, est propria effecta. Respondetur primum, hoc non habere locū in carne Christi, quia ut suppositum est, corpus ejus non fuit successive dispositum, sed in instanti, unde in tempore immediato ante illud instans, non poterat materia esse propria animæ, cum nullo modo esset disposita. Secundo dicitur, in tempore immediato ante instans generationis, materiam vere nondum est propriam effectam formæ introducendæ: cum nondum abjecerit aliam repugnantem, nec sit consummate disposita ad subsequentem formam: & hoc sensu dixit Cajetan. esse propriam in fieri, non in facto esse. Secundo dubitat Cajetan. nam caro illa post mortem Christi, jam non erat caro humana, nec propria animæ rationalis, cum non esset proxime ad illam disposita, & nihilominus fuit unita Verbo, cur ergo non potuit idem fieri, antequam anima informaretur? Respondetur, caro illa semel facta propria per conceptionem & generationem, semper, etiam post mortem, mansit propria in ordine ad resurrectionem, & ideo debuit manere unita: at vero ante ipsam conceptionem nullo modo erat propria; & ideo non est eadem ratio.

**c** Secundum argumentum est hujusmodi. Anima non fuit prius tempore assumpta, quam unita carni, quia naturale est illi non prius esse, quam uniri corpori, & ita fit in aliis hominibus: ergo e contrario caro prius debuit concipi, quam informari anima, quia hoc naturale est carni humanæ, ita enim fit in omnibus aliis hominibus: ergo prius etiam debuit uniri Verbo, quam animæ, quia simul ac fuit concepta, fuit unita.

Respondet D. Thom. negando primam consequentiā, est enim alia ratio animæ, & alia carnis: anima enim est actus constituens speciem; & ideo contra rationem ejus est, ut existat ante speciem; at vero caro habet rationem materiæ, cui naturale est præexistere ante formam. Ex quo infert D. Thom. differentiam inter modum conceptionis carnis Christi, & aliorum hominum, non arguere naturæ diversitatem, quia tantum est in aliquo, quod præcedit constitutionem naturæ: differentiam autem in origine animæ, redundaturam in naturæ diversitatem. Sed non caret hoc difficultate, quia vel est sermo de origine connaturali, vel de miraculosa, & præternaturali. Si primum, sicut argueret diversitatem naturæ, si animæ Christi naturale esset habere esse ante corpus, & non animabus aliorum hominum: ita sine dubio argueret naturæ diversitatem, si carni Christi naturale esset, subito concipi sine semine viri sola Spiritus sancti virtute, corporibus vero aliorum hominum esset naturale concipi in tempore, ex semine viri, &c. Si autem sit sermo de origine miraculosa, & præternaturali, sicut non arguit diversitatem naturæ, quod caro Christi fuerit illo modo concepta, ita non redundaret in naturæ differentiam, si Deus vellet ex speciali privilegio animam Christi ante corpus condere; nulla ergo est differentia a D. Thom. assignata.

Hanc objectionem videtur vidisse Cajetan. cum dixit, differentiam D. Thom. solum adduci ad ostendendum, quid fuerit conveniens, non vero quid fuerit possibile: concludit enim obiectio facta utrumque fieri potuisse miraculose absque naturæ diversitate, neutrum vero animæ, aut carni humanæ connaturale esse potuisse: at vero quia anima intrinsece pertinet ad constitutionem naturæ, non fuit conveniens ante ipsam naturam fieri, sicut nec fuit conveniens carnem Christi humanam perfecte dispositam prius fieri, quam animari, quia ut sic pertinet intrinsece ad naturæ constitutionem: & propterea si ita factum esset, ut anima prius crearetur, id solum fuisset, quia hoc esset illi connaturale, & hoc modo talis productio argueret naturæ diversitatem. At vero illa dispositio remota, quæ solet præcedere in corpore humano naturali modo concepto, non pertinet ad intrinsecam constitutionem naturæ, sed ad imperfectum modum productionis ejus, & ideo fuit expediens, illum modum conceptionis mutari in carnis Christi formatione.

**d** In solutione ad tertium duo a D. Thom. dicta non  
Suarez, Tom. XVI.

tanda sunt. Primum est, carnem prius natura uniri Verbo, ut effectus suæ primæ causæ, quam animæ: quia prius intelligitur esse quoddam ens, quam animari. Ex quo obiter sumi potest, prius natura habere materiam esse a causa prima, quam informetur forma: illud autem esse non potest esse nisi existentia, quia hoc esse est, quod per efficientiam communicat causa prima suæ creaturæ; est enim eadem ratio, & proportio, prius est enim esse, quam informari. Unde materia supponitur formæ, & ut supponitur, est effectus Dei. Sed de hoc latius alibi. Secundo dicit D. Thom. carnem Christi prius secundum intellectū fuisse unitam animæ, quam Verbo: quæ assertio est intelligenda de prioritate in genere causæ formalis, si velimus eam de prioritate naturæ intelligere: nam auctor expresse solum de prioritate secundum intellectum loquitur, & posset satis exponi de prioritate secundum abstractionem & præcisionem mentis; sed tamen etiam de prioritate in genere causæ formalis, vel quasi dispositivæ verificari potest, quia caro per animam convenienter disposita est, ut assumeretur a Verbo. An vero sub alia ratione unio materiæ ad Verbum sit prior natura ordine executionis, quam ad animam disput. 17. tractabitur.

## DISPUTATIO XVI.

In tres sectiones distributa.

*De ordine assumptionis secundum realem durationem, seu temporis successionem.*

**C**omparatio hæc fieri potest, vel inter existentiam humanitatis, & animæ, & carnis, & unionem eorum ad Verbum: vel inter unionem eorundem ad Verbum: an scilicet hæc omnia simul tempore facta fuerint, vel aliquid eorum duratione præcesserit.

## SECTIO I.

*Utrum humanitas Christi simul ac capite existere in rerum natura, fuerit Verbo unita absque ulla successione durationis.*

**A**ntiqui heretici, qui posuerunt unionem Incarnationis accidentalem, & non veram, & hypostaticam, consequenter dixerunt illam unionem non fuisse factam a principio, sed Christum prius extitisse purum hominē, & postea suis meritis illam unionem fuisse assecutum. Ita sensit Cherint. ut refert Iren. lib. 1. c. 25. & Nestoriani, ut referunt Vincent. Lirinens. & Cassia. lib. 1. & 2. de Incar. quorum errorem infra agentes de Christi conceptione fusius tractabimus. Nunc breviter hoc loco dicendum est, humanitatem Christi non prius tempore extitisse in rerum natura, quam fuerit unita Verbo, atque adeo hunc hominem Christum nunquam fuisse purum hominem, sed a principio suæ conceptionis fuisse hominem Deum. Est res certa de fide, & probatur primo ex illis verbis ad Hebr. 1. *Et cum iterum introducit Primogenitum in orbem terræ, dicit: & adorent eum omnes Angeli ejus.* Ubi Paulus de Christo loquitur; dicit autem, Patrem iterum introduxisse Primogenitum in orbem terrarum, cum Christum factum hominem ad nos misit in utero Virginis: ex tunc ergo fuit adoratus ab Angelis, ut verus Deus, quem admodum exponunt hunc locum Patres, præsertim Cyrillus. lib. de fide ad Theod. circa finem, & lib. de fide ad Reg. in probationibus, quod Christus sit Deus, ex epist. ad Hebræos, qui etiam inferius probando Christi mortem mundo salutarem ex eadem epist. ponderat verba illa cap. 10. *Ideo ingrediens mundum dicit, hostiam, & oblationem novisti, corpus autem adaptasti mihi.* Ingressus enim dicitur Christus in mundum, quando homo factus est; ex tunc ergo fuit etiam Deus, potens ad redimendum homines, & placandum Deum. Hoc etiam convinci potest ex illis verbis Angeli Luc. 1. *Quod ex te nascetur sanctum, vocabitur Filius Dei.* Et ex aliis, quibus infra probandum est, ipsum Filium Dei conceptum esse ex Virgine: quæ omittit, ne sæpius eadem repetere necesse sit.

Secundo definiunt hoc Concil. Ephes. 1. can. 13. qui sumptus est ex Epistol. Cyrilli ad Nestorium, ubi dicitur, *Ideo Deum natum esse ex Virgine, & conceptum, quia in utero Virginis, & in ipsa conceptione hominis Deus carni unitus est.* Quæ Epistola legitur etiam, & probatur in Concil. Chalcedon. Act. 1. pag. 31. & infra pag. 80. multa ex Patribus referuntur, ex quibus evidenter hæc veritas elici-



elicitur: hoc enim sensu sæpe dicunt, Verbum in vulva Virginis conjunctum esse carni. Idem sumitur V. Synod. collat. 8. can. 6. clarius vero VI. Synod. Aët. 11. Ubi Sophronius in sua Epistola sic ait: *Incarnatur Verbum Deus, non præfacta carni copulatus, vel animæ præexistenti conjunctus, sed tunc his ad subsistendum venientibus, quando eis ipsum Verbum, & Deus naturaliter copulatus est: & infra: Et non ante verissimum ipsius Verbi conventum, in seipsis extiterunt: & infra: Nec quantum in istu oculi, hanc quam illam priorem habentia: simul quippe caro, simul Dei Verbi caro, simul caro animata rationalis, simul Dei caro animata rationalis.* Idem in VII. Synod. Aët. 3. in Epistola Synodica Theodori Jerosolymitani, quam omnes Patres recipiunt, & in Concil. Francoford. in Epistola ad Episcopos Hispaniæ, circa finem referuntur hæc verba ex Gregor. Nazianz. in Epist. ad Quirin. *Non prius in utero Virginis caro concepta est, & postmodum divinitas venit in carnem, &c.* Ac denique Concil. Toletan. XI. in profec. fidei inter alia inquit: *In quo mirabili conceptu, edificante sibi sapientiæ domum, Verbum caro factum est.*

Tertio ex patribus Ignatius in Epistol. ad Trallianos inter alia inquit: *Vere genuit Mariæ corpus habens in se Deum habitantem, vere natus est Deus Verbum ex Virgine, vestitus corpore, vere natus ex vulva, qui corpus fabricavit ex sanguinibus Virginis.* Idem sæpe docet Leo Papa in Epistolis, præsertim in 10. 11. & 97. ubi hoc argumento confutat Eutychem dicentem, Christum subsistere ex duabus naturis, non vero in duabus, quia inde fieret, illas duas naturas prius extitisse, quam facta esset earum unio. Idem late persequitur Virgil. lib. 3. contra Eutych. in principio, ubi utitur illo testimonio Angeli, *Quod ex te nascetur sanctum.* Et Augustin. lib. contra sermonem Arianorum, cap. 8. *Unus, inquit, Christus est, & Dei Filius semper natura, & hominis filius, qui ex tempore assumptus est, non ut prius creatus, post assumeretur, sed ut ipsa assumptione crearetur.* Et cap. 28. ad hoc propositum accommodat illud Psal. 21. *De ventre matris meæ Deus meus es tu,* dicens: *De ventre quippe matris ejus, in quo hominem sumpsit, Deus ejus est.* Idem August. serm. 58. de verbis Domini: *Adveniens, inquit, divinitas in utero Virginis Mariæ auctoritate illa, qua in paradiso Adam de limo formavit, carnem sibi ex substantia ipsius Mariæ fabricavit: quam pro salute nostra suscipiens, & sibi coadjuvans, natus est Deus, & homo.* Idem Fulgentius de fide ad Petrum cap. 13. & seqq. Damasc. lib. 3. de fide cap. 12. & Bernardus hom. 4. in Missus est. Rupert. lib. 1. de operib. Spiritus sancti cap. 9. Theoph. super cap. 9. Joan. in fine.

Quarto arguitur ratione, primo a posteriori, seu ab inconvenienti: quia nisi hæc unio facta esset in eodem momento, in quo humanitas facta est in utero Virginis, non concepisset B. Virgo Deum, sed purum hominem, contra illud ad Galat. 4. *Misit Deus filium suum factum ex muliere.* Sequela manifesta est, quia si in eo momento non fuit humanitas in persona Verbi, necesse est, ut fuerit subsistens in propria creata persona; ergo conceptio terminata esset ad personam creatam, & nullo modo ad Deum: ergo non posset vere dici Deus conceptus ex Virgine, etiam si postea humanitatem illius personæ assumpsisset. Sicut si tempore, quo Christus fuit mortuus, non fuisset humanitas unita Verbo, non potuisset Deus dici mortuus, etiam si post resurrectionem illam humanitatem assumpsisset. Et hac ratione utuntur fere omnes Patres citati, & præsertim Cyrillus sæpe illam inculcat in variis operibus, quæ habentur in 1. tom. Concil. Ephes. & eam etiam tetigit Athanas. in serm. de sanctissima Deipara. Secunda ratio a priori est, quoniam ita voluit Deus fieri, quia ita expediebat: cum enim assumpturus esset illam humanitatem, & nullum esset impedimentum, nec deesset illi virtus ad perficiendum statim hoc mysterium, decuit, ut statim sine ulla dilatione fieret. Hoc enim, & ad dignitatem, & perfectionem illius humanitatis pertinebat, & ad perfectionem divini operis: supervacaneum enim fuisset, ut prius illa humanitas existeret in proprio supposito, quod statim per unionem fuisset destruendum. Neque contra veritatem hanc aliquid, vel ex auctoritate, vel ex ratione probabili objici potest.

Dico secundo: unio animæ & corporis in Christo non fuit prius tempore facta, quam unio totius humanitatis ad Verbum. Est æque certa ac præcedens, sequitur enim evidenter ex illa: quia humanitas nihil aliud est, quam

totum quoddam ex unione corporis & animæ resultans. Unde in eodem momento incipit existere humanitas, quo fit unio animæ & corporis: si ergo humanitas non prius extitit, quam fuerit unita Verbo, neque etiam unio illarum partium.

## SECTIO II.

*Utrum anima Christi prius extiterit, quam fuerit unita Verbo: vel an prius fuerit unita Verbo, quam corpori.*

Origenes 2. Periarch. cap. 6. docet animam Christi a principio mundi fuisse creatam, sicut de omnibus animabus dixerat lib. 1. cap. 7. an vero dixerit in illo principio fuisse unitam Verbo prius quam corpori, D. Thom. hic art. 3. nihil dicit, Quidam vero putant, idem sensisse Origenem de unione illius animæ, quod de creatione, hoc est, a principio simul fuisse creatam & unitam. Quod de Origene sentit Prateolus verb. Origenistæ. Alii existimant asseruisse Origenem creationem illius animæ, non vero unionem ad Verbum antecessisse conceptionem ex Virgine, & cum carne conjunctionem, quia nec Hieron. Epist. 61. ad Pamaçh. de erroribus Origenis hunc errorem illi attribuit, neque Epiph. in Epist. ad Joan. Hierosol. quæ est 60. Hieron. neque in hæref. 64. Mihi duo vera esse videntur. Unum est, Origenem asseruisse, animam Christi, ob meritum, quod ante corpus habuerit, recepisse unionem ad Verbum, quod notavit D. Thom. lect. 4. super ad Hebr. & aperte legitur in Origene d. cap. 6. ubi sic ait: *Sed & unum spiritum esse cum Deo, cui magis convenit, quam huic animæ (scilicet Christi), quæ ita se Deo per dilectionem junxit, ut cum eo unus spiritus merito dicatur? Quod autem dilectionis perfectio, & meriti affectus sinceritas, hanc inseparabilem cum Deo fecerit unitatem, ita ut non fortuita fuerit, nec cum persona acceptione animæ assumptio, sed virtutum suarum ei merito delata, audi Propheciam ad eam dicentem, Dilexisti iustitiam, & odisti iniquitatem, propterea unxit te Deus, Deus tuus oleo latitæ, &c.* Dilectionis ergo merito ungitur anima Christi, id est, cum Verbo Dei unum efficitur; ut autem declararet, se loqui de hypostatica unione, subdit. *Quod autem præ participiis, dixit, indicat, quia non gratia spiritus ei, sicut Prophetis data est, sed ipsius Verbi Dei in ea substantialis inerat plenitudo.* Deinde vero certum etiam videtur, Origenem censuisse, Christi animam fuisse Verbo unitam, priusquam corpori infunderetur. Ita enim illi attribuit Hieron. Apol. cont. Ruffin. lib. 2. Damasc. lib. 4. cap. 26. Niceph. lib. 17. hist. cap. 18. Et ex citato capite id plane colligitur, ut jam dicam. An vero censuerit, prius tempore esse creatam, quam unitam Verbo, ut ad meritum unionis videtur esse necessarium, juxta supra dicta q. 2. art. 11. vel, non obitante merito, putaverit, a principio suæ creationis fuisse unitam Verbo, mihi incertum est. Si tamen attente legatur, videtur hanc posteriorem partem indicare: nam in principio ait, *animam illam ab initio creaturæ, & deinceps inseparabiliter atque inassociabiliter Verbo inhaesisse.* Tota (inquit) totum recipiens, atque in ejus lucem, splendoremque ipsa cedens. Quibus verbis unionem sine dubio hypostaticam describit, ut ex toto contextu facile constat. Et quia inferius dicit, ratione illius unionis animæ ad Verbum, potuisse etiam carnem, media tali anima, Verbo uniri, ita ut ratione illius, Jesus Christus Dei Filius, sapientia, & virtus appelletur, & tamen illam animæ unionem dicit factam esse a principio creaturæ. Et infra ait per ejusmodi unionem, factam esse illam animam impeccabilem, semperque talem fuisse, quia semper ita unita fuit Verbo.

Dico tamen primo, animam Christi Domini non prius tempore fuisse creatam, seu existentem, quam corpori unitam. Hæc conclusio est de fide, primum quia in genere, de anima humana id de fide est, ut ex 1. part. suppono, & eleganter probat contra Orig. Cyril. lib. 1. in Joan. cap. 9. & Niceph. lib. 17. Hist. cap. 28. refert Canonem V. Synodi, ubi hoc expresse definitur, non tantum in genere, sed etiam specialiter de anima Christi. Et in VI. Synodo Aët. 11. id satis aperte docetur. Et a Leone Papa Epist. 11. ubi contra Eutychetem sic ait: *Arbitror enim, tali aproloquentem, hoc habere persuasum, quod anima, quam Salvator assumpsit, prius in cælis sit commemorata, quam de Maria Virgine nasceretur, eamque sibi Verbum in utero copulavit: sed hoc catholica mentes, auresque non tolerant.* Et infra subdit, hunc



hunc errorem damnatum esse in Origene; & infra loquens de Christo, ait: *Non alterius tamen natura erat ejus caro, quam nostra, nec alio illi, quam ceteris hominibus, anima est inspirata principio.* Idem bene confirmat Damasc. lib. 4. de fide cap. 6. Ratio vero est, quam supra in litera D. Thom. explicuimus, quia anima cum sit forma corporis, natura sua postulat, ut in ipso corpore, & informando illud incipiat: anima vero Christi fuit vera anima, & ejusdem rationis cum aliis animabus humanis; ergo natura sua postulabat hunc modum inceptionis. Afferere autem ex speciali privilegio, & præter naturam fuisse antea creatam, quam corpori unitam: & sine fundamento dicitur, quia nulla est auctoritas, aut probabilis ratio ad hoc asserendum; & hæreticum est, quia repugnat communi sensui, traditioni, & definitioni Ecclesiæ, & modo loquendi Scripturæ, quæ eodem modo dicit, incepisse Christum ut hominem in utero, & ex utero Virginis, sicut alios homines.

Dico secundo, animam non prius tempore fuisse unitam corpori, quam Verbo, neque e converso: atque adeo neque prius tempore extitisse, quam fuerit unita Verbo. Est hæc conclusio æque certa ac præcedens, eisdem enim testimoniis, & definitionibus probatur, & evidenter sequitur ex illa, suppositis quæ dicta sunt sectione præcedenti: quia ibi ostensum est, partes humanitatis non prius fuisse inter se unitas, quam tota humanitas fuerit unita Verbo. Unde fit, neque prius fuisse animam unitam corpori, quam Verbo, quia non potuit humanitas uniri Verbo, quin eidem uniretur anima. Rursus anima non prius tempore habuit existentiam, quam fuerit unita corpori, & composuerit humanitatem existentem; ergo nec prius habuit existentiam, quam unionem ad Verbum. Ac denique neque prius habere potuit unionem ad Verbum, quam ad corpus, cum sine existentia non potuerit habere unionem ad Verbum, & non habuerit existentiam ante unionem ad corpus. Hæc ergo tria simul tempore facta sunt, creatio seu existentia animæ, assumptio & conjunctio cum corpore.

## SECTIO III.

*Utrum caro Christi prius fuerit concepta, quam assumpta, vel an prius fuerit assumpta, quam anima unita.*

**P**RÆTER hæreticos, qui posuerunt, carnem Christi prius fuisse conceptam, quam assumptam, quos sect. 1. confutavimus: alii contraria via errarunt, asserentes illam carnem prius tempore fuisse assumptam, quam animæ unitam. Quem errorem in antiquis hæreticis non invenio, nisi fortasse illis tribuatur, qui animam rationalem Christo negarunt. Solum invenio referri Calvinum hunc errorem asseruisse, ex Canisio lib. 3. de B. Maria cap. 22. ubi in his, quæ ex Ambrosio contra Calvinum objicit, significat, eum ita sensisse: in verbis autem, quibus ejus refert errorem, potius significat, eum docuisse carnem Christi aliquando fuisse conceptam in utero Virginis sejunctam a Verbo. Unde & Prateol. & alii recentiores, qui Calvinii hæreses referunt, hanc præmittunt: cujus erroris nullum invenio fundamentum.

Dico autem primo. Caro Christi, seu corpus Christi humanum non prius fuit conceptum, quam assumptum, nec prius assumptum, quam animæ unitum. Loquor formaliter de carne, seu corpore humano, quia materia illa, ex qua fuit formatum Christi corpus, sine dubio prius extitit in rerum natura, quam fuerit unita Verbo, vel animæ Christi, ut per se constat: quia prius fuit unita hypostasi Virginis, sub forma sanguinis ejus. Conclusio ergo sic exposita est de fide definita in V. Synod. apud Niceph. supra, & expresse VI. Synod. Aët. 11. in epist. Sophronii, quæ in Aët. 13. approbatur, & in Concil. Ephes. can. 13. quibus locis dicitur, illam carnem simul fuisse carnem, & carnem Verbi, & Verbum non assumpsisse carnem, nisi animatam anima rationali. Et idem habetur in edicto fidei Justiniani Imperatoris, & in Leone Papa d. epist. 11. Optime Damasc. lib. 3. cap. 2. inquit: *Neque enim Deus Verbum præexistens seorsum carni unitus est: & infra. Carnem animæ rationali, atque intellectualem animatam condidit, & ejus hypostasis factum est: ac proinde simul ut caro extitit, simul quoque Dei Verbi caro extitit, simul caro animata rationis atque intelligentiæ particeps.* Itē

Suarez Tom. XVI.

August. epist. 3. Ambros. de Incarn. cap. 6. & 7. Theodor. Dialog. 2. Ac denique optime Fulgent. lib. de Incarn. cap. 3. circa finem: *Ipse, inquit, acceptio carnis fuit conceptio virginalis: & infra: Nec caro sine Verbi Dei unitione potuit aliquatenus, nullius viri coitu seminata, in intimo vulva virginalis innasce. Non est igitur aliquod intervallum temporis estimandum inter conceptum carnis initium, & concipiendæ majestatis adventum.* Et lib. de fide ad Petr. c. 18. *Firmissime tene, & nullatenus dubites, &c.*

Ratio vero est, quia carnis conceptio nihil aliud est, quam ejus formatio, per quam fuit suis organis, & membris conformata, & disposita, ut apta esset ad animam rationalem suscipiendam: hæc autem caro non prius tempore existit perfecte, & ultimo disposita, quam uniatur animæ rationali: hoc enim naturale est tali corpori, & ita fit in conceptione cujuscumque hominis, quod ultima dispositio non antecedit tempore introductionem formæ; ergo ita factum est in Christo. Nam sine causa fingeretur aliqua præternaturalis mora seu temporis distantia inter perfectam conceptionem carnis, & introductionem animæ. Rursus illa caro non fuit prius imperfecte, ut ita dicam concepta, quam fuerit perfecte formata, & disposita, ut nunc suppono ex dicendis infra q. 3. ergo simpliciter, & absolute, nullo modo nec perfecte, nec imperfecte fuit prius concepta, quam unita animæ; ergo nec potuit prius esse assumpta, quam animæ unita, cum non potuerit prius esse assumpta, quam concepta. Neque e converso potuit prius esse concepta, quam assumpta, cum non prius fuerit animata, quam assumpta, & simul fuerit concepta & animata. Quin potius etiam si quis fingeret, illam carnem prius fuisse imperfecte conceptam, seu dispositam, quam fuerit perfecte disposita & animata, nullo modo deberet asserere, fuisse unitā Verbo illo priori tempore, in quo imperfecte disponebatur, & nondum erat animata: quia nondum componebat humanitatem, neque erat corpus vere ac perfecte humanum; Verbum autem non prius tempore unitum est alicui naturæ, quam humanitati. Quamquam illud suppositum falsum sit, ut dixi.

Dico secundo: Verbum assumendo corpus, simul tempore assumpsit omnes partes integrales corporis humani formales, non materiales. Quam partium distinctionem suppono ex Arist. lib. 1. de gener. cap. 5. & ex illa facile declaratur tota conclusio: nam Verbum simul assumpsit totum corpus perfectum, & organicum, constans ex omnibus membris, seu partibus organicis; ergo has omnes partes simul assumpsit. Quod intelligendum est modo accommodato humanæ naturæ, id est, de partibus illis, quas homo requirit, prout est in statu suæ conceptionis perfectæ: sunt enim quædam partes, quæ postea acquiruntur, ut v.g. dentes, &c. quas habere in principio conceptionis esset monstruosum, & præternaturale, & has non assumpsit Verbum, sed postea tempore accommodato. Et similiter non assumpsit a principio partes organicas in perfecta quantitate, sed successu temporis acquisivit, & assumpsit partes materiæ, usque ad quantitatem perfectam: & hoc modo non assumpsit simul omnes materiales partes.

## ARTICULUS V.

*Utrum tota humana natura sit assumpta mediantibus partibus.*

**A**D quantum sic proceditur. Videtur, quod Filius Dei assumpsit totam naturam humanam mediantibus partibus ejus. Dicit enim Augustin. in lib. de Agone Christiano\*, quod invisibilis & incommutabilis veritas per spiritum animam, & per animam corpus, & sic totum hominem assumpsit. Sed spiritus, anima, & corpus sunt partes totius hominis. Ergo totum assumpsit mediantibus partibus.

2. Præterea, ideo Filius Dei carnem assumpsit mediante anima, quia anima est Deo similior, quam corpus: sed partes humana natura, cum sint simpliciores, quam corpus, videntur esse similiores Deo, quia est simplicissimus, quam totum. Ergo assumpsit totum mediantibus partibus.

3. Præterea. Totum resultat ex unionem partium. Sed unio intelligitur ut terminus assumptionis, partes autem præintelliguntur assumptioni. Ergo assumpsit totum per partes.

41.  
3. d. 2. q. 2.  
art. 1. q. 3.  
& art. 1. q. 3.  
2. c. & d. 3.  
q. 5. art. 2.  
c. & d. 5. q. 2.  
art. 3.  
Colligitur ex c. 18. 19. 20. 21. tom. 3.



Lib. 3. c.  
16. circa  
finem.

Sed contra est, quod Damasc. dicit in 3. lib. in Domini nostro Jesu Christo non partes partium intuemur, sed quæ proxime componuntur, id est, deitatem & humanitatem. Humanitas autem est quoddam totum, quod componitur ex anima & corpore sicut ex partibus. Ergo Filius Dei assumpsit partes mediante toto.

Art. 7. hujus  
q. 2. art. 2.

Respondeo dicendum, quod cum dicitur aliquid medium in assumptione incarnationis, non designatur ordo temporis: quia simul facta est assumptio totius & omnium partium: ostensum est enim, quod simul anima & corpus sunt adinvicem unita ad constituendam naturam humanam in Verbo. Designatur autem intentio ordinis, unde per id, quod est prius in natura, assumitur id, quod est posterius. Est autem aliquid prius in natura dupliciter: uno modo ex parte agentis: alio modo ex parte materiae: hæc enim duæ causæ præexistunt rei. Ex parte quidem agentis est simpliciter primum illud, quod primo cadit in ejus intentione: sed secundum quid prius est illud, a quo incipit ejus operatio. Et hoc ideo, quia intentio est prior operatione. Ex parte vero materiae est primum illud, quod prius existit in transmutatione materiae. In incarnatione autem oportet maxime attendere ordinem, qui est ex parte agentis: quia ut Augustinus dicit in Epist. ad Volusianum\*, in talibus rebus tota ratio facti est potentia facientis. Manifestum autem est, quod secundum intentionem facientis prius est completum, quam incompletum, & per consequens totum, quam partes. Et ideo dicendum est, quod Verbum Dei assumpsit partes humane naturæ, mediante toto: sicut enim assumpsit corpus propter ordinem, quem habet ad animam rationalem, ita assumpsit corpus & animam, propter ordinem, quem habent ad humanam naturam.

Non multum  
mote ante  
medium,  
est cp. 3.  
som. 2.

Ad primum ergo dicendum, quod ex verbis illis nihil aliud datur intelligi, nisi quod Verbum, assumendo partes humane naturæ, assumpsit totam humanam naturam: & sic assumptio partium est prior in via operationis, intellectu, non tempore: Assumptio autem naturæ est prior, in via intentionis: quod est esse prius simpliciter ut dictum est\*.

1. cor. art. 1.

Ad secundum dicendum, quod Deus ita est simplex, quod etiam est perfectissimus: & ideo totum est magis simile Deo, quam partes, in quantum est perfectius.

Ad tertium dicendum, quod unio personalis est ad quam terminatur assumptio: non autem unio naturæ, quæ resultat ex conjunctione partium.

#### COMMENTARIUS.

HÆC quæstio procedit de ordine naturæ, seu causalitatis, sicut in 1. & 2. art. diximus. Cui D. Thom. respondet, Verbum assumpsisse partes humane naturæ mediante tota humanitate, quia ex parte agentis, assumptio totius est prius intentio, quam partium. Addit vero in solutione ad primum, ordine operationis, seu executionis, prius naturæ esse assumptas partes, quam totam humanitatem: quæ omnia in sequenti disputatione examinanda & declaranda sunt, litera enim hujus articuli longiori expositione non indiget.

#### ARTICULUS VI.

Utrum humana natura sit assumpta mediante gratia.

42.  
3. d. 2. q. 2.  
art. 2. & d.  
13. q. 3. ar.  
1. ap. Et  
ver. q. 29.  
art. 2. &  
opus.

Ad sextum sic proceditur. Videtur, quod Filius Dei assumpsit humanam naturam mediante gratia. Per gratiam enim unimur Deo. Sed humana natura in Christo maxime fuit Deo unita. Ergo illa unio facta fuit per gratiam.

2. Præterea. Sicut corpus vivit per animam, quæ est ejus perfectio, ita anima per gratiam. Sed humana natura redditur congrua ad assumptionem per animam, ut dictum est: ergo & anima congrua redditur ad assumptionem per gratiam. Ergo Filius Dei assumpsit animam mediante gratia.

Lib. 15. c.  
31. tom. 3.

3. Præterea, August. in 15. de Trin.\* dicit, quod Verbum incarnatum est sicut verbum nostrum in voce. Sed verbum nostrum unitur voci mediante spiritu: ergo Verbum Dei unitur carni mediante Spiritu S. & ita mediante gratia, quæ Spiritui sancto attribuitur: secundum illud 1. ad Corint. 12. Divisiones gratiarum sunt, idem autem Spiritus.

Sed contra est, quod gratia est quoddam accidens anime, ut in secundæ parte habitum est\*. Unio autem Verbi ad humanam naturam est facta secundum substantiam, & non secundum accidens, ut ex supra dictis patet\*. Ergo natura humana non est assumpta, mediante gratia.

1. 2. q. 110.  
art. 2. q. 2.  
97. 6.

Respondeo dicendum, quod in Christo ponitur gratia unionis & gratia habitualis. Gratia ergo non potest intelligi, ut medium in assumptione humane naturæ, sive loquamur de gratia unionis, sive de gratia habituali. Gratia enim unionis est ipsum esse personale, quod gratis divinitus datur humane naturæ in persona Verbi, quod quidem est terminus assumptionis. Gratia autem habitualis pertinet ad spirituales sanctitatem illius hominis, est effectus quidam consequens unionem: secundum illud Joan. 1. Vidimus gloriam ejus quasi unigeniti a Patre, plenam gratia, & veritatis. Per quod datur intelligi, quod ex hoc ipso, quod ille homo est unigenitus a Patre, quod habet per unionem, habet plenitudinem gratiæ & veritatis. Si vero intelligatur gratia, voluntas Dei, aliquid gratis faciens vel donans, sic unio facta est per gratiam, non sicut per medium, sed sicut per causam efficientem.

Ad primum ergo dicendum, quod unio nostra ad Deum est per operationem, in quantum, scilicet, eum cognoscimus & amamus, & ideo talis unio est per gratiam habitalem, in quantum operatio perfecta procedit ab habitu. Sed unio naturæ humane ad Verbum Dei, est secundum esse personale: quod non dependet ab aliquo habitu, sed immediate ab ipsa natura.

Ad secundum dicendum, quod anima est perfectio substantialis corporis, gratia vero est perfectio anime accidentalis. Et ideo gratia non potest ordinare animam ad unionem personalem (quæ non est accidentalis) sicut anima & corpus.

Ad tertium dicendum, quod Verbum nostrum unitur voci mediante spiritu: non quidem sicut medio formali, sed sicut per medium movens. Nam ex Verbo conceptio interiorius procedit spiritus, ex quo formatur vox. Et similiter ex Verbo eterno procedit Spiritus S. qui formavit corpus Christi: ut infra patebit\*. Non autem ex hoc sequitur, quod gratia Spiritus S. sit formale medium in unione predicta.

q. 31. art. 1.

Hic articulus supra explicatus est disp. 10. sect. 2. circa art. 10. q. 2. D. Tho. ubi eandem materiam tractat.

#### DISPUTATIO XVII.

In sex Sectiones distributa.

De ordine naturæ in hac assumptione servato.  
UT distincte in hac disputatione procedam, quæ alias implicita esse solet, & obscura, tres faciam cōparationes: prima erit in singulis partibus, inter uniuscujusque partis unionem ad Verbum, vel ad aliam partem, utra fuerit natura prior. Secunda erit ipsarum partium inter se, quæ fuerit prius natura unita Verbo. Tertia erit totius humanitatis cum suis partibus. De cōparatione vero totius naturæ, vel partium ejus secundum existentiam suam, cum unione ad Verbum, nihil hoc loco dicā, sed ut probabilius supponam, tam animam, quam corpus, & humanitatem prius natura extitisse, quam fuerint Verbo unita: quia ut q. 4. art. 2. D. Thom. dixit, & ibi explicatum est, quod assumitur, præintelligitur assumptioni, supponitur enim esse aliquid, atque adeo existere, ut assumi possit: de qua re late dicendum est infra q. 17. Supponendum deinde est in tota hac quæstione, non esse nobis sermonem de sola prioritate rationis, quæ, vel unum potest ab alio præscindi, vel illud dicitur esse prius, quod cum alio non convertitur subsistendi consequentia: hoc enim modo illa omnia, quæ inter se habent necessariam connexionem erunt simul, & neutrum prius alio, etiam si naturæ ordinem possint inter se habere. Quod vero ita comparatur ad aliud, ut ab eo non dependeat, aliud vero pendeat ab ipso, erit hoc modo prius illo. Quæ autem ita se habent, ut unum quodque sine alio esse possit, nec rationem hanc prioris ac posterioris inter se habent, neque etiam simultatis habitudinem, sed impertinenter se habent, quia nec postulant esse simul, nec cum aliquo ordine. De hac ergo ratione prioris & posterioris in subsistendi consequentia hic non agimus per se, nisi quatenus cum ordine causalitatis & naturæ habent connexionem: agimus ergo de ordine naturæ, qui necessarius est ad hoc mysterium explicandum.

#### SECTIO I.

Utrum anima rationalis fuerit prius natura unita Verbo, quam carnis.

Ratio dubitandi esse potest, quia ordo, seu prioritas naturæ, solum est inter causam & effectum, sed unio animæ



animæ ad Verbum nullo modo est ratio, vel causa unionis ejusdem animæ ad corpus: neque enim illa anima unita fuit corpori, quia assumpta fuit a Verbo, cum uniri corpori conveniat illi natura sua, & commune sit omni animæ, non vero unio ad Verbum; ergo nulla ratio est, propter quam illa unio sit natura prior. E contrario vero potius videtur prior unio ad corpus, quia est aliquo modo ratio, & causa alterius unionis: anima enim assumpta est, quia est pars humanitatis, cujus assumptio est primo & per se intenta: sed anima est pars, quia est forma informans corpus; ergo ideo assumpta est, quia est forma corporis; ergo quia unita est corpori; ergo hæc unio est natura prior. Et confirmari potest hæc ratio, quia unio ad Verbum est ad subsistendum, sed anima hominis prius natura informat corpus, quam intelligatur aliquo modo subsistens, quia quamdiu est in corpore, non subsistit ut quod, sed est ratio subsistendi toti humanitati: ergo non potuit anima Christi prius natura trahi ad subsistendum per unionem ad Verbum, quam fuerit corpori unita.

Omissa opinione Durandi, qui nullum naturæ ordinem in hac assumptione admittit, quam infra tractabimus, aliquorum sententia est, animam prius natura fuisse unitam corpori, quam Verbo. Ita aperte sentit Scot. dist. 2. q. 2. §. Ideo quantum, &c. Et Palud. q. 2. in solut. argum. isti enim asserunt humanitatem prius assumptam esse, quam animam, unde necessario sequitur, animam prius natura composuisse humanitatem informando corpus: sed ipsorum fundamentum infra in propria quæst. tractabimus. Cajet. etiam, qui hac quæst. art. 3. negat, animam, dum informat corruptibile corpus, subsistere, videtur consequenter eodem modo debere opinari: nisi fortasse aliter in hoc sentiat de Christi anima, quam de aliis, quod eo loco ipse non explicat. Ut breviter respondeam, distinguo illum duplicem ordinem, quem D. Th. art. 5. attingit, scilicet intentionis & executionis: dicitur enim prius in intentione id, quod primario intenditur, & propter quod aliud fit, in executione vero illud est prius, a quo incipit operatio agentis.

Dico ergo primo: Ordine intentionis, unionem animæ ad corpus esse aliquo modo naturæ priorem unionem ejusdem ad Verbum. In hac non videtur esse posse controversiam, quia ut infra dicemus, assumptio totius humanitatis est primario intenta, in ea vero continetur unio partium inter se: unde anima est a Verbo assumpta propter unionem ad corpus, ut illa mediante assumeret totam humanitatem; ergo unio ad corpus fuit sub hac consideratione, intentione prior.

Dico secundo. Ordine executionis, prius natura anima est unita Verbo, quam corpori. Hæc sumitur ex D. Th. hic art. 5. ad 1. & ex aliis principiis doctrinæ ejus, ut infra videbimus. Tenet etiam Cajetanus hic art. 1. & 5. Capreol. in 2. dist. 1. art. 3. ad arg. secundo loco induct. cont. 1. conc. §. Ad aliud, quod tangitur in illa confirmatione, ubi eandem doctrinam ex Hervæo refert. Tenet etiam Richardus in 3. dist. 2. art. 2. q. 2. Gabr. q. unica, art. 2. Altiſiod. lib. 3. summæ tract. 1. c. 1. q. 2. & alii omnes, qui sentiunt, animam prius natura esse assumptam, quam humanitatem totam: hoc enim verum esse non potest, nisi anima prius sit unita Verbo, quam corpori; quia si anima prius esset unita corpori, prius esset composita tota humanitas, quam anima assumpta; ergo in subsequente signo naturæ, prius assumpta esset tota humanitas, quam anima, nam postquam intelligitur existens tota humanitas, nihil intelligitur prius assumi; quam illa, ut ex sequentibus magis constabit. Videtur etiam ita insinuare August. epist. 99. ad Evod. q. 2. dum ait: *Verbum creasse sibi animam, & illam immiscuisse corpori mortali.* Ratione declaratur primo, quia unio animæ ad Verbum non pendet ab actuali unionem ejusdem animæ ad corpus; ergo non est posterior illa, etiam ordine naturæ. Patet consequentia, nam id proprie est posterius natura alio, quod ab illo pendet: ordo enim naturæ non est sine ordine causæ, & effectus (sub nomine causæ comprehendendo omne id, quod in causa præsupponitur, ut ab illa fluat effectus) ordo autem causæ & effectus neque intelligi potest sine dependentia. Antecedens patet, quia dissoluta unionem animæ ad corpus, mansit integra unio animæ ad Verbum; ergo signum est, hanc non dependisse ab illa.

**Objeſtio.** Dicitur fortasse, illam unionem animæ ad Verbum, quæ in principio facta est, non mansisse eandem nume-

ro, sed illa dissoluta aliam in eodem instanti factam esse. Sed hoc omnino alienum est a mente Sanctorum, ut patet ex his, quos supra citavi disp. 9. sect. 1. Bernard. lib. 5. de Confid. Leon. Papa serm. 9. de Nativ. & serm. 10. 17. 19. de Passio. & aliis, quos infra, tractando de Christi morte referam, qui non solum ajunt, corpus & animam mansisse unita Verbo, sed etiam priorem unionem illarum partium indissolubilem permanſisse, quod non esset verum, si ablata priori unionem alia succederet. Et hunc etiam esse sensum D. Th. notavimus supra art. 1. ad 3. Denique hoc signo utuntur Patres ad explicandum, unionem animæ ad Verbum esse majorem & excellentiorem quam ad corpus, quia hæc dissolvi potuit, non illa: si autem prima unio esset dissoluta, & alia facta, nulla esset excellentia, nec perfectio. Aliter responderi potest, hanc unionem animæ ad Verbum, dependisse in fieri ab unionem ad corpus, quamvis non in conservari, & ita in fieri fuisse naturæ posteriorem. Sed hæc responsio, licet quoad ordinem seu successionem temporis locum habeat, & in simili admittatur a D. Th. art. 1. ad 3. tamen quoad ordinem naturæ non placet, quia si in fieri fuisset illa dependentia, maxime quia anima non fuit unita Verbo in principio, nisi ratione totius humanitatis; nulla enim alia causa esse potest, propter quam oporteat supponi ordine naturæ unionem animæ ad corpus, ante unionem ejusdem ad Verbum: sed hoc dici non potest consequenter, nam si anima in illa prima unionem tantum esset unita ratione totius humanitatis, soluta humanitate, & consequenter ablata unionem ad illam, non potuisset manere eadem numero unio ad animam: si ergo fuisset dependentia in fieri, necessario fuisset in conservari, quod ex sequentibus evidentius patebit, & ex supra dictis disp. 14. de assumptione formæ materialis in natura irrationali idem constare potest: diximus enim ibi, hujusmodi formam ita uniri hypostatice media tota natura, si assumatur, ut ex vi illius assumptionis non possit manere unita; si tota natura dissolvatur, & separetur a persona.

Unde sumitur secunda ratio, ad quam explicandam suppono id quod existimo certum, animam Christi Domini factam esse per creationem, sicut animas aliorum hominum: ut expresse, & eleganter docet Hieronym. lib. 2. apologiæ 1. contra Rufin. circa princ. & August. dicta epist. 99. & Leo Papa epist. 11. quorum verba supra citavi, quia sicut illa anima est ejusdem naturæ cum nostra, ita habuit eandem naturalem originem, & productionis modum: unde fit, illam animam fuisse per se productam, & non tantum comproductam cum tota natura, quia hoc est proprium materialis formæ: ex his ergo formatur secunda ratio hujus sententiæ, quia anima humana natura sua, prius natura subsistit, quam uniatur corpori: ergo in Christi humanitate, prius natura assumpta est, quam uniretur corpori. Consequentia, quamvis enervari possit ex doctrin. Cajet. hic art. 1. circa ad 2. negat enim oportere, in hac assumptione servari ordinem subsistendi, qui in propria persona servatur, mihi tamen videtur evidens, ut ibi etiam notavi. Et probatur aperte in præſenti materia, quia si in aliis hominibus anima prius natura subsistit, quam uniatur corpori; ergo ut in Christo non habeat propriam subsistentiam prius natura, quam unionem ad corpus, necesse est, ut supernaturaliter impediatur: non impediatur autem propria subsistentia, nisi per assumptionem, ut supra q. 2. ostensum est; ergo necesse est, ut in illo priori naturæ assumatur. Quam rationem simili discursu latius persecuti sumus supra disp. 10. sec. 2. Antecedens hujus rationis philosophicum est, & ideo non tam est disputandum hoc loco, quam supponendum. Sumitur autem ex D. Th. 1. p. q. 75. art. 2. & q. 76. art. 1. ad 5. ubi ait, id aperte docet, & ex eodem D. Th. 1. p. q. 45. art. 4. ubi ait, creari esse proprium subsistentium: sicut ergo anima prius natura creatur, quam uniatur corpori, ita etiam prius natura subsistit, actio enim, per quam anima unitur corpori, distincta est a creatione, & quasi extrinſeca illi, unde illam supponit perfecte terminatam, quoad omnem efficaciam ejus, neque illam potest impedire.

Dicitur fortasse, hoc argumento solum probari, prius natura existere, sicut etiam anima Christi prius natura creata est, quam uniretur Verbo, & tamen non fuit prius natura subsistens. Respondetur, aliud est loqui de creatione secundum naturalem modum, & efficaciam suam, aliud prout aliquo modo impedita, seu præventia per

**Responſio.**

Quo ordine res subsistens eodem assumi oportet.

**Objeſtio.**

**Responſio.**



per assumptionem supernaturalem: creatio enim de se, & ex natura sua, sicut postulat, ut fiat ex nullo subiecto, ita ex naturali sua efficacia habet, ut ultimo terminetur ad rem subsistentem per se, nisi præveniatur; quod ita etiam declaratur, quia licet subsistentia sit etiam ex natura rei distincta ab existentia, tamen est modus intrinsecus, & quasi complementum ejus: & ideo creatio, per quam res producitur, ut existat eo modo, quem intrinsece, & ex natura sua postulat, de se terminatur ad rem subsistentem, & non tantum existentem. Et ideo non est simile de creatione animæ Christi comparata ad assumptionem, quia per assumptionem prævenitur, & impeditur creatio, ne usque ad subsistentiam perveniat: & ideo ipsa unio ad Verbum est quasi complementum quoddam creationis, altiori tamen modo, quam per creationem fieret; & ideo dixit Leo Pap. epist. 11. & August. præcedenti disputatione citatus, animam Christi ita fuisse assumptam, ut ipsa assumptione crearetur; ut vero unio ad corpus, ut dixi, est magis extrinseca, & posterior, & supponit creationem completam, & terminatam, quantum natura sua potest, & ideo supponit terminum ejus, non solum existentem, sed etiam subsistentem. Adde in opinione asserentium, in humanitate Christi, & anima ejus non esse existentiam creatam, magis necessario dicendum esse, animam Christi prius natura esse unitam Verbo, quam corpori: quia negari non potest, quin anima rationalis prius natura existat, quam corpori uniatur.

Ordo naturæ ex duplici capite.

Ad rationem ergo dubitandi in principio positam respondetur, quamquam inter has uniones non interveniat propria ratio causæ per se, intervenire tamen quandam rationem naturalis ordinis, quatenus unus modus existendi natura sua supponitur alteri; sicut enim in causa efficiendi, subsistentia supponitur ordine naturæ operationi, non quia sit formale, & principium per se illius, sed quia est connaturalis modus efficiendi ipsius principii, qui prior est in unaquaque re, & magis intrinsecus quam operatio: ita in anima rationali, quæ est perfectissima forma, quamvis subsistentia non sit ratio informandi, tamen quia est modus connaturalis, & maxime intrinsecus ipsius animæ, præsupponitur ordine naturæ causalitati etiam formali ipsius animæ: & propterea unio, per quam impedita est illa subsistentia, eodem ordine naturæ antecedit unionem ad corpus. Unde ad aliam argumenti partem nego, actualem unionem ad corpus esse in ordine executionis rationem assumendi animam, sed tantum in ordine intentionis: in executione vero sicut anima creatur & subsistit, ut uniatur corpori, ita etiam eodem ordine assumpta est.

Ad confirmationem, negatur, animam humanam in corpore non subsistere, in quo certe Cajet. non loquitur consequenter. Primo, quia si anima prius natura subsistit, ut probatum est, quam uniatur corpori, necesse est, ut in eodem instanti sit subsistens, in quo unitur, & consequenter eodem modo manebit semper in corpore: quia non magis repugnat subsistentiæ unio ad corpus in sequenti tempore, quam in primo instanti: prima vero consequentia probatur, quia impossibile est, ut forma habeat prius natura aliquem positivum, & realem modum subsistendi in aliquo instanti, & tamen quod in eodem instanti illo privetur, est enim hæc manifesta implicatio contradictionis: & ideo anima Christi in primo instanti suæ creationis non habuit subsistentiam creatam, cum in illo instanti illa privata fuerit. Secundo, quia post resurrectionem anima vere informabit corpus, & nihilominus manebit subsistens; ergo & nunc est subsistens in corpore: quam consequentiam immerito Cajetanus negat: nam si modus unionis ad corpus per modum formæ non repugnat formaliter cum subsistentia; ergo utrumque habebit anima, quia de se est apta ad subsistendum, & ideo separata a corpore subsistit; ergo si in corpore non habet impedimentum, etiam ibi subsistit: si autem illa unio ad corpus formaliter repugnaret cum subsistentia, neque in corpore glorioso posset anima esse subsistens. Neque enim dici potest, in eo statu ex speciali miraculo fore animam subsistentem, & informantem: tum quia si anima ex natura sua hunc modum existendi non requirit, dum est in corpore, sine ratione & fundamento tale miraculum ponitur: tum etiam, quia si est aliqua repugnantia naturalis inter illos modos, unus in-

cludet proximam negationem alterius, sicut modus existendi per se & in alio, & ita nulla ratione poterunt conjungi: quod si non ita opponuntur, nec naturaliter repugnabunt, & ita revera est, ut jam explicabo. Quod vero Cajetan. dicit, animam rationalem in principio suæ creationis individuari a corpore, in resurrectione vero individuum corpus, commentitium est, ex falsa Metaphysica profectum, & introducens in Theologia falsam de resurrectione doctrinam: sed non possumus hoc loco omnia prosequi.

Tertio ratio propria hujus est, quia modus, quo anima rationalis informat materiam, non repugnat formaliter cum subsistentia, quia anima rationalis non ita informat, ut illius esse seu existentia terminetur, sustentetur, aut pendeat a materia, in quo differt ab aliis formis materialibus, & ideo potest simul informare, & subsistere, quia modo subsistendi non repugnat quælibet unio substantialis cum alio, sed solum unio ad terminum ipsius existentia, a quo ipsa aliquomodo pendeat, ut a sustentante: sic enim ut statim dicam, ipsa materia est suo modo subsistens, quamvis conjuncta sit formæ, & natura divina, seu Verbum non definit esse subsistens propter unionem ad humanitatem, quia unitur illi ut sustentans illam; sic enim anima, cum unitur materiæ, potius continet, & quasi terminat ipsam, quam sustentetur ab illa. Et hoc maxime necessarium est dicere in opinione Thomistarum, asserentium, ipsum esse, prius natura convenire animæ rationali, & ab illa communicari corpori, & toti homini: quæ est sententia D. Th. 1. p. q. 76. art. 1. ad 5. & 2. contra gent. c. 68. quibus locis Cajet. & Ferrar. late hoc docent, illud enim, *Esse*, in eorum sententia, vel est ipsa subsistentia, vel supponit illam. Ac denique hanc sententiam tenet aperte D. Th. 1. p. q. 75. art. 2. ubi definit animam esse subsistentem, & clare loquitur de anima actu informantem corpus, & ideo in solutione ad primum dicit, subsistens, ut sic, excludere inhærentiam accidentis, & formæ materialis, non tamen imperfectionem partis, unde concludit, animam humanam esse subsistentem, ut quiddam incompletum, ad eum modum, quo pars integralis subsistit in toto: nam illa revera habet suam partialem subsistentiam, quam retinet cum dividitur a toto. Eandem sententiam late docet idem D. Th. quæst. disputat. de anima art. 1. per totum, & art. 6.

Sed hæc sufficiant de Physica quæstione. Aliqui enim volunt, etiam si in aliis hominibus anima actu informant non habeat modum subsistendi proprium, nihilominus in Christo esse proprie unitam ad subsistendum, eodem modo, quo fuit in triduo, quando erat separata a corpore, quia subsistere in alio minus repugnat cum actuali informatione corporis, quam in se & per se subsistere per propriam subsistentiam, sicut supra dicebamus minus repugnare unam naturam subsistere in duabus alienis personis, quam in aliena, & propria. Sed hoc sicut improbari non potest sufficienter, ita nec probari; sine fundamento enim videtur talis modus unionis tribui animæ Christi, si non est illi naturale in corpore subsistere. Ex quo obiter infero, si verum est, sanguinem non informari anima rationali, in ea unione quasi partiali, qua intelligimus sanguinem esse unitum Verbo, non posse convenienter dici, formam sanguinis prius natura esse unitam Verbo, quam suæ materiæ: quia illa non est forma subsistens, & ita ex natura sua non est capax talis unionis, nisi ratione totius, quod satis manifestat ordo resolutionis, quia illa forma non potest separari a sua materia, quin etiam separetur a Verbo, quia per separationem a materia definit esse simpliciter, cum sit materialis forma.

Quomodo sit in anima rationali subsistentia cum informatione.

Deformæ sanguinis assumptione.

## SECTIO II.

*Utrum caro Christi fuerit prius natura unita Verbo, quam anima rationali.*

**R**atio dubitandi est eadem, quæ in præcedenti, scilicet quia unio carnis ad verbum non videtur ullo modo fuisse causa unionis ad animam; ergo non est, cur sit prius natura: alioqui vero caro seu materia non est capax subsistentiæ, nisi ratione animæ: quia anima est, quæ suam subsistentiam communicat corpori, ut paulo antea ex D. Th. referebamus; ergo per unionem ad animam fit caro capax subsistentiæ; ergo illa unio est natura prior, quam



quam unio ad Verbum, quæ est ad subsistendum: Et confirmatur, quia caro non est assumpta, nisi ut humana, ut D.Th. docet art. 4. & videtur certum ex communi doctrina Patrum: sed caro fit humana per informationem animæ rationalis: ergo per eandem fit assumptibilis: ergo prius unitur animæ, quam Verbo. Et ita hanc sententiam videtur tenere D. Thom. hic art. 4. ad 3. ubi inquit: *Unione personali, prius secundum intellectum oportet, quod caro uniatur animæ, quam Verbo, quia ex unione ad animam habet, quod sit unibilis Verbo in persona*; & idem indicat art. 1. ad 3. ubi Cajetanus idem sentit, & inter Thomistas videtur frequens hæc sententia, & eadem tenet Scotus supra, dum ait, humanitatem prius esse assumptam, quam carnem: assumptio enim totius humanitatis supponit conjunctionem carnis ad animam. Idem sentit Bonavent. in 3. d. 2. art. 3. q. 1. Palud. q. 2. a. 3. Alenf. 3. p. q. 4. memb. 5. Et favent Patres dicentes, assumptum esse corpus mediante anima, quos infra referemus.

Nihilominus, supposita distinctione supra data de duplici ordine intentionis & executionis, dico primo. Ordine intentionis prior est unio carnis ad animam, quam ad Verbum. Hoc sensu intelligendum puto citatum locum D. Th. quoniam aliàs non satis sibi constaret, ut statim patebit: constat etiam hæc conclusio ex illa communi locutione Patrum, corpus esse assumptum mediante anima, quam infra late explicabimus. Ratio vero est, quia corpus non est assumptum, nisi propter animam, seu propter totam humanitatem, quæ resultat ex unione corporis ad animam; ergo hæc unio intelligitur ordine intentionis antecedere.

Dico secundo. Ordine executionis caro est prius unita Verbo, quam animæ. Hanc conclusionem sumo ex D. Th. hic art. 5. ad 1. ubi dicit, ordine executionis partes prius natura esse assumptas, quam totam humanitatem: ex hoc enim aperte sequitur, secundum eundem ordinem executionis carnem prius natura esse assumptam, quam informatam animam, quia si prius deberet informari, & media hac informatione assumi, cum per illam informationem constituatur humanitas tota, necessario prius natura esset assumenda humanitas tota, quam caro. Eandem sententiam significat Altfiod. lib. 3. Summæ tract. 1. c. 1. q. 2. ubi ponit duas uniones partiales animæ & carnis ad Verbum, per quas sumpta est tota humanitas. Eandem significat Richard. in 3. dist. 2. ar. 2. q. 2. ad 1. & Abulen. Parad. 2. c. 42. dicens prius natura fuisse assumptas animam & carnem, & consequenter humanitatem. Idem Capreolus, Hervæus, & Cajetanus citati sect. præced. Rationes vero sunt fere eadem, quæ tactæ sunt sectione præcedenti. Prima, quia hæc unio ad carnem, quatenus substantialis unio est cum materia ipsa, non pendet ex unione ad animam: mansit enim immutata post separationem animæ, sicut de unione animæ probatum est, nam est eadem ratio. Dices. Hoc argumento probaretur, illam carnem fuisse assumptam, etiam ante ultimam dispositionem ad animam, quia etiam illa unio fuit conservata ablata dispositione; hoc autem falsum est, quia licet illa dispositio non fuerit quasi vinculum intrinsece coniungens carnem cum Verbo, fuit tamen dispositio prævia requisita, saltem secundum ordinationem divinam, quia illa materia non erat assumptibilis secundum se, sed prout humana, & proxime disposita ad formam hominis: & ideo potuit illa unio prærequiri ordine naturæ ad fieri illius unionis, quamvis illa unio semel facta conservari potuerit, ablata illa dispositione; ergo

Obiectio.

Responsio.

idem dici posset de actuali animæ informatione. Sed in primis jam hinc habetur, illam unionem partialem materiæ esse factam in ipsa entitate materiæ secundum se, independentem ab actuali unione ad animam rationalem. Deinde quod hæc actualis unio ad animam ordine naturæ antecesserit per modum congruæ dispositionis, posset quidem Theologice sustineri, si cum veris Philosophiæ, & Metaphysicæ principiis constaret: & idem dico de ultima dispositione, seu organizatione corporis, ut infra explicabo.

Quod autem id repugnet, ostenditur secunda ratione, quia materia prius natura, quam uniatur formæ, est subsistens propria partiali subsistentia, quam ex se habet; ergo & in Christo prius natura debet intelligi illa materia unita Verbo, quam uniatur animæ rationali. Antecedens supponendum est ex philosophia, nunc solum indicatur

breviter fundamentum ejus: materia enim, ut uniatur formæ, supponitur tanquam substantiale, & reale subiectum generationis, atque adeo ut habens aliquam entitatem realem actualem, sine qua neque concipi potest reale subiectum: & consequenter, ut ex se habens suam partialem subsistentiam, ut etiam ex litera D. Th. notavimus art. 4. ad 3. nam existentia est, qua constituitur entitas actualis, & quæ per realem efficientiam communicatur: rursus hæc existentia materiæ natura sua talis est, ut non innitatur alteri, tanquam subiecto, vel sustentanti, & ideo natura sua secum affert suum partialem terminum subsistentiæ, quem materia conservat sub quacumque forma, sicut & existentiam: sicut enim materia subsistat utrique termino generationis, ut quid existens, ita etiam ut quid subsistens, quia revera supponitur, & existens ex se, & per se: hic enim modus existendi videtur quidē intrinsece includi in conceptu, & ratione primi subiecti naturalis generationis: & ideo sicut materia retinet sub quacumque forma eandem numero entitatem actualem, & partialem existentiam, ita & partialem subsistentiam; sicut ergo materia prius natura existit, quam subijciatur generationi, vel quam uniatur formæ, ita & prius natura subsistit. Jam vero prima rationis huius consequentia probanda est eodem modo, quo alia similis in sect. præced. probata est: tum quia eo ordine intelliguntur istæ partes humanitatis assumptæ a Verbo ad subsistendum, quod in propria hypostasi subsisterent: tum etiam quia ex natura rei in generatione humana, materia ordine naturæ præintelligitur subsistens introductioni formæ per propriam partialem subsistentiam creatam; ergo eodem modo fuisset in humana Christi generatione, nisi impedita esset illa materia, ne haberet propriam subsistentiam; non est autem impedita, nisi per assumptionem; ergo intelligenda est assumpta in eodem signo, & ordine naturæ, quo per propriam subsistentiam esset terminanda. Quod accommodare explicari potest, sumpto exemplo ab instanti mortis Christi, in quo recedente anima rationali, intelligimus formam cadaveris introduci in illam materiam, cui introductioni intelligimus etiam supponi eandem materiam unitam Verbo, & subsistentem in illo: ita enim fuit unita toto tempore præcedente illud instans, & illa unio immutata permanfit, ut dictum est: ad hunc ergo modum intelligendum est, accidere in materia terminata propria subsistentia, in aliis naturalibus generationibus: in generatione autem humana Christi fuisse ordine naturæ præventam per assumptionem, ne propria subsistentia subsisteret.

Sed retorqueri potest ratio facta, nam materia prima in homine non prius natura existit, quam uniatur animæ: ergo nec prius natura subsistit, quia subsistentia est terminus existentie in nostra sententia: ergo in Christo non potuit caro prius natura uniri Verbo, quam animæ, cum ad subsistendum unita sit. Primum antecedens patet, quia materia pendet in existentia a forma juxta probabiliorum philosophorum sententiam: ergo non potest prius natura existere, quam a forma informetur, quia non potest effectus esse prior naturæ sua causa, nec materia potest concipi existens, nisi dependenter ab omnibus causis requisitis ad suam existentiam, ex quibus una est forma illi unita.

Hoc argumentum pendet ex multis principiis philosophicis, quæ hoc loco expendi non possunt. Primo ergo adhuc est in controversia positum, an materia secundum naturam particularem ac propriam pendeat in suo esse intrinsece a forma informante. Si quis enim hoc neget, & dicat, solum ob debitum ordinem universalis naturæ semper esse sub aliqua forma, nec posse naturaliter aliud accidere, sicut non potest dari vacuum, facile eludet argumentum factum, evertendo illius fundamentum. Secundo, admittendo illam dependentiam, responderi potest, eam nihil ob stare, quominus materia prima sub alia ratione causæ sit prior natura: negari enim non potest, quin in aliis compositis extra hominem sit prior natura, quam forma, quæ ab illa pendet in existendo, & quam actio eductiva talis formæ, ad quam materia ut subiectum supponitur: & hæc ipsa præsuppositio est quædam prioritas naturæ, ut constat ex Aristotele in Postprædicam. Unde juxta probabilem distinctionem supra positam disp. 8. sect. 1. de duplici dependentia, una per realem influxum in ipsum esse rei, alia per necessariam ac naturalem connexionem, probabilissimum est, existentiam materiæ

Materia  
ex se, non  
a forma  
subsistit.



riā pendere a forma tantum posteriori non autem priori modo, sed a solo Deo, a quo sub quacumque forma per eandem actionem conservatur. Quod si verum est, facile intelligitur, quomodo cum hac dependentia stet prioritas naturæ simpliciter, quia absolute loquendo, materia existens & subsistens supponitur illi actioni, qua formæ unitur, licet secundum quid, & ut intelligitur habere omnia requisita ad existendum, sit posterior in alio genere causæ. Nec aliquid refert, quod illa causa sit formalis, & ita in suo genere perfectior, quia id, quod minus perfectum est, solet esse ordine generationis, & executionis prius, quia absolute & simpliciter præsupponitur, ut aliud fiat. Unde dicitur ultimo, quod licet materia existens pendeat a forma, non tamen ab hac vel illa forma, & ita in præsentī unio materiæ corporis Christi ad Verbum non pendet ab unione cum anima, & hac ratione dicitur illa materia prius natura uniri Verbo, quam animæ, quia & unitur unione independente ab unione cum anima, & unitur Verbo, ut sit apta uniri animæ, quia non potest ei uniri, nisi ut habens actualem entitatem, & subsistentiam. Et, licet in hoc possit considerari mutua prioritas secundum diversas rationes, tamen in ordine ad executionem, hæc, quæ respicit materiam secundum se, & ut est primum fundamentum totius mutationis, videtur simpliciter prior.

Ad rationem ergo in principio positam patet solutio ex dictis, sicut enim materia subsistens, ordine naturæ, & causæ materialis antecedit unionem ad formam: ita in hoc mysterio unio ad Verbum, per quam impedita, seu suppleta fuit propria subsistentia, antecessit ordine naturæ, & participavit eandem rationem causæ, respectu alterius unionis. Negatur autem, materiam non esse capacem suæ partialis subsistentiæ, nisi ratione formæ informantis: per suam enim entitatem intrinsece est capax illius, quamquam cum ordine, & dependentia a forma in genere causæ formalis, hæc enim dependentia non repugnat subsistentiæ, sicut nec repugnat illi dependentia ab efficiente, sed solum dependentia a termino intrinseco, seu sustentante. Cum vero dicitur, materiam illam non fuisse assumptam secundum se, seu ut materiam remotam, sed ut humanam, seu ut partem humanæ naturæ, jam informatam forma, respondetur hoc esse verum secundum ordinem, seu durationem temporis, ut supra dictum est: secundum ordinem autem naturæ, necessario prius assumi debuit, ut in eodem instanti posset ultimatè disponi, & informari, & esse pars actualis humanæ naturæ. Unde, secundum ordinem naturæ loquendo, non est assumpta illa materia ut facta jam caro humana pro illo signo, sed ut fieret caro humana pro eodem instante temporis in subsequente signo naturæ.

### SECTIO III.

*Utrum caro sit prius natura unita Verbo, quam anima, vel e contrario.*

Comparavimus in singulis partibus supra dictas duas uniones, nunc superest, ut partes ipsas conferamus in ordine, quo unitæ sunt Verbo; in ordine enim, quo unitæ sunt inter se, non sunt comparabiles, sic enim mutuum habitudinem dicunt, & simul ad invicem unitæ sunt, in ordine vero ad Verbum comparabiles sunt, quia distinctas habent partiales uniones. Videtur autem nullus esse ordo naturæ inter illas, quia neque una est ratio alterius, neque altera pendet ab altera. Et hanc sententiam videtur sequi Richard. in 3. d. 2. q. 2. & eandem a fortiori tenet Durand. ibi q. 2. Aliunde autem videtur, animam prius natura assumptam fuisse, quam carnem, quia caro assumpta est mediante anima. Breviter tamen, supposita distinctione de ordine intentionis, & executionis

Dico primo: Ordine intentionis anima prius natura assumpta est, quam caro. Sumitur ex D. Th. a. 1. & ex illa locutione communi, animam fuisse medium ad carnem assumendam, quam in sect. seq. latius explicabo. Et ratio est, quia licet primaria intentio fuerit ad totam humanitatem, tamen comparando partes inter se, corpus assumptum est propter animam, quæ principalior est, & quasi finis ejus: est ergo animæ unio prior in hoc ordine. Dico secundo: Ordine executionis utraque pars potest dici prius assumpta, quam alia, in suo genere causæ: simpliciter tamen assumptio corporis videtur antecedere,

hoc ordine naturæ. Explicatur prior pars, nam quatenus corpus non potest subsistere in rerum natura, nisi dependenter ab anima informante, ideo potest aliquo modo dici anima prius natura assumpta in genere causæ formalis; tamen quia creatio animæ supponit corpus dispositum, in quo creatur, quod corpus, ut supra dictum est, includit materiam subsistentem, ideo in genere causæ materialis supponi dicitur assumptio carnis. Et hinc declaratur ultima pars, nam materia simpliciter supponitur creationi animæ, & est fundamentum totius generationis: supponitur autem subsistens, & in eo instanti non potuit subsistere nisi subsistentia Verbi; ergo supponitur etiam assumpta ad sic subsistendum. Et confirmatur, quia in quacumque generatione humana ita accidit, quod materia proxime disposita simpliciter supponitur ordine naturæ creationi animæ: supponitur autem existens, & subsistens, ut declaratum est; ergo idem ordo servatus est in Christi conceptione juxta discursum in superioribus sæpius inculcatum. Denique confirmatur, quia optime quadrat, ut ordo executionis sit contrarius ordini intentionis: quia licet perfectiora sint magis intentata, tamen executio a minus perfectis, uti a fundamentis inchoari solet. Et ad hoc explicandum conferre potest exemplum Cajetani de ædificante domum, in qua fundamentum aliis partibus supponitur, & ideo cum successive fit domus, prius tempore jacitur fundamentum: ac proinde, etiam si quis haberet vim ædificandi domum in instanti, intelligeretur ordine naturæ prius esse jactum fundamentum: ita ergo in hac assumptione intelligimus, prius natura esse assumptum id, quod est tanquam fundamentum cæterorum.

### SECTIO IV.

*Utrum caro sit assumpta mediante anima, & anima mediante spiritu.*

Quidquid in hoc titulo ad quæstionem de re pertinet, in superioribus explicatum est, solum proponitur ad explicandas has locutiones Patrum, & quomodo doctrina tradita illis accommodetur: Quod enim caro assumpta sit per animam, aut mediante anima, omnino certum est; ita enim loquitur VI. Synod. act. 28. in confess. fid. Constantini, missa ad Leonem II. & ab eodem per epistolam decretalem, quæ ibi habetur, approbata. Sic etiam Nazianzenus orat. 35. circa finem, & orat. 42. post medium, & orat. 51. Damascenus lib. 3. c. 6. Origen. 1. Periarch. c. 6. & Augustinus de agone Christi. c. 18. & in epist. 3. & Rufinus in expositione Symboli, circa illa verba: *Qui conceptus est de Spiritu Sancto ex Maria Virgine*, & eodem modo dicunt hi Patres, animam fuisse assumptam per mentem, seu mediante spiritu, ut explicuimus circa literam art. 2. Et hunc modum loquendi imitati sunt omnes Theologi cum D. Th. hic, & Magist. in 3. dist. 2. licet Durandus solum secundum intellectum hanc rationem medii admittat, de cujus opinione sequente sectione dicetur. Et Gabriel probabile putat animam non esse medium, si materia potest immediate assumi a Verbo, & Almainus non longe est ab eadem sententia. Sed, licet illa ratione probetur, non omnem rationem medii animæ convenire, non tamen inde sequitur animam non esse medium; fit enim argumentum ex puris particularibus. Unde illa sententia absolute non est probabilis, cum tot patribus repugnet: idque magis ex dicendis constabit.

Ut ergo hujus locutionis sensus intelligatur, advertendum est, variis modis existimari posse, animam fuisse medium ad assumendam carnem: Primo, ut sit quasi vinculum inter Verbum, & carnem: sicut punctum est medium; quo unitur una pars lineæ alteri. Secundo, ut anima tantum sit, quæ immediate assumitur; corpus vero dicatur assumi tantum ratione animæ: quomodo accidentia dici possunt assumi media substantia. Tercio dici potest medium, quia in re ipsa prius natura assumitur, & est quasi via, ut aliud assumatur: ut in ædificatione domus, erectio parietum potest dici medium, quo pervenitur ad tectum; & hoc vocarunt, *medium quod*, Scot. supra, & Cajet. art. 1. & 5. & hujusmodi medium pertinet proprie ad ordinem executionis, quia via est hoc modo medium perveniendi ad terminum, & potest hoc medium dupliciter intelligi. Primo, quia per unum pervenitur ad alterum,

Multiplex ratio medii ad assumendam.



rum, ut in exemplo posito. Secundo, quia unum quasi necessario secum trahit aliud, ut cum movetur vas, per illud trahitur aqua. Quarto modo dicitur medium, quod est ratio assumendi aliud, vel tanquam finis, vel tanquam dispositio accommodans assumptibile ad assumptionem: quamvis ipsum in se non prius natura assumatur, & hoc vocarunt Scotus & Cajet. *medium quo*. Quod alii subdistingunt in medium congruitatis seu decentiæ, & medium necessitatis, ut videre licet in Richard. Gabr. Almain. supra, Alenf. 3. p. q. 4. memb. 2. & insinuat D. Th. hic a. 1. ad 3. nec indiget expositione: nam ex ipsis terminis satis est clara distinctio.

Dico ergo primo. Anima non fuit medium ad assumendam carnem, tanquam vinculum uniens ipsam ad Verbum. Ita docet recte D. Th. infra q. 50. a. 2. Bonav. in 3. d. 2. a. 3. q. 1. Richard. a. 2. q. 2. Scotus q. 2. & est per se evidens, supra enim disp. 8. ostendimus, in hac unione hypostatica, si sit vera unio, & secundum hypostasim, nullum posse intercedere medium, quod jungat extrema, sed per se immediate uniri, solo modo unionis interveniente. Neque intelligi posset, animam hoc modo esse medium, quo caro unitur, nisi negando veram unionem hypostaticam inter carnem, & Verbum, & ponendo solam conjunctionem mediatam, & in hypostasi: quod quam sit falsum, jam explico.

Dico secundo. Anima non fuit tale medium ad assumendam carnem, ut ad illam solam sit unio immediate terminata, ad corpus vero solum mediate, quatenus animæ unitum est, sed hoc sensu tam corpus, quam anima, immediate assumpta sunt. Hæc conclusio est omnino certa, quamquam Gabr. in 3. dist. 1. q. 2. art. 3. dub. 2. probabile existimet contrarium, quia probabile putat, nullam naturam materialem posse Verbo immediate uniri. Item dist. 2. q. unica art. 2. neque improbabile hoc iudicat Almai. dist. 1. q. 2. art. 2. & dist. 2. q. 2. licet simpliciter iudicet probabilius contrarium. Dico tamen omnibus aliis Theologis, esse omnino certum, & erroneam, contra illud: *Verbum caro factum est*, & illud, *in quo habitat omnis plenitudo divinitatis corporaliter*, ac denique contra illa omnia, quibus supra probavimus Verbum non tantum assumptisse animam, sed etiam corpus, ex quibus probatum est assumptisse proxime, & immediate sanguinem: inde enim constat potuisse immediate assumere partem materialem, & a fortiori potius sumptisse hoc modo corpus, quod informatur anima, quam sanguinem. Confirmatur primo, quia alias corpus Christi haberet suam partialem substantiam creatam, & Verbum non terminasset humanitatem, sed animam solam. Et confirmatur secundo, quia in triduo non potuisset corpus manere unitum Verbo. Respondet Gabr. dist. 1. q. 2. art. 2. ad 8. mansisse unitum, non per unionem sibi inhærentem, sed per gratiam unionis existentem in anima. Sed falsissimum hoc est, quia hoc est dicere re ipsa non mansisse unitum, sed aliqua fortasse denominatione extrinseca ita denominari: nam vel ipsum corpus habebat intrinsecam, & creatam substantiam, & ita vere non erat hypostaticè unitum; vel non habebat, & tunc necesse est, ut haberet in se modum unionis ad Verbum, & ut Verbum immediate, & per se suppleret ejus substantiam. Sed arguit, nam sequitur, corpus non dici assumptum mediante anima. Almain. supra concedit, sed immerito, quia licet illa locutio non verificetur de hoc medio, potest alio sensu verificari, ut dicitur.

Dico tertio: Unio Verbi ad animam non fuit medium ad assumendam carnem, tanquam via ad illam, nec quia ex illa necessario consecuta sit carnis assumptio. Hæc conclusio constat ex dictis sectione præcedenti, quia ordine executionis non est simpliciter prius natura assumpta anima, quam caro: at vero, quod est medium hoc modo, necesse est, ut saltem prius natura assumatur. Unde si inter corpus, & animam est aliqua ratio huius medii, potius corpus dici potest medium ad assumendam animam, non quia ad illius unionem necessario sequatur unio animæ, saltem physice, & proprie loquendo; (nulla enim ratio talis consecutionis fingi potest); sed quia hæc unio ordine naturæ per assumptionem carnis quasi inchoata est, & ad assumptionem animæ terminata.

Dico quarto. Corpus dicitur assumi mediante anima, quia corpus non fuit assumptibile, nisi ratione animæ, & in ordine ad animam: non quia necesse sit, ut actualis unio

ad animam ordine executionis præcesserit, nec quia ipsa anima ordine etiam executionis prius natura assumpta fuerit, sed ex eo, quod caro assumpta sit propter habitudinem ad animam, & ratione illius, ita exponit D. Th. art. 1. & infra q. 50. art. 2. ad 2. Richard. Bonavent. & alij dist. 2. & Alenf. 3. p. q. 4. memb. 5. & ex dictis satis patet, hic enim sensus & in re ipsa verus est, & sufficiens ad veritatem, & proprietatem illius locutionis: in nullo autem alio sensu potest commode explicari, aut vere intelligi. Quod etiam patet ex alia simili locutione, animam esse assumptam medio spiritu, aut mente: sensus enim ejus similis est, animam scilicet, in quantum vivificantem corpus, vel, ut est principium sentiendi, fuisse assumptam per gradum intellectualem, quatenus ratione illius tota anima assumptibilis fuit; ubi non oportet, ut illa locutio vera sit, fingere aut realem distinctionem inter animam, & mentem, aut talem ordinem assumptionis, ut prius natura sit assumpta mens, quam anima: hæc enim necessaria non sunt, illi enim gradus solum ratione formali Metaphysica distinguuntur, assumptio vere, quæ est actio Physica, per se primo versatur circa ipsam animam, ut in re unicam essentiam Physicam habet, & ideo non potuit in aliquo signo naturæ assumi, ut rationalis est, quin secundum totam suam essentiam assumeretur: hæc ergo ratio medii tantum est, ut formalis ratio, quæ constituit rem assumptibilem, non ut res, quæ prius natura assumatur. Advertendum vero est, cum sæpe dicimus per huiusmodi medium rem assumptibilem constitui, intelligendum potissimum esse ex quadam decentia, seu congruitate, si absolute intelligatur de unione hypostatica: si vero sit sermo de Incarnatione ad nostram redemptionem ordinata, in ordine ad talem finem potest interdum esse medium necessarium, ut notavimus circa solutionem ad secundum art. 1. D. Thomæ.

Sed objicies, ex hac explicatione sequi, non animam, sed habitudinem seu ordinem materiæ ad animam fuisse medium ad assumendam carnem. Consequens est falsum: primo, quia est contra intentionem Patrum, qui ideo utuntur illa locutione, asserentes, animam esse medium, ut contra Apollinarem declarent, Verbum non fuisse loco animæ: at, si ipsa anima realiter & substantialiter non esset medium, sed ordo ad animam, posset materia habere ordinem, & dispositionem ad animam, & non habere animam, sed Verbum loco animæ. Secundo, quia alias sequitur ex vi illius locutionis, non esse necessarium, materiam actu informari anima eodem instanti, quo assumpta est, quia antea habebat ordinem ad animam, ad quam disponebatur, aut saltem ita fieri poterat: consequens autem est contra mentem sanctorum, qui illo loquendi modo declarare intendunt, Verbum non assumptisse carnem nisi actu animatam anima rationali. Tertio, quia vel illa habitudo ad animam est accidentaliter, vel substantialiter. Primum dici non potest, quia nullum accidens fuit medium ad assumendam substantiam, ut infra dicam. Si vero dicatur secundum: aut illa tantum est radicalis & potentialis habitudo ad formam, & hæc non, quia est æque indifferens ad animam & alias formas; vel est aliqua specialis habitudo ad animam, & hæc esse non potest nisi actualis unionis cum ipsa: & hoc modo ipsamet anima, ut informans materiam, erit medium. Respondetur, has objectiones non impugnare assertionem positam, quæ posita est eisdem fere verbis, quibus D. Th. art. 4. usus est, dicens: *Caro humana assumptibilis est a Verbo, secundum ordinem, quem habet ad animam rationalem sicut ad propriam formam*. Et ratione huius ordinis dixerat art. 1. carnem assumi mediante anima. Hic autem ordo, ut ibi declaravi, non est remotus, seu aptitudinalis (ut ita dicam), sed proximus seu actualis. Itaque ordo ad animam ut ad formam propriam & actu informantem reddit materiam aptam, ut Verbo uniatur. Sicut autem in lib. 2. de Anima dicitur, corpus organicum posse dupliciter sumi, videlicet, vel ut includit animam informantem, vel ut præcise dicit materiam ultimo dispositam ad recipiendam animam: ita certe utroque modo hic sumi potest caro humana. Et quidem D. Th. art. 5. in corp. videtur priori modo loqui, dum, prædictum ordinem declarans, ait. *Hunc autem ordinem non habet caro, antequam anima rationalis ei adveniat: quia simul, dum aliqua materia sit propria alicujus forme, recipit illam formam*. Distinguit ergo duo, materiam scilicet fieri propriam alicujus forme, & reci-

quoniam  
ratione  
animæ  
fuit as-  
sumptibi-  
le.

Quo sensu  
anima as-  
sumpta  
medio  
spirita  
seu mente.

Instantia.

Solutio.

Corpus  
assumptum  
mediante  
anima

reci-



recipere formam, quæ licet simul fiant, ordine tamen causalitatis & naturæ distinguuntur: hæc enim forma in hanc materiam introducit, quia propria ejus effecta est per dispositiones. Cum ergo D. Th. ait, carnem esse assumptam secundum ordinem, quem habet ad animam ut ad propriam formam, videtur de illo ordine loqui, qui secundum naturam antecedit receptionem animæ, quamvis simul tempore fiat. Et hoc posset esse satis, ut anima dicatur medium ad assumendam carnem: quia hoc medium non est medium quod, sed quo, ut ex dictis patet, & D. Th. art. 1. Scotus & omnes exponunt: ordo autem ille materiæ ad animam non est per se ratio assumendi materiam, sed ipsa anima secundum se: ipsa ergo anima est ratio assumendi talem materiam, & hoc est esse medium quo. Sicut quando amatur medium propter finem, licet in medio tantum sit ordo ad finem, ut ametur, tamen ipse finis secundum se est simpliciter ratio amandi medium. Et si femina aliqua ducitur in matrimonium (imitando exemplum, quo D. Th. utitur dicto art. 1. ad 3.) propter divitias, non quas ante matrimonium habet, sed quas habitura est post matrimonium, vel in ipso matrimonio, tunc divitiæ ipsæ sunt ratio contrahendi, licet tantum antecedit ordo aliquis vel jus ad ipsas: sic ergo in præsentia. Nihilominus idem D. Th. eodem art. 4. ad 3. indicat hunc ordinem esse intelligendum actualis esse informationis, ita ut, cum dicitur caro assumpta, quia humana, vel quia respicit animam ut formam propriam, intelligatur includere intrinsece ipsam animam, & actuale conjunctionem cum illa: hac enim de causa videtur D. Th. dixisse dicta solut. ad 4. carnem ex unione ad animam habere, quod sit unibilis Verbo, & ideo prius secundum intellectum carnem uniri animæ, quam Verbo. Et hunc præcipue sensum intendunt argumenta facta, qui est etiam verus, & admittendus: nam prior, licet non satis impugnetur, & verum etiam sensum habere possit, tamen solus non sufficit, quia, juxta superius dicta, secundum ordinem executionis prius ratione & natura Verbum est unitum materiæ, quam illa sit effecta & disposita propriis dispositionibus animæ rationalis, quia, ut sic disponatur, supponitur existens, & subsistens. Et tamen non obstante hac prioritate, dicitur assumpta, ut propria effecta animæ rationalis per dispositiones: ergo eadem ratione dici poterit assumi per ipsam animam ut actu unitam, tanquam per medium quo. Duobus ergo modis hoc verificari potest juxta doctrinam datam. Primo, quia ad hoc satis est, ut unio carnis ad animam sit prior in aliquo genere causæ, licet absolute in alio genere sit prior natura unio carnis seu materiæ ad Verbum. Secundo, quia satis est, quod in eodem instanti caro uniatur animæ, licet secundum ordinem naturæ non consideretur, ut jam unita, sed ut in eodem instanti temporis unienda: nam, cum hoc medium sit tantum quo, & ut ratio movens assumentem ad assumptionem, potest facile intelligi movere ut præsens in eodem instante, & futurum secundum ordinem naturæ, ita ut dicatur, hoc instante assumptam esse carnem, quia in eodem informanda erat anima rationali, & ut tali anima informaretur. Et per hæc satis responsum est omnibus objectionibus.

**Objeçio.** Sed dicit aliquis: hoc sensu etiam dici posset, animam assumptam esse medio corpore, nam etiam corpus fuit aliquo modo ratio assumendi animam, assumpta enim est, ut illud informet, & per illud patiat, & satisfaciatur. Unde supra diximus, ipsam animæ assumptionem factam esse propter unionem ad corpus, & propterea hanc esse quodammodo intentionem priorem. Respondent aliqui, ita posse hoc totum concedi in genere causæ materialis: tamen quia genus causæ formalis simpliciter perfectius est, ideo absolute potius dici, corpus sumi mediante anima, quam e contrario. Et potest hoc facile sustineri, quamquam modus loquendi non admodum mihi probeatur: quia licet materia sit aliquo modo causa formæ in genere causæ materialis, tamen non est propria ratio, propter quam est forma, quia hoc magis pertinet ad rationem causæ finalis, quam materialis, & forma non est proprie propter materiam, sed propter compositum, ratione cujus unitur materiæ: materia vero & est propter compositum, & propter ipsam formam, quæ perfectior est. Melius ergo dicitur, animam esse assumptam ratione humanitatis, quam ratione corporis.

*Utrum tota humanitas sit prius natura assumpta, quam partes ejus, & consequenter, an assumpta sit mediantibus illis, vel e contrario.*

**I**N hac re est prima sententia Durandi in 3. dist. 2. q. 2. qui negat esse realem ordinem naturæ inter assumptionem totius, & partium: & eodem modo loquitur de partibus inter se comparatis, de quibus jam diximus; hanc vero opinionem Durandi hic tractandam remisimus. Fundamentum ejus est, ut assumptio fuit unica, unde ex parte ejus nullus est ordo: partes vero non sunt assumptæ, nisi ut conjunctæ, & unitæ in tota natura, quæ per se primo assumpta est, & ut sic non distinguuntur ab illa, & ideo neque hac ratione potest ex parte rei assumptæ esse ordo, cum ordo realis non sit, nisi inter distincta. Addit vero, secundum rationem posse considerari quendam ordinem, quo humanitas dicitur prius assumpta, & esse medium ad assumptionem partium, quatenus ipsa perfectior est, & fructum incarnationis perfectius participat, & eodem modo loquitur de anima cum corpore comparata.

Secunda opinio est, humanitatem fuisse assumptam prius natura simpliciter, & absolute, quam corpus, vel animam. Ita Scot. dist. 2. q. 2. & Palud. dist. 2. q. 2. Fundamentum est, quia unio personalis per se primo facta est in humanitate, & ratione illius in partibus, nam per se primo convenit humanitati, ut subsistat, partibus vero ratione illius; ergo quod per se primo assumitur, est humanitas. Et confirmatur. Nam Verbum primario factum est homo: ergo primo assumpsit humanitatem; illa est ergo prius natura assumpta, quam partes. Unde inferit hæc sententia, partes non posse dici medium ut quod, seu tanquam rem prius natura assumptam, quam totum: posse autem dici medium quo, seu rationem constituentem totam naturam assumptibilem. Hæc duæ opiniones videntur in hoc convenire, quod assumptionem hanc ad humanitatem unicam & indivisibilem constituere videntur: hac enim ratione existimant, per se primo esse terminatam ad humanitatem, & non ad partes ut ad modum quod. Sed, licet verum sit, hanc unionem esse aliquomodo unam, ut fatetur etiam hic Cajetanus art. 5. & constat, quia tam humanitas, quam omnes partes ejus assumptæ sunt per modum unius, tamen in primis illa unio non potest esse ita una, ut sit indivisibilis, sed composita saltem ex partialibus modis unionis corporis & animæ, nam in corpore ille modus est materialis, in anima vero spiritualis; nam, cum modus sit aliquo modo idem realiter cum re, quam modificat, illi accommodatur, & proportionatur, & ita ex parte corporis recipit extensionem, diminutionem, & augmentum, non vero ex parte animæ: necesse est ergo illas uniones esse saltem partialiter distinctas: igitur tota unio non est una, ut indivisibilis, sed ut composita. Rursus nec eo sensu potest dici indivisibilis, quia licet composita sit, nihilominus est indissolubilis, ut non possint partiales uniones esse nisi in tota, ad quem modum dicitur cælum indivisibile. Constat enim hoc esse falsum ex Christi passione, in qua, dissoluta unione totali, manserunt uniones partiales in anima & carne, ut supra declaratum est. Item ostensum est, animam prius natura fuisse unitam independentem ab unione cum corpore, & e converso: ergo fuit unita unione partiali & dissolubili ab unione animæ cum corpore: ergo sunt etiam illæ partiales uniones dissolubiles & separabiles inter se: non enim possunt partes naturæ esse disjunctæ, tum substantialiter, tum etiam localiter, ut quando una erat in inferno, & altera in sepulcro, & quod tunc uniones hypostaticæ earum essent conjunctæ & componerent unam. Denique integra subsistentia hominis, licet una sit, ita tamen est composita ex partialibus subsistentiis animæ & corporis, ut dissoluta unione earum inter se, permaneat partialis subsistentia in anima, & similiter in materia: ergo idem erit in partialibus unionibus ad hypostasim Verbi: nam, ut supra dixi, in hac unione servatur idem ordo, eademque proportio, quæ in propria subsistentia servaretur. Si ergo Durandus & Scotus intelligant, unionem hanc esse unam indivisibiliter aliquo ex prædictis modis, eorum sententia satis improbatæ est. Si vero hoc non intendant, sed tantum assumptionem esse unam per compositionem, nullum inde suæ sententiæ fundamentum.



damentum fumere possunt, ut ex dicendis patebit.

Tertia sententia esse potest, animam quidem esse prius natura assumptam, quam humanitatem, quia prius existit, quam tota humanitas: carnem vero esse posterius assumptam, quia solum existit per animam, atque supponit totam humanitatem constitutam, priusquam assumatur; ergo supponit etiam assumptionem totius humanitatis, & per illam assumitur, seu potius coassumitur. Supposita tamen distinctione supra posita de ordine intentionis, & executionis, advertendum ulterius est partes humanitatis, animam scilicet, & corpus, dupliciter intelligi posse Verbo unitas esse. Primo secundum se, seu secundum suas entitates, quatenus existere possunt, etiam si inter se unitæ non sint, quomodo manserunt unitæ in triduo: quem modum unionis habuerunt a principio, & toto tempore, quo fuerunt inter se unitæ. Secundo modo intelligi possunt unitæ Verbo, non solum secundum se, sed etiam ut inter se unitæ sunt: hic enim modus unionis aliquid addit priori, ut ex dicendis constabit.

Dico jam primo: Ordine intentionis tota humanitas fuit prius natura assumpta, quam partes, & eodem sensu potest dici medium, seu ratio partes assumendi. Ita D. Th. art. 5. & perspicuum est, quodque argumenta Scoti satis etiam convincunt: in hoc enim mysterio per se primo intentum fuit, ut Verbum fieret homo; ergo totius humanitatis assumptio per se primo fuit intenta, partes vero ideo assumptæ sunt, quia ad componendam humanitatem sunt institutæ.

Dico secundo: Ordine executionis, tam anima, quam caro secundum se, sunt prius natura assumptæ, quam tota humanitas: & hoc sensu dici possunt medium ad assumendam humanitatem. Prior pars est aperta sententia D. Th. art. 5. ad 1. quam Cajetan. ibi, & art. 1. defendit: & Richard. in 3. art. 2. q. 1. & Gabriel q. 1. art. 2. Altifiod. 3. lib. Summæ, tract. 1. c. 1. q. 2. & suppositis, quæ diximus in sect. 1. & 2. sequitur evidenter, quia anima, & caro prius natura sumptæ sunt, quam fuerint inter se unitæ; ergo sunt prius natura assumptæ, quam sit constituta humanitas, constituitur enim per ipsarum unionem inter se: ergo a fortiori sunt prius natura assumptæ secundum se, quam ipsa humanitas, quia necesse est humanitatem prius constitui, quam assumi. Deinde de anima id peculiariter probari potest, quia in homine prius natura existit, & subsistit, quam tota humanitas, & qui hoc principium non admittunt, vix possunt hanc sententiam defendere: & idem est suo modo, & servata proportionem, de carne seu materia. Posterior pars conclusionis constat, quia ille modus loquendi, Humanitas est assumpta mediis partibus, seu (quod idem est) per animam, & carnem, reperitur apud August. locis præcedenti sectione citatis, unde immerito a Durand. supra negatur, & quamvis in sensu a Scoto explicato verus sit, quia hæc partes, quatenus constituunt humanitatem, possunt dici ratio, seu medium quo assumptionis illius: tamen etiam hoc sensu vere dicuntur medium tertio modo supra explicato, scilicet quia earum assumptio fuit quasi via ad assumendam totam humanitatem, in eodem instanti temporis, posterius tamen natura.

Dico tertio: Per hanc unionem, seu assumptionem non solum assumptæ sunt partes secundum se, sed etiam ut inter se unitæ, seu assumpta etiam est tota humanitas ut constans ex his partibus inter se unitis. Ad intelligendam, & probandam hanc conclusionem, advertendum est, duobus modis intelligi posse, assumptam esse totam humanitatem mediis partibus; primo, ut prius natura intelligantur assumptæ partes secundum se, ut explicuimus, deinde vero uniantur inter se illæ partes ad unam naturam componendam, & ex hoc præcise intelligantur, quasi per accidens conjungi partiales uniones animæ, & carnis ad Verbum, & tota humanitas ab illis ut sic denominetur assumpta, nullo intellectu alio modo unionis ad Verbum, quem dicendi modum aperte sequitur Altifiod. supra, & ex his, quæ ordine temporis acciderunt, potest ita explicari, quando enim in morte Christi anima a corpore separata fuit, nulla unio ad Verbum videtur immutata, sed facta separatione partium inter se, mansit unio ad Verbum in ipsis partibus: e contrario vero, quando in resurrectione anima & corpus iterum conjuncta sunt, non videtur facta nova unio hypostatice, nec novus modus illius, sed tantum unio animæ & corporis, per quam

factum est, ut partiales uniones animæ, & corporis simul sumptæ quasi componerent unam unionem hypostatice, per quam tota humanitas dicatur assumpta. Exemplis etiam a natura sumptis id potest intelligi: in creata enim persona humana subsistentia totius naturæ nihil aliud esse videtur, quam partiales subsistentiæ animæ & corporis simul sumptæ, quæ non videntur aliter uniri, nisi per ipsam unionem animæ, & corporis. Et similiter in toto integrali subsistentia totius non est aliud, quam subsistentiæ partium inter se unitarum: unde cum continuum dividitur, eadem subsistentia manet in partibus, divisa tamen, & quæ antea erat pars, fit totum, solum quia natura, quam terminat, est ab aliis distincta, & in se propriis terminis clausa. Denique hic modus potest ratione suaderi, quia illæ uniones partium inter se conjunctarum sufficiunt ad unionem totius; ergo superfluum est fingere aliam unionem totius, nam per hanc iterum deberent assumi partes: cum enim totum non distinguatur a partibus simul sumptis, fieri non potest, ut partes assumantur non assumpto toto, neque e converso. Nec vero dici potest, illas partiales uniones hypostatice inter se uniri per aliam unionem hypostatice, tum quia hoc modo posset in infinitum procedi, si unio indigeret nova unione: tum etiam quia unio hypostatice non unitur hypostatice, sed tantum est ratio, qua aliud unitur.

Secundo modo intelligi potest, ita assumptum esse totam humanitatem mediis suis partibus, ut præter partiales uniones ipsarum partium secundum se, intelligatur assumptio terminari ad totam humanitatem, quatenus natura quædam est integra, includens partes, non utcumque, sed ut unitas inter se, & illam ut sic uniat Verbo speciali modo unionis, constante ex unionibus ipsarum partium, & aliquid præter illas addens, quod ad rationem integræ unionis hypostatice vere pertineat, scilicet proprium ac per se vinculum partialium unionum inter se. Hic dicendi modus quibusdam novus, & parum probabilis visus est. Sed certe novus non est: illum enim satis indicat Gab. in 3. dist. 1. q. 2. art. 3. dub. 2. ubi quærit, an sit una unio, vel plures; & omissa priori responsione, in posteriori ait, juxta opinionem asserentem, quamcumque naturam substantialem esse assumptibilem, tot esse uniones realiter distinctas, quot sunt unita: ponit vero exempla in unionibus animæ & carnis: non meminit autem unionis totius humanitatis, nec tamen illam excludit. Supponendo autem humanitatem distingui a partibus, & a collectione earum, idem necessario censeret Gabriel esse dicendum de unione totali. Idem plane sentit Cajetan. hic art. 5. ubi respondens Scoto ait: *Nec somniamus, Verbum dici hominem a partibus assumptis, & non totaliter terminata assumptione*: & subdit, assumptionem tantum esse unam, progredientem a partibus ad totum. Et respondens Durando ait, assumptionem esse unam, & unius compositi, non solum prout in se est unum, sed etiam secundum suas partes: sentit ergo non tantum ibi esse uniones partiales, sed etiam totalem terminatam ad totam humanitatem, ut totum quoddam est. In eadem sententia videtur esse Capreolus in 3. d. 2. q. unica concl. 2. dicens, filium Dei non solum assumpsisse animam & carnem, sed etiam tertiam entitatem resultantem; & in solut. ad 3. cont. illam concl. id plane declarat, citans optimum locum Athanasii apud D. Th. infra q. 50. art. 3. ad 2. Expressius hoc docuit Capreo. in 2. d. 1. q. 1. a. 3. ad argumenta secundo loco cont. 1. concl. inducta §. Ad aliud, quod tangitur in illa confirmat. ubi ex sua & Hervæi sententia ait, quod, licet humanitas uniatur Verbo una unione principali, quæ fundatur in tota natura ut sic, tamen præter illam est propria unio materiæ, quæ mansit in morte: & idem a fortiori diceret de anima. Non est itaque novus hic dicendi modus. Deinde existimo, non esse parum probabilem, imo multo probabiliorem alio.

Primo, quia aliàs non fuisset unita hypostatice tota humanitas, ut est una natura: tum quia hæc humanitas distinguitur in re ipsa ab entitatibus suarum partium, collective etiam sumptis, ut per se constat, unde in triduo, utraque pars mansit unita Verbo, & non mansit unita humanitas: tum etiam, quia ex vi unionis animæ & corporis secundum se non manet unita humanitas ut sic, nam potest manere tota illa unio, etiam si huma-

nitas

Ordine executionis partes secundum se totius humanitati præsumptæ.

Dupliciter partes assumptæ sunt, & secundum se, & prout unitæ.



**Obiectio.** Dicitur fortasse, si humanitas existat in rerum natura, necessario manere unitam stante unione partium, & hoc satis esse. Sed contra, nam licet maneat unita mediate, seu remote, ratione partium, non tamen proxime, & secundum se, prout in re ipsa est quid distinctum a partibus. Nec refert, quod humanitas solum addit præter entitates partium, unionem earum inter se: quia hæc unio aliquid substantiale est, pertinens ad constitutionem totius humanæ naturæ; assumpta est autem proxime, & immediate tota humana natura, & concomitanter quidquid pertinet ad substantiam ejus; ergo non solum est facta unio in anima, & corpore secundum se, sed etiam in humanitate ipsa, ut sic, & in partibus ejus, ut unitis.

**Responsio.** Et confirmatur primo, quia in assumptione naturæ constantis ex forma omnino materiali, ut v. g. in unione ad sanguinem, necesse est Verbum uniri formæ non secundum se, quia non est forma subsistens, sed ut unitæ materiæ, & cum ea unam naturam integram componentem: ergo quamvis in anima rationali, quia est forma subsistens, locum habeat unio ad ipsam secundum se, non tamen est illi negandus ille modus unionis, quem potest habere forma, ut conjuncta materiæ, cum non sit minus propriæ forma ipsa, quam reliquæ, nec sit tota humanitas, ut sic, minus proxime ac immediate assumpta, quam esset quælibet alia natura. Denique confirmatur, quia in proprio supposito humano, sicut natura integra est una, ita habet unam subsistentiam, sive simplicem, sive compositam ex partialibus subsistentiis: ita tamen, ut ipsa vere sit una saltem per compositionem; ergo in præsentī etiam mysterio, subsistentia Verbi fuit proxime unita toti naturæ, ut sic, unde fit consequens, in illa etiam natura esse specialem modum unionis, veluti integrum & completum, conjungentem in se incompletas uniones partium. Neque inde sequitur processus in infinitum, quia licet unio inter duo extrema non conjungatur illis per illam unionem, quia est modus illorum, & quia inde sequeretur processus in infinitum: tamen partiales uniones bene possunt inter se uniri, addendo modum unionis, quia una non est modus alterius, sed sunt quasi distincta extrema alterius unionis, & ideo non proceditur in infinitum. Ex his ergo conclusio posita satis explicata est, satisque probata.

Et ex partiales uniones uniantur, non sequitur processus in infinitum.

Hypostatica unio completa, unica est.

Neque contra conclusionem urgent, quæ ad explicandum priorem modum asserabamus: nam omnia exempla ibi adducta potius credimus posse contrarium ostendere: non videtur enim verisimile, in Christi resurrectione non aliter fuisse unitam totam humanitatem & partes ejus Verbo, quam in triduo fuerint. Et idem est in aliis. Ad rationem vero jam responsum est, totam naturam in re ipsa distingui aliquo modo a partibus, & ideo speciali modo unionis indigere; declaratum est etiam, quomodo partiales uniones uniri inter se possint sine processu in infinitum. Nec vero dicimus, unam unionem uniri alteri hypostatice, sed inter se conjungi ad componendam unam unionem hypostaticam totius naturæ ad Verbum. Quocirca (quod supra etiam tactum est) quamvis ad explicandum ordinem naturæ servatum in hac unione distinguamus uniones partium, & totius naturæ, non tamen propterea dicendum est, esse plures uniones, sed unam perfectam, & completam, quæ ordine executionis & naturæ ab incompletis inchoatur, & tandem complete consummatur, & perficitur; necesse est enim unionem accommodari naturæ unitæ, unde sicut natura est una, apta ad complete subsistendum, constans tamen ex partibus, quæ incomplete subsistunt, ita unio in illa facta est una, proportionem servata.

Sed urgeri adhuc potest ratio, quæ ex Scoto, loco citato, desumitur, quia vel per hanc assumptionem seu unionem totius humanitatis assumuntur etiam partes, scilicet, anima & corpus, vel non. Si primum dicatur, sequitur, aut has partes bis assumi & terminari a Verbo, quod est superfluum; vel alteram ex his unionibus confictam esse. Unde cum in superioribus ostensum sit, necessariam esse unionem singularum partium per se, alia totalis non erit necessaria præter aggregatum illarum partialium unionum, quæ in corpore & anima proxime secundum se fundantur. Si vero dicatur secundum, in primis impossibile videtur intelligere, totum aliquod uniri alteri per aliquam unionem, si per eandem non uniantur partes

ejus, cum totum vel a partibus non distinguatur, vel eas necessario includat: aliàs potuisset Deus efficere unionem hanc totalem cum humana natura, non assumendo partes ejus, quod est plane impossibile, & mente concipi non potest. Secundo sequitur, per hanc unionem, quam totalem appellamus, solum assumi unionem illam naturæ humanæ, quæ est inter animam & corpus: nam præter partes nihil superest in tota humanitate, nisi hæc unio; consequens est plane falsum: ergo. Probatur minor, quia unio illa, cum tantum sit quidam substantialis modus, non est capax hypostaticæ unionis: nam hæc fit ad subsistendum, unde tantum fieri potest in substantiali natura, quæ apta est ad subsistendum. Qua ratione in superioribus dicebamus, accidentia non posse hypostatice uniri: eadem autem est ratio de hoc modo substantiali, quia ille non est natura substantialis, sed modum ejus, & quasi adhærens illi: unde non est capax subsistentiæ, & consequenter nec hypostaticæ unionis. Et confirmatur primo, quia in proprio supposito humano illa unio materiæ & formæ non subsistit, sed solum existit in natura subsistente: nam cum sit quidam modus, non requirit aliam subsistentiam, nec fingi facile potest, quomodo per novam subsistentiam terminetur: ergo in Christi humanitate illa unio animæ & corporis per se non unitur Verbo, quia unio succedit loco propriæ subsistentiæ; & ideo solum unitur, quod per propriam subsistentiam terminatur. Confirmatur secundo, quia aliàs etiam unio partium integralium corporis inter se haberet propriam unionem ad Verbum, quod videtur ridiculum, aliàs infinitæ multiplicarentur hypostaticæ uniones, sicut infinitæ sunt continuationes, seu uniones partium integralium corporis. Unde tandem confirmatur, nam, si unio non est assumptibilis, ut probatum est, & anima & corpus sufficienter assumuntur per suas partiales uniones, per illas assumitur sufficienter quicquid assumptibile est in humanitate, nam in illa nihil est substantiale præter animam & corpus & unionem: ergo per illas duas partiales uniones sufficienter assumitur humanitas; quia tunc sufficienter humanitas assumitur, quando, quicquid in ea assumptibile est, assumitur: ergo supervacanea est omnis alia totalis unio.

Respondetur, difficultatem hanc procedere, ac si diceremus, hanc unionem totalem totius humanitatis esse simplicem ac distinctam prorsus a partialibus unionibus animæ & corporis, quod est plane falsum, ut sufficienter convincitur primo argumento facto. Non ergo hoc dicimus, neque hoc modo cogitanda est hæc unio integra totius humanitatis, sed dicimus, solas duas uniones partiales animæ & corporis, vel aggregatum earum ut sic, non satis esse, ut tota humanitas, quatenus est quædam integra natura substantialis, sit Verbo unita hypostatice: hoc enim vincit ratio supra facta, quam etiam Scotus terigit, scilicet, quod per duas uniones partiales terminatas ad corpus & animam secundum se non est unita humanitas ut sic, nec Verbum est homo: potest enim utraque illa partialis unio conservari, quin Verbum sit homo, ut patet in triduo: est ergo necessaria aliqua unio totalis, qua per se primo assumatur humanitas, & ita illi conveniat, ut partibus disjunctis convenire non possit: atque hac ratione assumat Verbum non solum partes, sed etiam totum; nec solum partes, verbi gratia, animam secundum se, sed etiam ut informantem corpus, & corpus, ut vivificatum ab anima. Hæc autem unio totalis essentialiter includit uniones partiales animæ & corporis secundum se, solumque addit uniones earum inter se ad componendam unam subsistentiam totalem: ita ut, sicut humanitas tota essentialiter includit animam & corpus, & addit unionem eorum inter se, ita unio totius humanitatis, ut integra unio est, includit essentialiter partiales uniones animæ & corporis, & addit propriam unionem earum inter se ad componendam unam totalem unionem: ita, ut duæ illæ partiales uniones non dicantur inter se uniri solum per accidens & denominatione extrinseca: quia partes naturæ, quas afficiunt, uniantur inter se: hæc enim revera non est unio, nec compositio unius integræ unionis, sicut non uniantur inter se accidentia corporis & animæ, eo quod anima & corpus inter se uniantur: nec illa sola denominatio extrinseca sufficeret, ut tota humanitas ut sic maneat assumpta, ut argumenta facta probant.



bant. Uniuntur ergo illæ duæ hypostaticæ uniones per se ac proprie ad componendam unam, quæ tota humanitas per se primo uniatur: hoc enim modo illas partiales uniones hypostaticas inter se uniri, nihil repugnat; & alioqui necessarium est ad propriam & perfectam unionem totius humanitatis. Ex hac autem doctrina facile solvitur argumentum factum; dicendum igitur enim per hanc unionem totalem secundum totum, quod includit, uniri totam humanitatem, & consequenter animam & corpus: quia impossibile est uniri totum non unitis partibus, ut recte in argumento dicitur: quia hæc unio totalis includit uniones singularum partium; & ita non sequitur, easdem partes bis assumi, quia illæ, si secundum se considerentur, non assumuntur per hanc unionem totalem, nisi quatenus includit partiales, ex quibus componitur; si autem considerentur ut unitæ inter se, sic assumuntur, vel potius coassumuntur cum tota natura per unionem totalem, seu per partiales inter se unitas, & ita nihil est, quod bis assumatur.

Quod autem tota humanitas, ut est quædam natura integra & totalis, assumptibilis sit propria & adæquata assumptione, certissimum est, quia est natura substantialis, & maxime apta ad subsistendum. Denique illa est, quæ maxime, & per se primo assumpta est a Verbo: non est autem assumpta per uniones partiales, nec per solum aggregatum earum, ut ostensum est; ergo per integram & totalem assumptionem. Hinc vero non sequitur, quod in secunda objectione inferebatur, unionem partium humanitatis assumi proprie, & ut quod, quia licet humanitas non addat præter animam & corpus, nisi unionem eorum inter se: nihilominus non est ipsa unio, sed quædam natura integra ex partibus unitis resultans. Igitur ad summum inferri potest, unionem coassumi cum tota natura, aut assumi ut quo, quia est veluti ratio & mediū necessarium, ut tota natura assumptibilis sit, & aliquo modo concurrat ad illam substantialiter complendam: non vero est ipsa unio per se considerata, & præcise sumpta unibilis, & ideo non dicitur nec est assumptibilis ut quod. Et hoc posterius tantum probat ratio ibi facta: per eam vero non excluditur illud prius, quia non repugnat esse modum substantialem, & esse coassumptibilem prædicto modo. Nec est quoad hoc similis ratio de accidentibus, nam hæc omnino sunt extra rationem naturæ substantialis. Accommodatius exemplum esset de substantiali forma materiali, quæ secundum se proprie non est subsistens, & coassumi potest cum tota natura, ut illam constituit, informando materiam, quo modo assumpta est forma sanguinis, & tamen non potest dici proprie assumpta ut quod, cum non subsistat ut quod, sed dicitur assumpta ut quo, & coassumpta cum tota natura. Atque eodem modo respondendum est, ad primam confirmationem, nam in proprio supposito unio formæ ad materiam non subsistit ut quod, nec terminatur propria partiali subsistentia, sed tota natura, prout ex materia & forma ac illa unione resultat, est, quæ terminatur totali subsistentia, & quæ subsistit per illam; unio vero est medium, seu conditio necessaria ad hanc terminationem, & consubsistere in toto dici potest, sicut forma materialis, vel e contrario (& fortasse proprius) totum compositum dicitur subsistere in omnibus, & ex omnibus his. Quo circa potius hæc ratio potest in contrarium retorqueri, nam in propria & creata persona humana, subsistentiæ partiales animæ & corporis non terminant totam humanitatem, nisi ut unitæ inter se, & componentes unam subsistentiam, ut sic integra subsistentia correspondeat integræ naturæ, & subsistentiæ partiales partibus naturæ, & unio partialium subsistentiarum unioni partium naturæ, ut latius in Metaphysica ostensum est. Simili ergo proportionem intelligendum est accidere in unione hypostatica, quæ propriam subsistentiam impedit, & vicem ejus supplevit, ut sæpe dixi. Qualis autem sit hæc unio inter subsistentias partiales, & quomodo rationi subsistentiæ non repugnet, in Metaphysica explicatur. Ad confirmationem respondetur, eodem modo proportionali loquendum esse de continuatione substantiali partium materiæ: & hoc potius exemplo confirmari, quæ hæcenus diximus. Nam certum est, unionem corporis Christi ad Verbum extensam esse sicut corpus ipsum, nam unio unius partis non est unio alterius, & cum pars addebatur illi corpori, ex parte ejus adde-

batur pars unionis: est ergo illa unio extensa: ergo necessario debet esse continua, quia non potest esse divisa in omnem suam partem: sicut ergo in partibus corporis datur propria continuativa, ita etiam in ipsa unione: pars ergo unionis correspondet parti corporis, & continuativum unionis continuativo corporis. At vero sicut unio tota dicitur habitudinem transcendentalem inter humanam naturam & Verbum, & est quasi nexus amborum: ita etiam unio totius corporis dicitur proportionalem habitudinem inter totum corpus & Verbum, & pars illius corporis dicitur habitudinem talis partis corporis ad Verbum, & continuativum ejusdem unionis; dicit etiam habitudinem talis continuativi corporis ad idem Verbum, quia & tota unio, & omne id, ex quo componitur, dicit transcendentalem habitudinem ad eundem terminum, ut continuativa sint proportionata partibus, quæ continuantur, & omne id, quod est in humano corpore substantiali, & pertinet ad substantialem compositionem, & unitatem ejus, est immediate Verbo unitum, ut ex dictis qu. 5. constat. Neque ex hoc multiplicatur infinitæ hypostaticæ uniones, sed est una, quæ hoc ipso, quod materialis est, & extensa, in infinitum dividi potest, & in ea designari possunt infinitæ partes in potentia, & infinita continuativa correspondentia continuativis partibus corporis. De quibus tamen eodem modo loquendum est, quod de unione animæ & corporis, quod scilicet non proprie assumuntur, sed coassumuntur, &c. Ad ultimam confirmationem satis declaratum est, humanitatem, ut quædam natura integra est, esse maxime assumptibilem, & non sufficienter assumi per partiales uniones, sed per totalem ex illis compositam.

Dico quarto. Licet anima, & caro secundum se, prius natura fuerint assumptæ, tamen ut inter se unitæ, fuerunt assumptæ media humanitate, quæ per hanc unionem, ut perfectam & completam, fuit per se primo unita. Hæc conclusio facile constat ex dictis, & explicatur facile in resurrectione, in qua anima, & caro secundum se, præexistebant unitæ Verbo: cum primum vero conjunctæ sunt ad componendam unam naturam, tota illa natura est, quæ manet unita Verbo, & id, quod intelligitur addi, ut modus unionis hypostaticæ, immediate intelligitur addi toti naturæ ut sic, quia illa est, quæ in illo termino proxime unitur; ergo per illam uniuntur partes ut inter se copulatæ: quin potius hoc modo partes assumuntur, vel potius coassumuntur eadem unione cum toto, ita ut totum ipsum sit quasi medium, secum necessario afferens unionem partium sub hac ratione, adeo ut non possint partes sub hac ratione manere unitæ ad Verbum, nisi tota natura maneat unita, sicut supra in natura omnino materiali explicatum est. Neque contra hanc, vel alias conclusionem obstat fundamentum Durand. tum quia licet assumptio sit una, tamen non est omnino simplex, sed composita, & ex hac parte potest in ea intelligi quidam ordo naturæ; tum etiam, quia licet partes simul sumptæ, & prout inter se unitæ, non distinguantur a toto, tamen secundum se distinguuntur, & quælibet seorsum sumpta, etiā ut unita, distinguitur a toto, & hoc modo etiam ex parte rei assumptæ, naturæ ordo, atque ratio medii potest reperiri. Quod si fundamentum Durandi validum esset, fere eodem modo concluderet, nullum ordinem rationis in re ipsa fundatum esse admittendum. Semper enim, ut Paludanus recte obiicit, habet locum illud dilemma, quia, vel comparatio fit inter totum, & partes divisas, vel conjunctas. Priori modo non recte fit, quia partes, ut divisæ, non sunt assumptæ. Posteriori autem modo non est perfectius totum, quam partes. Quod si dicat, totum esse perfectius singulis partibus, etiam ut unitis, idem dicere posset de prioritatem naturæ in ordine ad assumptionem. Sine causa ergo recessit Durandus a communi modo loquendi, non solum Theologorum, sed etiam Patrum; & novum modum prioritatis finxit, ad rem de qua agimus minime necessarium, scilicet, secundum perfectionem, vel participationem fructus redemptionis. Quid enim hæc referunt ad ordinem assumptionis? Cum possit esse alius ordo assumptionis, quam perfectionis, ut ex dictis patet.

Ad fundamentum autem Scoti satis per primam & quintam conclusionem responsum est, illas enim probat, & non aliud.

Anima, & caro prout unitæ, media humanitate assumptæ sunt.



## SECTIO VI.

*Utrum humanitas prius natura sit assumpta,  
quam accidentibus informata.*

**E**xplicato ordine servato in assumptione substantiæ, & partium ejus, superest, ut brevissime de accidentibus dicamus, facile enim ex tractatis in superioribus colligi potest, quid de illis sentiendum sit. Primo enim certum est, substantiam fuisse medium, per quod, vel potius in quo sumpta sunt accidentia: quia, ut supra dictum est, non sunt immediate assumpta, sed tantum in hypostasi, ratione naturæ, in qua sunt. Unde secundo constat, prius saltem natura assumi substantiam, quam accedens, non tam ex parte unionis, quæ unica est, proxime terminata in substantia, remote vero, & quasi extrinsece denominans accedens assumptum, quam ex parte ipsarum rerum, quarum una non assumitur, nisi mediante alia, intelligendum est autem de substantia naturæ totius, aut partis, sæpe enim accedens tantum inest parti, ut animæ, v. g. & per illam intelligitur assumi.

Solum ergo potest hic comparari unio accidentis ad substantiam, cum unione hypostatica ipsius substantiæ ad Verbum, utra fuerit natura prior, ut, v. g. in instanti creationis animæ Christi, quid in illa intelligatur esse prius natura, unio ad Verbum, vel habere intellectum, & voluntatem. Et videtur quidem hoc secundum, præsertim in iis proprietatibus, quæ intrinsece manant ab essentia existente, quia natura existens præintelligitur assumptioni; ergo etiam præintelligitur habens omnia, quæ ab illa manant necessario, nam ad hoc sufficit existentia, assumptio enim veluti quid extrinsecum est. Adde, relationem creaturæ, vel similes necessario præintelligi in natura existente, atque in materia præintelligi accidentia, quibus disponitur ad formam. Aliunde autem videri potest, inter illa duo nullum esse ordinem naturæ, quia accedens neque est ratio, vel causa, vel dispositio per se unionis hypostaticæ: nec vero assumptio est ratio talium accidentium, aut inhærentiæ eorum in suo subiecto, quia est quasi extrinseca respectu illorum. Unde ab illa non pendent, variata enim assumptione, vel unione, eadem accidentia in eadem natura remanerent.

Prius natura assumitur substantia, quam recipiat ali, quod accedens.

Nihilominus si consequenter loquendum est iis, quæ hæcenus dicta sunt, probabilius videtur, prius natura assumi substantiam, quam adveniat ei aliquid accedens, ut verbi gratia, animam quam intellectum, humanitatem quam sensum, & sic de aliis, servata proportionem. Ratio est, quia in propria hypostasi, substantia prius natura convenit naturæ substantiali, quam quodlibet accedens, in hoc vero mysterio, assumptio intelligitur facta in eo signo naturæ, quo propria substantia esset futura, ut sæpe in superioribus probatum est, præsertim disp. 10. sect. 2. & ex ibi dictis probari potest major propositio hic assumpta: tum, quia modus substantiæ est magis intrinsecus nature, quam quodlibet accedens: tum etiam, quia ad complementum ipsius substantiæ pertinet: tum præterea, quia substantia est quasi conditio, ordine naturæ requisita ad sustentanda accidentia, prius enim est, rem esse in se, & per se completam, quam intelligatur apta ad sustentandum aliud. Confirmari potest exemplis, quia in accedente existente modo sibi conaturali, nullus modus intelligitur prior, quæ actualis inhærentia; ergo similiter.

Dices: quamvis hoc videatur probabile in illis accidentibus, quæ simul tempore sunt in natura, vel parte assumpta, & quæ non habent intrinsecam ac necessariam connexionem cum tali natura, non tamen in his, quæ hujusmodi connexionem habent: nam ab his pendet existentia naturæ assumenda; sed hujusmodi existentia naturæ supponitur assumptioni: ergo & accidentia hæc, a quibus talis existentia pendet, supponuntur assumptioni ordine naturæ. Responderi potest primo, non esse inconveniens, id concedere secundum aliquod genus causæ, vel dependentiæ, vel conditionis sine qua non, dummodo illa prioritas intelligatur tantum esse secundum quid, nam simpliciter magis intima est substantia, magisque ab illa pendet existentia, quam ab accidentalibus proprietatibus. Absolute tamen melius responderetur negando assumptum: nam hæc dependentia naturæ a propriis passionibus (ut supra dixi) non est ut a pro-

pria causa, sed ut a conditione intrinsece subsequente: hujusmodi autem conditiones possunt esse plures, inter quas una potest esse intimior & immediatior substantiæ, quam alia: & hæc est simpliciter natura prior; altera vero, cum non habeat propriam causalitatem, non est, cur sub alia ratione censeatur prior: nam, licet habeat necessariam connexionem cum eadem natura, hoc est illi commune cum alia proprietate: unde in hoc sunt pares, & quasi simul: superatur autem ab alia intimiori & immediatiori proprietate in naturali ordine prædictæ connexionis, in quo tantum consistit hæc prioritas nature: & ad hunc modum comparatur substantia respectu omnium accidentalium proprietatum, & ideo illa est simpliciter prior ordine naturæ: & consequenter etiā est prior unio hypostatica, quæ vicem propriæ substantiæ subit.

Dices ulterius: esto hoc ita sit in his proprietatibus quæ simul tempore esse incipiunt, in natura vel parte quæ assumitur, non tamen in his, quæ prius tempore præcesserunt, & in instante etiam assumptionis in eadem parte permanent, ut v. g. si supponamus eandem numero quantitatem, quæ præcessit in materia Virginei sanguinis, ex quo formatum est corpus Christi, mansisse in eodem corpore in eo instante, quo formatum est, consequenter dicendum videtur, illam quantitatem pro illo eodem instante prius natura inhærisse illi materiæ, quam assumpta fuerit: nam, si in priori tempore præcessit, quomodo non etiam in prioritate naturæ? cum illa materia seculum afferat quantitatem, quæ sibi prius antea inhærebat: & idem argumentum fieri potest de reliquis accidentibus, quæ in eadem materia duratione præcesserunt. Propter hanc difficultatem posset prædicta conclusio limitari ad ea tantum accidentia, quæ de novo esse incipiunt cum ipsa assumptione: quia hæc supponunt subiectum subsistens, & alioqui non habent naturalem existendi consecutionem, sicut ea, quæ duratione præcesserunt. Estque hic modus dicendi probabilis. Nihilominus rem attentius considerando, eandem rationem in illis etiam accidentibus reperimus: nam, licet priori tempore præcesserint in materia, tamen ut in instanti assumptionis in illa perseverant, necesse est, ut pro eodem instante propria & speciali influentia conserventur: hæc autem conservatio in subiecto, & ex subiecto fit: unde, cum non tendat ad substantiam, ex natura sua supponit subiectum subsistens: ergo etiam illa est ordine naturæ posterior, quam conservatio substantiæ: ergo etiam est posterior natura, quam unio hypostatica, quæ vicem illius supplet. Confirmatur ac declaratur, quia tam unio, quam quantitas, insunt, seu conveniunt materiæ primæ in instante assumptionis, & in illo instante habent eundem ordinem dependentiæ vel causalitatis inter se, quem haberent, etiam si in illo instante materia primum creata esset, & cum illa quantitas concreata; nam quod priori tempore extiterint, quoad hoc est veluti per accedens, nec variare potest modum dependentiæ, quem in illo instante habent ac requirunt: ergo habent eundem ordinem prioris ac posterioris naturæ, qui ex ratione dependentiæ, seu causalitatis nascitur: ergo, sicut unio ordine naturæ antecedit respectu proprietatis, quæ de novo fit; ita etiam respectu proprietatis, quæ in eodem instante conservatur: nam, sicut præsupponitur effectioni, ita & conservationi: & in hac tantum præsuppositione consistit ordo naturæ, ut dicebam, quia alioqui hæc omnia mutuam inter se connexionem habent in ordine ad esse, ut dictum est. Neque obstat difficultas tacta, nam, licet illa accidentia tempore præcesserint, tamen cum dependentia ab alia substantia propria ipsius materiæ: in illo autem instante, quamvis non mutant existentiam, mutant dependentiam, & incipiunt suo modo pendere ab unione, & ideo prout in illo sunt, ordine naturæ sunt posteriora. Sicut, quando unus effectus, qui antea fuit ab una causa, incipit in hoc instante conservari ab alia, quamvis ille effectus simpliciter sit prior tempore, quam causa, a qua conservatur, tamen, prout in illo instante est, & conservatur a tali causa, est posterior natura, quam illa, quia præsupponit esse illius, cum ab illo sua conservatio dimanet: ita igitur in præfate contingit.

Quæret tandem aliquis, esto accidentia non prius insint naturæ vel parti assumptæ, quam unio, an ita dici possint esse medium ad assumendam naturam. In quo certum est non posse esse medium ut quod, quia accidentia non assu-



assumuntur per unionem, quæ ad ipsa per se & immediate terminetur, sed solum mediate, & quasi denominatione extrinseca, per unionem sui subiecti substantialis, in quo inhærent: & ideo, ut in principio dicebam, assumptio naturæ est medium, ratione cuius accidens dicitur assumptum, non vero e contrario. Sed de medio ut quo potest esse nonnulla difficultas, quia in primis, ut aliquid sit medium quo, non est necesse, ut ad ipsum immediate terminetur assumptio, sed solum ut sit ratio, dispositio, aut conditio necessaria, ut aliquid assumatur, quod convenire potest alicui, etiam si ipsum in se & immediate non sit assumptum; & ita Doctores omnes, qui admittunt aliquam dispositionem ordine naturæ præviā ad hanc unionem, consequenter dicent, esse medium ad illam. Deinde non est necesse, ut tale medium ordine naturæ simpliciter præcedat in re, quæ assumitur, ut supra dicebamus de anima respectu materiæ; sed satis est, quod in eodem instante tale medium bene disponat & efficiat subiectum, quod assumitur, quod potest convenire etiam formæ accidentali; & hoc modo Richar. 3. d. 2. art. 2. q. 3. licet neget gratiam habitualem esse priorem naturæ unioni, affirmat posse medium ad illam appellari. Nec videtur inconueniens ita loqui, imo, ut supra tractatum est, quando Patres dicunt, Verbum assumpsisse animam mediante mente, multi per mentem, intelligendam putant potentiam intellectivam accidentalem, & eam dicunt esse medium ad assumendam animam. Nihilominus ille modus loquendi mihi non admodum probatur, quia accidens proprie non fuit ratio assumendi substantiam: neque etiam fuit dispositio ad unionem, ut supra disp. 10. sectio. 2. probavi: nulla ergo propria ratio medii hic reperitur. Antecedens quoad priorem partem in primis sequitur ex posteriori, quæ, ut dixi, jam probata est: nam, si accidens non potest esse dispositio ad unionem, multo minus esse potest formalis ratio reddens assumptibilem substantiam: sicut enim substantialis natura, nec dispositive, nec formaliter terminabilis est propria substantia ratione alicujus accidentis, ita neque est assumptibilis a Verbo, medio accidente ut formali ratione seu medio. Loquor autem semper de ratione formali, nam finaliter contingere potest accidens esse rationem assumendi substantiam eo modo, quo dicitur substantia esse propter operationem, quomodo humana natura dicitur assumpta propter redemptionem operandam, tamen hæc ratio non est medium, cum potius sit finis. Non est ergo accidens proprie medium ad assumendam substantiam, non solum, quia immediate non assumitur, nec quia substantia prius natura assumatur, quam uniatur accidentibus, ut ratio in contrarium facta assumebat, sed quia proprie non reddit naturam assumptibilem. Unde non est par ratio de accidentibus respectu substantiæ, quæ est materiæ respectu formæ substantialis: nam hæc non subsistit nisi in ordine ad aliquam formam, per quam actu informetur, & ita non est assumptibilis absque novo miraculo, nisi ut est actu sub tali forma: & ita caro humana fit formaliter assumptibilis per animam, maxime secundum congruitatem, substantia vero non subsistit proprie in ordine ad accidentia, nec per illa proprie fit formaliter assumptibilis, sed potius e contrario, quia substantia assumptibilis est, ideo cum illa sunt accidentia assumptibilia & quia de facto assumpta est substantialis natura, ideo vel ex necessitate, vel ex congruitate talia accidentia cum illa fuerunt assumpta.

### Q U Æ S T I O VII.

De gratia Christi, prout quidam singularis est homo, in tredecim articulos divisa.

**D**Einde considerandum est de coassumptis a Filio Dei in humana natura. Et primo de his, quæ pertinent ad perfectionem. Secundo de his, quæ pertinent ad defectum.

Circa primum consideranda sunt tria.

Primo, de gratia Christi: secundo, de scientia ejus: tertio, de potentia ipsius.

De gratia autem Christi considerandum est dupliciter.

Primo quidem de gratia ejus, secundum quod est quidam singularis homo. Secundo, de gratia ejus, secundum quod est caput Ecclesiæ: nam de gratia unionis jam dictum est.

Circa primum queruntur tredecim.

Sharez Tom. XVI.

Primo, utrum in anima Christi fuerit aliqua gratia habitualis.

Secundo, utrum in Christo fuerint virtutes.

Tertio, utrum in eo fuerit fides.

Quarto, utrum fuerit in eo spes.

Quinto, utrum in Christo fuerint dona.

Sexto, utrum in Christo fuerit timoris donum.

Septimo, utrum in Christo fuerint gratie gratis date.

Octavo, utrum in Christo fuerit prophetia.

Nono, utrum talis plenitudo gratiæ.

Decimo, utrum talis plenitudo sit propria Christi.

Undecimo, utrum Christi gratia sit infinita.

Duodecimo, utrum potuerit augeri.

Decimotertio, qualiter hæc gratia se habeat ad unionem.

**E**xpluit hæcenus D. Th. ipsum Incarnationis mysterium, nunc tractare incipit de perfectionibus, quæ in humana natura a Verbo assumptæ sunt. Et quoniam gratia creata, inter omnes perfectiones animæ, & major est, & ipsi gratiæ unionis propinquior, ideo de illa primo loco disputat: quoniam vero Christi gratia non solum illius naturam perfecit, sed principium etiam fuit perficiendi alios: ideo prius in hac quæstione agit de hac gratia, prout singularis, seu personalis perfectio animæ Christi est, in sequenti vero quæstione agit de illa, prout est gratia capitis, seu prout est principium influendi in alios. In præfati vero quæstione prius inquit, an hæc gratia fuerit in Christo, quod persequitur per octo articulos primos, agens prius de ipsa gratia sanctificante, quæ est veluti fons, & origo aliorum donorum, deinde vero de virtutibus, donis, & aliis gratiis: ultimo vero loco de perfectione hujus gratiæ disputat ar. 9. & seqq.

### A R T I C U L U S I.

Ut in anima Christi fuerit aliqua gratia habitualis.

**A**d primum sic proceditur. Videtur, quod in anima assumpta a Verbo non fuerit gratia habitualis. Gratia enim est quadam participatio divinitatis in creatura rationali secundum illud 2. Petr. 1. Per quem maxima & pretiosa promissa nobis donavit, ut divine simus consortes naturæ: Christus autem est Deus, non participative, sed secundum veritatem. Ergo in eo non fuit gratia habitualis.

2. Præterea, gratia ad hoc est necessaria homini, ut per eam bene operetur (secundum illud 1. Corinth. 15. Abundantius omnibus laboravi, non ego autem, sed gratia Dei mecum) & etiam ad hoc, quod homo consequatur vitam æternam secundum illud Rom. 6. Gratia Dei vita æterna. Sed Christo ex hoc solo, quod erat naturalis filius Dei, debebatur hereditas vite æternæ, ex hoc etiam quod erat Verbum, per quod facta sunt omnia, aderat ei facultas omnia bene operandi. Non ergo secundum humanam naturam indigebat alia gratia, nisi unionem ad Verbum.

3. Præterea, illud, quod operatur per modum instrumenti, non indiget habitu ad proprias operationes, quia habitus fundatur in principali agente. Humana autem natura in Christo fuit sicut instrumentum divinitatis, ut dicit Damascenus \* in 3. libr. Ergo non debuit in Christo esse aliqua gratia habitualis.

Sed contra est, quod dicitur Isai. 11. Requiescet super eum Spiritus Domini. Qui quidem in homine esse dicitur per gratiam habitualement, ut in prima parte dictum est. Ergo in Christo est gratia habitualis.

b Respondeo dicendum, quod necesse est ponere in Christo gratiam habitualement, propter tria. Primo quidem propter unionem animæ illius ad Verbum Dei: quanto enim aliquod receptivum est propinquius cause influenti, tanto magis participat de influentia ipsius. Influxus autem gratiæ est a Deo, secundum illud Psalm. 83. Gratiam, & gloriam dabit Dominus. Et ideo maxime fuit conveniens, ut anima illa reciperet influxum divinæ gratiæ. Secundo, propter nobilitatem illius animæ, cujus operationes oportebat propinquisime attingere ad Deum per cognitionem & amorem: ad quod necesse est elevari humanam naturam per gratiam. Tertio, propter habitudinem ipsius Christi ad genus humanum: Christus enim, in quantum homo, est mediator Dei & hominum, ut dicitur 1. ad Timotheum 2, & ideo oportebat, quod haberet gratiam etiam in alios redundantem, secundum illud Joannis primo:

V 2 De



De plenitudine ejus omnes accepimus, & gratiam pro gratia.

q. 2. ar. 1.

c Ad primum ergo dicendum, quod Christus est verus Deus secundum personam, & naturam divinam: sed quia cum unitate persone remanet distinctio naturarum (ut ex supradictis patet), anima Christi non est per suam essentiam divina: unde oportet, quod fiat divina per participationem, quæ est secundum gratiam.

q. 19. ar. 1.

2.

d Ad secundum dicendum, quod Christo, in quantum est naturalis Filius Dei, debetur hereditas æterna, quæ est ipsa beatitudo increata, per increatum actum cognitionis, & amoris Dei, eundem scilicet, quo Pater cognoscit, & amat seipsum, cujus actus anima capax non erat propter differentiam naturæ. Unde oportebat, quod attingeret ad Deum per actum fruitionis creatum: qui quidem esse non potest, nisi per gratiam. Similiter etiam, in quantum est Verbum Dei, habuit facultatē omnia bene operandi operatione divina: sed quia præter operationem divinam oportet poni in eo operationem humanam (ut infra patebit) \*, oportuit in eo esse habitualement gratiam, per quam hujusmodi operatio in eo esset perfecta.

e Ad tertium dicendum, quod humanitas Christi est instrumentum divinitatis, non quidem sicut instrumentum inanimatum, quod nullo modo agit, sed solum agitur, sed tanquam instrumentum animatum anima rationali, quod ita agitur, quod etiam agit. Et ideo ad convenientiam actionis oportuit eum habere gratiam habitualement.

#### COMMENTARIUS.

Hæc quæstio formaliter intelligitur de gratia sanctificante, quæ in nobis dicitur justitia inhærens, sive illa sit in essentia animæ, sive in potentiis. Sed quia D. Tho. supponit suam veram sententiam, scilicet, hanc gratiam quoad suum primarium, & essencialem habitum, inhære proxime in animæ substantia: ideo de hac gratia videtur potissimum proponere præfatum articulum, nam in sequentibus agit de virtutibus, donis, & cæt. b Respondet ergo D. Tho., necessarium esse ponere in Christo gratiam habitualement; intelligit autem non de necessitate simpliciter, seu secundum absolutam potentiam Dei, sed secundum legem ordinariam, & quasi connaturalem animæ Deo unitæ. Et hoc sensu conclusio optime probatur rationibus D. Tho. Primo, quia Christi anima est propinquior Verbo, & ideo majorem gratiæ influxum ab illo recipit. Secundo, quia ad supernaturales operationes indigebat hac gratia. Tertio, quia illa anima potest influere illam gratiam in alios, multo ergo magis eam in se suscipit. In qua ratione dubitat Cajetanus, quia videtur D. Tho. divertere a gratia personali ad gratiam capitis. Sed nulla erat occasio dubitandi, proprie enim sumpta est hæc ratio ab effectu ad causam, & est satis accommodata; perfectio enim, quæ communicatur effectui, præexistit in causa, præfertim si sit perfectio simpliciter nullam significans imperfectionem, & causa etiam perfecta sit.

Respon-

sio.

c In solutione ad primum dicit D. Thom., animam Christi fuisse divinam per participationem, & ideo habuisse gratiam, quæ est divinitatis participatio. Sed advertendum est, illam animam prius ordine naturæ fuisse deificatam per unionem personalem: sed quia per illam unionem anima non est facta divina per essentiam, vel naturam, sed solum per assumptionem, ideo potuit illa anima unita, in se suscipere participationem divinæ naturæ, & hoc modo dicitur facta divina per gratiam; & quod dicitur de anima, potest dici de humanitate ratione animæ: de Christo vero non potest simpliciter dici, quod sit Deus per participationem, vel quod sit factus divinus per participationem, & ideo D. Tho. cum argumentum factum esset de Christo, in responsione ad distinctionem naturarum recurrit, indicans non esse de ratione gratiæ creatæ, ut per ipsam deificetur suppositum secundum se, sed satis esse deificari naturam: an vero id concedi possit de persona, ut subsistente in tali natura, seu de Christo cum illa adjectione, ut est homo, inferius quæstione 16. & 23. dicitur.

1. Argum.  
Anima  
Christi  
quomodo  
ex gratia  
habeat,  
ut sit di-  
vina per  
participa-  
tionem.

2. Argum.

d Argumentum secundum hoc hujusmodi: Christo debetur vita æterna, & omnis bona operatio propter unionem; ergo propter operationem non indigebat gratia habituali. Responsio vero in forma est, Christo homini necessarias fuisse operationes creatas, quibus vel Deo frueretur, vel recte operaretur in humana natura: ad

perfectiōem vero harum operationum indiguisse gratia, & ideo ratione unionis utrumque fuisse debitum, & operationem, & gratiam. Quæ solutio est valde notanda pro iis, quæ inferius dicemus de actuali gratia Christo homini necessaria: nam licet D. Th. hic de habituali loquatur, doctrina vero ejus evidētius procedit de actuali. e Solutio ad tertium clara est, sed valde notanda pro materia de gratia.

#### DISPUTATIO XVIII.

In quatuor Sectiones distributa.

##### De Gratia sanctificante, seu justitia creata anime Christi.

Supponimus hoc loco, gratiam, de qua agimus, esse aliquid inhærens in anima: nam licet extrinseca benevolentia, seu voluntas Dei soleat interdum gratia appellari, ut D. Th. supra q. 2. a. 10. & q. 6. a. 6. notavit, hic vero nihil est, quod de hujusmodi gratia differamus, non quod animæ Christi collata non fuerit, sed potius quia evidētissimum est, uberime fuisse collatam: tum etiam, quia ratio, & mensura hujus gratiæ, in donis & effectibus ejus relucet. Gratia vero inhærens in habitualement, & actualement distingui solet: de priori tantum disputavit hic D. Tho. non videbitur autem extra rem, aliquid dicere de posteriori, ita tamen, ut solum, quæ ad Christum pertinent, attingamus: supponendo universalia principia, quæ ad doctrinam de gratia pertinent, & quomodo in homine Christo locū habeant, explicando.

#### SECTIO I.

Utrum ad suam sanctificationem, & justificationem indigerit anima Christi gratia creata sanctificante.

Constat inter Catholicos, Christum Dominum ab initio suæ conceptionis fuisse gratum Deo, sanctum, innocentem, juxta illud Joan. 1. *Vidimus gloriam ejus, gloriam quasi unigeniti a Patre, plenum gratia, & veritatis*, quæ verba inferius expendemus, & illud Luc. 1. *Quod ex te nascetur sanctum, vocabitur Filius Dei*, ut eleganter ponderat Bernard. homil. 4. in Missus est. Et illud Joan. 10. *Quem Pater sanctificavit, & misit in mundum*. Quanquam enim August. tract. 48. in Joan. & Beda ibidem, Filium secundum divinitatem intelligant, dici sanctificatum a Patre per æternam generationem, quatenus ab illo accipit ipsam sanctitatem per essentia: non tamen videtur posse negari, Christum eo loco de se, ut homine, fuisse locutum, cum se sanctificatum a Patre dixit, ut exponit Hilar. lib. 7. de Trinit. & Athanas. in lib. de Natura hum. suscepta, prope initium, & Chryso. hom. 60. in Ioan. est ergo Christus sanctus, & sanctificatus a Patre, cui sanctitati Pater testimonium præbuit, cum dixit: *Hic est Filius meus dilectus, in quo mihi bene complacui*, Matth. 3. & 17.

Hoc ergo firmo fundamento supposito, difficultas est, an indigerit Christus gratia accidentali, ut fuerit sanctus, & gratus Deo. Primam sententiam affirmantem hoc tenet Paludan. in 3. dist. 13. q. 2. opin. 4. concl. 1. unde infert indiguisse Christum hac gratia, etiam ad materiā, quia meritum supponit hominem perfecte gratum. Idem sentit Marsilius in 3. q. 10. a. 1. Et fundamentum eorum esse potest, quia hic est effectus formalis gratiæ habitualis, qui sine sua forma esse non potest. Et ex hac radice ortæ videntur duæ aliæ extremæ sententiæ, quarum auctores pro hac parte citari possunt. Altera est quorundam, qui dixerunt, non posse Verbum assumere naturam humanam sine gratia habituali: nam quia videbant non posse Deum fieri hominem, quin ille homo esset sanctus, & existimabant non posse esse sanctum sine hac gratia, ideo concludebant hanc gratiam necessario conjunctam esse cum unionem hypostaticam. Ita refert & late tractat Henric. quodlib. 13. q. 5. nec multum ab hac opinione discrepat Bonav. in 3. d. 13. a. 1. q. 1. quāquam non loquatur aperte de necessitate absoluta. Indicat etiam Alenf. 3. p. q. 11. mem. 1. & 3. & Gab. in 3. d. 1. q. 1. & d. 2. q. 2. quamvis ex alio fundamento supra impugnato disp. 8. sect. 2. Altera extrema sententia est, posse fieri, ut Deus sit homo & tamē quod ille, ut homo, nō sit sanctus, nec



nec gratus Deo, cum enim gratia creata sit res omnino distincta a natura humana, & persona divina, potest Deus assumere naturam sine illa gratia: unde fit consequens, si per solam hanc gratiam fit homo sanctus, posse esse hominem Deum, & tamen ut hominem non esse sanctum, gratum Deo. Quam sententiam videntur defendere aliqui ex discipulis D. Th. & aperte Durand. in 3. dist. 12. q. 2.

Secunda principalis sententia est, non indignum Christum gratia aliqua creata, ut esset sanctus, & gratus Deo, etiam secundum humanitatem. Hanc sententiam pauci ex scholasticis Theologis attingunt; videtur autem sumi ex communi sententia Sanctorum, asserentium, per gratiam unionis sanctificari animam & corpus Christi, quos statim referam: ex hoc enim fundamento concludi videtur, propter sanctificationem non fuisse Christo habitalem gratiam necessariam. Et hæc sententia est sine dubio vera.

Ne tamen in æquivoco laboremus, aperiamus, quæ vis sit in his vocibus, scilicet esse sanctum, gratum, iustum: multa enim in his prædicatis includuntur, primum, ut is, qui gratus dicitur, diligatur a Deo secundum præsentem iustitiam, dilectione supernaturali, id est, ordinata ad communicationem supernaturalium bonorum, nam esse gratum aliquid addit supra naturam, profectum ex divina dilectione. Secundo, esse sanctum includit carentiam culpæ, vel mortalis, vel etiam venialis, si sit purissima & perfectissima sanctitas: hæc enim est vis illius vocis, ut constet. Tertio, esse perfecte iustum & sanctum includit, ut anima & facultates ejus sint bene dispositæ, & ordinatæ ad finem, & ad omne id, quod honestum est: & si iustitia sit supernaturalis, ut nunc loquimur, ut hæc bona habitudo, & proportio sit in ordine ad finem, & media supernaturalia. Et hinc consequenter fit, ut persona sic sancta, & grata, sit de se accepta ad gloriam, & apta ad merendum.

Dico ergo primo, humanitatem Christi, seu Christum ut hominem, formaliter ex vi ipsius gratiæ unionis fuisse absolute, & simpliciter sanctum, & Deo gratum. Probatur primo ex sanctis Patribus, qui explicantes verba illa Ps. 44. *Unxit te Deus, Deus tuus oleo latitiæ*, & Isai. 61. ac Luc. 4. *Spiritus Domini super me, propter quod unxit me*, illa etiam Daniel. 9. *Et ungetur Sanctus Sanctorum*, & Act. 4. & 10. *Unxit eum spiritu sancto, & virtute*, dicunt hanc unctionem, qua Christus homo fuit unctus, & a qua Christus esse appellatus, esse ipsam divinitatem, seu Verbum, per cuius præsentiam humanitas sanctificatur. Ita Nazian. orat. 36. num. 7. & 93. orat. 42. ubi humanitatem dicit delibutam, unctam, Deificatam ipsa unione ad Verbum. Unde Cyril. l. 4. in Jo. c. 29. dicit, Christum vocari unctum, non sicut alios Reges, aut sanctos, sed quia *Verbum caro factum est*; & ideo lib. de Fide ad Theodof. prope finem: *Cum Verbum*, inquit, *antea non esset Christus, in ipsa carnis assumptione dictum est Christus*. Similia fere leguntur apud Origenem hom. 1. in Cant. ad med. & l. 2. Periarch. c. 6. quos Patres imitatus est Damasc. orat. 1. de Imag. ante medium, & lib. 3. de Fide c. 3. & 4. 17. & li. 4. c. 6. & Nicet. lib. 3. Theof. c. 3. *Ipsa*, inquit, *seipsum unxit, divinitas enim humanitatis unctio est*; quod fere eisdem verbis antea dixerat Dionys. Alexand. in ep. contra Paul. Samosat. in princ. quem refert Turrian. in Oplotheca, dicens Christum non indignum unctione externa, ut sit res, quam nomen ejus præ se fert, id est, unctus: *Quia per se unctus est, & sibi ipsi ipse est unctio*. Ex Latinis vero Aug. lib. 15. de Trinitate, c. 26. *Tunc*, ait, *unctam fuisse invisibili Deo humanam naturam, quando divina est junctæ personæ*; & idem fere scribit libro 3. contra Maximin. c. 16. & Hierony. in Psal. 132. & Fulgent. de Incarnat. & grat. c. 10. unde optime Anselm. in c. ad Hebr. 1. *Non ante conceptus & postmodum unctus, sed hoc ipsum de Spiritu sancto, & carne Virginis concipi, Spiritu sancto ungi fuit*, quæ verba sumpta sunt ex Gregor. lib. 9. registri Epist. 61.

Dicit aliquis, hæc omnia exponi posse non formaliter, sed causaliter, id est, non quia ipsum Verbum per se sit forma sanctificans humanitatem, seu hunc hominem, sed quia fuit radix & fons, a quo sanctitas in illam animam manavit, sic enim dicunt iidem sancti, animam Christi per ipsam unionem factam esse impeccabilem, quod hoc modo necessario exponendum esse infra qu. 15. ostendemus, & Greg. Nazian. orat. 51. post medium dicit etiam totum humanum genus fuisse per humanitatis su-

sceptionem, sanctificatum. Sed in primis, si verba Sanctorum ponderentur, solutio non satisfacit, dicentes enim unctionem humanitatis fuisse divinitatem ipsam, non potuerunt clarius rationem formalem explicare, præsertim cum expresse dicant per ipsammet unionem, qua Christus constituitur, esse divinitatem unctum: & Hilari. 7. lib. de Trin. & Chrys. hom. 60. in Joan. exponentes, ut supra citavi, verba illa Joan. 10. *Quem pater sanctificavit*, de sanctificatione Christi in humanitate, dicunt, sanctificatum esse Christum a patre, non ut alios homines, sed ipsa divinitate, in persona Filii humanitati unita, & ideo dicitur Pater sanctificasse, & misisse, quia ipsa missio, quæ per incarnationem facta est, fuit humanitatis sanctificatio.

Deinde ita explicatur ex ipso nomine *Christus*; ajunt enim Christum eo oleo spirituali fuisse formaliter sanctificatum, quo fuit unctus, & a quo nomen Christi accepit; sed in ipsa unione præcise ac formaliter concepta est Christus, ut Christus & unctus: ergo. Minor constat ex citatis verbis Cyrilli, qui etiam l. de fid. ad Regin. ait, Verbum secundum se non esse Christum, sed quædo *Verbum caro factum est*, tunc esse Christum nominatum. Idem Athanasius, serm. de Epiph. quem Damascenus citat, lib. 4. c. 6. *Quando Deus (ait) factus est homo, tunc hoc nomen, Christus, inductum est*. Hinc Ambr. lib. 1. de Spiritu S. c. 3. ait, in nomine Christi, & Patrem, qui unxit, & Filium, qui unctus est, & Spiritum S. quo unctus est, indicari. Quod etiam habet Irenæus l. 3. contr. her. c. 20. Cum autem dicunt, Christum fuisse Spiritu S. unctum, non loquuntur de sanctificatione gratiæ habitualis, quæ Spiritui S. attribuitur, sed de ipsamet conceptione Filii Dei, quæ etiam Spiritui S. appropriatur, dum in Symbolo Christus de Spiritu sancto conceptus dicitur. Et utrumque optime quadrat cum verbis Angeli, Luc. 1. *Spiritus sanctus superveniet in te, & virtus altissimi obumbrabit tibi*: Ecce auctorem mirabilis conceptionis, unde statim subdit: *Ideoque &, quod ex te nascetur sanctum, vocabitur Filius Dei*. Quia nimirum, ex vi talis conceptionis, quantumvis præcise ac formaliter sumatur, sanctus est. Et hæc est unctio, de qua Petrus ait, Act. 10. *Quomodo unxit eum Deus Spiritu sancto*, id est, excellenti dono gratiæ unionis, quod ex conceptione de Spiritu S. habuit. Et hoc est, quod subdit, *quoniam Deus erat in illo*, scilicet, per intimam & substantialem unionem, sicut alibi Paulus dixit: *Erat Deus in Christo, mundum reconcilians sibi*. 2. Cor. 5. & ad Col. 1. *In ipso habitat omnis plenitudo divinitatis corporaliter*.

Dices, licet his testimoniis recte probetur, Christum ut hominem, seu ejus humanitatem fuisse unctam divinitate, non tamen esse sanctificatam, sed solum evectam ad quandam maximam dignitatem. Respondetur in primis, nihil aliud per illam metaphoram, nisi sanctificationem, significari juxta communem phrasim Scripturæ; Exod. 29. & 30. Levit. 10. 21. & sæpe alias, unde 1. Jo. 2. *Unctionem habemus a Sancto*. Unde Dionys. de Eccles. hier. c. 4. p. 3. ait; *Unguentum Chrismatis, & omne divinum unguentum cuiusvis rei consecratione adhibitum, aperte monstrare Christum, qui illum, qui sanctificatur, sanctificavit, ut qui idem sit, sui que similis in omni bonitatis munere*; quod late ibi profequitur, ac declarat. Et optime probatur ex loco illo Danielis 9. *Et ungetur Sanctus Sanctorum*, id est, tali unctione ungetur, quæ non solum Sanctum, sed Sanctum Sanctorum constituat, ut eleganter, sicut cætera solet, ibi declarat noster Benedictus Pererius, q. 15. plures rationes reddens illius appellationis. Cui consonat illud II. 51 quod de se Christus exposuit, Luc. 4. *Spiritus Domini super me, eo quod unxerint me*, unctione, nimirum, hypostatice unionis. Deinde propriis etiam verbis hanc metaphoram declarant Patres, non enim solum vocant unctionem, sed expresse sanctificationem, imo & impeccabilitatem, & Deificationem, ut loquuntur Nazian. Chrys. Hilarius, & Aug. cit. loc. Et videri etiam potest idem Aug. in Ench. c. 40. Athan. orat. 2. contra Arianos, Cyrillus Alex. l. 1. in Isaiā, orat. 4. & l. de incarn. unig. c. 8. Damasc. l. 3. c. 17. & plures afferemus inf. q. 15. Christi Domini impeccabilitatem declarantes. Denique ratione ita declaratur.

Nam primum necesse est, humanitatem assumptam, seu hunc hominem maximo amore supernaturali a Deo diligere, quia maximum supernaturale donum in sua humanitate a Deo suscepit, quod est effectus, vel objectum divinæ dilectionis, totum naturæ ordinem superantis: ergo illa unio præcise per se ipsam reddit illam naturam ma-

Quid sit  
esse san-  
ctum, gra-  
tum & ju-  
stum.

Christus  
ex vi gra-  
tiæ unio-  
nis forma-  
liter, san-  
ctus, &  
gratus est.



Humanitas non potest uniri Verbo, quin hic homo constitutur gratus

xime Deo gratam, & dilectam, non quatenus hæc denominat io dilecti esse potest extrinseca ab actu diligentis, sed quatenus dicit objectum dilectionis, quod amor divinus, & efficax, non tam supponit, quam constituit, per donum illud, quod amando confert. Rursus hoc donum gratiæ unionis tale est, ut nullam secum admittat peccati maculam in natura unita, unde per se habet constituere hunc hominem innocentem; constituit ergo sanctum, & gratum Deo, id est, supernaturaliter dilectum tali dilectione, quæ necessario omne odium excludat, & constituat objectum intrinsece dignum tali amore. Ad hæc, hoc donum tale est, ut ratione illius debeantur humanitati omnes supernaturales perfectiones, quibus ad vitam beatam, & rectam operationem bene disponitur, ut inferius ostendemus: de ratione autem doni formaliter sanctificantis non est, ut præcise per seipsum conferat omnem perfectionem, sed satis est, ut ipsum per se reddat animam dilectam, & gratam, & secum afferat alia dona, ut in gratia ipsa habituali, quæ est in essentia animæ, necessario dicendum est. Unde fit tandem, hunc hominem Deum ex vi unionis hypostaticæ habere in se, & in sua natura sufficientem dignitatem, & quandam gratiam, ob quam illi debeat beatitudo æterna; ergo verissimum est, hunc hominem constitui iustum, & sanctum formaliter ex vi ipsius gratiæ unionis.

Sed quæret aliquis, an hæc sanctificatio fiat formaliter per unionem hypostaticam, ut est modus creatus in humanitate existens, an vero per Verbum ipsum humanitati unitum. Respondetur, hæc duo esse ita conjuncta & inseparabilia, ut vix possint comparari, & quasi sejungi in hoc effectu; quia nec unio creata esset sufficiens ad conferendam tam perfectam sanctificationem, nisi terminaretur ad increatum Verbum, & illud intime copularet humanitati; includit enim hæc sanctificatio impeccabilitatem, infinitatem, & Deificationem quandam, quæ omnia nullum creatum donum per se conferre posset sine increato; nec etiam persona Verbi posset hanc sanctificationem conferre, nisi intercederet unio, quia sine illa unionis non posset terminare humanitatem, nec hominem per se sanctum, & naturalem Dei filium constituere: hæc ergo sanctificatio utrumque requirit, scilicet, & modum unionis creatum, & terminum increatum, humanitati unitum. Et quia unum est ab alio inseparabile, ideo Patres indifferenter, & Verbo, & unioni tribuunt hanc sanctificationem. Nam, ut ex Nazian. Damasc. & aliis adduximus, sicut dicitur, humanitatem fuisse divinitate delibutam, & unitam ista ungentis præsentia, & ipsius Verbi substantiali plenitudine, ut ait Origenes loco citato, similiter dicitur Christi humanitas sanctificata ipsa unione, ratione cujus dicitur gratia connaturalis Christo ab Aug. in Enchir. c. 40. Similiter dicitur humanitas illa sanctificata ipsa assumptione, & conceptione de Spiritu sancto, prout incarnationem includit, ut late Bernardus hom. 4. in *Missus est*, a medio. Quod si velimus singulis attribueret, quod eis propriissime convenit, Verbum est quasi forma ipsa sanctificans humanitatem, & constituens hunc hominem per se sanctum, quia Verbum est sanctitas ipsa per essentiam, & per se ac intime conjungitur humanitati. Item Verbum ipsum est, a quo habet hic homo, ut sit filius Dei naturalis, & ab eodem habet infinitam dignitatem, ratione cujus est potens ad infinitum meritum, & sanctificationem, eique debetur summa gratia, caritas, & gloria, & perfectissima patriæ adoratio. At vero unio est quasi via ad hanc sanctificationem, vel conditio ad illam necessaria, quia non posset Verbum formaliter conferre illam sanctificationem, nisi intercedente hac unione; sicut gratia est forma sanctificans animam, in hæso autem gratiæ in ipsa est conditio necessaria, seu via in suo genere ad illam sanctificationem.

Dices; modus iste unionis hypostaticæ, ut est quid creatum in humanitate, est quid perfectius, quam gratia habitualis; ergo sanctificat etiam perfectius, non tantum ut conditio, seu via, sed etiam ut forma; item per illam unionem formaliter est humanitas affecta dono supernaturali perfectissimo, & est facta incapax peccati. Respondetur, unionem quidem esse perfectiorem gratia habituali, tamen esse diversi ordinis, & servata proportionem, non habere unionem in suo ordine illam perfectam rationem, quam habet gratia in sua; & ita gratia, licet in gradu & ordine simpliciter sit inferior, tamen secundum

quid, seu in modo excedit, quia est forma quasi essentialis, & absoluta in suo ordine, unio vero est modus & quasi via in gradu suo. Quocirca, licet unio perfectius sanctificet, quia concurret suo modo ad excellentiorem sanctificationem, & quia perfectius est, inchoare (ut sic dicam) illam sanctificationem, quam consummare inferiorem, tamen in modo non ita est forma sanctificans in suo ordine, sicut gratia in suo. Unde etiam fit, ut illa unio per se, & ut quid creatum est, non constituat formaliter filium Dei, nec adoptivum, ut est certum, de quo infra, q. 23. nec naturalem, quia humanitas non est filia, & illa est, quæ proprie afficitur illa unione; est tamen illa unio, veluti conditio aut via, ut hic homo constitutur filius Dei naturalis. Cujus filiationis fundamentum non est proprie unio creata, sed ipsum Verbum, ut unitum humanitati. At vero gratia, quia est propria forma, & quasi natura quædam afficiens personam illam, constituit filium, saltem adoptivum; non possunt ergo gratia & unio cum eadem proportionem comparari; & omnes illæ proprietates, quæ tribuuntur unioni, ut reddere impeccabilem &c. intelliguntur potissimum ratione sui termini, vel in ordine ad illud, & quasi in via ad illum. Non nego tamen posse mente præscindi donum illud creatum, quod est unio, a dono increato ipsius Verbi, & in illo præcise conceptu posse considerari aliquam sanctificationem, & magnam excellentiam, & quasi consecrationem quandam illius humanitatis. Dico tamen, totam illam ut sic conceptam pertinere ad humanitatem tantum ut natura est, & non esse propriam Christi hominis sanctificationem, sed esse quasi viam ad illam, seu conditionem requisitam, & inchoationem ejus, quæ per ipsum Verbum formaliter consummatur. Quia vero Christus, ut homo, non est plures Deus, sed ex Deo & humanitate constat, ideo in sua integra sanctificatione totum illud includit, scilicet, & increatam formam sanctificantem, & creatam unionem, suo etiam modo ad illam sanctificationem concurrentem.

Atque ex his inferitur primo, per hanc unionem non solum animam Christi, sed etiam carnem fuisse sanctificatam. De anima potissimum procedunt omnia, quæ dicta sunt. Ad carnem vero facile applicari possunt, juxta illius capacitatem; non enim omnis res est capax æqualis sanctificationis, & ideo licet Verbum divinum ex se infinitam sanctificationem conferre possit, tamen unicuique confert juxta modum suum. Caro ergo non potest sanctificari, ut capax essentialis gloriæ, aut amicitiae propriæ, sed potest sanctificari, ut focia animæ sanctæ, & ut organum illi conjunctum, & ut essentialis pars humanitatis assumptæ; sic ergo sanctificata fuit per unionem caro Christi, quia ex vi illius digna est supremo cultu & reverentia. Secundo, quia purissima & mundissima effecta est, incapax omnis maculæ, non solum culpæ, sed etiam fomitis, & omnis inordinationis aut defectus, qui aliquam indecentiam includit; dicitur autem sanctum, quod est coram Deo purum, & mundum, ut ex usu Scripturæ constat. Tercio, quia specialiter fuit Deo consecrata, vel potius quasi propria illius effecta; dicuntur autem maxime sancta, quæ Deo conjunguntur, ejusque cultui dicantur. Quarto, quia ex vi unionis debetur illi conjunctio cum anima sancta, & beata, & ipsa beatitudo, quantum illius potest esse capax: unde speciale miraculum fuit, ad tempus illa privari propter homines. Quinto denique quia non solum sancta, sed etiam sanctificatrix, & vivificatrix effecta est, ut Cyrillus dixit.

Secundo sequitur, non potuisse humanitatem uniri Verbo hypostatice, quin hic homo etiam secundum humanitatem constitutur gratus Deo & sanctus. Probat ex ratione facta, quia non potest non esse supernaturaliter dilectus, & innocens, & dignus omni dono gratiæ, & gloriæ; hoc autem satis superque est ad veram sanctitatem; & iustitiam, nam licet posset Deus non acceptare illam animam ad gloriam, id est statuere illam nunquam ei conferre, hoc tamen non excludit internam sanctitatem, sufficit enim, ut homo in se habeat, unde sit dignus illa gloria, sive Deus illam velit dare, sive non: similiter enim homini habenti gratiam habitualem posset statuere Deus nunquam conferre gloriam, & nihilominus ipsa gratia retineret suam dignitatem, & proportionem cum gloria; hanc vero dignitatem multo altiori modo confert gratia unionis. Et confirmatur hoc, quia fieri non potest, ut operationes humanae talis hominis



non sint moraliter infiniti valoris, & dignitatis, & de se maxime grata Deo, ut supra q. 1. art. 2. late dictum est, & infra, q. 19. iterum dicemus, contra eos, qui falso existimant, gratiam creatam fuisse Christo necessariam ad meritum: sed hunc valorem habent opera ex dignitate personæ operantis, & propter conjunctionem, quam cum illa habent media natura; ergo multo magis ipsa natura assupta, seu persona, ut in illa subsistēs, est grata & iusta, &c.

Dubium.

Solutio.

Dices. Etiam si humana natura uniretur personæ angelicæ sanctæ, & iustæ, non esset necessarium ipsam humanitatem esse iustam. Respondetur exemplum esse in multis dissimile. Primo, quia cum persona angeli non sit per se sancta, sed per accidens, non uniretur humanitati, ut sancta, quia solum uniretur secundum suam personalitatem, at vero persona Verbi, ut sic, per se ipsam est ipsa sanctitas: deinde persona angeli non necessario excluderet culpam, seu malitiam a natura assumptam, non solum de potentia absoluta, sed neque ex natura rei, at vero persona Verbi excludit illam, non solum ex natura rei, sed etiam de potentia absoluta.

Deus potest  
quicquid  
assumere  
humanae  
naturæ,  
sine gratia  
habituali.

Tertio inferitur, potuisse Deum assumere naturam humanam sine gratia habituali, quamvis non possit eam assumere, quin sibi gratiam eam reddat. Probatur prior pars, quia cum illa gratia sit qualitas omnino distincta ab anima, & a gratia unionis, & formaliter non concurrat ad unionem, ut supra dictum est, nec sit dispositio ad illam, sed veluti effectus illam consequens, nihil repugnat, si Deus suspendat influxum illius, conservando unionem: nullam enim vel physicam contradictionem, vel moralem indecentiam alicui virtuti contrariam hoc includit, sicut etiam posset Deus assumere naturam, & per eam nullas supernaturales operationes exercere, vel certe illas efficere per auxilia, & non per habitus, quid enim repugnat? Posterior vero pars jam probata est, potest enim ille effectus, scilicet esse gratum, ab alia gratia formaliter fieri præter habituales, scilicet, a gratia unionis. Qui vero dicunt potuisse assumi humanam naturam in puris naturalibus, atque adeo nec gratiam, nec ingratam Deo, non satis animadvertere videntur quid dicant, nam si humanitas assumitur, necessario suscipit donum superans non tantum naturam, sed etiam omne aliud donum gratiæ, quomodo ergo dicetur assumi in puris naturalibus? Nisi fortasse dicatur sumi in puris naturalibus quoad operationes, vel alias naturæ perfectiones: sed hoc non obstat, ut dixi: quin homo ille esset gratus. Dices, tamen non esset amicus, quia non haberet vinculum mutui amoris. Respondetur. Ipse homo esset gratus & dilectus, & ita ex parte Dei non deesset vinculum amoris, ipse vere homo etiam amaret Deum vel dilectione supernaturali, si daretur illi auxilium etiam sine habitu, vel saltem dilectione naturali, & prout posset, & hoc satis est.

Dico secundo: Gratia unionis præcise ac formaliter per se ipsam non confert humanæ naturæ omnem iustitiæ ac sanctitatis perfectionem, quasi extrinsecam, quæ in homine iusto & sancto necessaria est, ut sit omni ex parte bene affectus & præparatus ad beatitudinem, & omnem rectam operationem. Hæc conclusio non solum est communis Theologorum, sed per se ita clara, ut tantum indigeat terminorum expositione, quia unio hypostatica solum confert dignitatem personalem, non vero confert animæ illam pulchritudinem, & quasi naturam ac formam proportionatam gloriæ, quam confert gratia habitualis, neque illam propensionem, & proximam facultatem bene operandi, quam conferunt virtutes; nam isti omnes sunt effectus formales & physici horum habituum, quos Verbum non potest per se ipsum formaliter supplere, tantum enim per se confert ipsum subsistere. Confirmatur & declaratur primo, quia ad perfectam sanctitatem per essentiam Verbi divini, ut Deus est, pertinet non tantum personalis dignitas Verbi, sed etiam naturalis, & essentialis virtus ac perfectio, quam habet in ipsa natura divina; ergo ad consummatam perfectionem & sanctitatem Christi hominis pertinet non tantum dignitas personæ, sed etiam optima dispositio & affectio ipsius naturæ humanæ, quæ sanctitas quædam est ipsius naturæ; cum in ordine ad ultimum finem, & ad omne id, quod est honestum, convenienter illam disponat. Confirmatur secundo, quia corpus humanum proprie sanctificari dicitur, quando redditur aptum, & accommodatum

Sharez. Tom. XVI.

ad opera sanctitatis, quod non fit sine aliqua interna dispositione bona, quæ moderetur affectus, & promptitudinem conferat ad honeste operandum: ergo quamvis caro Christi per ipsam unionem sit formaliter sanctificata, quia caro Dei effecta, tamen ut omni ex parte juxta capacitatem suam sit perfecte sanctificata, requirit illam internam bonam dispositionem, & quasi ordinatum concentum facultatum omnium, quem Verbum per se ipsum formaliter conferre non potest.

Dices. Cur subsistentia Verbi, sicut per se ipsam dicitur facere formaliter gratum & sanctum, non poterit etiam eodem modo conferre omnem aliam bonam affectionem & dispositionem ad perfectam sanctitatem pertinentem? Respondetur, quia denominatio illa grati aut sancti præter substantialem perfectionem subsistendi, quam Verbum per se ipsum confert humanæ naturæ non addit aliquem alium effectum physicum, sed solum explicat, vel dignitatem & excellentiam illius personæ, vel singularem Dei dilectionem, a qua donum illud proficiscitur, vel moralem quandam dignitatem, quæ ratione illius doni convenit humanæ naturæ, qua singulari modo est consecrata, & conjuncta Deo, & ita dilecta, ut non possit esse in ea aliquid, quod illi displiceat, neque declinet ab eo, quod rectum est: at vero illa bona dispositio, & affectio naturæ, dicit peculiarem effectum physicum & formalem, qui propriam formam requirit, quam Verbum ipsum supplere non potest.

Dices secundo. Quomodo hæc duæ assertiones inter se coherent? nam si aliqua aliarum perfectionum præter ipsam subsistentiam Verbi necessaria sunt ad perfectam sanctificationem, ergo Verbum per se ipsum non perfecte sanctificat. Vel saltem sequitur, Christum sanctiorem esse per utramque gratiam simul sumptam, unionis scilicet & habituales, quam per solam gratiam unionis, quod videtur alienum a modo loquendi Sanctorum. Ad priorem partem respondetur absolute negando sequelam. Nam unio hypostatica sanctificat perfecte in suo genere, seu substantialiter, ut Damasc. dixit, non tamen omni modo seu accidentaliter: & illa perfectio creaturæ, qualis est anima Christi, per accidentia consummatur, ideo præter substantialem unionem indiget illa anima ad consummatam perfectionem suæ sanctitatis formis accidentalibus, ut sunt operationes rectæ, & principia earum. Unde dici etiam potest, verbum per se sanctificare perfecte intensive, quia confert sanctitatem, quæ eminenter continet hæc omnia, & illa secum affert juxta naturæ assumptæ capacitatem; & ideo ut supra diximus disputat. 14. sectio. 2. quamvis subsistentia Verbi & dignitas in se una sit, aliter tamen dicitur sanctificasse humanitatem, quam naturam irrationalem, si illam assumeret, quia illa non esset capax moralis dignitatis, neque honestæ operationis & beatitudinis, sicut est humanitas.

Obiectio.

Responsio  
Unio hypostatica  
quomodo  
sanctificat

Ad alteram ergo partem negatur etiam sequela, quia, ut dicatur Christus sanctior, non sufficit illa extensiva perfectio, quando tota illa intensive, eminenter, & in radice in una gratia continetur. Sicut non est homo, simpliciter sanctior per gratiam & charitatem simul, quam esset per solam gratiam in eodem gradu intensificationis. Quod certissimum est in Christo Domino propter majorem eminentiam gratiæ unionis.

Ex quibus tandem, ut in forma quæstioni respondeam, dico tertio, quamvis Christus, ut homo Deus, non indigeret gratia creata, ut esset gratus Deo, & sanctus, fuit tamen illi necessaria ad consummatam perfectionem extensivam seu statum sanctitatis. Utraque pars conclusionis patet ex duabus conclusionibus positis. Fundamentum vero primæ sententiæ nihil obstat, quia esse gratum ut sic, non est effectus formalis ad æquatus gratiæ creatæ, sed esse gratum tali modo, scilicet per participationem divinæ naturæ, seu accidentali sanctificatione, de qua loquebatur Concilium Trident. sess. 6. cum dixit, formalem causam justificationis esse inhærentem iustitiam: at sanctificatio ex se abstrahit ab accidentali, & substantiali: & hoc posteriori modo per ipsam unionis gratiam conferitur sanctificatio. Quæri vero hic solet, an ad meritum indigeret Christus Dominus hac gratia creata habituali. Sed hæc quæstio ad hunc locum non pertinet, & supra q. 1. art. 2. fere a nobis expedita est, & inferius q. 19. in proprio loco tractabitur.



*Quæ certitudine tenendum sit, animam Christi habuisse gratiam habitualement.*

**F**uit prima quorundam Theologorum opinio (fratrum opinio dicenda est), qui negarunt animam Christi habere hanc gratiam, nam esset in illo supervacua, quia solum confertur ad sanctificandū, & sine illa est anima Christi sanctificata. Ita refert Palud. in 3. dist. 13. q. 2. qui non admodum hanc sententiam reprehendit.

Secundā sententia licet fateatur esse in Christo hanc gratiam, non tamen existimat hoc ita certum, sicut de aliis hominibus, quia alii simpliciter illa indigent ad suam sanctificationem, præsertim parvuli, qui nullam aliam in hærentem formam habere possunt, qua sanctificentur, Christus autem non ita illa indiguit. Tum etiam quia de aliis hominibus hoc definitum videtur in Trident. Sess. 6. c. 7. juncto canon. 11. de Christo autem nusquam.

Dico primo, Christi animam habuisse donum gratiæ habitualis. Ita docent omnes Doctores d. 13. & probatur ex Scriptura simul & Patribus; dicitur enim Psalm. 44. *Propterea unxit te Deus, Deus tuus oleo lætitiæ præ consortibus tuis:* quamvis enim hunc locum supra de gratia unionis exposuerimus, & interdum aliis modis a sanctis exponatur, tamen de gratia etiam habituali illum intelligit Athanas. ferm. 2. contra Arianos, circa finem, dicit enim oleum illud esse sanctificationē, qua Verbum homo factum se ipsum sanctificavit, cujus etiam est Dominus, & qua nobiscum communicavit, & infra: *Ipse est*, inquit, *qui dat, & accipit Spiritum sanctum, dat ut Verbum, accipit ut homo:* & infra: *Ex eo quod ipse ut homo eam gratiam Spiritus accepit, factum est, ut nos illam ex plenitudine dimanantem acceperimus.* Quam sententiam aliquantulum verbis mutatis docet aperte Cyril. to. 1. Conc. Ephe. c. 2. in ep. ad solitariam vitam agentes, ubi ait, nomen Christi propriè tribui iustis, quia Spiritus sancti gratia debiti sunt juxta illud. 1. Joan. 2. *Et vos unctionem habetis a sancto*, quam unctionem, inquit, certum est fuisse in Christo; scriptum est enim Ps. 44. *Propterea unxit te Deus Deus tuus oleo lætitiæ;* & Act. 10. *Unxit illum Deus Spiritu sancto & virtute.* Addit vero singulare fuisse Christo, non solum fuisse Christum, sed etiam Deum, unde concludit: *Si quis propter hanc solum unctionem dicat appellari Christum Deum, & adorari, eadem ratione dicendum esse nos esse Deos, & adorandos æque ac Christum:* ubi evidenter supponit illam gratiam Spiritus sancti esse ejusdem rationis in Christo, & in nobis, unde to. 5. ejusdem Concil. c. 1. in declaratione septimi anathemat. expresse dicit tractans eundem locum, Christum secundum humanam naturam perinde ac unum ex nobis inunctum esse, quia licet Spiritum sanctum largiatur, tamen ut homo est, dispensatorie inunctus est. Similia habet Chrys. hom. de sancto & venerando Spiritu post med. & Euseb. li. 4. de demonstr. c. 25. & lib. 1. hist. c. 1. Hieronym. in id Abac. 3. *Egressus es in salutem populi tui*, inquit: *super omnia unguentorum genera, est unguentum spirituale, quod vocatur oleum exultationis, quo ungitur Salvator;* & infra: *Participes autem eos puto, ad quos loquitur Joannes, & vos unctionem habetis a Sancto;* quam unctionem infra dicit dari in baptismo, & si amittatur, posse per poenitentiam reparari. Idem sentit Ambros. 1. de Spirit. sanct. c. 8. & super ad Hebr. 1. ubi hoc unguentum dicit esse gratiam, quæ communis modo tantum in capite. Et ad hoc accommodat illud Ps. 28. *Sicut unguentum in capite quod descendit in barbam, barbam Aaron, quod descendit in oram vestimenti ejus est,* &c. Neque aliud ibidem sentit Anselm. qui animadvertit, Deum hominem factum, esse, qui ungi dicitur, oleum vero esse gratiam seu donum Spiritus sancti, quod ejus, inquit, conscientiam exhilararet. Denique Bernardus ferm. 16. in Cant. idem oleum explicat esse septem Spiritus sancti dona; quibus Christum replendum fore Isajas prædixerat. Ex quo summi potest secundum testimonium ad hanc veritatem confirmandam, ex verbis Isajas 11. *Requiescit super eum Spiritus Domini, Spiritus sapientiæ, &c.* Quem locum de donis etiam gratiæ habitualis exponit aperte Cyril. ibi prædixisse prophetam, dicens requieturum Spiritum De multis virtutibus & viribus pollentem: subdit vero:

*Prophetam ita artificium suum temperasse, ut non hominem merum nobis inducat Jesum, deinde Spiritu afflatum, & quasi nostri ordinis esset, charismatum divinarum participem factum: sed potius Dei Verbum humanam naturam assumpsisse declararet, cumulatam bonis omnibus, quatenus ad ipsius naturam pertinet, ac etiam cum humanitate, quæ ad eam spectant, velut sua ac propria sibi vendicante.* Quibus verbis & rationem explicat, propter quam Spiritus sancti charismata humanitati Christi communicata fuerint, scilicet quia ad illius perfectionem pertinebant, & modum, quo illa habuit, videlicet ut sibi propria & connaturalia. Ad eundem modum Greg. 29. Mor. c. 30. vel juxta aliam divisionem 16. eundem locum tractans, inquit: *Redemptor noster, Spiritus operationes simul in se & cunctas & manentes habuit.* Sic etiam Tertul. l. contra Jud. c. 9. n. 119. *Requiescet*, inquit, *super illam Spiritus Dei, id est, universitas spiritualium documentorum, quæ in solum Christum competeat.* Et l. 3. contra Marcion. c. 17. dicit hanc esse pulchritudinem gratiæ spiritualis, interiorē ejus qualitatem, propter quam dictus est: *Speciosus forma præ filiis hominum.* Similia habet lib. 5. contra Marcion. c. 8. n. 126. Et fere Irenæus l. 3. c. 19. Tertio probari hoc potest ex verbis Angeli Luc. 1. *Quod nascetur ex te sanctum:* ut de sanctitate, omni ex parte perfecta, atque adeo non tantum gratiam unionis, sed etiam habitualement includente intelligatur, juxta id, quod Bernard. ait hom. 4. in Missus est: *Singulariter sanctum fuit, quidquid Virgo concepit, & per spiritus sanctificationem & per Verbi assumptionem.*

Quarto denique probari hoc potest ex illo Joan. 1. *Videbimus gloriam ejus; plenam gratiæ & veritatis:* quo testimonio Scholastici omnes ad hoc probandum utuntur, nec sine causa, nam plenitudo gratiæ Christi hæc omnia complectitur. Sed de hoc testimonio dicam plura infra disp. 22. nunc sufficiant ad confirmandam hanc expositionem verba August. 15. de Trin. c. 26. Ubi loquens de donatione Spiritus sancti per gratiam sanctificantem, inquit: *Dominus ipse Jesus, non solum Spiritum sanctum dedit ut Deus, sed etiam accepit ut homo, & propterea est plenus gratiæ, quia unxit Deus Spiritu sancto, non utique oleo visibili, sed dono gratiæ, quod visibili significatur unguento, quo baptizatos ungit Ecclesia.* Ubi sermo est aperte de dono gratiæ creatæ. Ultimo argumentari possumus ratione, quæ ex dictis sect. præced. facile desumitur, quoniam hæc gratia cum Christi hominis perfectione maxime congruebat, & suo modo illi necessaria erat, quod magis ex sequenti conclusione constabit.

Dico secundo. Secundum fidem certum existimo, hanc habitualement gratiam esse in anima Christi, esseque donum creatum illi inhærens. Probatum primo, quia cōmunis consensus Sanctorum & Scholasticorum conspirantium in assertionem alicujus veritatis ut indubitata, & in scripturis contenta, facit certitudinem fidei: ita vero est in proposito, ut ostensum est. Secundo, quia de fide est Christi animæ fuisse charitatem infusam, hoc enim donum commune est omnibus iustis, quorum princeps Christus est. Scriptura passim docet, & Paulus universe dicit, sine charitate nihil cætera valere: quis ergo sine nota hæresis negare potest charitatis donum infusum fuisse animæ Christi? Hoc autem donum non est solum operatio, quæ transit, sed aliquid permanens per modum habitus, sic enim intelligunt Patres & Concilia Scripturas, quæ de hoc dono loquuntur. Et non minus Christum hominem, quam alios iustos comprehendunt, ut est illud ad Rom. 5. *Charitas Dei diffusa est in cordibus nostris, per Spiritum sanctum, qui datus est nobis.* Multo ergo magis diffusa est in corde Christi, de quo Paulus ait ad Ephesios 3. *In charitate radicati & fundati, ut possitis comprehendere cum omnibus sanctis, quæ sit latitudo, longitudo, sublimitas, & profundum, scire etiam supereminentem scientiæ charitatem Christi.* Unde idem Christus Dominus Joan. 15. quoad hoc donum, eodem modo de se & aliis iustis loquitur, cum dicit: *Si præcepta mea servaveritis, manebitis in dilectione mea, sicut & ego patris mei præcepta servavi, & maneo in ejus dilectione.* Quapropter non minus verum in ipso est, quam in nobis, quod ca. 14. dixerat: *Si quis diligit me, mandata mea servabit, & Pater meus diliget eum, & ad eum veniemus, & mansionem apud eum faciemus.* Quibus verbis inhabitatio Dei per gratiam habitualement & permanentem significatur:



atur. Dicitio autem illa, *Si quis*, generalis est, & omnes comprehendit, qui Deum diligunt, & ejus mandata servant, inter quos Christus homo comprehenditur. Hoc autem loco per gratiam habitualementem solum intelligimus creatum donum, quo mediante Spiritus sanctus inhabitat animam iusti, sive illud sit gratia in essentia animæ, sive charitas in potentia, sive hæc res, sive ratione distinguantur: hæc enim sub opinionem cadunt. Unde arguitur tertio: quia licet speciatim de Christo non sit hoc definitum, tamen generatim de iustis definitum est, justificari per infusionem gratiæ & charitatis, ut constat ex Trid. sess. 6. c. 7. & can. 11. ubi constat nomine gratiæ & charitatis non intelligi operationem; nam illa doctrina generalis est de justificatione, tam adultorum, quam parvulorum; constat autem donum hoc in parvulis non posse esse operationem.

Neque etiam dici potest Concilium loqui de dono abstractante ab operatione, vel habitu, tum quia loquitur de iustitia, quæ ejusdem rationis est in omnibus hominibus iustis: tum etiam, quia explicando causam formalem illius justificationis, illam distinguit ab operatione, & dicit esse unicam, & infundi secundum propriam cuiusque dispositionem, & cooperationem, & effici per sacramenta: tum præterea quia de fide est, baptismum non minus conferre gratiam adultis, quam parvulis; cum tamen non conferat operationem: imo fieri possit, ut dum adulti baptizantur & justificantur, actu non operentur. Propter quod idem Conc. sess. 6. c. 14. & sess. 14. c. 1. & 4. definit, gratiam comparatam per baptismum, & amissam per peccatum, posse iterum per penitentiam reparari, quod dici non potest, nisi de gratia habituali & permanente. Est ergo de fide ex hac definitione, gratiam & charitatem non tantum per modum operationis, sed etiam per modum formæ permanentis, & inherens, infundi iustis: hæc ergo definitio etiam Christum hominem comprehendit, quia, ut ostensum est, Scriptura, & Patres non minus docent habitare Spiritum sanctum in anima Christi per hæc dona, imo multo perfectius, quam in aliis iustis. Concilium autem generaliter explicuit hanc doctrinam Sanctorum, de donis, quæ permanent & inhaerent: & quam vis non usus fuerit nomine habitus in genere, tamen cum in specie utatur nomine gratiæ & charitatis, perinde esse existimo: quamvis in rigore certior sit res his nominibus, quam illis explicata.

Ultimo tandem ratio jam tacta est, quia licet hæc dona non fuerint necessaria animæ Christi ad excludendum peccatum, sicut sunt homini lapsi, neque etiam ad primam seu primariam ejus sanctificationem, sicut fuerunt necessaria Angelis, vel Adæ in statu innocentis, quia Christus habuit aliam priorem, & excellentiorem sanctificationem: tamen ad debitam illius animæ pulchritudinem, & dispositionem, & ad connaturalem modum operandi, atque adeo ad perfectam participationem divinitatis, & consummatam justificationem, tam necessaria fuit hæc gratia animæ Christi, sicut aliis, ut bene indicavit D. Th. hic ad 1. & infra ar. 9. ad 2. Aliunde vero hæc optima dispositio erat illi animæ multo majori ratione conferenda, propter dignitatem personæ verbi, & divinæ naturæ, cui erat conjunctissima: nam inde etiam habuit, ut esset quasi quoddam universale principium, & perfectissimum exemplar gratiæ aliis conferendæ. Habuit etiam inde perfectissima dona sapientiæ, & scientiæ, ac visionis Dei: cum tamen non minus opportuna, & necessaria sint hæc dona sanctificantis gratiæ. Denique corpori etiam ipsi, quamvis unito Verbo, imo quia unitum est Verbo, data sunt creata dona gloriæ tempore convenienti; quod non minus certum est, quam sit de aliis hominibus, quorum corpora futura sunt conformia corpori claritatis ejus. Cur ergo non idem existimandum est de donis animæ? Unde non immerito existimari potest, hanc veritatem doceri ab omnibus Patribus, & Conciliis tradentibus utramque naturam, divinam & humanam fuisse in Christo perfectam omnibus proprietatibus, & perfectionibus ad utramque pertinentibus. Sed hanc rem elegantibus Ambrosii verbis concludamus: ille enim lib. de Spiritu S. c. 11 cum dixisset, Christum de Spiritu S. natum esse, & renatum, subdit: *Quem natum de Spiritu sancto confitemini, quia negare non potestis, renasci negatis: magna insipientia est, ut quod singulare est hominum, confiteamini, quod commune est hominum, denegetis.*

Ex quibus colligo, & dico tertio, hanc gratiam habitualementem in Christo, & in aliis hominibus iustis esse ejusdem speciei, & rationis essentialis. Quod notavit Richardus d. 13. a. 1. q. 2. Cajetan. infra ar. 11. circa ad tertium, & sumitur ex omnibus adductis testimoniis, & rationibus, quæ vel expresse hoc affirmant, & probant, vel certe manifeste supponunt. Et ratione patet, quia charitas animæ Christi ejusdem rationis est cum nostra, habet enim objectum formale, & modum tendendi ejusdem rationis: similiter etiam visio beata, & lumen gloriæ sunt ejusdem rationis specificæ in Christo, & aliis beatis, ut infra ostendemus. Deinde gratia sanctificans, quæ in nobis est, est suprema quædam participatio divinæ naturæ, quæ fortasse nulla potest esse major per qualitatem creatam, cum non possit habere operationes connaturales meliores, quam sint visio, & amor supernaturalis Dei. Denique nullum est fundamentum ad fingendam hanc distinctionem, cum tamen Scriptura, & Patres, ut dixi, eodem modo loquantur de hac Christi gratia, & nostra. Et potest hoc inde confirmari, quod Christi anima, sicut est exemplar nostræ gloriæ, ita & nostræ iustitiæ, juxta illud ad Rom. 8. *Quos prædestinavit conformes fieri imagini Filii sui.* Oportuit autem, ut perfectissimum exemplar esset ejusdem rationis, quoad fieri posset.

Sunt vero quidam discipuli D. Thomæ, qui licet propter nonnulla ex adductis fateantur, gratiam habitualementem Christi, & nostram, secundum absolutam essentiam suam consideratas, esse ejusdem speciei: tamen secundum modum essendi, & ex parte subjecti dicant gratiam Christi esse alterius rationis & essentialis. Sed hoc existimo tantum ad quendam loquendi modum pertinere, qui non admodum mihi placet, quia in ipsa Christi gratia revera nihil est speciei differens a gratia nostra: solum est in illa singularis conjunctio ad Verbum, & ad gratiam unionis, ad quam ordinata est, ex qua conjunctione habet, ut aliquos effectus possit efficere, quos non potest privata gratia aliorum hominum. Sed hæc omnia nullam in illa indicant differentiam specificam, sed solum habitudines quasdam pertinentes ad moralem dignitatem. Quis enim dicat, humanitatem Christi & aliorum hominum secundum se esse ejusdem speciei, quatenus vero sunt in hoc, vel illo supposito differre speciei, quia humanitas Christi habet dignitatem quandam, vel quia potest esse principium aliquorum effectuum, quos alii homines efficere non possunt? Sed cum de re constet, de modo loquendi non admodum laboro.

## SECTIO III.

*Quando & quomodo data sit anima Christi hæc gratia habitualis.*

Dico primo. Hæc gratia data est Christi animæ simul tempore cum ipsa gratia unionis. Hæc est communis Scholasticorum sententia, qui non solum hoc docent, sed etiam ab illo instanti habuisse omnem gratiam habitualementem, omnemque intentionem ejus, quam perpetuo erat habitura, absque ullo illius augmento, vel mutatione. Et hoc sensu intelligitur conclusio posita, & asserta a D. Th. infra, ar. 12. & 13. & q. 34. ar. 1. & 4. & in 3. d. 13. q. 1. ar. 2. quæstionum. 12. Ubi reliqui Doctores consentiunt, & colligitur ex verbis Isai. 11. *Egredietur virga de radice Jesse, & flos de radice ejus ascendet, & requiescet super eum Spiritus Domini.* In eodem ergo momento, quo beata Virgo floruit (ut ita dicam) concipiendo Filium, requievit super eum Spiritus Domini: frequentius enim Sancti, per virgam, virginem, per florem autem, Christum intelligunt, ut seq. tomo, disp. 1. sect. 1. videbimus. Et licet alii, ut ibidem dicam, virgam illam florentem, Christum esse declarent, idem potest fere argumentum sumi, quia sicut a principio conceptionis Christus fuit virga florens divinitate, ita a principio habuit inhabitantem Spiritum S. per dona gratiæ. De quo mysterio multi etiam interpretantur, præsertim juxta Hebraicam veritatem, illud Ps. 109. *Ex utero ante luciferum genui te; nam licet exponantur hæc verba de æterna generatione, tamen de humana exponit etiam Augustinus ibi, & Tertullianus l. 5. contra Marcionem, c. 9. & multi recentiores, præsertim Flamin. Eugub. Jansenius, Vatablus, qui ita vertit. Tibi est ros generationis tuæ, in summo decore & sanctitate ex utero auroræ; & ita exponit in Commen-*

Gratia  
habitua-  
lis ejusde  
rationis  
est in  
Christo  
& in no-  
bis.

De fide est  
gratiam,  
& chari-  
tatem in  
iustis esse  
quid per-  
manens.

Ob quam  
causam  
Christo  
dona gra-  
tiae colla-  
ta sunt,



tario: *Gratie illa, quæ tibi dantur a Patre, dum carnem assumes, obveniunt tibi jam inde ab utero.* Et idem redit, quod ait Eugubinus: *Ex utero, ex aurora tibi ros natiuitatis tue;* ubi per rorem significari ait abundantiam gratiæ, juxta phrasim Scripture: *Dei tibi Deus de rore cæli,* &c. Erit ergo sensus; ab utero matris cœlesti rore gratiæ perfusus est; cui consonat illud Luc. 1. *Quod ex te nascetur sanctum, vocabitur filius Dei.* Sicut ergo a primo conceptionis instanti fuit Dei filius, ita & sanctus, ac plene & omni perfectione sanctus, non solum per gratiam unionis, sed etiam per habitualem nam ex hoc habere debuit gloriam & gratiam, qualis decebat unigenitum a Patre, quod latius confirmabimus infra, agentes de scientia beata animæ Christi.

Ratio vero est, quia hæc gratia data est Christo ratione unionis personalis, ut dictum est, & iterum statim dicitur; ergo habuit illam simul cum ipsa unione. Quam rationem insinuare videtur Damasc. l. 3. de fid. c. 22. cum ait, eos, qui dicunt vere in gratia profecisse Christum, non existimare unionem esse factam a principio conceptionis, quod videtur sumpsisse ex Athanasio serm. 4. contra Arian. a medio. Et colligi etiam potest ex August. 15. de Trinit. c. 26. Secundo ostendimus infra, animam Christi ab instanti suæ creationis esse beatam, unde necessario sit ab eodem instanti habuisse gratiam consummatam. Tercio, quia Christi animæ omnis gratiæ perfectio tribuenda est, magna autem perfectio est, habere a principio totam gratiam. Contra hanc vero conclusionem hoc sensu expositam obijci potest locus ille Luc. 2. *Puer autem crescebat ætate, sapientia, & gratia.* Sed hunc locum exponit D. Th. infra art. 12. ad 3. ubi aliquid addemus.

Dico secundo. Quanquam hæc gratia simul tempore fuerit cum gratia unionis, ordine tamen naturæ fuit posterior, ad modum proprietatis connaturalis, quasi resultantis ab illa. Hæc conclusio partim in superioribus probata est disp. 10. sect. 2. ubi ostendimus gratiam habitua-lem non antecessisse ordine naturæ gratiam unionis: quod vero subiecta sit, affirmat supra D. Th. quem Cajet. & alii Thomistæ sequuntur, & Soto in 4. d. 19. q. 1. ar. 2. Tenet etiam Alex. Alenf. 3. p. q. 8. memb. 3. a. 4. §. ult. Et colligi potest ex Concil. Francof. ep. ad Episc. Hispan. col. 7. ubi tractans locum illum Psal. 44. *Propterea auxiit te Deus Deus tuus,* differentiam constituit inter nos & Christum, quod nos per gratiam, ille vero unctus est per naturam, quia in illo plene fuit divinitas. Nec videtur solum loqui de unctione, quæ formaliter est ab ipsa divinitate, nam paulo antea illam unctionem explicaverat per dona creata. Præterea probari hoc solet ex Aug. in Enchir. c. 40. & 41. ubi dicit, gratiam quodammodo factam esse Christo naturalem ratione unionis: quæ verba de gratia habituali intelligit D. Th. infra a. 13. ad 2. & satis congrue, quia licet exponi possent de gratia unionis, tamen ipse August. videtur distinguere hanc gratiam ab ipsa susceptione humanæ naturæ, ratione cujus illa gratia facta est naturalis. Sicut esse impeccabilem naturale est Christo ratione unionis, ut ibidem dicit, cum tamen esse impeccabilem, aliquid donum includat distinctum ab unione. Tercio, idem sensit Cyril. loco supra citato Isai. 11. cum dixit, Christum habuisse hæc charismata Spiritus S. non ad modum aliorum hominum, quasi adventitia, sed ut sua & propria. Et l. 1. Jo. c. 17. eodem sensu dixit, alios sanctos non sua, sed superiori virtute signa & miracula effecisse: Christum vero, ut virtutum omnium dominum: & eadē ratio est de gratia habituali. Quarto, Basilus in id Ps. 44. *Propterea auxiit te Deus oleo letitiæ,* intelligens per hoc oleum Spiritum S. quatenus spirituale gaudium confert, & consequenter cætera dona, & virtutes, quæ gaudium illud secum afferunt, differentiam constituit inter Christum & alios homines, quod alii labore & exercitatione hæc assequuntur, Christo autem naturalis est ad boni prosecutionem proprietas, & ad iniquitatis fugam perquam familiaris alienatio. Quinto, similia verba habet Dionysius Alexan. in supra citata epist. contra Paulum Samos. Sexto est optimus locus apud Damasc. l. 3. c. 22. ubi ait hæreticos tribuentes Christo verum augmentum in gratia & cognitione, non agnoscere in ipso veram hypostaticam unionem. Nam, si vere inquit unita est Verbo Dei caro, quomodo non perfecte ditata est omni sapientia & gratia? Quem locum latius tractabimus infra de Christi scientia disputantes. Ubi etiam expendemus locum Jo. 1.

quo confirmari solet hæc veritas. *Vidimus gloriam ejus, gloriam quasi unigeniti a Patre* &c. de quo legi potest Tolet. ibi. annot. 47. Can. l. 12. de locis c. 14. D. Th. etiam infra art. 13. in arg. Sed contra, adducit illud Isai. 42. *Sciscipiam eum, Dedi spiritum meum super eum.* Cui simile est illud Isai. 11. *Flos de radice ejus ascendet, & requiescet super eum Spiritus Domini.* His enim & similibus locutionibus significari videtur, hæc dona manasse ex susceptione humanitatis, & Christum habere hanc gratiam, quia est unigenitus: sicut etiam Joan. 3. dicitur: *Pater diligit Filium, & omnia dedit in manu ejus.* Ultimo probatur ratione, ex eisdem locis desumpta: nam cum per unionem natura humana sit effecta natura Filii Dei, hoc titulo illi debetur maxima perfectio & participatio optimorum donorum Dei, qualis sunt gratia & gloria. Item debentur illi optimæ operationes, proportionatæ divinæ personæ subsistendi; ergo & accommodatæ facultates, seu principia operandi: hæc ergo omnia data sunt ratione unionis, & consequenter ordine naturæ sunt posteriora, quam illa.

Et hinc colligitur, hanc gratiam habitua-lem posse dici connaturalem Christo, quamvis in modo loquendi contradicere videantur Bonav. in 3. d. 4. art. 2. q. 3. Richardus a. 3. q. 2. Durand. q. 3. quia illa gratia simpliciter est supernaturalis humanitati, & libere illi datur, supposita unione. Sed in re non dissentiant, ut jam explicabo. Dubitari enim hic potest, an gratia habitualis sit in omni rigore proprietatis resultantis physice, & effective ex unione. Quidam enim ita putant esse intelligendam conclusionem positam, quia aliàs non esset vera proprietates, sed nomine tantum. Nec refert, quod non sequatur ex natura specifica vel individua Christi hominis: satis namque est, quod sequatur ex unione seu subsistentia. Nam etiam illa unio habet suam propriam & essentialē rationem, ad quam potest aliqua proprietates consequi. Hæc opinio solet tribui Cajetano hic a. 12. & aliis Thomistis. Sed apud eos, nec expressam, nec satis insinuatam invenio. Sed si attente legantur, contrarium potius docet, & eodem sensu Bonaven. Richardus & Durandus negant, gratiam habitua-lem esse proprietatem Christi naturalem.

Dicendum ergo tertio est, gratiam habitua-lem non manare a Verbo, aut ab unione hypostatica, physica dimanatione, aut per aliquam veram efficientiam, sed immediate dari a Deo per suam voluntatem, & potentiam.

De hac assertionē in propriis terminis pauca apud antiquos Theologos reperientur; eam tamen satis significat D. Th. hac q. a. 13. ubi ait, actionem incarnationis attribui Filio, actionē vero gratiæ Christi attribui Spiritui sancto: sentit ergo fieri actionē omnino distincta, & non manare ex alia. Eandem sententiam docent omnes recētiōres, quæ apud me est certissima, eamque in hunc modum ostendo. Duobus enim modis intelligi potest hæc dimanatio. Primo, ut hæc gratia manet ab unione hypostatica ratione illius modi creati, quem in humanitate ponit. Secundo, ut proxime manet a subsistentia increata Verbi humanitati unita. Omitto alios modos, qui excogitari possunt, scilicet, ut ab utroque simul, vel a toto composito, Deo homine, vel a divinitate in humanitatē fluere immediatē. Hi namque modi sūt prorsus improbabilēs; & quibus rationibus impugnabimus singula ex prioribus membris, sufficienter etiam falsa esse cætera constabit. Quia totum compositum non est per se primo operativum, sed ratione alicujus principii agendi: & humanitas in hoc composito non est principium, a quo possit gratia manare, nec ut a totali, nec ut a principio partiali. Et, sicut modus unionis aut subsistentia Verbi non possunt esse principium proximū totale hujus emanationis, ut probabimus, ita nullā prorsus efficientiam habere possunt, ut eadem rationes ostendent. Divinitas autē, sicut non est immediate unita humanitati, sed ratione subsistentiæ Verbi; ita nō est principium, a quo possit aliqua proprietates in humanitatē naturaliter dimanare. Aliās & divinitas aliquid ad extra naturaliter ageret, & merito cenferi posset, ex divinitate & humanitate cōflata una natura, quandoquidē proprietates unius alteri naturaliter cōmunicari dicuntur ex vitalis unionis. Nā tunc subiectum propriū talium proprietatū nec esset sola humanitas, nec sola divinitas, sed id, quod ex utraque resultaret, & illud idem esset adæquatū principium operationum procedentium ab illis proprietatibus: non possumus autem nos melius unitatem natu-

Gratia  
habitua-  
lis  
connatu-  
ralis  
Christo,  
quo sensu.

Gratia  
habitua-  
lis  
post. in  
natura,  
quam gra-  
tia unio-  
nis.



raz,quam ex unitate proprietatum & operationum colligere, quia natura est radicale principium operandi.

Gratia  
habitua-  
lis Chri-  
sti, a mo-  
dounio-  
nis hu-  
manitatis  
ipsius ad  
Verbum  
physice  
manare  
nequit.

Probatur ergo prior pars de modo unionis, primo, quia ille modus natura sua non est activus, nec principium efficiendi aliquid magis, quam modus subsistentiæ, & alii similes, sed solum formaliter conjungit humanitatem Verbo, & ad hoc solum natura sua institutus est, & in hoc quasi absolvitur virtus ejus. Secundo, quia illa unio non se habet ad modum actus primi respectu alicujus actionis vitalis: nulla est enim, quæ ab illa unione physice ac per se procedat, ut a formali principio agendi: ergo neque habitus infusi, qui sunt proxima principia actionum vitalium supernaturalium procedunt ab illa unione: ergo neque gratia sanctificans, quæ comparatur ad illos actus ut forma ad proprietates, & est veluti radicale principium illorum actuum. Tertio ille modus unionis & gratia sanctificans sunt res omnino diversorum ordinum, nec per se una ordinatur ad aliam physice loquendo: nulla ergo probabili ratione fingi potest illa, resultantia inter illas. Quarto ex probationibus alterius partis hæc fiet evidentior: nam, cum illa unio tota sit, ut subsistentia verbi communice- tur humanitati, si ex subsistentia ipsa non resultat gratia habitualis, multo minus resultare potest ex illo modo unionis. Maxime quia, si humanitati unitæ debetur gratia habitualis ex aliqua congruenti proportionem, id potius est ratione ipsius Verbi, quam ratione modi unionis.

A subsi-  
stentia  
Dei Verbi  
gratia ha-  
bitualis  
Christi  
physice  
dimanare  
non po-  
test.

Secundo probatur altera pars de subsistentia increata Verbi. Primo ex illo principio supra demonstrato, quod subsistentia illa, ut est propria Verbi, & relativa, non est activa propria aliqua efficientia, aliàs Verbum divinum per suam proprietatem increatam haberet aliquam efficientiam ad extra, quæ non esset communis cæteris personis: de qua re multa dixi superius disp. 4. sect. 4. Secundo quia duobus modis intelligi posset hæc resultantia gratiæ a subsistentia Verbi, primo, absque aliquo alio concursu libero divinæ voluntatis: secundo per modum principii proximi indigentis concursu voluntatis, ut ex hac parte effectus ille sit communis aliis personis, & in se absolute liber. Prior modus est omnino falsus, & ex illo sequuntur duo illa incommoda insinuat, quod ille effectus gratiæ habitualis, illaq; resultantia non est immediate a Deo ut Deus est, neque a Patre & Spiritu S. quia non est a voluntate divina, ut est ad extra operativa per omnipotentiam efficientem, sed a sola subsistentia increata filii Dei ut sic. Consequens autem est manifestus error. Item sequitur, facta incarnatione, non esse liberum Verbo, aut Deo & cæteris personis, communicare gratiam sanctificantem humanitati assumptæ, sed necessario profluere, & communicari, prorsus independentem a voluntate divina: quia dicitur ille effectus ab illa ut sic non profluere: actio autem non est libera, nisi quatenus a voluntate profluit. Ex quo ulterius sequitur, supposita incarnatione non potuisse Deum impedire, quin gratia sanctificans a subsistentia Verbi in humanitatem proflueret. Quæ omnia sunt plane absurda. Secundus modus non est adeo erroneus tamē, præter hoc quod tribuit relationi filii aliquam efficientiā, quam non tribuit aliis relationibus divinis, errat præterea quia personalitati ut sic tribuit vim agendi tanquā principio formali, quod est contra rationem personalitatis, & tam in creatis, quam in divinis falsum invenitur. Præterea eadem ratione posset relatio divina esse principium proximum creandi, & in Christo posset esse principium, saltem radicale actionum humanitatis Christi, maxime supernaturalium, quod superius satis est impugnatum. Sequela vero patet, quia id, quod est principium, a quo resultat principium proximum operationis, est principium radicale & principale earundem operationum, ut inductione ostendi potest, præsertim in operibus vitæ. Deniq; efficere per modum principii proximi, & cum dependentia ab influxu superioris causæ, imperfectionem involvit, estq; proprium creaturæ, nam ille est modus operandi causæ secundæ, quæ operatur cū dependentia a prima: non potest igitur hic efficientiæ modus tribui relationi vel subsistentiæ divinæ: ergo si subsistentia Verbi esset principium activum, a quo proxime dimanaret gratia, cū illa subsistentia sit res infinite perfecta, non haberet dependentiam in ea efficientia ab alio influxu vel cōcursu Dei.

Tertio probatur utraque pars simul, videlicet non manare physice gratiam habitualement a gratia unionis, sive sit sermo de modo unionis, sive de subsistentia Verbi, sive

de utroque. Primo, quia hæc duæ gratiæ sunt omnino diversorum ordinum, nec est cur una ab altera physice profluat. Secundo, per gratiam unionis communicatur divina persona ad subsistendum: per gratiam habitualement cōmunicatur divina natura participatione quadam: nulla est ergo connexio physica inter has gratias, ut una ab alia physice profluat. Tertio si esset hic naturalis resultantia, dimanaret gratia habitualis ab unione in aliquo certo ac determinato gradu, quia naturalis actio vel quasi actio seu emanatio ad unum aliquo tendit. Imo, quia natura nō impedita agit quantum potest, ex gratia unionis non impedita profluere gratia habitualis quanta est possibilis: & cum hæc non habeat certum & determinatum gradum (ut suppono) manaret infinita: hoc autem est impossibile, ut infra dicam. Unde fit, ut gratia habitualis determinata sit in Christo ad certum gradum, non ex natura rei, sed ex ordine divinæ sapientiæ & voluntatis: ergo signum est, totam illam gratiam non manare physice & per resultantiam ab unione, sed a Deo speciali ac libera actione conferri.

Dices. Cur ergo appellatur hæc gratia connaturalis Christo, & proprietates consequens unionem, si non resultat ab illa, sed necessaria est nova Dei actio libera ab actione incarnationis distincta, per quam hæc gratia conferatur. Et confirmatur, nam operatio consequitur esse: sed per unionem communicatur humanitati divinum esse: ergo ex illo resultat in humanitate divina operatio: ergo & habitualis gratia, quæ est talis operationis principium. Respondetur etiam in naturalibus accidere, aliqua esse accidentia connaturalia ab extrinseco agente juxta naturæ debitum collata, & non ab intrinseco principio active manantia; sic multi opinantur de quantitate respectu materiæ primæ, de motu circulari respectu cœli, & de speciebus infusis angelorum. Sic ergo in præsentī dicimus vocari gratiam connaturalem proprietatem Christi Dei hominis, quia ex dignitate talis personæ debita est, debito quodam proportionis connaturalis; ratione cujus præternaturale ac prodigiosum esset, unam actionem ab altera separare, & naturam humanam sine ornamentis gratiæ Verbo conjungere. Quomodo dici etiam potest, corporis pulchritudinem, optimamque dispositionem fuisse Christo debitam & connaturalem ratione unionis, ita ut miraculum fuerit carere corporis immortalitate & gloria, quamvis hæc corporis proprietates non manent ab unione per physicam resultantiam, sed debeantur solum debito proportionis. Et hoc solum etiam suadet supra posita cōfirmatio, quod ratione divini esse personalis debeantur Christo hæc dona, non vero quod ab illo physice manent, quia loquendo physice, operationes & principia earum non consequuntur personam, sed naturam: humanitati autem per hanc unionem communicatum est tantum esse personale, non essentiale divinæ naturæ; & ideo non sunt physice consecutæ operationes divinæ, vel gratia aut virtutes divinæ, sed tantum prædicto modo. De quo plura dicemus inferius disp. 49. circa qu. 23. explicando, quomodo Christus ut homo sit filius Dei naturalis.

Sed quæret aliquis, an, sicut gratia habitualis est Christo connaturalis per modum proprietatis debita, ita e converso ipsi gratiæ habituali sit Christus connaturale subiectum, quod per se primo & ut maxime proportionatum respiciat, ad eum modum, quo calor est in igne tanquam in subiecto maxime connaturali, & lux in sole. Quidam enim existimant, habere gratiam ad Christum hujusmodi habitudinem. Primo quia in solo Christo habet & habere potest omnem modum suæ perfectionis tam in essendo, quam in operando, vel causando: in eo enim habet quandam infinitatem in esse gratiæ, quam in aliis habere non potest. In eo disponit subiectum, cui proxime inhæret ad summam cum Deo unionem, quam gratia maxime intendit efficere, & in nullo subiecto ita potest illam perficere. In eodemque est principium perfecti meriti & satisfactionis, quod in aliis subiectis habere non potest. Secundo, quia illæ duæ habitudines videntur converti, scilicet, quod accidens aliquod sit proprium alicujus subiecti, & quod accidenti sit tale subiectum maxime proportionatum. Tertio, & melius, quia gratia est quedā participatio divinæ naturæ: ergo in nullo subiecto ita proportionato & proprio esse potest sicut in divina persona: & quia in illa proxime & secundum se esse non potest,

Respons.

Quæritur



test, tamen saltem erit propriissime in illa ut subsistente in assumpta natura: & huiusmodi subiectum est Christus.

Satisfactio.

Sed, quamvis hæc quæstio parvi momenti sit, quia in verbis potius, quam in re aliqua consistere videtur, nihilominus dicendum est, gratiam secundum habitudinem sibi intrinsecam, connaturalem, ac physicam (ut sic dicā) non respicere Christum ut subiectum proprium & connaturale, tamen secundum quemdam respectum quasi obedientialem esse in illo tanquam in subiecto sibi convenientissimo, & in quo maxime perfici potest, & perfectionem suam ostendere ac communicare. Ut hoc breviter declarem, suppono, Christum hoc loco non considerari ratione solum humanitatis, vel animæ, ut est creatura quædam spiritualis, sic enim non est aptius gratiæ subiectum, quam Angeli, vel quam alii homines, ut per se constat. Consideratur ergo ut Deus homo, & ratione divinæ personæ inquiritur, an gratia respiciat ipsum ut subiectum maxime proportionatum. Secundo est considerandum, quod, sicut natura & gratia sunt ordinum diversorum, ita etiam gratia habitualis, & gratia unionis: & sicut natura est in ordine inferiori & gratia in superiori, ita etiam gratia unionis est in ordine longe excellentiori, quā gratia habitualis: imo ex ea parte, qua gratia unionis includit intrinsece & formaliter personam divinam, magis superat omnem gratiā creatam, quam omnis gratia creata superet naturam; quia est inter illa longe maior distantia: est enim alia inter ens per essentiam & ens per participationem: hæc vero inter duo entia per participationem.

Ex his vero infertur & probatur prior pars sententiæ propositæ: natura enim non potest dicere connaturalem habitudinem ad gratiam propter improprietatem & distantiam diversorum ordinum: ergo nec gratia habitualis, quæcumque illa sit, potest dicere habitudinem intrinsecam & connaturalem ad gratiam unionis, ita ut ex natura sua petat conjunctionem & unionem ad illam, quia est inter eas major distantia & improprietas: ergo non potest gratia dicere habitudinem intrinsecam & connaturalem ad Christum ut Deum hominem, qui essentialiter includit gratiam unionis, seu per illam constituitur, vel potius (ut sic dicam) ipse est maxima excellentia, & supremus ordo gratiæ unionis. Confirmatur ac declaratur, nam sicut perfectiones, quæ naturæ communicantur per gratiam habitualement, sunt supra vires connaturales ejus, & attollunt illam ad superiorem ordinem, ita perfectiones, quæ communicantur gratiæ habituali per conjunctionem ad gratiam unionis, sunt supra vires connaturales gratiæ creatæ, pertinentque ad alium supremum ordinem: ergo, sicut propter eam causam naturæ non debetur perfectio gratiæ, nec conjunctio cum illa, ita nec gratiæ creaturæ ex propria sua ratione debetur conjunctio ad unionem hypostaticam: ergo nec debetur subiectum, quod sit Deus homo: ergo non respicit hoc subiectum tanquam sibi proprium & connaturale. Confirmatur, nam si Verbum relinqueret humanitatem, eamque in propria persona conservaret cum omnibus donis gratiæ creatæ, quæ illi inhærent; aut si a principio ita ornasset illam animam absque hypostatica unionem, fecisset quidem singularem gratiam illi animæ, tamen absolute nihil fecisset contra vel præter naturam ipsius gratiæ habitualis: nec illud fuisset miraculosum in ordine gratiæ sanctificantis, quia ex natura sua potest in infinitum intendi in quovis subiecto capaci. Unde, quod Deus suo arbitrio det gratiam in quâ-tavis intentione personæ creatæ, non est præter naturam ipsius gratiæ: habet enim etiam ipsa gratia naturam suam & essentiam, secundum quam considerari potest, quid illi debitum sit, quidve supra connaturale debitum ejus. Atque hinc confici potest ultima ratio & confirmatio: nam gratia, ut est quædam qualitas realis ac physica, licet ordinis divini sit, dicit ordinem ad subiectum, cui proxime inhæreat, quod sit forma vel natura creata: ad suppositum autem naturæ non alia ratione dicit habitudinem, nisi quatenus necesse est, illam naturam; cui inhæreere ipsa debet, prius subsistere, vel sustentari, quam sustentare aliud: ergo gratia ex se non potest dicere connaturalem habitudinem ad illam naturam ut subsistentem in supposito increato, quia hoc valde extrinsecum est tali naturæ, & per se minime necessarium ad inhærentiam creatæ gratiæ, & formalem effectum ejus. Unde, si habitudo connaturalis præcise consideretur, potius dicendum est, sicut gratia creata intrinsece respicit naturam creatam, ita ex se

contentam esse substantia creata talis naturæ.

Posteriorem partem nostræ assertionis probant ad summum prioris opinionis argumenta, præsertim primū & tertium. Et res est adeo clara, ut non indigeat probatione. Natura enim, licet sit inferioris ordinis a gratia, & ideo illam non postulet ut sibi debitam, tamen illa maxime perficitur, estque illi convenientissima: ergo similiter gratiæ creatæ convenientissimum est esse in persona increata, quamvis hoc etiam sit supra naturam ejus. Imo ipsi etiam humanitati convenientissima est subsistentia increata, & unio ad Verbum, licet maxime distent: majori igitur ratione gratiæ creatæ, quæ ex se pertinet ad divinum ordinem, aptissimum erit conjungi gratiæ unionis, & personæ increatæ, eo modo quo potest, scilicet media natura creata substantiali. Tandem est ratio generalis, quia, licet inferioribus non debeatur semper conjunctio ad superiora, tamen, si illis tribuatur, ea maxime perficiuntur, illisque optime quadrat, & convenit.

Unde contra hanc partem non militant rationes pro alia parte factæ, quia non repugnat aliquod suppositum non esse debitum alicui accidenti, & quod si in illo constituitur, optimum & perfectum statum habeat. Quod in ipsis etiam facultatibus naturalibus animæ vel corporis Christi videre licet, nam intellectui creato non fuit debitum, vel connaturale, esse in Verbo Dei, & tamen optimum illi fuit esse in illo, & sic de aliis.

Argumenta prioris opinionis, si contra priorem partem nostræ sententiæ fiant, facile expediri possunt. Ad primum distinguendum est de perfectione connaturali ac debita gratiæ, & de supernaturali etiam ipsi gratiæ creatæ: priorem enim habere potest gratia extra Christum, quantum est de se, quamvis Deus statuerit nullam æqualem puræ creaturæ conferre: posteriorem vero fatemur habuisse non posse nisi in Christo, & huiusmodi sunt omnes, quæ ibi numerantur, nam gratia creata ex se non ordinatur ad summam unionem substantialem cum Deo, sed accidentalem, ut per affectum, ac cognitionem, & sic de aliis. Ad secundum admitti potest, illas duas habitudines converti in prædicto sensu, scilicet quia si subiecto debetur accidens, etiam accidens convenienter erit in illo: non tamen converti necesse est in alio sensu, scilicet ut accidenti etiam debeatur tale subiectum, viventi namque debetur calor, & nivi candor, non vero e converso. Ad tertium fatemur, illam perfectionem esse valde convenientem gratiæ creatæ, sed tamen esse adeo excellentem, ut nō possit illi esse connaturaliter debita, quia hoc ipso, quod forma creata est, licet divini ordinis, nō potest dicere habitudinem connaturalem ad personam increatam.

#### SECTIO IV.

*Utrum præter gratiam habitualement fuerit animæ Christi necessaria aliqua actualis gratia.*

Suppono ex materia de gratia duplicem esse gratiam, scilicet habitualement, de qua hætenus diximus, & dicemus plura in sequentibus: & actualem, quæ in excitantem, & adjuvantem dividitur. Sub qua divisione omnes alias comprehendimus, & nomine adjuvantis intelligimus illud auxilium, quo Deus actu, & intime influit in opera gratiæ: nomine vero excitantis, omnia alia auxilia supernaturalia comprehendimus, quibus Deus prævenit, vel excitat semper ad bonum, vel a malo liberat, & custodit. Advertendum enim secundo est, hanc gratiam actualem propter hæc duo esse posse necessariam, scilicet, vel ad operandum supernaturale bonum, vel ad vitandum malum, seu peccatum, ut ex doctrina de gratia constat. Ex qua etiam sumo, gratiam adjuvantem proprie explicatam dicto modo, ad actus naturales non requiri, quia illi cum concursu naturali efficiuntur: ad actus vero supernaturales in nobis est necessaria, quia ad illos indigemus altiori concursu; at vero gratia excitans ad utroque actus potest esse aliquo modo necessaria, vel utilis juxta varietatem, vel perfectionem, vel multitudinem actuum.

Dico ergo primo: tam necessaria fuit animæ Christi ad supernaturales actus efficiendos gratia actualis adjuvans, sicut nobis. Hæc conclusio, quamvis non asseratur a Theologis, quia de hac re nihil expresse disputant, tamen suppositis principiis de gratia, est certa: & primo patet inductione, quis enim dubitet indigni esse intellectum animæ Christi actuali auxilio supernaturali ad videndum

Habituali gratiæ convenientissimum subiectum increatum, non item connaturale.

Ad posteriorem partem rationes solutio.

Ad argumenta prioris opinionis responsio.



dum Deum, & voluntatem ad amandum ex charitate? hoc autem auxilium vocamus gratiam adjuvantem. Ratio vero est, quia isti actus in se sunt supernaturales, & respectu animæ Christi, & potentiarum ejus, etiam sunt supra illarum vires naturales; ergo concursus necessarius ad illos actus est supernaturalis, tam secundum se, quam respectu illius, cui datur; hic autem concursus supernaturalis dicitur gratia adjuvans. Dicitur fortasse, per Verbi præsentiam, cui anima Christi & potentia ejus conjunctæ sunt, satis suppleri & adjuvari naturalem defectum harum potentiarum, & ideo non ita esse necessariam illi animæ gratiam adjuvantem. Sed contra, quia, ut sæpe dictum est, unio hæc Verbi per se ac formaliter, præcise terminata est ad subsistendum, & non formale principium, vel ratio efficiendi aliquid; ergo non potest per se supplere defectum, quem natura assumpta habet ad aliquid efficiendum. Sicut si calor existens in hoc vel illo subjecto nihil ab illis, vel eorum formis adjuvetur ad agendum, non poterit plus agere in uno, quam in alio propter nobilitatem subjecti. Et confirmatur primo, nam potentia naturalis non potest adjuvari a Verbo ad actum supernaturalem, nisi quatenus Verbum ipsum per se actu influit in illum actum, seu movet & elevat potentiam ad illum; sed hic influxus & motio, cum sit effectio quedam, necessario debet esse communis Patri & Spiritui sancto; non ergo est a Verbo, ut peculiariter unito hypostatice, sed ut a causa prima & principali adjuvante: ergo totum illud auxilium pertinet ad adjuvantem gratiam, & est ejusdem rationis cum auxilio, quod datur aliis hominibus ad similes actus. Et confirmatur secundo, quia propter similem rationem ad actus naturales indigebat anima Christi eodem concursu naturali, quo indigent aliæ animæ: & similiter ad miracula facienda indiguit gratia miraculorum, & sic de aliis. Solum ergo est differentia, quæ ex fine præcedentis sectionis sumitur, quod hæc gratia, quamvis in se sit vere gratia & supernaturalis animæ Christi, tamen respectu animæ unitæ est veluti naturalis concursus illi debitus ratione unionis modo ibi explicato. Et hæc sufficient de gratia adjuvante.

Dico secundo: Anima Christi Verbo unita etiam indiget gratia excitante ad supernaturales actus, accommodata tamen statui, in quo est constituta. Ad explicandam & probandam hanc conclusionem advertendum est primo, hanc gratiam excitantem posse intelligi vel in intellectu per aliquam revelationem, vel prævenientem cogitationem, aut in voluntate per motiones aliquas, seu actus, ut constat ex doctrina de gratia. Advertendum est secundo, animam Christi unitam Verbo posse considerari, vel ut constitutam in statu beatitudinis, & ornatam scientia infusa, & aliis similibus perfectionibus, vel præcise ut unitam Verbo absque visione beata, posset enim assumi & relinqui in statu viatorum: si primo modo consideretur, sicut de facto semper fuit, nulla gratia excitante indiget ad supernaturalia opera, neque in intellectu præter visionem beatam, & scientiā inditam, quam semper habuit: neque in voluntate præter amorem, quo necessario Deum semper dilexit: ipsa enim visio fuit illi sufficiens principium, ut per se ipsam posset veluti excitare, & applicare ad considerandum, quidquid ad omnem rectam & supernaturalem operationem necessarium est, amor vero satis etiam movet & impulit illam voluntatem ad omnem hujusmodi actum. At vero si fingamus, illam animam esse assumptam in statu viatoris, sine dubio non obstante unione indigeret ad dictos actus supernaturales eadem gratia excitante, qua indiget quælibet alia anima non unita Verbo, in eodem proportionali statu constituta, ita ut tantum in unione differant. Quod mihi tam certum est, sicut prima conclusio posita, & eodem modo proportionaliter probandum est; non enim posset anima unita magis concipere fidem seu cognitionem supernaturalem sine prævia inspiratione aliqua & motione divina, quam quælibet alia anima non unita, & sic de aliis. Ratio vero est eadē, scilicet, quia necessitas hujus gratiæ est ex eo, quod totus ordo horum supernaturalium actuum est supra naturalem capacitatem animæ humanæ; ergo eodem modo est supra capacitatem naturalem animæ Christi etiam unitæ, quia unio non immutat capacitatem naturalem, neque per se ipsam formaliter elevat potentias, nec confert il-

lis supernaturalia objecta, ut ex ratione supra facta constat; ergo.

Dico tertio: Anima Verbo unita etiam indiget speciali auxilio excitante vel adjuvante ad servanda præcepta, & vitandum omne malum juxta rationem status, in quo est constituta. Suppono animam unitam Verbo nec posse peccare, nec esse in peccato, quod infra q. 15. est demonstrandum: unum se fit, Christum, seu hominem Deum, esse non posse, etiam de potentia absoluta, in statu (quem vocant) naturæ lapsæ, quia ille status culpā includit. Præter hunc vero statum potest hujusmodi homo in aliis statibus considerari, seu de potentia absoluta constitui, qui communes sunt puris etiam hominibus. Primus est status gloriæ seu beatitudinis, qui maxime connaturalis est homini Deo, & propterea in illo fuit semper Christus Dominus secundum animam, & in hoc statu nulla alia indiguit speciali gratia ad servanda præcepta, & vitandum omne malum, quia ipsa beatitudo intrinsecus ac necessario hoc secum affert, unde præter illam solum est necessarius concursus ad operandum ipsis actibus, seu operibus præceptis accommodatus. Secundus vero status hujus hominis Dei esse posset status puri viatoris ad consequendam supernaturalem beatitudinem tendentis; hic enim status quamvis de facto nunquam fuerit possibilis, tamen est de potentia absoluta; & in eo indigeret Christus eisdem auxiliis gratiæ excitantis, vel adjuvantis, ad servanda omnia præcepta, & semper sine ullo defectu honeste operandum, quibus indigeret purus homo peccato carens, & in simili statu constitutus, solum interveniente differentia inter eos in unione: ratio est eadem, quæ in superioribus tacta est, quia Deus homo, quod ad facultatem operandi attinet, præcise ac formaliter ratione solius unionis non habet majores vires, quam sint connaturales ipsi humanitati, & ideo oportet, ut quacunque ratione elevandus sit ad operandum aliquid ultra naturales vires humanitatis, indigeat auxilio gratiæ non minus, quam si talis natura in proprio supposito subsisteret, cæteris paribus: cum ergo purus homo etiam sine peccato constitutus indigeat auxilio gratiæ excitantis, & adjuvantis, ad hunc effectum servandi omnia præcepta absque ullo defectu, quia superat naturales vires humanæ naturæ, eodem auxilio indigeret Christus in simili statu constitutus. Et idem omnino eadem ratione & proportionem dicendum esset de tertio statu possibili, scilicet, si Verbum assumeret naturam humanam in puris naturalibus quoad præcepta & operationes, & finem, ad quem tenderet, ita ut solū illi adderetur unio; tunc enim idem auxilium esset necessarium Christo ad hunc effectum, quod fuisset necessariū puro homini in simili statu constituto sine peccato, ut facile patet ex dictis applicando rationem factam. Solum est advertendum, probabile esse non posse naturam humanam a Verbo assumi, nisi in statu, quem vocant integræ naturæ, saltem quoad perfectam subjectionem appetitus inferioris ad superiorem, & superioris ad rationem, quo posito solū indigebit natura assumpta in unoquoque statu illis auxiliis, quibus purus homo integer in simili statu constitutus egeret; tamen illam et naturæ integritas, seu subiectio & perfecta subordinatio appetituum, cum non sit connaturalis homini, non potest convenire naturæ assumptæ præcise ac formaliter ex sola assumptione, sed necessarium est superaddi peculiare auxilium Dei, seu specialem providentiam, qua id fiat propter rationem sæpe repetitam, quod sola unio ut sic nihil confert potentiis, quod operandi facultatem, aut vires præstet, aut immutet. Quod si admitteremus posse naturam humanam a Verbo assumi omnino puram sine hac subjectione perfecta & subordinatione potentiarum (id enim probabile est, ut infra dicemus), tunc clarius procedit, quod dictum est de comparisonem cum puro homine in simili statu constituto.

Una tantum obiectio superest contra hanc ultimam conclusionem, ut a nobis explicata est; videtur enim repugnare cum impeccabilitate, quam Christus habuit ex vi unionis: si enim Christus ab intrinseco & ex natura rei est ita impeccabilis ex vi unionis, ut de potentia etiā absoluta peccatum in eo esse non possit, quomodo potest indigere auxilio, vel providentia speciali, ut servet præcepta, & immunem se a peccato custodiat, in quocunque statu constituitur? Propter hoc nonnulli videntur negare conclusionem positam, dicentes sufficere solam unionem

Obiectio.

Responsio.

Anima Christi unita, non indiget gratia excitante, indiget tamen ut viatrix.

Obiectio.



nem præcise & formaliter sumptam ad hunc effectum, quia ex vi illius ipsa voluntas creata Christi, est voluntas Dei, & hoc satis est, ut deficere non possit, etiam si nulum aliud auxilium, ut singularem providentiam recipiat. Sed hoc (ut infra q. 15. latius patebit) intelligi non potest, ut ratio facta convincit, quia unio sola non est principium operandi, sicut si in intellectu vel sensibus Christi nihil aliud intelligeremus, quam quod essent facultates cujusdam naturæ assumptæ a Deo, non posset intelligi, quin illæ potentia essent subiectæ errori vel deceptioni, non minus quam similes potentia alterius hominis. Illa enim denominatio, scilicet quod illa voluntas esset voluntas Dei, quamvis, ut jam dicam, sit sufficiens ratio, & origo hujus effectus, sola tamen ipsa per se sumpta ad illum non sufficit, quia solum est quædam denominatio quasi extrinseca, quæ in ipsa voluntate nihil revera ponit, nec facit illam esse regulam suorum actuum, sed relinquit in suo ordine, quia naturæ & proprietates earum inconfusæ manent post unionem. Dicendum est ergo ad objectionem factam, Christum quidem in omni statu ab intrinseco esse impeccabilem, quia ab intrinseco habet totum illud auxilium necessarium ad hunc effectum pro ratione status, ita ut non possit illo carere, ut infra dicam suo loco. Quocirca inter Christum & purum hominem non est differentia in necessitate auxilii, neque in substantia ejus, si cætera sint paria, & solum sit diversitas in unionem, tamen est differentia in hoc, quod respectu puri hominis tale auxilium est, quasi extrinsecum, & supra debitum tam naturæ, quam personæ additum, unde fit, ut negari illi possit, vel de potentia ordinaria, vel de absoluta: at vero respectu Christi, hoc auxilium est quasi ab intrinseco, & ita debitum ratione unionis, ut negari non possit etiam de potentia absoluta. Cujus rei rationem magis infra q. 15. explicabimus.

## ARTICULUS II.

*Utrum in Christo fuerint virtutes.*

**A**d secundum sic proceditur. Videtur, quod in Christo non fuerint virtutes. Christus enim habuit abundantiam gratia: sed gratia sufficit ad omnia recte agenda, secundum illud 2. Cor. 12. Sufficit tibi gratia mea.

Ergo in Christo non fuerint virtutes.

2. Præterea, secundum Philosophum 7. Ethic. \* virtus dividitur contra quendam heroicam, sive divinam habitum, qui attribuitur hominibus divinis. Hic autem maxime convenit Christo. Ergo Christus non habuit virtutes, sed aliquid altius virtute.

3. Præterea, sicut in secunda parte dictum est, \* virtutes omnes simul habentur. Sed Christo non fuit conveniens habere omnes virtutes, sicut patet de liberalitate & magnificencia, quæ habent actum suum circa divitias, quas Christus contempsit, secundum illud Matt. 18. Filius hominis non habet, ubi caput suum reclinet. Temperantia etiam & continentia sunt circa concupiscentias pravas, quæ in Christo non fuerunt. Ergo Christus non habuit virtutes.

Sed contra est, quod super illud Ps. 1. Sed in lege Domini plenus omni bono: Sed bona qualitas mentis est virtus. Ergo Christus fuit plenus omni virtute.

Respondetur dicendum, quod sicut in secunda parte dictum est, \* sicut gratia respicit essentiam anime, ita virtus respicit potentiam ejus. Unde oportet, quod virtus potentia anime derivantur ab ejus essentia, ita virtutes sint quædam derivationes gratia. Quæ autem aliquod principium est perfectius, tanto magis imprimit suos effectus. Unde cum gratia Christi fuerit perfectissima, consequens est, quod ex ipsa processerint virtutes ad perficiendum singulas potentias anime, quantum ad omnes anime actus. Et ita Christus habuit omnes virtutes.

Ad primum ergo dicendum, quod gratia sufficit homini, quantum ad omnia, quibus ordinatur ad beatitudinem. Horum autem quædam perficit gratia immediate per seipsam, sicut gratum facere Deo, & alia hujusmodi: quædam autem mediantibus virtutibus, quæ ex gratia procedunt.

Ad secundum dicendum, quod habitus ille heroicus, vel divinus, non differt a virtute communiter dicta, nisi secundum perfectiorem modum: in quantum scilicet aliquis est dispositus ad bonum quoddam aliori modo, quam communiter omnibus competat. Unde per hoc non ostenditur,

quod Christus non habuerit virtutes, sed quod habuerit eas perfectissime ultra communem modum. Sicut etiam Plotinus posuit quendam sublimem modum virtutum, quas esse dixit animi purgati.

Ad tertium dicendum, quod liberalitas & magnificencia commendatur circa divitias, in quantum aliquis non tantum appretiat divitias, quod vellet eas retinere, præmittendo id, quod fieri oportet. Ille autem minime divitias appretiat, qui penitus eas contemnit, & abiicit propter perfectionis amorem. Et ideo in hoc ipso, quod Christus omnes divitias contempsit, ostendit in se summum gradum liberalitatis, & magnificencie. Licet etiam liberalitatis actum exercuerit, secundum quod sibi conveniens erat, faciendo pauperibus erogari, quæ sibi dabantur. Unde cum Dominus Jude dixit Jo. 13. Quod facis, fac citius, discipuli intellexerunt Dominum mandasse, quod egenis aliquid daret. Concupiscentias autem pravas Christus omnino non habuit sicut infrapatebit: nec propter hoc tamen excluditur, quin habuerit temperantiam, quæ tanto perfectior est in homine, quanto magis pravis concupiscentiis caret. Unde secundum Philosophum 7. Ethic. \* temperatus in hoc differt a continente, quod temperatus non habet pravas concupiscentias, quas continens patitur. Unde sic accipiendo continentiam, sicut Philosophus accipit, ex hoc ipso, quod Christus habuit omnem virtutem, non habuit continentiam, quæ non est virtus, sed aliquid minus virtute.

## COMMENTARIUS.

**D**ivus Thomas solum tractat hanc quæstionem de virtutibus per se in suis, ut constat aperte ex discursu articuli, & non agit de virtutibus pure intellectuales, de his enim infra quæstione nona sermonem instituit, sed de pertinentibus aliquo modo ad appetitum: dico autem aliquo modo, ut prudentiam, quæ a moralibus virtutibus non separatur, complectar.

Affirmat ergo S. Tho., in Christo fuisse omnes virtutes, quoniam cum gratia simul infunduntur. Ubi statim occurrit dubitatio, quo modo D. Tho. universe hoc affirmet, cum in sequentibus articulis neget, aliquas virtutes fuisse in Christo. Responderi potest, D. Tho. locutum esse de virtutibus, quæ sunt virtutes simpliciter, quæve nullam imperfectionem includunt statui beatitudinis repugnantem. Et fortasse verum est nullam virtutem voluntatis secundum totam honestatem suam & latitudinem objecti, & multitudinem actuum, repugnare statui beatitudinis, quamvis sub denominatione aliqua, vel habitudine ad actum imperfectum, cum illo pugnet, quod ex dicendis melius constabit.

Solutiones argumentorum faciles sunt, notandæ tamen pro materia de virtutibus, & pro iis, quæ in sequentibus dicemus, præsertim illud, quod ex solutione ad secundum & tertium colligitur, scilicet sicut virtus heroica non differt essentia a virtute communi, sed solum statu, & eximio gradu perfectionis, quem connotat: ita continentiam, de qua Arist. locutus est, non differre essentia a virtute simpliciter, sed statu imperfecto, qui voce illa denotatur. Quod ita breviter declaratur: propterea enim virtus heroica non differt essentia a virtute communi, quia in eadem materia & sub eadem ratione formali, seu motivo versantur, & perfectio, quam addit virtus heroica, solum est, ut parum aut nihil habeat admixtum vitii contrarii, & facilis & expedita sit ad ferventem & perfectum actum virtutis elicendum, quæ perfectio accidentaria manifeste est, ut vero proportionali modo, quamvis opposita, continentia, verbi gratia, & temperantia, quæ est virtus simpliciter, in eadem materia, & sub eadem ratione honesti versantur, & ad idem medium constituendum tendunt; solum est differentia in imperfectione accidentali, quia continentia dicit virtutem in eo statu, in quo & multum habet admixtum de contrario vitio, & affectiones patitur immoderatas: virtus vero simpliciter dicta requirit perfectiorem statum, quæ tamen differentia simpliciter accidentaria est.

Et juxta hoc intelligendum est, quod D. Tho. in solutione ad tertium dicit, continentiam non esse virtutem, sed aliquid minus virtute, est enim quasi inchoata virtus, ac si dicas infantem non esse virum; & eodem sensu negatur continentia in Christo, non quod aliqua virtus secundum essentiam illi defuerit, sed quia non fuit in illo imperfectio, quam nomen continentia denotat.

A R-

Vera solutio,

Inf. ar. 3.  
ad 1. & 2.  
& q. 15. a. 2.  
e. Et 3. d.  
p. 1. q. 1. a. 1.  
cap. Lib. 7.  
Eth. in  
prim. 10. 5.

1. 2. q. 65.  
ar. 1. & 2.

Gloss. ord.  
iis ex Cas.  
fiodor.

P. 2. q. 110.  
ar. 2. & 3.

Quæst. 15.  
ar. 1. & 2.

Li. 7. Ethic.  
c. 9. non  
tenetur a  
fin. to. 5.

Responsio



Utrum in Christo fuerit fides:

<sup>45</sup>  
Infra. 3. 4.  
2. & 2. 8. ad  
2. & 2. 9. ad  
1. & 1. 2. q.  
6. 5. 2. 4. ad  
3. & 3. d.  
13. q. 1. a. 2.  
q. 1. ad 1.  
& d. 36. ar.  
2. ad 3. Et  
re. Sed de Christo dicitur Hebr. 12. quod est auctor &  
consummatur fidei. Ergo in eo maxime fuit fides.  
3. Præterea: Quidquid est imperfectionis, excluditur  
a beatis. Sed in beatis est fides: nam super illud Roman. 1.  
Iustitia Dei revelatur in eo ex fide in fidem, dicit Glof.\*  
de fide verborum & spei, in fidem rerum & spei. Ergo vi-  
detur, quod etiam in Christo fuerit fides, cum nihil im-  
perfectiois importet.

Sed contra est, quod dicitur Hebr. 11. quod fides est  
argumentum non apparentium: sed Christo nihil fuit non  
apparent: secundum illud quod dixit ei Petrus Joan.  
ult. Tu omnia nosti. Ergo in Christo non fuit fides.

Respondendo dicendum, quod sicut in secundâ parte di-  
ctum est. \* obiectum fidei est res divina non visa. Habitus  
autem virtutis sicut & quilibet alius recipit speciem ab  
obiecto. Et ideo excluso, quod res divina sit non visa, ex-  
cluditur ratio fidei; Christus autem a primo instanti sue  
conceptionis plene vidit Deum per essentialitatem, ut infra di-  
cet. Unde in eo fides esse non potuit.

Ad primum ergo dicendum, quod fides est nobilior vir-  
tus virtutibus moralibus, quia est circa nobiliorem mate-  
riam, sed tamen importat quendam defectum in compa-  
ratione ad illam materiam, qui defectus in Christo non  
fuit. Et ideo non potuit in eo esse fides, licet fuerint in eo  
virtutes morales, quæ in sui ratione huiusmodi defectum  
non important per comparationem ad suas materias.

Ad secundum dicendum, quod meritum fidei consistit  
in hoc, quod homo ex obedientia Dei assentitur illis, quæ  
non videt: secundum illud Rom. 1. Ad obediendum fidei in  
omnibus gentibus pro nomine eius. Obedientiam autem ad  
Deum plenissime habuit Christus: secundum illud Phil. 2.  
Factus est obediens usque ad mortem. Et sic nihil ad me-  
ritum pertinens docuit, quod ipse excellentius non impleveret.

Ad tertium dicendum, quod sicut glossa ibidem dicit,  
\* fides proprie est, quæ creditur, quæ non videntur. Sed  
fides, quæ est rerum visarum, improprie dicitur, & secun-  
dum quandam similitudinem, quantum ad certitudinem  
aut firmitatem adhesionis.

## COMMENTARIUS.

Negat D. Tho. in Christo fuisse fidem, quia fuit sem-  
per beatus, quæ est communis sententia Schola-  
sticorum in 3. dist. 26. cum Aug. 14. de Trinit. cap. 2. qui  
generatim de omnibus beatis loquitur, unde quoad hoc  
eadem est ratio de Christo, & de aliis, & ideo de hac re  
nihil amplius in hac materia dicam; solum adverto ser-  
monem esse de fide Theologica, prout dicit credulitatem  
intellectus, nam fides moralis, quæ fidelitatem significat,  
seu constantiam, & veritatem in promissis servandis, in  
Christo fuit perfectissima; de hac enim loquitur Isai. cap.  
11. cum de Christo dicit: Erit fides cinctorium renum eius  
ἀνθεξις enim vocat, non πίστις, ut Cyril. & Hieron. ex-  
ponunt. Alia expositio est, ut ibi abstractum pro concre-  
to positum intelligatur, id est, fides, pro fidelibus, qui di-  
cuntur futuri indumentum Christi. Quod his verbis si-  
gnificavit ibi Hieronymus. Si pro veritate fides legitur, di-  
cendum, quod cingulum Domini, quo cinctus est & Hiere-  
mias, fides credentium sit. Alludit ad locum Hierem. 13.  
ubi dicit Dominus. Sicut adheret lumbare ad lumbos vi-  
ri, sic agglutinavi mihi omnem domum Israel. Quod late  
declaratur nomine Hier super id Psal. 132. Quod descen-  
dit in oram vestimenti eius. August. & Remig. in id Psal.  
44. Myrrha, & gutta, & casia a vestimentis tuis. An ve-  
ro potuerit in intellectu Christi esse actus fidei humane,  
infra q. 9. dicetur. Quomodo vero in illo fuerit fides, quæ

Ad fidem esse gratia gratis data, statim disp. 21.  
requisitur actus & habitus voluntatis, & intel-  
lectus.

tum est, ex quo colligere solet, duos habitus ad creden-  
dum esse necessarios: unum in voluntate, alium in intel-  
lectu, nam ad eliciendum omnem actum supernaturalem,  
& infuso modo perfecto & connaturali, est necessarius  
habitus proportionatus & infusus: sicut ergo in intelle-  
ctu necessarius est habitus, qui sit principium eliciens as-  
sensum fidei, ita in voluntate est necessarius habitus in-  
fusus, a quo eliciatur voluntas illa supernaturalis, seu de-  
bita affectio ad fidem, sive ille habitus sit charitas, sive re-  
ligio, ut quidam volunt, sive sit specialis, & ab omni alia  
virtute distinctus, ut ego existimo.

Advertendum deinde est, in intellectu Christi nun-  
quam fuisse assensum fidei divinæ, quia nunquam habuit  
revelationem obscuram, sed semper visionem claram: ex  
quo fit in voluntate etiam non habuisse voluntatem illam  
efficacem, quæ est per modum usus, seu executionis,  
qua intellectus movetur seu applicatur ad credendum; po-  
tuit tamen habere ipsum affectum bene dispositum ad  
illammet honestatem, quæ est in credendo, & ad  
obediendum fidei, si oporteret, vel si Deus in tali statu  
ipsum constitueret. Ex quo ulterius probabiliter sequit-  
ur, quod licet in Christo non fuerit habitus fidei, ille e-  
nim proprie, & simpliciter dictus est habitus intellectus:

habitus tamen, quo voluntas bene disponitur ad obedi-  
endum fidei, in illo esse potuit, quia huiusmodi habitus nul-  
lam imperfectionem supponit, cum solum bene dispo-  
nat, & præparet affectum; potest enim aliquis, etiam si nū-  
quam opus aliquod executurus sit, habere affectum bene  
dispositum ad honeste exercendum illud opus, si oportet,  
præsertim quando ex natura sua subjectum est capax  
talis actus, & solum ratione status, vel ex defectu mate-  
riæ illum non efficit. Exemplum esse potest apud D. Th.

1. p. q. 95. art. 3. ubi hoc modo constituit poenitentiam, &  
misericordiam in Adamo in statu innocentie, ut ejus af-  
fectus esset bene dispositus ad honestatem harum virtu-  
tum, quamvis non posset in eo statu exequi actus illa-  
rum, ut ibidem dicit. Simile est in virtute magnificentie,  
de qua bene Cajet. a. 2. loquitur, & infra aliquid dicemus;

actus enim exterior huius virtutis est effusio magnarum  
divitiarum, & nihilominus potest aliquis habere hanc  
virtutem, licet non possit habere illi actui exteriori, quia  
potest bene disponere interiori affectum circa honestatem  
& obiectum talis virtutis. Eodem autem modo assensus fi-  
dei, qui est in intellectu, comparatur ad voluntatem per mo-  
dum actus exterioris, & ideo licet in intellectu desit ma-  
teria talis actus, potest tamen simplex affectus esse bene  
dispositus ad honestatem, seu obedientiam, quæ est in illo  
actu, & ideo potest in voluntate esse habitus, qui hanc bo-  
nam dispositionem conferat: & hoc sensu videtur recte in-  
telligi, quod D. Th. in hac solutione dicit, licet in Christo  
non fuerit fides, fuisse tamen ex parte voluntatis, quidquid  
ad obedientiam vel meritum fidei pertinet. Et eodem modo  
intelligo, quod infra dicit ar. 9. ad 1. licet in Christo non  
fuerit fides, fuisse tamen quidquid est perfectionis in fide.

In Christo  
nunquam  
fuit affec-  
tus fidei.

Habitus  
piæ affec-  
tionis ad  
fidem in  
Christo  
fuit.

## ARTICULUS IV.

Utrum in Christo fuerit spes.

Ad quartum sic proceditur. Videtur, quod in Christo  
fuerit spes. Dicitur enim Ps. 30. ex persona Chri-  
sti: In te Domine speravi: Sed virtus spei est, qua homo  
sperat in Deum. Ergo virtus spei fuit in Christo.

2. Præterea. Spes est expectatio future beatitudinis, ut  
in secundâ parte habitum est. \* Sed Christus aliquid expe-  
ctabat ad beatitudinem pertinentes, videlicet gloriam cor-  
poris. Ergo videtur, quod in eo fuerit spes.

3. Præterea. Unusquisque potest sperare illud, quod ad  
eius perfectionem pertinet, si sit futurum. Sed aliquid erat  
futurum, quod ad perfectionem Christi pertinet, secundum  
illud Ephes. 4. Ad consummationem Sanctorum in opus  
ministerii, in edificationem corporis Christi. Ergo vide-  
tur, quod Christo competeat habere spem.

Sed contra est, quod dicitur Rom. 8. Quod videt quis,  
quid sperat: Et sic patet, quod sicut fides est de non visis,  
ita & spes. Sed fides non fuit in Christo, sicut dictum est:  
\* ergo nec spes.

Respondendo dicendum, quod sicut de ratione fidei est,  
quod aliquis assentiatur iis, quæ non videt, ita de ratione  
spei est, quod aliquis expectet id, quod nondum habet. Et  
sicut

46  
Ies. ar. 6.  
ar. 1. & ar.  
1. ad 2. &  
ar. 9. ad 1.  
Et 1. 2. q.  
16. ar. 5. ad  
3. Et 2. 2.  
4. 18. a. 2.  
ad 1. Et 3.  
d. 26. q. ar.  
5. q. 1. & d.  
36. ar. 2.  
ad 3.  
\* 2. 2. q. 17.  
ar. 5. ad 3.

Art. præc.



sicut fides, in quantum est virtus Theologica, non est de quocumque non viso, sed solum de Deo: ita etiam spes, in quantum est virtus Theologica, habet pro objecto ipsum Deum, cujus fruitionem homo principaliter expectat per spei virtutem. Sed ex consequenti ille, qui habet virtutem spei, potest etiam in aliis divinum auxilium expectare: sicut & ille, qui habet virtutem fidei, non solum credit Deo de rebus divinis, sed etiam de quibuscumque aliis divinitus sibi revelatis. Christus autem a principio sua conceptionis plene habuit fruitionem divinam (ut infra dicitur \*) & ideo virtutem spei non habuit. Habuit tamen spem respectu aliquorum, quæ nondum erat adeptus: licet non habuerit fidem respectu quorumcumque: quia licet plene cognosceret omnia, per quod totaliter fides excluderetur ab eo, non tamen adhuc plene habebat omnia, quæ ad ejus perfectionem pertinebant, puta immortalitatem, & gloriam corporis, quam poterat sperare.

q. 34. art. 4.

In corp. art.

In 3. q. 4. a. 6. &amp; q. 67. art. 4.

Ad primum ergo dicendum, quod hoc non dicitur de Christo secundum spem, quæ est virtus Theologica, sed eo quod quadam alia speravit nondum habita, sicut dictum est\*.

Ad secundum dicendum, quod gloria corporis non pertinet ad beatitudinem, sicut in quo principaliter beatitudo consistat, sed per quandam redundantiã a gloria anime, ut in secunda parte dictum est\*. Unde spes secundum quod est virtus Theologica, non respicit beatitudinẽ corporis, sed beatitudinẽ anime, quæ in divina fruitione consistit.

Ad tertium dicendum, quod edificatio Ecclesie per conversionem fidelium non pertinet ad perfectionem Christi, quæ in se perfectus est, sed secundum quod alios ad participationem suæ perfectionis inducit. Et quia spes dicitur proprie respectu alicujus, quod expectatur ab ipso sperante habendum, non proprie potest dici, quod virtus spei Christo ratione inducitur\* conveniat.

In corp. art.

## C O M M E N T A R I U S.

Q Uæstio hujus articuli communis est omnibus beatitatis, & ideo non est hoc loco ex professo disputanda, sicut dictum est articulo præcedenti. Quoniam vero ea, quæ D. Thom. hic dicit, non nihil difficultatis habent, ut intelligantur, aliquid breviter notandum est. Duo enim D. Thomas dicit; prius enim simpliciter negat in Christo fuisse virtutem spei, quia spes ut est virtus Theologica habet pro objecto Deum, seu fruitionem Dei, quam Christus sperare non potuit, quia semper eam habuit, spes autem est de re nondum possessa; quæ ratio manifeste probat, non fuisse in Christo actum spei circa Deum, seu de animæ beatitudine, quia sicut motus requirit, ut mobile non sit in termino, ita spes, quæ veluti motus quidam est animi in rem consequendam, requirit in subiecto carentiam rei speratæ. Addit vero secundo D. Tho. habuisse Christum spem respectu aliquorum, quæ nondum erat adeptus, ut est gloria corporis, vel quid simile, quam spem in solutione ad primum & secundum dicit non fuisse illam, quæ est virtus Theologica.

Ubi statim occurrit difficultas, cujus virtutis sit hic actus: cum enim honestus sit, ad virtutem aliquam pertinere necesse est: non pertinet autem ad charitatem, quia non est actus amicitie divinæ, sed proprii commodi, quod respicit tanquam objectum proprium.

Cajetanus hic, quem omnes sequuntur, dicit illum actum ad nullum virtutis habitum pertinere, quia non est proprie spes, cum non tendat in objectum arduum, ut sic, unde Durand. in 3. dist. 26. q. 3. dicit, illum actum potius esse desiderium, quam spei, quod etiam Cajet. dicit; quamquam enim gloria corporis ad humanam naturam comparata sit quid arduum, tamen respectu animæ jam beatæ non est ardua, sed quasi connaturalis, & quasi præsens; & quamvis respectu Christi Domini possit objectum illud videri aliquo modo arduum, quia comparanda erat illa gloria per passionem, & mortem, tamen difficultas, quæ in hoc medio erat, potius per fortitudinem, obedientem, & charitatem erat superanda; respectu vero spei non reddebat objectum arduum, quia jam erat quasi præsens, & maxime debitum, ratione unionis; non ergo pertinuit ille actus ad virtutem spei. Nec vero ad aliquam aliam, ut per se constat, & probatum est; ad nullum ergo habitum pertinet. Neque immerito (inquit Cajet.) quia, qui videt Deum, & illo fruitur, per ipsam fruitionem est melius dispositus ad illum actum eliciendum, quam per habitum; non ergo indiget habitu.

Sed doctrina hæc mihi non satisfacit: & primum, ut

omittam, an illa ratio ardui, vel non ardui, quæ pendet ex causa intrinseca, vel statu personæ efficiat diversitatẽ specificam in actibus voluntatis (hoc enim magnam questionem habet, sed non possumus hic omnia disputare), negari non potest, quin actus ille expectandi, vel desiderandi gloriam corporis sit in se supernaturalis, cum sit de objecto supernaturali, & illi proportionatus; suppono enim esse actum perfectum, & maxime accommodatum objecto, qualem oportuit esse in Christo; ergo necesse est illum actum effici ab aliquo habitu infuso; propria enim adæquata ratio, propter quam necessariis est habitus infusus, est actus supernaturalis, etiam si fingatur non esse aliunde difficilis, neque arduus; ex hoc enim solo quod supernaturalis est, est latis difficilis, quia est improporionatus potentie, & ideo oportet illam per habitum elevari, ut perfecte, & connaturali modo possit elicere talem actum. Neque ad expediendam hanc difficultatem sufficit illa melior dispositio per visionem, & fruitionem, quam Cajet. invenit, quia illi actus non sunt principium eliciens hunc, de quo agimus; nos autem quærimus principium eliciens & proxime elevans potentiam, & quod sit veluti facultas intrinseca ad illum actum; sicut per visionem beatam optime disponitur beatus ad amandum Deum, nihilominus tamen necessarius est habitus, a quo hic amor elicitur, quia licet visio bene disponat ex parte objecti, non tamen dat potentie propriam facultatem ad illum actum; & eadem ratione quamvis per amorem Dei bene disponatur beatus ad amorem proximi, nihilominus requiritur habitus ad talẽ actum, & idem fere est de omnibus aliis actibus virtutis, ad quos potest beatus dici aliquo modo bene disponi per visionem, & fruitionem. Propter hæc ergo rationem videtur mihi dicendum, necessarium esse habitum infusum, ad quem proprie talis actus pertineat.

Ut vero breviter explicemus, quis ille sit, advertendum est, ex 2. 2. circa Deum, ut est bonum nostrum nobis amabile amore concupiscentiæ, quo amamus nostram supernaturalem beatitudinem, plures actus versari posse, scilicet amoris, desiderii, spei, & delectationis, seu gaudii, ex quibus actibus amor fertur in objectum secundum se, & ex illo sequitur desiderium, si objectum sit absens, & spes, si etiam sit arduum; si vero sit præsens, & possessum, sequitur gaudium, & isti actus omnes sunt supernaturales, respectu supernaturalis beatitudinis, & Theologici, cum Deum ipsum attingant; & ex illis licet spes & desiderium non maneant in beatitudine, amor tamen & gaudium manent, quia isti non requirunt imperfectionem, seu carentiam boni; unde fit manere etiam in patria aliquem habitum, a quo isti actus eliciantur, ut satis probat discursus supra factus ab illo; ergo ab habitu, a quo eliciuntur hi actus, manet etiam actus ille expectandi, vel desiderandi gloriam corporis, de qua agimus, sunt enim isti actus inter se connexi: sicut enim anima appetit corpus, ita habitus ille, quo amamus, & gaudemus de beatitudine animæ, tanquam de bono nostro, desideramus beatitudinem corporis.

Quod sit tandem quæras, quis sit ille habitus, a quo tam ille amor, & gaudium, quam hæc expectatio eliciuntur; respondet aliqui esse charitatem. Sed non vere, potest enim charitas sub propria ratione benevolentie Dei in se ipso amare illa bona; potest etiam imperare, vel referre omnem alium amorem ad Deum; tamen elicere proprium amorem concupiscentiæ, & alios actus, qui cum illo connexi sunt, non potest; differunt enim isti amores essentialiter, habent enim motiva, honestates, & difficultates diversas rationum. Propter quod dixit etiam hic D. Th. ad 3. (quod valde notandum est) sperare aliis bona, scilicet propter illorum benevolentiam non pertinere ad virtutem spei, sed ad aliam, quæ non potest esse nisi charitas. Ut ergo, quod sentio, tandem dicam, existimo, omnes hos actus re ipsa ad eundem habitum pertinere, qui prout est in via dicitur spes, denominatione sumpta ab actu difficiliore, & maxime arduo, & necessario viatori; idem vero habitus est habitualis amor concupiscentiæ propriæ beatitudinis: licet ergo ille habitus, ut connotat imperfectionem spei, non maneat in beatis, tamen prout potest esse principium amandi, & consequenter etiam fruendi propria beatitudine supernaturali, manere potest. Et hoc modo intelligendum est, virtutem spei non manere in beatis, seu non fuisse in Christo, scilicet, quoad imperfectionem, quam connotat, sicut art. 2. dictum

Dubium;



dictum est de continentia, & statim de aliis dicitur. Et hoc etiam modo intelligi potest, quod D. Th. infra art. 9. ad 1. dicit, licet in Christo non fuerit spes quoad defectum, fuisse tamen quidquid est perfectionis in spe. Idem in 3. dist. 13. q. 1. art. 2. quæstiunc. 1. ad 1. & ibi Bona. ar. 1. q. 3. ad 1. Clarius Alexander 3. p. q. 12. mem. 3. ad 1. dicit in Christo non fuisse spem in ratione spei, quod infra exponens ait, fuisse in illo, quod est perfectionis in spe, scilicet, adhæSIONem cum bono, sed non cum illa imperfectione, quæ est expectatio boni, quod non habetur: & hoc etiam tantum probat ratio, qua hic concludit D. Th. spem non fuisse in Christo, quia spes respicit Deum, ut obiectum nondum habitum; hoc enim est verum de primario actu spei, & de habitu, prout illum respicit; at vero ut elicit actum amoris, respicit Deum ut summum bonum proprium abstrahendo ab absentia, ut sic potest manere in patria, gaudium etiam efficiendo, qui actus etiam sunt principales, & primarii respectu illius habitus secundum se.

## DISPUTATIO XIX.

In duas sectiones distributa.

## De virtutibus moralibus anime Christi.

**D**E Theologicis virtutibus nihil superest dicendum: etenim de charitate, quia cum gratia omnino conjuncta est, tractatum est, cum de gratia disputaremus. De fide autem & spe, præter ea, quæ dicta sunt inter exponendos articulos D. Th. nihil dicendum superest, quod ad hunc locum pertineat. Reliquum ergo est, ut de virtutibus moralibus dicamus, quæ duplices sunt, ut ex 1. 2. suppono, aliæ per se infusæ, aliæ vero suo genere acquisitæ, quæ per accidens interdum infundi possunt. De utroque ergo virtutum genere breviter differendum est.

Duplex  
genus vir-  
tutum  
moralium.

## SECTIO I.

*Utrum omnes virtutes morales, & supernaturales fuerint infusæ anime Christi, simul cum gratia.*

**R**espondeo, omnes hujusmodi virtutes fuisse animæ Christi infusæ a principio suæ creationis, & conceptionis, sine imperfectionibus tamen, quæ vel peccatum supponunt, vel statui beatitudinis repugnant. Prior pars non est magis certa, quam certum sit infundi iustis hujusmodi virtutes, quod tamen non est certum, sed sub opinione: tamen supposita illa sententia, quæ sine dubio verior est, nullus, qui bene de Christo sentiat, dubitare potest in conclusione posita, erroneum enim esset dicere posse alios iustos habere actus virtutum moralium perfectiores, quam potuerint esse in anima Christi; si ergo in aliis possunt esse isti actus supernaturales, & propter eos infunduntur habitus virtutum moralium supernaturales, multo magis asserendum est, hos habitus fuisse infusos animæ Christi. Et hinc etiam constat fuisse infusos a principio; quia hujusmodi virtutes simul cum gratia infunduntur, & ideo Greg. 2. moral. c. ultim. inter dona, quæ omnibus iustis ab Spiritu sancto dantur, tam ponit virtutes morales, quam Theologales. Secunda pars conclusionis in genere sumpta evidens est, quia cum Christus a principio fuerit beatus, & incapax fuerit peccati, certum est non potuisse habere virtutes, quæ requirunt, vel supponunt in subiecto hanc imperfectionem, sicut supra diximus de continentia, illa enim dicit virtutem connotando imperfectionem repugnantem beato, & simile est de poenitentia, quæ simpliciter dicta supponit peccatum, vel saltem capacitatem peccati, & ideo fere omnes Theologi in 4. dist. 14. negant habuisse Christum hanc virtutem, ut videre est in D. Th. dist. 14. q. 1. art. 3. q. 2. Palud. q. 4. Soto q. 2. ad finem. Alenf. 3. p. q. 12. memb. 2. & alii.

Debitum

Dubitari vero de hac virtute potest, an habitus ille, qui in nobis est poenitentia, nullo modo fuerit in Christo; an vero habitus ipse sub alia ratione esse potuerit, quamvis non fuerit sub ea imperfectione, quam nomen poenitentia denotat. Respondetur hoc pendere ex variis opinionibus circa hanc virtutem, quas hoc loco tractare ex professo non possumus. Quidam enim existimant poenitentiam esse singularem habitum virtutis ab omnibus aliis distinctum, cujus unicus, & adæquatus actus est satisficere Deo pro injuria in ipsum commissæ ab ipso poenitente. Et juxta hanc sententiam omnino negandum est, habuisse Christum talem habitum, quia habere non potuit aliquem actum ad talem habitum pertinentem. Aliorum vero sententia, & fortasse probabilior est, habitum illum, qui in nobis est poenitentia, licet ita denominetur ex habitudine ad illum actum detestandi proprium peccatum, tamen secundum se non limitari ad illum actum solum, sed posse habere alios, qui non supponunt in operante aliquod peccatum, imo nec potentiam peccandi: ut est simplex odium peccati propter vitandam divinam injuriam, & propositum vitandi divinam injuriam, non in satisfactionem præteritæ, sed per se propter turpitudinem ejus, seu propter honestatem, quæ est in contrario objecto. Item voluntas, seu bonus affectus ad recompensationem divinæ offensæ, a quocumque illata sit. Addunt etiam alii, hunc habitum poenitentia re ipsa non esse virtutem distinctam ab omnibus aliis virtutibus moralibus: sed vel esse charitatem, vel justitiam, vel certe religionem, quod ego cum Cajetano valde probabile existimo.

Et hac sententia nunc supposita, ut probabiliori, consequenter dicendum est, sicut in Christo fuit justitia, seu religio ejusdem rationis cum virtute religionis, quæ infunditur aliis hominibus iustis, ita in illo fuisse eundem habitum virtutis, qui in nobis est poenitentia, quamvis in illo non habuerit rationem poenitentia, quia in illo non fuit illa imperfectio, quam poenitentia denotat: & ita tenet expresse Marfil. in 4. q. 20. ad 6. argum. & idem sumitur ex Alex. Alenf. 3. p. q. 12. memb. 3. ad 1. ubi eodem modo loquitur de poenitentia, & spe, & ita dicit fuisse in Christo, quidquid perfectionis est in poenitentia, scilicet detestationem mali, non vero quod est imperfectionis, scilicet, ut illa detestatio sit mali commissi; & eodem fere modo loquitur D. Th. in 3. d. 13. q. 1. art. 2. ad 1.

Neque video objectionem, neque incommodum aliqujus momenti, quod possit contra hoc objici: & præter exempla supra posita, potest hoc ipsum aliis modis explicari. Simpliciter enim loquendo, in Christo non fuit potentia peccandi, cum tamen in illo fuerit eadem voluntas, seu liberum arbitrium, quod in aliis hominibus, & in illamet humanitate, si in propria persona existeret, esset potentia peccandi, quia potentia peccandi præter voluntatem ipsam quoad substantiam ipsius potentia (ut ita dicam) denotat imperfectionem personæ creatæ. Quid ergo mirum, quod similiter eadem virtus, quæ in aliis hominibus est poenitentia, quia est facultas detestandi proprium peccatum, in Christo non sit poenitentia, quoad imperfectionem hoc nomine importatam, quamvis sit idem habitus? Et certe, si humanitas Christi prius existeret in propria persona & in illa haberet omnes virtutes, & inter eas habitum poenitentia, & assumeretur, non videtur verisimile, ex vi solius assumptionis corrumpendum esse talem habitum quoad substantiam ejus, licet non maneret quoad imperfectionem poenitentia, sicut nec mutaretur voluntas, quoad substantiam ejus, & tamen non maneret, quoad imperfectionem potentia peccandi. Denique possumus a contrario argumentari, nam eadem virtus justitiæ, aut religionis existens in Christo, habet rationem perfectæ justitiæ ad Deum, quam denominationem non potest suscipere in persona creata: non quia, quoad substantiam habitus sit aliqua virtus moralis in Christo, quæ non possit esse in puro homine, sed quia connotat circumstantiam talis personæ, quæ possit efficere actum perfectæ justitiæ erga Deum, ut supra disp. 4. sect. 5. dictum est: ergo simili modo dici potest in præfenti, servata proportionem. Simile argumentum sumi potest de virtute continentia sub hac denominatione, de qua art. 2. dictum est.

Dicet aliquis; ergo pari ratione negandum esset, Christum habuisse virtutem magnificentiæ, vel similes, quarum materiam non assumplit, ut posset earum actus exercere. Respondetur non esse simile. Primo, quia hæc virtus de se nullam imperfectionem connotat, aut includit, quia licet concedamus Christum non assumpsisse usum divitiarum temporalium, potuisset tamen sine imperfectione. Deinde, quia exercere potuit proprios actus talis virtutis, vel interioris, habendo debitum affectum circa medium talis virtutis, vel contemnendo magnas divitias, & honores: vel certe interdum utendo externa materia talis virtutis, ut cum pavit quinque millia hominum. Nam

Obiectio.

Responsio.



quod hæc, & similia fecerit sine sumptu divitiarum, sed potestate divinitus accepta, non refert, neque impedit, quin potuerit talis actus esse ab hac virtute. Adde, in ordine ad spiritualia bona perfectissime exercuisse Christum actus harum virtutum. Magnanimitatis, ordinatissime appetendo & intendendo cœlestia, & spiritualia bona, ut claritatem a patre. Joan. 17. Potestatem in cœlo & in terra. Item liberalitatem, gratiam elargiendo, remissionem peccatorum, imo & sanitatem, vitam, &c. In quibus bonis, & modo illa communicandi, Christus ut homo perfectissime participavit divinam magnificentiam, & similes virtutes.

## SECTIO II.

*Utrum virtutes suo genere acquisitæ, fuerint Christi animæ infusæ, simul cum gratia.*

**A**ntiqui Theologi nihil fere de quæstione hac inspeciedicunt, sed de virtutibus Christi disputant, vel in genere, vel de infusis tantum. Ratio vero dubitandi esse potest, quia virtutes acquisitæ adeo sunt imperfectæ, ut in beatis non maneant, ut docet D. Th. in 3. dist. 33. q. 1. art. 4. ubi simul docet, has virtutes non esse in beatis, & omnes virtutes morales esse in Christo, unde videtur hoc secundum tantum intelligere de infusis. Et idem videtur sentire Capreol. ibi concl. 4. nam licet de virtutibus simpliciter loquatur, rationes tamen affert solum de infusis. Richar. etiam ibidem art. 1. q. 6. cum absolute quæsitisset, an virtutes morales maneant in beatis, respondet infusas manere, de acquisitis vero nihil dicit. Et de Christo potest esse singularis ratio. Primo, quia ex vi unionis non solum peccare non poterat, verum etiam neque inordinatum pati animi motum; habebat enim moderatissimos omnes animi affectus, ad quos bene disponendos potissimum requiruntur hæ virtutes. Secundo, quia verissimile est, Christum numquam fuisse operatum ex motivo mere naturali: operabatur enim semper perfectissime, atque adeo ex motivo, & sine supernaturali; ergo numquam operatus est actus virtutum acquisitarum; ergo neque habitibus indiguit. Tercio, quia Verbum ipsum per se conferre poterat, quidquid perfectionis conferunt isti habitus.

Dico primo, Christum Dominum habere potuisse has virtutes morales, suo genere acquisitas. Hæc conclusio videtur clara, & certa, quia istæ virtutes nec repugnant unioni, nec beatitudini. Primum per se manifestum est, sunt enim perfectiones quædam humanitatis, quæ divino supposito non repugnant; potuisset enim Verbum assumere humanam naturam, etiam cum his solis virtutibus: scientiæ etiam acquisitæ non repugnant unioni; cur ergo repugnabunt virtutes, quæ simpliciter meliores sunt? Secundum colligitur ex D. Th. 1. 2. q. 65. art. 1. ubi (ut ego existimo) retractavit sententiam, quam in 3. docuerat, simpliciter enim ibi definit, virtutes morales manere in beatis, nihil distinguendo inter acquisitas, & infusas: cum tamen ibi generatim de utrisque loquatur, & hanc methodum in illis quæstionibus observet, ut doctrinam communem utrisque virtutibus simpliciter, & sine distinctione tradat, ubi vero est diversa ratio de moralibus, & infusis, ibi distinguat, ut videri potest ibidem q. 65. art. 1. & 2. cum ergo hic nihil distinguat, intendit sine dubio idem de utrisque docere. Unde cum in argumento primo objecisset authoritatem Arist. qui tantum virtutes acquisitas cognoscere potuit; illi ita respondet, ut defendat, illas easdem virtutes morales, de quibus Arist. locutus est, manere in beatis. Eodem modo citari potest Gabriel pro hac sententia in distinct. 33. art. 3. nam, cum dub. 2. duo genera virtutum moralium posuisset, scilicet infusarum & acquisitarum, indub. 3. absolute & sine distinctione affirmat, virtutes morales manere in beatis. Bonavent. etiam ibi absolute loquitur q. 6. & dicit manere, licet q. 5. distinxerit; in particulari vero & expresse tenet ibi Major q. 32. qui citat Magist. ibi, & Bedam Exo. 26. qui indefinite id affirmant. Scotus vero eadem dist. 33. q. unica supponit potius, quam doceat, virtutes morales manere in beatis, quas tamen ipse nunquam cognovit per se infusas, sed acquisitas tantum, ut constat ex dist. 34. & 36. Alexander Alenf. 4. p. q. 12. membr. 1. art. 1. §. 1. ad argumenta: ubi tam de beatis omnibus, quam de

Christo loquitur, & affert Aug. 14. de Trinit. c. 9. ubi docet manere virtutes morales in via beata. Et loquitur August. aperte de virtutibus suo genere acquisitis, nam scribit contra Tullium, qui negabat, has virtutes manere in beatitudine. Idem docet August. lib. 6. de Musica cap. 1. Ratio vero est, quia istæ virtutes perfectionem dicunt ipsius naturæ, & nullam includunt imperfectionem cum beatitudine pugnantem. Sicut enim uti naturali ratione clara, & evidenti, quamvis sit perfectio inferioris ordinis, simul esse potest cum beatitudine, quia non habet conditionem illi repugnantem, & gratia per se non destruit perfectiones naturæ, sed superaddit alias: ita operari secundum rectam rationem naturalem, & habere affectum illi conformem, de se perfectio quædam est naturalis, quam beatitudo non excludit.

Dico secundo, Christum Dominum habuisse has virtutes perfectissimas in suo genere, sine ulla imperfectione repugnante beatitudini, sicut dictum est de infusis. Hæc conclusio videtur mihi certa, & communis Theologorum, quorum sine dubio hic est sensus, quamvis non omnes hoc distinguant. Ratio vero est, quia hæ virtutes sunt magna perfectio humanæ naturæ: imo D. Th. quæst. unica de virtutibus, art. 9. ad 7. dicit, esse maximum bonum in genere humanorum bonorum; ideo 1. p. q. 95. art. 3. docet, has virtutes datas esse Adæ, etiam si datas illi simul fuerint aliæ per se infusæ valde perfectæ; sed Christus assumpsit in humana natura, quidquid perfectionis in illa plantavit, ut Concilia loquuntur: habuit enim animæ potentias optime dispositas in ordine ad omne bonum, & finem, seu beatitudinem, tam naturalem, quam supernaturalem, hoc enim totum debetur illi naturæ ratione unionis. Unde confirmatur primo, satisfaciendo simul objectionibus, quia licet perfecta moderatario affectuum sit debita illi naturæ ratione unionis; tamen oportuit, ut hic effectus fieret per propriam, & accommodatam causam: hæc autem est virtus acquisita, ad quam pertinet conferre maiorem propensionem ad obediendum rectæ rationi naturali, & consequenter moderari affectum huic rationi repugnantem, quia effectus iste est ita proprius huius virtutis, ut in virtutem per se infusam non conveniat: sicut D. Th. docuit 1. 2. q. 65. art. 3. ad 2. hæc enim virtus elevat potentiam ad alium ordinem, per se tamen non disponit illam intra ordinem naturæ. Confirmatur secundo, quia non est, cur negemus Christum sæpe fuisse operatum actus naturales harum virtutum; sunt enim simpliciter boni, & non excludunt actus virtutum infusarum, præsertim in Christi anima, quæ illos exercere poterat independentem a corpore: poterant etiam referri ad supernaturalem finem, atque adeo esse meritorii, & satisfactorii; non est ergo, cur eos non habuerit, & consequenter etiam habitus. Quæ omnia aperte confirmantur illo exemplo scientiæ acquisitæ, cuius actum & habitum fuisse in Christo, nullus cordatus Theologus dubitat. Denique, quamvis Verbum, ut prima causa efficiens, potuisset miraculose supplere quidquid est efficacitatis in his habitibus ex illo principio, quod Deus potest supplere genus causæ efficientis: Verbum tamen præcise consideratum, ut hypostasis humanæ naturæ, non poterat per solam unionem supplere hanc efficientiam, ut supra in similibus probatum est. Perfectio autem formalis, quam conferunt isti habitus, bene disponendo, & inclinando potentias ad bonum, non poterat sine illis a Deo conferri: & consequenter passionibus, & affectibus Christi, quamvis sine his habitibus possent impediri, ne exirent in aliquem actum secundum, vel motum inordinatum, non tamen poterant sine illis intrinsece quasi frænari, & temperari in actu primo, quia hic est effectus formalis, qui sine propria forma fieri non potest. Non ergo potuit Verbum per se ipsum conferre omnem perfectionem, quam conferunt isti habitus: & ideo nullo modo negandum est illos fuisse in Christo, magis quam supernaturales, & infusos, de quibus quoad hoc eadem est ratio.

Dico tertio. Istæ virtutes infusæ fuerunt animæ Christi Domini ab instanti suæ creationis in summo quodam gradu perfectionis. Hæc sequitur ex præcedenti, quia hæc perfectio debita erat illi naturæ ratione unionis, & quod aliquo tempore illa careret, neque ad finem redemptionis, neque ad aliquem alium erat necessarium: Christus autem a principio habuit omnem perfectionem



unioni debitam, cujus carentia redemptioni necessaria non erat, ut partim ex præcedentibus constare potest, partim dicetur sapius in sequentibus quæstionibus. Confirmatur primo, quia Adæ fuerunt infusæ hæ virtutes a principio creationis; multo ergo magis Christo. Confirmatur secundo, quia Christus habuit a principio omnes affectus optime dispositos & moderatos, & rectæ rationi subiectos, & optimo modo, scilicet per internam affectionem & dispositionem.

**Objeçtio.** Dices primo. Major perfectio esset has virtutes propriis actibus acquirere, quia perfectius est aliquid a se habere, quam ab alio, & ab intrinseco, quam ab extrinseco. Respondetur, melius simpliciter fuisse numquam carere virtute, quia in hoc genere boni honesti melius est semper esse in ultimo termino perfectionis, quam paulatim illam acquirere. Dices. Potuisset illas omnes virtutes habere in primo instanti, & tamen per proprios actus illas comparare: potuit enim in primo instanti habere perfectissimos actus omnium virtutum, & per eos illas sibi acquirere.

**Objeçtio.** Respondetur (quidquid aliqui dicant) hoc nec necessarium, nec verisimile videri: oportuisset enim, ut anima Christi in eo instanti simul habuisset cogitatione præsentis materias omnium virtutum, & per naturalem prudentiam judicaret de omnibus agendis in omnibus illis materiis, atque ita haberet actus perfectissimos circa illas: hoc vero totum, quamvis non implicet contradictionem, non est tamen tantum miraculum sine fundamento asserendum: præsertim, quia quomodocumque Christus habuerit hos habitus, verissime dicitur habuisse a se, & ab intrinseco, & connaturaliter; & perfectius illi fuit, quidquid operatus est in primo instanti, ex habitu operatum esse, quam ad acquirendum habitum; non ergo indiguit exercitio virtutum ad has virtutes obtinendas.

**Responso.** Respondetur (quidquid aliqui dicant) hoc nec necessarium, nec verisimile videri: oportuisset enim, ut anima Christi in eo instanti simul habuisset cogitatione præsentis materias omnium virtutum, & per naturalem prudentiam judicaret de omnibus agendis in omnibus illis materiis, atque ita haberet actus perfectissimos circa illas: hoc vero totum, quamvis non implicet contradictionem, non est tamen tantum miraculum sine fundamento asserendum: præsertim, quia quomodocumque Christus habuerit hos habitus, verissime dicitur habuisse a se, & ab intrinseco, & connaturaliter; & perfectius illi fuit, quidquid operatus est in primo instanti, ex habitu operatum esse, quam ad acquirendum habitum; non ergo indiguit exercitio virtutum ad has virtutes obtinendas.

**Objeçtio.** Sed urgebis tandem, quia sequitur, Christum Dominum per actus harum virtutum, quos exercebat, nihil sibi adquisivisse. Dicunt aliqui, adquisivisse augmentum harum virtutum. Sed hoc nec vere, nec satis considerate dictum est, nam rationes, quæ probant habuisse Christum hos habitus a principio, probant similiter habuisse illos in gradu heroico, ut hic dixit D. Th. vel, ut clarius dicamus, habuisse in summa perfectione, quam habere possunt, vel secundum legem Dei ordinariam, vel secundum naturalem capacitatem & facultatem hominis, cui hi habitus, & eorum actus accommodantur: vel denique in summa perfectione, quam in ipso Christo unquam habituri erant. Ratio est, quia hoc totum debitum erat unioni, ut ostensum est. Et confirmatur, nam modo in beatitudine non augentur hi habitus in Christo per actus, sed a principio conceptionis fuit tam perfecte beatus, & constitutus in ultimo termino in iis, quæ pertinent ad virtutem, & perfectionem animi, sicut nunc est. Confirmatur secundo, quia Christus non reddebatur promptior, vel facilior ad operandum studiose per exercitium actuum, ut eleganter dixerunt Basil. & Diony. præcedenti disput. sect. 3. citati, quia omnis hæc perfectio est naturalis Christo. Unde neque ad unam virtutem fuit unquam promptior, quam ad aliam, sed in summa proportionem omnes semper habuit.

**Responso.** Concedo ergo per hos actus, neque habitus, neque augmentum eorumdem Christum adquisivisse: quia actus non intendit habitum, nisi sit intensior illo, Christus autem a principio habuit habitus, vel magis vel æque intensos, quam futuri essent actus. Non vero negandum est, potuisse passibile corpus Christi Domini per externos actus habilius reddi ad externos labores perferendos, ut peregrinationes, vigiliis, &c. hoc enim sæpe pendet ex qualitatibus, seu dispositionibus materialibus, quæ non spectant ad perfectionem virtutis.

## ARTICULUS V.

*Utrum in Christo fuerint dona.*

**Ad quintum sic proceditur.** Videtur, quod in Christo dona dantur non fuerint dona. Sicut enim communiter dicitur, dona dantur in adiutorium virtutum. Sed id, quod est in se perfectum, non indiget exteriori auxilio. Cum igitur in Christo fuerint virtutes perfectæ, videtur, quod in eo non fuerint dona.

**2. Præterea.** Non videtur esse ejusdem dare dona, & recipere: quia dare est habentis, accipere autem non habentis. Sed Christo convenit dare dona, secundum illud Suarez Tom. XVI.

*Psal. 57. Dedit dona hominibus. Ergo Christo non convenit accipere dona Spiritus sancti.*

**3. Præterea.** Quatuor dona videntur pertinere ad contemplationem viæ, scilicet sapientia, scientia, intellectus & consilium, quod pertinet ad prudentiam: unde & Philosophus in 6. Ethic. \* numerat ista inter virtutes intellectuales. Sed Christus habuit contemplationem patriæ. Ergo non habuit hujusmodi dona.

Sed contra est, quod dicitur Isaia 4. apprehendent septem mulieres virum unum. Glos. \* id est, septem dona Spiritus sancti Christum.

Respondeo dicendum, quod sicut in Secunda parte dictum est, \* dona proprie sunt perfectiones quadam potentialium animæ, secundum quod sunt nate moveri a Spiritu sancto. Manifestum est autem, quod anima Christi perfectissime a Spiritu sancto movebatur: secundum illud Luca 4. Jesus autem plenus Spiritu sancto regressus est a Jordane, & agebatur a Spiritu in desertum. Unde manifestum est, quod in Christo fuerunt excellentissime dona.

Ad primum ergo dicendum, quod illud, quod est perfectum secundum ordinem sue nature indiget adjuvari ab eo, quod est altioris nature: sicut homo quantumcumque perfectus indiget adjuvari a Deo. Et hoc modo virtutes, quæ perficiunt potentias animæ, secundum quod ducuntur ratione, quantumcumque sint perfectæ, indigent adjuvari per dona, quæ perficiunt potentias animæ, secundum quod sunt motæ a Spiritu sancto.

Ad secundum dicendum, quod Christus non secundum idem est respiciens, & dans dona Spiritus sancti: sed dat, secundum quod Deus, & accipit, secundum quod homo. Unde Greg. dicit in 2. Moral. \* quod Spiritus sanctus humanitatem Christi nunquam deseruit, ex cujus divinitate procedit.

Ad tertium dicendum, quod in Christo non solum fuit cognitio patriæ, sed etiam cognitio viæ, ut infra dicitur. Et tamen etiam in patria sunt per aliquem modum dona Spiritus sancti, ut in secunda parte dictum est. \*

**I**n hoc articulo nihil occurrit notandum, præter ea, quæ dicemus disputatione sequenti.

## ARTICULUS VI.

*Utrum in Christo fuerit donum timoris.*

**Ad sextum sic proceditur.** Videtur, quod in Christo non fuerit donum timoris. Spes enim videtur potior quam timor: nam spei objectum est bonum, timoris vero malum: ut in secunda parte habitum est. \* sed in Christo non fuit virtus spei, ut supra habitum est. \* Ergo etiam in eo non fuit donum timoris.

**2. Præterea:** Dono timoris timet aliquis vel separationem a Deo, quod pertinet ad timorem castum: vel puniri ab ipso, quod pertinet ad timorem servilem: ut Aug. dicit \* super Cano. Joan. Sed Christus non timuit separari a Deo per peccatum, neque etiam puniri ab eo propter culpam, quia impossibile erat ei peccare, ut infra dicitur 4. Timor autem non est de impossibili. Ergo in Christo non fuit donum timoris.

**3. Præterea.** Prima Joan. 4. dicitur, quod perfectæ charitas foras mittit timorem. Sed in Christo fuit perfectissima charitas, secundum illud Ephes. 3. Super eminentem scientiæ charitatem Christi. Ergo in Christo non fuit donum timoris. ¶ Sed contra est, quod dicitur Isa. 11. Replebit eum Spiritus timoris Domini.

Respondeo dicendum, quod sicut in secunda parte dictum est, \* timor respicit duo objecta, quorum unum est malum terribile, aliud est illud, cujus potestate malum potest inferri: sicut aliquis timet Regem, in quantum habet occidendi potestatem. Non autem timeretur ille, qui potest nocere, nisi haberet quandam eminentiam potestatis, cui de facili resisti non possit: ea enim, quæ in promptu habemus repellere, non timemus. Et sic patet, quod aliquis non timeretur, nisi propter suam eminentiam. Sic igitur dicendum est, quod in Christo fuit timor Dei: non quidem secundum quod respicit malum separationis a Deo per culpam, neque etiam secundum quod respicit malum punitionis pro culpa, sed secundum quod respicit ipsam divinam eminentiam: prout scilicet anima Christi quodam affectu reverentiæ movebatur in Deum, a Spiritu sancto acta. Unde Heb. 7. dicitur, quod in omnibus exauditus est pro sua reverentiâ. Hunc enim affectum reverentiæ ad Deum, Christus secundum quod homo, præ ceteris habuit plenior. Et ideo ei attribuit Scriptura plenitudinem timoris Domini.

X 2 Ad

Lib. 6. ethic.  
c. 3 & seq.  
tom. 5.

Glos. ord.  
ibidem.

1. 2. q. 68.  
art. 1.

Li. 2. c. 41.  
2. med. illius.

q. 34. ar. 4.

1. 2. q. 68.  
art. 6.

48.  
Infr. q. 15.  
ar. 7. Et 3.  
d. 15. q. 2.  
ar. 2. q. 3.  
2. 2. q. 19.  
& 17. art. 1.  
Ar. 4. huius  
quæst. August. in  
Can. Joan.  
tract. 9.  
circ. ined.  
10. 9. q. 15.  
ar. 2. & 2.

1. 2. q. 19.  
art. 1.

47.  
Ira. 1. li.  
2. col. 2.



Li. 3. Ethic.  
c. 6. in  
prin. 10. l.

*Ad primum ergo dicendum, quod habitus virtutum, & donorum proprie, & per se respiciunt bonum: malum autem ex consequenti. Pertinet enim ad rationem virtutis, ut opus bonum reddat, ut in 2. Eth. \* dicitur. Et ideo de ratione doni timoris non est illud malum, quod respicit timor, sed eminentia illius boni, scilicet divini, cuius potestate aliquod malum infligi potest. Sed spes, secundum quod virtus est, respicit non solum auctorem boni, sed etiam ipsum bonum, in quantum est non habitum. Et ideo Christo, qui jam habebat perfectum beatitudinis bonum, non attribuitur virtus spei, sed donum timoris.*

*Ad secundum dicendum, quod ratio illa procedit de timore, secundum quod respicit objectum, quod est malum.*

*Ad tertium dicendum, quod perfecta charitas foras mittit timorem servilem, qui respicit principaliter penam. Sic autem timor non fuit in Christo.*

**H**ic articulus etiam in disputatione sequenti explicabitur.

## DISPUTATIO XX.

In duas sectiones distributa.

### *De donis Spiritus sancti, anime Christi collatis.*

**D**ona Spiritus sancti generali ratione dici possunt omnia bona gratiarum gratum facientis, quomodo virtutes infusæ sunt dona Spiritus sancti; speciali tamen ac propria significatione sic appellantur quidam habitus, quibus homo bene disponitur, ut sit facile mobilis ad operandum ex peculiari motione Spiritus sancti. De quibus, an distinguantur a virtutibus, necne, res est controversa inter Theologos, & sub opinione existens, nos vero supponimus cum D. Th. esse distincta, & hoc sensu de illis disputamus. Ex his vero donis (quæ septem ab Isai. numerantur, cap. 1. l. 1.) quatuor ad intellectum pertinent, scilicet intellectus, sapientia, scientia, & consilium: tres ad voluntatem, timor, pietas, & fortitudo. De quibus in 1. 2. ex professo disputatur, hic solum attingemus breviter, quæ ad Christum pertinent.

## SECTIO I.

*Utrum dona Spiritus sancti, intellectum perscientia, fuerint in Christo.*

**D**urand. in 3. dist. 34. q. 3. negat donum consilii manere in beatis quantum ad actum; unde consequens esse videtur, ut etiam in Christo negare illud debeat. Ratio ejus est, quia in beatis non reperitur objectum hujus doni, neque erit dubitatio de aliquo agendo; ergo. De aliis vero tribus donis magis videtur posse dubitari, quia illa dona, prout dantur hominibus viatoribus, dantur ad juvandam, vel fulciendam fidem: unde non obscuritatem aliquam includunt, vel certe imperfectionem, quæ fidem supponat; ergo cum Christus non habuerit fidem, non videtur his donis indiguissse. Et confirmo, nam per scientiam beatam & infusam perfectissime omnia novit, ad quid ergo indiguit aliis donis intellectus, sapientia, & scientia?

Breviter tamen dicendum est, simpliciter, & absolute hæc dona fuisse in Christo: quod sub his nominibus sapientia, scientia, &c. de fide certum est: ex illis verbis Isai. 1. l. 1. *Requiescet super eum Spiritus Domini, spiritus sapientia, & intellectus*, &c. quem locum de Christo interpretantur omnes Sancti, Cyrill. & Hieron. ibi quorum testimonia supra tractavi, & Orig. hom. 6. in Num. Irenæ lib. 3. contra hæres. c. 10. Athan. lib. de fide sua, ex quibus Patribus, adjunctis aliis, Aug. 1. 2. contra Faust. c. 25. Basil. ser. 5. contra Eun. c. 14. Hilari. c. 15. in Matt. & Ambr. Ser. 5. in Pl. 1. 18. colligitur, hæc dona ita fuisse in Christo, ut sint communia omnibus iustis. Unde sit probabile, hæc dona non solum fuisse ipsam scientiam beatam, vel infusam, propter aliquos respectus his vocibus nominatos: sed esse peculiariora dona ab his scientiis distincta, quia alias non possent hæc dona esse ejusdem rationis in Christo, & in nobis. Deinde hæc dona in aliis iustis comitantur gratiam gratum facientem, & ita distinguuntur a fide, ut amittantur amissa gratia, & manente fide, & maneat in patria fide sublata, ut Theologi communiter docent: ergo.

**P**ræterea de dono consilii nulla major ratio dubitandi est, quod fuerit in Christo, quam de prudentia infusa, vel acquisita, vel quam de aliis virtutibus moralibus. Ratio enim Durandi, si quid valeret, æque in omnibus procederet, quia hæc omnia versantur aliquo modo in actione, & quodammodo circa eandem materiam, diverso modo: si ergo in Christo fuit materia prudentia, & aliarum virtutum moralium, fuit etiam objectum, seu materia consilii. Modus autem judicandi per modum doni consilii, non potuit illi repugnare, quia non requirit dubitationem, sed absolutum judicium de agendis, ex speciali instinctu Spiritus sancti: hic autem modus, cum perfectissimus sit, multo magis in Christum convenit, quam in alios. Unde Durandus ipse supra dicta quæst. in solut. ad 1. concedit Christum in via habuisse actus hujus doni, quia aliquo modo exerceat vitam activam; sed in patria negat, non habitum, sed actum, quia ibi cessat exercitium vitæ activæ. Sed tamen, quamvis cesset exterior usus hujus vitæ, tamen non omnino cessant, vel exerceri ibi non possunt interiores actus circa materiam, vel honestatem virtutum moralium; unde neque omnino cessant actus prudentia, vel consilii. Ultimo de aliis tribus donis ita explicari breviter potest, non includere imperfectionem Christo aut beatitudini repugnantem: quia in primis hæc dona nullam includunt obscuritatem, sed eo modo, quo sapientia, & scientia judicant de divinis mysteriis, quod sint creditu digna, vel Deo consentanea, vel aliquid hujusmodi certo & evidenter judicant. Intellectus vero, si est ad judicandum, aliquem modum claritatis, & evidentia habet: vel si tantum est ad perfecte concipiendum, seu apprehendendum supernaturalia mysteria, proprie nec claritatem, nec obscuritatem habet, sed perfectionem quandam, quæ has condiciones non requirit. Actus vero istorum donorum, quamvis fidelibus iustis conferantur in adjumentum fidei, non tamen propter hunc solum finem utiles sunt, sed per se etiam perfectionem afferunt propter se appetibilem, & ad quamcumque abstractivam cognitionem, quæ de Deo habeatur, juvare etiam possunt: in Christo autem non solum fuit cognitio intuitiva supernaturalium mysteriorum fidei, sed etiam abstractiva.

## SECTIO II.

*Utrum in Christo fuerint dona Spiritus sancti, pertinetia ad voluntatem, præsertim donum timoris.*

**D**e his donis dubitari potest, vel propter rationem aliquam omnibus illis communem, vel de aliquo in particulari, propter propriam aliquam difficultatem, ex speciali ejus ratione, seu conditione ortam. Priori modo ratio dubitandi esse potest, vel quia modus operandi horum donorum videtur repugnare perfectioni Christi: quando enim homo operatur actus horum donorum, ab alio potius, scilicet ab Spiritu sancto, movetur, quam a se, ita ut ipse non satis capiat, quomodo, aut qua ratione moveatur: hic autem modus, licet ex parte moventis, scilicet Spiritus sancti, sit perfectus: tamen ex parte moti valde imperfectus videtur, & Christo repugnans, qui in omnibus suis actibus se perfecte movebat, perspicendo, qua ratione & propter quid moveretur. Vel secundo potest in hoc dubitari, quia materia, circa quas versari solent actus horum donorum, non habent locum in beatitudine. Propter quam rationem Durandus in 3. dist. 34. q. 3. & 6. quamvis non negat actus horum donorum fuisse in Christo viatore, negat tamen esse in Christo jam ex omni parte beato. Posteriori modo seu in speciali tractari hic solet difficultas de dono timoris, cuius actus ex peculiari sua ratione maxime videtur repugnare Christo; timor enim est fuga mali imminentis, qui propterea solet esse cum animi tristitia, & anxietate, teste Arist. 2. Rhet. c. 5. & D. Th. 2. 2. q. 19. art. 1. l. sed Christum nullum malum pertinens ad donum timoris potuit hoc modo timere, quia tale malum solum est aut culpæ, aut propter culpam propriam, hoc autem malum in Christo esse non potuit. Propter quam difficultatem Abailardus hæreticus negavit in Christo, & beatis hoc donum timoris esse: a qua sententia non multum discrepat Durand. qui licet non neget habitum, negat tamen omnes ejus actus in beatis reperiri, cum tamen, si quæ sunt testimonia Scripturæ, quæ de hoc timore beatorum loquantur, potius de actu, quam de habitu intelligenda videantur.

Dico

Quo modo in Christo fuerint dona Spiritus sancti intellectus, scientia, & actus eorum.



Dico primo, fuisse in Christo Domino tria Spiritus sancti dona ad voluntatem spectantia, scilicet, fortitudinem, pietatem, timorem. Hæc conclusio sub his verbis censetur de fide certa, propter testimonium Isaia supra citatum. Sed sciendum est nonnullos Hebræos, & alios, qui eos sequuntur, omittere donum pietatis, & loco illius ponere donum timoris, & loco illorum verborum: *Et replebit eum Spiritus timoris Domini*, sic legere: *Operari faciet eum omnes in timore Domini*, id est, Spiritus sanctus faciet, ut Christus facile cognoscat, & dijudicet, qui sint timentes Dominum. Ita fere Pagninus, Vatablus, & alii. Verumtamen nulla ratione nobis recedendum est a vulgata latina editione, nam & Septuaginta interpretes ita verterunt, & vulgata latina editio nobis omnino retinenda est præsertim in re tam gravi, & ad mysteria fidei pertinente; & in Hebræo eodem modo haberi credimus, nam D. Hieron. qui veritatem Hebraicam secutus est, ita vertit, & expresse colligit dona Spiritus sancti in septenario numero fuisse super virgam & florem, qui de stirpe David surrexit, & significari ait per septem oculos, Apocal. 5. quos esse super lapidem, id est, Christum, dixit Deus per Zach. c. 3. quamquam illius loci literalis sensus alius fortasse sit, ut ibi erudire tractat Franc. Riberas. De loco vero Isaia certa res est, & constans traditio Patrum. \*§. Est ergo certa assertio sub prædictis nominibus, fortitudinis, pietatis, timoris. Et licet a prædictis Patribus fere semper operationes appellerentur, sunt tamen operationes supernaturales, quæ habitus proprios requirunt, ut connaturali modo fiant, & ideo hæc dona etiam per habitus infunduntur. Quod de Christo significatur in illo verbo Isaia, *requievit*, ut etiam in superioribus dictum est. Et eandem vim habet illud Joan. 1. *Super quem videris Spiritum descendentem & manentem*. Nam in quo manet divinus Spiritus, manent ejus dona, quibus habilis semper est, & proxime dispositus, ut a Spiritu sancto moveatur.

Quod vero hæc dona sint, distincta a virtutibus, & quod in Christo fuerint ejusdem rationis cum similibus donis, viatoribus iustis infusus, est solum probabilius, propter rationem fere supra tractatam. Quæ ita explicatur, nam hæc dona sunt perfectiones simpliciter, & non includunt imperfectionem repugnantem unioni, aut beatitudini; ergo. Probatur minor, quia in primis modus operandi horum donorum, quamvis essentialiter consistat in hoc, quod sit ex peculiari motione & instinctu Spiritus sancti, non tamen ita requirit, ut is, qui movetur, non intelligat, & percipiat distincte, & clare, a quo, & ad quid, & propter quid moveatur: quamquam enim hæc imperfectio in nobis reperiatur, qui per fidem ambulamus, & non satis possumus capere omnes interiores motiones Spiritus sancti, non est tamen hæc imperfectio de essentia horum donorum: potuit ergo esse in Christo, quicquid est perfectionis in modo operandi talium donorum, sine dicta imperfectio. Quod ita confirmatur, & declaratur, nam per actum doni movetur homo ab Spiritu S. interdum ad operandum præter ordinarias regulas rationis tam naturales, quam supernaturales, per quas prudentia acquisita, vel infusa regi solet: Christus autem poterat moveri ad operandum hoc modo; hoc ergo satis erat, ut operatio ejus pertineret ad donum, quamvis per scientiâ beatam, vel infusam clare perciperet illam motionem, & principium ac terminum ejus. Neque vero repugnabat animæ Christi sic moveri a supremo principio, scilicet Spiritu S. quia, cum sit creatura illi subiecta, potius hac motione valde perficitur: & non excluditur cooperatio ejus, quia per hanc motionem Spiritus S. ita movetur voluntas, ut tamen ipsa consentiat, & libere operetur.

Deinde neque ex defectu materiæ caruit Christus actibus horum donorum. Et primo, de dono pietatis nulla videtur esse posse dubitandi ratio (quod miror Durandū non advertisse), quia hoc donum potissimum versatur circa materiâ religionis, & cultus divini, qui perfectissimus manet in beatis. Secundo de dono fortitudinis est quidem hoc ad intelligendum difficilius, sed non habet majorem difficultatem, quam sit in virtute acquisita, vel infusa fortitudinis: quia, ut supra dicebam de dono consilii, hæc dona, & virtutes, quibus respondent, in eadem materia versantur; quod ergo in via exercere potuerit Christus actus hujus doni, facillimum est, sicut potuit exercere actum virtutis fortitudinis: in patria vero solum intelli-

Suarez Tom. XVI.

gi potest actus per modum simplicis affectus vel gaudii circa honestatem fortitudinis, seu de honeste factis fortiter ex instinctu Spiritus sancti, & ita quoad hæc dona satisfactum est primæ dubitationi propositæ.

Ultimo de timore major est difficultas. Sed simpliciter tanquam in re de fide certa fatendum est, timorem Dei esse in Christo, & in beatis, juxta illud: *Et replebit eum Spiritus timoris Domini*, Isaia. 11. & illud Psal. 18. *Timor Domini sanctus permanet in seculum seculi*; unde Bernar. epist. 190. contrarium numerat inter errores Abailardi, quos generatim damnat Innoc. III. in epist. quæ est 194. inter epist. Bernardi, & inter hæreses ponit Castro, verbo Christus, hæres. 9. Sander. lib. 7. de visib. monar. hæres. 146. Quæ definitio & veritas de actu, & non tantum de habitu timoris intelligenda est. Primo, quia omnes Patres citati de actu & operatione Spiritus sancti intelligunt locum Isaia. Secundo, quia locus Psal. 18. de actu etiam intelligitur ab omnibus, præsertim ab Aug. ibi, & tract. 85. in Joann. & tract. 9. in 1. canon. Joan. Constat autem, in hoc esse eandem rationem de Christo, & de aliis beatis. Tertio quia illa verba Eccl. *Tremunt potestates*, clare significant actum: sumpta autem videntur ex illis Job. 26. *Columnæ cæli contremiscunt*. Ubi Gregor. ita exponit lib. 17. Moral. c. 15. Quarto quia habitus est propter actum, & talis actus non includit imperfectionem, ut jam declarabitur. Igitur, licet non sit certum, actum timoris Dei esse actum doni distincti a virtutibus, potest enim aliquis timor Dei elici a Charitate, & aliquis a virtute Spei: tamen quacumque ratione constet, actum & materiâ timoris Dei habere locum in beatis, facile ex principiis positis, tanquam probabilius concludetur, posse in eisdem esse timorem aliquem, etiam per modum doni. Quis autem sit hic actus timoris in beatis, & quod habeat objectum, quomodo fiat, variis modis explicatur, qui tractantur late in 2. 2. q. 19. & a Theolog. in 3. dist. 14. quos brevissime attingam, quantum necessarium fuerit ad explicandum hunc art. 6. D. Thom.

Primus modus est D. Th. hic dicentis hunc timorem consistere in quodam affectu reverentiæ ad Deum, propter eminentiam ejus, quem affectum pertinere ad timorem ita D. Thom. explicat: nam timor respicit malum, quod ab alio infligi potest; necesse est autem eum, qui potest infligere malum, habere quandam eminentem potestatem super alium, a quo timetur: & ideo, quamvis interdum nullum timeatur malum ab eo, qui eminet potestate, tamen affectus reverentiæ ad aliquem propter eminentiam ejus, timor appellatur. Hanc sententiam docuit idem D. Th. 2. 2. q. 10. & q. 81. art. 2. ad 1. & Alenf. 2. p. q. 118. memb. 3. art. 6. & q. 175. memb. 1. Bonavent. in 3. dist. 34. art. 2. q. 3. Gabr. q. unica art. 3. dub. 2. & Altfiodoren. lib. 3. Sum. tract. 8. c. de timore filial. q. 3. & Janfenius super c. 1. Prover. & videtur hæc expositio consentanea modo loquendi Scripturæ Luc. 7. *Accepit autem omnes timor, & magnificabant Deum*; ubi timor non videtur significare fugam alicujus mali, sed reverentiam conceptam ad Christum, quoniam videbant eum miram facientem: unde c. 5. dicitur: *Repleti sunt timore dicentes, quia vidimus mirabilia hodie*; & eodem sensu dicitur ad Rom. 13. *Reddite omnibus debita, cui timorem, &c.* ut ibi Chrysost. & Theophyl. intelligunt. Quod si obijcias, quia de ratione timoris est, ut sit fuga mali, & causa ipsius mali, solum quatenus potens est illud infligere. Respondet hic Cajet. late: sed ejus sententiam statim explicabo: nam licet in se probabilis sit, non videtur tamen mihi esse sensus D. Th. Respondetur ergo ex eodem D. Th. hic ad 1. & 1. 2. q. 67. art. 4. ad 2. donum timoris non solum respicere malum, sed etiam bonum, imo, inquit D. Th. (quod valde notandum est) omnem virtutem & omne donum per se respicere bonum, malum autem ex consequenti, & ideo donum timoris non solum posse habere actum circa malum, fugiendo illud, sed etiam circa eminentem potestatem, quæ bonum quoddam est, illi reverentiam exhibendo. Sed in hac responsione illud semper manet difficile, quia juxta illam solam defenditur esse in Christo habitum doni timoris & aliquem actum ejus, qui non est verus timor, quod facillimum est, nam etiâ gaudere, quod quis a Deo separari non potest per peccatum, est actus ab eodem habitu elicitus, a quo timor filialis, ut bene Richard. in 3. d. 34. art. 2. q. 4. imo & bonus affectus ad honestatē, qui est in divino timore potest dici

De dono timoris.

Objeatio.



tem omnia non satis esse videntur; ut dicatur timor esse in Christo, ut a simili sumi potest ex iis, quæ supra de penitentia & de spe dicebamus.

Responso.

Quocirca, ut hæc sententia melius intelligatur, oportet explicare, quis sit hic actus reverentiæ ad Deum propter eminentiam ejus. Et primum constat non esse actum solius intellectus, supponit quidem cognitionem seu iudicium de divina omnipotentia & maiestate, ille autem non est reverentia actus, sed aliquis motus resultans in voluntate. Deinde in voluntate ipsa possumus intelligere per modum reverentiæ ad Deum voluntatem parendi illi ut supremo Domino, vel colendi illum ut supremum principium, qui actus proprie pertinent ad religionem, vel obedientiam, & si fiant per modum doni, pertinent ad donum pietatis. Possumus præterea intelligere voluntatem quandam subdendi se Deo, præferendo in omnibus honorem divinum proprio, qui actus videtur proprie ad humilitatem pertinere, atque adeo ad donum timoris, si fiat ex speciali instinctu Spiritus sancti, nam hoc donum humilitati respondet, ut August. dicit in lib. de sermone Domini in monte: qui etiam ferm. 1. de annuat. timorem superbiam opponit, & ideo Gregor. 2. Moral. cap. 26. alias 28. dicit donum timoris dari contra superbiam. Ex hoc vero affectu intelligi potest sequi in voluntate quidam affectus, qui sit per modum fugæ, quo creatura in conspectu divinæ eminentiæ ita se habeat, ut veluti non audeat ad illam accedere, & omnino caveat usurpare in aliquo excellentiam ejus, seu quo formidat, & fugit investigare, vel comprehendere mirabilia ejus, & hic actus videtur vocari a Patribus timor reverentiæ, seu admirationis, ut videre est in Greg. 17. lib. Moral. c. 15. alias 17. & Dionys. c. 13. de cæl. Hier. ubi exponens visionem Isai. c. 6. ubi Seraphim velabant pedes & terga, inquit significari: *Sacram illam ac plenam horrore venerationis, quia sancti celsiorem mysteriorum indaginem perhorrescunt*, quod fere eodem modo habet Chrysost. enar. 6. in c. 5. Isai. quomodo Apoc. 16. dicitur beatos cantare: *Magna & mirabilia sunt opera tua Domine*, & statim subdit. *Quis non timebit te Domine, & magnificabit nomen tuum?* Et hoc modo explicato hoc actu reverentiæ includit, non tantum voluntatem alicujus boni, sed etiam fugam alicujus mali, non quidem imminentis, seu quod formidetur futurum, sed quod secundum se malum est, & repugnans divinæ excellentiæ; & hoc satis est ad rationem & denominationem timoris perfecti, ut jam amplius dicam.

Secunda ergo explicatio hujus timoris sumitur ex Aug. 14. de civit. c. 6. dicentis. *Timoris casti nomine ea voluntas significata est, qua nos necesse erit nolle peccare, non sollicitudine necessitatis, sed tranquillitate charitatis*. Itaque fuga, quam beatus habet, omnis peccati, quatenus a Deo separat, timor castus dici potest, & hunc etiam potuit habere Christus: tum, quia licet ipse peccare non potuerit, tamen natura ejus secundum se capax erat peccati, & ita potuit voluntate sua fugere hoc malum, tanquam possibile simpliciter suæ naturæ: hic vero actus proprie ad charitatem pertinet.

Tertia expositio colligitur ex Cajet. hic, scilicet hunc timorem esse de malo, quod Deus de absoluta potentia sua potest inferre creaturæ suæ, quia licet anima Christi, & cujuscumque beati considerando Dei omnipotentiam, ut conjunctam voluntati & promissioni ejus, securissima sit, nec timere possit aliquod malum: tamen præcise considerando divinam potentiam secundum se, potest voluntas refugere malum illud, quod ab ea provenire posset: & juxta hunc modum explicat D. Th. dicens, Deum esse objectum hujus timoris, ut potentem infligere malum; tamen quia non respicit illud malum ut futurum, sed tantum ut possibile, nec divinam potentiam, ut effecturam aliquod malum, sed tantum ut potentem secundum se, ideo dicitur habere pro objecto divinam eminentiam. Quæ explicatio probabilis est, & non dubito, quin ille actus sit possibilis; existimo tamen, illum non pertinere ad donum timoris, sed potius ad habitum illum, quo beatus amat Deum & propriam beatitudinem amore concupiscentiæ: nam ex hoc amore nascitur hic timor, sicut ex amore Dei nascitur timor vel fuga mali culpæ, quatenus a Deo separat. Unde nec D. Th. nec Scripturæ, quæ loquuntur de timore sancto & perfectissimo, qui in beatis manet, de hoc timore loquuntur, qui omnium imper-

fectissimus est inter eos, qui in beatis esse possunt, imo quibusdam videtur, hunc actum non habere locum in beatis, quia videtur esse quidam timor servilis. Quod bene probat non ita esse beatis, ut propter hujusmodi timorem fugiant culpam, aut honeste operentur, hoc enim aliquo modo servile esset; tamen, simpliciter habere illum affectum consentaneum proprio amori ordinato & supernaturali, non repugnat beato, & consequenter nec Christo, qui potest totum illud objectum considerare in ordine ad suam naturam secundum se sumptam.

Ad difficultatem ergo in principio positam, quæ contra omnes hos modos æque procedit, & in hoc consistit, quod hæc fuga magis videtur ad simplex quoddam odium, quam ad proprium timorem pertinere, quia magis respicit malum secundum se, quam malum futurum vel imminens, Castro supra nescio quam differentiam invenit in Christo viatore, vel omnino jam beato: quasi in via potuerit magis proprie esse capax hujus timoris. Sed hic non agimus de timore naturali mortis, de quo infra dicitur, sed de dono timoris Dei; & in hoc multa est differentia, quia tam securus & alienus erat ab omni malo vel culpa, vel poenæ, aut alterius mali possibilis numquam futuri in via, sicut in patria. Dico ergo illum actum non esse omnino idem cum odio; aliter enim Deus ipse odio habet peccatum, & aliter beatus, quia Deus tantum considerat peccatum, ut secundum se malum, & simpliciter odio illud averfatur, beatus autem considerat illud ut malum sibi seu naturæ suæ secundum se simpliciter possibile (& idem est de quolibet alio modo), & fugit illud per actum quandam respicientem executionem possibilem; & sic talis actus quoad substantiam suam ejusdem rationis est cum timore, qui est de malo futuro, vel imminente, quamvis non habeat omnem modum ejus, & consequenter neque effectus, qui imperfectionem supponunt. Et ideo interdum dicere solent Patres, timorem mali etiam filialem non manere in beatis, ut legitur nomine Hieronymi in id Prover. 1. *Timor Domini principium sapientiæ*: intelligitur enim de timore imperfecto & quasi incerto, qui poenam ingerat, ut Gregorius & Augustinus citatis locis satis declarunt. Sed de variis modis timoris dicemus plura infra q. 15. & 18.

#### ARTICULUS VII.

Utrum in Christo fuerit gratie gratis data.

**A**d septimum sic proceditur. Videtur, quod in Christo non fuerint gratie gratis datæ. Etenim, qui habet aliquid secundum plenitudinem, non competit illud habere secundum participationem. Sed Christus habuit gratiam secundum plenitudinem: secundum illud Joan. 1. Plenum gratiæ & veritatis. Gratia autem gratis datæ videtur esse quadam participationes divinæ divisi, & particulariter diversis attributæ: secundum illud 1. ad Corinth. 12. Divisiones gratiarum sunt. Ergo videtur, quod in Christo non fuerint gratie gratis datæ.

2. Præterea. Quod debetur alicui, non videtur esse gratis ei datum. Sed debitum erat homini Christo, quod sermone sapientiæ & scientiæ abundaret, & potens esset in virtutibus faciendis, & in aliis hujusmodi, quæ pertinent ad gratias gratis datas: cum ipse sit Dei virtus & Dei sapientiæ, ut dicitur 1. ad Corinth. 1. Ergo Christo non fuit conveniens habere gratias gratis datas.

3. Præterea. Gratie gratis datæ ordinantur ad utilitatem fidelium: secundum illud 1. ad Corinth. 12. Unicuique datur manifestatio Spiritus ad utilitatem. Non autem videtur ad utilitatem aliorum pertinere habitus aut quacumque dispositio, si homo non utatur: secundum illud Eccles. 20. Sapientiæ abscondita & thesaurus invisus, quæ utilitas in utrisque? Christus autem non legitur usus omnibus gratiæ gratis datis, præsertim quantum ad genera linguarum. Non ergo in Christo fuerunt omnes gratie gratis datæ.

Sed contra est, quod Augustinus dicit in epistola ad Dardanum, \*quod sicut in capite sunt omnes sensus, ita in Christo fuerunt omnes gratie.

Respondeo dicendum, quod sicut in secunda parte habitum est, gratia gratis datæ ordinantur ad fidei, & spiritualis doctrinæ manifestationem: oportet enim eum, qui docet, habere ea, per quæ sua doctrina manifestetur: alias sua doctrina esset inutilis. Spiritualis autem doctrinæ & fidei primus, & principalis Doctor est Christus, secundum illud Hebr. 2. Cum initium accepisset enarrari per Domi-

Fuga mali proprii absolute possibilis, actus veri timoris est.

49. 3. col. 354. fin & veri. q. 17. art. 1. & 5. cor. Et opus. 3. ca. 221. & Rom. 1. li. 3. col. 2. & Eph. 1. li. 2.

Epist. 57. declinando ad fin. tom. 2.

1. 2. q. 111.

Actus domini timoris in Christo, & beatus, est actus humiliani di se coram Deo.

Timor mali quod Deus potest inferre creaturæ suæ, ad spem pertinet.



nium, ab eis qui audierunt, in nos confirmata est, contestante Deo signis, & portentis, &c. Unde manifestum est, quod in Christo excellentissime fuerunt omnes gratia gratis data, sicut in primo & principali fidei Doctore.

Ad primum ergo dicendum, quod sicut gratia gratum faciens ordinatur ad actus meritorios tam interiores, quam exteriores, ita gratia gratis data ordinatur ad quosdam actus exteriores, fidei manifestativos, sicut est operatio miraculorum, & alia huiusmodi. In utraque autem gratia Christus plenitudinem habuit: in quantum enim divinitati unita erat ejus anima, plenam efficaciam habebat ad omnes predictos actus perficiendos. Sed alii Sancti, qui moventur a Deo sicut instrumenta non unita, sed separata, particulariter efficaciam recipiunt ad hos vel ad illos actus perficiendos. Et ideo in aliis Sanctis huiusmodi gratia dividitur, non autem in Christo.

Ad secundum dicendum, quod Christus dicitur Dei virtus & Dei sapientia, in quantum est æternus Dei filius. Sic autem non competit habere gratiam, sed esse potius datorem gratia. Competit autem sibi habere gratiam secundum humanam naturam.

Ad tertium dicendum, quod donum linguarum datum est Apostolis, quia mittebantur ad docendas omnes gentes. Christus autem in una sola gente Judeorum voluit personaliter predicare, secundum quod ipse dicit Matth. 18. Non sum missus nisi ad oves, quæ perierunt domus Israel. Et Apostolus dicit Rom. 15. Dico Christum Jesum ministrum fuisse circumcisionis. Et ideo non oportuit, quod loqueretur pluribus linguis. Nec tamen defuit ei omnium linguarum notitia: cum etiam occulta cordium ei non essent abscondita (ut infra dicitur\*), quorum voces quæcumque sunt signa. Nec tamen inutiliter hanc notitiam habuit: sicut non inutiliter habet habitum, qui eo non utitur, quando non est opportunum.

Hunc articulum exponemus disputatione sequenti.

## ARTICULUS VIII.

Utrum in Christo fuerit prophetia.

**A**D octavum sic proceditur. Videtur, quod in Christo non fuerit prophetia. Prophetia enim importat quandam obscuram & imperfectam notitiam: secundum illud Numer. 12. Si quis fuerit inter vos Propheta Domini, per somnium, aut in visione loquar ad eum. Sed Christus habuit plenam & apertam notitiam multo magis quam Moyses, de quo ibi subditur, quod palam & non per anigmata videt Deum. Non ergo in Christo debet poni prophetia.

2. Præterea. Sicut fides est eorum, quæ non videntur, & spes eorum, quæ non habentur, ita prophetia est eorum, quæ non sunt præsentia, sed distant: nam propheta dicitur quasi procul fans. Sed in Christo non ponitur Fides, nec Spes, ut supra dictum est. \* Ego prophetia etiam non debet poni in Christo.

3. Præterea. Propheta est inferioris ordinis, quam Angelus: unde & de Moyse, qui fuit supremus Prophetarum (ut in secunda parte dictum est\*) dicitur Act. 7. quod locutus est cum Angelo in solitudine. Sed Christus non est minoratus ab Angelis secundum notitiam animæ, sed solum secundum corporis passionem, ut habetur Hebræ. 2. Ergo videtur, quod Christus non fuit propheta.

Sed contra est, quod de eo prædicitur Deut. 18. Prophetam suscitabit vobis Deus de fratribus vestris. Et ipse de se dicit Matth. 13. & Joan. 4. Non est propheta sine honore nisi in patria sua.

Respondeo dicendum, quod propheta dicitur quasi procul fans, vel procul videns: in quantum, scilicet cognoscit & loquitur ea, quæ sunt procul ab hominum sensibus: sicut etiam Augustinus dicit. 16. contra Faustum. \* Est autem considerandum, quod non potest dici aliquis propheta ex hoc, quod cognoscit & annunciat ea, quæ sunt aliis procul, cum quibus ipse non est. Et hoc manifestum est secundum locum, & secundum tempus: si enim aliquis in Gallia existens, cognosceret & annuntiaret aliis in Gallia existentibus ea, quæ tunc in Syria agerentur, propheticum esset: sicut Helisæus ad Giezi dixit 4. Regum. 5. quo modo vir descenderat de curru, & occurreret ei. Si vero aliquis in Syria existens, ea, quæ sunt ibi annuntiaret, non esset propheticum. Et idem apparet secundum tempus. Prophe-

Suarz Tom. XVI.

ticum enim fuit quod Isaias prænuntiavit, quod Cyrus Rex Persarum templum Dei esset reedificaturus, ut patet Isaiæ 44. Non autem fuit propheticum, quod Esdras hoc scripsit, cujus tempore factum est. Si igitur Deus aut angeli vel etiam Beati cognoscunt & annunciant ea, quæ sunt procul a nostra notitia, hoc non pertinet ad prophetiam: quia in nullo nostrum statum attingunt; Christus autem ante passionem nostrum statum attingebat, in quantum non solum erat comprehensor, sed etiam viator. Et ideo propheticum erat, quod ea, quæ erant procul ab aliorum viatorum notitia, & cognoscebat & annuntiabat. Et hac ratione dicitur in eo fuisse prophetia.

Ad primum ergo dicendum, quod per illa verba non ostenditur esse de ratione prophetia anigmatica cognitio, quæ scilicet est per somnium, & in visione: sed ostenditur comparatio aliorum Prophetarum, qui per somnium & in visione perceperunt divina, ad Moysen, qui palam & non per anigmata Deum vidit. Qui propheta est dictus secundum illud Deut. ult. Non surrexit ultra propheta in Israel, sicut Moyses. Potest tamen dici, quod & si Christus habuit plenam & apertam notitiam, quantum ad partem intellectivam, habuit tamen in parte imaginativa quasdam similitudines, in quibus etiam poterat speculari divina: in quantum non solum erat comprehensor, sed etiam viator.

Ad secundum dicendum, quod fides est eorum, quæ non videntur ab ipso credente, & similiter spes est eorum, quæ non habentur ab ipso sperante: sed prophetia est eorum, quæ sunt procul a communi hominum sensu, cum quibus propheta conversatur, & communicat in statu viæ. Et ideo Fides & Spes repugnant perfectioni beatitudinis Christi: non autem prophetia.

Ad tertium dicendum, quod Angelus cum sit comprehensor, est supra Prophetam, qui est purus viator, non autem supra Christum, qui fuit simul viator & comprehensor.

Quæ ad hunc articulum spectant, trademus in disputatione, quia in litera D. Thom. nihil occurrit notandum præter ea, quæ ibi dicuntur.

## DISPUTATIO XXI.

In duas sectiones distributa.

### De gratiis gratis datis animæ Christi.

**G**RATIAE gratis datæ dicuntur quædam operationes seu actus, qui supra naturam sunt, & divina virtute fiunt ad confirmationem fidei, vel aliorum profectum, potius quam ad operantis utilitatem: & ad has gratias pertinent omnia auxilia vel principia, quæ ad hæc opera perficienda ab Spiritu sancto tribuuntur. Sunt autem hæc gratia novem ex communi sententia doctorum fundata in Paul. 1. Corinth. 12. ubi Chrysof. hom. 29. Oecumen. Theophylact. & alii Græci, Ambros. D. Th. Anselm. & alii expositores variis modis illas exponunt. Idem D. Th. 1. 2. q. 111. art. 4. & 2. 2. q. 171. & sequentibus & 3. cont. Gent. c. 151. Et quantum præsentī loco necessarium fuerit, eas expositiones breviter antingemus. In his ergo gratiis duæ, scilicet operatio virtutum, & gratia sanitatum ad operationem pertinent, & ad potestatem faciendi miracula, de qua in q. 13. dicendum est, & ideo de illis ibi tractabitur. Aliæ vero partim ad cognitionem, ut prophetia & discretio spirituum, &c. partim ad sermonem pertinent, ut donum linguarum, &c. de quibus breviter dicendum est.

## SECTIO I.

Utrum in Christo fuerit prophetia, & si quæ alia gratia gratis data ad cognitionem spectat.

**P**rima sententia est Christum non habuisse verum donum prophetia, sed vocari prophetam existimatione, & appellatione vulgi. Ita sentit Abulen. in c. 11. Numer. q. 64. & potest fundari in illo 1. ad Corinth. 13. Sive prophetia evacuabitur, sive lingue cessabunt; & infra: Ex parte cognoscimus, & ex parte prophetamus, cum autem venerit quod perfectum est, evacuabitur quod ex parte est; ex quo colligitur visionem beatam excludere prophetica cognitionem; sed Christus habuit semper visionem beatam: ergo non fuit capax prophetia. Et confirmatur pri-



mo, quia de ratione prophetiæ est, ut sit obscura cognitio auctore D. Th. 2. 2. q. 174. art. 2. ad 3. sed in Christo non habuit locum obscuritas, hac enim ratione non habuit fidem. Confirmatur secundo, quia nunc Christus non est Propheta, neque habet propheticam cognitionem, aliis omnes beati possent esse prophetae: sed Christus nunc habet omne genus cognitionis supernaturalis, quod in via habuit, quia in hoc anima eius non est mutata. Denique argumentatur Abulensis, quia Joannes Baptista fuit plerumque Propheta, multo ergo magis Christus, qui est Deus. Et huic opinioni videtur favere Tertul. lib. 4. contra Marcion. c. 22. n. 33. ubi inquit: *Deum a principio prædixisse populo Israel, ut audiret Christum sub nomine Prophetæ, quoniam Prophetæ existimandus erat a populo*; significat ergo non fuisse, sed existimatum fuisse Prophetam. Sed hanc sententiam existimo esse valde falsam.

Christus  
vere, &  
proprie  
Propheta.

Dico ergo primo, Christum Dominum vere & proprie fuisse Prophetam, atque adeo veram ac propriam & omnino perfectam habuisse gratiam prophetiæ. Probatur primo, quia ita appellatur in scriptura, quæ proprie intelligenda est, cum commode possit. Assumptum patet Deut. 18. *Prophetam sicut me*, &c. quem locum de Christo exponunt Petrus & Stephanus Act. 3. & 7. ut notant Justin. Mart. q. 101. ad gentes, Irenæ. lib. 3. c. 12. Clemens Alexan. lib. 1. pædagog. c. 7. Cypr. lib. 1. contra Judæos c. 18. Cyrillus lib. 1. in Joan. c. 24. & lib. 3. c. 9. Refert autem Galatinus lib. 8. de arcanis c. 7. Judæos negasse locum illum esse de Messia intelligendum, ne convincerentur fateri, Christum esse Messiam promissum. Christum enim insignem Prophetam fuisse negare non possunt. Unde in Evangeliiis sæpe ita vocatur, tam a vulgaribus hominibus, Lucæ 7. *Prophetam magnum surrexit in nobis*, quam a discipulis, Lucæ 24. *Fuit vir Prophetæ*, &c. imo & a se ipso, qui Lucæ 4. de se dixit: *Non est Prophetæ sine honore, nisi in patria sua*, ut August. notavit tract. 15. in Joan. inde probans non male sensisse Samaritanam de Christo, cum ad illum dixit Joan. 4. *Domine ut videam Prophetas tuos*; in quibus locis ex contextu, & ex re, de qua agitur, constat aperte Prophetam dici non in aliis significationibus, quas hæc vox interdum habere potest, sed ut significat eum, qui divinitus agnoscit ea, quæ longe distant a communi sensu hominum, & potens est ea prædicere.

Secundo hæc est communis sententia omnium Patrum, præsertim ubicumque exponunt locum citatum Deuter. 18. quem tractans August. 16. contra Faust. c. 18. hæreticam vanitatem appellat, negare de Christo esse intelligendum; & subdit: *An quia Prophetæ dictus est, qui & homo esse dignatus est, & tam multa futura prædixit, nisi forte aliud est Prophetæ, quam homo ultra humanas conjecturas futura prædicens*, &c. Secundo Ambrosius serm. 8. in Pl. 188. circa id: *Particeps ego sum: Habet*, inquit, *Christus participes suos, habet participes carnis, habet & prophetiæ, quia Prophetam*, inquit, *suscitabit vobis Dominus*, &c. & infra: *Ipse est verus Prophetæ, qui sine alterius munere futura cognoscit*. Tertio, Cyrillus lib. 8. contra Julianum in principio dicit: *Christum vocari Prophetam a dono prophetiæ, quod in ordine summarum dignitatum humanitatis recensetur, oportebat enim demittentem se humiliatione, humanitatis subire mensuram*. Quarto recte Chrysost. homil. 35. in Joan. notat, quando Pharisei interrogaverunt Joannem Baptistam, *Propheta est tu?* non de quocumque, sed de illo excellentissimo a Moyse prædicto interrogasse, & ideo Græce addi articulum habentem illam vim, scilicet, *Esne tu ille Prophetæ?* & ideo Joannem negasse; & in demonstratione, quod Christus sit Deus, probat contra Judæos Christum esse prophetam a Moyse prædictum, & homil. 7. in 2. ad Corinth. dicit Christum esse Prophetam secundum carnem. Quinto, Isidorus lib. 7. originum c. de Filio Dei, unum ex nominibus, quæ in Scriptura sacra vere tribuuntur Christo Domino, dicit esse nomen Prophetæ, quia futura revelavit, & lib. 6. c. de prophetis, dicit Christum esse finem omnium prophetarum, cui dictum est a Patre: *Et Prophetam in gentibus dedi te*, Jerem. 1. Sexto, Hieronym. tractans hæc verba Jerem. 1. ait: *Quidam hunc locum super Salvatore intelligunt, qui proprie Prophetæ gentium fuit*, quam expositionem, licet more suo sub aliorum nomine referat, tamen revera eam probat & confirmat. Denique D. Th. hic eandem tenet sententiam, & eisdem

Verbis Moyſis illam confirmat: incredibile enim est, tam gravem, tamque insignem prophetiam de Christo dictam esse sub nomine significante proprietatem, quæ vere in ipsum non conveniat.

Tertio principaliter probatur conclusio ratione, quia licet cognitio Prophetiæ interdum possit esse obscura, non est autem hoc de ratione prophetiæ, quia non oportet, quod cognitio prophetica sit fides, vel in illa fundetur, quin potius sæpe tribuitur prophetis, ut ea videant, quæ prædicunt, unde & in scriptura videntes vocantur: & Basil. præfatione in Isai. & Cyril. lib. 3. in Isai. in principio dicunt Prophetas videre futurum tempus tanquam instans; citatur etiam Aug. in 5. de Civitate c. 9. quod dicat prophetiam esse luce clariorem. Sed eo loco potius videtur dicere luce clarius esse dari prophetiam veram, quam ipsam prophetiam esse luce clariorem; tamen D. Th. 2. 2. q. 171. art. 1. ad 4. ait, per prophetiam tolli obscuritatis & ignorantiae velamen; & art. 3. ad 2. distinguit prophetiam a fide, quia fides non dat cognitionem rerum, sed tantum certitudinem, prophetia vero etiam cognitionem tribuit, quod non nisi propter aliquam claritatem, & evidentiam videtur dici potuisse. Denique hoc art. 8. ad 1. clare negat ænigmaticam cognitionem esse de ratione prophetiæ. Nec vero dicimus evidentiam aut claritatem esse semper necessariam in cognitione prophetica, quia neque hoc verum est, ut ex 2. 2. suppono: sed hoc solum dicimus, prophetiam de se neque obscuritatem, neque claritatem requirere in cognitione ipsius Prophetiæ, sed sufficere, ut sit cognitio eorum, quæ longe distant a sensibus hominum, & omnino ab ordinaria cognitione viatorum, ut hic dicit D. Th. qui eodem sensu dixit citato loco 2. 2. nomen Prophetæ de se indicare remotionem ab intelligibili veritate, non quidem in ipso actu cognitionis, nam potius ibidem subdit prophetiam perfectissimam esse, quæ fit per intellectualem visionem: sed indicat illam elongationem in subiecto ipso, seu in persona, quæ secundum statum suum longe distat ab iis, quæ prævidet, vel dicit: dicitur enim propheta (inquit D. Thom.) quasi procul fans, aut videns: tota autem hæc ratio prophetiæ seu Prophetæ propriissime convenit in Christum pro statu viæ, qui prævidebat & prædicebat ea, quæ longe distant a cognitione hominum, in huiusmodi statu constitutorum; ergo.

Et ex hac conclusione colligitur primo, hanc cognitionem propheticam in anima Christi re ipsa non fuisse distinctam a cognitione supernaturali, quam per visionem beatam, vel per se infusam de divinis rebus habuit, quia, ut infra dicemus, non fuit in intellectu humano Christi aliqua supernaturalis cognitio præter hæc duas. Sed quæres, quæ istarum possit hanc denominationem prophetiæ recipere? Quidam sentiunt, solam cognitionem scientiæ infusæ posse proprie vocari prophetiam: tum, quia D. Th. 2. 2. q. 174. art. 5. ad 2. dicit Christum simul fuisse comprehensorem & viatorem, & rationem prophetiæ non convenire illi, ut erat comprehensor, sed ut viator erat; & q. 20. de verit. art. 6. reddit rationem, quia prophetia est imperfecta participatio visionis beatæ: tum etiam quia ad rationem prophetiæ pertinet, ut possit conjungi phantasmatibus, seu imaginibus sensibilibus, per quas res distantes præsentis fiunt, ut hic D. Th. significat in secunda responsione ad primum argumentum, & idem sentit super 6. cap. Joannis lect. 2. in princ. ubi dicit Christum non fuisse similem Prophetis in cognitione intellectiva, sed in sensitiva: at vero scientia beata non potest conjungi phantasmatibus, infusa autem potest. Respondetur tamen, verum quidem esse cognitionem scientiæ infusæ posse satis accommodare hanc denominationem prophetiæ recipere: nihilominus tamen etiam visionem beatam conjunctam statui viatoris sufficere ad rationem prophetiæ, quod plane sentit D. Th. hic, qui solum requirit in vero Propheta, ut ea annunciet, & supernaturaliter cognoscat, quæ tam ab ipso secundum statum suum, quam ab aliis longe distant: unde concludit in Christo fuisse prophetiam in quantum simul erat comprehensor & viator: & idem plane sentit in solutionibus argumentorum, & ratio supra facta idem probat: quia scilicet prophetia nullam obscuritatem, vel imperfectionem in ipso actu cognitionis requirit. Nec D. Thom. in 2. 2. docet contrarium, sed dicit Christum non fuisse Prophetam, ut comprehenso-

Obscuritas non est de ratione prophetiæ.

Ratio prophetiæ quæ.

Visionem beatam in eo, qui simul est viator, sufficit ad rationem prophetiæ.



henforem, sed ut viatorem, quod hic magis explicuit dicens fuisse Prophetam, ut comprehenforem simul & viatorem, quia licet, dum existerat in via, per ipsammet visionem comprehensoris posset prophetare: tamen illa non habebat rationem prophetiæ, nisi prout existerat in viatore. Illa vero conjunctio ad sensibiles imagines non est de ratione prophetiæ, nam potius eo perfectior est cognitio prophetica, quo est magis abstracta a sensibus & pure intellectualis, ut D. Thom. docuit in 2.2. locis citatis: ut vero hic explicaret habuisse locum in Christo etiam illum modum prophetiæ, addit eam responsionem de sensibilibus similitudinibus.

Secundo sequitur, hoc donum prophetiæ fuisse in Christo permanenter, ita ut ad nutum voluntatis suæ posset illo uti, in quo inter alia multum reliquos prophetas superavit. Patet, quia ut dictum est, fundatum fuit in scientia infusa, vel beata. Notavit hoc Hieron. 3. tom. Epist. 125. ad Damasum de 3. quæst. sacre Scripturæ in q. 3.

Discretio  
spirituum  
in Christo.

Tertio sequitur etiam fuisse in Christo illam gratiam, quæ dicitur discretio spirituum, quæ veluti quædam prophetiæ pars est: quia vel significat vim cognoscendi & manifestandi interiores cogitationes mentium, vel saltem discernendi, & dijudicandi ex instinctu Spiritus sancti inter motionem boni, & mali Spiritus, ut Chrysostom. homil. 19. in 1. ad Corinth. & Anselm. 1. Corinth. 12. & ibi Oecum. D. Thom. & alii. Utroque autem modo potuit Christus per suam scientiam creatam discernere spiritus, ut per se constat, & dicitur inferius q. 10. & 11. Et patet ex illo Joan. 3. *Opus ei non erat, ut quis testimonium perhiberet de homine: ipse enim sciebat, quid esset in homine.* Et eadem ratione constat, quamcumque aliam gratiam explicatam in ordine ad cognitionem, quæ obscuritatem non includat, perfectissime in Christum convenire, ut si interpretatio sermonum explicetur, ut sit vis quædam, & lux Spiritus sancti ad penetrandos veros & intimos Scripturarum sensus, & idem est de dono scientiæ & sapientiæ, si aliquo modo ad cognitionem referantur. De gratia autem fidei statim dicitur,

Quo sensu  
prophetiæ  
in patria  
evacuatur.

Ad fundamentum Abulensis respondetur primo, in illo loco 1. ad Corinth. 13. prophetiam non significare donum prædicendi futura, sed interpretandi sermones, seu Scripturam sacram, ut patet ex toto contextu cap. 14. Sed esto hoc ita sit, eadem manebit difficultas de hac gratia interpretandi sermones, quæ etiam fuit in Christo. Respondetur ergo utramque gratiam evacuari in patria quantum ad imperfectionem, quam includit, & quantum ad necessitatem: quia hæc munera sunt accommodata statui viæ, sicut ibidem dicitur. *Sive lingua cessabit, sive scientia destruetur*, & tamen non propterea negandum est Christum habuisse donum linguarum. Illud vero, quod ibi dicitur, scilicet nunc ex parte nos prophetare, verum quidem est regulariter in hominibus, non est tamen illa imperfectio de ratione prophetiæ. Ad primam confirmationem responsum jam est, negando obscuritatem esse de ratione prophetiæ. Ad secundam confirmationem respondetur prophetiæ donum dicere cognitionem supernaturalem eorum, quæ distant secundum statum cognoscentis, & ideo eandem cognitionem in statu viæ, in quo Christus secundum conditionem corporis passibilis distabat ab iis, quæ divinitus cognoscebat, habuisse rationem prophetiæ, in statu vero patriæ non habere hanc rationem, quia deficit illi imperfectio connotata ex parte subjecti. Ita D. Thom. 2.2. q. 174. art. 5. in corp. & ad 3. Et hoc potest esse aliud exemplum ad comprobandum id, quod supra dicebamus, scilicet eundem habitum, qui secundum se ejusdem rationis est, posse in uno statu recipere unam denominationem, quam non recipit in alio propter imperfectionem connotatam. Ad ultimam respondetur, etiam Christum fuisse plusquam Prophetam multo altiori modo, quam Joannem Baptistam, sed non ideo non fuit etiam Propheta, sicut etiam Joannes Baptista fuit Propheta, licet etiam fuerit plusquam Propheta.

## SECTIO II.

*Utrum alie gratie gratis data, quæ ad sermonem spectant, fuerint in Christo.*

**R**atio dubii esse potest, quia una ex his gratiis vocatur fides, quæ in Christo non fuit. Alia gratia est

donum linguarum, quo Christum nunquam fuisse usum docet D. Thom. hic art. 7. ad 3. & 2.2. q. 176. artic. 1. ad 3. quem Durandus sequitur in 3. d. 13. q. 1. ad 2. cum autem hæc gratiæ potissimum consistant in usu, perinde videtur esse negare Christum habuisse hanc gratiam, & negare habuisse usum illius.

Dico tamen primo, Christum Dominum habuisse omnes gratias gratis datas, quæ aliis hominibus communicantur. Ita docet hic D. Thom. & reliqui Theologi cum Magistro in 3. d. 13. & id colligunt ex August. epist. 57. circa finem, ubi dicit, sicut in capite omnes sensus, ita in Christo vigere omnem gratiam. Ex quo idem mutuavit, & docuit Anselm. in id ad Coloss. 1. *Ipse est caput corporis Ecclesiæ.* Et ad hunc modum videtur exponere plenitudinem gratiæ Christi Chrysost. hom. 11. in Joan. Et clarior hom. 29. in id Joan. 3. *Non ad mensuram dat Deus Spiritum filio.* Et potest recte inde concludi: quia ad plenitudinem gratiæ Christi hæc omnia spectant, omnia enim hæc debentur illi humanitati ob gratiam unionis. Pertinet etiam hoc ad dignitatem seu munera Christi obeunda, est enim ipse quasi universalis dispensator harum gratiarum omnium in Ecclesia sua, ut dicitur ad Ephes. 4. debuit ergo in se habere omnes gratias, quas aliis communicat. Deinde fuit universalis ac perfectissimus Doctor, & Evangelii prædicator: hæc autem gratiæ sunt vel necessaria, vel certe convenientissima ornamenta in perfecto doctore requisita, in quo præter exactam rerum intelligentiā facultas ad explicanda, & clare ac distincte proponenda mysteria, eaque suadenda, & confirmanda, necessaria est, & ad hunc finem ordinantur hæc gratiæ.

Omnes  
gratiæ  
gratis da-  
tæ fuerūt  
in Christo.

Unde secundo probatur conclusio discurrendo breviter per alias quatuor, vel quinque gratias, quæ explicandæ supersunt. Duæ illarum sunt, *Sermo scientiæ & sapientiæ*, quæ ad sermonem applicatæ nihil aliud sunt, quam facilitas quædam ex speciali Spiritus sancti auxilio data ad proponendas seu explicandas res fidei, vel delectando, vel persuadendo eas per superiores aut inferiores causas, aut per effectus, & similia exempla confirmando & declarando, quæ dona fuisse in Christo perfectissima dubitari non potest, cum imperfectionem nullam includant, & ad perfectionem & statum ejus maxime pertineant: cum fuerit supremus cœlestis doctrinæ magister. Et ideo de illo dicitur Corinth. 5. *habet guttur suavissimum, & labia distillantia myrrham primam;* & Psal. 44. de illo dicitur, *Diffusa est gratia in labiis tuis.* Quæ quidem gratia ita in verbis, & doctrina ejus maxime relegebat, ut non immerito homines mirarentur, *De his, quæ procedebant de ore ipsius.* Luc. 4. & ideo Joan. 6. Petrus dixerit: *Quo ibimus? Verba vite æternæ habes;* & cap. 7. etiā ejus hostes dicebant: *Nunquam sic locutus est homo.*

Sermo  
scientiæ,  
& sapientiæ.

Tertia est gratia fidei, quæ interdum solet referri ad operationem, quo modo magis videtur pertinere ad potestatem faciendi miracula, dicitur enim hæc fides miraculorum, quæ, ut dicit assensum obscurum, non fuit in Christo, tamen fuit in illo ex parte intellectus clarus & indubitatus assensus, speciale Dei auxilium non fuisse defuturum suæ humanitati ad omnia miracula, quæ faciebat, & de eadem re habebat perfectissimam fiduciam ex parte voluntatis. Unde Joan. 11. dicebat ad Patrem: *Gratias ago tibi quoniam audisti me, ego autem sciebam, quia semper me audis;* hoc ergo modo fuit in illo hæc gratia. Secundo solet hæc gratia referri ad cognitionem, ut scilicet significet singularem certitudinem & intelligentiam rerum fidei, quam Spiritus sanctus præbet Doctori Evangelico, ut possit convenienter docere, & ut hoc modo hæc gratia locum habeat in Christo, subtrahenda est ab obscuritate, ita ut de ratione ejus tantum sit perfectio, & firmitas in assensu, sive ille clarus sit, sive obscurus. Tertio vero modo explicatur hæc gratia in ordine ad sermonem seu locutionem, & est facilitas quædam data dono Spiritus sancti ad proponendas res fidei simpliciter & accommodatè, ita ut etiam a rudibus & ignorantibus percipi possint, & in hoc sensu multo facilius constat habuisse Christum hanc gratiam.

Gratia  
fidei.

Quarta gratia est donum linguarum, ad quam primum pertinere potest habere notitiam linguarum omnium; & quoad hoc fuisse in Christo D. Thom. supra docet, nec dubitari potest, cum per scientiam infusam & beatam habuerit notitiam rerum omnium: quamquam hoc juxta aliorum sententiam magis pertineat ad quintam gratiā, quæ

Donū lin-  
guarum.



quæ dicitur, *interpretatio sermonum*. Deinde pertinet ad donum linguarum potestas utendi linguis omnibus, quæ diversa aliquo modo est a priori notitia, multi enim intelligunt linguam aliquam, qui illa uti non possunt: hæc ergo potestas sine dubio etiam fuit in Christo, quia scientia linguarum, quam habebat, erat perfectissima, & ipsum organum, & facultas naturalis ad loquendum etiã erant in illo perfecta, & expedita. Ex his autem duobus principiis oritur illa potestas; Tertio pertinet ad hanc gratiam usus ipse diversarum linguarum, & de hoc nihil videtur esse certum: verisimile tamen est, publice & pro concione non fuisse usum hoc dono, quia ex Evangelio hoc non colligitur, sed potius oppositum, tum quia hoc donum omnino novum visum est in prædicatione Apostolorum; tum etiam, quia ipse Christus de se dixit, *Non sum missus nisi ad oves, quæ perierunt domus Israel*; cum ergo solis Judæis per se ipsum prædicaturus esset, solum ea lingua pro concione usus creditur, quæ ipsi tunc utebantur, quæ dicitur fuisse Syriaca; si aliqua autem erat varietas in illis partibus vel civitatibus, quas perambulabat, omnibus se accommodabat Christus, ita ut posset intelligi, hoc enim erat necessarium. Et ita est intelligenda sententia D. Th. hic artic. 7. ad 3. & 2. 2. q. 176. artic. 1. ad 1. quam sequitur Durand. in 3. dist. 13. q. 1. ad 1. In privatis autem colloquiis fortasse interdum sese obtulit opportunitas utendi variis linguis, ut cum peregrinatus est in Ægyptum, vel cum ad Gentiles loquebatur, vel si fortasse scripsit epistolam ad aliquem alienæ linguæ, ut de Abgaro fertur.

Interpretatio sermonum.

Hinc constat, quid dicendum sit de quinta gratia, scilicet interpretatione sermonum, ad sermonem relata; hoc enim modo vel est intelligentia variarum linguarum, de qua dictum est, vel est singulare Spiritus sancti auxilium, vel ad condendam divinam scripturam, vel ad reconditos ejus sensus explicandos, vel etiam ad transferendum ab una lingua in aliam, nihil omnino a vero sensu discrepando; & hoc donum quoad facultatem & potestatem non est dubium, quin in Christo fuerit, tum propter scientiæ plenitudinem & voluntatis rectitudinem, quæ ad malum vel falsum inclinari non poterat; tum etiam quia in omnibus operibus & actionibus suis ab Spiritu sancto regebatur, unde omnia verba ejus verba sacra sunt: an vero usus fuerit hac gratia aliquid scribendo, dicitur fortasse infra quæst. 42.

Omnes hæ gratiæ fuerunt in Christo permanentes.

Dico secundo, has gratias fuisse in Christo permanentes & per modum habitus, ita ut illis uti posset suo arbitrio, in quo alios homines superavit. Ita colligitur ex Theologis & Patribus supra citatis præsertim exponen- tibus verba Isaia 11. *Requiescet super eum spiritus Domini*; & Joan. 1. *Super quem videris spiritum descendentem, & manentem*, circa quem locum videri potest Orig. hom. 6. in Numer. & Gregor. lib. 2. Moral. cap. 28. & 29. & Hieron. epist. 125. ad Damasum, & Ezech. 35. Ratio vero facili reddi potest, tum quia totum hoc personali dignitati Christi, & muneri eximii doctoris debebatur; tum etiam, quia ad usum harum gratiarum fere nihil aliud requirebatur præter perfectam scientiam rerum omnium, verborum & signorum, cum perfecta & expedita facultate utendi organo vocis & linguæ: utrumque autem horum fuit in Christo perfectissimum.

## ARTICULUS IX.

a *Utrum in Christo fuerit plenitudo gratiæ.*

58. **A**d donum sic proceditur. Videtur, quod non fuerit in Christo gratiæ plenitudo. A gratia enim derivantur virtutes, ut in secunda parte dictum est. Sed in Christo non fuerunt omnes virtutes: non enim fuit in eo fides, neque spes, ut ostensum est; ergo in Christo non fuit gratiæ plenitudo.

59. **2. Præterea.** Sicut patet ex his, quæ in secunda parte dicta sunt, gratia dividitur in operantem & cooperantem: Operans autem gratia dicitur, per quam justificatur impius. Quod quidem non habuit locum in Christo, qui nunquam subiecit alicui peccato: ergo in Christo non fuit plenitudo gratiæ.

3. Præterea, Jacob. 1. dicitur, *Omne datum optimum, & omne donum perfectum de sursum est descendens a Patre luminum*. Sed quod descendit, habetur particulariter & non pæne. Ergo nulla creatura, nec etiam anima Chri-

sti potest habere plenitudinem donorum gratiæ.

Sed contra est, quod dicitur Joan. 1. *Vidimus eum plenum gratiæ & veritatis*.

b **Respondeo dicendum**, quod plene dicitur haberi, quod perfecte, & totaliter habetur. Totalis autem perfectio potest attendi dupliciter. Uno modo quantum ad quantitatem ejus intensivam: puta si dicam aliquem plene habere albedinem, si habet eam, quantumcumque nata est haberi. Alio modo secundum virtutem: puta si aliquis dicatur plene habere vitam: quia habet eam secundum omnes effectus vel opera vitæ, & sic habet plene vitam homo, non autem brutum animal, vel planta. Utrouque autem modo Christus habuit gratiæ plenitudinem. Primo quidem quia habuit eam in summo secundum perfectissimum modum, quo haberi potest. Et hoc quidem apparet primo ex propinquitate animæ Christi ad causam gratiæ, dictum est enim quod quantum aliquod receptivum propinquius est cause influenti, tanto abundantius recipit. Et ideo anima Christi, quæ propinquius conjungitur Deo inter omnes creaturas rationales, maximam recipit influentiam gratiæ ejus. Secundo ex comparatione ejus ad effectum. Sic enim recipiebat anima Christi gratiam, ut ex ea quodammodo transfunderetur in alios. Et ideo oportuit, quod haberet maximam gratiam, sicut ignis, qui est causa caloris in omnibus calidis, est maxime calidus. Similiter etiam quantum ad virtutem gratiæ plene habuit gratiam: quia habuit eam ad omnes operationes vel effectus gratiæ. Et hoc ideo, quia conferebatur ei gratia tanquam cuidam universali principio in genere habentium gratiam. Virtus autem primi principii alicujus generis universaliter se extendit ad omnes effectus illius generis: sicut sol, qui est universalis causa generationis (ut Dionys. dicit 4. cap. de Divin.) ejus virtus se extendit ad omnia, quæ sub generatione cadunt. Et sic secunda plenitudo gratiæ attenditur in Christo, in quantum se extendit ejus gratia ad omnes gratiæ effectus, qui sunt virtutes, & dona, & alia hujusmodi.

\* ar. 1. hujus quasi.

Ad primum ergo dicendum, quod fides & spes nominant effectus gratiæ in quodam defectu, qui est ex parte recipientis gratiam, in quantum scilicet, fides est de non visis, & spes de non habitis. Unde non oportet, quod in Christo, qui est auctor gratiæ, fuerint defectus, quos important fides & spes: sed quicquid est perfectionis in fide & spe, in Christo est multo perfectius. Sicut in igne non sunt omnes modi caloris defectivi ex defectu subiecti, sed quicquid pertinet ad perfectionem caloris.

Ad secundum dicendum, quod ad gratiam operantem per se pertinet facere iustum: sed quid iustum faciat ex impio, hoc accidit ei ex parte subiecti, in quo peccatum invenitur. Anima Christi igitur justificata est per gratiam operantem, in quantum per eam facta est iusta & sancta a principio suæ conceptionis, non quod ante fuerit peccatrix, aut etiam non iusta.

c **Ad tertium dicendum**, quod plenitudo gratiæ attribuitur animæ Christi secundum capacitatem creature, non autem per comparationem ad plenitudinem infinitam bonitatis divine.

## COMMENTARIUS.

**T**itulus articuli sufficienter a D. Thom. explicatur; cavendus tamen est Cajetanus, qui in hoc articulo & sequentibus conatur accommodare D. Thomam ad suam sententiam de tali plenitudine & intensiōe gratiæ Christi, ut etiam de potentia absoluta non potuerit esse major, quod quam sit a D. Thom. alienum constabit ex sequentibus. Nunc supponatur D. Thom. loqui de plenitudine gratiæ simpliciter, tam in perfectione intensiva, quam extensiva, in ordine tamen ad potentiam Dei ordinariam, non absolutam.

b Hoc supposito affirmat D. Thom. in Christo fuisse plenitudinem gratiæ simpliciter, quam assertionem tam perspicue declarat, & confirmat, ut nihil hoc loco addere oporteat. De solutione ad primum multa in superioribus dicta sunt. In solutione ad secundum notetur primo, quod D. Thom. ait animam Christi fuisse justificatam per gratiam operantem: gratia enim operans apud D. Thom. significare potest vel motionem operans apud Dei, quo primo movetur homo, ut se disponat ad justificationem, vel infusionem ipsius gratiæ habitualis, per quam justificatur. Et hoc posteriori sensu hic loquitur D. Thomam argumentum, cui respondet, de gratia habituali procedebat,



cedebat. De priori vero sensu, seu quomodo anima Christi fuerit justificata per propriam dispositionem tractat infra q. 34. artic. 4. & nonnihil dicemus q. 19. agentes de merito Christi. Notetur secundo, quod D. Thom. ait animam Christi ita fuisse justificatam per gratiam habitua-lem, ut nec fuerit antea peccatrix, neque non iusta, & de priori quidem parte nihil est quod dicamus: posterior vero intelligenda videtur de priori tempore seu duratione, nam secundum naturæ ordinem necessario videtur dicendum fuisse factam iustam ex non iusta, quia in omni mutatione vel productione necesse est terminum a quo natura antecedere terminum ad quem, & ita loqui solemus de Angelis & de homine in sua creatione iustificatis. Addi vero hic potest, quoniam sermo præfens est de justificatione per gratiam habitua-lem, animam Christi non fuisse per illam gratiam factam iustam ex non iusta, quia ordine naturæ in illa anima jam præcesserat altior gratia, per quam erat sanctificata, ut supra dictum est, in quo superavit anima Christi Angelos & Adam: unde terminus a quo hujus justificationis animæ Christi non fuit carentia sanctitatis simpliciter, sed creatæ, & hanc solam verum esse ordine naturæ antecessisse,

**Obiectio.** In solutione ad tertium ait D. Thom. plenitudinem gratiæ attribui animæ Christi secundum capacitatem creaturæ; quod videtur difficile, quia vel loquitur de capacitatem naturali, & hoc non, quia nulla est respectu gratiæ: vel de obedientiali, & hæc non potest impleri, quia in infinitum progredi potest. Respondetur sermonem esse de capacitatem obedientiali, & de plenitudine ejus secundum potentiam ordinariam, non absolutam, ut in titulo explicatum est: accommodanda vero est hæc doctrina intentioni argumenti, procedebat enim argumentum de donis gratiæ secundum se, id est (ut bene Cajetan. notavit) non ut sunt qualitates creatæ, sed absolute ut sunt formales quædam perfectiones, ut sunt Charitas, Sapientia, &c. In his vero donis sic abstracte consideratis duplex plenitudo intelligi potest, alia vocari potest per essentiam, & hujus non est capax creatura, sed solus Deus: & ideo ait D. Thom. non tribui hanc plenitudinem per comparationem ad plenitudinem infinitam bonitatis divinæ: alia vero dici potest accidentaliter accommodata perfectioni creaturæ juxta capacitatem suam, & de hac plenitudine explicatur plenitudo gratiæ Christi in sensu jam dicto.

## ARTICULUS X.

## a Utrum plenitudo gratiæ sit propria Christi.

**A**ddecimum sic proceditur. Videtur, quod plenitudo gratiæ non sit propria Christi. Quod enim est proprium alicuius, sibi soli convenit. Sed esse plenum gratiæ, quibusdam aliis attribuitur: dicitur enim Luc. 1. Beate Virgini. Ave gratia plena, dicitur etiam Act. 6. Stephanus plenus gratia & fortitudine. Ergo plenitudo gratiæ non est propria Christo.

2 Præterea, illud, quod potest communicari aliis per Christum, non videtur esse proprium Christo. Sed plenitudo gratiæ potest communicari per Christum aliis: dicit enim Apost. Ephes. 3. Ut impleamini in omnem plenitudinem Dei. Ergo plenitudo gratiæ non est propria Christo.

3 Præterea. Status viæ proportionari videtur statui patriæ. Sed in statu patriæ erit quedam plenitudo: quia in illa cælesti patriæ, ubi plenitudo est omnis boni, licet quedam data sint excellenter, nihil tamen possidetur singulariter, ut patet per Gregor. in hom. 4. de centum ovibus. Ergo in statu viæ habetur gratiæ plenitudo a singulis hominibus: & ita plenitudo gratiæ non est propria Christo.

Sed contra est, quod plenitudo gratiæ attribuitur Christo, in quantum est unigenitus a Patre: secundum illud Joan. 1. Vidimus eum quasi unigenitum a Patre plenum gratiæ & veritatis. Sed esse unigenitum a Patre, est proprium Christo. Ergo & sibi proprium est, esse plenum gratiæ & veritatis.

b Respondeo dicendum, quod plenitudo gratiæ potest attendi dupliciter. Uno modo ex parte ipsius gratiæ, alio modo ex parte habentis gratiam. Ex parte quidem ipsius gratiæ dicitur esse plenitudo gratiæ ex eo, quod aliquis pertingit ad summum gratiæ, & quantum ad essentiam, & quantum ad virtutem, quia scilicet habet gratiam & in maxima excellentia, qua potest haberi, & in maxima ex-

tensione ad omnes gratiæ effectus, & talis gratiæ plenitudo est propria Christo. Ex parte vero subiecti gratiam habentis, esse dicitur gratiæ plenitudo, quando quis habet plene gratiam secundum suam conditionem, sive secundum intensiorem, prout in eo est intensa gratia usque ad terminum præfixum ei a Deo, secundum illud Ephes. 4. Unicuique nostrum data est gratia secundum mensuram donationis Christi: sive etiam secundum virtutem: in quantum scilicet habet facultatem gratiæ ad omnia, quæ pertinent ad suum officium sive statum, sicut Apostolus dicebat Ephes. 3. Mihi omnium Sanctorum minimo data est gratia hæc illuminare omnes, &c. Et talis gratiæ plenitudo non est propria Christo, sed communicatur aliis per Christum.

Ad primum ergo dicendum, quod B. Virgo dicta est plena gratia, non ex parte ipsius gratiæ, quia non habuit gratiam in summa excellentia, qua potest haberi, nec ad omnes effectus gratiæ: sed dicitur fuisse plena gratia per comparationem ad ipsam: quia scilicet habebat gratiam sufficientem ad statum illum, ad quem erat electa a Deo, ut esset scilicet mater Unigeniti ejus. Et similiter Stephanus dicitur plenus gratia, quia habebat gratiam sufficientem ad hoc, quod esset idoneus minister & testis Dei, ad quod erat electus. Et idem dicendum est de aliis. Harum tamen plenitudinum una est plenior altera, secundum quod aliquis est divinitus præordinatus ad altiorē, vel inferiorem statum.

Ad secundum dicendum, quod Apostolus ibi loquitur de illa plenitudine gratiæ, quæ accipitur ex parte subiecti, in comparatione ad id, ad quod homo est divinitus præordinatus. Quod quidem est vel aliquid commune, ad quod præordinantur omnes Sancti: vel aliquid speciale, quod pertinet ad excellentiam aliquorum. Et secundum hoc quedam plenitudo gratiæ est omnibus sanctis communis, ut scilicet habeant gratiam sufficientem ad merendum vitam æternam, quæ in plena Dei fruitione consistit: & hanc plenitudinem optat Apostolus fidelibus, quibus scribit.

Ad tertium dicendum, quod illa dona, quæ sunt communia in patria, scilicet visio, comprehensio, fructio, & alia hujusmodi habent quedam dona sibi correspondentia in statu viæ, quæ etiam sunt communia omnibus Sanctis. Sunt tamen quedam prerogative Sanctorum in patria, & in viæ, quæ non habentur ab omnibus.

## COMMENTARIUS.

**P**roprium uno modo distingui potest ab extraneo vel adventitio, & hoc modo sensus quæstionis esset, an gratia conveniat Christo ex se seu ex propriis, & hoc sensu non tractatur hic a D. Thom. sed infra art. 13. & a nobis sæpe jam dictum est: alio ergo modo proprium distinguitur contra commune, & hoc modo hic quæritur, an plenitudo gratiæ conveniat Christo & non aliis.

b Responso D. Thom. est plenitudinem simpliciter tam intensivam, quam extensivam esse propriam Christi, qui gratiam habuit cum maxima excellentia & virtute, quæ convenire potest ipsi gratiæ secundum se, plenitudinem autem secundum quid seu ex parte subiecti aliis communicari. Quæ posterior pars per se clara est, & satis a D. Thom. tractatur. Prior vero intelligenda est secundum potentiam Dei ordinariam juxta dicta in principio articuli præcedentis, & sic non habet difficultatem.

Solutiones argumentorum nulla expositione indigent. Sed præsertim observatione digna est solutio ad primum propter ea, quæ in sequenti tomo de plenitudine gratiæ Beatissimæ virginis explicabuntur.

## ARTICULUS XI.

## a Utrum Christi gratia sit infinita.

**A**ddecimum sic proceditur. Videtur, quod gratia Christi sit infinita. Omne enim immensum est infinitum. Sed gratia Christi est immensa: dicitur enim Joan. 3. Non enim ad mensuram dat Deus Spiritum Filio, scilicet Christo. Ergo gratia Christi est infinita.

2 Præterea. Effectus infinitus demonstrat virtutem infinitam, quæ non potest fundari, nisi in essentia infinita. Sed effectus gratiæ Christi est infinitus: extendit enim se ad salutem totius humani generis: ipse enim est propitiatio pro peccatis nostris & totius mundi: ut dicitur prima Joan. 2. ergo gratia Christi est infinita.

3 Præterea. Omne finitum per additionem finiti potest pervenire ad quantitatem cujuscumque finiti. Si igitur

52.  
3 d. 3. q. 1.  
art. 2. q. 2.

\* hom. 14.  
in Evange

33.7  
3 d. 13. q. 1  
art. 2. q. 2.  
& d. 14. ar.  
1. q. 1. co.  
Et verit.  
q. 19. art. 3  
Et opus. 3.  
cap. 22. &  
op. 60. c. 3.  
colu. 9. &  
Joan. 3.  
lect. 6. col.  
2. & 3.



zur gratia Christi esset finita, posset alterius hominis gratia tantum crescere, quod perveniret ad equalitatem gratie Christi, contra quod dicitur Joan. 28. Non adequabitur ei aurum vel vitrum: secundum quod Gregorius ibi exponit. Ergo gratia Christi est infinita.

*Sed contra est, quod gratia est quiddam creatum in anima. Sed omne creatum est finitum: secundum illud Sapient. 11. Omnia in numero & pondere & mensura dispositi sunt. Ergo gratia Christi non est infinita.*

b Respondeo dicendum, quod sicut ex supra dictis pa-  
 tet, \* in Christo potest duplex gratia considerari. Una qui-  
 dem est gratia unionis: quae sicut supra dictum est, \* est ipsū  
 uniri personaliter Filio Dei, quod est gratis concessum hu-  
 manae naturae: & hanc gratiam constat esse infinitam, se-  
 cundum quod ipsa persona Verbi est infinita. Alia vero est  
 gratia habitualis, quae quidem potest dupliciter considerari.  
 Uno modo, secundum quod est quoddam ens. Et sic ne-  
 cesse est, quod sit ens finitum: est enim in anima Christi si-  
 cut in subiecto: Anima autem Christi est creatura quaedā  
 habens capacitatem finitam: unde esse gratiae cum non ex-  
 cedat suum subiectum, non potest esse infinitum. Alio mo-  
 do potest considerari secundum propriā rationem gratiae.  
 Et sic gratia Christi potest dici infinita, eo quod non li-  
 mitatur: quia scilicet habet quicquid potest pertinere ad  
 rationem gratiae: & non datur ei secundum aliquam cer-  
 tam mensuram id, quod ad rationem gratiae pertinet: eo  
 quod secundum propositum Dei, cuius est gratiam mensu-  
 rare, gratia confertur animae Christi, sicut cuidam uni-  
 versali principio gratificationis in humana natura: se-  
 cundum illud Ephef. i. Gratificavit nos in dilecto filio  
 suo: Sicut si dicamus lucem solis esse infinitam: non qui-  
 dem secundum suum esse, sed secundum rationem lucis,  
 quia habet quicquid ad rationem lucis pertinere potest.

c Ad primum ergo dicendum, quod id, quod dicitur, Pater non ad mensuram dat Spiritum filio, uno modo exponitur de dono, quo Deus pater ab eterno dedit Filio, scilicet divinam naturam, quæ est donum infinitum. Unde quædam glos. dicit ibidem. Ut tantus sit filius, quantus & Pater. Alio modo potest referri ad donum, quod datum est humane nature, ut unitatur divine persone: quod etiam est donum infinitum. Unde glos. dicit ibidem. Sicut Pater plenum & perfectum genuit Verbum, sic & plenum & perfectum est unitum humane nature. Tertio modo potest referri ad gratiam habituales, in quantum gratia Christi se extendit ad omnia, quæ sunt gratiæ. Unde August. hoc exponens dicit, Mensura divina, divisio quædam donorum est: alii enim datur per Spiritum sermo sapientiæ, alii sermo scientiæ: sed Christus, qui dat, non ad mensuram accepit.

*Ad secundum dicendum, quod gratia Christi habet infinitum effectum, tum propter infinitatem prædictam gratiæ, tum propter unitatem divinæ personæ, cui anima Christi unita est.*

d Ad tertium dicendum, quod minus per augmentum potest pervenire ad quantitatem majoris, in his, que habent quantitatem unius rationis: sed gratia alterius hominis comparatur ad gratiam Christi, sicut quaedam virtus particularis ad universalem. Unde sicut virtus ignis, quantumcumque crescat, non potest adequare virtutem solis: ita gratia alterius hominis, quantumcumque crescat, non potest adequare gratiam Christi.

COMMENTARIUS.

*Titulus  
argenti.*

**H**ic titulus, si materiam, de qua agimus, spectemus, de habituali gratia sine dubio intelligendus est. Divus autem Thom. in corpore articuli ad quandam doctrinæ amplificationem de gratia etiam unionis sermonem facit. Unde tribus assertionibus respondet.

*b* Prima est, gratiam unionis esse infinitam, quatenus ipsa persona Verbi infinita est. videantur supra dicta q. 2. art. 12. nihil enim addendum occurrit. Secunda assertio est; Gratia habitualis Christi, prout est quoddam ens, est finita simpliciter. Probat, quia est in anima Christi, quæ, cum sit creatura, solum est capax finitæ perfectionis. Hæc vero assertio ambiguum habet sensum; potest enim gratia dici simpliciter finita, ut est quoddam ens, primo quia habet finitam essentiam, quomodo quantitas etiam infinita, ut est quoddam ens, posset dici finita simpliciter. Et videtur certe D. Tho. hoc tantum sensu locutus, quia ratio ejus nihil aliud probare videtur. Secundo vero modo potest dici gratia finita ut est quoddam ens, quia ut est

quædam qualitas habet finitam essentiam, & finitos gra-  
dus intensiōis, & hoc sensu est etiam vera conclusio, ut  
infra dicitur: difficile tamen est illam convincere ratio-  
ne D. Thom. quia capacitas animæ ad recipiendam in-  
tensiōem gratiæ videtur esse infinita, cum possit inten-  
siōem gratiæ in infinitum suscipere. Dicendum tamen  
est D. Th. vocasse hanc capacitatem simpliciter finitam,  
quia non potest recipere perfectiōē actû in infinitum quæ-  
cumque ratione, hoc vero nō amplius probavit hoc loco,  
quia supponit generatim tractatum & probatum 1. p. q. 7.

Tertia assertio est, Gratiā Christi secundum propriam rationem gratiæ esse infinitam. Quam ita explicat D. Thom. ut plane doceat non esse sermonem de infinito simpliciter, sed secundum quid: comparat enim hanc gratiam cum luce Solis, quam dicit posse vocari infinitam non in esse suo, sed quia habet quiddam ad rationem lucis pertinere potest; sed hæc longiori indigent expositione, quam trademus sequenti disputatione.

c In solutione ad primum tractat D. Thom. locum illud Joan. 3. *Deus non ad mensuram dat spiritum Filio*, ita enim D. Thom. citat, & in hoc fundat argumentum, cum tamen in textu non habeatur illa particula, *Filio*, unde quasi per paraphrasim, vel expositionem illam addidisse videtur: tum, quia in toto contextu est sermo de Filio seu Christo, tum etiam, quia Patres omnes antiqui ita exponunt, Patrem scilicet sine mensura dedisse spiritum Filio, ut August. tract. 14. in Joan. qui hoc probat ex verbis sequentibus, statim enim subiungitur. *Pater enim diligit Filium, & omnia dedit in manu ejus*. Idem Cyril. lib. 2. in Joan. cap. 72. qui intelligunt, hoc esse dictum de Filio secundum divinitatem, quia substantialiter spiritum possidet, ut ait Cyril. vel quia ei datum est per æternam generationem, ut sit tantus, quantus Pater. Gregor. etiam Nazian. orat. 36. n. 49. de Filio, secundum divinitatem hoc intelligens multo aliter interpretatur, dicens ideo Patrem non dare spiritum ad mensuram Filio, quia omnino non dat, eo scilicet modo, quo illum dat hominibus, ut sanctificet eos per adoptionem, & liberalem donationem, filius enim non indiget hujusmodi adoptione, cum sit filius naturalis, quæ expositionem etiam Theoph. tetigit Chrysostom. vero super Joan. quem Theoph. Euthy. & alii sequuntur, eundem locum de Filio intelligentes, de Christo ut homine illum interpretantur, cui dicitur dari spiritus sine mensura, vel ratione gratiæ unionis, quæ suo modo est infinita, ut Cyril. indicat lib. 2. in Joan. cap. 3. & ad eundem sensum possunt accommodari alia verba ex eodem citata, vel ratione donorum gratiæ, quæ aliis dantur sub certa mensura, juxta illud, *Unicuique datur gratia, secundum mensuram donationis Christi*, & illud, *Divisiones gratiarum sunt*; at vero Christo data est omnis virtus, & operatio gratiæ, cum omni plenitudine, & perfectione, & hunc sensum magis indicat Chrys. & Græci, nec dissentit August. Itaque antiqui patres omnes intelligunt hoc testimonium de Christo Filio Dei, cui Pater dedit spiritum sine mensura. At vero recentiores expositores, quia Evangelista non addidit expresse illam particulam, *Filio*, non putant de illo esse dictum datum esse ei spiritum sine mensura, sed simpliciter dictum esse, Deum non dare spiritum ad mensuram. Vel ut his verbis solum significatum sit, Deum non habere definitam mensuram communicandi gratiam suam, sed aliis majorem, aliis minorem, arbitrio suo communicare, vel certe, ut illis verbis significetur Deum dedisse mundo, & hominibus donum sine mensura, quando Filium suum misit, qui verba Dei loqueretur hominibus.

Sed mihi multo magis probatur patrum expositio, multoque magis videtur textui consentaneum, ut de Christo verba illa intelligantur: in illis enim redditur ratio ejus, quod immediate præciserat, ut patet ex illa particula *enim*: sic enim habetur in textu, *Quem misit Deus, verba Dei loquitur, non enim ad mensuram dat spiritum*, ut sensus sit; ideo Christum semper verba Dei loqui, neque aliud verbum posse ab ore ejus audiri, quia Deus non ad mensuram dat spiritum, certe non alteri nisi ei, qui verba Dei loquitur, aliàs ratio non quadraret, quod etiam sequentia verba manifestant. *Pater diligit filium, &c.* ut Augult. etiam notavit. Placet autem esse sermonem de Christo homine, nam de illo loquitur Joan. Baptista in illis verbis: *Et ille est, qui verba Dei loquitur, quia illi datus est spiritus sine mensura*; quod



ideo dictum confeo, quia ita est homo, ut sit etiam Deus, unde fit, ut carere non possit omni perfectione, & ideo necesse sit eum verba Dei loqui.

**3. Argum.** Tercium argumentum (omisso secundo, de quo in superioribus multa dicta sunt) est, quia si gratia Christi est finita, gratia puri hominis crescendo posset ad illius quantitatem, & æqualitatem pervenire. Responsio est id non sequi, quia habent quantitates diversarum rationū: gratia enim Christi est veluti universalis virtus, in homine autem puro est solum particularis gratia. Quam solutionem fuse explicat Cajet. Sed breviter jam supra dixi, gratiam Christi in nulla physica perfectione sibi inhærente esse diversæ speciei a gratia aliorum hominum, unde loquendo de quantitate physica, non potest habere quantitatem diversæ rationis, quia hæc quantitas in qualitate nihil aliud est, quam intensio vel perfectio ejus: at vero secundum morales quosdam respectus verum est gratiam Christi habere perfectionem, & quantitatem alterius rationis, ut sequenti disputatione amplius explicabimus.

**Objeſſio.** Dices. Ergo non satis dissolvit argumentum D. Thom. nam licet verum sit, gratiam puri hominis non posse pervenire ad eam dignitatem, quam in esse gratiæ habere dicitur gratia Christi per conjunctionem ad gratiam unionis, videtur tamen argumentum probare, quod pervenire possit ad æqualem perfectionem in intensione, & gradibus qualitatis, quia hæc quantitas in utraque gratia ejusdem rationis est. Respondetur argumentum concludere, non implicare contradictionem, ut possit dari gratia in puro homine, tam intensa in gradibus qualitatis, quam est gratia Christi: nihilominus tamen certum est fieri non posse secundum legem Dei ordinariam, ut aliquis crescendo in gratia perveniat ad intensiorem gratiæ Christi, quia facultas, auxilia & periodus viæ, & alia necessaria ad augmentum gratiæ, ita sunt concessa, & commensurata hominibus, & Angelis, ut nullus possit, neque unquam potuerit tam excelsum terminum gratiæ attingere. Quia vero hæc excellentia concessa est Christo propter unionem ad verbum, & quia est universale principium gratiæ, ideo D. Thom. rationem hanc, ut primariam, & aliarum fundamentum tetigit, quam hoc loco amplius non explicuit, quia sequenti articulo ostensurus erat, mensuram gratiæ ex ordine divinæ sapientiæ fundam esse. Sed de hoc argumento & de errore Begardorum, & Biguinarum, qui in eo tangitur in 2. 2. q. 24. ex professo disputatur.

## ARTICULUS XII.

a Utrum gratia Christi potuerit augeri.

**A**D duodecimum sic proceditur. Videtur quod gratia Christi potuerit augeri. Omni enim finito potest fieri additio. Sed gratia Christi fuit finita: ut dictum est. \* Ergo potuit augeri.

2. Præterea. Augmentum gratiæ fit per virtutem divinam: secundum illud 2. ad Cor. 9. Potens est autem Deus omnem gratiam abundare facere in vobis. Sed virtus divina, cum sit infinita, nullo termino coarctatur. Ergo videtur, quod gratia Christi potuerit esse major.

3. Præterea. Luc. 2. dicitur, quod puer Jesus proficiebat sapientia & ætate, & gratia apud Deum & homines. Ergo gratia Christi potuit augeri.

Sed contra est, quod dicitur Joan. 1. Vidimus eum quasi unigenitum a Patre, plenum gratia & veritatis. Sed nihil potest esse aut intelligi majus, quam quod aliquis sit unigenitus a Patre: ergo etiam non potest esse vel intelligi major gratia, quam illa, qua Christus fuit plenus.

b Respondeo dicendum, quod aliquam formam non posse augeri, contingit dupliciter. Uno modo ex parte ipsius subiecti: alio modo ex parte ipsius forme. Ex parte quidem subiecti, quando subiectum attingit ad ultimum gradum in participatione illius forme secundum suum modum: sicut si dicatur, quod aer non potest crescere in caliditate, quando pertingit ad ultimum gradum caloris, qui potest salvari in natura aeris, licet possit esse major calor in rerum natura, qui est calor ignis. Ex parte autem forme excluditur possibilitas augmenti, quando aliquod subiectum attingit ad ultimam perfectionem, quam potest talis forma habere in natura: sicut si dicamus, quod calor ignis non potest augeri, quia non potest esse perfectior gradus caloris quam ille, ad quem pertingit ignis. Sicut autem aliarum formarum est ex divina sapientia determinata propria mensura, ita & gratiæ: secundum illud Sapient. 11. Omnia in numero & pondere & mensura disposuisti. Mensura

autem unicuique forma præfigitur per comparisonem ad suum finem: sicut non est major gravitas, quam gravitas terre, quia non potest esse inferior locus loco terre. Finis autem gratiæ est unio creature rationalis ad Deum: non potest autem esse nec intelligi major unio creature rationalis ad Deum, quam quæ est in persona: & ideo gratia Christi pertingit ad summam mensuram gratiæ. Sic igitur manifestum est, quod gratia Christi non potest augeri ex parte ipsius gratiæ. Sed nec etiam ex parte subiecti: quia Christus, secundum quod homo a primo instanti sue conceptionis fuit verus & plenus comprehensor. Unde in eo non potuit esse gratiæ augmentum, sicut nec in aliis Beatis: quorum gratia augeri non potest, eo quod sunt in termino. Hominum vero, qui sunt pure viatores, gratia potest augeri, & ex parte forme, quia non attingunt summum gradum gratiæ: & ex parte subiecti, quia nondum pervenerunt ad terminum.

c Ad primum ergo dicendum, quod si loquamur de quantitativibus mathematicis, cuilibet finite quantitati potest fieri additio: quia ex parte quantitatis finita non est aliquid quod repugnet additioni. Si vero loquamur de quantitate naturali, sic potest esse repugnantia ex parte forme, cui debetur determinata quantitas, sicut & alia accidentia determinata. Unde Philosophus\* dicit in secundo de anima, quod omnium natura constantium est terminus & ratio magnitudinis & augmenti. Et inde est, quod quantitati totius cæli non potest fieri additio. Multo igitur magis in ipsis formis consideratur aliquis terminus, ultra quem non progrediuntur. Et propter hoc non oportet, quod gratia Christi possit fieri additio, quamvis sit finita secundum sui essentiam.

Ad secundum dicendum, quod virtus divina licet possit facere aliquid majus & melius, quam sit habitualis gratia Christi non tamen posset facere, quod ordinaretur ad aliquid majus, quam sit unio personalis ad Filium unigenitum a Patre. Cui unioni sufficenter correspondet talis mensura gratiæ, secundum definitionem divinæ sapientiæ.

d Ad tertium dicendum, quod in sapientia & gratia aliquis potest proficere dupliciter. Uno modo secundum ipsos habitus sapientiæ & gratiæ augmentatos: & sic Christus in eis non proficiebat. Alio modo secundum effectus, in quantum scilicet aliquis sapientiora & virtuosiora opera facit. Et sic Christus proficiebat sapientia & gratia, sicut & ætate: quia secundum processum ætatis perfectiora opera faciebat, ut se verum hominem demonstraret, & in his quæ sunt ad Deum, & in his, quæ sunt ad homines.

## COMMENTARIUS.

**T**itulus hujus articuli intelligendus est de potentia ordinaria, seu stante ordine a divina sapientia præfixo, ut ex corpore articuli non obscure colligitur.

b Respondet igitur in dicto sensu, gratiam neque ex parte sua, neque ex parte suscipientis augeri posse. Ratio prioris partis est, quia illa gratia in Christo fuit ad unionem ordinata; sed illa unio est summa, quæ potest esse in creatura; ergo & gratia illa habuit in Christo summum gradum, quem habere potest secundum divinæ sapientiæ mensuram, & legem. Dicitur autem gratia ordinari ad unionem, non ut dispositio antecedens, sed ut ornamentum consequens, & facultas operandi, ut supra dictum est, artic. etiam sequenti D. Thom. dicit. Ratio posterioris partis est, quia Christus a principio fuit beatus, gratia autem beati propter statum suscipientis augeri non potest, de qua ratione infra quæst. 10. & 11.

c Primum argumentum est. Omni finito potest fieri additio; gratia Christi est finita; ergo. Respondet, si in gratia finita consideretur quantitas ejus veluti mathematicæ, sic posse ei fieri additionem; si vero consideretur, ut est veluti naturalis quantitas, sic non posse fieri additionem illi, quia formæ sibi determinant certos terminos, ultra quos non progrediuntur. Potuisset quidem D. Thom. clarius dicere, argumentum concludere posse illi gratiæ fieri additionem in gradibus intensiōis de potentia absoluta, non tamen de ordinaria: hoc tamen ipsum significavit illis verbis, ut utriusque partis rationem attingeret; ideo enim gratia illa de potentia absoluta posset augeri seu intendi, quia nullam involvit repugnantiam, aut contradictionem, magis quam quod finita quantitas secundum se, & mathematicè considerata, augeatur, tamen quia ex ordinatione divina, gratia illa quasi coaptata est gratiæ unionis, & non potest ad altiore finem ordinari, ad il-

Gratia Christi non est diversæ speciei a gratia puri hominis.

Solutio. Non implicat in pura creatura dari gratiam habituale æque intensam, ac fuit in Christo.

54.  
1. d. 15. q. 5  
art. 1. q. 4.  
& d. 17. q.  
2. art. 4. ad  
3. & 3. d. 13  
q. 1. art. 2.  
q. 1. & d. 18  
art. 5. co.  
Et Iſai. 1.  
lib. 2. prio.  
\* art. præg.

\* lib. 2. de  
anima  
2. x. 4.  
2. m. 5.

Titulus  
articuli.

1. Argum.



ad illud vero sufficit quantitas gratiæ, quæ ex dispositione divinæ sapientiæ Christo data est, ut in solutione ad secundum, aperte dicit D. Th. ideo sub hac consideratione hæc gratia habet rationem connaturalis formæ, & ideo augeri non potest secundum potentiam ordinariam, ut dictum est.

*d* In solutione ad 3. (nam de secundo jam satis dictum est), explicat D. Th. locum illum Luc. 2. *Puer autem cre-  
scebat sapientia, etate, & gratia*, & exponit intelligendū esse, non de augmento ipsius gratiæ in se, sed in ostensione, & manifestatione sua, quæ est communis Patrum expositio, Greg. Naz. orat. 20. in laudem Basilii n. 65. quem locum citavit Euthy. Luc. 2. & D. Th. ibi in catena, Canus vero lib. 12. de locis cap. 14. quia fortasse locum non invenit, existimavit, falso allegari. Eamdem expositionem habet idem Naz. orat. 51. Athan. orat. 4. contra Arium, Cyril. 1. in Joan. c. 17. & lib. 2. c. 72. & lib. 10. thes. cap. 7. Hieron. in id Isai. 7. *Ut sciat reprobare malum*, & in id Jerem. 31. *Fœmina circumdabit virum*. Bernard. hom. 2. in Missus est. Bed. hom. 1. in Dominicam primam post Epiphaniam circa fin. tom. 7. Hugo de S. Victor. lib. de Incarnat. Verb. c. 6. Damasc. lib. 3. de fide c. 22. ubi aliam refert expositionem, scilicet, ut Christus dicatur crescere in gratia in suis membris, quæ, ut per se constat, literalem sensum non continet.

**Obiectio.** Sed de priori dubitari potest, quia ita dicitur de Christo crevisse in gratia, sicut in ætate, sed in ætate non solum ostendit augmentum, sed vere comparavit illud; ergo & in gratia, unde & ibidem dicitur crevisse coram Deo, & hominibus. Respondetur, ideo D. Thom. hic non solum dixit crevisse, ostendendo gratia suam, sed crevisse in effectibus, faciendo excellentiora opera ipsius gratiæ, & hoc modo revera crescebat, quia re ipsa efficiebat opera gratiæ excellentiora, per quæ licet ipse non fieret sanctior, aut iustior, nec plus aliquid mereretur, propter infinitam dignitatem personæ suæ, & quia a principio habuit gratiam consummatam: nihilominus illa opera de fecerant sufficientia ad augendam gratiam, quatenus novum meritum continebant.

**Solutio.** Solum dixit crevisse, ostendendo gratia suam, sed crevisse in effectibus, faciendo excellentiora opera ipsius gratiæ, & hoc modo revera crescebat, quia re ipsa efficiebat opera gratiæ excellentiora, per quæ licet ipse non fieret sanctior, aut iustior, nec plus aliquid mereretur, propter infinitam dignitatem personæ suæ, & quia a principio habuit gratiam consummatam: nihilominus illa opera de fecerant sufficientia ad augendam gratiam, quatenus novum meritum continebant.

## ARTICULUS XIII.

*Qualiter gratia Christi habitualis se habeat  
ad unionem.*

**A**D tertium decimum sic proceditur. Videtur, quod gratia habitualis in Christo non subsequatur unionem. Idem enim non sequitur ad seipsum. Sed hac gratia habitualis videtur eadem esse cum gratia unionis: dicit enim August. in lib. de Prædestinat. \* Sanctorum: Ea gratia fit ab initio fidei sue homo quicumque Christianus, qua gratia homo ille ab initio suo factus est Christus. Quorum duorum primum pertinet ad gratiam habituales: secundum ad gratiam unionis. Ergo videtur, quod gratia habitualis non subsequatur unionem.

2. Præterea. Dispositio præcedit perfectionem tempore, vel saltem intellectu. Sed gratia habitualis videtur esse sicut quedam dispositio humane nature ad unionem personalem. Ergo videtur, quod gratia habitualis non subsequatur unionem, sed magis præcedat.

3. Præterea. Commune est prius proprio. Sed gratia habitualis est communis Christo, & aliis hominibus, gratia autem unionis est propria Christo. Ergo prior est secundum intellectum gratia habitualis, quam ipsa unio. Non ergo sequitur eam.

Sed contra est, quod dicitur Isai. 42. *Ecce servus meus, suscipi eum*; & postea sequitur, *Dedi Spiritum meum super eum*; quod quidem pertinet ad donum gratiæ habitualis. Unde relinquitur, quod susceptio nature humane in unitatem personæ præcedat gratiam habituales in Christo.

Respondeo dicendum, quod unio humane nature ad divinam personam (quam supra diximus esse ipsam gratiam unionis) præcedit gratiam habituales in Christo, non ordine temporis, sed nature & intellectus.

Et hoc triplici ratione: primo quidem secundum ordinem principiorum utriusque. Principium enim unionis est persona Filii assumens humanam naturam, quæ secundum hoc dicitur missa esse in mundum, quod humanam naturam assumpsit. Principium autem gratiæ habitualis, quæ cum charitate datur, est Spiritus sanctus, qui secundum hoc di-

citur mitti, quod per charitatem mentem inhabitat. Missio autem Filii secundum ordinem nature, prior est missione Spiritus sancti, sicut ordine nature Spiritus sanctus procedit a Filio, & a sapientia dilectio. Unde & unio personalis, secundum quam intelligitur missio Filii, est prior ordine nature, habituali gratia, secundum quam intelligitur missio Spiritus sancti. Secundo, accipitur ratio huius ordinis ex habitudine gratiæ ad suam causam. Gratia enim causatur in homine ex præsentia divinitatis, sicut lumen in aere ex præsentia solis: unde dicitur Ezech. 43. *Gloria Dei Israel ingrediebatur per viam Orientalem*, & terra splendebat a maiestate eius. Præsentia autem Dei in Christo intelligitur secundum unionem humane nature ad divinam personam: unde gratia habitualis Christi intelligitur, ut consequens hanc unionem, sicut splendor solem.

Tertio, ratio huius ordinis sumi potest ex fine gratiæ: ordinatur enim ad bene agendum. Actiones autem sunt suppositorum, & individuorum. Unde actio, & per consequens gratia ad ipsam ordinans, præsupponit hypostasim operantem. Hypostasis autem non præsupponitur in humane nature ante unionem, ut ex supra dictis patet. \* Et ideo gratia unionis secundum intellectum præcedit gratiam habituales.

Ad primum ergo dicendum, quod August. \* ibi gratiam nominat gratuitam Dei voluntatem, gratis beneficia largientem. Et propter hoc eadem gratia dicit hominem quemcumque fieri Christianum, quia gratia factus est homo Christus: quia utrumque gratuita Dei voluntate absque meritis factum est.

Ad secundum dicendum, quod sicut dispositio in via generationis præcedit perfectionem, ad quæ disponit in his, quæ successive perficiuntur: ita naturaliter perfectionem sequitur, quam aliquis jam consecutus est: sicut calor, qui fuit dispositio ad formam ignis, est effectus profluens a forma ignis jam præexistentis. Humana autem natura in Christo unita est persona Verbi a principio, absque successione. Unde gratia habitualis non intelligitur, ut præcedens unionem, sed ut consequens eam, sicut quedam proprietas naturalis. Unde & August. dicit in Ench. quod gratia est quodammodo Christo homini naturalis.

Ad tertium dicendum, quod commune est prius proprio, si utrumque sit unius generis. Sed in his, quæ sunt diversorum generum, nihil prohibet proprium esse prius communi. Gratia autem unionis non est in genere gratiæ habitualis: sed est supra omne genus, sicut & ipsa divina persona.

Unde hoc proprium nihil prohibet esse prius communi: quia non se habet per additionem ad commune, sed potius est principium, & origo ejus, quod est commune.

Itera D. Thom. clara est, res vero ipsa jam est in superioribus explicata.

## DISPUTATIO XXII.

In duas Sectiones distributa.

*De perfectione habitualis gratiæ Christi.*

**H**ic non est fermo de perfectione essentiali, seu specifica, de hac enim satis in superioribus diximus disput. 18. agitur ergo in præsentia de perfectione accidentali, & præsertim de ea, quæ est per modum intensiōis, nam de extensione huius gratiæ multa etiam tractata sunt, & alia dicenda sunt in quæst. sequent. Diximus enim in Christo fuisse omnes habitus, & omnes operationes gratiæ, quæ ad perfectionem pertinent; dicimus vero inferius hanc gratiam esse principium sanctificandi alios, quæ omnia ad extensivam perfectionem pertinent. Nonnulla vero alia hic obiter attingemus.

## SECTIO I.

*Utrum gratia Christi sit infinita.*

**S**olet gratia distingui, in rationem qualitatis, vel in esse gratiæ, juxta quam distinctionem tres esse possunt opiniones. Prima, ut hæc gratia sub utraque ratione sit infinita. Hanc tenet Major in 3. d. 13. q. 3. ubi Almain. eam probabilem reputat. Fundamentum ejus est, quia non implicat contradictionem fieri gratiam in esse qualitatis intensive infinitam; ergo data est Christo. Antecedens supponitur ex materia de infinito, nunc solum ita declaratur, quia Deus potest gratiam in infinitum intensiorem facere; ergo tota latitudo gratiæ, quam Deus com-

q. 4. art. 2.

Ecce cit.  
in argum.

Ench. c.  
49. tom. 3.

1. Opinio.

85.  
3. d. 13. q. 3.  
art. 2. q. 3.  
& p. 1. c. 3.  
c. 2. r. Et  
p. 1. c. 6.  
c. 3. col. 2.  
cap. 5. ante  
medum  
tom. 7.

q. 9. art. 6.  
& quæst. 6.  
art. 6.



comprehendit ut possibilem, complectitur infinitos gradus gratiæ; nam si essent finiti, ad illos posset terminari augmentum gratiæ; ergo infinita illa gratia possibilis est; ergo non repugnat, quod illam Deus conferat creaturæ. Prima vero consequentia probatur, quia Christo debetur gratia habitualis perfectissima propter unionem, & non debetur in aliquo gradu finito; quia cum gratia unionis sit infinita, & altioris ordinis, excedit quemcumque gradum finitum habitualis gratiæ; & ideo ex parte illius non potest signari terminus in gratia habituali; ergo si hæc gratia infinita possibilis est, nulla ratione negari potest, datā

2. Opin. esse Christo. Secunda opinio omnino contraria est, gratiā Christi esse omnino finitam, tam in qualitate ipsa, quam in esse gratiæ. Hanc tenent Scot. & Durand. in 3. d. 13. q. 1. & Albert. artic. 7. Fundamentum esse potest, quia in gratia non distinguuntur esse qualitatis, & esse gratiæ, quia illa qualitas ex sua specifica, & essentiali ratione est gratia, Nec fingi ibi potest aliquod esse gratiæ, nisi quod illa qualitas confert subiecto in quo inest; ergo si qualitas illa finita est, etiam ipsum esse, quod ipsa habet, vel subiecto confert, finitum esse necesse est. Et confirmatur, nam illa qualitas existens in animam Christi, tam in esse qualitatis quam in esse gratiæ, potest esse perfectior; potest enim intendi in gradibus ipsius qualitatis: si autem intenderetur necessario redderet pulchriorem ipsam animam, & proportionatam, & acceptam ad maiorem gloriam; ergo faceret animam magis gratam; ergo ageretur ipsa in esse gratiæ, sicut in esse qualitatis; est ergo utraque ratione finita. Tertia sententia est, gratiam illam in entitate, & gradibus intensiōis esse finitam, tamen in ratione gratiæ esse aliquo modo infinitam. Hæc videtur esse opinio D. Thom. in his articulis, ut illum exposuimus, & videtur esse communior sententia & vera; oportet tamen eam convenienter exponere, præsertim quoad posteriorem partem.

3. Opin. Dico ergo primum: Gratia habitualis in Christo est infinita in entitate sua, & intensiōe, quam in subiecto habet: ita D. Thom. & tota ejus schola. Palud. in 3. d. 13. q. 1. art. 2. & art. 4. concl. 2. Bonav. & Richard. ar. 1. q. 2. Alma. q. 1. Gabr. q. 1. art. 2. Capr. q. 1. art. 1. concl. 2. & art. 3. in princ. Marfil. in 3. q. 10. Ocham q. 7. Scot. Durand. & Albert. locis citatis. Duobus autem modis potest hæc assertio fundari. Prior erit, si non supponamus esse impossibilem qualitatem gratiæ infinite intensam. Sic enim aliqui contendunt, etiam si gratia infinite intensa in esse qualitatis possibilis sit, nihilominus datam non esse Christo ut homini, quia nec fuit necessaria ad finem redemptionis, nec per se fuit debita ratione unionis. Primum per se notum est, quia infinitas meritorum, & æquitas ac rigor justæ satisfactionis ejus non est sumendus ex infinita qualitate gratiæ; imo (ut ex dictis supra q. 1. art. 2. constat) nec sola illa infinitas fuisset sufficiens ad totum illum valorem moralem, qui fuit in operibus Christi; nec ad illum fuit necessaria, quia satis fuit infinitas personæ, & dignitas, quam gratia ipsa creata in esse gratiæ, & omnes Christi operationes in esse meriti & satisfactionis inde participarunt. Secundum probatur, quia, ut D. Thom. hic ait artic. 12. mensura dispositionis seu formæ sumenda est ex fine & mensura proprietatis ex principio, a quo manat: sed unio, propter quam datur gratia habitualis, vel ut dispositio ad illam, vel ut proprietas debita ratione illius, hæc, inquam, unio est simpliciter finita physice seu in genere entis; ergo illi tantum respondet gratia finita in genere qualitatis, quia Deus, qui omnia in pondere & mensura constituit, optimo ordine ac proportionem omnia perficit, & non confert infinitum aliquid sine necessitate aut ratione sufficiente. Minor probatur, quia illa unio est modus quidam realis creatus, atque adeo simpliciter finitus in essentia: nam licet secundum quid, seu negative sit infinitus, in quantum nulla potest esse perfectior unio, licet in infinitum multiplicentur, absolute tamen finitum quid est essentialiter, ut per se constat; intensive autem non est infinita, quia est indivisibilis, & non recipit magis & minus.

Sed hic dicendi modus mihi probari non potest; fateor equidem non colligi evidenti consequentia, si gratia habitualis potest esse actu infinita intensive, datam esse animæ Christi, quia sine dubio potuit Deus illam non conferre, ut de tota ipsa gratia supra dictum est: censeo tamen tanta probabilitate colligi, quanta colligimus, ex vi

unionis Christo fuisse debitam perfectissimam gratiam, & gloria a principio conceptionis, & alia similia dona. Hoc autem non colligimus ex aliquo fine extrinseco, ut redemptionis, vel alio simili: nam ad hunc finem non erat necessaria infinita gratia, ut argumentum factum probat, & de facto omnes fatemur. Neque hoc quidquam ad præsens refert, nam multas perfectiones habuit Christus, quæ per se necessariae non erant ad finem redemptionis, ut gloriam a principio conceptionis suæ, scientiam infusam, & similes, quas habuisse dicimus propter se, & propter earum perfectionem, tanquam proprietates decentes talem personam. Ad hunc ergo modum dicimus habitum fuisse infinitam gratiam habitualement, & infinitum lumen gloriæ, & infinitam visionem & dilectionem Dei, si hæc essent possibilis. Probatur primo ratione supra insinuat, quia nullus gradus finitæ perfectionis potest in his proprietatibus assignari ita conveniens & decens dignitatem personæ Christi, quin major perfectio in eadem proprietate sit, etiam decens & proportionata tantæ dignitati: ergo si possibilis esset infinita perfectio, illa sola esset, quæ haberet proportionem veluti ad æquatam, maximeque connaturalem cum tali dignitate.

Dices. Hoc argumentum probaretur, de facto nullam gratiam finitam potuisse conferri Christo; sed ad hoc responsum est non esse simile, nunc enim verum est, nullam gratiam finitam ex se esse plene ad æquatam dignitatem Christi, tamen, quia nulla dari potuit summa possibilis absolute, necessarium fuit ex ordine sapientiæ divinæ in certo aliquo gradu constitui, in quo solo esset possibilis secundum legem Dei ordinariam, & haberet convenientem proportionem cum tali mysterio, consideratis aliis rationibus divinæ providentiæ. Quod necesse est fateantur omnes, qui dicunt, gratiam Christi non fuisse simpliciter summam, sed ex se potuisse augeri in infinitum secundum potentiam Dei absolutam: quia ex sola natura physica, ut sic dicam, non potest assignari aliquis gradus gratiæ habitualis finitæ, qui sit connaturalis & debitus Christo ratione suæ dignitatis, & quod in majori gradu esset excedens & superans dignitatem talis personæ. Est enim hoc per se incredibile, & statim amplius impugnabitur. Unde confirmatur ratio facta, nam si gratia esset possibilis in summo gradu finito, ita ut fieri posset tam intensa gratia, ut intensior esse non posset, etiam de potentia Dei absoluta, omnes faterentur, talem gratiam debitam esse Christo, & in illo reperiri, si ve fingatur esse majoris intensiōis, quam sit ea gratia, quam nunc habet Christus, si ve non; id enim censetur impertinens, sed ut sit illi subiecto debita, satis est, quod sit summa; ergo, etiam si esset infinita, esset debita eodē proportionis & connaturalitatis debito, quia esset summa. Et ratio est, quia gratia est in Christo, ut in subiecto proprio & connaturali, vel etiam ut in subiecto superexcedente, qualitas autem petit, ut sit in summo gradu, saltem in proprio & connaturali subiecto, & a fortiori in subiecto excedente, quod majori ratione virtute continet omnem perfectionem & intensiōem talis proprietatis.

Atque hinc ulterius formari potest ratio a priori: nam radix hujus gratiæ in Christo est infinita; ergo ex se postulat infinitam gratiam, si illa est possibilis: ergo ex vi debiti & connaturalitatis, tota illa danda fuit, & data censenda est, si possibilis existimatur. Nec ratio facta, quod unio est finita, quidquam valet. Primo quidem, quia, si est sermo de finito in essentia, etiam gratia infinita intensive, esset finita in essentia, & ita ex hac parte non est improprio: si vero est sermo de finito in intensiōe, unio, nec finita, nec infinita dici potest, quia in ea ratione quantitatem non habet, sed indivisibilis est; forma autem indivisibilis potest ratione suæ essentiae esse tam perfecta, ut petat qualitatem infinite intensam, si hæc possibilis est, utpote, si sit forma superioris ordinis, ut est illa unio, & quodammodo sine proportionem ulla excedens proprietatem & qualitatem inferioris ordinis. Secundo, & maxime, quia hæc gratia & perfectio etiam non debetur Christo, ratione unionis præcise sumptæ, ut quid creatum est, sed ut includit terminum increatum intrinsece componentem hunc hominem Christum; itaque debetur tanta gratia huic homini Christo, ratione suæ dignitatis personalis, quæ simpliciter infinita est. Hoc autem probatur, quia gratia non est proprie debita humanitati, sed huic homini: ergo debetur ratione dignitatis, & perfectionis



tionis hujus hominis; ergo non solum ratione modi unionis, qui magis est proprietas seu perfectio humanitatis ut sic, quam hujus hominis ut sic, sed maxime debetur ratione dignitatis personalis hujus hominis. Confirmatur primo, nam huic homini debetur hæc gratia, quatenus est filius Dei naturalis; non est autem filius Dei naturalis, humanitas, sed hic homo, nec est filius naturalis ratione unionis præcise sumptæ, ut modus creatus est, sed ratione personæ increatæ, quæ hunc hominem componit, & reddit dignum omni supernaturali perfectione; ergo, &c. Confirmatur secundo, quia visio beatifica non debetur naturæ, si proprie loquamur, quia actiones sunt suppositorum; debetur ergo personæ; ergo debetur ratione dignitatis personalis; ergo debetur in perfectione & intensione proportionata dignitati personæ; sed hæc est simpliciter infinita; ergo, si visio infinita possibilis est, tota illa debetur tali personæ: ergo & lumen gloriæ infinitum, & consequenter gratia infinita.

Sed dicunt, gratiam Christi non esse commensurandam personalitati, sed unioni, quia gratia datur ut perfectio naturæ, & ut elevans naturam ad novum ordinem & genus operationum: principium autem operandi est natura, non personalitas ista. Sed hoc non recte dicitur, aliàs eodem modo dici posset, gratiam habituales non deberi ratione hypostaticæ unionis, quia illa unio, prout est modus creatus in humana natura, non ordinatur proxime & per se ad operationem, sed ad componendam personam, & ad subsistendum: tamen hinc consequenter fit, ut illi personæ sic compositæ debeantur operationes, non tantum consentaneæ naturæ unitæ secundum se consideratæ, sed etiam dignæ tali persona sic composita, & natura sic deificata per unionem ad personam increatam: hujusmodi autem sunt operationes ordinis divini, & consequenter principia earum, atque adeo habitualis gratia, quæ est veluti radix omnium principiorum seu habituum, & actuum. Denique licet personalitas non sit principium formale operandi, tamen constituit ipsum principium per se operans, unde etiam postulat naturam aptam ad operandum sibi proportionatam, unde personalitas divina postulat per se, & intrinsece naturam divinam, quod si unienda est extrinsece naturæ, postulat illam deificatam formaliter & in esse naturæ: & hoc est debitum isti personalitati. Et revera hic est modus loquendi Sanctorum, ut patet ex omnibus adductis, & signatim ex Damasc. 3. de fid. orthod. quem D. Thom. in tota hac questione imitatur, ut patet ex hoc artic. 1. & art. 1. 1. 2. 13. ubi ex dignitate Verbi divini, & proprietatibus ejus, colligit gratiam habituales in Christo, & perfectionem ejus. Quod si aliquando tribuitur unioni, ut revera tribui potest, non est ut principali formæ ac radicis, sed ut nexui seu conditioni, quæ secum necessario adducit Verbum, & illud intrinsece unit naturæ, & in eo consistit summa excellentia illius doni, ratione cujus cætera debentur. Igitur gratia habitualis non tantum ratione illius unionis, sed maxime ratione Verbi uniti confertur humanitati Christi, sicut esse impeccabilem, & similes proprietates ratione Verbi uniti præcipue conferuntur: ergo gratiæ intensio, si fieri posset, commensuranda esset Verbo unito, unde, si possibilis esset infinita, tam connaturalis illi esset, sicut est ipsa gratia absolute dicta: illa ergo supposita sententia, non video, cur negandum sit, esse in Christo infinitam gratiam intensive in esse qualitatis, esseque in eo actum amoris Dei infinite intensum, & visionem Dei, quæ videat infinite Deum, tam intensive, quam extensive, nam, si hæc non repugnant, optime quadrant, & maximam proportionem habent cum illius animæ dignitate. Imo simpliciter videtur pertinere ad perfectionem operum Dei, ut sese alicui creaturæ illo perfecto modo possibili manifestet, & quod simili modo summo omni ratione creata, ab aliqua creatura ametur: ergo maxime hoc decebat fieri in illa anima seu natura, quæ deificata est per unionem, & quodammodo propria Dei effecta. Ad hæc, si Christus suis meritis assequeretur gratiam & gloriam, prout posset, infinita gratia & gloria intensive, si est possibilis, illis responderet, quia ex vi unionis ejus merita habent valorem condignum, & super efferentem ad totum illud pondus gratiæ & gloriæ, nec esset ulla ratio, cur ex divina ordinatione, ad limitatum aliquod præmium essent illa merita referenda, sed totum id, quod posset secun-

dum legem ordinariam esse debitum ex merito, est debitum & connaturale ex vi unionis: ergo. Alio ergo modo fundanda est conclusio posita, scilicet, quia gratia fieri non potest actu infinita secundum intensiorem realem ac physicam seu gradualem. Hoc autem probari potest primo ex propria ratione ipsius gratiæ, quæ est facere gratum aut sanctum: creatura autem nunquam potest ita esse grata, & sancta, quin per opera fieri possit gravior, & sanctior; ergo signum est non esse capacem infinitæ gratiæ. Sed ad hoc facile responderi potest negando assumptionem: anima enim Christi per gratiam est ita grata, ut gravior esse non possit; idem ergo dici posset in suo genere de anima infinite grata per gratiam actu infinitam. Nec refert, quod talis anima posset opera sanctitatis multiplicare, quia per ea non fieret sanctior, ut etiam patet in anima Christi, & suo modo in beatis, qui non fiunt sanctiores, etiam si varia opera virtutis operentur: sicut enim illi ratione status non sunt capaces augmenti, ita si quis haberet gratiam actu infinitam, esset etiam augmenti incapax ratione infinitæ perfectionis talis formæ. Aliter D. Thom. hoc probat ex subjecti incapacitate, quia anima cum sit creatura, non est capax infinitæ perfectionis, quæ ratio, & per se difficilis est, & supponit rationes alias, propter quas repugnat creaturæ infinita perfectio intensiva, ut supra exponendo D. Thom. diximus. Unde qui dicunt gratiam secundum se & separatam posse esse infinitam, & non vero in hærentem in subjecto, ut sumi potest ex Capreolo in 1. d. 43. art. 2. concl. 2. Hi inquam non recte loquuntur, ut docent Gregor. in 1. d. 17. q. 6. concl. 3. in fine, & Gabr. ibi. q. 8. concl. 3. & 4. & in 3. d. 13. tum quia fieri non potest, ut accidens separatum sit capax majoris intensiōis, quam in hærens, cum essentialiter dicat ordinem ad subjectum secundum omnes gradus suos; si ergo est infinite intensum, secundum se totum est aptum in hærenti subjecto; tum etiam, quia si gratia actu infinita est possibilis, cum gradus ejus inter se formaliter non repugnent, neque in eodem subjecto simul esse repugnabunt. Et propterea dixi, difficile esse ex incapacitate subjecti ostendere talem gratiam infinitam esse impossibilem, quia anima de se capax est cujuscumque gradus gratiæ, & omnium simul, si aliunde non repugnat infinitos gradus gratiæ simul produci, unde incapacitas animæ ad gratiam actu infinitam videtur supponere talem formam actu infinitam de se esse impossibilem. Quocirca nullam invenio propriam rationem, qua hoc ostendam, sed generalibus rationibus utendum censeo, per quas ostendi solet, repugnare creaturam esse actu infinitam, tam in essentia, quam in quantitate, vel intensione, quæ potissimum sumi solent ex incommodis, & repugnantibus rebus, quæ posito infinito sequi videntur: tum etiam ex ipsa ratione infiniti, quod cum sit quid confusum & indeterminatum, non videtur posse cadere sub certam & determinatam intentionem agentis, ut D. Thom. 1. p. q. 7. argumentatur.

Et specialiter de infinitate intensiva qualitatis declarari potest, quia vel intensio fit per aggregationem plurium graduum similium in eodem subjecto, vel per radicationem, & proprium ac per se augmentum ejusdem qualitatis. Prior modus est falsus, ut ex Philosophia suppono, & præterea ex eo sequitur, si potest Deus congregare infinitos gradus gratiæ in eodem subjecto, eadem ratione posse in illo ponere omnes posibles, ita ut neque in illo, neque in alio subjecto possint alius gradus gratiæ fieri, quia nulla major ratio repugnantia in hoc posteriori modo infinitatis, quem adæquatam vocant, reperitur, quam in priori, quem vocant inadæquatam. At consequens est absurdissimum: quis enim intelligat Dei potentiam ita exhaustam, ut amplius non possit producere, vel simpliciter, vel in aliquo ordine? aut quis admittat fieri posse, ut propter multiplicationem gratiæ in uno subjecto, non possit Deus alia subjecta gratificare? hic ergo modus infinitæ intensiōis impossibilis est. At, si veriori modo intelligamus intensiōem per radicationem & augmentum per se ejusdem qualitatis, tunc concipi non potest qualitas intensa sine principio & fine, id est, sine primo & ultimo gradu. De primo ita declaro, quia augmentum per se in intensiōe qualitatis consistit in hoc, quod unus gradus per se supponit alium, & quoad hoc habent aliquam diversitatem. Unde fit, necessarium esse, ut sit aliquis gradus immediate respiciens subjectum, quia



quia unus non respicit subiectum, nisi mediante illo, quæ per se supponit; ergo necesse est, ut aliquis sit quasi immediatus, & ille erit primus, quia aliàs nō posset illa qualitas afficere subiectum, nisi per aliquid sui immediate respiceret illud, & quasi inciperet fundari in illo: ex illa ergo parte necesse est dari extremum & terminum in qualibet qualitate intensa. Quod in hunc modum potest confirmari & declarari, quia Deus posset gratiam seu charitatem; quæ fingitur infinite intensa, minuere infinite, sicut auxit infinite, & illam relinquere in unico tantum gradu, qui proxime respicit subiectum, & est quasi fundamentum cæterorum: ergo ex ea parte ille est primus & terminus illius qualitatis. §. De alio vero extremo, quod etiam in illo necesse sit dari ultimum terminum, probari in primis potest illa ratione, quod in per se ordinatis non potest intelligi processus in infinitum. Deinde quia Deus posset unum gradum auferre ab illa qualitate, qui necessario deberet esse ultimus, quia intermedius non posset auferri, quin auferrentur omnes in eo fundati propter essentialē subordinationem, quam supponimus. Similiter posset Deus unum gradum addere illi qualitati: ille ergo superadderetur ultimo gradui præexistenti.

**Obiectio.** Potest etiam adjungi ratio Theologica a posteriori, quia si gratia Christi esset actu infinita, etiam lumen gloriæ, & visio beata essent actu infinita: unde fieret consequens, animam Christi videre Deum, quantum visibilis est ex parte obiecti, videndo in illo quidquid ab eo fieri potest. Consequens autem esse falsum ostendimus infra q. 10. Sequela vero patet, quia gratiæ respondet gloria.

**Solutio.**

Dicitur fortasse aliquis, magis repugnare actualem visionem esse infinitam, quam habitum gratiæ, vel ipsum lumen gloriæ, quia ad visionem requiritur conatus activus potentiæ, potentia autem finita non potest infinitum conatum adhibere: at vero in suscipienda gratia, vel lumine gloriæ, passive tantum concurrat anima; & ideo non videtur similis ratio. Sed hoc non recte dicitur, quia si habitui gratiæ, vel lumini gloriæ non repugnat intensio actu infinita, neque etiam repugnabit actu videndi, quantum est ex parte illius; neque ergo repugnabit potentiam humanam elevari ad eliciendum illum per habitum, seu principium infinitum, & auxilium proportionatum, quia intellectus non concurrat ad illam visionem, juxta mensuram naturalis perfectionis, sed juxta mensuram auxilii, & formæ, per quam elevatur, & ideo verius & proprius dicitur non concurrere per potentiam, & efficacitatem naturalem ut sic, sed ut habet in se potentiam obedientialem, quæ de se extenditur ad omne id, quod contradictionem non implicat.

**2. Obiectio.** Dicitur secundo potest, fieri posse, ut lumen, & visio animæ Christi sint infinita, & nihilominus non videat Deum quantum visibilis est, neque omnia, quæ in eo videri possunt: quia potest cognitio circa eandem omnino rem esse magis vel minus intensa, per majorem vel minorem conatum potentiæ; etiam si ex parte obiecti nihil amplius per unam visionem, quam per aliam videatur, sicut in amoris actibus evidenter apparet. Respondetur, quidquid de hoc sit, de quo nunc disputare nolo, tamen si gratia potest esse infinita simpliciter, & talis fuit gratia Christi, etiam erit possibile lumen gloriæ simpliciter infinitum in omni intentione sibi possibili, id est, ut attingere potest totum Deum, & omnia, quæ in ipso, & per ipsum videri possunt: quia non magis repugnabit dari hujusmodi lumen infinitum, quam gratiam simpliciter infinitam; imo tali gratiæ proportionaliter respondet tale lumen, ex tali autem lumine sequitur visio infinita, non solum secundum quid per conatum potentiæ circa aliquod particulare obiectum, sed simpliciter circa totum obiectum primarium illius visionis, quod est Deus ipse, & circa omnia, quæ in illo continentur, & in illo videri possunt; hujusmodi autem visionem existimo esse impossibilem sine comprehensione Dei: quam repugnat facere intellectum creatum, ut infra latius q. 10. dicitur.

**Solutio.**

Dico secundo. Gratia Christi Domini, secundum quandam rationem, & dignitatem gratiæ dici potest infinita: ita D. Thom. hic, & q. 29. de Veritat. art. 3. & cæteri auctores præcedenti assert. citati, & Marsil. in 3. q. 10. art. 1. in 2. part. illius, post 1. conclus. & Altiſod. lib. 3. summ. tract. 1. cap. 5. in fine. Potest autem dupliciter explicari hæc conclusio. Primo, ut illa gratia non dicatur simpliciter infinita ulla ratione, sed solum secundum

quid, quia habet, quidquid pertinet ad bonum usum, & operationem gratiæ; & quia se extendit ad omnes effectus gratiæ, cum enim omnes hi effectus sint finiti intensive, non potest ex hoc capite vocari hæc gratia infinita simpliciter, sed ad summum, secundum quid. Secundo potest hæc infinitas explicari solum per quandam acceptationem, vel relationem extrinsecam, quatenus scilicet hæc gratia habitualis in Christo ad ipsam unionem ordinatur; ut D. Thom. dicit art. 12. ad 2.

Sed in hoc considerandum est, ex sola acceptatione extrinseca ut sic non conferri gratiæ propriam aliquam dignitatem physicam, vel moralem, ratione cujus possit dici infinita: tamen si hæc acceptatio, vel ordinatio non consideretur, ut mere extrinseca, sed quatenus per eam fit, ut illa gratia conjuncta sit aliquo modo divinæ personæ, dici potest ex hac conjunctione habere hanc gratiam quandam infinitum valorem & dignitatem, non quia illi addatur aliquid physicum, vel reale distinctum ab ipsa, & a persona divina, seu ab unione humanitatis ad ipsam; nihil enim hujusmodi fingi, aut excogitari potest; sed quia secundum moralem æstimationem quandam dignitatem, & excellentiam habet ex hac conjunctione, sicut humanitas ipsa infinitam dignitatem habet ex unione, ut D. Thom. loquitur 1. p. q. 25. art. 5. ad 4. & sicut operationes Christi ex eadem radice, seu conjunctione habent infinitum valorem in esse meriti, ut in superioribus dictum est; illa enim unio ad Verbum quasi elevat, & nobilitat, quidquid illi conjungitur juxta uniuscujusque modum & capacitatem. Unde, quia opus bonum est meritum, dat illi infinitum valorem in illo ordine; & quia opus poenale est satisfactorium, dat illi infinitatem in genere satisfactionis; quia ergo gratia ex propria ratione habet facere gratum, & dilectum; ideo per hanc unionem accipit quandam dignitatem & valorem, ratione cujus censetur facere infinite gratum, & hoc est habere quandam infinitatem in esse gratiæ in ordine ad unionem. Quod recte per affectus declaratur, nam hinc habet, quod sit proximum principium infiniti meriti; quævis enim gratia unionis sit principalis radix hujus quantitatis in merito, gratia tamen habitualis est veluti proximum principium ejus. Et hinc etiam habet, ut possit influere in infinitos homines: nam ad omnes potest extendi fructus ejus, etiam si in infinitum multiplicarentur.

Dices: implicat contradictionem creaturam esse infinite gratam Deo, aliàs esset tam grata, sicut divinitas; ergo multo minus ipsa gratia potest esse infinita in ratione gratiæ. Respondetur negando antecedens, sicut supra dicebamus de merito Christi, esse scilicet infinitum in ratione meriti; & ut sic infinita quadam ratione placere Deo: non tamen propterea æque placet, ac ipsa divinitas, quia unum est infinitum secundum quid, & alia simpliciter: sic igitur gratia unionis est in suo genere infinita, & reddit humanitatem infinite gratam, licet nō æque, atque est grata divinitas ipsa, quia hæc est grata per essentialitatem, illa per unionem; unde illa est infinita simpliciter, hæc secundum quid, sicut illa comparetur, quamvis in suo genere sit absolute infinita; & eodem modo gratia habitualis, ut conjuncta gratiæ unionis, inde habet quandam infinitatem inferioris quidem rationis, in suo tamen genere infinitatem simpliciter.

Ad fundamentum primæ sententiæ negatur gratiam actu infinitam fieri posse. Ratio autem ibi indicata attingit difficultatem tractandam sect. seq. Admittendo tamen, quod argumentum supponit, scilicet gratiam posse in infinitum augeri, respondetur, totam gratiæ latitudinem, quam Deus comprehendit ut possibilem, non esse unam aliquam certam gratiam, sed esse infinitas, seu in infinitum multiplicabiles gratias; quarum una potest esse intensior alia, nulla autem earum cognoscitur, quæ esse possit actu infinita. Et similiter respectu ejusdem gratiæ cognoscitur illi posse additionem fieri in infinitum; non tamen illi posse fieri additionem simpliciter infinitam, sicut de quantitate continua, vel discreta dicere necesse est. Quod si urgeas de tota illa latitudine simul sumpta respectu ejusdem numero gratiæ. Respondetur illam vere non esse categorematicæ, seu actu infinitam, sed Syncategorematicæ, seu in potentia, ut latius in simili explicabo, infra quæst. 10. Et hinc fit, ut non possit tota simul actu cōvenire in re ipsa alicui gratiæ, quia repugnat hoc rationi infiniti in potentia, & quia tota illa latitudo

Y

simul



simul sumpta est quasi quid indeterminatum, quod non potest cadere ut sic sub actionem, & intentionē agentis.

Ad fundamentum secundæ sententiæ respondetur esse æquivocationem in illo termino gratia in esse gratiæ, nā si sit sermo de esse reali, & inhærente, quod ipsa gratia cōfert animæ, fatemur hanc gratiam etiam in esse gratiæ esse finitam, & eodem modo conferre animæ finitam pulchritudinem, & reddere illam proportionatam finitę gloriæ: non autem ita loquimur de gratia, quando dicimus illam esse infinitam. Alio ergo modo loquimur de esse gratiæ pertinente ad dignitatem ejus, prout ordinatur ad unionem hypostaticam, illique conjuncta est, & hoc non habet gratia habitualis ex natura sua, sed ex conjunctione ad unionem: & ita distinguitur aliquo modo ab ipsa gratia in esse qualitatis; & ideo sub hac ratione potest esse infinita, quamvis qualitas ipsa finita sit.

**Dubium.** Indicatur autem in confirmatione illius opinionis breve dubium, scilicet, an hæc gratia sub ea ratione, qua infinita dicitur, possit augeri. Respondetur breviter, intensive non posse proprie augeri sub ea ratione, qua infinita est, est enim contra rationem infiniti, ut crescere possit quatenus infinitum est, sicut supra dicebamus, unum opus Christi nō habere intensive majus meritum, quam aliud, quia omnia sunt simpliciter infinita in ratione meriti; unde si animæ Christi data esset intensior gratia, ut argumentum proponebat, esset quidem illa gratia major ex ea parte, qua finita est: tamen dignitas, quam habet gratia ex ordine ad unionem, non esset major in una, quam in alia, & ex ea parte habet infinitatem; & ideo non cresceret, neque augeretur quatenus infinita est. Quod a posteriori etiam declaratur, quia non esset illa gratia principium majoris meriti, neque efficacior ad sanctificandum alios, vel ad satisfaciendum pro peccatis, etiam si in infinitum multiplicentur, quam nunc sit gratia, quam habet Christus. Dico autem non posse augeri intensive, & proprie, quia extensive quodammodo augeri posset, ut si ordinetur ad unionem non tantum cum persona Verbi, sed cum omnibus personis: & similiter quoad effectum, licet non possit esse principium majoris meriti quoad valorem, quam nunc sit gratia Christi: posset tamen meritum ab illa procedens ordinari, ut in plures haberet effectum, vel quoad efficaciam, vel etiam quoad sufficientiam: posset enim ordinare meritum etiam ad salutem, seu remedium malorum Angelorum, quod nunc factum non est; sed hæc omnia sunt extrinseca, nam dignitas ipsius gratiæ in se vere non augeretur, ut ex dictis satis patet; & ita loquitur D. Th. q. 29. de Verit. ar. 3. & in 3. d. 13. q. 1. ar. 2. q. 2. & 3.

**Dubium.** Ultimo tamen quæret hic aliquis, an sicut gratia Christi dicitur infinita modo supra explicato, possit etiam charitas, vel alia similis virtus infinita appellari. Nonnulli enim Thomistæ hoc recusant concedere, quia charitas, seu virtus ordinatur ad operationem, & non ad ipsum esse personale, sicut gratia habitualis; operatio autē est finita, esse vero personale est infinitum. Dico tamen etiam charitatem, & alias virtutes Christi, præsertim morales, habere in suo genere infinitatem quandam ex unionē ad Verbum, quia ex illa etiam habent infinitam quandam dignitatem, quia revera etiam ordinantur ad unionē, ut sint videlicet ornamenta & bonæ dispositiones Verbi incarnati, sunt etiam principia infiniti meriti. Et discurrendo per singulas id facili etiam suaderi potest; nam justitia, vel religio, in Christo propter unionem ad verbum, habet, ut sit perfecta justitia respectu Dei, & perfecta gratitudo, ut sit perfectum actio æqualis beneficiis acceptis; hæc autem est infinita quædam dignitas talis virtutis: simili modo humilitas, vel obedientia, eo quod sunt Verbi Dei, recipiunt quandam inestimabilem dignitatem, quod enim intelligimus in ipsis operationibus, proportionali modo accommodandum est ipsis habitibus, seu virtutibus; & eadem ratio est de reliquis omnibus. Dices. Ergo eadem ratione omnia accidentia humanitatis Christi ratione unionis habent aliquam infinitatem. Respondetur concedendo habere aliquam, sed non eodem modo; sicut enim supra dicebamus, si Verbum assumeret irrationalem naturam, illam habituram quidem ratione unionis quandam excellentiam, quatenus vere esset natura Verbi divini: quamquam illa dignitas non pertineret ad moralem, & propriam sanctificationem talis naturæ, quia non est capax illius, sicut est natura rationalis: ita in proposito, accidentia omnia, quatenus sunt aliquo

modo conjuncta Verbo, habent inde singularem dignitatem, ratione cujus singulari reverentia, & veneratione tractanda sunt, quæ dignitas suo modo est infinita; tamen hæc non in omnibus accidentibus pertinet ad dignitatem moralem, quæ confert ad meritum, & ad valorem moralem honestarum operationum, quia non omnia sunt capacia hujus valoris, sed solum operationes liberæ, vel principia earum, quatenus talia sunt.

## SECTIO II.

*Utrum gratia Christi fuerit tam intensa, & perfecta, ut non possit fieri intensior, & ideo Christus plenus gratia esse dicatur.*

**D**UO sunt, in quibus omnes Theologi conveniunt. Primum est gratiam Christi fuisse tam intensam, ut neque in hominibus, neque in Angelis aliqua illi æqualis reperitur, nec reperiri possit, secundum potentiam ordinariam, & legem a Deo statutam. Hoc enim de fide certum est, & sufficienter probatur testimoniis Scripturæ & Patrum, quibus supra ostensum est, hanc gratiam fuisse in anima Christi, & alia statim afferemus. Ratio etiam id convincit: quia cum Christus sit naturalis Filius Dei, & caput hominum, & Angelorum, decuit, ut haberet animam suam perfectiori gratia & gloria ornata, quam omnis alia creatura; juxta illud Joan. 1. *Vidimus gloriam ejus, gloriam quasi unigeniti a Patre*, ubi Cyril. August. & alii hunc locum ita interpretantur.

Secundum est, soli animæ Christi datam esse plenitudinem gratiæ simpliciter, quod etiam docet D. Thom. his articulis, & alii Theologi in 3. d. 13. Richard. art. 1. q. 3. Duran. q. 2. Palud. q. 1. Gab. dub. 1. Alen. 3. p. q. 11. memb. 3. Et videtur etiam de fide certum, ut colligitur ex verbis illis Joan. 1. *Vidimus gloriam ejus, gloriam quasi unigeniti a Patre, plenum gratia & veritatis*: quo loco Erasmus, & Cajetanus illam plenitudinem non ad Christum, sed ad Joannem referunt, ita constituentes literam, ut sermo de Christo finiatur in illis verbis: *Vidimus gloriam ejus, gloriam quasi unigeniti a patre*, & postea incipiat sermo de Joanne hoc modo: *Plenus gratia & veritatis Joannes testimonium perhibet de ipso, &c.* qui solum moti sunt, quia in Græco nomen *πλῆρης* masculinum est, & in nominativo ponitur, & ideo non videtur posse construi cum antecedentibus, sed cum sequentibus. Sed est pluriquam temeraria expositio contra communem usum, & sensum totius Ecclesiæ, & contra omnes antiquos Patres, & contra contextum, statim enim subditur Jo: Baptista testimonium esse de Christo, *de plenitudine ejus omnes accepimus*. Unde videtur Joannes Evangelista, in confirmationem ejus, quod dixerat, Verbum carnem factum fuisse plenum gratiæ & veritatis, Jo: Baptista testimonium adduxisse. Quod autem nomen *πλῆρης* masculinum sit, non refert, quia nomen *λόγος*, cum quo Græce construitur, etiam est masculinum: quod vero nominativi casus in Græco sit, non stat, varia enim in Græcis exemplaribus habetur lectio, & Cyril. lib. 1. in Joan. cap. 17. & Chrysost. hom. 11. in Joan. & Orig. hom. 2. in Matth. circa finem in accusativo casu legisse videntur. Si autem in recto legato (ut frequentius fit) conjungenda est lectio hoc modo: habitavit sermo in nobis plenus gratiæ & veritatis; reliqua autem verba per parenthesis sunt interponenda, scilicet, *Et vidimus gloriam ejus, &c.* non est ergo dubium, quin plenitudo gratiæ hoc loco Christo tribuatur, & talia plenitudo, quæ omnes alias superat, cum reliqui ex plenitudine ejus accepisse dicantur.

Quæ autem fuerit illa plenitudo gratiæ, non omnes eodem modo exponunt; nam Cyrillus & Origenes supra ad plenitudinem divinitatis, quæ in carne apparuit per mira opera, & facta divinitatis, hoc referte videntur, a quo sensu non multum distat Athanasius in Epist. de Synodo Arimin. non longe a fine, & lib. de humana natura suscepta prope a principio; Chrysostomus etiam dicta homil. 11. hanc plenitudinem refert ad opera gratiæ, tam miraculorum, quam passionis, mortis, & aliarum virtutum, quæ operatus est. Augustinus vero 13. de Civit. cap. 19. hanc plenitudinem gratiæ refert ad ipsam unionem, tractatu autem 3. in Joan. dicit, ipsam redemptionem, & mortem Christi esse gratiam & veritatem nobis promissam, seu potius effectum ejus, seu gratiam, quæ nobis communicatur, esse illam, qua plenus dicitur Christus, quia illam nobis promeruit, & in se continet, quæ



quæ omnia vera sunt, & in plenitudine gratiæ Christi continentur: non est tamen dubium, quin in hac etiam plenitudine contineatur summa abundantia, & perfectio gratiæ habitualis, quæ illi data est ratione unionis, quomodo dixit August. 15. de Trinit. c. 26. Christum dictum esse plenum gratia, quia plenus erat Spiritu sancto; & ad hunc modum dicere videtur tract. 3. in Joan. *Ille dedit legem, qui dedit gratiam, sed legem per servum misit, cum gratia ipse venit*; quod etiam tractat lib. 3. contra Maxi. c. 16. & Damasc. lib. 3. de Fid. c. 22. *Ditata est, inquit, illa humanitas propter unionem ad Verbum omni sapientia, & gratia*; & Orig. homil. 2. ex variis ad finem, dicit hanc plenitudinem, de plenitudine deificationis, & sanctificationis esse intelligendam. Quod exponens, subdit: *Deificationis dico, quia homo & Deus in unitatem unius substantiæ adunati sunt: sanctificationis vero, quia non solum de Spiritu sancto conceptus, verum etiam plenitudine donationum ejus repletus est: ac veluti in summitatem mystici Ecclesiæ candelabri, gratiarum lampades in ipso, & de ipso fulgere*. Quod etiam confirmari potest ex illo ad Colos. 1. *In eo complacuit omnem plenitudinem inhabitare, ut sit ipse in omnibus primatum tenens*. Si ergo omnis plenitudo in Christo inhabitavit; ergo & gratiæ plenitudo, quæ post gratiam unionis dignissima est, cuique plenitudo gratiæ respondet: & hoc confirmant etiam illa testimonia, in quibus dicitur plenus Spiritu sancto: ut Luc. 4. *Et singulariter dilectus a Patre. In quo sibi bene complacuit*, Matth. 3. unde Joan. 1. singulariter dicitur de scendisse, & mansisse super eum Spiritus sanctus: quæ omnia non solum de sanctificatione per gratiam unionis, sed etiam per habitalem a sanctis exponuntur, & satis indicant singularem, & propriam plenitudinem gratiæ Christi, quam etiam cōfirmant adducta in principio hujus sectionis, & latius supra disp. 18. & fere omnibus sequentibus. Neque in hoc difficultas alicujus momenti occurrit, quæ inter explicandos articulos D. Thom. soluta non sit.

Solum est advertendum, quod D. Thom. art. 10. notavit, interdum in Scriptura sacra tribui plenitudinem Spiritus sancti, seu gratiæ aliis Sanctis, ut Beatæ Virgini, Jo: Baptista, &c. non tamen eodem sensu; aliquando enim hoc genere locutionis non significatur in Scriptura certa aliqua dignitas, vel excellentia gratiæ, sed solum confusæ, seu in genere magna abundantia, seu perfectio sanctitatis, quæ non solum in magna intensione consistere potest, sed etiam in quadam extensione ad omnia opera virtutis, & ad omnes facultates hominis, ut dicitur aliquis plenus gratia & virtute, quando in omnibus sermonibus & actibus ejus singularis virtus apparet, & in omnibus suis potentiis est ita moderatus, ut gratia Spiritus sancti in omnibus perfectus videatur. Quomodo intelligi potest illud ad Ephes. 3. *Ut impleamini in omnem plenitudinem Dei*, &c. & illud Luc. 1. ubi dicitur, *Repleta Spiritu sancto Elisabeth*. Sicut in eodem sensu interdum dicitur aliquis repletus ira, aut malitia; ut Luc. 4. *Repleti sunt omnes in Synagoga ira hæc audientes*, & c. 6. *Repleti sunt in sapientia*, ad Rom. 1. *Repleti omni iniquitate*, &c. & in communi, seu vulgari sermone hoc modo loquendi utimur ad significandum aliquem re aliqua vel perfectione abundare.

Aliquando vero plenitudo significat eximiam aliquam perfectionem gratiæ, quæ adæquet statum, vel munus, aut dignitatem fuscipientis, plenū enim proprie dicitur, quod tantum habet, quantum capere potest; & ad hunc modum plenus gratia dicitur, qui habet eximiam aliquam gratiā proportionatam dignitati, vel muneris, in quo a Deo constitutus est: & hæc plenitudo, cum respectiva sit, potest esse multiplex, & major, vel minor juxta diversitatem statuum, vel dignitatum, cum quibus fit comparatio, & hoc modo alia est plenitudo B. Virginis, alia Jo: Baptista, &c. omnis vero hæc plenitudo est respectiva, & secundū quid; Christi vero plenitudo est plenitudo simpliciter, quia licet gratiæ Christi plenitudo etiam fuerit proportionata dignitati personæ, & unionis; tamen quia illa dignitas personæ erat suprema omnium, & eminenter omnes alias continens, ideo talis plenitudo respectiva in plenitudinē simpliciter redundavit; ut bene notavit Orig. hom. 29. in Luc. & Cajet. hic art. 10. ad 1. Et hinc etiam factum est, ut hæc plenitudo sit quanta esse potest, non tantum ex parte objecti, sed etiam ex parte formæ, quia scilicet in Christo pervenit gratia ad totam intensiōem, & perfectionem, quam secundum se habere potest; saltem secundum se-

Suarez Tom. XVI.

gem ordinariam, & hoc modo dixit Chrysost. hom. 7. ad Col. Christum habere plenitudinem, quia habet totum. Plura de hac diversitate & varietate plenitudinis gratiæ legi possunt in Alexand. Alen. 3. p. q. 12. memb. 3. Palud. in 3. d. 13. q. 1. art. 2. Durand. q. 2. Gab. q. 1. art. 3. dub. 1.

His ergo existentibus certis, unum est, quod inter Scholasticos controvertitur, an scilicet hæc Christi gratia de potentia saltem absoluta potuerit esse intensior, & sermo est de qualitate ipsa, & de esse physico, & reali ejus, in quo diximus esse finitam; nam de alia ratione, sub qua infinita est, jam supra satis diximus. In qua re variæ sunt sententiae. Prima est, non posse gratiam Christi esse intensiorem, neque in anima Christi, neque in ulla alia creatura. Ita tenet Scot. in 3. d. 13. §. ad 1. q. Durand. q. 1. Marf. q. 10. art. 1. in 3. p. illius concl. 1. Cajet. hic art. 9. 10. & 12. & infr. q. 10. art. 4. & 2. 2. q. 24. art. 7. & inclinatur Palud. in 3. d. 13. q. 1. idem Durand. in 1. d. 17. q. 9. ubi Carthus. q. 8. in charitate ait dari summum gradum possibilem, citatque Henr. Ægid. & Palud. imo ait vix aliquem, præter D. Thom. fensisse contrarium. Pro hac vero sententia nullum fere invenio fundamentum, quod negotium possit facessere. Solum enim fundari potest in hoc, quod gratia cū sit forma creata intrinsece limitata est; ergo tantum est capax finitæ perfectionis; ergo si ad illam perveniat, nō potest ultra progredi. Et cōfirmari potest, quia gratia data est Christo ratione unionis; ergo dari debuit summa, quæ esse potest, cum dignitas unionis sit summa, propter quā dari potest.

Secunda sententia est, illam gratiam non posse esse majorem in anima Christi, non quia gratia ipsa de se ita sit terminata, ut non possit ulla ratione crescere, seu esse major, sed quia capacitas animæ ita est finita, ut non possit nisi tantam gratiam suscipere; unde in subiecto capaci, v. g. in Angelo, non repugnaret esse majorem. Ita opinatur Bonav. in 1. d. 17. 2. p. d. art. 1. q. 4. & Richard. ibid. art. 2. q. 4. quamvis hi duo auctores in 3. aliter de anima Christi sentiant, ut statim dicam. Tenet vero eam opinionem Durand. in 3. d. 13. q. 1. Carthus. q. 2. Dried. tract. 2. de Captivitat. & redempt. gen. hum. c. 2. p. 6. sent. 8. Sed si considerentur, quæ præced. sect. dicta sunt, parum probabilis est hæc sententia; tum quia capacitas hæc gratiæ æqualis est in omni creatura intellectuali, loquendo de capacitate remota, quæ est in ipsa natura secundum se, quia est capacitas obedientialis, quæ non mensuratur ex perfectione naturali subiecti, sed de se indifferens est ad recipiendum omne id, quod non repugnat; & ideo licet hæc capacitas sit finita, quatenus infinitam formam suscipere non potest, ut supra diximus circa art. 1. d. Thom. tamen quodammodo etiam est infinita obedientialis; ut loquitur idem D. Thom. q. 29. de verit. art. 3. ad 3. & cum eo Capreol. in 3. d. 13. ad 3. Aureoli; tum etiam, quia, ut supra diximus, & colligitur ex Scoto loco supra citato, potentia capax alicujus formæ sibi non contrariæ, sed potius accommodatæ, & perficientis ipsam, de se capax est ad recipiendam talem formam in quocumque gradu, & saltem ex parte ejus non est repugnantia, neque ulla ratio, aut fundamentum ejus assignari potest.

Minus vero probabile est, quod Bonav. & Richard. affirmant in 3. d. 13. ille in 2. p. d. art. 1. q. 2. hic vero q. 2. ad 1. scilicet quamcumque puram creaturam, sive Angelū, sive rationalem animam esse capacem gratiæ usque ad certum gradum, ita ut de potentia absoluta non possit recipere majorem, & nihilominus animam Christi unitam Verbo factam esse capaciore intensioris gratiæ, quam esse possit in aliqua pura creatura, & in ipsamet anima Christi, si non esset unita Verbo; hoc enim & sine fundamento dictum est, & nullo modo intelligi potest, nam licet congruentia ad recipiendam majorem gratiam possit esse major ratione unionis, sicut & capacitas proxima, quæ est per actum vel dispositionem propriam augeri possit (ut loquitur D. Thom. 2. 2. q. 24. art. 7.), tamen capacitas remota, & quasi fundamentalis, quæ est in natura ipsa, nec crescere potest, nec mutari, quia hæc nihil aliud est quam entitas naturæ, cui talis perfectio non repugnat. Et deinde multo minus intelligi potest, quod per unionē augeatur, cum Verbum ipsum, nec possit concurrere per modum potentiæ passivæ ad suscipiendam gratiam, nec aliquo modo immutet ipsam animam secundum entitatem naturalem ejus, ut capaciore illam faciat, & gratia hæc non aliter inhæreat illi animæ, quam si per se esset separata. Adde, quod si illa anima capacior fieret



per unionem, sicut unio est infinita, ita illa capacitas infinite augetur; ergo vel haberet illa anima infinitam gratiam, vel certe posset in illa gratia in infinitum augeri, quod isti auctores non concedunt.

§ Sensus.

Tertia sententia referri hoc loco potest, quæ affirmat, habitum gratiæ aut charitatis potuisse esse intensiorem, quam sit in anima Christi, non vero actum, quia hic habet terminum in unaquaque creatura rationali juxta capacitatem ejus, unde fit, ut ipse habitus quatenus proportionatus actui augeri non possit. Ita Almain. & Petr. de Alliaco in 3. d. 13. q. 1. quod non displicet Gabrieli, ibidem art. 1. Fundamentum horum est, quia ad recipiendam gratiam anima tantum passive concurret; & ideo potest recipere quantum voluerit Deus facere; at vero ad actum concurret active, conatus autem ad efficiendum in potentia finita habet terminum. Sed hoc fundamentum supra se habet. præcedit. rejectum est, quia vis activa istarum potentiarum ad supernaturales actus non mensuratur ex naturali perfectione subjecti, sed ex virtute infusa, & motione divina, per quam potentia elevatur, ut supra naturales vires operetur; ergo efficientia istorum actuum non terminatur per naturalem conatum potentia: aliis omnino non posset naturalis potentia efficere hujusmodi actus, quia conatus naturalis secundum se ad illos non extenditur. Sicut ergo per habitum; & auxilium elevatur potentia ad substantiam talium actuum efficiendam, ita per habitum intensiorem, & majus auxilium, poterit efficere intensiorem actum, & si non datur terminus in intensione habitus, & augmento auxilii, nec dabitur in elevando potentiam non solum ad recipiendum, sed etiam ad agendum.

§ Sensus.

Quarta sententia est, gratiam animæ Christi esse summam intensam, quæ ex natura gratiæ esse potest, atque adeo augeri non posse intra limites suæ naturæ, seu in statu sibi naturali, quamquam Deus per extrinsecam potentiam possit illam augere. Hæc tribuitur D. Thom. hic art. 12. & Capreol. in 3. d. 13. ad argumentum contra 2. conclus. sed Capreol. nihil aliud dicit, quam D. Thom. Divus autem Thom. nunquam assignavit terminum ex natura ipsius gratiæ, sed ex ordine divinæ sapientiæ, ut in superioribus explicatum reliquimus. Nec pro hac sententia probabile video fundamentum, nam si hæc gratia potest esse major, & non habet terminum in ordine ad absolutam potentiam Dei, cur dicitur habere illum ex natura sua? cum neque ex parte subjecti, neque ex parte objecti (si de charitate loquamur), neque ex aliquo alio capite possit hic terminus assignari. Primum patet, quia gratia nulli subjecto creato est connaturalis, unde neque alicui forme seu naturæ finitæ commensuratur; ergo ex parte subjecti non habet terminum. Secundum patet, quia objectum est omnino infinitum, quod non adæquat charitas finita in quocumque gradu existat; ergo neque ex parte habet terminum: aliunde vero hæc gratia est participatio quedam divinæ naturæ, quodammodo ejusdem ordinis, & quantumvis crescat, & illam magis ac magis participet, nunquam tamen attingit terminum possibilem illius participationis; ergo sicut ipsa gratiæ natura est, ut sit supernaturalis infinitæ naturæ participatio, ita tota illa latitudo est illi connaturalis; ergo. Dicendum est igitur, quamquam Christi gratia fuerit tam intensa, ut juxta ordinem divinæ sapientiæ nulla intensior esse potuerit, de potentia tamen Dei absoluta potuisse fieri intensiorem, tam in ipsa anima Christi, quam in Angelo, vel in alia anima. Ita est intelligenda sententia D. Thom. in his articulis, ut insinuat ab ipso art. 12. in corpore, & ad 2. & infra q. 10. art. 4. ad 3. & colligitur etiam ex 2.2. q. 24. art. 7. ubi docet charitatem quantum est de se posse in infinitum augeri. Ita est etiam intelligendus Magist. in 3. d. 13. ubi idem sentit Gabr. artic. 1. notab. 3. & art. 2. in princip. & Capreol. art. 3. ad 3. argum. Aureoli contra 2. concl. & in 1. d. 17. q. 2. concl. 2. & ibidem Gabr. q. 8. concl. 3. & 4. & Greg. q. 6. concl. 3. & Ocham q. 8. concl. 1. & in 3. q. 7.

Verasent.

Fundamentum hujus conclusionis jam indicatum est, & explicatur breviter, quia hujusmodi augmentum in infinitum non repugnat gratiæ, quia solo quod forma accidentaliter est essentialiter finita, quia non omnis progressus in infinitum repugnat formæ finitæ, ut patet in quantitate, quæ in infinitum augeri potest, neque enim in augmento intensificationis est specialis aliqua repugnantia, quando alioquin forma intensibilis est, quia neque per ta-

lem intensificationem mutatur species, aut essentia finita, neque forma ipsa in re habet aliquando infinitam perfectionem, sed semper finitam. Rursus, neque hoc augmentum repugnat gratiæ, quatenus talis forma est, quin potius ex hac parte habet omnia principia accommodata huic augmento, quia est participatio infinitæ naturæ, quæ solum ab infinito agente, tanquam a principali causa communicari potest, & per se, vel facultates suas in infinitum objectum, prout in se est, tendit, & illi nunquam adæquat; ergo. Et confirmatur, quia visio Dei finita semper augeri potest, ut infra dicitur; gratia vero est quedam forma, cui est connaturalis illa visio, propter quod dici solet, gratiam esse acceptionem ad gloriam; potest ergo ipsa gratia in infinitum crescere, sicut & ipsa gloria. Confirmatur secundo, quia nulla potest assignari ratio, propter quam repugnet, hominem habentem hujusmodi gratiam quantumvis perfectam mereri augmentum illius & beatitudinis. Dices. Eodem argumento probaretur potuisse Christum mereri augmentum suæ gratiæ, & gloriæ. Respondetur. De absoluta potentia concedo, nec videtur posse in hoc dubitari, quia opera ejus dignissima erant, & poterant ad hunc effectum ordinari, tamen de facto & secundum legem ordinariam non fuit hoc expediens, quia secundum ordinem divinæ sapientiæ conveniens fuit definiri aliquem gradum gratiæ & gloriæ, quam illa anima perpetuo haberet, quia non decuit, ut esset in perpetuo motu, vel augmento, hoc enim est præter statum beatitudinis connaturalem; debuit ergo definiri aliqua certa intensio, seu perfectio, in qua perpetuo quiesceret, quæ cum ex natura rei definita non sit, ut diximus, & infinita simpliciter esse non possit, ut etiam dictum est, debuit per divinam sapientiam definiri: fuit autem multo convenientius, ut totam illam perfectionem gratiæ, quam perpetuo habitura erat, simul a principio haberet consummatam & perfectam. Ad fundamenta omnium opinionum, partim inter referendum ipsas opiniones, partim confirmando nostram sententiam satis responsum est.

Objeccio.  
Respon.

Sed quæres primo, quanta sit hæc intensio gratiæ Christi, quantumque excesserit aliorum hominum vel Angelorum gratias. Respondeo, hoc minime posse constare: verisimile tamen esse, tantam esse hanc unicam gratiam animæ Christi, ut omnes alias in se complectatur, & excedat, ita ut si concipiamus ex omnibus aliorum hominum, & Angelorum gratiis inter se conjunctis unam confurgere habentem omnes illos gradus intensificationis, intensio gratiæ Christi totam illam vel æquat, vel superat. Ratio est, quia si dignitas animæ Christi Verbo unitæ secundum se consideretur, digna erat summæ gratiæ, si esset possibilis; quia vero hæc impossibilis est, definita est per divinam sapientiam summam quædam gratia, quæ maxime esset consentanea dignitati, & muneribus Christi; tota vero illa intensio optima ratione convenit Christo tum propter dignitatem personalem; tum quia est universalis fons gratiæ, in quo tota debuit congregari, quæ in alios erat diffundenda; ergo credibile est ita factum esse, quia juxta regulam August. lib. 3. de liber. arbitr. cap. 5. id, quod vera ratione melius esse occurrerit, id credendum est fecisse Deum; & ideo Bernard. serm. de Nativitate. Mariæ dicit Christum fuisse plenum ut fontem, Mariam ut aquæ ductum, alios ut rivulos; & ad hoc solet accommodari illud Psalm. 132. *Sicut unguentum in capite, quod descendit in barbam, barbam Aaron, quod descendit in oram vestimenti ejus*; hoc enim unguentum gratiam significare satis in superioribus ostensum est. Unde multa ex testimoniis adductis hoc confirmant, præcipue illud. *Vidimus gloriam ejus, gloriam quasi unigeniti a Patre*; & illud ad Colos. 2. *In ipso habitat omnis plenitudo divinitatis corporaliter*, id est, vere, ut Theodor. & Ansel. exponunt. De quo loco videri etiam potest August. ep. 57. Hinc Bonav. dist. 3. d. 13. q. 2. ait, gratiam Christi incomparabiliter excedere gratias alias aliorum. Altissiod. vero lib. 3. summ. titul. 1. cap. 5. ait excedere super omnem proportionem. De hac vero redibit latior sermo, cum sequente tomo similem quæstionem de gratia Virginis disputabimus.

Objeccio.

Respon.

Sed quæres secundo, an quod dictum est de intensione gratiæ, intelligendum etiam sit de donis & virtutibus, quæ illam comitantur. Respondetur idem omnino esse de illis sentiendum, est enim eadem ratio de illis omnibus, cum sint ejusdem ordinis, & gratiam ipsam comitentur quodammodo ut proprietates, vel facultates illi propor-

Respon.



proportionata, unde cum in Christo sint omnia hæc dona supernaturalia in summa proportionem, sicut gratia est summa; ita & charitas, & reliquæ virtutes omnes.

## Q U Æ S T I O VIII.

De gratia Christi, secundum quod est caput Ecclesiæ, in octo articulos divisa.

**D**Einde considerandum est de gratia Christi, secundum quod est caput Ecclesiæ. Et circa hoc queruntur octo.

Primo, utrum Christus sit caput Ecclesiæ.

Secundo, utrum sit caput hominum, quantum ad corpora: vel solum quantum ad animas.

Tertio, utrum sit caput omnium hominum.

Quarto, utrum sit caput Angelorum.

Quinto, utrum gratia Christi, secundum quam est caput Ecclesiæ, sit eadem cum gratia habituali ejus secundum quod est quidam homo singularis.

Sexto, utrum esse caput Ecclesiæ, sit proprium Christo.

Septimo, utrum diabolus sit caput omnium malorum.

Octavo, utrum Antichristus etiam possit dici caput omnium malorum.

**D**isputavit D. Thom. de gratia Christi, prout est formalis perfectio ejus, nunc de illa tractat, prout est principium gratificandi alios; & quoniam hæc efficacia convenit Christo quatenus est caput Ecclesiæ, ideo duo D. Thom. inquit in hac questione. Primum est, an hæc dignitas capitis conveniat Christo, & quoniam caput dicit respectum ad membra, simul inquit, quorum sit caput. Secundum est, quæ sit gratia, per quam influit, seu operatur ut caput, hæc enim proprie gratia capitis dicitur.

## ARTICULUS I.

Utum Christus sit caput Ecclesiæ.

**A**d primum sic proceditur. Videtur, quod Christo secundum quod est homo, non competat esse caput Ecclesiæ. Caput enim influit sensum, & motum in membra. Sensus autem, & motus spiritualis, qui est per gratiam, non influitur nobis a Christo homine: quia sicut August. dicit in libr. de Trinit. \* nec etiam Christus, secundum quod est homo, dat Spiritum sanctum, sed solum in quantum est Deus. Ergo ei, secundum quod est homo, non competit esse caput Ecclesiæ.

2. Præterea. Capitis non videtur esse aliud caput. Sed Christi, secundum quod est homo, est caput Deus: secundum illud primæ ad Corint. 11. Caput Christi Deus. Ergo ipse Christus non est caput.

3. Præterea. Caput in homine est quoddam particulare membrum influentiam recipiens a corde. Sed Christus est universale principium totius Ecclesiæ. Ergo non est Ecclesiæ caput.

Sed contra est, quod dicitur Ephes. 1. Ipsum dedit caput supra omnem Ecclesiam.

b Respondeo dicendum, quod sicut tota Ecclesia dicitur unum corpus mysticum per similitudinem ad naturale corpus hominis, quod secundum diversa membra habet diversos actus (ut Apostolus docet Roman. 12. & 1. ad Corint. 12.) ita Christus dicitur caput Ecclesiæ, secundum similitudinem humani capitis. In quo tria possumus considerare; scilicet, ordinem, perfectionem, & virtutem. Ordinem quidem, quia caput est prima pars hominis, incipiendo a superiori. Et inde est, quod omne principium consuevit vocari caput, secundum illud Ezech. 16. Ad omne caput via edificasti signum prostitutionis tuæ. Perfectionem autem, quia in capite vigent omnes sensus & interiores & exteriores, cum in cæteris membris sit solus tactus: & inde est, quod dicitur Isai. 9. Senex & longævus ipse est caput. Virtutem vero, quia virtus & motus cæterorum membrorum, & gubernatio eorum in suis actibus, est a capite propter vim sensitivam & motivam ibi dominantem: unde & rector dicitur caput populi, secundum illud 1. Reg. 15. Nonne cum parvulus esses in oculis tuis, caput in tribubus Israel factus es? Hæc autem tria competunt Christo spiritualiter. Primo enim secundum propinquitatem ad Deum gratia ejus altior est, & prior, et si non tempore: quia omnes alii receperunt gratiam per respectum ad gratiam ipsius: secundum illud Rom. 8. Quos prædestinavit conformes fieri imaginis Filii.

Suarez Tom. XVI.

lii sui, ut sit ipse primogenitus in multis fratribus. Secundo vero perfectionem habet quantum ad plenitudinem omnium gratiarum: secundum illud Joan. 1. Vidimus eum plenum gratiæ & veritatis: ut etiam supra ostensum est. Tertio virtutem habet influendi gratiam in omnia membra Ecclesiæ: secundum illud Joan. 1. De plenitudine ejus nos omnes accepimus. Et sic patet, quod Christus convenienter dicitur Ecclesiæ caput.

c Ad primum ergo dicendum, quod dare gratiam aut Spiritum sanctum convenit Christo, secundum quod Deus, auctoritative: sed instrumentaliter convenit etiam ei, secundum quod homo, in quantum scilicet ejus humanitas instrumentum fuit divinitatis ejus. Et ita actiones ipsius ex virtute divinitatis fuerunt salutiferae, ut pote gratiam in nobis causantes, & per meritum & per efficientiam quandam. August. \* autem negat Christum, secundum quod homo est, dare Spiritum sanctum per auctoritatem: instrumentaliter autem, sive ministerialiter etiam alii Sancti dicuntur dare Spiritum sanctum: secundum illud Galat. 3. Qui tribuit vobis Spiritum, &c.

Ad secundum dicendum, quod in metaphoricis locutionibus non oportet attendi similitudinem quantum ad omnia: sic enim non esset similitudo, sed rei veritas. Capitis igitur naturalis non est caput aliud, quia corpus humanum non est pars alterius corporis: sed corpus similitudinarie dictum, id est, aliqua multitudo ordinata, est pars alterius multitudinis: sicut multitudo domestica est pars multitudinis civilis: & ideo pater familias, qui est caput multitudinis domesticæ, habet supra se caput, rectorem civitatis. Et per hunc modum nihil prohibet, caput Christi esse Deum: cum tamen ipse Christus sit caput Ecclesiæ.

Ad tertium dicendum, quod caput habet manifestam eminentiam respectu cæterorum exteriorum membrorum: sed cor habet quandam influentiam occultam. Et ideo cordi comparatur Spiritus sanctus, qui invisibiliter Ecclesiam vivificat, & unit, capiti autem comparatur ipse Christus secundum visibilem naturam, secundum quam homo hominibus præfertur.

## COMMENTARIUS.

**Q**uoniam hæc capitis appellatio metaphorica est, non potest proprie de ea disputari, nisi prius constet, quid per illam metaphoram significetur; & ideo merito D. Thom. in hoc articulo ad tres condiciones reduxit rationem capitis, in quibus hoc caput mysticum naturale caput imitatur, scilicet ut sit aliquo modo primum in ordine, & excedat perfectione, & in alia membra influat: quærere ergo, an Christus sit caput, nihil aliud est quam quærere, an habeat has tres condiciones, & præcipua difficultas est de tertia; tum quia illa est, quæ præcipue attenditur in capite præsertim mystico seu morali; tum etiam, quia de aliis duabus conditionibus satis ex superioribus constat, eas in Christo reperiri. Quid vero nomine Ecclesiæ in hoc titulo D. Thom. intelligat, non satis manifestum est, an scilicet intelligat solam Ecclesiam militantem in hominibus, an vero simpliciter totam Ecclesiam, ut ex Angelis & hominibus constat, & partim militat, partim triumphat; doctrina enim articuli in utroque sensu vera est, & ad utrumque accommodari posse videtur: si tamen D. Thom. attente legatur in hoc, & sequentibus articulis, non obscure intelligi poterit, eum de Ecclesia in posteriori sensu fuisse locutum; ex hoc enim principio hic stabilito, scilicet, quod Christus est caput Ecclesiæ, infert in sequentibus esse caput hominum & Angelorum, ut expresse videri potest in art. 4. & hoc modo loquitur Paulus de Ecclesia loco hic citato in argumento. Sed contra est, ad Ephes. 1. cum inquit. Et ipsum dedit caput supra omnem Ecclesiam, præmiserat enim Christum esse constitutum supra omnes principatus, &c.

b Explicato titulo, responsio est facilis, Christum scilicet esse caput totius Ecclesiæ, cujus assertionis probatio in articulo clara est. Solum in prima conditione advertere oportet, quod D. Thom. ait gratiam Christi esse priorem non tempore, sed secundum propinquitatem ad Deum, per quam propinquitatem non videtur intelligere specialem conjunctionem per gratiam unionis, sed prioritatem in ordine intentionis, quia scilicet gratia Christi in mente, & intentione divina fuit prior; hoc enim probat ratio, quam statim subdit, quia omnes alii nimirum Angeli & homines (juxta expositionem datam) receperunt gratiam per respectum ad gratiam ipsius.

q. præced. art. 9.

Loco cit. in argum.

Quid D. Tho. nomine Ecclesiæ intelligat in hoc art.

56.  
Infr. q. 48.  
art. 1. cor.  
q. 49. art. 1.  
cor. & 30.  
dist. 3. q. 2.  
art. & ver.  
q. 29. art. 3.  
c. fin. & art.  
4. & art. 5.  
co. & op. 3.  
c. 23. &  
epul. 60. g.  
colu. 9. &  
cor. 11. li.  
1. eel. 2. &  
Ephes. 1. f.  
\* Lib. 1. de  
Trinitat.  
ar. 12. ante  
med. to. 3.



ipſius. Unde fit etiam tertiam conditionem, ſcilicet, quod habeat virtutem influendi in omnia membra Eccleſiæ, eodem modo eſſe intelligendam, quamquam teſtimonia, quibus D. Tho. utitur, de ſolis hominibus ſufficienter exponi poſſe videantur, ſcilicet ad Rom. 8. *Quos præſciuit & prædeſtinavit*, & Joan. 1. *De plenitudine ejus omnes accepimus*. Sed primum teſtimonium D. Thom. intelligere videtur de omnibus prædeſtinatis, in poſteriori vero intelligi poteſt, Joannem loqui non ut hominem tantum, ſed ut membrum Eccleſiæ, quæ tota ex plenitudine Chriſti ſanctificatur.

c De ſolutione ad 1. dicendum eſt late infra q. 13. & q. 62. quomodo ſcilicet Chriſtus vel per humanitatem ſuam, vel per ſacramenta gratiam influat.

## ARTICULUS II.

*Utrum Chriſtus ſit caput hominum, quantum ad corpora, vel ſolum quantum ad animas.*

**A**d ſecundum ſic proceditur. Videtur, quod Chriſtus non ſit caput hominum, quod ad corpora: Chriſtus enim dicitur caput Eccleſiæ, in quantum influit ſpiritualem ſenſum & motum gratia in Eccleſiam. Sed huius ſpiritalis ſenſus & motus capax non eſt corpus; ergo Chriſtus non eſt caput hominum ſecundum corpora.

2 Præterea, ſecundum corpora communicamus cum brutis. Si ergo Chriſtus eſſet caput hominum quantum ad corpora, ſequeretur, quod etiam eſſet caput brutorum animalium: quod eſt inconueniens.

3 Præterea, Chriſtus corpus ſuum ab aliis hominibus traxit: ut patet Matth. 1. & Luc. 3. Sed caput eſt primum inter cætera membra, ut dictum eſt\*: ergo Chriſtus non eſt caput Eccleſiæ quantum ad corpora.

Sed contra eſt, quod dicitur Philip. 3. Reformavit corpus humilitatis noſtræ, configuratū corpori claritatis ſuæ.

b Reſpondeo dicendum, quod corpus humanum habet naturalem ordinem ad animam rationalem, quæ eſt propria forma ejus & motor. Et in quantum quidem eſt forma ejus, recipit ab anima vitam & cæteras proprietates convenientes humano corpori ſecundum ſuam ſpeciem; in quantum vero anima eſt motor corporis, corpus inſtrumentaliter ſervit animæ. Sic ergo dicendum eſt, quod habet vim influendi humanitas Chriſti, in quantum eſt conjuncta Dei Verbo, cui corpus unitur per animam, ut ſupra dictum eſt. \* Unde tota Chriſti humanitas, ſecundum ſcilicet animam & corpus influit in homines, & quantum ad animam, & quantum ad corpus: ſed principaliter quantum ad animam, ſecundario quantum ad corpus. Uno modo in quantum membra corporis exhibentur arma juſtiæ in anima exiſtenti per Chriſtum, ut Apoſtolus dicit Rom. 6. Alio modo in quantum vita gloriæ ab anima derivatur ad corpus, ſecundum illud Rom. 8. Qui ſuſcitavit Chriſtum Jeſum a mortuis, vivificabit & mortalia corpora veſtra, propter inhabitantem Spiritum ejus in vobis.

Ad primum ergo dicendum, quod ſenſus ſpiritalis gratiæ non pervenit quidem ad corpus primo & principaliter: ſed ſecundario & inſtrumentaliter, ut dictum eſt.\*

Ad ſecundum, dicendum, quod corpus animalis bruti nullam habitudinem habet ad animam rationalem: ſicut habet corpus humanum. Et ideo non eſt ſimile.

Ad tertium dicendum, quod licet Chriſtus traxerit materiam corporis ab aliis hominibus: vitam tamen immortalẽ corporis omnes homines trahunt ab ipſo, ſecundum illud 1. ad Corint. 15. Sicut in Adam omnes moriuntur, ita & in Chriſto omnes vivificabuntur.

## COMMENTARIUS.

**S**enſus hujus quæſtionis juxta dicta in præcedenti articulo eſt, an Chriſtus ut auctor gratiæ aliquid influat in corpora noſtra.

b Et reſpondet affirmando; nam quamdiu hic vivimus influit virtutem, & auxilium, ut corpora noſtra juſtiæ organa efficiantur, & ut non ſolum cor, ſed etiam caro in ipſum exultet, ut ſic facilius, & virtutem operetur, & paſſiones, vel crucem ſuſtineat; denique omnia bona corporis, quæ ſunt media utilia ad ſalutem æternam, propter Chriſtum dantur, & ad hunc influxum pertinent, in futura autem vita influet corporum reſurrectionem, & vitam immortalem, & alias dotes corporis glorioſi; eſt ergo Chriſtus caput etiã corporum, quamvis ſecundario, quia bona gratiæ, quibus corpus eſt capax, ſecundaria ſunt, &

minus principalia in illo ordine. Unde etiam fit Chriſtus ſecundum corpus ſuum habere rationem capitis, quia per corpus ſuum nos redemit, & ſanguine ſuo nos lavit, & in ſtatu gloriæ per corpus ſuum beatificabit corpora noſtra, & per modum efficientis, & per modum objecti: non eſt tamen neceſſe, ut ſemper per actionem corporis influat in corpora, & per actionem animæ in animas, nam etiam per actionem corporis poteſt influere in animam, & per actum animæ in corpus; quod quidem de influxu morali manifeſtum eſt, nam per paſſionem corporis ſatiſfecit & liberavit animas a pœna, & per actus animæ meruit ipſis corporibus gloriã. De influxu vero phyſico dicitur infra q. 13. & hæc videntur ſufficere ad hujus articuli expoſitionem.

## ARTICULUS III.

*Utrum Chriſtus ſit caput omnium hominum.*

**A**d tertium ſic proceditur. Videtur, quod Chriſtus non ſit caput omnium hominum, caput enim non habet relationem, niſi ad membra ſui corporis. Infideles autem nullo modo ſunt membra Eccleſiæ, quæ eſt corpus Chriſti, ut dicitur Ephes. 1. Ergo Chriſtus non eſt caput omnium hominum.

2 Præterea. Apoſtolus dicit ad Ephes. 5. Quod Chriſtus tradidit ſemetipſum pro Eccleſiã, ut ipſe exhiberet ſibi glorioſam Eccleſiam, non habentem maculam, aut rugam, aut aliquid hujusmodi. Sed multi ſunt etiam fideles, in quibus invenitur macula, aut ruga peccati. Ergo nec etiam omnium fidelium Chriſtus eſt caput.

3 Præterea. Sacramenta veteris legis comparantur ad Chriſtum, ſicut umbra ad corpus: ut dicitur Colof. 2. Sed Patres veteris Teſtamenti ſacramentis illis ſuo tempore ſerviebant, ſecundum illud Hebr. 8. Qui exemplari & umbra deſerviunt celeſtium. Non ergo pertinebant ad corpus Chriſti, & ita Chriſtus non eſt caput omnium hominum.

Sed contra eſt, quod dicitur 1. Timot. 4. Eſt Salvator omnium hominum, & maxime fidelium. Et 1. Joan. 2. Ipſe eſt propitiatio pro peccatis noſtris, non pro noſtris tantum, ſed etiam pro totius mundi. Salvare autem homines, & propitiationem eſſe pro peccatis eorum, competit Chriſto ſecundum, quod eſt caput. Ergo Chriſtus eſt caput omnium hominum.

a Reſpondeo dicendum, quod hæc eſt differentiã inter corpus hominis naturale, & corpus Eccleſiæ myſticum, quod membra corporis naturalis ſunt omnia ſimul, membra autem corporis myſtici non ſunt omnia ſimul; neque quantum ad eſſe naturæ, quia corpus Eccleſiæ conſtituitur ex hominibus, qui fuerunt a principio mundi uſque ad finem ipſius. Neque etiam quantum ad eſſe gratiæ: quia eorum etiam, qui ſunt in uno tempore, quidam gratia carent, poſtmodum habituri, aliis eam jam habentibus. Sic igitur membra corporis myſtici accipiuntur, non ſolum ſecundum quod ſunt in actu, ſed etiam ſecundum, quod ſunt in potentia. Quædam tamen ſunt in potentia, quæ nunquam reducuntur ad actum. Quædam vero ſunt, quæ quandoque reducuntur ad actum. Et hoc ſecundum triplicem gradum, quorum primus eſt per fidem, ſecundus per charitatem viæ, tertius per fruitionem patriæ. Sic ergo dicendum eſt, quod accipiendi generaliter ſecundum totum tempus mundi, Chriſtus eſt caput omnium hominum: ſed ſecundum diverſos gradus. Primo enim & principaliter eſt caput eorum, qui actu uniuntur ſibi per gloriã: ſecundo eorum, qui actu uniuntur ſibi per charitatem: tertio eorum, qui actu uniuntur ſibi per fidem: quarto vero eorum, qui ſibi uniuntur ſolum in potentia nondum reducta ad actum, quæ tamen eſt ad actum reducenda ſecundum divinam prædeſtinationem: quinto vero eorum, qui in potentia ſunt ſibi uniti, quæ nunquam reducetur ad actum: ſicut homines in hoc mundo viventes, qui non ſunt prædeſtinati, qui tamen ex hoc ſeculo recedentes totaliter deſinunt eſſe membra Chriſti, quia jam nec ſunt in potentia, ut Chriſto uniuntur.

Ad primum ergo dicendum, quod illi, qui ſunt infideles, etſi actu non ſint de Eccleſiã, ſunt tamen de Eccleſiã in potentia. Quæ quidem potentia in duobus fundatur. Primo quidem & principaliter in virtute Chriſti, quæ eſt ſufficiens ad ſalutem totius humani generis: ſecundario in arbitrii libertate.

Ad

57.  
3. d. 13. q. 2  
art. 2. q. 3.  
Et vide q.  
29. art. 4. 1  
Et op. 60.  
s. 3. col. 7.

Art. præc.  
ad 3. etiã.

q. 6. art. 1.

1. q. cor. art.

57.  
Infra q. 13  
art. 3. c. &  
q. 19. art. 4  
eo. & 1. &  
diff. 13. q. 2  
art. 1. q. 3  
& 3.



*Ad secundum dicendum, quod esse Ecclesiam gloriosam non habentem maculam neque rugam, est ultimus finis, ad quem perducimur per Passionem. Unde hoc erit in statu patriæ, non autem in statu viæ: in quo si dixerimus, quia peccatum non habemus, nos ipsos seducimus, ut dicitur prime Joannis primo. Sunt tamen quedam scilicet mortalia, quibus carent illi, qui sunt membra Christi per ætalem unionem charitatis. Qui vero his subduntur peccatis, non sunt membra Christi actualiter, sed potentialiter, nisi forte, imperfecte, per fidem informem: quæ unit Christo secundum quid, & non simpliciter, ut scilicet per Christum homo consequatur vitam gratiæ. Fides enim sine operibus mortua est, ut dicitur Jacob. 2. Percipiunt tamen tales a Christo quemdam actum vitæ, qui est credere: sicut si membrum mortificatum moveatur aliquantulum ab homine.*

*Ad tertium dicendum, quod Sancti Patres non insistebant sacramentis legalibus tanquam quibusdam rebus, sed sicut imaginibus & umbris futurorum. Idem autem est motus in imaginem, in quantum est imago, & in rem, ut patet per Philosophum in lib. de Memo. & remi. Et ideo antiqui Patres servando legalia sacramenta, ferebantur in Christum per fidem & dilectionem eamdem, quæ & nos in ipsum ferimur. Et ita Patres antiqui pertinebant ad idem corpus Ecclesiæ, ad quod nos pertinemus.*

## COMMENTARIUS.

**D**istinguit D. Thomas omnes homines, qui a principio mundi usque ad finem futuri sunt, in tres ordines, beatorum, viatorum, & damnatorum.

Et respondet, Christum esse caput beatorum, & viatorum omnium in quocumque statu sint, non tamen damnatorum. Cajetan. beatorum nomine comprehendit putat antiquos Patres, qui in sinu Abrahamæ exitebant. Sed melius eos intelligimus sub nomine viatorum, quia per fidem adhuc ambulabant, & temporalem penam damni, seu carentiam visionis Dei, saltem propter culpam totius naturæ sustinebant: & in eodem ordine comprehenduntur sine ullo dubio animæ purgatorii & omnes, qui in hac vita mortali vivunt, sive sint prædestinati, sive reprobi, sive iusti, sive iniusti, fideles vel infideles, omnes enim, dum hic vivunt, possunt salvari, & Christi influxum suscipere. Dices, qui fide carent, non sunt membra, sunt enim bis mortui, ut Judas dicit in sua Canonica, quia neque spirituale vitam, neque aliquem illius motum participant. Dicitur fortasse, hæc esse membra in potentia, sicut ea, quæ fidem habent, & non charitatem, sunt membra mortua actu, viva autem in potentia. Sed contra. Ergo Christus erit caput illorum in potentia, non in actu. Respondetur negando consequentiam, duo enim in capite considerari possunt; aliud est ipsum esse capitis; aliud est actualis unio membrorum ad ipsum. Christus igitur actu habet quicquid ad esse seu constitutionem capitis pertinet, & de se potens est ad influendum in omnia membra, & sine ulla sui mutatione omnibus uniri potest, si ipsa illi conjungi velint; interdum etiam habet aliquam influentiam in eos, qui tantum sunt membra in potentia, in mittendo aliquas illustrationes, seu inspirationes, ut eos paulatim ad suam fidem & amorem trahat; est enim hoc caput ita effcax, ut possit agere in membrum separatum, seu in potentia tantum, ut illud sibi tandem conjungat.

In tertio ordine constituuntur damnati, & in eo comprehenduntur, tam illi, qui propter actuale, quam qui propter solum originale peccatum a regno coelorum exclusi sunt, & horum omnium negatur Christum esse caput, quia nullum gratiæ influxum illis tribuit, neque illi sunt in statu, quo possint illum participare, quia pro illis ut in eo statu existentibus, Christus, nec sua merita, nec satisfactionem obtulit. Dices. Damnati in inferno puniuntur citra condignum; sed hoc beneficium contetur illis propter Christi merita; ergo jam sentiunt aliquem influxum a Christo. Pueri etiam, qui in solo originali mortui sunt, recipiunt aliquando (ut credibile est) aliquam Dei cognitionem & amorem, & aliquem modum felicitatis, sed hoc totum non immerito in Christum revocari potest. Respondetur, hos omnes nullum beneficium sentire aut recipere ex meritis Christi perfectum, quia meritum Christi non communicatur alicui nisi per fidem, vel saltem remote propter dispositionem aliquam ad fidem obtinendam ordinatam, quæ omnia tandem ad

Suarez Tom. XVI.

charitatem & gloriam consequendam referuntur: isti autem omnes sunt jam incapaces fidei, & aliorum supernaturalium bonorum, quæ in illa fundantur, vel per eam obtinentur: illa ergo, si quæ est, remissior pœna in damnatis, non est ex meritis Christi, sed ex quadam generali providentia, & benignitate Dei: & simili modo, si bonum aliquod conferendum est iis, qui in solo originali decedunt, illud solum erit naturalis ordinis, & ad generalem providentiam pertinebit.

Reliqua, quæ hoc loco a D. Tho. insinuantur de membris Christi & Ecclesiæ, quæ sint & per quid constituantur, non sunt hic disputanda, cum ad materiam de Ecclesiâ pertineant, de qua in 2.2.q.1. differendum est.

## ARTICULUS IV.

Utrum Christus sit caput Angelorum.

**A**d quartum sic proceditur. Videtur, quod Christus, secundum quod homo, non sit caput Angelorum. Caput enim & membra sunt unius naturæ: sed Christus, secundum quod est homo, non est conformis in natura cum Angelis, sed solum cum hominibus: qui aut dicitur Hebræor. 2. Nusquam Angelos apprehendit, sed semen Abrahamæ apprehendit. Ergo Christus, secundum quod homo, non est caput Angelorum.

2. Præterea. Illorum Christus est caput, qui pertinent ad Ecclesiam, quæ est corpus ejus, ut dicitur Ephes. 1. Sed Angeli non pertinent ad Ecclesiam: nam Ecclesiæ est congregatio fidelium: fides autem non est in Angelis: non enim ambulant per fidem, sed per speciem: alioquin peregrinarentur a Domino: secundum quod Apostolus argumentatur 2. ad Corinth. 5. Ergo Christus, secundum quod homo, non est caput Angelorum.

3. Præterea. Augustinus dicit super Joannem, \* quod sicut Verbum, quod erat in principio apud Patrem, vivificat animas: ita Verbum caro factum vivificat corpora, quibus Angeli carent. Sed Verbum caro factum est Christus secundum quod homo. Ergo Christus secundum quod homo non infundit vitam Angelis. Et ita secundum quod homo non est caput Angelorum.

Sed contra est, quod Apostolus dicit Colossens. secundo. Qui est caput omnis principatus & potestatis. Et eadem ratio est de Angelis aliorum ordinum. Est ergo Christus caput Angelorum.

a. Respondeo dicendum, quod sicut dictum est, \* ubi est unum corpus, necesse est ponere unum caput. Unum autem corpus similitudinarie dicitur una multitudo ordinata in unum secundum distinctos actus sive officia. Manifestum est autem, quod ad unum finem, qui est gloria divine fructificationis, ordinantur & homines & Angeli. Unde corpus Ecclesiæ mysticum, non solum consistit ex hominibus, sed etiam ex Angelis. Totius autem hujus multitudinis Christus est caput, quia propinquius se habet ad Deum, & perfectius participat dona ipsius, non solum quam homines, sed etiam quam Angeli: & de ejus influentia non solum homines recipiunt, sed etiam Angeli. Dicit enim Ephes. 1. quod constituit eum scilicet Christum Deus Pater ad dextram suam in cælestibus supra omnem potestatem, & principatum, & virtutem, & dominationem, & omne nomen, quod nominatur non solum in hoc seculo, sed etiam in futuro, & omnia subiecit sub pedibus ejus. Et ideo Christus non solum est caput hominum, sed etiam Angelorum: unde & Matthei quarto legitur, quod acceperunt Angeli & ministrabant ei.

Ad primum ergo dicendum, quod influentia Christi super homines principaliter quidem est quantum ad animas, secundum quas homines conveniunt cum Angelis in natura generis, licet non in natura speciei. Et ratione hujus conformitatis Christus potest dici caput Angelorum, licet deficiat conformitas quantum ad corpus.

Ad secundum dicendum, quod Ecclesiâ secundum statum viæ est congregatio fidelium: sed secundum statum patriæ est congregatio comprehendendum; Christus autem non solum fuit viator, sed etiam comprehensor. Et ideo non solum fidelium, sed etiam comprehendendum est caput, utpote plenissime habens gratiam & gloriam.

Ad tertium dicendum, quod Augustinus \* ibi loquitur secundum quandam similitudinem causæ ad effectum: prout scilicet res corporalis agit in corpus: & res spiritalis in res

59.  
3. d. 13. q. 2.  
att. q. 1. &  
d. 14. art. 3.  
q. 2. & 6. q.  
Et ver. q. 2.  
9. art. 4. &  
5. opusc. 3.  
c. 223. Et  
1. Cor. 11.  
col. 2. &  
Ephes. 1.  
in fin.

Tr. 9. 23.  
ante me-  
dium, &  
19. tra. 2. a  
med. 19. 9.

Ar. 1. ad 2

Loco cit.  
in argum.



*Spirituales. Tamen humanitas Christi ex virtute spiritalis nature, scilicet divina, potest aliquid causare non solum in spiritibus hominum, sed etiam in spiritibus Angelorum, propter maximam conjunctionem ejus ad Deum, scilicet secundum unionem personalem.*

#### COMMENTARIUS.

**A**ffirmat D. Thom. & tota litera perspicua est. Solum adverto, si doctrina hujus articuli cum doctrina articuli primi conferatur, satis ex mente D. Thom. constare Christum habere influentiam gratiæ in Angelos, nihil enim aliud hic facit, quam respectu Angelorum applicare Christo tres conditiones capitis, quas art. 1. posuerat. Cum ergo hic concludit de influentia Christi non tantum homines, sed etiam Angelos recipere, nisi valde ambigue & æquivoce loquatur, de influentia gratiæ eum loqui necesse est. Ne vero quis existimet, eum locutum esse de influentia pertinente ad ordinem gratiæ, non tamen de primaria influentia ipsius gratiæ, sed de secundaria alicujus accidentalibus perfectionis, hoc excludit D. Thomas solutione ad primum, ubi ut ostendat Christum secundum humanam naturam esse caput Angelorum, etiam si natura humana corporea sit, inquit, primariam influentiam hujus capitis super homines esse quantum ad animas, in quibus sunt aliquo modo similes Angelis, & ideo posse Christum eandem influentiam in illos habere, atque adeo esse illorum caput: certum autem est, illam influentiam principalem, quam habet Christus super homines quantum ad animas, esse ipsius influxum seu donationem. Et hæc quantum attinet ad mentem D. Thom. nam de ipsa non est animus disputandi usque ad q. 19. ubi de Christi merito agendum est.

#### ARTICULUS V.

*Utrum gratia Christi, secundum quam est caput Ecclesia, sit eadem cum gratia habituali ejus, secundum quod est quidam homo singularis.*

**A**d quintum sic proceditur. Videtur, quod non sit eadem gratia, qua Christus est caput Ecclesiæ, cum gratia singulari illius hominis. Dicit enim Apostolus Roman. 5. Si unius delicto multi mortui sunt: multo magis gratia Dei, & donum, in gratia unius hominis Jesu Christi in plures abundavit. Sed aliud est peccatum actuale ipsius Adæ, & aliud est peccatum originale, quod traduxit in posteros. Ergo alia est gratia personalis, qua est propria ipsius Christi, & alia est gratia ejus, in quantum est caput Ecclesiæ, qua ab ipso ad alios derivatur.

**2.** Præterea. Habitus distinguuntur secundum actus. Sed ad alium actum ordinatur in Christo gratia ejus personalis, scilicet, ad sanctificationem illius anime: & ad alium actum ordinatur gratia capitis, scilicet ad sanctificandum alios. Ergo alia est gratia personalis ipsius Christi, & alia est gratia ejus in quantum est caput Ecclesiæ.

**3.** Præterea. Sicut supra dictum est\*, in Christo distinguitur triplex gratia, scilicet, gratia unionis, gratia capitis, & gratia singularis illius hominis: sed gratia singularis Christi est alia a gratia unionis: ergo etiam est alia a gratia capitis.

Sed contra est, quod dicitur Joan. 1. De plenitudine ejus nos omnes accepimus. Secundum hoc autem est caput nostrum, quod ab eo accipimus. Ergo secundum hoc, quod habuit plenitudinem gratiæ, est caput nostrum. Plenitudinem autem gratiæ habuit, secundum quod perfecte fuit in illo gratia personalis, ut supra dictum est\*. Ergo secundum gratiam personalem est caput nostrum, & ita non est alia gratia capitis, & alia gratia personalis.

**a.** Respondeo dicendum, quod quia unumquodque agit, in quantum est ens actu, oportet, quod idem sit actus, quo aliquid est actu, quo agit, sicut idem est calor, quo ignis est calidus, & quo calefacit. Non tamen omnis actus, quo aliquid est actu, sufficit ad hoc, quod sit principium agendi in alia: cum enim agens sit præstantius patiente (ut Augustinus dicit 12. super Gen. ad literam\*: & Philosophus in 3. de anima\*) oportet quod agens in alia habeat actum secundum eminentiam quandam. Dictum est autem supra\*, quod in anima Christi recepta est gratia secundum maximam eminentiam: & ideo ex illa eminentia gratiæ, quam accepit, competit sibi, quod gratia illa ad alios derivetur: quod pertinet ad rationem capitis. Et ideo ea-

dem est secundum essentiam gratia personalis, qua anima Christi est justificata, & gratia ejus, secundum quam est caput Ecclesiæ, justificans alios: differt tamen secundum rationem.

Ad primum ergo dicendum, quod peccatum originale in Adam, quod est peccatum naturæ, derivatum est a peccato actualem ipsius, quod est peccatum personale: quia in eo persona corripuit naturam: qua corruptione mediante, peccatum primi hominis derivatur ad posteros, secundum quod natura corrupta corrumpit personam. Sed gratia non derivatur a Christo in nos, mediante natura humana, sed per solam personalem actionem ipsius Christi. Unde non oportet in Christo distinguere duplicem gratiam: quarum una respondeat naturæ, alia personæ, sicut in Adam distinguitur peccatum naturæ & personæ.

Ad secundum dicendum, quod diversi actus, quorum unus est ratio, & causa alterius, non diversificant habitum: actus autem personalis gratiæ, qui est sanctum facere formaliter habentem, est ratio justificationis aliorum, quæ pertinet ad gratiam capitis. Et inde est, quod per hujusmodi differentiam non diversificatur essentia habitus.

Ad tertium dicendum, quod gratia personalis & gratia capitis ordinantur ad aliquem actum: gratia autem unionis non ordinatur ad actum, sed ad esse personale. Et ideo gratia personalis & gratia capitis conveniunt in essentia habitus, non autem gratia unionis. Quamvis personalis gratia possit quodammodo dici gratia unionis, prout facit congruitatem quandam ad unionem. Et secundum hoc una per essentiam est gratia unionis, & gratia capitis, & gratia singularis personæ, sed differens solatione.

#### COMMENTARIUS.

**A**ffirmat D. Thom. quia eadem est forma, qua agens in se perficitur, & agit in alios: & litera corporis art. clara est. Solum argumentum primum cum solutione indiget aliqua explicatione. Est ergo argumentum, quia in Adam aliud est peccatum actuale ipsius Adæ, aliud peccatum originale, quod traduxit in posteros: ergo & in Christo alia est gratia capitis, & alia gratia personæ. Respondet D. Thom. negando consequentiam. Sed in antecedenti advenit peccatum originale proprie non fuisse in Adam, sed in filiis, ad quos peccatum primi parentis per originem derivatur; & hoc modo sicut distinguitur peccatum originale a personali Adæ, ita distinguitur justitia baptismalis seu Christiana, quæ per Christum ad nos derivatur, a propria gratia & justitia, quæ est in ipso Christo capite; sed non hoc sensu procedebat argumentum, quamquam enim in Adam non fuerit peccatum originale, id est, per originem contractum, fuit tamen peccatum quasi habituale, cui simile est originale peccatum, quod nos ab illo trahimus, & hoc vocavit D. Thom. peccatum originale in Adam; quod tamen etiam dici potest personale, quia per actum proprium ipsius personæ fuit contractum, & ita in hoc proportionaliter convenit cum gratia Christi: quia sicut gratia capitalis in Christo necessario est etiam personalis, ita peccatum illud simul & capitale fuit & personale: tamen D. Thom. ipsum actuale peccatum Adæ videtur proprie vocare personale, & hoc distinguit ab ipso habituali peccato, & hoc modo constituit differentiam inter Adamum & Christum, quod in Adamo peccatum ipsum habituale, quod fuit veluti totius naturæ deordinatio, ortum est ex peccato actualem, & ita corrupta est natura per actionem personæ: natura vero sic corrupta communicatur filiis Adæ, & cum natura communicatur etiam culpæ, & hoc modo distinguitur in Adamo peccatum naturæ a peccato personæ: at vero in Christo gratia communicatur humanæ naturæ assumptæ, non per aliquam actionem ipsius naturæ, sed immediate a Deo propter dignitatem personæ; ipse vero Christus communicat nobis gratiam, non per actionem seu communicationem naturæ, sed per propriam personalem actionem suam; & ideo in eo non distinguitur personalis gratia a capitali. Potest etiam alia differentia inter Adamum & Christum excogitari, quia in Adamo solum unum peccatum, scilicet, esus cibi prohibiti, fuit, ut ita dicam, capitale, alia vero, si quæ commisit, fuerunt tantum personalia: at vero in Christo omnis gratia personalis fuit etiam capitalis, & omne opus ab illa procedens fuit non solum in se bonum, sed etiam utile ac meritum aliis, quo sensu dici potest omne opus Christi fuisse opus capitis. Ratio vero hujus differentiæ est quia

Peccatum originale proprie non fuit in Adamo, sed in filiis.

Aug. li. 12. c. 16. circa med. to. 3.  
\* Arist. de anima lib. 2. c. 19.  
\* Phil. 1. h. 1. q. 9. art. 9.



quia Christus per se propter excellentiam personæ suæ est caput hominum, & ideo omnis gratia illius est gratia capitis, quia est diffusiva suæ virtutis ad alios. Et similiter omnis actio illius est sufficiens ad perficiendum alios; at vero Adam non habuit ex intrinseca suæ personæ conditione, ut peccatum ejus esset peccatum totius naturæ, seu quatenus ex peculiari lege & pacto Dei acceperat illud peculiare præceptum veluti nomine totius naturæ: & tanquam principium totam illam in se continens, & ideo illa transgressio fuit, ut ita dicam, capitalis, non tamen omnis alia. Reliqua argumenta clara sunt.

## ARTICULUS VI.

*Utrum esse caput Ecclesiæ sit proprium Christo.*

61.  
Infra art.  
7. c. Ex ve-  
ri. q. 29. ar.  
4. c. Et  
Cor. 11.  
cor. 13.

**A**D sextum sic proceditur. Videtur, quod esse caput Ecclesiæ non sit proprium Christo. Dicitur enim primo Regum 15. Cum esses parvulus in oculis tuis, caput in tribubus Israel factus es. Sed una est Ecclesiæ in novo & veteri Testamento. Ergo videtur, quod eadem ratione aliquis alius homo præter Christum poterit esse caput Ecclesiæ.

2. Præterea. Ex hoc Christus dicitur esse caput Ecclesiæ, quod gratiam insinuat Ecclesiæ membris. Sed etiam ad alios pertinet, gratiam aliis præbere: secundum illud Ephes. 4. Omnis sermo malus ex ore vestro non procedat: sed si quis bonus est ad edificationem fidei, ut det gratiam audientibus. Ergo videtur, quod etiam alii quam Christo competat esse Ecclesiæ caput.

3. Præterea, Christus ex eo quod præest Ecclesiæ, non solum dicitur caput, sed etiam Pastor & fundamentum Ecclesiæ. Sed non sibi soli Christus retinuit nomen Pastoris secundum illud 1. Petri 5. Cum apparuerit princeps pastorum, percipietis immarcescibilem gloriæ coronam. Nec etiam nomen Fundamenti, secundum illud Apocalyp. 21. Murus civitatis habens fundamenta duodecim: ergo videtur, quod nec etiam nomen capitis sibi soli retinuerit.

Sed contra est, quod dicitur Colos. 2. Caput Ecclesiæ est, ex quo corpus per nexus & conjunctiones subministratum & constructum, crescit in augmentum Dei. Sed hoc soli Christo convenit. Ergo solus Christus est caput Ecclesiæ.

b Respondeo dicendum, quod caput in alia membra insinuat dupliciter. Uno modo, quodam intrinseco influxu: prout scilicet, virtus motiva & sensitiva a capite derivatur ad cetera membra. Alio modo secundum quandam exteriorē gubernationem: prout, scilicet, secundum visum & alios sensus, qui in capite radicanter, dirigitur homo in exterioribus actibus. Interior autem influxus gratiæ, non est ab aliquo, nisi a solo Christo: cujus humanitas ex hoc, quod est divinitati conjuncta, habet virtutem justificandi. Sed influxus in membra Ecclesiæ, quantum ad exteriorē gubernationem potest aliis convenire. Et secundum hoc aliqui alii possunt dici capita Ecclesiæ: secundum illud Amos 6. Optimates capita populorum. Differenter tamen a Christo: primo quidem quantum ad hoc, quod Christus est caput omnium eorum, qui ad Ecclesiā pertinent, secundum omnem locum & tempus ad statum: alii autem homines dicuntur capita secundum quandam specialia loca, sicut Episcopi suarum Ecclesiarum: vel etiam secundum determinatum tempus, sicut Papa est caput totius Ecclesiæ, scilicet tempore sui pontificatus: & secundum determinatum statum, prout, scilicet, sunt in statu viatoris. Alio modo, quia, Christus est caput Ecclesiæ propria virtute & autoritate. Alii vero dicuntur capita, in quantum vicem gerunt Christi secundum illud 2. Corinth. 2. Nam & ego quod donavi, si quid donavi, propter vos in persona Christi: & secundum illud secunde ad Corinth. 5. Pro Christo legatione fungimur, tanquam Deo exhortante per nos.

Ad primum ergo dicendum, quod verbum illud intelligitur, secundum quod ratio capitis consideratur ex exteriori gubernatione: prout dicitur Rex caput regni sui.

Ad secundum dicendum, quod homo non dat gratiam interius influendo, sed exterius persuadendo ad ea, quæ sunt gratiæ.

Ad tertium dicendum, quod sicut August. \* dicit super Joann. Si præpositi Ecclesiæ Pastores sunt, quomodo unus pastor est, nisi quia sunt illi omnes unius membra pastoris?

Tract. 46.  
in medio  
illius 10.9

Et similiter alii possunt dici fundamenta & capita, in quantum sunt unius capitis & fundamenti membra. Et tamen sicut Augustinus ibidem dicit, \* pastorem esse dedat membris suis, ostium vero nemo nostrum se dicit: hoc sibi ipse proprium tenuit. Et hoc ideo, quia in ostio importatur principalis auctoritas, in quantum ostium est, per quod omnes ingrediuntur in domum: & ipse solus Christus est, per quem accessum habemus in gratiam istam, in qua stamus. Per alia vero nomina prædicta potest importari auctoritas, non solum principalis, sed etiam secundaria.

\* Tract.  
47. in  
Joann.  
inter  
princ. &  
n. c. 10.9.

## COMMENTARIUS.

**H**Æc quæstio, ut ex superioribus constat, solum movetur de influentia capitis, nam de duabus alijs conditionibus, satis ex superioribus constat inventas esse in Christo proprio quodam & singulari modo: & ita D. Th. in hoc articulo solum de influentia respondet.

Titulus  
articuli.

b Dicitur igitur, internam gratiæ influentiam esse propriam Christi capitis, externam vero, quæ est per gubernationem seu jurisdictionem, interdum communicari aliis secundum quandam capitis participationem. Quæ distinctio difficultate non caret; nam si est sermo de influxu externo ejusdem perfectionis, & excellentiæ cum influxu ipsius Christi, hoc modo nullus habet influxum capitis, nisi Christus: si vero sit sermo de influxu participato, & dependente a Christo, sic etiam internus influxus gratiæ communicatur aliis, nam remissio peccatorum ad hunc influxum pertinet, & hæc sacerdotibus communicatur. Respondetur primo, sermonem D. Th. esse præcipue de influxu gratiæ, quæ est per modum meriti, & redemptionis, hic enim est, qui proprie convenit in Christum, ut est caput Ecclesiæ, & hic non communicatur aliis, qui aliquam rationem capitis participant. Deinde potestas regendi Ecclesiā, quæ communicatur aliis, qui aliquo modo sunt capita, licet sit inferior potestate Christi, & ab illa manans, tamen in suo genere est propria, & quasi principalis, sicut potestas, aut virtus causæ secundæ, vel sicut potestas regia & dominativa, est in suo ordine propria, & principalis, quamvis a Deo derivetur: & ideo per hanc potestatem vere constituuntur Pastores Ecclesiæ, superiores, & veluti capita in suo genere, quoad hunc influxum externum: at vero potestas influendi gratiam vel dandi remissionem peccati, omnino est quasi instrumentaria, & ideo non censetur proprie exerceri a ministro ut capite, sed ut ab instrumento ipsius capitis: Christus vero habet potestatem hanc tanquam caput, quia licet ejus humanitas non possit gratiam efficere nisi ut instrumentum Verbi, tamen nihilominus hoc illi est debitum ratione suæ excellentiæ personalis, & propter suum infinitum meritum: & ideo est veluti causa principalis hujus influxus, ut quæstione 13. explicabitur.

Respon.

## DISPUTATIO XXIII.

*De dignitate & gratia capitis, quæ est in Christo.*

**S**I hoc loco tractanda essent omnia, quæ sub hac metaphora capitis comprehendere possunt, oporteret quæstiones multas, quas D. Thom. in sequentibus tractat, huc revocare: quia (ut diximus) hoc nomine præcipue indicatur potestas superioris ad influendum in omnes eos, qui sunt veluti partes ejusdem corporis mystici seu politici, unde in præsentī materia ad dignitatem capitis Christi pertinere potest potestas ferendi leges, condendi Ecclesiā, illuminandi, sanctificandi, &c. Et ita sub dignitate capitis continetur non etiam dignitas Redemptoris & Sanctificatoris, sed etiam dignitas Sacerdotis summi, Regis, Legislatoris, Doctoris, & si quæ sunt aliæ similes. Hoc vero loco non agimus de dignitate capitis Christi sub tota hac amplitudine, sed solum in ratione Sanctificatoris, seu Justificatoris, quia solum agimus de hac dignitate in ordine ad gratiam Christi explicandam. Quia vero hæc quæstio hoc sensu explicata omnino pendet ex cognitione meritum Christi, ideo ne materias confundamus, brevissime illam expediemus, duo tantum explicando: scilicet hanc dignitatem convenire Christo respectu omnium creaturarum, eo modo quo illæ sunt capaces effectus hujus potestatis: & quæ sit gratia, quæ Christo ut capiti conveniat.

SE-



*Utrum Christus sit totius Universi caput, præsertim hominum & Angelorum.*

Sensus quæstionis est de Christo homine, ut homo est, seu secundum humanitatem specificative, ut ajunt, id est, an in ipsa humanitate habeat hanc dignitatem, & per eam munus capitis exerceat; de qua tres sententiæ referri possunt. Prima affirmat Christum esse caput hominum tantum, non Angelorum, nec aliarum creaturarum. Ita Altiſiod. lib. 3. sum. tract. 1. c. 4. q. 2. Gab. indicat in 3. dist. 13. art. 3. dub. 2. ubi dicit Christum ut hominem non esse caput Angelorum, nisi quoad excellentiam & perfectionem gratiæ. Idem tenet Driedo tract. 2. de Captiv. & redemp. gen. human. c. 2. p. 3. art. 5. prop. 4. for. 51. Soto in 4. dist. 49. q. 4. art. 2. in fine, cui sententiæ videntur favere multi Patres, qui ubicumque Paulus dicit Christum esse caput hominum & angelorum, explicant, hominum esse caput secundum humanitatem, angelorum vero secundum divinitatem, quos infra adducam. Fundamentum vero hujus sententiæ potest esse duplex. Primum, quia Christus ut homo non est ejusdem naturæ cum angelis, caput autem debet esse homogeneum. Secundum, quia Christus non meruit gratiam angelis. Secunda sententia est, Christum esse caput omnium hominum & angelorum, quia in omnes potest influere gratiam vel supernaturale aliquod donum, non vero aliarum creaturarum, quia illæ non sunt capaces hujus influxus. Hæc videtur esse D. Th. sententia in his articulis, nam primam illius partem aperte docet, secundam vero satis indicat art. 2. ad 2. Idem Alexand. Alenf. 3. p. q. 12. m. 2. art. 1. & alii doctores in 3. dist. 13. Richard. art. 2. q. 3. Palud. q. 1. art. 3. Durand. q. 2. Turrecrem. lib. 1. sum. Eccles. cap. 45. & sequentibus. Tertia sententia est, Christum esse caput non solum hominum & Angelorum, sed etiam creaturarum omnium. Hanc late tractat Galat. lib. 7. de arcanis cathol. verit. cap. 2. & sequent. & Catherin. lib. de eximia Christi prædest. quibus favere videtur Orig. hom. 2. in Pl. 36. col. 2. dicens, Christus, cujus omne hominum genus, imo fortasse totius creaturæ universitas corpus est, &c. Et Hilar. in lib. de Synodis, ubi ex Conc. Sirm. refert, Christum esse caput omnium, caput autem Christi esse Deum. Quod necessario videtur intelligendum de Christo homine, nam Christus, ut Deus, licet habeat principium scilicet patrem, non tamen potest dici caput ejus, cum non sit quid perfectius.

2. Concl.

Dico primo, Christum esse caput totius Ecclesiæ, quæ ex hominibus constat, sive in terra militantis, sive in cælo regnantis. Hæc conclusio est de fide: probatur ex Paul. ad Ephes. 1. *Ipsum dedit caput super omnem Ecclesiam, quæ est corpus ipsius.* Ubi constat sermonem esse de Christo homine, præmittit enim: *Suscitans eum a mortuis, & constituens ad dexteram suam in Cælestibus, & omnia subjecit sub pedibus ejus:* Christus enim non ut Deus, sed ut homo suscitatus est, & illi non tantum ut Deo (quod jam per se habebat), sed etiam ut homini omnia subiecta sunt. Unde Anf. non incommode ibi inquit, significatam esse humanitatem, quia sicut pes, inferior pars corporis est, ita humanitas est inferior Christi natura. Ac denique Ecclesia non dicitur corpus Christi ut Dei, sed ut hominis; ergo similiter Christus est caput ejus, non tantum ut Deus, sed ut homo, unde c. 4. *Veritatem facientes in charitate, crescimus in illo per omnia, qui est caput Christus: & c. 5. Vir caput est mulieris, sicut Christus caput est Ecclesia, ipse Salvator corporis ejus, &c.* Et ita interpretantur hæc loca Chrysost. Hierony. Ambros. Theodoret. Theophyl. & alii Patres. Simile est illud ad Colos. 1. *Et ipse est caput corporis Ecclesiæ, quem locum tractans Hilar. 8. de Trinit. sub fine, inquit: Ob dispensationem corporis nostri ipse est caput;* & idem docet Basil. lib. de Spirit. S. c. 5. Augustin. optime præfatione ad 2. enarrationem Pl. 29. & ad Pl. 139. & serm. 50. de Verbis Dom. & epist. 50. in fine & 57. in fi. ubi ait: aliter habitare Deum in Christo ut in capite, & aliter in cæteris membris, & lib. 1. de Trinit. c. 12. dicit Christum secundum formam servi esse caput Ecclesiæ. Ratio vera est, quam supra circa art. 1. D. Th. explicatam reliquimus. Et potest confirmari ex Paulo 1. ad Cor. 12. & aliis locis, ubi Ecclesiam dicit esse unum corpus habens diversa membra, quorum

diversa sunt munera seu ministeria: ergo oportet, ut hoc corpus unum habeat caput, non tantum quasi extrinsecum, quod est Deus, sed etiam veluti intrinsecum, & quasi homogeneum; hoc autem non potest esse nisi Christus, qui inter omnia hujus Ecclesiæ membra eminet, & in omnia influit. Dices. Pari ratione posset dici cor Ecclesiæ, quia etiam cor influit, & est membrum principale. Respondetur. Quamquam concederetur totum, non esset magnum inconveniens; negatur tamen consequentia cum D. Th. art. 1. ad 3. quia cordis influentia est occulta & invisibilis, & ideo in Ecclesia potius Spiritui sancto accommodatur, caput autem habet eminentiam inter alia membra, & influentiam magis visibilem: & ideo hæc metaphora magis accommodatur Christo homini, qui in natura assumpta est caput visibile. Sed objicies, quia Christus, ut homo, non habuit sufficientem vim ad influendum in alios; ergo ut sic non potest esse caput. Antecedens patet, tum quia alias omnes homines haberent hanc vim: tum etiam quia sola humanitas non potest esse principium tam perfecti meriti. Respondetur non esse sermonem de Christo ut homine reduplicative, sed specificative. Unde non excluditur dignitas suppositi divini, sed illa est veluti radix hujus dignitatis, quæ in humanitate & per humanitatem exercetur.

Et ex hac conclusione inferitur, Christum esse caput omnium hominum, qui recipiunt, vel possunt recipere influxum ejus, ut circa art. 3. satis explicatum est; & quia omnes homines pro aliquo saltem tempore sunt in statu, in quo possunt recipere hunc Christi influxum, ideo simpliciter omnium illorum caput est: aliquorum quidem solum ad tempus, quamdiu in hac vita degunt, scilicet reprobatorum; aliorum vero perpetuo, scilicet prædestinatorum, quamvis ipsi non semper illi eodem modo conjungantur: aliquando enim sunt membra illius viva, aliquando mortua, donec ad statum patriæ perveniunt, ubi perfectissime illi conjunguntur.

Sed dubitari hic potest primo de infantibus, qui in utero matris moriuntur, quia illi numquam videntur esse membra Christi; non enim postquam moriuntur ut supra dictum est, nec vero dum vivunt in utero materno, quia etiam ibi non possunt recipere influxum a Christo capite. Hoc dubium tangit gravem difficultatem, alienam vero ab hoc loco, & in materia de baptismo vel de prædestinatione disputandam. Ideo breviter dico, statim ac homo incipit vivere etiam in utero materno, posse dici membrum Christi, quia per se loquendo potest recipere influxum ejus, quamvis per accidens interdum impediatur: aliqui etiam in utero sanctificati sunt per meritum Christi, & aliqui etiam, præsertim prædestinati, recipiunt aliquod auxilium per specialem providentiam saltem mediis parentibus, hoc ergo satis est, ut Christus vere sit eorum caput.

Secundo dubitari potest, an Christus sit vel fuerit caput Adæ pro statu innocentie. Nonnulli enim Thomistæ negant. D. Th. autem art. 3. expressè dicit Christum esse caput omnium hominum accipiendo generaliter secundum totum tempus mundi, sub hoc vero tempore includitur etiam Adam in statu innocentie, & est expressa sententia Aug. cujus verba statim referam. Dico igitur etiam in eo statu fuisse Adam membrum Christi, quia tunc habuit fidem ejus, ut supra q. 1. art. 3. late ostendi.

Dico secundo: Christus ut homo etiam est caput angelorum. Hanc docent Theologi supra in opinione secunda citati. Et probatur primo eisdem testimoniis citatis ex Paulo, præsertim ad Eph. 1. ubi dicit Christum esse constitutum caput super omnem Ecclesiam: ita enim legit nostra Vulgata Latina, & frequentius Latini expositores, & Gregor. hom. 7. in Ezech. Igitur si super omnem Ecclesiam; ergo super angelicam & humanam, vel super totam universalem Ecclesiam ex Angelis & hominibus constantem, ut manifeste ibi exponit Hier. Præterea ad Colos. 2. *Estis, inquit, in illo repleti, qui est caput omnis principatus, & potestatis, &c.* aperte loquitur de Christo homine in utroque loco, ut in superioribus præsertim disp. 5. satis ostensum est. Tertio, est hæc communis sententia patrum. Aug. conc. 3. in Psal. 36. inquit: *Caput nostrum Christus est, corpus capitis illius nos sumus, numquid soli nos? Et non etiam illi, qui fuerunt ante nos? Omnes qui ab initio sæculi fuerunt iusti adjunctis etiam legionibus, & exercitibus Angelorum, ut illa una civitas fiat*

Objec.

Solutio.

Esse caput  
Ecclesiæ  
proprius  
accommodatur  
Christo  
quam esse  
corpus.

Christus  
solum in  
hac vita  
est caput  
reprobatorum,  
perpetuo  
est  
caput  
prædestinatorum.

2. Concl.



*fiat sub uno Rege, & una provincia sub uno Imperatore.* Hil. Psal. 139. circa illa verba: *Caput circuitus eorum; ut in omnibus*, inquit, *Sanctis caput Christus est, in omnibus iniquis caput diabolus est.* Et similia habet Aug. in expof. ejusdem Pf. circa illa verba: *Qui cogitaverunt supplantare gressus meos, &c.* Unde potest sumi confirmatio, nam dæmon, eo modo quo est caput malorum, non tantum est caput malorum Angelorum, sed etiam malorum hominum; ergo multo magis Christus non tantum est caput bonorum hominum, sed etiam Angelorum.

Ratio vero est, quia ex Angelis & hominibus una Ecclesia, quæ est veluti una spiritualis respublica, constituitur; sed huic Ecclesiæ toti Christus præest, & potestatem habet super omnia membra illius; ergo est caput omnium, tam Angelorum, quam hominum. Major receptissima est, ut constat ex Hieronymo supra, & August. in Ench. c. 56. & collatione 3. contra Donat. Et in ejus confirmationem nonnulla congerit Turrian. lib. 2. de dogmat. caract. non longe a principio, ubi adducit canonem Concilii Nicæni dicentis, unam esse Ecclesiam in cœlis & in terra. Hinc etiam Sancti frequenter dicunt, homines assumptos esse ad sedes Angelorum reparandas; utpote unum cum eis regnum, unamque Ecclesiam componentes. Minor etiam est certa, nam in primis per se se maxime decet, ut unum politicum corpus unum habeat caput, a quo regatur, ut August. citatis verbis egregie declaravit, & alia similia refert, Turrianus supra ex Theophane, Episcopo Nyss. Denique est hoc maxime debitum Christo Domino, & humanitati ejus, tum ratione unionis, tum ratione infinitorum meritum. Tandem probatur ex ipso usu, nam in primis Angeli obediunt Christo, & sunt ministri ejus, unde in Evangelio legimus illi ministrasse, & Paul. ait: *Omnes esse administratores spiritus propter eos, qui hereditatem capiunt salutis*: in hoc autem ministerio Christo homini parent, qui est nostræ salutis author, & totius Ecclesiæ gubernator. Unde D. Th. infra q. 56. art. 6. dicit Christum judicaturum Angelos, saltem quoad ea, quæ pertinent ad gubernationem Ecclesiæ. Deinde Christus homo illuminat Angelos, ut Theophilus fatentur cum Dion. 7. c. de cœl. hierar. Denique quod illis meruerit gratiam, & gloriam, & consequenter quod in illis habeat perfectum influxum capitis in genere gratiæ, ostendimus infra q. 19.

Objea.  
Solutio.

Sed contra, nam August. in Enchirid. c. 56. solum dicit Christum esse caput Ecclesiæ, quæ est in hominibus. Sed hoc difficultatem non habet, quia licet August. ibi hoc tantum affirmaverit, non tamen aliud negavit, quod aliis locis expresse asseruit, ut vidimus. Major difficultas est in Chrys. homil. 1. super ad Ephes. 1. circa finem, quem Theophylact. sequitur, qui exponunt Christum esse caput hominum, & Angelorum: hominum secundum carnem, Angelorum vero, ut est Deus Verbum. Unde quod ibi dicit Paulus Christum datum esse caput super omnem Ecclesiam, intelligunt de Ecclesia hominum, quæ omnis Ecclesia dicitur, vel propter partiales Ecclesias, vel propter illam, quæ ex Gentibus, & Judæis congregatur. Quamquam alii non legant super omnem Ecclesiam, sed super omnia Ecclesiæ, id est, super omnia Ecclesiæ membra: vel certe dicitur datus caput Ecclesiæ super omnia, id est, ut omnibus bonis eam repleat, ut Anselm. exponit. Denique quod ad Colof. 2. dicitur Christum esse caput principatum, &c. de Christo ut Deo ab eisdem Græcis exponitur. Respondetur, propter hujusmodi testimonia, & expositiones conclusio non est de fide, est tamen multo probabilior propter ea, quæ adduximus. Et fortasse Chrysost. non intendit negare, Christum esse caput Angelorum in humanitate ipsa, sed assignat causam propter quam est eorum caput, scilicet, quia est Deus, hominum enim posset esse caput, etiam si tantum homo esset, quamvis non tam perfecte, & proprie sicut modo est: respectu vero Angelorum cum natura humana sit inferior illis, elevata est ad dignitatem capitis solum ratione divinæ naturæ, seu personæ infinitæ illi conjunctæ.

3. Concl.

Dico tertio: Christus aliquo modo dici potest caput creaturarum omnium, non vero eo modo, quo Angelorum, & hominum. Prior pars declaratur breviter ex illo ad Colof. 1. ubi Christus dicitur: *Primogenitus omnis creaturæ*, quia dignitate, & propinquitate ad Deum antecedit omnes, nam & in mente & voluntate Dei fuit primus omnium, ut supra q. 1. art. 3. ostendimus, & per-

fectione etiam ac dignitate primus est, ut per se constat. Quod vero ad influentiam attinet, quidam existimant Deum per humanitatem Christi & ob illius merita influere in res omnes ipsum esse, & naturalem perfectionem. Sed non est hoc verisimile, nec probabili fundamento niti potest: quia si intelligatur de influxu physico, non est cur fingamus, Deum per humanitatem conservare res omnes, aut ad omnium actiones concurrere, quia hoc nec pertinet ad dignitatem assumptæ humanitatis, nec est necessarium ad manifestationem nominis Christi, ut dicitur q. 13. Si vero sit sermo de influxu per modum meriti, solum meruit, quæ ad sanctitatem, vel beatitudinem pertinent, aut conferunt: nam hæc sunt bona, ad quæ merita ordinantur, non ad naturalia bona, ut talia sunt, unde Aug. epist. 105. circa med. *Meruit, inquit, nobis Christus, ut justii essemus, non ut homines, vel liberi essemus.*

Solum ergo potest dici Christum influere in res omnes, & omnium esse caput, vel quatenus omnibus dominatur, & omnia subiecta sunt sub pedibus ejus, ut Ps. 8. dicitur, & de Christo exponitur a Paulo ad Ephes. 1. & ad Hebr. 2. & hoc modo dixit Hier. ad Ephes. Christum esse caput etiam dæmonum, quia est illorum dominus, & princeps, & illis potest imperare: vel quatenus per Christi Incarnationem res omnes quandam dignitatem, aut nobilitatem suscipiunt, ut supra q. 1. explicatum est; vel certe quatenus omnibus uti potest ad bonorum salutem: & præsertim quia post diem judicii per Christum omnia renovabuntur, & quendam splendorem, & incorruptionem accipient, propter quod dicitur ad Rom. 8. quod *expectatio creaturæ revelationem filiorum Dei expectat, nam liberabitur a servitute corruptionis in libertatem gloriæ filiorum Dei.* Propter quod Theodoret, & Oecumen. exponentes illud ad Hebr. 2. *Ut pro omnibus gustaret mortem*, dicunt, Christi mortem omnibus creaturis attulisse emolumentum. Et ex his facilis est secunda pars conclusionis, nam influxus, quem habet Christus in creaturas rationales, multo est alterius rationis, & excellentior, quam sit influxus in creaturas irracionales. Deinde Ecclesiæ tantum ex Angelis & hominibus constans dicitur proprie corpus mysticum Christi, ad quod non pertinent res aliæ inferiores tanquam membra vel partes ejus, quia non vivunt spirituali vita hujus corporis, nec ad finem ultimum hujus reipublicæ ordinantur, quia revera non sunt capaces ejus, sed sunt quasi res, vel bona externa huic corpori seu Reipublicæ deservientia. Proprie ergo Christus est caput hujus Ecclesiæ; aliarum vero rerum dicitur dominus, aut princeps magis, quam caput, sicut Rex in regno, vel Pater familias in domo, proprie dicitur caput hominum, regni, vel familiæ, aliarum autem rerum, quibus illi homines utuntur, potius dicitur dominus, vel gubernator.

Sed hoc loco non immerito dubitabit aliquis, an sicut Christus dicitur caput hujus corporis, ita etiam possit dici membrum ejus? Solet enim caput esse membrum totius corporis. Quidam Theologi ita loquuntur, quia considerando totam Ecclesiam, ut constantem ex omnibus aliis membris, & suo capite, nihil ob stare videtur, quin Christus vocetur membrum hujus corporis primum, & principale; sic enim videtur loqui Paul. 1. ad Corint. 12. dicens: *Vos autem estis corpus Christi, & membra de membro*, id est, de principali membro, quod est Christus. Ita D. Th. ibi, & in 4. d. 49. q. 4. art. 3. ad 4. Aristod. lib. 3. tract. 1. c. 4. q. 6. Turrecre lib. 1. sum. Eccl. c. 47. Aliis autem non placet ille modus loquendi, quia ratio membri videtur quandam imperfectionem includere, quam non includit ratio capitis, nimirum dependentiam aliquam ab aliis membris, & participationem alicujus virtutis seu influxus, sicut naturale caput recipit ab aliis membris alimentum, & alia subsidia, Christus vero ita est caput, ut nihil a suis membris recipiat, neque ab illis ullo modo pendeat. Neque est inconveniens in his metaphoricis locutionibus accommodari unum nomen, quod imperfectionem non includit, non vero aliud propter imperfectionem importatam: & hic modus loquendi mihi magis probatur cum D. Th. in 3. dist. 13. q. 2. art. 1. ad ult. Ales. 3. p. q. 12. memb. 2. art. 1. Marsil. in 3. q. 10. Nec Paulus alio modo loquitur in illo loco ad Corint. tribus enim aliis modis exponitur; primo *Estis membra Christi de membro*, id est, per ministerium alterius membri: scilicet ipsius Pauli, per quem Christo uniti fuerant. Ita

Qua ratione dicitur Christus influere in res omnes



Anselm. ibi quamvis non ad literam. Alia ergo & magis literalis expositio est: *Vos estis corpus Christi, & membra ad invicem*, seu vicissim: hanc enim vim habet vox Græca ἐκ μέρους ita indicant ibi Ambrosius & Hieron. Claud. & Gagne. & consonant verba sequentia, scilicet: *Et quodamposuit Apostolos, &c.* Tertia expositio & satis etiam consentanea literæ est. *Estis corpus Christi, & membra ex parte*, id est, non integrum corpus, neque omnia membra, sed ex parte: Ecclesia enim Corinthiorum non erat integrum corpus Christi, nec continebat omnia Christi membra, sed ex parte, & hoc significat magis proprie vox Græca ἐκ μέρους. Et ita etiam vertit vulgata, ut in margine notatur, sicut ad Rom. 15. *si vobis ex parte fructus fuero*, Græce habetur, ἀπὸ μέρους, & ita exponunt hic Chrysostomus Theophylactus & Græci, quos Cajet. sequitur.

Ad duo fundamenta prioris sententiæ respondetur breviter; ad primum dicitur, non oportere caput mysticum esse omnino ejusdem speciei cum omnibus membris: nam dæmon caput est malorum hominum, & Deus ut Deus est caput Christi hominis, & Angelorum: non ergo oportet, ut caput mysticum sit ejusdem naturæ specificæ, sed satis est, ut in gradu intellectuali conveniant, & in fine seu beatitudine, ad quam tendunt: ita vero conveniunt natura humana & Angelica, quæ in ordine ad supernaturalia bona quasi ejusdem naturæ sunt: eandemque gratiam, & gloriam participant; & ideo dicuntur homines futuri in beatitudine sicut Angeli; hoc ergo satis est, ut verissime Christus sit caput Angelorum.

Dices. Esto non sit necessarium, ut caput sit ejusdem naturæ, necessarium tamen videtur, ut sit vel æqualis, vel superioris naturæ, quod Christo ut homini non competit: nam in hoc minoratus est ab Angelis Ps. 8. ad Hebr. 2. Respondeo, neque id esse necessarium, quando excellentia personæ tanta est, ut naturam sibi unitam ad superioris perfectionis ordinem eleve. Imo sola excellentia gratiæ creatæ posset sufficere; quia Ecclesiæ perfectio magis ex gratia, quam ex natura pensatur.

Ad 2. quod est de merito Christi respectu Angelorum, primo negatur assumptum, de quo infra dicitur. Secundo etiam qui hoc negant non propterea negabunt Christum esse caput: dicent enim sufficere, quod influat aliquid pertinens ad accidentalem gloriam, vel supernaturalem cognitionem. Hi vero, qui ita opinantur, non dicent fortasse, Angelos fuisse membra Christi etiam ante Incarnationem ejus, quia pro eo tempore nihil in eos influebat, quia tunc tantum influere poterat ratione meriti: hoc autem mihi non probatur, quia tota Ecclesia in omnibus membris suis semper fuit Christo conjuncta per fidem vel charitatem, & illius influxum participavit.

## SECTIO II.

*Quæ fuerit in Christo gratia capitis.*

EX dictis in præcedenti sectione constat, hanc dignitatem capitis non esse distinctam a dignitate Redemptoris, vel Sanctificatoris, quia solum consideramus nunc rationem capitis quoad influxum gratiæ, qui convenit Christo, prout est aliorum sanctificator. Duplex autem influxus gratiæ intelligi potest in Christo, primus est proprie, ac physice effectivus, qui pertinet ad potestatem faciendi opera supernaturalia, de qua dicemus q. 13. alius est per modum meriti, & qui per se, ac proprie pertinet ad rationem hujus capitis, unde quia principium omnis meriti est gratia, ideo gratia Christi, quæ est principium hujus meriti, dicitur gratia capitis: quam propterea omnes Theologi supponunt esse in Christo, tanquam certum, quia necessario sequitur ex dignitate capitis, & ex dicto merito, si tantum vocis significatio, ut jam explicata est, intelligatur.

Dubitant vero, quid sit ista gratia; in quo triplex potest esse dicendi modus. Primus est hanc gratiam esse formam seu rem aliquam distinctam a gratia unionis, & gratia habituali. Sed hic modus neque ullum habet authorem, nec probabile fundamentum: & ideo omnino rejiciendus est: gratia enim, quæ est principium meriti, non est alia ab illa, per quam homo sanctificatur, & operatur: imo ideo requiritur gratia ad meritum, quia requiritur ad sanctificandam personam, quod necessarium est, ut sit capax meriti, vel ad operandum; ergo in Christo eadem gratia, per

quam humanitas ejus sanctificatur, & operatur, est principium merendi; illa vero est gratia unionis, vel habitualis, ut in superioribus ostensum est; eadem ergo fuit principium merendi; ergo illa fuit gratia capitis, quia (ut dixi) nihil aliud est gratia capitis, quam gratia, quæ est principium merendi aliis, & in Christo eadem gratia fuit principium merendi sibi, & aliis, quia quodlibet meritum Christi habuit valorem & efficaciam ad utrumque.

Secundus modus dicendi est, hanc gratiam capitis esse ipsammet gratiam habituales, quæ secundum essentiam suam, & prout sanctificat animam Christi, & est principium operandi, dicitur gratia habitualis seu personalis: prout vero fuit principium sanctificandi alios, dicitur gratia capitis. Hæc est communis sententia Theologorum D. Th. hic art. 5. & aliorum in 3. dist. 13. ubi Bonaventura. art. 2. q. 2. Richard. art. 3. q. 2. Gab. art. 3. in fine Almai. q. 1. in fine, Marsili. q. 10. art. 1. dub. 3. Alensi. 3. p. q. 11. memb. 3. & fundamentum est supra tactum, quia eadem est gratia sanctificans, & quæ est principium meriti.

Tertia vero sententia esse potest, gratiam capitis esse ipsam gratiam unionis. Quæ sumi videtur ex D. Th. art. 6. ubi dicit proprium esse Christo esse caput Ecclesiæ simpliciter, & proprie secundum influxum gratiæ, quia ejus humanitas, ex hoc quod est divinitati conjuncta, habet virtutem justificandi: & videtur etiam sequi ex his, quæ supra diximus, animam Christi per gratiam unionis perfectissime sanctificari; sed gratia illa est principium meriti, quæ est forma sanctificans, imo ut D. Th. dixit art. 4. sicut non quælibet forma, quæ dat esse, est principium perficiendi alios, sed illa, quæ est forma excellens, & perfecta, ita non quælibet gratia sanctificans personam est principium merendi aliis, seu justificandi alios, sed illa, quæ est excellens, & perfectissima; sed hujusmodi est Christo gratia unionis, potius quam habitualis. Unde confirmatur, nam gratia habitualis secundum se, quantumvis sit intensa, & perfecta ex suo genere, non est principium merendi aliis, neque ad hoc ex natura sua ordinatur; si autem in Christo habet hanc vim esse propter conjunctionem ad gratiam unionis, & propter dignitatem, quam in esse gratiæ inde accipit, ut supra declaratum est, & videtur intellexisse Cajetanus in art. 5. ergo, &c.

Inter has opiniones non invenio differentiam, quæ ad disputationem de re ipsa pertineat; rationes enim factæ in favorem ultimæ sententiæ concludunt, hanc dignitatem capitis potissimum deberi Christo ratione unionis, atque adeo gratiam unionis per se, & ratione excellentiæ, quam de se habet, esse sufficiens principium sanctificandi alios, gratiam vero habituales participare hanc virtutem ex conjunctione ad unionem. Unde non immerito dici potest gratia unionis quasi principium principalis meriti, nam ab illa oritur præcipuus, & infinitus valor, ac efficacia, & influxus in alios, ut ex dictis in 4. disp. satis constat; gratia autem habitualis est quasi principium proximum ejusdem meriti, unde fit, utramque possede dici gratiam capitis, unamquamque in suo ordine. Unde posset etiam distinguere gratia, quæ caput ipsum constituitur in esse capitis, a gratia, quæ datur capiti, ut eliciat actiones capitis, per quas influat in alios: prior est gratia unionis, quæ sine dubio potest hoc modo vocari gratia capitis, posterior vero est gratia habitualis, quæ proprie etiam vocatur in sua ratione gratia capitis. Et de hac potissime loquuntur D. Th. & alii Theologi, supponunt enim tanquam clarum, Christum esse vi suæ unionis esse & singularem hominem, & caput aliorum hominum: & inde inferunt indigere accidentali gratia, quæ & naturam ejus bene disponat, & perficiat, ut sit principium operandi ad sanctificationem aliorum, quia gratia unionis (ut supra dictum est) non est principium proximum, seu ratio operandi; & hoc sensu recte concludunt eandem gratiam habituales esse personalem, & capitis: loquimur autem generatim de gratia habituali, ut includit totam animæ iustitiam & habitus etiam potentiarum.

Ex his intelligitur, gratiam & dignitatem capitis ita esse Christo propriam, ut nulli alteri communicata sit, imo nec communicari possit puræ creaturæ saltem quoad perfectionem, & modum influendi gratiam in alios ex perfecta iustitia, quia hoc non convenit nisi ratione gratiæ unionis, ut dicta disp. 4. late dictum est. Quoad alia etiam, quæ ad potestatem excellentiæ pertinent, ut est sacramentorum institutio, &c. nemini etiam communi-

Gratia  
capitis  
quid sit.

Duplex  
influxus  
gratiæ in  
Christo.

Dubium;

Gratia  
capitis  
Christo  
propria.



eata fuit hæc dignitas, ut infra q. 22. latius explicabimus.

Quod vero hic aliqui disputant, an alius præter Christum possit dici caput Ecclesiæ, ad hunc locum non pertinet, constat enim eo modo, quo est Christus, nullum aliud esse caput; tamen sub Christo, & dependenter ab illo Vicarius ejus potest dici caput Ecclesiæ militantis, tanquam supremus gubernator, & dispensator mysteriorum Dei ab eodem Christo constitutus.

## ARTICULUS VII.

*Utrum diabolus sit caput omnium malorum.*

Inf. art. 8.

**A**D septimum sic proceditur. Videtur, quod diabolus non sit caput malorum. Ad rationem enim capitis pertinet, quod influat sensum & motum in membra: ut dicit quedam glossa super illud ad Eph. 1. Ipsum dedit caput, &c. Sed diabolus non habet virtutem influendi malitiam peccati, quod ex voluntate peccantis procedit. Ergo diabolus non potest dici caput malorum.

2. Præterea. Per quodlibet peccatum fit homo malus. Sed non omnia peccata sunt a Diabolo. Quod quidem manifestum est de peccatis demonum, qui non ex persuasionem alterius peccaverunt. Similiter etiam nec omne peccatum hominis ex diabolo procedit: dicitur enim in libro de Ecclesiasticis \* dogmatibus. Non omnes cogitationes nostræ malæ, semper diaboli instinctu excitantur: sed aliquoties ex motu arbitrii nostri emergunt. Ergo diabolus non est caput omnium malorum.

c. 82. habetur in operibus Augustini.

3. Præterea. Unum caput uni corpori præficitur. Sed tota multitudo malorum non videtur habere aliquid, in quo uniat: quia malum malo contingit esse contrarium: contingit etiam ex diversis defectibus, ut Dion. dicit 4. cap. de Divinis nominibus. \* Non ergo diabolus potest dici caput omnium malorum.

Sed contra est, quod super illud Job. 18. Memoria illius pereat de terra dicit glossa. \* De unoquoque iniquo dicitur, ut ad caput, id est diabolum, reverteretur.

c. 4. par. 4. in c. 1. medium & 6. Est Greg. lib. 14. moralium c. 11. id est 12. in.

at. præc.

a. Respondeo dicendum, quod sicut supra dictum est, \* caput non solum interius influit membris, sed etiam exterius gubernat, eorum actus dirigendo ad aliquem finem. Sic ergo potest dici aliquis caput alicujus multitudinis, vel secundum utrumque, scilicet secundum interiorem influxum, & exterioriorem gubernationem: & sic est Christus caput Ecclesiæ, ut dictum est. \* Vel secundum solam exterioriorem gubernationem: & sic quilibet princeps vel prælatus est caput multitudinis sibi subiectæ. Et per hunc modum dicitur diabolus caput omnium malorum: nam ut dicitur Job. 41. Ipse est Rex super universos filios superbia. Pertinet autem ad gubernatorem, ut eos, quos gubernat, ad suum finem adducat: finis autem diaboli est aversio rationalis creaturæ a Deo unde & a principio hominem ab obedientia divini præcepti remove tentavit. Ipsa autem aversio a Deo habet rationem finis, in quantum appetitur sub specie libertatis: secundum illud Hieron. 2. A seculo confregisti jugum, rupisti vincula, & dixisti, non serviam. In quantum igitur ad hunc finem aliqui adducuntur peccando, sub diaboli regimine & gubernatione cadunt: & ex hoc dicitur eorum caput.

Ar. præc.

Ad primum ergo dicendum: quod licet diabolus interius non influat rationali menti, tamen suggerendo inducit ad malum.

Ad secundum dicendum, quod gubernator non semper suggerit singulis subiectis, ut sue voluntati obediant, sed proponit omnibus signum sue voluntatis, ad cuius sequelam aliqui excitantur inducti, alii propria sponte. Sicut patet in duce exercitus, cujus vexillum sequuntur milites, etiam nullo persuadente. Sic igitur primum peccatum diaboli (qui ab initio peccat, ut dicitur 1. Joannis 3.) propositum est omnibus ad sequendum: quod quidam imitantur per suggestionem ipsius, quidam propria sponte absque ulla suggestionem. Et secundum hoc omnium malorum caput est diabolus, in quantum ipsum imitantur: secundum illud Sap. 2. Invidia diaboli mors introivit in orbem terrarum: imitantur autem illum qui sunt ex parte illius.

Ad tertium dicendum, quod omnia peccata conveniunt in aversione a Deo, licet ad invicem differant, secundum conversionem ad diversa commutabilia bona.

## COMMENTARIUS.

**H**ic, & sequens articulus tantum per occasionem a D. Th. positi sunt, & ideo præterea, quæ ad mentem ejus intelligendam pertinent, nihil de re ipsa disputabo. Cajetanus ergo circa finem articuli sequentis non bene exponit hunc titulum; dicit enim nomine diaboli hoc loco non intelligi aliquem singularem Angelum malum, scilicet Luciferum, sed totum ordinem diabolicum, & consequenter nomine omnium malorum tantum intelligi homines malos, quia articulus sequens ita necessario intelligendus videtur, & de eisdem malis est sermo in utroque, ut ex contextu patet.

Sed mihi non videtur hoc verisimile, sed D. Th. loqui de principe dæmoniorum, qui per antonomasiam solet in scriptura vocari, *diabolus*, eumque comparare ad omnes malos tam dæmones, quam homines: omnium enim est caput, quia omnes superat malitia, & omnes aliquo modo ad peccatum induxit, vel per se, vel per alios, ut traditur partim in 1. p. q. 63. art. 8. & q. 109. & 114. partim in 1. 2. q. 80. propter quod *Princeps hujus mundi* dicitur, Joan. 12. & 14. & hic sensus aperte colligitur ex argumento secundo cum solutione, ubi D. Thom. declarat, quomodo diabolus fuerit causa peccandi & dæmonibus, & hominibus. Cætera, quæ hic dici posset de modo, quo dæmon est causa peccandi aliis, incitatis locis tractanda sunt, & videri potest Greg. 32. moralium c. 24. & 25. & Cassian. collat. 8.

Quid nomen diaboli. D. Th. in scilicet.

## ARTICULUS VIII.

*Utrum Antichristus possit etiam dici caput omnium malorum.*

**A**D octavum sic proceditur. Videtur, quod Antichristus non sit caput malorum. Unius enim corporis non sunt diversa capita. Sed diabolus est caput multitudinis malorum. Non ergo Antichristus est eorum caput.

2. Præterea. Antichristus est membrum diaboli. Sed caput distinguitur a membris. Ergo Antichristus non est caput malorum.

3. Præterea. Caput habet influentiam in membra. Sed Antichristus nullam habet influentiam in malos, qui eum præcesserunt. Ergo Antichristus non est caput malorum.

Sed contra est, quod Job. 21. super illud, Interrogate quemlibet de viatoribus, dicit glossa. \* Dum de omnium malorum corpore loqueretur, subito ad omnium iniquorum caput Antichristum verba convertit.

a. Respondeo dicendum, quod sicut supra dictum est, \* in capite naturali tria inveniuntur, scilicet ordo, perfectio, & virtus influendi. Quantum igitur ad ordinem temporis, non dicitur Antichristus esse malorum caput, quasi ejus peccatum præcesserit, sicut præcessit peccatum diaboli. Similiter etiam non dicitur esse caput malorum propter virtutem influendi: etsi enim aliquos sui temporis ad malum sit conversurus, exterius inducendo, non tamen illi, qui ante eum fuerunt, ab ipso sunt in malitiam inducti, nec etiam ejus malitiam sunt imitati, unde secundum hoc non posset dici caput omnium malorum, sed aliquorum. Relinquitur ergo, quod dicatur caput omnium malorum propter malitiæ perfectionem. Unde super illud 2. ad Thessal. 2. Ostendens se tanquam sit Deus, dicit glossa. \* Sicut in Christo omnis plenitudo divinitatis inhabitavit, ita in Antichristo omnis malitiæ plenitudo: non quidem ita persona, sicut humanitas Christi a filio Dei: sed quia diabolus suam malitiam eminentius ei influit suggerendo, quam omnibus aliis. Et secundum hoc omnes alii mali, qui præcesserunt, sunt quasi quedam figura Antichristi, secundum illud 2. ad Thessal. 2. Mysterium jam operatur iniquitatis.

Ad primum ergo dicendum, quod diabolus & Antichristus non sunt duo capita, sed unum, quia Antichristus dicitur esse caput, in quantum plenissime invenitur in eo impressa malitia diaboli. Unde super illud 2. ad Thessal. 2. Ostendens se tanquam sit Deus: dicit glossa. \* In ipso erit caput omnium malorum, scilicet diabolus, qui est Rex super omnes filios superbia. Non autem dicitur in eo esse per unionem personalem: nec per intrinsecam inhabitatorem (quia sola Trinitas menti illabitur, ut dicitur in libro de ecclesiasticis dogm. †) sed per malitiæ effectum.

63. 1. 2. q. 84. a. 3. & 4. Et 3. d. 13. q. 2. a. 1. c. Et veri. q. 29. ar. 4. c. & mal. q. 8 ar. 1. co. & op. 3. 223. & 1. c. 11. co. 4. & 4.

Est gl. Greg. li. 15. Moralium c. 28. in principio pro a. 1. hujus qu.

gl. ord. ib.

Gl. ord. ib.

c. 83. inter opera Augustini, to. 39.



Ad secundum dicendum, quod sicut caput Christi est Deus, & tamen ipse est caput Ecclesie (ut supra dictum est), ita Antichristus est membrum diaboli, & tamen est caput malorum.

Ad tertium dicendum, quod Antichristus non dicitur caput omnium malorum propter similitudinem influentia, sed propter similitudinem perfectionis. In eo enim diabolus quasi malitiam suam ducet ad caput, per modum, quo dicitur aliquis ad caput suum propositum ducere, cum illud perfecit.

#### COMMENTARIUS.

**R**espondet D. Th. Antichristum posse dici caput solum quoad perfectionem, & abundantiam malitiae. Ubi statim occurrit inquirendum, quomodo possit hoc esse verum respectu demonum. Propterea Cajet. dicit in hoc titulo nomine omnium malorum intelligendos esse solos homines, quia fieri, inquit, non potest, ut Antichristus malitia superet daemones, cum illi sint ita obstinati in malo, ut nec converti possint, nec bene operari, Antichristus autem futurus sit viator. Quæ ratio (si quid valet) etiam probat, neque omnes malos homines posse in hoc titulo intelligi, quia etiam damnati homines habent voluntates obstinatas, sicut daemones. Ratio ergo inefficax est, quia licet probet ratione status, damnatorum statum excedere in malitia statum, &c. cuiuslibet viatoris: tamen in intensione, vel multitudine malitiae superare interdum potest viator damnatum. Et ideo probabile videtur hunc articulum intelligi de omnibus malis, etiam comprehendendo daemones præter Luciferum, ut titulus hujus articuli, & præcedentis eodem modo intelligantur: tum etiam quia ita D. Th. insinuat in solutionibus argumentorum, ubi dicit Antichristum esse quasi primum membrum diaboli, & caput aliorum malorum. An vero hoc ita sit, incerta res est. Sed de Antichristo integra disputatio tradenda est infra in fine hujus materiae, ubi de secundo Christi adventu disputabimus.

Quæri vero hic potest, an Adam possit etiam vocari caput malorum hominum: sed non oportet in hoc immorari, non est tamen ita vocandus, quia nec malitia superat alios, nec ex directa intentione sua alios ad malum inducit, sicut daemon.

#### QUÆSTIO IX.

De scientia Christi in communi, in quatuor articulos divisa.

**D**einde considerandum est de scientia Christi. Circa quam duo consideranda sunt. Primo, quam scientiam Christus habuerit: secundo, de unaquaque scientiarum ipsius.

Circa primum queruntur quatuor.

Primo, utrum Christus habuerit aliquam scientiam præter divinam.

Secundo, utrum habuerit scientiam, quam habent Beati vel comprehensores.

Tertio, utrum habuerit scientiam inditam vel infusam.

Quarto, utrum habuerit aliquam scientiam acquisitam.

**P**ost tractatum de gratia aggreditur D. Th. tractatum de scientia animæ Christi, quem ab hac usque ad q. 12. prosequitur, & in hac quaestione agere proponit in communi de hac scientia, tamen in discursu ejus tractat quaestionem, an est, de hujusmodi scientia tam in communi, quam in particulari, in sequentibus vero quaestionibus de singularum scientiarum perfectione disputat.

#### ARTICULUS I.

Utum Christus habuerit aliquam scientiam præter divinam.

**A**d primum sic procedit. Videtur, quod in Christo non fuerit aliqua scientia præter divinam. Ad hoc enim necessaria est scientia, ut per eam aliqua cognoscantur. Sed Christus per scientiam divinam cognoscebat omnia: superfluum igitur fuisset, quod in eo esset alia scientia.

2. Præterea. Lux minor per majorem offuscat. Sed omnis scientia creata comparatur ad scientiam Dei creatam, sicut lux minor ad majorem. Ergo in Christo non refulsit alia scientia, quam divina.

3. Præterea. Unio humanae naturæ ad divinam facta

est in persona, ut ex supra dictis patet. † Ponitur autem in Christo secundum quosdam quædam scientia unionis: per quam scilicet Christus ea, quæ ad mysterium Incarnationis pertinent, plenius scivit, quam aliquis alius. Cum ergo unio personalis contineat duas naturas, videtur, quod in Christo non sunt due scientia, sed una tantum scientia pertinet ad utramque naturam.

Sed contra est, quod Ambrosius dicit in libro de Incarnat. \* Deus in carne perfectionem naturæ assumpsit humane, suscepit sensum hominis, sed non sensum carnis inflatum. Sed ad sensum hominis pertinet scientia creata. Ergo in Christo fuit scientia creata.

a. Respondeo dicendum, quod sicut ex supradictis patet, \* Filius Dei humanam naturam integram assumpsit, id est, non solum corpus, sed etiam animam: non solum sensitivam, sed etiam rationalem. Et ideo oportuit, quod haberet scientiam creatam propter tria. Primo quidem considerata est in potentia ad intelligibilia cognoscenda: est enim sicut tabula, in qua nihil est scriptum, & tamen possibile est in ea scribi per intellectum possibilem, in quo est omni a fieri, ut dicitur in tertio de Anima. \* Quod autem est in potentia, est imperfectum, nisi reducat ad actum. Non autem fuit conveniens, quod Filius Dei humanam naturam imperfectam assumeret, sed perfectam, utpote, qua mediante, totum humanum genus ad perfectum erat reducendum. Et ideo oportuit, quod anima Christi esset perfecta per aliquam scientiam, quæ esset propria perfectio ejus. Et ideo oportuit in Christo esse aliquam scientiam præter scientiam divinam, alioquin anima Christi esset imperfectior animabus aliorum hominum. Secundo, quia cum qualibet res sit propter suam operationem, ut dicitur in secundo de Cael. \* frustra haberet Christus animam intellectivam, si non intelligeret secundum illam, quod pertinet ad scientiam creatam. Tertio, quia aliqua scientia creata pertinet ad animam humanam naturam, scilicet, illa, per quam naturaliter cognoscimus prima principia: scientiam enim hic large accipimus pro qualibet cognitione intellectus humani. Nihil autem naturalium Christo defuit, quia totam humanam naturam suscepit, ut supra dictum est. \* Et ideo in sexta Synodo damnata est positio negantium in Christo esse duas scientias, vel duas sapientias.

Ad primum ergo dicendum, quod Christus cognovit omnia per scientiam divinam operatione increata, quæ est ipsa Dei essentia: Dei enim intelligere est sua substantia, ut probat \* Philosophus 12. Metaphy. Unde hic actus non potuit esse anima humana Christi, cum sit alterius naturæ. Si igitur non fuisset in anima Christi aliqua alia scientia præter divinam, nihil cognovisset: & ita fuisset frustra assumpta, cum omnis res sit propter suam operationem.

Ad secundum dicendum, quod si duo lumina accipiantur ejusdem ordinis, minus offuscat per majus, sicut lumen solis offuscat lumen candelæ: quorum utrumque accipitur in ordine illuminantis. Si vero accipiantur duo lumina, ita quod majus sit in ordine illuminantis, & minus in ordine illuminati, minus lumen non offuscat per majus, sed magis augetur: sicut lumen aeris per lumen solis. Et hoc modo lumen scientiæ non offuscat, sed magis clarescit in anima Christi per lumen scientiæ divinæ, quæ est lux vera illuminans omnem hominem venientem in hunc mundum, ut dicitur Joan. 1.

Ad tertium dicendum, quod ex parte unitorum ponitur scientia in Christo, & quantum ad naturam divinam, & quantum ad humanam: ita quod propter unionem, secundum quam est eadem hypostasis Dei & hominis, id, quod est Dei, attribuitur homini, & id, quod hominis, attribuitur Deo, ut supra dictum est. † Sed ex parte ipsius unionis non potest poni in Christo aliqua scientia: nam unio illa est ad esse personale, scientia autem non convenit personæ nisi ratione alicujus naturæ.

#### COMMENTARIUS.

**D**ivus Thom. nomen scientiæ pro nomine cognitionis usurpat, ut ipse in articulo exponit, & generatim agit de cognitione, ut actum primum, & secundum comprehendit: unde cum respondet, in Christo esse scientiam creatam, utrumque affirmat, scilicet esse in illo cognitionem creatam, & principia ad illam necessaria. Et ita ex tribus rationibus, quas affert, prima, quæ fundatur in perfectione animæ Christi, generalis est, & utrumque

pro-

q. 2. art. 2.

II lib. de Incarn. Dom. fac. c. 7. a medio 1. 2.

qu. 5.

II. 3. de anima 10. 18. com. 2.

II. 2. de Cael. 10. 17. com. 2.

q. 5. & c.

lib. 12 Metaph. 10. 39. com. 3.

q. 3. art. 1. arg. & respons.

Debium.

Responso.

64. 3. d. 14. ar. 1. q. 1. & 10. 2. 2. & op 3. 6. 233.



probat, scilicet tam actum, quam habitum, seu facultatem intelligendi. Secunda vero tantum procedit de operatione, & consequenter de facultate ad illam necessaria. Tertia autem, quæ in hoc fundatur, quod habitus principiorum est homini naturalis, non tam de actu, vel habitu proprie dicto, quam de ipso naturali lumine intellectus concludit, & ita est tota litera perspicua. Solutiones vero argumentorum faciles sunt, verum difficultas, quæ tangitur in solutione ad primum, in sequenti disputatione tractanda est. De opinione vero, quæ ponebat in Christo specialem scientiam unionis, quam D. Th. tangit in solutione ad 3. dicemus commodius disp. 26. super q. 10. D. Th.

## DISPUTATIO XXIV.

In quatuor sectiones distributa.

*De intellectu creato animæ Christi, & ejus actibus.*

DE tribus occurrit hoc loco disputatio, scilicet de intellectiva potentia animæ Christi, & de actibus ejus, & habitibus in communi, omnia enim hæc D. Th. in hoc art. attigit, & supra q. 5. art. 4. quæsit, an Verbum assumpserit intellectum, quam quæstionem ibi diximus pertinere ad hunc locum, prout intellectus significat ipsam potentiam intelligendi.

## SECTIO I.

*An in anima Christi sit intellectus creatus, & quantum perfectionis sit.*

PRæter errorem Apollinaris, & Arii, & aliorum, qui negarunt esse in Christo animam rationalem, non invenio aliquem posuisse in Christo substantiam animæ rationalis, & negasse potentiam intellectivam, quamquam aliqui voluntatem creatam negasse videantur, de qua eadem fere est ratio. Sed de eorum sensu, & errore infra q. 18. dicemus. Dico ergo, de fide certum esse habere animam Christi intellectum creatum. Probatur primo ex Scripturæ testimoniis, & Conciliorum definitionibus, quibus supra probatum est, assumpsisse Verbum mentem, seu animam rationalem; quamquam enim subtilitate metaphysica anima rationalis distingui possit, & præscindi ab intelligendi facultate, tamen communi loquendi modo, prout loquuntur Scripturæ, Concilia, & Sancti, anima rationalis vocatur illa, quæ proxime est apta ad ratiocinandum, atque adeo, quæ facultatem habet intelligendi. Secundo probatur ex generalibus definitionibus Conciliorum, quæ licet in particulari non loquantur de intellectu, tamen in generali definitione illum comprehendunt: dicit enim Agatho Pap. in epist. Synod. (quæ VI. Synod. act. 4. refertur, & in 8. suscipitur): *Confitemur in Christo omnia duplicia, quæ ad naturas pertinent, duas naturas ejus prædicamus, & unamquamque proprietates naturales habere confitemur: divinam, omnia quæ divina, humanam omnia, quæ humana sunt, absque ullo peccato.* Et idem inferius repetit, & refert in eandem sententiam Concilium Chalcedonen. act. 5. dicens, Christum: *Rationalem animam perfectam assumpsisse, salva omni ejus proprietate, & per omnia nobis similem, absque peccato;* & V. Synod. collat. 8. can. 7. ubi eodem modo loquitur. Idem Sophronius in epist. quæ refertur eadem VI. Synodo, act. 11. ubi expresse videtur loqui de intellectu, dicit enim: *Assumpsisse Verbum animam rationalem animabus nostris contribilem, & mentem nostram menti comparem;* & ideo D. Th. hic dixit in VI. Synodo damnatam esse positionem negantium in Christo duas scientias, vel duas sapientias. Similis denique definitio habetur in Concil. Lateran. sub. Mart. I. can. 9. ubi dicitur: *Fuisse proprietates humanitatis in Christo indiminate, & sine deminutione.* Tercio omnia, quibus statim probabimus in Christo fuisse actum intelligendi, hoc a fortiori convincunt, nam actus præsertim vitalis supponit potentiam. Idem etiam convincitur illis testimoniis, quibus infra probaturum fuit, in Christo fuisse liberum arbitrium, quo argumentum utitur Damas. lib. 3. de fid. c. 14. *Quoniam* *θελησις* inquit, *appetitio est cum ratione conjuncta;* & Theologi definiunt liberum arbitrium esse *Facultatem voluntatis, & rationis*, ut constat ex 1. 2. q. 1. art. 1. Ultima ratio est, quia est evidens verum hominem

neccessario habere intellectum creatum, seu proximam intelligendi facultatem, quæ cum substantia animæ rationalis necessario conjuncta est.

Dices: non est tamen evidens, non posse separari de potentia absoluta. Respondetur tamen. Ex dictis est certum non fuisse separatum; imo & evidens fere est, quia assumere animam sine potentia intellectiva, nec dignitatem Verbi Dei decebat, quia illo posito non esset capax in humanitate assumpta visionis divinæ, nec rationalis cognitionis, sed esset quasi brutum, unde contra finem incarnationis hoc fuisset, quia tunc nec mereri, nec satisfacere potuisset.

Sed quæres, quantæ perfectionis naturalis fuerit hic Christi intellectus. Respondetur, si cum intellectibus angelicis conferatur, non dubium est, quin fuerit inferior illis in naturali perfectione, quia intellectus Christi in naturali perfectione non transcendit speciem humani intellectus, ut probant fere omnia, quæ in confirmationem positæ assertionis adducta sunt: intellectus autem humanus essentialiter est minus perfectus, quam angelicus: si autem intellectibus aliorum hominum comparetur, pendet comparatio ex quæstione physica, an unus intellectus sit perfectior alio secundum se, quam ego nunc neque tractare, neque definire intendo. Si tamen cum Cajet. & aliis id affirmetur, sine ullo dubio est consequenter dicendum intellectum Christi esse perfectissimum inter omnes creatos in hominibus, atque adeo superare etiam intellectum Adæ, quem credibile est inter alios homines optimam animam fuisse sortitum, eo quod fuerit totius naturæ parens ab ipso Deo solo immediate productus. Quod vero Christus illum superaverit, suaderi potest, tum ex dignitate personæ, tum ex fine altiori, ad quem anima Christi creabatur, & assumebatur. Dico autem inter intellectus creatos, quia si comparatio fiat cum omnibus intellectibus humanis, qui creari possunt, non est necesse, ut intellectus Christi sit omnium possibilium perfectissimus, quia juxta hanc præsertim sententiam, sicut una anima, vel unus intellectus est in sua entitate individua perfectior alio: ita in hac perfectionis inæqualitate, seu varietate potest in infinitum procedi: & ita semper Deus potest facere in hac specie perfectiorem intellectum, in hoc enim nulla potest assignari repugnantia supposita illa sententia, & est maxime consentaneum divinæ omnipotentis, ut constare potest ex his, quæ 1. p. q. 25. de hac materia tractantur. Si autem quis contendat unum intellectum humanum non esse perfectiorem alio secundum se, cessat hæc quæstio: non est tamen negandum, eo modo, quo experimur unum hominem excedere alterum in facultate intelligendi, sive id proveniat ex ipsis animabus, sive ex sola corporis dispositione, hoc (inquam) modo Christum superasse reliquos homines propter rationes easdem supra tactas, & quia (ut infra ostendemus) corpus Christi fuit optime dispositum ad rationalem animam suscipiendam.

## SECTIO II.

*Utrum fuerit in Christo homine actus intelligendi creatus, & ex quo tempore.*

CONstat, in Christo esse scientiam increatam, est enim verus, & perfectus Deus, unde fit per communicationem idiomatum vere dici, hunc hominem omnia scire per increatam scientiam, ut bene exponit D. Th. quæstione sequenti, art. 1. ad 3. nunc vero inquiremus, an in humanitate, & anima, & intellectu creato habuerit actualem scientiam, & quæ illa fuerit.

In quo primus error esse potest negans, Christum per humanitatem aliquid actu cognovisse, & hujusmodi existimant aliqui fuisse Monothelitarum errorem, qui unam tantum dicebant esse in Christo operationem, eamque esse divinam: quod præcipue intelligebant de operatione interna voluntatis, atque adeo intellectus. Sed de hac hæresi infra q. 19. dicendum est.

Secunda sententia affirmat, Christum per animam suam actu intellexisse, non tamen actu creato, sed ipsa scientia increata unita intellectui creato Christi ratione actus intelligendi. Hanc sententiam ex parte tenet Hug. de Sanct. Viç. opus. de anima Christi, & ejus scientia, & lib. 2. de sacrament. p. 6. c. 1. dico autem, ex parte, quia hic author, quamvis affirmet animam Christi cognovisse

Obiectio.  
Responsio.

Dubium.  
Responsio.

Perfectio  
naturalis  
intellectus  
Christi  
quæ sit.

Intellectus  
Adæ  
inter  
humanos  
perfectissimus  
ex  
cepto  
intellectu  
Christi.



per scientiam increatam, non tamen expresse negat esse in illa anima aliquem actum creatum, & in eandem sententiam citat hic Cajetan. Joan. de Ripa, & Capreolus in 3. dist. 14. q. 1. art. 2. argumentis contra 2. concl. & Gregorius in 2. d. 7. q. 2. refert aliquos ita sensisse de omnibus beatis. Fundamentum in presenti esse potest, quia hoc non implicat contradictionem, & pertinet ad maximam Christi perfectionem; ergo non est illi negandum, præsertim cum Paul. 1. ad Colos. 2. dicat in Christo esse *Omnes thesauros sapientie, & scientie Dei*. Major probatur, quia auctoris divina tam vere, ac formaliter est actus intelligendi, sicut est objectum actu intelligibile; ergo sicut per seipsam uniri potest in ratione objecti, seu speciei intelligibilis, ita & in ratione actus. Idem argumentum & difficilius fumitur ex ratione subsistentiæ, quia sicut anima formaliter intelligit per actum intelligendi, ita subsistit per actum subsistendi: at Verbum, quia est formalis subsistentia, potest per se ipsum uniri, & supplere vicem subsistentiæ creatæ; ergo similiter, &c.

Dico primo. Certum de fide est, Christum ut hominem per intellectum creatum habuisse actualem scientiam, seu cognitionem. Probatur primo ex scriptura Joan. 8. *Scio, unde veni*; & infra, *scio eum, & sermonem ejus servo*; sicut ergo observat mandata, in quantum homo, ita & sciebat, in quantum homo. Simile est illud Joan. 13. *Sciens Jesus, quia venit hora ejus*, Matth. 22. *Cognita Jesus nequitia eorum*, & similia, quæ passim habentur in Evangelio. Secundo in Scriptura tribuuntur Christo oratio, meritum, & similes actiones, quæ vel sunt actus intellectus, vel voluntatis, quæ supponit actum intellectus ejusdem animæ, cujus est voluntas, quia non excitatur anima ad amandum nisi ea, quæ cognoscit. Tertio confirmatur ex sermone & doctrina Christi, docebat enim, quæ intelligebat (loquebatur enim, ut homo rationalis); sicut ergo docebat, & loquebatur ut homo, ita etiam intelligebat: unde Joan. 1. *Deum nemo vidit unquam: Unigenitus, qui est in sinu Patris, ipse enarravit*, & Joan. 8. *Quod video loquor*; & Agatho Pap. in citata epistola dicit in Christo fuisse locutionem humanam habentem humanas proprietates, quarum una est, ut ab humana intelligentia procedat. Quocirca definitiones supra adductæ ad hoc ipsum confirmandum adduci possunt. Ultimo uti possumus ratione, & optima est illa D. Th. quia potentia est propter operationem (frustra enim assumpsisset Verbum rationale animam, & intellectum, nisi illa esset intellecturum), quare hoc esset contra finem Incarnationis, & præter dignitatem Verbi incarnati.

Dico secundo. In intellectu Christi fuit actus creatus intelligendi. Hanc etiam conclusionem existimo de fide certam & definitam in VI. Synod. & aliis Conciliis, quæ definiunt in Christo esse duas operationes, divinam & humanam: est enim universalis definitio, quæ non minus locum habet in actu intellectus, quam voluntatis. Item ex supracitatis generalibus locutionibus, quibus affirmant Concilia fuisse in Christo utramque naturam perfectam cum omnibus proprietatibus. Probatur autem breviter ex Scriptura, Isai. 11. *Requiescet super eum Spiritus Domini, Spiritus sapientie, intellectus, scientie, & consilii*, quod esse intelligendum de donis creatis supra ostendimus ex sanctis, qui magis de actibus, quam de habitibus loquuntur. Item Luc. 2. *Proficiebat sapientia, &c.* Nam licet hic locus a multis sanctis exponatur de demonstratione, & ostensione sapientiæ (sicut supra diximus agentes de gratia), tamen, sicut ibi diximus hanc ostensionem non esse sine aliquo augmento in ipsis actibus gratiæ, ita nec fuit sine actibus scientiæ, præsertim quia infra q. 12. referemus multos patres, qui locum hunc intelligunt de vero augmento scientiæ creatæ per proprios actus ejus. Ac denique ex contextu constat, sicut est sermo de ætate, & gratia hominis, ita & de sapientia hominis, ut expresse docuit Ambr. lib. de Incarn. Dom. sacram. 2. 7. Ultima ratio sumpta ex proprietate, & perfectione humanæ naturæ, quæ est in Christo, hoc satis confirmat.

Dico tertio. Anima Christi Domini neque Deum ipsum, neque quidquam aliud formaliter intellexit per ipsam scientiam increatam divinitatis. Hæc est sententia communis Theologorum D. Th. hic, in 3. q. 1. art. 1. & q. 20. de verit. art. 1. Cajet. & aliorum Thomistarum. Capreol supra dicta dist. 14. ubi Bonavent. q. 1. Marfil. q. 10.

art. 2. Gregor. supra, & colligi potest ex Agathone Pap. dict. epist. inde enim probat in Christo non posse unam esse operationem utriusque naturæ, quia impossibile est propriam operationem unius naturæ fieri operationem alterius. Et in hanc sententiam citat Augustin. 5. contra Julian. ubi nihil invenio; in lib. tamen de duabus animabus contra Manichæos c. 10. multa habet, ex quibus illud deduci potest, & Ambros. lib. 2. de fide c. 4. aperte dicit operationem unius potestatis non posse esse alterius: *Nam ubi est, inquit, substantia diversa, nequit esse operatio una*. Et ad eundem modum argumentatur Damasc. lib. 3. c. 13. 14. & 15. & Leo Pap. Epist. 10. ad Flavian. & 96. ad Leonem Augustum. Ratio vero peculiaris ex hoc mysterio reddi potest, quia, si scientia increata divinitatis per seipsam esset ita unita intellectui creato animæ Christi, ut redderet illam actu intelligentem, jam esset unio facta in natura, & esset communis toti Trinitati. Sed hæc ratio non cogit, diceretur enim, hanc unionem non esse hypostaticam, sed beatificam, & vel esse, vel saltem posse esse communem omnibus beatis, atque adeo non esse substantialem unionem, sed accidentalem, seu potius intelligibilem, sicut multi loquuntur de unione divinitatis in ratione speciei intelligibilis. Ratio ergo propria est, quia actus intelligendi intellectus creati essentialiter dicit duplicem respectum ad intellectum, quem constituit intelligentem, ratione cujus repugnat actui increato, ut per seipsum constituat talem intellectum actu intelligentem. Primus respectus est actionis: nam quia intelligere est actus vitæ, oportet, ut sit actio intelligentis, nam actualis vita consistit in actione, ut ex prima parte, seu materia de anima constat. Alius respectus est formæ, est enim intellectio actus formalis intelligentis, cum sit actus secundus, & immanens, & ideo per formalem unionem sui ad intellectum constituit illum intelligentem. Quod duobus modis fieri potest, scilicet, vel per summam identitatem, ut contingit in Deo, quia est ipsum intelligere per essentiam, vel per informationem propriam, ut est in omni intellectu, quæ ab intellectu distinguitur, quia ergo intellectio increata nec fieri potest ipse intellectus creatus, neque ab illo effici, neque illum informare, ideo per seipsam non potest constituere illum actu intelligentem.

Et hæc ratio solvit fundamentum secundæ sententiæ, ad priorem enim partem de specie, seu objecto intelligibili respondet hic Cajetan. speciem esse formam in esse intelligibili, intellectionem vero in esse naturali: essentiam autem divinam posse informare intellectum creatum, ut intelligibilem formam, non vero naturalem. Quod si interroges, cur actus intelligendi creatus magis sit forma naturalis, quam species intelligibilis; Cajetan. nullam rationem reddit, sed solum inductione probat intellectionem esse formam naturalem, quia ita reperimus in omnibus intellectionibus creatis, cum tamen eadem fere fieri possit in speciebus creatis. Quare gratis mihi videtur conficta illa distinctio, ut omittam vix posse intelligi, si de vera forma sit sermo: nam illa, quæ dicitur forma in esse intelligibili, vel formaliter dat aliquid esse reale, vel nullum confert: si hoc posterius dicatur, vere non est forma realis, cum non habeat realem causalitatem formæ, quæ est dare formaliter aliquid esse reale componendo unum aliquid reale ens. Si autem dicatur prius, fieri non potest, ut essentia divina ita informet intellectum creatum, quia nec potest dare illi esse substantiale, quia intellectus non est capax illius: nec accidentale, cum ipsa formaliter non sit accidens: neque posset alteri ex his modis uniri, quin esset vera forma substantialis, vel accidentalis, atque adeo forma physica, seu naturalis. Et hæc ratio applicari optime potest ad confirmandam conclusionem positam, quia quamvis divina essentia sit formalis intellectio, est tamen intellectio substantialis, cujus non est capax intellectus creatus, qui solum accidentaliter, non substantialiter est intelligens.

Ad exemplum ergo de specie intelligibili respondetur, speciem intelligibilem creatam per se non poni, ut informet, sed ut efficiat, nam per se tantum est quasi semen objecti, ut suppleat absentiam, vel efficacitatem ejus: ut enim intellectus intelligat, requirit concursum sui objecti, qui non est concursus formæ intrinsece informantis, sed efficientis, aut termini, specificantis: species vero ponitur, ut suppleat vicem ejus, præsertim in ratione principii

Anima Christi nihil formaliter intellexit per scientiam increatam divinitatis.

Actio vitalis immanens cur necessario sit esse a potentia sui subiecti.

Respond. ad fundamentum.

Essentia divina cur uniri potest intellectui creato per se ipsam in ratione speciei intelligibilis, & non actus.



ei ipsi coefficientis, quod vero inhæreat, convenit speciei accidentali eo quod accidens est, non ex vi concursus necessarii ad intellectionem: essentia ergo divina, cum dicitur per se ipsam supplere vicem speciei, non est, quia vere informat, sed solū, quia intinse adest intellectui, & cum illo cōcurrit ad visionem sui, tam in ratione principii efficiētis, quam objecti terminantis illā, ut latius 1. p. q. 12.

Ad aliud vero exemplum de subsistentia, negatur similitudo propter multa. Primo quia subsistere non consistit in actione, quæ sit ab intrinseco principio vitæ, sicut intelligere, quæ ratio, etiam de specie intelligibili dari poterat. Secundo, quia subsistentia non est vera forma, sed tantum terminus naturæ, ut supra dictum est. Tertio, quia subsistentia etiam creata est actus substantialis, & ideo suppleri potest per subsistentiam increatam etiam substantialem: at vero intellectio creata est actus accidentalis, & ideo intellectio substantialis non potest vicem ejus subire. Et confirmatur hæc responsio & conclusio, nam si fundamentum illud aliquid valeret, sequeretur, quia essentia divina est formaliter sua misericordia, & iustitia, & aliæ perfectiones similes, posse per se ipsam reddere formaliter iustam, misericordem, &c. animam humanā, quod est absurdū, aliās posset etiā justificari homo formaliter per ipsam iustitiam increatam Dei, quod est plusquam falsum, ut constat ex doctrina de justificatione.

Ex quibus exemplis licet intelligere, nullam perfectionem formaliter existentem in Deo, posse per se ipsam formaliter communicari, seu uniri creaturæ, præter subsistentiam, quia omnis alia perfectio, ut est in Deo, pertinet ad ipsius naturæ (ut ita dicam) constitutionem: Deus autem non potest uniri creaturæ in natura, ut supra ostensum est. Ut vero talis perfectio esse potest in creatura, vel est essentialis, ut est perfectio substantiæ, prout de natura dicitur, & ita non potest conferri per ipsam essentiam Dei, quia non potest illa essentialiter constituere essentiam creatam: vel est accidentalis, & ita etiam non potest formaliter dari per substantialem perfectionem ipsius divinitatis propter rationem factam.

**Dubium.** Sed quæres primo, quam sit certa hæc postrema conclusio. Quidam enim eam putant esse de fide & contrariam hæreticam. Alii periculosa, & temerariam sententiam Ripæ appellant, quia ex illa sequitur, animam Christi comprehendere Deum, quia videret Deum eadē visionē, quæ ipse se videt. Sequitur etiam, animam Christi non indigere lumine creato ad videndum Deum, quod est damnatum in Concilio Viennen. Clement. Ad nostrum, de hæc. Sequitur denique, animam Christi amare Deum ipso amore increato, quo Deus se amat, & non per charitatem creatam illi infusam, quod supra hæreticum esse diximus. Denique in Concil. Basil. Sess. 22. damnantur hæc propositio Augustini de Rōmā: *Anima Christi tā clare, ac intense videt Deum, sicut Verbum ipsum.*

**Respons.** Respondeo, ita asserere animam Christi cognoscere omnia, quæ intelligit, per ipsam increatam scientiam, ut nullum habeat creatum actum intelligendi, est plane hæreticum: tamen, si non negetur habere actus creatos, asserere etiam cognoscere per increatum, non est hæreticum, quia neque conclusio nostra est definita in aliquo Concilio, neque aperte colligitur ex Scriptura, vel ex aliis principiis fidei, neque enim ex contraria sententia sequitur aperte comprehensio Dei: dici enim posset, illam scientiam increatam non totaliter uniri intellectui creato, sed juxta capacitatem ejus, & eadem ratione dici posset lumen gloriæ esse necessarium, non ad agendum, sed ad suscipiendam illam visionem, & ut intellectus fiat capax illius. Merito tamen temerarius censendus esset, qui contrariam sententiam vellet defendere, quam Theologi fere omnes, ut absurdam, & improbabilem reliquerunt, cuique Agatho Pap. & alii Patres citati fere aperte contradicunt, quæ denique licet non aperte repugnet, parum tamen consentanea est principiis fidei.

**Dubium 2.** Quæres secundo, quo tempore ineeperit anima Christi habere hos actus intelligendi, seu ratione uti? Gnostici, quantum ex Irenæo colligitur l. 1. c. 17. videntur asseruisse, Christum in infantia non habuisse rationis usum. Brentium etiam asseruisse Christum, sicut corpore ita & animo adolevisse, refert Fevarden. in Iren. l. 2. c. 49. n. 5. Et ibidem ait, Gallasium in annotat. illius loci Irenæi asseruisse, Christum more aliorum hominum didicisse. Et alios similes hæreticos ibidē refert, quos variis Patrū

Suarez. Tomo XVI.

testimoniis confutat, & ex his, quæ in discursu sequentium quæstionum dicemus, sufficienter confutabuntur a nobis. Nunc breviter dico, ex communi doctrina Theologorum in 3. dist. 14. Christum a primo instanti conceptionis suæ usum fuisse ratione, & habuisse actus intelligendi. Hæc est aperta sententia August. l. 2. peccat. merit. c. 29. & juxta illam intelligenda sunt, quæ idem tractaverat, lib. cap. 37. idem docet Ansel. lib. 2. Cur Deus hom. c. 13. Probatur ex illo Jerem. 31. *Mulier circumdabit virum*, id est, Virgo Christum, qui vir dicitur, non ætate, sed sapientia: ut ibi Hieron. & alii Patres exponunt, & eleganter Bernard. homil. 2. in Missus est: deinde ex illo Joan. 1. *Vidimus gloriam ejus gloriā quasi unigeniti a Patre plenum gratiæ, & veritatis*, id est, scientiæ, ut August. & alii exponunt: sicut ergo a primo instanti conceptionis fuit *Unigenitus a Patre*, ita etiam fuit plenus scientiæ, ita enim decebat tantæ personæ dignitatem, ut in simili argumentatur August. 15. de Trinit. c. 26. & indicat Cypr. lib. de Cardin. Christ. oper. capit. de Nativ. Christi, & melius Anselm. l. 2. Cur Deus hom. c. 13. Ex quibus confirmatur: nam Verbum in natura nostra eas tantum imperfectiones assumpsit, quæ ita sunt connaturales naturæ nostræ mortali, ut possent etiam ad nostram redemptionem conducere: at vero carentia actus intelligendi, seu usus rationis, nihil nobis prodesse poterat, non ergo assumpsit hanc imperfectionem: sed veritas hæc magis ex sequentibus disputationibus constabit, & explicabitur. Sed obijci potest contra hoc, illud Isai. 8. *Antequam sciat: puer vocare Patrem. &c.* cujus proprius sensus esse videtur, antea quam habeat usum rationis, cui consonat illud Luc. 2. *Proficiebat sapientia*. Respondetur, Hieronymum ita exponere primum locum; *Antequam sciat vocare Patrem* id est, antequam fiat homo, & habeat Patrem, quem vocare possit. Ambros. vero lib. de incarnat. c. 7. & August. serm. 32. de tem. exponunt: *Antequam sciat*, id est, antequam propter infantiam possit vocare Patrem. Exponi etiam potest de scientia experimentalī, sicut testimonium Lucæ, de quo qu. 12.

## SECTIO III.

*Utrum omnis actus intelligendi anime Christi fuerit verus, certus, & evidens.*

**N**onnulli antiqui hæretici docuerunt, habuisse animam Christi cognitionem creatam admixtam ignorantiae, atque adeo ex aliqua patre incertam, & evidentem. Ita sensisse Gnosticos, colligitur ex Iren. 1. contra hæres. c. 16. de Arianis idem indicat Ambros. 5. li. de fid. c. 7. & idem docuit Themistius quidam, a quo Themistiani, ut refert Sophronius in epist. quæ habetur VI. Synod. act. 11. & Liberatus in Breviario, c. 19. Idem denique Agnoitæ, ut refert Gregor. li. 2. regist. c. 42. & Isidor. lib. 8. Etymolog. c. 5. Fundamenta horum errorum sunt quædam loca Scripturæ, quæ in sequentibus quæstionibus a nobis explicanda sunt.

Suppono ergo in intellectu animæ Christi fuisse actus, tum naturales, tum etiam supernaturales. Hoc ex seqq. quæstionibus fusius constabit, nunc breviter explicatur; quia in Christo fuit perfecta natura humana cum omnibus suis proprietatibus naturalibus, ut Concilia definiunt; ergo habuit suos actus naturales, nam licet hi actus non sint ad modum proprietatum manantium a natura, sed pendere possint ex voluntate operantis, tamen sunt proprietates seu perfectiones maxime consentaneæ ipsi naturæ, quibus privari non debet natura omni ex parte perfectæ: quin potius servato naturali ordine impossibile est, ut homo utens sensibus non interdum eliciat aliquem actum naturalem intellectus: unde, ut anima Christi caruisset, vel suspendisset omnem hujusmodi actum, oportuisset præternaturali, & miraculoso modo hoc facere: quod tamen sine fructu, & sine causa fieret, quia neque ad perfectionem ejus, neque ad utilitatem nostram conferebat. Unde censeo hanc partem certam esse de fide, eamque colligo ex definitionibus Conciliorum supra citatis, & aliis, quibus tradunt esse in Christo duas operationes, & ex modo, quo Scriptura de Christo loquitur, ut de homine sentiente, & intelligente naturali modo.

Altera pars de actu supernaturali, etiam est de fide, Z quia



quia fide certum est in aliis iustis, & beatis esse supernaturalem cognitionem, multo magis de anima Christi, de qua infra ostendimus esse beatam, & cognoscere omnia divina mysteria, quæ non nisi supernaturaliter cognosci possunt. Dices. Quamvis hæc cognitio aliis sit supernaturalis, tamen animæ Christi erit naturalis propter unionem. Respondetur, si sit sensus ipsum actum in se esse naturalem, vel animam unitam non indigere altiori lumine, & auxilio ad illum eliciendum, quam ad alios actus naturales, falsum omnino est: quia sicut unio non immutat, nec confundit naturas, ita nec proprietates earum; neque ipsa unio per se formaliter dat vires ad operandum, ut supra disp. 18. late dictum est: si vero sit sensus, illum actum esse connaturalem animæ unitæ, quia ratione unionis debita est illi tam perfecta cognitio, verum est quidem: non tamen est contra id, quod dicimus, loquimur enim de ipsis actibus secundum se, sicut habere dicitur anima Christi amorem Dei naturalem, & supernaturalem, quamvis uterque possit dici aliquo modo connaturalis animæ unitæ, & hoc exemplum confirmat positionem factam.

Dico primo. Omnis actus supernaturalis, qui fuit in intellectu animæ Christi, est verus, certus, & evidens. Hæc conclusio est omnino certa, nam primum de ratione omnis actus intellectualis supernaturalis est, ut sit verus: quia cum huiusmodi actus sit ex speciali Dei revelatione & influxu, non potest non esse verus, quia si falsus esset, ejus falsitas in Deum redundaret. Quod explicatur, & confirmatur, quia vel talis actus est evidens, vel obscurus, si evidens, hoc ipso necessario est verus, si obscurus, & supernaturalis, necessario est actus fidei infusæ, cui non potest subesse falsum. Denique rationes omnes, quibus hoc solent probari de actu fidei infusæ, evidentius procedunt de omni actu supernaturalis cognitionis. Ex his vero plane efficitur, omnem huiusmodi actum debere esse certum, ostensum est enim necessario esse infallibilem, certitudo autem ibi est, ubi non potest esse falsitas. Quod vero etiam evidens sit, facile declaratur, suppositis iis, quæ dicta sunt qu. 7. ostendimus enim ibi nunquam fuisse fidem infusam in anima Christi, quia non fuit capax cognitionis obscuræ; ergo.

Dico secundo. Omnis actus naturalis intellectus Christi fuit etiam verus, certus, & evidens. Hæc conclusio etiam colligitur ex communi doctrina Theologorum in 3. dist. 14. & 17. & ex D. Th. infra, q. 15. art. 3. & est omnino certa, Scriptura enim sacra ita loquitur de Christo, sicut de homine habente infallibilem auctoritatem, qui in iis, quæ loquebatur, decipere alios non potuit, & consequenter neque ipse decipi: & in hoc fundatur maxima certitudo nostræ fidei: ergo omne iudicium, quod fuit in anima Christi, fuit verum, & infallibile, atque adeo certum, & evidens: quia in actibus naturalibus certa veritas, & infallibilitas assensus fundatur in evidentia, nec potest dari actus obscurus omni ex parte, verus & certus, hoc enim est proprium fidei infusæ. Et confirmatur, quia error, seu falsus assensus est magna imperfectio, quæ per se utilitatem asferre non posset ad nostram redemptionem, quin potius posset obesse, valde enim imminueret loquentis Christi auctoritatem: ergo non assumpsit Verbum talem imperfectionem, neque ejus majestatem, aut dignitatem decebat, ut illam assumeret. Confirmatur tandem, quia omne iudicium, etiam naturale, quod est in intellectu beati, est verum, & infallibile, multo ergo magis in intellectu Christi, qui non solum beatus erat, sed etiam Deus.

Sequitur primo, non fuisse in intellectu Christi actum opinionis, vel fidei humanæ de se fallibilis, quia his actibus potest subesse falsum, unde si illos exerceret, potuisset interdum habere actum falsum. Item hi actus sunt de se incerti: actus autem incertus non habuit locum in Christo, ut dictum est, quia incertitudo includit dubium, seu formidinem de veritate iudicii, & ideo, qui assensum incertum habet, ex vi illius exponit se periculo falsitatis. Sequitur secundo, omnem actum intellectus Christi fuisse aliquo modo actum scientiæ, quia generali quadam ratione omnis actus evidens, actus scientiæ dicitur; & propter hanc fortasse causam D. Th. hic, & alii Theologi, solum sub nomine scientiæ agunt de cognitione creatæ intellectus Christi.

Sed contra primo, quia Christus per intellectum creatum multa ignoravit; ergo eadem ratione potuit in multis errare; quia non est major ratio de ignorantia privationis, quam pravæ dispositionis. Antecedens patet ex Damasc. l. 3. de fid. c. 21. dicente; *Verbum assumpsisse naturam ignorantem*; & Ambr. 2. de fid. videtur tribuere Christo dubitationem ex ignorantia profectam propter verba illa Matth. 26. *Pater, si possibile est, transseat a me calix iste*; & idem significat Aug. exponens verba illa Ps. 21. *Quare me dereliquisti, &c.* Et confirmatur primo, quia oportuit Christum per omnia fratribus assimilari, ad Hebr. 2. *Pro similitudine absque peccato*, ad Hebr. 4. Sed error non est peccatum; ergo. Et confirmatur secundo, quia error intellectus sæpe nascitur ex errore in sensu; sed in sensibus Christi sæpe potuit esse deceptio: nam interdum a longe potuit res apparere minor, quam erat, vel aliquid simile.

Ad argumentum respondetur in primis, non esse eandem rationem de ignorantia privationis, & de errore, quia hæc multo major imperfectio est, magisque contraria perfectioni virtutis, & infallibili auctoritati, quæ in Christo esse debuit. Secundo dicitur, antecedens, proprie & in rigore loquendo, esse falsum, quia Christi anima nihil eorum nescivit, quæ in aliqua temporis differentia existentiam habitura sunt; & quævis demus, ex rebus, quæ in sola divina potentia continentur, & ab ea fieri possunt, aliquas non cognovisse (de quo infra dicetur), tamen illa carentia seu negatio scientiæ non potest dici vera ignorantia; quia ignorantia non significat quæcunque negationem cognitionis, sed privationem illius scientiæ, quæ inesse deberet, juxta conditionem, vel statum propriæ naturæ, ut non dicitur homo ignorans, eo quod careat scientia angelicæ; cognoscere autem omnia possibilia fortasse non pertinet ad statum, vel conditionem intellectus creati, & ita Christus nihil eorum nescivit, seu ignoravit, quæ oportuit scire, considerata dignitate personæ, conditione naturæ, & ratione status seu officii, & ita, simpliciter loquendo, ignorantiam non habuit, sed plenitudinem scientiæ, ut dicitur Jo. 1. *Et thesaurus sapientiæ Dei*, ad Colos. 2. & hoc magis constabit ex quæstionibus seqq. Ad Damascenum ergo respondetur, sensum ejus esse, assumpsisse Christum naturam, quæ de se ignorans esset, nisi in assumptione ipsa impleta esset sapientia, ut ipse postea exponit ibidem, & optime, l. 2. de fide c. 22. Ambr. vero non dicit, Christum dubitasse, vel ignorasse: sed ita se gessisse, ac si dubitaret, vel ignoraret. Et eodem modo potest exponi August. quamvis ipse addat, Christum ibi locutum esse in persona suorum membrorum.

Ad primam confirmationem respondetur oportuisse Christum esse similem hominibus peccatoribus in natura passibili, & mortali, & hanc esse Pauli intentionem: non tamen decuisse illum fieri similem in culpa, vel in aliis defectibus, quia ita sunt cum culpa conjuncti ut ad medendum illi prodesse non possint: & huiusmodi est error, & ideo nullo modo potuit esse, neque expediens, neque decens, ut illum assumeret: unde Paulus nunquam dixit oportuisse, ut Christus esset nobis similis in omnibus præter peccatum: alius etiam in modo nativitatæ, & in aliis rebus omnibus debuisset esse similis: sed prius dixit debuisset: *Per omnia fratribus assimilari, ut misericors fieret, &c.* Itaque in iis, quæ conferebant ad opus nostræ redemptionis, quo factus est nobis misericors, oportuit, ut nobis esset similis, in alio vero loco solum dicit fuisse tentatum per omnia, absque ullo peccato.

Ad secundam confirmationem respondetur, primum non recte inferre, quia Christus per sapientiam intellectus prævenire poterat, & corrigere sensum, ne saltem intellectui deceptionem pareret. Deinde negatur etiam minor, quia licet deceptio sensus minor esset imperfectio: potuit tamen Christus Dominus, sua divina virtute, ita confortare sensum, ut semper viderent, seu apprehenderent res, prout veræ sunt, sive prope essent, sive distantes, & sive hoc, sive illo modo applicarentur.

Alii addunt etiam per superiorem rationem potuisse prævenire sensum, ne deciperentur. Sed non placet, quia sola ratio superior non poterat præcavere, ne objectum immutaret sensum modo sibi proportionato. Unde neque etiam potuit prævenire, ne sensus sentiret, & apprehenderet, juxta qualitatem speciei ab objecto receptæ, & ideo quamvis ratio per superiorem scientiam possit præveniri, ne ipsa sequatur apparentem cognitionem

Christus  
nullam  
habuit  
ignorantiam.

Objectio.

Responsio.

Omnis iudicium naturale animæ Christi fuit infallibile.

In intellectu Christi nullus actus opinionis.

Objectio.



nem sensus, non tamen, ne sensus ipse tali modo apprehendat objectum, & ideo oportuit hoc fieri alia superiori virtute, & potestate.

Obje.

Sed contra secundo, quia Christus Dominus intelligebat omnes rationes probabiles omnium opinionum, & credebatur hominibus, qui sibi aliqua narrabant; ergo poterat habere assensus opinionis, & fidei humanæ, qui sunt incerti. Confirmatur primo, quia huiusmodi actus sunt connaturales homini. Sed Christus assumpsit naturam cum omnibus proprietatibus, aliis neque potuisset per discursum cognoscere, quia hic modus est imperfectus. Præsertim, quia licet ita assentiret, posset vitare periculum falsitatis, ita per superiorem aliquam scientiam dirigendo hæc iudicia, ut nunquam nisi in vera materia versarentur. Respondetur, Christum evidenter semper cognovisse res omnes, quæ, vel ab hominibus narrari poterant, vel rationibus probabilibus confirmari: & ita nunquam utebatur testimonio humano ad assentiendum, sed per suam evidentiam judicabat de uniuscujusque testimonio, per rationes autem probabiles non judicabat de veritate, sed tantum de singularum opinionum probabilitate, de qua evidentiam habere poterat.

Respons.

Ad confirmationem respondetur, oportuisse quidem, ut intellectus Christi haberet actus sibi connaturales, non tamen omnes, præsertim illos, qui magnam imperfectionem includunt, ut sunt isti actus obscuri, & incerti, quia (ut dictum est) habere hos actus, neque suæ naturæ perfectionem, neque nobis utilitatem afferret. Quod ita etiam declaratur, quia in voluntate nullum actum habuit Christus, qui non sit actus virtutis ipsius voluntatis; ergo neque in intellectu habuit actus, nisi virtutis intellectualis; fides autem humana & opinio non sunt intellectuales virtutes, & ideo neque sancti Angeli, neque beati, huiusmodi actus exercent.

Unde ad ultimam confirmationem respondetur, potuisse quidem Christum modo ibi indicato vitare omnem assensum falsum, etiam si huiusmodi assensus præstare vellet: tamen non propter solam falsitatem vitandam non decuit illos exercere, sed etiam quia ex vi objecti formalis incerti sunt, & falsitati expositi, & ideo ad perfectionem intellectus non pertinent. Non deerunt etiam, qui dicant, non potuisse ullo modo habere hos actus, supposita evidenti cognitione, quam de eisdem rebus aliunde habebat. Sed quam verum hoc sit, alibi est disputandum.

Dubium: Sed quæres ultimo an saltem de potentia absoluta posset Verbum in humanitate assumere, vel permittere falsum assensum, vel erroneum. Quibusdam enim ita videtur, nec sine probabili conjectura: posset enim Verbum assumere humanam naturam, nullum donum, vel speciale auxilium intellectus illi præbendo, quo posito ille homo non posset certius, aut verius judicare de rebus, quam posset purus homo cum eodem ingenio, & eisdem sensibus, ut supra disp. 18. demonstratum est; posset ergo decipi, sicut purus homo. Primum antecedens probatur, quia illud neque physicam repugnantiam involvit, neque est contra aliquam moralem virtutem, neque contra sapientiam, aut aliud attributum ipsius Dei, ut Deus est: sicut ergo non repugnat, Deum in assumpta natura mori, ita neque errare, neque falsum materialiter proferre, hoc enim nec peccatum esset, & ideo neque esset contra divinam bonitatem, quia Deus non vellet tale materiale mendacium, vel errorem, sed tantum permetteret: neque etiam esset contra veritatem, vel auctoritatem Dei, quia ille homo tunc non sentiret, nec loqueretur auctoritate divina, sed humana.

Respons. Difficile quidem est, implicationem contradictionis in hoc offendere: nihilominus tamen non possum ita de Christo, seu Deo homine, sentire, ut existimem potuisse, vel in intellectum ejus cadere errorem, vel in sermonem mendacium, etiam materiale, & sine culpa: quæ videtur esse sententia Anselmi, l. 2. Cur Deus homo, c. 13. Et potest suaderi primo, quia licet hoc nude consideratum in ordine ad solam potentiam quasi physicam non videatur contradictionem involvere, consideratum tamen in ordine ad potentiam conjunctam divinæ sapientiæ, & prudentiæ, videtur sane repugnare. Quia ad prudentem providentiam rationalis personæ pertinet, non admittere falsitatem, & deceptionem in propria natura, quando facile præveniri, & cavari potest; per unionem autem fa-

Christus de potentia etiam absoluta falli, errare, & revelari non potuit.

Suarez. Tomo XVI.

cta est humanitas vere ac proprie natura Verbi Dei; & Verbum, quod est persona illius naturæ, potest illam ita dirigere & gubernare, ut nunquam decipiatur: ergo. Secundo quia in errore aut falsitate nulla potest esse ratio boni honesti, neque ad illud potest conferre: sed Deus non potest in propria natura admittere, nisi quod honestum est, vel ad honestum confert: qua ratione utitur Anselmus supra. Tertio, quia talis error, si esset possibilis in divina persona ratione assumptæ naturæ, multum diminueret auctoritatem talis personæ, per assumptam naturam loquentis. Si enim ex hoc solum, quod is, qui loquitur, est persona divina, non intrinsece sequitur, ipsum nec decipi posse, nec decipere, etiam sine peccato, fere non haberet Deus homo majorem auctoritatem in loquendo, quam homo purus, quia uterque decipi posset, nisi ex divina relatione loqueretur, & uterque posset illa carere, & decipi, etiam sine culpa, existimando verum esse, quod non est, seu a Deo revelari, quod vera revelatione ostensum non est. Consequens autem videtur valde absurdum.

#### SECTIO IV.

*Utrum in anima Christi fuerint habitus intellectuales.*

HÆC quæstio ex dictis facile definiri potest, nam ex actibus facile est habitus colligere: sicut ergo actum in naturalem, & supernaturalem distinximus, ita pariter ratione potest distingui habitus. Dico ergo primo, in Christi intellectu fuisse habitus naturales. Hæc conclusio certa est apud Theologos, in 3. dist. 14. & patebit etiam ex dicendis disputatione sequenti, & infra etiam quæst. 12. Nunc solum adverto primo, simpliciter loquendo, non esse certius, esse habitus naturales in intellectu Christi, quam aliorum hominum, quia hoc nullo modo revelatum est de Christo, & pendet ex principio generali de omnibus hominibus, non omnino certo. Si quis tamen hos habitus in aliis hominibus admitteret, in Christo autem negaret, certe & temerarius esset, & suspectus in fide: & hoc modo intelligo conclusionem esse certam supposito, scilicet, principio philosophico, non solum probabiliori, sed fere evidenti. Secundo adverto, nomine habituum comprehendi hoc loco, tam species intelligibiles, quam habitus scientiarum, atque omne id (quidquid illud est) quod in intellectu manet per modum actus primi, & est principium recordationis, seu memoriæ, & reddit illum facilem, & promptum ad naturales actus scientiæ. Quamquam enim de his variæ versentur opiniones, tamen in genere, quod aliquid sit in intellectu permanens per modum habitus, quo intellectualis memoria generetur, fere nullus dubitat: negari autem non potest, quin in anima Christi fuerit memoria intellectiva. Est enim hæc naturalis proprietas, & facultas animæ rationalis, & ostensum est ex definitionibus fidei, fuisse in anima Christi omnes proprietates naturales humanitatis; fuit ergo in illa intellectualis memoria. Item hæc facultas, & usus ejus, spectat ad perfectionem prudentiæ humanæ, teste Arist. 6. Ethic. c. 8. ubi ad prudentiam, experientiam requirit, experientiam autem memoria efficit, ut idem docet 1. Metaph. in principio. Sic ergo in genere constat esse in intellectu Christi aliquid permanens per modum habitus naturalis. In particulari vero, quid illud fuerit, pendet ex opinionibus. In eis tamen ita loquendum est de Christo, sicut de aliis hominibus, ut supra dictum est, quia hoc pertinet ad consummatam humanæ naturæ perfectionem, & ita constat, probabilius esse habere species intelligibiles naturales, & habitus ab speciebus distinctos, &c.

Habitus naturales in intellectu Christi.

Dico secundo, etiam est in intellectu Christi habitus infusus intellectualis: nomine habitus intelligo quodcumque principium actus, quod sit qualitas infusa intellectui, & in eo permanens, sive sit per modum luminis, sive per modum speciei, & sive habeat actum secundum semper conjunctum, sive non. Et hoc sensu existimo conclusionem esse ita certam, ut sit fidei proxima, neque negari possit sine nota erroris. Probatur ex dictis supra de habituali gratia Christi. Illa enim æque fere generalia sunt perfectionibus intellectus, sive voluntatis, unde in locis Scripturæ, quæ de hoc loquuntur, ambæ

Habitus infusus in intellectu Christi.



conjunguntur, ut Isai. 11. *Requiescet super eum Spiritus Domini, Spiritus sapientie & intellectus.* Ubi verbum, *requiescit*, indicat permanentiam per modum habitus. Et Jo. 1. *Vidimus gloriam ejus plenum gratia & veritatis.* Item, quia tam certum est, lumen gloriæ datum esse animæ Christi ad videndum Deum, sicut aliis beatis.

Denique ostensum est, fuisse in anima Christi actus supernaturalis cognitionis; sed ad eliciendos hujusmodi actus connaturali, & perfecto modo requiritur habitus; ergo. Confirmatur, nam hac ratione in quocunque Sancto est aliqua virtus intellectualis infusa, cur igitur non erit in Christo? Nulla sane est dubitandi ratio, nequiquid invenio, quod contra has veritates objiciam, quod responsione dignum sit; quamquam Palud. in 3. d. 13. qu. 2. multa in utramque partem objiciat. An vero hic habitus sit unus, vel multiplex, in sequentibus disputabitur.

## ARTICULUS II.

*Utrum Christus habuerit scientiam, quam habent beati, vel comprehensores.*

65  
Ios. 3. 3.  
eo. Et op.  
3. c. 223.

**A**D quartum sic proceditur. Videtur, quod in Christo non fuerit scientia beatorum, vel comprehensorum. Scientia enim beatorum est per participationem divini luminis: secundum illud Ps. 35. *In lumine tuo videbimus lumen.* Sed Christus non habuit lumen divinum, tanquam participatum, sed ipsam divinitatem in se habuit substantialiter manentem: secundum illud Colos. 2. *In Christo inhabitat omnis plenitudo divinitatis corporaliter.* Ergo in Christo non fuit scientia beatorum.

2. Præterea. Scientia beatorum eos beatos facit, secundum illud Jo. 17. *Hæc est vita æterna, ut cognoscant te, solum verum Deum, & quem misisti Jesum Christum.* Sed homo ille fuit beatus ex hoc ipso, quod fuit Deo unitus in persona: secundum illud Ps. 64. *Beatus, quem elegisti & assumpsisti.* Non ergo oportet ponere in ipso scientiam beatorum.

3. Præterea. Scientia duplex homini competit, una secundum suam naturam, alia supra naturam. Scientia autem beatorum, quæ in divina visione consistit, non est secundum naturam hominis, sed supra ejus naturam. In Christo autem fuit alia supernaturalis scientia multo altior, scilicet, scientia divina. Non ergo oportuit in Christo esse scientiam beatorum.

Sed contra. Scientia beatorum in Dei cognitione consistit. Sed ipse plene cognovit Deum, etiam secundum quod homo: secundum illud Joan. 8. *Scio eum, & sermonem ejus servo.* Ergo Christo fuit scientia beatorum.

a. Respondeo dicendum, quod illud, quod est in potentia, reducitur in actum per id, quod est actus: oportet enim esse calidum id, per quod alia calefiunt. Homo autem est in potentia ad scientiam beatorum, quæ in Dei visione consistit, & ad eam ordinatur sicut ad finem: est enim creatura rationalis capax illius beate cognitionis, in quantum est ad imaginem Dei. Ad hunc autem finem beatitudinis homines reducuntur per Christi humanitatem, secundum illud Hebraeorum 2. *Decebat eum, propter quem omnia, & per quem omnia, qui multos filios in gloriam adduxerat, auctorem salutis eorum per passionem consummari.* Et ideo oportuit quod cognitio beata in Dei visione consistens excellentissime Christo homini conveniret: quia semper causam oportet esse potioris causato.

Ad primum ergo dicendum, quod divinitas unita est humanitati Christi secundum personam, non secundum essentiam, vel naturam, sed cum unitate persone remanet distinctio naturarum: & ideo anima Christi quæ est pars humane nature, per aliquod lumen participatum a natura divina, perfecta est ad scientiam beatam, quæ Deus per essentiam videtur.

Ad secundum dicendum, quod ex ipsa unione homo ille est beatus beatitudine increata, sicut ex unione est Deus. Sed præter beatitudinem increatam oportuit in natura humana Christi esse quandam beatitudinem creatam, per quam anima ejus in ultimo fine humane nature constitueretur.

Ad tertium dicendum, quod visio, seu scientia beata, est quodammodo supra naturam animæ rationalis, in quantum, scilicet, propria virtute ad eam pervenire non potest. Alio vero modo est secundum naturam ipsius, in

quantum, scilicet, secundum naturam suam est capax ejus, prout, scilicet, est ad imaginem Dei facta, ut supra dictum est\*. Sed scientia increata est omnibus modis supra naturam animæ humane.

In corp.  
arto

## COMMENTARIUS.

**A**ffirmat D. Th. & probat, quia Christus est aliis beatitudinis causa, multo ergo magis eam habuit. Quæ ratio est moralis demonstratio, non metaphysica: & ideo difficultas, quam Cajetanus movet, necessaria non est, quamvis quæ occasione illius dicit, & quæ notat in solutione ad tertium, utilia sint, omnia tamen clara.

## ARTICULUS III.

*Utrum Christus habuerit scientiam inditam, vel infusam.*

**A**D tertium sic proceditur. Videtur, quod in Christo non sit alia scientia indita, vel infusa, præter scientiam beatam. Omnis enim alia scientia comparatur ad scientiam beatam, sicut imperfectum ad perfectum. Sed, præsentem cognitionem perfectam, excluditur cognitio imperfecta sicut uanifesta visio faciei excludit enigmaticam visionem fidei, ut patet 1. Corinth. 13. Cum igitur in Christo fuerit scientia beata (ut dictum est\*), videtur, quod non posuerit in eo inesse alia scientia indita.

2. Præterea, imperfectior modus cognitionis disponit ad perfectiorem, sicut opinio, quæ est per syllogismum dialecticum, disponit ad scientiam, quæ est per syllogismum demonstrativum. Habita autem perfectio, non est ulterius necessaria dispositio: sicut habito termino, non est necessarius motus. Cum ergo cognitio quæcunque alia creata comparatur ad cognitionem beatam sicut imperfectum ad perfectum, & sicut dispositio ad terminum, videtur, quod cum Christus habuerit cognitionem beatam, quod non fuit ei necessarium, habere aliam cognitionem.

3. Præterea. Sicut materia corporalis est in potentia ad formam sensibilem, ita intellectus possibilis est in potentia ad formam intelligibilem. Sed materia corporalis non potest simul recipere duas formas sensibiles, unam perfectiorem, & aliam minus perfectam: ergo neque anima potest simul recipere duplicem scientiam, unam perfectiorem, & aliam minus perfectam: & sic idem, quod prius.

Sed contra est, quod dicitur Coloss. 2. *quod in Christo sunt omnes thesauri sapientiæ & scientiæ absconditi.* b. Respondeo dicendum, quod, sicut dictum est\*, decebat, ut natura humana assumpta a Verbo Dei imperfecta non esset: Omne autem, quod est in potentia, est imperfectum, nisi reducatur ad actum. Intellectus autem possibilis humanus est potentia ad omnia intelligibilia. Reducitur autem in actum per species intelligibiles, quæ sunt quoddam forma completivæ ipsius, ut patet ex his, quæ dicuntur in 3. de Anima\*. Et ideo oportet in Christo ponere scientiam inditam, in quantum per Verbum Dei, anima Christi sibi personaliter unita, impressa sunt species intelligibiles ad omnia, ad quæ intellectus possibilis est in potentia. Sicut etiam per Verbum Dei impressa sunt species intelligibiles menti angelicæ in principio creationis rerum: ut patet per August. 2. super Genes. ad liter. Et ideo, sicut in Angelis, secundum eundem August. ponitur duplex cognitio (una scilicet, matutina, per quam cognoscunt res in Verbo: & alia vespertina, per quam cognoscunt res in propria natura per species sibi inditas) ita præter scientiam divinam & increatam, est in Christo secundum ejus animam scientia beata, quæ cognoscit Verbum, & res in Verbo: & scientia infusa sive indita, per quam cognoscit res in propria natura per species intelligibiles humane menti proportionatas.

Ad primum ergo dicendum, quod visio imperfecta fidei, in sui ratione includit oppositum manifestæ visionis, eo quod de ratione fidei est, ut sit de non visis, ut in secunda parte dictum est\*. Sed cognitio, quæ est per species inditas, non includit aliquod oppositum cognitioni beate. Et ideo non est eadem ratio utrobique.

c. Ad secundum dicendum, quod dispositio se habet ad perfectionem dupliciter. Uno modo, sicut via ducens ad perfectionem: alio modo, sicut effectus a perfectione procedens. Per calorem enim disponitur materia ad suscipiendam formam ignis, quæ tamen adveniente, calor non cessat, sed remanet quasi quidam effectus talis forme. Et similiter opinio ex syllogismo dialectico causata, est via ad scientiam, quæ per demonstrationem acquiritur: quæ tamē acquisita potest remanere cognitio, quæ est per syllogismum dialecticum.

66.  
Inf. q. 12.  
2. 1. cor. &  
3 d. 14 a. 1.  
q. 5. Et  
ver. q. 20.  
a. 2. o. fin.  
& 2. 3. &  
op. 1. q. 6.  
221. & op.  
2 q. 81.  
Att. pr. 26.

Ar. 1. hujus qu.

Li. 3. t. 30.  
38. tom. 2.

Li. 2. a. 8.  
tom. 3.  
Li. 11. de  
civ. Dei c.  
7. d. medio  
to 5 Et 1.  
4. super  
Genes. 24.  
tom. 31.

2. 2. q. 1. a.  
4.



*dialecticum, quasi consequens scientiam demonstrativam, quae est per causam. Quia ille, qui cognoscit causam, ex hoc etiam magis potest cognoscere signa probabilia, ex quibus procedit dialecticus syllogismus. Et similiter in Christo, simul cum scientia beatitudinis, manet scientia indita, non quasi via ad beatitudinem, sed quasi per beatitudinem confirmata.*

*Ad tertium dicendum, quod cognitio beata non fit per speciem, quae sit similitudo divinae essentiae, vel eorum, quae in divina essentia cognoscuntur: ut patet ex his, quae in prima parte dicta sunt: sed talis cognitio est ipsius divinae essentiae immediate per hoc, quod ipsa essentia divina unitur menti beate, sicut intelligibile intelligenti, quae quidem essentia divina est forma excedens proportionem cuiuslibet creaturae. Unde nihil prohibet, quin cum hac forma superexcedente, simul insint rationali menti species intelligibiles proportionatae suae naturae.*

## COMMENTARIUS.

**D**upliciter potest aliqua scientia esse infusa, vel per se, quia natura sua postulat illum productionis modum, vel per accidens, quia licet acquiri possit, ex accidente infunditur. D. Th. ergo de scientia per se infusa loquitur, ut constat ex tota qu. seq. praesertim art. 4. Cajet. vero nescio quam differentiam invenit inter nomen scientiae inditae, vel infusae. Ait enim, scientiam dici infusam, quando datur supra naturae debitum, atque adeo diversa actione, quia illius subiectum creatum est, qualem dicit (& bene) fuisse scientiam infusam animae Christi; inditam autem scientiam vocari dicit, quae datur alicui simul cum ipsa natura, quia est connaturalis, & quasi debita ipsi naturae, atque adeo, quae imprimitur eadem actione, quae ipsa natura creatur, ut est, inquit, scientia angelica. Sed, quod ad verba attinet, non immoror, quamquam existimem, has voces apud Theologos fere semper pro eadem usurpari, & Latine idem significare, si tamen vox, *indita*, Latina est. Quod vero ad rem attinet, illud solum de productione scientiae inditae per eandem actionem, quae producit subiectum, existimo esse falsum, quia, cum sit qualitas a subiecto distincta, & ab illo effective non resultat, ut in materia de angelis ostendi, etiam si connaturalis sit subiecto, necesse est, ut ab agente distincta actione producatur. Vera ergo differentia solum est, quod scientia cum natura concreata, sive infusa, sive indita dicatur, interdum est supra naturalem capacitatem, & debitum naturae; interdum vero est illi consentanea.

**b.** Respondet D. Th. esse in Christo scientiam infusam praeter beatam. Probat, quia intellectus Christi est in potentia ad species intelligibiles; ergo, ut esset perfectus, debuit habere actum. Sed contra, nam vel est fermo de potentia naturali, & sic non concluditur intentum, quia ad scientiam per se infusam non est intellectus humanus in potentia naturali. Vel est fermo de obedientiali, & hanc potentiam non oportet habere semper actum, quia neque est debitus, nec potest dari omnino adaequatus. Respondetur ex eodem D. Th. q. 1. art. 1. sermonem esse de potentia obedientiali. Sed (ut bene Cajetan. hic, & ibi notat) non est intelligendum de potentia obedientiali in tota sua latitudine, prout ad absolutam Dei potentiam comparari potest, sic enim recte procedit argumentum factum; sed intelligendum est de hac potentia, ut pertinente ad perfectum statum gratiae, seu prout in eo statu secundum legem Dei ordinariam reduci solet in actum, ac si diceremus, animam esse in potentia ad gratiam, vel ad caritatem infusam; eodem enim modo per intellectum est in potentia, ut in aliquo statu perfecte cognoscat res in proprio genere seu per proprias species; & ita optime procedit ratio D. Thomae, & multo magis in Christo, quam in aliis, cui ratione unionis potest haec capacitas dici quodammodo naturalis.

**c.** In argumentis tractat D. Th. an cum scientia beata possit esse simul alia scientia de eisdem rebus per beatam cognitionis; quae questio facilis est, & communis aliis beatis, & ita argumenta omnia clara sunt, & non indigent expositione. Notanda vero est solutio ad secundum, ubi D. Tho. sentit: actum opinionis esse posse simul cum scientia, & Cajetanus in re idem affirmare videtur, quamvis in modo loquendi neget. Sed de hoc alius.

*Utrum Christus habuerit aliquam scientiam acquisitam.*

**A**d quartum sic proceditur. Videtur, quod in Christo non fuerit aliqua scientia experimentalis acquisita. Quicquid enim Christo conveniens fuit, excellentissime habuit. Sed Christus non habuit excellentissime scientiam acquisitam, non enim institit studio literarum, quo perfectissime scientia acquiritur, dicitur enim Jo. 7. *Mirabantur Judaei dicentes: Quomodo hic literas scit, cum non didicerit?* Ergo videtur, quod in Christo non fuerit aliqua scientia acquisita.

**2.** Praeterea. Ei, quod est plenum, non potest aliquid superaddi. Sed potentia animae Christi fuit impleta per species intelligibiles divinitus inditas, ut dictum est. Ergo non potuerunt supervenire animae species acquisitae.

**3.** Praeterea. In eo, qui jam habet habitum scientiae, per ea, quae a sensu accipit, non acquiritur novus habitus (quia sic duae formae ejusdem speciei simul essent in eodem); sed habitus, qui prius inerat, confirmatur & augetur. Ergo, cum Christus habuerit habitum scientiae inditae, non videtur, quod per ea, quae sensu percepit, aliquam aliam scientiam acquisierit.

Sed contra est, quod Hebraeorum s. dicitur: Cum esset Filius Dei, didicit ex his, quae passus est, obedientiam. *Glos. id est, expertus est. Fuit ergo in Christo aliqua experimentalis scientia, quae est scientia acquisita.*

**b.** Respondeo dicendum, quod ut ex supra dictis patet, nihil eorum, quae Deus in nostra natura plantavit, defuit humanae naturae, assumptae a Dei Verbo. Manifestum est autem, quod in humana natura Deus plantavit, non solum intellectum possibilem, sed etiam intellectum agentem. Unde necesse est dicere, quod in anima Christi fuit, non solum intellectus possibilis, sed etiam intellectus agens. Si autem in aliis Deus & natura nihil frustra faciunt (ut Philosophus dicit in 1. de Caelo) multo minus in anima Christi aliquid fuit frustra. Frustra autem est, quod non habet propriam operationem, cum omnis res sit propter suam operationem, ut dicitur in 2. de Caelo. Propria autem operatio intellectus agentis est facere species intelligibiles actu, abstrahendo eas a phantasmatibus: unde dicitur in 3. de Anima, quod intellectus agens est, quo est omnia facere. Sic igitur necesse est dicere, quod in Christo fuerint aliqua species intelligibiles, per actionem intellectus agentis in intellectu possibili ejus receptae: quod est, esse in ipso scientia acquisita, quae quidam experimentalis nominant.

Et ideo, quamvis aliter alibi scripserim, dicendum est, in Christo fuisse scientiam acquisitam, quae proprie est scientia secundum modum humanum, non solum ex parte subiecti recipientis, sed etiam ex parte causa agentis. Nam talis scientia ponitur in Christo secundum lumen intellectus agentis, quod est anima humana connaturale. Scientia autem infusa attribuitur animae humanae secundum lumen de super infusum: qui modus cognoscendi est proportionatus naturae angelicae. Scientia vero beata, per quam ipsa Dei essentia videtur, est propria & connaturalis soli Deo, ut in prima parte dictum est.

Ad primum ergo dicendum, quod cum duplex sit modus acquirendi scientiam, scilicet, inveniendū & addiscendū, modus, qui est per inventionem, est praecipuus: modus autē, qui est per disciplinam, est secundarius. Unde dicitur in primo Ethicorum. Ille quidem est optimus, qui omnia per se ipsum intelligit: bonus autem rursus est ille, qui bene discit obedi. Et ideo Christo magis competebat habere scientiam acquisitam per inventionem, quam per disciplinam, praesertim cum ipse daretur a Deo omnibus in doctorem: secundum illud Joelis 2. *Latamini in Domino Deo vestro, quia dedit vobis doctorem iustitiae.*

Ad secundum dicendum, quod humana mens duplicem habet respectum. Unum quidem ad superiora: & secundum hunc respectum, anima Christi fuit plena per scientiam inditam. Alius autem respectus ejus est ad inferiora, id est, ad phantasmatum, quae sunt nata movere mentem humanam per virtutem intellectus agentis. Oportuit autem, quod, etiam secundum hunc respectum, anima Christi scientia impleretur: non quia prima plenitudo menti humanae sufficeret secundum se ipsam: sed oportebat eam perfici, etiam secundum comparationem ad phantasmatum.

87.  
Inf. q. 12. 2.  
22. & q. 13  
2. 3. & opus.  
3. c. 215. &  
3. d. 14. a. 3  
q. 51. & d.  
8. a. 35. &  
ver. q. 10.  
2. 31.

Ar. p. 22.

Glos. inter lin.  
ibidem.

Ar. 2. h. u.  
1. a. q. 9.  
51.

Li. 1. de  
cel. 32. &  
1. 2. & 48.  
to. 2.

Li. 3. de  
cel. text. 17.  
to. 1.

Li. 3. de a.  
nima  
text. 18.  
to. 2.

3. sec. d.  
14. q. 3. ar.

1. p. q. 12.  
2. 4.

Li. 1. c. 4.  
in fi. to. 5.



*Ad tertium dicendum, quod alia ratio est de habitu acquisito, & de habitu infuso. Nam habitus scientiæ acquiritur per comparationem humanæ mentis ad phantasmata: unde secundum eandem rationem non potest alius habitus iterato acquiri. Sed habitus scientiæ infusa est alterius rationis, utpote a superiori descendens in animam, non secundum proportionem phantasmatum: & ideo non est eadem ratio de utroque habitu.*

#### COMMENTARIUS.

**D**uplex potest esse sensus quæstionis hujus. Prior, an in Christo fuerit scientia natura sua acquisita, sive ab ipso acquisita fuerit, sive aliunde habita, ut fuit in Adam. Posterior est, an in illo fuerit talis scientia, & tali modo, scilicet, per proprios actus paulatim comparata, & hic posterior est manifestus sensus D. Th. ut patet ex corpore articuli. Quid autem nomine scientiæ intelligat, non satis constat, potest enim intelligere, vel proprium habitum scientiæ in rigore sumptum (ut Cajet. illum intelligit, & videtur sane mens ejus), vel generaliter quemcumque habitum in intellectu acquisitum, sive sit species, sive quidvis aliud, de quo magis videntur procedere probationes D. Thomæ.

Assertio ergo est, fuisse in anima Christi hujusmodi scientiam acquisitam, ne intellectus agens in Christo fuerit otiosus. Quæ ratio, ut constat, summum probat, comparasse Christum aliquas species intelligibiles per actionem intellectus agentis, eadem enim potest ad Adamum applicari. Sed de hac re infra disputandum est latius. Argumenta D. Th. solum procedunt contra priorem sensum quæstionis, & ideo difficultatem non habent.

#### DISPUTATIO XXV.

Intres Sectiones distributa.

*De triplici scientia anime Christi, quoad quæstionem, an est.*

**O**stendimus disputatione præcedenti in Christo esse scientiam creatam. Sequitur, ut videamus, quotuplex illa sit, tractaturi postea, quid unaqueque sit, ordinem D. Th. sequentes. In hac vero quæstione non distinguemus actum, & habitum scientiæ, supponentes eandem esse de utroque rationem, ut ex fine præced. disp. constat.

#### SECTIO I.

*Utrum anima Christi a principio creationis sue fuerit beata.*

**D**ifficultas hujus quæstionis posita est in tempore, quo Christus Dominus cœpit habere hanc scientiam. Nam, quod nunc illam habeat, & saltem a tempore mortis suæ illam habuerit, de fide certum est, neque aliquid, qui in Christum credat, invenio in hoc dubitasse, cum per mortem Christi aliis etiam iustis aperta sit janua celi, ut infra ostendetur, & cum Latroni ipse promiserit: *Hodie mecum eris in paradiso*, & cum gloriosa Resurrectio corporis fuerit evidens testimonium gloriæ ipsius animæ. Quod ergo in quæstionem verti potest, solum est, an in tempore vitæ mortalis hac eadem scientia potius fuerit. Hæretici enim, qui Christo ignorantiam tribuunt multarum rerum, quas prius non cognovit, & postea paulatim didicit, consequenter negant, habuisse semper hanc scientiam beatam, in quem errorem multi ex hæreticis hujus temporis lapsi sunt, præsertim Lutherus, Calvinus, & Zuïnglius. Fundamenta eorum (si quæ esse possunt) statim attingemus.

Dico ergo primo, animam Christi Domini, etiam eo tempore, quo fuit conjuncta corpori mortali, habuisse scientiam beatam. Ita sentiunt Theologi statim citandi. Et probatur testimoniis Scripturæ sacræ, quæ licet per se singula non cogant, tamen simul sumpta, & adjunctis Patrum testimoniis, magnam fidem faciunt. Joan. 1. *Deum nemo vidit unquam. Unigenitus, qui est in sinu Patris, ipse enarravit.* Ac si apertius diceret, *Unigenitus, qui vider, ipse enarravit.* Et sicut per humanitatem, & dum in mortali vita viveret, enarravit: ita per eandem humanitatem, & eodem tempore vidit. Ita fere Aug. tr. 3. in Jo. & colligitur etiam ex Cyrill. li. 1. in Jo. c. 22. & Chryf. hom. 14.

in Jo. cui non consonant verba Christi, Jo. 3. *Quod scimus, loquimur, & quod vidimus, testamur.* Ubi aperte loquitur de se homine, & ad eundem sensum exponitur, quod statim subdit: *Nemo ascendit in cælum, nisi qui descendit de cælo, filius hominis, qui est in cælo.* Ubi verbum, *ascendit*, non est præsentis temporis, sed præteriti, ut constat ex verbo Græco, *ἀνέβη*; dicitur ergo Christus secundum humanitatem ascendisse, & esse in cælo, non corporeo ascensu, sed visione beata; quia priori modo non dum ascenderat, neque ille ascensus potuit convenire Christo secundum divinitatem, quia in illam non cadit ascensus, ratione sui. Neque obstat, quod ait: *Nemo ascendit, nisi qui descendit.* Quia non oportet, ut ascensus & descensus secundum eandem rationem vel metaphoram intelligantur: descendit ergo per incarnationem, ascendit per visionem. Unde non fuit prior ascensus, quam descensus, sed e contrario, prius descendit (scilicet, ordine nature) ut posset ascendere. Unde ibidem ait de illo Joannes. *Qui de cælo venit, super omnes est, & quod vidit, & audivit, hoc testatur.* Quæ verba eandem vim habent, quam præcedentia. Quod autem dicit: *Vidit, & audivit*, non sunt diversa, sed eadem visio, auditio dicitur, ut significetur, non habere illam ex vi humanitatis, sed ex infusione divina: est ergo illa auditio longe diversa ab ea, quam nos habemus per fidem. Unde veluti hoc ipsum interpretans, ait Christus, Jo. 6. *Omnis qui audivit a Patre & didicit, venit ad me, non quia Patrem viderit quisquam, nisi is, qui est a Deo.* Ac si diceret, non ita audiunt alii, sicut Christus, qui videndo audit. Simile est illud Jo. 8. *Ego, quæ vidi apud Patrem, loquor.* Et Jo. 12. *Ubi ego sum, illic & minister meus erit*, id est in gloria. Et c. 14. *Ut, ubi ego sum, & vos sitis.* Accommodatur etiam illud Ps. 40. *Beatum faciet illum in terra.* nam Ps. ille de Christo exponitur, Jo. 13. Et confirmari potest, nam gloria Transfigurationis signum fuit gloriæ latentis in anima, ut Patres omnes tradunt, exponentes illud mysterium, ut infra suo loco videbimus. Ex dictis etiam testimoniis fumitur bona ratio, nam Christus futurus erat auctor divinæ doctrinæ, & doctor præcipuus mysteriorum Dei; ergo oportuit, ut non tantum audita, sed a se visa narraret. Sed hæc assertio magis cum sequenti confirmabitur.

Dico ergo secundo. Anima Christi vidit Deum a primo instanti creationis suæ. Ita docent Theologi omnes in 3. d. 14. D. Th. hic & infra q. 15. ar. 10. 34. a. 4. Can. late lib. 12. de locis c. 14. & sequitur fere ex præcedenti conclusionem, quia non est major ratio de uno tempore vitæ mortalis, quam de alio. Nam visio beata non magis impediri poterat in infanti corpore, quam passibili, cum supra utriusque statum sit, & a neutro statu corporis pendeat. Alioqui vero fons & primaria ratio illius visionis eadem fuit semper in Christo a principio conceptionis, scilicet, unio hypostatica. Et ita probatur optime hæc conclusio ex illo Jo. 1. *Vidimus gloriam ejus, gloriam quasi unigeniti a Patre, plenum gratiæ & veritatis.* Ubi indicatur (ut supra cum D. Th. & Theologis) gloriam & plenitudinem gratiæ & veritatis datam esse Christo homini; quia est unigenitus Patris: & ita esse veluti proprietatem manantem ab unione: ergo sicut a primo instanti conceptionis ille homo fuit unigenitus Patris, ita ex tunc habuit gloriam, & gratiam consummatam in gloria & visione Dei. Ita colligitur ex Athanas. orat. 4. contra Arian. & in li. de salutari Christi adventu, & de humanitate Verbi, clarius & brevius ex Damasc. l. 3. de fide c. 22. Ubi propterea inquit, eos, qui dicunt Christum verum incrementum in sapientia accepisse, consequenter negare unionem factam esse a primo illo carnis ortu: nam si tunc, inquit, facta est, quid tandem afferri potest, quin omnibus prorsus sapientia, gratiaque opibus afflueret? &c. Confirmari potest ex illo Jer. 31. *Fœmina circumdabit virum*, scilicet, sapientia ut supra cum Hieronymo exposuimus: in Scripturis autem non dicitur hoc modo vir, nisi qui videt Deum, reliqui enim, ut parvuli, existimantur, juxta illud 1. Cor. 13. *Postquam autem factus sum vir, evacuavi, quæ erant parvuli.* Confirmatur secundo ex illo Psal. 21. *In te projectus sum ex utero.* Quæ verba de Christo intelligit Eusebius li. 10. de demonstrat. Evangel. cap. ultimo. Et introducit Christum dicentem ad Patrem: *Ex tunc Deum meum jam videbam.* Denique accommodatur illud Psal. 65. *Beatus, quem elegisti & assumpsisti.* Quod de humanitate Christi intelligit Augustinus, indicans, in ipsa assumptione plenam fuisse gloriam & beatitudinem. Idem sentit

Christus a primo suo conceptionis instanti scientiam & visionem beatam.



sentit lib. 83. q. 65. & li. 4. de consensu Evangel. c. ultimo in fine. Ubi, cum dixisset, nullum mortalem hominem posse in hac vita videre Deum, subdit: *Quam maxime proprietate distat a ceteris homo, cujus susceptione Verbum caro factum est.* Denique Richardus de S. Victore li. 1. de Emmanuel. c. 22. *Quod nos, inquit, expectamus in consummatione, illi datum est in sua conceptione.* Ad hoc etiam confirmandum afferri possunt omnia, quæ supra adduximus super art. 12. qu. 7. D. Thomæ, ex Patribus exponentibus locum Lucæ 2. *Proficiebat sapientia*, & docentibus non ita in se profecisse, ut aliquid denuo didicerit, de quo testimonio dicemus plura infra, qu. 12. Afferri etiam possunt, quæ disp. 18. & 22. de plenitudine gratiæ Christi attulimus, quam a principio conceptionis obtinuisse probavimus. Denique afferri possunt, quæ statim q. 10. a. 2. D. Th. dicimus de illo testimonio Matt. 13. *De illa die nemo scit, neque filius.*

Ultimo addere possumus rationes. Prima, quæ ex dictis testimoniis Scripturæ sumitur, est, quia Christus semper fuit Filius Dei naturalis; ergo hæres; ergo possessor, neque enim tempore indigebat ad fruendum hereditate: neque interventura erat mors patris, ut filius in possessionem mitteretur; neque propter etatem impediri poterat, ut supra ostensum est. Secunda, quia non est credibile, divinam personam non statim distasse naturam suam omnibus donis gratiæ & gloriæ, & omnem contrariam imperfectionem ab anima sua abjecisse: carere autem felicitate, magna est imperfectio, quæ nec nobis erat necessaria, nec divinam personam decebat.

Dices. Imo fuit nobis & ipsi necessaria propter maiorem perfectionem, scilicet, ut sibi, & nobis mereri posset, & pro nobis dolere & tristari. Respondetur, quod ad ipsum attinet, melius ipsi fuisse, semper fuisse beatum, quam beatitudinem mereri, præsertim cum beatitudinem quodammodo sibi connaturalem haberet ratione unionis. Adde, si oportuisset sibi mereri beatitudinem, potuisset hoc facere etiam si nullo tempore ea caruisset, ut inferius, q. 19. ostendimus: unde, quod ad nos pertinet, potuit simul esse viator, & comprehensor, & ita pro nobis mereri, & pro nobis satisfacere, & veram tristitiam, & dolorem pro nobis suscipere, absque carentia beatitudinis. Tertia ratio sumitur ex D. Tho. hic, quia Christus est caput influens in omnes gratiam & gloriam; ergo debuit ipse multo magis esse ornatus gratia, & gloria. Cui adde, quod a principio conceptionis fuit caput etiam Angelorum quod statim ipsi iussi sunt adorare, ut dicitur ad Hebr. 1. ergo non est credibile, fuisse caput in inferiori statu gratiæ, aut gloriæ, quam Angeli erant. Unde confirmatur, nam Angeli sancti parum post creationem suam acceperunt gloriam, in tertio, vel (ut alii volunt) in secundo instanti; ergo anima Christi illos superavit, & a primo instanti Deum vidit. Tandem conjectura, quæ ex D. Th. hic colligitur, optima est, quia Christus de iustitia meruit aliis gratiam, & gloriam. Ergo decuit, ut a principio ipse haberet gratiam & gloriam, quia licet visio Dei proprie & per se non requiratur ad meritum, tamen in eo, qui est perfectissimum principium omnis meriti, quique ad suam sanctificationem non indigebat merito, convenientissimum fuit, ut gratia consummata esset illi principium meriti. Unde confirmatur, quia Adam, eo quod futurus erat naturale principium generis humani, creatus fuit a principio perfectus in naturalibus: ergo Christus, qui est supremus auctor gratiæ & gloriæ, debuit a principio suæ conceptionis habere gratiam & gloriam summe perfectam.

Dubium.

Sed quæres, quæ certitudine hæc doctrina tenenda sit. Aliqui existimant, simpliciter esse de fide. Sed non videtur, quia Scripturæ testimonia non sunt adeo expressa, quin aliis modis explicari possint, & nulla etiam extat de hac Ecclesiæ definitio, neque etiam traditio est satis aperta, nam licet Theologi in hac veritate asserenda consentiant, non tamen illam affirmant, ut dogma fidei, & fere eodem modo loquuntur sancti Patres: & ideo alii solum dicunt esse opinionem ita veram, ut contrarium opinari temerarium sit. Et hæc censura est mitissima omnium, quæ fieri potest: existimo enim contrariam sententiam etiam erroneam, & proximam hæresi esse, quia Scripturæ testimonia adjunctis expositionibus, & testimoniis Patrum, & consensu Doctorum omnium Catholicorum sufficiunt ad hanc certitudinem præstandam.

Suarez Tomo XVI.

Sed contra hanc veritatem obijci solent varia loca Scripturarum, quæ partim tractata sunt, cum de gratia ageremus, partim attinguntur in sequentibus. Nunc solum obijciatur illud Luc. 22. *Nonne oportuit pati Christum, & ita intrare in gloriam suam?* Ergo ante passionem non intravit in gloriam. Unde Jo. 7. dicitur: *Nondum erat Spiritus datus, quia nondum erat Jesus glorificatus.* Et ideo Jo. 17. orat ipse Christus: *Clarificame Pater, &c.* Respondetur, hæc testimonia intelligi de gloria Resurrectionis, & Ascensionis, & de manifestatione & exaltatione nominis Christi, ut Patres omnes intelligunt.

Dices. Gloria corporis & animæ conjuncta necessario sunt, si corpus & anima inter se sint conjuncta; manat enim gloria corporis ex gloria animæ, ut Theologi docent cum Aug. ep. 56. Respondetur, fuisse quidem debitam gloriam corpori Christi a principio conceptionis, non tantum ratione gloriæ animæ, sed etiam ratione unionis; tamen propter nostram redemptionem, divina dispensatione, illa ad tempus caruisse, cujus rei significationem quandam in Transfiguratione tradidit, ut dictum est.

## SECTIO II.

Utrum in anima Christi sit scientia connaturalis animæ humane.

IN hac quæstione, sicut in præc. dixi, nulla est difficultas de hac scientia secundum se, seu absolute considerata, sed solum in tempore & modo, quo Christi anima coepit habere hanc scientiam. De qua re nihil hoc loco dicam, quia pendet ex multis, quæ circa q. 12. D. Tho. tractanda sunt, ubi hoc melius expeditur: & ideo hic brevissime dicendum est, certum omnino esse, Christum Dominum habere scientiam connaturalem animæ humane. Ita docent omnes Theologi, in 3. d. 13. & 14. Quamvis Bonaventura toleat in contrarium citari, quia negat fuisse in Christo scientiam acquisitam. Sed non est credibile, eum esse locutum de substantia ipsius scientiæ (ut ita dicam), sed de modo acquirendi illam, ut ex sequenti sectio. & magis ex disp. 28. constabit. Richard. vero ibi, a 3. q. 2. & 3. videtur hanc sententiam docere, quia sentit, scientiam infusam animæ Christi fuisse superioris rationis a scientia connaturali homini, & tamen præter illam negat in Christo fuisse aliam acquisitam; sed est sententia omnino falsa. Unde sine magno errore negari hæc veritas non potest, quia (ut supra late citatum est) in Christo est natura humana cum omni proprietate, & perfectione illi connaturali; sed scientia humana est una ex maximis perfectionibus humanæ naturæ, ergo. Deinde supra ostendimus, fuisse in intellectu Christi actus intellectus naturales; ergo maxime actus scientiæ; ergo. Tertio quia habuit virtutes morales connaturales homini: ergo & prudentiam naturalem, ergo pari ratione alias scientias. Denique Angeli habent scientiam sibi connaturalem, eandem habent beati, habuit etiam Adam in statu innocentie, & in universum perfectio gratiæ non destruit perfectionem naturæ, quæ imperfectionem non includit, perfectioni gratiæ repugnantem: ergo. Neque contra hoc occurrit nova obiectio, præter eas, quæ fieri solent de beatis, quas tetigit D. Th. supra, art. 1. hujus quæstionis.

Sed observandum est primo, nomine scientiæ hic intelligi omnes virtutes intellectuales, scilicet, intellectum seu habitum principiorum, de quo nulla potest esse dubitatio ratio, cum assensus principiorum sint maxime evidentes, & connaturales homini: sapientiæ deinde, ac scientiam. De quibus solum potest dubitari, quia in hominibus non sunt sine admitione opinionum, & incertitudinis. Dicendum vero est, in Christo fuisse quoad conclusiones evidentes, quæ per lumen naturæ certæ esse possunt. De iis vero rebus, de quibus lumen naturæ consequi non potest evidentem cognitionem, affectus est Christus, quidquid ratio naturalis consequi potest, & omnes rationes probabiles, aut verisimilia judicia opinionum omnium: non tamen per hæc de veritate ipsa judicabat, sed vel suspēdebat assensum, vel de probabilitate, quæ evidēs esse poterat, iudiciū ferebat. Præterea comprehendit etiam potest prudentiam, de qua jã dictū est. Et ultimo etiam artem complectimur, quæ, ut est intellectualis virtus, etiam pertinet ad absolutam perfectionem intellectus, & fortasse a scientia non multum distinguitur, nisi in materia factibili; ait autem D. Thom. infra q. 13. ar. 1. ad 3. fuisse in Christo scientiam omnium factibilium. Nec refert, quod ars videtur esse conjuncta cum usu, nam licet ipsa dirigat usum, non tamen ab illo essen-

Obje. 10.

Respons.

Obje. 2.

Respons.

In anima Christi scientia acquisita, seu connaturalis.

Quid nomine scientiæ connaturalis hic intelligatur.

In Christo ars factibilis fuit.

In Christo scientia experientialis.



trialiter pendet; tota enim perfectio artis, quæ ad intellectum spectat, sine usu haberi potest.

Observandum secundo est, scientiam hanc connaturalem generaliter dictam, prout comprehendit omnem naturalem cognitionem evidentem, duplicem distingui posse: est enim quædam cognitio, quæ vocatur experimentalis, & potissimum versatur circa singularia, quæ per sensum experimur, ex quo intellectus accipit evidentem cognitionem in ipsa experientia fundatam. Alia est cognitio evidens conclusionum ex propriis principiis naturali lumine evidentibus, quæ proprie vocatur, seu meretur nomen scientiæ; hic vero utrumque genus cognitionis sub hac voce comprehendimus, nam cum utraque harum cognitionum naturalis sit homini, & perfectionem afferat sine imperfectione, unioni, aut beatitudini repugnante; dubium non est, quin utraque fuerit in Christo, ut latius q. 12. tractabitur.

### SECTIO III.

*Utrum fuerit semper in anima Christi scientia rerum in proprio genere supernaturalis, & per se infusa.*

**T**Ractavi prius de scientia naturali, quam de hac infusa, ut ratio dubitandi, & opinionum varietas, quæ hic esse potest, melius intelligatur. Ratio enim difficultatis est, quia per scientiam beatam & naturalem, habet anima Christi omnem cognitionem & perfectionem, quæ vel ex Scripturis, vel ex dignitate personæ, vel ex munere Redemptoris, vel ex capacitate intellectus humani, vel denique ex quovis alio iudicio, vel signo colligi potest. Habet enim per illas duas cognitiones, perfectionem naturæ debitam & gratiæ, & consequenter habet actum respondentem capacitati naturali intellectus, & obedientiali, habet cognitionem rerum omnium naturalium, & supernaturalium, contingentium, & liberarum: quorsum ergo necessaria est alia scientia?

Propter hoc quidam Theologi videntur aperte negare habuisse animam Christi hanc scientiam. Ita sentit Bonav. in 3. d. 14. a. 3. q. 1. & 2. quamquam enim concedat, habuisse Christum scientiam infusam, aperte tamen sentit illam fuisse naturalem & infusam per accidens: propterea enim negat ibidem, Christum aliam scientiā sibi acquisivisse, & illam scientiā dicit esse similem illi, quam Adam habuit in statu innocentie, & idem sentit Alenf. 3. p. q. 13. memb. 1. & 2. quia non aliter ponit scientiam infusam in Christo, quam in Adamo, & fere eodem modo loquuntur alii Nominales, ut Almain. Gab. & alii in 3. dist. 14. Scot. vero ibi q. 3. & Durand. q. 3. & 4. mediam quandam videntur habere opinandi rationem; nam circa res naturales, quæ per naturalem scientiam humanam cognosci possunt, non putant habuisse Christum aliam scientiam per se infusam: circa alias vero res, quæ naturalem capacitatem humani intellectus superant, illam videntur admittere; fortasse, ut non tantum in Verbo, sed etiam in proprio genere cognoscantur. Sed hoc jam pertinet ad quæst. de objecto huius scientiæ infusæ, quæ inf. q. 11. tractanda est.

Dico primo, Christi animæ datam esse scientiam per se infusam, distinctam a beata & a naturali. Hæc est sententia D. Th. hic, & tota qu. 11. quam ita intelligunt, & sequuntur Thomistæ omnes, Cajet. Capreol. in 3. d. 14. q. 1. a. 1. conc. 2. & a. 3. ad argum. contra illam. Paludan. ibi. q. 2. Richard. a. 3. q. 2. & 3. si attente legatur. Idem Marsil. q. 10. a. 2. & alii. Ex Scriptura, & Patribus non potest hæc conclusio efficaciter probari, ut ostendit ratio dubitandi in principio posita. Nam licet ex Scriptura constet, Christum fuisse sapientissimum sapientia plusquam humana, & infusa, quia cognoscebat cogitationes hominum, & revelabat divina, & supernaturalia mysteria & futura contingentia, & Luc. 2. *adhuc infans, sedebat in medio doctorum, & stupebant omnes super prudentia, & responsis eius*. Unde Joan. 7. quidam interrogabant: *Unde hic literas scit, cum non didicerit?* Quamvis hoc (inquam) ita sit, quia tamen omnes hi effectus, vel demonstrationes sapientiæ proficisci potuerunt ex sola scientia beata, ideo non potest ex illis efficaciter concludi alia scientia per se infusa. Arguitur ergo ratio probabilis, & pro materię qualitate iussicienti. Primo, quia Christus non solum erat comprehensor, sed etiam viator; ergo etiam, ut viator, debuit habere cognitionem aliquam supernaturalem, quia visio est propria scientia comprehensoris. Secundo, quia hæc scientia posi-

ibilis est, & expedit, pluribus modis cognoscere creaturas, atque adeo non tantum in Verbo, sed etiam in ipsis per proprias earum species. Propter quam causam Aug. 4. Genes. ad lit. c. 23. & 24. duplicem scientiam in Angelis distinguit: *Matutinam, & vespertinam*; & hoc etiam tendit ratio D. Th. in ar. 3. pertinere ad perfectionem proportionatam intellectui creato, tam secundum se, quæ elevato per gratiam, ut cognoscat res per proprias species, ut ibi exposuimus. Et hæc conclusio magis cum seq. confirmabitur.

Dico ergo secundo. Christi anima habuit hanc scientiam a primo instanti suæ creationis. Ita sentit D. Th. & omnes, qui illam ponunt. Et probari potest ex præcedenti, addito testimonio Pauli ad Hebr. 10. ubi de Christo dicit: *Ingressus mundum dicit. Hostiam & oblationem noluisse, corpus autem adaptasti mihi, &c.* ex Psal. 39. & infra subdit: *In qua voluntate sanctificati sumus*; satis significans in ipso ingressu, atque adeo in primo momento conceptionis suæ, cognovisse Christi animam voluntatem Patris, & mysteria nostræ redemptionis, & voluntarie obtulisse vitam pro hominibus, & per illam voluntatem, nostram sanctificationem meruisse. Hinc ergo satis probabiliter colligitur, illam cognitionem ad hanc scientiam per se infusam pertinuisse; fuit enim sine dubio supernaturalis cognitio, cum esset de supernaturalibus mysteriis; & cum illa fuerit fundamentum meriti, credibile est non fuisse tantum visionem comprehensoris, sed cognitionem aliam scientiæ infusæ. Facit etiam illud Isai. 7. *Butyrum, & mel comedet, ut sciat reprobare malum, & eligere bonum*; ubi Hieron. id est, *adhuc puer hoc sciet*, quæ scientia electiva melius accommodatur scientiæ infusæ. Denique faciunt illa communia testimonia Isaia 11. *Egredietur virga, &c. & requiescet super illud, &c.* & Coloss. 2. *In quo sunt omnes thesauri sapientiæ, & scientiæ Dei*. Posset etiam hoc confirmari testimoniis Patrum asserentium, Christi animam a principio fuisse sapientia plenam; sed ea omitto, quia non de hac scientia in specie loquuntur, sed in communi de sapientia, & ita in superioribus sufficienter facta sunt, & videri possunt in Bellarm. lib. 4. de Christi anima cap. 3. Ratio vero est sæpe jam tacta. Primo, quia tota hæc sapientia data est Christo ratione unionis, quam a principio habuit, & neque illi fuit necessarium, nec nobis utile illa carere aliquo tempore. Secundo, quia hæc scientia aliquo modo pertinet ad perfectum statum beatificum animæ Christi, non quidem, ut essentialis, sed quasi accidentalis perfectio; quæ cum non pendeat a corpore, statim dari debuit. Immo addit Marsil. supra, hanc scientiam infusam manare a beata, ut a causa efficiente, quod videtur gratis, & sine fundamento dictum: quia actus secundus amoris, vel cognitionis non efficit aliquid, nisi fortasse intermedium habitum, qui similes actus producat. Satis ergo est, si dicamus, hanc scientiam esse convenientem dispositionem, vel perfectionem intellectus beati. Tertio argumentari possumus, quia in Christo etiam pertinuit hæc scientia ad perfectum statum viatoris; quia, licet sit etiam perfectio comprehensoris, tamen quatenus respectu Dei est abstractiva cognitio, est magis accommodata ad statum viatoris; Christus autem a primo instanti suæ conceptionis fuit perfecte viator, & comprehensor. Denique Angelis in primo instanti suæ creationis infusa est scientia illis connaturalis; sed hæc scientia est etiam connaturalis Christo ratione unionis; ergo.

Ratio dubitandi in principio posita ex dictis satis est expedita. Quæret vero fortasse aliquis, quo gradu certitudinis tenenda sit doctrina posita. Nonnulli enim Theologi temerarium esse dicunt negare hanc scientiam. Sed vereor, ne hoc temere dictum sit, quia ubi nulla est auctoritas Scripturæ, vel Patrum, quæ multum urgeat, & graves Theologi inter se dissident, solique conjecturas utuntur, non video, cur temeritatis nota inurenda sit. Negare igitur omnem scientiam infusam in anima Christi, esset plusquam temerarium & erroneum, & quia scientia beata etiam est infusa: negare vero scientiam supernaturalem, & per se infusam distinctam a beata, est quidem falsum, & minus probabile; nullam vero meretur graviorem censuram, præsertim in eorum opinione, qui asserunt habuisse Christum ab instanti conceptionis scientiam per accidens infusam. Nam si quis negando hanc scientiam per accidens infusam, negaret etiam aliam, multo minus probabiliter loqueretur, & non sine

Scientia  
infusa  
Christi  
ab instanti  
conceptionis

Anima  
Christi  
habuit  
scientiam  
infusam.

Dubium

Responsio.



sine temeritate, quia nullus Theologorum ausus est ita opinari: multum enim derogat ille modus dicendi perfectioni debite animæ Christi, & eam in hoc facit inferiorem Angelis; quod nec veritati, nec pietati consentaneum est, nec Paulo dicenti, minoratum quidem esse ab Angelis propter passibile corpus, non propter defectum perfectionis, quæ ad animam pertineat.

Dubium.

Ultimo dubitari hic poterat, an præter has tres scientias habeat aliam Christi anima. Alexand. enim 3. p. qu. 13. memb. 1. & 2. videtur addere quandam aliam scientiam, quam vocat unionis, & indicat esse distinctam a beata. Idem Altrifiod. lib. 3. summ. tr. 1. c. 5. Sed, ut recte dixit D. Th. in hac qu. 1. ad 3. quamvis ipsa scientia beata, vel infusa, possit denominari scientia unionis, quia per ipsam scitur, & cognoscitur ipsa unio, vel quatenus ratione unionis data est: tamen fingere distinctam scientiam a prædictis, omnino superfluum, & præter rationem est: quia scientia convenit Christo ratione naturæ, id est, in aliqua natura; unde necesse est, vel creatam esse, vel incretam; si sit increta, non pertinet ad scientiam humanitatis, de qua agimus: si autem creata sit, vel est clara visio Dei in se ipso, & hæc est scientia beata; vel est scientia creaturarum per proprias species, & Dei tantum abstractiva, & hæc esse potest vel naturalis, vel supernaturaliter infusa; non est ergo in anima Christi alia scientia præter dictas. Et confirmatur, quia illa unio nullius scientiæ principium est: non est enim operativa, sed ad subsistendum.

Responsio

## Q U Æ S T I O X.

De scientia beata animæ Christi, in quatuor articulos divisa.

**Q**uest. 14. *Deinde considerandum est de qualibet prædictarum scientiarum. Sed quia de scientia divina dictum est in prima parte, restat nunc dicendum de aliis tribus: primo, de scientia beata; secundo, de scientia indita: tertio, de scientia acquisita.*

*Sed quia etiam de scientia beata, quæ in Dei visione consistit, plura dicta sunt in prima parte: hic illa sola videntur dicenda, quæ proprie pertinent ad animam Christi.*

*Circa hoc ergo queruntur quatuor.*

*Primo, utrum anima Christi comprehenderit Verbum, sive divinam essentiam.*

*Secundo, utrum in Verbo cognoverit omnia.*

*Tertio, utrum anima Christi in Verbo cognoverit infinita.*

*Quarto, utrum videat Verbum, sive divinam essentiam clarius qualibet alia creatura.*

**C**onnexio hujus quæstionis cum præcedenti satis ex supra dictis constat.

## A R T I C U L U S I.

*Utrum anima Christi comprehenderit Verbum, sive divinam essentiam.*

**A**d primum sic proceditur. Videtur, quod anima Christi comprehenderit, & comprehendat Verbum, sive divinam essentiam. Dicit enim Isidorus, \* quod Trinitas sibi soli nota est, & homini assumpto. Igitur homo assumptus communicat cum sancta Trinitate in illa notitia sui, quæ est sancta Trinitati propria. Hujusmodi autem est notitia comprehensionis. Ergo anima Christi comprehendit divinam essentiam.

2. Præterea. Magis est uniri Deo secundum esse personale, quam secundum visionem. Sed, sicut Damasceus \* dicit in 3. lib. Tota divinitas in una personarum est unita humana nature in Christo. Multo ergo magis tota natura divina videtur ab anima Christi: & ita videtur, quod anima Christi comprehenderit divinam essentiam.

3. Præterea. Illud, quod convenit Filio Dei per naturam, convenit filio hominis per gratiam: ut Aug. \* dicit in primo de Trinitate. Sed comprehendere divinam essentiam competit Filio Dei per naturam. Ergo filio hominis competit per gratiam. Et ita videtur, quod anima Christi per gratiam Verbum comprehenderit.

4. Sed contra est, quod Aug. dicit in lib. 83. q. 1. Quod se comprehendit, finitum est sibi. Sed essentia divina non

est finita in comparatione ad animam Christi, cum infinitum eam excedat. Ergo anima Christi non comprehendit Verbum.

Respondetur dicendum, quod, sicut ex supra dictis patet, sic facta est unio naturarum in persona Christi, quod tamen proprietas utriusque nature inconfusa permanferit, ita scilicet, quod increatum manserit increatum, & creatum manserit intra limites creature: sicut Dam. \* dicit in 3. li. Est autem impossibile, quod aliqua creatura comprehendat divinam essentiam (sicut in prima parte ostensum est) eo quod infinitum non comprehenditur a finito. Et ideo dicendum, quod anima Christi nullo modo comprehendit divinam essentiam.

c. Ad primum ergo dicendum, quod homo assumptus connumeratur divine Trinitati in sui cognitione, non ratione comprehensionis, sed ratione cujusdam excellentissime cognitionis præ cæteris creaturis.

Ad secundum dicendum, quod nec etiam in unione, quæ est secundum esse personale, natura humana comprehendit Dei Verbum, sive naturam divinam. Quæ quamvis tota unita fuerit humana nature in una persona Filii, non tamen fuit tota virtus divinitatis ab humana natura quasi circumscripta. Unde Aug. \* dicit in Ep. ad Volusianum: Scire te volo, non hoc Christi anam habere doctrinam, quod ita Deus infusus sit carni, ut curam gubernande universitatis, vel deseruerit, vel amiserit, vel ad illud corpusculum quasi contractam, collectamque transulerit. Et similiter anima Christi totam Dei essentiam videt, non tamen eam comprehendit, quia non totaliter eam videt, id est, non ita perfecte, sicut visibilis est: ut in prima parte \* expositum est.

Ad tertium dicendum, quod verbum illud Augustini est intelligendum de gratia unionis, secundum quam omnia, quæ dicuntur de Filio Dei secundum divinam naturam, etiam dicuntur de filio hominis, propter identitatem suppositi. Et secundum hoc vere potest dici, quod filius hominis est comprehensor divine essentie, non quidem secundum animam, sed secundum divinam naturam. Per quem etiam modum potest dici, quod filius hominis est creator.

## C O M M E N T A R I U S.

**C**omprehensio interdum significat ultimi finis conclusionem, quæ est spei, seu vitæ terminus: juxta illud Paul. 1. Cor. 9. Sic currite, ut comprehendatis. Alio modo accipitur comprehensio pro adæquata, & exacta rei cognitione, quæ, videlicet, cognoscitur, quantum cognoscibilis est; & hoc posteriori sensu movetur quæstio, nam in priori constat, non solum animam Christi, verum etiam omnes beatos Deum comprehendere.

b. Negat ergo D. Th. animam Christi comprehendere Deum, & probat, quia infinitum non potest adæquari finito; ergo neque ab illo comprehendi; anima autem Christi finita est, divina vero essentia infinita; ergo. In qua ratione solum est advertendum, dupliciter posse intelligi. Primo, ut sit sermo de re finita tantum in essentia. Secundo, de re finita, etiam in intensione: si hoc posteriori modo intelligatur, nulla est difficultas, quia per se notum videtur, virtutem omni ex parte finitam, scilicet, in essentia & intensione, non posse comprehendere objectum simpliciter infinitum: tamen in hoc sensu antecedens non est evidens: quia licet anima Christi finita sit in essentia, non tamen constat, omnem virtutem ejus esse finitam intensione: si autem priori modo intelligatur, antecedens quidem evidens est, tamen ratio non est evidens; quia licet anima sit finita, si tamen haberet lumen gloriæ infinite intensum, posset comprehendere divinam essentiam, ut ex eodem D. Th. colligitur 1. p. q. 12. a. 7.

Quocirca D. Th. in hac ratione videtur supponere ex præc. q. 7. animam Christi hoc ipso, quod finita est, non esse capacem alicujus perfectionis, vel virtutis infinitæ in essentia, aut intensione. Sed de hac re plura in seq. disp.

c. Argumentum primum D. Tho. fundatur in testimonio Isidori, quod D. Th. his verbis citat. Trinitas sibi soli nota est, & homini assumpto, quod non videtur posse intelligi, nisi de notitia comprehensionis: nam alio modo etiam clare, & quidditative, aliis etiam nota est. Respondet D. Th. illud esse intelligendum, non ratione comprehensionis, sed ratione excellentissime cognitionis, quam habet Christus præ cæteris creaturis. Sed hæc pia expositio non omnino quadrare videtur literæ, & contextui Isidori:

2. d. 14. a. 2.  
q. 1. & 2. &  
ver. q. 20.  
2. q. & 5. c.  
& quod. 3.  
q. 2. a. 1. c.  
227. & 1.  
Tim. 6. le.  
Glo. 3.  
† Lib. 3.  
de sum.  
bono c. 3.  
Lib. 3. c. 6.  
sh. fid. c. 6.

Lib. 1. c. 13.  
tom. 3.

† Lib. 83.  
q. 14. in  
pr. tom. 4.

Lib. 1. c. 3.  
& 4.

1. p. q. 12.  
a. 7.

Est ep. 3.  
non mul-  
tum re-  
mote a  
prin. 10. 3.

1. p. q. 12.  
a. 7.

Infinitum  
duplex.

Isidori te-  
stimonium.



sumptum enim est hoc testimonium ex li. 1. Sentent. seu de Summo bono c. 3. ubi prius ait, Trinitatem esse invisibilem omni creaturæ, etiam Angelis beatissimis, ubi necesse est, invisibilem, accipi pro incomprehensibili, quod etiam ipse satis explicuit, dicens: *Videre tamen ejus essentiam plane non valet, quam nec ipsa perfectio Angelica attingit scire in totum*; hæc enim particula, *in totum*, comprehensionem indicat: unde consequenter subdit: *Sola enim Trinitas sibi integre nota est*, ubi illa particula, *integre*, idem significat. Addit vero obscura verba, & in quibus tota est difficultas: *Sola*, inquit, *Trinitas sibi integre nota est, & humanitas a Christo suscepta, que tertia est in Trinitate persona*: totus ergo sermo videtur esse de comprehensione. Non videtur tamen Isidorus dicere Trinitatē, sibi, & humanitati esse integre notam, sed potius, tam Trinitatem ipsam, quam humanitatem assumptam, soli Trinitati esse notam; ac si diceret, non solum mysterium Trinitatis, sed etiam Incarnationis, esse soli Deo comprehensibile, quia Christus est tertia in Trinitate persona. Unde non existimo, esse legendum illud relativum, *Que*, prout habetur in aliquibus exemplaribus, sed, *Qui*, ne referat humanitatem, sed Christum: ille enim, non humanitas, est tertia in Trinitate persona. Alia argumenta facilia sunt.

## ARTICULUS II.

Utrum anima Christi in Verbo cognoverit omnia.

**A**d secundum sic proceditur. Videtur, quod anima Christi in Verbo non cognoscat omnia. Dicitur enim Marc. 23. De die autem illa nemo scit, neque Angeli in celo, neque Filius, nisi Pater. Non ergo omnia scit in Verbo. 2. Præterea. Quanto aliquis perfectius cognoscit aliquid, quod principium, tanto plura in illo principio cognoscit. Sed Deus perfectius videt essentiam suam, quam anima Christi. Ergo plura cognoscit in Verbo, quā anima Christi. Non ergo anima Christi in Verbo cognoscit omnia.

3. Præterea. Quantitas scientiæ attenditur secundum quantitatem scibilem. Si ergo anima Christi sciret in Verbo omnia, que scit Verbum, sequeretur, quod scientia anima Christi æquaretur scientiæ divinæ, creaturæ, videlicet, increato, quod est impossibile.

Sed contra est, quod super illud Apoc. 5. Dignus est agnus, qui occisus est, accipere divinitatem, & sapientiam. Glo. ord. id est, dicit, id est, omnium cognitionem.

**R**espondeo dicendum, quod, cum quaeritur, an Christus cognoscat omnia in Verbo, ly, omnia, potest dupliciter accipi. Uno modo proprie, ut distribuatur pro omnibus, que quocumque modo sunt, vel erant, vel fuerunt, vel facta, vel dicta, vel cogitata a quocumque secundum quodcumque tempus. Et sic dicendum est, quod anima Christi in Verbo cognoscit omnia. Unusquisque enim intellectus creatus, in Verbo cognoscit, non quidem omnia simpliciter, sed tanto plura, quanto perfectius videt Verbum. Nulli tamen intellectui beato deest, quin cognoscat in Verbo omnia, que ad ipsum spectant. Ad Christum autem, & ad ejus dignitatem spectat quodammodo omnia, in quantum ei subiecta sunt omnia.

Ipse etiā est omnium iudex constitutus a Deo, quia Filius hominis est, ut dicitur Jo. 5. Et ideo anima Christi in Verbo cognoscit omnia existentia secundum quodcumque tempus, & etiam hominum cogitatus, quorum est iudex: ita ut, quod de eo dicitur Jo. 2. ipse enim sciebat, quid esset in homine, possit intelligi, non solum, quantum ad scientiam divinam, sed etiam quantum ad scientiam anime ejus, quā habet in Verbo. Alio modo, ly, omnia, potest accipi magis large, ut extendatur, non solum ad omnia, que sunt actu secundum quodcumque tempus, sed etiā ad omnia, quecumque sunt in potentia, nunquam reducenda, vel reducta ad actum. Horum autem quedam sunt in sola potentia divina, & huiusmodi non omnia cognoscit in Verbo anima Christi. Hoc enim esset comprehendere omnia, que Deus potest facere: quod esset comprehendere divinam virtutē, & per consequens divinam essentiam. Virtus enim quilibet cognoscitur per cognitionem omnium, in que potest. Quedam vero sunt, non solum in potentia divina, sed etiam in potentia creature, & huiusmodi omnia scit anima Christi in Verbo. Comprehendit enim in Verbo omnis creatura essentiam, & per consequens potentiam, & virtutem, & omnia, que sunt in potentia creature.

**A**d primum ergo dicendum, quod illud verbum intellexerunt Arius, & Eunomius, non quantum ad scientiam animæ, quam in Christo non ponebant (ut supra dictum est).

sed quantum ad divinam cognitionem Filii, quem ponebant esse minorem Patre, quantum ad scientiam. Sed illud stare non potest, quia per Verbum Dei facta sunt omnia, ut dicitur Jo. 1. Et inter alia, facta sunt etiam per ipsum omnia tempora. Nihil autem per ipsum factum est, quod ab eo ignoretur. Dicitur ergo, nescire diem, & horam Judicii, quia non facit scire: interrogatus enim super hoc ab Apostolis, Act. 1. hoc eis noluit revelare, sicut e contrario legitur Genes. 22. Nunc cognovi, quod timeas Deum, id est, nunc cognoscere te feci. Dicitur autem Pater scire, quia huiusmodi cognitionem tradidit Filio. Unde in hoc ipso, quod dicitur, Nisi Pater, datur intelligi, quod Filius cognoscit, & non solum quantum ad divinam naturam, sed etiam quantum ad humanam: quia, ut Chrysostomus argumentatur, si Christo homini datum est, ut sciat, qualiter oporteat iudicare, quod est majus, multo magis datum est ei scire quod minus est, scilicet, tempus Judicii. Origenes tamen hoc exponit de Christo secundum corpus ejus, quod est Ecclesia, que hoc tempus ignorat. Quidā autē dicunt, hoc esse intelligendum de filio Dei adoptivo, non de Filio naturali.

**A**d secundum dicendum, quod Deus in tantum perfectius cognoscit suam essentiam, quam anima Christi, quod eam comprehendit, & ideo cognoscit omnia, non solum, que sunt in actu, secundum quodcumque tempus, que dicitur cognoscere scientia visionis: sed etiam omnia, quæcumque ipse facere potest, que dicitur cognoscere per simplicem intelligentiam, ut in primo habitum est. Scit ergo anima Christi omnia que Deus in se cognoscit per scientiam visionis, non tamen omnia, que Deus in se ipso cognoscit per scientiam simplicis intelligentiæ. Et ita plura scit Deus in se ipso, quam anima Christi.

**A**d tertium dicendum, quod quantitas scientiæ non solum attenditur secundum numerum scibilem, sed etiam secundum claritatē cognitionis. Quamvis igitur scientia anime Christi, quā habet in Verbo, parificetur scientiæ visionis, quam Deus habet in se ipso, quantum ad numerum scibilem: scientia tamen Dei excedit in infinitum, quantum ad claritatem cognitionis, scientiam anime Christi: quia lumen increatum divini intellectus in infinitum excedit lumen creatum quodcumque receptum in anima Christi. Licet, absolute loquendo, scientia divina excedat scientiā anime Christi, non solum quantum ad modum cognoscendi, sed etiam quantum ad numerum scibilem, ut dictum est.

## COMMENTARIUS.

In cor. ar.

**T**itulus hic de omnibus, quæ eminenter in Deo continentur, intelligendus est, ut ex corpore articuli aperte colligitur; de iis enim, quæ formaliter in Deo sunt, supponit D. Th. non solum ab anima Christi, sed a quolibet beato omnia videri: ex iis vero, quæ sunt tantum eminenter in Deo, quedam interdum actu futura sunt, quedam nunquam, ex quibus aliqua in potentia creaturæ, alia in sola Dei virtute, & onipotētia cōtinētur. Juxta hæc ergo tria mēbra respondet D. Th. tribus assertionibus.

**P**rima assertio est. Anima Christi videt in Verbo omnia, quæ in aliqua differentia temporis existunt, vel aliquando existunt, quia hæc omnia pertinent ad statum ejus.

**S**ecunda. Non videt anima Christi in Verbo omnia, quæ in onnipotentia Dei continentur: quia aliās comprehenderet onnipotentiam Dei, & Deum ipsum.

**T**ertia est. Videt anima Christi in Verbo omnia, quæ continentur in potentia, seu virtute creaturarum, quas in Verbo intuetur; comprehendit enim illas, & virtutem earum, & ideo omnia cognoscit, quæ efficere possunt. Et potest tam de speciebus, quam de individuis, intelligi hæc conclusio, ut magis ex art. sequenti patebit. Sed hæc omnia statim latius disputanda sunt.

**I**n argumento 1. tractat D. Th. locum illum Marc. 13. De die autem illa nemo scit, neque Angeli in celo, neque Filius, nisi Pater. In quo primo advertendum est, quodam dubitasse cum Ambr. 5. de Fide c. 7. an illa particula, neque Filius, ad textum pertineat, vel ab Arianis malitiose addita sit: nam Hieron. Mat. 4. dicit, in codicibus quibusdam deesse. Sed jam nullo modo licet hoc in dubium revocare: imo Sotus in 4. d. 43. q. 2. art. 2. hæreticum dicit esse in hoc dubitare; satis vero est, si dicamus, id jam esse omnino certum, præsertim post Concilium Trid. & quia, licet in Matthæo sit nonnulla varietas in codicibus Græcis, tamen in Marco nulla est, neque Hieronymus, neque ullus antiquorum illam notat; unde neque Ambrosius in illa sententia persistit.

Illa

Ho. 72. in  
Matt. 10.  
2. & hom.  
14 in Mar.  
idem idem  
nuit t. 2.  
Hom. 30  
in Mat. in  
ult sol. il-  
lus hom.  
10. 2.

1. p. q. 14.  
2. 9.

Glo. ord.  
id.

Titul art.



1. Expositio. Illa ergo supposita, est prima expositio hæretica, hoc esse intelligendum ut sonat, de Filio secundum divinitatem, cui Ariani ignorantiam tribuebant. Sed contra hos disputant Patres, agentes de mysterio Trinitatis, & ostendentes Filii divinitatem: & ex dicendis a fortiori patet hujus expositionis falsitas. Secundo ergo exponitur de Filio, etiam secundum divinitatem, ita tamen, ut non dicatur nescire illum diem, quia vere ignoret; sed quia non scit ad manifestandum aliis. Pater autem dicitur illum scire, quia communicat Filio etiam scientiam per generationem æternam. Quæ expositio non videtur displicere D. Th. hic. Sed non invenio illam apud antiquos Patres, omnes enim agentes contra Arium, nolunt hoc intelligi de Filio, ut Deus est; quos statim referam. Deinde, quia illo modo potius Spiritus S. debuisset excludi, quam Filius: nam etiam Filius ita scit, ut communicet eam scientiam Spiritui S. imo cum omnes tres personæ communicent eam scientiam Christo homini, nulla earum dici potest, etiam in eo sensu, nescire illum diem: unde particula illa, *nisi solus Pater*, non excludit alias personas, ut sunt unus Deus, ut constat ex generali regula, quæ de Trinitate dari solet, quia particula exclusiva non excludit concomitantia. Ulterius ergo exponitur hic locus de Christo secundum humanitatem, ut est apud Cyril. l. 9. thes. c. 4. & l. 2. de Fide ad Regin. & in defensione 4. anathem. in cuius impugnatione Theod. idem dixerat. Idem Athan. serm. 4. contra Arian. & Orig. hom. 30. in Matt. Nazianz. orat. 36. n. 60. & orat. 35. n. 77. ubi videtur, in Christo ponere ignorantiam, ut ibi Elias notat. Idem Basil. ep. 1. ad Amphil. Juxta hanc vero expositionem potest adhuc variis modis intelligi verbum illud.

2. Expositio. Tertia ergo expositio sit, Christum, ut hominem, vere ignorasse illum diem, saltem eo tempore, quo verba illa protulit, & hic fuit error hæreticorum, qui Agnoitæ dicuntur, quos refert Gregorius l. 8. regist. ep. 42. & Isid. 8. etymol. c. 5. & Damasc. l. de hæres. & Niceph. l. 18. hist. c. 50. & idem sentit Themistius quidam, qui auctor hujus hæresis fuisse dicitur, ut colligitur ex Liberato in Breviario c. 19. & ex ep. Sophronii in VI. Synod. act. 11. ubi hæc sententia damnatur, ut erronea & hæretica, & Justinus Matt. q. 58. ad orthodox. impium esse dicit, hanc ignorantiam Christo tribuere: & merito, quia repugnat testimoniis Scripturæ, quæ Christo tribuunt scientiam plenitudinem, & thesauros sapientie, & scientie Dei: repugnat etiam dignitati personali Christi Domini, & muneris supremi Judicis, ac denique pugnat cum revelationibus, ab ipso Christo Domino factis; tum quia, ut Ambros. & Hier. & alii argumentantur, Christus prædixit omnia signa diei Judicii, & quæ ante, & post illum futura sunt, quomodo ergo illum ignorabat? tum etiam, ut argumentatur Hilar. 9. l. de Trin. sub finem, quia Christus præcivit, quid alii essent facturi, scilicet, qui essent credituri in ipso, Jo. 6. quis esset eum traditurus, Jo. 13. &c. quomodo ergo ignoravit, quid ipse esset facturus?

3. Expositio. Quarta ergo expositio est, Christum, ut hominem, dici nescire diem Judicii, non quia in humanitate nescivit, sed quia non ex humanitate, seu humana scientia, sed divina, & singulari revelatione. Hic est sine dubio sensus Greg. Nazian. qui hoc sensu tribuit ignorantiam Christo homini, non quam habuit, sed quam de se habuisset, quantum est ex conditione humanitatis, nisi esset Deo conjuncta, ut recte exposuit Damasc. l. 3. de Fide ca. 21. & Nicet. 3. thesaur. c. 38. & idem est sensus Basilii, qui ita expositionem concludit: *Nemo scit, neque Angeli, neque Filius sciret, nisi Pater ei revelasset*. Neque aliud sentit Athanasius, qui hoc explicat exemplo Pauli, qui dixit: *Sive in corpore, sive extra corpus, nescio*; quod ipse ita intelligit, Paulum revera non id ignorasse: sed quia superiori quadam scientia cognoverat, ideo se nescire dixisse; hoc ergo accommodat Athanasius ad dictum verbum Christi, quem ibidem dicit plenum fuisse scientia, neque unquam in illa crevisse. Cyril. etiam sine dubio, juxta hunc sensum aliorum Græcorum, locutus est; nam aliàs etiam ipse sæpe docet, Christum ut hominem, semper fuisse plenum scientia, & non acquisivisse augmentum ejus, ut patet li. 1. in Jo. c. 17. & li. 10. thes. c. 7. Unde in loco citato ex lib. 9. hanc expositionem declarat exemplo verborum Christi, Jo. 11. quando interrogabat: *Ubi posuisti eum?* & Matth. 16. *Quem dicunt homines esse Filium hominis?* quibus interrogationibus inquit fuisse Christum usum ad

ostendendam ignorantiam humanæ naturæ, scilicet, secundum se, & secundum vires sibi naturales: quomodo etiam dixit Basil. ep. 141. in Evangelio voluisse interdum Christum cum ignorantibus numerari, propter infirmos. Denique eadem videtur esse expositio Ambrosii super c. 17. Lucæ. Quæ expositio probabilis est, sed non satis circumstantiæ loci consentanea, quia Christus ideo dixit, se nescire, ut Apostoli intelligerent, ideo eos de illo die non docuisse, sicut desiderabant; si autem sciebat ex divina revelatione, quamvis nesciret humana scientia, eorum petitioni non satisfaceret.

5. Expositio. Et propter eandem rationem minus placet quinta expositio Origenis supra, & Chrys. hom. de Trin. 3. & Epiph. in Acorato, & hæ. 69. & Bernard. l. de 12. grad. humil. qui ajunt, Christum locutum esse de scientia practica, quia nondum exercuerat judicium, & ita non sciebat practice illum diem: sed hoc etiam non erat ad rem, imo nec Pater sciebat proprie illo modo. Displicet etiam 6. Expositio propter eandem causam sexta expositio, dicens Christum ibi fuisse locutum, non in persona propria, sed suorum membrorum, quæ etiam habet Orig. supra, Hier. & Greg.

Ultima ergo, & vera expositio est, Christum negasse se scire, quia veluti sub secreto illum sciebat, & non ad dicendum aliis. Quæ optime quadrat contextui, & responsioni Christi Domini, & phrasi Scripturæ, in qua interdum Deus dicitur scire, quia alios facit scire, ut Gen. 22. *Non cognovi*, &c. e contratio vero dicitur nescire quia non facit scire, & Jo. 15. dicit Christus Apostolis: *Omnia, quæ novi a Patre meo, nota feci vobis*: cum tamen non omnia simpliciter illis revelasset, statim enim dixit: *Multa habeo vobis dicere, quæ non potestis portare modo*: non ergo illis dixerat omnia, quæ a Patre audierat: sed quæ audierat illis revelanda, & tamen illa vocat omnia simpliciter. Consonat etiam hæc expositio communi, & prudenti loquendi modo, quo ea, quæ sub secreto accipimus, nescire dicimus. Et hæc est communior expositio Patrum in illo loco Matth. Hier. Chrys. Theophyl. & aliorum, quam habet etiam Aug. 1. de Trin. c. 12. & 1. Genes. ad lit. c. 22. Ambr. Athanas. Hilar. locis citatis, Basil. lib. 4. lib. 4. contra Eunomium, & Scholastici frequentius.

Solum potest objici, quia juxta hanc expositionem etiam Pater nescit. Sed hoc facile ex dictis expeditur, negando sequelam, quia Pater ita sciebat, ut saltem homini Christo revelaret. Sed urgebis, nam e contrario sequitur, Angelos scire diem Judicii, quamvis ad revelandum nesciant. Respondetur, ex hoc loco tantum in rigore colligi, eos nescire ad dicendum, an vero omnino nesciant, ex hoc loco non colligi, sicut neque oppositum. Unde Abulensis in 24. cap. Matthæi, q. 209. affirmat, eos scire diem Judicii. Sotus vero supra omnino negat: uterque autem divinat, quamquam opinio Soti majori conjectura niti videatur, quia necesse non est, Angelos scire diem Judicii, cum neque sint judices, neque sciant omnia, sicut Christus: & aliunde nulla est ratio, vel auctoritas, quæ ad id afferendum cogat. Alia argumenta attingunt difficultatem sequenti disputandam.

## ARTICULUS III.

Utrum anima Christi in Verbo cognoverit infinita.

A D tertium sic proceditur. Videtur, quod anima Christi non possit cognoscere infinita in Verbo. Quod enim infinitum cognoscatur, repugnat definitioni infiniti, prout dicitur in 3. Physic. quod infinitum est, cujus quantitatem recipientibus, semper est aliquid extra accipere. Impossibile autem est, definitionem a definito separari: quia hoc esset, contradictoria esse simul. Ergo impossibile est, quod anima Christi sciatur infinita.

2. Præterea. Infinitorum scientia est infinita. Sed scientia anime Christi non potest esse infinita: est enim capacitas ejus finita, cum sit creata. Non ergo anima Christi potest cognoscere infinita.

3. Præterea. Infinito non potest esse aliquid majus. Sed plura continentur in scientia divina, absolute loquendo, quam in scientia anime Christi, ut dictum est. Ergo anima Christi non cognoscit infinita.

Sed contra. Anima Christi cognoscit totam suam potentiam, & omnia, in quæ potest. Potest autem in emundationem infinitorum peccatorum, secundum illud 1. Joan. 2. Ipse

Obj. 60.

Responsi.

70.  
1. q. 4. a. 18.  
& 3. d. 14.  
a. 2. q. 2. ad  
2. & ver.  
q. 2. a. 4.  
cor. & ad  
1. 2. & 5. &  
quod l. 3.  
q. 2. a. 1. &  
p. 9. q. 82.  
† Lib. 3.  
Phyl.  
text. 63.  
tom. 2.

q. præ. a.  
1. & 1. qu.



*Ipsa est propitiatio pro peccatis nostris, non autem pro nostris tantum, sed etiam pro totius mundi. Ergo anima Christi cognoscit infinita.*

*b Respondeo dicendum, quod scientia non est nisi entis, eo quod ens, & verum convertuntur. Dupliciter autem dicitur aliquid ens. Uno modo simpliciter, quod, scilicet, est ens actu: alio modo secundum quid, quod, scilicet, est ens in potentia. Et quia, ut dicitur in 9. Metaph. t. unumquodque cognoscitur secundum quod est actu, non autem, secundum quod est in potentia: scientia primo, & principaliter respicit ens actu, secundario autem respicit ens in potentia, quod quidem non secundum se ipsum cognoscibile est; sed secundum quod cognoscitur illud, in cuius potentia existit.*

*Quantum igitur ad primum modum scientia, anima Christi non scit infinita, quia non sunt infinita in actu, etiam si accipiantur omnia, quaecumque sunt in actu, secundum quodcumque tempus, eo quod status generationis, & corruptionis non durat in infinitum. Unde est certus numerus, non solum eorum, quae sunt absque generatione, & corruptione, sed etiam generabilium & corruptibilium. Quantum vero ad alium modum sciendi, anima Christi in Verbo scit infinita: scit enim, ut dictum est\*, omnia, quae sunt in potentia creaturae. Unde cum in potentia creaturae sint infinita per hunc modum scit infinita, quasi quadam scientia simplicis intelligentiae, non autem scientia visionis.*

*Ad primum ergo dicendum, quod infinitum (sicut in 1. p. dictum est\*) dupliciter dicitur. Uno modo secundum rationem formae. Et sic dicitur infinitum negative, scilicet, id, quod est forma, vel actus non limitatus per materiam vel subiectum, in quo recipiatur: Et huiusmodi infinitum, quantum est de se, est maxime cognoscibile, propter perfectionem actus, licet non sit comprehensibile a potentia finita creaturae: sic enim dicitur Deus infinitus. Et tale infinitum anima Christi cognoscit, licet non comprehendat. Alio modo dicitur infinitum secundum rationem materiae: quod quidem dicitur privative, ex hoc, scilicet, quod non habet formam, quam natum est habere: & per hunc modum dicitur infinitum in quantitate. Tale autem infinitum ex sui ratione est ignotum, quia, scilicet, est quasi materia cum privatione formae (ut dicitur 3. Phys.\*). Omnis autem cognitio est per formam vel actum. Sic ergo, si huiusmodi infinitum cognosci debeat secundum modum ipsius cogniti, impossibile est, quod cognoscatur: est enim modus ipsius, ut accipiatur pars eius post partem ut dicitur in 3. Physic.\* Et hoc modo verum est, quod ejus quantitatem accipientibus, scilicet, parte accepta post partem, semper est aliquid extra accipere. Sed sicut materialia possunt accipi ab intellectu immaterialiter, & multa uniri: ita infinita possunt accipi ab intellectu, non per modum infiniti, sed quasi finite: ut sic ea, quae sunt in se ipsis infinita, sint in intellectu cognoscens finita. Et hoc modo anima Christi scit infinita, in quantum, scilicet, scit ea non discurrendo per singula, sed in aliquo uno, puta in aliqua creatura, in cuius potentia existit infinita, & principaliter in ipso Verbo.*

*Ad secundum dicendum, quod nihil prohibet, aliquid esse infinitum uno modo, quod est alio modo finitum: sicut, si imaginemur in quantitatibus superficiem, quae sit secundum longitudinem infinita, secundum latitudinem autem finita. Sic igitur, si essent infiniti homines numero, haberent quidem infinitatem secundum aliquid, scilicet, secundum multitudinem, secundum tamen essentiam rationem haberent finitatem, eo quod omnium essentia esset limitata sub ratione unius speciei. Sed id, quod est simpliciter infinitum secundum essentiam, rationem, est Deus: ut in prima parte dictum est. Proprium autem obiectum intellectus est, quod quid est (ut dicitur 3.\* de Anima) ad quod pertinet ratio speciei. Sic igitur anima Christi propter hoc, quod habet capacitatem finitam, id, quod est simpliciter infinitum secundum essentiam, scilicet, Deum, attingit quidem, sed non comprehendit, ut dictum est\*. Id autem infinitum, quod in creaturis est in potentia potest comprehendere ab anima Christi, quia comparatur ad ipsam secundum essentiam rationem, ex qua parte infinitatem non habet. Nam etiam intellectus noster intelligit universale, puta naturam generis vel speciei, quod quodammodo habet infinitatem, in quantum potest de infinitis predicari.*

*Ad tertium dicendum, quod id, quod est infinitum omnibus modis, non potest esse, nisi unum. Unde & Philosophus dicit in 1. de Caelo, \*quod quia corpus est ad omnem partem dimensionatum, impossibile est, esse plura corpora*

*infinita. Si tamen aliquid esset infinitum uno modo tantum, nihil prohiberet, esse plura talia infinita: sicut si intellexeremus plures lineas infinitas secundum longitudinem, protrahitas in aliqua superficie finita secundum latitudinem.*

*Quia igitur infinitum non est substantia quedam, sed accidit rebus, quae dicuntur infinitae (ut dicitur 3. Phys.) sicut infinitum multiplicatur secundum diversa subiecta, ita necesse est, quod proprietates infiniti multiplicentur, ita quod conveniat unicuique illorum, secundum illud subiectum. Est autem quedam proprietates infiniti, quod infinito non sit aliquid majus. Sic igitur, si accipiamus unam lineam infinitam, in illa non est aliquid majus infinito. Et similiter, si accipiamus quamcumque aliarum linearum infinitarum, manifestum est, quod unicuique earum partes sint infinitae: oportet ergo, quod omnibus illis partibus infinitis non sit aliquid majus in illa linea: tamen in alia linea, & in tertia, erunt plures partes, etiam infinitae, praeter istas. Et hoc etiam videmus in numeris accidere: nam species numerorum parium sunt infinitae, & similiter species numerorum imparium; & tamen numeri pares & impares sunt plures, quam pares. Sic igitur dicendum est, quod infinito simpliciter quoad omnia, simpliciter nihil est majus infinito autem secundum aliquid terminatum, non est aliquid majus in illo ordine, potest tamen accipi aliquid aliud majus extra illum ordinem. Per hunc igitur modum infinita sunt in potentia creaturae, & tamen plura sunt in potentia Dei, quam in potentia creaturae: & similiter anima Christi scit infinita scientia simplicis intelligentiae, plura tamen scit Deus, secundum hunc scientiae modum.*

#### COMMENTARIUS.

**H**ic articulus de infinita multitudine substantiarum intelligendus est, quia licet D. Th. in toto art. hoc non declaret, tamen responsio, & doctrina ejus cogit, ut de substantiis, & non de accidentibus intelligatur. Supponit enim D. Th. in hac scientia beata animae Christi distinguendam esse scientiam visionis, qua videntur res futurae in aliqua differentia temporis, a scientia simplicis intelligentiae, qua videntur ea, quae fieri possunt, sed nunquam erunt: & duplici assertionem respondet.

**c** Prima est. Scientia visionis non videt anima Christi in Verbo infinita. Eandem assertionem posuit 3. dist. 14. qu. 1. art. 2. qu. 3. ad 2. & 1. contra Gentes c. 69. & eodem modo loquitur de scientia Dei. Probat, quia res futurae finitae sunt, nam successio generationum aliquando terminabitur: quae ratio aperte ostendit, illum de solis substantiis esse locutum. Praeterquam quod expositio haec necessaria est, ne dicamus, D. Th. secum pugnare, nam 1. p. qu. 14. ar. 1. 2. & qu. 20. de ver. ar. 4. ad 1. docuit, Deum ipsum videre scientia visionis infinita, & hic etiam docuit articulo praecedenti, animam Christi videre in Verbo omnia, quae Deus videt scientia visionis: ergo necesse est, ut etiam ipsa videat infinita. Sed in prima parte locutus est D. Th. de accidentibus, scilicet, de actibus intellectuum, & voluntatum, quorum successio perpetua erit: hic vero de substantiis, ut etiam Cajet. hic, & Ferr. 1. contra Gentes c. 69. notarunt, post Cap. 3. di. 14. q. 2. Cur autem hic mutaverit modum loquendi, & tractandi hanc quaestionem, quem in 1. p. tenuerat: cur etiam hic nullam mentionem fecerit accidentium, & sine ulla declaratione usus fuerit modo loquendi opinionis, quam ibi rejecerat, haecenus non sum rationem assecutus. Nullus tamen hinc sumat occasionem suspicandi, D. Th. opinatum fuisse, animam Christi non videre in Verbo cogitationes, nam expresse contrarium docuit art. praeced.

Possent tamen quis dicere, D. Thomam ibi solum dixisse, cognoscere Christum, etiam hominum cogitationes, quorum est iudex, quasi indicantem, non cognoscere cogitationes futuras post diem iudicii, quarum iudex futurus non est, & ita non cognoscere infinitas cogitationes in aeternum futuras. Sed haec expositio improbabilis omnino est, nam D. Th. ibi aperte loquitur universaliter de omnibus, quae aliquando habitura sunt esse, & solutione ad 2. & 3. expresse dicit, scientiam beatam animae Christi aequari scientiae divinae in numero scibilium, quae sub scientiam visionis cadunt.

Secunda assertio est, animam Christi scire infinita in Verbo, per scientiam simplicis intelligentiae. Probat, quia per hanc scientiam scit omnia, quae continentur in potentia creaturae: sed illa sunt infinita, ergo. Ubi adven-

Lib. 3.  
text. 37. &  
10. 2.

Lib. 9.  
Met. text.  
20. 2.

Art. praec.

1. p. q. 70  
ad 1.

Lib. 3.  
text. 67.  
20. 1.

Lib. 3.  
Phys. text.  
45. & 92.  
20. 2.

1. p. q. 70  
ad 2.  
1. 3. de an.  
text. 26. 1.

Art. hu.  
jusq.

Lib. 1. text.  
2. 10. 2.

Note 3

ten-



Infini-  
tum  
substan-  
tiarum.

tendum est, tam rationem, quam conclusionem, intelligendam esse de substantiis, sicut præcedentem: quia est idem contextus sine ulla variatione: potest autem intelligi, vel de infinita multitudine specierum substantiarum, vel tantum de infinita multitudine individuorum. Si priori modo exponatur, videtur, aliquantum esse creditu difficile, in potentia creaturæ contineri infinitas species substantiales, cum creatura sit finitæ virtutis, & perfectionis. Potest ita autem hoc fieri verisimile; nam species rerum, quæ in causis naturalibus continentur, solum sunt species mistorum (simplicia enim, cum sint quasi prima elementa generationum naturalium, non possunt secundum speciem multiplicari per causas naturales); mistio vero simplicium infinitis modis fieri potest, interveniente præcipue influxu cælorum; qui cum sint superioris ordinis, possunt cõcurrere ad generationes varias inferioris ordinis in infinitum, præsertim, si aliis & aliis modis applicentur, quod esse possibile, facile intelligi potest; sic ergo fit verisimile, videre Christi animam in Verbo infinitam varietatem specierum possibilem, totam essentiam, & virtutem universi comprehendentem. Si autem posteriori modo exponatur conclusio, scilicet, de individuis, sic facile intelligitur, in potentia creaturæ contineri individua, quæ in infinitum multiplicari possunt; tamen non constat, animam Christi, comprehendendo potentiam creaturæ, cognoscere hæc omnia individua, quia virtus creata non per se respicit individua, sed speciem: unde nec sola sua virtute potest illa efficere, nisi aliæ causæ, & circumstantiæ concurrant, in quo maxime differt ab omnipotentia Dei, quæ per se omnia potest, & a nulla circumstantia, vel causa dependet. Dicit vero posset, quamquam in una sola causa creata non possint distincte cognosci omnia individua, quæ ab illa in infinitum prodire possunt, aliis concurrentibus, ut ratio facta concludit: tamen, cognito toto ordine causarum universi, & omnibus circumstantiis; & infinitis modis, quibus ad producendos varios effectus convenire possunt, cum concurrat primæ causæ ad illos necessario, cognosci consequenter omnia etiam individua, quæ a talibus causis fieri possunt: & hoc modo est verisimile, videre animam Christi in Verbo infinita individua substantialia per modum simplicis intelligentiæ.

Alii addunt, quamvis in scientia, quæ est in proprio genere, non sit necessarium, ut comprehensa causa creata cognoscantur omnia individua, quæ ab illa fieri possunt; tamen in scientia, quæ est in Verbo, id necessario sequi, quia illa scientia fit per ideas divinas, quæ non tantum speciem, sed etiam individua representant. Quæ ratio minus efficax mihi videtur, tum, quia, licet in ideis divinis represententur omnia individua & species, tamen, cum illæ ideæ non comprehendantur, potest in eis cognosci unum individuum, & non omnia, vel species, & non individua: tum, quia hic non tam agitur de cognitione individuorum per proprias ideas, quam in causa proxima, & creata.

Ex argumentis D. Th. primum est facile, secundum vero ita difficile, ut specialem quæstionem requirat, infra disputandam: in tercio vero solum est notandum, quomodo D. Th. illam propositionem explicet: *Infinito non est aliquid majus*: dicit enim intelligendam esse in eodem subjecto, & sub ea ratione & ordine, quo infinitum dicitur, quod optime declarat, neque aliquid addere oportet.

## ARTICULUS IV.

*Utrum anima Christi videat Verbum, sive divinam essentiam, clarius qualibet alia creatura.*

<sup>17.</sup>  
<sup>Sup. q. 9. a.</sup>  
<sup>2. o. & 1. a.</sup>  
<sup>inf. q. 11.</sup>  
<sup>a. 5. ad 1.</sup>  
**A**D quartum sic proceditur. Videtur, quod anima Christi non perfectius videat Verbum, quam qualibet alia creatura. Perfectio enim cognitionis est secundum medium cognoscendi, sicut perfectior est cognitio, quæ habetur per medium syllogismi demonstrativi, quàm quæ habetur per medium syllogismi dialectici. Sed omnes Beati vident Verbum immediate per ipsam divinam essentiam, ut in prima parte dictum est. Ergo anima Christi non perfectius videt Verbum, quam qualibet alia creatura.

<sup>1. p. q. 32.</sup>  
<sup>a. 2.</sup>

<sup>c. 4. a. me-</sup>  
<sup>dio illius.</sup>

2. Præterea. Perfectio visionis non excedit potentiam visivam. Sed potentia rationalis animæ, qualis est anima Christi, est infra potentiam intellectivam Angelis, ut patet per Dionysium. Ergo anima Christi

non perfectius videt Verbum, quam Angeli.

3. Præterea. Deus in infinitum perfectius videt Verbum suum, quam anima Christi. Sunt ergo infiniti gradus medii possibiles, inter modum, quo Deus videt Verbum suum, & inter modum, quo anima Christi videt ipsum. Ergo non est asserendum, quod anima Christi perfectius videat Verbum vel essentiam divinam, quam qualibet alia creatura.

Sed contra est, quod Apostolus dicit ad Ephes. 1. quod Deus constituit Christum ad dexteram suam in cælestibus, supra omnem principatum, & potestatem, & virtutem, & dominationem, & omne nomen, quod nominatur, non solum in hoc seculo, sed etiam in futuro. Sed in illa cælesti gloria tanto aliquis est superior, quanto perfectius cognoscit Deum. Ergo anima Christi perfectius videt Deum, quam quavis alia creatura.

a. Respondet dicendum, quod visio divinæ essentiae convenit omnibus Beatis, secundum participationem luminis derivati in eos a fonte Verbi Dei, secundum illud Eccles. 1. Fons sapientiæ. Verbum Dei in excelsis. Huic autem Verbo Dei propinquius conjungitur anima Christi, quæ est unita Verbo in persona, quam quavis alia creatura. Et ideo plenius recipit influentiam luminis, in quo Deus videtur ab ipso Verbo, quàm quæcunq; alia creatura. Et ideo præ cæteris creaturis perfectius videt ipsam veritatem, quæ est Dei essentia. Unde dicitur Jo. 1. Vidimus gloriam ejus, quasi Unigeniti a Patre, plenam, non solum gratiæ, sed etiam veritatis.

Ad primum ergo dicendum, quod perfectio cognitionis, quantum est ex parte cogniti, attenditur secundum medium, sed quantum est ex parte cognoscentis, attenditur secundum potentiam vel habitum. Et inde est, quod etiam inter homines per unum medium, unus perfectius cognoscit aliam quam conclusionem, quam alius. Et per hunc modum, anima Christi, quæ abundantiori repletur lumine, perfectius cognoscit divinam essentiam, quam alii Beati, licet omnes ipsam Dei essentiam videant per se ipsam.

b. Ad secundum dicendum, quod visio divinæ essentiae excedit naturalem potentiam cujuslibet creaturæ, ut in prima parte dictum est. Et ideo gradus in ipso attenduntur magis secundum ordinem gratiæ, in quo Christus est excellentissimus, quam secundum ordinem naturæ, secundum quem natura Angelica præfertur humane.

c. Ad tertium dicendum, quod, sicut supra dictum est, de gratia, quod non potest esse major gratia, quam gratia Christi, per respectum ad unionem Verbi: idem etiam dicendum est, & de perfectione divinæ visionis, licet, absolute considerando possit esse aliquis gradus altior, sublimiorque secundum infinitatem divinæ potentie.

## COMMENTARIUS.

**I**N superioribus articulis explicuit D. Th. perfectionem scientiæ beatæ Christi ex parte objecti: nunc ostendit illius excellentiam ex parte luminis, seu potentiæ, & hoc modo docet, animam Christi clarius videre Deum omnia alia creatura. Et tota litera articuli clarissima est.

b. Quæ Cajetanus notat in solutione ad secundum & tertium, cavenda sunt, & corrigenda; non solum enim falsa sunt, sed etiam contra expressam mentem D. Tho. in solutione enim ad 2. ait D. Th. gradus perfectionis in divina visione magis attendendos esse secundum ordinem gratiæ, quam secundum ordinem naturæ, unde infert Cajetanus, ex utroque capite oriri posse, ut una visio sit perfectior alia, atque adeo perfectionem intellectum cum eodem lumine perfectius videre Deum. Sed quidquid sit de re (quam ego sine dubio falsam existimo) in hac litera D. Thomæ nullum habet fundamentum, sed ex illa potius contrarium non obscure colligitur, si argumenti intentio consideretur, & recte applicetur solutio: argumentum enim contendebat, Angelum perfectius videre Deum, quam animam Christi, quia habet perfectionem intellectum. Respondet D. Thomas, negando consequentiam, & rationem reddit, quia illa visio est supra naturalem perfectionem potentiæ creatæ; intendit ergo concludere, perfectionem visionis non esse ex naturali perfectione potentiæ, sed ex supernaturali, unde illa particula, magis, non sumitur in illo sensu comparativo, ut Cajetanus exponit, sed ut idem valeat, quod, potius, & ita non affirmat utrumque extremum, sed alterum affirmat, alterum negat.

c. In solutione vero ad tertium ait D. Thomas, absolute loquendo, posse esse sublimiorem gradum visionis Dei, quam sit visio animæ Christi, quod bene Cajetanus exponit.



ponit ex sublimiori gradu, non in essentia, sed in intentione: male vero addit id non esse verum in eodem subiecto, seu in ipsamet anima Christi, sed in alio perfectiori, verbi gratia, in Angelo; putat enim ille (sicut supra de gratia vidimus) ita lumen gloriæ non posse esse intensius de potentia absoluta, quam sit in anima Christi; unde infert nec visionem posse esse intensiorem in eadem anima; quia tamen existimat perfectionem potentiam cum eodem lumine perfectionem visionem elicere, ideo dicit in Angelo posse esse perfectiorem visionem, quia potest esse æquale lumen: quæ doctrina, & duobus nititur falsis fundamentis (ut visum est), & non sibi constat, quia nullam potest reddere rationem, cur visio Dei, quæ est quædam qualitas, possit in infinitum intendi vel in uno, vel in diversis subiectis, & non lumen gloriæ: ostensum est autem supra, si in diversis potest, etiam in eodem posse. Sed, quidquid de re sit, constat totum esse contra mentem D. Thom. hic, qui non loquitur de diversis subiectis, sed de eodem, & ideo non tribuit hoc perfectioni subiectorum, sed infinitati divinæ potentiæ.

## DISPUTATIO XXVI.

In tres Sectiones distributa.

De perfectione scientiæ beatæ animæ Christi.

Scientia  
beatæ a-  
nimæ  
Christi  
ejusdem  
speciei est  
visio  
beatifica  
aliorum  
beatorum

**T**Riplex perfectio in hac scientia, sicut in aliis, considerari potest, scilicet, essentialis seu specifica, intensiva seu in claritate majori intra eandem speciem, tertia quasi extensiva, seu ex parte objecti. De prima, seu essentiali perfectione, nihil oportet in præsentia dicere. Suppono enim esse in Theologia certum, hanc scientiam in anima Christi esse ejusdem speciei cum visione beatæ aliorum beatorum: nam sacra Scriptura promittit nobis consortium ejusdem beatitudinis cum Christo homine, unde dicimur, *heredes Dei, coheredes autem Christi*, ad Rom. 8. Quem locum ad hoc ponderant ibi Anselm. & Beda, qui etiam refert Augustinum; Ambrosius etiam ibi declarat, quid sit esse coheredes, ex illo 1. Jo. 3. *Videbimus eum, sicuti est*, idem visionis genus Christo & aliis beatis attribuens. Recte etiam declaratur ex verbis ejusdem Christi Joan. 8. *Ubi ego sum, illic & minister meus erit*, & apertius c. 14. *In domo Patris mei mansiones multe sunt*, & infra, *Vado parare vobis locum, ut ubi ego sum, & vos sitis*, & similia habet c. 17. & ex iis, quæ dicta sunt de gratia animæ Christi, hoc etiam concludi potest: ostendimus enim ibi gratiam habitualement Christi esse ejusdem speciei cum nostra: eadem autem est ratio de gloria, seu visione beatæ, quæ est ultimus finis connaturalis ipsi gratiæ. Et confirmatur præterea, quia Christus est caput Ecclesiæ homogeneum, & ideo sicut est nobis simile in natura, ita & in gloria. Denique valde probabile existimo, quod Cajetanus hic etiam indicavit, nullam visionem, vel scientiam beatam Dei posse esse perfectioris speciei, & essentialis, quam sit illa visio, qua Angeli, vel homines vident Deum, quia nec potest propinquius attingere Deum, neque ab ipso procedere immediatius: ergo visio animæ Christi, quamvis perfectissima sit, non est tamen specie diversa. Et in hoc videntur Theologi omnes, tanquam in re certa, convenire fere sine disputatione. Ex quo infertur, ita sentiendum esse de lumine gloriæ, & de specie intelligibili, & de aliis proprietatibus hujus scientiæ, quæ illi conveniunt, quatenus est clara visio Dei, & ultima beatitudo intellectualis naturæ, sicut de visione beatæ secundum se Theologi sentiunt, & tractatur in 1. p. q. 12.

De secunda, seu intensiva perfectione illud etiam tanquam certum, supponimus hanc scientiam esse perfectiorem, & clariorem in anima Christi, quam in omnibus aliis, tam hominibus, quam Angelis, quod est sine dubio de fide certum ex communi consensu, & perpetua traditione totius Ecclesiæ, & ex illo Pauli ad Ephes. 1. *Constituens eum super omnes principatus*, &c. & ex aliis locis supra sæpe citatis, in quibus dicitur: *Plenus gratia, & scientia, & in eo esse omnes thesauros sapientiæ, & scientiæ Dei*, & quia in hoc sensu dicitur Christus, ut homo, *sedere ad dexteram Dei*, ut 2. to. disp. 52. sect. 3. exponemus. Denique ratio facile sumitur ex illis verbis ad Heb. 2. *Tanto melior Angelis effectus, quanto differentius præ-*

*illis nomen hereditavit*, ipse enim est Filius naturalis, illi adoptivi: ergo illi sine dubio data est perfectior, & major hereditas. Et confirmatur, nam ipse est principium, & fons gloriæ omnium beatorum: ergo superat omnes in gloria. Legatur Cyrillus l. 1. in Jo. c. 17. ubi elegantissime comparat gloriā animæ Christi cum gloria Sanctorum omnium, dicitque: *longe aòsq; comparatione sublimiorem*: quia habet gloriā, *quasi unigenitus Patris*. Nec de illa perfectione aliquid amplius dicere possumus; sed de illa eodem modo judicandum est, sicut supra in simili dubio de perfectione gratiæ respondimus: est enim summa, quæ de potentia ordinaria esse potest, quāvis de potentia absoluta possit esse major, ut hic etiam circa art. 4. cum D. Th. notatum est, & magis ex sequ. disp. patebit.

De tertia igitur perfectione superest nobis disputationis, scilicet, ex parte objecti, in quo distinguendum est objectum primum, quod est Deus clare visus, ab objecto secundo, quod sunt creaturæ visæ in Deo, & de utroque sigillatim dicendum est.

## SECTIO I.

Quid sit de ratione comprehensionis intellectualis objecti alicujus, præsertim divinæ essentia.

**N**Ecessarium existimavi, quæstionem hanc in hujus disputationis initio adjungere, ne, vocibus abutendo, in illa laboremus in æquivoco.

Primum ergo supponenda est vulgaris distinctio comprehensionis, in commentario articuli primi breviter annotata: interdum enim sumitur pro assecutione, seu obtentione rei, quam insequimur, interdum pro exacta & perfecta rei cognitione vel inclusione, ut sic dicam. Est enim hæc vox translata a corporalibus ad intellectualia. Et in corporalibus comprehendere, idem est quod apprehendere, & opponitur insecutioni, ut notavit D. Th. 1. p. q. 12. ar. 7. ad 1. aliquando vero idem significat, quod totam rem complecti & includere; ut quando rem parvæ quantitatis manu concludimus, vel quando locus æqualis totum circumambit locatum. Hinc ergo in spiritualibus, quoniam mens proprium habet motum, quo suum objectum inquirat, & præsertim Deum, quando illum ita assequitur, ut suum desiderium & inquisitionem terminet, comprehendere dicitur, etiam si non exacte cognoscat. Sic dicit Paul. ad Philip. 3. *Sequor, si quo modo comprehendam* dicens enim, *si quo modo*, satis denotat, illam comprehensionem non fore perfectam & exactam pro objecti dignitate; esse vero terminum sui cursus & insecutionis, & ideo comprehensionem vocari. Unde 1. Cor. 9. ad omnes fideles loquens, ait: *Sic curare ut comprehendaris*. Ad Ephes. 3. *Ut possitis comprehendere cum omnibus Sanctis*, &c. usque ad id, *supereminentem scientiæ charitatem Christi*. Ex quo ultimo verbo constat, illam comprehensionem non fore exactam cum charitas Christi superet nostram scientiam. Hinc comprehensio attribuitur aliquando hominibus in hac vita, si pro ratione status, perfectam cognitionem, quæ in illo haberi potest, assequantur. Et apud Latinos, intellectualis perceptio solet interdum generatim comprehensio vocari. Specialiter autem solent hoc modo Beati cum Christo regnantes comprehensores vocari. Quo sensu Nazian. oratio. 25. cum multa de Beatissima Trinitate disputasset, in fine concludit. *In hoc igitur commune nomen, crede, & prospere incide & regna; atque hinc ad alterius vite beatitudinem transibis. Ea porro (ut mihi quidem videtur) in expressiori horum cognitione, & comprehensione sita est*. De hac vero comprehensione nihil est, quod dicamus, supponimus enim, hoc modo posse Deum comprehendere ab homine, quia potest ab eo clare, & prout in se est, videri, non in hac vita, nec naturali virtute, sed in futura & virtute supernaturali, ut 1. p. q. 2. latius differitur.

Alia ergo acceptio comprehensionis pro exacta rei cognitione & adæquata, est magis stricta & propria, & de illa intelligitur præfens quæstio, quas scilicet conditiones requirat cognitio aliqua divinæ essentia, ut sit vera ac propria comprehensio ejus.

Circa quam difficultatem Ocham in 4. q. 13. a. 1. Gab. in 3. d. 14. a. 3. dubio 2. Almain ibi q. 1. Major. q. 2. ad finem, quinque modos comprehensionis distinguunt sine ulla methodo vel ratione, ut bene notavit Soto, in 4. d. 49. q. 8.

Comprehensio  
vox multiplex.

Intellectualis  
quævis perceptio  
interdum  
comprehensio  
appellatur.

Stricta  
comprehensio  
significatio.  
Comprehensio  
a sumptis  
acceptio  
ab aliis  
constituitur.

Omnis visio  
Dei est  
ejusdem  
perfectio  
essentialis.



q. 8. ar. 1. Primus vero illorum, qui est videre rem totam clare & distincte, coincidit in præsentem materiam cum priori membro a nobis exposito in præcedente distinctione. Secundus autem, scilicet, quod comprehensio sit cognitio totius, & omnium partium distincte, est impertinens, quia de ratione comprehensionis ut sic non est, quod sit de re habente partes; & quando circa illam versatur, non est illa diversa acceptio comprehensionis, cum contineatur in ratione distinctæ & exactæ cognitionis. Atque idem est de quarta acceptance, scilicet, quod comprehensio est illa cognitio, qua cognoscuntur omnia prædicata, quæ de tali objecto cognosci possunt, hæc enim non est diversa acceptio comprehensionis, sed in adæquata ratione comprehensionis includitur. Nec vero sola conditio sufficit ad rationem comprehensionis absolute loquendo, nam beati cognoscunt omnia prædicata, quæ in Deum conveniunt, illud tamen non comprehendunt, nisi primo illo lato modo. Major negatur a dictis auctoribus; existimo autem esse verissimam, quia non prædicantur de Deo, nisi quæ formaliter in illo reperiuntur: beati autem vident in Deo omnia, quæ formaliter sunt in ipso. De aliis duobus membris, quæ dicti auctores ponunt, dicetur in sequente distinctione.

Quot alii  
acceptio-  
nes affi-  
gnant.

Alii ergo videntur duplicem comprehensionem distinguere. Una dici potest comprehensio extensiva tantum, alia vero extensiva & intensiva simul. Hæc videtur fuisse sententia Godofredi, quod lib. 6. q. 3. ut sumitur ex his, quæ de illo refert Capr. in 4. d. 49. ult. a. 2. arg. 4. Comprehensio autem intensiva tantum & non extensiva, non datur: quia, si cognitio habet totam perfectionem intensivam, quæ potest haberi circa tale objectum, fieri non potest, quin illud extensive etiam comprehendat, quia cognitio, quo est intensive perfectior, eo, cæteris paribus, magis penetrat objectum, & quod in illo est, Comprehensio ergo extensiva dicitur illa cognitio, qua cognoscitur objectum, quidquid in illo est formaliter vel eminenter: atque adeo erit illa cognitio, qua objectum, & omnis modus ejus, & quidquid in illo cognosci potest, cognoscatur. Potest autem tota hæc cognitio de objecto haberi cum majori vel minori claritate aut intensione, seu perfectione intensiva: quando ergo cognitio habuerit totam illam extensionem, non tamen omnem claritatem, vel intensivam perfectionem, quam habere potest, dicetur cognitio comprehensiva tantum extensive, quia in extensione habet totum, quod habere potest, & exhaurit rem, in intensione vero non item. Unde, quod talis cognitio sit aliquo modo comprehensio, videtur evidens ex terminis, & a fortiori patebit ex dicendis: an vero sit simpliciter comprehensio, vel tantum secundum quid, illud potest in quaestionem verti, de quo statim. Quando ergo cognitio habuerit etiam summam claritatem, & intensivam perfectionem, dicetur comprehensio extensiva & intensiva, atque adeo comprehensio simpliciter absque controversia. Sed est hic considerandum, duobus modis posse intelligi, cognitionem exactam in extensione, esse etiam summam in perfectione intensiva. Uno modo absolute in genere entis, seu in tota latitudine intelligentium, & hæc videtur esse altera acceptio comprehensionis, quam Nominales ponunt. Sed est impropria & gratis conficta, nam juxta illam sola Dei cognitio est comprehensio respectu cujuscunque objecti, & ita nulla res erit comprehensibilis ab alio, quam a Deo, quod ridiculum est. Sequela patet, quia solus Deus potest habere de quacunque re cognitionem summe perfectam in intensiva perfectione: ergo, si hoc est necessarium ad rationem comprehensionis simpliciter, nulla est alicujus rei comprehensio, nisi sola cognitio Dei. Alio modo potest id intelligi respective, seu proportionate, nimirum, ut quanta est intensiva perfectio objecti cogniti in ratione intelligibilis, tanta sit perfectio cognoscentis, ut sic, seu cognitionis in ratione intellectionis: & quia Deus est objectum intelligibile infinite perfectum intensive, illa sola sit comprehensio intensiva ejus, quæ habuerit infinitam claritatem & perfectionem, & sic de aliis proportionate.

Juxta hanc ergo distinctionem, ad quaestionem propositam erit etiam sub distinctione respondendum: nam ad comprehensionem extensivam necessarium erit, & sufficiet, cognoscere omnia, quæ in objecto continentur: ad comprehensionem vero intensivam ultra id requiretur, ut ea omnia cognoscantur, quantum tale objectum

cognoscibile est, id est, cum tota ea claritate, & perfectione intensiva, quam ex natura sua requirit, ut exacte cognoscatur. Quod si absolute respondendum est, utraq; conditio dicetur necessaria ad comprehensionem simpliciter, quia comprehensio dicitur adæquatam rei cognitionem: non est autem adæquata simpliciter, nisi in intensione & claritate habeat proportionem & commensurationem cum re: ergo neque erit comprehensio simpliciter. Minor colligitur ex D. Th. hic ar. 2. ad 3. ubi dicit, quantitatem cognitionis non attendi tatum ex numero scibilium, sed etiam ex claritate: & in eodem sensu videtur dicere hic, ar. 1. ad 1. & 1. p. q. 12. ar. 10. ad comprehensionem non satis esse cognoscere totum objectum, seu necessarium esse, cognoscere totaliter. Quid autem sit cognoscere totaliter, declarat, docens non esse intelligendum ex parte objecti, id est quia nihil in ipso lateat: nam hoc habet cognitio, qua absolute videtur totum objectum, ita ut nullam ejus non videatur, sed intelligendum esse ait ex parte modi, scilicet, ut tam perfecte videatur objectum, quantum visibile est; id est, tam perfecto modo, quantum natura sua est aptum cognosci. Et eandem doctrinam repetit D. Th. li. 3. cont. Gent. c. 55. & q. 8. de verit. ar. 2. in corp. & ad 2. & 6. quibus locis utitur exemplo cognitionis per opinionem, quam dicit non esse comprehensionem, etiam si non ignoretur aliquid in principio, vel conclusione solum, quia in modo cognitionis est imperfecta. Citari potest pro hac sententia Durand. in 1. d. 35. q. 1. n. 10. ubi ait, cognoscere rem comprehensive, esse cognoscere illam omnimodo, quo cognosci potest. Et in 3. d. 14. q. 2. n. 6. ait, licet creatura videat in Deo omnia, non esse tamen illam perfectissimam cognitionem. Unde significat, non fore comprehensivam. Idem clarius dicit ibi Scotus q. 2. §. Potest dici & §. ad 2. q. Et hanc sententiam necessario sequi debent omnes, qui existimant, posse creaturam videre in Deo omnia, non solum futura, sed etiam possibilis, & tamen non comprehendere ipsum. Ejus modi est Auréol. apud Capreo. 4. d. 49. q. ult. a. 2. Bachon. in 3. d. 14. q. 1. a. 3. Greg. 1. d. 44. q. 4. a. 2. ad 9. Gab. 3. d. 14. a. 2. conc. 2. & a. 3. dub. 2. Major. ib. q. 2. ad fin. & 4. d. 49. q. 15. Imo & Soto ibi q. 3. a. 3. cōc. 5. ad 2. arg. cont. illam, ait, quod licet quis videret omnia in Deo, non comprehenderet ipsum, si non infinita claritate videret, de qua re plura dicemus, sect. 3.

Sed quanquam hæc doctrina, recte intellecta, sit vera, scilicet ad comprehensionem necessarium esse etiam modum perfectum ex parte cognoscentis, & proportionatum objecto cognito, nihilominus non existimo, distinctionem illam esse necessariam: quia non potest esse comprehensio vera & propria ex parte objecti cogniti, quin sit etiam intensive sufficienter perfecta, ut comprehensio simpliciter dici possit. Quod per sequentes propositiones in hunc modum declaro.

Dico primo, ad comprehensionem intellectualem 1. Concl. necessarium esse, ut cognitio sit clara, evidens, & certa, cum debita proportionem ad objectum cognitum. Hæc assertio est expressa D. Th. citatis locis, & tam clara, ut non possit in dubium revocari, quia, qui non habet rei evidentiam, tantum potest aut per fidem, aut per extrinsecam media & probabilis veritatem cognoscere; cognitio autem per fidem, aut per rationem probabilem, potius ignorationis, quam comprehensionis nomen meretur. Unde, saltem quoad hoc, id est, quoad claritatem & evidentiam cognitionis, clarum est, ad comprehensionem requiri aliquem modum perfectum ex parte cognitionis, nam claritas, & evidentia, modus cognitionis est. Quomodo autem hæc claritas esse debeat proportionata rei cognitæ, ita declarari potest, nam objectum est cognoscibile ut verum: potest ergo in objecto esse veritas simplex, seu immediata, qualis a nobis intelligitur esse in primis principiis, aut mediata, qualis est in conclusionibus, quarum extrema non per se, sed medio aliquo copulantur. Ad comprehensionem ergo, ut minimū, necessarium est, ut tanta sit claritas in cognitione, quanta sufficiat ad cognoscendam veritatem objecti, prout in se est, si immediata fuerit, ex vi cognitionis extremorum, si mediata, ex vi illius proprii medii, quo extrema copulantur. Et secundum hanc considerationem est in primis de ratione comprehensionis, ut per illam cognoscatur objectum, quantum cognoscibile est ex parte medii, seu modi cognoscendi, ut declaratum est. Et ratio est aperta, quæ magis etiam declarat causam a priori, ob quam



quam non potest esse comprehensio, nisi sit etiam cognitio evidens & clara, scilicet, quia, si veritas esset immediata, & non cognosceretur per seipsam, seu ex vi cognitionis extremorum, necesse esset, habitudinem propriam, quam inter se habent illa extrema, a cognoscente ignorari: nam, si illam cognosceret, simul etiam videret, quo vinculo inter se conjungerentur: si autem illa habitudo ignoratur, non comprehenditur objectum, quia non cognoscitur secundum omnem habitudinem realem, quam in se habet. Similiter si veritas objecti sit mediata, & non cognoscatur per proprium medium, necesse est, ignorari habitudinem propriam, quam illa extrema habent cum tali medio, & consequenter necesse est, talem veritatem non comprehendendi. Atque hinc fit, ut neque evidentia a posteriori, sive per effectum, ad comprehensionem sufficiat: quia illud, quod est medium cognitionis a posteriori, non est medium ipsius rei, seu quo extrema in re ipsa copulantur: & ita ex vi talis cognitionis non cognoscitur propria & intrinseca habitudo, quæ est in objecto ipso ad medium, vel causam, unde ejus veritas pendet. Et ideo, quo cognitio fuerit per medium magis extrinsecum, ut est in fide, vel opinione, eo magis distabit cognitio a perfecta comprehensione: neque ex vi talis cognitionis videtur res, & veritas ejus, prout in se est, nec proprius & adæquatus ejus conceptus formatur, ideoque non potest veram rationem comprehensionis attingere.

**¶ Epocl.** Dico secundo. De ratione comprehensionis est, ut sit cognitio tam clara & intensa, quantum necesse est ad exacte cognoscendas & penetrandas in objecto cognito omnes habitudines & connexiones, quas ex natura sua habet, & habere potest, cum omnibus rebus, a quibus ipsum pendet, & quæ ab ipso pendere possunt. Hæc conclusio videtur ex ipsis terminis evidens, & ex descriptionibus comprehensionis communiter receptis constare potest. Est enim de ratione comprehensionis, ut per eam res cognoscatur, quantum cognoscibilis est, ex D. Tho. citatis locis, tum hic, tum 1. p. q. 12. ar. 7. & 3. contra Gent. c. 55. ergo oportet, ut saltem ex parte objecti distinctissime cognoscatur, quidquid in eo est, & omnis habitudo ac connectio, sub qua cognosci potest. Item ex August. 12. de Civit. c. 18, Ep. 112. c. 5. 6. 7. & 8. & serm. 38. de verb. Domini, asserente, comprehensione circumscribi, & quasi finiri objectum comprehensum, quantumvis infinitum: sed non omnino circumscribitur objectum, & finitur, nisi cognoscatur quidquid in illo est, & in illo cognosci potest & secundum omnem habitudinem, qua potest cognosci: ergo hoc saltem ad comprehensionem necessarium est. Tandem ex ipsa metaphora, quia comprehensio materialis, seu quantitativa dicit adæquationem & inclusionem perfectam rei comprehensæ in comprehendente; ergo intellectualis comprehensio hoc etiam requirit.

Dices. Ergo nulla creatura potest aliam comprehendere, quia non potest eam cognoscere distincte secundum omnem habitudinem, quæ in ea cognosci potest, saltem in ordine ad divinam potentiam; nam infinita sunt, quæ potest Deus in illa, vel per illam operari, quæ non possunt a creatura exhaustiri. Respondetur, unam creaturam virtute naturali posse aliam comprehendere secundum naturalem perfectionem, & potestatem ejus, non tamen secundum obedientialem, ut argumentum ostendit. Hoc autem non pertinet ad rei comprehensionem simpliciter & proprie dictam. Satis est enim exhaustire naturam ejus: nam cognoscere, quæ per potentiam obedientialem fieri in ea possunt, magis est cognoscere Dei omnipotentiam, quam creaturam ipsam perfectius cognoscere, præsertim quoad ea, quæ naturalia ei sunt. Adde denique, esto non possit una creatura virtute naturali cognoscere, quidquid per obedientialem potentiam in alia creatura & per illam fieri potest, tamen virtute supernaturali, seu per aliquod divinum lumen fieri posse, ut una creatura, etiam sub hac ratione, comprehendat aliam: ad hoc enim non est necesse comprehendere omnipotentiam Dei, sed satis erit cognoscere illam clare & distincte secundum aliquam latitudinem effectuum, quod non repugnat; nam, ut videbimus, sine comprehensione possunt in Deo videri infinita, atque adeo potest videri omnipotentia Dei cum habitudine ad totam aliquam latitudinem infinitorum effectuum. & multo magis poterit cum habitudine ad omnia, quæ in aliqua creatura operari potest, absque comprehensione videri.

Dico tertio. Si cognitio habet eam perfectionem & claritatem, quæ sufficit ad cognoscendum objectum ex parte ejus exacte & perfecte, id est, ad cognoscendum, quidquid in eo est formaliter vel eminenter, & ad penetrandam omnem rationem formalem ejus, & omnem habitudinem distinctissime, talis cognitio est vera comprehensio. Hæc est sine dubio sententia D. Tho. quæ sumitur ex his, quæ docet, tum hic, a. 2. tum 1. p. q. 12. a. 8. & 3. cont. Gent. c. 55. & 56. & ubicumque docet creaturam non posse elevare ad videndum quæcumque sunt in Deo eminenter, quia alias comprehenderet ipsum. Hæc enim ratio locum non haberet, si ad comprehensionem aliquid aliud necessarium esset: facile enim dici posset, etiam si creatura videret ea omnia in Deo, ipsum non comprehendere, quia non summa intensione, claritate, aut perfectione videret. Et ita conclusionem hanc supponit Thomista, quos sect. 3. referam. Sumitur hæc veritas ex Aug. Ep. 112. c. 8. ubi ait, tunc aliquid comprehendendi, quando totum ita videtur, ut nihil ejus lateat videntem: quomobrem ait, hoc modo Deum a nullo visum esse, quod tam de angelo, quam de homine intelligit absque dubio. Eodem modo loquitur Chrys. homiliis de compreh. Dei nat. præsertim 1. & 5. & alii quos sect. seq. commemorabimus.

Ratione declaratur ex metaphora ipsa comprehensionis: sumpta est enim ex quantitativis, quæ secundum extensionem suam ita commensurantur, ut una omnino aliam capiat, & complectatur: sic ergo, comprehensio intellectualis in adæquatione quasi extensiva consistit, quæ, scilicet, intellectus capiat totum, quod est in objecto, secundum omnem extensionem, vel quasi extensionem ejus ad omnia illa, quæ aliquo modo in se continet, vel ad omnia illa, ad quæ quovis modo dicere potest habitudinem. Quod vero ultra hanc adæquationem seu proportionem, intercedat alia in intensione & perfectione, conferet quidem ad aliud genus æqualitatis & proportionis in genere entis, non tamen ad rationem comprehensionis. Unde, licet sit evidens, unam cognitionem totalem objecti, prout a nobis explicata est, posse esse perfectiorem alia in entitate, & claritate specifica, seu graduali, tamen id certe non tollit absolutam rationem comprehensionis, imo nec variat rationem ejus, prout hac voce significatur. Sicut in corporalibus, quod unum corpus continens aliud sit majus, aut perfectius, non impedit, quominus aliud corpus minoris quantitatis, aut perfectionis, vere comprehendat, si vere totum aliud intra se claudit. Confirmatur ex communi modo loquendi de comprehensione intellectuali, tunc enim rationem aliquam nos comprehendere putamus, quando totam ejus vim clare percipimus. Quod autem id sit summa attentione, vel intensione, nihil ad hoc conferre censemus. Quod autem in hac vulgari acceptione comprehensionis accidit, proportionem servata, contingit in exacta comprehensione. Unde nunquam censetur incomprehensibile aliquod objectum, quia ex parte cognoscentis non possit perfectissimo actu attingi, sed quia res ipsa exacte secundum omnia, quæ includit, non possit cognosci.

Quomobrem non existimo necessariam illam distinctionem de comprehensione extensiva tantum, vel etiam intensiva, quanquam in modo loquendi immorandum non sit, dummodo constet, extensivam comprehensionem, simpliciter, & absolute comprehensionem esse, ut probatum est. Quod vero illa cognitio, quæ totam hanc perfectionem extensivæ comprehensionis habuerit, & ultra illam addiderit majorem intensiorem, claritatem, aut specificam perfectionem, ratione hujus excessus dicatur intensiva comprehensio, vel super comprehensio, aut alio simili modo, parum nos trahe refert: solum observandum est, ut terminis usitatis, & qui æquivocationem non pariant, utamur. Quapropter, quod nonnulli dicunt, ad comprehensionem requiri, ut sit tam perfecta, sicut objectum ipsum, si intelligatur de perfectione in genere entis, & de æqualitate simpliciter, est plane falsum; aliàs non posset angelus comprehendere se, vel inferiorem, quia cognitio ejus est quoddam accidens, quod non exæquat in sua perfectione substantiam cognitam. Item, quia sine ullo rationis fundamento talis conditio postulatur: nam cognitio, & res cognita, in ratione actus & objecti servare debent proportionem, non vero æqualitatem in genere entis. Rursus quod nonnulli contendunt, totam illam cognitionem dicendam esse simpliciter com-

3. Concl.

Ratio pro  
conclu-  
sione.Occurrit  
tur ob-  
jectioni.



comprehensionem, quæ est absolute & simpliciter perfectissima cognitio, quæ de tali objecto esse potest, tam in his, quæ de illo cognoscuntur, quam in modo, quo cognoscuntur, verum non est, neque probabile, ut convincunt ea, quæ adduximus. Et quia aliàs nulla cognitio creata esset comprehensio alicujus objecti, quia divina cognitio est perfectior illa, saltem in modo cognoscendi. Similiter, quod alii dicunt, ad comprehensionem requiri, ut sit tanta perfectio in cognitione in esse cognitionis, quanta est in objecto, ut cognoscibile seu intelligibile est, vel incidit in id, quod diximus, vel verum non est. Duobus enim modis dici potest res cognoscibilis: uno modo proxime & formaliter: & sic dicitur cognoscibilis per denominationem extrinsecam a facultate cognoscendi, quæ in alio est, & ita res est perfectius cognoscibilis a perfectiori cognoscente: ergo cognoscibilitas objecti in hoc sensu esse non potest mensura comprehensionis: nam hoc modo tantum est res cognoscibilis, quanta est vis cognoscendi in alio: non dicitur autem cognitio comprehensiva per comparisonem ad virtutem cognoscendi, sed ad objectum ipsum in se, ut scilicet omnino cognoscatur. Alioqui sequeretur, vel unumquemque comprehendere objectum, si tota virtute sua illud cognoscat, etiam si non penetret totum, quod in illo est, quia cognoscit illud, quantum ab ipso cognoscibile est. Vel, si comparatio non est facienda cum virtute ipsius cognoscentis, sed absolute, sequitur, quod antea inferebam, nullam rem comprehendere, nisi a solo Deo, quia a solo ipso cognoscitur, quantum cognoscibilis est absolute & simpliciter secundum hanc extrinsecam denominationem. Alio modo potest dici res cognoscibilis ex se, seu fundamentaliter, quatenus ens est & verum; & ita dicitur perfectius ens, ex se perfectiorem cognitionem requirere, ut comprehendatur, & perfectius principium cognoscendi. Sed hæc ipsa cognitionis perfectio in tantum ad comprehensionem necessaria est, in quantum ad perfecte penetrandum tale objectum, & distincte illud cognoscendum secundum omnia, quæ in se continet, & secundum omnem habitudinem suam, necessaria esse potest. Quod si ad hunc gradum perfectionis cognitio attingat, jam habet exactam adæquationem cum objecto, & manifestat, seu cognoscit illud, quantum cognoscibile est. Quod vero majori, minori ve intensione, aut entitativa perfectione cognoscatur, materiale est: & id non potest fundari in ipso objecto, sed in perfectione cognoscentis.

**Objectio.** Dices. Objectum perfectius & altius non solum est ex se cognoscibile, quoad tales rationes, vel habitudines, quæ in ipso, vel per ipsum cognoscuntur, sed etiam quoad modum cognitionis in claritate, vel intensione: ergo adæquatio etiam in hoc potest esse necessaria ad rationem comprehensionis simpliciter. Consequentia patet, quia per comprehensionem debet cognosci objectum, quantum ex se cognoscibile est, quoad omnem modum perfectionis, quam ex se requirit in cognitione sibi adæquata. Antecedens autem probatur, quia objectum ex se est principium perfectæ cognitionis sui, vel immediate, ut in visione Dei, vel mediante specie intelligibili, quam natum est producere vel habere: sed objectum ex se non solum est natum habere speciem, vel activitatem adæquatam quoad representationem extensivam cognitionis, sed etiam quoad intensivam. Unde objectum visibile intensiorem speciem producit in visum propinquum, & bene dispositum, quam in distantem & male affectum: & non censetur videri, quantum visibilis est, nisi quando speciem sibi adæquatam in intensione producit. Et potest in hunc modum explicari; nam angelus, v.g. intuens se ipsum per suam substantiam comprehendit se, quia non solum cognoscit omnia, quæ in se habet, sed etiam claritate, intensioremque adæquatam suæ activitati in ratione objecti cognoscibilis, seu intelligibilis: unde ab inferiori angelo non comprehenditur, etiam si quoad omnia cognoscatur, id est, quoad omnem modum cognitum in objecto, quia quoad modum cognitionis non ita exacte cognoscitur. A superiori autem Angelo, licet intensius & clarius cognoscatur, tamen ille excessus est ultra eum modum cognitionis, quem objectum ex se requirit: & ideo non obstat, quominus sine illa majori intensione vel claritate possit esse comprehensio talis objecti. Simili ergo modo in objecto quovis intelligibili sola illa cognitio, erit comprehensio ejus, quæ fuerit adæquata illi in omni

Suarez. Tom. XVI.

modo cognitionis, quasi intrinseco & proportionato perfectioni objecti. Respondeo in primis, objectum posse considerari in ratione termini & materiæ, circa quam versatur cognitio, & in ratione moventis seu principii, & ad rationem comprehensionis satis esse, quod cognitio sit adæquata objecto, ut termino, sive sit adæquata illi in ratione principii, & motivi, sive non: quia comprehensio formaliter consistit in adæquatione extensiva, ut ostendimus: & hæc sumitur ex habitudine ad objectum in ratione termini. Item hæc adæquatio est quasi formalis in cognitione, quatenus cognitio est: alia vero est communis in ratione effectus & causæ agentis, sub qua habitudine non tam effectus comprehendit causam, cujus virtuti adæquatur, quam e converso, causa comprehendat effectum. Ad comprehensionem ergo intellectualem videtur impertinens, quod objectum efficiat ex se intensiorem, vel minus intensam speciem. Deinde dicitur, in objectis per se primo intelligibilibus nunquam unam adæquationem esse separabilem ab alia, & objectum nunquam comprehendere posse quoad omnes rationes cognitæ, nisi per speciem adæquatam activitati objecti. Quod sic declaro, quia, si est sermo de rebus materialibus, hæc tantum sunt in potentia intelligibiles, unde nullam habent ex se vim effectivam speciei intelligibilis, & ideo ex parte earum non potest hæc adæquatio considerari: sed omnis intellectio, quæ habuerit sufficientem perfectionem intensivam ad penetranda hæc objecta exacte ex parte eorum, erit sufficiens ad eorum comprehensionem. Si vero tractemus de objectis creatis actu intelligibilibus, ut sunt substantiæ angelicæ, & anime separate, hæc nunquam adæquate ex parte objecti cognoscuntur, nisi per actum adæquatam etiam, seu proportionatam potius & connaturalem, vel per alium superioris ordinis: & ita angelus superior naturaliter non comprehenditur ab inferiori, sed vel a se, vel a superiori. Unde colligimus, illam intellectiorem, quæ in intensiva perfectione, vel claritate non est adæquata talibus objectis, non esse etiam sufficientem ad penetranda illa objecta exactissime, etiam quoad extensionem, seu quoad modum perfectæ cognitionis ex parte eorum. Atque eadem ratione, ascendendo ad Deum, nulla cognitio esse potest sufficiens ad Deum comprehendendum extensive (ut sic dicam), nisi ea, quæ est connaturalis, & adæquata ipsi Deo in perfectione intensiva, ut latius dicturi sumus sect. 3.

Dices, sæpe visiones seu intellectiones posse esse inæquales in modo attingendi objectum, non quia aliquis modus objecti per unam videatur, & non per aliam, sed quia uno modo idem videatur per unum actum, & non per alium: ergo eadem ratione potest visio adæquata objecto extensive esse perfectior in modo, quamvis ille modus non sit in objecto visus, vel non visus. Respondetur, concedendo totum, sic enim comprehensio ejusdem angeli inferioris perfectior est in supremo angelo, quam in alio intermedio, licet nullam rationem, modum, aut habitudinem, terminum ve ejus cognoscat unus, non vero alius, in particulari, & cum omni distinctione, seu specificatione ex parte objecti. Dico tamen, quando cognitiones attingunt hunc gradum perfectionis ex parte objecti, illum alium modum, in quo est excessus, non fundari in objecto, neque ut terminante, neque ut efficiente, vel quasi efficiente cognitionem, sed fundari in sola perfectione cognoscentis, & ideo diversitatem illam nihil ad comprehensionem referre.

Sed contra, quia, licet in substantialibus objectis semper inveniatur vera dicta regula, & doctrina, non tamen in accidentalibus: nam angelus inferior, licet non possit comprehendere superiorem angelum, poterit tamen comprehendere, saltem extensive, aliquem actum ejus, ut unam intellectiorem, vel actum amoris; & tamen illemet actus ex se perfectiorem notitiam sui generat in proprio subjecto, sive in angelo cujus est, quam in inferiori. Respondetur in primis, hoc esse dubium, nam, cum accidentia essentialia dicant ordinem ad subjectum connaturale, satis probabiliter dici potest, non comprehendendi nisi ab eo, qui subjectum comprehendit, & intellectum animæ comprehendendi non posse, non comprehendenda anima. Deinde, si assumptum admittatur, potius inde elicitur accommodatum exemplum ad declarandum, quomodo perfectio intensiva actus necessaria non sit ad comprehensionem simpliciter. Nam actus superioris angeli

Resolvitur.

A a com-

Objectio.

Satisfit objectio.

Replica.



comprehenditur ab inferiori, quamvis non cum tota perfectione intensiva cognoscatur, cum quæ ex se & natura sua aptus est cognosci. Tandem potest in hoc assignari discrimen inter substantias, & accidentia, quia accidentia ex se sunt in inferiori ordine constituta. Unde ex se etiam minorem virtutem requirunt, ut comprehendantur. Quod autem a propria substantia intellectuali clarius & perfectius cognoscantur, quam ab inferiori, est per accidens, quia ipsa non sunt per se primo intelligibilia a tali substantia, sed quasi consequenter ad cognitionem substantiæ suæ. Accedente id magis provenit ex parte subiecti, quam ex parte ipsorum accidentium. At vero substantia ex se est in superiori ordine, & quando ex se est actu intelligibilis, seipsam respicit, ut objectum quasi proportionatum, & commensuratum suæ virtuti; & ideo seipsam comprehendere potest, non vero ab inferiori comprehendere, bene tamen a superiori.

## S E C T I O II.

*Utrum secundum fidem anima Christi non comprehendat divinam essentiam.*

**H**Æc quæstio communis est aliis beatis, & ita tractatur a D. Th. 1. p. q. 12. art. 7. tamen, quia video nonnullos specialiter de anima Christi dubitare, propter singularem dignitatem ejus, & unionem ad Verbum, ideo cogor exacte hic inquirere, quam sit certum, Deum esse incomprehensibilem ab intellectu creato, atque adeo ab anima Christi. Quamquam enim de fide certum sit, hominem in hac vita non posse comprehendere Deum, neque id posse Angelum, aut quemlibet intellectum creatum suis naturalibus viribus: tamen, quod neque per divinam virtutem possit intellectus creatus ita elevari, ut possit Deum comprehendere, non videtur, unde sit certum, quia neque ex Scriptura, neque ex Patribus, id satis probari potest. Illud enim testimonium Jerem. 32. quo præcipue solet a Theologis hoc probari: *Magnus consilio, & incomprehensibilis cogitatu*, nihil probare videtur: tum, quia recte exponi potest de cogitatione humana, & quacumque cognitione, viribus naturæ habita: tum etiam, quia septuaginta interpretes non ita legunt, sed *Magnus consilio, & potens viribus*; & ad hunc modum fere exponi possunt reliqua testimonia Scripturæ sacra, ubi de Dei incomprehensibilitate sermo est, ut est illud Ecclesiast. 43. *Ne laboretis, non enim comprehendetis*, id est, non defatigemini, viribus enim vestris illum comprehendere non poteritis: quamquam ibi non tam de cognitione, quam de perfecta Dei laude sermo sit. Et augetur difficultas, quia in Scriptura tam appellatur Deus *invisibilis*, quam *incomprehensibilis* intellectui creato, ut primæ ad Timoth. 1. *Invisibili soli Deo honor, & gloria*, ad Coloss. 1. *Qui est imago Dei invisibilis*, & primæ ad Timoth. 6. *Quem nullus hominum vidit, sed nec videre potest*. Sed hæc necessario interpretanda sunt, vel respectu hominis in vita mortali, vel respectu intellectus creati, solis suis viribus naturalibus operantis: ergo eodem modo intelligi potest, cum dicitur *incomprehensibilis*. Quæ intelligentia confirmatur, tum ex Scriptura sacra, quæ interdum incomprehensibiles vocat etiam ipsos effectus Dei, ut Job. 9. *Qui facis magna, & incomprehensibilia, & mirabilia, quorum non est numerus*; & c. 11. *Forssitan vestigia ejus comprehendes?* cum tamen certum sit, opera Dei posse, saltem supernaturaliter, comprehendi; tum etiam ex Patribus, qui dicunt, non posse nos comprehendere Deum, donec ad patriam perveniamus, ut Irenæ. lib. 4. con. hæres. c. 37. Nazianz. orat. 25. & 27. n. 26. & 34. & orat. 42. qui etiam orat. 20. 34. 36. n. 66. ita exponit, Deum esse incomprehensibilem, ut non possit ab homine mortali comprehendere, donec ad patriam perveniat. Et eodem modo loquitur Origen. 1. Periarch. c. 1. & Cyprian. in principio operis de Cardin. Christi operibus. Ratione possumus argumentari, quia si Christi anima haberet lumen infinitum, quo videat omnia, quæ in Deo sunt, tam eminenter, quam formaliter, comprehendet ipsum Deum; ut aperte docet D. Th. in hac qu. art. 2. & colligitur ex eodem 1. p. q. 12. art. 7. & 8. Sed non est de fide, animam Christi non habere lumen infinitum, nec videre omnia in Verbo, sed probabilis est opinio hoc affirmans; ergo etiam est probabile, comprehendere Deum.

Nihilominus dico primo. De fide est, Deum esse incomprehensibilem quacumque creata cognitione. Hæc conclusio intelligenda est de comprehensione absolute & simpliciter dicta, ita ut sensus sit, Deum esse incomprehensibilem a creatura comprehensione propria, & simpliciter perfecta, licet non sit de fide certum, in quo consistat hæc comprehensio. Et hoc modo docent hanc assertionem omnes Theologi, D. Th. cit. loc. & 3. con. Gent. c. 55. alii in 3. d. 14. Bonavent. art. 1. q. 2. Richard. q. 4. ubi Albertus art. 1. dicit, esse blasphemiam contra divinitatem Christi, asserere ab ejus humanitate comprehendere. Durand. Scot. Gabri. Paludan. q. 1. & alii in 4. dist. 49. ubi Sotus q. 3. art. 1. Et probatur primo ex Scripturis, Jerem. 32. *Magnus consilio, & incomprehensibilis cogitatu*; quod enim ita legendum sit, constat ex vulgata editione, quam in re tam gravi hoc tempore rejicere manifeste esset contra Concil. Trident. præsertim cum Hebraica veritas cum illa consentiat, quod vero ita intelligendum sit, est sententia Hieronymi & Glossæ ibi (alii Patres hunc locum non attigerunt), & Theologi omnes hunc sensum secuti sunt, quibus omnibus contradicere plus esset, quam temporarium, præsertim quia juxta planum contextum illa particula *Cogitatu* non tam videtur referenda ad hominum, vel Angelorum cogitationes, quam ipsius Dei, vel (ut ita dicam) non tam active, quam passive sumitur; nam sicut dicitur Deus, *magnus consilio*, quia consilia ejus altissima sunt, ita dicitur *incomprehensibilis cogitatu*, quia in suis cogitationibus est incomprehensibilis, juxta illud: *Nimis profunda factæ sunt cogitationes tuæ*, Ps. 91. & illud Pauli ad Rom. 11. *Quam incomprehensibilia sunt judicia ejus, & investigabiles viæ ejus?* & infra: *Quis cognovit sensum Domini, aut quis consiliarius ejus fuit?* Quod si Deus in consiliis, & in judiciis suis incomprehensibilis est, multo magis in substantia sua. Et eodem modo dicuntur interdum opera, seu vestigia Dei, incomprehensibilia, quatenus, scilicet, cadunt sub divinam providentiam, & sapientiam; unde in cit. loc. Job. 11. postquam dixit: *Forssitan vestigia Dei comprehendes?* subdit: *Et usque ad perfectum omnipotentem reperies?* & c. Denique ex communi phrasi Scripturæ, & ex modo, quo de immensitate Dei loquitur, ejusque incomprehensibilitatem exaggerat, variisque figuris, & metaphoris illam sæpius proponit, satis significat, altiori modo esse Deum incomprehensibilem creaturæ, quam sit ulla creatura: non ergo vocatur incomprehensibilis solum, quia a mortali homine cognosci non potest, prout in se est, hoc enim modo etiam Angelum non potest mortalis homo comprehendere: neque etiam dicitur incomprehensibilis solum, quia ab intellectu creato solis naturæ viribus videri non potest, prout in se est, hoc enim modo, etiam gratia, quæ est in essentia animæ, dici posset incomprehensibilis. Sed quia Scripturæ per se nude sumptæ non videntur omnino convincere, adjungamus communem sensum, & traditionem Patrum, apud quos illa sunt præcipue notanda testimonia, in quibus comparando Deum, etiam ad Angelos, vel beatos ipsum videntes, affirmant tanquam indubitatum dogma fidei, Deum esse incomprehensibilem.

Secundo ergo arguitur testimoniis Patrum, Latinorum 1. Gregor. 10. moral. c. 10. *In retributionis (ait) culmine reperiri omnipotens per contemplationis speciem potest, sed tamen ad perfectum non potest; quia, etsi hunc in claritate sua quandoque conspiceretur, non tamen ejus essentiam plene contuemur, & cætera*, quæ seq. sect. notabimus, & lib. 18. c. 28. aliàs 3. & seq. sequente, explicat, illam claritatem Dei esse ipsam substantiam Dei, quia in eo non distinguitur claritas a substantia; & ibidem ait: *Longe dissimiliter videre creaturam creatorem, quam ipse se ipsum videat nam quantum ad immensitatem Dei*, inquit, *modus nobis figitur contemplationis, quia eo ipso pondere circumscribimur, quo creatura sumus*. Secundo, Ambros. lib. 1. in Lucam, tractans illud Joan. 1. *Deum nemo vidit unquam*, ad Angelos extendit, & declarat, dictum esse ratione incomprehensibilitatis. Tertio idem docet Augustinus, citans dictum locum Ambrosii in Epist. 112. c. 8. & 9. ubi bene distinguit visionem a comprehensione; clarius serm. 190. de Tempore, & 38. de Verbis Domini, & lib. de cognitione veræ vitæ cap. 31. etiam beatis dicit Deum *incomprehensibilem*, unde in quæstionculis de Trinitate, tomo 3. optime exponit, quomodo dica-

Deus  
omni  
e  
e  
aturæ  
in  
compre  
hensibilis,

Deus quomodo  
dicitur  
incompre  
hensibilis.



dicatur in Scriptura Deus, *incomprehensibilis*, seu, *invisibilis*, his verbis: *Videri potest Deus per donagratia, sive ab Angelis, sive ab animabus Sanctorum, plenam vero divinitatis naturam, nec Angelus quilibet, nec Sanctorum aliquis, perfecte videre poterit, ideo incomprehensibilis dicitur Deus.* Quarto Beda, circa illud 1. Joan. 3. *Videbimus eum, sicuti est; promittitur, inquit, nobis videre Deum, nam comprehendere concedi non potest.* Quinto idem optime tractat Hilarius 2. de Trinit. circa principium, & lib. 10. sub finem. Sexto, Anselmus in lectionibus super Evangelia, lect. in Matth. 17. quæ est de Transfiguratione Domini, & super 1. ad Timotheum, c. 2. uno sensu explicat Deum dici *invisibilem*, quia licet a beatis videri possit, non tamen comprehendendi. Eandem veritatem docet in Monolog. c. 35. Septimo, ex Patribus Græcis Chrysostomus multus est in hac sententia asserenda, in enarratione super c. 6. Isaïæ, ubi ita exponit visionem illam de Domino sedente in throno excelso, & Seraphin, qui velabant facies suas ad indicandam Dei incomprehensibilitatem: & homil. 2. de eadem visione contra eos, qui contrarium sentiunt, ita exclamat: *Horresce cælum, obstupece terra;* idem latissime persequitur quinque homiliis de incomprehensibili Dei natura, ubi contrariam sententiam hæresim vocat: caute tamen legendus est, ita enim adhæret huic veritati, ut in errore n. extreme contrarium inclinare videatur, scilicet, Deum a nulla creatura in substantia sua videri posse; sed explicandus est ex aliquibus locis, in quibus addit particulam, *exacte*, seu *perfecte*, quod perinde est, ac comprehendere, sicut supra Augustinus Scripturam sacram, vocantem Deum *invisibilem*, exponebat. Octavo, eodem sensu Theodoret. Pf. 103. dicit, Deum minime conspici posse, accommodans verba illa: *Amictus lumine, sicut vestimento.* Nono, idem Cyril. Alexand. lib. 11. thesaur. c. 1. accommodans illud Isaïæ 40. *Qui meritis est manu aquas, & cælum palmo?* Decimo, eodem loco ad hoc propositum utitur Irenæus lib. 4. contra hæres. c. 36. Undecimo, Cyril. etiam Jerosol. Catechesi 6. eodem sensu dicit, Deum esse incomprehensibilem, & hoc modo subdit. *Vident sane Angeli, sed non ita ut est, sed secundum quod est, & ipsi capiunt, ipse enim Jesus dicit, quod Patrem nemo vidit, nisi qui est de cælo, hic vidit Patrem,* quem locum aperte intelligit de Christo, ut est Deus, ut de visione comprehensiva, subdit enim: *Vident Angeli ita ut capiunt, & Archangeli, ita ut possunt, Throni vero & Dominationes plus quidem, quam illi, sed minus tamen, quam pro Dei benignitate: solus autem Spiritus sanctus, ita ut oportet, videt, ille enim scrutatur omnia, etiam profunda Dei, & unigenitus Dei Filius, ita ut oportet, etiam cognoscit, quoniam Dei patris paterne est particeps Filius, tanquam unigenitus.* Duodecimo, Epiphani. lib. 3. cont. hæres. in 70. *Deus, inquit, infinitis modis, & adhuc amplius incomprehensibilis est;* & infra: *omnia, quæ ab illo facta sunt, infra ipsius gloriam sunt, sola autem Trinitas incomprehensibilis est, & in gloria incomparabili, &c.* Decimo tertio Damasc. lib. 1. de fid. cap. 1. & 4. Deum vocat *omnibus modis incomprehensibilem*, ubi Eckius hoc bene explicat, & confirmat. Decimo quarto, Gregor. Nazian. orat. 1. sæpe hanc veritatem inculcat, & ad illam accommodat illud Pal. 119. *Posuit tenebras latibulum suum,* & illud Psal. 103. *Amictus lumine, sicut vestimento,* & illud, *Abyssus, sicut vestimentum, amictus ejus.* Ubi etiam Elias hoc notat, & orat. 34. n. 9. & 19. de Angelis beatis loquens, dicit, *elevari ad conspiciendum Deum, si non prorsus, saltem melius, quam nos.* Idem significat orat. 36. n. 66. Denique definita est hæc veritas in Concil. Lateranen. de summa Trinitate, & fid. Cathol. c. Firmiter: *Credimus, & simpliciter confitemur, unum esse Deum, infinitum, immutabilem, incomprehensibilem;* ubi tam absolute, & simpliciter definit esse Deum *incomprehensibilem*, sicut *immutabilem*; sicut ergo ita immutabilis est, ut etiam de potentia absoluta mutari non possit; ita incomprehensibilis est, ut nulla ratione a creatura comprehendendi possit; hoc enim sensu Theologi, & Catholici omnes loquuntur de Dei incomprehensibilitate, & ita illam intelligunt, unde dubium non est, quin Concilium eodem sensu de illa locutum sit.

Ultimo arguuntur ratione, quia Deus est immensus, & infinitus; ergo non potest a creatura finita comprehendendi, quæ consequentia visa est a Theologis per se nota ex

Suarez Tom. XVI.

terminis, quamvis rationem ejus non omnes eandem reddant: explicabitur vero melius sectione sequenti, ex qua, veluti a signo, confirmabitur hæc veritas; quia intellectus creatus non potest in Deo videre omnia, quæ in eo sunt, quod est signum, non posse comprehendere omnipotentiam ejus. Et hæ rationes probant conclusionem quoad veritatem ipsam; quoad gradum autem certitudinis fidei, satis probata videtur omnibus regulis fidei, scilicet, Scriptura, traditione, & definitione Ecclesiæ.

Dico secundo. Eodem modo certum est, animam Christi non comprehendere divinam essentiam. Ita docent Theologi omnes supra citati, & sequitur aperte ex dictis, nam anima Christi, intellectus ejus, & actus, quo videt Deum, creata sunt, & finita: sed Deus est incomprehensibilis per actum creatum, & finitum; ergo. Confirmatur, quia si anima Christi, videndo Deum, comprehenderet ipsum, vel id esset ex communi ratione visionis, scilicet, quia clare videt totum Deum, prout in se est; & hoc non est satis, aliàs quilibet beatus comprehenderet Deum, quod esse hæreticum, ostensum est: non ergo satis est videre totum, nisi videat totaliter, ut explicatur late in prima parte, q. 12. & sectione præced. dictum est, & in sequenti non nihil attingemus. Vel hoc convenit animæ Christi ex singulari ratione unionis: & hoc etiam dici non potest, quia Verbum unitum neque est principium formale videndi, nec per se ipsum, ac formaliter dat intellectui virtutem, seu efficaciam ad videndum, neque etiam ratione illius datur intellectui Christi infinita aliqua virtus cognoscendi; ergo non potest magis illa anima comprehendere Deum, quam si esset separata, & haberet idem lumen gloriæ, &c. Et confirmatur, quia comprehendere divinam essentiam est proprium attributum ipsius divinæ naturæ; sed post hanc unionem naturæ manent inconfusæ, & attributa unus non communicantur alteri; ergo, quamvis anima sit unita, non propterea est potens ad comprehendendam divinam naturam.

Ad difficultatem in principio positam fere responsum est, jam enim ostendimus, quomodo ex Scriptura hæc veritas colligatur, & quid proprie significet attributum hoc, scilicet, Deum esse incomprehensibilem. Ad illud vero simile, quod afferebatur de *invisibili*, respondetur, communiter a Patribus interpretari, Deum simpliciter, & per omnem potentiam esse invisibilem a creatura, dicitur enim invisibilis oculis corporis, vel exacta & adæquata visione intellectus. Patres vero ibi citati aperte loquuntur in illis locis de comprehensione, ut significat affectionem, & non ut significat perfectam cognitionem, juxta distinctionem explicatam in principio articuli primi D. Thomæ. In aliis vero locis a nobis citatis pro conclusione evidenter loquuntur de comprehensione in ea significatione, qua nunc utimur, ut legenti omnia loca aperte constabit.

Ad rationem respondetur, sæpe veritatem aliquam esse de fide certam, modum autem explicandi, vel defendendi illam, cadere sub opinionem; & ideo non licet ex eo, quod aliquod principium in opinione positum sit, inferre, conclusionem etiam esse opinabilem, nisi illatio sit ita evidens, ut omnino necessario sequatur; in proposito ergo omnes Theologi sine controversia fatentur, ut veritatem fidei, Deum esse incomprehensibilem, & in aliis opinionibus ita procedunt, ut nihil huic veritati contrarium admittere audeant: & ita, qui existimant, lumengloriæ posse esse infinitum, vel intellectum creatum posse videre in Deo omnia, quæ in eo sunt eminenter, negant inde sequi comprehensionem Dei; qui vero hoc sequi existimant, assumptionem negant. Unde ex his opinionibus illa semper eligenda est, cum qua melius veritas fidei consistere possit.

### SECTIO III.

*Utrum anima Christi videat in Verbo omnia possibilia, quæ in Deo eminenter continentur.*

PRima sententia affirmat, videre animam Christi in Verbo omnia, quæ Deus potest facere de sua potentia absoluta. Ita tenuit Hugo in lib. de scientia animæ Christi, qui falso fundamento nititur, scilicet, quia anima Christi videt Verbum visione increata. Quod supra rejectum est; & ex hic dictis intelligi potest, etiam posito illo fundamento, hoc non sequi, quia posset intelligi, vi-

Anima Christi non comprehendit essentiam Dei.

Respons. ad argumenta.



fionem illam magis vel minus communicari pro capacitate suscipientis. Alioqui dicendum consequenter esset, animam Christi comprehendere Deum, quia visio in creatura, comprehensio Dei est; quam vero falsum sit consequens, constat ex sect. præcedente. Hanc vero sententiam tenet Magist. in 4. dist. 14. & ibi Albert. art. 1. & probabilem censet Scot. q. 2. cujus argumenta parum urgentia sunt, & ex parte idem tenuit Alenf. 3. p. q. 13. memb. 7. Durandus q. 2. dicit enim videre animam Christi in Verbo omnia, quæ in Deo sunt eminenter, saltem quatenus possibilia sunt: consentit etiã ex parte Henric. quodlibet. 7. q. 4. & 5. qui hoc affirmat de speciebus possibilibus, non tamen de individuis. Altfiod. lib. 3. Summ. tract. 1. c. 5. qui hoc tribuit scientiæ unionis, non beatæ ut sic; sed hæc distinctio est impertinens, ut supra vidimus. Fundamentum Magistri sumitur ex quibusdam testimoniis ad Coloss. 2. *In eo sunt omnes thesauri sapientiæ, & scientiæ Dei*, ubi Chrysost. hom. 5. affirmat, Christum *omnia scire, & nihil ignorare*, si autem non omnia videret, aliqua nesciret, & ignoraret. Propter quod hanc sententiam videtur etiam tenere Fulgentius in lib. ad Ferrandum, responsione ad 3. quæstionem. Et Euseb. discipulus Hieronymi, in epist. quam de morte ejus ad Damasum scripsit, & habetur tom. 9. oper. Hieron. refert, ipsum Hieron. morti proximum his verbis cum Christo fuisse collocutum. *Tua anima statim ac inseparabiliter fuit unita divinitati, omnia scivit & potuit, quæ ipsa scit, & potest divinitas*. Et confirmari ratione potest, quia non implicat contradictionem, hanc perfectionem communicatam esse intellectui Christi; ergo non est, cur negemus fuisse illi datam: imo Durand. & Henric. putant id, quod ipsi affirmant, necessario sequi ex visione Dei, unde non tribuunt hoc Christo, tanquam singulare illi, sed tanquam omnibus beatis commune.

Secunda sententia affirmat, animam Christi per lumen gloriæ scire in habitu omnia, quæ sunt in Deo, tamen in actu secundo non posse simul videre omnia, sed hæc, vel illa suo arbitratu, vel prout Deus revelare voluerit. Ita tenet Bonavent. d. 14. art. 2. q. 3. & Marfil. q. 10. art. 2. Sotus autem ibi q. 2. primum improbat hanc opinionem, deinde vero in illam fere incidit, alio modo minus probabilis. Objicit ergo contra illam primo, quia omnis habitus potest habere actum sibi adæquatam. Quæ ratio non est efficax, si sensus sit (ut revera esse oportet ad efficaciam argumenti) habitum habere unum actum adæquatam circa totam materiam suam. Contrarium enim fere reperitur in omnibus habitibus & in potentiis animæ, quibus suo modo simile est lumen gloriæ. Deinde subdit opinionem suam, dicens, animam Christi in actu primo videre omnia, non in actu secundo: illum autem actum primum dicit, non per lumen gloriæ, sed per ipsammet visionem, quam dicit interdum actuare per modum actus secundi circa aliqua objecta, ad quæ ipse intellectus attendit: interdum vero tantum per modum actus primi, si intellectus non attendat: contra quam sententiam urgentius procedit argumentum ipsius Scoti, quia visio essentialiter est actus secundus, & ultimus, & actuat potentiam, non activè, sed formaliter, unde si actu est, non solum potest habere effectum formalem sibi adæquatam, sed etiam necessario illum habet, quia necessario inhæret subjecto secundum totam suam entitatem, & rationem: fieri autem non potest, ut qualitas actu inhærens subjecto non habeat in illo suum effectum formalem adæquatam; est ergo illa distinctio actus primi & secundi omnino repugnans ipsi visioni.

Ut respondeamus quæstioni, suppono ex sententia Augustini, & omnium Theologorum, paucis Nominalibus exceptis, posse beatum, videntem Deum, videre in ipso creaturas, quæ in Deo eminenter continentur, non tantum effective, seu causaliter, ut quidam dicunt, id est, quod ex visione Dei resultet alia cognitio creaturarum per propriam speciem; hoc enim non est proprie videre in Verbo, sed potius in proprio genere: neque cognitio hæc esset Matutina, sed Vespertina, & in Christo talis cognitio ad scientiam infusam pertinet, non ad beatam; intelligitur ergo formaliter, quia per ipsammet visionem, qua videtur Deus, videntur creaturæ in ipso, cum enim ipse sit prima causa omnium, eminenter omnia continens, in ipso, tanquam in causa, possunt effectus videri: sicut enim Deus videndo se ipsum videt omnia, quæ in ipso sunt, ita potest

participationem illius scientiæ creaturæ communicare.

Circa hoc vero duo observare oportet. Primum est, ut creaturæ dicantur videri in Deo, non satis esse, ut eodem actu videantur, quo Deus, sed oportere, ut Deus ipse sit ratio videndi creaturam. Dupliciter enim intelligi potest, duas res uno actu intellectus cognosci; primo tantum concomitanter, ita ut neutra sit ratio cognoscendi alteram. Exemplum esse potest in Angelo, qui habet speciem universalem, repræsentantem duas naturas, v.g. hominis, & equi, & consequenter habet unum actum adæquatam illi speciei, quo simul cognoscit hominem, & equum, & neque homo est ratio cognoscendi equum, neque e contrario: & ideo dico illa duo tantum concomitanter cognosci illo actu, per quem non magis dici potest equus cognosci in homine, quam e contrario, quia nulla est major ratio in uno, quam in alio. Secundo intelliguntur duo aliqua cognosci uno actu intellectus, non tantum concomitanter, sed quia unum est ratio cognoscendi aliud; exemplum est in Angelo, qui videndo, & penetrando essentiam hominis, consequenter intuetur, & videt proprietates, non solum enim uno actu utrumque videt, sed etiam videndo unum, ratione illius videt aliud, & tunc proprie dicitur videri unum in alio: & signū a posteriori esse potest, quia, quando hoc modo cognoscuntur duo eodem actu, non potest actus terminari ad objectum in alio cognitum, nisi mediante illo. Cum ergo creaturæ dicuntur videri in Deo, non est sensus videri tantum priori modo, & quasi concomitanter; sed posteriori modo, scilicet, quia visio Dei est ratio cognoscendi creaturas; quod patet, tum ex ipso modo loquendi; nam si tantum concomitanter se haberent, non magis cognoscerentur creaturæ in Deo, quam Deus in creaturis, quia non haberent inter se ordinem respectu actus cognoscendi: tum etiam, quia considerando illa duo objecta, quasi per accidens esset cognitio unius ad cognitionem alterius, quādoquidem unum eorum nullo modo esset ratio cognoscendi alterum. Quin potius addo, si illa duo objecta non ita se habent, ut unum sit ratio cognoscendi aliud, gratis omnino dici cognosci, aut videri Deum, & creaturas eodem actu, quia plura objecta non attinguntur uno, & eodem actu, nisi quia, vel in ratione objecti cogniti habent inter se connexionem & ordinem alicujus causalitatis, respectu talis cognitionis, vel quia per eandem speciem intelligibilem repræsentantur; essentia autem divina licet respectu sui ipsius suppleat vicem speciei, tamen respectu creaturarum non habet vicem speciei intelligibilis immediate inducentis, vel efficientis cognitionem earum in se ipsis, tanquam ratio, seu medium incognitum (ut philosophi loquuntur), quia hic modus concurrendi ad cognitionem alterius est imperfectus; Deus autem non continet creaturas illo imperfecto modo, sed eminenter, tanquam perfecta causa earum; unde licet Deus possit supplere sua infinita virtute efficientiam cujuslibet speciei intelligibilis; non tamen hoc potest per modum objecti, nisi respectu sui ipsius; respectu vero aliorum tantum per modum causæ supremæ, quæ per suam voluntatem supplere potest efficientiā particularis causæ, & ita potest facere, ut visus videat sine specie, supplendo per omnipotentiam suam efficacitatem speciei, & hoc modo potest idem facere in intellectu; hoc tamen nihil refert ad visionem beatam, neque ad visionem creaturarum in Deo: non ergo se habet divina essentia per modum unius speciei intelligibilis immediate repræsentantis Deum, & creaturas: ergo ex hac parte non est ratio, ut cognoscantur Deus & creatura eodem actu: ergo si aliunde non esset connexio inter objecta, ita ut unum esset ratio, seu medium cognitum ad cognoscendum aliud, nulla esset causa, propter quam illa duo eodem actu cognoscerentur: videntur ergo creaturæ in Deo, quia Deus cognitus est ratio cognoscendi illas. Et hoc sensu vere dicit sæpe D. Th. videri creaturas in Deo ex vi visionis ipsius Dei, sicut Deus videt illas in se ipso, tanquam in causa, & primo principio; hic autem modus cognoscendi non solum non repugnat, sed potius pertinet ad perfectum genus cognoscendi: illa autem visio Dei in se ipso, & creaturarum in ipso, est altissima participatio scientiæ Dei, supremi ordinis, & rationis cujus esse potest.

Dices, inde fieri, visio una creatura, videri necessario omnes, quia non est major ratio de una, quam de alia. Negatur tamen consequentia, quia cum lumen sit finitum, ex parte illius provenire potest, ut aliqui effectus videantur,

Visio Dei  
ratio co-  
gnoscendi  
creaturas.

Objectio.  
Responsio.



tur, & non omnes, & hi potius, quam illi, vel quia ipsum lumen est determinatum ad hos effectus potius, quam ad illos, vel quia concursus necessarius ex parte divinæ essentiae datur ad cognoscendam divinam essentiam, ut continentem hos effectus potius, quam illos: sic enim sæpe contingit, in uno principio videri aliquam conclusionem, & non alias, vel ex defectu specierum, vel luminis.

Et hinc ulterius sequitur, cæteris paribus, eo perfectius videri Deum, quo plures, vel perfectiores effectus videntur in ipso; quia cum Deus visus, sit ratio videndi creaturas, necessario videntur in ipso omnes creaturæ, quæ ex vi visionis perfectæ usque ad talem gradum videri possunt, & ideo, ut plura videantur, necesse est, ut perficiatur visio respectu ipsius Dei: alioqui tales creaturæ non videntur ex vi visionis Dei, sed immediate, & quasi concomitanter simul cum Deo, & ideo, quidquid sit, an ex perfectiori visione Dei necessario sequatur visio plurium, vel meliorum effectuum (de hoc enim modo non disputo) tamen e contrario, si plures effectus videtur, cæteris paribus, recte a posteriori infertur, Deū ipsū perfectius videri.

Ultimo tandem observandum est, cum dicimus, creaturas videri in Deo, non esse sensum, quod videantur solum secundum esse, quod in ipso Deo habent: hoc enim non esset cognoscere formaliter ipsas creaturas, sed solum ipsum esse divinum, quod eminenter continet illas, quod omnes beati necessario vident, nec ex vi illius visionis posset beatus discernere creaturas, vel inter se, vel ab essentia Dei, unde nec posset vere dici videre creaturas.

Et hæc est sine dubio mens Augustini, ut D. Thom. & graviores Scholastici illum intellexerunt, & plane colligitur ex lib. 2. Gen. ad lit. c. 8. & lib. 4. c. 24. & seqq. & lib. 5. c. 4. 18. & 19. sed non possumus hoc loco hæc latius persequi. Videt ergo beatus creaturas secundum esse proprium, quod habent, seu habere possunt, in se ipsis, & secundum proprias perfectiones formales earum; dicuntur tamen videri in Deo quia (ut dictum est) Deus visus est ratio videndi illas, seu quia, intime penetrando eminentem perfectionem Dei, eodem indivisibili actu videtur formalis perfectio creaturæ, quæ in Deo eminenter continetur, & est quasi objectum omnipotentiae ejus, & hoc modo dici potest creatura videri in Deo, ut in causa, & in se ipsa, ut in objecto cognito in sua causa.

Dubium:

Responsio.

Et hinc cessat questio, quæ inter aliquos Theologos versatur, an per visionem beatam possint dici creaturæ videri in proprio genere; quidam enim affirmant, ut Marsil. in 3. q. 10. art. 2. Alii vero negant. Sed, intellectis nominibus, non potest esse questio de re: nam si cognitio in proprio genere nihil aliud significet, quam cognitionem rei, prout in se est, vel esse potest, hoc revera convenit visioni beatæ respectu creaturarum, quæ per illam videntur: si autem cognitio in proprio genere significet cognitionem rei per propriam speciem, quæ immediate, & primario terminatur ad rem in se cognitam, & non in alio, hoc modo illa visio non dicitur esse cognitio in proprio genere, & is est communior usus hujus vocis, & ita sine dubio loquendum est, ut colligere licet ex D. Th. 1. p. q. 12. art. 9. & q. 14. art. 5. Scot. & aliis in 3. dist. 14.

Dico primo. Anima Christi Domini non videt actu in verbo omnia, quæ absolute in omnipotentia Dei continentur. Hæc conclusio est communior Theologorum, D. Th. hic, & generaliter 1. p. q. 12. art. 8. & omnium Thomistarum, Cajet. Capreo. & Palud. in 3. dist. 14. q. 1. & ibi Bonavent. art. 1. q. 2. art. 2. q. 3. Richard. art. 1. q. 4. art. 3. q. 3. & ex parte consentit Henricus supra citatus, & in Directorio Inquisitorum q. 11. refertur, contrariam sententiam Tarraconæ fuisse, ut erroneam, ab Inquisitoribus damnatam, & quendam Arnaldum coactum esse illam retractare. Sed ille Arnaldus videtur in eam sententiam incidisse ex principio erroneo, & quia male sentiret distinctionem naturarum in Christo, ut colligi potest ex aliis, quæ ibi referuntur; alioqui vero hæc sententia per se sumpta tantum est probabilior theologica opinio, & ad fidei dogmata non pertinet, quia neque extat Ecclesiæ definitio, neque Scriptura, & Patres aliquid de hac re loquuntur, neque ex revelatis evidenter sequitur, sed solum probabilius. Ratio ergo D. Th. qua conclusionem hanc probat, est, quia, si anima Christi omniaabilia videret in Deo, comprehenderet Deum. Quæ ratio late examinari solet in citato loco primæ partis. Nunc breviter explicatur ejus vis ex dictis sec. 1. quia, teste August. epist.

Suarez Tom. XVI.

112. c. 8. *Tunc aliquid comprehenditur, quando ita videtur, ut nihil omnino eorum, quæ in ipso sunt, videntem lateat.* Et propterea inquit idem August. 12. de Civ. c. 18: & lib. 8. q. 14. *quod comprehenditur, finiri a comprehendente;* sicut in materialibus quantitativis, a quibus sumpta est metaphora, tunc una quantitas dicitur comprehendendi ab alia, quando intra illam tota clauditur, & finitur: sed si anima Christi videret, quidquid in Deo est formaliter & eminenter, nihil, quod in Deo est, lateret animam videntem ipsum, & tota (ut ita dicam) cognoscibilitas Dei finiretur intra cognitionem illius animæ: ergo per illam cognitionem comprehenderetur Deus.

Hæc ratio enervari potest distinctione sect. 1. recitata, de comprehensione extensiva & intensiva: dicitur enim, prædictam visionem esse comprehensivam tantum extensive, atque adeo secundum quid, non tamen simpliciter & omni modo, hoc est, extensive, & intensive: & ideo non repugnare, dari visionem Dei creatam, qua omniaabilia simpliciter videantur in ipso; quia, quod fides docet, Deum esse incomprehensibilem, non est necesse, ut excludat comprehensionem secundum quid, seu extensivam, sed comprehensionem omni modo perfectam, etiam intensive. Quod si non repugnat, communicari creaturæ talem visionem, qua omnino videatur Deus quoad extensionem potentiae suæ, credibilis sane erit, esse communicatam animæ Christi, ut facile ostendi potest ex his, quæ de gratiæ ipsius infinitate diximus.

In hac responsione, conditionalis illa mihi valde placeat, & fere ex terminis longe verisimilior appareat, nimirum, si non repugnat dari visionem creatam, qua videantur in Deo omnia, quæ Deus videt scientia simplicis intelligentiæ & visionis, talem visionem communicatam esse animæ Christi: quia tota illa est proportionata dignitati ejus, & multum conferet ad perfectionem beatitudinis ejus. Et nulla est probabilis ratio, ob quam talis visio illi communicata non sit, maxime cum inferius ostensum sit, si talis visio aliunde non est impossibilis, posse optime intelligi sine ulla infinitate entitativa per modum intensificationis vel extensionis, sed solum cum perfectione indivisibili simpliciter finita, & objective tantum infinita, quam constat esse possibilem. Itaque conditionalis illa, licet evidens non sit, quia totum pendet ex libera voluntate Dei, nec certa, quia non est revelata, est tamen per se verisimilior & probabilior.

Addo tamen ulterius, illam hypothesin, scilicet, talem visionem Dei creatam non repugnare, falsam esse. Quamquam enim, ut statim dicam, difficile sit ratione hoc convincere, tamen in his rebus magnum est auctoritatis pondus, & ratio satis verisimilis non deest. Itaque illa sententia in primis est contraria D. Th. qui non aliter probat, Christi animam non videre omnia in Verbo, nisi deducendo ad impossibile, nimirum, quod comprehenderet Deum: & eodem discursu probat 1. p. q. 12. art. 8. Beatos non videre in Deo omnia, quæ sunt in ipso eminenter, quia, scilicet, comprehenderent divinam potentiam, & consequenter Deum, quia non potest unum attributum sine aliis comprehendi, cum omnia sint de essentia cujuslibet. Deinde est illa sententia aliena a sensu Patrum, qui, dum ajunt, esse Deum incomprehensibilem, & comprehensionem ejus esse impossibilem intellectui creato, non tractant de intensione vel de claritate cognitionis, sed de totali objecti penetratione, & omnium, quæ in illo, quovis modo sunt, aut cognosci possunt. Hoc facile sibi persuadebit, qui sect. præced. adducta satis attente consideraverit. Præsertim sunt clarissima verba Greg. qui lib. 10. Moral. post superius adducta, subdit: *Angelica vel humana mens, cum ad incircumscriptum lumen inhiat, eo ipso se, quo est creatura, coangustat, & super se quidem per provelum tendit, sed tamen ejus fulgorum comprehendere, nec dilatata sufficit, qui & transcendendo, & portando omnia, & implendo concludit.* Ubi considerandum inprimis est, eum loqui de statu beatitudinis: sic enim inchoat: *In retributionis culmine.* Deinde est ponderandum illud verbum: *Eo ipso, quo est creatura,* hæc enim ratio habet locum in omni intellectu, & lumine. Notandum est etiam illud: *Nec dilatata sufficit,* idem enim est, ac si diceret: Quantumvis in virtute intelligendi crescat, aut elevetur. Tandem expendo illa ultima verba: *Qui transcendendo omnia concludit.* Nam in hoc plane significat, ratione suæ infinitæ perfectionis,

Anima Christi cur Deum non possit comprehendere.

Qualiter enervatur visio ratio prædicta.

Roboratur ratio, & enervatur ratio expenditur.

Comprehensio omnium quæ in Deo sunt formaliter & eminenter, etiam sine infinita intensione & claritate impossibilis.



tionis, qua omnia continet, non posse adæquate cognosci. Unde statim subiungit sequentia verba. *Excelsior cælo est; & quid facies? Profundior inferno; & unde cognosces? Longior terra mensura ejus, & latior mari.* Chryl. etiam locis ibi citatis aperte excludit comprehensionem Dei in hoc sensu. Insinuat etiam valde Nazian. nam licet frequentius loquatur de viatoribus, interdum tamen extendit sermonem ad omnes, & loquitur ex parte objecti. Specialiter ponderandum est verbum illud orat. 84. n. 4. *Si non prorsus, at certe plenius*, loquiturque de angelis videntibus Deum, quos dicit, non prorsus videre; & orat. 36. n. 66. *Quemadmodum nemo est, qui aerem totum unquam hauserit, ita Dei naturam nec mens unquam ulla prorsus concepit.* In his etiam, quæ ex August. retuli, ponderanda sunt illa ultima verba, Deum esse incomprehensibilem: *Quia plenam ejus naturam nemo videre potest.* Non enim ad intensiorem vel claritatem cognitionis, sed ad objectum id refert. Et eodem modo loquuntur cæteri ibi citati, & Cyprian. in Præfat. ad lib. de Cardin. Christ. oper. & Basil. lib. de vera fide. Huc accedit, quod scet. 1. ostensum est, hanc perfectionem cognitionis sufficere ad comprehensionem simpliciter: at nemo dicit absolute, animam Christi comprehendisse Deum, aut creaturam posse ad Deum comprehendendum elevari: ergo.

At vero in reddenda ratione, cur hoc repugnet, non modica, ut dixi, difficultas est. Quidam hac utuntur ratione. Ad videndum in Deo omnia absolute possibilia necessaria visio infinita in sua entitate, saltem secundum augmentum extensivum: omnis autem infinitas in actu repugnat creaturæ, ut nunc supponimus, & supra tactum est. Idemque argumentum fieri potest de lumine gloriæ, quod scilicet lumen actu infinitum ad talem visionem requiratur. Probatur autem assumptum, quia creaturæ possibiles sunt infinitæ, seu in infinitum simpliciter procedunt, tam in singularum specierum individuis, quam in ipsis speciebus, ut ex 1. p. q. 25. suppono: & ad videndas plures rerum species, seu perfectiones in Deo, major seu intensior visio necessaria est, & quo res visæ plures fuerint, eo major erit perfectio visionis & luminis; & in utroque augmento progredi potest in infinitum: ergo, si ex parte objecti pervenitur ad videndum infinita simpliciter, necesse etiam est visionem ipsam pervenire ad infinitam intensiorem, vel extensionem in actu: quia nec potest fieri ascensus ad visionem altioris ordinis, neque in eodem ordine potest fieri augmentum, nisi extensivum, vel intensivum: neque in eo augmento sibi potest in aliquo termino finito, cum processus in rebus visis non sit intra aliquem terminum finitum, sed in tota latitudine entis creabilis.

Hæc ratio aliquando mihi visa est efficax, & sumi ex D. Th. 1. p. q. 12. art. 7. & 8. nam in priori probat, Deum non posse comprehendere, quia non potest videri in infinito lumine; in posteriori vero probat, non posse creaturam videre in Deo omnia possibilia, quia comprehenderet Deum. Unde de primo ad ultimum inferri videtur, quod, si creatura videret in Deo omnia possibilia, videret infinitum lumine, quia comprehenderet ipsum, & ad comprehensionem necessarium esset infinitum lumen. Unde si obijciatur, quia plus est videre Deum, quam creaturas: sed ad videndum Deum non requiritur infinitum lumen: ergo neque ad videndas creaturas; facilis est responsio ex dicto discursu, quia plus est comprehendere Deum, quam videre, & ideo ad illud potest necessario requiri infinitum lumen, licet ad hoc non requiratur. Videre ergo creaturas in se ipsis minus est, quam videre Deum, tamen videre illas in Deo, majus quid est, quam videre præcise Deum, non videndo creaturas in ipso, quia videre creaturas in Deo, includit videre Deum, & videre plures creaturas in Deo includit videre Deum perfectius, cæteris paribus: & consequenter videre omnes possibiles videtur esse infinite videre Deum, quod non fit sine infinito lumine, & infinita visione. Unde Soto in 4. loco supra citato concedit, si per impossibile viderentur in Deo omnia possibilia sine infinita claritate, visionem illam non fore comprehensionem: sed ideo talem visionem necessario fore comprehensionem, quia non potest fieri sine infinito lumine, & ob eandem causam esse impossibilem creaturæ.

Sed nihilominus hæc ratio in prædicto sensu non tam efficax nunc apparet mihi, sed aliquid ei addere, ut persuadeat, iudico necessarium. Triplex ergo infinitas potest

intelligi in tali visione. Prima est essentialis, & specifica, secunda extensiva in ordine ad objectum, tertia intensiva in ordine ad subjectum. Ratio ergo facta non procedit de prima infinitate essentiali, neque in hoc sensu fit ab authoribus ejus: tum quia supponunt, talem visionem, qua viderentur in Deo omnia possibilia, esse creatam: non enim disputamus nunc cum Hugone, & aliis, qui posuerunt, illam visionem esse increatam: visio autem creata non potest esse infinita simpliciter, & in specie sua; ac essentia: tum etiam, quia supponunt, talem visionem esse ejusdem speciei cum visionibus aliorum beatorum, qui non vident in Deo omnia possibilia; augmentum ergo talis visionis solum esse potest alterutro ex his duobus modis, vel utroque simul: in neutro autem illorum videtur necessario sequi infinitas in actu ex visione omnium possibilem in Verbo.

Quod in hunc modum declaro in primis, quod attinet ad extensivum augmentum visionis beatificæ: nam videtur ille modus ratiocinandi de augmento extensivo, supponere, visionem illam per additionem entitativam extendi ad objecta secundaria, visa in Deo, sicut in objecto primario: ita ut illa visio sit suo modo composita in sua entitate, & in ea possit intelligi aliquid entitatis, quo attingit Deum præcise; & aliquid aliud illi addi, ut perfectius videns Deum, attingat etiam creaturas in ipso, & hoc additum eo esse majus in sua entitate, quo plures creaturæ per talem visionem attingi possunt; ac denique si visio Petri non extenditur ad videndas decem creaturas in Deo, ut augeatur & extendatur ad undecimam, aliquam partialem entitatem illi esse addendam. Et juxta hunc conceptum recte concluditur, non posse intelligi illam visionem actu terminatam ad infinitas creaturas possibiles, quin intelligatur actu habere infinitum augmentum secundum hunc modum compositionis & augmenti. Verū tamen hic modus compositionis in actu visionis beatæ, prout ad Deum in se, & ad creaturas in Deo terminatur, non existimo esse verum, ut nuper in 1. 2. in materia de beatitudine docui, & hac potissimum ratione probavi. Quia, si visio illa intelligitur composita & aucta per unionem, & additionem partialium entitatum, vel illæ entitates partiales sunt etiam compositæ & divisibiles in infinitum, sicut sunt partes quantitatis, & gradus intensiōis, aut sunt indivisibiles omnino, & uniuntur sicut materia & forma, vel alio simili modo. Neuter autem modus compositionis potest habere locum in visione beata respectu illorum objectorum. Quod sic ostendo. Nam in priori compositionis modo duo intercedunt, quæ nec ratione subsistunt, nec satis intelligi possunt. Unum est, quod illæ duæ partes entitatis visionis terminatæ ad Deum, v. g. & ad Angelum in Deo visum, sint iterum divisibiles, & compositæ entitative, non secundum intensiōem ex parte subjecti: nunc enim non agimus de latitudine & compositione pure intensiva, de qua statim, sed agimus de extensiva in ordine ad objectum: secundum hanc ergo considerationem, & compositionem, non est; unde illa pars visionis (ut sic dicam) quæ terminatur præcise ad Deum, sit divisibilis, neque illa quæ terminatur ad angelum, quia neque ex parte subjecti habent partes, ut per se constat, quia subjectum est indivisibile: neque ex parte objecti, quia etiam singula objecta in exemplo posita sunt indivisibilia, & in ordine ad illa sunt singulæ illæ partes indivisibiles, quia illa pars visionis, quæ versatur præcise circa Deum, tota tendit in Deum secundum idem, & nec mente fingi potest, quod in illa sit aliqua particula, qua videatur aliquid in Deo, & alia, qua videatur aliquid aliud: quia suppono, per totam illam videri solum id, quod est formaliter Deus, in quo non potest illa partitio fieri. Idemque argumentum fieri potest de alia parte, prout terminatur ad Angelum: non possunt ergo illæ partiales entitates esse amplius divisibiles extensive, seu ex parte objecti. Atque hinc facile constat, idem esse dicendum, etiamsi objectum creatum, visum in Deo, sit materiale vel compositum, tum quia videtur indivisibili modo seu per modum unius; tum etiam, quia, si illa visio, prout terminatur præcise ad Deum, indivisibilis est, non potest compositionem facere per modum continuationis cum alia entitate partiali divisibili, ut constat ex natura talis compositionis & statim amplius declarabo.

Hinc colligitur secundum, quod proposui, scilicet non posse

Visio quæ infinita est, facta possibiles in Verbo viderentur, non esset extensiva infinita.

Quam ratione aliqui insensum probare studeant.

Super ratione prædicta auctoritatis judicium.



posse intelligi, quomodo illæ duæ partes uniantur ad componendam unam visionem, nam si utraque illarum est indivisibilis, non possunt uniri per modum continuationis: quia hæc compositio requirit latitudinem in partibus, & quod non secundum se totas jungantur, sed solum in aliquo extremo seu termino communi indivisibili. Nec etiam possunt uniri proxime & immediate, secundum se totas, quia hic modus unionis non intercedit, nisi inter subiectum & accidens, materiam & formam, & in universum, inter potentiam & actum, vel cum proportionem ad illa: at vero in præsentem nulla ratio potentia & actus inter illa duo intercedit: quia utraque pars est per modum actus secundi & ultimi, & per se tendit in suum obiectum. Neque etiam explicari potest, quis modus unionis inter illas duas partes intercedat, nec quæ sit ratio, ob quam illæ duæ partes in unam coalescant. Nam, si quæ esset, maxime quia tendunt in obiecta non æque primo, sed cum ordine intuendo unum in alio: sed hæc ratio potius probat, actum esse indivisibilem, quam esse sic compositum, ut statim declarabo. Atque hinc etiam fit, licet fingatur illa visio indivisibilis, prout terminatur ad Deum, & divisibilis, prout terminatur ad obiecta creata, non posse intelligi unionem inter illas partes: neque enim esset unio per modum continuationis, quia neutrum extremum talis unionis potest esse indivisibile, sed solum potest esse terminus, & imperfectum quid in tali genere entitatis, quod hic cogitari non potest de illa visione, prout terminata ad Deum. Neque etiam potest intervenire aliud genus, propter eandem rationem factam. Quinimo, etiam si gratis daremus, illas partes visionis esse aliquo modo divisibiles, non posset intelligi, quo communi termino copularentur, quia ille communis terminus deberet esse proportionatus visioni, & ejusdem ordinis & habitudinis: ergo oporteret, ut haberet ordinem ad obiectum aliquod, quia tota visio secundum se totam, & secundum totum, quod in illa est, tendit in aliquod obiectum, illudque repræsentat, alioqui esset in tali actu aliquid, quod degeneraret a natura visionis, & nullo modo compleret in illa repræsentationem obiecti adæquati ejus, quod est contra naturam visionis, & prorsus impertinens ad integritatem seu complementum ejus: si ergo duæ illæ partes visionis unico communi termino uniantur, necesse est, ut ille terminus aliquod obiectum respiciat: vel ergo respicit Deum tantum, & sic non esset aptus ad terminandum alteram partem, quæ tendit in angelum. Atque eadem ratione non potest respicere angelum tantum, quia non posset terminare alteram partem, quæ tendit in Deum. Et præterea est communis ratio, quia nulla est, ob quam ad unum obiectum potius, quam ad aliud, terminetur. Neque etiam potest terminari ad utrumque, tum quia esset alterius rationis a singulis partibus: & quia si illud indivisibile attingit utrumque obiectum, melius dicitur, totum actum esse indivisibilem, & simul repræsentare Deum, & creaturam in ipso, quia non est major ratio de illo indivisibili, quam de toto actu.

Atque hinc sumitur alia ratio a priori, quia per hanc visionem non videntur Deus & creatura (v.g. angelus) concomitanter solum, & æque primo, ut in principio hujus sectionis supposui & ostendi. Quia, nec hoc esset videre unum in alio, nec posset tunc ratio reddi, cur illa obiecta tam diversi ordinis uno actu viderentur. Videntur ergo cum ordine ex parte obiectorum, videndo, scilicet unum in alio: ergo non potest in illa visione intelligi aliquid entitatis, attingens præcise creaturam, quod non etiam attingat Deum: quia nihil est in illa visione, quod primario attingat creaturam, sed secundario, & in Deo, ac per Deum: ergo ille actus indivisibiliter attingit Deum, & creaturam in Deo. Et confirmatur, quia per illam visionem ita videntur Deus & creatura, ut videatur distinctio eorum, & habitudo creaturæ ad Deum in ratione participationis dependentis a Deo: ergo necesse est, ut sit indivisibilis entitas, quæ hæc omnia attingit: quia non potest repræsentare habitudinem & distinctionem, nisi repræsentando extrema: & ita eadem indivisibili entitate, quæ repræsentatur unum, repræsentantur etiam alia. Ultimo tandem hoc persuadetur, quia aliàs non potest intelligi, quo modo de facto visio animæ Christi attingat infinita sine augmento infinito secundum partiales entitates: hoc autem modo facillime hoc intelligetur, ut inferius declarabitur.

Suarez Tom. XVI.

Concludo igitur, visionem beatam non attingere Deum & creaturas in Deo per compositionem, nec per augmentum, quod fiat per additionem partialis entitatis; sed per indivisibilem entitatem tantæ perfectionis, quæ potens sit repræsentare non solum Deum præcise, sed etiam ut continet has vel illas creaturas: excluso enim priori modo, non potest alius excogitari, quo possit eadem visio ad Deum primario, & ad creaturas in Deo, & secundario terminari. Quocirca, quamvis, cæteris paribus, visio Dei perfectior sit, quo plures vel meliores effectus in ipso videntur, hæc tamen inæqualitas non consistit in aliquo partiali augmento, vel intensione, sed in perfectiori entitate indivisibili ipsius visionis, non quod una sit diversæ speciei ab alia, neque essentialiter perfectior: conveniunt enim in primario obiecto, a quo habent essentialem speciem & perfectionem: sed quod intra eandem speciem una sit perfectius individuum, seu perfectiorem entitatem individualement habeat, quam alia: hæc enim inæqualitas intra eandem speciem non repugnat, ut ex Metaphysica suppono. Unde etiam fit, ut una & eadem visio Dei, qua videntur in Deo pauciores effectus seu creaturæ, non possit per aliquod augmentum crescere ad plures creaturas in Deo videndas, sed oportebit omnino visionem mutari, & ablata imperfectiori, perfectiorem dari, si beatus crescere debet in visione creaturarum in Verbo. Ratio est clara ex dictis, quia res indivisibilis, ut talis est, non recipit augmentum: sed visio eadem indivisibiliter attingit Deum, & creaturas in Deo: ergo secundum eam rationem non potest augeri: sed necesse est, ut vel eandem res semper manifestet, vel, si plures manifestandæ sunt, mutetur visio. Confirmatur, quia si visio eadem augenda esset, illi addenda esset aliqua entitas partialis, quia alio modo nequit intelligi augmentum, præsertim extensivum; ostendimus autem, talem entitatem non posse addi, neque uniri priori entitati: ergo repugnat tale augmentum.

Atque hinc tamdem colligitur id, quod in hoc discursu intentum est, ad intelligendam visionem creatam Dei, qua videantur in ipso omnia possibilia, non oportere, in illa visione concipere infinitum augmentum entitatis talis visionis quasi extensivum ex parte obiecti, per additionem partialis entitatis, ad eum modum, quo censent multi augeri habitum, cum ad plures conclusiones seu actus extenditur: jam enim ostensum est, hoc genus augmenti non reperiri in visione beata: satis ergo esset intelligere visionem indivisibilem, habentem perfectissimam entitatem in illa specie visionis, quæ una habitudine, ut sic dicam, seu una repræsentatione indivisibili attingeret Deum, & repræsentaret omnia, quæ in ipso sunt formaliter, vel eminenter, sicut ipsa visio increata Dei indivisibiliter hæc omnia repræsentat ex vi perfectæ repræsentationis ipsius essentia Dei: sic enim illa visio creata esset participatio visionis increatæ, & modo quodam indivisibili participaret illam perfectionem, cum quadam æqualitate extensiva ex parte obiecti, non tamen cum æqualitate simpliciter, quia haberet minorem claritatem & perfectionem intensivam, & esse participatum. Sicut angelus ab æterno productus haberet quadam æqualitatem quasi extensivam cum Deo in duratione, quia semper cum illo coexistisset, non tamen haberet æqualitatem simpliciter, quia ejus duratio esset intensive minus perfecta, & non necessaria ex se, sed dependens. Igitur ex hac infinitate extensiva non videtur posse immediate concludi, hanc visionem esse impossibilem.

Ex his ergo facile videtur demonstrari posse, nullam etiam infinitatem intensivam necessario sequi in visione beata creaturæ ex hoc præcise, quod attingeret omnia possibilia, quæ in Deo eminenter continentur. Probatur ex dictis, quia quod una visio beata repræsentet plures vel pauciores creaturas in Deo, non provenit ex intensione visionis, sed ex perfectiori entitate individuali ipsius visionis: ergo, quod repræsentet omnes, non provenit ex infinita intensione; neque ad hunc effectum erit per se loquendo illa intensio necessaria. Antecedens, præter ea, quæ dicta sunt, declaratur primo, quia, si visio Dei sit ut unum, & per illam videatur in Deo species humana v.g. etiam si intendatur, & fiat ut duo, non extendetur ad plures creaturas, sed per illam videbitur Deus clarius, & similiter humana species in Deo: ergo extensio visionis ad plura obiecta secundaria non provenit ex

Illatio ex dictis.

Visio creata possibilia omnia eminenter in Deo continens, attingens non necessario intensive infinita.



Intensione. Antecedens patet, quia, si illa visio vere intenditur, illi gradus intensionis sunt per se subordinati, ita ut secundus natura sua ponat primum, & tertius secundum: at vero representatio speciei humanæ vel alterius non habent inter se eam subordinationem, ut per se notum est: ergo ex vi intensionis præcise non potest fieri illa extensio ad representandas alias species. Secundo quia augmentum intensivum ut sic, totum est ex parte subiecti per maiorem conatum potentiae, & consequenter per maiorem radicationem ejusdem actus in eodem subiecto circa idem objectum: ergo necesse est, totam intensionem versari circa easdem res visas: nam, si conatus potentiae extenderetur ad nova objecta, etiam secundaria, non necessario cresceret in intensione & claritate circa primum objectum ut sic; ergo hæc duo argumenta sunt diversarum rationum, nec unum ex alio necessario consequitur, neque e converso. Quo fit, ut eadem numero visio, quæ representat Deum, & decem creaturas in ipso, possit esse, & intensa, & remissa, illas decem creaturas clarius, vel minus clare representando, & non plures neque pauciores; & e contrario fieri potest, quod duæ visiones sint inæquales in representando plures vel pauciores creaturas, & tamen, quod in gradibus intensionis sint æquales. Ac denique non repugnat, visionem, quæ ad plures creaturas extenditur, esse in intensione & conatu operantis remissiolem. Sicut angelus inferior videt interdum in uno principio omnes conclusiones, quas videt superior, licet hic majori claritate illas & non plures videat. Interdum vero fieri potest, ut plures conclusiones unus actu consideret, quam alius in eodem principio, quamvis actu minus intenso, seu minori conatu. Sunt ergo hæc duo, intensio, scilicet, & extensio visionis, quasi duæ quantitates diversarum rationum, quarum altera potest esse major, etiam si altera minor sit, & e contrario: sicut actus charitatis erga Deum potest esse intensior, & actu non extendi ad proximum, & aliquando e converso, potest actus simul esse circa Deum & proximum, & minori conatu & intensione fieri. Ex hoc autem principio, quod verissimum esse existimo, aperte concluditur, ex vi comprehensionis extensive tantum omnium, quæ eminenter in Deo continentur, non sequi per locum (ut ajunt) intrinsecum, visionem illam esse infinite intensam, aut procedere a lumine gloriæ infinite intenso. Quia illa perfectio extensiva non conveniret illi ex vi intensionis, sed ex vi suæ entitatis individualis indivisibiliter. Et hoc principio posito, nullam vim habet supputatio. Ad videndum tot creaturas requiritur visio, vel lumen tam intensum, & ad plures intensus: ergo ad infinitas infinite intensum. Negatur enim antecedens, quia non requiritur certa intensio, sed solum talis individua entitas visionis, quæ, si existat, licet remissa, manifestabit eadem omnia: & si eadem fiat intensior, non representabit plura, sed eadem clarius: imo etiam si habeat plures gradus intensionis, non manifestat quasdam res per unum gradum, & alias per alios, sed omnes per quemlibet gradum, quia omnes gradus tendunt in idem objectum, & quæque representationem clariorem reddunt, quod non possent facere, si res diversas representarent. Igitur licet daretur visio Dei, representans omnes creaturas posibles, non necessario esset infinite intensa. Imo illam et posset in infinitum intendi, sicut potest in infinitum intendi amor beatificus Dei, etiam si ad nova objecta non extendatur.

**Objectiones.** Qui videt in Deo omnes creaturas, videt totam (ut sic dicam) intensionem omnipotentiae Dei: ergo videt infinitam Dei veritatem intensive: ergo actu infinite intenso. Antecedens probatur, quia licet in effectibus illa sit extensio quædam, in virtute tamen ipsa effectrice est intensio, quia ex perfectione ejus intensiva provenit, quod ad tot effectus, & in infinitum perfectiones extendatur: ergo ex cognitione omnium effectuum in divina omnipotentia colligitur, illam potentiam cognosci secundum totam intensionem perfectionis suæ.

**Responsio.** negando secundam consequentiam; committitur enim æquivocatio: aliud est enim videre totam intensionem objecti, aliud videre tota intensione, totoque conatu, quo potest illa intensio objectiva a vidente videri. Recte ergo colligitur illo argumento, divinam perfectionem objective videri infinite, id est, secundum infinitam intensionem objectivam: non tamen inde necessario sequitur, videri infinita intensione ex parte vi-

dentis, quia potest videri majori & minori conatu, vel claritate. Quin potius omnes videntes Deum, vident totam ejus infinitatem intensivam, quia illa simplicissima, prorsusque indivisibilis est, licet finite videant. Is autem, qui videret in Deo omnia possible, peculiari modo videret totam illam infinitatem, quodammodo penetrando totam illam ex parte objecti, quatenus ex parte illius distincte videret continentiam eminentialem omnium rerum in ipsa: non tamen inde necessario sequitur, quod videret toto conatu possibili ex parte videntis, & consequenter neque infinita intensione.

Ex his ergo satis concludi videtur, nullam necessario sequi actualem infinitatem ex visione creata Dei, etiam si per illam omnia possible in Deo ipso videantur. Hinc vero retorquendam censio esse rationem, & concludendum, impossibile esse talem visionem. Nam, vel illa finita est, vel infinita. Finita, esse non potest sufficiens ad comprehendendam Dei immensitatem, & representandum adæquate totum Deum secundum omnia, quæ in ipso formaliter & eminenter continentur, ac representabilia sunt. Infinita autem nec admittitur, neque esse potest, ita ut ad illum effectum sufficiat: ergo. Minor quoad priorem partem ex terminis per se nota visa est Sanctis Patribus. Hinc est enim id, quod Gregorius ait lib. 18. Moral. c. 39. *Quantum ad immensitatem Dei quidam nobis modus figuratur contemplationis, quia eo ipso ponere circumscribimur, quo creatura sumus.* Et loquitur de visione beata, quam dicit, hoc ipso, quod creata est & finita, non posse circumscribere immensitatem Dei: circumscribere autem non significat, intente aut clare videre, sed veluti intra se capere totam illam immensitatem, totamque ejus quasi extensionem in se complecti. Et Theologi omnes non alia ratione probant, creaturam non posse comprehendere Deum, nisi quia finita est, ut constat ex D. Th. 1. p. q. 12. art. 7. Bonav. in 3. dist. 14. art. 1. q. 2. Richard. art. 1. q. 1. Scot. q. 1. ad 1. Durand. q. 1. art. 10. Majore. 4. d. 49. q. 15. & aliis infra citandis. Ratio ergo ex ipsis terminis colligenda est, quia inter finitum & infinitum non potest esse adæquatio: illa autem visio est simpliciter finita: cognoscibilitas vero Dei, & ut sic loquar, representabilitas est simpliciter infinita: quomodo ergo potest intelligi, quod adæquet representatio visionis totum illud objectum, & comprehendat illud, etiam extensive? Confirmatur, ac declaratur, nam plus distat omnis visio creata possibilis a perfectione illius objecti, quam distet visio, quam inferior angelus habet de superiori, a perfectione ipsius angeli superioris: sed angelus inferior non potest superiorem comprehendere tali visione, non solum ex defectu intensionis, vel claritatis, sed etiam quia non potest totum illud objectum distincte ex parte objecti intra se capere, eo quod cognoscibilitas objecti superet capacitatem cognoscentis: ergo multo magis superabit essentia divina quamcumque visionem creatam possibilem.

Dices, argumentum concludere, non posse virtute naturali, quomodo inferior angelus non potest plene capere superiorem, secus autem esse virtute supernaturali, seu per divinam elevationem. Respondetur, in primis argumentum esse proportionale, & ita procedere potentia jam elevata. Itaque magis distat omnis potentia creata, quantumvis elevata, ab essentia divina in ratione & proportionem objecti & potentiae, quam distet inferior angelus a superiori, quia illa est distantia infinita & diversi ordinis, hæc autem finita. Deinde dicitur, hic non habere locum elevationem, quia loquimur de visione ipsa, quæ non est amplius elevabilis ad representandum, quia ex natura sua formaliter representat. Comparando ergo actum ad actum, respectu suorum objectorum, quæ naturaliter representant, procedit ratio facta; & secundum eam rationem magis limitatus & improporcionatus est actus visionis create ad representandum adæquate Deum, quam intellectio inferioris angeli ad representandum inferiorem.

Altera vero pars superius assumpta, scilicet, illam visionem non posse esse infinitam, ex superius dictis clara est: aut enim esse infinita extensive ex parte ipsius visionis, id est, per verum augmentum & additionem realem. Et hoc non, tum quia repugnat, dari aliquod infinitum in actu hujusmodi, tum etiam, quia extensio actus ad plura objecta non fit hoc genere augmenti, ut declaratur.

Visiō creata omniū possible in verbo, a solute impossible.

Occurritur objectioni.

Dissolvitur.



ratum est. Vel esset infinita intensive in intensione gradu-ali, & hoc non, quia etiam huiusmodi infinitum in actu repugnat esse, & etiam, quia hæc intensio nihil per se confert, ut actus extendatur ad plura objecta, ut etiam probatum est. Vel esset infinita intensive intensione perfectionis & essentialis. Et hoc non, quia hæc intensio non est alia, quam essentialis perfectio rei; & ideo nulla potest esse visio sic infinita intensive, nisi quæ est essentialiter infinita: huiusmodi autem est sola increata visio. Quod si dicas, hoc esse verum de visione sic infinita simpliciter, tamen secundum quid & objective posse dari visionem sic infinitam: respondetur, hanc esse petitionem principii: quia esse hoc modo infinitam secundum quid nihil aliud est, quam esse in se simpliciter finitam, representare autem adequate rem infinitam: & hoc est, quod in priori parte probavimus esse impossibile. Atque hoc sensu dixit semper D. Thom. ad videndum omniaabilia in Deo, necessestiam esse visionem comprehensivam, & infinitam intensive, non intensione graduum & accidentalium, sed perfectionis & essentialis. Et simili modo dixit Cajetan. d. q. 12. art. 8. videre in Deo omniaabilia, & videre Deum infinite, sese mutuo consequi: sic etiam dixit Ferrar. 3. cont. Gent. cap. 56. Pro solutione, cognoscere omnia in causa, esse comprehendere causam: & Soto in 4. d. 49. q. 3. art. 3. concl. 5. ad 2. dixit, visionem omnium in Deo, necessario connecti cum infinita claritate: hoc enim est verum, non de infinitate gradu-ali, sed de essentiali, ut a nobis declaratum est. Atque hæc ratio sic declarata videtur mihi sufficientissima pro materiae capacitate & altitudine.

Dico secundo: Anima Christi neque in actu primo, seu habitu videt omniaabilia in Deo. Hæc conclusio videtur mihi necessario sequi ex præcedenti, supposita perfecta natura huius scientiæ beatæ, de cuius ratione est, ut semper sit in actu secundo, quia est perfectissima scientia & immutabilis. Et confirmatur seu declaratur hoc modo, quia vel actus ille primus potest interdum reduci ad actum secundum, saltem successive cognoscendo nunc has creaturas in Deo, nunc alias: vel nunquam potest omnino variare actum secundum: si hoc posterius dicatur, gratis fingitur talis actus primus, & reddi non potest ratio, cur intellectus habens sufficientem actum primum, non possit per voluntatem applicari ad actum secundum, nisi fortasse ab extrinseco a Deo impediatur: quod si perpetuo impediendus erat, superflue illi datus esset talis primus actus. Si vero dicatur primum, sequitur in ipsa visione, & beatitudine animæ Christi, esse posse varietatem, ita ut nunc sit beator, postea minus beata, vel e contrario.

Neque enim dici potest, hanc varietatem esse in solo objecto secundario, non in primario, quia, cum creaturæ non videantur illa visione, nisi in Deo ipso, non potest variari circa creaturas, quin varietur circa Deum. Neque etiam refert, si dicatur variari quidem circa Deum, semper tamen cum æquali perfectione, quamvis in ordine ad diversas creaturas; tum quia hoc ipsum esset magna imperfectio in tali visione; tum etiam, quia qua ratione posset hoc modo variari, posset etiam intendi, & remitti; cur enim quoad unum subiceretur voluntati videntis, & non quoad aliud?

Quod vero quidam dicunt, posse visionem illam successive variari ex parte objecti, seu creaturarum cognitionem, nulla facta mutatione in ipsa intelligi potest: quia, ut variæ creaturæ cognoscantur, necessaria est varia representatio, varius effectus formalis, atque adeo varia perfectio cognitionis, ac denique, quia sine mutatione alicujus extremi non potest intelligi varia habitudo, & cognitio. Ultimo confirmatur, quia hic actus primus, quo anima Christi dicitur cognoscere omnia, vel est ipsa visio, (ut dicebat Scotus) & hoc non, ut efficaciter videtur probatum, referendo ejus opinionem, quia visio ipsa essentialiter est actus secundus: unde quamdiu eadem omnino immutata manet, eodem modo constituit videntem in actu secundo, & respectu ejusdem, quod si aliquid per eam denovo videndum est, aliquid ei addi oportet, ut nunc probatum est. Vel hic actus primus est ipsum lumen gloriæ, & hoc potest dupliciter intelligi. Primo, quo lumen gloriæ sit ex se sufficiens ad videnda simul omnia, quæ in Deo continentur, licet non habeat in anima Christi actum adequatum. Et hic sensus est falsus, tum quia

sequitur, illud lumen esse infinitum, ut ostendi; tum etiam, quia sequitur, lumen illud esse sufficiens, ad comprehendendum Deum, saltem extensive; tum denique, quia sequitur, non habere actum adequatum suæ virtuti respectu visionis Dei, quamvis illum habere possit; quod sine fundamento diceretur, cum ad perfectionem non pertineat, sed potius ad defectum perfectionis. Alio modo id intelligi potest, quia successive potest anima Christi eodem lumine has vel illas res in Verbo videre, & hoc non satis est, quia, licet deus, eodem lumine gloriæ, & anima Christi nunc videt aliquas creaturas in Deo, potuisse videre alias, & non istas, & sic in infinitum (id quod etiam incertum est, & sub opinione) tamen hoc neque arguit singularem perfectionem in illa scientia, sed commune fere est omnibus beatis, neque satis est, ut dicatur omnia scire in actu primo, sicut, licet eodem lumine intellectu-ali possit quis quascumque res cognoscere, non tamen omnes scit in actu primo, quia non omnium habet species, neque est in potentia proxima, ut possit, cum velit, has vel illas res contemplari: at vero intellectus animæ Christi informatus hoc lumine, non est ita proxime dispositus ad cognoscendum in actu secundo omniaabilia, etiam successive, quia non habet proprie species rerum omnium in ordine ad hanc scientiam, neque essentialiter divinam per modum speciei unitam, nisi in ordine ad talem modum videndi ipsam: unde nec potest suo arbitrio res alias per illam visionem contemplari; ergo.

Dico tertio: Anima Christi videt in Verbo aliqua ex rebus possibilibus, quæ nunquam erunt. Videtur certa, & communis conclusio: & eam expresse affirmat D. Thom. hic artic. 2. & potest aliquo modo probari ex illo Matth. 11. & Luc. 10. *Si in Tyro & Sidone factæ essent virtutes, &c.* ubi Christus revelat aliquid possibile, quod fuisset futurum in eo casu, quod tamen absolute futurum nunquam fuit; facit illud Matth. 26. *Possunt rogare Patrem, &c.* Ex quibus locis colligitur, animam Christi hæcabilia cognovisse, sed non convincitur vidisse illa in Verbo, potuisset enim illa scire scientia infusa; sit tamen probabilis conjectura, etiam scientia beata, quæ perfectissima est, illa cognovisse. Ex articulo etiam secundo D. Thom. sumitur hæc ratio, quia multa possunt fieri a creatura, quæ nunquam fient; sed anima Christi videbat in Verbo omnia, quæ sunt in potentia creaturæ, quia comprehendebat ipsam; ergo. Denique verisimile est, etiam alios beatos videre nonnullas res posibles, quæ nunquam fient, ut constat ex 1. p. q. 12.

Ad fundamentum Magistri, quod ex quibusdam testimoniis sumebatur, respondet D. Thom. Christum cognovisse omnia, quæ habent rationem entis in aliqua differentia temporis, de quibus sit proprie illa distributio. Dici etiam potest, in eo fuisse omnem scientiam, quæ secundum potentiam ordinatam a Deo communicatur alicui intellectui creato, sicut in simili supra de gratia dictum est: & hoc satis est, ut dicatur habere omnes thesauros sapientiæ & scientiæ, & nihil ignorare. Deinde disputatione sequenti videbimus, an saltem per scientiam infusam, omniaabilia sciat.

Ad Henricum & Durand. negatur, cum visione Dei esse necessario conjunctam cognitionem omnium rerum & quidditatum, quæ in ipso eminenter continentur: cum enim illa visio non sit comprehensiva Dei, & possit esse magis, vel minus perfecta, possunt per illam plura, vel pauciora videri in Verbo. Neque Durandus satis frequenter loquitur, quia posita determinatione divinæ voluntatis, vel scientiæ ad talia objecta futura, fere eadem est ratio cognoscendi tales res futuras in Verbo, quæ est cognoscendi res posibles: nec potest etiam vitare comprehensionem, tum quia ad comprehendendam potentiam non oportet cognoscere, quid factura sit, sed satis est, comprehendere, quidquid potest facere; tum etiam, quia anima Christi videt in Verbo, quidquid futurum est in qualibet differentia temporis, ut jam dicam. Et eadem rationes urgent contra Henricum, quia nulla est ratio, cur magis necessario videantur omnes species rerum in Deo viso, quam omnia individua, cum tam individua, quam species, continentur eminenter in Deo, & represententur in divinis ideis.

Verum tamen est, rationem sumptam ex comprehensione non ita convincere contra Henricum, quod sit impossibile videre in Deo omnes rerum species posibles, esto

Respon-  
ad argu-  
menta.



esto non sit necessarium: nam si viderentur species, non visis omnibus individuis, non videretur certe comprehendi Deus, quia omnipotentia Dei per se primo respicit non tantum species, sed etiam individua, & infinita ejus perfectio eminenter omnia continet. Sed quamvis illa ratio directe non ita convincat, tamen ratio facta de lumine infinito optime contra hanc sententiam procedit, & inde consequenter effici videtur, tale lumen non solum ad cognoscendas omnes species, sed etiam ad omnia individua sufficere.

Ultimo ex dictis in hac, & in sectione præcedenti aperte colligitur, quam sit verum, quod D. Thom. dixit art. 4. ad 3. hanc scientiam beatam Christi, licet perfectissima sit omnium, quæ de potentia ordinaria esse possunt; tamē de absoluta potentia posse esse perfectiorem, imo semper in infinitum posse dari aliam perfectiorem, quia nunquam potest adæquari suo objecto primario, neque illud comprehendere, neque omnia cognoscere, quæ in illo continentur: ergo semper potest perfectius tendere in objectum suum, & plura in illo videre, atque adeo visionem ipsam increatam Dei perfectius participare, quod non solum in diversis subjectis, sed etiam in eodem verum est, ut satis contra Cajetanum in superioribus diximus. Et eadem ratione posset illa eadem visio in intensione crescere, ut ex dictis patet.

#### SECTIO IV.

*Utrum anima Christi videat in verbo omnia, quæ Deus videt scientia visionis, atque adeo infinita.*

**M**ulti ex Theologis negant, animam Christi videre in Verbo hæc omnia. Ita Gabr. & Richard. Scot. & Bonav. locis supra citatis in 3. d. 14. quamvis non eodem modo; nam Scotus eodem modo loquitur de scientia futurorum & possibilium, distinguens de cognitione in actu primo, vel secundo: quæ distinctio jam a nobis rejecta est, quia in hac scientia eadem est ratio de utroque. Bonaven. art. 2. q. 3. & Gabr. q. 1. art. 1. negant, cognosci omnia simul, affirmant tamen successive: quod etiam a nobis rejectum est; tum quia in illa visione nulla est successio; tum etiam, quia infinita pertransiri non possunt, unde, si simul non videntur, nec viri poterunt omnia successive. Richard. art. 2. q. 3. dicit, cognoscere Christi animam omnia, quæ futura sunt in numero, vel tempore finito, ut individua substantiarum, & similia, non vero cogitationes omnes in æternum futuras. Fundamentum eorum est, quia non potest intellectus creatus actu attendere ad contemplanda distincte, & clare infinita, quia ad hoc requiritur infinita virtus & attentio, & consequenter infinitus actus; sed quæ Deus videt scientia visionis, sunt actu infinita, & visio Christi necessario est finita; ergo.

Dico tamen primo, animam Christi videre in Verbo simul, & in actu secundo, omnia, quæ Deus videt scientia visionis. Ita D. Thom. hic, & communiter Theologi in 3. d. 14. Magist. Albertus Magnus, Palud. Capreol. & alii. A lens. & Marfil. & Henric. locis præced. sectione citatis. Ex Scriptura & Patribus nihil habemus ad hoc probandum; solum ex eis colligi potest, animam Christi cognoscere hæc omnia, præsertim ex Damasc. lib. 3. cap. 22. Chrysost. Fulgent. & Hieron. citatis in principio sect. præced. Nam simpliciter dicunt, animam Christi cognoscere omnia; ergo saltem id erit verum de his, quæ aliquando futura sunt. Unde verisimile fit, ea cognoscere per scientiam beatam, quia indicant semper actu illa omnia intueri, quod non fit, nisi per beatam scientiam. Fundamentum vero D. Thom. est, quia omnis Beatus videt in Verbo omnia, quæ ad statum suum pertinent, quod supponit ex 1. part. q. 12. art. 8. sed ad statum, & dignitatem, animæ Christi pertinent omnia, quæ Deus videt scientia visionis. Primo, propter dignitatem personæ suæ. Secundo, quia est caput omnium hominum, & angelorum, præsertim iustorum, & prædestinatorum, propter quos omnia creata sunt. Tertio, quia iudex omnium est constitutus. Adde quarto, quia illi subiecta sunt omnia, & propter ejus gloriam & honorem suo modo omnia creata sunt.

**Dubium.** Sed circa fundamentum hujus rationis dubitat Cajet. hic artic. 2. quia ex illo sequitur aliquem minus beatum plura videre in Verbo, quam beatiorem, quia possunt pertinere plura ad statum ejus: consequens est falsum, quia,

qui plura videt in Deo, perfectius videt Deum; ergo est beator. Et in summa respondet, Beatum videre in Verbo formaliter ea, quæ pertinent ad statum eo tempore, quo ingreditur beatitudinem, cætera vero, quæ postea fiunt, tantum causaliter. Sed hæc responsio primum non expedit difficultatem, quia etiam accidere potest, ut plura pertineant ad statum Beati inferioris, etiam pro illo tempore, quo ingreditur beatitudinem, ut si constituamus B. Dominicum esse minus beatum, quam B. Paulum primum Eremitam, quod non repugnat, ut per se notum est, & tamen constat, plura ad statum S. Dominici, quam S. Pauli, potuisse pertinere: etiam si solum comparantur pro eo momento, quo mortui sunt. Deinde non est necessaria illa responsio, quia non semper necesse est, ut qui plura videt in Deo, perfectius videat in Deum, nisi cætera omnia paria sint: fieri autem potest, ut aliquis videat plura intra inferius genus, vel speciem, & alius excedat aliunde, vel clarius quidem & perfectius res alias, vel aliquid superius, & perfectioris rationis intuendo. Quid vero dicendum sit de aliis beatis, an, scilicet, videant hæc omnia causaliter, vel formaliter in Verbo, non est hujus loci examinare.

Breviter tamen, ut intelligatur vis rationis factæ, ego in hoc ita sentio perfectionem beatitudinis primo omnium esse commensurandam uniuscujusque meritis; deinde unumquemque Beatum videre formaliter in Verbo omnia illa, quæ pertinent ad suum statum, quantum sub quantitate perfectionis divinæ visionis suis meritis debita cadere possunt: nam si fortasse ad videnda illa omnia, necessaria esset perfectior visio, quam suis meritis deberetur, non posset omnia illa formaliter in Verbo videre, sed videret præcipua, seu quæ sufficerent, juxta ordinem divinæ justitiæ, & providentiæ, reliqua autem videret causaliter: Christus autem Dominus non habuit beatitudinem per sua merita, sed altiori titulo sufficientissimo ad totam hanc perfectionem visionis: & si habuisset per merita, illis esset debita tota hæc perfectio, & multo major, si ad illam referrentur; & ideo recte concluditur, omnia hæc vidisse formaliter in Verbo. Unde accipi potest confirmatio similis illi, quam supra tetigimus, cum de gratia Christi ageremus, quia, si infinita visio Dei esset possibilis, tota illa Christi animæ ratione unionis deberetur: quia vero illa anima non est capax tantæ visionis, perfectissima quædam, juxta ordinem divinæ sapientiæ, data est, ac ejus statui maxime accommodata, cujusmodi est illa, de qua agimus; nam, quod anima Christi sit capax illius, dubitandum non est, cum tota illa finitæ perfectionis sit, ut magis patebit ex dicendis sequenti assertionem. Quod autem illa optime quadret cum Christi dignitate, & muneribus, jam explicatum est. Confirmatur, quia aliàs esset in anima Christi actualis ignoratio, vel saltem inconsideratio multarum rerum, quæ actu fierent, & consequenter posset non cognoscere nunc quid ego cogitem, & similia; quod sane est absurdum, & a Christi dignitate alienum. Confirmatur ultimo, quia verisimile est, omnes beatos simul sumptos videre in Verbo omnia, quæ Deus videt scientia visionis, præter ea, quæ specialiter pertinent ad ipsam animam Christi, quia omnia sunt propter electos, unde omnia pertinent aliquo modo ad statum eorum; sed verissimum est, animam Christi, & videre omnia, quæ sibi sunt propria, & præterea videre omnia simul, quæ omnes alii vident; tum, quia gratia animæ Christi (ut supra dictum est), superat gratias omnium Beatorum, etiam simul sumptas, sicut dignitas animæ Christi exuperat omnium dignitates, etiam si in unum conferantur; tum etiam, quia merita Christi infinite superant omnia aliorum merita, etiam simul sumpta: quamquam enim visio non sit animæ Christi data ex meritis, data est tamen tam perfecta, quam per merita secundum legem ordinariam comparari posset.

Sed objici potest, nam sequitur Animam Christi comprehendere scientiam visionis Dei, cum nihil eam lateat eorum, quæ sub tali scientia continentur. Aliqui concedunt sequelam, nec putant esse inconveniens, quia non præterea comprehenditur Deus. Ita sumitur ex Capreol. 3. d. 14. q. 2. art. 3. ad 2. & Cajet. 1. p. q. 12. artic. 8. in fine. Alii renuunt hoc concedere, quia scientia visionis est ipsemet Deus, unde comprehendi non potest, ipso non comprehenso. Sed distinctione uti possumus, nam scientia visionis sumi potest vel pro objecto ipsius scientiæ, vel pro

Respon.

Visio plurimum in Deo non necessario semper perfectior est.

Objeccio.



Respon.

pro formali scientia, quæ est in Deo. Rursus oportet considerare in objecto scientiæ visionis non solum contineri res creatas, sed etiam ipsum Deum, & liberam voluntatem ejus. Anima ergo Christi dici potest comprehendere illam scientiam solum quantum ad objecta creata, quæ per illam videntur, & hoc, ad summum, probat argumentum factum: non vero comprehendit illam scientiam, quantum ad objectum increatum, cum non comprehendat Deum ipsum, nec generationem æternam, & similia. Unde fit etiam, ut non comprehendat illam scientiam, prout est formalis actus ipsius Dei, quia ut sic, est perfectio simpliciter infinita, & eadem omnino cum scientia simplicis intelligentiæ, & comprehendere non potest, illa non comprehensa.

Dices: Cognitio, quæ videntur omnia, ad quæ se extendit potentia, est comprehensio ejus, ut D. Thom. hic sumit art. 2. & 1. p. q. 12. art. 8. & Cajetan. eisdem locis, & Capreol. supra, & 4. d. 49. q. ult. & alii auctores citati sect. præced. Et in toto ejus discursu nos id videmur supposuisse; ergo pari ratione, visis omnibus, ad quæ se extendit aliqua scientia, comprehendetur talis scientia: ergo, cum visio animæ Christi se extendat ad omnia, quæ cadunt sub scientiam visionis Dei, comprehendet illam. Respondetur primo, posse assignari differentiam, quod effectus videntur in potentia ut in causa, & ut in medio cognito, & objecto primario: objecta autem scita non videntur in scientia visionis ut sic, tanquam in medio proprio, secundum eam rationem. Secundo, & magis ad rem respondetur, etiam divinam potentiam proprie non comprehendit, ut est principium talium effectuum, quia, ut in se videtur, non potest præcindi respectu talium effectuum, quia est essentialiter eadem in ordine ad omnes, & ideo si absolute non comprehenditur, neque in ordine ad aliquem effectum comprehendere potest. Atque idem a fortiori est de scientia visionis creaturarum, quæ in se præcisa non est a scientia visionis, quam Deus habet de seipso, neque a scientia simplicis intelligentiæ. Denique est optima ratio, quæ sumitur ex D. Thom. hic art. 2. ad 3. quia licet Christi anima comprehendat objectum illud creatum, quoad numerum scibilium, non tamen comprehendit ea claritate, qua Deus, & consequenter neque comprehendit ipsam claritatem & eminentiam, qua Deus illa intuetur; & ideo nec scientiam visionis Dei, prout in ipso Deo est, comprehendit.

Christus videt infinita in Verbo.

Dico secundo: Anima Christi videt in Verbo infinita. Hæc conclusio sequitur ex præcedenti, & explicanda est, & probanda modo dicto circa articulum tertium D. Thomæ, neque aliquid addendum occurrit. Solum superest solvendum fundamentum Scoti, & aliorum. Ad quod breviter dicitur, hæc infinita contineri intra terminum finitum, quia solum sunt, vel plura individua sub eadem specie finita contenta, vel plures cogitationes, &c. vel certe plures species sub aliquo inferiori genere, ut v. g. plures species corporum mistorum, quæ omnes non transcendunt perfectionem cæli. Deinde omnia hæc videntur per unum simplex principium; & ideo omnia illa videri possunt simul, & per actum, & lumen finitum. Nam, visis omnibus illis in Verbo, adhuc videtur Verbum finite & limitate, cum non comprehendatur totum objectum omnipotentis ejus: ergo actus & lumen sunt finita, quia eorum perfectio ex primario objecto, & ex modo, quo ipsum cognoscitur, pensanda est potius, quam ex objecto secundario.

Objectio.

Sed superest difficultas, quia sumendo numerum finitum rerum contentarum in eodem ordine, & specie, ad videndum illum in Verbo, requiritur aliquod lumen, & ad videndum majorem numerum earundem rerum, cæteris paribus, requiritur majus lumen, & sic in infinitum: ergo ad videndum infinita erit necessarium lumen infinitum. Responderi solet cum Cajetan. hic art. 3. hinc solum inferri, visionem animæ Christi esse infinitam secundum quid, eo modo, quo una res ordinis superioris dici potest infinita secundum quid, quatenus sub se continere potest res infinitas inferioris ordinis. Quæ responsio non videtur satisfacere, quia argumentum semper procedit in rebus ejusdem ordinis, scilicet in lumine gloriæ, & visione beata: procedit etiam de augmento extensivo intra eundem ordinem, in quo intelligi non potest medium inter qualitatem finite extensam, vel actu infinitam in extensione, cum sit sermo de eadem qualitate,

& de perfectione extensiva, quam actu habet a parte rei: hæc autem extensio non videtur esse posse actu finita in visione, vel lumine gloriæ animæ Christi, ut videtur probare argumentum factum: ergo colligitur infinita extensio illius luminis, seu visionis. Quod etiam hoc modo explicatur, quia illa visio ex parte objecti habet infinitam extensionem, sed tantum augetur extensio ipsius qualitatis luminis, vel visionis, quantum augetur extensio objecti, nam tota illa scientia respicit hoc objectum, & per unum gradum intelligitur respicere unam partem objecti, & per alium aliam, nam illi duo gradus distincti sunt inter se, posset enim unus separari ab alio, & e contrario. Et idem est de omnibus aliis partialibus objectis, quæ infinita sunt: ergo respondent illis in ipsa scientia infiniti gradus extensionis.

Respon.

Respondetur, propter hoc argumentum, aliquos admittere hoc infinitum augmentum in visione animæ Christi, quod esse censent per veram & realem additionem partium æqualium, componentium unam entitatem: ego vero suppono, omne hujusmodi augmentum infinitum repugnare omni rei creatæ, ut supra attigi, q. 7. Alii ergo aliter respondent, videlicet, illud augmentum extensivum non esse per se necessarium, sed aliquando idem lumen gloriæ, & visionem beatam, sufficere ad videndum infinita in Verbo sub aliquo genere, vel specie, ex vi alicujus gradus veluti indivisibilis, ita ut ex vi ejusdem perfectionis, qua cognoscit totam aliquam multitudinem infinitam, cognoscat omnia & singula, sub illa multitudine contenta: neque intelligatur, in ipsa visione aliquid respondere uni rei visæ, & aliud alteri, sed eundem gradum perfectionis quasi indivisibiliter respondere omnibus, & toti multitudini: alia enim via non potest vitari infinitum augmentum, ut argumentum bene probat. Quomodo autem hoc verum sit, ita declarari potest ex doctrina D. Thom. hic, quia hæc infinita non videntur in Verbo, nisi prout connexionem habent cum aliqua causa creata, qua comprehensa, comprehenduntur: quia ergo causa illa finita est, ad comprehendendum illam finitum lumen sufficit, & illud idem satis est ad cognoscenda omnia, quæ in illa continentur, licet sint infinita, quia tota illa infinitas comprehenditur sub finito gradu perfectionis. Unde, quando ita videntur plura inter se connexa, & radicata in uno principio finito, unum & idem lumen indivisibiliter sumptum, quod sufficit ad videndum quædam ex his, sufficit ad videndum plura, & omnia, quæ in illo principio comprehenso continentur, quod non est creditu difficile, cum omnia illa a virtute finita procedant, & præsertim, si tantum numero differant, cum hæc sint tam inter se similia, ut idem fere sit, cognoscere unum, vel plura, quæ successive a tali causa fieri possunt. Unde ad argumentum in forma distinguitur illa propositio: Ad videndum res distinctas in Verbo requiritur major seu distincta perfectio luminis aut visionis: si enim illæ res sint inter se omnino distinctæ, & ut sic cognoscantur, non inter se connexæ, vel cum aliqua causa finita, sic concedo assumptum: & consequenter admitto, non posse videri in Verbo hujusmodi res infinitas, nisi per visionem habentem infinitos gradus extensionis. Si vero tales res cognoscantur, ut connexæ in uno principio finito, sic negatur assumptum propter rationem jam explicatam: & hoc modo videt anima Christi infinita in Verbo, & fortasse etiam quilibet beatus, quamvis non æque, neque sub omni genere, vel specie, in qua Christus videt infinita.

Visio infinitorum effectuum in Verbo quomodo non requirit lumen infinitum.

Hæc responsio aliquando mihi probabatur, eo quod existimarem, visionem extendi ad plura objecta secundaria, per additionem partialis entitatis; nunc vero opinor, fundamentum hoc esse falsum, ut sect. præced. declaravi, & ostendi; & ex hac ipsa solutione confirmari potest, nam si ad videndum aliqua infinita sufficit aliqua entitas indivisibilis visionis & luminis, etiam sufficere ad omnia illa, quæ in Verbo videri possunt, quia omnia videntur, media connexionem, quam habent cum divina essentia & potentia, quæ finite, & per finitam visionem videri potest, etiam si aliqua infinita videantur in ipsa, quia non sunt infinita in tota latitudine entis, sed infra aliquam speciem aut genus. Posito autem hoc fundamento, & contrario e medio sublato, cessat difficultas posita, & progressus, qui in ea fit. Nam dum visio extenditur ad plura objecta secundaria, non augetur eadem visio per aliquam



aliquam additionem, sed est alia visio numero distincta, quæ ex vi suæ individuat, & indivisibilis entitatis habet omnia illa repræsentare, nec potest repræsentare plura, neque pauciora, nisi tota visio mutetur. Atque ita solum concluditur, habere animam Christi quandam visionem perfectiorem in sua individua entitate, quacumque alia, quæ ad illa omnia repræsentanda non est sufficiens. Et secundum quid habere quandam infinitatem objectivam, non tamen extensivam, & formalem in entitate sua, quia eadem indivisibili entitate respicit, & repræsentat omnia illa.

**Dubium.** Quæret aliquis ad hujus materiæ complementum, an hæc infinita, quæ videt anima Christi (& idem est de scientia Dei) dicenda sint *categorematice*, vel *syncategorematice* infinita, seu actu, aut potentia. Videtur enim primum, quia illa omnia simul videntur; ergo ut sic, actu sunt simul; ergo actu infinita: hoc enim differt infinitum actu ab infinito in potentia, quod illud est totum actu simul, hoc partim actu, partim potentia, ut constat ex 3. Physic. cap. 6. Et confirmatur, nam si illa omnia, quæ simul cognoscuntur, simul essent in re, esset multitudo *categorematice* infinita; sed eadem sunt nunc in cognitione; ergo.

In contrarium vero est, quia licet omnia illa simul sint cognita, tamen non aliter sunt infinita, quam in re esse possint, quia cognitio accommodatur rebus ipsis, sed in re non possunt esse, nisi *syncategorematice* infinita, quia non potest tota illa multitudo in re existere simul. Unde nihil referre videtur, quod in cognitione sint simul, si in re tantum fieri possunt successive, quia modus cognoscendi non variat modum quantitatis ipsius rei, nec res habet magnitudinem, aut multitudinem suam, atque adeo, quod sit finita aut infinita hoc vel illo modo, ex ordine ad cognitionem, quæ illi extrinseca est, sed in ordine ad existentiam, quam juxta naturam suam habere potest. Nec videtur recte dici posse, illa esse infinita *categorematice* in esse cognito, & a parte rei esse infinita *syncategorematice*, quia non habet res aliam quantitatem in esse cognito, quam a parte rei, alias non esset vera cognitio. Et confirmatur, quia Deus ipse non videt aliud infinitum, quam sit possibile, vel futurum; sed non est possibile aut futurum infinitum *categorematice*, sed *syncategorematice*; ergo. D. Thom. in hoc nihil aperte dicit, tamen ejus discipuli videntur frequentius loqui priori modo. Gabriel autem, Almain. & alii in 3. distin. 4. magis eligunt posteriorem modum, quos sequitur Viguer. in institut. cap. 20. §. 2. vers. 1.

Sed in re non videtur esse posse magna diversitas, nam omnes conveniunt in his. Primo, illa, quæ videntur, non esse in certo aliquo numero finito, nec posse pervenire in finem eorum, numerando unum post aliud. Secundo, illa omnia simul cognosci, & ita esse simul aliquo modo, scilicet, objective. Tertio, totam illam collectionem non posse actu poni in re. Quibus positis, fere de modo loquendi videtur controversia.

**Respon.** Mihi tamen placet posterior modus loquendi, quia illa multitudo, quamvis simul cognita, talem habitudinem habet ad suam existentiam, ut ex intrinseca natura sua petat, non posse exauriri, cum sit: unde in sua intrinseca ratione includit hanc veluti potentialitatem, ut semper, scilicet, aliquid illius restet efficiendum. Et in hac potentialitate consistit ratio infiniti *syncategorematice*: sicut quamvis tempus totum simul cognoscatur, ipsum tamen etiam cognitum, ens successivum est, quia talem habitudinem habet ad existentiam, ut non possit totum simul existere, sed pars post partem: similis enim ratio est de hoc infinito in potentia, includit enim in conceptu suo successionem quandam in existentia, seu productione suæ: & hoc modo salvantur facile multa, quæ tractari solent de infinito, ut est in cognitione divina. De quibus agitur 1. part. quæst. 7. 14. & 25.

Supererat hoc loco tractandum, an Christi anima videat in Verbo futura contingentia conditionata, id est, quæ posita aliqua conditione futura essent, licet de facto absolute futura non sint, quia conditio non est ponenda. Sed hæc quæstio non habet specialem difficultatem, hujus loci propriam. Nam supponendo, quod verissimum est, Deum habere hanc scientiam certam horum futurorum, dubium non est, quin potuerit illam Christi animæ communicare in visione beata, quia non est major difficultas in hac scientia, quam in qualibet alia scientia

creaturarum in Verbo. Quin potius in Matth. 2. satis constat, Christi animam hanc scientiam habere. Sicut autem anima Christi non videt de facto in Deo omnia possibilia, ita necesse non est, ut hæc conditionata omnia, & in omnibus rebus cognoscat, sed ea tantum quæ; juxta divinæ sapientiæ rationem, & mensuram, videre expediens fuit, & ad Christi dignitatem, & munera fuit conveniens.

## QUÆSTIO XI.

De scientia indita, vel infusa animæ Christi, in sex articulos divisa.

**D**Einde considerandum est de scientia indita vel infusa anime Christi. Et circa hoc querantur sex. Primo, utrum secundum hanc scientiam Christus sciat omnia.

Secundo, utrum hac scientia uti potuerit, non convertendo se ad phantasmata.

Tertio, utrum hac scientia fuerit collativa.

Quarto, de comparatione hujus scientiæ ad scientiam Angelicam.

Quinto, utrum fuerit scientia habitualis.

Sexto, utrum fuerit distincta per diversos habitus.

## ARTICULUS I.

Utrum secundum scientiam inditam vel infusam Christus omnia sciat.

**A**d primum sic proceditur. Videtur, quod secundum hanc scientiam Christus non cognoverit omnia. Hec enim scientia indita est Christo ad perfectionem possibilis intellectus ejus. Sed intellectus possibilis anime humane non videtur esse in potentia ad omnia simpliciter, sed ad illa sola, in quæ potest reduci in actum per intellectum agentem, qui est proprium activum ipsius, quæ quidem sunt cognoscibilia secundum rationem naturalem. Ergo secundum hanc sententiam non cognovit Christus ea, quæ naturalem rationem excedunt.

2. Præterea. Phantasmata se habent ad intellectum humanum, sicut colores ad visum: ut dicitur tertio de Anima. Sed non pertinet ad perfectionem visus potentie, cognoscere ea, quæ sunt omnino absque colore. Ergo neque ad perfectionem intellectus humani pertinet, cognoscere ea, quorum non possunt esse phantasmata, sicut sunt substantiæ separate. Sic ergo, cum hujusmodi scientia fuerit in Christo ad perfectionem anime intellectivæ ipsius, videtur, quod per hujusmodi scientiam non cognoverit substantias separatas.

3. Præterea. Ad perfectionem intellectus non pertinet, cognoscere singularia. Videtur ergo, quod per hujusmodi scientiam anima Christi singularia non cognoverit.

Sed contra est, quod dicitur Isai. 11. quod replevit eum Spiritus sapientiæ & intellectus, scientiæ & consilii. Sub quibus comprehenduntur omnia cognoscibilia: nam ad sapientiam pertinet cognitio omnium divinarum: ad intellectum autem pertinet cognitio omnium immaterialium: ad scientiam autem pertinet cognitio omnium conclusivorum: ad consilium autem cognitio omnium agibilium. Ergo videtur, quod Christus secundum scientiam inditam sibi per spiritum sanctum, habuerit omnium cognitionem.

Respondeo dicendum, quod, sicut prius dictum est, conveniens fuit, ut anima Christi omnino esset perfecta per hoc, quod omnis ejus potentialitas sit reducta ad actum. Est autem considerandum, quod in anima humana, sicut in qualibet creatura, consideratur duplex potentia passiva. Una quidem per comparationem ad agens naturale. Alia vero per comparationem ad agens primum, quod potest quamlibet creaturam reducere in actum aliquem altiore actu in quem reducitur per agens naturale: & hæc consuevit vocari potentia obedientiæ in creatura. Utraq; autem potentia anime Christi fuit reducta in actum, secundum hanc scientiam divinitus inditam. Et ideo secundum eam anima Christi primo quidem cognovit, quæcumque ab homine cognosci possunt per virtutem luminis intellectus agentis: sicut sunt quæcumque pertinent ad scientias humanas. Secundo vero per hanc scientiam cognovit Christus omnia illa, quæ per revelationem divi-

72.  
Infr. q. 12.  
art. 2. c. &  
ad 3. & 3.  
d. 14. art. 1.  
q. 1. & q. 4.  
c. & q. 5. ad  
2. & vers.  
q. 20. art. 6  
& opus. 3  
cap. 223.

Ex lib. 3.  
text. 3. 18.  
& 39. 80. 2

q. 9. art. 1.

Anima  
Christi  
non videt  
infinita  
categorema-  
tice.



nam hominibus innotescunt, siue pertineant ad donum sapientie, siue ad donum prophetie, siue ad quodcumque donum Spiritus sancti. Omnia enim ista abundantius & plenius ceteris, cognovit anima Christi. Ipsam tamen Dei essentiam per hanc scientiam non cognovit, sed solum per q. preced.

q. praed. *primam, de qua supra dictum est.* \*  
 Ad primum ergo dicendum, quod ratio illa procedit de  
 potentia naturali animae intellectivae, quae, scilicet, est  
 per comparationem ad agens naturale, quod est intelle-  
 ctus agens.

*Ad secundum dicendum, quod humana anima in statu  
hujus vite, quia quodammodo est ad corpus obligata, ut si-  
ne phantasmate intelligere non possit, non potest intelli-  
gere substantias separatas. Sed post statum hujus vite  
anima separata poterit aliqualiter substantias separatas  
per seipsam cognoscere, ut in prima parte dictum est.\* Et  
hoc precipue manifestum est, circa animas Beatorum. Chri-  
stus autem ante passionem non solum fuit viator, sed etiam  
comprehensor, unde anima eius poterat cognoscere substan-  
tias separatas per modum, quo cognoscit anima separata.*

*Ad tertium dicendum, quod cognitio singularium non pertinet ad perfectionem animae intellectivae secundum cognitionem speculativam. Pertinet tamen ad perfectionem eius secundum cognitionem practicam, quae non perficitur absque cognitione singularium, in quibus est operatio: ut dicitur in 6. Ethic. \* Unde ad prudentiam requiritur memoria praeitorum, cognitio praesentium, & providentia futurorum, ut Tullius dicit in sua Rethorica. \**

Quia igitur Christus habuit plenitudinem prudentie secundum donum consilii, consequens est, quod cognoverit omnia singularia praesentia, praeterita & futura.

**H**ic articulus explicandus est diffuse disputatione sequenti: & ideo circa literæ expositionem nihil notare oportet, commodius enim mens D. Thom. simul cum re ipsa explicabitur.

## DISPUTATIO XXVII.

In quinque Sectiones distributa,

*De objecto scientiæ infusæ animæ Christi.*

**D**E hac scientia tria consideranda occurrunt, quæ ad exactam cuiuslibet scientiæ cognitionem necessaria sunt, scilicet, objectum, actus, & habitus; de quibus D. Thom. in discursu quæst. disputat; prius vero de objecto tractat, quoniam ab illo ratio seu species actus, & habitus sumi solet. Duplex vero distinguitur objectum scientiæ, materiale, & formale: materiale dicitur illa, de qua scientia tractat; formale vero est ratio, sub qua talis res a scientia consideratur, quæ sæpius sumitur ex parte medii, vel luminis, sub quo talis scientia versatur. In hac ergo disputatione præsertim agimus de materiali objecto, seu de rebus, quas anima Christi per hanc scientiam cognovit: de objecto enim formali nihil dicendum occurrit, præter ea, quæ de speciebus intelligibilibus, & lumine inferius dicemus.

S E C T I O N I.

Utrum res pertinentes ad ordinem naturæ  
cognoscantur per hanc scientiam infusam.

**R**atio dubitandi esse potest, quia hujusmodi res sunt objectum scientiæ naturalis, siue illa acquisita sit, siue infusa per accidens. Sed hæc scientia infusa est altioris ordinis; ergo non versatur circa has res inferiores, sed circa res tantum ordinis superioris. Et confirmatur; quia ejusdem objecti sufficit una scientia in proprio genere; sed harum rerum naturalium habuit Christus scientiam propriam, & connaturalem; ergo.

Propter hæc est prima sententia, negans, hujusmodi res contineri sub objecto scientiæ per se infusæ: quam tenet aperte Scotus d. 14. q. 3. & Durand. q. 3. & 4. nam licet affirmant, animam Christi cognovisse res naturales per scientiam infusam, docent tamen, illam esse ejusdem rationis cum acquisita, solumque differre per ordinem ad causas efficientes; sicut visus comparatus per naturalem generationem, vel per miraculum repositus. Unde infert Scotus, quem Gabr. & alii sequuntur, sub hac scientiam non cadere singularia omnia, quia illa possunt in in-

finis procedere: unde oportuiffet habere infinitas species intelligibiles fimul infufas, quia unumquodque fingulare per propriam speciem cognofcitur naturali cognitione: & hoc ex parte fentit D. Thom. d. 14. q. 1. art. 3. q. 1. & q. 20. de verit. art. 6. Secundo inferit Scot. non poffe per hanc fcientiam cognofci res exiftentes, ut fic: quia species infufa indifferenter repræfentat rem exiftentem, & non exiftentem; non ergo poteft effe principium cognofcendi, feu intuendi rem exiftentem.

Dico tamen primo, animam Christi per hanc scientiam cognovisse omnes res naturales, quas Angeli cognoscunt per species inditas, unde res illæ sub objecto hujus scientiæ comprehenduntur. Hæc est sententia D. Thom. hic, & fere omnium, qui admittunt hanc scientiam per se infusam, quos disput. 2. 5. sect. 3. citavi. Congruentia esse potest; quia decebat, animam Christi, non solum in Verbo, sed etiam in proprio genere, altiori modo cognoscere res omnes naturales, quam ipsos Angelos; si autem solum per scientiam acquisitam, seu infusam per accidens, illa cognovisset, sine dubio imperfectiorem scientiam illorum habuisset, quia illa scientia non transgrederetur perfectionem scientiæ, quæ per vires naturales humani ingenii acquiri potest: hæc autem, quantumvis perfecta sit in sua specie, inferior est naturali scientia Angelica, sicut intellectus naturalis Christi, minus perfectus est omni intellectu Angelico; ergo. Ratio vero propria, & quasi physica est, quia licet lumen inferioris ordinis terminetur ad res inferiores, nec possit ad superiora extendi, quia perfectionem ejus superant, tamen lumen superioris ordinis, non solum superiora, sed etiam inferiora, sub objecto suo complexi potest, quia virtus, quo superior, eo universalior, & quia inferiora non excedunt virtutem superioris, & possunt nobiliori modo attingi: exemplum est in intellectu, & sensu; ergo lumen scientiæ infusæ, quod est ordinis superioris (ut infra dicetur), potest sub objecto suo, non solum res supernaturales, sed etiam naturales comprehendere, attingendo has nobiliori modo.

Et hinc facile dissolvitur fundamentum Scoti & Durandi, qui ex eo solum, quod objectum materiale idem est, inferunt, scientiam ejus, esse ejusdem rationis; quæ consecutio nullius momenti est; potest enim eadem res cognosci altiori, & inferiori modo sub diversis luminibus, sicut ab intellectu Angelico, & humano, cognoscitur eadem res per scientias specie differentes, nam eodem modo cognosci potest ab humano intellectu per scientiam humanam, & divinitus infusam. Unde falsum est, quod dicunt, hanc scientiam infusam animæ Christi, prout versatur circa res naturales, tantum differre ab acquisita, sicut visus datus vel congenitus a natura, vel per miraculum constitutus, quia visus est idem in objecto formali, & modo attingendi illud, & ille modus productionis per miraculum est accidentarius illi: at vero hæc scientiæ differunt in modo attingendi objectum, qui transit in objectum formale, unde etiam differunt in naturali modo productionis. Hæc enim scientia natura sua postulat fieri per infusionem; scientia autem naturalis, vel acquisita, minime: quæ differentia arguit in ipsis scientiis diversitatem specificam, ut per se constat.

Et hinc obiter inferitur, sine causa Scotus supra d. 14. q. 4. dubitare, an Christus per hanc scientiam perfectius cognoscat has res naturales cognitione abstractiva, quā Angeli simili cognitione, Nam si species (inquit) intelligibiles infusæ Christo ad cognoscendas has res, sunt minus perfectæ, quam species Angelicæ, minus etiam perfecta erit cognitio animæ Christi: si autem illæ species sunt multo perfectiores, adeo ut magis superent in perfectione species Angelicas, quam intellectus Angelicus superet intellectum humanum, hoc posito, poterit cognitio animæ Christi esse perfectior, quia quod deest perfectioni in naturali lumine intellectus Christi, compensari potest ex perfectione speciei. Sed in primis non consequenter loquitur, quia, si hæc scientia, ut versatur circa res naturales, est tantum per acciden infusa, dubitari non potest, quin species cum illa infusæ sint minus perfectæ, quam angelicæ, ut probatum est, quia essent inferioris ordinis, & commensuratæ naturali perfectioni ingenii humani. Si autem admittit esse posse in intellectu humano species intelligibiles rerum naturalium per se infusas, & superioris ordinis, quam sint species connaturales homini, vel Angelo (ut re vera possibile est), sicut



ratione facta declaratum est, neque esse potest ulla ratio, ob quam hoc videri debeat impossibile: si hoc, inquam, admittit, necesse est, ut admittat etiam scientiam per se infusam rerum naturalium perfectiorem Angelicam, & possibilem intellectui humano: hæc enim duo vel idem sunt, vel ita necessario conjuncta, ut proportionem debitam servant, ut disput. 29. dicitur. Non est ergo, cur dubitet hanc esse datam animæ Christi, cum tota hæc perfectio debita sit illi animæ ratione unionis, neque enim decebat in hoc superari ab Angelis, neque æquari. Unde hæc scientia, prout data est animæ Christi, non procedebat a Deo, ut auctore naturæ, sicut scientia naturalis Angelorum, sed ut auctore gratiæ, & beatitudinis, & quodammodo ut ab auctore unionis hypostaticæ, nam infundit illam, ut proprietatem consequentem unionem, & tamquam ornamentum ejus, & ideo perfectiorem, quam sit omnis scientia naturalis Angelica, vel humana, ut recte etiam notavit Richard. 3. d. 14. art. 4. q. 4. & sumitur ex D. Thom. hic art. 4. Neque refert, quod intellectus Christi sit naturaliter minus perfectus, quam angelicus, quia hæc scientia non infunditur juxta capacitatem naturalem, sed obedientialem, & ita usus ejus non commensuratur naturali perfectioni, sed divinæ elevationi.

Dico secundo, cognovisse Christum per hanc scientiam singularia, etiam intuendo eorum existentias. Et intelligitur conclusio tam de rebus materialibus, quam immaterialibus, & tam de accidentibus, quam de substantiis, & eam tenent D. Thom. hic Capreol. in 3. d. 14. q. 1. art. 3. Durand. q. 3. Marfil. q. 10. art. 2. & alii auctores, qui tenent præcedentem conclusionem: sequitur enim manifeste ex illa. Primo, quia Angeli per suam scientiam inditam hæc omnia cognoscunt, & intuentur; non fuit autem anima Christi inferior Angelis in aliqua perfectione ad scientiam infusam pertinente. Secundo, quia lumen superius hæc omnia sub se complectitur, & illi respondent species infusæ repræsentantes hæc omnia. Tercio addit hic D. Thom. optimam rationem in solutione ad tertium, quia cognoscere singularia pertinet ad perfectionem prudentiæ: Christi autem anima habuit perfectam prudentiam. Nec dici potest habuisse illam tantum per scientiam beatam, quia sicut præter illam visionem habere debuit perfectam cognitionem speculativam in proprio genere rerum omnium: ita debuit etiam habere perfectam cognitionem practicam, atque adeo perfectam prudentiam quasi in proprio genere.

**Objeçtio.** Sed ait Scotus, ad prudentiam perfectam necessarium esse, & sufficere, cognoscere singularia agibilia, non vero omnia singularia naturalia, quorum plurima nihil ad humanas actiones pertinent. Respondetur illo argumento in primis satis ostendi cognoscere Christum per hanc scientiam aliqua singularia, tam existentia, quam futura, vel præsentia, quorum cognitio ad prudentiam necessaria est. Et hinc colligimus, etiam ad omnia singularia se extendere scientiam hanc, quia saltem aliis titulis est debita Christo eorum cognitio, & non repugnat haberi per hanc scientiam. Unde dicitur secundo, Christum non tantum habuisse prudentiam perfectam commensuratam humanæ potestati, & facultati naturali, sed commensuratam potestati excellentiæ, & supremo dominio, quod habuit in humanitate sua ratione unionis, nam omnia subiecta sunt ei, ut dicitur 1. ad Corinth. 15. & ad Hebr. 2. omniumque potestas ei data est, Matth. ultim. Et ideo, sicut uti potuit rebus omnibus naturalibus, ita prudentiam habuit, quæ ad usum omnium se extendere, quæ dici potest monarchica & regalis; & ideo omnium singularium etiam naturalium cognitionem habere debuit.

Et ex hac conclusione colligitur (sicut in præcedenti diximus) cognovisse Christum hæc singularia altiori modo, & sub altiori lumine, quam possint naturaliter cognosci ab homine, vel etiam ab Angelo. Videt enim per hanc scientiam non solum singularia materialia, sed etiam ipsos Angelos, clare & perfecte comprehendendo eorum naturas, & intuendo eorum existentias melius, quam ab anima separata, vel ab ipsis Angelis cognoscantur: quæ omnia eisdem rationibus, & conjecturis ostenduntur. Quod vero Scotus supra dicta q. 4. objicit, non posse cognitionem intuitivam harum rerum quoad existentias earum pertinere ad scientiam per se infusam, atque adeo neque esse perfectiorem in anima Christi, quam in

Angelis, quia hæc cognitio sit immediate ex præsentia objecti concurrente intellectu sua propria virtute; hæc, inquam, objectio supponit falsum fundamentum, scilicet, cognitionem intuitivam non fieri mediante specie, quod falsum est, ut in sensibus etiam externis patet. Et deinde etiam si species non esset necessaria ex parte luminis infusi, posset intellectus Christi altiori modo intueri hæc ipsa objecta præsentia per hanc scientiam, quam posset homo, vel Angelus per naturale lumen: hoc igitur modo possunt hæc res singulares, etiam in ordine ad cognitionem intuitivam, ad objectum hujus scientiæ pertinere. Ad rationem ergo dubitandi in principio positam negatur consequentia; quia lumen, seu scientia superioris ordinis potest habere universale objectum, quod non solum res superiores, sed etiam inferiores complectatur. Ad confirmationem negatur, sufficere animæ Christi scientiam harum rerum connaturalem animæ humanæ, quia illa est imperfecta, & ideo habere debuit aliam altioris ordinis.

Ad fundamentum vero Scoti quoad primam ejus partem respondetur primo, non oportuisse, ut de singulis individuis haberet singulas species intelligibiles, hoc enim, ad sumum, habet locum in scientia naturali suo genere acquisita: at vero species infusa potest una repræsentare & totam specificam naturam, & omnia ejus individua, ut bene Cajetan. hic, & art. 6. Deinde individua substantialia futura, finita sunt, & per speciem perfectam unius individui possunt cognosci ab anima Christi accidentia ejus, ut, verbi gratia, per speciem unius Angeli omnes cognitiones ejus, licet in infinitum multiplicentur. Quod si fortasse potuit Christus cognoscere per hanc scientiam omnia individua substantialia contenta in potentia creaturæ, etiam si nunquam futura sint, illa cognoscere potuit per species causarum, quas comprehendebat, & ita potuit per species finitas cognoscere omnia individua etiam infinita. Quoad alteram vero partem respondetur, speciem infusam posse dici indifferentem ad repræsentandum, rem esse vel non esse, non negative, scilicet, quia neutrum repræsentare potest: sed positive, quia potest esse principium cognoscendi utrumque in objecto, juxta illius statum, seu exigentiam: quia, quando res existit, potest intellectus per speciem repræsentantem illam, & quidquid in illa est, & ad ipsam converti & illam intueri, prout in se est actu existens, & secundum omnes conditiones existentia, quod est, illam intueri.

## SECTIO II.

*Utrum actus liberi, & contingentia futura cadant sub objecto hujus scientiæ.*

**P**Ræter res naturales sunt in rebus creatis duo ordines rerum, quæ neque ab homine, neque ab Angelo possunt naturaliter cognosci, scilicet, actus liberi, & mysteria gratiæ: de quibus consequenter dicendum est, quomodo sub hanc scientiam cadant. Actus vero liberi, de quibus est præfens quæstio, considerari possunt, vel ut præfentes, vel ut futuri, vel ut præteriti: nam si tantum considerentur ut possibiles, pertinent potius ad ordinem rerum naturalium, quatenus ut sic habent necessarium ordinem cum ipsa potentia: loquimur enim de actibus connaturalibus ipsi potentia: eadem vero erit ratio de supernaturalibus, si ad potentiam elevatam comparentur. Hi ergo actus, ut præfentes, dici solent cogitationes cordium: cum enim in quæstionem versitur, an aliquis possit cognoscere cogitationes cordium, sub hac voce comprehenduntur omnes actus liberi intellectus & voluntatis actu existentes. Ut futuri vero, dicuntur futura contingentia, nam propriissima contingentia futurorum ex his actibus pendet; reliqua enim futura, quæ ex vario concursu rerum naturalium contingentiam habent, licet respectu unius causæ proximæ contingentia sint, tamen respectu totius ordinis causarum naturalium necessario eveniunt, & ita dubium non est, quin anima Christi illa cognoverit per hanc scientiam, quia simpliciter pertinent ad ordinem rerum naturalium: de præteritis actibus liberis nihil dici solet, pauca tamen in fine subjiciam.

De actibus ergo liberis, & præsertim de futuris, est quædam sententia negans, animam Christi cognoscere illos

Respon.

Responsio ad argum. menta.



illos per hanc scientiam, & consequenter illos pertinere ad objectum hujus scientiæ. Ita sentit D. Thom. in 3. d. 14. q. unic. art. 3. & clarius q. 20. de verit. art. 6. Quod solet ex illis testimoniis Scripturæ probari, quibus dicitur, cognitionem harum rerum esse propriam Dei; ut est illud Isai. 14. *Annunciate nobis futura, & dicemus, quia Dilectis vos*: unde neque Angeli per species infusas hæc cognoscere possunt. Sed difficilior fundamentum hujus scientiæ infra tractabitur, hoc enim constat nullius esse momenti: quia licet sit proprium Dei hæc cognoscere propria, & naturali scientia, tamen certum est, per lumen, & scientiam supernaturalem posse a creatura cognosci: aliàs neque per scientiam beatam cognovisset hæc omnia anima Christi, neque per lumen prophetici cognosci possent. Unde nullum etiam sumitur argumentum ex naturali scientia Angelorum, quia lumen, & species hujus scientiæ per se infusæ superioris ordinis sunt.

Dico ergo primo. Anima Christi cognovit per hanc scientiam cogitationes cordium, seu actus liberos existentes. Hæc est sententia D. Thom. hic, & omnium Thomistarum, quem communiter sequuntur Theologi in 3. d. 14. & potest ex Scriptura, & Patribus probabiliter colligi: constat enim, Christum hominem revelasse hominibus has cogitationes; cognoscebat ergo illas: & quamvis referri possit hæc cognitio ad scientiam beatam, convenienter tamen tribuitur etiam infusæ, quia hæc etiam scientia in suo ordine perfecta fuit, & Christus, non tantum ut beatus, sed etiam ut viator, fuit perfectissime dispositus ad docendam, & confirmandam fidem: unum autem testimonium, quo illa confirmavit, fuit revelatio cogitationum cordium. Et confirmatur, quia hæc cogitatio cogitationum cordium maxime spectat ad dignitatem Christi, & ad munus supremi Judicis, qui de his cogitationibus potissimum judicaturus est: unde non dicebat, quod in perfecta illarum cogitatione, & intuitione ab ipsius cogitantis voluntate, seu locutione penderet, etiam quoad scientiam, & cognitionem harum rerum in proprio genere. Denique in cognitione istorum actuum jam existentium fere nulla est difficultas, quia cum actu existant, de se jam habent sufficiens fundamentum, & intuitive videri possunt, si ex parte cognoscentis sit sufficiens principium: sed hoc facile dari potuit animæ Christi per lumen intellectuale, & species intelligibiles perfecte representantes hos actus, prout in se sunt.

**Obj. 1o.** Dices. Hi actus occultari possunt ab operante per solam voluntatem liberam, seu quamdiu per illam non manifestantur, hæc enim ratione occultantur Angelis, etiam si habeant species lumenque sufficiens ad illos cognoscendos. Respondetur primum, fortasse non esse verum, per solam voluntatem posse hos actus occultari, vel revelari, nisi quatenus ab hac voluntate pendet spiritalis locutio, quæ non fit sine impressione alicujus, vel speciei, vel modi, seu immutationis factæ in aliqua specie intelligibili ejus, ad quem ordinatur locutio, qua immutatione indigent Angeli, ut possint hos actus cognoscere, non tamen anima Christi. Deinde, quamvis sola voluntas agentis liberi posset occultare hos actus respectu luminis seu cognitionis naturalis, non vero respectu luminis divinitus infusi, per quod participatur vis quædam divina ad intuendos hos actus, sine dependentia a voluntate ipsius operantis.

Dico secundo. Etiam cognoscit anima Christi per hanc scientiam actus liberos futuros, seu futura contingentia: ita D. Thom. hic ad 3. & omnes Thomistæ. Scot. d. 14. q. 3. Durand. q. 3. nu. 6. Marsil. q. 10. art. 2. Et fundamentum est idem, quod in præcedenti conclusione, & in 1. sect. variis modis explicatum est: nam si supponamus, fieri posse, ut hæc futura cognoscantur aliqua scientia infusa extra visionem ipsius divinitatis, facile probari potest, hujusmodi cognitionem debitam fuisse Christi animæ, est enim necessaria ad perfectissimam prudentiam, & providentiam. Deinde pertinet ad consummatum donum prophetiæ, atque adeo ad perfecte exercendum munus Doctoris, & ita sæpe Christus Dominus usus est hoc dono prædicendi futura.

**Dubium.** Solum ergo superest obscura difficultas circa id, quod hæc conclusio & ratio supponunt, scilicet, quomodo poterit anima Christi hæc futura cognoscere per hanc scientiam: non enim cognovit illa obscure (ut supponimus), quia non habuit fidem. Unde fit, non cognovif-

se illa per testimonium alicujus dicentis: nam omnis cognitio hujusmodi & obscura est, cum per illam non videatur res, & ad fidem pertinet, cum auctoritate alterius nitatur. Nec vero esse potuit evidens & clara cognitio: quia vel esset intuitiva, & hoc non, quia intuitiva cognitio est rei existentis: hæc autem futura ut sic nondum existunt. Quod si dicantur existere in æternitate, nihil juvat. Primum, quia actus hujus scientiæ infusæ non mensurantur æternitate, cum sint variabiles & mutabiles. Deinde, quia hæc existentia in æternitate, si intelligatur de vera & reali existentia, quæ possit fundare veram relationem realem coexistentiæ ad Deum existentem in eadem mensura æternitatis, est falsa sententia, & impossibilis, quia nulla res potest vere existere in superiori mensura, nisi ratione existentia, quam habet in propria, quid Cajetan. & alii Thomistæ opinentur: ut latius in 1. p. q. 14. ostensum est. Si vero illa existentia in æternitate intelligatur solum secundum præsentiam objectivam, sic videtur peti principium: nam rem esse objectivæ præsentem, nihil aliud est, quam cognosci, seu esse objectum cognitionis; quod idem est. Dicere ergo, hæc futura videri propter præsentiam objectivam, nihil est aliud, quam dicere, videri, quia videtur, quæ est clara petitio principii. Vel hæc cognitio esset abstractiva, & hæc etiam intelligi non potest: quia nulla veritas, quæ non sit per se nota ex terminis, potest evidenter, & abstractivè cognosci, nisi per aliquod medium, quod illam evidenter ostendat: sed hæc veritas futurorum contingentium non est per se nota ex terminis, ut constat, neque est aliquod medium, quo evidenter demonstrari possit, quia neque per causam, cum illa sit indifferens, neque per effectum, quia vel ille effectus est etiam futurus, & de illo erit eadem quæstio, vel est jam factus, & ita non potest esse proprie effectus rei futuræ, ut sic.

Hæc difficultas duobus modis expediri potest. Primus est, quem Cajetanus hic sequi videtur, hanc cognitionem futurorum contingentium esse per modum intuitivæ cognitionis, ad eum modum, quo Deus illa cognoscit: quia nulla videtur esse implicatio contradictionis, cum Deus hæc futura intueatur, quod intellectui creato participationem illius scientiæ communicet. Quod confirmari potest primo, quia per visionem beatam communicatur intellectui creato intuitiva cognitio horum futurorum, cur ergo repugnabit communicari etiā in proprio genere?

Dicunt aliqui, Deum solum cognoscere hæc futura in determinatione suæ divinæ voluntatis, & quia hæc determinatio non potest clare videri a creatura, nisi per visionem ipsius Dei; ideo non posse illi concedi claram cognitionem futurorum contingentium, nisi per claram visionem. Sed hæc responsio supponit fundamentum valde falsum: quamquam enim Deus possit nonnulla ex his futuris, quæ honesta sunt, & divinæ voluntati consentanea, sua efficaci voluntate prædefinire, eaque in illa cognoscere: tamen affirmare, hoc tantum modo posse Deum cognoscere hæc futura, vel omnia, etiam peccata, posse hoc modo cognosci, improbabile mihi videtur, & a divina sapientia, & bonitate alienum. Præsertim, quia Deus non tantum cognoscit contingentia, quæ aliquando futura sunt, sed etiam, quæ nunquam erunt, futura tamen essent, si causæ liberæ hoc vel illo modo ad operandum essent dispositæ, ut in singulari tractatu de hac re probatum est. Ubi etiam ostendi, non posse hanc scientiam in determinationem divinæ voluntatis revocari; tum, quia antecedit, secundum rationem, omnem liberam determinationem divinæ voluntatis; tum etiam, quia aliàs intelligi non potest, quomodo non esset Deus auctor omnis malæ voluntatis, & læderet libertatem voluntatis creatæ, ut latius eo loco declaratum est. Habet ergo Deus alium modum intuen- di hæc futura. Quin potius illa cognitio futurorum in determinatione suæ voluntatis, ut sic, non est intuitiva; poterit igitur participatio illius intuitionis per hanc scientiam communicari. Quod ita confirmatur, & explicatur: quia ad cognoscendum hæc futura, duo intelligimus in Deo requiri: alterum est ex parte cognoscentis, quod habeat lumen sufficiens ad perfecte comprehendendam rem, & omnes causas ejus, & quidquid potest illas, vel impedire, vel impellere ad operandum, atque adeo, ut penetrare valeat, non solum, quid talis causa agere possit, sed quid actura sit, cum quo lumine necessaria etiam est eminens representatio divinæ essen-

1. Respon.

Obj. 2o.

Respon.



essentia, quæ ratione suæ infinitæ perfectionis potest habere vim speciei intelligibilis, seu supplere vicem ejus ad repræsentandum id, quod futurum est, prout in se futurum est: alterum ad hanc cognitionem requisitum est ex parte objecti, scilicet, quod illud sit cognoscibile, seu scibile, quod habet futurum contingens, non quia jam in re actu existat in se ipso (ut supra probatum est), nec quia existat in aliqua imagine repræsentatum, tamquam in objecto, in quo cognoscatur, quia talis imago objectiva nec satis concipi potest, nisi in se habeat formaliter formam ejusdem rationis cum re repræsentata, neque per illam repræsentari possit, rem esse futuram, quamvis simplex objectum repræsentari possit, abstrahendo ab omni actuali existentia, præsentis vel futura, sicut videmus imaginem repræsentare suum exemplar. Cujus ratio esse videtur, quia rem esse futuram, nihil reale ponit in re possibili, quod sit repræsentabile per hujusmodi imaginem. Denique, si talis imago danda esset in scientia, quam Deus habet de futuris contingentibus, non esset nisi ipsamet essentia Dei: at vero in divina essentia non potest esse talis repræsentatio, quia oporteret esse aliquid in ipsa essentia, quod necessario, ac naturaliter deberet illi convenire: at vero divina essentia non repræsentat naturaliter, aliquid esse futurum (ut constat), quia quod aliquid sit futurum, pendet ex voluntate ejus, naturalis autem repræsentatio divinitatis non pendet ex voluntate ejus. Solum ergo requiritur ex parte objecti, quod res ipsa vere futura sit, nam hoc ipsum, scilicet, hanc rem esse futuram, est quædam veritas, omnis autem veritas de se cognoscibilis est ab eo, qui sufficientem vim habet cognoscendi.

Ex his autem duobus, quæ in Deo concurrunt ad hanc scientiam, id, quod tenet se ex parte objecti, de se non magis repugnat objici huic scientiæ infusæ creatæ, quam ipsi scientiæ divinæ, si alias ex parte cognoscentis, seu ipsius scientiæ, sit sufficiens virtus, quia nulla potest fingi major repugnantia: & difficultas in principio tacta quoad hoc soluta est, quia æque procedit in ipsamet scientia Dei: id autem, quod se tenet ex parte cognoscentis, videtur posse participari a Deo per species intelligibiles, & lumen supernaturaliter infusum: nam per species datas ad quandam imitationem divinæ essentia potest repræsentari res futura quoad omnes conditiones suas: per lumen vero supernaturaliter infusum potest participari illa vis divini luminis ad penetrandum, & judicandum de re cognita, non solum quid possit, sed etiam quid futura sit, per modum cujusdam simplicis intuitionis veritatis, quæ vere habeat rationem cognitionis intuitivæ, quia attingit rem ipsam futuram secundum omnes conditiones existentia tam distincte, ac perspicue, ac si esset realiter existens, quod est, habere illam objective præsentem.

Et hic modus dicendi est valde probabilis, quia licet directe probari non possit, esse possibilem creaturæ, non tamen potest satis ostendi, esse impossibilem. Quamquam (ut verum fatear) difficilis sit. Primo, quia licet Deus illo modo intueatur hæc futura, tamen hoc ipsum non capit humana mens, quomodo fiat: sed solum id credit propter infinitam vim divini intellectus, & propter singularem modum, quo se, & in se cætera omnia comprehendit; ergo satis est, si credamus, posse hunc modum videndi futura communicari creaturæ per supremam scientiam creatam, & visionem ipsius Dei, & non per aliquam inferiorem. Secundo, quia alias dici posset, etiam Angelum per species inditas, & lumen suum, posse dicto modo intueri hæc futura, quia ipsa sunt aliquo modo cognoscibilia, & ipse per species, & lumen suum participat a Deo hanc vim. Quod si respondeas, tale lumen, vel species habentes hanc vim, non posse esse connaturales angelo, hujus rei ratio quaeritur. Nam si talis repræsentatio non repugnat luminis, & speciei creatæ, extra visionem Dei, unde ostendi potest, non posse esse connaturalem angelo, Tercio, quia ad videndum dicto modo futuras determinationes causarum liberarum, oportet perfecte intueri omnia, quæ tam ex parte Dei, quam ex parte causæ proximæ, possunt, vel ad effectum concurrere; vel illum impedire, sed hæc omnia non cognoscuntur perfecte extra visionem Dei; ergo. Nihilominus tamen affirmare non possumus, illum modum esse impossibilem, quia non ostenditur repugnantia, & licet mirabilis videatur, mirabilior est divina potentia. Intelligenda tamen est hæc sententia, & limitanda, ad ea futura contingentia, quæ per se

primo pendent a creata voluntate: nam sunt aliqua, quæ specialiter pendent ex singulari, & extraordinaria gratia, quæ datur ex sola libera Dei voluntate, de quibus est specialis ratio. Nam cum tales effectus sint indifferentes ex se, non tantum respectu voluntatis creatæ liberæ, sed etiam respectu voluntatis divinæ, quæ per hanc scientiam infusam, ut in se est, non cognoscitur, neque ipsi effectus possunt per eandem cognosci. Neque enim fieri potest, ut per aliquam scientiam intuitive videatur effectus contingens futurus, per quam videri non potest causa libera, & interna ejus determinatio, seu voluntas, a qua per se proxime pendet, quod talis effectus futurus sit. Quod ex his, quæ infra de cogitatione præteritorum dicentur, evidentius constabit.

Secundus modus explicandi hanc scientiam est, ut per eam solum abstractive cognoscantur hæc futura; ad hunc autem scientiæ modum, præter species repræsentantes ipsum effectum, quæ per se solæ potius ad apprehensionem serviunt, quam ad judicium, necessarium est aliquod medium, quod evidenter veritatem ostendat, ut difficultas supra tacta, in qua versamur, satis ostendit; hoc autem medium, cum non possit esse causa, vel effectus, vel aliquid aliud signum ex re ipsa sumptum, ut ibidem etiam ostensum est, necessario esse debet ipsamet revelatio divina, in se includens divinam auctoritatem, & testificationem, evidenter per lumen hujus scientiæ manifestatam, nullum enim aliud medium superest, ut ex dictis constat: quod autem hoc possibile sit, facile persuaderi potest, quia nullam involvit repugnantiam, & quia lumine prophetico sæpe hoc modo ostenduntur futura.

Sed triplex occurrit in hoc difficultas. Prima est, quia hæc cognitio videtur ad fidem pertinere, nititur enim testimonio revelantis. Nec refert, quod illud evidenter cognoscatur, quia evidentia in testificante non excludit fidem. Respondent aliqui, assensum evidentem in attestante separatim a visione esse fidem, conjunctum autem cum visione non esse fidem: sed hoc est dicere, fidem quoad substantiam, & intrinsicum modum ipsius actus esse in anima Christi, licet non quoad denominationem, quod tamen falsum est. Respondetur ergo, negando assumptum, est enim de essentia fidei infusæ, ut nitatur divina auctoritate credita, & non evidenter cognita per ipsam revelationem. Unde, quamvis fortasse fides non necessario excludat cognitionem evidentem Dei testificantis a subjecto, seu persona credente, & præsertim, quando evidentia illa est inferioris ordinis, sumpta ex aliquibus naturalibus signis, vel effectibus, tamen necessario excludit evidentiam ab ipso assensu, & medio, quo divino testimonio fidem præbet; est enim de ratione assensus fidei, ut ita sit certus, ut tamen ejus certitudo non fundetur in evidentia, sed in solo divino testimonio credito, & obscure cognito: at vero hæc cognitio scientiæ infusæ est in se evidens supernaturali claritate & evidentia, orta ex ipso lumine talis scientiæ, in qua certitudo judicii, & assensus ejus fundatur; & ideo talis cognitio non est fidei, sed perfectioris rationis supernaturalis, & dicitur scientia, quia est in se evidens, & certa.

Sed occurrit secunda difficultas, quomodo fieri possit, ut intellectus habeat supernaturalem evidentiam Dei testificantis per cognitionem, quæ non sit clara visio ipsius Dei. Respondetur. Ad hoc intelligendum duo oportet explicare: alterum est, quomodo Deus interior loquatur intellectui, non ostendendo clare, & intuitive se ipsum, neque rem, de qua loquitur; est enim hoc obscurum, cum Deus non loquatur per signa, aut verba ad placitum significantia, sed solum per conceptus intellectuales naturaliter repræsentantes: quod tamen sæpe hoc modo loquatur, dubitari non potest; per hujusmodi enim locutionis modum revelavit Angelis fidem, cum eos creavit, & fortasse etiam Adæ, & aliquibus Prophetis. Potest autem hoc ita explicari, quod Deus interior loquatur, formando in intellectu conceptum, seu actualement apprehensionem illius rei, quam manifestare vult, quod facere potest, vel dando species novas, vel movendo intellectum talibus speciebus informatum ad formandam talem rei conceptionem potius, quam aliam, ut verbi gratia, ad concipiendum Deum, ut trinum & unum, vel quippiam simile. Sed tunc oportet, alterum explicare, scilicet, quomodo cum Deus ita loquitur, possit evidentiter ostendere, se esse, qui loquitur, non manifestando clare se

2. Respon.

Quomodo futura contingentia sit objectum se etia infuse Christi.

1. Object.

Respon.

Dubium.

Respon.

Deus anime quomodo loquatur.

Evidentia Dei testificantis quomodo haberi possit.



## S E C T I O   I I I .

*Utrum res supernaturales, seu mysteria gratia  
contineantur sub objecto hujus scientia.*

**I**n hac re explicanda fere nulla est difficultas, nam propter has res cognoscendas videtur præsertim posita hæc scientia, unde illæ videntur esse quasi objectum maxime proprium, & accommodatum tali scientiæ.

Dicendum est ergo, cognovisse animam Christi per hanc scientiam quidditative, & intuitive, res creatas supernaturales in substantia, aut modo suo, per proprias earum species, & in proprio genere. Ita sentit D. Thom. hic, & Doctores in 3. d. 14. neque in hoc invenio contradicentem; & ratio est, quia istæ res sunt finitæ perfectionis; ergo possunt repræsentari, prout in se sunt, per species creatas ejusdem ordinis; ergo possunt etiam lumine finito ejusdem ordinis clare, & quidditative cognosci; ergo potuit communicari animæ Christi hujusmodi scientia harum rerum; ergo communicata est. Probatur hæc ultima consequentia. Primo, quia (ut ostensum est), decuit, ut hæc omnia perfecte cognosceret, non tantum in Verbo, sed etiam in principio genere. Secundo, quia cum ipse sit auctor gratiæ, & supernaturalium mysteriorum, debuit habere perfectam scientiam eorum. Tertio, quia lumen hujus scientiæ fuit superioris ordinis (ut supra dictum est), & habuit species intelligibiles proportionatas; ergo.

Sed obijciat primo aliquis de gratia, quæ essentialiter est participatio quædam divinæ naturæ, unde non videtur posse quidditative cognosci, nisi cognita eodem modo divina natura, quod non fit nisi per beatam visionem. Respondetur tamen, negando consequentiam, quia etiam omne ens est participatio primi entis, & omnis intellectus creatus est participatio increati intellectus, & tamen possunt in proprio genere cognosci: dicitur ergo gratia participatio divinæ naturæ, non quia ejus essentia consistat in aliqua habitudine divinæ naturæ, ut ratione illius habitudinis cognosci non possit sine clara cognitione divinæ naturæ, sed vel quia a divina natura, ut a propria causa efficiente, & exemplari procedit: vel simul etiam, quia majorem quandam similitudinem, & singularem convenientiam habet cum divina natura, quia est superioris & divini ordinis. Sicut lumen solis est participatio lucis, & tamen videri & cognosci potest, non visa luce.

Secundo tamen obijci, aut quæri potest de ipsa visione beata, quæ res est creata, & supernaturalis, & tamen videri non potest per hanc scientiam, sed solum per visionem Dei, atque adeo se ipsa: quia, cum essentialiter terminetur ad Deum, ut præsentem, non videtur posse exacte cognosci, nisi illo actu, quo simul videatur Deus. Respondetur, sermonem esse posse, vel de visionibus aliorum Beatorum, vel de propria visione ipsius animæ Christi. Primo ergo, quoad visiones aliorum, probabile mihi videtur, potuisse in proprio genere cognosci per hanc scientiam per proprias species, atque adeo per propriam cognitionem, distinctam a visione ipsius Dei. Cum enim illa visio sit qualitas creata, distincta a Deo, & in se finita, nihil repugnat in se ipsa videri, & cognosci per propriam speciem, & cognitionem, distinctam a cognitione Dei, quia licet illa visio habeat quandam habitudinem transcendentem ad Deum, non propterea necesse est videri clare Deum ad videndam hanc visionem, & habitudinem ejus: satis enim erit quasi abstractivè cognosci in illa, & per illam, Deum ipsum, cum Deus solum sit terminus quasi extrinsecus illius habitudinis.

Dices: Illa visio est similitudo Dei, & repræsentat illum; ergo, visa illa, necessarium est in illa videri Deum. Respondetur, negando consequentiam, quia illa visio non est similitudo objectiva, sed solum est ratio cognoscendi, informans intellectum: unde licet objective cognoscatur, si tamen ipsa non informat intellectum, non constituit videntem: unde non est necesse videre Deum, prout in se est, sicut potest clare videri aliqua species intelligibilis, non clare visa re, quam repræsentat: vel sicut actus charitatis, quamvis tendat in Deum, ut in se est,

Objectio.

Respon.

Respon.

2. Objectio.

Objectio.

Respon.

reseipsum: quod hoc modo intelligi potest, quia, cum Deus animæ loquitur, potest simul dare vim, & lumen supernaturale ad intuendum, & quidditative cognoscendum, quæ & qualis sit illa locutio: ex quo evidenter intelligitur, illam esse talis rationis, ut non possit esse, nisi a Deo ipso immutante intellectum. Exemplis explicari potest, primo in supernaturalibus: nam si quis evidenter videat actum, vel habitum fidei infusæ, & quidditative illum cognoscat, clare videbit, illam esse entitatem supernaturalem, quæ ab alio, quam a Deo, esse non potest. Secundo, ex rebus humanis: nam si satis perspectam habeam vocem alicujus, illa audita, evidenter intelligam, eum esse, qui loquitur, quamvis personam non videam. Sic ergo intelligitur Deus habere proprium modum loquendi, seu supernaturaliter immutandi intellectum: sicut enim proprium est Dei illabi menti, ita habere potest proprium modum loquendi illi, quo modo clare evidenter cognito, & ut facile divino lumine cognosci potest, evidenter constabit eodem lumine, Deum esse, qui loquitur, & consequenter erit evidens, ita rem se habere, sicut mente concipitur, seu auditur.

Sed tunc est tertia difficultas, quia hujusmodi cognitio imperfecta videtur, & superflua animæ Christi, quæ omnia videbat in Verbo. Quid enim attinet, per testimonium etiam evidens audire, aliquid esse futurum, quo quis clare videt, prout in se futurum est? Respondetur, hunc modum cognitionis posse dici imperfectum *negative*, id est, minus perfectum, quam sit ipsa visio intuitiva: non tamen *privative*, quia nullam majorem perfectionem excludit, & in suo genere perfectionem magnā continet, includit enim distinctam cognitionem rerum singularium, quæ futuræ sunt, & eo modo, quo futuræ sunt, & continet etiam aliquam evidentiam illius veritatis, scilicet, quod tales res futuræ sunt. At proinde non est ita imperfectus hic modus cognoscendi, ut Christo repugnet. Superflua autem erit, si prior est possibilis, nam sufficit unus modus cognoscendi hæc futura in proprio genere, ille autem erit per simplicem eorum intuitionem, si possibilis est: si autem talis intuitio non esset possibilis, vel non esset data animæ Christi, altera revelatio non esset superflua, nam talis cognitio ad plura esset utilis, scilicet, ad perfectam prudentiam, & providentiam, & alia, quæ supra dicta sunt.

Ex his, quæ de futuris dicta sunt, intelligi potest, quomodo per hanc scientiam cognoscat anima Christi res præteritas tali tempore, & modo fuisse. Dupliciter enim potest hujusmodi præteritum cognosci. Uno modo per modum memoriæ relictæ ex præcedenti cognitione. Et hic modus in præsentī difficultate primum non potest esse universalis, quia non omnia præterita actu fuerunt cognita, vel considerata ab anima Christi, quando fuerunt præsentia, quod in iis præsertim, quæ fuerunt ante, quam illa anima crearetur, est manifestissimum, & deinde hic motus memoriæ (ut ego opinor) non pertinet pure ad scientiam infusam, ut sic. Necessarium est enim, ut quis possit recordari præteritorum ex vi præcedentis cognitionis, ut ex illa aliquid in memoria relictum sit, quod sit principium illius recordationis, & quoad hoc miscetur aliquid scientiæ acquisitæ, seu experientiæ, saltem intellectualis, quamvis illud, quod per hanc memoriā acquiritur, possit esse supernaturale, si a supernaturali actu relictum sit. Alio ergo modo potest præteritum cognosci in se, vel in sua causa ex vi solius luminis, & specierum infusarum, & hoc modo existimo, eandem esse rationem in cognoscendis præteritis effectibus liberis, seu contingentibus, quæ est in futuris, & ita non minus pertinet ad donum prophetiæ hæc, quam illa. Et ratio est, quia postquā res præterit, jam non magis habet esse, quam res futura, & sicut propositio de præterito est determinate vera, quia res aliquando jam fuit, ita propositio de futuro, est etiam determinate vera, quia res aliquando erit. Cognovit ergo anima Christi hæc præterita altero ex duobus modis, quibus diximus cognovisse futura: qui facile possunt applicari, servata proportionē, & posterior videtur universalior, nam quod mundus, verbi gratia, tali die inceperit, cum ex sola Dei voluntate dependerit, non videtur posse in se intuitive videri per solam scientiam infusam, qua non videtur ipsa voluntas Dei. Et ideo, saltem in hujusmodi effectibus, videtur necessaria evidentia testificantis.



videri tamen potest, non visio Deo; idem major ratione dicendum est de habitu, vel de ipso lumine gloriæ, quod non tam proxime, & actualiter respicit Deum, sicut ipsa visio. Secundo, quoad propriam visionem ipsiusmet animæ Christi, dicendum est, non fuisse necessarium alium actum, sed per ipsummet, illum clare cognoscere & intueri, quia ille actus est perfectissimus, & maxime immaterialis, & in se ipsum reflectitur: sicut etiam non videtur ille actus per speciem intelligibilem a se distinctam, sed se ipso. Possumus tamen distinguere illum actum, vel quatenus directe terminatur ad Verbum, vel quatenus quasi concomitanter est visio sui ipsius: nam sub hac secunda ratione est cognitio sui, non in Verbo, sed in se ipso; & sub hac ratione dici potest quodam modo visio sui in proprio genere. Unde est etiam probabile, per illam visionem posse ad eundem modum videri visiones aliorum Beatorum: quia & habent inter se magnam similitudinem, & illa visio, cum sit altioris ordinis, videtur habere vim, ut per idem principium cognoscat & se ipsam, & rationem suam specificam; & reliqua individua sub illa contenta. Probabilior tamen videtur prior modus, & ad intelligendum facilior.

**Dubium.** Tertio tandem quæret aliquis de mysterio Incarnationis, an cadat etiam sub objectum hujus scientiæ, & possit per illam cognosci. Et quidem, si loquamur de mysterio, ut includit totum integrum terminum suum, sic certum est, non posse clare videri, aut scire per hanc scientiam, nam includit ipsam personam Verbi, quæ non nisi per visionem beatam videri potest. Difficultas ergo solum potest esse de modo unionis, qui est in humanitate, an possit per hanc scientiam clare videri: videtur enim non posse: tum quia est quasi actualis in existentia, & ad hæsiō humanitatis ad Verbum: non ergo videri potest nisi in Verbo; tum etiam, quia est superioris ordinis, quā gratia vel omnes res aliæ supernaturales. Nihilominus probabilius videtur, etiam hunc modum contineri sub objecto hujus scientiæ, quia simpliciter est res creata; & ideo non repugnat cognosci per scientiam in proprio genere. Deinde, quia sicut hic modus est actualis conjunctio cum Verbo, ita visio est actualis conjunctio in suo ordine cum Deo: & respectu utriusque Verbum seu Deus se habet ut terminus cujusdam habitudinis transcendentalis; ergo est eadem ratio de utroque. Denique non videtur repugnare, ut videatur clare aliquod accidens, & modus inhærentiæ ejus, non videndo clare subjectum, cui inhæret: sic ergo esse potest in proposito. Verum est tamen, hæc omnia, quæ dicuntur intrinsecam habitudinem ad Deum, prout in se est, non ita exacte & perfecte cognosci, quantum ex parte sua cognosci possunt, extra visionem clarā ipsius Dei: quia habitudo ad aliquem terminum, tanto perfectius cognoscitur, cæteris paribus, quanto & ipse terminus perfectius videtur; & ideo, licet hæc omnia videri possint, & quidditative cognosci per hanc scientiam, non tamen comprehensive. Et in hoc potest constitui differentia inter hunc modum unionis, & modum existendi, quem habet corpus Christi in Eucharistia: hic enim, cum sit quasi absolutus, & non pendens, per se loquendo, in suo esse, vel in cognitione, a divina persona tanquam a termino, potest per hanc scientiam, non solum videri, prout in se est, sed etiam comprehendi. Et ex his facile judicari potest de aliis supernaturalibus rebus, seu mysteriis creatis.

#### S E C T I O IV.

*Utrum omnes effectus possibiles divine omnipotentia cadant sub hanc scientiam.*

**P**ars negativa hujus quæstionis, quamvis non expresse dicatur, videtur tamen supponi a D. Thoma, Cajetano, & aliis hoc loco: Durando, Richardo, & aliis d. 14. Marfil. q. 10. sentiunt enim, Christum non cognovisse plura per scientiam infusam, quamper beatam; & August. ubique significat, scientiam *matutinam*, & *vesperinam* circa easdem res versari. Et probari potest, quia videtur impossibile, scientiam finitam hæc omnia possibilia actu sub se comprehendere. Primo, quia oporteret lumen talis scientiæ habere infinitum augmentum intensionis: probò, quia illud lumen non ex vi solius perfectionis specificæ & indivisibilis extenditur ad omnia illa objecta; tum,

quia est qualitas quedam indivisibilis, & remissibilis; ergo, quo fuerit perfectior, vel minus perfecta, eo poterit ad plura, vel pauciora objecta extendi; tum etiam, quia aliàs quicumque haberet lumen talis speciei, cognoscere posset hæc omnia possibilia; ergo potest dari lumen hujus scientiæ tam parvum seu remissum, ut non se extendat ad cognoscendos omnes effectus possibiles: ergo illud lumen sufficiet ad tot effectus cognoscendos, & non plures; ergo, ut se extendat ad plures, necesse est augeri seu intendi; ergo, ut extendatur ad omnes possibiles, necesse est, ut augmentum ejus in infinitum simpliciter procedat, persistendo semper intra eandem speciem scientiæ; & luminis; atque adeo, si anima Christi jam habet totum hoc lumen, necesse est, esse infinitum.

Quod si dicatur, hoc lumen, qualecumque sit, de se sufficere ad omnia hæc possibilia cognoscenda, si omnium habeat species, sicut lumen intellectus sufficit ad omnia naturalia. Contra hoc fere eodem modo objici potest, quia oportebit ad representandas omnes res possibiles, infinitas species intelligibiles infundi, quia non possunt res tam variæ, tamque diversæ, quæ non in uno aliquo objecto superiori, sed in se ipsis representantur, per unam speciem, nec per finitum numerum specierum representari. Et augetur difficultas, quia si Christus per hanc scientiam cognosceret hæc omnia, comprehenderet essentiam Dei, quandoquidem cognoscit totum ejus objectum, illudque comprehendit. Quod confirmatur, quia multi sunt effectus possibiles, qui pendunt ex sola efficacia divinæ omnipotentis, & in creaturis nihil supponunt, præter non repugnantiam, seu obedientialem potentiam.

Contrariam sententiam tueri videntur Magister, Alexander. Alenf. & alii, qui dicunt animam Christi habuisse scientiam horum omnium possibilium. Non enim hoc limitant ad scientiam beatam, & videtur multo verisimilius in hac scientia infusa: quia, quod per hanc scientiam hæc omnia cognoscantur, nullam involvit repugnantiam: non est ergo hæc perfectio animæ Christi neganda, cum alioquin consentanea videatur his, quæ in Scriptura, & Patribus dicuntur de Christo, scilicet, quod omnia cognoscat, & quod in eo sint *omnes thesauri sapientiæ, & scientiæ Dei*, & similia: & quia hoc modo tota capacitas intellectus Christi, tam naturalis, quam obedientialis, verius dicitur habere actum suum perfectum, & adæquatum. Antecedens autem ostenditur, quia in primis ex hac scientia non sequitur comprehensio Dei, seu divinæ omnipotentis, quia per hanc scientiam non videtur Deus, prout est in se: sed ad summum, per effectus suos a posteriori cognoscitur, ut sequenti sectione dicam; & ideo per hanc scientiam comprehendi non poterit. Neque etiam per visionem beatam, quia illa non perficitur in se, propter conjunctionem hujus scientiæ, sed concomitanter solum se habet, & si una perficeret aliam, potius scientia beata perficeret infusam, quam e contrario, quia hæc est inferior. Et ratio est clara, quia per hanc scientiam non videntur effectus Dei in Deo, sed in proprio genere; & ideo ex sola cognitione ipsorum effectuum non augetur visio Dei, in se; & ideo non comprehenditur. Deinde nec ad hanc scientiam requiritur infinita intensio ex parte luminis, sed ideo lumen indivisibile ex vi suæ speciei potest intelligi ad hoc sufficiens, ut bene, referendo primam opinionem, responsum est. Et confirmari potest, nam datur lumen, quod ex vi suæ speciei in quocumque gradu sufficiet ad videndum Deum, prout in se est: cur ergo non poterit dari sufficiens ad videndam collectionem omnium creaturarum possibilium, quæ ipso Deo inferior est? Item datur lumen supernaturale, quod ex vi suæ speciei sufficit ad credendum omnia revelabilia a Deo, & si de facto revelarentur omnia, per idem lumen omnia crederentur; ergo potest etiam infundi lumen scientiæ sufficiens ad omnia scibilia, quæ continentur in potentia Dei. Denique neque infinita multitudo specierum intelligibilium est ad hoc necessaria, quia potest una species intelligibilis, esse principium cognoscendi res infinitas numero, vel specie differentes sub aliquo certo genere, ut in speciebus angelicis frequentius docent Theologi; ergo cum gradus & genera rerum sint finita, poterunt per finitas species representari. Quin imo non videtur impossibile, unam solam speciem intelligibilem representare omnes creaturas possibiles, quia (ut probabilis opinio) potest



potest dari species creata repræsentans Deum, prout in se est; sed magis est repræsentare Deum, quam omnes creaturas: ergo. Adde, posse Deum sine speciebus inhærentibus, supplere per potentiam suam earum necessitatem, & efficacitatem: ergo hoc etiam modo posset elevare animam Christi ad cognitionem omnium extra Verbum.

In hac re nihil certum definire possum: fateor tamen, nullam esse efficacem, aut valde probabilem rationem, quæ ostendat, huiusmodi scientiam non posse communicari creature per lumen aliquod superioris ordinis, & per species perfectas, & valde universales, ut argumenta secundo loco facta satis probare videntur, & plane ita sentit D. Thom. q. 26. de verit. art. 5. ad 1. An vero de facto communicata sit hæc scientia animæ Christi, incertum est: placet tamen sentire, & loqui cum communiore sententia, quæ etiam D. Thom. est: præsertim inf. q. 13. art. 1. ad 2. Ratio vero non est, quia hoc sit impossibile (ut dixi), sed quia non est necessarium, neque est ullum sufficiens fundamentum ad id asserendum: & quia non oportet pluram scire per scientiam inferiorem, quam per superiorem. Ac denique, quia non omne id, quod non videtur apertam contradictionem implicare, statim tribuendum est animæ Christi, præsertim in his rebus, quæ neque ad maiorem perfectionem, nec sanctitatem multum conferunt.

## SECTIO V.

*Utrum Deus, ut trinus & unus, cadat sub  
objectum huius scientia.*

Dictum est de creaturis, superest, ut breviter de Deo ipso dicamus, de quo D. Thom. hic inquit, Christum per hanc scientiam omnia cognovisse, præter Dei essentiam: eodè fere modo loquitur Durand. in 3. d. 14. q. 3. n. 6.

Dico tamen primo, animam Christi per hanc scientiam cognovisse Deum quoad unitatem ejus, & omnia attributa essentialia, solum *scientia quia*, seu a posteriori, quatenus per creaturas cognosci possunt. Hæc conclusio est certa, & a nemine negari potest, quia per effectus Dei cognoscitur ipse Deus, tanto perfectius, quanto & effectus perfectiores sunt, & melius cognoscuntur, & comprehenduntur: sed Christum per hanc scientiam optime cognovit perfectissimos effectus Dei; ergo. Et confirmatur, nam Angeli cognoscunt Deum unum, & attributa ejus per scientiam inditam, & per effectus: ergo multo magis anima Christi per hanc scientiam. In quo est differentia notanda inter Christum, & Angelos: Deus enim considerari potest, ut auctor naturæ, & gratiæ, & ut finis naturalis, vel supernaturalis: priori modo manifestatur per naturales effectus, & ita cognoscitur ab Angelis per scientiam inditam, & connaturalem: posteriori vero modo cognosci potest per effectus supernaturales, quos Angeli per illam scientiam attingere non possunt: anima vero Christi sub utraque ratione eum cognoscit per hanc scientiam, quia lumen illius est superioris ordinis, quo non tantum naturales, sed etiam supernaturales effectus intuetur, ut ostensum est. Unde fit, cognitionem Dei, quæ Christus habuit per hanc scientiam, esse sufficientem ad amandum Deum amore infuso, & supernaturali, quia ejus cognitio simpliciter est ordinis divini, & supernaturalis. Et juxta hanc conclusionem exponendus est D. Thom. hic, negat enim cognosci Dei essentiam per hanc scientiam, quia non quidditative cognoscitur: cognitionem enim imperfectam, & a posteriori, negare non potuit, & eandem confitetur Durand. supra citato loco.

Dico secundo. Verisimilius est etiam cognoscere animam Christi per hanc scientiam mysterium Trinitatis, quantum ad, *an est*, magis tamen distincte, & expresse, quam per fidem cognoscatur. Probatur primo, quia inconveniens est, dicere, cognitionem Dei, quam Christus extra Verbum, ut viator, habuit, fuisse minus perfectam, saltem ex parte objecti, & quoad ea, quæ de Deo cognovit, quam sit nostra fides. Secundo, quia aliàs sequitur aperte, Christum ut viatorem non potuisse orare ad Patrem, quantum erat ex vi hujus scientiæ, quia ut sic non cognoscebat illum: & eadem ratione sequitur, non potuisse amare distincte tres personas divinas, ac denique sequitur, non potuisse loqui de mysterio Trinitatis, nisi utendo scientia beata, cum tamen eodem modo de hoc mysterio fuerit locutus, sicut de futuris contingentibus, & cogita-

Sharez Tom. XVI.

tionibus cordium. Tandem non est impossibile, cognoscere hoc mysterium per hanc scientiam, ut late in genere disputant Doctores in Prolog. lib. 1. sentent. præsertim Dionys. Carth. attigit etiam Cajet. 2. 2. q. 171. art. 5. Dur. d. 23. & hæc cōclusionē tenet Cajet. hic, & alii Thomistæ.

Sed difficultas est in explicando modo, quo potuit anima Christi cognoscere Trinitatem per hanc scientiam, debuit enim illa cognitio esse evidens & clara, aliàs fuisset cognitio fidei: & non potest esse cognitio intuitiva, ut constat, quia hæc est visio beata: neque etiam videtur posse esse abstractiva: quia neque per causam, quia Trinitas nullam habet: neque per effectum, quia nullus effectus procedit a Deo, ut Trinus est.

Primus modus dicendi esse potest, cognosci hanc veritatem, *Dens est trinus & unus*, solum ex vi luminis aliqujus speciei, quibus evidenter ostendatur, id esse verum per modum simplicis cognitionis, quia cognoscatur veritas, licet non videatur res ipsa in se. Hic modus dici quidem potest, & fortasse non potest ita impugnari, ut protervus aliquis convincatur: fateor tamen, me non posse concipere, quo modo id fiat, quia non potest aliqua veritas cognosci ab intellectu evidenter, nisi vel per aliquod medium, vel per tam evidentem cognitionem extremorum, ut ex vi illius simul cognoscat connexionem extremorum: hæc autem cognitio sic explicata non fit per medium aliquod, ut constat (loquor enim de medio cognito, non de ratione cognoscendi, qualis est species intelligibilis) neque per illam ita cognoscitur Deus, & Trinitas in se, ut quidditative & clare cognoscatur, prout in se est; hoc enim pertinet ad visionem beatam, quia cognitio quidditativa Dei non potest esse nisi intuitiva, quia ipsum existere est de quidditate Dei, & est per se ipsum præsens intellectui; & ideo fieri non potest, ut videatur, prout in se est actu existens, & non intuitive: & eadem ratione non potest illo simplici modo cognosci evidenter hæc veritas, & tamen cognosci abstractivè. Confirmatur & explicatur exemplo, quia non potest intelligi, ut aliquis habeat evidens judicium abstractivum de numero stellarum, nisi per aliquod medium: quomodo enim concipi potest, ut aliquis evidenter judicet, astra esse paria, non videndo ipsa in se ipsis, neque utendo aliquo medio ad illud judicium ferendum?

Secundus modus dicendi esse potest animam Christi cognoscere hoc mysterium per aliquos effectus. Sed hic rejicitur ab omnibus Theologis, ut tractatur 1. p. q. 32. quia opera Trinitatis ad extra sunt indivisa: unde procedunt a Deo, ut unus est, & Trinitas personarum, quoad illos efficiendos, se habet, quasi per accidens. Dices: Relatio creaturæ respicit creatorem ut sic: ergo Deum, ut subsistentem cum potestate creandi: sed non subsistit nisi in tribus personis: ergo respicit tres personas: ergo, comprehensa hac relatione, tres personæ cognoscuntur. Respondetur facile, primo Deum non subsistere tantum per relationes, sed etiam per suam essentiam, ut supra ostensum est. Deinde, esto subsisteret per solas relationes, tamen relatio creaturæ non terminatur formaliter ad relationes, nisi ut unum sunt in essentia, potentia, & actione creandi, & si velis, etiam ut in ratione subsistendi conveniunt, non vero ut plures sunt. Adde, relationem nunquā esse medium ad cognoscendum terminum, sed potius supponere cognitionem sui termini, ut ipsa cognosci possit. Sed de hac materia latius in proprio loco dicendum est. Solum de duobus potest esse difficultas, scilicet de visione beata, & de modo unionis, qui est in humana Christi natura, quæ diximus per hanc scientiam cognosci ab anima Christi: visio enim terminatur ad personas, & repræsentat illas, & similiter unio terminatur ad Verbum: ergo per hos effectus cognosci possunt proprietates personales. Non defunt, qui verisimile existimant, non solum ex his, sed ex omnibus supernaturalibus effectibus, gratia, charitate, & similibus, clare cognitis, posse Trinitatem cognosci; sed existimo, hanc sententiam falsam esse, & eodem modo posse prædicta ratione convinci, nisi loquatur de cognitione, quæ ad evidentiam testificantis revolvitur, ut jam explicabo. Dicendum est ergo, visionem beatam per se primo terminari ad Deum, ut sic, & consequenter ad personas, & ita, cognita ipsa visione, solum cognosci, illam esse visionem Dei, prout in se est, non tamen cognosci, quomodo Deus in se ipso sit, & videatur, præsertim quia dictum est, illam visionem non per-

B b 2 fecte

Anima  
Christi  
non ha-  
buit sci-  
entiam in-  
fusa om-  
nium cre-  
aturarum  
possibiliū

Trinitas  
objectum  
scientiæ  
infusæ  
Christi.



fecte comprehendere extra visionem Dei. Et idem dicendum est de modo unionis: nam licet in re terminetur ad solam personam Verbi, tamen, quantum est ex ratione sua, solum requirit terminum, qui sit substantia incommunicabilis: & ita ex vi cognitionis illius unionis solum confuse cognoscitur esse in Deo substantia, quæ possit terminare illam visionem, non tamen videtur, qualis sit in se, neque an sit relativa, vel absoluta.

Tertius ergo modus est, hanc cognitionem esse evidentem in testificante ex vi proprii luminis & revelationis supernaturalis, sicut diximus de futuris contingentibus. Et ad illam possunt applicari, quæ ibi dicta sunt. Duplitter vero intelligi potest hæc evidentia, primo quasi indirecte, & per revelationes aliis factas: anima enim Christi per hanc scientiam evidenter intuetur actum fidei, quo viator aliquis credit hoc mysterium; ergo evidenter videt, illum actum esse infallibilem, & fundatum in revelatione facta ab ipso Deo: & consequenter videt, objectum illius verum esse; quæ evidentia licet procedat ex cognitione alicujus effectus supernaturalis, tamen quia ille effectus supponit testimonium Dei, & ab illo sumit suam rationem & essentiam, ideo tota hæc evidentia ultimo ad testificantem revocatur. Secundo intelligi potest hæc evidentia per revelationem propriam, factam ipsi animæ Christi. Nam per species infusas concipere potest Deum trinum, & unum, imperfecto quidem modo, si cum re ipsa conferatur, perfectiori tamen, quam possit per naturales vires alicujus intellectus creati concipi: quam conceptionem, seu Dei locutionem, distincte & evidenter intuetur, & ita evidenter videt, esse a solo Deo, quæ cognitio non excludit altiore cognitionem per visionem claram: quia licet aliqua res in se videatur, potest simul videri in imagine, & uterque modus perfectionem aliquam affert; & ideo utrumque habuit anima Christi, ut dictum est.

## ARTICULUS II.

*Utrum Christus hac scientia uti potuerit, non convertendo se ad phantasmata.*

**A**d secundum sic proceditur. Videtur, quod anima Christi non potuerit intelligere secundum hanc scientiam, nisi convertendo se ad phantasmata. Quia, ut dicitur in tertio de Anima, phantasmata comparantur ad animam intellectivam humanam, sicut colores ad visum. Sed potentia visiva Christi non potuit exire in actum, nisi convertendo se ad colores. Ergo etiam neque anima intellectiva ejus potuit aliquid intelligere, nisi convertendo se ad phantasmata.

2. Præterea. Anima Christi est ejusdem nature cum animabus nostris: alioquin ipse non esset ejusdem speciei nobiscum, contra id, quod Apostolus dicit Philip. 2. quod est in similitudinem hominum factus. Sed anima nostra non potest intelligere, nisi convertendo ad phantasmata. Ergo etiam neque anima Christi.

3. Præterea. Sensus dati sunt homini, ut deserviant intellectui. Si igitur anima Christi intelligere potuit absque conversione ad phantasmata, quæ per sensus accipiuntur, sequeretur, quod sensus frustra fuissent in anima Christi, quod est inconveniens. Videtur igitur, quod anima Christi non potuerit intelligere, nisi convertendo se ad phantasmata.

Sed contra est, quod anima Christi cognovit quedam, quæ per phantasmata cognosci non possunt, scilicet substantias separatas. Potuit igitur intelligere, non convertendo se ad phantasmata.

Respondetur ad idem, quod Christus in statu ante passionem, fuit simul viator & comprehensor, ut infra magis patebit. Et præcipue quidem conditiones viatoris habuit ex parte corporis, in quantum fuit passibile: conditiones vero comprehensoris maxime habuit ex parte anime intellectivæ. Est autem hac conditio anime comprehensoris, ut nullo modo subdatur suo corpori, aut ab eo dependeat, sed totaliter ei dominetur. Unde & post resurrectionem, ex anima redundabit gloria ad corpus. Ex hoc autem anima hominis viatoris indiget ad phantasmata converti, quod est corpori obligata, & quodammodo subjecta, & ab eo dependens. Et ideo anima beata, & ante resurrectionem, & post, intelligere possunt absque conversione ad

phantasmata. Et hoc etiam oportet dicere de anima Christi, quæ plene habuit facultatem comprehensoris.

Ad primum ergo dicendum, quod similitudo illa, quam Philosophus ponit, non attenditur quantum ad omnia. Manifestum est enim, quod finis potentie visivæ est cognoscere colores: finis autem potentie intellectivæ non est cognoscere phantasmata, sed cognoscere species intelligibiles, quas apprehendit a phantasmatibus & in phantasmatibus, secundum statum præsentis vite. Est igitur similitudo, quantum ad hoc, ad quod aspicit utraque potentia, non autem quantum ad hoc, in quod utriusque potentie conditio terminatur. Nihil autem prohibet secundum diversos status, ex diversis rem aliquam ad suum finem tendere: finis tamen proprius alicujus rei semper est unus. Et ideo licet visus nihil cognoscat absque colore, intellectus tamen secundum aliquem statum potest cognoscere absque phantasmate, sed non absque specie intelligibili.

Ad secundum dicendum, quod, licet anima Christi fuerit ejusdem nature cum animabus nostris, habuit tamen aliquem statum, quem anime nostre non habent nunc in re, sed solum in spe, scilicet statum comprehensoris.

Ad tertium dicendum, quod, licet anima Christi potuerit intelligere, non convertendo se ad phantasmata, poterat tamen intelligere, se ad phantasmata convertendo. Et ideo sensus non fuerunt frustra in ipsa, præsertim cum sensus non dentur homini solum ad scientiam intellectivam, sed etiam ad necessitatem vite animalis.

## COMMENTARIUS.

**E**xpositio hujus articuli ex libris de anima supponenda est, nihil enim aliud est converti ad phantasmata, quam quod Aristot. dixit, necessarium esse intelligentem phantasmata speculari. Et hanc necessitatem negat D. Thom. habuisse animam Christi in usu hujus scientiæ, etiam dum erat in corpore mortali, quia tunc etiam erat beata; & ideo non erat subdita corpori in actionibus mentis. Addit vero D. Thom. in solutione ad tertium, potuisse animam Christi in usu hujus scientiæ converti ad phantasmata, quod infra in disputatione explicabitur.

## ARTICULUS III.

*Utrum hæc scientia fuerit collativa.*

**A**d tertium sic proceditur. Videtur, quod anima Christi hanc scientiam non habuerit per modum collationis. Dicit enim Damasc. in 3. lib. In Christo non dicimus consilium, neque electionem. Non autem remouentur hæc a Christo, nisi in quantum important collationem & discursum. Ergo videtur, quod in Christo non fuerit scientia collectiva vel discursiva.

2. Præterea. Homo indiget collatione & discursu rationis, ad inquirenda ea, quæ ignorat. Sed anima Christi cognovit omnia, ut supra dictum est. Non ergo in ea fuit scientia discursiva vel collativa.

3. Præterea. Scientia anime Christi se habuit per modum comprehensorum, qui Angelis conformantur, ut dicitur Matth. 22. Sed in Angelis non est scientia discursiva seu collativa: ut patet per Dionys. 7. cap. de Divinis nominibus. Ergo nec etiam in anima Christi fuit scientia discursiva seu collativa.

Sed contra est, quod Christus habuit animam rationalem, ut supra dictum est. Propria autem operatio anime rationalis est conferre & discurre de uno in aliud. Ergo in Christo fuit scientia discursiva vel collativa.

a. Respondeo dicendum, quod aliqua scientia potest esse discursiva vel collativa dupliciter. Uno modo quantum ad scientiæ acquisitionem: sicut accidit in nobis, qui procedimus ad cognoscendum unum per aliud, sicut effectus per causam, vel e converso. Et hoc modo scientia anime Christi non fuit discursiva vel collativa: quia hæc scientia, de qua nunc loquimur, fuit sibi divinitus indita, non per investigationem rationis acquisita. Alio modo potest dici aliqua scientia discursiva vel collativa, quantum ad usum: sicut interdum scientes, ex causis concludunt effectus, non ut de novo addiscant, sed volentes uti scientia, quam jam habent. Et hoc modo scientia anime Christi poterat esse collativa & discursiva: poterat enim ex uno aliud concludere, sicut sibi placebat. Sicut Matth. 17. Cum Dominus quævisset a Petro, a quibus reges terre tributum acciperent, a filiis suis, an ab alienis, Petro respondente, quod ab alienis, conclusit: Ergo liberi sunt filii.

Ad

73.  
Inf. 2. 4.  
fi. & q. 34.  
ar. 23. & 3.  
dist. 1. q. 1.  
art. 2. & d.  
1. q. 2. 3. c.  
q. 2. & 3. c.  
& veri. q.  
20. art. 3.  
ad 1.

q. 15. ar. 10

74.  
3. d. 14. ar.  
3. q. 3. &  
veri. q. 20.  
art. 3. ad 1.  
Lib. 3. c. 14  
non pro-  
cul a fin.  
& lib. 2.  
cap. 22.

q. p. 2. c. 1.  
art. 2.

Cap. 7. in a  
per princ.  
& med.

q. 3. art. 3.



*Ad primum ergo dicendum, quod a Christo excluditur consilium, quod est cum dubitatione, & per consequens electio, quæ in sui ratione tale consilium includit. Non autem a Christo excluditur usus consiliandi.*

*Ad secundum dicendum, quod ratio illa procedit de discursu & collatione, prout ordinatur ad scientiam acquirendam.*

*Ad tertium dicendum, quod Beati conformantur Angelis, quantum ad dona gratiarum, manet tamen differentia, quæ est secundum naturam. Et ideo uti collatione & discursu, est connaturale animabus Beatorum, non autem Angelis.*

## COMMENTARIUS.

**S**ensus quæstionis est, an cognitio huius scientiæ fiat per discursum. Et respondet D. Thom. comparatam esse hanc scientiam sine discursu, quia a Deo infusa est: tamen usum ejus potuisse esse cum discursu, ut Matt. 17. ex eo, quod reges accipiunt tributum ab alienis, & non a filiis, concludit Christus: *Ergo liberi sunt filii.* Quod sane testimonium, quo D. Thom. utitur, est quidem probabile, non tamen urgens; tum quia poterat per modum discursus explicari, quod sine discursu concipiebatur; tum etiam, quia licet discursus vocis a discursu mentis procederet, poterat ad cognitionem naturalem seu acquisitam pertinere. Ratio vero D. Thom. solum est, quia poterat anima Christi ex uno alio concludere, sicut sibi placebat. Ubi est advertendum D. Thom. solum docere in conclusione, potuisse Christum discurre per hanc scientiam, non vero indiguisse tali discursu. In solutione vero ad secundum, si attente cum argumento conferatur, videtur hoc addere. Sed exponendus videtur, juxta ea, quæ dixerat in corpore. Quid vero de re ipsa sentiendum sit, infra dicam.

## ARTICULUS IV.

*Utrum hæc scientia fuerit major scientia Angelorum.*

**A**d quartum sic proceditur. Videtur, quod huiusmodi scientia in Christo fuerit minor, quam in angelis. Perfectio enim proportionatur perfectibili. Sed anima humana secundum ordinem nature est infra naturam Angelicam. Cum igitur scientia, de qua nunc loquimur, sit indita anime Christi ad perfectionem ipsius, videtur, quod huiusmodi scientia fuerit infra scientiam, quæ perficitur natura angelica.

2 Præterea. Scientia anime Christi fuit aliquo modo collativa & discursiva, quod non potest dici de scientia angelica. Ergo scientia anime Christi fuit inferior scientia Angelorum.

3 Præterea. Quanto aliqua scientia est magis immaterialis, tanto est potior. Sed scientia Angelorum est immaterialior, quam scientia anime Christi: quia anima Christi est actus corporis, & habet conversionem ad phantasmata, quod de Angelis dici non potest. Ergo scientia Angelorum est potior, quam scientia anime Christi.

Sed contra est, quod Apostolus dicit Hebr. 2. Eum autem, qui modico, quam Angeli, minoratus est, videmus Jesum, propter passionem mortis, gloria & honore coronatum. Ex quo apparet, quod propter solam passionem mortis dicatur Christus ab Angelis minoratus: non ergo propter scientiam.

Respondet dicendum, quod scientia indita anime Christi, potest dupliciter considerari. Uno modo secundum illud, quod habuit a causa influente: alio modo secundum id, quod habuit ex subiecto recipiente. Quantum igitur ad primum scientia indita anime Christi, fuit multo excellentior, quam Angelorum scientia, & quantum ad multitudinem cognitorum, & quantum ad scientiæ certitudinem: quia lumen spiritualis gratiæ, quod est inditum anime Christi, est multo excellentius, quam lumen, quod pertinet ad naturam angelicam. Quantum autem ad secundum, scientia indita anime Christi, est infra scientiam angelicam, scilicet quantum ad modum cognoscendi, qui est naturalis anime humane, qui, scilicet, est per conversionem ad phantasmata, & per collationem & discursum. Et per hoc patet responsio ad objecta.

## COMMENTARIUS.

**T**itulus huius articuli a D. Thom. in corpore explicatur, ubi docet, hanc scientiam anime Christi, quod

ad objectum, claritatem, & certitudinem, fuisse excellentiorem scientia angelica: tamen ex parte subiecti fuisse secundum quid minus perfectam, quantum ad modum cognoscendi per conversionem ad phantasmata, & per discursum. Quæ doctrina quoad priorem partem ex dictis præcedenti disputatione satis est manifesta, & patebit amplius ex disputationibus sequentibus: quoad posteriorem vero partem est valde difficilis, ut infra videbimus disputatione sequenti.

## ARTICULUS V.

*Utrum hæc scientia fuerit habitualis.*

**A**d quintum sic proceditur. Videtur, quod in Christo non fuerit habitualis scientia. Dicitur enim, quod animam Christi decuit maxima perfectio scientiæ. Sed maior est perfectio scientiæ existentis in actu, quam existentis in potentia vel habitu. Ergo conveniens fuisse videtur, quod omnia sciret in actu. Non ergo habuit habituales scientias.

2 Præterea. Cum habitus ordinetur ad actum, frustra videtur esse habitualis scientia, quæ nunquam in actum reducitur. Cum autem Christus sciverit omnia (sicut jam dictum est) non potuisset actu omnia illa considerare, nisi post aliud cogitando: quia infinita non est enumerando pertransire. Frustra igitur fuisset in eo quorundam scientia habitualis, quod est inconveniens. Habuit ergo actuales scientias omnium quæ scivit, & non habituales.

3 Præterea. Scientia habitualis est quedam perfectio scientiæ. Perfectio autem est nobilior perfectibili. Si igitur in anima Christi fuisset aliquis habitus scientiæ creatus, sequeretur, quod aliquid creatum esset nobilius, quam anima Christi. Non igitur in anima Christi fuit scientia habitualis.

Sed contra, scientia Christi, de qua nunc loquimur, univoca fuit scientiæ nostræ, sicut anima ejus fuit unius speciei cum anima nostra. Sed scientia nostra est in genere habitus. Ergo & scientia Christi fuit habitualis.

b Respondeo dicendum, quod sicut supra dictum est, modus huius scientiæ indita anime Christi fuit conveniens ipsi subiecto recipienti: nam receptum est in recipiente per modum recipientis. Est autem hic modus connaturalis anime humane, ut quandoque sit intelligens actu, quandoque in potentia: medium autem inter puram potentiam & actum completum, est habitus: ejusdem autem generis est medium & extrema: & sic patet, quod modus connaturalis anime humane est, ut recipiat scientiam per modum habitus. Et ideo dicendum est, quod scientia indita anime Christi fuit habitualis, & poterat ea uti, quando volebat.

c Ad primum ergo dicendum, quod in anima Christi fuit duplex cognitio, & utraque suo modo perfectissima. Una quidem excedens modum nature humane, quæ, scilicet, vidit Dei essentiam, & alia in ipsa: & hæc fuit perfectissima simpliciter, & talis cognitio non fuit habitualis, sed actualis respectu omnium, quæ hoc modo cognovit. Alia autem cognitio fuit in Christo secundum modum proportionatum humane nature: prout, scilicet, cognovit res per species sibi divinitus inditas, de qua cognitione nunc loquimur. Et hæc cognitio non fuit simpliciter perfectissima, sed perfectissima in genere humane cognitionis: unde non oportuit, quod esset semper in actu.

d Ad secundum dicendum, quod habitus reducitur in actum ad imperium voluntatis, nam habitus est, quo quis agit, cum voluerit. Voluntas autem indeterminate se habet ad infinita. Nec tamen hoc est frustra, licet non in omnia actualiter tendat, dummodo tendat actualiter in id, quod convenit loco & tempore. Et ideo etiam habitus non est frustra, licet non omnia reducatur in actum, quæ habitui subjacent, dummodo reducatur in actum id, quod congruit ad debitum finem voluntatis, secundum exigentiam negotiorum & temporis.

Ad tertium dicendum, quod bonum, sicut & ens, dupliciter dicitur. Uno modo simpliciter: & sic bonum & ens dicitur substantia, quæ in suo esse & in sua bonitate subsistit. Alio modo dicitur ens & bonum secundum quid: & hoc modo dicitur ens & bonum accedens: non quia ipsum habeat esse & bonitatem, sed quia ejus subiectum est ens & bonum. Sic igitur scientia habitualis non est simpliciter melior, aut dignior, quam anima Christi, sed secundum quid, cum tota bonitas habitualis scientiæ cedat in bonitatem subiecti.



## COMMENTARIUS.

**N**omine habitus significari potest quodlibet lumen, vel species, quod est principium actus secundi. Et hoc modo non tam disputat D. Thom. quam supponit, in hac scientia dari habitum, seu aliquid, quod sit principium actus secundi, de quo principio magis disputat art. sequenti. Tribus autem modis potest infundi aliqua scientia: uno modo solum quasi transeuntem, quia, scilicet tantum durat aliquo brevi tempore, quo durat actus, & tunc non dicitur esse habitualis, quia non infunditur permanenter per modum habitus, sed per modum dispositionis. Secundo modo potest infundi scientia, & lumen ejus permanenter, ita tamen, ut semper sit in actu secundo, ut scientia beata: & hæc non tam vocatur habitualis, quam actualis. Tercio modo infunditur ita, ut maneat in operante, saltem quoad actum primum, & in voluntate ejus sit uti illa, vel cessare ab actu secundo. Et in hoc sensu tractat D. Thom. an hæc scientia infusa habitualis sit.

**6** Respondet, affirmando esse habitualement. Ratio ejus est, quia hæc scientia data est, juxta proportionem animæ humanæ; sed hic modus habitualis scientiæ est connaturalis animæ humanæ; ergo. Quam rationem magis explicans in solutione ad primum, differentiam constituit inter scientiam beatam, & hanc infusam, quod illa excedit modum humanæ naturæ, & est perfectissima simpliciter; & ideo semper est in actu secundo: hæc vero est secundum modum proportionatum humanæ naturæ, & solum est perfectissima in genere humanæ cognitionis; & ideo non oportet, ut semper sit in actu secundo.

**Dubium.** In qua doctrina statim occurrit difficultas, quia videtur D. Thom. evertere omnia, quæ de hac scientia diximus, & sentire, non esse per se, sed per accidens, infusam: nam si per se infusa est; ergo est supernaturalis, & excedens naturalem capacitatem humanæ naturæ: cur ergo dicitur dari secundum modum connaturalem humanæ naturæ? Et confirmatur, quia species & lumen hujus scientiæ non sunt connaturalia humanæ naturæ; ergo neque quoad modum existendi in actu, vel in habitu oportebit, ut sit connaturalis humanæ naturæ. Unde secundo difficile est, quod D. Thom. ait, hanc scientiam esse perfectissimam, non simpliciter, sed in genere *humana cognitionis*. Interrogo enim, quid nomine *humana cognitionis* intelligat. Si enim loquatur de cognitione connaturali ipsi homini, supponit aperte, hanc scientiam esse per accidens infusam, & falsum est, quod dicit, quia hæc scientia perfectior est omni angelica cognitione, tam naturali, quam supernaturali, excepta scientia beata: si autem per cognitionem humanam intelligit omnem cognitionem, quæ potest esse in homine, etiam supernaturaliter, hoc modo etiam scientia beata potest dici humana, & ita etiam propositio falsa erit.

**Respon.** Respondetur breviter, scientiam rerum seu creaturarum in proprio genere vocasse D. Thom. scientiam accommodatam modo cognoscendi humanæ naturæ: est enim proprium Dei cognoscere creaturas per suam essentiam, quia proprium est jus, illas omnes continere tamquam propriam omnium causam; & ideo modus cognoscendi res in Verbo dicitur singulariter a D. Thom. modus excedens conditionem naturæ humanæ: non quia non excedat etiam conditionem angelicæ naturæ, sed quia nunc de humana natura erat sermo. Dicitur ergo hæc scientia dari modo connaturali animæ humanæ, non quia non sit per se infusa, & supernaturalis, sed quia data est per infusionem specierum representantium res in proprio genere: & quia supernaturalia infundi solent, quantum fieri potest, modo accommodato naturæ, & cognitio, quæ fit per intelligibiles species, solet esse subiecta arbitrio operantis quoad usum earum in actu secundo, inde probabiliter intulit D. Thom. hanc scientiam hoc modo infusam esse animæ Christi, & ita esse habitualement, & per hoc fit satis primæ difficultati.

**c** Ad secundam vero respondetur distinguere D. Thom. scientiam humanam a scientia divina, quæ habetur per ipsammet essentiam Dei: unde cum dicit, hanc scientiam esse perfectissimam in genere cognitionis humanæ, non solum intelligit de cognitione naturali, sed de omni cognitione, quæ per species inditas fieri potest, saltem de potentia ordinaria, quidquid sit de absoluta. Unde sub hac cognitione humana comprehendit cognitionem omnium, quæ extra verbum esse potest in anima huma-

na, tam conjuncta corpori, quam separata, & tam per naturam, quam per infusionem Dei: & hoc modo scientia perfectissima in hoc genere excedere potest, non solum scientiam hominum, sed etiam angelorum. Et ita solvitur secunda difficultas, & exposita est solutio ad primum.

**d** Secundum argumentum D. Thom. est hujusmodi. Per hanc scientiam cognoscit anima Christi infinita: ergo vel simul omnia illa intelligit, vel nunquam poterit per successionem actuum illa omnia considerare. Respondet D. Thom. concedendo res cognitæ per hanc scientiam in actu primo esse infinitas, & ita nunquam posse omnes actu considerari ab anima Christi, nec simul, nec successive: neque tamen propterea superfluum esse talem primum actum, quia satis est, ut pro loco & tempore possit anima Christi actu considerare quamlibet ex illis infinitis rebus. In qua solutione difficile creditur est, nunquam posse animam Christi per actus ab hac scientia elicitos exhaustire totum materiale objectum hujus scientiæ. Melius ergo videtur solvi argumentum (ut Cajetan, hic notavit) dicendo, posse animam Christi per finitum numerum actuum, actu contemplari omnia, quæ sub hanc scientiam cadunt, etiamsi infinita sint; quia illa per finitum numerum specierum representantur, & per quamlibet speciem potest habere actum illi adequatum. Unde fit, consequenter dicendum esse potuisse interdum animam Christi actu considerare infinita per hanc scientiam sub aliquo genere, vel specie, quia alias non posset totum objectum infinita complectens, finitis actibus pertransire; hoc vero nullum est incommodum, cum talis cognitionis modus etiam angelis possibilis sit.

## DISPUTATIO XXVIII.

In duas Sectiones distributa.

## De actibus scientiæ infusæ animæ Christi.

**D**E his actibus in præcedenti disputatione tacta sunt multa, quæ hic breviter supponi possunt, videlicet, illos esse certos, & evidentes esse supernaturalis ordinis, atque adeo perfectiores, quam sint actus cunctarumque scientiarum humanarum, vel angelicarum, præter visionem beatam. Hic ergo duo tantum supersunt disputanda, quæ D. Thom. his articulis tetigit. Unum est, an hi actus sint multiplices, vel sit unus tantum, continuus vel interruptus: cum qua quæstione conjuncta est alia, an scilicet, hæc scientia, vel necessario sit, vel saltem esse semper in actu secundo. Alterum est, an actus hujus scientiæ sit per modum simplicis intelligentiæ, vel per modum compositionis, & discursus.

## SECTIO I.

Utrum anima Christi potuerit semper esse in actu secundo hujus scientiæ.

**D**ico primo: Christus Dominus non impeditur per scientiam beatam, quominus possit actum hujus scientiæ circa res easdem exercere. Hæc concl. est contra Gabrielem, qui in 3. d. 14. q. unic. art. 3. dub. 1. dixit, non posse animam Christi simul easdem res per hanc scientiam, & per beatam contemplari. Sed est sententia sine fundamento, nam inde fit, vel non cognoscere animam Christi in Verbo eas res, quas per hanc scientiam cognoscit, quod supra improbatum est: vel non posse uti hac scientia, nisi mutando, seu avertendo considerationem scientiæ beatæ, quod tamen facere, & præter naturam est illius visionis, & contra debitum ordinem esset: quis enim divinam scientiam, propter usum inferioris scientiæ, vel ad momentum, omitteret? Deinde actus harum scientiarum procedunt ex diversis virtutibus & principiis. Nam de speciebus intelligibilibus id constat: de lumine vero intellectuali est satis probabile (ut infra disputabitur), licet fortasse sit idem lumen utriusque scientiæ: tamen actus visionis est ita connaturalis illi, ut quasi naturaliter manet ab illo, actus vero per inferiores species circa creaturas sunt liberi; & ideo non repugnat, habere actum aliquem ex his inferioribus, simul cum illo superiori, sicut intellectus angelicus habet hoc modo actualement sui cognitionem veluti connaturalem, & usum liberum

Scientia beata non impedit in Christo actum scientiæ infusæ.

alicujus



alicujus speciei intelligibilis. Tandem quamvis unus & idem sit intellectus per utramque scientiam operans, tamen ad utramque potest perfecte attendere, quia non proprie naturali virtute operatur, sed divino lumine, & auxilio confortatus, & elevatus.

Dico secundo. Anima Christi potuit semper, & a principio creationis suae, esse in actuali usu & consideratione hujus scientiae, sine impedimento sensuum, vel corporis corruptibilis. Haec sumitur ex D. Thom. hic, & ostendi potest sufficienter, animam Christi a principio suae creationis, seu conceptionis, habuisse usum rationis, non tantum in visione beata, sed etiam extra illam, & statim habuisse actum meritorium, fundatum in cognitione hujus scientiae: qui modus operandi supponit independentiam a corpore & phantasia, nam in illa aetate, saltem ex naturae rei, non sunt apta organa sensuum, ut rationi deferantur. Propria vero ratio sumitur ex duplici capite: primo ex statu & perfectione animae Christi. Nam licet informaret corpus corruptibile, erat tamen beata; & ideo ita dominabatur corpori, ut in suis spiritualibus actibus ab illo non impediretur: haec enim potestas & perfectio, ad perfectionem beatitudinis animae spectat: anima autem Christi, licet caruerit illis perfectionibus status beatifici, quae ad corpus pertinent, seu repugnant cum conditione corporis possibilis, eas tamen, quae ad animam spectant, qualis est illa, de qua agimus, semper retinuit. Secundo probari potest ex parte ipsius scientiae per se infusae, quae superioris est ordinis, & ita abstracta a sensibilibus, ut ab illis per se nulla ratione pendeat, ex quo etiam fit, ut potuerit Christus uti hac scientia, sine dependentia seu conversione ad phantasmata.

**Objeſtio.** Sed objicit Durand. in 3. d. 14. q. 3. quia viator, ut sic, pendet in suis actionibus a phantasia; haec autem scientia data est Christo tamquam viatori: ergo in illius usu pendebat a phantasmatibus. Sed haec ratio nullius est momenti, primum quia licet major sit vera in homine puro viatore, non tamen in eo, qui simul est viator & comprehensor. Secundo, quamvis haec scientia dicatur data Christo ut viatori, quia erat cognitio extra Verbum, & ita magis accommodata ad actiones meritorias, tamen etiam pertinet ad quandam perfectionem & ornamentum animae beatae, & ideo habuit modum operandi consentaneum animae beatae, & per se non repugnantem rationi meriti, aut satisfactionis, quae sunt actiones viatoris. Unde dicitur tertio, interdum per divinam gratiam elevari hominem pure viatorem ad intelligendum aliquid sine phantasmatibus, ut altissima contemplatione, vel prophetica revelatione; hanc autem perfectionem, quae interdum communicatur homini viatori quasi in transitu, habuit anima Christi permanentemente quasi per modum habitus.

Addit quarto D. Thom. art. 2. ad 3. potuisse Christum uti hac scientia cum conversione ad phantasmata; quod solum potest habere locum in his objectis, quorum Christus habebat phantasmata, non vero in rebus spiritualibus, quas, prout in se sunt, cognoscebat, ut per se constat. Et hoc argumento, a cognitione harum rerum desumpto, convinci etiam potest conclusio posita. Cum contemplabatur vero res sensibiles, quarum habebat phantasmata, poterat movere & applicare phantasmata ad cogitandum de eisdem rebus modo sibi accommodato. Non video tamen, cur hoc redundet in imperfectionem hujus scientiae; quamvis hoc D. Thom. indicet art. 4. quia haec conversio non dicit ullam dependentiam talis scientiae a phantasmatibus, sed solum dicit efficaciam, & motionem quandam, quae potius spectat ad perfectionem ejus, accommodatam subjecto, in quo existit. Unde solum potest haec existimari imperfectio, quasi per extrinsecam denominationem, quia scilicet est in subjecto inferioris naturae.

Dico tertio. Verisimile est, animam Christi semper fuisse in aliquo actu secundo hujus scientiae. Probatum primo, quia hoc erat in potestate ipsius Christi, & est major perfectio, non repugnans alteri perfectioni, quia melius est, esse in actu secundo, quam tantum in primo, & ille actus secundus (ut diximus) non repugnabat visioni beatae, neque etiam repugnabat cognitioni naturali, propter eandem rationem, quia sunt actus diversorum ordinum, ex diversis principiis, & virtutibus, procedentes; ergo verisimile est, semper Christum usum fuisse hac perfectione. Et confirmatur, nam Angeli semper sunt in aliquo actu secundo; ergo multo magis anima Christi,

Suarez. Tom. XVI.

Sed objicies, nam D. Thom. hic art. 5. significat contrarium; scilicet hanc scientiam fuisse in Christo interdum tantum in actu primo, hoc enim sensu (ut diximus) vocat illam *habitualement*.

Respondeo primum, D. Thom. praesertim intendere docere, non esse quasi intrinsecum, & connaturale huic scientiae, esse in actu secundo, sicut est scientiae beatae, sed usum ejus fuisse liberum animae Christi; quod est sine dubio verum, quia actus hujus scientiae non est immutabilis natura sua, neque est aliquid, quod necessitatem simpliciter imponat animae Christi, ut sit semper in actuali usu & consideratione hujus scientiae: & hoc est satis, ut dicatur scientia habitualis. Et propterea etiam non dixi, esse certum, sed tantum verisimilius, animam Christi fuisse semper in actuali usu hujus scientiae, quia hoc est illi possibile, perfectius, & a voluntate illius pendens. Secundo fortasse etiam intendit D. Thomas, non esse hanc scientiam semper in eodem actu secundo, ut jam dicam.

Quaeri enim hic potest primo, quomodo haec scientia esse semper potuerit in actu secundo; an in eodem actu adaequato toti scientiae, an vero in diversis actibus inadaequatis, quasi per successionem seu transitum ab uno ad alium. Nonnulli censent probabile, potuisse animam Christi uno & eodem actu contemplari omnia objecta hujus scientiae, quod censet probabile Marfil. in 3. q. 10. art. 2. 4. part. illius, concl. 2. & 3. quia haec perfectio neque est impossibilis, nec excedit Christi meritum, seu dignitatem: & hinc fit probabile, ut in hoc actu perfectissimo, & adaequato huic scientiae, semper actu perseveret. Sed id, quod haec sententia supponit, difficile creditur est, considerata natura hujus scientiae. Et ita fere reliqui Theologi sentiunt, varios & multiplices esse actus hujus scientiae, quod non obscure colligitur ex D. Thom. his articulis, praesertim 3. & 5. & idem sentiunt Richard. & Bonav. & alii in 3. d. 14. Primo, propter rerum multitudinem diversorum generum, & ordinum, quae sub hanc scientiam cadunt, & non in aliquo primario objecto, sed per proprias species cognoscuntur. Secundo, propter varios modos cognoscendi: quaedam enim res cognoscuntur per hanc scientiam a priori, quaedam a posteriori, quaedam intuitive, aliae abstractivae, quaedam per evidentiam ipsarum rerum, quaedam fortasse per solam evidentiam in testificante: sed tanta diversitas non videtur posse cadere in unum & eundem actum. Denique fere nullus est habitus, habens plura objecta materialia, qui uno actu complectatur omnia illa. Verisimilius etiam est (ut infra dicam) species intelligibiles hujus scientiae esse plures, non unam tantum; actus autem alicujus scientiae multiplicari solent, ut minimum, juxta numerum specierum intelligibilium. Et hinc consequenter fit, animam Christi non permanere semper in uno & eodem actu hujus scientiae.

Sed tunc occurrit secunda dubitatio, an Christi anima potuerit simul elicere omnes actus hujus scientiae, seu actu considerare omnia materialia objecta ejus, licet diversis actibus: & consequenter, an in hujusmodi actuali, & veluti adaequata consideratione hujus scientiae possit semper durare: videtur enim id posse, quia ratione unionis poterat uti intellectu suo, & qualibet scientia ultra vires naturales: ergo poterat simul elicere omnes illos actus: & videtur deuisse, ut id faceret, alias multo tempore aliqua objecta hujus scientiae ignorasset. Respondeatur tamen, aliud esse loqui de potentia absoluta, & de modo operandi miraculoso, & praeternaturali huic scientiae, aliud vero de modo illi connaturali: priori enim modo poterat anima Christi elevari ad eliciendos simul plures actus, non solum hujus scientiae, sed etiam inferioris: tamen posteriori, seu connaturali modo, non poterat per hanc scientiam habere, nisi unum actum adaequatum uni speciei intelligibili, quia hujusmodi species semper infunduntur proportionatae, & adaequatae virtuti intelligendi, quae finita est, ut ex materia de angelis latius constat: verisimilius autem est, Christum usum esse hac scientia modo connaturali: quia, cum per scientiam beatam omnia actu consideraret, non oportuit in hoc, extraordinario miraculo uti; & ideo probabilius est, vel non semper, vel fortasse nunquam, actu & simul considerasse omnia objecta hujus scientiae, quod plane sentit D. Thom. hic art. 5. ad 3. & tenet Durand. in 3. dist. 14. quaest. 3. Neque enim propterea ignorasse aliquid dici potest; non enim ignorat, qui habitualement scientiam habet,

B b 4 & suo

Scientia  
infusa  
Christi  
independens  
a  
phantasmatibus.

Objeſtio.

Respon.

Dubium.

Quomodo  
Christus  
semper  
fuerit in  
actu  
secundo  
scientiae  
infusae.

Dubium.

Respon.



& suo arbitrio uti illa potest ad considerandum id, quod voluerit, quamvis non semper omnia actu consideret, ita vero erat disposita anima Christi: unde concluditur, animam Christi fuisse semper in actu secundo hujus scientiæ, per successionem seu transitum ab uno actu ad alium, angelorum more.

**Dubium 3** Et hinc obiter expeditur aliud dubium, an, scilicet, anima Christi per hanc scientiam potuerit simul actu multa cognoscere. Quidam enim, vel simpliciter negant, ut Richard. d. 24. art. 4. q. 1. vel quod perfecte possit, ut Marsil. q. 10. art. 2. part. 4. concl. 4. qui addit, quo anima Christi plura simul actu cognoscit per hanc scientiam, eo minus perfecte attendere ad singula, quia vis intelligendi ejus finita est. Dicendum est tamen, juxta dicta, hoc esse verum de multitudine rerum, quæ per diversas species representantur, utendo adæquato & connaturali modo singulis speciebus: secus vero est de multis rebus per unam speciem representatis: nam illæ possunt simul, & uno actu perfecte considerari, sicut de angelis dici solet, propter rationem factam, quia virtus luminis est quasi commensurata speciei intelligibili; & ideo omnia, quæ per unam speciem representantur, dicuntur cognosci per modum unius.

**Dubium 4** Sed ultimo quæret hic aliquis, quomodo possit anima Christi per voluntatem suam reducere, seu applicare hanc scientiam ad actum secundum, seu ad usum hujus speciei potius, quam illius. Et est ratio dubii, quia voluntas non infertur in incognitum: ergo voluntas utendi hac specie, seu considerandi hoc objectum, supponit cognitionem ejus, quæ est repugnantia. Hæc difficultas, sicut & aliæ multæ, quæ hic tactæ sunt, in materia de angelis fuisse tractatur, nam fere est eadem proportionalis ratio. Et ideo breviter altero ex duobus modis expediti potest. Primo, dicendo, animam Christi juvari posse cognitione scientiæ beatæ, per quam actu semper omnia considerat, ad applicandam per voluntatem suam hanc scientiam inferiorem ad actum secundum. Vel secundo, dicendo, animam Christi semper considerare aliquo modo per lumen hujus scientiæ, ipsummet lumen & species intelligibiles ejus, tanquam perfectiones sibi inhærentes: sicut enim illa anima semper actu considerat seipsam, ita etiam considerat omnes facultates suas, & perfectiones earum, & hæc cognitio est sufficiens, ut antecedit illam voluntatem, per quam se applicat ad actus secundos hujus scientiæ.

## S E C T I O II.

*Utrum actus hujus scientiæ sit per modum simplicis intelligentiæ, vel compositionis & discursus.*

**T**riplex potest esse dicendi modus; primus est, modum operandi hujus scientiæ esse eundem, qui est homini connaturalis, atque adeo per modum compositionis, & discursus. Ita tenet Alexander Alenf. 3. p. q. 13. art. 5. Durand. 3. d. 14. q. 3. Fundamentum Alenfis esse videtur, quia non ponit hanc scientiam, nisi per accidens infusam: sed hoc jam rejectum est. Fundamentum autem Durandi est, quia anima Christi non simul omnia per hanc scientiam considerat: ergo ex cognitione unius pervenit in cognitionem alterius, quod est discurre. Quæ consequentia nullius est momenti, aliud est enim cognoscere unum post aliud, aliud cognoscere unum ex alio, quod est discurre: alias eodem modo probaretur, angelos indigere discursu.

Secundus modus dicendi est, proprium actum hujus scientiæ esse per modum simplicis intelligentiæ, cognoscendo prædicatum in subiecto, & conclusionem in principio, effectum in causa, & causam in effectum; nihilominus tamen potuisse Christum uti hac scientia, componendo, vel discurrendo. Hæc est sententia omnium Thomistarum, videtur enim docuisse illam D. Tho. hic art. 3.

Tertia vero sententia est, actum hujus scientiæ semper ac necessario esse simplicem, nec posse fieri cum vera compositione, & discursu. Ita tenet Bonav. in 3. d. 14. a. 3. q. 2. & Rich. ar. 4. q. 3. Quæ sententia mihi verisimilior videtur.

Ad quam explicandam dico primo. Hæc scientia natura sua non est discursiva, sed est ad cognoscendum per modum simplicis intelligentiæ. Probatur primo, quia lumen hujus scientiæ perfectissimum est, excedens lumen angelicum, ut D. Thom. etiam art. 4. docuit. Rursus spe-

cies perfecte representant res, prout in se sunt, sunt etiam universales, ut infra ostendemus: ergo natura sua præbent vim ad cognoscendum perfecte res representatas, cognoscendo, & intuendo proprietates, vel effectus in suis principiis. Et confirmatur primo, quia per unum actum hujus scientiæ possunt interdum simul videri res variæ, etiam si inter se aliam connexionem non habeant, nisi quod per eandem speciem representantur: ergo multo magis cognoscentur uno actu simplici ea, quæ inter se connectuntur, ut proprietas & principium, vel ut causa & effectus, aut alio simili modo. Tandem confirmatur, quia ostensum est, & infra iterum dicetur, hanc scientiam esse perfectiorem angelicam: sed actus scientiæ angelicæ est per modum simplicis intelligentiæ; ergo. Et in hac conclusione conveniunt auctores primæ, & secundæ sententiæ.

Sed obijci potest, nam per hanc scientiam cognoscitur Deus per effectus suos, ut dicendum est: alio ergo actu cognoscitur Deus, & alio effectus ejus, & unus actus ex alio oritur: ergo talis cognitio necessario fit per discursum. Antecedens patet, quia cum cognitio effectus sit intuitiva, cognitio autem Dei abstractiva, & una sit cognitio propria & a priori, & alia a posteriori, non videntur posse in eundem actum coincidere. Respondetur: potest primo, eodem actu, quo effectus perfecte cognoscitur, cognosci causa in effectum, tunc enim illa cognitio causæ, quia veluti consequenter se habet ad illum actum, & quia causa non per se primo cognoscitur, sed quatenus connexa est cum effectum, ideo per se non dat novam speciem actui. Et hoc modo cognitio intuitiva, & abstractiva, a priori & a posteriori, respectu diversarum rerum, potest per eundem simplicem actum fieri: quamvis, quando primo, & per se versantur circa eandem rem, videantur semper esse diversi actus, ut cognitio Dei intuitiva, & abstractiva. Secundo dicitur, probabile esse, quando Deus cognoscitur in effectum, formari alium conceptum Dei, & alium ipsius effectus: quia effectus concipitur perfecte, & prout in se est, Deus autem imperfecto modo, & quodam conceptu, aut negativo, aut respectivo, vel alio simili: non tamen propterea intercedit proprie discursus; tum quia illi duo actus simul habentur, & unus resultat ex alio, tanquam simplex effectus a causa simplici; tum maxime, quia connexio, quæ est inter causam & effectum, cognoscitur eodem actu, quo cognoscitur effectus. Discursus autem in hoc maxime perfici videtur, quod distincto actu cognoscitur principium, ab eo, quo cognoscitur connexio, quam habet cum alia re, quæ per illum cognoscitur.

Dico secundo: Anima Christi nunquam usa est hac scientia, componendo, aut discurrendo, nec talis modus cognoscendi potest in illa habere locum. Probatur, quia proprius & connaturalis modus cognoscendi per hanc scientiam est per simplicem intuitum, seu cognitionem: sed hujusmodi modus operandi natura sua opponitur discursui seu compositioni: ergo ex natura rei nunquam hæc scientia operatur alio modo, sicut fieri non potest, ut per habitum principiorum cognoscantur principia per discursum, quia ille habitus intuetur veritatem principiorum simpliciter, prout in se est. Et confirmatur, quia quamvis possit anima Christi uti aliqua specie per se infusa inadæquate, & postea paulatim perficere illum actum: non tamen propterea erit ille discursus, sed solum erit cognitio unius rei post aliam, sicut contingit etiam in angelo: ergo nulla ratione intelligi potest, quomodo per hanc scientiam fiat discursus, saltem loquendo juxta naturam hujus scientiæ, & secludendo miracula, nec necessaria, nec utilia.

Dices: Quamvis ipsa scientia secundum se non posset discursum, tamen ex parte subiecti poterit ad illum modum operandi accommodari, sicut supra dicebamus de conversione ad phantasmata. Respondetur, non esse simile, quia conversio ad phantasmata non dicit aliquid intrinsecum ipsi scientiæ, quæ est in intellectu, sed tantum dicit concomitantiam quandam inferioris potentiæ ex motione superioris, quæ motio fieri potest per scientiam superiorem & perfectam: at vero discursus dicit intrinsecam imperfectionem, & limitationem in actibus, per quos fit discursus: fieri autem non potest, ut scientia, quæ ex natura sua habet efficere actus perfectos, & superioris ordinis, trahatur ad efficiendos actus ordinis inferioris.

Dicunt

Actus  
scientiæ  
infusa  
Christi  
per modum  
simplicis  
intelligentiæ.

Obiectio.

Respon.

Scientia  
infusa  
Christi  
non potest  
esse discursiva.

Obiectio.

Respon.



## DISPUTATIO XXIX.

In quatuor sectiones distributa.

## De habitu scientiæ infusa animæ Christi.

**D**uo in hac disputatione tractanda sunt, primum de speciebus, deinde de lumine: supponimus autem ex Philosophia & communi sententia Theologorum, ad intellectualem scientiam necessarias esse species intelligibiles, quando objectum per se non unitur potentia, neque in Verbo cognoscitur, sed in se ipso, & quia hoc modo fit cognitio per hanc scientiam, certum est, eam includere species per se infusas. Deinde supponimus, has species esse perfectas quoad vim repræsentandi objecta, ita ut per illas perfecte cognosci possint, in quo dubium non est, quin etiam angelorum species superent, quia sunt altioris ordinis, & perfectiorem cognitionem efficiunt; solum ergo inquirendum de illis superest, quam sint universales, vel limitatæ.

## SECTIO I.

## Utrum species per se infusæ animæ Christi fuerint universales, quam angelicæ.

**V**ariæ sunt sententiæ, & valde contrariæ. Prima affirmat, solum esse infusam animæ Christi unam speciem universalissimam, quæ sufficiens principium est ad cognoscenda omnia, quæ cadunt sub hanc scientiam. Ita tenet Marsil. in 3. q. 10. art. 2. p. 4. concl. 2. Fundamentum esse potest, quia hoc non est impossibile, ut ex dictis disputatione præcedenti, sect. 1. colligi facile potest; tum quia nulla implicatio contradictionis in hoc assignari potest: tum etiam, quia minus est, repræsentari hæc omnia per unam speciem, quam ipsam essentiam Dei: tum denique, quia (ut constat ex doctrina de Angelis) quacumque specie universali facta, potest fieri alia universalior; ergo potest esse aliqua tam universalis, ut repræsentet hæc omnia, est ergo hæc perfectio possibilis, & est major, quia virtus, quo simplicior & magis unita, eo perfectior est; non est ergo, cur animæ Christi denegetur hæc perfectio.

Secunda sententia dicit, species hujus scientiæ esse minus universales, quam omnes angelicas, ita ut singularum rerum datæ sint singulares species. Ita D. Th. hic in corpore, & ad tertium, quem Thomistæ sequuntur: explicant tamen de naturis specificis, non de individuis, Scotus vero in 3. d. 14. q. 3. & Gabr. q. 1. art. 2. concl. 1. & 2. ut supra disp. 27. sect. 1. visum est, etiam singulis individuis dicunt respondere singulas species intelligibiles. Fundamentum hujus sententiæ est, quia hæc scientia data est Christo, modo proportionatæ & connaturali animæ humanæ; est autem connaturale huic animæ, cognoscere per species limitatas, & minus universales, quam sint angelicæ. Quæ sententia est probabilis propter autoritatem D. Thom. fundamentum enim ejus parum suadet, & ideo media via incedendum mihi videtur.

Dico ergo primo, species intelligibiles infusas in hac scientia esse plures, & non unam tantum. Hæc sententia est D. Th. hic, & in 3. dist. 14. art. 3. & ibi est communis, & opinio Marsilii est singularis, & ideo non videtur tenenda, quamquam evidenter improbari non possit, quia revera non videtur impossibile, quod affirmat, ut probatum est. Si autem impossibile non est, cum factum pendeat ex voluntate Dei, quæ non autoritate aliqua, sed conjecturis colligenda est, constat, neutram partem sufficienter posse convinci; tamen non, quidquid impossibile non est, statim tribuendum est animæ Christi, præsertim, quando nulla est necessitas, & cum alioqui valde difficile intellectu sit, res distinctissimas, & diversorum ordinum, naturales, & supernaturales etiam per eandem speciem, in proprio genere repræsentari. Denique, cum hæc scientia minus perfecta sit, quam beata, minus simplex, & unita est; non ergo per unam speciem, sed per plures cognoscet objecta sua.

Dico secundo. Hæ species universaliores sunt, quam sint species connaturales intellectui humano. Hæ conclusio colligitur ex doctrina Cajet. hic, quam admittunt omnes Thomistæ, docent enim, unam harum specierum, ad minimum, repræsentare unam naturam specificam, & omnia individua sub illa contenta; hujusmodi autem universalis repræsentatio speciei non est connaturalis intelle-

Dicunt aliqui, hæc recte procedere in his, quæ anima Christi evidenter, ac comprehensive per hanc scientiam intuebatur, non vero in aliis, quæ aliis modis cognoscere poterat, vel per evidentiam tantum in attestante, vel a posteriori, vel interdum etiam conjectando. Sed sub hanc scientiam nulla cognitio cadit, nisi ut evidens est, & ut talis est, vel in se, vel in suis principiis manifestatur sine discursu, nec alius modus est connaturalis lumini, & speciebus hujus scientiæ: & similia argumenta fieri solent in angelis, qui discurrere non possunt, juxta magis receptam sententiam.

## ARTICULUS VI.

## Utrum hæc scientia fuerit distincta per diversos habitus.

**A**d sextum sic proceditur. Videtur, quod in anima Christi non fuerit nisi unus habitus scientiæ. Quanto enim scientia est perfectior, tanto est magis unita: unde & Angeli superiores per formas magis universales cognoscunt, ut in prima parte dictum est. Sed scientia Christi fuit perfectissima: ergo fuit maxime una: non ergo fuit distincta per plures habitus.

2. Præterea. Fides nostra derivatur a scientia Christi: undi dicitur Heb. 12. Aspicientes in authorem fidei & consummatorem Jesum. Sed unus est habitus fidei de omnibus credibilibus, ut in secunda parte dictum est. Ergo multo magis in Christo non fuit nisi unus habitus scientiæ.

3. Præterea. Scientiæ distinguuntur secundum diversas rationes scibilium. Sed anima Christi omnia scivit secundum unam rationem, scilicet, secundum lumen divinitus infusum. Ergo in Christo fuit tantum unus habitus scientiæ.

Sed contra est, quod Zach. 3. dicitur, quod super lapidem unum, id est, Christum, sunt septem oculi. Per oculum autem scientia intelligitur. Ergo videtur, quod in Christo fuerint plures habitus scientiæ.

Respondetur dicendum, quod sicut dictum est, scientia indita animæ Christi habuit modum connaturalem animæ humanæ. Est autem connaturale animæ humanæ, ut recipiat species in minori universalitate, quam Angeli: ita scilicet, quod diversas naturas specificas, per diversas species intelligibiles cognoscat. Ex hoc autem contingit, quod in nobis sint diversi habitus scientiarum, quia sunt diversa scibilium genera: in quantum, scilicet, ea, quæ reducuntur in unum genus, eodem habitu scientiæ cognoscuntur: sicut dicitur in primo Posteriorum, quod una scientia est, quæ est unius generis subiecti. Et ideo scientia indita animæ Christi, fuit distincta secundum diversos habitus.

Ad primum ergo dicendum, quod, sicut supra dictum est, scientia animæ Christi est perfectissima, & excedens Angelorum scientiam, quantum ad id, quod consideratur in ea ex parte Dei influentis: est tamen infra scientiam angelicam, quantum ad modum recipientis. Et ad hujusmodi modum pertinet, quod scientia illa per multos habitus distinguatur, quasi per species magis particularis existens.

Ad secundum dicendum, quod fides nostra innititur primæ veritati, & ideo Christi est author fidei nostræ secundum divinam scientiam, quæ est simpliciter una.

Ad tertium dicendum, quod lumen divinitus infusum, est communis ratio intelligendi ea, quæ divinitus revelantur: sicut & lumen intellectus agentis eorum, quæ naturaliter cognoscuntur. Et ideo oportuit esse in anima Christi proprias species singularum rerum, ad cognoscendum cognitione propria unumquodque. Et secundum hoc oportuit esse diversos habitus scientiæ in anima Christi, ut dictum est.

## COMMENTARIUS.

**H**abitus scientiæ includit tam species intelligibiles repræsentantes objecta, quam lumen, vel habitum, qui potentiam facilem reddat ad exercendum actum, & præsertim ad judicium ferendum. D. Th. ergo hoc loco, quantum ex solutione ad tertium colligere licet, potissimum loquitur de habitu hujus scientiæ, ratione specierum intelligibilium, & hoc modo dicit, hanc scientiam esse divisam per plures habitus, & addit, hujusmodi habitus, seu species intelligibiles, esse in hac scientia Christi minus universales, quam species angelicas. Quæ sententia statim disputanda est, est enim mihi difficilis, & valde dubia.



intellectui humano, ut constat. Item, per unam ex his speciebus representatur natura specifica cum omnibus suis proprietatibus, ita ut comprehendi possit, quia Christus per hanc scientiam comprehendebat, quamlibet naturam creatam, etiam superiorem humanam; at vero hæc representatio excedit naturalem capacitatem ingenii humani. Deinde docent, per has species huius scientiæ representari infinita, ut aperte tradit etiam D. Th. art. 5. ad 2. sed non possunt representari infinita per species intelligibiles multitudine finitas, nisi aliqua earum representent infinita, ut per se constat; ergo necesse est, ut hæ species tantum habeant universalitatem, ut una species valeat representare res infinitas, quæ maxima sine dubio est, & quæ non solum capacitatem naturalem humani intellectus excedat, sed angelici etiam intellectibus vix concedatur. Ratio denique est, quia istæ species sunt superioris ordinis, & non sunt quasi coarctatæ & limitatæ ad imperfectionem sensuum, ex qua oritur tanta limitatio, quanta est in speciebus, quas humanum ingenium per sensus acquirit: sicut ergo anima Christi per hanc scientiam elevata est ad altiorum modum cognoscendi, ita & ad universaliores species. Et hæ conclusio magis ex sequenti patebit.

**Obiectio.** Contra illam vero obijci potest fundamentum D. Th. quia species infusæ sunt modo connaturali animæ humanæ. Sed necesse est, ut ipsi Thomistæ illud solvant, dicendo, hanc scientiam non esse infusam juxta capacitatem tantum naturalem, sed juxta obedientialem, & ideo modum ejus non esse mensurandum ex naturali modo operandi ipsius potentiæ, sed ex perfectione debita ipsi scientiæ, ad quam potentia elevatur, sicut in visione beata elevatur potentia ad unionem cum ipsa essentia divina per modum perfectissimæ & universalissimæ speciei, & ibi non attenditur naturalis conditio potentiæ, sed perfectio luminis.

**Responso.** Dico tertio, has species fuisse universaliores, quam sint species angelorum. Ita sensit D. Th. in 3. dist. 14. art. 3. Richar. art. 4. q. 2. Scot. q. 4. quia licet ipse, neque in angelis, neque in anima Christi admittat universales species, dicit tamen, has species animæ Christi fuisse perfectiores angelicis, imo sentit esse perfectissimas, quæ de potentia absoluta esse possunt, quod necessarium non est. Probatur ergo conclusio primo, quia in omnibus aliis perfectionibus gratiæ & scientiæ, anima Christi superavit angelos, cur non etiam in ista? Respondent aliqui Thomistæ, non esse eandem rationem, quia species infusæ sunt connaturales animæ humanæ, & anima Christi superavit angelos in perfectionibus gratiæ, non naturæ. Sed hoc non est constanter dictum, nam ipsi concedunt, lumen huius scientiæ non esse connaturale animæ humanæ, sed esse supra naturam etiam angelicam: quod evidenter patet ex obiecto ejus, nam se extendit ad cognoscenda omnia supernaturalia: at vero species infunduntur proportionatæ lumen, & intellectui non secundum se, sed prout elevatur per lumen, quia obiectum unitur potentiæ ut elevatur: ut exemplo patet in visione beata, in qua (ut ita dicam) universaliori modo unitur essentia divina intellectui Christi, quam angelorum, propter perfectius lumen; sic ergo in proposito. Unde retorqueri potest argumentum, quia perfectiones supernaturales altiori modo datæ sunt Christo, quam angelis; sed hæc scientia est supernaturalis animæ Christi; ergo.

Respondent aliqui, rationem hanc recte procedere in hac scientia, quatenus circa supernaturalia objecta versatur, non vero, ut versatur circa objecta naturalia; quia species priorum obsectorum supernaturales sunt, unde non conferuntur, servata proportionem ad imperfectionem naturæ, sed ad perfectionem gratiæ: at vero species posteriorum obsectorum sunt naturales, & proportionatæ naturali capacitati subiecti, & ideo sunt minus universales. Sed neque hæc distinctio placet, nec videtur mihi satis consequenter adhibita. Nam idem lumen indivisibile est huius scientiæ, quod circa hæc omnia objecta versatur; ergo proxima potentia, cui commensurantur species omnium obsectorum, non est intellectus animæ Christi secundum se, sed est intellectus tali affectus lumine, & elevatus per illud; ergo intellectui sic elevato debent omnes species proportionari, & non soli capacitati naturali. Præterea actus huius scientiæ, ut versatur circa objecta naturalia, est in se supernaturalis, cum pro-

xime, & principaliter procedat a lumine supernaturali; ergo species etiam est supernaturalis, quia oportet omnia principia actus esse illi proportionata. Dices. Etiam actus fidei est supernaturalis, & procedit a lumine supernaturali, & nihilominus species naturales ad illum deserviunt. Respondetur, non esse simile, quia per actum fidei non cognoscitur obiectum creditum, prout in se est, sicut cognoscitur per hanc scientiam. Unde probabile est, species non concurrere immediate ad iudicium fidei, sed tantum ad apprehensionem, quæ antecedit, & naturalis est; at vero in hac scientia species concurrunt ad perfectam rei cognitionem, quæ simul est perfecta apprehensio & cognitio obiecti. Unde confirmatur ulterius, nam Christus per hanc scientiam longe perfectiorem conceptum format ipsarum rerum naturalium, non solum quam ipse possit per naturales vires, sed etiam quam angeli possint; perfectiorem (inquam) conceptum, tum in claritate & certitudine, quæ a lumine provenit, tum in expressiori representatione, & altiori, quæ provenit ab specie; ergo etiam species talium obsectorum datæ sunt animæ perfectiores, & altioris ordinis & supernaturales. Tandem ex his concluduntur rationes, quæ omnibus obiectis generales sunt. Prima, quia licet Christus per naturales vires humanitatis non possit præstare aliqua, quæ angeli possunt per naturales vires, tamen elevatus ejus intellectus potest perfectius hoc præstare, quam angeli, & ita perfectius comprehendit angelum, vel dicat de omnibus agendis, quam angelus: ergo pari ratione, quamvis per vires naturæ non possit tam universaliter intelligere, sicut angeli, tamen elevatus lumine divino hoc poterit, non solum in cognitione in Verbo, sed etiam in proprio genere. Secunda, quia istæ species in sua entitate, & substantia sunt perfectiores, quam angelicæ, ut sentit D. Th. in art. 4. & patet ex ratione facta, quia proportionantur luminis; ergo etiam erunt universaliores, quia est eadem ratio. Ultima, quia aliàs non posset anima Christi uno actu tam multa simul intelligere, quam angeli possunt, saltem non adjungendo nova miracula, sed utendo hac scientia modo connaturali, quia (ut supra dicebamus ex doctrina D. Thomæ) solum potest ea intelligere simul, quæ per unam speciem representantur; consequens autem per se satis absurdum videtur. Denique contra hanc sententiam nulla difficultas occurrit, quia fundamentum D. Thomæ jam solutum est, & in re pia, & probabili, & quæ majorem perfectionem Christo tribuit, non mirum esse debet, quod a sententia D. Thomæ discedamus.

## S E C T I O II.

*An, præter species intelligibiles requiratur in hac scientia lumen seu habitus infusus.*

**I**N hac questione etiam sunt duæ extremæ sententiæ. Prima, præter species, requirit duas qualitates distinctas, quas vocat habitum & lumen, ut habitus det facultatem potentiæ, lumen obiectum illuminet. Hæc vero opinio improbabilis mihi semper visa est, quia multiplicare, seu distinguere illas duas qualitates, & supervacaneum est, & sine ullo fundamento: quia lumen intellectuale non aliter manifestat obiectum, quam præbendo vim, & facultatem cognoscendi seu intelligendi illud, & habitus similiter non aliter reddit virtutem potentiam, quam inclinando illam, & augendo facultatem, & facilitatem operandi. ergo in intellectu eadem qualitas, quæ est habitus, & dat facilitatem potentiæ, manifestat etiam obiectum, & ut sic appellatur lumen; non est ergo realis distinctio inter illa duo, sed tantum rationis, & denominationis, neque ex effectibus eorum aliud colligi potest. Denique exemplis id potest facile explicari, & confirmari: habitus enim fidei non requirit lumen a se distinctum, sed ipsemet dicitur lumen fidei, quatenus aliquo modo manifestat veritatem obiecti, & simili modo lumen gloriæ non requirit habitum distinctum, sed ipsummet est habitus, quatenus immobiliter inhaeret potentiæ, & dat illi facultatem seu facilitatem operandi.

Secunda sententia negat, esse necessarium in hac scientia lumen seu habitum distinctum ab speciebus. Quam nonnulli etiam Thomistæ sequi videntur. Fundamentum eorum est, quia intellectus constitutus in actu primo per speciem intelligibilem representantem perfecte ob-

*Iner habitum, & lumen infusum nulla distinctio.*



jectum suum, est sufficiens principium actus intelligendi secundum omnem rationem ejus; ergo superfluum est alius habitus. Antecedens patet primo inductione, nam angelus, quia per scientiam inditam recipit species perfectas rerum ad actus talis scientiæ, non indiget alio habitu. Secundo ratione, quia in actu intelligendi duo sunt, scilicet, ratio intellectiōis, & species talis intellectiōis; intellectus de se habet vim sufficientem ad efficiendam intellectiōem, ut intellectio est: per speciem vero sufficienter determinatur ad intellectiōem talis speciei; ergo. Contraria sententia est communior inter antiquos Theologos, & videtur mihi longe verior, & ad eam explicandam, suppono primo ex Philosophia, intellectum specie formatum ita concurrere per modum unius completi principii ad actum intelligendi, ut intellectus ipse secundum se habeat aliquam vim activam, & non sit species ipsa tota ratio efficiendi actum. Imo sunt nonnulli Philosophi, qui simpliciter negant, speciem intelligibilem habere aliquam efficacitatem, seu concurrere active ad actum intelligendi: quorum sententia ad probandum id, quod intendimus, evidentius deservire posset. Sed quia illa, nec certa est, nec vera (ut ego existimo), ideo sumimus id, quod certum est, quamvis species habeat suam veluti partialem vim & activitatem, intellectum tamen esse, qui præcipue influit in actum per propriam, & intrinsicam vim activam suam, hoc enim est de intrinseca ratione actus vitæ. Non est autem hæc efficientia ita intellectui, & speciei attribuenda, ut credatur intellectus efficere in actu intelligendi, quasi rationem genericam intellectiōis, species vero intelligibilis efficere differentiam ultimam in ipso actu, est enim hæc distributio commentitia, & impossibilis. Primo, quia hæc distinctio gradus generici & specifici in actu intelligendi, est secundum rationem & conceptum, efficientia vero est physica circa rem, ut est a parte rei: sicut ergo actus intelligendi est a parte rei unica simplex forma, in qua ratio distinguit illos duos gradus, ita totus actus fit ab intellectu, & totus ab specie. Secundo, quia totus actus, etiam secundum differentiam ultimam, est vitalis, & informat potentiam, & constituit intelligentem; ergo etiam sub specifica ratione procedit a potentia: & eadem ratione species efficit totum actum, non tantum secundum specificam rationem, sed etiam ut intellectio est, quia virtus activa potentiæ est quasi incompleta & partialis, completur autem per speciem in ordine ad totum actum. Quocirca vulgaris illa distinctio de intellectiōe, ut intellectio est, vel ut talis est, & quod priori ratione procedit ab intellectu, posteriori vero ab specie, vel rejicienda est, vel solum secundum quandam accommodationem explicanda. Quia enim intellectus est quasi universale principium omnium intellectiōum, ideo tribuitur illi vis efficiendi intellectiōem ut sic, non quasi præscindendo gradum genericum, sed assignando effectum adæquatum, & sumendo rationem intellectiōis quasi transcendentalem, & ut comprehendit omnes rationes, & species intellectiōum: e contrario vero species intelligibilis, quia solum potest efficere intellectiōem talis speciei, ideo dicitur illam efficere, ut talis est, licet in illa consequenter efficiat gradum genericum, & quidquid in illo actu intelligendi reperitur.

Intellectus de se insufficientes ad actus supernaturales.

Ex his infertur primo, in ordine ad naturales actus intelligendi, intellectum de se habere totam vim activam ex parte potentiæ necessariam ad efficiendum actum intelligendi, solumque illi deesse concursum objecti, qui media specie tribuitur: at vero in ordine ad actus supernaturales, non solum deest intellectui humano concursus objecti, sed etiam deest illamet activitas partialis seu incompleta, quæ ex parte potentiæ necessaria est. Quod patet, quia nulla potentia habet ex se, & ex natura sua virtutem activam in suo ordine seu ex parte potentiæ sufficientem ad actus supernaturales, seu superioris ordinis: quia potentia naturalis per se tantum ordinatur ad actus naturales, & sibi proportionatos, ut in voluntate constat; ergo erit idem in intellectu.

Obiectio. Dices, assumptum esse verum de actibus supernaturalibus, ut supernaturales sunt, non ut intellectiōes sunt: quia ut sic conveniunt cum naturalibus, & ideo sunt proportionati virtuti naturali. Sed hæc evasio explosa jam est, si recte considerentur, quæ diximus, tum quia non satis est, intellectum per virtutem suam activam attinge-

re in actu intelligendi rationem communem, sed oportet, ut efficiat specificam & propriam, atque adeo, ut efficiat actum, etiam ut supernaturalis est: tum etiam, quia ipsa quoque communis ratio intellectiōis, contracta jam ad talem actum, supernaturalis est, & ideo fieri non potest a potentia in tali actu per solam naturalem virtutem ipsius potentiæ: quamvis enim ratio intellectiōis ut sic, a naturali & supernaturali abstrahat, & ideo intellectio ut sic, nec naturalis, nec supernaturalis, necessario sit, tamen hæc ipsa ratio, in re ipsa contracta per differentiam supernaturalem, ad eundem ordinem elevata est, & in re supernaturalis est. Sicut ratio substantiæ de se abstrahit a materiali, & spirituali, contracta tamen ad angelum, in illo spiritualis invenitur: per vim autem activam (ut diximus) attingitur res, prout a parte rei invenitur, & ideo fieri non potest, ut potentia per solam vim naturalem possit efficere rationem intellectiōis in actu supernaturali. Quæ omnia confirmantur, nam si intellectus de se haberet vim connaturalem sufficientem ex parte potentiæ ad actus supernaturales, & solum indigeret conjunctione cum objecto, quæ per speciem fieri solet, eodem modo compararetur ad actus naturales, & supernaturales, & utrorumque esset æque capax, & ad utroque haberet eandem propensionem, ac denique æque essent illi debita species requisita ad tales actus: patet sequela, quia de se sufficientem habet vim connaturalem ad omnes illos actus, & ad omnes requirit species seu conjunctionem cum objecto. Dicitur fortasse, differentiam esse, quia ad quosdam actus requiruntur species naturales, ad alios vero supernaturales. Sed hæc est quædam petitio principii, contrarium enim videtur convincere ratio facta, nam si potentia de se est æque capax, seu æque effectiva utrorumque actuum, cur magis hæc species, quam illæ, sunt ipsi potentiæ supernaturales, vel cur sunt minus debita hæc quam illæ? Nam etiam si dicatur, quosdam species a solo Deo infundi posse, hoc non est satis, ut sint supernaturales, si aliæ sunt proportionatæ naturali virtuti ipsius potentiæ, ut manifeste patet in speciebus angelicis, vel in iis, quæ animæ separata infunduntur.

Secundo infertur ex dictis, intellectum animæ Christi non habere sufficientem virtutem activam naturalem, requisitam ex parte potentiæ ad actus hujus scientiæ: probatur ex dictis, quia actus hujus scientiæ sunt supernaturales, ut ex supra dictis constat, & facile intelligitur de actibus, quia versantur circa objecta supernaturalia, aut circa futura contingentia, & similibus. Et ex his potest idem concludi de actibus, qui versantur circa res naturales, nam licet materiale objectum naturale sit, tamen modus cognoscendi est altior & diviniore, superans naturalem modum cognoscendi, non tantum hominis, sed etiam angeli. At vero intellectus animæ Christi de se non habet vim activam naturalem ex parte potentiæ necessariam ad supernaturales actus efficiendos, ut ostensum est: nam quoad hoc eadem est ratio de intellectu Christi, & quolibet alio intellectu humano; ergo.

Et ex his ulterius concluditur tertio, intellectum animæ Christi non elevari sufficienter ad efficiendos actus hujus scientiæ per solas species infusas, sed indigere aliqua virtute, vel auxilio, quo elevetur ad conferendam efficaciam necessariam ex parte potentiæ ad illos actus. Hoc etiam aperte sequitur ex dictis, & declaratur primo, quia activitas potentiæ & speciei sunt distinctæ, & diversarum rationum, & in suo ordine utraque debet esse completa, & sufficiens: sed species tantum confert activitatem requisitam ex parte objecti, & intellectus de se non habet activitatem sufficientem, requisitam ex parte potentiæ; ergo oportet aliunde suppleri. Secundo, quia ad actus naturales, species solum confert activitatem sufficientem ex parte objecti, supponit vero in ipsa potentia totam vim ex parte illius necessariam ad efficiendum talem actum, & utendum ipsa specie, quam vim conferre non potest ipsamet species; ergo similiter in his actibus supernaturalibus species non confert hanc vim, sed supponit. Cum ergo non supponat illam tanquam naturalem, ut ostensum est, necesse est, ut per aliud supernaturale principium conferatur. Tertio, si objectum ipsum uniretur potentiæ ad intelligendum, tantum conferret ad actum efficaciam ex parte objecti necessariam; ergo species tantum hunc confert, est enim veluti semen objecti, ut illius suppleat efficientiam; ergo si deest poten-

Obiectio.

Responsio.

Intellectus non sufficienter elevatur ad actus supernaturales per solas species infusas.



tiæ vis agendi ex parte sua necessaria, aliunde suppleri necesse est. Quod argumentum exemplo visionis beatæ aperte declaratur: in illa enim visione essentia divina conjungitur potentiæ in ratione objecti, & confert totam effectiorem, quam objectum conferre potest, vel quam species in absentia objecti contulisset; nihilominus tamen ex parte potentiæ lumen ad illam visionem necessarium est, quia intellectus ex natura sua non habet naturalem vim ad conferendam activitatem ex parte potentiæ necessariam ad illum actum: solum ergo objectum, vel species, non potest illam supplere. Cujus rationis vis nullo modo vitari potest, nisi, vel negando lumen gloriæ creatum a visione distinctum, quod absurdissimum in Theologia est; vel dicendo, videri Deum per speciem creatam, & præter illam nondari lumen gloriæ, sed illam vocari lumen, quia manifestat objectum. Quæ evasio duo falsa continet: alterum, Deum videri per speciem creatam, contra receptam D. Thomæ sententiam, & contra rationem, quia, ubi objectum ipsum est actu intelligibile, & per se ipsum adest potentiæ, & potest cum illa concurrere, species necessaria non est: alterum non dari aliud lumen Beatis, præter illam speciem, quod est abuti terminis, præter communem usum Theologorum solum ad explicanda Concilia, quæ de lumine gloriæ loquuntur, quod est Conciliorum definitiones enervare, & occasionem præbere, eas ad falsos sensus detorquendi. Omnes enim Theologi, qui de lumine gloriæ loquuntur, sive, præter illud, admittant speciem, sive negent, per lumen intelligunt rem ab specie distinctam, neque ullus est, qui speciem intelligibilem vocet lumen intellectuale, sicut nec sensibilis species lumen sensibile vocatur. Cum enim species habeat vicem objecti, tanquam unum cum illo reputatur; lumen autem dicitur quoddam aliud medium, quod objectum manifestat. Et præterea contra hanc sententiam urget argumentum factum, nam etiam si objectum ipsum per se concurrat cum potentiæ, requiritur lumen seu virtus ex parte potentiæ; ergo idem erit necessarium, etiam si concurrat, mediante specie. Quarto arguitur, nam experimur, duos intellectus inæquales in perfectione per eandem species inæqualiter intelligere, cujus ratio est, quia species non supplet defectum potentiæ, & quia usus speciei multum pendet ex virtute activæ ipsius potentiæ: ergo, quando potentia de se est insufficiens ad efficiendum actum, non potest sola species illam supplere. Quinto id explicatur ex subordinatione instrumentorum, quæ ita se habent, ut unumquodque requirat propriam virtutem seu formam, & dispositionem, ut sunt calamus, & manus, quamvis enim calamus bene aptus sit, nisi manui virtus sufficiens insit ad movendum, & menti etiam ars dirigens & ordinans talem motum, ineptus erit effectus. Similiter, si species angelica, & universalis tribuatur intellectui humano, non poterit ea uti sua naturali virtute, quemadmodum utitur angelus, quia est improporcionatum instrumentum, multo autem magis improporcionatæ sunt supernaturales species. Unde confirmatur obiter, quia aliàs sine causa uni intellectui, vel angelo, darentur universaliores species, vel perfectiores, quam alteri, si quilibet eorum æque posset illis uti, ac alius. Ultimo arguitur, quia in hac scientia infusa, cognitio (ut dictum est) fit per simplicem modum, cognoscendo effectum in causa, & proprietatem in essentia: sed ad perfectam hanc cognitionem non videtur posse sufficere sola species, nisi ex parte intellectus, & luminis sit sufficiens vis, tum ad intelligendum perfecto modo, tum ad objectum penetrandum; ergo.

Et ex his ultimo tandem concluditur, in hac scientia, præter species intelligibiles, dari habitum per se infusum, elevantem intellectum ad illius actus. Ita sentit aperte D. Th. hic ad 3. ubi distinguit lumen divinitus infusum ab speciebus, & illud significat esse unum, species plures. Et idem docet in 3. d. 14. art. 3. q. 4. & hic etiam, art. 4. dicit, hanc scientiam esse perfectiorem angelicam, quantum ad lumen. Item sentit Richar. dist. 14. art. 3. q. 4. & Bonav. art. 3. q. 2. Probat aperte ex dictis, quia virtus activa intellectus de se est insufficiens ad actus hujus scientiæ, & non elevatur per solas species: ergo aliqua alia res: ergo aliquo habitu infuso, quia, ut connaturali modo elevetur, debet per intrinsecam & inherentem, ac permanentem virtutem elevari, & hanc vocamus habitum. Et confirmatur primo exemplo voluntatis, conveniunt enim

hæ duæ potentiæ in hoc, quod præter virtutem activam potentiæ, utraque indiget concursu objecti ad operandum, quamvis fortasse concursus objecti non sit ejusdem rationis in utraque potentia, quod nihil ad præsentem disputationem attinet. Hinc igitur formatur argumentum, nam voluntas, postquam illi propositum est objectum supernaturale, & supernaturali modo cognitum, quia non habet naturalem virtutem ad efficiendum actum, illi objecto proportionatum, indiget habitu per se infuso, ut elevetur ad illum connaturali modo efficiendum; ergo similiter intellectus indigebit hujusmodi habitu, quandoquidem, posita specie, per quam veluti applicatur objectum, ipse in suo ordine est insufficiens, & non habet naturalem virtutem ad efficiendum actum tali speciei proportionatum.

Et ex hoc exemplo solvitur objectio quædam, quæ fieri potest, scilicet, intellectum informatum specie sufficienter elevari per auxilium, nam, etiam posito habitu, indiget auxilio. Respondetur enim, de potentia absoluta posse ita elevari, non tamen modo perfecto, & rerum naturis magis consentaneo. Sicut etiam voluntas posset eodem modo elevari, tamen perfectior modus, & magis connaturalis est, ut per intrinsecum principium, & habitualem virtutem elevetur.

Nec refert, quod, posito habitu, requiratur auxilium, nam illud est debitum, tanquam concursus primæ causæ in suo ordine necessarius: si autem non daretur habitus, majus auxilium, & alterius generis deberet conferri. Ultimo tandem confirmatur hæc sententia, quia in scientiis naturalibus, præter species, requiritur habitus, & similiter in fide, & in prophetica cognitione; ergo & in hac scientia. Responderi potest, in his omnibus requiri habitus, quia species sunt imperfectæ, unde obijci potest scientia infusa angelorum, in qua non datur habitus distinctus ab speciebus, quia species sunt perfectæ. Sed contra primo, nam hæc responsio locum non habet in visione beata, a qua etiam supra argumentum sumpsimus. Secundo, quia, si in aliis requiritur habitus propter imperfectionem specierum, multo magis hic erit necessarius propter imperfectionem potentiæ. Unde non est simile, quod ex scientia Angelorum assertur, quia in illa non solum species perfectæ sunt, sed etiam virtus potentiæ est in suo ordine sufficiens, & accommodata ad actus tales scientiæ, ad quos naturalem propensionem habet absque ullo impedimento, & ideo non indiget habitu: secus vero est in intellectu animæ Christi, ad actus hujus scientiæ comparato, ut satis explicatum est. Et ex his expeditum relinquitur fundamentum secundæ sententiæ supra positæ.

### SECTIO III.

*Utrum hic habitus, vel lumen scientiæ infusæ sit in se unum tantum.*

PRIMA sententia est, hunc non esse unum habitum, sed plures. Ita Bonav. in 3. d. 14. art. 3. q. 2. Cajet. 1. 2. q. 54. art. 4. non longe a fine, & tribuit D. Th. hic, sine causa tamen; nam hoc loco non ponit plures habitus in hac scientia infusa, nisi ratione specierum, non vero ratione luminis infusi, ut in solutione ad 3. satis explicuit, & ita eum intellexit Petrus Bergomensis in concordantiis D. Th. dub. 12. & 16. & Cajetanus hic videtur etiam aliter sentire, non explicat autem hæc opinio, quod sint hi habitus. Videtur tamen, duobus modis in ea procedi posse, juxta duplex ejus fundamentum. Primum est, ut, quia species intelligibiles hujus scientiæ sunt plures, ideo etiam habitus, vel lumina multiplicentur: & ita primus modus dicendi in hac sententia esse potest, tot multiplicari habitus, vel lumina, quot multiplicantur species intelligibiles. Sed fundamentum hoc parum est efficax, quia fere omnibus habitibus scientiarum commune est, ut unus habitus scientiæ variis utatur speciebus intelligibilibus: unde verisimile non est, in hac scientia, de qua agimus, tot multiplicari habitus vel lumina, quot sunt species intelligibiles: & ratio generalis est, quia cum habitus, vel lumen teneat se ex parte potentiæ, ex suo genere universalius principium est, quam species, quæ supplet vicem objecti, & ad talem actum determinat potentiam.

Secundum fundamentum sumi potest ex diversitate rerum, in quibus hæc scientia versatur, cum enim sint diver-



diversorum ordinum, non videntur omnes ad eundem habitum pertinere: unde secundus modus in hac sententia esse potest, duos esse habitus hujus scientiæ, quorum alter circa res naturales, alter circa supernaturales versatur. Cum enim hæc objecta sint omnino diversorum ordinum, & per hanc scientiam in proprio genere & per proprias species cognoscantur, videntur requiri diversa principia, & habitus, scilicet, ad cognoscendas res supernaturales, prout in se sunt, habitus ordinis divini & supernaturalis, ad cognoscendas autem res naturales, etiam altiori modo, quam humano, alius inferior, & quasi angelici ordinis. Quod vero non sit necessarium, hos habitus in plures dividere, facile videtur posse suaderi, quia res omnes naturales cognoscuntur ab Angelo eodem lumine, quamvis per diversas species; ergo & in hac scientia poterunt cognosci eodem lumine infuso, cum sit perfectius, quam angelicum: & pari ratione aliud lumen sufficit ad cognoscendas omnes res supernaturales, tum, quia illæ res non minorem inter se convenientiam habent, quam res naturales inter se: tum etiam, quia illud lumen est altius, & perfectius. Solum in hoc dubitari posset de modo unionis hypostaticæ, qui inter omnes res supernaturales videtur esse altioris ordinis: tamen non oportet propter illum ponere specialem habitum, etiam in hac sententia, quia licet in genere gratiæ, & ex parte personæ divinæ, quæ communicatur humanitati, illa unio merito dicatur specialem ordinem gratiæ constituere, tamen, quatenus ille modus unionis creatum quid est, & supra naturalem capacitatem naturæ creatæ, cadere potest simul cum aliis supernaturalibus operibus sub idem lumen supernaturale hujus scientiæ. Et hæc opinio ita explicata est probabilis.

Lumen  
scientiæ  
infuse  
Christi  
unus tan-  
tum est  
habitus.

Nihilominus dicendum videtur, lumen hujus scientiæ esse unum tantum habitum, seu qualitatem simplicem, ut sentit D. Th. hic ad 3. & in 3. d. 14. art. 3. q. 4. & Richard. art. 3. q. 4. Marfil. q. 10. art. 2. p. 4. Et fundamentum hujus sententiæ fumendum est fere ex dictis inter explicandam præcedentem sententiam, adjunctis iis, quæ superius diximus de modo, quo res naturales per hanc scientiam cognoscuntur altius, & perfectius, quam per naturale lumen alicujus intellectus creati cognosci possunt. Ex quibus ita argumentari possumus; nam lumen hujus scientiæ est sicut potentia quædam altioris ordinis, quam sit lumen angelicum; est ergo de se universalius principium; ergo completitur sub objecto suo ea omnia, quæ lumen Angelicum attingere potest, & rursus ea, quæ sunt supra Angelicum ordinem, & pertinent ad supernaturalem, in quo lumen hujus scientiæ collocatur; sicut lumen intellectuale, quod superioris ordinis est, quam sensus, comprehendit sub se omnia, quæ sub sensum cadunt, & præterea res etiam sui ordinis sibi proportionatas. Et confirmatur, quia idem lumen fidei hac ratione versari potest circa res omnes, tam naturales, quam supernaturales, quatenus altiori modo per illud lumen manifestantur, charitas etiam amat bonitatem naturæ sub aliqua habitudine, vel ratione supernaturali. Et confirmatur præterea, quia res supernaturales ita sunt connexæ cum naturalibus, ut vix possint perfecte, & ut in se sunt, videri sine illis, ut gratia in hærens animæ non videtur sine anima, & sic de aliis. Denique confirmatur, quia non oportet distinctionem ponere sine necessitate; hic autem nullum est sufficiens fundamentum, nam ex sola distinctione materialium objectorum non potest colligi distinctio habituum, & modus cognoscendi naturales res per hanc scientiam non solum excedit humanam cognitionem, sed etiam angelicam.

## SECTIO IV.

*Utrum lumen hujus scientiæ distinctum sit a lumine gloriæ.*

Non invenio quæstionem hanc a Theologis disputatam, sed habet non contemnendam difficultatem. Tres enim modi dicendi mihi occurrunt, qui in dubitatione hac esse possunt. Primus est, supponendo opinionem supra tactam, quod in hac scientia sit duplex habitus, quorum unus circa naturalia, alius circa supernaturalia versetur. Quo supposito, dici potest, habitum seu lumen, quod versatur circa supernaturalia, non distingui ab

ipso lumine gloriæ, propter ea, quæ statim in modo tertio dicemus: habitum vero, qui versatur circa naturalia, distinguui ab illo lumine, propter suppositionem factam: & si illa suppositio vera esset, ego hunc modum tanquam veriore etiam eligerem. Sed (ut vidimus) fundamentum, quod hæc sententiam supponit, minus probabile est.

Secundus ergo modus dicendi est, lumen hujus scientiæ esse in se unum, & omnino distinctum a lumine gloriæ, & hunc modum videntur supponere omnes Theologi, distinguunt enim absolute & simpliciter hanc scientiam a beata, unde videntur illas distinguere, non tantum in speciebus, sed etiam in luminibus. Et ratio esse potest, quia lumen gloriæ respicit essentiam divinam ut objectum adequatum suum, ita ut non possit circa creaturas versari, nisi prout in Deo, & per divinam essentiam manifestantur, hic enim modus cognoscendi creaturas est longe altior, & excellentior, quam sit cognitio creaturarum in se ipsis. Propter quod Augustinus illam cognitionem, *matutinam*, hanc vero, *vespertinam*, vocavit; ergo lumina, quæ sunt principia talium cognitionum, sunt distincta. Et confirmatur, quia lumen gloriæ creatum est altissima participatio luminis increati, & ad eundem ordinem quodammodo spectans; imitatur ergo modum cognitionis ejus; sicut ergo Deus est quasi adequatum objectum sui luminis increati, & nihil per illud videt nisi in se, & per se ipsum, ita suo modo se habet lumen gloriæ creatum, atque adeo lumen hujus scientiæ inferioris rationis est, ab illoque distinctum.

Tertius tamen modus dicendi esse potest, lumen hujus scientiæ esse ipsum lumen gloriæ, atque adeo scientiam infusam quoad habitum solum addere intellectui lumine gloriæ informato species per se infusas, ad quarum usum satis eodem lumine gloriæ intellectus elevatur. Quæ sententia non videtur omnino aliena a D. Th. in his articulis, nam in hoc sexto solum distinguit habitus hujus scientiæ ratione specierum intelligibilium, & in solutione ad 3. dicit lumen divinitus infusum esse communem rationem intelligendi ea, quæ divinitus revelantur, quod art. 4. vocaverat, *lumen spiritualis gratiæ*. Et ratione potest ita explicari, quia lumen, per quod hæc scientia infusa versatur circa res supernaturales quoad substantiam, cognoscendo illas in se ipsis per proprias species, non est aliud a lumine gloriæ. Ergo absolute & simpliciter lumen hujus scientiæ non est aliud a lumine gloriæ. Consequentia evidens est ex supra dictis; ostensum est enim, unum & idem esse lumen hujus scientiæ, quo cognoscuntur res supernaturales, & Deus ut author & causa illarum, & consequenter omnia mysteria supernaturalia, atque adeo res etiam inferiores, & naturales, quia intellectuale lumen unius ordinis, quamvis per se primo versetur circa res sui ordinis, tamen etiam secundo completitur res inferioris ordinis, quas superiori, & excellentiori modo attingit, ut patet in lumine immateriali, quod primo circa immaterialia versatur, tamen etiam attingit materialia modo immateriali. Antecedens vera declaratur, & probatur, quia lumen gloriæ est sufficiens principium ad cognoscendum se ipsum, & alia lumina sibi similia, per se ipsum seu per propriam speciem; ergo est etiam sufficiens principium ad cognoscendam gratiam sanctificantem perfecte, & quidditative, atque adeo ad cognoscendas omnes qualitates supernaturales, ut sunt charitas, dona supernaturalia, & similia, quæ ejusdem ordinis sunt, & ad gratiam, sicut potentiæ ad formam principalem, comparantur; unde idem lumen sufficiens est ad hæc omnia cognoscenda. Antecedens, assumptum de ipso lumine gloriæ, videtur sane per se clarum, quia nullum intellectuale lumen videtur esse ita accommodatum ad habendam perfectam scientiam in proprio genere, sicut est ipsum lumen gloriæ, quia nullum inferius videtur esse posse ita sufficiens, cum non sit tam perfectum: perfectius autem lumen, vel omnino esse non potest, vel sine causa requiratur ad tale lumen cognoscendum, cum lumen intellectus angelici natura sua sufficiens sit ad cognoscendum se ipsum, & sibi similia. Et in universum, omne lumen intellectuale clarum & evidens est sufficiens principium se ipsum manifestandi; consequentia vero, quod ad gratiam sanctificantem attinet, facilis etiam videtur: tum, quia gratia & lumen sunt res ejusdem ordinis, unde eandem videntur habere rationem objecti scibilis: tum etiam, quia in angelo idem naturale lumen est sufficiens prin-



principium, non tantum seipsum cognoscendi, sed etiam substantiam ipsius angeli, cuius est proprietas: sed hoc lumen gloriæ etiam comparatur ad gratiam, præsertim consummatam, sicut proprietas ad naturam, cum qua habet proportionem: ergo erit principium sufficiens cognoscendi illam, & eadem ratio probat de aliis qualitatibus, & virtutibus supernaturalibus, cum neque illæ perfectiones sint, neque ad illas cognoscendas maior virtus requiratur. Et confirmari potest hic discursus, quia virtus, quæ potens est per se primo versari circa aliquod objectum, quod est tale per essentiam, potest etiam attingere participationes illius objecti ad eundem ordinem pertinentes: ut potentia, quæ est principium videndi lumen, est etiam sufficiens ad videndos colores: & charitas, quæ amat Deum propter bonitatem increatam, est sufficiens principium amandi seipsam, & sibi similes, & proximum, propter supernaturalem creatam sanctitatem. Confirmatur secundo hæc sententia, exemplo intellectus angelici, cuius lumen unum est, quod respicit propriam essentiam ipsius angeli, a qua manat, tanquam objectum maxime proprium & proportionatum, quod semper actu naturaliter intuetur, & nihilominus simul extenditur ad res alias per proprias species cognoscendas: sic igitur lumen gloriæ, quamvis essentiam divinam respiciat, ut objectum maxime proprium & connaturale, & ita actu quasi connaturali perpetuo circa ipsam versetur, poterit tamen versari circa res alias per proprias earum species altiori & excellentiori modo, quam omne aliud lumen: intellectuale quippe lumen, quo excellentius est, eo habet objectum universalius. Neque oportet in omnibus ferveri similitudinem inter hoc lumen creatum, & lumen increatum Dei: hoc enim, quia est purissimus actus, non tantum est lumen, sed etiam visio, & objectum ipsum intelligibile, unde nullo principio a se distincto uti potest ad intelligendum: lumen vero gloriæ hoc ipso, quod creatum est, habet admixtam potentiam, & potest uti principio, seu specie, a se distincta, sicut etiam efficit actum distinctum a se, & ideo mirum non est, quod uti possit speciebus ad cognoscendas res, non tantum in Deo, sed etiam in proprio genere. Et hæc sententia videtur mihi probabilis, & verisimilis propter discursum factum, & quia in contrarium nec autoritas aliqua occurrit, neque ratio, quæ magnam ingerat difficultatem. Nihilominus tamen, quia res nova est, nolo eam definire, sed difficultatem ejus insinuasce sufficiat. Ad quam, defendendo sententiam communem, dicendum est, lumen gloriæ habere pro objecto adæquato essentiam increatam, & nullam rem creatam directe attingere in seipsa, sed tantum in Verbo, ac denique hos duos modos cognoscendi creaturas in Verbo, & in seipsis, tam esse distinctos, ut non possint eidem lumini convenire, quod etiam per sese satis probabile apparet.

## QUESTIO XII.

De scientia animæ Christi acquisita, in quatuor articulos divisa.

**D**Einde considerandum est de scientia animæ Christi acquisita, vel experimentalis.

Et circa hoc quaruntur quatuor.

Primo, utrum secundum hanc scientiam Christus cognoverit omnia.

Secundo, utrum in hac scientia profecerit.

Tertio, utrum aliquid ab homine didicerit.

Quarto, utrum acceperit aliquid ab Angelis.

### ARTICULUS I.

Utrum secundum hanc scientiam Christus cognoverit omnia.

**A**d primum sic proceditur. Videtur, quod secundum hanc scientiam Christus non omnia cognoverit. Hujusmodi enim scientia per experientiam acquiritur. Sed Christus non omnia expertus est. Non igitur omnia secundum hanc scientiam scivit.

2. Præterea. Homo scientiam per sensum acquirit. Sed non omnia sensibilia sensibus corporalibus Christi fuerunt subiecta. Non igitur secundum hanc scientiam omnia cognovit Christus.

3. Præterea. Quantitas scientiæ attenditur secundum scibilia. Si igitur secundum hanc scientiam Christus omnia scivisset, esset in eo scientia acquisita, equalis scientiæ infusæ, & scientiæ beatæ, quod est inconveniens. Non ergo secundum hanc scientiam Christus omnia scivit.

Sed contra est, quod nihil imperfectum fuit in Christo, quantum ad animam. Fuisse autem imperfecta hæc ejus scientia, si secundum eam non scivisset omnia, quia imperfectum est, cui potest fieri additio. Ergo secundum hanc scientiam Christus omnia scivit.

Respondeo dicendum, quod scientia acquisita ponitur in anima Christi (ut supra dictum est) propter convenientiam intellectus agentis, ne ejus actio sit otiosa, quæ facit intelligibilia in actu: sicut & scientia indita, vel infusa ponitur in anima Christi ad perfectionem intellectus possibilis. Sicut autem intellectus possibilis est, quo est omnia fieri, ita intellectus agens est, quo omnia est facere, ut dicitur in tertio de Anima. Et ideo, sicut per scientiam inditam scivit anima Christi omnia illa, ad quæ intellectus possibilis est quocumque modo in potentia, ita per scientiam acquisitam scivit omnia illa, quæ possunt sciri per actionem intellectus agentis.

Ad primum ergo dicendum, quod scientia rerum acquiri potest, non solum per experientiam ipsarum, sed etiam per experientiam quarundam aliarum rerum, cum ex virtute luminis intellectus agentis possit homo procedere ad intelligendum effectus per causas, & causas per effectus, & similia per similia, & contraria per contraria. Sic igitur, licet Christus non fuerit omnia expertus, ex his tamen, quæ expertus est, in omnium devenit notitiam.

Ad secundum dicendum, quod licet sensibus corporalibus Christi non fuerint subiecta omnia sensibilia, fuerunt tamen sensibus ejus subiecta aliqua sensibilia, ex quibus, propter excellentissimam vim rationis ejus, potuit in aliorum notitiam devenire, per modum prædictum: sicut videndo corpora cælestia, potuit comprehendere eorum virtutes & effectus, quos habent in istis inferioribus, qui ejus sensibus non subiacebant. Et eadem ratione ex quibuscumque aliis in aliorum notitia devenire potuit.

Ad tertium dicendum, quod secundum istam scientiam anima Christi non simpliciter cognovit omnia, sed illa omnia, quæ per lumen intellectus agentis homini sunt cognoscibilia. Unde per hanc scientiam non cognovit essentias substantiarum separatarum, nec etiam singularia præterita, præsentia, & futura, quæ tamen cognovit per scientiam inditam, ut supra dictum est.

### COMMENTARIUS.

**I**n hoc articulo explicat D. Thom. materiale objectum hujus scientiæ, & supponit sententiam, quam supra docuit, nimirum, Christum non habuisse hanc scientiam a Deo infusam, sed propria industria & exercitatione, seu actione intellectus agentis comparatam. Unde concludit, cognovisse Christum per hanc scientiam omnia, quæ per actionem intellectus agentis ab homine sciri possunt, non vero substantias separatas, nec singularia præterita, præsentia, aut futura, ut dicit in solutione ad 3. Contra quam doctrinam objicit D. Th. argumenta non facilia. Sed quæ in solutione eorum dicit, & tota hæc sententia indiget prolixiori examine, ut videbimus disputatione sequenti.

### ARTICULUS II.

Utrum Christus in hac scientia profecerit.

**A**d secundum sic proceditur. Videtur, quod secundum hanc scientiam Christus non profecerit. Sicut enim secundum scientiam beatitudinis, & secundum scientiam infusam, Christus cognovit omnia, ita & secundum hanc scientiam acquisitam, ut ex dictis patet. Sed secundum illa scientias non profecit: ergo nec secundum istam.

2. Præterea. Proficere, est imperfecti, quia perfectum additionem non recipit. Sed in Christo non est ponere scientiam imperfectam. Ergo secundum hanc scientiam Christus non profecit.

3. Præterea. Damascen. dicit. Qui proficere dicunt Christum sapientia & gratia, ut additamentum sensus susipientem, non venerantur unionem, quæ est secundum hypostasim. Sed impium est, illam unionem non venerari. Ergo impium non est dicere, quod scientia ejus acceperit additamentum.

Sed

Differen-  
tia inter  
lumen  
gloriæ  
creatum  
& increa-  
tum Dei.

q. 9. art. 4.

Lib. 3. de  
anima  
tex. 18.  
tom. 2.

In corp.  
art.

In corp. 2.  
& q. præc.  
& q. 5. a. 3.  
& 4.

79.

Sup. q. 7. a.  
12. 3. &  
inf. a. 33. &  
q. 15. a. 8. &  
3. d. 13. lit.  
in fin. & d.  
14. a. 3. q. 5  
& ver. q.  
20. ar. 6. 3.  
& opuse. 3.  
c. 223. &  
Joan. 1. 1.  
10 col. 1. 6.  
& Hebr. 5.  
eol. 9. \* ar.  
præorden.  
Lib. 3. c.  
21. orcho.  
fin. paulo.  
a princip.



Lib. de 1.  
o. Do-  
mini Sac.  
c. 8. a me  
dio tom. 2.

Sed contra est, quod dicitur Luca 2: quod Jesus proficiebat sapientia, & etate, & gratia apud Deum & homines. Et Ambrosius\* dicit, quod proficiebat secundum sapientiam humanam. Humana autem sapientia est, quae humano modo acquiritur, scilicet, per lumen intellectus agentis. Ergo Christus secundum hanc scientiam profecit.

Respondeo dicendum, quod duplex est profectus scientiae. Unus quidem secundum essentiam, prout scilicet ipse habitus scientiae augetur. Alius autem secundum effectum, puta si aliquis secundum eundem & aequalem scientiae habitum, primo minora aliis demonstrat, & postea majora & subtiliora. Hoc autem secundo modo manifestum est, quod Christus in scientia, & gratia profecerit, sicut & in etate: quia, scilicet, secundum augmentum etatis opera majora faciebat, quae, scilicet, majorem scientiam & gratiam demonstrabant. Sed quantum ad ipsum habitum scientiae, manifestum est, quod habitus scientiae infusus in eo non est augmentatus, cum a principio plenarie fuerit sibi omnium scientia infusa: & multo minus scientia beata in eo augeri potuit. De scientia enim divina, quod non possit augeri, supra in 1. p. dictum est\*. Si igitur prae ter habitum scientiae infusum, non sit in anima Christi aliquis habitus scientiae acquisita (ut quibusdam videtur, & mihi aliquando visum est), nulla scientia in Christo augmentata fuit secundum essentiam, sed solum per experientiam, id est, conversionem specierum intelligibilium inditarum ad phantasmata. Et secundum hoc dicunt, quod scientia Christi profecit secundum experientiam, convertendo, scilicet, species intelligibiles inditas ad ea, quae de novo per sensum accepit. Sed quia inconueniens videtur, quod aliqua naturalis actio intelligibilis, Christo deesset, cum extrahere species intelligibiles a phantasmatibus, sit quaedam naturalis actio hominis secundum intellectum agentem, conueniens videtur, hanc etiam actionem in Christo ponere. Et ex hoc sequitur, quod in anima Christi aliquis habitus scientiae fuerit, qui per huiusmodi abstractionem specierum potuerit augmentari, ex hoc, scilicet, quod intellectus agens post primas species intelligibiles abstractas a phantasmatibus, poterat etiam alias & alias abstrahere.

Ad primum ergo dicendum, quod tam scientia infusa anima Christi, quam scientia beata, fuit effectus agentis infinitae virtutis, qui potest simul totum operari: & ita in neutra scientia Christus profecit, sed a principio eam perfectam habuit. Sec scientia acquisita causatur ab intellectu agente, qui non simul totum operatur, sed successive. Et ideo secundum hanc scientiam Christus non a principio scivit omnia, sed paulatim, & post aliquod tempus, scilicet, in perfecta etate. Quod patet ex hoc, quod Evangelista simul dicit, eum profecisse scientia, & etate. Ad secundum dicendum, quod hoc etiam scientia in Christo semper fuit perfecta secundum tempus, licet non semper fuerit perfecta simpliciter & secundum naturam. Et ideo potuit habere augmentum.

Ad tertium dicendum, quod verbum Damascen.\* intelligitur, quantum ad illos, qui dicunt simpliciter fuisse factam additionem scientiae Christi, scilicet, secundum quamcumque ejus scientiam, & praecipue secundum infusam, quae causatur in anima Christi ex unione ad Verbum. Non autem intelligitur de augmento scientiae, quae ex naturali agente causatur.

#### COMMENTARIUS.

Quoniam in art. praeced. docuit D. Th. aliquo modo cognovisse Christum omnia per hanc scientiam, in hoc explicat, quo tempore etatis suae haec omnia sciverit. Et docet, non a principio conceptionis, sed paulatim hanc universalem scientiam acquisivisse, quia intellectus agens, cujus actione ad comparandam hanc scientiam usus est, non simul omnia, sed paulatim in temporis successione operatur. Quod si interrogas, quando incepit Christus hanc scientiam acquirere, & quo tempore ad ultimam ejus perfectionem pervenit. Respondet D. Th. in sol. ad 1. & 2. in singulis etatibus habuisse Christum hanc scientiam cum tota perfectione unicuique etati accommodata, unde cum primum coepit uti ratione, modo connaturali homini statim videtur incepisse, hanc scientiam acquirere (juxta hunc dicendi modum), postmodum vero intra breve tempus illam consummavit, quam cito potuit ingenio, & industria humana fieri; & juxta hunc sensum intelligendum cenfeo, quod D. Th. dixit in perfecta

etate habuisse Christum hanc scientiam consummatam.

#### ARTICULUS III.

Utrum Christus aliquid ab homine didicerit.

Ad tertium sic proceditur. Videtur, quod Christus aliquid ab hominibus didicerit. Dicitur enim Luca 2. quod invenerunt eum in templo in medio Doctorum: interrogantem illos, & respondentem: interrogare vero, & respondere est addiscere. Ergo Christus aliquid didicit ab hominibus.

2. Præterea. Acquirere scientiam ab homine docente, videtur esse nobilius, quam acquirere a rebus sensibilibus: quia in anima hominis docentis sunt species intelligibiles in actu, in rebus autem sensibilibus sunt species intelligibiles solum in potentia. Sed Christus accipiebat scientiam experimentalem ex rebus sensibilibus, ut dictum est. Ergo multo magis poterat accipere scientiam, addiscendo ab hominibus.

3. Præterea. Christus secundum scientiam experimentalem non omnia a principio scivit, sed in ea profecit, ut dictum est. Sed quilibet audiens sermonem significativum alicujus, potest addiscere, quod nescit. Ergo Christus potuit ab hominibus aliqua addiscere, quae secundum hanc scientiam nesciebat.

Sed contra est, quod dicitur Isa. 55. Ecce testem populi dedi eum, ducem ac præceptorem gentibus. Præceptoris autem non est doceri, sed docere. Ergo Christus non accepit aliquam scientiam per doctrinam alicujus hominis.

Respondeo dicendum, quod in quolibet genere id, quod est primum movens, non movetur secundum illam speciem motus: sicut primum alterans non alteratur. Christus autem constitutus est a Deo caput Ecclesiae, quinimo omnium hominum (ut supra dictum est\*), ut non solum omnes per ipsum gratiam acciperent, sed etiam, ut omnes ab eo doctrinam veritatis reciperent. Unde ipse dicit Joan. 18. In hoc natus sum, & ad hoc veni in mundum, ut testimonium perhibeam veritati. Et ideo non fuit conueniens ejus dignitati, ut a quocumque homine doceretur.

Ad primum ergo dicendum, quod sicut Origenes\* dicit super Lucam, Dominus interrogabat, non ut aliquid addisceret, sed ut interrogatus erudiret. Ex uno quippe doctrinae fonte manat, & interrogare, & respondere sapienter. Unde & ibid. in Evang. sequitur, quod stupebant omnes, qui eum audiebant, super prudentiam, & responsis ejus.

Ad secundum dicendum, quod ille, qui addiscit ab homine, non accipit immediate scientiam a speciebus intelligibilibus, quae sunt in mente ipsius, sed mediantibus vocibus sensibilibus, tanquam signis intelligibilium conceptuum. Sicut autem voces ab homine formatae sunt signa intellectualia scientiae ipsius, ita creatura a Deo condita sunt signa sapientiae ejus. Unde dicitur Eccles. 1. quod Deus effudit sapientiam super omnia opera sua. Sicut igitur dignius est doceri a Deo, quam ab homine: ita dignius est accipere scientiam per sensibiles creaturas, quam per hominis doctrinam.

Ad tertium dicendum, quod Jesus proficiebat in scientia experimentali, sicut & in etate, ut dictum est. Sicut autem etas opportuna requiritur ad hoc, quod homo accipiat scientiam per inventionem, ita etiam ad hoc, quod accipiat scientiam per disciplinam. Dominus autem nihil fecit, quod non congrueret ejus etati: & ideo audiendis doctrinae sermonibus non accommodavit auditum, nisi illo tempore, quo poterat, etiam per viam experientiae, talem scientiam gradum attingisse. Unde Gregorius† dicit super Ezechielem: Duodecimo anno etatis suae interrogare dignatus est homines in terra, quia, juxta rationis usum, doctrinae sermo non suppetit nisi in etate perfecta.

#### COMMENTARIUS.

Duplex est modus acquirendi scientiam, scilicet per inventionem & per disciplinam, in qua magister, & doctor esse potest homo, aut Angelus: quamvis ergo D. Th. art. 1. solvendo argumenta, obiter dixerit, Christum inventionem propria hanc scientiam acquisivisse, in hoc & sequenti articulo exponit, etiam per disciplinam aliquid ab homine, vel angelo didicerit; & hic negat, aliquid didicisse ab homine, quia non decuit supremum Doctorem a discipulis doceri, Christus autem est supremus Doctor hominum, Isa. 55. & Joan. 18. Sed dici posset, Christum esse datum hominibus, ut eos doceret, & illuminaret in doctrina, & veritatibus fidei, ad salutem animae pertinentibus, non vero in aliis scientiis & doctrini-

1. p. q. 14.  
art. 15.

3. Senten.  
d. 14. q. 3.  
art. 3.

Art. præ.

Art. præ.

Quæst. 8.  
art. 3.

Homil. 19.  
in fin. 10.3

Art. præ.

Hom. 2.  
parum a  
Princ.



doctrinis, nunquam enim homines docuit Physicam, aut Mathematicam, &c. Non est autem inconueniens, Doctorem in uno supremo genere scientiæ, doceri a discipulo de aliquibus inferioribus rebus. Nihilominus conclusio D. Th. recepta est ab omnibus Theologis, & eam indicant Patres omnes, ubicumque de scientia animæ Christi loquuntur, quia, quamvis illud, quod in contrarium obijcitur, non repugnauerit, hoc tamen magis decuit, præsertim propter dignitatem personæ Christi, quæ cum sit æterna Dei sapientia, non debuit ab hominibus doceri, unde Jo. 7. dicebant Judæi: *Quomodo hic literas scit, cum non didicerit?* Et Marci 6. *Mirabantur in doctrina ejus, dicentes. Unde huic hæc omnia, & quæ est hæc sapientia, quæ data est illi?*

## ARTICULUS IV.

Utrum Christus aliquid acceperit ab Angelis.

**A**D quantum sic proceditur. Videtur, quod Christus ab Angelis scientiam acceperit. Dicitur enim Luc. 22. quod apparuit Christo Angelus de cælo, confortans eum. Sed confortatio fit per verba confortatoria docentis, secundum illud Job. 4. *Ecce docuisti plurimos, & manus lassas roborasti, vacillantes confirmauerunt sermones tui.* Ergo Christus ab Angelis edoctus est.

2. Præterea. Dionys. 4. dicit 4. Cælest. hierarch. Video enim quod & ipse Jesus, super cælestium substantiarum super substantialis substantia, ad nostram intransmutabiliter veniens, obedienter subijcitur Patri & Dei per Angelos formationibus. Videtur igitur, quod ipse Christus ordinationi legis diuine subijci voluerit, per quam homines, mediantibus Angelis, erudiuntur.

3. Præterea. Sicut corpus humanum naturali ordine subijcitur corporibus cælestibus: ita etiam humana mens Angelicis mentibus. Sed corpus Christi subiectum fuit impressionibus cælestium corporum, passus est enim calorem in æstate, & in hyeme frigus, sicut & alias humanas passiones. Ergo etiam ejus mens humana subiacebat illuminationibus supercælestium spirituum.

Sed contra est, quod Dionysius\* dicit 7. cap. Cælest. hier. quod supremi Angeli ad ipsum Jesum questionem faciunt, diuini quoque illius operis, & pro nobis assumpta carnis scientiam discunt, & eos ipse Jesus sine medio docet. Non est autem ejusdem docere, & doceri. Ergo Christus non accepit scientiam ab Angelis.

a. Respondeo dicendum, quod sicut anima humana media est inter spirituales substantias & res corporales, ita duobus modis nata est perfici. Uno quidem modo per scientiam acceptam ex rebus sensibilibus: alio modo per scientiam inditam sive impressam ex illuminatione spiritualium substantiarum. Utroque autem modo anima Christi fuit perfecta: ex sensibilibus quidem secundum scientiam experimentalem, ad quam quidem non requiritur lumen angelicum, sed sufficit lumen intellectus agentis: ex impressione vero superiori secundum scientiam infusam, quam est immediate adeptus a Deo. Sicut enim supra communem modum creatura anima illa unita est Verbo in unitate personæ, ita supra communem modum hominum, immediate ab ipso Dei Verbo repleta est scientia & gratia. Non autem mediantibus angelis, qui etiam ex influentia Verbi, verum scientiam in sui principio acceperunt, sicut in 2. super Genes. ad litteram Augustinus\* dicit.

b. Ad primum ergo dicendum, quod illa confortatio angelis non fuit per modum instructionis, sed ad demonstrandum propriam humanam naturam. Unde Beda dicit super Lucam\*. In documento utriusque naturæ, & angeli ei ministrasse, & eum confortasse dicuntur. Creator enim creatura sue non eguit presidio, sed homo factus, sicut propter nos tristis est, ita propter nos confortatur, ut scilicet, in nobis fides Incarnationis ipsius confirmetur.

Ad secundum dicendum, quod Dionys. dicit, Christum fuisse formationibus angelicis subiectum, non ratione sui ipsius, sed ratione eorum, quæ circa ejus Incarnationem agebantur, & circa ministracionem ejus in infanti etate constituti. Unde ibidem subdit, quod per medios angelos nuntiatur Joseph a Patre, dispenſata Jesu ad Ægyptum recessio, & rursum ad Judæam de Ægypto traductio.

Ad tertium dicendum, quod Filius Dei assumptus corpus passibile (ut infra dicetur) sed animam perfectam scientia & gratia. Et ideo corpus ejus conuenienter fuit subiectum impressioni cælestium corporum, anima vero ejus non fuit subiecta impressioni cælestium spirituum.

## COMMENTARIUS.

**N**Egat D. Thomas, Christum ab angelis aliquid didicisse, & optima utitur conjectura, quia neque quoad naturalem cognitionem indiguit lumine angelico, proprium enim illi sufficiebat: neque ad supernaturalem, seu infusam cognitionem, quia sicut illa anima proxime fuit Verbo conjuncta, ita per illius immediatum influxum hujusmodi scientiam accepit. Adde, rationem præcedentis articuli etiam ad hanc conclusionem applicari posse, quoniam Christus non solum hominum, sed angelorum etiam Doctor existit, teste Dionys. c. 6. de cælest. hierar. ubi ait, Christum angelos illuminare; nunquam ergo ab illis illuminatus est.

b. In solutione ad primum tractat D. Th. locum illum Luc. 22. Apparuit autem illi Angelus de cælo confortans eum, qui dupliciter a Patribus exponitur. Primo minus proprie, & quasi per quandam metaphoram, ut scilicet, illud confortare, non significet, animare, seu ad fortiter agendum excitare, sed potius fortitudinem Christi prædicare, sicut nos dicimus magnificare Deum, cum magnitudinem ejus prædicamus. Ita exponit Chrysost. tom. 5. hom. de Trinitate, Epiph. hæref. 69. qui dicit, angelum confortasse Christum quasi admirando fortitudinem ejus, & laudando, & dicendo: *Tua est potentia Domine, tua est fortitudo*, &c. sequitur Theophylact. Lucæ 22. Secundo proprius, & (ut ego existimo) magis ad rem exponitur, angelum confortasse Christum proponendo rationes, quæ possent tristitiam ejus lenire, & inferiorem portionem confortare: unde non fit, angelum docuisse Christum, non enim propterea ad illum eum sermonem habuit, quia Christus eas rationes ignoraret, vel illas per se considerare non posset, sed quia ita per rationem superiorem illas considerabat, ut nullum inde solatium communicari permetteret inferiori parti, & ut magis constaret veritas passionis ejus, voluit angelico ministerio rationes illas proponi, & quasi in memoriam revocari. Et hoc modo dicitur Angelus, quantum in se erat, confortasse Christum, quamquam ipse neque illud consolationis genus acceptare visus sit, statim enim factus in agonia prolixius orabat. Et hanc expositionem magis indicat D. Thom. hic quam ex Beda refert Luc. 22. sed est etiam Hier. dial. 2. cont. Pelagianos. Hil. lib. 10. de Trin. Cyril. Alex. epist. 9. Dam. lib. 3. de fid. c. 20. & Bern. ferm. 1. de sancto Andrea.

Angelus  
qualiter  
in horro  
Christum  
confortat.

## DISPUTATIO XXX.

In duas sectiones distributa.

De perfectione scientiæ acquisita animæ Christi, & modo, quo illam obtinuit.

**P**RIUSquam inquiramus modum, quo scientiam hanc anima Christi comparavit, explicandum est, in quo perfectionis gradu illam habuerit, nam ex hoc principio, illud maxima ex parte pendet. In perfectione autem hujus scientiæ explicanda, possemus eundem ordinem tenere, quem in disputationibus de scientia infusa secuti sumus, sed quia præsens materia clarior est, brevius illam expediemus. Supponimus enim, hanc scientiam esse ejusdem rationis essentialis & specificæ cum scientia connaturali animæ humanæ, ut ex ipsis terminis constat, & ex supra tractatis disp. 15. sect. 2. Unde fit, eodem modo philosophandum esse de objecto, actibus, speciebus, & habitibus ejus scientiæ in Christo, ac in aliis hominibus, quod ad essentialem perfectionem attinet, seclusa imperfectione opinionum, & judiciorum incertorum, quæ in anima Christi locum non habuerunt, ut supra diximus. Solum ergo superest, ut inquiramus perfectionem hujus scientiæ secundum extensionem ad plura, vel pauciora objecta materialia, & secundum dependentiam a corpore corruptibili.

## SECTIO I.

Utrum Christus per hanc scientiam cognoverit omnia, quæ naturaliter cognosci possunt ab anima humana, tam conjuncta, quam separata.

**Q**UÆSTIO hæc procedit de Christo in statu viæ, nunc enim dubium non est, quin hæc omnia per hanc scientiam

Christus  
nihil ab  
homine  
didicit.

81.  
Ios q 30.  
a. 2. 1. & 3.  
d. 1. 3. q. 2.  
a. 2. q. 1. &  
d. 14. a. 3.  
q. 6.

Cap. 4.  
non pro-  
cul. a. 8.  
cap.

Cap. 7.  
post mod.  
illius.

Lib. 2. c. 2.  
tom. 3.

Lib. 6. in  
Luc. c. 92.  
secundum  
ordin. Be-  
da, ante  
med. 16. 2.

Quæst. 14.  
ait. 1.



scientiam cognoscat, quia anima propter conjunctionem ad corpus gloriosum non impeditur, quominus perfecte cognoscere possit omnia, quæ cognoscit separata. De statu autem viæ est clara sententia D. Th. in his articulis, Christum solum cognovisse per hanc scientiam ea, quæ ex sensibilibus objectis per abstractionem, & efficientiam intellectus agentis cognosci possunt; & loquitur consequenter, quia supponit Christum solum propria inventionem hanc scientiam acquisivisse. Et confirmari potest, quia Christus dependebat in usu hujus scientiæ a phantasmatis; nam hic est naturalis modus operandi scientiæ naturalis, seu acquisitiæ; ergo solum per hanc scientiam cognoscere poterat, quæ in phantasmatis repræsentantur, vel ex illis cognosci possunt.

Dico tamen primo Christum per hanc scientiam cognovisse omnes res naturales, tam materiales, quam immateriales, & tam substantias, quam accidentia ea perfectione, qua ab anima, tam conjuncta, quam separata, naturaliter cognosci possunt. Hanc conclusionem intelligo de iis rebus, quæ proprie sub scientiam cadunt (ut omittamus singularia materialia, & contingentia, de quibus sect. sequenti dicam) quam tamen non invenio ita distincte explicatam a Theologis loquentibus de hac scientia; sumitur tamen aperte ex illis authoribus, qui, cum negent habuisse Christum scientiam per se infusam respectu rerum naturalium, affirmant tamen a principio illas omnes perfecte cognovisse per scientiam hanc per accidens infusam. Ratione vero, primo generatim suadet, quia anima Christi a principio habuit omnem perfectionem sibi debitam ratione unionis vel beatitudinis, cujus carentia necessaria, aut utilis non fuit ad nostram redemptionem, sed tota hæc perfectio scientiæ est illi debita ratione beatitudinis, & unionis, ut per se constat, & ejus carentia redemptioni hominum nihil conferbat, neque necessario sequebatur ex eo, quod anima illa informaret corpus corruptibile, nam (ut D. Th. docuit q. 11. art. 1. ad 2. & art. 2.) anima Christi, quamvis esset in corpore corruptibili, in hoc tamen retinuit conditionem animæ beatæ, quod non fuit ita subdita suo corpori, ut ab eo dependeret, sed illi omnino dominata est; ergo, etiam dum erat in illo corpore, fuit capax omnis prædictæ perfectionis hujus scientiæ; ergo illam habuit.

Secundo in particulari hoc declaratur, & probatur tali discursu: nam primo negari non potest, quin Christus per hanc scientiam cognoverit materiale substantiam proprio, & absoluto conceptu, prout in se est, nam etiam D. Th. hic art. 1. ad 2. dicit Christum per hanc scientiam comprehendisse virtutes corporum cœlestium, & effectus, quos habent in istis inferioribus: impossibile autem est comprehendere virtutem cœli, substantia ejus non plene perspecta. Et confirmatur hoc, quia alias valde imperfecte cognovisset anima Christi substantias rerum materialium cognitione naturali, quamdiu fuit in viâ, quod videtur satis absurdum: at vero propria cognitio substantiæ, etiam materialis, non potest comparari ab anima conjuncta corpori corruptibili ex vi sensibilibus phantasmatum, ut ex scientia de Anima, & ex Metaphysica suppono; habuit ergo anima Christi, etiam existens in corpore corruptibili, illam cognitionem naturalem substantiæ materialis, quam anima separata, vel conjuncta corpori glorioso habere potest. Secundo non videtur posse dubitari, quin anima Christi in statu viæ se per se ipsam cognoscere, & intueri potuerit eo modo, quo anima separata, vel angelus suam substantiam per ipsammet naturaliter intuetur. Probatur ex eodem principio, quia anima Christi, etiam in statu viæ, non erat subiecta, nec pendens a corpore, sed naturale est animæ non impediri a corpore se intueri, & cognoscere hoc modo; ergo. Tertio hinc fit valde verisimile potuisse etiam animam Christi in statu viæ intueri omnes substantias separatas, prout in se ipsis sunt, eo naturali modo, quo ab anima separata cognosci possunt. Probatur, quia est eadem ratio; anima enim, quæ est capax cognitionis suæ propriæ substantiæ spiritualis, prout in se est, est etiam capax similis cognitionis aliarum creaturarum substantiarum spiritualium; anima autem Christi fuit a principio perfecta secundum totam capacitatem suam naturalem. Ex his ergo omnibus satis concluditur cognovisse animam Christi in statu viæ omnia, quorum naturaliter capax est anima humana in quocumque statu constituta.

Suarez. Tom. XVI.

Dico secundo. Anima Christi in corpore corruptibili potuit habere naturalem cognitionem, seu scientiam intellectivam, sine conversione ad phantasmata. Hæc conclusio sequitur aperte ex præcedenti, non enim potuisset illa anima in eo statu cognoscere se ipsam, aut alias substantias, præsertim spirituales, prout in se sunt, si in ea cognitione omnino a phantasia dependeret. Hac enim ratione animæ aliorum hominum non possunt intueri se ipsas, quia cognoscere non possunt sine conversione ad phantasmata. Ratio vero sumenda est ex supra dictis, quia hæc dependentia oritur ex quadam subiectione, seu quasi alligatione animæ ad corpus, at vero anima Christi, tum ratione unionis, tum ratione beatitudinis, quamvis informaret corpus corruptibile, non tamen illi fuit alligata, neque subiecta, & ideo, etiam in eo statu, retinuit vim operandi actus intellectus & voluntatis, etiam naturales, sine corporis consortio, aut dependentia. Et confirmatur, quia non repugnat animam Christi habuisse hanc perfectionem, & alioqui illi debita erat ratione unionis, & beatitudinis, & illius carentia non erat nobis necessaria; ergo.

Dices, videri nos confundere scientiam per se infusam cum hac acquisita, nam cognoscere substantias separatas, prout in se ipsis sunt, & operari sine conversione ad phantasmata, videtur esse proprium scientiæ per se infusæ. Respondetur non confundi has scientias, quamvis in aliqua conditione aliquo modo convenire possint; scientia enim per se infusa dicta est a nobis quædam scientia divini & supernaturalis ordinis, per quam non solum res supernaturales, sed etiam naturales, supernaturali modo cognoscuntur: unde illa scientia dicitur per se infusa, non solum ratione specierum, sed etiam ratione luminis, & quia omnino est supra conditionem animæ humanæ, tam conjunctæ, quam separatæ. At vero hæc scientia, de qua modo agimus, est connaturalis humanæ naturæ, & licet attingat res spirituales eo modo, quo anima humana potest illas naturaliter cognoscere, tamen, etiam quoad hoc, est inferioris rationis, quam scientia per se infusa: unde ad hanc cognitionem non requiritur aliud lumen, præter illud, quod naturale est animæ humanæ. Requiritur autem species per se quidem infusa, tamen ordinis naturalis, quales infunduntur animæ separatæ juxta naturalem conditionem ejus, quæ omnino diversæ sunt ab speciebus alterius scientiæ, ut ex supra dictis facile constat. Et hinc etiam possunt hæc duæ scientiæ in hoc convenire, quod Christus potuit utraque uti sine conversione ad phantasmata: quia hæc conditio non solum oriri potest ex propria & specifica conditione scientiæ infusæ, & supernaturalis, sed etiam ex conditione seu statu ipsius subiecti, seu animæ beatæ, perfecte dominantis corpori suo, ut ex doctrina etiam D. Thomæ satis declaratum est.

Objecio.

## SECTIO II.

*Utrum anima Christi habuerit hanc naturalem scientiam infusam a Deo a primo instanti creationis sue.*

PRIMA sententia negat habuisse animam Christi hanc scientiam a principio, seu infusam, sed discursu temporis eam propria inventionem acquisivisse abque hominis magisterio, seu doctrina: est enim inter hos duos modos differentia, quia in inventionem objecta solum ministrant species, quibus habitis homo per se discurret, & propriam virtutem exercet, & se ipsum perficit, & quasi docet, & illuminat; at vero in disciplina illuminatur homo ab alio, & quasi dirigitur in discursu, seu cognitione, quod quandam dicit imperfectionem, cum tamen illud primum ad perfectionem spectet. Hæc est sententia D. Thomæ supra q. 9. art. 4. & tota hac questione; quibus locis Cajetanus, & alii Thomistæ hanc sententiam defendunt, & Capreolus in 3. dist. 14. Citantur etiam Major in q. 5. Marfilus q. 10. sed loquuntur aperte de scientia experimentalis, de qua est diversa ratio, ut statim dicam. Fundamentum D. Thomæ est, quia alias intellectus agens frustra fuisset in Christi anima, caruisset enim propria operatione, scilicet, abstractione specierum, si anima Christi a principio illas infusas habuisset. Et confirmari potest primo, quia perfectius est a se ipso, & per propriam actionem habere perfectionem propriam, quam ab alio

C c

eam

Christus  
per scientiam  
acquisitam  
novit res  
omnes  
naturales.



eam recipere. Unde Aristot. 1. Ethic. c. 4. ex Hesiodo ait, *Optimus ille quidem est, ex sese qui omnia novit*. Dicunt aliqui potuisse a principio habere hanc scientiam, & per proprios actus. Sed hoc verisimile non est, ut supra in simili diximus de virtutibus moralibus acquisitis. Oportuisset enim statim in primo instanti conceptionis habere actus scientiarum omnium, & circa objecta omnia, quæ ad perfectionem habitus sufficerent; hoc autem sine multis, & non necessariis miraculis excogitari non potest. Et præterea interrogo, an habuerit Christus in eo instanti infusas species omnium illorum objectorum, vel illas a phantasmatibus abstraxerit. Si dicatur primum, cur non dicitur idem de habitibus, cum sit eadem ratio? si vero secundo afferatur, quomodo id fieri potuit in ea ætate, & dispositione sensuum, & in utero matris, & unico momento? certe necessarium est multa confingere sine causa probabili, non potuerunt ergo hæ scientiæ acquiri, & in primo instanti haberi. Confirmo secundo, quia alias Christus infans, non vere, sed simulate operatus esset ut infans, & ut puer, quod est contra huius mysterii veritatem. Confirmatur tertio testimonio illo Luc. 1. ubi Christus dicitur profecisse sapientia, quod cum non potuerit vere dici ratione scientiæ beatæ, vel infusæ, necessario videtur secundum hanc scientiam intelligendum. Præsertim, cum ita videantur exponere sancti Patres, Ambr. lib. de Incarn. Domin. sacram. c. 7. & lib. 5. de fide c. 7. & Cyrillus lib. 2. de fide ad Reg. c. 3. Theod. in epitome divinorum decret. c. Quod suscepit animam cum corpore. Richardus de S. Victore 1. lib. de Emanuel. c. 15. & 16. & lib. 2. c. 18. Laurentius Justinianus lib. de sacro connub. Verbi & animæ cap. 10. Quod si contra hanc sententiam objiciatur, quia ex illa sequi videtur Christum aliquo tempore habuisse humanam ignorantiam, quatenus excludit naturalem scientiam humanam, respondendum est, quamvis non omni tempore omnia sciverit, quæ per hanc scientiam sciri possunt, proprie tamen nullam habuisse unquam ignorantiam, quia singulis temporibus, & ætatibus omnia scivit, quæ pro illo tempore vel ætate scire naturaliter poterit, & debebat, ut supra circa textum D. Thomæ explicatum est. Et hæc sententia sic exposita est probabilis. Si tamen, quæ sectione præcedenti dicta sunt, considerentur, consequenter defendi non potest, & ideo in memoriam revocandum est, quod supra, disp. 25. sect. 2. dixi, sub hac scientia naturali comprehendendi posse & experimentalem cognitionem, & propriam scientiam ex propriis principiis procedentem.

Dico ergo primo Christi animam a principio conceptionis suæ habuisse perfectos omnes habitus scientiarum, & virtutum intellectualium, cum speciebus ad usum eorum necessariis. Hæc est communior sententia, quam etiam tenuit D. Th. q. 20. de verit. art. 2. & in dist. 14. art. 3. quæst. 1. Et Palud. q. 2. Bonav. art. 3. q. 2. Gabriel, Scotus, Durandus, & Alensis 3. p. q. 13. & alii, qui in Christi anima ponunt scientiam per accidens infusam, similem illi, quam Adam habuit. Et possunt pro hac sententia referri sancti Patres illis locis, quibus simpliciter negant, Christum humanam scientiam profecisse, ut Damascen. lib. 3. de fid. c. 22. & in oratione, seu libro: *Quomodo ad imaginem Dei facti sumus*: ubi negat Christum profecisse, tam in scientia divina, quam humana, & per scientiam divinam videtur intelligere scientiam supernaturalem, loquitur enim de scientia creata, per humanam vero scientiam consequenter intelligere scientiam naturalem. Et eodem modo loquitur Bernard. homil. 2. in *Missa* *sus est*, & Beda tom. 7. homil. Domin. 1. post Epiphaniam, Theophylactus, Euthymius, Lyranus, & alii, Luc. 2. & alios statim referam. Ratione probatur primo ex dictis in præcedenti sectione, nam in primis, si Anima Christi in statu vitæ potuit se ipsam propria cognitione naturali per propriam substantiam cognoscere, ergo a primo instanti creationis suæ hoc potuit: quia, cum in ea cognitione non penderet a corpore ætas, aut organorum dispositio, nihil ad eam referebat; ergo ab eodem primo instanti hanc cognitionem seu scientiam habuit, nam substantia spiritualis, potens se cognoscere, & non impedita, actu se intuetur, & considerat naturali cognitione. Et simili fere argumento concludi potest ab eodem instanti habuisse infusas species ad cognoscendas substantias angelicas ejusdem rationis cum illis, quæ veluti naturaliter infunduntur aliis animabus, cum a corporibus

separantur. Ostensum est enim habuisse animam Christi hanc scientiam in statu vitæ, sed non est major ratio de quodam tempore illius status, quam de alio, neque cur aliquo tempore differretur infusio talium specierum, cum neque illæ, neque illarum usus a dispositione corporis pendeat. Et hinc fit ulterius etiam a principio habuisse proprias species aliarum etiam substantiarum materialium propter easdem rationes, quæ simili proportionem applicari possunt. Unde tandem fit omnium etiam aliarum rerum naturalium scientiam ab eo instanti fuisse illi datam, tum quia fere est eadem ratio, tum etiam quia cognitio substantiis propria & perfecta cognitione, facile cognoscuntur accidentia. Secundo arguitur illa ratione sæpe inculcata, quia licet hæc scientia non debeatur animæ, seu naturæ humanæ secundum se: tamen ratione unionis debetur naturæ assumptæ: postulat enim personæ assumptæ dignitas, ut natura assumpta sit omnino perfecta, non solum supernaturali, sed etiam naturali perfectione, & præsertim intellectus, quæ est potissima facultas talis naturæ: & carere ad tempus hac perfectione non fuit ad finem redemptionis necessarium; ergo.

Dices fuisse necessarium propter maiorem perfectionem illius animæ, scilicet, ut per se ipsam talem scientiam acquireret. Sed hoc falsum est primo, quia melius est nunquam carere aliqua perfectione, etiam si a Deo solo recipienda sit, quam carere illa aliquo tempore, ut per proprios actus obtineatur, quia hoc fere nihil perfectionis addit, ut in simili dixit D. Th. infra q. 19. art. 3. Præsertim, quia quacumque ratione Christus hanc scientiam infusam habuerit, a se illam habere dicendus est, non tanquam adventitiam, sed tanquam proprietatem connaturalem ratione unionis, sicut de gratia & aliis donis in superioribus dictum est. Quod secundo ita declaratur, & confirmatur, quia si Christus assumpsisset humanam naturam in statu per se debito unioni, sine defectibus, quos propter nostram redemptionem in corpore assumpsit, sine dubio assumpsisset illam perfectam hac scientia, sicut reliquis perfectionibus; ergo & nunc de facto ita illam assumpsit cum hac perfectione, ex illo principio, quod carentia huius scientiæ neque est necessario conjuncta cum corpore passibili, nec per se confert ad finem redemptionis. Tertio, hac ratione habuit virtutes morales naturalis ordinis, non acquisitas propriis actibus, sed a principio infusas, & hoc fuit illi simpliciter melius, ut supra ostensum est; ergo similiter, &c. Unde arguitur quarto, quia si habuit virtutes morales perfectas, ergo & prudentiam, quæ est auriga reliquarum virtutum, sed prudentia perfecta, cum constet in practica cognitione, supponit perfectam cognitionem speculativam, non tantum primorum principiorum, sed etiam universalium conclusionum, a quibus iudicium in singulis eventibus pendet; ergo habuit moralem scientiam horum omnium: ergo & habuit ceteras scientias, non enim ad alias erat magis impeditus, neque una scientia potest sine consortio aliarum esse omni ex parte perfecta, sunt enim quodammodo connexæ, sicut virtutes. Quinto, quia Christus a principio potuit uti ratione, non tantum in supernaturalibus actibus, sed etiam in naturalibus, ut ex omnibus dictis in hac disputatione facile intelligi potest. Et ex iis etiam, quæ supra q. 9. art. 1. tractavimus ex Augustino 2. de peccatorum meritis cap. 29. ubi docet in Christo infante non fuisse illud impedimentum rationis, quod est in aliis parvulis, quia est magna imperfectio redemptioni nostræ minime necessaria, illud autem impedimentum in aliis infantibus est in usu rationis naturalis. Fuit ergo anima Christi a principio expedita ad huiusmodi usum; ergo oportuit, ut ad illum fuerit etiam perfecte disposita per habitus scientiarum naturalium. Ultimo tandem, quia alias non potuisset Christus habere has scientias omni ex parte perfectas, ut omitam, non admodum decuisse Christum inveniendis & inquirendi huiusmodi scientiis operam dedisse.

Antecedens patet primo, quia discursus humanus in huiusmodi scientiis quodammodo in infinitum procedit, ut in Mathematicis constat. Secundo, quia non potuit Christus brevi tempore vitæ proprio discursu invenire omnia, quæ sub humanam scientiam cadere possunt, quia non poterant omnia experimenta dignosci, a quibus hæc scientia realiter accipi potest. Marfilus 3. q. 10. art. 3.

non

Omnes  
scientiæ  
in: hris  
ab instan  
ti conce  
ptionis.

Prudentia  
auriga  
virtutum.



non dubitavit propter hæc concedere hanc scientiam in Christo non fuisse omni ex parte perfectam; sed non recte, tum quia Adam habuit illam perfectam, quid ni igitur Christus? tum etiam, quia hæc est perfectio simpliciter humanæ naturæ, tum denique, quia alias habuisset anima Christi aliquam naturalem ignorantiam. Aliter ergo respondet D. Th. viso uno individuo potuisse Christum propter excellentiam ingenii sui, ex illo alia cognoscere, vel contraria, vel similia, & viso cælo potuisse se illud comprehendere, & omnem ejus virtutem. Sed hoc excedit naturales vires ingenii humani, etiam si sit sermo de visione experimentalis (ut Cajet. exponit) quia tota cognitio, quæ hinc elici potest, non excedit virtutem & efficaciam earum specierum intelligibilium, quæ ex sensibilibus, & phantasmatis erui possunt: sed per has nunquam potest devenire ingenium humanum ad comprehendendum totam virtutem corporis cælestis, quia nec potest experiri omnes ejus effectus, neque aliquos, in quibus alii virtute contineantur, quia fere in infinitum procedere possunt, & sunt valde dissimiles, ac denique in ipsis motibus cælorum multa sunt, quæ humana inventionem nullus assequi potest, nisi diuturni temporis observatione, quæ in Christo homine locum non habet.

Multoque minus poterant illæ species sufficere ad comprehendendas quasdam res ex aliis, ut substantias ex accidentibus, unam substantiam ex alia simili, vel unum contrarium ex alio, tum quia species, quæ naturaliter possunt abstrahi ex accidentibus sensibilibus, non repræsentant substantias, prout in se sunt, sed tantum per improprios & connotativos conceptus, qui non sufficiunt ad perfectam rei cognitionem, ne dum ad comprehensionem: tum etiam quia neque angelus potest unam substantiam perfecte cognoscere per solam similitudinem, quam habet ad aliam; alioqui non indigeret propriis speciebus singularum, sed per speciem unius posset alias comprehendere, quod est plane falsum. Et ratio est, quia similitudo non est in propria & specifica differentia; & ideo ex vi solius naturalis similitudinis non potest una substantia comprehendere ex cognitione alterius. Quocirca his & similibus rationibus convinci videtur non potuisse Christum acquirere perfectam scientiam earum rerum, quas non est perfecte expertus quoad omnes earum proprietates, & effectus, nedum eas, quas nunquam vidit, neque ullo modo expertus est, ut sunt stellæ variæ, & influentiæ cælorum, pisces maris, & similia.

Neque enim fat est, quod Capreolus addit, dist. 14. q. 1. ad 6. contra 2. conclus. & cum eo alii, potuisse Christum juvari scientia infusa ad perfectam scientiam connaturalem acquirendam. Hoc (inquam) non satis est; nam, licet illa scientia ad aliquam directionem juvare posset, non tamen supplere propria ac per se principia, quales sunt species accommodatæ tali scientiæ: neque etiam fieri poterat ratione illius scientiæ, ut ex uno principio naturali plures conclusiones inferrentur, quam in eo essent contentæ: ergo non poterat efficere, ut ex proprietatibus unius naturæ specificæ aliæ diversæ speciei cognoscerentur exactæ, nec ut per solas species accidentium ad proprios conceptus substantiarum perveniretur.

Quapropter addit Cajetanus ministerio angelorum applicata esse sensibus Christi omnia objecta necessaria ad perfectam harum scientiarum inventionem & acquisitionem. Sed hoc etiam est sine fundamento excitatum, & vix potest commode declarari. Nam, vel illa applicatio adhibenda erat sensibus externis, & sic oportebat objecta omnia localiter applicari Christi sensibus, & in illos, vel coram illis, omnes actiones suas exercere, quæ ad suæ virtutis manifestationem sufficerent, quod quidem simul fieri non posset sine magnis miraculis, successive autem vix longo tempore finiretur, & indignum est Christum multum temporis huic studio & occupationi dedisse. Ut omittam, fictitium esse cogitare, reconditas cæli stellæ, aves omnium regionum, pisces maris, & omnium fluminum, & similia, fuisse sensibilibus ad Christum adducta, ut ab eis scientiam acciperet. Vel illa applicatio faciendæ erat solum interius per phantasmata talium rerum, & hæc non possunt immediate infundi ab angelis, sed per applicationem objectorum verorum aut apparentium: oportebat ergo aliqua supernaturali virtute fieri: facilius ergo dicitur infusa fuisse a Deo, multoque facilius & probabilius idem dicitur de speciebus in-

Suarez. Tom. XVI.

telligibilibus, atque adeo de habitibus ipsis. Denique, quacumque ratione fingatur hæc abstractio specierum facta ab objectis, mediis phantasmatis, non poterant illæ species sufficere ad formandos proprios & absolutos conceptus substantiarum, prout in se sunt, & consequenter nec ad exactam eorum scientiam acquirendam.

His ergo rationibus aliqui convicti fatentur hanc scientiam fuisse per accidens infusam, quoad ea objecta, quæ Christus Dominus suis sensibus expertus non est, aut ex his, quæ expertus est, dijudicare non poterat virtute naturali, nihilominus tamen, quoad alia objecta, quæ per experientiam cogniturus erat, & ab eis poterat facile scientiam acquirere, non habuisse illam infusam, sed propria inventionem illam acquisivisse. Qui authores non loquuntur de sola scientia experimentalis, de qua statim dicemus, sed de propria scientia rerum naturalium, quoad proprias essentias específicas, & proprietates earum, & quoad proprios habitus intellectuales, quibus de eis judicatur ex propriis principiis. In hoc autem sensu non probatur mihi illa scientiarum partitio, & (ut sic dicam) dimidiata infusio, ac partialis acquisitio. Primo quidem, quia illa generalis ratio semper urget, quod ad formandos proprios conceptus substantiarum omnium oportuit omnium earum species infundi, quia species, quæ sensibus acquiruntur, ad hoc non sufficiunt: nec acumen ingenii potest defectum speciei supplere, nam sunt principia diversarum rationum, & unumquodque est per se ac simpliciter in suo genere necessarium. Quod si omnium naturarum substantialium habuit infusam scientiam, ergo & proprietatum earum & accidentium, quæ non sunt nisi propter substantias. Secundo, quia opera Dei sunt perfecta: ergo, si infudit animæ Christi has scientias, perfectas illas tribuit, tum in intensione, tum in extensione. Præsertim, quia hæ scientiæ quandam connexionem inter se habent, & vix separari possunt secundum partes. Nam, si sit sermo de habitibus propriis scientiarum, illi, ut ego existimo, sunt indivisibiles extensive in entitate sua: unde non possunt per partes infundi, aut acquiri; si vero sit sermo de speciebus, credibile est unicuique habitui datas esse omnes species proportionatas ad perfectum usum suorum actuum, quia est fere eadem ratio. Rursus inter ipsos habitus aliqui sunt subordinati ex parte objectorum, ut Philosophia naturalis, Metaphysicæ; unde non debuit illa sine hac infundi: & idem est de omnibus similibus scientiis, vel virtutibus intellectualibus, habentibus similem connexionem, ut supra dicebam de prudentia respectu scientiarum moralium, & idem est de his respectu naturalium, & de his respectu rationalium, & sic de aliis. Denique, cum nulla sit necessitas, nec sufficiens congruitas ad hanc partitionem confingendam, & hoc, quod asserimus, simpliciter afferat perfectionem animæ Christi, valde consentaneam unioni, & aliunde non misceatur imperfectio ulla, neque in illo alio inventionis modo sit aliqua perfectio aliquis momenti, non est cur in illas angustias deveniamus, ut perfectam harum scientiarum infusionem Christo denegemus.

Dico secundo animam Christi non habuisse a principio creationis suæ eam humanam cognitionem, quæ in experientia rerum consistit, atque adeo successione temporis in hac profecisse. Hæc conclusio dupliciter intelligi potest; uno modo de ipso sensuum experimento, sive inde nova cognitio in intellectu generetur, sive præexistens tantum exerceatur, & quodammodo applicetur ad operandum simul cum sensu. Et hoc modo est indubitata veritas, quia constat discursu temporis Christum multa vidisse, & audivisse, gustasse, &c. quæ illis sensibus antea non receperat. Et ad hunc modum intelligi potest illud ad Hebr. 5. *Didicit ex iis, quæ passus est, obedientiam*. Non quia denuo virtutem obedientiæ didicerit, aut acquisiverit; sed quia illam novo modo exercuit, & illius effectum expertus est. Secundo modo intelligi potest conclusio, quod etiam in intellectu acquisiverit Christus, mediis sensibus, novam aliquam experimentalem cognitionem, & species intelligibiles ad illam necessarias, quas a principio non habuit: & hoc modo etiam est vera conclusio, & communis Theologorum in 3. dist. 14. & Marfil. q. 10. art. 2. c. 5. late illam profecit, & juxta illam interpretatur sententiam D. Th. hic, & Bonavent. ibi, quos non existimat in hac parte dissentire. Unde

Scientia experimentalis in Christo qualis.



ipse nullam aliam scientiam acquisitam ponit in Christo, præter hanc experimentalem; nam earum rerum, quas non est expertus, negat habuisse Christum scientiam acquisitam, sed infusam tantum, quam proinde videtur ponere solum per accidens infusam, quare non recte adducit in suam sententiam D. Th. & eadem est sententia Major. dist. 14. q. 5. Bene autem advertit Marfil. solvendo argumenta Christum superasse alios homines in modo acquirendi hanc experientiam. Nam in aliis hominibus experientia fit veluti inductione quadam, ex repetita memoria rerum sensu perceptarum, & quatenus perceptæ sunt, ex Arist. lib. 1. Metaph. c. 1. & adhuc contingit in eis esse experimentum fallax, ut dixit Hippocrates in princ. aphor. At vero Christus ex uno singulari poterat perfectam experientiam acquirere, certamque & evidentem, tum propter ingenii acumen, tum propter concomitantiam, & directionem scientiæ infusæ.

Quod ergo potuerit Christus hanc cognitionem acquirere, si præventus, vel impeditus non fuerit, per se notum est, quia hoc pertinet ad perfectionem naturæ; quod vero præveniri vel non potuerit, vel non debuerit, ita declaratur. Nam ad hanc experientiam non satis est habere species rerum, quæ sub experientiam cadere possunt, tota enim hæc representatio, & cognitio potest esse sine experientia, ut fuit in Adamo in primo instanti creationis suæ: oportet ergo, loquendo de humana experientia, ut species representent illas res, quatenus aliquando sub sensum ceciderunt, seu ut sint principium cognoscendi ipsas esse sensu perceptas. Unde fit potuisse infundi scientiam naturalium rerum sine propria experientia, quia licet experientia ex natura rei conferat ad acquirendam scientiam naturalem; tamen ab illa non omnino, ac per se pendet: quia non in illa nititur tanquam in proprio principio, sed solum est veluti quædam via, qua naturaliter proceditur ab imperfecto ad perfectum: & ita accidit in Adamo, quia in statu innocentie multarum rerum scientiam habuit, quas pro eo statu experiri non potuit. Secus vero est de experientia, nam potius ex dictis fieri videtur huiusmodi experimentalem cognitionem non potuisse infundi, sed solum per ipsam experientiam acquiri: tum quia species, quæ ad experientiam deserviunt, pertinent ad memoriam rei præteritæ seu jam cognitæ: ut sic: hæc autem species, ut vere representent, non possunt esse omnino infusæ, sed debent esse aliquo modo relictæ ex præcedenti cognitione, ut in superioribus ostensum est. Quod maxime verum est in cognitione, de qua agimus, quia nullum est medium naturale, quod ostendat evidenter rem fuisse, præter ipsam experientiam sensus, media specie ab illa relictæ; tum etiam quia alias species infusa posset ducere in falsam cognitionem, representando aliquid ut per sensum perceptum, quod nunquam revera sensu cognitum sit. Unde facile solvitur objectio, si quis dicat illam speciem, quæ in intellectu resultat ex cognitione ac experientia sensuum, potuisse a solo Deo infundi, quia efficacia sua potest supplere dependentiam, quam productio illius speciei naturaliter habet a phantasmatibus: neque in hoc apparet implicatio contradictionis. Respondetur tamen, si solam omnipotentiam Dei spectemus, nullam cerni in hoc repugnantiam, ut argumentum probat; si vero consideremus providentiam, & utilitatem talis actionis, non esse consentaneam divinæ providentiæ: quia vel talis species infunderetur animæ Christi, ut illa uteretur secundum totam representationem ejus, antequam res representata fieret, & sub experientiam sensuum caderet, vel suspendendus, & impediendus erat ejus usus, usque ad rei eventum, & experientiam. Primum dici non potest, alias data esset talis species ad deceptionem, quia per eam representaretur res ut præterita, & ut experimento cognita, antequam revera ita esset. Si autem dicatur secundum superflua, prorsus esset talis speciei infusio, cujus usus omnino impediendus esset ulque ad rei eventum & experientiam.

Atque in hoc cernitur magna differentia inter has species rerum singularium, quæ experimentali cognitioni deserviunt, & species, quibus scientia utitur: nam harum usus semper fuit expeditus a principio, illarum vero minus, usque ad sensibile experimentum earum rerum, quæ per illas representantur: item species, quibus scientia utitur, in sua representatione & cognitione ab-

strahunt a tempore, & a præcedente aliqua cognitione; at vero species, quæ experimento deserviunt, representant cum ordine ad tempus præteritum ut tale est, & ad intuitivam seu sensibilem cognitionem præteritam. Unde tandem fit, ut species, quæ deserviunt scientiæ, licet ex parte principii efficientis, vel ex parte subiecti, non petant infundi homini a principio, & ex hac parte præter naturam sit infundi a Deo a principio conceptionis, vel creationis hominis, tamen ex parte objecti, quod representant, & ex parte actus cognitionis, ad quem ordinantur, non est id præternaturale, quia objectum illud ex se indifferenter se habet, ut tam in actu primo, quam in actu secundo, hoc vel illo tempore representetur, sive sensu perceptum sit, sive non sit. At vero species, quibus experimentum elicitur, non solum ex parte principii & subiecti, sed etiam ex parte objecti & actus, petunt generari ex præcedentibus actibus, & representare in ordine ad illos, adeo ut non possint veram cognitionem elicere, donec intuitiva seu sensibilis cognitio objecti præcesserit; & ideo non debuerunt tales species infundi, sed acquiri, etiam si species scientiarum infusæ essent. Cujus rei optimum exemplum habemus in Adamo, cui infusæ fuerunt species ad scientiam, non vero ad experientiam, & idem de angelis existimo, eo modo, quo in eis experientia locum habere potest, de quo alias.

Ex his ergo satis aperte constat ratio conclusionis, est enim huic generi cognitionis omnino intrinsecum, & ex parte objecti quasi essentiale, ut per sensum acquiratur, & ideo mirum non est, quod a principio infusa non fuerit. Addo experientiam proprie versari circa singularem, & non fuisse necessarium, ut anima Christi a principio habuerit infusas species naturales omnium individuum materialium, & effectuum contingentium, qui sub sensum cadunt, quia hoc neque ad perfectionem scientiæ, nec naturalis prudentiæ, videtur necessarium: potuit ergo acquirere species aliquorum singularium, & ita eorum experimentum comparare. Quæ ratio supponit posse esse in intellectu speciem acquisitam, representantem directe rem singularem. De qua re alio loco disputandum est.

Ad fundamentum contrariæ sententiæ respondetur idem argumentum fieri posse in Adamo, qui a principio habuit omnes scientias, & virtutes naturales per se infusas; & tamen non propterea dicendum est frustra habuisse intellectum agentem, & ratio multiplex reddi potest. Primo, quia non omnino caruit intellectus agens sua operatione in Christo, vel Adamo, quia (ut dictum est) potuit efficere species aliquorum singularium, & quæ sunt principium experientiæ. Cajetanus addit habere aliam operationem, scilicet, illustrandi prima principia per se nota. Sed (ut ego existimo) hoc non pertinet ad intellectum agentem, nisi quatenus efficit species representantes terminos, seu res ipsas, nam reliqua cognitio fit ex virtute cognoscitiva ipsius intellectus possibilis. Secundo probabile est intellectum agentem re ipsa non distinguere a possibili, qui exercebat operationes suas, & ideo non potest illa potentia dici frustra, sicut potentia generandi, vel ridendi, quamvis in Christo non habuerint actus proprios, ut sub his nominibus concipiuntur, & significantur (si verum est Christum nunquam risisse, ut significavit Basiliius in regulis fusius disput. in 17.) in re tamen non distinguuntur ab aliis, quæ habuerunt actus suos, ut potentia generativa a nutritiva, & potentia risiva ab ipso appetitu, & potentia motiva secundum locum. Tertio, neutrum horum est necessarium, ut potentia aliqua non dicatur frustra esse, satis enim est, quod ex natura sua sit connaturalis alicui formæ, & ad perfectum statum & integritatem naturæ requisita, licet ex accidenti contingat, ut nunquam exerceat operationes, quia aliunde prævenitur. Quod maxime verum est, quando talis operatio ad perfectionem simpliciter non pertinet, & effectus ejus potest aliunde melius suppleri.

Ad primam confirmationem jam responsum est, & explicatū, quomodo sit major perfectio, habuisse semper hanc scientiam, quam propriis actibus illam acquisivisse.

Ad secundam negatur hinc sequi simulationem in actibus Christi infantis, nam vere habuit infantilia membra, & organa sensuum eo modo disposita, quem illa ætas postularat. Unde, quod erat ex parte virium humanarum natu-

Scientia  
experimen-  
talis non po-  
test esse  
infusa.

Respon-  
do ad argu-  
menta.

Intel-  
lus agens  
in Chri-  
sto non  
fuit otio-  
sus.

Discrimē  
inter spe-  
cies, quæ  
scientiæ uti-  
tur, & eas, quæ  
experimen-  
to deserviunt.



naturæ, vere operabatur ut infans, quatenus supernaturali virtute posset operari ut vir.

Ad 3. confirmationem respondetur, primum illud testimonium. Luc. 2. a multis Patribus exponi eodem modo de scientia, sicut de gratia, scilicet, de augmento quoad ostensionem, & operationem, quos late citavimus supra q. 7. circa a. 12. D. Th. Secundo exponi potest iuxta secundam conclusionem supra positam, juxta quam loquuntur Patres, in eadem confirmatione citati.

### Q U Æ S T I O XIII.

De potentia animæ Christi in quatuor articulos divisa.

**D**einde considerandum est de potentia animæ Christi. Et circa hoc queruntur quatuor.

Primo, utrum habuerit omnipotentiam simpliciter.

Secundo, utrum habuerit omnipotentiam respectu immutationis creaturarum.

Tertio, utrum habuerit omnipotentiam respectu proprii corporis.

Quarto, utrum habuerit omnipotentiam respectu executionis suæ voluntatis.

**I**n hac quæstione agit D. Th. de potentia operativa, ut distinguitur ab intellectu, & voluntate, & est facultas exterius operandi aliqua actione transeunti, & præsertim agit de potentia communicata Christi humanitati ad supernaturales actiones, quamvis de potentia naturali non nihil attingat.

### A R T I C U L U S I.

Utrum anima Christi habuerit omnipotentiam simpliciter.

82  
Ius huius  
q. & q. 21.  
a. 11. & 1.  
d. 43. q. 1. a.  
2. a. & 3. d.  
14. a. 4.  
Glos. ord.  
id habet  
ex Ambro.  
Luc. 1. su-  
per illud  
Hic est  
magis  
q. 10. a. 2.

**A**d primum sic proceditur. Videtur, quod anima Christi habuerit omnipotentiam. Dicit enim Ambrosius super Lucam. Potentiam, quam Dei Filius naturaliter habet, homo erat ex tempore accepturus. Sed hoc præcipue videtur esse secundum animam, quæ est potior pars hominis. Cui ergo Filius Dei ab æterno omnipotentia habuerit, videtur, quod anima Christi ex tempore omnipotentia accepit.

2. Præterea, Sicut potentia Dei est infinita, ita etiam eius scientia. Sed anima Christi habet omnium scientia, quæ scit Deus, quodammodo, ut supra dictum est. Ergo etiam habet omnium potentiam, & ita est omnipotens.

3. Præterea, Anima Christi habet omnem scientiam. Sed scientiarum quedam est practica, quedam speculativa. Ergo habet eorum, quæ scit, scientiam practica, ut scilicet, sciat facere ea, quæ scit. Et sic videtur, quod omnia facere possit. Sed contra. Illud, quod est proprium Dei non potest alicui creatura convenire. Sed proprium est Dei esse omnipotentem, secundum illud Exodi 15. Iste est Deus meus, & glorificabo eum. Et postea subditur, Omnipotens nomen eius. Ergo anima Christi, cum sit creatura, non habet omnipotentiam.

q. 2. a. 1.

4. Respondeo dicendum, quod, sicut supra dictum est, in mysterio Incarnationis ita facta est unio in persona, quod tamen remansit distinctio naturarum, utraq; scilicet, natura retinente id, quod sibi est proprium. Potentia autem activa cuiuslibet rei sequitur formam ipsius, quæ est principium agendi. Forma autem, vel est ipsa natura rei, sicut in simplicibus, vel est constituens ipsam rei naturam, in his, scilicet, quæ sunt composita ex materia & forma. Unde manifestum est, quod potentia activa cuiuslibet rei consequitur naturam ipsius. Et per hunc modum omnipotentia consequenter se habet ad divinam naturam. Quia enim natura divina est ipsum esse Dei incircumscriptum (ut patet per Dionysium 5. c. de Div. nom.) inde est, quod habet potentiam activam respectu omnium, quæ possunt habere rationem entis, quod est habere omnipotentiam. Sicut & quilibet aliarum habet potentiam activam respectu eorum, ad quæ se extendit perfectio sue nature: sicut calidum ad calefaciendum. Cum igitur anima Christi sit pars humane nature, impossibile est, quod omnipotentiam habeat.

Ca. 5. in te  
medium.

Ad primum ergo dicendum, quod homo accepit ex tempore omnipotentiam, quam Filius Dei habuit ab æterno, per ipsam unionem persone: ex qua factum est, ut sicut homo dicitur Deus, ita dicatur omnipotens. Non quasi sit alia omnipotentia hominis, quam Filii Dei, sicut nec

Suarez Tom. XVI.

alia Deitas, sed eo quod est una persona Dei & hominis.

b. Ad secundum dicendum, quod alia ratio est de scientia, & de potentia activa, sicut quidam dicunt. Nam potentia activa consequitur ipsam naturam rei, eo quod actio consideratur ut egrediens ab agente: Scientia autem non semper habetur per ipsam essentiam, vel formam scientis, sed potest haberi per assimilationem scientis ad res scitatas, secundum similitudines susceptas. Sed hac ratio non videtur sufficere, quia sicut aliquis potest cognoscere per similitudinem susceptam ab alio, ita etiam potest agere per formam ab alio susceptam, sicut aqua, vel ferrum calefacit per calorem susceptum ab igne. Non ergo per hoc prohibetur, quin, sicut anima Christi per similitudines omnium rerum sibi a Deo inditas potest omnia cognoscere, ita per easdem similitudines possit ea facere.

Est igitur ulterius considerandum, quod id, quod a superiori natura in inferiori recipitur, habetur per inferiorem modum; non enim calor in eadem perfectione & virtute recipitur ab aqua, quæ est in igne. Quia igitur anima Christi inferioris nature est, quam natura divina, similitudines rerum non recipiuntur in ipsa anima Christi, secundum eandem perfectionem & virtutem, secundum quæ sunt in natura divina. Et inde est, quod scientia animæ Christi est inferior scientia divina, quantum ad modum cognoscendi, quia Deus perfectius cognoscit res, quam anima Christi, & quantum etiam ad numerum scitorum, quia anima Christi non cognoscit omnia, quæ Deus potest facere, quæ tamen Deus cognoscit scientia simplicis intelligentie, licet cognoscat omnia præsentia, præterita, & futura, quæ Deus cognoscit scientia visionis. Et similiter similitudines rerum, animæ Christi indite, non adequant virtutem divinam in agendo, ut scilicet possint omnia agere, quæ Deus potest, vel etiam eo modo agere, sicut Deus agit, qui agit infinita virtute, cuius creatura non est capax. Nulla autem res est, ad cuius cognitionem alicuius habendam requiratur virtus infinita, licet aliquis modus cognoscendi sit virtutis infinita: quædam tamen sunt, quæ non possunt fieri nisi a virtute infinita, sicut creatio & alia huiusmodi: ut patet ex his, quæ in prima parte dicta sunt. Et ideo anima Christi (quæ, cum sit creatura, est virtutis finita) potest quidem omnia cognoscere, sed non per omnem modum, non autem potest omnia facere, quod non pertinet ad rationem omnipotentia. Et inter cetera manifestum est, quod non potest creare seipsum.

Ad tertium dicendum, quod anima Christi habuit, & scientiam practica, & speculativa: non tamen oportet, quod omnium illorum habeat scientiam practica, quorum habuit scientiam speculativa. Ad scientiam enim speculativa habendam sufficit sola conformitas, vel assimilatio scientis ad rem scitam: ad scientiam autem practica requiritur, quod forma rerum, quæ sunt in intellectu, sint factiva. Plus autem est habere formam, & imprimere formam habitam in alterum, quam solum habere formam: sicut plus est lucere & illuminare, quam solum lucere. Et inde est, quod anima Christi habet quidem speculativam scientiam creandi (scit enim qualiter Deus creat) sed non habet huius rei scientiam practica, quia non habet scientiam creationis factivam.

### C O M M E N T A R I U S.

**N**egat D. Th. omnipotentiam potuisse humane nature communicari, quia est proprietas nature divine, & per unionem non est facta naturarum confusio, sed utraque natura suas proprietates retinuit. Et tota littera & sententia D. Th. clara est.

b. Solum est notanda solutio ad secundum, in qua Div. Th. explicat convenientiam & differentiam inter divinam scientiam, & omnipotentiam, ex quarum comparatione argumentum procedebat, assumendo, totam divinam scientiam esse communiter nature humane, & inde inferendo, esse communicatam omnipotentiam. Respondet autem D. Th. negando assumptionem, in hoc enim scientia & potentia divina conveniunt, quod neutra potuit communicari nature create secundum totam perfectionem, quam in Deo habet. Addit vero differentiam inter eas, scilicet, scientiam aliquarum rerum posse communicari nature create, ad quas efficiendas non potest communicari potentia. Exemplum ponit D. Th. in creatione, quod saltem in creatione sui ipsius est indubitatum, potuit enim humanitati Christi communicari scientia creationis sue, non tamen potentia.



Cujus ratio redditur a D. Thom. quia ad cognoscendum aliquo modo aliquam rem non requiritur virtus infinita; at vero ad efficiendum aliquid, v.g. ad creandum requiritur virtus infinita. Quæ ratio difficultatem habet; sed eam omitto, quia ad materiam de creatione pertinet; ad summum enim probat de virtute principali creandi, non de instrumentaria. De propria vero creatione sui ipsius evidentior ratio redditur, quia productio rei simpliciter supponit necessario ipsum non esse rei tanquam terminum a quo; potestas vero creandi, quæcunque illa sit, supponit rem habentem talem potestatem habere etiam esse, & ideo implicationem involvit alicui communicari potestatem creandi se ipsum: tamen scientia rei, & productionis ejus, non supponit rem illam non esse, & ideo potest aliquis scire se ipsum, aut suam creationem, non tamen potest illam facere. Adde, ad cognoscendam rem, satis esse participare aliquam similitudinem intentionalem, vel lumen. Nam per cognitionem quasi extrinsece attingitur objectum cognitum; at vero ad producendam rem requiritur virtus, quæ valeat ipsum esse illi conferre: ex quo fit, ut possit creatura accipere scientiam, non solum earum rerum, quas producere non potest, sed etiam ipsius Dei.

## ARTICULUS II.

Utrum anima Christi habuerit omnipotentiam respectu immutationis creaturarum.

**A**d secundum sic proceditur. Videtur, quod anima Christi habeat omnipotentiam respectu immutationis creaturarum. Dicit enim ipse Matthæi ult. Data est mihi omnis potestas in cælo & in terra: sed nomine cæli & terre intelligitur omnis creatura, ut patet, cum dicitur Genes. 1. In principio creavit Deus cælum & terram. Ergo videtur, quod anima Christi habeat omnipotentiam respectu immutationis creaturarum.

2. Præterea, Anima Christi est perfectior qualibet creatura: sed qualibet creatura potest moveri ab aliqua creatura, dicit enim August. \* in 3. de Trin. quod, sicut corpora crassiora & inferiora per subtiliora & potentiora quodam ordine reguntur, ita omnia corpora per spiritum vitam, & spiritus vita irrationalis per spiritum vitam rationalem, & spiritus vita rationalis desertor atque peccator per spiritum vitam rationalem pium & justum. Anima autem Christi etiam ipsos supremos spiritus movet, illuminando eos ut dicit Dionysius \* c. 7. Cæl. hier. Ergo videtur, quod anima Christi habeat omnipotentiam respectu immutationis creaturarum.

3. Præterea, anima Christi habuit plenissime gratiam miraculorum seu virtutum, sicut & ceteras gratias: sed omnis immutatio creature potest ad gratiam miraculorum pertinere, cum etiam miraculose cælestia corpora a suo ordine immutata fuerint, sicut Dionysius probat in Epistola \* ad Polycarpum. Ergo anima Christi habuit omnipotentiam respectu immutationis creaturarum.

Sed contra est, quod ejusdem est, transmutare creaturas, cujus est, eas conservare. Sed hoc est solius Dei, secundum illud Hebr. 1. Portans omnia verbo virtutis sue. Ergo solius Dei est habere omnipotentiam respectu immutationis creaturarum. Non ergo hoc convenit anime Christi.

**b** Respondeo dicendum, quod hic duplici distinctione est opus. Quarum prima est ex parte transmutationis creaturarum, quæ triplex est. Una quidem est naturalis, quæ, scilicet, fit a proprio agente, secundum ordinem naturæ. Alia vero est miraculosa, quæ fit ab agente supernaturali, supra consuetum ordinem & cursum naturæ, sicut resuscitatio mortuorum. Tertia autem est secundum quod omnis creatura vertitur in nihil. Secunda autem distinctio est accipienda ex parte anime Christi, quæ dupliciter considerari potest. Uno modo secundum propriam naturam & virtutem, sive naturalem sive gratuitam potentiam habuit ad illos effectus faciendos, qui sunt anime convenienter: puta, ad gubernandum corpus, & ad disponendos humanos actus, & etiam ad illuminandum per gratiam & scientiæ plenitudinem, omnes creaturas rationales ab ejus perfectione deficientes, per modum, quo hoc est conveniens creaturæ rationali. Si autem loquamur de anima Christi, secundum quod est instrumentum Verbi sibi uniti, sic ha-

buit instrumentalem virtutem ad omnes immutationes miraculosas faciendas, ordinabiles ad Incarnationis finem, qui est instaurare omnia, sive quæ in cælis, sive quæ in terris sunt. Immutationes vero creaturarum, secundum quod sunt vertibiles in nihil, correspondent creationi rerum, prout, scilicet, producuntur ex nihilo. Et ideo sic solus Deus potest creaturas in nihilum redigere, qui etiam solus eas in esse conservat, ne in nihilum decedant: sic ergo dicendum est, quod anima Christi non habet omnipotentiam respectu immutationis creaturarum.

**c** Ad primum ergo dicendum, quod sicut Hier. dicit, illi potestas data est, qui paulo ante crucifixus, qui sepultus in tumulo, qui postea resurrexit, i.e. Christo, secundum quod homo. Dicitur autem sibi omnis potestas data, ratione unionis per quam factum est, ut homo esset omnipotens, ut supra dictum est. Et quamvis hoc ante resurrectionem innotuerit angelis, post resurrectionem tamen innotuit omnibus hominibus, ut Remigius dicit. Tunc autem dicuntur res fieri, quando innotescunt, & ideo post resurrectionem dicit Dominus, sibi datam omnipotentiam in cælo & in terra.

Ad secundum dicendum, quod licet omnis creatura sit mutabilis ab alia creatura, præter supremum angelum, qui tamen potest illuminari ab anima Christi, non tamen immutatio omnis, quæ potest fieri circa creaturam, potest fieri a creatura, sed quedam immutationes possunt fieri a solo Deo. Quæcunque tamen immutationes possunt fieri per creaturas, possunt etiam fieri per animam Christi, secundum quod est instrumentum Verbi, non autem secundum propriam naturam & virtutem: quia quedam hujusmodi immutationum non pertinent ad animam, neque quantum ad ordinem naturæ, neque quantum ad ordinem gratiæ.

Ad tertium dicendum, quod (sicut dictum est) in secundaparte gratia virtutum seu miraculorum datur anime alicujus Sancti, non ut propria virtute ei conveniat miracula facere, sed ut per virtutem divinam hujusmodi miracula fiant. Et hæc quidem gratia excellentissime data est anime Christi, ut, scilicet, non solum ipse miracula faceret, sed etiam, ut hanc gratiā in alios transfunderet. Unde dicitur Matt. 10. quod convocatis duodecim discipulis dedit eis potestatem spirituum immundorum, ut ejicerent eos, & curarent omnem languorem & omnem infirmitatem.

## COMMENTARIUS.

**H**IC articulus differt a præcedenti solum, quia in præcedenti sub omnipotentia comprehenditur ipsū opus creationis, hic vero solum agitur de immutationibus, quæ fieri possunt circa creatas res. Deinde in ar. præced. agitur de omnipotentia simpliciter, ut includit modum operandi proprium Dei, independentem ab omni causa superiori: hic vero non agitur de omnipotentia hoc modo, sed solum quoad numerum, vel multitudinem effectuum, ut ex discursu D. Th. constat aperte.

**b** Respondet ergo tribus assertionibus suppositis duabus distinctionibus, quæ in litera clare sunt, & ex ipsis conclusionibus satis intelligentur. Prima assertio est animam Christi perfecte & secundum propriam naturam habuisse virtutem, & potentiam ad omnes effectus, qui sunt connaturales anime humanæ, tam secundum potentiam naturalem, quam secundum gratuitam. In qua conclusione solum est advertendum D. Thomam in ea loqui de effectibus, seu actibus, quos anima humana operatur, ut principale principium, in quo ordine in primis sunt actus vite proprii, & connaturales, sive sint actus intellectus, & voluntatis, sive actus sensuum, sive actus, qui ad corpus transeunt, ut nutritio & motus localis, &c. de quibus hic præcipue agitur. Et de omnibus est res certa, quia (ut sæpe dictum est) Christum habuit humanam naturam integram & perfectam quoad omnes naturales facultates, & consequenter quoad actiones & effectus earum. Secundo pertinere possunt ad hunc ordinem & sub hac conclusione comprehendere actus supernaturales intellectus & voluntatis anime Christi, ostensum enim in superioribus est actus scientiæ & gratiæ fuisse in anima Christi perfectos, & modo perfectos & connaturali elicitos per internam & proportionatam virtutem, hoc autem sensu dicimus animam Christi habuisse virtutem efficiendi hos actus per modum agentis principalis, ratione habituum gratiæ & scientiæ, a quibus hi actus efficiuntur, quamquam anima per se ipsam, & suas potentias non habeat propriam & connaturalem vim ad illos efficiendos. Tertio ponit D. Tho. in hoc ordine

Lib. 3. c. 4.  
non pro-  
cul. a  
princ.  
tom. 3.

Ca 7. post  
medium

Per totā  
epistolā.

Super il-  
lud Matt.  
28.  
Data est  
mihi om-  
nis pote-  
stas, to 9.  
Art. præc.  
ad 1.

2 Po. 1. 11.  
art. 1.



dine potestatem illuminandi rationales creaturas, quia hæc potestas licet ratione unionis data sit, non tamen est distincta a plenitudine gratiæ, & scientiæ, quæ de se est sufficiens principium hujus effectus. Hæc enim illuminatio (ut ex doctrina de angelis sumo) solum sit per spirituales quandam locutionem, per quam is, qui scientia superior est, inferiorem docet: hæc autem spiritualis locutio fieri potest ab anima Christi ad eum modum, quo actus intellectus & voluntatis efficiuntur, sit enim illa locutio per voluntatem, qua proprii actus, vel conceptus ad alium ordinantur, & quamvis sit locutio illuminans, non tamen per eam necessario fit productio alicujus intellectus luminis in eo, qui illuminatur, sed si fortasse fit productio aliarum specierum intelligibilium, hæc fieri potuit ab anima Christi illuminans alios per proprios actus suos, tanquam per objecta actu intelligibilia, quæ propriam sui speciem possunt aliter communicare. Quid si interdum anima Christi ita illuminat angelos, ut lumen aliquod illis infundat, id non facit, nisi ut instrumentum Dei, sicut de aliis supernaturalibus effectibus statim dicemus.

Secunda assertio D. Th. est habuisse animam Christi, ut Instrumentum Verbi, virtutem ad omnes immutationes miraculosas, quæ ad finem Incarnationis ordinari possunt, præter eam, qua creaturæ in nihilum redigi possunt. Conclusionem non probat D. Th. sed ut notam relinquit ex ipso fine Incarnationis, supponendo, ut alias probatum est in 2.2. hanc potestatem faciendi miracula esse communicabilem creaturæ. Exceptionem vero probat D. Th. quia annihilatio respondet creationi, unde sicut potestas creandi repugnat creaturæ, ita & annihilandi. Ex his ergo concludit D. Th. tertiam assertionem absolute negantem, scilicet, non habere Christum omnipotentiam circa immutationem creaturarum, quam ex assertione secunda probatam relinquit.

c In solutione ad primum tractat D. Th. locum illum Matthæi ult. *Data est mihi omnis potestas in cælo & in terra.* Et exponit hæc verba intelligenda esse de omnipotentia simpliciter, quæ communicata dicitur homini Christo per communicationem idiomatum, sicut artic. precedenti exposuerat Ambrosium, Luc. 1. dicentem, accepisse hominem in tempore omnipotentiam, quam Filius Dei habet ab æterno, unde consequenter ait illam potestatem datam esse a principio, post resurrectionem vero, dici datam esse quoad manifestationem. Quam expositionem indicasse videtur Tertul. li. contra Praxean. c. 16. ubi dicit Christum ab initio, seu ab æterno, accepisse potestatem omnem in cælo, & in terra & Gregor. Nis. orat. 2. de Resurrect. circa finem: *Que naturaliter* (inquit) *habebat tanquam Deus, hæc dicitur accipere ita quam homo.* Juxta quam expositionem, etiam si Christus in humanitate nullam specialem potestatem accepisset per ipsam humanitatem exercendam, posset dicere sibi datam esse omnem potestatem in cælo, & in terra: sicut dicitur Christus, seu hic homo, simpliciter omnipotens, etiam si omnipotentia simpliciter humanitati communicata non sit. Propter quod non videtur mihi hæc expositio textui consentanea, loquitur enim Christus de singulari quadam, & suprema potestate sibi, ut homini, seu humanitati suæ tributa, ita ut per ipsam esset exercenda, ratione cujus mittebat Apostolos ad prædicandum omnibus gentibus: non est ergo ibi sermo de omnipotentia simpliciter, sed de excellenti quadam potestate communicabili creaturæ: & ita intelligunt locum illum expostores communiter, Anselmus, Theophy. Euthym. & D. Thomas in catena, ubi refert Remigium, Rabanum, & Severum. Indicat etiam Cyp. lib. 2. contra Judæos c. 26. & Athan. oratio quadam contra Arianos, in hoc dictum *Ex Deo Deus Verbum*, non longe a principio: & optime Gregor. Nyf. lib. de cognitione Dei, cap. Ex Daniele, habetur tom. 1. Bibliot. sanct. & S. Vigilii, l. 5. contra Eurych. colum. 7. Existimo tamen ibi non esse præcipue sermonem de potestate faciendi miracula, de qua nunc agimus, hæc enim & antea data erat, & satis fuerat hominibus nota, sed potestate dominandi, & imperandi omnibus creaturis, & regendi omnes homines suprema quadam Pontificali, & Regia potestate excellentiæ: de qua infra q. 22. dicturi sumus, ut egregie exposuit Vigil. citato loco: ad hanc enim potestatem pertinet actus ille, quem Christus statim exercuit, dicens: *Euntes ergo, docete omnes gentes.* Dixit autem Christus post resurrectionem

nem datam sibi esse hanc potestatem, vel quia tunc cepit innotescere hominibus, quod jam erat notum angelis, ut Remigius supra dicit, vel, ut addit Anselmus, quia ex tunc videtur Christus, & imperandi, & dominandi statum accepisse, antea enim fuerat in statu passibili: *Paulo ab angelis minoratus:* vel denique, quia tunc accepit plenum, & expeditum usum hujus potestatis: nam licet antea haberet illam veluti quoad proprietatem ratione unionis, non tamen quoad plenam possessionem & usum, ratione status viatoris.

d In solutione vero ad tertium notandum est, quod D. Thomas dicit non tantum accepisse Christum potestatem faciendi miracula, ut ea uti posset, sed etiam, ut eam posset aliis communicare, juxta illud Matth. 10. & Luc. 10. *Ecce ego mitto vos, & infra Curate infirmos; & c.* Etiam *damonia subjiciuntur vobis.* & infra, *Ecce dedi vobis potestatem, & c.* & Matth. 16. *Signa autem eos, qui crediderint, hæc sequentur, & c.* Et huc pertinet, quod Christus dedit aliis potestatem consecrandi, remittendi peccata, & c. Tota enim hæc excellentia debetur dignitati Christi, & meritis ejus, & pertinuit ad eam, quam Theologi vocant *potestatem excellentiæ*, qua potuit instituire sacramenta Evangelica, & ordinare perfectos sacerdotes, & creare Apostolos, & prædicatores Evangelicos conveniendi virtute, & potestate instructos ad fidem confirmandam.

## ARTICULUS III.

Utrum anima Christi habuerit omnipotentiam respectu proprii corporis.

Ad tertium sic proceditur. Videtur, quod anima Christi habuit omnipotentiam respectu proprii corporis. Dicit Damasc. \* in 3. lib. quod omnia naturalia fuerunt Christo voluntaria: volens enim esurivit, volens sitivit, volens timuit, volens mortuus est, & c. Sed ex hoc Deus dicitur omnipotens, quia omnia, quacunque voluit, fecit. Ergo videtur, quod anima Christi habuerit omnipotentiam respectu naturalium operationum proprii corporis.

2. Præterea in Christo fuit perfectius humana natura, quam in Adam, in quo secundum originalem justitiam, quam habuit in innocentia statu, corpus habebat omnino subiectum anime, ut nihil in corpore posset accidere contra anime voluntatem. Ergo multo magis anima Christi habuit omnipotentiam respectu sui corporis.

3. Præterea, ad imaginationem anime naturaliter corpus immutatur, & tanto magis, quanto magis anima fuerit fortis imaginationis, ut in 1. parte habitum est. Sed anima Christi habuit virtutem perfectissimam, & quantum ad imaginationem, & quantum ad alias vires. Ergo anima Christi fuit omnipotens in respectu ad corpus proprium.

Sed contra est, quod dicitur Heb. 2. quod debuit per omnia fratribus assimilari, & præcipue in his, quæ pertinent ad conditionem naturæ humanæ. Sed ad conditionem humanæ naturæ pertinet, quod valetudo corporis, & ejus nutritio, & augmentum, imperio rationis, seu voluntatis non subdantur: quia naturalia soli Deo, qui est auctor naturæ, subdantur. Ergo nec in Christo subdebantur. Non igitur anima Christi fuit omnipotens respectu proprii corporis.

Respondeo dicendum, quod, sicut dictum est, \* anima Christi potest dupliciter considerari. Uno modo secundum propriam naturam, & virtutem. Et hoc modo, sicut non poterat immutare exteriora corpora a cursu & ordine naturæ, ita etiam non poterat immutare proprium corpus a naturali dispositione: quia anima Christi secundum propriam naturam habet determinatam proportionem ad suum corpus. Alio modo potest considerari anima Christi secundum quod est instrumentum unitum Verbo Dei in persona. Et sic subdebatur ejus potestati totaliter omnis dispositio proprii corporis. Quia tamen virtus actionis non proprie attribuitur instrumento, sed principali agenti, talis omnipotentia magis attribuitur ipsi Verbo Dei, quam anime Christi.

Ad primum ergo dicendum, quod verbum Damasc. \* est intelligendum, quantum ad voluntatem Christi divinam: quia sicut ipse in præced. ca. \* dicit beneplacito divine voluntatis permittatur carni pati, & operari quæ propria.

Ad secundum dicendum, quod non pertinebat hoc ad originalem justitiam, quam Adam habuit in statu innocen-

Potestas  
faciendi  
miracula  
in Christi  
qualis

84

Lib. 3. ors  
tho. 6 d. c.  
20. & 23.

Art. præc.

Citatum  
in arg.  
Lib. 3. or. 15  
a med. &  
cap. 14.



rie, quod animæ hominis haberet virtutem transmutandi proprium corpus in quamcumque formam, sed quod posset ipsum conservare absque omni nocimento. Et hanc etiam virtutem Christus assumere potuisset, si voluisset. Sed cum sint tres status hominum, scilicet, innocentie, culpe, & gloriæ, sicut de statu gloriæ assumpsit comprehensionem, & de statu innocentie immunitatem a peccato, ita & de statu culpe assumpsit necessitatem subiacendi pœnalitati-  
 bus huius vite, ut infra\* dicitur.

Qu. 14 a. 2.

Ad tertium dicendum, quod imaginationi, si fuerit fortis, naturaliter obedit corpus quantum ad aliqua: puta, quantum ad casum de trabe in alto posita, quia imaginatio nata est esse principium motus localis, ut dicitur 3, de Anima.\* Similiter etiam, quantum ad alterationem, quæ est secundum calorem, & frigus, & alia consequentia, eo quod ex imaginatione consequenter nata sunt consequi animæ passiones, secundum quas movetur cor, & sic per commotionem spirituum, totum corpus alteratur. Aliæ vero dispositiones corporales, quæ non habent naturalem ordinem ad imaginationem, non transmutantur ab imaginatione, quantumcumque sit fortis: puta, figura manus vel pedis, vel aliquid simile.

Li. 3. de anima, text. 48. & seq. 10. 2.

#### COMMENTARIUS.

Doctrina huius art. eadem est cum doctrina art. præced. solum, quod ibi generatim dictum est, hic ad ipsum corpus Christi applicatur. Et hoc sensu docet D. Th. animam Christi propria naturali virtute non habuisse omnipotentiam circa corpus proprium, tamen, ut instrumentum Verbi, habuisse in sua potestate omnium dispositionem, & proprii corporis immutationem.

#### ARTICULUS IV.

Utrum anima Christi habuerit omnipotentiam respectu executionis suæ voluntatis.

**A**D quartum sic proceditur. Videtur, quod anima Christi non habuerit omnipotentiam respectu executionis propriæ voluntatis. Dicitur enim Marci 7. quod ingressus domum, neminem voluit scire: & non potuit latere. Non ergo potuit in omnibus exequi propositum suæ voluntatis. 2. Præterea præceptum est signum voluntatis: ut in prima parte dictum est\*. Sed Dominus quadam faciendâ præcepit, quorum contraria acciderunt: dicitur enim Matt. 9. quod cæcis illuminatis comminatus est Jesus, dicens: Videte, ne quis sciat, illi autem exentes, diffamaverunt illum per totam terram illam. Non ergo in omnibus potuit exequi propositum suæ voluntatis.

i. p. q. 19. ar. 12.

3. Præterea. Id, quod potest aliquis facere, non petit ab alio. Sed Dominus petivit a Patre, orando illud, quod fieri volebat: dicitur enim Luc. 9. quod exiit in montem orare, & erat pernoctans in oratione Dei. Ergo non potuit exequi in omnibus propositum suæ voluntatis.

Sed contra est, quod dicit August.\* in lib. de Questionibus veteris, & novi Testamenti: impossibile est, ut Salvatoris voluntas non impleatur, nec potest velle, quod scit, fieri non de cœre.

In li. q. ex novo Testamen. qui incipit. Deus quidem perfectus est q. 77. in princ. 10. 4

Respondeo dicendum, quod anima Christi dupliciter aliquid voluit. Uno modo quasi per se implendum. Et sic dicendum est, quod quicquid voluit, potuit: non enim conveniret sapientiæ eius, ut aliquid vellet per se facere, quod suæ virtuti non subiaceret. Alio modo voluit aliquid, ut implendum virtute divina, sicut resurrectionem proprii corporis, & alia huiusmodi miraculosa opera. Quæ quidem non poterat propria virtute, sed secundum quod erat instrumentum divinitatis, ut dictum est\*.

Art. 1. huius quæst. in lib. de Quest. veteris & novi Testam. Quod factum est, hoc voluisse dicendus est Christus. Advertendum est enim, quod illud in finibus gestum est Gentilium, quibus adhuc tempus prædicandi non erat: ultro tamen venientes ad fidem non suscipere, invidia erat. A suis ergo noluit prædicari, requiri autem se voluit, & ita factum est. Vel potest dici, quod hac voluntas Christi non fuit de eo, quod per eam faciendum erat, sed de eo, quod erat faciendum per alios, quod non subiacebat humanæ voluntati ipsius. Unde in Epist.\* Agathonis Papa, quæ est recepta in 6. Syn. legitur, \* ergo ne ille unum Conditor, ac Redemptor, in terris latere volens non potuit, nisi hoc ad humanam eius voluntatem, quam temporaliter est dignatus assumere, redigatur.

Quæ habetur in 6. Synod. Constantin. a medio il.

Ad secundum dicendum, quod sicut Gregor.\* dicit 19. Moralium, per hoc, quod Dominus præcepit, taceri virtutes suas, servis suis sequentibus exemplum dedit, ut ipsi quidem virtutes suas occultare desiderarent, & tamen, ut alii eorum exemplo proficiant, prodantur inviti. Sic ergo præceptum illud designabat voluntatem ipsius, qui humanam gloriam refugiebat, secundum illud Joan. 8. Ego gloriam meam non quero: Volebat tamen absolute, præsertim secundum divinam voluntatem, ut publicaretur miraculum factum, propter aliorum utilitatem.

Ad tertium dicendum, quod Christus orabat, & pro his, quæ virtute divina faciendæ erant, & pro his etiam, quæ humana voluntate erat facturum, quia virtus & operatio animæ Christi dependebant a Deo, qui operatur in nobis velle, & perficere, ut dicitur Philip. 2.

#### COMMENTARIUS.

Doctrina huius articuli difficilis est, pendet tamen ex iis, quæ 18. qu. de voluntate Christi, ac ejus actibus, dicenda sunt.

#### DISPUTATIO XXXI.

In octo Sectiones distributa.

De gratia, seu potestate animæ Christi data ad miracula, vel supernaturalia opera faciendâ.

**I**N hac disputatione nihil de facultatibus naturalibus animæ Christi dicendum est, est enim res, & per se clara, & satis in superioribus tractata; agendum ergo est solum de supernaturali potestate ad supernaturales actiones: & quia de actibus vitalibus supernaturalibus, & de illuminatione, quæ per illos fieri potest, in superiori bus etiam satis dictum est, nihil de eis hoc loco dicemus; sed solum de aliis miraculosis actionibus, & de virtute ad illas efficiendas, ad quam pertinent illæ duæ gratiæ gratis datæ: quarum dispositionem supra huc remisimus, scilicet, gratia sanctorum, & operatio virtutum. Quoniam vero actiones supernaturales, & miraculose complures sunt, quarum præcipua esse videtur animatum justificationem, seu gratiæ productio, non oportebit de singulis earum dicere, sed in communi res disputanda est, & si quid in particulari dicere oportebit, id frequentius explicabimus in gratiæ productione, nisi alicubi alia occurrerit specialis difficultas.

#### SECTIO I.

Utrum omnipotentia Dei tota sit humanitati assumpta communicata.

**H**OC loco referri posset error hæreticorum huius temporis, qui dicunt, per unionem hypostaticam factum esse, ut attributa divinæ naturæ vere ac secundum se, humanæ fuerint communicata, ita ut non solum per communicationem idiomatum Christus sit omnipotens, sed etiam ipsa humanitas, & cum reduplicatione Christus in quantum homo. Sed hic error re ipsa coincidit cum errore Eutychetis, & simul cum illo satis explosus est, & iterum impugnabitur inferius, cum generatim de communicatione idiomatum agemus.

Dico ergo primo, omnipotentiam Dei simpliciter, & secundum totam perfectionem suam, nec fuisse communicatam, nec potuisse communicari Christi humanitati, atque adeo Christum ut hominem non fuisse omnipotentem. Ita, præter D. Th. hic, docent Theologi cum Magistro in 3. d. 14. Bonav. a. 3. Rocher. a. 2. Durand. q. 5. Palud. q. 3. Gabr. q. 1. a. 3. dub. 1. Alenf. 3. p. q. 14. Et est res omnino certa, evidenter enim sequitur ex certis principiis fidei; definiunt enim Concilia (ut supra vidimus) naturas post unionem mansisse inconfusas, suasque proprietates, facultates, & operationes duplices retinuisse; ut constat ex Concil. Chalced. act. 5. VI. Synod. act. 4. 1. 1. & 17. & concil. Later. sub Martino, consultat. ult. can. 9. 10. 11. & ex Leone P. ep. 20. & aliis, quæ supra allegata sunt. Ex quo constat, aliam esse potentiam humanitatis a potentia divinitatis, nam potentia activa est proprietas naturæ, sicut ergo mansit duplex natura ita duplex potentia; ergo potentia humanitatis non est ipsamet potentia divinitatis, & consequenter nec potest esse omnipotentia  
 sim-



simpliciter, quia hæc tantum est una, & multiplicari non potest. Quod secundo ita explicatur, nam potentia humanitatis est distincta ab ipsa divinitate: ergo est potentia creata: ergo finita: ergo non est omnipotentia. Unde argumentor tertio, quia vel intelligitur omnipotentia communicata humanitati formaliter, & per se ipsam, vel per donum creatum. Primum intelligi non potest, nisi vel per confusionem naturarum, vel quia ipsamet omnipotentia increata unita est humanitati tamquam forma illa informas, & constituens omnipotentem, quod repugnat, & ipsi divinitæ naturæ, ut supra ostensum est, & unioni, quia talis esset unio in natura, quandoquidem omnipotentia, quæ est ipsamet natura Dei, informaret humanam naturam, & communicaret illi suum esse. Si vero dicatur secundum, constat, tale donum creatum, quodcumque illud sit, non posse esse omnipotentiam simpliciter, nam & perfectione, & entitate esset inferius omnipotentia Dei; ergo & in virtute, & efficacia, quæ in perfectione fundatur. Quarto tandem hoc demonstratur, quia ad omnipotentiam duo necessaria sunt. Primum, ut in objecto omnia factibilia comprehendat. Secundo, ut in modo agendi sit virtus principalis eminenter continens omnia, & independens a concursu superioris agentis: neutrum autem horum communicatum est, aut communicari potuit, Christi humanitati, quia nec potest esse principium producendum omnia, saltem seipsam, neque etiam potest esse causa creationis, saltem principalis, quia ad hoc requiritur virtus infinita. Unde nec producere potest res perfectiores se, per modum principalis agentis. Denique neque in actione sua est independens, indiget enim divino concursu. Quæ ratio probat, circa nullum effectum habere potuisse Christi humanitatem omnipotentiam simpliciter.

**Obje. 10.** Neque contra hanc veritatem aliquid obijci potest, quod difficultatem habeat. Solum videtur Patres interdum ita loqui, scilicet, omnipotentiam Dei esse communicatam Christo homini, vel ejus humanitati, ut constat ex Damasc. l. 3. c. 18. ex Nicet. l. 3. Thef. c. 38. Respondetur, hæc & similia testimonia altero ex duob. modis debere exponi, prout intentio, & contextus literæ postulerat. Primus est, quem attingit D. Th. hic ar. 1. ad 1. per hanc unionem ita esse conjunctam humanitatem Verbo Dei, ut ratione illius possit hic homo dici omnipotens per communicationem idiomatum. Secundus est, per hanc unionem communicatam esse Christi humanitati speciale vim operandi supra naturam ea opera, quæ Dei sunt propria, saltem ut divinitatis organo, & instrumento, de qua re videri potest Leo Pap. Ep. 81. aliàs 83. ad Episcopos Palæstinos. Aug. lib. contra Felicianum Arianum, c. 11. & Cyril. Alex. l. 10. Thef. l. c. 9. & l. 12. ca. 15. & l. 4. in Joan. c. 24 & l. de Incarn. Unigen. c. 1. & 2. Theodoretus dialog. 2.

Dico secundo. Humanitas Christi ex vi solius unionis ad Verbum, formaliter ac præcise sumptæ, non est facta potentior ad operandum, quam ex natura sua esset. Conclusio hæc intelligitur primum de potestate ad reales, & physicos effectus efficiendos, non enim agimus de effectibus moralibus meriti, & satisfactionis: nam ad hos multum confert ipsa unio, per se ac præcise considerata, ut supra disp. 4. late dictum est. Deinde intelligitur, ut in ipsa conclusione dicitur, de unionis præcise, nam licet ipsa unio sit ratio, ob quam humanitati supernaturalis virtus, seu potestas donatur, non est tamen ipsa, qua humanitas potentior efficitur: ut recte Durandus docet supra dicta dist. 14. qu. 5. & colligitur satis aperte ex D. Th. tota hac quæst. præsertim ar. 1. & 3. Et probari sufficienter potest ex dictis supra, disp. 18. sect. 4. ubi ostendimus, in actibus gratiæ unionem non esse principium formale, quod humanitatem reddat potentem ad ipsos efficiendos: est autem eadem ratio de quocumque supernaturali effectus, quia in omni actione principium agendi est natura; substantia vero tantum est, quasi conditio requisita, humanitas autem unita retinuit eandem omnino naturam, & eandem formam; ergo de se retinuit etiam eandem virtutem, & potentiam agendi. Et confirmatur, quia Verbum unitum ut sic non habet ratione unionis specialem influxum physicum in actiones humanitatis, quia hujusmodi influxus ad extra, communis est tribus personis.

**Obj. 11.** Sed contra: nam perfectior existentia conducit ad perfectiorem operationem: sed humanitas Christi ratione

unionis habet perfectiorem existentiam; ergo per unionem formaliter potentior facta est. Propter hoc argumentum Richar. dist. 14. a. 2. q. 2. contra hanc conclusionem opinari videtur. Sed procedit ex falso fundamento, **Respons.** humanitas enim ex vi unionis non habet perfectiorem existentiam, sed substantiam, quæ non confert per se ipsam, ac formaliter ad perfectiorem effectum physicum, ut dictum est. Deinde, si essentia creata esset distincta entitas ab existentia, ut Richard. videtur supponere, sic negandum esset, existentiam per se conferre ad actionem ut principium formale operandi, sed solum esse conditionem requisitam: & ideo, quamvis juxta illam sententiam humanitas Christi existeret existentia increata, non propterea dicendum esset, per ipsam unionem formaliter, factam esse potentioram ad agendum.

## S E C T I O II.

*An ratione unionis data sit animæ Christi supernaturalis gratia, seu virtus ad facienda supernaturalia opera, seu miracula.*

**I**N hac re fere nulla est controversia inter Theologos, & ideo breviter dico primo, Christum Dominum per humanitatem suam vera miracula fuisse operatum, unde necessario fit, illi humanitati communicatam esse virtutem supernaturalem ad miracula facienda. Conclusio est de fide, ut ex universa Evangelica historia constat, & specialiter Matth. 9. inquit Christus: *Ut autem sciaitis, quia filius hominis habet in terra potestatem remittendi peccata, dicitur paralytico, surge, &c.* ubi ex uno effectu supernaturali potestatem ad alium efficiendum confirmat: ut quia effectus ille major esset, sed quia evidentior, & ideo, ut Evangelista concludit: *Homines glorificabant Deum, qui dedit potestatem talem hominibus.* Plura testimonia afferemus in seqq. Ratio vera prima, & præcipua est divina voluntas, e qua omnis hæc gratia dimanat. Congruentia vero est: prima, dignitas ipsius personæ: secunda, officium doctoris; nam cum Christus doceret novam & supernaturalem legem, oportuit, ut doctrinæ suæ divinis signis confirmaret, & præsertim, cum se Deum, & Filium Dei esse diceret, debuit hoc operibus ostendere. Unde Jo. 5. inquit Christus: *Opera, quæ dedit mihi Pater, ut faciam, ipsa sunt, quæ testimonium perhiberent de me: & c. 10. Si mihi non vultis credere, operibus credite: & c. 15. Si opera non fecissem in eis, quæ nemo alius fecit, peccatum non haberent: & ideo unum ex signis, quod dederat Deus ad cognoscendum Messiam, fuit, quod mira opera esset facturus, ut constat II. 35. & Matth. 11. *Ite, & renunciate Joanni, quæ audistis, & vidiistis, cæci vident, claudi ambulant, &c.* Sed quæret aliquis, an hæc conclusio non solum certa sit, sed etiā evidens, suppositis iis, quæ de Christo narrantur. Et est ratio dubii, quia ipsi Judæi, qui ipsius Christi opera videbant, calumniabantur, non fuisse vera miracula, sed apparentia signa virtute demonum facta. Nec defuerunt alii, qui dicerent, illa opera fieri potuisse, vel ex virtute, & efficacia optimi temperamenti corporis Christi Domini, vel virtutis imaginativæ animæ ejus, ut Richard. hic refert, d. 15. a. 2. q. 3. & latius Castro contra hæres. v. Miracula, & Michael Medina l. 2. de recta in Deum fide c. 7. ubi latissime hunc errorem impugnatur, quod superfluum duco, quia per se est incredibilis, & prorsus absurdus. Respondetur ergo, sermonem esse posse, aut de iis, qui opera Christi intuebantur, hominibus, aut angelis, aut de iis, qui solum audiverunt, ea esse facta: angeli ergo evidentissime cognoverunt, illa esse vera miracula, divina virtute facta; & de bonis quidem angelis res est clara; de demonibus autem declaratur; quia evidenter experiebantur vim, & efficaciam humanitatis Christi in ipsos. Deinde intuebantur animam, v.g. Lazari, vere fuisse a corpore separatam, atque iterum eidem corpori conjunctam per veram informationem, similiter visum fuisse restitutum ei, qui illo caruerat: cum enim hi effectus, licet supernaturali modo fierent, in se tamen, seu in termino sint naturales, evidenter videntur ab angelis prout in se sunt, cognitione naturali. Est autem eisdem angelis evidens hujusmodi effectus illo modo non posse fieri naturali virtute, & ideo etiam mali angeli tergiversari non poterant. Homines vero non potuerunt habere tam claram evidentiam, quia non possunt tam intime effectus in*

Dubium.

Respons.

sci-



seipſis intueri, ſed ſolum, quantum per externa ſigna apparent. Nihilominus habere potuerunt tantam evidentiam, ſaltem moralem, ſine magna temeritate, & inſigni malitia, repugnare non poſſent, ut ipſe Dominus Jo. 13. & 14. teſtatur eſt. Et breviter declaratur, nam de ratione miraculi duo ſunt. Primum, ut ſit inſolitum opus, & extraordinarium, vel in effectu, vel in modo. Secundum, ut opus ſit tale, quod per naturales cauſas fieri non poſſit; huiusmodi autem fuiſſe opera, quæ Chriſtus faciebat, per ſe notum eſt, tum ex ipſis effectibus, quales ſunt ſuſcitatio mortuorum, reſtitutio viſus, &c. tum ex modo, quia ſubito ſine ulla reſiſtentia ſolo imperio hæc faciebat, & morbos etiam incurabiles ad quamcunque diſtanti-  
Reſponſ.

Quod autem illa opera revera talia eſſent, qualia apparebant, evidens etiam eſſe potuit humana quadam & naturali evidentia. Primo ex multitudine talium operum, quorum effectus erant diuturni, & perſeverantes, & in nullo eorum inventa eſt fallacia, vel deceptio, cujus evidens ſignum eſt, quod, cum ſæpius, & multo tempore, & inter hoſtes ſuos, qui maximo odio illum proſequebantur, hæc fuerit Chriſtus operatus, nunquam tamen illi obſecerunt deceptionem, aut falſitatem in huiusmodi operibus, neque etiam unquam auſi ſunt negare vel Lazarum vere fuiſſe ſuſcitatum, vel cæco a nativitate viſum vere reſtitutum, quamquam interdum ignoranter, & impudenter calumniarentur hæc fieri ex pacto cum dæmonibus, quaſi vero ipſi dæmones talium operum auctores eſſe poſſent. Secundo id conſtare poterat vere evidenti experientia. Quis enim dubitare poſſet eum, qui triginta & octo annis in lecto jacebat, vere fuiſſe infirmum? aut eum, qui ſubito viſus eſt lectum ſuum portare, vere fuiſſe ſanatum? Similiter erat evidens hominem cæcum a nativitate vere caruiſſe viſu: & ſimiliter manifeſte conſtare poterat ipſum poſtea vere viſiſſe. Tertio, hanc veritatem maxime comprobabat ipſius Chriſti vita innocentiffima, & rerum temporalium contemptus. Quarto, id conjici poterat ex fine, & effectu talium operum, ideo enim illa faciebat, ut homines ad veri Dei cognitionem, & amorem, & ad virtutem, & honeſtatem proſequendam traheret: quo argumento uſus eſt ipſe Matth. 12. ut oſtenderet ſe non operari ex pacto dæmonum, quia *omne regnum, in ſe diſiſum deſolabitur, &c.* His ergo modis potuit eſſe evidens iſis, qui Chriſti opera viderunt, & experti ſunt illum ex ſupernaturali, & divina virtute fuiſſe operatum. At vero iſis, qui ea non viderunt, ſed audierunt, non poteſt hoc eſſe tam evidēs (ut per ſe conſtat); tamen eſt tam certum, quantum eſſe poteſt res aliqua, quæ non ſolum fide divina conſtat, ſed etiam fide humana tantæ certitudinis, ut ab homine cordato in dubium revocari non poſſit; in qua non immerito dici poteſt in eſſe quoddam genus humanæ evidentia, ut v. g. quod a Tito & Veſpaſiano Hieroſolyma vaſtata fuerit, & ſimilia: tam certum enim & evidens humano modo eſt & Chriſtum hominem fuiſſe in mundo, & ea, quæ de illo narrantur, operatum eſſe: omnibus ergo conſtat illum habuiſſe hoc miraculorum donum. De qua re plura dicentur in materia de Fide.

Dico ſecundo. Hæc virtus miraculorum fuit in Chriſto homine permanenter per modum habitus, in quo alios Prophetas ſeu homines ſanctos ſuperavit: alii enim non habent hanc poteſtatem quaſi habitualem, ut illa, cum voluerint, uti poſſint; ſed ſolum per modum cujuſdam actionis tranſeuntis interdum illam recipiunt, ut Gregorius tract. lib. 2. dialog. c. 31. & latius D. Thom. 2. 2. qu. 178. a. 1. at vero Chriſtus dicitur habere hanc poteſtatem permanentem, & per modum habitus, quia ſicut habitibus utimur, cum volumus, ita ipſe arbitrio ſuo, & ad nutum ſuæ voluntatis, poterat miracula facere, juxta illud Matth. 8. *Domine, ſi vis, poteſ me mundare*: nam licet illud fuerit a leproſo dictum, quod autem ex vera fide fuerit profeſſum, ipſe Dominus oſtendit, dicens: *Volo mundare*. Unde Joan. 11. cum ad ſuſcitandum Lazarum Chriſtus orationem præmiſiſſet, propter eos, qui aderant, dixit ſe id feciſſe, non quod ipſe indigeret. Ratio vero eſt, quia hæc virtus data eſt humanitati quaſi proprietas conſe-  
Objeſtio. Reſponſ.

cil. Ephel. dicente, *carnem Chriſti eſſe vivificatricem propter unionem ad Verbum*: in quibus verbis ſatis ſignificatur & unionem ad Verbum eſſe radicem huius poteſtatis, & utrumque eſſe æque permanens in Chriſti humanitate. Secundo, quia voluntas Chriſti hominis, etiam ſi humana ſit, eſt tamen voluntas divinæ perſonæ, ergo oportuit, ut ſemper eſſet efficax, quantum absolute vellet; atque adeo, ut haberet poteſtatem operandi miracula ſuæ voluntati ſubjectam. Tertio probari poteſt, quia ſupra oſtendimus alias gratias gratis datas animæ Chriſti, permanenter, & per modum habitus fuiſſe conſeſſas.

Sed contra, nam D. Th. citato loco 2. 2. indicat fieri non poſſe, ut gratia miraculorum communicetur creaturæ per modum habitus. Reſpondetur D. Th. ſolum ſignificare non poſſe hanc gratiam eſſe qualitatem aliquam permanentem, & habitum inſeſe inherenter, qui ſit principium omnium harum operationum, quod verum eſt, ut ego exiſtimo, & infra latius dicam. Neque in hoc ſenſu aſſero hanc gratiam eſſe permanentem, & per modum habitus in Chriſti humanitate, ſed ſolum quia ſemper, ac perpetuo habuit paratum Dei concurſum, vel motionem neceſſariam ad miracula efficienda, quotieſcumque vellet, ſicut nunc vere dicitur ſacerdos habere poteſtatem conſecrandi permanentem, & per modum habitus, quamvis neceſſe non ſit eam facultatem eſſe habitum aliquem inherenter, qui ſit proprium principium illius actionis. Et hanc conſiſionem bene docuit Vega l. 7. in Trident. c. 14. dub. 2.

Sed quæres primo, quando fuerit hæc virtus data humanitati Chriſti. Reſpondetur breviter ipſam facultatem quaſi in actu primo datam eſſe ab inſtanti incarnationis, quia (ut dixi) eſt quaſi proprietas conſequens unionem, & nullum fuit impedimentum, quominus a principio dari poſſet: & ita docuit Anſelmus lib. 2. Cur Deus homo, ca. 13. in fine, at vero quoad uſum non conſtat, quando hac poteſtate uti inceperit, quamquam enim Jo. 2. dicatur miraculum illud convertendi aquam in vinum fuiſſe initium ſignorum Jeſu; tamen non inde certo conſtat illud fuiſſe omnino primū opus miraculoſum, quod Chriſtus in hac vita operatus eſt, ſed ſolum fuiſſe primū publicum miraculum, quo cepit gloriam ſuam manifeſtare, & doctrinam ſuam confirmare, ut recte D. Th. infra q. 43. a. 3. An vero, ante illud tempus aliqua miracula privatim fecerit, non conſtat, quidquid enim de hac re ſcriptum eſt de infantia Salvatoris, apocryphum eſt, ut Geſaius Papa docet in c. S. Romana 15. diſt. & Chryſoſt. hom. 16. in Jo. Et Euthym. ac Theophyl. ſuper Joannem absolute rejiciunt, ut falſam ſententiam aſſerentem, Chriſtum in infantia mirabilia opera patraſſe: quamquam Chryſ. omnia mirabilia ſigna, quæ facta ſunt in Chriſti nativitate, ut de ſtella quæ Magis apparuit, & ſimilia, huic poteſtati & virtuti attribuat. Sed fortaiſſe hoc intelligit de Chriſto, ut Deo, potius quam ut homine. Contra hoc vero referri poſſet hoc loco eorum ſententia, qui aſſerunt Chriſti animæ fuiſſe communicatam vim effectricem gratiæ ante creationem ſuam, & unionem ad Verbum, quæ vis pertinet ad hanc potentiam operatricem ſupernaturalium operum, ut ſupra dictum eſt: hæc vero ſententia infra commodiori loco impugnabitur, eſt enim (ut opinor) improbabilis.

Quæres ſecundo, quamdiu duraverit hæc gratia, ſeu poteſtas in Chriſti humanitate. Reſpondetur, ex quo illam accepit, nunquam eſſe illa privatam: tum quia dona Dei ſunt ſine poenitentia: tum etiam quia (ut dictum eſt) illa eſt proprietas conſequens unionem, quæ ſemper perſe-  
Dub. 2. Reſponſ.

ſeſſat: tum etiam quia pertinet ad perfectionem illius humanitatis, & non includit imperfectionem ſtatu ſu-  
Objeſtio. Reſponſ.

tionem



tionē præsertim Beatorū, efficiendā esse per Christi humanitatem tanquam per instrumentum, nam totum hoc debetur ejus dignitati, & meritis. Et ad hoc non incommode applicari potest illud Joa. 5. *Sicut Pater suscitavit mortuos, & vivificat, sic & Filius, quos vult, vivificat*, quamvis enim hoc præcipue intelligatur de Christo ut Deo, qui æqualem cum Patre habet potestatem: tamen satis accommodatè exponi potest de potestate communicata Filio, etiam ut homini, ut per carnem suam suscitare possit mortuos, sicut statim dicitur, *Patrem omne judicium dedisse Filio*, quod recte de Christo homine intelligitur, ut infra suo loco dicitur: & ita hoc, quod intendimus, docuit August. tr. 19. & 29. & seqq. & D. Th. infra qu. 56. Tertio, omnes gratiæ, vel supernaturalia dona, quæ in Ecclesia conferuntur, per Christi humanitatem conferri, satis pie, & probabiliter credi potest: nam ille est, qui principaliter baptizat, qui consecrat, qui sanctificat: hi autem effectus ad usum hujus potestatis pertinent. Nam licet istæ actiones jam non dicantur proprie miraculosæ, quia non sunt insolitæ, & fiunt secundum ordinariam legem gratiæ, simpliciter tamen supernaturalia sunt, & ad potestatem supernaturalem efficientem pertinent. Denique sicut Christus nunc retinet, & perfectissime exercet dignitatem capitis, ita & perfecto modo influit gratiam per usum hujus potestatis. Scio Andreæ de Vega, lib. 6. in Trid. c. 14. in fine, probabilius existimare Christum in cælo nunc existentem non influere immediate in gratiam, quæ nobis confertur. Sed si intelligat, non immediate, id est, non sine alio instrumento propinquo, est id verum in justificatione, quæ fit per sacramentum, non vero in aliis. Si vero intelligat (quod magis significat) humanitatem Christi per se non influere, non est improbable, quod ait, verius tamen credimus esse oppositum, quia nulla est causa sufficiens ad negandam Christo hanc dignitatem. Quod vero quosdam asserere audio, Christum per angelos hunc effectum conferre, intellectum de propria efficientia instrumentali, improbable est, quia nullo fundamento, sed mere gratis asseritur: intellectum autem de causa ministeriali & morali, non est ad rem, ut per sese satis constat.

Tertio quæri posset, quod sit adæquatum objectum hujus potestatis, quod est quærere, ad quos effectus se extendat. Sed hoc explicabitur commodius post sectionem 5. quia pendet ex modo, quo hæc potestas operatur.

## SECTIO III.

*An hæc potestas sit vere, & physice effectiva gratiæ, & supernaturalium operum.*

Suppono per potentiam physice activam nos intelligere illam, quæ per realem & veram actionem operatur, & a qua effectus re ipsa pendet in suo esse. Multi ergo auctores negant humanitatem Christi potuisse hoc modo elevari, ut esset principium efficiens opera supernaturalia, & præsertim gratiam, de qua frequentius auctores loquuntur, quamquam eorum fundamentum generale sit. Ita tenet Alexand. a. lenf. 3. p. q. 3. mem. 3. a. 3. Altissiod. 3. p. summ. tr. 1. c. 4. q. 2. Bonav. & Richar. in 3. d. 13. a. 2. q. 3. & ibi Gabr. dub. 3. Durand. dist. 14. q. 4. & in 4. d. 1. q. 4. & ibi Scot. q. 1. circa finē, agens de instrumento creationis, & q. 4. & 3. agens de vi effectrice sacramentorum, & ibidem Bonav. & Ric. & multi Nominales, de eadem re disputantes. Fundamentum eorum est, quia humanitas Christi, ut vere ac physice efficiat, oportet ut in se suscipiat aliquam virtutem agendi, hæc vero nulla esse potest, quia nec potest esse qualitas aliqua, neque motus, neque aliquid hujusmodi, ergo. Major constat, quia actus secundus essentialiter supponit primum, non ergo potest aliquid agere sine virtute agendi. Secundo, nam eadem res in se immutata manens non potest aliquid efficere, ad quod efficiendum de se virtutem non habet, sed humanitas de se non habet virtutem ad hæc opera, ergo oportet, ut illam recipiat per aliquam sui mutationem, & alicujus rei receptionem; intelligi enim non potest fieri potentio rem manentem sicut antea. Tertio, quia intelligi non potest, ut duæ res, quæ ex natura sua non habent connexionem, nec dependentiam causæ & effectus, incipiant illam habere eodem modo, utraque permanente absque additione ulla, quæ conferat virtutem a-

gendi, & sit principium, & ratio hujus dependentiæ. Unde infert hæc sententia hanc potestatem efficiendi miracula solum in hoc esse positam, quod infallibiliter ad tactum, aut verbum, seu voluntatem humanitatis Christi statim adest divina virtus ad opus conficiendum, quod Christus, ut homo, fieri vult, & quia hoc pactum est firmum, & infallibile, ac perpetuum; ideo morali quadam ratione dicitur Christus ad perpetranda miracula habere permanentem potestatem. Nec a sensu sanctorum Patrum hæc expositio videtur aliena: Damasc. enim lib. *Quomodo ad imaginem Dei facti sumus*, circa finem, cum dixisset vim divinam per tactum corporis sanasse infirmos, & divinam voluntatem per humanam effecisse miracula, explanans hunc effectus modum, dicit singula naturas, divinam & humanam, effecisse sibi propria cum consortio alterius, duabus tamen actionibus intervenientibus. Sicut, quando ferra ignita, sciindendo urit: altera est actio secandi, altera urendi, a diversis principiis procedentes. Sic, inquit, *quando divinitas tactu carnis sanabat infirmum, alia erat propria actio divinitatis, altera humanitatis, & finis humanæ actionis in manus extensione, & tactu positus erat, divine autem natura in excitatione puella, &c.* Nec dissimilia sunt verba Athanasii, serm. 4. contra Arianos; *Humano, inquit, more manum extendit, divinitas autem morbum compevit.* Et Sophronius in Ep. synodica, quæ habetur in VI. Synodo act. 11. Unus, inquit, *duarum naturarum, secundum aliam divina signa operabatur, secundum aliam humilia recipiebat.* Et fere eodem modo Leo Papa Epist. 10. cap. 4. *Agit, inquit, utraque forma cum alterius communionem, quod proprium est, Verbo, scilicet, operante, quod Verbi est, & carne exequente, quod carnis est, unum barum corpuscat miraculis, aliud succumbit injuriis.* Denique August. 22. de Civit. cap. 9. quanquam dubius in hac re sit, satis tamen indicat hunc modum efficiendi sufficere ad intelligenda ea, quæ de miraculis Christi Scriptura docet. Quod tandem ita confirmo, nam in multis operibus necesse est fateri, non intervenisse actionem physicam, ergo pari ratione in nullo opere miraculoso oportet illam concedere, quia omnia eodem modo Christo tribuntur, & ita eodem sensu vera esse debent. Antecedens probatur: nam, quando ejiciebat demones, nihil physice in illis effecit, neque in anima Lazari, quando illam a sinu Abraham ad sepulchrum revocavit: & similiter cum solidavit aquas, ambulans in eis, ut Dionysius loquitur 2. cap. de divin. nominibus, nihil physicum in illis impressit, sed vel sustinuit corpus, ne illas divideret, vel certe illas diffuere non permisit, & sic de aliis: ergo.

Nihilominus dicendum est Christum hominem per actiones suæ humanitatis, non solum morali modo, sed etiam reali & physico, operatum esse opera miraculosa, & justificasse animas, conferendogratiam, & similia. Hæc est aperta sententia D. Thomæ hic, a. 1. & 2. ita enim concedit Christi animam potuisse efficere miracula, sicut negat potuisse assumi ad creandum, vel annihilandum. Constat autem, si sermo esset solum de concursu morali, vel de conditione, sine qua non, seu ad cujus præsentiam operatur Deus ex pacto certo & instabili, potuisse animam Christi concurrere ad anihilationem, & creationem: loquitur ergo D. Th. de vera, & physica effectione. Idem sentit infra q. 48. a. 6. q. 52. ar. 1. & 2. qu. 56. a. 5. q. 62. ar. 1. & 1. 2. q. 112. a. 1. ad 2. & in 3. dist. 14. q. unic. a. 4. & q. 6. de potent. a. 4. Cajetan. hic. & infra qu. 62. & 1. 2. q. 112. a. 1. Palud. in 4. dist. 1. q. 1. n. 3. 2. 5. 1. & sequentibus. Soto, q. 3. a. 5. Capreol. q. 1. a. 3. ad argumenta contra 4. conclusionem, & dist. 13. q. 1. ad argum. contra 1. concl. & in 3. d. 25. q. unica a. 3. ad argumenta contra 1. concl. Ferrar. 3. contra Gent. c. 56. Vega l. 7. in Trident. c. 11. Dried. tr. 2. de captiv. & redemp. gener. hum. c. 2. p. 3. a. 6. quamvis eodem c. 2. memb. 2. videatur docuisse contrarium, sed in hoc loco videtur de causa principali locutus, in alio vero de instrumentali. Probatur, quia Scriptura sacra simpliciter ita loquitur, dicens, Christum hominem habuisse potestatem, & virtutem ad miracula faciendā, & simpliciter loquendo, sanasse infirmos, &c. ut patet ex testimoniis sect. præced. citatis. Et præterea Luc. 6. *Virtus de illo exibat, & sanabat omnes.* Ex cap. 8. *Ego sensi virtutem de me exisse:* ubi ipsum miraculosum opus, virtus vocatur, & manasse dicitur Christo homine. Joan. 1. *Gratiæ, & veritas per Jesum Christum facta est.*



est. Sed hæc locutiones possunt proprie intelligi de physica effectione, hoc enim non repugnare infra ostendemus, & est sensus magis consentaneus proprietati ipsorum verborum, & alias pertinet ad perfectionem, & dignitatem humanitatis maxime accommodatam personali unioni. Deinde quadrat optime cum modo, quo Christus efficiebat hæc miracula per actiones humanitatis, tangendo, & imperando, Matth. 8. *Imperavit ventis*, & infra, *Volo mundare*: & infra, *Tetigit eos*, &c. Jo. 11. *Lazare veni foras*: & Isai. 51. 52. 53. & sæpe alibi, Christus dicitur *brachium Domini*, quia per eum mira opera efficit, ut Sancti exponunt. Denique locutiones Sanctorum, quæ ex Scriptura sacra sumptæ sunt, multum huic sensui favent. Concilium Ephes. can. 11. dicit carnem Christi propter unionem ad Verbum fuisse *vivificatricem*, & in VI. Synodo, act. 11. dicit Sophronius in citata epist. a Synodo recepta Verbum per carnem suam effecisse opera, quæ erant divinitatis indicia. Dionys. Ep. 4. ad Cajum, præter actiones humanas & divinas, ponit in Christo alias quasi mistas, quas vocat *theandricas*, de quibus agens Damasc. lib. 3. ca. 19. duobus modis dicit aliquam operationem Christi vocari *theandricam*. Primo, quia non solum erat actio hominis, sed etiam Dei, & hoc modo omnis operatio Christi potest dici Dei virilis. Secundo, quia Verbum per humanitatem, tanquam per instrumentum, divinas actiones efficiebat, & hoc peculiari modo actiones miraculose humanitatis Christi dicuntur *theandricæ*. Præterea Cyrill. in Exegeti ad Valerian. Episcopum, quæ habetur in Concil. Ephes. tom. 6. c. 17. dicit carnem Christi, quia vivificantis Verbi propria effecta est, actionem ejus participasse, & ep. ad Monachos Ægypti, quæ habetur tom. 1. c. 2. dicit venisse Christum hominem coelesti virtute instructum, & perfectiori modo, quam Moysem miracula fuisse operatum, & lib. 2. in Joan. c. 5. & 1. 4. c. 14. advertit Christum interdum tactu carnis effecisse miracula, ut ostenderet ipsam carnem fuisse cooperatricem. Plura alia habet 1. 1. de fide ad Regin. & dial. 6. de Trinit. Greg. Nazianz. carm. de miraculis Christi, sæpe ad eundem modum loquitur, & præsertim in miraculis ex Marco sic inquit: *Viribus ejecit Christi cum damone febris*. Athanas. ferm. 4. contra Arian ante medium, sæpe dicit Christum per humanitatem effecisse miracula. Optime Chrys. hom. 26. in Matth. ponderans verba illa: *Domine, si vis, potes me mundare*, advertit non dixisse, si oraveris, sed, *si vis, omnia*, inquit, *ejus arbitrio, & potestati committens*, quod Christus ipse, & assensione, & operatione confirmavit, dicens, *Volo mundare*; & voluntatem statim sanitatis donum consecutum est. Idem indicat hom. 31. in Joan & hom. 1. in Acta. Gregor. Nys. orat. in Greg. Thaumaturg. Euthym. Luc. 7. sub c. 19. sic inquit: *Quem ad modum ferrum, quod in igne aliquo tempore permansit, habet ignis operationes, ita quoque sancta ipsius caro divinitati unita, quæ divinitatis sunt, operabatur. Ideo manus quidem mortuum ac desertum corpus conjunxit, vox autem recedentem animam revocavit*. Ambr. ferm. 90. & 91. Euseb. 4 li. de demonst. Evang. c. 13. hoc sensu vocat humanitatem, *organum divinitatis*: & eodem modo loquitur Theodoret. in dialog. *Immutabilis*. August. tract. 24. in Joan. dicit potestatem multiplicandi panes fuisse *in manibus Christi*. Lib. autem 22. de Civit. c. 9. quamvis subdubio relinquat, an hic modus faciendi miracula communicatus sit Sanctis, tamen aperte supponit illum esse possibilem, & Psal. 138. circa illud: *Mirabilia opera tua*, in hoc magis inclinat, quod Sancti, etiam hoc modo, miracula efficiant, & super Psal. 130. dicit hoc in majorem gloriam Christi cedere, a quo Sancti hanc virtutem accipiunt, unde excellentiori modo ipse illam habet. Unde & Greg. 2. dial. c. 30. duobus modis dicit Sanctos miracula facere, scilicet, *impetratione*, quod pertinet ad genus causæ moralis, & *potestate*, quod ad genus causæ physicae spectat, ut D. Th. exposuit q. 6. de potent. ar. 4. & bene attingit Canisius l. 5. de Deip. c. 18.

Solum superest, ut probemus hunc sensum Scripturæ & Sanctorum posse esse verum, atque adeo non repugnare hanc physicam efficientiam communicari humanitati. Sed hoc potissimum ostendendum est, solvendo difficultates, quæ in hac sententia occurrere possunt, & explicando modum, quo hæc effectio intelligenda est: quod fecit 5. & sequent. copiose prætabimus. Nunc solum ita suadet, quia nulla ratione asserendum

est nihil posse Deum per creaturam efficere, quod creatura per suæ naturæ vires efficere non possit; ergo non repugnat creaturam elevari ad efficiendum aliquid supra naturam suam; ergo nec repugnabit humanitatem Christi elevari ad supernaturalia opera: est enim eadem ratio, & si fundamentum contrariæ sententiæ aliquid probaret in universum excluderet omnem efficientiam creaturæ supra naturam suam. Antecedens variis exemplis ostendi solet, sed tria sunt potissima. Primum est de actione ignis inferni, de quo alibi latius. Secundum est de sacramentis novæ legis, quæ physice efficiunt gratiam, ut infra q. 62. late tractabitur; nunc sufficiant verba Concilii Trid. sess. 6. c. 7. ubi Baptismum vocat *causam instrumentalem gratiæ*. Tertium est de intellectu, & voluntate, has enim potentias Deus elevat ad efficiendos actus, totam virtutem naturæ superantes, interdum per inherentem habitum, interdum vero sine illo, ut ex doctrina de gratia constat.

Dices ideo has potentias posse elevari ad hos actus, quia, cum per vires suæ naturæ possint efficere actus intelligendi & amandi in genere, mirum non est, quod elevari possint ad perfectiores actus in eodem genere. Sed hoc non enervat argumentum factum: tum quia (ut supra dicebam, disp. 29.) quamvis potentia ista viribus possint efficere rationes intellectionis & amoris, ut abstracte consideratae possint in qualibet specie salvari; tamen, prout in re ipsa sunt contractæ ad actus supernaturales, non possunt attingi ab his potentiis, viribus naturæ, quia in illis sunt elevatæ ad superiorem ordinem, sicut ratio qualitatis ut sic fieri interdum potest a calore; non tamen, prout contracta est ad esse gratiæ: tum etiam quia in hoc eadem est ratio de effectione gratiæ, vel de alio opere supernaturali. Nam cum humanitas Christi natura sua possit efficere aliquam qualitatem, atque adeo attingere rationem qualitatis ut sic, eadem ratione elevari poterit, ut efficiat superiorem qualitatem, nempe gratiam, quamvis naturaliter illam efficere non valeat.

Ad fundamentum contrariæ sententiæ respondendum est ex professo in sect. 5. nunc breviter dicitur humanitatem elevari per potentiam obedientialem, adhibito concursu illi proportionato. Ad illud vero, quod ibi dicitur de causalitate morali, aut de conditione, ad cujus præsentiam Deus operatur, respondetur hoc non satis esse ad veram & propriam efficientem, quam Scriptura sacra, & sancti Patres humanitati Christi tribuere videntur. Nec testimonia Sanctorum ibi citata aliquid juvant, nam in aliis locis satis docuerunt, quid de hac virtute, & efficientia sentirent: in illis vero locis solum intendunt docere, quid conveniat humanitati ex virtute propria, & quid ex virtute divinitatis. Et ita distinguunt actionem quasi præviam humanitatis, ut est tactus, vel locutio, in qua virtus humanitatis secundum se terminatur, a principali effectu, verbi gratia, suscitatione mortui, qui principaliter fit ex virtute divinitatis; non tamen solius, sed medio tactu, vel voce, aut alio simili actu humanitatis. Et hunc esse verum sensum, præter citata, constat ex Damasceno, tertio de fide, cap. 15. ubi dicit aliter passiones humanitatis tribui Christo Deo, & opera divinitatis Christo homini. Primum enim verum est propter solam communicationem idiomatum, non quia illæ passiones ad divinitatem transeant; secundum vero non propter solam communicationem idiomatum, sed etiam, quia interdum illa opera per ipsam humanitatem perfecta sunt.

Ad ultimam confirmationem, quæ sumebatur ex quibusdam effectibus, in quibus non videtur habere locum efficientia physica, respondetur primum satis esse humanitatem Christi habuisse hanc physicam efficientiam circa illos effectus, ad quos est necessaria: nam si ad aliquos necessaria non est, non ideo in aliis est neganda; cum enim dicitur Christum efficere aliquid miraculosum opus, vere ac proprie intelligitur illum efficere modo necessario, vel tali effectui accommodato, & ita effectus physicos efficiebat physice morales moraliter. Sicut, cum dicitur satisfecisse perfecte per humanitatem, quia effectus ille moralis est, optime intelligitur de morali perfectione seu efficacia, & cum permisit Dominus deminibus, ut in porcos intrarent, non est necesse intervenire physicam efficaciam, sed tantum permissionem, & ad eundem modum dici potest in similibus.

Addo



Addo vero in omnibus effectibus in confirmatione illa numeratis posse intelligi physicam efficientiam: potuit enim, ut expelleret demones, effectivè loco movere etiam repugnantes, vel potuit etiam necessitatem physicam illis inferre, ut ipsi consentirent, & se moverent. Et simili modo potuit revocare animam Lazari, quantum ad motum ejus localem pertinet, nam de unione illius ad corpus non est dubium, quin per physicam efficientiam fieri debuerit. Denique, cum ambulabat super aquas, poterat vel effectivè sustinere pondus corporis sui, vel continere aquas, ne loco cederent. Et sic de aliis similibus.

## SECTIO IV.

*Utrum hæc virtus efficiendi miracula, seu gratiam, fuerit communicata humanitati tanquam principali agenti, vel tanquam instrumento,*

**N**on agimus de causa prima, quæ in actione sua a superioris influxu non pendet. Hoc enim modo, non solum gratiam, vel supernaturalia opera, verum nec naturales ipsas actiones, poterat Christus per humanitatem operari, quia (ut supra dictum est, & per se constat) in illis operabatur ut causa secunda, indigens influxu primæ causæ. Agimus ergo de causa principali eo modo, quo causa secunda habet in suo ordine sufficientem virtutem ad effectum producendum. Et præsertim esse potest difficultas de effectione gratiæ: nam in Scriptura sacra Christus Dominus dicitur fons & auctor gratiæ, juxta illud Joan. 1. *Gratia, & veritas per Jesum Christum facta est*, & ad Ephes. 1. *Gratificavit nos in dilecto Filio suo*; ergo & principalis causa gratiæ. Secundo, quia Christus est per se gratus est per essentiam, alii per participationem: ipse habet a se gratiam, alii ab ipso; ipse est exemplar, cui alii per gratiam efficiuntur similes; sed hæ sunt proprietates causæ principalis; ergo. Tertio, quia, si humanitas Christi tantum esset instrumentum gratiæ, haberet gratiam modo minus perfectio, quam sit in effectu, quia instrumentum, nec formaliter, neque eminenter continet formam, quam effectui communicat, sed inferiori, & minus perfectio modo. Quarto, quia sacramenta, vel ministri sacramentorum, sunt instrumenta Christi ad producendam gratiam, Christus igitur altiori modo illam producit, atque adeo ut principalis causa. Propter hæc & similia argumenta, nonnulli ausi sunt dicere Christum efficere gratiam per humanitatem, tanquam per causam principalem, quæ sententia habet speciem pietatis aliquam, veritatis autem, aut probabilitatis nullam: quin potius, loquendo de causa propriæ & physice efficiente, ut nunc loquimur, existimo esse omnino falsam, & temerariam. Nam loquendo de causa meritoria, potest in genere dici Christus causa principalis, ut loquitur D. Thom. in 4. d. 5. q. 2. art. 2. quæstionum. 2. quia propria virtute, & dignitate potuit perfectissime mereri, & meritum ejus plus valuit, quam omnis gratia creata; nunc vero non de hac causa agimus, sed de causa propria efficiente.

Dico ergo primo humanitatem Christi Domini non fuisse principium principale proximum ad efficienda miracula, sed solum organum seu instrumentum Verbi divini. Ita sentiunt omnes Theologi præcedenti sectione citati proutraque sententia ibi tractata, qui potissimum conveniunt in parte negativa hujus conclusionis. Patres etiam ibi citati, ad summum, tribuunt humanitati Christi, quod sit Verbi instrumentum ad hos effectus efficiendos. Ratione facile demonstrari potest: quia si humanitas posset concurrere, ut principale principium ad has actiones, vel id esset per seipsam, vel per aliquam virtutem illi superadditam. primum dici non potest, quia, cum humanitas de se non habeat intrinsecam virtutem sufficientem ad hunc effectum, si nihil ei superaddatur, nullo modo operari potest ut principalis causa, de cujus ratione est, ut habeat intrinsecam virtutem, & sufficientem ad effectum, & ut possit illum producere vi sua, & ex concursu primæ causæ sibi debito: & ideo ad hoc non satis est obedientialis potentia, quæ pertinet ad rationem divini instrumenti, ut infra dicetur, alias omnia sacramenta essent causæ principales, quia elevaruntur ad agendum per potentiam obedientialem. Secundum, etiam dici non potest, quia illa virtus superaddita non potest esse nisi aliqua qualitas inhærens humanitati. Neque enim esse

potest aliqua forma substantialis, quia nec posset esse in humanitate Christi, nec per seipsam pertinere ad ordinem supernaturalem, imo nec transcendere gradum angelicum: oportet ergo, ut sit forma accidentalis, & consequenter qualitas, quæ sola est principium operandi: non potest autem fingi neque intelligi qualitas aliqua, quæ ex natura sua habeat sufficientem virtutem ad efficienda hæc opera cum solo Dei concursu sibi connaturali. Primo, quia talis forma non posset hoc modo esse principium creationis; nam ille modus agendi requirit, saltem in principali agente, infinitam virtutem, ut demonstratur in 1. part. quæst. 45. art. 5. neque etiam posset esse principium miraculosæ transmutationis rei jam existentis: quia hæc non fit juxta naturalem capacitatem subjecti, sed juxta obedientialem; & ideo fieri non potest ex connaturali virtute formæ creatæ, ut recte D. Thom. sentit 1. part. quæst. 115. art. 2. ad quartum. Quia unaquæque res creata in hoc genere solum respectu sui auctoris & creatoris habet hanc obedientialem potentiam: tum quia hæc capacitas obedientialis habet quasi pro objecto adæquato, quidquid non repugnat, & ideo solum dicit ordinem ad illud agens, quod efficere potest, quidquid non repugnat; quod si sit principale, necesse est, ut virtutem habeat infinitam: tum etiam, quia natura non obedit ad nutum, nisi auctori suo, solus enim auctor naturæ potestatem habet supra totam naturam. Cum ergo in omni opere miraculoso quasi abrogentur, & rumpantur naturæ leges, nulla virtus creata potest hoc modo ut principale agens operari, sed solus ille, qui est supra omnes leges naturæ creatæ. Secundo, quia vel hæc qualitas, seu forma esset una & eadem sufficiens ad omnes actiones miraculosas, & hoc certe incredibile est: nam illæ operationes infinitis modis fieri possunt, & in diversis generibus, & ordinibus; excedit ergo perfectionem cujuscumque qualitatis (quam necessario finitam esse oportet) ut de se habeat sufficientem, & principalem vim ad hæc omnia efficienda. Vel ad singula miracula specie distincta oporteret singulas qualitates, aut formas ponere, & hoc etiam stare non potest. Primo, quia oporteret hujusmodi formas fere in infinitum multiplicari. Secundo, quia si talis forma in uno opere, vel effectu posset operari præter & supra ordinem legemque naturæ, cur non in quolibet? Tertio, quia sæpe opus miraculosum non consistit in productione alicujus rei, vel formæ supernaturalis, sed in modo agendi, ut patet in illuminatione cæci a nativitate, qui modus agendi propriè oritur ex suprema potestate auctoris naturæ: unde intelligi non potest forma creata, & finita, cui naturale sit illo modo operari. Quarto, quia hujusmodi miraculosa actio sæpe est substantialis mutatio, quomodo ergo qualitas erit proprium, & principale principium illius? Quinto, qualitas finita habet terminum, & modum in agendo, nam potest impediri a medio, vel ex resistantia subjecti retardari, quæ non conveniunt in hac virtutem miraculorum operatricem. Sexto, si fingatur illa qualitas esse ordinis naturalis, non posset sua propria virtute efficere transmutationes supernaturales: si vero sit ordinis supernaturalis, vel erit principium agendi solum actione transeunti, ad modum naturalium formarum; & hic modus, cum sit valde imperfectus, indicat imperfectam naturam, & ideo non convenit huic gratiæ miraculorum: vel erit principium actuum immanentium, & vitalium, & ita oportet, ut sit habitus intellectus, aut voluntatis. Talis autem qualitas & non videtur posse esse perfectior, quam charitas, vel lumen gloriæ, quæ non habent hanc virtutem, & non posset proxime efficere nisi actum intellectus, aut voluntatis, per quos oportet facere effectum miraculosum, solum per modum imperii, aut efficacis voluntatis. Producere autem formas hoc modo, vel transmutare res in qualitatibus vel substantiis earum, est proprium voluntatis divinæ, quæ supremum habet dominium, & potestatem in res omnes: cujus signum est, quia nulla voluntas creata potest, solum volendo vel imperando, naturali virtute producere aliquam formam, etiam naturalem, neque transmutare res, nisi ad motum tantum localem.

Dico secundo. Humanitas Christi non habet virtutem producendi gratiam seu supernaturalem justitiam tanquam principalis causa ejus, sed solum ut præcipuum instrumentum, Verbo conjunctum. Hæc etiam est communis

Humanitas Christi omni miraculis efficiendis solum se habet ut instrumentum Verbi.



munis sententia Theologorum in 4. d. 1. & D. Thom. 1. 2. q. 112. art. 1. qui falso in contrarium citari solet in hac quaestione art. 2. nam hic non agit de productione gratiæ, seu gratificatione, sed tantum de illuminatione, de qua alia ratio est, ut declarabimus. Docuit etiam hanc sententiam Driedo de capt. & redempt. gen. hum. tract. 2. cap. 1. part. 2. memb. 2. & sumi potest ex Concil. Trident. sess. 6. cap. 7. ubi solum Deum ponit causam efficientem gratiæ, & loquitur de propria, & principali: nam inferius de instrumentaliter loquens, eam causalitatem Baptismo tribuit. Et similiter favent omnes Scripturæ, quæ proprium Dei esse dicunt gratiam & gloriam conferre. Psalm. 83. & a peccato mundare, Job. 14. Marc. 2. quod necesse est intelligi de causa principali quacumque: nam si solum esset sermo de causa prima, hoc modo etiam est proprium Dei quemcumque alium effectum producere, ut supra dicebamus. Ratione hoc ipsum probari potest, & primum applicari possunt fere omnes factæ pro conclusione præcedenti: quia gratia & iustitia producuntur in anima, non juxta capacitatem naturalem, sed obedientialem, quæ solum Deo subditur, ut principali agendi, ut ibidem probatum est.

Humani-  
tas Chri-  
sti non est  
principa-  
lis causa  
gratiæ.

Obiectio.

Respon.

Dices. Hac ratione probaretur non posse animam Christi efficere proprios actus supernaturales, ut supernaturaliter illuminare alios per modum principalis agentis, cujus contrarium supra dictum est. Sequela patet, quia etiam isti actus sunt qualitates supernaturales, & consequenter recipiuntur in subiecto, juxta capacitatem obedientialem ejus. Respondetur. Quando hi actus sunt a potentia carente habitu supernaturali, verum est non fieri ab illa ut a principali principio, sed ut ab instrumento moto, & elevato divino auxilio, quamquam sit instrumentum vitale, & liberum, motum & elevatum modo sibi proportionato. Christi autem anima non sic operabatur unquam, sed per habitus infusos, qui in suo ordine sunt principia principalia, & proportionata actibus ejusdem ordinis, & elevant potentiam, ut sit non solum proportionatum principium, sed etiam quasi connaturale subiectum talium actuum, & ideo de illis est specialis ratio. Et ad eundem modum dicendum est de illuminatione, ut supra diximus; nam vel per eam nihil vere producitur in eo, qui illuminatur (ut multi volunt) sed solum illi speciali modo proponitur veritas, circa quam illuminatur, per modum objecti: vel, si aliquid producitur, illud est sola species, quæ supponit potentiam habere lumen tali speciei proportionatum, per quod est quasi connaturale subiectum susceptivum illius: vel si oportet ipsum etiam lumen produci, oportet, ut illud fiat ab humanitate Christi tamquam ab instrumento Verbi, & non ut a principali principio, ut supra dictum est, & ratio facta probat. Unde argumentor secundo, quia si anima Christi posset efficere, ut principale agens, gratiam in aliis, vel hoc faceret per gratiam, quam in sua anima habet, tamquam per formale principium agendi, vel per aliquam aliam qualitatem. Hoc posterius dici non potest: tum quia fortasse nulla potest esse perfectior qualitas, per quam melius participetur divina natura, quam sit gratia: tum etiam, quia nulla ratio est, cur alia qualitas possit natura sua esse effectiva gratiæ, quæ gratia ipsa: immo rationes, quibus ostendimus, per gratiam hoc fieri non posse, applicari fere possunt ad quamcumque qualitatem. Probatur ergo, quod nec primum dici possit. Primo, quia gratia non est qualitas activa sui similis, ut a posteriori ostendi potest, alias unus angelus, vel anima in gratia constituta, posset sanctificare, & producere similem gratiam in alio. Neque habitus operativi, qui hanc gratiam comitantur, ut charitas, & aliæ virtutes infusæ, possunt per se producere sibi similes: eadem autem ratio est de gratia, & de his habitibus. Et ratio reddi potest, quia hæc est communis ratio habitus operativi, ut scilicet non sit productivus alterius habitus, sed solum actuum: quod si de gratia loquamur, quæ communiter non censetur habitus operativus, dicemus illam esse in hoc ejusdem rationis cum aliis habitibus supernaturalibus, quibus accommodatur tamquam præcipua forma. Vel certe dici potest gratiam esse eminentem quandam participationem divinæ naturæ, quæ propterea postulat, ut solum per influxum divinitatis natura sua participari possit; & ideo non est qualitas activa sui similis, sed a solo Deo, ut a principali causa producibilis: sicut, quia natura angelica

talis est, ut ex se postulet produci per creationem, inde fit, ut non sit productiva sui similis, sed a solo Deo creari possit. Et confirmatur, nam si gratia creata existens in anima Christi posset esse proprium principium producendi aliam similem, vel hoc faceret veluti actionem transeunte ad modum formæ naturalis: & hic modus agendi est imperfectus, & non convenit gratiæ, quæ est quasi quædam natura spiritualis ordinata ad operandum per actus vitales, & immanentes. Vel efficeret talem gratiam per aliquem actum vitalem, & immanentem, & hoc etiam dici non potest; nam isti habitus infusi non producuntur, neque augentur effective per proprios actus, etiam in proprio subiecto; ergo multo minus produci poterunt in subiectis extrinsecis, seu diversis. Denique nulla pura creatura potest esse principalis causa gratiæ, ergo nec Christi humanitas, quia sola unio per se non auget, seu confert virtutem agendi, ut supra ostensum est.

Ad rationes vero in principio positas facile potest responderi. Ad primam dicitur Christum in genere causæ meritoriae esse fontem & auctorem gratiæ, non tamen proprie in ratione efficientis physice, si in rigore loquamur: comparando enim Christi humanitatem ad alia instrumenta gratiæ, ut ad sacramenta & sacramentorum ministros, dici quodammodo potest Christum principale agens, ut etiam D. Thom. loquitur in 4. d. 5. q. 2. art. 2. quaestione. 2. ad 1. quia omnium aliorum virtus ab ipso manat, & pendet, & ad humanitatem Christi reliqua comparantur tanquam instrumenta separata ad conjunctum. Nihilominus tamen proprie, & in rigore, non est principalis causa physica, quia non habet virtutem propriam ad producendam gratiam, ut ostensum est. Quinimo etiam si in justificatione peccatoris consideremus id, quod est veluti morale quid, & consistit in condonatione vel remissione peccati, quæ simul cum productione physica gratiæ conjuncta est: quoad hoc etiam remissio peccati non est a Christo homine, ut operante per voluntatem humanam, ut a causa principali, sed a solo Deo, qui per peccatum præcipue offensus est. Et hoc modo dixit D. Thom. infra q. 16. artic. 11. ad 2. potestatem dimittendi peccata esse in natura divina per auctoritatem, in humana autem natura Christi, instrumentaliter & per ministerium.

Respon.  
ad argum.

Ad secundam rationem respondetur illa omnia, de quibus ibi fit mentio, quamvis per se non sint requisita ad causalitatem instrumentalem, tamen ad perfectam causam meritoriam, vel necessario, & per se requiri, vel saltem multum conferre, & etiam esse aptissima ornamenta humanitatis, quæ est instrumentum conjunctum Verbi, licet ad causalitatem instrumentalem non essent simpliciter necessaria. Christus ergo dicitur per se gratus per gratiam unionis, ratione cujus etiam ipsam gratiam accidentalem a se habere dicitur. Alii vero sanctificantur per gratiam participatam ab alio, quæ tamen, physice loquendo, non est propria participatio gratiæ Christi, sed divinitatis, quæ sola est principale principium ejus, atque adeo primum etiam exemplar ex parte causæ efficientis sufficientissimum. In genere autem causæ meritoriae dici potest nostra gratia participatio iustitiæ Christi, in quantum illa fuit principium merendi nobis iustitiam: & eodem modo gratia Christi potest dici exemplar nostræ gratiæ ex parte nostra, quia oportet, ut illi in gratia conformemur: ut in simili dixit D. Thom. infra q. 56. art. 1. ad tertium, quæ omnia respectu physice causalitatis instrumentalis quasi concomitanter se habent. Et per hæc responsum est ad alias rationes, quæ difficultatem non habent.

Gratia  
hominum  
quomodo  
sit parti-  
cipatio  
gratiæ  
Christi.

## S E C T I O V.

*Quid sit in humanitate Christi hæc virtus seu potentia, per quam operatur miraculose ut instrumentum Verbi.*

IN hoc dubio explicandus est modus, quo humana natura elevari potuit ad hos effectus miraculose producendos, & simul expeditur difficultas, in qua hærebat illa sententia, quæ hanc physicam efficientiam negabat. Sunt autem inter Theologos varii modi explicandi hanc rem. Primus est, humanitati Christi datam esse qualitatem aliquam superioris ordinis, quæ esset virtus instrumentaria ad has actiones efficiendas, sicut a multis philosophis

Habitus  
operativus  
cuius  
non sit  
productivus  
alterius  
habitus.



Iosophis dicitur calor datus igni, ut sit illi instrumentum ad formam substantialem producendam. Ita opinantur Palud. Capreol. & Ferrar. locis supra citatis, & D. Thom. tribuunt, qui de humanitate Christi loquens nunquam hoc significavit quamquam agens de sacramentis; interdum obscure loquatur, ut suo loco videbimus. Scotus etiam in 4. d. 1. q. 4. & 5. & d. 6. q. 5. & Richar. d. 1. art. 4. q. 3. quamvis hanc efficientiam negent, tamen, si admittatur, necessarium putant fieri media aliqua qualitate. Fundamentum est illud supra tactum, quia humanitas non potest fieri potentior, nisi aliqua virtus ei addatur, non potest autem addi, nisi per aliquam qualitatem.

Hæc tamen opinio mihi non probatur, sicut nec Cajetano, Soto, & aliis discipulis D. Thom. quam contra illius doctrinam esse existimo: nam in 2. 2. q. 178. art. 1. ad primum impossibile existimat principium operandi miracula esse aliquam qualitatem habitualiter manentem in anima: si autem in Christo esset hæc virtus, esset aliqua qualitas permanens per modum habitus, quia hoc modo communicata est illi hæc potestas faciendi miracula. Adde, si non potest dari talis qualitas permanens, a fortiori nec dari posse per modum transeuntis, quidquid Capreolus, & alii dicant: tum quia qualitas permanens perfectior est, quam transiens, saltem in modo existendi: tum etiam, quia nulla intelligi potest huiusmodi qualitas, quæ sit transiens ad modum rei successivæ, quia non habebit unam partem post aliam, sed tota simul erit cum omnibus suis partibus pro aliquo instanti, aut tempore, & solum dicetur transiens, quia brevi tempore duratura est: omnis autem huiusmodi qualitas, cum natura sua non pendeat a causa successiva, sicut conservatur a Deo per breve tempus, ita potest per longum conservari. Si ergo potest esse per modum transeuntis, etiam poterit esse permanens per modum habitus; est ergo eadem ratio de utraque, & ita rationes, quas faciemus, æque de utraque procedent. Probatur ergo primo hanc virtutem humanitatis Christi non esse aliquam qualitatem illi superadditam, quia vel qualitas illa potest naturæ suæ facere hæc opera, vel non; si non, non est ergo virtus miraculorum, & sine causa ponitur, nam oportebit de eadem querere, quomodo eleveetur ad agendum ultra terminos naturæ suæ; si vero dicatur naturæ suæ hoc posse, contra hoc procedunt fere omnes rationes factæ præcedenti sectione, quibus ostendimus, superare naturalem perfectionem qualitatis finitæ, habere naturalem vim ad efficienda opera supra totam legem naturæ, solum quia non implicant contradictionem. Quod si dicatur eas rationes procedere de principio principali agendi, non vero de instrumento, fateor ad hoc probandum habere maiorem vim: tamen, si proportionaliter applicentur, saltem multæ ex illis satis probabiliter ostendunt, excedere perfectionem cuiusdam accidentis, & qualitatis finitæ, habere connaturalem vim, etiam instrumentalem, ad tot effectus, tamque supernaturales, & admirabiles. Secundo, quia omnis qualitas, quæ operatur ad efficiendum perfectius opus per modum instrumenti, semper illud facit media aliqua actione magis proportionata, cuius ipsa sit veluti proprium, & principale principium: ut, si calor est instrumentum ad faciendam formam substantialem, hoc facit prævia calefactione, quæ est actio sibi accommodata tamquam proprio & principali principio, & idem est de reliquis. Et hoc principium docuit D. Thom. 1. part. quæst. 45. art. 5. & rationem ejus reddidit, quia nisi hæc instrumenta connaturalia agerent aliquid proprium, quo attingerent effectum principalis agentis, nulla esset ratio assignandi determinata instrumenta ad determinatas actiones: at vero in huiusmodi qualitate non potest intelligi talis actio connaturalis, quæ naturæ suæ tendat, & quasi viam præparet ad actionem principalis agentis. Responderi potest ex Capreolo, & aliis, hanc qualitatem efficere quandam præviā dispositionem, per quam attingerent effectum principalis agentis. Sed in primis nec ipsi explicant, nec facili concipi potest, quæ dispositio sit ista, quæ paret viam ad consecrationem, vel restitutionem visus, vel alias similes actiones. Et deinde interrogo, an illa dispositio sit aliqua naturalis qualitas, vel supernaturalis: si naturalis, impertinens est, neque ex natura sua disponere potest ad effectum supernaturalem: si supernaturalis, illa non poterit fieri ab alia qualitate, ut a principio principali: ~~fit~~

ergo instrumentaliter; ergo oportebit fieri alia actione prævia, & sic procedemus in infinitum, vel argumentum suum vim retinebit. Et confirmatur, nam si hæc qualitas miraculorum effectrix haberet propriam aliquam operationem præviā, cuius ipsa esset veluti proprium & principale principium, dependeret in illa a distantia loci, a dispositione, seu resistantia medii seu subiecti, quod est contra modum operandi talis virtutis. Quæ ratio etiam probat actionem hanc instrumentalem faciendi miracula non esse ex naturali virtute aliquus qualitatis finitæ: nam omnis huiusmodi qualitas pendet in omni actione sua naturali a supradictis circumstantiis. Tertio rogo, an illa qualitas sit corporea, vel spiritualis. Primum affirmat Paludan. sed non videtur verisimile: quomodo enim corporea qualitas potest virtute sua naturali efficere formas spirituales, & supernaturales, & miraculosos effectus? Secundum affirmat Capreol. sed est difficile ad intelligendum: nam caro Christi erat effectiva miraculorum, & per vocem materialem producebat gratiam in anima: ergo oporteret illam qualitatem esse in ipsa carne, vel voce Christi: non potest autem qualitas spiritualis esse in subiecto corporeo, nam vel esset extensa, quod est contra rationem ejus, vel tota esset in toto, & tota in singulis partibus, quod videtur repugnare formæ dependenti a subiecto in fieri, & in esse, qualis est omnis forma accidentalis. Et præterea, quia qualitas spiritualis non habet naturalem habitudinem ad corpus, nec proportionem cum illo: ergo non potest informare illud, quia forma non potest informare subiectum, nisi sit suæ naturæ proportionatum: ergo nec potest recipi in illo, quia forma tantum recipitur in eo subiecto, quod informat: unde, propter similem rationem, non potest fides recipi in voluntate, nec charitas in intellectu. Quod vero Capreol. distinguit, dicens spirituales qualitatem non posse recipi in corpore permanenti, posse tamen transeunter, nihil ad rem pertinet, quia rationes factæ æque de utroque modo procedunt: & (ut supra dicebam) illa differentia solum potest consistere in majori quadam duratione, quæ parum, aut nihil refert ad minuendam, vel augendam hanc repugnantiam. Quarto argumentor, quia vix concipi potest, quomodo aliqua qualitas sit ex natura sua potens ad expellendos dæmones, & curandos omnes morbos uno momento sine resistantia, & non per alterationem aliquam, sed per modum imperii, neque naturali necessitate, sed ad nutum humanæ voluntatis. Hæc enim, & similia, quæ supra de virtute principali dicebamus, eodem modo procedunt de instrumentali. Unde formari potest ultima ratio, quia si hæc qualitas inhærebat in carne Christi, sicut ab aliis corporibus expellebat quamcumque ægritudinem, ita posset in corpore Christi impedire omnem contrariam alterationem seu passionem, unde fieret carnem Christi esse intrinsece impassibilem.

Nec satisfaciet, si quis dicat noluisse Christum uti illa qualitate ad hunc effectum, quia, si talis effectus est connaturalis illi qualitati, non poterat impediri per voluntatem Christi, ut operantem per suas vires naturales, sed ut instrumentum Verbi: ergo, vel hoc efficiebat per ipsammet qualitatem, quod plane repugnat, vel quærenda erit alia qualitas, per quam hic effectus fiat, quod etiam improbabile est. Sic enim facile poterit procedi in infinitum, & illud inconveniens nunquam satis expeditur, quia, juxta hunc modum, necessario videtur sequi carnem Christi, juxta intrinsecam dispositionem suam, fuisse impassibilem, miraculose autem, & quasi ex divina virtute, pati potuisse. Ultimo tandem Christus interdum operabatur miracula per vocem, interdum tactu, sputo, unctione luti: quomodo ergo illa qualitas in hæc omnia diffundebatur?

Secundus modus dicendi est hanc virtutem miraculorum non esse rem aliquam, vel qualitatem inhaerentem humanitati, & permanentem in illa; sed esse quandam artificiosum motum, quem Deus imprimebat actionibus illius humanitatis, per quem illas elevabat ad supernaturales effectus: & hunc motum vocant instrumentariam virtutem. Ita docet Scotus, & multi ex Thomistis, adducti verbis D. Thomæ locis citatis, qui interdum ita loqui videtur: hi vero auctores non probant suam sententiam, sed explicant exemplum instrumentorum artis, quæ ab artifice humano elevantur per motum artifi-

Virtus faciendi miracula in Christo non est qualitas humanitati superaddita.



artificioſum ad proprium effectum perficiendum, non repugnat autem Deum ſimili modo operari.

Sed hæc ſententia vel rem non explicat, vel falſa eſt, minusque intelligi poteſt, quam præcedens: rogo enim, quid ſit hic motus artificioſus. Si enim nihil reale eſt receptum in humanitate Chriſti, aut verbo, vel tactu ejus, quod ſit veluti principium actionis miraculoſæ, ſed ſolum ſit ſupernaturalis efficientia, & concurſus Dei, hoc modo, neque explicatur, nec ſolvitur poſita difficultas, quia per illum motum modo explicatum intelligi poteſt Deum efficere effectum, tanquam per actionem, vel concurſum ſuum, non tamen poteſt intelligi, quid per illum efficiat humanitas, quandoquidem neque eſt actio, neque aliquid aliud. Si autem per motum artificioſum intelligat hæc opinio aliquid impreſſum, inhærens humanitati, ſic eſt falſa, & minus intelligi poteſt: quia talis motus vel eſſet alteratio, & hoc non, quia oporteret per illum aliquam qualitatem produci, quod jam exploſum eſt; vel eſſet motus localis, & hoc etiam dici non poteſt: tum quia ſæpe operari poteſt anima Chriſti effectum miraculoſum per voluntatem ſuam abſque motu locali, aut per vocem abſque alio artificioſo motu præter illum, qui ex natura rei neceſſarius eſt ad formandam vocem, in quo nullum eſt artificioſum in ordine ad ſupernaturalem effectum producendum; motus ergo ille non poteſt eſſe virtus instrumentalis: tum etiam, quia quidquid eſſe fingatur hujusmodi motus, eſt quid imperfectius, quam quælibet qualitas; ergo natura ſua non poteſt eſſe virtus ad agendum ſupernaturalem effectum: ergo nec per illum elevari poteſt humanitas ad hos effectus ſupernaturales efficiendos. Exemplum autem illud ſumptum ex instrumentis rerum artificialium nihil ad rem hanc explicandam juvat: quia hæc instrumenta artis mota ab artifice revera nihil efficiunt proprie, & per ſe, quod illorum formas, & virtutem ſuperet. Quia per ſe primo per hujusmodi instrumentum ſolum ſit applicatio, vel expulſio alicujus corporis ab hoc vel illo loco; & motus instrumenti directus, ſeu gubernatus ab arte, ſolum ad hoc deſervit, ut hæc introductio, vel expulſio corporis in loco ordinate fiat, ut inde reſultent diverſæ figuræ, per quas res artificioſæ conſtituuntur. Unde ſit, ut hic motus non ſit proprie ratio, & principium agendi, ſed tantum applicatio, & conditio requiſita, ut poſſit per instrumentum, aliud corpus, hoc vel illo modo movere: & ideo ex his instrumentis, & ex modo eorum, non poteſt ſumi argumentum ad instrumenta ſupernaturalia, nec ad virtutem eorum explicandam, in qua difficultate nunc verſamur.

Tertio modo explicari ſolet hæc difficultas ex Cajetano, & Ferrar. ſupra, humanitatem, & in univerſum omnem rem creatam elevari ad efficiendum aliquid, ut instrumentum Dei, non per aliquam rem, vel qualitatem, vel phyſicum motum, qui humanitati, vel instrumento ſuperaddatur; ſed ſolum, quia ita ſubordinatur divinæ voluntati, ut per ſeipſam, vel per ſuam actionem intimet divinum imperium, per quod res omnis vel effectus fieri poteſt. Sed hæc ſententia vel rem non explicat, vel tollit veram, & propriam efficientiam iſtorum instrumentorum. Interrogo enim, quid ſit intimare divinum imperium, præſertim circa res, quæ cognitione carent, vel circa effectus denuo producendos. Vel enim ſolum eſt, ad præſentiam talis rei, vel actionis naturalis, Deum imperio ſuo rem efficere, & hunc eſſe ordinem inſallibilem ex Dei pacto, vel promiſſione, & hoc modo negare his instrumentis veram actionem, & efficientiam, & inciditur in opinionem afferentem eſſe conditiones, ſine quibus non ſit effectus, & ad quarum præſentiam ſtatim ſit, Deo ita diſponente, & ordinante: quod tandem conceſſit Ferrar. 3. contra gent. cap. 102. Vel intimare imperium, eſt vere exequi, & efficere ſupernaturale opus juxta divinum imperium, & in hoc ſenſu non explicatur res, ſed petitur principium per hunc dicendi modum, hoc enim eſt, quod inquirimus, quomodo efficiant abſque ſuperaddita virtute.

Dicendum ergo videtur hanc virtutem instrumentalem in Chriſti humanitate non eſſe rem, vel entitatem aliquam, aut intrinſecum modum humanitati additum, illique inhærentem, ut bene probant, quæ contra primam ſententiam, & ſecundam dicta ſunt; ſed eſſe po-

tentiam obedientialem activam in rebus iſſis exiſtentem, per quam efficere poſſunt ſupernaturalia opera, ut instrumenta Dei, ipſo concurrente per auxilium vel concurſum proportionatum effectui, & excedentem concurſum debitum naturali virtuti creaturæ. Hunc modum dicendi indicavit D. Thom. in 4. diſtinct. 8. quæſt. 2. artic. 3. ad 4. ubi ſic inquit: *Sicut creatura ineſt obedientia potentia, ut in ea fiat, quidquid creator diſpoſuerit, ita etiam, ut ea mediante fiat, quæ eſt ratio instrumenti.* Eandem rem docuit Cajetan. infra quæſt. 78. artic. 4. & indicavit Alexand. Alenſ. 4. part. q. 34. membr. 5. artic. 2. ubi ſolvens quoddam argumentum, inter alia ſic inquit, *Cum ergo obijciatur, quod virtus creata non poteſt in aliquid, quod eſt ſupra communem naturam, dicendum, quod hoc forte verum eſt per ſe, habet tamen ut adiuta a virtute increata.* Hæc autem ſententia non aliter probatur, niſi quia nullam repugnantiam involvit, & per ſe eſt veriſimilis, & credibilis, & illa poſita, non admodum difficile expenduntur difficultates, quæ in hoc negotio occurrunt. Primum enim, cum Chriſti humanitas ſit res creata, & participatio primi entis, & illi ſubordinata, mirum non eſt, quod ſit in potentia obedientiali activa ad agendum omne id, ad quod fuerit per divinam voluntatem applicata. Et quod illud vere ac proprie efficiat adiuta, ſeu elevata ad agendum per concurſum ſpecialem, & ſupernaturalem, accommodatum hujusmodi potentia obedientiali, & hæc applicatio cum illo concurſu ſpeciali dici poteſt motio, ſeu elevatio primi agentis. Deinde conſtat in rebus creatis reperiri potentiam obedientialem receptivam, ut in eis, vel ex eis, Deus faciat, quidquid non implicat contradictionem: Cur ergo non reperietur etiam potentia obedientialis activa, ut efficiant, vel Deus per eas efficiat, quidquid non repugnaverit ita fieri? Non enim involvit hoc ullam contradictionem, ut non potuerit Deus hoc modo creaturas inſtituere, & eſt major perfectio, ſic enim magis ac perfectius ſubjicitur omnis creatura Deo, non tantum ad recipiendum, ſed etiam ad agendum. Tertio, quia unum corpus ſua quantitate non poteſt niſi unum locum replere, & tamen per potentiam Dei fieri poteſt, ut repleat duo loca, nulla illi addita quantitate: & e contrario, cum duo corpora naturaliter ſimul eſſe non poſſint in eodem loco, facit Deus, ut ſimul eſſe poſſint, non mutatis eorum quantitativis, nec raritate, aut denſitate, vel alia eorum diſpoſitione. Similiter, licet anima natura ſua informare nō poſſit, niſi corpus tantæ quantitatis, facere poteſt Deus, ut det vitam corpori majori, & ſimiliter, ut una albedo informet duo ſubjecta: ſi ergo ad hæc omnia eſt potentia obedientialis in rebus iſſis, cur ergo non erit, ut ultra naturæ terminos agant? Ultimo, juxta hanc obedientialem potentiam eliciunt noſtræ potentie, intellectus, ſc. & voluntas, actus ſupernaturales quoad ſubſtantiam, & interdum ſine habitibus, cum divino auxilio, ut ex materia de gratia ſuppono. Et ſimiliter juxta hunc modum intelligitur, quomodo non ſit actio ſine virtute agendi, nam virtus agendi eſt hæc potentia obedientialis activa applicata ad agendum cum proportionato concurſu: ſi enim calor, juxta probabilem multorum philoſophorum ſententiam, eſt virtus ignis, & ſuo modo instrumentum ad producendam formam ignis, ex eo ſolum, quod eſt facultas ejus connaturalis (quamquam hoc neque augeat, neque immutet caloris perfectionem) quid mirum, quod humanitas ſit virtus, & instrumentum Dei ad efficienda divina opera, quatenus illi per hanc potentiam obedientialem ſubordinata eſt, & per concurſum proportionatum ad has actiones elevata? Intelligitur etiam juxta hunc modum, quomodo duæ res, quæ ex natura ſua non habent connexionem cauſæ & effectus, poſſint illam habere, etiam ſi nihil addatur cauſæ, ſeu instrumento, quia, videlicet, ſecundum obedientialem potentiam capaces ſunt illius dependentiæ, & habitudinis, & per divinam voluntatem & concurſum altera elevatur, ut ſit instrumentum ad aliam efficiendam.

Quod ſi inquiratur, quid ſit in rebus hæc potentia obedientialis activa, & quod objectum habeat, quæſve actiones. Reſpondetur non eſſe aliquid a rebus diſtinctum, ſed in unaqueque re creata ipſammet entitatem per ſeipſam eſſe hanc obedientialem virtutem, ſeu potentiam ad agendum ut instrumentum Dei, itaque, ſicut calor per ſe eſt virtus naturalis ad calefaciendum, ita etiam per

Dubium.

Reſpon.

Inſtr. g.  
alis vir-  
tus mira-  
culorum  
in Chr. ſt.  
humani-  
tate quid  
ſit.



Potentia  
obedi-  
entialis  
quid sit.

per se sit virtus obediencialis ad agendum, v. g. in spiritum: quæ ratio obediencialis potentia nihil addit entitati rei, sed includitur in essentiali conceptu entis creati. Extenditur autem ad omne id, quod non implicat contradictionem, ut tali modo fiat, & hoc est quasi adæquatum objectum ejus; cum enim hæc virtus instrumentaria sit, & non agat nisi in virtute principalis agentis, pro objecto habet ipsummet effectum agentis principalis, ex cujus virtute & perfectione mensuranda est perfectio talis effectus seu objecti, & non ex perfectione instrumenti. Actio vero talis potentia obediencialis est ipsamet productio supernaturalis effectus, per quam pendet a tali instrumento, quæ actio eadem est cum actione principalis agentis, quatenus per tale instrumentum operatur, ut infra explicabo.

Obje-  
ctio.

Respon-  
sio.

Sed dicit aliquis. Ergo unaquæque res creata habet hanc potentiam innatam ad efficiendas actiones miraculosas: ergo est absolute potens ad illas agendas. Respondetur hanc potentiam secundum se esse quidem innatam, quia non est nisi ipsa entitas rei: tamen, quia modus agendi per illam, & concursus ad hoc necessarius, nec naturalis est, nec rei debitus; ideo illa potentia secundum se sumpta est tantum remota, nec constituit rem ex natura sua simpliciter potentem ad sic operandum, sed proprie constituit capacem, ut elevari possit a Deo ad hujusmodi operandi modum. Et ideo, sicut potentia obediencialis passiva non denominat rem absolute, sed in ordine ad Deum, non enim dicemus simpliciter materiam cœli posse separari a sua forma, licet in ordine ad Deum sit in potentia obedienciali ad hunc effectum: sic etiam ab hac potentia obedienciali activa non denominatur res simpliciter potens, sed in ordine ad Deum. Unde etiam obiter intelligitur, quomodo humanitas, vel simile instrumentum, fiat potens ad miraculose operandum sine sui mutatione, vel additione ulla, solum quia per Dei voluntatem ita ad hoc ordinatur, ut habeat paratum specialem concursum, vel auxilium, per quod elevatur, & quasi applicatur ad agendum per hanc potentiam, quæ in re supponitur. Et quamvis nude sumpta non denominet rem potentem ad operandum, tamen ut jam applicata a primo agente, & habens paratum proportionatum concursum, præbet dictam denominationem, quia ut sic jam est veluti potentia proxima, habens omnia necessaria ad operandum.

## SECTIO VI.

*An, & quomodo in rebus creatis sit aliqua vis activa obediencialis, ut eleventur in divina instrumenta.*

SENTENTIA hæc de potentia obedienciali activa instrumentorum Dei, quam superiori sect. probavimus, & a sufficiente enumeratione eligendam duximus, ad defendendam communiorum ac veriorum doctrinam de physica efficientia humanitatis Christi, & aliorum instrumentorum Dei circa supernaturalia opera, nonnullis posterioribus scriptoribus ac Theologis displicuit, eamque nonnullis argumentis impugnare conati sunt, quæ hoc loco proponemus, & alia fortasse difficiliora: ante quorum solutionem, quid ipsi dicant, & quomodo rem hanc expediant, examinabimus, ex quo sententiæ nostræ majorem confirmationem & declarationem eliciemus, & tandem difficultatibus omnibus satisfaciemus, & obiter varia dubia, quæ per occasionem occurrent, expediemus, unde non poterit sectio hæc non esse aliquantulum prolixior. Et ideo, ne legentibus fastidium pariat, eam diversis titulis & paragraphis subdividuemus.

Argum-  
ta par-  
tis  
negantis  
propon-  
untur.

Primo itaque objiciunt, quia potentia obediencialis non est aliquid positivum in creatura: ergo repugnat esse obediencialem potentiam, & esse activam. Patet consequentia, quia potentia activa vel nulla est, vel esse debet positiva: quia per illam constituitur agens in actu primo ad operandum, & ab illa pendet realiter effectus: non potest autem intelligi, quod aliquid pendeat ab eo, quod nihil est positivum, sed negatio tantum, vel privatio. Antecedens patet, quia potentia obediencialis passiva non est potentia positiva præhabens in sua potestate supernaturales effectus vel actus, alioqui nihil differret a naturali potentia: ergo solum est non repugnantia creaturæ, ut

Suarez Tom. XVI.

in ea fiat, quod Deus voluerit: ergo multo minus potest esse in creatura potentia activa positiva, sed erit non repugnantia, ut elevetur a Deo ad agendum, quæ, cum sit sola negatio, non potest esse potentia activa obediencialis.

Secundo, vel hæc potentia obediencialis activa, & activitas ejus est naturalis, vel supernaturalis: naturalis esse non potest, alioqui esset improporcionata ad effectus supernaturales, & consequenter esset impertinens, & sine fundamento. Neque etiam dici potest supernaturalis: nam hæc potentia, ut dicitur, non est aliquid superadditum naturæ, sed est congenita cum entitate uniuscujusque rei, imo re ipsa non est aliud ab ipsa entitate: fictitium autem est existimare aliquam supernaturalem potestatem esse ex natura rei congenitam naturali entitati: nam virtus congenita & intrinseca unicuique enti non potest excedere gradum & ordinem talis entis.

Secundus.

Tertio certum est creaturam non posse efficere supernaturalia opera, ut instrumentum Dei, absque speciali concursu & auxilio ipsius Dei: igitur, vel hoc auxilium est tota virtus agendi creaturæ, vel supponit in ea inchoatam virtutem, & complet illam, vel denique supponit totam virtutem proximam ad agendum, solumque cum illa concurrat, ut causa prima cum secunda: ex his tribus membris secundum & tertium sunt improbabilia: ergo eligendum est primum, & consequenter dicendum est talem concursum Dei nullam supponere potentiam obediencialem activam, sed solum passivam ad recipiendam activitatem per concursum Dei. Minor quoad utramque partem probatur secunda ratione facta: quia illa potentia, sive inchoata, sive completa dicatur, & esse debet naturalis, & supernaturalis quod implicat: naturalis quidem, quia congenita cum natura, & a Deo ut auctore naturæ: supernaturalis vero, quia est ad effectus miraculosos & supernaturales; & consequenter ejusdem ordinis supernaturalis cum illis, quod maxime urget, si potentia illa completa dicatur solumque requirere ad agendum concursum Dei proportionatum: nam, si talis est, ita comparatur ad actiones suas, sicut lumen gloriæ ad visionem Dei, vel sicut habitus charitatis ad suum actum: erit ergo plena virtus ac potentia supernaturalis, quam tribuere naturali creaturæ, & valde improporcionatum est; nam confundit supernaturalem ordinem cum naturali, & ipsi naturæ plenam vim proximam tribuit ad supernaturalia, quod ad errorem Pelagii pertinet. Imo, etiam si potentia illa dicatur inchoata tantum, non videtur tutum eam tribuere creaturæ in ordine ad supernaturales actus, affirmando esse illi connaturalem: nam hoc etiam esset non parum favere errori Pelagii: quia ordo gratiæ bona ex parte reduceretur ad virtutem naturæ. Propter quod graviores Theologi censent, neque in intellectu, neque in voluntate nostra, esse activitatem aliquam, quam ex se habeant ad actus supernaturales, ut supernaturales sunt, sed totam provenire ab habitu, vel auxilio supernaturali: rejiciuntque opinionem Cajetani, qui de visione beata, & a fortiori de cæteris actibus supernaturalibus, oppositum sensit.

Quartum.

Quarto, quia, si in creaturis est hæc potentia obediencialis activa, sequitur, quando per illam agunt, Deo tribuente accommodatum concursum non esse instrumentum, sed causas proximas principales, quod esse plane falsum nemo negabit. Sequela patet, quia illa potentia obediencialis non procedit a Deo, ut auctore supernaturali: quia est congenita cum natura, & non fit per aliquam actionem supernaturalem: ergo creatura, ratione illius potentia, non est instrumentum Dei auctoris supernaturalis. Neque vero est instrumentum Dei auctoris naturæ: quia Deus, ut sic, non efficit supernaturales effectus: ergo nullo modo constituitur creatura in esse instrumenti divini per hanc potentiam.

Quinto, vel hæc potentia obediencialis est materialis, vel spiritualis: si spiritualis est, in rebus materialibus reperiri non potest, sicut supra nos argumentabamur de qualitate superaddita: falsum ergo est hanc potentiam obediencialem esse communem omnibus entibus. Ex quo ulterius consequitur nec Christi corpus, nec sacramenta materialia esse posse instrumenta ad efficiendam gratiam. Si autem hæc potentia dicatur de se esse indifferens ad immaterialem, & materialiam: ergo, ubi materialis est, non potest esse effectiva rei spiritualis, neque etiam poterit attingere spirituale subiectum.

Quintum.

D d

Sex-

Argum-  
tum pri-  
mum.



Sextum.

Sexto argumentari possumus, & fortasse difficilius, ex parte ipsius dependentiæ seu actionis, per quam gratia efficitur (& idem est de quolibet alio miraculoso opere, præsertim spirituali) omnis enim actio & dependentia, quatenus talis est, dicit ex natura sua intrinsecam, essentialem, & connaturalem habitudinem ad suum principium, seu ad potentiam, a qua fluit: sed nulla potest esse actio productiva gratiæ, quæ ex natura sua dicat intrinsecam & essentialem habitudinem sibi, connaturalem ad entitatem materiale, neque ad quamcumque entitatem naturalem: ergo neque e contrario potest in huiusmodi entitatibus esse potentia activa obedientialis respectu talis actionis. Major evidens est ex principiis Metaphysicæ, & in superioribus sæpe hoc tactum est, & latius in 3. tomo hujus 3. partis, in materia de sacramentis in genere, & copiosius, magisque ex propriis, in disputationibus metaphysicis, quæ, Deo juvante, brevi in lucem prodibunt, dicitur. Et patet, nam actio, ut actio, includit intrinsece & essentialiter rationem actualis dependentiæ effectus a causa, loquor enim proprie & in rigore de actione, prout in creaturis reperitur, ne quis sermonem misceat de processione divinis ad intra, quæ sicut vere dependentiæ non sunt, ita nec proprie actiones dici debent, sed origines seu processionem. Loquor item de actione formaliter ac proprie in transeunte, seu realiter procedente a suo principio, ne quis etiam misceat questionem illam, an creatio, vel qualibet productio immediate a Deo facta, sit actio formaliter transiens, nec ne. Denique, ut ab omnibus opinionibus abstraham, loquor de dependentia, qua unusquisque effectus seu terminus actionis pendet a sua causa efficiente: si enim illa dependentia vocetur actio, siue passio, siue dependentia passiva, siue via ad terminum, negari non potest, quin illa sit intrinsece vel identice in re, quæ ab alia pendet, & simul dicat essentialem habitudinem ad principium, a quo pendet, seu profluit. Unde fit, ut talis habitudo sit prorsus immutabilis in tali dependentia, ita ut etiam in individuo non possit hæc numero dependentia conservari sine tali principio, quia alias oporteret unam dependentiam manere seu pendere a suo principio per aliam ex natura rei a se distinctam, quod est impossibile, alias in infinitum procederetur. Atque hinc etiam fit, in unaquaque dependentia, habitudinem ad suum principium esse illi connaturalem, & non posse esse supernaturalem, seu extrinsecus additam: agimus enim formaliter de ipsamet dependentia, & non de re, quæ pendet, ab hac enim dependentia ex natura rei distinguitur, estque modus ejus: unde fit, ut rei seu termino, qui fit, possit aliqua dependentia esse supernaturalis, si res illa non fiat modo connaturali, sed supernaturali: tamen dependentiæ unicuique habitudo ad suum principium necessario esse debet connaturalis, quia est intrinseca essentialis ejus, qualis in huiusmodi rebus & modis esse potest. In præsentia ergo, si gratia, verbi gratia, effective fit a carne, contactu, aut voce Christi, quamvis illi gratiæ præternaturalis sit ille modus effectivus, tamen illi actioni, per quam hic & nunc gratia fit, essentialis, atque adeo connaturalis erit habitudo seu transcendentalis ordo ad potentiam obedientialem activam, quæ est in voce, vel in carne Christi, ita ut omnino repugnet hanc numero dependentiam manere sine ordine ad tale principium. Quod autem hoc sit impossibile (quæ erat minor subsumpta in principali argumento) probatur, quia illa actio est spiritualis: ergo non potest dicere intrinsecam & connaturalem ordinem ad principium materiale, quia non habet cum illo proportionem connaturalem, quæ necessaria est, saltem ad connaturalem habitudinem. Quamquam enim gratis concedamus rem spirituales posse supernaturaliter habere dependentiam a principio materiali, tamen, quod hoc sit connaturale rei spirituali, & præsertim superioris ordinis, non videtur intelligibile: sicut, quod accidens spirituale supernaturaliter constitui possit in subiecto materiali, est fortasse non prorsus improbabile: tamen, quod ex natura sua spirituale accidens habeat connaturalem habitudinem, seu dependentiam a subiecto materiali, neque ullus unquam dixit, nec satis intelligi potest. Sed non est minor dependentia actionis a suo principio, nec minorem proportionem inter se requirunt: ergo fieri etiam non potest, ut actio spiritualis habeat connaturalem habitudinem ad principium materiale, a quo pendet. Idemque

proportionale argumentum fieri potest de actione super naturali respectu cuiuscumque naturalis entitatis. Hinc autem manifeste concluditur prima consequentia argumenti, scilicet, non esse possibilem talem potentiam activam in creaturis: quia, si non est possibilis actio, neque potentia est possibilis, cum potentia non sit nisi propter actionem: sed ostensum est esse impossibilem actionem respectu talis potentiæ, cum non possit esse sine connaturali habitudine ad illam, nec talis habitudo connaturalis sit possibilis: ergo etiam talis potentia impossibilis est.

Septimo argumentor, quia omnis potentia habet speciem aliquam a suo actu & objecto: nam, juxta principia Aristotelis, potentiæ ex actibus, & actus ex objectis speciem sumunt: sed in entitate materiali, vel mere naturali, non potest fingi aliqua species realis sumpta ex actione spirituali, seu supernaturali: ergo nec potest fingi talis potentia activa, quæ in illa entitate intrinsece supponatur ante omnem Dei elevationem. Patet consequentia, quia talis potentia, si vera potentia est, debet habere aliquam speciem, quam consequenter accipiet a suo termino, vel actione. Minor autem probatur, quia res materialis, in se & ex se sumpta, non habet intrinsecam habitudinem ad actionem spirituales, nec res naturalis ad actionem supernaturalem, ut inde aliquam realem speciem sumat: tum etiam, quia vel illa species est ex natura rei distincta ab essentiali differentia specifica talis entitatis, vel non. Neutrum autem dici, aut satis excogitari potest. Nam, si non est distincta, quomodo fieri potest, ut in conceptu essentiali cuiuscumque entitatis creatæ includatur habitudo ad talem actionem? Si vero est distincta, quomodo, vel quo fundamento fingi potest ab omni entitate manare talem proprietatem ab illa distinctam? Maxime quia, si illa est proprietatem consequens essentiali entitatis creatæ, erit minoris perfectionis, quam sit illa: quomodo ergo dicere poterit habitudinem ad actionem superioris ordinis? Adde denique nullum esse vestigium aut indicium distinctionis ex natura rei inter entitatem, & huiusmodi potentiam. Nam, si ex natura rei distinguuntur, vel una est modus alterius, vel sunt res omnino distinctæ: non est enim aliud modus distinctionis ex natura rei, ut in Metaphysica ostenditur: sed hæc potentia non potest esse tantum modus, quia ratio modi est imperfecta, & nunquam constituit proprium principium agendi, sed, ad summum, esse solet conditio ad agendum, ut est interdum motus localis. Neque etiam potest esse res omnino distincta, quia neque est ullum fundamentum ad fingendam talem entitatem, neque satis potest mente concipi, quæ, vel qualis sit. Nec denique his modis verum erit, quod dicitur omnem entitatem creatam habere hanc potentiam obedientialem: nam, si hæc potentia est res distincta, separet illam Deus: quid enim repugnabit? aut ergo in alia entitate manet potentia obedientialis activa, & sic superflua est illa entitas: vel non manet, & sic non in omni entitate creata datur talis potentia obedientialis activa. Quod si per divinam potentiam potest conservari entitas sine tali potentia, nullum fundamentum relinquitur ad fingendam huiusmodi potentiam in qualibet entitate: nam in illa entitate sic conservata sunt omnia, quæ movere possunt ad ponendam talem potentiam in omnibus entitatibus creatis.

Octavo. Omnis potentia activa est proportionata illi, cuius est potentia: ergo, si in rebus creatis est hæc potentia obedientialis activa, est proportionata illi; ergo, sicut illa finita sunt, ita hæc potentia erit finita in genere & ratione potentiæ: omnis autem potentia finita habet determinatum ac limitatum objectum, & certam ac finitam latitudinem actionum: ergo & hæc potentia obedientialis habebit finitum objectum & actiones; hoc autem dici non potest, quia non est major ratio, cur ad hos effectus & actiones extendatur potius, quam ad alios: & ideo dicitur extendi ad omnia, quæ non implicant contradictionem, quod plane includit quandam infinitatem & illimitationem. Atque idem argumentum fieri potest ex parte subiectorum seu entitatum, in quibus dicitur esse hæc potentia: nam, cum illa valde inæqualia sint in perfectione, incredibile est habere æqualem vim activam in hoc genere seu ordine: minusque verisimile videtur omnem entitatem, quantumvis imperfectam si naturaliter nihil agere possit, habere totam hanc vim activam obedientialem.

Septimum argumentum.

Octavum argumentum.



dientialem. Denique alias etiam de relationibus divinis posset dici, quod licet naturaliter non sint activæ, secundum id, quod eis est proprium, nihilominus habent potentiam obedientialem activam, per quam possit una relatio aliquid efficere, quod non facient alia.

Præsens controversia solum inter eos versatur, qui admittunt physicam & supernaturalem effectiorem instrumentorum Dei, nam, qui negant Christi humanitatem & sacramenta, & cætera huiusmodi, esse physica instrumenta, non est, cur de potentia obedientiali activa sint solliciti, imo, quia talem potentiam non agnoscunt, ideo talem effectiorem negant, & consequenter loquuntur: sed de illo principio, ac fundamento satis a nobis dictum est. Quo supposito, antequam satisfaciamus argumentis positis, videamus necesse est, quibus modis efficientiam physicam instrumentorum Dei in supernaturali gratiæ effectiione, & aliis miraculosis actionibus, absque hac potentia obedientiali activa tueantur hi Doctores, qui nobis in hoc contradicunt. Quod ut declaretur, nonnulla principia statuere oportet, in quibus necesse est, ut nobiscum conveniant. Primum est nullam rem posse efficere sine virtute activa proportionata causalitati ejus, ita ut, si sit causa principalis & integra, habeat virtutem propriam activam, adequatam effectui in suo genere: si vero sit causa partialis, habeat etiam virtutem partialem. si vero sit causa instrumentalis, habeat vim activam instrumentalem: ita ut actio eo modo, quo dicitur esse ab aliquo, supponat in illo vim agendi. Quod principium omnes Theologi tanquam per se notum in hac materia supponunt, ut videre licet in Paludano, Capreolo, Durando, Scoto, & aliis in 4. d. 1. & sumitur ex D. Th. ibi, & hic, & infra, q. 62. & 1. p. q. 45. art. 5. & Cajet. his locis, & Ferr. 4. cont. Gent. c. 65. & Alexand. Alen. 4. p. q. 8. memb. 3. art. 5. §. 6. & videtur ex terminis evidens: quia actus secundus essentialiter supponit primum, sed actio comparatur ad causam agentem, tanquam actus secundus: supponit ergo in illa actum primum, qui est virtus vel potentia agendi. Major constat, quia actus primus & secundus sunt per se ordinati; & ideo alter est secundus, quia supponit priorem. Item, quia, si actus secundus sit per modum passionis vel informationis, necessario supponit potentiam patiendi, seu capacitatem recipiendi talem formam, sine qua impossibile est intelligere talem actum secundum in aliquo subiecto: ergo similiter, si actus secundus sit per modum actionis, necessario supponit actum primum, seu virtutem agendi in eo, a quo dicitur esse actio: quia etiam actio, ut actio, dicit essentialiter habitudinem ad talem actum primum, seu potentiam agendi. Tercio, nam ab actu ad potentiam (ut dialectici dicunt) necessaria est consecutio: ergo, si aliquid agit, potest etiam agere: non potest autem agere, nisi per vim agendi: ergo actio agentis in actu supponit in eo virtutem agendi. Quarto, quia, teste Aristotele, causa, ut causa, est prior, saltem natura, effectui, & actione sua, quæ ab illa realiter manat: non est autem prior natura causa in actu secundo, quam sua actio, ut per se constat: quia per ipsam actionem formaliter constituitur in actu secundo, sive intrinsece, sive per extrinsecam tantum denominationem, juxta varias opiniones, quæ ad præsens non referunt: ergo causa est prior natura actione in actu primo. Quinto, quia actio ut actio, dicit transcendentalem habitudinem ad causam agentem, ut ad reale principium, a quo fluit. Unde causa agens, licet habeat rationem principii, quatenus ab ea fluit effectus, vel actio, tamen quatenus est id, ad quod actio, ut actio, dicit immediatam habitudinem, vocari potest terminus ejus: ergo supponit in causa agente entitatem, formam, vel rationem aliquam, ad quam possit illa habitudo transcendentalis ipsius actionis terminari: quia non potest esse habitudo realis, nisi in termino supponatur id, quod necessarium est ad terminandam illam habitudinem: in præsentem autem, quia hæc habitudo actionis, est habitudo emanationis, seu dependentiæ realis a vera & propria causa reali, supponit in ea aliquid reale, quo talem habitudinem seu dependentiam terminet: ergo supponit in ea realem virtutem agendi, quia virtus agendi nihil aliud est, quam id, quo causa agens potest terminare dependentiam effectus ad ipsam. Sexto, potest hoc idem aliter explicari, quia effectum fieri nihil aliud est, quam extra causas suas educi, seu constitui: ergo, antequam fiat, necessario supponitur contentus in

Suarez Tom. XVI.

virtute causarum: ergo a nulla causa fieri potest, nisi quatenus in ea aliquo modo virtute continebatur; ergo, si causatur efficienter ab aliquo, continetur in virtute effectiva illius eo modo, quo ab illo fit: ergo activa emanatio supponit semper virtutem producendi in causa, ac commodatam causalitati ejus. Quod adeo constans fuit apud Theologos, ut etiam in divinis processibus seu emanationibus ad intra, quamvis sine imperfectionibus causalitatis existant, & sine dependentia, imo sine reali emanatione ipsius originis activæ, sed tantum ipsius personæ productæ: nihilominus, quia illæ sunt veræ productiones reales, necessario ad illas requirunt potentiam producendi; & ita in Patre dicunt esse potentiam generandi; & in Patre & Filio potentiam spirandi. Est ergo hoc principium certissimum: & quamvis in illo, ut dixi, conveniamus omnes, illud tamen omnibus rationibus adductis confirmare & declarare volui, quia ex eo pendent omnia, quæ dicenda sunt, & quia multi, qui verbis illud admittunt, postea in re ipsa longe ab illo distare videntur, ut ex dicendis patebit.

Secundum principium est virtutem hanc instrumentalem, quæ necessaria est in instrumentis divinis, ut talia sunt, non esse qualitatem aliquam superadditam, v. g. humanitati Christi, aut voci ejus, realiterque ab illis distinctam, quod in superiori sectione satis ostendi. & in tertio tomo de sacramentis plura ad id confirmandum adducam, pauca tamen hic dicenda sunt. Loquor igitur de instrumento Dei, ut instrumentum est, ut excludam infusionem supernaturalium habituum seu virtutum, quæ ad eliciendos supernaturales actus nobis dantur: nam illæ qualitates proprie non dantur ad efficiendum instrumentaliter, sed potius ad operandum connaturaliter, & per modum causæ proximæ principalis, saltem quatenus ipsi habitus infusi ad suos actus concurrunt: nam, quia illi actus sunt actus secundi vitalium potentiarum, non repugnat illis, quod possint infundi habitus ejusdem ordinis, qui ad illos comparentur, ut principia connaturalia illorum, quod tamen repugnat respectu ipsius gratiæ & aliarum supernaturalium actionum seu miraculorum propter rationem supra traditam, sect. 4. ubi ostendimus humanitatem Christi non posse esse causam principalem gratiæ aut justificationis, & supernaturalium miraculorum, quia non potest ei infundi qualitas, quæ sit principium principale talium effectuum: sine qualitate autem huiusmodi seu virtute addita, clarum est non posse constitui humanitatem in ratione principalis principii, cum certum sit, neque ex se habere talem virtutem, neque per solam unionem hypostaticam formaliter ac præcise sumptam fuisse illi communicatam, ut supra probatum est: quia sola unio, ut sic, solum dat humanitati, quod sit conjuncta Verbo ut supposito: ex quo præcise nulla virtus physice operativa additur humanitati, sed solum habet, quod in tali supposito sit principium operandi juxta naturalem, realem, ac moralem perfectionem, propriam talis naturæ, & cum morali dignitate, & valore consentaneo tali personæ.

Hic ergo non solum excludimus hanc qualitatem, quæ sit principale principium horum effectuum, sed etiam instrumentalem vim, scilicet, quæ ex natura sua habeat huiusmodi virtutem connaturalem ac propriam instrumentaliter efficiendi hæc opera, ita ut ex natura sua in illa influat; talem enim qualitatem impossibilem esse existimo. In quo nonnulli ex prædictis authoribus (mea sententia) non loquuntur consequenter: docent enim hanc qualitatem instrumentariam esse possibilem, & negant esse inditam humanitati Christi: quia licet possibile sit, non decet tamen creaturam illam habere: interrogo enim, quænam sit hæc indecentia; aut enim hoc judicatur indecens, quia si hæc qualitas humanitati tribueretur, aliqua imperfectio, vel defectus aliquis in ea poneretur: vel e converso, quia nimia perfectio illa esset, & excedens dignitatem ejus. Primum nullo modo dici potest, quia illa qualitas esset in se valde perfecta, & non repugnaret cum qualibet alia perfectione, vel naturæ, vel gratiæ, vel scientiæ, vel potentiæ humanitatis Christi: non ergo posset humanitati defectum & imperfectionem asferre, sed magnam potius perfectionem & virtutem.

Secundum etiam non est consentaneum perfectioni, vel dignitati Christi, & humanitati ejus: tanta enim est dignitas illius humanitatis ratione unionis, ut non

D d 2

possit

Proponitur nonnulla principia recepta inter disputantes.

Abio supponit in causa vim agendi.

Virtus instrumentalis in divinis instrumentis non est qualitas superaddita.



possit hoc ornamentum creatum, respectu illius, nimium vel excedens existimari. In quo enim potest poni huiusmodi excessus? Nunquid in eo, quod videretur humanitas æquari divinitati in omnipotentia? Sed hoc nullius momenti est, quia instrumentaria & accidentaria virtus non potest cum principali ac substantiali comparari: imo, quamvis fingeretur qualitas, quæ esset principalis virtus, non posset conferri cum virtute divinitatis, quia hæc est virtus per essentiam primaria & independens: illa vero esset participata, secundaria, & pendens ab influxu causæ primæ in omni actione sua. Et confirmatur primo, quia non excedit, imo est valde consentaneum dignitati Christi hominis, quod ad arbitrium voluntatis suæ, non tantum divinæ, sed etiam humanæ, possit homines sanctificare, & miracula facere: in quo non æquatur voluntas humana divinæ: quia semper est illi subordinata, eique conformatur: ergo neque excederet dignitatem ejus, quod reciperet hanc virtutem per qualitatem inditam, cui esset connaturalis talis modus agendi, si illa esset possibilis. Tandem confirmatur, quia prædicti authores concedunt characterem sacerdotalem esse ex natura sua instrumentariam virtutem ad transubstantiationem efficiendam, & consequenter etiam ad remittenda peccata, & gratiam infundendam: & nihilominus non dedit hanc qualitatem infundi creaturæ, & in ea permanere habitualiter ita subditam voluntati ejus, ut possit ea uti, quando voluerit: cur ergo non decet qualitatem illam permanentem inditam esse humanitati Christi, si possibilis est?

Vera ergo ratio huius rei est, quia talis qualitas, quæ natura sua hoc habeat, seu (quod idem est) cui talis modus agendi, & concursus ex parte Dei necessarius ad tales effectus, ex propria natura ei debitus sit, est revera impossibilis. Quod de qualitate permanente habitualiter docuit D. Th. 2. 2. q. 178. art. 1. ad 1. est autem eadem vel major ratio de qualitate solum transeunte data, ut supra ostensum est. Sunt autem, qui exponunt D. Th. ibi fuisse locutum de potentia ordinaria, non de absoluta. Sed hæc interpretatio in præsentem gratis conficta est, cum D. Th. simpliciter dicat esse impossibile, & non loquatur de re aliqua, quæ per naturæ leges metienda sit, ut respectu illarum dici possit impossibilis. Intelligit ergo, omni modo, etiam supernaturaliter, id esse impossibile. Et ratio, quam adducit, ad hoc etiam tendit scilicet, quia divina omnipotentia nulli creaturæ communicari potest; de qua ratione non est hic dicendi locus: sensum tamen ejus esse existimo ea, quæ sunt propria omnipotentia Dei, quatenus infinitæ virtutis est, & supra totum ordinem naturæ creatæ, tam in suo esse, quam in sua virtute, dominio, & potestate, non posse communicari creaturæ, ita ut ex vi suæ naturæ sit effectrix talium operum, sive principaliter sive instrumentaliter.

Aliam vero huius rei causam, quæ mihi valde semper probatur supra, ego attuli ex doctrina ejusdem D. Th. in 1. p. q. 45. art. 5. scilicet, quia hæc virtus seu qualitas creata non potest habere actionem aliquam propriam & commensuratam suæ virtuti in ordine ad hos effectus: nullum autem instrumentum, quod ex natura sua institutum est & ordinatum ad aliquem effectum superiorem, concurrat ad illum, nisi aliqua prævia sibi accommodata & propria actione, & non excedente propriam perfectionem: & quoad hoc revera est demonstrativus discursus D. Th. in illo art. ut iterum attingam sect. seq. Explicari autem amplius potest utraque ex his rationibus, quia instrumentum connaturale semper dicitur habitudinem ad aliquod agens principale, quod non solum possit agere, medio tali instrumento, sed etiam vel illo indigeat ad talem effectum, vel certe magis consentaneus sit naturis rerum, vel ex parte agentis, vel ex parte effectus, ut inductione ostendi potest, & per se se est maxime consentaneum rebus ipsis. Hoc autem in præsentem dici non potest, quia gratia, v. g. maxime connaturale est fieri a solo Deo, nullo instrumento medio: & Deo ipsi hoc est maxime proprium & connaturale, neque ullo instrumento indiget: nulla ergo excogitari potest qualitas, quæ natura sua postulet, habere huiusmodi effectum vel actionem per modum instrumentariæ virtutis connaturalis.

Quod si qualitas infundi non potuit humanitati Christi, quæ huiusmodi virtutem haberet, convincitur nullam esse ponendam huiusmodi qualitatem, quia, si natu-

ra sua sit improporcionata ad talem actionem, impertinens est ad rationem instrumenti, cum nullam virtutem agendi illi possit conferre. Addo denique sermonem esse de qualitate, quæ sit virtus instrumentaria per modum actus primi necessarii ex parte ipsius instrumenti: quod dico, ut abstineam ab alia quæstione, & opinione nove inventa, de qualitate nescio qua, quam Deus ut prima & universalis causa in omni ordine dicitur imprimere omni causæ secundæ, tam principali, quam instrumentali ad agendum & concurrendum cum illa: nam etiam si demus licentiam fingendi hanc qualitatem (est enim revera conficta, ut in disputationibus metaphysicis latius ostendo) ad præsentem quæstionem nihil refert, quia illa qualitas velentitas, quæcumque illa sit, non ponit in causa secunda principali vel instrumentali actum primum, quo illa operatura est, sed supponit illum, præbetque illi motionem vel concursum ex parte causæ primæ necessarium, ut causa secunda agat, ad hunc enim finem ponitur illa qualitas ab his authoribus, a quibus excogitata est: & ideo non solum in operibus gratiæ & miraculosis, sed etiam in operibus naturæ, illam necessariam esse existimant: nec solum in causis instrumentalibus, sed etiam in principalibus, quantumvis per proprias formas & virtutes sint in actu primo plene ac perfecte in suo ordine constitutæ: quod, quam sit absurdum, & ex falsa intelligentia divini concursus profectum, prædicto loco, & in 1. p. late ostensum est. Nunc autem (quidquid de hoc sit) solum excludimus qualitatem, per quam Christi humanitas in ratione instrumenti constituatur in actu primo, cui dandus sit divinus concursus, qualiscumque ille sit: & in hac qualitate neganda, nobiscum consentiunt prædicti authores, quamvis fortasse in fundamento, & ratione excludendi illam, non consentiant.

Tertium principium est divina instrumenta formaliter & proprie non constitui in actu primo ad agendum instrumentaliter per motum aliquem physicum, ipsi instrumento superadditum. Dicunt quidem aliqui ex authoribus contrariæ sententiæ, regulariter loquendo, non uti Deum Christi humanitate, aut alia creatura ad supernaturalia opera, nisi prævio aliquo motu, vel operatione creaturæ, sive ille sit motus aliquis localis, sive contactus, sive locutio, sive aliqua operatio immanens, juxta doctrinam D. Th. infra q. 62. art. 1. & 4. & 2. 2. q. 178. art. 1. ad 1. quam in eo sensu, quem ipsi etiam indicant, facile admittimus: non enim putant hunc motum ipsius instrumenti esse simpliciter necessarium, ut ad physicam, & supernaturalem efficientiam eleveatur: hoc enim plane convincunt, quæ in præcedente sectio. contra secundam sententiam a nobis dicta sunt: quibus non obstat, quominus Deus frequentius utatur, aut requirat huiusmodi motum, & operationem instrumenti, quia hic est suavior modus utendi creatura ut instrumento, & elevandi illam ad superiorem actionem, quando commode fieri potest: quia est magis accommodatus ordinario modo operandi instrumentorum. Nihilominus tamen, cum hic modus instrumenti non censeatur necessarius simpliciter ad hanc instrumentariam actionem, quando ille non adhibetur, inquirendum necessario est aliquid aliud, quo instrumentum constituatur in actu primo ad talem actionem. Imo etiam, quando talis motus adhibetur, non potest ille secundum proprias vires naturales consideratus constituere divinum instrumentum in actu primo ad supernaturale opus efficiendum; quia imperfectior est talis motus, quam res, quæ illo afficitur, seu movetur: ergo neque ille potest esse virtus activa naturalis ad talem actionem & effectum, neque entitas ipsius instrumenti, ut, v. g. humanitatis aut vocis Christi, ut sic mota, seu ut affecta tali motu, potest esse virtus activa naturalis ad talem actionem vel effectum. Probatur, ac declaratur ex re ipsa, inductione facta, nam hic motus, ut D. Th. aperte declarat, non est, nisi aut contactus per manus, salivam, aut vestes Christi, vel aliquid huiusmodi; vel vox Christi imperantis & loquentis; vel ad summum erit actus intellectus aut voluntatis, quo imperat, seu vult talem effectum fieri: omnia autem hæc sunt ex sese insufficientia ad hanc virtutem activam, quæ ex natura sua sit virtus instrumentalis ad talem effectum, quia, si sit contactus corporeus, ille vel nihil addit intrinsecum & reale uni corpori præter relationem, vel denomi-

Virtus instrumentorum Dei non est physica motus illis inditus.



nationem ab alio corpore propinquo, vel ad summum addit motum localem, & aliquod novum ubi, & cum eo conjungi potest aliqua alteratio corporalis, quamvis hæc accidentaria sit: omnia autem hæc sunt imperfecta & ex se improporcionata ad omnem supernaturalem effectum, & idem est de sono vocis corporalis, quod attinet ad realem entitatem ejus: nam de significatione, quam habet ad placitum, jam satis ostensum est non posse esse principium vel rationem physicæ efficientiæ, cum nihil sit præter denominationem extrinsecam aut ens rationis. Ac denique idem est de actibus immanentibus intellectus & voluntatis, quia, si sint naturales, non solum ex se non sunt activi talium effectuum, sed etiam sunt inferioris ordinis ac rationis: si vero sint supernaturales, saltem ex natura sua non sunt formæ activæ gratiæ, v. g. in alio aut resurrectionis mortui, vel similibus operum. Denique rationes, quibus probamus qualitatem superadditam non posse esse instrumentum natura sua ordinatum ad has actiones, & habens virtutem connaturalem, etiam instrumentariam ad illas, a fortiori probant hunc motum, vel actum, qui fit circa instrumentum Dei, non esse natura sua vim activam instrumentariam ad tales effectus, & consequenter non constituere formaliter tale instrumentum in actu primo in ordine ad talem actionem.

Quod si forte dicatur, etsi formaliter non constituat instrumentum in actu primo, tamen ex divina ordinatione esse conditionem necessariam, ut tale instrumentum per divinam virtutem in actu primo constituatur, facile hoc totum concedemus, seu permittemus: inquirendum tamen ac declarandum superest, quid sit illud, quo formaliter constituitur tale instrumentum in actu primo ad agendum: in hoc enim cardo totius questionis versatur. Nam, licet actus primus, de quo in præsentia agimus, comparetur ad effectum seu actionem in actu secundo in ratione efficientis, tamen comparatus ad ipsam causam, vel principalem, vel instrumentalem, formaliter seu per modum formæ constituentis ad illam comparatur, vel secundum rem, si sit qualitas aut forma distincta, vel secundum rationem, si sit per identitatem realem, quomodo Deus est formaliter activus per omnipotentiam suam, & calor est activus sua naturali virtute. Unde, etiam si dicatur, quod ille motus divinis instrumentis impressus, vel naturalis operatio ab eis manans, quamvis secundum se, & natura sua, non sit vis activa & instrumentaria ad hujusmodi effectus miraculosos, tamen, ut est a Deo movente quasi artificiose seu miraculose habere sufficientem rationem virtutis activæ instrumentariæ, quia jam non spectatur ille motus secundum se tantum, vel secundum præcisam naturam suam, sed ut elevatur a principali agente: licet hoc (inquam) dicatur, non repugnabimus, dummodo sufficienter explicetur, quid sit, motum illum elevare a Deo, seu esse artificiosum, ut subest divinæ motioni aut virtuti, quod ad eandem difficultatem revolvitur, in qua diximus esse controversiæ cardinem, quamque in sequente puncto tractabimus. Nihil enim interest, quod hæc elevatio, seu subordinatio ad divinam virtutem, attribuat rei, quæ dicitur instrumentum, mediante motu, qui in illa fit, ut cum dicitur elevari caro Christi, medio contactu, vel aqua, per motum, quo ad abluendum movetur, aut quod ipsimet motui, seu contactui tribuatur, ut cum dicitur ipse contactus vel ablutio, ut est motio Dei artificiosa, elevari, ut per illam communicetur instrumento virtus agendi, vel ut sit illi virtus agendi: his enim omnibus dicendi modis, idem dicitur, quamvis diversis rebus attribuat, quæ est materialis differentia potius quam formalis, quantum ad præsentem difficultatem spectat. Igitur, quod attinet ad hunc realem motum, vel contactum, vel actum, vel aliquid hujusmodi, quod regulariter solet esse prævium in his divinis instrumentis, vel efficientiis eorum, nulla est dissensio, quæ ad rem pertineat, sed tota esse potest in hac elevatione divinatorum instrumentorum explicanda, & in eo, quod ex parte eorum requiri potest, ut elevabilia sint, sive cum aliquo motu physico, sive absque illo eleventur.

*Declaratur opinio, quæ sine potentia obedientiali activa ponit efficientiam physicam, per solam extrinsecam elevationem.*

His ergo suppositis, & seclusa potentia obedientiali Suarez Tom. XVI.

activa propter rationes supra factas, ajunt prædicti auctores hæc instrumenta divina, etiam si ex vi suæ entitatis nullam habeant vim activam, nec naturalem, nec supernaturalem, nec obedientialem, & quamvis etiam non detur eis talis virtus per qualitatem, aut rem novam illis inhærentem, fieri activa per solam conjunctionem & actualem subordinationem ad virtutem Dei principalis agentis: quam conjunctionem ajunt ordine naturæ antecedere effectum talium instrumentorum, & non ponere aliquid reale positivum supra entitatem instrumenti, nec modum aliquem realem in instrumento receptum, ultra materialem motum vel contactum, si fortasse circa illud fiat; sed addere solum prædictam subordinationem ipsius rei, quæ instrumentum dicitur, ad virtutem Dei. Unde tandem concludunt creaturam non constitui in actu primo ad agendum instrumentaliter cum Deo, per aliquid novum, & in ea receptum, sed per divinam virtutem increatam ineffabiliter illi conjunctam, seu per subordinationem ad increatam virtutem Dei, & ad imperium practicum ejus. Quæ sententia sic exposita potissimum in eo fundatur, quod, seclusis aliis modis declarandi hanc efficientiam, & elevationem instrumentorum Dei, nullus alius sufficiens ac possibilis excogitari posse videtur. Quod autem hic sit sufficiens ac possibilis, non aliter probatur, nisi quia nec involvit repugnantiam, nec afferri potest ulla ratio, ob quam prædicta subordinatio non sufficiat, ut creatura subflans increatæ virtuti Dei, & divino imperio, instrumentaliter cum Deo efficiat, quod ipse suo imperio principaliter operatur, concurrente cum sua creatura ad instrumentalem actionem. Secundo declaratur in hunc modum, quia imperium Dei practicum, licet formaliter sit immanens, tamen virtute est transiens, estque infinitæ suavitatis ac efficacæ, & priori ratione sese accommodat suis creaturis in agendo: posteriori autem ratione eis utitur, easque elevat ad agendum, prout vult: ergo virtus divina, applicata creaturæ, per hoc imperium potest illam constituere in actu primo ad operandum in ratione instrumenti, absque alia re superaddita. Tertio, quia actio, qua Deus & instrumentum ejus producant gratiam, est una & simplex: ergo non postulat duas virtutes, sed unam, quæ per se est in principali agente, scilicet Deo, communicatur autem creaturæ ut instrumento. Quarto, instrumentum non operatur in virtute propria, sed principalis agentis: ergo, ut constituatur in actu primo, satis est, quod habeat immediatam conjunctionem ad virtutem causæ principalis. Quinto, quia causa inferior perficitur in ratione causæ ex conjunctione & subordinatione ad superiorem absque superaddita entitate. Sexto, confirmatur hoc, & declaratur exemplis. Primo. Color per conjunctionem ad lucem confortatur, & fit potens ad producendas species visibiles, ad quas producendas non erat in actu per se solus, sed tantum in potentia: & tamen lumen, per quod fit potens, & constituitur in actu ad hujusmodi actionem, non inest illi, sed tantum ei conjungitur. Secundum exemplum est de phantasmate, quod per conjunctionem intellectus agentis constituitur in actu primo, ut instrumentum ad efficiendam speciem intelligibilem: & tamen nihil sibi inhærens recipit ab intellectu agente, per quod in actu primo constituitur. Tertium exemplum est de motu cæli, qui, ut est ab intelligentia, est vivificus seu aptum instrumentum ad producenda viventia, absque additione entitatis. Quartum est de calore, qui per conjunctionem ad animam est instrumentum productivum carnis: per conjunctionem vero ad formam ignis, est instrumentum productivum ignis, quamvis in se realiter non immutetur. Quintum est de intellectu & voluntate, quæ potentiæ (juxta opinionem satis communem, & a multis Theologis probatam) producant primos actus supernaturales, absque ullo habitu vel qualitate superaddita, sed per solam subordinationem ad divinum auxilium.

*Impugnatur prædicta sententia.*

Hic modus explicandi activitatem divinatorum instrumentorum apertam (ni fallor) involvit contradictionem, & cum principiis positis & admissis manifestam repugnantiam. Quod si ostendero, consequenter convincam aut potentiam activam obedientialem esse admitendam, aut hanc physicam activitatem humanitatis

Argumenta prædicta  
sæpe secum  
tinent.



Christi, & aliorum divinorum instrumentorum, esse negandam. Prædicta autem repugnantia, & contradictio sic ostenditur, quia dictum est causam, etiam instrumentalem, non posse in actum secundum prodire, nisi prius in actu primo constituitur. Hæc autem constitutio non potest intelligi esse per solam extrinsecam denominationem: ergo necessario esse debet per intrinsecam entitatem, vel per formam inhærentem, aut per utrumque simul, aut per alterum tantum, juxta diversos activitatis gradus, ac modos: ergo in præsentī materia non possunt instrumenta divina constitui per solam extrinsecam denominationem a virtute divina: ergo non possunt constitui in actu primo per solam subordinationem ad divinam virtutem: nam hoc solum est in illis extrinseca denominatio: ergo necesse est, ut supponatur ex parte illorum aliqua vis activa intrinseca, quæ, cum non sit addita per formam inhærentem, erit per propriam entitatem: & hanc ego voco virtutem activam obedientialem: quia, ut ostenditur, nec naturalis simpliciter, nec supernaturalis dici potest, neque est tantum passiva.

In hoc discursu primum omnium demonstranda est illa propositio subsumpta, quod instrumentum non potest constitui in actu primo per solam extrinsecam denominationem, ubi primum advertendum est duobus modis, in communi loquendo, posse intelligi aliquid constitui in actu primo per entitatem a se distinctam. Primo, tanquam per formam vel actum dantem ei totam virtutem agendi, quomodo aqua constituitur in actu primo ad calefaciendum per calorem, ipse vero calor se ipso constituitur in actu primo in ratione virtutis calefactivæ ut sic. Secundo modo, tanquam per formam vel actum complementem vim activam, quæ aliquo modo in altera entitate inchoata erat, non tamen completa: quomodo species visibilis dicitur constituere visum in actu primo ad videndum: non enim dat illi totam vim activam videndi, sed supponit aliquam ex parte potentiæ necessariam, & addit aliam, quæ ex parte objecti necessaria est. Quando igitur constitutio in actu primo fit hoc posteriori modo, non repugnat, quod aliquando fiat per formam inhærentem intrinsecam, ut in exemplo posito de visu & specie, aliquando vero per formam tantum, seu entitatem assistentem, seu extrinsece circumstantem, & quoad hoc extrinsece denominantem, ut intellectus Beati dicitur constitui in actu primo ad videndum Deum per divinam essentiam.

Ratio autem hujus posterioris partis (prior enim est per se nota) est, quia quando aliquid dicitur constitui in actu primo per aliud, solum quia complet vim activam ejus, tunc illud sic constitutum non denominatur agens vel activum, præcise ratione alterius formæ vel entitatis extrinsece illi assistentis, sed ratione activitatis, quam per suam entitatem habet, saltem inchoative: neque effectus, vel actio pendet per se a sola entitate, seu forma assistente, seu extrinsecus constituyente aliam in actu primo, sed etiam pendet efficienter & per se ab alia re, quæ in actu primo constitui dicitur, ut in exemplo posito visio beatifica non tantum pendet ab essentia divina, sed etiam ab ipso intellectu hominis vel angeli beati, qui non dicitur principium efficiens visionis propter efficientiam essentiæ divinæ ut sic, sed propter efficientiam & influxum, quem per propriam entitatem habet. Denique in hoc posteriori modo constitutionis in actu primo (si res attente consideretur) non tam unum per aliud in actu primo constituitur quoad rem ipsam, quam ex utroque confurgit unus, integer, & completus actus primus respectu actionis vel effectus: ac si diceremus in effectibus actionum causarum secundarum agens in actu primo complete & integre constitui ex virtutibus causæ secundæ, & causæ primæ conjunctis & subordinatis in ordine ad eandem actionem: quamvis quoad denominationem, quando una ex his causis est incompleta & insufficient in suo ordine, ad effectum secundum propriam rationem ejus efficiendum, tunc dicatur una constituere alteram in actu primo completo, & proximo, quia illi adjungitur ad eam juvandam & elevandam ad talem modum agendi. Non est tamen dicendum, nec vere dici potest, tunc constitui causam in actu primo per solam denominationem extrinsecam, cum virtus, & entitas intrinseca simul concurrat ad cōpletum actum primum constituendum.

At vero, quando constitutio fit priori modo, id est,

quod forma constituens in actu primo, confert formaliter totam virtutem agendi, tunc fieri non potest, ut aliquid constituatur in actu primo per virtutem seu entitatem tantum extrinsecus assistentem seu denominantem: sed constitui debet per propriam entitatem vel performam inhærentem. Quod patet primo inductione in omnibus agentibus, tam naturalibus quam supernaturalibus, extra materiam, de qua disputamus. Secundo, ex illo eodem principio, quod nihil potest esse in actu secundo, nisi præintelligatur potens in actu primo: nihil enim est potens, in actu primo, nisi in quantum est ipsamet potentia activa, vel in quantum potentia activa informatur: nam potentia activa ut sic non reddit potentem, nisi id, cui inest, vel per identitatem, vel per informationem: nam si potentia non sit res distincta a re, quæ per illam efficitur potens, erit illi intrinseca per identitatem: si autem sit res distincta, pertinebit ad genus qualitatis; & ideo non potest constituere rem potentem, nisi informando. Quod si talis potentia intrinsece constituat potens id, in quo est intrinsece per identitatem vel informationem, non poterit illa ut sic constituere potentem rem aliā omnino distinctam, cui solum assistit, vel quam solum extrinsece denominat. Tertio, quia extrinseca denominatio nullum esse, nullamre perfectionem potest ponere in re denominata: esse autem activum, aliquid perfectionis est, & in aliquo esse fundatur: imo, ut habet commune proloquium, agere consequitur seu comitatur esse. Quarto, quia quando forma constituit se sola rem aliam in actu primo ad agendum, inhærendo illi, seu informando illam, tunc res illa sic informata in tantum dicitur activa vel agens, in quantum in se sustentat, vel infra se habet formam, quæ est principium actionis: sicut aqua dicitur calefaciens seu calefactiva denominative, quia in se habet calorem, quæ dominatio in tantum intrinseca est, in quantum calor intrinsece inhæret aquæ: ergo, seclusa identitate, & seclusa etiam intrinseca informatione, non potest res vere denominari activa a virtute totali prorsus extrinseca.

Dices, etsi non possit denominari denominatione intrinseca, tamen posse, supposita alia denominatione, seu conjunctione extrinseca. Sed contra hoc est, quia ostendimus denominationem potentis seu activi ex propria ratione esse intrinsecam, tum quia requirit aliquid esse, & aliquam perfectionem in re sic denominata: tum etiam, quia denominatio potentis est denominatio continentis aliquo modo effectum: quia effectus non fit a causa, nisi quatenus in se recipit esse, quod in illa aliquo modo præhabebat: non potest autem effectus contineri in causa per solam extrinsecam denominationem, sed secundum aliquod verum esse: quia extrinseca denominatio nihil est, neque in ipsa causa vere continetur. Quinto, quia nulla potest intelligi conjunctio vel assistentia extrinseca, ex qua talis denominatio proprie ac physice sumatur. Dico autem proprie ac physice, quia dicimus interdum posse, quod per amicos possumus: sed illud non proprie ac physice sed moraliter ac metaphorice dicitur. Item quia dicitur aliquis potens propter divitias, & similia, quæ ipsum non intrinsece afficiunt. Sed illa etiam est potentia metaphorica & moralis. Tamen loquendo de potentia physica ac per se, nulla potest intelligi conjunctio solum extrinseca, quæ sufficiat, ut una res dicatur potens solum per extrinsecam assistentiam alterius: alioqui explicetur aliquo modo talis conjunctio, & quomodo ad hanc denominationem sufficiat: quod hætenus factum non est, neque existimo fieri posse, ut patebit magis inferius, discurrendo per exempla supra adducta, & declarando elevationem divinorum instrumentorum, & omnem conjunctionem, seu assistentiam extrinsecam virtutis divinæ respectu eorum, & ostendendo illam solum non posse sufficere, ut illa instrumenta dicantur constitui in actu primo ad agendum.

Ac denique declaratur ex differentia inter duos modos constitutionis in actu primo supra adductos: quia, quando res, quæ habet in se aliquam virtutem activam, dicitur constitui in actu primo per assistentiam alterius rei, potest illi præintelligi aliqua conjunctio vel denominatio sufficiens, quatenus virtus illa velut inchoata dicitur quasi compleri vel juvari ex consortio alterius, quamquam, ut dixi, propria ratio vel denominatio agentis seu activi, etiam tunc, non sumatur ab illo

extrin-

Causa nō  
constituitur  
in  
actu primo  
ad  
agendum  
per solam  
denominatio-  
nem  
extrinsecam.

Duplex  
modus cō-  
stituendi  
causam in  
actu primo  
decla-  
ratur.



extrinseco denominante, sed ab intrinseca activitate, quæ in re ipsa supponitur. At vero, quando in re nulla omnino virtus activa intrinseca supponitur, non potest res extrinseca illi conjungi, vel assistere, ut illam adjuvet in agendo, vel ut ex utraque constetur unum completum agens; & ideo nec potest ibi intercedere aliqua extrinseca denominatio, quæ ad rationem agendi sufficiat, multoque minus potest ibi intervenire aliquid, unde sumatur propria, & intrinseca denominatio agentis in actu primo, seu activi aut potentis agere: hæc enim omnia idem sunt. Sexto explicatur hoc ipsum argumento supra facto de termino dependentiæ: nam, si respectu unius & ejusdem actionis duæ aliæ res ita se habeant, ut una sit tota virtus, a qua pendet talis actio, alia vero secundum se nullam omnino vim habeat ad influendum in talem actionem, tunc tota dependentia illius actionis terminatur per se ad illam rem, in qua est tota virtus agendi: ad aliam vero nullo modo, nisi quatenus habet aliquam unionem cum virtute agendi in ratione suppositi operantis per illam, & sustentantis illam: quod, seclusa hac unionem, nullo modo intelligi potest, ergo res, quæ in se nullam habet vim agendi, constituatur in actu primo per aliam rem supposito distinctam, in qua sit tota vis agendi, & a qua solum possit extrinsece denominari. Patet consequentia, quia tunc actio non potest intrinsece & per se terminari secundum suam habitudinem transcendentalem, & dependentiam ad talem rem, cui extrinseca est tota virtus activa: & physice loquendo, per accidens se habet ad talem actionem. Unde, conservata illa re, in qua est tota virtus agendi, etiam si alia de medio tolleretur, posset talis actio conservari, quia maneret totus terminus, totaque virtus, a qua pendet. Igitur, ut aliqua res sit activa, & maxime ut sit aliquo modo principium per se actionis, necesse est, ut per propriam, & intrinsecam formam seu entitatem habeat aliquam vim agendi; & hoc est, quod ostendere proposuimus.

*Ostenditur instrumenta Dei non elevari per  
solam subordinationem, si in eis nulla  
supponatur potentia.*

Ex hoc vero principio probandum superest secundo loco, ad complendum discursum factum, nullam rem posse elevari, ut sit instrumentum Dei ad aliquam actionem per solam subordinationem ad divinam virtutem, seu per solam extrinsecam elevationem, nisi in re, quæ elevatur, supponatur aliqua vis activa intrinseca per inhærentiam, vel identitatem. Hoc autem probatur primo, quia virtus Dei substantialis, seu quæ in Deo ipso existit, non conjungitur per se ipsam formaliter & intrinsece instrumentum suo in ordine ad operationem: ergo non potest instrumentum Dei per illam virtutem constitui in actu primo ad agendum, si in se nullam vim activam habet: ergo neque etiam potest constitui in actu primo per solam subordinationem. Antecedens est certissimum, quia illa virtus Dei est subsistens, & essentialis Deo: non ergo intrinsece conjungitur creaturæ, ut sit veluti forma & virtus, qua ipsa creatura agat. Deinde hoc sensu damnant omnes Theologi sententiam Magistri dicentis charitatem increatam ita uniri voluntati creatæ, ut sit illi loco intrinseci principii, & virtutis ad amandum. Præterea quænam unio fingi potest inter virtutem increatam Dei, & aquam, v.g. baptismalem, ut ratione talis unionis dicatur aqua agere per solam virtutem Dei? quia nec talis unio potest esse naturalis, ut per se constat, quia nec fingi potest, quæ sit, neque, si esset, sufficere posset actionem supernaturalem, sicut diximus de quacumque motione physica, & naturali circa aquam. Neque etiam potest illa unio esse supernaturalis; seclusa enim actione aliqua supernaturali Dei in aquam, quænam esse potest talis unio? nulla autem supernaturalis actio ibi intervenit, quia, ut supponimus, nihil supernaturale imprimatur aquæ: nulla ergo ibi fingi potest vera unio; sed hoc solum, quod Deus statuit ac voluit gratiam, non ab ipso solo, sed etiam ab aqua produci: quæ voluntas nullam præviam unionem intrinsecam facit inter Dei virtutem & aquam.

Dices. Quamvis hæc argumenta procedant in cæteris instrumentis separatis Dei, non tamen in humanitate, quæ est instrumentum conjunctum vere ac realiter, ac suo modo intrinsece unitum divinitati: per quam unionem potest intelligi constitutum in actu primo ad efficiendas has supernaturales actiones. Sed hoc nihil ob-

stat, quia, ut supra ostensum est, unio hypostatica formaliter & per se ipsam non constituit humanitatem in actu primo ad aliquid supernaturale agendum: quia illa unio non est formaliter ad agere, sed ad esse, & subsistere. Unde verbum, ut humanitati unitum, non est illi formalis ratio operandi aliquid, sed subsistendi, quamvis sit radix, ob quam datur humanitati virtus operandi miracula. Quod etiam patet, quia unio creata, quæ est in humanitate ad Verbum, formaliter & natura sua non est activa, quia solum est modus quidam unionis ad subsistendum: subsistentia item Verbi, ut unita humanitati, non est activa ad extra, quia unitur ut est propria Filii: divinitas autem non unitur humanitati, nisi ratione subsistentiæ, non vero in ratione formæ agendi.

Imo, si hac ratione uniretur, quod a tali virtute denominaretur agens, non posset dici instrumentum, sed potius agens principale, saltem denominative, quia non ageret principale agens per ipsum, sed potius ipsum ageret per virtutem principalis agentis sibi unitam: sicut aqua agens per calorem non potest dici instrumentum caloris, sed potius denominatur agens, ut quod & principale denominative, quantum ad eam actionem, quæ est a calore, ut a principali principio agendi. Et, si fingere-mus illam virtutem increatam Dei, non tantum assistendo, sed etiam inhærendo, conjungi creaturæ, & esse totam rationem agendi, non intelligeremus talem creaturam esse instrumentum, sed denominari agens principale quasi materialiter, sicut dictum est de aqua calida calefaciente: ergo multo magis, si daremus, a quacumque unionem vel assistentia talis virtutis, posse denominari creaturam agentem, ea ratione non esset instrumentum, sed haberet aliam denominationem agentis veluti materialem, quæ inexplicabilis est, nisi in dominatione suppositali (ut sic dicam) quæ est in Christo Domino per communicationem idiomatum, quatenus ratione unionis hypostaticæ denominatur hic homo operans virtute divina, creans, &c. sic enim non est instrumentum, sed principale operans. Igitur divina virtus increata non ita conjungitur instrumentis suis, prius natura, quam per illa operatur, ut per se ipsam illa formaliter constituat in actu primo ad operandum: igitur per hujusmodi solam unionem (quæ non potest esse, nisi extrinseca, ut ostensum est) non possunt hæc instrumenta constitui in actu primo, nisi in eis supponatur aliqua vis agendi intrinseca, ita ut talis constitutio in actu primo sit quasi ad complendam inchoatam virtutem, non ad conferendam formaliter totam illam juxta ea, quæ explicata sunt.

Atque hinc tandem concluditur solam subordinationem, sine aliqua virtute intrinseca ex parte instrumenti, non posse sufficere ad hanc physicam efficientiam: imo nec posse intelligi veram subordinationem instrumenti & principalis agentis, nisi in instrumento talis virtus vel præsupponatur, vel addatur. Probatur primo, quia talis subordinatio, præter omnem entitatem, quæ intrinsece existit in illa re, quæ, ut instrumentum, dicitur subordinari Deo, non addit, nisi solam extrinsecam denominationem, quia inter additionem intrinsecam, & denominationem extrinsecam non potest medium excogitari: hic autem non fit additio intrinseca, ut supponitur, solum ergo relinquitur denominatio extrinseca: ergo non sufficit ad constituendum in actu primo dando formaliter totum actum primum, seu totam virtutem agendi; sed solum complendo virtutem inchoatam: ergo hanc necesse est præsupponi ex parte instrumenti. Secundo, quia omnis actio instrumentalis, si propria sit ac per se physice, est immediate ab instrumento: ergo, præter virtutem agentis principalis, debet esse in instrumento aliqua virtus intrinseca, a qua procedat actio, ut ab illo est: sed hæc non datur formaliter per hanc subordinationem, ut ostensum est; quia solum est quid extrinsecum: neque etiam effective, quia nihil ponit in instrumento, ut etiam probatum est: ergo debet necessario præsupponi. Antecedens patet, quia agens principale operatur per instrumentum: & ideo necesse est, ut actio immediate fluat ab instrumento, & quodammodo immediatus, quam a principali agente: quia licet in utroque sit immediate in suo genere, tamen virtus principalis agentis quodammodo se accommodat instrumento: & ideo dicitur per illud determinari ad talem agendi modum. Necessaria ergo est in instrumento propria instrumentalis



virtus, quæ in ipso intrinsece & formaliter sit distincta a virtute, quæ est in principali agente: nam aliàs non principale agens per instrumentum, sed instrumentum per virtutem principalis agentis causaret, & ita actio solum esset a virtute agentis principalis ut a principio quo, & ab instrumento ut a principio quod, hoc autem intelligibile est, & contra omnem veram rationem instrumenti. Necessaria ergo est virtus intrinseca in illo, sic adeo, ut, si hæc virtus sit aliqua qualitas inhærens ipsi, subiectum illius qualitatis solum quasi materialiter denominetur agens, & instrumentum: sicut aqua calida denominatur calefaciens: si autem illa virtus sit ipsamet entitas instrumenti, tunc propriissime ac maxime per se possit talis entitas influere ut verum instrumentum.

Quod tertio ita declaratur, quia vel actio, qua fit effectus principalis agentis, pendet immediate ab entitate instrumenti, vel non, sed a sola virtute increata Dei. Hoc secundum dici non potest, aliàs tale instrumentum revera non est agens, vel activum, cum in se nihil habeat, a quo actio pendeat. Si autem dicatur primum, necesse est, ut in ipsamet entitate instrumenti sit aliquid distinctum a tota virtute, quæ est in Deo, a quo possit talis actio fluere, & pendere: quia, ut dictum est, actus secundus supponit primum, & actio potestatem: ergo hoc, quod est in tali entitate instrumenti, cum de novo non sit in illa, necessario supponitur in eadem ante omnem elevationem seu subordinationem ad Deum ut principalem agentem: hoc autem, quod in tali entitate supponitur, vocamus vim activam: quia vis activa nihil aliud est, quam id, a quo potest fluere ac pendere actio ut actio.

Quidnam  
elevationis  
sic.

Quarto hoc declaratur ex ipso nomine elevationis, & explicando rationem & modum, quo in præsentia intelligi potest. Elevationis enim multa seu multiplicem respectum includit, scilicet ad id quod elevatur, a quo elevatur, ad quod elevatur, & quo elevatur. Id enim, quod elevatur, elevationi supponitur: & secundum id non est per elevationem, sed ex se vel aliunde præhabet aliquid, quod ad elevationem supponitur: & hac ratione non dicitur vere creatura elevari ad esse, cum creatur, quia creatio nullo modo esse supponit: elevatio autem dicitur provectionem rei ad altiorem seu meliorem statum: unde supponit aliquid esse. Et hac ratione inter alias, id, quod non est, non potest elevari, ut sit instrumentum Dei. Rursus quod elevatur, est aliquid agens superius, superiori virtute operans, si de effectiva ac physica elevatione loquamur: nam, si sit sermo de morali seu extrinseca elevatione, illa non sit per propriam efficientiam circa rem, quæ elevatur, sed vel per moralem causalitatem, vel per extrinsecam aliquam voluntatem, vel conjunctionem alterius causæ, ut dicemus. Præterea, elevatio ipsa interdum fit ad esse ut sic: & tunc, si sermo sit de intrinseca elevatione formali & physica, hæc fit per aliquam formam additam rei, quæ elevari dicitur, quomodo anima elevatur per gratiam: si vero sit elevatio tantum moralis, aut per extrinsecam denominationem, fieri potest per extrinsecam formam, seu voluntatem, quamvis hoc nunquam fiat sine habitudine ad aliquam intrinsecam formam: quomodo homo, etiam cum non habet gratiam, nec alia supernaturalia dona, dici potest aliquo modo elevatus ad supernaturalem finem, in quantum ad illum est divina voluntate institutus & ordinatus. Interdum vero est hæc elevatio ad operandum aliquid supra vires ejus rei, quæ elevatur: quod uno e tribus modis fieri potest. Primum quando rei, quæ nullam habet vim agendi talem actionem, additur tota vis agendi: & tunc necessario debet fieri elevatio per formam intrinsecam, ut ostendi, sicut aqua calida dici potest elevari ad agendum per calorem: imo, ut notavi, in hoc genere elevationis, id, quod elevatur, non ad hoc elevatur, ut ipsum per se sit vere agens, sed solum per formam, quam recipit: atque adeo, ut solum denominetur agens quasi materialiter, quia sustentat formam, quæ est principium agendi: unde, seclusa tali forma, nullatenus intelligi potest talis elevationis modus. Secundus modus elevationis ad agendum est, quando rei non additur tota vis agendi, sed tantum suppletur, quod deerat, per virtutem intrinsecam superadditam: & hoc modo elevantur potentie animæ nostræ, ut intellectus & voluntas, ad supernaturales actus eliciendos, ut certum esse existimo, quidquid aliqui dicant, ut attingam inferius. Tertius modus elevationis ad agendum esse potest per conjunctionem extrinsecam

causæ complementis vim agendi aliquid, ad quod efficiendum id, quod elevatur, erat ex se insufficiens & improporcionatum, & talis est elevatio instrumentorum Dei, ut ex dictis est evidens. Hæc autem elevatio etiam supponit necessario in eo, quod elevatur, aliquam vim activam ei intrinsecam: alioqui hic modus elevationis reduceretur ad primum, quem ostendimus non posse fieri per solam extrinsecam denominationem vel conjunctionem causæ agentis.

Quod præterea declaratur, quia hæc elevatio per conjunctionem superioris causæ dicitur habitudinem ad illud, cui talis superior causa conjungitur, ut illud elevet: ergo, vel est conjunctio unius agentis ad aliud, habens aliquam vim activam, vel partialem, vel instrumentalem, & habetur intentum: vel est conjunctio rei habentis totam virtutem agendi ad rem, quæ nullam habet: & sic non conjungitur cum illa ad agendum. Dicitur potest, esse conjunctionem principalis agentis ad instrumentum, quod prius natura, quam conjungatur principali agenti, non habet ullam potentiam activam, sed tantum passivam, ut elevetur. Sed cum supponamus, hanc elevationem non esse per impressionem alicujus rei in ipsum instrumentum: manifestus error est, existimare, hæc instrumenta elevari per potentiam passivam. Nec refert, quod rem aliquam esse elevabilem, ut sit instrumentum Dei, videatur per modum potentie passive significari: quia Theologus, vel Philosophus, non debet ex modo significandi vocabulorum decipi: nam etiam, esse visibile, vel intelligibile, significatur per modum passionis, & tamen non indicat potentiam passivam, sed aptitudinem tantum ad terminandum extrinsece actum: & si aliqua potentia illa voce indicatur, potius est activa ad imprimendam speciem visibilem, quam passiva, cum nullo modo sit ad aliquid recipiendum. Sic ergo in præsentia, aquam esse elevabilem ad efficiendam gratiam, non potest esse potentia passiva in aqua, cum non sit ad aliquid recipiendum, & potentia passiva nihil aliud sit, quam capacitas seu potentia ad aliquid patiendum: passio autem sine receptione intelligi non potest. Igitur, esse elevabile hoc modo ut instrumentum, proxime dicitur denominationem a principali agente, quod est Deus, qui voluntate sua, & speciali auxilio potest conjungi tali rei ad utendum illa ut instrumento. Unde quoad hoc, elevatio illa in actu primo, sola denominatio extrinseca est, & ideo non requirit potentiam passivam, ut instrumentum elevabile sit, sed solum aptitudinem, ut sic denominetur: hæc autem aptitudo necessario debet fundari in aliqua potentia activa intrinseca, quæ ex parte instrumenti supponatur, ut per illam possit simul agere cum principali agente: nam sola denominatio extrinseca non potest ad hoc esse sufficiens, ut probatum est. Quin potius, quando aliquid est elevabile ad agendum per potentiam tantum passivam, revera proxime & immediate non est elevabile ad agendum, sed ad recipiendum aliquam formam, & aliquid esse: imo neque est elevabile, ut per se seu per suam entitatem agat, sed ut sustentet formam, quæ est principium agendi: & hoc modo dicitur quasi denominative agens, ut videre licet in aqua, quatenus dici potest elevabilis ad calefaciendum: & idem est in similibus: si autem aliquid est elevabile ad agendum per formam intrinsecam & inhærentem, ita tamen, ut non solum sustentet formam, quæ est principium agendi, sed etiam ipsum per se vere agat, & influat in effectum; quidquid hujusmodi est, non est elevabile per solam potentiam activam, nec per passivam tantum, sed per utramque: quia passiva requiritur ad recipiendum formam; activa vero ad cooperandum illi: & hoc modo, sine dubio, potentie animæ nostræ sunt elevabiles ad actus supernaturales, qui alio modo non possent esse vitales: multoque minus possent esse liberi, ut statim amplius declarabitur.

*Solvuntur argumenta pro sola extrinseca elevatione proposita.*

Ex his ergo manifeste, ut existimo, demonstratum est, sine fundamento potentie activæ, quæ in his instrumentis supponatur, non posse intelligi subordinationem seu elevationem, quæ constituentur in actu primo ad agendum. Sed antequam ulterius progrediamur, oportet argumenta solvere, quæ contra hoc fiebant, ut nulla relinquatur dubitandi ratio. Ad primum jam ostensum est, quam repugnantiam involvat illa sententia, & cur



& cur sit impossibilis, & insufficiens ille elevationis modus: quia ex illo sequitur creaturam elevari ad agendum sine potentia agendi, aut præsupposita, aut de novo data. Quod autem dicitur, sufficere imperium Dei, ut creatura illi obediat, & cooperetur, est quidem verum, quia illud imperium esse non potest, nisi in creatura supponat potentiam ad obediendum, vel illam conferat: potentia autem ad obediendum in præsentem est potentia ad agendum, quia id, quod præcipitur, est, ut agat: unde cum de novo non detur, ut ostensum est, necesse est, ut supponatur. Dices, hoc solo, quod Deus efficaciter velit, creaturam agere, ipsa incipiet habere virtutem agendi, etiam si antea illam non habeat, nec de novo eam recipiat per aliquam rem superadditam: sed solum per imperium Dei. Sed hoc apertam involvit contradictionem, agendo de virtute intrinseca, quia instrumentum ex parte sua constitui debet in actu primo: quia, si voluntas Dei non immutat realiter creaturam, quia vult uti ut instrumento, non potest illam in se reddere potentiorē & magis activam, quam antea erat: ergo, ut Deus possit habere talem voluntatem, debet necessario supponere in creatura vim aliquam, ut possit efficere accedente imperio Dei, & concursu accommodato ad agendum, qui ratione illius imperii seu voluntatis divinæ, tribuitur.

Ad 2. Et hinc patet responsio ad secundum: totum enim id, quod dicitur in antecedente, de efficacia divini imperii, verissimum est, semper tamen supponitur divinum imperium, cum sit prudentissimum non cadere nisi in rem possibilem: & consequenter, vel supponere, vel conferre creaturæ potentiam præstandi id, quod imperatur, ita ut, si imperium sit de recipiendo, supponat in creatura capacitatem passivam: si vero sit de agendo, supponat virtutem aliquam agendi, & quod deest, suppleat, vel de novo det illam: nam in altero istorum ejus efficacia consistit. Unde si in consequente, quod in illo argumento inferitur, sermo esset de constitutione in actu primo, coadjuvando, vel elevando potentiam inchoatam & imperfectam, optima esset illatio, & sic totum argumentum recte concluderet, affirmandum esse potius, quam negandum potentiam activam obedientialem instrumentorum Dei, ut ea supposita possint in illo modo in actu primo constitui per divinum imperium efficax: sine illa vero est impossibilis talis modus constitutionis in actu primo, ut ostensum est.

Ad 3. Tertium argumentum nullius est momenti: nam actio simplex potest a duplici virtute pendere, ut a virtute causæ secundæ & primæ. Et, quamvis actio simplex ut sic, ex se non requirat duplicem virtutem in agente, tamen, ut possit procedere a duobus propriis & per se, ex parte illorum requirit in utroque virtutem: & ita requirit duas virtutes, vel totales diversorum ordinum, ut, verbi gratia, causæ primæ & secundæ, vel partiales ejusdem ordinis, ut in duabus causis proximis simul concurrentibus: vel principalem, & instrumentalem, ut in præsentem. Quod autem dicitur virtutem principalis agentis communicari instrumento, verba tantum sunt sine re ad præsentem materiam applicatas: quia virtus divina non communicatur his instrumentis per aliquam participationem, quæ a tali virtute in ea derivetur, neque per se ipsam potest formaliter communicari, ut satis probatum est.

Ad 4. In quarto argumento æquivoca esse potest illa propositio assumpta: instrumentum non agit in virtute propria, sed principalis agentis: si enim sit sensus instrumentum non habere virtutem per se sufficientem ad effectum, neque in genere causæ proximæ, neque etiam in genere causæ primæ; ideoque non posse influere in effectum principalis agentis, nisi ab eo specialiter motum & adjuvatum, ut virtute sua suppleat improportionem, & insufficienciam instrumenti, sic est verissima illa propositio, quæ in hoc sensu communissima est, præsertim in instrumentis, quæ philosophi conjuncta vocant: tamen in hoc sensu nihil ad intentionem argumentis conducit: quia hoc modo omnes fatemur hæc instrumenta divina non agere in virtute propria, sed Dei. Alius sensus esse potest, magisque conformis intentioni arguentis, instrumentum non agere per virtutem aliquam, quam in se intrinsece habeat, sed per solutum virtutem extrinsecam principalis agentis: & hic sensus est plane falsus, & repugnat principiis positis, & ab omnibus admissis: quia non potest instrumentum agere, nisi in suo ordine prius sit constitutum in actu primo: constituitur autem in actu primo per

virtutem agendi, non extrinsecam, quæ illius non est, sed intrinsecam, quæ sit in ipso, vel potius sit idem, quod ipsum: unde, si aliqua hujusmodi virtus in eo non supponatur, impossibile est, quod per aliquam immediatam conjunctionem ad virtutem principalis agentis in actu primo constituitur, ut satis demonstratum est.

Ad 5. Ad quintum eadem fere est responsio: illa enim propositio, causa inferior perficitur in ratione causæ ex conjunctione, & subordinatione ad superiorem absque superaddita entitate, potest quidem habere verum sensum, si in causa inferiori supponatur aliquid, quo possit esse causa, seu (quod idem est) quo habeat aliquam vim causandi, quamvis imperfectam, quæ perfici dicitur per conjunctionem ad superiorem, non formaliter & in se, sed cooperative, ut sic dicam, & in ordine ad actionem, & hic sensus satis indicatur in ipsis nominibus causæ inferioris & superioris. Quod autem sit causa inferior, nihil in se habens, quo possit esse causa, repugnans est: rursus quod, nihil novum recipiens, perficiatur in ratione causæ per conjunctionem, nescio quam, ad superiorem contradictionem apertam involvit: quia, si nihil in se habet, quo causare possit, quomodo causa inferior appellatur, antequam superiori jungatur, ut per eam conjunctionem perficiatur in ratione causæ? Aut, si ante conjunctionem nullo modo est causa, etiam in actu primo remoto vel obedientiali, quomodo conjungi dicitur superiori causæ, ut perficiatur, & non potius, ut in esse causæ constituitur? aut quomodo id, quod ex se nullo modo est causa, per conjunctionem ad superiorem simul constituitur formaliter in actu primo in ratione causæ imperfectæ, & perficitur in completa ratione causæ? Adde, quod illa conjunctio, nulla supposita activitate ex parte causæ imperfectæ, intelligibilis non est.

In sexto argumento, & in primo ejus exemplo, duo continentur falsa: primum est, lumen, quo illuminantur colores, non inhærere in ipso corpore affecto colore quoad extrinsecam superficiem ejus: nulla enim philosophica ratione id negatur, cum tamen ipsa fere experientia contrarium suadere videatur. Sed sit hoc erratum tolerabile, seu utcumque probabile, illud certe intolerabile est, quod existiment, colores nullam habere virtutem activam propriarum specierum sensibilium, sed totam esse in lumine, quo illuminantur, sive extrinsece, sive intrinsece: est enim hoc contra omnium philosophorum sententiam, quia lumen non habet vim efficiendi speciem repræsentativam albedinis, sed ab ipsa albedine principaliter determinatur talis actio ad efficiendam talem speciem. Quod ergo colores non illuminati dicuntur visibiles tantum in potentia, non est, quia ex se non habeant aliquam virtutem activam specierum, sed quia illa uti non possunt, nisi illuminentur. Unde fortasse est incompleta illa virtus, & a lumine in sua actione juvatur, sine aliqua tamen vi activa coloris non posset intelligi illa actio: unde hoc exemplum potius confirmat sententiam nostram.

Secundum exemplum de phantasmate supponit sententiam incertam, quod phantasma sit proprium instrumentum ad producendam speciem: illa vero supposita, necessario dicendum est, phantasma ex natura sua habere aliquam vim activam illius speciei, esse tamen insufficientem & improportionatam: & ideo indigere confortio superioris virtutis, ut possit efficere: & hoc modo potest aliquo modo intelligi, quod constituitur in actu primo ad agendum per conjunctionem ad intellectum agentem, etiam si nihil sibi inhærens recipiat, modo in superioribus explicato: si autem phantasma, neque ex se habet activitatem ullam, neque aliquid recipit ab intellectu agente, intelligi non potest, vel explicari, quomodo elevetur, aut quæ sit illa conjunctio cum intellectu agente, per quam elevari dicitur: hoc ergo exemplum etiam confirmat intentionem nostram.

Tertium exemplum de motu cæli rem falsam, ut existimo, assumit; non est enim instrumentum ad agendum motus cæli, nec per illum intelligentia aliquid influit: sed, si fortasse habet aliquam influentiam, mediante cælo, necesse est, ut in ipso cælo sit aliqua virtus activa & instrumentalis respectu intelligentiæ, sive illa sit per motum, aut cum motu impressa, sive innata, pendens tamen in actione sua a motu intelligentiæ.

Ad quartum dicendum est, calorem eo modo, quo est instru-

Ad 5.

Ad 7. arg. &amp; 1. exemplum.

2. Exemplum.

3. Exemplum.

Quartum.



instrumentum, habere ex se aliquam activitatem innatam, & intrinsecam, ut conjunctus variis formis possit varios effectus producere: & sine hac activitate connaturali impossibile est intelligere calorem esse aptum, & connaturale instrumentum ad varios effectus, prout variis & distinctis formis conjungitur.

Tandem idem convincit quintum exemplum de intellectu & voluntate, non solum prout elevari possunt ad supernaturales actus efficiendos cum solo speciali concursu Dei absque habitu, vel qualitate superaddita per modum actus primi, ut probabilius esse existimo, sed etiam, ut elevantur ad eosdem actus connaturaliter efficiendos per habitus infusos, quia in priori modo elevationis procedunt rationes hactenus factæ, in posteriori autem modo procedit specialis ratio horum actuum. Nam dictæ potentia elevantur ad efficiendos illos actus vitali modo, ita ut in eorum effectum vitaliter influant, & consequenter per eos vitaliter informantur: ad hunc autem modum agendi non satis est elevatio ad agendum denominative tantum, neque per subordinationem extrinsecam, quia illud revera non esset agere, ut sæpe dictum, & variis modis probatum est; neque intrinsece per formam inherenter, quæ sit totale principium agendi, quia hoc non satis est ad actionem vitalem, cum potentia, in qua inest talis forma, tantum concurrat, sustentando formam, & recipiendo actionem, quæ ab illa procedit.

Obiectio.

Dices, hinc sequi, esse in his potentiis partialem virtutem activam horum actuum supernaturalium naturaliter ipsis congenitam: consequens autem (ut dicunt quidam) non est tutum: quia non parum in hoc favetur errori Pelagii, cum aliquid tribuatur naturæ secundum se, respectu supernaturalium actuum: ergo. Respondetur, si sit sermo de partiali virtute activa absolute & simpliciter, abstrahendo ab hoc, quod illa virtus dicatur naturalis, vel obedientialis, principalis, vel instrumentalis, omnino dicendum est, quod in his potentiis ex præcisa natura sua consideratis sit aliqua vis activa imperfecta, & inchoata ad efficiendos hos actus supernaturales; hoc autem non solum nihil habet periculi, aut doctrinæ minus tutæ, verum etiam parum erit tutum, parumque consentaneum principiis fidei id negare: quia, sicut est de fide certum, has potentias solis naturæ viribus cum concursu generali non posse elicere hos actus, ita etiam est de fide certum cum supernaturali auxilio (quicquid illud sit) posse illos efficere: & consequenter est etiam certum has potentias ita esse ex natura sua institutas, ac conditas, ut naturæ sint elevari per divinam gratiam ad hos actus efficiendos. Ex hoc autem principio, adjuncto alio fere evidenti naturaliter, scilicet, actus vitales saltem ex natura sua postulare, ut active fiant a potentia vitali, non denominative tantum, sed emanative (ut sic dicam) vere ac per se profluendo ab ipsa, plane concluditur has potentias ex natura sua posse elevari ad hos actus hoc modo connaturaliter efficiendos: unde sicut non est tutum negare conclusionem Theologicam, quæ ex uno principio de fide, & alio naturali sequitur, ita non potest tuto negari esse in nostris potentiis secundum se hanc aliqualem activitatem inchoatam, quæcumque illa sit.

Unde, quod August. dixit 1. de Prædest. Sanct. cap. 5. *Possesse habere fidem, natura est hominum, habere autem, gratia est fidelium*, non solum est verum ratione potentia receptivæ, sed etiam ratione hujus potentia activæ, saltem inchoatæ & imperfectæ: quia fides (sermo est de actuali) haberi non potest recipiendo tantum, sed coagendo, & cooperando gratiæ excitanti, & adjuvanti. Fundamentum autem hujus cooperationis necessario esse debet in ipsa natura: quia non potest totum ab extrinseco provenire, illud autem fundamentum nihil aliud est, quam activitas aliqua, cum non sit sola receptiva potentia. Denique hoc multo certius apparet in his actibus supernaturalibus, quando libere fiunt: quia, quod sint nobis liberi, non habent formaliter & præcise ex eo, quod sint a Deo, quia ut sic non comparantur ad nos active, sed passive: liberum autem, ut liberum, non est in recipiendo, sed in agendo, ut non obscure significavit Concil. Trident. sess. 6. can. 4. & latius traditur in prima secundæ, neque etiam hi actus formaliter habent, quod sint liberi, ex eo quod ab habitibus procedunt: quia neque ipse habitus est liber, nisi in quantum potentia illo uti potest, cum vult: ergo hi actus habent, quod sint liberi ex influxu libero ipsius po-

tentia: necesse est ergo, ut potentia non solum per habitum, sed etiam per se ipsam influat in hos actus: non potest autem per se influere, nisi ex se in entitate sua habeat aliquam vim activam ad tales actus: nam si illam ex se non haberet, non posset ei intrinsece & intime addi, sed solum posset adjungi activitas, quæ est in habitu, vel forma superaddita, vel in aliquo extrinseco cooperante, quod non est sufficiens, ut ostensum est. Et propterea recte dixit August. libro de Spiritu & litera, *liberum arbitrium naturaliter attributum a creatore animæ rationali esse vim mediam, quæ vel intendi ad fidem, vel inclinari ad infidelitatem potest*. Et de hac possibilitate loquitur in lib. 1. de gratia Christi cap. 50. cum ait naturalem possibilitatem peccato esse vitiatam; ideoque inermem ac infirmam ab Ambrosio vocari: non enim possibilitas passiva infirmata est per peccatum; eadem enim semper manet, sed activa eatenus infirmata est, quatenus destituta est consortio iustitiæ, & habitum gratiæ. Denique ad salvandam vitam & libertatem in actibus supernaturalibus, necessariam existimarunt hanc activitatem Driedo de conc. lib. arbitrii, & præd. cap. 3. Ruard. art. 7. Bellarminus lib. de gratia & liber. arbitrii. cap. 15. qui etiam videndus est lib. 3. cap. 10. Non ergo per hanc vim activam inchoatam & imperfectam nostrarum potentialium ad actus supernaturales favemus errori Pelagii, sed fugimus errorem Lutheri: Pelagius enim non ideo damnatus est, quia vim aliquam activam imperfectam nostræ naturæ attribuit, sed quia totam vim propriam & principalem in ea posuit: neque Concilia, quando illum damnant, negant nostris facultatibus naturalibus omnem vim ad hos actus, sed aliqualem potius supponunt, dum ajunt Deum nos adjuvare, & facere, ut faciamus, & nos libere consentire gratiæ vocanti cum adjuvantis auxilio, & alia similia, quæ sine aliqua vi activa, intrinseca, & innata ipsis potentiis, neque intelligi possunt. An vero hæc vis activa dicenda sit naturalis vel obedientialis, principalis vel instrumentalis, id est, in Theologorum disputatione positum, quæ non est hujus loci propria, de illa tamen infra non nihil attingemus, hoc ergo exemplum tantum abest, ut nostram sententiam impugnet, ut potius ad illam confirmandam plurimum conferat.

*Necessitas potentia obedientialis activa ex dictis concluditur.*

Quæ hactenus diximus, manifeste, ut opinor, demonstrant impossibile esse elevationem creaturæ, ut sit verum ac proprium instrumentum physicum, per se, realiter, ac immediate influens in effectum Dei principalis agentis, non per qualitatem, aut novam entitatem illi inditam, sed per entitatem suam, ut substantem divinæ voluntati, & specialissimo concursu impossibilem (inquam) esse hunc elevationis modum, nisi in entitate creaturæ, quæ hoc modo elevanda est, supponatur aliqua activitas in ordine ad talem actionem. Quæ activitas secundum se considerata, priusquam talis res a Deo elevetur, assumatur, vel assignetur in instrumentum, ita ut paratum habeat proportionatum concursum, & remota, & fundamentalis, & obedientialis a nobis vocatur propter rationes præcedent. sectione assignatas, quas in solutionibus argumentorum magis declarabimus. Igitur, quod hæc vis activa necessaria sit, contra prædictos auctores concluditur. Primo a sufficienti partium enumeratione, quia ostensum est sine hac activitate impossibile esse elevationem per solam cooperationem divinæ virtutis extrinsecæ ipsi instrumento, & principaliter operantis cum illo, & per illud: sed ipsi admittunt hunc modum elevationis Deo esse possibilem: ergo necesse est, ut etiam admittant hanc activitatem in entitate elevandæ. Secundo, quia necesse est terminum actionis (ut ipsi etiam dicunt) præhaberi aliquo modo in principio actionis tam principali, quam instrumentali, modo scilicet accommodato ipsi principio, id est, formaliter, aut virtualiter, vel instrumentaliter, quia nemo dat, quod non habet aliquo modo: sed non potest illa res, quæ in instrumentum assumitur, præhabere seu continere terminum actionis per entitatem omnino a se distinctam, quam in se nullo modo recipit, quia, si illam in se non habet, quomodo per illam dicetur habere aliud: ergo necesse est, ut per suammet entitatem præhabeat illum terminum, virtute saltem remota, & obedientiali. Tertio, quia res, non existens, neque habens entitatem actualem, non potest elevari, ut sit instrumentum, ut

conce-

Quarum de concursu intellectus & voluntatis ad actus supernaturales.

Respon. In potentiis animæ aliqua est vis ad supernaturales actus.



concedunt aliqui ex dictis auctoribus, & in sequentibus sectionibus demonstrabitur: sed hujus non potest alia ratio reddi, nisi quia oportet, ut instrumentum hujusmodi per suam entitatem influat in effectum, & ut ipsamet entitas instrumenti concurrat aliquo modo ad constituendum, & complendum principium activum per se talis effectus: ergo totum hoc necessarium est in hujusmodi instrumentis: non potest autem hoc intelligi sine aliqua vi activa intrinseca ipsi instrumento, quæ cum non sit superaddita, oportet, ut sit innata; & hanc nos vocamus obedientialem.

Hæ tamen rationes omnes solum procedunt contra eos, qui admittunt possibilem esse illam elevationem creaturæ ad operandum ut instrumentum physicum Dei respectu gratiæ, vel aliorum effectuum omnino supernaturalium. Vereor tamen, ne aliquis, conjungens has nostras rationes cum rationibus in principio factis contra hanc potentiam obedientialem, inde potius concludat hanc elevationem esse impossibilem, in hunc modum concludendum. Intelligi non potest talis elevatio sine prædicta obedientiali potentia activa: sed non videtur posse etiam intelligi, qui talis potentia activa obedientialis sit in rebus propter rationes superius factas: erit ergo talis elevatio impossibilis. Propter hanc ergo causam oportet, non solum ex principio ab aliis concessio, sed absolute & simpliciter declarare hanc potentiam non esse impossibilem: hoc autem præcipue fiet solvendo rationes omnes in principio adductas: nam si in hujusmodi elevatione & activitate nulla invenitur repugnantia, & contradictio, quam humana mens non dissolvat, non est, cur negetur hujusmodi potentia in creatura.

Prima ratio ex non repugantia talis potentia,

Unde formatur prima ratio, quia ad omnipotentiam Dei pertinet, ut possit uti creatura sua ad omnem effectum, & secundum omnem modum, & rationem non involvunt contradictionem: ergo, si in hoc genere elevationis non involvitur repugnantia, ad omnipotentiam Dei pertinet, ut possit uti creatura ut instrumento ad omnem supernaturalem actionem, in qua talis repugnantia vel contradictio inventa non fuerit: ergo & e converso ad debitam subordinationem seu subjectionem creaturæ ad Deum spectat, ut in se habeat fundamentum sufficiens, per quod possit obedire Deo ad hujusmodi instrumentalem usum. Major ex terminis videtur per se nota, quia ad omnipotentiam Dei spectat, ut se extendat ad omne possibile, & ad omnem modum operandi possibilem, & non implicantem contradictionem: ergo, si hic modus operandi per creaturam, ut per instrumentum, non involvit contradictionem, sub omnipotentia Dei continetur. Et confirmatur, quia si Deus non potest nunc uti sua creatura hoc modo, vel est, quia non potuit illam talem concedere, ut sibi ad hunc usum posset deservire, vel quia noluit. Neutrum dici potest: ergo. Prior pars minoris probatur, quia est implicatio in terminis dicere ex parte objecti seu creaturæ non involvi repugnantiam in hoc, quod constituitur apta & subiecta ad hunc usum; & tamen quod Deus non potuerit illam talem concedere: quia id provenire non posset, nisi ex imperfectione & limitatione potentia Dei. Quod autem in illo objecto non involvatur repugnantia, constabit, ut dixi, solvendo difficultates omnes, & per se videtur maxime verisimile, & consentaneum divinæ omnipotentia, quod potuerit creaturam condere subiectam, seu subicibilem quoad hunc usum operandi per illam, etiam ea, quæ sunt ultra naturales vires creaturæ, in quibus aliunde specialis repugnantia non involvatur. Altera vero pars minoris, scilicet creaturam non carere hac facultate, quia Deus noluerit talem illam condere, quamvis potuerit, facillime suaderi potest: nam in primis nullo verisimili fundamento negari potest Deum noluisse hoc efficere; nam cum potuerit id velle, unde constat novisse? Deinde convinci etiam potest hoc ipso, quod voluit Deus creaturam condere, necessario voluisse cum prædicta subiectione illam constituere: tum quia non potuit Deus creaturam condere, quin habeat perfectissimum ac supremum illius dominium, & consequenter potestatem utendi illa in omnem usum non repugnantem; tum etiam quia, ut infra ostendamus, illa potentia seu facultas, quæ ex parte creaturæ supponitur, ut possit Deus illa uti prædicto modo, est in ipsa omnino indistincta ab entitate creaturæ; & ideo est inseparabilis ab illa: non ergo potuit Deus velle crea-

re illam entitatem, quin etiam voluerit creare illam cum dicta facultate & subiectione. Quod si potuisset Deus aliquam entitatem creare, & non dare illi prædictam facultatem & subiectionem, impossibile esset eandem entitatem condere cum tali facultate & subiectione, quia vel non esset eadem entitas, sed alia, vel habens aliam adjunctam; vel, si esset eadem, eandem, quantum in se est, haberet, vel non haberet facultatem agendi: quia idem manens idem, semper est natum facere idem. Quod si entitati creatæ, ut sic non repugnat condi cum hac facultate, de nulla entitate creata affirmari potest hoc ei repugnare, nisi vel in aliqua peculiari actione, vel in aliqua entitate specialis aliqua ratio repugnantia ostendatur; quod, an interdum contingat, ad præsentem institutum non refert; aliquid tamen attingemus in solutionibus argumentorum.

Dicunt vero aliqui, hoc discursu solum ostendi, esse in creatura potentiam obedientialem, ut elevari possit in instrumentum: non tamen probari illam potentiam esse activam, sed passivam obedientialem: quia proxieme non est ad efficiendum, sed ad hoc, ut creatura possit elevari a Deo. Sed hæc responsio in superius dictis impugnata est: nam propter solam verborum figuram, seu similitudinem, hujusmodi potentia, non ut activa, sed ut passiva, concipitur: quamvis autem *elevari* passive significetur, non tamen illo verbo significatur propria receptio alicujus actionis, seu passionis vel formæ, ad quam potentia obedientialis passiva sit necessaria, sed significatur denominatio quædam proveniens ex consortio plurium agentium, & subordinatione unius ad aliud, quomodo causa secunda dici potest juvari a prima in agendo, & natura sua esse apta, ut ita juvetur, quæ aptitudo non fundatur in potentia passiva, sed in activa potius inferioris ordinis. Sic ergo in præsentem (servata proportionem) creatura est apta, ut elevetur a Deo in instrumentum, non per potentiam passivam, cum in ea elevatione nihil receptura sit, sed per activam inchoatam & imperfectam ac obedientialem, cum ad agendum elevanda sit, & sine illa vi activa illa elevatio omnino repugnet, ut ostensum est.

Secunda ratio seu conjectura sumi potest ex potentia obedientiali passiva, quam Theologi ponunt in creatura ad recipiendas formas supernaturales & præternaturales, ut ad gratiam, unionem hypostaticam, visionem beatificam, & similes: cujus meminit sæpe D. Thom. præsertim in 1. d. 42. q. 2. artic. 2. ad 4. ubi dicit Deum indidisse materiæ primæ duplices rationes, scilicet, causales & obedientiales, per quas omnes res nate sunt obedire Deo. Idem repetit in 2. d. 18. q. 1. art. 2. & in 3. d. 2. q. 1. art. 1. & q. 8. de verit. art. 4. ad 13. & idem indicat 1. p. q. 15. art. 2. & 4. & hac 3. p. q. 1. art. 3. ad 3. & q. 1. art. 1. Et eandem potentiam passivam obedientialem agnoscunt omnes ejus discipuli. Capreol. & Hispa. q. 1. prolog. Palud. & idem Capreol. in 4. d. 1. q. 1. Cajetan. 1. p. q. 1. art. 1. & tom. 3. opus. tract. 3. q. 2. & Ferr. 1. cont. Gent. cap. 5. & 3. cont. Gent. cap. 156. ergo similiter non repugnat esse creaturis potentiam activam obedientialem. Hæc congruentia videtur plane esse D. Thom. q. 6. de potentia art. 4. ubi, cum adduxisset sententiam Gregor. 2. Dialog. cap. 30. & 31. dicentis, creaturas cooperari Deo in actionibus miraculosis potestative, hac ratione hoc ipsum ex eodem confirmat. *Quia, si hominibus data est (inquit) potestas filios Dei fieri, non est mirum, si ex potestate mira facere possint.* Deinde eadem consequentia probatur: primo, quia, si aliquæ rationes sunt contra potentiam activam obedientialem, eandem difficultatem ingerunt contra passivam, & eisdem modis in utraque solvendæ sunt, ut patebit in solutionibus argumentorum. Secundo, quia non minus pertinet ad omnipotentiam Dei, quod creaturæ illi obediant in agendo, quam in recipiendo, sicut autem non possunt illi obedire in recipiendo, nisi habeant potentiam passivam; ita neque in agendo, nisi habeant activam, cum denuo illam non recipiant, ut supponimus: quale enim est imperium seu actus, qui imperatur, talis esse debet potentia in eo, cui imperium imponitur.

Tandem probatur consequentia, quia ex parte ipsarum potentialium non est major repugnantia, ob quam potentia passiva possit extendi extra naturæ terminos, & activa non possit: imo quodammodo videtur esse minor repugnantia in activa, quia actio, quæ ab illa fluit, minus intrinseca illi est, quam susceptio potentia passiva, quæ

Secunda ratio ex potentia obedientiali passiva.

Obiectio. intra



intra illam recipitur. Respondent aliqui, negando primam consequentiam huius rationis, & omnes probationes ejus: quia de intrinseca ratione potentia obedientialis est, quod sit intrinsece passiva: sic enim ab omnibus definiri solet, quod sit aptitudo ad recipiendum aliquid ab eo, cui præter, vel supra naturam res obedire potest, ut sumi potest ex D. Th. cit. loc. & ex ipsa voce obedientialis potentia videtur colligi: quia, sicut imperare est agere aut movere, ita potentia obediendi ut sic est potentia passiva: proxime enim, & ut talis est, tantum respicit directionem, vel imperium alterius, ad quod non comparatur ut principium agendi, sed recipiendi directionem seu imperium. Sed hæc obiectio nullius momenti est; nam, quod attinet ad definitionem illam potentia obedientialis, ut illis verbis significatur, non est universalis, sed limitata ad potentiam receptivam, potest autem similis proportionaliter dari de potentia activa; vel si abstracte definiatur, non per aptitudinem recipiendi, sed per abstractiora verba describenda esset, ut, verbi gratia, quod sit principium actus, &c. quia nomen principii abstrahit a potentia activa & passiva, & similiter nomen actus ab actione & receptione.

Quod vero spectat ad rationem factam, tota consistit in solis verbis, vel proprie interpretando, quæ metaphorica sunt, vel ex sola specie locutionis passivæ inferendo veram passivam potentiam. Utrumque declaratur: nam hæc vox potentia obedientialis attributa rebus inanimatis aliquid metaphoræ involvit: nam hæc res non ita possunt obedire, ut alterius imperium prius percipiant, & deinde exequantur; quomodo potentia obediendi videtur includere potentiam aliquid recipiendi, saltem notitiam imperii superioris: res autem inanimatae non cum hac proprietate obedire dicuntur, sed metaphorice, quia ad nutum divinæ voluntatis, vel recipiunt, vel agunt, quod Deus vult. Atque hinc fit, ut, licet creatura dicatur obedire Deo, vel subordinari illi in agendo, vel dirigi ab eo, & similia, quæ passive significantur, nihilominus his verbis non indicetur aliqua vera passio, & consequenter nec potentia passiva creaturæ, sed solum vel dependentia, quam a Deo habet in agendo, vel concomitantia necessaria, & subordinatio quædam inter actionem ejus, & divinam voluntatem, ut, hac posita, statim illa ponatur. Quo tandem fit, ut, licet potentia dicatur obedientialis, quasi per metaphoram, ut dixi, & per denominationem extrinsecam, ut per eam explicetur, & modus operandi talis potentia, & qualis sit actus ejus, nihilominus sit verum principium, vel agendi, vel recipiendi. Ex illa ergo denominatione *obedientialis* colligi non potest potentiam obedientialem ut sic limitatam esse ad rationem potentia passivæ. Exemplo declarari potest, nam potentia motiva, quæ est in membris corporis humani, quatenus subordinatur appetitui, aut voluntati, & præsertim quatenus per artem dirigi potest, sine inconveniente dici potest potentia obedientialis, quia, quantum est ex se, operatur ad nutum voluntatis humanæ, & ita nata est ab ea moveri, dirigi, &c. & nihilominus (juxta veriore sententiam) illa potentia physice & realiter est tantum activa, quamvis natura, & modus operandi ejus, per illam denominationem quasi passivam explicari possit.

**Obiectio.** At vero dicunt alii potentiam obedientialem passivam non esse veram potentiam realem, sed solum non repugnantiam ad effectus miraculosos; & ideo non posse dari potentiam activam obedientialem, quæ reale esse debet, verumque principium agendi. Sed hoc non recte dictum est, potentia enim passiva obedientialis formaliter & in se non est sola non repugnantia, quod verisimilius dici posset de potentia, quam vocant obiectivam, quam intelliguntur habere res, quæ creari possunt, antequam fiant: quia, licet actu nihil sint, esse tamen ac fieri, eis non repugnat: in qua non repugnantia non intelligitur potentia aliqua passiva ex parte ipsarum rerum: quia illa non repugnantia solum est quædam negatio, potentia autem passiva intrinsece includit positivam entitatem cum positiva & reali capacitate alicujus actus. Potentia ergo obedientialis passiva non potest esse sola non repugnantia, sed necessario esse debet positiva & realis potentia, ut patet in potentia obedientiali animæ ad recipiendam gratiam: nam, sicut positive & realiter illam in se recipit, ita in illa præintelligitur potentia & realis

capacitas ejus: nam actus positivus & realis supponit potentiam positivam & realem proportionatam. Item, quia anima ratione illius potentia habet causalitatem physicam & realem in genere causæ materialis respectu ipsius gratiæ, quam sustentat in fieri & in esse respectu compositi: nam ex anima & gratia vere componitur unum compositum physicum tamquam ex actu & potentia reali physica positiva, quæ non est nisi passiva obedientialis: hæc ergo potentia non tantum est non repugnantia, sed est positiva ac realis potentia; illa vero non repugnantia verius ac proprius assignatur ex parte obiecti talis potentia: est enim ad actum non repugnantem, quamvis præter & supra naturam sit: recte igitur ex hujusmodi potentia colligimus posse dari simile genus potentia intra latitudinem potentia activæ.

Tertia ratio (quæ est nova confirmatio illationis factæ in ratione præcedente) sumitur ex actibus vitalibus supernaturalibus, quos anima nostra, & per intellectum, & per voluntatem, efficit. Sunt enim hi actus secundum fidem supernaturales; & juxta veriore, magisque hoc tempore receptam sententiam, in substantia, specie, & entitate sua supernaturales sunt. Rursus negari non potest, quin hi actus effectives fiant a nobis potentiis, ut plane definit Concil. Trident. sess. 6. can. 4. quod necessario intelligendum est de his actibus, etiam quatenus supernaturales sunt; tum quia Concilium plane loquitur de supernaturali actu ut sic, loquitur enim de hoc actu, quatenus per illum homo se ad justificationem disponit, ac præparat; tum etiam, quia, si tota entitas actus essentialiter supernaturalis est, non potest entitas actus fieri a potentia, quin secundum suam supernaturalitatem ab eadem potentia fiat. Imo, quamvis non tota substantia actus esset supernaturalis, dummodo supernaturalitas non ponatur in sola denominatione extrinseca ab aliquo influxu Dei, vel alicujus habitus (quod absurdissimum est) necesse est modum illum, quo actus supernaturalis dicitur, quidquid ille sit, esse elicitive a potentia, cujus est actus: quia secundum illam rationem & modum vitalis est, & liber esse potest, ipsamque potentiam vitaliter informat. Ad hos ergo effectus necessaria est in his potentiis aliqua vis activa, quæ ad agendum extra naturæ limites extendatur ex motione seu auxilio Dei supernaturali: ergo datur in his viribus animæ potentia obedientialis activa respectu horum actuum: ergo eadem ratione dari potest in aliis rebus.

Prima consequentia declaratur ex his, quæ paulo ante diximus, quia hi actus non possunt manare effective a sola qualitate superaddita, tanquam a proximo & formali principio agendi ex parte ipsius animæ, sicut nonnulli putant visionem beatam esse activæ a solo lumine gloriæ, & actus fidei, spei, & charitatis a solis suis habitibus: ostendimus enim paulo ante hoc repugnare his actibus, hoc ipso quod vitales sunt, multoque evidentius quod liberi sunt. Necesse est ergo, quod ipsæmet potentia animæ per suas entitates influant in hos actus; & e contrario, quod ipsæmet actus, etiam quatenus supernaturales sunt, pendeant immediate a potentiis, etiam si simul pendeant ab habitu, vel auxilio. Loquor autem in tota hac ratione de actibus, quatenus supernaturales sunt specificative, & designando totam rationem formalem, quæ sit, & abstraho nunc a ratione formali, sub qua, & ab alio modo loquendi, in quo per quam rationem accommodationem solet effectus secundum unam rationem tribui uni causæ, & secundum aliam alteri: quomodo dicunt aliqui actum supernaturalem, ut actum vitalem vel liberum, esse a potentia, ut supernaturalem vero, ab habitu vel auxilio: hoc enim nihil ad præsens refert, dummodo constet totam supernaturalem entitatem actus, prout in re est, physice & effective manare immediate a potentiis animæ, & a propriis entitatibus earum: nam hoc satis est ad concludendum esse in his potentiis virtutem aliquam activam respectu horum actuum, quæ esse non potest superaddita, sed esse debet omnino intrinseca & innata, quia hæc vis activa distincta est ab illa, quæ datur per qualitatem superadditam.

Dicunt vero aliqui hanc vim activam in his potentiis non esse obedientialem, sed naturalem, imo aliqui volunt esse virtutem principalem, quamvis non integram. Sed de hoc modo loquendi dicam statim, & ostendam, verius dici obedientialem. Nunc illud argumentum nobis

Tertia ratio ex vi activa potentiarum animæ ad actus supernaturales.



bis sufficiat, quod potentia activa & passiva, teste Aristotele, proportionem inter se servant, sed potentia receptiva, quam anima habet ad hos actus, etiam si innata sit, non naturalis, sed obedientialis dicitur: ergo idem dicendum est de virtute activa. Denique quomodocumque vocetur; hinc saltem concludimus dari in aliis rebus similem vim activam innatam ad cooperandum Deo imperanti & inveniendi in supernaturalibus actionibus & effectibus. Probatur hæc ultima consequentia, quia non est major repugnantia in aliis rebus, quam sit in his, imo quodammodo major poterat esse repugnantia in his actibus, quia vitales sunt, & majorem quandam dependentiam habere videntur ab intrinseco & connaturali principio. Atque hinc confirmatur hæc ratio cum præcedente: nam propria obedientialis potentia primum omnium, ac præcipue veluti experimento cognita est a Theologis in animabus nostris, quatenus capaces sunt actuum & habituum supernaturalium, de aliis autem rebus vix potest certo aliquo effectu constare esse in eis potentiam ad recipiendum aliquam formam supernaturalem, quamvis constet multa in eis fieri posse supernaturali modo; quamvis de humanitate constet ex fide habere capacitatem obedientialem ad modum unionis hypostaticæ cum divina persona. Ex hac vero capacitate obedientiali, quam ex effectibus certis colligimus in quibusdam rebus, inferimus dari similem seu proportionalem in aliis rebus ad eos effectus, in quibus specialis repugnantia vel implicatio contradictionis inventa non fuerit: ergo simili modo recte argumentamur ex effectibus, quos in nobis & a nobis esse recta fide credimus, ad alios, qui per alias creaturas fiunt, aut fieri possunt. Eo vel maxime, quod hi effectus non sunt inusitati Deo, per alias creaturas operanti.

Quarta  
ratio ab  
exemplis.

Quarto non videtur contemnenda conjectura, quam præcedente sect. afferebamus ex naturalibus exemplis, nam calor natura sua esse dicitur instrumentum subordinatum respectu diversorum agentium in ordine ad effectus se ipso perfectiores, & ut sic dicitur habere aliquam vim activam instrumentariam & connaturalem respectu illorum: quid ergo mirum, quod creatura respectu sui creatoris possit habere vim instrumentariam obedientialem? Et augeri potest hæc conjectura ex instrumentis artium; sicut enim materia naturalis est in quadam potentia obedientiali respectu humanæ facultatis & ingenii ad recipiendas formas artis; ita in ratione instrumenti subijcitur eidem arti ad efficienda mira opera, quæ vim naturalem talium instrumentorum excedere videntur: ergo credibile est posse Deum altiori modo uti sua creatura ut instrumento ad supernaturalia opera divinæ artis & omnipotentia, ac consequenter, quod in eisdem rebus creatis supponatur aliqua vis activa, qua possint Deo sic operanti cooperando obedire.

Quinta  
ratio ex  
illimitatione  
divinæ  
potentia.

Quinto non videtur rejicienda ratio in superioribus tacta, quia sine hac virtute activa intelligi non potest, quod creatura eleveatur ad faciendum aliquid ultra id, quod naturaliter agere potest, ut satis videtur in superioribus demonstratum, & amplius ex solutionibus argumentorum constabit: difficillimum autem creditu est divinam potentiam esse in hoc genere operandi adeo limitatam. Et ad hoc conferunt illa exempla, quibus sect. præced. ostendi, in aliis rebus immutare Deum naturas, & elevare illas ad aliquid præter vel supernaturale, nihil eis addendo, sed eis sua voluntate utendo. Atque hic adduci possent omnia testimonia Scripturæ & Sanctorum, quibus hæc activitas instrumentorum Dei confirmari solet, ex quibus plura in præcedentibus sect. adducta sunt, & plura etiam afferam in 3. tom. tractando de activitate sacramentorum; & videri etiam possunt August. in Psal. 130. & in id Psal. 138. *Mirabilia opera tua, & anima mea cognosceat nimis*, Chrysost. hom. 1. in Acta, Ambros. ferm. 9. 1. & optime D. Thom. quæst. 6. de potentia art. 4. Et potest hoc confirmari, quia Sancti sæpe numero mirantur, quod Deus interdum operetur aliquos effectus, adhibendo res, vel nullius virtutis, vel etiam repugnantes, ut, quod illuminet cæcum, luto ungendo oculos ejus, quæ admiratio nulla certe esset, nisi hujusmodi res aliquid conferrent ad tales effectus: admiratio ergo est, quod in hujusmodi rebus sit vis ad obediendum Deo, efficiendo etiam oppositum ejus, quod earum natura postulare videbatur: imo in naturalibus existimant aliqui inter-

dum hoc accidere, ut quando aqua movetur sursum ad replendum vacuum, quod putant fieri activa vi obedientiali gravitatis ad imperium Dei, universalis naturæ gubernatoris.

Sexto possumus hanc sententiā auctoritate confirmare, & in primis affero August. 9. de Trinit. cap. 17. ubi cum dixisset, esse in rebus naturalibus virtutes agendi, juxta naturales leges, subdit, *Super hunc autem motum cursumque rerum naturalium, potestas creatoris habet apud se posse de his omnibus facere aliud, quam eorum quasi seminales rationes habent; & quamvis in his verbis videtur tantum loqui de potentia passiva, tamen mens Augustini aperte est indifferenter loqui de vi activa & passiva, de qua paulo superius dixerat, Elementa hujus mundi corporei habent definitam vim, qualitatēque suam, quid unumquodque valeat, vel non valeat, quid de quo fieri possit, vel non possit; in quibus verbis de utraque potentia loquitur: & infra de utraque ponit exempla, ut quod lignum aridum repente floreat, & fructum gignat, ut asina loquatur, &c.* Docet ergo aperte illo loco Augustinus posse Deum facere, ut creatura aliquid ultra virtutem naturalem operetur ex imperio & voluntate Dei, atque adeo per potentiam activam obedientialem, ut sæpe deductum est. Præter citatos etiam auctores in sect. præced. afferri potest Bonaven. in 4. d. 10. art. 3. q. 2. ad 2. ubi agens de virtute efficiente transubstantiationem, & miraculosam Christi conceptionem, significat ad utramque fuisse in creatura potentiam obedientialem, & quamvis videatur loqui de potentia ex parte materiæ, circa quam versatur utraque actio, tamen revera præcipue loquitur de virtute activa, quam concedit communicari creaturæ ad utramque actionem. Eandem sententiam significare videtur Cajetan. hic art. 2. ubi ait Deum efficere miracula per creaturam, non dando illi virtutem gratuitam, sed utendo illa instrumentaliter. *Qui usus (inquit) est vis activativa ipsius in esse instrumenti, ac per hoc in esse causæ effectivæ instrumentaliter operis miraculosi: reducitur enim res illa de potentia obedientiali ad actum, cum de non instrumento sit instrumentum, quod fieri constat ex hoc solo, quod Deus utitur illa instrumentaliter ad opus miraculosum*: hæc enim verba non possunt commode intelligi de potentia passiva obedientiali, cum ipse fateatur nullam virtutem supernaturalem addi creaturæ per hujusmodi usum: ergo nulla potentia passiva creaturæ reducitur in actum per talem usum: ergo id vere solum dici potuit de potentia activa.

*Solvuntur argumenta in principio posita.*

Superest respondeamus argumentis in principio posit. Ad primum jam fere responsum est in superioribus, falsum enim in eo assumitur, dum dicitur omnem potentiam obedientialem esse meram non repugnantiam, quam sententiam refert Capreolus ex Aureolo in 4. d. 42. q. 1. art. 2. & 3. in principio, eamque impugnat, ubi expresse docet potentiam obedientialem proprie passivam seu receptivam esse potentiam realem; & ad quintum dicit secundum rem non esse aliud ab essentia subiecti, sed tamen secundum rationem addere respectum ad potentiam Dei, & in hunc modum intelligendus est idem Capreolus in Prolog. q. 1. ad 1. cont. 6. concl. ubi inquit hanc potentiam obedientialem non esse nisi quandam relationem; intelligendum n. est, præter entitatem, rei non addere nisi relationem. Unde ibidem hanc potentiam interdum vocat naturalem, quia est congenita cum natura, eique intrinseca, proprie tamen ait non esse naturalem, sed obedientialem: quia naturalis potentia est (inquit) quædam inchoatio actus, & potest reduci in actum per agens naturale.

Ad argumentum ergo in forma respondetur potentiam obedientialem passivam esse positivam & realem, & habere in potestate actum, qui ex ea educi potest, in quo ex parte convenit cum potentia naturali; differt tamen, quia potentia naturalis est per se instituta & ordinata ad actum sibi proportionatum, & naturaliter debitum, vel saltem naturaliter possibilem virtute agentis naturalis: potentia autem obedientialis est ad actum non debitum, seu excedentem ordinem naturæ, quam potest recipere ex vi supernaturalis agentis, hoc ipso: quod aliunde non involvit repugnantiam, non quod ipsa potentia sit solum non repugnantia, sed quod talis entitas rei seu subiecti, comparata ad talem actum absque repugnantia

Sexta  
probatio  
ab aucto.  
Augustino.



gnantia recipiendi illum a tali agente, sufficiat ad rationem huiusmodi obedientialis potentia. Igitur ex hoc generali capite non excluditur potentia obedientialis a ratione potentia realis & positivæ; & per consequens nec excluditur hoc titulo a ratione potentia activæ.

*Circa secundum argumentum versatur quæstio, an hæc potentia naturalis sit, vel supernaturalis.*

In secundo argumento petitur, an hæc potentia naturalis vel supernaturalis dicenda sit. Quidam enim contendunt esse naturalem potentiam; alii vero omnino esse dicendam supernaturalem. Sed in primis quæstio hæc, & tota difficultas in illo argumento proposita, locum habet tam in potentia passiva, quam in activa; nam etiam de potentia passiva quæri potest, quomodo supernaturalis esse valeat, cum sit cum natura ipsa congenita: aut, si naturalis est, quomodo possit ad supernaturales effectus deservire: ergo vel neganda est etiam potentia obedientialis passiva, quod fieri nullo modo potest, vel quod de passiva dictum fuerit, dici etiam poterit de activa.

In utraque ergo locum habet eadem difficultas, quæ in hoc consistit, quod hæc potentia videtur quodammodo media inter naturalem & supernaturalem, unde in quantum est congenita naturæ, videtur esse naturalis. Item entitas illius naturalis est, cum nihil addat naturæ ipsius rei: nec possit unam entitatem simul esse naturalis & supernaturalem. Præterea hæc potentia fit in re naturali ex vi causalitatis naturalis, & ab agente naturali, concursu naturali operante, a quo nihil nisi naturale fieri potest. Præterea, vel hæc potentia est ex natura rei distincta ab entitate naturali rei, vel non: si non est distincta, quomodo esse potest magis supernaturalis, quam illa; si vero est distincta, erit ergo res vel modus supernaturalis talis naturæ: ergo natura secundum se considerata est in potentia passiva ad talem entitatem vel modum. Imo etiam erit in potentia activa, a qua resultet talis entitas, vel modus, cum sit illi intrinsece ac necessario conjunctus ex natura rei: ergo redit quæstio de potentia ad illum modum, an sit naturalis, an supernaturalis. Nam, si supernaturalis dicatur, redibit de illa eadem quæstio, & sic procederetur in infinitum; si vero dicatur naturalis, etiam si actus seu terminus ejus sit supernaturalis, idem dici poterat de illa potentia, de qua nunc disputamus: superflue ergo ponitur talis potentia supernaturalis media inter naturam & actum supernaturalem. Aliunde autem apparet nullo modo posse hanc potentiam naturalem esse aut appellari. Primo, quia ordinatur ad actus vel effectus supernaturales: omnis autem facultas accipit speciem suam ex objecto seu actu, ad quem ordinatur. Secundo, quia, teste Aristot. cuicumque potentia naturali activæ respondet passiva; & e contrario 3. de anima cap. 5. & 5. Metaph. cap. 12. lib. 9. cap. 1. Sed in præsentem non correspondet huic potentia obedientiali aliqua potentia naturalis: ergo neque ipsa potest naturalis appellari. Tercio, quia per hanc potentiam elevatur res ad supernaturalem ordinem, & quodammodo per illam inchoatur supernaturalis ordo: ergo non potest ipsa esse mere naturalis. Quarto, quia hæc potentia natura sua est proportionata suo actui, aliàs superflue poneretur: ergo est supernaturalis sicut ille: patet consequentia, quia hac sola ratione dicimus habitus infusos esse supernaturales, quia habent vim activam proportionatam ad efficiendos actus supernaturales.

Propter has ergo rationes auctores diversimode loquuntur agentes præsertim de potentia passiva: nam Scotus q. 1. Prolog. & in 4. d. 49. q. 9. & 10. absolute vocat hanc potentiam naturalem; quod etiam omnes sentire videntur, qui ponunt in homine appetitum naturalem ad videndum Deum. Alii vero appellant supernaturalem, quod sentire videntur, qui negant illam esse naturalem, ut Capreolus locis paulo ante citatis: quibus favet Augustinus loco supra citato, indicans hanc potentiam esse supra leges naturæ. Alii partim naturalem, partim non naturalem vocant, ut Ferr. 3. cont. Gent. cap. 51. circa finem. Alii denique nullo ex his modis, sed obedientialem appellant, & hic est frequentior modus loquendi D. Thom. ut patet ex locis paulo antea citatis in ratione secunda; quem frequentius sequuntur Thomistæ ibidem citati, & Fonseca lib. 1. Metaph. cap. 1. q. 2. sect. 2. & 3. Et hic posterior modus loquendi verior & sanior est.

Nec tamen res tota revocetur ad quæstionem de modo

loquendi, eo quod facile sit ex variis respectibus denominationes varias sumere: ut res tota explicetur, supponendum in primis est huiusmodi potentiam obedientialem, sive activam, sive passivam, in re ipsa nullo modo distinguere, nec realiter, neque ex natura rei ab illa entitate, cuius est potentia, neque ut rem, neque ut modum ejus. Et quidem, quod non sit res distincta omnino realiter, evidentissimum est, neque ullus hæctenus (quod ego sciam) contrarium dixit: & a fortiori constabit, excludendo etiam distinctionem ex natura rei: & rationes dubitandi pro utraque parte supra posita hoc etiam convincunt: quia, si talis entitas est omnino ejusdem ordinis cum entitate naturæ, superflue ponitur ac fingitur. Si vero est superioris & supernaturalis ordinis, non potest esse debita naturæ, & consequenter neque cum illa congenita. Quæ ratio recte intellecta ostendit esse impossibilem talem potentiam obedientialem, quæ sit res distincta realiter a subiecto, in quo est; nam, si est res distincta, erit forma vel qualitas aliqua: interrogo ergo, an illa vis agendi sit connaturalis illi qualitati, vel obedientialis: hoc posterius dici non potest, alioquin oporteret illam vim esse rem distinctam a tali forma: & sic vel procederetur in infinitum, vel in prima entitate non oportebit hanc vim obedientialem esse rem distinctam, quod intendimus. Si vero dicatur primum, sequitur illam activitatem non esse obedientialem, sed naturalem. Dicitur fortasse illam vim esse connaturalem formæ, non autem subiecto. Sed contra, nam ipsa forma est connaturalis subiecto, nam est intrinsece innata illi, nam forma extrinsece superaddita non erit potentia obedientialis, de qua nunc agimus, sed erit virtus illa instrumentalis per infusionem qualitatibus, quæ a nobis supra rejectæ est.

Quod vero non sit aliquis modus ex natura rei distinctus ab entitate naturali, probatur primo, quia nullum est indicium talis distinctionis: hæc enim potentia obedientialis ita convenit entitati unicuique per se ipsam, ut sit prorsus inseparabilis ab ea, & immutabilis etiam de potentia Dei absoluta: hoc autem est signum indistinctionis ex natura rei, ut in disputationibus Metaphysicis latius declaratum & probatum est. Quod secundo amplius declaratur, nam, quæ eadem generatione per se primo generantur, sunt idem inter se, teste Aristot. 4. Metaph. sed ita est in præsentem, nam creatura præcise considerata secundum eam entitatem, quam habet per suam creationem seu productionem, per se ipsam est subiecta essentialiter suo creatori, absque eo, quod ab illa intelligatur dimanare aliqua entitas, vel aliquis modus realis, quo habeat illam subjectionem, vel in recipiendo, vel in agendo: ergo potentia hæc obedientialis non est proprietas vel modus ex natura rei distinctus ab entitate creaturæ, alioquin non posset illi, vel sine aliqua nova actione, propria, & ab extrinseco proveniente, vel saltem sine aliqua intrinseca dimanatione, convenire. Minor declaratur & probatur, nam, si præcise consideres creaturam, secundum illud esse, quod habet ex vi creationis suæ, omnino essentialiter includit illam subjectionem ad creatorem, ita ut etiam si mente concipiamus illam entitatem nudam & carentem omni modo superaddito, necessariam & essentialiter includat hanc plenam subjectionem ad Deum, sicut e contrario in intrinseca ratione creatoris ut sic includitur, quod habeat plenum & perfectum dominium suæ creaturæ.

Tertio id declaratur in utraque potentia, nam v. g. anima rationalis per se ipsam est capax gratiæ, & per intellectum immediate est capax fidei, & per voluntatem charitatis & spei, ita ut, si ratione separemus, vel etiam negative, omnem realitatem, vel modum realem additum substantiæ animæ & potentiis ejus, ex vi suæ perfectionis & substantiæ erit capax harum perfectionum supernaturalium; sicut ex vi earum est ad imaginem Dei: ergo potentia obedientialis, quæ est in anima ad recipiendos hos actus vel habitus, non potest esse aliquid distinctum ex natura rei ab entitate animæ, & potentialium. Idemque argumentum fieri potest de potentia obedientiali activa, quæ ad eisdem actus supernaturales est in eisdem potentiis animæ. Et confirmari potest, quia, quando fiunt hi actus, immediate profiungit ex ipsamet entitate intellectus & voluntatis: ergo illa entitas est per se ipsam in suo ordine activa talis actus. Et idem argumentum fieri potest de aliis divinis instrumentis, quæ elevantur ad agen-

Potentia obedientialis non distinguitur ex natura rei ab entitate, in qua est.

Argumenta in utramque partem proposita.

Varij dicendi modi.



agendum per suasmet entitates, ut in superioribus declaratum est: hæc ergo activitas, quatenus intelligitur innata cum entitate creata, nullam rem, nec modum realem ex natura rei distinctum illi addit.

Quarto id probatur, declarando rationem a priori huius rei, nam huiusmodi potentia obedientialis, tam activa, quam passiva, quam in entitate creata esse dicimus, non est res aliqua per se primo ordinata ad agendum vel recipiendum id, ad quod esse dicitur obedientialis potentia: unde non est concipienda tanquam habens proprium & transcendentalem ordinem ad talem actum, aut aliquam speciem entis ab illo accipiens, sed solum est intelligenda talis entitas, ut constituta absolute in sua specie vel natura, quæcumque illa sit, & per se ipsam quasi concomitanter existens vis agendi vel recipiendi ex imperio creatoris, quidquid non repugnaverit; & ideo talis potentia nihil potest addere illi entitati, cui convenire intelligitur. Hoc enim, non tantum in hac potentia obedientiali, sed etiam in naturali potentia & virtute agendi invenitur: nam quodcumque non convenit per se primo entitati ex primaria intentione ejus, sed solum quasi concomitanter, non addit novam aliquam specificationem, aut realitatem vel modum. Exemplis declarari potest, nam materia prima, quæ per se primo est potentia ad recipiendam formam substantialem, quamvis concomitanter, sic etiam potentia ad recipiendam quantitatem, inde tamen nec speciem aliquam, nec modum aliquem realem sumit. Item forma substantialis per se primo instituitur ad dandum esse composito & actuandam materiam, & inde habet suam speciem & essentiam; quod si hinc concomitanter habet vim aliquam immediate agendi per se ipsam, ut, v.g. aliquam intrinsecam proprietatem per resultantiam naturalem, ut dicitur frigiditas manare a forma substantiali aquæ, quando se reducit ad primam frigiditatem; vel certe tanquam principium principale per se influens in suo ordine in aliquam actionem, quomodo multi censent animam per suam substantiam influere in actus vitæ; vel si fortasse aliqua forma substantialis est per se ipsam activa sui similis; in his omnibus exemplis vis activa, neque propriam specificationem habet a tali actu, neque aliquid reale addit ipsi formæ substantiali. Ad eundem modum explicare soleo, quomodo in Deo sit potentia affectiva ad extra, absque transcendentali ordine, vel specificatione propria a tali actu vel objecto, quia, scilicet, illa potentia non est quasi per se primo relata ad agendum, sed est ipsamet entitas Dei, quæ, hoc ipso quod est, quasi concomitanter habet totam illam vim agendi cum summa identitate. Eodemque modo philosophandum cenfeo in accidentibus, nam quantitas, v.g. per se primo est ad extendendum formaliter substantiam: & hinc habet suam speciem, concomitanter vero hinc habet, ut sit ratio recipiendi qualitates corporeas: hoc autem habet per se ipsam sine ulla nova specificatione, aut additione alicujus rei, vel modi realis: & calor v.g. per se primo ordinatur, ut ita disponat, & formaliter afficiat suum subiectum, & inde habet propriam & specificam rationem suæ entitatis, ex vi cuius est etiam activus sui similis, quod (ut opinor) non addit ei aliquam realem speciem, neque modum ex natura rei distinctum, quod secus contingit in his potentiis, quæ per se primo ordinantur ad aliquid agendum circa extrinsecam objecta, nam inde habent suam primariam specificationem, & rationem. In præsentia ergo, cum hæc potentia obedientialis non sit specialis entitas ad hunc finem per se prima instituta, sed sit veluti conditio quædam necessario concomitans quancumque entitatem creatam, hoc ipso, quod in sua natura, vel ad suum peculiarem finem instituitur, non potest esse aliquid ex natura rei distinctum ab entitate rei, & sumens aliam propriam speciem ex tali actu, seu ex habitudine ad illum.

Atque hinc constat primo hanc potentiam obedientialem, quæ est in naturalibus entibus, non posse esse facultatem aliquam supernaturalem talium entium, quia alias necessarium esset intelligere huiusmodi facultatem ut aliquo modo distinctam ab entitate, cuius est facultas. Et hoc etiam bene confirmant rationes dubitandi supra adductæ in favorem huius partis. Posset autem excogitari alius modus, quo hæc potentia supernaturalis sit, non per additionem & distinctionem a naturali entitate, sed per conjunctionem gradus inferioris cum su-

periori in eadem entitate indivisibili secundum rem, indivisibili autem secundum rationem per conceptus præcisos seu inadæquatos in re ipsa fundatos, sicut sensitivum, v.g. & rationale conjunguntur in anima humana secundum eandem indivisibilem entitatem physicam: sic enim naturale & supernaturale sunt duo gradus entium, quos non repugnat physice conjungi in eadem entitate, seu forma aut qualitate. Sed hic modus dicendi etiam est impossibilis; primo, quia sequitur nullam esse entitatem creatam mere naturalem, sed necessario esse per se & essentialiter elevatam ad supernaturalem ordinem, quantum ad aliquam participationem perfectionis ejus: consequens videtur valde falsum: ergo. Sequela patet, quia nulla est creatura, in qua non sit aliqua potentia obedientialis, vel activa, vel passiva. Minor autem constat, tum ex communi sententia omnium Theologorum, tum etiam, quia gradus naturæ inferior est, & finitus, & consequenter ex se limitatus ad proprium ordinem. Secundo, quia ex illa fictione sequitur nullam formam naturalem solum agere, ut naturalis est, sed etiam ut est supernaturalis: consequens est absurdum; ergo. Sequela declaratur, quia, si calor v.g. est naturalis, quatenus est productivus caloris, & potentia supernaturalis, quatenus est productivus gratiæ: ergo quando producit alium calorem, non solum producit in illo vim producendi alium calorem, sed etiam vim producendi gratiam: ergo non solum producit id, quod est naturale, sed etiam id, quod est supernaturale: ergo non solum agit, ut principium naturale, sed etiam ut principium supernaturale, quandoquidem agit communicando aliquid supernaturale. Falsitas autem consequentis videtur manifesta: nam inde sequitur nihil posse naturam agere cum solo concursu naturali sine aliquo supernaturali, quod est confundere ordinem naturæ cum ordine gratiæ.

Tertio, nam quando gradus seu ordo supernaturalis dicitur conjungi cum gradu naturali in eadem entitate, physice indivisibili, interrogo, quo modo, vel qua ratione ille gradus aut entitas illa secundum unam rationem supernaturalis dicatur: aut enim dicitur supernaturalis absolute, quia nulli creaturæ est naturalis; aut respective, scilicet, quia est supra naturam illius entitatis, cui inest. Hoc secundum dici non potest, quia, quod est de essentia alicujus, non potest dici supernaturale illi. Item quia, quando gradus inferior & superior conjunguntur in eadem entitate indivisibili, uterque est naturalis illi entitati, ut gradus sensitivus & rationalis in anima humana. Et hinc a fortiori colligitur nec primum dici posse, quia, quod alicui creaturæ, tam accidenti, quam substantiæ, potest esse connaturale, non potest dici supernaturale absolute: illud enim dicitur absolute supernaturale, quod non tantum respectu hujus vel illius creaturæ, sed simpliciter respectu omnium, quibus inesse potest, supernaturale est. Et ideo contradictionem involvit dicere gradum supernaturalem absolute & in essentia sua posse contrahi, & ita conjungi cum naturali gradu, ut sit connaturalis, & essentialis ipsi entitati naturali. Et propter hanc causam, inter alias, repugnat dari substantiam supernaturalem creatam. Dices. In Deo conjunguntur illæ duæ rationes, nam est auctor naturalis & supernaturalis; & illud habet per vim naturalem, hoc vero per supernaturalem. Respondetur primo sine causa sumi argumentum ex Deo, cuius essentia non potest semper imitari a creatura. Deinde, si de Deo secundum se loquamur, revera nihil esse potest in illo supernaturale: ipsa enim vis producendi gratiam, vel faciendi miracula est illi maxime naturalis, appellatur vero supernaturalis solum denominatione extrinseca, quia est productiva alicujus rei, quæ est supernaturalis creaturæ, vel quia talis perfectio est omnino supra naturam entis creati, quo sensu etiam vis creandi, secundum quam Deus dicitur naturalis auctor, est maxime supernaturalis, non Deo, sed creaturæ. Non est ergo simile, quod de Deo assertur, quia in Deo secundum se non est distinctio naturalis & supernaturalis secundum gradus, nec secundum comparisonem intrinsecam ad ipsum Deum, in creaturis vero distinguuntur illi gradus & ordines, & ita ille, qui supernaturalis dicitur, talis est per intrinsecam comparisonem ad gradum naturæ, seu entitatem naturalem: & ideo fieri non potest, ut in creaturis hæc duo conjungantur tanquam essentialia eidem entitati.

Quarto,

Potentia  
obedien-  
tialis non  
est ali-  
quid su-  
pernatu-  
rale.



Quarto, quia illæ duæ rationes, seu ordines naturalis & supernaturalis gradus, non possunt in eandem entitatem coalescere & convenire tanquam duæ rationes adæquatæ & convertibiles inter se, neque etiam tanquam gradus superior & inferior, quomodo ergo conjungentur? Major patet primo inductione, quia in omnibus aliis rationibus, quando gradus inferior & superior illo modo uniuntur, unus comparatur ad alium, ut genus ad differentiam, ut sensibile ad rationale, & vivens ad sensibile, &c. & nunquam se habent ut duæ rationes inter se convertibiles. Secundo, quia, quando hujusmodi rationes sunt convertibiles, semper una comparatur ad aliam ut proprietas ad essentiam; sed hi duo gradus essentialis sunt ejusdem essentialis: ergo non apparet, quomodo per se uniantur, quia unus non contrahit alium, neque e converso: neque ambo sunt differentia ejusdem generis; imo si quæ universales sunt, vix potest reddi ratio, cur unus naturalis, alter supernaturalis dicatur. Minor autem declaratur, quia in primis ratio naturalis entis non potest comparari ut genus ad gradum supernaturalem: quia nulla est naturalis entitas, in qua non sit aliqua potentia obedientialis activa vel passiva: ergo si talis potentia est obedientialis, nulla est entitas ita naturalis, quæ non sit aliqua ratione supernaturalis: ergo non comparatur gradus naturalis ad supernaturalem, ut genus ad differentiam contrahentem & elevantem talem gradum: quia omnis ratio generica in aliquo inferiori salvari potest sine differentia contrahente & elevante illam ad superiorem ordinem, ut sensibile est in bruto absque rationali, & vivens in planta absque sensibili. Neque etiam e contrario gradus supernaturalis potest comparari ad naturalem, ut genericus ad specificum; tum quia est superioris ordinis, magisque actualis, tum etiam quia pari ratione in qualibet entitate supernaturali poterit aliqua naturalis potentia inveniri, ut in charitate v. g. poterit excogitari potentia ad producendum calorem, quo erit naturalis ratione termini, seu objecti, sicut e contrario potentia obedientialis, quæ est in calore ad producendam gratiam, dicitur supernaturalis ratione objecti.

Quinto argumentari possumus, quia ex contraria sententia sequitur potentiam illam obedientialem, quasi inchoatam vel radicalem, quæ est in voluntate vel intellectu ad eliciendum actum fidei vel charitatis infusæ, esse ejusdem ordinis seu supernaturalitatis cum habitu charitatis vel fidei infusæ; consequens est valde absurdum: ergo. Sequela patet, quia eodem modo dicitur hæc potentia esse supernaturalis, sicut sunt illi habitus, & ex eadem radice, scilicet, quia ex se apta est concurrere ad actus supernaturales cum concursu Dei supernaturali. Falsitas autem consequentis patet, quia hoc est confundere ordinem naturæ cum ordine gratiæ, & est attribucere naturæ humanæ secundum se & ex se aliquid vere supernaturale, quod non videtur sanæ doctrinæ consentaneum.

Ultimo tandem, quia alias sequitur ordinem gratiæ habere quandam intrinsecam connexionem cum ordine naturæ, & formam supernaturalem, nimirum gratiam, recipi in subiecto omnino connaturali, & ejusdem ordinis: nam recipitur in anima secundum capacitatem vere supernaturalem, quam in se habet, & e contrario ipsi animæ, prout talem capacitatem habet, debita erat talis forma debito quodam connaturalitatis, sicut materiæ debetur forma, & cuilibet potentiæ actus proportionatus: & consequenter potentiæ activæ, quam intellectus habet ad credendum, vel videndum Deum, debitus esset concursus, & complementum necessarium ad operandum, quæ omnia falsa sunt, ut constat ex materia de gratia. Non potest ergo hæc potentia dici supernaturalis, neque ut facultas superaddita naturæ, neque ut gradus essentialis illi rei, cui talis potentia convenire dicitur.

Neque rationes dubitandi superius quoad hanc partem propositæ difficilem solutionem habent. Ad primam enim respondetur facultatem per se primo ordinatam ad actum aliquem vel objectum accipere speciem proportionatam ab illo: hæc autem potentia obedientialis non est hujusmodi, sed concomitanter se habet ad ipsam rei entitatem: unde tam absoluta est, quam est illa; neque habet aliam speciem præter eam, quam entitas ipsa habet. Ad secundam respondetur, ad summum, probare hanc potentiam non esse simpliciter naturalem, quoad rationem seu munus potentiæ, quod concedimus, &

statim declarabimus. Et eadem fere est responsio ad tertiam, quamquam, quod in ea dicitur, per hanc potentiam elevari rem, seu inchoari in illa supernaturalem ordinem, sano modo intelligendum sit: nam, si intelligatur de actuali seu formali elevatione, etiam inchoata, falsum est; alioquin non posset creatura produci in puris naturalibus, absque eo, quod esset actu elevata aliqua ex parte ad supernaturalem ordinem, quod falsum est. Si vero intelligatur de elevatione in potentia, & de inchoatione quoad fundamentum ex parte naturæ necessarium ad actuale elevationem, sic verum est, quod assumitur; tamen ex eo nihil contra nos inferri potest, quia ipsa naturalis entitas rei secundum propriam rationem suam est fundamentum hujus elevationis absque aliquo addito supernaturali, ut in homine, per hoc ipsum, quod est ad imaginem Dei, est fundamentum, ut ad supernaturalem ordinem elevari possit. Ad quartam respondetur dupliciter posse dici potentiam proportionatam ad actum; uno modo positive, quia est ex natura sua instituta & ordinata ad talem actum; alio modo non repugnanter, quia, scilicet, non repugnat elevari ad talem actum recipiendum, vel efficiendum: vel aliter, dupliciter posse potentiam dici proportionatam ad actum, vel proportionem connaturali, quæ fundatur in naturali subordinatione, vel transcendentali relatione unius ad aliud, vel proportionem obedientialem, quæ fundatur in subordinatione creature ad suum creatorem, supposita non repugnantia ex parte effectus seu objecti. Hæc ergo potentia, de qua agimus, est proportionata tantum posteriori modo: & ideo necesse non est, ut sit ejusdem ordinis cum actu suo. Et in hoc maxime differt vis activa obedientialis potentiarum animæ a vi activa, quæ est in habitibus infusis: nam hæc est proportionata priori modo, tanquam connaturalis & ejusdem ordinis, cui proinde debitus est concursus ad talem actum; illa vero solum est obedientialis: unde neque natura sua ordinata est ad talem actum, neque ei debitus est talis concursus.

Secundo principaliter colligitur ex dictis hanc obedientialem potentiam, tam activam, quam passivam, aliquo modo posse dici naturalem: vel naturale appellando, quidquid supernaturale proprie non est, vel quia, quidquid est entitatis in illa potentia, naturale est, vel cum natura congenitum. An vero simpliciter hæc potentia activa sit appellanda naturalis, quamvis de nomine & de modo loquendi quæstio videatur, nonnulli tamen omnino ita censent sentiendum & loquendum in quodam sensu, quem falsum esse existimo, & non tantum ad modum loquendi, sed etiam ad rem pertinere. Existimant itaque hanc potentiam activam, quam nos obedientialem vocamus, necessario esse debere aliquam naturalem potentiam, effectivam naturæ suæ alicujus effectus, qui secundum rationem aliquam communem conveniat cum effectu supernaturali, ut ratione illius convenientiæ possit talis naturalis potentia elevari ad efficiendum supernaturalem effectum, quatenus in eo invenitur aliqua ratio, quam potentia illa possit naturæ suæ attingere, ratione cujus possit elevari ad alium effectum, quem natura sua non posset efficere: atque hoc modo potentia illa, quæ elevatur, dicitur esse potentia naturalis. Exemplis res illustratur, nam intellectus naturæ suæ est effectivus intellectualis cognitionis seu visionis, & quia hæc ratio in visione Dei reperitur, quamvis elevata ad supernaturalem ordinem; ideo intellectus per illam facultatem naturalem, quam habet ad efficiendum actum intellectionis ut sic circa Deum, elevari potest ad eliciendum actum videndi clare Deum.

Similiter aqua naturæ suæ est effectiva alicujus qualitatis, & quia hæc ratio qualitatis in gratia reperitur, quamvis elevata ad supernaturalem ordinem; ideo aqua per naturalem vim activam, quam habet ad efficiendam qualitatem, elevari potest, ut cum superiori aliquo concursu efficiat illam supernaturalem qualitatem; sine hujusmodi autem activitate naturali (ajunt) intelligi non posset, quomodo sit elevabilis creatura ad agendum aliquid extra limites naturæ suæ.

Sed hæc sententia & in re falsum dicit, & in modo loquendi non recte loquitur, nec rem declarat. Primum itaque falsum est dicere non posse creaturam elevari ad aliquid, nisi in ea supponatur propria naturalis potentia ad talem actum vel effectum, saltem secundum aliquam

Potentia obedientialis, alio quo modo est naturalis, non tamen simpliciter.

An potentia obedientialis activa necessario fundetur in naturali activitate.



rationem communem. Nam in primis in potentia passiva susceptiva obedientiali id deesse videtur in anima rationali, quæ ex natura sua non est naturaliter receptiva immediate & per substantiam suam alicujus qualitatis ab extrinseco advenientis, seu alicujus mutationis, & tamen supernaturaliter potest recipere immediate per substantiam suam qualitatem aliquam supernaturalem: illa ergo capacitas animæ ad gratiam nullo modo ordinatur naturaliter ad aliquam qualitatem naturalem, sed est mere obedientialis. Nisi forte quis dicat, animam per substantiam suam esse capacem suarum potentiarum, & ita habere aliquam capacitatem naturalem ad aliquas qualitates. Sed ad hoc excludendum dixi, non esse capacem alicujus mutationis, seu qualitatis extrinsecus impressæ. Et revera videtur valde impertinens, quod potentia animæ supponantur distinctæ ab anima, & receptæ in illa, ut ipsa intelligatur capax gratiæ: non enim ea ratione elevari potest ad supernaturale esse gratiæ, sed quia, propter convenientiam, quam habet cum Deo in gradu intellectuali, participare potest superiori quodam modo divinam ipsam naturam. Unde multo melius haberet hanc capacitatem, etiamsi intra proprium ordinem naturalem esset per se intelligens & volens absque distinctione reali potentiarum.

Deinde in vi activa, seu in elevatione creaturæ ut agat ut instrumentum Dei, incredibile videtur, non posse Deum elevare ad aliquid supernaturaliter agendum nisi id, quod habet aliquam naturalem vim ad aliud naturaliter agendum. Primo quidem, quia si potest elevare aquam, ut frigida est, v.g. ad efficiendam gratiam, cur non potest eandem, ut quanta est, ad eundem effectum elevare? quod enim frigiditas sit naturaliter effectiva frigiditatis, quantitas vero non sit naturaliter effectiva alterius quantitatis, valde impertinens est ad prædictum gratiæ effectum. Quod ex institutione nunc facta verisimiliter coniectare possumus: nam, ut aqua baptismi conferat gratiam, impertinens est, quod sit frigida vel calida, dummodo aqua sit, & impertinens etiam est, quod possit alterare corpus, tum quia, licet non posset, propter resistantiam vel dispositionem corporis, nil referret; tum etiam, quia non est effectura gratiam in corpore, sed in anima, in qua nullam qualitatem potest naturaliter producere. Deinde, quando Christus Dominus sanabat ægrotum, vel sanctificabat illum per contactum, omnino impertinens & per accidens erat ex parte carnis aut vestimentorum Christi naturalis vis activa qualitatum, sed immediate & per se sequebatur effectus ex contactu illorum corporum, qui præcise in quantitativis seu per quantitates fiebat: & fortasse actio immediate procedebat, vel a carne ipsa substantiali, vel a quantitate ipsa, vel simul etiam a qualitatibus, quibus erat affecta, sive activæ essent qualitatum sibi similium, sive non essent. Et idem est de effectum gratiæ sanctificantis, quando per manus impositionem datur. Multoque evidentius erit argumentum, si talis effectus proxime per localem motionem instrumenti fiat, ita ut immediata ratio & virtus agendi sit motus ipse: nam motus localis nullam vim activam naturalem habet, idemque est de voce seu verbo, quæ elevari possunt, ut sint instrumentum Dei ad producendam gratiam: imo & ad producendam substantiam, vel convertendam unam substantiam in aliam, ut in sacro Eucharistiæ mysterio fit: & Christus Dominus etiam id fecit verbo suo, quando in nuptiis aquam in vinum convertit, saltem conversione formali, cum tamen verba ex natura sua non habeant efficientiam ullam, præsertim ad producendam substantiam. Item interior actus voluntatis vel intellectus non habet ullam naturalem vim activam, & tamen, si aliqua creatura potest sumi ut instrumentum ad supernaturales effectus, maxime hujusmodi actus intellectus & voluntatis, ut D. Thom. citatis locis sæpe docet. Quod si quis dicat, in his actibus esse virtutem naturalem ad efficiendos habitus sibi proportionatos, id quidem, & impertinens videtur ad efficiendos effectus superioris ordinis, & non est universaliter verum: nam actus supernaturales, ut visio beata, dilectio aut contritio infusa, non habent hanc naturalem vim, & tamen ex omnium sententia multo facilius possunt hi actus elevari, ut sint instrumenta gratiæ efficiendæ, quam alii actus mere naturales. Deinde, quis credat, posse Deum uti his accidentibus, quæ sunt qualitates activæ, & non aliis, si

Suarez. Tom. XVI.

quæ fortasse sunt bene efficientia & disponentia subiectum absque naturali ordine ad agendum? aut posse Deum elevare accidens, etiam materiale, ad supernaturaliter agendum, non vero substantiam etiam angelicam, si fortasse immediate & per se nullam habeat activitatem? Denique in Eucharistia caro vel sanguis Christi Domini, prout ibi existit, nihil potest naturaliter agere, & tamen, prout ibi est, elevatur ad efficiendam gratiam in fumentem digne: ergo signum est non elevari per naturalem potentiam, quam habeat ad aliquid aliud agendum.

Ratio vero est, quia, quamvis potentia sit naturaliter activa, si ex natura sua est omnino limitata ad talem effectum, propter eam activitatem non habet actualem proportionem ad alios effectus, præsertim perfectiores & superiores, producendos; ergo, si non obstante hac naturali improportionem & impotentiam potest elevari ad efficiendos illos excellentiores effectus, etiam alia res, quæ non sit potentia activa naturalis, sed substantia vel quantitas, vel aliquid hujusmodi, potest elevari ad efficiendum aliquid, quod naturaliter efficere non potest. Patet consequentia, quia respectu (ut sic dicam) eadem est formalis improportio: quia tam inepta est potentia ad ea, quæ sunt extra suam vim activam, ac si prorsus nulla esset potentia, neque activitatem haberet. Unde ratio potentia activæ in tali instrumento quasi materialiter se habet in ordine ad supernaturalem actionem, ut in voluntate, v.g. ut elevari possit ad efficiendos actus intellectus, materiale est, quod ipsa habeat naturalem activitatem respectu propriorum actuum: sic ergo, ut possit aqua elevari ad gratiam efficiendam, videtur impertinens, quod sit naturaliter activa frigiditatis vel alterius qualitatis similis. Præterea huc accedunt rationes, quibus supra probavimus esse in creaturis potentiam obedientialem, ut in divina instrumenta assumi & elevari possint: illæ enim non solum probant de his rebus, quæ sunt activæ aliquorum effectuum naturalium, sed in universum de omnibus entibus creatis, respectu omnium effectuum, in quibus specialis repugnantia inventa non fuerit.

Atque hinc ulterius intelligitur, quando potentia naturaliter activa aliquorum effectuum, ad supernaturales res efficiendas elevatur, tunc, licet res, quæ elevatur, sit naturalis potentia, tamen quatenus elevata agit, non agere ut naturalem potentiam, id est, prout est virtus activa natura sua ordinata ad tales effectus, sicut quando elevatur substantia ad agendum, quamvis id, quod elevatur, sit substantia naturalis, tamen formaliter ac præcise loquendo non agit ut substantia naturalis, quia ut sic solum dicit ordinem ad subsistendum in suo esse, sed agit quatenus elevata est, & quatenus in se habet fundamentalem, seu obedientialem vim, ut elevari possit, ad quam vim quasi materialiter se habet, quod sit in substantia, vel in qualitate naturaliter activa, vel non activa. Et confirmatur hoc illatum, quia prædicta naturalis activitas limitata est ad tales effectus: ergo, quando ultra illos operatur, non agit ut naturalis vis activa. Patet consequentia, quia tunc non operatur intra naturæ limites: ergo nec operatur per concursum, seu auxilium naturæ debitum aut proportionatum, neque habet connaturalem ordinem seu inclinationem ad talem effectum. Denique naturaliter est simpliciter impotens, seu sine potentia ad talem effectum: ergo non potest dici efficere illum, ut potentia naturalis est.

Dices, hinc solum sequi non efficere talem effectum ut potentiam naturalem, naturali modo operantem: nihilominus tamen posse illum efficere, ut potentiam naturalem operantem ut elevatam: quia non repugnat, rem imperfectiorem adiutam a perfectiori efficere aliquid superius & perfectius, quod ex se non potest. Sed hoc quidem admitti posset, si illa particula, *ut*, specificativè numeretur, & designaret tantum rem, quæ ad agendum elevatur: hoc enim sensu verum est, rem inferioriorem posse elevari ad efficiendam superiorem, ut naturalem ad supernaturalem: & corpoream ad spirituales producendam: tamen sumpta illa particula omnino formaliter ac reduplicative, involvitur repugnantia in argumento, nam, cum dicitur potentia naturalis, ut talis est, virtute sua attingere superiorem effectum, sensus est, quod ex propria vi naturalis activitatis influit in talem effectum; repugnat autem hoc modo influere & solum ut virtutem elevatam influere. Implicat itaque effectum esse omnino

E e

super-



supernaturalem, & tamen virtutem naturalem prædicto modo influere in illum: nam, si prædicto modo influit ex natura sua, habebit ordinem ad talem effectum, saltem per modum virtutis partialis, vel instrumentalis connaturalis: ergo comprehendet illum effectum sub adæquata latitudine seu pbjecto suæ activitatis naturalis: non ergo talis effectus erit simpliciter supernaturalis respectu talis virtutis: sicut calor, si naturaliter est activus formæ substantialis ignis, & carnis, quamvis non habeat sufficientem vim ad illum effectum, nec principalem, sed instrumentalem tantum, & quamvis non possit talem effectum efficere, nisi a superiori agente juvetur, nihilominus effectus est illi connaturalis, quia ipse naturaliter vi, ut talis est, influit in illum. Quod si dicas, in calore hoc ideo esse, quia non solum agit virtute naturali, sed etiam ut instrumentum subordinatum alicui virtuti principali connaturali. Respondetur, licet hoc verum sit, hinc tamen sumi argumentum: quia nulla potest esse virtus naturalis, quæ, si ut naturalis operatur, non sit, vel principalis virtus, vel instrumentalis, subordinata alicui principali ejusdem ordinis: nam hæc debent inter se proportionem & debitam habitudinem servare.

Nec vero satis est, quod supernaturalis effectus in aliqua generica vel communi ratione conveniat cum effectui connaturali, ut naturalis virtus, quatenus talis est, dicatur influere in supernaturalem effectum sub illa communi ratione. Primo quidem, quia aliàs eadem ratione dici posset influere in illum, ut principalem virtutem partialem, si fortasse respectu effectus naturalis, in quo talis ratio reperitur, est principalis virtus. Secundo, quia virtus naturalis non semper respicit illam rationem communem per se, sed solum rationem particularem, in qua illa communis includitur, ut frigiditas aquæ non est per se virtus ad producendam qualitatem ut sic, sed ad producendam hanc qualitatem sibi similem. Unde non habet naturalem virtutem ad producendam rationem qualitatis, nisi ut contractam ad talem speciem qualitatis: ergo, quando aqua ut instrumentum Dei producit gratiam, non potest dici producere illam per naturalem potentiam, quam habet ad producendam frigiditatem: eo quod gratia & frigiditas convenientiam quandam in communi ratione qualitatis habere videantur: cum illa communis ratio qualitatis non attingatur a tali virtute naturali, neque ut adæquata ratio, quam per se primo in effectui respiciat; neque ut ratio, sub qua attingit suum naturalem effectum. Et hoc argumentum maxime urget in actione transubstantiandi, quæ attingit substantiam ipsam secundum se, seu quatenus esse potest terminus conversionis alterius substantiæ in ipsam, qui terminus nullam habet realem convenientiam cum alio termino naturaliter producibili præter communem convenientiam substantiæ aut entis, quam nulla naturalis virtus creata potest per se primo, vel tamquam rationem formalem, sub qua attingit suum effectum, respicere.

Tertio, quia aliàs omnis potentia activa naturalis cujus effectus esset aliquo modo potentia activa naturalis omnium effectuum habentium aliquam convenientiam genericam cum altero effectui naturali, quod sine dubio est valde absurdum in philosophia, ut facta inductione facile ostendi potest. Et ratione, quia naturalis potentia non est commensurata illi effectui, nisi secundum propriam & specificam rationem ejus: & ita non attingit ex natura sua rationes communes, nisi prout in illo contractas. Maxime, quia hæ rationes communes physice, & in re non distinguuntur a particularibus, & ab entitatibus physicis, in quibus reperiuntur: hæc autem commensuratio inter virtutem activam & effectum physicum est, & physice est consideranda inter res, prout a parte rei sunt, & non secundum rationes communes abstractibiles a nostro intellectu.

Atque hæ relationes eodem fere modo procedunt in potentiis animæ, quatenus ad supernaturales actus eliciendos elevari possunt, in quibus ille modus loquendi videri posset habere majorem probabilitatis speciem propter vitalem & liberum modum operandi harum potentiarum: nihilominus tamen, etiam in illis potentiis, ego nulla ratione concederem, influere in hos actus virtute naturali, ut naturalis est, quia non censeo, has potentias esse naturaliter commensuratas, aut essentialiter ordinatas, aut institutas ex vi suæ specificationis ad hos actus

supernaturales eliciendos, etiam partialiter: neque ad attingenda illorum objecta sub ea speciali ratione, quæ ab eis attingi possunt: alioquin non video, quomodo in his potentiis non sit etiam naturalis capacitas passiva ad hujusmodi actus, cum hæc & proxime sequatur ex illa naturali commensuratione talium potentiarum, & respondeat activitati naturali, quæ negari non potest in his potentiis, saltem partialis, si tales potentie habent essentialem habitudinem ad hujusmodi actus seu ad totam latitudinem talium actuum, prout tam supernaturales, quam naturales complectitur: quia hæ potentie essentialiter sunt activæ: unde, quantum habent essentialis habitudinis ad hos actus, tantum habent activitatis: nullo enim modo in re distinguitur activitas naturalis ab essentia earum: solum ergo esse potest differentia inter actus naturales & supernaturales, quod ad illos erit major virtus activa, quam ad hos, vel quod ad illos est completa in genere potentie proximæ, ad hos vero est incompleta, etiam in illo genere. Quod sane non satis est, ut hi actus dicantur simpliciter supernaturales respectu harum potentiarum: quia, ut supra argumentabar, etiam si virtus sit instrumentalis tantum, vel partialis, si ex natura sua est illo modo instituta ad talem effectum, eique commensurata, effectus est illi simpliciter connaturalis, & juxta debitum naturæ ordinem tali virtuti, ut passiva est, debetur talis actus, & perfectio: ut autem activa est, debetur illi activitatis complementum, vel intrinsecum, vel per subordinationem & concursum superioris causæ. Hac enim ratione & angelis species intelligibiles, & homini generanti debetur concursus etiam creativus animæ. Ac denique vix potest intelligi, quod potentia mere naturalis habeat specificationem suam & essentiam ex habitudine ad supernaturales actus, neque adæquate, neque partialiter, multoque minus intelligi potest, quod aliqua sit essentialiter potentia activa, & naturaliter activa aliquorum actuum, & quod id non habeat ex sua specifica & essentiali ratione.

Tertio igitur (ut huic secundo argumento tandem satisfaciam) concludo, hanc vim activam instrumentorum Dei secundum rem quidem talem esse, qualis est entitas, cui convenire dicitur: unde, si illa entitas est naturalis ordinis, etiam illa potentia secundum totam suam entitatem est naturalis: si autem entitas, seu forma, in qua consideratur talis activitas, sit ordinis supernaturalis, etiam illa potentia erit entitative supernaturalis, non propter habitudinem ad illum effectum, sed propter speciem & essentiam talis entitatis. Potest enim hæc potentia obediens etiam in supernaturalibus qualitatibus considerari: nam character, v.g. vel charitas, aut gratia elevari possunt ad efficiendos effectus, quos naturaliter efficere non possunt, sive, quia superioris, sive, quia inferioris sunt ordinis, ut si eleventur ad efficiendam transubstantiationem, vel ad efficiendum calorem, vel quid simile. At vero quoad usum (ut sic dicam), seu quoad munus potentie, vel quoad modum agendi, non potest hæc potentia proprie dici naturalis propter ea, quæ diximus, quia non agit juxta commensurationem, vel propriam institutionem seu specificationem suæ entitatis, neque cum concursu seu auxilio sibi debito, nec denique ad effectum, vel actionem suæ naturæ proportionatam. Neque etiam dicitur supernaturalis, quia non est naturæ superaddita aut infusa. Sed specialiter vocatur potentia obediens, quia non operatur nisi ex imperio creatoris, & cum extraordinario, & non debito concursu. Et eodem proportionali modo loquendum est de potentia receptiva actuum, vel formarum supernaturalium, sicut ex communi doctrina D. Thom. & aliorum, superius dictum est.

*Solvitur argumentum tertium, & declaratur, per quod instrumenta divina in actu primo constituentur.*

Ex his, quæ in solutione hujus argumenti latissime dicta sunt, plura ex aliis, quæ in principio fuerunt proposita, expedita fere relinquuntur: & quidem tertium eandem difficultatem attingit, quod secundum, eodemque fere nos usi sumus contra oppositam sententiam. Ex tribus enim membris ibi propositis, scilicet an auxilium speciale Dei (quo, secundum omnes, indigent ejus instrumenta, ut supernaturaliter agere possint) sit tota virtus seu ratio agendi, vel supponat in instrumento totam virtutem proximam, vel saltem supponat inchoa-



inchoatam, eamque compleat, & eleve ad agendum: ex his (inquam) tribus membris omnes convenimus, non posse secundum affirmari propter rationes in argumento factas, & quia jam talia agentia non essent instrumenta, sed principalia agentia. Rursus, manifeste (ut existimo) probavi, primum membrum nullo modo affirmari posse: quia, si auxilium divinum esset tota virtus agendi, hæc instrumenta, præsertim inanimata, nihil omnino agerent, quia hoc auxilium non est in ipsis rebus, quæ dicuntur instrumenta: unde nec constituere illa potest in actu primo ad agendum, nec ratione illius tantum possunt denominari agentia, nec materialiter aut suppositaliter (ut sic dicam) quia non sustentant virtutem agendi, nec per se se formaliter, quia per suas entitates non influunt in effectum. Unde sumi potest nova ratio, quia hoc auxilium, si sumatur in actu secundo, non est virtus agendi proprie & in rigore, sed est actualis concursus ad agendum, qui etiam auxilium nominatur, & non est in instrumento, cui conferri dicitur, sed in effectu seu subiecto, circa quod versatur actio instrumenti: nihil est aliud, quam ipsamet actio, ut specialiter ac principaliter a Deo fluens: non potest ergo hoc auxilium sic declaratum esse virtus agendi, quia virtus significat actum primum, non actionem ipsam: unde, sicut actus secundus supponit primum, & concursus cum alio supponit illud, cum quo est concurrendum, ita hoc auxilium supponit virtutem agendi. Si autem sit sermo de hoc auxilio in actu primo, quod aliqui vocant auxilium internum, sic respectu horum instrumentorum non est aliquid creatum inhærens ipsis, sed est ipsamet omnipotentia increata Dei, per voluntatem ejus specialiter applicata ad concurrendum cum creatura ad talem actionem, in qua nihil prævium aut creatum ponit, ut supponimus; ipsa autem Dei omnipotentia non potest esse tota virtus agendi in his actionibus: alioquin ipsa sola agit, & ab ipsa sola pendet effectus: nullo ergo modo poterit tribui creaturæ, cum nullo vero ac reali modo habeat, vel sustentet omnipotentiam Dei. Et hic quidem discursus, suppositis principiis supra tractatis, evidenter (ut existimo) concludit, in his instrumentis, quæ agunt actione transeunte, sine ulla supernaturali ac physica mutatione positiva prævia, quæ in ipsis fiat, tertium membrum esse eligendum, scilicet, supponi in his rebus inchoatam, & quasi fundamentalem vim, quæ per auxilium elevatur ad agendum, & illam vim potentiam obedientialem activam appellamus: si autem quis sermonem misceat de potentiis animæ, quatenus ad actus supernaturales eliciendos elevantur, in quibus præcedere solet auxilium distinctum ab actuali concursu gratiæ, quod auxilium vocari solet præveniens seu excitans, & censetur esse virtus ad efficiendos tales actus supernaturales, dicendum est breviter (quoniam hæc materia de auxiliis gratiæ amplissima est, & ab hoc loco aliena) esse quidem de fide certum, ad proprios actus supernaturales, præsertim humanos, id est, consentiente & cooperante libero arbitrio factos, necessarium esse non solum supernaturalem concursum gratiæ (quem ego inter gratias adjuvantes merito numerandum censeo), sed etiam auxilium excitans seu præveniens, juxta Conciliorum definitionem. Non est autem certum, quid universaliter hoc auxilium præveniens sit. Itaque si censeatur esse aliqua qualitas per modum actus primi non eliciti a potentia vitali, sed recepti tantum ad eliciendum actum alium secundum, in hoc sensu certum mihi est, non sufficere hoc genus gratiæ excitantis, sed ultra hoc ponendum esse aliud per modum actus secundi, ut plane Concilia docent, dum hanc excitantem gratiam vocant, *Spiritus Sancti inspirationem, vocationem, & motionem*. Et e converso non est mihi certum, illud genus gratiæ per modum actus primi inhærentis potentia esse simpliciter necessarium ad prædictos actus supernaturales eliciendos: nam, licet sit certum dari habitus infusos, non tamen est certum illos concurrere ad omnes actus, sed probabilius est non concurrere ad eos actus, qui sunt dispositiones ad infusionem ipsorum habituum, sed solum ad illos, qui eliciuntur post obtentos ipsos habitus, qui fructus justitiæ appellari solent. Est item certius ad ipsosmet actus, qui sunt gratiæ excitantes, non concurrere prædictos habitus: fingere autem alias qualitates priores habitibus & actibus, quæ per modum actus primi transeuntis (ut ajunt)

infundantur ad illos actus eliciendos, neque in Conciliis aut in Patribus fundamentum habet, neque ulla satis verisimili ratione suaderi aut defendi potest. Rursus, quamvis actus gratiæ excitantis detur propter alium actum supernaturalem libere eliciendum, non est tamen certum, hujusmodi gratiam excitantem physice & per propriam efficientiam influere in alium actum, sed solum moraliter excitare ac elevare potentiam, atque ita etiam in his actibus supernaturalibus non est in universum verum, vel saltem non est certum, ad illos eliciendos dari virtutem inhærentem, & superadditam potentiis, quæ sit actus primus, seu per modum actus primi ad physice efficiendos tales actus: nam hoc deficit tum in actibus excitantis gratiæ (si tamen illi supernaturales quoad substantiam sunt) tum in actibus supernaturalibus, qui sunt dispositiones ad primam gratiam.

Addo denique, etiam in his actibus supernaturalibus, ad quos eliciendos datur auxilium prævium, seu gratia inhærens per modum virtutis activæ, non esse solum tale auxilium totam virtutem ad agendum, seu totum actum primum: quia, cum actus, qui eliciuntur per hanc virtutem, sint vitales & liberi, necesse est, ut non solum a virtute extrinsecus data, sed etiam ab intrinseca, vitali, ac libera efficiantur: atque ita etiam fit, primum membrum partitionis propositæ in prædictis actibus locum non habere. Relinquitur ergo, ut respectu etiam talium actuum tertium membrum verum sit, scilicet in his instrumentis vel potentiis supponi aliquam virtutem, in completam quidem & de se improporcionatam, & indigentem divina ac supernaturali elevatione, & ideo instrumentariam tantum esse, & non principalem. Quæ doctrina tantum abest, ut inclinet in errorem Pelagii, ut potius necessaria sit ad fundandam totam doctrinam de gratia, quam fides docet contra Pelagium. Quia sine hac vi fundamentali non posset natura nostra excitari, neque adjuvari ad opera gratiæ faciendæ: unde etiam necessaria est ad vitandum errorem Lutheri asserentis, potentias nostras solum recipere, non autem efficere hos actus diviniæ gratiæ. An vero hæc virtus a nobis explicata, naturalis, vel supernaturalis dicenda sit, jam est sufficienter tractatum. Nec vero hæc doctrina (quod in eodem argumento tangitur) quicquam favet opinioni Cajetani circa visionem beatam, quod scilicet cum aequali lumine perfectior fiat a perfectiori intellectu: non enim id sequitur ex nostra sententia, nam cum hæc virtus obedientialis, quam ponimus, sit incompleta, & de se improporcionata, non potest agere, nisi juxta mensuram supernaturalis virtutis, seu auxilii, quo elevatur. Et hoc sensu sano modo intelligendum est, si apud auctorem aliquem gravem legatur, in his actibus supernaturalibus, totam virtutem agendi esse auxilium, seu habitum infusum, quod scilicet intelligatur de virtute principali, seu de virtute completa, seu quasi ultimate constituyente, ac mensurante virtutem agendi.

*Solvitur quartum argumentum, & declaratur, an, & quomodo hæc potentia obedientialis sit instrumentaria virtus.*

Quarti etiam argumenti solutio ex proxime dictis facilis est. Petitur enim in illo, an creaturæ ut agens per hanc potentiam obedientialem dicenda sit agere ut instrumentum, an vero ut principalis causa: & si est instrumentum, cujusnam sit instrumentum, & sub qua ratione. Et quidem, quod attinet ad actiones miraculosas & transeuntes, certum est, creaturam non esse principalem causam earum, sed solum instrumentalem, ut a fortiori constat ex his, quæ de Christi humanitate dicta sunt sect. 4. & ex eo, quod de baptismo docet Concil. Trident. sess. 6. cap. 7. & quæ de aliis sacramentis 3. tom. tractabimus. Ratio autem hujus veritatis sumenda est ex propria definitione seu ratione causæ instrumentalis: non enim per se spectat ad rationem instrumenti, ut a causa principali, quæ per illud operatur, quoad suum esse procedat. Quamvis enim hoc in multis reperiatur, præsertim in instrumentis, quæ vocantur separata: quia hæc veluti substituantur ab agente principali, ut vices ejus suppleant in agendo: tamen in instrumentis conjunctis non est id per se necessarium, quia potest unum agens operari per instrumentum ab alio fabricatū, ut exemplis instrumentorum artis facile intelligi potest. Et ratio est, quia ad rationem causæ per se in unoquoque genere solum requiritur



immediatus influxus inter ipsam & effectum: ordo vero illius effectus ad aliam remotiorem causam, a qua proxima causa processit, est per accidens, ut constat de habitudine inter avum & nepotem: sic ergo, ut duæ causæ conjungantur vel subordinentur in agendo, ut principalis & instrumentalis, per se solum requirunt debitum influxum in effectum; quod vero una ab altera procedat, nec per se ac formaliter necessarium est, neque etiam est conditio necessaria ad primum, quod per se requiritur: nulla est enim ratio, qua hujusmodi necessitas ostendatur. Nam cum esse sit prius, saltem natura, quam causare, possunt duæ causæ conjungi ad effectum causandum, si in eis supponatur esse accommodatum ad talem causandi modum, undecumque illud habeant.

Deinde non est per se necessarium ad rationem instrumenti, ut in se recipiat aliquem motum seu influxum principalis agentis distinctum a suo esse, & prævium ad actionem, ut per illum afficiat, vel applicetur ad agendum: quamvis enim hoc in instrumentis artis inveniatur, quia homo operans ut artifex nihil potest efficere, nisi per motum localem applicando activa passivis, vel unū corpus in unum locum introducendo, & expellendo aliud; in instrumentis autem naturæ illud non est necessarium, quia agentia principalia non operantur illo modo, sed physice influendo in ipsum effectum, vel per solum instrumentum, si separatum sit, vel etiam per se ipsa, si instrumentum sit conjunctum. Priori enim modo operatur generans per semetipsum ut per instrumentum, & proiciens movet per impetum: posteriori autem modo concurrunt intellectus agens cum phantasmate, vel forma ignis cum calore, juxta probabiles opiniones: multo ergo minus in instrumentis gratiæ, & omnipotentiæ divinæ est necessarius prior ille modus agendi, quia etiam Deus est principale operans per hæc instrumenta, & per se immediate influens in ipsum effectum, & potest elevare instrumentum, speciali modo cum illo concurrente, quamvis in illo nihil prævium efficiat, ut ex dictis sect. præced. probatum est. Ratio ergo instrumenti proprii ac physici in hoc consistit, quod, licet vere efficiat, non tamen virtute principali, id est, ita proportionata, ut sit ejusdem vel eminentioris ordinis cum effectu in perfectione. Unde fit, ut efficere non possit effectum, nisi ut subest superiori concursui principalis agentis, vel alterius superioris, qui defectum ejus suppleat, ut latius in Metaphysicis disputationibus tractamus. In præsentī vero ratio divini & miraculosi instrumenti ultra hoc habet, quod non ex naturali proportionem, sed ex obedientiali, seu non repugnante operatur, ac deinde hinc habet, ut efficiat per concursum modo suæ naturæ debitum, sed per concursum superioris ordinis. Ex quo ulterius fit, ut actio non sit mensuranda ex naturali perfectione instrumenti, sed ex virtute seu influxu principalis agentis.

Ad argumentum ergo in forma negatur sequela, scilicet, creaturam operantem per potentiam obedientialem operari ut principale agens: jam enim satis declaratum est, quomodo ratio instrumenti ei conveniat. Ad probationem autem sequelæ respondetur, creaturam tunc agere ut instrumentum Dei auctoris gratiæ, & supernaturalium effectuum. Neque ratio, quæ contra hoc fit, est ullius momenti: nam, licet creatura cum omnipotentia obedientiali, quæ in ipsa est, tam activa, quam passiva, procedat a Deo ut auctore naturæ, nihilominus usus ejus, vel in recipiendo, vel in agendo in ratione instrumenti, est respectu Dei ut auctoris supernaturalis: quia necesse non est, ut idem efficiat instrumentum, qui illo utitur, ut diximus: ergo multo minus necessarium erit, ut idem secundum eandem rationem efficiat instrumentum, ut utatur illo: sicut ergo in artificialibus inferior artifex præparat interdum instrumenta, & superior illis utitur: ita hic dicere possumus, Deum ut auctorem naturæ præparare seu creare res aptas, ut sint instrumenta; Deum vero ut auctorem supernaturalem illis uti. Maxime, quia idem omnino est Deus auctor naturæ & gratiæ, solumque per habitudinem ad diversos effectus illas denominationes a nobis recipit, quæ ita sunt subordinatæ, ut una alteram per se supponat; ideo enim Deus potest præter vel supra naturam immutare creaturas, quia est auctor & supremus illarum dominus per infinitam potentiam, qua illas creat, & eodem titulo eisdem potest uti ut instrumentis ad ea omnia, quæ non repugnant; &

ideo, quod potentia obedientialis comitetur creaturam, ut ab auctore naturæ procedat, nihil obstat, imo valde consentaneum & consequens est, ut idem auctor ejus ea uti possit, ut instrumento supra naturam ejus tamquam supremus illius dominus.

Atque hæc quidem difficultatem non habent in actionibus supernaturalibus, seu miraculosis transeuntibus, seu non vitalibus: de actibus vero supernaturalibus immanentibus, & vitalibus intellectus & voluntatis specialis difficultas est, an dicendæ sint potentiæ animæ influere in illos ut instrumenta divinæ gratiæ, an vero ut principia proxime principalia, saltem partialia: nam juxta rationem instrumenti a nobis declaratam, videntur hæc potentiæ dicendæ instrumenta, non minus, quam cætera divina instrumenta. Aliunde vero videtur repugnare, quod influxus sit vitalis & liber, & quod non sit ab operante ut ab agente principali & proximo. Propter quod aliqui negant, has potentias influere in hos actus ut instrumenta, sed ut principalia principia proxima, & operantia, non per potentiam obedientialem, sed per naturalem, quam habent ex natura sua commensuratam his actibus, quamvis non plenam. Sed hæc sententia hoc modo explicata, a nobis rejecta est in solutione 1. argumenti.

Alii dicunt, has potentias influere prædicto modo in hos actus, ut sunt actus credendi, amandi, &c. non vero, ut sunt actus supernaturales. Sed hic etiam modus dicendi non probatur, nam vel per illam reduplicationem indicatur ratio, quæ in effectu sit, vel ratio, sub qua sit. Primum dici non potest, quia cum in actu amoris supernaturalis, v.g. in re non distinguantur ratio amoris, & talis amoris, non potest actio physica attingere unum, quin attingat aliud, maxime cum ratio amoris ut ibi contracta est, ad supernaturalem ordinem sit elevata: unde non potest aliqua potentia esse principium principale illius effectus secundum unam rationem, & instrumentale secundum aliam, quia & ratio generica elevata est ad supernaturalem ordinem per differentiam specificam, & e contrario actus etiam secundum differentiam specificam vitalis est & liber. Secundum autem de ratione, sub qua non recte hic accommodatur, qua ratio aliqua communis inventa in effectibus non attribuitur ut adæquata ratio sub qua respectu potentiæ activæ, & ut illi commensurata, & naturaliter proportionata, nisi illa potentia habeat naturalem vim & proportionem cum omnibus inferioribus sub tali ratione contentis, quod in præsentī dici non potest, ut ex dictis patet. Assumptum ostendi potest primo inductione, tam in omnipotentia divina, quam in omnibus inferioribus: deinde ratione, quia potentia activa ut sic non attingit rationes has communes, ut prædictas & abstractas, sicut attinguntur interdum objecta a potentiis cognoscentibus, & amantibus ut sic, quia effectio semper versatur circa particularem actum, seu terminum productum; ergo ratio communis non potest assignari, ut adæquata ratio sub qua potentiæ productivæ, nisi potentia se extendat ad omnia sub tali ratione contenta, alioquin excedit talis ratio ipsam potentiam. Sed in præsentī voluntas, vel intellectus, ut sunt naturales potentiæ, non se extendunt ad omnes actus cognitionis & amoris, ut dictum est: ergo non respiciunt illas rationes communes, ut adæquatas & proportionatas rationes, sub quibus operantur.

Quod si quis contendat, rationem formalem sub qua esse illam rationem communem, quæ sub se comprehendit omnes illas rationes particulares, ad quas extendi potest actio potentiæ, vel naturaliter, vel ex elevatione. Contra hoc est, quia sequitur in primis, eadem ratione idem esse dicendum de propriis & specificis rationibus, ad quas efficiendas potest elevari potentia. Sequitur deinde, idem esse dicendum de quacumque alia virtute naturali activa actione transeunte, quatenus elevatur ad efficiendam gratiam, vel aliam rem similem, quæ in aliquo genere convenit cum effectu sibi connaturali. Neutrum autem horum conceditur, neque recte concedi potest. Et ratio a priori esse videtur, quia, quando illa ratio communis de se est indifferens ad res inferioris & superioris ordinis, & potentia tantum potest sua vi naturali illam attingere, ut contracta est in rebus inferioris ordinis, quibus naturaliter est commensurata, tunc non attingit per se primo illam rationem communem, etiam ut rationem sub qua, sed solum ut contractam, sibi que

An potest animæ efficiant supernaturales actus ut instrumenta.

1. Opinio rejicitur.

2. Opinio refutatur.



sibi accommodatam; & ideo non potest ratio illa communis dici adæquata ratio sub qua talis potentia, & consequenter neque attribui potest tali potentia, quod naturali vi attingat effectum superioris ordinis, etiam sub illa ratione communi. Maxime, quia potentia activa non potest attingere effectum sub ratione communi, nisi attingat totam specificam rationem, quam effectus in re habet, & ideo non potest ratio communis, si ut præcisa sumatur, assignari tamquam propria ratio, sub qua potentia attingit effectum, quia ratio, sub qua debet intime inveniri, & quasi transcendere totum effectum, & totam rationem, quod si hoc modo sumatur ratio illa communis actus cognoscendi, & amandi, ut naturales actus & supernaturales in se complectitur, sic revera non est adæquata ratio in ratione effectus respectu intellectus & voluntatis creata; ut ex dictis satis constat.

Tertia  
opinio  
improba-  
tur.

Alii distinguunt aliter, nimirum, actus supernaturales quoad substantiam & entitatem suam fieri ab his potentiis ut instrumentis divinæ gratiæ; tamen, quatenus sunt actus vitales & liberi ipsi homini, esse ab illis ut a proximis principiis principalibus, & a naturali etiam vi, pro ut ab obedientiali distinguitur, propter rationes dubitandi supra tactas. Verumtamen hæc distinctio nihil ad rem explicandam confert, ut patebit intelligenti, quid importetur per illas denominationes vitales ac liberi actus. Ratio enim vitalis actus nihil dicit in entitate & natura ejus actus, qui vitalis dicitur, nisi talem dependentiam actualem a potentia vitali, vel aptitudinem ad illam. Duobus enim modis dici potest actus vitalis. Uno modo, veluti aptitudine, quia de se natus est ita fieri a potentia vitali, ut eam possit informare, & in actu ultimo vitæ constituere, & hoc nihil omnino addit supra essentiam seu entitatem actus, quia hæc est ratio essentialiter constituens illum. Unde, si potentia instrumentaliter efficit actum quoad totam essentiam, & substantiam ejus, etiam efficit illum instrumentaliter, quatenus hoc modo vitalis est. Alio modo potest actus vitalis dici, quia actu procedit a potentia vitali; & hoc modo præter entitatem actus, quæ in illo tamquam in termino actionis consideratur, addit solum talem dependentiam seu actionem, quæ intrinsece ac necessario respiciat potentiam vitalem ut proximum principium, a quo manat: nihil enim aliud excogitari potest, quod per talem denominationem significatur: fingere enim in actu vitali alium modum, ex natura rei distinctum ab entitate actus, & a dependentia ejus, seu ab actione & a termino actionis, neque explicari potest, quid sit, neque ad quid sit; nam, illis duobus positis, intelligitur sufficienter tota ratio actus vitalis in ratione effectus elicit a potentia, quam nunc consideramus: ergo improbabile est alium distinctum modum excogitare, quo ratio vitalis actus compleatur. Hoc autem supposito, non habet locum distinctio data, nam ibi tantum est unica actio, qua talis actus procedit a potentia vitali; ergo vel potentia attingit illum effectum per illam actionem ut causa principalis, vel ut instrumentalis, si priori modo; ergo effectus, tam ut vitalis, quam secundum suam entitatem, procedit a potentia ut a causa principali: si autem potentia per illam actionem attingit effectum quoad entitatem ejus, ut instrumentum; & nihilominus effectus est vitalis actus, & ut est a tali potentia, denominatur vitalis: ergo etiam ut vitalis procedit a potentia ut instrumento, cum ab actione instrumentaria vitalis denominetur.

De alia vero denominatione liberi clara ratio est, quia liber actus supra vitalem nihil intrinsecum actui addit, sed solum denominationem a facultate, quæ est in potentia ad suspendendum influxum in talem actum, vel ad adhibendum contrarium, quæ facultas, quatenus est ad non agendum, vel ad efficiendum aliquem actum naturalem, repugnantem supernaturali actui, potest quidem attribui potentia ut principali virtuti, non tamen quatenus includit positivam facultatem ad eliciendum actum supernaturalem; & quia denominatio liberi hæc omnia includit, ideo actus ille, etiam ut liber, non potest attribui potentia ut principali virtuti, sed solum secundum quid quoad prædictam negationem, quoad ad rem, de qua agimus, nihil refert. Si autem quoad modum loquendi quis contendat, denominationes vitales & liberi sumi ex habitudine ad potentiam tamquam a principali forma denominante, facile id potest concedi, etiam si in-

Suarez Tom. XVI.

fluxus potentia instrumentalis sit, in ratione actionis seu activi principii; nam ab instrumento & ab actione ejus potest aliqua denominatio principaliter sumi, ut productio gratiæ, quatenus actio sacramentalis denominatur, principaliter recipit hanc denominationem ex dependentia, quam habet a sacramento: & nutritio ut sic præcipue denominatur a dependentia, quam habet a potentia nutritiva, quamvis hæc solum concurrat ut organum & instrumentum animæ ad illam actionem: sic ergo in præsentia, quamvis actus vitalis ut sic denominationem hanc recipiat ab influxu vel habitudine ad potentiam animæ, adhuc superest questio, an influxus ille esse debeat causæ principalis, vel sufficiat instrumenti proportionati.

Alii distinguunt aliter, quia vel actus supernaturalis sit a sola potentia cum auxilio extrinseco, & tunc sit a potentia ut instrumentum: si vero fiat a potentia informata habitu supernaturali, sit ab ea ut a causa principali. Sed hæc etiam distinctio non explicat rem, quamvis fortasse in modo loquendi possit aliquo modo admitti. Quod ita declaro, nam in primis in hac distinctione manet integra illa difficultas, quomodo instrumentalis actio sufficiat ad actum vitalem & liberum. Deinde etiam manet integra difficultas, quomodo potentia, etiam informata habitu, possit influere ut causa principalis: rationes enim, quæ procedunt de potentia sine habitu, eodem modo urgent in potentia affecta habitu. Probatur, quia quando potentia habet habitum, non per solum illum efficit, sed etiam per suam entitatem, & per illam activitatem radicalem, quam habet innatam ante habitum, & ab illa habet actus, quod sit vitalis: ergo etiam tunc adhibet potentia proprium influxum per eandem activitatem obedientialem, per quam illum adhibet, quando operatur sine habitu; ergo eodem modo operatur ut instrumentum. Et confirmatur, ac explicatur amplius, nam licet habitus quantum ad id, quod confert, sit causa principalis, tamen non confert totam vim agendi, sed supponit inchoatam & imperfectam, ac complet, & elevat illam; ergo semper illa virtus, quæ se tenet ex parte potentia, est ejusdem ordinis & modum loquendi, quando informatur habitu, potest dici speciali titulo causa principalis vel denominative, & quasi materialiter, quia sustentat habitum, qui est causa principalis, vel quia ratione habitus intrinsece inhærentis debitus est tali potentia supernaturalis concursus, quo possit per talem habitum operari, & hoc modo dicitur potentia intrinsece elevari per habitum, quia nimirum ex utroque componitur quoddam integrum principium, cui simpliciter connaturale est, tali modo, & cum tali concursu operari, quamvis hoc solum ratione ultimæ & supernaturalis formæ illi conveniat, quomodo dici solet, intellectui informato lumine gloriæ connaturalem esse visionem beatam. Sed hoc, ut dixi, ad modum loquendi spectat, difficultas autem, quæ in re ipsa versatur, adhuc superest explicanda.

Dicunt ergo alii non repugnare illa duo, scilicet, quod hæc potentia agant tantum virtute obedientiali, & quod nihilominus agant ut principalia principia. Quod si obijcias, hinc sequi cæteras creaturas, quando elevantur ad agendum per potentiam obedientialem, agere etiam ut principalia principia respondent, negando consequentiam, quia potentia vitales elevantur ad agendum intra idem genus, quod attingere possunt naturali virtute; quamvis eleventur ad agendum in altiori specie, quam possint efficere naturali virtute, intellectus enim naturaliter potest efficere intellectionem, seu cognitionem, elevarur autem ad eliciendam cognitionem supernaturalem; & ideo semper retinet eundem modum agendi causæ principalis, quod non ita accidit in aliis rebus, qui ad supernaturaliter agendum elevantur. Sed contra, quia licet non in omnibus aliis rebus seu instrumentis in animatis servetur illa proportio, tamen in multis videtur reperiri: aqua enim elevarur ad producendam gratiam, quæ continetur in genere qualitatis vel dispositionis, sub quo genere potest aqua aliquid producere naturaliter, v. g.

Quarta  
opinio in-  
sufficiens est.

Quintam  
opinionem,  
repugnans  
tæ dicere,  
re, ostendit  
dicitur.



*frigiditatem*: elevatur ergo eodem modo seu proportionem, scilicet, ad quandam altiore speciem sub illo genere contentam, quod sua naturali ac principali virtute potest attingere: ergo vel aqua etiam erit principalis causa gratiæ, quod est plane falsum, vel hic modus agendi non obstat, quominus intellectus instrumentaliter efficiat supernaturalem actum.

Et confirmatur primo, quia in superioribus est ostensum hunc modum elevationis non transcendere activitatem obedientialem, & eisdem rationibus ostendi potest non transcendere activitatem instrumentalem; imo videtur aperte repugnare aliquam rem agere ut principale principium, & non agere virtute connaturali: ergo & e contrario repugnat agere virtute tantum obedientiali, & non agere ut instrumentum. Antecedens patet, quia principalis causa dicitur, quæ agit virtute propria, & de se proportionata ad effectum, tanquam existente ejusdem, vel superioris ordinis cum illo, ut constat ex communi & recepta definitione causæ principalis; sed causa, quæ hujusmodi est, operatur virtute maxime connaturali ac propria: ergo.

Et confirmatur secundo, quia magis est intellectum elevari ad efficiendam intellectionem supernaturalis essentia vel speciei, quam calorem ut unum v.g. elevari ad efficiendum calorem ut octo, quia major est excessus in essentia specifica intra idem genus, quam excessus in sola intensione intra eandem speciem; sed si calor ut unus elevatur ad efficiendum calorem ut octo, non potest elevari ad agendum ut principale agens, sed tantum ut instrumentale: ergo idem majori ratione dicendum est de intellectu. Responderi potest esse differentiam, quia calor (& idem est de cæteris instrumentis inanimatis) sistit in effectu producto tanquam in ultimo termino & fine suæ actionis, quatenus ab illo est ut a principali principio, actio autem intellectus tendit principaliter in objectum, & quia intellectus semper elevatur ad agendum circa aliquod objectum, quod naturaliter potest aliquo modo attingere, ut v.g. circa Deum; ideo dicitur potius intellectus agere, ut principalis causa, quam calor elevatus. Quod si objicias hanc differentiam non videri universaliter veram, quia aliqua res excogitari possunt, quas non possit intellectus naturaliter cognoscere, ut ad eas vel cognoscendas, vel intuendas elevari possit, ut sunt relationes divinæ, unio hypostatica, gratia, & similia. Respondebitur, quamvis homo non possit hæc naturali cognitione invenire, posse tamen per doctrinam hæc omnia naturaliter concipere vel apprehendere aliquo modo, & similiter posse circa illa aliquod naturale judicium ferre, saltem per humanam fidem, quamvis non possit propriam scientiam vel conceptionem de illis naturaliter consequi. Sed, licet hæc vera sint, parum certe conferre videntur ad rem, de qua agimus, tum quia illa cognitio per solam fidem humanam, & testimonium dicentium plus habet de ignorantia, quam de cognitione, tum, magis ad rem, quia hæc omnia non sufficiunt, ut propria ratio causæ principalis conveniat intellectui operanti per virtutem obedientialem elevatum. Ac denique, quia objectum illud, licet materialiter sit idem, tamen ut sic non est objectum specificans, sed est veluti commune & genericum; & ideo eadem ratio est de illo, quæ est de generica ratione actus intelligendi: sicut ergo hæc non sufficit, ut intellectus sit causa principalis actus, neque etiam sufficit, quod intellectus possit habere aliquem actum circa illud materiale objectum. Et ratio sane est eadem, quia, quando intellectus elevatur ad attingendum illud objectum supernaturale, seu per actum supernaturalem, jam tunc non agit ex vi illius activitatis naturalis, qua potest per alium actum imperfectum circa illud materiale objectum versari: ergo hoc nihil potest conferre, ut illa activitas, quæ est per elevationem, censeatur esse ab ipso ut a causa principali. Sed dici tandem potest omnes res alias, quæ elevantur ad actiones miraculosas, non agere vitali actione, has autem potentias elevari ad agendum vitali modo, & hanc differentiam satis esse, ut hæc potentia eleventur ad agendum, ut principia principalia, quamvis reliquæ res sint tantum instrumenta. Sed hæc responsio nec satisfacit argumentis factis, nec declarat, cur illa duo habeant necessariam connexionem, scilicet, esse principium proximum actus vitalis ut sic, & esse principium proximum principale ejusdem actionis.

Mihi vero dicendum videtur has potentias, quantum ad id, quod conferunt in efficiendis actibus supernaturalibus quoad substantiam, se gerere ut instrumenta divinæ gratiæ, & non ut principia principalia, tum ob rationem factam, quia illis nullo modo convenire potest ratio causæ principalis, tum quia efficiunt virtute obedientiali, & non naturali, tum etiam quia solum agunt vel elevata ab alio, in cujus virtute principaliter nituntur ad operandum, quæ est fere definitio causæ instrumentalis, ut supra tactum est. Et confirmatur, quia hæc potentia in hujusmodi actione non habent limitatum terminum, sed ultra omnem gradum in infinitum possunt magis & magis perfectos actus elicere, vel secundum speciem, vel secundum intensionem: ergo signum est non agere ut principales virtutes, neque integras, neque partiales: quia in omni virtute sua principali limitata sunt, sicut & in essentia & perfectione. Atque hinc consequenter est necessario dicendum hæc duo non includere inter se repugnantiam, scilicet agere vitaliter, & instrumentaliter: quia certum est has potentias in his actibus vitali modo operari. Quod autem illa duo non repugnent, probatur primo, quia neque in propriis definitionibus seu conceptibus involvunt inter se repugnantiam, neque aliqua alia satis probabili ratione hætenus ostensa est. Ratio enim actus vitalis solum in hoc consistit, ut procedat a proximo & radicali principio vitæ, taliter ut ipsummet principium formare possit, & in ultimo actu constituere; sed hoc totum consistere potest cum hoc, quod ipsummet radicale & proximum principium etiam vitæ, quamvis per suam entitatem influat in actum, non autem connaturali modo, nec secundum naturalem proportionem, nec per concursum naturæ debitum, quæ sufficiunt ad rationem instrumenti: ergo non repugnat activitas instrumentalis cum vitali. Unde argumentor secundo, nam potius hoc spectat ad omnipotentiam Dei, ut unaquaque creatura possit uti ut instrumentum, modo illi accommodato, id est, rebus vitæ carentibus, ut inanimatis instrumentis; anima vero & potentiis ejus, ut vitalibus instrumentis. Unde Concil. Trident. sess. 6. can. 4. definit hominem in his actibus per potentias suas non concurrere tantum recipiendo, sed agendo, quia non se habet sicut inanime quoddam nihil omnino agens: ergo Concilium nihil aliud requirit, nisi quod agat sufficiente modo ad actum vitæ, sive ut principale, sive ut instrumentale principium operetur.

Tertio est similiter dicendum hæc duo non repugnare scilicet agere instrumentaliter, & libere, quia certum de fide est voluntatem in his actibus libere operari, & tamen nos dicimus operari ut instrumentum: ergo oportet dicere, sicut potest dari instrumentum vitæ, ita & dari posse instrumentum liberum: hoc autem eisdem rationibus cum proportionem applicatis suaderi potest. Et, supposito præcedente puncto, potest facillime in hunc modum declarari; nam instrumentum liberum supra vitale solum addit facultatem ad non eliciendum actum, vel ad eliciendum actum contrarium: hæc autem facultas, ut supra dixi, esse potest in potentia ex propria virtute, & connaturalis, quamvis virtus ad eliciendum actum supernaturalem sit tantum obedientialis, & instrumentalis: ergo optime intelligitur posse voluntatem esse instrumentum liberum ad aliquem actum, quoniam ita potest illum elicere ex gratia Dei, & ut instrumentum ejus, ut tamen possit propria virtute illum non facere, vel etiam elicere contrarium actum, qui mere naturalis erit: ergo ratio instrumenti liberi optime intelligitur supposita ratione vitalis instrumenti in potentia de se libera, quæ ita recipit elevatam virtutem ad eliciendum actum, ut non privetur propria ad suspendendum suum influxum, vel eliciendum contrarium actum. Exemplo res declaratur; voluntas enim proposita sufficienter fide, virtute propria, & in eo genere ut principalis causa, potest non velle credere, aut etiam velle non credere: ergo, quamvis huic facultati addatur supernaturalis virtus, seu elevatio sufficiens, ut possit velle credere, saltem ut vitale instrumentum divinæ gratiæ, non privabitur priori facultate naturali: manebit ergo libera ad supernaturalem actum, quamvis solum instrumentaliter possit illum elicere: non ergo hic modus agendi instrumentalis repugnat libertati; maxime cum ad illum non sit necessaria aliqua motio vel qualitas prævia circa ipsummet instru-



instrumentum, physice illud prædeterminans, ut aliis locis copiose tractatum est, & ex dictis de elevatione instrumentorum Dei sine prævia qualitate facile intelligi potest. Atque hæc sufficiunt de quarto argumento.

*Solvitur quintum argumentum, & declaratur, an potentia obedientialis sit materialis, vel spiritualis.*

Quintum argumentum petit aliam difficultatem de hac obedientiali potentia, scilicet, an materialis, vel spiritualis dicenda sit: nam si potentia ex objecto suam rationem & denominationem sumit, videtur hæc potentia spiritualis esse dicenda, cum ad spirituales effectus se extendat: si autem ex subiecto, vel quasi subiecto, sumit entitatem, potius materialis esse videtur, cum in materiali entitate reperitur. Atque eodem modo interrogari potest, an talis potentia substantialis, vel accidentalis dicenda sit: quia & in accidentibus, & in substantiis reperiri potest, & ad substantias, & accidentia producenda potest elevari. Rursus ejusdem fere rationis est quæstio, an hæc potentia una vel multiplex dicenda sit, vel in eodem, vel in diversis; nam cum in variis rebus invenitur, ex hac parte videtur esse multiplex in illis, cum vero ad multiplices effectus etiam in eadem re sufficiat, ex hoc capite videtur etiam in eadem re multiplicari. Aliunde vero propter identitatem, quam habet cum re, in qua existit, videtur manifestum non posse in eadem re multiplicari, & consequenter cum in qualibet re ad eosdem effectus extendatur, videtur esse eadem vel ejusdem rationis in omnibus. Et quoniam hæc quæstiones & similes non videntur habere convenientem responsum; ideo suspectam videntur reddere hanc potentiam obedientialem. Sed, si quis recte consideret, hæc omnia compertiet ita interrogari, ac si potentia esset aliqua propria qualitas distincta aliquo modo ex natura rei ab his rebus, in quibus invenitur, quo modo non solum suspecta, sed plane impossibilis mihi videtur talis potentia, ut supra dixi: supponendo autem non esse rem distinctam, facillime quæstiones illæ expediuntur; imo vix eis locus relinquitur, eademque in potentia passiva moveri possunt.

Dico igitur ad primam interrogationem potentiam hanc ex se nec materialem esse, nec immaterialem, sed talem, qualis est res, quæ ut instrumentum assumitur; nam si res illa spiritualis est, nemo negabit vim ejus activam esse spiritualement, sive ad res spirituales efficiendas elevetur (quod per se notum est) sive ad materiales res producendas, vel etiam creandas assumatur, tum quia res ipsa, quæ, ut instrumentum assumitur, spiritualis est, tum etiam, quia res & virtus spiritualis potest esse effectrix materialium rerum, quia est ordinis superioris, ut virtus divina, quæ maxime est spiritualis, effectrix est rerum materialium. Deinde, si res materialis elevetur ad efficiendas alias res materiales, nulla est difficultas, quod potentia, secundum quam elevarur, materialis sit: quia & res, quæ elevarur, & actio, & effectus, ad quem elevarur, materialia sunt. Denique, etiam si res materialis ad rem spiritualement efficiendam elevetur, potentia, secundum quam elevarur, formaliter (ut sic dicam) & simpliciter materialis est, licet secundum quid & virtualiter possit dici spiritualis. Probatur, quia illa potentia nihil aliud est, quam entitas ipsius rei, nihilque ex natura rei distinctum supra illam addit: ergo non potest non esse materialis & extensa ac partes habens, si entitas ipsius instrumenti ejusmodi est. Item non refert, quod ad effectum spiritualium efficiendum elevetur, quia potentia hæc nullam habet speciem realem ex habitudine transcendentali ad talem effectum, ut supra ostensum est. Item non obstat improprio, quæ esse videtur inter materialem virtutem, & spiritualement actionem seu effectum, nam hæc solum impedire potest connaturalem habitudinem inter talem virtutem instrumentalem & talem actionem, non tamen potest impedire efficientiam per subordinationem ad imperium primi agentis, a qua talis potentia obedientialis nominatur. Atque hoc sensu dicit D. Th. & alii Theologi, qui illum sequuntur, sacramenta, licet res materiales sint, elevari, ut sint instrumenta ad efficiendam spiritualement gratiam: hæc est enim omnipotentia Dei, ut respectu illius instrumentum materiale latius pateat in agendo, quam ejus natura, seu ordo rerum, in quo existit, postulare videatur. Etenim, si multi censent phantasma materiale esse accommodatum instrumentum naturale ad producendam intelligibilem speciem,

*Suarez. Tom. XVI.*

cum tamen negare non possint, quin tota vis activa, quæ in phantasmate existit, materialis sit: quid mirum, quod res materialis per potentiam formaliter materialem possit esse instrumentum Dei ad spirituales actiones? Dici autem potest hæc potentia virtute esse spiritualis, quia eo modo, quo est causa, virtute continet effectum, non quidem eminenti virtute, sed instrumentali, quo modo sacramentum dicitur continere gratiam Christi, & semè dicitur continere rem ex illo producendam, & objectum dici potest contineri in specie tanquam in semine.

Atque hinc constat, eodem plane modo respondendum esse ad secundam interrogationem; nam, cum hæc potentia non sit aliquid distinctum ab instrumento quoad entitatem & realitatem suam, talis est, qualis est res, quæ in instrumentum assumitur. Unde, si res illa sit substantia, potentia etiam erit substantialis, etiam si ad efficiendam accidentia assumatur, tum quia non accipit ab eis speciem; tum etiam quia nihil repugnat rem substantialem esse principium rerum accidentalium, ut patet de divina virtute, & de forma substantiali, saltem quatenus est radix suarum proprietatum. Quod, si fortasse substantia creata non potest naturaliter esse principium proximum, & instrumentale ad proprias actiones accidentales, illud est propter naturalem improprietatem, vel etiam, quia substantia ut sic non subordinatur alteri, ut proprium instrumentum, nisi auctori suo; & ideo neutra ex his rationibus impedit, quominus in substantia possit esse potentia obedientialis ad efficiendum accidens. Si autem res, quæ assumitur ut instrumentum, sit accidens, potentia hæc accidentalis in ea erit, etiam si ad substantiam efficiendam elevetur propter easdem rationes, quas confirmat naturale exemplum, juxta opinionem satis probabilem & receptam, quod accidens, ut calor, verbi gratia, est instrumentum ad producendam substantiam, cum tamè in calore quidquid est virtutis & activitatis, sive principalis, sive instrumentalis, nō sit nisi accidentale.

Hinc denique ad tertiam interrogationem facile respondetur hujusmodi potentiam in unaquaque re tantum esse unam secundum rem, quamvis secundum rationem & conceptus nostros inadæquatos possit multiplex distinguui in ordine ad varios effectus, quomodo dicere possumus in verbis humanis esse virtutem obedientialem ad iustificandum, vel transubstantiandum, vel etiam ad creandum: quod autem hæc omnia sola ratione distinguantur in eodem instrumento, patet ex dictis, quia non distinguuntur ex natura rei ab entitate instrumenti, neque addunt illi novam speciem, aut novum modum: ergo neque inter se distinguui possunt. Possimus etiam naturali exemplo id explicare, nam idem calor est principalis virtus ad producendum calorem, & instrumentalis ad producendam substantiam, & conjunctus cum forma ignis est virtus ad producendam formam ignis, & cum forma aeris ad producendum aerem, &c. & tamen hæc omnia in calore, non re, sed ratione tantum distinguuntur: quia non addunt illi novum modum, aut novam entitatem realem, sed ipsa entitas caloris ex vi suæ essentialis habet totam illam vim, quam nos intellectu partimur in ordine ad diversa: idem ergo, seu simile, potest in præfenti facile intelligi. At vero in diversis instrumentis seu creaturis hæc potentia realiter diversa est pro rerum diversitate, tamen secundum rationem potest dici eadem, in quantum eodem titulo, & quasi sub eadem ratione, omnibus rebus creatis convenit, scilicet, quatenus hoc ipso, quod entia creata sunt, plane subjiciuntur auctori suo in his omnibus, quæ non repugnant.

*Solvitur sextum argumentum, & declaratur, qualis sit actio a potentia obedientiali progrediens.*

In sexto argumento tangitur difficultas de actione, quæ progreditur ab hac potentia obedientiali, qualis sit, & quam habitudinem ad illam dicat. Ut autem melius intelligatur, loquamur de actione, qua gratia fit medio baptismate, vel per Christi humanitatem. De qua certum esse existimo esse distinctam ab actione, qua eadem gratia numero vel conservari vel fieri posset a solo Deo absque ullo instrumento, quod mihi satis probat sextum argumentum propositum. Et quia intelligi, ut existimo, non potest, quod eadem res nunc pendeat ab una causa, nunc vero nō pendeat ab illa, sed ab alia, quin intercedat aliqua mutatio, saltē in ipsa dependentia: quia supponimus nec-

An potentia obedientialis sit substantia vel accidens.

An hæc potentia sit una, vel plures.







sive, quam potest producere in effectum, licet enim non possit infinitum producere, ut nunc suppono, potest tamen in infinitum semper intensiorem effectum producere, quod satis est ad infinitatem potentie in hoc genere, ut est in Philosophia notum, atque hoc modo est in voluntate & in intellectu fundamentum, ut elevari possint ad efficiendum visionem vel affectionem Dei in qua intentione, etiam si in infinitum procedatur, & eodem modo aqua, licet potest esse instrumentum ad producendos quatuor gradus caliditatis, ita ad producendos centum gradus caliditatis, & sic in infinitum. Secundo esse potest hanc limitationem variare, & multitudinem effectuum diversarum rationum, in quibus procedi etiam potest in infinitum, nam, qua ratione elevata fuerant verba Christi ad producendam gratiam, vel ad convertendam substantiam panis in corpus suum, poterant etiam elevari ad quovis alios effectus, ubi specialis repugnancia inventa non fuisset. Tertio potest hanc infinitatem considerari in modo agendi, quia per hanc activitatem immutantes res, non tantum ad formas naturales, sed etiam ad supernaturales, nec solum naturali modo, sed etiam extrinsecum & supernaturalem: hoc autem indicat instrumentum quendam modum operandi, & hanc potest limitationem includitur in illo quasi objecto, cum dicemus hanc potentiam se extendere ad omnem actionem instrumentalem, in qua specialis repugnancia inventa non fuerit.

Jam vero in particulari inquirere, an hanc vel illa actio involvat hanc repugnanciam, an infinitum effectum procedere, & a nobis insituro alienum: de his autem actionibus solet esse specialis difficultas, & utraque potest ad Christi humanitatem pertinere. Una est actio creationis, an illa specialiter repugnet dicere respectum dependens ad instrumentum creatum, de qua nonnulli stringentes sectione ultimam hujus disputacionis. Altera est de actione seu activitate, de qua iam supra diximus non repugnare, quod fiat per principium instrumentale, etiam quatenus vitalis est, seu talem deum nationem recipit a principio, a quo ducit, & in quo recipitur, commode principium illud vitale sit intrinseca facultas formae vitalis et sic. Hoc vero alterius quærit potest, an principium extrinsecum, & de se non vitale, possit esse instrumentum ad efficiendum actum vitalem, ut v.g. in Christus per humanitatem suam tanquam per instrumentum possit in nobis efficere actus seu motiones vitales. De qua et possent multa dici, sed quia in alio loco tanguntur, & determinatur hanc tantum amplexata est, brevitatis et modo, quo Deus in nobis efficit nos actus vitales, posse illos efficere per instrumentum creatum extrinsecum, instrumentum, ac materiam, non posse tamen Deum seu efficiens hunc actus in nobis, ut ex vi formae induxit deum, actus vitales licet in nobis sine induxit nostro, cum hanc denominatione ab hoc induxit formaliter sumatur, vel ad illam essentialiter requiratur, ut nunc suppono. Sed potest Deus induxit suo nobiscum efficere in nobis hos actus, vel etiam excitare aut facere, ut scilicet, quoad hoc ergo, quod ipse facit, potest hanc actionem uti et instrumentum, quia secundum eam rationem non involvit actus repugnanciam, cum ille sit induxit agentis extrinseci, a quo non ducit actus formaliter, quod vitalis sit, sed effectus, ut tantum in quo genere potest Deus per creaturam facere, quod se sola facit. Et eadem ratione potest Deus per se supplere in actu vitali concursum speciem intellectus, vel habitus, quia actus non habet inde formaliter quod vitalis sit. Unde potest etiam alium concursum supplere per aliam creaturam ut per instrumentum: ergo & induxit, quem vis admittit, potest communicare cum creatura, utendo illa ut instrumento. Oportet ergo distinguere in actu vitali concursum illum principium, unde habet, quod actus vitalis sit, seu (ut ita dicam) ut sit extrinsecum utriusque formaliter, & ad hanc non potest adduci extrinsecum vel maxime instrumentum, tamen ratione, quia actus vitalis requirit, ut induxit alios concursus extrinsecos, qui dici possunt non vitales, nulli repugnat, quod ad illum efficiendum adhibetur extrinsecum instrumentum, etiam maxime. Et eadem ratione, supponendo posse Deum se solo producere totam entitatem actus vite, talem extra substantiam, in quo actus exerceat manus formae vitalis, etiam potest hanc talem actus fieri per quovisque creaturam et instrumentum Dei, quia ut sic, non pendet essentialiter a principio intrinseco, & hoc secundo, a hanc non est re-

pugnancia. Et hanc sententiam de priori limitatione hanc per nos et obedientiam.

De potentia autem res est facta, una ex diffinitione hanc potentia nihil aliud habet, nisi quod res extrinsecum, ergo non potest esse intensio aut extensio magis, ut magis, immo nec magis perfecta, quam se extrinsecum, ut convenire deus. Neque hoc potest repugnare illi potest limitationi, quia illa non tantum est perfectio, sed extensio, cum hanc potentiam obliuiscimus habet, quam ex perfecta subiectione, quam habet ad Deum, & ex lastime dominio & potestate Dei. Et vel maxime, quod omni concordes, quem creatura in hoc modo efficiendi potest adhibere, est finis & imperfectio, unde non commutatur perfectio effectus, sed modo concursus ipsius instrumenti, qui est per elevari ad hanc subiectionem ad infinitam virtutem ut principium operantem. Et propter eandem causam non est levis sententia, quod hanc potentia omnibus creatis entibus concorsit, hanc perfectio, hanc imperfectio finis, quia non commutatur perfectio effectus, nec concorsit illis, nulli quatenus entia creati sunt primo agenti subordinata, neque ad eum proportionem aut hanc rationem requirit cum effectus. Et eadem autem ratio prevalet, ut hanc potentia obliuiscimus, seu hanc modo agendi instrumentali, non extendatur ad divinas & increatas relationes, quia supponit imperfectio, quia illis concorsit non potest, ut in §. primo, tractando de efficientia instrumentorum, verum dicam. Denique ex eodem principio videtur, ut hanc potentia determinetur ad agendum, quia concursus principii agentis, a cuius voluntate & actione per illam pendet in agendo. Neque hoc est contra rationem potentiam activam, quæ superiori agenti subordinatur, ut patet etiam in naturali, nam potentia progressiva, v.g. actus est, & de se indifferens ad motum, ut hanc & motum solum vel deorsum, per voluntatem autem vel appetitum, ad hanc modum potius, quam ad alium determinatur, ad hanc ergo modum intelligi potest in hac potentia, quod vis non oporteat in omnibus esse determinatam, quia concorsit divinus cum hoc instrumentum alterius rationis est, & ipse se accommodat hoc instrumentum, utriusque rationis & eugenicam, secundum divinas providentia sapientiam, infinitamque potentiam.

## SECTIO VII.

*Utrum hoc virtus ministrorum Christi se extendat ad effectus sui aspectus.*

Explicamus, quid sit hoc gratia ministrorum, & quomodo ardeat effectus suos, nunc docet nonnullas difficultates circa hoc occurrentes. Et precipue tres graviores, quas nunc tractare, ab doctor explicamus, ad quas effectus se extendat hoc virtus. Primo ergo difficultas est, an indigeat humanitas Christi contactu phisico, seu propinquitate locali ad rem aliam, ut circa illam possit ministrum operari. Et ratio dubia esse potest, quia propinquitas seu contactus est in omni agente phisico necessaria conditio ad agendum, adeo et Deus, ipse suam sequitur ad agendum per dominatorem suam, operari enim hoc potest, nulli ubi est, ut in §. primo. D. Th. docet, & sumitur ex Phil. Act. 17, ut modo colligit Deum non longe a se habere ab unoquoque nostrum, quia in ipso vivamus, movemur, & sumus: est ergo conditio commune instrumenti, & necessaria omni agenti phisico, seu omni taliter proprie efficiendi. Et confirmatur, cum et virtus operari non potest, nisi ubi est potens, neque hoc propter aliam immensitatem, sed propter ipsam effectivam, ergo nec potest communicare humanitati, ut operetur, nec non est. Et confirmatur, qui non potest operari humanitas, quando non est, seu in eis tempore instrumentum neque ubi non existit, seu circa res non distantes.

In hoc difficultate, quidam propter rationem factam assumunt Christum per humanitatem suam tantum potest efficere ministrum per contactum phisicum, vel instrumentum operantem, per quam diffundit potentia virtus, vel alia similis actio: unde si intendamus circa hanc difficultatem negat effectus, negat per veram efficientiam humanitatis hanc locum, sed solum per modum concorsit, nulli fingimus augumentum, quia instrumentum illud est ad humanitatem, utque ad locum, nec debet effectus, per



per quam instrumentaria virtus applicabatur. Quod tamen omnino gratis, & sine fundamento diceretur, & non difficile impugnari posset ex supra dictis contra opinionem, quæ virtutem hanc ponit in qualitate inhærente.

Contraria tamen sententia mihi videtur probabilior, nimirum, humanitatem Christi posse operari miraculose, ubi non est localiter præsens, etiamsi illud non attingat per se, nec per ullam virtutem realiter diffusam, sed solum per actionem, quia ibi effectus fit dependenter ab humanitate alibi existente. Quam sententiam tenent communiter Thomistæ hic, & Vega lib. 7. in Trident. c. 14. dub. 1. & colligitur ex S. Thoma q. 56. art. 1. ad 3. ubi ait contactum virtuale sufficere ad hanc efficientiam propter infinitam virtutem Divinitatis. Et probari potest, quia Christus Dominus eodem modo operabatur hæc miracula in locis distantibus, sicut in propinquis. Deinde, quia nulla ostenditur repugnantia in hoc modo operandi, quia illa conditio, scilicet, ut agens, & passum sint simul juxta probabilem sententiam gravium authorum, non est simpliciter necessaria ad agendum, etiam in agentibus naturalibus. Et quamvis demus ex natura rei esse necessariam, tamen, cum non sit per se, neque intrinsece necessaria in ipso principio agendi, neque in actione, nulla est ratio, cur etiam de potentia absoluta necessaria sit. Quod ita confirmatur, nam Christus, tangendo v.g. infirmum, sanabat illum, sed ille contactus nullam virtutem seu efficaciam addebat humanitati Christi; ergo poterat etiam sine illo eundem effectum facere. Dicere enim illum contactum esse conditionem de potentia absoluta ita necessariam, ut sine illa non possit fieri effectus, incredibile est, cum nulla repugnantia, aut contradictio in hoc appareat, & simile est de voce Christi, quando per illam operabatur miracula: quis enim credat oportuisse, ut realiter perveniret usque ad infernum, seu sinum Abraham, ut inde animam Lazari revocaret? aut, cum dixit Joan. 4. *Vade, filius tuus vivit*, fuisse necessariam, ut vox illa perveniret usque ad locum, in quo erat filius Reguli, ut per illam sanitatem ei præstare posset? Unde Greg. hom. 28. in Evang. notat Regulum illum imperfectam fidem habuisse, eo quod corporalem præsentiam Domini requireret, ut filium suum sanare posset.

Ad rationem ergo dubitandi in principio positam responderi solet ad agendum necessariam esse, ut principale principium actionis attingat effectum, vel per se ipsum, vel per instrumentum: quia ergo divinitas Christi est principale principium harum actionum, & illa est ubique; ideo per humanitatem potest illas efficere, etiam ubi humanitas non est. Sed contra hanc responsionem urgeri potest, quia actio, quæ fit per instrumentum, proxime ab illo pendet, alias instrumentum nihil efficeret; ergo, si contactus necessarius est, maxime in ipso instrumento, alias pari modo dici posset causas secundas naturales non requirere hunc contactum, quia Deus, qui cum illis concurrat, & suo modo per illas operatur, ubique est. Respondetur tamen hanc conditionem non esse essentialem actioni, seu virtuti agendi, sed requiri interdum, juxta proportionem virtutis activæ: agentia enim naturalia, quia habent finitam virtutem, & imperfectum ac determinatum agendi modum, illam conditionem fortasse requirunt; Deus vero, non ex indigentia virtutis agendi, sed ex immensitate sua, & ex infinita perfectione habet, ut non operetur, nisi ubi est: tum quia non potest non ubique esse: tum etiam, quia sicut in esse, ita & in operari perfectissimum modum sibi vendicat. At vero instrumenta Dei neque agunt per potentiam naturalem, ut inde limitentur ad agendum per contactum, neque habent tam perfectum modum existendi, vel operandi, ut ex hac parte illis repugnet operari, ubi non sunt; & ideo hoc illis communicari potest per infinitam Dei virtutem, cui obediunt, & in qua principaliter nituntur in actione sua. Et per hoc patet ad primam confirmationem: ad secundam vero dicitur sectione sequenti.

### SECTIO VIII.

*Utrum hæc gratia miraculorum se extendat ad operandum effectus tempore distantes, seu ad efficiendum per instrumentum actu non existens.*

**H**æc est secunda difficultas hujus materiæ, & oritur ex duplici capite. Primum est de effectibus gratiæ,

qui tempore antecesserunt Christi humanitatem, seu Incarnationem, quos certum est manasse a Christo homine, ut a causa meritoria; difficultas vero est, an ab illo etiam manaverint, ut a causa efficiente, ita ut humanitas Christi fuerit physicum instrumentum, per quod Deus effecerit gratiam in hominibus, qui ipsum præcesserunt. Quidam enim Theologi hoc affirmare voluerunt, inter quos est Capreolus in 4. dist. 13. q. unica, art. 3. ad argum. contra 1. concl. circa finem, & Sotus in 4. dist. 1. q. 2. art. 3. & in fine totius 4. qui nullo fundamento nituntur. Sotus enim solum allegat quædam testimonia Pauli ad Roman. 3. & sæpe alias docentis, antiquos Patres fuisse justificatos in fide Christi: ex quo non potest colligi efficientia physica, sed solum, quod propter merita Christi prævisa, gratia antiquis Patribus collata sit; & ideo fides ejus fuerit semper necessaria ad illam justitiam consequendam: repugnat autem hæc sententia cum D. Th. doctrina infra q. 62. art. 5. & 6. ubi negat passionem Christi, antequam facta esset, potuisse efficienter operari per sacramenta veteris legis, quia causa efficiens non potest esse duratione posterior, quam effectus, & reliqui omnes discipuli D. Th. in hoc illi consentiunt. Et ratio clara est, quam ipse D. Th. tetigit, quia causa efficiens requirit realem existentiam, ut efficere possit: sicut enim causa finalis requirit saltem esse apprehensum, ut in suo genere causet, & implicat finem causare, nisi saltem apprehensus; ita causa efficiens requirit esse actualis existentia, ut efficere possit. Quod in primis patet ex communi omnium Philosophorum consensu, imo ex communi conceptione omnium hominum, nam cum efficere, sit dare esse reale per veram actionem, & influxum realem, nec mente concipi potest, quomodo talis actio manet, & pendeat ab eo, quod nondum est. Unde arguitur secundo, quia efficere aliquid, includit dependentiam realem effectus a causa; dependere autem realiter, intrinsece includit, ut id, quod dependet, existere non possit sine alio; id enim, quod existeret potest, etiamsi aliud non existat, non potest dici vere dependere ab illo; in quo enim consistet hæc dependentia? implicat ergo dicere effectum dependere a causa, sine qua esse potest, & existere, antequam illa exeat, loquendo de propria, & physica dependentia in genere causæ efficientis. Tertio hic habet locum argumentum illud, quod causa, vel instrumentum agere non potest sine virtute agendi, res autem, quæ non existit, nullam virtutem agendi habet, quia nihil est; unde nec potentiam naturalem habet nec obedientialem, quia hæc fundari debet saltem in entitate rei, unde neque elevari potest, neque moveri a primo agente, nec concurrere recipere: quomodo enim hæc cadere possunt in id, quod est nihil? Quarto denique ab inconvenienti, nam alias sequitur posse creaturam assumi ut reale & physicum instrumentum ad sui creationem, vel productionem: nam si aliqua specialis repugnantia in hoc intercedit, maxime, quod supponeretur existens, antequam esset producta: sed hoc non sequitur juxta hanc sententiam, quæ affirmat potuisse humanitatem Christi esse physicum instrumentum, antequam existeret; consequens autem est plane falsum, & contra omnes, & expresse contra D. Th. in hac quæst. art. 2.

Sed dicunt aliqui Christi humanitatem non potuisse efficere gratiam antiquorum Patrum secundum suum esse reale, quia illud nondum habebat, ut bene probant argumenta facta: effecisse tamen illam secundum esse apprehensum, quod habebat in fide credentium, sicut nonnulli Philosophi dicunt, objectum apprehensum movere efficienter voluntatem. Sed hæc sententia, si ejus sensus tantum sit, Deum usum fuisse fide Christi tanquam instrumento physico ad efficiendam gratiam in anima, non est quidem impossibilis, ut per se constat; non est tamen vera, neque admodum probabilis, tum quia nullo fundamento probabili nititur, sed prorsus divina: tum etiam quia nunc, quando homo justificatur per dispositionem propriam sine sacramento, gratia non fit efficienter ab actu fidei vel charitatis, ut constat ex materia de gratia, & de charitate; & tamen etiam nunc justificatur homo per fidem Christi, & perfectius quam antea.

Quod ergo ad hanc primam partem hujus difficultatis attinet, dicendum est Christi humanitatem non fuisse instrumentum physicum ad aliquod opus efficiendum prius, quam existeret, & unita esset Verbo; quia hoc implicat apertam contradictionem, ut ostensum est. Nec mirum

**Virtus miraculorum Christi ad effectus, longe distantes extenditur.**

**Humanitas Christi efficiens operari non potest antequam existens suam.**

**Causa efficiens requirit realem existentiam ad agendum.**

**Responsio ad argum.**

**Simulcas localis agentis & passivi, quo modo necessaria sit ad actionem.**



mirum est, quod, sicut illa humanitas, antequam existeret, non habuit gratiam prophetiæ, nec gratiam linguarum, vel aliam quamcumque gratis datam, aut gratum facientem, ita nec habuerit gratiam sanitatum vel operationum: eadem enim est ratio de omnibus, quia existentia est omnium fundamentum, unde non magis pertinet ad talis humanitatis perfectionem habere talem gratiam, antequam existit, quam existere, antequam existat.

Quod vero Sotus supra significat, Christi humanitatem jam existentem effecisse omnem gratiam, quæ prius data erat antiquis Patribus, licet aliquo sensu possibile sit, est tamen incertum, & ad præsentem disputationem non pertinet. Quod enim illa gratia jam semel facta, per Christi humanitatem denuo fiat illam actionem, qua primo producta fuit, impossibile est: quia illa gratia, & actio, per quam fuit producta, independens fuit a Christi humanitate toto anteriori tempore. Impossibile autem est, ut res prius existens sine dependentia ab aliqua causa, incipiat ab illa dependere sine aliqua mutatione, saltem in ipsa actione, quia, si pendere incipiat, mutatur secundum dependentiam, quæ est per actionem; ergo necesse est saltem actionem esse diversam. Denique, si jam res semel producta est, & existit, simpliciter impossibile est, denuo produci per aliam causam. Non est autem impossibile, ut tota gratia, antea producta sine Christi humanitate, inceperit effective conservari per humanitatem jam existentem: & nova actione conservante qualitatem alia actione prius productam, quia in hoc nulla est repugnantia: tunc enim non causaret humanitas, antequam existeret, neque effectus, ut ab illa est, tempore antecederet, sed comitaretur tantum; & ideo dixi, huiusmodi efficientiam ad præsentem difficultatem nihil pertinere. Est tamen incerta hæc efficientia, quia, cum illa gratia jam esset producta, & sufficienter conservetur per eandem permanentem actionem, per quam producta est, non videtur necessarium ponere illam mutationem actionis, & novam conservationem, præsertim, quia etiam de tota gratia, quæ in lege nova communicatur, etiam si per Christi humanitatem, & ejus sacramenta fiat, incertum valde est, an semper in conservari pendeat ab efficientia physica humanitatis. Et fortasse non est necessarium, quia non oportet gratiam illam quasi miraculoso modo semper existere, neque habere aliam dependentiam, præter illi connaturalem.

Secundum caput hujus difficultatis est de humanitate Christi jam quidem existente, operante tamen per actiones, vel passiones, quæ in ea aliquando fuerunt, sed jam non sunt, ut fuerunt passio, mors, resurrectio, ascensio, & similes. Sunt enim quidam Theologi, qui volunt non solum humanitatem Christi secundum se habere virtutem ad efficiendam in nobis gratiam, resurrectionem, vel similes effectus, sed etiam posse uti actionibus, vel passionibus suis jam præteritis tanquam physicis instrumentis ad eisdem effectus: quam sententiam defendunt Capreol. etiam in 3. dist. 14. q. 1. & Sot. in 4. dist. 1. q. 5. art. 4. quibus videtur favere D. Th. multis in locis, agens de passione, & aliis mysteriis Christi, infra q. 48. art. 6. & q. 50. art. 6. & q. 15. art. 1. ad 2. q. 52. art. 1. ad 2. q. 56. art. 1. q. 57. art. 6. quibus locis ait, passionem Christi, resurrectionem, &c. efficienter causare nostram justificationem, resurrectionem &c. Et ad eundem modum loquitur Alex. Alenf. 3. p. q. 20. m. 2. art. 2. & 6. q. 23. mem. 7. art. 2. Et confirmari potest, primo, quia resurrectioni Christi in Scriptura tribuitur, quod sit causa nostræ justificationis, ad Roman. c. 4. *Resurrexit propter justificationem nostram*. Et quod sit causa nostræ resurrectionis ad Ephes. 2. *Conresuscitavit nos, & consedere fecit*, ubi simile quid indicatur de ascensione; & de sepultura idem significatur ad Rom. 6. *Consepulsi sumus, &c.* Sed resurrectio, ascensio, & sepultura non sunt causæ meritoriae nostræ justitiæ, aut resurrectionis, ut infra dicitur: ergo solum potest hoc pertinere ad causalitatem efficientem. Et confirmatur, nam humanitas per unionem ad Verbum sortita est vim efficiendi hæc divina opera. Ergo communicavit suis actionibus, & passionibus hanc virtutem propter eandem unionem, quod significavit Ambrosius super Psal. 36. tractans illum locum Joa. 1. *Quod factum, in ipso vita erat*: ubi sic inquit: *Caro facta est,*

*in ipso vita est: mors facta est, in ipso vita est, resurrectio facta est, in ipso vita est.* Et sic de aliis. Et tandem concludit. *Vide quanta in ipso facta sunt, quibus vite nostræ conversio facta est, ut, quæ perierat, redderetur.* Quomodo autem intelligenda sit hæc efficientia, nonnulli ex Thomistis dicunt esse mysterium reconditæ Theologiæ, unde in eo explicando varii sunt, nec inter se consentiunt. Ego vero nullum fere mysterium in hac difficultate invenio, sed clare & simpliciter existimo explicari debere, nulla fingendo mysteria, quæ nec fundari, nec intelligi possunt, si tamen ea, quæ impossibilia sunt, mysteria appellare licet.

Dico ergo Christum Dominum per quamcumque actionem, vel passionem suam eo tempore, quo illam patiebatur, seu, quo actio illa existeret, potuisse, vel gratiam, vel alios effectus supernaturales efficere: sicut enim per contactum carnis suæ, cum actu fiebat, vel per vocem aliquam, quando illam emittebat, faciebat miracula, ita per quamvis aliam actionem, vel passionem suam, suo tempore existentem, poterat idem efficere, quia non est major ratio de una, quam de alia. At vero actio, vel passio, quæ præterit, ut revera fuit mutatio quædam, vel quoddam fieri, quod pertransit, non potest nunc esse instrumentum, vel actio physica vere ac proprie efficiens supernaturalem effectum, qui nunc sit. Quam sententiam bene docuit Vega lib. 7. in Triden. c. 18. cum D. Bonav. in 3. dist. 19. art. 1. q. 1. & (ut existimo) est sententia Cajet. quem statim referam. Et probatur aperte ex supra dictis, quia res, quæ non existit, non potest esse instrumentum physicum ad aliquid efficiendum, ut satis probatum est.

Respondent aliqui, hoc verum esse de re, quæ nuncquam extitit, secus vero esse de re, quæ jam semel fuit, quæ cum jam habuerit entitatem, per illam potest esse instrumentum. Et addunt alii, rem, quæ esse desiit, per proprietatem suæ naturæ non posse aliquid efficere, tamen per virtutem occultam, quæ in illa mansit ex merito & valore, quem habuit propter dignitatem personæ, posse vere efficere. Alii vero addunt, quando agens principale adhuc existit, non necessario requiri, ut instrumentum etiam actu existat, sicut supra dicebamus, Deum ubi que existentem posse uti instrumento ad agendum, ubi ipsum instrumentum non existit. Sed hæc neque rem explicant, neque aliquid probabilitatis afferunt: nam primum, quid refert ad efficientiam, quod res fuerit, si jam non est, neque aliquid vice sui reliquit, per quod dici possit efficere? Si hoc enim reliquisset, jam non esset instrumentum id, quod præterit, ut sic, sed id, quod perseverat, in quo aliud quodammodo, seu virtute manet: si autem res, quæ fuit, omnino jam non est, non magis est apta ad agendum, quam si nunquam fuisset, quia nihil prorsus entitatis habet, unde nec est capax virtutis, vel potentiæ ad agendum: nam, illam rem fuisse, solum est relatio rationis, quæ nihil ad efficiendam realem potest deservire, sicut etiam, rem esse futuram, est relatio, rationis, quæ non satis est, ut res futura agat, antequam existat. Quod vero additur de virtute occulta, quæ mansit ex tali actione, vel passione propter meritum ejus, nihil ad rem explicandam confert, quia illa virtus vel est aliqua res, quæ vere & realiter manet in humanitate, & hoc non est contra id, quod intendimus: quia jam non est instrumentum, quod pertransit, ut sic, sed quod manet, sive talis res manens vere aut falso contingatur, quod nihil refert ad præsentem difficultatem. Vel illa virtus occulta nihil in se ipsa est præter actum, qui præterit, qui ratione sui meriti & valoris potest dici semper manere in acceptione divina, & ut sic, habere virtutem ad causandam gratiam: & hoc sensu recte quidem intelligitur, quomodo actus præteritus in genere meriti potest habere rationem causæ, non tamen in ratione proprii principii efficientis: quia (ut dictum est) ad efficiendum physice requiritur existentia seu realis entitas rei, & non satis est, esse in acceptione vel in apprehensione. Quod denique additur sufficere, ut principale agens existat, omnino falsum est, quia etiam instrumentum (si tamen verum, & physicum instrumentum est) vere & realiter agit, & effectus ab illo pendet, media actione reali, & ideo non solum in principali agente, sed etiam in instrumento requiritur actuale esse; & hoc probant rationes factæ in primo puncto hujus sectionis, scilicet, quia aliàs etiam res, quæ neque habet, neque unquam habuit esse, esse posset instrumen-

Christus per actiones, & passiones suas quomodo operetur.

Objeccio.

Nihil est, fieri ad agendum, quod res extiterit.



tum physicum: quia satis esset, quod principale agens actu existat, & consequenter posset esse instrumentum ad productionem sui, aut certe ad productionem, si res, quæ aliquando fuit, esset in nihilum redacta, quod non minus absurdum est. Quocirca non est eadem ratio de præsentia locali, & de actuali existentia, quia existentia vel est ipsa actualis & realis entitas rei, vel certe sine illa esse non potest; effectus autem pendet intrinsece, & essentialiter a sua causa, prout habet entitatem realem, per quam agit; & ideo, si tollitur existentia, omnino tollitur virtus seu ratio agendi: at vero præsentia localis est accidentaria conditio rei superaddita, a qua non pendet essentialiter virtus seu ratio agendi, & ideo non est similis ratio.

D. Thom.  
sententia.

Nec existimo D. Thomam voluisse docere contrarium aliquid huic sententiæ, prout explicata est, cum enim ait Christum per passionem, vel resurrectionem suam efficere in nobis iustitiam, vel resurrectionem &c. non loquitur (ut existimo) de passione, & resurrectione, ut fuit quidam motus, vel actio, quæ pertransiit, sed ut aliquo modo intelliguntur hæc manere in ipsa humanitate, in qua passio, & resurrectio facta est. Et secundum quandam accommodationem humanitas, prout passioni vel morti subiecta fuit, dicitur esse instrumentum ad liberandum nos a morte peccati: ut vero resurrexit, dicitur accommodatum principium nostræ resurrectionis, & sic de aliis. Et hunc sensum indicavit satis D. Thomas q. 56. art. 1. ad 3. ubi dicit resurrectionem Christi esse efficientem causam, in quantum humanitas Christi, secundum quam resurrexit, est quodammodo instrumentum divinitatis, & operatur in virtute ejus, ut supra, inquit, dictum est, citans locum hujus questionis, in qua versamur, ubi Cajetanus ad hunc modum, hanc D. Thom. sententiam intellexit. Et eundem sensum indicavit idem D. Thom. q. 50. art. 9. & quamvis Vega supra hunc etiam D. Thomæ sensum impugnet, non est tamen, quod in ejus impugnationibus immoremur, quia (ut dixi) non tam in rigore metaphysico, quam secundum quandam accommodationem, & proportionem intelligendus est.

Mors, &  
resurrectio Christi  
quomodo sit  
instrumentum  
iustificationis  
& resurrectionis  
nostræ.

Nec ex locis Scripturæ, quæ in confirmationem primæ sententiæ citantur, aliquid aliud colligi potest; est enim resurrectio Christi causa nostræ resurrectionis, & in genere causæ exemplaris, & ratione sui termini: quia Christus resuscitatus est causa efficiens nostram resurrectionem, & quia resurrectio nostra ita pendet a resurrectione illius, quod, si ille non resurgeret, nec nos resurgeremus. Et idem est de ascensione, & similibus, ut latius in sequentibus, agentes de his mysteriis, explicabimus. Et idem est sensus Ambrosii in citato loco, verissimum enim est omnes Christi actiones, & passionem esse nobis salutares, & propter nostrum bonum aliquo modo factas esse: non est tamen necessarium, nec verisimile (etiamsi id non repugnaret) omnes illas per se, ac proprie effective concurrere ad productionem omnis gratiæ, quæ in nobis fit, esset enim hoc superfluum & impertinens, tam ad dignitatem Christi, quam ad nostram utilitatem. Unde ad ultimam confirmationem respondetur, quod, sicut humanitas Christi ratione unionis habet, ut sit instrumentum divinitatis ad miracula faciendæ, ita actiones humanitatis sunt veluti media, per quæ humanitas hanc virtutem exercet; tamen, quia usus hujus potestatis seu gratiæ non est necessarius, sed voluntarius, non oportet, ut per omnem actionem suæ humanitatis Christus hanc virtutem exerceat, sed prout ipse voluerit. Et sicut illa humanitas non habuit hanc gratiam, antequam existeret, nec retineret illam, si esse desineret, & amitteret simul cum existentia actualem unionem ad Verbum: ita quando juxta hanc gratiam operatur, utitur aliqua actione sua actu existente, & sibi unita, non vero actione, vel futura, & nondum existente, vel præterita, quæ jam neque est sibi unita, neque existens, quia illa non est capax talis efficientiæ, ut dictum est.

Statim vero occurrebat hic difficultas, quomodo Christus interdum efficiebat miracula per verba, quæ prius finiuntur, quam operentur. Sed hæc difficultas proprie pertinet ad formas sacramentorum, & ideo usque ad questionem 20. differenda est.

*Utrum Christi humanitas efficere possit miracula absque prævia actione, & consequenter, an potuerit esse instrumentum creationis, aut annihilationis.*

Hæc est ultima difficultas hujus materiæ, quæ plures involvit inter se connexas. Ratio autem dubitandi in illa est, quia (ut supra dicebamus ex doctrina D. Th. 1. p. q. 45. art. 5. & 2. lib. cont. Gent. c. 21. rat. 6.) instrumentum non potest elevari ad efficiendum effectum principalis agentis, nisi per aliquam actionem præviam sibi proportionatam; sed Christi humanitas non poterat habere actionem præviam ad effectum miraculorum, nam licet posset aut verbum proferre, aut tangere mortuum, aut aliam similem propriam actionem exercere, tamen hæc non possunt dici actiones præviæ ad effectum principalis agentis, quia ad illum nihil conferunt, vel disponunt: atque adeo perinde se habent ad talem effectum, ac si non fierent; si enim tactus, vel vox Christi per se, & natura sua nihil confert ad suscitandum, v. g. mortuum, quid attinet ad talem effectum efficiendum? In instrumentis enim artis, vel naturæ, quæ nos experimur, & ex quibus colligimus necessariam esse actionem præviam, talis actio de se aliquid confert ad effectum principalis agentis, saltem disponendo, & ideo tale instrumentum habet proportionem cum tali effectu, & tali agente, & non cum alio: ergo si actio propria instrumenti nihil confert ad effectum principalis agentis, illa non est sufficiens ad actionem instrumenti; alias, si illa sufficeret, certe non esset necessaria, cur enim dicemus eam actionem, quæ nihil ad effectum confert, necessariam esse ad illum? Et confirmatur, nam actio prævia instrumenti semper versatur circa subiectum, in quod operaturum est agens principale, ut verbi gratia calor ignis circa lignum est, quo ignis producendus est, & sic de aliis: at vero sæpe actio Christi, per quam faciebat miraculum, non versabatur circa subiectum susceptivum effectus miraculosi, sed vel circa medium, ut vox, vel interdum manere poterat in ipsa anima Christi, ut si per actum voluntatis faceret miraculum.

Hæc difficultas præsertim vigere videtur in doctrina D. Th. qui etiam in divinis instrumentis, quæ tantum per obedientialem potentiam ad agendum assumuntur, existimavit necessarium, ut per propriam actionem præviam eleventur ad efficiendum proprium effectum principalis agentis: & ita omnes discipuli ejus conantur defendere hanc actionem præviam fuisse etiam necessariam in miraculis, quæ Christus Dominus per humanitatem suam operatus est: fatentur tamen non esse necessarium, hanc actionem versari, aut recipi in subiecto, in quo fit miraculosus effectus, hoc enim convincit argumentum factum: fatentur etiam hanc actionem non esse propriam dispositionem, neque natura sua aliquid conferre ad effectum principalis agentis: nihilominus tamen ajunt esse necessariam, fortasse ne instrumentum nihil omnino agere videatur, si ex se nihil confert, & quidam eorum dicunt esse necessariam talem actionem, ut per eam intimetur divinum imperium. Sed hæc (ut verum fatear) mihi non satisfaciunt, non enim intelligo, cur, sicut humanitas Christi, manu contingendo mortuum, potuit illum resuscitare, non etiam id posset facere sine tali contactu. Præsertim, cum supra ostensum sit localem propinquitatem non esse necessariam in hujusmodi instrumento. Deinde, quamvis in manu v. g. Christi non intelligatur esse actio prævia, potest recte intelligi, quod ipse effectus procedat, & pendeat ab ipsa carne Christi: nam quando efficiebat talem effectum, tangendo, effectus revera immediate procedebat ab ipsa carne, & tactus solum erat conditio quasi voluntarie adhibita, non tamen simpliciter necessaria, unde interdum faciebat miraculum sine tali contactu; ergo præcise propter efficientiam non erat necessaria illa actio prævia. Tandem illud, quod dicitur de intimatio imperii, jam rejectum est: nam, si solum dicit conditionem, ad cujus præsentiam Deus operatur, hæc nihil refert ad rationem veri instrumenti, & præterea, sicut ad præsentiam actionis creaturæ, ponitur divinum imperium, ita ad præsentiam ipsius substantiæ, vel carnis creatæ sine alia actione ejus posset poni divinum imperium. Si vero illa intimatio



re divini imperii sit vera effectio, & executio ipsius supernaturalis effectus, petitur principium: nam quod inquirimus est, cur ad hoc sit omnino necessaria actio, quæ aliàs nihil de se confert ad effectum.

**Primum** genus instrumentorum naturalium, & artificialium.

Ut ergo axioma illud, & tota hæc materia radicitus intelligatur, incipiendum est ab instrumentis naturæ, vel artis, quæ omnia ad tria genera revocari possunt. Primum genus instrumentorum est, quæ per actionem sibi con-naturalem efficiunt aliquem effectum, qui est dispositio, seu via quædam ad effectum principalis agentis: ad quem tamen in se ipsum non attingit instrumentum per novam actionem, sed vel naturaliter resultat, posita priori actione, vel sola virtute, & actione nova principalis agentis efficitur. Exemplum dari potest in naturalibus instrumentis, juxta multorum probabilem opinionem in calore ignis, vel viventis, quo dispositio efficitur in materia ad introductionem formæ ignis, vel carnis, ipsa vero forma substantialis proxime, & in se non attingitur, seu introducit per calorem. Juxta hanc enim sententiam calor solum dicitur instrumentum, quia illo utitur principale agens, ut suum tantum effectum perficiat, quamvis proxime, & immediate non attingat calor illam actionem, qua principale agens introducit ultimam, & principalem formam in effectu intentam. Aliud, & magis indubitatum exemplum horum instrumentorum est in artificialibus, nam tota actio instrumentorum artis per se terminatur in modo locali, & termino ejus, ex quo resultat forma artis sine nova actione instrumenti. Quod facile intelligitur, discurrendo per singula; quædam enim ex his instrumentis deserviunt ad expellendum aliud corpus a loco suo, ut in ferra videre licet: dum enim ipsa introducitur inter partes ligni, quod per eam secatur, & occupat locum illum medium, ab eo expellit partes ligni, quæ illum replebant, expellit autem non tantum in genere causæ formalis, ut putavit Scotus, sed etiam in genere causæ efficientis, & impellentis, quia per illam actionem non solum fit, ut corpus expulsus careat suo loco, sed etiam, ut ad alium locum impellatur, quod non fit sine motione efficiente.

Alia sunt instrumenta artis, quæ solum deserviunt ad deferendum corpus, & quasi in varia loca distribuendum, ut calamus, vel penicillus: alia denique per contactum, vel collisionem corporum, motum efficiunt: ut patet in lyra, vel cymbalo, & idem est de cæteris. Constat ergo inductione facta actionem horum instrumentorum totam consistere in motu locali, & termino ejus, & inde resultare effectum intentum sine nova actione instrumenti: ut figura ex tali situ partium corporis, vel sonus ex tali naturali qualitate corporum se tangentium, & sic de reliquis. Et ratio generalis reddi potest, quia hæc instrumenta solum operantur, quatenus substant motioni humanæ virtutis; homo autem in corporibus solum potest efficere motum localem, vel imprimere impetum, qui sit principium ejus, & ideo solum ad hunc effectum potest immediate movere hæc instrumenta, ut inde forma aliqua artificialis, seu figura resultet. Quocirca de hoc toto genere instrumentorum vere dicitur, non assumi ad efficiendum effectum a principali agente intentum, nisi per propriam actionem præviā: quin potius verum etiam est, talia instrumenta nullam aliam habere actionem circa hujusmodi effectum, nisi hanc propriam, respectu cuius non tam sunt instrumenta, quam principales virtutes, sicut est calor ad calefaciendum, & ferra ad scindendum, seu expellendum aliud corpus a suo loco. In ordine vero ad effectum principalis agentis dicuntur hæc instrumenta per quandam habitudinem, & subordinationem ad principale agens, quæ non addit novam sufficientiam, sed relationem quandam, vel extrinsecam denominationem. Divina autem instrumenta non possunt in hoc genere collocari, quia nullam dispositionem attingunt, ex qua resultat effectus principalis agentis ex vi talis dispositionis, ut per se manifestum est, & constat satis ex ratione dubitandi in principio hujus sectionis posita, quia si talis dispositio naturalis est, non potest ex ea necessario resultare effectus supernaturalis, ex natura rei loquendo: si autem dispositio ipsa supernaturalis est, non potest fieri ab instrumento ex propria naturali virtute & efficacia. Ex hoc ergo capite in his instrumentis actio præviā nec requiritur, nec intelligi potest.

Secundum genus instrumentorum est, quæ per realem

actionem immediate attingunt ultimum effectum principalis agentis sine alio influxu, vel concursu proprio ipsius agentis principalis, sed solum per actionem propriam ipsius instrumenti, quod, vel a principali agente sustentatur, vel quasi substituitur, ut vice illius agat. Exemplum sunt in calore ignis, vel semine viventis, ut jam explicabo: in hoc enim genere adhuc possunt hæc instrumenta distingui, ut quædam sint, quæ attingunt effectum se nobiliorem, ut multi opinantur de calore ignis, quia substantialis forma ignis generantis alium ignem, per se & immediate non influit in actionem, per quam producit forma substantialis ignis geniti, sed solum per calorem, ita ut calor per se, solus, & separatus possit totam illam actionem efficere. Cujus simile exemplum, & clarius, est in semine, quod est instrumentum ad generandum animal, cum tamen sit minus perfectum, & cum operatur, nullum habeat influxum, nec concursum agentis principalis, sed tota actio sit a virtute, quam primum agens reliquit seu impressit in ipso semine. Hujusmodi autem modus naturalium instrumentorum valde dubius est, si tamen est verus (hoc enim nunc examinandum non est, cum ad præsentem quæstionem non referat) illo, inquam, supposito, verissimum est, talia instrumenta non attingere effectum agentis principalis, nisi præmittendo actionem præviā: assumuntur enim ad actionem agentis principalis propter naturalem connexionem, quæ est inter illam, & propriam actionem præviā, quæ ratio in divinis instrumentis locum non habet.

Alia vero sunt in hoc genere instrumenta, quæ sua quidem actione immediate attingunt effectum principalis agentis, quia ille effectus non excedit naturalem virtutem, & perfectionem talium instrumentorum, quomodo dicitur a multis calor esse instrumentum ignis ad calefaciendum, & gravitas lapidis dicitur instrumentum, quo movetur a generante, ac denique impetus impressus lapidi projecto dicitur instrumentum projicientis ad efficiendum illum modum. In quibus, & similibus exemplis, satis constat, illas qualitates, quæ dicuntur instrumenta, habere sufficientem vim, & perfectionem ad efficiendum illos effectus, quos revera efficiunt propria virtute sine novo influxu, aut concursu alterius agentis. Quapropter hæc non sunt proprie instrumenta, sed virtutes, vel potentie; vocantur autem interdum instrumenta, vel quia suppleant locum principalis suppositi operantis: vel certe solum generali quadam ratione, quatenus omnia accidentia dici possunt instrumenta, per quæ substantia operatur. Et ideo etiam in efficientia horum instrumentorum nulla est proprie actio præviā, quævis habeant actionem propriam, & connaturalem, quia hæc non subordinatur alteri actioni, sed est unica, per quam totus effectus fit. Ex quo etiam certum est, hunc modum operandi non posse convenire divinis instrumentis: cum enim eleventur ad operandum supra naturam suam, non habent in se propriam, & sufficientem virtutem ad talem effectum, nec possunt circa illum aliquid efficere sine proprio, & singulari influxu principalis agentis.

Tertium genus instrumentorum est, quæ immediate attingunt actione sua proprium effectum principalis agentis, non tamen sine proprio influxu ipsius principalis agentis per suam propriam formam, & virtutem concurrentis, ita ut unica & eadem actione effectus simul fiat ab instrumento, & principali forma. Exemplum in naturalibus accommodatum (si tamen est verum) esse potest in phantasmate, quod esse dicitur instrumentum intellectus agentis ad producendam speciem intelligibilem, quæ tamen non a solo phantasmate fit, sed simul cum illo influit intellectus agens, ut virtus principalis. Aliud esse potest de intellectu operante per speciem intelligibilem influentem in actum intelligendi simul cum potentia, nam species quodammodo est instrumentum potentie, quæ per ipsam operatur, & illi præbet veluti influxum & concursum vitalem. Et de hujusmodi instrumentorum genere facile intelligitur, quomodo etiam in ordine naturali possint attingere effectum se perfectiorem, quia, videlicet, non solum instrumentum immediate efficit, sed simul influit causa seu virtus principalis, & ex utroque veluti conflatur unum integrum agens perfectius effectum, unde hujusmodi instrumentum quodammodo simile est causæ partiali, tamen, quia imperfectius est, & subordinatum principaliori virtuti, ideo instrumentum appellatur.

Secundum genus instrumentorum.

Tertium genus instrumentorum.

Species intelligibilis quomodo sit instrumentum intelligendum.



latur. Unde etiam fit, in hoc genere instrumenti non oportere intercedere actionem prævia propriam ipsius instrumenti, distinctam ab actione principalis agentis, quia unus, & idem effectus per eandem indivisibilem actionem est simul ab instrumento, & a virtute principali, ut clare videri potest in exemplis supra positis.

Solet tamen in huiusmodi effectu, vel actione distinguere duplex ratio, ut secundum alteram intelligatur actio esse accommodata instrumento, secundum alteram vero principali virtuti: ut in exemplo posito, actus intelligendi, ut est actus vite, dicitur esse ab intellectu, ut vero est representatio talis objecti, dicitur esse ab specie. Sed (ut supra dixi, agens de lumine scientiæ infusæ) hoc solū secundum quandam accommodationem intelligi potest, ad assignandas rationes, sub quibus effectus procedit a diversis principiis, seu rationes, propter quas talia principia necessaria sunt. Nam, loquendo de effectu, prout in re ipsa fit, nihil in ipso est, quod non ab utroque principio procedat, quia in re ipsa est unus, & indivisibilis effectus, ut in exemplo dato facile patet, & in superioribus declaratum est. Divina igitur instrumenta maxime similia sunt his, quæ in hoc tertio genere collocantur, immediate enim attingunt ipsum effectum principalis agentis, ut v. g. suscitatio nem mortui, productionem gratiæ, &c. Attingunt autem hos effectus, non ex vi naturalis suæ virtutis, & perfectionis, quæ inferior est, & natura sua non postulat talem agendi modum, neque ad illum habet concursum debitum, sed indiget concursu, & influxu principalis agentis, qui specialiori, & superiori quodam modo exhiberi debet, & ideo merito hæc instrumenta in hoc tertio ordine collocantur.

Ex quo discursu tandem concluditur, in his instrumentis non esse per se, & intrinsece necessariam actionem prævia propriam, & connaturalem ipsi instrumento, ut possit attingere effectum principalis agentis: primo quidem, quia hoc non est de ratione instrumenti ut sic; constat enim ex discursu facto, etiam in naturalibus instrumentis non semper hoc esse necessarium, & præsertim in iis, quæ ad ultimum ordinem pertinent, quibus divina instrumenta similia sunt. Deinde, quia, licet hoc esset necessarium in naturalibus instrumentis, quæ naturali virtute, & juxta naturalem ordinem operantur, non propterea esset eadem necessitas in instrumentis divinis, quæ solum secundum potentiam obedientialem assumuntur, non quia ex natura rei necessaria sunt ad effectum, sed quia Deus illis uti vult. Cujus signum est, quod huiusmodi instrumenta non sunt determinata ad determinatos effectus, sed simpliciter uti potest Deus, ut instrumento, quacumque creatura ad quoscumque effectus non implicant contradictionem. Adde nihilominus, Christum semper operatum esse miracula per aliquam propriam actionem humanitatis, vel ut concursus ipsius humanitatis notior esset, ut supra ex Cyrillo dicebamus, vel ut humanitas perfecto modo, scilicet, humano, & libero posset ad hæc miracula facienda applicari, quod fieri oportebat per actionem voluntatis humanæ vel imperatam, vel elicitam. Illa vero actio humanitatis, per quam faciebat miraculum, non proprie erat actio prævia ad actionem principalis agentis, sed interdum erat veluti applicatio ipsius instrumenti ad passum: ut quando per contactum carnis suæ vivificatricis sanabat ægrotum, vel suscitabat mortuum: nam effectus ille revera immediate erat ab ipsa carne, contactus autem solum erat, ut applicatio, & conditio, non quidem necessaria, sed voluntaria, & ad melius esse. Interdum vero ipsemet actus humanitatis erat proximum instrumentum, quod fiebat miraculum, ut v. g. si per actum voluntatis, vel per verbum, aliquod faciebat miraculum, ipsemet vox non tam erat actio prævia, quam proximum instrumentum, a quo actio miraculose dependebat, sicut inferius in simili dicemus latius agentes de sacramentis.

Ex quo tandem fit, in huiusmodi operatione miraculosa humanitatis, unam & eandem fuisse actionem, quia immediate fiebat effectus ab humanitate, ut ab instrumento, & a divinitate, ut principali virtute, ante quam actionem non est necessarium intelligere aliam propriam ipsius instrumenti. Quod si velimus proportionem in omnibus servare cum instrumentis naturalibus, quamquam id necessarium non sit, cum hæc instrumenta non habeant naturalem proportionem, & connexionem cum

effectu, sicut illa: fieri tamen aliquo modo potest distinguendo in hac actione, & effectu duplicem rationem: quatenus enim effectus ille est, v. g. participatio quædam divinæ naturæ, scilicet gratia, vel aliquid huiusmodi, est a Deo, quatenus vero est res quædam finita, quæ ab alia finita pendere potest, sic intelligitur esse ab instrumento creato. Et ex his facile expeditur difficultas in principio huius sectionis tacta, cui magis ex dicendis satisfiet.

Ex dictis enim oritur alia difficultas, nam si vera sunt, quæ dicimus, sequitur potuisse humanitati communicari, ut esset instrumentum creationis. Probatur sequela, quia si non posset, maxime, quia ad operandum instrumentaliter necessaria est actio prævia, quæ in creatione habere locum non potest; sed hoc principium non est necessarium in divinis instrumentis, ut diximus; ergo. Respondeo breviter, argumentum apud me convincere, ex illa ratione sumpta ab actione prævia non satis probari creaturam, atque adeo humanitatem non posse esse instrumentum creationis: tum, quia illa actio prævia non est simpliciter necessaria, ut supra dictum est: tum etiam quia licet esset necessaria, non tamen in extrinseca materia, ex qua effectum fieri oporteret, sed posset esse actus immanens, aut vox ipsius humanitatis, per quam non magis repugnaret creationem fieri, quam justificationem, vel transubstantiationem, & alia similia opera. Quia huiusmodi actus, qui manet in agente, & solum quoad efficaciam, & virtutem suam est transiens, per se non requirit, ut effectus fiat ex præsupposito subiecto; ergo ex vi talis actionis non repugnaret fieri etiam ex nihilo, nam etiam transubstantiationis effectus proprie non fit ex subiecto tanquam ex causa materiali, quæ maneat in effectu, & nihilominus fieri potest per instrumentum creatum.

Quam difficultatem attingens Medina infra q. 48. art. 6. in fine, respondet, creaturas habere inter se ordinem, ratione cuius fieri potest, ut mota una, virtute divina moveantur aliæ: at vero creaturæ non habent ordinem ad id, quod est nihil, & ideo non possunt sumi, ut instrumentum creationis. Sed in primo D. Thom. nunquam est hac ratione usus, sed illa, quæ sumitur ex actione prævia, quam ipse non tuetur, nec defendit. Deinde illa ratio magis videtur in verbis, quam in re consistere, nam creaturæ non habent inter se alium ordinem necessarium, in quo possit fundari instrumentaria actio, nisi quod sunt entia participata a primo ente, & illi subordinata ut primo agenti, & imperanti. Unde fit, ut una possit efficere aliam saltem per potentiam obedientialem, & alia pendere ab alia; hic autem ordo etiam intercedere potest inter unam creaturam jam factam, & aliam creandam: non enim necesse est, ut creatura habeat dictum ordinem ad nihil, quod est terminus a quo creationis, sed ad ipsam creaturam, ad quam creatio terminatur: nam etiam Deus ipse, qui est primum principium creationis, non habet proprie loquendo ordinem ad id, quod est nihil, ut sic, sed habet virtutem, ut faciat esse aliquid, id quod de se nihil est.

Aliter hoc alii declarant, dicentes, naturalem modum agendi creaturæ esse operari ex subiecto, vel in subiecto, & ideo non posse creaturam assumi ut instrumentum, nisi supponatur subiectum, ad quod habeat aliquam habitudinem, cuique præsentet divinum imperium, ut ex illo aliquid efficiat: alioqui actio non poterit esse a creatura ut instrumento, sed a solo Deo. Unde in hunc modum argumentantur. Ut creatura instrumentaliter agat respectu Dei, oportet, ut virtus divina sese illi accommodet juxta modum ejus, ita ut participet creatura virtutem divinam, & quodammodo illam in se recipiat, & in ea determinetur, & quasi limitetur ad talem actionem, & agendi modum; sed hoc non potest intelligi, nisi per habitudinem ad aliquod subiectum, in quo actio versetur, quæ habitudo in creatione locum non habet: ergo neque talis efficientia instrumentalis habet in creatione locum. Major constat, quia omne, quod recipitur, debet accommodari modo recipientis. Deinde quia virtus divina non potest intelligi, in quo accommodetur instrumento creato, vel quam cum illo proportionem servet, nisi ex illo huiusmodi determinationem subeat. Minor etiam constat, quia modus agendi creaturæ est per habitudinem ad subiectum: & ideo, si actio omnino abstrahatur a subiecto, non relinquitur ulla habitudo, vel proportio, secundum quam possit creatura ut instrumentum assumi.

Objectio.

Responsio.

Creatura potest esse instrumentum creationis.

Improbatur discursus qualiter aliqui roborare conentur.

Divina instrumenta qualia.

In divinis instrumentis non est necessaria actio prævia ad effectum principis agentis.

In miraculis Christi una &amp; eadem actio divinitatis, ut principis agentis, &amp; humanitatis, ut instrumenti.



Refelli-  
tur præ-  
dictæ  
firmatio.

Sed hæc verba omnia nullam vim addunt præcedenti discursui, neque excludunt instantias & objectiones factas. Primo enim, si illa discursus efficax esset, etiam probaret, creaturam non posse assumi in instrumentum transubstantiationis, quia etiam transubstantiatio non fit ex subiecto, neque in subiecto, ut ex sententia etiam D. Th. latius in 3. tomo probamus. Nec refert, quod transubstantiatio supponat aliquam materiam, ex qua fit ut ex termino a quo, quia habitudo non est subiectum, ex quo, vel in quo fiat actio, neque est ulla creatura, quæ habeat hunc naturalem modum agendi ex alio ut ex puro termino a quo. Secundo, simili ratione concludi posset non posse creaturam corpoream assumi ut instrumentum ad agendum in spiritum, quia modus agendi talis creaturæ est agere ex subiecto corporeo & extenso, neque cum subiecto spiritali habet naturalem proportionem agentis & patientis. Quod si dicatur, satis esse, ut habeant aliquam proportionem in ratione entis creati, pari ratione dicam, satis esse, quod habeant proportionem in ratione entis creati, ut unum esse possit terminus actionis, & aliud principium instrumentale: nam, si illa proportio sufficit, ut comparentur, tanquam subiectum & agens, ea, quæ natura sua non habebant hanc proportionem: cur etiam non sufficeret, ut comparentur tanquam terminus & principium actionis? Unde argumentor tertio, nam, ut supra ostendi, Deus non solum potest elevare ad actiones supernaturales, eas creaturas, quæ naturaliter agere possunt, sed etiam illas, quæ nullam habent connaturalem activitatem: huiusmodi autem res non habent naturalem proportionem ad agendum etiam ex subiecto: elevat ergo Deus ad agendum ex tali subiecto id, quod nullam habet naturalem proportionem ad agendum ex illo. Rursus elevat ad agendum ex subiecto id, quod cum nullo subiecto habet naturalem proportionem ad agendum ex subiecto: ergo poterit etiam elevari ad agendum ex non subiecto id, quod ex natura sua nullam habet naturalem proportionem ad sic agendum. Quarto denique ratio a priori est, quia ad divinam actionem nulla alia naturalis proportio necessaria est, præter non repugnantiam seu potentiam obedientialem, ad quam satis est, quod creatura, quæ fit, habeat esse dependens, & quod creatura, quæ assumitur ut instrumentum, habeat esse, a quo possit alia res dependere. Unde nulla alia limitatio, vel determinatio divinæ virtutis ad hoc est necessaria, nisi quod nolit agere se sola, sed per creaturam, id, quod per se solam agere posset. Et in hoc solo sese accommodat creaturæ, quam assumit ut instrumentum, nimirum quod non vult, actionem fieri sine illa, nec nisi dependenter ab illa. Non vero oportet, ut sese accommodet naturali modo agendi creaturæ, sed potius ut illam elevet, eique quodammodo communicet suum operandi modum. Nec etiam proprie virtus divina recipitur in creatura, ut hæc fiat instrumentum, sed solum supernaturaliter adjuvat, elevat, ac movet creaturam modo superius explicato. Unde ad argumentum in forma concessa majori in bono sensu declarato negatur minor, quia seclusa habitudine ad subiectum, potest optime intelligi habitudo ad effectum seu terminum actionis, ad quam satis est proportio in ratione entis creati, quorum unum potest ab alio dependere, & utrumque subicitur Deo in modo agendi, & dependendi. Aliter dicunt alij creationem consistere in essentiali dependentia creaturæ a Deo, quæ omnino immutabilis est, & invariabilis, quia non tam est per actionem mediam, quam per ipsammet entitatem, & essentialiam creaturæ, & ideo fieri non posset, ut hoc modo penderet una creatura ab alia: quia omnis dependentia ab alia creata causa efficiente variari potest, & conservari creatura per solam dependentiam, quam habet a Deo, & ita per hanc solam creari potest.

Dices, Si hæc ratio aliquid valeret, etiam probaret non posse unam creaturam produci, vel generari ab alia, quia etiam forma, quæ educitur de potentia subiecti, pendet essentialiter a Deo, & a solo illo: quia per solam actionem illius conservatur, & sola illa dependentia est omnino invariabilis, & simpliciter necessaria, ut talis res existat. Respondetur simpliciter negando sequelam, concedendo tamen non posse unam formam creatam ita manere ab alia etiam per generationem, quin simul sufficienter fiat per solum influxum, quem Deus habet in tali creatura: non solum quatenus concurrat cum causa

secunda, sed etiam quatenus alia via, & modo ipse solus eandem rem creat in eodem instanti, ratione dictæ essentialis dependentiæ creaturæ a Deo. Quinimo, licet hic influxus Dei simul tempore sit cum actione causæ secundæ, tamen ordine naturæ antecedit, quia est maxime essentialis, & necessario supponitur alteri. Sed non est hic locus tractandi quæstionem hanc, quæ latissima est, & postulabat, ut explicarem modum, quo causæ secundæ operantur, & Deus cum illis concurrat.

Dico ergo breviter, doctrinam, quæ in hoc modo dicendi supponitur, & falsam esse, & improbabilem, & in præsentiquæstione non satisfacere. Primum patet, quia illa doctrina supponit omnem effectum causæ secundæ prius natura creari a solo Deo, & deinde fieri a creatura. Quod in philosophia absurdum est: nam re ipsa hoc est tollere efficientiam causarum secundarum, & solum verbis illam concedere: & in Theologia potest id esse periculosum præsertim in actibus liberis, & maxime in malis, & peccatis. Secundum patet, quia, esto concedamus hanc quasi priorem Dei creationem, tamen sicut potest Deus calorem vel gratiam, quam prius natura ipse creavit solus, alio modo efficere per ignem vel per sacramentum, eadem ratione posset efficere angelum, v.g. vel cælum per humanitatem Christi, quamvis prius natura ipse solus easdem res alio modo crearet. Patet sequela argumentis supra factis, quæ probant, eo modo, quo una creatura potest pendere instrumentaliter ab alia, non minus posse hoc fieri in creaturis, quæ fiunt in subiecto, quam in iis, quæ per se, & ex nihilo fiunt: ergo illa efficientia angeli per humanitatem esset creatio, quia esset productio ex nihilo, & quia angelus non potest alio modo produci. Quamvis fortasse secundum illam falsam doctrinam, non esset illa dicenda prima creatio angeli, sed secunda, sicut generatio ignis, verbi gratia, non est in hac sententia prima productio ignis, sed secunda: solumque erit differentia, quod in igne prima productio est creatio, secunda generatio, in angelo vero utraque esset creatio. Nisi forte dicatur, illam secundam actionem, seu effectum angeli non esse creationem, quia non est omnino ex nihilo, cum supponatur jam angelus creatus, alio genere actionis, seu dependentiæ. Sed hoc non recte, neque consequenter dicitur, quia vel illa actio esset productio angeli, vel non: si non, ergo neque alia forma producta a causis secundis, quia jam supponuntur productæ alia via a prima causa, juxta hanc sententiam: si vero est productio angeli, illa non est ex præsupposito subiecto; ergo est creatio. Deinde, quia si non est creatio, quid aliud esse potest: cum angelus producibilis non sit nisi per creationem? Sed totus hic discursus est ad hominem, veritas enim est, formas, quæ educuntur de potentia materiæ, non fieri prius a Deo per creationem, nec per aliam actionem, quam per illam, qua concurrat cum causa secunda ad talem educationem. Unde fit, ut licet creatura ad hunc sensum pendeat essentialiter a Deo, ut non possit existere, aut conservari sine actuali influxu Dei, non tamen sit de essentia alicujus creaturæ, ut a solo Deo pendeat, neque ut habeat invariabilem, & immutabilem dependentiam sine ulla actione media. Sed ille Dei influxus dari potest nunc per unam actionem, nunc per aliam: nunc media creatura, nunc sine illa, aut juxta diversas rerum naturas, aut pro Dei voluntate, & arbitrio in operibus supernaturalibus, & miraculosis. Sic igitur non repugnat dependentiæ essentiali, quam creatura habet a Deo, ut per aliam creaturam creetur, quia nihilominus dependebit a Deo, quamvis non per eandem actionem, per quam penderet, si a solo Deo crearetur.

Ad difficultatem ergo propositam, quod ad potestatem attinet, concedo me hætenus non invenisse, cur sit impossibile, aut quam contradictionem implicet, ut creatura assumatur a Deo, ut sit instrumentum creationis; an vero communicata fuerit hæc potestas humanitati Christi, & an illa fuerit aliquando usus, mihi non constat, neque facile affirmandum censeo, quia illa humanitas non est elevata ad omnes actiones, & omnia opera, quæ de potentia absoluta per illam fieri possunt, hoc enim a nemine asseritur, & immerito gratis diceretur sine fundamento, aut ratione sufficienti. Chrysostomus quidem homil. 86. in Joann. & Euthymius Joann. 21. circa illa verba, *Ut ergo descenderunt in terram, viderunt prunas positas*, dicunt, illa tria fuisse producta a Chri-

An fuerit  
in Christo  
potestas  
creandi.



## ARTICULUS I.

*Utrum filius Dei in humana natura assumere debuerit corporis defectus.*

**A**d primum sic proceditur. Videtur, quod Filius Dei non debuerit assumere humanam naturam cum corporis defectibus. Sicut enim anima unita est personaliter Verbo Dei, ita & corpus. Sed anima Christi habuit omnimodam perfectionem & quantum ad gratiam, & quantum ad scientiam, ut supra dictum est\*. Ergo etiam corpus ejus debuit esse omnibus modis perfectum, nullum in se habens defectum.

2 Præterea. Anima Christi videbat Verbum Dei ea visione, qua Beati vident (ut supra dictum est\*), & sic anima Christi erat beata. Sed ex beatitudine animæ glorificatur corpus: dicit enim August.\* in Epistola ad Dioscorum. Tam potenti natura Deus fecit animam, ut ex ejus plenissima beatitudine redundet etiam in inferiorum naturam, quod est corpus: non beatitudo, quæ fruentis & intelligentis est propria, sed plenitudo sanitatis, id est, incorruptionis vigor. Corpus igitur Christi fuit incorruptibile, & absque omni defectu.

3 Præterea. Pœna consequitur culpam: sed in Christo non fuit aliqua culpa: secundum illud 1. Pet. 2. Qui peccatum non fecit. Ergo nec defectus corporales, qui sunt pœnales, in eo esse debuerunt.

4 Præterea. Nullus sapiens assumit id, quod impedit ipsum a proprio fine. Sed per hujusmodi defectus corporales, multipliciter videtur impediri finis Incarnationis. Primo quidem quia propter hujusmodi infirmitates, homines ab ejus cognitione impediuntur: secundum illud Isai. 53. Desideravimus eum de speculum, & novissimum virorum, virum dolorum, & scientem infirmitatem, & quasi absconditus est vultus ejus, & de speculo ejus, unde nec reputavimus eum. Secundo, quia sanctorum Patrum desiderium non videtur impleri: ex quorum persona dicitur Isai. 51. Consurge, consurge, induere fortitudinem, brachium Domini. Tercio, quia congruentius per fortitudinem, quam per infirmitatem, videbatur, & potestas diaboli posse superari, & humana infirmitas posse sanari. Non ergo videtur conveniens fuisse, quod Filius Dei humanam naturam assumpserit cum corporalibus infirmitatibus, sive defectibus.

Sed contra est, quod dicitur Heb. 2. In eo, in quo passus ipse est, & tentatus, potens est & cis, qui tentantur, auxiliari. Sed ad hoc venit, ut nos adjuvaret: unde & David dicebat. Levavi oculos meos in montes, unde venit auxilium mihi. Ergo conveniens fuit, ut Filius Dei carnem assumpserit, infirmitatibus humanis subjacentem, ut in ea posset peti, & tentari: & sic auxilium nobis ferre.

a Respondeo dicendum, conveniens fuisse, corpus assumptum a filio Dei, humanis infirmitatibus, & defectibus subjacere, & præcipue propter tria. Primo quidem quia ad hoc Filius Dei carne assumpta venit in mundum, ut pro peccato humani generis satisfaceret. Unus autem pro peccato alterius satisfacit, dum pœnam pro peccato alteri debitam, in se suscipit. Hujusmodi autem defectus corporales scilicet, mors, fames, sitis, & hujusmodi sunt pœna peccati, quod est in mundum per Adam introductum secundum illud Rom. 5. Per unum hominem peccatum intravit in mundum, & per peccatum mors. Unde conveniens fuit quantum ad finem Incarnationis, quod hujusmodi pœnalitates in nostra natura susciperet vice nostra secundum illud Isai. 53. Vere languores nostros ipse tulit. Secundo, propter fidem Incarnationis astruendam. Cum enim natura humana non aliter esset nota hominibus, nisi per hujusmodi corporalibus defectibus subiaceret, si sine his defectibus Filius Dei humanam naturam assumpisset, videretur non fuisse verus homo, nec veram carnem habuisse, sed phantasticam, ut Manichei posuerunt. Et ideo, ut dicitur Philippen. 2. Exinanivit semetipsum formam servi accipiens, in similitudinem hominum factus, & habitu inventus ut homo. Unde & B. Thomas per aspectum vulnerum est ad fidem revocatus, ut dicitur Joan. 20. Tercio, propter exemplum patientiæ, quod nobis exhibet, passiones, & defectus humanos fortiter tolerando: unde dicitur Hebr. 12. Sustinuit a peccatoribus adversus semetipsum contradictionem, ut non fatigemini, animis vestris deficietibus.

Ad primum ergo dicendum, quod satisfactio pro peccatis alterius, habet quidem quasi materiam, pœnas, quas aliquis

Christo miraculose ex his, quæ non erant, & Chrysostom. addit non ex materia subiecta. Quorum sententiam referens Toletus ibi, concedit, id Christum facere potuisse, scilicet, ex nihilo, vel ex materia subiecta, licet incertum sit, quomodo fuerit Christus usus, & probabilius existimat fecisse ex materia subiecta. Assumpta ergo est ad illa opera, quæ secundum ordinem divinæ sapientiæ oportuit per illam humanitatem fieri, hæc autem (ut recte D. Thomas dixit) videntur esse illa, quæ ad finem Incarnationis conferre possunt, quia (ut supra dictum est) hæc potestas non fundatur in aliqua qualitate, neque in sola potentia obedientiali secundum se sumpta, sed ut habente paratum concursum juxta divinam ordinationem, quæ, cum per potentiam absolutam regulanda non sit, non potest commodius ex alio principio, quam ex fine Incarnationis definiri, & assignari, ut recte etiam notavit Durand. in 3. dist. 13. q. 5. Ad hunc autem finem non videtur necessarium, ut assumpserit potentiam creandi, quia nec per opus creationis manifestari commode poterat opus Incarnationis, quia non potest esse manifestum, an actio fiat ex nihilo: neque oportebat novas res in universo creari præter animas rationales, quæ modo sibi connaturali fiunt. Solum videri posset probabile materiam primam, quæ ponitur sub speciebus Eucharistiæ, quando ex illis aliquid aliud generatur fieri per creationem media Christi humanitate, ut instrumento. Sed de hac speciali difficultate suo erit loco dicendum.

Et ex his constat, quid dicendum sit de annihilatione, hæc enim, cum ad non ens simpliciter terminetur, non potest fieri per positivam actionem: quia necesse est omnem actionem hujusmodi ad aliquem terminum positivum tendere, quod est contra rationem annihilationis, & ideo hoc modo repugnat aliquid esse instrumentum annihilationis. Quia vero annihilatio fit per subtractionem influxus, si Deus communicaret humanitati potestatem creandi rem aliquam, & conservandi illam, posset etiam in voluntate ejus ponere, ut posset suum concursum subtrahere, & hoc modo in nihilum redigere rem, quæ ab illo concursu in suo esse penderet: ideoque recte dixit D. Th. potestatem annihilandi pendere ex potestate creandi, & per illam esse cognoscendam, seu judicandam, sicut privationem per habitum suum.

Ultimo tandem ex dictis constat, quale sit objectum hujus potestatis faciendi miracula, seu ad quas res se extendat. Dicendum est enim, cum hæc potestas non sit qualitas aliqua, vel potestatis naturalis, non habere certam, & determinatam materiam, sed pendere ex divina ordinatione, & concursu, ut dictum est, loquendo proprie de potentia proxima, & ad agendum expedita: si enim esset fermo de potentia remota, illa ad omnia, quæ contradictionem non implicant, extendi potest.

## QUÆSTIO XIV.

De defectibus corporis assumptis a Filio Dei in quatuor articulos divisa.

**D**einde considerandum est de defectibus, quos Christus in humana natura assumpserit. Et primo de defectibus corporis, secundo de defectibus animæ. Circa primum quaruntur quatuor.

Primo, utrum Filius Dei assumere debuerit in humana natura corporis defectus.

Secundo, utrum assumpserit necessitatem his defectibus subjacendi.

Tercio, utrum hos defectus contraxerit.

Quarto, utrum omnes hujusmodi defectus assumpserit.

**P**ostquam disseruit D. Thom. de perfectionibus humanitatis assumptæ, disputare aggreditur de defectibus ejus, tum in corpore, quod in hac quæstione agit, tum in anima, quod expedit quæstione sequenti. Dici autem videntur hoc loco defectus corporis, non omnes, qui in corpore fiunt, seu recipiuntur: hoc enim modo omnes defectus sensibiles ad corpus pertinent, & tamen quæstione sequenti inter defectus animæ numerantur; sunt ergo defectus corporis, qui de se corpori conveniunt & non per animam, nec per proprias potentias ejus, eas præsertim, quæ ad cognoscendum, & amandum deferviunt.

Ad quod nam miraculorum genus humanitas Christi assumpta, Durand.

Instrumētum annihilationis quomodo esse possit.

Obiectum potestatis faciendi miracula, in Christo quæritur.

89.  
1. dist. 3. q. 1. art. 8. d. 1.  
2. q. 2. 2. 1.  
q. 1. c. 5.  
CONTR. c. 5.  
5. 11. &  
opus. 3.  
cap. 4. 2. 4. 7.  
q. 7. art. 9.  
q. 9. art. 2.

& q. 9. a. 1.

Epist. 56.  
non multum a nobis medium tom. 2.



In materia de satisfactione non erat facturus, non com-  
plevis.

*aliquis pro peccato alterius sustinet: sed pro principio habet habitum anime, ex quo inclinatur ad volendum satisfacere pro alio, & ex quo satisfactio efficaciam habet. Non enim esset efficax satisfactio, nisi ex charitate procederet, ut infra dicitur †. Et ideo oportuit, animam Christi, & perfectam esse, quantum ad habitus scientiarum & virtutum, ut haberet facultatem satisfaciendi: & quod corpus esset subiectum infirmitatibus, ut ei satisfactionis materia non deesset.*

*Ad secundum dicendum, quod secundum naturalem habitudinem, quæ est inter animam & corpus, ex gloria anime, redundat gloria ad corpus. Sed hæc naturalis habitudo in Christo subiacebat voluntati divinitatis ipsius: ex qua factum est, quod beatitudo remaneret in anima, & non derivaretur ad corpus, sed caro pateretur: quæ conveniunt naturæ passibili, secundum illud, quod Damascenus \* dicit, quod beneplacito divina voluntatis permittebatur carni pati, & operari, quæ propria.*

Lib. 3. c. 15  
a med. &  
cap. 14.

*Ad tertium dicendum, quod poena semper sequitur culpam actualem, vel originalem; quandoque quidem ejus, qui punitur: quandoque autem alterius; pro quo ille, qui poenas patitur, satisfaciunt. Et ita accidit in Christo, secundum illud Isai. 53. Ipse vulneratus est propter iniquitates nostras, attritus est propter scelera nostra.*

In corp.  
art.

*Ad quartum dicendum, quod infirmitas assumpta a Christo non impedivit finem Incarnationis, sed maxime promovit, ut dictum est †. Et quamvis per hujusmodi infirmitates absconderetur ejus divinitas: manifestabatur tamen humanitas, quæ est via ad divinitatem perveniendi: secundum illud Romanorum 5. Accessum habemus per Jesum Christum ad Deum. Desiderabant autem antiqui Patres in Christo, non quidem fortitudinem corporalem, sed spiritualem, per quam, & diabolus vicit, & humanam infirmitatem sanavit.*

#### COMMENTARIUS.

**A**ffermat D. Thomas, assumptisse Christum hos defectus, cujus assertionis tres rationes assignat ex fine ipsius Incarnationis desumptas. Primam, ex fine satisfaciendi pro nobis. Secundam, ex fine confirmandi, & ostendendi magis veritatem Incarnationis. Tertiam, ut nobis esset exemplum: quæ omnes claræ sunt. Solum circa primam dubitare potest aliquis, quia enim hi defectus corporis sunt in nobis poenæ peccati, infert D. Th. fuisse conveniens, ut Christus in se assumeret eas poenas, quæ nobis erant debitæ. Quo argumento posset etiam concludere, fuisse conveniens, ut assumeret poenam purgatorii, vel inferni, ut quidam hujus temporis hæretici blasphemant: quia etiam hæ poenæ sunt debitæ hominibus peccatoribus, & pro illis omnibus Christus satisfecit. Respondetur tamen non esse eandem rationem: tum quia illæ poenæ non debeant sanctissimam Christi animam, ut suo loco dicitur: tum etiam, quia illæ poenæ non sunt proprie ordinatæ ad eum modum satisfactionis voluntariæ, qui viatorum est proprius, & exercetur per modum condignæ recompensationis, sed sunt ad propriam vindictam ipsius peccati, quæ ab ipso iudice sumitur, seu imperatur: poenæ autem hujus vitæ, quales sustinentur per defectus & infirmitates corporis, sunt accommodatissimæ ad proprium modum satisfaciendi per voluntariam recompensationem, quam Christus viator exhibere debuit. Tum denique, quia poena inferni, vel purgatorii non est necessario lubeunda peccatoribus, sed solum quasi sub conditione, scilicet, si mortalis peccati veniam non fuerint in hac vita consecuti, quoad poenam inferni: vel si pro peccato non plene satisfecerit in hac vita, loquendo quoad poenam purgatorii. At vero corporis defectus seu poenalitates omnino sustinendæ sunt hominibus a Christo redemptis, neque per aliquam satisfactionem propriam possunt illas vitare, quamvis illis uti possint ad satisfaciendum pro peccatis, & ideo maxime decuit, ut Christus in his poenis fieret similis hominibus peccatoribus, & per eas pro illis satisfaceret. Sed in hac ratione cavendum est aliud extremum; quidam enim exultimant, supposito hoc fine Incarnationis, scilicet, satisfaciendi pro hominibus, non solum conveniens, sed omnino necessarium fuisse, Christum assumere hos corporis defectus. Ita indicat Bonav. in 3. dist. 16. art. 1. q. 3. Durand. in 3. dist. 15. q. 1. n. 6. qui in eam sententiam citant Antelmum in lib. Cur Deus homo. Sed tamen revera hoc non sequitur necessario ex fine redemptionis. Primo quidem, quia uno solo

Responso.

Suarez Tom. XVI.

actu amoris posset nos per modum meriti sufficienter redimere, ut constat ex supra tractatis q. 1. art. 2. potuisset autem exercere hunc actum in corpore impassibili, etiam si corporis defectus non assumpisset. Et simili modo potuisset pro culpa, & injuria in Deum commissa satisfacere per actum reverentiæ, & obsequii ad Deum, & veniam hominibus deprecando, & per alios similes actus divini cultus. Ac denique per actum doloris, vel tristitiæ in sola anima conceptæ, absque passione corporali, potuisset satisfacere pro qualibet poena hominibus debita: quamquam præter naturalem ordinem rerum esset, habere animam passibilem in corpore impassibili: ergo simpliciter non fuerunt necessarii defectus corporis ad satisfaciendum pro nobis, fuerunt tamen aptissimi & accommodatissimi, propter rationes dictas. Solutiones argumentorum claræ sunt, sed valde notandæ.

#### ARTICULUS II.

*Utrum Christus necessitatem his defectibus subjacendi assumpserit.*

**A**d secundum sic proceditur. Videtur, quod Christus non ex necessitate his defectibus subjacuerit. Dicitur enim Isai. 53. Oblatus est, quia ipse voluit, & loquitur de oblatione ad passionem. Sed voluntas opponitur necessitati. Ergo Christus non ex necessitate subjacuit corporalibus defectibus.

87.  
Inf. 1. 15.  
art. 51. &  
3. dist. 1. q. 1.  
art. 2. q. 1.  
6. fin.

2. Præterea. Damasc. \* dicit in 3. lib. Nihil coactum in Christo consideratur, sed omnia voluntaria. Sed quod est voluntarium, non est necessarium. Ergo hujusmodi defectus non fuerunt ex necessitate in Christo.

Li. 3. c. 20.  
in fine.

3. Præterea. Necessitas infertur ab aliquo potentiori. Sed nulla creatura est potentior, quam anima Christi, ad quam pertinebat, proprium corpus conservare. Ergo hujusmodi defectus seu infirmitates non fuerunt in Christo ex necessitate.

Sed contra est, quod Apostolus dixit Roman. 8. Misit Deus Filium suum in similitudinem carnis peccati. Sed conditio carnis peccati est, quod habeat necessitatem moriendi, & sustinendi alias hujusmodi passiones. Ergo talis necessitas sustinendi hos defectus fuit in carne Christi.

a. Respondeo dicendum, quod duplex est necessitas. Una quidē coactionis, quæ fit ab agente extrinseco. Et hæc quidem necessitas contrariatur & naturæ, & voluntati: quorum utrumque est principium intrinsecum. Alia autem est necessitas naturalis, quæ consequitur principia naturalia, puta, formam, sicut necessarium est, ignem calefacere: vel materiam, sicut necessarium est, corpus ex contrariis compositum dissolvi. Secundum igitur hanc necessitatem, quæ consequitur materiam, corpus Christi subiectum fuit necessitati mortis, & aliorum hujusmodi defectuum: quia sicut dictum est \*, beneplacito divina voluntatis, carnis Christi permittebatur agere & pati, quæ propria. Hæc autem necessitas causatur ex principiis humanæ naturæ, ut dictum est \*. Si autem loquamur de necessitate coactionis, secundum quidem quod repugnat naturæ corporali: sic, iterum corpus Christi, secundum conditionem propriæ naturæ necessitati subjacuit & clavi perforantis, & flagelli percutientis. Secundum vero quod necessitas talis repugnat voluntati, manifestum est, quod in Christo non fuit necessitas horum defectuum, neque per respectum ad divinam voluntatem, neque per respectum ad voluntatem humanam Christi absolute, prout sequitur rationem deliberantē, sed solum secundum naturalem motum voluntatis, prout, scilicet, naturaliter refugit mortem, & etiam corporis nocumenta.

Art. præ.  
ad 2.

In isto art.

Ad primum ergo dicendum, quod Christus dicitur oblatus, quia voluit, & voluntate divina, & voluntate humana deliberata: licet mors esset contra naturalem motum voluntatis humanæ, ut Damasc. \* dicit.

Li. 3. c. 23.  
& 24.  
In corpore  
re articulo.

Ad secundum patet responsio ex dictis. †

Ad tertium dicendum, quod nihil fuit potentius, quam anima Christi absolute: nihil tamē prohibet, aliquid fuisse potentius, quantum ad hunc effectum: sicut clavus ad perforandum. Et hoc dico, secundum quod anima Christi consideratur secundum propriam naturam & virtutem.

#### COMMENTARIUS.

**D**efectus corporis, de quibus hic agit D. Th. considerari possunt, vel in actu primo, ut esse passibilem, mortalem, vel quasi in actu secundo, ut pati, mori. D. Th. ergo in corpore articuli præcipue tractat quæstionem, de his defectibus posteriori modo consideratis, scilicet, quatenus in actuali aliqua passione positi sunt, ut ex illis explicet

Ff



plicet ipsam dispositionem, & quasi potentiam, quam in suo corpore Christus suscepit ad has passiones sustinendas. Unde proprius sensus huius questionis est, an Verbum in tali dispositione assumpserit corpus, ut ex illa necessario consecuti fuerint hi defectus, qui sunt per modum actus secundi, seu passionis actualis. Et hoc sensu respondet D. Th. assumpsisse Christum necessitatem naturalem his defectibus subjacendi, quia assumpsit corpus ita dispositum, & carens superiori dono gloriæ, ut suæ naturæ relictum, non posset non subjacere his defectibus, supposita intrinsicæ compositione, & natura corporis humani, & extrinsecis agentibus: & hoc sensu dixit Damasc. lib. 3. cap. 15. corpori Christi permixtum esse a divinitate agere, & pati, quæ propria. Ex quo infert ulterius D. Th. assumpsisse Christum necessitatem coactionis, quæ naturali appetitui opponitur: multa enim contra naturalem corporis propensionem ex quadam naturali necessitate patiebatur, quæ tamen absolutæ, & deliberatæ voluntati coacta non erant. Reliqua clara sunt in textu.

## A R T I C U L U S III.

*Utrum Christus defectus corporales contraxerit.*

88. **A**D tertium sic proceditur. Videtur, quod Christus defectus corporales contraxerit. Illud enim contrahere dicimus, quod simul cum natura ex origine trahimus. Sed Christus simul cum natura humana, defectus, & infirmitates corporales per suam originem traxit a matre, cujus caro huiusmodi defectibus subiacebat. Ergo videtur, quod hos defectus contraxerit.

2. Præterea. Id, quod ex principiis naturæ causatur, simul cum natura trahitur, & ita contrahitur. Sed huiusmodi pœnalitates causantur ex principiis naturæ humanæ. Ergo eas Christus contraxit.

3. Præterea. Secundum huiusmodi defectus Christus aliis hominibus similatur: ut dicitur Hebr. 2. Sed alii homines huiusmodi defectus contraxerunt: ergo videtur quod etiam Christus huiusmodi defectus contraxerit.

Sed contra est, quod huiusmodi defectus contrahuntur ex peccato: secundum illud Rom. 5. Per unum hominem peccatum intravit in hunc mundum, & per peccatum mors. Sed in Christo non habuit locum peccatum. Ergo huiusmodi defectus Christus non contraxit.

a. Respondeo dicendum, quod in verbo contrahendi intelligitur ordo effectus ad causam, ut scilicet, illud dicatur contrahi, quod simul cum sua causa ex necessitate trahitur. Causa autem mortis, & horum defectuum in humana natura, est peccatum, quia per peccatum mors intravit in hunc mundum, ut dicitur Rom. 5. Et ideo illi proprie dicuntur hos defectus contrahere, qui ex debito peccati hos defectus incurrunt. Christus autem hos defectus non habuit ex debito peccati: quia, ut August. \* dicit, exponens illud Joan. 3. Qui de sursum venit, super omnes est: de sursum venit Christus, id est, de altitudine naturæ humanæ, quam habuit ante peccatum primi hominis. Accipit enim naturam humanam absque peccato, in illa puritate, in qua erat in statu innocentie: & simili modo potuisset assumere humanam naturam absque defectibus. Sic igitur patet, quod Christus non contraxit hos defectus, quasi ex debito peccati eos suscipiens, sed ex propria voluntate.

Ad primum ergo dicendum, quod caro Virginis concepta fuit in originali peccato: & ideo hos defectus contraxit. Sed Christus naturam ex Virgine assumpsit absque culpa. Et, mihi potuisset naturam assumere absque pena: sed voluit suscipere penam propter opus nostræ redemptionis implendū, ut dictum est. Et ideo habuit huiusmodi defectus, non contrahendo, sed voluntarie assumendo.

Ad secundum dicendum, quod causa mortis, & aliorum corporalium defectuum in humana natura, est duplex. Una quidem remota, quæ accipitur ex parte principiorum materialium humani corporis, in quantum est ex contrariis compositum, sed hæc causa impediatur per originalem iustitiam. Et ideo proxima causa mortis, & aliorum defectuum est peccatum, per quod subtrahitur originalis iustitia. Et propter hoc, quia Christus fuit sine peccato, dicitur non contraxisse huiusmodi defectus, sed voluntarie assumpsisse.

Ad tertium dicendum, quod Christus in huiusmodi defectibus assimilatus est aliis hominibus, quantum ad qua-

litatem defectuum, non autem quantum ad causam. Et ideo Christus non contraxit huiusmodi defectus, sicut alii.

## C O M M E N T A R I U S.

**H**ÆC tota quæstio posita est in significatione verbi contrahendi; hi enim defectus, si nudam hominis naturam consideremus, necessario consequuntur ad humanam generationem, & naturalem hominis conditionem, & compositionem: & hoc modo dixit Durand. in 3. dist. 15. q. 1. n. 8. (ut illi imponi solet) Christum contraxisse hos defectus, quamvis revera ipse non dicat contraxisse, sed ex necessitate quadam naturali illos habuisse: quamquam neque hic modus loquendi placeat, ut statim dicam, licet res, quam ipse intendit, vera sit. Si autem consideremus humanam naturam, prout a Deo est condita, non habuit hos defectus, neque habuisset unquam, nisi intervenisset peccatum, propter quod dono iustitiæ privata est, quod illam ab his defectibus immunem reddebat: & ideo in his hominibus, qui ab Adamo naturali generatione descendunt, non dicuntur absolute hi defectus esse ex naturali necessitate, sed ex peccato contracti: & hoc sensu certissimum, & de fide est non contraxisse Christum hos defectus, quia non est conceptus ex semine viri, sed Spiritus sancti opere, & ideo nec peccato originali obnoxius fuit, neque defectus ab illo manantes contraxit. Neque etiam simpliciter dicendum est, ex necessitate naturali subditum fuisse his defectibus, quia propter conditionem, & dignitatem personæ, debita illi erat talis naturæ perfectio, quæ omnes hos defectus impediret: & ideo nec contracti, nec simpliciter naturales dicendi sunt, sed voluntarie assumpti. Quæ tota doctrina sumpta est ex August. lib. 5. contra Julian. c. 9. versus finem, & Damasc. lib. 3. de Fid. c. 20. & Anselmo lib. 1. Cur Deus homo c. 10. & lib. 2. c. 10. 11. & seq.

## A R T I C U L U S IV.

*Utrum Christus omnes defectus corporales hominum assumere debuerit.*

**A**D quartum sic proceditur. Videtur, quod Christus omnes defectus corporales hominum assumere debuerit. Dicit enim Damascen. \* Quod est inassumibile, est incurabile. Sed Christus venerat, omnes defectus nostros curare. Ergo omnes defectus nostros assumere debuit.

2. Præterea. Dictum est, \* quod ad hoc, quod Christus pro nobis satisfaceret, debuit habere habitus perfectivos in anima, & defectus in corpore. Sed Christus ex parte animæ assumpsit plenitudinem omnis gratiæ. Ergo ex parte corporis debuit assumere omnes defectus.

3. Præterea. Inter omnes defectus corporales, præcipuum locum tenet mors. Sed Christus mortem assumpsit. Ergo multo magis omnes alios defectus assumere debuit.

a. Sed contra est, quod contraria non possunt simul fieri in eodem. Sed quadam infirmitates sunt sibi ipsis contrariæ, utpote ex contrariis principiis causatæ. Ergo non potuit esse, quod Christus omnes infirmitates humanas assumeret.

Respondeo dicendum, quod, sicut dictum est \*, Christus defectus humanos assumpsit, ad satisfaciendum pro peccato humane naturæ, ad quod requirebatur, quod haberet perfectionem scientiæ, & gratiæ in anima. Illos ergo defectus Christus assumere debuit, qui consequuntur ex peccato communi totius naturæ, nec tamen repugnant perfectioni scientiæ, & gratiæ. Sic igitur non fuit conveniens, ut omnes defectus seu infirmitates humanas assumeret. Sunt enim quidam defectus, qui repugnant perfectioni scientiæ & gratiæ: sicut ignorantia, pronitas ad malum, & difficultas ad bonum. Quidam autem defectus sunt, qui non consequuntur communiter totam humanam naturam, propter peccatum primi parentis, sed causantur in aliquibus hominibus ex quibusdam particularibus causis: sicut lepra, & morbus caducus, & alia huiusmodi. Qui quidem defectus, quandoque causantur ex culpa hominis, puta, ex inordinato victu: quandoque autem ex defectu virtutis formativæ. Quorum neutrum convenit Christo: quia & caro ejus de Spiritu sancto concepta est, qui est infinitæ sapientiæ & virtutis, errare & deficere non potens, & ipse nihil inordinatum in regimine sue vitæ exercuit. Sunt autem tertii defectus, qui in omnibus hominibus communiter inveniuntur, ex peccato primi parentis: sicut mors, fames, sitis, & alia huiusmodi. Et hos defectus omnes

Refertur  
3. senten.  
dist. 16. &  
habetur  
in gl. or-  
din. super  
hunc lo-  
cum.

Art. 1. huius  
questionis.

89.  
Supra q. 13.  
art. 4. 3. &  
infr. q. 15.  
8. & q. 46.  
art. 4. 3. &  
3. d. 1. q. 2.  
1. & d. 15.  
q. 1. art. 1.  
& d. 22. q.  
2. art. 1. q.  
1. & d. con-  
tra q. 55.  
11. & opus.  
3. & 238.  
\* Li. 2. op.  
& 18.  
Artic. 1.

Artic. 1. &  
2. huius q.



Lib. 1. or-  
th. fid. e.  
14. in fin.  
& lib. 3.  
c. 20.

omnes Christus suscepit, quos vocat Damascenus \* naturales, & indetractibiles passiones: naturales quidem, quia consequuntur communiter totam naturam humanam: indetractibiles autem, quia defectum scientiæ & gratiæ non important.

Ad primum ergo dicendum, quod omnes particulares defectus hominum causantur ex corruptibilitate, & passibilitate corporis, superadditis quibusdam particularibus causis. Et ideo, cum Christus curaverit passibilitatem, & corruptibilitatem corporis nostri, per hoc, quod eam assumpsit, ex consequenti omnes alios defectus curavit.

Ad secundum dicendum, quod plenitudo omnis gratiæ & scientiæ, animæ Christi secundum se debeatur, ex hoc ipso, quod erat a Verbo Dei assumpta: & ideo absolute omnem plenitudinem sapientiæ & gratiæ Christus assumpsit. Sed defectus nostros dispensative assumpsit, ut pro peccato nostro satisfaceret, non quia ei secundum se competere. Et ideo non oportuit, quod omnes assumeret, sed solum illos, qui sufficiebant ad satisfaciendum pro peccato totius humanæ nature.

Ad tertium dicendum, quod mors in omnes homines devenit ex peccato primi parentis: non autem quidam alii defectus, licet sint morte minores. Unde non est similis ratio.

#### COMMENTARIUS.

Objeçio.

Responsio.

**T**RIBUS assertionibus D. Th. respondet. Prima est, non assumpsisse Christum illos defectus, qui cum scientiæ & gratiæ perfectione pugnant. Hæc satis constat ex iis, quæ supra de gratia & scientia Christi dicta sunt, & ex parte tractanda est late quæstione sequenti. Non immerito tamen percontatur Cajetan. quare D. Th. horum defectuum mentionem hic fecerit, qui ad animam potius, quam ad corpus pertinent, ut sunt ignorantia, propensio ad malum, difficultas in bono. Responderi tamen potest, obiter tantum hæc attigisse D. Th. ut illam generalem regulam statueret, scilicet, præter eos defectus, qui ad veritatem humanæ naturæ pertinent, illos tantum defectus Christum assumpsisse, qui ad finem Incarnationis utiles esse poterant: non vero, qui ad hunc finem nihil conferunt, ut sunt ignorantia, &c. Vel certe dici potest, non loqui hic D. Th. de his defectibus, prout formaliter ad animam pertinent, sed prout ex dispositione corporis originem trahunt, ut sensus sit, non assumpsisse Christum corpus ita dispositum, vel ita prædominans animæ, ut perfectionem scientiæ, & gratiæ posset impedire.

Secunda assertio, non assumpsisse Christum particulares defectus corporis, qui non sunt toti naturæ communes, ut sunt ægrotudo, & deformitas. Ratio est, quia in Christo non sunt inventæ causæ, ex quibus hi defectus oriri solent, quæ sunt, aut imperfecta virtus formans corpus, aut imperfectum regimen ipsiusmet corporis.

Tertia est, assumpsisse Christum defectus communes omnibus hominibus, quos Damascenus vocat naturales, & irreprehensibiles hominis affectiones. Circa quam conclusionem, & cæteras nihil notandum occurrit, præter ea, quæ statim disputabimus. Solum est observandum illud principium positum a D. Th. in principio corp. art. & in solutione ad 2. repetitum, scilicet, perfectionem omnem humanæ naturæ convenientem per se debitam esse humanitati ratione unionis: defectus vero tantum esse assumptos propter nos. Hoc enim principium, & pro qualitate materiæ per se notum est, & illo in superioribus sæpe uti sumus, & in sequentibus utemur.

#### DISPUTATIO XXXII.

In quatuor sectiones distributa.

##### De perfectionibus, & defectibus corporis Christi.

**Q**UONIAM defectus, carentiam quandam perfectionis indicat, idem enim defectus nomine, quod voce imperfectionis significari videtur: ideo ad explicandum quos defectus Christus in corpore suo assumpsit, a perfectionibus assumptis inchoandum est, ut per habitum privatio facilius cognoscatur. Advertendum autem est, duplices esse posse perfectiones in corpore humano; quædam sunt connaturales, & debitæ tali corpori secundum debitum statum ejus, ut sunt pulchritudo, sanitas, & similes: aliæ sunt supra debitum naturæ, ut sunt dotes, quas corpus habebit in gloria, & ad has revocari possunt per-

Suarez Tom. XVI.

fectiones, quas haberet in statu innocentiae, in quo esset aliquo modo impassibile, & immortale: quarum quidem perfectionum carentia, defectus quidam est, qui solum consideratur secundum id, quod naturæ humanæ de se debitum est, solum est veluti negatio quædam, seu negativa imperfectio: tamen respectu naturæ humanæ elevatæ ad superiorem quandam statum, & præsertim ad unionem hypostaticam, cui omnis illa perfectio debita est, magis habet rationem privationis, & proprii defectus, seu imperfectionis. Præter hos vero considerari possunt in humano corpore alii defectus omnino connaturales illi, qui non privant illud aliqua perfectione, in aliquo statu sibi debita, sed solum negant perfectionem propriam alicujus naturæ superioris, ut sunt circumferibi loco, & esse loco mutabilem, & alii similes, de quibus breviter sigillatim dicendum est.

#### SECTIO I.

Utrum Verbum assumpserit in corpore humano perfectiones corporis gloriosi, vel potius defectus illis repugnantes, ut esse passibile, mortale, &c.

**S**ensus hujus dubii est de principio temporis, de quo facta est assumptio, & de toto tempore viæ. Nam quod post Resurrectionem habuerit Christus in corpore suo omnes has perfectiones, & caruerit omnibus his defectibus, dubiū non est, de qua re infra in proprio loco disputabimus. Est ergo primus error eorum, qui negarunt assumpsisse Christum corpus passibile, etiam si non negarent assumpsisse verum corpus humanum. Author hujus fuit Julianus Halicarnassæus, & Cajetanus, ut refert Damascenus. hæref. 84. & Nicephorus lib. 17. hist. c. 29. & in eundem errorem dicitur incidisse Justinianus Imperator, ut est apud Evagrium lib. 4. hist. c. 19. & Nicephorum supra c. 31. qui tamen excusat imperatorem, eo quod per ignorantiam lapsus fuerit, ut non propterea sit inter hæreticos reputandus, præsertim quia in VI. Synod. in præfatione ejus, & aliis locis, in quibus sit mentio Justiniani Imperatoris, inter Catholicos, & iustos numeratur. Fundamentum hujus erroris solum fuit, quia non existimabant isti hæretici, Verbum divinum corpus passibile decessisse. In quorum favorem adjungi potest illud Psal. 15. & Actorum 2. *Non dabis sanctum tuum videre corruptionem.* Secundus error hic referri potest quorundam, qui negarunt assumpsisse Christum corpus grave, quod natura sua deorsum ferretur. Ita sentit Theodorus quidam, ut refert Beda lib. 2. in Marc. c. 28. & D. Th. in Catena Matth. 14. Clitov. super Damascen. lib. 3. c. 15. Fundamentum fortasse fuit, quia Christus super aquas ambulabat.

Dico tamen primo, assumpsisse Verbum corpus humanum vere passibile, ac mortale, atque adeo carens dotibus, seu perfectionibus gloriæ. Est de fide, quæ satis constat ex illo Luc. 22. *Nonne oportuit pati Christum, & ita intrare in gloriam suam?* constat etiam ex toto Evangelii discursu, in quo affirmatur Christum passum fuisse famem, Matth. 4. sitim, Matth. 27. corporis defatigationem, Joannis 4. quæ vera esse non possunt, si corpus vere passibile non habuit. Dicere autem, specie solum, & non veritate hæc passum esse, contra fidem Scripturæ est, præsertim cum Isai. 53. dicatur: *Vere languores nostros ipse tulit:* est etiam contra veritatem redemptionis, & fidei nostræ, quia si non vere mortuus est, nec vere nos redemit, nec vere resurrexit: vana esset ergo fides nostra, ut in simili argumentatur Paul. 1. ad Cor. 15. Denique Paulus ad Hebr. 2. propter corpus passibile dicit, Christum paulo fuisse minoratum ab Angelis, & causam reddit dicens: *Quia pueri communicaverunt carni, & sanguini* (per quæ corpus passibile significatur) oportuisse Filium Dei, eisdem participasse, & fieri fratribus similem, ut misericors fieret: & c. 12. aliam reddit rationem, quam etiam docuit Petrus prima canonica c. 2. dicens: *Christus passus est pro nobis, vobis relinquens exemplum, &c.* Denique contra hos hæreticos faciunt omnes Scripture, quæ supra contra Manichæos, & alios adductæ sunt. Illud enim inter hos hæreticos convenit, quod solum specie, & apparentia Christum passum esse dicebant, propter quod Phantasiastæ dicti sunt, ut Nicephorus refert lib. 18. cap. 45. Secundo, definita est hæc veritas in toto Concilio Ephesino, Chalced. act. 5. V. Synodo act. 8. VI. Synodo act. 11. 13. & 18. Lateran. sub Mart. I. & aliis: & tradit



dit Damasus Papa in epist. & in professione suæ fidei ad Paulinum: & Eutychianus Papa epist. 1. Leo Papa epist. 11. Ambrosius lib. 2. de Fide c. 4. & lib. de incarn. Dom. sacram. c. 6. & 7. Augustinus epist. 146. Damascenus lib. 3. c. 28. & Tertullianus lib. de Carne Christi, & alios in sequentibus referam. Tertio, ratio potissima sumenda est ex fine redemptionis: nam licet corpus passibile non fuerit conveniens Christo secundum se, propter unionem ad Verbum, & propter animæ gloriam: tamen supposito lapsu humanæ naturæ, & necessitate redemptionis nostræ, expediens omnino fuit, Christum hujusmodi corpus suscipere, ut exponendo textum D. Thomæ satis declaratum est, & supra etiam q. 1. art. 2. & dicitur infra q. 46. & 47. Utuntur etiam Patres interdum illa ratione, quia aliàs corpus Christi non esset ejusdem naturæ cum nostro, ut constat ex Damasceno, Nicephoro, & aliis supra citatis. Quæ ratio per se sumpta non videtur efficax, quia potuit esse corpus Christi Domini ejusdem naturæ specificæ cum corporibus aliorum hominum, & tamen non habere eamdem conditionem, seu statum corruptionis. Solum ergo potest procedere illa ratio, supponendo ex fide Christum a principio, dotes gloriæ suo corpori non communicasse. Unde fit, si corpus illud fuit impassibile, id non habuisse ex dono superiori, sed ex natura sua: quo pacto recte sequeretur, esse alterius naturæ a corporibus aliorum hominum.

Dico secundo, assumpsisse Verbum in corpore humano illos defectus, qui sunt veluti naturales proprietates, comitantes conditionem corporis mortalis seu passibilis. Est certa conclusio, quæ ex D. Thomæ hic colligitur, & ex aliis Scholasticis in 3. dist. 15. & sequitur aperte ex præcedenti, & ex tractatis supra q. 5. & 6. ubi probatum est assumpsisse Christum omnes proprietates humanæ naturæ, & quidquid in illa plantavit: & in specie declaratur contra secundum errorem supra citatum: quia sicut corpus Christi caruit gloriæ immortalitate, impassibilitate, ita etiam caruit claritate, & agilitate; fuit ergo corpus ejus grave, sicut sunt nostra, sequitur enim hæc proprietas naturaliter ex humani corporis compositione, nisi supernaturaliter impediatur; non est autem impedita in corpore passibili, cujus signum certissimum est, quia corpus illud ambulando fatigabatur, ut constat Joa. 4. illa enim defatigatio ex gravitate, & corporis corruptione provenit. Eadē autē ratio est de similibus proprietatibus.

Ad fundamentum primi erroris ex dictis patet responsio, quid enim Deum deceat non ex humano sensu, sed ex divina sapientia, & bonitate judicandum est: passibile ergo corpus, quamvis de se non esset conveniens Deo, tamen neque per se fuit indecens, & ad redemptionem nostram, virtutisque exemplum, fuit maxime decens. In verbis autem illis: *Non dabis sanctum tuum videre corruptionem*, non est sermo de passione, aut morte humani corporis, sed de corruptione corporis jam emortui per putrefactionem vel resolutionem in elementa: hæc enim corruptio in corpore Christi locum non habuit.

Ad fundamentum secundi erroris respondetur, sicut in transfiguratione communicata fuit ad breve tempus humanitati Christi quædam claritas, vel ejusdem rationis, vel aliquo modo similis claritati corporis gloriosi, ut infra suo loco dicemus: non tamen propterea putandum est, Christum habuisse illam claritatem toto tempore vitæ suæ: ita cum aliquando ambulavit super aquas, communicavit corpori suo quoddam vestigium agilitatis corporis gloriosi, non tamen propterea existimandum est, toto tempore vitæ suæ illam dotem habuisse. An vero pro illo parvo tempore communicata sit illi corpori, propria agilitas corporis gloriosi, quamquam Abulen. Matth. 14. q. 153. id affirmet; incertum est tamen, disputatione enim præcedenti assignavimus duos alios modos, quibus id fieri potuit absque qualitate alia, vel mutatione facta in ipso corpore Christi: qui eo probabiliore videntur, quo faciliores sunt. An vero effectus ille dicendus sit miraculosus, vel potius connaturalis illi corpori ratione unionis, vel ratione gloriæ ipsius animæ, dicemus latius infra quæst. 45. de Transfiguratione tractantes. Nunc breviter dicitur, supposita dispositione illius corporis, & priori miraculo, quo factum erat, ut ex gloria animæ gloria ad corpus non redundaret, illud fuisse simpliciter miraculosum opus, & præter naturalem conditionem talis corporis, ut loquuntur Hieronym. Chrysost.

& alii Matth. 14. & Dionys. 2. cap. de Divin. nominib. & epist. 4. ad Cajum, & Augustinus sermon. 185. de tempore, & Hilar. 10. de Trinit.

## SECTIO II.

*Utrum assumpserit Verbum omnes perfectiones connaturales humano corpori, vel potius defectus aliquos illis repugnantes.*

**D**uplex potest esse hæc perfectio, aut defectus, scilicet aut per modum actus primi, seu permanentis formæ, vel habitus, vel passibilis qualitatis, aut per modum actus secundi, seu actionis, & passionis transeuntis,

Dico ergo primo, assumpsisse Christum corpus humanum, perfectum, & bene dispositum juxta conditionem, & statum ex natura rei debitum tali corpori: unde non assumpsit defectus huic dispositioni, & perfectioni repugnantes. Hæc est mens D. Th. hic art. 4. & aliorum Theologorum in 3. dist. 15. & Bonavent. art. 1. q. 1. & 2. Richard. q. 2. & 3. Durand. q. 1. Et ratio generalis reddi potest, quia hæc perfectiones, cum pertineant ad debitam compositionem humani corporis, per se debebant, & conveniebant, corpori humano perfecto: aliunde vero defectus repugnantes huic perfectioni, cum non consistant in aliqua actione, vel passione, non conferebant ad meritum, vel satisfactionem; non ergo oportebat illos assumi. Sed in particulari hoc melius explicatur, sequitur enim ex hac conclusione, assumpsisse Christum optimum temperamentum, seu complexionem humani corporis, ut ex ratione facta constat. Et præterea, quia tale corpus debetur perfectissimæ animæ, habenti perfectam intelligendi vim, hujusmodi autem erat anima Christi, ut supra ostensum est: ac denique quia defectus hujus perfectionis nihil ad redemptionem nostram deservire poterat.

Secundo ex eadem conclusione colligitur, assumpsisse Christum perfectam corporis pulchritudinem, quam in corpore humano, ac virili esse oportebat: quod sine causa, ac temere negare ausus est Michael Medina lib. 2. de Recta in Deum fide cap. 7. Est enim hæc communis sententia Sanctorum, ad quam accommodari potest illud Psalm. 44. *Speciosus forma præ filiis hominum*: nam licet Basil. ibi, & Cyrillus lib. 5. sup. 53. c. Isai. de pulchritudine divinitatis hunc locum intelligant, Theodoretus vero, Remigius, & Arnobius ibi, & Gregorius lib. 1. Regum c. 1. de pulchritudine gratiæ exponant: tamen de pulchritudine corporis interpretantur Augustinus & Cassiodor. ibi, & Bernardus serm. 1. de omnibus Sanctis, Chrysostomus hom. 18. in Matt. ubi de hac pulchritudine Christi pulchre loquens, inter alia inquit: *Sicut insignis perficiendis miraculis fuit, ita visus gratiosissimus fuisse dicitur*: inferius vero tractans illud Isai. 53. *Non erat ei species, neque decor*, dictū esse exponit, vel quia pulchritudo divinitatis sub mortali corpore occultabatur, ut etiam Cyrillus supra citatus exponit. Vel quia ipsa corporis pulchritudo, per ejusdem macerationem, passionem, & tormenta quasi deformata, & abolita fuit, vel potius occultata, juxta id, quod statim subjungitur: *Et quasi absconditus vultus ejus*: quam expositionem probavit etiam Tertullianus lib. contra Judæos c. de claritate gentium, & 3. lib. contra Marcion. & Virgilius lib. 2. contra Eutychem; & in eundem sensum tractat utrumque locum Hieronym. tom. 2. epist. 160. ad Principium, ubi inquit: *Abque passionibus corporis, universis pulchrior est, virgo de Virgine, qui non ex sanguinibus, sed ex Deo natus est*. Et ad eundem sensum dicit Naziazen. orat. 2. Paschæ, in Resurrectione fuisse Christo Domino pulchritudinem restitutam, non quod naturalis corporis forma, membrorum proportio, & nativus color mutata fuerint: sed quia perfectum statum suum habuere, & per corporis gloriam quasi illustrata sunt, ut D. Thomas infra dicit q. 54. art. 1. ad 3. In hac denique sententia est Clemens Alexand. 3. lib. Pædag. c. 1. & Abulen. Parad. 1.

Ratione ita declaratur, quia ut D. Thomas docet 1. q. p. 59. a. 8. & 2. 2. q. 145. a. 2. ex Dionys. c. 4. de div. nominib. & Augustinus 22. de Civit. cap. 19. pulchritudo ex tribus confurgit: primo ex omnium membrorum integritate, quam fuisse in corpore Christi Domini certissimum est, non enim accepit corpus mutilum, aut monstruosum, sed in naturali sua integritate, sic enim docent Patres assumpsisse omnia, quæ in nostra debita plantavit. Secundo ex eorumdem membrorum debita proportione, & hanc fuisse etiam in corpore Christi facile persuaderi potest,

tum



tum quia tale corpus debebatur perfectissimæ animæ ejus: tum etiam, quia oportuit, ut corpus illud esset aptissimum ad omnia opera vitæ exercenda, quæ aptitudo multum ex dicta proportione pendet: denique hoc facile colligitur ex forma ejus, quam describit Nicephorus lib. 1. hist. c. ultim. Tertio requiritur ad pulchritudinem conveniens color nativus, qui oritur ex optimo temperamento, & complexione: sicut ergo hæc fuit optima in Christi corpore, ita illi erat connaturalis perfectus color, & ad pulchritudinem corporis humani maxime accommodatus. Et confirmatur primo, quia corpus Christi Domini Spiritus sancti virtute fabricatum est; sed opera, quæ Deus per se ipsum facit, sunt pulcherrima & perfecta; ergo. Confirmatur secundo, quia Adam, eo quod ab ipso Deo immediate effectus est, fuit pulcherrimus & optime dispositus; multo ergo magis Christus. Confirmatur tertio, quia corpus Christi futurum est veluti objectum beatitudinis corporis nostri, ut supra disputatione 5. cum Augustino, & Cypriano dicebamus: est etiam futurum exemplar pulchritudinis omnium corporum beatorum; ergo est ipsum pulcherrimum. Tandem confirmatur, quia nec per se fuit expetibile, ut Christus hac perfectione careret, nec defectus illius nostræ deserviebat redemptioni.

**Objectio.** Dices, imo per se decuisse, & ad quandam reverentiam Deo debitam pertinuisse, ne pulchritudinem affectaret, quia quamvis neque oportuerit illum esse deformem, tamen virum religiosum, & Evangelii prædicatorem nec pulchritudo decebat, sed quædam mediocris, gravisque venustas. Respondetur. Naturalis & virilis pulchritudo cum summa virtute, & modestia conjuncta, maxime decet, & ornat quemcumque sanctum virum, & incitat ad reverentiam, & dilectionem; præsertim quando propter labores, & afflictiones corporis ita est moderata, ut per se ostendat, solum ab ipsa naturali compositione, & formatione perfecta proficisci, non ex humana curiositate, seu affectatione.

Dico secundo, non assumpsisse Christum omnes perfectiones naturales, commodas corpori humano, quæ in actione aliqua, vel passione, seu in actuali dispositione consistunt: sed potius defectus contrarios, cujusmodi sunt fames, sitis, defatigatio corporis, & similes. Hæc conclusio hoc sensu explicata, est certa secundum fidem, & probatur satis ex testimoniis Scripturæ citatis sectione præcedenti. Et ratio est, quia D. Th. est usus, quia hi defectus sunt pœnæ accommodatæ ad satisfaciendum pro nobis, & præbenda exempla virtutis. Solum superest explicandum, quos ex his defectibus assumpsit: constat enim non assumpsisse omnes possibiles humano corpori, quia neque oportuit, neque convenienter fieri potuit. In quo breviter dicendum est primo, suscepisse passiones illas, quæ intrinsece oriuntur ex corpore mortali, & toti naturæ communes sunt: pertinebat enim hoc ad veritatem corporis mortalis, & ad fidem ejus comprobendam. Suscepit deinde aliquas passiones, vel defectus ab extrinseca causa naturali, vel violenta provenientes, sicut enim interdum passus est frigus vel calorem, flagella, & crucem. Regula autem, seu mensura harum passionum fuit æterna Dei sapientia, qua definitum fuit, quid in hoc genere expediret suscipere. Unde tandem dicitur, non accepisse quosdam defectus, qui vel indecentiam aliquam continent, vel communes non sunt toti naturæ, sed ex aliqua speciali imperfectione oriuntur, ut hic D. Thomas, & cum illo omnes Theologi docent.

Ex quo expeditur commune dubium, an in Christo fuerit morbus aliquis ut febris, aut morbus caducus; non enim defuerunt, qui assererent, Christum assumpsisse hujusmodi ægritudines, ut in omnibus fratribus assimilaretur. Sed est sententia temeraria, & piarum aurium offensiva, eo magis, quo ægritudo Christo attributa majorem imperfectionem, vel indecentiam continuerit. Dicendum ergo est, neque morbum, neque ægritudinem assumpsisse, ut sensit D. Thomas hic, & alii in 3. dist. 15. & 16. & docuit etiam Abul. paradox. 3. c. 21. Cajet. 2. tom. opusc. opusculo 13. Glossæ, Lyra, & alii expolitores Matth. 8. ubi citatur illud Isai. 53. *Per languores nostros ipse tulit*, qui exponunt, id est, non in se accepit, sed a nobis abstulit, & depulit: quod multi referunt ad virtutem miraculorum, per quam morbos hominum sanabat, ut videre est in D. Hieron. super Isai. & August. tract. 91. in Joan. &

Suarez Tom. XVI.

Basilio in regulis brevioribus in 177. quamvis locus ille Isai. alium etiam literalem sensum habere possit, ut constat ex 1. epist. Petri c. 2. Juxta prædictum vero sensum videtur dixisse Athanasius, libro de Incarnat. ante medium, non decuisse, ut is, qui ad tollendas infirmitates nostras veniebat, ægritudines susciperet: unde cum Isaias Christum vocat virum dolorum, & scientem infirmitatem, infirmitatem vocat ipsam passionem & corporis afflictionem, ut omnes Patres exponunt, non aliquem morbum, vel corporis ægritudinem. Ratio redditur a D. Th. quia morbus vel ægritudo non oritur nisi vel ex imperfecta corporis formatione, quæ in Christo locum non habuit, ut constat, vel ex aliqua immoderatione in cibo & potu, aut ex alia simili causa, quæ quam longissime etiam a Christo absuit. Dices interdum potest etiam provenire ex causa extrinseca, ut ex inclementia aeris, vel ex influentia cœli. Respondetur, corpus optime temperatum, quale fuit corpus Christi, facile resistere & superare hujusmodi injuriam, vel intemperiem cœli, præsertim quia hujusmodi causæ nimium violentæ facile poterant ab ipso Christo vitari, quod & expediens fuit, cum hujusmodi defectus nec per se divinam personam decerent, neque nobis essent necessarii, vel utiles.

Sed dicet aliquis; ergo si Christus non fuisset per vim interfectus, nunquam fuisset mortuus, quod repugnat conditioni corporis mortalis. Sequela vero patet, quia nunquam contraheret morbum, aut ægritudinem; ex sententia autem Medicorum, non potest homo senio confici, aut naturaliter mori, nisi in illo aliqua ægritudo intercedat. Respondetur, nos tantum fuisse locutos de facto, nam de possibili, si Christus usque ad senilem, & decrepitam ætatem viveret, fortasse non repugnaret, ut in aliquam ægritudinem incidere posset levem, & ad breve tempus, qualem eam Medici describunt accidere in iis, qui naturaliter senio confecti, quasi sponte sua occidunt. Secundo vero dici potest, esse disparem rationem de morte, & ægritudine, mors enim habet intrinsecam & sufficientem causam in ipsa naturali compositione, & conservatione humani corporis, ex qua fit, ut naturalis calor, & humidum radicale paulatim remittantur, & debilitentur, & tandem deficiant: morbus autem vel ægritudo non habet sufficiens principium intrinsecum in ipsa natura, si corpus ipsum bene formatum sit, & convenienter gubernatum. Illa enim remissio vel debilitas, quæ paulatim fit in ipsa naturali virtute, non habet rationem ægritudinis, sed naturalis dispositionis, in tali ætate convenientis humano corpori. Quocirca sententia illa Medicorum, si vera est, juxta commune usum vitæ humanæ interpretanda est; per se autem & intrinsece non repugnat corpori humano usque ad mortem pervenire per actionem mutuam caloris naturalis, & alimentii, &c. absque propria ægritudine intercedente: nam dispositio naturalis, in qua potest humanum corpus conservari, habet certum terminum saltem extrinsecum, & statim ac illum attingit, deficit, & unio corporis & animæ dissolvitur. Potest autem remissio naturalis caloris usque ad illum terminum paulatim pervenire absque ægritudine, quia in singulis ætatibus potest corpus illud in convenienti dispositione conservari. Nam sicut pueritiæ conveniens est talis dispositio, sicut etiam senectuti, & aliis ætatibus: morbus autem proprie consistit in defectu naturalis & convenientis dispositionis corpori humano in tali statu vel ætate debitæ. Poterat autem corpus Christi nunquam carere hujusmodi dispositione, & nihilominus naturaliter mori, ut explicatum est.

## SECTIO III.

*An hi defectus fuerint necessarii, vel voluntarii Christo Domino.*

**D**Ubi hoc solum habet locum proprie loquendo in his defectibus, qui in aliqua actione, vel passione consistunt. Et ratio dubii sumi potest ex Damasc. l. de her. in 84. ubi inter hæreses Juliani, & aliorum ponit, quod dicerent has passiones non fuisse in Christo sicut in nobis, quia in nobis necessaria, in Christo autem voluntariæ extiterunt. In contrarium vero est, quia ipse Damasc. l. 3. de fid. c. 20. dicit has passiones fuisse in Christo voluntarias, imo & supernaturales eas vocat, quia non præveniebant

Nullum morbum neque ægritudinem assumpsisse Christus.

Objectio.

Responsio.

Objectio.

Responsio.

Christus absque ulla ægritudine talem mortem non per vim nec ex interfectione.



niebant voluntatem: quamvis etiam appellet illas naturales, quia sunt secundum naturam.

Supponendum vero est, sermonem esse de voluntario, prout ab actu voluntatis humanae denominatio hæc sumi potest, nam secundum voluntatem divinam constat, hos defectus fuisse voluntarios, tum in ipsa assumptione voluntaria corporis passibilis, tum etiam in se ipsis: quia dum Christus patiebatur, hoc ipsum divina voluntas volebat & efficiebat, loquimur enim de innoxiiis & poenali- bus defectibus, ut erant omnes Christi passiones. Respe- ctu vero voluntatis humanae, dupliciter potest aliquid dici voluntarium, scilicet, vel ut effectus, seu actus, cujus principium est voluntas, vel ut objectum tantum, quod voluntas ipsa amat, seu acceptat, quamvis illius princi- pium non sit. Denique voluntas humana Christi consi- derari potest, vel secundum naturales vires suas, vel ut instrumentum Verbi, habens vim ad efficienda opera, quæ naturam superant.

Hi defe-  
ctus quo-  
modo  
Christo  
necessarii  
fuerint.

Dico ergo primo. Supposita dispositione naturali, in qua corpus Christi passibile formatum est, & positis etiam aliis naturalibus causis, necessitate quadam naturali patiebatur Christus hos defectus, ut famem, sitim, &c. nec poterat eos per vires naturales humanae voluntatis impe- dire: & hoc modo dicitur Christus assumpsisse neces- sitatem subjacendi his defectibus, & eodem sensu dicun- tur necessarii. Hic est sensus D. Th. hic art. 4. & præced. q. art. 3. in quo consentiunt Theologi in 3. dist. 15. & 16. Marfil. q. 11. Alexand. Alenf. 3. p. q. 17. memb. 1. & hoc sensu videtur Damasc. contrariam sententiam ut hære- ticam damnare: videntur enim illi hæretici dixisse, tale fuisse corpus Christi, taliterque dispositum, ut etiam ab igne sibi applicato non necessario calefieret, etiam seclu- so miraculo, & ideo dicebant non paruisse naturæ legi- bus. Quæ sententia eo hæretica est, quod in re negat, cor- pus Christi vere fuisse passibile, unde ex contrario princi- pio fidei sufficienter probatur conclusio. Quæ confirma- tur, nam corpus Christi vere & naturaliter indiguit cibo & potu. quando ergo hæc deerant, famem & sitim natu- rali necessitate sentiebat. Quare, quod quadraginta die- bus fuerit sine cibo, in miraculis ejus a Patribus numerat- ur. Unde etiam confirmatur: nam augmentum, & de- crementum, & diversarum ætatum successio ex naturali necessitate inventa est in corpore Christi: ergo alteratio ex calore naturali, vel ex alimento, & aliæ similes natu- rali necessitate fuerunt in ipso: ergo & naturales defe- ctus, qui hinc sequuntur, ut fames, sitis, defatigatio, & denique mors naturaliter esset secuta, nisi per violentiam anticipata fuisset, ut Aug. docuit lib. 2. de peccato- rum merit. & remis. c. 29. & D. Th. in 3. d. 16. q. 1. art. 2.

Quomodo  
fuerint  
volunta-  
rii.

Dico secundo. Nihilominus hi defectus fuerunt Chri- sto homini voluntarii: primo per modum objecti volun- tarie acceptati & amati, vel in ipsamet assumptione cor- poris passibilis, juxta illud: *Corpus autem adaptasti mihi, tunc dixit, ecce unio, in capite libri scriptum est de me, ut facerem voluntatem tuam, Deus meus volui;* vel in singulis occasionibus, cum se offerebat opportunitas, vel necessitas sustinendi hujusmodi defectus. Secundo, per modum effectus, aliquo modo procedentis ab ipsamet voluntate Christi, vel quia occasiones, & causas hujusmo- di defectuum voluntarie assumebat, ut cum jejunabat, & usque ad defatigationem ambulabat: vel quia saltem ut instrumentum Verbi poterat has passiones impedire, & noluit: & hic est sensus Damasceni secundum locum supra citato, & Sophronii in Epistola Synodali, quæ refertur VI. Synod. Act. 11. D. Thomæ hic, & aliorum. Quæ do-ctrina, & per se satis probata est, & confirmari potest, quia Christus assumpsit hos defectus, ut per eos pro no- bis satisfaceret: oportuit ergo, ut essent voluntarii, alias non fuissent ad satisfaciendum idonei.

Et ex his sequitur primo, hujusmodi defectus seu pas- siones non fuisse Christo simpliciter coactas, quia, licet essent contra appetitum naturæ, & interdum contra natu- ralem aliquam displicentiam voluntatis, ut natura est: fuerunt tamen consentanei deliberatæ, atque absolutæ, & efficaci voluntati, a qua habet actio, ut sit voluntaria simpliciter, quamvis sit involuntaria aut violenta secun- dum quid, ut constat ex 3. Ethic. c. 1. & 1. 2. q. 6. art. 6. de qua re plura dicemus interius, questione 18. Secundo ex his intelligi & conciliari possunt varia Theologorum dicta: affirmant enim aliqui, Christum Dominum non

fuisse ita subjectum necessitati harum affectionum, quin fuerit in ejus voluntate positum illas non sentire, etiam si contraria agentia essent sufficienter applicata, quomodo loquitur Abulensis supra. Alii vero omnes contrario mo- do loquuntur. Sed primum est verum, considerata Chri- sti voluntate, ut Verbi instrumentum est. Secundum vero, consideratis solum naturalibus viribus humanae volun- tatis. Deinde dicunt aliqui, passiones has fuisse Christo voluntarias, solum voluntate concomitanti, ut Bonav. Almain. & alii loquuntur, quod quidem est verum in ali- quibus passionibus, & considerata voluntate Christi, so- lum juxta vires naturales: nihilominus tamen, conside- rata illa voluntate ut instrumento Verbi, omnes defe- ctus possunt dici voluntarii, etiam antecederet, & mul- ti eorum fuerunt eodem modo voluntarii, etiam respec- tu voluntatis per vires suas naturales operantis, ut ex- plicatum est.

#### S E C T I O IV.

*Utrum assumpsit Christus sui corporis localem  
circumscriptionem & mutationem.*

Hæc quæstio in superioribus est virtute definita, & ideo fortasse a D. Th. & aliis antiquis Scholasticis prætermissa est, quia eo tēpore non erat in dubium revo- cata: nunc vero propter novos nostri temporis hæreticos necessario disputanda est, breviter tamen juxta scholasti- cum institutum. Dicunt ergo isti hæretici, non assumpsisse Christum Dominum corporis sui circumscriptionem, seu definitionem ad unum locum, sed ex vi unionis illi communicatum esse, ut sit ubique, sicut ipsa divinitas, quamvis non in omnibus locis visibili modo apparuerit. Unde fit, consequenter eos esse dicturos, illud corpus nunquam fuisse vere, & in re ipsa localiter motum: quam- quam enim in hoc loco interdum se ostenderit, & in alio occultaverit, nunquam tamen, vel priorem locum reli- quit, vel novum occupavit. Hujus erroris primus author censetur fuisse Jacobus Faber Stapulensis super 1. ad Cor. 12. ubi dicit, corpus Christi replere cælum & terram, & idem habet in cap. 14. Joan. Et ab hoc creditur hausisse hunc errorem Lutherus, quem sequutus est Brentius, Kemnitius, & alii hujusmodi, ut refert Prateolus sub eorum nominibus, Lindanus Dialog. 2. Sanderus lib. 7. de visib. Monarch. hæres. 295. & 655. & Claud. de Sainct. in lib. de Eucharist. repetitione 4. & ex nostris optime, & nuperrime Robertus Bellarminus lib. 3. de Incarnat. c. 1. Fundamentum horum hæreticorum fuit, quia ex unione hypostatica consequi necessario putant, ut proprietates unius naturæ alteri communicatæ sint, non solum in concreto respectu personæ per communicationem idio- matum, sed etiam in abstracto per realem communica- tionem proprietatum & naturarum inter se. Sed obser- vandum est, hæreticos non eodem modo, neque constan- ter hunc errorem asseruisse: principio enim dixisse vi- dentur, Christi humanitatem ab ipsa Incarnatione, & ex vi unionis habuisse hanc, quam ubiquitatem vocant: postea vero, quia videbatur hoc Scripturis repugnare, dixerunt, hanc ubiquitatem dupliciter haberi posse, pri- mo quasi in radice, vel in actu primo, & hoc modo habuisse illā ab initio Incarnationis: quod nihil aliud esse vide- tur, quam fuisse illi debitam hanc perfectionem ratione unionis, quamquam postea statum statum personis passibilis re ipsa non statim communicata fuerit. Secundo ergo modo haberi potest hæc proprietas actu, & in se ipsa, quod vo- cant ipsi, illam habere in actu secundo, non enim possunt hi termini in proposito habere alium sensum: quia in at- tributis, quæ non consistunt in operatione, neque in prin- cipio illius, sed in aliqua formali perfectione, ut est hoc, de quo agimus, scilicet, immensitas, vel ubiquitas, actus secundus nihil aliud esse potest, quam ipsum esse actua- le, & formale talis perfectionis: hoc ergo modo dixerunt postea, ubiquitatem non esse communicatam humani- tati Christi usque ad Resurrectionem, vel, ut alii tan- dem dixerunt, usque ad Ascensionem.

Dico tamen primo, Christi humanitatem non esse nunc, neque unquam fuisse ubique, atque adeo corpus ejus loco circumscribi, sicut alia. Quæ veritas, simpliciter loquendo, de fide est, & probatur primo, nam de tempore, quo fuit viator, dicitur Joan. 6. *Cum vidisset turba, quod*  
Jesús



*Iesus non esset ibi, & c. 11. Ut sciatis, quia non erat ibi.* De tempore vero post mortem, & Resurrectionem dicitur Joa. 16. *Relinquo mundum & vado ad Patrem.* Marc. 16. *Surrexit non est hic,* & Act. 1. *Assumptus est in caelum;* & infra. *Sic veniet, quemadmodum vidistis eum euntem in caelum.* Quod testimonium etiam de tempore post Ascensionem procedit, & Act. 2. dicitur, animam Christi aliquando fuisse in inferno, non tamen semper ibi mansisse; non ergo erat ubique: & eodem modo dicitur in Evangeliiis, corpus depositum esse de Cruce, & positum in sepulchro: & satis significatur, tunc alibi non fuisse. Respondent hæretici, in his locis sermonem esse de existentia visibili corporis Christi in loco, & ideo negari fuisse alicubi, quia ibi non erat localiter, seu visibiliter: & eodem modo exponunt, ascendisse, vel descendisse, & c. Sed hæc fuga primo est contra vim & proprietatem verborum: secundo contra communem expositionem, & traditionem Patrum: tertio contra veritatem mysterii Incarnationis Christi, sequitur enim, non vere, sed secundum apparentiam quandam fuisse factam, ut, v.g. sequitur, non vere fuisse inclusum Christi corpus in utero Virginis, neque vere ex illo per humanam nativitatem exivisse, neque vere fuisse ingressum ad discipulos, januis clausis: & alia similia, quæ sine vera loci mutatione, & reali existentia in uno, & non in alio, proprie ac vere intelligi non possunt. Quarto est in rigore contra veritatem illarum locutionum, non enim vere dici potest, Christum non esse hic, signata hostia consecrata, solum quia ibi non est visibiliter, seu localiter. Sed retorquent hoc argumentum hæretici, nam Joa. 16. dicit Christus, se relinquere mundum, & ire ad Patrem, quamvis revera manserit in Eucharistia; ergo dicitur relinquere, solum quia visibiliter in mundo non mansit. Respondetur, illa verba proprie, & vere, & cum toto rigore intelligi, nam Christus, ascendendo in caelum, vere reliquit mundum, illi auferens suam realem præsentiam, non solum secundum visibilem apparentiam, sed secundum realem existentiam in mundo: reliquit autem Christus mundum, seu existentiam in mundo, quod erat ex vi illius motus, & ascensionis: quod vero aliunde, scilicet, per illud mysterium, & alio modo in mundo manserit, est accidentiarum ad illorum verborum veritatem, & fortasse, quando Christus ascendit, pro illo tempore in nullo inferiori loco mansit, quia nulla tunc erat hostia consecrata: quamquam etiam hoc sit per accidens. Adde, illa verba satis proprie intelligi de morte, per quam Christus proprie ita reliquit mundum, ut in eo non manserit secundum humanitatem.

Secundo argumentor traditione Conciliorum, & Patrum; in VI. enim Synod. act. 1. r. expresse dicitur, assumptis Christum corporis circumscriptionem, & in VII. Synod. act. 6. tom. 6. ubi damnatur nonus canon Concilii abulani Constantinopolitani, & ex professo variis testimoniis Scripturæ probatur, Christum ante & post Resurrectionem fuisse loco secundum humanitatem circumscriptum, & inferius act. 7. post fidei definitionem anathemate feriuntur, qui hoc negant: & in Concil. Lateran. sub Martin. 1. can. 4. *Si quis non confitetur Christum circumscriptum corpore, & incircumscriptum Deitate, condemnatus sit.* Præterea ex Græcis Patribus Athanas. contra Arium disputatione coram Probo, tom. 4. ex hac proprietate, corporis Christi veritatem confirmat; Cyril. Alex. lib. 9. in Joa. c. 21. dicit, Christum corpore nobis abesse, & Divinitate esse præsentem. Idem repetit lib. 11. c. 21. & similia habet Cyril. Jerol. catech. 14. & Theodor. dialog. 2. qui refert in eandem sententiam Gregor. Nyssen. orat. contra Eunom. & Damasc. 3. lib. de fide, c. 7. *Carne, inquit, minuitur, & contrahitur, nam secundum divinitatem, omnem refugit circumscriptionem: neque enim corpus una cum divinitate, qua incircumscripta est, porrigit, & extendit.* Idem Damasc. orat. de Transfig. Corpus, inquit, illud sane circumscriptum, & definitum erat: neque enim, cum in Thabor staret, extra montem pertinebat, at Deitas captivum omnem excedebat, atque ultra omnia erat. Ex Latinis Aug. serm. 58. de Verbis Domini, circa illud Joa. 14. *Vado ad eum, qui misit me.* Ibat, inquit, per id, quod in uno loco erat, manebat per id, quod ubique erat; & tractat. 50. in Joa. dicit, Christum nunc nobis esse absentem, & præsentem, quia suum, inquit, corpus intulit in caelum, maiestatem non abstulit mundo: Idem epist. 57. ad Dardanum, & Ambros. lib. 2. de

Suarez Tom. XVI.

fide c. 4. in princ. Hieron. 3. tom. epist. 148. ad Marcellam, quæ incipit: *Magnis nos provocas questionibus,* & Greg. hom. 28. in Evangelia, tractans illud Joa. 4. *Erat quidam Regulus, & c. Corporalem, inquit, præsentiam Domini querebat, qui per spiritum nusquam deerat: minus itaque in illum credidit, quem non putavit posse salutem dare, nisi præsens esset & corpore.* Idem docet Fulgen. lib. 2. ad Trasimundum c. 17. & Vigilius lib. 1. & 4. contra Eutychetem, & alii Patres frequenter, tractantes de Ascensione Christi Domini, & descensu ad inferos, & aliis simili-bus mysteriis.

Ultimo arguitur ratione, quia, vel hæc proprietas communicata esset humanitati necessario ex vi unionis, vel voluntarie: neutrum dici potest. Primum probatur primo, quia unio hypostatica non requirit, ut proprietates unius naturæ communicentur alteri, nam hoc esset confundere naturas, & in errorem Eutychetis incidere, ut patet ex dictis quæst. 2. disp. 7. & in quæst. præcedenti; disp. 31. in principio. Et probatur aperte, quia aliàs ex vi unionis, humanitas etiam esset æterna, sicut dicitur esse immensa, & necessario existeret in omnibus temporibus, præteritis, & futuris, sicut dicitur esse in omnibus locis: similiter esset omnipotens, & alia, quæ plane sunt impossibilia. Secundo, quia aliàs fatendum esset hæreticis, humanitatem a principio conceptionis esse ubique, non tantum aptitudine, sed actu, quod multi eorum non audent concedere, quia repugnat veritati mysteriorum ad humanitatem pertinentium: quomodo enim vere mortuus esset, & descendisset ad infernum secundum animam, & non secundum corpus, jacuisset vero in sepulchro secundum corpus, & non secundum animam, nisi secundum eas partes circumscriberetur, aut definiretur loco, ita ut partes illæ inter se loco distarent? Tertio declaratur exemplo naturali, nam, licet materia capitis, v.g. sit substantialiter conjuncta toti animæ, non inde necessario sequitur, illam esse, ubicumque est anima. Secundum de voluntaria communicatione facile excluditur, primo, quia communicatio hujus ubiuitatis, prout ab ipsis hæreticis intelligi videtur, & contradictionem involvit, & ipsi mysterio Incarnationis repugnat; volunt enim, ipsammet immensitatem divinitatis formaliter communicari humanitati, & per se ipsam ita illam perficere, ut faciat illam ubique existere; quod plane intelligi non potest sine naturarum confusione, talique unione, ut ex eis una natura resultet. Quod si intelligant, humanitatem constitui ubique per quandam participationem creatam immensitatis Dei, ita tamen, ut æque sit ubique, ac ipse Deus, adhuc mihi videtur omnino impossibile, quod affirmant; nam Deus ita est ubique, ut substantia ejus sit quasi infinite diffusa, quod a nobis explicatur, vel in ordine ad spatia imaginaria, vel ad corpora, quæ in majori & majori quantitate in infinitum creari possunt, in quibus omnibus Deus esse potest sine ulla sui mutatione: hinc enim aperte constat, ipsam divinam substantiam ita in se esse, ut ita dicam dispositam, seu immensam, ut sit actu veluti infinite diffusa: hic autem modus immensitatis, & existendi ubique, cum in suo ordine sit actu infinitus, non minus repugnat corpori, quam infinita quantitas vel extensio.

Quod si tandem intelligant, humanitatem Christi ex speciali, & voluntario dono Dei esse ubique, id est in omnibus rebus creatis, quæ intra finitum spatium terminantur, non intelligo hoc esse impossibile, aut implicare contradictionem, ut aperte ostendit Eucharistiæ mysteriū: sicut enim nunc Christi humanitas realiter est præsens multis locis, ita potuisset toti universo fieri præsens; nullā enim majorem repugnantiam involvit, imo ex illius mysterii vi posset in universo orbe existere, si in omnibus partibus universi esset materia, ex qua illud mysterium constituitur, & a debito ministro convenienti intentione forma applicaretur. Dicere autem, de facto ita esse, non solum est temerarium, quia est contra Patrum autoritatem, & Theologorum omnium, & sine fundamento: sed etiam hæreticum, quia est contra Scripturam, & contra alia mysteria fidei, ut explicatum est, & specialiter contra mysterium Eucharistiæ, prout ab universa Ecclesia intelligitur, quia, posita illa ubiuitate, non magis esset præsens corpus Christi in speciebus panis, quam in aliis rebus: neque quoad realem præsentiam magis sumeretur a nobis in Eucharistia, quam in communi cibo: unde ad illam efficiendam nulla esset necessaria con-

F f 4

versio

Ubiuitas ut ab hæreticis ponitur, repugnat rei creatæ.

Ubiuitatem, prout dicitur esse in omnibus creaturis, humanitati Christi attribuitur hæretice.



versio seu transubstantiatio, quæ omnia sunt contra fidem. Unde concludo, Christi corpus tantum esse in cælo, & in Eucharistia; secluseque eodem Eucharistia mysterio, non solum non esse corpus Christi ubique, sed neque etiam esse alibi, quam in cælo: & contrarium asserere esset magna temeritas, sine fundamento, & contra omnes Theologos in 3. d. 22. D. Th. infra q. 52. art. 3. & 4. contra Gent. c. 49.

**Objeçtio.** Sed contra primo. Verbum est ubique: ergo & Christus est ubique per communicationem idiomatum, ut Patres communiter loquuntur, August. ser. 14. de Verb. Apostoli, & Chryl. hom. 17. in ad Hebræ. Ambr. lib. 7. in Luc. Hierony. contra Vigilant. & alii communiter: ergo & ipsa humanitas est ubique: probatur hæc consequentia ultima, quia Christus ubique est homo. Respondetur ex S. Thoma dist. 22. q. 1. art. 2. & aliis Theologis ibi, ut Christus dicatur esse ubique per idiomatum communicationem, satis esse, ut ipsa persona sit ubique; sicut, ut dicatur æternus, satis est, ut ipsa persona æterna sit. De illa autem propositione, *Christus ubique est homo*, si illud, *ubique*, cadat supra prædicatum, *homo*, D. Th. dicit, in rigore esse falsam, quia prædicata formaliter tenentur: & ideo illud, *ubique*, cadit supra humanitatem ipsam, & significat, illam esse ubique, seu ubique copulari tali supposito. Sicut hæc etiam est falsa propositio: *Christus ab æterno est homo*, propter eandem rationem: & hæc similiter *Anima, ubicumque est, informat manum*: & si unus homo esset in pluribus locis, & in eis haberet proprietates diversas, v.g. in uno albedinem, & in alio nigredinem, falsum esset dicere illum ubique esse album: & nunc falsum est dicere, corpus Christi, ubicumque est, esse extensum in ordine ad locum. Quæ omnia vera sunt, intellecta propositione in illo sensu, qui videtur maxime formalis, & rigorosus: si tamen adverbium præcise jungatur cum subiecto, admitti potest illa locutio: sensus enim erit, hoc suppositum, quod est ubique, esse hominem, & de illo ubique existente vere dici posse esse hominem.

**Hæc propositio. Christus ubique est homo, quomodo intelligenda.**

**Objeçtio.** Sed contra secundo, quia Matth. ult. dicit Dominus: *Data est mihi omnis potestas in cælo, & in terra*; ergo saltem ex tunc accepit hanc ubiquitatem, seu præsentiam in cælo, & in terra. Respondetur. Jam supra diximus, illam potestatem humanitati Christi communicatam, non esse ipsammet omnipotentiam Dei, sed quandam potestatem excellentiæ in omnes creaturas, quæ non requirit realem præsentiam in omnibus creaturis: existens enim in cælo potest omnibus imperare, easque immutare, ut supra declaratum est.

**Objeçtio.** Sed contra tertio, nam ad Ephes. 4. dicitur Christus ascendisse in cælum, ut adimpleret omnia; ergo saltem ex tunc cœpit esse in omnibus rebus. Respondetur, satis ineptum esse, exponere hunc locum de corporali præsentia, ita ut Christus dicatur omnia implevisse, quia omnibus rebus cœpit esse localiter præsens. Ut quid enim Christus ascendisset in cælum, ut inde veluti localiter se diffunderet, omniaque replet? vel si jam hoc modo replet omnia, non vere postea descendet ad iudicium, ut dicitur Act. 1. Ascendit ergo Christus, ut adimpleret omnia, id est, ut suam peregrinationem concluderet, ac terminaret, ut ait S. Thom. Vel, ut adimpleret omnia, quæ de illo prædicta erant, ut Chryl. & Hieronym. exponunt, juxta communem phrasim Scripturæ, ut Luc. 24. *Neceesse est implere omnia, quæ scripta sunt de me*. Vel tertio, ut rerum omnium testimonio se dominum universorum ostenderet, ut exponit Bernard. serm. 2. de Ascensione. Vel quarto, ut inde impleter Ecclesiam donis gratiæ, & Spiritus sancti, ut dicit Ambr. epist. 16. Vel denique, si velimus hoc ad localem præsentiam referre, exponi potest, ut impleter omnia non simul, sed successive, neque existendo, in omnibus individuis locis, sed in omnibus partibus mundi, nunc in terra, postea in aere, ac tandem in cælo, ut videtur Oecumenius exponere.

**Dub. quo modo Christus movetur fuerit localiter, nulla facta in Verbo mutatione.** Dico secundo, Christum secundum corpus vere fuisse localiter motum. Hæc conclusio habetur in terminis in VI. Synod. Act. 11. & sequitur evidenter ex præcedenti, & eisdem testimoniis, & rationibus probanda est: solum eam distinguo, ut exponam difficultatem hic occurrentem, scilicet, quo modo poterit Christus secundum humanitatem substantialiter unitam Verbo mutare locum, nulla facta in Verbo mutatione. Dicitur fortasse, hoc ideo fieri potuisse, quia Verbum est ubique, non autem

humanitas: Sed in hoc est difficultas, quia, cum humanitas sit substantialiter unita Verbo existenti in hoc loco, non videtur fieri posse, ut hæc humanitas transferatur ab uno loco in alium, nisi vel simul secum quasi deferat Verbum sibi unitum, & consequenter Verbum ipsum per accidens moveatur, vel ipsa unio ad Verbum quasi continue dissolvatur ab ipso Verbo, prout est in illo loco: & iterum fiat in eodem Verbo, prout est in alio. Exemplo res explicatur, nam licet tota anima sit in singulis partibus corporis, si tamen intelligamus, partem unam moveri ad locum alterius per penetrationem, nihilominus intelligimus, animam per accidens moveri simul cum parte mota, propter unionem substantialem indissolutam, quamvis in alia parte tota anima existeret. Aliud exemplum est, nam si hostia consecrata circulari motu intra suam sphaeram movetur, corpus Christi per accidens movetur, propter unionem cum speciebus, quamvis totus sit præsens in toto illo loco, & totus in qualibet parte. Respondetur, sicut Verbum divinum ubique est, unum & indivisibile, ita unionem humanitatis ad ipsum, ubicumque existat, eandem omnino esse: unde, sicut corpus, vel humanitas mutat locum, ita secum deferit illam unionem ad Verbum, & ita, immanente prorsus eadem unione, intelligitur fieri mutatio in humanitate, nulla facta mutatione in Verbo. Et exempla adducta potius valent ad hoc confirmandum, quam ad impugnandum, quia anima non potest moveri ad locum, in quo antea erat, cum non intelligatur in eodem loco bis esse, etiam si fortasse in eodem loco informet duas materias, se penetrantes secundum locum. Et eodem modo corpus Christi Domini, in casu posito non movetur per accidens, quia semper retinet eandem præsentiam secundum se totum, & secundum omnes partes suas ad species, & ad omnes partes earum, & eandem relationem distantiae & propinquitatis ad cætera corpora.

Dices; ergo per communicationem idiomatum concedi posset, Verbum aut Deum esse mutatum, quando Christus mutatus est. Aliqui respondet, hoc posse, & debere concedi in determinatis seu specificis mutationibus: sic enim dicimus, Deum ambulasse, passum esse, ascendisse, &c. quia istæ locutiones nihil involvunt, aut requirunt ad suam veritatem, quod repugnet Verbo secundum se: quia satis est, ut illa prædicata convenienter personæ ratione alicujus naturæ, & ex ipsis terminis satis indicatur, illa non dici de Verbo secundum se, sed ratione naturæ assumptæ: at vero sub generali nomine mutationis negant illam locutionem: quia non est usitata a Patribus, & Conciliis. Mihi tamen videtur, esse ambiguum & distinguendam, ne videatur significare, Deum in se ipso mutatum esse ratione hujus mysterii, nam in hoc sensu falsa est, & negatur a Patribus; si tamen sit sermo de sola communicatione idiomatum, propter mutationem factam in humanitate jam unita Verbo, vera est propositio, ut argumentum probat, neque habet majus inconveniens, quam quod Deus sit mortuus, vel genitus ex virgine.

## QUÆSTIO XV.

De defectibus animæ, a Christo assumptis, in decem articulos divisa.

**D**Einde considerandum est de defectibus pertinentibus ad animam. Et circa hoc quaruntur decem.

*Primo, utrum in Christo fuerit peccatum.*

*Secundo, utrum in eo fuerit fomes peccati.*

*Tertio, utrum in eo fuerit ignorantia.*

*Quarto, utrum anima ejus fuerit passibilis.*

*Quinto, utrum in eo fuerit dolor sensibilis.*

*Sexto, utrum in eo fuerit tristitia.*

*Septimo, utrum in eo fuerit timor.*

*Octavo, utrum in eo fuerit admiratio.*

*Nono, utrum in eo fuerit ira.*

*Decimo, utrum simul fuerit viator & comprehensor.*

## ARTICULUS I.

*Utrum in Christo fuerit peccatum.*

**A**d primum sic proceditur. Videtur, quod in Christo fuerit peccatum. Dicitur enim in Psalm. 21. *Deus meus*

90.  
Iosr. a. 32.  
21. 7. & 3.



ad 3. q. 1.  
cir. 60. &  
d. 11. q. 1.  
c. & quod  
4. q. 11. a. 1

meus respice in me, quare me dereliquisti, longe a salute mea verba delictorum meorum. Sed hæc verba dicuntur ex persona ipsius Christi, ut patet ex hoc, quod ipse ea in cruce protulit. Ergo videtur, quod in Christo fuerint delicta.

2. Præterea. Roman. 5. dicit Apostolus, quod in Adam omnes peccaverunt: quia, scilicet, in eo originaliter fuerunt. Sed Christus etiam originaliter fuit in Adam. Ergo in eo peccavit.

3. Præterea. Apostolus dicit Hebr. 2. quod in eo, in quo Christus passus est & tentatus, potens est & his, qui tentantur, auxiliari. Sed maxime indigebamus auxilio ejus contra peccatum. Ergo videtur, quod in eo fuerit peccatum.

4. Præterea. Secunda ad Corinth. 15. dicitur, quod Deus cum, qui non noverat peccatum, scilicet, Christum, pro nobis peccatum fecit. Sed illud vere est, quod a Deo factum est. Ergo in Christo vere fuit peccatum.

cap. 11. in sp.  
40m. 3.

5. Præterea. Sicut August. dicit in lib. de Agone Christiano, in homine Christo se nobis ad exemplum vite præbuit Filius Dei: sed homo indiget exemplo, non solum ad recte vivendum, sed etiam ad hoc, quod pœniteat de peccatis. Ergo videtur, quod in Christo debuerit esse peccatum, ut, de peccatis pœnitendo, pœnitentia nobis daret exemplum.

Sed contra est, quod ipse dicit Joan. 8. Quis ex vobis arguet me de peccato?

Art. 1. & 2  
huius q.

Respondeo dicendum, quod, sicut supra dictum est\*, Christus suscepit defectus nostros, ut pro nobis satisfaceret, & ut veritatem humane nature comprobaret, & ut nobis fieret exemplum virtutis. Secundum quæ tria manifestum est, quod defectum peccati assumere non debuit. Primo quidem, quia peccatum nihil operatur ad satisfactionem, quinimo virtutem satisfactionis impedit: quia, ut dicitur Eccles. 34. dona iniquorum non probat Altissimus. Similiter etiam ex peccato non demonstratur veritas humane nature: quia peccatum non pertinet ad humanam naturam, cuius Deus est causa: sed magis est contra naturam, per seminationem diaboli introductum, ut Damasc. dicit. Tertio, quia peccando exemplum virtutis probare non potuit, cum peccatum contrarietur virtuti. Et ideo Christus nullo modo assumpsit defectum peccati, nec originalis, nec actualis, secundum illud, quod dicitur 1. Petr. 2. Qui peccatum non fecit, nec inventus est dolus in ore ejus.

lib. 3. c. 30  
& lib. 3.  
cap. 20.

lib. 3. orth.  
fid. c. 25.

b. Ad primum ergo dicendum, quod, sicut Damasc. dicit in 3. lib. dupliciter dicitur aliquid de Christo. Uno modo secundum proprietatem naturalem & hypostaticam: sicut dicitur quod Deus factus est homo, & quod passus est pro nobis. Alio modo secundum proprietatem personalem & habitudinem, prout, scilicet, aliqua dicuntur de ipso in persona nostra, quæ sibi secundum se nullo modo conveniunt. Unde & inter septem regulas Ticonii, quas August. ponit in 3. de Doct. Christiana prima ponitur de Domino & ejus corpore: cum, scilicet, Christi & Ecclesie una persona æstimatur. Et secundum hoc Christus ex persona membrorum suorum loquens, dicit, Verba delictorum meorum, non quod in ipso capite delicta fuerint.

lib. 3. c. 21.  
et om. 3.

lib. 10. e. 19  
& 20. 10. 3.

Ad secundum dicendum, quod, sicut dicit August. 10. super Genes. ad litteram, non eodem omni modo Christus fuit in Adam & aliis Patribus, quo nos ibi fuimus. Nos enim fuimus in Adam secundum seminalem rationem, & secundum corpulentam substantiam: quia, scilicet, (ut ipse ibidem dicit) cum sit in semine & visibilis corpulentia, & invisibilis ratio, utrumque currit ex Adam. Sed Christus visibilem carnis substantiam de carne Virginis sumpsit, ratio vero conceptionis ejus non a semine virili, sed longe aliter, ac de super venit. Unde non fuit in Adam secundum seminalem rationem, sed solum secundum corpulentam substantiam. Et ideo Christus non accepit active ab Adam humanam naturam, sed solum materialiter: active vero a Spiritu sancto. Sicut & ipse Adam materialiter sumpsit corpus ex limo terre, active autem a Deo. Et propter hoc Christus non peccavit in Adam, in quo fuit solum secundum materiam.

Ad tertium dicendum, quod Christus ex sua tentatione, & passione nobis auxiliatus est, pro nobis satisfaciendo: sed peccatum non cooperatur ad satisfactionem, sed magis ipsam impedit, ut dictum est\*. Et ideo non oportuit, quod peccatum in se haberet, sed quod omnino esset purus a peccato: alioquin pœna, quam sustinuit, fuisset sibi debita pro proprio peccato.

Ad quartum dicendum, quod Deus fecit Christum pec-

la corp.  
art. 16. ad  
2.

catum: non quidem, ut in se peccatum haberet, sed quia fecit enim hostiam pro peccato. Sicut & Osee 4. dicitur: Peccata populi mei comedent, scilicet, Sacerdotes, qui secundum legem comedebant hostias pro peccato oblatas. Et secundum hunc modum dicitur Isai. 53. quod Dominus posuit in eo iniquitatem omnium: quia, scilicet, eum tradidit, ut esset hostia pro peccatis omnium hominum, vel fecit eum peccatum, id est, habentem similitudinem carnis peccati: ut dicitur Roman. 8. & hoc propter corpus passibile & mortale, quod assumpsit.

Ad quintum dicendum, quod pœnitens laudabile exemplum dare potest, non ex eo quod peccavit: sed in hoc, quod voluntarie pœnam sustinet pro peccato. Unde Christus dedit maximum exemplum pœnitentibus, dum non pro peccato proprio, sed pro peccatis aliorum voluit pœnam subire.

#### COMENTARIUS.

Hæc quæstio simpliciter de peccato intelligenda est, ut tam originale, quam actuale mortale & veniale comprehendat. Tractatur autem a D. Th. de facto, non de possibili: quo sensu nullam difficultatem habet littera articuli. Respondet enim D. Th. in Christo nullum fuisse peccatum, quod optimis, & perspicuis rationibus confirmat.

Titulus  
articuli.

Respon.

b. In solutione ad primum tractat locum illum Ps. 21. *Longe a salute mea verba delictorum meorum.* In quo observandum est, juxta veritatem Hebraicam non legi *delictorum meorum*, sed *Verba rugitus mei*, seu *fremitus mei*. Juxta quam lectionem sensus est apertus, scilicet, cur Deus ita me dereliquisti, ut verba, quibus ad te clamo, longe sint ab impetranda salute mea. Sed quoniam lectio vulgata, quæ eadem est cum lectione Septuaginta, retinenda est; ideo communis expositio illius loci est, quam D. Th. hic attulit, illa scilicet verba dicta esse de Christo in persona suorum membrorum, ut sicut dixit Saulo Act. 9. *Cur me persequeris?* cum non illum in persona sua; sed in membris suis persequeretur: ita hic delicta suorum membrorum appellat sua, quia illa in se suscepit, ut pro illis pateretur. Ita August. epist. 120. de Gratia novi Testamenti cap. 6. & seq. quem alii expositores secuti sunt. Idem August. 3. de Doct. Christ. cap. 31. & Nazian. orat. 36. in princ. & Damasc. lib. 3. cap. 25. & lib. 4. c. 19. Nec multum ab hac expositione discrepat, quod ibi notat Theodoretus, sicut dicitur Christus pro nobis factus peccatum, quia factus est hostia pro alienis peccatis, ita eundem Christum vocare delicta sua, non propter culpas, quas in se habuerit, sed propter obligationem, quam suscepit satisfaciendi pro alienis culpis: quomodo Isai. 53 dicitur Deus posuisse in illo *iniquitates omnium nostrorum*. Alia expositio esse posset, ut Christus delicta sua vocet, non quæ revera habebat, sed quæ illi falso imponebantur, sicut exponit Rufinus verba illa Psal. 68. *Deus tu scis insipientiam meam*, id est, passionem meam, quæ ab hominibus insipientia reputata est, ut etiam August. & Hilar. exponunt. *Et delicta mea a te non sunt abscondita*, id est, delicta, quæ mihi homines imputant, tu scis, qualia sint, quia revera nulla sunt. Et ad eundem modum exponi possunt verba illa Psalm. 39. *Comprehenderunt me iniquitates mee*, si ad Christum referantur, nam de illo exponit hunc Psalmum Paul. ad Hebr. 10. Aliter vero Euthymius negative interpretandum putat, *Verba delictorum meorum*, id est, delicta mea longe sunt a salute mea, id est, longe sunt a me, seu longe absum, ut saluti meæ nocere possint, cum revera nulla sint. Quem sensum fere secutus est Jansenius, per interrogationem legens hunc locum, scilicet, nunquid verba delictorum meorum longe me faciunt a salute mea? quasi dicat, nullo modo: qui omnes sensus pii sunt, & probabiles; facilius tamen est adhærere communi lectioni, & expositioni. Aliorum argumentorum solutiones optimam doctrinam continent, non indigent tamen expositione.

#### ARTICULUS II.

Utrum in Christo fuerit fomes peccati.

Ad secundum sic proceditur. Videtur, quod in Christo fuerit fomes peccati. Ab eodem enim principio derivatur fomes peccati & passibilitas corporis sive mortalitas, scilicet, ex subtractione originalis justitiæ: per quam simul inferiores vires anime subdebantur rationi, & corpus animæ. Sed in Christo fuit passibilitas corporis, & mortalitas. Ergo etiam in illo fuit fomes peccati.

2. Præterea. Sicut Damasc. dicit in 3. lib. Beneplacito divina voluntatis permittebatur carni Christi pati &

91.  
Infr. q. 27.  
art. 3. c. &  
1 & 3. d. 17  
art. 1. q. 24  
& opus 3.  
c. 231.

lib. 3. orth.  
fid. c. 15. 2  
med. &  
cap. 14.



*operari, quæ propria. Sed proprium est carni, ut concupiscat delectabilia sibi. Cum igitur nihil aliud sit fomes, quam concupiscentia, ut dicitur in Glos. † Rom. 7. videtur, quod in Christo fuerit fomes peccati.*

3. Præterea. Ratione fomitis peccati, caro concupiscit adversus spiritum: ut dicitur Galat. 5. Sed tanto spiritus ostenditur fortior & magis dignus corona, quanto magis superat hostem, scilicet concupiscentiam carnis: secundum illud 2. ad Tim. 2. Non coronabitur, nisi qui legitime certaverit. Christus autem habuit fortissimum & victoriosissimum spiritum, & maxima dignum corona secundum illud Apoc. 6. Data est ei corona & exivit vincens, ut vinceret. Videtur ergo, quod in Christo maxime debuerit esse fomes peccati.

Sed contra est, quod dicitur Matth. 1. Quod in ea natum est, de Spiritu sancto est. Sed Spiritus sanctus excludit peccatum & inclinationem peccati, quæ importatur nomine fomitis. Ergo in Christo non fuit fomes peccati.

a. Respondeo dicendum, quod sicut supra dictum est, \* Christus perfectissime habuit gratiam & omnes virtutes. Virtus autem moralis, quæ est in rationali parte anime, eam facit esse rationi subiectam: & tanto magis, quanto perfectior fuerit virtus: sicut temperantia concupiscibilem, & fortitudo & mansuetudo irascibilem: ut in Secunda parte dictum est; ad rationem autem fomitis pertinet inclinatio sensualis appetitus in id, quod est contra rationem. Sic igitur patet, quod quanto virtus in aliquo fuerit magis perfecta, tanto magis in eo debilitatur vis fomitis. Cum igitur in Christo fuerit virtus secundum perfectissimum gradum, consequens est, quod in eo fomes peccati non fuerit, cum etiam iste defectus non sit ordinabilis ad satisfaciendum: sed potius inclinet ad contrarium satisfactioni.

Ad primum ergo dicendum, quod inferiores vires pergentes ad sensibilem appetitum, naturaliter sunt obedientes rationi; non autem vires corporales, vel humorum corporaliū, vel etiam ipsius anime vegetabilis, ut patet in primo Ethic. \* Et ideo perfectio virtutis, quæ est secundum rationem rectam, non excludit possibilitatem corporis: excludit autem fomitem peccati: cuius ratio consistit in resistantia sensualis appetitus ad rationem.

Ad secundum dicendum, quod caro naturaliter concupiscit, quod est sibi delectabile concupiscentia appetitus sensitivi: sed caro hominis (qui est animal rationale) hoc concupiscit secundum modum & ordinem rationis. Et hoc modo caro Christi concupiscentia appetitus sensitivi naturaliter appetebat escam, & potum, & somnum, & alia, quæ secundum rectam rationem appetuntur: ut patet per Damasc. \* id. 3. lib. Ex hoc autem non sequitur, quod in Christo fuit fomes peccati, qui importat concupiscentiam delectabilem, præter ordinem rationis.

Ad tertium dicendum, quod fortitudo spiritus aliqualis ostenditur, ex hoc quod resistit concupiscentie carnis sibi contrariantis, sed major fortitudo spiritus ostenditur, si per ejus virtutem totaliter caro comprimatur, ne contra spiritum concupiscere possit. Et ideo hoc competebat Christo, cuius spiritus summum fortitudinis gradum attigerat. Et licet non sustinuerit impugnationem interiorem ex parte fomitis, sustinuit tamen exteriorem impugnationem ex parte mundi & diaboli: quos superando victoria coronam promeruit.

#### COMMENTARIUS.

Quamvis peccatum proprie sit in voluntate, fomes autem in appetitu sensitivo, quia tamen fomes ad peccatum inclinat, & ideo D. Thom. hunc articulum præcedenti conjungit: & quia effectus fomitis aliquo modo in voluntatem redundat, quia, quatenus appetitu conjuncta est, per illius motus, & affectiones prævenitur, & interdum trahitur, ut rationem præveniat, & contra illam infurgat. Potest autem fomes peccati vel in actu secundo, vel in actu primo considerari, & in actu secundo, significat motum aliquem appetitus, qui rationem & voluntatem liberam antevertit, & ad peccatum inclinat: at vero in actu primo significat ipsum appetitum, seu naturalem inclinationem ejus, ita inordinatam, ut interdum possit prævenire voluntatem, & contra rationem infurgere.

Negat ergo D. Thom. in Christo fuisse fomitem, quod duplici ratione confirmat. Prior est, quia habuit omnes virtutes morales omni ex parte perfectas: sed per has virtutes subicitur appetitus inferior superiori, & irranatur

fomes, & quod hæc virtutes sunt perfectiores, eo est major hæc subiectio: ergo in Christo, in quo virtutes fuerunt perfectissimæ, ista subiectio integra & perfecta fuit. Quæ ratio in primis intelligenda videtur de virtutibus, non tantum per se infusis, sed etiam de iis, quæ suo genere acquisitæ sunt, quia hæc sunt maxime accommodatæ ad moderandos affectus, & subjiendum appetitum inferiori superiori.

Sed adhuc difficile est, quomodo hæc perfecta subiectio fieri possit per solos inhærentes habitus, ita ut per solos illos omnino auferatur fomes. Respondet Cajetanus hic animam Christi quoad perfectionem virtutis habuisse itatum, quem haberent animæ in statu innocentie, & ideo habitus virtutum perfectos potuisse omnino extinguere fomitem in Christi humanitate, quamquam in Jo: Baptista, vel in quolibet alio habente naturam vulneratam, non fuerint sufficientes ad præstandum hunc effectum. Sed hoc non sufficit ad explicandam rem; interrogo enim, quæ sit illa perfectio, in qua Christi anima, vel humanitas similis fuit homini existenti in statu innocentie. Nam vel est aliqua intrinseca perfectio ipsi animæ, vel potentiis ejus inhærens, & sic esse non potest, nisi qualitas, & consequenter, vel actus, vel habitus virtutum, qui ejusdem rationis, & perfectionis conferri possunt cuilibet homini lapsor: sed omnes illi revera non sufficiunt ad omnino extinguendum fomitem, & ita frangendum, ut nunquam rationem præveniat, quia appetitus sæpe excitatur ab objecto non applicato per rationem, sed aliunde, antequam ratio advertere possit, quæ excitatione facta, ipse naturaliter moveri potest, antequam ratio possit advertere: quæ naturalis operatio non potest per solos habitus corrigi, vel frangi. Unde etiam in statu innocentie, ad tollendum fomitem, præter habitus inhærentes, fuit necessaria (ut ego existimo) aliqua alia perfectio, seu specialis Dei providentia, qua ita custodiretur homo, ut non permitteretur appetitus ejus moveri, aut excitari, antequam ratio adverteret: ut in 1. part. latius tractavi. Vel ergo Cajetanus loquitur de hac perfectione status innocentie, & sic potius deberet concedere, hunc effectum non fieri per solos inhærentes habitus virtutum. Et ita ego existimo, virtutes perfectas fuisse ex natura rei necessarias, & convenientissimas ad hunc effectum, non tamen illas sufficere secundum habituales tantum perfectionem ad conjungendam actualem aliquam perfectionem, per quam anima sit ita semper actualiter disposita, ut prævenire possit motiones objectorum sensibilium: vel certe divinum auxilium, & prævenientem gratiam, qua hoc donum conferratur, ut latius statim in disputatione explicabo. Et propterea D. Thom. non contentus hac ratione, ut concluderet virtutes habuisse in Christo hunc perfectissimum statum, & omnia requisita ad extinguendum fomitem, addidit rationem secundam sumptam ex fine Incarnationis, ad quem fomes nihil posset conferre. Unde cum aliàs non sit consentaneus personæ Christi, recte concluditur in illo non fuisse.

Solutiones argumentorum claræ sunt.

#### DISPUTATIO XXXIII.

In duas Sectiones distributa.

##### De defectibus gratiæ, & virtuti contrariis, a Christo non assumptis.

Defectus animæ, de quibus in hac quaestione agit D. Thom. intelligi possunt, vel in ipsa animæ essentia, vel in potentiis ejus. Rursus pertinere possunt vel ad malum culpæ, vel ad malum poenæ, sub quo omnes imperfectiones, tam intellectus, quam sensus comprehendendo. In essentia autem animæ potest intelligi defectus pertinens ad malum culpæ, quatenus privatio gratiæ, quæ ad hoc genus mali revocatur, in essentia ipsius animæ esse intelligitur, proprie vero malum culpæ in voluntate consummatur. Et ideo in hac disputatione agendum est de hoc defectu, pertinente ad animam ratione ipsius voluntatis, postea vero de aliis defectibus dicemus: ad malum autem culpæ revocari potest omnis defectus animæ, qui vel ad peccatum inclinat, vel est quasi proprius, & intrinsecus peccati effectus: ut sunt peccati fomes & habitus vitiorum, qui peccando acquiruntur, de quibus omnibus in hac disputatione dicemus.

Glos. ord.  
super ill.  
lus Rom.  
7 ut obe-  
diatis.

q. 7. art. 2.  
& 9.

1. 2. q. 56.  
art. 4.

lib. 1. Eth.  
cap. ult.  
§ 10. 5.

1. 3. orth.  
ad. c. 14.

Titulus  
articuli.

Respon.



## SECTIO I.

*Utrum in Christo fuerit peccatum, vel secundum ordinariam potentiam esse potuerit.*

**N**on defuerunt hæretici, qui Christo Domino maculam, aut peccatum imponere ausi sunt; referunt enim Lindan. dialog. 2. Hofius lib. 1. de hæres. nostri temporis, Præteol. verbo Antichrist. & verbo Præmonstratensis, & alii, quosdam hæreticos hujus temporis asserere, Christum in Cruce in quosdam impatientiæ, ac desperationis motus incidisse, quos significasse dicunt illis verbis, *Deus Deus meus, ut quid dereliquisti me?* Calvinus etiam asseruisse fertur Christum in horto ita fuisse turbatum, & tentationibus agitatam, ut sine spiritu oraverit, dicens: *Pater, si possibile est, transeat a me calix iste*, & propterea quasi ad se rediens inordinatam petitionem statim correxerit, suamque voluntatem Patris voluntati subdiderit. Refertur etiam in Concil. Basileen. sess. 22. quendam Augustinum de Roma Episcopum Nazarenum dixisse (quamvis longe alio sensu) Christum quotidie peccare, quia membra ejus quotidie peccant, & ipse vocat delicta sua, peccata suorum membrorum.

Dico primo, in Christo Domino nullum unquam fuisse peccatum. Est de fide, & de originali probatur Luc. 1. *Quod ex te nascetur Sanctum, vocabitur Filius Dei.* Est enim ibi sermo de nativitate in utero: fuit ergo Christus ab ipsa conceptione sanctus. Ad quod confirmandum adduci possunt omnia, quibus supra probavimus Christum ab instanti suæ conceptionis gratia plenum extitisse. Et ratio est, non solum quia ab illo instanti ille homo fuit verus Deus, sed etiam, quia conceptus fuit de Spiritu sancto, neque ab Adamo per seminalem rationem descendit, ut recte D. Th. hic ad 2. ex August. lib. 10. Genes. ad litteram c. 19. & in Enchirid. c. 41. & lib. 5. cont. Julian. c. 9. De actuali, quod in Christo locum non habuerit, sunt expressa testimonia, Joan. 8. *Quis ex vobis arguet me de peccato?* & ad Heb. 4. *Non habemus Pontificem, qui non possit, compati infirmitatibus nostris, tentatum per omnia pro similitudine absque peccato;* & cap. 9. *Semetipsum obtulit immaculatum Deo,* &c. 1. Petr. 2. *Qui peccatum non fecit, nec inventus est dolus in ore ejus.* Ex quo loco colligit etiam August. supra, in Christo non fuisse originale peccatum. Denique 2. ad Cor. 5. *Eum, qui non noverat peccatum, pro nobis peccatum fecit,* id est, hostiam pro peccato, ut cum Ambrosio exponit hic D. Th. citans illud Osee 4. *Peccata populi mei comedent,* id est, oblationes pro peccatis; vel aliter, *Pro nobis peccatum fecit,* id est, induit illud Christus similitudine carnis peccati, ut de peccato damnaret peccatum, ut dicitur ad Roman. 8. exponente August. 14. contra Faust. cap. 4. & 5. Secundo definitur hoc in Conc. Ephes. can. 10. ubi tradit, Christum obtulisse sacrificium pro peccatis nostris, non pro suis, quia illa non habuit; idem Concil. Lateran. sub Martino 1. can. 5. & alia Concilia quæstione præcedenti citata, sicut affirmant Christum assumpsisse naturales, & irreprehensibiles defectus corporis, ita negat assumpsisse culpabiles animæ defectus. Unde August. epist. 99. dicit, animam Christi nec mortificatam peccato, nec damnatione punitam fuisse. Alia vero testimonia Sanctorum in sequenti sectione referam. Tertio sunt rationes evidentes ex dignitate personæ, ex plenitudine gratiæ, ex statu beatitudinis, quem in anima habuit a principio conceptionis. Tandem ex fine Incarnationis, qui est destructio peccati, unde ad Hebr. 7. dicitur: *Oportebat, ut nobis esset Pontifex sanctus, innocens, impollutus, segregatus a peccatoribus, & excelsior cælis factus.* Deinde fuit etiam finis Incarnationis, veram & supernaturalem doctrinam, ipsique peccato contrariam verbo, tum exemplo persuadere: & ita maxime oportuit, talis doctrinæ prædicatorem esse summa innocentia, & virtute præditum, & ideo ipsemet Christus, ut concluderet, *Si veritatem dico vobis, quare non credistis mihi?* præmisit: *Quis ex vobis arguet me de peccato?* Et Petrus cum dixisset, *vobis reitinquens exemplum, ut sequamini vestigia ejus,* addidit, *Qui peccatum non fecit.* Dices. Etiam debuisset dare exemplum poenitentiae peccatoribus. Respondet bene D. Thom. hic ad 4. Christum dedisse peccatoribus perfectissimum poenitentis exemplum, voluntarie poenam pro peccatoribus sustinendo, & pro illis satisfaciendo. Adde, etiam dolendo de alienis peccatis

propter sincerum, & perfectum Dei amorem, eaque detestando, ut pote Dei injurias, atque offensiones. Ita enim præbuit exemplum poenitentiae, secundum id, quod in ea perfectissimum est sine respectu ad proprium peccatum, quod pertinet ad imperfectionem.

Dico secundo, secundum legem ordinariam non potuisse in Christo esse peccatum. Est etiam certa sine controversia inter Catholicos, & sequitur ex præcedenti: tum, quia secundum legem ordinariam non potuit Christus non esse plenus gratia, & beatus secundum animam: tum etiam, quia constat fuisse legem Dei statutam, ut in Christo nullum permetteretur peccatum, quod donum ita connaturale illi est, & debitum ratione unionis, ut saltem secundum ordinariam potentiam illi negari non potuerit.

Ad hæreticos ergo respondetur, primum stultissimum esse impatientiam, vel desperationem colligere ex verbis illis, *Deus Deus meus, ut quid dereliquisti me?* quomodo enim esset impatiens, qui summa voluntate, & charitate patiebatur? aut quo modo desperaret, qui Deo fruebatur? certusque erat de sua gloria, & resurrectione, quæ sepe prædixerat, nulliusque peccati conscius erat: Duobus ergo modis verba illa a Patribus exponuntur, primo, ut Christus in persona suorum membrorum locutus sit: usurpavit enim Christus verba Psal. 21. qui incipit, *Deus Deus meus respice in me,* cujus verba supra circa textum D. Th. in hunc modum ex Patribus exponebamus, & hunc sensum habet Damasc. lib. 3. de Fid. cap. 34. & Leo Papa serm. 16. de passione circa finem, & toto serm. 14. August. dicta epist. 120. cap. 6. Secundo recte intelligi potest, Christum quoad hæc verba in sua propria persona esse locutum, ipsam autem derelinqui a Patre, ut Leo etiam exponit, nihil aliud est, quam non fuisse exauditum, cum in horto oraverat: vel derelinqui fuit privari omni consolatione in inferiori portione, ita ut sicut peccator derelinquitur quoad culpam, quando privatur auxilio ad resistendum culpæ, ita Dominus derelictus dicatur quoad poenam, quia destitutus fuit omni ope ad illam leniendam. Ita fere Orig. homil. 35. in Matth. & Cyril. Alexand. lib. 1. de Fid. ad reginas circa princip. qui recte advertit, verbum illud, *Ut quid,* non fuisse dubitantis, sed dolentis: sicut Exod. 32. *Quare irasceris Domine?* & Psal. 42. *Quare me repulisti?* Quo sensu facile constat, non fuisse verba illa dicta ex aliqua inordinata, vel indeliberata affectione, vel impatientia: sed summa potius sapientia, & virtute, qua Christus permisit naturæ inferiori, ut suum dolorem ostenderet, tum ad naturæ veritatem, tum etiam ad doloris acerbiteriam demonstrandam. Addit etiam Tertul. lib. contra Praxe. nu. 21. illa verba esse dicta ad ostendendam divinitatem ipsam immunem, ac liberam omni poena permanisse. Omitto, Hilarium, & Ambros. interdum indicare, in eo momento corpus Christi esse separatam a divinitate, atque ita derelictum: hoc enim intolerabilem continet errorem, quem infra suo loco confutabimus, & illos Patres pie exponemus.

Deinde non minus stulte, & impie errant hi hæretici, defectum aliquem, vel ordinationem ex oratione in horto facta colligentes: nam, ut infra q. 18. dicemus, eis verbis solum ostendit Christum naturalem affectum suum, quod per se malum non est. Nec vero verba ipsa aliquid inordinatum præ se ferunt, cum nihil aliud contineant, quam subjectionem, & conformitatem ad Patris voluntatem: hoc enim significat verbum illud, *Si possibile est,* scilicet secundum divinum beneplacitum, quod alius Evangelista dixit, *Pater si vis, transfer calicem hunc a me,* &c. Quapropter recte dixit Justinus Martyr. dialog. contra Triphonem in illa oratione impletam esse prophetiam David. Psal. 21. *Clamabo per diem, & non exaudies, & nocte, & non ad insipientiam mihi,* nam licet Christus ita tunc oraverit, ut exauditus non fuerit, quia non efficaciter volebat, quod orabat: nihilominus non ad insipientiam illi imputata est illa oratio, quæ ex summa potius sapientia, & perfecta ratione profecta est. Ad quod propositum optime explicat figuram de Jephthe, & filia virgine ab illo immolata Prosper lib. de Promissionibus, & predictionibus Dei part. 2. cap. 20.

Ad aliam denique locutionem illius Episcopi Nazareni, quamquam re ipsa contraria non sit veritati a nobis posita, tamen scandalosa est, & merito damnata in dicto Concil. Basileensi: cum enim membra Christi non peccant,



cent, ut membra ejus, neque juxta consilium ejus, sed potius ab illo recedendo, non potest Christus dici peccare, quia illa peccant. Et quamvis per quandam metaphoram dicantur peccata membrorum esse Christi, quoad obligationem satisfaciendi pro illis, non tamen quoad commissionem, seu perpetrationem eorum, & ideo nullo modo potest dici Christus in membris suis peccare, sed potius expellere, & abolere peccata.

## SECTIO II.

*Utrum de absoluta potentia Dei possit esse peccatum in Christo, seu in humana natura Verbo unita.*

**A**rius, cum erraverit asserendo, Verbum Dei esse creaturam, consequenter errare potuit, faciendo Christum capacem peccati, etiam ut est Verbum Patris, ut refert Nicephor. lib. 4. hist. cap. 5. Nos autem supponimus esse verum Deum, in quem peccatum non cadit, & ideo non dubitamus de voluntate divina Christi, sed de humana. Quam etiam supponimus secundum se esse capacem peccati, si Verbo non esset unita, vel certe si ab illo dimitteretur, & donis gratiæ, & beatitudinis privaretur. Est ergo quæstio de illa voluntate unita Verbo, an perseverante unione ex vi illius impeccabilis sit.

In qua est quorundam Theologorum sententia, non repugnare Deum peccare per assumptam naturam, cujus præcipuus auctor est Durand. in 3. d. 12. q. 2. Tribuitur etiam Scoto ibidem, & d. 2. q. 1. quatenus dicit, Christum ratione beatitudinis non potuisse peccare, non tamen ex vi solius unionis: unde cum aliis sentiat posse humanam naturam assumi sine beatitudine, consequenter videtur sentire, non implicare contradictionem, naturam assumptam manere peccabilem. Et idem sentit Gabr. d. 2. & 13. q. 1. Quamvis in modo loquendi differat, quia negat in eo casu esse concedendum, Deum peccare, quod quam constanter dictum sit, infra videbimus. Argumenta pro hac sententia solent multa congeri, sed unum est, in quo tota difficultas consistit, scilicet quod humanitas ex vi solius formalis unionis non redditur sapientior, nec potentior, ut supra ostensum est: posset autem illa humanitas assumi sine ullo dono superaddito præter unionem; ergo tunc ille homo esset non minus ignorans, quam cæteri, nec minus fragilis ad operandum ex ignorantia, vel ex inconsideratione, aut passione, per liberam voluntatem humanam; ergo posset peccare: nam tota radix seu potentia peccandi posita est in illis imperfectionibus.

Dico tamen primo. Impossibile est Christum Dominum, seu Deum per assumptam humanitatem, aut quamcumque aliam creaturam intellectualem Verbo hypostatice unitam aliquod actuale peccatum committere. Hanc conclusionem adeo veram existimo, ut contraria neque sine temeritate, neque sine quadam impietatis specie defendi posse videatur. Primum enim alii omnes Theologi, tamquam fere certam, illam affirmant cum Magistro in 3. d. 12. ubi D. Thom. q. 1. art. 2. Bonavent. & Richar. art. 2. q. 1. & 2. Palud. q. 2. Capreol. q. 1. Almay. d. 1. q. 2. Dionys. Cisterciensis in 3. q. 3. art. 2. Hugo de S. Vict. lib. 2. de Sacram. part. 1. c. 7. Citari etiam possunt Alenf. q. 7. memb. 2. q. 1. & 12. memb. 1. Henric. quodlib. 6. q. 6 & Marfil. in 3. q. 3. art. 2. in 4. part. & q. 9. art. 3. & Picus Mirand. in Apol. q. 4. quatenus dicunt, de potentia absoluta non potuisse assumi humanitatem sine gratia habituali, & beatitudine anime: quamquam enim hoc falsum sit, tamen ex illo principio consequenter in presenti questione sentire tenetur, Deum hominem peccare non posse.

Quod secundo, & præcipue probatur ex communi Patrum traditione, asserentium voluntatem humanam per unionem ad Verbum factam esse impeccabilem. Primo indicatur VI. Synod. act. 8. ubi refertur Athanas. serm. 2. contra Apollin. & habetur in lib. de Incarnat. satis post med. cum enim Apollinaris negaret esse in Christo animam, & voluntatem humanam, ne concedere cogeretur illum esse capacem peccati: respondet Athanas. nihil esse timendum, quia per ipsam assumptionem illa voluntas impeccabilis facta est, unde idem Athanas. serm. 2. contra Arianos satis post med. vocat Christum, per se sanctum, & Dominum sanctificationis, & naturæ suæ justum, & immutabilem ad malum, & in hoc dicit superasse primum hominem, & angelos: & ad hoc accommodat ver-

ba illa Psal. 44. *Dilexisti justitiam, & odisti iniquitatem, propterea unxit te Deus, Deus tuus oleo latitiæ præ confortibus tuis*, intelligens per illam unionem, ipsam unionem hypostaticam: & illam particulam, *Propterea*, significare habitudinem causæ finalis, ut sensus sit; Ideo te unxit Deus hoc singulari, & ineffabili modo, ut omnino diligeres justitiam, & odio haberes iniquitatem, nec posse ab hac virtutis rectitudine declinare. Secundo in eadem VI. Synod. act. 17. citatur Gregor. Nazian. in orat. 36. num. 46. qui dicit, voluntatem humanam Christi ita fuisse deificatam per unionem ad Verbum, ut non posset divinæ repugnare. Tertio Cyril. Alexand. dialog. 6. de Trinit. vocat Christum incapacem peccati, & lib. de Fide ad Theodos. non longe a princip. dicit animam Christi per unionem ad Verbum factam esse superiorem omni peccato, & immutabilem. Quarto, Chrysostomus in cap. 7. Isai. tractans verbum illud: *Antequam sciat parvulus, &c.* inquit, *qui aliorum tollit peccata, & utique immunis est omnis peccati, nec peccare potest*, & infra dicit, Paulum tribuere Christo, *το ἀναμάρτητον* hoc est, liberrimam immunitatem omnis peccati, seu impeccabilitatem, quam dicit esse proprietatem Dei: & Hieronymus dialog. 2. contra Pelagianos, solum Deum dicit esse *ἀναμάρτητον*, id est, impeccabilem, quamquam etiam hæc vox interdum personam innocentem significare solet, ut constat ex Damasc. lib. 2. de Fid. cap. 12. Quinto Basil. epist. 65. dicit Christum abjecisse omnes pravæ effectiones, tamquam divina majestate indignas. Quæ ratio de omni peccato, & in omni possibili statu procedit. Sexto, clarius Epiph. in Anchorato non longe a fine, dicit contra Apollinar. *Christum in se assumpsisse animam, & carnem, quæ ipse in se continuit non divisa ad malitiam; & infra dicit, si Christus superne, id est, secundum divinitatem, est perfectus, & verax, etiam inferne, id est, in humanitate. Unde infert, si in humanitate inventa esset culpa, vel in divinitatem ipsam esse refundendam, vel certe divinitatem non perfecte in humanitate habitare.* Septimo Origen. 2. Periar. cap. 6. ita veritatem hanc explicat: *Ferrum naturæ suæ capax est caloris, & frigoris, si tamen semper intra fornacem ignis contineatur, dici poterit incapax frigoris: sic, inquit, beatissima Christi anima in Deo semper existens, quidquid agit, quidquid intelligit, Deus est, & ideo inconvertibilis est, & immutabilis, quæ inconvertibilitatem ex Dei Verbi unione indeficienter ignita possedit.* Octavo indicavit hoc ipsum Iren. lib. 3. cap. 5. dicens, Christum non potuisse mentiri, quia erat ipsa veritas, quæ ratio servata proportionem in omni peccato procedit. Nono referri potest Dionys. cap. 3. de Cœlesti hierar. part. 3. circa finem, ubi dicit, oportere nos divinam Christi in carne vitam intueri assidue, & sanctam ipsius impeccantiam, seu impeccabilitatem imitari. Decimo, Dionys. Alexand. in Epist. contra Paul. Samosat. circa finem, de Christo dicit: *Nisi esset Deus, non posset esse alienus a potestate peccandi*; sentit ergo, quia est Deus, ideo illam potestatem peccandi (quæ potius impotentia dicenda est) ab illo esse alienam: unde infra dicit, naturalem illi esse virtutem, & justitiam, & non adventitiam, sicut aliis hominibus. Meminit hujus epistolæ Euseb. lib. 7. Hist. cap. 24. & eam refert Turrian. in Oplothea, in princ. Damascenum, & Nicetam infra referam. Undecimo ex Latinis August. lib. de Corrept. & grat. cap. 11. *Neque metuendum erat, inquit, ne isto ineffabili modo in unitatem personæ a Verbo Dei humana natura suscepta, per liberum voluntatis peccaret arbitrium: cum ipsa susceptio talis esset, ut natura hominis a Deo ita suscepta, nullum in se motum malæ voluntatis admitteret*; & lib. 1. contra duas Epist. Pelagianor. *Non ob aliud factus est inter Deum, & hominem mediator, nisi quia ex hominibus non potuit esse peccator*; & lib. 2. de Peccat. merit. cap. 11. *Mente, inquit, conspiciens Christi justitiam, in cuius non tantum divinitate, sed neque in anima, neque in carne ullum potuit esse peccatum*; & lib. 1. de Prædest. Sanct. cap. 15. *Nunquid metuendum fuit, ne accedente etate homo ille libera peccaret arbitrio? an ideo in illo non libera voluntas erat, ac non tanto magis erat, quanto magis peccato servire non poterat.* Et tandem in Enchirid. cap. 36. dicit, per gratiam unionis factum esse, ut Christus homo nullum posset habere peccatum; & cap. 40. dicit in naturæ humanæ susceptione factam esse illi homini gratiam quodammodo naturalem, quæ nullum pecca-



peccatum posset admittere. Duodecimo, Ambros. lib. de Incarn. Domin. Sacramen. cap. 7. Apollinari respondens, eandem sententiam habet, quam ex Arthanas. supra retulimus, scilicet, non esse timendum, ne anima Christi capax esset peccati, quia per unionem facta est impeccabilis, & principium sufficiens ad aliorum tollenda peccata. Decimotertio, Hieron. tom. 2. Epist. ad Ctesiphon. contra Pelagianos, dicit proprium esse Christi, esse impeccabilem. Decimoquarto, Hilar. lib. 10. de Trinit. multa in hanc sententiam habet, & inter alia dicit, ita repugnare Christo peccatum, sicut repugnat, Christum non esse Christum. Decimoquinto, Cyprian. lib. de Cardinal. Christi operibus cap. de jejunio, & tentatione Christi, sentit Christum ex vi unionis caruisse omni sensu, & consensu peccati. Decimosexto, Gregor. lib. 3. Moral. cap. 13. & homil. 16 in Evang. ait, Christi mentem divinitati suae ita fuisse conjunctam, ut non solum peccare non posset, verum neque interiori concuti, aut perturbari. Decimoseptimo, Boetius lib. de duabus nat. circa finem dicit, assumpsisse Christum in humanitate sua, ut nec peccaret, nec peccare posset. Decimo octavo, Tertul. lib. de Carne Christi, ita sibi objicit: *Si nostram induit carnem, peccatrix fuit caro Christi*, respondet. *Nostram induit, suam fecit, & suam faciens, non peccatricem effecit*. Decimonono, Ansel. lib. 2. Cur Deus homo cap. 10. Primus, inquit, Adam peccare potuit, quia purus homo: secundus, Adam peccare non potuit, quia est Deus. Vigesimo, hoc ipsum late docet Fulgent. lib. de Incarnat. & grat. cap. 7. & 8.

Ratione probari potest primo hac veritas, quia humanitas Christi per ipsam gratiam unionis formaliter sanctificatur. Sed hac ratio, quamquam satis probabilis sit, melius in sequenti conclusione a nobis explicabitur, habet enim inter alias illam specialem difficultatem in principio sectionis tactam: quia licet concedamus ipsam gratiam unionis per se, & formaliter sanctificare, nihilominus non videtur per seipsam posse formaliter excludere potestatem peccandi: nam in primis hoc non est de ratione formae, formaliter sanctificantis: quia licet gratia habitualis sit forma sanctificans, & licet daremus ita sanctificare, ut nec de potentia absoluta posset esse cum peccato, nihilominus non facit hominem impeccabilem. Deinde hoc minus videtur convenire in gratiam unionis: quia ipsa per se non est formaliter operativa: non ergo potest per se solum immutare naturalem modum operandi humanarum virum, atque adeo nec reddere per seipsam animam impeccabilem. Et ideo aliquid aliud huic rationi addere oportet, videlicet, cum dicitur, voluntatem humanam fieri impeccabilem ex vi unionis non excludi omne donum, seu omne divinum auxilium, seu divinam directionem, & protectionem, qua Deus ita gubernat voluntatem humanam sibi unitam, ut illa stante peccare nullo modo possit: nam sine aliquo hujusmodi dono impossibile est intelligere, quo modo per solum unionem talis voluntas maneat in bono confirmata, ut ratio facta demonstrat: dicitur ergo voluntas humana fieri impeccabilis per unionem, quia impossibile est, Deum non ita dirigere, & custodire voluntatem sibi unitam, ut ad malum declinare non possit. Hoc ergo est, quod ultimo probandum superest, quod fiet in sequenti ratione.

Respon.

Secunda ergo ratio, & in hac materia praecipua est, quia si Christus peccaret per humanitatem, Deus peccaret: consequens est impossibile; ergo. Respondet tamen primo Marfil. si humanitas Verbo unita peccaret, solum ipsam humanitatem esse, quae peccaret, non Christum, & consequenter neque Deum, & non reddit aliam rationem, nisi quia peccatum repugnat Deo. Sed vel Marfil. ad rem non loquitur, vel Nestorianum errorem sapit ejus responsio: nam vel loquitur in eo casu, in quo humanitas illa in eodem instanti, in quo peccat, jam non est unita Verbo, vel in quo unita peccat: si primum, non est ad rem, quia nos loquimur de operatione humanitatis unitae, ut sic, quae non est tam proprie operatio humanitatis, quam divini suppositi per humanitatem operantis. In eo autem casu, nec sola humanitas operatur, nec divinum suppositum per illam, cum jam non sit illi unitum, sed aliud suppositum proprium, in quo necesse est, ut in tali instanti humanitas jam subsistat. Nisi fortasse dicatur, humanitatem illam prius natura peccare, & ideo in eodem instanti separari a Verbo, quod statim probabimus esse im-

possibile. Vel intelligit Marfil. humanitatem, conservata unionem ad Verbum posse peccare, & nihilominus illam operationem non esse hujus hominis, & Verbi, quem sensum ipse magis indicat. Sed est falsissimum, & sapit Nestorianum: nam hoc est multiplicare supposita. Deinde eadem ratione nulla passio, vel operatio humanitatis esset Deo, aut Verbo tribuenda: nam cum ipse ait, peccatum illud non tribui Deo, quia repugnat ipsi, vel intelligit, quia repugnat Deo, ut Deus est, & hac ratione nec mors esset illi tribuenda: vel quia repugnat Deo in assumpta natura, & hoc est dicere, repugnare ipsi naturae unitae Deo, & hoc intendimus.

Quapropter Durandus non censet inconveniens concedere, Deum peccare, per communicationem idiomatum, quia non minus, inquit, Deo (qui vita ipsa est) repugnat mors, quam divinae bonitati malitia: sed ea repugnantia non obstante, Deus dicitur mori in assumpta natura, quidni ergo dici poterit peccare? Sed haec responsio pia omnium Theologorum aures offendit. Primo, quia absurdissimum putant (etiam per solum communicationem idiomatum) concedere Deum peccare: quia quod per hanc communicationem de Deo dicitur, peculiari modo ab ipso assumitur, & approbatur, & quasi deificatur: repugnat autem bonitati divinae, hanc tam singularem dignitatem culpae conferre, quae simpliciter mala est: in quo multum differt a malo poenae, quod simpliciter bonum est, & ideo potest recte amari, & assumi, sicut a Christo Domino assumptum fuit, & per assumptionem honoratum, & quasi deificatum. Secundo, non solum sequitur ex contraria sententia Deum per communicationem idiomatum peccare, sed etiam culpam, & defectum in ipsam divinam voluntatem redundare: quia quando plures naturae, & voluntates eandem personam componunt, ad officium superioris voluntatis spectat, inferiorem appetitum, seu voluntatem, in officio continere: atque ad id, quod honestum est, dirigere, si potest: hoc igitur negligere, seu praetermittere, defectus esset ipsius superioris voluntatis. Cum ergo natura divina, & humana unam personam Christi componant, ad divinam voluntatem, quae suprema est, & potest inferiorem, scilicet, humanam ita dirigere, ut semper, & sine defectu honeste operetur, pertinet hoc munus praestare, & ad rectitudinem ejus spectat ita facere: & ideo si aliquis defectus in hoc committeretur, in illam redundaret.

Quae ratio indicata est a D. Thom. in 3. d. 12. q. 2. art. 1 ubi ait, Christum peccare non potuisse, quia anima, & corpus ejus fuerunt quasi organum Deitatis, & Deitas regebat animam, & anima corpus. Et eandem habent ibi Capreol. ad secundum, & Palud. q. 2. & colligitur ex multis Patribus citatis. Cyprianus enim, cum dixisset Christum esse impeccabilem, addidit, Christum exemplo suo docuisse liberum hominis arbitrium fieri posse insuperabile a peccato, si libertas ejus libero moderamine dirigatur. Ambros. post quam respondit Apollinari, non esse timendum, ne anima humana in Verbo peccaret, rationem reddens, inquit: *Nam qui alios regebat, multo melius sese regere poterat*. Epiphani. cum dixisset humanitatem per unionem factam esse incapacem peccati, rationem reddens, inquit: *Quia Verbum virtute sua frenabat inferiorem naturam ab omni inutili carnali turba, & remittebat ad decentes ipsius deitatem corporales necessitates*, & infra: *Animam, inquit, vere humanam, & mentem, & si quid est aliud, ipse in sese habens universa continuit, Deus existens non dimissa ad malitiam*. Et eundem sensum habent illa verba: *Si superne perfectus est, etiam inferne, quod si inferne imperfectus esset, etiam superne, quasi apertius diceret, imperfectionem, vel defectum inferioris voluntatis, redundare in imperfectionem, & defectum superioris*. Huc etiam accedit, quod Damasc. lib. 3. cap. 19. & alii Patres dicunt, humanitatem esse instrumentum conjunctum Verbi, non tantum ad actiones miraculosas, sed simpliciter ad actiones humanas, sicut corpus dicitur organum animae: ergo ad illud, tamquam ad principale operans pertinebat, humanam voluntatem in actibus suis gubernare, ut idem Damascen. late prosequitur d. lib. 3. cap. 14. 15. & seqq. usque ad 22. ubi tradit, licet in Christo sint duae voluntates, & duae operationes, sicut & duae naturae: tamen sicut naturae conjunctae sunt, ita & voluntates, & operationes esse connexas, & multa similia habet Nicet. lib. 3. Thesau. cap. 27. & lib. 2. cap. 31. Quod

Dicere  
Deū pec-  
care, qua-  
cumque  
prius  
ratione  
dicatur,  
absurdif-  
simum est

Superiori  
mutatur,  
quod  
inferior  
peccat, si  
cū possit,  
negligit  
cohibere,

Confuta-  
tur.



Sicut na-  
tura in  
Christo  
unita &  
operatio-  
nes inter  
se conueni-  
unt.

Quod exemplo hominis recte declaratur; sunt enim in homine duo appetitus, inferior, & superior, & ad superiorem pertinet moderari inferiorem: unde si aliquis defectus moralis est in inferiori appetitu, qui possit a superiori præueniri, & vitari, & non fiat, imputatur ipsi voluntati. Nec refert, quod isti appetitus in homine non tantum sint unius suppositi, sed etiam unius naturæ, quia non oportet esse exemplum in omnibus simile: satis est, ut similitudo teneat in ordine ad idem suppositum, quia ratio fere eadem est, quæ ita explicari potest. Quia ex hac duplici natura, divina & humana, fit unum ens simpliciter, tam vere ac per se unum, sicut fit ex anima & corpore: ergo oportet, ut in illo composito sit unum veluti primum movens, ad quod pertineat operationes huius personæ dirigere, & gubernare: hoc enim per se postulare videtur rectæ rationis ordo, quia aliàs compositum illud non esset bene institutum, neque operationes huius personæ essent debito, & convenienti modo ordinatæ.

Obiectio.

Dices primo, si Angelus assumeret humanam naturam hypostatice, quamvis per humanam voluntatem peccaret, non tribueretur peccatum voluntati angelicæ, sed soli humanæ, quæ per se libera est; ergo. Respondetur, data hypothese impossibili in aliqua re esse exemplum dissimile, in alia vero esse simile: Angelica enim voluntas non haberet eam vim, ut suo arbitrio posset in rebus omnibus dirigere voluntatem humanam, eamque movere, & trahere, quo vellet: quia non habet eam efficacitatem super voluntatem humanam, quam habet divina voluntas, & ideo posset interdum illud suppositum per voluntatem humanam peccare, sine defectu angelicæ voluntatis: & in hoc est dissimilitudo. Similitudo autem est in hoc, quia teneretur tunc Angelus facere, quod per angelicam voluntatem posset, ut in officio contineret voluntatem humanam, quæ sua iam esset ratione hypostatice unionis, unde si hoc facere negligeret, illi etiam tale peccatum imputaretur. Quod aliis exemplis explicatur, nam ex conjunctione quadam humana multo minori, qualis est inter filium & patrem, uxorem & maritum, quia in ea fit aliquo modo unum, oritur similis obligatio, ut ad superiorem voluntatem spectet inferiorem regere, ad honestumque dirigere. Quid ergo mirum, quod ex hac substantiali, & intima unione, qua una vera persona componitur, oriatur in superiori voluntate prædicta obligatio, seu cura regendi inferiorem.

Minor  
unitas,  
quam per-  
sonalis  
inducit ob-  
ligationem in su-  
periori,  
inferiori  
gubernan-  
di.

Obiectio. 2.

cum non sit capax præcepti, & legis, non ergo potest teneri ad regendam dicto modo voluntatem creatam etiam sibi hypostatice unitam: ergo quamvis illud non faciat, non imputabitur illi lapsus humanæ voluntatis, cum non teneatur illum vitare, quia non se haberet, ut cooperans, sed tantum ut permittens. Unde confirmatur, nam permittere peccatum etiam in assumpta natura, non est intrinsece malum, potest enim ex bono, & honesto fine permitti, vel ad ostendendam assumptæ naturæ veritatem, & humani arbitrii libertatem, vel ad divinæ gratiæ commendationem, vel denique ad perfectiorem laudem virtutis, si videlicet cum potuerit transgredi, non fuerit transgressus. Respondetur, hanc obligationem consideratam in voluntate creata, oriri quidem ex lege, non positiva, sed naturali, orta ex intrinseca rectitudine, quam obiectum ipsum requirit, ut operatio honesta sit: in suprema autem & divina voluntate non oportet intelligere legis obligationem, sed solam naturam ipsius voluntatis, quæ per se recta est, nec potest ab eo, quod honestum est, deviare. Sicut etiam Deus mentiri non potest, non quia lege obligetur, sed quia verum dicere, est per se & intrinsece necessarium ad honestum operandum, & ideo omnis voluntas, quæ est capax præcepti, ad hoc obligatur, divina autem, quæ est supra omnem legem, natura sua ad hoc determinata est. Unde ad confirmationem respondetur, quod licet permittere peccatum in alienis voluntatibus, sit de se bonum, vel indifferens, tamen illud permittere in voluntate naturæ assumptæ, quæ iam est voluntas ipsius Dei per unionem, est ex obiecto intrinsece malum, unde non potest ex fine honeste fieri, magis quam mentiri. Et ideo consideranda valde est differentia inter voluntatem Christi, & alias voluntates: nam respectu aliarum se gerit Deus, ut causa universalis per generalem providentiam, ad quam pertinet permisso peccati: respectu autem voluntatis Christi habet fin-

Dens sine  
obligatio-  
ne legis,  
natura  
sua deter-  
minatur  
ad bonum.

gularem habitudinem proprii propositi, & ideo peculiari modo illam gubernat, ejusque rectitudini, & honestati consulit.

Sed urgebis tandem, quia voluntas divina communis est Patri, & Spiritui sancto, qui nullo titulo, seu ratione tenentur, ut ita dicam, illo speciali modo custodire, & regere humanam voluntatem; ergo nec Verbum. Respondetur negando consequentiam, quia voluntas divina ita est communis tribus personis, ut sit etiam propria singularum, non minus perfecte, quam si uniuscujusque tantum esset: & ideo hæc cura regendæ voluntatis assumptæ per se primo pertinet ad Verbum, cuius humana natura suo modo propria facta est per assumptionem, Pater autem, & Spiritus sanctus discordare non possunt a Filii voluntate, in quam etiam consenserunt, quando humanam naturam personæ Verbi unire voluerunt. Manet ergo ratio facta solida, quæ fundamentalis est in hac materia. Aliam vero post sequentem conclusionem subjiciemus.

Obiectio. 3.

Respon.

Dico ergo secundo. Non potest in humana natura a Verbo assumpta esse peccatum aliquod per modum habitus, quale est originale, aut macula, quæ ex actuali peccato relinquitur. Hæc conclusio differt a præcedenti, & quamvis sit vera, minus tamen certæ ex conclusione enim præcedenti recte sequitur, non posse esse in humanitate assumpta maculam aliquam ex proprio actuali peccato post unionem commissio relicta: posset autem intelligi, Verbum assumere naturam per feminalem generationem conceptam, contrahendo in illa originalem culpam, quæ non ex proprio actu, sed ex infecta radice originem trahit. Posset etiam intelligi, Verbum assumere naturam, quæ prius tempore in proprio supposito subsistisset, & in eo esset maculis peccatorum infecta, quibus etiam post unionem subjacere permitteretur. Hoc enim esse impossibile, non videtur probari ratione facta pro conclusione præcedenti: nihilominus tamen dicimus, hoc esse impossibile. Et in primis, quod ad peccatum originale attinet, constat, in Christo non potuisse habere locum, supposito modo conceptionis suæ, quia non traxit originem ab infecta radice. Deinde, etiam si per feminalem propagationem conciperetur, si supponamus factam esse unionem a primo instanti conceptionis ejus, etiam non posset ex vi talis conceptionis peccatum originale contrahere, ut bene tractat Anselm. lib. 2. Cur Deus homo cap. 16. & lib. de Conceptu virginali cap. 18. & 19. Et potest hoc modo ex supradictis explicari, quia anima rationalis non prius inficitur peccato originali, quam informet corpus: sed potius e contrario, prius natura informat corpus, quam peccato originali maculetur, & similiter tota humana natura, prius natura intelligitur subsistere in proprio supposito, quam contrahere originale peccatum: ostensum autem in superioribus est, humanam naturam assumptam in sua conceptione uniri Verbo veluti eodem signo naturæ, quo subsisteret in proprio supposito, atque adeo animam prius natura uniri Verbo, quam corpori; ergo etiam in casu, in quo loquimur, prius natura esset anima assumpta, quam peccato originali maculata: ergo post illam unionem non posset ex vi conceptionis contrahere originale peccatum, quia per talem unionem intelligitur ablatum omne debitum contrahendi tale peccatum.

In natura  
a Verbo  
assumpta,  
ne per  
modum  
quidem  
habitus  
peccatum  
aliquod  
esse po-  
test.

Sed jam asseramus universalem, & efficacem rationem, quæ probet de omni macula peccati, etiam præexistente in tali natura, quæ ex casu supponitur prius tempore in proprio supposito subsistisse. Ratio vero est, quia necesse est, adveniente gratia unionis, quamcumque culpam expelli a tali natura: probatur, quia per illam unionem talis natura perfectissime sanctificatur, & deificatur; ergo impossibile est, ut simul hæc natura peccato maneat maculata. Quod aliter explicatur: nam ex vi unionis, hic homo est Deo gratissimus, illique debetur gratia, & gloria: ergo impossibile est, ut Deo simul invivus maneat, & dignus æterna poena.

Dices, non implicare, eandem naturam simul esse dilectam a Deo uno titulo, scilicet, quatenus ab illo recipit summum beneficium unionis hypostatice, & nihilominus alio titulo, scilicet, quatenus subjacet peccato, esse invivam, & odio dignam: sicut enim non omne malum est contrarium omni bono, & ideo potest aliqua res aliquid boni, & mali simul habere, ita etiam potest diversis rationi-

Obiectio.

tionibus.



tionibus amari, & odio haberi; gratia autem unionis & culpa non videntur formaliter contraria, vel privative opposita, & ideo non videtur contradictionem implicare, ut simul sint, & habeant effectus, diversos quidem, non tamen repugnantes. Nam licet in eo casu ille homo titulo unionis esset dignus gloria, tamen ratione peccati posset esse indignus, sicut inter homines contigit, filium ratione filiationis esse dignum paterna hereditate, & tamen ratione culpæ factum esse indignum. Et idem dicunt in habituali gratia, qui dicunt, non implicare contradictionem, eam conservari in homine existente in peccato. Quocirca cum dicitur gratia unionis per se, & formaliter naturam sanctificare, seu hunc hominem, si per verbum sanctificandi intelligatur, facere immunem omnis peccati, videtur peti principium: id enim querimus, an gratia unionis id per se habeat, aut unde habeat. Si vero solum significet, efficere gratum, & quasi constituere objectum singularis dilectionis Dei, hoc verissimum est; tamen, ut argumentabamur, hinc non videtur necessario sequi, ut natura illa omni culpa libera reddatur. Et præsertim urget difficultas in culpa veniali, quæ non reddit hominem inimicum Deo, nec simpliciter odio dignum.

**Respon.**  
Quomodo  
gratia u-  
nionis re-  
pugnet  
cuicumq;  
peccati  
maculæ,  
etiam ve-  
niali.

Respondetur nihilominus rationem esse optimam, quia licet inter gratiam unionis, & peccatum non sit propria, & formalis oppositio, immediata, & physica, qualis est inter duo contraria, vel inter privationem, & habitum, (tum quia peccatum formaliter non consistit in privatione gratiæ unionis: tum etiam, quia peccatum consistit in morali quadam deordinatione, seu macula, gratia vero unionis est res suo modo physica, & substantialis) nihilominus tamen illa gratia unionis talis ac tanta est, ut repugnantiam habeat cum ipsa formali deformitate peccati: & ratio supra indicata est, quia hæc gratia quodammodo deificat naturam, cui fit, & quidquid in ea est, ut frequenter Patres loquuntur: præsertim Damasc. lib. 3. c. 17. repugnat autem malitiam ipsius peccati per unionem ad Verbum ita extolli, ac deificari. Deinde, quia communicatio hujus gratiæ est summa dilectio Dei ad naturam creatam, & per illam intrinsece fit illa natura digna omni bono, & omni rectitudine. Ac denique ille homo est simpliciter Filius Dei naturalis; repugnat autem cum tanto Dei amore, & cum tali gratia, & dignitate permanere naturam illam, seu personam ratione illius esse propter culpam dignam odio, & Deo inimicam: per se enim statim apparet hoc indecens, & indignum tali persona. Denique ratio in præcedenti conclusione facta hic etiam aliquo modo potest applicari: quia ad perfectam sanctitatem alicujus suppositi, vel personæ spectat, non admittere in propria natura aliquam maculam culpæ, sed eam statim expellere, si potest: talis enim macula, nec per se amabilis est, nec ad honestum finem referri potest, cum sit intrinsece mala. Et hæc ratio sic exposita probat, non solum de culpa mortali, sed etiam de veniali: quam etiam repugnat deificari, & honorari a Deo: & ad infinitam sanctitatem divinæ personæ pertinet, omnem vel minimam maculam naturæ, quam assumit, consumere, etiam si in illa antea præextitisset.

Et ex hac conclusione, & ratione ejus, potest amplius prima conclusio confirmari, quia si natura semel assumpta peccasset, vel manerent simul unio & peccatum, & hoc est impossibile, ut probatum est: vel per ipsum peccatum dissolveretur unio, ita ut primum esse peccati intelligatur esse primum non esse unionis, sicut in habituali gratia contingit, in eodem instanti amitti, in quo quis peccat, quamvis simul cum illa esse non possit. Hoc enim modo finxerunt aliqui, posse in humanitate assumpta esse peccatum; quod si verum esset, non fieret humanitas ex vi unionis impeccabilis. Sed hic modus etiam est impossibilis, primo quidem, quia gratia unionis nostris operibus neque comparatur, neque augetur; ergo, nec iisdem corrumpi potest: gratia enim habitualis ideo per opera potest corrumpi, quia per eadem potest comparari, saltim dispositive, & meritorie augeri. Quæ tamen ratio ex rebus extrinsecis fumitur, & ita rem non explicat: quod enim gratia unionis augeri non possit per opera, ideo est, quia ipsa in se indivisibilis est, & incapax augmenti, obtineri autem per opera præcedentia in proprio supposito, simpliciter non repugnet, quamvis repugnet obtineri per opera, vel dispositionem præcedentem ordine natu-

**Cur gra-  
tia u-  
nionis per  
peccatum  
expelli  
non pos-  
sit.**

re, in sola ipsa natura assumenda, ut supra probatum est. Et inde sumi potest proportionale argumentum, cujus proprium fundamentum statim explicabitur. Secundo ergo probatur hoc esse impossibile, quia natura assumpta ex vi unionis manet confirmata in bono, propter rationem supra factam in prima conclusione: & in hoc multum excedit gratia unionis gratiam habitualement, quia multo altiori modo deificat naturam, cui datur. Tertio id magis proprie explicatur ex differentiâ inter gratiam habitualement, & unionis: illa enim non constituit suppositum, & ideo non omnis operatio, procedens a supposito habente gratiam, procedit a gratia: ex quo fit, ut tale suppositum efficere possit operationem, quæ gratiam ipsam expellat, sicut in aliis formis, vel habitibus contingit: at vero gratia unionis constituit ipsum suppositum operans, & ideo omnis operatio procedens a natura habente hanc gratiam necessario procedit ab ipso supposito, quod illi unitum est, ab illo enim præcipue est omnis operatio: & ideo fieri non potest, ut per operationem procedentem a natura, quæ prius habet hanc gratiam unionis, unio dissolvatur. Quod ita ulterius declaratur, & confirmatur: nam operatio procedit a supposito; ergo vel proprio, vel alieno: si a proprio; ergo prius natura, quam intelligatur facta operatio, intelligitur unio dissoluta, & natura subsistens in proprio supposito, & ideo mirum non est, quod peccare jam possit, cum unione privata sit, nos enim loquimur de natura unita: si autem operatio procedit a supposito alieno, impossibile est, ut in eodem instanti, in quo ab illo procedit, desinat unio naturæ ad tale suppositum, quia impossibile est, ut simul sit, & non sit unio: ut autem operatio in hoc instanti procedat a divino supposito, necesse est, ut in hoc instanti duret unio ad tale suppositum; non ergo potest in eodem instanti desinere esse per primum non esse: sicut impossibile est, ut si opus procedit a gratia habituali, desinat in eodem instanti gratia habitualis: & idem est in calore, & aliis similibus.

Neque dici potest, tale opus peccati procedere a natura humana secundum se sine ordine ad suppositum, & per illud mereri separationem a tali supposito, in eodem instanti perficiendam: sicut dicunt aliqui potuisse naturam humanam secundum se existentem prius natura operari, & mereri unionem, & obtinere illam in eodem instanti. Hoc (inquam) dici non potest, primo quidem, quia supra ostendimus, illud de merito esse falsum, & impossibile: hoc autem impossibile est, nam in via generationis, cum humanitas prius natura supponatur existens, quam unita, posset aliquo modo intelligi prius natura operans, quam intelligatur suppositum per illam operari. At vero postquam jam unita est, fieri non potest, ut aliqua operatio sit ab illa natura, quin ab ejus etiam supposito sit, nisi prius supponatur unio dissoluta: quia non alia ratione operatio est suppositi, nisi quia natura est etiam ipsius suppositi, neque alia ratione omnes actiones, & passionis humanitatis Christi dicuntur esse suppositi divini. Denique saltem hoc sensu per se notum est, actiones esse suppositorum, quorum sunt naturæ. Relinquitur ergo impossibile esse, ut per peccatum naturæ unitæ dissolvatur ipsa unio: atque, cum etiam impossibile sit, peccatum esse simul cum unione, fit omnibus modis esse impossibile, ut peccatum cadat in naturam Verbo conjunctâ.

Ex dictis vero sequitur, non esse impossibile, Deum assumere naturam, quæ toto priori tempore fuerit in proprio supposito, peccato subjecta, quia in ipso instanti assumptionis potest ita illam mundare, ut nihil omnino culpæ relinquatur. Quod autem prius in peccatis fuerit, licet non sit admodum decens, neque congruum ad hanc unionem, & ideo nec factum sit, nec secundum ordinariam potentiam fieri expediat: tamē neque sit ita indecens, aut a divina bonitate alienum, ut fieri repugnet, quia neque inde fit, ut Deus sibi culpam assumat, sed potius, ut per suam unionem illam expellat; neque in eo opere aliquid invenitur, quod sit contra virtutem aliquam, seu honestatem: quin potius posset ad misericordiam pertinere, quatenus bonitatis divinæ est hominum peccatorum misereri, eosque a peccatis mundando, spiritualibus bonis afficere. Dices. Inde fieret, verum esse dicere, Deum aliquando peccavisse, seu fuisse in peccato, quia hic homo aliquando in peccato fuit, sicut nunc verum est dicere, hunc hominem Christum creasse mundum. Respondetur tamen negando sequelam, neque exemplum est simile, quia

**Obj. 2<sup>a</sup>.**

**R. Ton.**

**Non repugnat, Deum assumere naturam, quæ immediate ante fuerit in peccato.**

**Obj. 3<sup>a</sup>.**

**Respon.**



quia Christus est idem suppositum, quod mundum creavit: at vero in illo casu suppositum, quod peccavit in illa natura, fuit diversum ab illo, quod post assumptionem in illa subsistit: unde multi etiam negarent, esse eundem hominem, quia non est idem suppositum: sed quidquid de hoc sit, certum tamen est, inter supposita ejusdem naturæ non esse idiomatum communicationem, præsertim quoad operationem, quæ omnino requirit talis suppositi proprietatem: sicut non dicitur Filius generare, etiam si in eadem natura subsistat, & sit idem Deus cum Patre: communicatio ergo idiomatum propria est respectu ejusdem suppositi subsistenti in pluribus naturis, ut quæst. 16. dicitur.

De reatu  
pæne

Sed inquiri obiter potest, an in eo casu posset Verbum assumere naturam, culpam quidem expellens, non tamen omnem reatum pænæ. Respondetur, nullam in hoc esse implicationem contradictionis, quia reatus pænæ non est culpa, neque macula, sed ad malum pænæ pertinet: quamquam ergo non potuerit Verbum per suas actiones contrahere hunc reatum, quia hoc modo essentialiter supponit actionem illam, per quam contrahitur, esse culpabilem: tamen postquam supponitur jam contractus per actiones hujus naturæ in alio supposito, nulla repugnantia est, quod possit manere in eadem natura assumpta a Verbo, ablata culpa, a qua ille reatus in esse, seu conservari non pendet: unde fit, hoc proprie intelligendum esse de reatu pænæ temporalis, nam reatus pænæ æternæ simul cum culpa remittitur, nec potest proprie sine illa manere, & præsertim in persona Verbi, in qua omnis pænæ assumpta, etiam minimo tempore durans, necessario est sufficientissima ad satisfaciendum pro quacunque culpa, seu reatu ex illa relicto. Ex quibus ulterius infero, si reatus involvat respectum ad propria opera ipsius debitoris, id est, si significet debitum pænæ resultans ex operibus ipsius debitoris, sic proprie illud debitum, quod intelligitur manere in Christo, respectu illius non esse reatum, sicut illud debitum, quod de facto assumpsit satisfaciendi pro hominibus, non est proprie reatus, sed debitum voluntarie assumptum: quamquam respectu naturæ assumptæ, in casu, de quo loquimur, habet illud debitum rationem reatus, quia contractum est per opera ejusdem naturæ in alio supposito.

Obiectio.  
De habi-  
tibus vi-  
tiorum.

Respon.

Sed tunc nascitur aliud dubium, nam ex hoc fieri videtur, posse Deum assumere in humana natura habitus vitiorum, ut si supponamus, illos antea fuisse in tali natura. Sequela patet, quia etiam isti habitus non habent rationem mali culpæ, ablata enim omni culpa, imo & omni reatu pænæ, possunt manere hi habitus, ut patet in baptizatis, quibus omnis culpa, & pænæ perfecta remittitur, & tamen, si habebant antea habitus vitiorum, non propterea per baptismum auferuntur. Quidam non putant inconveniens, totum hoc concedere, & revera in hoc non apparet tam aperta implicatio contradictionis. Nihilominus tamen mihi non placet, non enim videtur divinæ bonitati consentaneum, ut vitiosam naturam suam faciat, & nihilominus eam vitiosam relinquat. Item, quia hæc vitia magis detestanda sunt, & fugienda, quam omnis error, vel falsitas: ostendimus autem supra, non posse Deum assumere errorem, vel falsitatem: multo ergo minus hæc vitia. Præterea, quia quilibet prudens debet vitare hæc vitia in sua natura, quantum potest, quia nec per se amabilia sunt, neque ad honestum finem possunt per se conferre. Denique indigna sunt, quæ per unionem hypostaticam deificentur, sicut supra de culpa ipsa dicebamus. Negatur ergo sequela, non est enim eadem ratio de his, & reatu pænæ, quia reatus pænæ, quamvis in sua causa supponat deordinationem, tamen in se, postquam contractus est, nullam dicit deordinationem, nec pravam inclinationem, sed solam obligationem ad id, quod bonum est, scilicet, ad satisfaciendum Deo pro culpa: at vero hæc vitia, quamvis culpæ non sint, tamen in se retinent inordinationem quandam, quatenus rectæ rationi repugnant, & inclinant ad ipsam culpam, & ideo magis huic assumptioni repugnant.

Aliud dubium, quod hic tractandum supra proposui, scilicet, de fomite peccati, quod cum præcedentibus videtur connexum, quia ad appetitum sensitivum proprie pertinet, in sequenti disputatione commodius tractabitur.

Utrum in Christo fuerit ignorantia.

**A**d tertium sic proceditur. Videtur, quod in Christo fuerit ignorantia. Illud enim vere fuit in Christo, quod sibi competit secundum humanam naturam, licet ei non competat secundum divinam, sicut passio & mors. Sed ignorantia convenit Christo secundum humanam naturam: dicit enim Damasc. \* in 3. lib. quod ignorantem & servilem assumpsit naturam: ergo ignorantia vere fuit in Christo.

92.  
9. d. 17. ar.  
1. 2. 5.

lib. 3. ord.  
5. cap. 21.  
ia. p. 116.

2. Præterea, aliquis dicitur ignorans per notitiæ defectu. Sed aliqua notitia defuit Christo: dicit enim Apost. 2. ad Corinth. 5. Eum, qui non novit peccatum, pro nobis peccatum fecit: ergo in Christo fuit ignorantia.

3. Præterea, Isaia 8. dicitur. Antequam sciat puer vocare patrem suum, & matrem suam, auferetur fortitudo Damasci. \* Puer autem ille est Christus: ergo in Christo fuit aliquarum rerum ignorantia.

Aug. ser. 4  
de epip.  
tom. 10.

Sed contra. Ignorantia per ignorantiam non tollitur. Christus autem adhuc venit, ut ignorantias nostras auferret: venit enim, ut illuminaret hos, qui in tenebris & umbra mortis sedent: ergo in Christo ignorantia non fuit.

Respondetur dicendum, quod, sicut in Christo fuit plenitudo gratiæ & virtutis, ita in ipso fuit plenitudo omnis scientiæ, ut ex præmissis patet. Sicut autem in Christo plenitudo gratiæ & virtutis excludit fomitem peccati, ita plenitudo scientiæ excludit ignorantiam, quæ scientiæ opponitur. Unde sicut in Christo non fuit fomes peccati, ita non fuit in eo ignorantia.

q. 7. ar. 9 &  
q. 6. ar. 1.

Ad primum ergo dicendum, quod natura a Christo assumpta potest dupliciter considerari. Uno modo, secundum rationem suæ speciei, & secundum hoc dicit Damasc. \* eam esse ignorantem & servilem. Unde subdit: Nam serva quidem est hominis natura ejus, qui fecit ipsam, Dei, scilicet, & non habet futurorum cognitionem. Alio modo potest considerari secundum id, quod habet ex unione ad hypostasim divinam, ex qua habet plenitudinem scientiæ & gratiæ, secundum illud Joan. 1. Vidimus eum quasi unigenitum a Patre, plenum gratiæ & veritatis. Et hoc modo natura humana in Christo ignorantiam non habuit.

Loc. citat.  
in arg. p. 1.

Ad secundum dicendum, quod Christus non novit peccatum, quia nescivit per experientiam, scivit autem per simplicem notitiam.

Ad tertium dicendum, quod loquitur ibi Propheta de scientia humana Christi. Dicit enim: Antequam sciat puer, scilicet secundum humanitatem, vocare patrem suum, scilicet, Joseph (qui pater ejus fuit putativus) & matrem suam, scilicet, Mariam, auferetur fortitudo Damasci. Quod non est sic intelligendum, quasi aliquando fuerit homo, & hoc nesciverit: sed antequam sciat, id est, antequam fiat homo scientiam habens humanam, auferetur, vel ad literam, fortitudo Damasci & spolia Samaria, per regem Assyriorum: vel spiritualiter, quia nondum natus, populum suum sola invocatione salvabit, ut gloss. \* Hieron. ibi exponit. August. tamen in sermone \* de Epiph. dicit, hoc esse completum in adoratione Magorum. Ait enim: Antequam per humanam carnem humana verba proferret, accepit virtutem Damasci, scilicet, divitias, in quibus Damascus præsumebat: in divitiis autem principatus auro defertur. Spolia vero Samaria id est ipsi erant, qui eam incolebant. Samaria namque pro idololatria ponitur, illic enim populus Israel aversus a Domino, ad idololatriam dominationi detraxit. Et secundum hoc intelligitur, antequam sciat, id est, antequam ostendat se scire.

Hieron.  
ib. d. 10. 5.  
August. in  
1. 4. qui  
est 32. in  
ordine  
ante med.  
tom. 10.

Negat D. Thomas; materiam vero hanc satis supra disputavimus in quæst. 9.

#### ARTICULUS IV.

Utrum anima Christi fuerit passibilis.

**A**d quartum sic proceditur. Videtur, quod anima Christi non fuerit passibilis. Nihil enim patitur, nisi a fortiori, quia agens præstantius est patiente, ut patet per August. 1. 2. super Gen. \* ad literam, & per Philof. 3. de Anima. Sed nulla creatura fuit præstantior, quam anima Christi. Ergo anima Christi non potuit ab aliqua creatura pati, & ita non fuit passibilis: frustra enim in ea fuisset potentia patiendi, si a nullo pati potuisset.

93.  
3. d. 13. q. 1  
ar. 2. q. 1.  
2. & d. 15.  
q. 2. ar. 1.  
q. 1. & 2. &  
d. 32. l. 1. Et  
op. 3. c. 48.  
Et op. 60.  
cap. 3. co. 5

2. Præ-



2. Præterea. Tullius in libro\* de Tusculanis quaestio-  
nibus dicit, quod passiones anime sunt quedam aegritudi-  
nes. Sed in anima Christi non fuit aliqua aegritudo, nam  
aegritudo anime sequitur peccatum, ut patet per illud Ps.  
40. Sana animam meam, quia peccavi tibi. Ergo in Chri-  
sto non fuerunt anime passionēs.

3. Præterea, passiones anime videntur idem esse cum  
fomite peccati: unde & Apostolus Rom. 7. vocat eas pas-  
siones peccatorum. Sed in Christo non fuit fomes peccati,  
ut supra dictum est. Ergo videtur, quod non fuerint in eo  
anime passionēs: & ita anima Christi non fuit passibilis.

Sed contra est, quod in Psalm. 87. dicitur ex persona  
Christi. Repleta est malis anima mea, non quidem pecca-  
tis, sed humanis malis, id est, doloribus: ut Glos. ibi ex-  
ponit. Sic ergo anima Christi fuit passibilis.

Respondeo dicendum, quod animam in corpore consti-  
tutam dupliciter contingit pati. Uno modo passione corpo-  
rali: alio modo passione animali. Passione quidem corpo-  
rali patitur per corporis lesionem. Cum enim anima sit  
forma corporis, consequens est, quod unum sit esse anima &  
corporis: & ideo, corpore perturbato per aliquam corpo-  
reā passionem, necesse est, quod anima per accidens per-  
turbetur, scilicet, quantum ad esse, quod habet in corpore.

Quia igitur corpus Christi fuit passibile & mortale (ut  
supra habitum est) necesse fuit, ut etiam ejus anima hoc  
modo passibilis esset. Passione autem animali pati dicitur  
anima secundum operationem, quæ vel est propria anime,  
vel principaliter est anima, quam corporis. Et quamvis,  
etiam secundum intelligere & sentire, dicatur hoc modo

anima aliquid pati: tamen, sicut in 2. Parte dictum est,\*  
propriissime dicuntur passiones anime, affectiones appeti-  
tus sensitivi, quæ in Christo fuerunt, sicut & cætera, quæ  
ad naturam hominis pertinent. Unde August. dicit in 14.  
de Civit. Dei: Ipse Dominus in forma servi vitam agere  
dignatus humanam, adhibuit eas, ubi adhibendas esse judi-  
cavit: neque enim in quo verum erat homini corpus, &  
verus hominis animus, falsus erat humanus affectus.

Sciendum tamen est, quod hujusmodi passiones aliter fue-  
runt in Christo, quam in nobis, quantum ad tria: primo  
quidem, quantum ad objectum, quia in nobis plerumque hu-  
jusmodi passiones feruntur ad illicita, quod in Christo non  
fuit. Secundo, quantum ad principium, quia hujusmodi  
passiones frequenter in nobis præveniunt iudicium ratio-  
nis: sed in Christo omnes motus sensitivi appetitus orie-  
bantur secundum dispositionem rationis. Unde August.  
dicit 14. de Civit. Dei,\* quod hos motus certa dispen-  
sationis gratia, ita, cum voluit, Christus suscepit animo hu-  
mano, ut, cum voluit, factus est homo. Tertio, quantum ad  
effectum: quia in nobis quandoque hujusmodi motus non si-  
stunt in appetitu sensitivo, sed irahunt rationem, quod in  
Christo non fuit: quia motus naturaliter humane carni  
convenientes, sic ex ejus dispositione in appetitu sensitivo  
manebant, quod ratio ex his nullo modo impediēbatur fa-  
cere, quæ convenienter. Unde Hieron.\* dicit super Matth.  
quod Dominus noster, ut veritatem assumpti hominis pro-  
baret, vere quidem contristatus est: sed, ne passio in animo  
illius dominaretur, per propassionem dicitur, quod cepit  
contristari & mæstus esse, ut passio perfecta intelligatur,  
quando animo, id est, rationi dominatur: propassio au-  
tem, quando est inchoata in appetitu sensitivo, sed ulte-  
rius non se extendit.

Ad primum ergo dicendum, quod anima Christi pote-  
rat quidem resistere passionibus, ut ei non supervenirent,  
præsertim virtute divina: sed propria voluntate se passio-  
nibus subiciebat, tam corporalibus, quam animalibus.

Ad secundum dicendum, quod Tullius\* ibi loquitur se-  
cundum opinionem Stoicorum, qui non vocabant passiones  
quoscumque motus appetitus sensitivi, sed solum inordi-  
natos: tales autem passiones manifestum est in Christo  
non fuisse.

Ad tertium dicendum, quod passiones peccatorum sunt  
motus appetitus sensitivi in illicita tendentes: quod non  
fuit in Christo, sicut nec fomes peccati.

#### COMMENTARIUS.

Uobis modis potest anima dici passibilis. Uno mo-  
do secundum essentiam: alio modo secundum po-  
tentias: & quidem priori modo, naturaliter loquendo,  
anima non est passibilis, nisi quatenus forma corporis, &  
quatenus per alterationem ejus separari ab eo potest, & a  
suo statu naturali immutari: & hanc vocavit D. Th. pas-

sionem corporalem, de qua recte docet, animam Christi  
fuisse passibilem pro statu vitæ, quod nihil aliud est, quam  
dicere, corpus passibile informasse. Posteriori autem mo-  
do, scilicet, secundum potentias, dicitur anima passibilis  
passione animali, quatenus per affectum doloris & tristi-  
tiæ, & alios similes pati potest. Et hoc etiam modo docet  
D. Th. in 2. part. artic. animam Christi fuisse passibilem,  
quam denominationem magis proprie sumi dicit ab a&i-  
bus appetitus sensitivi, quam voluntatis, quia illi proprie  
fiunt cum motione, & alteratione corporis, & ideo no-  
men passionum sibi proprie vendicant: quia vero hujus-  
modi passiones fuerunt in Christo omnino moderatæ, &  
rationi subiectæ, ut art. 2. dictum est, ideo addit D. Th.  
ex doctrina Hieronymi, non fuisse hos affectus in Chri-  
sto per modum passionum, sed propassionum. Quam do-  
ctrinam statim in sequenti disputatione explicabimus,  
prior enim pars hujus art. quæ ad passionem corporalem  
pertinet, nulla disputatione indiget, quia coincidit cum  
doctrina de corpore passibili Christi supra tractata: po-  
sterior ergo pars, quæ est de passione animali, fusius a no-  
bis explicanda est.

#### DISPUTATIO XXXIV.

In tres Sectiones distributa.

De appetitu sensitivo, & perfectionibus, vel defectibus  
convenientibus anime Christi ratione illius.

DE intellectu anime Christi, & perfectionibus, vel de-  
fectibus ejus, dictum late est supra q. 9. & seq. ubi  
obiter etiam de sensibus diximus id, quod sufficere visum  
est. De voluntate autem Christi agit D. Th. infra q. 18.  
quamquam de præcipuis ejus perfectionibus supra dixit  
q. 7. & in art. 1. hujus quaestionis ab illa exclusit primum  
& maximum defectum, ut visum est: sed de cæteris, quæ de  
voluntate supersunt, dicemus q. 18. ne D. Th. ordinem in-  
vertamus. Solum ergo superest dicendum de appetitu  
sensitivo anime Christi, ejusque actibus, unde etiam con-  
stabit, quos defectus, media hac potentia, assumpserit.

#### SECTIO I.

An in Christo fuerit appetitus sensitivus,  
& actus ejus.

Dico primo, esse in Christo Domino verum appeti-  
tum sensitivum. Ita supponit D. Th. hic, & docet  
infra q. 18. art. 2. & reliqui Theologi in 3. dist. 17. & est  
censenda res certa de fide, quia, licet sub his terminis non  
sit in specie definita, tamen continetur in generalibus  
definitionibus Conciliorum, quibus assumptisse Christum  
humanam naturam cum suis omnibus facultatibus tradi-  
tur, quæ supra q. 9. ostensæ sunt. Est autem una ex his ap-  
petitus sensitivus, non quidem, ut hoc nomine intelli-  
gam qualitatem a liquam ab anima distinctam (hoc enim  
sub opinione est), sed proximam facultatem necessariam  
ad actus, seu affectiones sensibiles, & animales elicien-  
das: unde etiam ex illis locis Scripturæ, in quibus hi actus  
tribuuntur Christo, evidenter hæc veritas colligitur. Cu-  
jus ratio patet ex dictis, est enim hic appetitus de perfe-  
ctione & integritate humanæ naturæ, qui etiam maxime  
necessarius fuit ad finem redemptionis, scilicet, ut pro  
nobis Christus pati posset.

Dico secundo, fuisse in Christo veros & proprios actus  
hujus appetitus. Conclusio est æque certa, ac præcedens:  
testimonia vero, quibus probanda est, afferemus infra de  
singulis actibus in particulari disputantes. Ratione de-  
claratur, 1. quia potentia est propter actus, secus otiosa  
esset, præsertim, quando actus sunt immanentes, qui per  
se pertinent ad connaturalem individui perfectionem; 2.  
quia, ut dicebamus, isti actus fuerunt accommodatissimi  
ad finem redemptionis, & ad veritatem humanæ naturæ  
demonstrandam; 3. quia in Christo fuerunt actus sensuum  
externorum, & interiorum: ergo & appetitus sensitivi;  
4. denique, quia voluntas Christi operabatur modo natu-  
rali, & accommodato anime informanti corpus: est au-  
tum naturalis consensus inter hujusmodi facultates, ut  
voluntas excitare possit, & movere appetitum ad simi-  
lem seu proportionalem actum, & hic modus pertinet  
ad perfectionem humanæ operationis, & nihil habet in-  
decens, vel Christo repugnans; ergo.

G g

Dico



Appetitus  
sensitivus  
in Chri-  
sto sem-  
per ratio-  
ni obe-  
diens.

Dico tertio. Isti actus semper fuerunt in Christo ex consensione rationis, & voluntatis, quam nunquam prævenire potuerunt. Est communis sententia, non solum Theologorum, sed etiam sanctorum Patrum. Leo Pap. Epist. 11. circa finem inquit: *Animam Christi excellere, non diversitate generis, sed sublimitate virtutis, nihil enim carni sue habebat adversum, nec discordiæ desideriorum gignebant compugnantiam voluntatum: sensus corporei vigeant sine lege peccati, & veritas affectionum, sub moderamine deitatis, & mentis.* August. lib. 1. contra duas epist. Pelagianorum dicit, fuisse proprium Christo non sentire repugnantiam carnis, & concupiscentiæ. Intelligendum vero est, per se, & ex vi suæ conceptionis, hoc fuisse proprium illius: alio enim modo communicatum fuit Virgini, ut infra dicemus: similiter lib. 2. de Peccator. merit. & remis. c. 29. & lib. de Correp. & grat. 11. dicit, in Christo non fuisse illam pugnam carnis & spiritus, quam describit Apostolus ad Rom. 7. Idem lib. 4. hypognost. circa finem, ubi indicat, Pelagianos contrarium sensisse. Cyprianus hoc sensu dicit in sermone de jejunio, & temptationibus Christi, ipsum caruisse, & sensu, & consensu peccati. Probat etiam hoc late Damasc. lib. 3. de Fid. cap. 20. & 32. ubi dicit, hos affectus fuisse in Christo voluntarios, quia nihil in illo coactum fuit. Denique in V. Synod. collat. 8. can. 12. damnatur quidam Theodor. qui dicebat, Christum aliquo tempore vitæ suæ rebellionem super appetitus passum esse, & virtutis exercitio illam hujusmodi. Rationes faciles sunt: prima, quia appetitum inferiorem moveri contra vel præter superioris consensum est quidam defectus humanæ naturæ, qui in aliis hominibus ex peccato originali contractus est: sed in Christo esse non potuit ex hac radice, nec vero oportuit, aut decuit voluntarie assumi, quia neque ad fidem Incarnationis, seu nostram utilitatem conducebat, nec per se se erat expetibilis, aut Christo conveniens: ergo assumptus non est. Secunda, quia hic defectus, neque fuit in statu innocentiae, neque erit in statu gloriæ: Christus vero Dominus utriusque status perfectionem assumpsit, excepto corpore impassibili. Tertia, Christus semper fuit in actuali usu rationis, quo potuit prævenire, & considerare, quidquid appetitum suum excitare poterat, quod per voluntatem potuit, vel admittere, vel vitare. Rursus habuit, saltem per supernaturalem virtutem, perfectum dominium omnium suarum potentiarum: ergo & appetitus sui, & omnium actuum, & motionum ejus.

Dubium,  
quomodo  
voluntas  
Christi in  
regendo  
appetitu  
se habue-  
rit.  
Responso.

Sed quares, an hujusmodi actus appetitus fuerint semper in Christo perfecti ex positivo consensu, & motione voluntatis, an vero interdum fuerint prævisi, & permisi. Respondetur, sæpe fuisse Christum usum priori modo positivæ motionis, ut constat ex illo Joan. 11. *Turbavit semetipsum*, ut ibi notarunt Chrysost. homil. 62. Cyril. lib. 7. in Joan. c. 20. August. tract. 49. Theophyl. Euthy. &c. & fortasse fere semper hoc modo operatus est, quia, & perfectior est, & illi facillimus. Quamquam in rigore non sit necessarius, ut illi motus seu effectus dicantur voluntarii, & ex ratione perfecti, absque ullo defectu virtutis, satis enim esse potuisset, ut, præeunte advertentia rationis, portio superior permitteret inferiori operari, quæ illius sunt propria, ut loquitur Damasc. lib. 3. c. 15. & 20. ut enim q. 14. dicebamus, naturales Christi facultates non impeditur, & habentes applicata objecta, naturaliter operantur, ut si flagellabatur, naturaliter dolebat, &c.

Passiones  
sensibiles  
an fuerint  
in Chri-  
sto.

Et ex his facile definitur illa quæstio, an in Christo fuerint passiones sensibiles: si enim sit sermo de re ipsa, constat, in illo fuisse affectus, qui in nobis dicuntur passiones, quia hi affectus, seu passiones in nobis nihil aliud sunt, quàm prædicti actus appetitus sensitivi, quatenus sunt cum corporis motione, & alteratione. Constat etiam non habuisse hos actus cum illis imperfectionibus, quæ in nobis sunt, & perfectio statui virtutis repugnant: quia in nobis & præveniunt rationem, & illam interim perturbant, & ad peccatum inclinant, quæ omnia in Christo non fuerunt. Si autem sermo sit de modo loquendi, an scilicet, isti affectus in Christo simpliciter vocandi sint passiones, D. Th. hoc art. 4. ita loqui videtur; ideo enim simpliciter concedit, Christum fuisse passibilem passione animali, quomodo etiam loqui videtur Cyril. lib. 10. Thes. c. 3. & Ambros. lib. 2. de Fide c. 3. Damasc. lib. 3. c. 20. imo etiam in VI. Synod. act. 4. & 11. videtur sæpe usurpari hæc locutio. Et ratio esse potest, quia hi affectus non dicuntur passio-

nes, eo quod præveniant rationem, aut propter aliquam imperfectionem virtutis, sed quia fiunt cum motione, & alteratione corporis, quem effectum habent, etiam si maxime moderati, & rationabiles sint: & ita illum habuerunt in Christo, quia ille est naturalis modus operandi horum affectuum, & nullam habet indecentiam, præsertim in corpore passibili. Quæ omnia sunt sine dubio vera, & inter sapientes possumus sine scrupulo ita loqui. Nihilominus tamen Hier. Matt. 5. & 26. & tom. 1. epist. 22. ad Eustoch. de Custod. virg. refugit in Christo admittere nomen passionum simpliciter dictum, quia nomen illud videtur frequentius in malam partem usurpari, & effrænem quandam ac inordinatam concupiscentiam significare: & ideo ipse *propassiones* vocat, qui loquendi modus propter majorem reverentiam Christo debitus, non displicet. Objectiones vero, quæ hic occurrere poterant, attingemus sectione seq.

## SECTIO II.

*An in appetitu sensitivo Christi fuerit fomes peccati.*

**R**atio dubitandi est, quia hic fomes nihil aliud est, quam naturalis inclinatio ipsius appetitus sensitivi ad objecta sensibilia: sed in Christo non potuit esse hic appetitus sine hac inclinatione, quia est illi intrinseca, & essentialis; ergo nec sine fomite. Major constat, quia hic fomes non est aliquis habitus, ut constat: neque actus, quia infans, cum primum concipitur, habet fomitem, antequam habeat ullum actum. Et similiter homo, dum dormit, habet fomitem, etiam si nihil operetur: ergo non potest esse aliud, quam ipsa inclinatio appetitus, quæ indifferenter fertur ad sensibilia, sive illa contra rationem sint, sive non. Propter hæc Durand. in 3. dist. 3. q. 3. negat fieri posse, ut, manente appetitu sensitivo, non sit fomes, sed tantum, ut ligetur, vel impediatur. Unde fit, ut consequenter concedere cogatur, fomitem, & fuisse in Christo, & nunc esse, & a fortiori fuisse in Adamo in statu innocentiae, & futurum esse in corporibus resurgentium; quamquam non audeat Durandus talem loquendi modum simpliciter concedere, est enim revera falsus, & absurdus, ex illo enim ulterius sequitur, fomitem non esse in nobis effectum originalis peccati, sed ipsam naturam appetitus sensitivi. Sequitur etiam, non manere in baptizatis ad agonem, sed quia nulla ratione separari ab illis potuit, manente appetitu: quæ omnia aliena sunt a sensu, & doctrina Conciliorum, SS. Patrum, & Theologorum, ut constat ex materia de peccato originali, & ex Concil. Trid. sess. 5. in Decr. de peccato originali. Propter quæ dixerunt aliqui, fomitem esse morbidam quandam qualitatem, additam appetitui, quæ manat ex originali peccato, & auget inclinationem appetitus ad sensibilia, & quasi fovet ejus concupiscentiam: quo posito, facile intelligitur, Christum caruisse fomite, si caruit hac qualitate. Sed hæc sententia antiquata jam est, & ab omnibus Theologis, qui bene sentiunt, rejecta. Est enim improbabile, hujusmodi qualitatem fingere, quæ intelligi non potest, quid sit, nisi fortasse aliquis vitiosus habitus, qui non potest cum anima ipsa concreari; oportere enim ab ipso Deo infundi, quia aliunde originem trahere non potest, cum neque ab ipsa anima naturaliter manet, hoc enim etiam in injuriam ipsius auctoris naturæ redundaret, nec possit a peccato Adæ, quod jam diu præterit, physice produci. De qua re latius in Prima secundæ. Advertendum igitur est, quod supra dixi, fomitem dupliciter posse considerari, scilicet, in actu primo, vel secundo: in actu secundo est actualis motio, seu vitalis & sensibilis affectio ipsius appetitus ad objectum sensibile rationi contrarium, ipsam rationem præveniens, & ad peccatum trahens. In actu autem primo dicit quidem naturalem inclinationem appetitus, neque solam omnino, neque morbidæ qualitati subjectam, sed ut conjunctam privationi illius rectitudinis, & debiti ordinis ac subjectionis, quam per originalem justitiam in statu innocentiae habebat ad rationem superiorem: unde fomes significat ipsum appetitum expeditum, & quasi proxime dispositum, ut prævenire possit rationem, & contra illam moveri,

Dico ergo primo, in Christo Domino non fuisse fomitem



tem quoad actum secundum. Hæc conclusio certa est, in qua omnes Theologi sine dubitatione conveniunt, & satis patet ex testimoniis citatis sect. præcedenti: præter quæ, videri potest Cyril. lib. 3. in Levit. circa med. Et ratio est evidens ex dictis, quia ostensum est, nullum motum appetitus fuisse in Christo, nisi voluntarium: si ergo talis motus esset de objecto pravo, esset peccatum; sicut ergo in Christo non fuit peccatum, ita neque esse potuit motus appetitus, inclinans ad peccandum.

**Objec. 1.** Ex qua ratione solvitur objectio, quæ hic fieri solet, scilicet, oportuisse Christum esse tentatum omnibus modis, ut omnibus esset exemplo: sed unus modus tentationis, & maximus, est per huiusmodi motus concupiscentiæ, & fomitis. Cui objectioni D. Th. infra respondet q. 41. art. 1. ad tertium, hoc genus tentationis nunquam esse sine peccato, saltem veniali, & ideo non potuisset in Christo, quem oportuit, quidem esse *tentatum per omnia pro similitudine, absque peccato tamen*, ut dicitur ad Hebr. 4. Quæ responsio intelligenda videtur, juxta rationem factam, non enim universe in omnibus hominibus hi tentationum motus semper sunt venialia peccata; possunt enim interdum esse omnino involuntarii, & tantum motus, qui primo primi appellantur, in quibus nec moralis malitia est, nec ratio culpæ: in Christo autem, qui poterat omnes hos motus prævenire, & cohibere, aliqualis culpa esset, illos in se permittere. Adde præterea, hos motus per sese indecentes esse, quia turpes & ad peccatum inclinantes, unde & modesti homines erubescunt, cum illos patiuntur: & ideo omnino alienus a Christo fuit huiusmodi tentationis modus, qui per interiorem suggestionem esse dicitur, ut recte docuit Greg. 3. Mor. c. 20. & Abul. Matth. 4. 20. Unde ad objectionem responderetur, ad exemplum nostrum non oportuisse, Christum hoc genus tentationis in se suscipere: tum quia erat indecens, & cum peccato conjunctum: tum etiam, quia, cum sit internum & occultum, non potuit per illius victoriam convenienter dari nobis exemplum vincendi tēationes: tum denique quia, superando tentationes externas, & patienter sustinendo injurias, ignominias, & dolores, ac denique purissimam, ac sanctissimam vitam ducendo, perfectissimum, ac sufficientissimum exemplum nobis tribuit ad quascumque tentationes superandas.

**Objec. 2.** Sed contra, nam Cyril. lib. 10. Thesauri c. 3. dicit, in Christo fuisse commotas passiones appetitus, non ut illum superarent, sed ut vincerentur virtute inhabitantis Verbi. Ubi ergo necessaria fuit victoria, supponitur pugna: ergo fomes seu affectio contra rationem. Confirmatur primo, nam Christus præter visibiles dæmonis tentationes, passus est alias invisibiles, ut Beda sentit Marc. 1. & D. Th. infra q. 41. art. 3. ad 2. sed invisibiles tentationes non sunt, nisi internæ per motionem fomitis. Confirmatur secundo, nam Christus per appetitum sensitivum appetebat non mori, quod erat contra rationem, & præceptum Dei: ergo per appetitum suum inclinabatur ad malum, & consequenter retardabatur ab honesto exequendo: ergo erat in illo pugna, quæ ad actum fomitis pertinet. Respondetur, Cyrillum aperte loqui de naturalibus, & innoxiiis affectibus, ut sunt tristitia, vel timor mortis: dicit autem, Christum vicisse has passiones, vel quoad nos, quia sicut morte sua destruxit mortem nostram, ita timore suo meruit nobis fortitudinem, ad mortem pro virtute obeundam, & sic de aliis: vel quoad seipsum, quia ita in se admisit hos effectus, ut summa voluntate eos superaverit, nihilque illis ab implenda Patris voluntate retardatus sit: illos ergo vincere fuit, ita illos permittere, ac moderari, ut naturæ affectum ostenderent, & tamen neque ad malum inclinarent, neque a bono retraherent. Ad primam confirmationem respondetur, non vocari ab illis Patribus invisibiles tentationes eas, quæ mere interius excitantur in imaginatione, vel appetitu: non enim permixtum est dæmoni hoc modo Christi potentias attingere, seu excitare: dicuntur ergo tentationes invisibiles illæ, in quibus tentator non apparet visibiliter, quamvis per externa signa terrere, aut perturbare tentet. De quibus adhuc incertum est, an in Christo fuerint; quod attingemus infra quæst. 41.

**De fuga, & horrore mortis in appetitu Christi.** Ad secundam confirmationem respondetur, horrere, ac fugere mortem, quatenus malum naturæ est, per displicentiam & fugam naturalem, non esse malum: quia illud objectum ut sic, secundum rectam rationem formi-

tabile est, & actus ille conformis est inclinationi naturæ, quæ bona est: præsertim quia, cum ille actus non sit omnino absolutus, sed simplex affectus, cum illo simul esse potest actus appetendi, & aggrediendi mortem, obediendo superiori rationi, hoc præcipienti: quo sensu August. lib. 10. confessionum c. 28. de poenis loquens dixit: *Tolerare eas jubet, non amare, nemo autem, quod tolerat, amat, quamvis tolerare amat*. Deinde huiusmodi affectus non fuit in Christo involuntarius, sed prudenter admissus ex dictamine rationis superioris, & ita nullam habebat rationem fomitis, nec speciale ingerebat difficultatem voluntati Christi, præter eam, quæ intrinseca erat objecto talis virtutis. Tum quia, ut dictum est, ipsemet affectus huiusmodi ex Christi voluntate pendeat, & solum explicabat propensionem naturæ: tum etiam, quia virtus, & efficacia rationis tanta erat in Christo, ut non posset commoveri, nec retardari a quovis simplici affectu inferioris appetitus.

Dices. Ergo idemmet appetitus sensitivus Christi, & refugiebat mortem ex impetu naturæ, & appetebat illam ex imperio voluntatis: quæ duo videntur repugnare in appetitu sensitivo, qui non videtur capax actus conditionati, sicut voluntas: videtur enim pendere ex quadam collatione, & discursu. Respondetur, revera ita esse, & illos actus non esse repugnantes, quia unus est tanquam appetitio efficax, movens efficaciter ad opus, alius vero solum per modum simplicis complacentiæ, seu displicentiæ: quia non tendit in objectum absolute, & simpliciter consideratum, ut hic & nunc exequendum vel fugiendum, pensata omni ratione boni & mali, quam habet, sed tantum consideratum secundum aliquam rationem boni, aut mali præcise sumptam, ac si esset sola, & ab aliis disjuncta. Et ideo dicitur ille actus conditionatus, quia virtute includit conditionem, & per eam explicatur, quamvis formaliter illam conditionalem propositionem non includat: quem modum appetendi etiam in brutis interdum videre licet, appetunt enim aliquod objectum, & metu continentur, ne ad illud moveantur, quod est signum, illum esse appetitum simplicem, & inefficacem.

Dico secundo non fuisse in Christo fomitem, etiam quoad actum primum. Hic est sensus D. Thomæ hic, & aliorum Theologorum in 3. dist. 15. qui etiam in Beatissima Virgine dicunt, fuisse extinctum fomitem, saltem a tempore Incarnationis, & loquuntur de actu primo: nam actum secundum, seu motum fomitis nunquam omnino habuit. Et probari potest hæc conclusio ex supradictis inter referendam Durandi opinionem: & explicatur tandem, hoc fuisse possibile, quia fomes dicit appetitum, non utcumque, sed proxime dispositum, & expeditum, atque adeo sibi relictum, ut possit exire in actum contra rationem, & inclinare ad peccatum: potest autem manere appetitus sensitivus, & non ita dispositus, sed quasi correctus omnino, & frænatus; ergo potest in illo ratio fomitis extingui. Quod autem, si hoc est possibile, ita factum fuerit in Christo, nullus dubitare potest: tum quia in Christo non fuit origo fomitis, quæ est originale peccatum, & cum aliàs ad peccatum inclinet, non decuit Christum: tum etiam quia Christus venit, ut nos liberaret a lege peccati, & fomitis, ad Rom. & 8. ad Galat. 3. & 4. ad hunc autem finem non fuit expediens, ut ipse subderetur legi fomitis, sed potius, ut omnino esset a peccatoribus segregatus. Quod si inquiratur, per quid fomes in Christo fuerit extinctus, jam hoc fere explicatum est circa art. 2. D. Thomæ. Primum enim supponuntur perfectissimi habitus virtutum moderantium appetitum. Deinde erat ratio perpetuo vigilans, & potens prævenire objecta omnia, quæ appetitum aut excitare possunt, aut movere. Præterea voluntas habebat perfectum dominium super omnes potentias suas, vel propter unionem ad Verbum, vel propter perfectissimam gratiam, & virtutem animæ beatæ, quæ suo arbitrio potest inferiores potentias per superiores gubernare.

Sed quæritur tandem potest, an de potentia absoluta potuerit Christus fomitem assumere. Videtur enim, in hoc nullam esse apertam repugnantiam, sicut supra in similibus dubiis de errore & habitibus vitiorum diximus. Proprie tamen loquendo de fomite, prout dicit actum ita inordinatum, ut sine peccato voluntarie haberi non possit, probabilius existimo, non potuisse assumi talem

Objec. 3.

Respon.

Fomes nullo modo potuit assumi a Christo etiam quoad actum primum.



actum, quia est per se indecens: nec potest ulla esse ratio honesta ad illum admittendum in propria natura, cum tamen, ut supra dictum est, ad suppositum naturæ pertineat, similes indecentes motus impedire in propria natura, si potest. At vero de aliis imperfectionibus seu defectibus, qui non sunt ita cum culpa conjuncti, facilius admitti potest potuisse assumi de potentia absoluta, etiam si de facto propter maiorem assumpti non sint: ut v. g. quod appetitus inferior, saltem ad objectum bonum potuerit interdum moveri præveniendi rationem, vel aliquid huiusmodi.

### SECTIO III.

*An in Christo fuerint omnes actus, seu passiones appetitus sensitivi.*

**D**Ivus Thomas in 1. 2. agens de his passionibus a q. 22. usque ad 48. ad undecim capita eas revocat, quæ sunt amor, concupiscentia, delectatio, odium, fuga, tristitia, spes, audacia, desperatio, timor, & ira. De his ergo undecim affectibus generatim quærimus, an omnes in Christo fuerint, non vero de omnibus speciebus, quæ sub singulis eorum contineri possunt. Constat enim, non assumptisse Christum omnes species amoris, vel doloris sensibilis, quoniam aliquis amor potest esse malus, & aliquis dolor, v. g. ex ægitudine corporis profectus, non decebat Christum: & idem est de cæteris actibus, quorum objecta vel erant a Christo aliena, vel nunquam illi oblata sunt, neque enim necessarium erat, ut omnia objecta sensibilia caderent sub sensu ejus. Quæstio igitur, ut dixi, esse potest de illis undecim affectibus, quam tractat D. Th. ab art. 5. usque ad 9. in quibus tamen solum de tribus affectibus disputat, scilicet, de dolore, & tristitia, quos duos actus sub eadem ratione complexus est in 1. 2. quia uterque est de malo præsentis apprehensus, vel sola imaginatione, vel etiam sensu externo, ut hic docuit etiam S. Thomas ex August. 14. de Civit. c. 7. & 15. Secundo agit de timore, & de admiratione, quæ, ut videbimus, ad timorem, vel concupiscentiam revocatur. Et tertio agit de ira, isti enim tres affectus potissimum includere videntur defectum aliquem: & quoniam hic D. Th. agit de defectibus, de illis specialiter disputat: alios vero prætermisit, quia per se nullum defectum includere, aut præsupponere videntur. Sed ad materiæ complementum discurrere breviter per singulos.

Primo ergo certum videtur, fuisse in Christi appetitu amorem sensibilem, quia hic actus est maxime connaturalis huic appetitui, & per se versatur circa bonum & conveniens, & est fundamentum aliorum actuum, & per se nullam requirit imperfectionem, unde & in statu beatitudinis reperitur. Quis enim dubitat, in sensibilibus corporibus Beatorum futurum esse nexum, & vinculum amoris sensibilis? aut quis potest cogitare, quin Christus Dominus, tum in terra, tum etiam nunc in cælo, summo affectu sensibili matrem suam dilexerit, sicut ab illa dilectus est? Et quoniam contrariorum eadem est ratio, hinc facile constat, etiam actum odii in appetitu Christi esse potuisse: versatur enim circa malum naturæ, aut bono amato contrarium; qui autem ad unum terminum accedit, necesse est, ut ab alio contrario termino recedat. Et eadem rationes ad hunc actum applicari possunt, quia nullum defectum vel imperfectionem importat.

Secundo, certum est, fuisse in Christo actum desiderii, seu concupiscentiæ sanctæ & honestæ: hic enim actus versatur circa bonum amatum, quod absens est, & tendit ad illud inquirendum, & obtinendum: unde tam honestus, & conformis rationi esse potest, sicut ipse amor. Solum supponit quandam imperfectionem, scilicet carentiam boni amati; hæc autem habere potuit locum in Christo, etiam respectu sui corporis in statu vitæ passibilis, ut per se constat: respectu vero aliorum, quibus etiam desiderare potuit sensibilia bona, facile etiam constat potuisse in eis cognoscere indigentiam seu carentiam talium bonorum. Et hinc facile etiam colligitur, fugam mali contrarii bono amato & desiderato facile in appetitu Christi esse potuisse, est enim eadem ratio.

Tertio certum est, actum delectationis seu voluptatis sensibilis interdum in appetitu Christi esse potuisse: hæc enim interdum necessario, ac naturaliter sequitur ex aliquibus objectis, & non est per se mala, sed sæpe est honesta, ut quando ad conservationem corporis necessaria est, vel ex actibus honestis resultat: unde & in statu beatitudinis erit sine dubio hic actus, & in statu vitæ reperitur sæpe in rebus spiritualibus, & divinis, juxta illud: *Cor meum, & caro mea exultaverunt in Deum vivum.*

Quarto, de spe dubitari potest, quatenus versatur circa bonum arduum consequendum, quia Christo Domino nullius boni consecutio sibi convenientis videtur ardua fuisse, propter eximiam ejus potentiam. Sed dicendum sine dubio est, etiam hunc actum habuisse locum in Christo, quia respectu naturalium virium suæ humanitatis, sæpe potuit illi esse ardua, & difficilis consecutio alicujus boni; ut constat de ipsa gloria corporis, quam per labores & passionem obtenturus erat. Spes vero sensibilis, de qua loquimur, cum naturalis sit, tendit in bonum & consecutionem ejus prout naturalibus viribus commensurata. Unde fit etiam, ut circa aliquod bonum sensibile, vel circa malum vitandum potuerit esse in appetitu Christi desperatio, quia potuit apprehendi ut insuperabile per vires naturæ, ut constat de ipsa morte vitanda; qui actus videtur quidem supponere aliquem defectum, sed est idem cum defectu timoris, de quo statim dicemus.

Quinto de actu audaciæ nulla est difficultas, quin potuerit esse in Christo in statu vitæ passibilis: hoc enim actu aggredimur pericula propter vitandum malum, vel consequendum bonum: Christus autem in maximis periculis vitæ, & honoris versatus est, & ideo, supposito illo statu, hic actus audaciæ prudenter elicitus ad perfectionem & fortitudinem ejus pertinuit. De his ergo actibus nulla est difficultas. De aliis vero dicemus, sequentes articulos D. Thomæ explicantes.

### ARTICULUS V.

*Utrum in Christo fuerit dolor sensibilis.*

**A**D quintum sic proceditur. Videtur, quod in Christo non fuerit verus dolor sensibilis. Dicit enim Hilarius in 10. de Trinit. Cum pro Christo mori sit vita, quid ipse in mortis sacramento doluisse existimandus est, qui pro se morientibus vitam rependit? Et infra dicitur, *Unigenitus Deus hominem verum, non deficiens a se Deo sumptus: in quem quamvis aut ictus incideret, aut vulnus descenderet, aut nodi concurrerent, aut suspensio elevarer, afferrent quidem hæc impetum passionis, non tamen dolorem passionis inferrent, ut telum aliquod aquam perforans. Non igitur in Christo fuit verus dolor.*

2. Præterea. Hoc proprium videtur esse carni in peccato conceptæ, quod necessitati doloris subiaceat. Sed caro Christi non est cum peccato concepta, sed ex Spiritu sancto in utero virginali. Non ergo subjacuit necessitati patiendi dolorem.

3. Præterea. Delectatio contemplationis divinorum, diminuit sensum doloris: unde & martyres in passionibus suis tolerabilius sustinuerunt, ex consideratione divini amoris. Sed anima Christi summe delectabatur in contemplatione Dei, quem per essentiam videbat, ut supra dictum est. Non ergo poterat sentire aliquem dolorem.

Sed contra est, quod Isai. 53. dicitur; Vere languores nostros ipse tulit, & dolores nostros ipse portavit.

a. Respondeo dicendum, quod (sicut patet ex his, quæ in secunda Parte dicta sunt) ad veritatem doloris sensibilis requiritur læsio corporis & sensus læsionis. Corpus autem Christi lædi poterat, quia erat passibile, & mortale, ut supra habitum est. Nec defuit ei sensus læsionis, cum anima Christi perfecte haberet omnes potentias naturales. Unde nulli dubium debet esse, quin in Christo fuerit verus dolor.

b. Ad primum ergo dicendum, quod in omnibus illis verbis & similibus, Hilarius a carne Christi non veritatem doloris, sed necessitatem excludere intendit. Unde post præmissa verba subdit. Neque enim tum, cum sitiivit, aut esurivit, aut fleuit, bibisse Dominum, aut manducasse, aut doluisse monstratus est: sed ad demonstrandam corporis veritatem, corporis consuetudo suscepta est, ita ut natura nostra consuetudine, consuetudini sit corporis satisfactum, vel, cum potum & cibum accepit, non se necessitati corporis, sed consuetudini tribuit. Quia non accepit necessitatem per comparisonem ad causam primam horum defectuum, quæ est peccatum, ut supra dictum est: ut, scilicet, ea ratione dicatur caro Christi non subjacuisse necessitati defectuum, quia non fuit in ea peccatum.

94.  
Inf. q. 46.  
a. 6. c. Et. 3.  
d. 15. q. 2.  
a. 3. q. 1. Et  
verit. q. 26  
a. 8. corp.  
fin. & 8. c.  
239.  
Hilar. lib.  
10. in 2. fo.  
a. princ.  
lib.  
Lib. 10. de  
Trin. ante  
med. lib.

Quæst. 9.  
art. 2.

Part. 2. q.  
35.

Quæst. 14.  
art. 1.

Loco citato in  
argum.

Quæst. 14.  
a. 2. & 3.  
ad a.



lib. 10. de Trinit. ante med. illius.

*tum. Unde subdit \*. Habuit enim, scilicet, Christus, corpus, sed originis sue proprium, neque ex vitiis humane conceptionis existens, sed in formam corporis nostris, virtutis sue potestate subsistens. Quantum tamen ad causam propinquam horum defectuum, quæ est compositio contrariorum, caro Christi subjacuit necessitati horum defectuum, ut supra dictum est\*.*

Quæst. 14. art. 2.

*Ad secundum dicendum, quod caro in peccato concepta subjacet dolori, non solum ex necessitate naturalium principiorum, sed etiam ex necessitate reatus peccati. Quæ quidem necessitas in Christo non fuit, sed solum necessitas naturalium principiorum.*

Quæst. 14. art. 2.

*Ad tertium dicendum, quod, sicut supra dictum est \*, virtute Divinitatis Christi, dispensative sic beatitudo in anima continebatur, quod non derivabatur ad corpus, ne ejus passibilitas & mortalitas tolleretur. Et eadem ratione delectatio contemplationis sic retinebatur in mente, quod non derivabatur ad vires sensibiles, ne per hoc dolor sensibilis excluderetur.*

## COMMENTARIUS.

UT declaret D. Thom. in Christo fuisse dolorem sensibilem, advertit, ad hujusmodi dolorem duo requiri, scilicet, læsionem corporis, & sensum doloris: quæ duo in Christo esse potuerunt, cum & habuerit corpus passibile, & animam perfectissime sentientem. Considerandum vero est, non asserere D. Thom. in illis duobus dolorem formaliter consistere, sed requiri ad verum dolorem, ita ut, illis positis naturaliter resultet, nisi miraculose impediatur. Læsiō enim corporis habet rationem objecti respectu doloris, quia, vel ipsa læsiō, vel aliqua qualitas disconveniens corpori, quæ per illam resultat, est objectum, circa quod dolor versatur: sensus vero læsionis est veluti applicatio objecti doloriferi, ex qua dolor in appetitu resultat, sicut in universum, cognitio objecti prosequendi, vel fugiendi per appetitum, est applicatio seu conditio necessaria, ut appetitus moveri possit. Dolor ergo formaliter consistit in quodam actu ipsius appetitus, quo veluti contristatur, & fugit corporis læsionem, sensu perceptam. Sicut ergo in Christo fuit vera læsiō corporis, & verus sensus læsionis, ita & verus dolor. Quæ conclusio de fide certa est, ut constat ex modo loquendi Scripturæ, & communi sensu totius Ecclesiæ. Isai. 53. Vere dolores nostros ipse tulit. Et Ps. 87. Repleta est malis anima mea. Ubi Augustinus: Non vitiis, sed humanis malis, id est, doloribus. Et plura alia ex Scriptura, Conciliis, & Patribus supra q. 14. adduximus, quibus ostendimus, Christum habuisse corpus vere passibile, & in eo vere pro nobis passum esse: vera autem passio talis corporis non est sine vero dolore. Unde etiam ex fine Incarnationis hoc confirmari potest, quia hic affectus est maxime pœnalis, & ab omni culpa alienus, & ideo accommodatissimus est ad satisfaciendum pro culpis. Quin potius infra, agentes de passione Christi, ostendemus cum D. Thoma, hunc dolorem in Christo fuisse maximum, seu acerbissimum.

In argumento primo objicit D. Thomas testimonium Hilarii lib. 10. de Trinit. parum a principio, & circa medium. Qui disertis fere verbis videtur negare Christum passum esse verum sensibilem dolorem, & eodem modo loquitur Canone 31. in Matth. & super Psalm. 53. & 68. propter quæ Claudius Viennensis lib. 2. de statu animæ c. 11. in 6. tom. Bibliot. Sanct. dicit, Hilarium revera in ea sententia fuisse, & Bonav. in 3. dist. 16. art. 1. q. 1. ad 1. sentit, Hilarium in dictis locis errasse, postea vero sententiam retractasse. Dicit enim, se audivisse Guilielmum Parisiensem referentem, se vidisse, & legisse librum Hilarii, in quo illam sententiam retractavit; quamquam ipse Bonaventura in hac solutione non persistat, sed alias assignet. Et mihi quidem incredibile est, Hilarium lapsum esse in hunc errorem, primo, quia a nullo antiquorum Patrum de hac re notatur, cum ad fundamenta nostræ fidei valde pertineat. Quin potius Hieronym. tom. 1. ep. 7. ad Latam: Libros, inquit, Hilarii inoffenso decurrat peccato: illorum tractatibus, illorum delectetur ingenis, in quorum libris pietas fidei non vacillet. Et 3. tom. epist. 141. ad Marcellam de expositione Psalm. 126. dicit, se non audere reprehendere tantum virum, suis temporibus eruditissimum. Secundo, quia aliis locis idem Hilarius tam vere & proprie tribuit Christo hos affectus, famem, sitim, &c. sicut crucifixionem, & mortem: ut in dicto Psalm. 53.

Suarez Tom. XVI.

circa medium, sic inquit. Ex communi infirmitate nostra salutem est deprecatus a Patre, ut intelligeremus, naturam nostram cum ipsis infirmitatibus nostræ officii illis inesse. Hinc illud est, quod esurivit, dormivit, lassatus fuit, moestus fuit, & flevit, & passus, & mortuus est. Et similia multa ibidem subiungit, & fere similia habet lib. 3. de Trin. col. 3. Natus, inquit, ex Virgine a cunis, atque infantia usque ad consummatum virum venerat, per somnum, famem, sitim, lassitudinem, lacrymas, hominem egerat: etiamnum conspuendus, flagellandus, crucifigendus erat. Propterea ergo merito D. Th. hic sentit, Hilarium minime errasse, & ideo illius dicta interpretatur. Quod etiam faciunt alii Doctores cum Magistro in 3. dist. 16. Alexand. Alen. 3. p. q. 17. memb. 1. Primo ergo intendit Hilarius, Christum ita passum esse, ut tamen Verbum ipsum dolores, & similes affectus non senserit, cujus contrarium Ariani sentiebant, contra quos Hilarius libros de Trinitate conscripsit. Quæ expositio est Bonaven. & aliorum, & fundari potest in verbis ejusdem Hilarii lib. 10. de Trinit. ubi de Ariani sic inquit: Quia ex nullis Filium creatum esse dicunt, ideo in eo doloris anxietatem, ideo ipsius passionem cum corporis passione ponunt. Et Psal. 63. circa fin. cum dixisset, passionem fuisse a Christo assumptam, subdit: Officio quidem ipsa satisfactura pœnali, non tamen pœne sensu læsura patientem: non quod illa non habuerit ledendi naturam, pro ipsius passionis qualitate, sed quod dolorem divinitatis natura non sensit. Et eundem sensum prosequitur Psalm. 138. in princ. & lib. de Synodis in duodecimo Canone ex Conc. Sardicensi.

Secundo hinc ulterius voluit docere Hilarius, ut hic D. Th. exponit, in Christo non fuisse necessitatem illam subjacendi doloribus, contractam ex peccato, quæ in nobis est: sed potius ratione unionis illi fuisse debitum, & quasi connaturale, ne dolores sustineret, quamquam voluntarie illos assumpserit. Unde nunquam negat Hilarius, in Christo fuisse dolorem, sed naturam doloris, id est, ex conditione sua subjectam dolori. Quod ita esse constat ex illo lib. 10. de Trinit. a colum. 12. usque ad 22. ubi inter alia dicit in Christo fuisse affectiones sitis, famis, &c. Ita tamen inquit, ut passionum non conficeretur injuriis. Quod exponens, addit: Quia flens, non sibi flebat, &c. Et infra: Non se necessitati corporis, sed consuetudini tribuit, habebat enim corpus, sed originis sue proprium, & non ex vitiis humane conceptionis existens. Et propterea ibidem dicit, Christum habuisse corpus talis conditionis, ut calcare posset aquas, & ingredi clausis januis, & ut posset non dolere: quæ omnia dicuntur de illo corpore ratione unionis, non secundum intrinsecam, & naturalem ejus constitutionem. Quod clarius exponens idem Hilarius Psal. 68. dicit, infirmitates nostras fuisse in Christo, non naturales, sed assumptas. Et in principio Ps. ita loquitur: Universarum humanarum passionum sorte perfunctus secundum infirmitatem nostram loquitur, & dolet ipse quidem; extra necessitatem tamen & timoris positus, & doloris, sed iis tantum quæ suscepit, se accommodas. Et circa illa verba: Super dolorem vulnerum meorum addiderunt: iterum repetit, Christum doluisse. Quod autem de vero dolore loquatur, atque adeo, quod non neget eam necessitatem dolendi, quæ ex dispositione corporis passibilis oritur, sed eam tantum, quæ est ex peccato, constat ex principio ejusdem Ps. ubi sic ait. Infirmitatem nostram suscipiens, portansque peccata, se somno & lassitudini sepe commisit, etiam usque ad sitis, & esuritionis necessitatem. Præter hæc vero etiam interdum voluit docere Hilarius, Christum non fuisse perturbatum his passionibus, ut art. 7. iterum dicitur.

Juxta hæc vero, quæ de Hilario diximus, exponenda sunt obscura verba Clementis Alexandrini li. 6. Stromat. fol. 134. aliàs pag. 301. ubi inquit, ridiculum esse existimare corpus Christi indignum cibo & potu, ut permaneret: Sancta enim, inquit, virtute continebatur, & tantum comedebat, ne phantasticum putaretur; ipse autem, ut semel dicam, impatibilis erat, quem nullus subiit motus affectionis, nec voluptatis, nec doloris. Quæ verba (si pie exponenda sunt, sensum habere debent: Christi corpus divina virtute, & ratione unionis potuisse conservari sine cibo & potu: usum tamen illis fuisse ad veritatem corporis comprobendam. Et simili modo potuisse ratione unionis esse omni passione liberum, voluntarie tamen illas assumpsisse: vel certe vocat impatibilem, eo sensu



sumpta passione, quo significare solet affectionem sensibilem prævenientem rationem: in sequentibus enim dicit participasse hanc Christi impatibilitatem, & nos debere illam imitari.

## ARTICULUS VI.

*Utrum in Christo fuerit tristitia.*

**A**D sextum sic proceditur. Videtur, quod in Christo non fuerit tristitia. Dicitur enim de Christo Isai. 42. *Non erit tristis, nec turbulens.*  
 2. Præterea. Proverb. 12. dicitur. *Non contristabit iustum, quicquid ei acciderit.* Et hujus rationem Stoici assignabant, quia nullus tristatur, nisi de amissione suorum bonorum: iustus autem non reputat bona sua, nisi iustitiam & virtutem, quas non potest amittere, alioquin subiceretur iustus fortune, si pro amissione bonorum fortuna illaretur. Sed Christus fuit maxime iustus, secundum illud Hier. 23. *Hoc est nomen, quod vocabunt eum, Dominus iustus noster.* Ergo in eo non fuit tristitia.

3. Præterea. Philos. dicitur in 7. *Ethic. quod omnis tristitia est malum, & fugiendum.* Sed nullum malum fugiendum fuit in Christo. Ergo in Christo non fuit tristitia.

4. Præterea. Sicut August. dicit 14. de Civitate Dei, *tristitia est de his, quæ nobis nolentibus, accidunt.* Sed nihil passus est Christus contra suam voluntatem: dicitur enim Isai. 53. *Oblatus est, quia ipse voluit.* Non ergo in Christo fuit tristitia.

Sed contra est, quod dicit Dominus Matth. 26. *Tristis est anima mea usque ad mortem.* Et Ambr. dicit in 3. de Trinit. *† Ut homo tristitiam habuit, suscepit enim tristitiam meam, confiderit tristitiam nomino, qui crucem prædico.*

Respondendo dicendum, quod, sicut dictum est\*, delectatio divina contemplationis ita per dispensationem divinæ virtutis retinebatur in mente Christi, quod non derivabatur ad vires sensitivas, ut per hoc dolor sensibilis excluderetur. Sicut autem dolor sensibilis est in appetitu sensitivo, ita & tristitia. Sed differentia secundum motum ita obiectum: nam obiectum & motum doloris, est læsio sensu tactus percepta: sicut, cum aliquis vulneratur. Obiectum autem & motum tristitiæ, est nocivum seu malum interius apprehensum, sive per rationem, sive per imaginationem (ut in secunda Parte habitum est) sicut, cum aliquis tristatur de amissione gratiæ, vel pecuniæ. Potuit autem anima Christi interius apprehendere aliquid ut nocivum, & quantum ad se, sicut passio & mors ejus fuit: & quantum ad alios, sicut peccatum discipulorum, vel etiam Judæorum occidentium ipsum. Et ideo, sicut in Christo potuit esse verus dolor, ita potuit in eo esse vera tristitia, alio tamen modo, quam in nobis secundum illa tria, quæ supra assignata sunt\*, cum communiter de passionibus anime Christi loqueremur.

Ad primum ergo dicendum, quod tristitia removeretur a Christo secundum passionem perfectam, fuit tamen in eo initiata secundum propensionem. Unde dicitur Matth. 26. *Copit contristari & mæstus esse.* Aliud enim est contristari, aliud incipere contristari, ut Hieronym. ibidem dicit.

Ad secundum dicendum, quod sicut August. dicit in 14. de Civitate Dei, pro tribus perturbationibus, scilicet, cupiditate, letitia, & timore, Stoici tres\* eupatias, id est, bonas passiones in animo sapientis posuerunt, scilicet, pro cupiditate voluptatem, pro letitia gaudium, pro metu cautionem: sed pro tristitia negaverunt esse posse aliquid in animo sapientis, quia tristitia de malo est, quod jam acciderit: nullum autem malum existimant posse accidere sapienti. Et hoc ideo est, quia non credebant, aliquid esse bonum nisi honestum, quod homines bonos facit: nec aliquid esse malum nisi inhonestum, per quod homines mali fiunt. Quamvis autem honestum sit principale hominis bonum, & inhonestum principale hominis malum (quia hæc pertinent ad ipsam rationem, quæ est principalis in homine) sunt tamen quedam secundaria hominis bona, quæ pertinent ad ipsum corpus, vel ad exteriores res corpori deservientes. Et secundum hoc potest in animo sapientis esse tristitia, quantum ad appetitum sensitivum, secundum apprehensionem hujusmodi malorum: non tamen ita, quod ista tristitia perturbet rationem. Et secundum hoc etiam intelligitur, quod non contristabit iustum, quicquid ei acciderit: quia, scilicet, ex nullo accidente ejus ratio perturbatur.

*batur. Et secundum hoc tristitia fuit in Christo secundum propensionem, non autem secundum passionem.*

Ad tertium dicendum, quod omnis tristitia est malum pænæ, non autem est semper malum culpe, sed solum quando ex inordinato affectu procedit. Unde Aug. dicit 14. de Civit. Dei. *Cum rectam rationem sequuntur ista affectiones, & quando, & ubi oportet, adhibentur, quis eas tunc morbidas seu vitiosas passiones audeat dicere?*

Ad quartum dicendum, quod nihil prohibet, aliquid esse contrarium voluntati secundum se, quod tamen est volitum ratione finis, ad quem ordinatur: sicut medicina amara non est secundum se voluta, sed solum secundum quod ordinatur ad sanitatem. Et hoc modo mors Christi, & ejus passio secundum se considerata fuit involuntaria, & tristitiam causans, licet fuerit voluntaria in ordine ad finem, qui est redemptio humani generis.

## COMMENTARIUS.

**S**ensus quæstionis est de tristitia sensibili, de his enim affectibus nunc agimus, ut dictum est, & aperte D. Th. explicat in corpore articuli. Qui respondet, in Christo fuisse hanc tristitiam, cujus assertio de fide certa est ex Matthæi 26. & Luc. 22. & ex dictis in art. præcedenti. Eam vero optime declarat D. Th. ex duobus, primum, quia in Christo potuit esse obiectum hujus tristitiæ, sicut est obiectum doloris: hoc enim obiectum est malum aliquod sensibile, quod licet realiter corpus non lædat, neque exteriori sensui sentiat (hoc enim ad dolorem spectat) sensui tamen interno, seu imaginatione, ut præfens apprehenditur: in Christo autem esse potuit apprehensio hujus mali, ut mortis, aut injuriarum, vel peccatorum ipsorum hominum, &c. potuit ergo esse tristitia sensibilis, quæ ex tali obiecto naturaliter sequitur in appetitu, si modo sibi connaturali permittatur operari. Quia vero non satis est ad habendam tristitiam representatio obiecti, nisi etiam appetitus careat dispositione contraria, & repugnante ipsi tristitiæ, qualis esse posset magna delectatio; ideo addit secundo D. Th. divina dispensatione factum esse, ut talis dispositio non esset in appetitu Christi. Quamquam enim ex divina contemplatione, quæ erat in anima Christi, redundare posset hæc delectatio in appetitum sensitivum, divina tamen virtute impedita est, ne dolorem, vel tristitiam sensibilem impediret: quam doctrinam docuerat D. Th. art. præc. ad tertium, solvens difficultatem, quomodo anima Christi beatam, fuerit capax doloris, & tristitiæ. Circa quam doctrinam supererat difficultas, quia ex illa videtur sequi, in voluntate Christi nullam fuisse tristitiam, quia in illa fuit summum gaudium ex divina contemplatione & visione manans. Sequela patet, quia, si appetitus sensitivus privatus est delectatione, quæ in ipsum derivari posset in fruitione beata, ne fieret incapax tristitiæ: ergo voluntas, in qua per se primo fuit gaudium illud beatificum, per illud effecta est omnino incapax tristitiæ. Respondeo D. Th. hoc loco ea tantum docuisse, quæ ad præsentem difficultatem solvendam sufficiebant, & assignasse modum, quo evidentius constare poterat appetitum sensitivum Christi fuisse capax tristitiæ: an vero alio modo potuerit voluntas esse capax tristitiæ simul cum gaudio, D. Th. hoc loco, nec negavit, nec asseruit, quia ad rem non spectabat. Adde D. Th. non tantum voluisse ostendere appetitum sensitivum Christi fuisse capax tristitiæ secundum quid, seu secundum aliquam rationem; sed absolute, & simpliciter ita potuisse tristitiam pati, ut omnis delectationis & voluptatis expers aliquando fuerit. Quod in voluntate locum habere non potuit, quia, licet secundum aliquam rationem potuerit tristari, tamen, quia secundum potentior, seu superiorem rationem semper fuit beata, non potuit omni gaudio privari; appetitus autem sensitivus simpliciter fuit in statu passibili, & caruit statu beatifico, & ideo fuit capax talis tristitiæ, quæ omnem voluptatem excluderet. Cætera, quæ ad hanc difficultatem pertinent, tractabimus infra q. 18.

In solutione ad primum explicat D. Th. illud Isai. 42. ubi de Christo dicitur: *Non erit tristis, neque turbulentus;* Ubi Septuaginta legunt: *Splendebit & non coneretur.* Quod de Christi Resurrectione dictum esse constat ex Hieron. Cyril. & aliis, qui eam lectionem ibi interpretantur: & ex eodem Hieron. tom. 3. ep. 151. ad Algasiam q. 2. & Aug. l. 20. de Civit. c. ult. & l. de unit. Eccles. c. 7. Christus enim, licet occisus fuerit, non tamen fuit contritus, & quasi

Lib. 14. c. 9  
ante med.  
tom. 13.

Titulus  
articuli.

Responsio.

Obiectio.

Responsio.

95.  
Infr. q. 46.  
a. 2. & 3. d.  
15. q. 2. a. 1.  
q. 3. c. & ad  
5. Et opus  
3. c. 23.

Lib. 7. Eth.  
c. 13. & 14.  
tom. 5.

Lib. 14. c. 6  
in medio  
tom. 5.

Lib. 2. de  
fide ad  
Grat. c. 7.  
post. med.  
tom. 2.  
Art. præc.  
ad 3.

Part. 2. q.  
35. art. 2.

Art. 4. hujus  
quæst.

Hierony.  
in Matth.  
26. tom. 9  
Aug. l. 14  
cap. 8. in  
princ. t. 5.



& quasi in nihilum redactus, sed statim amplius per Resurrectionem splenduit. Quod verbum in Hebræo per negationem legitur, & ad literam verti potest: *Non fumigabit*. Quo verbo intelligi potest, significatum esse, ita fuisse Christum hominem per mortem extinguendum, ut tamen fumigaturus non esset, sed statim per Resurrectionem fuisse accendendum, ut singularem splendorem emitteret. Sequendo vero vulgatam lectionem, verbum illud: *Non erit tristis*, exponendum est illo Proverbiorum 12. *Iustus, quidquid ei acciderit, non contristabitur eum*. Non enim est sensus, nullam tristitiam illum esse sensurum, hoc enim ad iustitiam non pertinet: sed quod tristitia non dominabitur ei, nec pacem, vel tranquillitatem animæ ejus immutabit, ut Hieronymi ibi exponit. Et hæc sufficiunt etiam de solutionibus ad 2. & 3. Quod vero in solutione ad quartum D. Th. attigit, quomodo aliquod malum potuerit esse Christo involuntarium, ut inde tristitia oriretur, tractabitur latius q. 18. nunc satis est, potuisse accidere Christo aliquod malum contra naturalem effectum appetitus, ut inde tristitia, de qua loquimur, nasci potuerit.

## ARTICULUS VII.

*Utrum in Christo fuerit timor.*

96.  
Sup. 7. a.  
6. Et 3. d.  
15. q. 2. a. 2.  
9. 3

**A**D septimum sic proceditur. Videtur, quod in Christo non fuerit timor. Dicitur enim Proverb. 28. *Iustus quasi leo confidens, absque terrore erit. Sed Christus fuit maxime iustus. Ergo in Christo non fuit aliquis timor.*

Lib. 10. in  
2. fo. 2  
princ. lib.

2. Præterea. Hilarius dicit. 10. de Trinitat. \* Interrogo eos, qui hoc ita existimant, an ratione subsistat, ut mori timerent, qui omnem ab Apostolis mortis timorem expellens, ad gloriam eos sit martyrii adhortatus. Non ergo in Christo rationale videtur, fuisse timorem.

3. Præterea. Timor non videtur esse nisi de malo, quod non potest homo vitare. Sed Christus poterat vitare, & malum poena, quod passus est, & malum culpæ, quod aliis accidit. Ergo in Christo non fuit aliquis timor.

Sed contra est, quod dicitur Marc. 14. *Cæpit Jesus pavere & tedere.*

a Respondeo dicendum, quod sicut tristitia causatur ex apprehensione mali præsentis, ita timor causatur ex apprehensione mali futuri. Apprehensio autem mali futuri, si omnimodam certitudinem habeat, non inducit timorem: unde Philosophus dicit in 2. Rhetor. \* quod timor non est, nisi ubi est aliqua spes evadendi. Nam, quando nulla spes est evadendi, apprehenditur malum ut præsens, & sic magis causat tristitiam, quam timorem.

b Sic ergo timor potest considerari, quantum ad duo. Uno modo, quantum ad hoc, quod appetitus sensitivus naturaliter refugit corporis lationem: & per tristitiam, si sit præsens, & per timorem, si sit futura. Et hoc modo timor fuit in Christo, sicut & tristitia. Alio modo potest considerari secundum incertitudinem futuri eventus: sicut, quando nocte timemus ex aliquo sonitu, quasi ignorantes, quid hoc sit. Et quantum ad hoc timor non fuit in Christo, ut Damasc. 1. dicit in 3. lib.

Ad primum ergo dicendum, quod iustus dicitur esse absque terrore, secundum quod terror importat perfectam passionem, advertentem hominem ab eo, quod est rationis. Et sic timor non fuit in Christo, sed solum secundum propensionem. Et ideo dicitur, quod Jesus cæpit tedere & pavere, quasi secundum propensionem, ut Hier. exponit.

Ad secundum dicendum, quod Hilarius eo modo a Christo excludit timorem, quo excludit tristitiam, scilicet, quoad necessitatem timendi. Sed tamen, ad comprobendam veritatem humanæ naturæ, voluntarie timorem assumpsit, sicut etiam & tristitiam.

Ad tertium dicendum, quod licet Christus potuerit vitare mala futura secundum virtutem divinitatis, erant tamen inevitabilia, vel non facili vitabilia, secundum infirmitatem carnis.

## COMMENTARIUS.

Obiectio ex D. Th. & Arist.

**R**esolutio D. Thomæ subobscura est, vix enim colligi ex litera potest, quid simpliciter affirmet, vel neget: nam in principio articuli cum Aristotele docet, de ratione timoris esse incertitudinem futuri mali: deinde vero subdit, in Christo non fuisse timorem secundum incertitudinem futuri eventus, ex quo videtur absolute sequi, in

Suarez Tom. XVI.

Christo non fuisse timorem. Addit vero nihilominus, in Christo fuisse timorem quoad fugam mali futuri, quam fugam a tristitia distinguit, quæ est de malo præsentis: in quo significat, illam esse verum timorem, quamvis hoc videatur principio articuli repugnare.

b Dicendum tamen est, simpliciter & absolute in Christo fuisse verum & proprium sensibilem timorem: & hanc existimo esse mentem D. Th. hic, & communem sententiam Theologorum in 3. dist. 15. quæ satis convincitur ex illo Marc. 14. *Cæpit pavere, & tedere.* Quod cum proprietate intelligendum est, & maxime potest esse verum de timore sensibili præsertim, cum statim addatur: *Spiritus quidem promptus est, caro autem infirma.* Quod vero cum proprietate hoc sit intelligendum, constat ex generali regula exponendi Scripturam proprie, & præsertim in historiæ narratione, ubi maxime servari solet verborum proprietates, cum hoc sine incommodo fieri possit: alias nihil firmum aut certum esse posset in his, quæ de passionibus Christi narrantur, ut recte dixit August. circa illud Ps. 93. *Quoadusque iustitia convertatur in iudicium.* Et ideo sancti Patres ita de hoc timore Christi senserunt, ut constat ex Cyril. lib. 4. in Joan. c. 1. cum enim dixisset, Verbum nihil timere, subdit: *Caro autem factum permittit carni suæ, ut propria pariat: & ideo tanquam verus homo mortem in januis existentem pertimebat.* Idem fere Chrysost. hom. 14. in Matth. & Damasc. lib. 3. de fide c. 23. referens Athanasium, qui hoc habet lib. de Incarn. idem Leo Pap. ser. 7. de passione Domini, & Cyr. ser. de passio. Ambr. lib. 2. de fide c. 3. Ratio vero est, quia hic affectus est naturalis homini passibili, cui imminet aliquod malum, & est innoxius, & poenalis, & accommodatus ad varietatem naturæ, & poenæ demonstrandam: non est ergo, cur assumi non potuerit, & debuerit.

Ad objectionem autem factam ex corpore articuli D. Th. respondet Cajet. aliud esse loqui de Christo simpliciter, aliud vero secundum quid, id est, secundum inferiorem portionem, in Christo enim simpliciter non potuit esse incertitudo futuri eventus, quia saltem per rationem superiorem omnia sciebat: tamen in parte inferiori, seu cogitativa potuit esse apprehensio mali futuri, abstrahendo ab hac certitudine, quia potuit ratio superior non communicare illam inferiori: & ita, licet in Christo simpliciter & absolute non potuerit esse timor, quo ad incertitudinem eventus: tamen in portione inferiori Christi potuit esse huiusmodi timor, quod satis est, ut in eo fuerit verus timor sensibilis: quam sententiam videtur prius docuisse Richard. in 3. dist. 15. a. 3. q. 4. ad 4. Sed hæc responsio in primis aliena est a sensu D. Th. aperte enim hic loquitur de appetitu sensitivo, ut patet, tum ex art. 4. & sequentibus, tum quia expresse in litera ita dicit. *Timor potest considerari quantum ad duo, uno modo quantum ad hoc, quod appetitus sensitivus naturaliter refugit corporis lationem, &c.* Unde in utroque membro suæ distinctionis evidenter loquitur de Christo secundum eandem rationem, & potentiam. Deinde hi authores videntur supponere, in Christi voluntate non esse timorem, sed tantum in appetitu sensitivo, quod falsum esse ostendat infra q. 18. Quod si fortasse in ipsa voluntate distinguant portionem superiorem, & inferiorem: & in hac dicant fuisse timorem, non in illa, redit eadem difficultas, quia voluntas non movetur nisi a iudicio intellectus, in intellectu autem Christi nullum fuit iudicium nisi certum, & infallibile, ut supra ostendi: cum ergo iudicabat, mortem sibi imminere, iudicium illud erat omnino certum, præsertim, quia ex scientia infusa procedebat. Unde fit tertio, etiam in cogitativa facultate animæ Christi non satis intelligi illam apprehensionem mali futuri, cum abstractione a certitudine, quia cogitativa non apprehendebat, vel iudicabat de futuro malo, nisi ex communicatione & consortio intellectus: sed, ut ex dictis patet, illa cognitio existens in cogitativa oriri non poterat, nisi ex certo iudicio intellectus; ergo non poterat esse nisi certa eo modo, quo hæc inferior potentia participare potest certitudinem, seu apprehendere objectum ut certum & infallibile. Et confirmatur, nam, sicut Aristot. dixit secundo Rhetoric. c. 5. timorem esse de malo incerto, ita dixit, non posse esse timorem, nisi ubi potest esse evadendi spes: sed non potuit Christus, etiam per appetitum sensitivum, habere spem evadendi mortem; ergo nec potuit habere illum timorem, qui cum incertitudine futuri eventus conjunctus est.



Vera res  
sponsio,  
quid sit de  
ratione  
timoris.

Respondetur ergo aliter, negando, hanc incertitudinem mali futuri, seu spem evadendi, esse de ratione omnis timoris veri: fuga enim mali absentis, seu nondum in re ipsa existentis, aliquando tamē futuri, est verus timor, etiam si illud malū evitari non possit: hoc enim non minuit rationem mali, sed potius auget: unde ex hac parte non impedit timorem, sed constituit potius quendam specialem gradum ejus, quem videntur vocasse stuporem Damasc. lib. 2. de Fide c. 15. & Gregor. Nyssen. lib. 4. Philos. c. 4. Neque obstat, quod tale malum propter suam certitudinem existimetur ut præsens, & jam ingerat tristitiam: quia, cum re ipsa sit absens, adhuc relinquit locum aliquem timori, cum quo illa tristitia conjuncta esse potest, imo quodammodo in illa fundari. Quod videtur satis posse suaderi argumento a contrario sumpto, contrariorum enim est eadem proportionalis ratio: constat autem, bonum futurum, etiam si omnino certum seu inamissibile apprehendatur, non ideo excludere spem, ut aperte constat in animabus Purgatorii, in quibus vera est spes consequendi beatitudinem, quia nondum illam consecutur sunt, quamvis certissime cognoscant, se illam consecuturas, absque ullo impedimento. Ex qua certitudine & spe consequitur in illis magna consolatio, & gaudium, & excluditur omnis timor amittendi illam beatitudinem: ergo idem proportionaliter dicendum est de timore, nam sicut se habet spes ad futurum bonum arduum, ita timor ad malum.

Duplex  
actus timoris.

Ad explicandam vero sententiam Aristotelis, quem D. Th. est secutus, distinguere possumus actum timoris, sicut alios actus appetitus. Dupliciter enim haberi potest. Primo per modum actus absoluti, & efficacis. Secundo per modum cujusdam actus imperfecti, seu simplicis displicentiae, quæ nolleitas dici solet. Quando priori modo fit, requirit, ut malum futurum apprehendatur ut evitabile, & consequenter, ut aliquam spem evadendi relinquat: quia talis actus efficax versatur circa objectum, quod, pensatis omnibus, simpliciter existimatur possibile. De hoc ergo timoris modo locutus est Aristoteles, ut colligi potest ex ratione, quam subiungit, dicens: *Timor enim ad consulendum inducit, nemo autem de re consulit, de qua nulla est spes.* Et quia hic timor supponit ignorantiam mali futuri, ideo vocat illum Damascen. *aratione aversum*, & negat, illum in Christo fuisse: & eundem vocat D. Thom. timorem secundum incertitudinem futuri eventus. At vero alter timor per modum actus simplicis & imperfecti, potest esse circa malum, judicatum inevitabile: quia hujusmodi actus imperfectus versari potest circa rem impossibilem: sicut enim potest quis desiderare vitam actu imperfecto, etiam si aliās judicet, non posse hic, & nunc fugere mortem: ita potest fugere, vel formidare mortem, etiam si illam ut inevitabilem apprehendat. Et hic timor fuit in Christo, quem Damasc. lib. 3. c. 23. dicit esse naturalem, quia est quasi coarctans, & retrahens animum a naturali incommodo, & oritur ex concupiscentia commodi naturalis: hunc etiam vocavit D. Thomas *simplicem fugam mali futuri*, quam sentit esse verum, ac proprium timorem, & affectionem ab odio, & tristitia distinctam.

Primum argumentum D. Th. facile est. De testimonio vero Hieronymi ibi citato dicemus statim.

Secundum argumentum sumptum est ex testimonio Hilarii 10. de Trinit. col. 6. cujus verba D. Th. refert, & similia habet Canone 31. in Matth. quem imitatus Hieronymus Matth. 26. negare videtur, Christum habuisse timorem patiendi. *Ad hoc enim*, inquit, *venerat, & Petrum timiditatis arguerat.* Et similiter August. enarrat. 2. in Ps. 21. indicat, verba illa: *Transseat a me calix iste*, non fuisse indicium timoris, *quia non est*, inquit, *fortior miles, quam dux.* Denique Epiphani. in Anchorato, significat, Christum non vere timuisse, sed dissimulasse fortitudinem ad provocandum adversarium. Respondetur primum, Hilarium eo sensu locutum esse de timore Christi, sicut de tristitia. Ita respondet D. Th. Addo tamen, Hieronymum & Hilarium aperte posuisse timorem in Christo, sed de objecto illius timoris videntur illis locis disputare, & singulari modo sentire: indicant enim, illum timorem non fuisse de malo, seu incommodo naturæ, quod est in morte, atque adeo non fuisse naturalem affectum timoris, sed potius fuisse profectum ex charitate ad populum Judaicum, & objectum illius fuisse ruinam, &

destructionem illius populi, futuram ex occasione mortis Christi: & eodem fere modo loquitur Hieronym. de tristitia Christi, & ponderat, non dixisse Evangelistam, Christum fuisse contristatum propter mortem, sed *usque ad mortem.* Quam sententiam indicat etiam Basil. lib. 4. contra Eunomium, sub finem. Sed, ut verum sit, potuisse Christum etiam hoc malum formidare, negandum tamen non est, quin etiam permiserit naturæ suæ, explicare suum bonum affectum, atque adeo timere mortem, ut erat malum naturæ, & naturali inclinationi contrarium, quod satis indicant illa verba Christi: *Transseat a me calix iste.* Illud enim verbum, *a me*, satis ostendit, eum formidasse, bibere illum calicem, ut erat malum suum. Quod enim Hilarius exponit, Christum non orasse, ut a se transiret calix, ita ut ipse non biberet: sed etiam, ut post illum alii sectatores ejus illum biberent, scilicet, martyres: hoc (inquam) mysticum potius est, quam literale, ut satis constat ex verbis a Christo subjunctis: *Si fieri non potest, nisi bibam illum, fiat voluntas tua.* Nec dissimile est, quod Hieronym. ait, Christum non orasse simpliciter, ut calix transiret, sed *calix iste*, id est, propinandus a Judæis: quod enim simpliciter formidaverit mortem, satis constat ex verbo illo: *Spiritus promptus est, caro autem infirma*, & ex Marco dicente, absolute orasse Christum, ut transiret ab illo hora: timuit ergo Christus mortem, non quidem ex absoluta voluntate, & desiderio non moriendi, voluntarie enim passus est, atque in ea voluntate fortior fuit omnibus martyribus: sed ex rationabili voluntate, qua permittebat naturæ suæ, ut affectum suum ostenderet, ad naturæ veritatem, & passionis acerbiter demonstrandam: & hoc vocavit Epiphanius, *dissimulare fortitudinem*, non fingendo falsum, sed occultando dæmoni veram fortitudinem, & divinitatem, sub vera humanitate latentem, & ideo dixit August. citato loco, portasse tunc Christum infirmitatem nostram: & ideo super Ps. 93. dicit, tunc dedisse Christum futuris Sanctis exemplum patientiæ, cum orant, & petunt liberari a malis, & tribulationibus suis, & non exaudiuntur. Addit præterea Cyril. lib. 10. Theol. c. 3. Christum illo suo timore fortitudinem martyribus meruisse. De qua re optime loquitur Damasc. lib. 3. de Fide c. 18. Bernard. serm. 1. de S. Andrea.

Tertium argumentum D. Thomæ est, quia timor est de malo, quod facile vitari non potest; Christus autem facile poterat omne malum suæ naturæ superare, ad quam rationem alludens supra Hilarius inquit; *Quem dolorem mortis sua timeret, potestatis suæ libertate moriturus?* Respondet optime D. Th. Christum per inferiores vires naturæ suæ non potuisse facile vitare futura mala, & hoc satis fuisse, ut per appetitum sensitivum timere posset. Secundo addi potest, non satis esse, posse vitari malum, nisi honeste id fieri possit, & convenienti ratione: propter quod martyres poterant quidem vitare mortem consentiendo tyrannis, non tamen sancte & honeste: unde etiam fit, nihil referre illam potestatem ad excludendum timorem, si quis habeat firmum propositum non utendi tali potestate: & ideo fieri recte potest, ut quis voluntarie assumat aliquod malum, vel dolorem, & tamen, quod per appetitum sensitivum illud fugiat, & timeat, ut ipsa experientia satis compertum est. Notavit hoc Richard. in 3. dist. 15. art. 4. q. 3. ad 4.

Malum facile, sed non honeste vitabile, objectum timoris esse potest.

## A R T I C U L U S VIII.

Utrum in Christo fuerit admiratio.

**A**D octavum sic proceditur. Videtur, quod in Christo non fuerit admiratio. Dicit enim Philosophus in primo Metaphysic: *\* quod admiratio causatur ex hoc, quod aliquis videt effectum, & ignorat causam. Et sic admiratio non est, nisi ignorantis. Sed in Christo non fuit ignorantia, ut dictum est. † Ergo in Christo non fuit admiratio.*  
2. Præterea. Damasc. dicit in 2. lib. *\* quod admiratio est timor ex magna imaginatione: & ideo Philosophus dicit in 4. Ethic. \* quod magnanimus non est admirativus. Sed Christus fuit maxime magnanimus. Ergo in Christo non fuit admiratio.*

3. Præterea. Nullus admiratur de eo, quod ipse facere potest. Sed Christus facere poterat quidquid magnum erat in rebus. Ergo videtur, quod de nullo admirabatur.

Sed contra est, quod dicitur Matth. 8. Audiens Jesus (scilicet verba Centurionis) miratus est.

90.  
43. c. 6.  
33. fin. &  
Mat. 7.  
col. 5. fin.  
L. b. 1.  
Met. c. 2.  
in med.  
tom. 3.  
Art. 3. In-  
jos quæst.  
Lib. 2. c. 15.  
Lib. 4. eth.  
3. decl. ad  
fin. tom. 2.

Re-



Respondeo dicendum, quod admiratio proprie est de aliquo novo, & insolito. In Christo autem non poterat esse aliquid novum, & insolitum, quantum ad scientiam divinam, qua cognoscebat res in Verbo: neque etiam quantum ad scientiam humanam, qua cognoscebat res per species inditas: potuit tamen aliquid esse sibi novum, & insolitum secundum scientiam experimentalem, secundum quam, sibi poterant quotidie aliqua nova concurrere.

Et ideo, si loquamur de ipso, quantum ad scientiam divinam, & scientiam beatam, vel etiam infusam, non fuit in Christo admiratio. Si autem loquamur de eo, quantum ad scientiam experimentalem, sic admiratio in eo esse potuit. Et assumpsit hunc defectum ad nostram instructionem, ut, scilicet doceat esse mirandum, quod etiam ipse mirabatur. Unde dicit Augustinus in primo super Genes. \* contra Manicheos. Quod mirabatur Dominus, nobis mirandum esse significat: quibus ad hoc opus est sic moveri. Omnes ergo tales motus ejus non perturbati animi signa sunt, sed docentis magistri.

Ad primum ergo dicendum, quod, licet Christus nihil ignoraret, poterat tamen aliquid de novo occurrere experimentali ejus scientie, ex quo admiratio causaretur.

Ad secundum dicendum, quod Christus non admirabatur de fide Centurionis, ea ratione, quod esset magna quantum ad ipsum, sed quia erat magna quantum ad alios.

Ad tertium dicendum, quod ipse poterat facere omnia secundum virtutem divinam secundum quam in eo admiratio non erat, sed solum secundum humanam scientiam experimentalem, ut dictum est\*.

## COMMENTARIUS.

Uo sunt in hoc articulo difficultia. Primum est, an propria, & vera admiratio sit in Christo ponenda. Secundo, esto illa fuerit in Christo, an illa pertineat ad appetitum sentientem, de cujus actibus nunc disputamus. Ratio prioris difficultatis est, quam hic tetigit D. Th. argumento 1. quia admiratio ex ignorantia procedit: est enim admiratio, ut idem D. Th. dicit 1. q. 32. art. 8. desiderium sciendi, ortum ex visione effectus, & ignorantia causae, quod ex Arist. etiam colligitur 1. Metaphy. c. 2. sed in Christo non habuit locum ignorantia: ergo nec admiratio. Et augetur difficultas, quia nulla est ratio, seu fundamentum sufficiens, ut affectum hunc Christo tribuamus: quia, licet semel in Evangelio dicatur Matth. 8. & Lucæ 7. *Et miratus est Jesus*, non constat autem, an id dictum sit, quia in se passus est aliquem admirationis affectum, an vero, quia signis ostendit, fidem illam Centurionis fuisse hominibus admirandam: in hunc enim sensum videtur interpretari locum illum August. lib. 1. de Genes. contra Manich. c. 8. & lib. 1. contra adversar. legis & Prophet. c. 7. & lib. 22. contra Faust. c. 13. quem imitati sunt Ansel. Matth. 8. & Bed. lib. 2. in Matth. c. 8. & lib. 2. in Luc. c. 15. Alii vero Patres nihil fere dicunt, nam Chrysostom. homil. 27. in Matth. & Hilar. can. 7. tantum simpliciter dicunt, Christum fuisse miratum.

Nihilominus responsio D. Thom. est, in Christo fuisse proprie admirationem, quia secundum scientiam experimentalem potuit illi occurrere aliquid novum, & insolitum, ex quo propria admiratio nascitur. Quod confirmat, quia hic affectus Christi potuit ad nostram instructionem deservire: & ita explicat Augustinum supra citatum. Nam licet dicat, Christum fuisse admiratum propter nostram instructionem, non tamen dicit fuisse admiratum, solum secundum speciem, & signa externa, sed vere: ita enim se gessit exterior, sicut interior erat dispositus per veram admirationem: *qua fuit*, inquit Aug. *motus animi Christi, non perturbati, sed voluntarie operantis propter nos*. Et confirmatur tandem ex illa generali regula, quia Verba Evangelii, si commode possunt, proprie sunt intelligenda, & facta Christi, non ficta, sed vere interpretanda. Et hanc sententiam ita expositam sectantur discipuli D. Th. & recentiores Evangelii expositores, ut Cajet. Jansen. & alii. Et mihi vera esse videtur.

Ut vero explicemus, & rationem D. Th. & modum hujus admirationis, & in quo ipsa consistat, advertendum est, admirationem aliquid in cognitione requirere, & aliquid in appetitu ponere. Sed quoniam varii sunt admirationis modi, ut Augustinus tractat epist. 101. non omnis admiratio eandem cognitionem supponit, neque eundem affectum importat. Primo ergo admiratio oritur interdum ex ignorantia causae, viso effectum, & consistit in

desiderio sciendi, ut supra objiciebam: & hæc admiratio non videtur posse tribui Christo, etiam secundum naturalem scientiam, quia, viso effectum, etiam per hanc scientiam cognoscebat omnes causas ejus, quantum per hanc scientiam cognosci possunt. Cum autem desiderium ejus ordinatum esset, non appetebat scire per hanc scientiam, nisi quod sub illam cadere potest. Dicere tamen forte quis potest, habere posse locum hanc admirationem respectu cognitionis experimentalis, potuit enim Christus interdum experiri effectum, & non causam, & desiderare experimento cognoscere causam ipsam. Sed hoc mihi non satis placet: tum quia causæ non cognoscuntur experimento distincto ab experientia effectuum, qui ab illis procedunt, sed ex hoc experimento ad scientiam proceditur: tum etiam quia admiratio Christi, præsertim illa, quam in Evangelio legimus, erat de effectum, cujus causa sub sensum experimento cadere non poterat, scilicet, de fide Centurionis. Secundo ergo admiratio oritur ex apprehensione rei magnæ, & singularis, etiam si aliàs cognita sit, ut August. supra dicit, & hæc requirit in intellectu judicium de rei magnitudine, vel simpliciter, vel in ordine ad aliquem: ut, cum admiramur scientiam pueri, quæ, licet in se magna non sit, est tamen magna, & insolita respectu illius ætatis. Præter hoc tamen necessarium est, ut res hujusmodi novo aliquo modo cognoscatur, aliàs non excitat admirationem, & propterea in Deo non habet locum admiratio: tum quia illi nihil est magnum, etiam in ordine ad alios, quia quidquid ab aliis fit, ab illo fit, & facile illi est, etiam per alios, magna operari: tum etiam, quia nihil novo modo cognoscit. In appetitu autem oritur ex hac cognitione affectus, qui admiratio dicitur: qui tamen non semper est ejusdem modi, sed accommodatur objecto. Nam si res illa, quæ magna æstimatur, sit bona & conveniens, oritur in appetitu complacentia quædam, & desiderium laudandi illam. Et de hoc genere admirationis dixit Arist. 4. Ethic. c. 3. magnanimum non esse proclivem ad admirationem, nec esse nimium in laudando, quia non facile æstimat aliquid esse magnum. Si vero res illa, quæ magna æstimatur, sit incommoda, & malum aliquod afferat, quod difficile vitari possit, infert genus quoddam timoris, quem Damasc. & Nyssen. supra terrorem, vel stuporem vocant, & in eo consistit tunc admiratio, ut notavit D. Th. 1. 2. q. 14. art. 4. & omnes hi modi admirationis potuerunt esse in Christo. Nam in illo esse potuit novus modus cognoscendi rem aliquam, quæ & magna æstimari potuit, vel simpliciter, vel sub aliquo respectu. Potuit etiam esse affectus consequens hanc cognitionem, & accommodatus rei cognitæ, ut patet ex iis, quæ de aliis actibus appetitus Christi dicta sunt; ergo. Tertio, addi potest alius modus admirationis ex D. Th. 1. 2. q. 41. art. 4. ad 4. & 5. Fieri enim potest, ut, licet effectus & causa cognoscantur, non tamen comprehendantur, nec perfecte videri possit modus emanationis a tali causa: ex hac cognitione oriri potest, aut complacentia in re cognita, si jucunda sit, aut timor quidam ferendi judicium, aut amplius perscrutandi rem illam. Et hic modus, cum non supponat ignoratiam, sed solum quandam cognitionem inferioris ordinis, seu minus perfectam, constat etiam potuisse habere locum in anima Christi, secundum aliquam rationem, seu inferiorem scientiam. Et ex his satis expedita est prima difficultas proposita.

Ad secundam etiam ex dictis facile respondetur, hunc affectum admirationis posse quidem ad voluntatem pertinere, tamen circa objectum proportionatum etiam posse in appetitu sensitivo reperiri, quia formaliter non consistit, nisi in aliquo affectu timoris, vel desiderii ut explicatum est. Supponit autem cognitionem, quæ non excedit ordinem cognitionis sensibilis, nam etiam potest cogitativa aliquem sensibilem effectum denuo apprehendere tanquam magnum & insolitum, in qua cognitione affectus admirationis fundatur.

## ARTICULUS IX.

Utrum in Christo fuerit ira.

Ad nonum sic proceditur. Videtur, quod in Christo non fuerit ira. Dicitur enim Jacob. 1. *Ira viri, justitiam Dei non operatur. Sed quicquid fuit in Christo,*

98.  
3. d. 15. q. 2  
art. 2. q. 2.

ad

Lib. 1. c. 8.  
non pro-  
cul. 2. sup.  
tom. 1.

In corp.  
ait.



ad iustitiam Dei pertinuit: ipse enim factus est nobis iustitia a Deo, ut dicitur 1. Corinth. 1. Ergo videtur, quod in Christo non fuerit ira.

2 Præterea. Ira in aeternitatem opponitur, ut patet in 4. Ethic. \* Sed Christus fuit maxime mansuetus. Ergo in eo non fuit ira.

3 Præterea. Gregor. dicit in 4. Moral. \* quod ira per vitium, excavat oculum mentis: ita vero per zelum, ipsum turbat. Sed in Christo mentis oculus non fuit excavatus, nec turbatus. Ergo in Christo non fuit, nec ira per vitium, nec ira per zelum.

Sed contra est, quod Joan. 2. de eo dicitur esse impletum, quod in Psalm. 68. legitur, Zelus domus tue comedit me.

Respondetur dicendum, quod sicut in secunda parte dictum est: \* ira est effectus tristitiae. Ex tristitia enim alicui illata consequitur in eo circa sensitivam partem appetitus repellendi illatam injuriam, vel sibi, vel aliis. Et sic ira est passio composita ex tristitia & appetitu vindictæ. Dictum est autem, \* quod in Christo tristitia esse potuit. Appetitus etiam vindictæ, quandoque est cum peccato, quando, scilicet, aliquis vindictam querit sibi absque ordine rationis, & sic ira in Christo esse non potuit, huiusmodi enim dicitur ira per vitium. Quandoque vero talis appetitus est sine peccato, imo est laudabilis: puta, cum aliquis appetit vindictam secundum ordinem iustitiæ, & hæc vocatur ira per zelum. Dicit enim August. super Joan. \* quod zelo domus Dei comeditur, qui omnia, quæ ibi perversa videt, satagit emendare, & si emendare non potest, tolerat & gemit. Et talis ira fuit Christo.

Ad primum ergo dicendum, quod sicut Gregor. dicit. 5. Moral. \* ira dupliciter se habet in homine. Quandoque enim prævenit rationem, & trahit eam secum ad operandum, & tunc proprie ira dicitur operari, nam operatio attribuitur principali agenti. Et secundum hoc intelligitur, quod ira viri iustitiam Dei non operatur. Quandoque vero ira sequitur ipsam rationem, & est quasi instrumentum ipsius, & tunc operatio, quæ est iustitiæ, non attribuitur ira, sed rationi.

Ad secundum dicendum, quod ira, quæ transgreditur ordinem rationis, opponitur mansuetudini, non autem ira, quæ est moderata, & ad modum reducta per rationem: nam mansuetudo medium tenet in ira.

Ad tertium dicendum, quod, in nobis secundum naturalem ordinem, potentie animæ mutuo se impediunt, ita, scilicet, quod, cum unius potentie operatio fuerit intensa, alterius operatio debilitetur. Et ex hoc procedit, quod motus ira, etiam si sit secundum rationem moderatus, utcumque impedit oculum animæ contemplantis. Sed in Christo per moderationem divine virtutis, unicuique potentie permettebatur agere, quod erat ei proprium, ita quod una potentia ex alia non impediatur. Et ideo, sicut delectatio mentis contemplantis non impediatur tristitia vel dolorem inferioris partis, ita etiam e converso passiones inferioris partis in nullo impediunt actum rationis.

#### COMMENTARIUS.

IN hoc articulo nulla est difficultas, certum est enim, quod D. Th. affirmat potuisse in Christo esse iustum iræ affectum, nam hic actus honestus esse potest, si sit, servato ordine iustitiæ & charitatis, & non excedit vires appetitus sensitivi: neque Christus aliqua alia ratione fuit incapax ejus, imo ut recte D. Th. ait, si Christus fuit capax tristitiæ, fuit etiam iræ, quæ est effectus tristitiæ. Et in hac doctrina consentiunt reliqui Theologi in 3. dist. 15. Bonavent. art. 2. q. 3. Richard. art. 3. q. 4. Durand. q. 2. & alii, & est omnino certa, quam etiam Sancti colligunt ex Joan. 2. ubi Christo accommodatur illud Psalm. 63. Zelus domus tue comedit me. Zelus enim proprie quantum ad pacem iræ significat. Unde Chrysostomus hom. 22. in Joan. dicit, Christum fuisse indignatum. Cyril. vero lib. 2. c. 28. dicit fuisse commotum, & non tantum verbis, sed etiam signis ostendisse, se indigne ferre. Aug. etiam enarrat. 2. in Psalm. 68. ita exponit: *Id est, non patienter tuli, quos sic corripui.* Verum est, hæc omnia potius intelligi de hoc affectu, prout esse potest in voluntate: concomitantem vero etiam de passione appetitus intelligi possunt, nam Christus operabatur modo humano in iis, quæ nec indecentiam, neque peccatum includunt, cuiusmodi, ut dixi, est hic affectus iræ. De quo Psalm. 4. dicitur: *irascimini, & nolite peccare,* ubi Basil. inquit, iram dicit utilem contra eos, qui iniuste agunt. Neque hic occurrit alia difficultas,

#### ARTICULUS X.

Utrum Christus simul fuerit viator, & comprehensor.

AD decimum sic proceditur. Videtur, quod Christus non fuerit simul viator & comprehensor. Viatori enim competit moveri ad finem beatitudinis, comprehensori autem competit in fine quiescere. Sed non potest eidem simul convenire, quod moveatur ad finem, & quod quiescat in fine. Ergo non potuit simul esse, quod Christus esset viator & comprehensor.

2 Præterea. Moveri ad beatitudinem, aut eam obtinere, non competit homini secundum corpus, sed secundum animam: unde Augustinus dicit in epist. \* ad Dioscorum, quod ad inferiorem naturam, quæ est corpus, redundat ab anima, non beatitudo, quæ propria est fruentis, & intelligentis, sed plenitudo sanitatis, id est, incorruptionis vigor. Sed Christus, licet haberet corpus possibile, tamen secundum mentem plene Deo fruebatur. Non igitur Christus fuit viator, sed purus comprehensor.

3 Præterea. Sancti, quorum anime sunt in celo, & corpora in sepulchris, fruuntur quidem beatitudine secundum animam, quamvis eorum corpora morti subiaceant: tamen non dicuntur viatores, sed solum comprehensores. Ergo per rationem, licet corpus Christi fuerit mortale, quia tamen mens ejus Deo fruebatur, videtur, quod fuerit purus comprehensor, & nullo modo viator.

Sed contra est, quod dicitur Hierem. 14. Quare colonus futurus es in terra, & quasi viator declinans ad manendum.

Respondetur dicendum, quod aliquis dicitur viator, ex eo quod tendit in beatitudinem: comprehensor autem dicitur ex hoc, quod jam beatitudinem obtinet, secundum illud 1. Corinth. 9. Sic currite, ut comprehendatis, & Phil. 3. Sequor autem, si quomodo comprehendam. Homini autem beatitudo perfecta consistit in anima, & corpore, ut in secunda Parte habitum est. In anima quidem, quantum ad id, quod est ei proprium secundum quod mens videt, & fruatur Deo. In corpore vero, secundum quod corpus resurget spirituale, & in virtute, & gloria, & in incorruptione: ut dicitur 1. Cor. 15. Christus autem ante passionem secundum mentem plene videbat Deum: & sic habebat beatitudinem, quantum ad id, quod est proprium animæ, sed quantum ad alia deerat ei beatitudo: quia & anima ejus erat passibilis & corpus passibile, & mortale, ut ex supra dictis patet. Et ideo simul erat comprehensor, in quantum habebat beatitudinem propriam animæ: & simul viator, in quantum tendebat in beatitudinem, secundum id quod ei de beatitudine deerat.

Ad primum ergo dicendum, impossibile est moveri ad finem, & quiescere in finem secundum idem. Sed secundum diversa nihil hoc prohibet: sicut aliquis homo simul est sciens, quantum ad ea, quæ jam novit: & addiscens, quantum ad ea, quæ nondum novit.

Ad secundum dicendum, quod beatitudo principaliter, & proprie consistit in anima, & secundum mentem: secundario tamen, & quasi instrumentaliter requiruntur ad beatitudinem corporis bona: sicut etiam Philosophus dicit 1. Ethic. \* quod exteriora bona organice deserviunt beatitudini.

Ad tertium dicendum, quod non est eadem ratio de animabus Sanctorum, & de Christo, propter duo. Primo quidem, quia anime Sanctorum non sunt passibiles, sicut fuit anima Christi. Secundo, quia corpora non agunt aliquid, per quod in beatitudinem tendant, sicut Christus secundum corporis passiones, in beatitudinem tendebat, quantum ad beatitudinem corporis.

#### COMMENTARIUS.

QUAMquam D. Thomas duo in hoc articulo completatur, quorum alterum, scilicet, esse comprehensorem, ad perfectionem pertinet; alterum vero, scilicet, esse viatorem, potius videtur supponere defectum, vel imperfectionem: tamen hoc posterius solum est, quod ad præsentem questionem attinet, ubi de defectibus agimus. Utramque vero conditionem conjunxit D. Thom. quia alterius difficultas ex altera nascitur.

Respondet ergo, Christum fuisse comprehensorem secundum animam; viatorem vero in quantum illi deerat corporis beatitudo. Circa quam veritatem nihil nobis disputan-

Li. 4. Eth.  
c. 5. tom. 5.  
Li. 5. mor.  
c. 33. no.  
procul  
prio.

Li. 2. q. 46.  
art. 3. ad 3.  
Et. 2. q. 1.  
157. a. 1. q. 1.  
c. 3. Es.  
Mal. q. 12.  
art. 1. & 2.  
a. 2. q. 46.  
art. 1. & art.  
3. ad 3.  
Art. 6. bu.  
jus quæst.  
Tract. 10.  
in Joan.  
super il.  
lud. Zelus  
domus  
tue co.  
medit me,  
tom. 9.

Li. 5. mor.  
cap. 31.

99.  
3. dist. 14.  
ar. 2. & d.  
18 ar. 2. Et  
ver. q. 26.  
ar. 10 & q.  
29. art. 6.  
Et quod li.  
11. q. 2. a. 1.  
Et omne.  
3. c. 238. &  
op. 1. 18.  
c. 7.  
Epist. 55.  
an. med.  
tom. 2.

1. 1. q. 2. 6.

Art. 4. bu.  
jus q. 1. q.  
14. art. 4.

Lib. 1. Eth.  
c. 8. circa  
fin. tom. 5.



sputandum superest. Quod enim Christi anima viderit Deum a principio suæ creationis, supra late ostendimus q. 10. quod autem Christi corpus fuerit passibile, & dotibus gloriæ caruerit, in q. 14. demonstratum est. Et ex his duobus constat fuisse comprehensorem, & viatorem. Infra etiam ostendimus, fuisse in statu merendi sibi, & aliis, quod est proprium munus viatoris. Cætera legantur in D. Th. nam litera ejus expositione non indiget. Solum in argumento sed contra, notetur testimonium Jeremiæ 14. *Quare colonus factus es in terra, & quasi viator declinans ad manendum?* In sensu enim omnino proprio, & literali non satis probat conclusionem: quia vel non est sermo de Christo Domino, sed de Deo, ut sic, qui per metaphoram colonus, vel viator dicitur, quatenus suum populum deserebat: vel certe, si de Christo intelligatur, ut Hieron. indicat, non est ibi sermo de viatore eo modo, quo Theologi loquuntur, sed in propria & communi significatione. Significat enim, ut dicit Hieron. Christum futurum fuisse peregrinum in terra, & parvo tempore terræ usum hospitio. Ex hoc vero sensu sumpserunt Theologi probabile argumentum, ille enim est viator in ordine ad meritum, qui hoc modo peregrinatur super terram, ut ad Hebr. 11. Paulus indicavit.

## Q U Æ S T I O XVI.

De consequentibus unionem, quantum ad ea quæ conveniunt Christo secundum esse & fieri, in duodecim articulos divisa.

**D**Einde considerandum est de his, quæ consequuntur unionem. Et primo, quantum ad ea, quæ conveniunt Christo secundum se. Secundo, de his, quæ conveniunt Christo per comparationem ad Deum Patrem. Tertio, de his, quæ conveniunt Christo per comparationem ad nos. Circa primum, duplex consideratio occurrit. Prima quidem de his, quæ conveniunt Christo secundum esse, & fieri. Secunda de his, quæ conveniunt Christo secundum rationem unitatis.

Circa primum queruntur duodecim.

Primo, utrum hæc sit vera, Deus est homo.

Secundo, utrum hæc sit vera, Homo est Deus.

Tertio, utrum Christus possit dici homo Dominicus.

Quarto, utrum ea, quæ conveniunt filio hominis, possint prædicari de Filio Dei, & e contrario.

Sexto, utrum hæc sit vera, Filius Dei factus est homo.

Septimo, utrum hæc sit vera, Homo factus est Deus.

Octavo, utrum hæc sit vera, Christus est creatura.

Nono, utrum hæc sit vera, Iste homo, demonstrato Christo, incepit esse vel fuerit semper.

Decimo, utrum hæc sit vera, Christus secundum quod homo, est creatura.

Undecimo, utrum hæc sit vera, Christus secundum quod homo, est Deus.

Duodecimo, utrum hæc sit vera, Christus secundum quod homo, est hypostasis, vel persona.

**T**Ractat D. Thom. in hac quæstione de modo vere & proprie, ac sine periculo erroris loquendi in hac materia, quod per duodecim articulos prosequitur, in quibus de variis locutionibus, seu propositionibus in particulari disputat. Ut autem, & doctrina ejus facilius intelligatur, & tota hæc doctrina ad certa aliqua principia seu capita redigatur, expediens visum est, disputationem quandam præmittere, in qua de communicatione idiomatum, & de generalibus regulis in ea servandis, disseramus. Illis enim cognitis, facile erit de singulis propositionibus judicare.

## DISPUTATIO XXXV.

In tres sectiones distributa.

De communicatione idiomatum.

**C**ommunicatio idiomatum vox est a Græcis Patribus desumpta, quæ Latine idem significat, quod proprietatem seu attributorum divinarum, & humanarum, inter Deum, & hominem mutua prædicatio: quia enim in hoc mysterio natura divina & humana in unam convenere personam, inde consequenter effectum est, ut di-

vina de homine, & humana de Deo prædicentur. De hac igitur idiomatum communicatione primo videndum est, quæ, & qualis sit. Deinde, quomodo sit exercenda.

## S E C T I O I.

*Quæ & qualis idiomatum communicatio ex mysterio Incarnationis consecuta sit.*

**H**Æretici sicut in fundamento, id est, in ipso mysterio explicando, errarunt, ita consequenter in communicatione idiomatum exponenda decepti sunt. Nestoriani enim negantes, veram & substantialem unionem inter Deum & humanam naturam factam esse, consequenter negarunt, veram & propriam communicationem idiomatum ex illa esse secutam: & ideo vel illam omnino rejiciebant, vel certe improprie, & abusive illam explicabant: a quibus non longe distant nonnulli scholastici, qui (ut Bonav. in 3. d. 7. art. 1. q. 1. & Scot. q. 1. referunt) dixerunt, Deum non proprie dici hominem in recto, sed in obliquo, ut ipsi agebant, id est, non est homo, sed habet hominem: quod est, re ipsa negare veram communicationem idiomatum, quia inde evidenter fit, non posse vere dici: *Deus est homo*, sicut non potest dici: *Deus est humanitas*, licet habeat humanitatem, neque homo potest dici vestis, licet habeat vestem. Si autem illud non vere dicitur, ruit tota communicatio idiomatum, quia in illa veritate fundatur. In quo male etiam audit Durand. sed quia ille, nec veritatem, nec proprietatem negat, commodius illius sententiam tractabimus, explicantes primum articulum D. Thom. Secundo Eutyches, & alii omnes, qui confundunt naturas, variis modis in hoc errare potuerunt, juxta diversos modos sentiendi in illo errore, ut facile ex iis, quæ supra q. 2. relata sunt, intelligi potest: & ideo inutile censeo in illis referendis immorari. Error vero hæreticorum hujus temporis prætermitti hoc loco non potest. Illi enim ita exponunt hanc communicationem idiomatum, ut consistere dicant in reali communicatione attributorum naturæ divinæ, facta humanæ naturæ: imo in hac dicunt consistere totum incarnationis mysterium. Unde inferunt per hanc communicationem, non solum prædicari divina attributa de homine, sed etiam de ipsa humanitate, quam vocant omnipotentem, omniscientem, omnipresentem, ut supra etiam q. 14. indicavimus. Non explicant autem hi hæretici, an hæc communicatio mutua sit, id est, an similiter proprietates humanitatis communicentur realiter naturæ divinæ, quamquam ex iis, quæ dicunt, potius hoc negare, quam affirmare videantur. Neque etiam satis explicant, qualis esse possit illa realis communicatio attributorum Dei ad humanam naturam.

Illis ergo omisissis, dico primo. Ex mysterio Incarnationis consecuta est vera, ac propria communicatio idiomatum inter Deum, & hominem. Hæc conclusio simpliciter loquendo, est de fide, ut docent omnes Theologi in 3. d. 4. & 7. & constat ex supra dictis de hoc mysterio, ostendimus enim, vere ac proprie Deum esse hominem factum, & unum & eundem esse Deum & hominem: & ex dicendis statim in conclusione tertia hoc amplius constabit.

Dico secundo. Hæc communicatio idiomatum non consistit in reali communicatione attributorum Divinitatis facta humanitati: unde multo minus mysterium ipsum Incarnationis potest in illa communicatione consistere. Hanc conclusionem etiam censeo esse de fide. Primo, quia vel hæc communicatio attributorum intelligitur esse per aliqua dona accidentalialia, vel quia ipsamet substantialia attributa Dei, per se formaliter communicantur humanitati. Si primum dicatur, primo incidit in errorem Nestorii, quia jam non ponitur substantialis, sed accidentalialis unio. Secundo falsum est dicere ipsamet attributa Dei vere prædicari de humanitate, quia non prædicabuntur, nisi participationes quædam illorum attributorum: nam per creatam participationem omnipotentia non potest vere dici humanitas omnipotens eo modo, quo Deus ipse omnipotens est, ut aperte constat, quia neque ab æquali perfectione sumpta erit illa denominatio. Et simile est de aliis attributis. Quocirca, quamvis secundum veram & Catholicam doctrinam ex unione substantiali humanitatis ad Deum, in qua hoc mysterium

Nestoriani

Hæretici hujus temporis.



rium consistit, secuta sint in humanitate eximia dona, per quæ divinas perfectiones participat: tamen communicatio idiomatum propria ac vera, quam fides docet, non consistit in his donis, neque in prædicationibus ab illis desumptis, quia illa sunt dona creata, & non sunt ipsa essentialia & increata attributa Dei, quæ tamen prædicari debent de homine in vera idiomatum communicatione, aliàs homo non esset verus Deus, sed tantum per participationem.

Si autem dicatur secundum, scilicet, communicationem hanc esse divinorum attributorum, prout in se sunt increata, & per essentialiam, hoc etiam potest duobus modis explicari. Primo, ut solum dicantur communicari humanitati, quia illi uniuntur tanquam instrumento, per quod divinitas omnia operatur, & in quo ejus sapientia, justitia, & alia attributa singulari modo relucent. Et hoc totum nec transcendit errorem Nestorii, qui damnatus est, eo quod diceret, hanc unionem factam esse per energiam, seu dignitatem: nec sufficit, ut vere ac proprie dici possit humanitas omnipotens, & similia. Quia licet principale agens utatur instrumento, non propterea propria perfectio principalis agentis potest vere ac proprie de ipso instrumento prædicari. Secundo modo posset hoc ita intelligi, ut ipsa essentialia attributa divinitatis ita uniatur humanitati, ut illam constituent formaliter sapientem, omnipotentem, &c. Et hoc in primis est incidere in errorem Eutychetis, quia esset unio in natura, cum divinitas uniretur humanitati per modum formæ. Deinde est plane impossibile: tum quia generaliter impossibile est; divinam perfectionem, prout in se est, informare naturam creatam: tum etiam, quia quibusdam divinis attributis specialiter repugnat, hoc modo formaliter communicari, aut prædicari de humanitate: quomodo enim dici potest humanitas ætus purus, aut æterna sine principio? Corpus etiam Christi mortuum mansit hypostatice unitum, & tamen tunc non erat capax sapientiæ, justitiæ, aut similibus attributorum: & tempore vitæ mortalis non fuit illi communicata impassibilitas, immortalitas, & similia: non ergo requirit unio hypostatica hanc communicationem omnium attributorum Dei: ergo neque aliorum, vel unius tantum. Cum enim Divina attributa in re idem sint, & unum sit de essentia alterius, fieri non potest, ut unum formaliter communicetur sine aliis, dicto genere communicationis: sicut non potest humanitas esse omnipotens, nisi etiam sit infinite perfecta, infinite sapiens, &c. Et confirmatur primo, quia, si unio hypostatica consisteret in hac communicatione attributorum, potius facta esset unio in natura, quam in persona, quia hæc attributa divina ad naturam & essentialiam Dei pertinent. Unde fit ulterius, non magis unam personam esse incarnatam, quam aliam: fit etiam, omnes tres personas divinas inter se hypostatice uniri, quia omnia attributa divina illis tribus personis, formaliter communicantur, quæ omnia sunt absurda, & hæretica. Confirmatur secundo, quia cum hæc unio naturarum, & communicatio idiomatum mutua sit, sequitur, etiam naturam humanam formaliter communicare suas proprietates naturæ divinæ, atque adeo Divinitatem per hanc unionem factam esse mutabilem, mortalem, finitam, &c. Quæ etiam hæretica sunt, unde August. ser. 195. de tempore, dicit, nullam unquam hæresim ausam esse dicere, omnia, quæ erant Divinitatis, in humanitatem, & quæ humanitatis erant, in Divinitatem esse transfusa: nam hoc modo exinanita esset utraque substantia, & in aliud esset mutata. Quod si fortasse dicant, Divinitatem esse formam humanitatis, non vero e contrario, & ideo attributa divina denominare humanitatem, & vice e contrario, jam plane concedunt compositionem unius naturæ ex utraque. Sequitur etiam ex illa evasione, Deum non esse hominem, neque mortuum, quandoquidem dicunt, naturam humanam non communicare Deo sua attributa: vel necesse est, ut fateantur alium modum communicationis idiomatum, qui non sit ipsarum naturarum inter se, sed respectu ejusdem personæ, quod verissimum est.

Dico ergo tertio. Vera communicatio idiomatum, quæ ex mysterio Incarnationis secuta est, tantum in hoc consistit, ut ratione illius unionis divina & humana prædicata de eadem persona vere prædicentur. Conclusio hæc in re est de fide certa, duas vero habet partes: altera est affirmans, hunc modum communicationis idiomatum

consecutum esse ex hoc mysterio. Et hæc pars constat ex doctrina Conciliorum omnium, & Sanctorum, quos in superioribus præsertim disput. 7. & 8. explicando ipsum mysterium, late retulimus: & in Concilio præsertim Ephesino frequenter docetur, & a Cyrillo multis opusculis, & epistolis, quæ de hac materia in eodem Concilio referuntur: præsertim in anathematismis & in defensionibus eorum, & lib. 10. Theod. c. 2. Leone Pap. dict. epist. 10. & serm. de Nativ. & Passione, frequenter. August. 1. de Trinit. c. 13. & sæpe aliàs. Ambr. 2. lib. de Fid. c. 4. & lib. 5. c. 8. Damasc. lib. 3. de Fide c. 4. 6. & 11. & constat ex illis Scripturis, quibus supra ostendimus, eundem esse verum Deum, & verum hominem: & alia testimonia in sequentibus afferemus. Ratio vero est, quia, quando duæ formæ vel naturæ in eodem supposito realiter uniuntur, de eodem possunt vere prædicari. Unde fit, ut in ordine ad idem suppositum, seu sub nominibus connotantibus idem suppositum, possint proprietates unius naturæ de individuo, seu supposito alterius naturæ prædicari. Ut in formis accidentalibus constat, calor enim & albedo, si eidem supposito, v. g. Petro, insint, de eodem prædicantur: unde fit, ut hoc album dicatur calidum, & e converso. Sed in hoc mysterio duæ naturæ uniuntur substantialiter eidem supposito: ergo nomina significantia illas naturas in ordine ad suppositum, ut sunt, *homo*, & *Deus*, vere prædicabuntur de illo supposito, cui naturas ipsas applicant, ipsumque in illis subsistere significant: unde etiã fit, ut unum de altero inter se vere prædicetur. Quod per syllogismum expositivum facile colligi potest, nam si Christus est homo, & Christus est Deus: ergo homo est Deus.

Sed duo obijci possunt contra hanc rationem, quia licet nomen significans formam accidentalem vere prædicetur de supposito seu subiecto talis formæ, quia prædicatur denominative, tamen nomen substantiale, ut est, *homo*, non prædicatur nisi de supposito, quod intrinsece & essentialiter constituitur per illam naturam: quomodo prædicatur *homo*, de Petro: Verbum autem non ita constituitur per humanitatem, ut constat.

Objec. 1.

Secunda obiectio est, quia in hac materia collectio syllogismi expositivi non est formalis, ut patet in simili: *Hic Deus est homo, hic Deus est Pater: ergo Pater est homo*. Quæ illatio nulla est, quia syllogismus non est re vera expositivus, quia mediū non est perfecte singulare, ex parte enim suppositorum, pro quibus supponit, est commune multis. Idem autem defectus videtur esse in proposito, nam, sicut hic Deus dicit hanc naturam in multis suppositis, ita Christus dicit idem suppositum sub multis naturis.

Objec. 2.

Ad primam respondetur, antecedens esse verum in supposito connaturali, & proprio naturæ substantialis, quod non supponitur naturæ, sed ex illa & subsistentia constituitur tale suppositum: at vero in hoc mysterio, suppositum ipsum est per se perfectum, & supponitur humanæ naturæ, per quam non constituitur in esse simpliciter, sed tantum in esse hominis, & hoc satis est, ut possit homo de illo supposito vere prædicari, quia ratio hominis in hoc consistit, ut per humanitatem substantialiter constituatur, illa vero differentia non variat hominis rationem. Exemplum esse potest, quia & substantia corporea, & quantitas ejus, vere dicitur quanta, quamvis quantitas per se ipsam, substantia vero per quantitatem, illam denominationem suscipiat.

Respon. 1.

Ad secundam respondetur, factam argumentationem expositivam esse optimam & formalem, & exemplum adductum non esse similis formæ: quia, licet Christus sit suppositum multarum naturarum, non tamen supponit pro illis, sed pro eodem indivisibili supposito, quod in utraque natura subsistit, & de illo vere prædicantur termini utriusque naturæ, & propterea etiam prædicantur inter se: at vero hic Deus, licet unam naturam significet, tamen supponit pro distinctis suppositis illius naturæ, de quibus distincta prædicata dici possunt, quæ inter se prædicari non possint.

Respon. 2.

Secunda pars conclusionis excludit & negat alium modum communicationis idiomatum: & hæc satis probata est ex iis, quæ contra hæreticos dicta sunt, quæ amplius in sequentibus sectionibus confirmabuntur, & explicabuntur. Adde, in sanctis Scripturis & Patribus non doceri alium modum communicationis idiomatum: quia ex ipso mysterio, ut fides illud docet, non potest aliud genus communicationis idiomatum colligi. Sed obijciunt hæc.

Objec. 3.



heretici, Sanctos interdum dicere, maiestatem & gloriam Divinitatis, aut efficaciam, vel similia attributa communicata esse humanitati. Ita loquitur Leo Papa ser. 1. de Nativ. August. lib. contra Felician. c. 11. Ruffin. in expof. Symboli, Cyril. lib. de Incar. Unig. c. 1. & 2. & lib. 10. Thef. c. 9. Basil. Psalm. 21. Gregor. Nyffen. lib. de Anima, Athanas. in Evang. seu concione de Sanctis. Deipara, & alii frequenter. Et confirmatur, quia aliàs hæc communicatio idiomatum non esset vera & realis, sed solum in quadam verborum denominatione consisteret. Respondetur, tria velle docere Sanctos in illis locis, non omnia in singulis, sed modo unum, modo aliud, pro locorum varietate. Primum est, humanitatem per hanc unionem esse elevatam ad tale consortium divinitatis in eadem persona, ut ratione illius vere dicatur de homine, quidquid ad Dei gloriam & maiestatem spectat: & hæc est vera communicatio idiomatum, quæ a nobis explicata est. Secundum est, illam humanitatem ratione huius unionis esse dignam summa gloria & honore, & divina quadam adoratione. Tertium est, ratione huius unionis communicatas esse humanitati divinas perfectiones, per eximia quædam dona. Et hunc esse sensum sanctorum Patrum facile constare potest ex citatis testimoniis, & ex Leone Papa epist. 83. ad Episcopos Palæstinos, & Cyril. 12. Thef. c. 15. & lib. 4. in Joan. c. 24. Damasc. lib. 2. c. 22. & Theod. dialog. ubi refert Gregor. Nyffen. & alios. Ad confirmationem negatur sequela, quia, cum per illas locutiones significetur, utramque naturam vere & realiter esse conjunctam eidem supposito, & unam ac eandem esse personam, quæ per utramque naturam operatur, non potest hæc communicatio dici in solis verbis consistere, sed indicare potius veram & realem unionem, in qua mysterium ipsum positum est.

## S E C T I O II.

*An hæc communicatio idiomatum possit interdum fieri inter abstracta, vel tantum inter concreta.*

EX dictis in sectione præc. colligitur primo, unam naturam non posse de alia vere prædicari in abstracto, quod est de fide certum, quia aliàs sequeretur confusio naturarum: si enim confusæ non sunt, manent duæ: ergo una non est alia: ergo, cum per terminos abstractos significetur duæ ut distinctæ, & non quatenus uniuntur in eodem supposito, non potest una prædicari de alia.

Et hinc sequitur secundo, proprietates seu attributa divinitatis, sive in concreto, sive in abstracto, non posse de humanitate prædicari. Est de fide, & sumitur ex illis Conciliis, in quibus definitur, proprietates utriusque naturæ mansisse distinctas & inconfusas, & incommunicabiles alteri naturæ: quæ supra suis locis late adducta sunt ex Concil. Chalcedon. act. 5. & Ephesino in canonibus seu anathematismis Cyrilli, & ex VI. Syn. act. 4. 11. & 17. & ex Concil. Lateran. sub Mart. I. canone 9. & sequentibus Leone epist. 10. & aliis. Et ratio colligitur aperte ex dictis, quia humanitas, nec est divinitas, nec Deus: ergo neque est omnipotentia Dei, neque immensitas, neque etiam omnipotens, neque immensa: quia, cum hæc sint propria & essentialia Dei, & Deitatis, non possunt vere dici, nisi de re, quæ sit Deus, & Divinitas. Intelligitur autem hoc de prædicatione propriorum attributorum Dei, prout sunt in ipso, nam si loquamur de participationibus illorum attributorum communicatis humanitati per dona creata, ab illis recte potest humanitas denominari, & interdum hæc denominatio fit eisdem nominibus, quæ Deo tribuuntur. Quomodo aliquando dicitur anima Christi omnipotens, vel sciens omnia, seu infinita, ut videre licet apud Nicetam lib. 3. Thef. cap. 38. quæ omnia intelligenda sunt secundum analogiam quandam & singularem excellentiam.

**Objeçtio.** Sed contra, nam Christi humanitas dicitur esse deificata: ergo etiam potest dici Deus: sicut aqua, quæ calefacta dicitur, etiam denominatur calida. Antecedens constat ex modo loquendi Sanctorum, Sophronii in illa epist. quæ habetur in VI. Syno. act. 11. Nazia. ora. 42. ubi dicit: *Christum esse perfectum, non modo propter divinitatem, sed etiam propter humanitatem divinitate delibutam, idemque effectam, quod id, a quo unctus est, & ut audacter dicam, & p. 1. 1. id est, simul Deum: & orat. 51. dicit, ima-*

ginem Dei, quæ est in homine, fuisse deificatam in Christo. Idem Damasc. lib. 3. c. 29. & lib. 4. c. 19. *Ob personalem unionem* (ait) *& caro deificata, ac Deus facta est, divinitatisque cum Verbo sociata dicitur.* Respondetur ex D. Th. infra art. 5. & ex Damasc. lib. 3. c. 27. & lib. 4. c. 19. per illam locutionem non significari mutationem humanitatis in Deum, seu humanitatem factam esse Deum, sed solum esse Deitati unitam in persona Verbi, & ideo concessio in hoc sensu antecedenti negatur consequentia. Neque est simile, quod assertur, quia non eodem sensu dicitur humanitas deificata, quo aqua dicitur calefacta: aqua enim formaliter afficitur calore, a quo denominatur calida, humanitas vero non formaliter afficitur deitate, sed solum ratione dispensationis, ut ait Damasc. id est, unionis personalis, deificata dicitur. Illa verò locutio Nazian. qua inquit, humanitatem esse factam id, a quo unctus est, sano modo interpretanda est in sensu causali: quia scilicet, ita est unita divinitati, ut idem, qui est Deus, sit etiam homo ratione illius unionis: & idem est sensus Damasceni.

Tertio colligitur ex dictis in eadem sectione præcedenti, proprietates humanitatis, neque in abstracto, neque in concreto, posse proprie prædicari de divinitate in abstracto sumpta. Est conclusio eodem modo certa, & ex eisdem principiis & testimoniis probanda, quibus præcedens: nam hæc duo mutuo se consequuntur, & ita simul traduntur semper a Patribus. Et ratio est eadem, quia divinitas non est humanitas: ergo, licet humanitas sit passibilis, creata & finita, &c. non propterea potest divinitas, passibilis, creata, finita, &c. denominari: similiter divinitas non est homo: ergo proprietates, quæ conveniunt homini in concreto, non possunt de divinitate ipsa prædicari: antecedens est communis Theologorum sententia in 3. dist. 8. ubi specialiter Bonav. & Richard. art. 1. q. 3. & colligitur etiam ex D. Th. infra art. 5. & expressius ex Damasc. lib. 3. c. 11. & Nicet. lib. 3. Thef. c. 38. Et ratio est, quia divinitas in abstracto significata ex vi modi significandi non supponit pro persona: ergo in illa propositione: *Divinitas est homo*, ex modo significandi non indicatur conjunctio naturarum in una persona, sed potius confusio illarum inter se: præsertim, quia prædicatum, *homo*, applicat suum formale significatum ad ipsam divinitatem secundum se: consequentia vero per se clara est, quia proprietates hominis solum possunt de illa re vere & proprie dici, quæ vere & proprie est & dicitur homo. Et confirmatur inductione, nam omnes istæ locutiones falsæ sunt: *Divinitas est risibilis*, seu *est mortalis*, vel *passa est*, aut *mortua*, ut aperte docent Damasc. supra, & c. 4. 6. & 10. & Nicet. supra & c. 33. D. Th. & alii Theologi cit. loc. in his enim omnibus in proprio sensu significatur, ipsi Divinitati secundum se, & ratione sui, illa omnia convenire, quod tamen hæreticum est. Antecedens constat ex modo significandi, & supponendi termini abstracti, & præsertim, quando ex parte prædicati ponitur terminus connotativus. Propter quam rationem hæc est falsa, & hæretica: *Deitas generat*, quia generatio tribuitur ipsi divinitati secundum se.

Sed contra, quia vere dicitur: *Deitas est incarnata*; ergo vere dicitur: *est homo*, ideo enim Verbum est homo, quia est incarnatum. Antecedens vero late tractatum est supra disp. 7. lect. 2. in fine, ex variis Patribus, & Conciliis, & eandem locutionem habet Sophron. sæpe citata epist. & Fulgen. q. 2. ad Ferrandum Diac. & Petrus Diac. lib. de Incarn. c. 2. Simile argumentum sumitur ex hac locutione, *Divinitas assumpsit humanitatem*, ideo enim Verbum est homo, quia humanitatem assumpsit: illam vero locutionem admittit D. Thom. supra q. 3. art. 2. ad 1. & alii Theologi cum Magistro in 3. dist. 5. & super dictum art. D. Th. citavimus plura loca Sanctorum ita loquentium. Confirmatur primo, quia Fulgent. dicta resp. 2. ad Ferrandum ex professo defendit hanc locutionem: *Deitas est passa, quia Deitas*, inquit, *est Deus*, & Ecclesia etiam canit: *Mors mortua tunc est in ligno, quando mortua vita fuit.* Confirmatur secundo, ratione insinuat a Fulgentio, quia Deus est mortuus, & Deus est deitas; ergo deitas est mortua. Similiter, Verbum est homo, & Verbum est divinitas; ergo divinitas est homo. Simili enim syllogismo expositorio supra concludebamus vere dici Deum esse hominem, & fuisse mortuum. Respondetur ad principale argumentum, illas propositiones, divinitas est incarnata, vel assumpsit humanitatem, jam su-

**Responsio.**



pra a nobis expositas, solum significare divinitatem substantialiter esse conjunctam humanitati, non tanquam suppositum, seu proprium terminum illius, sed tanquam naturam ejusdem suppositi: & ideo negatur consequentia, non enim, quidquid unitur humanitati, fit homo, sed quod unitur per modum suppositi illius, & ideo non sunt similes consequentia, quæ illic afferuntur, quia non eodem sensu dicitur incarnari, vel assumere de Verbo, & de divinitate, ut explicatum est. Ad primam confirmationem respondetur, illam locutionem Fulgentii in rigore non esse veram, ipse vero locutus est in sensu identico, & semper addit aliquam determinationem, scilicet divinitas secundum carnem passa est. Illa vero locutio: *Mors mortua tunc est in ligno, quando mortua vita fuit*, metaphorica est: in est: nomine enim vitæ significatum est Verbum ipsum seu Deus. Ad secundam confirmationem negantur illæ illationes, nam licet Deus dicatur sua deitas propter summam identitatem, tamen in ratione & modo significandi, & supponendi distinguuntur: & hoc satis est, ut in illis argumentis varietur sensus identicus in formalem, & mutetur appellatio, ut dialectici dicunt: & ideo neganda est utraque consequentia, sicut in simili forma manifeste patet, non enim sequitur, Pater, vel Deus generat, Pater, vel Deus est deitas; ergo deitas generat, propter eundem defectum.

Quarto sequitur divinitatem in abstracto non prædicari proprie, & formaliter de homine, atque adeo nec proprietates ejus, etiam in abstracto, seu formaliter sumptas: quamquam in sensu identico, illa propositio: *Christus, vel hic homo est Deitas*, admitti possit. Ratio prioris partis constat ex præcedentibus, quia, cum abstracta ex modo suæ significationis non supponant pro supposito, neque etiam proprie significant conjunctionem naturarum in eodem supposito, quæ est fundamentum hujus communicationis idiomatum, ideo, &c. posterior vero pars ita colligi potest: nam Verbum est deitas: & Verbum est Christus, seu hic homo: ergo Christus, seu hic homo est deitas. Hoc enim consequens potest optime in sensu identico verificari, sicut antecedens: cujus ratio est, quia subiecta solent stare materialiter, & ideo Christus, seu hic homo ex parte subiecti, sumitur pro ipso supposito Verbi, de quo vere dicitur, quod sit sua deitas: & propter hanc causam magis concedi potest hæc, *homo est Deitas*, quam, *Deitas est homo*: Verum tamen, quia hæc locutio non est propria, nec formalis, non est extendenda, neque assumenda ad concludendas alias propositiones, quæ sensum formalem faciunt, & ideo falsæ sunt, ut in simili dictum est.

Ultimo tandem sequitur humanitatem, & ejus proprietates in abstracto sumptas, non posse vere prædicari de Deo. Hoc constat ex dictis, quia neque in sensu formali, neque in identico, Deus, aut Christus est humanitas: unde fit etiam in rigore has locutiones esse falsas: *Christus est anima*, vel *est caro*, vel *est anima & caro*, etiam simul sumptæ, propter eandem rationem. Quod si aliquando hujusmodi locutiones inveniuntur apud Patres, ut v.g. apud August. tract. 47. in Joan. & alios, sunt locutiones figuratæ, & per synecdochen pars sumitur pro toto, juxta illud Joan. 1. *Verbum caro factum est*, ut notat idem August. 2. de Trin. c. 6. Fit etiam ex eodem principio, nec partes integrales posse prædicari de Deo, aut Christo, ut si dicas, *Est caput, est manus*, &c. tum quia hæc significant in rigore per modum abstractorum: tum etiam, quia hujusmodi partes non solent vere prædicari de toto supposito, nisi denominative. In quo erravit Wicleph, introducens in hoc mysterio absurdas locutiones, ut tractat Walden. lib. 1. Doctr. fidei antiquæ c. 40. & 41.

Solet vero hic peculiariter dubitari: an hæc locutio in rigore vera sit: *Christus est divinitas & humanitas simul sumptæ*, nam sigillatim, seu divisim, jam ex dictis satis constat, non posse utramque naturam vere prædicari de Christo: & in hoc sensu refertur illa propositio inter errores Wicleph, & Joa. Hus, in Concilio Constantiensi, sess. 12. & 15. in hoc enim sensu illi asseriebant illam propositionem, ut Walden. supra refert cap. 42. Male ergo nonnulli propter hujus Concilii testimonium damnant illam propositionem, ut erroneam, etiam in sensu conjuncto, seu complexivo, ut ajunt, quia Concilium nihil de hoc dixit, & a Catholicis illa propositio admittitur, ut a Greg. in 1. d. 28. q. 2. ad 18. & Wald. supra, & in Pa-

tribus reperientur locutiones non admodum dissimiles. Et in Concil. Arelateni IV. can. 1. habetur hæc locutio: *Due nature in Christo sunt Deus & homo*. Leo Papa epist. 11. dicit. *Verbum, caro, & anima, sunt unus Christus*: & August. in enchirid. c. 38. *Utraque substantia, divina, scilicet, & humana sunt unus Filius Dei*. Et eodem modo loquitur. Damasc. lib. 3. c. 19. & Bernard. lib. 5. de Considerat. ad Eugen. imo & VI. Synod. act. 18.

Dices, hos Sanctos debere explicari in sensu causali scilicet, Christus est duæ naturæ, id est, constat duabus naturis. Sed contra primo, quia eadem ratione posset Christus dici sua humanitas, in sensu causali, quia constituitur humanitate. Secundo, quia si illa admittitur in sensu causali, cur non etiam in identico? quia de quolibet homine vere dici potest in sensu identico, quod sit sua humanitas, & subsistentia simul sumptæ: & universe constat, nullum compositum distinguere a componentibus simul sumptis. Christus autem est compositum quoddam ex divinitate, & humanitate. Dicendum est ergo, si Christus sumatur pro solo supposito, illam propositionem non esse veram, sed omnino falsam, ut per se constat, quia illud suppositum est distinctum ab humanitate, quam in se, & per se non includit: si autem Christus sumatur pro toto composito ex natura divina & humana, sic, licet locutio illa sit impropria, tamen in sensu identico non est falsa. Neque enim ex illa inferri possunt propositiones, quas aliqui inferunt, scilicet quod Christus non sit divinitas, & similes: scilicet hoc modo argumentando: Divinitas non est Divinitas, & humanitas; Christus est Divinitas & humanitas: ergo Christus non est divinitas. Hujusmodi enim argumentationes nihil valent, quia variata acceptatio, & suppositio illius termini, *Christus*, & patet defectus in simili forma: Divinitas non est persona composita; Christus est persona composita: ergo Christus non est Divinitas, quæ consecutio nulla est, cujus ratio latius patebit ex dicendis sect. 4. Nihilominus tamen illa locutio, etiam in hoc sensu, non est simpliciter usurpanda: non solum, quia impropria est, sed etiam, quia est valde ambigua, & in aliquo sensu potest errorem generare: vel ergo vitetur, vel non sine sufficienti explicatione proferatur.

### S E C T I O III.

*Quomodo divina attributa in concreto prædicanda sint de Christo, seu de homine.*

**H**æc quæstio expediri facile potest ex principio, & fundamento posito in sectione prima, ex quo colligendæ sunt regulæ universales, quæ in hujusmodi locutionibus servandæ sunt.

Dico ergo primo, Deus & attributa ejus simpliciter prædicari de Christo, & de homine, absoluta seu substantiali prædicatione, vera ac propria. Hæc conclusio in re ipsa est de fide, quia de fide est, hunc hominem Christum esse Deum, & consequenter esse omnipotentem, æternum, &c. Videantur dicta sectione prima, & ibi citata, & circa articulum secundum D. Thomæ nonnulla addemus de proprietate & qualitate harum locutionum.

Et hinc colligitur secunda universalis regula. Quidquid essentialiter dicitur de Deo, & quidquid essentialiter, vel personaliter dicitur de Filio, seu Verbo Dei, simpliciter & absolute prædicatur vere de hoc homine Christo. Est etiam in re ipsa de fide: nam continetur in præcedenti, & in illis locis Scripturæ, in quibus Christo tribuuntur, quæ sunt Filii Dei naturalis propriæ, ut patet ad Heb. 1. & 2. & Joan. 8. ubi Christus dicit: *Antequam Abraham fieret, ego sum*: & in aliis, quæ late citavimus supra, agentes de Christi Divinitate, & tradunt Patres omnes supra citati, Concil. Ephes. can. 4. VI. Synodus act. 11. & 18. Lateran. sub Mart. I. consul. 5. can. 4. Leo Papa epist. 10. 11. & 83. August. lib. 1. de Trinit. cap. 7. & seq. Fulg. de Fide ad Petrum c. 2. Nazian. orat. 51. & 52. Cyril. lib. 12. Thec. c. 15. Damasc. lib. 3. c. 4. 6. & 11. Et ratio est supra tacta, quia Christus est Deus: ergo necesse est, ut quidquid essentialiter dicitur de Deo, dicatur etiam de Christo, & eadem ratio est de personalibus Verbi Dei, quia Christus est Verbum Dei; secus vero est de propriis prædicatis personalibus Patris, vel Spiritus sancti, quia, cum verbum non sit Pater, nec Spiritus Sanctus, etiam Christus, seu

Objec.

Respon.

1. Regula communicationis idiomatum.

2. Regula.



seu hic homo, non est Pater, nec Spiritus sanctus: & consequenter neque illa notionalia prædicata, quæ ita sunt propria Patris vel Spiritus sancti, ut non convenient Verbo, possunt vere de Christo, aut homine prædicari.

3. Regula. Dico tertio. Divinitas, seu attributa ejus non possunt prædicari de Christo seu homine denominative, propria denominatione accidentali. Hanc etiam regulam quoad rem ipsam existimo certam, & de fide, directe enim excludit errorem Nestorii, qui solum ponebat unionem accidentalem. Et explicatur in particularibus locutionibus, in Concilio enim Ephesino damnatur hæc vox *θεοῦ ὁ υἱός*, id est, *Dei filius*, tanquam propriam Nestorianorum, quia per illam denominative tantum prædicatur Deus de homine: & significatur, supponi hominem constitutum & subsistentem, qui in se ferat Deum, unde indicat distinctionem suppositorum, & unionem accidentalem, & ideo Damasc. lib. 3. c. 12. & Athanas. in ferm. de sanctis. Deip. circa finem: *Non vocamus, inquit, hominem Dei ferum, sed Deum carniferum*, quia vere Deus carnem assumpsit, & illam in se sustentat: homo autem non posset in se sustentare, aut substantialiter terminare divinam naturam, & ideo non potest dici *Dei filius*, nisi ratione accidentalis unionis. Verum est, Basil. in Pl. 59. sic loqui: *Divinitatis calceamentum est caro Deum ferens, quia habet Deum in se substantialiter inhabitantem*: magis vero proprie diceretur ferri ab ipso Deo, ubi obiter etiam observandum ex Naz. orat. 52. Apollinari- stas abusos fuisse illa voce, *carniferum*, ad significandum Verbum assumpsisse carnem, & non animam: & hoc sensu dicit ipse, potius dicendum esse Verbum ferens humanitatem, quam carnem: in vero autem sensu utrumque dici potest, quia caro non excludit animam, sed pars pro toto sumitur. Præterea propter hanc regulam non potest dici Christus, *homo Deificatus*, ut recte docuit Cyril. Alexand. lib. de Incarn. c. 11. ubi sentit, illam locutionem esse Nestorianam, quia significat, supponi hominem, & illum sibi unire Divinitatem, quod non posset esse verum, nisi de unionem accidentali. Idem docet Damasc. lib. 3. de Fid. c. 2. unde, si illa locutio interdum reperitur in Patribus, ut apud Sophronium sæpe citata epist. & Nicet. lib. 3. Thef. c. 29. qui citat Greg. Naz. pie explicanda est: vel enim est sermo de humanitate, quæ deificata dici potest per substantialem unionem, cui ipsa supponitur: vel, si est sermo de homine, intelligitur, formaliter ac simpliciter abstrahendo a determinato supposito, juxta ea, quæ circa art. 7. in simili dicimus. Tertio propter hanc etiam regulam non dicitur proprie Christus homo dominicus, ut latius circa art. 3. dicitur.

Sed contra, nam Christus dici potest homo divinus, ut art. 3. ad 3. D. Th. concedit ex Dionys. cap. 4. de Eccles. hierar. part. 3. circa finem, ubi juxta translationem Perionii, vocat *divinissimum Jesum*: Ambrosius enim Florentinus non ita vertit, sed *summum Deum*, quod magis vox Græca significat, *θεῶν ἀρχιπρωτάτος*, id est, supremum numen, ita vero appellat Aug. lib. 83. quæst. in 57. Respondetur, hanc denominationem non esse accidentalem, sed substantialem & essentialem: nam & natura Dei, essentia divina dicitur, & secunda persona dicitur Verbum divinum. Hæc enim denominatio sumi potest ab ipsa Dei natura, concepta per modum formæ vel differentię essentialis, sicut dicitur natura humana: sed in hac ipsa denominatione cavenda est æquivocatio, nam illa denominatio, *Divinus*, addita divinis rebus habet dictam significationem juxta communem usum: addita vero rebus creatis significare solet accidentalem participationem divinæ perfectionis, ut cum dicitur homo divinus, & ideo non videtur ita simpliciter appellandus Christus Dominus, sine sufficienti explicatione & determinatione.

Sed urgebit aliquis: nam Christus Dominus dicitur sanctificatus a Patre, cum vere sit sanctus per essentiam. Respondetur, juxta August. expositionem, Christum ut Deum dici sanctificatum a Patre per æternam generationem, & hoc sensu illa denominatio non est accidentalis, seu per participationem, sed est essentialis, conjuncta cum notionali: sumpta est enim ab ipsa sanctitate per essentiam, ut communicata Filio per æternam generationem: in alio vero sensu dicitur Christus ut homo sanctificatus, vel per ipsam unionem, vel per accidentalem sanctitatem. In quo observandum est, quædam esse prædicata,

quæ licet Christo ut Deo per essentiam convenient, eidem tamen ut homini insunt per quandam participationem accidentalem: ut esse bonum, sapientem, sanctum, &c. & hæc utroque modo dici possunt de Christo per communicationem idiomatum, quamquam simpliciter illi semper tribuenda est maxima perfectio, quæ imperfectionem non includat.

Dico quarto. Divina attributa licet absolute & simpliciter dicantur de Christo homine, non tamen cum reduplicatione humanitatis. Itaque hæc propositiones, & similes non sunt veræ: *Christus, in quantum homo, est Deus, est æternus, immensus, &c.* Hæc est certa doctrina, quam hæretici hujus temporis satis ignoranter negant: si tamen, vel ipsa significatio terminorum intelligatur, constat negari non posse, nisi incidendo in errorem Eutychetis: nam, si naturæ manent distinctæ post unionem, ut vere manent, non possunt attributa divina & increata convenire homini ratione naturæ: hoc autem per illam locutionem significatur, ut etiam ex dialectica constat: sunt ergo illæ locutiones falsæ in proprio sensu: an vero in aliquo improprio possint ad verum sensum revocari, dicemus circa articulum 11. D. Thomæ.

## S E C T I O IV.

Quomodo proprietates humane, seu creatæ dicantur de Deo, seu Filio Dei in concreto.

Solum hic modus loquendi nobis superest explicandus, quod breviter fieri potest, colligendo generales regulas ex principio posito in sect. 1. sicut in aliis fecimus.

Dico ergo primo. Homo, & quicquid essentialiter de homine dicitur absoluta & substantiali prædicatione, vere & proprie dici potest de Deo, & Filio Dei: & idem intelligendum est de omnibus prædicatis, quæ simpliciter dici possunt de hoc homine Christo, ratione humanæ naturæ. Tota conclusio est certa, & in re ipsa continet doctrinam fidei: nam, quod Deus seu Verbum vere sit & dicatur homo, articulus est fidei, sæpe in superioribus probatus, de quo plura statim dicemus in art. 1. & hinc evidenter sequitur, essentialia prædicata hominis eodem modo dici posse de Deo, quia, cui convenit esse hominem, necesse est, ut etiam convenient omnia, quæ sunt de essentia hominis: & hinc etiam fit, ut actiones & passionis talis hominis de Deo vere prædicentur: quomodo dicitur Actor. 20. Deus redemisse Ecclesiam sanguine suo, & 1. ad Cor. 2. Dominus gloriæ dicitur crucifixus, & Psal. 67. dicitur Deus ascendisse in altum, quod ad Eph. 4. de Christo explicatur, & Baruch. 3. *Posthac in terris visus est, & cum hominibus conversatus est.* Concilia, & Patres satis in superioribus citati sunt. Et ratio est eadem, quia, cum sit idem suppositum subsistens in utraque natura, de illo absolute dici possunt, quæ ratione utriusque nature illi conveniunt, etiam si nominibus ab utraque natura sumptis significetur. Solum est in hac regula observandum, sermonem in ea esse tantum de illis prædicatis, quæ præcise conveniunt homini ratione humanæ naturæ, ita ut non involvant imperfectionem suppositi creati, nam de his alia ratio est, ut statim dicitur.

Sed contra, nam sequitur, simul dici de Christo prædicata opposita, ut esse corporeum & incorporeum, mortalem & immortalem: consequens videtur falsum, nam inde facile possunt inferri contradictoria, si enim est incorporeus: ergo non est corporeus. Propter hoc dicunt quidam, hæc prædicata, quæ videntur privationem involvere, non esse simpliciter dicenda de Christo, sed cum additione, scilicet, Christus est incorporeus secundum divinitatem. Ita significat D. Th. art. 8. ad 2. Sed intelligendum est, illud esse prudens consilium ad tollendam ambiguitatem: alioqui enim constat, locutiones illas simpliciter esse in Conciliis usitatas, ut in Chalc. act. 1. ubi Nazianz. citatur, & VI. Syn. Act. 11. & 18. & in Leone Pap. & aliis Patribus supra citatis, qui frequenter Christo tribuunt hæc opposita prædicata, & in ipsorum conjunctione satis explicant verum sensum, scilicet, secundum diversas naturas Christo tribui, & ideo nec vere esse opposita, neque ex illis contradictionem inferri: tum quia illi termini, qui videntur privativi, usurpantur a nobis ad significandas positivas perfectiones divinitatis; tum etiam, quia, licet secundum unam naturam affirmetur privatio, non potest inde inferri negatio simpliciter, quia omnia destruit, atque adeo significat, secundum nullam naturam tale prædicatum huic supposito convenire.

Dico

4. Regula.

Hæretici  
hujus  
temporis.

1. Regula.

Objeccio.

Responsio.

Objeccio. 2.  
Responsio.



**1. Regula.** Dico secundo. Hæc prædicata dicuntur de Deo absolute, non cum reduplicatione divinitatis, quia non, in quantum Deus, est homo. Hæc est certa, ut in sectione præcedenti in simili propositione satis dictum est. Et in præsentis est hoc evidentius, quia nec ratione divinæ naturæ, nec ratione ipsius suppositi divini, ut sic, convenit Deo, ut sit homo, & consequenter neque aliæ proprietates, vel actiones hominis. Sed contra, nam vere dicitur

**Obiectio.** Christus, in quantum Deus, mereri, & satisfacere pro nobis, quamquam hæc prædicata, & similia, non conveniant Christo, nisi mediante humana natura. Circa hanc objectionem advertendum est, quædam esse prædicata, quæ non possunt quidem convenire Deo secundum se, quia requirunt naturam finitam, & quæ superiorem aliquam voluntatem recognoscat, ut sunt orare, mereri, satisfacere: possunt tamen illi convenire, ut subsistenti in natura humana: & ideo absolute & simpliciter non possunt talia prædicata dici de Deo cum reduplicatione solius divinitatis, ut non vere dicitur Christus orare, in quantum Deus, sed in quantum homo: habent tamen interdum huiusmodi prædicata perfectionem aliquam Christo, ratione divini suppositi, quam sine illo habere non possunt in supposito creato, ut quod meritum sit infinitum, & satisfactio de rigore iustitiæ: & hæc prædicata proprie dicuntur de Christo cum reduplicatione divinitatis, non solius, sed cum conjunctione humanitatis. Et hoc modo vere dicitur Christus meruisse, & satisfecisse, ut Deus homo, quia operatio meritoria erat humanitatis, valor autem & iustitia potissimum erat ex divino supposito, ut late superius disp. 4. diximus, quæ doctrina consentanea est Cyrillo, epist. ad Acacium, quæ refertur in Concil. Ephes. tom. 5. c. 7. ubi triplicia attributa Christi distinguit: quædam, quæ illi conveniunt ratione divinitatis, alia ratione humanitatis, alia ratione utriusque. Exemplum est de attributo seu prædicato *mediatoris*, quod perfecte convenit Christo, in quantum est Deus homo, quia neque sola humanitas in persona creata, nec sola persona divina sine humanitate sufficeret ad constituendum nobis perfectum mediatorem, & redemptorem, ut ex dictis in eadem 4. disp. constat: & ex Aug. in Enchir. c. 108. & hom. de centum ovibus c. 12. Fulgen. de Fide ad Petrum c. 2. Basil. in Pl. 48. & Cyril. lib. 12. c. 10. & plura afferemus infra q. 26.

**Respon.** Quædam conveniunt Christo ratione utriusque nature.

**3. Regula.** Dico tertio. Prædicata concreta, ab humanitate sumpta, non solum dicuntur de Deo absolute, sed etiam denominative. Est certa conclusio, quia non solum dicitur Deus homo, sed humanatus, sicut dicitur incarnatus. Et ratio est, quia in Christo suppositum, quod est homo, non constituitur simpliciter in suo esse per humanitatem, sed supponitur constitutum, & per humanitatem sibi unitam constituitur in esse hominis: suppositum autem, quod supponitur alicui formæ vel naturæ, quæ illi postea unitur, non solum absolute, sed etiam denominative potest a tali forma denominari: sed hæc conclusio latius explicabitur art. 1. dub. 3. pendet enim ex ibi dicendis.

**4. Regula.** Dico ergo quarto. Quædam sunt prædicata, quæ ita conveniunt homini, ut requirant suppositum creatum, & hæc nec Christo, nec Verbo, aut Deo possunt vere attribui. Hæc regula est de fide, cum fides doceat, tale suppositum creatum non esse in Christo. Exemplum est, v. g. si dicatur purus homo, ibi enim excluditur divinum suppositum. Sic dixit Cyrillus lib. cont. Theod. relatus in V. Synod. collat. 5. *Neque enim erat homo simpliciter, sed in specie humana, qui est ex Deo Patre, Deus Verbo.* Non enim est sensus, Christum non posse absolute & simpliciter hominem appellari, sed non posse dici, hominem simpliciter, ita ut illud, *simpliciter*, sit pars prædicati, & idem significet, quod purus vel nudus homo. Simile est hoc prædicatum, esse *peccabilem*, de quo supra dictum est, item hoc, esse *Filium adoptivum*, esse *aliud a Deo*, & similia, de quibus in sequentibus dicemus: nam interdum difficile est discernere huiusmodi prædicata. Illud vero in universum observandum est, quandoque significatio est ambigua, & in uno sensu potest prædicatum habere dictam significationem, & inducere errorem, quamvis in alio possit efficere verum sensum, non esse simpliciter afferendum sine sufficienti explicatione, ut vitetur scandalum, & erroris periculū. Et ex hac regula intelligitur alia, quæ a multis assignari solet, scilicet, ea prædicata, quæ conveniunt homini, & repugnant personæ divinæ, non posse de Deo, aut Christo affirmari: huiusmodi enim prædicata

non sunt talia, nisi quæ involvunt suppositum creatum, quæ dicuntur repugnare personæ divinæ, non solum, quia non possunt illi convenire secundum propriam naturam suam, hoc enim modo omnia prædicata creata repugnant personæ divinæ: sed quia non possunt illi convenire, etiam in assumpta natura, quia non potest persona divina fieri persona creata, etiam si in natura creata subsistat. Et hinc ulterius colligo, hæc prædicata, quæ hanc imperfectionem involvunt, non posse dici de Christo, etiam cum reduplicatione humanitatis, quia neque in quantum homo est personæ creata, nec purus homo, nec Filius adoptivus, ut infra dicitur. Quod tamen limitandum est, nisi, addendo talem determinationem, ita limitetur significatio aut suppositio terminorum, ut jam non requiratur suppositum creatum ad talem propositionem verificandam, ut contingit in hac: *Christus, in quantum homo, incepit esse*, & in aliis similibus, ut circa articulos D. Thomæ magis explicabimus, & solvemus nonnullas difficultates occurrentes.

Unum solum superest hic dubium necessario expediendum, quia multa ex supra dictis ab illo pendent, scilicet, an, quidquid simpliciter dicitur de Christo, possit etiam simpliciter dici de Verbo, aut Filio Dei. Et ratio dubii est, quia in omnibus supra dictis semper hoc supponi videtur, quia est idem suppositum. In contrarium vero est, quia Christus significat totum compositum ex duabus naturis, ut passim ex Damasc. & Cyril. constat, & sæpe in superioribus diximus: Verbum autem, vel Deus, non dicit huiusmodi compositum, sed tantum personam Verbi secundum se; aliquid ergo dici poterit de Christo ratione suæ compositionis, quod non possit dici de Verbo: ut hoc ipsum, esse personam compositam, constare ex divinitate & humanitate, esse terminum resultantem ex unionem duarum naturarum in una persona, & similia. Respondetur, hoc dubium ex regulis dialecticorum definiendum esse. Dicunt enim illi, subjecta frequentius stare materialiter, interdum vero definiti a prædicatis, ut stent formaliter, quia ipsa ratio prædicati hoc ex propria significatione requirit, ut, cum dicitur calidum esse dulce, materialiter stat subjectum. Si vero dicas, calidum esse terminum alterationis, stabit formaliter, neque enim suppositum ipsum est terminus alterationis, neque illi materialiter sumpto hoc vere tribui potest, sed tantum ut subest calori, seu potius composito ex subjecto & calore. Sic ergo dicendum est, regulariter loquendo, prædicata, quæ simpliciter dicuntur de Christo, dici etiam de Verbo, quia subjectum illud stat materialiter pro supposito: interdum vero ratione prædicati determinari, ut stet pro toto composito, ut sic: & tunc prædicatum non communicatur Verbo, quia variatur suppositio, & appellatio terminorum, & huiusmodi sunt illa prædicata, quæ in ratione dubitandi sunt adducta, & si quæ fortasse sunt similia. Et hæc notanda sunt pro his, quæ circa articulos D. Thomæ dicemus, ad quorum explicationem jam accedere oportet, & ex generalibus regulis assignatis, de singulis propositionibus ferre iudicium.

## ARTICULUS I.

*Utrum hæc sit vera, Deus est homo.*

**A**D primum sic proceditur. Videtur, quod hæc sit falsa, Deus est homo. Omnis enim propositio affirmativa in materia remota est falsa. Sed hæc propositio, Deus est homo, est in materia remota, quia forma significat per subjectum & prædicatum, sunt maxime distantes. Cum ergo propositio prædicta sit affirmativa, videtur, quod sit falsa.

**2. Præterea.** Magis conveniunt tres personæ divinæ ad invicem, quam humana natura & divina. Sed in mysterio Trinitatis una persona non prædicatur de alia: non enim dicimus, quod pater est Filius, vel e contrario. Ergo videtur, quod nec humana natura possit prædicari de Deo, ut dicatur, quod Deus est homo.

**3. Præterea.** Athanasius dicit\*, quod sicut anima & caro unus est homo, ita Deus & homo unus est Christus. Sed hæc est falsa, anima est corpus: ergo etiam hæc est falsa, Deus est homo.

**4. Præterea.** Sicut in prima parte habitum est, † quod prædicatur de Deo non relative, sed absolute, convenit toti Trinitati & singulis personis. Sed hoc nomen, homo,

An quidam quid simpliciter dicitur de Christo, dicatur de Verbo.

120.  
3. dist. 7. q.  
1. art. 1. &  
uni. art. 4.  
q. 6. n.

In suo fi-  
de sym-  
bolo.

1. p. q. 19.  
art. 3.



non est relativum, sed absolutum. Si ergo vere predicatur de Deo, sequeretur, quod tota Trinitas & qualibet persona sit homo, quod patet esse falsum.

Sed contra est, quod dicitur Philip. 2. Qui, cum in forma Dei esset, exinanivit semetipsum, formam servi accipiens, in similitudinem hominum factus, & habitu inventus ut homo. Et sic ille, qui est in forma Dei, est homo: sed ille, qui est in forma Dei, est Deus. Ergo Deus est homo.

Respondeo dicendum, quod ista propositio, Deus est homo, ab omnibus Christianis conceditur, non tamen ab omnibus secundum eandem rationem. Quidam enim hanc propositionem concedunt, non secundum propriam acceptionem horum terminorum. Nam Manichæi Verbum Dei dicunt esse hominem, non quidem verum, sed similitudinarium, in quantum dicunt, Filium Dei corpus phantasticum assumpsisse: ut sic dicatur Deus homo, sicut cuprum figuratum dicitur homo, quia habet similitudinem hominis. Similiter etiam illi, qui posuerunt, quod in Christo anima & corpus non fuerunt unita, non possunt dicere, quod Deus sit verus homo, sed quod dicatur homo figurative ratione partium. Sed utraque harum opinionum supra improbatæ est. \* Alii vero e converso ponunt veritatem ex parte hominis, sed negant veritatem ex parte Dei. Dicunt enim Christum, qui est Deus & homo, esse Deum, non naturaliter, sed participative, scilicet, per gratiam, sicut & omnes sancti viri dicuntur Dei, excellentius tamen Christus præ aliis, propter gratiam abundantiorum. Et secundum hoc, cum dicitur, Deus est homo, ly Deus, non supponit verum & naturalem Deum. Et hæc est hæresis Photini, quæ supra improbatæ est. \* Alii vero concedunt hanc propositionem cum veritate utriusque termini, ponentes Christum & verum Deum esse, & verum hominem, sed tamen veritatem predicationis non salvant. Dicunt enim, quod homo predicatur de Deo per quandam conjunctionem, vel dignitatis, vel auctoritatis, vel etiam affectionis aut inhabitationis. Et sic posuit Nestorius, Deum hominem esse, ut per hac nihil aliud significetur, quam quod Deus est homini conjunctus tali conjunctione, quod homo inhabitetur a Deo, & uniatur ei secundum affectionem, & secundum participationem auctoritatis & honoris divini. Et in similem errorem incidunt, quicumque ponunt duas hypostasises vel duo supposita in Christo: quia non est possibile intelligi, quod duorum, quæ sunt secundum suppositum vel hypostasim distincta, unum proprie predicetur de alio, sed solum secundum quandam figurativam locutionem, in quantum in aliquo conjunguntur: puta, si dicamus, Petrum esse Joannem, quia habent aliquam conjunctionem ad invicem. Et hæc opiniones supra improbatæ sunt. \* Unde, supponendo secundum veritatem Catholica fidei, quod vera natura divina unita est cum vera natura humana, non solum in persona, sed etiam in supposito vel hypostasi, dicimus, hanc propositionem esse veram & propriam, Deus est homo, non solum propter veritatem terminorum (quia, scilicet, Christus est verus Deus, & verus homo) sed etiam propter veritatem predicationis. Nomen enim significans naturam communem in concreto, potest supponere pro quolibet contentorum sub natura communi: sicut hoc nomen, homo, potest supponere pro quolibet homine singulari. Et ita hoc nomen, Deus, ex ipso modo sue significationis potest supponere pro persona Filii Dei, ut etiam in prima parte habitum est. \* De quolibet autem supposito alicujus naturæ, potest vere & proprie predicari nomen significans illam naturam in concreto, sicut de Socrate & Platone proprie & vere predicatur homo. Quia ergo persona Filii Dei (pro qua supponit hoc nomen, Deus) est suppositum naturæ humanæ, vere & proprie hoc nomen, homo, potest predicari de hoc nomine, Deus, secundum quod supponit pro persona Filii Dei.

b Ad primum ergo dicendum, quod, quando forme diverse non possunt convenire in unum suppositum, tunc oportet, quod propositio sit in materia remota, cujus subjectum significat unam illarum formarum, & predicatum, aliam. Sed quando due forme possunt convenire in unum suppositum, non est materia remota, sed naturalis, vel contingens: sicut, cum dico, album esse musicum. Natura autem divina & humana, quamvis sint maxime distantes, tamen conveniunt per Incarnationis mysterium in uno supposito, cui neutra illarum inest per accidens, sed per se. Et ideo hæc propositio, Deus est homo, non est neque in materia remota, neque in materia contingenti, sed

Suarez Tom. XVI.

in materia naturali. Et predicatur homo de Deo, non per accidens, sed per se, sicut species de sua hypostasi, non quidem ratione formæ significatæ per hoc nomen, Deus, sed ratione suppositi, quod est hypostasis humanæ naturæ.

Ad secundum dicendum, quod tres persone divine conveniunt in natura, distinguuntur tamen in supposito, & ideo non predicantur de se invicem. In mysterio autem Incarnationis, naturæ quidem, quia distinctæ sunt, de se invicem non predicantur, secundum quod significantur in abstracto (non enim natura divina est humana) sed, quia conveniunt in supposito, predicantur de se invicem in concreto.

Ad tertium dicendum, quod anima & caro significantur ut in abstracto, sicut divinitas & humanitas. In concreto vero dicuntur animatum, & carneum sive corporeum, sicut & ex alia parte Deus & homo. Unde utrobique abstractum non predicatur de abstracto, sed solum concretum de concreto.

c Ad quartum dicendum, quod hoc nomen, homo, predicatur de Deo, ratione unionis in persona, quæ quidem uniorelationem importat. Et ideo non sequitur regulam eorum nominum, quæ absolute predicantur de Deo ab æterno.

#### COMMENTARIUS.

Affirmat D. Thomas, illam propositionem esse veram & propriam, tam ex parte extremorum, quam ex parte copulæ seu predicationis, quod satis clare explicat, refellendo contrarios errores, & confirmando doctrinam fidei, de qua nullus relinquitur dubitandi locus: neque est, quod in illius confirmationem plura hoc loco afferamus, cum & supra q. 2. & disputatione præcedenti, satis multa allata sint. Nonnulla vero leviora dubia breviter expedire oportet, ut litera D. Th. clarius sit.

Primum dubium est, an in ea propositione, Deus, supponat indefinite pro hoc Deo, & quolibet ejus supposito, vel tantum pro persona Verbi. Et ratio dubii est, quia nomen, Deus, ex se habet illam indefinitam suppositionem: ergo non est, cur dicamus, in ea propositione mutari, cum ad veritatem propositionis hoc necessarium non sit: quia ad veritatem propositionis indefinitæ satis est, ut predicatum vere conveniat uni supposito subiecti, quamvis subiectum pro aliis multis supponat, ut constat in hac propositione, homo est albus, vel homo est Deus. In contrarium vero est, quia D. Thomas hic, & in simili art. sequent. ad 2. & 1. p. q. 39. art. 4. indicat, illud subiectum determinari a predicato, ut tantum supponat pro persona Verbi, quod etiam indicat Damasc. lib. 3. c. 4. & Nicet. lib. 3. Theol. c. 16. Et quamvis parum referat, hoc vel illo modo loqui, quia in utroque dicendi modo constat de veritate & proprietate propositionis, nihilominus posterior modus loquendi videtur magis usurpandus, quia, si in illa propositione subiectum quasi indefinite supponeret, pari ratione etiam in hac propositione negativa: Deus non est homo, haberet eundem modum suppositionis, quia sola negatio adjuncta verbo non variat suppositionem extremorum. Effet ergo illa propositio negativa, vera, quia predicatum vere negatur de aliquo supposito, pro quo subiectum supponit; scilicet, de Patre, quod satis est ad propositionis indefinitæ veritatem: consequens autem est falsum, & contra communem modum concipiendi & sentiendi, non solum Theologorum, sed etiam Christianorum omnium: ex quo colligimus, in hujusmodi locutionibus & propositionibus, communem sensum esse, loqui de Deo ratione illius personæ, in quam potest predicatum convenire, & hac ratione determinari predicatum a subiecto, ut pro illa tantum supponat, sicut etiam dicimus in hac propositione: Deus generat, Deum supponere pro Patre, & ideo negativam, Deus non generat, falsam esse. Et ratio addi potest, quia, cum Deus sit terminus singularis, semper supponit pro determinato supposito, juxta exigentiæ prædicati, & nunquam habet indefinitam suppositionem, sed determinatam, sive illa sit pro una tantum persona, ut in dicta propositione: sive pro pluribus, quatenus in eadem singulari forma per predicatum formaliter significata conveniunt, ut in hac: Deus est sapiens, & similibus.

Secundum dubium est circa prædicatum illius propositionis, an homo dicatur univocè de Christo seu Deo, &

De subiecto hujus propositionis, Deus est homo.

De prædicato.

H h

no-



nobis: nonnulli enim Theologi, præsertim Nominales in 3. dist. 4. ausi sunt hoc negare, quibus consentire videtur Marfil. q. 6. & Scot. dist. 7. q. 1. dicit, aliud esse prædicatum univocum, aliud prædicari univoce: hoc ergo prædicatum, *homo*, dictum de Deo, & de nobis, dicit esse univocum, quia est in se unum in specie, & in conceptu & ratione sua; negat vero prædicari univoce, quia de Deo prædicatur denominative, cum supponat suppositum, cui potest convenire, & non convenire esse hominem: de aliis vero hominibus dicitur intrinsece & essentialiter, quia ratione utuntur etiam Nominales. Sed ex ea ulterius concludunt, etiam ipsum prædicatum non esse univocum, quia homo non tantum significat naturam, sed etiam suppositum: at vero Christus, & alii homines non conveniunt univoce in ratione suppositi & personæ.

Dicendum vero est primo, hominem dictum de Christo seu Deo, & aliis hominibus, esse quid univocum. Ita docuit D. Th. supra q. 2. art. 5. & non videtur posse cadere in dubium apud Catholicos, in Symbolo enim Athanasii dicitur Christus perfectus Deus, & perfectus homo, & in Conciliis sæpe supra citatis, vel eisdem, vel æquivalentibus verbis, sæpe id docetur, ut patet ex V. Synod. can. 8. ubi Christus dicitur consubstantialis Patri secundum Divinitatem, & consubstantialis nobis secundum humanitatem, & in Concil. Latera. sub Martin. l. can. 4. dicitur verus Deus, & verus homo consubstantialis nobis. Idem in VI. Synod. act. 11. & in aliis Sanctis supra citatis. Ratio vero est, quia homo significat subsistens in humana natura ex corpore & anima rationali composita: ergo ratio hujus nominis dicti de Deo, & nobis, una est, quia natura humana in Christo, & in nobis, ejusdem rationis est, propter quod dicitur a Paulo ad Philip. 2. *In similitudinem hominum factus*, in similitudinem, scilicet, specificam, atque adeo univocam. Et confirmatur, nam Christus tam vere, proprie, & univoce est filius Virginis, sicut quilibet homo est filius matris suæ: ergo est tam vere & simpliciter homo, sicut alii homines, quia de ratione filii est, ut sit ejusdem rationis univoce cum eo, a quo procedit. Et hinc ulterius infero, hoc prædicatum non solum in se esse univocum, sed etiam univoce dici de Christo & de nobis: tum, quia ratio prædicati univoci consistit in habitudine ad multa, de quibus eadem ratione dicitur: tum etiam, quia rationes factæ non solum probant, prædicatum in se esse quid univocum, sed etiam univoce convenire Christo, quia sub eadem omnino ratione dicitur homo, scilicet, quia est verum animal rationale, & verum individuum humanæ naturæ. Neque contra hoc obstat argumentum Nominalium: nam homo non significat formaliter subsistentiam, sed constitutum per humanam naturam, & ideo, si natura est ejusdem speciei & rationis, etiam homo erit ejusdem speciei & rationis, atque adeo univoce homo. Ad rationem vero Scoti respondetur, in primis non procedere de hoc prædicato, ut dicitur formaliter de hoc homine, prout significatur hoc nomine, *Jesus*: nam ille tam per se & essentialiter est homo, sicut Petrus, & quilibet alius, & idem est de hoc homine, prout significatur hac voce *Christus*, quia etiam Christus significat constitutum per humanam naturam, ut constat ex Damasc. lib. 3. c. 3. Cyril. de Incarn. c. 1. & ex communi usu: ergo, ut sic, per se & essentialiter est homo. Nec refert, quod sub nomine Christi utraque natura includatur, quia hoc non impedit, quin simul sit perfecte & essentialiter Deus, ut in natura divina subsistit, & homo, ut subsistit in humana: ad rationem, enim univocæ prædicationis satis est, quod sub eadem ratione & habitudine dicitur prædicatum de subiecto, quamvis in subiecto plura includantur, quam per prædicatum significantur. At vero, si comparetur hoc prædicatum, *homo*, ad Christum, ut significatur nominibus divinis: id est, ad Verbum Filium Dei, seu Deum, sic nonnullam dubitationem ingerit argumentum Scoti, supponit tamen ea, quæ in dubio quarto tractanda sunt, & ibi commode expediuntur.

Tertium dubium est circa totam ipsam prædicationem, *Deus est homo*, an sit omnino propria. In quo non est nobis disputandum cum hæreticis, cum quibus jam satis actum est, sed solum proponitur dubium propter Durandum, qui dist. 4. q. 2. nonnulla dicit correctione digna. Primum enim inquit, si quis credat mysterium Incarnationis, non referre, etiam si hunc modum loquendi neget, *Deus est homo*, quia, cum rem non neget, sed locu-

tionem, non errabit in fide. In quo valde ipse errat, nam ex verbis inordinate prolatis hæresis incurritur, & si quis uno modo neget veritatem fidei, licet alia via rem fidei constiteatur, in hæresim nihilominus labitur: nam, licet per ignorantiam sibi ipsi contradicat, tamen a ratione formalis fidei discedit, cum aliquid revelatum a Deo falsum esse dicat, ut, si quis confitens tres personas unius essentiae neget, illas esse unum Deum, hæreticus est: ita ergo dicendum est in presenti, & ideo Durandus non negat, hanc propositionem esse veram & propriam: *Deus est homo*: Dicit tamen secundo, non esse tam propriam, sicut hanc: *Petrus est homo*, unde addit, etiam non esse omnino propriam. De quo etiam a cæteris Theologis graviter reprehenditur, & merito, quia Scriptura docet, & Concilia definiunt, & sancti Patres tradunt, Deum vel Christum esse hominem cum omni veritate & proprietate, & Beatam Virginem propriissime & verissime esse matrem Dei & hominis: cum enim veritas propositionis ex illius significatione pendeat, sicut illa propositio omnino vera est, ita etiam in significatione terminorum omnino propria veritatem habet. Rursus in modo prædicationis nullam habet improprietatem, nam, postquam Deus assumpsit humanam naturam, illud prædicatum formaliter significat id, quo est veluti forma subiecti: ergo omnino proprie prædicatur de illo. Denique, cum dicimus, Petrum esse hominem, significamus, Petrum esse suppositum naturæ humanæ: sed hoc idem significamus in illa: *Deus est homo*, scilicet, Deum esse suppositum naturæ humanæ, quod æque verum est.

Sed objicit Durandus, nam de Petro dicitur, *homo*, per se & essentialiter, de Deo autem quasi denominative; ergo non tam proprie. Respondetur (quidquid sit de antecedenti, de quo statim) negando consequentiam: potest enim propositio esse omnino propria in quacumque materia, & in quacumque qualitate propositionis, si tamen fervet propriam significationem terminorum, & debitam habitudinem eorum. Sicut tam propria est hæc, *homo est albus*, sicut hæc, *homo est animal*, quamvis altera sit denominativa & in materia contingenti, altera essentialis & in materia naturali. Sed urget Durandus, quia in terminis substantialibus significantibus diversas naturas, non potest fieri propria prædicatio unius de alio, præsertim, si sint termini absoluti, & non connotativi, & significant naturas perfectas & específicas, ut sunt Deus, & homo. Respondetur, negativas propositiones fieri omnino proprias ex hujusmodi terminis, ut cum dicitur, *homo non est equus*, quia propriissime significatur, suppositum unius naturæ non esse suppositum alterius. Et propterea, naturaliter loquendo, affirmativæ propositiones ex similibus terminis compositæ, non possunt esse veræ, quia non potest esse idem suppositum utriusque naturæ; tamen, si veritatem propositionis a significatione propria distinguamus, etiam hæc propositio affirmativa, *homo est equus*, proprie significat, idem esse suppositum naturæ humanæ & equinæ, quamquam hoc falsum sit. Ac propterea, supposito mysterio Incarnationis, absque mutatione ulla facta in significationibus terminorum, illa propositio, *Deus est homo*, & propria est, & vera, quia per illam proprie significatur, idem esse suppositum utriusque naturæ, quod verum est.

Sed urget tandem Durandus, quia Deus dicitur proprie humanatus; ergo non ita proprie dicitur homo, quia idem terminus substantialis non potest utroque modo, & æque proprie prædicari de eodem subiecto. Respondetur, negando consequentiam, & probationem ejus: quia, licet illa procedat in subiecto vel supposito, quod per formam simpliciter constituitur in suo esse, non tamen in subiecto seu supposito, quod in suo esse simpliciter supponitur formæ seu naturæ formaliter significatæ per prædicatum, & per illam solum constituitur in tali esse specifico. Nam tunc, licet natura & unio sint substantiales, modus prædicationis & denominationis est tanquam a forma adventitia & extranea, & ideo, sicut aqua non solum dicitur calida, sed etiam calefacta, ita Verbum non tantum dicitur homo, sed etiam humanatum. Adde, hanc denominationem non proprie sumi ab ipsa humanitate ut sic, sed ab unione, a qua optime denominatur suppositum, cui humanitas unitur, non vero quod per ipsam simpliciter in esse constituitur: & ideo Petrus non dicitur humanatus, quod tamen proprie dicitur de Filio Dei: ab ipsa vero

Homo univoce dicitur de Christo, & de nobis.

De proprietate hujus propositionis, Deus est homo.

Obiect. 1. Respon.

Obiect. 2.

Respon.

Obiect. 3.

Respon.



vero humanitate utrumque suppositum proprie denominatur homo. Proprium vero prædicatum denominativum ab humanitate sumptum, esset humanum: & hoc est ambiguum, nam interdum non sumitur hæc denominatio a substantiali natura, sed ab accidentali perfectione & idem significat, quod benignus, &c. interdum vero significat essentialem differentiam, ut cum dicitur natura humana: interdum vero significat substantialem denominationem personæ constitutæ per naturam, ut cum dicitur persona humana; quæ etiam denominatio æquivoca esse potest, significare enim potest personam propriam & connaturalem humanitatis, sicut persona angelica, & hoc modo non potest hæc denominatio Christo tribui. Alio modo significare potest personam subsistentem in humanitate, & hoc modo interdum appellatur Christus persona humana, sicut Ambros. epist. 40. dicit, in Christo esse personam hominis, & Damasc. lib. 3. c. 11. dicit, esse hypostasim carnis, & Deum & hominem esse eundem propter personæ unitatem, sic enim ex Græco evitendum est, & non propter personarum unionem, ut male vertit Billius: & ita loquuntur interdum Theologi, ut patet ex Cajetano supra q. 2. art. 5. & Marsil. in 3. q. 6. art. 3. dub. 3. & aliis, quos infra referam art. 12. & hæc circa corpus artic.

De qualitate ejusdem propositionis.

*b* Circa primum argumentum D. Th. occurrit quartum dubium de qualitate & materia hujus propositionis: *Deus est homo*, an, scilicet, sit per se vel per accidens, necessaria vel contingens, nam D. Th. hic docet, esse in materia naturali & per se. Idem in 3. d. 7. q. 1. art. 1. Idem Cajet. hic latissime, & Ferr. 4. lib. contra Gent. c. 45. Richard. in 3. d. 7. art. 1. q. 1. ad 3. Fundamentum D. Thom. est, quia homo dicitur de Deo tanquam de supposito humanæ naturæ; ergo dicitur sicut species de individuo: ergo per se & quidditative: est ergo propositio in materia naturali. Et confirmatur, quia illa propositio est vera, ratione unionis duarum naturarum in eodem supposito; sed neutra conjungitur illi per accidens, sed per se. Addit vero D. Thom. illam propositionem esse per se, non ratione formæ significatæ per hoc nomen *Deus*, sed ratione suppositi, quod est hypostasis humanæ naturæ, sub intelligendum autem est, subjectum illud, *Deus*, per prædicatum determinari, ut supponat pro illo supposito, non utrumque, sed ut conjuncto humanæ naturæ, quod ut sic sub specie humana constituitur.

Contrariam sententiam sequuntur communius Theologi in 3. d. 4. & 7. Bonav. d. 7. art. 1. q. 1. Scot. q. 1. Gabr. dub. 3. Durand. q. 1. ad 2. & in d. 4. q. 2. ubi idem sentit Capreol. ad argum. Scoti contra 2. conclus. Marsil. in 3. q. 6. ad 5. qui multas congerunt rationes, & sane difficiles. Prima, quia propositio affirmativa in materia naturali ita est vera, ut non possit esse falsa; hæc autem: *Deus est homo*, potest esse falsa: est ergo in materia contingenti, seu libera in ordine ad divinam potentiam, nam in ordine ad naturalem potentiam est in materia remota. Secundo, quia propositio per se est vera formaliter, etiam cum reduplicatione, illa autem, de qua est quæstio, non est hujusmodi: nam si dicas: *Deus in quantum Deus, est homo*, est falsa. Alias rationes omitto, quia dissensio est parvi momenti, pendens ex usu, vel acceptione vocum, res enim ipsa constat. Dubitari enim non potest, quin sumptis illis terminis in propria significatione & suppositione, propositio illa per se non sit, neque in materia naturali ut rationes factæ probant: quia prædicatum non est de ratione subjecti, neque ex natura sua cum illo connexum, non solum formaliter, sed neque etiam materialiter: humanitas enim, nec Deo, nec supposito divino est necessario & ex natura rei unita; sed hoc pendet ex unionem libere facta a Deo. Sicut ergo in hoc sensu potest illa unio dici libera, & suo modo contingens: ita in eodem sensu posset illa propositio dici esse in materia contingenti, seu libera.

Uterius vero addendum est, etiam considerata illa propositione in hoc sensu, non esse dicendam prædicationem accidentalem, sed substantialem: tum ad vitandos errores, tum quia, quod prædicatur, est substantia, & veritas prædicationis in substantiali unionem fundata est. Et fere eodem sensu post factum mysterium potest dici aliquo modo per se, quia prædicatum est unum per se cum subjecto, & non per accidens, & similiter dici potest necessaria, quia ejus veritas fundatur in unionem ex natura

Suarez Tom. XVI.

sua indissolubili, & immutabili. Quæ omnia sunt vera, loquendo in rigorosa & propria suppositione terminorum: at vero, si ex communi usu intelligatur subjectum illud, *Deus*, trahi a prædicato ad supponendum pro persona Filii composita, & conjuncta humanæ naturæ, sic concedi potest, propositionem illam esse per se, & in materia naturali, & ita locutus est D. Th. magis pie exponendo, & Theologice, quam in rigore dialectico, unde fit, hanc propositionem: *Jesus est homo*, esse propriissime in materia naturali, & per se, quia per illud nomen formaliter significatur individuum humanæ nature, & idem est censendum de hac: *Christus est homo*, quidquid Scotus & Gabr. dicant, quia etiam hoc nomen formaliter dicit humanitatem. Et licet etiam dicat divinitatem, inde solum fit, Christum per se & essentialiter dici Deum, & hominem, quia nomen illud formaliter dicit individuum, & suppositum utriusque naturæ. Et ex his facile expeditur difficultas ex dub. 2. huc remissa, scilicet, quomodo *homo* dicatur univoce de Deo & de nobis, cum de nobis dicatur per se & formaliter, non tamen de Deo, sequendo enim modum loquendi D. Th. facile respondetur, negando assumptum: considerando autem præcisam & rigorosam significationem & suppositionem terminorum, dicendum est, id non esse contra rationem termini univoci, quia forma, quæ prædicatur seu applicatur subjecto, ejusdem rationis est, quamvis modus prædicationis sit diversus. Et si in hoc sensu dicatur prædicatio non esse univoce, quia modus seu qualitas prædicationis non est eadem, non est multum in verbis immorandum, quamvis caute, & sine offensione loqui oporteat.

Homo univoce dicitur de Deo, & nobis.

*c* Quartum argumentum D. Thomæ (omissis 2. & 3. quæ expositione non indigent) est hoc. Absolutum prædicatum conveniens Deo, est commune toti Trinitati; sed homo est absolutum prædicatum; ergo, si dicitur de Deo, dicitur de tota Trinitate, quod omnino falsum est. Respondet D. Th. obscurissime, hoc nomen, *homo*, non sequi regulam absoluti, sed relativi prædicati respectu Dei, quia dicitur de Deo ratione unionis in persona, quæ est relatio. Quæ responsio Cajetano & aliis Thomistis negotium facebat. Sed res est clara, solutio enim argumenti facilis esse posset, prædicata, absoluta, quæ conveniunt Deo ab æterno, & sunt illi intrinseca & connaturalia, esse communia toti Trinitati, non vero prædicatum absolutum, quod convenit Deo ex tempore, ratione assumptæ naturæ. Et hoc ipsum explicavit D. Th. illis verbis, quibus simul declarare voluit, quomodo potuerit aliquod prædicatum absolutum convenire uni personæ ex tempore, & non aliis: quia unio, quæ est fundamentum hujus prædicationis, est unio in persona, & consequenter relationem dicit ad illam personam, & non ad alias; nam licet per hanc propositionem: *Deus est homo*, non prædicetur illa relatio, sed substantia absoluta, tamen per relationem optime explicatur, cum prædicatum illud aliis personis incommunicabile sit.

## ARTICULUS II.

*Utrum hæc sit vera, Homo est Deus.*

*A*d secundum sic proceditur. Videtur, quod hæc sit falsa, homo est Deus. Deus enim est nomen incommunicabile, secundum quod Sapient. 13. reprehenduntur idololatrae, do hoc quod hoc nomen, Deus, quod est incommunicabile, lignis & lapidibus imposuerunt. Ergo pari ratione videtur esse inconveniens, quod hoc nomen, Deus, prædicetur de homine.

101.  
Locis sup  
art. 1. in  
ductis.

2. Præterea. Quicquid prædicatur de prædicato, prædicatur de subjecto. Sed hæc est vera, Deus est Pater, vel Deus est Trinitas. Si ergo hæc sit vera, homo est Deus, videtur, quod hæc etiam sit vera, homo est Pater, vel homo est Trinitas, quas quidem patet esse falsas: ergo & primâ.

3. Præterea. In Psal. 80. dicitur: Nō erit in te Deus recens. Sed homo est quiddam recens: non enim Christus semper fuit homo: Ergo hæc est falsa, Homo est Deus.

Sed contra est, quod dicitur Roman. 6. Ex quibus est Christus secundum carnem, qui est super omnia Deus benedictus in secula. Sed Christus secundum carnem est homo. Ergo hæc est vera, Homo est Deus.

a Respondeo dicendum, quod, supposita veritate utriusque naturæ, divinæ, scilicet, & humanæ, & unionem in persona & hypostasi, hæc est vera & propria, Homo est Deus,

H h 2

sicut



sicut & ista, Deus est homo. Hoc enim nomen, homo, potest supponere pro qualibet hypostasi humana natura, & ita potest supponere pro persona Filii Dei, quam dicimus esse hypostasim humanam naturam. Manifestum est autem, quod de persona Filii Dei vere & proprie predicatur hoc nomen, Deus, ut in prima parte habitum est. \* Unde relinquitur, quod hoc sit vera & propria, Homo est Deus.

Ad primum ergo dicendum, quod idololatras attribuebant nomen Deitatis lapidibus & signis, secundum quod in sua natura considerantur: quia putabant in illis aliquid numinis esse. Nos autem non attribuimus nomen Deitatis Christo homini secundum humanam naturam, sed secundum suppositum eternum, quod est etiam per unionem suppositum humanam naturam, ut dictum est. †

In cor. ar.

Ad secundum dicendum, quod hoc nomen, Pater, predicatur de hoc nomine, Deus, secundum quod hoc nomen, Deus, supponit pro persona Patris: sic autem non predicatur de persona Filii, quia persona Filii non est persona Patris. Et per consequens non oportet, quod hoc nomen, Pater, predicetur de hoc nomine, homo, de quo predicatur hoc nomen, Deus, in quantum ly, homo, supponit pro persona Filii.

Ad tertium dicendum, quod, licet humana natura in Christo sit quiddam recens, tamen suppositum humane nature non est recens, sed eternum. Et quia hoc nomen, Deus, non predicatur de homine, ratione humane nature, sed ratione suppositi, non sequitur, quod ponamus Deum recentem. Sequeretur autem, si poneremus, quod homo supponit suppositum creatum, secundum quod oportet dicere eos, qui in Christo ponunt duo supposita.

## COMMENTARIUS.

Affirmat D. Thomas, & est res certa, & satis in superioribus confirmata. Et tota litera articuli est perspicua. Possunt tamen hic moveri fere eadem dubia, quæ in precedenti articulo tractata sunt. Sed hic minorem habent controversiam, nam de suppositione illius subiecti, homo, parum refert, sive dicatur supponere indefinite, sive trahi a prædicato ad supponendum pro tali supposito, ut Cajetanus hic docet: utroque enim modo propositio est æque vera, & per modum videtur magis consentaneum communi usui talium terminorum. De illo autem prædicato, Deus, non est dubium apud Catholicos, quin omnino proprie de homine Christo dicatur, & facilius de hac propositione concedi potest esse per se, saltem ratione suppositi, quia illud suppositum humane nature, ratione cuius verum est dicere, hominem esse Deum, per se & essentialiter est Deus, natura enim divina est illi intrinseca & connaturalis, & non adventitia, & assumpta, sicut humana.

## ARTICULUS III.

Utrum Christus possit dici homo dominicus.

Ad tertium sic proceditur. Videtur, quod Christus possit dici homo dominicus. Dicit enim August. \* in lib. 83. quæst. Monendum est, ut illa bona expectentur, quæ fuerunt in illo homine dominico. Loquitur autem de Christo. Ergo videtur, quod Christus sit homo dominicus.

2. Præterea. Sicut dominium convenit Christo, ratione divine nature, ita etiam humanitas pertinet ad humanam naturam. Sed Deus dicitur humanatus, ut patet per Damas. in 3. lib. \* ubi dicit, quod humanatio eam, quæ ad hominem est, copulationem demonstrat. Ergo pari ratione potest dici denominative, quod homo ille sit Dominicus.

3. Præterea. Sicut dominicus denominative dicitur a Domino, ita divinus denominative dicitur a Deo. Sed Dion. \* Christum nominat, divinisimum Jesum. Ergo pari ratione potest dici, quod Christus sit homo dominicus. Sed contra est, quod August. dicit in lib. Retract. \* Non video, utrum recte dicatur homo dominicus Jesus Christus, cum sit utique Dominus.

a Respondeo dicendum, quod, sicut supra dictum est, \* cum dicitur homo Christus Jesus, designatur suppositum æternum, quod est persona Filii Dei, propter hoc, quod est unum suppositum utriusque nature. De persona autem Filii Dei predicatur Deus, & Dominus essentialiter, & ideo non debet predicari denominative, quia hoc derogat veritati unionis. Unde, cum Dominicus dicatur denominative a Domino, non potest vere & proprie dici, quod homo ille sit dominicus, sed magis, quod sit Dominus. Si autem per hoc, quod dicitur homo Christus Jesus, designa-

retur suppositum aliquod creatum, secundum illos, qui ponunt in Christo duo supposita, posset dici homo ille dominicus, in quantum assumitur ad participationem honoris divini, sicut Nestoriani posuerunt. Et hoc etiam modo humana natura non dicitur essentialiter Deus, sed deificata: non quidem per conversionem ipsius in divinam naturam, sed per conjunctionem ad divinam naturam in una hypostasi, ut patet per Damas. in lib. 3.

Ad primum ergo dicendum, quod Augustinus verba illa, & similia retractat in lib. Retract. \* Unde post verba præmissa in lib. Retract. \* subdit, Ubicumque hoc dixi, scilicet, quod Christus Jesus sit homo dominicus, dixisse me nollem, postea quippe vidi non esse dicendum. Quamvis nonnulla possit ratione defendi, quia, scilicet, posset aliquis dicere, quod dicitur homo dominicus ratione humane nature, quam significat hoc nomen, homo, non autem ratione suppositi.

Ad secundum dicendum, quod illud unum suppositum, quod est humana & divina natura, primo quidem fuit divina natura, scilicet, ab æterno: postea autem ex tempore per incarnationem factum est suppositum humane nature. Et hac ratione dicitur humanatum, non quia assumpsit hominem, sed quia assumpsit humanam naturam. Non autem sic est e converso, quod suppositum humane nature assumpsit divinam naturam, unde non potest dici homo deificatus vel dominicus.

Ad tertium dicendum, quod hoc nomen, divinum, consuevit predicari, etiam de his de quibus predicatur essentialiter hoc nomen Deus. Dicimus enim, quod divina essentia est Deus, ratione identitatis: & quod essentia est Dei sive divina, propter diversum modum significandi, & Verbum divinum, cum tamen Verbum sit Deus. Et similiter dicimus personam divinam, sicut & personam Platonis, propter diversum modum significandi. Sed dominicus non dicitur de his, de quibus Dominus predicatur: non enim consuevit dici, quod aliquis homo, qui est Dominus, sit Dominicus. Sed illud, quod qualitercumque est dominus, dominicum dicitur: sicut dominica voluntas, vel dominica manus, vel dominica passio. Et ideo ipse homo Christus, qui est Dominus, non potest dici dominicus: sed potest caro eius dici caro dominica, & passio eius potest dici passio dominica.

## COMMENTARIUS.

Divus Thomas videtur movisse quæst. hanc propter August. qui interdum hac locutione usus est, & postea illam retractavit, ut D. Th. refert in articulo, constat etiam ex lib. 2. de ferm. Domini in monte c. 10. Sed non solus August. ea locutione interdum usus est, sed etiam Athanas. in expositione fidei, quæ habetur in tom. 1. & Chrys. homil. de Cruce Domini in tom. 3. & Epiphani. hæres. 69. & in lib. Ancorato post medium, & Dydimus lib. 3. de Spiritu S. col. 4. in 6. tom. Biblioth. sanctæ, Nihilominus D. Th. sequens retractionem Augustini, negat simpliciter hanc locutionem, quia Dominicus dicitur denominative a Domino: unde, cum Christus sit ipse Dominus, non potest vere dici Dominicus, quia per hoc importatur solum quedam habitudo ad Dominum. Circa quam rationem & sententiam observanda est regula supra posita de prædicationibus denominativis, non enim omnis prædictio denominativa repugnat huic mysterio, sed illa, quæ indicat distinctionem suppositorum, atque adeo unionem accidentalem: hoc vero prædicatum, Dominicus, significat sine ullo dubio habitudinem ad Dominum, & consequenter importat distinctionem rei sic denominatæ ab ipso Domino, unde fit, ut humanitas Christi vere possit dominari Dominica, quia est distincta a supposito. Et hoc fortasse modo locuti sunt Patres Græci, & August. in prioribus locis, frequens enim apud illos est, humanitatem hominem appellare. Et idem est de passione & aliis similibus: at vero homo Christus, cum non distinguatur a supposito, quod est Dominus, non potest Dominicus appellari, quia indicatur Nestorianus error, & distinctio suppositorum. Unde etiam Nazianz. orat. 51. refert, etiam Appollinarem illa voce utam esse, ipse vero subdit: Nos vero rectius Deum, & Dominum nostrum appellamus non enim hominem a Domino separamus. Ad id vero potest, hæc omnia esse vera, si intelligamus, hoc nomen, Dominicus, dicere habitudinem ad ipsummet Verbum, ut revera contingit in illa propositione juxta communem usum terminorum: intelligi ta-

li. 3. orat. 8.  
c. 1. 4. 13.  
& 17.  
lib. 1. retr.  
c. 19. de cl.  
ad fi. to. 1.

August.  
Athanas.  
Chrys.  
Epiphani.  
Dydimus.

107.  
3. d. 7. q. 1.  
art. 2. q. 36  
circa me  
dium. 10. 4

lib. 3. orat.  
fid. cap. 11

ca. 4. Eccl.  
hier. p. 3.  
in tit.  
Contr. in  
prioc.  
Lib. 1. retr.  
c. 19. non  
procul. a  
fi. to. 1. ar.  
p. 5. ad 3.



men posset, hanc denominationem etiam sumi per habitudinem ad Patrem: sicut enim dicitur Christus Filius Dei propter habitudinem ad Patrem, ita etiam potest dici Filius, seu Verbum Domini, quomodo in Scriptura interdum appellatur: ergo ratione hujus habitudinis potest dici Verbum Dominicum, & Filius Dominicus, & per communicationem idiomatum homo Dominicus. Sed quia vocibus utendum est juxta communem usum, cui sensus hic non est consentaneus, ideo hæc locutio introducenda non est. Posset vero hic habere locum quaestio, an, saltem cum hac determinatione, in quantum homo, possit hoc prædicari dici de Christo, sed hæc quaestio coincidit cum illa, an Christus in quantum homo, possit dici servus, quæ infra, q. 20. tractanda est.

Solutio ad primum simul cum art. explicata est. Solutiones vero ad 2. & 3. in disp. præc. sect. 3. tractatae sunt.

## ARTICULUS IV.

Utrum ea, quæ conveniunt Filio hominis, possint prædicari de Filio Dei, & e converso.

**A**d quartum sic proceditur. Videtur, quod ea, quæ sunt humana naturæ, non possint dici de Deo. Impossibile enim est, opposita de eodem prædicari. Sed ea, quæ sunt humana naturæ, sunt contraria his, quæ sunt propria Dei: Deus enim est increatus, immutabilis, & æternus: ad humanam autem naturam, pertinet, ut sit creata, temporalis, & mutabilis. Ergo ea, quæ sunt humana naturæ, non possunt dici de Deo.

2. Præterea. Attribuere Deo ea, quæ ad defectum pertinent, videtur derogare divino honori, & ad blasphemiam pertinere. Sed ea, quæ sunt humana naturæ, defectum quandam continent, sicut pati, mori, & alia hujusmodi. Ergo videtur, quod nullo modo ea, quæ sunt humana naturæ, possint dici de Deo.

3. Præterea. Assumi convenit humana naturæ. Non autem hoc convenit Deo. Non ergo ea, quæ sunt humana naturæ, de Deo dici possunt.

Sed contra est, quod Damascen. \* dicit in 3. lib. quod Deus suscepit ea, quæ sunt carnis idiomata, id est, proprietates, dum Deus passibilis nominatur, & Deus glorie crucifixus est.

Respondendo dicendum, quod circa hanc questionem diversitas fuit inter Nestorianos & Catholicos. Nestoriani enim voces, quæ dicuntur de Christo, dividere volebant hoc modo, ut ea, quæ pertinent ad humanam naturam, non dicerentur de Deo: nec ea, quæ pertinent ad divinam naturam, dicerentur de homine. Unde Nestorius dixit. Si quis Dei Verbo tentat passiones tribuere, anathema sit. Si quæ vero nomina sunt, quæ pertinent possunt ad utramque naturam, de talibus prædicabant ea, quæ sunt utriusque naturæ: sicut hoc nomen, Christus, vel Dominus. Unde concedebant Christum esse natum de Virgine, & fuisse ab æterno, non tamen dicebant, vel Deum natum de Virgine, vel hominem ab æterno fuisse. Catholici vero posuerunt, hujusmodi, quæ dicuntur de Christo (sive secundum divinam naturam, sive secundum humanam) dici posse tam de Deo, quam de homine. Unde Cyrillus dicit: \* Si quis duabus personis seu substantiis, id est, hypostasis, eas quæ in Evangeliiis, & Apostolis conscriptionibus sunt, dividit voces, vel ea, quæ de Christo a Sanctis dicuntur, vel ab ipso Christo de semetipso, & aliquas quidem ex his homini applicandas crediderit, aliquas vero soli Verbo deputaverit, anathema sit. Et hujus ratio est, quia, cum sit eadem hypostasis utriusque naturæ, eadem hypostasis supponitur nomine utriusque naturæ: sive ergo dicatur homo, sive Deus, supponitur hypostasis divina & humana naturæ. Et ideo de homine possunt dici ea, quæ sunt divine naturæ, tanquam de hypostasi divine naturæ: & de Deo possunt dici ea, quæ sunt humane naturæ, tanquam de hypostasi humane naturæ. Sciendum tamen, quod in propositione, in qua aliquod de aliquo prædicatur, non solum attenditur, quid sit illud, de quo prædicatur prædicatum: sed etiam secundum quid de illo prædicetur. Quamvis ergo non distinguantur ea, quæ prædicantur de Christo, distinguuntur tamen secundum id, secundum quod utrumque prædicatur. Nam ea, quæ sunt divine naturæ, prædicantur de Christo secundum divinam naturam: ea autem, quæ sunt humane naturæ, prædicantur de eo secundum humanam naturam. Unde August. dicit in primo de

Trinit. \* Distinguantur, quid in Scripturis sonet, secundum formam Dei, in qua equalis est Patri, & quid, secundum formam servi, quam accepit, in qua minor est Patri. Et infra, quid, & propter quid, & quid secundum quid dicatur, prudens, & diligens, & pius lector intelliget.

Ad primum ergo dicendum, quod, opposita prædicari de eodem secundum idem, est impossibile, sed secundum diversa, nihil prohibet. Et hoc modo opposita prædicantur de Christo, non secundum idem, sed secundum diversas naturas.

Ad secundum dicendum, quod si ea, quæ ad defectum pertinent, Deo attribuerentur secundum divinam naturam, esset blasphemiam, quasi pertinet ad diminutionem honoris ipsius: non autem pertinet ad Dei injuriam, si attribuantur ei secundum naturam assumptam. Unde in quodam sermone Ephesini Concilii dicitur. Nihil putat Deus injuriam, quod est occasio salutis hominibus, nihil enim abjectorum, quæ elegit propter nos, injuriam facit illi naturæ, quæ non potest esse subiecta injuriis, propria vero facit inferiora, ut salvet naturam nostram. Quando ergo abjecta & vilia sunt, divinam naturam non injuriantur, sed salutem hominibus operantur. Quomodo dicis ea, quæ causa nostræ salutis sunt, injuriæ occasionem Deo fuisse.

Ad tertium dicendum, quod assumi convenit humana naturæ, non ratione suppositi, sed ratione sui ipsius, & ideo non convenit Deo.

**A**ffirmat D. Thomas, & litera & doctrina ejus est satis clara. Nihil vero addendum occurrit, quæ in disputatione præcedenti, sect. 3. & 4. dicta sunt.

## ARTICULUS V.

Utrum ea, quæ conveniunt filio hominis, possint prædicari de divina natura: & de humana, ea, quæ conveniunt Filio Dei.

**A**d quintum sic proceditur. Videtur, quod ea, quæ sunt humana naturæ, possint dici de natura divina. Ea enim, quæ sunt humana naturæ, prædicantur de Filio Dei, & de Deo. Sed Deus est sua natura. Ergo ea, quæ sunt naturæ humane, possunt prædicari de divina natura.

2. Præterea. Caro pertinet ad naturam humanam, sed, sicut dicit Damasc. \* in 3. lib. dicimus, naturam Verbi incarnatam esse, secundum Beatos Athanasium & Cyrillum. Ergo videtur, quod pari ratione ea, quæ sunt humane naturæ, possint dici de divina natura.

3. Præterea. Ea, quæ sunt divine naturæ, conveniunt humane naturæ in Christo: sicut cognoscere futura, & habere salutiferam virtutem. Ergo videtur, quod pari ratione ea, quæ sunt humane naturæ, possint dici de divina natura.

Sed contra est, quod Damasc. \* dicit in 3. libro: Deitatem quidem dicentes, non nominamus de ea, quæ humanitatis idiomata sunt, id est, proprietates: non enim dicimus Deitatem passibilem, vel creabilem. Deitas autem est divina natura. Ergo ea, quæ sunt humane naturæ propria, non possunt dici de divina natura.

Respondendo dicendum, quod ea, quæ sunt propria unius, non possunt vere de alio prædicari, nisi de eo quod est idem illi: sicut risibile non convenit nisi ei, quod est homo. In mysterio autem Incarnationis non est eadem natura divina & humana, sed eadem est hypostasis utriusque naturæ, & ideo ea, quæ sunt unius naturæ, non possunt de alia prædicari, secundum quod in abstracto significantur. Nomina vero concreta supponunt hypostasis naturæ, & ideo indifferentem prædicari possunt ea, quæ ad utramque naturam pertinent, de nominibus concretis, sive illud nomen, de quo dicuntur, det intelligere utramque naturam, sicut hoc nomen, Christus, in quo intelligitur, & Divinitas ungens, & humanitas uncta: sive solum divinam naturam: sicut hoc nomen, Deus, vel Filius Dei: sive solum naturam humanam, sicut hoc nomen, homo, vel Jesus. Unde Leo Papa dicit in Epistola ad Palestinus. \* Non interpretetur, ex qua Christus substantia nominetur, cum, inseparabiliter manente unitate persone idem sit & totus hominis filius, propter carnem, & totus Dei Filius, propter unam cum Patre Deitatem.

Ad primum ergo dicendum, quod in divinis realiter est idem persona cum natura, & ratione hujus identitatis divina natura prædicatur de Filio Dei. Non tamen est idem modus significandi, & ideo quedam dicuntur de Filio Dei,

\* l. r. c. 11.  
in prin.  
aom. 3.

Lib. 3. or.  
fid. c. 6.  
circa fi. &  
c. 7. a meo  
dio.

Lib. 3. c. 6.

Et Epi.  
83. inter  
med. &  
fin. illius.

\* lib. 3.  
orch. fi. c.  
6. in meo  
dio.

\* In Conc.  
Epiph. 1.  
qui præ-  
fuit Cyril.  
sal. 4. 10.  
3. conc.



que non dicuntur de divina natura: sicut dicimus, quod Filius Dei est genitus, non tamen dicimus, quod natura divina sit genita, ut in 1. parte habitum est. \* Et similiter in mysterio Incarnationis dicimus, quod Filius Dei passus est, non autem dicimus, quod divina natura sit passa.

Ad secundum dicendum, quod Incarnatio magis importat unionem ad carnem, quam carnis proprietatem. Utraque autem natura in Christo est unita alteri in persona, ratione cuius unionis, & divina natura dicitur incarnata, & humana natura deificata, ut supra dictum est. †

Ad tertium dicendum, quod ea, que sunt divina natura, dicuntur de humana natura, non secundum quod essentialiter competunt divine nature: sed secundum quod participative derivantur ad humanam naturam. Unde ea, que participari non possunt a natura humana (sicut esse increatum, aut omnipotentem) nullo modo de humana natura dicuntur: Divina autem natura nihil participative recipit ab humana natura, & ideo ea, que sunt humane nature, nullo modo possunt dici de divina natura.

Hic articulus etiam expositus est in disputatione præcedenti, sectione secunda.

### ARTICULUS VI.

Utrum hæc sit vera, Deus factus est homo.

Ad sextum sic proceditur. Videtur, quod hæc sit falsa, Deus factus est homo. Cum enim homo significet substantiam, fieri hominem, est fieri simpliciter. Sed hæc est falsa, Deus factus est simpliciter. Ergo hæc est falsa, Deus factus est homo.

2. Præterea. Fieri hominem est mutari. Sed Deus non potest esse subiectum mutationis, secundum illud Malach. 3. Ego Dominus, & non mutor. Ergo videtur, quod hæc sit falsa, Deus factus est homo.

3. Præterea. Homo secundum quod de Christo dicitur, supponit personam filii Dei. Sed hæc est falsa, Deus factus est personæ filii Dei. Ergo hæc est falsa, Deus factus est homo.

Sed contra est, quod dicitur Joan. 1. Verbum caro factum est. Et sicut Athanasius dicit in Epistola ad Epiphretum. Quod dixit, Verbum caro factum est, simile est, ac si diceretur, quod Deus homo factus est.

a. Respondeo dicendum, quod unumquodque dicitur esse factum illud, quod de novo incipit predicari de ipso. Esse autem hominem vere predicatur de Deo (sicut dictum est\*) ita tamen, quod non convenit Deo esse hominem ab æterno, sed ex tempore per assumptionem humane nature. Et ideo hæc est vera, Deus factus est homo. Diversimode tamen intelligitur a diversis, sicut & hæc, Deus est homo, ut supra dictum est\*.

Ad primum ergo dicendum, quod fieri hominem, est fieri simpliciter in omnibus his, in quibus humana natura incipit esse in supposito de novo creato. Deus autem dicitur factus homo, eo quod humana natura incipit esse in supposito divine nature, ab æterno præexistente. Et ideo, Deum fieri hominem, non est, Deum fieri simpliciter.

Ad secundum dicendum, quod, sicut dictum est, fieri importat, quod aliquid predicetur de novo de altero. Unde quodcumque aliquid de novo predicatur de altero cum mutatione ejus, de quo dicitur, tunc fieri est mutari. Et hoc contingit in omnibus, que absolute dicuntur: non enim potest albedo aut nigredo de novo advenire alicui, nisi per hoc, quod de novo mutatur ad albedinem vel nigredinem. E contrario, que relative dicuntur, possunt de novo predicari de aliquo absque ejus mutatione: sicut homo de novo fit dexter absque sui mutatione, per motum illius, qui fit ei sinister. Unde in talibus non oportet omne, quod dicitur fieri, esse mutatum, quia hoc potest accidere per mutationem alterius. Et per hunc modum ad Deum dicimus, Domine refugium factus es nobis. Esse autem hominem, convenit Deo ratione unionis, que est relatio quedam, & ideo esse hominem predicatur de novo de Deo absque ejus mutatione per mutationem humane nature, que assumitur in divinam personam. Et ideo, cum dicitur, Deus factus est homo, non intelligitur aliqua mutatio ex parte Dei, sed solum ex parte humane nature.

Ad tertium dicendum, quod homo supponit personam filii Dei, non nudam, sed prout subsistit in humana natura. Et ideo, quamvis hæc falsa, Deus factus est persona filii Dei, est tamen hæc vera, Deus factus est homo, ex eo quod est unitus humane nature.

Respon.

Respondet D. Thomas simpliciter & sine distinctione nulla illam propositionem esse veram. Quamquam enim in aliquo sensu, scilicet, si participium, factus, sit pars subiecti, & non prædicati, sit falsa, quia Christus non est Deus factus, sed Deus verus, juxta ea, quæ in simili docet D. Th. art. sequenti: tamen, quia ille sensus impropiissimus est, & in ea propositione nunquam usitatus, ideo merito D. Th. distinctionem illam prætermisit, & simpliciter affirmavit, quod in proprio sensu de fide Catholica certum est, juxta illud Joan. 1. Verbum caro factum est, & ad Rom. 1. Qui factus est ei ex semine David, secundum carnem, & ad Galat. 4. Factum ex muliere, ad Philip. 2. In similitudinem hominum factus, ac denique in Symbolo: Et homo factus est, & reliqua Concilia, & Patres omnes loquentes de hoc mysterio his fere, vel similibus verbis illud explicant. Ratio vero est, quia suppositum, quod prius simpliciter subsistit, & non est homo, vel aliquid hujusmodi, si postea est homo, vel aliquid tale, necesse est, ut factum sit tale: sed ita est in præsentia, nam suppositum Verbi antea erat, & non erat homo, & nunc est homo; ergo necesse est, ut factum sit homo, & ita ratione illius verum erit dicere, Deum factum esse hominem. Et confirmatur, quia Deus nunc est homo, & antea non erat homo; ergo vel homo factus est Deus, vel Deus homo: non primum, ut statim dicitur: ergo secundum.

Sed quares primo, an illa locutio sit omnino propria. D. enim Bonavent. in 3. dist. 7. art. 1. q. 2. negat esse propriam, quia ille modus locutionis in rigore sermonis indicat subiectum illud, quod dicitur factum esse tale, mutatum esse, ut patet inductione in omnibus similibus; sed Deus non est mutatus, cum est incarnatus; ergo non proprie dicitur factus homo. Dicendum tamen est, illam propositionem tam propriam esse, quam veram; sicut enim Deus nunc est propriissime homo, licet antea non fuisset; ita propriissime dicitur factus homo; quia per hanc locutionem in tota ejus proprietate nihil aliud significatur, quam acquisivisse, esse hominem, quod antea non habebat, per aliquam veram actionem seu effectiorem, sive per illam fiat mutatio in subiecto, quod dicitur fieri tale, sive in alio, ex cuius mutatione resultet, ut tale subiectum denuo sit tale. Quamquam enim in creaturis fere semper fiat priori modo, in hoc tamen mysterio posteriori modo, scilicet, per mutationem solius humanitatis, Deus factus est homo, ut supra disp. 8. fuisse tractatum est, & hic D. Thom. in solut. ad secundum explicat exemplo relativorum, in quibus dicitur aliquis factus dexter, aut similis, sine mutatione sui. per alterius extremi mutationem. Quod exemplum optimum est ad explicandam propriam vim, & significationem illius verbi, factum, quod ex vi sua non importat mutationem in subiecto, cui attribuitur. Tenet etiam illud exemplum in hoc, quod per hoc mysterium nihil additum est Deo inhærens ipsi, per quod mutari potuerit, quia relatio unionis in eo tantum est rationis. Quoad alia vero non oportet exemplum in omnibus esse simile, ut in supra citata disputatione latius tractatum est.

Dices, saltem per communicationem idiomatum necesse est fateri, Deum mutari, si sit homo, quia illa mutatio, quæ fit in humanitate, per communicationem idiomatum tribui poterit Verbo & Deo. Respondent aliqui, negando sequelam, quia ex vi illius propositionis significatur, Deum esse mutatum. Sed nulla ratio redditur, cur hoc magis per illam propositionem significetur, quam per hanc: Deus est mortuus, vel similes. Alii ergo exultant, in rigore illam propositionem esse veram in dicto sensu Catholico, quamvis propter ambiguitatem distinguenda sit, quod in aliis motibus factis in Christo homine ego supra dixi in fine disput. 3. 2. Tamen de hac mutatione, per quam humanitas juncta est Verbo, existimo, id non esse verum in propria & rigorosa communicatione idiomatum; quia per illam mutationem non mutatur homo, sed sola humanitas, communicatio autem idiomatum non sumitur a proprietatibus, vel actionibus humanitatis ut sic. Et ratio hujus est, quia hæc mutatio non supponit unionem, sed est via ad unionem, & ideo, sicut humanitas dicitur uniri, & non homo, ita & mutari, & propterea ratione hujus mutationis non potest dici Verbum mutari, etiam per

Obje.

Respon.

1. q. 39. art. 3.

q. 3. art. 2.

105.  
Infra q. 13  
art. 3. c. Et  
3. dist. 3. q.  
5. art. 3. co.  
& dist. 7. q.  
2. Et op. 1.  
cap. 18. &  
Op. 2. c. 6.  
& Ro. 1. l.  
2. c. 3.

Art. 1. hu-  
jus quæst.

Art. 1. hu-  
jus quæst.



**Objec. 1.** per communicationem idiomatum. Dices; ergo nec poterit dici Deus genitus ex Virgine per communicationem idiomatum, quia generatio, a qua illa denominatio sumitur, fit in humanitate prius natura, quam uniatur Verbo, tanquam in subiecto. Respondetur, negando consequentiam, primo quidem, quia generatio substantialis non denominat subiectum, sed terminum, qui est suppositum ipsum. Deinde, quia hæc generatio nihil aliud est, quam unio formæ cum materia naturali modo facta, & hæc ordine naturæ supponit unionem ipsius animæ, & corporis ad Verbum, ut in superioribus dictum est, & inferius late dicemus, agentes de B. Virgine.

**Respon.** Secundo dubitari potest, an hæc propositio etiam vera sit: *Deus factus est hic homo*. Respondetur breviter, afirmando, sequitur enim ex præcedenti; Deus enim non fit homo in communi, sed in particulari, nec assumptit humanitatem in communi, sed hanc humanitatem, unde ideo factus est homo, quia factus est hic homo. Et confirmatur, quia Deus factus est Filius Virginis: ergo factus est Jesus, & hic homo, illa enim tria nomina idem individuum significant, quamvis diverso modo. Præterea, quia, fieri hominem, significat actionem, quæ non versatur nisi circa singulare, & ratione illius dicitur de universali: ergo fit Deus homo, quia fit hic homo. Denique cum dicitur Deus factus homo, ibi, *homo*, non supponit simpliciter aut immobiliter, ut sophistæ dicunt; ergo licet sub illo prædicato descendere, & designare hunc vel illum hominem, ratione cuius vera sit propositio. Sed contra. Hic homo designat suppositum, sed Deus non est factus hoc suppositum: ergo non est factus hic homo. Respondetur primum, negando maiorem, sed hic homo formaliter designat hanc humanitatem ut subsistentem, seu subsistens in hac humanitate: quia de ratione huius hominis non est hoc suppositum, sed tantum subsistens in hac humanitate, & ita hic homo ex vi suæ significationis hoc tantum designat, præsertim positus a parte prædicati, quod sumi solet formaliter. Deinde, quamvis hic homo diceret hoc suppositum, non tamen utrumque, sed ut compositum ex humanitate, & ita potest Deus dici fieri hic homo, non quia ipsum suppositum fiat, sed quia ex supposito divino, & humanitate fit hic homo.

**Objec. 2.** Sed contra secundo, nam sequitur per communicationem idiomatum posse dici: *Verbum caro factus est Deus*, nam hic homo est Deus, & Verbum factum est hic homo: ergo Verbum factum est Deus; videtur enim hic syllogismus expositivus. Consequens autem est omnino falsum, significat enim, Verbum per aliquam effectiorem acquisivisse divinitatem, quod nullo sensu potest esse verum. Reponetur, negando consequentiam; rationem reddit Scot. in 3. dist. 7. q. 2. ad 3. quia communicatio idiomatum non fit in iis, quæ significant unionem: sed hoc, ut dixi dubio præcedenti, verum est in terminis significantibus mutationem naturæ unitæ, non vero in iis, quæ significant productionem ipsius termini, & ipsum denominant, ut sunt *generari, nasci, & fieri hominem*. Ratio ergo facilius redditur, quia in illo syllogismo variatur appellatio, & proceditur in quatuor terminis: aliud est enim, fieri hominem, quod in antecedenti sumitur, aliud fieri Deum, quod in conclusione concluditur, in qua aliquid additur majori extremitati, quod in minori non erat positum. Sed contra, nam saltem sequitur, Christum factum esse hominem, quod videtur falsum, quia Christus potius est terminus huius effectiōis, terminus autem ut sic, non potest dici fieri talis per actionem, propter quod non dicimus proprie, Petrum factum esse hominem, sed factum esse simpliciter. Cujus ratio est, quia, quod dicitur fieri tale, supponit actioni, ut articulo sequenti dicitur. Sequela vero probatur, expositivie arguendo: *Verbum factum est homo, & Christus est Verbum: ergo Christus factus est homo*. Respondetur, concedendo sequelam, est enim illa conclusio vera ratione suppositi, pro quo Christus in subiecto illius propositionis supponit: & ideo, quamvis totum compositum, quod est Christus, non supponatur actioni, tamen ipsum suppositum Christi illi supponitur. Et hoc satis est, ut illa propositio sit vera, & ex his sufficienter est exposita litera D. Thomæ cum solutionibus argumentorum.

**Objec. 3.** Sed contra secundo, nam sequitur per communicationem idiomatum posse dici: *Verbum caro factus est Deus*, nam hic homo est Deus, & Verbum factum est hic homo: ergo Verbum factum est Deus; videtur enim hic syllogismus expositivus. Consequens autem est omnino falsum, significat enim, Verbum per aliquam effectiorem acquisivisse divinitatem, quod nullo sensu potest esse verum. Reponetur, negando consequentiam; rationem reddit Scot. in 3. dist. 7. q. 2. ad 3. quia communicatio idiomatum non fit in iis, quæ significant unionem: sed hoc, ut dixi dubio præcedenti, verum est in terminis significantibus mutationem naturæ unitæ, non vero in iis, quæ significant productionem ipsius termini, & ipsum denominant, ut sunt *generari, nasci, & fieri hominem*. Ratio ergo facilius redditur, quia in illo syllogismo variatur appellatio, & proceditur in quatuor terminis: aliud est enim, fieri hominem, quod in antecedenti sumitur, aliud fieri Deum, quod in conclusione concluditur, in qua aliquid additur majori extremitati, quod in minori non erat positum. Sed contra, nam saltem sequitur, Christum factum esse hominem, quod videtur falsum, quia Christus potius est terminus huius effectiōis, terminus autem ut sic, non potest dici fieri talis per actionem, propter quod non dicimus proprie, Petrum factum esse hominem, sed factum esse simpliciter. Cujus ratio est, quia, quod dicitur fieri tale, supponit actioni, ut articulo sequenti dicitur. Sequela vero probatur, expositivie arguendo: *Verbum factum est homo, & Christus est Verbum: ergo Christus factus est homo*. Respondetur, concedendo sequelam, est enim illa conclusio vera ratione suppositi, pro quo Christus in subiecto illius propositionis supponit: & ideo, quamvis totum compositum, quod est Christus, non supponatur actioni, tamen ipsum suppositum Christi illi supponitur. Et hoc satis est, ut illa propositio sit vera, & ex his sufficienter est exposita litera D. Thomæ cum solutionibus argumentorum.

**Objec. 4.** Sed contra secundo, nam sequitur per communicationem idiomatum posse dici: *Verbum caro factus est Deus*, nam hic homo est Deus, & Verbum factum est hic homo: ergo Verbum factum est Deus; videtur enim hic syllogismus expositivus. Consequens autem est omnino falsum, significat enim, Verbum per aliquam effectiorem acquisivisse divinitatem, quod nullo sensu potest esse verum. Reponetur, negando consequentiam; rationem reddit Scot. in 3. dist. 7. q. 2. ad 3. quia communicatio idiomatum non fit in iis, quæ significant unionem: sed hoc, ut dixi dubio præcedenti, verum est in terminis significantibus mutationem naturæ unitæ, non vero in iis, quæ significant productionem ipsius termini, & ipsum denominant, ut sunt *generari, nasci, & fieri hominem*. Ratio ergo facilius redditur, quia in illo syllogismo variatur appellatio, & proceditur in quatuor terminis: aliud est enim, fieri hominem, quod in antecedenti sumitur, aliud fieri Deum, quod in conclusione concluditur, in qua aliquid additur majori extremitati, quod in minori non erat positum. Sed contra, nam saltem sequitur, Christum factum esse hominem, quod videtur falsum, quia Christus potius est terminus huius effectiōis, terminus autem ut sic, non potest dici fieri talis per actionem, propter quod non dicimus proprie, Petrum factum esse hominem, sed factum esse simpliciter. Cujus ratio est, quia, quod dicitur fieri tale, supponit actioni, ut articulo sequenti dicitur. Sequela vero probatur, expositivie arguendo: *Verbum factum est homo, & Christus est Verbum: ergo Christus factus est homo*. Respondetur, concedendo sequelam, est enim illa conclusio vera ratione suppositi, pro quo Christus in subiecto illius propositionis supponit: & ideo, quamvis totum compositum, quod est Christus, non supponatur actioni, tamen ipsum suppositum Christi illi supponitur. Et hoc satis est, ut illa propositio sit vera, & ex his sufficienter est exposita litera D. Thomæ cum solutionibus argumentorum.

## ARTICULUS VII.

*Utrum hæc sit vera, Homo factus est Deus.*

**A**d septimum sic proceditur. Videtur, quod hæc sit vera, *Homo factus est Deus*. Dicitur enim Rom. 1. Quod ante promiserat per Prophetas suos in Scripturis sanctis de Filio suo, qui factus est ei ex semine David secundum carnem. Sed Christus, secundum quod homo, est ex semine David secundum carnem. Ergo homo factus est Filius Dei.

2. Præterea. August. dicit in primo de Trinit. \* Talis erat illa susceptio, quæ Deum hominem faceret, & hominem Deum. Sed ratione illius susceptionis hæc est vera, Deus factus est homo. Ergo similiter hæc est vera, Homo factus est Deus.

3. Præterea. Gregor. Nazianzenus dicit in epistola ad Clidonium: \* Deus quidem humanatus est, homo autem Deificatus, vel quomodo libet aliter nominaverit. Sed Deus ex ratione dicitur humanatus, quia est homo factus. Ergo homo ex ratione dicitur Deificatus, quia est factus Deus. Et ita hæc est vera, Homo factus est Deus.

4. Præterea. Cum dicitur, Deus factus est homo, subiectum factionis vel mutationis non est Deus, sed humana natura, quam significat hoc nomen, homo. Sed illud videtur esse subiectum factionis, cui factio attribuitur. Ergo hæc magis est vera, Homo factus est Deus, quam ista, Deus factus est homo.

Sed contra est, quod Damascen. dicit in 3. lib. \* Non hominem Deificatum dicimus, sed Deum humanatum. Idem autem est fieri Deum, quod Deificari. Ergo hæc est falsa, homo factus est Deus.

2. Respondeo dicendum, quod ista propositio, *Homo factus est Deus*, tripliciter potest intelligi. Uno modo, ita quod participium, factus, determinet absolute, vel subiectum, vel prædicatum. Et in hoc sensu est falsa, quia neque homo ille, de quo Deus prædicatur, est factus; neque Deus est factus, ut infra dicitur.

Et sub eodem sensu hæc est falsa, Deus factus est homo. Sed sub hoc sensu non queritur hic de istis suppositionibus. Alio modo potest intelligi, ut ly, factus, determinet compositionem, ut sit sensus, Homo factus est Deus, id est, factum est, ut homo sit Deus. Et sub hoc sensu utraq; est vera. Et homo factus est Deus, & Deus factus est homo. Sed hic non est proprius sensus harum locutionum, nisi forte intelligatur secundum quod ly, homo, non habet personalem suppositionem, sed simplicem. Licet enim hic homo non sit factus Deus, quia hoc suppositum, scilicet, persona Filii Dei, ab æterno fuit Deus: tamen homo, cōmuniter loquendo, non semper fuit Deus. Tercio modo proprie intelligitur, secundum quod hoc participium, factus, ponit fieri circa hominem in respectu ad Deum, sicut ad terminum, factionis. Et in hoc sensu, supposito quod in Christo sit eadem persona, & hypostasis, & suppositum Dei, & hominis (ut supra ostensum est) ista propositio est falsa: quia, cum dicitur, Homo factus est Deus, ly, homo, habet personalem suppositionem. Non enim, esse Deum verificatur de homine ratione humana natura, sed ratione suppositi sui: suppositum autem illud humane nature, de quo verificatur esse Deum, est idem, quod hypostasis, seu persona Filii Dei, quæ semper fuit Deus. Unde non potest dici, quod iste homo incepit esse Deus, vel quod fiat Deus, aut quod factus sit Deus. Si vero esset alia persona, vel hypostasis Dei, & hominis, ita quod esse Deum, prædicaretur de homine, & e converso, per quandam conjunctionem suppositorum, vel dignitatis personalis, vel affectionis, vel inhabitationis (ut Nestoriani dixerunt) tunc pari ratione posset dici, quod homo factus est Deus, id est, conjunctus Deo, sicut & quod Deus factus est homo, id est, conjunctus homini.

Ad primum ergo dicendum, quod in verbis illis Apostoli hoc relativum, qui, quod refert personam Filii Dei, non debet intelligi ex parte prædicati: quasi aliquis existens ex semine David secundum carnem sit factus Filius Dei, in quo sensu obiectio procedebat, sed debet intelligi ex parte subiecti, ut sit sensus, quod Filius Dei factus est, scilicet, homo, ad honorem Patris (ut Gl. exponit) existens ex semine David secundum carnem. Ac si diceret, Filius Dei factus est habens carnem ex semine David, ad honorem Dei.

Ad secundum dicendum, quod illud verbum Augustini est intelligendum in illo sensu, secundum quod ex illa susceptione Incarnationis factum est, ut homo esset Deus, & Deus esset homo. In quo sensu ambe locutiones sunt veræ, ut dictum est.

106.  
Locus sup.  
art. 6. cit.

Lib. 1. c. 13  
ad Clidonium in  
ter priores  
& med.

Lib. 1. c. 13  
non longe  
a fine.

Art. 8. & 9;  
huius q.

Quæ. 2. a. 3

Glos. in  
ser. sup. il-  
la verba  
Rom. 1.

in corp. 2.



<sup>m</sup> Et similiter dicendum est ad tertium: nam Deificari idem est, quod fieri Deum.

Ad quartum dicendum, quod terminus in subiecto positus tenetur materialiter, id est, pro supposito: positus vero in prædicato, tenetur formaliter, id est, pro natura significata. Et ideo, cum dicitur, Homo factus est Deus, ipsum fieri non attribuitur humanæ naturæ, sed supposito humanæ naturæ, quod est ab æterno Deus, & ideo non convenit ei fieri Deum. Cum autem dicitur, Deus factus est homo, factio intelligitur terminari ad ipsam humanam naturam. Et ideo, proprie loquendo, hæc est vera, Deus factus est homo: sed hæc est falsa, Homo factus est Deus. Sicut si Sortes, cum fuerit homo, postea factus est albus, demonstrato Sorte, hæc est vera, Hic homo hodie factus est albus: hæc tamen est falsa, Hoc album hodie factum est homo. Si tamen ex parte subiecti poneretur aliquod nomen significans naturam humanam in abstracto, posset hoc modo significari ut subiectum factionis: puta, si dicatur, quod natura humana facta est Filii Dei.

#### COMMENTARIUS.

**D**istinguit D.Th. tres sensus hujus propositionis. Primus est, ut participium illud, factus, sit pars subiecti, vel prædicati: quo sensu dicit esse propositionem inusitatam, improprie & falsam. Quod est certissimum, præcipue si, factus, sit pars prædicati, absolute illud determinans, nam tunc sensus est, Christum esse Deum, seu per participationem: si vero sit pars subiecti, significat, Christum esse hominem factum simpliciter, quod in rigore non est verum, ut infra dicitur. Posset tamen sumi subiectum illud in alio sensu, scilicet, ut significet non factum simpliciter, sed factum hominem, ita ut sensus sit, quia factus est homo, est Deus. Et hoc modo esset vera propositio, sed in re est eadem, quæ articulo præcedenti tractata est, aut cum hac: *Verbum incarnatum est Deus*.

Secundus sensus est, ut participium, factus, cadat in totam propositionem, quæ, sicut in tempore cœpit esse vera, ita dici potest facta vera, seu factum esse, ut vere dici possit. *Homo est Deus*. Et hoc sensu ait D.Th. propositionem esse veram, quia non significat, aliquem hominem per actionem aliquam acquisivisse Deitatem, sed solum simpliciter factum esse hoc totum, *hominem esse Deum*: & ideo dixit D.Th. juxta hunc sensum subiectum illud, *homo*, supponere simpliciter, seu immobiliter, ita ut nullum suppositum sub illo liceat designare. Propter quod merito dicit, hunc etiam sensum esse improprium, & præter usitatam suppositionem terminorum, maxime, ut notarunt idem D.Th. & Bonav. in 3. dist. 7. cum vox illa, factus, masculini generis sit, sic enim non potest proprie cadere in totam propositionem. Dixi autem subiectum illud, *homo*, in hoc sensu, ita supponere immobiliter, ut non liceat sub illo designare certum suppositum, quia, ut statim dicam, nullum suppositum est, quod factum sit Deus: licebit tamen formaliter designare hunc hominem, quia in eodem sensu etiam factum est, ut verum sit dicere, hunc hominem esse Deum: hoc enim non semper fuit verum, & aliquando incepit esse verum: imo ideo indefinite cœpit hoc vere dici de homine, quia cœpit vere dici de hoc homine.

Tertius sensus, & propriissimus illius propositionis est, quem ipsa præ se fert, scilicet, aliquem hominem acquisivisse divinum esse, seu divinam naturam, per aliquam effectiorem, hoc enim est, quod D.Th. ait, participium, factus, in hoc sensu applicare effectiorem homini, tanquam subiecto actionis, respicere vero Deum, tanquam terminum illius. Et hoc sensu, atque adeo simpliciter & proprie loquendo, ait D.Th. propositionem illam falsam esse: quæ est sententia communis Theologorum in 3. dist. 7. Bonavent. Richard. Durand. Palud. & Marfil. q. 6. art. 3. dub. 8. & ejus propositionis falsitas fere ex ipsa explicatione satis constat, quam D.Th. ita declarat: quia, *homo*, in illa propositione supponit personaliter; de nulla autem persona subsistente in humanitate vere dici potest, factum esse Deum verum, de quo loquimur, maxime enim de persona Christi; illa autem non est facta Deus, sed per se & essentialiter est Deus. Unde si diceretur, *homo genitus est Deus*, vere diceretur, quia hic homo per generationem habet, ut sit Deus, non per effectiorem. Unde confirmatur primo, nam per illam propositionem significatur Deum ut sic, esse terminum effectiorem, ad quem ipsa terminatur, quod repugnat Deitati. Confirma-

tur secundo, quia per illam propositionem significatur, hunc hominem supponi illi actioni, per quam talis homo fit Deus, quod etiam repugnat veritati hujus mysterii. Antecedens patet ex communi modo significandi illius participii, factus: supponit enim suppositum, cui applicatur, unde recte dicimus, Petrum factum esse calidum, non vero calidum factum esse Petrum. Confirmatur tertio, quia aliàs sequitur, Christum factum esse Deum: quia, ut supra dicebam, si hoc vere dici potest de homine, est ratione hujus hominis: consequens autem falsum est, aliàs etiam ulterius sequitur, expositior concludere, Verbum factum esse Deum. Tandem confirmatur, quia illa propositio neque est vera ratione humanæ naturæ, quia neque illa est homo, neque fit Deus, neque ratione illius homo est Deus: neque etiam potest esse vera ratione suppositi, seu personæ, quia illa non fit Deus: neque etiam ratione hujus hominis, abstrahendo a supposito, quia, cum effectio sit actio realis, versatur circa singulare, & determinatum suppositum, & ideo non potest applicari huic homini, abstrahendo a supposito: in quo differt hoc participium, factus, a participio, *prædestinatus*, de quo dicitur infra q. 24. Potest denique hæc sententia confirmari ex his, quæ supra diximus disp. præced. sect. 3. hominem non posse dici deificatum, sed verum Deum, ratione hujus mysterii, ubi & Patres pro hac sententia citavimus, & exposuimus aliquos, qui interdum videntur aliter locuti. Sic etiam Fulgent. lib. de Incarn. & grat. c. 10. inquit. *Non ipsa caro*, id est, ipse homo, *in se formam divinitatis accepit, sed Deus formam servi*: & Petrus Diacon. lib. de Incarnat. c. 5. *Deum dicimus factum esse Christum, non Christum factum esse Deum*. Idem Nicet. lib. 3. Thef. c. 32. & Elias Cretenfis orat. 1. Nazianzeni. §. *Hæc assumpta caro est, &c.*

Contra hanc vero sententiam sentit Scotus in dist. 7. **Object. 1.** q. 2. Cujus fundamentum solum est, quia per aliquam actionem factum est, ut homo sit Deus; sed hoc solum significatur per illam propositionem; ergo. Facile tamen responderetur, negando minorem, quia etiam significatur, illam actionem terminatam esse ad Divinitatem, & supposuisse hominem: & utrumque falsum est. Sed obijcit, quia per conversionem simplicem recte videtur sequi, *Deus factus est homo: ergo homo factus est Deus*: quod argumentum eo magis urget, quo sancti Patres interdum ita loquuntur, August. lib. 1. de Trinit. c. 13. *Talis*, inquit, *erat illa susceptio, ut Deum hominem faceret, & hominem Deum*, & ideo in Enchirid. cap. 40. & 41. & de præd. Sanct. c. 15. dicit, hunc hominem fuisse conjunctum in unitate personæ Filio Dei, quamquam ibi hominem pro humanitate sumpsisse videatur. Simili tamen modo Damascen. lib. 3. c. 11. *Verbum*, inquit, *caro factum est, & caro Verbum, Deus homo, & homo Deus*: sic etiam Nazian. orat. 35. n. 86. *Hic homo*, inquit, *Deus effectus est, postquam cum Deo coaluit*: & orat. 51. circa principium dicit, Deum & hominem connexionem unum esse, Deo nimirum humanitatem, & homine divinitatem fuscipiente.

Respondetur ad argumentum, illam non esse legitimam conversionem, quia mutatur suppositio, seu appellatio terminorum, ut per se satis constat: fieri ergo debet conversio hoc modo: *Deus factus est homo: ergo is, qui factus est homo, est Deus*: Patres vero citati, quando ex adjunctis, & ex contextu sermonis constat eorū sensus, non tam dialecticum rigorem, quam sermonis elegantiam, & ipsius rei veram expositionem observant. Unde in citatis locis loquuntur in secundo sensu a D.Th. explicato, scilicet, per hoc mysterium factum esse, ut homo sit Deus, & ut eadem sit persona hominis & Dei. Sed quæres, si humanitas Christi præexistisset prius tempore in alio supposito, quam assumeretur a Verbo, an posset vere tunc dici homo factus Deus, jam enim illi actioni supponeretur homo, & hic homo. Respondetur, etiam in eo casu non posse id proprie dici, quia etiam tunc nullum esset suppositum, de quo vere dici posset factum esse Deum: nam si præexistisset in alia natura suppositum creatum, illud non solum non fieret Deus, sed potius desineret esse in suæ naturæ assumptione: & ita proprie non supponitur actioni, nisi ut terminus a quo. Quod si supponatur, suppositum illud esse increatum, scilicet, aliam divinam personam, illa per se esset Deus, unde nec fieret Deus, nec Filius Dei, quia unum suppositum non fit aliud.

**6** In solutione ad primum tractat D. Thomas locum illum

**Object. 1.**

**Respon.**

**Object. 2.**

**Respon.**

**Dub.**

**Respon.**



illum Paul. ad Rom. 1. ubi loquens de Filio Dei subdit: *Qui factus est ex semine David secundum carnem*, ubi videtur dicere Paulus, Christum, qui est ex semine David secundum carnem, factum esse Filium Dei. Circa quem locum Adamus secutus Laurentium Vallam, putat verendum potius fuisse *genitum*, quam *factum*, quia vox Græca γένεσις utrumque sensum patitur. Divus tamen Augustinus q. 44. novi testamenti, quamquam fateatur potuisse generationis nomen eo loco poni, vel intelligi, mysterium tamen in hoc invenit, quod Apostolus nomine, *facti*, potius quam, *geniti*, usus est, sicut ad Galat. 4. cum dixit: *Factum ex muliere*. Quoniam enim, inquit Augustinus, *sine humano semine concreta caro Domini est in utero Virginis, & corpus effecta, sed effectu, & virtute sancti spiritus, ideo sic locutus est Apostolus: aliud est enim semine admisto, sanguinem coagulare & generare, & aliud, non permissione, sed virtute procreare, ideo factum potius dicit, quam genitum*. Ut autem recte D. Th. exposuit, non Christus dicit factus Filius Dei, sed potius Filius Dei, illum enim refert participium, qui factus est, non simpliciter, sed secundum carnem, ut recte ibi notavit Chrysostomus. Nam de homine, inquit, est sermo, propterea adiecit iuxta carnem, & ex semine David, id est ex Virgine a David descendente. Unde sensus planus est, Filium Dei factum esse hominem ex Maria Virgine, ut recte ibi Anselmus & alii fere omnes exponunt, & Augustinus sermon. 193. de tempore.

## ARTICULUS VIII.

*Utrum hac sit vera, Christus est creatura.*

**A**D octavum sic proceditur. Videtur, quod hac sit vera, Christus est creatura. Dicit enim Leo Papa. Nova & inaudita conventio. Deus, qui est & erat, sit creatura. Sed illud potest predicari de Christo, quod Filius Dei factus est per Incarnationem. Ergo hac est vera, Christus est creatura.

**2** Præterea. Proprietates utriusque nature possunt predicari de hypostasi communi utriusque nature, quod cum nomine significetur, ut supra dictum est. Sed proprietates humana nature est esse creaturam, sicut & proprietates divina nature est esse creatorem. Ergo utrumque potest dici de Christo, scilicet, quod sit creatura, & quod sit increatus, & creator.

**3** Præterea, principalior pars hominis est anima, quæ corpus. Sed Christus ratione corporis, quod de Virgine traxit, dicitur esse simpliciter natus de Virgine. Ergo ratione anima, quæ creata est a Deo, debet simpliciter dici, quod Christus sit creatura.

Sed contra est, quod Ambrosius dicit in lib. de Trinit. \* Nunquid dicto factus est Christus? nunquid mandato creatus est Christus? quasi dicat, non. Unde subdit. Quomodo autem creatura in Deo esse potest? etenim Deus natura simplicis est, non conjuncta. Ergo hac non est concedenda, Christus est creatura.

**a** Respondeo dicendum, quod, sicut Hieronymus\* dicit, ex verbis inordinate prolatis incurritur hæresis. Unde cum hæreticis nec nomina debemus habere communia, ne eorum errori favere videamur. Ariani autem hæretici Christum dixerunt esse creaturam, & minorem Patre, non solum ratione humana nature, sed etiam ratione divine persone. Et ideo non est absolute dicendum, quod Christus sit creatura, vel minor Patre, sed cum determinatione, scilicet, secundum humanam naturam. Ea vero, de quibus suspicari non potest, quod divine persone convenient secundum se ipsam, possunt simpliciter dici de Christo ratione humana nature, sicut simpliciter dicimus, Christum esse passum, mortuum, & sepultum. Si ut etiam in rebus corporalibus, & humanis, ea, quæ in dubitationem venire possunt, an convenient toti vel parti, si sunt alicui parti, non attribuius toti simpliciter, id est, sine determinatione: non enim dicimus, quod Æthiops est albus, sed quod est albus secundum dentes. Dicimus autem absque determinatione, quod est crispus, quia hoc non potest convenire, nisi secundum capillos.

Ad primum ergo dicendum, quod aliquando sancti doctores causa brevitate, determinatione omissa, nomine creature utuntur circa Christum: est tamen in eorum dictis subintelligenda determinatio, in quantum homo.

*Ad secundum dicendum, quod omnes proprietates humane nature, sicut & divine, possunt aliquantulum dici de Christo. Unde Damasc.\* dicit in 3. lib. quod Christus, qui Deus est & homo, dicitur, & creatus & increatus, passibilis & impassibilis. Sed tamen illa, quæ dubitationem habent circa alterutram naturam, non sunt dicenda absque determinatione. Unde ipse postea alibi subdit. \* Ipsa una hypostasis, scilicet, Christi, & increata est deitate, & creata est humanitate. Sicut & e converso non esset dicendum sine determinatione, Christus est incorporeus, vel impassibilis ad evitandum errorem Manichæi, qui posuit, Christum verum corpus non habuisse, nec vere passum esse, sed dicendum est cum determinatione, quod Christus secundum deitatem est incorporeus, & impassibilis.*

*Ad tertium dicendum, quod de nativitate ex Virgine nulla dubitatio potest esse, quod conveniat persona Filii Dei, sicut potest esse de creatione. Et ideo non est similis ratio utrobique.*

## COMMENTARIUS.

**Q**UAMQUAM D. Thomas negat, simpliciter Christum appellandum esse creaturam, an vero id consulat propter vitandum periculum erroris, an vero id doceat, quia in proprietate sermonis falsa est propositio, obscurum & incertum est. Quod factum est, ut non solum de re ipsa, sed etiam de sententia & mente D. Thom. variz sint opiniones. Prima ergo est, eam propositionem in rigore & proprietate sermonis verum habere sensum: tamen, quia est ambigua, & potest ad Arianum sensum facile trahi, simpliciter asserendam non esse, sed cum aliqua determinatione & explicatione. Ita exponit D. Th. Cajet. hic, & habet fundamentum in principio corporis articuli, ubi solum dicit, non esse ita absolute loquendum, ne Arianorum errori favere videamur. Deinde expressius in solutione ad secundum, idem iudicium facit de hac propositione: *Christus est creatura*, quod de hac *Christus est impassibilis, & incorporeus*: quod negat, simpliciter esse dicendum, ne errori Manichæorum favere videamur. Constat autem, illas locutiones, & in proprietate sermonis, & rigore veras esse. Deinde infra q. 20. art. 1. ad 1. similiter iudicat de hac: *Christus est creatura*, ac de hac: *Christus est subjectus Patri*, & solum ait, convenientius esse, ad d. re determinationem. Et eandem sententiam tenet Bonavent. in 3. dist. 11. art. 2. q. 1. præsertim in solutionibus argumentorum, quamquam male in contrarium citari soleat. Et Scotus idem probabile hoc cenet. Tenet etiam Waldens. lib. 1. doctrinalis fidei, ubi c. 40. & 41. late probat, Christum secundum se non esse creaturam, tamen c. 42. tandem concludit, per communicationem idiomaticum posse ita appellari. Et huic sententiæ favet usitatus modus loquendi Sanctorum: Sophronius in enim illa epistola, quæ habetur in VI. Synod. act. 11. sæpe vocat Christum, creatum & increatum. Leo Pap. serm. 3. Pentec. *Si homo*, inquit, *ad imaginem Dei factus legem Dei servasset, creator hominum creatura non fieret*. Nazian. orat. 34. *Novam missionem, & admirandam temperationem, qui est, sit, & qui non est creatus, creator*. August. de Fid. & Sym. c. 4. *Quando Verbum caro factum est, eadem sapientia, quæ de Deo genita est, dignata est in hominibus creari; & in Enchir. c. 38. Illam creaturam, quam Virgo concepit, &c. & epist. 57. Quod ad Verbum attinet, creator est Christus, quod vero ad hominem, creatura est Christus*, lib. 4. de Trinit. c. 19. ita inquit: *Factum quippe creaturam, per quem facta est omnis creatura, omnem creaturam testem habere oportebat; & serm. 16. de tempore: Propter nos creatus est creator; & ser. 25. Creatur ex Matre, quam creavit; & ser. 27. Creator cæli creatus sub cælo*. Similia habet Fulgent. de Fide ad Petrum c. 2. & 45. & lib. de Incarnat. cap. 2. quamvis hic determinationem addat. Damasc. lib. 3. c. 4. & lib. 4. c. 5. & 19. *Verbum caro factum, creatura & novissimum appellatur*. Ambros. lib. 3. de Fid. cap. 4. *eundem dicit creatum esse ex Virgine, creatum ex homine, creatum ad causam, qui est generatus ante secula*. Nec dissimiliter Gregor. lib. 5. Moral. c. 25. *Redemptor noster, quia divinitatis ejus status capi ab humana mente non potuit, hunc se nobis ad nos veniens, creatus, natus, mortuus, &c. quasi transcendendo monstravit*.

Sed quoniam ad hos Patres responderi potest, vel late usos esse nomine creationis pro nomine conceptionis, vel generationis, aut subintelligisse determinationem illam, in quantum homo, & fere semper aliquid illi æquivalens

Lib. 3. c. 4. fin. & c. 3. a medio.

Lib. 4. c. 5. a medio.

107.  
Infr. q. 20.  
art. 1. ad 1.  
Et 1. q. 41.  
art. 3. & 4.  
& 3. d. 4. q.  
2. a. 2. ad 4.  
& d. 11. q.  
1. a. 2. & d.  
11. q. 1. art.  
3. ad 2. &  
4. concl. u.  
cap. 48. &  
v. c. 19.  
art. 1. ad 1.  
& opusc. 3.  
c. 223. Et  
1. Corp. 15.  
2. col. 1.  
fin.  
\* Art. 5.  
huius q.

In lib. 1.  
de fide c. 7  
et circa  
med. to. 2.

Refert in  
4. sent.  
dist. 13. in  
fin.



valens addidisse, conjungendo creatorem cum creatura, vel aliquid simile: affero Hieronymum, qui non videtur hanc expositionem pati posse, tractans enim hanc quæst. fere in terminis super epist. ad Ephes. c. 2. circa illa verba: *Ipse enim factura sumus*, & lib. 3. in Isaiam in principio, circa illa verba c. 45. *Ego Dominus creavi eum*, & referens, quosdam dubitasse, Christum vocare creaturam, Nos, inquit, libere proclamamus, non esse periculum, illum dicere creaturam. Nam creari in Scriptura, inquit, interdum significat fieri, quod non erat, interdum, id quod erat, transferri in aliud esse, ut Psalm. 50. *Cor mundum crea in me Deus*, & ad Ephes. 2. *Creati in operibus bonis*: quam doctrinam videtur sumpsisse ex Hilario lib. 12. de Trin. ubi circa finem dicit, Christum esse facturam, vel creaturam, de Christo intelligens illud ad Ephes. 4. *Induite novum hominem, qui secundum Deum creatus est*, id est, Christum, de quo dicitur etiam ad Rom. 13. *Induimini Dominum Jesum Christum*: & eandem fere doctrinam habet Cyrill. Alexand. lib. 5. Thef. c. 4. de Christo exponens illud Prov. 8. *Dominus possedit me*: & in epistola ad Anastasium circa finem, quæ habetur in Concil. Ephe. 2. tom. c. ult.

Rationes adduci solent multæ: tres videntur potissimæ. Primo, quia non videtur majus incommodum, vocare Christum creaturam, quam tribuere illi proprietates creaturæ, quæ eandem imperfectionem includere videntur, ut esse *mutabilem, finitum, passibilem*, &c. sed hæc tribuuntur Christo; ergo. Secunda, quia esse creaturam est de essentia hominis; sed omnia, quæ sunt de essentia hominis, dicuntur de Christo, ut supra dictum est: ergo. Tertia quia in humanitate Christi est relatio creaturæ ad Deum, nam humanitas sine controversia creatura est; sed relationes, quæ sunt in humanitate, tribuuntur Christo in concreto: sic enim dicitur Christus *similis, equalis*, &c. ergo.

Secunda opinio negat, illam propositionem esse veram in rigore, & proprietate sermonis. Hæc videtur esse sententia Magistri in 3. dist. 11. quam ibi D. Th. q. 1. art. 2. secutus est, & Durandus, Paludanus, & Capreolus q. 1. Richard. art. 1. q. 2. idem S. Thomas lib. 4. contra Gent. c. 48. ubi Ferrar. idem etiam D. Th. q. 29. de verit. art. 1. ad 3. & hic in fine corporis articuli, non videtur ab hac sententia alienus: tam falsum enim existimat vocare Christum simpliciter creaturam, sicut nigrum hominem appellare simpliciter album, solum quia habet dentes albos. Et hanc opinionem sequuntur fere moderni Thomistæ, ut Cano lib. 12. de locis c. 11. & alii. Et pro illa referuntur Sancti Basilii lib. 2. contra Eunom. ubi ex professo probat, Christum non posse dici creaturam: Ambros. lib. 1. de Fid. c. 6. & 7. Chrysost. hom. 3. in Joan. & tom. 5. hom. *Quod Christus est Deus*. August. lib. 83. q. in 67. Sed hi Sancti, & alii, qui sæpe hoc confirmant, aperte loquuntur de Christo secundum divinitatem, & contra Arianos, & ideo nihil ad præsentem causam ex eis afferri potest. Rationes pro hac sententia affert quatuor Medina, quas evidentes vocat. Prima, quia omnis creatura aliquando non fuit, sed Christus semper fuit; ergo. Secunda, quæ eadem est, Omnis creatura incipit esse, Christus non incipit esse: ergo. Tertia, similiter eadem, creatura includit negationem præcedentis esse, quæ Christo repugnat. Quarta, quia sequitur, Verbum esse creaturam, quod est hæreticum, sequela patet, expositorie arguendo, Christus est creatura, & Christus est Verbum; ergo Verbum est creatura.

Hæc controversia pendet ex illa regula supra posita **Objectio.** disputatione præcedenti, sectione ultima, scilicet prædicata, quæ involvunt suppositum creatum, non posse simpliciter prædicari de Christo, & difficultas est, an hoc prædicatum, *creatura*, involvat hujusmodi suppositum, quod magis pendet ex usu & acceptione vocis, quam aliunde. Advertendum ergo est, hanc vocem proprie & in rigore sumptam, significare posse rem ex nihilo productam; creatio enim significat productionem ex nihilo, & creatura proprie significat terminum creationis. Alio modo sumitur hæc vox ad significandam quamcumque rem in tempore productam per aliquam actionem vel effectiorem; omne enim, quod increatum non est, creatura dici potest, ut supra tractatum etiam est disp. 7. lect. 5.

Dico ergo primo, Christum non posse dici creaturam, si hæc vox in priori, & rigoroso sensu sumatur. Hæc con-

clusio certa est, quia Christus non est ex nihilo productus, includit enim suppositum divinum, quod non est ex nihilo productum. Dices. Hoc sensu etiam Petrus non poterit dici creatura, quia non est productus ex nihilo; nulla ergo est in hoc differentia inter Christum, & alios homines. Respondetur, esse maximam. Primo quidem, quia Petrus, licet immediate non sit productus ex nihilo, sed per generationem, tamen mediate est productus ex nihilo, quia tota materia, ex qua productus est, facta est ex nihilo: at vero Christus includit rem aliquam, scilicet, personam, quæ non est facta ex nihilo, & ideo totus Christus nec proxime, nec remote factus est ex nihilo. Unde fit secundo, ut Petrus, vel alius similis homo, licet actu non sit productus ex nihilo, tamen producibilis sit, & hoc est, quod per se pertinet ad rationem creaturæ, quæ magis consistit in intrinseca aptitudine, quam in actuali denominatione extrinseca: at vero Christus, neque est productus, neque produci potuit ex nihilo. Componitur enim Christus ex natura humana & persona divina; hoc autem compositum, non est producibile per creationem, sed solum assumptionem humanitatis, quia necessario supponit personam, quæ ex nihilo produci non potest, quod a contrario manifeste patet, nam Petrus, qui est creatura dicto modo, annihilari potest a Deo, Christus autem annihilari non potest, cum enim necessario semper mansura sit persona, non potest totus Christus in nihilum redigi.

Dico secundo. Si creatura sumatur posteriori modo, ut idem significet, quod factura, seu quid factum, illa locutio potest habere sensum proprium, & verum: tamen, quia est ambigua, & suspicionem erroris ingerere potest, usurpanda non est, sine sufficienti expositione seu determinatione. Hæc conclusio videtur esse juxta mentem D. Th. hic, & tota sumitur ex Patribus citatis, ita enim approbant illam locutionem, ut satis semper explicant, sermonem esse de Christo, ut ex humanitate componitur. Ratio vero est, quia Christus significat compositum ex divinitate & humanitate; sed hoc compositum est quid creatum in dicto sensu, ut supra dicta sect. 5. disp. 7. late ostensum est; ergo Christus eadem ratione poterit dici quid creatum, atque adeo creatura.

Dices. Christus positus ex parte subiecti, simpliciter & sine determinatione, non stat seu supponit pro toto composito ut sic, sed pro supposito tantum; subiecta enim stant materialiter, ut dicunt Dialectici; at vero de supposito non potest vere dici, esse quid creatum, seu esse creaturam.

Respondetur primo, supra dictum esse, subiecta interdum determinari a prædicatis, ut stent formaliter, ut constet in his locutionibus, album est quale, calidum est terminus calefactionis: sic ergo dici poterit Christus terminus effectiōis cujusdam, & tunc stabit formaliter ratione prædicati: ergo eadem ratione dici poterit factura, atque adeo creatura, quia his vocibus idem terminus effectiōis significatur. Quando cumque enim prædicatum accommodatur subiecto formaliter sumpto, & per se illi convenit, potest illud determinare, ut ita accipiatur: ita vero est in præsentī. Non est ergo, cur negetur, hunc sensum esse proprium & verum supposita illa propria, & usitata significatione terminorum. Nihilominus reliquæ partes conclusionis per se notæ sunt, vitanda est enim omnis suspicio erroris, & ideo cum hæreticis nec in vocibus convenire debemus, quando sensus est ambiguus, sed Catholicus sensus sufficienter explicari debet.

Argumenta primæ opinionis probant hanc secundam conclusionem. Si vero contra primam fiant, respondetur omnia illa Sanctorum testimonia juxta secundam conclusionem intelligenda esse.

Ad primam vero rationem respondetur primo, attributa creaturarū convenire Christo ratione naturæ creatæ, quando illa non includunt suppositum creatum, & simpliciter ex nihilo productum, & ideo ex illis solum inferri potest, Christum posse dici creaturam posteriori modo dicto, non vero priori. Secundo dicitur, quædam esse prædicata creaturarum, quæ per se statim indicant dici de Christo ratione humanæ naturæ, de quibus inter nos, & hæreticos nulla est controversia, ut esse *morialem, passibilem*, &c. Alia vero sunt prædicata, de quibus dubium esse potest, an tribuantur Christo ratione naturæ humanæ, vel etiam ratione suppositi, de quibus est controversia inter nos & hæreticos, ut esse *mutabilem, esse finitum, esse minorem Patre*. Et hæc licet in proprietate, & rigore dici

Respō.

Objectio:

Respō.

Prædicata creaturarum, dupliciter, respectu Christi.



diei possent de Christo ratione humanæ naturæ, simpliciter tamen asserenda non sunt sine sufficienti determinatione, propter rationes factas.

Ad secundam rationem respondetur, esse creaturam priori modo, non esse de essentia hominis, sed tantum posteriori modo, quia non est essentia hominis, ut sit persona creata, sed tantum, ut per naturam creatam constituitur. Ad tertiam respondetur, quod licet humanitas sit facta ex nihilo mediate, vel immediate, ut supra dictum est, & sub hac ratione sit in illa relatio creaturæ ad Deum, inde non fit, ut totus Christus per se primo, seu ratione totius compositi referatur ad Deum illa relatione, sed solum, ut in se habeat naturam, in qua est illa relatio; totum vero compositum ut sic non refertur ad Deum illa relatione fundata in creatione, sed alia fundata in actione unitiva, a qua Christus denominatur creatura secundo modo supra explicato.

Argumenta secundæ opinionis probant primam conclusionem. Si vero contra secundam fiant, nihil urgent; ad Patres enim ibi responsum est. Ad tres vero rationes primas, quæ una sunt, respondetur, creaturam in hac significatione non includere negationem totius esse simpliciter, sed solum illius esse, sub quo denominatur creatura. Unde, ut Christus sit creatura, non oportet, ut aliquando non fuerit, sed ut aliquando non fuerit Christus; neque ut incepit esse simpliciter, sed ut incepit esse Christus. Ad ultimam primo negatur sequela, scilicet, Verbum posse dici creaturam. Et ad probationem negatur consequentia, quia mutatur suppositio, & appellatio terminorum: quia, cum Christus dicitur creatura, subiectum non stat materialiter pro supposito, sed formaliter pro toto composito. Cum vero Christus dicitur esse Verbum, aut Verbum creatura, subiectum sumitur pro solo supposito. Secundo respondetur, in Catholico sensu posse dici Verbum creaturam, eo modo, quo dicitur homo: est enim homo, quia terminat humanitatem; dicitur ergo creatura, quia terminat naturam creatam. Sicut enim per humanitatem constituitur in esse hominis, ita per naturam creatam in esse creaturæ: sic enim dixit Leo Pap. creatorem fieri creaturam in hoc mysterio. Et Hieronymus dixit, in quodam sensu in Scriptura usitato non significare fieri simpliciter, quod non erat, sed quod erat, fieri tale. Quomodo dixit Augustinus de Fide, & Symbolo c. 4. *Quando Verbum caro factum est, eadem sapientia, quæ a Deo genita est, dignata est in hominibus creari.* Sed quamquam hoc verum sit, istæ locutiones multo magis sunt vitandæ, quia est major æquivocatio, & majus periculum erroris; Verbum enim simpliciter est persona increata, & ideo absolute nullo modo dici debet creatura.

## ARTICULUS IX.

*Utrum hac sit vera, iste homo, demonstrato Christo, incepit esse.*

**A**D nonum sic proceditur. Videtur, quod ille homo, demonstrato Christo, incepit esse. Dicit enim Augustinus super Joan. \* Priusquam mundus esset, nec nos eramus, nec ipse mediator Dei & hominum, homo Jesus Christus. Sed illud, quod non semper fuit, incepit esse. Ergo ille homo, demonstrato Christo, incepit esse.

2 Præterea. Christus incepit esse homo. Sed esse hominem, est esse simpliciter. Ergo ille homo incepit esse simpliciter.

3 Præterea. Homo importat suppositum humanæ naturæ. Sed Christus non semper fuit suppositum humanæ naturæ. Ergo ille homo incepit esse.

Sed contra est, quod dicitur Hebr. ultimo, Jesus Christus heri & hodie, ipse & in seculum.

a Respondetur dicendum, quod non est dicendum, quod ille homo, demonstrato Christo, incepit esse, si nihil addatur, & hoc duplici ratione. Primo quidem, quia hac locutio est simpliciter falsa secundum sententiam Catholicæ fidei, quia ponimus in Christo unum suppositum & unam hypostasim, sicut & unam personam. Secundum hoc enim oportet, quod in hoc, quod dicitur, iste homo, demonstrato Christo, designetur suppositum æternum, cujus æternitati repugnat incipere esse. Unde hæc est falsa, hic homo incepit esse. Nec obstat, quod incipere esse convenit humanæ naturæ, quæ significatur per hoc nomen, homo, quia terminus in subiecto positus non tenetur formaliter pro natura,

sed magis materialiter pro supposito, ut supra dictum est. \* Secundo, quia etiam si esset vera, non tamen esset eandem absque determinatione, ad evitandam hæresim Arii: quia sicut persona Filii Dei attribuit, quod esset creatura, & quod esset minor Patre, ita attribuit ei, quod esse incepit, dicens, quod erat, quando non erat.

Ad primum ergo dicendum, quod autoritas ista est intelligenda cum determinatione: ut, scilicet, dicamus, quod homo Jesus Christus non fuit antequam mundus esset, secundum humanitatem.

Ad secundum dicendum, quod cum hoc verbo, Incipit, non sequitur argumentum ab inferiori ad superius: non enim sequitur, hoc incipit esse album; ergo incipit esse coloratum. Et hoc ideo quia incipere, impartat nunc esse & non prius: non autem sequitur, hoc non erat prius album: ergo non erat prius coloratum. Esse autem simpliciter, est superius ad esse hominem: unde non sequitur, Christus incepit esse homo: ergo incepit esse.

Ad tertium ergo dicendum, quod hoc nomen, homo, secundum quod accipitur pro Christo, licet significet humanam naturam, quæ incepit esse, tamen supponit suppositum æternum, quod esse non incepit. Et ideo, quia secundum quod ponitur in subiecto, tenetur pro supposito, secundum autem quod ponitur in prædicato, refertur ad naturam, ideo hæc est falsa; homo Christus esse incepit: sed hæc est vera: Christus incepit esse homo.

## COMMENTARIUS.

**D**IIVS Thomas aliter huic quæstioni respondet, quam præcedenti, hanc enim locutionem: *Christus incepit esse*, dicit esse falsam in proprietate, & rigore sermonis. Et ratio ejus est, quia significat, personam Christi simpliciter incepisse, quod illius æternitati repugnat. Antecedens probat, quia subiecta tenentur materialiter pro suppositis, unde cum dicitur: *Christus incepit esse*, incipit tribuitur ipsi supposito. Quæ ratio, atque adeo tota hæc doctrina, magnam patitur difficultatem, præsertim suppositis, quæ articulo præcedenti dicta sunt.

Primo quidem, quia subiecta interdum etiam stant formaliter, si determinantur a prædicatis, ut ibi dictum est: ergo hoc subiectum, *Christus*, potest determinari ab illo prædicato, *incipit*, ut stet formaliter pro toto composito, quod est Christus: sed illud compositum vere dicitur incepisse; ergo. Confirmatur ad hominem, nam in hac propositione: *Deus est homo*, dicunt Thomistæ, subiectum determinari a prædicato, ut stet pro supposito, quatenus substat humanitati, ut illa propositio sit per se: cum tamen illa suppositio multo magis sit aliena a significatione illius termini, *Deus*, qui nullo modo humanitatem significat. Unde illa sententia probabilior est, si propositio fiat sub nomine Christi scilicet: *Christus est homo*, illa enim est per se, & formalis prædicatio, quia prædicatum determinat subiectum: ergo idem dici poterit de hac: *Christus incepit esse*. Confirmatur secundo, ex communi modo concipiendi, cum enim dicimus, *hoc album incepit hodie*, non significamus, ipsum subiectum incepisse simpliciter, sed incepisse esse album.

Propter hæc & similia argumenta, Scotus in 3. dist. 11. q. 3. dicit, illam propositionem in rigore sermonis esse veram. A qua sententia parum discrepat Bonaventura art. 2. q. 2. quamvis variis distinctionibus utatur. Et Durand. dist. 12. q. 1. qui dicit, illam esse æquivocam & distinguendam. Hi tamen omnes simpliciter negant hanc: *Verbum incepit esse*, quia hæc repugnat æternitati Verbi: nec sequitur per communicationem idiomatum ex illa: *Christus incepit esse*, quia mutatur formalis suppositio in materialem, atque adeo variatur appellatio, nam in una tribuitur inceptio Christo ut sic, in alia autem Verbo. Nec modus loquendi Sanctorum videtur ab hac sententia alienus. Augustinus enim tract. 105. in Joan. ait: *Antequam mundus fieret, nec nos eramus, nec ipse mediator Christus*; si ergo non erat, incepit esse. Deinde Nazianz. orat. 35. n. 72. dicit Christum esse factum, quod perinde est. Denique Leo Papa in dicto ser. 3. Pentecost. c. 2. dicit, Christum esse temporalem, quod est dicere, incepisse.

Nihilominus sententia D. Th. est communior Doctorum, cum Magistro in 3. dist. 11. & 12. ubi Palud. Hervæus, Capreolus, & alii. Marfil. q. 9. in fine, Cajetanus late hic, refert varia argumenta Scoti & Durandi, & illa solvit. Ratio vero D. Th. quæ est fundamentum hujus sententiæ, ita explicanda est. Nam, licet illa propositio: *Christus incepit*

Art. 7. hujus q. ad 3.

An Verbum  
possit dici  
creatura,

108.  
3. d. 12. q. 1  
art. unic.  
118. d. 105  
a med. 10.  
9.



*inceptum esse affirmativa videatur, tamen includit hanc negativam: Christus aliquando non fuit: hæc vero est falsa, quia ejus contradictoria est de fide, quia Christus semper fuit, est enim æternus, juxta illud Joan. 8. Antequam Abraham fieret, ego sum. Et ad Heb. 13. Jesus Christus heri, & hodie ipse & in secula: non possunt autem de Christo verificari contradictoria, etiam per communicationem idiomatum, quia negatio simpliciter omnia negat, ut nos etiam supra dicebamus.*

Unde licet Christus possit vocari spiritualis, & materialis, non potest negari, quod sit spiritualis vel omnipotens; unde sicut hæc simpliciter est falsa: *Christus non est omnipotens*, ita & hæc: *Christus non est æternus*; ergo & illa, Christus incepit esse, quæ hanc includit. Confirmatur primo, quia hæc simpliciter est falsa, Christus habuit ex matre suum esse simpliciter, sed hoc significatur per illam propositionem, nam esse absolute dictum seu secundum adjacens, ut Dialectici dicunt, significat esse simpliciter illius rei cui tribuitur. Unde confirmatur secundo, nam in illa propositione simpliciter prolata *Christus incepit esse*, inceptio attribuitur esse divino, quod est esse simpliciter Christi; secus vero erit, si addatur determinatio, *in quantum homo*, quia jam tunc ratione illius inceptio attribuitur esse humano.

Inter has sententias, quod ad rem attinet, nulla esse potest differentia, quam Fulgentius lib. de Incarnat. c. 10. optime his verbis complexus est. *Verbum incepit esse Christus, Verbum tamen mansit æternum, & caro in ipso sumpsit initium.* Quod ad modum vero loquendi attinet, quamquam prior sententia sit probabilis, quia ille usus vocum, & sensus illius locutionis non est omnino alienus a significatione terminorum, neque a communi modo loquendi hominum, nihilominus tamen simpliciter & in rigore sententia D. Th. verior est & securior, quia non dicitur aliquis simpliciter & absolute incipere esse, nisi denuo acquirat præcipuum ac principale esse suum: Christus autem non acquisivit denuo illud esse, quod in ipso est primum, atque adeo esse simpliciter, & ideo huic prædicato non potest convenire, ut determinet subiectum illo modo, quo prima sententia afferebat, quia prædicatum significans inceptionem, cadit super esse absolute dictum, atque adeo super esse simpliciter: non ergo potest determinare subiectum in ordine ad esse secundum quid, respectu suppositi, pro quo supponit. Tum etiam, quia prædicatum negativum non determinat subiectum, sed simpliciter negat: propter quod hæc est falsa, Christus non est omnipotens, quia revera non significat, non esse omnipotentem, secundum humanam naturam, sed simpliciter & absolute: propter quod etiam hæc est falsa, Christus non fuit ab æterno. Illa vero propositio, Incipit esse, includit hanc negationem, & per illam exponitur, ut dictum est, & constat ex Dialectica. Et per hoc satisfactum est argumentis primæ sententiæ.

Unde a fortiori constat hanc esse falsam, Christus incepit esse Deus, tum quia includit illam negativam, aliquando non fuit Deus: tum quia quod incipit esse tale, supponitur actioni, per quam incipit esse tale; quod hic dici non potest, ut art. 7. tractatum est. De hac vero propositione, Christus est factus, idem indicat D. Th. quod de hac, Christus incepit esse, quia fieri simpliciter dictum, refertur ad esse simpliciter illius subiecti, cui tribuitur, unde includit eandem negationem, quam verbum, *incipit*. Non est autem idem de his prædicatis, *natus ex virgine*, seu *mortuus*, quia hæc ex vi suæ negationis solum referuntur ad esse humanum, secundum quod natus est Christus, vel mortuus.

## ARTICULUS X.

*Utrum hæc sit vera, Christus, secundum quod homo, est creatura.*

**A**D decimum sic proceditur. Videtur, quod hæc sit falsa: Christus, secundum quod homo, est creatura, vel, incepit esse. Nihil enim in Christo est creatum nisi humana natura. Sed hæc est falsa, Christus, secundum quod homo, est humana natura. Ergo hæc etiam est falsa, Christus, secundum quod homo, est creatura.

2. Præterea, prædicatum igitur prædicatur de termino in reduplicacione posito, quam de ipso subiecto. propositio- nis: sicut si dicam, corpus, secundum quod coloratum, est

visibile, sequitur quod coloratum sit visibile. Sed hæc non est absolute (sicut dictum est \*) concedenda, homo Christus est creatura. Ergo neque hæc, Christus secundum quod homo, est creatura.

3. Præterea. Quicquid prædicatur de quocumque homine, secundum quod homo, prædicatur de eo per se & simpliciter, idem enim est per se, & secundum quod ipsum, ut dicitur 5. Metaph. \* Sed hæc est falsa, Christus est per se, & simpliciter creatura. Ergo etiam hæc est falsa, Christus secundum quod homo, est creatura.

Sed contra, omne quod est, vel est creator, vel creatura. Sed hæc est falsa, Christus secundum quod homo est creator. Ergo hæc est vera, Christus secundum quod homo est creatura.

a. Respondeo dicendum, quod cum dicitur, Christus secundum quod homo, hoc nomen, homo, potest resumitur in reduplicacione, vel ratione suppositi, vel ratione nature. Si quidem resumatur ratione suppositi, cum suppositum humana natura in Christo sit æternum & creatum, hæc erit falsa, Christus secundum quod homo, est creatura. Si vero resumatur ratione humane nature, sic est vera: quia ratione humane nature, sive secundum humanam naturam convenit sibi esse creaturam, ut supra dictum est. \* Sciendum tamen, quod nomen sic resumptum in reduplicacione magis proprie tenetur pro natura, quam pro supposito: resumitur enim in vi prædicari, quod tenetur formaliter. Idem enim est dictum, Christus secundum quod homo, ac si diceretur, Christus secundum quod est homo. Et ideo hæc magis est concedenda, quam neganda, Christus, secundum quod homo, est creatura. Si tamen adderetur aliquid, per quod traheretur ad suppositum, esset propositio magis neganda, quam concedenda: puta, si diceretur, Christus, secundum quod hic homo, est creatura.

Ad primum ergo dicendum, quod, licet Christus non sit humana natura, est tantum habens humanam naturam. Nomen autem creatura, natum est prædicari non solum de abstractis, sed etiam de concretis: dicimus enim, quod humanitas est creatura, & quod homo est creatura.

Ad secundum dicendum, quod ly, homo, secundum quod ponitur in subiecto, magis respicit suppositum: secundum autem quod ponitur in reduplicacione, magis respicit naturam, ut dictum est. \* Et quia natura est creata, suppositum vero increatum: ideo licet non concedatur ista simpliciter, Homo Christus est creatura: conceditur tamen ista, Christus secundum quod homo, est creatura.

Ad tertium dicendum, quod cuilibet homini, qui est suppositum solius nature humane, competit quod non habeat esse, nisi secundum humanam naturam: & ideo de quolibet tali supposito sequitur, si secundum quod homo est creatura, quod si creatura simpliciter. Sed Christus non solum est suppositum humane nature, sed etiam divine, secundum quam habet esse increatum: & ideo non sequitur, si secundum quod homo est creatura, quod sit simpliciter creatura.

## COMMENTARIUS.

Quamvis D. Thomas distinctionem præmittat, tamen absolute docet, illam propositionem debere concedi, quia per illam determinationem positam a parte subiecti, si proprie usurpetur, determinatur subiectum, ut non accipiat pro supposito absolute & secundum se, sed prout substat humanitati, constat autem ex dictis, Christum hoc modo vere posse dici creaturam. Et ex hoc facile solvitur obiectio, quam hic refert Cajetanus ex Scotto in 2. dist. 11. q. 2. qui primum dicit, non magis hanc propositionem esse veram: *Christus, in quantum homo, est creatura*, quam illam: *Christus est creatura*, quia cum illud, *in quantum*, non sit conditio diminuens, illa propositio reduplicata includit propositionem de inesse, seu præjacentem: unde Gabriel 3. dist. 11. q. 1. art. 3. putat, quidquid de Christo absolute negatur, vel conceditur, etiam cum illa determinatione negandum esse, vel concedendum, quod etiam Major, Almain, & alii ibi insinuant. Sed hæc regula absolute sumpta nobis non placet, quia ex vi formæ locutionis non semper est eadem ratio utriusque propositionis, ut ex dictis facile patet, quia, quando subiectum est sine determinatione, solet supponere pro supposito, quasi materialiter, per determinationem autem fit, ut stet formaliter: illa enim determinatio in hac propositione, non sumitur reduplicative, sed specificative, & ideo non oportet, ut possit simpliciter resolvi in

Art. p. 10.

Lib. 1. Metaph. text. 28. tom. 3.

\* Art. 8. hujus quæst.

In corp. articuli.

Obiectio, Scoti.

Responsio.



vi in suam de inesse, quia poterit facile mutari suppositio & acceptio terminorum. Et hoc modo dici potest illa particula, *in quantum*, aliquo modo, non quidem diminuens significationem aut proprietatem terminorum, sed quasi limitans & determinans suppositionem subiecti. Et hac etiam ratione, ut D. Th. hic indicavit, & Cajetan. explicuit, quamvis hæc non sit vera simpliciter: *Christus incepit esse*, cum prædicta vero limitatione, *in quantum homo*, est vera, quia Christus in quantum homo, non est æternus, sicut neque in quantum homo est Deus: ergo in quantum homo, est creatura, & incepit esse.

**Obiect. 2.** Secundo vero addit Scotus, etiam si huiusmodi modus loquendi verus sit, tamen esse improprium, quia huiusmodi determinatio specificans, deberet potius poni in subiecto, quam in prædicato, ut si dicamus Christum incepisse secundum esse humanum. Et confirmatur hoc, quia aliàs in rigore est falsa hæc propositio: *Christus in quantum homo, incepit esse*, quia illud prædicatum significat esse simpliciter ipsius Christi, ut supra dictum est: Christus autem non incepit in suo esse simpliciter, etiam in quantum homo. Respondetur tamen, proprietatem sermonis ex communi usu esse accipiendam: at vero juxta communem & proprium modum loquendi, non solum in prædicato, sed etiam in subiecto, poni solet determinatio: & merito, quia per illam indicatur propria ratio, secundum quam convenit subiecto tale prædicatum. Unde fit, ut consequenter etiam prædicatum accommodetur tali subiecto, ut cum dicitur: *Christus in quantum homo, incepit esse*, hoc ipso quod limitatur subiectum, ut stet pro supposito humano ut sic, limitatur etiam prædicatum, ut solum tribuat illi subiecto ut sic inceptionem essendi, scilicet, in esse humano. Et ita solvitur confirmatio, nam licet, esse, absolute dictum, & applicatum subiecto, simpliciter etiam sumpto, & sine addito, significet esse simpliciter illius suppositi: tamen, quando applicatur subiecto, sub determinatione aliqua tantum significat esse, quod supposito sub tali determinatione convenit. Et ita facile concordat hæc doctrina cum iis, quæ dicta sunt disputatione præcedenti sect. 4. regula 4. nam hoc prædicatum significans inceptionem absolute dictum de supposito, requirit suppositum creatum; non vero, si dicatur de subiecto cum prædicta determinatione. Unde etiam intelligitur, cum Christus, in quantum homo dicitur creatura, ibi, *creaturam*, non significare aliquid omnino ex nihilo productum, sed aliquid effectum & productum per actionem aliquam, quia Christus, in quantum homo, non est ex nihilo productus, quia illud, *in quantum*, non designat solam humanitatem, sed totum compositum ut sic, quod non est factum ex nihilo, ut constat. Unde ad hoc magis explicandum observare oportet, non omnino esse idem dicere, *secundum humanitatem*, & *in quantum homo*, nam prior particula videtur solam designare humanitatem, quæ omnino est creatura producibilis ex nihilo; posterior vero particula, *in quantum homo*, totum compositum designat, ut dictum est.

Et ex his tandem facile intelligitur, quod ultimo loco addidit D. Th. si addatur ex parte subiecti articulus demonstrativus, ut dicendo: *Christus, in quantum hic homo, est creatura*, propositionem esse magis ambiguam: erit enim falsa, demonstretur ipsum suppositum. Tamen in rigore & ex proprietate sermonis, etiam potest admittere sensum verum: quia hic homo, & formaliter non designat suppositum, sed subsistentem in hac humanitate, ut sic, & licet designet illud, non tamen absolute & secundum se, sed ut cum hac humanitate componit hunc hominem, qui sub hac ratione dici potest creatura, ut explicatum est.

## ARTICULUS XI.

*Utrum hac sit vera, Christus, secundum quod homo, est Deus.*

**III.** **A**d undecimum sic proceditur. Videtur, quod Christus, secundum quod homo, sit, Deus. Christus enim est Deus per gratiam unionis. Sed Christus, secundum quod homo habet gratiam unionis. Ergo Christus, secundum quod homo, est Deus.

**2.** Præterea. Dimittere peccata, est proprium Dei, secundum illud Isaia 43. Ego sum ipse, qui deleo iniquitates tuas propter me. Sed Christus, secundum quod homo,

dimittit peccata, secundum illud Matth. 16. Ut autem sciamus, quia filius hominis habet potestatem in terra dimittendi peccata, &c. Ergo Christus, secundum quod homo, est Deus.

**3.** Præterea. Christus non est homo communis, sed est homo iste particularis. Sed Christus, secundum quod est iste homo, est Deus, quia in isto homine desinitur suppositum æternum, quod naturaliter est Deus. Ergo Christus, secundum quod homo, est Deus.

Sed contra, illud, quod convenit Christo, secundum quod homo, convenit cuilibet homini. Si ergo Christus, secundum quod homo, est Deus, sequitur, quod omnis homo sit Deus, quod patet esse falsum.

**a.** Respondeo dicendum, quod iste terminus, quod homo, in reduplicatione positus, potest dupliciter accipi. Uno modo quantum ad naturam, & sic non est verum, quod Christus, secundum quod homo, sit Deus, quia humana natura est distincta a divina secundum differentiam naturæ. Alio modo potest accipi ratione suppositi & sic, cum suppositum nature humane in Christo, sit persona Filii Dei, cui per se convenit esse Deum, verum est, quod Christus, secundum quod homo, sit Deus. Qui tamen terminus in reduplicatione positus magis proprie tenetur pro natura, quam pro supposito (ut supra dictum est) ideo magis est ista neganda, Christus, secundum quod homo, est Deus, quam sit affirmanda.

**Ad primum ergo dicendum**, quod non secundum idem convenit alicui, moveri ad aliquid, & esse illud: nam moveri convenit alicui ratione materie vel subiecti, esse autem in actu ratione forme. Et similiter non secundum idem convenit Christo ordinari ad hoc, quod sit Deus per gratiam unionis, & esse Deum. Sed primum convenit sibi secundum humanam naturam, secundum vero secundum divinam. Et ideo hac est vera, Christus, secundum quod homo, habet gratiam unionis: non tamen ista, Christus, secundum quod homo, est Deus.

**Ad secundum dicendum**, quod filius hominis habet in terra potestatem dimittendi peccata, non virtute humane nature sed virtute nature divine. In qua quidem natura divina consistit potestas dimittendi peccata per auctoritatem, in humana autem natura consistit instrumentaliter & per ministerium. Unde Chrysostomus super Matth. hoc exponens, dicit: Signanter dixit, In terra dimittendi peccata, ut ostenderet, quod humane nature potestatem divinitatis univit indivisibili unioni, quia etsi factus est homo, tamen Dei Verbum permansit.

**Ad tertium dicendum**, quod, cum dicitur, iste homo, pronomen demonstrativum, hoc nomen, homo, trahit ad suppositum. Et ideo magis est hac vera, Christus, secundum quod iste homo, est Deus: quam ista, Christus, secundum quod homo, est Deus.

## COMMENTARIUS.

**D**ivus Thomas hic eadem distinctione utitur, qua in articulo præcedenti, scilicet, si dictio, *in quantum*, reduplicet suppositum, propositionem esse veram, si autem naturam, esse falsam. Quia vero prior sensus est valde improprius, & contra vim illius reduplicationis, quæ in illo sensu superflue & sine fructu fieret, sequitur, propositionem illam simpliciter & in rigore falsam esse, quia significat, esse Deum, convenire Christo formaliter, ut subsistenti in humanitate, quod falsum est. Addit vero D. Th. hanc propositionem magis posse concedi: *Christus, in quantum hic homo, est Deus*, quia ille articulus facit, ut prior sensus melius hic applicari possit, designando suppositum per dictionem illam, *in quantum*: quam sententiam non probat Durand. in 3. dist. 10. q. 1. num. 12. & Bonavent. art. 1. q. 1. & 2. in eandem sententiam inclinare videtur. Et est probabilis sententia propter ea, quæ dixi in simili, circa articulum præcedentem: sed res est parvi momenti: & revera videtur etiam hoc modo impropria propositio, atque adeo ambigua & distinguenda. Hinc vero fit, hanc esse magis falsam: *Christus, in quantum Deus, est homo*, quia nec ratione nature, nec ratione suppositi potest habere unum verum sensum. Videantur generales regulæ supra positæ disp. præced. sect. 3. & 4.

## ARTICULUS XII.

*Utrum hac sit vera, Christus, secundum quod homo, est hypostasis vel persona.*

**A**d undecimum sic proceditur. Videtur, quod Christus, secundum quod homo, sit hypostasis vel persona.

Art. præced. in corpor. & ad 2.

Homil. 30 in Ma thæ circa me. 10. 2.

112. 3. d. 10. q. 1. art. 2. Et Ro. 1. 16. 3. col.



na. Illud enim, quod convenit cuilibet homini, convenit Christo, secundum quod est homo: est enim aliis hominibus similis, secundum illud Phil. 2. In similitudinem hominum factus, sed omnis homo est persona. Ergo Christus, secundum quod homo, est persona.

2. Præterea. Christus, secundum quod homo, est substantia rationalis natura, non autem substantia universalis: ergo substantia individua. Sed nihil aliud est persona quam rationalis natura individua substantia, ut Boetius dicit in libro de duabus naturis. \* Ergo Christus, secundum quod homo, est persona.

3. Præterea. Christus, secundum quod homo, est res humane nature, & suppositum & hypostasis ejusdem nature. Sed omnis hypostasis & suppositum & res humane nature, est persona. Ergo Christus, secundum quod homo, est persona.

Sed contra, Christus, secundum quod homo, non est persona aeterna. Si ergo Christus, secundum quod homo, sit persona, sequeretur, quod in Christo sint due persone, una temporalis & alia aeterna. Quod est erroneum, ut supra dictum est. \*

a. Respondeo dicendum, quod, sicut supra dictum est, \* iste terminus homo, in reduplicatione positus, potest accipi vel ratione suppositi, vel ratione nature. Cum ergo dicitur: Christus secundum quod homo est persona, si accipitur ratione suppositi, manifestum est, quod Christus, secundum quod homo, est persona, quia suppositum humane nature nihil aliud est, quam persona Filii Dei. Si autem accipitur ratione nature, sic potest intelligi dupliciter. Uno modo, ut intelligatur, quod humane competat esse in aliqua persona. Et hoc etiam modo verum est: omne enim, quod subsistit in humana natura, est persona. Alio modo potest intelligi, ut natura humane in Christo propria personalitas debeat, causata ex principiis humane nature. Et sic Christus, secundum quod homo, non est persona, quia humana natura non est per se seorsum subsistens a divina natura, quod requirit ratio persone.

Ad primum ergo dicendum, quod omni homini convenit esse personam, secundum quod omne subsistens in humana natura est persona. Sed quod est proprium homini Christo, quod persona subsistens in humana natura ejus, non sit causata ex principiis humane nature, sed sit aeterna. Et ideo uno modo est persona, secundum quod homo, alio modo, sicut dictum est. \*

Ad secundum dicendum, quod substantia individua, quæponitur in definitione persone, importat substantiam completam per se subsistentem separatim ab aliis: alioquin manus hominis posset dici persona, cum sit substantia quedam individua, quia tamen est substantia individua, sicut in alio existens, non potest dici persona. Et eadem ratione, nec humana natura in Christo, quæ tamen potest dici individuum, vel singulare quoddam.

Ad tertium dicendum, quod, sicut persona significat quid completum, & per se subsistens in natura rationali, ita hypostasis, suppositum, & res nature, in genere substantie significant quiddam per se subsistens. Unde, sicut humana natura non est per se persona seorsum a persona Filii Dei: ita enim non est per se hypostasis, vel suppositum, vel res nature. Et ideo in sensu, in quo negatur ista, Christus secundum quod homo, est persona, oportet etiam negari omnes alias.

#### COMMENTARIUS.

DIVUS THOMAS. fere sub eadem distinctione respondet, & in summa sentit, illam propositionem esse ambiguum & distinguendam. Advertendum autem videtur ex Alti. lib. 3. Summæ tract. 1. c. 1. q. 8. distinctionem illam, in quantum, non debere applicari homini, vel humanitati in communi, quia ut sic abstrahit a personis: debet ergo applicari homini seu humanitati ut subsistenti in re ipsa: & hoc modo fere idem est dicere, Christum, in quantum hominem, vel in quantum hunc hominem, esse personam. Hoc autem modo duplex videtur esse posse sensus non impropius hujus propositionis. Primus est, Christum ab humanitate habere, quod sit persona, quomodo sumitur, in quantum, reduplicative: & sic est plane falsa propositio, quia significat, Christum esse personam creatam, cujus veluti causa & radix est humanitas. Secundus sensus est, Christum etiam ut subsistentem in humana natura esse personam, quomodo sumitur, in quantum, specificative: & ita est propositio verissima, ut per

se constat, & hic est sensus D. Th. in hoc articulo, & aliorum Theologorum in 3. d. 10. Bonavent. Richard. Durand. & Alenf. 3. p. q. 6. mem. 2. art. 4. Neque in hoc occurrit difficultas explicatione digna.

Solum queri potest, an saltem concedi possit, Christum in quantum hominem, esse personam humanam, eo sensu, quo supra art. 1. dictum est, esse personam humanam. Responderetur, illam propositionem concedi posse & debere in utroque sensu supra posito, ut colligitur ex S. Th. 4. cont. gent. c. 49 ad 6. 7. & 10. & Cajet. supra q. 2. art. 5. & Richard. d. 10. art. 1. q. 1. ad ultim. Et ratio est, quia Christus, ut est sub humanitate, est persona composita, ut patres loquuntur: ergo est persona humana. Item, licet ab humanitate non habeat, ut persona sit, habet tamen, quod humana sit. Et cum hoc optime consonat, quod definit Alexander III. cap. Cum Christus, de hæreticis, Christum, ut hominem esse aliquid, id est, primam substantiam humanam. Nec sequitur: Christus, in quantum homo, est persona humana: ergo, in quantum homo, est persona in sensu casuali: quia respectu Christi est argumentum a secundum quid, ad simpliciter. Et hæc tenet de ista questione.

#### QUÆSTIO XVII.

De pertinentibus ad unitatem in Christo, quantum ad esse, in duos articulos divisa.

DEINDE considerandum est de his, quæ pertinent ad unitatem in Christo in communi. Nam de his quæ pertinent ad unitatem vel pluralitatem in speciali, suis locis determinandum est, sicut supra \* determinatum est quod in Christo non est una tantum scientia, & infra \* determinabitur, quod in Christo non est una tantum nativitas.

Considerandum est ergo primo de unitate Christi, quantum ad esse. Secundo, quantum ad velle. Tertio, quantum ad operari. Circa primum queruntur duo.

Primo, utrum Christus sit unum vel duo.

Secundo, utrum in Christo sit tantum unum esse.

#### ARTICULUS I.

Utrum Christus sit unum vel duo.

AD primum sic proceditur. Videtur, quod Christus non sit unum, sed duo. Dicit enim August. in primo de Trinitate \* quia forma Dei accepit formam servi, utrumque Deus, propter accipientem Deum: utrumque autem homo, propter acceptum hominem. Sed utrumque dici non potest, nisi ubi sunt duo. Ergo Christus est duo.

2. Præterea. Ubicumque est aliud, & aliud, ibi sunt duo. Sed Christus est aliud & aliud: dicit enim Augustinus. \* in Enchirid. Cum in forma Dei esset, formam servi accepit, utrumque unus, sed est aliud propter Verbum, aliud propter hominem. Ergo Christus est duo.

3. Præterea. Christus non est tantum homo, quia sic purus homo esset. Ergo est aliquid aliud, quam homo: & ita in Christo est aliud & aliud. Ergo Christus est duo.

4. Præterea. Christus est aliquid, quod est Pater, & est aliquid, quod non est Pater. Ergo Christus est aliquid & aliquid. Ergo Christus est duo.

5. Præterea. Sicut in mysterio Trinitatis sunt tres persone in una natura, ita in mysterio Incarnationis sunt due nature in una persona. Sed propter unitatem nature, non obstante distinctione persone, Pater, & Filius sunt unum secundum illud Joann. 10. Ego & Pater unum sumus. Ergo non obstante unitate persone, propter dualitatem naturarum, Christus est duo.

6. Præterea. Philosophus dicit in 2. Phys. \* quod unum & duo denominative dicuntur. Sed Christus habet dualitatem naturarum. Ergo Christus est duo.

7. Præterea. Sicut forma accidentalis facit alterum, ita forma substantialis aliud, ut Porphyrius dicit, \* Sed in Christo sunt due nature substantiales, humana, scilicet, & divina. Ergo Christus est aliud & aliud. Ergo Christus est duo.

Sed contra est, quod Boetius dicit in libro de duabus naturis. \* Omne, quod est, in quantum est, unum est. Sed Christum esse confitemur. Ergo Christus est unum.

Respondeo dicendum, quod natura secundum se considerata, prout in abstracto significatur, non potest vere predicari de supposito seu persona, nisi in Deo, in quo non differt, quod est, & quo est, ut in 1. parte habitum est. \* In Christo autem cum sint due nature divine, scilicet, & humana.

aliquan-  
tulum a  
prin. in.  
3. pag.

q. 2. art. 3.  
& 6.

art. 10. hu-  
jus q.

In corpo-  
articul.

quæst. 8.

quæst. 35.

112.  
3. d. 6. q. 2.  
art. 1. & d.  
21. q. 1. a. 1.  
q. 2. ad 6.  
Et 4. cont.  
c. 37. fin.  
Et unio  
art. 2. 2. &  
7 & art. 3.  
& 4. per  
totum, &  
art. 4. ad  
14. Lib. 10.  
de Trinit.  
c. 7. in fin.  
tom. 3.  
Enchi. c.  
35. a. med.  
tom. 3.

Lib. 5. tex.  
18. tom. 2.

In prædic.  
in 1. de  
differe. 1.  
inter  
oper.  
Arist.

In lib. du.  
omne  
quod est,  
bonū sit.

1. par. 7. 3.  
art. 3. & 4.



humana, altera earum, scilicet, divina, potest de eo predicari, & in abstracto, & in concreto: dicimus enim, quod Filius Dei, qui supponitur in hoc nomine, Christus, & est divina natura, & est Deus. Sed humana natura non potest predicari de Christo secundum se in abstracto, sed solum in concreto, prout, scilicet, significatur in supposito. Non enim verè potest dici, quod Christus sit humana natura, quia natura humana non est nata predicari de suo supposito. Dicitur autem, quod Christus est homo, sicut & quod Christus est Deus; Deus autem significat habentem deitatem, & homo significat habentem humanitatem. Aliter tamen habens humanitatem significatur per hoc nomen, homo, & aliter per hoc nomen, Jesus, vel Petrus. Nam hoc nomen, homo, importat habentem humanitatem indistincte, sicut & hoc nomen, Deus, indistincte importat habentem deitatem; hoc autem nomen, Petrus vel Jesus, importat distincte habentem humanitatem, scilicet, sub determinatis individualibus proprietatibus: sicut & hoc nomen, Filius Dei, importat habentem Deitatem sub determinata proprietate personali. Numerus autem dualitatis in Christo ponitur circa ipsas naturas, & ideo si ambe natura in abstracto predicaretur de Christo, sequeretur, quod Christus esset duo. Sed quia due natura non predicantur de Christo, nisi prout significantur in supposito, oportet secundum rationem suppositi predicari de Christo unum vel duo. Quidam autem posuerunt in Christo duo supposita, sed unam personam, quæ quidem videtur se habere secundum eorum opinionem tanquam suppositum completum ultima completionem. Et ideo, quia ponebāt in Christo duo supposita, dicebant, Christum esse duo neutraliter, sed quia ponebant unam personam, dicebant Christum unum masculine: nam neutrum genus designat quiddam informe, & imperfectum: genus autem masculinum designat quiddam formatum & perfectum. Nestoriani autem ponentes in Christo duas personas, dicebant, Christum non solum esse duo neutraliter, sed etiam duo masculine. Quia vero nos ponimus in Christo unam personam & unum suppositum (ut ex supra dictis patet\*) sequitur, quod dicamus, quod non solum Christus est unus masculine, sed etiam, quod est unum neutraliter.

o. 3. art. 3. &amp; 6.

eiatum  
in argum.

c Ad primum ergo dicendum, quod verbum illud Augustini, non est sic intelligendum, quod ly, utrumque, teneatur ex parte predicati, quasi dicat, quod Christus sit utrumque, sed tenetur ex parte subiecti. Et tunc ly, utrumque, ponitur non quasi pro duobus suppositis, sed pro duobus nominibus significantibus duas naturas in concreto. Possum enim dicere, quod utrumque scilicet, Deus & homo, est Deus, propter accipientem Deum: & utrumque scilicet, Deus & homo, est homo, propter acceptum hominem.

d Ad secundum dicendum, quod, cum dicitur, Christus est aliud & aliud, locutio est exponenda, ut sit sensus, habens aliam & aliam naturam. Et hoc modo exponit Augustinus, in lib. contra Felicianum. Ubi cum dixisset: In mediatore Dei & hominum, aliud Dei Filius, aliud hominis Filius, subdit. Aliud (inquam) pro discretione substantie, non alius pro unitate persone. Unde Gregorius Nazianzenus in Epistola ad Clidonium dicit. † Si oportet compendiose dicere, aliud quidem & aliud, ea, ex quibus Salvator est: si quidem non idem est invisibile visibili, & quod absque tempore, ei, quod sub tempore, non autem alius & alius, absit, hæc enim ambo unum.

cap. 11. in  
fin. tom. 6.Ad Clidon. epist.  
1. inter  
prin. &  
medium  
incipit  
Honoran-  
tissimo.

e Ad tertium dicendum, quod hæc est falsa, Christus est tantum homo: quia non excludit aliud suppositum, sed aliam naturam: eo quod termini in predicato positi formaliter tenentur. Si vero adderetur aliquid, per quod traheretur ad suppositum, esset vera locutio: puta, Christus est tantum id, quod est homo. Non tamen sequitur, quod sit aliud aliud, quam homo: quia ly, aliud, cum sit relativum diversitatis substantie, proprie refertur ad suppositum (sicut & omnia relativa facientia personalem relationem); sequitur autem, ergo habet aliam naturam.

Ad quartum dicendum, quod cum dicitur, Christus est aliquid, quod est Pater, ly, aliquid, tenetur pro natura divina, quæ etiam in abstracto predicatur de Patre & Filio. Sed cum dicitur, Christus est aliquid, quod non est Pater, ly, aliquid, tenetur non pro ipsa natura humana, secundum quod significatur in abstracto, sed secundum quod significatur in concreto: non quidem secundum suppositum distinctum, sed secundum suppositum indistinctum, prout, scilicet, substat nature, non autem proprietatibus indivi-

duantibus. Et ideo non sequitur, quod Christus sit aliud & aliud, vel quod sit duo: quia suppositum humana natura in Christo, quod est persona Filii Dei, non ponit in numerum cum natura divina, quæ predicatur de Patre & Filio.

Ad quintum dicendum, quod in mysterio divina Trinitatis natura divina predicatur etiam in abstracto de tribus personis, & ideo simpliciter potest dici, quod tres persone sint unum. Sed in mysterio Incarnationis non predicantur ambe natura in abstracto de Christo, & ideo non potest simpliciter dici, quod Christus sit duo.

Ad sextum dicendum, quod duo dicitur, quasi habens dualitatem, non quidem in aliquo alio, sed in ipso, de quo duo predicantur. Fit autem prædicatio de supposito, quod importatur per hoc nomen, Christus. Quævis igitur Christus habeat dualitatem naturarum, quia tamen non habet dualitatem suppositorum, non potest dici Christus esse duo.

Ad septimum dicendum, quod alterum importat diversitatem accidentis, & ideo diversitas accidentis sufficit ad hoc, quod aliquis simpliciter dicatur alterum. Sed aliud importat diversitatem substantie: substantia autem dicitur, non solum natura, sed etiam suppositum: ut dicitur in 5. Metaph. \* & ideo diversitas nature non sufficit ad hoc, quod aliquid simpliciter dicatur aliud, nisi adsit diversitas secundum suppositum. Sed diversitas nature facit aliud secundum quid, scilicet, secundum naturam, si non adsit diversitas suppositi.

Lib. 5. me-  
ta. h. tex.  
15. tom. 3.

## COMMENTARIUS.

V Idetur magis D. Thom. tractare hoc loco modum loquendi in hac questione, quam rem ipsam, res enim ipsa satis in qu. 2. tractata & explicata videtur: ibi enim ostensum est, Christum esse unam personam ex duabus naturis compositam non accidentaliter, sed per se ac substantialiter. Hic ergo inquiritur, an hoc satis sit, ut Christus simpliciter dicatur unus, vel unum: nam licet D. Th. in titulo tantum proponat, an Christus sit unum, vel duo in neutro genere, ut Cajet. advertit, tamen in articulo, tam in neutro genere, quam in masculino satisfacit questioni.

b Respondet ergo D. Th. duplici assertionem. Prima est: Christus est unus, etiam si hoc predicatum masculine sumatur. In qua conveniunt cum D. Th. Scholastici in 3. dist. 6. ubi bene Scotus q. 2. & res est certa de fide. Quæ probari potest primo, omnibus Scripturæ testimoniis, quibus in superioribus ostensum est, unum & eundem esse Deum & hominem, ad Timot. 2. Unus Mediator Dei, & hominum, homo Christus Jesus. Secundo ita docent Concilia omnia, quæ de hoc mysterio loquuntur. Ephesinum in cōfectione fidei, & canon. 2. & 3. ubi damnamur, qui Christum in duo dividunt, Chalcedon. actio. 1. V. Synod. actio. 8. VI. Synod. actio. 11. & 18. Concil. Lateranen. sub Martin. I. Et denique, ubicumque agitur contra Nestorium, definitur, Christum esse unam personam compositam: & in Symbolo Athanasii: Non duo tamen, sed unus est Christus; & infra: Nam sicut anima rationalis & caro unus est homo, ita Deus & homo unus est Christus; & infra: unus omnino, non confusione substantie, sed unitate persone; & in Symbolo Niceno: Et in unum Dominum Jesum Christum; & Eutych. Pap. de Christo loquens, inquit: Utrunque unus existens, dum ipse ex unitis in id ipsum naturis, natura utriusque res eadem est: & Leo Papa epist. 95. alias 97. ad Leonem August. c. 2. Cum ergo, inquit, unus sit Dominus Jesus Christus, & vera Deitatis, veræque humanitatis in ipso una prorsus eademque persona sit, & c. & infra: Inseparabiliter unus, atque idem est, & totus hominis filius propter carnem, & totus Dei Filius, propter unam cum Patre Deitatem: & ibidem multa congerit Patrum testimonia in hujus veritatis confirmationem. Idem Ambros. l. 2. de Fide c. 4. August. in Enchirid. c. 38. & tract. 78. in Joan. dicit: Utrumque simul, scilicet, Deus, & homo, non duo, sed unus Christus. Fulgent. lib. de Incarn. c. 11. in hujus confirmationem, adducit illud Matth. 28. Baptizantes eos in nomine Patris, & Filii, & Spiritus sancti, adjungens, quod Actorum 2. & ad Rom. 6. dicitur Baptismus dari in nomine Christi. Nam, quia omnino unus, inquit, est Filius & Christus Deus homo, quod datur in nomine Filii, dari dicitur in nomine Christi: similia habet Petr. Diaconus lib. de Incarn. c. 3. & ex professo probat Damasc. lib. 3. de Fide c. 5. 7. & 11. & Cyrillus Alexand. l. b. de fide ad Theodosi. dicit, post unionem non posse intelligi Christum esse duo. Quia licet mens in eo intelligat duas naturas, hæc tamen contemplatio, inquit, utriusque in uni-



*in unitatem concursum non excludit, unus itaque adnumerum est Christus* Ratio vero est, quia, unus, masculine & simpliciter dictus, indicat unitatem suppositi seu personæ, ut ex communi modo loquendi constat: unde in Trinitate tres personæ licet dicantur unum in neutro, & unus Deus, non tamen unus simpliciter, ne significetur unitas personæ. Unus enim hoc modo sumptus, adjectivus terminus est, & ideo simpliciter positus a parte prædicati suum significatum applicat supra suppositum subiecti. Tandem Christus est unus homo, & unus Deus, & unus Deus homo; ergo.

Secunda assertio D. Thomæ est, Christum etiam esse unum simpliciter, & absolute, quamvis illud prædicatum in neutro genere sumatur. Consentiunt etiam Theologi supra citati. Marfil. q. 6. art. 3. dub. 1. ad 4. dicit, in Christo esse plura individua, licet ipse non sit plura, sed illud primum dixit propter plures naturas. Et hæc conclusio etiam sumitur ex omnibus testimoniis citatis, nam hoc etiam intendunt, ut bene notavit Nicetas libro 3. Theol. c. 38. & constat, quia hoc sensu definiunt in Christo esse veram unitatem per propriam compositionem, & unionem sine imperfectione. Et hinc sumitur ratio conclusionis, quia *unum*, cum substantive dicatur, significat vel unum suppositum, vel unum individuum, vel unum ens: sed Christus est unum suppositum, & unum individuum utriusque naturæ, & unum ens, non simplex, sed compositum: quia compositio ex multis rebus, præsertim si substantialis sit, & ex eis resultet unum per se, non tollit unitatem simpliciter: at vero licet in Christo sint plures naturæ, tamen illæ substantialiter conjunguntur ad constituendum per se unum. Alia ratione hoc probat D. Th. quia in Christo non sunt aliqua duo, quæ de ipso prædicari possint, quia licet in illo sint duæ naturæ humanitas & divinitas, tamen illæ in abstracto, & ut duæ sunt, non possunt prædicari de Christo: ergo Christus simpliciter non est duo: ergo est unum, sicut humanitas licet ex anima & corpore constet, quæ duo sunt, tamen, quia anima & corpus non prædicantur de humanitate, sed compositum ex illis, ideo simpliciter non est duo, sed unum. Contra hanc D. Th. doctrinam sentit Durand. in 3. dist. 6. q. 1. art. 2. qui dicit, Christum simpliciter non esse dicendum unum, neque plura, sed cum addito, esse unum suppositum, & habere duas naturas. Sed multum errat in modo loquendi, neque affert probabile fundamentum, cui oporteat satisfacere.

Solet vero hic disputari circa rationem D. Th. quamvis Christus non sit duæ naturæ divisive, an cōplexive possit dici, quod sit duæ naturæ, sive humanitas, & divinitas. Sed de hoc dubio satis dictum est disp. præc. sect. 2. in fine.

c Argumentum primum D. Th. fundatur in testimonio August. lib. 1. de Trinit. c. 7. circa finem, ubi sic inquit. *Quia forma Dei accepit formam servi, utrumque Deus, & utrumque homo: sed utrumque Deus propter accipientem Deum, utrumque autem homo propter acceptum hominem*: ubi verbum illud, *utrumque*, videtur indicare Christum esse plura: exponit autem D. Th. August. posuisse nomen illud, *utrumque*, non pro duobus suppositis, sed pro duobus nominibus significantibus idem suppositum sub diversis naturis, scilicet: *Deus & homo*. Aliter exponi posset mens August. ex alio ejus loco sup. cit. trañt. 78. in Joan. ut scilicet, nomen illud, *utrumque*, propter duas naturas positum sit, ita ut sensus sit, utramque simul unum esse, seu componere Christum, qui sensus ex verbis ejus colligi videtur, sic enim inquit: *Agnoscamus geminā substantiam Christi, divinam, scilicet, quæ equalis est Patri, humanam, quæ major est Pater. utrumque autem simul, non duo, sed unus est Christus, ne sit quaternitas, non trinitas, Deus: sicut enim unus est homo, anima rationalis & caro, sic unus est Christus, Deus & homo, ac per hoc Christus est Deus, anima rationalis, & caro*. Ubi ex contextu constat illud verbum, *utrumque*, ad utramque naturam referri: & eundem esse sensum alterius loci, patet ex verbis sequentibus, cum enim dixisset, *Utrumque Deus & homo*, subdit: *Neque enim illa susceptione alterum eorum in alterum conversum est, nec divinitas in creaturam, nec creatura in divinitatem*. In hoc autem sensu explicari potest hæc propositio in sensu causali, juxta supra dicta disp. præceden. sect. 2.

d In secundo, tertio, & septimo argumento, insinuat D. Th. dubium, an Christus possit dici aliud & aliud, &

quidem D. Th. hic simpliciter videtur negare hanc locutionem, & rationem reddit ad 3. quia, cum, *aliud*, sit relativum diversitatis substantiæ, proprie refertur ad suppositum, & hanc sententiam sequitur Scotus dist. 6. At vero idem D. Th. supra q. 2. art. 3. ad 1. expresse docuit contrariam sententiam, dicens: *Sicut alterum & alterum in creaturis non significant diversitatem suppositorum, sed formarum accidentalium: ita aliud & aliud in Christo, non significant distincta supposita, sed diversas naturas substantiales*: quam sententiā sequuntur Palud. & Richard. dicta dist. 6. & Waldens. lib. 1. Doctrin. fid. antiq. c. 22. & videtur esse expressa sententia Damasc. lib. 3. de Fid. c. 7. dicentis: *Aliud, personam indicat, aliud, naturam*: unde August. lib. contra Felician. c. 11. *In homine*, inquit, *non alius homo anima, alius homo corpus, sed anima, aliud corpus, sic in Mediatore, aliud Dei Filius, aliud hominis filius, sed non alius, & alius, sed unus & idem*. Idem fere in enchirid. c. 35. & 36. Et confirmari potest, nam, si *aliud & aliud* diceret diversitatem suppositorum, in Trinitate Pater & Filius possent dici aliud & aliud, quod est contra omnes Sanctos, Aug. & Damasc. supra Nazian. & alios, quos statim referam. Quod si respondeatur relativum, *aliud*, dicere diversitatem suppositi & naturæ, & ex secundo capite, illam locutionem in Trinitate esse falsam. Contra hoc est ratio, quæ ex D. Th. supra desumitur, quia *alterum & alterum* non dicit diversitatem suppositi, nam idem dicitur alter a se ipso, si accidentaliter mutatus sit: ergo neque *aliud & aliud* necessario dicit diversitatem suppositorum: nam licet sit relativum substantiæ, solum dicit diversitatem essentialem in natura substantiali.

In hac re primo certum est, Christum non posse dici aliud & alium. Ita docent Patres citati, quia, sicut *unus* masculine proprie refertur ad unitatem personæ, ita *alius*, ad ejusdem distinctionem, & ideo in Trinitate Pater dicitur alius a Filio. Secundo est certum, in Christo esse aliud & aliud, quia natura divina est aliud ab humana, & e converso, quomodo Nazian. *Aliud*, inquit, *& aliud sunt, ex quibus est Salvator, non tamen alius atque alius, ambo enim hæc connexionem unum sunt*: cujus contrarium dicit esse in Trinitate, ubi Pater est alius a Filio, non aliud. Quæ doctrina Nazian. refertur, & probatur in Conc. Chalced. act. 4. & similem habet Athanas. ep. ad Ep. sub fin. Cyril. lib. de Incarn. c. 36. ubi dicit, Christum esse Deum & hominem, secundum aliud & aliud. Leo Pap. ep. 10. c. 4. *Quamvis in Domino Jesu Christo Dei & hominis una persona sit, aliud tamen, unde contumelia in utroque communis, aliud, unde cōmunis est gloria*. Tertio illa propositio: *Christus est aliud & aliud*, neganda potius est, quam concedenda, quia juxta communem significationem & sensum ejus, significando diversitatem in naturā substantiali, significat etiam diversitatem in supposito, quia significat diversitatem simpliciter, quæ includit utramque distinctionem, in quo differt ab illo relativo, *alterum*, quod tantum dicit diversitatem secundum quid. Et licet fortasse contrarium probabiliter defendi posset, tamen cum propositio sit ambigua, & possit facere erroneū sensum, simpliciter admittenda non est: dicatur ergo Christus habere aliud & aliud, & esse Deum & hominem secundum aliud & aliud, & componi ex his, quæ sunt aliud & aliud: non vero simpliciter esse aliud, & aliud. In solutione ad 3. docet D. Th. hanc propositionem esse falsam: *Christus est tantum homo*, quia illa dictio exclusiva posita in prædicato cadit supra formale ejus, unde excludit aliam naturam, non aliud suppositum, unde eadem ratione hæc etiam est falsa: *Christus est tantum Deus*, & constat, quia est utrumque: ergo non est tantum alterum illorum.

Quod si objiciatur, quia illa dictio exclusiva ita resolvenda est, quia Christus est homo, & non est aliud, quam homo: sed utraque est vera, quia juxta dicta, Christus non est aliud, & aliud. Respondet D. Th. illam propositionem exclusivam non ita esse exponendam: sed hoc modo *Christus est homo, & non habet aliud esse, quam hominis*, & hæc posterior falsa est. Quam doctrinam admittunt Scotus, & fere alii Theologi in 3. dist. 6. & est consentanea Damasc. lib. 3. de Fid. c. 7. qui addit hanc locutionem posse admitti. *Totus Christus est homo, & totus Christus est Deus, & Christus est totus homo, & Christus est totus Deus*. Et quidem in his posterioribus locutionibus, cum particula, *totus*, est pars prædicati, nulla est difficultas, quia, ut bene

Christus non potest dici alius & alius,

An possit dici aliud & aliud.

Obiectio.

Responsio.



Damascenus inquit, in eis solum significatur, Christum esse perfectum Deum, & perfectum hominem, & habere in se totam Dei naturam, & totam hominis naturam: at vero in prioribus locutionibus ubi particula, *totus*, est pars subiecti, & conjungitur cum Christo, cavenda est ambiguitas: significari enim per illas potest, totam personam Christi esse Deum, & totam esse hominem, & ita sunt veræ, ut recte Damasc. explicavit: significari etiam potest Christum totaliter, ut ita dicam, constitui humanitate vel Divinitate, atque adeo, vel Divinitatem solam, vel humanitatem esse totam formam, qua Christus constituitur: & hic sensus esset falsus, & ideo non videtur esse loquendum sine sufficienti expositione. Sic enim dixit August. sermon. 30. de verbis Apostoli. *Qui Jesum Christum plusquam hominem non noverunt, Jesum Christum utique non noverunt: si enim tantummodo homo est, & nihil amplius, non est ipse Jesus Christus.*

Reliqua argumēta D. Th. alia expositione non indigēt.

## ARTICULUS II.

*Utrum in Christo sit tantum unum esse.*

**A**D secundum sic proceditur. Videtur, quod in Christo non sit tantum unum esse, sed duo. Dicit enim Damasc. in 3. lib. quod ea, quæ consequuntur naturam, in Christo duplicantur. Sed esse consequitur naturam, esse enim est a forma. Ergo in Christo sunt duo esse.

2. Præterea. Esse Filii Dei est ipsa natura divina, & est æternum. Esse autem hominis Christi non est divina natura: sed est esse temporale. Ergo in Christo non est tantum unum esse.

3. Præterea. In Trinitate quamvis sint tres persone, est tamen unum esse propter unitatem naturæ. Sed in Christo sunt due nature, quamvis sit una persona. Ergo in Christo non est tantum unum esse, sed duo.

4. Præterea. In Christo anima dat aliquod esse corpori, cum sit forma ejus. Sed non dat sibi esse divinum, cum sit increatum. Ergo in Christo est aliud esse, præter esse divinum, & sic in Christo non est tantum esse.

Sed contra. Unumquodque secundum hoc dicitur ens, secundum quod dicitur unum: quia unum & ens convertuntur. Si ergo in Christo essent duo esse, & non tantum unum, Christus esset duo, & non unum.

Respondeo dicendum, quod quia in Christo sunt due nature & una hypostasis, necesse est, quod ea, quæ ad naturam pertinent in Christo, sint duo, quæ autem pertinent ad hypostasim in Christo, sint unum tantum. Esse autem pertinet & ad naturam & ad hypostasim. Ad hypostasim quidem, sicut ad id, quod habet esse: ad naturam autem, sicut ad id, quo aliquid habet esse. Natura enim significatur per modum formæ, quæ dicitur ens ex eo, quod ea aliquid est, sicut albedine est aliquid album, & humanitate est aliquis homo. Est autem considerandum, quod si est aliqua forma vel natura, quæ non pertineat ad esse personale hypostasis subsistentis, illud esse non dicitur esse illius persone simpliciter, sed secundum quid, sicut esse album est esse Sortis, non in quantum est Sortes, sed in quantum est albus. Et huiusmodi esse nihil prohibet multiplicari in una hypostasi, vel persona: aliud enim est esse, quo Sortes est albus, & quo Sortes est musicus. Sed aliud esse, quod pertinet ad ipsam hypostasim, vel personam, secundum se impossibile est in una hypostasi vel persona multiplicari: quia impossibile est, quod unius rei non sit unum esse. Si igitur humana natura adveniret Filio Dei, non hypostatice vel personaliter, sed accidentaliter (sicut quidam posuerunt) oporteret in Christo duo esse: unum quidem, secundum quod est Deus, aliud autem secundum quod est homo. Sicut in Sorte ponitur aliud esse secundum quod est albus, & aliud secundum quod est homo, quia esse album non pertinet ad ipsum esse personale Sortis. Esse autem capitulum, & esse corporeum, & esse animatum, totum pertinet ad unam personam Sortis: & ideo ex omnibus his non fit nisi unum esse in Sorte. Et si contingeret, quod post constitutionem persone Sortis, advenirent Sorti manus, vel pedes, vel oculi (sicut accidit in cæco nato) ex his non accresceret Sorti aliud esse, sed solum relatio quedam ad huiusmodi, quia, scilicet, diceretur esse, non solum secundum ea, quæ prius habebat, sed etiam secundum ea, quæ sibi post modum advenirent. Sic igitur, cum humana natura conjungatur Filio Dei hypostatice vel personaliter (ut supra dictum est) & non accidentaliter, consequens est, quod secundum humanam naturam non adveniat sibi novum

Suarez. Tom. XVI.

esse personale, sed solum nova habitudo esse personalis præexistentis ad naturam humanam, ut scilicet, persona illa jam dicatur subsistere, non solum secundum divinam naturam, sed etiam secundum humanam.

Ad primum ergo dicendum, quod esse consequitur naturam, non sicut habentem esse, sed sicut quæ aliquid est: personam autem sive hypostasim consequitur, sicut habentem esse. Et ideo magis retinet unitatem secundum unitatem hypostasis, quam habeat dualitatem secundum dualitatem naturæ.

Ad secundum dicendum, quod illud esse æternum Filii Dei, quod est divina natura, sit esse hominis, in quantum humana natura assumitur a Filio Dei in unitate persone.

Ad tertium dicendum, quod scilicet in prima parte dictum est\*, quia persona divina est idem cum natura, in personis divinis non est aliud esse persone præter esse naturæ: & ideo tres persone non habent nisi unum esse. Habebant autem triplex esse, si in eis esset aliud esse persone, & aliud esse naturæ.

Ad quartum dicendum, quod anima in Christo dat esse corpori, in quantum facit ipsum actu animatum: quod esse dare ei complementum naturæ & speciei. Sed si intelligatur corpus perfectum per animam absque hypostasi habente utrumque hoc totum compositum ex anima & corpore (prout significatur nomine humanitatis) non significatur, ut quod est sed ut quo aliquid est. Et ideo ipsum esse est persona subsistentis, secundum quod habet habitudinem ad talem naturam: cujus habitudinis causa est anima, in quantum perficit humanam naturam, informando corpus.

## COMMENTARIUS.

**I**N hoc articulo, non solum est quæstio de modo loquendi, sed etiam de re ipsa. Et quoniam mens D. Th. in toto articulo obscura est, prius res ipsa disputanda videtur, & deinde sensus D. Th. & vera ejus mens ac sententia explicanda: ipse enim simpliciter docet, in Christo esse tantum unum esse personale. Quid autem intelligat nomine esse personalis, quomodo etiam illud affirmet esse unum, non satis declarat, neque etiam exponit, quomodo per illud esse humanitas ipsa exiit; omnia ergo hæc ex sequenti disputatione constabunt.

## DISPUTATIO XXXVI.

In duas Sectiones distributa.

*De esse existentia Christi, & humanitatis ejus.*

**D**UO breviter in hac disputatione tractanda sunt. Primum est, per quam existentiam humanitas Christi in rerum natura exiit, alterum vero est, an & quomodo esse existentia Christi unum sit; quæ disputatio, quod ad rem ipsam attinet, & præsertim quoad primam ejus partem, ad quæstionem secundam D. Thomæ pertinebat, ubi mysterium ipsum & unio Incarnationis explicata est. Ibi enim videndum erat, an hæc unio sit in ipsa existentia increata, nec ne: tamen in hunc locum remissa est, ut hoc consuetudini daremus, & quia maxime videtur hæc disputatio necessaria ad ea intelligenda, quæ D. Thomas in hoc articulo tradit.

## SECTIO I.

*An humanitas Christi formaliter, & intrinsece existat in rerum natura per existentiam increatam, vel per propriam & creatam.*

**P**rima sententia negat, in Christi humanitate esse aliquam existentiam creatam, sed per unionem assumptam esse ad existendum per ipsam existentiam increatam Verbi divini. Hæc est sententia communis Thomistarum: Cajet. hic, Capreol. in 3. dist. 6. Ferrar. 4. contra Gent. c. 35. & 41. tenet etiam Henric. quodlib. 3. q. 2. & communiter censetur esse D. Thom. Quæ sententia supponit unum metaphysicum fundamentum, scilicet existentiam & essentiam in rebus creatis realiter, seu ex natura rei, ita distingui, ut possit natura creata in essentia sua conservari, & privari sua existentia, & per alienam terminari. Nam ex hoc fundamento sequitur, possibile esse humanitatem Christi esse privatam propria existentia creata, & per existentiam Verbi ita esse terminatam, ut per eam formaliter exiit. Sicut enim supra dicebamus, Verbum potuisse assumere naturam ad suam subsistentiam, quia ex parte naturæ est distinctio sufficiens, & ex parte Verbi nulla est imperfectio, seu defectus perfectionis, unde hoc possit impediri: ita, supposita distinctione existentia creata ab essentia, est ex parte naturæ sufficiens fundamentum, ut possit privari propria existentia,



tia, & assumi ad existendum existentia aliena; ex parte autem Verbi est sufficiens perfectio, ut possit supplere existentiam alienam, quia est suum esse perfectissimum, & infinitum, eminenter continens omnes esse creaturæ, & sine imperfectione hoc facere potest post mutationem creaturæ, sine mutatione sui. Quod si hoc fieri potest, non est negandum, quin factum sit in hoc mysterio: primo quidem, quia ita insinuant sancti Patres, Sophron. Damasc. & D. Th. Et deinde, quia hoc modo melius intelligitur substantialis unio ac per se, quæ alia ratione vix potest subsistit. Quæ omnia commodius proponemus infra, cum illis satisfaciendum erit, nunc solum insinuata sunt ad explicandum fundamentum hujus sententiæ.

Dico primo. Impossibile est humanitatem existere in rerum natura per existentiam increatam Dei, seu divini Verbi, unde necesse est, ut existat per existentiam propriam & creatam. Hæc est communior sententia Theologorum, Altrifod. lib. 3. summ. tract. 1. c. 1. q. 8. Albert. in 3. dist. 6. q. 2. art. 4. & ibi Scot. Durand. Gabr. Almay. Bonavent. dist. 5. a. 2. q. 1. ad argum. & ex Thomistis, Hervæ. dist. 9. q. 1. art. 3. Paludan. q. 3. qui late defendit, hanc sententiam non esse contrariam D. Th. sed potius illius doctrinæ consentaneam. In Conciliis vel sanctis Patribus pauca reperientur, quibus satis possit hæc conclusio confirmari; in hoc vero favent huic assertioni, quod loquentes de hoc mysterio semper supponunt humanitatem Christi habere in se intrinsecam entitatē actualem creatam, distinctam ab entitate & actualitate Verbi, & prærequisitam ad ipsam unionem. Ex quo principio potissimum confirmanda nobis est hæc conclusio. Deinde in VII. Synod. act. 6. tom. 3. col. 8. quidam Epiphanius Episcopus ita distinguit naturam ab hypostasi, quod natura dicit tantum humanitatem existentem, hypostasis vero addit substantiam. Præterea Damasc. lib. 3. cap. 3. dicit, Verbum assumpsisse humanitatem: *Nec substantia, nec existentia privatam*. Sic enim vertit Faber, aliter enim vertit Billius, scilicet: *Assumpsit humanitatem redactam in nihilum*, id est, non privatam existentia. Hoc enim ad litteram significat vox Græca, ac si idem sit, privari existentia, quod redigi in nihilum. Et c. 11. & 12. dicit Damasc. humanitatem habuisse existentiam in Verbo, non per Verbum: & ibidem distinguit existentiam humanitatis ab assumptione.

Ut ratione probemus hanc conclusionem, oportet, ut in æquivoco non laboremus, & inter authores utriusque opinionis conveniat, quid nomine existentie significetur. Ego enim per existentiam intelligo id, quo unaquæque res formaliter habet, ut sit actualis entitas in rerum natura, & extra nihil, seu extra causas suas: ut verbi gratia anima Christi, vel humanitas prius quam crearetur, actu nihil erat, sed solum in potentia; cum primum ergo intelligitur exire ex illa potentia in actum, & desinere esse nihil, intelligitur actu existens: & existentia illius erit ille modus, vel illa actualitas, quo intrinsece, & formaliter constituitur extra nihil. Quod autem iste sit proprius & præcisus conceptus existentie, late ostensum est in propria disputatione metaphysica de hac re. Nunc breviter declaratur primo, quia res, quæ actu est extra nihil, & extra causas, hoc ipso intelligitur actu existens, quid enim aliud significare potest hoc verbum existendi? Sed existentia est id, quo res existit formaliter; ergo. Secundo omnis res, cum primum intelligitur producta a sua causa, & esse extra nihil, intelligitur habere aliquod esse, quod ab æterno non habuit ergo illud esse est esse existentie. Antecedens per se notum est, quia habet aliquod esse, quod est terminus actionis novæ, quæ ab æterno non fuit. Consequentia vero probatur, quia illud esse non est esse essentie, ut sic, quia esse essentie, quod a D. Th. aliquando distinguitur ab esse existentie in creaturis, dicitur esse æternum, & immutabile, & inseparabile ab essentia; & propterea distingui dicitur ab ipsa existentia: at vero hoc esse novum, quod habet res, cum primo producit, seu per ipsam productionem, est temporale & separabile ab essentia: potest enim res amittere hoc esse, quamvis rei essentia semper eadem maneat; non est ergo hoc esse essentie, sed existentie. Tercio quia si ex hoc, quod res intelligitur actu esse in rerum natura extra causas suas, non intelligitur actu existens, quæro, quid illi addat existentia postea adveniens? Certe non potest illi tribuere, ut actu sit, hoc enim aperte supponitur ex vi prioris conceptus: tribuet ergo, quod hoc vel

illo modo sit: at vero hoc jam non pertinet ad rationem existendi absolute, sed ad determinationem quandam & modificationem ipsius existentie, unde hoc potius pertinet ad rationem subsistentie vel inhærentie. Quod si quis contendat, hunc modum determinantem, ut ita dicam, entitatem actualem, ut sic, vel aliter sit, vocari existentiam, & non illud ipsum esse, quo constituitur res in esse entitatis actualis, de significatione vocis potius, quam de re contendit, & contra communem modum concipiendi non solum sapientum, sed etiam omnium hominum, utitur nominibus: quamvis enim quantitas, v. g. in Sacramento Eucharistiæ mutet modum existendi, nullus tamen dicit mutare ipsam existentiam, quæ eadem est in quantitate, sive inhæreat, sive a subiecto separetur.

Ex ratione vero existentie sic explicata colligitur primo, fieri non posse, ut aliquid sit ens in actu, seu ut concipiatur tanquam actualis entitas, quin in suo conceptu formaliter & intrinsece includat existentiam, ita ut nec per abstractionem præcisivam intellectus possit unum ab altero separari, manente vero conceptu utriusque. Quod patet ex dictis, addito generali principio, impossibile esse concipere effectum aliquem formaliter constitutum per aliquam formam, aut per actum intrinsecum similem formæ, quin in illo includatur talis forma. Exemplis res sit manifesta, non enim potest concipi album constitutum in ratione albi, quin in illo conceptu intrinsece includatur albedo: & in hoc mysterio impossibile est concipere Christum constitutum hominem, quin ibi includatur humanitas, quæ est forma constituens hominem, Et pari ratione impossibile est concipere eundem Christum constitutum in ratione hujus personæ compositæ, quin ibi includatur substantia Verbi, tanquam intrinsecus terminus quasi formaliter constituens Christum in esse personæ. Et ratio generalis est, quia causa formalis, vel actus quasi formalis concurret ad suum effectum vel quasi effectum, intrinsece, & per se ipsum illum constituendo, & ideo intime includitur in conceptu constituti: constat autem ex dictis, entitatem actualem ut sic, intrinsece, & quasi formaliter constitui in esse entitatis actualis per existentiam; ergo impossibile est concipere entitatem actualem ut sic, quin in illa intrinsece includatur existentia. Unde mea sententia valde decipiuntur, qui dicunt essentiam creatam intrinsece constitui in esse entitatis actualis, non per existentiam ipsam, sed per habitudinem ad existentiam, seu per capacitatem existentie, ita ut rem esse entitatem actualem, sit esse proxime capacitatem existentie, ipsa vero existentia sit quædam conditio, seu quidam ultimus terminus & actus illius entitatis, seu capacitatis. Est enim hoc repugnans veræ ac propriæ rationi existentie a nobis explicatæ: & improbatum facile, quia essentia secundum se, ut dicitur esse æterna in potentia suæ causæ, est capax existentie secundum potentiam objectivam, seu per extrinsecam denominationem a potentia suæ causæ; entitas ergo actualis non consistit in hac capacitate, ut sic.

Dicetur fortasse, hanc esse capacitatem remotam, rationem vero entitatis actualis consistere in capacitate proxima. Sed contra, nam vel hæc capacitas proxima est objectiva tantum, & sic non est extra latitudinem entis in potentia, neque est realitas actu producta: vel est capacitas subiectiva fundata in aliqua actuali entitate jam producta, & sic necesse est, ut illa entitas, in qua fundatur, habeat aliquod esse intrinsecum novum & productum, quod necesse est, ut sit esse existentie, ut probatum est: ergo talis entitas non constituitur per capacitatem existentie, sed intrinsece per existentiam ipsam. Quin potius, ut supra dicebam, si res jam habet hoc esse actualis entitatis, non intelligitur, quomodo sit in potentia, vel capacitate, ut ulterius terminetur per existentiam: sed recte intelligitur esse in potentia, ut terminetur per inhærentiam, vel per substantiam nam, ut recte dixit Damascenus lib. 5. c. 3. *substantia est modus existentie*. Unde etiam obiter intelligitur, essentiam non vere, neque proprie comparari ad existentiam per modum subiecti, vel potentie receptivæ: quia in subiecto, vel receptiva potentia necesse est præintelligi actualitatem aliquam, ut possit alium actum suscipere; ipsi vero existentie nulla actualitas seu actus supponitur, sed per illam intime & formaliter constituitur. Et eadem ratione obiter colligitur, essentiam non comparari ad

Existencia  
est de  
mali  
conceptu  
causæ  
in  
actu

Impossibile  
est humanitatem  
existere  
in natura  
increata

Existencia  
quid sit

Objectio

Responsio



existentiam per modum principii effectivi, neque per propriam actionem, neque per naturalem resultantiam: quia in omni principio effectivo supponi debet aliquod actuale esse, ut ab illo possit aliquid fieri vel manere. Quod enim actualiter nihil est, nullo modo potest aliquid efficere: at vero essentia, ut præintelligitur existentia, non est actualis entitas, sed in potentia tantum: nihil ergo potest efficere, nisi prius per ipsam existentiam constitutur in esse actualis entitatis; ergo impossibile est, ut sit principium efficiens ipsam existentiam.

Ex his principiis metaphysicis demonstratur Theologica conclusio a nobis posita, quia humanitas Christi, ut distincta a Verbo, intelligitur esse quædam actualis entitas, quam ipsa secum affert, & illam a Verbo formaliter non recipit: ergo intelligitur esse existens per existentiam propriam, & creatam, omnino a Verbo distinctam. Consequentia patet ex dictis, quia idem est, esse entitatem existentem, quod entitatem actualem, & quia in intrinseco conceptu entitatis actualis includitur existentia, in intrinseco autem conceptu humanitatis, ut est entitas actualis, non includitur Verbum. Quod simul cum antecedenti probatur, primum ex modo, quo Concilia & Sancti explicant hoc mysterium, dicunt enim, factum esse per ineffabilem compositionem unius personæ ex duabus naturis realibus, & actualibus, & ut sic inter se distinctis: unde plane significant, sicut Divinitas seu Verbum habet suam actualem entitatem, in cuius intrinseco conceptu non includitur humanitas: ita & e converso, humanitatem habere etiam suam entitatem actualem, in qua intrinsece non includitur Verbum, neque aliquid increatum: necesse est ergo, ut ibi includatur existentia creata. Et revera per se incredibile est, humanitatem, quæ, ut est actualis entitas, tota est creata, formaliter constitui in esse talis entitatis per divinitatem, seu Verbum increatum, quod argumentum infra amplius urgebimus.

Secundo hoc declaratur, nam Angelus bonus vel malus virtute naturali intuitive videt humanitatem Christi, & totam actualem entitatem ejus: ergo videt id, quo illa humanitas intrinsece & formaliter constituitur in esse talis entitatis actualis. Fieri enim non potest, neque intelligi, ut aliquis intuitive videat album ut album, & non videat albedinem ipsam: sed Angelus virtute naturali non poterat intueri Verbum, vel divinitatem unitam humanitati; ergo signum evidens est, humanitatem non constitui in esse actualis entitatis per hanc unionem, nec per rem increatam, sed per existentiam propriam, & creatam, quam Angelus intueri potest. Quod ex eodem mysterio ita confirmatur, nam quia humanitas Christi in ratione subsistentis constituitur per ipsam subsistentiam increatam, quam dæmon intueri non potest, fit, ut ipse non possit illam intueri & clare videre in ratione subsistentis: ergo, si per existentiam divinam constitueretur in esse actualis entitatis, non posset illam sub hac ratione clare intueri, non visa ipsa existentia divina, quod est evidenter falsum.

Tertio. Humanitas ut actualis entitas ordine naturæ supponitur assumptioni; ergo non constituitur in esse actualis entitatis per ipsam assumptionem, & consequenter nec per existentiam increatam, nam terminus assumptionis non potest illi supponi. Antecedens, primum est D. Thom. supra q. 4. art. 2. & 3. ubi inquit, quod assumitur, non esse terminum assumptionis, sed præintelligi assumptioni: vult autem præintelligi secundum esse existentia actualis, nam secundum esse in potentia, etiam quod creatur, præintelligitur creationi, & terminus resultans per assumptionem præintelligitur ut possibilis: & ideo apertius q. 6. art. 4. ad 3. dicit, carnem Christi non prius natura esse ens, quam sit a Verbo effecta, prius autem natura esse ens, quam sit Verbo personaliter unita. Ratione vero probatur primo, quia, quod assumitur, oportet, ut sit aliquid ens in actu, quia Verbum non assumit essentiam humanitatis, prout intelligitur esse in potentia objectiva, sed prout intelligitur esse in actu. Secundo, quia esse, ordine naturæ prius est, quam uniri, quia, quod assumitur in hac unionem, est subiectum unionis, & ideo supponitur illi, ut actuale ens.

Dices, interdum aliquid non prius natura fit, quam uniatur, quia, si fit in alio, ut accidens, simul fit, & unitur, quia in ipso subiecto fit, unde accidens non prius natura est, quam in fit: idem ergo dici poterit de humanitate

Christi, scilicet, fieri in ipso supposito Verbi, & ideo non prius natura existere, quam uniri. Respondet ur, non esse simile exemplum, quod assertur, nam quando forma fit in subiecto per mutationem ipsius subiecti, & per actionem in ipso susceptam, & cum concursu materiali ipsius subiecti, ex quo educitur forma, tunc recte intelligitur, illam et actione & concursu formam fieri, & uniri subiecto. At vero, cum in præsentis mysterio actio unitiva & mutatio non recipiatur in supposito Verbi tanquam in subiecto, sed in ipsa humanitate, necesse est, ut humanitas ipsa supponatur unioni, sicut subiectum ejus, non potest autem supponi ut subiectum, nisi supponatur in ratione actualis entis jam producti. Quod ita confirmatur, nam modus rei, præsertim extraneus, supponit ordine naturæ rem, cujus est modus; unio autem vel assumptio est modus ipsius humanitatis extra naturam ejus; ergo ordine naturæ supponit illam in ratione entis actualis, & consequenter non habet humanitas per hanc unionem, ipsam rationem actualis entis, atque adeo neque existentiam ipsam.

Unde arguitur quarto, nam creatio animæ Christi, & unio illius ad Verbum, sunt actiones distinctæ, quarum prima secundæ supponitur, sicut creatio ejusdem animæ distincta est ab unionem ad corpus, & illi supponitur: sed per creationem recipit anima aliquid esse: ergo existentiam creatam: major supra probata est disp. 1. sect. 9. tum rationibus, tum autoritate D. Th. & aliorum Theologorum. Nunc breviter declaratur, tum quia creatio animæ est productio ex nihilo, unio vero est mutatio vel actio ex præsupposito subiecto: tum etiam, quia creatio animæ Christi est actio naturalis ejusdem ordinis & rationis cum creatione alterius animæ, at vero unio est actio supernaturalis distinctæ rationis & ordinis. Tum etiam, quia, ut supra dicebam, non potest intelligi, Verbum terminare animam, ut erat ab æterno in potentia, sed ut est aliquid jam factum; ergo alia est actio, per quam anima fit, & alia, per quam unitur, ut terminetur a Verbo, & idem proportionaliter est de tota humanitate. Prima vero & secunda consequentia probantur, quia per illam creationem fit aliquid esse in ipsa anima, & non fit esse essentia, ut distinguitur ab esse existentia, quia ut sic non est esse novum, sed æternum, quia revera tantum est esse in potentia: est ergo esse existentia creatum, cum per creationem fiat, quod manet in ipsa anima Verbo unita, non enim potest perdere per assumptionem illud esse, quod per creationem habuit: aliàs non possent creatio & assumptio simul esse in eodem instanti.

Ad hanc, & præcedentem rationem, respondet quidam modernus author, verum quidem esse, creationem & assumptionem animæ & humanitatis esse actiones seu mutationes diversas, & creationem in via seu in fieri præsuppositam fuisse ordine naturæ assumptioni; nihilominus tamen in termino seu in facto esse, assumptionem fuisse priorē productione, ita ut licet hæc propositio vera sit, *humanitas prius natura producit, quàm sit assumpta*, hæc tamen sit falsa, *humanitas prius natura est producta, quam assumpta*; sed e contrario verum sit, humanitatem prius natura fuisse assumptam, quam productam; atque hinc defendit, per illam creationem in fieri non fuisse communicatum animæ Christi aliquid esse existentia, quia per assumptionem fuit præventum, ne ad suum terminum deveniret: nam ex vi creationis in fieri tēdebat anima Christi ad existendum, non tamen obtinuit existentiam, quia per unionem impedita est, seu præventa.

Verumtamen hæc responsio, & doctrina tot includit falsa, & intelligibilia, ut ad confirmandam doctrinam nostram sufficiat. Nam in primis manifestum involvit repugnantiam, quod aliquid intelligatur prius assumptum, quam productum, vel creatum: quamvis enim defendi possit, aliquid non prius produci, quam uniri, tamen, quod uniatur, priusquam producat, aperta est repugnantia, cum esse unitum essentialiter supponat vel includat esse, & consequenter unio in rerum natura existens supponat vel includat productionem vel existentiam unibilium cum proportionem debita, id est, si unio sit in fieri, supponat vel includat productionem in fieri, si vero in facto esse, similiter. Et declaratur in præsentis, nam hæc unio, vel supponit existentiam, & est ad subsistendum; & sic necessario supponit rem productam quoad existentiam, ut nos dicimus: vel est ad existendum simul & subsistendum, ut alii ajunt; & sic necesse est, ut in quocumque

Respon.



signo intelligitur humanitas assumpta & unita in facto esse, intelligatur etiā existens: & consequenter producta: non ergo potest esse prius natura assumpta, quā producta in facto esse. Quod vero neque in præsentī materia illa duo sint omnino simul, late probatum est, cit. dif. 8. sect. 1.

Deinde ex his, quæ in illa responsione conceduntur, demonstratur aperte; nam cum dicitur creatio in fieri esse prius natura, quam assumptio, interrogo, an in re ipsa talis creatio existat, ut est fieri passivum humanitatis, an non. Hoc posterius consequenter dici non potest, quia alioqui non intervenit ibi duarum mutationes, ut conceditur, si utraq; in re ipsa non existit. Itē, quomodo est prior creatio in fieri, si secundum illud fieri in rerū natura non est? Admittenda ergo est juxta illam responsionem vera & realis creatio in fieri in re ipsa existens. Hoc autem posito, impossibile est, talem creationem seu quasi mutationem impediri, ne in re ipsa suum habeat terminum, quod in universo in omni mutatione vel actione, seu in omni fieri, verum est, quia actio seu fieri dicit essentialē habitudinem ad terminum, non aptitudinalem, ut sic dicā, sed actualem, ut est, quatenus actu fit: ergo implicat contradictionem, quod ipsum fieri in rerū natura ponatur, & quod impediat terminus juxta gradum & latitudinem talis fieri; unde, si fieri est momentaneum & simul totum, necessario habet integrum terminum. Et declaratur in præsentī, nam, si ordine naturæ antecessit creatio animæ in fieri, quidnam factum est, aut quidnam consecuta est illa anima per tale fieri? Respondent, nihil in re esse consecutam, nisi quod tendebat ad existendum, nisi impediretur. Sed quidnam, quæso, est tendere ad existendum? Aut quid esse potest talis tendentia, nisi ipsa existentia, prout in fieri? tendere enim ad calorem nihil aliud est, quam habere calorē in fieri: & idem est in omnibus aliis tendentiis: sicut ergo impossibile est, esse actualem calefactionem, seu tendentiam ad calorem, quin resultet aliquis calor ita impossibile est intelligere tendentiam ad existendum per veram creationem in fieri, quin per tale fieri aliqua existentia facta intelligatur: si ergo creatio in fieri ordine naturæ antecedit, & illa non potuit impediri per assumptionem a suo intrinseco termino, necesse est, ut secundum eundem naturæ ordinem in facto esse antecesserit. Quod si quis tandem respondeat, verum esse, creationē illam in fieri non impediri a suo intrinseco termino; hunc autem terminum non esse rem secundum esse existentiam, sed secundum esse essentialē, hoc in primis nihil confert ad prædictam responsionem defendendam; concedendum enim consequenter est, animam Christi non solum prius naturā creari, quam assumi, sed etiam prius naturā esse creatam, quam assumptam, quia illa creatio non fuit impedita quoad suum intrinsecum terminum; & quia anima secundum illud esse essentialē, quod dicitur habere per creationem, supponitur assumptioni. Deinde satis ostensum est in superioribus, illud esse, cum sit novum & temporale, necessario esse debere esse existentiam.

Quinto, eadem numero entitas actualis humanitatis, quæ nunc est unita Verbo, posset in rerum natura conservari separata a Verbo; ergo in utroque statu constitueretur in esse actualis entis per eundem numero actum, atque adeo per eandem numero existentiam: sed separata constituitur in esse entis per existentiam creatam, ut per se notum est; ergo & unita. Antecedens evidens est ex iis, quæ supra diximus de hac unione, unde a nemine in dubium revocatur. Prima vero consequentia probatur, quia impossibile est, effectum formalem, seu rem constitutam per aliquem intrinsecum actum seu formam, esse eandem numero, quin actus seu forma, qua constituitur, eadem numero sit, ut in hoc eodem mysterio separata humanitate, non maneret eadem numero persona, quia non constitueretur in esse personæ per eandem numero personalitatem increatam. Si ergo humanitas unita constitueretur in esse entis actualis per ipsam existentiam increatā, dissoluta unione non posset conservari eadem numero entitas actualis: unde etiam fit, dissoluta unione, humanitatem corrumpi, quia amitteret suum esse existentiam, & hoc est corrumpi; & eadem ratione si maneret sub alia existentia, produceretur de novo, quia acquireret novum esse existentiam, quod est proprius terminus productionis, ut ostensum est: esset ergo entitas numero distincta, vel maneret eadem numero entitas in eodem instanti producta & corrupta, quod inintelligibile est.

Sexto. In Christo Domino sunt duæ naturæ habentes

distinctas entitates actuales creatam & increatam: ergo constituuntur in suis entitatibus per existentias distinctas, creatam & increatā: patet consequentia, tum ex ratione facta, quod non possunt effectus, seu res constitutæ per aliquem actum esse distinctæ, ut constituuntur per illum, & tamen actus, quo constituuntur, esse omnino iidem: tum etiam, quia si existentia est, qua formaliter constituitur actualis entitas, intelligi non potest, per existentiam increatam constitui entitatem aliquam in esse entitatis creatæ: sicut, quia personalitas est formale constitutivum personæ, intelligi non potest per increatam personalitatem constitui personā creatam; formalis enim effectus, vel quasi effectus, debet esse proportionatus actui intrinseco seu formæ, per quam constituitur. Scio, multa ex his argumentis posse juxta contrariam sententiam nonnullis exemplis metaphysicis enervari, ut v. g. de materia, quæ juxta multorum opinionem nullam habet propriam existentiam, & sub diversis formis per diversas existentias eadem numero existit. Sed hæc & similia non solum non impediunt rationes factas, verum eisdem, aut similibus convincuntur illa exempla esse falsa.

Ultimo tandem arguitur ex propriis principiis theologicis, quia, si humanitas Christi existit per increatam existentiam, sequitur, unionem Incarnationis factam esse in aliquo essentiali, quod est omnino falsum, ut supra contra Durand. visum est ex sententia etiam D. Th. & totius scholæ ejus. Sequela patet, quia esse existentie in Deo est esse absolutum & essentialē, ut supra visum est, & hic ad 3. docet S. Thom. Ex quo ulterius sequitur, hanc unionem factam esse in natura, quia compositio in esse & essentiali, est compositio unius naturæ existentis: vel certe sequitur, hic esse duas uniones, saltem ratione distinctas, alterā essentialis humanitatis ad existentiam Dei, alterā humanitatis existentis ad suppositum, & illam terminari ad absolutum, hanc vero ad relativum, atque adeo illā per hanc determinari ad unam tantū personam, quæ tamen omnia seu similia graviter in Durando reprehenduntur. Ad hanc vero rationem responderi potest, primo existentiam naturæ creatæ, nihil aliud esse, quam personalitatem ejus, & ideo unica assumptione & unione assumptam esse humanitatem ad existentiam & personalitatem alienam. Sed hæc responsio in primis fundatur in opinione Capreoli, quam pauciores Thomistæ sequuntur, scilicet, subsistentiam seu personalitatem naturæ creatæ esse illius existentiam, quæ opinio falsa est, ut in disp. metaph. de hac re latius tractavi, & ex dictis supra circa q. 2. D. Th. & hic non obscure intelligi potest, quia, naturam substantialem existere, nihil aliud est, quā esse actu ens, extra nihil, & extra causas suas: subsistere vero aut personari pertinet ad modū per se, & complete existendi. Deinde, suppositis iis, quæ supra disp. 11. diximus, negari non potest, quin existentia absoluta in Deo a personalitate Verbi, saltem ratione, distinguatur. Sed responderi potest secundo, in Trinitate dari in singulis personis existentias relativas ratione distinctas ab absoluta, quæ in singulis personis non distinguuntur a propriis relationibus, ita unica unione humanitatis terminata ad proprietatem Verbi assumi potuisse humanitatem, tam ad existendum, quam ad subsistendum, quia illa proprietas, & subsistentia est, & existentia relativa. Sed quamquam hæc videri possit apparens fuga vel evasio, tamen non sibi constat, neque consequenter loquitur: nam ex eodem fundamento, ex quo cogimur ponere in Trinitate existentiam absolutam & relativam, cogimur ponere in duabus Christi naturis existentiam creatam & increatam, & ideo vel utrumque affirmandum esset, vel utrumque negandum. Quod ita declaratur, quia, si in Deo est existentia absoluta & relativa, ideo est, quia existentia nihil aliud intrinsece est, quam ipsa actualis entitas rei, & ideo quot sunt modi entitatum, tot necesse est esse modos existentiarum: & hinc concluditur, quia in Deo est entitas absoluta & relativa ratione distincta, esse etiam proportionalem existentiam: ergo pari ratione, quia in Christo sunt duæ naturæ, quæ sunt duæ entitates actuales, altera creata, altera increata, proportionaliter erunt existentia creata & increata. Vel e contrario confirmatur, quia si in persona creata existentia est unicus actus indivisibilis, per quam & persona, & natura existit, multo magis in personis divinis ipsum esse absolutum naturæ erit etiam existentia omnium relationum, & existentia erit tantum absoluta, & in ea facta erit unio, & procedet ratio facta. Si autem in Deo, sicut persona



sona & natura ratione distinguuntur, ita etiam esse naturæ & esse personæ: ergo multo magis in natura & persona creata distinguetur esse naturæ ab esse personæ, & in Christo homine distinguetur esse naturæ creatæ, quod creatum est, ab esse personæ increato. Et confirmatur tandem, quia humanitas Christi est res absoluta: ergo constituitur ut sic per aliquod esse absolutum, & non per relativum: sicut e contrario, persona Christi non est absoluta, sed relativa, quia in ratione personæ non constituitur per terminum absolutum, sed per relativum.

**Qualis sit existentia creata animæ Christi.** Dico secundo. Creata existentia humanitatis Christi non est omnino perfecta & completa in genere substantiæ, & ideo habet potius rationem inexistentiæ, quam existentiam simpliciter. Hæc conclusio colligitur ex authoribus supra citatis, & ipso mysterio; nam per hanc existentiam non habet humanitas Christi, ut in se existat, seu per se, & independentem ab alio, existit enim in Verbo, a quo pendet: unde caret ultimo termino & complemento suo, & habet modum existendi in alio, sicut supra disp. 9. explicatum est; habet ergo rationem inexistentiæ.

**Obiectio.** Dices. Hinc solum colligitur, deesse illi humanitati & existentiam ejus, ultimum & connaturalem terminum, qui est propria substantia seu personalitas, quæ ex natura rei distinguitur ab existentia naturæ; non tamen inde fit, ipsam existentiam naturæ esse in se minus perfectam & completam, quam in quacumque alia humana natura.

**Responsio.** Respondetur ex principiis positis, quidquid actum est, eo modo, quo est, habere aliquid existentiam: unde fit, ut personalitas creata eo modo, quo est aliquid distinctum a natura, ita suo modo habeat propriam existentiam, qua conjuncta cum existentia naturæ ex utraque conflatur una absoluta, & completa substantialis existentia. Existentia igitur solius naturæ comparata cum hac completa existentia, dicitur imperfecta & incompleta: nam sicut ipsa natura seu humanitas præcisa a persona, est incompleta substantia, ita ejus existentia præcise sumpta incompleta est, & hoc modo dicimus existentiam humanitatis Christi esse incompletam, & capacem modi inexistendi in Verbo: quia, licet nihil illi desit de existentia naturæ, tamen hoc totum est de se incompletum præcise sumptum, & carens ultimo suo termino, ut explicatum est. Fundamentum contrariæ sententiæ fere ex dictis eversum est. Ostensum est enim, existentiam non ita distingui ab essentia, ut possit res aliqua existere per existentiam alterius, sicut non potest esse entitas per entitatem alterius: quia, sicut nihil est magis intrinsecum, & (ut ita dicam) magis idem cum unaquaque re, quam ipsa ejus entitas, ita nullus quasi effectus formalis requirit actum magis intrinsecum & proprium ipsius rei, quam ipsum existere: & propterea illa compositio ex essentia creata & existentia increata, & in universum ex essentia propria, & existentia aliena, impossibilis est. Sed ne videamur difficultatem subterfugere, oportet in particulari dissolvere, quæ in contrarium obijci solent.

**Obiectio.** Obijcitur enim primo autoritas Sophronii VI. Synod. act. 1. ubi de Christi humanitate loquens, inquit, *in ipso*, id est in Verbo, & non in se, habuit existentiam unam cum Verbo. Secundo obijcitur autoritas Damasc. lib. 3. c. 22. ubi dicit, humanitatem Christi existere per existentiam Verbi. Hæc duo testimonia assert Medina hic, his eisdem verbis, idcirco ita illa proposui. Addunt etiam auctoritatem D. Th. quam nunc omitto, quia de illius mente latius fest. sequenti dicturus sum. Adjungi vero potest testimonium Leonis Papæ epist. 1. 1. dicentis, humanitatem Christi ipsa assumptione fuisse creatam, & Fulgent. lib. de Incarnat. cap. 3. ubi sic ait: *Ipsa acceptatio carnis fuit*

**Responsio.** *conceptio Virginis.* Ad Sophronium respondetur primum, illam particulam ultimam, scilicet, *cum Verbo*, additam esse ab arguente, non enim ita habetur in textu: qua sublata, reliqua verba simpliciter intellecta, ut sonat, nostram sententiam potius confirmant, quia non est sermo de Christo, sed de humanitate, ut patet aperte ex verbis antecedentibus: *Simul*, inquit, *caro, simul Dei Verbi caro, simul caro animata rationalis, simul Dei Verbi caro animata rationalis, in illo itaque, & non in se, ipsa, habuit existentiam unam*; de humanitate autem verissime dicitur habere tantum unam existentiam, eamque non in se, sed in Verbo. Verus tamen sensus Sophronii, ejusque intentio est, docere contra hæreticos, humanitatem in eodem instanti temporis, in quo inceptum esse

in rerum natura, fuisse Verbo unitam; & hoc modo dicit, semper habuisse unam existentiam invariata, & ejusdem modi, quia non prius per se existit, postea in Verbo, sed semper in Verbo. Qui sensus facile patet ex verbis citatis, & ex omnibus, quæ antecedunt ab illo loco. *Incarnatur ergo Verbum Deus, quod nostrum est, non præfæctæ carni copulatus, præformative atque in se se præsubsistenti aliquando corpori conlinitus, vel animæ præexistenti conjunctus: sed tunc his ad subsistendum venientibus, quando eis ipsum verbum & Deus naturaliter copulatus est, contemporaneam habens unionem atque subsistentiam, & non ante verissimum ipsius Verbi conventum in se ipsis unquam existerunt, vel cuiuspiam secundum nos alterius hominis penitus existerunt, sed Verbi ipsius naturali conventu, subsistentiam habitura concurrerunt, & nec quantum in actu oculi, hanc quam illam priorem habent, sicut Paulus Samos. perstreptit, atque Nestorius: simul quippe, &c.* ut supra: & postea subjungit rationem, qua id ipsum declarat, dicens: *Cum conceptu quippe Verbi hæc ad subsistendum prolata sunt, &c.* Difficiliora videri possunt verba, quæ post tres fere columnas subjunxit, dicens: *Quæ enim extat persona composita ex inconfuso constans temperamento, partitionem convenientium nescit, sed esse unum, & permanere unum indivisum sortitur: & infra; Est unum & duo, unum secundum subsistentiam atque personam, duo vero secundum ipsas naturas, atque eorum proprietates, ex quibus esse unum sortitur natura duplex, & unum permanere servavit.* Respondetur tamen, eundem sensum per hæc omnia verba intendere, scilicet, illas naturas semper fuisse unitas, & hoc modo habuisse semper unum esse personale, in quo semper permanferunt indivisa & indissoluta, componendo semper unam personam Christi. Possunt etiam hæc verba ultima explicari juxta doctrinam statim sectione sequenti tradendam, quæ illis poterit confirmari.

Testimonium Damasceni falso confictum est, quia nec illa verba, nec alia similia, vel in citato capite, vel in toto 3. lib. de Fide reperiuntur, sed in illo c. 22. dicit: *carnem ab ultimo ortu Deo Verbo unitam esse, imo potius in ipso existisse, ac personalem cum eo identitatem habuisse.* Quæ verba aliter vertit Faber, dicens: *Verbum fuisse unitum carni extreme existentie*: Ex quo verbo aliqui nituntur nostram sententiam confirmare, quia indicat, Verbū fuisse unitum carni existenti *extreme*, id est, imperfecta existentia. Sed melius vertit Billius in citatis verbis, quorum verus sensus est, *carnem ab ultimo ortu*, id est, a sui initio & primo ortu, seu conceptione, *fuisse Verbo unitam, & in eo existisse*, ubi non dicit, *per illud*, sed *in illo existisse*, quia Verbum non est ipsa existentia humanitatis, sed terminus existentia ejus.

Ad Leonem Papam & Fulgent. respondetur, sensum eorum esse eundem, qui Sophronii, scilicet, in eodem instanti fuisse animam seu humanitatem creatā & assumptam. Sic enim ait Leo. *Natura nostra non sic assumpta est, ut prius creata, postea assumeretur, sed ut ipsa*, id est, in ipsa assumptione crearetur, ubi illud prius, & posterius, ad temporis successionem manifeste referuntur. Fulgentius vero ita rem exposuit: *Hanc carnem tunc ex se natura Virginis concipientis exhibuit, cum in eadem Deus concipiendus advenit: non est igitur aliquod intervallum existimandum inter initium carnis, & adventum majestatis.* Addi potest, per creationem ex natura sua produci rem subsistentem, & ideo quodammodo dici potest creatio non esse consummata, donec res ad subsistendum perducta sit. Quia ergo productio animæ vel humanitatis Christi non fuit terminata ad subsistentiam, nisi ratione assumptionis, ideo quodammodo dici potest, ipsa assumptione fuisse creatam.

Secundo obijciuntur rationes metaphysicæ. Prima, quæ supra insinuatæ est, quia esse existentia in creaturis distinguitur ex natura rei ab essentia; ergo potest Deus separare essentiam ab existentia, & per propriam existentiam increatam illam supplere, sicut de subsistentia dicimus; ergo ita factum est. Secunda, quia vel existentia substantia nihil est aliud, quam subsistentia ipsa, quia est existentia per se; vel si aliquo modo distinguuntur subsistentia & existentia substantialis, sunt ita per se ordinatæ, ut existentia propria necessario supponat propriam subsistentiam: quia existentia est proprius actus suppositi, nam id, quod est, & quod fit, est suppositum: ergo neutro

Obiect. 2.



modo poni potest in Christi humanitate existentia creata. Nam si prior dicendi modus asseratur, sicut in illa humanitate non potest poni secundum fidem subsistentia creata: ita nec creata existentia substantialis, quia ponuntur esse omnino idem: si autem affirmetur posterior modus, constat in his, quæ sunt per se subordinata, ablato priori consequenter tolli id, quod posterius est, atque adeo, ablato proprio susceptivo existentia, quod est suppositum, auferri existentiam. Neque enim potest existentia creata recipi in persona increata, vel esse actus ejus: alias Verbum existeret per existentiam increatam, & existentia creata esset perfectio personalitatis Verbi, quæ impassibilia sunt.

**Respon-**  
**sio.** Essentia  
ab existi-  
tia in  
creaturis  
quomodo  
distingua-  
tur.

Ad primam rationem respondetur, essentiam creaturæ, ut abstrahit ab actuali existentia, solum significare rem possibilem, quæ ut sic nihil actu est, neque habet entitatem actualem, sed in potentia tantum objective, unde ut sic distinguitur ab actuali existentia seu entitate, sicut res in potentia a re in actu: at vero essentia creaturæ ut jam facta, seu ut actualis entitas, vel formaliter est ipsamet actualis existentia, vel ita illam includit, ut nulla ratione possit ab illa præscindi vel separari. Et ideo impossibile est, ut essentia creata sua propria existentia privata assumptibilis maneat, quia non assumitur ens in potentia, sed ens in actu, unde non est eadem ratio de subsistentia seu personalitate; quia personalitas creata non constituit naturam in ratione actualis entitatis, sed supponit in illa entitatem, & terminat illam tanquam modus illius: & ideo, separata personalitate, intelligitur natura manere assumptibilis, & terminabilis personalitate aliena, at vero, ablata existentia, nihil manet in re, quod assumi possit. Dices, esse verum, si res privaretur omni existentia, non vero, si ablata propria assumatur ad alienam; sic enim id, quod assumitur, erit aliquid in actu saltem per alienam existentiam. Sed hoc jam rejectum est, ostensum est enim, id, quod assumitur debere, esse aliquid in actu, ut supponitur assumptioni; ostensum est etiam, nullam entitatem actualem posse constitui in esse talis entitatis per existentiam, aut entitatem alienam.

**Obje-**

**Respon-**

**Existen-**  
**tia a sub-**  
**sistentia**  
**quomodo**  
**distingua-**  
**tur.**

Ad secundam rationem respondetur ad priorem partem, subsistentiam ex natura rei distinguere ab existentia substantiali naturæ creatæ; nam licet illa existentia dicatur esse per se, ut distinguitur contra esse in alio per modum accidentis, quia ex natura sua est apta, ut terminetur per subsistentiam, tamen in suo formali conceptu non includit actualem modum per se essendi, in quo subsistentia consistit. Et hoc sensu subsistentia est modus existentia, ut recte Damascenus dixit, sicut in accidentibus, existentia accidentalis potest dici esse in alio, non quia actualis inhærentia sit de conceptu ejus, sed quia natura sua apta est per illam terminari; ipsa vero actualis inhærentia modus est ab illa distinctus, & de potentia absoluta ab illa separabilis: sic igitur ab humanitate Christi separabilis fuit subsistentia creata, servata existentia ipsius humanitatis. Ad alteram vero partem respondetur, existentiam substantialem completam & integram ex omni parte in creaturis tantum reperiri in supposito seu persona, & ideo dixi supra, existentiam creatam humanitatis Christi non esse hoc modo completam: at vero, generatim & absolute loquendo, existentia non est actus suppositi, sed est actus cujuscumque entis, seu potius est ipsa actualis entitas cujuscumque rei. Et hoc modo existentia naturæ est actus vel entitas ipsiusmet naturæ, quæ in omni natura creata prior natura est, quam subsistentia, unde potius natura per suam existentiam constituitur capax personalitatis, quam e contrario, quamvis totum suppositum compleatur in suo esse per personalitatem, & ideo illud dicatur simpliciter esse & fieri. Quocirca ablata personalitate creatæ abhumanitate Christi, licet non permaneret esse completum personale & creatum, potuit tamen manere esse ipsius nature, quod non est posterius, sed prius, quam personalitas. Et ideo non sequitur, Verbum simpliciter existeret per existentiam creatam, quia, ut supra q. 16. art. 9. dicebamus, existeret absolute dictum, & secundum adjacens, significat esse simpliciter ejus, cui tribuitur; at vero esse simpliciter Verbi non est creatum: vere autem dici potest, quod Verbum existit homo per existentiam creatam & humanam, non quia illa existentia sit actus suppositi secundum se, sed ut est homo, seu quia est actus humanitatis in eo existentis.

Tertio obijciunt rationes Theologicas. Prima & præcipua est, quia sequitur, unionem humanitatis ad Verbum esse accidentalem; non enim potest intelligi inter aliqua duo substantialis unio, nisi in quantum unum trahitur ad esse alterius; unde si anima & corpus haberent proprias existentias, non posset intelligi inter ea substantialis unio, præsertim quia existentia humanitatis est completa, & existentia Verbi similiter: ergo non potest una alteri advenire nisi accidentaliter. Secunda, quia alias sequitur, humanitatem Christi habere existentiam a matre per generationem; terminus ergo illius generationis erit hoc esse creatum humanitatis; erit ergo Beata Virgo mater humanitatis, & non Dei. Tertio addi potest, quia id, quod est simpliciter unum, tantum habet unum esse. Sed hoc dicemus sectione sequenti. Ad primam ergo rationem respondetur, negando sequelam, quia unio naturæ cum supposito substantialis est, & huiusmodi est hæc unio, ut Concilia tradunt, quæ nunquam dixerunt hanc unionem esse essentia cum existentia, sed naturæ realis cum supposito increato: cui unioni tantum abest, ut repugnet existentia creata ipsius naturæ, ut sine illa potius nec intelligi possit: quia sine illa non esset natura realis in actu, & consequenter neque assumptibilis, Neque est verum, unionem substantialem duarum rerum in hoc consistere, quod una trahat aliam ad suum esse existentia: nam etiam anima & corpus revera habent partiales existentias suas, incompletas quidem in suo genere; substantialiter tamen uniuntur per modum actus & potentia ad constituendam unam completam naturam ejusdem generis substantia: tota vero humanitas licet in ratione naturæ completa sit, tamen in ratione substantia adhuc est incompleta & caret ultimo termino, & ideo substantialiter uniri potest substantia Verbi, ut cum illa componat unum suppositum ac personam humanam. Ad secundum concedo primam sequelam, imo non video, qua ratione id negari possit, quia si Christus non habuit a matre existentiam humanitatis, nihil ab illa habuit, quia ab illa non habuit existentiam increatam, neque unionem ad Verbum, essentiam autem nudam ab illa habere non potuit, quia illa nihil est, nisi tantum quædam res in potentia. Negatur vero ultima consequentia, quia licet formalis terminus illius generationis sit humanitas cum sua existentia, tamen ultimus terminus, quia generatur, non est humanitas, sed hic homo: quia illa humanitas & existentia ejus non in se fit, sed in Verbo, & ideo Verbum veredicitur generari & nasci ex Virgine. Sicut interfectores Christi vere privarunt humanitatem existentia sua, non enim extitit humanitas in illo triduo: tamen, quia humanitas non est passa, nec privata existentia secundum se, sed ut in hoc supposito existens, ideo vere dicitur hic homo interfectus, & Deus mortuus. Unde hoc argumentum multo magis retorqueri potest contra Thomistas, quia si humanitas Christi non habet existentiam creatam, vix intelligi potest, quid habuerit Christus a matre, ut sit filius ejus. Et quamvis ipsi dicant, habuisse esse essentia ipsius humanitatis, hoc præterquam quod repugnantiam involvit in ipsis terminis, ut ostensum est, quia esse essentia non fit nisi ratione existentia, evidenter ostendit, quam sit invalidum dictum argumentum, nam si hoc illis satis esse videtur, ut B. Virgo sit mater Dei & hominis, multo magis videri debet sufficiens, quod nos dicimus, habuisse, scilicet, Verbum & Christum a matre non solum essentiam, sed existentiam humanitatis.

**Christus**  
**per gene-**  
**rationem**  
**habuit a**  
**matre**  
**existentia**  
**humani-**  
**tatis.**

## SECTIO II.

*Utrum simpliciter dicendum sit, Christum habere unum esse, vel plura.*

**I**N hoc dubio fere jam non relinquitur quæstio in re ipsa, sed in modo loquendi, & enunciandi propositiones: nam in re constat, suppositis, quæ diximus, sicut natura humana & divina in Christo distinctæ res sunt, ita etiam habere existentias distinctas prout ad naturas pertinent. Constat autem ex fide illas naturas ita esse distinctas, ut tamen substantialiter unitæ sint & conjunctæ in uno Christo. Solum ergo videtur relinqui quæstio de propositionibus ipsis, an simpliciter loquendo, Christus dicendus sit habere plura esse propter naturas, vel unum esse propter suppositum, & hunc existimo esse sensum quæ-



quæstionis a D. Thoma hic proposito, quidquid Cajetanus dicat, quod ex sequentibus constabit.

Scotus ergo, Durand. & fere alii authores citati sect. præced. pro nostra sententia simpliciter ita loquuntur: sicut in Christo sunt plures naturæ, & plures formæ, ita etiam esse plures existentias, sicut etiam dicuntur esse in illo plures voluntates, seu plures operationes, quarum formalia principia sunt ipsæ naturæ, quamvis suppositum volens, & operans sit unum & idem. At vero D. Thom. hic expresse docet in Christo tantum esse unum esse. Cujus sententiam sequuntur omnes ejus discipuli, qui modus loquendi mihi magis probatur.

Unde breviter dico primo. Simpliciter dicendum est, esse in Christo tantum esse substantiale, completum, & perfectum. Hanc existimo esse mentem D. Thomæ hic, & potest confirmari verbis Sophronii supra citatis. Et optime probatur ratione D. Thomæ, nam ens in actu constituitur per ipsum esse, ut ostensum est; ergo quod est simpliciter unum ens, simpliciter habet unum esse, quo constituitur: sed Christus est simpliciter unum ens, ut dictum est articulo primo; ergo & habet unum esse. Et confirmatur rationibus Thomistarum sectione præcedenti allatis, quæ in bono sensu ad hanc conclusionem confirmandam accommodari possunt hoc modo: quia omnis substantialis unio, sicut terminatur ad unam substantiam, ita & ad unum ens per se; ergo & ad unum esse simpliciter. Et hoc sensu necesse est, ea, quæ substantialiter uniuntur, convenire aliquo modo in uno esse totius, cum ergo in Christo sit substantialis unio, necesse est, ut in Christo sit tantum unum esse.

Esse unū  
in Christo,  
sed nō omni-  
no sim-  
plex.

Dico secundo. Hoc esse Christi Domini, quatenus Deus & homo est, non est unum per omnimodam simplicitatem, sed per admirabilem compositionem & substantialem unionem naturæ humanæ cum persona Verbi, & naturalis existentia humanitatis cum personali existentia seu subsistentia Verbi Dei. Hæc conclusio sequitur evidenter ex dictis constat enim esse existentia Verbi Dei secundum se, esse unum omnino simplex: diximus autem, præter hoc esse increatum, esse in humanitate Christi suum esse existentia creatum, non omnino perfectum, sed quale esse potest esse solius naturæ, & rursus addidimus in Christo Deo homine simpliciter dari unū esse: ergo necesse est esse unum compositione, non simplicitate. Et ratio etiam hoc suadet, omne enim ens ita habet unum esse, sicut ipsum est unum; sicut ergo Christus Deus homo non est unus simplicitate, sed compositione, ita proportionali modo habebit unum esse. Quod exemplo substantiæ corporeæ explicari, & confirmari potest: sicut enim homo constat ex anima rationali & corpore, ita habet unum esse, non quidem omnino simplex, quia aliud est esse parziale animæ, & aliud corporis, sed per compositionem ex utroque: & idem est in tota substantia, quatenus ex partibus integrantibus constat. Et ex hac conclusione intelligitur ratio, propter quam in Christo Deo & homine, sicut fatemur duas naturas, ita & duas voluntates, & operationes, & non simpliciter unam, & tamen simpliciter fatemur unum esse, & non duo, nisi cum addito & secundum quid. Ratio enim est, quia duæ naturæ non uniuntur in unam naturam, sed tantum in unam personam, & ita in ratione naturarum semper manent duæ & distinctæ: & similiter duæ voluntates non uniuntur in unam voluntatem, nec duæ operationes in unam operationem, sed omnino distinctæ manent istæ proprietates, sicut ipsæ naturæ, quibus mediantibus solum uniuntur in una persona. At vero natura & persona simpliciter uniuntur in uno esse, quia (ut sæpe dixi) existentia est ipsa actualis entitas rei, vel intrinsecus actus ejus: unde non potest fieri unio inter ipsas entitates ut sic, quin fiat inter ipsa esse, & ideo sicut ex unione substantiali resultat simpliciter unum ens, ita unum esse, non simplex, sed compositum.

Quid senserit D. Th. de existentia humanitatis Christi;

Juxta doctrinam hanc existimo posse convenienter explicari sententiam D. Th. in hoc articulo. Primo quidem, quia nunquam ipse docuit, humanitatem Christi existere per existentiam incretam Verbi, sed solum esse in Christo unum esse personale, quod juxta doctrinam positam optime intelligi potest. Secundo, quia ex principiis ab eodem D. Th. positae aliis locis aperte intulimus nostram sententiam de existentia creata humanitatis. Tercio quia D. Th. qu. de unione Verbi incarnati art. 4.

Suarez Tom. XVI.

hoc diserte docuit, & nunquam aperte retractavit. Quarto, quia supra q. 2. art. 6. ad 2. dicit humanitatem esse assumptam ad unum esse, non ut est esse naturæ, sicut corpus assumitur ad esse animæ, sed prout est hypostasis vel persona: ubi aperte loquitur de esse existentia naturæ, sic enim dicitur ab eodem corpus assumi ad esse animæ 1. p. q. 76. art. 1. Quinto quia quoties D. Th. loquitur de hoc uno esse Christi, addit aliquid, quo suam sententiam limitet, & explicet: ut hic semper addit illam particulam, *esse personale*; & similem addit quodlibeto 9. art. 3. in 3. dist. 5. q. 2. art. 2. & supra hac 3. p. q. 9. art. 1. ad 3. dicit unionem factam esse ad hoc unum esse personale. Et infra q. 19. art. 1. ad 4. dicit, esse pertinere ad constitutionem personæ, & ideo unitatem personæ requirere unitatem ipsius esse completi, & personalis: non ergo sine causa D. Th. tam caute semper loquitur, sed ut indicet hoc unum esse personale, non excludere existentia ipsius naturæ, quæ ad componendum ipsum esse totius personæ concurrat, quia ita unitur supposito, ut ex illa unione resultet unum esse simpliciter totius personæ compositæ. In quo differt humanitas ab accidentibus, quia accidentia nullo modo pertinent ad constitutionem personæ, sed adveniunt illi jam plene constitutæ, unde in dicto quodlib. sic loquitur D. Th. *Rei substantiali duplex esse tribuitur: unum resultans ex iis, ex quibus ejus unitas integratur, quod est esse suppositi substantiale: aliud superadditum per accidens: quia ergo in Christo ponimus unam rem subsistentem tantum, ad cujus integritatem concurrat etiam humanitas, ideo est unum esse substantiale Christi, habens unitatem ex parte suppositi, non ex natura*. Sentit ergo hoc unum esse coalescere aliquo modo ex esse ipsius naturæ, quamvis unitatem simpliciter habeat ex conjunctione ad suppositum. Sexto ex discursu hujus articuli hoc colligi potest: tum, quia in principio dicit, esse pertinere ad naturam, & ad hypostasim: ad hypostasim ut ad habentem esse, ad naturam vero ut ad id, quo aliquid habet esse; habet ergo natura aliquo modo suum esse, quo concurrat ad esse totius suppositi. Neque enim verisimile est, quod Cajetan. hic & alii Thomistæ dicunt, naturam esse, quo aliquid est, quia est principium ipsius esse: quia, ut supra ostensum est, non potest natura esse principium ipsius esse, nisi ipsa existat. Unde minus credibile est, quod Cajet. ait, & indicat Capreol. in 3. dist. 5. q. 2. art. 3. ad 4. & 5. principale, ut natura existat, non oportere ipsam actuari per existentiam, sed sufficere, quod ipsa sit, quæ aliquis existit; quamvis enim natura non sit ens completum, tamen est verum ens intrinsece includens propriam entitatem suam actualem: quæ sine intrinseca existentia veluti actuante seu constituyente ipsam entitatem nec mente concipi potest: tum etiam, quia aperte D. Th. explicat unitatem hujus esse personalis per conjunctionem, seu constitutionem unius ex multis, unde in exemplo, quo utitur, sic inquit: *Esse autem capitatum, & esse corporeum, & esse animatum totum pertinet ad unam personam Sortis: & ideo ex omnibus his non fit nisi unum esse in Sorte*; & postea adhibet exemplum de parte integrante, quæ advenit supposito jam constituto: quam dicit non afferre novum esse, sed trahi ad unum esse suppositi, cum tamen evidentiissimum videatur, partem integram habere suam existentiam partialem, licet ex omnibus his partibus unitis resultet unum esse totius, non simplex, sed compositum. Tum denique, quia discursus, & ratio D. Th. non concludit esse in Christo unum esse, nisi prædicto modo; non est ergo cur asseramus D. Thom. plus intendisse, quam probat.

Possunt vero contra hanc expositionem D. Th. nonnulla objici. Primum est, quia constat in doctrina D. Th. existentiam realiter distinguere ab essentia, ex quo fundamento videtur in hoc articulo procedere. Sed hæc obiectio in præsentia non urget: tum, quia sensus D. Th. in illa quæstione metaphysica variis modis exponitur, etiam a discipulis D. Th. tum etiam quia præsens quæstio Theologica non omnino ab illa pendet, ut constat ex rationibus sect. præced. factis. Secundo vero obijciatur, quia D. Th. nullo alio loco disputavit de propria existentia humanitatis, de unitate autem personæ Christi satis in superioribus dixerat; ergo hic non intendit agere de hoc secundo, sed de primo. Respondetur forte D. Th. non movisse specialem quæstionem de creata existentia humanitatis, quia ut evidens supposuit hanc esse actualem

Obiect. 1.

Responsio.

Obiect. 2.



## ARTICULUS I.

Utrum in Christo sint due voluntates.

**A**D primum sic proceditur. Videtur, quod in Christo non sint due voluntates, una divina, & alia humana. Voluntas enim est primum movens & imperans in unoquoque volente. Sed in Christo primum movens & imperans fuit voluntas divina, quia omnia humana in Christo movebantur secundum voluntatem divinam. Ergo videtur, quod in Christo non fuerit nisi una voluntas, scilicet divina.

2. Præterea. Instrumentum non movetur propria voluntate, sed voluntate moventis. Sed natura humana fuit in Christo, sicut instrumentum divinitatis ejus. Ergo natura humana in Christo non movebatur propria voluntate, sed divina.

3. Præterea. Illud solum multiplicatur in Christo, quod pertinet ad naturam. Voluntas autem non videtur ad naturam pertinere, quia ea, quæ sunt naturalia, sunt ex necessitate. Quod autem est voluntarium, non est necessarium. Ergo voluntas est una tantum in Christo.

4. Præterea. Damas.\* dicit in 3. lib. quod aliquando velle non est nature sed nostre intelligentie scilicet personæ. Sed omnis voluntas est aliquando voluntas, quia nihil est in genere, quod non sit in aliqua ejus specie. Ergo omnis voluntas ad personam pertinet: sed in Christo fuit, & est una tantum persona. Ergo in Christo est una tantum voluntas.

Sed contra est, quod Dominus dicit Luc. 22. Pater, si vis, transfer calicem istum a me, verumtamen non mea voluntas sed tua fiat. Quod inducens Ambrosius ad Gratianum Imperatorem dicit. \* Sicut suscepit voluntatem meam, suscepit tristitiam meam. Et super Lucam dicit. \* Voluntatem suam ad hominem retulit, Patris ad divinitatem: voluntas enim hominis est temporalis, voluntas divinitatis æterna.

b. Respondeo dicendum, quod quidam posuerunt, in Christo esse unam solam voluntatem: sed ad hoc ponendum diversimode moti esse videntur. Apollinaris enim non posuit animam intellectualem in Christo: sed quod Verbum esset loco anime, vel etiam loco intellectus. Unde, cum voluntas sit in ratione (ut Philosophus dicit in 3. de Anima\*) sequebatur, quod in Christo non esset voluntas humana, & ita in eo non esset nisi una voluntas. Et similiter Eutyches, & omnes, qui posuerunt unam naturam compositam in Christo, cogebantur ponere unam voluntatem in eo. Nestorius etiam, quia posuit, unionem Dei & hominis esse factam solum secundum affectum & voluntatem, posuit unam voluntatem in Christo. Postmodum vero Macharius Antiochenus Patriarcha, & \* Cyprius Alexandrinus, & Sergius Constantinopolitanus, & quidam eorum sequaces, posuerunt in Christo unam voluntatem, quamvis ponerent duas naturas in Christo secundum hypostasim unitas: quia opinabantur, quod humana natura in Christo nunquam movebatur proprio motu, sed solum secundum quod erat mota a divinitate: ut patet ex epistola synodica Agathonis Papa.\* Et ideo in VI. Synodo apud Constantinopolim celebrata, determinatum est, oportere dici, quod in Christo sint due voluntates, ubi sic legitur. \* Juxta quod olim Propheta de Christo, & ipse nos erudit, & sanctorum Patrum nobis tradidit Symbolum, duas naturales voluntates in eo, & duas naturales operationes predicamus. Et hoc necessarium fuit dici. Manifestum est enim, quod Filius Dei assumpsit humanam naturam perfectam, sicut supra ostensum est. Ad perfectionem autem humane nature pertinet voluntas, quæ est naturalis ejus potentia, sicut & intellectus: ut patet ex his, quæ in prima parte dicta sunt.

\* Unde necesse est dicere, quod Filius Dei humanam voluntatem assumpsit in humana natura. Per assumptionem autem humane nature, nullam diminutionem passus est Filius Dei in his, quæ pertinent ad divinam naturam, cui competit, voluntatem habere, ut in prima parte habitum est. Unde necesse est dicere, quod in Christo sint due voluntates, una, scilicet, divina, & alia humana.

c. Ad primum ergo dicendum, quod quicquid fuit in humana natura Christi, movebatur natura voluntatis divine, non tamen sequitur, quod in Christo non fuerit motus voluntatis proprius nature humane: quia etiam aliorum sanctorum pie voluntates moventur secundum voluntatem Dei, qui operatur in eis velle & perficere, ut dicitur Philipp. 2. Licet enim voluntas, non possit interius moveri ab aliqua creatura, interius tamen movetur a Deo, ut in

prima

& realem entitatem creatam, quæ sine creata existentia neque mente concipi potest. Ideo vero movit questionem de unitate ipsius esse Christi, quia hæc consequens erat ad questionem de unitate ipsius Christi. Unde sicut ex superioribus constare poterat, Christum esse unum, quia ostensum fuerat, esse unam personam compositam, & hanc unionem esse substantialem: & nihilominus quia unitas est veluti quid consequens ipsum ens, ideo hic D. Th. specialiter differuit, quomodo sentiendum sit de unitate Christi: ita licet ex dictis de unitate personæ, & substantiali unionem Incarnationis constare posset, esse in Christo unum esse, nihilominus hoc discrete explicandum fuit, propter eandem rationem. Concedo ergo, hic esse sermonem de esse existentie ut sic, & de unitate illius, non tamen de unitate simplici, sed composita, nec de existentia solius humanitatis, sed totius Christi Dei & hominis, de quo in præcedenti articulo quaesitum fuerat, an sit unum vel duo. Et quod hic fuerit sensus hujus questionis D. Th. inde etiam confirmari potest, quia hoc modo explicata proprie pertinebat ad hunc locum: si autem quaestio esset de unionem essentiali creatæ cum existentia increata, potius pertineret hæc quaestio ad explicationem ipsius mysterii, quæ supra q. 2. tradita est, ut ex ibi etiam dictis facile constare potest. Quam difficultatem vidit Cajetanus hic in explicatione tituli, eamque expedit, dicens, omnia, quæ antea tractata sunt, pertinere ad esse vel fieri Incarnationis, in se, vel in enunciationibus: nunc vero agi de unitate, quæ sequitur ens. Sed revera non ita est, nam, quæ supra de scientia, & gratia, & similibus dicta sunt, non pertinent ad esse vel fieri Incarnationis, quoad substantiam ejus: unio autem in existentia ipsius nature maxime pertinet ad substantiam mysterii, si revera intercessisset.

Tertio objici potest, quia D. Th. aperte hic dicit, secundum humanam naturam non advenire Filio Dei novum esse, sed solum habitudinem esse præexistentis ad humanam naturam. Respondetur tamen facile ex dictis, non negare simpliciter novum esse, sed novum esse personale; advenit enim humanitas Verbo, tanquam natura supposito, & ideo non affert esse simpliciter, & completum, tanquam id, quod est, sed solum esse nature, quod est esse secundum quid, & potius habet rationem inexistentie in Verbo. Unde licet respectu Verbi secundum se, nullum esse illi addatur per unionem humanitatis, sed solum quædam habitudo ad ipsam: tamen respectu Verbi ut hominis, revera additur esse naturale ipsius humanitatis. Et ad eundem modum facile intelliguntur omnia, quæ D. Th. dicit in solutionibus argumentorum.

Unum solum, quod in solutione ad tertium dicit, scilicet tres personas divinas non habere nisi unum esse, quia in eis idem est esse nature & personæ, difficile est. Ostendimus enim in superioribus, esse in Trinitate non tantum unum esse absolutum, sed etiam tria relativa. Sed hæc difficultas solvenda est etiam a discipulis D. Th. qui admittunt tres existentias relativas. Unde dicendum est, D. Thomam loqui de esse perfectissimo, quod est esse simpliciter Dei, & omnium personarum, quod secundum se & ex proprio conceptu est, non solum existentia, sed etiam subsistentia: & ideo ratione illius tres personæ sunt unum absolute, & habent simpliciter unum esse, quamvis personaliter distinguantur, & ut sic habeant distincta esse relativa, & secundum quid.

## Q U Æ S T I O XVIII.

De pertinentibus ad unitatem in Christo, quantum ad voluntatem, in sex articulos divisa.

**D**Einde considerandum est de unitate, quantum ad voluntatem. Et circa hoc quaeruntur sex.

Primo, utrum in Christo sit alia voluntas divina, & alia humana.

Secundo, utrum in humana natura Christi sit alia voluntas sensualitatis, & alia rationis.

Tertio, utrum ex parte rationis fuerint in Christo plures voluntates.

Quarto, utrum in Christo fuerit liberum arbitrium.

Quinto, utrum voluntas humana Christi fuerit omnino conformis divine voluntati in volito.

Sexto, utrum in Christo fuerit aliqua contrarietas voluntatum.

214.  
3. d. 14. a. 1.  
q. 1. cor. &  
d. 17. a. 1. q.  
1. & 4. eod.  
c. 36. Et  
po. q. 10. a.  
4. 13. &  
op. f. 1. o.  
218. & Jo.  
6. l. 4. co. 3.  
fi.

li. 3. o. 13.  
fi cap. 14.

li. 2. de fid.  
ad Gratia.  
c. 3. med.  
tom. 2. Su-  
per illud  
Luc. Nog  
mea vo-  
luntas,  
sed tua  
fiat. li. 10.  
in Luc.  
tom. 5.

Lib. 3. de  
anima  
tex. 4.  
tom. 1.

aliis Cyp-  
rius seu  
Typus.

Hæc epist.  
missa fuit  
ad synod.  
lecta in  
actione 4.  
& recepta  
in 8.  
In epist.  
Agatho-  
que fuit  
lecta in  
a. 5.  
Syn. d.  
VI. gener.  
q. 2. art. 5.

1. p. q. 79.  
& 80.

1. p. q. 80f

Objec. 3.

Respon.

Objec. 4.

Respon.



x. p. q. 105  
art. 4.

Li. 3. c. 20.  
ante med.  
tom. 6.

Li. 1. polit.  
c. 3. & 4.  
& lib. 8.  
ethic. c. 11  
tom. 5.

1. p. q. 5. a.  
8. & q. 6.  
art. 4.

*prima parte dictum est. \* Et sic etiam Christus secundum voluntatem humanam sequebatur voluntatem divinam, secundum illud Psalm. 39. Ut facerem voluntatem tuam, Deus meus volui. Unde Augustinus dicit contra Maxim-  
mum: Ubi dixit Filius Patris Non quod ego volo, sed quod tu vis, quid te adiuvat, quod tua verba subjungis & dicis? Ostendit vere suam voluntatem, subiectam suogenitori: quasi nos negemus hominis voluntatem, voluntati Dei debere esse subiectam.*

*Ad secundum dicendum, quod proprium est instrumenti, quod moveatur a principali agente, diversimode tamen secundum proprietatem naturae ipsius. Nam instrumentum inanimatum sicut securis, aut ferra, movetur ab artifice per solum motum corporalem. Instrumentum vero animatum anima sensibili, movetur per appetitum sensitivum: sicut equus a seffore. Instrumentum vero animatum anima rationali, movetur per voluntatem ejus, sicut per imperium domini movetur servus ad aliquid agendum: ut Philoſophus dicit in primo Politicorum. \* Sic ergo humana natura in Christo fuit instrumentum divinitatis, ut moveretur per propriam voluntatem.*

*Ad tertium dicendum, quod ipsa potentia voluntatis est naturalis, & consequitur naturam ex necessitate. Sed motus vel actus hujus potentiae (qui etiam voluntas dicitur) quandoque quidem est naturalis & necessarius, puta respectu felicitatis: quandoque autem ex libero arbitrio rationis proveniens, & non necessarius neque naturalis (sicut patet ex his, quae in prima parte dicta sunt) \* & tamen etiam ipsa ratio, quae est principium hujus motus, est naturalis. Et ideo praeſter voluntatem divinam, oportet in Christo ponere voluntatem humanam, non solum, prout est potentia naturalis, aut prout est motus naturalis, sed etiam, prout est motus rationalis.*

*Ad quartum dicendum, quod per hoc, quod dicitur aliquo velle, designatur determinatus modus volendi: determinatus autem modus ponitur circa ipsam rem, cujus est modus. Unde, cum voluntas pertineat ad naturam, ipsum etiam, quod est aliquo velle, pertinet ad naturam, non secundum quod est absolute considerata, sed secundum quod est in tali hypostasi. Unde etiam voluntas humana Christi habuit quandam determinatum modum, ex eo, quod fuit in hypostasi divina, ut scilicet, moveretur semper secundum nutum divinae voluntatis.*

#### COMMENTARIUS.

**Q**uestio hæc, tam de facultate ipsa, quam de actu voluntatis, intelligi potest. D. Th. autem proprie videtur illam tractare de ipsa potentia, ut patet ex ratione articuli: quamvis in solutionibus argument. præsertim ad 3. ad motum seu actum voluntatis, responſionem extendat, directe vero de operatione ipsa in sequ. qu. disputat.

*b* Antea vero quam D. Th. quæſtionem definiat, refert, hæreticos, qui unam tantum voluntatem in Christo posuerunt, inter quos numerat Apollinarem, Eutychetem, Nestorium, & Macharium Antiochenum cum illius sectatoribus: ex quibus solum hi poſtremi, qui Monothelitæ dicti sunt, hunc errorem directe asseruerunt, de quorum sensu infra nonnihil dicemus. Apollinaris vero, negando habuisse Christum animam rationalem, consequens est, ut etiam negaverit habuisse voluntatem creatam, & eodem modo videtur D. Th. argumentari de Eutychete, sicut posuit in Christo unam naturam, ita etiam posuisse unam voluntatem, & est optima collectio, si ille posuit unam naturam per conversionem, seu transmutationem unius naturæ in altera, vel utriusque in unam tertiam. Si autem posuisset unam naturam solum per compositionem, non est necesse, ut posuerit unam voluntatem, nisi solum unitate ordinis seu conformitatis: sicut, licet natura hominis una sit, duplex in ea potest esse appetitus, ita tamen ut unus alteri subordinatus sit. De Nestorio autem, cum ille posuerit in Christo duas personas & duas naturas, mirum videri potest, quomodo D. Th. illi tribuat, quod unam tantum posuerit in Christo voluntatem. Sed considerandum est, aliud esse loqui in sententia Nestorii de Deo, & homine, aliud de Christo: ille enim in vero Deo ac vero homine ponebat duas personas, & duas naturas, & consequenter etiam duas voluntates: at vero in Christo, quem a vero Deo ipse distinguebat, unam tantum voluntatem creatam esse credidit, & hic est sensus D. Th. ut bene Cajet. indicavit. Unde hic

error Nestorii non est directe contra veritatem, quam hoc loco D. Th. docere intendit, scilicet esse in Christo homine voluntatem creatam: supponit enim, ipsum esse verum Deum, & consequenter habere voluntatem divinam, & inde concludit habere duas voluntates, quia necesse est, ut etiam habeat voluntatem creatam: nam, cum hæc pertineat ad perfectionem humanæ naturæ, eamque necessario consequatur, necesse est fateri, illam assumptam esse a Verbo in humana natura. Denique de Machario sciendum est, non fuisse ipsum primum hujus erroris authorem, nam in VI. Synodo act. 10. versus finem, & act. 16. in fine referuntur Themiltius, Theodosius, & alii antiquiores hujus hæresis patroni, quamvis fere omnes illi unam tantum naturam in Christo ponerent. Damascenus etiam, qui Machario antiquior fuit, contra hanc hæresim disputavit lib. 3. de fide c. 14.

In solutione ad primum & secundum declarat D. Th. optime, quomodo humana voluntas Christi possit esse instrumentum voluntatis divinæ, & ad nutum illius gubernari, & nihilominus libero & perfecto modo ac conaturali operari. Et significat D. Th. ita fuisse motam Christi voluntatem a verbo Divino, sicut solent voluntates justæ, & sanctæ ad nutum divinæ gratiæ moveri. Quod valde notandum est pro iis, quæ sequenti disput. trademus. Aliæ solutiones claræ sunt.

#### ARTICULUS II.

*Utrum in Christo fuerit aliqua voluntas sensualitatis, præter rationis voluntatem.*

**A**d secundum sic proceditur. Videtur, quod in Christo non fuerit aliqua voluntas sensualitatis præter rationis voluntatem. Dicit enim Philoſophus in 3. de Anima, \* quod voluntas in ratione est; in sensitivo autem appetitu est irascibilis & concupiscibilis. Sed sensualitas significat appetitum sensitivum. Ergo non fuit in Christo voluntas sensualitatis.

2. Præterea. Secundum August. 12. de Tri. \* sensualitas significatur per serpentem. Sed nihil serpentinum fuit in Christo, habuit enim similitudinem animalis venenosi sine veneno, ut August. dicit \* super illud Joan. 3. Sicut exaltavit Moyses serpentem in deserto. Ergo in Christo non fuit voluntas sensualitatis.

3. Præterea. Voluntas sequitur naturam, ut dictum est. \* Sed in Christo non fuit nisi una natura præter divinam. Ergo in Christo non fuit, nisi una voluntas humana.

Sed contra est, quod Ambr. dicit in 2. ad Gratianum Imp. \* Mea est voluntas, quam suam dicit, quia ut homo suscepit tristitiam meam. Ex quo datur intelligi, quod tristitia pertineat ad humanam voluntatem in Christo. Sed tristitia pertinet ad sensualitatem, ut in secunda parte habitum est. \* Ergo videtur, quod in Christo sit voluntas sensualitatis, præter voluntatem rationis.

Respondeo dicendum, quod sicut prædictum est, Filius Dei humanam naturam assumpsit cum omnibus, quæ pertinent ad perfectionem ipsius naturæ humane. In humana autem natura includitur etiam natura animalis, sicut in specie includitur genus. Unde oportet, quod Filius Dei assumpserit cum humana natura, etiam ea, quæ pertinent ad perfectionem naturæ animalis, inter quæ est appetitus sensitivus, qui sensualitas dicitur: & ideo oportet dicere, quod in Christo fuerit sensualis appetitus sive sensualitas. Sciendum est etiam, quod sensualitas, sive sensualis appetitus, in quantum est natus obedire rationi, dicitur rationalis per participationem, ut patet per Philoſ. in 1. Ethicorum. \* Et quia voluntas est in ratione (ut dictum est \*) pari ratione potest dici, quod sensualitas sit voluntas per participationem.

Ad primum ergo dicendum, quod ratio illa procedit de voluntate essentialiter dicta, quæ non est nisi in parte intellectiva. Sed voluntas participative dicta potest esse in parte sensitiva in quantum obedit rationi.

Ad secundum dicendum, quod sensualitas signatur per serpentem non quantum ad naturam sensualitatis, quam Christus assumpsit; sed quantum ad corruptionem fornicis, quæ in Christo non fuit.

Ad tertium dicendum, quod, ubi est unum propter alterum, ibi unum tantum esse videtur, sicut superficies, quæ est visibilis per colorem, est unum visibile cum colore. Et similiter, quia sensualitas non dicitur voluntas, nisi quia par-

115.  
Infra a. 5.  
co. Et 3. d.  
17. a. 1. q. 2  
& opu. 3.  
c. 239 li. 3.  
de anima,  
tex. 42.  
tom. 2.

li. 12. c. 13.  
paulo  
post prin.  
tom. 2. ex  
trac. 11. a  
medio po-  
telt col-  
13. tom. 9.  
Art. præc.

lib 2 de  
fide ad  
Gra. c. 3. a  
medio 1. 2.

1. 2. q. 23.  
art. 1. & 3.

Art. præc.

li. 1. Eth. c.  
ult. tom. 5.  
Art. præc.



participat voluntatem rationis: sicut est una natura humana in Christo, ita etiam ponitur una voluntas humana in Christo.

### COMMENTARIUS.

Supra hic articulus expositus est a nobis q. 15. ubi de appetitu sensitivo Christi Domini egimus, quia necessarium nobis visum est, ad explicandum motus & actus ejus, de quibus D. Th. ibi disseruit. Hic vero propter conjunctionem, quam appetitus cum voluntate habet, sermonem de illo miscet. Est autem litera ejus satis clara, De re vero ipsa nihil aliud a nobis dicendum occurrit.

### ARTICULUS III.

Utrum in Christo fuerint duæ voluntates quantum ad rationem.

**A**D tertium sic proceditur. Videtur, quod in Christo fuerint duæ voluntates, quantum ad rationem. Dicit enim Damasc. \* in 2. lib. quod duplex est hominis voluntas, scilicet, naturalis, quæ vocatur thelipsis: & voluntas rationalis, quæ vocatur bulipsis. Sed Christus in humana natura habuit, quicquid ad perfectionem humana nature pertinet. Ergo utraque prædictarum voluntatum fuit in Christo.

2. Præterea. Vis appetitiva diversificatur in homine secundum diversitatem virtutis apprehensivæ: & ideo secundum differentiam sensus & intellectus diversificatur in homine appetitus sensitivus & intellectivus. Et similiter in quantum ad apprehensionem hominis ponitur differentia rationis & intellectus, quorum utrumque fuit in Christo. Ergo fuit in eo duplex voluntas, intellectualis, & alia rationalis.

3. Præterea. A quibusdam ponitur in Christo voluntas pietatis, quæ non potest poni nisi ex parte rationis. Ergo in Christo ex parte rationis sunt plures voluntates.

Sed contra est, quod in quolibet ordine est unum primum movens; sed voluntas est primum movens in genere humanorum actuum. Ergo in uno homine non est, nisi una voluntas proprie dicta, quæ est voluntas rationis: Christus autem est unus homo. Ergo in Christo est una tantum voluntas humana.

Respondeo dicendum, quod, sicut dictum est, \* voluntas quandoque accipitur pro potentia, & quandoque pro actu. Si ergo voluntas accipitur pro actu, sic oportet in Christo ex parte rationis ponere duas voluntates, id est, duas species actuum voluntatis. Voluntatis enim, ut in secunda Parte dictum est, \* & est finis, & est eorum, quæ sunt ad finem, & alio modo fertur in utrumque. Nam in finem fertur simpliciter & absolute, sicut in id, quod est secundum se bonum. In id autem, quod est ad finem, fertur cum quadam comparatione, secundum quod habet bonitatem ex ordine ad aliud. Et ideo alterius rationis est actus voluntatis, secundum quod fertur in aliquid, quod est secundum se volitum, ut sanitas (quod a Damasc. \* vocatur thelipsis, id est, simplex voluntas & a Magistris vocatur voluntas ut natura) & alterius rationis est actus voluntatis, secundum quod fertur in aliquid, quod est volitum solum ex ordine ad alterum, sicut est sumptio medicine: quem quidem voluntatis actum Damasc. \* vocat bulisim, id est, consiliativam voluntatem, a Magistris autem vocatur voluntas ut ratio. Hæc autem diversitas actus non diversificat potentiam, quia uterque actus attenditur ad unam communem rationem objecti, quod est bonum. Et ideo dicendum est, quod, si loquamur de potentia voluntatis, in Christo est una sola voluntas humana, essentialiter, & non participative dicta. Si vero loquamur de voluntate, quæ est actus, sic distinguitur in Christo voluntas, quæ est ut natura, quæ dicitur thelipsis, & voluntas, quæ est ut ratio, quæ dicitur bulipsis.

Ad primum ergo dicendum, quod ille duæ voluntates non diversificantur secundum potentiam, sed solum secundum differentiam actus, ut dictum est.

Ad secundum dicendum, quod etiam intellectus & ratio non sunt diversa potentie, ut in prima parte dictum est.

Ad tertium dicendum, quod voluntas proprie dicta non videtur esse aliud, quam voluntas, quæ consideratur ut natura, in quantum, scilicet, resurgit alienum malum absolute consideratum.

### COMMENTARIUS.

Articulus hic solum est positus ad explicandum varios modos operandi ejusdem voluntatis Christi, &

diversa nomina, quæ ab illis sortitur. Et litera est satis clara, docet enim D. Th. unam esse voluntatem humanam Christi, quæ interdum operatur ut ratio, interdum ut natura. Quæ doctrina ex 1. p. & 1. 2. constaret etiam potest, nam in hoc eadem est ratio de Christo, & de aliis hominibus. In sequentibus etiam disputationibus nonnulla addemus.

### ARTICULUS IV.

Utrum in Christo fuerit liberum arbitrium.

**A**D quartum sic proceditur. Videtur, quod in Christo non fuerit liberum arbitrium. Dicit enim Damasc. \* in 3. lib. Gnomem autem, id est, sententiam, vel mentem, vel excogitationem; & probare sim, id est, electionem, in Domino dicere impossibile est, si proprie loqui volumus. Maxime autem in his, quæ sunt fidei, est proprie loquendum. Ergo in Christo non fuit electio & per consequens nec liberum arbitrium, cujus actus est electio.

2. Præterea. Philosophi dicunt in 3. Ethic. \* quod electio est appetitus præconcordiati. Sed consilium non videtur fuisse in Christo, quia non consiliamur, de quibus certi sumus: Christus autem de omnibus certitudinem habuit. Ergo in Christo non fuit electio, & sic nec liberum arbitrium.

3. Præterea. Liberum arbitrium se habet ad utrumque. Sed voluntas Christi fuit determinata ad bonum, quia non potuit peccare, sicut supra dictum est. Ergo in Christo non fuit liberum arbitrium.

Sed contra est, quod dicitur Isai. 7. Butyrum & mel comedet, ut sciat reprobare malum, & eligere bonum, quod est actus liberi arbitrii. Ergo in Christo fuit liberum arbitrium.

Respondeo dicendum, quod, sicut dictum est, \* in Christo fuit duplex actus voluntatis. Unus quidem, quo ejus voluntas ferebatur in aliquid, sicut secundum se volitum, quod pertinet ad rationem finis. Alius autem, secundum quem ejus voluntas ferebatur in aliquid per ordinem ad aliud, quod pertinet ad rationem ejus, quod est ad finem. Differunt autem, ut Philosophi dicunt in 3. Ethic. & electio a voluntate in hoc, quod voluntas, per se loquendo, est ipsius finis: electio autem eorum, quæ sunt ad finem. Et sic simpliciter voluntas est idem, quod voluntas ut natura. Electio autem est idem, quod voluntas ut ratio, & est proprius actus liberi arbitrii, ut in prima Parte dictum est. Et ideo, cum in Christo ponatur voluntas ut ratio, necesse est etiam ponere electionem, & per consequens liberum arbitrium, cujus actus est electio, ut in prima parte habitum est.

Ad primum ergo dicendum, quod Damasc. excludit a Christo electionem, secundum quod intelligit in nomine electionis impertari dubitationem. Hæc tamen dubitatio non est de necessitate electionis, quia etiam Deo convenit eligere, secundum illud Ephes. 1. Elegit nos in ipso, &c. cum tamen in Deo nulla sit dubitatio. Accidit tamen dubitatio electioni, in quantum est in natura ignorante. Et idem dicendum est de aliis, de quibus fit mentio in autoritate prædicta.

Ad secundum dicendum, quod electio præsupponit consilium, non tamen sequitur ex consilio, nisi jam determinato per judicium. Illud enim, quod judicamus agendum post inquisitionem consilii, eligimus, ut in 3. Ethicorum dicitur. Et ideo, si aliquid judicetur ut agendum absque dubitatione & inquisitione præcedente, hoc sufficit ad electionem. Et sic patet, quod dubitatio sive inquisitio, non per se pertinet ad electionem, sed solum secundum quod est in natura ignorante.

Ad tertium dicendum, quod voluntas Christi, licet sit determinata ad bonum, non tamen est determinata ad hoc vel ad aliud bonum. Et ideo pertinet ad Christum, eligere per liberum arbitrium confirmatum in bono, sicut ad Beatos.

### DISPUTATIO XXXVII.

In quinque Sectiones distributa.

De voluntate humana Christi, ejusque libertate.

**D**E hac sola facultate animæ Christi superest nobis disputare, quam disputationem in hunc locum distulimus, ne a D. Th. ordine recederemus, nam alioqui disputanda fuisset statim post tractatum de intellectu, prius quam de appetitu sensitivo diceremus. De hac autem potentia duo disputanda videntur. Primo de ipsa potentia & modo operandi, quem in Christo habuit; deinde

117  
3. d. 4. a. 1  
q. 1. cor. &  
dil. 17. a. 1  
q. 1. 5. Et  
dil. 18. ar.  
2. 5. lib. 3.  
c. 14. non  
procul. a  
fine.

lib. 3. Eth.  
3. circa 5.  
tom. 5.

q. 15. art. 1  
& a.

art. 1. hu-  
jus q. ad 3

li. 3. Eth.  
c. 2. in fi.  
tom. 5.

P. p. q. 83.  
art. 4.

P. p. q. 8. a.  
3. & p. 3.  
q. 13. art. 1.

Citata in  
art. 1.  
lib. 3. Eth.

c. 2. & 3.  
tom. 5.

116.  
Supr. ead.  
q. 2. 2. Et  
inf. ar. 4.  
5. cor. &  
3. d. 17. 3.  
Et opu. 3.  
c. 2. 9. lib.  
2. c. 22. &  
lib. 3. c. 14.  
& 18.

Art. 1. hu-  
jus q. ad 3.

P. 2. q. 8. a.  
2. & 3.

Loco ci-  
tato in  
arg.

Loco ci-  
tato in  
arg. 1.

In corp.  
art.  
P. p. q. 79.  
art. 8.



de actibus & efficacia ejus, nam cætera, quæ de ejus virtutibus desiderari possunt, supra q. 7. satis disputata sunt.

## SECTIO I.

*Utrum in Christo fuerit voluntas humana.*

**E**Rrores, qui circa quæstionem hanc olim fuerunt, satis in expositione textus D. Th. explicati sunt, ex quibus, qui processerunt ex aliis erroribus, scilicet, quia vel negarunt duas naturas, vel unam personam Christi, satis in superioribus refutati sunt. Monothelitæ vero proprie sunt hoc loco refutandi; eorum tamen sensus ambiguus est, quia ut refert Agat. Pap. in epist. quæ refertur VI. Synod. act. 4. tam varie tamque confuse locuti sunt, ut vix satis constet, quo sensu errorem suum asseruerint. In primis vero certum est, illos non negasse habere Christum divinam voluntatem: cum ergo dicebant, Christum tantum habere unam voluntatem, constat in eum errorem incidisse, quia putabant, Christum carere humana voluntate. Sed hoc quatuor modis asserere potuerunt. Primo, negando duas naturas Christi, & ita refert hunc errorem Prateol. verbo, Monophysitæ. Secundo, non negando duas substantiales naturas, sed tantum ipsam potentiam voluntatis humanæ, & hoc sub dubitatione indicat Castro, verbo, Christus, hæref. 6. Tertio non negando potentiam, sed omnem ejus actum, ut Cajet. hic interpretari videtur. Quarto, nec potentiam, nec omnem actum simpliciter negando, sed solum propriam determinationem, vel deliberationem voluntatis humanæ, ita ut dixerint, voluntatem Christi esse unam, unitate motionis liberæ, ut sicut actio elemosynæ dicitur una moraliter, quia unica motione libera fit, licet physice plures actiones vel facultates requirant, ita isti intellexerint, voluntatem Christi humanam non potuisse operari, se movendo, & applicando libere ad actus suos, sed solum ex determinatione voluntatis divinæ, & ideo unam Christi voluntatem vel operationem affirmarint. Quomodo videtur D. Th. exponere hunc errorem 4. lib. contra Gent. c. 36. & q. seq. art. 1. & sumitur ex Agath. Pap. supra. Sed hic postremus sensus pertinet ad sectionem sequentem: nunc contra secundum & tertium breviter dicendum est, nam de primo in superioribus fuisse satis dictum est; quid autem Monothelitæ senserint, incertum est, ut dixi. Quantum vero ex VI. Synodo, act. 4. in ep. Agathonis, & act. 8. 10. & 11. colligi potest, verisimilius est, tam secundo, quam tertio modo negasse in Christo humanam voluntatem, potentiam, scilicet, & operationem: & hoc significat D. Th. hic, & citatis locis.

Dico primo, in Christo Domino fuisse humanam seu creatam voluntatem. Conclusio est de fide, definita in VI. Synod. act. 4. 8. 11. & 18. ubi traditur esse in Christo duas voluntates. Idem in VII. Synod. act. 7. in definitione fidei: & in Lateran. sub Mar. I. can. 11. quibus locis multa ex sacra Scriptura & Patribus referuntur in confirmationem hujus veritatis, præsertim illa, in quibus Christus Dominus suam voluntatem a Patris voluntate distinguit, ut Matth. 26. *Non sicut ego volo sed sicut tu*, & Luc. 22. *Non mea voluntas, sed tua fiat*, & Joan. 5. *Non quero voluntatem meam, sed voluntatem ejus, qui misit me*, & c. 6. *Descendi de caelo, non ut faciam voluntatem meam, sed voluntatem ejus, qui misit me*. Et illa, in quibus Christo tribuitur obedientia, quæ cadere non potest nisi in voluntatem creatam: ad Phil. 2. *Factus obediens usque ad mortem*, Joan. 4. *Cibus meus est, ut faciam voluntatem ejus, qui misit me*. Et similia multa cogerit Leo Pap. epist. 19. & 83. Cajus Pap. ep. ad Felicem, Agap. Pap. ep. ad Ant. Rationes etiam sunt evidentes. Prima est Agat. Papæ supra dicta epist. quæ etiam sæpe utitur Damasc. lib. 3. c. 14. *Quia voluntas, inquit, est naturalis, non personalis*, id est, sequitur naturam, non personam. Unde in Deo est una voluntas omnium personarum propter unitatem nature, non triplex propter distinctionem suppositorum: ergo e contrario in Christo Domino sunt duæ voluntates propter duas naturas, non una propter personam unam: ergo præter voluntatem divinam est in eo voluntas humana. Secunda est D. Th. hic, & explicat præcedentem, quia voluntas est naturalis proprietas, necessario consequens humanam naturam, & pertinet ad magnam perfectionem ejus; sed omnia naturalia fuerunt in Christo integra &

perfecta; ergo. Tertia sumi potest ex fine Incarnationis, qui fuit mereri & satisfacere pro hominibus: sine voluntate autem creata nullo modo esse potest meritum vel satisfactio; ergo fuit in Christo voluntas creata.

Dico secundo, in Christo non solum fuisse hanc voluntatem, quoad ipsam facultatem seu actum primum, sed etiam fuisse expeditam ad operandum & eliciendum proprios actus secundos distinctos ab actu increato divinæ voluntatis. Quod etiam de fide est, ex eisdem definitionibus, testimoniis, & rationibus. Sacra enim Scriptura potissimum de actibus loquitur, & Concilia eodem modo de potentia & actibus loquuntur: & merito, quia potentia est propter operationem, & præsertim in præfenti materia, quia meritum, & satisfactio non consistit in ipsa potentia, sed in actibus ab illa elicitis. Neque hic occurrit specialis difficultas. Legantur, quæ asseruntur de hac re in VI. Synodo act. 4. & 10. & Damasc. lib. 3. c. 15.

## SECTIO II.

*Utrum voluntas Christi humana fuerit libera ad operandum.*

**H**Æretici, qui universaliter negant liberum arbitrium in humana natura, consequenter illud in Christo negabunt. Sed non est hujus loci generaliter errorem illum refutare, sed potius supponendum est, voluntatem humanam ex sua natura esse liberam: & inquirendum, an in Christo Domino hac libertate privata fuerit propter aliquam singularem causam, vel perfectionem. In qua re nihil invenio specialiter ab hæreticis dictum esse, præter ea, quæ de Monothelitæ sect. præced. explicavi. Inter Scholasticos vero, quamvis omnes consentiant, & simpliciter affirmant, voluntatem Christi fuisse liberam, ut videre licet in D. Th. hic, Alenf. 3. p. q. 16. & aliis cum Magist. d. 18. Bonaventura, art. 1. q. 1. & q. 2. ad 2. Rich. art. 1. q. 1. Scoto q. 1. Durand. q. 1. Palud. q. 2. art. 2. Gabriele art. 3. dub. 1. Marfilio q. 12. art. 1. concl. 1. tamen in modo explicandi hanc libertatem est nonnulla diversitas. Dupliciter enim potest voluntas dici libera, scilicet, vel tantum a coactione, quia voluntarie operatur & non coacte: vel etiam a necessitate, quia, scilicet, aliquo modo habet in sua potestate operari, & non operari. Quidam ergo voluntatem Christi faciunt liberam priori tantum modo, & non posteriori, ut evitent difficultates, quæ sunt in salvanda Christi libertate, quoad indifferentiam, & carentiam necessitatis. A qua sententia non multum discrepat Gabriel supra, vide ibi Marfil. q. 12. ad 1. principale, quam nonnulli moderni amplectuntur. Quin potius etiam D. Th. in 3. d. 18. q. 1. art. 2. ad 5. in 2. solutione illius, hanc sententiam ut probabilem relinquit. Sed nunquam D. Th. in Patribus hoc docuit, sed sæpe contrarium, est enim illa sententia omnino falsa & improbabilis.

Dico primo, voluntatem humanam Christi fuisse proprie ac perfecte liberam in actibus suis. Conclusio est de fide, quam hic art. 4. probat D. Th. in argumento, sed contra, ex illo Isai. 7. *Butyrum & mel comedet, ut sciat reprobare malum, & eligere bonum*, quia electio actus est facultatis liberæ. Et ita exponit illum locum Basil. ibi, ubi comparat libertatem, quam habuit Christus etiam in infantia, cum libertate, quam habuit Adam in statu innocentie. Et eodem sensu Cyril. lib. 1. in Isai. orat. 4. sub finem dicit eam facultatem libere eligendi, quæ aliis hominibus discursu ætatis advenit, in Christo Domino ab infantia fuisse. Et idem optime declarat ibi Hieronymus: & ex hoc loco colligit etiam August. lib. 8. Genes. ad liter. c. 14. scripsisse Christum *reprobare malum*, per electionem & prudentiam, non per experientiam, scilicet, mali culpæ. Secundo hoc probari potest ex illo Isai. 53. *Ob-latus est, quia ipse voluit*. Illo enim dicendi modo, actio vel passio libera significari solet in Scriptura. Unde Hieronymus ibi illam voluntatem necessitati opposuit, dicens: *Non necessitate, sed voluntate crucem subiit*. Et infra probat, verba illa non esse intelligenda de Christo, solum ratione voluntatis divinæ, sed ratione humanæ: quia Christus ut homo præcognovit & prædixit passionem suam, & tempus ejus, illique summa ac libera voluntate se obtulit. Quod etiam confirmant verba illa ipsius Christi, Joan. 10. *Ego pono animam meam: nemo tollit eam a me, sed ego pono eam a me ipso*, &c. ubi Cyril. lib. 7. c. 7.



hæc verba confert cum citato loco Isaïæ, late agens de hac Christi libertate, quamvis liber ille non sit Cyrilli; Chrysof. vero hom. 59. in Joan. inde colligit Christum habuisse liberam facultatem vitandi mortem. Tertio in hujus veritatis confirmationem afferri possunt omnia testimonia Evangelii, in quibus Christo homini tribuitur electio, Luc. 6. Joa. 6. 13. & 15. nam electio actus libertatis est. Unde Joa. 7. de illo dicitur: *Ambulabat Jesus in Galileam, non enim volebat in Judæam ambulare, quia volebant eum Judæi interficere.* Hæc enim verba, & similia, satis significant liberam voluntatem. Idemque est de illis testimoniis, quæ sunt de Christi obedientia & præcepto illi a Patre imposito, de quibus quæstione vigesima agemus. Non est enim voluntas capax præcepti, & obedientiæ, nisi sit libera. Quis enim præcipiat alicui necessarium actum, quæ non possit non operari? Unde SS. Patres de nostra libertate disputantes ex hoc potissimum principio illam colligunt, quod sumus capaces præcepti, & obedientiæ, præmii, & meriti, ut videre licet in Irenæo lib. 4. c. 7. 1. ubi Franciscus Fervadentius multa alia congerit. Quarto Concilia citata sect. præced. revera hanc etiam veritatem definire intendunt. Primum quidem, quia generaliter definiunt, in Christo fuisse omnes proprietates naturales, & propriam operationem humanæ naturæ: una autem ex his proprietatibus est liberum arbitrium, & operatio maxime propria hominis est operatio libera. Deinde, quia omnino damnant hæresim Monothelitarum, qui hoc potissimum sensu negabant esse in Christo duas operationes: non enim negare poterant operationes humanas quasi materialiter, & quoad substantiā earum, sed quoad modum actionis liberæ. Quia existimabant, humanam naturam Christi nunquam operari, ab intrinseco se movendo, sed necessario motam, & determinatam a divina voluntate. Concilia vero in contrario sensu definiunt duas operationes, ut præsertim explicat clarissime Agatho Papa in citata epist. Quinto ex Patribus bene hoc tractat & confirmat Anselmus libro: *Cur Deus homo*, a. c. 8. & lib. 2. a. cap. 16. Et Gregorius lib. 24. Moral. c. 2. *Omni, inquit, necessitate calcata, cum voluit, mortem sponte suscepit.* Et Augustin. lib. de prædest. Sanctorum c. 15. inquit: *An ideo non in illo libera voluntas erat, & non tanto magis erat, quanto magis peccato servire non poterat?* Idem lib. 4. de Trin. c. 2. 13. Basil. lib. de Spirit. S. c. 8. Origen. lib. 2. Periar. c. 6. Damasc. lib. 3. de Fide c. 13. 14. & 15. Ubi distinguit in Christo libertatem divinam & humanam, sicut voluntatem, & scientiam, & alias duplices proprietates, quæ duas consequuntur naturas. Idem Nicet. lib. 3. thes. c. 27. Sexto, rationes jam indicatæ sunt, prima, quia libertas arbitrii est magna perfectio connaturalis homini. Secunda, quia est maxime necessaria ad meritum & satisfactionem. Tertia, quam indicavit hic D. Th. art. 4. ad 3. & art. 1. ad 1. quia hæc perfectio manet in beatis, licet omnino viatores non sint: manet etiam in puris viatoribus quantumvis iustis & sanctis, & divina gratia confirmatis, & gubernatis. Cur ergo non manebit in Christo viatore simul & beato?

Ex quibus infero, & dico secundo, hanc libertatem voluntatis humanæ Christi, non solum intelligendam esse oppositam coactioni, sed etiam necessitati, atque adeo includere indifferentiam aliquam, seu potestatem operandi, & non operandi. Non est sensus, Christum in omnibus actibus suæ voluntatis habuisse hanc indifferentiam: non est enim hoc necessarium, nam Deum clare visum necessario amabat, & necessario illo fruebatur, sicut alii beati: sed sensus est, habuisse Christum hanc libertatem in aliquibus actibus: & hoc sensu existimo certam hanc secundam conclusionem.

Quæ primo in genere probari potest ex testimoniis adductis, tum sacræ Scripturæ, tum etiam Patrum illam exponentium, & Conciliorum, quæ veram libertatem Christo tribuunt, eamque non a coactione tantum, sed etiam a necessitate distinguunt. Secundo, quoniam in Christo Domino usus libertatis maxime videtur impediri potuisse in eo actu voluntatis, in quo mortem acceptavit sibi a Patre præceptum, propter difficultates infra tractandas, ideo in particulari de hoc actu probatur hæc veritas ex illo Joa. 10. *Ego pono animam meam, ut iterum sumam eam. Nemo tollit eam a me, sed ego pono eam a me ipso. Et potestatem habeo ponendi eam, & potestatem habeo iterum sumendi eam. Hoc mandatum accepi a Patre*

*meo.* Quibus verbis diferte satis significatur fuisse in voluntaria & libera Christi potestate, non solum acceptare passionem & lethalia vulnera, sed etiam ipsam mortem, prout dicit ipsam separationem animæ a corpore. Et hoc ipsum ait Christus esse in sua potestate, non solum ratione voluntatis divine, sed etiam humane, secundum quam mandatum a Patre acceperat. Et de hac potestate indifferente, ac libera intelliguntur illa verba a Chrysof. Theophyl. & D. Th. Rupertus etiam li. 6. in Joan. in fine addit: *Potestatem habeo ponendi, & non ponendi, & quærit: Quare ergo ponis pro omnibus animam tuam, cum potestatem habes etiam non ponendi?* Idem significat Greg. 24. Moral. c. 2. ubi ex hoc loco probat, Christum absque ulla necessitate passum esse, & optime August. lib. 4. de Trin. c. 13. ex hoc loco sic colligit: *Qui potuit non mori, si nollet, procul dubio, quia voluit, mortuus est.* Idem elegantissime tract. 119. in Joan. in fine; *Quis ita dormit, quando voluerit, sicut Jesus mortuus est, quando voluit? Quis ita vestem deponit, quando voluerit, sicut Jesus mortuus est, quando voluit? Quis ita, cum voluerit, obit, sicut, cum voluit, obiit?* Habuit ergo Christus potestatem faciendi aliquid in defensionem vitæ suæ, quod tamen volens non fecit, ut ibi considerant Origen. tra. 35. Chrysof. hom. 85. qui ait, illis verbis ostendisse Christum, *quod sponte sua hac susceperat.* Et Lyra ibi notat, illis verbis significasse Christum, quod alia via posset evadere, si vellet. Idem fere Hugo Cardin. & D. Th. Habuit ergo Christus libertatem cum indifferentia ad opposita: sicut ergo libere noluit se defendere, sed permittere, se capi & ligari, ita & crucifigi. Hinc etiam est illud Pauli ad Heb. 12. *Qui, proposito sibi gaudio, sustinuit crucem, confusionem contempnit.* Ubi Chrysof. hom. 28. *Hoc est, (ait) licebat illi nihil pati, si voluisset; & infra: Erat igitur arbitrii illius, non venire ad crucem, si voluisset.* Et statim affert citata verba Christi: *Potestatem habeo ponendi animam meam, &c.* & concludit: *Si igitur nullam necessitate non habuit, ut crucifigeretur, crucifixus est propter nos.* Similia habuit Theophylactus, Hugo, D. Th. Denique ad Rom. 15. de Christo ait Paulus: *Etenim non sibi placuit, sed, sicut scriptum est, impropria exprobrantium tibi ceciderunt super me.* Ubi Chrysof. eleganter hom. 57. interrogat: *Quid est autem, Non placuit sibi ipsi?* & respondet: *Poterat nulla ferre opprobria: poterat, quæ passus est, non pati, si quidem, quæ sua erant, spectare voluisset, verum noluit, sed quod nostrum erat, respiciens, quod suum erat, neglexit.* Quibus verbis aperte describit Chrysofomus libertatem indifferentiæ cum potestate ad utrumlibet, quem Theophylactus, Theodoretus, & alii expositores imitantur: præcipue vero legendus est D. Th. qui dicit, Christum elegisse mortem præ commodum suo, quod eandem libertatem indifferentiæ denotat. Et revera, si Christus ex necessitate, & non cum prædicta libertate, non sibi placuisset, non ei set, cur nobis in exemplum proponeretur, ut nos nobis non placeamus, sed proximorum utilitates quæramus. Fuit igitur Christus in illo negotio perfecte liber. Unde Cypr. ser. de Passione Domini in initio sic ad Christum loquitur: *Voluntarie obedisti Patri, & non te, ut patere-ris, coexit necessitas.*

Tertio probatur ex ipsa ratione liberi arbitrii: est enim hæc indifferentia de ratione liberi arbitrii veri, ac proprii, ut D. Th. tradit 1. p. q. 19. art. 10. 88. art. 1. ad 1. Estque communis sententia Scholasticorum in 2. d. 24. & 25. ubi late Capreol. Mai. & alii. Alenf. 2. p. q. 73. memb. 2. & 3. & q. 71. memb. 4. Henric. quodlib. 1. q. 16. & quodlib. 14. q. 5. Idemque fuit sensus antiquorum Patrum, ut patet ex superius citat. & ex August. lib. 3. de lib. arbit. c. 2. & 3. Hieronym. Dialog. 1. & 3. contra Pelag. & ep. 147. Greg. Nyssen. lib. 7. Philos. c. 1. & 3. Damasc. lib. 2. de fid. c. 7. 25. & 26. & alii passim. Imo & Scriptura ita declarat arbitrii libertatem, Ecclesiastici 15. 1. Cor. 7. denique etiam Aristoteles id docuit 3. Ethic. c. 5. li. 9. Metaph. text. 10. Et D. Th. 1. p. q. 41. art. 2. ubi Cajet. latissime hoc tradit, & q. 82. art. 1. ad 1. Et a posteriori explicatur, quia, si vera libertas arbitrii stare posset cum necessitate, possent omnia ex necessitate, & sine contingencia evenire, salva libertate arbitrii, quod est contra sententiam omnium, qui de libero arbitrio loquuntur. Unde merito damnatur Wicleph, eo quod dixerit, Christum mortuum necessitate, ut videri potest in Wuald. in doctrina art. 1. c. 25. & Calvinus damnatur ut hæreticus, quia libertatem arbitrii

Voluntas  
humana  
Christi  
libertate,  
etiam op-  
posita ne-  
cessitati  
libera  
fuit.



trii negat, quâvis ille solum neget libertatem necessitati oppositam, non coactioni. Fatetur enim, hominem voluntarie & libenter operari, quamvis non possit aliter operari. Et Pius V. & Gregorius XIII. in propriis Bullis contra Michaellem Bajum inter alias illius propositiones hanc damnarunt, quæ numero erat 38. *Quod voluntarie fit, quamvis necessario fiat.*

Denique rationes in fine præcedentis conclusionis adductæ, si quid valent, hanc eodem modo convincunt. Quia hæc libertas, seu indifferentia, & dominium propriarum actionum, est naturalis proprietas hominis, & magnam dicit perfectionem, & ad meritum maxime necessaria est. Nam, ut recte dicit Justinus Apol. 1. pro Christian. ad medium: *Nulla laude esset homo dignus, nisi esset ad utrumque flexibilis:* & Hilarius lib. 1. de Trinit. tractans illud Joan. 1. *Dedit eis potestatem filios Dei fieri. Non necessitatem (ait), sed potestatem, ut voluntas premium assequatur.* Et D. Hieronymus lib. 2. contra Jovinianum: *Ubi necessitas, ibi nec corona, ideo liberi arbitrii nos condidit Deus.* Quod in materia de gratia latius demonstratur. Solum superest, ut ostendamus, nihil fuisse in voluntate Christi, quod ei necessitatem imponeret: nam, cum hæc necessitas non sit naturalis homini, si aliunde non est illata, evidens est, in illo esse non potuisse. Id autem præstabitur, solvendo difficultates circa hanc libertatem Christi occurrentes, quæ gravissimæ & difficillimæ sunt.

## S E C T I O III.

*Quomodo voluntas Christi existens impeccabilis ex unione, potuerit esse libera.*

**P**rima difficultas sumitur præcise ex ipsa unione, per quam Christi voluntas intrinsece facta est impeccabilis, ut supra ostensum est: unde fit, voluntatem Christi ex vi unionis esse determinatam ad unum, scilicet, ad bonum, & consequenter non esse liberam. Respondet D. Th. hic ad 3. inde solum fieri, Christi voluntatem esse determinatam ad bonum in communi, non tamen ad hoc vel illud bonum, & ideo, ad summum, sequei, habuisse necessitatem quoad specificationem honesti ut sic, non vero quoad exercitium, nec quoad hoc vel illud honestum, quod satis omnino est ad libertatem, ut in Beatis & in Deo ipso constat: indifferentia enim, seu potestas ad malum, non est perfectio, sed imperfectio libertatis, ut recte Augustin. supra dixit. Quæ solutio optime satisfacit, quoad hoc, ut ex hoc solo capite impeccabilitatis Christi non satis probetur, Christum caruisse libertate in omnibus actibus suis; si tamen argumentum urgeatur de speciali actu voluntatis moriendi pro hominibus, non videtur satisfacere responsio: quia voluntas Christi ex vi suæ impeccabilitatis fuit omnino determinata ad hunc actum: ergo saltem in eo actu non fuit libera, quod est omnino falsum, quia eo actu maxime nobis meruit. Antecedens patet, quia ille actus fuit præceptus Christo: ergo non potuit illud præceptum transgredi, quia hoc intrinsece sequitur ex impeccabilitate, imo in re videtur esse idem, non posse peccare, & non posse transgredi præceptum. Ergo non potuit non habere actum illum præceptum, cum non posset aliter non transgredi illud præceptum: ergo erat omnino determinatus ad illum actum.

Hæc difficultas vulgaris est, nunquam tamen satis expedita, unde variis modis illi responderi solet. Prima responsio est, negando, Christum habuisse huiusmodi præceptum, Sed hoc & falsum est, ut ostendam quæst. 20. & non solvit difficultatem, quæ urgeri eodem modo potest in præceptis naturalibus, quibus nullus negare potest, Christum ut hominem fuisse ligatum, seu obligatum.

**Respon. 2.** Secunda & valde trita responsio est, verum esse, supposito præcepto, Christi voluntatem non potuisse efficere illum actum, atque adeo mansisse omnino determinatam ad illum, ac denique in sensu composito necessario habuisse illum: & nihilominus simpliciter fuisse liberam, quia simpliciter, seu ablato præcepto, potuisset illum non habere, necessitas enim, quæ est ex suppositione, vel tantum in sensu composito, non tollit libertatem.

**Confutatur.** Sed hæc responsio ita generatim sumpta neque solvit, neque explicat difficultatem: quia vel hæc solutio assumit ut generale principium, nullam suppositionem factam, quæ posita in voluntate necessario sequitur actus in sensu composito, efficere, ut talis actus simpliciter sit necessarius, & non liber: vel solum indefinite sumit, non

omnino suppositionem seu sensum compositum inferre necessitatem simpliciter, vel tollere libertatem. Primum est omnino falsum, primo, quia aliàs voluntas nunquam posset necessario, & sine libertate elicere aliquem actum, etiam de potentia absoluta. Patet sequela, quia nullus est actus, quem voluntas necessario efficiat, non facta aliqua suppositione, præsertim loquendo de actibus, ad quos voluntas natura sua non est determinata: in his enim, cum voluntas de se sit libera, si necessitatem pati debet, oportet, ut aliquid circa illam fiat vel supponatur, quo posito, sequatur illa necessitas, & ita non posset Deus necessitare voluntatem ad huiusmodi actum, quia non potest illam determinare, nisi addendo vel efficiendo aliquid, ex quo necessario efficiatur talis actus. Consequens autem est contra omnes Theologos docentes, licet Deus non possit cogere voluntatem, posse tamen illi necessitatem inferre. Et ratione patet, quia, licet naturalis modus operandi voluntatis sit liber, si tamen per suppositionem vel motionem extrinsecam fit (sicut fieri potest) ut non permittatur operari illo modo, sed omnino ab alio determinetur ad eliciendum actum, quid refert naturalis libertas voluntatis, qui solum est veluti in actu primo, ut talis actus non sit simpliciter necessarius?

Et confirmatur, quia aliàs neque amor Dei in Beatis esset necessarius necessitate opposita libertati simpliciter, quia solum est necessarius ex suppositione visionis, atque adeo in sensu tantum composito. Si vero dicatur secundum, scilicet, non omnem suppositionem tollere libertatem, primum relinquitur explicandum, quæ suppositio tollat illam, & quæ sit ratio differentiarum, & cur suppositio, de qua nunc agimus, illam non tollat. Quæ omnia in dicta solutione omittuntur. Deinde videtur suppositio præcepti, de qua nunc est sermo, esse ex illis, quæ tollunt libertatem simpliciter: nam, quando suppositio habet has duas condiciones, scilicet, ut, illa posita, necessario sequatur actus, & illam poni non pendeat ex libertate voluntatis, sed omnino antecedit liberum consensum illius, talis suppositio videtur tollere libertatem, & inducere necessitatem simpliciter: quia tunc neque suppositio est libera, neque dimanatio actus ex tali suppositione, seu ex voluntate sic affecta, est libera, & ita nulli bi relinquitur libertas circa talem actum. Sicut, si intentio finis non est libera, & electio talis medii unici necessario sequitur ex intentione, non potest electio esse libera: huiusmodi autem est in præsentia impositio præcepti, quæ non pendet ex voluntate humana Christi, nam ante omnem actum, & liberum consensum ejus, impositum est illi tale præceptum, & facta tali suppositione, non potest non sequi actus: ergo.

Propter hæc est tertia responsio, præceptum illud dependisse ex ipsa humana Christi voluntate, quia Pater æternus non imposuit Christo tale præceptum, nisi quia Christus ita voluit, & petiit. Sed hæc responsio probari nullo modo potest, & primo non generaliter satisfacit, quia non procedit in præceptis, quæ sunt de lege naturæ. Secundo etiam de hoc positivo præcepto redimendi homines, illud dicitur omnino sine fundamento. Imo est parum consentaneum, tum divinæ providentiæ, tum Scripturis, quæ de hoc negotio loquuntur. Primum constat, quia illa responsio ponit, totum negotium nostræ redemptionis primo, & per se dependisse ab humana Christi voluntate, & ab illa esse definitum. Est autem per se incredibile, supremum opus divinæ providentiæ, & prædestinationis, quasi primam originem habuisse ab humana Christi voluntate. Non ergo divina voluntas decrevit, & præcepit, ut Christus nos, moriendo, redimeret, quia ipse Christus hoc voluit & petiit: sed potius ideo ipse hoc voluit, quia de hac re mandatum accepit a Patre, ut dicit ipse, Joan. 10. & 14. & infra latius trademus: unde D. Paulus ad Hebr. 10. exponens Psal. 39. indicat, Christi animam statim in sua creatione cognovisse voluntatem, & præceptum Patris de morte obeunda pro hominum redemptione; cui voluntati, & præcepto divino statim ipse obedit, assensum præbens per humanam voluntatem, in qua voluntate (inquit Paulus) sanctificari sumus. Non ergo antecessit in hoc negotio humana Christi voluntas, divinam, sed subsecuta est. Nec vero fingi potest, ideo Deum in æternitate sua prædefinivisse imponere Christo hoc præceptum, quia præcivit, ipsum amatum & petiturum illud, tum quia hoc etiam sine fun-

Respon. 3

Confutatio.



damento dicitur: tum præterea, quia Deus non præcivit, nisi quod revera futurum fuit, Christus autem nunquam petiit, aut voluit hoc præceptum, quasi ut obtineret a Patre tale præceptum, sed solum ut consentiret præcepto imposito, quia in re ipsa semper præceptum & cognitio ejus, saltem ordine naturæ antecessit. Denique hæc solutio solum ponit libertatem in ipsa voluntate vel petitione præcepti, non in ipsa obedientia, quæ, posito præcepto, non erit in se & formaliter libera; nisi dicatur, ipsum præceptum semper dependisse a Christi voluntate, quia semper auferretur, si Christus voluisset: quod & gratis diceretur, & præterea, quæ Christus ipse in Evang. significavit, præsertim Joan. 12. *Qui misit me Pater, ipse mihi mandatum dedit, quid dicam, & quid loquar, & scio, quia mandatum ejus vita aterna est: quæ ergo ego loquor, sicut dixit mihi Pater, sic loquor.* Non ergo reliquit Pater hoc mandatum dependens quoad obligationem ab humana Christi voluntate. Adde, si vere loquamur, id esset, tollere præceptum. Quale enim præceptum est, quod positum est in voluntate ejus, cui imponitur, ut sit, vel non sit, & consequenter ut obliget, vel ut obligatio tollatur.

Evasio.

Respondent aliqui, ad sustinendam, explicandamque melius hanc solutionem, præceptum Patris simpliciter obligasse Christum, & non fuisse in absoluta ejus voluntate, tollere vel ponere præceptum: nihilominus tamen fuisse semper liberum Christo illius dispensationem petere, quam si petiisset, pro sua reverentia exauditus fuisset: quia ergo dispensationem petere noluit ex sua libertate sola (nec enim aliud præceptum habuit non petendi dispensationem), ideo absolute liber fuit ad præceptum implendum, sicut Matt. 26. dixit ipse Christus: *An non possum rogare Patrem meum, & ipse exhibebit mihi, plusquam duodecim legiones angelorum?* Sic enim dicere potuisset. An non possum rogare Patrem meum, & ipse auferet mandatum? Sed hæc responsio fere in eandem redit. Et præterea universalis non est: non enim habet locum in præceptis naturalibus, in quæ non cadit dispensatio. Deinde non procedit, si supponamus, Christo esse præceptum impositum, ea etiam conditione, ut illius dispensationem non peteret, quod fieri potuit: atque ita non salvatur, quod, si præceptum ponatur cum omnibus circumstantiis, non auferat libertatem. Ulterius, juxta illam responsionem voluntas moriendi non est in se libera, sed in alia priori voluntate non petendi dispensationem. Deinde, unde constat, quod, si Christus petiisset dispensationem, obtinuisset illam? Dices, id constare ex concordia voluntatum Christi & Patris. At hinc potius colligitur ex suppositione talis præcepti, prout impositum fuit, Christum non potuisse petere dispensationem, oratione profecta ex efficaci & absoluta voluntate obtinendi illam, quia noverat, Patrem imposuisse præceptum ex voluntate efficaci, ut perduceretur ad effectum, & consequenter cum deliberatione seu decreto absoluto non dispensandi, nec auferendi præceptum: ergo ob concordiam voluntatum potius debuit Christus ut homo non petere talem dispensationem, quam Pater illam concedere, si Christus illam postularet. Vel certe, si, non obstante præcepto ex tali Patris voluntate profecto, potuit Christus dispensationem petere potentia quadam, quæ nunquam fuit in actum reducenda in sensu composito, ita etiam, non obstante illo præcepto, potuit Christus non habere illum actum præceptum, ita tamen, ut infallibile esset, illam potentiam non fuisse in actum reducendam, facta illa suppositione: vel, si hæc potestas non est vera potestas, facta illa suppositione, neque illa erit: & ita eadem manet in utraque difficultas. Illa ergo responsio, neque in universum in omni præcepto vel casu possibili, neque etiam de facto satisfacit.

Resp. 4.  
Ponens  
libertatem  
in circum-  
stantiis.

Respondetur ergo quarto, generaliter loquendo, de præceptis, quibus obligari potuit voluntas Christi, ea, quæ negativa sunt, non inferre necessitatem voluntati ad aliquem actum eliciendum, quia ad observationem præcepti negativi nullus actus necessarius est, sed potius carentia actus. Et licet admittamus, Christum habuisse necessitatem carenti actu malo nullum esse incommodum, quia necessaria carentia talis actus ad perfectionem spectat, & imperfectionem nullam involuit: nam, ut August. disp. 22. de Civit. c. ult. & in Enchir. c. 104. & 105. posse peccare, non pertinere ad perfectionem libertatis, quod etiam docuit Anselm. Dialog. de lib. arbit. c. 2. Kur-

fus in ea negatione non est meritum, unde nec oportet illam esse liberam; quandocumque vero observatio talis præcepti fit per actum positivum voluntatis, facile intelligitur, illum esse liberum, cum non sit simpliciter necessarius ad talis præcepti observationem. Præceptum autem affirmativum, licet obliget ad actus positivos, non tamen pro singulis instantibus, nec cum omnibus circumstantiis, id est, cum tali intentione, ex hoc vel illo motivo, & ideo semper voluntas manet aliquo modo indifferens ad executionem talis actus, quia in omni instanti, in quo illum elicit, posset non elicere, aut non tali vel tali modo. Dices, tunc actum non esse liberum simpliciter, & quoad substantiam suam, sed solum quoad modum vel circumstantias. Respondetur, non ita esse, quia licet hæc indifferentia oriatur quodammodo ex circumstantiis, redundat tamen in ipsam substantiam actus, nam revera hic & nunc ita fit actus, ut posset simpliciter non fieri, etiam quoad substantiam suam: vel ita fit ex hoc motivo, ut posset fieri ex alio, quo mutato, mutatur tota substantia inferioris actus voluntatis. Et juxta hanc solutionem respondetur in forma ad argumentum, etiam per præceptum non determinari voluntatem Christi ad hunc actum numero, licet forte determinetur ad hoc objectum materiale, quale est, v. g. mors. Et hoc sensu habet hæc responsio fundamentum in dicta solutione ad tertium D. Thomæ. Quia eadem est ratio de voluntate determinata ad bonum, non tamen ad hoc bonum, & de voluntate determinata ad actum, non tamen ad hunc actum: nam, sicut illa indifferentia sufficit ad libertatem simpliciter ipsius actus, non tantum secundum rationem particularem, sed etiam secundum communem rationem, ita & hæc. Et eandem doctrinam indicat D. Th. in 3. dist. 18. q. 1. art. 2. ad 5. in 1. solut. & q. 29. de verit. art. 6. ad 1. Alex. A lenf. 3. p. q. 16. memb. 2. art. 2. Innuat etiam Soto lib. 3. de natu. & grat. c. 7.

Hæc responsio, quamvis satis impugnari non possit, non tamen omnino satisfacit, quia ex illa sequitur, saltem hanc conditionalem esse admittendam, si præceptum volendi mortem impositum est Christo determinate cum omnibus circumstantiis, v. g. ut statim in primo instanti suæ conceptionis, cum toto affectu, & intentione sibi possibili, per virtutem intrinsecam, ex charitate vel obedientia mori pro hominibus vellet, tunc actum illum non posse esse liberum, sed necessarium & consequenter nec meritorium. Sequela patet, quia, posita illa hypothese, tollitur omnis ratio indifferentiæ, in qua dicta solutio fundabatur. Quod si hoc concedatur, ulterius interrogo, unde constet, non fuisse Christo impositum præceptum hoc modo, & cum hac determinatione. Certe nulla vel probabili ratione, vel autoritate probari potest. Tota ergo illa responsio divinat, & sine fundamento procedit. Nisi forte quis dicat, a posteriori colligi, præceptum non fuisse illo modo impositum, & cum illa determinatione, ut salva maneret libertas. Et ita multi viri docti non formidant conditionalem illam concedere. In qua ego nihil erroris, aut temeritatis invenio, neque improbabilem esse censeo: quia & in D. Th. doctrina habet fundamentum, & in re obscurissima, verisimili conjectura ducitur. Quamquam non desint moderni quidam scriptores, qui non tam rationibus vel autoritatibus illam impugnent, quam exaggerationibus & convitiis exagitant.

Alii vero, ne illam concedant, dicunt, facta illa hypothese, adhuc manere voluntatem indifferentem ad eliciendum potius hunc actum numero, quam illum, & hoc satis esse ad libertatem. Sed hoc mihi non placet, nec satisfacit, tum quia illa indifferentia videtur valde materialis, & nihil referre ad libertatem studiosam & meritoriam: tum etiam quia alias eodem modo posset actus amoris Beatorum esse liber, quia licet objectum illud inducat necessitatem amandi, non tamen amandi hoc actu in individuo, præsertim juxta hanc sententiam; tum præterea, quia juxta veriora principia Philosophiæ, hoc ipso, quod potentia creata determinatur ad operandum cum his circumstantiis, determinatur ad istam actionem in individuo, & ad hunc actum vel effectum, potius quam ad alium, quia non potest fingi aliud principium hujus determinationis. Unde repugnantia est dicere, voluntatem Christi fuisse determinatam ad operandum hic & nunc circa hoc objectum, ex hoc motivo, & cum aliis circumstantiis, & non fuisse determinatam ad hunc actum

Objectio.

Responsio.

Objectio.

Responsio.

in



in individuo, nisi fortasse novo miraculo, & supernaturali potestate hoc tribuatur. Denique, quia urgeri potest argumentum, ut etiam actus ipse in individuo per præceptum fuerit præscriptus: potest enim Deus (ut est probabilior sententia) absoluta & efficaci voluntate sua prædefinire actum liberum voluntatis creatæ in particulari, & cum omnibus circumstantiis, & verisimilius est ita prædefinivisse, & præordinasse, vel omnes actus voluntatis Christi, vel saltem illum, quo statim in primo instanti conceptionis suæ se obtulit morti pro hominibus. Nam hic est providentiæ modus altior & perfectior, & illum magis Scripturæ indicant, & est magis consentaneus nostræ redemptioni, quæ supremum opus est divinæ providentiæ, ut supra argumentabar. Si ergo Deus prædefinivit hoc modo talem actum, potuit etiam præcipere, quia non magis unum repugnat libertati, quam alium. Quæ ratio etiam probat, per conditionem supra positam non esse veram, neque admittendam, saltem quantum est ex vi hujus difficultatis, in qua nunc versamur, sumptæ ex impeccabilitate Christi.

Respon-  
sio.  
ultima.

Ut sup-  
positio  
tollat li-  
bertatem,  
quid re-  
quiritur.

Ultimo ergo respondeo, concedendo post præceptum impositum voluntati Christi, infallibile esse, voluntatem illam efficere quod præceptum est, & impossibile esse, suppositionem illam præcepti componi, seu simul poni cum omissione talis actus. Et nihilominus nego, ex illa suppositione sequi, voluntatem Christi necessario efficere talem actum, hoc solo, quod impeccabilis est. Et ratio est, quia, ut tollatur libertas ex aliqua suppositione, non satis est, ut ipsa suppositio antecedit voluntatis consensum, & ab illo non pendeat, etiam si, tali suppositione posita, infallibiliter sequatur talis actus: sed propterea necessarium est, ut id, quod per talem suppositionem ponitur, aliquo efficaci & veluti physico modo determinet voluntatem ad talem actum, nam hoc est proprie necessitatem inferre. Quoniam si id, quod supponitur, non habeat hujusmodi vim, & efficacitatem, non potest mutare connaturalem modum operandi voluntatis: ergo nec tollit libertatem ejus, nam in ea consistit connaturalis modus operandi illius. Præceptum autem, quod in præfenti difficultate supponitur, quamvis sit talis suppositio, ut a voluntate non pendeat, & illa posita, infallibiliter sequatur obedientia: non tamen est talis, quæ habeat in ipsam Christi voluntatem efficaciam, ut physice determinet illam: nam præceptum est quid extrinsecum, & potius movet ex parte objecti, quam ex parte ipsius potentia: per se autem non ponit in objecto aliquid, quod possit necessitatem inferre voluntati. Et idem dicendum est de prædefinitione, seu decreto divinæ voluntatis, quod humanam voluntatem antecedit, & illo posito infallibile est humanam voluntatem esse consensuram, vel operaturam: nam hujusmodi decretum solum præintelligitur in Deo per modum intentionis, non per modum executionis, & ideo non intelligitur Deus per illum, ut sic, agere in voluntatem, nec physice determinare illam ad operandum, & ideo recte intelligitur non tollere libertatem. Dices. Quando suppositio erit hujusmodi, quæ hoc modo physico determinet voluntatem, & libertatem tollat? Respondetur, duobus tantum modis accidere posse. Primus est, quando proposito sufficienter objecto, ex vi illius & ex intrinseca propensione ipsius voluntatis oritur necessitas talis actus, quomodo est necessarius amor Dei in beatitudine. Secundus modus est ab extrinseco, quem solus Deus efficere potest, movendo voluntatem ipsam & tam efficaciter prædeterminando illam per actionem, & influxum physicum, & concursum ita determinatum ad unum actum, ut nec voluntas possit resistere, neque aliud operari: hoc enim modo, & non alio, potest Deus inferre necessitatem voluntati. Quando autem voluntas altero ex his duobus modis non movetur, necessitatem non patitur, ut ostensum est.

Duobus  
tantum  
modis po-  
test vo-  
luntas ne-  
cessitari.

Objectio.

Superest tamen in responsione explicandum, quomodo fieri possit, ut actus voluntatis infallibiliter sequatur aliqua suppositione posita, & tamen quod sine necessitate sequatur, & sine physica determinatione ad unum facta ex vi talis suppositionis. Nam, si facta suppositione voluntas non manet determinata, ergo manet indifferens; ergo potest operari, & non operari: quomodo ergo erit infallibile, voluntatem esse operaturam? vel, si talis actus habet infallibilem connexionem cum tali suppositione, ratione illius erit voluntas determinata ad unum.

Respondetur, hæc duo conjungenda esse & concilianda, supposita infinita præscientia divini intellectus, quæ de omnibus creatis voluntatibus cognoscit, non solum quid possint operari, aut quid de facto operaturæ sint, sed etiam quid essent facturæ in omnibus eventis, & opportunitatibus, si hoc vel illo modo applicarentur, vel excitarentur ad operandum. Hac enim scientia supposita, facile intelligitur, posse Deum aliquam voluntatem semper ita regere & excitare, ut infallibiliter consentiat, quamvis libere: quia potest illam motionem, vel operandi occasionem illi præstare, cum qua infallibiliter præcivit esse operaturam: & ita intelligendum est factum esse cum voluntate Christi, cujus singularem curam, & regimen divina persona assumpsit, quando illam sibi secundum hypostasim univit, ut supra q. 15. tractatum est. Et ideo, si Christi voluntas habebat præceptum hic & nunc operandi talem actum, per præceptum gratiam, & providentiam applicabatur, & movebatur ad illum actum, eo modo quo præcivit Deus, fore infallibile, ut ipsa consentiret. Et ita hæc infallibilis connexio non fundatur in necessitate, seu physica determinatione ipsius potentia, sed in sapientissima, & efficacissima Dei providentia, qua novit regere voluntatem creatam modo illi accommodato, ut quamvis libere, infallibiliter tamen consentiat. Et ita facile solvitur objectio facta, & omnes similes, præsertim illa communis: quia si suppositio, seu antecedens non est in potestate liberi arbitrii, neque etiam potest esse consequens, quod bene sequitur ex tali antecedenti. Hoc enim procederet, si consequens sequeretur absoluta necessitate ex tali antecedenti, non verò procedit, quando solum sequitur ex suppositione præscientiæ divinæ: quia tunc illa connexio non est infallibilis ex intrinseca vi extremorum, sed ab extrinseco ex præscientia, & providentia Dei. Unde etiam dici potest, eo modo, quo consequens sequitur ex antecedenti non esse in potestate liberi arbitrii facere, ut non sequatur, quamvis simpliciter, & secundum se sit in potestate liberi arbitrii. Et juxta hanc doctrinam expedienda est similis difficultas, quæ de confirmatis in gratia versari solet, & in universum de gratia prævenienti, & efficaci: nam quoad hoc eadem est ratio de Christo, & de aliis, ut recte D. Thom. supra docuit art. 1. ad 1.

Contra hanc vero responsionem objici potest, nam sequitur, manere in Christo potentiam physicam ad peccandum: & consequenter, Christum, absolute loquendo, posse transgredi præceptum sibi impositum, & peccare, quod esse omnino falsum supra q. 15. ostensum est. Sequela patet, quia Christus libere implevit præceptum obligans hic & nunc: ergo potuit implere & non implere: sed posse non implere præceptum, est posse peccare: ergo simpliciter potuit peccare. Neque locum hic habet distinctio de potentia in sensu diviso, & non in sensu composito: nam vel sensus divisus est, quod, ablato præcepto, posset non facere actum præceptum, seu quod habet potentiam, ut, si auferatur præceptum, non faciat, & hic sensus nihil refert, nec satis est ad usum libertatis circa actum præceptum, supposita præcepti impositione, quia illa conditio, videlicet, quod auferatur præceptum, nec ponitur in esse, nec est in potestate humanæ voluntatis Christi, ut ponatur: & ideo, si illa requiritur ad usum libertatis, illa ablata, impeditur talis usus. Quapropter ille sensus divisus, sic explicatus, solum reddit hunc sensum, quod in Christo habente præceptum manet potentia, quæ ex se libera est ad non faciendum actum præceptum: & ablato præcepto, esset expedita ad utendum illa potestate: nunc autem, posito præcepto, impedita est. Unde fit, ut, licet in se sit remote (ut sic dicam) & ex parte sua, libertas: tamen hic & nunc, suppositis omnibus, quæ illam circumstant, in ordine ad hanc actionem non habeat usum liberum. Vel ille sensus divisus est, quod stante adhuc præcepto, revera potest non facere actum præceptum, de facto tamen nunquam componet, vel simul ponet hoc non facere cum ipso præcepto, ita ut illud posse in sensu diviso non excludat suppositionem præcepti, sed excludat tantum conjunctionem & compositionem præcepti cum usu talis potestatis. Et in hoc sensu nihil aliud est posse in sensu diviso, nisi quod aliter dici solet, ita posse, quod infallibiliter non faciet. Et hoc modo explicatus sensus divisus in communi loquendo non involvit repugnantiam, ut constat in confirmatis in gratia,

Respon-  
sio.

Postea  
scientia  
conditio-  
nalia in  
Deo, opti-  
me conci-  
liatur in  
differen-  
tia cum  
infallibi-  
tate.

Valida ac  
perdis-  
cibilis  
objectio.

Excludi-  
tur evan-  
dendi  
modus.



tia, & in gratia seu vocatione efficaci, ut hic breviter tactum est, & alibi latius est declarandum. At vero in hoc sensu urget valde difficultas, nam sequitur, simpliciter dicendum esse, Christum posse peccare, licet infallibile sit ex præscientia & providentia Dei, illum non peccatum: consequens est valde absurdum: ergo. Sequela constat, nam facta suppositione præcepti, adhuc potest non facere actum, qui præceptus est: sed non facere actum præceptum, est peccare: ergo posse non facere actum præceptum, est posse peccare: ergo potest peccare. Item, potest transgredi præceptum: ergo peccare. Item confirmatus in gratia etiam infallibiliter non peccabit, supposita confirmatione, & tamen absolute potest peccare, quia manet in eo potestas non faciendi actum præceptum; ergo simile erit in Christo. Falsitas autem consequentis constat ex dictis supra, nam talis potestas Christo attributa refunderetur in Deum ipsum: Deo autem ita repugnat peccatum, ut non solum ipsum peccare, sed etiam posse peccare, & physica etiam potentia peccandi imperfectionem includat, maxime repugnantem Deo.

Hæc ratio maxime movet illos auctores, qui affirmant, ex suppositione præcepti præscribentis actum cum omnibus circumstantiis, loci, temporis, intensionis, & quibuslibet aliis, quæ excogitari possunt, & posita Christi voluntate in eo articulo, in quo præceptum sic obligat, tale præceptum tollere indifferentiam libertatis, quia tollit potestatem non faciendi etiam physicam, alias relinqueret in Christo potentiam physicam peccandi, quæ Deo repugnat. Quæ sententia declaratur ex efficacia præcepti negativi prohibentis Christo aliquem actum: nam, posita in Christo tali prohibitione, non solum est infallibile, Christum nunquam effecturum, aut voliturum actum prohibitum, sed etiam non habet Christus, absolute loquendo, completam potestatem physicam ad eliciendum talem actum, quia non habet paratum Dei concursus necessarium ad talem actum præstandum, sed illi potius denegatur ex decreto Dei absoluto & efficaci, quia concursus ad talem actum non spectat ad Christi perfectionem, sed potius ad impeccabilitatem ejus pertinet, ut ei denegetur concursus ad talem actum, quo negato, revera non manet potestas simpliciter, & consequenter nec libertas circa eundem actum: ergo pari ratione præceptum affirmativum præcipiens actum hic & nunc cum omnibus circumstantiis, determinat omnino voluntatem Christi ad illum actum, ita ut non relinquat potestatem omittendi illum: quia impeccabilitati ita repugnat omissio actus præcepti, sicut effectio actus prohibiti: unde videtur esse eadem ratio & proportio.

Sed hæc sententia probanda non est, nec propter unius argumenti difficultatem tantum cedendum est, & in alterum extremum inclinandum. Præsertim, quia hæc responsio revocat veritatem certam de Christi libertate ad principium incertum de præcepto, an fuerit impositum cum omnibus circumstantiis, nec ne: nam licet non constet, tamen non est improbabile, fuisse impositum præceptum determinando tempus, intans, modum, & cætera omnia, juxta illud Joan. 14. *Sicut mandatum dedit mihi Pater, sic facio*. Qui locus, licet possit de sola substantia actus exponi, nam particula, *sicut*, in Scriptura non dicit semper perfectam similitudinem, ut per se notum est, nihil tamen verat, quin interdum illam dicat: & in illo loco est probabile ex ipsa materia, de qua agitur: quia, cum præceptum sit regula operationis, tunc perfectissime proponitur, quando totus actus, prout re ipsa exequendus est, per illud regulatur atque præscribitur. Est optimum exemplum illud Exod. 25. *Inspice & fac secundum exemplar, quod tibi in monte monstratum est*: in quibus verbis particula *secundum*, quæ æquivalet particula *sicut*, non significat tantum imitationem operis quoad substantiam, sed etiam quoad modum, & omnes circumstantias ejus, quia exemplar erat perfectissimum & exacta illius imitatio exigebatur, quoad fieri posset. Sic ergo, quod Christus ait: *Sicut mandatum dedit mihi Pater*, recte intelligi potest de mandato perfectissimo, & comprehendente omnes circumstantias operis, ut esset veluti exemplar perfectum, & ipsius expletio consummata. Præterea, quidquid sit de præcepto proprie sumpto, de quo res est magis dubia, de voluntate tamen divina prædefiniente & efficaci verissimum certe est, æternum Patrem prædefinivisse voluntariam Christi passionem & mortem, non solum quo-

ad substantiam operis, sed etiam quoad omnes circumstantias ejus, quia sacra Scriptura hoc valde indicat, Act. 4. *Quæ manus tua & consilium tuum decreverunt fieri*; & Luc. 22. *Filius hominis vadit secundum quod definitum est de illo*; & Joan. 13. *Sciens Jesus, quia venit hora ejus*, id est, tempus & hora sua æterna providentia & voluntate disposita: hac enim ratione horam suam & tempus suum appellat, Joan. 2. & 7. & ob eandem causam tempus Incarnationis a Paulo ad Heb. 1. appellatum est *plenitudo temporis*. Item hanc temporis prædefinitionem significavit Christus, cum Matth. 26. Petro dixit: *An putas, quia non possum rogare Patrem meum &c. Quomodo ergo implebuntur Scripturæ, quia sic oportet fieri*? Secundo, quia hoc est magis consentaneum perfectioni providentiæ divinæ erga Christum, tam ex parte voluntatis divinæ, quia non statuit, nec disponit res faciendas confuse & abstracte, sed distincte & in particulari, atque adeo cum omnibus circumstantiis, quibus executioni mandanda sunt, quam ex parte voluntatis humanæ Christi, ut specialius & proximius a divina regatur, maxime in re omnium gravissima, hominum videlicet redemptione. Adde, verisimile esse prædefinivisse Deum actus omnes supernaturales, præsertim electorum hominum, in particulari & cum omnibus circumstantiis: multo ergo magis actus Christi. Posita igitur hac prædefinitione, infallibile est, Christum operaturum sicut est prædefinitum: & tamen non propterea privatus fuit potestate, aut sufficienti concursu ad operandum aliter, quam prædefinitum est: juxta illud Matth. 26. *An putas, quia non possum rogare Patrem meum, &c.* ergo, nec posito præcepto dicto modo cum omnibus circumstantiis, non est necesse tolli potestatem aliter operandi, vel saltem non operandi.

Responderi potest, non esse omnino idem de præcepto & prædefinitione, quia potentia agendi contra præceptum est potentia peccandi, quæ omnino repugnat Verbo: potentia vero agendi contra præfinitionem non est potentia peccandi, quia præfinitio ex se non inducit obligationem, quam inducit præceptum. Sed quamquam hæc ultima differentia, per se loquendo, vera sit, ut sequenti sect. dicam, loquendo de propria obligatione præcepti, tamen præfinitio cognita secum affert quasi ex consequenti necessitatem non resistendi positive efficaci voluntati Dei, quia talis resistit non solum esset stulta & vana, sed etiam esset mala ex generali ratione, quia malum est optare, aut conari, ut voluntas Dei efficax & præfinitiens non obtineat effectum, nam perinde est hoc velle, ac desiderare, ut Deus non sit omnipotens: ergo sicut, posito præcepto, etiam posita præfinitione cognita, necessarium fuit, necessitate saltem consequentiæ, ut Christus non haberet actum, quo dissentiret ab illa voluntate Dei: ita etiam potentia ad talem actum fuisset potentia ad actum otiosum, & pravum: ergo eadem fere est in utroque ratio: ergo, vel in utroque casu negandum est habuisse Christum potentiam ad talem actum: vel si in præfinitione separatur potentia ad actum a potentia ad malum vel stultum actum, ita etiam in præcepto.

Tertio argumentor in hunc modum; nam præceptum duplex est, affirmativum & negativum, seu præcipiens & prohibens: & similiter duplex est peccatum, ommissionis contra præceptum affirmativum, & commissionis contra negativum. Quod ergo spectat ad præcepta negativa, probabile quidem est, non habuisse Christum potentiam etiam physicam ad faciendos actus contrarios talibus præceptis, non quia voluntas ejus humana privata fuerit potestate illa physica, quam habebat ad efficiendos tales actus, id enim impossibile est, cum illa activitas ab ipsa voluntate non distinguatur, sed quod privata fuerit divino concursu ad tales actus efficiendos, sine quo concursu non potest voluntas illos elicere. Quamvis enim hic concursus debitus sit humanæ voluntati secundum se consideratæ, tamen voluntati Deo unitæ non est debitus: imo potius debita illi esse videtur carentia talis concursus, quia non pertinet ad perfectionem ejus simpliciter, sed potius tendit ad imperfectionem repugnantem unioni, scilicet, ad peccatum, a quo voluntas illa libera omnino esse debuit, quod non inivit, sed perficit libertatem ejus, ut dixit Augustinus locis parum antea citatis, & lib. 1. de Prædest. Sanct. c. 15. & supra tractatum est, disp. 34. sect. 2. Et confirmatur, nam hic concursus non est aliquid intrinsecum voluntati ante actum, sed consideratus in actu



actu primo est ipsa Dei potentia, & voluntas exposita, & quasi voluntarie applicata ad concurrendum, in actu vero secundo est ipsemet actus voluntatis creatæ ut a Deo pendens: sed Christi voluntas non potuit habere talem actum malum & prohibitum: ergo neque concursus ad illum in actu secundo: ergo neque in actu primo habere debuit quasi præparatum ex voluntate divina: nam præbere suum concursus in actu primo pertinet ad providentiam & regimen tali voluntati debitum: ostendimus autem supra q. 15. ex vi unionis deberi tale regimen voluntati humanæ Christi, quo peccare non posset: ergo ex vi talis regiminis debebatur potius illi carentia talis concursus, quam concursus ipse. Sic ergo probabile est non fuisse in Christi voluntate potentiam physicam ad actus prohibitos, & consequenter nec libertatem ad illos faciendos: ac denique carentiam illorum non fuisse liberam, sed necessariam, sicut & carentiam peccati, in quo nullum est inconveniens, nec simpliciter, nec in ordine ad meritum, ut supra tactum est.

At vero de præceptis affirmativis, in quibus maxime procedit difficultas præsens, non videtur esse eadem ratio, quia, licet concedamus, voluntatem Christi non habuisse paratum Dei concursus ad efficiendum aliquem actum voluntatis positivum, quo vellet transgredi tale præceptum, seu quo nollet efficere actum præceptum: & consequenter etiam concedendum sit non habuisse Christum potestatem physicam, nec libertatem: & licet consequenter etiam concedamus, non habuisse Christum potestatem physicam, nec libertatem ad efficiendum actum nolitionis, stante præcepto, adhuc non sequitur, voluntatem Christi fuisse privatam potestate illa connaturali, quam habebat ad suspendendum, seu non eliciendum talem actum, quia ad proprium usum ejus potestatis non indiget positivo Dei concursu, quia usus ille est mere negativus, qui non in agendo, sed in non agendo consistit, & ideo non requirit positivum Dei influxum, sed solum hunc negativum, quod Deus non imprimat voluntati motionem aliquam præviam, qua physice illam prædeterminet ad exercitium actus, & necessitatem illi inferat. Quamvis autem Christi voluntas privata fuerit positivo concursu ad malum actum efficiendum, non tamen fuit affecta motione aliqua physice prædeterminante illam ad efficiendum actum præceptum, quia talis motio, neque est connaturalis voluntati liberæ, ut suppono, aliàs esset connaturale illi privari usu libertatis, quod repugnat; neque est debita illi voluntati ratione unionis, quia neque est ei debitum, ut privetur suo connaturali operandi modo, neque est id necessarium ad Christi impeccabilitatem, nam suaviori modo potest Deus illam voluntatem regere, ut infallibiliter non peccet, ut expositum est, quod est satis ad impeccabilitatem Christi, ut jam declarabo: igitur non est, unde illa voluntas fuerit privata intrinseca facultate, quam habet ex natura sua ad suspendendum, vel non faciendum talem actum: ergo, non obstante præcepto, mansit libera saltem quoad exercitium actus. Confirmatur, quia aliàs præceptum ipsum redderet subiectum incapax præcepti & obedientiæ, quod repugnat: consequentia patet, quia, ubi non est usus libertatis, neque est etiam vera obedientia, nec propria ratio aut observatio præcepti; si ergo præceptum tollit libertatis usum, destruit quodammodo seipsum, suumque subiectum & actum.

Aliter ergo satisfaciendum est argumento, concedendo, stante affirmativo præcepto, quantumvis determinato, mansisse in Christi voluntate veram libertatem faciendi, & non faciendi talem actum, & nihilominus simpliciter loquendo, non fuisse in eo potestatem peccandi.

Quomodo autem hæc duo cohereant, ita a quibusdam exponitur, quia præceptum Christo impositum tale fuit, ut illum sub peccato non obligaverit. Quo fit, ut licet per impossibile illud non implevisset, non peccasset, sed ad summum, imperfecte operaretur: atque ita, licet habuerit potentiam non faciendi opus præceptum, non inde fit habuisse potentiam peccandi. Sed hæc responsio falso principio fundatur. Supponimus ergo ex dicendis infra q. 20. Christum habuisse verum ac proprium præceptum: ex quo necessario fit, illam conditionalem esse veram, si voluntarie omitteret actum præceptum, eo tempore, quo præceptum obligabat, peccaret, quia ageret contra præceptum: & peccatum nihil aliud est, quam di-

ctum vel factum contra legem Dei. Item, quia præceptum inducit obligationem: ergo qui voluntarie caret actu bono, seu bonitate actus præcepta, caret bonitate, quam debet habere: ergo habet non tantum negationem, sed etiam privationem moralis bonitatis moraliter debitæ: ergo contrahit defectum & malitiam moralem contra legem: ergo peccat: ergo ex hoc capite non satis excluditur potestas peccandi. Eo vel maxime, quod non solum repugnat Christo peccatum, veram etiam ille imperfectionis modus, qui est dissentire a divina voluntate sibi proposita ut regula suæ operationis.

Alii respondent, Christum potuisse omittere actum præceptum per puram omissionem, non vero per actum positivum, quo formaliter vel virtualiter vellet non facere actum præceptum, quia talis actus esset positivus & malus: ad hujusmodi vero actum non habuit concursus ex parte Dei oblatum: & ideo simpliciter non potuit talem actum efficere. Ad usum autem libertatis quoad exercitium sufficit potestas omittendi actum per puram omissionem, quæ tamen non sufficit ad potestatem peccandi, quia pura omissio, etiam si fieri contingat, non est peccatum, quia peccatum non est nisi voluntarium, illa autem omissio, licet sit aliquo modo libera, non tamen est voluntaria, quia voluntarium dicit denominationem positivam ab aliquo actu, & ideo non potest esse purum voluntarium, etiam indirectum, sine aliquo actu, per solam suspensionem actus. Hæc responsio supponit principia ex 1. 2. q. 6. & 71. quæ licet aliquibus probabilia videantur, mihi tamen probari nunquam potuerunt, & doctrinæ D. Thom. contraria esse videntur, videlicet quod possit dari pura omissio moraliter libera, & non voluntaria, nec peccaminosa, etiam si sit contra præceptum. Quomodo enim intelligi potest, quod aliquis sciens & videns non faciat quod sibi præceptum est, cum possit, & nihilominus non peccet? Quod enim Aug. dixit, peccatum esse dictum vel factum contra legem, Theologi omnes interpretantur ita, ut sub positivo carentiam intelligant, ut scilicet tam sit peccatum, non factum contra legem, quam factum, si utrumque sit humanum & liberum. Item, qui libere omittit, non ex impotentia omittit: ergo ex voluntate: ergo est voluntaria illa omissio, si est libera. Aut ergo negetur pura omissio libera, aut si hæc admittitur, censenda est voluntaria, & peccaminosa, si sit contra præceptum. Deinde assumitur aliud in ea responsione, nimirum Christum non habuisse paratum concursus ad actum impossibilem actui præcepto pro eo tempore, quo præceptum obligabat: quod, licet sit probabile, ut dixi, est tamen satis dubium: cur enim fingemus potuisse Christum suspendere actum, & non potuisse alium actum operari? cum potestas suspendendi unum actum non tam sit propter se, quam propter capacitatem habendi alium actum. Cumque moraliter perinde sit, quod sciens & prudens voluntate non facias cum possis, ac quod facere nolis. Unde, quamvis facilius intelligi & credi possit negatio concursus ad actum malum, quam motio physice prædeterminans ad bonum, ut bene supra declaratum est, tamen quod ad impeccabilitatem attinet, non magis est necessaria una, quam altera. Quia sicut cum concursu, ad bonum ex se non determinante potentiam, stat infallibiliter operari tale bonum, & consequenter stat etiam impotentia quædam moralis non operandi tale bonum, quæ ad impeccabilitatem sufficit: ita cum oblatione concursus ad actum contrarium stat impossibilitas quædam utendi tali concursu, quæ ad impeccabilitatem sufficit: ergo quoad hoc eadem fere est ratio.

Dicendum ergo cenfeo, Christum ratione libertatis habere aliquo modo potentiam physicam non faciendi, vel etiam faciendi aliud, & nihilominus simpliciter loquendo non posse peccare, nec habere potentiam peccandi. Quæ res, suppositis, quæ diximus, potest quidem ad modum loquendi pertinere, si tamen caste & proprie loqui velimus, ita sentiendum, & dicendum est, cum ex dictis constet, omnibus pensatis, quæ ad Christi operationem concurrunt, non potuisse in Christo esse peccatum, non ex defectu libertatis, sed ex divina protectione & regimine ita sibi debito ratione unionis, ut nullo modo potuerit illo carere. Quocirca notanda est distinctio in hac materia maxime necessaria, dupliciter, scilicet aliquid dici possibile, uno modo sola denominatione a potentia proxima ex se sufficienti ad illud producendum: alio modo

Aliorum solutio.

Improbatur.

Notanda distinctio.



non ex sola denominatione a tali potentia, sed simul excludendo omne id, cum quo sit impossibilis talis effectus, ita ut possibile dicatur, quia simul est potentia faciendi illud, & carendi omni alia re illi incompossibili. Priori modo fuit possibilis in Christo carentia actus, vel oppositum actus non obstante præcepto, & hoc fuit satis ad libertatem. Posteriori autem modo non fuit possibilis talis actus, vel carentia, quia impossibile erat, in re ipsa componi talem actum vel carentiam cum unione & regimine, quod ratione unionis tali voluntati tribuebatur, nec poterat illo carere, & huiusmodi possibilitas necessaria erat ad potentiam peccandi: nam posse peccare non solum dicit potentiam physicam proximam ad faciendum actum, vel ad omissionem actus, sed etiam includit proximam deficiendi potentiam, ita ut accidere possit, nihil intervenire, quod talem potentiam in officio contineat, ita ut nunquam deficiat, quod in Christo locum non habuit. Atque hæc distinctio non solum in præcepto, sed etiam in præfinitione Dei interna, & per modum intentionis, admittenda est; illa enim juxta veriore doctrinam non tollit libertatem, nec potestatem proximam faciendi oppositum: tollitur tamen potestas componendi actum oppositum cum illa præfinitione, & ita omnibus pensatis, est quædam impossibilitas ab extrinseco ad omne id, quod repugnat tali præfinitioni, vel quod involuit illam compositionem, quamvis non sit impossibilitas ad actum simpliciter ac nude consideratum in ordine ad suam potentiam proximam.

Responso  
ad diffi-  
cultatem  
in forma  
ex aucto-  
ris mente.

Adducuntur ergo in forma negatur sequela, absolute loquendo, propter rationem dictam: solum enim sequitur, Christum non esse impeccabilem ex vi modi intrinseci & proprii operandi suæ voluntatis: cum quo tamen stat, ut ex conditione personæ, & ex modo regendi illam voluntatem sit impeccabilis, Et quia Christus simpliciter dictus includit illam personam, & illud regimen, ideo simpliciter dicendus est impeccabilis. Quapropter non est simile de Christo, & alijs confirmatis; illi enim ab extrinseco habent hanc gratiam, & absolute loquendo possunt illa carere, & ideo absolute semper sunt peccabiles, quamquam in sensu composito, id est, supposita tali gratia, non possint peccare, quia non possunt componere peccatum cum illa gratia, seu providentia Dei: Christus vero absolute dictus habet illud infallibile regimen, quasi connaturale, & ab intrinseco, & nullo modo potest illo carere, & ideo in ipso nomine Christi includitur sensus compositus, & ideo simpliciter est impeccabilis. Atque in hunc modum, supposita explicatione jam data, hic applicatur optime distinctio illa de sensu composito & diviso. Nam licet simpliciter loquendo, Christus ita libere operaretur, ut considerato intrinseco modo operandi suæ voluntatis posset operari, & non operari: tamen ex suppositione divinæ præscientiæ, & motionis infallibilis erat, talem actum esse operatum, & ita in sensu composito non poterat aliud fieri, quia non poterat divina præscientia falli, neque alius actus componi cum tali motione divina.

Ex quo fit, ut loquendo de Christi libertate simpliciter concedi possit quicquid indicat proprium modum operandi ipsius Christi, & non involvit aliquid contrarium dictæ suppositioni: & ita simpliciter verum est Christum libere perfecisse actum, quo implebat præceptum, quia ita illum faciebat, ut per facultatem propriam suæ voluntatis, quæ intrinsece impedita non erat, posset illum non facere. Simpliciter autem falsum est dicere, Christum potuisse peccare, aut non implere præceptum, quia jam includitur sensus compositus, & indicatur potuisse Christi voluntatem carere illa divina custodia, cum qua non potuit componi peccatum. Et similiter voluntas Christi secundum se potest dici potentia peccandi, seu capax peccati, non tamen ut est voluntas Christi, quia jam componitur cum illa voluntate conjunctio cum divina persona, a qua ita gubernatur, & regitur, ut cum illo providentiæ genere non possit simul esse peccatum. Sic igitur expositus sensus divisus, & compositus, sufficienter solvit difficultatem hanc. Et intelligentur melius & facilius omnia dicta, si fingamus Christum Deum hominem, & non habentem scientiam beatam, neque infusam, imo nec cognitionem suæ unionis hypostaticæ, sed per fidem, vel rationem operantem: tunc enim non minus esset impeccabilis ex vi unionis, quam modo est, & nihilominus

non magis necessitaretur ad operandum, vel servandum præceptum, quam nunc necessitetur homo per gratiam, vel motionem divinam: quia nec ex parte intellectus, neque ex parte voluntatis aliter moveretur: quia hoc necessarium non esset, ut infallibiliter nunquam peccaret, neque in sensu composito peccare posset.

#### S E C T I O I V.

*Quomodo voluntas Christi ex necessitate diligens Deum, in reliquis actibus potuerit esse libera.*

Expedita superiori difficultate, occurrit alia fortasse non minor, orta ex beatifico amore animæ Christi, qui erat simpliciter necessarius, tam respectu Dei, quam respectu propriæ beatitudinis. Ex quo sic argumentor. Voluntas Christi necessario amabat Deum: ergo actu necessario volebat, quicquid ad hunc amorem necessarium erat: ergo in nullo actu habuit libertatem. Prima consequentia constat, tum ex 1.2.q.13. & 1.p.q.82. ubi ostenditur, voluntatem efficacem finis necessario inferre voluntatem medii necessarij ad finem, unde si talis intentio est simpliciter necessaria, erit etiam electio: tum etiam quia, si amor Dei est efficax & perfectus, includit formalem, vel virtutalem voluntatem placendi Deo in omnibus, & faciendi quicquid ad retinendam, & conservandam Dei amicitiam fuerit necessarium. Et hinc probatur secunda consequentia, quæ in primis evidentius urget in actibus præceptis, quia præceptum efficit, ut actus præceptus habeat necessariam connexionem cum amore divino, quia non potest esse talis amor sine observatione mandatorum: & ideo posito amore & præcepto, videtur esse in illo objecto & potentia intrinseca vis inducens necessitatem ad talem actum, Deinde generaliter extendi hoc potest ad omnes actus voluntatis Christi, nam ille amor divinus, qui necessario erat in tali voluntate, erat perfectissimus: ergo includebat voluntatem volendi, quicquid esset gratius Deo: nam hoc est de intrinseca ratione perfectissimi amoris: sed in singulis actibus, & objectis cognoscebat Christus, quid esset gratius Deo: ergo tam necessario illud volebat, quam necessario amabat Deum.

Propter hanc difficultatem negari in primis posset, actum amoris beatifici esse simpliciter necessarium, ut Scot. Gabr. & alij Nominales docuerunt, partim in 3. d. 18. partim in 1. d. 2. & 10. partim in 4. d. 49. quibus non videtur repugnare D. Th. in dicta d. 18. art. 2. ad 2. & 5. Sed hæc responsio altero tribus modis potest intelligi. Primo, ut ille amor dicatur liber, solum quia est perfectissimo modo spontaneus, & voluntarius, atque adeo libertate opposita coactioni, non necessitati: quo sensu videtur loqui Scot. & alij Nominales. Sed est jam a nobis rejectus in principio hujus sectionis, & ideo satis non est ad præsentem difficultatem solvendam. Secundo ergo modo existimari potest ille actus liber, quia revera de se, & natura sua est indifferens, ita ut in omnibus beatis sit potestas ad sustinendum illum: & hoc existimo falsum, sed quia non est hujus loci illud disputare, id suppono ex 1.2. q.4. & 10. & 1.p. q.82. & in hoc fundatur difficultas posita. Tertio ergo modo potest singulariter tribui Christo hæc libertas in illum actum propter supernaturalem potestatem faciendi miracula. Unum enim ex his miraculis esse poterat sustinere illum actum, sicut nonnulli dixerunt sustinuisse aliquando actum fructificationis, quamquam natura sua non sit minus necessarius: & hæc potestas, quamvis miraculosa, satis est, ut ille actus sit liber. Sed neque hoc mihi placet, quia non omnis potestas ad omnia miracula possibilis de potentia absoluta communicata est animæ Christi, sed tantum illa, qua, vel interdum Christus usus erat, vel certe qua poterat convenienter uti in ordine ad finem Incarnationis: at vero Christus Dominus nunquam usus erat potestate privandi se, seu carendi actuali amore Dei, neque unquam poterat convenienter, imo neque prudenter uti tali potestate. Non ergo assumpsit illam, neque talis potestas digna videtur, ut ab illo assumeretur.

Responderi ergo secundo potest, amorem finis inferre necessario voluntatem medij, quando illud medium per se & simpliciter, atque ab intrinseco est necessarium ad talem finem: at vero quando medium solum ab extrinseco, & ex aliqua suppositione facta habet necessita-

Responso.

Responso.  
ultima.

tem,



Confutatur.

tem, non oportet, ut simpliciter necessario ametur ex amore finis. Hujusmodi autem est actus, qui solum propter extrinsecum præceptum est necessarius, ut fuit mors Christi. Sed hæc responsio minus probabilis est, quæcumque enim ratione medium sit necessarium, ejus voluntas, seu amor habet necessariam connexionem cum amore finis: quia hæc connexio inter actus sequitur ex necessaria connexionem inter objecta; unde si re vera in objecto sit illa necessitas, impertinens est, ut oriatur ex causa intrinseca, vel extrinseca, ex præcepto, vel aliunde. Ut exemplis facile patet, nam si quis efficaciter vult conservare vitam, & hic & nunc non habet nisi hoc medium, v. g. uti hoc cibo, aut fugere in vasorem, necesse est, ut velit tale medium, vel tollat priorem voluntatem, quamvis fortasse necessitas illius medii per accidens, & ab extrinseco orta sit. Et similiter qui nunc efficaciter vult salvari, necesse est, ut velit baptizari, quamquam hoc medium, solum ex præcepto necessarium sit, seu ex institutione extrinseca. Denique propter hanc causam efficax amor Dei includit voluntatem observandi omnia præcepta, sive naturalia, sive positiva, sive divina, sive humana, quia omnium observatio ad divinum amorem necessaria est; præceptum enim habet hanc efficaciam, ut efficiat actum necessarium ad honestatem morum, & consequenter ad debitam conjunctionem cum ultimo fine. Et ratio etiam hoc convincit, quia si voluntas finis hic & nunc est absoluta, virtute includit omne medium, quod hic & nunc est necessarium, undecumque necessitas illa oriatur, quia tunc discedere a medio, virtute esset recedere ab ipso fine.

Resp. 3.

Tertia responsio colligi potest ex dictis in priori difficultate in solutione quarta, non esse necessarium actus voluntatis Christi illi esse propositos, ut habentes in individuo, & in particulari illam necessariam connexionem cum amore Dei. Nam in primis multi actus non erant illi præcepti, nec offerebatur semper, & in quolibet instanti aliquis actus maxime bonus, seu maxime placens Deo, sed poterant varii actus offerri moraliter æquales; poterat etiam esse æque indifferens in ordine ad divinum amorem, vel in hoc instanti, vel in alio talem actum exercere. Et idem fere dici posset de actibus præceptis, si non determinant obligationem suam cum omnibus circumstantiis temporis, & modi, &c. Hæc vero responsio easdem fere difficultates habet, quæ supra tactæ sunt, & præsertim si supponatur, quod supra diximus, Deum absolutam voluntate prædefinivisse omnes actus voluntatis Christi, quos habitura erat omnibus temporibus, & momentis: quod possibile esse dubitari non potest; ita vero factum esse, quamquam non sit certum, longe tamen verisimilius est, ut ostendi. Hoc autem supposito, urget maxime difficultas proposita, quia Christus Dominus evidenter intuebatur, & cognoscebat hanc prædefinitionem divinæ voluntatis, quia hæc cognitio pertinet ad scientiam visionis, Christi autem anima intuebatur omnia, quæ sub scientiam visionis cadunt. Ergo in singulis momentis & occasionibus videbat, quid esset consentaneum divinæ voluntati, seu quid vellet Deus ipsum tunc operari: ergo videbat quid esset gratius Deo, & magis consentaneum charitati divinæ: ergo necessario illud volebat ex argumento facto. Imo simpliciter videtur hæc ratio concludere, quia Christus videbat se non posse resistere efficaci voluntati Dei: ergo necessario volebat quidquid sciebat esse a divina voluntate prædefinitum, ut ipse illud vellet. Et hæc objectio videtur etiam confutare responsionem aliam, quæ mihi satisfacere solita est, quantum ad necessariam connexionem, quæ ratione præcepti oriri potest inter actum præceptum & amorem Dei, in qua hæc difficultas fundatur.

Resp. 4.

Quarto enim responderi potest, actum præceptum dupliciter considerari posse. Primo sub ratione electionis, seu voluntatis medii necessarii ad obtinendum finem, seu conservandum amorem divinum. Secundo, prout est actus habens ex objecto suo intrinsecam aliquam bonitatem, sub ratione obedientiæ, aut misericordiæ, aut alia simili, sub qua ille actus est per se amabilis, & non habet rationem medii, sed cujusdam finis proximi: quamvis ergo actus præceptus, habeat sub priori ratione necessariam connexionem cum amore, non tamen sub posteriori, unde fit, potuisse Christum considerare singula objecta proxima secundum proprias & intrinsecas honestates, &

Suares. Tom. XVI.

ut sic, libere illa velle. Nihil est enim quod ad actus eliciendos necessitatem illi inferat, quia in illis actibus non intelligitur operari ex necessaria intentione alterius finis; sed solum, quia illi secundum se honesti sunt & convenientes, quamvis non sint necessarii. Ex quo ulterius fieri videtur, neque ipsam observationem præcepti esse simpliciter necessariam quoad exercitium, & specificationem ex vi amoris divini, quia illud præceptum satis observari potest, vel eligendo illud tanquam medium necessarium ad amorem, vel per se se illud volendo propter varia motiva, quæ in ipso reperiri possunt. Ex qua indifferentia nascitur, ut habeat locum libera operatio, quia ex vi ipsius amoris non determinatur ad certum modum operandi, amor enim finis non inducit necessitatem electionis, ut electio est, nisi quando ipsa formalis electio proponitur ut necessaria ad consecutionem talis finis: nam si alius actus sufficiat, nulla est sufficiens causa necessitatis; ita vero est in præsentia, ut explicatum est. Contra hanc vero responsionem videtur urgere objectio facta. Primo quidem, quia, si verum est, Deum prædefinivisse omnes actus voluntatis Christi: ergo sive actus fiant per modum electionis, sive per modum intentionis, sive ex hoc motivo, sive ex illo, denique quomodocumque fiant, ita fuerunt prædefiniti a Deo, & Christo Domino erat patens hæc divina voluntas: ergo ex vi amoris divini necessario se illi conformabat. Et augetur secundo difficultas, quia voluntas Dei absoluta & efficax, qua vult me aliquid velle, si sit mihi nota, & sufficienter proposita, videtur habere vim, & efficaciam præcepti, quia tenetur homo parere divinæ voluntati: ergo maxime parere tenetur voluntati efficaci, & illi præferti, quia Deus vult hominem velle. Si ergo Deus absoluta voluntate prædefinivit omnes actus voluntatis Christi, & circumstantias eorum, & hanc voluntatem Christo manifestavit, hoc ipso intimavit illi præceptum de omnibus agendis in particulari hic & nunc, & ex tali motivo, &c. ergo supposito amore, nulla relinquitur indifferentia, vel libertas. Et tertio urgetur amplius, quia non repugnat, præceptum fuisse hoc modo impositum de omnibus actibus cum omnibus circumstantiis & motivis eorum: erit ergo illa conditionalis vera, quod si Christo amanti Deum perfectissimo modo ex necessitate simpliciter sine ulla libertate, impositum est hoc modo præceptum, necessario obedivit sine libertate. Redeunt ergo difficultates supra tactæ, scilicet, unde consistet, non ita esse propositum præceptum, &c.

Propter hæc potest excogitari quintus respondendi modus: ad quem suppono, Christum non habuisse præceptum proprium charitatis amandi Deum: tum quia cum voluntas ejus esset necessario determinata ad hunc amorem, non indigebat tali præcepto: tum etiam, quia hac ratione alii Beati non habent hujusmodi præceptum, quia de necessariis non dantur præcepta. Unde fit, præceptum amoris Dei, quod per actum liberum charitatis in via impletur, pro statu beatitudinis non obligare, quia neque obligat ad actum necessarium, ut dictum est, neque ad distinctum actum, quia charitas ex natura sua uno actu contenta est, & ille sufficit ad operandum semper honestissime propter Deum. Neque hoc videri potest novum aut singulare, quia cum hæc præcepta affirmativa sint, non obligant pro semper, sed pro articulo necessitatis, quæ durante statu beatitudinis nulla est, cum illa necessitas quasi præventa sit ab amore necessario. Exemplum esse potest in præcepto naturali diligendi Deum amore naturali, nam, quia est affirmativum, & non obligat pro semper, ideo, quamdiu aliquis actu diligit Deum amore supernaturali, non obligatur pro illo tempore ad diligendum ipsum per naturalem actum, etiam si posset, quia tunc nulla est necessitas. Et hoc ipsum in aliis actibus virtutum videre licet, quia obligatio unius cessat, seu non viget pro eo tempore, quia ab alia virtute suum actum operante prævenitur, ut patet in obedientia & charitate, justitia, misericordia, & similibus.

Nihilominus suppono secundo, præter amorem Dei beatificum esse potuisse in anima Christi alium amorem Dei; nam, sicut anima Christi duplici supernaturali scientia cognoscebat Deum, beata & infusa, ita potuit duplici actu amoris illum amare, ut infra q. 19. latius dicam. Tertio suppono, Christum fuisse simul comprehensorem & viatorem, ex qua mirabili conjunctione conse-

K k 2

quen-

Resp. 5.



quenter effectum est miraculose, ut proprii actus beatifici ita continerentur in suprema parte animæ, ut non redundarent in inferiorem, neque perfectionem suam cum illa communicarent. Ad hunc ergo modum intelligi potest, ita animam illam amasse Deum necessario, ut amor ille sisteret in sola formali conjunctione, & unione ad Deum, suo modo ad formalem beatitudinem pertinente, & non se extenderet, nec communicaret (ut ita dicam) aliis operibus & actibus, qui in Christum, ut viatorem conveniebant. Cum enim hæc extensio, vel communicatio sit per modum cuiusdam efficientiæ, poterat facile impediri, sicut fructio beata impedita est, ne omnem tristitiam expelleret, nec inferiori portioni se communicaret. Hoc ergo supposito facile intelligitur illum Dei amorem, quem anima Christi habuit veluti consequentem scientiam infusam, & non beatam, fuisse liberum, quia neque ab intrinseco habuit necessitatem, cum non versaretur circa Deum clare visum ut sic, nec ex præcepto, quia ostensum est, Christum non habuisse speciale præceptum amandi Deum. Et ulterius probari potest, quia nec tale præceptum est veluti connaturale & intrinsecum ipsi charitati, quia illi satis est unico actu diligere Deum: unde si habeat unum actum necessarium dilectionis Dei, ex natura sua non obligat ad alium actum: nec vero est cur singamus datum esse Christo speciale præceptum de huiusmodi actu, quia ad hoc asserendum nullum est fundamentum, & positiva præcepta sine fundamento multiplicanda non sunt; erat ergo ille amor liber. Ex quo ulterius facile intelligitur ab illo amore libero libere etiam processisse actus obedientiæ, charitatis proximi & aliarum virtutum, quos Christus Dominus ut viator exercuit: tum quia ille amor est sufficiens principium & causa illorum; tum etiam, quia amor beatificus, ut dictum est, veluti continebatur, ne influeret in huiusmodi actus, sed relinqueret voluntatem operari modo accommodato viatori. Et ita videtur fieri satis omnibus difficultatibus positis.

Confutatur.

Sed adhuc non quiescit animus. Primo quidem, quia ea, quæ supponuntur in hac responsione, non videntur satis probata, nec satis firma, præsertim illud tertium, quod scilicet amor beatificus veluti frænatus & impeditus fuerit, ne influeret, & moveret ad actus obedientiæ & similes. Deinde, quia ex hac responsione sequi videtur, Christum nunc in patria non habere libertatem, quia ibi amor beatificus non impeditur, sed operatur quantum potest: consequens autem videtur absurdum, & contra D. Th. hic art. 4. ad 3. ubi aperte docet, eandem esse in hoc rationem de Christo, & aliis Beatis, absurdum autem esset dicere omnes Beatos carere arbitrii libertate, aut usu illius. Denique difficultas tacta de prædefinitione divinæ voluntatis non videtur satis expediri juxta hanc responsionem: quia etiam ille amor consequens scientiam infusam, si fuit in Christo, fuit prædefinitus a Deo. Quamquam hæc obiectio non concludat, quia si ille amor non oritur necessario ex alio priori actu ejusdem voluntatis, sola prædefinitio divinæ voluntatis non imponit illi necessitatem, quia neque ex parte ipsius potentia, ut patet ex dictis in prima difficultate, neque ex parte objecti, ut magis patebit ex dicendis in tertiam. Aliæ etiam objectiones possent fortasse dissolvi, sed ut tota hæc difficultas melius dissolvatur, & intelligatur,

Responsio ultima.

Advertendum primo est, & si concedamus Deum absolute voluntatem prædefinivisse in particulari, & cum omnibus circumstantiis omnes actus voluntatis Christi: est enim hoc verisimilius, & sententijs D. Thom. magis consentaneum, dicit enim lib. 4. cont. Gent. c. 36. Christum voluntate humana nihil voluisse, nisi secundum quod eum velle voluntas divina disposuit, secundum illud Joan. 8. *Qua placita sunt ei, facio semper*, & infra q. 21. art. 4. dicit, Christum secundum voluntatem rationis nihil voluisse, nisi quod scivit Deum velle: licet hoc, inquam, concedamus, non inde fieri Christum habuisse præceptum de omnibus actibus in individuo, & particulari, quia voluntas, qua superior vult, & veluti intra se disponit, ut inferior aliquid velit, ex hoc præcise non habet vim legis & præcepti, etiam si aliunde ipsi inferiori nota sit, ut constat ex doctrina D. Thom. in 1. 2. q. 90. sed ad obligationem præcepti necesse est, ut superior velit & statuatur obligare inferiorem ad aliquid faciendum, eamque voluntatem præcise & imperando intimet infe-

riori. Quamquam autem superior, aut Deus velit & statuatur, ut ego aliquid velim, non ideo vult ut ex obligatione id velim, sed potest velle, ut mere libere, & sine obligatione id velim; aliud ergo est Deum prædefinire meum actum voluntatis, aliud velle me obligare ad illum actum. Quamquam ergo Christus Dominus clare videret voluntatem Dei prædefinientem omnes actus suos, non ideo videbat se teneri ex præcepto ad illos faciendos: quin potius videbat eadem divinam voluntatem prædefinitum esse, ut quosdam faceret ex obligatione, quosdam, ut ita dicam, faceret ex consilio.

Advertendum secundum est, quamquam verum sit, Beatum in patria amare Deum necessario quoad specificationem & exercitium, eo amore, qui est (ut ita dicam) de substantia & necessitate charitatis perfecta, quæ excludit omne peccatum, & omne malum beatitudini repugnans: non tamen videtur necessarium, ut actualiter, & quoad exercitium amet Deum necessario quoad omnem modum, & perfectionem objectivam possibilem ipsi charitati: ut v. g. non est necesse, ut semper actu Beatus velit honorem Dei, vel gloriam extrinsecam, quam habet ex conversione hominum, & alia similia, quæ secundaria sunt. Quamquam enim quando Beatus operatur circa hæc objecta, semper operetur ex perfecta charitate: tamen non est necesse, ut circa illa semper actu operetur. Et eadem ratione non est necesse, ut eo actu, quo necessario amat Deum, formaliter, explicitè, & actualiter semper velit implere divinam voluntatem, etiam in iis, quæ præcepta non sunt, neque sub aliquam obligationem cadunt: quia hoc etiam est secundarium, & non est de absoluta necessitate charitatis seu beatitudinis, & ideo non est unde oriatur necessitas quoad exercitium in tali actu, seu in tali actus extensione, seu perfectione. Et ex hac duplici animadversione cessant omnes difficultates, quæ sunt de actibus non præceptis, quia licet sint a Deo prædefiniti, & ideo consentanei divinæ voluntati, non ideo sunt sub obligatione & necessarij simpliciter, neque in amore beatifico est aliquid, quod ad huiusmodi actus eliciendos necessitatem inferat, ut explicatum est.

Tertio, de actibus præceptis nihil fere addendum occurrit iis, quæ in quarto, & quinto modo respondendi dicta sunt. Nam si concedamus præceptum determinare, & actum, & modum, & motivum, & omnes denique circumstantias: non video, quo modo supposita necessitate actus amoris relinquitur indifferentia aliqua in observatione talis præcepti, nisi quinta utamur responsione, & dicamus amorem beatificum non influxisse in huiusmodi actus, qui pertinebant ad statum viatoris, quia alias ipse amor est efficax causa necessario inducens obedientiam præcepti. Unde si alias in ipso præcepto, vel obedientia nulla relinquitur indifferentia, non est, in quo possit manere libertas. Potest tamen facile negari, præceptum esse hoc modo impositum cum tota hac determinatione. Et ratio ex dictis reddi potest, quia cum hic modus præcipiendi, neque ex natura ipsius præcepti, neque ex Scriptura sacra, aut aliqua ratione colligatur, & alias extraordinarius sit, & minime usitatus, non est cur sine fundamento asseratur. Quod maxime declarari potest in præcepto illo moriendi pro hominibus, de quo solet præcipue hæc difficultas versari, nam illud præceptum directe cadit in ipsum actum exteriori, qui est objectum interioris actus voluntatis, qui etiam consequenter præcipitur, quatenus cum exteriori componit unum actum moralem, & liberum. Quia vero ille actus exterior potest libere fieri per varios actus interiores diversarum virtutum, & propter diversa motiva, etiam si præceptum determinaret circumstantias temporis, vel loci, vel alias similes, non est necesse neque consentaneum naturæ talis præcepti, ut omnino determinet interiorem actum, vel motivum, ut in alijs præceptis, quæ dantur hominibus, videre licet. Et hoc satis est, ut in executione talis præcepti maneat indifferentia, & libertas. Adde tamen ulterius, si præceptum esset impositum determinando aliquem interiorem actum, quoad motivum, & omnes circumstantias, illum quidem fore necessarium, supposita efficacia amoris: nihilominus tamen posse voluntatem habere alios actus liberos ex alijs motivis circa illud idem objectum, & exterioriorem.



riorem actum. Imo in ipsomet actu sic præcepto, potest ex sua libertate, quasi supra ipsum objectum reflecti, & præcise velle illud propter suam honestatem, quasi sub hac conditione, vel affectu, scilicet, etiam si cum illo non esset conjuncta necessitas præcepti, vel etiam si simpliciter non esset necessarius ad divinum amorem. Et hic ultimus modus exercendi libertatem, tam intrinsecus est voluntati, tamque honestus, ut non possit rationabili præcepto impediri: quia nec fingi potest, ut per præceptum cogatur voluntas ad efficiendam omnem huiusmodi reflexionem liberam, quam circa actus suos efficere potest: quia in huiusmodi modo operandi habet voluntas infinitatem quandam, ut post quodcumque præceptum sibi impositum possit supra ipsum reflecti, & præscindere in objecto honestatem a necessitate, & alteram sine altera propter se amare. Non potest autem præcipi voluntati, ut quasi exhaustiat hanc totam potentiam suam, est enim quasi infinita, & in ea non datur ultimus actus, sed quocumque dato potest dari alius. Nec vero fingi potest, ut per præceptum impediatur voluntas, ne huiusmodi liberum affectum habeat: est enim intrinsece honestus, & bonus, & observationem aliorum præceptorum minime impediens, unde non est cur prudenter prohibeatur. Et hæc videntur sufficere de præsentis difficultate, quæ, licet legentium studio satis multa, & proluxa videri possint, mihi tamen, pro rei difficultate & dignitate, pauca esse videntur: quæ generatim etiam conferre possent ad intelligendum, quomodo liberum arbitrium maneat in Beatis, non obstante divina visione, & Dei amore, quo redduntur intrinsece impeccabiles.

## S E C T I O V.

*Quomodo Christus videns semper in Verbo omnes actus suos, eos libere exercere potuerit.*

**S**uperest tertia difficultas orta ex beatifica Christi visione, per quam actu semper videbat, quid & quomodo in omnibus momentis esset operaturus. Ex hac ergo visione apparet, voluntatem ejus fuisse omnino determinatam ad operandum eo modo, quo videbat se operaturum, quia videbat, se non posse resistere illi cognitioni: ergo nulla relicta fuit indifferentia in illa voluntate. Neque enim hic habet locum ulla indifferentia sumpta ex circumstantiis, vel ex motivis objectorum, vel ex reflexione actuum, quia, quidquid in hoc genere futurum erat, totum erat determinatum in illa visione. Et augeri potest hæc difficultas ex supra dictis, quia non solum videbat Christi anima, quid singulis momentis actura erat, sed etiam videbat, hoc esse a Deo prædefinitum, & se minime posse, aut tali decreto Dei repugnare, aut non consentire. Dices, hanc difficultatem coincidere cum illa vulgari de scientia Dei respectu nostrorum actuum. Sed non ita est, scientia enim Dei est nobis extrinseca, unde licet Deus sciat, quid ego sim acturus, talis scientia non determinat meam voluntatem ad illud agendum. Scientia vero animæ Christi erat intrinseca dispositio ipsius operantis; dispositio autem, vel iudicium existens in alicujus intellectu habet vim movendi, & applicandi voluntatem: unde, si tale est, ut voluntas non possit illi repugnare, videtur omnino illam determinare ad unum, atque adeo tollere libertatem.

Hæc tamen difficultas brevius, quam alia, expediti potest. Dico enim, illam scientiam visionis animæ Christi prout terminatur ad actus, quos Christi voluntas effectura est, præsupponere, illos actus esse futuros: non enim ideo futuri sunt, quia videntur, sed ideo videntur, quia futuri sunt. Ex quo sequitur primo, eam scientiam ut sic non esse ex iis suppositionibus, quæ omnino antecedunt libertatem, vel usum ejus, sed potius ex iis, quæ involvunt, vel supponunt liberam determinationem potentiae, vel ut actu existentem, vel ut futuram. Præsupponit enim illa visio, voluntatem Christi fore determinandam ad tales actus, & ideo illos intuetur, & quoad hoc eadem est ratio de illa, & de scientia Dei. Ex quo efficitur secundo, illam scientiam non posse destruere se ipsam, vel suum objectum, & consequenter non posse tollere libertatem actuum: quia ipsa scientia, ut esse possit, supponit in objecto hanc libertatem. Quod ita declaro, nam ideo

*Suarez. Tom. XVI.*

## A R T I C U L U S V.

*Utrum voluntas humana Christi, fuerit omnino conformis divinae voluntati in volito.*

**A**d quintum sic proceditur. Videtur, quod voluntas humana in Christo non voluerit aliud, quam Deus vult. Dicitur enim in Psal. 39. ex persona Christi: *Ut facerem voluntatem tuam, Deus meus, volui. Sed ille, qui vult voluntatem alicujus facere, vult quod ille vult. Ergo videtur, quod voluntas humana Christi nihil aliud voluerit, quam voluntas divina ipsius.*

118.  
Infr. q. 21  
art. 3. & 4  
Et 3. d. 17.  
art. 2. q. 1.  
Et 4. cont.  
c. 36. § 2.

2. Præterea. Anima Christi habuit perfectissimam Charitatem, quæ etiam comprehensionem nostræ scientiæ excedit: secundum illud Ephes. 3. *Supereminentem scientiæ charitatem Christi. Sed charitatis est facere, quod homo idem velit, quod Deus. Unde & Philosophus in 3. Ethic. \* dicit, quod unum de amicabilibus est eadem velle & eligere. Ergo voluntas humana in Christo nihil aliud voluit, quam divina.*

Lib. 9. c. 4.  
tom. 5.

3. Præterea. Christus fuit verus comprehensor. Sed Sancti, qui sunt comprehensores in patria, nihil aliud volunt, quam quod Deus vult: aliqui non essent Beati, quia non haberent quicquid vellent: Beatus enim est, qui habet, quæcumque vult, & nihil male vult: ut August. dicit in lib. de Trinit. \* Ergo Christus nihil aliud voluit secundum voluntatem humanam, quam voluit voluntas divina.

Lib. 8. c. 5  
in fin. &  
c. 6. tom. 3

Sed contra est, quod August. dicit contra Maximum. \* In hoc, quod Christus ait, Non quod ego volo, sed quod tu, aliud se ostendit voluisse, quam Pater: quod nisi humano corde non posset, cum infirmitatem nostram in suum, non divinum, sed humanum transfigureret affectum.

Li. 3. cont.  
Maxim.  
c. 20. in  
med. to. 6.

a. Respondeo dicendum, quod sicut dictum est \*, in Christo secundum humanam naturam ponitur duplex voluntas, scilicet, voluntas sensualitatis, quæ participative voluntas dicitur: & voluntas rationalis, jive consideretur per modum naturæ, sive per modum rationis. Dictum est autem supra \*, quod ex quadam dispensatione Filius Dei ante suam passionem permittebat carni agere & pati, quæ sunt ei propria. Et similiter etiam permittebat omnibus viribus animæ agere & pati, quæ propria. Manifestum est autem, quod voluntas sensualitatis refugit naturaliter dolores sensibiles, & corporis lesionem. Similiter etiam voluntas, ut natura, repudiat ea, quæ sunt naturæ contraria, & quæ sunt secundum se mala: puta, mortem, & alia huiusmodi. Sed hæc tamen voluntas quandoque per modum rationis eligere potest ex ordine ad finem. Sicut etiam in aliquo puro homine sensualitas ejus,

Art. 1. 2.  
& 3. hu-  
jus quæst.

Quæst. 14.  
art. 1. ad 2.



*Et etiam voluntas absolute considerata refugit usionem, quam tamen voluntas secundum rationem eligit propter finem sanitatis. Voluntas autem Dei erat, ut Christus dolores, & passiones, & mortem pateretur: non quod ista essent a Deo volita secundum se, sed ex ordine ad finem humane salutis. Unde patet, quod Christus secundum voluntatem sensualitatis, & secundum voluntatem rationis, quæ consideratur per modum naturæ, aliud poterat velle, quam Deus. Sed secundum voluntatem, quæ est per modum rationis, semper idem volebat, quod Deus. Quod patet ex hoc ipso, quod dicit: Non sicut ego volo, sed sicut tu. Volebat enim secundum rationem voluntatem divinam impleri: quamvis aliud dicat se velle secundum quandam aliam ejus voluntatem.*

*b Ad primum ergo dicendum, quod Christus per voluntatem rationalem voluit, ut divina voluntas impleretur: non autem per voluntatem sensualitatis, cujus motus non se extendit usque ad voluntatem Dei: neque per voluntatem, quæ consideratur per modum naturæ, quæ fertur in aliqua objecta absolute considerata, & non in ordine ad divinam voluntatem.*

*Ad secundum dicendum, quod conformitas voluntatis humane ad voluntatem divinam, attenditur secundum voluntatem rationis, secundum quam etiam voluntates amicorum concordant, in quantum, scilicet, ratio considerat aliquod volitum in ordine ad voluntatem amici.*

*Ad tertium dicendum, quod Christus fuit simul comprehensor & viator, in quantum, scilicet, per mentem fruebatur Deo, & habebat carnem passibilem. Et ideo ex parte carnis passibilis poterat in eo aliquid accidere, quod repugnaret naturali voluntati ipsius, & etiam appetitui sensitivo.*

### COMMENTARIUS.

**V**oluntatem aliquam esse conformem alteri, variis modis accidit, ut constat ex 1.2.q.19. quod vero ad præsentem quæstionem pertinet, duo sunt potissimi. Primus est, quando aliquis vult id, quod alius vult ipsum velle, quæ conformitas dici solet in genere efficientis, vel in ratione regulæ, seu in ipso actu, quia scilicet habet actum, quem alius vult ipsum habere: ut loquitur Durand. 3. dist. 17. q. 1. ubi Gabriel etiam addit conformitatem in modo actus, ut quando aliquis eo modo vult aliquid, quo alius vult ipsum velle. Secundus est, quando aliquis vult id, quod alius vult: & de hoc posteriori modo movet D. Th. quæstionem, ut patet ex titulo, qui est de conformatione in objecto voluto. De priori autem modo supponit D. Th. ut manifestum, voluntatem humanam Christi semper fuisse conformem divinæ illo modo: pertinet enim & ad efficaciam divinæ voluntatis, & ad summam perfectionem humanæ Christi voluntatis, ut in articulo etiam sequenti declaratur. Posterior autem modus distingui potest in conformitatem materialem, seu in objecto materiali, quæ invenitur, quando duæ voluntates eandem rem volunt: & formalem, seu in objecto formali, ut quando non solum volunt eandem rem, sed etiam propter eandem rationem, seu causam.

De posteriori ergo modo conformitatis respondet D. Th. voluntatem Christi operantis per modum naturæ, per actus simplices, quibus fugiebat malum naturæ per se consideratum, non semper fuisse conformem in materiali objecto divinæ voluntati: at vero eandem voluntatem, ut deliberate operantem, seu per modum rationis semper fuisse conformem divinæ voluntati, & utrumque recte colligit ex illis verbis: *Non sicut ego volo, sed sicut tu*: quæ omnia satis in litera sunt clara, neque indigent nova expositione.

*b* In solutione ad primum animadversione dignum est, quod D. Th. loquens de conformitate cum voluntate divina circa objecta naturæ repugnantia, in voluntate rationali Christi distinguit, dicens, voluntatem illam ut rationem fuisse conformem divinæ voluntati circa hæc objecta, non tamen ut naturam: de appetitu autem sensitivo non distinguit, sed simpliciter negat. Unde videtur significare, appetitum sensitivum nullo modo circa hæc objecta idem voluisse, quod voluntatem divinam. Nihilominus tamen dicendum censeo, etiam appetitum sensitivum fuisse in hoc aliquo modo conformem divinæ voluntati, consentiendo & appetendo labores & passio-

nes corporis, & ipsam mortem, ex motione portionis superioris. Sicut enim interdum caro ipsa ex superioris partis redundantia exultat in Deum vivum: ita ex eadem redundantia, & motione potest appetere corporis incommoda propter eundem Deum vivum. Quando enim homo aggreditur pericula, vel se ipsum castigat propter Deum, non solum per voluntatem, sed etiam per appetitum consentit, & movet membra, ut se affligat, vel periculis objiciat, &c. multo ergo perfectius fuit hujusmodi consensus, & concordia in appetitu Christi. D. Th. autem exponendus, & intelligendus videtur de appetitu & voluntate, & quasi ex propriis operantibus, & se moventibus: voluntas enim, quamquam ex impetu naturæ fugiat ejusdem naturæ incommoda, tamen ex propria perfectione & libertate potest contrarium velle, & naturæ impetum moderari & vincere: at vero appetitus sensitivus sua sola virtute hoc non potest, quamvis ex motione superioris rationis possit in hujusmodi affectum inclinari. Et hoc probat ratio D. Th. scilicet, quia motus hujus appetitus non se extendit usque ad voluntatem Dei: est enim hoc verum de ipso appetitu sua tantum virtute se movente, motus enim a voluntate & ratione potest fieri in objectum corpori disconveniens quoad sensum, apprehensum sub ratione convenientis confuse existimata, seu apprehensa ex vi superioris motionis: quanquam ipsa ratio convenientiæ, & modus ejus per sensum distincte non apprehendatur, ut latius aliis locis explicatur, tractando de motu charitatis, poenitentiae, & similibus.

Solutio ad secundum non indiget expositione. De solutione vero ad tertium dicemus disputat. sequenti.

### ARTICULUS VI.

*Utrum in Christo fuerit contrarietas voluntatum.*

**A**d sextum sic proceditur. Videtur, quod in Christo fuerit contrarietas voluntatum. Contrarietas namque voluntatum attenditur secundum contrarietatem objectorum: sicut etiam contrarietas motuum attenditur secundum contrarietatem terminorum: ut patet per Philos. in 5. Phys. \* Sed Christus secundum diversas voluntates contraria volebat: nam secundum voluntatem divinam volebat mortem, quam refugiebat secundum voluntatem humanam. Unde Athanasius dicit in lib. adversus Apollinarem. \* Quando Christus dicit: Pater, si possibile est, transeat a me calix iste: & tamen non mea, sed tua voluntas fiat: & iterum, spiritus promptus est, caro autem infirma, duas voluntates hic ostendit: humanam, quæ propter infirmitatem carnis refugiebat passionem, & divinam ejus promptam ad passionem. Ergo in Christo fuit contrarietas voluntatum.

2. Præterea. Ad Gal. 5. dicitur, quod caro concupiscit adversus spiritum, & spiritus adversus carnem. Est igitur contrarietas voluntatum, quando spiritus unum concupiscit, & caro aliud. Sed hoc fuit in Christo, nam per voluntatem charitatis, quam Spiritus sanctus in ejus mente faciebat, volebat passionem, secundum illud Isai. 53. Oblatus est, quia voluit: secundum autem carnem, passionem refugiebat. Ergo erat in eo contrarietas voluntatum.

3. Præterea. Luc. 22. dicitur, quod factus in agonia prolixius orabat. Sed agonia videtur importare quandam compugnationem animi in contraria tendentis. Ergo videtur, quod in Christo fuerit contrarietas voluntatis.

Sed contra est, quod in determinatione sexta Synodi dicitur. \* Predicamus duas naturales voluntates, non contrarias (juxta quod impii asserunt hæretici) sed sequentem ejus humanam voluntatem, & non resistentem vel reluctantem, sed potius subiectam divinæ ejus atque omnipotenti voluntati.

a Respondeo dicendum, quod contrarietas non potest esse, nisi oppositio attendatur in eodem, & secundum idem. Si autem secundum diversa, & in diversis existat diversitas, non sufficit hoc ad rationem contrarietatis, sicut nec ad rationem contradictionis, puta, quod homo sit pulcher, aut sanus secundum manum, & non secundum pedem. Ad hoc ergo, quod sit contrarietas voluntatum in aliquo, requiritur primo quidem, quod secundum idem attendatur diversitas voluntatum. Si enim unius voluntas sit de aliquo fiendo secundum quandam rationem universalem,

119.  
3. dist. 16.  
17. ar. 2. q.  
2. & 3. Et  
opus. 3. c.  
139.  
Li. 5. Phys.  
sic. text.  
49. u. que  
ad 52. tu.  
2.  
In lib. de  
natur.  
hum. sus-  
cepta nō  
procul a  
finem. 3.

Habetur  
in Epist.  
Agatho.  
ad VI. Sy-  
nod. gene-  
ral. & le-  
gitur ibi  
a. 4.  
& recipi-  
tur a. 10.  
ne 8.

Etiam ap-  
petitus  
sensitive  
Christi  
erat con-  
formis di-  
vine vo-  
luntati,  
circa ob-  
jecta na-  
turæ re-  
pugnantia.



## DISPUTATIO XXXVIII.

In quinque Sectiones distributa.

*De actibus voluntatis humane Christi, eorumque diversitate & efficacia.*

**D**Ivus Thomas pauca de his actibus voluntatis Christi hoc loco tradit, vel quod reliqua communia sint cuilibet humane voluntati, vel quod nonnulla, quæ propria Christi esse videntur, superius q. 13. & 15. satis ab eo indicata sunt: ad complementum autem doctrinæ, ad brevem quandam summam redigemus ea, quæ ad hos actus voluntatis Christi pertinent, & trademus aliqua, quæ in superioribus omissa sunt, ut facilius & commodius intelligi possint. Primo ergo explicabimus varios actus hujus voluntatis. Secundo concordiam eorum cum divina voluntate. Tertio eorum efficaciam in omnibus, quæ Christus Dominus sua humana voluntate voluit.

## SECTIO I.

*Utrum in humana voluntate Christi fuerit omnis varietas actuum, quæ in humana voluntate esse solet.*

**R**evis resolutio hujus dubitationis est, exceptis pravis actibus, qui rectæ rationi consentanei non sunt, fuisse in Christi voluntate fere omnia genera, vel modos actuum, qui in humana voluntate esse solent, accommodare distributionem intelligendo de omnibus generibus, seu modis actuum, non de singulis individuis, vel speciebus, quod per se constat, & ita breviter explicari & probari potest, revocando hos actus omnes ad sex capita, seu sex partitiones, sub quibus omnes contineri videntur.

Primo ergo dividi potest actus humanus in bonum & malum, seu turpem & honestum, de quibus constat, honestos actus fuisse in Christo, & ex q. 7. colligi potest, fuisse in omni specie virtutis, quæ perfectioni beatitudinis non repugnat; de actibus vero malis q. 15. ostensum est, neque fuisse in Christo, neque esse potuisse.

Secundo dividi potest actus voluntatis in necessarium & liberum: & utrumque inventum fuisse in Christi voluntate ex tractatis in disp. præcedenti fatis constat.

Tertio dividitur in naturalem & supernaturalem: & manifestum etiam est, utrumque genus istorum actuum fuisse in Christi voluntate, quia neque gratia in illo otiosa fuit, neque impedivit naturam, quo minus proprios actus sibi accommodatos eliceret: unde superius quæst. 7. ostendimus, virtutes supernaturales & infusas, & naturales seu acquisitas, & utrarumque actus perfectissimos in Christo Domino fuisse.

Quarto dividi potest actus voluntatis ex D. Th. 1. 2. q. 8. & sequentibus, in simplicem voluntatem, intentionem, electionem, consensum, usum, & fruitionem, & quacumque ratione hi actus inter se distinguantur, certum est, omnes illos, tam in naturali ordine, quam in supernaturali, potuisse a Christi voluntate exerceri. Ratio est, quia latitudo istorum actuum pertinet ad perfectum modum operandi, & tendendi in finem libero & rationali modo: Christus autem in utroque ordine gratiæ & naturæ perfectissime operatus est propter finem, vel amando illum, & tendendo per media in consecutionem illius, vel fruendo illo jam consecuto.

Quinto possunt actus voluntatis distingui ad eum modum, quo supra distinguimus affectus appetitus sensitivi: quamquam enim illi actus solum, prout sunt in appetitu sentiente, passionum nomen obtinuerint, quia illi proxime fiunt cum motione corporis, & humorum ejus, tamen dubium non est, similes affectus perfectiori & altiori modo in voluntate reperiri. Quod de Christi Domini voluntate facile inductione ostendi potest, fuit enim in illo amor Dei & proximi, odium peccati, spes gloriæ corporis sui, & exaltationis sui nominis: desperatio vero, vel in illo non fuit, præsertim circa hæc objecta, quia fuisset rationi contraria: vel certe solum fuit circa aliquod malum corporale proprium, aut spirituale alienum, sic enim desperare potuit, aut fugam mortis seu passionis suæ, aut correctionem hominum damnatorum. Deinde fuit in eo desiderium gloriæ Dei, & redemptionis hominum, juxta illud Lucæ 22. *Desiderio desideravi*

*lem, & alterius voluntas sit de eodem non fiendo secundum quandam rationem particularem, non est omnino contrarietas voluntatum. Puta, si Rex vult suspendi latronem propter bonum publicum, & aliquis ejus consanguineus nolit eum suspendi propter amorem privatum, non erit contrarietas voluntatis, nisi forte in tantum se extendat voluntas hominis privati, ut bonum publicum velit impedire, ut conservetur bonum privatum: tunc enim circa eadem attenditur repugnantia voluntatum. Secundo autem requiritur ad contrarietatem voluntatis, quod sit circa eandem voluntatem. Si enim homo vult unum secundum appetitum rationis, & vult aliud secundum appetitum sensitivum, non est hic aliqua contrarietas: nisi forte appetitus sensitivus in tantum prævaleat, quod vel immutet vel retardet appetitum rationis: sic enim jam ad ipsam voluntatem rationis perveniret aliquid de motu contrario appetitus sensitivi. Sic igitur dicendum est, quod, licet voluntas naturalis & voluntas sensualitatis in Christo aliquid aliud voluerit, quam voluntas divina & voluntas rationis ipsius, non tamen fuit aliqua contrarietas voluntatum. Primo quidem, quia neque voluntas naturalis, neque voluntas sensualitatis repudiabat illam rationem, scilicet, quia divina voluntas, & voluntas rationis humana in Christo passionem volebat. Volebat enim etiam voluntas absoluta in Christo salutem humani generis: sed ejus non erat velle hoc in ordine ad aliud. Motus autem sensualitatis ad hoc se extendere non valebat. Secundo, quia neque voluntas divina, neque voluntas rationis in Christo impediebatur aut retardabatur per voluntatem naturalem, aut per appetitum sensualitatis. Similiter etiam nec e contrario voluntas divina vel voluntas rationis in Christo, refugiebat aut retardabat motum voluntatis naturalis humane, & motum sensualitatis in Christo. Placebat enim Christo secundum voluntatem divinam, & etiam secundum voluntatem rationis, ut voluntas naturalis in ipso, & voluntas sensualitatis, secundum ordinem suæ nature moverentur. Unde patet, quod in Christo nulla fuit repugnantia vel contrarietas voluntatum.*

*Ad primum ergo dicendum, quod hoc ipsum, quod aliqua voluntas humana in Christo aliud volebat, quam ejus voluntas divina, procedebat ex ipsa voluntate divina, cujus beneplacito natura humana motibus propriis movebatur in Christo, ut Damasc. \* dicit.*

*Ad secundum dicendum, quod in nobis per concupiscentiam carnis impeditur aut retardatur concupiscentia spiritus, quod in Christo non fuit. Et ideo in Christo non fuit contrarietas carnis ad spiritum, sicut in nobis.*

*Ad tertium dicendum, quod Agonia non fuit in Christo, quantum ad partem animæ rationalem, secundum quod importat concertationem voluntatum ex diversitate rationum procedentem. Puta, cum aliquis, secundum quod ratio considerat unum, vult hoc, & secundum quod considerat aliud, vult contrarium. Hoc enim contingit propter debilitatem rationis, quæ non potest judicare, quid sit simpliciter melius. Quod in Christo non fuit, quia per suam rationem judicabat, simpliciter esse melius, quod per ejus passionem impleveretur voluntas divina circa salutem generis humani. Fuit tamen in Christo agonia, quantum ad partem sensitivam, secundum quod importat timorem infortunii imminentiis, ut dicit Damasc. \* in 3. libro.*

## COMMENTARIUS.

**S**ub titulo hujus articuli comprehendit D. Thom. tam voluntatem divinam Christi, quam humanam rationalem & sensitivam: nam, quia præcedenti articulo docuerat, secundum aliquam rationem potuisse in his voluntatibus reperiri diversitatem, & veluti quoddam genus discordiæ: ideo in hoc articulo explicat, hanc diversitatem non fuisse talem, ut veram oppositionem vel contrarietatem induceret, aut inter voluntatem divinam & humanam, aut inter voluntatem humanam & appetitum sensitivum inter se: quia illi diversi motus harum voluntatum, quamvis interdum circa eandem materiam versarentur, sub diversis tamen rationibus: & ita erant moderati & inter se compositi, ut unus alium minime impediret. Quæ omnia D. Thomas diffuse & satis clare explicat.

Solutiones argumentorum tractabuntur commodius disputatione sequenti.



*hoc pascha manducare vobiscum, antequam patiar; & consequenter etiam esse potuit fuga mali contrarii. Fuit etiam audacia, quatenus est voluntas efficax aggrediendi pericula ob majus malum superandum, vel bonum obtinendum; est enim hic actus fortitudinis, quæ est perfectissima virtus: quem actum indicant illa Christi verba: *Surgite, eamus hinc, ecce, qui me tradet, prope est*. Marc. 14. & illa Joan. 18. *Jesus itaque sciens omnia, quæ ventura erant super se, processit & dixit eis, Quem queritis?* &c. De ira etiam, quatenus esse potest iusta voluntas vindicandi aliquod malum, satis ex dictis supra q. 15. constat in Christi voluntate fuisse, & per se etiam evidens est, in supremo iudice esse valde necessariam. Similiter etiam manifestum est, gaudium seu fruitionem perfectissimam in Christi voluntate semper fuisse; solum ergo de tristitia & timore nonnihil dubitationis superest, quam post sectionem sequentem commode explicabimus.*

Sexto & ultimo dividi potest actus voluntatis in efficacem & inefficacem, quos alii absolutum & conditionatum vocant: quia actus efficax absolutus est in ordine ad executionem, est enim talis actus principium operandi, & solet explicari hac voce, *volo*; actus vero inefficax solum est complacentia quædam seu displicentia; ut bene explicuit Scotus in 2. d. 6. q. 1. & explicatur hac voce, *vellem*. Et dicitur actus conditionatus, non quia, ut est in voluntate, conditionem includat, id enim intelligi non potest, cum sit simplex quædam affectio, re ipsa adherens voluntati simpliciter & absolute: sed quia ex parte objecti conditionem quamdam includit, ut implicite, quatenus fertur in objectum sub una præcisa ratione consideratum, ac si esset separata ab illis conditionibus, quæ illius executionem impediunt: vel etiam interdum explicite per intellectum considerata & appositæ conditione ipsi objecto, ut in 1. 2. latius explicatur. De hoc ergo duplici genere voluntatis, quomodo fuerit in voluntate Christi, sequenti sectione explicandum est.

## SECTIO II.

*Utrum in voluntate Christi fuerint actus efficaces, & inefficaces.*

**D**E actibus efficacibus voluntatis Christi, quod in illo fuerint perfectissimi, nulla est difficultas, aut dubitandi ratio: constat enim, per hos actus operatum esse omnia virtutis actus, & divinæ voluntati ac iussioni obsecutum esse: ac denique mortem ipsam suscepisse: *Oblatus enim est, quia ipse voluit*, in qua voluntate, ut Paulus ait, sanctificati sumus, per illam enim nostram redemptionem perfecit. Quod vero etiam interdum actus aliquos inefficaces habuerit, satis probant verba illa Matth. 26. *Pater, si possibile est, transeat a me calix iste*. quibus suum affectum indicat: illum autem non fuisse efficacem & absolutum ostendunt verba sequentia: *Non sicut ego volo, sed sicut tu*; eum autem affectum non solum in appetitu sensitivo, sed etiam in voluntate fuisse constat ex VI. Synod. act. 4. & 11. ubi ex hoc loco probatur humana Christi voluntas, quod etiam probant multa testimonia Sanctorum, quæ ibi adducit Agatho in epistola, quæ habetur act. 4. & alia afferuntur act. 10. & nonnulla alia statim referam. Hoc etiam confirmant illa verba Marci 7. Neminem voluit scire, & non potuit latere. Quo loco utitur etiam Agatho supra, intelligendusque est necessario de voluntate aliquo modo inefficaci, ut in sectione ultima hujus disputationis latius dicam.

Ut vero rationem explicemus, propter quam Christus hos actus elicit vel assumpsit, quæri hoc loco potest, an hi actus fuerint in voluntate Christi, ut natura est, an vero ut est ratio superior, vel inferior, quarum vocum significationem satis D. Thom. hoc loco indicavit, & latius tradidit 1. p. q. 41. art. 2. 79. art. 9. 1. 2. q. 10. art. 1. q. 74. art. 7. & ex dicendis etiam constabit.

Primo igitur certum est, interdum fuisse hos actus in voluntate Christi, ut natura est: quod aliqui ita explicant, ut dicant, hos actus non fuisse vere elicitos, sed tantum esse ipsum naturale pondus voluntatis ad bonum sue naturæ. Quæ sententia solet tribui Scoto in 3. d. 15. & 17. Sed falso illi imponitur, oppositum enim docet, sicut & cæteri Theologi, & ex loco Evangelii aperte colligitur, hanc voluntatem iuste actum elicitum in Christo: quia

non dicitur aliquis velle, nisi id, quod per actum elicitum aliquo modo vult, & in nobis constat, huiusmodi actus inefficaces esse elicitos, sunt enim vitales actus. Alii existimant, hos actus tunc esse elicitos a voluntate ut natura, quando sunt omnino necessarii: quod videtur sentire Marsil. in 3. q. 1. art. 3. in 1. parte illius. Sed licet fortasse in nobis sæpe accidat, ut similes actus ex necessitate fiant, non est tamen simpliciter hoc necessarium, ut dicantur procedere a voluntate ut natura. Neque in Christo Domino habere potuit locum talis necessitas: in nobis enim provenit ex motione appetitus sensitivi prævenientis considerationem rationis, & secum trahentis voluntatem, antequam libertate sua uti possit: unde si aliàs voluntas & ratio tam perfecte sint dispositæ ad operandum, ut semper perfecta advertentia rationis antecedit motionem appetitus, non est, unde oriri possit talis necessitas, quando objectum ipsum necessario non rapit voluntatem, ut est in amore & visione beata. Cum ergo in Christo Domino nunquam appetitus rationem perturbare aut prævenire potuerit, ut supra q. 15. probatum est, non est, unde pati potuerit necessitatem quoad exercitiū in exercendis his actibus. Dicuntur ergo tunc elicitæ a voluntate ut natura, quando procedunt ex sola inclinatione naturali, quam voluntas habet ad commodum suum, vel naturæ suæ, & tunc habere possunt, saltem per se loquendo, necessitatem quandam quoad specificationem; quia cum natura propensa sit ad suum commodum, si actus procedunt ab hac naturali inclinatione, necesse est, ut sint illi conformes: quia ergo Christus habuit veram humanam naturam, ad illius veritatem ostendendam permisit interdum voluntati suæ operari ex inclinatione naturæ, quæ recta est & honesta, & ideo assumpsit hos actus procedentes ab ipsa voluntate, ut natura est: quæ doctrina sumitur ex D. Th. & Cajet. hic & supra q. 14. art. 2. Addi vero potest, in ipsa voluntate ut natura distinguui posse superiorem, & inferiorem partem, quia in eadem voluntate intelligi potest naturalis inclinatio ad ultimum finem suum, & ad alia propter ipsum, quæ est suprema inclinatio voluntatis. Potest etiam intelligi naturalis propensio ad corpus, ad prosequenda ea, quæ sunt commoda parti sentienti, & sub utraque ratione verum esse potest, elicitisse voluntatem Christi, ut naturam, huiusmodi actus, maxime tamen sub posteriori ratione, ut ex dictis patet.

Dico secundo, etiam potuisse voluntatem Christi, ut rationem superiorem, & inferiorem, elicere hos actus. Ita sentit D. Th. in 3. d. 17. q. 1. art. 2. & ibi Gabr. Marsil. dicta q. 1. & colligitur etiam ex D. Th. infra q. 2. 1. art. 2. ubi dicit rationem fuisse in oratione Christi sensualitatis advocatam, & ex Scoto d. 15. & ex Cajet. supra q. 13. art. 4. ad 1. & in primis idem actus, qui sunt a voluntate ut natura, quatenus aliquo modo liberi sunt, possunt dici esse a voluntate ut ratione. Deinde interdum potuit habere Christus hos actus circa objecta, quæ non pertinebant ad proprium commodum, sed ad amorem amicitiae, vel ad alias superiores & honestas rationes: sic enim potuit desiderare omnium salutem ex charitate, quamvis sciret non omnes fore salvandos, sic etiam Matth. 9. voluit latere, non quidem ex impetu naturæ, sed ex humilitate, ut nobis esset exemplum. Et eodem modo voluit per hunc affectum, signum suæ vehementis tristitiae exhibere, tum ad gravitatem nostrorum peccatorum ex acerbitate suæ tristitiae declarandam; tum ad consolationem nostram, ut cum similes affectus patimur in difficultatibus superandis, vel doloribus perferendis, non despondeamus animum, sed per deliberatam voluntatem hunc affectum superemus. Similiter etiam Hilar. & Hierony. exponunt appetivisse Christum fugam mortis, non solum ex naturæ inclinatione, sed etiam propter vitandam ruinam Judæorum, quæ fuit etiam expositio Origenis tractat. 35. in Matth. & lib. 2. contra Celsum: quæ si non excludat affectum naturalem supra explicatum, sed præter illum hunc alium adjungat, neque impossibilis est, neque ullum habet inconveniens. Ratio vero est, quia hi actus sunt honesti, & non repugnant alicui perfectioni Christo Domino debitæ.

Scio, nonnullos auctores non admittere hos actus imperfectos, nisi in voluntate, ut natura est, quo modo videntur loqui Capreol. & Mai. & Duran. in 3. d. 17. quibus favere videtur D. Th. in his art. & infra q. 2. 1. art. 4. & ratio

Quomodo  
actus in-  
efficaces  
fuerint  
elicti a  
voluntate  
Christi ut  
natura.

Etiams  
ratio su-  
perior &  
inferior  
potuit eli-  
cere vo-  
luntas  
Christi  
actus inef-  
ficaces.

Obiectio  
Respons.



ratio esse potest, quia proprie non dicitur operari voluntas, ut ratio, nisi quando ex efficaci intentione finis de mediis deliberat: & quando hoc modo non operatur, semper actus procedit ex naturali pondere, vel ipsius voluntatis, vel alicujus virtutis in ea existentis, ut charitatis, vel alterius similis. Et ad hunc modum operatur semper illos actus imperfectos. Sed hæc differentia, ut existimo, tantum est in modo loquendi, nos enim dicimus, voluntatem operari magis ut rationem, quam ut naturam, quando non operatur ex appetitu proprii commodi ipsius naturæ: præsertim, quia interdum etiam ex intentione alicujus finis potest quis habere actum inefficacem desiderandi medium secundum se utile, etiam si hic & nunc non apprehendatur ut possibile, vel eligendum, qui actus potuit esse in Christo, ut ex dictis patet. Nec D. Th. repugnat, loquitur enim præcipue de actu efficaci, & de electione, quæ fit secundum rationem, ut patet ex art. 5.

Scio etiam Cajetanum, infra q. 46. art. 7. specialiter negare hos actus in voluntate Christi, ut est ratio superior. Sed non video propriam aut singularem rationem, nisi fortasse diverso modo nominibus utamur. Fortasse enim ipse non vocat rationem superiorem, nisi quando operatur per rationes superiores, & versatur circa res æternas, & Deum ipsum, circa quem non videtur Christus habere hos actus imperfectos, sed tantum perfectos. Ego vero existimo rationem superiorem recte vocari, quotiescunque per rationes & regulas æternas ad operandum movetur, etiam si materia, circa quam operatur, res suprema non sit, quia formalis ratio potentiæ magis ex objecto motivo, quam ex materia, circa quam versatur, sumenda est. Præsertim, quia salus proximorum & gloria Dei res superiores sunt, & suo modo æternæ, circa quas versari poterant dicti actus, ut explicatum est. Unde Medina hic art. 5. etiam in aliis beatis admittit hujusmodi actus inefficaces, ortos non ex solo impetu naturæ, seu ex incommodo illius, sed ex aliis rationibus superioribus: Christus enim, quia erat in statu passibili, potuit utraque ratione hujusmodi actus seu affectus elicere, beati autem, qui omnino sunt extra viam, & nullum pati possunt naturæ incommodum, non habent hujusmodi actus procedentes illo modo ab impetu naturæ, possunt tamen habere aliis rationibus, ut dictum est: quamquam Cajet. supra dicto loco utrumque neget, cui videtur favere D. Th. hic art. 5. ad 3. & 1. 2. q. 19. art. 10. 10. ad 1. Sed in priori loco exponendus est iuxta dicta de actibus procedentibus ex aliquo incommodo naturæ, seu carnis passibilis, de qua expresse D. Th. loquitur: in loco autem posteriori loquitur de actu absoluto, & non tantum de inefficaci. Unde addo etiam in beatis, qui sunt omnino extra viam, posse interdum esse hos actus inefficaces procedentes a voluntate, ut natura est, non quia habeant aliquem dolorem, vel quia timeant aliquid incommodum naturæ, sicut accidebat in Christo, sed ex aliis causis: ut, v.g. anima beata appetit corpus suum, & resurrectionem, ac gloriam ejus, ut constat Apocal. 6. illud autem desiderium est per voluntatem inefficacem procedentem ab appetitu naturæ, quæ aliquo modo imperfecta est, donec corpore & animo sit beata.

## SECTIO III.

*Utrum in voluntate humana Christi fuerint actus timoris, & tristitiæ.*

**O**portet distinguere in ipsamet voluntate rationali Christi superiorem & inferiorem portionem, seu rationem, quoniam in singulis propria & singularis est difficultas. Primo igitur certum est, actum timoris habuisse locum in suprema portione voluntatis Christi, nam ad illam pertinet filialis timor Dei, quem in Christo fuisse constat ex illo Isai. 11. *Replevit eum spiritus timoris Domini*: & supra q. 7. late hoc declaravimus, agentes de dono timoris.

Secundo certum etiam est, in inferiori parte ejusdem voluntatis habuisse locum verum timorem, ut constat ex illo Marc. 14. *Cæpit pavore, & cadere*. Hunc enim locum non solum de sensibili timore, sed etiam de naturali timore voluntatis Christi intelligit Damasc. lib. 3. de Fide c. 18. & 23. ubi refert Athan. qui hoc habet lib. de Incarn. post medium, exponens etiam verba illa Joan. 12. *Animam turbata est*, de rationali parte animæ Christi: Cyril.

etiam lib. 4. in Joan. c. 1. idem docet, & lib. 10. Theol. c. 3. addit, orationem Christi Domini in horto ex timore mortis esse profectam, & inde colligit fuisse in Christo voluntatem humanam; sentit ergo, hunc timorem ad illam voluntatem pertinuisse. Ratio vero facile colligi potest ex dictis supra q. 15. de simili passione appetitus sensitivi: nam idem objectum, quod potest excitare timorem in appetitu sensitivo, potest etiam excitare in voluntate: imo in his affectibus, qui naturales sunt, & innoxii, sicut voluntas ex natura sua comitatur appetitum, ita in Christo permixta est naturali modo operari; nulla est enim ratio, cur fuerit impedita, neque cur potius hic affectus admixtus fuerit in appetitu sensitivo, quàm in voluntate, cum in utraque potentia esse potuerit, & deservire ad veritatem naturæ ostendendam, & alioqui naturale sit, ut hæc duæ facultates se invicem juvent, seu comitentur.

Dico tertio, in Christi Domini voluntate secundum portionem inferiorem fuisse verum actum tristitiæ. Est communis sententia & certa, colligitur ex D. Th. hic, clarius supra q. 15. art. 6. ad 4. tenet Alenf. 3. p. q. 17. memb. 2. art. 5. §. 2. & 3. Henric. quodl. 8. q. 7. Durand. d. 15. q. 2. Bonav. d. 16. q. 1. Et probatur ex verbis Matt. 16. *Tristis est anima mea*, quæ intelligit de tristitia voluntatis Agath. Pap. in ep. quæ refert VI. Synod. act. 4. & Sophro. in ep. quæ habetur eadem Synod. act. 11. habetur etiam in edito Constantini approbato a Leone Pap. II. ut refertur in eadem Synod. act. 18. ubi in hanc sententiam referuntur Gregor. Nyss. li. contra Apoll. Athanas. & Cyril. locis paulo antea citatis, & Epipha. qui hoc sentit hæresi 66. dicit enim non potuisse Christum esse capacem hujus tristitiæ, nisi haberet animam rationalem: quod videtur exposuisse Hieronym. Matth. 26. his verbis: *Qui irrationalem animam sumpsisse Christum suspicantur, dicant, quo modo contristatur, & perfecte noverit causas tristitiæ*. Eandem sententiam habet Damasc. lib. 3. de Fide c. 26. Ratio vero eadem est, quæ in assertione præcedenti tacta fuit, quia hic affectus etiam est naturalis, & innoxius, & habuit in Christo sufficientes causas ex parte objecti, & apprehensionis ejus, & ex natura rei connexus est cum tristitia sensus, nisi impediatur: non oportuit autem in Christo impediri, præsertim cum ad satisfaciendum pro nobis accommodatissimus sit, non minus quam tristitia sensibilis.

Dico quarto, etiam in portione superiori voluntatis humanæ Christi tristitiæ actum locum habuisse. Tenet Scot. dist. 15. Bonav. d. 16. art. 2. q. 2. & 3. Gabr. dist. 15. art. 2. in 1. p. illius. Et probatur, quia Christus ut homo tristitiam habuit propter peccata hominum: quin potius Sancti explicantes causas sudoris sanguinei Christi, sentiunt magis fuisse ortum ex consideratione peccatorum hominum, & ex tristitia inde concepta, quam ex consideratione propriæ mortis. Sed hæc tristitia pertinet ad rationem superiorem, quia potissimum fundabatur in divina offensione, quam considerare & ponderare proprium munus est superioris rationis. Similiter tristitiam habuit Christus de perditione Judæ, & ruina Judæorum, adeo ut Hieronymus & Hilarius dixerint magis doluisse Christum de morte sua propter ruinam Judæorum, quam propter suum incommodum: sed hoc etiam pertinet ad portionem superiorem, erat enim opus insignis charitatis. Et ex his exemplis facile constat ratio hujus conclusionis, quia hic etiam affectus est optimus & honestissimus, & valde consentaneus statui Christi in carne passibili, & ad satisfaciendum pro hominibus valde accommodatus.

Contra hanc vero ultimam conclusionem sentiunt nonnulli Theologi, inter quos est Henricus supra dicto quodl. 8. q. 7. & Cajet. infra q. 46. art. 7. ubi propterea inquit, dictam tristitiam a nobis explicatam pertinere ad rationem inferiorem, quia erat de objectis temporalibus, & inferioris rationis: & ita exponit D. Th. ibi, quamquam ipse fateatur dissensionem potius esse de modo loquendi, quam de re. Nihilominus tamen puto proprius ac verius dici, illos actus ad rationem superiorem pertinere, quia, ut supra dicebam, uniuscujusque potentiæ ratio ex formali potius motivo, quam ex materia, sumenda est. Deinde, quia commissio mortalis peccati ad rationem superiorem pertinet, quatenus tale peccatum est aversio a Deo: ergo multo magis dolor de peccato, quatenus est offensa Dei, ad superiorem portionem pertinet; ergo & prædicta Christi tristitia. Tandem velle mortem propter redem-

Etiam in portione superiori voluntatis Christi tristitiæ actus locum habuit.

Object. 1.

Respons.



redemptionem hominum & obedientiam Patris, erat sine dubio actus rationis superioris, quia, licet materia esset humana, tamen motivum & ratio erat altissima, & suprema; ergo idem erit de tristitia. Nec S. Th. unquam oppositum docuit, sed in eo loco solum docet portionem superiorem voluntatis Christi non esse passam tristitiam ab objecto suo, quod est Deus, quia illo potius perfecte fruebatur: & hoc modo dici quodammodo posset, quamvis aliqua tristitia fuerit in superiori portione Christi, quia regulabatur per regulas supremas, & æternas, non tamen fuisse quasi in suprema parte illius portionis, qua attingitur Deus ipse in se. Præsertim, quia illa eadem tristitia, quæ erat in ratione superiori, admittebatur, & eligebatur sub aliis rationibus, etiam supremis, & æternis: & objectum ipsum contristans, quod sub aliqua superiori ratione displicebat, sub alia magis superiori, vel amabatur, si tantum erat malum pœnæ, vel permittebatur, si culpe, quia voluntas Christi in ratione volendi semper erat conformis divine, ut dicemus. Et ita constat in re non esse diversitatē, & facile posse opiniones conciliari.

Objec. 2.

Una vero supersit hoc loco difficultas, vulgaris quidem, sed gravis, quomodo, scilicet, in eadem voluntate, & in eadem superiori parte illius potuerit simul tanta esse tristitia, cum perfectissima fruitione beata, qua Christi anima semper potita est. Propter hanc difficultatem Canon lib. 12. de locis c. 14. dicit animam Christi sustinuisse interdum gaudium beatificum, ut tristitiæ locum daret. Quod sine ulla probatione affirmat, ut evitet vim argumenti. At eam sententiam Henric. supra dicit esse fidei contrariam: ego falsam & temerariam illam existimo, & contra omnes Theologos, qui in hac difficultate contrariam sententiam ut certam ponunt. Et primo contra illam objici potest locus ille Canticor. 3. *Egredimini & videte, filia Sion, Regem Salomonem, in diademate, quo coronavit eum mater sua in die desponsationis illius, & in die lætitiæ cordis ejus*, juxta probabilem Sanctorum Patrum expositionem, qui per diadema Salomonis intelligunt spineam Christi coronam, qua coronatus est in die passionis suæ, quem dicunt esse diem lætitiæ cordis ejus, quia in eo maxime lætatus est spiritu, quamvis corpore maxime doleat, prout exponunt Gregor. Nyss. Maximus, & Nilus, quos Theodoret. refert; & Hortulanus lib. 3. commentar. in Cant. & eandem expositionem attigit D. Th. Cantic. 3. dicens, illum diem fuisse lætitiæ cordis Christi, quia in eo maxime gaudebat ob hominum, quam operabatur, redemptionem de diaboli potestate: & Rufinus in exposit. Symboli, de spinea corona eundem locum intellexit. Quod autem dies passionis Christi dicitur dies lætitiæ cordis ejus, satis confirmat, non fuisse ipsius animam privatam eod die perfectissimo gaudio: ergo maxime carere non debuit gaudio beatifico. Quod etiam recte confirmatur verbis illis Psal. 15. *Propter hoc lætatum est cor meum, & exultavit lingua mea*, nam, quod in eis sit sermo de Christo & passione ejus, constat ex sequentibus verbis: *Insuper & caro mea requiescet in spe*. Item ex illis Lucæ 15. Et cum invenerit eam, imponit in humeros suos gaudens: ovis enim perdita est humanum genus, quod tunc maxime super humeros suos Christus gaudenter sustulit, quando peccata nostra ipse perulit in corpore suo super lignum 1. Pet. 1. Denique ex illis Joan. 15. Hæc locutus sum vobis, ut gaudium meum in vobis sit, & gaudium vestrum impleatur; Quæ verba interpretans Cyril. lib. 10. in Joan. c. 21. inquit, Christum loqui de suo spiritali gaudio, quo semper fuit plenus, etiam in cruciatibus & opprobriis, quæ delicias sibi esse putabat, ut voluntatem Patris impleret, & salutem hominum operaretur. Et hoc gaudium (ait) optasse Christum discipulis, quo ipse gavisus est, quia solum illud gaudium solidum est, quod in Deo est. & cap. 22. ait: *Talem ergo nos Salvator charitatem ostendit, ut summo cum gaudio cruci affigi non erubuerit, ut peccatoribus salutem afferret*. Non ergo caruit Christus gaudio, etiam in ipsa cruce: ergo multo magis habuit gaudium beatificum ex summa Dei charitate, quæ est radix hujusmodi gaudii.

Secundo argumentor ratione, quia supra q. 9. ex Scriptura, & Patribus ostendimus, & certum esse diximus, animam Christi a principio fuisse beatam: beatitudo autem & fruitionem includit, & perpetuitatem sine intermissione. Quod vero Canus inquit, potuisse manere fruitionem sine gaudio, contradictionem involvit: quia frui-

tio nihil aliud est, quam gaudium ipsum, ut ex 1. 2. q. 11. suppono. Minus male diceretur, potuisse conservari visionem, & amorem, in quibus, vel altero eorum, essentialis beatitudo consistit, sine fruitione, quæ solum est beatitudinis proprietas, & perfectio. Sed hoc miraculum quavis contradictionem non involvat, afferendum non est sine magno fundamento, præsertim cum ad perfectionem Christi nihil pertineat, sed potius ad cujusdam perfectionis defectum, nam sine fruitione beatitudo non manet simpliciter perfecta. Adde, si hæc assertio Cani permittatur, facile posse inveniri alium, qui dicat, privatam esse interdum animam Christi etiam ipsa visione beata, ut magis pateretur. Denique vel Canus admittere debet Christi animam toto, aut majori vitæ mortalis tempore caruisse gaudio beato: quod tamen neque ipse audeat dicere, sed solum de passionis tempore: vel certe difficultatem non expedit, quia Christi anima & voluntas fere nunquam caruit magna tristitia, vel certe frequentissime illam habuit, considerando peccata hominum, & mortem suam veluti præsentem intuenso, cum tamen gaudium illud de se omnem expelleret tristitiam.

Secundo ergo respondetur, quamvis tristitia, & gaudium contraria sint, divina tamen virtute fieri potuisse, ut in eadem voluntate simul conjungerentur. Ita respondet Palud. in 3. dist. 15. q. 2. qui in universum docet posse Deum in eodem subiecto ponere duas contrarias formas in quocumque gradu, sicut in eodem loco potest ponere duo corpora naturaliter repugnantia. Sed licet in aliis qualitatibus, aut formis verisimile hoc sit, tamen in actibus vitæ, si proprie contrarii sint, specialem videtur involvere repugnantiam: vel quia speciali modo afficiunt subiectum, per intrinsecam quamdam emanationem ab illo: vel certe, quia ex parte objectorum includunt immediatam contradictionem, ut, v. g. si intellectus simul assentitur, & dissentitur eidem propositioni, simul ponit in objecto esse, & non esse: unde, sicut impossibile est, ut eodem assensu judicet idem esse & non esse, ita est impossibile simul habere illos duos actus, & idem est de omnibus contrariis similibus. Quod etiam naturali quodam signo confirmari potest: nam alia contraria, saltem in gradu remisso, possunt interdum esse simul, etiam naturali modo: & in ipso intellectu, vel voluntate, habitus contrarii possunt simul esse in gradu remisso: at vero actus ipsi non possunt naturaliter simul esse in eodem, si vere contrarii sint, ut experientia satis constat in assensu, & dissensu, & similibus. Quod vero quidam respondent, ex D. Th. q. 26. de verit. art. 10. hæc contraria, si per se inint subiecto, inter se repugnare, non vero si unum per se, aliud per accidens inquit, hoc, inquam, non satisfacit, gaudium enim per se dicitur inesse voluntati Christi, ab iis, qui ita respondent. Interrogo ergo, cur tristitia dicatur inesse per accidens. Si forte, quia non inest ipsi voluntati in se ipsa, sed tantum in appetitu, hoc est falsum, & contrarium est satis demonstratum: si vero dicatur per accidens inesse, quia ex passione corporis oriebatur, non est verum de omni tristitia, ut vidimus, neque etiam si ita esset, quidquam ad rem pertineret: quia repugnantia inter formas contrarias non provenit ex causis, unde illæ oriuntur, sed consistit in ipsa formali inhærentia respectu ejusdem subiecti. Ut, licet aqua sit aliquo modo per se frigida, nihilominus repugnat, ut simul sit calida, etiam ex accidenti: sic ergo nihil refert, quod tristitia ex corpore, vel ex quacumque alia causa extrinseca oriatur, si formalem repugnantiam, & oppositionem habet cum ipso gaudio.

Aliter dici posset, actus animæ contrarios, qui ita versantur circa idem indivisibile objectum, ut unus destruat formale, & proprium objectum alterius, non posse simul esse in eodem subiecto: ut mihi quidem videtur de assensu & dissensu ejusdem propositionis, vel amore & odio ejusdem secundum idem. At vero quando actus non ita sunt contrarii, ut unus prorsus destruat objectum alterius, quamquam naturaliter interdum repugnent esse simul, non tamen implicabit contradictionem divina virtute conjungi in eadem potentia: hoc autem modo videtur contigisse in gaudio & tristitia Christi, non enim versata sunt circa idem, neque secundum eandem rationem, ut per se satis constat.

Aliter dici potest (& fortasse res est eadem, quamvis diversis verbis explicata) gaudium & tristitiam secundum rationes suas genericas, & modum, quo versantur circa ob-

Respon. 1.

Confutatur.

Quæ major incognibilis sit inter actus vitales contrarios, quam inter contrarios.

Respon. 3.

Confutatur.

Respon. 4.

Gaudium & tristitia, nisi circa idem omnino versentur, proprie contraria non sunt.



objecta sua, habere magnam diversitatem, & quandam repugnantiam, non tamen propriam contrarietatem, nisi in particulari versentur circa idem omnino, cuius simile videre licet in assensu & dissensu: nam in communi habent illam diversitatem, non tamen contrariam oppositionem, nisi sint ejusdem de eodem: quo fit, ut interdum ex assensu unius propositionis oriatur dissensus alterius, & simili modo ex gaudio de divino honore oriri potest tristitia de divina offensione. Sic ergo gaudium & tristitia Christi non erant actus vere contrarii, quia versabantur circa diversa objecta: gaudebat enim de bonitate divina, & sua beatitudine, tristabatur autem de peccatis hominum, & de morte sua. Quam solutionem attingit D. Th. in q. disputata de passionibus animæ, art. 10. ad 7.

**Object. 3.** Solum video objici posse, quia Christus per visionem beatam videbat in Verbo mortem suam; ergo per perceptionem beatam de illa gaudebat: sed de illa eadem tristabatur; ergo habebat simul gaudium, & tristitiam ejusdem objecti, atque adeo proprie contraria. Et confirmatur, quia alias nullum fuisset miraculum, tantam tristitiam conjunctam fuisse cum illo gaudio, neque Beati fierent ex vi illius gaudii naturaliter incapaces omnis tristitiæ. **Respons.** Ad argumentum respondetur primo, negando primam consequentiam, quia non est necesse, ut Beatus, qui necessario fruitur Deo ipso, necessario etiam gaudeat de omnibus, quæ in Deo videt, quia illa non representantur ut summum bonum, sicut ipse Deus: sicut etiam, licet necessario amet Deum, non tamen proximum, & cætera omnia, quæ in Deo videt. Secundo respondetur aliter Christum gavissimum fuisse de morte sua, & aliter de ea tristitiam habuisse; tristitia enim erat de morte, ut est malum naturæ, de quo malo Christus, ut sic, non gaudebat, sed de fructu & utilitate, quam mors sua nobis erat allatura, & de ipsa morte, ut erat medium ad hujusmodi finem: & ita actus illi non erant omnino contrarii, quia non erant de eodem secundum idem. Ad confirmationem negatur sequela: tum, quia licet gaudium & tristitia in communi sumpta, non sint perfecte contraria, tamen propter diversum modum tendendi in objectum, si gaudium circa unum objectum sit perfectissimum, & intensissimum, non admittit secum ullam tristitiam, etiam circa aliud objectum, ut partim etiam experientia notum est: tum etiam quia visio & fruitio beata, quæ natura sua constituunt animam in ultimo suæ perfectionis statu, ex natura sua excludunt omnem causam tristitiæ, fuit igitur illud miraculum, speciali dispensatione in Christo factum propter nostram redemptionem.

## SECTIO IV.

*Utrum voluntates Christi interdum fuerint inter se contrarie, vel semper conformes.*

**S**uppositis distinctionibus supra positis de actu efficaci, & inefficaci voluntatis, & de diversis modis, quibus una voluntas potest alteri esse conformis, vel difformis, resolutio hujus questionis facilis est, ac fere sine controversia.

Dico enim primo, actum efficacem voluntatis Christi semper fuisse conformem divinæ voluntati omni modo, scilicet, in objecto formali & materiali. Hæc est communis sententia Theologorum, D. Th. hic, & supra q. 13. art. 4. infra q. 21. art. 4. aliorum in 3. d. 15. Bonaven. art. 2. q. 2. Mai. q. 1. concl. 4. Dur. q. 2. Gabr. dist. 17. q. 1. concl. 3. & 4. Palud. Capreol. & aliorum. Cajet. locis citatis, Ferrar. 4. lib. contra gen. c. 37. & in aliquo sensu est conclusio de fide, scilicet, quatenus Christus semper voluit efficaciter quicquid Deus voluit ipsum velle, & prout Deus voluit, ut aperte colligitur ex Joan. 4. *Mens cibis est, ut faciam voluntatem ejus, qui misit me*, & cap. 5. 6. & 8. *Non quero voluntatem meam, sed ejus qui misit me*, & ad Heb. 10. & Ps. 36. *In capite libri scriptum est de me, ut faciam voluntatem tuam, Deus meus, volui*: quamquam enim hæc præsertim intelligantur, & exponi possint de voluntate signi, seu præceptiva, tamen generaliter etiam intelligenda sunt de quacunque absoluta voluntate Dei: tum, quia verba Scripturæ generalia sunt: tum etiam, quia ita intelliguntur a Conciliis & sanctis Patribus veritatem hanc definientibus, & docentibus: ut patet ex VI. Synod. act. 4. in epist. Agath. ubi plura refert Sanctorum testimonia, & act. 11. in epist. Sophron. act. 17. in definitione fidei, Concil. Later. sub Mart. contul. 5. c. 16. & ex

Cyrl. lib. 2. in Joan. 2. 146. & lib. 4. c. 1. ubi id optime declarat, & Damasc. lib. 2. de Fid. c. 22. circa fin. & lib. 3. c. 14. 17. & 18. Chrysost. homil. 47. in Joan. Hieron. in id. Matth. 26. *Fiat voluntas tua*, & August. super Joan. locis citatis, & q. 77. in novum Testamentum. Denique, quia si Christi anima aliud efficaciter vellet, quam Deus vellet, ipsum velle esset propria contrarietas & repugnantia inter illas voluntates, quæ est magna imperfectio; unde in Christo locum habere non potuit. Et confirmatur, quia Beati semper hoc modo habent voluntatem conformem divinæ voluntati; ergo multo magis Christus, cui nota erat in omnibus divina voluntas, & ideo repugnare illi non poterat. Et ex his ulterius colligitur, semper humanam Christi voluntatem in hoc actu efficaci fuisse conformem divinæ ex parte objecti, atque adeo non potuisse actu efficaci nolle, quod Deus volebat, neque velle, quod Deus nolebat, quia hæc etiam esset contrarietas voluntatum, quæ est magna imperfectio Christo repugnans. Quapropter omnis hæc conformitas cum divina voluntate connaturalis fuit Christo ratione unionis. Secundo, quia Deus vult, ut humana voluntas non opponatur hoc modo divinæ, præsertim quando homini constat de divina voluntate, ut Christo constabat. Tertio, quia supposita hac scientia animæ Christi, qua sciebat omnem divinam voluntatem beneplaciti seu consequentem, impossibile erat, aliud efficaciter velle: quia, facta illa suppositione, objectum representabatur ut impossibile, unde illa voluntas non solum esset otiosa, & imprudens, sed (ut existimo) etiam fuit impossibilis, & ideo neque beati possunt habere talem actum, quando illis constat de divina voluntate.

Quæres, an hoc ita verum sit, ut sit certum, & an contrarium implicet contradictionem. Scotus enim dist. 15. q. unic. ante solutionem argument. & Gabr. conclus. 9. opinionem referunt asserentem potuisse Christum per voluntatem humanam efficaciter velle, quod Deus absolute nolebat, & licet non approbent, putant tamen esse probabilem & possibilem, quia poterat Christi anima considerare mortem ut incommoda naturæ, præcise, & abstrahendo ab omnibus aliis rationibus, & ut sic, efficaciter eam nolle, etiam si Deus eam vellet. Respondetur tamen, de absoluta Dei potentia non repugnasse humanitatem assumptam carere scientia beata, vel infusa, quam modo habet, atque adeo non scire in singulis rebus & objectis, quid de illis Deus efficaciter velit: & tunc recte poterat per voluntatem humanam actu efficaci ex parte sua intendere aliquod bonum & honestum, ut, v. g. orare vel aliud simile, quamvis fortasse absolute esset definitum a Deo, ne id fieret. Cujus ratio est, quia hic modus operandi, supposita illa imperfectio ignorantia, seu carentia scientiæ, est bonus & honestus, neque involvit imperfectioem aliquam, quæ Christo repugnet etiam de absoluta Dei potentia. Confirmatur, nam angeli beati aliquando intendunt aliquid, & quantum in se est, conantur ut fiat aliquid, quod Deus statuit ne fiat, quia non semper de singulis rebus cognoscunt quid Deus præfinierit, ut ex Danielis 10. constat juxta expositionem magis receptam, quam recte ibi tractat Pereira, & lib. 12. ex D. Th. 1. p. q. 113. art. 7. & aliis: ergo ex prædicta hypothese non repugnat Christo de potentia absoluta similis operatio. Dices, Christo propter unionem deberi, quod voluntas ejus humana ita gubernetur a divina, ut etiam si non agnoscat per humanitatem, quid Deus in aliquo negotio voluerit, nihilominus in re semper velit efficaciter id, quod Deus voluit: nam hæc conformitas non solum ex præscientia, sed etiam ex intrinseco regimine est magna perfectio. Respondeo, potuisse quidem ita fieri, esseque satis consentaneum unioni, & dignitati humanitatis assumptæ, non tamen esse ita necessarium, quin de potentia absoluta fieri aliud potuerit, ut dictum est, quia nullam repugnantiam involvit, nec imperfectioem, aut indecentiam aliquam divinæ bonitati, ac voluntati repugnantem. At vero, supposita scientia voluntatis divinæ, quam anima Christi habuit, impossibile fuit habere actum contrarium: quis enim potest actu efficaci conari contra absolutam Dei voluntatem sibi cognitam? aut quis cordatus & prudens id faceret, quamvis posset? Unde hic accommodari possunt verba illa Joan. 5. *Filius a se non potest facere quicquam, nisi quod viderit Patrem facientem*, ut Cyril. exponit lib. 2. c. 135. & Chrysost. hom.

Objectio.

Respons.

Quæ ratione potuerit Christus habere actum efficacem, non conformem divinæ voluntati.



hom. 37. Neque contra hoc urget ratio Scoti, quia licet anima Christi per aliquam inferiorem scientiam potuerit non semper actu considerare omnem rationem volendi, vel nolendi mortem, neque omnem divinam voluntatem: tamen simpliciter semper hæc omnia consideravit per aliquam scientiam, & ideo nunquam potuit in eodem intellectu habere iudicium prudens, quo moveret voluntatem ad talem actum efficacem & absolutum: quia iudicium prudentiæ debet esse connexum cum perfecta scientia, & consideratione intellectus, & ideo semper versatur circa id, quod pensatis omnibus est possibile, & expediens. Quocirca ex illa præcisa consideratione mortis per inferiorem scientiam solum sequi poterat actus voluntatis inefficax, ut recte D. Th. hic docet, & infra q. 21. art. 4. & Cajet. his locis, Dur. d. 15. q. 2. de quo jam dicemus.

Dico secundo. Per actum inefficacem interdum voluit humana Christi voluntas, quod absolute & simpliciter Deus nolebat, semper tamen huiusmodi actus erat conformis divinæ voluntati, tamquam principio, & regulæ, & ideo simpliciter illæ voluntates nunquam fuerunt contrariæ. Tota hæc conclusio est certa & communis Theologorum in 3. dist. 17. Ubi Richard. & Bonavent. art. 1. q. 3. Alenf. 3. p. q. 15. memb. 1. a. 2. & colligitur ex omnibus Conciliis, & Sanctis citatis in priori assertionem, & eam declarat optime August. lib. 3. cont. Maximin. c. 20. Et prima quidem pars conclusionis de diversitate in objecto materiali satis constat ex illis verbis sæpe citatis: *Non sicut ego volo, sed sicut tu*, & ex dictis supra de his actibus inefficacibus. Secunda vero pars de formali, seu affectiva concordia, facile etiam patet, quia etiam isti actus inefficaces, erant in suo genere honesti & boni: unde divina voluntas volebat, ut humana illos efficeret, & ipsa humana voluntas ex perfecta ratione & deliberatione illos in se admittebat, ut in hoc etiam divinæ voluntati obsequeretur: & ita non solum in hoc erat conformitas inter divinam & humanam voluntatem, sed etiam inter inferiorem & superiorem partem ejusdem humanæ voluntatis. Et hinc facile etiam ostenditur ultima pars: & excluditur contrarietas inter voluntates Christi: nam hæc esse non potest, ubi in ratione volendi est consensus voluntatum, neque ubi una voluntas nihil vult, nisi quod alia vult ipsam velle. Ac denique, quia contrarietas saltem requirit, ut quod alteri sub aliqua ratione placet, sub eadem alteri displiceat, vel illud idem, quod una voluntas efficaciter vult, altera absolute nolit, quia, nisi adsit hæc repugnantia, voluntates non se impediunt, neque una alteram excludit, quod est de ratione contrariorum: ostensum autem est, non fuisse in Christo actus hoc modo oppositos seu repugnantes. Quæ ratio etiam procedit in actibus ejusdem voluntatis humanæ operantis per modum rationis vel naturæ, quia etiam in illis non fuit vera contrarietas propter eandem rationem: Christus enim simpliciter amabat mortem, v. g. ut in ipsa exequendam, fugiebat autem illam, non absolute ut exequendam, sed solum præcise consideratam ut incommodam naturæ, qui actus erat solum inefficax, & minime contrarius priori.

**Objec. 1.** Dices. Hi actus, *volo & nollem*, quamvis non sint simpliciter contrarii, tamen, ut versantur circa idem materiale objectum, sunt aliquo modo repugnantes, & unus potest alium saltem ex parte impedire seu retardare; ergo fuit in Christo saltem aliqualis repugnantia actuum seu voluntatum. **Respons.** Respondetur, proprie nullam fuisse, huiusmodi enim actus tunc habent illum modum repugnantiam, quando alter eorum est præter rationem & deliberationem voluntatis, quando vero ipsemet actus inefficax est ab ipsamet voluntate præordinatus & deliberatus, non potest ipsamet voluntatem retardare vel impedire, ex cuius deliberato consensu oritur, ut in simili dictum est supra q. 15. de actibus appetitus disputando: præsertim, quia cum omnes isti actus essent ex divina ordinatione, ut dictum est, & omnes essent honestissimi, nulla inter eos poterat esse propria contrarietas, aut repugnantia.

#### SECTIO V.

*Utrum humana Christi voluntas semper fuerit impleta.*

**H**oc dubium supra huc remissimus q. 13. art. 4. quoniam ejus resolutio ex iis, quæ hic dicta sunt de actu efficaci & inefficaci voluntatis Christi, pendebat.

Dicendum est enim primo, quidquid Christus Dominus sua humana voluntate absolute, & efficaciter voluit, effectum esse: atque hoc sensu Christi voluntatem semper fuisse impletam. Est res certa, & colligitur ex supra citatis Conciliis, & Patribus, præsertim ex August. q. 77. novi Testam. & Gregor. lib. 19. Moral. c. 14. & constat etiam ex dictis supra de potentia animæ Christi q. 13. pertinuit enim hæc potestas ad Christi Domini perfectionem: cum enim voluntas humana Christi esset voluntas Dei, debuit semper impleri. Et confirmatur primo, nam illa voluntas in suo efficaci actu semper erat conformis voluntati beneplaciti Dei; ergo sicut hæc semper impletur, ita & illa. Confirmatur secundo, quia Christi anima præsciebat omnia futura; ergo non poterat efficaciter velle, nisi quod sciebat revera futurum esse. Denique Christus nihil, nisi prudentissime, & honestissime voluit; ergo tantum efficaciter voluit, quod perficere potuit.

Sed dicunt aliqui, hoc esse verum in his, quæ volebat per se ipsum implenda, non vero in his, quæ voluit fieri per alios, quod sentit Cajet. supra q. 13. art. 4. fundat in D. Th. ibi. Sed conclusio posita simpliciter vera est, neque absolute oportet aliquam exceptionem facere, ut rationes factæ probant: nam, licet ultima solum procedat de his, quæ per se ipsum erat facturum, aliæ tamen generaliter procedunt. Fuit enim impossibile, vel saltem fuisset imprudens, & otiosum velle efficaciter ab alio fieri, quod ipse sciebat efficiendum non fuisse: aliàs pari ratione posset velle efficaciter, aliquos salvari, quos sciebat non esse salvandos, & similia, quomodo autem ille locus D. Thom. & Cajetani exponendus sit, statim dicam.

Advertenda enim est differentia, quæ in hac efficacitate est inter voluntatem humanam & divinam Christi: nam voluntas divina per se, & virtute propria potens est ad perficienda omnia, quæ absolute vult, sive velit per se, sive per alios illa efficere, quia est omnipotens, & ita propria virtute potest, vel facere, quæ per se ipsam vult fieri, vel immutare aliorum voluntates, per quos aliquid fieri decrevit, vel denique uti quibus voluerit instrumentis ad ea perficienda, quæ efficaciter vult. At vero humana voluntas Christi per se non est ita potens, semper autem impletur, vel ex perfecto & prudenti modo volendi, scilicet, quia semper est conformis divinæ voluntati; vel quia participat aliquo modo omnipotentiam Dei, tanquam instrumentum Divinitatis. Dices; ergo non magis absoluta voluntas Christi semper impletur, quam voluntas Beatorum, quæ etiam est conformis divinæ voluntati & ideo, si aliquid vult efficaciter, infallibiliter fit, quia illud idem vult Deus voluntate beneplaciti: quo modo dixit Ansel. li. de Simil. c. 52. quælibet Beatum posse transferre montem ab uno loco in alium, si efficaciter velit, & c. 68. dicit posse facere, quidquid vult, *quoniam ipsum omnipotentem*, inquit, *sua voluntati concordantem habet*.

**Respons.** Respondetur, esse quidem inter Christum & alios Beatos quandam proportionalem æqualitatem, seu similitudinem potius: non tamen est inter eos æqualitas simpliciter. Primo quidem, quia omnis Dei voluntas beneplaciti, soli animæ Christi semper nota, & ideo simpliciter nunquam nititur contra hanc Dei voluntatem: at vero alii Beati non semper agnoscunt, quid Deus absolute velit fieri, & ideo interdum, quantum in ipsis est, cupiunt & intendunt aliquid fieri, quod revera Deus non vult voluntate beneplaciti, ut de angelis Beatis colligitur ex Daniel. 10. tum etiam, quia voluntas Christi est organum Divinitatis ad exequenda opera mirabilia, quod non habet voluntas aliorum Beatorum, & ideo multa potest voluntas Christi absolute, & efficaciter velle per se ipsam efficere, quæ alii Beati non possunt.

Dico secundo. Voluntas, seu desiderium inefficax Christi, non semper habuit effectum, seu impletum fuit. Hoc etiam certum est ex Matt. 26. *Transseat a me calix iste*, & Matth. 9. & Marc. 7. ubi voluit latere, & non potuit. Et ratio ex ipsis terminis constat, quia, si actus esset inefficax, non est, cur semper habeat effectum: imo tunc tantum per huiusmodi actum Christus aliquid volebat, quando simpliciter nolebat illud fieri, sed potius contrarium.

Sed occurrit hoc loco difficultas ex Agath. Pap. in ep. decr. quæ refertur in VI. Synod. act. 4. ubi differentiam constituit inter humanam & Divinam Christi voluntatem, quia humana aliquid interdum voluit, quod non fuit factum, ut patet in citatis locis Mat. 9. & Marc. 7. at vero divina

**Actus inefficax Christi quomodo conformis, & non conformis divinæ voluntati esse potueris.**

**Objec. 1.**

**Respons.**

**Aliter humana Christi voluntas, aliter divina semper impleta.**

**Objec. 2.**

**Respons.**



divina nihil vult, quod omnino non fiat, quam etiam indicat Damasc. lib. 3. c. 14. post medium. Quæ differentia nulla esse videtur, si sermo sit de voluntate inefficaci: quia sicut in humana voluntate hæc non semper impletur, ita nec in Divina, quia voluntas signi, vel antecedens Dei, non semper habet effectum; videtur ergo constitui hæc differentia in actu efficaci voluntatis: unde fit ex sententia Agat. aliquando humanam voluntatem Christi efficacem non esse impletam. Hæc difficultas videtur movisse Cajet. supra q. 13. a. 4. ut diceret, aliquando non fuisse impletam voluntatem efficacem Christi, quando erat de rebus efficiendis per alios. Sed non est intelligendum de voluntate efficaci simpliciter, per quam, omnibus prefatis, aliquis absolute vult aliquid ab alijs fieri: nam hic actus in Christo esse non potuit circa effectum, quem sciebat non esse efficiendum, ut supra late probatum est.

Respons.

Intelligi ergo debet de voluntate aliquo modo efficaci, scilicet, quantum erat ex potestate, & viribus naturalibus humanitatis: potuit enim Christus per voluntatem humanam, quantum in se erat, desiderare, ut aliquid fieret, & omnia media existentia in sua potestate naturali adhibere, ut id consequeretur, & nihilominus id non fieri; quia vires humanæ voluntatis ad id non sufficiebant, Et hoc fortasse modo voluit Christus latere, & non potuit, quia quidquid per voluntatem humanam ut sic facere poterat, ut lateret, id præstitit, & tamen id assequi non potuit. Et in hunc fortasse sensum dixit Aug. dicta q. 77. novi testamenti, non simpliciter voluisse Christum latere, sed voluisse, ne alii cum manifestarent, quod tamen dicit fuisse factum, quamvis effectus intentus, scilicet, ipsum latere, obtentus non fuerit. Clarius Damasc. lib. 3. de fide c. 17. dicit, voluntatem humanam Christi fuisse per unionem deificatam, non tamen amisisse suum naturalem motum seu actionem. Et subdit. *Quo factum est, ut, cum sui conspectum subducere vellet, per se id non potuerit, quod, nimirum, Deo Verbo perspicuum hoc fieri placuisset, in se inesse voluntatis humanæ imbecillitatem.* Et hoc sensu clara est differentia inter voluntatem divinam & humanam, quia voluntas divina, quidquid ex parte sua efficaciter vult, applicando omnia media, quæ per se & suis viribus efficere potest, ineffabiliter fit, sive per se, sive per alios, illud sit efficiendum: at vero voluntas humana per se non habet hanc vim, præsertim in ijs, quæ pendent ex aliorum voluntatibus, quas ipsa per se, & suis naturalibus viribus efficaciter movere non potest. Alia differentia constitui posset, quia in voluntate humana reperitur proprius & formalis actus imperfectus seu inefficax, ratione cujus dicitur talis voluntas non semper impleri: in voluntate autem divina non reperitur huiusmodi actus proprie, & formaliter, sed tantum metaphorice. Sed hæc differentia, & incerta est, & ad illam examinandam & declarandam oporteret multa repetere ex ijs, quæ de voluntate divina traduntur 1. p. q. 19. & ideo illam omitto, non est enim præfenti loco necessaria.

### QUÆSTIO XIX.

De pertinentibus ad unitatem Christi quantum ad operationem, in quatuor articulos divisa.

**D**einde considerandum est, de unitate operationis Christi. Et circa hoc queruntur quatuor.

*Primo, utrum in Christo sit una operatio divinitatis & humanitatis, vel plures.*

*Secundo, utrum in Christo sint plures operationes secundum humanam naturam.*

*Tertio, utrum Christus secundum humanam operationem aliquid sibi meruerit.*

*Quarto, utrum per eam aliquid meruerit nobis.*

**H**oc modo proponendus est titulus hujus questionis, quamquam communiter habeatur de pertinentibus ad virtutem Christi. Denim Th. in his questionibus non agit de virtute, sed de unitate, ut evidenter constat ex q. 17. in capite questionis, ubi ordinem harum questionum distincte explicat.

### ARTICULUS I.

*Utrum in Christo sit una tantum operatio divinitatis & humanitatis.*

**A**d primum sic proceditur. Videtur, quod in Christo sit una tantum operatio divinitatis & humanitatis. Dicit enim Dion. \* in 2. c. de Di. no. Discreta autem

est benignissima circa nos Dei operatio per hoc, quod secundum nos ex nobis integre, vereque humanatum est Verbum, quod est supra substantiam, & operari & pati quæcumque humana ejus divinaque operationi congruunt. Ubi unam operationem nominat humanam & divinam, quæ in Græco dicitur Theandrica, id est, Deo virilis. Videtur igitur esse operatio composita in Christo.

**2** Præterea. Principalis agentis & instrumenti est una sola operatio. Sed humana natura in Christo fuit instrumentum divina, ut supra dictum est. \* Ergo eadem est divina & humane nature in Christo operatio.

**3** Præterea. Cum in Christo sint due nature in una hypostasi vel persona, necessarium est unum & idem esse, quod pertinet ad hypostasim vel personam. Sed operatio pertinet ad hypostasim vel personam, nihil enim operatur, nisi suppositum subsistens: unde secundum Philosophum, actus sunt singularium. \* ergo in Christo est una & eadem operatio divinitatis & humanitatis.

**4** Præterea. Sicut esse est hypostasis subsistens, ita etiam operari. Sed propter unitatem hypostasis, est in Christo unum esse, ut supra dictum est. \* Ergo etiam propter eandem unitatem, est in Christo una operatio.

**5** Præterea. Ubi est unum operatum, ibi est una operatio. Sed idem operatum erat divinitatis & humanitatis: sicut sanatio leprosi, vel suscitatio mortui. Ergo videtur, quod in Christo sit una tantum operatio divinitatis & humanitatis.

Sed contra est, quod Ambros. \* distinct. 2. lib. ad Gratianum Imperatorem. Quomodo eadem operatio diversa est potestatis, nunquid sic potest minor, quemadmodum major, operari, aut una operatio potest esse, ubi diversa substantia est?

**a** Respondeo dicendum, quod supra dicti heretici, qui posuerunt in Christo unam voluntatem, posuerunt etiam in Christo unam operationem. Et, ut eorum opinio erroris melius intelligatur, considerandum est, quod ubicumque sunt plura agentia ordinata, inferius movetur a superiori: sicut in homine corpus movetur ab anima, & inferiores vires a ratione. Sic igitur actiones & motus inferioris principii sunt magis operata quadam, quam operationes, id autem, quod pertinet ad supremum principium, est proprie operatio. Puta, si dicamus in homine, quod ambulare, quod est pedum, & palpare, quod est manuum, sunt quadam hominis operata, quorum unum operatur anima per pedes, aliud per manus. Et quia est eadem anima operans per utrumque, ex parte ipsius operantis, quod est primum principium movens, est una & indifferens operatio: ex parte autem ipsorum operatorum differentia invenitur. Sicut autem in homine puro corpus movetur ab anima, & appetitus sensitivus a rationali, ita in Domino Jesu Christo humana natura movebatur & regebatur a divina. Et ideo dicebant, quod eadem est operatio & indifferens ex parte ipsius divinitatis operantis: sunt tamen diversa operata, in quantum, scilicet, divinitas Christi aliud agebat per se ipsam, sicut quod portabat omnia verbo virtutis sue; aliud autem per humanam naturam, sicut quod corporaliter ambulabat. Unde in VI. \* Syn. inducuntur verba Severi heretici, sic dicentis: Ea, quæ agebantur & operabantur ab uno Christo, multum differunt. Quadam enim sunt Deo decibilia, quadam humana: veluti corporaliter vadere super terram, profecto humanum est: curibus vero vexatis, & ambulare super terram penitus non valentibus, sanum gressum donare, Deo decibile est. Sed unus, scilicet, incarnatum Verbum, hoc & illud operatus est: & nequaquam hoc quidem huius, hoc vero huius est natura: neque eo quod diversa sunt operamenta, ideo duas operatrices naturas atque formas iuste deferimus. Sed in hoc decipiebantur, quia actio ejus, quod movetur ab altero, est duplex. Una quidem, quam habet secundum propriam formam, alia autem, quam habet, secundum quod movetur ab alio. Sicut securis operatio secundum propriam formam est incisio: secundum autem quod movetur ab artifice, operatio ejus est facere scammum. Operatio igitur, quæ est alicujus secundum suam formam, est propria ejus: nec pertinet ad moventem, nisi secundum quod utitur huiusmodi re ad suam operationem. Sicut calefacere est propria operatio ignis, non autem fabri, nisi quatenus utitur igne ad calefaciendum ferrum. Sed illa operatio, quæ est rei, solum secundum quod movetur ab alio, non est alia præter operationem moventis ipsius: sicut facere

q. 1. a. 2 q.  
2. & d. 18  
a. 1. & 4.  
cont. 36.  
& 1. 2. q.  
2. a. 1. ad  
2. & 6. &  
unio 2. 1.  
16. & a. 5.  
& opulc.  
3. c. 219 c.  
inter si-  
nem &  
medium  
ca. q. 17.  
art. 2. & 3.

lib. 1. Me-  
tap. cap. 1.  
ante meda-  
tom. 31.

q. 17. art. 2.

Lib. 2. de  
fide c. 4 in  
2. p. p. a  
c. 1. c.  
tom. 2.

Quæst. \*  
negat.

Constat.  
3.



facere scammum, non est seorsum operatio securis ab operatione artificis, sed securis participat instrumentaliter operationem artificis. Et ideo ubicumque movens & motum habent diversas formas seu virtutes operativas, ibi oportet, quod sit alia operatio moventis, & alia operatio propria moti: licet motum participet operationem moventis, & movens utatur operatione moti, & sic utrumque agat cum communione alterius. Sic igitur in Christo humana natura habet propriam formam & virtutem, per quam operatur: & similiter Divina. Unde humana natura habet propriam operationem distinctam ab operatione divina, & e converso. Et tamen divina natura utitur operatione naturæ humanæ, sicut operatione sui instrumenti: & similiter humana natura participat operationem divinæ naturæ, sicut instrumentum participat operationem principalis agentis. Et hoc est, quod dicit Leo Papa in

Epist. 10. cap. 4. paulo ante med. Incipit. Ingressus ergo.

Epistola ad Flavianum: \* Agit utraque forma (scilicet, tam natura divina, quam humana in Christo) cum alterius communione, quod proprium est: Verbo scilicet, operante, quod Verbi est, & carne exequenti, quod carnis est. Si vero esset una tantum operatio Divinitatis & humanitatis in Christo, oporteret dicere, vel quod humana natura non haberet propriam formam & virtutem (de divina enim hoc dici est impossibile) ex quo sequeretur, quod in Christo esset tantum divina operatio: vel oporteret dicere, quod ex divina virtute & humana esset constata in Christo una virtus, quorum utrumque est impossibile. Nam per primum horum, ponitur natura humana in Christo esse imperfecta: per secundum vero ponitur confusio naturarum. Et ideo rationabiliter in VI. Synodo\* hæc opinio est condemnata, in cuius determinatione dicitur, Dnas naturales operationes indivise, inconvertibiliter, inconfuse, inseparabiliter, in eodem Domino Jesu Christo vero Deo nostro glorificamus, hoc est, Divinam operationem, & humanam operationem.

In VI. Syn. gener. act. 4. & 5. & 6.

Ad primum ergo dicendum, quod Dionys. \* ponit in Christo operationem theandricam, id est, Divinam virilem, vel Divinam humanam, non per aliquam confusio- nem operationum seu virtutum utriusque naturæ, sed per hoc, quod Divina operatio ejus utitur humana, & humana ejus operatio participat virtutem divine operationis. Unde sicut dicit in quadam Epist. ad Cajum. \* Super hominem operabatur ea, quæ sunt hominis: quod monstrat Virgo supernaturaliter concipiens, & aqua instabilis, terrenorum pedum sustinens gravitatem. Manifestum est enim, quod concipi est humana naturæ, similiter & ambulare, sed utrumque fuit in Christo supernaturaliter. Et similiter Divina operabatur humanis: sicut cum sanavis leprosum tangendo. Unde in eadem Epist. subdit: \* Non secundum Deum divinæ faciens, non humana secundum hominem. sed Deo homine facta, nova quadam Dei & hominis operatione. Quod autem intellexerit duas esse operationes in Christo, unam Divinæ naturæ, aliam autem humanæ, patet ex his, quæ dicit in 2. cap. de Divin. \* nominibus, ubi dicit, quod his, quæ pertinent ad humanam ejus operationem, Pater & Spiritus sanctus nulla ratione communicant: nisi quis dixerit secundum benignissimam & misericordem voluntatem: in quantum, scilicet, Pater & Spiritus sanctus ex sua misericordia voluerunt, Christum agere & pati humana. Addit autem & omnem sublimissimam & ineffabilem Dei operationem, quam homo pro nobis factus adimplevit, immutabilis profecto Deus, & Dei Verbum. Sic igitur patet, quod alia est operatio humana, in qua Pater & Spiritus sanctus non communicant, nisi secundum acceptionem misericordie sue: & alia est ejus operatio, in quantum est Dei Verbum, in qua communicant Pater, & Spiritus sanctus.

Loco citato in argumentis.

In epist. 4. ad Cajum, circa med.

In prædicatione epistolæ in fine.

Cap. 2. in eadem sententia. per finem. partis 1.

Ad secundum dicendum, quod instrumentum dicitur aliquid agere, ex eo, quod movetur a principali agente, quod tamen præter hoc potest habere propriam operationem secundum suam formam, ut de igne dictum est\*. Sic igitur actio instrumenti in quantum est instrumentum, non est alia ab actione principalis agentis, potest tamen habere aliam operationem, prout est res quedam. Sic igitur operatio, quæ est humane naturæ in Christo, in quantum est instrumentum Divinitatis, non est alia ab operatione Divinitatis: non enim est alia salvatio, quæ salvat humanitas Christi, & Divinitas ejus. Habet tamen humana natura in Christo, in quantum est natura quedam, quandam propriam operationem præter divinam, ut dictum est\*.

In corp. art.

In corp. art.

Ad tertium dicendum, quod operari est hypostasis subsistentis, sed secundum formam & naturam, a qua operatio speciem recipit. Et ideo a diversitate formarum seu naturarum est diversa species operationum: sed ab unitate hypostasis est unitas secundum numerum, quantum ad operationem speciei. Sicut ignis habet duas operationes specie differentes scilicet, illuminare & calefacere, secundum differentiam lucis & caloris, & tamen est una numero illuminatio ignis semel illuminantis. Et similiter in Christo oportet, quod sint due operationes specie differentes secundum ejus duas naturas, qualibet tamen operationum est una numero in Christo semel facta, sicut una ambulatio, & una sanatio.

Ad quartum dicendum, quod esse & operari est persone a natura, aliter tamen & aliter. Nam esse pertinet ad ipsam constitutionem persone: & sic quantum ad hoc se habet in ratione termini. Et ideo unitas persone requirit unitatem ipsius esse completi & personalis. Sed operatio est quidam effectus persone secundum aliquam formam vel naturam: unde pluralitas operationum non præjudicat unitati personali.

Ad quintum dicendum, quod aliud est proprium operatum operationis divine & operationis humane in Christo: sicut operatum proprium divine operationis est sanatio leprosi, operatum autem proprium humane naturæ est ejus contactus. Concurrent autem ambæ operationes ad unum operatum, secundum quod una natura agit cum communione alterius, ut dictum est\*.

In corp. art.

#### COMMENTARIUS.

IN explicando sensu hujus tituli merito Cajetanus immoratur, quoniam, si ille intelligatur, & res tota facillime intelligetur, & hæresis tribuentium Christo unam tantum operationem, æqua facilitate refellitur. Tribus ergo modis intelligi potest, esse in Christo tantum unam operationem, primo substantialiter, seu realiter & physice: & hoc sensu nullus potuit in Christo ponere unam operationem, nisi qui in illo ponit unam tantum naturam, nam, admissa distinctione naturarum, nullus negare potest, quin locutio, intellectio, & aliæ similes operationes, quæ per animam, vel corpus Christi efficiebantur, sint distinctæ actiones physice & realiter. Secundo modo intelligi potest esse in Christo unam tantum actionem divinitatis, & humanitatis, non simpliciter & absolute quoad omnes actiones, sed tantum quoad actiones miraculosas, in quibus humanitas operabatur ut instrumentum Verbi: & in hoc sensu explicatur ab aliquibus dicta hæresis, & optime refellitur a D. Th. Quia, licet actio instrumenti, quæ immediate attingit effectum principalis agentis, sit una & eadem cum actione ipsius agentis: tamen actio propria ipsius instrumenti distincta est ab actione principalis agentis: qualis erat in humanitate Christi tactus carnis suæ, vel locutio, aut aliæ similes. Quæ doctrina vera est, sed non exultimo, hunc fuisse sensum illorum hæreticorum, quia illi non tantum in actionibus miraculosis, sed simpliciter, & absolute negabant in Christo duas operationes, & propterea simpliciter damnantur in Conciliis; si enim solum agerent de illo genere actionis miraculose, cum non sit certum, actionem propriam instrumenti necessario antecedere actionem principalis agentis, non fuissent fortasse propter solam illam causam ut hæretici damnandi, nisi quatenus incidere potest in tertium sensum jam explicandum. Tertio ergo modo dici potest, tantum esse unam operationem Divinitatis, & humanitatis Christi in genere actus moralis, & liberi, quia, videlicet, tantum est in Christo una libertas, & una voluntas, in cuius potestate est, reliquas omnes potentias ad operandum applicare. Et hoc sensu exultant aliqui, hæreticos Monothelitas dixisse, tantum esse in Christo unam operationem, & unam voluntatem: sed hoc incertum est, tamen etiam in hoc sensu est apertus error negare in actionibus Christi non fuisse aliam actionem Divinitatis, ac humanitatis, quia revera Christus per proprium actum voluntatis humane liberum, & in sua potestate exilientem, volebat & peraciebat sua opera. Et hoc sensu intelligit, quod D. Th. hic ait, humanam naturam Christi habuisse propriam formam & virtutem, per quam operabatur, scilicet, sua sponte & libertate operando. Et sic est facilis discursus D. Th. Et omnia, quæ in solutionibus argumentorum dicit, quæ magna ex parte exposita etiam sunt in iis, quæ,

Una operatio, quod sensu ab hæreticis Christo tribuitur.



quæ circa q. 17. & 18. disputata sunt. Quapropter nec de re ipsa, nec de hac littera D. Th. plura dicenda supersunt.

## ARTICULUS II.

Utrum in Christo sint plures operationes humane.

**A**D secundum sic proceditur. Videtur, quod in Christo sint plures humane operationes. Christus enim, in quantum homo, communicat cum plantis in natura nutritiva, cum animalibus autem in natura sensitiva, cum Angelis vero in natura intellectiva, sicut & ceteri homines. Sed alia est operatio plantæ, in quantum est planta: & alia animalis, in quantum est animal. Ergo Christus, in quantum est homo, habet plures operationes.

2. Præterea. Potentiæ & habitus distinguuntur secundum actus. Sed in anima Christi fuerunt diversæ potentiæ & diversi habitus. Ergo & diversæ operationes.

3. Præterea. Instrumenta debent esse proportionata operationibus. Corpus autem humanum habet diversa membra differentia secundum formam. Ergo diversis operationibus debent esse accommodata. Sunt ergo in Christo diversæ operationes secundum humanam naturam.

**Li. 3. c. 14. ad princ. & c. 15.** Sed contra est, quod sicut Damasce\* dicit in 3. lib. operatio sequitur naturam. Sed in Christo est tantum una natura humana. Ergo in Christo fuit una tantum operatio humana.

a. Respondeo dicendum, quod quia homo est id, quod est secundum rationem, illa operatio dicitur esse simpliciter humana, quæ a ratione procedit per voluntatem, quæ est rationis appetitus. Si quæ autem operatio est in homine, quæ non procedit a ratione & voluntate, non est simpliciter operatio humana: sed convenit homini secundum aliquam partem humane nature. Quandoque quidem secundum ipsam naturam elementis corporalis, sicut ferri deorsum: quandoque vero secundum virtutem anime vegetabilis: sicut nutrire & augeri: quandoque vero secundum partem sensitivam, sicut videre & audire, imaginari & memorari, concupiscere & irasci. Inter quas operationes est differentia. Nam operationes anime sensitivæ sunt aliquantulum obediens rationi, & ideo sunt aliquantulum rationales & humane, in quantum, scilicet, obediunt rationi, ut patet per Philosophum in 1. Ethicorum\*. Operationes vero, quæ sequuntur animam vegetabilem, vel etiam naturam elementaris corporis, non subiaciuntur rationi, unde nullo modo sunt rationales, nec humane simpliciter, sed solum secundum partem humane nature. Dicitur autem supra\* quod, quando agens inferius agit per propriam formam, tunc est alia operatio inferioris agentis & superioris: quando vero agens inferius non agit, nisi secundum quod est motus a superiori agente, tunc est eadem operatio superioris agentis & inferioris. Sic igitur in quocumque homine puro alia est operatio elementaris corporis & anime vegetabilis ab operatione voluntatis, quæ est proprie humana. Et similiter etiam operatio anime sensitivæ, quantum ad id, quod non movetur a ratione, sed quantum ad id, quod movetur a ratione, est eadem operatio partis sensitivæ & rationalis. Ipsius autem anime rationalis est una operatio, si attendamus ad ipsum principium operationis, quod est ratio vel voluntas. Diversificatur autem secundum respectum ad diversa objecta, quam quidem diversitatem aliqui appellaverunt diversitatem operatorum magis, quam operationum, iudicantes de unitate operationis solum ex parte operativi principii. Sic enim nunc queritur de unitate vel pluralitate operationum in Christo. Sic igitur in quolibet puro homine est tantum una operatio, quæ proprie humana dicitur: præter quam tamen sunt in homine puro quedam aliæ operationes, quæ non sunt proprie humane, sicut dictum est\*. Sed in homine Iesu Christo nullus erat motus sensitivæ partis, qui non esset ordinatus a ratione. Ipsa etiam operationes naturales & corporales aliquantulum ad ejus voluntatem pertinebant, in quantum voluntatis ejus erat, ut caro ejus ageret & pateretur, quæ sunt sibi propria, ut dictum est supra\*. Et ideo multo magis est una operatio in Christo, quam in quocumque alio homine.

**Li. 1. Eth. c. 14. & c. 15.** **Art. p. 2c.** **In ista.** **Quæst. p. 2c. a. 5.** Ad primum ergo dicendum, quod operatio partis sensitivæ & etiam nutritivæ non est proprie humana: sicut dictum est\*. Et tamen in Christo hujusmodi operationes fuerunt magis humane, quam in aliis.

**In corp. art.** **Quæst. p. 2c. a. 5.** **In corp. art.** **De adibus beatificis.** **Objec. 1. de actio- nibus naturalibus.** **Objec. 2. de prima intellectu- tione.** **Responso:** **De adibus beatificis.** **Ad secundum dicendum, quod potentia & habitus diversificantur per comparisonem ad objecta. Et ideo diversitas operationum hoc modo respondet diversis potentiis & habitibus, sicut etiam respondet diversis objectis. Talem autem diversitatem operationum non intendimus excludere ab humanitate Christi, sicut nec eam, quæ est secundum aliud & aliud instrumentum: sed solum illam, quæ est secundum primum principium activum, ut dictum est\*. Unde patet etiam responsio ad tertium.**

## COMMENTARIUS.

**I**N hoc titulo, Una operatio, eodem sensu sumitur, quo in præcedenti, ut D. Thomas in corpore articuli expresse declarat: unde quod D. Thom. hic definit in Christo esse tantum unam operationem humanam, nihil aliud significat, quam secundum humanam naturam esse in Christo unum principium liberæ operationis, cui omnis actio subiecta & subordinata fuit. Quo fit, ut explicatis terminis nulla hic supersit nova quæstio, quæ ad rem pertineat: jam enim in superioribus disputatum est, esse in Christo Domino voluntatem humanam liberam, quod vero illa sit tantum una, ex principiis philosophicis, communibus aliis hominibus constat. Et colligi etiam potest ex Conciliis definientibus, in Christo esse duas voluntates, alteram divinam, alteram humanam: loquuntur enim de voluntatibus rationalibus & liberis: & ita constat ex parte principii fuisse in Christo unam humanam operationem. Potest autem hoc in duplici sensu intelligi. Primus est, omnem operationem humanam Christi fuisse hujusmodi ex habitudine seu subiectione ad unum & idem principium humane actionis & libertatis. Et hic sensus est clarus & sine ulla difficultate, hoc enim modo in quolibet homine est una operatio humana ex parte principii, non quia omnis actio hominis sit ab illo principio (sunt enim in homine multe actiones naturales, quæ humane proprie non dicuntur) sed quia omnis actio hominis, quæ humana est, habet eam rationem ex habitudine ad unum & idem principium. Secundus sensus est, omnem actionem Christi fuisse humanam, & ita in illo non fuisse aliam actionem proprie dictam præter unam operationem humanam: & hic sensus videtur esse a D. Thom. intentus.

Difficultatem autem nonnullam habet, quia videntur etiam in Christo fuisse actiones naturales, quæ non subiacent humane voluntati seu libertati. Sed hæc etiam difficultas facile potest ex iis, quæ in superioribus tractata sunt, expediri, nam de actionibus partis vegetativæ & aliis, quæ in nobis sunt mere naturales, jam supra q. 14. diximus, etiam in Christo fuisse naturales, considerata naturali complexione & constitutione corporis passibilis, neque fuisse subiectas imperio voluntatis, propriis naturalibus viribus operantis: nihilominus tamen potuisse ab eadem voluntate ut Verbi organo seu instrumento sustineri, & impediri: & hac ratione dixit hic D. Thom. illas actiones posse dici in Christo aliquo modo humanas. Similiter de actibus partis sentientis supra q. 15. ostensum est, semper fuisse in Christo ex deliberatione rationis, & consensu voluntatis liberæ: & idem paulo antea diximus de actibus ipsius voluntatis, sive operetur ut ratio, sive ut natura, sive actus sit efficax, sive inefficax, excepto solo amore beatifico, quem supra diximus esse necessarium.

Solum de prima intellectione quidam dubitant, quia cum illa necessario antecedit voluntatem etiam in Christo, non videtur esse per se actio humana, quia non cadit sub voluntatis motionem, seu electionem. Dicit vero potest in Christo non fuisse aliam primam intellecti- nem præter visionem beatam, qua supposita omnis alia intellectio, seu consideratio Christi, potuit esse ex motione, seu consensu voluntatis ejus, qui modus operandi perfectior est, & ideo Christo Domino tribuendus; & ideo non oportet in eo fuisse aliquam aliam intellecti- nem mere naturalem.

An vero ipsa visio beata, & amor ac fruitio, quæ illam consequuntur, dici possint actiones humane, quæstio fortasse est de modo loquendi: nam in re constat, in illis actibus consistere perfectissimum usum intellectus, & voluntatis humane, & illos actus esse perfecto modo voluntarios, & omnino proprios intellectualis nature, quod multi satis esse putant, ut actio dicatur humana, ut in prima Secundæ in principio disputatur. Quod vero ad li- berta-

In corp. art.

Una op-  
eratio hu-  
mana  
Christi  
duplici-  
ter intel-  
ligi po-  
test.

Omnis  
operatio hu-  
manitatis  
Christi  
aliquo  
modo fuit  
humana.

Objec. 1.  
de actio-  
nibus na-  
turalibus.

Objec. 2.  
de prima  
intellec-  
tione.  
Responso:

De adibus  
beatificis.



bertatem attinet, ego probabilius censeo, ut supra dixi, hos actus non magis esse liberos in anima Christi, quam in aliis Beatis, quia non oportuit illi communicari potestatem supernaturalem ad suspendendum illos. Et ideo si sola actio libera dicatur humana, dicendum est illos actus non computari inter actiones humanas Christi, sed esse veluti divinas quasdam seu supernaturales actiones, illi connaturales ratione unionis, nec D. Thom. de his actibus loquitur, sed de aliis inferioribus actionibus, ut evidenter patet ex litera, quæ ex iis, quæ dicta sunt, sufficienter manet exposta.

## ARTICULUS III.

*Utrum actio humana Christi potuerit esse sibi meritoria.*

**A**D tertium sic proceditur. Videtur, quod actio humana Christi non potuit ei esse meritoria. Christus enim ante mortem fuit comprehensor, sicut & modo est. Sed comprehensor non est mereri: charitas enim comprehensoris pertinet ad premium beatitudinis, cum secundum eam attendatur fruitio: unde non videtur esse principium merendi, cum non sit idem meritum & premium. Ergo Christus ante passionem non merebatur, sicut nec modo meretur.

2. Præterea. Nullus meretur id, quod est sibi debitum. Sed ex hoc, quod Christus est Filius Dei per naturam, debetur sibi hereditas æterna, quam alii homines per bona opera merentur. Non ergo Christus aliquid sibi mereri potuit, quia a principio fuit Filius Dei.

3. Præterea. Quicumque habet id, quod est principale, non proprie meretur id, quod ex illo habito sequitur. Sed Christus habuit gloriam animæ, ex qua secundum communem ordinem sequitur gloria corporis: ut Augustinus 1. dicit in Epistola ad Dioscorum: in Christo tamen dispensative factum est, quod gloria animæ non derivaretur ad corpus. Non ergo Christus meruit gloriam corporis.

4. Præterea. Manifestatio excellentiæ Christi non est bonum ipsius Christi, sed eorum, qui eum cognoscunt: unde & pro premio promittitur dilectoribus Christi, ut eis manifestetur: secundum illud Joan. 14. Si quis diligit me, diligetur a Patre meo: & ego diligam eum, & manifestabo ei meipsum. Ergo Christus non meruit manifestationem suæ altitudinis.

Sed contra est, quod Apostolus dicit Philip. 2. Factus est obediens usque ad mortem, propter quod & Deus exaltavit illum. Meruit ergo obediendo suam exaltationem: & ita aliquid sibi meruit.

a. Respondeo dicendum, quod habere aliquid donum per se, est nobilius, quam habere illud per aliud: semper enim causa, quæ est per se, potior est ea, quæ est per aliud: ut dicitur in 8. Phys. \* Hoc autem dicitur aliquis habere per se ipsum, cuius est sibi aliquo modo causa. Prima autem causa omnium bonorum nostrorum per autoritatem est Deus. Et per hunc modum nulla creatura habet aliquid boni per se ipsam: secundum illud 1. ad Corinth. 4. Quid habes, quod non accepisti? Potest tamen secundario aliquis esse causa sibi alicujus boni habendi: in quantum, scilicet, in hoc ipso Deo cooperatur. Et sic ille, qui habet aliquid per meritum proprium, habet quodammodo illud per se ipsum. Unde nobilius habetur id, quod habetur per meritum, quam id, quod habetur sine merito. Quia autem omnis perfectio & nobilitas Christo est attribuenda, consequens est, quod ipse per meritum habuerit illud, quod alii per meritum habent: nisi sit tale quid, cuius carentia magis dignitati Christi & perfectioni præjudicet, quam per meritum accrescat. Unde nec gratiam, nec scientiam, nec beatitudinem animæ, nec divinitatem meruit. Quia cum meritum non sit nisi ejus, quod nondum habetur, oporteret quod Christus aliquando istis caruisset: quibus carere, magis diminui dignitatem Christi, quam augeat meritum. Sed gloria corporis, vel si quid aliud hujusmodi est, minus est quam dignitas merendi, quæ pertinet ad virtutem charitatis. Et ideo dicendum est, quod Christus gloriam corporis, & ea, quæ pertinent ad exteriorē ejus excellentiam (sicut est ascensio, veneratio, & alia hujusmodi) habuit per meritum. Et sic patet, quod aliquid sibi mereri potuit.

Ad primum ergo dicendum, quod fruitio, quæ est actus

charitatis, pertinet ad gloriam animæ, quam Christus non meruit: & ideo si per charitatem aliquid meruit, non sequitur, quod idem sit meritum & premium. Nec tamen per charitatem meruit, in quantum erat charitas comprehensoris, sed in quantum erat viatoris: nam ipse fuit simul viator & comprehensor, ut supra habitum est. \* Et ideo quia nunc non est viator, non est in statu merendi.

Ad secundum dicendum, quod Christo, secundum quod est Deus, & Dei Filius, per naturam debetur gloria divina, & dominium omnium, sicut primo & supremo Domino. Nihilominus tamen debetur ei gloria, sicut homini beato, quam quantum ad aliquid debuit habere sine merito, & quantum ad aliquid cum merito: ut ex supra dictis patet. \*

Ad tertium dicendum, quod redundantia gloriæ ex anima ad corpus est ex divina ordinatione secundum congruentiam humanorum meritorum, ut scilicet, sicut homo meretur per actum animæ, quem exercet in corpore, ita etiam remuneretur per gloriam animæ, redundantem ad corpus. Et propter hoc non solum gloria animæ, sed etiam gloria corporis cadit sub merito, secundum illud Roman. 8. Vivificabit mortalia corpora nostra, propter inhabitantem Spiritum ejus in nobis. Et ita potuit cadere sub merito Christi.

Ad quartum dicendum, quod manifestatio excellentiæ Christi pertinet ad bonum ejus, secundum esse, quod habet in notitia aliorum: quamvis principaliter pertineat ad bonum eorum, qui eum cognoscunt, secundum esse quod habent in se ipsis. Sed etiam hoc ipsum refertur ad Christum in quantum sunt membra ejus.

## COMMENTARIUS.

**Q**Uoniam meritum in actione liberæ voluntatis consistit, ideo D. Thom. huic quæstioni, quæ est de unitate operationis humanæ Christi, adjunxit disputationem de merito Christi, quam in hoc & articulo sequenti brevissime expedit: supponit enim, Christum mereri potuisse, & hic docet quid sibi, in articulo vero sequenti, quid nobis meruerit. Hic igitur docet non meruisse sibi eas animæ perfectiones, quas ab initio Incarnationis habuit, scilicet, gratiam, gloriam, &c. meruisse tamen gloriam corporis, & alia, quæ pertinent ad exteriorē exaltationem, quæ a principio non habuit. Et utrumque breviter & clare probat in articulo: indigent tamen tam assertiones, quam probationes, magna examinatione & declaratione, quam sequentibus disputationibus commodius trademus.

## DISPUTATIO XXXIX.

In tres sectiones distributa.

*De merito Christi Domini absolute, & secundum se.*

**H**Æc materia de merito Christi gravissima est & amplissima, quam D. Thom. variis locis attigit in hac materia, supra q. 1. art. 2. q. 2. art. 1. q. 8. art. 1. & sequentibus: & infra q. 34. art. 3. q. 48. 49. 56. & 57. art. 6. & 59. art. 3. & in 3. distinct. 18. ubi alii Theologi eamdem rem tractant. Nos vero quidquid ad hanc materiam pertinere videbitur, quod per occasionem aliquam in superiori disputatum non sit, hoc loco dicemus, totamque hanc materiam quatuor disputationibus amplectemur: & in hac prima, an & quale fuerit Christi meritum, & quo tempore, & quibus actibus perfectum fuerit, explicabimus: in sequentibus vero, quid sibi, quid nobis, quid denique Angelis Christus meruerit, tractandum erit.

## SECTIO I.

*An in Christo Domino fuerit meritum, seu conditiones omnes ad merendum necessarie.*

**Q**Uæstio hæc de proprio, & perfecto merito de condigno ac de iustitia intelligenda est, de cuius natura & conditionibus ad illud necessariis in 1. 2. quæstione 14. tamquam in proprio loco disputatur, ex qua, ne materias confundamus, ea solum sumemus, quæ præsentis negotio fuerint necessaria, & indicabimus, quæ ad hoc meri-

122.  
g. d. 18. a. 1  
3. 4 & 5. &  
verit. q. 29  
art. 7. 9. &  
opus. c. 3. &  
338. ad.

Est epist.  
56 non  
multum  
remotum  
ant. med.  
eqm. 2.

Li. 8. Phy  
tex. 59.  
rom. 2.

Quæst. 15.  
art. 10.

In corp.  
art.

D. Thom.



meritum requisita sunt, ut ea, atque adeo perfectum meritum in Christo fuisse concludamus. Possunt autem aliqua ad meritum requiri ex parte ipsius operis, alia ex parte personæ merentis, alia ex parte ejus, apud quem meretur. De quibus sigillatim ac breviter dicendum est.

Prima ergo conditio ex parte actus meritorii est, ut sit honestus, quæ & per se nota est, loquimur enim de merito præmii apud Deum, & multo notius est, inventam esse in omnibus, & singulis actibus voluntatis Christi, ut ex iis, quæ de gratia, sanctitate, & innocentia ejus in superioribus tractata sunt, satis constat.

Secunda conditio in opere meritorio necessaria est, ut sit liberum, quoniam per ea, quæ naturalia sunt, & quorum domini non sumus, nec meremur nec demeremur. Unde hæc libertas, quæ ad meritum, necessaria est, non coactionem tantum, sed necessitatem etiam simpliciter excludit, quia illa sola nomen libertatis meretur, solaque illa in vero proprii actus dominio consistit. Unde Paulus ad Philemon: *Sine consilio* (inquit) *tuonihil volui facere, uti ne veluti ex necessitate bonum tuum esset, sed voluntarium*: & 2. Corinth. 9. *Non ex tristitia aut necessitate*: quibus locis id notant Patres. Hinc Methodius lib. de liber. arbitr. *Si factus esset homo* (inquit) *ut unus de numero eorum, qui ex necessitate serviunt, non reciperet mercedem libera voluntate dignam*, & Hieronym. lib. 2. cont. Jovin. *Ubi necessitas, ibi nec corona*. Hilar. lib. 1. de Trinit. aliquantulum a princ. ita exponit illud Joan. 1. *Dedite eis potestatem, filios Dei fieri. Esse filios Dei non necessitatem esse voluit, sed potestatem, ut voluntas præmii assequatur*. Eademque est sententia Patrum, & Doctorum, quos disp. 37. sect. 2. retuli, ubi etiam hanc conditionem locum habuisse in actibus voluntatis Christi, fuisse satis disputatum est. Neque enim probo quorundam Nominalium sententiam, qui conditionem hanc solum in puris creaturis dicunt ex lege Dei esse necessariam, illam vero legem Christum Dominum non comprehendisse, ideoque non fuisse illi necessariam libertatem ad merendum. Hæc enim sententia primum nullo nititur fundamento, ostendant enim isti, ubi hæc lex pro hominibus puris lata fuerit, non autem pro Christo, aut ubi cum Christo Domino in hac lege dispensatum sit: aut quæ fuerit necessitas hujus exceptionis, seu dispensationis: Si enim existimant, in Christo non fuisse libertatem, & ideo indignis hæc exemptione a lege communi, valde errant contra communem doctrinam Scripturæ, Conciliorum, & Sanctorum: si autem de Christi libertate non dubitant, non est cur hanc dispensationem, seu exemptionem a communi lege confingant. Præsertim, quia lex hæc nullam imperfectionem Christo homini repugnantem supponit, sed ad perfectionem potius meriti spectat. Deinde falso videntur hi authores supponere, libertatem requiri ad meritum ex lege extrinseca Dei & non ex intrinseca natura, & essentia ipsius meriti, sicut enim ad meritum, seu potius demeritum, poenæ, necessaria est libertas, non ex lege extrinseca Dei, sed ex intrinseca natura talis meriti, ita ut sine hac conditione omnino esse repugnet: ita de vero ac proprio merito præmii sentiendum est, ut latius in materia de merito disputatur.

Tertia conditio in actione etiam meritoria necessaria est, ut sit proportionata præmio, atque adeo ut habeat valorem condignum, & aliquo modo illi æqualem. Cum enim ratio meriti ad justitiam pertineat, æqualitatem aliquam inter meritum & præmium requirit: hanc vero dignitatem seu valorem fuisse in actibus Christi respectu cujuscumque præmii, non est quod denuo probeamus; superius enim q. 1. art. 2. latissime ostensum est, opera Christi Domini & ex se fuisse perfectissima, & dignissima, & ex personæ dignitate habuisse infinitum valorem ad satisfaciendum, & merendum.

Quarta, ex parte personæ merentis necessaria est, ut sit persona Deo grata. Quamquam autem certum sit, personam Christi fuisse Deo gratissimam, tam secundum se, quam ut subsistentem in humanitate, & ratione gratiæ unionis, & ratione gratiæ habitualis ab illa manantis: disputari vero a Theologis solet, an hæc posterior gratia fuerit Christo necessaria ad meritum, atque adeo an illa fuerit Christo Domino principium sui meriti. Quidam enim existimant, hanc gratiam etiam in Christo fuisse ad meritum necessariam. Ita tenet Marfil. in 3. q. 10. art. 1. Bonavent. dist. 13. art. 1. q. 1. Durand. q. 1. Palud. q. 2.

Suarez Tom. XVI.

opinione 4. conclus. 3. indicant Capreol. lib. 1. q. unica, art. 3. ad argumenta Scoti contra 1. conclus. & Dried. tract. 2. de Capt. & redemp. gen. hum. c. 2. p. 3. art. 4. ad 3. Favet D. Thom. q. 29. de verit. art. 5. ad 4. ubi ait, meritum Christi habere rationem meriti a gratia habituali, sine qua meritum esse non potest. Fundamentum esse potest, quia si anima Christi careret hac gratia habituali, non esset intrinsece ordinata ad supernaturalem beatitudinem, quæ in visione beata consistit; ergo nec posset actiones suas in illum finem referre, ergo nec mereri. Dicendum vero absolute & simpliciter est, hanc gratiam non fuisse Christo Domino necessariam ad merendum: duobus enim modis intelligi potest, hanc gratiam esse necessariam ad meritum. Primo, ut sit principium elevans potentiam ad eliciendum actum ipsum meritorium. Et hoc sensu diximus supra cum S. Thom. & aliis authoribus solum fuisse hanc gratiam Christo necessariam ad supernaturales actus connaturali modo efficiendos. Unde fit primo hac ratione, neque ad omnem actum meritorium fuisse necessariam, quia, ut infra dicam, Christus non tantum meruit per actus supernaturales, sed per naturales etiam. Fit secundo, neque ad ipsos actus supernaturales fuisse simpliciter, & de potentia absoluta necessariam, sed solum secundum ordinariam legem, seu ad eliciendum illos perfecto, & connaturali modo. Et existimo nonnullos ex citatis authoribus nihil aliud intendisse: & ita etiam esse explicandum D. Thom. supra q. 7. art. 1. & q. 29. de verit. art. 1. & ubicumque gratiam habitualement ad hoc meritum Christi requirit.

Secundo potest requiri hæc gratia præcise propter ipsam rationem meriti, seu ut actus ipse habeat valorem, & condignitatem coram Deo. Suppono enim ex materia de merito, hanc dignitatem seu valorem actus non solum pendere ex ipsa specifica ratione, & honestate actus, sed etiam ex conditione & sanctitate personæ operantis: inde enim fit, ut dispositio remota, aut proxima ad gratiam, non sit meritoria de condigno gratiæ, neque augmenti fidei, aut spei, cum tamen similis actus in persona jam grata, & digna sit meritorius de condigno augmenti gratiæ, & aliarum virtutum. Ex hoc ergo capite omnino certum, & indubitatum existimo, non fuisse Christo necessariam accidentalem gratiam ad perfectum meritum: ut bene docuit Soto in 4. dist. 19. q. 1. art. 2. & lib. 3. de Nat. & grat. cap. 6. Vega lib. 7. in Trid. cap. 9. Tolet. in Joan. cap. 1. annot. 47. Perer. in Daniel. c. 9. q. 15. Et ratio est evidens ex dictis supra q. 9. quia hic homo Christus per se & substantialiter ratione ipsius personæ est maxime gratus Deo, & similiter ejus humanitas ipsamet unione ad Deum fuit sanctificata & grata: ergo hæc sola personalis dignitas erat per se sufficiens ad valorem meriti, suppositis aliis conditionibus ex parte operis necessariis. Confirmatur, quia nunc opera Christi ex hac dignitate personæ operantis habent infinitam quandam rationem meriti, quatenus ipsamet opera ex vi unionis deificantur quodammodo, ut supra q. 1. art. 2. late diximus; ergo multo magis sufficit per se hæc dignitas ad rationem meriti. Ex nullo ergo capite fuit simpliciter requisita gratia habitualis ad Christi meritum. Sed contra nam sola gratia unionis sine habituali, non ordinat, nec elevat hominem ad finem supernaturalem: ergo non potest sufficere ad condignum meritum ejus. Respondetur, negando simpliciter antecedens, nam licet non ordinet proxime, ordinat tamen radicaliter & principaliter, nam facit suo modo debitam, etiam ipsam habitualement gratiam. Addo vero ultimo, quamvis illa gratia non fuerit simpliciter necessaria, tamen de facto cum Christus illam habuerit, etiam ex illo capite habuisse opera Christi valorem & condignitatem ad meritum, quia illa gratia non fuit inferioris conditionis in Christo, quam in nobis. Quocirca, quod Richard. dixit in 3. dist. 13. art. 1. q. 1. ad ultimum, gratiam habitualement fuisse principium, quo Christi opera essent magis meritoria, si de augmento intensivo intelligatur, falsum est, quia diximus supra q. 1. art. 2. opera Christi ex personali dignitate habuisse infinitum valorem meriti, & ideo sub ea ratione non potuisse intensivo augeri: si autem solum intelligeretur de augmento quodammodo extensivo, id est, ut pluribus modis & rationibus illa opera essent condigna & proportionata ad meritum, in hoc sensu verum est illud dictum,

L I

ut



ut explicatum est. Constat igitur, hanc quartam conditionem perfectissimo modo inventam esse in Christo Domino. An vero indiguerit Christus aliqua alia gratia actuali, vel supernaturali cognitione, dicemus in fine sequentis sectionis.

Quinta conditio ex parte etiam personæ merentis est, ut sit viator, quam necessariā esse saltem ex lege Dei ordinaria (quidquid sit de absoluta potentia) omnes Theologi docent, ut latius videbimus statim sect. 3. ubi simul ostendemus, conditionem hanc etiam in Christo Domino fuisse necessariam. Quod enim viator aliquando fuerit, scilicet, eo tempore, quo vixit in corpore passibili, demonstravit D. Th. supra q. 15. art. 10. & ideo saltem pro eo tempore fuisse Christum in statu merendi, quia cum haberet corpus passibile, secundum eam rationem aliquo modo tendebat in beatitudinem, & hoc est esse viatorem, & consequenter habere statum merendi, quia meritum est via ad præmium. Sicut etiam fuit Christus eo tempore in statu satisfaciendi, propterea enim corpus passibile assumpsit. Unde fit, licet fuerit miraculosum, & præter legem, Christum simul esse viatorem & comprehensorem, supposito tamen illo statu, consequens fuisse, ut esset capax meriti, non ex dispensatione, sed servata omni propria & rigorosa lege meriti: quia, licet esse viatorem miraculosum sit, tamen viatorem mereri non est miraculosum, sed quodammodo naturale. Sicut etiam Deum esse hominem fuit opus miraculosum, seu supernaturale, tamen supposito illo opere, Deum hominem ambulare, videre, & alia opera exercere, naturale fuit. Neque est ullus Theologorum, qui in hoc contradicat: quamquam enim Scotus soleat contraria sententia imponi, tamen immerito, nam in 3. dist. 18. eandem habet doctrinam. Dices. Ergo animæ Beatorum erunt nunc in statu merendi, quia carent gloria corporis. Respondetur, negando consequentiam: tum quia illæ animæ eo modo, quo existunt, sunt omnino beatæ, & extra statum viæ: tum maxime, quia terminus viæ ex lege Dei ordinaria positus est in fine mortalitatis, & ideo non solum animæ beatæ, sed etiam animæ sanctorum Patrum, quæ erant in limbo, & animæ purgatorii, sunt extra statum merendi.

Sexta conditio, quæ ex parte Dei assignari solet, ad quem pertinet & acceptare meritum, & præmium retribuere, est, ut intercedat pactum, seu promissio Dei, ut sit veluti fundamentum hujus meriti, seu obligationis justitiæ, quæ ex illo nasci potest. In hac vero explicanda conditione duas extremas sententias vitandas censeo. Altera est, quæ totum valorem operis meritorii tam in Christo, quam in aliis hominibus, ponit in quadam extrinseca Dei acceptatione: ita ut non ideo opus acceptetur ad præmium, quia illo dignum sit, sed e contrario potius, ideo sit dignum præmio, quia ad illud acceptatur. Unde fit, quodlibet opus posse esse meritorium majoris vel minoris præmii, prout voluerit Deus illud acceptare. Quæ doctrina est Scoti in 1. d. 17. q. 3. & in 3. d. 19. & in 4. dist. 15. quam Gabr. amplectitur in 1. d. 17. q. unica, art. 3. dub. 2. & in 2. dist. 27. q. unica, art. 3. dub. 2. & in 3. d. 19. q. 1. notab. 3. & conclus. 1. Almay. & fere alii Nominales iidem locis. Sed est falsa sententia, quæ veram & propriam rationem meriti tollit, ut latius in materia de merito demonstratur. Et indicatur breviter, quia verum meritum est opus dignum præmio, sola autem extrinseca acceptatio non potest operi conferre hanc dignitatem: sicut nec potest per extrinsecam imputationem fieri, ut opus sit dignum poena, nisi ipsum in se tale sit. Altera sententia omnino negat promissionem seu pactum Dei vel necessarium esse, vel posse aliquid ad meritum conferre, Quæ videtur esse sententia Cajetani, & Thomistarum in 1. 2. q. 114. art. 3. Quorum fundamentum esse potest illud, quod paulo antea tetigimus, scilicet, promissionem vel acceptationem Dei nullum valorem, vel dignitatem conferre operi, cum sit omnino extrinseca illi: meritum autem fundatur in dignitate & valore operis. Unde, stante hoc valore, etiam si nulla promissio præcesserit, Deus ex sua justitia distributiva debet aliquod præmium ratione illius conferre: sed promissio non potest aliam rationem justitiæ addere, nisi distributivæ: ergo non est necessaria. Quod præsertim verum est de vero merito ex perfecta justitia, quale fuit Christi meritum: cum enim acceptatio seu promissio Dei gratuita sit, quo magis fun-

datur meritum in hujusmodi acceptatione, eo minus habet de perfectione justitiæ.

Inter hæc igitur extremas sententias, media via incedendum censeo, existimo enim de ratione meriti perfecti esse, ut opus ipsum, de se seu moraliter consideratum, prout ab operante fit, habeat sufficientem proportionem, & condignum valorem respectu illius præmii, ad quod ordinatur: quia alias non servaretur æqualitas, quam justitia postulat: meritum autem, de quo loquimur, esse debet ex propria justitia, vel etiam ex perfecta, si in speciali sermo sit de Christi merito. Præter hanc autem operis proportionem & dignitatem, existimo necessariam esse promissionem sub conditione operis, in qua tale opus nitatur: est enim meritum (ut omnes Theologi fatentur) actus, cui debetur ex justitia merces, unde non satis est, ut de se sit condignus & proportionatus præmio, sed etiam oportet, ut habeat vim inducendi obligationem ex justitia, ex qua illi debeatur præmium. Nullus autem actus meritorius apud Deum potest respectu illius habere hanc vim, nisi in ipsius promissione, vel pacto fundatur: quia, cum Deus sit absolutus, & supremus Dominus, nullus alius potest per se obligare illum ex justitia, seclusa promissione ejus: posita autem tali promissione sub conditione operis, recte intelligitur opus ipsum factum in virtute talis promissionis habere vim inducendi hujusmodi obligationem, supra q. 1. artic. 2. latius dixi. Quod vero perfectum meritum hanc vim justitiæ requirat, variis modis ostendi & declarari potest. Primo, ex ipso nomine meriti, quod simpliciter dictum, dicit ordinem ad mercedem: merces autem non est, nisi ubi intervenit justitiæ debitum, ut constat ex modo loquendi sacre Scripturæ, ex qua potissimum sumenda est propria ratio meriti apud Deum: in Scriptura autem merces justorum vocatur *corona justitiæ* 2. ad Timot. 4. & ad Heb. 6. *Non est injustus Deus, ut obliviscatur operis vestri*: & Matt. 20. fit expressa mentio pacti: *Nonne, inquit, ex denario convenisti mecum? tolle quod tuum est, & vade*. Unde S. Th. 1. 2. q. 112. art. 3. dicit facturum Deum contra justitiam, quam ipse statuit, si præmium merito denegaret: & q. 114. art. 6. requirit ad meritum divinam ordinationem, etiam respectu Christi: hanc vero ordinationem nos declaramus, esse promissionem sub conditione operis. Quæ innuatur verbis Isai. 53. *Si posuerit pro peccato animam suam, videbit semen longævum, & voluntas Domini in manu ejus dirigetur*: & eodem modo exponunt nonnulli Sancti, quos infra citabo, illud Ps. 2. *Postula a me, & dabo tibi gentes hereditatem tuam*, & alia similia in hanc sententiam congerit Driedo supra artic. 2. Ex quibus potest hoc secundo confirmari, nam opera, quæ Christus nunc operatur in cælo, ut v. g. amor Dei, & proximorum, oratio, &c. non sunt minoris dignitatis, quam essent similes actus, quos exercuit in statu viæ: & tamen per illos actus meruit in via, & nunc non meretur in patria, quod referri non potest, nisi in promissionem & pactum Dei, quod solum pro statu viæ fuit constitutum. Quod argumentum fieri etiam potest in animabus sanctis existentibus in sinu Abraham, vel in Purgatorio.

Dicetur fortasse hoc non solum provenire ex pacto Dei, sed etiam ex naturali conditione animæ humanæ, cui veluti connaturale est posse proficere, quamdiu est in statu viæ mortalis. Respondeo, habere quidem hanc legem aliquod fundamentum, & proportionem cum natura hominis: tamen per se non sufficere solam conditionem naturæ, nisi promissio Dei intercederet: tum quia illa circumstantia temporis, vel status animæ in corpore, vel extra corpus passibile, aut impassibile, non variat dignitatem personæ, nec bonitatem operis: tum etiam, quia si Deus concederet animæ separatæ tempus aliquod ad bene operandum promittendo illi præmium, nihil illi deesset ad perfectionem meriti, & e contrario potuisset non concedere totum hujus viæ tempus ad merendum, sed ætatem aliquam definire, pro illo tempore præmium promittendo, sicut verisimile est Eliam, & Enoch, etiam si adhuc vivant in corpore mortali, non semper esse in statu merendi tam longo tempore. Quocirca, cum hæc moralia sint, non possunt in sola rei natura fundari, nisi intercedat ordinatio divina, signum ergo est hanc esse necessariam ad justitiam meriti. Quod etiam tertio declaratur, nam si homo in puris naturalibus crearetur, & Deum amaret, ac bene moraliter viveret, habet

Objeçtio.

Responsio.

Objeçtio.

Responsio.



habere opera ejus proportionem, & eondignitatem cum naturali beatitudine, vel alio naturali præmio: & tamen non habere illam propriam rationem meriti, quam nunc habent opera justorum, quia revera non deberetur illis corona justitiæ, sicut nunc debetur justis. Ac denique ex his, quæ inter homines accidunt, idem explicari potest, non enim unus meretur ex justitia mercedem ab alio, nisi aliquod genus pacti intercedat, ut supra citato loco q. 1. art. 2. expositum reliqui. Quocirca, seclusa promissione sub conditione operis condigni, non esset tam propria & perfecta ratio justitiæ, sicut est, illa supposita; nam, sine illa esset tantum quædam decentia aut congrua proportio, quæ nomine justitiæ significari solet, posita autem illa, intercedit necessitas justitiæ, quæ non repugnat Deo ex tali suppositione, & intercedit aliquod jus proprium ad tale præmium ex parte merentis juxta superius dicta quæst. 1. art. 2.

**Pactum,** seu promissio sub conditione operis nihil derogat justitiæ. Hæc igitur conditio nihil minuit de perfectione justitiæ, ut secunda sententia supra citata existimavit: aliud est enim loqui de acceptatione: aliud de promissione sub conditione operis, si proprie terminis utamur. Acceptatio enim intelligitur quasi posterior ipso meritorio opere, & quasi extrinsece & accidentarie illi advenire, & ideo nihil confert ad morales effectus, ut ratio supra facta probat: videtur enim hæc acceptatio respicere actum tanquam objectum, quod supponit, & ideo illum neque physice nec moraliter mutat, sed talem illum acceptat qualis ipse est: at vero promissio sub conditione operis intelligitur antecedere opus ipsum, quod in tali promissione quodammodo fundatur & nititur, & ut sic conferre multum potest ad moralem æstimationem & efficaciam operis. Exemplum afferri potest ex Adæ peccato, nam si omne pactum & legem Dei excludamus, illa transgressio soli Adam nocere potuisset; postquam autem ex lege Dei constitutus est Adam veluti caput, quod pro se & posteritate sua legem accepit, cuique eodem modo promissio justitiæ, vel comminatio mortis facta est, per transgressionem divini pacti & legis de condigno meruit non solum sibi, sed etiam posteris suis odium, & inimicitiam Dei. Et simili modo diximus supra, potuisse Deum constituere aliquem purum hominem, qui in genere gratiæ esset caput aliorum hominum, & talem promissionem, vel pactum cum illo constituere, ut posset homo in tali dignitate constitutus, vere aliis mereri ex justitia, quia illa conditio personæ, & divinum pactum, moraliter loquendo, multum conferret ad moralem æstimationem & efficaciam operum. Sic ergo quando promissio sub conditione operis antecedit, & actio meritoria in illa fundatur, habet vim inducendi debitum ex justitia, quam alias non haberet. Et ratio reddi potest, quia morales actus a circumstantiis accipiunt valorem & efficaciam moralem; quod autem opus fiat ex dicta promissione, est quædam circumstantia, ratione cujus tale opus ad justitiam pertinet, & ideo inducere potest obligationem justitiæ. Quæ fere omnia supra citato art. 2. indicavi, ubi etiam explicui, quæ differentia sit inter promissionem simplicem seu absolutam, & onerosam, seu, quæ fit sub conditione operis: illa enim per se non inducit obligationem justitiæ, sed fidelitatis, hæc vero, posita conditione seu expleto opere, infert justitiæ obligationem. Explicui etiam eo loco, quomodo hujusmodi promissio nihil diminuat de perfectione justitiæ: sicut in omni contractu, quod contrahentes libere paciscantur, non tollit, quin obligatio inde orta ad perfectam justitiam pertineat, maxime cum opus ipsum proportionatum est mercedi & præmio, quod sub illius conditione promittitur.

Ex his ergo omnibus sufficienter concluditur, omnes conditiones ad perfectum meritum requisitas, in Christo Domino inventas esse, atque adeo potuisse mereri, ac denique de facto meruisse. Quæ assertio de fide certa est, quam ex Scripturis melius infra demonstrabimus ostendendo, quid sibi, & quid aliis meruerit. Nunc sufficiat definitio Concilii Trident. sess. 6. c. 7. docentis, Christum esse causam meritoriam nostræ justificationis. Ratione etiam patet ex dictis, quia omnis viator gratus Deo, illi obediens, & studiose operans propter ipsum, & ex gratia ejus, meretur coram ipso, & hæc est una ex magnis perfectionibus viatoris: sed Christus assumpsit statum viatoris, & erat gratissimus Deo, & optime operabatur, &c. ergo meruit coram Deo: sine causa enim assumpsit

set viatoris statum, & hac perfectione seipsum privasset.

Ex hoc vero ulterius infert Alexand. Alenf. 3. p. q. 16. mem. 2. non solum potuisse Christum mereri & meruisse, sed etiam non potuisse non mereri, quia non potuerunt virtutes ejus esse otiosæ. Quæ sententia, si de potentia ordinaria intelligatur, & supposito statu & modo operandi, quem Christus habuit, verissima est: quia supponimus, Christum habuisse liberum arbitrium, quod non potuit semper esse otiosum, & libera actione privatum, esset enim hæc magna inordinatio, præsertim cum habuerit Christus præceptum interdum libere operandi. Rursus libera Christi operatio non potuit non esse honesta, cum prava esse non potuerit, nec honesto sine privata. Deinde talis operatio in Christo non potuit non esse proportionata ad merendum propter dignitatem personæ, ut magis ex sequenti sectione patebit: non ergo potuerunt opera Christi non placere Deo, & æstimari digna præmio. Ac denique cum ex lege ordinaria supponantur promissio & pactum, consequenter habuerunt necessario illa opera vim ad obtinendum præmium ex justitia, atque ita non potuit in eis non esse completa ratio meriti. At vero si de potentia absoluta loquamur, potuisset Christus ut homo privari libertate, & consequenter potestate merendi: potuisset etiam Deus nullum præmium promittere operibus Christi etiam liberis, & consequenter ad nullum præmium illa ordinare vel acceptare, quia hoc contra nullam est virtutem, neque aliunde implicat contradictionem: & tunc, licet opera de se essent digna, & magni valoris, non tamen haberent completam rationem meriti. Sed hoc loco insinuabat se quæstio alia, an potuerit Deus non acceptare Christi opera ad præmium. Hæc tamen dubitatio, & ex dictis facile expediri potest, & eam sufficienter tractavi supra quæst. 1. art. 2. ubi videri potest cum aliis, quæ hic possent desiderari: videlicet, an hoc Christi meritum fuerit infinitum: an ex perfecta justitia, & an ex commutativa vel distributiva: & similia, quæ cum communia sint merito & satisfactioni, ibi prætermitti non potuerunt: cum vero ejusdem rationis sint in utroque, hic repetenda non sunt.

Christus de potentia ordinaria non potuit non mereri, de absoluta potuit.

## S E C T I O II.

*Per quos actus Christus Dominus meruerit.*

**H**ÆC quæstio solum tractanda est de actibus a voluntate elicitis. Suppono enim ex 1. 2. q. 20. & 21. proprium & formale meritum esse in actu elicitum a voluntate: actus vero externos per se non addere meritum actui voluntatis, neque esse formaliter & intrinsece meritorios, sed solum per extrinsecam denominationem ab actu meritorio voluntatis, a quo imperantur, & extrinsece seu moraliter informantur, sicut etiam ab illo denominantur liberi & studiosi. Deinde suppono, sermonem esse de voluntate humana Christi, nam voluntas divina non est capax meriti, ut per se constat, & sæpe dictum est.

Ratio vero dubitandi in hac quæstione est, quia radix totius meriti apud Deum est charitas, & amor ipsius Dei; hic autem in Christi voluntate non potuit esse meritorius, quia non erat liber, sed necessario consequebatur visionem beatam: caruit ergo voluntas illa potissimum actu meritorio, & consequenter videtur etiam caruisse merito in omnibus actibus suis, quia, destructa radice & fundamento, cætera quoque destrui necesse est. Propter hanc difficultatem Theologi varie sentiunt. Quidam enim docuerunt, Christum Dominum non meruisse amando ipsum Deum, potuisse autem mereri, amando proximum, vel alia opera virtutis exercendo. Ita tenet aperte Alexand. Alenf. 3. p. q. 17. mem. 1. in solutione argumenti. & Scot. in 3. dist. 18. licet hanc sententiam non omnino sequatur, non tamen eam improbat. Et ratio esse potest, quam in principio tetigimus, addendo, meritum singulorum actuum virtutum non pendere ex merito ipsius actus amoris Dei: quia singuli actus studiosi, & præsertim supernaturales, per se sunt meritorii, dummodo supponant charitatem in operante, etiam si non supponant meritum in proprio actu ipsius charitatis. Hæc sententia facile defendi potest: tamen imperfectum quendam modum meriti ponit in Christo, & facile superatur difficultate tacta. Quam si aliter expedire potuerimus, non est, cur Christo negemus perfectum meritum in ipso actu



amoris Dei existens, quod omnes Theologi statim citandi admittunt.

Secunda ergo sententia dicit, Christum meruisse per actum amoris Dei beatificum ut sic, id est, ut terminatur ad ipsum Deum. Ita tenet Altifiodorens. lib. 3. sum. tract. 1. c. 7. Gab. dist. 18. q. unic. concl. 2. & idem videtur sentire Sor. ibidem §. in ista questione, quamquam in solutione ad secundum, contrarium indicare videatur. Tenet etiam Capreo. ibi in fine questionis, & existimat esse sententiam D. Th. ibi q. 1. art. 2. ad 2. & de verit. q. 29. art. 6. ad 6. Sed hæc sententia niti non potest, nisi alterutro ex duobus fundamentis, scilicet, vel quia ille amor est actus liber & non necessarius, vel quia ad meritum non est necessaria libertas. Utrumque autem existimo falsum, ut in superioribus dixi, & ideo non video quomodo possit hæc sententia satis probabiliter defendi.

Dico ergo primo, habuisse Christum actum amoris Dei liberum, supernaturalem, & elicatum a charitate, & ab amore beatifico distinctum, & illo actu perfectissime meruisse. Ita intelligo sententiam D. Th. hic solutione ad primum dicentis, meruisse Christum per charitatem non in quantum erat charitas comprehensoris, sed in quantum erat viatoris: ubi de charitate loquitur, prout terminatur ad Deum. Et non potest exponi de uno, & eodem actu charitatis Dei, ut sub una ratione sit meritorium, & non sub alia: quia non potest idem actus numero, prout tendit in idem indivisibile objectum, atque adeo secundum eandem indivisibilem entitatem, esse liber & necessarius, quia hæc duæ proprietates includunt contradictionem: ergo non potest idem actus indivisibilis esse meritorius, ut est comprehensoris, & non ut est viatoris. Præsertim, quia ille actus, licet materialiter, ut ita dicam, potuerit dici viatoris, quia fuit in Christo etiam eo tempore, quo fuit viator, formaliter autem proprie non potest dici pertinuisse ad Christum ut viatorem: intelligendus ergo est D. Thom. de charitate operante per diversos actus, quorum alter consequitur visionem beatam, & ut sic dicitur charitas comprehensoris, alter vero versatur circa Deum, ut cognitum per scientiam infusam, quæ ut sic dicitur charitas, ut viatoris. Et eandem sententiam inducit D. Thom. infra q. 34. art. 3. ubi inquit, Christum fuisse sanctificatum secundum proprium motum liberi arbitrii in Deum, *qui motus, inquit, meritorius est*. Idem colligitur ex q. 29. de verit. art. 5. ad 6. & sequuntur Thomistæ, Palud. in 3. d. 18. q. 2. art. 2. & sumitur ex Capreolo in 1. dist. 1. q. 3. circa finem ad argumenta contra 4. conclusionem; tenet etiam Feira. lib. 3. contra Gent. cap. 62. ad finem, Scotus lib. 3. de Nat. & gra. cap. 7. Viguerius in Instit. Theol. c. 20. Medina hic. Idem sentit Durand. dist. 18. q. 2. Et ratio, quæ ex dictis colligitur, est, quia Christus meruit amando Deum, ut videtur indicari Joan. 14. in illis verbis: *Ut cognoscat mundus, quia diligo Patrem, & sicut mandatum dedit mihi Pater, sic facio*. Sed non meruit per amorem necessarium: ergo per amorem liberum. Et confirmatur, quia Christus potuit habere hunc actum liberum amoris Dei: sicut enim duplici scientia supernaturali illum cognoscebat, ita poterat duplici actu amoris illum amare.

**Objeçio.** Dices, non esse eandem rationem scientiæ, & amoris, quia actus scientiæ differunt specie, quia per diversa media attingunt Deum, actus vero charitatis non videntur posse specie differre, cum sub eadem ratione summi & supernaturalis boni attingant Deum, prout in se est: si autem solo numero differunt, vel non possunt simul esse, vel saltem non est cur multiplicentur simul in eadem voluntate, aliis eadem ratione possent in infinitum multiplicari. Sed hoc altero ex duobus modis probabilibus dissolvi potest. Primus est, dicendo actus illos differre specie, quia actus amoris beatifici tendit in Deum propter omnem perfectionem & rationem, propter quam amabilis est: nam tota illa per visionem beatam distincte, & clare videtur, & proponitur voluntati, at vero amor, qui consequitur scientiam infusam, vel tantum fertur in Deum sub speciali aliqua ratione boni, ut iustitiæ, misericordiæ, &c. vel solum sub ratione summi boni, quasi confuse cognita, & non distincte proposita quatenus in se continet omnem bonitatem, & perfectionem. Quæ diversitas satis esse videtur ad diversitatem specificam illorum actuum. Secundus mo-

dos est, illos actus esse tantum numero diversos, quia tendunt in idem objectum diversis viis, seu diversis modis applicatum, & modis etiam diversis, scilicet, necessario ac libere, idque non ex aliqua inadvertentia, seu accidente, sed per se & ex perfecta cognitione, & duplici modo intrinseco, ac connaturali voluntatis: & quia illi modi tantum sunt duo, ideo illi actus amoris non plures multiplicantur. Quod autem duo accidentia solo numero distincta, possint saltem supernaturaliter esse in eodem subjecto, nullum est dubium; quin potius etiam naturaliter contingere potest, ut hæc accidentia, quæ respiciunt extrinsecum terminum vel objectum, possint multiplicari numero in eodem subjecto. Quis autem horum modorum probabilior sit, in materia de charitate ex professo disputandum est, pendet enim ex illa questione, an actus amoris Dei in via, & in patria specie differant.

Dico secundo, meruisse Christum per actum charitatis proximorum. Est communis Theologorum, & certa, quia in illo actu concurrunt omnia necessaria ad meritum. Solum est notandum, hunc amorem proximi duplicem intelligi posse, unum consequentem scientiam infusam; & de hoc nulla ratio dubitandi esse potest, quin fuerit meritorius, præsertim suppositis his, quæ de amore Dei diximus. Alius vero potest intelligi amor proximi consequens visionem beatam, nam cum anima Christi in Verbo videat omnia, videt etiam proximos, & omnes rationes amandi illos: unde non est dubium, quin ex vi illius cognitionis illos amare possit ex charitate. Dubitari ergo potest, an etiam hic actus fuerit in Christo meritorius; & ratio dubitandi sumenda est ex conditione libertatis, quia nulla alia potuit illi actui ad meritum deesse, ut per se manifestum est. De libertate autem merito dubitatur, quia anima Christi eodem motu charitatis, quo ferebatur in Deum clare visum, ferebatur etiam in proximum visum in Deo; ergo secundum utramque rationem erat actus ille necessarius: ergo neutra ratione potuit esse meritorius. In hac re tres occurrunt dicendi modi. Primus est, illum amorem proximi fuisse eundem actum cum amore beatifico Dei, & nihilominus fuisse meritorium, quia est liber, ut terminatur ad proximum, licet, ut terminatur ad Deum, sit necessarius. Quæ opinio supponit quidem, eundem actum dilectionis Dei extendi ad proximos, non tamen secundum eandem indivisibilem entitatem: quia hoc repugnat entitati creatæ & finitæ, cum objecta sint diversa, & inter se non necessario connexa in ordine ad actuale amorem. Intelligi ergo debet actus ille extendi ad creaturas secundum reale augmentum, seu realem extensionem ejusdem actus: & hac ratione fieri posse, ut ille actus, qui secundum se, & ut terminatur ad primum objectum, est necessarius, habeat augmentum, seu extensionem liberam ad secundarium objectum. Propter augmentum autem illud de immutabilitate illius actus, dicunt aliqui posse actum esse liberum, & immutabilem, sicut videre licet in voluntate Dei, quæ libere se determinat ad aliquod objectum, & in ea determinatione immutabilis est. Sic (inquiunt) intelligi potest, animam Christi in primo instanti suæ creationis libere dilexisse proximos illo actu, & tamen in actuali dilectione immutabilem permanisse, solum quia natura illius actus talis est, ut sit immutabilis.

Sed licet hoc acute dictum sit, non tamen consequenter dictum videtur. Primo quidem, quia voluntas Christi non majorem necessitatem habuit perseverandi semper in illa actuali dilectione proximi, quam habendi illam in primo instanti, quia neque ab objecto, neque a Deo ipso necessitatem patiebatur: referre autem hanc necessitatem in solam naturam illius actus, est gratis dictum, & est quedam petitio principii: nam, cum ille actus sit quid creatum, ex hac parte non est immutabilis, in quo differt multum ab actu increato divinæ voluntatis: & cum alias sit actus potentiæ liberæ, & versetur circa objectum, quod non infert potentiæ necessitatem, neque etiam ex sua specifica ratione immutabilis est: non est ergo natura sua immutabilis. Deinde, quia si Christus in primo instanti libere dilexit proximos illo actu: ergo potuit non diligere: demus ergo sustinuisse pro aliquo tempore illum actum, seu extensionem ejus, nonne poterat postea incipere diligere proximos illo actu? certe non videtur

Nihilus  
actus  
creatus  
liber, est  
immuta-  
bilis.

**Respons.**



detur id probabiliter posse negari, quia si in principio id potuit, cur non postea? cum ille actus capax sit illius augmenti, & ipsa potentia semper retineat vim & libertatem ad efficiendum illum. Quod si potuit Christus post aliquod tempus incipere proximos diligere per illum actum: ergo ille actus de se mutabilis est secundum illud augmentum: ergo pari ratione mutari posset per cessationem ab actuali proximorum dilectione. Denique ille actus, prout terminatur ad proximos, non pertinet ad essentialem beatitudinem, neque habet necessariam connexionem cum actuali amore Dei, potest enim perfecte amari Deus, quamvis proximus non semper actu ametur, sed interdum tantum in habitu: non est ergo inconueniens (supposita illa sententia) admittere huiusmodi mutationem possibilem in illo actu. Nec sequitur necessarium idem dici posse de visione beata, quia per illam videntur creaturæ in Deo ex vi visionis ipsius Dei, unde non posset fieri mutatio in ipsa visione, ut terminata ad creaturas, quin fieret in eadem ut terminata ad Deum: actus vero amoris non extenditur ad creaturas ex necessaria connexionem objectorum, sed ex libera efficacia voluntatis, ut dictum est.

**Obiectio.** Sed adhuc obijci potest, hoc non esse satis, ut ille actus ut sit sit meritorius, quia non est actus viatoris, ut viator est, cum fundetur in scientia beata: de ratione enim meriti esse videtur, ut formaliter sit actus viatoris ut sic. **Resp. 1.** Respondetur. Hoc argumento probaretur, omnes actus fundatos in scientia infusa non esse meritorios, nec viatoris ut sic, quia ipsa scientia infusa aliquo modo consequitur scientiam beatam. Dico igitur, ut actus sit meritorius, satis esse, ut sit bonus, liber, & in persona grata in via existente: unde supponendo, eandem personam simul esse comprehensorem, & viatorem, non repugnat merito, ut aliquo modo fundetur in ipsa visione comprehensoris, sed solum repugnat illi, ut formaliter ac per se pertineat ad statum comprehensoris ut sic. Unde sicut scientia beata existens in viatore potest esse ratio prophetandi: ita etiam potest esse principium vel fundamentum merendi. Et dici potest ille actus viatoris ut sic, quia ipsa visio non potest ad illum actum, ut meritorius est, deservire, nisi prout est in viatore.

Hic modus dicendi, supposito uno principio, in quo fundatur, satis probabiliter procedit, satisque consequenter, atque ita mihi aliquando placuit. Jam vero existimo, principium illud esse falsum, quia in actibus voluntatis, vel intellectus, non est extensio illa ad plura objecta materialia, per compositionem & unionem realium partium distinctarum, sed aut actus terminatur ad unam tantum rem, vel, si terminatur ad plures, id habet ex perfectione, & eminentia suæ indivisibilis entitatis, quod supra q. 101. tractando de visione beata Christi Domini, a nobis probatum est, & omnia ibi adducta eadem, vel majori ratione locum habent in hoc actu voluntatis, quia illæ duæ res, scilicet, Deus & proximus, minus necessariam connexionem habent in ordine ad amorem, quam in ordine ad visionem: unde, si illa entitas amoris, quæ terminatur ad proximum, est in re distincta ab alia, quæ terminatur ad Deum, non potest intelligi, quo uniantur, aut quomodo ad componendum unum actum conjungantur: non ergo distinguuntur partialiter, sed erunt actus distincti. Hoc autem principio supposito, aperte sequitur, non posse eundem actum, secundum aliquid sui esse necessarium in ordine ad Deum, & secundum aliquid aliud re ipsa distinctum & separabile, esse liberum in ordine ad proximum. Dicendum ergo erit, aut non amari proximum, etiam visum in Deo, eodem actu, quo amatur Deus, quod est probabile, ut statim dicam; aut certe, si amatur eodem actu, illum esse indivisibilem, & consequenter esse secundum se totum necessarium, & ideo non esse meritorium, etiam prout ad proximum terminatur. Dices, eundem actum entitative indivisibilem posse terminari ad unum objectum necessario, & ad aliud libere, nihil ei addendo, ratione liberæ terminationis, ut constet in actu increato voluntatis divinæ. Respondetur, hanc eminentissimam perfectionem esse propriam divini actus increati, & infiniti, neque posse cum fundamento attribui actui creato, & finito. Quod enim Deus illomet actu, quo se necessario amat, possit libere amare, & non amare creaturas, nulla re illi addita, vel subtracta, est unum ex difficillimis mysteriis divinæ infinitatis, adeo

Suarez. Tom. XVI.

ut nonnulli Theologi, quia illud non intelligunt, nec revelatum expresse inveniunt, illud credant. Qui ergo credibile est, hanc perfectionem communicari actui creato, ut idem omnino manens possit terminari ad solum Deum ex necessitate, libere vero possit extendi, vel non extendi ad proximos, nihil ei addendo, vel subtrahendo?

Propter hæc ergo est secunda sententia, quæ negat, Beatos amare Deum & proximum eodem actu numero, sed diversis, atque ita animam Christi ex vi solius visionis beatæ, qua videbat Verbum, & proximos in Verbo, habuisse unum actum, quo necessario diligebat Deum, & alium, quo libere proximos amabat, atque hoc modo meruisse per amorem proximorum consequentem visionem beatam; ita sentit Scot. 3. d. 18. q. unica ad argum. & sequitur Med. hic a. 3. dub. 2. & est probabilis opinio.

Tertia vero sententia est, Christi animam ex vi visionis Verbi & proximorum in Verbo, dupliciter potuisse diligere proximos; primo, ut objectum secundarium simul ac uno indivisibili affectu cum Deo ipso directe ac primario amato eodem actu: secundo, ut objectum materiale adæquatum talis actus. Quod enim prior modus sit possibilis, supponitur ex 1. 2. q. 12. & 2. 2. q. 26. & infra q. 25. tractando de adoratione, constabit in motu adorationis similes actus reperiri. Et declaratur breviter, quia, cum charitas inclinet ad amandum proximum, ut rem quamdam Dei, si intellectus simul proponat, ut objectum summe amabile, tam in se, quam in proximo, seu tam amando ipsum, quam omne id, quod est aliquo modo bonum ejus, nihil vetare videtur, quominus voluntas unico impetu feratur in hoc totum objectum per modum unius: & hoc est ferri uno actu indivisibili. Quod si hic modus actus, & dilectionis ex se non repugnat, exerceri poterit a Beato ex vi visionis beatæ, quia per illam perfectissime & unitissime præsentatur totum illud objectum, & aliunde voluntas perfectas habet vires ad talem actum eliciendum. Rursus, quod alter actus dilectionis proximi sit possibilis, qui solum versatur circa proximum ut rem dilectam, & materiam, circa quam, licet ratio sic amandi sit Deus, nullus fere dubitat, imo hic est frequens, & usitatus modus diligendi proximum ex charitate, quia non est necesse, ut ratio amandi sit semper directe amata, sed solum ut terminus alicujus habitudinis, ut patet in fine, & medio, quod propter finem diligitur; & aliunde constat, proximum esse sic amabilem ex charitate propter Deum; est ergo hic actus possibilis ex se: ergo etiam in anima vidente Deum erit possibilis, non obstante priori actu, quia & distincti sunt, & unus alteri non repugnat. Primum patet ex dictis, quia non posset hic actus circa solum proximum directe versari, nisi esset distinctus; item, quia hic actus aliquid entitatis addit: ergo non potest in eundem actum cum priori coalescere. Item, quia hic actus supponit alium completum & perfecte terminatum ad totum suum objectum; cur ergo unietur illi? Secundum vero patet, quia nulla ratio talis repugnantiae cogitari, aut fingi potest.

Hoc ergo supposito, certum est, posteriorem actum non esse necessarium sed liberum, atque ita esse meritorium; de priori autem videtur probabile, esse necessarium simpliciter quoad totam suam entitatem, quia indivisibilis esse supponitur, & consequenter non potest secundum aliquid sui necessario elici, quin totus & secundum omnem suam habitudinem sit necessarius. Unde, licet proximus, spectata conditione talis objecti, non necessario diligatur, tamen ex parte talis actus necessario diligitur, quia simul cum Deo necessario dilecto amatur. Item per talem actum videtur Deus perfectiori modo diligi, saltem extensive seu entitative, quia non solum quoad intrinsecam, sed etiam quoad extrinsecam bonam ejus, & quoad omne id, quod ad ipsum pertinet, amatur; & ideo ratione perfectioris amoris Dei, poterit talis actus esse necessarius, quia, cum charitas Beati naturaliter operetur circa Deum, agit quantum potest, & ideo perfectissimum actum elicit, tam intensive, quam entitative. Atque ita fit, ut talis actus, etiam ut terminatur ad proximum, meritorius non sit.

Dices. In quo ergo distinguitur prior amor proximi, ab illo, quem exercere potest anima Christi ratione scientiæ infusæ, amando proximum propter Deum, prout per scientiam, vel prudentiam infusam amandum esse judi-



cat? Responderi potest dupliciter. Primo, negando, hos actus esse distinctos, per se loquendo, si eodem tempore, & circa idem omnino objectum, seu circa eundem proximum exerceantur: quia nulla est ratio distinguendi illos, nam sola distinctio cognitionum, per quas idem objectum applicatur, non videtur sufficere, quando alias in objectis, & in modo tendendi, est omnimoda similitudo, seu convenientia. Unde consequenter fit, non alia ratione dici posse, meruisse Christum per actum dilectionis proximi consequentem scientiam beatam, nisi quia ad illum actum sufficere poterat scientia beata, quamvis etiam infusa satis esse possit, & fortasse Scotus non aliud sensit. In hoc autem sensu etiam est probabile, amoris Dei meritum, qui consequbatur scientiam infusam, potuisse exerceri ex vi solius scientiæ beatæ, simul cum amore necessario, sub ratione tamen aliqua, aut modo minus perfecto. Secundo responderi potest, illos actus amoris proximi esse numero diversos, quia per illos tendit voluntas in objectum diversis modis applicatum, sed quia hoc difficile creditur est, prior responsio verisimilior videtur.

Dico tertio, meruisse Christum per actus omnes virtutum infusarum, quos libere exercuit. Est certissima, sic enim meruit per actum obedientiæ, ut testatur Paul. ad Phil. 2. & per actum religionis, ut orationis, &c. & ad eundem modum meruit per passionem suam, quatenus illa erat actus charitatis Dei & proximi, & religionis (erat enim sacrificium quoddam) & misericordiæ, iustitiæ, obedientiæ, ac fere virtutum omnium. Et ad eundem modum philosophandum est de omnibus actibus Christi.

Dico denique quarto, meruisse Christum per omnes actus liberos suæ voluntatis, etiam si illi fuerint ordinis naturalis, ut sunt amor naturalis Dei, & actus aliarum virtutum moralium acquisitarum. Probat, quia omnes illi actus erant honesti, & a Christo referebantur in supernaturalem finem, & quamvis non referrentur, sola dignitas suppositi deificantis illos, satis esset, ut haberent omnem proportionem, & valorem ad meritum. Sicut enim Christi humanitas per ipsam unionem ita deificatur, & sanctificatur, ut ratione illius debeantur illi alia dona (etiam ipsa gloria) tanquam connaturales proprietates: ita omnis actus bonus humanitatis unitæ, etiam si secundum se esset ordinis naturalis, tamen ratione unionis erat Dei gratissimus, & dignus quocumque præmio supernaturali: quia dignitas illius personæ magis ad hanc dignitatem confert, quam quævis alia conditio actus, & quam relatio operantis ad extrinsecum finem, quæ simpliciter necessaria non est ad talis actus valorem, & dignitatem.

Sed obijciunt quidam, nam præmium est in sua substantia supernaturale: ergo actus naturalis non potest esse condignum meritum ejus. Respondetur, negando consequentiam, quia in nobis bona opera moralia, licet naturalia sint, sunt merita de condigno supernaturalis gloriæ, non quidem ex se, sed quia per gratiam eleuantur & dignificantur, vel immediate, ut quidam volunt, vel saltem media aliqua relatione supernaturali charitatis. In Christo vero, licet hæc relatio de facto non defuerit, sola dignitas personæ, & gratiæ unionis, ob excellentiam ejus ad hoc sufficere. Et ratio est in superioribus tacta, quia dignitas meriti non fundatur in physica dignitate, sed in valore morali, quem participare potest actus a gratia vel forma supernaturali, etiam si ipse naturalis sit.

Atque hinc colligitur (quod supra huc remisimus) licet in Christo nullum esset donum gratiæ creatum, nec supernaturalis cognitio, sed sola unio, potuisse in illo esse condignum meritum cujusvis supernaturalis præmii, intercedente sufficiente conjunctione divina, seu promissione sub conditione talis operis. Quia in illo opere revera esset sufficiens valor & dignitas. Nec oportet, quod ipse operans semper cognoscat præmium, quod suo actu meretur, nec quod speciali ac propria relatione suum actum referat in tale præmium. Nam, licet fortasse in humana iustitia id necessarium sit, non tamen apud Deum, quia ejus ordinatio, & promissio sufficit propter efficaciam & supremum dominium voluntatis ejus, quæ, ut obligationem inducat, vel jus conferat, non indiget alterius acceptance, vel consensu, sed solum ut conditio operis habentis sufficientem valorem impleatur. Atque in nostris meritis apud Deum sæpe contingit, neque

enim necesse est, ut opus nostrum in præmium referamus,

## SECTIO III.

### Quo tempore Christus meruerit.

**T**Ria in hoc dubio desiderari possunt. Primum, quando Christus mereri incepit. Secundum, quo tempore duravit in actuali merito. Tertium, quando posuit finem, & terminum merito suo.

Circa primum, fere omnes Theologi conveniunt, Christum incepisse mereri a primo instanti suæ Incarnationis. Quamquam enim Durandus in 3. d. 18. q. 2. & ex parte Palud. ibidem q. 2. art. 2. in dubium hoc revocent, simpliciter tamen negare non audent. Et ratio, quæ eos ad dubitandum movit, difficilis non est, ut statim ostendam. In explicando autem modo hujus inceptionis, nonnulla est diversitas: nam Alexan. Ales. 3. p. q. 16. memb. 2. art. 1. dicit, meritum Christi incepisse in illo instanti, tantum extrinsece: quia in illo instanti Christus non meruit, & immediate post illud meruit. Quam sententiam non solum falsam, sed etiam impossibilem existimant Marsil. & alii. Sed an possibile sit, actum immanentem seu meritum illo modo incipere, philosophica potius quam Theologica controversia est, & ideo illam præmitto: quamquam judico minime repugnare. Quidquid tamen de possibilitate sit, sine ullo tamen fundamento, vel probabilitate tribuitur talis modus inceptionis merito Christi: quia cum actus meritorius in instanti perfici possit, si potuit Christus inchoare suum meritum statim post conceptionem suam, potuit etiam in ipso instanti conceptionis, non extrinsece tantum, sed intrinsece, efficiendo actum in illo instanti: quia quando operatio est momentanea, non oportet, ut sit tempore seu duratione posterior, quam sua causa.

Quocirca dicendum est primo, Christum Dominum intrinsece incepisse mereri a primo instanti Incarnationis suæ, ita ut in illo instanti habuerit perfectum meritum. Ita D. Th. infra q. 34. art. 3. & in 3. dist. 18. q. unica, art. 3. ubi Magister idem docet, & communiter Theologi. Bonavent. art. 1. q. 1. Richard. art. 1. q. 2. Scot. Gabr. & alii. Marsil. q. 12. art. 1. concl. 4. Et colligi potest ex ad Heb. 10. ubi citantur, & de Christo exponuntur verba Ps. 39. *Hostiam & oblationem noluit, corpus autem adaptasti mihi, usque ad illud, In capite libri scriptum est de me, ut faciam (Deus) voluntatem tuam*: quæ verba inquit Paul. dixisse Christum ingredientem mundum. Et concludit, in ea voluntate nos esse sanctificatos: ingressus autem Christi in mundum esse intelligitur in ipsa carnis assumptione, ut recte Anselm. & D. Th. exposuerunt, juxta illud Joan. 26. *Exivi a Patre, & veni in mundum*, utique per Incarnationem, per quam dicitur *primogenitus introduci in orbem terrarum*, ad Heb. 1. Igitur in ipso ingressu, atque adeo in ipso puncto Incarnationis, habuit Christi voluntatis actum ad nostram sanctificationem sufficientem, atque adeo meritum. Ratione etiam convinci potest, quia in primo instanti, sicut habuit actum visionis beatæ, ita potuit habere actum scientiæ infusæ (de quo sine causa dubitat Durand.) quia in usu illius scientiæ non pendebat a corpore, neque a phantasmatibus, neque discursu aliquo, neque successione temporis, ut supra q. 11. late ostensum est: ergo potuit in eodem instanti liberum actum voluntatis elicere circa objecta per illam scientiam repræsentata. Itaque, si actu consideravit Dei bonitatem, & beneficia suæ humanitati collata, potuit illum ex charitate libere diligere, eique gratias agere, & similiter cognoscendo voluntatem Patris esse, ut se in mortem pro redemptione hominum offerret, potuit statim obedire, acceptando mortem, ac voluntarie se pro hominibus offerendo. Posita enim in intellectu sufficienti scientia & judicio, voluntas non indiget successione temporis ad libere amandum, vel eligendum; potuit ergo Christus mereri in primo instanti: ergo meruit. Probat, hæc ultima consequentia: tum quia quod perfectius est, Christo est tribuendum, perfectius autem est semper esse in actu secundo, quam in solo actu primo, ut per se constat: tum etiam, quia habebat summam gratiam impellentem voluntatem ejus ad hujusmodi meritum, & nihil erat, quod eam retardaret: tum denique quia Angeli hæc ratione sese statim in primo instanti creationis suæ converterunt



in Deum, & per eam conversionem gloriam meruerunt, ut frequentius Theologi sentiunt. Et de hominibus docet D. Th. debere se convertere in Deum, se & omnia sua in eum referendo, statim ac ratione & libertate uti possunt: quod siue in præceptum cadat, siue non, tamen non est dubium, quin sit melius & perfectius: ergo Christus, qui bene omnia fecit, quam primum potuit libere se convertere in Deum per amorem & obedientiam, statim sine mora perfecit, nescit enim tarda molimina Spiritus sancti gratia. Denique quia Christus nunquam profecit in statu virtutis, aut meriti, ut supra q. 7. late ex Patribus ostendimus, multum autem profecisset, si prius nullum habuisset meritum, & postea illud habere inciperet.

Circa secundum dicendum est, Christum Dominum continue, & sine intermissione ulla meruisse a primo instanti conceptionis suæ, usque ad instantis mortis. Hanc conclusionem indicant Theologi cum Magist. in 3. d. 18. & Alenf. supra, Bonav. in Brevil. p. 4. c. 7. Cajet. infra q. 34. art. 2. qui bene explicat, ad perfectionem Christi pertinuisse, ut virtutes ejus nunquā fuerint otiosæ, neque in actu primo tantum: quamquā enim non semper in eodem numero actu libero perseveraverit (id enim dicere non est necesse, nec verisimile) semper tamē transibat ab uno actu ad alium, & nunquam ab actu ad non actum: ad hunc enim modum operantur Angeli, quibus ipse similis fuit in operando per scientiam infusam. Unde etiam supra ostendimus in q. 11. semper fuisse in actuali consideratione hujus scientiæ; est autem eadem vel major ratio de actibus voluntatis, qui magis ad virtutis perfectionem pertinent. Cum igitur hoc sit magis consentaneum perfectioni Christi, & nulla sit repugnantia, vel difficultas, ita de illo sentiendum est. Unde nullum invenio Theologum, qui contrarium docuerit. Occurrebat vero statim quæstio, quia videtur sequi, merita Christi aucta fuisse per hujusmodi continuationem, seu multiplicationem actuum. Sed hæc quæstio satis tractata est, & expedita q. 1. art. 2. ubi videri potest, ne earumdem rerum prolata repetitione tædio lectorem afficiamus.

Dico tertio circa tertium punctum, Christum Dominum ab instanti mortis suæ, nihil amplius ultra meruisse. Hæc conclusio est communis Theologorum, & ita certe ut sine temeritate in dubium revocari non possit: eam docet expresse D. Th. hic ad 1. ubi inquit, Christum nunc non esse in statu merendi, quia non est viator: idem docet infra q. 50. a. 6. ad 2. 56. a. 1. ad 3. 57. a. 9. ad 1. & in 3. d. 18. a. 2. ad 2. & 3. & in 4. d. 15. q. 4. a. 6. q. 2. ad 3. Gabr. in 3. d. 18. q. unica ad finem. Scot. Durand. Bonav. Richar. Major, & Marfil. locis supra citatis, qui inter conditiones necessarias ad Christi meritum ponunt statum viatoris. Idem docet Sotus in 4. d. 1. q. 3. a. 5. ubi in particulari dicit non solum post resurrectionem, sed etiam animam separatam Christi in triduo non meruisse. Ratio autem prima & præcipua hujus conclusionis fumenda est ex generali lege a Deo statuta, ut homines quamdiu in hac vita vivunt, mereri possint, tempus autem merendi cum ipsa vita finiatur. Est enim tempus hujus vitæ hominibus concessum, ut in eo lucrari possint, & quasi in stadio currere, seu in agone contendere, ut postea possint comprehendere, & incorruptam coronam accipere, ut dicitur 1. ad Cor. 9. & ideo Eccles. monet Sapiens. *Quodcumque potest agere manus tua, instanter operare: quia nec opus, nec ratio, nec sapientia, nec scientia est apud inferos, quo tu properas*: quod ut Hierony. exponit, intelligendum est de opere meritorio, & de scientia, & sapientia, prout illi deserviunt. Cum enim loquatur Sapiens (ut idem Hierony. notat) generatim de inferno, qui animas purgatorii, & eo tempore animas sanctorum Patrum continebat, negare non potuit, simpliciter esse in inferno charitatem, & bona opera: necesse est ergo, ut de opere meritorio loquatur. Et ideo ibidem ait mortuos non habere ultra mercedem: & ita exposuit hunc locum etiam Gregor. lib. 4. Dialog. c. 39. Et ideo in Scriptura semper retributio operum dicitur esse in ordine ad opera hujus vitæ, ut Eccles. 11. *Facile est coram Deo in die obitus retribuere unicuique secundum vias suas* & c. 14. *Ante obitum operare iustitiam*: & c. 18. *Ante iudicium, quod, scilicet, in morte fit, para iustitiam tibi*: & ita inferius subdit. *Ne verearis usque ad mortem iustificari*, id est, in iustitia crescere, ut exposuit Concil. Trident. sess. 6. c. 10. nec sine causa additum est: *Usque ad mortem*, sed ut deno-

Suarez Tom. XVI.

tetur illum esse merendi terminum. Et ideo Matth. 25. in parabola de quinque talentis, unusquisque recipit prout lucratus fuerat, ante rationem a Domino postulatam, postulatur autem in morte. Et simile videre est in parabola de villico iniquitatis, Luc. 16. ut ibi Theophyl. & Euthym. suo cap. 58. indicant: hinc etiam Paul. 2. ad Corinth. 5. unumquemque ait esse judicandum, *prout gessit in corpore*: ut August. notavit lib. de Prædestin. Sanct. c. 12. & ideo monet ad Galat. 6. ut, *dum tempus habemus, operemur bonum*, quia, ut ibi prædixerat: *Qua seminare vis homo, hæc & metet*, ut recte Hieronym. advertit: & propter hanc fortasse causam vocavit Paul. 1. ad Corinth. 6. tempus hoc, *tempus acceptabile, & diem salutis*, quia ut Hieronym. inquit, *tempus sementis est præsens vita, quam currimus: cum ista vita transierit, operandi*, id est, merendi, *tempus aufertur*. Est ergo sine dubio hæc generalis lex a Deo statuta, ut homines possint in hac vita mereri, & non amplius, ut ex omnibus citatis Scripturæ locis Patres illam exponentes docuerunt.

Dicit vero fortasse aliquis, hanc regulam & legem positam esse pro puris hominibus, non tamen comprehendisse Christum, qui propter excellentiam personæ suæ videtur in omni statu posse mereri. Sed hæc exceptio plus videtur esse quam temeraria, quia est contra torrentem Theologorum omnium, & contra generalem canonem Scripturæ, sine ulla Ecclesiæ, vel Patrum autoritate, Quin potius nonnulli Patres exponentes ad hoc propositum verba illa Christi Joan. 9. *Me oportet operari opera ejus, qui misit me, donec dies est: venit nox, quando nemo potest operari*: per noctem mortem interpretantur, postquam nemo meritorie operari potest: & cum Christus loqueretur de seipso, seipsum sub negatione universalis comprehendit. Quæ expositio colligitur ex Chrys. hom. 55. in Joan. Aug. tract. 44. in Joan. Hieronym. sup. Eccl. 9. & ad Galat. 6. Greg. lib. 4. Dialog. c. 39. Orig. homil. 3. in Psal. 36. ubi ad hoc varia Scripturæ testimonia in sensu mystico accommodat. Aliter dici potest, hanc legem, quod status merendi solum duret pro tempore hujus vitæ, intelligendam esse, ut quis possit sibi mereri, non vero ut possit mereri aliis: cuius ratio reddi potest, quia post hanc vitam homo recipit præmium sibi debitum, & ideo non potest ultra sibi mereri, cum sit constitutus in termino. Hoc autem non obstat, quin possit mereri aliis, qui nondum in termino constituti sunt: poterit ergo Christus etiam nunc mereri saltem aliis: nam & nonnulli Theologi docuerunt posse beatos mereri saltem de congruo, quo modo interdum locutus est D. Th. in 4. dist. 21. q. 1. art. 3. ad 4. ubi de animabus purgatorii loquitur. Si ergo alii Beati possunt de congruo mereri, poterit Christus de condigno. Sed hæc evasio non est magis probabilis, quam præcedens, quia Scriptura absolute & sine distinctione loquitur de merito, & Sancti ac Theologi ita illam interpretantur, præsertim agentes de proprio merito de condigno & de iustitia. Si autem distinctio data admitenda esset, non solum de Christo, sed etiam de cæteris beatis concedendum esset, esse nunc in statu, in quo possunt mereri aliis, eo modo, quo in via poterant: ergo pari ratione possent sibi mereri de condigno quicquid illis deesset: nam status beatitudinis & termini solum posset impedire meritum quoad ipsum terminum seu quoad beatitudinem essentialem, non vero quoad accidentale complementum nondum comparatum. Sequeretur ergo primo, adhuc posse Christum sibi mereri exaltationem & manifestationem sui nominis, quam nondum est plene affectus. Sequeretur secundo, posse animas beatas mereri de condigno gloriam accidentalem, & resurrectionem, & gloriam suorum corporum, his enim bonis adhuc carent, & ea petunt ac desiderant. Sequeretur tertio, animas existentes in Purgatorio posse per modum meriti consequi remissionem poenarum: quæ omnia falsa sunt, & contra omnes Theologos. Illa autem locutio de merito, de congruo, impropria est: interdum enim omnis impenetratio, meritum de congruo appellatur, proprie tamen meritum non est. Et ita D. Th. 1. p. q. 62. art. 9. ad 3. simpliciter negat omne meritum in beatis, & eodem modo loquitur de animabus Purgatorii q. 7. de malo, art. 11. Bonav. Scot. & alii Theologi in 4. dist. 21.

Secundo potest hæc ratio amplius in Christo explicari, quia ut supra dicebamus q. 1. a. 2. cum D. Th. quodlib. 2. a. 2. licet quodlibet Christi opus per se sufficiens esset ad

Christum  
toto vitæ  
mortalis  
tempore,  
abique  
ulla in-  
termis-  
sione me-  
ruisse.

Objectio.

Respons.

Objectio.

Respon.

Tempus  
merendi,  
cum vita  
finiatur.



omne præmium obtinendum: tamen ex divino pacto & ordinatione factum est, ut tota Christi vita ordinaretur ad integrum jus obtinendum, quasi per modum unius meriti in morte Christi consummandi. Unde fit in ipsa morte obtinuisse plenum jus & perfectum ad omnia præmia, quæ secundum legem ordinariam mereri poterat, & ideo non oportuit, ut postea mereretur; nam postquam quis acquisivit perfectum & absolutum jus ad præmium, non est, quod amplius mereatur. Et hæc est ratio, ob quam animæ iustorum non merentur unionem ad corpus gloriosum, quamvis illa careant, quia, scilicet, ex vi meritorum hujus vitæ habent plenum & consummatum jus, propter quod illis ex iustitia debetur. Sicut etiam inter homines mercenarius, qui operatus est, quidquid ex pacto tenebatur, ut sibi ex iustitia merces deberetur, non est, quod illam ulterius mereatur. Quod autem in morte Christi ita fuerit meritum ejus consummatum, ut plenum jus ad omne præmium acquisiverit, constat ex modo loquendi Scripture, quæ meritum tribuit omnibus Christi actionibus & passionibus hujus vitæ: consummationem vero ponit in morte juxta illud ad Philipp. 2. *Factus obediens usque ad mortem, mortem autem crucis, propter quod & Deus exaltavit illum*: Cui concinunt verba ejusdem Christi, Luc. 24. *Nonne oportuit pati Christum, & ita intrare in gloriam suam?* Ubi Patres notant, prius tempus fuisse meriti, posterius præmii. Unde Cyprian. serm. de Ascens. *Hæc, inquit, est merces obedientie Christi, hæc mortis & crucis stipendia* & infra: *Solum ad hæc, quæ dicta sunt, restat iudicium: de iudicio & angustia sublatum est Christus, superest, ut post misericordie tempora iustitia sequatur iudicium*. Sic etiam exponitur illud Pl. 2. *Postula a me, & dabo tibi gentes hereditatem tuam*, ab August. qui notat, illud: *Postula a me*, ad totam dispensationem temporalem, quæ pro humano genere sumpta est, referri. Et ibidem Hilarius: *Resurgens, inquit, in cælo & in terra jus omne sortitus est, unde & ipse ait, Data est mihi omnis potestas in cælo & in terra, in eo autem quod data est, poposcisse se id, quod accepit, ostendit: poposcit autem cum dixit: Clarifica me Pater claritate, quam habui prius quam mundus fieret apud te, & cum dixit: Non pro eis tantum, sed pro iis, qui credituri sunt per verbum eorum in me*. Et S. Vigilius lib. 5. contra Eutychetem, multa in hanc sententiam edisserens, inter alia attingens hunc locum inquit: *Christus post Resurrectionem suam dicit: Data est mihi omnis potestas in cælo & in terra: quam potestatem olim Pater promiserat, dicens: Postula a me, & dabo tibi gentes hereditatem tuam: quam petitionem & largitionem Patris tempore passionis fuisse expletam testatur Isa. dicens: In tempore placito exaudivi te, &c. c. 49. & apud eundem Isaiam c. 53. ut supra dicebam, est pactum expressum. Si posuerit pro peccato animam suam, videbit semen longævum, & ideo Paul. ad Hebr. 10. sic de Christo loquitur. Unam pro peccatis offerens hostiam, in sempiternum sedet in dextra Dei, de cætero expectans, donec ponantur inimici sub pedibus ejus. Satis aperte docens, Christum illa oblatione totum negotium suum & meritum consummasse: jam vero solum expectare veluti possessionem, & executionem, ut cap. etiam 9. prius indicaverat. Quem locum tractans Cyril. in Exegeti ad Valerian. quæ habetur in Concil. Ephes. tom. 6. cap. 17. circa medium inquit: *Cum Christus Incarnationis æconomiam consummasset, cælos ascendit, &c.**

Et tandem confirmatur & explicatur, quia Christus usque ad mortem, & per mortem suam nos redemit, jam vero nos non redimit, sed applicat nobis redemptionem suam: & ideo Scriptura sacra semper loquitur de præterito, salvavit nos, redemit nos, quia jam redemptio est consummata: ergo & meritum consummatum est, neque jam amplius Christus meretur: nam si adhuc mereri posset, etiam posset satisfacere, quia sicut oratio meritoria est, ita & satisfactoria, neque passio aut poena simpliciter necessaria est ad satisfaciendum, præsertim pro culpa. Si autem adhuc mereretur, & satisfaceret pro nobis, adhuc nos redimeret, quia non aliter nos redimit, quam merendo & satisfaciendo pro nobis. Si autem adhuc nos redimit, nondum plane nos redemit, neque emit pretio magno sanguinis sui, neque consummavit meritum suum per mortem: nam sicut ante mortem fecit opera per se condigna & sufficientia ad nostram redemptionem, & tamen illis contentus non est, sed multa alia addit usque ad mor-

tem: ita & his non fuit contentus, sed multa etiam addidit post mortem, scilicet, descensum ad inferos, reditum ad corpus, & post resurrectionem Apostolos revocavit & confirmavit in fide, & adhuc interpellat pro nobis: si ergo de toto hoc tempore, & omnibus his operibus idem est iudicium quoad meritum & satisfactionem, non magis consummata est redemptio per mortem Christi, quam per opera subsequencia: quod non solum falsum, sed etiam hæreticum mihi esse videtur.

Sed contra primo, quia Christus nunc orat pro nobis, & ejus oratio est dignissima, & ex lege Dei non potest non exaudiri: ergo per illam meretur. Respondetur, an & quomodo Christus oret in cælo, infra q. 2. 1. explicandum est: dato vero antecedenti, negatur consequentia, quæ ejusdem formæ fieri potest de orationibus aliorum beatorum, maxime, quando sibi aliquid postulant, ut, v. g. resurrectionem suorum corporum. Ratio vero est, quia Christus non orat nunc, ut per ipsam orationem faciat sibi deberi rem, quam postulat: sed potius tanquam exigens, quod alias titulo iustitiæ sibi jam est debitum: itaque illa oratio nititur præcedentibus meritis, non denuo meretur: sicut inter homines quando mercenarius petit mercedem suam, quam promeruit, non ideo petit ut illam mereatur, sed ut illam exigit. Quocirca illa lex, in qua fundatur certa & infallibilis impetratio talis orationis, est ipsa promissio, ex qua debetur retributio prioribus meritis, non specialis aliqua lex vel promissio, propter quam illi orationi retributio aliqua debeatur. Hæc est doctrina D. Th. 2. 2. q. 83, art. 1. 1. ad 1. quam indicasse videtur Rupert. Abb. lib. 9, de Divin. offic. c. 3. sic inquit: *Illam interpellatio, Doctorum omnium vera assertione, non submissa est postulatio, sed passionis ejus, quæ semel pro nobis in sacrificium oblata est, æterna commemoratio*. Dices. Ergo, cum Christus orabat in terra: *Clarifica me Pater &c.* non merebatur per illam orationem, sed exigebat rem sibi debitam ratione unionis. Respondetur negando consequentiam, quia per illam orationem simul cum aliis operibus, & passionem suam, acquisivit jus iustitiæ, quod est proprie mereri: quo modo non debebatur illi claritas, seu gloria ratione unionis, sed solum jure quodam filiationis, seu proportionis cujusdam, at vero per orationem, quam habet in cælo, nullum novum jus acquirit, ut dictum est.

Contra secundo, quia vulnus lanceæ inflictum est Christi corpori post mortem ejus, & tamen per illud maxime promeruit, sacramenta enim in Christi meritis fundantur, & tamen virtus eorum fluxisse dicitur a latere Christi pendentes in cruce, ut loquitur Leo P. ep. 4. c. 6. dicens: *Tunc regenerationis potentiam sanxit, quando de latere ejus profluxerunt sanguis redemptionis, & aqua baptismatis*. Et August. tract. 15. & 120. in Joan. inquit: *O mors unde mortui reviviscunt: quid sanguine isto mundius? quid vulnere isto salubrius?* Similia habet lib. 2. de Symbolo ad catechum. cap. 6. lib. 15. de Civit. c. 26. lib. 12. contra Faust. c. 20. Chrysost. hom. 84. in Joan. Cyril. lib. 12. c. 39. ac denique lib. 10. in Luc. c. de commendatione Mariæ. *Ex illo, inquit, in corrupto corpore, sed defuncto, omnium vita manabat; aqua enim & sanguis exivit, illa, quæ diluat, iste, qui redimat*. Quidam hæretici dixerunt, vulnus illud inflictum esse Christo adhuc viventi. Sed est hæresis contra expressum testimonium Joan. c. 19. damnata in Concil. Viennensi, Clementina unica de Summa Trin. Respondetur ergo, in illius vulneris susceptione, cum ipsum factum est, nullum fuisse novum meritum, quia neque ipsum corpus exanime jam erat capax meriti, neque anima separata, quamvis intelligatur voluntarie acceptasse injuriam illam sibi factam in suo corpore, erat jam in statu merendi: intelligi tamen potest Christum ipsum dum viveret prævidisse, & libere acceptasse, & obtulisse pro nobis vulnus illud, & dedisse etiam in pretium redemptionis nostræ sanguinem, qui de illo exivit. Et hac ratione posset virtus sacramentorum in hoc merito fundari, quamquam citati Patres, non tam de merito, quam de significatione loquantur, dicentes, aquam & sanguinem significasse sacramenta Ecclesiæ, quibus iustificamur: præsertim Baptismum & Eucharistiam, ad quæ tanquam ad januam & consummationem omnium sacramentorum cætera revocantur: dicunt etiam significatum esse, virtutem sacramentorum a Christi morte manasse, ipsumque Christum fuisse veluti fontem, ex quo sacramenta profluxerunt.

Object. 1.

Respons.

Object. 2.  
An per  
vulnus  
lanceæ  
Christus  
meruerit.

Respons.



**Objc.** 3. *Tertio objicitur, nam Christus Dominus per mortem suam nos redemit; ergo meruit in eo instanti, in quo consummata est mors: sed in illo jam anima non erat in corpore, quia homo moritur per primum sui non esse; ergo.*  
**Respon.** Qui dicunt hominem mori per ultimum sui esse, facile se expediunt ab hac difficultate, & ab aliis similibus, quæ de martyribus tractari solent. Supponendo tamen communio-rem philosophorum sententiam, Cajet. 1. p. q. 63. a. 6. dicit in instanti mortis hominis esse meritum, non tantum in pura via, sed tanquam in termino viæ, unde pro illo termino concedit meritum in anima separata: & in speciali loquens de Christi anima infra q. 50. a. 6. similiter sentire videtur, quamvis obscurissime loquatur. Sed hæc sententia mihi semper displicuit, quia illud instans mortis est terminus extrinsecus viæ, unde sicut in illo jam non est via, ita nec meritum. Eodem ergo modo dicendum est de Christi Domini morte, & merito: & hoc sensit D. Th. in illa q. 50. art. 6. ad 1. cum dicit, redemisse nos Christum per mortem, ut est in fieri, non ut est in facto esse, hoc enim est dicere Christum meruisse toto tempore, quo passus est pro nostra redemptione, in instanti autem mortis, cum vita terminatum esse meritum eodem modo, quo ipsam vitam.

## DISPUTATIO XL.

In tres sectiones distributa.

*De iis, quæ ibi Christus Dominus meruit.*

**E**xplicato merito Christi Domini secundum se, sequitur, explicemus, quid & quibus meruerit, & ratio doctrinæ postulat, ut prius de ipso dicamus, deinde de aliis. Supponimus autem Christum sibi aliquid meruisse, quamquam Calvinus hæreticus id negare ausus est: quem confutabimus commodius sect. 2. ne eadem sacræ Scripturæ testimonia repetere necessarium sit. Videamus ergo, quid sibi meruerit: ubi statim occurrebat quæstio, an incarnationem suam sibi Christus meruerit. Sed quoniam ordo ac methodus D. Th. id postulat, eam disputatam reliquimus q. 2. art. 1. Superest ergo, ut de aliis donis, quæ præter Incarnationem Christo collata sunt, breviter disseramus.

## SECTIO I.

*Utrum Christus mereri potuerit gloriam animæ suæ, & alia donagratia, & scientia.*

**Q**uæstionem hanc intelligo de potentia absoluta, nam de potentia ordinaria dicemus sectione sequenti, explicando, an de facto habuerit tale meritum. Procedit autem quæstio, supponendo Christum habuisse gratiam, gloriam, & alia similia dona a primo instanti creationis animæ suæ, non enim existimo posse in dubium verti, quin de potentia absoluta potuerit illa anima, etiam unita Verbo, carere gloria animæ aliquo tempore, & ita illam de condigno mereri: illud enim prius ostensum est supra q. 7. & 9. & ex illo evidenter aliud sequitur, ut per se notum est, & ex dicendis constabit, quamquam contrarium videatur posse colligi ex Scoto dist. 18. q. unica. §. Hoc viso ad primum: ubi dicit, tantum fuisse gloriam animæ Christi, ut propter excellentiam suam non potuerit cadere sub meritum, etiam ipsius Christi, quem sequitur Gab. ibi art. 3. dub. 2. Ratio enim illa, si vera est, procedit, etiam si supponatur Christum aliquando caruisse illa gloria. Sed si intelligant hi authores illam gloriam non potuisse cadere sub meritum Christi ratione suæ excellentiæ, & perfectionis intensive, est ratio omnino falsa, & indigna, quia Christi meritum de se non solum ad illam gloriam promerendam, sed etiam ad quamcumque aliam perfectiorem, etiam si in infinitum procedatur, sufficiens fuit, cum fuerit infinitum. Si autem sub illa perfectione gloriæ comprehendant modum habendi illam ab initio, sic non contradicunt nobis, sed pertinet eorum opinio ad quæstionem, quam disputandam aggredimur: & ita videntur illi authores intelligendi, qui etiam non loquuntur aperte de potentia absoluta, quamvis hoc magis indicent. Et ad eundem modum dicendum est de gratia habituali, & aliis donis, potuisse, scilicet, Christum illa mereri, si eis aliquando caruisset, propter eandem causam & rationem: quamquam de habituali gratia nonnulli dubitare videantur, ut Medina q. 7. art. 13. dub.

penul. *Quia principium, inquit, meriti non potest cadere sub meritum, gratia autem habitualis est principium meriti.* Quæ ratio, si quid probaret, simpliciter, & sine ulla suppositione probaret de gratia habituali: re tamen vera nihil probat, quia ut supra ostendi gratia unionis est sufficiens principium meriti, & ideo per illam potuisset Christus mereri habitualement gratiam, si illa caruisset. Quæstio ergo hæc solum procedit ex dicta suppositione, an scilicet hæc duo simul stare potuerint de potentia absoluta, ut scilicet Christus nunquam caruerit gratia, & gloria, & nihilominus per propria merita ea fuerit consecutus.

Prima sententia negat hoc esse possibile, sed implicare contradictionem. Hæc existimatur sententia D. Th. in hoc articulo, & ita videntur interpretari Cajet. & alii Thomistæ: indicant etiam Scot. & Gab. paulo ante citati: tenet etiam Henri. quodlib. 6. q. 6. qui sicut absolute opinatur, non potuisse etiam de potentia absoluta animam unitam Verbo carere visione beata, ita simpliciter existimat impossibile mereri illam. Fundamentum hujus sententiæ ita explicari potest, quia implicat contradictionem, eandem gratiam simul esse perfectam & imperfectam, consummatam, & non consummatam: sed gratia, quæ est principium merendi gloriam, est gratia imperfecta, & non consummata, gratia vero, quæ semper est conjuncta gloriæ, semper est perfecta & consummata; ergo impossibile est hæc duo simul conjungi. Secundo, impossibile est moveri ad terminum, & esse in termino; sed mereri gloriam est moveri ad gloriam; ergo impossibile est, esse in termino gloriæ, & moveri ad illud. Tertio, quia vel posset esse tale meritum per opera, quæ antecederent ipsam visionem beatam, & hoc non, quia supponimus animam nunquam caruisse illa visione: vel per opera subsequenter, & hoc est contra rationem ipsius meriti, debet enim antecedere præmium, cum sit illius causa, & aliquo modo efficiens.

Secunda sententia est non implicare contradictionem, ut Christus beatus existens a primo instanti Incarnationis suæ, beatitudinem animæ, & cætera dona gratiæ & scientiæ sibi meruerit. Hæc est communis Theologorum in 3. d. 18. expresse Albe. Mag. art. 4. & 7. Mai. q. 2. Guliel. de Rubio. q. 1. art. 2. Bafol. art. 3. Francisc. de Mairo. q. 1. Alii vero tantum indicant, quos sect. sequenti referam. Indicat etiam Alenf. 3. p. q. 16. memb. 1. tenet aperte Altiſiod. 3. Summæ tract. 1. c. 7. Et mihi videtur vera sententia, quæ duobus modis tractari, & probari potest.

Primo ergo possibile fuit Christum mereri hæc bona per aliquod opus, quod prius natura antecederet illa, quamvis simul in eodem instanti darentur propter tale meritum. Quod etiam hoc nullam involvat contradictionem, ita declaratur: quia in genere loquendo non est necesse, ut meritum tempore antecedit præmium, sed solum natura, ut de facto etiam videre licet in merito iustorum, & aliquo præmio illius: meretur enim iustus perfecte & de iustitia augmentum gratiæ, habet ergo illud augmentum veram rationem præmii, meritum enim & præmium correlativa sunt: & tamen in eodem instanti, in quo illud meretur, recipit illud, ut est indubitatum apud omnes Theologos. Ratio vero est clara, nam meritum vel comparatur ad præmium, vel ad Deum, qui daturus est præmium: si ad Deum, nulla est repugnantia, quia in eodem instanti, in quo meritum fit, Deus acceptat illud, & cum sit omnipotens, statim potest reddere præmium, si aliunde non repugnet; si autem comparetur ad præmium ipsum, intelligi facile potest, illam rem, quæ est præmium, esse talem, ut non repugnet simul esse cum illo actu, in quo fundatur meritum, ut aperte constat in exemplo posito de actu charitatis, & de eisdem charitatis augmento: ergo ex parte ipsarum rerum, in quibus consistunt meritum & præmium, non semper est repugnantia. Nec denique esse potest ex ordine meriti & præmii, quia vel ille intelligitur esse per modum habitudinis causæ ad effectum: & ex hac parte non est repugnantia, quia utrumque potest fieri in instanti, & in his, quæ hoc modo producuntur, si causa est perfecta, simul tempore est cum suo effectu: & eadem ratio est, si habitudo illa intelligatur esse per modum viæ ad terminum, quia, quando via est momentanea simul etiam est cum suo termino, ut philosophis notum est: & apud Theologos constat, ultimam dispositionem ad gratiam esse aliquo modo causam,

Christus potius mereri gloriam animæ suæ, etiam per actum naturæ priorem.



fam, & viam ad illam, & nihilominus simul tempore infunditur. Ex quo obiter solum relinquitur secundum argumentum primæ sententiæ.

Constat ergo ex generali ratione meriti, & præmii non repugnasse Christi animam per aliquem actum prius natura elicitum meruisse gratiam & gloriam sibi, in eodem instanti infundendam: superest, ut probemus, non repugnasse ex speciali ratione talis præmii, quod colligi potest ex D. Th. quodlib. 9. a. 8. & in 2. d. 5. q. 2. a. 2. & potest ostendi, quia si in hoc est specialis repugnantia, necesse est, ut oriatur ex ipsis rebus vel actibus, in quibus tale meritum & præmium constituit: nam, cum in cæteris omnibus eadem sit ratio de hoc præmio, & aliis, fingi non potest alia radix, ex qua oriatur. Sed hinc etiam nulla repugnantia necessario nascitur; ergo, probatur minor, quia in merito Christi duo considerari possunt, aliud est cognitio intellectus, quæ fundat meritum, & hæc in illo non fuit fides, sed scientia infusa: aliud est actus voluntatis, in quo est formale meritum, qui sit, v. g. actus liber amoris Dei; sed utrumque horum, etiam si prius natura habeatur, potest esse simul cum visione beata, & cum quibuscumque aliis donis gratiæ posterius natura infusis, de facto enim hæc omnia habuit Christus simul in eodem instanti; ergo ex parte ipsarum rerum, quæ sunt tale meritum, & tale præmium, nulla est specialis repugnantia.

**Objeçtio.** Dicitur fortasse, simpliciter non repugnare, hæc omnia simul fieri & haberi in eodem instanti, repugnare tamen, simul fieri cum illo ordine naturæ, ut actus inferioris scientiæ natura antecedit actum visionis, & actus amoris liberi gratiam ipsam consummatam, quia scientia infusa sequitur ex ipsa visione beata, & actus amoris ex ipsa gratia, quæ proxime nascitur ex unione. Sed gratis & sine fundamento diciiur hoc esse impossibile, cum nulla vel probabilis contradicção ostendi possit: quia nec necesse est scientiam infusam sequi ex beata, cum possit Deus sua sola virtute proxime & immediate illam donare; neque necesse etiam est, primum actum procedere ab habitu gratiæ, sed potest fieri a sola potentia cum auxilio.

**Respons.** Unde facile explicari potest modus, quo tale meritum in Christo esse potuit, potuit enim Deus in instanti creationis animæ Christi, primum omnium elevare intellectum ejus ad cognitionem aliquam Dei abstractivam, & per scientiam infusam, & similiter præbere auxilium voluntati, ut per liberum actum se disponeret ad susceptionem gratiæ, & aliorum donorum ad eum modum, quo nunc elevat voluntatem hominis in instanti justificationis, ut se disponat ad gratiam: unde sicut in justificatione nostra dispositio natura antecedit infusionem gratiæ, ita fieri potuit in prima sanctificatione animæ Christi per gratiam accidentalem. Est tamen differentia, quia nos per dispositionem non meremur de condigno infusionem gratiæ, quia non supponimur grati: Christus autem, quia per ipsam unionem est gratissimus, & perfectissimus principium meriti, ideo per talem dispositionem de condigno ex perfecta iustitia mereretur ipsam infusionem gratiæ: nam respectu Christi, hæc non est prima gratia, sed secunda, quæ aliam perfectionem supponit, nihil autem repugnat per primam gratiam, mereri secundam. Unde etiam fit, ut per eandem dispositionem poterit mereri eandem gratiam consummatam, & perfectam, atque adeo gloriam & cætera dona: quia valor & meritum illius dispositionis majus est, quam hæc omnia, & aliunde nulla est repugnantia, ut declaratum est. Ex quo discursu intelligitur, solum illum primum actum scientiæ, & primum auxilium datum voluntati Christi ad prædictum actum, non potuisse hoc modo cadere sub meritum ejusdem Christi, quia ante primam cognitionem, & primum actum liberum impossibile est intelligi, ut in eodem homine antecedit meritum, etiam ordine naturæ, cum meritum necessario supponat cognitionem, & in actu libero fundetur.

Secundo modo intelligi potest fuisse possibile hoc meritum per subsequenter opera, ita ut propter illa prævisa data fuerit prima gratia & beatitudo: & extendi hoc potest ad primum auxilium, & primum actum cujuscumque scientiæ. De hoc tamen modo, quia nunc necessarium non est, plura non dicam, sed judicandum de illo est juxta ea, quæ de possibili merito Incarnationis diximus supra q. 2. art. 11. & in sequentibus occurret occasio addendi nonnulla.

Etiam per  
subsequen-  
tia opera  
a Deo  
prævisa,  
merito  
potest  
Christus  
de illa do-  
na.

Ad argumenta, primo non existimo sensum D. Th. esse, quem explicat illa sententia, sed posse optime de potentia ordinaria explicari, ut sectione sequenti dicam. Ad primam vero rationem respondetur, gratiam, quæ esset in Christo principium meriti in dicto casu, non esse gratiam imperfectam, sed ipsam gratiam unionis. Deinde etiam si demus (ut revera fieri posset) habitum gratiæ infundi animæ Christi sine merito, ut per aliquem actum ab illo elicitum mereretur visionem beatam in eodem instanti dandam, adhuc argumentum illud non procederet: nam interrogo, quid intelligatur nomine gratiæ imperfectæ; nam si intelligitur gratia, quæ aliquo tempore non habet conjunctam visionem, sic petitur principium; nego enim esse de ratione gratiæ, quæ est principium meriti, ut sit hoc modo imperfecta, nulla enim ratione hoc probatur, & contrarium satis a me probatum est. Aut per gratiam imperfectam intelligitur gratia, quæ per fidem operatur, & hoc sensu in aliis præter Christum speciali modo repugnat, meritum visionis beatæ simul esse cum ipsa visione beata, eo modo quo repugnat, fidem & visionem esse simul, si illa repugnantia sit in ordine ad absolutam Dei potentiam, si solum ex natura rei, aut secundum legem ordinariam, quod fortasse probabilius est: at vero in Christo Domino neque hic modus repugnantia reperitur, quia meritum ejus non fundatur in fide, unde neque gratia, quæ fuit principium ejus, fuit in illo sensu imperfecta. Aut per gratiam imperfectam intelligitur gratia, quæ non habet totum augmentum seu intensiorem, quam habitura est, & hoc sensu etiam facile negari potest, hanc imperfectionem esse de ratione illius gratiæ, quæ est principium meriti, nihil enim illa ad meritum confert, neque ulla ratio assignari potest propter quam requiratur, præsertim cum possit habitus gratiæ esse tam intensus in viatore, quam in comprehensore. Aut denique per gratiam imperfectam intelligitur gratia, quæ est veluti in fieri & in via, & hic sensus vix potest distinguui a præcedenti, unde neque hæc imperfectio ad meritum est necessaria; posset enim gratia consummata & perfecta in intensiōe gratis alicui donari prius natura vel tempore, hac lege & conditione, ut quamprimum ab illa proflueret operatio libera & meritoria, statim in eodem instanti redderetur illi præmium visionis beatæ. Secundum & tertium argumentum, ex superioribus soluta sunt.

Gratia, ut  
sit per ac-  
tionem me-  
riti, non  
opus est,  
ut sit ali-  
quo modo  
imperfec-  
ta.

## SECTIO II.

*Utrum Christus meruerit gloriam animæ suæ, & alia dona gratiæ, & scientiæ.*

**P**rima sententia affirmat, quam tenent Altiſiodoren. Albert. Magn. Guilielm. de Rubion, Bassolis & Mairo, præcedenti sectione citati. Et suaderi potest nonnullis sacre Scripturæ testimoniis, Psal. 44. *Dilexisti iustitiam, & odisti iniquitatem, propterea unxit te Deus, Deus tuus oleo lætitiæ.* Quamquam enim interdum exponatur hic locus de gratia unionis, multi tamen Sancti illum intelligunt de gratia habituali, ut supra vidimus: & licet illud, propterea, possit denotare causam finalem, satis tamen commode videtur intelligi de causa meritoria. Præsertim tamen videtur urgere illud Isai. 53. *Pro eo quod laboravit, videbit, & saturabitur.* Visio enim, quæ satiat, non est nisi visio beata, juxta illud Psal. 26. *Satiabor cum apparuerit gloria tua.* Unde sanctus Vigilii lib. 5. contra Eutych. hoc testimonio probat Christi animam vidisse lucem & fuisse saturatam scientia propter suum meritum: & ibidem de merito Christi exponit illa verba Joan. 10. *Propterea me diligit Pater, quia animam meam pono.* Meruit ergo Christus dilectionem Patris, atque adeo gratiam. Denique Isai. 72. dicitur: *Ecce salvator tuus venit, & merces ejus cum illo.*

Rationibus videtur urgentius confirmari hæc opinio. Prima colligitur ex dictis in sect. præced. juncto principio, quo D. Th. in hoc art. utitur; quia si meritum non requirit carentiam præmii, melius est habere illud ex merito, quam sine merito; sed ostensum est, hoc meritum gloriæ in Christo non requirere carentiam ipsius gloriæ: ergo perfectius fuit habere illam ex merito, quam sine illo, Christo autemtribuendum est, quod perfectius est, Major probatur, quia habere aliquid ex merito perfectio est, unde, si non excludat majorem vel æqualem perfe-

ctio-



tionem, melius erit habere aliquid ex merito, quā sine merito: sed nullam maiorem perfectionem excludit, quia non excludit hanc, scilicet, semper esse beatum, & nulla alia excogitari potest, quam excludat, nec D. Th. alterius meminit. Dices excludere aliam, scilicet, quod ipsa gloria sit per se debita, ut proprietas connaturalis. Sed hoc falsum est, potest enim eadem gloria deberi, ut proprietas connaturalis ipsi unioni, & fieri debita ex iustitia per meritum, si aliunde non sit repugnantia, nam illi duo tituli optime inter se coniunguntur, & perfectius est habere aliquid ex utroque titulo, quam ex altero tantum. Ut si regis filius regnum sibi iure hereditario debitum, suis etiam victoriis, & facinoribus mereatur, maior illi erit gloria & perfectio, ita enim sectione sequenti nobis philosophandum est in merito gloriæ corporis Christi Domini. Unde quod contra hanc sententiam obijci solet, quia Christo gratia & gloria est connaturalis, tanquam naturali Filio Dei, juxta illud Joan. 1. *Vidimus gloriam ejus, gloriam quasi Unigeniti a Patre*, & ad Roman. 8. *Si Filii & heredes*. Quod autem connaturale est, non cadit sub merito. Hæc (inquam) ratio parum urgere videtur contra hanc sententiam, quia illi duo tituli (ut diximus) non repugnant: præsertim quia gloria & gratia non est connaturalis humanitati Christi secundum se, humanitati autem ut unitæ dicitur connaturalis, non quia sit proprietas physice manans ab ipsa unione, sed quia debetur secundum quandam veluti connaturalem proportionem, & congruentiam: hujusmodi autem proprietati multo minus repugnat, ut possit simul per meritum obtineri: sicut nullus negat, quin Christus Dominus potuerit obtinere gratiam habitualement per propriam dispositionem liberam, quod esset alienum a proprietate connaturali physice manante a suo principio, non vero a proprietate connaturali modo explicato.

Ex quo potest secunda ratio fieri pro hac sententia, nam Christus suscepit gratiam habitualement per propriam dispositionem; ergo per illam meruit gratiam ipsam. Antecedens videtur esse communiter receptum, præsertim in schola D. Th. quia ipse docet infra q. 30. art. 5. Christum sanctificationem esse per proprium motum liberi arbitrii, quia hic modus sanctificationis perfectior est: consequentia vero probatur, quia necesse est, ut illa dispositio fuerit actus supernaturalis ordine naturæ antecedens gratiæ infusionem, quia hoc est de ratione dispositionis, cum esse dispositionem sit esse causam, id quod docuit etiam D. Th. 1. p. q. 62. a. 2, ad 3. & 1. 2. q. 109. art. 6. ad 3. sed dispositio ad gratiam est meritoria gratiæ de condigno, si supponat personam gratam, ut in Christo supponebat; ergo in Christo illa dispositio ut prior natura gratia, fuit meritoria gratiæ, & consequenter etiam gloriæ, quia nullus meretur gratiam, quin mereatur etiam gloriam, quia gratia est prior gloria. Et confirmatur, nam ideo dicitur Christus sanctificatus per propriam dispositionem, quia hic modus sanctificationis est perfectior, sed etiam pertinet ad maiorem perfectionem, ut illa dispositio simul sit dispositio & meritum; ergo. Tandem, posito hoc ordine naturæ, quem requirit dispositio, ponuntur omnia, quæ necessaria sunt ad hoc meritum, ut evidenter patet ex dictis in sectione præcedenti, nam illa dispositio necessario includit cum actu voluntatis actum intellectus distinctum a visione beata, quia visio beata non est dispositio ad gratiam, sed consummatio ejus: habuit ergo Christus de facto totum id, quod de possibili requirebamus ad meritum; ergo meruit.

Hæc sententia est sine dubio probabilis, cum habeat graves auctores, & valde probabiles rationes, & speciem quandam pietatis: unde, qui illi temeritatis notam incurrunt, temere sine dubio loquuntur, præsertim cum nullum solidum fundamentum afferant, ut videbimus.

Nihilominus contraria sententia, quæ negat, Christum hæc dona animæ suæ meruisse, sicut communior Theologorum est, ita simpliciter videtur mihi probabilior. Tenet illam D. Th. hic, Magister & alii Theologi in 3. d. 18. Bonav. art. 2. q. 1. Richard. art. 2. q. 1. Palud. q. 2. Durand. q. 3. n. 6. Scot. & Gab. q. unica. Marsil. q. 12. a. 1. concl. 3. qui pro hac sententia refert August. sed falso, quia August. non loquitur de merito gratiæ aut gloriæ, sed de merito Incarnationis: refert item contra hanc sententiam Alexandrum Alensem, sed male, aperte enim tenet eandem 3. p. q. 16. memb. 3. a. 1. & Dried. de Capti.

& redemp. gen. hum. tract. 2. c. 2. p. 3. a. 3. Soto in 4. d. 21. q. 1. art. 2. Cano lib. 12. de locis c. 14. ad 6. Solet hæc sententia fundari quibusdam rationibus invalidis, quas breviter attingere oportet. Prima est illa de proprietate connaturali, quæ jam rejecta est. Secunda, quia si Christus meruisset gloriam suam, obtinuisset gloriam infinitam, sicut meritum est infinitum. Sed hæc minoris momenti est, idem enim argumentum fieri posset, ut non meruerit nobis gloriam, quia obtinuisset nobis gloriam infinitam, sicut meritum est infinitum. Simili etiam argumento probaretur, non habuisse gloriam, ut proprietatem unioni debitam, quia unio est infinita, & consequenter illi danda esset gloria infinita: & sine dubio, si sola dignitas ejus pensetur, gloria perfectior, etiam si in infinitum augetur, esset illi proportionata. Sicut ergo in hujusmodi exemplis dicimus infinitam gloriam non esse possibilem, & ideo datam esse Christo ratione unionis in certo termino juxta dispositionem divinæ sapientiæ: ita dari potuisset ratione meriti, nam licet meritum in se sit infinitum, tamen ab ipso Christo referri posset ad præmium finitum a Deo præscriptum, sicut de facto retulit sua merita, ut in nobis haberent effectum finitum. Tertia ratio est, quia alias Christus non obtinuisset gloriam usque ad finem vitæ suæ, quia non consummavit meritum suum, neque obtinuit perfectum jus ad præmium usque ad finem vitæ. Sed parum etiam hoc urget, quia non oportuit omne præmium meritorum Christi ita differri, multa enim petiit & meruit, ut statim fierent. Illa ergo dilatio & complementum meriti potissimum locum habuit in ordine ad nostram redemptionem & completam satisfactionem pro reatu totius humanæ naturæ: unde consequenter factum est, ut eo etiam tempore Christus caruerit aliquibus bonis, seu perfectionibus corporis, quarum carentia necessaria erat ad perficiendam nostram redemptionem, & ideo non ordinavit sua merita ad obtinenda ea bona ante mortem: de bonis autem animæ non est eadem ratio, & ideo poterat facile ordinare suum meritum ad illa obtinenda statim, & sine dilatione ulla. Ex quo ruit quarta ratio, qua alii utuntur, scilicet, quia alias habuisset Christus spem beatitudinis animæ suæ: hoc enim non sequitur, quia spes requirit carentiam & dilationem præmii, Christus autem, si gloriam animæ meruit, in primo instanti Incarnationis illam meruit, & statim, ac sine dilatione ulla, illud præmium obtinuit.

Quintam rationem addit Scotus, quam ipse aliter format, melius autem videtur hoc modo proponi: quia in beatitudine sunt aliqui habentes gloriam sine proprio merito, ex alieno tantum: sicut infantes: alii tantum habent ex proprio merito, sicut angeli: alii ex proprio & alieno simul, ut puri homines adulti; ergo decuit ad perfectionem illius status, ut esset aliquis habens beatitudinem sine ullo merito. Sed in primis, unde infertur, hunc futurum fuisse Christum? cur enim id, quod ipsi habenti perfectio non est, accommodandum est potius Christo, quam aliis, etiam si ad perfectionem totius communitatis pertinere videatur? Deinde negari potest, partitionem illam ad perfectionem vel complementum status beatifici pertinere, major enim perfectio videri potest, ut tota beatitudo omnium Beatorum in Christi meritis fundetur: unde & unum membrum illius enumerationis falsum est, quia angeli non ita habent gloriam ex merito proprio, quin etiam habeant ex merito Christi, ut infra dicemus. Sexta ratio aliquibus videtur evidentior, quia si Christus meruisset gloriam animæ suæ, propter illam præcipue venisset, & operatus esset potius propter comparandam sibi gloriam, quam nobis: quod non est modo loquendi Scripturæ consentaneum. Hoc argumento utitur Calvinus, ut probet Christum nihil sibi meruisse: *Alioqui, ait, frigeret confirmatio illa amoris, quam Paulus commendat, quod pro nobis mortem subiecit*, ad Rom. 8. *Unde ipse quasi sui oblitus, totum suum meritum ad nos transtulit, dicens, Pro illis sanctifico me ipsum*: Joan. 17. Sed hoc argumentum frivolum etiam est, quamquam etiam sine dubio verissimum est, Deum magis amare gloriam solius animæ Christi, quam omnium hominum, & angelorum, sive illam per se ac primario prædestinaverit, ut nos probabilius existimamus, sive oblata occasione peccati: quia quacumque ratione prædestinata sit, est majus bonum, magisque pertinens ad Dei gloriam, quam aliud. Deinde etiam verissimum est, Christum Domi-



num magis amare & velle gloriam suam, quam nostram: quia juxta charitatis ordinem ita amari debet, quia illud bonum, & in se excellentius est, & magis conjunctum Deo & Christo. Nihilominus tamen verum est, Filium Dei non propter suum commodum, sed propter homines humanitatem assumpsisse, quia ipsa Incarnatio fuit humanitatis exaltatio, non divinæ personæ: quia divinæ personæ nihil inde utilitatis accessit, sed potius *se ipsam exinanivit*, ut loquitur Paul. ad Phil. 2. id est, assumpsit naturam humanam passibilem, quæ comparatione divinæ naturæ est quasi nihil, & sub ea majestatem suam occultavit, ut omnes Patres exponunt: & in hoc sensu utitur interdum illa argumentatione contra hæreticos Cyril. Alex. lib. 3. Theof. c. 2. Similiter etiam verum est, omnia, quæ ad poenam, dolorem, & satisfactionem pertinent, ac denique quæ in corpore passibili ut sic peracta sunt, tantum propter nos fuisse suscepta, ipsi enim Christo propter se non fuissent necessaria: at vero postquam illa assumpsit, consequenter potuit Christus aliquid per ea sibi acquirere in humanitate sua. Neque inde in aliquo minuitur charitas Christi, sed in eo apparet maxima, quod cum ad gloriam suam non indigeret morte, ut nos copiose redimeret, voluit pro nobis mori: & ideo in Scriptura passio, & mors, & similia ad nos referuntur, quia occasione nostri peccati assumpta fuerunt.

Ut vero aliquo probabiliore discursu hanc sententiam confirmemus, dico primo. Christus Dominus non meruit sibi gratiam creatam, neque alios habitus infusos. Probat, quia duobus modis intelligi posset hæc meruisse. Primo, per opera subsequenter tempore, vel natura, seu precedentia ab ipsis habitibus, & per hæc non meruit hujusmodi habitus. Primo quia ex natura rei meritum debet antecedere præmium saltem ordine naturæ; hoc enim postulat natura ipsius meriti, cum sit causa, & via ad præmium. Quod si interdum aliter factum est, ex divina dispensatione fuit propter aliquam necessariam causam, & supposita aliqua imperfectione, ut dicemus infra, agentes de gratia data antiquis Patribus ex meritis Christi, & ideo respectu sui ipsius, non oportuit, nec decessit, esse in Christo talem modum meriti. Secundo, quia quod datur propter merita futura, datur dependenter a futuris operibus: Christus autem semper habuit hæc dona, tanquam proprietates sibi connaturales, & ut absolute sua sine aliqua dependentia a futuris, quia ille alius modus habendi hæc dona imperfectus esset. Tertio, quia principium meriti de facto non cadit sub meritum, & ideo Christus non meruit Incarnationem suam: ergo eadem ratione habitualis gratia non cadit sub meritum illius operis, cujus ipsa est principium. Quocirca omnes rationes, quibus supra probavimus, Christum non meruisse Incarnationem, probant non meruisse gratiam per hæc opera subsequenter. Secundo intelligi potest hoc meritum per opera ordine naturæ antecedentia hos habitus: & quod neque hoc modo possit hujusmodi meritum convenienter Christo attribui, probatur, quia tale meritum primo & per se fundari deberet in actibus supernaturalibus, actus enim naturales non sunt secundum se proportionati ad merenda supernaturalia dona, Christi autem meritum fuit omni ex parte perfectum, & ideo non solum ex parte personæ operantis, sed etiam ex parte ipsorum operum habuit proportionem & condignitatem cum præmio. Tum præterea, quia Christi anima in primo instanti suæ creationis, vel non habuit cognitionem naturalem, ut quidam volunt, quia hæc cognitio pendet a phantasmatibus: vel si habuit, non prius natura illam habuit, quam cognitionem supernaturalem, quia naturalis cognitio nullo modo fuit ratio & causa supernaturalis cognitionis. Quin potius supernaturalis cognitio dici potest ordine naturæ antecessisse, quatenus per illam elevata est anima Christi ad statum supernaturalem, & beatificum, in quo esse debuit omni ex parte perfecta, & independens in omni cognitione sua ab usu phantasmatum: ergo meritum supernaturalium donorum non potuit fundari in cognitione naturali, neque in actibus voluntatis, qui illam consequuntur.

Denique certum est, omne meritum de condigno apud Deum, fundari in aliqua cognitione supernaturali; superest ergo, ut probemus, non meruisse Christum habitus supernaturales per actus supernaturales ordine naturæ priores. Quod ita ostenditur, quia actus supernaturalis,

qui est prior natura suo habitu, non elicitur ab illo, ut in materia de gratia late demonstravi, & infra in materia de poenitentia illud attingam, quia repugnat propriam causam efficientem esse effectum sui effectus in genere causæ materialis, vel alio simili. At vero anima Christi nunquam operata est actus supernaturales, etiam in primo instanti, nisi ex habitu, quia semper operata est perfecta, & connaturali modo, unde ad eliciendum primum actum scientiæ infusæ præintelligitur illi esse indita lumen & species: & primus actus charitatis intelligitur supponere habitum, a quo elicitur: ergo Christus non obtinuit hos habitus per meritum horum actuum ordine naturæ antecedens, cum revera non antecesserit: ergo ulterius nec gratia ipsa data est propter hoc meritum, quia hæc gratia, quæ est in essentia animæ, & comparatur ad alios habitus infusos, ut forma principalis ad suas potentias, ordine naturæ illis supponitur. Et eadem ratione concluditur, nullum alium habitum cecidisse sub hoc meritum, quia non est major ratio de uno quam de aliis, & quia, infusa gratia, omnes alii infunduntur, ut comitantes illam, unde alii habitus non cadunt sub meritum, nisi cadat ipsa gratia. Unde confirmatur, quia isti habitus consequuntur unionem ut proprietates illius; unio autem hypostatica, cum substantialis sit, proprie fit in substantia ipsius animæ simul cum corpore: ergo ratione illius primo perficitur anima in essentia sua per gratiam habitalem, ex qua manant habitus ad potentias, & tandem anima sic perfecta in actu primo intelligitur connaturali & perfecto modo prodire in actum secundum. Non ergo dati sunt isti habitus animæ Christi, quia supernaturaliter operata est, sed dati potius sunt, ut supernaturaliter operaretur; non ergo sunt dati propter meritum, sed potius ad merendum.

Ex his dico secundo, non meruisse Christum beatitudinem animæ suæ. Hæc fere sequitur ex præcedenti, & fere eodem modo demonstratur, nam ex dictis satis constat, non meruisse illam per actus ordinis naturalis; neque per supernaturales, posteriores vel subsequentes ipsam visionem beatam. Quod vero neque per antecedentes, seu priores ordine naturæ illam meruerit, probatur primo, quia nullus actus intellectus præcessit ordine naturæ in Christo ipsam visionem beatam. Primo quia est magna perfectio animæ Christi, ut primus intuitus ejus ad ipsam divinam essentiam in se ipsam fuerit terminatus: quo enim illa anima intelligitur effecta similior ipsi divinæ naturæ, eo perfectior ex stimanda est: primus autem intuitus Dei intelligentis intelligitur terminatus ad se ipsum; ergo anima Christi erit Deo similior, atque adeo perfectior, si ad hunc modum visionem ejus participavit. Secundo, quia nullus alius actus intellectus est causa, vel dispositio ad illam visionem, ut significat D. Th. supra q. 9. art. 3. ad 2. ratio est, quia non est intelligendus Christus procedere in cognitione ab imperfecto ad perfectum, etiam ordine naturæ: sed potius intelligendus est ab optimo, & perfectissimo actu, ut pote sibi intrinseco & maxime connaturali statim inchoasse. Tertio, quia lumen gloriæ est quasi prima proprietas consequens gratiam consummatam, seu existentem in eo perfecto statu, in quo in fide fundata non est: sicut enim intellectus est prima proprietas consequens rationalem animam, ita lumen supernaturale & divinum, est prima proprietas comitans supernaturalem gratiam, quæ in statu viæ propter imperfectionem ejus fide utitur tanquam intellectuali virtute sibi proportionata; de se autem postulat lumen clarum & perfectum ad suam consummatam perfectionem. Quocirca, sicut non meruit Christus alias virtutes comitantes gratiam, ita neque lumen gloriæ, quod est virtus quædam per modum potentiæ vel habitus, seu actus primi perficiendi & elevandi intellectum ad perfectissimum actum secundum: quia, sicut alia virtutes prius natura intelliguntur infusæ animæ Christi ante omnem actum secundum, ita & lumen gloriæ. Ex quo ulterius concluditur, non meruisse Christum visionem ipsam beatam, quia prius natura intelligit anima Christi per hoc lumen, quam per ullum aliud, quia est potentissimum & expeditissimum ad agendum, & habet conjunctam essentiam divinam per modum speciei, seu objecti actu intelligibilis perfectissimi: unde necessario prodit in actum visionis Dei, qui est vel adæquatus illi, vel certe maxime proprius & connaturalis: unde, sicut intel-

Christus  
sibi neque  
gratiam  
creatam,  
neque  
alios ha-  
bitus in-  
fusus me-  
ruit.

Neque  
beatitudi-  
nem ani-  
mæ suæ  
meruit  
Christus.  
Primus  
autem  
intellectus  
Christi  
ordine  
naturæ  
fuit visio  
beatifica.



Intellectus angelicus prius natura intelligitur elicere cognitionem proprię substantię, quam cuiuscumque alterius objecti: ita intellectus informatus lumine glorię, prius natura intelligitur elicere ipsam visionem Dei, quam alium quemcumque actum supernaturalem: ergo antecessit ordine naturę illa visio omnem cognitionem, in qua posset fundari meritum, atque adeo antecessit omne meritum: non ergo per prius aliquod meritum comparata est. Quę ratio evidenter concludit, si lumen glorię, & scientię infusę est unum & idem: hoc enim supposito recte concludit illa ratio, primum actum illius luminis esse visionis beatę, & consequenter ordine naturę antecedere omnem actum scientię infusę. Si vero dicamus illa lumina esse distincta, verisimilius dicetur comparari inter se, tanquam perfectum, & imperfectum in eodem ordine, & statu beatifico: videtur enim lumen scientię infusę veluti accidentaliter perfectio illius status. Unde nulla ratione probabili videtur dici posse, actum scientię infusę antecessisse ordine naturę actum visionis beatę, neque igitur aliquod meritum illam antecessisse credendum est. Quod tandem confirmatur, quia necesse est fateri aliquem actum cognitionis supernaturalis datum esse animę Christi absque ullo priori merito; ergo maxime hoc verisimile est de visione beatę, quę & natura sua est prior & perfectior actus, & maxime debitus ac connaturalis unioni.

**Ratio D. Thom.** Et juxta hęc, quę dicta sunt, explicanda est vis rationis D. Thom. quę in hoc fundatur, quod meritum beatitudinis non est simul cum ipsa beatitudine: quod nonnulli discipuli D. Thom. propter primum argumentum primę sententię de ordine naturę interpretari conantur. Sed D. Thom. aperte loquitur de duratione temporis: intelligendum ergo est, non de quocumque merito, & pręmio, sed de pręmio beatitudinis & secundum ordinariam potentiam seu legem: huiusmodi enim meritum fundatur in gratia operante per fidem, & hoc sensu dici solet fundari in gratia imperfecta, ut D. Thom. loquitur 1. p. q. 62. art. 4. illa autem imperfectio repugnat cum tali pręmio. Quod si datur aliquod meritum fundatum in aliori cognitione, ut fuit Christi meritum, repugnat illud esse simul cum beatitudine & ordinari ad illam, quia supponit illam, ut explicatum est. Et hęc ratio probat etiam de gratia & scientia.

Ex fundamentis vero primę sententię testimonia Scripturarum facilia sunt, & exponenda juxta ea, quę statim sect. sequenti dicemus. Prima item ratio expedita jam est, ostensum est enim non potuisse Christum mereri hęc dona, nisi vel carendo illis, vel imperfecto modo illa habendo, vel etiam efficiendo imperfecte & non connaturali modo aliquam operationem: & ita non procedunt reliqua, quę in illa ratione recte dicuntur, sed non contra nostram sententiam: quia non nititur fundamento ibi impugnato, scilicet, quod illi duo tituli meriti & proprietatis connaturalis repugnant: hoc enim non dicimus, sed solum, quod repugnaverit habere hęc dona cum omni perfectione debita & connaturali, & habere ex merito. Ut autem recte supra notavit Scotus, quod Christus non meruerit hęc dona, solum quia perfectissimo modo illa pręhabuit, nihil minuit perfectionem ejus, quia nihilominus vere habuit potestatem merendi hęc omnia, seu quidquid perfectionis est in tali potestate, habuit etiam actuale meritum tanti valoris, ut ad hęc omnia promerenda esset sufficiens. Quod ergo propter solam anticipationem, unum non fuerit ordinatum ad aliud, nihil perfectionis simpliciter minuit. Possumus exemplum adhibere in ipso meto Christo, ut Deus est, cuius perfectionem non minuit, quod generare Deum non possit, quia in se habet quidquid perfectionis est in potentia generandi, & totam perfectionem actus, quo pater generat, & solum non convenit illi generare, quia secundum ordinem originis quodammodo a Patre pręventus est.

Ad secundum discipuli D. Th. valde laborant, ut concilient has sententias, quas ipsi tribuunt D. Th. scilicet Christum sanctificatum esse per propriam dispositionem, & nihilominus non meruisse gloriam per talem dispositionem; & qui melius effugiunt, respondent, licet dispositio sit prior in genere causę materialis, non tamen simpliciter, & ideo non esse meritoriam. Sed hoc non fatifacit, tum quia hęc dispositio simpliciter est prior natura, ut in materia de gratia demonstravi: tum etiam quia

juxta doctrinam D. Th. ipsum meritum ad genus causę dispositivę revocatur, ut patet ex 1. p. q. 23. a. 5. Respondendo igitur negando, animam Christi fuisse sanctificatam per dispositionem, qua se ipsam ad gratiam pręparavit, ut recte docuerunt Bonav. & Richar. supra, & in eadem sententia fuisse Sotum refert Medina supra q. 7. a. 13. in fine, qui non satis consequenter loquitur, tam in eo loco, quam in præsenti: quia revera est eadem ratio in Christo Domino de merito & de dispositione: tum quia vera dispositio ad gratiam procederet ab auxilio & non ab habitu gratię: tum etiam quia oportet talem dispositionem fundari in aliqua cognitione priori visione beatifica. D. Thom. autem in citato loco q. 34. a. 3. solum dixit, Christum esse sanctificatum secundum proprium actum, quod non necesse est intelligi de actu, qui natura antecedit ipsam infusionem habitus, sed qui consequatur potius per modum liberi consensus, quo anima, quę sanctificatur, diligit suum sanctificantem, & gratias ei agit: qui actus, & si quis est alius similis, non est dispositio pręparans, sed veluti ornans, & consummans ipsam sanctificationem, sicut actus secundus perficit primum: hanc enim duplicem dispositionem distinxit D. Th. supra q. 9. art. 3. ad 2. significans, dispositiones animę Christi potius esse posteriores, quam priori modo explicandas. Et conveniens ratio reddi potest, quia cum anima Christi nihil haberet repugnans sanctificationi, imo haberet ratione unionis veluti intrinsecum principium sanctificationis connaturalis, non indigebat libera dispositione pręparante ipsam ad gratiam, sed potius ex vi unionis gratia illi data est, ut per eam modo perfecto & connaturali, statim operaretur. Quocirca hęc Christi sanctificatio non in omnibus proprietatibus similis fuit sanctificationi aliorum, etiam ratione utentium, habuit enim quidquid perfectionis in aliis invenitur, & ideo simul habuit actum secundum cum primo. Quod vero in aliis sit dispositio pręparans, & natura prior, ad perfectionem non pertinet, sed potius imperfectionem supponit: quia vel sanctificatio sit ad removendum peccatum, vel saltem ad elevandam naturam ad supernaturalem ordinem: at vero Christi anima supponitur elevata per gratiam unionis, quam nulla potuit pręcedere dispositio, ut supra demonstratum est.

Sed, quamquam ea, quę diximus, vera sint de habitibus gratię & scientię per se infusis, dubitari adhuc potest primo, an meritis fuerit Christus gratiam actualem, seu actus supernaturales, aut valorem suorum actuum. Quidam enim formidant concedere huiusmodi meritum actibus Christi; quia alias toto illo tempore, quo sibi hęc merebatur, nihil nobis mereri potuisset; & ita usque ad finem vitę, & fortasse usque ad extremum actum meritorium, quando jam nihil amplius sibi merebatur, nihil etiam nobis fuisset meritis; quod esse, plusquam falsum, constat ex his, quę disp. 39. sect. 2. & 3. adduximus, & ex supra dictis q. 1. art. 2. disp. 4. Sequela probatur, quia quilibet actus Christi erat infiniti valoris: ergo, si per priorem actum merebatur valorem actus sublequentis, illud erat adæquatum pręmium talis actus: ergo per illum nihil amplius poterat de condigno mereri: ergo, si semper per actus priores meritis est posteriores gratias actuales, & valorem sublequentium actuum, nihil potuit per illos priores actus nobis mereri, donec perventum est ad actum, quo nihil sibi meritis est, quod de solo ultimo actu dici poterit. Sed hic discursus fundatus est in uno timore proveniente ex falsa estimatione meritorum Christi & infiniti valoris eorum. Ostendi enim supra disp. 4. Christi meritum tam excellens & infinitum, ut quilibet actus ejus ad omnia pręmia, tam divisive quam collective sumpta, sufficiat, etiam si in illis plura contineantur, quę infinitatem habeant, & cum eis alia conjungantur; nam hęc omnia adæquat infinitas divinę personę, a qua sumitur infinitus valor meritorum Christi. Secundo deficit ille discursus, quia, licet Christus meritis fuerit gratiam actualem, non sequitur meritum etiam fuisse valorem suorum actuum, ut declarabo.

Alii negant, Christum meritum fuisse has gratias, quia erant sibi connaturales & debitę, tam ratione unionis, quam ratione habituum supernaturalium. Sed hęc ratio non est sufficiens, ut ex dictis constat: quia diximus, hos duos titulos, scilicet, debitum connaturalitatis, & meriti non

Anima Christi non fuit sanctificata per propriam dispositionem pręparantem.

Dubium.

Quorumdam opinio.

Impugnatur.

Aliorum placitum refutatur.



Per distinctiones varias dubio satisfi.

non repugnare, si aliunde non intercedat impedimentū, vel aliquid repugnans merito. Nam etiam in homine puro, qui per infusionem primæ gratiæ justificatur, reperimus, hoc ipso, quod illi prima gratia infunditur, debere ei gloriam debito connaturalitatis, ut hæreditatem filio; & nihilominus, juxta probabilem sententiam eam sibi meretur per actum contritionis gratia formatum.

Distinctione igitur videtur utendum, & in primis excludendi sunt actus beatifici, & omnia bona supernaturalia ad illos necessaria: de his enim jam satis dictum est. Nam, quæ de beatitudine animæ diximus, procedunt de omnibus actibus necessariis ad illam beatitudinem, sive in eis consistat essentia beatitudinis, sive non; & a fortiori procedunt de quolibet Dei concursu ad illos necessario: nam ille etiam omne meritum antecedit. Deinde omit-tendus est primus actus meritorius Christi, quia ex iisdem rationibus factis constat, neque talem actum secundum se potuisse esse ex merito, cum meritum non supponat, neque etiam concursum ad talem actum, vel quicquid ad illum necessario perexigitur, potuisse esse ex merito propter eandem causam. Difficultas ergo superest de reliquis actibus, qui tempore vel natura consequuntur primum actum meritorium. In quibus distingui potest id, quod erat ex solo Deo, ut Deus est, & quod erat ex humana Christi voluntate libere eliciente vel imperante, & quod erat ex Verbo Divino ut hypostatice unito humanitati. A Deo enim ut Deo, erat actualis concursus gratiæ seu supernaturalis ad tales actus, & omnis actualis gratia præveniens: ostendimus enim supra q. 7. has etiam gratias fuisse interdum necessarias, interdum valde utiles animæ Christi. A voluntate humana Christi erant iidem actus, quatenus in eos influebat libere. A Verbo autem erat specialis dignitas & sanctitas, quæ illis actibus communicabatur, & quantitas valoris infiniti, quem in genere meriti & satisfactionis habebant.

Ut ergo a clarioribus incipiam, actus Christi Domini, ut erant ab illius humana voluntate, non cadebant sub meritum ejusdem Christi. Patet, quia nemo meretur id, quod est suum, quatenus suum est; sed actus, ut sunt a propria voluntate, sunt ita proprii ipsius operantis, ut ea ratione dicatur maxime ipsorum dominus: ergo ut sic non cadunt sub meritum ipsius operantis. Hæc autem ratio eodem modo procedit in Christo. Secundo, quia ea tantum cadunt proprie sub meritum coram Deo, quæ sunt dona ejus: sed actus liberi ut sic non sunt dona Dei, nisi ut sunt a Deo, non vero ut sunt ab ipso homine operante, nisi quatenus Deus facit, illum operari, in quo jam consideratur operatio ut est a Deo, & non præcise ut est ab homine: ergo, absolute loquendo de actu sub hoc præciso respectu ut est a voluntate libera, non potest esse præmium meritorium, & consequenter nec potest cadere sub meritum.

Addo ulterius, hos actus, quantum ad valorem infinitum, quem habebant ex conjunctione ad Verbum; non cecidisse proxime sub meritum Christi, non quia exhaurirent illud meritum: hæc enim ratio (ut opinor) parvi momenti est: sed quia ille valor non pendet ex nova Dei voluntate, neque ad illum est novus concursus necessarius, imo neque impediri potest, etiam de potentia absoluta, supposita unione hypostatice in ipsa natura, quæ est talis operationis principium: & ideo dixi, proxime non cadere hunc valorem sub meritum, nam remote, si ipsa unio caderet sub meritum, posset aliquo modo talis valor attribui meritis, non in se, sed in radice: sicut nunc dici potest de unione quoad conservationem ejus, ut supra dictum est. Sed hoc non satis est, ut valor operum in se dicatur cadere sub meritum, sicut nunc iustus meretur augmentum gratiæ, a quo augetur etiam subsequens meritum, & tamen non dicitur mereri posteriora merita, quod majori ratione in præsentem verum est.

Argumentor igitur in hunc modum; quia id solum cadit sub meritum respectu Dei, quod Deus ipse conferre potest, & posset etiam non conferre non intercedente merito: sed supposito quod Christus sic operetur, fieri non potest, quin talis actus habeat infinitum valorem, & sanctificationem, ac dignitatem infinitam a Verbo: ergo, supposita incarnatione talis actus secundum talem specialem rationem non potest cadere sub meritum. Dices. Videtur hæc ratio coincidere cum alia de proprietate connaturali aut debito: quia hic valor videtur esse connaturalis proprietatis moralis talium actuum prout sunt a

Verbo incarnato. Respondetur, esse quidem proprietatem connaturalem, sed talem, quæ sit a solo Verbo quasi formaliter, sine novo influxu aut causalitate Dei, quia non est proprietas physica, sed moralis. Unde etiam fit, ut impediri non possit de potentia absoluta, supposita unione, sicut fieri non potest, quin humanitas sanctificetur per unionem. Nec potest illa sanctificatio cadere sub meritum, si unio sub meritum non cadit. Non ergo procedit ratio de quacumque proprietate connaturali, sed de illa quæ est tantum formaliter a priori dono, seu gratia unionis, & novam dependentiam a Deo non habet. Secus vero est de proprietate, debita quidem ex quadam proportionem connaturali, quæ tamen indiget novo influxu Dei, & quam Deus posset negare absolute loquendo: in hac enim proprietate est longe diversa ratio, ut per se constat.

Sed objicies; nam supra disp. 10. sect. 4. diximus, meritum fuisse Christum partialem unionem hypostatice illarum partium materiæ, quas per continuam nutritionem acquirebat: ergo eadem ratione meritis est unio in hypostasi convenientem actibus, quos in discursu totius vitæ exercebat: meritis est igitur infinitum valorem, quem tales actus ex hac unione habuerunt. Respondetur, negando priorem consequentiam, quia partes materiæ uniuntur immediate Verbo Dei: unde necessaria est nova actio, & quasi novum donum Dei, ut illæ in se ipsis uniantur, & de absoluta potentia possent non uniri, etiam si humanitas, ut ex parvo corpusculo composita, esset unita: & ideo est in illis quiddam necessarium est, ut cadere possint sub meritum, supposita actus meritorii & sufficientis effectione & antecessione. At vero actus non uniuntur Verbo immediate, sed tantum mediate, & quasi denominatione extrinseca ab unione facta in humanitate, & ideo talis unio non potest cadere sub speciale meritum, quia solum est veluti relatio resultans necessario, posito fundamento, & termino, quam impossibile est cadere sub proprium & distinctum meritum ab ipso fundamento & termino: maxime si supponatur (quod in præsentem verissimum est) ad illam resultantiam nullum novum Dei influxum esse necessarium.

Ultimo addendum est, meritum fuisse Christum omnes actus supernaturales, quos post primum meritorium habuit, quatenus sunt dona Dei, hoc est, quantum ad supernaturalem concursum, quem ad illos eliciendos a Deo habuisset, & consequenter etiam fuisse meritum omnes gratias actuales, tam excitantes, quam adjuvantes, omnesque supernaturalis providentiæ effectus ac beneficia suæ humanitati collata. Ratio est, quia respectu harum gratiarum fuerunt in Christo omnes condiciones ad meritum necessariae, sine ulla nova dispensatione, sed modo maxime connaturali: ergo nulla superest ratio ad negandum hæc meritum fuisse, cum aliunde procedant omnes rationes supra tactæ, scilicet, quod hoc spectat ad quandam majorem perfectionem, tam ex parte ipsius Christi ut hominis, quam ex parte Dei, & sapientissimæ providentiæ ejus. Antecedens probatur facile, quia primus actus meritorius Christi habuit sufficientem valorem ad hæc omnia promerenda, ut constat ex dictis disp. 4. antecessit etiam tempore, vel natura reliquos omnes actus, vel actuales gratias, ut supponimus. Hujusmodi etiam gratiæ ex se sunt convenientia præmia meritorum: unde & nos, si iusti simus, interdum illas meremur: nam bene utendo priori gratia, meremur posteriorem: & ipse Christus illas nobis promeritus est: quid ergo obstat potuit, quin Christus sibi fuerit illas meritis? Dices. Quia erant sibi connaturales ratione unionis & status beatifici. At hoc nihil obstat, quia res uno modo debita potest fieri debita alio titulo, præsertim quando novus illi titulus est diversæ rationis, & majus quoddam vinculum addit priori debito: ita vero est in præsentem, nam meritum addit debitum justitiæ, quod diversum est a debito connaturalis proportionis; & aliquo modo majus, quia, quod hoc modo debetur, negari non potest ex solo arbitrio & voluntate debitoris, quin violeretur rectitudo alicujus virtutis: quod vero priori tantum modo debetur negari potest, saltem per potentiam Dei absolutam ex ipsius voluntate sine defectu rectitudinis seu violatione alicujus virtutis. Quamvis ergo hæc gratiæ actuales Christo essent illo priori modo debitæ ratione unionis, nihilominus habuit locum in eis meritum, ut fierent debitæ etiam ex justitia.

Dices, hæc ratione, ad summum, probari, non repugnasse,

Occurritur objectioni.

Respondetur objectioni.



gnasse, ut hæ gratiæ caderent sub meritum Christi, non obstante priori debito, non vero, quod de facto illas meruerit: unde cum hoc alias nulla sufficiente autoritate aut ratione constet, non est cur sine necessitate asseratur. Præsertim, cum non videatur verisimile, Christum ordinasse sua merita ad obtinenda hæc auxilia, quæ certo sciebat, sibi esse parata & donata cum ipsa unione. Respondetur, utrumque concludi sufficienter ex discursu facto: probatur enim illa ratione potuisse Christum Dominum hæc dona mereri, servatis omnibus legibus necessariis ad meritum, tam ex natura rei, quam secundum ordinariam Dei providentiam, quia hæ gratiæ sunt ex his bonis, quæ proposita sunt hominibus viatoribus in præmium bonorum operum, & Christus viator fuit, & meritum ejus valorem habuit sufficientissimum, & antecessit collationem harum gratiarum. Huic autem principio adjungimus, Christum Dominum meritum fuisse tam sibi, quam aliis, quidquid sine dispensatione mereri potuit, quia cum hoc sit majoris perfectionis, & in Christi operibus & dignitate habeat sufficientissimum fundamentum non est cur ipsi denegetur. Accidit, quod Deus in omni genere causarum & effectuum operatur per causas secundas quidquid commode potest: ergo in genere causæ meritoriarum operabitur per Christum, præsertim in ipsomet Christo, ejusque humanitate, quidquid connaturaliter potest. Neque necesse est, ut omnia in particulari sint revelata, sed satis est, quod in principiis generalibus contineantur: alioqui multa alia essent a Christo jure excludenda, ut quod promeritus sit capitis dignitatem, vim miraculorum effectricem, & alia de quibus sect. seq. dicemus. Sicut de puris hominibus non sunt in particulari revelata omnia, quæ merentur, & tamen ex principiis generalibus, & ex quibusdam particularibus alia colligimus, ut quod bene utendo uno auxilio, mereantur aliud, &c. Quod denique attinet ad ordinationem meritorum Christi, ut fiebat per voluntatem ejus humanam in primis ad merendum aliquid, non est necesse, ut is, qui meretur, ex propria intentione ordinet suum meritum ad obtinendum tale præmium, ut in nobis etiam constat: sed sufficit divina ordinatio, & promissio sub conditione operis. Ac deinde, licet in particulari non fiat hæc relatio, tamen in generali nullus est, qui vel formaliter vel virtute non habeat intentionem consequendi vel merendi suis operibus, quidquid potest, juxta illorum valorem, & leges a Deo statutas. Tandem in Christo, qui omnia distincte agnoscebat, verisimilius est, actu ordinasse sua merita ad obtinenda omnia præmia, quæ sub meritum suum cadere poterant juxta divinam ordinationem: in hoc enim nullum est inconveniens, nec imperfectio, sed potius major perfectio, quia cum hac ordinatione habebat Christus optimos fines & motiva in suis operibus, & meritis exercendis, & hanc ipsam ordinationem suorum meritorum, ad majorem Dei gloriam tandem ultimate referebat.

Sed dicit tandem aliquis. Ergo meritum est sibi Christus Dominus impeccabilitatem animæ suæ, quia meruit illam divinæ providentiæ directionem, qua suæ animæ collatum est, ut a bono declinare non posset: consequens videtur esse absurdum, quia Christus non suis meritis factus est impeccabilis, sed natura sua ita id habuit, ut secluso omni merito illi denegari non potuerit, etiam de potentia absoluta. Respondetur, negando sequelam, quia ante omne meritum fuit impeccabilis, sicut fuit sanctus per gratiam unionis: unde hoc non est ex donis, quæ subsequuntur, sed ex his, quæ antecedunt primum actum meritorium. Quod confirmatur, nam esse impeccabilem non dicit actum tantum, sed intrinsecum debitum & necessitatem carenti omni culpa, hanc autem necessitatem non habuit Christus per meritum sed immediate ex vi unionis, & ideo non meritum est esse impeccabilis, etsi mereri potuerit particulare auxilium, quo voluntas ejus ad aliquod bonum operandum excitata, vel adjuta est. Necessitas enim non peccandi tantum est necessitas quoad specificationem, & abstrahit ab hoc vel illo modo, quo potest executioni mandari: & ideo, licet hoc vel illud auxilium cadat sub meritum, non tamen ipsa necessitas non peccandi. Eo vel maxime, quod per visionem beatam facta est proxime illa anima impeccabilis, licet radicaliter jam esset impeccabilis per unionem, & tamen nec unio, nec visio beata, sub Christi meritum ceciderunt, ut in superioribus ostensum est.

Ex his expeditur quæstio, an Christus meritis fuerit habitus scientiarum, & virtutum moralium suo genere acquirarum: item concursus & auxilium ad omnes actus habituum recte & frequenter exercendos: item ministracionem specierum intelligibilium accommodatam ad plenitudinem scientiæ vel experienciæ obtinendam absque defectu vel errore & similia. Dicendum est enim, in primis non meruisse sibi Christum dictos habitus, quia illos habuit per accedens infusos a principio simul cum gratia, & in eodem signo atque adeo prius ordine naturæ quam actum meritorium exerceret: quia prius intelligitur perfecte constitutus in actu primo ad actus omnes exercendos, quam in actum aliquem secundum exierit. Tenendo autem, hos habitus discursu temporis fuisse comparatos, ex alio principio dici potest non cecidisse sub meritum, quia scilicet sunt naturalia bona, & in causis naturalibus sufficienter contenta, imo ex illis necessitate quadam obtinenda: hujusmodi autem bona non sunt ordinata a Deo, per se loquendo, ut per meritum habeantur, sed solum ea, quæ supernaturalia sunt, quod in Christo Domino intelligendum est modo statim declarando. Deinde, de ministracione specierum vel phantasmatum concursu, & aliis supra tactis, quando mere naturaliter fiebant per solas causas naturales suo naturali cursu operantes, nullum erat necessarium meritum, ob rationem dictam. Quando autem intercedebat singularis providentia, vel actio Dei, sive immediate, sive median- tibus angelis, singulari & extraordinario modo Christo obsequentibus multum verisimile est; totum id fuisse Christo retributum, non solum propter personæ dignitatem, sed etiam propter sua merita. Nam in hujusmodi bonis locum habent omnes rationes factæ, & omnes leges & conditiones meriti: & illa bona, licet in substantia naturalia sint, in modo tamen sunt supernaturalia & ad supernaturalem finem ordinata erant, nimirum ad unionem hypostaticam tanquam debitum ornamentum ejus, & ut Christus convenienter posset sua munera exercere, præsertim munus redemptoris, & doctoris hominum, & supremi judicis, ac perfectissimi exemplaris virtutum omnium.

## SECTIO III.

*Utrum Christus meruerit gloriam sui corporis, sui que nominis exaltationem.*

Calvinus, ut supra retuli, negat Christum aliquid sibi meruisse, cujus sophisticum fundamentum supra indicavimus, & dissolvimus: ex Scholasticis vero Guillemus de Rubion in 3. d. 18. non negat simpliciter hoc Christi meritum, dicit tamen esse rem dubiam & incertam, & ideo non esse simpliciter affirmandum, quia neque ex Scriptura colligitur, neque ex certa aliqua ratione: quia cum Christus sit dominus omnium, non indiguit merito, ut perfectionem quamcumque, seu dignitatem obtineret. Scotus vero eadem distinct. 18. dicit indirecte meruisse Christum gloriam corporis, quia meruit, ut removeretur impedimentum talis gloriæ, directe autem non meruisse illam, quia ablato impedimento habebat intrinsecum principium, ex quo illa manaret. Et ad hunc modum videtur loqui Cyril. lib. 3. Thesau. cap. 3.

Dico tamen primo, Christum Dominum meruisse gloriam corporis sui, neque hoc posse sine temeritate negari. Ita enim docent Theologi omnes cum D. Th. hic, & Magistro in 3. d. 18. & habet magnum in Scripturis fundamentum. Lucæ enim 24. dicit ipse Christus: *Nonne oportuit pati Christum, & ita intrare in gloriam suam?* satis aperte significans, per passionem parasse sibi viam ad gloriam, atque adeo illam sibi meruisse, quod magis explicuit Paul. ad Philip. 2. dicens *Propter quod & Deus exaltavit illum, & donavit illi nomen, quod est super omne nomen.* Ubi particula illa *Propter*, si juxta vim & proprietatem suam, ut debet, explicetur, non tantum consecutionem unius post aliud, ut hæretici exponunt, sed etiam unum fuisse causam alterius significat: nulla autem alia ratio causæ hic intercedere potest, nisi meritoria, & ideo ad Hebr. 2. dicit idem Paul. *Vidimus Jesum propter passionem mortis, gloria & honore coronatum,* ubi nomen coronæ satis indicat victoriam, & præmium. Unde Basil. lib. 4. contra Eunom. sub titul. *Quod filius creatura*



*tura non sit*, dicit, propter obedientiam datum esse Christo in humanitate nomen super omne nomen. Idem dicit Aug. lib. 2. contra Maximi. c. 5. & lib. 3. c. 2. Chrys. Ambr. Anselm. Beda & alii explicantes citata loca Pauli: & late Vigil. lib. 5. contra Eutych. Hugo Victor. lib. 2. de Sacrament. p. 2. c. 6. Ratio vero est, quia hic habuerunt locum omnes conditiones necessariæ ad meritum, & ceteris paribus perfectius est habere aliquid ex merito, quam sine illo, ut recte D. Th. hic argumentatur. Neque huic merito obstat, ut supra dicebamus, quod aliis titulis & nominibus esset hæc gloria debita humanitati Christi, quia potuit illis adjungi ratio meriti, & hoc perfectius est.

Distinctio vero illa Scoti vix potest intelligi, quia in corpore Christi non fuit aliquod impedimentum gloriæ, nisi vel naturalis conditio corporis passibilis, quæ ex divina dispensatione cum gloria animæ conjuncta fuit: vel ipsa divina dispositio, qua statuit non influere gloriam in tali corpore usque ad resurrectionem. Primum non potest dici proprie impedimentum, cum sit ipsa naturalis conditio, quæ per gloriam perficienda erat, & quamvis ita vocetur, auferri tamen non poterat nisi per ipsam gloriam corporis: mereri ergo ut tale impedimentum auferatur, nihil aliud est, quam mereri ipsam gloriam corporis: & idem est si dicamus, meruisse ut auferretur impedimentum ex parte divinæ ordinationis, quia hoc ipsum est mereri, ut Deus influat gloriam hoc tempore, quam antea non influebat. Et quamquam modum loquendi admitteremus, potius dicendum esset meruisse Christum directe gloriam corporis, & consequenter, ut auferretur impedimentum: sicut qui redimit captivum, directe meretur libertatem ejus, & consequenter, ut vincula vel impedimenta removeantur. Nec denique huic merito obstat connexio, quæ est inter gloriam animæ, & corporis, ex qua fieri videtur, ut nemo possit alteram sine altera mereri: hoc enim, ad summum, procedit in eo, qui utraque caret, cum enim corpus non possit esse gloriosum nisi per animam (saltem de potentia ordinaria) non potest quis mereri gloriam corporis nisi vel gloriam animæ habeat, vel illam mereatur: & hoc modo merentur omnes puri viatores: quia enim merentur per actus animæ informati corpus, ideo merentur gloriam animæ, quæ redundat in corpus. At vero supposita gloria animæ separata a gloria corporis, nihil est, cur non possit ipsa gloria corporis directe sub meritum cadere: præsertim cum non omnino physice sequatur ex gloria animæ, sed secundum Dei determinationem, qui voluit ut gloria animæ communicaretur corpori, potuit tamen velle, ut hoc ipsum per merita mandaretur executioni.

Et ex hac conclusione sequitur primo, meruisse Christum impassibilitatem animæ suæ, quam ab instanti mortis consecuta est, quamquam enim Magister in 3. d. 18. in dubium revocet, an ab instanti mortis illa anima fuerit perfecte impassibilis, vel tantum a resurrectionis puncto, mihi tamen omnino verum & certum videtur statim fuisse impassibilem, ut Palud. ibi notavit q. 2. a. 3. & dicemus latius infra agentes de morte Christi: quia anima Christi Domini statim, ac fuit separata a corpore passibili, fuit simpliciter & omni ex parte beata, quantum esse potest anima separata a corpore. Hoc enim commune est omnibus animabus justis, quæ nulla indigent purificatione, post ipsius Christi mortem; cur ergo negabitur hæc perfectio ipsi animæ Christi? Præsertim cum ipse promiserit latroni: *Hodie mecum eris in paradiso*, ex qua promissione Patres omnes intelligunt, statim illo die animam latronis fuisse post Christi mortem in statu beatificatio, & impassibili; ergo a fortiori idem sentiendum est de anima Christi. Quod tandem confirmatur, quia cum jam consummasset nostram redemptionem, non indigebat statu viatoris: ergo statim cepit omnino esse in termino, & extra statum viæ, atque adeo omnino impassibilis. Hanc ergo indolentiam, seu impassibilitatem meruit Christus Dominus, sicut meruit gloriam corporis, illam enim merentur omnes isti, qui per sua merita gloriam consequuntur: & rationes supra factæ æque procedunt de hoc statu & de gloria corporis, & accommodari potest testimonium illa 33. *Si posuerit pro peccato animam suam, videbit semen longævum, & voluntas Domini in manu ejus dirigetur*, illo enim loco Septuaginta interpretes legunt: *Et vult Dominus auferre de doloribus animam ejus*, quæ verba Hieronymus etiam juxta hanc le-

ctionem de Christo exponit, sicut & Aug. lib. 1. de consen. Evang. c. 31.

Propter quæ (ut obiter hoc notetur) non mihi placet, quod Vega dicit lib. 7. in Triden. c. 18. animam Christi usque ad resurrectionem fuisse propter nos viatricem, non ad merendum, sed ad satisfaciendum: quæ animæ, inquit, *separata interdum esse possunt viatrices, quoad satisfactionem*. Hoc, inquam, non mihi placet, quia anima separata nullo modo est in statu viatoris, nisi sit aliquo modo in statu passibili, & careat visione beata, quam est aliquando habitura, ut constat inductione in omnibus aliis: anima autem Christi post separationem a corpore non fuit in hoc statu passibilitatis, ergo neque in statu viæ, neque enim oportet fingere novum modum seu statum viæ in anima Christi absque ullo testimonio, vel ratione efficaci. Adde, animam separatam nunquam esse in statu satisfaciendi, sed satisfaciendi tantum poenam, quam in hac vita plene non persolvit: at vero anima Christi in hac vita plenissime solvit, & consummavit redemptionem nostram, ut supra probatum est.

Secundo inferitur meruisse Christum resurrectionem suam, & omnes dotes corporis gloriosæ, ut recte docet D. Th. infra q. 53. a. 4. ad 2. & eisdem rationibus & testimoniis supra allatis probari potest: quibus addi potest illud Pl. 109. *De torrente in via bibit, propterea exaltabit caput*, quod in hunc sensum August. exponit, sicut & illud Pl. 40. *Tu autem Domine miserere mei, & resuscita me*. Denique alii justī merentur resurrectionem suorum corporum, multo ergo magis Christus, quandoquidem potuit illam mereri, unde ad Rom. 8. dicitur nos futuros esse hæredes, *si compatimur, ut & conglorificemur*.

Dices. Ergo eadem ratione dicendum erit, meritum fuisse Christum augmentum corporis sui, & informationem seu unionem animæ suæ, ad omnes partes materiæ, quas per nutritionem acquirebat, sicut in superioribus diximus, meritum fuisse partialem unionem hypostaticam earundem partium materiæ. Consequens videtur absurdum, quia hæc erant mere naturalia supposito statu corporis passibilis & infantilis. Respondetur primo non esse necessarium hoc concedere, quia non habet rationem similem. Nam, ut nuper dicebam, supernaturalia bona sunt, quæ in præmium meritorum proprie sunt proposita, & ideo non est simile de resurrectione corporis, quæ supernaturalis est, & de augmento naturali ejusdem corporis. Neque de unionem partium materiæ ad animam, & ad Verbum, quia prior erat mere naturalis, & per concursum causarum naturalium fiebat: posterior vero erat supernaturalis. Secundo dici potest meruisse Christum naturalia hæc bona, quatenus vel aliquo supernaturali modo fiebat, vel ex speciali aliqua Dei providentia procedebant, vel ad supernaturales fines erant necessaria, ut v. g. quod Ecclesia de Beatiss. Virgine ait, *lactasse Christum ubere de cælo pleno*. Significat sane, etiam lac ipsum, quo Christus nutriebatur, fuisse singulari Spiritus sancti providentia præparatum, ac dispositum, prout tali corpori, & ad tales effectus, quales ipse intendebat, erat expediens. Hæc ergo ratio providentiæ, omnisque alia similis, ac denique quidquid Deus cum Christo post primum instans conceptionis ejus propter dignitatem personæ ejus, specialiter operatus est: id totum propter meritum ipsius fieri potuit, & credendum est, ita factum esse propter rationes factas sectione præcedente, quas omitto, quia eadem proportionem hic possunt accommodari. Quocirca conceptio ex virgine, sine viro, & opera Spiritus sancti, prævio angelico ministerio, ac nuntio, quæ tempore vel natura antecesserunt primum actum meritorium Christi ut in re ipsa exercitum, licet facta fuerint ob dignitatem personæ Verbi incarnandi, non tamen fortasse ob meritum Christi, quia nondum in re præcesserat: & licet præcesserit in prævisione Dei, tamen ordo ad meritum, re ipsa præexistens in eadem persona est magis connaturalis, & non est necesse alium ordinem extraordinarium fingere sine fundamento aut necessitate. At vero nativitas ex virgine, servata ejus integritate, angelorum præconia & laudes, adoratio Magorum, & similia omnia, quæ Christi conceptionem subsecuta sunt, non tantum in ejus personali dignitate, sed etiam in ejus infinito merito fundamentum habuere, quia jam antecesserat, & nihil aliud desiderabatur. Ordinatio enim divina non creditur defuisse; cum hæc ratio providentiæ altior sit,

Obj:ctio

Primæ responsio.

Ab instanti mortis anima Christi fuit impassibilis, meritis ejusdem Christi.



fit, ejusque iustitiæ, misericordiæ, ac sapientiæ, Christi- que dignitati magis consentanea. Tertio evidentius sequitur ex dictis meruisse Christum triumphum ascensionis suæ, ut eisdem testimoniis & rationibus comprobari potest, indicatur ad Eph. 4. *Qui descendit, ipse est, qui ascendit, quid est quod ascendit, nisi quia & descendit prius?* & Apoc. 3. *Ego vici, & sedeo cum Patre meo.*

Dico secundo, Christus Dominus meruit exaltationem nominis sui. Ita D. Th. hic, qui sub hac exaltatione comprehendit omnia, quæ ad externam gloriam (quæ est clara cum laude notitia) pertinent. Quæ probatur, præter citata testimonia ex illa oratione Christi Joan. 17. *Ego te clarificavi super terram, opus consummavi, quod dedisti mihi ut faciam, & nunc clarifica me tu Pater, &c.* Quæ oratio fuit efficacissima & meritoria: unde Aug. ibidem tract. 104. *Humilitas, inquit, claritatis est meritum, claritas humilitatis est premium:* cui orationi similis est illa Joan. 12. *Anima mea turbata est, & quid dicam? Pater clarifica me ex hac hora, & venit vox de celo dicens: Et clarificavi, & iterum glorificabo.* Quæ oratio aperte ostendit Christum non fuisse omnino sui oblitum, ut supra Calvinus dicebat, sed suam etiam gloriam apud Deum desiderasse, & petivisse eo modo & ordine, quem charitas postulabat. Hoc etiam confirmat illud Apocalyp. 5. *Dignus est Agnus qui occisus est, accipere divinitatem*, id est, ut ab omnibus cognoscatur, & honoretur tanquam verus Deus. Testimonia etiam citata in principio sectionis præcedentis hanc conclusionem confirmant. Ratio denique est eadem, quia hic concurrunt omnia necessaria: & præterea hæc excellentia & exaltatio merito debebatur eximie Christi humanitati.

Sequitur primo, meruisse Christum Dominum ea testimonio dignitatis, & maiestatis suæ, quæ illi data esse in Evangelio legimus, quale fuit testimonium Patris post baptismum, Matthæi 3. & post transfigurationem, seu in transfiguratione ipsa, Matth. 17. Et idem verisimile est de testimonio, & laudibus Angelorum in die Nativitatis, & de manifestatione facta Magis per stellam, & similibus: quia licet hæc omnia propter utilitatem nostram facta sint, tamen ad exaltationem, & gloriam Christi pertinebant: utraque ergo de causa, scilicet nostra & sua, meritis illius debita fuerunt.

Secundo sequitur, meruisse Christum aliquo modo regnum & dominium in universum orbem: quia hoc etiam pertinet ad externam gloriam, & manifestationem nominis illius; & indicatur ab Aug. lib. de unitate Eccles. c. 7. & 8. ubi varia congerit Scripturarum testimonia, quale est illud Psal. 2. *Postula a me & dabo tibi gentes hereditatem tuam, & possessionem tuam terminos terræ:* & illud Psal. 21. ubi post narratam Christi passionem subditur: *Convertentur ad Dominum universi fines terræ, & alia similia ponit præcipue ex Isai. & Psalmis.* Est autem optimum illud ad Rom. 14. *Christus in hoc mortuus est, & resurrexit, ut vivorum & mortuorum dominetur*, quæ verba imitatus Cyrill. lib. 11. in Joan. c. 17. dicit: *Unum mori oportuit, sufficientem pro omnium vita redemptionem, ut vivorum & mortuorum imperium acciperet.* Sed contra, quia hoc dominium & regnum habuit Christus a principio conceptionis ex vi unionis. Propter hoc Soto in 4. dist. 47. q. 1. art. 2. videtur negare hanc conclusionem, cum tamen affirmet meruisse dignitatem capitis, & eadem ratio de illa procedat: nam illam etiam habuit a principio conceptionis, imo hæc dignitas illam potestatem includit. Observandum ergo est, si loquamur de titulo supremi regis, & domini, qui est proprius Dei, & per communicationem idiomatum homini communicatur, verissime dicitur, Christum non meruisse, ut summo Dei imperio potiretur, neque ut esset caput Angelorum eo modo, quo est caput in quantum Deus. Hos enim maiestatis titulos non magis mereri potuit, quam Incarnationem ipsam: conclusio ergo loquitur de dominio & regno, quod in humanitate assumpsit, ut latius q. 22. explicandum est. De quo ulterius est observandum, Christum a principio habuisse hoc dominium & regnum, quasi in radice & proprietate, & sic illud non meruit: & eodem modo habuit dignitatem capitis, quam similiter non meruit: caruit tamē veluti possessione & usu huius domini & dignitatis, & hoc modo dicimus, illud postea meruisse, quomodo dixit recte Bernar. lib. 3. de consider. Christum merito redemptionis vendicasse sibi possessionem cœli &

Suarez Tom. XVI.

terræ: juxta illud Matt. ult. *Data est mihi omnis potestas in cœlo, & in terra.* Tertio sequitur, meruisse Christum Dominum judicariam potestatem, ut recte docet S. Th. infra q. 59. art. 3. & confirmat ex illo Job. 36. *Causa tua tanquam impii iudicata est, causam iudiciumque recipies.* Quæ verba de omnibus iustis iniusta patientibus intelligit Greg. lib. 26. moral. c. 25. D. Th. autem recte illa Christo accomodat, quia in illum principaliter & quasi per antonomasiam conveniunt, quod etiam confirmat illud Joan. 5. *Dedit illi iudicium facere, quia filius hominis est*, ut late tractat Aug. serm. ult. de verbis Domini, & Vigilii lib. 5. contra Eutychetum. Sed de hac potestate in ultimis disputationibus sequentis Tomi, fusius nobis dicendum est.

#### ARTICULUS IV.

Utrum Christus aliis mereri poterit.

**A**D quartum sic proceditur. Videtur, quod Christus aliis mereri non poterit. Dicitur enim Ezech. 18. *Anima quæ peccaverit, ipsa morietur. Ergo pari ratione anima, quæ meretur, ipsa remunerabitur. Non ergo est possibile quod Christus aliis meruerit.*

2. Præterea, De plenitudine gratiæ Christi omnes accipiunt ut dicitur Joan. 1. *Sed alii homines habentes gratiam Christi, non possunt aliis mereri:* dicitur Ezech. 14. *quod si fuerint in Civitate Noe, Daniel & Job, filium & filiam non liberabunt: sed ipsi iustitia sua liberabunt animas suas. Ergo nec Christus potuit aliquid nobis mereri.*

3. Præterea, Merces, quam quis meretur, debetur secundum iustitiam, & non secundum gratiam: ut patet Rom. 4. *Si ergo Christus meruit salutem nostram, sequitur quod salus nostra non sit ex gratia Dei, sed ex iustitia: & quod iniuste agat cum eis, quos non salvat, cum meritum Christi ad omnes se extendat.*

Sed contra est, quod dicitur Rom. 5. *Sicut per unius delictum in omnes homines in condemnationem, sic & per unius iustitiam in omnes homines in justificationem vitæ. Sed demeritum Ade derivatur ad condemnationem aliorum. Ergo multo magis meritum Christi ad alios derivatur.*

Respondetur dicendum, quod sicut supra dictum est\*, in Christo non solum fuit gratia, sicut in quodam homine singulari, sed sicut in capite totius Ecclesiæ, cui omnes univertur, sicut capiti membra, ex quibus constituitur mystice una persona. Et exinde est, quod meritum Christi se extendit ad alios, in quantum sunt membra ejus, sicut etiam in uno homine actio capitis aequaliter pertinet ad omnia membra ejus: quia non solum sibi sentit, sed omnibus membris.

Ad primum ergo dicendum, quod peccatum singularis persone non nocet nisi sibi ipsi: sed peccatum Ade, qui constitutus est a Deo principium totius nature, ad alios per carnis propaginem derivatur. Et similiter meritum Christi, qui est a Deo constitutus caput omnium hominum, quantum ad gratiam, se extendit ad omnia ejus membra.

Ad secundum dicendum, quod alii de plenitudine Christi accipiunt, non quidem fontem gratiæ, sed quandam particularem gratiam: & ideo non oportet, quod alii homines possint aliis mereri, sicut Christus.

Ad tertium dicendum, quod sicut peccatum Ade non derivatur ad alios nisi per carnalem generationem: ita meritum Christi non derivatur ad alios, nisi per generationem spiritualem, quæ fit in Baptismo, per quam homines Christo incorporantur: secundum illud ad Galat. 3. *Omnes quotquot in Christo baptizati estis, Christum induistis. Et hoc ipsum est gratia, quod homini conceditur regenerari in Christo: & sic salus hominis est ex gratia.*

**E**T si D. Thom. de sola potestate videatur inquirere, respondet tamen, Christum Dominum aliis meruisse, in quos gratiam infundit, sicut caput in membra. Et in litera D. Thom. quæ brevis est, nulla est difficultas, præterquam in solutione ad 3. quam in sequenti disputatione latius tractabimus.

#### DISPUTATIO XLI.

In quatuor Sectiones distributa,

De iis, quæ Christus Dominus hominibus meruit.

**Q**UOD Christus Dominus hominibus meruerit, non est, quod in quæstionem vertamus, quia inter Catholicos de hac veritate controversia non est. Contra hæreticos vero Pelagianos, Petrum Abailar. & alios, satis

123.  
Infra q. 48  
art. 1. cor.  
& art. 6. &  
q. 49. art. 1  
cor. & 2.  
dist. 20. q.  
2. art. 3. ad  
3. & 3.  
dist. 18.  
art. 6. &  
ver. q. 26.  
art. 6. 20.  
& q. 29.  
art. 7.

\*Quæst. 8.

Obiectio.

Responsio.



tis multa dicta sunt supra q. 1. art. 2. & in tota hac disputatione, ostendendo, quid nobis meruerit, simul constabit hominibus meruisse. Quatuor ergo sunt de quibus hoc loco disputare possumus, scilicet de prima gratia, & gloria, de dispositionibus & auxiliis, quæ illam antecedunt, de merito & augmento, quæ illa consequuntur usque ad gloriæ consecutionem: ac denique de tota hominum prædestinatione, de quibus sigillatim dicemus.

## S E C T I O I.

*An Christus meruerit nobis primam gratiam, & gloriam, & remissionem peccatorum.*

Multa sub hoc titulo comprehenduntur, quæ breviter expediri possunt, quia non sunt admodum controversa, ut an Christus meruerit hæc omnia hominibus, qui illum subsecuti sunt, & an illis, qui ipsum præceperunt, & an primis hominibus in statu innocentiae, vel an simpliciter omnibus hominibus, vel tantum aliquibus.

Dico ergo primo. Christus omnibus hominibus sufficienter meruit remissionem peccati, tum originalis, tum etiam actualis. Est de fide, ad Rom. 5. *Sicut per unum hominem peccatum intravit in mundum, &c. Multo magis gratia Dei, & donum, in gratia unius hominis Jesu Christi in plures abundavit*, & infra. *Gratia autem ex multis delictis in justificationem*, & infra. *Multo magis abundantiam gratiae donationis & justitiæ accipientes, in vitam regnabunt per unum Jesum Christum*, & infra. *Ita & per unius obedientiam, justi constituuntur multi*, & ad Coloss. 2. *Kos cum mortui essetis in delictis, & præputio carnis vestrae, convivificavit cum illo donans vobis omnia delicta*, usque ad illud: *Expoliatis principatus & potestates traduxit confidenter, palam triumphans illos in semetipso*: & frequentissime in suis epistolis hoc repetit Paul. præsertim tota epistola ad Rom. ad Galat. & ad Hebræ. & Joan. 1. Canon. c. 2. *Ipse est propitiatio pro peccatis nostris, non pro nostris autem tantum, sed etiam pro totius mundi*, & plura alia in hujus veritatis confirmationem adduximus supra q. 1. art. 2. agentes de satisfactione Christi: sicut enim Christus sufficienter satisfacit pro peccatis omnium hominum, ita omnibus remissionem meruit: est enim eadem utriusque ratio, quia, sicut Christi satisfactio est infinita, ita & meritum, & utrumque oblatum est pro salute & redemptione hominum: ergo de justitia illam meruit, quia ratione suæ personalis dignitatis & gratiæ capitis, quæ illam consequitur, non solum sibi, sed etiam aliis de justitia mereri potuit. Et confirmatur, nam hoc modo magis ostenditur divina justitia, & misericordia in remissione peccatorum hominum, ut agentes de satisfactione late diximus.

**Objeçtio.** Dices, si Christus omnibus meruit remissionem peccatorum, quomodo non omnes illam consequuntur? **Responsio.** Respondetur, Ideo dixi sufficienter omnibus meruisse; distinguunt enim Theologi duplicem rationem, seu considerationem meritorum Christi, scilicet quoad sufficientiam, & quoad efficaciam: & quoad sufficientiam dicunt meruisse Christum omnibus hominibus remissionem peccatorum, quia pro omnibus obtulit sufficiens meritum, quod esset universalis causa, seu generale pretium, quo omnes uti possent: ut a servitute peccati, & potestate demonis liberarentur: non tamen meruit hanc remissionem omnibus quoad efficaciam, quia non applicuit suum meritum, ut omnes infallibiliter talem effectum consequerentur, sed voluit per ordinata media applicari, media libertate, & voluntate humana, per quam interdum talis applicatio impeditur, & ideo Paul. quamvis 2. ad Corint. 5. dixisset, *Erat Deus in Christo mandum reconcilians sibi*, scilicet quoad sufficientiam, addit statim, *Obsecramus pro Christo, reconciliamini Deo*, scilicet quoad efficaciam, hoc enim pendeat ex eorum arbitrio, sicutiam Apoc. 1. dicitur Christus *lavisse nos a peccatis in sanguine suo*, & tamen c. 7. quidam specialiter dicuntur *lavisse stolas suas in sanguine Agni*, scilicet quoad efficaciam. An vero hanc ipsam efficaciam, & applicationem suorum meritorum Christus illis meruerit, quibus confertur, infra dicitur.

Dico secundo. Simili modo meruit Christus omnibus hominibus primam gratiam sanantem naturam a lapsu peccati. Est de fide Joan. 1. *Dedit eis potestatem filios Dei fieri*, & statim subdit, *Verbum caro factum est*, &

concludit, *Gratia & veritas per Jesum Christum facta est*, quod testimonium in hujus veritatis confirmationem optime explicat August. lib. 13. de Trinit. c. 9. Eadem convincit testimonium Pauli ad Rom. 3. *Justificati gratis per gratiam ipsius, per redemptionem, quæ est in Christo Jesu*, & ad Eph. 1. *In quo habemus redemptionem per sanguinem ipsius, remissionem peccatorum secundum divitias gratiæ ejus: quæ abundavit in nobis*. Et similia habentur ad Coloss. 1. & 1. ad Tim. 2. ad Tit. 2. & sæpe alias: & definita est hæc veritas in Conciliis fere integris, Milevit. & Auranf. II. & expresse in Trid. Sess. 6. cap. 7. quare superfluum est testimonia Sanctorum Patrum referre in re tam perspicua, cum præsertim complures supra retulerimus q. 1. art. 2. & ex iis, quæ in sequentibus sectionibus afferemus, hoc a fortiori comprobari possit. Ratio vero eadem est, quæ pro priori assertionem; hæc enim conclusio ex illa necessario sequitur: nam remissio peccati tam originalis, quam mortalis non confertur homini, nisi per infusionem gratiæ & justitiæ, & ideo Christus unum sine alio mereri non potuit.

Sed contra. Ergo gratia non datur nobis gratis, sed ex justitia, quandoquidem jam Christus nobis illam meruit, & pretium dedit, quo illam emeremus, quod repugnare videtur Paulo ad Rom. 3. dicenti, nos esse *justificatos gratis per gratiam ipsius*. Et confirmatur, nam Paul. ibidem c. 4. ait, *Mortuum esse Christum propter delicta nostra, resurrexisse autem propter justificationem nostram*, per resurrectionem autem nihil meruit, ut supra diximus: ergo. Ad argumentum respondet hic D. Th. ad tertium objeçtio: sed illius sensum infra expendemus: nunc breviter respondetur aliter, primam gratiam nobis gratis dari respectu nostri, id est sine merito nostro de condigno, & hoc sensu dicere Paulum nos justificari gratis, ut etiam Concilium Trid. exposuit, sess. 6. c. 8. respectu vero Christi datur nobis gratia ex justitia, & ex perfecto merito: unde quando August. lib. de Prædest. sanct. c. 15. dicit, tam gratis justificari hominem, quam gratis Deus factus est homo, non simpliciter, sed respective intelligendum est, id est, tam ex nullo merito peccatoris illi dari gratiam, quam ex nullo merito Christi humanitatis ejus data est gratia unionis. Ad confirmationem respondetur, Christum per mortem suam tam remissionem peccatorum, quam justificationem & gratiæ infusionem nobis meruisse: quia, ut dixi, non potest saltem de potentia ordinaria alterum horum cadere sub meritum sine altero: unde S. Thom. infra q. 56. art. 2. ad citatum locum Pauli respondet, in genere causæ exemplaris mortem Christi dici exemplar destructionis peccati: resurrectionem vero justificationis, per quam animæ vita acquiritur. Dicit etiam potest, Christum esse mortuum, *propter delicta nostra*, id est, ut pro eis satisfaceret, eorumque remissionem quoad sufficientiam nobis mereretur: resurrexisse vero, *propter nostram justificationem* non quidem ut per suam resurrectionem illam nobis mereretur, quam jam plene meruerat, sed ut meritum ejus posset nobis applicari: nam si Christus non resurgeret, nemo in ipsum crederet, existimaretur enim, *Vana fides ejus, & inanis predicatio ejus*, ut dicitur 1. ad Cor. 15. si autem in eum non crederemus, non applicaretur nobis meritum ejus nec re ipsa justificaremur, nemo enim nisi per fidem Christi justificari potest: ita exposuit hunc locum August. 16. contra Faust. cap. 29. & Fulgent. lib. de Incarn. & grat. cap. 8.

Dico tertio. Christus Dominus eodem modo meruit omnibus hominibus gloriam, & æternam vitam. Est de fide, & ex præcedenti conclusione aperte sequitur: nam per gratiam acceptamur ad gloriam, & ideo Christus merendo nobis gratiam, meruit etiam gloriam. Quam rationem satis indicavit Paul. ad Rom. 5. dicens, *Justificati ergo ex fide, pacem habemus ad Deum, per Dominum nostrum Jesum Christum, per quem & habemus accessum per fidem in gratiam istam, in qua stamus, & gloriamur in spe gloriæ futuri Dei*; & infra; *Multo magis abundantiam gratiæ donationis, & justitiæ accipientes, in vitam regnabunt per unum Jesum Christum*; & infra; *Ita & gratia regnet per justitiam in vitam æternam per Jesum Christum Dominum nostrum*, & ideo cap. 6. concludit, gratiam Dei esse vitam æternam scilicet semine, & radice: seu vitam æternam esse gratiam in Christo Jesu Domino nostro, & c. 8. *Si filii, & heredes, heredes quidem Dei, coheredes autem Christi*, & 2. ad Timoth. 1. dicit, promissionem

æter-



æternæ vitæ factam esse in Christo, & ad Titum. 3. *Ut iustificati gratia ipsius, heredes simus secundum spem vitæ æternæ*, & huiusmodi testimoniis refertæ sunt Scripturæ. Et confirmatur, nam Christus Dominus sua morte aperuit nobis januam regni cælorum, quæ antea fuerat hominibus clausa, ut infra super q. 52. D. Th. late dicemus: ergo meruit nobis regnum cælorum, atque adeo æternam beatitudinem. Ratio jam tacta est, quia meritum gloriæ conjunctum est cum merito gratiæ, non quia omnis, qui meretur gloriam, mereatur gratiam, hoc enim necessarium non est, potest enim gratia gratis dari, per quam quis ex iustitia gloriæ mereatur: sed quia qui meretur gratiam, etiam meretur gloriam, nam eo modo quo habet gratiam ex merito de condigno, debetur illi ex iustitia gloria. Et hoc modo parvulis in gratia decedentibus datur gloria ex meritis Christi, & debita est ex iustitia, non propria, sed Christi. Addi etiam possunt rationes aliæ & congruentiæ, quia hic concurrunt omnes conditiones necessariæ ad meritum, & valor operum Christi non solum condignus est, sed etiam superexcedens: pertinet etiam hoc ad dignitatem quandam & excellentiam ipsius Christi, & ad maiorem perfectionem reparationis nostræ: ac denique ad meliorem divinæ providentiæ rationem, ad quam pertinet, ut inferiora per superiora reducantur ad suos fines.

Ex his sequitur, nulli hominum fuisse unquam remissum peccatum, præsertim originale aut mortale, nec datam esse gratiam primam aut gloriam, nisi propter merita Christi. Hoc sequitur evidenter ex dictis, quamquam enim meritum Christi dicatur causa sufficiens horum effectuum in nobis, prout causa sufficiens distinguitur a causa efficaci, seu actu efficiente: non tamen dicitur causa sufficiens, prout distinguitur a necessaria; ita enim Christus sufficiens nobis meruit prædicta dona, ut sine ejus merito obtineri non possint. Et hoc modo dicitur meritum Christi causa universalis istorum effectuum in omnibus hominibus, quia in quibuscumque fiunt, per illud meritum fiunt, quamvis ex ipsorum hominum defectu non in omnibus fiant. Et hoc convincunt omnes Scripturæ citatæ, quæ Christo seu fidei ejus, tanquam causæ aut medio necessario, huiusmodi effectus attribunt: quia non est datum aliud nomen hominibus, in quo salvi fiant: & in particulari de hominibus, qui ipsam incarnationem præceperunt, de quibus nonnulla poterat esse difficultas, hoc late ostendimus supra q. 1. art. 3.

**Objec. 1.** Quod si objiciatur, meritum debere antecedere præmium tempore, vel natura. Respondetur. Ex natura rei, & nulla interveniente dispensatione, fortasse ita est, quia meritum est aliquo modo causa efficiens, seu dispositio, aut via ad præmium (omnibus enim his nominibus illud appellat D. Th. variis in locis, ut patet 1. p. q. 23. art. 5. & q. 62. art. 4. & q. 29. de Verit. art. 6.) simpliciter tamen non est semper necessarium, ut in re ipsa meritum antecedit præmium, sed satis est, si præcedat in præscientia ejus, qui redditurus est præmium: cum enim meritum non sit causa per se physica præmii, sed moralis, excitans, seu movens illum, qui daturus est præmium: influere suo modo potest, antequam realiter existat, si per cognitionem moveat præmiantem, in quo similitudinem quandam habet cum causa finali.

**Objec. 2.** Sed instabit aliquis, quod nec propter merita Christi prævisa potuerit dari gratia antiquis Patribus, nam prius intelligitur prævisa ipsa gratia antiquorum Patrum, quam Christi merita, quia per illam gratiam parata est via ad exequendum Incarnationis mysterium, per illam enim electus & sanctificatus est peculiaris populus, ex quo Christus nasceretur: per illam impetrabant antiqui Patres filios, ex quibus Christus descenderet: per illam merebantur aliquo modo exhibitionem tanti mysterii: per illam denique ipsa beatissima Virgo disposita fuit, ut esset digna Dei Mater. Hac difficultate superatus Driedo, dixit, eas præparationes, quas divina gratia effecit, atque præmisit in populo suo, ut ex illo Christus nasceretur, esse quidem divinæ gratiæ dona, in Christum ut in finem ordinata, non tamen propter ejus merita collata. Sed est intolerabilis sententia, alias nec prima gratia sanctificans, nec præservatio Virginis ab originali peccato esset ex meritis Christi, quod erroneum est: sed de sententia Driedonis plura in sect. seq. Nunc præfens objectio, si meminerimus eorum, quæ supra q. 1. art. 3. tractata sunt,

Suarez Tom. XVI.

facile expediri potest, probat enim, ordine executionis illam gratiam fuisse priorem, quam incarnationem ipsam: atque adeo, si consideremus Dei præscientiam, tantum ut intuentem res, prout in executione fiunt, sic merita Christi non fuisse prius secundum rationem prævisa, quam gratiam antiquorum Patrum: tamen secundum ordinem intentionis & divinæ prædefinitionis, qua Deus statuit omnes homines redimere per Christi meritum, antecessit præscientia meritorum Christi, propter quæ sic prævisa statuit dare gratiam antiquis Patribus, & merita congruentia, ut sese ad tantum mysterium suscipiendum disponerent, ut q. etiam 2. art. 1. explicatum reliquimus.

Sed ulterius dicit aliquis, si gratia data fuit antiquis Patribus ex meritis Christi prævisis, potuisse etiam dari gloriam: ergo nulla est ratio, cur expectatus fuerit Christi adventus, ut illis daretur. Respondetur, potuisse quidem id fieri, factum tamen non esse; cujus propria ratio est, quia Deo non placuit: congruentia vero est, quia gratia est simpliciter necessaria ad remissionem peccati & amicitiam Dei, & ideo, ne omnes illi homines, qui Christum præceperunt, perpetuo perirent, conveniens fuit ut Deus provideret illis modum, quo possent gratiam consequi & remissionem peccati, scilicet, per fidem vivam in Christum venturum, & per merita ejus prævisa: at vero respectu gloriæ non occurrebat hæc necessitas, quia illa temporalis earentia, vel dilatio, solum erat poena quandam, quam non oportuit omni ex parte remitti, cum nondum esset pro reatu totius naturæ Deo satisfactum. Quam rationem indicat D. Th. infra q. 49. art. 5. ad 1. de qua re ibi, & in q. 52. plura dicemus.

Ultimo quæret aliquis, an quod dictum est de gratia data antiquis Patribus ex meritis Christi prævisis, intelligendum sit etiam de prima gratia & iustitia data Adæ in statu innocentis. Quidam enim simpliciter negant, ut Soto lib. 1. de natur. & grat. cap. 6. Mihi tamen contraria sententia probabilior supra visa est q. 1. art. 3. explicando solutionē ad 5. D. Thomæ, ubi ipse D. Thomæ & multorum Patrum autoritate comprobavi, Adam in eo statu habuisse fidem Christi venturi. Ex quo principio, juncta etiam autoritate D. Th. 2. 2. q. 2. art. 7. probabiliter elici Adam fuisse iustificatum in fide Christi venturi, & in spe meritorum ejus. Quæ sententia est etiam valde consentanea ordini prædestinationis Christi, quem ibi explicuimus: pertinet etiam ad Christi honorem, & ideo mihi semper magis probanda videtur. Objiciunt autem aliqui, quod in Christo nullum fuit meritum, quod non spectaverit ad nostram redemptionem: ergo nullum fuit, quod Adamo in statu innocentis prodesse potuerit. Respondetur, antecedens esse valde æquivocum: unus enim illius sensus esse potest, in Christo nullum fuisse actum meritorium, qui ad nostram redemptionem non profuerit, ordinatusque fuerit, & sic est verum antecedens, sed consequentia mala, quia potuit idem actus esse utilis, & ad redemptionem, & ad alios effectus. Alter ergo sensus est, nullum fuisse in Christo actum meritorium, nisi per modum redemptionis, seu ad solam redemptionem, & in hoc sensu est omnino falsa propositio: nam constat, Christum sibi ipsi meruisse & non per modum redemptionis: constat etiam in quolibet actu Christi fuisse valorem ad totam redemptionem, & ad alios effectus. Ultimus sensus illius antecedentis esse potest, nullum fuisse in Christo meritum, quod non fuerit primario præordinatum propter redemptionem; & dependenter ab illa, seu occasione illius, & hoc, licet probabile sit, non tamen verum, mea quidem sententia, ut circa art. 2. quæst. 1. satis tractatum est.

## SECTIO II.

Utrum meruerit Christus nobis dispositiones ad gratiam, seu suorum meritorum applicationem.

Hæc quæstio proprie est de merito Christi quoad efficaciam, & est valde controversa inter Catholicos. Duobus enim modis applicantur nobis merita Christi, uno modo ex opere operato, ut parvulo per baptismum: alio modo, media dispositione vel operatione operantis, ut adulto per contritionem. Dicunt ergo aliqui meruisse Christum, ut parvulo baptizato detur gratia, quod autem parvulus baptizetur, non esse ex meritis Christi: & similiter meruisse Christum, ut homini con-

M m 2 trito

Objec. 3.

De prima gratia data Adæ in statu innocentis.



trito remittatur peccatum, quod autem illi detur auxilium efficax, quo conteratur, hoc non esse ex meritis Christi. Cui sententiæ videtur multum favere D. Th. hic solutione ad tertium. Cum enim proposuisset argumentum, quod fere est fundamentum Capreoli & aliorum, qui hanc sententiam sequuntur, scilicet, quia, si Christus meruit nobis salutem, de iustitia nobis daretur gratia, & non gratis, & injuste fieret cum his, quibus non datur: respondet, gratiam non dari nisi iis, qui regenerantur in Christo, hoc autem ipsum esse gratiæ, quod, scilicet, homini concedatur, regenerari in Christo, & hoc modo salutem hominis esse ex gratia. Cujus solutionis sensus, ut argumentum satisfaciatur, esse videtur, applicationem sacramenti non dari ex iustitia, sed gratis, & in hoc consistere, quod iustificatio nostra gratis fiat, non solum respectu nostri, sed etiam respectu Christi: ergo ex sententia D. Thom. non meruit Christus nobis applicationem suorum meritorum. Eandem doctrinam habet D. Thom. q. 29. de Veritate, art. 7. ad 4. ubi inquit, meritum Christi æqualiter se habere ad omnes quoad sufficientiam, non vero quoad efficaciam, & subdit: *Quod accidit partim ex libero arbitrio, partim ex divina electione, per quam misericorditer effectus meritorum Christi quibusdam confertur, quibusdam vero iusto iudicio subtrahitur*: quibus verbis totam rationem efficaciam & applicationis meritorum Christi refert in divinam misericordiam, & nullo modo in ipsius Christi merita. Et evidenter in solutione ad 13. inquit, hoc ipsum gratis alicui nostrum a Deo conferri, quod efficaciam meriti Christi consequatur, & ideo gratiam non evacuare per Christi meritum.

Propter quæ testimonia tenuit hanc sententiam Capreol. in 3. dist. 18. ad argumenta Scoti contra quartam conclusionem, quem ibi sequitur Paulus Soncinas in summa q. unica, conclus. 3. sed latius hoc docuit Dried. de captiv. & redemp. gener. hum. tract. 2. c. 2. p. 3. art. 4. ubi negat, illa dona gratiæ, quæ ante Christum data sunt ut præparationes ad ipsam Incarnationem, seu ad Christi adventum, fuisse impensa propter merita Christi: quamvis non neget, iustificantes gratiam tunc etiam datam esse propter merita Christi futura. Idem docet in tract. 4. c. 2. par. 8. memb. 3. & Ruard. art. 6. contra Luther. ante medium. Ferrar. etiam lib. 4. contr. gent. cap. 55. circa responsionem D. Th. ad 6. rationem, quamvis de applicatione sacramentorum vel meritorum Christi nihil expresse dicat; tamen de dispositionibus ad gratiam docet, dispositiones remotas non esse ex meritis Christi, de dispositione autem ultima dicit contra Capreol. dari ex Christi meritis, propter quædam D. Th. testimonia, quæ ad rem præsentem nihil mihi referre videntur. Fundamentum huius sententiæ est duplex. Primum, quia alias iustificatio fieret omnino ex iustitia, & nullo modo ex gratia, saltem respectu Christi, quod illis videtur inconueniens, & contra Paulum, ubicumque de gratia iustificationis loquitur, quia iam gratia non esset gratia, sed iustitia. Quod si objicias, quia idem sequi videtur in eorum opinione, quia ipsi concedunt, habenti contritionem, seu ei, cui applicatur baptisumus, ex iustitia dari gratiam & remissionem peccati respectu Christi. Respondent, hoc non esse inconueniens, quia sufficienter saluatur ratio gratiæ in ipsa gratuita applicatione, & ita coniunguntur perfectissimo modo ratio misericordiæ & iustitiæ in iustificatione peccatoris: si autem totum fiat ex meritis Christi, prorsus nulla ratio gratiæ intercedet. Secundum, quia, quod huic potius quam illi applicetur Christi meritum, atque adeo, quod hic baptizetur potius quam ille, non est ex meritis Christi, sed ex sola divina electione & misericordia, juxta illud Pauli ad Ephes. 1. *In quo nos sorte vocati sumus, prædestinati secundum propositum ejus, qui operatur omnia secundum consilium voluntatis sue*, & ad Rom. 8. *Quos præscivit, & prædestinavit conformes fieri imaginis Filii sui, hos & vocavit, &c.* Quod totum statim in c. 9. in solam Dei voluntatem & electionem refert, & similia sunt frequentia loca apud Paulum, sed præsertim videntur ad præsentem questionem accommodata illa ultima verba totius epistolæ ad Hebr. *Deus autem pacis apert vos in omni bono, ut faciatis ejus voluntatem, faciens in vobis, quod placeat coram se per Jesum Christum*: ubi applicationem videtur referre in beneplacitum Dei, effectum vero in Jesum Christum.

Hæc sententia, quamvis antiquiores Theologi nihil

expresse circa illam asserant, quia questionem hanc in propriis terminis non attigerunt, mihi tamen nec probanda, neque in scholis audienda videtur: quia neque veritati, neque pietati consentanea est: impugnant illam late Vega toto lib. 4. super Concil. Triden. & lib. 15. c. 9. & 10. Hosius in Confessione fidei, c. 41. & 42. Lindanus lib. 3. Panopliæ c. 36. & alii qui nostra ætate contra Lutheranos scribunt. Ad explicandam ergo, & definiendam veritatem.

Dico: Omne auxilium gratiæ excitantis & adjuvantis, quod datur homini, ut se disponat ad gratiam a prima vocatione usque ad dispositionem ultimam, est effectus & præmium meritorum Christi, qui hæc omnia bona hominibus meruit. Hæc, ut existimo, est aperta sententia D. Th. supra q. 7. art. 9. ubi inquit, Christo datam esse gratiam, tanquam cuidam principio universali in genere habentium gratiam, cujus virtus se extendit ad omnes gratiæ effectus, & operationes, quod art. 10. repetit, & in art. 11. & in q. 8. tota, præsertim art. 3. ad 2. ubi fidem etiam mortuum dicit esse ex influxu Christi capitis, & ita omnes recentiores discipuli D. Th. hanc conclusionem amplectuntur. Quam satis etiam indicat Scot. in 3. dist. 19. q. unica. Probo ex Scriptura & sanctis Patribus ad Ephes. 1. *Qui benedixit nos omni benedictione spirituali in celestibus in Christo*, ubi inquit Ambrosius: *Omne donum gratiæ Dei in Christo est, & si quis spreto Christo benedici se a Deo putat, errare se sciat*: & subjungit Paulus: *In quo sorte vocati sumus*: quo testimonio abutebatur contraria sententia: nam expresse ibi Paulus ait ipsam vocationem dari nobis in Christo, ut notavit August. lib. de dono persever. c. 9. & evidentius docuit idem Paul. 2. ad Timot. 1. *Vocavit nos vocatione sua sancta, non secundum opera nostra, sed secundum gratiam, quæ data est nobis in Christo Jesu*, ubi recte hoc exponit Anselmus, quod etiam confirmat Paulus ad Ephes. 2. generatim dicens, *creari nos in operibus bonis in Christo Jesu*: ubi totum negotium gratiæ & iustificationis peccatoris, quia ex nullo ejus merito aut opere initium sumit, quædam moralis creatio dicitur, quæ tamen tota Christi meritis tribuitur, ut Chrysost. notavit, & c. 4. inquit Paul. unicuique dari gratiam, *secundum mensuram donationis Christi*, qui in Ecclesiam suam influit diversas gratias, diversa ministeria, & auxilia ad illa perficienda. Et ad Philip. 1. *Vobis, inquit, donatum est pro Christo, non solum ut in eum credatis, sed etiam ut pro ipso pati amini*. Ex quo loco colligit August. tract. 3. in Joan. etiam ipsum initium fidei, & auxilium patientiæ dari propter Christi merita: & in hunc sensum exponit illud Joan. 1. *De plenitudine ejus nos omnes accepimus*: ita enim censet simpliciter esse legendum, ut sensus sit, ex plenitudine Christi accepisse nos, non hanc vel illam gratiam, sed simpliciter quidquid boni accipimus, quod ad salutem conferat: postea vero additur: *& gratiam pro gratia*, id est, secundum pro prima, ut ipse exponit. Et ibidem Chrysost. hom. 13. in eundem sensum exponit sequentia verba: *Gratia & veritas per Jesum Christum facta est*: dicens illum esse fontem gratiarum omnium. Ac denique Hieron. in eundem sensum tractat illud Isai. 53. *Si posuerit pro peccato animam suam, videbit semen longævum, & voluntas Domini in manu ejus dirigitur, id est, inquit, ut quidquid Deus disposuit, illius virtutibus impleatur*: quod verbum est valde notandum, dissolvit enim fundamenta contrariæ sententiæ, & indicat punctum & occasionem deceptionis ejus.

Secundo probatur eadem conclusio testimoniis Conciliorum & aliorum Patrum, præsertim Augustini: Concilium enim Milevit. c. 3. & 4. & Concil. Arausic. II. c. 5. 6. 7. 19. 22. 24. Innoc. I. rescripto ad Concil. Milevit. quod est epist. 26. ejusdem, & 93. inter epistolas Augustini: & Cœlestinus Pap. epist. 1. ad Episcop. Galliarum, loquentes de gratia Dei necessaria ad salutem, & ad opera pietatis, sub qua evidenter comprehendunt omnia auxilia excitantia & adjuvantia, & vocationes, & dispositiones remotas & ultimam: loquentes, inquam, de hac gratia Dei, eamdem vocant gratiam Christi, quia per Christum datur, & perinde existimant esse, dicere, gratiam Dei, & gratiam Christi, esse necessariam ad hæc omnia. In quo imitati sunt hi Patres Augustinum I. de Prædestin. Sanct. c. 2. ubi initium iustitiæ tribuit gratiæ Dei, & Christi, & lib. 1. contra duas epistolas Pelagianorum. c. 9. eodem sensu affirmat, totam gratiam Dei per Christum dari, & si

Omne auxilium gratiæ ad iustificationem ordinatur, Christi meritis datur.



milia habet epist. 106. Denique videtur jam hæc expressa definitio Concil. Trident. Sess. 6. c. 5. ubi sic inquit: *Declarat præterea, ipsius justificationis exordium in adultis, a Dei per Christum Jesum præveniente gratia sumendum esse, hoc est, ab ejus vocatione, &c.* Et confirmatur ex usu & consuetudine Ecclesiæ, quæ omnem gratiam etiam prævenientem, & conversionem ipsam seu vocationem ad fidem, postulat per Jesum Christum Dominum nostrum: persuasa, omnia hæc danda esse nobis per Christum, hoc est, per meritum ejus. Unde eleganter August. enarrat. 1. in Ps. 108. *Oratio, inquit, quæ non fit per Christum, non solum non potest delere peccatum, sed etiam ipsa fit in peccatum*, & Bernard. serm. 13. in Cant. *Quidquid sapientia, quidquid virtutis te habere confidis, Dei virtuti, Dei sapientiæ, deputa Christo: origo fontium & fluminum mare est, virtutum & scientiarum Dominus Jesus Christus.*

Tertio, ut hoc ratione ostendatur, simulque fundamentum contrariæ sententiæ destruat, distinguendus est in operibus divinæ gratiæ ordo intentionis ab ordine executionis, ut supra late explicuimus, q. 1. a. 3. quamvis ergo verum sit, ut infra latius tractabimus, Deum elegisse ad gloriam, vel gratiam, vel fidem hos homines potius quam illos ex sola sua voluntate, & non propter merita Christi: nihilominus voluit conferre illis omnibus necessaria media, & infallibilia, per quæ gratiam vel gloriam consequerentur per ipsum Christum. Quod evidenter docet Paulus locis citatis, & ostendemus iterum inferius, cum explicabimus, quo modo prædestinatio nostra sit ex meritis Christi. Et quod non repugnet, per se manifestum est, quia sicut Deus elegit Jacob, quam Esau ad gloriam, sine meritis Jacob, & nihilominus voluit, ut Jacob non consequeretur gloriam sine meritis: ita potest eligere hunc hominem potius quam illum ad gloriam, & consequenter ad omnia, quæ necessaria sunt ad gloriam, sine meritis Christi, & nihilominus non conferre illi aliquid medium, seu aliquam gratiam qua disponitur ad consequendam gloriam nisi propter merita Christi. Quod autem ita factum sit, probatur, quia ante omnem hanc gratiam prævenientem, & excitantem collatam hominibus antecessit meritum Christi, vel in re ipsa, vel in prævisione divina, ut scet. præced. explicatum est: & meritum Christi dignum est omni præmio hujusmodi, imo est majus & excellentius illo: & hujusmodi ratio providentiæ perfectior est, & magis consentanea divinæ sapientiæ, & cedit in majorem quandam dignitatem ipsius Christi, & totius humanæ naturæ, ergo. Et confirmatur, quia hoc pertinet ad perfectam Christi redemptionem, si enim non meruisset nobis, omnes has gratias, non meruisset perfecte justificationem nostram, nec gratiam necessariam ad consequendam justitiam, & remissionem peccati, ut per se constat, & magis ex sequentibus patebit. Unde confirmatur secundo conclusio, quia Adam, quod in ipso fuit, meruit nobis carentiam omnis gratiæ, omnisque divini auxilii, ergo Christus ut perfectissimus redemptor, hæc omnia nobis promeruit, quia non sicut delictum, ita & donum, sed longe efficacius, & in suo genere excellentius.

Et ex hac conclusione sequitur primo, meruisse Christum omnibus adultis omnes dispositiones ad gratiam, quas de facto recipiunt, tam remotas, quam ultimam, probatur ex dictis. Primo, quia hi actus sunt aliquo modo supernaturales, ergo sunt dona Dei gratuita, ergo dantur nobis per Christi merita. Secundo, hi actus non alia ratione sunt dona Dei, nisi quia per illius gratiam excitantem, & adjuvantem efficiuntur in nobis, ergo eadem ratione sunt dona Christi, & effectus meritorum ejus, quia tota illa gratia adjuvans & excitans, est ex illius meritis, ut probatum est. Tertio specialiter de ultima dispositione, quia cum illa infallibiliter conjuncta est justificatio, & remissio peccati, ergo si posset homo sine meritis Christi habere hanc dispositionem, posset etiam sine eisdem meritis consequi justitiam & remissionem peccati, sicut si homo per solas vires naturæ posset habere hujusmodi dispositionem, per easdem posset a se expellere peccatum. Responderi posset, actum, qui de facto est ultima dispositio ad gratiam, posse haberi sine meritis Christi, tamen quod illa acceptetur, ut sufficiens dispositio, & habeat secum conjunctam infallibiliter justitiam, & remissionem peccati, esse ex meritis Christi: cum enim contritio de se sit insufficiens ad satisfaciendum Deo, tamen propter Christi meritum Deus illa contentus est, & habenti

Suarez. Tom. XVI.

illam confert justitiam & remissionem peccati, sicut in attritione manifestum est, respectu justificationis per sacramentum comparandæ, illa enim de se non erat sufficiens dispositio, tamen propter Christi meritum acceptatur ut sufficiens. Juxta quam responsionem dicendum esset, actum contritionis non haberi ex meritis Christi, tamen in esse ultimæ dispositionis esse ex illis, quia ab illis habet, quod illam rationem induat.

Sed hæc responsio, & doctrina omnium falsa est, tum propter rationes factas: tum etiam, quia, ut verum sit, illud actum ut est ab homine, prius natura, quam justificetur, non esse condignam satisfactionem pro peccato: tamen ex natura sua est actus maxime proportionatus ipsi justitiæ & charitati, unde de se & natura sua est proxima dispositio ad infusionem justitiæ, præsertim si includat amorem Dei super omnia, sicut actus fidei est proxima dispositio ad habitum fidei: si ergo hos actus posset homo habere sine Christi meritis, non fuissent admodum necessaria talia & tanta merita ad remissionem peccati obtinendam: tum etiam quia Concil. Trident. totam justificationem nostram tribuit Christi meritis, unum autem ex præcipuis, & maxime requisitis in justificatione, est hæc dispositio. Quarto & ultimo, quia perfectum agens non tantum inducit formam, sed ad illam etiam disponit: Christus autem per sua merita perfectissimo modo in nobis operatur, habet enim perfectum influxum capitis, unde non prærequirit membra conjuncta corpori, ut in illa possit influere: sed efficacitatem habet ad influendum in membra separata, quæ tantum sunt membra in potentia, ut illa conjungat corpori suo, ut supra cum D. Th. q. 8. notavi: & hæc ratio tam de proxima, quam de remotis dispositionibus procedit. Dices. Hi actus sunt liberi, si ergo pendent a nostra libertate, quomodo possunt esse dona data ex meritis Christi? Respondetur, sicut sunt dona Dei, ita sunt præmia meritorum Christi, utrumque autem habent quatenus sunt actus supernaturales procedentes ab auxiliis excitante & adjuvante, sufficientibus, & efficacibus.

Secundo sequitur, applicationem omnium mediorum, per quæ homini infunditur prima gratia, & datur remissio peccati, esse ex meritis Christi. Hoc probatur ex dictis primo ratione generali, quia hæc applicatio est maximum donum Dei, & maxime necessarium ad salutem: sed Christus meruit nobis omnia Dei dona, & omnia media necessaria ad salutem, ut ostensum est, ergo. Secunda in speciali explicatur, quia hæc applicatio meritorum Christi, aut fit ex dispositione operantis, ut per contritionem, aut fit ex opere operato, ut per sacramenta: si fiat primo modo, jam ostensum est, non solum contrito dari gratiam ex meritis Christi, sed etiam contritionem ipsam, & quidquid gratiæ ad illam habendam confertur, propter eadem merita dari: sed merita Christi non applicantur hoc modo, nisi per ipsam contritionem; ergo talis applicatio etiam est ex meritis Christi. Et confirmatur, quia tunc applicatio fit per fidem Christi vivam, sed ostensum est hanc fidem esse donum datum propter merita Christi, ergo. Et ex hoc probatur alia pars scilicet, cum applicatio meritorum Christi si per sacramentum, ex opere operato etiam dari propter merita Christi, non solum effectum sacramenti, sed etiam ipsum sacramentum: tum, quia nulla est ratio, cur applicatio meritorum Christi facta uno modo, sit effectus meritorum Christi, & non alio modo: tum etiam, quia ipsamet applicatio est donum Dei maxime necessarium ad salutem: tum præterea, quia sicut adultus vocatur ad fidem, & trahitur ad Ecclesiam per vocationem Dei efficacem, ita parvulus trahitur per baptismum, qui potest dici veluti quædam efficax vocatio ejus: ergo, sicut in adulto ipsamet vocatio est ex meritis Christi, ita in parvulo ipse baptismus. Quod ita etiam explicatur, nam in adulto ipsa voluntas suscipiendi baptismum est ex Christi merito, ergo etiam respectu parvuli illa Dei providentia qua fit, ut prius, quam moriatur, baptizetur, & quod parentes, vel aliquis loco eorum habeat voluntatem, & curam, ut ille baptizetur, est specialis gratia Dei præveniens ipsum: cur ergo hæc non erit ex meritis Christi, sicut ostensum est de omni auxilio gratiæ, quod datur adultis? Ultimo, ratio fundamentalis est, quia, sicut Deus sua voluntate elegit hos potius quam illos ad gloriam, vel gratiam, vel alia supernaturalia dona, ita manifestavit Christo hanc suam electionem,

Confutatur.

Objeccio.

Respons.

Respondetur  
adversario.



Christus  
& quoad  
sufficien-  
tiam me-  
ruit, &  
quoad ef-  
ficaciam.

nem, & voluntatem: ergo quamvis Christus omnibus meruerit, non tamen aequè pro omnibus obtulit sua merita, sed juxta electionē Patris, aliter obtulit pro electis, & aliter pro aliis, & pro hoc parvulo obtulit, ut illi infallibiliter applicaretur baptismus, pro alio autem minime, sed tantū generali modo, ut magis ex seq. illatione constabit.

Tertio sequitur, Christum Dominum meruisse, non tantum quoad sufficientiam omnibus hominibus omnia dona gratiæ, sed etiam quoad efficaciam meruisse aliquibus specialia dona, seu ut sua merita in illis haberent infallibiliter aliquem effectum gratiæ. Hoc sequitur manifeste ex præcedentibus, quia Christus, quamvis meruerit omnibus quoad sufficientiam, quibusdam tamen meruit, ut cum effectu illis applicarentur sua merita: hoc autem est mereri quoad efficaciam. Quod præterea ex modo loquendi sacre Scripturæ confirmatur, Joan. enim 17. inquit Christus: *Ego pro eis rogo, non pro mundo rogo, sed pro iis, quos dedisti mihi*, & infra, *Pater sancte serva eos in nomine tuo, quos dedisti mihi, ut sint unum sicut & nos*; & infra, *Non rogo, ut tollas eos de mundo, sed ut serves eos a malo*; & infra, *Non pro eis autem rogo tantum, sed & pro eis, qui credituri sunt per verbum eorum in me, ut omnes unum sint*, & infra. *Pater, quos dedisti mihi, volo ut ubi sum ego, & illi sint mecum*. Quo loco aliter Christus orat pro Apostolis, & pro electis, quam pro universo mundo, quia pro illis orat, ut efficaciter eis applicetur suum meritum, quomodo nunquam oravit pro omnibus hominibus unde in eisdem verbis ostendit absolutam & efficacem voluntatem salutis illorum pro quibus orat. Unde Justin. Marty. in q. 23. ad orthodoxos, advertit, illam orationem Christi, *Sanctifica eos in veritate*, non esse fusam pro Juda, quia fuit efficax, sed pro cæteris Apostolis: & Luc. 22. dixit Jesu Petro, *Ego rogavi pro te, ut non deficiat fides tua, & tu aliquando conversus confirma fratres tuos*, quæ oratio fuit sine dubio efficax: meruit ergo per illam Christus & Petri conversionem, & infallibilem perseverantiā in fide. Deinde Luc. 21. dicit Christus Apostolis, *Ego dabo vobis os & sapientiam, cui non poterunt contradicere, & resistere, omnes adversarii vestri*: sicut ergo Christus est dispensator horum donorum Dei, & quibusdam illa donat, & non aliis: ita etiam illa meruit nobis, & quibusdam ita applicuit sua merita, ut efficaciter illa consequantur, non vero aliis. Denique Paulus ad Hebr. 5. sic inquit, *Qui in diebus carnis sine precibus, supplicationibusque ad eum, qui possit illum salvum facere a morte, cum clamore, & lacrymis offerens, exauditus est pro sua reverentia*, & infra, *& confirmatus, factus est omnibus obtemperantibus sibi causa salutis æternæ*; est ergo oratio Christi efficax & infallibiliter exaudita, si ex voluntate absoluta procedat. Unde, sicut diversimode pro hominibus oravit, ita diversimode etiam meruit, aliis sufficienter, aliis efficaciter, propter quod licet omnium sit universalis redemptor, & sufficiens causa salutis, speciali tamen modo est causa efficax salutis eorum, quos sibi facit obediētes. Et confirmatur tandem, quia incredibile est, non aliter obtulisse Christum sua merita pro illis, quos sciebat esse electos a Patre, quam pro aliis: cum videret voluntatem Patris esse, ut illi infallibiliter salvarentur, & non alii, cui voluntati ipse se in omnibus conformabat.

Ad fundamenta contrariæ sententiæ. Ad D. Th. respondetur, male a citatis authoribus referri, & pejus explicari, nam in illa q. 29. de Verit. art. 7. ad 8. expresse dicit, meritum Christi sufficienter operari salutem humanam, ut causam universalem, sed oportere, hanc causam applicari singulis per sacramenta, & per fidem formatam, quæ per dilectionem operatur: *Et ideo*, inquit, *requiritur aliquid aliud ad salutem nostram præter meritum Christi, cujus tamen meritum Christi est causa*: docet ergo aperte D. Th. meritum Christi esse causam etiam ipsius fidei vel cujuscunque alterius medii, per quod ipsum meritum Christi nobis applicatur. Et in hac 3. p. infra q. 21. art. 4. ad 2. dicit, Christum non absolute orasse pro omnibus, sed pro prædestinatis, ut vitam consequerentur æternam: sentit ergo, Christum prædestinatis meruisse efficacem applicationem suorum meritorum. Cum ergo hoc loco ad tertium dicit, regenerari in Christo, esse gratiam homini factam, intelligit respectu ipsius hominis, non respectu Christi, & eodem sensu dicit, salutem hominis fieri ex gratia, & eodem sensu loquitur in locis alijs citatis ex q. 29. de Verit. ut ipse se explicuit in solu-

tionem ad 8. jam citata: imo in eadem solutione ad quartum ait, meritum Christi æqualiter se habere ad omnes quoad sufficientiam, non quoad efficaciam: quod intelligendum est non tantum ex parte effectus, qui in uno fit, & non in alio, sed etiam ex parte voluntatis, qua ipse Christus meruit, & diverso modo obtulit sua merita pro diversis, ut explicatum est. Quia vero prima radix hujus diversitatis fuit electio & voluntas divina, cui se voluntas humana Christi conformavit, ideo absolute & simpliciter totum hoc negotium tribuitur gratuite voluntati Dei, ut magis in sect. ultima explicabimus. Et hinc etiam colligitur, quo modo sit intelligenda comparatio inter Christum, & Adamum, quam D. Th. hic ponit in eadem solutione ad tertium: conveniunt enim in hoc, quod sicut peccatum Adæ fuit prima radix omnis mali culpæ, & pænæ, ita meritum Christi est prima radix omnis boni, & gratiæ humano generi collatæ: tenet etiam in hoc similitudo, quod sicut generatio carnalis ex peccato Adæ habet (ut ita dicam) vim & efficaciam ad influendum originale peccatum, ita regeneratio in Christo, quæ fit per baptismum, ab ipso Christo habet vim ad influendam justitiam: differunt tamen, quia peccatum Adæ non est causa ipsius naturalis generationis, nec dispositionis ad illius effectum necessariæ, nec denique est causa, quod iste homo generetur, quamvis sit causa, ut generatus contrahat peccatum: nam illud, quod naturale est, est per se bonum, & per se ordinatum a Deo, unde non trahit originem ex peccato. at vero meritum Christi, & est causa ipsius spiritualis regenerationis, & dat illi efficaciam, & influit in effectum ejus, & simul etiam causa est, ut hic homo regeneretur, propter quem specialiter suum obtulit meritum: quod bene indicavit Scot. dicta dist. 19. dicens, hoc fuisse potissimum in merito Christi, quod meruit, non conjunctos conjungi.

Ad rationes ex dictis patet responsio, ad primam enim respondetur, quamvis omne opus gratiæ quod in nobis fit, propter merita Christi fiat, nihilominus veram salvari rationem gratiæ: tum quia respectu nostri totum hoc fit mere gratis, tum etiam quia includendo ipsum Christum, & meritum ejus, & modum merendi, & offerendi sua merita pro nobis, totum negotium nostræ salutis duxit originem ex sola gratuita divina voluntate & electione. Ad secundam vero respondetur, concedendo non esse ex merito Christi hoc totum, scilicet, ut huic potius quam illi applicetur ejus meritum, seu quod hic potius quam ille baptizetur: est tamen ex meritis, ut hic baptizetur, & ut huic applicentur ejus merita: in illa enim comparatione includuntur duo, scilicet, ut hic baptizetur, & non alius, & hoc posterius Christus non meruit, licet meruerit primum: quia illud non pertinet ad remunerationem, sed potius ad pœnam, unde non est, opus gratiæ, sed justitiæ, & occultis iudicijs Dei. Neque testimonia Pauli ibi adducta aliud ostendunt: imo si recte expendantur, nostram sententiam confirmant, ut de testimonio ad Ephes. 1. tractatum jam est, & de ultimo testimonio ad Heb. ex ipsis verbis facile constare potest: dicitur enim Deus aptare nos in omni bono juxta beneplacitum suum, hoc tamen facere per Jesum Christum: quamquam ergo electio sit ex voluntate Dei, tamen executio est per merita Christi. An vero ipsa etiam electio fundata sit in Christi meritis, dicetur in sect. ultim.

#### S E C T I O III.

*Utrum Christus Dominus meruerit nobis omnia dona gratiæ, quæ post primam justificationem conferuntur.*

Hæc quæstio multa comprehendit, quia hæc dona varia & multiplicia esse possunt: omnia tamen sub una quæstione comprehendimus, ut prolixitatem vitemus, & quia in omnibus fere eadem est ratio quæstionis. Primum tamen omnium hic jam non agimus de habitibus infusis, qui justificantem gratiam comitantur, vel in illa aliquo modo continentur, ut sunt virtutes Theologicæ & morales, & Spiritus Sancti dona: quia perfecta justitia omnes hos habitus complectitur, & ideo ubi probatum est, primam justitiam dari ex meritis Christi, demonstratum relinquitur, omnes hos habitus infundi nobis propter eadem merita, unde Concil. Trident. sess. 6. c. 7. definit, in justificatione accipere hominem per Christum fidem, spem & charitatem, ubi de habitibus loquitur, ut in superioribus tractatum est. Et inferius dicit, Christianam



stianam iustitiam, quam prius dixerat includere infusionem gratiæ & donorum, dari per Christum Jesum. Secundo non tracto de effectibus sacramentorum, in quibus variæ includuntur perfectiones, præter primam gratiam iustificantem, ut augmentum gratiæ, remissio venialium peccatorum, seu poenarum temporalium, varia auxilia seu gratiæ sacramentales, characteres, seu spirituales potestates: nam hæc omnia, & quidquid per sacramenta ex opere operato confertur, certissimum est esse præmium, seu effectum meritorum Christi: quia sacramenta ex meritis Christi habent virtutem, & nihil aliud sunt, quam organa per quæ merita Christi nobis applicantur, ut constat ex Concil. Trid. sess. 7. & trademus latius infra agentes de sacramentis. Relinquitur ergo quæstio de aliis donis, quæ extra sacramentum homini conferuntur post primam iustitiam, quæ ad quatuor capita revocari possunt, scilicet, auxilia excitantia, & adjuvantia, quæ homini dantur ad bene operandum post acceptam primam gratiam. Secundo meritum augmenti gratiæ & gloriæ, atque adeo ipsummet augmentum gratiæ & gloriæ. Tercio, satisfactio pro venialibus culpis & temporali poena. Quarto, perseverantia in gratia usque ad finem vitæ.

Dico ergo primo: Omnia gratiæ auxilia, quæ hominibus iustificatis conferuntur, effectus sunt meritorum Christi. Hæc conclusio ex eisdem principiis probanda est, quibus supra probavimus similem assertionem de auxiliis antecedentibus iustificationem, quia testimonia Scripturæ & Sanctorum generaliter de omnibus loquuntur. Et ratio est eadem, quæ hoc modo potest commode explicari: hæc enim auxilia, quædam sunt, veluti connaturalia ipsi gratiæ, ad eum modum, quo concursus ad operandum debitus est unicuique facultati: & hæc auxilia intelliguntur cadere sub idem Christi meritum, sub quo cadit ipsa prima gratia. Sicut enim cum meruit nobis Christus primam gratiam, meruit perpetuam ejus conservationem, quamdiu nos peccati impedimentum non obicerimus: ita etiam meruit illam aptam & expeditam ad operandum quantum necesse esset ex parte ipsius gratiæ: quia non tantum meruit illam, ut esset in nobis, sed etiam ut per illam operari possemus: meruit ergo auxilium, seu supernaturalem concursus simpliciter necessarium ad operandum. Alia vero sunt auxilia extraordinaria: & uberiora, & hæc rursus interdum dantur homini iusto ex beneplacito Dei sine merito susipientis: atque adeo mere gratis respectu illius: & de his etiam est certum semper dari propter merita Christi, ut evidenter probant omnia superius adducta, quæ generaliter loquuntur de omnibus gratiæ donis, hoc autem est speciale donum gratiæ distinctum omnino ab ipsa prima, & ideo non solum est ex meritis Christi, sed etiam est nova applicatio talium meritorum: & hoc optime confirmant illa verba Christi Joann. 15. *Sine me nihil potestis facere*. Interdum vero aliquod ex his auxiliis confertur ex merito hominis iustificati, qui orando, operando, & bene disponendo, per primam gratiam & priora auxilia impetrat, & de condigno meretur alia majora sibi necessaria & valde utilia, & de his eadem est ratio, quæ de augmento gratiæ, & merito de condigno illius.

Ex his tamen obiter inferitur, & dico secundo, donum perseverantiæ semper esse effectum meritorium Christi, quia hoc donum includit specialia auxilia, vel speciale Dei providentiam, quæ homini confertur, ut infallibiliter in gratia moriatur, quod est sine dubio magnum donum gratiæ, ut Concil. Trident. sess. 6. illud appellavit, & est ita distinctum ab ipsa prima gratia & illi non debitum, ut non possit cadere sub meritum de condigno hominis iustificati: est ergo ex illis donis, quæ de condigno dantur, solum propter merita Christi. Et confirmatur primo, quia hoc donum est maxime necessarium ad salutem æternam consequendam; ergo Christus, qui est autor & perfectissima causa meritoria nostræ salutis, est etiam autor, & causa hujus doni. Confirmatur secundo, quia, ut infra ostendam, Christus meruit prædestinationem nostram, impossibile autem est mereri prædestinationem, non merendo hoc perseverantiæ donum, quod est unus ex potissimis effectibus prædestinationis, & quasi complementum ejus. Item supra ostensum est, meruisse Christum prædestinatis efficacem applicationem suorum meritorum ad primam iustitiam, & remissionem peccati consequendam, quia obtulit sua merita, ut talis applicatio in-

fallibiliter fieret; ergo eodem modo meruit prædestinatis efficacem applicationem suorum meritorum, quæ infallibiliter consequerentur vitam æternam: quia pro illis hoc modo obtulit sua merita, quoniam sciebat esse ab æterno Patre electos; ergo obtulit sua merita, ut illis daretur perseverantiæ donum, quod necessarium est ad vitam æternam consequendam. Denique unus homo potest vel sibi, vel alteri mereri de congruo hoc donum, petendo & obsecrando, sed Christus ita oravit pro electis; ergo ipse de condigno & ex perfecta iustitia meruit illis hoc donum. Et juxta hanc doctrinam & similem traditam sect. præcedenti intelligitur optime doctrina Concilii Valent. tempore Lotharii cap. 4. ubi damnat erroris sententiam quorundam asserentium, Christum obtulisse sua merita, seu effudisse suum sanguinem pro impiis, & qui in peccatis moriuntur: ipsum autem Concilium definit, hoc pretium datum esse ad multorum exhaurienda peccata, illorum, scilicet, qui credendo in Christum non per eunt, sed vitam æternam consequuntur, hoc enim intelligendum est de merito quoad efficaciam, & de illo speciali modo quo pretium sanguinis sui pro prædestinatis obtulit: nam quoad sufficientiam pro omnibus hominibus meruit Christus, & pretium obtulit, ut dictum est.

Dico tertio, Christus Dominus meruit nobis augmentum gratiæ & gloriæ, & omnes actus, quibus illam mere-mur. Probatur primo ex Joan. 15. ubi Christus se comparat viti, & justos palmitibus; & subdit: *Sicut palmes non potest ferre fructum a semetipso, nisi manserit in vite, sic nec vos, nisi in me manseritis*. Et rationem subdit: *Quia sine me nihil potestis facere*, significans, sicut palmes non potest crescere sine influxu vitis, ita neque justum sine influxu meritorum Christi. Unde Trident. sess. 6. c. 16. colligit, Christum influere virtutem in justos, tanquam caput in membra, & tanquam vitam in palmites: *Quæ virtus*, inquit, *bona eorum opera antecedit, comitatur, & subsequitur, & sine illa nullo pacto Deo grata, & meritoria esse possent*, & idem significat sess. 14. cap. 8. ut statim ponderabimus. Indicat etiam Concil. Arausicanum II. cap. 24. explicans eundem locum Joannis. Et confirmari potest ex Paul. ad Eph. 2. dicente: *Superedificati super fundamentum Apostolorum, & Prophetarum, ipso summo angulari lapide Christo Jesu, in quo omnis edificatio constructa crescit in templum sanctum in Domino*. Et clarius cap. 4. *Veritatem autem facientes in charitate, crescimus in illo per omnia, qui est caput Christus, ex quo totum corpus compactum, & connexum per omnem juncturam subministrat, secundum operationem in mensuram uniuscujusque membri augmentum corporis facit, in adificationem sui in charitate*. Ex quibus testimoniis manifeste constat, omne augmentum spirituale & consequenter omne meritum esse ex influxu meritorum Christi. Hoc vero ut ratione declaratur, observandum est, duobus modis explicari posse, primo ratione auxiliorum, quæ justis dantur ad bene merendum, & per merita crescendo in gratia: & in hoc modo nulla est difficultas, ostensum est enim hæc auxilia dari propter Christum, declaratum etiam est, quod sicut actus nostri & merita nostra dicuntur dona Dei, quia sunt supernaturalia bona ad quæ operanda nos trahimur & sublevamur per supernaturalia auxilia: ita etiam possunt dici dona Christi, quia propter ejus merita hæc omnia conferuntur. Tamen ex vi hujus modi ipsum augmentum gratiæ non dicitur dari propter merita Christi, nisi in radice, id est, in auxilio, quod propter Christum datur ad promerendum tale augmentum.

Secundo modo hoc explicari potest ratione valoris & meriti illorum operum, quibus promeremur tale augmentum, ita ut propter Christum, non solum nobis conferatur auxilium ad efficiendum opus meritorium, sed etiam detur ipsi operi valor, propter quem acceptetur, ut condignum meritum talis augmenti gratiæ aut gloriæ. Et hic modus est difficilior, quia opus supernaturale a gratia procedens intrinsece & natura sua habet proportionem & condignitatem cum tali præmio, & valorem sufficientem ad illud: ergo non est quod per Christi meritum conferatur. Imo nec conferri posse videtur, quia, ut recte notavit Durand. in 3. dist. 18. q. 3. n. 7. quamvis uni possit dari præmium propter meritum alterius, tamen meritum unius non potest fieri meritum alterius, quia neque operatio unius potest fieri operatio alterius, consistit enim

Christus nobis meruit augmentum gratiæ, & gloriæ, & omnes actus, quibus illam mere-mur.

Duplex sententia conclusionis positæ.

Nullum auxilium gratiæ confertur iustificatis, nisi per merita Christi.

Donum perseverantiæ semper est effectus meritorum Christi.



meritum in propria & spontanea operatione: meritum ergo Christi non potest fieri meritum nostrum; ergo nec merita nostra habere possunt a merito Christi, ut sint merita, neque ut habeant valorem majorem, quam de se nata sunt habere. Probatur hæc ultima consequentia, quia neque nostris operibus aliquid additur intrinsecum, neque inherens illis propter Christi merita, a quo habeant valorem illum, nihil enim hujusmodi fingi potest: neque ipsa Christi merita per se ac formaliter possunt hunc valorem conferre nostris operibus, ut ostensum est, neque sola aliqua denominatio, vel habitudo extrinseca ad hoc sufficit, alias nostra merita non essent vera merita, sed propter Christum acceptarentur ut talia, quamvis revera talia non sint. Nihilominus multorum sententia est, etiam hoc posteriori modo habere Christi meritum influxum in nostra merita, & in omnem effectum eorum, ita ut quicquid nos meremur, non solum detur nobis propter nostrum meritum, sed etiam propter meritum Christi: & nostra opera non habent rationem meriti, quam nunc habent, tantum ex sua bonitate & qualitate, & proxima gratia, a qua procedunt, sed etiam ex conjunctione ad meritum Christi in quo nituntur, & a quo habent vim & efficaciam, ut ex perfecta iustitia illis debeat premium. Hanc sententiam late defendit Hosius in confessione Polonica cap. 73. ubi refert Albert. Magn. Bonav. Gab. & alios: multa etiam in eadem sententiam congerit Vega lib. 15. in Trident. a cap. 4. usque ad 10. & 18. indicant etiam Cajet. tom. 3. opuscul. tract. 10. c. 9. Soto in 4. dist. 19. q. 1. art. 2. conclus. 3. & est opinio satis pia & probabilis, & consentanea locutionibus Scripturæ & Sanctorum, quas de hoc Christi merito, & de effectu quem in nos infuit adduximus: & præsertim videtur illi multum favere Concil. Trident. ut statim referam.

Oportet tamen convenienter illam explicare, non est enim negandum, quin nostra merita sint vera merita, ita ut opera iustorum ex gratia procedentia ex se habeant intrinsecam dignitatem, & proportionem cum præmio, quam haberent, etiam si intelligeremus hominem esse iustum, & bene operari absque meritis Christi: sicut multi de angelis existimant, & de homine in statu innocentie, & hoc bene probant rationes paulo antea posite: nihilominus tamen quia posset Deus hæc opera quantumvis digna & proportionata præmio, non ordinare ad meritum, nec acceptare ad præmium, quia infinitis aliis titulis sunt illi debita: ideo sancti Patres divinæ gratiæ attribuant, quod voluerit nostra esse merita, quæ sunt ipsius dona, ut Coelestinus Pap. loquitur epist. 1. cap. 12. & Trident. sess. 6. c. 16. Hæc autem gratia confertur nobis propter merita Christi, & in illis fundatur, ipse enim est author nobis bonorum omnium, & omnis gratiæ. Unde August. lib. 13. de Trinit. c. 10. recte ad hoc propositum accommodat illud ad Ephes. 4. *Ascendit in altum, dedit dona hominibus*, dicens hæc dona esse merita nostra, per quæ ad summam beatitudinem pervenimus. Deinde dictum est supra q. 1. art. 2. ad rationem meriti de condigno non requiri tantum proportionem operis, sed etiam promissionem, in qua opus ipsum nitatur, ut habeat vim & efficaciam ad exigendum præmium de iustitia: hæc ergo promissio facta nostris operibus referenda est in Christi merita, ut colligitur ex Paul. 2. ad Timot. 1. dicente, *Paulus Jesu Christi per voluntatem Dei, secundam promissionem vitæ, quæ est in Christo Jesu*. Et ex Concil. Trident. sess. 6. c. 16. dicente, *Bene operantibus usque in finem, & in deo sperantibus proponenda est vita æterna, tanquam gratia filijs Dei per Christum Jesum misericorditer promissa, & tanquam merces ex ipsius Dei promissione bonis ipsorum operibus, & meriti fideliter reddenda*. His ergo modis recte intelligitur, Christi merita influere in nostra merita, ut vera & efficacia merita sint. Quo sensu dixisse etiam videtur Concil. Trident. sess. 14. c. 8. de nostra satisfactione loquens. *Nec vero ita nostra est satisfactio hac quam pro peccatis nostris exolvimus, ut non sit per Christum Jesum*. Quod infra magis explicans, inquit, *Omnis gloriatio nostra in Christo est, in quo vivimus, in quo meremur, in quo satisfacimus, facientes fructus dignos penitentiæ, qui ex illo vim habent, ab illo offeruntur Patri, & per illum acceptantur a Patre*: quæ ultima verba sunt valde notanda, videntur enim aperte continere sensum a nobis explicatum.

Tertio addi potest probabile esse, nunc opera iustorum,

qui sunt membra Christi, referri ad majus præmium, quæ de se postularent, ex sola proportionem quasi connaturali, quam habent cum præmio, quo modo multi intelligunt pie illud Joan. 10. *Ego veni ut vitam habeant, & abundantius habeant*. Hoc autem verum esse potest, vel quia nunc iustus, quia est membrum Christi, habet majorem quandam dignitatem moralem apud Deum, quæ redundat in ipsius opera, & confert illis majorem quandam valorem & æstimationem moralem: vel certe, quia propter Christi meritum effectum est, ut majus præmium sit illis promissum. Ultimo, sicut supra dicebamus, Christum meruisse peccatori, & ut contritionem habeat, & ut habenti contritionem detur prima gratia & remissio peccatorum: ita recte intelligi potest meruisse Christum homini iusto, & ut bene operetur, & ut ipsi bene operanti detur tale augmentum gratiæ & gloriæ: sicut ergo prima gratia respectu peccatoris datur gratis, & ad summum ex aliquo merito de congruo, respectu vero Christi datur ex perfecta iustitia, ita ipsummet augmentum gratiæ respectu ipsius iusti datur ex merito & iustitia, qualis esse potest in puro homine: respectu vero Christi dabitur ex perfecta & rigorosa iustitia. Neque enim repugnat idem premium dari ex duplici titulo, præsertim respectu diversorum, & quando illi tituli diversarum rationum existunt: quin potius etiam in ipsa prima gloria hoc ipsum necessario dicendum videtur: nam quando adultus iustificatur per actum contritionis, licet non mereatur primam gratiam, meretur tamen de condigno primam gloriam, & nihilominus illa eadem prima gloria datur propter merita Christi, sicut & gratia, ut expresse dixit Concil. Trident. supra, & ex dictis in sect. 1. satis colligi potest: aliis non meruisset Christus omnibus hominibus gloriam, sed tantum gratiam, qua ipsi mererentur gloriam, quod falsum est: sed utrumque ipse nobis meruit, quamvis nos etiam possimus adjungere nostrum meritum respectu gloriæ. Idem ergo dicendum est de augmento gratiæ & gloriæ, ut totius salutis & vitæ æternæ iustorum Christus sit perfectissima causa, & omnis Sanctorum beatitudo, merces sit operum Christi: ad quem sensum accommodat Hilar. illud Ps. 126. *Ecce hæreditas Domini, Filii merces*: dicens, ipsa hæreditatem Sanctorum esse mercedem Filii, id est, Christi, & meritorum ejus. His ergo modis præsertim duobus primis & hoc ultimo (nam tertius magis dubius est) recte intelligitur meruisse Christum nobis augmentum gratiæ, & gloriæ, & ipsa merita, per quæ illud consequimur.

Ex quibus infero, & dico quarto, meruisse nobis Christum remissionem poenæ temporalis, etiam quæ nobis datur per satisfactiones nostras. Et idem proportionaliter est de remissione venialium peccatorum. Ita docet & bene Andreas Vega locis supra citatis, & lib. 4. c. 6, & colligitur non obscure ex verbis Concilii Trident. supra citatis ex sess. 14. cap. 8. & favet sacra Scriptura, quæ omnem hujusmodi remissionem sanguini Christi tribuit, ut Apocal. 7. dicuntur Sancti lavisse stolas suas, dealbavisse eas in sanguine Agni, & 1. Joan. 2. *Sanguis ejus emundat nos ab omni peccato*, dicimur autem emundari & dealbari non solum per remissionem culpæ, sed etiam poenæ: sicut in purgatorio dicuntur animæ Sanctorum purgari, etiam si interdum solum habeant reatum poenæ temporalis. Explicanda vero est hæc conclusio sic præcedens, quia etiam ad satisfactionem pro poenâ, necessaria est gratia, & promissio Dei, & utrumque est ex meritis Christi: & quia, sicut ipse meruit, ut iusto sic bene operanti daretur tale præmium, ita meruit, ut iusto tali modo se affligenti, aut castiganti in hac vita, concederetur remissio tantæ poenæ: totum enim hoc optime cadit in perfectissimum Christi meritum, & commendat magis charitatem ejus erga nos, & perfectum influxum, quem in nos habet, ut caput in membra, & perfectiorem rationem iustitiæ continet: ac denique supra citatis Scripturis & Conciliis contentateum est. Et confirmari etiam potest ex tractatis de satisfactione Christi & nostra, quæ in illa fundatur, supra q. 1. art. 2. Sine causâ ergo Palud. in 4. dist. 20. q. 4. n. 14. quem Antoni. sequitur. 1. par. tit. 10. c. 3. §. 1. negat remitti nobis semper poenas temporales ex merito Christi, sed ex liberali remissione Dei. *Quia alias*, inquit, *in nullo esset Deus nobiscum liberalis*. Quæ sententia eo absurdior mihi videtur, quo ipsi loquuntur de remissione, quæ fit in sacramentis: nam certissimum est, omnem effectum sacramentorum esse, ex Christi meritis, ut supra dixi.

Quo modo intelligenda sit conclusio in secundo sensu.

Remissio nem poenæ temporalis, & venialium peccatorum nobis meruit Christus.



dixi. Et ratio eorum nullius momenti est, nam major liberalitas Dei est dare nobis Christi merita, & satisfactionem, & propterea remittere nobis poenam, quam eandem poenam nobis gratis condonare.

**Obiectio.** Dicit aliquis. Si meritum Christi simul concurrat cum nostra satisfactione ad eundem effectum, vel utrumque imperfecto modo concurrat, vel alterum redundat. Respondetur, negando consequentiam, concurrunt enim ut causae diversorum generum, meritum enim Christi per se sufficiens est, tamen in hoc maxime relucet ejus sufficientia & perfectio, quod & suum effectum habet, & non excludit nostra opera, merita, & satisfactiones, sed illius potius vim & efficaciam tribuit, unde possunt dici concurrere, ut causae diversorum generum, universalis & proxima, quæ in suo ordine perfecte existunt. Errant igitur nostri temporis hæretici, qui meritum Christi dicunt nostrum excludere, & si nostrum asseratur, obscurari Christi meritum: potius enim meritum Christi infert nostrum, tanquam causa effectum: & nostrum, ut Concil. Trident. dixit, manifestat, & illustrat gloriam meritum Christi.

**De poenæ purgatorii remissione.** Ultimo tandem quæret aliquis, an remissio poenæ, quæ fit in purgatorio, sit etiam effectus meritorum Christi. De hac re dictum est supra disp. 4. sect. 11. Nunc breviter respondetur, quando poena ibi remittitur per indulgentias vel satisfactiones vivorum, sine dubio est effectus meritorum Christi, juxta dicta in conclusione ultima, est enim eadem ratio: illa vero quæ potius est solutio, quam remissio poenæ, quia fit per condignam satisfactionem, non est cur sit effectus meritorum Christi, quia ibi homo solvit Deo quantum poenæ debet. Addit tamen Vega lib. 15. in Trident. c. 10. etiam illis animabus prodesse meritum Christi, ut cum illis remissus agatur, & citra condignum puniantur. Sed non est intelligendum præter illam poenam, quæ interdum remittitur in purgatorio per suffragia Ecclesiæ, interdum etiam remitti aliquam poenam propter merita Christi immediate applicata ex voluntate Dei abique alio medio. Hoc enim neque fundamentum habet, nec verissimile mihi videtur: cur enim Deus postea remitteret illam poenam, quam non remisit, quando abstulit culpam, cum supponatur, nullum aliud medium esse applicatum homini ad remissionem talis poenæ? Solum ergo intelligi potest in ipsa remissione culpæ, quando reatus poenæ æternæ mutatur in temporalem, propter merita Christi fieri, ut mutatio fiat in minorem poenam, quam fieret cæteris paribus, si non esset fundata in meritis Christi. Et hic sensus habet illam probabilitatem, quam dixi explicando conclusionem tertiam, & hoc modo, si fortasse poena purgatorii propter Christum mitior est, non est propter remissionem, quæ ibi fiat, sed propter illam, quæ in hac vita facta supponitur. Et propter similem rationem non video quid difficultatis habeat, vel quid sit, quod in eodem loco c. 11. Vega contendit, postquam anima est perfecte purgata, indigere nova applicatione meritorum Christi, ut in beatitudinem introducat: si enim contendat, ipsam collationem gloriæ esse effectum meritorum Christi, illud quidem est verum, & a nobis jam probatum: si vero contendat, novam aliam applicationem meritorum esse necessariam, supervacaneum est, & sine fundamento assertum: illa enim applicatio tunc proprie facta est, quando homini datum est perfectum jus ad gloriam: incipit autem habere effectum, quando beatitudo ipsa confertur.

## S E C T I O IV.

*Utrum Christus Dominus meruerit hominum electionem, & prædestinationem.*

**I**N superioribus dictum est de effectibus prædestinationis, & gratiæ creatæ beneficiisque, quæ propter Christum Deus nobis confert, nunc dicendum est de prædestinatione ipsa, & electione, quam aliqui (nec immerito) *gratiam increatam* vocant, eo quod non solum consistat in beneficio aliquo creato nobis collato, sed in ipsismet actibus increatis intellectus divini & voluntatis, prout ad electos & prædestinatos libere terminantur.

**Prima sententia.** Medina hic q. 19. dub. ult. Hinc modernus quidam Theologus hanc quæstionem attingens, non solum falsum, sed & improbabile, minimeque tutum aut securum existimat esse, dicere hanc

gratiam divinæ electionis aut prædestinationis, in hac proprietate sumptam, posse cadere sub meritum, quia alias dari posset causa actus divinæ voluntatis ex parte ejus, quod est impossibile, cum actus ille increatus sit, ut recte notavit D. Th. 1. p. q. 19. a. 5. & q. 24. a. 4. qui hac ratione docet, ex parte divini actus prædestinationem Christi non esse causam nostræ prædestinationis, tum quia eodem actu prædestinamur nos, quo fuit Christus prædestinatus, tum etiam, quia actus divini non potest dari causa.

Veruntamen, quod ad quæstionem de possibili spectat, nemini dubium esse potest, quin divina benevolentia & voluntas libera, quoad liberam determinationem ad aliquod objectum creatum possit cadere sub meritum; & hoc supponunt omnes authores, qui admittunt causam aliquam vel rationem electionis divinæ in prædestinatis; & qui hanc negant de facto, nunquam in eo fundant suam sententiam, quod sit impossibile meritum electionis, sed aliis rationibus utuntur. Præterea omnes Theologi docent, & videtur per se notum, posse dari ex parte objecti creati rationem aliquam per se motivam alicujus decreti liberi divinæ voluntatis. Idque expresse docet D. Th. 1. cont. Gent. c. 86. & 87. ubi idem sentit, & declarat tenetque idem Greg. in 1. dist. 40. art. 2. Durand. dist. 41. q. 2. Gab. q. unic. in init. Gaspar. Cassal. lib. 1. de quadri. pari. just. c. 4. & moderni scriptores in 1. p. D. Th. q. 19. a. 5. & q. 23. a. 5. Et ratio est, quia, licet decretum liberum voluntatis nihil addat reale ipsi actui necessario ejusdem divinæ voluntatis, juxta veriorum sententiam, nihilominus per illud vere Deus vult libere tale objectum creatum; & ut id velit, licet prima ratio sit bonitas ejus, ex parte tamen objecti potest interdum considerare propriam aliquam rationem, ob quam id velit: hoc enim imperfectionem nullam involvit, nec dependentiam aut causalitatem veram alicujus rei, quæ in Deo sit; & alioqui est necessarium, ut aliqua conditio vel actio creaturæ possit esse ratio vera alterius effectus divini, non solum per modum finis, cujus gratia aliquid fit, sed etiam per modum meriti, aut alterius principii ex se postulantis talem effectum. Quod in effectibus divinæ providentiæ frequenter inveniri certissimum est: sic enim Deus dicitur quandam rationem justitiæ servare in connaturalibus rerum proprietatibus conferendis, ac distribuendis: sol etenim, quem in tali natura Deus condere decrevit, quasi jure suo postulat a Deo lucem, ignis calorem, calor concursum ad calefaciendum, lux ad illuminandum, &c. In rebus item & actionibus moralibus id clarius conspicitur: peccatum enim ab homine commissum, exigit a Deo, postulatque vindictam; bonum autem opus postulat premium. Dices, his rationibus solum ostendi, inter ipsas res creatas unam esse radicem, aut rationem alterius. Respondetur, non hoc solum probari, sed etiam respectu voluntatis divinæ habere quandam rationem motivi inclinantis, allicientis illam ad volendum hoc vel illud. Quod patet primo ex modo loquendi Scripturæ, Joan. enim 10. ait Christus, *Propter me diligit Pater, quia ego pono animam meam*, Chrysost. Euthym. & alii expositores advertunt, licet, in Christo sint plures aliæ rationes, propter quas a Patre diligitur, propter hanc tamen rationem maxime diligi, quod sponte sua mortem appetit, ut Patri obediret. Huc etiam spectant illa Christi verba, *Qui diligit me, diligitur a Patre nemo*, & illa, *Si quis diligit me, sermonem meum servabit, & Pater meus diligit eum, & ad eum veniemus*, &c. hæc enim & similia non solum concomitantiam significant, sed etiam rationem divinæ dilectionis erga nos.

Secundo idem declaratur, quia Deus interdum confert creaturæ suam dilectionem ac benevolentiam ex solo suo beneplacito ac liberalitate; & tunc non datur ratio dilectionis ex parte creaturæ: interdum vero confert Deus hanc dilectionem aut benevolentiam per modum cujusdam justæ distributionis, ut in naturalibus aliter vult ornare cælos, quam terram, quia vult servare unicuique naturæ id, quod ei est aliquo modo debitum; & in moralibus, pro ratione melioris dispositionis, vel majoris meriti, majorem gratiam confert, atque adeo magis amat amicitia amore, igitur aliqua voluntas vel amor Dei habet rationem aliquam ex parte creaturæ, ob quam ipsa divina dilectio tali modo ad talem creaturam terminatur. Probatur hæc ultima consequentia, quia voluntas

Fors de prædicta sententia iudicium.

Obiectiva causa alicujus decreti liberi voluntatis divinæ esse potest creatura.

In natura libus patet.

In moralibus etiam & ab authoritate.



tas iusta eo modo, quo iustitiæ rationem habet, respicit ius alterius, & rationem ac motivum, in quo fundatur, nec potest in alio distingui voluntas mere liberalis a voluntate iusta.

Tertio idem probatur ex effectibus divinæ voluntatis, & principio eorum: nam homo meretur a Deo maiorem gratiam, vel alia similia dona: ergo meretur, ut Deus velit conferre ei talem gratiam. Patet consequentia, quia Deus non confert hoc donum nisi volens, & eo modo, quo vult, confert: ergo non potest quis mereri effectum ipsum, nisi mereatur, ut Deus velit illum donare, seu efficere: nam, si meretur effectum, merebitur etiam illius effectiorem: ergo & actum ad talem effectiorem terminatum, seu quod actus voluntatis ad talem effectiorem terminetur. Sicut inter homines, si ergo mereor, ut Rex conferat tale beneficium, certe mereor, ut velit conferre: neque intelligi potest, ut aliquis mereatur aliquod præmium, quin mereatur quidquid ad illud necessarium est, quando id non præsupponitur, ut superius etiam attigi disput. 4. sect. 4. Et in merito poenæ id clarius perspicitur, quando enim quis per peccata sua meretur æternam poenam, non solum meretur poenam ipsam, sed etiam ut Deus velit illam conferre, quia Deus ex se neminem vult perire, sed solum ob hominis demeritum, juxta illud, *Deus non vult mortem peccatoris*, seu *Deus mortem non fecit*. Unde Damasc. lib. 2. cap. 29. & 30. recte distinguit, quædam Deum velle ex se solo, quædam vero ex nobis, seu nostris actibus & meritis inclinatum. Non est ergo dubium, quin possit dari meritum divinæ voluntatis, ut libere terminatæ ad creaturam: nam meritum non est causa propria ac physica, sed tantum ratio motiva, quæ cognita a Deo, illum movet metaphorice, seu inclinatur ad hoc vel illud volendum. Neque D. Th. in hoc sensu negat, dari causam divinæ electionis ex parte actus divini, sed loquitur in primis de causa proprie & in rigore sumpta, quo sensu impossibile est dari causam divinæ voluntatis, aut actus ejus qui secundum se omnino increatus est, & improductus: ut vero libere terminatur ad objectum creatum, nihil reale additur ei, quod propriam causam habere possit, sed eminenti ac mirabili modo sine ulla additione, vel mutatione reali, atque adeo sine ulla vera causalitate, ad hæc vel illa objecta libere terminatur. Deinde loquitur de actu divino secundum se, & ab eo excludit illam causalitatem, quæ in nobis esse solet inter ipsos actus voluntatis, quatenus unus ab alio oritur, ut electio ab intentione: & sic negat D. Th. Deum velle unum, quia vult aliud, quia hæc locutio in rigore indicat causalitatem inter ipsos actus: non tamen negat D. Th. quin actus divinæ voluntatis, ut libere terminatæ ad creaturas, possit dari aliqua ratio, interdum ex parte ipsius Dei, interdum vero ex parte creaturæ: & in dicto lib. 3. contra gentes, utrumque satis aperte docet, nam cap. 86. concedit dari rationem, cap. vero 87. & 88. negat dari causam voluntatis divinæ: una vero ex rationibus divinæ voluntatis potest esse meritum, ut satis declaratum est, & per se videtur notum, quia non est major repugnantia in hac ratione, quam in cæteris. Et hinc etiam fit, ut, licet secundum rem non possit unus actus divinæ voluntatis esse alterius causa, secundum rationem tamen, sicut unum attributum est ratio alterius, v. g. intellectus voluntatis, & immaterialitas immortalitatis, ita actus voluntatis divinæ, ut terminatus ad unum objectum, est ratio cur terminetur ad aliud.

Hac ergo veritate supposita de possibili, superest quæstio præcipue a nobis intenta, an de facto Christus nobis meruerit electionem & prædestinationem, id est, an Deus in æternitate sua nos elegerit intuens ad merita Christi futura, jam provisa & præcognita. In qua re duæ sunt sententiæ: prior negat meruisse Christum nobis æternam electionem, aut prædestinationem. Ita tenet expresse Sonnius lib. 3. de demonstratione religionis Christianæ, tract. 3. cap. 19. & Adamus exponens id ad Ephesios 1. *Elegit nos in ipso, &c.* Eandem sententiam doceant necesse est, qui negant, meruisse nobis Christum omnes dispositiones remotas ad gratiam justificantem: nam inde fit, non meruisse nobis omnes effectus prædestinationis nostræ, & consequenter nec prædestinationem ipsam, nec electionem: quæ (ut supponimus) anterior est secundum rationem, & radix totius prædestinationis, omniumque effectuum ejus. Prædestinatio autem, ut minimum,

includit rationem omnium mediorum particularium, seu propriorum, per quæ electus infallibiliter producit ad regnum cælorum: ideoque nemo potest mereri totam prædestinationem, nisi hos omnes effectus, seu media mereatur: & quia nos non meremur hæc omnia beneficia, ideo neque nostram prædestinationem meremur: idem ergo necesse est de Christo sentiant, qui ipsum hæc omnia bona nobis meruisse negant. Rursus, qui putant hominum electionem secundum rationem antecessisse præscientiam originalis peccati, Christi vero prædestinationem posteriorem fuisse, necesse est, doceant, hominum electionem non fuisse intuitu meritorum Christi, sed ex sola voluntate divina, quia in eo signo, in quo ponunt, Deum elegisse prædestinatos, nondum intelligunt, ut habentem in sua præscientia merita Christi præsentia. Atque ita sentit Capreol. in 3. dist. 1. q. unica, art. 3. ad 2. & 3. Scoti cont. 1. conclu. qui indifferenter loquitur de electione & prædestinatione nostra, potissimum tamen videtur intelligendus de electione, nam prædestinatio, cum sit ratio mediorum, non potuit ante prævisum originale peccatum compleri, licet inchoari potuerit, ut more nostro loquamur. Denique hanc sententiam tenet Scotus in 3. dist. 19. q. unica, ad quoddam argumen. ante solut. princip. argumentorum. Et fundari in eo videtur, quod electio prædestinatorum simul cum Christi prædestinatione antecessit originale peccatum: Christus autem non est ordinatus ad merendum nobis, donec lapsus primi hominis prævisus est.

Secunda sententia absolute docet, Christum meruisse nobis prædestinationem & electionem ad gloriam. Hanc opinionem tenent ex modernis authoribus Catherin. opus. de exim. Christi præd. Vega lib. 4. in Trid. c. 5. Albert. Pighius lib. 8. de liber. arbit. c. 1. 2. & 3. & lib. 10. c. 1. Ex antiquis vero scholasticis citantur pro hac sententia D. Th. infra q. 24. art. 4. & in 3. dist. 10. q. 3. & super ad Ephesios 1. lect. 5. Alen. 3. p. q. 3. memb. 5. Durand. 3. dist. 10. q. 3. sed hi authores obscure loquuntur, & facile possunt in utramque partem induci. Nihilominus hæc sententia his temporibus receptissima est, & majorem habet pietatem, & probabilitatem: ea igitur nobis probanda est, & declaranda. Quia vero confuse tractari solet, eo quod non distinguitur prædestinatio, quatenus includit, vel dicit actum intellectus, ab electione seu dilectione, quam dicit vel supponit in voluntate, quæ duo non eodem modo, & ordine rationis ab omnibus in Deo concipiuntur, & constituuntur: & ideo breviter supponere oportet id, quod in hac re probabilis existimamus: Ante omnem igitur actum ad prædestinationem proprie pertinentem, ordine rationis antecedit scientia divina, tam simplicis intelligentiæ, quam conditionata, quæ novit infinitos mundos quos procreare posset, & infinitos modos, quibus in hoc mundo posset gubernare homines, eisque de mediis ad vitam æternam consequendam providere: & in singulis agnovit, quid omnes homines acturi essent, si cum his vel illis circumstantiis, aut mediis crearentur, vel gubernarentur. De hac igitur præscientia non potest quæstio præsens intelligi, quia hæc non potest cadere sub meritum, tum quia, supposita veritate objecti, necessaria est in Deo, tum quia ex vi illius, Deus nullum bonum confert creaturæ, nec videt aliquid, ut absolute futurum, meritum autem & necesse est, ut vel jam sit, vel saltem futurum præsciatur, & illi respondet beneficium aliquod, quod Deus confert ratione talis meriti.

Post hanc scientiam subsequitur decretum aliquod divinæ voluntatis, quo hujus mundi creationem præ aliis elegit, vel quo voluit homines ad supernaturalem beatitudinem ordinare sufficienter, aut efficaciter, per hæc vel illa media. Et in hoc actu censetur ab aliquibus consummata prædestinatio: alii vero cum D. Th. existimant post hanc voluntatem subsequi, secundum rationem in divino intellectu imperium efficax, vel iudicium practicum, præcipientis & dictans absolute de agendis, & ordinans totam seriem mediorum, quibus prædestinatus perducitur ad regnum, in qua intellectus ordinatione seu ratione prædestinationem constituunt. Dicendum ergo est primo de his, quæ in voluntate præcedunt, deinde de his, quæ in intellectu subsequuntur.

Distinguant aliqui in voluntate divina duplices actus circa hominum salutem: quodam dicunt esse generales, ut



ut est voluntas ordinandi omnes homines per sufficientia media ad supernaturalem beatitudinem, quæ voluntas ordine rationis intelligitur esse prima erga homines, & antecedere præscientiam originalis peccati. Alia item est voluntas generalis, quæ subsecuta est præscientiam originalis peccati, qua Deus voluit omnes homines lapsos reparare, & quantum in ipso est, salvos facere, juxta illud 2. ad Timotheum, *Deus vult omnes homines salvos fieri*, quod ad utramque voluntatem referri potest. Alios actus dicunt esse speciales, & particulares, ut est electio, & dilectio efficax Petri, v. g. vel Pauli, qua Deus ante omnia ejus merita prævisa, ex sola sua liberali voluntate illum eligit, & efficaciter definit, ut salvetur. In prioribus ergo voluntatibus generalibus dicunt, non habuisse Deum respectum ullum ad merita Christi prævisa, in particulari autem uniuscujusque electione habuisse, atque ita propter Christi merita omnes prædestinatos elegisse. De hac posteriori parte dicemus postea. Prioris autem fundamentum est, quia voluntas illa generalis dirigendi homines per sufficientia media ad vitam æternam, non supponit præscita Christi merita futura: ergo non potuit haberi intuitu illorum, seu propter illa. Consequentia est evidens, quia causa meritoria, ut sæpe in superioribus dictum est, supponi debet, vel re ipsa, vel saltem in præscientia præmiantis. Antecedens autem duplici ratione declaratur. Prima est, quia Deus in primo illo signo rationis, in quo voluit Universum perfectum condere, & in quo voluit Christum ut caput, & cætera ut membra, vel ut res, quæ illi deservirent, in illo (inquam) eodem signo voluit homines procreare propter supernaturalem beatitudinem assequendam, & ita in illo etiam habuit illam voluntatem generalem: sed in illo signo nondum intelligitur habere præscientiam meritorum Christi: ergo illa voluntas esse non potuit ex meritis Christi. Confirmatur & declaratur ex differentia inter causam finalem, vel exemplarem respectu causæ meritoria, nam finis non est necesse ut supponatur existens, neque in re, neque in præscientia causæ operantis seu volentis, sed satis est, quod præcognoscatur possibilis, ut aliquid possit in illum ordinari, vel ut ipse possit intendi per talia media, vel sufficienter, vel efficaciter uno actu perfecto. & idem est in causa exemplari, quæ in hac conditione finem imitatur. At vero causa meritoria, quæ in hoc similior est efficienti, supponi debet existens, vel in se, vel saltem in præscientia ejus, qui ex præscientia meriti inclinatur ad aliquid volendum & ideo Deus, licet uno actu voluerit Christum & alios homines, vel angelos ad esse, vel ad gloriam ordinare, potuit nihilominus intendere Christum ad finem vel exemplar aliorum, non tamen potuit ex merito Christi illam generalem voluntatem erga homines habere. Secunda ratio est, quia meritum Christi respectu hominum supponit voluntatem illam generalem ordinandi homines ad gloriam per sufficientes causas, quarum una fuit meritum Christi. Atque ideo Christus nobis meruit, quia Deus voluit, ut nobis mereretur: non ergo potuit Deus hoc velle propter meritum ejusdem Christi, cum omne meritum talem voluntatem supponat, præsertim cum supra disp. 39. ostensum sit, omne meritum proprium de justitia coram Deo, supponere ordinationem divinam circa tale meritum: sed Deus voluit Christum nobis mereri, quia voluit, quantum in se est, nobis gloriam conferre, nam illud meritum comparatur ad hanc gloriam, sicut medium ad finem: nullo ergo modo potuit illa generalis Dei voluntas in hoc merito fundari, sicut prima voluntas finis non potest fundari in medio, & hoc etiam est differentia inter finem & exemplar, respectu causæ meritoria. Nam, ut Christus sit finis gloriæ aliorum hominum, non prærequirit aliam ordinationem divinam, sed illomet actu, quo voluit Deus ordinare homines ad gloriam, id ordinavit etiam ad honorem Christi, & e contrario, volendo Christum, voluit eum ut finem & caput aliorum hominum. Similiter, ut Christus sit exemplar, non supponitur alia ordinatione, sed ex vi suæ intrinsecæ perfectionis, quam habet per gratiam unionis, & alias, quæ hanc consequuntur, natus est esse exemplar gloriæ aliorum, & ita hæc omnia habet ex vi suæ primariæ prædestinationis. At vero, quod sit causa meritoria de facto, habet ex speciali ordinatione divina, quæ necessario est posterior, quam generalis ordinatione hominum ad gloriam, ut

ostensum est, & ideo licet hæc generalis voluntas seu ordinatione potuerit respicere Christum ut finem, & exemplar gloriæ hominum, non tamen potuit in ipso, ut in causa meritoria, fundari. Itaque Christus sub ratione merentis hominibus habet rationem medii ad gloriam hominum, & ideo supponit in Deo aliquam intentionem hujus gloriæ, saltem per voluntatem illam generalem, & ideo fieri non potest, ut talis intentio seu voluntas in eodem Christi merito fundetur, nec quod supponat illud ut absolute futurum & præscitum.

Dices. Quamvis hæc rationes recte procedant de priori voluntate generali ordinandi homines ad æternam gloriam, tamen de posteriori voluntate reparandi hominem lapsum non ita procedere per se constat, quia hæc voluntas jam supponit ordinationem meritorum Christi Domini, & præscientiam eorum, præsertim juxta nostram sententiam, quod Christus fuerit primus omnium, & ante prævisum originale peccatum prædestinatus, & quod ex merito ejus prævisio fuerit data gratia hominibus in statu innocentia: jam ergo intelligitur sufficienter præscita merita Christi respectu hominum ut propter illa potuerit Deus velle homines reparare per eundem Christum. Respondent auctores prædictæ sententiæ, verum quidem esse rationem factam præcise sumptam, non habere eandem vim de hac posteriori voluntate: nihilominus, servata proportionem, esse applicandum: quia ante prævisum originale peccatum solum fuit Christus ordinatus ad merendum hominibus ea media gratia, & supernaturalis providentia, quæ statui innocentia fuissent consentanea, non vero ut esset universalis medicina peccati totius naturæ, nam circa hoc nihil intelligitur voluisse Deum statuere ante prævisum originale peccatum. Hac ergo ratione posterior voluntas, quam Deus habuit redimendi hominem, non potuit in merito Christi ut prævisio fundari, sed Deus sua voluntate ordinavit ut Christus veniret in carne passibili ad redimendos homines. Quod autem hoc ita sit, non potest evidenter probari, quia pendet ex libera voluntate Dei, qui variis modis potuit hæc omnia intendere, & providere: est autem consentaneum divinæ Scripturæ, ex qua divina voluntas nobis innotescit. Nam divina Scriptura soli misericordiae, ac dilectioni, & liberalitati Dei tribuit hoc decretum redimendi homines, non vero justitiæ Christi, ut Joan. 3. *Sic Deus dilexit mundum, & cæ.* Ad Ephes. 2. *Deus autem, qui dives est in misericordia, propter nimiam charitatem suam, qua dilexit nos, cum essemus mortui peccato, convivificavit nos Christo.* Rom. 5. *Commendat autem charitatem suam Deus, quia, cum adhuc peccatores essemus, & cæ.* Quem locum tractans Augustinus, tractatione 110. in Joannem dicit, *Non ita Christus nos Patri reconciliavit, ut inciperet amare, quos oderat, sicut reconciliatur inimicus inimico, ut deinde sint amici, & invicem diligant, qui oderant invicem. Sed jam nos diligenti reconciliati sumus ei, cum quo propter peccatum inimicitias habebamus.* Igitur ex sententia Augustini prius intelligitur Deus dilexisse nos, quam Christum nos ei reconciliaverit; illa autem dilectio non est alia, nisi qua nos lapsos in culpam gratis voluit reparare: in qua re humana natura majorem gratiam a Deo recipit, quam angelica, ut in fine illius tractatus idem Augustinus declarat, docens, non posse id nisi divinæ gratiæ, ac liberalitatis attribui. Et confirmari tandem potest, quia vel Christus prædestinatus fuit primo in remedium peccati, & post illud in Adamo prævisum vel per se fuit primario volitus ac prædestinatus: si primum dicatur, manifeste concluditur, sicut Christus non fuit causa suæ prædestinationis, ita nec illius voluntatis, qua destinatus est ad nos redimendum: ergo neque illius, qua Deus voluit generatim nos redimere, hæc enim aut antecedit illam, aut in ea includitur, seu non est alia, quam illa. Deus enim, qui simul ac perfecte vult finem & medium, volendo nos redimere, voluit per Christum redimere. Si vero dicamus, Christum absolute & per se fuisse prius prædestinatum, saltem fatendum nobis est, ad officium Redemptoris, & ad sumendam carnem passibilem, non esse destinatum nisi occasione peccati, & illo prævisio, quam secundariam (ut ita dicam) prædestinationem seu ordinationem Christus sibi non meruit, non enim sibi meruit ut haberet corpus passibile, sed ex divina tantum ordi-



ordinatione id habuit, ut illis verbis colligitur, *Corpus autem adaptasti mihi*, ad Hebræos 10. Psalmo 39. Unde ipse Christus Dominus nunquam suis meritis, sed beneplacito Patris, ordinationem mortis suæ attribuit: tota ergo hæc mirabilis providentia, quam Deus habuit in hominum redemptione, quoad primam suam originem, primumque decretum divinæ voluntatis, a quo tota processit, non habuit ortum ex Christi voluntate aut merito, sed solum ex voluntate divina.

Hæc sententia sic exposita, est satis probabilis, mihi-que aliquando placuit, & vera visa est. Nunc vero nonnullæ difficultates circa illam occurrunt. Prima est, quia in toto hoc discursu supponi videtur, habere Deum has voluntates universales, & quasi abstractas & confusas ex parte objecti: quod tamen falsum esse videtur. Quia Deus, sicut distinctissime omnia cognoscit, ita & vult: unde, sicut non cognovit ea, quæ communia sunt omnibus hominibus, aliquo communi & confuso conceptu, sicut nos, sed intuendo distincte omnia singularia, & quid in unoquoque est simile alteri: quia omnis alius cognitionis modus includit imperfectionem Deo repugnantem. Item non vult ea, quæ sunt communia omnibus hominibus, nisi volendo simul singulis hominibus tale bonum, vel volendo aliquam causam individuum & particularem in suo esse, universalem vero in sua virtute, & utilitate, volendo (inquam) illam, ut universalem in causando, & ut beneficiat omnibus: hic enim modus volendi est sufficiens, & perfectus, alius vero, & necessarius non est, & imperfectionem involvit. Quod autem in discursu facto id quod dixi de voluntate confusa & universali supponatur, satis constat ex ipsiusmet sententiæ expositione, quia alioqui non oporteret distinguere inter generalem illam voluntatem, & particularem, quas Deus habet circa singulorum hominum salutem, imo nec satis intelligi posset talis distinctio: in quo enim distinguuntur duæ illæ voluntates, si utraque circa singularia ista distincte versatur? supponit ergo necessario illa sententia, priores illas voluntates versari circa homines in communi, seu circa naturam humanam universè sumptam. Deinde declaratur in hunc modum, nam circa Petrum, v. g. quem suppono esse prædestinatum, Deus habuit efficacem voluntatem, qua illum ad gloriam elegit: aut ergo habuit circa eundem aliam priorem voluntatem, qua voluit illum ad gloriam ordinare, vel nullam aliam habuit. Si hoc secundum dicatur, sequitur, non habuisse Deum illam generalem voluntatem circa omnes homines, & consequenter sequitur, circa nullum hominem habuisse talem voluntatem generalem, sed solum circa singulos habuisse voluntatem efficacem, vel antecedentem seu inefficacem de uniuscuiusque statu & salute. Si vero dicatur primum, primo id superfluum est, quia in voluntate efficaci includitur sufficiens: quid ergo necesse est actus multiplicare secundum rationem distinctos, & unum fingere priorem alio? Et deinde illa prior voluntas necessario debet intelligi, non ut particularis ex parte objecti, scilicet, Petri prædestinati, sed ut generalis erga homines, in quibus Petrus continetur: est ergo talis voluntas uniformis respectu omnium, & ex se indifferens, & æqualis ad omnes, & consequenter quasi confusa & universalis ex parte objecti, quod videtur impertinens, & alienum a divina perfectione. Tandem confirmatur, quia alias, etiam circa electos, intelligendum esset, prius Deum in communi & uniformiter elegisse efficaciter tot homines ad gloriam, deinde hunc in particulari elegisse ad talem gradum & dignitatem gratiæ & gloriæ, illum vero ad alium, & sic de singulis: quod si hoc est vanum & superfluum, ut fere est, idem erit dicendum de omnibus hominibus. Atque ita fit, Deum nullum generalem actum habuisse circa homines in communi, sed circa omnes & singulos sibi propositos distinctissime per suam infinitam cognitionem, habuisse tale decretum voluntatis dandi gloriam, quale ei placuit, & hoc modo voluisse omnes salvare, vel redimere, non per actum universalem, seu confusum ex parte objecti, sed per actum distincte cadentem in singulos, non uniformiter, & eodem modo, sed juxta liberam distributionem divinæ voluntatis. Quia vero actus ille, prout ad hunc vel illum hominem terminatur, ratione a nobis distinguitur in plures, qui inter se conveniunt in ratione voluntatis dandi gloriam, ideo de illa voluntate loquimur tanquam de uno actu terminato

ad objectum universale, & abstractum, & ab illo actu intelliguntur profecta media generalia, ad omnium hominum salutem ordinata, cum tamen in re non sit nisi Dei voluntas ut libere terminata ad singulorum hominum salutem juxta beneplacitum suum.

Quod si hoc verum esse convincitur, hinc ulterius sequitur secunda difficultas circa prædictam sententiam, nimirum, aut fundamenta, quibus nititur, inefficacia esse, aut probare, Christum non meruisse prædestinatis efficacem electionem ad gloriam, quod nec ab illa sententia admittitur, nec verum est, ut ostendemus. Sequela probatur primo, quia Deus non habuit circa electos, duos actus volendi eos ordinare ad gloriam, sed simul unio actu, & unica simplicissima terminatione libera voluit efficaciter & hunc & illum salvare, in tali gradu, & perfectione: ergo, si Christus non meruit primam ordinationem talium hominum ad beatitudinem, neque etiam eorum electionem meruit. Rursus in eodem signo, in quo Deus elegit hunc, & illum prædestinatum, voluit antecedenter, seu ordinavit sufficienter singulos reprobos ad gloriam, & per hunc modum generaliter voluit omnes homines salvare: ergo si hæc voluntas generalis, seu potius generatim a nobis concepta, & declarata, non fuit ex meritis Christi, ergo nec illa voluntas, qua sufficienter ordinavit singulos reprobos ad gloriam, fuit ex meritis Christi, nam est idem omnino actus, & in eodem signo: ergo pari ratione non meruit prædestinatis electionem, seu ordinationem efficacem ad gloriam, nam simul & in eodem signo rationis intelligitur ille actus, ut terminatus ad singula objecta, seu ad singulas personas, juxta beneplacitum Dei. Unde tandem argumentor a paritate rationis, nam tota ratio, ob quam negatur Christum meruisse nobis ordinationem ad gloriam, vel ad redemptionem, est, quia merita Christi non supponuntur prævisa, eo quod ordinatio Christi ad merendum hominibus præcedat visionem meritorum ejus, & ante illam ordinationem Christi ad meritum, præcedat ordinatio hominum ad gloriam, sed hæc ratio, si est efficax, æque procedit de efficaci electione prædestinatorum: ergo. Probatur minor, quia prædestinati simul eodemque actu cum Christo sunt efficaciter dilecti, & ad gloriam electi, & in eodem signo reprobi sunt sufficienter ad gloriam ordinati, per actum, quo vere Deus voluit simplici seu antecedente voluntate eis dare gloriam, quantum in ipso esset, neque alio modo sunt omnes homines ordinati ad gloriam, quam per hujusmodi actus: sed in eo signo nondum erant prævisa merita Christi, nec Christus ipse intelligitur ordinatus ad merendum hominibus, imo hæc ordinatio non intelligitur profecta ex alia voluntate salvandi homines, nisi ex illa, quæ respectu horum est electio efficax, respectu vero aliorum simplex affectus: ergo, si propter dictam causam Christum non meruit generalem ordinationem hominum ad gloriam, nec etiam electionem prædestinatorum mereri potuit.

Propter has ergo difficultates videtur certe, non oportere in præsentī quæstione distinguere secundum rationem in divina voluntate hos actus generales a particularibus, quia illi actus, prout a nobis universaliter concipiuntur & significantur, non sunt formaliter in Deo, sed virtualiter, prout in ipsis particularibus includuntur, vel in mediis universalibus, quæ Deus voluit propter salutem omnium hominum: unde fit, eatenus posse assignari rationem horum actuum universalium ex parte meriti Christi, quatenus potest assignari particularium omnium, ut ad singulorum hominum salutem terminantur. Sicut enim Aristoteles dixit, medicum non curare hominem, nisi in quantum curat Calliam, vel Socratem, ita nos dicere possumus, Christum non mereri homini, nisi in quantum meretur Petro, Paulo, &c. & Deum non velle salvare humanum genus, nisi in quantum vult salvare Adamum, & Evam, & hos particulares homines, qui de facto sunt ab eis propagandi: quapropter ratio motiva per modum meriti ad volendam hominum salutem, eadem necessario esse debet, quæ movit Deum ad hujus & illius salutem volendam: tota ergo quæstio revocatur ad particularem voluntatem, prout est electio hujus vel illius, vel simplex affectus, seu conditionata voluntas, respectu aliorum. Videntur autem rationes factæ simul conjunctæ probare, non potuisse meritum Christi prævisum esse rationem talis voluntatis, etiam ut ad homines



in particulari terminatur, quia ex una parte priores rationes recte videntur procedere de voluntate Dei universe concepta & significata, ex alia vero parte ostensum est, illam voluntatem non exerceri in re, nisi circa particularia, & non uno modo circa omnia, sed pro divino beneplacito: concludunt ergo illæ rationes, non potuisse Christi meritum esse rationem electionis hominum.

In hac re dicendum est primo. Illa singularis benevolentia, & dilectio, qua Deus ante prævisa hominum merita prædestinatos elegit ad gloriam, ut est electio horum præ illis, non est ex meritis Christi, sed ex libertate divinæ voluntatis. Probatur ex Paul. ad Eph. 1. *Elegit nos in ipso ante mundi constitutionem*, & infra subdit, *Secundum propositum voluntatis sue*, ubi electionem illam in solum consilium voluntatis divinæ refert: quia licet Deus electionem illam fecerit in Christo, quatenus eos, quos elegit, ad gloriam Christi ordinavit, vel fortasse etiam, quia propter merita Christi illos dilexit, tamen quod per eam voluntatem hi potius, quam illi fuerint electi, non fuit Christi meritum, sed consilium divinæ voluntatis. Ex eodem sensu infra iterum subdit: *In quo etiam nos forte vocati sumus, prædestinati secundum propositum ejus, qui operatur omnia secundum consilium voluntatis sue*. Ut enim significaret Paul. non fuisse hanc electionem ex ulius meritis, nomine fortis usus est. Propter hoc etiam Christus Joan. 17. orans pro electis, & prædestinatis, eos appellat datos sibi a Patre, scilicet per æternam electionem, ut exponit Adrian. Papa in epist. 1. ad Episcopos Hispaniæ, & indicant August. tract. 106. in Joan. & Chrysost. homil. 80. in Joan. cui consonat illud Isai. 8. *Ecce ego & pueri, quos dedisti mihi*, quod in persona Christi dictum esse exponit Paul. ad Heb. 2. & hoc modo commode intelligitur illud verbum Christi Matth. 20. *Sedere autem ad dexteram meam, vel sinistram non est meum dare vobis, sed quibus paratum est a Patre meo*. Ratione probatur conclusio, quia Deus ab æterno elegit hos præ illis: si ergo hanc electionem & comparisonem fecit propter Christi merita, oportebit intelligere prævidisse Deum Christum per humanam voluntatem dilecturum fuisse hos potius quam illos, & efficacius oblaturum sua merita pro his, quam pro illis, & ideo elegisse hos, potius quam illos: nam si in meritis & voluntate Christi non prævidebat aliquam differentiam, seu personarum electionem, non potest intelligi quomodo propter Christi merita prævisa, voluntas Dei fuerit magis determinata ad hos eligendos, potius quam illos: sed ille ordo, seu modus electionis, neque est verus, nec conveniens, nec satis intelligi potest saltem circa omnes electos. Primum patet, quia non debuit voluntas divinæ humanæ conformari, sed potius humana divina, non ergo ideo Deus elegit hos potius quam illos, quia Christus ut homo ita erat electurus, sed potius ideo Christus efficacius obtulit sua merita pro his, quam pro illis, quia cognovit Patrem suum ita eos elegisse, ut ex omnibus, quæ in sect. 2. adducta sunt comprobari potest, præsertim ex toto c. 17. Joan. & illo dicto Hieronym. exponentis verba Isai. 35. *Voluntas Domini in manu ejus dirigetur*, scilicet, quia quidquid Pater disposuit, Christi virtutibus impletur. Et in hujus etiam confirmationem divinæ providentiæ nimirum electionem hominum, primo esse definitum per voluntatem humanam, & non per divinam, præsertim cum Paulus hoc reputet esse unum ex altissimis mysteriis sapientiæ, & scientiæ Dei. Tertium etiam facile constat, quia saltem circa homines, qui Christi incarnationem præceperunt, non videtur posse intelligi ille modus electionis in humana Christi voluntate, sed solum conformitas cum divina electione: quia circa præterita, quæ jam non cadunt sub potestate hominis, non potest proprie cadere electio, qui enim intelligi potest, ut Christus in quantum homo elegerit sibi matrem, ex qua nascetur? Et sic de aliis.

Dico quarto. Pie & probabiliter credi potest, illammet voluntatem, qua Deus prælegit prædestinatos ut

est efficax eorum dilectio, habuisse fundamentum & rationem aliquam in meritis Christi prævisis.

Prior pars declaratur, quia in hac divina electione duo intelliguntur, alterum absolutum & intrinsecum, quod est velle efficaciter beatitudinem huic prædestinato, qui actus ut sic, dicitur proprie dilectio prædestinati: alterum est respectivum, & quasi extrinsecum, nimirum quod alius non eodem modo diligatur, & consequenter, quod hic diligatur præ illo: quod includitur, & connotatur in nomine electionis. Quamquam ergo Christus non meruerit electionem, quantum ad hoc connotatum, quia non meruit desertionem, vel, ut ita dicam, non dilectionem aliorum, neque quod in particulari hic potius diligeretur, quam alius: potuit tamen Christi meritum esse ratio, propter quam Deus absolute dilexit prædestinatos. Quod probari potest ex citatis verbis Pauli ad Ephes. 1. *Elegit nos in ipso ante mundi constitutionem, ut essemus sancti*, ubi aperte loquitur de actu efficaci divinæ voluntatis, quo ante prævisa electorum opera illos elegit, non quia futuri erant sancti, sed ut essent sancti, ut frequenter August. & Hieron. ibi, & cum eo alii expositores ponderarunt. Quod vero loquatur de ipsa dilectione, seu voluntate efficaci dandi gloriam prædestinato, constat ex subjunctis verbis, *Ut essemus sancti & immaculati in conspectu ejus in charitate*, & ideo statim subjungit, *qui prædestinavit nos per Jesum Christum in ipsum*, quam totam expositionem indicavit ibi Ambrosius, & clarius docuerunt Ansel. & D. Th. & August. lib. de Prædestinat. Sanct. c. 17. & 18. & lib. de Correct. & gratia, c. 7. Certum autem est, cum Paulus dicit nos esse electos in Christo, loqui de hac electione quatenus est dilectio, seu quatenus per illam efficaciter ordinatur prædestinatus ad summum bonum obtinendum: nam sub alia ratione comparativa non poterat in Christum referri, ut satis explicatum est. Quid autem significet illa particula, *in ipso*, non satis constat ex dictis Patribus, & expositioribus. Ansel. tamen indicat significare habitudinem causæ finalis, quod est verissimum, quia omnes electi propter honorem & gloriam Christi, secundum Deum electi sunt: unde statim Paulus subdit: *Prædestinavit nos per Jesum Christum in ipsum*, ubi particula, *per*, denotare videtur causam meritoriam, particula vero, *in*, causam finalem. Probabiliter vero exponi potest, particulam, *in ipso*, indicare causam meritoriam, nec sine causa prius dixisse, *in ipsum*, nam hoc posteriori dicendi modo, cum particula, *in*, accusativo adjungitur, recte denotat habitudinem ad finem, adjuncta vero ablativo, magis videtur significare fundamentum, & rationem illius dilectionis, atque adeo causam meritoriam. Unde eodem dicendi modo statim subjungit, *In quo habemus redemptionem*, ubi evidenter significat causam meritoriam, sicut etiam inferius cum dicit, *In quo nos forte vocati sumus*, & infra, *In quo & vos credentes signati estis spiritu promissionis sancto*, quod etiam confirmat illud 2. ad Tim. 1. *Vocavit nos vocatione sua sancta, non secundum opera nostra sed secundum propositum suum & gratiam, quæ data est nobis in Christo Jesu ante tempora secularia*. Ubi dilectionem hanc vocat propositum, & gratiam nobis in Christo ab æterno concessam, ut D. Th. exponit. Facit etiam illud Joan. 17. *Dilexisti eos* (loquitur de prædestinatis) *sicut*, pro quia, *me dilexisti*, ut August. notavit; & sensit Hieron. lib. 2. contra Jovin. dicens. *Ideo nos diligit, quia Filium dilexit Pater*. Denique illa universalis propositio Pauli ad Ephes. 1. *Benedixit nos omni benedictione spirituali in cælestibus in Christo*, etiam dilectionem hanc potest comprehendere, quæ maximum beneficium Dei est, & suprema benedictio, & veluti aliarum omnium fons, & origo: unde Chrysost. hom. 1. super ad Ephes. inquit, *Per quem nos benedixit, per eundem nos elegit*. In quibus verbis indicat expositionem superius datam illius particulæ *in Christo*, ut æquivalet illi, *per Christum*, seu, *propter meritum Christi*, & ita etiam legit & exponit Oecumenius, & Theophylactus. Est frequens phrasis Scripturæ, ut Treno. 4. *Capus est in peccatis nostris*, id est, propter peccata nostra. Ratio vero solum est, quia, considerato valore meritorum Christi, sufficientissimus fuit ad hæc omnia nobis promerenda, considerato vero ordine divinæ præscientiæ & voluntatis, facile etiam intelligi potest, præscientiam meritorum Christi antecessisse hanc electionem prædestinatorum, ut statim explicabo.

Electio  
æterna  
horum  
præ illis,  
non fuit  
ex Christi  
meritis.

Efficax  
prædesti-  
natorum  
dilectio,  
in Christi  
merita re-  
ferri po-  
test.



caho. Non est ergo cur negetur, hanc dilectionem habuisse fundamentum in meritis Christi, cum hoc ad maiorem Christi gloriam pertineat, & magis ostendat in divina providentia perfectam iustitiam, & misericordie rationem.

Objec. 2.

Sed contra, quia si Deus dilexit hos predestinatos propter meritum Christi, ergo ante illam dilectionem supponitur prævisum illud meritum ut ordinandum, seu offerendum a Christo pro illis electis potius quam pro aliis. Consequens est falsum & contra dicta. Respondetur negando consequentiam, satis est enim quod in illo signo præviderit merita Christi, ut sufficientem rationem diligendi homines. Quod facile potest exemplo declarari; si enim dux aliquis vel miles bene meritis apud regem offerat sua merita, ut alicui ex filiis suis præmium aliquod, vel dignitatem rex conferat: quamvis ipse non designet hunc filium, potius quam illum, sed ex voluntate principis talis electio fiat, nihilominus verissime dicitur, regem voluisse illi benefacere propter merita patris. Et in reprobatione hominum, juxta probabilem sententiam Augustini est evidens exemplum: aliquos enim propter solum originale peccatum voluit Deus excludere a regno, quia illa est sufficiens ratio: quamquam comparatione facta non potuerit esse ratio, propter quam iste reproberetur potius quam alius habens simile originale peccatum.

Respons.

Sed hic occurrunt difficultates omnes in superioribus tactæ. Prima est, quia non potuerunt Christi merita prævideri a Deo prius ratione, quam vellet electorum gloriam efficaci dilectione: ergo non potuerunt illa merita esse ratio motiva ad talem electionem. Antecedens patet, tum quia simul omnino voluit Deus omnes predestinatos cum Christo, in gloriam Christi: unde, sicut merita Christi non potuerunt esse ratio motiva ad volendum ipsum Christum, ita neque ad volendum alios predestinatos. Tum etiam, quia prius ratione, quam Deus præciperet Christi merita, voluit illa, & ordinare illa ad nostrum commodum seu præmium, seque obligare sub conditione talium operum, ad tale præmium illi reddendum in nobis, hæc enim omnia prærequisita sunt ad meritum, ut supra visum est: quæ autem sunt prærequisita ad meritum, supponuntur ad præscientiam meriti futuri, nec possunt sub tale meritum cadere. Rursus hæc eadem voluntas meritorum Christi supponit electionem hominum predestinatorum, quia comparatur ad illam, sicut voluntas mediorum ad voluntatem finis: ergo de primo ad ultimum electio predestinatorum non potuit supponere præscientiam meritorum Christi.

Secunda difficultas est, quia si Christus meruit predestinatis electionem efficacem: ergo meruit reprobis eam dilectionem simplicem seu antecedentem, qua ad gloriam ordinati sunt, ex vi cujus dantur eis sufficientia media ad gloriam consequendam, est enim æqualis ratio: hoc autem falsum est, quia unum ex mediis sufficientibus quæ ratione illius voluntatis Deus confert omnibus hominibus, est ipsum Christi meritum infinitum quoad sufficientiam: non ergo potuit tale meritum esse ratio illius voluntatis. Tertia difficultas est, quia ex his ulterius sequitur, absolute & simpliciter loquendo, Deum ordinasse homines ad gloriam, sive efficaciter sive sufficienter, ob Christi meritum, sequitur subinde, illam Dei voluntatem, qua voluit reparare humanam naturam lapsam, fuisse ex meritis Christi prævisis, quia illa voluntas, vel includitur in priori voluntate conferendi gloriam hominibus, vel certe secundum rationem est posterior illa, & consequenter multo magis cadit sub meritum Christi, quam illa: hæc autem quæ inferuntur, videntur falsa, fatiscque impugnata argumentis contrariæ sententiæ.

Ad has difficultates primum in genere concedo, omne Dei beneficium, omnemque Dei benevolentiam erga homines, cui non repugnet supponi Christi merita; saltem in æternitate prævisa ut futura; fundari in eisdem meritis, seu ista merita ut prævisa fuisse rationem, seu motivum talis beneficii ac benevolentie divinæ. Hoc enim principium est satis consentaneum Paulo ad Eph. 1. ut supra tractatum est, estque valde consonum dignitati Christi, & meritorum ejus. Deinde addo, non repugnare huic merito, quod Deus uno actu indivisibili, & simul sub aliqua consideratione nos & Christum ut hominem elegerit & præordinaverit, illum ad esse Filii Dei naturalis, nos ad gloriam & filiationem adoptivam. Nam ille

actus, etsi in se sit unus & simplex, potest terminari ad unum objectum ratione alterius, & ita prius ratione potest terminari ad unum, quam ad aliud: & hoc satis est, ut possit ad unum terminari ex præscientia alterius, ut per se constat, & supra, q. 1. art. 3. ad 4. D. Th. attigit, & ibi tale tractatum est. Ex hoc ergo capite non repugnat, ut, licet Deus uno simplicissimo actu nos cum Christo elegerit, & simul durationis, vel subsistendi consequentia, quatenus hæc omnia voluit cum aliqua connexionione inter se, ut dicto art. 3. late tractatum est: non repugnat (inquam) ex hoc solo capite, quod Christi merita prævisa, sint ratio illius voluntatis, ut ad electos terminatur.

Solum ergo relinqui videtur difficultas illa de ordine finis & medii, nam cum merita Christi, ut ad nostram gloriam ordinata, sint media, videntur supponere in Deo aliquam intentionem talis finis, cujus ipsa non sint ullo modo ratio aut motivum. Respondent aliqui, licet in nobis voluntas finis sit prior voluntate medii, in Deo autem id non esse necessarium, in nobis enim ideo voluntas finis præcedit, quia post illam volitionem excogitanda sunt nobis media, & facienda electio: in Deo autem non ita est, sed ante omnem voluntatem supponitur præscientia omnium mediorum, simul cum fine, & ideo non est necesse, ut voluntas finis antecedit absolute & simpliciter, sed satis est, ut in genere causæ finalis antecedit, medium autem poterit præcedere in genere causæ meritorie. Sed hoc non recte dictum est, primo, quia, formaliter ac per se loquendo, non ideo voluntas finis antecedit electionem mediorum, quia post illam voluntatem excogitantur media, & inquiruntur, ac ponderantur, & ita paulatim ad electionem proceditur: tum quia, licet hic processus sæpe intercedat, quando illa antecessio est in tempore ac duratione, tamen ad ordinem naturæ & rationis, quem nos inquirimus, non est necessarius: tum etiam, quia interdum potest homo, prius quam eliciat voluntatem finis, habere præmeditata, & optime cognita omnia media possibile, & nihilominus si voliturus est finem & medium, necesse est, ut a fine incipiat, vel ordine naturæ, causalitatis, vel rationis, si simul & uno fortasse actu in utrumque tendit, vel certe ordine durationis, si pro sua libertate velit solum circa alterum, sum actum exercere.

Secundo, quia, loquendo de ordine causalitatis inter res volitas, vel de ordine rationis in ipso actu, hæc enim tantum sunt quæ in divina voluntate possunt considerari, juxta hunc (inquam) ordinem, finis non solum est prior medio, in uno genere causæ, sed simpliciter in omni genere: nec intelligi potest, quod medium ut medium, in aliquo genere prius sit volitum: quia in quocumque signo, & in quovis genere, solum est volitum propter finem, alioqui non est volitum ut medium: ergo, quocumque modo consideretur, necesse est, ut voluntas finis ratione antecedit.

Tertio videtur esse specialis ratio in merito, quia meritum non potest esse in suo genere ratio movens & alliciens voluntatem, si solum ut possibile, vel ut futurum sub conditione, præcognoscatur, sed oportet, ut videatur jam exhibitum, vel saltem præcognoscatur ut absolute futurum; ergo præscientia illa, quæ antecedit omnem liberam Dei voluntatem, non satis est ad rationem meriti, seu causæ meritorie, licet sufficiat ad rationem finis vel exemplaris, quia per illam scientiam non cognoscitur meritum, nisi ut possibile, vel, ad summum, ut futurum sub conditione, alioqui etiam posset proprium hominis meritum sic prævisum, esse ratio suæ electionis, & prædestinationis, quod falsum est. Igitur, antequam meritum moveat in ratione meriti, necesse est ut antecedit aliqua voluntas Dei, qua ordinet tale meritum, & causas, ac principia ejus: hæc igitur voluntas etiam respectu Christi, necessaria fuit, & antecessit simpliciter & in omni genere omnem causalitatem moralem meritorum ejus: sed in illa includitur, vel supponitur voluntas dandi nobis gloriam, ut ostensum est: ergo.

Aliter ergo respondendum videtur, negando, merita Christi tantum esse a Deo volita & ordinata, ut media, per quæ homines consequantur gloriam, ad quam præordinati supponantur: sed potius docendum est, sicut voluit Deus Christum hominem Deum, per sese propter gloriam suam, ita etiam voluisse ejus merita, & valorem operum ejus, propter perfectionem & excellentiam ipsiusmet Christi, ut ex se esset sufficiens causa, etiam in genere



nere morali, seu meriti, cuius intuitu & ratione posset Deus velle supernaturalia dona conferre, quibus aut quomodo vellet, juxta suæ divinæ sapientiæ dispositionem. Itaque in eo primo signo, in quo Deus Christum voluit, non tantum voluit illum, ut aptum ad merendum sed ut actum merendum suo tempore, voluitque, ut ipsius opera essent sufficienter ordinata ad rationem meriti, quantum est ex parte ipsius Dei: unde hoc ipso quod Deus prædestinavit Christum tali modo, talique voluntate, in ea voluntate prævidit futura ejus merita, propter quæ voluit aliis benefacere magis aut minus, juxta beneplacitum suum. Rursus ante hanc voluntatem Dei ut sic terminatam ad Christum, non est necesse intelligere priorem voluntatem terminatam ad gloriam hominum, quia aliud est velle Christum ut medium, aliud velle ipsum ut primam causam in genere meriti: Deus autem hoc posteriori modo voluit Christum in illo primo signo, non priori, & ideo non oportet præintelligere illam aliam priorem voluntatem, quia, licet voluntas mediæ supponat voluntatem finis, tamen voluntas causæ quasi efficientis in suo genere non supponit voluntatem effectus, sed potest illam secum asferre. Sicut etiam in eo signo, in quo voluit Deus Christum, voluit illi communicare potentiam sciendi supernaturalia opera, & miracula, non quia supponeretur in Deo voluntas talium operum, & ideo voluerit communicare Christo illam potentiam ut medium ad illa opera, sed potius, quia per se voluit communicare Christo illam perfectionem, ut esset in omni genere causæ perfectissima, quoad posset, causa: ideo ex ea voluntate consecutum est, ut ea opera essent possibilia, aut aliquando futura. Similiter in eodem signo prædestinavit Christum ut caput, quod haberet influentiam non tamen ut medium, neque ex priori voluntate influendi in alios, sed ut causam præcipuam in eo ordine, ad quam consequuntur tales effectus, idem ergo dicendum cenfeo de ejus merito.

Atque hinc facile est ad singulas difficultates respondere. Ad primam enim negatur assumptum, nimirum, non potuisse merita Christi prævideri ante electionem prædestinatorum. Et ad primam probationem respondetur, licet in quodam genere, seu in subsistendi consequentia, simul fuerint prædestinati omnes electi cum Christo, nihilominus in aliquo genere fuisse Christum aliis præelectum, scilicet, in genere finis & exemplaris, & similiter in genere causæ meritoriae, quia ita voluit Deus simul Christum & alios, ut tamen voluerit Christum, ut rationem volendi alios, & consequenter etiam voluerit prius ratione merita Christi, eorumque prævisionem, quam aliorum electionem, quod respectu dilectionis ipsiusmet Christi locum non habet, quia involvit repugnantiam, quæ non involvitur respectu aliorum. Ad aliam vero probationem jam declaratum est, quomodo voluntas meritorum Christi non supponat electionem hominum.

Dices. Quænam merita Christi potuerunt in illo signo prævideri, cum non potuerint in eo signo prævideri actiones, & passionem, quas habuit in mortali corpore? De hac re sæpe dictum est in superioribus, quidam sentiunt fuisse merita Christi in communi, seu formaliter, non in particulari, seu materialiter, prout per tales actus exercentur. Sed quia non recte attribuitur Deo hic modus confusæ cognitionis, melius dicitur, in eo signo fuisse prævisa merita per actum amoris Dei & proximi, qui non dependet a corpore passibili.

Ad secundam difficultatem eadem responsio adhibenda est, concedendum est enim illatum, quod in ea inferitur, imo ex illo sumitur prædictorum confirmatio. Eadem namque est proportionalis ratio dilectionis efficacis seu beneplacitis electorum, & dilectionis sufficientis seu antecedentis cæterorum: sicut ergo Christus meruit prædestinatis electionem, ita cæteris meruit eum amorem seu simplicem voluntatem, qua Deus, quantum in ipso est, vult eorum salutem. Unde, sicut propter Christum voluit Deus dare electis omnia media certa & efficacia, quibus salvantur, ita cæteris voluit etiam propter Christum dare sufficientia media, quibus salvari possunt. Christi ergo meritum non tam est medium sufficientis ex se ad salutem reprobos, quam causa omnium mediis sufficientium, quæ reprobo tribuuntur: & respectu divinæ voluntatis, est ratio seu motivum inclinans eam,

ad illam voluntatem. Vel potest meritum Christi dupliciter considerari, primo secundum se & absolute, prout est quædam perfectio moralis Christo conveniens, tum ex dignitate sua, tum ex præordinatione divina, ut ex se sit sufficiens ad obtinendum a Deo quodlibet supernaturale bonum gratiæ sanctificantis, & istam Dei benevolentiam impetrandam: & ut sic, negatur esse medium, formaliter loquendo, sed objectum per se amatum, seu coactum ipsi Christo, ut universali ac primæ causæ in genere meriti. Secundo potest Christi meritum considerari, ut peculiari aliquo modo ordinatum, & quasi applicatum ad salutem hominum sufficienter operandum, & ut sic, potest dici medium, tamen, quia hæc ratio supponit priorem, ideo difficultas tacta non procedit.

Ad tertiam difficultatem concedo, omnem divinam voluntatem, qua ordinavit homines in supernaturalem beatitudinem, fuisse in Christi merito fundatam, hæc enim voluntas non est nisi vel electio efficax prædestinatorum, vel voluntas accedens erga cæteros, utraque autem fuit ex Christi meritis, ut ostensum est. Idemque consequenter fatendum est de voluntate reparandi homines lapsos; hæc enim voluntas comparatur ad priorem, ut voluntas cuiusdam particularis mediæ, ad voluntatem finis, & ideo multo magis supponit meritum Christi prævisum, ut rationem & motivum universale benefaciendi, & bene volendi hominibus. Neque contra hoc urgent testimonia adducta in confirmationem alterius sententiæ. Nam testimonia sacre Scripturæ, vel solum probant, voluntatem redimendi genus humanum respectu hominum redimendorum fuisse ex sola misericordia, quod verum est, etiam si respectu Christi aliquam habuerit rationem iustitiæ. Vel probant primam originem huius beneficii fuisse Dei charitatem, qua voluit unigenitum suum dare, ut in natura assumpta esset caput ac princeps rerum omnium, ex hoc enim beneficio cætera omnia manant, quatenus ad supernaturalem ordinem gratiæ aliquo modo spectant. Et hoc posteriori modo potest etiam intelligi testimonium Augustini, quamquam eo loco solum intendit docere, Deum ita odisse in nobis culpam, ut tamen diligat naturam, ideoque eam dilectionem, quam nobis exhibet, cum culpam remittit, supponere aliam priorem, qua nobis dat esse nostramque diligit naturam. Ad rationem vero illius sententiæ dicendum est, nos supponere, Christum esse prædestinatum per se primo, & ante omnes & in omni genere primatum in divina mente ac voluntate habuisse, atque ita sine inconvenienti fieri potuisse, ut ipsamet ordinatio redemptionis nostræ in ejusdem Christi meritis fundamentum habuerit.

Potest autem hoc loco, ut res tota melius explicetur, solvaturque facilius difficultas in illa ultima ratione tacta, applicari distinctio in præcedentibus conclusionibus insinuata. Nam remedium & medicina peccati hominum, dupliciter potest considerari: uno modo in genere & absolute, alio modo in particulari, & secundum eum peculiarem modum quo a Deo ordinatum est, comparando illum ad infinitos alios modos, quibus posset Deus homines redimere. Quamvis igitur meritum Christi prævisum, ex se fuerit sufficiens ratio ad inclinandam divinam voluntatem, ut vellet hominibus remedium ac medicinam peccati tribuere, & ex se fuerit etiam sufficiens medium ad quodlibet remedium, quantumvis perfectum, & excellens obtinendum: tamen, quod, præviso illo Christi merito, Deus hoc remedium præ aliis elegerit, & quod hoc remedium per Christum exhibendum fuerit, per tales Christi passionem, & per illum modum, quem ipse sua mirabili sapientia præfinivit, hoc non fuit ex Christi meritis, sed ex sola divina voluntate, quia non fuit admirabile inventum humano ingenio, aut voluntate Christi humana excogitatum, aut dispositum, sed fuit divinitus inventum, & intuitu meritorum Christi dispositum. Atque hac ratione speciali jure tribuitur misericordiæ divinæ, ac beneplacito Patris, quod Christum nobis dederit, non solum in caput, & principem, sed etiam in Redemptorem: & similiter in illius admirabile consilium, & voluntatem referendum est; quod ordinaverit, ut Christus in corpore passibile veniret, & per passionem homines redimeret, hæc enim non sunt per Christi meritum, aut humanam voluntatem definita, sed per voluntatem Patris, licet non absque intuitu meritorum Christi, ad ostensionem iustitiæ perfectæ, quæ in illis vir-



rute continebatur, juxta illud ad Rom. 3. Quem proposuit Deus propitiatorem per fidem in sanguine ipsius ad ostensionem justitiæ suæ. Recte enim intelligi potest non solum effectum remissionis peccatorum per Christum, sed etiam propositum ipsum dandi nobis talem propitiatorem fuisse ad ostensionem justitiæ, tam, in remedio proposito ac definito, quam in ratione, & motivo proponendi illud: & hætenus de electione.

Christus  
fuit causa  
meritoria  
nostræ  
prædesti-  
nationis.

Ultimo tamen dicendum est, etiam esse Christum causam meritoriam nostræ prædestinationis. Hæc colligitur ex citato loco Paul. ad Ephes. 1. *Prædestinavit nos per Jesum Christum*. Illa enim particula, *per*, causam meritoriam designat, ut declaratum est, & colligitur satis ex Concil. Trident. sess. 6. c. 3. 4. 5. & 6. Loquitur autem Paulus de tota prædestinatione, eo enim modo tribuit prædestinationem meritis Christi, quo tribui non potest meritis ipsius prædestinati: potest autem prædestinatus mereri unum vel alterum effectum prædestinationis suæ. Christo ergo non tribuitur meritum prædestinationis propter unum vel alium effectum, sed propter totam prædestinationem: & ideo addit Paulus hanc prædestinationem factam esse *secundum consilium voluntatis Dei*. Quod proprie de integra prædestinatione dicitur, nec Paul. unquam usus est voce prædestinationis in alia significatione: quin potius ad Rom. 8. distinguit prædestinationem a singulis effectibus ejus: quæ expositio est consentanea Augustino locis supra citatis, & aliis expositoribus. Ratione probatur ex dictis, quia Christus meruit dilectionem efficacem prædestinatorum, sed tota prædestinatio eorum ex hac dilectione nascitur: ergo meruit etiam prædestinationem. Secundo, quia Christus meruit omnes effectus gratiæ, qui ex particulari Dei providentia fiunt circa prædestinatum, sed qui hæc omnia meretur, meretur totam prædestinationem, & si aliquis posset sibi hæc omnia mereri, mereretur prædestinationem suam, ergo.

Objectio.

Sed contra, quia Christus non meruit prædestinatis omnia media, per quæ consequuntur suam salutem, quia non meruit Incarnationem, quæ est potissimum medium, sed mereri prædestinationem, est mereri alicui omnia media suæ salutis. Et confirmatur, quia multa bona naturalia, quatenus ad salutem conferunt, sunt effectus prædestinationis, ut nasci hoc tempore, hoc loco, ex his parentibus, cum hac complexionem: sed hæc non oriuntur ex Christi meritis, sed ex ipsa dispositione, & naturali cursu universi, ergo. Respondetur ad argumentum, Incarnationem potius dici causam salutis prædestinati, quam proprie mediū, quia Incarnatio non est amata seu electa ex intentione efficaci dandi vitam æternam prædestinato, sed per se fuit primario amata. Et quamvis demus, vel Incarnationem, vel passionem, esse ordinatam ex intentione generali salvandi genus humanum, non autem ex particulari dilectione prædestinatorum, media autem prædestinationis dicuntur, quæ ex hac dilectione procedunt. Quocirca illud argumentum solum concludit, Christum non meruisse nobis omnes causas nostræ salutis, neque omnem supernaturalem providentiam gratiæ: non inde tamen fit, non meruisse prædestinationem nostram, quia ad hoc satis est, mereri prædestinato omnem gratiam, quæ illi confertur, & omnia media particularia, per quæ generales causæ vel remedia gratiæ illi applicantur. Prædestinatio enim significat specialem rationem divinæ providentiæ, per quam electus infallibiliter perducitur ad vitam æternam. Quapropter, qui negant, Christum esse causam nostræ prædestinationis, solum quia non fuit causa suæ incarnationis; non recte loquuntur, quamvis in solo modo loquendi a nobis differre videantur. Ad confirmationem respondetur, Christum Dominum etiam illa naturalia dona nobis meruisse, quæ ad salutem æternam conferunt, quatenus ex speciali intentione & electione prædestinati conferuntur: sicut enim possumus hæc bona promereri, & impetrare in Christo, & per Christum, ita etiam, cum sine merito vel oratione nostra dantur, possunt propter meritum Christi dari. Quis etiam neget, aut mori in tali tempore & loco, naturale esse, aut non sæpe dari propter Christi meritum cum hoc sæpe ad donum perseverantiæ pertineat? Licet ergo effectus naturales ex dispositione causarum naturalium proveniant, tamen, si ad prædestinationem pertinent, illamet dispositionis causarum, sicut sub prædestinationem cadit, ita & sub meritum Christi.

Naturalia  
quæ, &  
quomodo  
Christus  
nobis me-  
ruerit.

## DISPUTATIO XLII.

In duas Sectiones distributa.

*De iis, quæ Christus meruit Angelis.*

IN hac disputatione brevius quam in præcedentibus agendum est, quia res est minus certa, & ideo unica fere sectio examinabimus, an Christus meruerit angelis, & quid illis meruerit: nam hæc duo vix possunt disput. sejungi: deinde tamen occasione hinc sumpta, videndum erit, an possit Christus aliquo modo dici Redemptor angelorum, vel, quod idem est, an pro illis satisfecerit.

### SECTIO I.

*An Christus meruerit angelis omnia dona gratiæ & gloria.*

PRIMA sententia negat, Christum Dominum angelis aliquid meruisse, præsertim gratiam & gloriam. Ita videtur sentire Bonavent. in 3. d. 13. art. 2. q. 3. dum negat, Christum influere gratiam in Angelos, Paludan. q. 1. art. 3. Durand. q. 2. Alenf. 3. p. q. 12. memb. 2. art. 3. §. 5. dum affirmant Christum habere influxum gloriæ accidentalis, & aliquarum illuminationum in angelos: de alio vero influxu gratiæ omnino tacuerunt: D. Th. etiam hac 3. p. q. 8. art. 4. solum in communi dixit Christum aliquid influere in homines, & angelos, & q. 59. art. 6. negat, Christum judicaturum angelos quoad præmium essentiale, sed tantum quoad accidentale: quamquam hic locus parum urgeat, ut patet ex ratione, quam ibi subjungit in corpore & ad primum, scilicet, quia judicium illud consummatum est ante Incarnationem, & non est interandum: unde ad eundem modum loquitur de judiciis particularibus hominum, factis ante Incarnationem, vel ante diem judicii, ut ibidem patet art. 4. ad 3. & art. 5. ad 1. & 2. Expressius tamen in 3. dist. 13. q. 2. art. 2. hanc tenet sententiam, & q. 29. de verit. art. 4. ad 5. & art. 7. ad 5. & in eadem sententiam inclinat Dried. tract. 2. de captivit. & redempt. gener. human. c. 2. part. 3. art. 5. fol. 51. quamvis addat, Christum non meruisse gratiam angelis removendo ab illis peccatum. Et probatur primo, quia Scriptura sacra nunquam dicit Christum venisse propter angelos, ut eis gratiam, & gloriam mereretur: quin potius ipsemet Christus dicit, se reliquisse nonaginta novem oves, & venisse ad quærendam unam ovem perditam, Matth. 28. & Luc. 15. quibus locis Ambros. Anselm. Beba, Theophyl. & alii, & Gregor. homil. 34. in Evangelia, exponunt de divino Verbo, quod relictus in cælo angelis, ad quærendam humanam naturam lapsam descendit: non ergo venit ut angelis mereretur, neque ut eos ad suum ovile aggregaret. Unde Act. 4. de hominibus dicit Petrus, & non de angelis, non esse *sub cælo aliud nomen nobis datum, in quo oporteat nos salvos fieri*, 1. ad Timot. 4. dicit Paul. Christum esse salvatorem omnium hominum, maxime fidelium: de angelis vero nihil dicit. Confirmatur ex illo ad Hebr. 2. *Qui sanctificat, & qui sanctificantur, ex uno omnes: propter quam causam non confunditur eos fratres vocare*, & infra, *Quia ergo pueri communicaverunt carni & sanguini, & ipse similiter participavit eisdem*. Quibus verbis requirit Paulus inter sanctificantem & sanctificatos, vel originem ab eodem parente Adamo, vel (quod idem est) communicationem in eadem natura, ut exponit Adamus: & similiter inquit, ideo induisse nostram naturam, quia futuri eramus fratres ejus, & spirituales filii: hoc enim est quod ait, *Quia pueri communicaverunt carni, & sanguini, &c.* Unde statim subjungit, *Nusquam angelos apprehendit, sed semen Abrahæ apprehendit*. Ex quo testimonio ita concludi potest ratio; nam qui sanctificantur per merita Christi, sunt pueri, & fratres Christi, & communicant cum illo in carne, & sanguine, ut Paulus dicit, sed angeli non sunt hoc modo fratres Christi, non enim habent carnem & sanguinem, neque illis assimilatus est Christus: ergo non sunt illius merito sanctificati, & ita Chrysost. Theophyl. & alii ibi per sanctificatos a Christo solos homines intelligunt.

Secundo videtur colligi hæc sententia ex modo loquendi



quendi Patrum, ubicumque enim explicant, quid profuerit angelis Christi adventus, nihil aliud dicunt, nisi per Christum esse reparatas sedes angelorum, hominibus ad illas implendas assumptis, ex quo effectu magnum gaudium accidentarium ad sanctos angelos redundavit, & novam quandam, ac singularem amicitiam cum hominibus contraxerunt. De merito autem gratiæ, & gloriæ nihil omnino dicunt, ut videre licet in Chrysost. Theodoro. & Theophy. Anselm. Beda, & aliis exponentibus verba illa ad Ephes. 1. *Instaurare omnia in Christo, quæ in cælis, & quæ in terra sunt*, & illa ad Coloss. 1. *In ipso complacuit omnem plenitudinem inhabitare, & per eum reconciliare omnia in ipsum, pacificans per sanguinem crucis ejus sive quæ in terris, sive quæ in cælis sunt*. Et ad eundem modum loquitur August. in Enchir. c. 61. 62. 63. & 64. & Gregor. l. 28. Moral. c. 6. & 7. alias c. 14. & Ambrosius serm. 10. in Psal. 118. p. 3. qui multum videtur favere huic sententiæ dicens. *Habemus aliquid, quod fortasse angeli non habeant, ubi enim abundavit peccatum, superabundavit & gratia, nobis est natus Christus ex Virgine, legitimus enim, Puer natus est nobis, & Filius datus est nobis, nobis carnem suscepit, imo potius nos in illa carne suscepit, quando filium hominis in Dei sede constituit: non lego angelos in Dei sede nisi stantes, nisi ministerium deferentes, non lego angelos, sed homines conspectos Christo, & in Christo resuscitados. Denique ait Apostolus, quia convivificavit nos in Christo, cujus gratia estis salvificati, & simul suscitavit, simulque sedere fecit in cælestibus cum Christo Jesu*.

Tertio possemus argumentari ratione sumpta ex ordine prædestinationis, si verum esset, Christi meritum solum fuisse præordinatum, & prævisum post præciturum originale peccatum, quia totum negotium Angelorum intelligitur consummatum ante peccatum Adæ prævisum. Nam prius intelligitur prævisum peccatum angelorum, quam Adæ, quia fuit aliquo modo causa illius. Denique gratia, & gloria angelorum independens fuit a peccato hominum, unde, si Christus prædestinatus fuit post prævisum peccatum hominum, & dependenter ab illo, non potuerunt habere angeli gratiam, & gloriam dependenter a Christo. Quæ ratio videtur sane urgentissima, supposita illa sententia: quamquam multi discipuli D. Th. conentur illi respondere, ut concilient illam opinionem D. Th. cum ea, quam de merito Christi respectu angelorum statim explicabimus. Sed vix possunt id explicare, nec rationi factæ satisfacere: tamen non oportet, ut in examinandis eorum subterfugiis nos immoremur, cum credamus rationem hanc falso niti fundamentum, & supponamus, Christum & ante prævisum peccatum Adæ, & ante ipsos angelos fuisse prædestinatum. Aliter ergo probari potest hæc sententia ab inconvenientibus, nam sequitur primo angelos non fuisse glorificandos ante Christi adventum, sicut nec hominibus antea gloria data est, quia non decebat prius coronari milites, quam ducem, & ultimum præmium prius dari membris, quam capiti, quod est fons, & ratio totius meriti. Secundo quia sequitur, Christum redemisse angelos, qui non peccaverunt, saltem per modum præservationis, sicut beata Virgo fuit redempta: patet sequela, quia per Christum receperunt gratiam, per quam a peccando præservati sunt. Tertio sequitur, Christum mortuum esse pro angelis, quod est contra communem modum loquendi Scripturæ, in qua dicitur Christus esse mortuus propter delicta nostra. Sequela autem patet, quia merita Christi per passionem consummata sunt; si ergo Christus meruit angelis, per passionem meruit illis: unde in Apocal. 7. soli beati homines dicuntur *lavisse, & dealbasse stolas suas in sanguine agni*. Ubi aliqui notant, de hominibus dici *stare ante thronum Dei & agni, clamantes, & dicentes: salus Deo nostro, sedenti super thronum, & agno*. Tanquam redemptori suo, de angelis vero solum dicit stare ante thronum Dei, & adorare eum, nulla facta mentione agni, quia pro illis occisus non est.

Dico tamen primo, Christum Dominum meruisse angelis gratiam, & gloriam, quæ illis data fuerat propter merita Christi prævisa. Ita docet expresse D. Th. exponens illud Joan. 1. *De plenitudine ejus nos omnes accepimus, scilicet, inquit, omnes Apostoli, Patriarchæ, Prophetæ, & iusti, qui fuerunt, sunt, & erunt, & etiam omnes angeli; & infra, quia plenitudo gratiæ, quæ est in Christo, est*

*causa omnium gratiarum, quæ sunt in omnibus intellectualibus creaturis*. In hac vero 3. p. consulto videtur noluisse satis explicare sententiam suam, in particulari aliquid affirmando, vel negando: tamen, cum generaliter loquatur, & eodem modo dicat Christum influere in homines & angelos, tanquam caput in membra, multum huic sententiæ patrociniatur, in q. enim 8. art. 1. absolute dicit Christum influere gratiam in omnia membra Ecclesiæ, statim vero art. 4. dicit hanc Ecclesiam, cujus Christus est caput & in quam influit, constare ex hominibus, & angelis: nisi ergo magna æquivocatione utatur, loquitur in utroque loco de influxu gratiæ. Præterea q. 7. art. 9. dicit, Christo esse datam plenitudinem gratiæ simpliciter, quia data est illi, ut universali principio in genere habentium gratiam, in quo genere sine dubio angeli comprehenduntur. Unde cum subdit, *Et ut eam ad alios transmittat*, Angelos etiam complectitur, quod necessario etiam videtur dicendum, ut ratio ejus efficax sit, vult enim concludere, in Christo esse plenitudinem gratiæ simpliciter, tam respectu hominum, quam angelorum: Quod probat ex efficacia ejus, scilicet, quia est principium universale gratiæ, necesse est ergo, ut hoc intelligat etiam respectu angelorum. Statim tamen art. 11. videtur hoc limitare, dicens, Christo datam esse gratiam, *ut universali principio gratificationis in humana natura*. Sed in primis Cajetan. ibi, qui nostram conclusionem tenet, explicat particulam illam *in humana natura*, designare subiectum necessitatis, ex quo sumpta est occasio meritum Christi: non vero significare subiectum (ut ipse dixit) extensionis, quia meritum Christi, licet ex occasione peccati hominum ordinatum sit, extensum tamen est ad angelos. Quod quam consequenter dictum sit, jam inter argumentandum indicavi. Facilius exponi posset D. Th. ut *humana natura*, designet principium, in quo, vel per quod Christus est universale principium gratificationis, non subiectum, seu terminum, cui communicatur illa gratificatio. Denique etiam si intelligatur, ut jacet, D. Th. in hoc posteriori loco solum affirmat particularem terminum hujus gratificationis, non vero negat universalem, quem in articulo priori posuerat. Hanc conclusionem tenet etiam Albert. in 3. distinct. 13. art. 2. ubi dicit Christum esse caput angelorum, quoad influxum gratiæ, & gloriæ. In eadem inclinatur Ruardus art. 2. circa principium, ubi dicit, renasci in Christo ex Spiritu sancto, non solum hominibus, sed etiam angelis fuisse necessarium, art. vero 8. aliquantulum a principio expressius de hoc differens, cunctando quidem, tamen hanc partem amplectitur: ex professo tamen defendunt hanc sententiam Catherinus lib. 1. de eximia Christi prædestinatione, & in opusc. de gloria & peccato angelorum, Galatinus lib. 3. de arcanis Catholicæ veritatis c. 4. Joan. Arboreus lib. 3. Theosophiæ c. 13. Viger. in institutionib. c. 20. §. 1. versic. 4. Jacobus de Valentia in id Psal. 102. *Benedicite Dominum omnia opera ejus*; Neclantus super ad Ephes. 1. & in lib. cujus titulus est, *Medulla sacre Scripturæ in tertia mundi ætate cap. 2.* Melchior Flavius lib. de regno Christi. Et quamquam (ut verum fatear) neque ex Scripturis sacris, neque ex sanctis Patribus possit hæc sententia efficaciter convinci, possunt tamen ex illis adduci non contemnendæ conjecturæ, quæ conjunctæ cum iis, quæ de Christi prædestinatione in superioribus dicta sunt, eam valde probabilem ostendunt. Principio igitur suppono ex materia de angelis & de gratia, generalia principia, quæ traduntur a Conciliis, & ex sacra Scriptura colliguntur de necessitate gratiæ ad supernaturales actus, & ad promerendam vitam æternam, non solum ad homines, sed etiam ad angelos pertinere. Quod uno exemplo satis declaratur. Dicit Paulus ad Ephes. 2. *Gratia estis salvati per fidem, & hoc non ex vobis, donum enim Dei est, ne quis gloriatur*. Hæc sententia sine dubio de angelis etiam vera est, quia neque ipsi gloriari possunt, dono enim Dei, per gratiam, & fidem salvi facti sunt, ostensum est autem præcedenti disputatione, gratiam Dei necessariam ad salutem, & gratiam Christi, seu Christi meritis manantem, eandem esse, seu ad convertentiam dici: sicut ergo angelis gratia Dei necessaria fuit ad salutem, ita & gratia Christi. In quo sensu optime intelligi potest quod Fulgent. ait, lib. 2. ad Trasimund. c. 3. *Una est in utroque (scilicet angelo, & homine) gratia operata, in hoc, ut surgeret, in illo ne caderet, in illo ne*

Christus  
causa me-  
ritoria  
gratiæ, &  
gloriæ  
angelorum.



vulneraretur, in isto, ut sanaretur, ab hoc infirmitatem repulit, illum infirmare non sinit, illius esca, istius medicina. Unde quod Joan. 14. absolute, & simpliciter Christus de se pronuntiavit, *Ego sum via, veritas, & vita, nemo venit ad Patrem nisi per me*, tam de angelis, quam de hominibus merito intelligimus, neque etiam illa vox, *nemo*, ita ad homines refertur, quin possit etiam angelos comprehendere, ut cum Marci 10. ait Christus, *Nemo bonus nisi solus Deus*, non solum homines, sed etiam angelos excludit: & similiter intelligitur, quod ait Joan. 10. *Et nemo potest rapere de manu Patris mei*. Accommodari præterea potest illud Joan. 17. *Hæc est vita æterna, ut cognoscant te solum Deum verum, & quem misisti Jesum Christum*. Eadem enim est vita æterna hominum, & angelorum, Paulus etiam ad Ephes. 4. totum Ecclesiæ corpus dicit habere charitatem, & augmentum ejus ex influxu capitis, docuerat autem idem Paul. c. 1. & 2. & ad Coloss. 1. & 2. Christum non solum hominum, sed etiam angelorum esse caput. Illud denique ad Ephes. 1. ubi *omnia per Christum, & in Christo instaurari dicuntur*. Ubi Hierony. & alii, qui juxta lectionem Græcam, *recapitulari vertunt*, non parum favent: dicuntur enim, *omnia recapitulari in Christo*, vel quia cum inter se essent admodum distincta, sub uno Christo capite unum quodammodo effecta sunt, ut Chrys. & Theophyl. exponunt, vel quia in Christo omnia sunt nobilitata, & ad perfectionem deducta, singula juxta capacitatem suam, ut supra q. 1. art. 3. explicatum est. Quo fit, ut quæ perfectionis spiritualis vitæ capacia sunt, per Christum illam consequantur. Vel denique, quia omnia gratiæ mysteria, quæ tam in cælo, quam in terra facta sunt, in Christo, & per Christum complentur, ut Claudianus exponit.

Secundo probatur ex Patribus. Solet autem vulgo hæc sententia tribui Bernardo, serm. 17. & 22. in Cantica, in priori enim loco dicit angelos malos peccasse ob invidiam hominum. In posteriori vero dicit, Christum remississe angelos sanctos præsentando illos. Sed ut (quod verum est) fateamur, Bernardi sensus alius omnino est ab hac sententia, nam in priori loco non de invidia in Christum concepta, sed in homines, eo quod ad eandem beatitudinem cum angelis evecti sunt, loquitur Bernardus: in posteriori vero loco manifeste agit de Christo, ut est Deus, & Verbum Patris, & ut operatus est gratiam, & gloriam in angelis, antequam esset homo. Et eodem modo de eadem re loquitur serm. 1. de Circumcisione. Afferri etiam solet Cyril. lib. 5. in Isai. tom. 2. in principio, ubi dicit, per Dei Verbum, seu sermonem, omnem fructificationem spiritualement, tam in sanctis angelis, quam in hominibus insitam esse, & statim explicat, hoc Verbum esse Christum sponsum Ecclesiæ, cui Ecclesia ex gentibus congregata, per fidem desponsata est. Sed hoc etiam testimonium potest facile de Verbo secundum divinitatem intelligi, quamquam contemnendum non est. Sunt etiam optima verba Gregor. lib. 1. reg. c. 2. circa illa verba. *Non est alius extra te, subauditur, inquit, sanctus, quia nullus hominum, neque angelorum sanctus est, nisi per Christum*. Et infra dicit, tam angelos, quam homines esse sanctificatos in Filio: rem vero magis declarans, addit: *Et quia unigenitus Dei Deus est, extra eum non est alius, quia nemo electorum, nisi in ipso est quod sic refertur ad divinitatem ejus, ut nequaquam intellectum humanitatis evacuet*. Hætenus Gregor. ubi aperte loquitur de omnibus electis hominibus, & angelis, ut patet ex illa causali, & universali locutione. *Quia unigenitus Deus est, extra illum non est alius*; scilicet, neque homo, neque angelus: quod ergo subdit, ita esse hoc de divinitate intelligendum, ut humanitas non excluditur, de omnibus etiam intelligit. Quod etiam confirmat ratio, quoniam subdit, quia sine fide Christi nullus salvatur, quod tam de angelis, quam de hominibus verum habet. Ad eundem modum loquitur idem Gregor. hom. 14. in Ezechiel. exponens illa verba c. 40. *Et ecce murus forinsecus in circuitu domus undique*. Ubi sic inquit: *Unigenitus Patris, qui sursum est firmitas angelorum, inferius factus est hominum redemptio*. Quod licet exponi possit de Christo secundum diversas naturas, tamen ipse loqui videtur de muro extrinseco, quem dixerat esse Verbum Incarnatum. Laurent. etiam Justinian. serm. de Ascensione dicit, Christum factum esse *angelorum parietem & hominum*. Et in serm. de Assumptione B. Virginis de illius eximia gloria

verba faciens inter alia sic inquit. *Nemo invidet illi, quoniam ab ejus beneficiis nullus inveniebatur immunis, fructus quippe ventris ejus civitatē illam repleverat sanctitate*. Rupert. etiam lib. 3. de process. Spirit. sanct. c. 21. cujus sententiam late tractabimus q. 1. art. 3.

Tertio probatur conclusio rationibus, & conjecturis: quia Deus prævidit merita Christi prius, quam gratiam, vel gloriam angelorum juxta ordinem prædestinationis Christi supra a nobis explicatum: ergo credendum est, Deum ordinasse Christi merita ad hunc effectum, quandoquidem ipsa habebant valorem & condignitatem ad hunc effectum, & ad honorem Christi pertinebat, ut per merita sua haberet effectum gratiæ & gloriæ, etiam in angelis: ac denique hoc modo magis ostenditur perfecta ratio justitiæ, & misericordiæ in hoc divino opere de sanctificatione, & gloria angelorum. Secundo, quia optimus ordo rerum postulat, ut omnia, quæ sunt unius generis, revocentur in unam causam in illo genere, quoad fieri possit. Item in uno corpore, quo major est connexio omnium membrorum cum capite, eo est constituto perfectior; sed angeli, & homines conveniunt in uno genere gratiæ, & sunt membra unius corporis Ecclesiæ, cujus Christus est caput: ergo erit perfectior, & convenientior ordo, si totum hoc corpus habeat unum principium, & unum caput, per cujus influxum omnia illius membra vitam, & spiritualem sensum participant. Quæ ratio fundamentum habet, ut dixi, in Paulo ad Eph. 4. Et juvari potest illis principiis Metaphysicis: Quidquid est tale per participationem, revocatur ad id, quod est per se tale; Christus autem solus est per se gratus, angeli vero per participationem, & ideo ad Christum revocantur, ut ab illo, & per illum gratiam obtineant. Item quia quod est supremum in uno genere, est causa cæterorum eo modo, quo esse potest: Christus autem est supremus in genere gratiæ, & ideo est causa gratiæ angelorum finalis, exemplaris, & meritoria, omnibus enim his modis esse potest, & decet. Tertio conficio argumentum, quo supra in simili quæstione de justitia Adæ usus sum, nam angeli in statu viæ habuerunt fidem Christi Domini: ergo per eam fidem vivam sanctificati sunt: ergo per Christi merita sanctitatem, & gloriam obtinuerunt. Antecedens est sententia D. Th. 1. par. q. 64. art. 1. ad 4. & colligitur satis clare ex Augustino lib. 5. Genes. ad lit. c. 19. & ex Bernardo serm. 27. in Cantica, & significat Rupertus lib. 8. in Joan. circa finem exponens verba illa Joan. 8. *Ille homicida erat ab initio*. Et confirmari potest ex dictis supra q. 1. art. 3. Adam in statu innocentie habuisse hanc fidem, eadem enim est omnino ratio. Item quia dubitari non potest, quin sancti angeli videant in Verbo Incarnationis mysterium, ut omnes Theologi docent cum August. lib. 9. Civit. c. 21. ergo verisimilius est, illud prius credidisse in via, fidei enim respondet visio, & quodammodo est proportionatum illius meritum, seu accommodata dispositio, aut via ad illam obtinendam. Et ideo docent Theologi, homines ea mysteria supernaturalia videre in Verbo, quæ in via crediderunt. Denique apud August. notum est, angelos de his mysteriis habere scientiam *matutinam*, de quibus habent, vel aliquando habuerunt cognitionem *vespertinam*, lib. 4. Genes. ad lit. c. 22. si ergo sancti angeli lumine claro vident in Verbo Incarnationis mysterium, non est cur dubitemus, cum essent viatores, cognovisse illud lumine fidei. Consequentia autem facta in principali argumento satis probata sunt, cum de justitia Adami disputaremus, est enim omnino eadem ratio, quia si per fidem est Christus revelatus angelis ab initio suæ creationis, sine dubio est illis propositus ut caput eorum, cui subjicerentur, & in quo suam spem, & fidem, post Deum collocarent, hoc enim modo, & propter hanc causam, fides Christi in iis requiri solet, qui Deo placent. Ex quo verisimilis valde gravissimorum authorum sententia est, malos angelos ex revelatione Christi sibi facta occasionem sumpsisse peccandi, per superbiam, & invidiam humanæ naturæ, quod Rupert. supra indicat, & Hieronym. super ad Ephes. 1. dum inquit. *Omnis dissensio, quæ & ante mundum, & postea esse cepit in mundo, tam visibilibus, quam invisibilibus creaturarum, adventum Dei pollicebatur*. Ergo multo magis verisimile est, sanctos angelos in Christo & per Christum, in quem credebant, meruisse.

Ex hac conclusione colligitur secundo, Christum Do-

Angeli in  
via habuerunt  
fidem  
Christi.



Dominum meruisse sanctis angelis omnia dona gratiæ, quæ nobis diximus meruisse, proportionem servata, exceptis iis, quæ ad remedium peccati pertinent, de quo infra dicemus. Itaque meruit Christus sanctis angelis electionem, prædestinationem, vocationem, auxilia omnia excitantia, adjuvantia, sufficientia, & efficacia, ac denique omne meritum, & augmentum gratiæ, & gloriæ. Quæ omnia eisdem modis probanda sunt, quibus de hominibus probata fuerunt. Est enim eadem ratio supposito modo prædestinationis Christi, & supposito etiam illo principio, quod gratia Christi & Dei eadem est, quia omnis gratia Dei per Christum communicatur.

Quid  
Christus  
angelis  
meruerit.

Respons.  
ad argum.

Ad fundamenta contrariæ sententiæ. Ad Scripturæ testimonia respondetur, frequentius loqui de effectu passionis Christi per modum redemptionis, & liberationis a peccato, & ideo frequentius loqui de illa in ordine ad homines: cum vero loquitur de gratificatione, seu sanctificatione, quæ est per Christum, vel cum ipsum proponit ut universalem autorem gratiæ, & salutis, nunquam excludit angelos: quin potius cum de gratia angelorum, & causis ejus per pauca Scriptura loquatur, intelligendum videtur sub his universalibus locutionibus illos comprehendere, ut dictum est. In particulari vero ad illam parabolam de centum ovibus in primis dicitur, ea, quæ in argumento afferuntur, magis ad spirituales sensum, quam ad literalem pertinere, nam literalis sensus solum esse videtur, per eam parabolam tantum explicuisse Christum, cur potius cum penitentibus, quam cum iustis versaretur, ut late Jansen. ibi prosequitur c. 94. Concordiæ. Et in hoc literali sensu fundatur commodè mystica Sanctorum expositio, & hoc modo retorqueri potest ex illa parabola argumentum, primum quia Christus vocat angelos, oves suas, æque ac homines; non ergo minus ad se pertinere censuit illorum salutem, quam hominum, quamvis pro hominibus, qui plus indigebant, plus laboraverit. Deinde, sicut relinquere iustos non est non mereri illis, neque non operari salutem illorum, sed est, non ita conversari cum illis, neque illos tot mediis, & modis quærere, ita relinquere angelos non fuit non mereri illis, sed fuit ad homines singulari modo descendere, relicto ad tempus angelorum consortio, & statu beatifico.

Ad testimonium Pauli ad Hebr. 2. in primis fieri potest vis in illis verbis, *Qui sanctificat & sanctificantur, &c.* Et sic duplex potest esse responsio, vel certe triplex. Prima est, non esse legendum, *qui sanctificat & sanctificantur*, sed *qui sanctificati & sanctificantur*, ut hoc sit quoddam singulare nomen, & quasi epitheton Christi. Sic enim legitur videtur Dionys. cap. 4. de Ecclesiast. Hierar. circa finem, dicens, Christum, juxta modum loquendi Scripturæ, esse eum, *qui sanctificat & sanctificantur*, quod nomen in nullo alio Scripturæ loco Christo tribuitur, ut ibi Maximus notavit, exponens Dionysium. Eodemque modo legisse videtur alter Dionys. Alexandrin. in epist. contra Paulum Samosatenum apud Turrianum in Oplotecha, ubi idem refert ex Cyril. lib. 3. contra Nestorian. qui idem habet lib. 1. de Fide ad reginas, cap. *Quod Christus unus sit*. Qua lectione supposita, nullum potest ex illis verbis sumi argumentum. Obstat vero huic responsioni Vulgata lectio, quæ in plurali habet, *qui sanctificantur*, & eodem modo videntur legisse omnes antiqui expositores, & Cyril. Alex. lib. 2. ad reginas, cap. *de Christi sanctificatione*. Nec videntur illa sequentia verba, *ex uno omnes*, posse commodum habere sensum, nisi in plurali legatur, ut sensus sit, tam qui sanctificat, quam qui sanctificantur, ex uno sunt omnes; nam, si Christus est, qui sanctificat, & qui sanctificantur, quomodo ex uno omnes? aut qui sunt hi omnes? Quamvis enim responderi possit, hos omnes esse illos filios, quos Deus Pater in gloriam adduxerat, ut sensus sit, Christus & illi, ex uno omnes: tamen re vera est nimis coacta expositio. Et præterea verba sequentia, scilicet, *Propter quam causam non confunditur fratres eos vocare*, non recte coherent, nisi illud relativum, *eos*, referat eos, qui sanctificantur.

Retenta igitur Vulgata lectione, est secunda responsio, qui sanctificat, & qui sanctificantur, esse ex uno Deo, ex uno conditore, ex uno æterno Patre, licet diverso modo; ille ut naturalis Filius, & per se sanctus, & aliorum sanctificator, reliqui ut adoptivi, & sanctificati ab illo: quæ omnia, tam de angelis, quam de hominibus dici poterunt. Ita vero legunt & exponunt Chrysost. homil. 4.

Swarez. Tom. XVI.

Theodor. & Thophyl. Ambros. Anselm. D. Th. Primasius, Cyrillus Alexand. loco proxime citato. Tertio vero possumus admittere probabilem expositionem, qui sanctificat, & qui sanctificantur, esse ex uno Adamo, seu ex una stirpe & natura, ut Adamus, Cajet. & nonnulli alii exponunt. Hac autem posita expositione, dicendum est, ibi loqui Paulum de sanctificatione a peccato, id est, redemptione. De hac enim a principio illius capitis sermonem instituerat, ut patet ex illis verbis, *Quomodo nos effugiemus, si tantum neglexerimus salutem?* scilicet, quæ nobis parata est, per Christi mortem, & redemptionem; unde inferius subdit, *Videmus Jesum propter passionem mortis gloria & honore coronatum; ut gratia Dei pro omnibus gustaret mortem.* Et addit, *Decebat eum, propter quem omnia, & per quem omnia, qui multos filios in gloriam adduxerat, autorem salutis eorum per passionem consummare*, id est, decebat, ut Deus Pater, per quem & propter quem sunt omnia, quique per suam prædestinationem multos filios in gloriam adduxerat, autorem salutis eorum per passionem consummare, id est, in gloria & honore exaltare, ita enim communiter legitur & exponitur, ut patet ex citatis expositoribus & optime ex Petro Maxentio Dialog. 2. contra Nestorium. Alii vero legunt passive *consummari*, ut Ruffin. in expositione Symbol. &, quod ad præsens spectat, eundem reddit sensum, scilicet, decuisse, Christum, per quem omnia & propter quem omnia, qui per sua merita prævisa multos filios in gloriam adduxerat, consummari per passionem in autorem salutis eorum, id est, consummare ac perficere munus sanctificandi illos, per passionem, & mortem, eos, qui indigebant, a peccato liberando. De hac ergo sanctificatione recte subdit, eum, qui sanctificat, & qui sanctificantur, esse ex una stirpe, & natura, seu ex uno Adamo, licet non eodem modo, nos enim sumus per feminalem generationem, ille tantum secundum corpulentam substantiam. Et hinc etiam facile respondetur ad verba sequentia, si in eis vis fiat, scilicet, quod homines tantum vocat fratres & pueros suos, hoc enim non ideo est, quia illi soli a Christo gratiam accipiant, sed quia speciali modo cum illo in natura conveniunt & in origine, & quia singulari modo sunt ab illo sanctificati, & redempti. Unde, quod subdit Paulus, *Quia pueri communicaverunt carni & sanguini, & ipse similiter participavit eisdem*, puerorum nomine solos homines intelligit, propter prædictam singularem cum Christo conjunctionem, nomine autem *carnis*, &, *sanguinis*, non naturam tantum, sed etiam passibilem naturæ conditionem intellexit, ut supra, circa a. 3. q. 1. disp. 5. latius exposui, & hanc vim habet particula illa, *similiter*, scilicet quoad statum & conditionem passibilem, quod etiam sequentia verba declarant, *Ut per mortem destrueret eum, qui habebat mortis imperium*, ad hoc enim non sufficiebat sola natura carnis & sanguinis, sed necessaria etiam erat conditio passibilis.

Denique fieri potest vis in illis verbis. *Nunquam enim angelos apprehendit, sed semen Abraham apprehendit*, præsertim si juxta Chrysost. Ambros. Theophylact. D. Th. Prima & aliorum expositionem, emphasim, ac mysterium intelligamus latere in verbo, *apprehendit*. Nam proprie dicitur quis apprehendere eum, quem fugientem insequitur, ac tandem assequitur; cum ergo humana natura, & angelica ex parte, a Deo fugerit, Christus non est insecutus angelos sed homines, & ideo dicitur non angelos, sed homines apprehendisse. Responderi vero potest in primis, expositionem illam ac ponderationem, non esse necessariam, quia nomine apprehensionis intelligi sufficienter potest ipsa assumptio humanæ naturæ. Verbum enim, *apprehendo*, in rigore non requirit illam significationem, sed simpliciter significare potest, accipere, capere, & ad se trahere: & verbum Græcum, *ἐπιλαμβάνω*, quod illi respondet, eandem habet simplicem significationem, & ita simpliciter exponunt Theodoret. Cajet. & alii. Deinde, admitta illa ponderatione, nihil nobis obstat illa verba, fatemur enim. Christum non redemisse angelos, & ideo nec illorum naturam assumpsisse, nec fugientes ex illis fuisse insecutum ut eos apprehenderet, & ad se revocaret, nec etiam pro eis mortuum fuisse, nec eis similem in natura, & conditione effectum esse. Hoc tamen nil obstat quo minus sanctis angelis gratiam & gloriam meruerit, ut dictum est. Quin potius illa rigorosa significatione verbi, *apprehendit*, recte confirmatur,

N n 2

quod



quod dictum est, Paulum ibi loqui de sanctificatione a peccato, & ideo tantum habere sermonem de hominibus, & de specialibus beneficiis illis concessis, & de singulari conjunctione & similitudine, quæ est inter Christum, & ipsos, non tamen propterea excludit propria beneficia, quæ Christus potuit conferre angelis, & de facto contulit, quamvis illo loco eorum mentionem non fecerit, quia ad rem, de qua tractabat, non pertinebat.

Secundum fundamentum, quod ex autoritate Patrum sumptum erat, difficultatem non habet, quia fere totum in autoritate negativa fundatur. Conceditur ergo, sanctos Patres in illis locis meminisse illorum effectuum, & non hujus, quia fortasse in hanc quæstionem non inciderunt, vel in re dubia noluerunt suam proferre sententiam. Ambrosius vero, qui non nihil ob stare nobis videtur, primum dubitanter loquitur dicens, *Fortasse*, &c. Deinde exponi potest juxta ea, quæ seq. sect. dicemus.

Ad rationem ab inconvenientibus sumptam, negatur prima sequela, nam Christus nemini clausit januam regni cælorum, sed quantum in ipso est omnibus fuit semper patens, neque enim debuit per sua merita retardare aliquem ab ingressu gloriæ vel susceptione præmii suis meritis debiti, & ideo si angeli non habentes gratiam ex Christo habituri erant gloriæ statim post terminum suæ viæ, & meriti, multo magis eam sine mora recipere debuerunt propter Christum, eademque lex fuisset cum hominibus observata, si in statu iustitiæ & innocentiae permanissent: tamen quia peccando januam regni cælestis sibi occluserant, quæ aperta non fuit, donec plene fuit pro tota natura, quæ reatum peccati contraxerat, satisfactum, ideo ante Christi adventum nullus hominum ad illam beatitudinem admittebatur, ut latius inferius suo loco dicetur. Aliorum solutio patebit ex sect. seq.

## SECTIO II.

*Utrum Christus redemerit angelos, pro illisque mortuus fuerit.*

**D**Uobus modis intelligi potest, Christum redemisse angelos, & pro illis mortem obiisse, primo de peccatoribus angelis, ut sensus sit, Christum per sua merita & satisfactionem, liberasse eos, vel aliquando fore liberaturum, ab eo statu, in quem per sua peccata inciderunt. Secundo de angelis sanctis, ut scilicet Christus dicatur eos redemisse, quia per sua merita eos a peccatis præservavit. Priori modo dicitur errasse Origen. hom. 1. in Joan. post medium, circa illud. *In principio erat Verbum.* Clarius vero hoc docet hom. 1. in Levit. & hom. 24. in Numeros. Ejusque sententiam videtur usurpasse Hieronymus super ad Ephes. 1. ubi inquit, cur angeli, qui nunquam peccaverunt, dicantur subjici pedibus Christi, & ait. *Potest quidem responderi quod sine peccato nullus sit, unde & crux salvatoris, non tantum ea quæ in terra, sed etiam ea, quæ in cælis erant, purgasse perhibetur.* Quæ verba exponi possent juxta aliū sensū de præservatione, quia nulla creatura ex se impeccabilis est, & ideo dici possunt angeli sancti per Christum accepisse, ut peccatum non committerent, quo dicuntur omnino non caruisse, quia illud habere potuerunt: vel certe exponi possent juxta ea, quæ super cap. 2. scribit circa illa verba. *Qui fecit utraque unum,* dicens, *Christum pacem attulisse cælestibus, & terrenis, quia in suo sanguine cælestia & terrestria copulavit, quæ inter se dissidebant, atque ita factum esse, ut crux Christi non solum terra sed etiam cælo, nec solum hominibus, sed etiam angelis purgaret.* Veruntamen, quæ idem Hieronymus c. 4. scribit, exponens illa verba, *Ex quo totum corpus,* &c. non videntur pati posse hanc expositionem, dicit enim, *Christum venisse, ut totum corpus Ecclesie sanaret.* Quod intra explicans ita dicit. *Ut angelus refusa, id esse incipiat, quod creatus est, & homo, qui de Paradiso fuerat ejectus, ad culturam iterum Paradisi restituitur: ista autem universa sic fient, ut invicem inter se charitate jungantur.* Videtur ergo Hieronymus, vel secutus Orig. vel (quod verius est) simpliciter retulisse Orig. sententiam, neque approbando, neque reprobando illam, ut in præfatione illius Epistolæ ipse indicat, & in Apologia contra Rufinum generaliter se excusat, & in 2. tom. epist. 59. ad Avitum idemmet Hieronymus inter

Origenis errores ponit, quod docuerit, damnatos angelos aliquando revocandos esse ad statum sapientiorum angelorum, quem errorem damnatum esse contra Orig. in V. Synod. refert Nicephorus lib. 17. histor. c. 27. & 28. & contra eundem videri potest late Theophilus Alexandrinus in duabus epistolis, quæ referuntur in 1. tom. Bibliot. sanct. & in aliis locis his error ex professo impugnatur, ostendendo, poenas inferni esse æternas & immutabiles: in hoc ergo sensu certissimum est, Christum non redemisse angelos, nec mortuum esse pro illis, non quia id fieri non potuerit, sed quia Deus statuit illis non parcere, nec remedium præstare, cujus potissima ratio est inscrutabilis Dei voluntas, congruentias vero adduximus supra quæst. 1. art. 2.

De posteriori ergo sensu versari potest quæstio inter Catholicos, quæ suppositis iis, quæ in præcedenti sect. dicta sunt magis ad modum loquendi, quam ad rem spectat. Oportet tamen proprie, & caste loqui. Bernardus ergo locis citatis sectione præcedenti, videtur probare illam locutionem Christum redemisse angelos sanctos, gratiam præservationis illis conferendo. Dionysius etiam, c. 8. de divi. nomi. in fine dicit redemptionem posse appellari ex eo, *quod non finit, quæ vere sunt, ad id cadere ut non sint.* Præterea Theod. ad Hebr. 2. dicit, Christum pro creaturis omnibus mortuum fuisse, ubi enim nos legimus, *Ut gratia Dei pro omnibus gustaret mortem*, ipse legit, *ut absque Deo pro omnibus gustaret mortem*, & exponit, *Deo excepto, pro omnibus gustavit mortem.* Ubi Theophyl. licet lectionem illam non probet, quam a Nestorianis dicit esse inductam, illa tamen supposita, expositionem Theodor. approbat.

Dicendum vero breviter est primo Christum proprie loquendo non esse mortuum pro angelis, ut recte docet Augustinus in Enchir. c. 61. & sequent. & eodem sensu dicit Bernardus. serm. in ser. 4. hebdo. sanct. passionem Christi, neque malis angelis datam esse, sed tantum hominibus, multa etiam, quæ in sectione præcedenti in primo argumento primæ sententiæ adducta sunt, hoc confirmant. Quibus addi potest illud 2. ad Cor. 5. *Si unus pro omnibus mortuus est, ergo omnes mortui sunt.* Sed angeli non sunt mortui: ergo nec pro illis Christus mortuus est. Ratio vero est, quia mors ut mors, non est assumpta propter angelos, sed solum propter homines lapsos, unde gratia non est data angelis ex prævisione meriti fundati in morte Christi, sed fundati absolute in charitate & bonis operibus Christi hominis, ac propterea neque illis data est gratia dependenter a morte Christi, nam si homo non peccasset, Christus non esset mortuus, ut supra dictum est. Denique mors, & aliæ poenæ per se primo assumptæ sunt ad satisfaciendum, unde pro illis solis dicitur Christus mortuus pro quibus satisfacit, non autem satisfecit pro angelis licet illis meruerit, sed satisfecit pro hominibus, ad quos expiandos se ipsum obtulit sacrificium. Nec vero, si Christus angelis meruit, propterea sequitur pro illis mortuum esse, primum quia non est necesse, ut per ipsam mortem illis meruerit, sicut nobis, sed per alios actus charitatis, vel religionis, &c. quamquam enim omnes actus Christi de se digni essent quolibet præmio, potuerunt tamen ab ipso, quidam actus ordinari ad unum effectum, & non ad alios, ut ex supra dictis in hac quæst. & in q. 1. artic. 2. satis constat. Secundo & melius, quia quamvis meritum mortis extensum sit ad angelos, non inde fit mortuum esse pro angelis, quia non pro illis ordinata, & assumpta est mors. Exemplum evidens est, quia Christus per mortem suam sibi aliquid meruit: & tamen non propterea dici potest pro se mortuus, quin potius in Concil. Ephe. can. 10. damnantur dicentes, Christum pro se obtulisse sacrificium, & definitur pro solis hominibus obtulisse.

Dico secundo, Christum non posse proprie dici redemptorem angelorum. Hoc etiam colligitur ex Augustino supra, & ex communi modo loquendi Theologorum. Ratio est, quia *nullus redimitur, nisi is, qui sub peccato servit*, ut ex Zosimo Pap. dicit Augustinus epist. 157. sed angeli sancti nunquam servierunt peccato. Nec satis est, quod potuerint peccare, & propter merita Christi præservati sint, hac enim ratione potuerunt dici divina virtute, seu propter Christi merita fuisse præventi, ne peccarent, seu defensi a peccato, ut loquitur Fulgentius lib. 2. ad

Christus  
proprie  
pro ange-  
lis mor-  
tuus.

O igitur  
error de  
Angelis.



**Fulgent.** **Redem-**  
**ptio pro-**  
**prie quid**  
**fit.**

**Trasimund.** cap. 2. circa finem, non tamen hoc sufficit ad propriam redemptionem, quia *redemptio* dicit iteratam emptionem. Supponit ergo, eum qui redimitur, esse alio quo modo capitum, & venundatum sub peccato vel in se, vel in radice sua, ex qua necessario, contrahenda esset servitus, & captivitas peccati: angeli tamen sancti neutro modo fuerunt captivi, & ideo non fuerunt redempti, neque a Christo meritorie, neque a Deo ut principali auctore gratiæ, sicut etiam mali angeli non possunt dici quoad sufficientiam redempti, eo quod illis data est sufficiens gratia, qua possent vitare peccatum. Adde, Christum solum redemisse proprie pro quibus satisfacit, Christi enim redemptio hoc totum, & hoc potissimum includit: certum est autem, Christum non satisfacisse pro angelis. Potest ergo Christus vere dici sanctificator, iustificator, & glorificator angelorum, non vero proprie redemptor. Unde illæ locutiones Bernard. & Dionys. supra citatæ non sunt omnino propriæ, & rigorosæ, omnem enim liberationem a peccato, *redemptionem* vocarunt, nos vero hic explicamus propriam, & rigorosam significationem verborum. Et idem ad Theodoretum dicendum est, cuius locutio magis vitanda est, quia magis redolet errorem Orig. quamquam a Theodor. in Catholico sensu explicetur, dicit enim Christum mortuum esse pro omnibus, quia *per ipsum omnia instaurantur*, ut Paul. alio loco dixit,

## Q U Æ S T I O XX.

De convenientibus Christo, secundum quod Patri fuit subiectus, in duos articulos divisa.

**D**einde considerandum est de his, quæ conveniunt Christo per comparationem ad Patrem. Quorum quedam dicuntur de ipso secundum habitudinem ipsius ad Patrem: puta, quod est ei subiectus, quod ipsum oravit, quod in sacerdotio ministravit. Quedam vero dicuntur, vel dici possent, secundum habitudinem Patris ad ipsum: puta si Pater eum adoptasset, & quod eum prædestinavit.

Primo igitur considerandum est de subiectione Christi ad Patrem. Secundo, de eius oratione. Tercio, de ipsius sacerdotio. Quarto, de adoptione, an ei conveniat. Quinto, de eius prædestinatione. Circa primum quaruntur duo.

Primo, utrum Christus sit subiectus Patri.

Secundo, utrum sit subiectus sibi ipsi.

## A R T I C U L U S I.

Utrum dicendum sit, Christum esse subiectum Patri.

**124.**  
**1. q. 42. a.**  
**4. ad 1. &**  
**q. 43. art. 7**  
**1. & 3 d.**  
**21. art. 1.**  
**2. & d. 17.**  
**art. 3. q. 1.**  
**corp. & 1.**  
**cor. 15.**  
**lec. 1. flu.**  
**Cap. 4. ha-**  
**betur hic**  
**liber in-**  
**ter opera**  
**Aug. 10. 3.**  
**q. 16. ar. 6.**  
**Libr. 3.**  
**orth. fid.**  
**e. 21. par.**  
**ante med.**

**A**d primum sit proceditur. Videtur, quod non sit dicendum, Christum esse subiectum Patri. Omne enim quod subijcitur Deo Patri, est creatura: quia, ut dicitur in lib. \* de Ecclesiasticis dogmatibus, in Trinitate nihil est serviens, neque subiectum. Sed non est simpliciter dicendum quod Christus sit creatura, ut supra dictum est, \* Ergo etiam non est simpliciter dicendum, quod Christus sit Deo Patri subiectus.

2. Præterea, ex hoc dicitur aliquid Deo subiectum, quod est eius dominio serviens. Sed humane nature in Christo non potest attribui servitus. Dicit Damasc. \* in 3. lib. Sciendum est, quod neque servam ipsam, scilicet humanam naturam Christi, dicere possumus: servitutis enim & dominationis nomina, non naturæ sunt nomina, cognitionisque signa, sed eorum, quæ ad aliquid, quemadmodum paternitatis & filiationis nomina. Ergo Christus secundum humanam naturam non est subiectus Deo Patri.

3. Præterea, Prioris ad Corinth. 15. dicitur, Cum autem subiecta illi fuerint omnia, tunc ipse filius subiectus erit illi, qui sibi subiecit omnia. Sed sicut dicitur Hebr. 2. Nunc necdum videmus omnia subiecta ei. Ergo nondum ipse est subiectus Patri, qui ei subiecit omnia.

Sed contra est, quod Dominus dicit Joann. 14. Pater major me est. At Augustinus dicit in prima de Trinitate: \* Non immerito Scriptura utrumque dicit, & æqualem Patri Filium, & Patrem majorem Filio: illud enim propter formam Dei, hoc autem propter formam servi, sine ulla confusione intelligitur. Sed minor est subiectus majori. Ergo Christus secundum formam servi est Patri subiectus.

a Respondeo dicendum, quod cuilibet habenti aliquam naturam, conveniunt ea, quæ sunt propria illi naturæ. Natura autem humana ex sui conditione habet triplicem

Suarez Tom. XVI.

subiectionem ad Deum. Unam quidem secundum gradum bonitatis, prout scilicet divina natura est ipsa essentia bonitatis: ut patet per Dionysium 1. cap. de Div. nomin. natura autem creata habet quandam participationem divine bonitatis, quasi radiis illius bonitatis subiecta. Secundo, humana natura subijcitur Deo, quantum ad Dei potestatem, prout scilicet natura humana, sicut & qualibet creatura, subiacet operationi divine dispositionis. Tercio specialiter humana natura Deo subijcitur, quantum ad proprium suum actum: in quantum, scilicet, propria voluntate obedit mandatis ejus. Et hanc triplicem subiectionem ad Patrem Christus de seipso confiteretur. Primam quidem Matth. 19. Quid me interrogas de bono? unus est bonus Deus. Ubi Hieron. \* dicit: Qui magistrum vocaverat bonum, & non Deum vel Dei Filium confessus, discit hominem, quamvis sanctum, in comparatione Dei non esse bonum. Per quod dedit intelligere, quod ipse secundum humanam naturam non pertinebat ad gradum bonitatis divine. Et quia in his: quæ non mole magna sunt, idem est esse majus, quod melius, ut August. dicit in 6. de Trinit. \* ex hac ratione Pater dicitur major Christo, secundum humanam naturam. Secunda etiam subiectio Christo attribuitur, in quantum omnia, quæ circa humanitatem Christi acta sunt, divina dispositione gesta creduntur: unde Dionysius \* dicit 4. cap. Cælest. hierar. quod Christus subijcitur Deo Patri ordinationibus. Et hæc est subiectio servitutis, secundum quod omnis creatura Deo servit, ejus ordinationi subiecta: secundum illud Sapient. 16. Creatura tibi factori deserviens. Et secundum hoc etiam Filius Dei Philippen. 2. dicitur formam servi accepisse. Terciam etiam subiectionem attribuit sibi ipse Joan. 8. dicens: Quæ placita sunt ei, facio semper. Et hæc est subiectio obediencie Patris usque ad mortem. Unde dicitur Philip. 2. quod factus est obediens Patri usque ad mortem.

Ad primum ergo dicendum, quod sicut non est simpliciter intelligendum, quod Christus sit creatura: sed solum secundum humanam naturam, si ve apponatur ei determinatio, si ve non (ut supra dictum est) ita etiam non est simpliciter intelligendum, quod Christus sit subiectus Patri: sed solum secundum humanam naturam, etiam si hæc determinatio non apponatur, quam tamen convenientius est apponere, ad evitandum errorem Arii, qui posuit Filium minorem Patre.

Ad secundum dicendum, quod relatio servitutis, & dominii fundatur super actione & passione, in quantum, scilicet, servi est moveri a domino secundum imperium. Agere non attribuitur nature sicut agenti, sed persone: actus enim suppositorum sunt & singularium, secundum Philosophum. \* Attribuitur tamen actio nature, sicut ei secundum quam persona vel hypostasis agit. Et ideo quamvis non proprie dicatur, quod natura sit domina vel serva, potest tamen proprie dici, quod qualibet hypostasis vel persona sit domina vel serva secundum hanc vel illam naturam. Et secundum hoc nihil prohibet, Christum dicere Patri subiectum vel servum secundum humanam naturam.

Ad tertium dicendum, quod sicut Augustinus \* dicit in 1. de Trinitate, tunc Christus tradet regnum Deo & Patri, quando iustos, in quibus nunc regnat per fidem, perdetur est ad speciem: ut scilicet videant ipsam essentiam communem Patri & Filio. Et tunc totaliter erit Patri subiectus non solum in se, sed etiam in membris suis, per plenam participationem divine bonitatis. Tum etiam omnia erunt plene ei subiecta per finalem impletionem sue voluntatis de eis: licet etiam modo sint omnia ei subiecta quantum ad potestatem secundum illud Matthæi ultimo: Data est mihi omnis potestas in cælo & in terra.

## C O M M E N T A R I U S.

**I**n corpore articuli explicat D. Thom. tria sub nomine subiectionis, atque adeo sub hoc titulo, comprehendendi, scilicet inæqualitatem, subiectionem, & servitutem, unde hic queritur, an Christus sit inæqualis, aut minor Patri, an sit subiectus illi, & an sit servus illius, hæc enim tria diversa sunt, nam esse minorem consistit in inæqualitate, in bonitate, seu perfectione: esse subiectum consistit in obligatione parendi præceptis alterius: esse autem servum est esse sub dominio alterius, quæ omnia comprehendit D. Thom. sub uno titulo, quia eadem ratio quæstionis, vel dubitationis est in omnibus, & quia sub hoc nomine, subiectus, omnis inferior comprehendendi potest.

N n 3

Affir-

Cap. 1. &  
med. il-  
lius.

Super il-  
lud Quid  
me inter-  
rogas de  
bono?  
10. 9.

Lib. 6. de  
Tri. c. 8.  
circa  
med. 10. 3.

Cap. 4.  
circa fin.  
illius.

Quæst. 16.  
art. 8.

Lib. 1. Mer.  
paulo  
post prin.  
tom. 3.

Lib. 1. de  
Tri. c. 8.  
ante med.  
tom. 3.

Nomen  
subiectionis  
quid  
importet.



Affirmat igitur D. Th. hæc tria in Christum convenire, quod satis clare & distincte probat testimoniis Scripturarum, & rationibus, quæ expositione non indigent. Quoniam vero de re fere nulla hic est difficultas, supposita Catholica fide de vera divinitate, & humanitate personæ Christi: sed tota difficultas est de modo loquendi: ideo D. Th. in solut. ad primum & secundum, hunc explicat. Inquit enim in illis argumentis, an simpliciter dici possint hæc prædicata de Christo, vel solum cum illa determinatione, *in quantum homo*. Et sentire videtur convenientius esse hanc determinationem adungere, propter vitandum periculum erroris, simpliciter tamen non esse necessarium, quia etiam si non ponatur determinatio, intelligitur tale prædicatum tribui Christo, secundum eam naturam, secundum quam potest illi convenire: neque in hoc ponit D. Th. ullam differentiam inter illa tria prædicata: quæ omnia proprias difficultates habent infra tractandas.

b Tertium argumentum fundatum est in verbis Pauli 1. ad Corinth. 15. *Cum autem subjecta fuerint illi omnia, tunc ipse filius subjectus erit illi, qui sibi subiecit omnia*: quibus significari videtur, filium nondum esse subjectum Patri. Et respondet cum August. lib. 1. de Trinit. c. 8. nunc quidem filium ut hominem (ita enim intelligendum est) in propria humanitate sua esse perfecte subjectum Patri, tunc autem futurum etiam subjectum in membris suis: quia licet nunc omnia sint subjecta Patri quoad potestatem, non tamen quoad plenam participationem, & perfectam obedientiam, & conformitatem cum illius voluntate, quam subiectionem tunc habebunt. Et hanc expositionem latissime prosequitur Greg. Nyss. orat. propria de hac re, ubi circa medium his paucis verbis illam concludit: *Quæ Filii dicitur subiectio, per nos fit, quippe cum ea, quæ in corpore ejus perfecta fuerit subiectio, ad eum referatur, qui in nobis gratiam subiectionis effecit*. Eandem habet Ambros. lib. 5. de fide c. 6. ubi interdum de Christo in humanitate sua pro nobis subjecto, interdum de corpore mystico, seu de Christo in nobis subjecto, Patri, locum illum explicare videtur. Clarius Orig. hom. 2. in Psal. 36. in principio. Ac denique Damasc. lib. 4. de fide. c. 19. post medium, ubi ita videtur hanc subiectionem ad nos referre, ut videatur negare Christum posse dici subjectum, sic enim inquit: *Nec Patri subiaci necesse habet: etenim quæ ratione Deus est, Patri equalis est, non autem adversarius, nec subjectus: quia autem homo nunquam Patri contumax fuit, ut ei subiectione sit opus: sed ut ex ipsa ratione, qua utitur, constat, loquitur de nova subiectione, per quam prior inobedientia, vel contumacia correctæ sit*. Tali enim, inquit, subiectio non cadit in Christum secundum propriam humanitatem: & ideo de hac subiectione loquens recte concludit: *Ex quo intelligitur eum personam nostram usurpantem, ac sese in ordinem nostrum aggregantem his verbis usum esse*. Quæ expositio optima & facilis est. Addit vero Augustinus dicto lib. 1. de Trinit. cap. 8. specialiter dixisse Apostolum, ipsummet Christum tunc esse futurum subjectum Patri, ne quisquam putaret, habitum Christi, qui ex humana creatura susceptus est, conversum iri postea in ipsam divinitatem: ac si Apostolus diceret, ita fore Christo omnia subiacienda, ut tamen ipse semper futurus sit subjectus ei, qui omnia subiecit, non quod denuo sit ei subiaciendus: sed quod in subiectione, quam nunc habet, semper perseveraturus sit. Denique addit idem Augustinus lib. 83. qu. q. 69. & significat Hilarius lib. 11. de Trinitate post medium illam locutionem Pauli intelligi posse juxta usitam phrasim Scripturæ, in qua plerumque quod semper est, tunc fieri dicitur ab aliquo, cum in eo cognosci coeperit. Tunc ergo erit Christus subjectus Patri, quia tunc perfecte omnibus innotescet, quam eximia fuerit ejus subiectio, & obedientia ad Patrem, ex qua immortalitas, & Sanctorum omnium beatitudo manavit. Sed hoc testimonium accuratius tractabimus in sequenti Tomo disputatione 58. sect. 4.

## ARTICULUS II.

Utrum Christus sit subjectus sibi ipsi.

Ad secundum si proceditur. Videtur, quod Christus non sit subjectus sibi ipsi, si. Dicit enim Cyrillus in epistola synodica \*, quam scilicet synodus Ephesina recepit: *Neque ipse Christus sibi servus est, nec dominus, fatum enim est, vel potius impium hoc sentire, vel dicere. Et hoc*

etiam asserit Damascenus \* in tercio libro dicens. Unum enim ens Christus, non potest servus esse sui ipsius, & dominus. Sed in tantum Christus dicitur servus Patris, in quantum est ei subjectus. Ergo Christus non est subjectus sibi ipsi.

Lib. 1. 6d. or. h. c. 11. parom a med.

2 Præterea. Servus refertur ad dominum. Sed relatio non est alicujus ad se ipsum: unde & Hilarius dicit in libro de Trinitate \*, quod nihil est sibi simile, aut æquale. Ergo Christus non potest dici servus sui ipsius, & per consequens nec sibi esse subjectus.

Lib. 3. non multum remote ante finem.

3 Præterea: Sicut animarationalis & caro unus est homo, ita Deus & homo unus est Christus, ut Athanasius \* dicit. Sed homo non dicitur subjectus sibi ipsi, vel servus sui ipsius, aut major seipso propter hoc, quod corpus ejus subjectum est anima. Ergo neque Christus dicitur subjectus sibi ipsi propter hoc quod ejus humanitas subjecta est divinitati ipsius.

In suo simbolo fidei.

Sed contra est, quod Augustinus \* dicit in primo de Trinitate. Veritas ostendit secundum istum modum, quod scilicet, Pater major est Christo secundum humanam naturam, etiam se ipso minorem Filium.

Lib. 1. c. 7. ante medium to 3

2 Præterea: Sicut ipse argumentatur ibidem, sic accepta est a Filio Dei forma servi, ut non amitteretur forma Dei, sed secundum formam Dei, quæ est communis Patri, & Filio, Pater est filio major secundum humanam naturam. Ergo etiam Filius est major se ipso secundum humanam naturam.

3 Præterea. Christus secundum humanam naturam est servus Dei Patris, secundum illud Joannis vigesimo, *Ascendo ad Patrem meum, & Patrem vestrum, Deum meum, & Deum vestrum*. Sed quicumque est servus Patris est servus Filii: alioquin non omnia quæ sunt Patris essent Filii. Ergo Christus est servus sui ipsius, & sibi subditus.

a Respondeo dicendum, quod (sicut dictum est \*) esse dominum, & servum attribuitur personæ, vel hypostasi secundum aliquam naturam. Cum ergo dicitur Christus esse dominus, vel servus sui ipsius, vel quod Verbum Dei est dominus hominis Christi, hoc potest intelligi dupliciter. Uno modo, ut intelligatur hoc esse dictum ratione alterius hypostasis, vel personæ, quasi alia sit persona Verbi Dei dominantis & alia hominis servientis: quod pertinet ad hæresim Nestorii. Unde in condemnatione Nestorii dicitur in synodo Ephesina: \* *Si quis dicit Deum, vel dominum esse Christi ex Deo Patre Verbum, & non magis eundem ipsum confiteri simul Deum & hominem, ut potest Verbum factum carnem: secundum Scripturas, anathema sit. Et hoc modo negatur a Cyrillo, & Damasceno \*.* Et sub eodem sensu negandum est, Christum esse minorem seipso, vel esse sibi subjectum. Alio modo potest intelligi secundum diversitatem naturarum in una persona vel hypostasi. Et sic dicere possumus secundum unam earum, in qua cum Patre convenit, simul eum cum Patre præesse, & dominari: secundum vero alteram naturam, in qua nobiscum convenit, ipsum subesse & servire. Et per hunc modum dicit August. \*, *Filium esse seipso minorem*. Sciendum tamen, quod cum hoc nomen, Christus, sit nomen personæ, sicut & hoc nomen Filius, illa per se & absolute possunt dici de Christo, quæ conveniunt ei ratione sue personæ, quæ est æterna: & maxime hujusmodi relationes, quæ magis proprie videntur ad Personam vel hypostasim pertinere. Sed ea, quæ conveniunt sibi secundum humanam naturam, sunt ei potius attribuenda cum determinatione, ut videlicet dicamus Christum esse simpliciter maximum, & dominum, & præidentem: quod autem sit subjectus, vel servus, vel minor, est ei attribuendum cum determinatione, scilicet, secundum humanam naturam.

In Conc. 1. Ephesino cui præfuit Cyrillus can. 6.

Locis in argum. citatis.

Ad primum ergo dicendum, quod Cyrillus & Damascenus negant, Christum esse dominum sui ipsius, secundum quod per hoc importatur pluralitas suppositorum, quæ requiritur ad hoc, quod aliquis simpliciter sit dominus alicujus.

Locis in argum. citatis.

Ad secundum dicendum, quod simpliciter quidem oportet esse alium dominum, & alium servum: potest tamen aliqua ratio domini, & servitutis servari, prout idem est dominus & servus sui ipsius, secundum aliud & aliud.

Ad tertium dicendum, quod propter diversas partes hominis, quarum una est superior, & alia inferior, dicit etiam Philosophus in 5. Ethicorum \* quod est hominis ad se ipsum justitia, in quantum irascibilis & concupiscibilis ob-

Lib. 5. Eth. 4. ult. to 3

ob-

366.  
In sy. ob.  
1. 1. 1. 1.  
m. 1. 1. 1.  
Nestor. in  
medio il  
lud.



*obediunt rationi. Unde per hunc modum etiam unus homo potest dici sibi subiectus & serviens, secundum diversas sui partes.*

*Ad alia autem argumenta patet responsio ex dictis. Nam Augustinus\* asserit Filium se ipso minorem esse, vel sibi subiectum, secundum humanam naturam, non secundum diversitatem suppositorum.*

## COMMENTARIUS.

**Q**uæstio huius articuli fere eadem est cum quæstione articuli præcedentis, solumque est a D.Th. proposita: tum ad conciliandam diversam Sanctorum dicta: tum ut doceret, maiorem circumspeditionem in locutione hac servandam esse, quoniam hæc relationes, *subiecti, minoris aut servi*, videntur distinctionem suppositorum requirere, & indicare. Et ideo respondet, has locutiones simpliciter non esse usurpandas propter dictam causam, & ita exponit Cyrillum & Damascenum, quos citat, cum illo vero addito, *in quantum homo*, dicit esse admittendas, cum Augustino lib. 1. de Trinit. c. 7. & 8.

**Dubium.** Solum potest circa litteram huius articuli dubitari de sensu cuiusdam regulæ, quam in fine corporis D. Th. adiungit. Dicit enim, relationes, quæ conveniunt Christo ratione suæ personæ, simpliciter & sine addito esse de illo prædicandas, ut esse Dominum, superiorem, &c. relationes vero, quæ illi conveniunt ratione humanæ naturæ, esse prædicandas cum determinatione prædicta: aut enim D.Th. hoc intelligit de his prædicatis, quando simpliciter dicuntur sine explicatione alicujus termini: & hoc modo nulla est differentia, quia sicut Christus dicitur simpliciter dominus, ita potest dici simpliciter subiectus juxta dicta articulo præcedenti: aut loquitur de his prædicatis, quando in illis explicatur terminus, qui sit ipsemet Christus, ut in præsentis articulo tractatur quæstio: & in hoc sensu nulla est differentia, quia sicut Christus non potest simpliciter dici subiectus sibi sine addito: ita nec potest dici dominus sui sine determinatione, est enim eadem ratio, quia non minus una relatio, quam altera, indicat distinctionem suppositorum, & ideo necessaria est determinatio naturæ, per quam hic error excludatur. Respondetur cum Cajetano regulam intelligendam esse in priori sensu, nam in posteriori nulla est differentia, ut ratio facta concludit, in priori autem sensu potest variis modis intelligi. Primo, ut illa differentia non fundetur in necessitate simpliciter, seu in rigore propositionum, sed ut convenienti modo loquamur ad vitandum periculum erroris, & hoc quidem est verum, sed non satis rem explicat. Secundo, ut semper, & in omnibus locutionibus necessaria sit illa differentia, seu determinatio, ut propositio in rigore vera sit. Et hoc non videtur necessarium, nec ad mentem D.Th. ut art. præced. colligitur, & ex dicendis constabit. Tercio sensus esse potest, prædicata significantia relationem convenientem Verbo ratione divinitatis, seu personæ suæ, semper, & in universum posse dici simpliciter, & absolute de Christo: alia vero, quæ significant subjectionem, vel aliam similem imperfectionem, non semper dicenda esse simpliciter de Christo, sive hoc sit propter rigorem sermonis sive propter vitandum periculum, utroque enim modo contingere potest, ut dicemus.

## DISPUTATIO XLIII.

In quatuor Sectiones distributa.

*De subiectione, & obedientia Christi & præceptis, quorum est capax.*

**E**X tribus illis prædicatis, quæ D. Thomas in his articulis attingit, scilicet *minor, subiectus, servus*, primum nullam difficultatem habet, quæ in re posita sit, & ad præsentem disputationem pertineat. Quod enim Christus ratione personæ suæ, & propriæ naturæ divinæ non sit minor Patri, sed æqualis illi, non hoc loco, sed in materia de Trinitate ex professo tractandum est, & in disp. 2. huius materiæ, quæ præsentis negotio sufficere videbantur diximus: quod autem Christus ratione humanitatis, & secundum illud esse, quod ab illa habet, sit minor Pater, & se ipso ut Deo, nullus dubitare potest. Quandoquidem constat, humanam naturam esse inferiorem divinæ, ut ipsemet Christus confessus est Joann. 14. *Pater major me est*, juxta veriorum, & communiorum expositionem. Alia enim expositio quorundam Græcorum, qui

Suarez. Tom. XVI.

de persona divina ratione originis hoc intelligunt, minus propria est, & pie explicanda, ut latius in materia de Trinitate dicendum est. Quod vero pertinet ad modum loquendi, existimo, illam locutionem, Christus est minor Pater, non esse sine sufficienti determinatione usurpandam, in illo enim loco Joan. 14. satis ex circumstantiis constabat, Christum de se ut homine loqui: sic enim inquit: *Si diligeretis me, gauderetis utique, quia vado ad Patrem, quia Pater major me est*: discedebat enim ab eis secundum humanitatem, & secundum illam ad Patrem ibat, & eodem sensu illum, maiorem se appellat: requiritur ergo determinatio, non solum propter vitandum periculum erroris, sed etiam in rigore sermonis, quia si simpliciter fiat comparatio, in rigore fit inter personas, vel inter illud totum, quod Christus est, & Patrem, in quo sensu non potest dici simpliciter minor. Item, quia hæc locutio: *Verbum aut Filius est minor Pater*, simpliciter falsa est, sine ulla dubitatione: ergo nec Christus dicendus est simpliciter minor, quia nulla est ratio, cur dicamus hoc prædicatum, *minor*, habere eam vim limitandi subiectum, ut formaliter pro Christo tantum ut homine supponat. Addatur ergo determinatio, quæ multo magis necessaria erit, si comparatio fiat ad personam Verbi seu Filii, ut ex dictis circa art. 2. constat. Solum potest obistere autoritas D. Thomæ hic art. 1. ad primum, ubi tantum ait, convenientius esse apponere determinationem ad evitandum errorem Arian, qui posuit Filium minorem Patre. Ac deinde sumi potest argumentum, quia nulla apparet specialis ratio, ob quam non possit de Christo simpliciter dici esse minorem Patre aut Deo, sicut alia prædicata ab humanitate sumpta simpliciter de illo enunciantur. Respondetur ad D. Thom. asserere quidem esse convenientius determinationem apponere, non negare autem, ex vi & rigore sermonis esse necessarium, neque hoc examinasse, sed omisisse tanquam rem minoris momenti. Vel certe ita locutus est, quia non semper est necessarium explicite addere determinationem illam, sed satis est, quod ex antecedentibus & consequentibus colligatur, nam illa est quædam virtualis & implicita determinatio: tamen quia hoc interdum est ambiguum, ait D. Thomas convenientius esse, regulariter loquendo, determinationem addere. Ad rationem ex his, quæ diximus, facile colligi potest differentia inter hoc prædicatum & alia. Quæ dupliciter potest declarari. Primo, quia hoc prædicatum, *minor*, est relativum & comparativum: unde absolute Christo attributum respectu Patris comparat totum id, quod est Christus, cum Patre, & affirmat esse aliquid minus illo, quod simpliciter falsum est, quia in Christo aliquid est, quod non est minus, quam Pater. Secundo, & clarius (quamvis in re idem sit) quia prædicatum *minor*, includit negationem repugnantem supposito Christi: prædicata autem, quæ sunt huiusmodi, vel nullo modo attribui possunt Christo, etiam cum determinatione, ut, *homo*, si fortasse illa non sufficiat ad impediendam vel tollendam illam negationem, sicut contingit in hoc prædicato, *filius adoptivus*, ut suo loco dicetur. Vel saltem non enunciantur de Christo sine determinatione, ut, *homo*, quando illa sufficit ad limitandam negationem ad esse humanum, ut contingit in hoc prædicato, inceptum esse, vel in hac voce, *creatura*, rigorose sumpta. Ita ergo est in præsentem, nam minor includit negationem æqualis: imo illa negatio est veluti fundamentum aut proxima conditio fundans illam relationem: hæc autem negatio repugnat Verbo divino; unde nullus, ut existimo, concedet hanc locutionem simpliciter & sine addito, *Christus non est æqualis Patri*, cum determinatione autem, *in quantum homo*, recte conceditur, quia limitatur negatio ad esse humanum: idem ergo est de prædicato *minor*. Alia vero prædicata ab humanitate sumpta, non semper includunt negationem similem, ut constat ex supra dictis q. 16. Et signum, quod supra adduxi, recte declarat hanc differentiam, nam alia prædicata, quæ dicuntur de Christo simpliciter sub nomine Christi, dicuntur etiam sub nomine Verbi, aut Filii Dei, vel Dei, regulariter loquendo, ut esse passum, mortuum &c. At vero in præsentem de Verbo aut Filio Dei non potest absolute dici non esse æqualem, aut esse minorem Patre. Quis enim audeat ita loqui? Signum ergo est, inter hæc & alia prædicata humanitatis esse aliquam differentiam, ob quam non possint illa in rigore dici de Christo

N n 4

sim-



simpliciter, sed tantum cum determinatione, ut homo. Omissa ergo relatione *minoris*, seu *inequalis*, de aliis duabus, *subjectionis*, & *servitutis*, sigillatim disputandum est, quia aliquo modo distinguuntur, & proprias difficultates habent, ut videbimus. Quia vero *subjectio* relationem quandam dicit ad præceptum, & obedientiam, consistit enim *subjectio* in capacitate præcepti, & ad illud proprie dicit relationem qui potest præcipere, unde proprius actus personæ subjectæ, ut sic, est obedire, ideo de his omnibus hoc loco dicendum est, & prius erit res ipsa explicanda, scilicet, quo modo Christus capax præcepti fuerit, & quibus præceptis fuerit subjectus, & deinde modum loquendi breviter explicabimus.

## S E C T I O I.

*Utrum Christus Dominus fuerit capax præcepti, cui esset subjectus.*

**R**atio dubitandi est, quia præcepta habent vim coactivam, unde illud directe cadit sub præceptum, ad quod lex cogit: ut D. Th. docet 1.2.q.90.art.3. ad 2. & q. 100.art.9. & ideo nullus potest imponere legem, nisi qui potestatem habet coactivam, ut efficaciter possit inducere ad observationem legis, ergo solus ille est capax præcepti, qui subdi potest virtuti coactivæ, hoc autem Christo repugnat, ergo. Confirmatur primo, & explicatur, quia obligatio præcepti includit hanc divinam comminationem, si hoc non feceris, eris mihi inimicus. Sed hæc moraliter fieri non potest, nisi ad eum, qui potest fieri inimicus, quod Christo repugnat, ergo similiter illi repugnat vera, ac propria obligatio legis, & præcepti. Unde confirmatur secundo, quia Christus est impeccabilis ab intrinseco, & ex natura sua, ergo non est capax præcepti. Patet consequentia, quia præceptum obligat sub reatu culpæ; hæc vero obligatio non cadit nisi in eum, qui est capax culpæ. Tandem confirmatur, quia Christus est supremus dominus: habet ergo potestatem dispensandi in omni lege, poterat ergo secum dispensare, non ergo obligatur.

Propter hæc nonnulli opinati sunt, Christum non esse capacem præcepti. Distinguunt tamen inter præceptum, & mandatum, ut præceptum sit vera lex, veram obligationem inducens, cuius transgressio, iustitiæ seu obedientiæ contraria sit, mandatum vero latius patet, & significat non solum rigorosum præceptum sed etiam quamcumque directionem, seu regulam, quæ aliquid mandat, seu potius ordinat, aut commendat tanquam conveniens, seu melius: quæ distinctio fundamentum habet in D. Th. 1.2.q.99.art.5. ubi ex Hieron. refert, in præceptis esse iustitiam, in mandatis charitatem: quod dictum habetur in Glossa ordinaria in proemio in Marcum. Dicitur autem præceptum continere iustitiam, quia continet jus superiori debitum, & ejus observantia ad rectitudinem morum necessaria est: mandatum vero dicitur continere charitatem, quia ejus observantia non est in rigore necessaria, nec fundatur in jure superiori debito, sed in quadam amicitia, seu perfectione. Habet etiam hæc distinctio fundamentum in Chryf. Theophyl. & aliis sectione ultima citandis. Dicunt igitur Christum non esse capacem proprii præcepti, quia non est capax propriæ obligationis, ut rationes factæ videntur probare: dicunt tamen fuisse capacem mandati: tum propter testimonia Scripturarum infra citanda: tum quia per modum directionis potuit intelligere, quid Deo esset gratius, ut illud quasi commendatum haberet ad volendum, & exequendum.

Ut tamen certo constet, de quo sit disputatio, suppono, quæstionem hanc tractari de proprio præcepto, ut a consilio distinguitur, & est vera lex superioris: hoc enim vox ipsa in rigore significat: & idem significat vox, *mandatum*, ut constat ex omnium Latinorum usu, alia enim significatio minus propria est & non adeo usitata. Est autem de ratione proprii præcepti & legis ut obligationem inducat, quæ obligatio necessitatis interdum appellatur, & debitum ut constat ex D. Th. 1.2.q.90.art.4. ubi ait, esse proprium legis habere virtutem obligandi, & 2.2.q.104.art.4.5. & 6. ait, præceptum includere quandam iustitiæ necessitatem: & idem significat hæc 3.p.q.47.art.2. ad secundum. Idem Cajet. 2.2.q.104.art.1. ad finem, Durand. in 1.dist.37.q.40.n.14. & 15. Et a posteriori declaratur, quia non est aliud, in quo possit præceptum a consilio distingui, præsertim quando ab eodem legislatore, vel consultore, Deo nimirum, manant. Nam per consilium

Deus dirigit alium ad id faciendum quod consulit ei: quæ suum iudicium manifestat, quod id melius esse iudicat; imo & suam voluntatem ad id magis propensam ostendit; solumque deficit a ratione præcepti, quia per consilium non intimat Deus homini talem voluntatem suam, quia vellet illum obligare ad id faciendum quod consulit: ergo hæc voluntas est de ratione legis, sive in illa consistat formaliter lex, sive tantum sit radix & quasi anima legis: vis ergo obligandi, & inducendi debitum seu obligationem est de ratione legis. Atque hoc modo distinguere videtur consilium a præcepto Paulus 1. Cor. 7. cum enim dixisset, *De virginibus præceptum Domini non habeo, consilium autem do*, subdit inferius *Qui statuit in corde suo, non habens necessitatem*: scilicet, quam præceptum inducit: *potestatem autem suæ voluntatis*, scilicet eligendi id quod consulitur, servandi v. g. virginitatem. Atque ita hunc locum, & hanc differentiam declararunt Cypr. serm. de Nativ. Christ. in fine Aug. l. de S. virgine. c. 30. & lib. 1. de adult. conjung. c. 14. & 15. Amb. ep. 82. longe ante med. Hieron. ep. 22. ad Eustoch. de servan. virgin. parum ante med. & lib. 1. con. Jovinian. aliquantulum a principio, Chryf. hom. 63. in Mat. & omnes Pauli expostores loco citato.

Ac denique a priori declaratur, nam actus consilii per se non est actus superioris, quia non est actus jurisdictionis, & idem est de quacumque voluntate vel desiderio, quo unus velle potest, ut alius hoc faciat, aut velit, sola autem voluntas obligandi, & præceptum ab ea manans, & intimans seu inducens obligationem, est proprie actus superioris habentis jurisdictionem in subditum, ad determinandum illum moraliter ac politice ad aliquid faciendum: hoc autem non facit, nisi obligando & quasi coarctando illum ad id quod præcipit, ut non possit aliud jure seu honeste facere.

Ex quo infero, de ratione proprii præcepti esse, ut ejus transgressio vel omissio, libera ac sufficienter voluntaria, peccaminosa sit & prava. Loquor autem de proprio præcepto, ut omittam legem pure poenalem, vel regulam pure directivam, formaliter vel virtualiter obligantem ad poenam, quia vel hæc non sunt proprie leges, sed pacta quædam seu conventiones, quibus subjiciuntur tali poenæ, qui hoc fecerint, etiam si in eo non peccent: vel, si leges sunt, non obligant determinate ad talem actum, sed ad hoc disjunctum, vel ad faciendum actum, vel, si non fecerint, ad penam impositam acceptandam & solvendam. Illis autem præmissis quæ in Christo locum non habent, non potuit illi verum præceptum imponi, quin veram obligationem inducere, & necessitatem moralem talis actus, vel bonitatis ad bonos mores, ut q. etiam 18. tractatum est. Quapropter fieri non potuit ut imponeretur præceptum verum, quin consequenter induceretur necessitas servandi illud ad vitandam culpam, ac Dei inimicitiam, si præceptum intelligatur esse de re gravi, & in hoc consistit difficultas tacta, quod in hoc præcepto includitur comminatio, nisi hoc feceris, privaberis divina amicitia, quæ videtur indecens respectu Christi.

Nihilominus tractando de præcepto in hac proprietate sumpto, dicendum est, Christum hominem proprie, & vere fuisse capacem præcepti quoad vim directivam ejus, & obligationem faciendi, quod lex præcipit, & vitandi quod prohibet. Hæc est sine dubio sententia D. Th. hoc loco, & infra q. 47. & communis, ut ex iis, quæ in sequentibus dicemus, plane constabit: & videtur posse sumi ex 6. Synod. act. 17. in definitione fidei, ubi definiuntur duæ Christi voluntates non contrariæ, quia voluntas humana non resistebat, nec reluctabatur, sed subjecta erat divinæ voluntati, *Oportebat enim, inquit, carnis voluntatem moveri, subjicereque voluntati divinæ juxta sapientissimum Athanasium*. Potest etiam ex sacra Scriptura probari. Psalm. enim 39. de Christo dicitur, ut Aug. Euthym. & alii, imo & Paul. ad Hebr. 10. exponunt, *In capite libri scriptum est de me, ut faciam voluntatem tuam, Deus meus, volui, & legem tuam in medio cordis mei*, & alia plura, & urgentiora asseremus infra agentes de speciali præcepto moriendi pro hominibus. Ratione probatur primo, quia voluntas Christi humana, non erat sibi regula suorum actuum, habebat enim superiorem, a qua poterat dirigi, & gubernari, ergo Christus secundum hanc voluntatem humanam, poterat a superiori recipere talem regulam suorum actuum, ut ad honestatem mori

Quid di  
sci minis  
inter con  
siliu. &  
præceptū  
versetur.

Christus  
quemodo  
capax  
præcepti.



necessarium esset illi se conformare, hæc autem regula est lex, seu præceptum, ergo. Secundo, Christus ut homo, est subiectus Patri, ergo subijci potest legibus ejus. Quo argumento tacite concedit, & concludit D. Th. 1. 2. q. 93. artic. 4. ad 2. Christum ut hominem esse subiectum legi æternæ: antecedens probatur a D. Th. hic, & inferius tractabitur. Nunc breviter declaratur: quia Christus ut homo est creatura, ergo subiecta creatori, illud enim dicitur subiectum, quod est sub potestate alterius, nihil autem magis est sub alterius potestate, quam creatura sub creatore. Rursus, non est quæcumque creatura, sed rationalis, ergo subijcitur ut creatura rationalis, & libera libertate creata, propria autem subiecto hujus creaturæ est, ut præcepto superioris subdatur. Tertio, in Christo Domino fuerunt virtutes creatæ, etiam illæ, quæ respiciunt superiorem, habuit enim veram religionem, qua Patrem colebat, & ad illum orabat, veram humilitatem, verum timorem, & similia, ut in superioribus ostensum est: ergo & veram, & propriam obedientiam, est enim eadem ratio, præsertim cum Scriptura sacra hanc virtutem in illo maxime commendat, quæ proprie intelligenda est, cum commode possit: vera autem, ac propria obedientia non est, nisi ubi potest intervenire præceptum.

Responsio  
ad argum.

Neque contra veritatem hanc obstant rationes factæ. Ad primam enim respondetur primo, de ratione præcepti tantum esse, ut faciat actum necessarium ad rectitudinem, & honestatem virtutis, & hæc proprie dicitur vis directiva præcepti, vis autem coactiva, quæ respicit comminationem poenæ, non est per se, ac simpliciter necessaria ad præceptum. Quia in præcepto per se tantum est intentio moralis determinatio & directio ad actus morales: hæc autem sufficienter fit per intimationem voluntatis superioris inducentis obligationem. Igitur comminatio per se necessaria non est ad præceptum, sed, ad summum, secundario ad illud pertinet: & accommodari debet juxta capacitatem ejus, cui imponitur præceptum, unde si ille non est capax transgressionis, nulla coactione, aut comminatione poenæ indiget, & ideo in eo potest habere locum præceptum quoad vim directivam sine coactiva, sic enim interdum princeps obligatur suis legibus quoad vim directivam, non tamen quoad coactivam: & in Beatis sunt præcepta sine ulla comminatione.

Vis coactiva non  
est de necessitate  
præcepti.

Secundo dicitur ad argumentum, simul cum prima confirmatione, in præcepto præsertim divino contineri in virtute illam comminationem, quæ per illam conditionalem explicatur, *Nisi hoc feceris, eris mihi inimicus*: non est tamen necesse, ut formaliter, & directe fiat talis comminatio. Ut autem Christus sit capax præcepti virtute continentis comminationem illam, satis est, ut natura ejus humana secundum se considerata, & prout esse posset in proprio supposito, sit capax illius status, & poenæ, quæ per illam conditionalem explicatur: vel certe satis est, ut talis natura habeat aliam superiorem, cujus voluntatem respicere debeat tanquam regulam suæ voluntatis. Nam ex hoc fit, ut a superiori illa voluntate præscribi possit aliquid, ut necessarium ad honestatem morum, seu ad charitatem conservandam, in quo in virtute continetur illa conditionalis: quamvis ipsa ratio præcepti melius, & formaliter explicetur per hanc affirmativam, & absolutam propositionem, hoc præscribitur per præceptum tanquam necessarium ad virtutem seu charitatem, quam per illam conditionalem, seu negativam. Si hoc non feceris, non eris mihi amicus.

Unde ad secundam confirmationem respondetur, Christum esse impeccabilem ratione suppositi, voluntatem autem humanam ejus ex se, & ex natura sua non esse impeccabilem, & hoc satis esse, ut sit capax præcepti: quamvis enim sit unita Verbo, semper tamen manet inferior, & subdita, licet per ipsammet superiorem voluntatem ita gubernetur, ut non possit a bono deficere.

Ad ultimam confirmationem primum dicitur, quædam præcepta esse omnino indispensabilia: deinde non sequi, potest secum dispensare, ergo non tenetur legibus. Princeps enim suis legibus obligatur, & tamen potest secum dispensare sicut cum aliis, imo ex dispensatione possibile, potius infertur obligatio legis, quia non habet locum dispensatio, nisi ubi intercedit obligatio. Tandem (quod ad rem spectat) licet Christus ut Deus, sit supremus omnium dominus, & ideo ut sic non sit capax præcepti: tamen Christus ut homo, non habet supremum do-

minium per voluntatem humanam, imo secundum illam non potest non esse sub potestate alterius, & ideo ejus legibus subdi potest.

## SECTIO II.

*Quibus legibus fuerit Christus subiectus, vel subijci potuerit.*

Hæc quæstio præsertim tractanda est, de divinis legibus: nam hoc loco præcipue agimus de subiectione Christi ad Deum: tamen per occasionem, & ad complementum materiæ, dicendum etiam de legibus humanis: lex autem divina duplex est: altera naturalis, altera positiva, quæ dividi ulterius potest in legem communem, seu generaliter Ecclesiæ, aut populo Dei propositam, ut fuit lex vetus, & est nunc lex gratiæ, & in specialem, ut si Christus habuit aliquod speciale præceptum sibi impositum. De hoc dicemus sect. sequent. cætera hic breviter expediri possunt.

Lex divina  
quodam  
plex.

Dico ergo primo. Christus Dominus subiectus fuit legi Dei æternæ, seu naturali. Ita docet S. Thom. 2. 2. q. 93. ar. 4. ad 2. ubi de æterna lege loquitur, sed est eadem ratio de naturali. Et eam docet late Joan. Medina, Codice de poen. tract. 3. q. 1. ubi licet in aliis multis de merito, & satisfactione Christi minus digne sentiat: in hoc tamen bene loquitur, immerito tamen existimat hanc obligationem repugnare cum perfecta satisfactione de rigore justitiæ, ut satis dictum est in q. 1. art. 2. Probatur ergo conclusio, quia Christus tenebatur amare Deum, & non mentiri, & vitare alia quæ sunt intrinsece mala.

Dices. Etiam mentiri, vel esse infidelem in promissis servandis, est intrinsece malum respectu divinæ voluntatis, & tamen non propterea Deus obligatur præcepto, sed voluntas ejus natura sua abstracta est, & omnino aliena ab omni hujusmodi malo. Respondetur, hinc recte sequi, voluntati Christi ex vi & natura talium objectorum necessarium esse ad honestatem morum, ea vitare, quæ sunt intrinsece mala, etiam si per intellectum præscindamus omnem legem superioris, quod commune est Christo cum aliis omnibus, qui ratione utuntur, ut latius in 1. 2. tractatur. Ex hoc tamen ulterius sequitur, voluntatem Christi humanam, eo quod inferioris ordinis est, & superiorem habet, teneri ex præcepto superioris, quod per naturalem rationem illi manifestatur, hæc omnia mala vitare, vel contraria bona facere, quia hæc obligatio est quasi proprietas intrinseca, & connaturalis rationali naturæ, quæ superiorem habet, cujus gubernationi, & providentiæ subdita sit. Et hæc conclusio procedit tam de pura lege naturali, quæ consideratur respectu humanæ naturæ præcise sumptæ, quam de lege supernaturali, quæ connaturalis est gratiæ, seu naturæ ut elevatæ per gratiam, & supernaturalem cognitionem, est enim eadem ratio de utraque. Nec vero est quod inquiramus, an potuerit Christus non obligari hac lege naturali, vel an potuerit cum eo in hoc dispensare, non enim magis potuit hæc obligatio a Christo homine, quam ab aliis hominibus sejungi, quia (ut dixi) est quasi naturalis proprietas consequens humanam naturam. An vero naturalis lex simpliciter auferri possit, aut dispensari, non est hoc loco disputandum, cum in materia de legibus proprium habeat locum.

Obje. 2.

Responsio.

Dico secundo, Christus Dominus nullis humanis legibus subiectus fuit, quamvis de absoluta Dei potentia, subiectum esse non repugnaverit. Prior pars probatur optime illa ratione, quia Christus etiam in humanitate sua habuit dominium, & jus superioris ordinis super omnes homines per potestatem excellentiæ, ut latius infra q. 2. 2. dicturi sumus: non ergo magis potuit humanis legibus obligari, quam possit Rex lege lata ab aliquo sibi subdito obligari. Unde Matth. 17. de legibus tributorum agens ipse conclusit, *ergo liberi sunt filii*: quem locum Patres omnes de Christo intelligunt, & ex illo colligunt Theologi in 2. & 44. Christum non fuisse subiectum regibus temporalibus. De quo videri potest D. Th. ibi. q. 2. art. 2. Bonav. art. 3. q. 1. Soto in 4. d. 25. q. 2. art. 1. Turrecremata lib. 4. sum. p. 4. c. 37. ubi refert, Joannem XXII. contrariam sententiam, quæ fuit Marfilii Patavini, erroris damnasse. Et hæc conclusio magis constabit ex dicendis in conclusione sequenti.

Christus  
immunus  
legum  
humanarum.

Sed contra, quia Christus tenebatur obedire Matri, cui

Obje. 3.



**Responſio.** cui erat ſubditus, Luc. 2. Reſpondetur, ſponte ſua ſe illi ſubdiſſe ſicut Joſepho. jure tamen, & in rigore non fuiſſe obligatum, quia poteſtas excellentiæ & juridiſſio, quam Chriſtus habebat, etiam in matrem ſuam, & erat ſuperior & altioris ordinis. Dices. Ergo non tenebatur Chriſtus illa lege naturali, qua obligantur filii colere parentes, & obedire illis, quod eſt contra præcedentem conſuſionem. Reſpondetur, ſimpliciter negando conſequen-  
**Chriſtus quomodo matri ſubjeſtus,** tiam, tenebatur enim Chriſtus pietatem ſervare reſpectu matris: tamen quia hoc præceptum affirmativum eſt, non ſemper obligat, neque eodem modo, neque ad eodem actus, ſed juxta occurrentes circumſtantias, & quia hæc in Chriſto erant multo alterius rationis, quam in aliis hominibus, ideo diverſo modo obligari potuit illo præcepto.

Dico tertio. Chriſtus Dominus non fuit ſubjeſtus illis divinis legibus poſitivis, quæ pro univerſa Eccleſia, aut Iſraelitico populo datæ ſunt. Declaratur, quia hæc lex tantum eſt duplex, nova, & vetus: de nova facile probatur, quia ipſemet Chriſtus fuit autor, & legiſlator hujus legis, Conſiderandum vero eſt legiſtatores humanos interdum obligari legibus ſuis, quando illæ verſantur in materia æque ad ipſos legiſtatores pertinente, ſive hoc ſit, quia ſub hac conditione cenſentur accepſſe poteſtatem ferendi leges, ſive quia lex naturalis eos ſubjicit talibus legibus, eo ipſo quod ſunt ejusdem ſtatus, & conditionis cum aliis, ad quos leges feruntur; in Chriſto autem Domino hoc non habet locum reſpectu legis novæ a ſe conditæ: tum quia non ſub hac conditione accepit poteſtatem legiſlativam, quæ in ipſo fuit alterius, & excellentioris rationis: tum quia non habuit ſtatum ejusdem rationis cum ſubditis ut ad illum talis lex pertinere poterit. Quod ita etiam declaratur, quia quando lex Principis reſpicit ſubditos, ut ſubditi ſunt, ut eſt v.g. lex de ſolvendis tributis, talis lex non obligat Principem: ſed ad hunc modum proportionaliter eſt in præſenti, nam lex gratiæ a Chriſto lata reſpicit homines ut peccatores, ſeu ut viatores, atque adeo exiſtentes in inferiori ſtatu.

Igitur ſolum ſuper eſt, ut de veteri lege hanc conſuſionem probemus, non enim deſuerunt qui dicerent Chriſtum fuiſſe legi veteri obnoxium, atque adeo obligatum ad ſervandam illam. Ita tenet Joan. de Medina ſupra, cui videntur favere verba ipſius Chriſti Matth. 5. de ſe dicentis: *Non veni ſolvere legem ſed adimplere*, & Paulus ad Galat. 4. dicens, *miſiſſe Deum filium ſuum factum ſub lege*. Favent etiam Athan. diſputatione cum Ario circa finem, quæ habetur tom. 4. & Cyril. Alexand. lib. 2. de Fide ad Regi. longe poſt medium, & epistol. ad monachos Ægypti ſub finem, quæ habentur in 1. tom. Concil. Ephes. cap. 1. & 5. qui dicunt Chriſtum fuiſſe ſubditum legi. Et probatur ratione; quia illa lex generaliter fuit lata pro omnibus hominibus Iſraelitici populi, per circumciſionem ad Dei populum aggregatis: unde eſt illud Pauli ad Galat. 5. *Teſtificor omni homini circumcidenti ſe, quia debitor eſt univerſe legis faciendæ*, ſed Chriſtus fuit de illo populo, & circumciſus, ergo fuit ſub illa lege comprehenſus, nullibi enim legimus illum fuiſſe ſpecialiter exemptum, aut cum illo diſpenſatum, ne illa lege teneretur.

Nihilominus veriſſimam cenſeo aſſertionem poſitam, quæ videtur eſſe ſententia D. Th. infr. q. 37. art. 3. & 4. ubi ſimpliciter negat, Chriſtum fuiſſe obnoxium veteri legi, & idem dicit de B. Virgine quoad ea, quæ ad Filium pertinebant, & q. 40. art. 4. licet dicat Chriſtum Dominum ſemper ſervaviſſe legem veterem: non tamen ex obligatione, ſed propter alias congruentias, quas ibi adducit. Pro eadem ſententia multa congerit Joannes Arboreus lib. 3. Theoph. c. 6. Idem docuit Soto in 4. diſt. 2. q. 1. art. 3. in fine, qui optimam rationem indicat, nam illa lex data eſt populo Judæorum pro ſe, & ſua poſteritate, ſub qua ſolum comprehenduntur poſteri, quia via ordinaria, & per ſeminalem rationem a progenitoribus deſcendunt, ergo Chriſtus, qui hoc modo genitus non eſt, non eſt ſub illa lege comprehenſus. Quod explicatur, & confirmatur a ſimili, quia præceptum datum Adæ pro ſe, & poſteritate ſua in illo, ut in capite contenta, non comprehendit Chriſtum, ſicut nec tranſgreſſio ejus, quia Chriſtus non continebatur in Adam ſecundum ſeminalem rationem, ſed ſolum ſecundum corpulentam ſubſtantiam: ergo ſimiliter præceptum de circumciſione datum Abraham & poſteritati ejus, non comprehendit Chriſtum, quia in ſemine ejus non continebatur ſecundum

ſeminalem rationem: ergo pari ratione non fuit Chriſtus obnoxius univerſæ legi Moſaicæ.

Dicit fortasſe aliquis, argumentum recte concludere ſimpliciter & absolute loquendo: non tamen ſuppoſita circumciſione, quam Chriſtus aſſumpſit, nam per eam videtur ſe obnoxium reddiſſe univerſæ legi faciendæ, juxta teſtimonium Pauli ſupra citatum. Reſpondetur tamen, eodem modo poſſe applicari rationem, quia ſicut lex circumciſionis data eſt Abraham, & filiis ejus, qui naturaliter ex illo generabantur: ita lex vetus ſolū fuit poſita pro hominibus ex eadem ſtirpe progenitis, vel etiam pro aliis puris hominibus, ſi circumcidi vellent, præſertim quia, cum illa lex eſſet imperfecta, & ad oſtendendam imbecillitatem naturæ impoſita, ſolum hominibus imperfectis, & ex origine ſua peccato ſubjeſtis impoſita fuit. Unde ad Galat. 3. ait Paul. legem propter tranſgreſſionem eſſe poſitam: & infra dicit legem fuiſſe prædignum in Chriſto, ut ex fide juſtificarentur, qui ſub illa tenebantur, & idem colligi poteſt ex tota epiſt. ad Rom. & præſertim c. 6. ubi diſtinguuntur, *eſſe ſub lege*, & *eſſe ſub gratia*: multo ergo magis conſtinguuntur, *eſſe ſub lege*, & *eſſe ipſum autorem gratiæ*, non ergo fuit ſub lege Chriſtus, qui fuit autor gratiæ. Item cum eſſet *umbra futurorum*, & illius finis & complementum futurus eſſet Chriſtus, per quem abroganda erat, non debuit Chriſto imponi, unde ad Galat. 3. dicitur, illam legem poſitam eſſe, *donec veniret ſemen*, quod eſt Chriſtus. Deinde Chriſtus erat Dominus legis, & ideo non fuit decens, ut etiam ſecundum humanitatem illi ſubderetur: unde Matth. 12. cum Judæi illum calumniarentur, quod Sabbathum non ſervaret, reſpondit, *Dominus eſt filius hominis, etiam Sabbathi*, Quod explicans Auguſt. lib. quæſt. in Matth. q. 10. dicit, illis verbis oſtendiſſe Chriſtum, ſe non eſſe ſubjeſtum legi, quia erat Filius Dei naturalis, & Dominus legis. Et ad eundem ſenſum trahi poſſunt verba Joann. 5. *Pater meus uſque modo operatur, & ego operor*, quibus Chriſtus ad ſimilem calumniam reſpondit: quaſi diceret ſe cum Patre omnia feciſſe, & facere, & ideo non eſſe ſubditum legi, ut indicant Cyril. lib. 2. in Joan. c. 33. & Aug. tract. 17. in Joan. quamquam D. Th. aliter & ſatis bene explicet infra q. 40. a. 4. ad 1. Aliqui hoc confirmant ex verbis Pauli. ad Galat. 3. dicentis, legem veterem datam eſſe per Angelos in manu mediatoris, id eſt Chriſti, ut ipſi exponunt. Ac ſi ſit ſenſus, illam quidam legem ordinatam eſſe per Angelos, tamen totam poſitam eſſe in poteſtate Chriſti, & illum non obligaviſſe. Sed eſt expoſitio aliena omnino a ſenſu Pauli, & omnium Doſtorum interpretatione, mediator enim illo loco appellatur Moſes, qui inter Deum & populum internuntius, & ſequeſter fuit, ut dicitur Deuter. 5. dicitur ergo lex data in manu mediatoris, quia Angeli non immediate promulgarunt, & dederunt legem populo, ſed Moſi, per quem lex data eſt, ut dicitur Joan. 1. ex hoc ergo loco nihil probari poteſt. Alia vero, quæ adduximus ſatis hanc veritatem confirmant.

Argumenta vero contrariæ ſententiæ ex dictis fere ſoluta ſunt, dicitur enim Chriſtus non veniſſe ad ſolvendam ſed ad implendam legem. Primo, quia licet non fuerit legi obnoxius, plene tamen ac perfecte illam ſervavit, ut eleganter D. Th. explicuit in illo art. 4. q. 40. Secundo, quia Chriſtus implevit legem ſicut veritas figuram, vel ſicut donatio promiſſionem, ut bene Auguſt. lib. 16. contra Fauſt. c. 6. & lib. 18. a princ. & lib. 19. cap. 24. Tertio implevit legem, quia quidquid perfectionis legi deerat, ipſe addidit, & complevit, ut idem dixit Aug. lib. 1. de ſer. Dom. in monte c. 14. Et ad eundem modum dicit Chryſoſt. hom. 16. in Matth. Chriſtum impleviſſe legem dandogratiam, quam lex dare non poterat. Denique dici poteſt impleviſſe legem: quia per paſſionem, & mortem ſuam illam conſummavit, ut D. Th. infra explicat. q. 47. art. 2. ad primum. Quod vero Paul. ait, Chriſtum factum eſſe ſub lege non juſ, ſed factum, non obligationem, ſed uſum ſignificat, ut indicant Hieron. Aug. & Ambroſ. & clariuſ Anſelm. dicens *Subditus eſt legi, non quia ipſe legi quidquam deberet, ſed ut nos redimeret*. Et S. Thom. q. 37. art. 1. *factum*, inquit, *ſub lege*, quia pondus legis in ſe ſuſtinuit. Et idem eſt ſenſus Athanaſii, & Cyril. locis ſuperius allatis, qui ſimul aſſerunt, Chriſtum & fuiſſe liberum, & ſubditum legi, liberum ſcilicet, quoad obligationem; ſubditum vero quoad obſervationem.



*Utrum habuerit Christus aliquod speciale praeceptum  
divinum, cui fuerit subiectus,*

**H**OC dubium praecipue tractari solet de praecepto moriendi pro hominibus, an Christus illud habuerit, & quale illud fuerit. Quidam enim Theologi negant, Christo Domino impositum fuisse hoc praeceptum. Ita sentit Palud. in 3. d. 12. q. 2. a. 3. solum quia princeps (ut inquit) solutus est legibus. Quod fundamentum insufficiente est, ut ex dictis patet. Eandem sententiam tenet Dionys. Cisterciens. in 3. q. 3. art. 2. concl. 6. qui existimat obligationem praecepti repugnare cum perfecto merito de condigno. Quod tamen in superioribus jam a nobis rejectum est. Videtur autem hanc eandem sententiam docuisse Chrysof. hom. 59. & 74. in Joann. docet enim, illud mandatum, quod Christus dicit habuisse a Patre, non fuisse verum & proprium praeceptum, sed solum mandatum in illa latiori significatione, in 1. sect. explicata, & hom. 7. in epist. ad Philip. explicans obedientiam Christi contra Arianos, inquit: *O insensati, & amentes, nam & amicis nos obediunt, & nihil nos hoc deiecit, ut Filius obediret Patri, non in servilem conditionem decidens:* sentit ergo, illam obedientiam non fuisse in ordine ad praeceptum proprie sumptum sed in ordine ad divinam voluntatem sibi simpliciter insinuatam & commendatam, cui Christus per humanam voluntatem maxime conformis fuit. Unde sumi potest probabilis ratio, quae ut Christus in omnibus exequeretur voluntatem Patris, non indiguit praecepto, sed sola voluntatis paternae cognitione, perfecta enim obedientia non expectat praeceptum, sed ad nutum superioris voluntatis movetur, ut D. Th. docet 2. 2. q. 104. a. 2. Unde Theophy. exponens verba illa Joan. 15. *Si praecepta mea servaveritis, manebitis in dilectione mea, sicut & ego praecepta Patris mei servavi, & maneo in eius dilectione,* inquit, *hoc temperans se audientium infirmitati dicit, non enim, qui omnium est legislator, mandatis obnoxius, & sine patris mandatis vivere non potest, hoc enim cogitare fuerit absurdissimum:* & in fine c. 14. exponit illud: *Sicut mandatum dedit mihi Pater, sic facio,* hoc modo: *quod complacuit illi, & decretum ab eo, suscipio, & perficio:* & infra. *Mandatum dedit, hoc est voluit, dixit, approbavit, decrevit.* Et confirmatur primo ex verbis ejusdem Christi Joann. 10. *Propterea me diligit Pater, quia ego pono animam meam, ut iterum sumam eam, nemo tollit eam a me, sed ego pono eam a me ipso: potestatem habeo ponendi eam, & potestatem habeo iterum sumendi eam, hoc mandatum accepi a Patre meo.* Ubi in primis eodem modo loquitur Christus de morte sua, & resurrectione, utriusque dicens se habuisse mandatum a Patre: non potest autem dici habuisse proprium praeceptum resurgendi: tum quia illud magis erat opus divinitatis, quam humanitatis: tum etiam, quia alias semper Christus operatus esset ex praecepto, quia de omnibus sciebat Patris voluntatem, ergo neque moriendi habuit proprium praeceptum. Deinde in illis verbis insinuat Christus totum hoc negotium positum fuisse in suo arbitrio, & voluntate, quod etiam Chrysof. notavit hom. 24. super ad Heb. circa verba illa c. 12. *Aspicientes in authorem fidei, & consummatorem Jesum, qui proposito sibi gaudio sustinuit crucem, confusionem contempnit.* At vero si habuisset proprium, & rigorosum praeceptum, non esset simpliciter positum in ejus arbitrio, & voluntate. Ubi etiam insinuat ratio illa supra tractata, quia si Christus habuisset hujusmodi praeceptum, non libere sed necessario illud implevisset, quia est impeccabilis: Tandem confirmatur, quia vix intelligitur, quomodo fuerit possibile tale praeceptum moriendi, quia praecepta sunt de iis, quae sunt in nostra potestate; sed mors illa non fuit omnino posita in voluntate Christi, quia profecta est ex prava voluntate Judaeorum, ergo.

Dicendum nihilominus est, Christum habuisse verum, & proprium praeceptum redimendi genus humanum per passionem & mortem suam. Ita sentit D. Th. infra q. 47. art. 2. & 1. p. q. 41. art. 6. ad 2. Et fundamentum est, quia Christus ut homo potuit obligari, & subijci huic praecepto, ut ex supra dictis satis constat, sed Scriptura sacra proprie & juxta communioem Patrum sententiam intellecta, significat habuisse hoc praeceptum, ergo intelli-

genda est de vero, & proprio praecepto, cum facile possit, & sufficiens congruentia non desit: minor constat ex citatis verbis Joan. 10. *Hoc mandatum accepi a Patre,* & 14. *Sicut mandatum dedit mihi Pater, sic facio,* & 15. *Patris mei praecepta servavi,* quae omnia proprie intelligit August. tract. 79. in Joan. l. 12. de Trinit. c. 14. & q. 55. super Deuteronom. quibus locis interdum vocat hoc mandatum, *Patris voluntatem,* non quia proprium praeceptum non sit, sed quia ita loqui solemus de superioris praecepto, dicentes hanc esse superioris voluntatem. Et eodem modo loquitur Christus Joan. 4. cum dicit cibum suum esse, *ut faciat voluntatem Patris,* id est, ut sanctificationem nostram operaretur, sicut sibi erat a Patre praescriptum, ut exponit Gregor. Nyss. l. de Beatitudinib. circ. illud, *Beati qui esuriunt, & sitiunt iustitiam.* Et de eadem voluntate recte exposuit Paul ad Hebr. 10. illud psal. 39. *In capite libri scriptum est de me, ut facerem voluntatem tuam,* quam voluntatem statim legem appellavit subdens, *Deus meus, volui, & legem tuam in medio cordis mei,* ut notavit Agatho. Pap. in ep. 1. quae refertur in VI. Synod. act. 4. Ac denique propter eandem Patris voluntatem ait Christus Matth. 26. *Pater mi, si non potest hic calix transire, nisi bibam illum, fiat voluntas tua,* dicit enim non posse quia jure non poterat, intelligebat enim necessitatem praecepti urgere, ut indicavit Damasc. lib. 3. de Fide, cap. 24. Secundo principaliter hoc colligitur ex Paulo ad Philip. 2. *Factus obediens usque ad mortem, mortem autem crucis,* quod de propria obedientia intelligendum est, cum facile possit: propria autem & vera obedientia non est, nisi ubi intervenit praeceptum, quod est veluti formale objectum ejus, ut constat ex 2. 2. q. 104. Et optime confirmatur (ut bene notavit Origen. hom. 2. in Cant.) ex illo ad Rom. 5. *Sicut per unius inobedientiam peccatores constituti sunt multi, ita & per unius obedientiam, iusti constituentur multi:* obedientia ergo Christi, inobedientiae Adae opposita fuit: sicut ergo illa fuit vera inobedientia praecepto contraria, ita haec fuit vera obedientia praecepto conformis, quam collationem, seu comparationem Christi cum Adamo recte ponderavit Cyril. lib. 10. in Joan. cap. 11. Tertio hinc reddi potest conveniens ratio hujus praecepti, fuit enim expediens, ut sicut homines per inobedientiam periti fuerant, ita per obedientiam repararentur. Item etiam, quia opus ex obedientia factum, ceteris paribus perfectius est, & Deo gratius. Praeterea potuit hoc expedire, ut Christus nobis esset omni ex parte perfectum humilitatis, & obedientiae exemplar. Congruentias alias, & alia Patrum testimonia in hujus veritatis confirmationem adducit Cardinalis Toletus, Joann. 10. annotat. 14.

Quæri vero non immerito potest, quale fuerit hoc praeceptum, an mere positivum, vel omnino naturale. Dupliciter enim intelligi potest Deum imposuisse Christo Domino hanc obligationem, uno modo directe praecipiendo illi, ut per mortem suam homines redimeret. Alio modo solum revelando illi hoc esse medium necessarium ad hominum redemptionem, quia ipse decreverat, nullam aliam satisfactionem pro hominibus acceptare: multi enim existimant, ex hoc solo posteriori modo, absque alio positivo, praecepto ex ipsa lege naturali charitatis statim ortam esse in Christo obligationem sustinendi passionem, & mortem: quia lex charitatis obligat ad ponendam corporalem vitam pro salute spirituali proximi, & multo magis obligat ad ponendam illam pro salute spirituali totius naturae. Quod si dicatur hoc esse verum in puris hominibus, quorum vita corporalis non tanti momenti est, quanti spiritualis vita proximi, at vero in Christo non videri eandem rationem, quia ejus vita, eo quod esset vita Dei, erat infiniti valoris: certe hoc non videtur multum obistere, quia quamvis illa esset vita Dei, tamen non amittebatur simpliciter, sed ad tempus breve propter aeternam proximorum vitam exponebatur. Unde negari non potest, quin secundum ordinem charitatis praferendum fuerit illud bonum spirituale proximorum, illi corporali damno proprio, ergo eadem ratione recte intelligi potest eandem charitatem ex se obligasse ad subveniendum proximis in tanta necessitate constitutis. Neque enim refert dicere, potuisse Christum alio modo, scilicet, unico actu suo, sufficienter succurrere hominibus; supponimus enim ex ordinatione divina, hoc medium fuisse necessarium ad reparationem homi-



hominum. Et confirmatur & declaratur, quia si fingamus, Christum cognovisse, esse sibi medium necessarium ad promerendam gloriam, & resurrectionem sui corporis, & resurrectionem ad vitam immortalem, sustinere passionem, & alios hujus vitæ labores, etiam si non haberet aliud præceptum positivum, ex ipsa lege naturali charitatis propriæ, teneretur ea mala sustinere propter tantum bonum sui corporis, seu humanitatis suæ: ergo ad eundem modum potest intelligi similis obligatio propter æternam gloriam animarum. Nec dissimile argumentum colligi potest ex obligatione charitatis ad Deum, in cujus gloriam, & honorem redundat hominum gloria & redemptio: ipse igitur Dei amor veluti natura sua potuit obligare ad sumenda omnia illa mala propter Dei honorem, & gloriam. Et hoc modo videtur defendere hanc sententiam Anselm. lib. 1. Cur Deus homo, c. 8. & 9. & videtur mihi valde probabilis, quamquam in re non sit magna diversitas. Et facile intelligi potest, utrumque modum præcepti in hoc negotio intervenisse, cum simul esse non repugnet, & utrumque charitatem Dei, & Christi erga homines commendat.

Respon.

Respon.  
ad argum.

Ad argumenta ad Chrysostr. primum dicitur, cum propter vitandos Arianos eo modo fuisse locutum, illi enim de Filio ut Deo intelligebant, habere mandatum a Patre, & esse illi obedientem: ipse vero, ut hunc errorem radicitus evelleret, explicare voluit hæc omnia, & convenire Christo secundum assumptam naturam, & non includere imperfectionem repugnantem divino supposito. Et ideo (ut D. Th. supra dicta q. 47. a. 2. ad 1. notavit) addit Chryf. illa verba: *Non est intelligendum, quod prius expectaverit audire, & opus ei fuerit dicere: sed voluntarium monstravit processum, & contrarietatis ad patrem suspicionem destruxit.* Itaque non intendit negare præceptum, sed negat fuisse impositum Christo propter imperfectionem aliquam. Ex quo simul responsum est ad conjecturam ex verbis Chrysostr. de sumptam. Secundum dici potest Chrysostr. & Theophyl. docuisse, Christo non aliter fuisse impositum hoc præceptum, quam ostendendo illi divinam voluntatem, & decretum de iis omnibus, quæ ad redimendos homines facere oportebat, non tamen negare, hinc ortam esse Christo obligationem charitatis ad redimendos homines, quin potius indicant non indignisse alia positiva lege, & obligatione, ut hoc faceret, quod per se bonum, & necessarium erat, supposita Patris voluntate, & ita videtur sententia eorum coincidere cum sententia Anselm. supra tractata: vel certe volunt Christum propter summam perfectionem suam non indignisse præcepto expresso, sed tantum tacito, & insinuat in ipsa voluntate Patris.

Ad primam confirmationem ex loco Joan. 10. respondetur, ex ipso contextu aperte colligi, aliter fieri sermonem de morte, & aliter de resurrectione: sic enim inquit Christus, *Propterea me diligit Pater, quia ego pono animam meam, ut iterum sumam eam*, illud ergo intelligitur esse ut medium, hoc ut finis: de illo ergo medio intelligitur accepisse mandatum, ut per illud talem finem consequeretur. Quod vero ibidem dicitur, totum negotium mortis, & passionis Christi positum fuisse in ejus voluntate, non excludit obligationem, sed ostendit liberam & spontaneam voluntatem, qua Christus morti se obtulit: ostendit etiam superiorem quandam, & excellentem voluntatem quam habuit, ut posset, cum vellet, morti tradi: non antea. Quomodo autem cum hoc præcepto potuerit hæc libertas conjungi, supra quæst. 18. latissime tractatum est.

Ad ultimam confirmationem respondet supra Anselmus, Christo non fuisse directe præceptum ut moreretur, sed ut veritatem prædicaret, & in justitia perseveraret usque ad mortem, propter quod aliqui imponunt Anselmo, quod negaverit hoc præceptum. Sed immerito, ipse enim aperte illud admittit, explicat tamen modum, quo intelligendum est, non enim ibi præceptum est, ut ipse efficeret mortem suam, sed ut illam sibi oblatam sustineret, & amplecteretur, ut bene etiam notavit Scot. in 3. d. 10. q. 2. ad 2. Et hoc modo dicit Anselm. Christo fuisse præceptum, ut non desisteret a servanda justitia, & veritate prædicanda, etiam si mortem sustinere oporteret: & quia Deus præviderat pravas voluntates Judæorum hoc fuisse operaturas, ideo absolute & simpliciter dicendum est, habuisse Christum præceptum moriendi pro ho-

minibus, quod his tandem verbis bene exposuit Anselmus. *Potest tandem dici, quia præcepit illi mori Pater, cum hoc præcepit, unde incurreret mortem.*

#### SECTIO IV.

*An simpliciter dicendus sit Christus subiectus Patri, vel solum illa determinatione, ut homo.*

Hic jam non est quæstio de re, sed tantum de modo loquendi, nam in re certissimum est ex omnibus dictis, Christum ut hominem esse subiectum Deo, & jure, & facto: jure quidem, quia tenetur præceptis ejus parere: facto vero, quia & semper illi obedit, & promptissimam, & paratissimam habet voluntatem ad parendum illi: unde in Concilio Alexandrino, quod habetur in Epist. 10. Cyrilli, sic legitur, *Non ignoramus, quod cum Deus sit, & homo sub Deo factus sit, secundum legem humanitatis natura competentem.* In quibus verbis etiam ratio hujus veritatis continetur quæ etiam ex dictis est satis manifesta, & alia Patrum testimonia, ex dictis in commentario art. 2. circa fol. ad 3. & ex sequenti disput. peti possunt. An vero hæc locutio: *Christus est subiectus Patri*, simpliciter proferenda sit, vel solum cum addito, D. Thom. recte dicit, melius esse determinationem ponere ad tollendam omnem ambiguitatem, & suspicionem Ariani erroris: quod maxime verum est, si de Verbo aut Filio, sub his nominibus sermo sit. Simpliciter tamen, & in rigore sermonis non videtur necessaria illa determinatio, ut etiam D. Th. indicat, quia esse subiectum nihil aliud est, quam habere voluntatem subiectam voluntati alterius: unde hoc prædicatum convenit supposito ratione naturæ, & nihil includit repugnans supposito secundum se, ergo in rigore potest absolute, & simpliciter de Christo affirmari, quia sicut simpliciter est homo, ita simpliciter habet voluntatem humanam, quæ natura sua subiecta est voluntati divinæ. Et confirmatur, quia Christus simpliciter dici potest obediens Patri, sicut dicitur simpliciter mortuus, unde & Scriptura ita absolute loquitur, sed esse obedientem idem est quod esse subiectum, ergo.

Dices. Qui est subiectus alteri, est minor illo, sed Christus (ut diximus) non potest simpliciter dici minor Patri, sed solum cum addito, in quantum homo, ergo nec poterit dici simpliciter subiectus. Respondetur, negando consequentiam, quia per illud prædicatum, *minor*, fit comparatio absolute, & simpliciter in perfectione, quæ absolute, & simpliciter æqualis est in Christo, & Deo seu Patri, & solum secundum quid, id est, secundum assumptam naturam est minor: at vero prædicatum, *subiectus*, solum significat proprietatem quandam, seu relationem convenientem personæ, ratione assumptæ naturæ: unde non est necesse, ut is, qui est subiectus sit simpliciter minor, sed solum ut habeat voluntatem aliquam minorem, seu inferiorem alteri.

Obje.

Respon.

Advertendum vero est, hæc omnia potissimum intelligi, si hæc subiectio referatur ad Patrem, vel ad Deum, si autem referatur ad Verbum, seu ad Filium sic erit simpliciter necessaria determinatio, quia si absolute Christus diceretur subiectus Verbo, aut Filio, significaretur distinctio suppositorum inter Verbum, & Christum. Et ideo ut hic error caveatur addenda est determinatio, qua sufficienter denotetur, hanc subjectionem tantum esse secundum diversas naturas, & ita traditur in dicta Epist. 10. Cyrill. ex Concilio Alexandrino. At vero si locutio fiat per relativum reciprocum dicendo, Christum esse subiectum sibi ipsi, minus necessaria videri potest determinatio, quia illudmet relativum includit suppositi identitatem: nihilominus tamen illa locutio rejicienda est, quia simpliciter prolata quandam in se repugnantiam involvit, nemo enim sibi ipsi subicitur, sicut nec est inferior, aut minor se ipso, & ita in dicto Concilio Alexandrino absoluta rejicitur.

#### DISPUTATIO XLIV.

In duas Sectiones distributa.

*De servitute Christi.*

Quamquam servitus subjectionem includere videatur, aliquid tamen importat præter subjectionem; servus enim relationem dicit ad dominum, unde de ratione servi est, ut non solum sit subditus alteri, sed etiam omnino sit sub dominio alterius. Propter hanc ergo rationem disputationem hanc diversam a præcedenti propono,



pono, & quia ex diversis Patrum locutionibus singularis, & propria difficultas in hac materia orta est, primo ergo rem ipsam, deinde modum loquendi explicabimus.

## S E C T I O I.

*Utrum Christus, ut homo, vere ac proprie sit, & dici possit servus Dei.*

Prima  
sententia.

**P**rima sententia negat Christum, etiam cum illo addito ut homo, vere posse dici servum Dei secundum propriam ac legitimam significationem huius vocis *servus*, & consideratis omnibus conditionibus & imperfectionibus, quas vera ac propria servitus includit ac requirit. Hanc sententiam sic expositam apud nullum antiquorum scholasticorum invenio. Non tamen desunt novi Theologi, qui non solum censent, hanc sententiam esse veram, sed etiam de fide definitam. Præcipuum ac fere unicum fundamentum huius sententiæ fumitur ex definitione Concilii Francofordiensis contra Elipandum, qui Christum, sicut adoptivum, ita & servum appellare ausus est: quem æque utroque titulo Concilium reprehendit ac damnat. Unde Adrianus Papa in sua epistola sic ait. *Tanta nimirum vos temeritatis dementia deludit, ut adoptivum eum filium, quasi purum hominem, calamitati humane subiectum, & (quod pudet dicere) servum eum impii & ingrati tantis beneficiis, liberatorem nostrum non pertimescitis venenosa fauce suffurare. Cur non veremini, queruli obtretractores, Deo odibiles, illum servum nuncupare?* In quibus verbis (si quis recte pendat parenthesim illam *quod pudet dicere*) magis damnat Pontifex servi, quam filii adoptivi appellationem. Et infra subiungit. *Etsi in umbra Prophetiæ, dictus est servus, propter servilis formæ conditionem, quam sumpsit ex Virgine, &c. nunquid propterea nomen servi ei imponere debemus?* Unde concludit, postquam cessavit umbra, & manifestata est veritas, quæ sub allegoria latebat, non esse vocatum Christum ab Apostolis, & Evangelistis servum sed dominum. Ac tandem. *Nostrum* (inquit) *opus est ut simus servi per conditionem, & filii per gratiam adoptionis, opus ejus est, ut sit unicus, proprius & dilectus filius Dei.* Similia multa habentur in epist. Concilii ad Episcopos Hispaniæ, nam eodem modo damnat dicentes, Christum esse servum, & dicentes, esse filium adoptivum, ut videre licet præsertim in fine epistolæ. Ubi ratio redditur, *Quia alia est persona proprii filii, alia servi*, qua significatur, servitutem non minus, imo magis, requirere personam alienam & extraneam, quam adoptionem. Ac denique exponuntur Scripturæ, quæ interdum, Christum appellant servum, ut intelligantur, non de conditione servitutis, sed de humilitatis obedientia, qua factus est obediens usque ad mortem. Huic concilio adjungi solet aliud antiquius, Alexandrinum scilicet, quod habetur in epist. 10. Cyrilli. Sed Concilium illud nihil ad rem præsentem facit, ut inferius videbimus.

Authori-  
tate Pa-  
trum.

Secundo fundatur hæc sententia in Sanctorum dictis. Primum sit Chrysostomi hom. 13. in epist. ad Hebræos, ubi ait Christum nunc sursum sedentem ad dexteram Patris non esse ministrum nec servum, sed hoc cuiusdam concessionis fuisse prolatu viæ. Unde subdit. *Sicut factus servus, non mansit servus, sic & minister factus, non mansit minister, non enim ministri est sedere, sed stare.* Quorum verborum sensus idem esse videtur, qui in Concilio Francofordiensi insinuat, nimirum Christum in statu viæ assumpsisse ministerium & humilitatem servi, cum tamen secundum veritatem & propriam conditionem servus non sit: alioqui etiam in gloria servus mansisset, cum eandem naturæ conditionem retineat. Secundum testimonium sit Athanasii serm. 3. cont. Arian. ubi ait, Christum interdum vocari *servum appellatione non veritate, ad eum modum* (inquit) *quo filius se solet servum nominare, & ad hoc inferius adducit differentiam a Paulo inter Moysen & Christum constitutam ad Heb. 3. dicente. Et Moyses quidem fidelis erat in tota domo ejus tanquam famulus, Christus vero tanquam filius in domo sua.* Tertium Eusebii Emislen. qui in homil. 6. de Pasch. dicit, oblatum esse pro nostro peccato hominem iustum, qualem nostra regio non habet: quia nec subvenire peccato poterat simili peccato obnoxius, nec intervenire pro servis astrictus legibus servitutis. Unde infra concludit offerendum fuisse eum, qui esset ejusdem generis, sed non ejusdem conditionis, & longe alterius libertatis. Quartum est Leonis Papæ serm. 1. de Nativit. ubi sic inquit,

*Assumpta est de matre hominis natura, non culpa: creata est forma servi sine conditione servili, quia novus homo sic temperatus est veteri, ut & veritatem susciperet generis, & vitium excluderet vetustatis.* Quintum ex Augustino tractat. 3. in Joan. circa illa verba, *Lex per Moysen data est, &c. per servum* (inquit) *lex data est, per Imperatorem indulgentia.* Et infra, *Servus agere secundum legem potest, solvere a reatis legis non potest.* In Concilio etiam citato afferuntur alia verba Augustini ex quadam ejus homil. 36. *Dominus noster etiam in forma servi non servus, sed in forma etiam servi dominus fuit.* Sextum sit Cyrill. Alexand. in expositione Symboli Niceni circa medium dicentis, *Accepit autem* (scilicet Verbum) *formam servi ut liberi, non servus existens ad libertatis rediit gloriam. In similitudine hominum factus est, qui in forma & in Patris equalitate non homo existens, ut fieret in similitudine Dei secundum participium locupletatus est.* In quibus verbis ultimis significat radicem, ob quam Christus ut homo non est servus, scilicet, quia humanitas ejus secundum participium divinitatis locupletata est. Septimum sit Theodoret in impugnatione sexti anathematismi Cyrilli dicentis, *Quamvis Apostolus naturam a Verbo assumpsit, formam servi appellet, quia ex se, & ut prior assumptione, talis est, tamen, unitate facta non ultra locum habet servitutis nomen.* Unde inferius ea loca veteris Testamenti in quibus Christus servus vocatur, indicat esse intelligenda ratione naturæ assumptæ, ad explicandam conditionem, quam ex se habet, non statum, quem habet post unionem.

Octavum & præcipuum testimonium est Damasc. lib. 3. de fide c. 12. in quo tractans de ignorantia, & servitute respectu Christi, eodem modo de illis loquitur, & æque illas excludit ab hoc mysterio: & in summa ait. Si natura humana assumpta secundum se sumatur, & mente præscindatur a Verbo, inveniri ex se ignorantem & servam, verum ob personæ identitatem atque indivisam conjunctionem futurarum rerum notitiam consecutam esse. Unde, subiungit. *Quin illud quoque sciendum est, cum ne servum quidem dicere nobis licere, servitutis enim ac dominationis vocabula non naturas indicant, sed ex eorum sunt genere, quæ ad aliud referuntur, quemadmodum & paternitatis & filietatis voces, hæ enim non essentiam, sed affectionem & relationem ostendunt: nam quemadmodum de ignorantia a nobis dictum est, si exilibus quibusdam cogitationibus, id est, subtilibus mentis imaginationibus, id quod creatum est ab eo, quod increatum est, sejunxeris, sane servilis ordinis esset caro, nisi Dei Verbo copulata esset: at cum semel ei personaliter unita sit, quoniam jam pacto in servilem classem redigetur: & adjungit rationem aliam, dicens. Nam cum unus Christus sit, sui ipsius, profecto & servus & dominus esse nequit: hæc enim non ex eorum numero sunt quæ simpliciter dicuntur, sed quæ cum aliquo conferuntur. Cujusnam igitur servus erit? Patris ne? ergo non omnia quæ Pater habet, Filii quoque sunt: si quidem Patris servus est, sui ipsius autem minime. Ex quo in fine concludit. *Qui servum eum dicunt, unum Christum instar Nestorii in duos dividunt.* Et ad testimonia, in quibus appellatur servus, eandem expositionem adhibet, scilicet, quod appellatione tantum ita interdum vocetur propter assumptam passionis humilitatem, & eandem doctrinam indicat lib. 4. cap. 8. & 19. quam etiam transcripsit Nicetas lib. 3. Thelauri, c. 38.*

Tertio possumus argumentari ex Scriptura, quæ primo loco afferenda fuisset, tamen, quia nihil ex ea potest firmum afferri, nisi aliquo modo fundetur in Patrum auctoritate, ideo hoc loco melius collocatur. Adrianus ergo argumentatur ab auctoritate negativa Scripturæ, quia nunquam in Testamento Novo Christus, servus appellatur. Quod est signum, eam appellationem ubi in Testamento veteri reperitur, fuisse figuratam, cum in novo, eo quod in eo jam sit revelata veritas, fuerit prætermissa. Ponderat deinde Adrianus, etiam in ipso passionis & mortis articulo, Christum non vocasse Deum, dominum, sed Patrem suum, dicens, *Pater, si fieri potest, transeat a me calix iste.* Et in Cruce. *Pater dimitte illis, non enim sciunt, quid faciunt.* Et iterum, *Pater in manus tuas commendo Spiritum meum.* Si enim Christus se servum agnosceret, certe aliquando verbis suis hoc esset professus, & maxime in eo tempore, in quo summam imbecillitatem assumptæ naturæ experiebatur: & tamen id non fecit, quia

Scriptu-  
rarum re-  
sponsio.



quin potius in eodem articulo passionis sese dominum & regem ostendit, Latroni paradifum promittens. Nec refert, quod in Cruce Patrem, Deum suum appellaverit, quia distincta est Dei, & domini appellatio, ut fumitur ex Damasc. lib. 4. de fide c. 8. & 19. Ubi tractans verba Christi Joann. 20. *Ascendo ad Deum meum, & Deum vestrum*, significat ita Christum distinxisse, quia aliter est Deus noster, aliter ipfius Christi: noster enim ita est Deus, ut sit etiam dominus, non sic autem Christi, sed tantum Deus. Possumus etiam addere, quod in Novo Testamento non solum Christus non vocatur servus, verum etiam differentia in hoc constituitur inter ipsum & alios Prophetas quod in primis potest sumi ex parabola Matth. 21. de Patrefamilias habente vineam, ad quam iterum atque iterum servos misit, tandem vero filium & hæredem, hoc est, Christum, qui jam non servus appellatur. Sumi etiam potest ex illo Pauli ad Heb. 3. *Amplioris gloria iste præ Moyse dignus est habitus, quanto ampliore honorem habet domus, qui fabricavit illam. Et Moyses quidem fidelis erat in domo ejus tanquam famulus, Christus vero tanquam filius in domo sua.* Unde Augustinus tract. 14. in Joannem expendens illa verba, *Pater diligit filium, & omnia dedit in manu ejus, ut nosces* (inquit) *qua distinctione dictum sit, Pater diligit Filium. Quare enim? Pater non diligit Joannem? Et tamen non omnia dedit in manu ejus. Pater non diligit Paulum? Et tamen non omnia dedit in manu ejus. Pater diligit Filium, sed quomodo pater filium, non quomodo dominus servum: quomodo unicum, non quomodo adoptatum.*

Rationibus probatur prima sententia 1.

Quarto afferre possumus rationes, quas præcipue Damascenus & Adrianus indicant. Prima est, quia Christus ut homo non est filius adoptivus: ergo neque servus. Patet consequentia, quia magis aliena est a filio naturali conditio servitutis, quam adoptionis magisque extranea est persona servi, quæ filii adoptivi. Unde Christus etiam ad filios adoptivos dixit, *Jam non dicam vos servos, sed amicos*, quia vera amicitia cum Deo, & filiatio adoptiva ita perficit hominem, & elevat ad consortium divinæ naturæ, ut denominationem servi quasi expellere aut superare videatur: ergo multo magis filiatio naturalis hujusmodi denominationem auferet.

Secunda: Christus ut homo, nullam habuit conditionem servi, nisi obedientiam & subjectionem ad Deum: sed hæc non sufficit ad constituendum servum: ergo. Totum antecedens fumitur ex epist. Concilii Francofordien. ubi sic dicitur: *Etsi Christum Propheta servum nominavit, non tamen conditione servitutis, sed ex humilitatis obedientia, qua factus est Patri obediens usque ad mortem*: in his enim verbis & conditionem servi a jure subjectionis & obedientiæ distinguit, docens, posterius hoc non sufficere ad proprium servum constituendum. Quod certe per se manifestum est, homo enim ingenuus subditus & obediens est ei, cujus non est servus. & deinde negat in Christo fuisse eam conditionem servitutis, quæ præter subjectionem, ad propriam servi rationem requiritur. Hoc autem neque ibi probatur, nec declaratur, quænam sit hæc conditio servitutis. Unde quidam ita utrumque præstant, quia ratio & conditio servitutis præter subjectionem includit negationem quandam communicationis in propriis bonis ipsius domini, & consequenter etiam includit negationem illius intimæ unionis & conjunctionis, ad quam illa bonorum communicatio consequatur: sed Christus ut homo ita fuit subiectus Deo, ut non fuerit distinctus personaliter a Deo: ex quo ortum est, ut summam cum illo habuerit communicationem in excellentia & majestate, & omnibus bonis: hac ergo ratione fuit Christus subiectus sine conditione servili. Major supponitur ut manifesta ex Aristotele 1. Polit. c. 3. & ex iplomet nomine servi: nam, si in nobis, in honore, & sede cum domino communicat, quid est cur possit servus appellari?

Et potest præterea in hunc modum explicari, quia omnis alias conditio servi, potest in non servo reperiri: si hæc vero cum aliis adfit, servus necessario constituitur: ergo signum est, hanc esse necessariam & quasi propriam conditionem servitutis: antecedens patet, quia quod servus non sit capax domini sed quidquid acquirit, acquirit domino, commune potest esse filiis, si humana jura ita tuant, & aliis subditis ingenuis, si hac conditione subiciantur. Similiter, quod dominus habeat potestatem in

servum, ut eo utatur in omnem usum, commune etiam potest esse non servis: nam pater posset similem potestatem habere in filium, imo etiam si Deus daret patri facultatem interficiendi filium, non ideo esset servus, quia semper communicaret cum patre in honore, & in bonis: quia esset hæres ejus: præter hæc autem nihil aliud reperitur in servo, quod sit proprium servi ut sic, præter illam negationem communicationis in nobis. Confirmatur appposito exemplo, nam, si quis ancillam in uxorem ducat, hoc ipso definit esse ancilla, ut indicavit Leo Papa epist. 92. ad Rusticum, dicens, *nuptiarum fœdera tunc esse legitima, si sint inter ingenuos*: id autem non est, nisi quia matrimonii vinculum quodammodo facit unum ex duobus, ita ut eisdem bonis & honoribus ac titulis fruatur: & ideo Arist. 1. Polit. cap. 1. barbaros appellat eos, apud quos uxores in servorum gradu habentur: ergo signum est, illud consortium & communicationem in bonis repugnare servituti. Multo ergo magis personalis unio inter humanam & divinam naturam exclusit a Christo ut homine rationem servi, & ab humanitate assumpta, statum seu conditionem servilem: nam in eodem throno cum Deo collocata est, ut constat Apoc. 5. & 7. & ipsamet divinitate est sanctificata & Deificata, ut sup. q. 7. late vidimus, & eadem patriæ adoratione cum Deo colitur, ut q. 25. videbimus. Ac denique eisdem honoris titulis gaudet: nam hic homo est vere Deus & creator, ut q. 16. late visum est, qua ratione dixit Cyril. Ep. contra libidinosos, citata in VI. synod. act. 6. tom. 5. Verbum propria gloria carnem illustrans, Deum decentibus dignitatibus illam implevisse, & Athanas. ibidem citatus in Epist. ad Euprichium ait, Carnem propter unionem ad Verbum cognominem dignitate accepisse.

Secunda opinio est, Christum ut hominem esse & appellari posse servum Dei. Hanc docuit expresse D. Th. in hac q. art. 1. ad 2. ubi tam proprie ait Christum ut hominem appellari servum Patris sicut subiectum Patri, quod late prosequitur toto art. 2. Et infra q. 23. art. 4. ad 3. in hoc constituit differentiam inter servitutem & filiationem adoptivam, quod illa non tantum respicit personam, sed etiam naturam; & ideo potest Christo ut homini attribui. Quibus locis manifeste supponit D. Th. unionem hypostaticam non exclusisse ab humana natura eam conditionem servitutis, quam habet connaturalem: & ab ea ut sic ait Christum ut hominem denominari servum. Eandem sententiam tenet Palud. in 3. d. 12. q. 3. in primo dicto tertiæ opinionis, & Cajet. hic art. 1. & 2. & omnes Thomistæ. Ex quibus quidam recens author scripsit, veram Theologiam, imo & ipsam fidem, docere, Christum ut hominem esse servum. Ex antiquis etiam hoc tanquam certum supponit Bassol. in 3. d. 9. arg. 1. & in solutione id plane admittit. Durandus etiam (quamvis hoc expresse non attingat) cum admittat, Christum ut hominem esse filium Dei adoptivum, a fortiori hoc dicet, & idem censendum est de Ricardo & Scoto. Imo, cum D. Th. hoc ex professo docuerit, & reliqui Theologi antiqui sine disputatione id transegerint, videntur sane tanquam certum & indubitatum id supposuisse. Probat autem primo ex Testamento veteri, in quo frequentissime Christus nomine servi appellatur, ut Isaiæ 42. *Ecce servus meus: suscipiam eum, &c.* Qui locus de Christo exponitur Matth. 12. ut infra latius dicam. Idem Isai. 45. 49. 52. & 53. & Zachar. 3. est insignis locus, *Adducam servum meum Orientem, & Ezechiel. 34. Suscitabo super eas pastorem unum servum meum David.* Sed ad hæc & similia testimonia responderi solet ex Adriano & Damasceno supra, Christum illis locis esse dictum servum appellatione, non veritate, id est, allegorica & metaphorica appellatione, nam, quia in Scriptura veteri nondum erat Evangelica veritas propalata, ideo ad humilitatem Christi, & obedientiam prædicendam sub ænigmatibus servus appellatur. Veruntamen contra hanc explicationem objici potest primo, generalis regula interpretandi Scripturam, quia, ubi potest sine inconvenienti, cum proprietate intelligi, non est facile ad metaphoras recurrendum, quod maxime est in hac materia observandum, ne occasionem demus hæreticis, similiter respondendi, quando ex simili verborum proprietate, contra eos ostendimus, & hominem esse verum Deum, & Deum, verum hominem vereque passum, mortuum, &c. Nam quod in proprietate hujus appellationis nullum sit majus inconveniens,

Secunda sententia.

Fundamentum ab auctoritate Scripturæ.

Evangelii modus rejicitur.



niens, quam in reliquis, patebit ex dicendis. Secundo, quod in his locis nullum est metaphoræ indicium, quia non agitur in eis specialiter de obediētia aut humilitione Christi per passionem, sed potius de excellentia & potentia ejus, ut patet ex verbis illis Isa. 42. *Ecce servus meus, suscipiam eum, electus meus, complacuit sibi in illo anima mea. Dedi spiritum meum super eum, iudicium Gentibus proferet, & cæ. usque ad illud, & legem ejus insula expectabunt;* ubi Hierony. notat: *Nec mirum si servus vocetur, factus ex muliere, factus sub lege, qui cum in forma Dei esset, humiliavit se, formam servi accipiens, & habitu inventus ut homo.* Ubi consulto videtur tacuisse humiliationem passionis & mortis, ut significaret, ob incarnationem solam dictum esse servum. Similiter Isaia 52. *Ecce (dicitur) intelliget servus meus, exaltabitur, & elevabitur, & sublimis erit valde.* Unde non alia ratione videtur Christus appellari servus his locis, nisi ut denotetur, sermonē esse de illo ut homine, & ratione assumptæ naturæ. Unde Cyrillus lib. ad Evoptium: *Si quis (inquit) dicat, servum eum appellari propter vocem sanctorū Prophetarum, nullo modo offendi decet: cognoverunt enim per revelantem eis Spiritum Sanctum, quod Verbum ex Deo Patre fieret homo.* Ubi primum expendo, quod solam Incarnationem reddit ut sufficientem causam illius appellationis. Deinde, quod satis significat, illam appellationē esse propriā, cum sine offensione dicat posse a nobis usurpari, quod non semper licet in metaphoricis locutionibus. Unde & statim declarat, appellationem hanc cum naturali filiatione non repugnare, dicens: *Erat quidem & sic liber tanquam filius, neque sic tamen mensuram exinanitionis optime facta faciebat contemptibilem, configuratus nobis, servitutis iugo subditus.* Nec refert, quod ibidē enumerat Cyrillus aliquos actus hujus servitutis, qui non conveniebant Christo ex debito servitutis, sed ex dignatione & humilitate, ut solvere tributū didrachma, & subdi legibus & tributis. Non enim hæc affert Cyrillus, ut significet appellationē servi ab his vel similibus actibus esse desumptam, cum aperte dixerit, humanationem seu incarnationem Filii Dei fuisse propriam ejus causam, sed adducit illa ad exaggerandam exinanitionem, & extensionem (ut sic dicam) servitutis Christi, quomodo dicerent etiam Patres solent, Christum non solum Dei, sed etiā hominum servum factum esse, ut videre licet apud Aug. conc. 3. in Psal. 103. ubi illud Isa. 55. *Justificabit ipse justus servus meus multos,* citat juxta translationem Septuaginta, *justificare justum bene servientem multis.*

Secundo principaliter probari potest hæc sententia ex novo Testamento: ex quo imprimis afferri potest citatus locus Matth. 12. ubi de Christo exponuntur verba Isaia 42. Sed hic locus non omnino convincit, tum quia Evangelista non tribuit Christo appellationem illam, sed tantum refert, quid de eo dixerit Isaia, non tamen declarat, an proprie vel metaphorice ita Christum nominaverit: tum etiam, quia Matthæus non citat, *Ecce servus meus, sed, Ecce puer meus:* Græce, *παῖς*, juxta Septuaginta. Quæ vox est magis ambigua, quamvis ubi non commode potest referri ad ætatem, servum tantum significare soleat: & ideo in præsentī hoc discrimen non multum referat, ut indicavit etiam Hieron. epist. 151. ad Algasiam, q. 2. & ad Tit. 1. ubi ait, vocem Hebraicam ibi proprie significare servum. Sumitur etiam ex Aug. lib. 20. de Civit. c. ult. & lib. de unit. Ecclesiæ, c. 7. ubi indifferenter his vocibus utitur, *puerī, scilicet & servi.* Possumus etiā afferre illud Matth. 11. *Confiteor tibi Pater, Domine cæli & terræ, & c.* in his namque verbis Christus appellans Patrem suum Dominum, seipsum servum profiteri videtur. Responderi autem potest, potius ex hoc loco oppositum colligi, ita enim distinguenda sunt verba illa, ut Patrem suum vocet, Dominum autem non suum, sed cæli & terræ. Sed quamquam hæc interpunctio bona sit, nihilominus Athanasius serm. 3. contra Arianos ex hoc loco probat, Verbum postquam venit ad opus Patris absolvendum, & formam servi accepit, Patrem suum Dominum vocasse, quia, quando illum appellat Dominum cæli & terræ, res omnes ab ipso conditas, nomine cæli & terræ complectitur; inter quas Christus ut homo enumeratur: non ergo seipsum excludit, sed suum etiam Dominum, Patrem appellat. Sicut ibidem exponit illud Proverb. 8. *Dominus possedit me, in initio viarum suarum, & c.* Nam ibi interpretatur, loqui sapientiam incarnatam, & ideo vocare Deum, Dominū. Ex quibus & aliis testimoniis, sic Athanasius concludit:

*Merito igitur, quia nos servi, cum talis effectus erat, quales nos eramus, servus appellatur, atque id studio humani generis ita fecit, quæ nobis ex natura servus, ubi suscepissemus spiritum Filii, fiducia esset, eum, qui naturalis Dominus noster erat, Patrem ex gratia nominare. Cæterum, quemadmodum nos, cum Dominum nostrum Patrem vocamus, non inficiamur nostram naturalem servitutem, quippe qui ejus opera sumus: ipse enim fecit nos, & non ipsi nos: ita, cum Filius, servi specie suscepta, has voces edit, Dominus creavit me, inficiari non debent divinitatis in illo aternitatem, aut eum in principio Verbum fuisse. In quibus verbis nonnulla continentur, quæ non parum huic sententiæ favent: unum est, sicut in nobis non repugnat sibi naturalis servitus Dei & filiatio adoptiva, ita in Christo non repugnare naturalem filiationem Dei cum servitute in assumpta natura. Aliud est, ad universale Dei dominium pertinere, ut sit dominus Christi, quatenus homo est, quandoquidem sub ea ratione inter res conditas continetur. Ultimum denique est (quod nunc agimus) interpretari prædictorum Christi verborum, quæ sane non est proprio & genuino sensu aliena, nam propter naturalem filiationem Christus ita distinxit, ut specialiter Patrem suum appellaverit, propter generalem autem omnipotentiam & actionem dominum vocaverit cæli, & terræ, in quo non quidem expresse, & quasi speciali titulo, tamen saltem implicite & confuse, ac generali ratione, se ipsum ut hominem sub illo dominio comprehendit. Ac denique (quidquid sit de formali sensu verborum) tamen mediate (ut sic dicam) non est dubium, quin ex illo optimum sumatur argumentum; quia certum est in nominibus cæli & terræ continens sumi pro contento; atque adeo illis comprehendere quidquid sub Deo cæli & terræ ambitu continetur; Christus autem ut homo sub Deo est, cum sit minor Patre, & sub cæli ac terræ ambitu continetur: est ergo Deus, dominus ejus, & consequenter ipse servus, cum hæc duo correlativa sint.*

Potestque hoc testimonium seu argumentum confirmari ex verbis illis Pauli 1. ad Cor. 3. *Omnia vestra sunt, vos autem Christi, Christus vero Dei:* nam Christus Dei esse dicitur, quia Deus in suum honorē ipsum fecit Christum, ut Paulus ait ad Hebr. 3. & Petrus 1. canon. c. 3. ergo ut sic sub Dei dominio continetur. Item confirmari potest ex illis verbis Christi, Joan. 20. *Ascendo ad Patrem meum, & Patrem vestrum, Deum meum, & Deum vestrum:* nam, ut hic D. Th. art. 2. in arg. 3. Sed cont. notavit, Christus his verbis se ipsum Patris servum professus est: atque adeo idem est dicere *Deum meum*, ac, *Dominum meum.* Respondent autem aliqui ex Damasc. lib. 4. de fide c. 8. & 19. non sine causa, non dixisse Christum, *Deum nostrum*, sed divisisse dicendo, *Deum meum, & Deum vestrum;* sicut non dixit, Patrem nostrum, sed divisit, dicens, *Patrem meum & Patrem vestrum:* significavit ergo in illa divisione, aliter Patrē esse Deum suum, quam nostrum: nam ita est noster Deus, ut sit etiam dominus; ita vero est Deus Christi, ut non sit dominus ejus. Sed in primis hæc interpretatio, seu quod Christus in ea divisione hanc diversitatem indicaverit, nullum habet fundamentum in textu Evangelico, ut per se patet, quia nullum ibi est verbum, quo Christus indicet, Deum non esse dominum suum. Unde Euthymius, ibi quærens, cur Christus ita distinxerit, & non dixerit, *Deum nostrum*, non reddit illam rationem, sed quia, licet homo factus sit (inquit) & frater eorum naturæ humanitatis, honore tamen plurimum ab eis differebat & divinitatis unione, atque impeccabilitate. Augustinus vero tract. 121. *Neque hic (inquit) dixit, Deum nostrum: ergo & hic aliter meum, aliter vestrum, Deum meum, sub quo & ego homo sum, Deum vestrum, inter quos & ipsum mediator sum.* Rupertus vero l. 14. in Joan. *Deus meus est (inquit) quia creaturam ejus, id est, hominem assumpsit, Deus autem illorum est, quia non aliud, quam homines sunt.* Non ergo Evangelicus textus illam differentiam requirit. Neque etiam habet fundamentum in Damasceno: verba enim ejus sunt. *Non dixit, Deum nostrum, sed Deum meum, si subtili mentis agitatione id, quod oculis cernitur, ab eo, quod mente sola percipitur, distinguas, & Deum vestrum, ut opifcem ac dominum.* In quibus verbis potius Damascenus sentit Deum non alia ratione dici alicujus Deum, nisi quia est ejus opifex ac dominus: ideoque Christum Dominum non simpliciter dixisse, *Deum nostrum*, sed divisione prædicta usum fuisse, ut denotaret non esse



opificem suum ad dominum simpliciter & absolute secundum omnia, quæ in ipso sunt, sed solum secundum humanitatem assumptam: hoc enim est, quod ait: *Si subtili mentis agitatione id, quod cernitur, ab eo, quod mente concipitur, distinguas*, esse autem opificem ac dominum nostrum secundum omnia, quæ sumus. Et ita intellexit illum locum Scholiasies Damasceni Clichtoveus dicens: *Humanam naturam insinuat Christus, cum Deum Patrem, Deum suum appellat: nam, secundum divinam, non recte Deus Christus diceretur, si quidem ipse cum Filio suus unus est Deus, sed secundum humanam naturam, Deum Patrem Christum suum vocat Deum, quoniam ut homo, formatus est ab eo, factus & productus: & confimilis quoque ratione Deus Pater, noster Deus dicitur, quoniam ab eo creati sumus atque ad esse perducti*. Et adducit optimum locum Cyrilli lib. 12. in Joan. c. 51. ubi eadem verba tractans inter alia inquit: *Quomodo Dei secundum naturam sit Filius, Deum tamen suum nuncupavit: ut quemadmodum nos ad supernaturalem dignitatem per ipsum ascendimus, sic & ipse, quoniam homo factus est, Deum nostrum in Deum suum habeat, licet vere ac secundum naturam filius sit. Non ergo conturbetur, cum Patrem Deum nominet suum, sed diligenter considera, Patrem quidem suum esse naturam, Deum autem nostrum ut creatorem & dominum: sed, quod sibi natura inest nobis largitur, ut communiter Patrem appellemus, & quod nostrum est, quoniam naturam nostram assumpsit, sibi rursus accommodat, cum Deum nominet suum*, utique ut creatorem & Dominum suum, quatenus homo est: hoc enim titulo dixerat Cyrillus appellari Deum nostrum, eumque titulum Christum ut hominem sibi accommodasse seu usurpasse. Neque ab hac expositione discrepat Concilium Alexand. in epist. ad Nestor. quæ est 10. inter epistolas Cyrilli, & recepta in Concilio Ephesino, & habetur tom. 1. illius c. 14. ubi ait, Verbum ut Deum, Deum Patrem suum appellare, hominem tamen factum esse: proindeque secundum legem humane nature congruentem, Deo subiectum esse: & infra: *Ut, homo igitur, & ad exinanitionis conditionem, quod spectat, æque ac nos, se subditum fateatur*. Notandum sane est verbum illud, *æque ac nos*, &c. nam in primis docet Concilium, hac professione, qua confitemur Deum nostrum, profiteri nos esse subiectos Deo, & consequenter ipsum esse nobis superiorem & Dominum: & hoc ipsum professum esse Christum ut hominem, appellando Deum suum, & sub ea ratione esse æque Deo subiectum: ergo & Deum æque esse dominum eius; & in eundem fere modum tractat hunc locum late Hilar. lib. 11. de Trinit. aliquantulum a principio, cujus verba statim referam.

Ratione denique hoc declaratur, quia, quamvis verum sit, nomina *Dei* & *Dominus* in rigore esse diversa, & illud esse proprie nomen nature, hoc potestatis, tamen ita sunt conjuncta, & æqualia (ut sic dicam) quatenus in Deum conveniunt, ut æque late pateant, si sub aliquo respectu ad creaturas respiciant, vel potius a creaturis respiciantur: ergo hoc ipso, quod Deus dicitur alicujus Deus, necesse est ut sit etiam illius Dominus, & e contrario: ergo hoc ipso quod Christus ut homo vocat Deum suum, virtute vocat dominum suum. Quis enim sibi persuadeat, Deum alicujus esse Deum, cujus non sit dominus? ac si divina dominatio non tam late pateat, quantum quælibet alia habitudo, sub qua possit Deus dici alicujus Deus. Etenim, cum Deus per sese & absolute sit Deus, quid nam addi potest, cum dicitur esse alicujus Deus, nisi vel habitudo ultimi finis, vel primi principii, vel alia similis? Ad hunc enim modum dixisse videtur Jacob Genes. 28. *Si fuerit Dominus Deus mecum, &c. erit mihi Dominus in Deum*; id est, illum venerabor & colam ut supremum numen, in eo fidam, ei gratias referam, tanquam supremo auctori bonorum omnium: nullus autem ita recognoscit Deum suum, quin etiam recognoscat illum dominum suum, & se servum ejus. Quia non potest Deus non esse auctor illius, cujus est ultimus finis, nec potest non esse dominus ejus, cujus est auctor. Hinc Hilar. dicto li. 11. de Trinit. col. 8. a principio ex hoc loco Joannis quem tractamus, colligit, per assumptionem carnis factum esse, ut is, qui erat Pater Filii, inceperit esse Deum Christi; *Dum qui in forma Dei erat, receptus est in forma servi: servus enim non erat, cum esset secundum spiritum Filius Dei, & secundum communem naturam ubi non est servus, neque dominus est. Deus quidem & Pater natiuitatis est unigenitus Dei, sed ad id, quod servus est, non possumus nisi*

*tunc dominum deputare, cum servus est. Quia cum ante per naturam non esset servus, & postea secundum naturam esse quod non erat cepit, non alia dominatus causa intelligenda est, quam quæ exiitit servitutis: tunc habens ex natura dispensatione dominum, cum præbuit ex hominis assumptione se servum. Manens igitur in forma servi, qui manebat ante in Dei forma homo Christus Jesus locutus est, Ascendo ad Patrem meum & Patrem vestrum, Deum meum & Deum vestrum*. In quo discursu evidenter supponit Hilar. Christum, appellando Deum suum, cum ut hominem, dominum recognovisse: & in hoc solum incumbit, ut ostendat dominatum illum non convenire Patri ab æterno in Filium quem genuit, sed in tempore in Christum servum factum ratione humanitatis assumptæ: atque hoc modo respondet Arianis, qui hæc verba ad Christi divinitatem referebant. Unde ita concludit. *Si igitur hæc servus & ad servos locutus est, quomodo professio ista non servi sit, & ad eam magis naturam, quæ non in natura servi sit, transferetur, cum ei, qui in forma Dei manens formam servi assumpsit, quasi servo ad suos communio, non nisi ex eo tantum possit esse quod servus est? Pater igitur sibi ita ut hominibus Pater est, & Deus sibi ita ut servis Deus est. Et cum hæc omnia ad homines servos homo in servi forma Jesus Christus loquatur, non ambigitur, quin Pater sibi ut cæteris sit ex ea parte qua homo est, & Deus sibi ut cunctis sit ex ea natura, qua servus est. Quæ ultima verba nimium fortasse probare videbuntur propter id quod insinuat de paternitate, sed non oportet intelligi secundum omnimodam æqualitatem, & specificam rationem, sed secundum proportionem, & rationem communem, ut infra quæst. 23. latius explicabo.*

Quod si hæc, quæ diximus de interpretatione horum verborum Christi, satis fundata sunt, ex eis ulterius colligere licet, Christum ut hominem in morte sua non solum Deum ut Patrem, sed etiam ut dominum invocasse, illis nimirum verbis, *Deus meus, Deus meus, ut quid dereliquisti me?* Ostensum est enim perinde esse confiteri aut invocare Deum suum, quod dominum suum. Non ignoro divinum nomen, *Eli*, quo ibi usus est David Psal. 21. cujus verba Christus usurpavit, juxta proprietatem Hebraicam, sumptum esse ex attributo fortitudinis divinæ; ut idem fuerit Christo dicere *Eli, Eli*, ac si diceret, *Fortis meus, Fortis meus*, seu, *Fortitudo mea*. Hoc tamen nihil obstat, quin potius deservire potest ad declarandam rem de qua tractamus, nam licet nomina divina ex diversis attributis sint desumpta, ut sub ea ratione nominetur, vel invocetur a nobis, quæ pro negotiis, vel occasionis opportunitate maxime videtur accommodata, ut Christus in prædictis verbis usus est nomine fortitudinis, quia pro humanitatis imbecillitate, ea tunc maxime indigere videbatur: nihilominus tamen per hujusmodi confessionem vel invocationem recognoscitur Deus ab homine, ut supremum principium, a quo pendet; & cujus est dare auxilium & fortitudinem, & cætera bona: hoc autem idem est, quod recognoscere Deum ut supremum dominum, etiam si non invocetur nomine a dominio sumpto, vel dominium formaliter significante: ergo perinde fuit Christo dicere *Eli, Eli*, ac si diceret, *Dominum fortitudo mea, esto mihi in Deum protectorem, quoniam fortitudo mea & refugium meum est tu*. Psal. 17. & 30.

Tandem adjungere hic possumus verba illa, quæ Christus dæmoni tentanti respondit, Matth. 4. *Dominum Deum tuum adorabis, & illi soli servies*, & illud, *Non tentabis Dominum Deum tuum*: quamquam enim hæc generatim de omnibus scripta sint, Deut. 6. tamen a Christo sunt usurpata, ut ad se etiā pertinentia: ergo in illis confessus est non tantum Deum, sed etiam dominum suum. Nec dici potest, Christum illa verba attulisse, quæ de puris hominibus dicta sunt, quia dæmon nihil amplius de illo quā de puro homine sentiebat. Nam, ut Hieronymus ibi ait: *Falsas de Scripturis diaboli sagittas, veris Scripturarum frangit clypeis*. Non ergo attulit ibi Christus testimonium Scripturæ, quæ secundum falsam tantum dæmonis exultationem, sed vere ac proprie ipsum comprehenderent. Unde recte ibi Janfenius cap. 14. Concord. *Scripturam* (inquit) *male citatam, alia Scriptura recte adducta, ceu clavum clavo retudit*. Et quamvis nonnulli Patres, ut Hilar. & Hieronymus, dicant, Christum his verbis se indicasse dominum ac Deum, quem dæmon adorare potius quam tentare debuisset, tamen planus & literalis sensus est, Christum repulisse tentationem, ostendentem



ex Scriptura, ea quæ dæmon petebat, contra divina esse præcepta. Quod a quovis pio homine responderi poterat, ut Jansenius ait. Denique ex re ipsa, quæ his verbis continetur, potest sumi non inefficax argumentum, nam certum est, Christum ut hominem debuisse tribuere Deo illud genus adorationis & cultus, quod verbis illis omnibus præscribitur, *Dominum Deum tuum adorabis*: ille autem cultus non tribuitur tantum Deo ut Deo, sed ut domino, ut verba ipsa præferunt: imo in recognitione supremi ac divini domini hic divinus cultus magna ex parte consistit: ergo Christus ut homo Deum ut dominum confitetur & adorat.

Ex his ergo omnibus videtur hæc Christi servitus ex novo testamento sufficienter probari, & non sine fundamento dixisse Eliam Cretensem in scholiis ad Greg. Naz. orat. 1. versus finem circa illa verba, *Pacis justitiæ sanctificationis, redemptionis, hominis servi*, dixisse (inquam) *Quod autem servus etiam & homo factus sit, totum Evangelii & Apostolicarum epistolarum volumen plenum est*, ubi ipse adducit testimonium aliud in hac materia vulgare ad Philip. 2. *Formam servi accipiens, in similitudinem hominum factus*, &c. ubi per formam servi sine dubio intelligit Paulus naturam humanam, ut in superioribus a nobis explicatum est. Sed nihilominus hic locus aliquibus non videtur convincere, quia ex eo solum habetur, Christum assumpsisse formam, quæ de se est servilis conditionis, non tamen quod constituerit Christum Servum: quia potuit unione impediri. Sed in primis, si infra ostenderimus, unionem non potuisse hoc impedire, neque excludere ab humanitate naturalem conditionem servitutis, constabit, etiam hoc Pauli testimonium esse satis efficax. Et deinde Paulus non solum ait, assumpsisse Christum, formam servilem, sed formam servi, id est, qua servus ipse constitutus est, sicut dicitur assumpsisse formam hominis, id est, qua homo factus est, ut recte ibi intellexit Adamus cum cæteris expositoribus.

Tertio principaliter probatur hæc opinio ex sanctis Patribus. Primus sit Cyrillus, quem jam adduximus in lib. ad Evoptium, in defensione sexti anathematismi, & in epist. 10. cum Concil. Alexand. suscepta in Ephesino: & Præterea lib. 12. Thesauri cap. 15. circa finem, *Servi* (inquit) *Dei nos sumus secundum naturam, ipse dominus quidē secundum naturā, non quia Deus sed servus factus est quia vere homo*; ubi notanda est illa causalis, non enim fundat hanc servitutem in humilitate, vel ministerio aliquo, sed in veritate humanæ naturæ: & quia de ratione veri hominis est, ut sit etiam servus Dei. Præterea idem Cyrillus Dialog. 6. de Trinit. ante medium. *Nonne* (inquit) *quando factus est homo, tunc & in servi forma venisse dicitur? Proinde necessario intelligendum est, ante adventum in carne, non in servi forma fuisse Verbum, quod ex Deo apparuit, sed in denominatione naturali, & in propriis sublimitatibus, in quibus manere non magni fecit propter charitatem in nos, appellatusque est servus*. Paulo autem inferius quædam verba subdit, quæ videri possunt huic sententiæ obviare, dicens, *Quoniam autem secundum naturam est Deus & Dominus, permittit, & offensam, & ignobilitatem servitutis excellentia gloriæ victam aboleri*. In quo insinuat, eam servitutem solum fuisse in apparentia & humilitate passionis, ideoque esse abolitam per gloriam resurrectionis. Sed, si quis accurate advertat, non ait Cyrillus abolitam fuisse servitutem, sed ignobilitatem & offensam servitutis, quod inferius clarius dicit, *dispensationi secundum carnem ad breve tempus permisisse servitutis modum, postea vero ad claritatem naturalis domini rediisse*: hunc ergo modum servitutis, prius vocavit ignobilitatem servitutis, eundemque dicit esse ablatum seu mutatum per gloriam resurrectionis: ignominia autem servitutis in hoc posita fuit, quod non solum servus Dei ratione assumptæ naturæ factus est, sed etiam tractari voluit ut vile mancipium, non aliter quam si ratione culpæ esset obnoxius servituti. Aliud testimonium ejusdem Cyrilli ex Dialog. 4. expendemus inferius commodiori loco.

Secundum testimonium sit Athanasii, cujus apertum locum supra attulimus ex serm. 3. contra Arianos. Sed alius est manifestior in serm. 3. fol. 4. ubi inquit, *Quatenus in confesso est eum hominem esse factum, nihil discriminis attulerit, sive servus, sive filius hominis appelletur. Omnes enim istiusmodi vocula in ratione humanitatis bene & proprie competunt: illaque omnia non substantiam* Suarez Tom. XVI.

Verbi, sed hominem eum fuisse demonstrant. In quo testimonio expendendæ sunt illæ duæ voces, *bene & proprie*, quibus satis declarat Athanasius se non metaphorice esse locutum. Est aliud testimonium apud eundem Athanasium. tom. 2. in epist. contra Eusebium pro Nicæna Synodo, ubi tractat locum illum Proverb. 8. *Dominus possedit me*: sed non oportet verba referre, quia sunt fere eadem cum superius adductis.

Tertium testimonium sit Nazianzeni, cujus verba quædam ex orat. 1. superius citavimus, quæ videri possunt non adeo urgentia, quia cum nomine *servi* alia enumerat, quæ non proprie, sed per metaphoram Christo conveniunt. Tamen in orat. 35. quæ est 1. de Filio, & 3. de Theolog. circa finem enumerat fere omnia prædicta, quæ ratione humanitatis proprie de Filio Dei dicuntur; & inter ea ponit nomen *servi*: imo sentit abjectiora esse illa nomina, quæ humanitatis mortalitatem indicant, quam servi nomen. *Tu* (inquit) *mibi contra, illas ingrati tudinis tuæ voces enumera, has videlicet, Deus meus, & Deus vester, major, creavit, fecit, sanctificavit, servum etiam (si ita lubet) & obedientem adjuuge; & infra; Ade etiam, si ita placet, quæ his abjectiora sunt, dormire, esurire, fatigari*.

Quartum testimonium sit Chrysostomi serm. 7. in id ad Philippen. 2. *Formam servi accipiens*. Ubi declarat, accipere formam servi non fuisse opus servi facere, sed naturam servi induere, seu assumere. Unde concludit, *Sicut in forma Dei perfectus est Deus, ita in forma servi perfectus est servus*. Idem hom. circa illa verba David, *Quis ego sum Domine Deus?* 1. Paralipom. 17. inquit, *Quid humilior servo? tamen hoc fieri dignus est, ut nos liberos faceret*. Chrysostomum imitati sunt Græci expositores Philippen. 2. Theophylact. Theodoret. & alii, qui per formam servi intelligunt substantiam servi.

Quinto Theodoretus Ancyranus in homil. habita in Concil. Ephesino, & refertur in tom. 6. ejus, c. 9. *Efficitur* (inquit) *conservus, ut dominum suum olim declararet, Hinc magnus ille Paulus, Hoc sentite in vobis, quod & in Christo Jesu, & cætera usque ad illud, Formam servi accipiens, quem locum optime ad rem præsentem exponit, sentiens ita sumpsisse naturam servilem, ut secundum eam factus fuerit servus. Unde & in alia homil. ejusdem, quæ habetur in appendice ad eundem tomum sextum ejusdem Concilii, c. 2. interrogat, Quomodo Unigenitus, servus factus est, manens quod erat, & factus est quod non erat? quod late prosequitur tota illa homilia. Et Achatius homil. in eodem Concil. recit. tom. 6. c. 11. ubi inter alia ait, *Inferne servus, superne filius*.*

Sexto, inter Latinos Ambrosius frequenter hanc sententiam docet, non obiter illam attingens, sed ex professo lib. 7. epist. 47. quendam reprehendens, quia negabat, Christum pro nobis servitutem suscepisse: eumque dicit Apollinaris errore fuisse infectum; & inferius de Christo exponens illud Ps. 108. *Adjuva me Domine Deus meus*, ait, *Secundum formam servi locutus, dominum appellavit, quem Patrem noverat, servitus enim carnis dominatus divinitatis est*: & lib. 5. de fide c. 6. sic inquit, *Non igitur præjudicat quod subiectus dicitur, cui non præjudicat, quod servus legitur* & c. 4. habet multa similia: & præfat. in Ps. 35. de Christo exponit titulum Ps. qui est. *In finem servo Domini Psalmus David, Nam ex utero* (inquit) *servus exivit & dominus*. Respondent, his locis asserere Ambrosium, Christum appellari servum, non tamen proprie ac vere esse servum; quo modo possunt eludi multa ex dictis testimoniis. Sed in primis incredibile videtur, tot Patres tam frequenter, & absque alia explicatione, vel limitatione ita esse locutos in re ad fidem pertinente, si non esset propria & in omni rigore vera locutio. Præsertim, cum non tantum pro concione, sed disputantes contra hæreticos ita loquantur: & maxime contra Arianos, qui ex Christi servitute inferebant esse creaturam, quibus Patres nunquam respondent, improprie esse servum, quod facere oportuisset; si cum divinitate personæ propria servitus in assumpta natura esse non posset. E contrario vero Ambrosius primo loco citato ad errorem Apollinaris negantis assumptæ naturæ veritatem pertinere credit, negare in Christo ut homine veram servitutem, quia esset negare veram obedientiam, veramque subjectionem, ut tetigit etiam Theophylactus ad Philip. 2. Unde in secundo loco tam proprie ait Ambrosius Christum esse servum sic subiectum, alioqui non recte subje-

Rejicitur  
ad testi-  
monium  
Ambrosii  
responsio.



tionem ex servitute colligeret. Ac tandem in postremo loco ita fatetur Christum factum esse servum, sicut hominem aut doloribus subditum. Et plane ceteri Patres citati eodem modo loquuntur.

Septimo ex Hieronymo nonnulla in superioribus adduxi. Sed notandus in primis maxime videtur locus ille ad Tit. 1. ubi exponens illud verbum, *Paulus servus Dei*, ait, *Hæc servitus non est illa, de qua ipse Apostolus ait, neque enim accepistis spiritum servitutis iterum in timore, verum nobilis servitus, de qua & David ad Deum loquitur, Ego servus tuus & filius ancille tue, & infra, Nec mirum, quamvis sanctos homines, Dei servos nobiliter appellari: cum per Isaiam Prophetam Pater loquatur ad filium, Magnum tibi est, vocari te servum meum: & cætera quæ late prosequitur.*

Octavo, August. epist. 178, circa fin. sic ait, *In qua infirmitate humanitatis non solum subditum, sed etiam servum evidentissime confitemur, ipso dicente, Ego servus tuus, &c. & serm. 5. alias 6. de temp. Secundum hanc (inquit) regulam (id est, secundum communicationem idioma- tum, aut secundum diversas naturas) modo pauper, modo dives, modo equalis, modo dominus, modo servus.*

Nono Gregor. 2. Moral. c. 22. de Christo exponens illa verba, *Nunquid considerasti servum meum Job. Bene (inquit) servus dictus est, qui formam servi suscipere dignatus est.* Sic etiam Fulgent. de fide ad Petr. c. 2. *Formam servi accepit, ut fieret servus.* Atque ad eundem modum loquuntur Vigilii lib. 5. cont. Euty. col. 8. Petrus Diac. lib. de Incarn. & grat. c. 6. Bernard. in serm. de passio. & Rupertus Abb. in c. 3. Zach. Multa etiam & valde notanda supra ex Hilario retulimus. Denique optima sunt verba Ili- dori lib. 1. de Sum. bon. c. 16. *Christus & in forma servi servus, & in forma servi non servus; in forma quippe servi, domini servus; & in forma servi hominum dominus.*

Quarto principaliter probatur ratione hæc sententia, nam, ut recte Damascenus dixit, attributum servi ex his est, quæ ad alterum dicuntur, & in relatione consistunt; sed in Christo ut homine invenitur sufficiens fundamentum & terminus relationis servitutis: ergo & relatio servitutis: ergo ab illa vere ac proprie dicitur servus. Probat- ur minor, nam relatio servitutis ad Deum, si generaliter sumatur, non habet aliud fundamentum in creatura præ- ter essentialem dependentiam & subordinationem, quam habet ad Deum, ratione cuius & est sub potestate & do- mino Dei, ut possit illa uti prout sibi placuerit, & ex se nata est obedire Deo. Unde Cyrillus Alex. lib. 4. dialog. de Trinit. col. 6. *Servile (inquit) factum est, quidquid pro- ductum ex nihilo: ita & divinus nobis clamavit David ad dominum universorum Deum, Quoniam omnia ser- vium tibi.* Unde inferit, Verbum divinum non esse creatu- ram, cum sit extra omnem servitutem. Et inferius col. 8. *Quod locatur (inquit) cum creatura, nec Deus nec filius, nec Dominus vere esse potest, sed ut eximius inter mini- stros & subditos, & inferius agens de Verbo, Solus (in- quit) ipse liber & libertas, cum omnis creatura Deo ser- vilem cervicem submittat:* ergo ex sententia Cyrilli fun- damentum hujus servitutis est dependentia & subordi- natio intrinseca, quam creatura habet ad Deum, termi- nus autem est Deus ipse, quatenus potestatem habet do- minandi creaturæ, & præcipiendi illi, vel ea, suo arbi- trario, utendi. Constat autem, in Christo ut homine esse dependentiam & subordinationem ad Deum ut ad habentem supremam potestatem in ipsum: ergo est in illo fun- damentum & terminus relationis servitutis.

Sed ad evertendum hoc fundamentum, quod sane vi- detur efficacissimum, excogitatum est aliud fundamen- tum hujus relationis, quod non tantum includat illam rationem positivam a nobis declaratam, sed simul requi- rat conditionem illam privativam, seu negativam com- municationis in bonis. Sed qua facilitate hæc conditio inventa videtur, solum ad fugiendam vim argumenti, eadem facilitate rejicienda est & neganda talis conditio, quia neque a Philosophis aut Theologis de servitute tra- ctantibus posita est; nec Patres citati, qui de servitute Christi differunt, aliquam hujus conditionis mentio- nem fecerunt: neque etiam ex sola rei natura colligi po- test. Nam, si communicatio in bonis talis sit, quæ non au- ferat subordinationem & supremam potestatem, non est cur auferat relationem servitutis. Quod declaratur pri- mo, nam hæc relatio servitutis in aliqua positiva habi- tudine consistit: imo, si loqui volumus prout communiter

Theologi loquuntur, relatio servitutis ad Deum ex parte creaturæ est realis, ut sentit D. Thom. 1. p. q. 12. art. 7. & ibi expositores, & alii Theologi, quos ipsi citant: hæc ergo relatio, quatenus in positiva habitudine consistit, non potest in negatione fundari, sed in positiva subordina- tione aut dependentia, quia negatio ut sic non fundat habi- tudinem positivam. Neque etiam esse potest conditio ne- cessaria, si non sit etiam necessaria conditio ad totum id quod est positivum in fundamento & termino relationis positivæ. Nec poterit assignari aliqua alia relatio positi- va, quæ similem negationem in fundamento requirat. Neque etiam assignari poterit ratio, ob quam negatio, quæ nihil destruit positivum in fundamento & termino positivæ relationis, possit tollere aut impedire relatio- nem ipsam. Ut, si tanta quantitas utriusque extremi est sufficiens fundamentum, & terminus positivus relatio- nis æqualitatis, quæcumque negatio convenientiæ in alia forma vel qualitate, vel perfectione non poterit re- lationem æqualitatis impedire; aut e contrario si ad quantitates tantæ magnitudinis sequitur relatio in- æqualitatis, etiam si in aliis formis vel perfectionibus sit summa convenientia & unitas, non impeditur prædi- cta inæqualitas: sic ergo in præsentī, si communicatio in bonis talis est, quæ non tollat veram dependentiam & subordinationem positivam ex parte unius extremi, & supremam potestatem ex parte alterius, non poterit illa impedire relationem servitutis. Neque negatio illius communicationis potest rationabiliter assignari ut fun- damentum vel necessaria conditio ad talem relationem.

Responderi potest, quamquam hoc argumentum pro- cedat de relatione illa physice considerata, quæ fortasse alia non est a relatione creaturæ, non tamen moraliter de servitute, quæ potius est moralis, quam physica de- nominatio. Unde non pendet tantum ex physica forma vel relatione, sed etiam ex moralibus conditionibus ad talem statum, & conditionem servitutis necessariis, quarum illa videtur esse potissima, quod inter dominum & servum sit quædam distantia in excellentia & honore, quæ declaratur per illam negationem communicationis in bonis. Vel aliter dici potest, & fere in idem redit, aliud esse, formam inhærere, aliud denominare: sicut Philosophi dicunt, si calor remissus cum intenso frigore subiecto insit, non denominare calidum propter excel- lentiam formæ contrariæ: sic ergo in præsentī, quamvis in Christo ut homine reperiatur quidquid est positivum in relatione servitutis creaturæ ad Deum, nempe depen- dentia, subordinationis, &c. esse tamen quasi vestitum seu impeditum tot excellentiæ & majestatis titulis, ut absolute & simpliciter non possit Christum, etiam ut ho- minem, servum denominari. Sicut dicemus infe- rius q. 23. relationem effectus ad causam, quæ sequitur respectu Dei ex infusione gratiæ habitualis, eandem esse physice loquendo in Christo, quæ est in cæteris ho- minibus, & nihilominus in Christo non habere ratio- nem filiationis, nec denominare filium, præsertim adoptivum, quia impeditur excellentiori filiatione, & gratia unionis. Quod si dicatur, nomen filii adoptivi non esse mere positivum, sed ex parte, & quasi præsuppo- sitive, esse privativum aut negativum; cur non idem dicatur de nomine servi?

Sed hæc omnia, si recte expendantur, non enervant vim fundamenti positi, ita enim responsum retorquo, quia, vel hæc denominatio servi physice considerata est, ut ab aliqua reali ac physica forma sumpta; & sic ar- gumentum factum ostendit, hujusmodi formam esse in Christo ut homine, & consequenter ab illa denominari servum. Vel moraliter considerata est; & sic illæ tan- tum conditiones sunt ad illam exigendæ, quæ commu- ni vel doctorem vel prudentem hominum arbitrio ad hujusmodi denominationem necessariæ sunt; nam mora- les denominationes ex communi hominum aestima- tione maxime pendent: sed illa negatio communica- tionis in bonis non est hæcenus excludenda necessaria ad hanc denominationem, ut patet ex omnibus Patribus citatis, & amplius statim declarabitur, ergo etiam se- cundum moralem loquendi modum est in Christo ut ho- mine sufficiens fundamentum hujus relationis seu de- nominationis. Imo, si quis recte consideret, quæstio hæc ad hos terminos, & ad hoc fundamentum revocata, erit potius de nomine, quam de re: omnes enim in hoc convenimus, quod Christus, in quantum homo, est

Rationi-  
bus flabi-  
latur se-  
cunda sen-  
tentia.

Quid ad  
precedē-  
tem rati-  
onem re-  
spondeant  
aliqui.

Refutatio  
super.



non solum Deo subiectus, sed etiam ab eo pendens, & sub illius potestate constitutus. Rursus, quod humanitas Christi est Deo substantialiter unita, & per eam unionem admirabili modo sanctificata, & consequenter quod Christus homo habet maximam quandam communicationem cum Deo in bonis ejus, in honore, in sede, ac titulis majestatis & gloriæ: igitur solum videtur ad modum loquendi pertinere, an propter priores rationes dicendus sit servus, in quantum homo; vel an posteriores rationes hanc denominationem impediunt. In questione autem de modo loquendi nemo certe errabit, si communem modum loquendi Sanctorum sequatur; illi autem ita locuti sunt, & existimabant, se proprie loqui, ut ex multitudine testimoniorum, & ex circumstantiis, & modo loquendi, etiam in disputationibus contra hæreticos, & ex multis verbis eorundem Sanctorum, pluraquam verisimiliter conjectare licet: ergo non potest illa locutio ex vi sermonis, neque ut falsa neque ut impropria rejici.

Solvitur  
Obiectio.

Dices, etiam in modo loquendi potius esse sequendam definitionem Pontificis, quam plurium Sanctorum testimonia. Respondetur, hoc argumentum supponere, definitionem Pontificis esse contrariam torrenti Sanctorum, quod incredibile est; concedo ergo, definitionem Pontificis omnino esse veram; & si dictis omnium Sanctorum esset contraria, illis fore præferendam; imo, etiam si angelus de cælo ei opponeretur, etiam esset ejus testimonio definitio Pontificis præferenda, ea exaggeratione, qua Paul. dixit, *Licet nos aut angelus de cælo, &c.* nego tamen, definitionem Pontificis, aut fuisse unquam, aut fore aliquando communi sententiæ Patrum contrariam, cum communis Patrum consensus, præsertim fundatus in Scripturis ita ab eis intellectis ac declaratis, certam possit facere fidem de ea re, inquam conspirant. Quis autem fuerit sensus Pontificis Adriani, dicemus, solvendo argumenta.

Robora-  
tur pro-  
positio ra-  
tio.

Urgeo tamen amplius prædictam rationem, & gratis admitto, aliquam bonorum communicationem posse relationem ac denominationem servitutis impedire. Interrogo autem, quamnam & quanta illa futura sit: non enim est hoc cujusque arbitrio committendum, & pro libito definiendum, sed aliqua certa regula adhibenda est, aliqui nihil firmum statui poterit de hac relatione & denominatione servitutis. Certum est enim, non quamcumque communicationem cum Deo in bonis ejus impedire veram ac propriam relationem servitutis: alioqui homines iusti, & beati non essent vere ac proprie servi Dei, quia cum Deo communicant in visione & fruitione ejus, & in aliis supernaturalibus donis: constat autem id esse falsum, quia vera divina servitus inseparabilis est, saltem a pura creatura. Unde etiam in die judicii ad Sanctos & electos dicitur, *Euge serve bone & fidelis*, ut notavit August. tract. 85. in Joan.

Neque obstat, quod Christus dixit, Joan. 15. *Jam non dicam vos servos sed amicos*, nam idem August. cit. loc. intelligendum hoc censet de servitute servili (ut sic dicam) quæ ex timore nascitur, non vero excludi servitutem filialem, quæ cum charitate & filiatione adoptiva conjuncta est, nam timor & reverentia filiorum in æternum manet. Alii vero cum Irenæo lib. 4. cont. hæres. c. 27. intelligunt locum illum de servitute legali, quæ per libertatem legis gratiæ exclusa est: nam in lege veteri non tam clare & aperte revelabantur omnibus divina mysteria; in lege autem nova quasi revelata facie gloriam Domini speculamur; & ideo dicitur agere Deus nobiscum tanquam cum amicis. Quæ expositio parum a priori differt, nam servitus legis veteris, ideo potissimum in lege nova exclusa est, quia jam non accepimus spiritum servitutis iterum in timore, sed spiritum adoptionis filiorum Dei in quo clamamus, *Abba pater*, ut dicitur ad Rom. 8. Deinde Christus illo loco non dicit, non estis servi, sed non dicam vos servos, id est, non agam vobiscum tanquam cum servis, quia non solet dominus cum servo familiariter agere, & sui cordis secreta ei revelare; & hoc est quod subdit, *Quia servus nescit quid faciat dominus ejus: vos autem dixi amicos, quia omnia, quacumque audivi a Patre meo, nota feci vobis*.

Et sic etiam posse intelligi illud Joan. 8. *Servus non manet in domo in æternum, filius manet in æternum*: inde enim non licet inferre, Beatos, qui manent in domo Dei

Suarez Tom. XVI.

in æternum, non esse servos: nam licet servo, ea ratione qua servus est, non debeat ut maneat in domo in æternum, tamen si aliqui filius sit, poterit manere in domo patris in æternum. In quo est etiam differentia inter servitutem ad Deum, & ad homines, quod hæc per filiationem adoptivam excluditur, ut constat ex §. ult. Initit. de Adopt. illa vero non excluditur, sed perficitur: imo ipsamet filiatio adoptiva ad Deum intrinsece & quasi essentialiter est altior quædam ac perfectior servitus divina; & ideo non omnis servus excluditur ab æterna habitatione in domo Dei, sed ille qui non est filius. Proprie vero & ad literam in illo loco Joan. 8. non est sermo de servitute ad Deum, sed de servitute peccati, præmiserat enim Christus, *Omnis, qui facit peccatum, servus est peccati*: & subdit; *Servus autem non manet in domo in æternum*: intelligit ergo de servo peccati, nam servus Dei in æterna ejus domo manet; imo huic servituti, si perfecta sit, illa debetur hæreditas.

Igitur (ut rationem concludamus) non omnis communicatio seu participatio divinorum bonorum excludit servitutem ad Deum. Quæ est ergo communicatio, quæ illam excludit? Certe de nulla communicatione id affirmari potest, quæ in pura creatura reperiri possit; quia, in specie loquendo, fortasse nulla major participatio divinæ excellentiæ ac hæreditatis fieri potest cum pura creatura, quam nunc fiat per gratiam & gloriam: major autem vel minor intensio sola non potest quicquam conferre ad hunc effectum. Maxime quod in B. Virgine est illa bonorum communicatio in excellentissima quadam perfectione; neque hoc solum habet, sed etiam conjuncta est cum dignitate matris Dei, qua nuncior & excellentior videtur communicabilis personæ creatæ. Unde ratione illius quodammodo communicatur B. Virgini divini tituli, ut Regina cæli & terræ, & domina omnium, dicatur; & nihilominus tota illa communicatio non excludit veram denominationem, & relationem servitutis ad Deum: ergo nulla communicatio divinorum bonorum possibilis fieri personæ creatæ, excludit ab illa propriam relationem & denominationem servi Dei. Quæ ergo communicatio illam impedit? Reliquum itaque erit, solam communicationem hypostaticæ unionis illam impedire: quod, cum non sit in aliqua communi & recepta ratione servitutis fundatum, solum videtur inventum ad hanc questionem definiendam, & receptam a Patribus locutionem negandam.

Unde, ut aliquam certam regulam & generalem in hoc statuere possimus, illa sola communicatio in bonis impedire videtur rationem servitutis, quæ constituit æqualitatem inter eos, quæ in bonis communicant, quia servus hoc ipso quod servus est, inferior esse debet; atque hoc modo recte colligunt Sancti Patres, Verbum divinum non posse esse servum Patris, quia est illi æquale. Et fortasse ob eam causam servitus humana per adoptivam filiationem tollitur, cum tamen non tollatur divina, quia, cum inter homines sit æqualitas in natura, & per adoptionem addatur quædam æqualitas in statu, honore ac hæreditario jure, eo fere modo, quo solet illam habere filius naturalis: consentaneum est, ut talis adoptio servitutem humanam expellat, & idem fere est de vinculo conjugii, facit enim inter conjuges quandam æqualitatem, & ideo merito relationem servitutis unius ad alterum excludit: quamquam posset etiam harum legum alia ratio reddi, quam infra attingam. At vero adoptio divina nullo modo facit filium, Deo æqualem, sed relinquit inferiorem ac subditum totumque sub potestate Dei ut supremi domini constitutum; & eadem ratione maternitas divina non excludit veram servitutis seu ancillæ rationem, quia semper manet persona omnino inferior; maxime cum non sit mater Dei ut Dei, sed ut hominis. Juxta hanc vero regulam verius colligimus, etiam communicationem bonorum Dei per unionem hypostaticam non excludere a Christo ut homine veram & propriam relationem seu denominationem servitutis. Nam, licet humanitas unita, sit ipsamet divinitate sanctificata, tamen non est effecta æqualis divinitati, neque æque sancta & excellens ac ipsa divinitas: ergo, non obstante unionem, manet in ea sufficiens fundamentum seu conditio, ut servum constituat. Vel aliter (& in idem redit) Christus ut homo non est æqualis Deo, sed minor & inferior, ut patet ex Joan. 14. & supra dictum est: ergo ex vi unionis



nis non fit Christus ut homo incapax servitutis ad Deum.

Et confirmatur ac declaratur, nam tota illa communicatio bonorum, quæ est inter Christum ut hominem, & Deum, non est cum æqualitate, sed cum quadam inferioritate: ergo non est cur omnino servituti repugnet. Antecedens patet, discurrendo per omnia bona hujus communicationis, quia Christus ut homo non est tam sanctus, sicut Deus, quia non est sanctus per essentiam, sed per unionem humanitatis ad sanctitatem per essentiam. Item non est æque beatus ac Deus, ut per se constat. Item, quod attinet ad titulos majestatis, non attribuuntur Christo ut homini, etiam si Christo simpliciter tribuantur, quod forte sufficiet, ut Christus non sit simpliciter dicens servus, de quo postea dicemus, tamen cum determinatione specificante vel reduplicante, Christus, in quantum homo, neque est omnipotens, neque infinitus, nec denique Deus, nisi extrahendo illam determinationem ad suppositum, quo modo nunc non loquimur. Similiter in hoc sensu, Christus in quantum homo, non est Filius Dei naturalis, quatenus hæc filiatio consurgit per generationem æternam, & dicit omnimodam æqualitatem, sed alio inferiori modo dicitur Filius naturalis per gratiam unionis: ergo neque ista communicatio aut filiatio, cum in inferiori ordine maneat, necessario excludit veram servitutem a Christo ut homine. Cujus etiam signum esse potest, quia per eam non habet Christus ut homo, jus ad totam, seu ad æqualem Patris hereditatem, quia non habet jus ad beatitudinem per essentiam, seu ad comprehendendam divinitatem per humanitatem suam: ergo non est cur hoc jus hereditarium excludat ab illa natura relationem servitutis. Tandem, si consideremus communicationem in honore seu adoratione, licet verum sit eadem latria, qua Verbum colitur, adorari humanitatem ejus, tamen, si mente distinguamus illam adorationem ut humanitatem attingit, inveniemus, inferiori quodam modo ad illam pertinere, quam ad Verbum: & respectu humanitatis esse respectivam, ad Verbum autem esse absolutam. Colitur enim Verbum propter se ipsum, humanitas vero non propter se, sed propter Verbum. Sicut quando adoramus sanctum hominem, eodem actu corpus & animam ejus veneramus, & nihilominus non æque, quia animam propter se, corpus autem propter animam, & ideo corpus semper manet inferius, & quasi aliquid servile respectu animæ. Sic ergo philosophari licet de humanitate respectu divinitatis, quantumvis sit ei substantialiter conjuncta. Unde, si reduplicative sumatur illa determinatio, *Christus in quantum homo*, non est adorabilis æquali adoratione, ac Deus in quantum Deus, sed inferiori alio cultu, ut q. 25. videbimus. Imo ipse Christus ut homo adoratur Deum eodem genere cultus & subordinationis, quo nos Deum colimus & adoramus, nam ei sacrificium offert, ut infra q. 22. & latius in 3. tomo videbimus: in quo actu suprema ratio hujus cultus manifestatur, ut ibidem dicemus: ergo recognoscit se ipsum ut servum, & Deum ut dominum suum: hoc enim genere cultus nos Deum adoramus.

Ultimo potest tota hæc ratio amplius confirmari & urgeri ex parte Dei, nam, ut ex Hilario supra citavimus, dominus ad servum dicitur. Unde recte infert D. Thom. 2. 2. q. 81. art. 1. ad tertium, ubi est specialis ratio domini, ibi esse debere specialem rationem servitutis: sed Deus est vere ac proprie dominus Christi ut hominis: ergo etiam Christus ut homo est servus Dei. Minor probatur, quia dominium omnium rerum inferiorum seu conditarum tam est intrinsecum & connaturale Deo, ut ipsemet non possit se ipsum illo privare: Christus autem ut homo inter res Deo inferiores & ab ipso conditas numerandus est. Respondent aliqui, si per dominium intelligatur potestas dominandi seu utendi re in omnem usum, sic verum esse, habere Deum dominium in Christum ut hominem; si vero intelligatur de relatione domini, sic non esse verum reperiri in Deo respectu Christi. Sed hæc distinctio difficultatem non evacuat, nam hæc relatio domini in Deo non est realis sed rationis, ut omnes Theologi docent: unde proprium ac verum dominium, quod est intrinsecum & connaturale Deo, supposita productione creaturæ, in ejus potestate & voluntate consistit: ergo si in Christum ut hominem habet Deus prædictam potestatem, habet verum & reale dominium, quale in Deo esse potest. Ac deinde, supposita tali potestate,

respectu Christi ut hominis, cur non poterit mens nostra, conferendo illa extrema, respectum inter ea invenire, aut confingere; quod si id potest, is non erit alius ex parte Dei nisi respectus domini: nisi novum aliquod nomen excogitetur ad vim argumenti eludendam. Denique in hunc modum hoc ipsum declaro, nam Deus, quantumcumque bona sua communicet cum creatura, non amittit in illam dominii potestatem: ergo neque est, cur nomen seu denominationem domini amittat, & consequenter nec respectum aut rationem domini. Unde inter homines, nunquam is, qui dominus alterius antea erat, amittet relationem vel appellationem domini propter solam bonorum communicationem, nisi etiam privetur aliqua potestate, quam antea habebat in eum, qui erat servus. Et hoc modo per conjugium uxor definit esse ancilla, & per adoptionem amittitur servitus, quia potestas utendi talire, aut tollitur, aut mutatur. Si autem eadem potestas maneret integra juxta civilia jura, quantacumque beneficia dominus in servum conferret, non propterea dominus esse desineret. Cur enim? Sic ergo contingit in Deo, cujus potestas in opus suum nec tolli, nec minui potest: & ideo, quantumvis bona sua communicet, quod nihil aliud est, quam beneficia conferre, non propterea desinet esse aut dici dominus. Imo (si ita loqui fas est) eo est magis alicujus dominus, quo pluribus bonis eum cumulavit.

Nec vero dici potest, communicationem bonorum Dei cum Christo, non esse ex beneficio Dei, sed esse connaturalem, ex personæ dignitate. Nam hoc est verum respectu Christi ut Deus est, & consequenter respectu etiam Christi simpliciter & sine determinatione sumpti, quia Christus absolute dictus non est Deus ex beneficio, sed ex natura: non est tamen id verum respectu Christi ut hominis, quia omnis divinorum bonorum communicatio, quæ in illo ut homine reperitur, orta est ex beneficio & gratia suæ humanitati collata, ratione cujus nec potestatem nec nomen domini Deus amisit respectu illius. Quo factum est, ut Christus ut homo per eam humanitatem vere ac proprie sit sub dominio Dei constitutus, & quod ex beneficio Dei habeat omnia bona, quæ illi ut homini communicata sunt: hæc ergo communicatio bonorum nihil obstat, quominus & Deus sit vere ac proprie dominus Christi ut hominis, & consequenter ut e contrario etiam Christus ut homo sit vere ac proprie servus Dei.

Hæc, quæ in hujus posterioris sententiæ confirmationem adduxi, tantum, apud me habent pondus autoritatis & rationis, ut nullatenus negandum existimem, quin sit in Christo ut homine aliqua vera & propria ratio servitutis ad Deum, ac proinde vere ac proprie possit sub aliqua ratione dici servus Dei; quatenus, nimirum, est sub potestate ejus, & non solum illi in omnibus parere tenetur, sed etiam ab illo in omnibus pendet, & e contrario Deus potest illo uti prout sibi placuerit. Imo ulterius addo, juxta communem usum hujus vocis, *servus Dei*, sine ullo periculo vel suspitione erroris posse de Christo ut homine prædicari: quia revera hæc servitus nullam ignobilitatem importat, aut requirit, præter eam, quæ in ratione naturæ creatæ includitur: nullo autem modo exigit creatam personam, præsertim quando non de aliquo simpliciter, sed cum illa determinatione, *ut homo*, prædicatur.

Quod si aliquis a me inquirat, quam certam posteriorem hanc sententiam esse existimem, libentius aliorum in hoc judicium audiam, quam meum proferam. Non dubito tamen, quin si Adrianus Papa, & Concilium Francoford. specietenus oppositam sententiam docuisse non viderentur, posterior hæc opinio certa & de fide a Theologis existimaretur: si ergo ostenderimus, Adrianum & Concilium illi non repugnare, nam de cæteris Patribus id facillimum est, satis fundata ac fere certa illius veritas relinquetur.

Ad definitionem igitur Concilii Francoford. prima responsio esse potest, illam epistolam, quæ sub nomine Adriani circumfertur, non constare fuisse illius, quia nuper in lucem prodiiit, & ignoratur, quo loco inventa sit, & qua certa auctoritate vel traditione Adriano tribuatur: si autem illa epistola authentica non est, tota illius Concilii auctoritas sit incerta tum quod Generale non sit, & ideo sine Pontificis auctoritate infallibilem definitio-

Approba-  
tur secun-  
da senten-  
tia.

Quæstion-  
culæ.  
Prima  
opinio.



nem non habeat: tum etiam, quod in decretis seu epistolis, quæ nomine illius Concilii circumferuntur, eadem sit incertitudo, quæ in Adriani epistola. Sed hæc responsio, quicquid alii sentiant, nobis probanda non est, & jam hoc tempore non nihil temeritatis habere videtur, quia illa decreta, magna consensione recepta sunt, de qua re latius infra dicam, q. 23.

Secunda  
opinio.

Secunda responsio est, Adrianum & Concilium ex instituto non tractasse de servitute Christi, sed de adoptione tantum, & ideo, quæ de servitute dicunt, non habere infallibilem authoritatem, quia hæc in decretis Pontificum & Conciliorum solum est, circa ea, quæ per se & ex instituto definiuntur, non vero circa ea, quæ obiter attinguntur, neque in rationibus aut testimoniis, aut aliis hujusmodi, quæ afferuntur. Sed hæc responsio est etiam nimis libera & præceps, nam plane concedit, eos Patres errasse in his, quæ de servitute docent, quod nimis derogat eorum authoritati; nam licet verum sit, in omnibus historiis quæ Felicianæ hæresis meminerunt, quam Elipandus secutus est, referri errorem circa adoptionem Christi, quem dicunt fuisse damnatum, nulla fere mentione facta de servitute, ut latius infra q. 23. referemus, & interim videri potest apud nostrum Joannem Marianum lib. 7. suæ historiæ de rebus Hispaniæ, c. 8. Nihilominus qui attente & sincere legerit epistolam Adriani (& idem est de Concilio) plane conspiciet, illum æque damnare sententiam Elipandi in articulo servitutis, itaque in articulo adoptionis, & fere æque ex professo de utroque disputare, nam magnam ejus epistolæ partem in persuadendo ac probando hoc puncto de servitute consumit. Quocirca, quamvis ingenue fatear, non omnia argumenta, quibus utitur, esse solida, ut facile ex probationibus posterioris sententiæ supra positæ intelligi potest, tamen quod in conclusione intenta eo sensu, quo illam profert, erraverit, nulla ratione censere esse admittendum.

Tertia  
opinio.

Tertia responsio esse potest, Adrianum non reprehendisse Elipandum in hac parte, eo quod falsum diceret, sed eo quod indigne & irreverenter de Christo loqueretur: quod quidem ex multis ipsius Elipandi verbis colligi potest, nam in confessione ejus, quæ ex libro Beati & Heterii refertur, Christum non solum servum, sed etiam servulum appellat, dicens, *Cum parvulo parvuli, & cum servulo servuli*. Item non tantum *servum*, sed etiam *leprosum vocat*, quod merito reprehendit Adrianus, quia Christus nec lepram corporis habuit, nec animi, quæ non est nisi peccatum, nam poena peccati, & præsertim propter aliena peccata voluntarie suscepta, lepra dici non potest. Et ideo Isaïæ 53. etiam juxta vulgatam lectionem, non dicitur, fuit leprosus, sed, *putavimus eum quasi leprosum*, id est, dignum illis poenis pro peccatis suis, cum tamen ipse vulneratus fuerit propter iniquitates nostras. Denique in epistola Concilii, præsertim in fine, hoc indicatur illis verbis, *Cur eum servum nominare debemus, qui nos amicos maluit nominare, quam servos? &c.* Sed, licet verum sit, Adrianum & Concilium reprehendere insolentiam & audaciam Elipandi, tamen non est dubium, quin etiam falsitatem & erroneum sensum ejus damnent. Neque ad hoc persuadendum oportet plura verba referre, quam in principio citata sunt, quia illa videntur expressa, & si attente legantur illa decreta, res est tam clara, ut non egeat probatione.

Quarta  
opinio.

Quarta ergo responsio est, Concilium loqui de servitute spirituali fundata in conditione servili, qua is, qui servus est, non ex amore paret, & reveretur dominum suum, sed ex timore poenæ, & quasi coacte. Itaque hoc modo negare, Christum esse servum, nil aliud est, quam negare obediisse aut servivisse Deo spiritu servili & timoris. Hanc expositionem adhibuit quidam modernus interpres D. Th. & ad hunc sensum inducit illa verba Concilii in sua epistola *Et si cum Propheta servum nominasset, non tamen ex conditione servili, sed ex humilitatis obedientia*, ubi per conditionem servilem, spiritum timoris intelligit. Hæc vero expositio dicit quidem quippiam verum, tamen sine fundamento illud attribuit Adriano, aut Concilio. Verum namque est, in Christo non fuisse illum servitutis spiritum seu timorem cum conditione servili: hunc enim perfecta charitas excludit, ut 1. Joan. 4. dicitur: fuit autem in Christo perfectissima charitas. Tamen, quod Concilium hoc sensu de servitute loquatur, eamque in Christo neget, voluntarie excogitatum est, solum ad

eludendam Concilii authoritatem, re tamen vera nullum habet fundamentum, aut in verbis Adriani & Concilii, aut in causa de qua tractabant. Primum patet, quia in toto illo Concilio nulla fit mentio de spiritu servitutis, qui procedit ex timore: si autem eo tantum sensu definiretur, Christum non esse servum, sufficiens fuisset ostendere illum ex charitate & filiali reverentia obediuisse Deo, & non ex servili seu poenali timore: nihil vero de hoc ibi dicitur, sed aliis rationibus ostenditur, Christum non esse servum, ex majestate personæ ejus. Secundum patet, quia nulla historia aut conjectura constat, Felicem aut Elipandum appellasse Christum servum ea significatione, quæ ab spiritu servili sumitur. Neque ex verbis aliquibus, quæ de illorum sententia in eo Concilio referuntur, colligi potest, neque ex confessione Elipandi, quæ ex libro Beati & Heterii profertur: nam ibi tantum dicit, factum fuisse servum, sicut dicit, factum fuisse hominem. Imo, dum simul ait, Christum fuisse filium adoptivum, & habuisse charismata Spiritus, in quo clamabat, Abba Pater, & esse servum, sicut sunt alii Sancti, indicat potius sensisse, non habuisse Christum servilem spiritum, sed filialem. Neque enim omnes justi & filii adoptivi habent illum spiritum servilem, præsertim si perfecti sint. Neque est verisimile, Elipandum sensisse, Christum fuisse filium adoptivum minus perfectum, quam sint alii justi.

Quinta  
opinio.

Quinta responsio esse potest, solum voluisse Adrianum & Concilium docere, Christum non esse servum servitutis poenali ex peccato contracta, non tamen voluisse ab illo excludere servitutem naturalem, quam omnis creatura ex vi creationis habet ad Deum. Quod enim præter hanc naturalem servitutem sit alia in puris hominibus per peccatum introducta, certa res est. Imo servitus ex prima sua introductione & significatione eo modo quo est inter homines, non significat naturalem conditionem, ut notavit Augustinus 19. de Civit. c. 9. sed conditionem vilem & poenalem jure Gentium introductam, qua is, qui liber erat, in poenam delicti capitivus efficitur, & definit esse sui juris, totamque libertatem suam & actiones omnes sub dominio & potestate illius constitutas habet. Unde fit, ut neque bona propria possideat, neque cum suo domino in propriis ejus bonis communicet, neque habere possit jus ad illius hæreditatem obtinendam. Quod servitutis genus in bellis primum introduci cœpit, nam, qui morte plecti poterant, servabantur, ut in captivitatem redigerentur, & inde *servi* vocati sunt, ut notavit Isidor. lib. 5. originum, c. ult. ubi sic ait. *Hæc est sola malorum omnium postrema, quæ liberis omni supplicio gravior est, nam ubi libertas perit, una ibi perierunt & omnia*. Ad hunc ergo modum dicitur homo per peccatum contraxisse servilem quandam conditionem, non quidem naturalem sed poenalem, non solum respectu peccati, quomodo qui peccat, dicitur fieri ipsiusmet peccati servus, quia quodammodo illi subjicitur, & ad illi parendum trahitur: sed etiam respectu Dei, quia homo ex natura sua aptus est, ut per Dei gratiam ad ejus amicitiam sublevetur, ut cum ipso in bonis ejus communicet, & jus ad illius hæreditatem accipiat, & in hunc finem a Deo creatus est, per peccatum autem fit indignus his omnibus bonis, & quantum est ex merito peccati, in perpetuam captivitatem sub Deo redigitur, & ideo merito servilem conditionem contrahere dicitur, & peculiari modo fieri servus vili & ignobili servitute, quæ ab hominibus excluditur, cum justi sunt: ad quod possunt non male accommodari verba Christi, *Jam non dicam, vos servos, sed amicos*. Quod vero in Christo Domino non fuerit hæc servitus, certius est, quam ut nostra probatione indigeat, quia sicut in Christo peccatum non fuit, ita nec vilis servitutis status, qui ex peccato originem ducit, ut bene declarat Ambros. sermon. 6. in Psal. 118.

Dices: Quamvis Christus non fuerit obnoxius huic servituti ob propriam culpam, tamen ob nostram fuisse videtur, nam vere ac proprie sumpsit pro nobis debitum satisfaciendi pro peccato: ergo, sicut vere factus fuit mortalis, ita & vere servus hoc genere servitutis. Sicut, qui loco alterius se tradidit in servum, ut sanctus fecit Paulinus, vere manet servus, etiamsi non sit ob propriam culpam. Respondetur hinc solum probari assumpsisse Christum pro statu viæ speciem quandam & statum hujus servitutis, non tamen veram servitutem hujusmodi, quæ sine peccato & debito perpetuæ poenæ proprie ac vere non



existit: & ideo sub hac ratione certum existimo non posse Christum etiam ut hominem appellari servum, nisi tantum per metaphoram, seu secundum speciem externam: quomodo etiam peccatum dicitur pro nobis factus.

Denique, quod mens Adriani & Concilii fuerit, de hac servitute loqui, nonnullæ sunt conjecturæ. Prima sumi potest ex verbis, quæ in præcedenti responsione afferbantur ex epist. Concilii, *Et si cum Propheta servum nominasset, non tamen ex conditione servitutis, sed ex humilitatis obedientia, &c.* Quod enim ibi *conditio servitutis* pro spiritu timoris accipiat, nullum habet fundamentum: quod autem sumatur pro conditione peccati & culpæ, habet maximum, tum quia servitus, ut dixi, ex primæva institutione significat aliquid pœnale, & ideo conditio servitutis merito dicitur ipsa culpa, tum etiam quia conditioni servitutis opponitur humilitatis obedientia, quia, nimirum, non passus est Christus tanquam debitor pœnæ ex conditione peccati, sed tanquam humilis & obediens filius. Tum maxime, quia in illius sententiæ confirmationem adducit Concilium Leonem Papam serm. 2. de Nativitate hunc in modum dicentem, *Assumpta est de matre hominis natura, non culpa: creata est forma servi sine conditione servili*: certum autem est, apud Leonem eo loco, *conditionem servilem* culpæ statum significare, nam illud ipsum, quod dixerat, *assumptam esse de matre hominis naturam & non culpam*, per hoc declarat, quod creata est forma servi sine conditione servili. Quod si legamus *sine conditione virili*, ut aliqui codices legunt, æque bene quadrat, nam etiam ex hoc quod Christus non ex viro, sed ex Spiritu sancto conceptus est, maculam culpæ contrahere non potuit. Quod amplius declarat sequentibus verbis, *Quia novus homo sit contemptus est veteri, ut & veritatem suscipere generis, & vitium excluderet vetustatis*, id est, ita Christus, assumpsit humanitatem ex veteri Adamo, ut veritatem nature ejus assumpserit, non vero vitium: hoc ergo fuit accipere de matre naturam & non culpam, formam servilem sine conditione servili: conditio ergo servilis apud hos Patres est vitium nature. Quidam auctor ad vitandam hujus testimonii vim sic citat & distinguit verba Leonis, *Suscepta est de matre hominis domini natura non culpa*, & super hanc lectionem fundat expositionem voluntariam, scilicet, quod cum in illis verbis, *Assumpta est hominis domini natura, non culpa*, duo contineantur. Primum scilicet, quod sit assumpta natura hominis domini explicatur per se hoc, *quod creata est forma servi sine conditione servili*, secundum autem scilicet, quod non fuerit assumpta culpa declarat per illud, *quia novus homo sic contemptus est veteri, &c.* & ita concluditur, conditionem servilem ibi absolute & simpliciter sumi, & non pro conditione culpæ. Sed in primis illa lectio neque in codicibus Leonis reperitur, quod ego viderim, neque in Concilio ita citatur, sed codices Leonis frequentius legunt, *Assumpta est de matre hominis natura*, in Concilio vero juxta ultimam Romanam editionem ita citatur, *Assumpta est de matre Domini natura non culpa*: illa vero conjunctio hominis Domini, & reperitur nullibi, & fere inutilata est. Deinde illa partitio & accommodatio verborum non habet fundamentum in verbis Leonis. Imo, si attente consideremus, priores duas propositiones, scilicet, *Assumpta est natura non culpa, creata est forma servi sine conditione servili*, positas esse sine ulla causali nota, imo etiam sine ulla conjunctione, facile intelligetur, eamdem rem diverso modo ac diversis verbis in eis declarari: cum vero postea additur nota causalis, *quia novus homo, &c.* manifeste redditur ratio utriusque partis contentæ in quacumque ex prioribus propositionibus. Qui sensus vera illo adeo clarus & perspicuus, ut mirum sit potuisse de isto dubitari.

Secundo confirmatur & suadet amplius hæc expositio verbis, quæ proxime subjungit Concilium, *Nonne secundum seculi nobilitatem B. Maria Virgo ex Regali & libera prosapia processit? Huic vero Virgini regia dignitatis Spiritus S. accessit, & Filium ex ea procreari fecit. Mirum, si Spiritus S. hominem ex ea non potuit facere perfectum & ingenuum?* Quibus verbis hoc solum intenditur & probatur, Christum ex vi conceptionis suæ servitutem peccati non contraxisse, non solum quia Deus erat (quod in hac ratione non tangitur) sed quia non ex viro, sed de Spiritu S. conceptus est. Unde hoc ipsum tertio de-

clarant verba, quæ statim in eodem Concilio sequuntur. *Sed & hoc volumus a vobis audire, an Adam primus humani generis pater, qui de terra virgine creatus est, liber esset conditus, siue servus? Si servus, quomodo tunc imago Dei? Si liber, quare & Christus quoque non ingenuus de Virgine?* & infra: *Unde Adam fuit servus factus, nisi ex peccato, &c.* Constat igitur, Concilium loqui de servitute ex peccato contracta. Nam, si sit sermo de servitute Dei cōnaturali hominī tītulo creationis, certum est, Adamum etiam ante peccatum fuisse Dei servum. Video responderi posse, his quidem verbis præcise excludere Concilium servitutem peccati, non tamen inde sequi, in tota epistola loqui de sola illa, nam etiam ibi excludit a Christo servitutem respectu aliorum hominum & respectu angelorū, & tamen non de illis solis loquitur, sed discurrit per singulas, ut ita concludat, nullam servitutem propriam in Christū convenire, nam, licet illa enumeratio necessaria non esset, ad amplificandum sermonem & ad exaggerandam Christi dignitatem fieri potuit. Quæ responsio (ut verum fatear) multum enervat vim prædictorum verborū, saltem ut non cogamur dictam expositionem admittere, non tamen ut cogamur eam repellere. Accedit quod cum Concilium in ea enumeratione nunquam enumeret aliā servitutem respectu Dei ortā ex titulo creationis, sed semper insinuet servitutes, quæ vilem conditionem & pœnalem indicent, adhuc relinquitur probabile argumentum, in ordine ad Deum non agere Concilium, nisi de servitute ex peccato contracta. Quod potest quarto confirmari ex illis verbis, quæ in epist. etiam Adriani leguntur, *Nos per illum adoptivi sumus, non ille nobiscum adoptivus, nos per illum a servitute liberati, non ille nobiscum servus*. Non sumus autem nos per Christum liberati ab illa servitute Dei, quæ nobis est intrinseca & connaturalis, sed a servitute, quam ex peccato contraximus: ergo hoc modo negatur Christus esse nobiscum servus. Quinto addi potest cōjectura, quia de hoc genere servitutis verum habet, quod Adrianus sæpe dicit, Christum esse a Prophetis vocatum servum per tropum & figuram, quia assumpturus erat carnem in similitudinem carnis peccati, & subiturus penam peccatis debitam, factus obediens, & humiliatus usque ad crucem. Quamvis etiam illa testimonia Scripturæ aliam possint ad hanc servitutem, ideo secundū illam non proprie, sed per metaphoram & similitudinem dicitur Christus hoc modo nominari servus. Solum relinquebatur in hac expositione declarandū, Elipandum hoc sensu appellasse Christum servum, hoc enim satis videtur incertū, sed nihilominus fiet aliquo modo verisimile in ultima interpretatione Concilii. Est ergo hæc expositio probabilis, quam solam ego in priori editione adhibui, sed nunc non videtur simpliciter necessaria, nec per se sola sufficiens, quamvis fortasse sit etiam vera ut in sequentibus declarabo.

Sexta ergo expositio est, Concilium non negare, Christum cum determinatione, in quantum homo est, posse dici servum, sed simpliciter & sine ulla determinatione prolatum. Ita enim fere loquuntur Adrianus & Concilium in suis epistolis: & suaderi potest, nam hoc modo fit verisimile, quod Adrianus ait, in Scriptura novi testamenti non appellari Christum servum, scilicet absolute & sine addito, nam cum determinatione humanitatis, vel expressa, vel subintellecta in verbis antecedentibus aut consequentibus satis videtur in superioribus probatum, etiam in novo testamento sæpe fuisse significatam servitutem Christi ut hominis. Neque contra hanc expositionem multum me movet, quod interdum in illo Concilio additur determinatio, *secundum humanitatem*, quia non est necesse, quod illa determinatio intelligatur adjungi ex parte naturæ, sed ex parte suppositi, scilicet, ut designetur suppositum in tali humanitate subsistens. Et hunc sensum esse magis a Concilio intentum, constat ex dicendis hic & latius infra q. 23. Nihilominus tamen hæc expositio per se sola non mihi satisfacit, tum quia existimo, Concilium non tantum de modo loquendi, sed etiam de ipsa re tractasse ac definivisse: tum etiam quia eo modo quo est verum, Christum in quantum hominem esse servum, non est certum & de fide, etiam sine ullo addito non posse sic appellari, si tamen hæc expositio cum his quæ dicemus, adjungatur, aliquid verum continet, ut patebit.



Quæstio-  
culæ so-  
lutio.

Una ergo intentio Concilii ex sensu erroris Elipandi sumenda est, nam solum illum errorem directe damnare intendit: Elipandus autem, ut opinor, re ipsa Nestorianus fuit in eo errore, quem de Christo habuit, distinxit enim illum a Filio Dei naturali, non tantum natura sed etiam supposito: & hoc sensu dixit illum esse servum, id est (ut ita dicam) purum servum, & nullo modo filium, ideoque addebat, ex servo factum esse filium per adoptionem: in contrario ergo sensu docet Concilium, Christum non esse servum, sed etiam ut hominem, id est, ut substantiam in humanitate esse supremum dominum, ipsumque Filium Dei naturalem. Quod autem Elipandi error hic fuerit ex variis historiis, & signis ac conjecturis ostendimus infr. q. 23. Nunc, quod ad Historiographos attinet, sufficit referre verba Joannis Mariani, & in inquirendis antiquitatibus diligentissimi, & in rebus ac disputationibus Theologicis versatissimi. Ille ergo lib. 7. suæ histor. de reb. Hispan. c. 8. sic scribit, *Nestorii placita Concilii pridem Ephesini diligentia sopita, quasi veteris incendii scintilla in Hispania, illis auctoribus* (scilicet, Felice & Elipando) *suscitata sunt, Christum affirmantibus, quæ parte certe homo est, Dei filium adoptione esse, &c.* Deinde ex epistola totius Concilii hoc licet colligere ex illis verbis, quæ habentur col. 6. *Neque vero alium Jesum Christum, alium Verbum dicemus, ut nova hæresis calumniatur.* Et infra adducens locum ad Hebr. 3. *Amplioris gloriæ iste præ Moyse dignus est habitus: Quomodo* (inquit) *amplioris gloriæ, si servus sicut & Moyses, vel ex servo adoptivus? ubi confidero primum verbum, sicut & Moyses, id est, purus servus, & solum per adoptionem filius.* Deinde confidero verba illa, *ex servo adoptivus*: hæc enim verba manifeste indicant suppositorum distinctionem. Quod clarius inferius declaratur illis verbis, *Sed nescio ex quo servo adoptatus in filietatem ut vos dicitis.* Dicebant ergo isti, Christum hominem prius, vel natura, vel fortasse etiam tempore (ut sæpe in illo Concilio insinuat) fuisse quendam servum, & deinde fuisse factum filium Dei per adoptionem: ergo errarunt in sensu explicato: ergo in eodem, & non in alio damnavit Concilium hunc errorem. Unde omnes probationes ejus ad hoc præcipue tendunt, ut ostendat, hunc hominem Christum non esse alium a Filio Dei, & ex utero Virginis fuisse verum Filium Dei naturalem, & non servum, servitute, scilicet excludente hanc filiationem: atque adeo purum servum, ut nos sumus. Et hoc modo ait Adrianus in sua epistola, *Opus nostrum est ut servus servi per conditionem, & filii per gratiam adoptionis, opus ejus est, ut sit unicus, proprius, & dilectus filius Dei.* Atque hinc fortasse ortum est, quod hæc duo, scilicet affirmare, Christum esse servum & adoptivum, non referantur & notentur in Felice, & Elipando ut duo errores, sed ut unus, quia eandem habuere radicem, & connexionem in eodem principio; scilicet quod hic homo Christus ut conceptus de foemina, non fuit verus & naturalis Dei filius, nec sanctus ex vi suæ conceptionis: Ex quo plane sequebatur, illum & ex se esse omnino servum, & filium solum per adoptionem. Unde illud fundamentum est, quod præcipue evertitur in toto illo Concilio. Accedit tandem vehemens conjectura, quia, si Elipandus dixisset, Christum ut hominem, esse servum solum propter assumptam naturam servilem, licet fateretur, & suppositum assumens esse verum Deum, & assumptionem per veram unionem hypostaticam factam esse, in re nihil dixisset contra veritatem mysterii incarnationis, & in modo loquendi ab antiquis Patribus non discordasset: cur ergo propter eam locutionem posset ut hæreticus damnari, & tam acerbè reprehendi? maxime, cum Adrianus fateatur, Ambrosium, ad exprimendam in Christo naturæ humanæ veritatem, interdu Christum, ut hominem, servum appellasse. Neque enim tenebatur Elipandus credere aut scire, unionem hypostaticam excludere a Christo ut homine omnem veram servi appellationem, aut ab humanitate omnem conditionem servitutis respectu Dei, quia, neque hoc verum erat, neque, si fuisset, tunc erat in Ecclesia declaratum imo nec Adrianus aut Concilium Francoford. hoc unquam declararunt. Quod etiam est signum, non in eo sensu, sed in alio, quem diximus, rem hanc tractasse ac definitivisse.

Quis fuerit  
Elipandi  
error.

Atque hinc ulterius fit verisimile, Elipandum, non solum asseruisse, Christum, ut hominem, esse purum ser-

vum Dei, sed etiam ex se fuisse obnoxium cuicumque vili servituti, etiam peccati, quia, si semel concipiatur ut purus homo, facile est, hæc & similia de illo sentire. Unde in verbis Elipandi, quæ partim ex ejus confessione supra retulimus, partim in discursu illius Concilii indicantur, multum significatur, tam in ratione servitutis, quam adoptionis, nihil amplius de Christo, quam de cæteris hominibus sensit, quod fortasse etiam indicare voluit, appellando Christum leprosum: potius enim ab spiritali quam a corporali lepra appellationem illam sumpsisse videtur. Item ob hanc causam magis admiratur Adrianus, graviusque illum reprehendit, quod Christum appellaverit servum, quam filium adoptivum, quod certe sine causa fecisset, si Elipandus in alio sensu locutus fuisset, cum Sancti communiter vocent Christum, ut hominem, servum, non autem adoptivum. At vero in dicto sensu jure admiratur, quod servitutem, etiam ut ex peccato oriri potest, Christo attribuerit. Et forte etiam ob hanc causam sæpe declaratur in illo Concilio, Christum, non solum, quia Deus est, sed etiam, quia ex Spiritu sancto conceptus est, non fuisse servum, quod est verum de servitute ut includit omnem illam imperfectionem, non vero de servitute ad Deum, quæ ex sola creatione seu effectione oritur. Quod si cui incredibile videatur, Elipandum in tam apertum & blasphemum errorem incidisse, ut crederet Christum aliquando habuisse peccatum, respondetur inprimis, si semel credidit, illum esse purum hominem, facile potuisse in eum errorem labi. Deinde nobis hoc non constat, nec necessarium est hoc illi imponere, sed solum credimus, asseruisse, Christum fuisse pure servum, antequam fuerit in filium adoptatus: itaque de illa servitute fuisse locutum, ac si ille homo Christus ejusdem esset conditionis & originis, cujus nos sumus.

Atque hinc tandem probabile mihi est, ad eliminandum & detestandum hunc errorem, voluisse etiam Adrianum dicere, Christum simpliciter & absolute non esse a nobis appellandum servum: & hac ratione totis viribus conatum esse, explicare veteris testamenti Scripturas, ut non nisi per metaphoram in eis Christus, servus appelletur: nam licet illa testimonia possint alio modo exponi, ut a Patribus declarantur, sicut in superioribus visum est, tamen Adrianus, vel noluit alia interpretatione uti, quia ea visa est accommodatio ad rem, de qua tunc agebat ne aliquam occasionem relinqueret hæreticis abutendi in Christo illa servi appellatione: vel certe, si eam interpretationem aut unicam aut omnium optimam existimavit, id ad fidem non pertinet, sed ad privatam ipsius Pontificis opinionem. Et similiter, quod Adrianus ait, in novo testamento nunquam Christum, ut hominem appellari servum, ad Deum dominum ejus, in aliquo sensu verum est, scilicet, has expressas appellationes, & sub his nominibus in novo testamento non reperiri. quod est certe verum, & merito fuit a Pontifice observatum ad obstruenda hæreticorum ora, qui male appellatione servi utebantur. Non potuit tamen negare Pontifex, quin eo modo, quo in vero & Catholico sensu Christus, in quantum homo, servus dicitur, æquivalenter saltem ea appellatio in novo testamento reperitur, ut ex variis locis, & Sanctorum interpretationibus ostendimus. Neque est, cur credamus, Pontificem voluisse hoc negare, quamvis id tacuerit, quia eo tempore, ad eam causam, de qua tractabat, judicavit tunc magis expedire. Quamquam, licet in sensu & expositione illorum testimonium aliter sentiret, ejus expositio ad fidem non pertineret, quia (ut sæpe dixi, & est communis doctrina) in his decretis solum pertinet ad fidem definitio intenta, seu damnatio erroris, non vero omnia quæ in causæ discussione vel probatione afferuntur. Atque hæc sunt quæ dicenda occurrunt de sensu illius definitionis, & totius doctrinæ illarum epistolarum Adriani, & Concilii Francoford. quæ magis confirmabuntur ex his, quæ de adoptione inferius dicemus.

Unum vero hic adjicere non omitam (quod, quæso, lector animadvertat) non commendari, sed detrahi potius authoritati Adriani & Concilii, si dicamus, voluisse damnare locutionem illam in eo sensu, quo ab innumeris Patribus asseritur, nullo vel ex Scripturis sacris, vel ex aliis principiis fidei adducto fundamento. Existimare autem, eos motos fuisse ad damnandam illam sententiam, quæ nunc ab scholasticis docetur, aut Elipandum in



eodem sensu, ex sola illa ratione, quod unio hypostatica excludat servitutem, propter communicationem bonorum, quam inter Deum & hominem facit, valde alienum est a gravitate Ecclesiasticæ definitionis. Nam, licet hujus infallibilitas, non ex humanis rationibus, sed ex Spiritus sancti assistentia oriatur, tamen Spiritus sanctus non vult, vel ex parte sua miraculose hoc facere, neque ex parte hominum permittere ut temere fiat: & ideo nunquam infallibilis & Ecclesiastica definitio fit, nisi aut ex apertis testimoniis Scripturæ, aut ex sufficiente traditione, aut certe ex rationibus ita urgentibus, ut evidens sit, quod definitur in revelatis, & antea definitis contineri. In præsentia autem hæc omnia concurrebant ad damnandum errorem Elipandi in sensu explicato, ad negandam autem Christo ut homini omnem propriam servitutem respectu Dei, ex Scriptura vel traditione nihil juvabat, nam potius docet contrarium. Ratio autem illa quam sit inefficax, satis (ut existimo) constat ex dictis. Non est ergo verisimile, in eo sensu causam hanc esse tractatam a prædictis Pontifice & Concilio.

Ad Patrū  
testimo-  
nia pro  
prima  
sententia  
responsio.

Hactenus responsum est ad primum fundamentum contrariæ sententiæ. Nunc dicendum est ad singula testimonia, quæ in secundo fundamento adducuntur. Ad primum quod est Chrysost. respondetur, eum non loqui de naturali conditione servi, sed de usu & ministerio servi. Unde ex illo loco, si integre legatur, potius confirmatur nostra sententia. Ad quod primum expendo illa verba, *Sicut servus factus est, sic & Pontifex & minister*. At Christus non putative tantum aut metaphorice Pontifex factus est, sed vere ac proprie, ut q. 22. videbimus: ergo eodem modo factus est servus. Rursus, Christus ascendens in cælum non amisit dignitatem Pontificis: neque conditionem ministri, in actu primo (ut sic dicam) nam & est Pontifex in æternum, & quantum est ex se Christus ut homo semper est aptus ad ministrandum Deo, in omnibus quæ Deo placuerint: sed quantum ad usum dicitur in cælo non exercere munus ministri, aut Pontificis, scilicet, quantum ad ea ministeria, quæ inferioris sunt ordinis, vel ad statum viæ, & carnis passibilis pertinebant. Igitur eodem modo, quantum ad conditionem humanæ naturæ, semper manet servus, tamen quantum ad usum earum actionum quibus non tantum Deo, sed etiam hominibus dicitur Christus aliquando servisse, reliquisse dicitur servitutem. Hanc autem esse mentem Chrysost. patet ab illis verbis, *Noli igitur putare, cum Pontificem eum audis, quod semper Pontificali fungatur officio, &c.*

Secundum testimonium erat Athanasii, cujus verba in eodem ferm. 3. cont. Arianos satis sunt expressa in nostra sententiæ confirmationem, ut vidimus. Quocirca in reliquis locis illius sermonis solum intendit, Christum neque esse neque posse appellari servum ratione suæ personæ, sed tantum ratione assumptæ naturæ; illa autem verba, scilicet, dici Christum, *servum appellatione, non veritate*, in Athanasio non reperio: quod si reperirentur, referenda essent ad suppositum, quod secundum se revera non est servus, sed in quantum homo ratione assumptæ naturæ illam suscipit denominationem. Tertium testimonium est Eusebii Emiseni, quod in his homiliis Eusebii, quas apud me habeo non invenio, tamen ubicumque illa verba inveniantur, satis ex eis colligitur, authorem loqui de servitute peccati. Quod enim dixerat illis verbis, *Subvenire peccato non poterat, simili peccato obnoxius*, explicat per illa, *Nec subvenire pro servis subiectus legibus servitutis*. Et ab hac servitute & conditione, cõcludit, debuisse esse liberum eum, qui pro aliis offerendus erat.

Quartum erat Leonis, de quo satis dictum est, & ostensum, eum loqui de servitute peccati. Quintum erat Augustini, qui in priori comparatione Moysis & Christi loquitur plane de puro seu omnino servo, qui ita sit servus, ut non sit etiam dominus. Et probabiliter ex eo loco & similibus colligi potest, Christum non simpliciter, sed solum cum determinatione, *ut homo*, posse servum appellari, de quo dicemus sectione seq. Sextum erat Cyrilli Alexandrini, de cujus sententia satis ex dictis constat. In citato autem loco aperte loquitur contra Nestorium, & in virtute contra Elipandum, & contra omnes, qui *audent dicere* (hæc enim sunt verba Cyrilli) *quod ex semine Abraham hominem sibi ipsi adaptavit Deus, & communicavit illi dignitatem gloriæ & honoris ac filiationis*. Et infra, *Non enim ex homine Deus factus est Christus, ut di-*

*xi, sed Deus existens Verbum factum est caro, hoc est homo. Exinanitus vero esse dicitur, eo quod ante exinanitionem plenitudinem habuit in propria natura secundum quam intelligitur Deus, non enim ex eo, quod inanis quispiam sit, ad plenitudinem pervenit* (quod agebat Elipandus, ex quodam servo factum esse filium Dei) *sed magis ex divinis dignitatibus, & ineffabili gloria humiliavit se ipsum, non humilis existens, homo, exaltatus & glorificatus*. In hoc ergo eodem sensu subdit citata verba, *Acceptit autem formam servi ut liberi*. Ita enim est servus, in quantum homo, ut tamen ipsum suppositum sit liberum & dominus omnium, unde subdit: *Non servus existens ad libertatis rediit gloriam*. Hæc enim erat propria, & fere in eisdem terminis sententia Elipandi, quæ illis verbis refutatur: nam hic revera est planus sensus verborum Cyrilli, ut ex contextu citato constat. Etenim non affirmat in hac ultima propositione, Christum non servum, ad libertatis rediisse gloriam, ita ut illa particula, *non servus*, infinitanter sumatur, ut Sophistæ dicunt, sed negat, Christum prius fuisse servum, & per incarnationem, ad quandam gloriæ participationem fuisse assumptum, quod Nestorius agebat. Et hoc ipsum est quod subdit, *In similitudine hominum factus est, qui in forma, & in Patris aequalitate* (supple, erat) *non homo existens, ut fieret in similitudine Dei, secundum participium locupletatus est*: ubi non affirmat Cyril. Christum fuisse secundum participium locupletatum, sed potius negat, Christum fuisse hominem secundum participium locupletatum, ut fieret in similitudine Dei: quia potius fuit ipsemet Deus in similitudinem hominum factus, ut proxime antea dixerat.

Septimus erat Theodoretus in cujus verbis nulla vis fieri potest, quia Nestorianus erat, cum illa scripsit: & in eodem loco ait, quod formatum est in ventre Virginis, non fuisse Deum Verbum, sed servi formam, id est, servum hominem, quod agebat Elipandus. Cum ergo dicit, post unionem cessasse servitutis nomen, appellatione tantum intelligit, eo modo quo Nestoriani agebant hominem Christum vocari Deum. Solus Damascenus aliquid negotii nobis facessit. Cujus sententia, si communi sententiæ Patrum contraria existeret, non esset certe illi præferenda. Præsertim quia ratio, qua Damasc. utitur, præferenti momenti habere videtur: sic enim colligit. Servitus est ex his quæ dicuntur ad alterum, si ergo Christus est servus, alicujus erit servus: sed Christus nullius est servus. Quod probat, quia non est sui ipsius servus: ergo nec Patris: ergo nullius. Qui discursus in eadem forma fieri posset de appellatione subiecti, nam ex illo sequitur, Christum non esse subiectum, nam etiam subiectio est ex his, quæ ad alterum dicuntur: sed Christus non est subiectus sibi, quia hoc est dividere personam ejus, ut dicitur in Concilio Ephesino in epist. ad Nestorium, quæ est 10. Cyrilli: ergo neque est subiectus Patri: alias non omnia, quæ habet Pater, haberet Filius: ergo nulli est subiectus. Et constat Christum, ut simpliciter, vel saltem ut hominem vere dici subiectum, ut supra ostensum est. Sicut ergo de relatione & denominatione subiecti dicendum necessario est, Christum hominem esse subiectum Patri, sibi autem ipsi non dici subiectum, non quia aliquid subjiçitur Patri, quod non subjiçitur Filio, ut Deo, sed propter distinctionem personæ, quæ in illa locutione absolute prolata indicatur: unde cum addito vere dicitur Christum ut homo subiectus sibi ut Deo: ita dici poterit de relatione servitutis: non ergo apparet efficax ratio Damasceni. Vel certe, si e contrario ex ratione authoris colligendus est ejus sensus, alterum e duobus dicendum est. Primum est, Damascenum, ad summum, docuisse, Christum non esse simpliciter servum nominandum: hoc enim probabiliter suadet illa ratio, non vero cum determinatione, in quantum homo, cum, illa adhibita, vere dicatur Christus in quantum homo servus sui ipsius, ut est Deus, neque sit inconveniens, eundem esse sui ipsius servum secundum diversas naturas. Secundum est Damascenum eodem sensu negasse, Christum esse servum, quo id negavit Adrian. Pap. & quo id affirmabant Nestoriani & postea Elipandus, scilicet, quod Christus sit omnino aut purus servus. Et hoc modo exposuit Damasc. D. Th. hic, art. 2. in Corp. & ad primum. Quare cum de humanitate Christi Damasc. ait, *At cum semel ei personaliter unita sit, quonam jam pacto in servilem classem redigetur?* per servilem classem, nihil aliud intelligendum puto, nisi existentiam in servili persona,

Damasceni  
difficile  
testimo-  
nium ex-  
planatur.



sona, seu constitutionem ejus, qui ex se sit pure ac simpliciter servus. Et in hoc sensu bene probat ratio Damasceni Christum non esse servum sui ipsius, & appellationem servi & hoc sensu dividere Christi personam.

**Ad Scrip-  
turæ illo-  
ca pro  
primæ  
sententiæ  
responsio.**

Tertium argumentum ex Scripturis, quod negativum tantum erat, satis est ex dictis solutum, cum ostenderimus, & in veteri testamento reperiri, & in novo satis insinuari. Quid vero ad Adrianum, qui aliter ea loca interpretatur, responderi possit, jam diximus. Alia vero loca Damasceni ibi citata non recte exponi, & quis sit eorum sensus, inter confirmandam nostram sententiam ex novo testamento declaravimus. Denique quodammodo etiam in aliis locis ibi citatis distinguatur Christus ab aliis servis Dei, nam etiam diximus, distinguere scilicet, ut a pure servis. Ad quartum ex rationibus respondetur. Ad primam negatur consequentia, quæ ex adoptiva filiatione fit ad servitutem. Ratio autem a D. Th. citatis locis redditur, quia filiatione respicit solam personam: servitus autem etiam naturam. Sed est ratio difficilis, præsertim quia idem D. Th. hic art. 1. ad 2. dicit, etiam naturam non dici proprie dominam aut servam, sed personam secundum naturam seu ratione naturæ. At idem est de filiatione, nam, licet natura etiam non dicatur filia, tamen persona secundum illam, seu ratione illius dicitur filius: ergo quoad hoc parva aut certe nulla est differentia. Addendum ergo est, adoptionem dicere, non quamcumque filiationem, sed talem, quæ repugnet supposito divino etiam in assumpta natura, quia intrinsece requirit personam extraneam, dicitque filiationem omnino ab extrinseca benevolentia provenientem: & hac ratione includit negationem repugnantem divinæ personæ, ut late q. 23. videbimus: at vero relatio servitutis non requirit, nec connotat necessario aliquam imperfectionem vel negationem repugnantem divinæ personæ secundum se, & maxime, si non simpliciter, sed cum determinatione assumptæ naturæ ei attribuat.

**Ad ratio-  
nes primæ  
sententiæ.**

Ad ultimam rationem concedo in primis, ad propriam servitutem non sufficere solam obedientiæ subjectionem, quamvis certe Isidor. lib. 2. de propr. ser. n. 5. servitutem nihil aliud esse dicit, quam necessitatem serviendi, obedire autem, servire est: si ergo obedientia ex necessitate nascatur, servitus dici potest, aut certe servitutem supponere: Christus autem ut homo ex necessitate seu debito obedire debuit: potest ergo illa dici quædam servitus: & ita videtur loqui D. Th. hic. Sed, esto aliquid amplius ad servitutem requiratur, illud certe non est negatio communicationis in bonis, in qua totus discursus rationis illius fundatur, qui a nobis satis refutatus est, quia communicatio non impedit servitutem, nisi ad æqualitatem perveniat, quæ in Christo quidem simpliciter reperitur, non tamen in Christo ut homine, ut satis declaratum est. Unde retorqueri potest argumentum, quia Christus ut homo non est supremus dominus, vel aliarum rerum, vel suæ humanitatis, vel suarum actionum: ergo ut sic est sub supremo domino: atque adeo est servus ejus. Si quid ergo stricta servitus ultra subjectionem addit, solum est, quod non solum is qui servus dicitur, alteri ut superiori parere tenetur, sed etiam quidquid est & habet, sub illius dominio & potestate existit, ideoque eum ut dominum revereri ac colere tenetur: loquimur enim de rationali servo. Hæc autem conditio vere convenit Christo ut homini, ut per se constat, & nihil derogat divinitati ejus, magis quam quod, ut homo, sit a Deo conditus, & a Deo pendeat in omnibus, tam physicis, quem moraliter, ut sic dicam.

Ad replicam autem in illa ratione insinuatam, scilicet, quod hæc conditio reperiri potest in subdito non servo, negatur assumptum, quia hoc ipso, quod aliquis est omnino sub dominio & potestate alterius, & in omnibus tenetur illi parere: & dominus illo uti potest pro suo arbitrio in omnem usum, est vere ac proprie servus. Unde, si inter homines fingamus patrem habere omnem hujusmodi potestatem & dominium in filium naturalem, ille esset servus, tamen, sicut pater non haberet illam potestatem a natura, sed ex aliquo pacto vel jure positivo, ita talis filius non esset servus patris naturali servitute, sed humana vel civili, quæ introducta quidem non est; non repugnat tamen excogitari aut introduci: neque etiam repugnat eundem esse naturalem filium & servum civilem: tunc autem, quamvis in illo filio maneret radicale jus, ut sic dicam, ad bona patris, vel potius fundamentum,

quo a natura habet, ut patri succedat in bonis, si aliunde non impediatur: tamen proxime non haberet morale civile jus ad hæreditatem paternam, quia ex vi servitutis posset hoc jure privari: tamen quia hoc non est consentaneum naturali juri, nec illi conjunctioni & æqualitati naturæ & originis, quæ est inter patrem & filium naturalem, ideo talis servitutis modus non est positivo jure introductus, neque permissus.

Et hinc responderi potest ad objectionem, si in hunc modum fiat, nam servo repugnat habere connaturale & intrinsecum jus ad bona & hæreditatem domini propter quod, ut supra dicebam, etiam jure civili, statim ac servus adoptatur in filium, definit esse servus, quia incipit habere jus ad hæreditatem, quod repugnat servituti: sed Christus ut homo habet intrinsecum & naturale jus ad divinam hæreditatem: ergo non potest ut sic esse servus. Unde etiam Joan. 8. dicitur. *Servus non manet in domo in æternum.* Sed ad hoc testimonium jam supra diximus ibi esse sermonem de servitute peccati. Ad argumentum vero primum in genere dici potest, habere jus ad bona domini, quæ sint omnino eadem vel æqualia cum his, quibus dominus fruitur, fortasse repugnare servituti: habere tamen jus ad quandam participationem illorum bonorum cum quadam subordinatione & dependentia a domino, non repugnare servituti naturali. Hæc enim ratione, inter alias, quamvis humana servitus per adoptionem tollatur, divina vero non tollitur per divinam adoptionem, ut supra dixi: quia, nimirum, filii Dei adoptivi, licet recipiant jus ad hæreditatem Dei, non tamen cum æqualitate, neque ut in ea sint aliquando supremi domini, sicut suo modo filius adoptivus hominis futurus aliquando est in hæreditate patris. Christus autem, in quantum homo, licet habeat jus connaturale ad hæreditatem, non tamen secundum æqualitatem, sed secundum participationem cum subordinatione & dependentia a Patre & domino. Addenda deinde est differentia inter servitutem humanam & divinam: nam respectu Dei servitus quæ præcise oritur ex potestate, quam Deus habet in suam creaturam, est intrinseca & connaturalis: ex quo fit in primis ut separari non possit: deinde etiam fit, ut nullam vilem conditionem, ut sic dicam, in creatura requiratur, præter intrinsecam imperfectionem & dependentiam, quam dicit creatura: vel (quod fere idem est) non requirit carentiam alicujus dignitatis vel excellentiæ, cujus creatura sit capax: quia Deus non amittendo suum supremum dominium potest creaturæ suæ communicare bona sua, quantum voluerit, seu quantum ipsa capax fuerit. At vero servitus humana non est naturalis, sed ab hominibus introducta. Unde eas condiciones requirit quæ arbitrio hominum constitutæ sunt. Et quia hæc, servitus, & vilem conditionem & statum hominis secum affert, & in poenam gravissimam introducta est, ideo condiciones omnes ingenuitatis & nobilitatis excludit: & hac ratione differt etiam hæc servitus a divina, quod servus jure civili non est capax proprii domini, servus autem Dei est vere dominus supernaturalium etiam bonorum, quamvis sub dominio Dei. Unde etiam fit, ut servitus hæc humana excludat omne jus & consortium cum domino in omni genere bonorum: ac propterea etiam filiatio adoptiva humana excludit talem servitutem: quamvis adoptio Dei, ut dixi, illam non excludat. Atque ita optima ratione constat, quomodo Christo ut homini non repugnet simul filiatio naturalis & servitus respectu Dei: nam hæc relationes inter se non sunt repugnantes, quia nullas condiciones contrarias aut oppositas requirunt: præsertim cum & Deum sub diversa ratione respiciant, & diversa habeant fundamenta, nam servitus fundatur in natura humana secundum naturalem conditionem ejus: filiatio vero in gratia unionis. Quo etiam fit, ut aliter dicatur Christus, in quantum homo, servus, quam filius: dicitur enim filius specificative tantum non reduplicative, servus autem utroque modo, quia in humanitate servus est, & quia homo, ideo & servus.

Denique hinc etiam solutum manet exemplum de vinculo conjugii humani, quod tollit servitutem, ex quo fieri videtur, majori ratione vinculum unionis hypotitica excludere ab humanitate omnem conditionem servitutis, ratione cujus possit Christus ut homo appellari servus. Sed, si hæc conjectura quicquam probaret, eodem modo

Tasie  
objectioni  
satis  
fit.



modo posset concludere conjunctionem, quam B. Virgo habet cum Deo ratione maternitatis, debere ab illa excludere veram servitutem: quia, siue physice, siue moraliter res consideretur, non est minor, imo major illa conjunctio, quam sit in hominibus inter virum & uxorem. Negatur ergo similitudo seu consequentia, quia servitus ad Deum est intrinseca & connaturalis, & nobilissima: servitus autem humana est extrinseca & ad placitum hominum introducta, atque adeo ignobilis, ut merito non admittat eam æqualitatem & familiaritatem, quæ inter virum & uxorem esse debet.

## S E C T I O II.

*Utrum Christus cum sola determinatione, ut homo, possit dici servus, vel etiam sine illa.*

Dubitan-  
dis ratio.

**P**rimum supponimus, ex parte prædicati, *servus*, posse esse ambiguitatem & æquivocationem, & ideo oportere ita illa voce uti, ut ex adjunctis satis constet, in bono & Catholico sensu servitutem Christo attribui. Difficultas ergo est, an, loquendo de illa nobili servitute, quæ Christo ut homini convenire potest, in proprietate & rigore sermonis possit de illo prædicari sine determinatione, in quantum homo, vel tantum cum illa. In qua difficultate, etiam est certum convenientius esse illam determinationem addere, ut hic D. Th. admonuit, ad tollendam omnem ambiguitatem & suspicionem erroris.

De rigore autem sermonis D. Th. indicat etiam sine illa determinatione veram esse locutionem, nam solum ait, potius esse hoc prædicatum attribuendum cum determinatione, & quia hoc prædicatum æquiparat cum *esse subjectum*, quod supra diximus posse sine determinatione prædicari de Christo. Et confirmari potest hæc pars testimoniis, præcedente sectione adductis, nam quando Sancti Christum servum appellant, sæpe sine illa determinatione loquuntur: imo & Scriptura ita loquitur: cur ergo nos etiam non poterimus ita loqui? Negandum enim non est, quin Sancti in rigore & proprietate sermonis loquantur. Ratione probari potest, quia si cum determinatione est vera locutio, etiam erit sine illa, quia illa determinatio non extrahit subjectum a propria significatione, nec diminuit illam (ut sic dicam) ergo recte sequitur, Christus in quantum homo est servus, ergo Christus est servus, non enim fit illatio a dicto secundum quid ad simpliciter, sed a non amplo ad amplum affirmative.

Prima con-  
clusio.

In hac re certum in primis esse videtur, Christum non posse simpliciter dici servum Verbi aut Filii Dei: hoc enim est, quod Concil. Alexandrinum tradidit in epist. 10. Cyrilli, quam recipit Concil. Ephesinum, ubi sic legitur: *Verbum Dei carni secundum hypostasim unitum, omnino quidem Deus est, omnibusque dominatur: at sui ipsius nec servus est, nec dominus: stultum enim est, imo & impium, ad hunc modum sentire aut dicere.* Et ratio ibidem redditur: *ne unum Christum, & Filium, ac dominum, in duos scindamus.* Et ideo anathema. 6. damnat Cyrillus hanc propositionem, *Verbum est Dominus Christi*: & in defensione ejusdem declarat, illud esse dictum contra Nestorium, qui Christum a Verbo personaliter distinguebat. Et eandem sententiam significavit Damasc. loco supra tractato, ex lib. 3. de fide, c. 21. ubi magis explicat rationem a Cyrillo indicatam: nam servus dicit relationem ad alterum, & ideo, si Christus dicatur servus Verbi aut Filii Dei significatur, Christum esse alium a Filio Dei: & ideo illa locutio simpliciter est neganda. At vero cum addito, si Christus, in quantum homo, dicatur servus Verbi aut sui ipsius, in quantum est Deus, non erit falsa locutio: ut hic art. 2. sentit D. Th. & colligit ex August. 1. de Trin. cap. 7. & supra dictum est de hoc prædicato *subjectus* aut *minor*: nam eadem est horum ratio. Addita enim illa determinatio, satis declaratur, non secundum diversitatem suppositorum sed naturarum, dici Christum ut hominem sui ipsius servum: nam licet idem secundum eandem naturam non possit esse sui ipsius servus, tamen secundum diversas non repugnat, nam hæc relatio, quamvis denominet suppositum ratione naturæ, tamen ut reperiri possit, non requirit distinctionem suppositorum, sed naturarum: sicut in superioribus dicebamus de relatione *subjecti satis facientis*, & similibus.

Difficilis vero est, an etiam respectu Dei Patris, vel Spiritus sancti, sit etiam necessaria determinatio: nam tunc jam cessat prædictum inconveniens, quia Christus

est persona distincta a Patre & Spiritu sancto: & ideo, licet in ea locutione, *Christus est servus Patris*, involvatur personarum distinctio, nihil falsum significatur: & hoc etiam satis esse videtur, ut possit simpliciter dici servus Dei, quia licet, *Deus* possit supponere pro persona Filii, tamen quia nomen *Deus* potest etiam supponere pro persona Patris, ex vi suæ significationis & suppositionis admittit personarum distinctionem, quomodo dicitur Deus de Deo genitus: ergo etiam poterit dici Christus servus Dei. Et eadem ratione, licet Verbum non possit absolute dici Deus aut dominus Christi, tamen Pater dici poterit Deus Christi, sicut ipsemet Christus eum appellavit, Joan. 20. cap. & similiter poterit dici dominus Christi nam hæc duo, vel sunt idem, vel unum ex alio sequitur, ut supra diximus. Ac denique eadem ratione poterit dici Christus absolute servus, quamvis non addatur vel explicetur terminus servitutis, quia hoc non semper est necessarium in hujusmodi prædicatis relativis. Et similiter dici poterit Christus habere dominum, vel Deum, propter eandem causam.

Nihilominus tamen probabilius censeo, in rigore sermonis, non esse dicendum Christum servum sine determinatione, *ut homo*, vel, *in quantum homo*, vel *secundum humanitatem*, siue hæc determinatio expresse addatur, siue implicite subintelligatur, quod frequentius contingit, quando illa propositio non solitarie profertur, sed in alicujus sermonis progressu, in quo ex antecedentibus & sequentibus satis constat locutionis sensus, & hoc fere modo invenitur hæc locutio in Scriptura & Patribus. Ratio vero, ob quam hæc determinatio requiratur, in primis reddi potest ex Damasc. supra, quia, si Christus non potest dici simpliciter servus Verbi: ergo nec servus Patris, (& a fortiori nec Spiritus sancti) ne aliquem servum videatur habere Pater, quem non habet Filius: ergo nec Dei servus dici potest, quia neque ratione personarum potest id verificari, nec ratione hujus Dei ut sic, id est, ut absolute & essentialiter subsistentis, quia ut sic etiam non distinguitur personaliter a Christo, ut possit Christus, ejus servus simpliciter dici: igitur nec potest dici Christus absolute servus, non explicato termino, quia nullus servus invenitur. Ex qua ratione videtur colligi hoc generale principium, in quo ipsa fundatur, prædicata relativa, quæ in humanitate aut ratione humanitatis Christo conveniunt, si non possunt simpliciter dici de ipso respectu Verbi, non posse etiam dici respectu Patris, aut Dei, aut simpliciter sine expressione termini, ne sequatur illud inconveniens, ut aliquid Pater habere dicatur, quod non habet Filius. Sed, licet hoc principium sit probabile, non tamen videtur necessarium, nam inde fieret, Christum non posse etiam dici subjectum Patri, quod tamen in rigore sermonis dici potest, ut supra vidimus. Item, quia illud incommodum quod inferitur, esset quidem inconveniens, si in re ipsa accideret, tamen cum in re ipsa quidquid convenit Patri, conveniat etiam Filio, quod in figura locutionis possit aliquo modo dici de Patre, quod non potest vere dici de Filio, nullum est inconveniens: & ita accidit in præsentem, nam, sicut pater creavit seu fecit Christum ut hominem, ita & Filius: & sicut potest illi præcipere, & de omnibus illius rebus disponere, ita etiam Filius; & ideo in re Filius est æque dominus Christi ut hominis, tamen quia nihilominus Pater est persona distincta a Christo, & non Filius, ideo in aliqua locutione involvente distinctionem personarum, posset hoc dominium attribui Patri & non Filio, sicut etiam potest Pater dici creare a se: Filius autem non a se sed a Patre, quia in illa locutione non solum creatio, sed etiam origo involvitur. Igitur, si illa propositio, *Christus est servus Patris*, neganda est, non est propter distinctionem aut inæqualitatem personarum, quæ in ea involvatur, nam distinctio revera reperitur inter Patrem & Christum: inæqualitas vero revera non involvitur, saltem ex prædicta ratione.

Alia ergo ratio reddi potest, quia Christus simpliciter & sine addito non potest dici creatura, sed solum cum determinatione, *in quantum homo*: ergo nec servus dici poterit. Patet consequentia, tum quia hæc relatio servitutis, vel est eadem cum relatione creaturæ, vel potissimum convenit titulo creationis: tum etiam quia de utraque propositione est eadem ratio: nam Christus simpliciter dictus, & præsertim positus ex parte subjecti, stat pro sup-

Secunda  
conclusio.

posi-



posito, & tam servitus, quam ratio creaturæ talis est, ut possit indifferenter convenire, tam ratione suppositi, quam ratione naturæ: & ideo, sicut relatio creaturæ simpliciter dicta de Christo, in rigore videtur attribui supposito, & ideo falsa est locutio, ita etiam relatio servitutis. Sed hæc etiam ratio, licet sit probabilis, si nihil aliud addatur, potest pati calumniam, quia licet esse creaturam, quatenus in rigore significat id quod est factum ex nihilo, non possit simpliciter dici de Christo, tamen quatenus etiam significare potest quidquid est factum vel productum in tempore, potest in sensu Catholico attribui Christo, etiam simpliciter, & sine determinatione, ut homo, ut sup. q. 16. vidimus. At vero ad relationem servitutis sufficit esse creaturam hoc posteriori modo, sicut sufficit esse hominem, etiam si talis homo non sit ex nihilo factus: ergo hoc satis erit ut Christus simpliciter possit dici servus.

Addendum ergo superest ad dictæ rationis efficaciam, denominationem servi talem esse, ut, si simpliciter tribuatur, & aliunde non limitetur, includat imperfectionem divinæ personæ repugnantem, nimirum totalem dependentiam ejus qui servus dicitur, ab alio cujus dicitur servus. Quod probatur ac declaratur, quia servus proprie dicitur, qui omnino est sub dominio alterius, & hoc addit supra subjectionem: esse autem sub dominio alterius, est magna dependentia & imperfectio. Si ergo Christus simpliciter & sine addito dicatur servus, in rigore significatur, Christum secundum totum id quod est, esse sub dominio Dei, quod in rigore est falsum: nam suppositum, quod est præcipuum in Christo, quodque simpliciter est Christus, sub nullius dominio existit. Cum vero additur determinatio, in quantum homo, consequenter restringitur denominatio servitutis, solumque significatur, Christum ea ratione, qua homo est, seu secundum humanitatem Verbo unitam, esse sub dominio Dei, quod est verissimum: & ideo, quamvis altera propositio cum addito illo, in quantum homo, concedatur, altera sine addito neganda est. Quocirca hæc denominatio servi non est æquiparanda cum denominatione creaturæ, ut creatura late significat quidquid factum est in tempore, sed ut significat stricte id quod omnino est factum ex nihilo: nam perinde est esse omnino sub dominio Dei, ut nomine servi simpliciter dicti significatur, quod esse a Deo ex nihilo productum. Sed ajunt quidam, licet Christus, secundum totum quod habet, non sit de nihilo productus, nihilominus posse simpliciter dici creaturam, quia sensus est, Christum esse aliquid quod secundum se totum de nihilo produci- tur: & eadem ratione si Christus, in quantum homo, dicitur servus, etiam simpliciter posse servum appellari, quia sensus erit, Christum esse aliquid, quod secundum se totum sub alterius dominio existit. Sed non satis intelligo, quomodo hi auctores concedant hanc propositionem, Christus est creatura, esse simpliciter veram in hoc sensu, id est, Christus est aliquid, quod secundum se totum de nihilo produci- tur, quia in Christo nihil est secundum se totum de nihilo productum, nisi humanitas ejus: vel anima, vel materia: sed hæc est falsissima propositio, Christus est sua humanitas, vel sua materia: ergo etiam illa propositio est omnino falsa: Christus est aliquid quod secundum se totum de nihilo produci- tur. Quid enim illud est, si non est humanitas neque singulæ partes ejus? Nunquid est compositum ex humanitate & persona Verbi? At hoc non potuit ex nihilo produci: ergo Christus non est aliquid, quod secundum se totum sit de nihilo productum. Et eadem ratione non est aliquid quod secundum se totum est sub dominio alterius. Concedo ergo, dictam locutionem reddere hunc sensum: sed propter eam causam existimo in rigore sermonis esse falsam.

Ad rationem ergo dubitandi in principio positam, quod ad locutiones Patrum attinet, jam responsum est, eos, vel explicite ponere determinationem, vel implicite supponere, quia ex contextu sui sermonis satis intelligitur, D. Th. autem, ut supra dixi, non examinavit, nec definivit, quid unaquæque istarum vocum in rigore significet: quidve per eam attribuat subiecto simpliciter & sine determinatione sumpto, sed contentus fuit, & rem declarando, & quoad usum sermonis admonendo, ut semper addatur determinatio ad equivocationem tollendam sive in rigore sit necessaria, sive non. Ad rationem autem respondetur, sine dubio multa vere prædicari de Christo cum illa determinatione, in quantum homo, quæ sine illa

non prædicantur, quod duplici ex causa non potest contingere: una est, si dictio, in quantum, sumatur secundum quid, ut in subiecto tantum aliquam partem designet, ut (juxta quandam sententiam) potest dici Christus, in quantum homo est, creatura, id est, secundum humanitatem. Alia causa esse potest, si dictio illa, in quantum, usurpetur ad designandam formalem suppositionem subiecti, qua ratione hæc locutio est vera: Christus, in quantum homo, incepit esse: cum tamen illa sit falsa, Christus incepit esse: quia in hac inceptio attribuitur supposito divino in suo esse simpliciter, quia Christus absolute pro eo supponit: in priori vero inceptio attribuitur composito ex verbo & humanitate, pro quo Christus ibi supponit ob adjunctam determinationem in quantum homo. Quando- cumque ergo aliqua ex his causis intercedit, non recte sumitur argumentum a propositione habente determinationem, ad aliam carentem illa, quia committitur fallacia appellationis variatæ, vel a secundum quid ad simpliciter. Utraque autem causa in præsentem intercedit, nam in Christo sola humanitas est servilis naturæ, seu conditionis, quæ est esse secundum se totam sub dominio alterius, & ideo non dicitur Christus servus, nisi secundum quid, id est, secundum humanitatem, vel formaliter ratione compositi, quatenus formaliter constitutum est per naturam seu formam servi.

## Q U Æ S T I O XXI.

De oratione Christi in quatuor articulos divisa.

**D**Einde considerandum est de oratione Christi. Et circa hoc queruntur quatuor.

Primo, utrum Christo conveniat orare.

Secundo, utrum conveniat sibi secundum suam sensualitatem.

Tertio, utrum conveniat sibi orare pro se ipso, an tantum pro aliis.

Quarto, utrum omnis ejus oratio sit exaudita.

## A R T I C U L U S I.

Utrum Christo competat orare.

**A**D primum sic proceditur. Videtur, quod Christo non competat orare. Nam sicut Damascenus\* dicit, oratio est petitio decentium a Deo, sed cum Christus omnia facere posset, non videtur ei convenire, quod aliquid ab aliquo peteret: ergo videtur, quod Christo non convenit orare.

2. Præterea, Non oportet orando petere illud, quod aliquis scit pro certo esse futurum (sicut non oramus quod sol oriatur cras) neque est etiam conveniens quod aliquis orando petat, quod scit nullo modo esse futurum. Sed Christus sciebat circa omnia quid esset futurum, Ergo non conveniebat ei aliquid orando petere.

3. Præterea, Damascenus\* dicit in lib. 3. quod oratio est ascensus intellectus in Deum. Sed intellectus Christi non indigebat ascensione in Deum: quia semper intellectus ejus erat Deo conjunctus, non solum secundum unionem hypostasis, sed etiam secundum fruitionem beatitudinis. Ergo Christo non conveniebat orare.

Sed contra est, quod dicitur Luc. 6. Factum est, in illis diebus exiit in montem orare, & erat pernoctans in oratione Dei.

a. Respondeo dicendum, quod (sicut dictum est\* in Secunda parte) oratio est quedam explicatio propriæ voluntatis apud Deum, ut eam impleat. Si igitur in Christo esset una tantum voluntas, scilicet divina, nullo modo competere sibi orare, quia voluntas divina per se ipsam est effectiva eorum, quæ vult: secundum illud Psalm. 134. Omnia quæcumque voluit Dominus, fecit. Sed quia in Christo est alia voluntas divina, & alia humana & voluntas humana non est per se ipsam efficax ad implendum quæ vult, nisi per virtutem divinam: inde est quod Christus, secundum quod est homo, & humanam voluntatem habens, competit orare.

b. Ad primum ergo dicendum, quod Christus poterat perficere omnia quæ volebat, secundum quod Deus, non autem secundum quod homo: quia secundum quod homo, non habuit omnipotentiam, ut supra habitum est.\* Nihilominus tamen ipse idem Deus existens & homo, voluit ad

126.  
3. d. 17. ar.  
3. q. 1. & 4.  
d. 15. q. 4.  
art. 6. q. 2.  
1. & Jo. 11.  
12. 6. col. 2.  
na. li. 3. c.  
24. in  
prinç.

Lib. 3. or-  
tho. fid.  
ca. 24. in  
prinçip.

2. 2. q. 83.  
ar. 1. & 2.

q. 13. ar. 1.



*Patrem orationem porrigere: non quasi ipse esset impotens, sed propter nostram instructionem. Primo quidem, ut ostenderet se esse a Patre. Unde ipse dicit Joan. 11. Propter populum qui circumstat, dixi, scilicet verba orationis, ut credant, quia tu me misisti. Unde Hilarius in 10. de Trinit. \* dicit: Non prece eguit, pro nobis oravit, ne Filius ignoraretur. Secundo ut nobis exemplum orandi daret. Unde Ambros. dicit super Lucam. \* Noli insidiarices aperire aures, ut putes Filium Dei, quasi infirmum ragare, ut impetret, quod implere non possit, potestatis enim est auctor, obedientie magister, ad præcepta virtutis suo nos informat exemplo. Unde & August. \* dicit super Joan. Poterat Dominus in forma servi, si hoc opus esset, orare silentio: sed ita se Patri exhibere voluit precatorem, ut meminisset nostrum se esse doctorem.*

*c Ad secundum dicendum, quod inter alia, quæ Christus scivit futura, scivit quedam esse fienda propter suam orationem, & huiusmodi non inconvenienter a Deo petiit.*

*d Ad tertium dicendum, quod ascensio nihil est aliud, quam motus in id, quod est sursum: motus autem, ut habetur in 3. de Anima, \* dupliciter dicitur. Uno modo proprie, secundum quod importat exitum de potentia in actum, prout est actus imperfecti: & sic ascendere competit ei, quod est potentia sursum, & non actu. Et hoc modo, ut Damasc. \* dicit in 3. lib. intellectus humanus Christi non eget ascensione in Deum: cum sit semper Deo unitus, & secundum esse personale, & secundum contemplationem beatam. Alio modo dicitur motus, qui est actus perfecti: id est, existentis in actu: sicut intelligere & sentire dicuntur quidam motus. Et hoc modo intellectus Christi semper ascendit in Deum, quia semper contemplatur ipsum, ut supra se existentem.*

#### COMMENTARIUS.

**E**X corpore articuli duæ colliguntur assertiones. Prima est, si Christus tantum esset Deus, seu (quod idem est) si in eo tantum esset voluntas divina, non fore capacem orationis. Quod est per se evidens, ut idem D. Th. 2. 2. q. 83. art. 10. latius docuit, quia oratio est actus inferioris deprecantis superiorem, ut se adjuvet; unde est actus indigentis ope alterius, cui cultum & reverentiam exhibet, & ideo ad religionem pertinet: Deus autem, neque alterius ope indiget, neque alterum revereri, aut religione colere potest, cum omnipotens sit, & superiorem non habeat, & ideo orare non potest, neque enim ad se ipsum orationem dirigere valet, ut per se constat. Neque ad hoc refert, quod in Deo sit personarum distinctio, omnes enim æquales sunt & eadem omnipotentia, intellectu, & voluntate operantur, & ideo non potest una magis alteram orare, quam se ipsam.

*a* Secunda assertio D. Th. est, Christum Dominum ut hominem, quia humanam habet voluntatem, & intellectum, vere ac proprie orare posse, humana enim voluntas, etiam Christi, non est per se efficax, sed auxilio indiget divino, quod orando implorare potest, & voluntatem suam apud Deum explicando in quo ratio orationis consistit, ut D. Th. inquit, quod non est huius loci latius explicare: in quo enim actus orationis consistat, & cuius facultatis actus sit, non facile (ut existimo) explicari potest: id tamen agendum est in 2. 2. q. 83. Nunc quod præfati instituto fatis est, supponamus, actum mentalis orationis seu petitionis apud Deum (de hoc enim agimus) includere, vel supponere aliquid ad intellectum, & aliquid ad voluntatem pertinens, scilicet voluntatem, seu desiderium obtinendi aliquid a Deo, seu ope divina: quæ voluntas supponit, Deum cognosci ut autorem talis boni, a quo expectandum est, & petendum: deinde includit oratio ordinationem quandam huiusmodi voluntatis, seu desiderii ad Deum quæ homo manifestat Deo suum affectum, cupiens & sperans obtinere, quod appetit: sive igitur hæc ordinatio, vel explicatio desiderii apud Deum ad intellectum, sive ad voluntatem pertineat: constat tamen Christi animam capacem fuisse omnium istorum actuum, cum creata sit, Deoque subiecta, & inferior.

*b* Solutio ad primum nonnihil difficultatis habet, argumentum enim erat, Christum non indigere oratione, cum omnia per se possit. Respondet autem primum D. Th. Christum ut hominem non potuisse perficere omnia, quæ volebat sine oratione, quia ut homo non erat omnipotens: subdit vero deinde voluisse ad Patrem orationem porrigere, non quia ipse esset impotens, sed propter no-

stram instructionem, & exemplum. Quæ duo non videntur inter se consentanea, quia si propterea fuit capax orationis, quia ut homo non omnia poterat, ergo revera oravit, quia erat impotens. Et confirmatur, quia si tantum oravit propter instructionem, & exemplum, nec nunc oraret, neque in via orasset, nisi tantum publice. Respondetur mentem D. Th. esse, cum Christus sit Deus, assumendo humanitatem, potuisse illi communicare, ut omnia quæ vellet, operaretur absque orationis vel petitionis indigentia: & hoc modo dicitur orasse, non quia sit impotens, nimirum ipsa persona Christi ad operandum hoc modo per humanitatem suam: de facto tamen noluit communicare hanc efficaciam suæ humanitati, nisi per hoc medium orationis, & petitionis, & ideo recte etiam dicitur in quantum hominem non omnia posse sine oratione. Et hoc sensu etiam potest vere dici, Christum ut hominem interdum orasse, non solum propter instructionem, & exemplum, sed quia sine oratione revera non posset perficere, quod volebat: quamquam hoc totum ad nostram instructionem, & exemplum ordinatum sit. Ad confirmationem respondetur, illas esse optimas rationes, sed non adæquatas, nam etiam voluit Deus Christum, ut hominem oratione indigere, ut servaretur debitus ordo inferioris naturæ ad superiorem, & ut debitum orationis cultum divinitati præberet.

*c* Secundum argumentum duas partes habet: altera est, quomodo Christus petebat orando, quæ certo sciebat esse futura. Et hanc facile dissolvit D. Th. dicendo, ideo orasse, quia præsciebat per orationem suam fuisse futura. Altera pars erat, quo modo orando petebat interdum, quæ sciebat nullo modo esse futura. Et huic parti nihil respondet D. Th. fortasse enim omisit in 4. art. explicandum. Responsio vero est, simpliciter non petiisse res huiusmodi, sed solum interdum sub conditione explicasse affectum suum propter instructionem nostram, vel exemplum, vel alias honestas causas.

*d* In solutione ad tertium videtur sentire D. Th. Christum orasse Deum per ipsam contemplationem beatam: & hoc modo applicat orationi Christi definitionem Damasc. scilicet orationem esse ascensum mentis in Deum, ut scilicet in Christo intelligatur, non de aliquo novo ascensu, sed de illo, quem perpetuo habet per contemplationem beatam. Et est hoc quidem verum, quia (sicut supra diximus) potuit anima Christi, supposita visione Dei, exercere circa creaturas in Deo visas actus charitatis proximorum, liberos & meritorios, & ita etiam potuit desiderare illis bona, atque adeo ea petere a Deo. Ad di vero potest, per actus scientiæ infusæ, potuisse animam Christi habere novas ascensiones mentis in Deum, nunc per unum affectum, postea per alium, & hoc modo novas orationes fundere extra contemplationem beatam. Quæ omnia facile ex supra tractatis de scientia, & voluntate Christi constare possunt.

#### ARTICULUS II.

*Utrum Christo conveniat orare, secundum suam sensualitatem.*

**A**D secundum sic proceditur. Videtur, quod Christo conveniat orare secundum suam sensualitatem. Dicitur enim in Psal. 83. ex persona Christi. *Cor meum & caro mea exultaverunt in Deum vivum. Sed sensualitas dicitur appetitus carnis. Ergo sensualitas Christi potuit ascendere in Deum vivum, exultando, & pari modo orando.*

*2 Præterea, Ejus videtur esse orare, cujus est desiderare illud quod petitur. Sed Christus petiit aliquid quod desideravit ejus sensualitas, cum dixit, Transeat a me calix iste: sicut dicitur Matthæi 26. Ergo sensualitas Christi oravit.*

*3 Præterea, Magis est uniri Deo in persona, quam ascendere in Deum per orationem. Sed sensualitas fuit assumpta a Deo in unitatem personæ, sicut & qualibet pars humane nature. Ergo multo magis potuit ascendere in Deum orando.*

*Sed contra est, quod dicitur ad Philippenf. 2. quod Filius Dei secundum naturam, quam assumpsit, in similitudinem hominum factus est. Sed alii homines non orant secundum sensualitatem. Ergo nec Christus oravit secundum sensualitatem.*

Christus  
cur ora-  
verit.

127.  
Intra. arg.  
4. co. & ad  
7. & 3. dist.  
17. ar. 3. &  
opu. 3. c.  
340. &  
apud 7.

Lib. 10.  
parum an-  
te finem.  
Lib. 5. in  
Luc. c. 6.  
titul. il-  
lius c. est  
de oratio-  
ne.  
Jesu in  
monte,  
paulo a  
princ. 10. 5  
Tra 104.  
parum  
ante med.  
10. 9.

Lib. 3. de  
anima  
sect. 28.  
tom. 2.

Li. 3. c. 24.  
circa  
princ.

Ratio  
orationis  
quæ sit.



2 Respondeo dicendum, quod orare secundum sensualitatem potest intelligi dupliciter. Uno modo sic, quod ipsa oratio sit actus sensualitatis: & hoc modo Christus secundum sensualitatem non oravit: quia ejus sensualitas ejusdem naturae & speciei fuit in Christo & in nobis. In nobis autem non potest sensualitas orare, duplici ratione. Primo quidem, quia motus sensualitatis non potest sensibilibus transcendere: & ideo non potest in Deum ascendere: quod requiritur ad orationem. Secundo, quia oratio importat quandam ordinationem: prout, scilicet, aliquis desiderat aliquid quasi a Deo implendum, & hoc est solius rationis. Unde oratio est actus rationis, ut in secunda parte habitum est. \* Alio modo potest dici aliquis orare secundum sensualitatem, quia, scilicet, ejus oratio, orando, Deo proponit quod est in appetitu sensualitatis ipsius, & secundum hoc Christus oravit secundum sensualitatem in quantum, scilicet, oratio ejus exprimebat sensualitatis affectum tanquam sensualitatis advocata: & hoc, ut nos de tribus institueret. Primo quidem, ut ostenderet se veram naturam humanam suscepisse cum omnibus naturalibus affectibus. Secundo, ut ostenderet, quod homini licet secundum naturalem affectum aliquid velle, quod Deus non vult. Tercio ut ostendat quod proprium affectum debet homo divinae voluntati subicere. Unde Augustinus in Enchiridionem dicit. Sed Christus hominem gerens, ostendit privatam quandam hominis voluntatem, cum dicit, Transseat a me calix iste. Hec enim erat voluntas humana, proprium aliquid & tanquam privatam volens. Sed quia recto corde rectum vult esse hominem, & ad eum dirigi, subdit. Veruntamen non sicut ego volo, sed sicut tu. Ac si dicat, videte in me, quia potestis aliquid proprium velle, etsi Deus aliud velit.

Ad primum ergo dicendum, quod caro exultavit in Deum vivum, non per actum carnis ascendentem in Deum: sed per redundantiam a corde in carnem, in quantum appetitus sensitivus sequitur motum appetitus rationalis.

Ad secundum dicendum, quod licet sensualitas hoc voluerit quod ratio petebat: hoc tamen orando petere non erat sensualitatis, sed rationis, ut dictum est. \*

Ad tertium dicendum, quod unio in persona est secundum esse personale: quod pertinet ad quamlibet partem humanam naturam. Sed ascensio orationis est per actum, qui non convenit nisi rationi, ut dictum est. \* Unde non est similis ratio.

## COMMENTARIUS.

Questio hujus articuli & in se facilis est, & non est singularis de Christo Domino, sed communis omnibus hominibus, neque habet in Christo singularem aliquam rationem dubitandi, & ideo circa illam nihil adnotare oportet, pertinet enim ad 2.2.q.83. art.1. hic vero a D.Th. proposita ad explicandum, quomodo, & propter quas causas Christus interdum oraverit, proponendo, sed representando Patri suo sensualitatis affectum. Quod luculenter satis, & distincte docet, neque alia explicatione indiget.

## ARTICULUS III.

Utrum fuerit conveniens Christum pro se orare.

Ad tertium sic proceditur. Videtur, quod Christo non fuerit conveniens pro se orare. Dicit enim Hilarius in 10. de Trinitate. Cum sibi non proficeret deprecationis sermo, ad profectum tamen nostrae fidei loquebatur. Sic ergo videtur, quod Christus non sibi, sed nobis oraverit.

2 Præterea, Nullus orat nisi pro eo quod vult: quia sicut dictum est \*, oratio est quedam explicatio voluntatis per Deum implenda. Sed Christus volebat pati ea, quae patiebatur: dicit enim Augustinus 26. contra Faustum, Homo plerumque irascitur, etsi nolit, contristatur, etsi nolit, dormit etsi nolit, esurit, ac sinit. Ille autem scilicet Christus, omnia ista habuit, quia voluit. Ergo ei non competeat pro se ipso orare.

3 Præterea, Cyprianus dicit in libro \* de oratione Dominica: Pacis doctor & unitatis Magister noluit sigillatim & privatim preces fieri, ut quis cum precatur, pro se tantum precetur. Sed Christus illud implevit quod docuit, secundum illud Actorum primo, Cœpit Jesus fa-

cere & docere. Ergo Christus nunquam pro se solo oravit.

Sed contra est, quod ipse Dominus orando dicit Joan.

17. Clarifica filium tuum.

Respondeo dicendum, quod Christus pro se oravit dupliciter. Uno modo exprimendo affectum sensualitatis (ut supra dictum est) vel etiam voluntatis simplicis, quae consideratur ut natura, sicut cum oravit a se calicem passionis transferri. Alio modo, exprimendo affectum voluntatis deliberatae, quae consideratur ut ratio: sicut cum petiit gloriam resurrectionis. Et hoc rationabiliter. Sicut enim dictum est, \* Christus ad hoc uti voluit oratione ad Patrem ut nobis daret exemplum orandi, & ut ostenderet, Patrem suum esse auctorem, a quo & æternaliter processit secundum divinam naturam, & secundum naturam humanam ab eo habet quicquid boni habet. Sicut autem in humana natura, quedam bona habebat a Patre jam percepta, ita etiam expectabat ab eo quedam bona nondum habita, sed percipienda. Et ideo sicut bonis jam perceptis in humana natura gratias agebat Patri, recognoscendo eum auctorem (ut patet Matth. 26. & Joan. 11.) ita etiam, ut Patrem auctorem recognosceret, ab eo orando petebat ea quae sibi deerant, secundum humanam naturam, puta gloriam corporis & alia hujusmodi. Et in hoc etiam nobis dedit exemplum, ut de perceptis a nobis muneribus gratias agamus, & etiam nondum habita orando postulemus.

Ad primum ergo dicendum quod Hilarius \* loquitur quantum ad orationem vocalem, quae non erat ei necessaria propter ipsum, sed solum propter nos. Unde signanter dicit, quod sibi non proficiebat deprecationis sermo. Si enim desiderium pauperum exaudiri Dominus (ut in Psal. 6. dicitur) multo magis sola voluntas Christi habet vim orationis apud Patrem. Unde ipse dicebat Joan. 11. Ego sciebam, quoniam semper me audis, sed propter populum qui circumstat, dixi, ut credant, quia tu me misisti.

Ad secundum dicendum, quod Christus volebat quidem pati illa, quae patiebatur, pro tempore illo: sed nihilominus volebat, ut post passionem, gloriam corporis consequeretur, quam nondum habebat. Quam quidem gloriam expectabat a Patre sicut ab auctore, & ideo convenienter ab ipso eam petebat.

Ad tertium dicendum, quod ipsa gloria, quam Christus orando petebat, pertinebat ad salutem aliorum, secundum illud Roman. 4. Resurrexit propter justificationem nostram. Et ideo illa etiam oratio, quam pro se faciebat, erat quodammodo pro aliis. Sicut & quicumque homo aliquid bonum a Deo postulat, ut utatur illo ad utilitatem aliorum, non sibi soli, sed etiam aliis orat.

## COMMENTARIUS.

Respondet D.Th. Christum pro se orasse, interdum representando simplicem affectum, interdum efficaciter petendo quod omnino fieri volebat, ut cum Joan. 17. orabat: Pater venit hora, clarifica Filium tuum. Quae doctrina de fide certa est, expressit enim habetur in Evangelio, & rationes seu congruentiae illius optimae a D.Th. afferuntur.

Solutiones argumentorum sunt notandae, praesertim primi & terti; nam in primo explicat dictum Hilarii lib. 10. de Trinitate. circa finem dicentis, Christo non profuisse deprecationis sermonem, sed propter nostrum profectum interdum orasse. Quod dicit D.Th. intelligendum esse de oratione vocali, quae non erat illi necessaria propter ipsum, sed propter nos. In quo satis indicat D.Th. orationem mentalem fuisse Christo necessariam propter ipsum, ut super articulum primum etiam docuimus: fuit enim illi necessaria ad impetrandam, & merendam gloriam corporis, & impetrandam sui nominis claritatem, quia hoc medium erat a Deo praescriptum ad illum effectum consequendum: oratio autem vocalis per se non requiritur ad impetrationem, vel meritum, sed vel ad excitandam, & colligendam mentem, vel ad augendam satisfactionem, ut D.Th. docet. 2.2.q.83. art. 12. Et ideo non fuit Christo propter se necessaria, sed propter nos. Et ad hunc modum explicat D.Th. in eadem solutione verba Christi Joan. 11. Pater, gratias ago tibi, quoniam audisti me, &c. Quem locum statim fusius in disputatione tractabimus.

In solutione vero ad tertium explicat D.Thom. verba Cypr. in expositione orationis dominicae in principio totius expositionis post totum praambulum, ubi sic inquit: Ante omnia pacis doctor, atque unitatis magister sigilla-

Art. prae.

Art. 1 hujusq. ad. 2.

Loco in argumentis citato.

2.2.q.83. art. 1.

Pl. 32. c. 6. cione 1. super illud Roman. 4. os deest collaudatio tom. 8.

In corp. art.

In corp. art.

128. 3. d. 17. ar. 3. q. 2. & opus. 7. Et Joan. 12. lec. 4. col. 2.

\* Lib. 10. par. ante finem. art. 1. hujus q. 1. 26. c. 8. in fin. to. 9.

Aliquam solum a prae. incipit. Evangelica praescripta.



tim noluit, & privatim precem fieri, ut quis, cum precatur, pro se tantum precetur; & infra; Publica est nobis, & communis oratio, & quando oramus, non pro uno, sed pro toto populo oramus, quia totus populus unus sumus, &c. quæ late prosequitur. Dicit autem D. Th. Christum Dominum hanc legem orandi servasse, etiam cum gloriam suam postulavit: quia ejus gloria commune bonum est omnium nostrum, & eandem dicit nos servare, cum aliquid nobis privatim petimus, ut eo in aliorum utilitatem utamur. Non est autem intelligendum, hanc legem seu conditionem simpliciter, & absolute esse de necessitate orationis, ut recta sit, & honesta; potest enim aliquis intendere sibi, & alteri in particulari vitam, vel gratiam postulare, nihil pro aliis petendo, nec de eorum utilitate cogitando: quia neque charitas, neque aliqua virtus obligat ad desiderandum, vel petendum bonum aliorum, quandocumque nostrum bonum appetimus, vel postulamus: non est igitur hoc de ratione honestæ, & rectæ orationis, loquendo in particulari de singulis orandi actibus. Absolute tamen, & univérse loquendo ad munus orandi pertinet, ut non solum pro nobis, sed etiam pro aliis oremus, quod Cyprianus in dictis verbis intendit: unde, cæteris paribus, tanto erit perfectior oratio, quanto non solum ipsi oranti, sed etiam aliis utilis fuerit. Et propterea merito D. Thomas explicare voluit, quo modo hæc perfectio etiam in illa oratione, qua Christus pro se oravit, non defuerit.

## ARTICULUS IV.

Utrum oratio Christi semper fuerit exaudita.

**A**D quartum sic proceditur. Videtur, quod oratio Christi non semper fuerit exaudita. Petiit enim a se removeri calicem passionis: ut patet Matthæi 26. Qui tamen ab eo non fuerit translatus. Ergo videtur, quod non omnis oratio ejus fuerit exaudita.

2 Præterea, Ipse oravit, ut peccatum crucifixoribus suis ignoscatur: ut patet Lucæ 22. Non tamen omnibus peccatum illud fuit dimissum: nam Judæi fuerunt pro illo peccato puniti. Ergo videtur, quod non omnis ejus oratio sit exaudita.

3 Præterea, Dominus oravit pro his qui erant credituri per verbum Apostolorum in ipsum, ut omnes in eo unum essent, & ut pervenirent ad hoc, quod essent cum ipso. Sed non omnes ad hoc perveniunt. Ergo non omnis ejus oratio est exaudita.

4 Præterea, in Psalm. 21. dicitur in persona Christi, Clamabo per diem, & non exaudies. Non ergo omnis oratio Christi fuit exaudita.

Sed contra est, quod Apostolus dicit ad Hebr. 5. Cum clamore valido & lacrymis offerens, exauditus est pro sua reverentia.

a Respondeo dicendum, quod (sicut dictum est\*) oratio est quodammodo interpretativa voluntatis humane. Tunc ergo alicujus orantis exauditur oratio, quando ejus voluntas adimpletur. Voluntas autem simpliciter hominis est rationis voluntas: hoc enim absolute volumus, quod secundum deliberationem rationem volumus. Illud autem quod volumus secundum motum sensualitatis, vel etiam secundum motum voluntatis simplicis, quæ consideratur ut natura, non simpliciter volumus, sed secundum quid, scilicet si aliud non obstat, quod per deliberationem rationis invenitur. Unde talis voluntas magis est dicenda velleitas, quam absoluta voluntas, quia scilicet homo hoc vellet, si aliud non obsteret. Secundum autem voluntatem rationis, Christus nihil aliud voluit, nisi quod scivit Deum velle. Et ideo omnis absoluta voluntas Christi, etiam humana, fuit impleta, quia fuit Deo conformis: & per consequens omnis ejus oratio fuit exaudita. Nam & secundum hoc aliorum orationes implentur, quod sunt eorum voluntates Deo conformes: secundum illud Rom. 8. Qui autem scrutatur corda, scit, id est, approbat quid desideret spiritus, id est, quid faciat Sanctos desiderare: quoniam secundum Deum, id est, secundum conformitatem divina voluntatis, postulat pro Sanctis.

Ad primum ergo dicendum, quod illa petitio de translatione calicis, diversimode a Sanctis exponitur. Hilarius enim super Matth. dicit. \* Qui autem a se transeat, rogat, non ut ipse præteratur, orat, sed ut in alterum

id, quod a se transit, accedat: atque ideo pro his orat; qui passuri post se erant: ut sit sensus. Quomodo a me bibetur calix iste passionis: ita ab his bibatur sine spei diffidentia, sine sensu doloris, sine metu mortis. Vel secundum Hieronymum. \* signanter dicit, Calix iste, hoc est, populi Judeorum: qui excusationem ignorantia habere non potest, si me occiderit habens leges & Prophetas, qui me vaticinantur. Vel secundum Dionys. Alexandrinum. Quod dicit, Transfer calicem istum a me, non hoc est, non adveniat mihi: nisi enim advenit, transferri non poterit. Sed sicut quod præterit, nec intactum est nec permanens, sic Salvator leviter invadentem tentationem flagitat pelli. Ambrosius\* autem dicit & Origenes & Chrysostomus. quod hoc petiit quasi homo, naturali voluntate mortem recusans. Sic ergo si intelligatur quod petierit per hoc alios Martyres sue passionis imitatores fieri, secundum Hilary. \* vel si petiit quod timor bibendi calicis eum non perturbaret, vel quod mors eum non detineret: omnino impletum est quod petiit. Si vero intelligitur petiisse, quod non biberet calicem mortis & passionis, vel quod non biberet ipsum a Judæis, non quidem est factum quod petiit: quia ratio quæ petitionem proposuit, nolebat ut hoc impleteretur: sed ad instructionem nostram volebat demonstrare nobis suam voluntatem naturalem & motum sensualitatis, quem sicut homo habebat.

Ad secundum dicendum, quod Dominus non oravit pro omnibus crucifixoribus, neque etiam pro omnibus, qui erant credituri in eum: sed pro his solum, qui erant predestinati, ut per ipsum vitam consequerentur eternam.

Unde patet etiam Responsio ad tertium.

Ad quartum dicendum, quod cum dicit, Clamabo, & non exaudies, intelligendum est quantum ad affectum sensualitatis, quæ mortem refugiebat: exauditur tamen quantum ad effectum rationis, ut dictum est.\*

## COMMENTARIUS.

**Q**UÆSTIO hujus articuli coincidet cum quæstione supra tractata de voluntate Christi, an semper fuerit impleta; diximus autem absolutam voluntatem semper impletam esse, non tamen simplicem affectum, seu velleitatem: cum ergo oratio sit explicatio voluntatis, constat illam orationem, quæ ex voluntate absoluta proficiscatur, semper esse exauditam, non vero, quæ ex sola conditionata voluntate, & secundum quid, ut bene D. Th. respondet & declarat. Omnia vero, quæ in solutionibus argumentorum attingit, in superioribus etiam tractata sunt, nam in solutione ad primum tractat locum Matth. 26. Pater, si possibile est, &c. Cum quo coincidit illud. Psalm. 21. Clamabo per diem, & non exaudies, quod tangit in solutione ad 4. quæ supra tractavimus, partim disput. 24. sect. 2. partim disput. 38. sect. 2. & sequent. In solutione vero ad 2. & 3. declarat D. Th. quomodo Christus aliter pro prædestinatis, quam pro reprobis oraverit, de qua re egimus disp. 41. sect. 2.

## DISPUTATIO XLV.

In duas sectiones distributa.

De oratione Christi in via, & in patria.

**I**N præcedentibus disputationibus, circa quæst. 20. D. Thom. explicuimus quomodo virtus obedientiæ vere, ac proprie in Christo Domino locum habuerit, quatenus ut homo Deo subiectus est: nunc convenienter explicandum sequitur, quomodo etiam fuerit capax virtutis religionis ad Deum; cum enim dixerimus, illum ut hominem esse non solum subiectum, sed etiam servum, & ad officium servi pertineat, cultum & reverentiam exhibere domino, consequens necessario fit, Christum ut hominem perfectissime observasse hoc officium erga Deum, atque adeo cultum Deo debitum, scilicet latriæ, & religionis illi exhibuisse: unde Matth. 4. & Luc. 4. tam de aliis, quam de se ipso generalem sententiam protulit dicens, Dominum tuum adorabis, & illi soli servies, & Joan. 4. Vos adoratis quod nescitis, nos adoramus quod scimus. Itaque dubium non est, quin virtus religionis vere ac proprie in Christum conveniat. Cum vero hæc virtus plures habeat actus, duo tamen sunt præcipui, ad quos cæteri revocantur, scilicet oratio, & sacrificium, & ideo de his duobus specialiter disputatur a D. Th. in hac, & sequen-

Super illud  
locum  
Matt. 9.  
tom. 1.

Ambr. lib.  
10. in Luc.  
homil. 15.  
Origen.  
ho. 35. in  
Matt. in 6.  
fo. a pri.  
illius to-  
mo 2.  
Chrys.  
ho. 14. in  
Matt. 10. 2.  
fo. Hilary.  
canon. 31.  
in Matth.

In corp.  
att.

199.  
§ d. 17. ar.  
3. q. 3 & 4.  
& opusc. 3  
cap. 140. &  
opul. 7. &  
Pl. 20. co.  
q. & Joan.  
12. l. 4. col.  
a. & Heb.  
§. col. 5.

Art. præc.  
arg. 2. &  
art. 1. hu-  
jus quæst.

Can. 31. in  
Matt. pau-  
lo a me-  
dio.

Religio-  
nis a  
præcipuo



sequenti quaest. quia ceteri specialem difficultatem non habent. Quia licet de voto quaeri possit, an aliquod votum emiserit, & de juramento, an aliquando vere iuraverit, tamen primum horum in Evangelio fundamentum non habet. De secundo vero disputari solet in materia de juramento, & quidem de utroque aliquid infra dicemus in secundo tomo. De oratione igitur Christi duo breviter explicanda sunt, aliud ad statum viatoris, aliud ad statum comprehensoris pertinens.

## SECTIO I.

*An Christus in statu viae vere, ac proprie oraverit.*

**O**ratio generaliori quadam significatione significat omnem actum interiorem, qua anima in Deum elevatur per contemplationem, vel meditationem, devotionem, aut similes actus, & si hoc modo sumatur oratio, non est quod disputetur, an in Christo fuerit, cujus anima perfectissima contemplatione in Deum ferebatur, non solum per beatam fruitionem, sed per scientiam etiam infusam, & liberum charitatis actum, ut in superioribus satis tractatum est. Alio ergo modo magis proprio sumitur oratio, ut significat petitionem, seu postulationem, aut supplicationem, quae includit obsecrationem, & gratiarum actionem, & alios actus similes, ut D. Th. exponit 2. 2. q. 83. art. 7. & de hoc etiam genere orationis certissimum est, Christum Dominum in via existentem sapientissime illam exercuisse. Quod enim gratias egerit Patri seu Deo, frequenter in Evangelio legimus, Lucæ 22. *Accepto calice & pane, gratias egit*, Joan. 11. *Pater gratias ago tibi, quia audisti me*, & Matth. 11. *Confiteor tibi, Pater, Domine cæli & terræ*, Joan. vero 12. petit Christus, *Pater, clarifica nomen tuum*; & c. 17. longam habuit orationem similem, & postea in orto, ac tandem in Cruce. Ac denique Paul. ad Hebr. 5. *In diebus, inquit, carnis sue preces supplicationesque ad eum, qui possit illum salvum facere a morte, cum clamore valido, & lachrymis offerens, exauditus est pro sua reverentia*. Quæ omnia, sicut proprie dictum genus orationis significat, ita proprie intelligenda sunt: sicut ab universa Ecclesia, & omnibus Patribus, & Theologis intelliguntur, & ipsa Scripturæ sinceritas & historiarum veritas postulant. Quomodo autem Christus ut homo capax fuerit hujus orationis satis, explicando articulos D. Thom. declaratum est. Cur autem decens fuerit ipsum orare, satis ex honestate ipsiusmet actus orationis perspicitur: continet enim decentissimum Dei cultum, & ideo per se conveniens fuit, ut Christus ut homo illum Patri exhiberet & mente, & corpore. Deinde fuit hoc expediens, ut Christus omnibus modis operaretur nostram salutem merendo, satisfaciendo, & impetrando. Et ut nobis daret exemplum eisdem modis illam per orationem procurandi, ut late tractat Hilarius lib. 10. de Trinit. a medio, & Ambrosius lib. 5. in Luc. cap. de oratione Jesu in monte, & Damascenus lib. 3. cap. 24. August. epist. 121. cap. 14. Ubi dicit voluisse Christum interdum ita orare ut non exaudiretur, ut nobis esset exemplum patientiæ, quando non fit quod petimus.

Dubium.

Solum illud potest hic breviter dubitari, an revera Christus in oratione aliquid petierit, quia illud medium erat sibi necessarium ut id fieret, vel solum propter exercitium virtutis, & exemplum nostrum. Et ratio dubitandi sumi potest ex facto Christi Joan. 11. ubi, cum Martha illi dixisset, *Scio, quia quæcumque poposceris a Deo, dabit tibi Deus*, respondit ipse Dominus, *Resurget frater tuus*, quasi diceret, sua potestate se id facturum, & non indigere oratione, seu petitione, cum ipse sit Deus. Ubi Chrysost. homil. 61. notat, Martham non altius sensit de Christo, quam de puro homine, cum ipsum non nisi media petitione, & oratione posse resuscitare mortuum existimaret, unde Christus inferius, cum gratias Patri egisset, subdit, *Ego autem sciebam, quia a semper me audis: sed propter populum, qui circumstat, dixi, ut credant, quia tu me misisti*, ubi indicat solum propter exemplum gratias egisse Patri, eo quod ipsum exaudisset. Unde Chrysost. ibi homil. 63. & Euthym. ibi, & Ambrosius lib. 4. de fide c. 3. ita exponunt illa verba, quæ Christus subjunxit, *Ego autem sciebam, quia a semper me audis*, ut illa ad divinitatem

Christi referant. Unde ita exponunt, *Gratia tibi ago*, non quia indigeam precibus coram te, scio enim unam voluntatem me tecum habere, ideoque semper velle, quod ego volo, *sed propter populum, qui circumstat, &c.* Et Theophyl. advertit, Christum, ante quam orasset, vel aliquid petisset, dixisse, *Gratias tibi ago, quia a audisti me*, quia enim non opus habebat oratione, non fuit oratio exaudita, sed voluntas implera, & hoc fuit Christo exaudiri juxta phrasim Scripturæ, secundum illud Psalm. 9. *Desiderium pauperum exaudivit Dominus*, & Job. 31. *Desiderium meum audiat omnipotens*. Et confirmatur ex Damasc. lib. 4. de fide, cap. 19. circa medium, ubi inquit, quædam dici de Christo homine simulationis modo, *Ut cum precatur*, inquit: & subdit. *His enim, & similibus, neque ut Deus, neque ut homo opus habebat, verum ratione humanitati congruente ad id se confirmabat, quod usus, atque utilitas poscebat, verbi gratia, ob eam causam precabatur, ut se impium quendam, Deique adversarium minime esse demonstraret, atque ut Patrem, a quo originem ducebat, honore afficeret*.

Dicendum tamen est (sicut in articulo primo circa solutionem ad primum adnotavimus) primum, Christum vere ac proprie orasse postulando, & suppliciter petendo aliquid a Patre, ut ex Evangelio constat. Ex quo fit consequens, sæpe ex divina providentia & ordinatione ita fuisse res dispositas, & prædefinitas, ut multa fuerint a Christo homine per orationem impetranda, quæ sine illius oratione non fierent; sicut enim non redemisset homines, nisi pro illis pateretur, quia ita fuerat a Deo præscriptum, & præordinatum, ita neque sine oratione obtinisset, quæ non nisi per orationem obtinenda erant, juxta divinam præordinationem. Unde sicut necessarium fuit illi pati, ut ita intraret in gloriam suam, & nos secum in illam introduceret: ita necessarium fuit illi orare ad impetrandum multa, quæ per orationem obtinuit: juxta illud Psalm. 2. *Postula a me, & dabo tibi gentes hereditatem tuam*: at vero sicut necessitas passionis ad redemptionem nostram non fuit ex defectu personæ, aut quia Christus non esset sufficiens infinitis aliis modis, vel operibus illam perficere, sed quia propter congruentes rationes Deus illam ordinavit ut necessarium medium ad illum finem: ita hæc necessitas orationis non fuit ex indigentia ipsius personæ, aut quia per se non sufficeret ad efficiendum per humanitatem abique petitione, quidquid petendo obtinuit, vel effecit, sed quia propter rationes congruentes, & ad divinum honorem, nostramque utilitatem pertinentes, ita a Deo fuit ordinatum, & dispositum. Itaque uno verbo dici potest, Christum simpliciter non indiguisse oratione, quia propter dignitatem personæ potuisset, quidquid vellet sine oratione perficere, & de facto habuit etiam in humanitate sua potestatem faciendi miracula, imperando & volendo sine necessitate orationis. Nihilominus tamen in sensu composito, id est, supposita divina ordinatione, multa non potuit in quantum homo sine oratione perficere, ut D. Thom. docuit, quod non negant citati Patres, sed priorem hujus doctrinæ partem docere voluerunt: & hic est sensus Chrysost. Ambrosii. Theophyl. & Euthymii. Qui facile etiam potest ad locum Joannis accommodari, quamquam quod Christus dixit, *Ego autem sciebam, quoniam a semper me audis*, satis commode, & fortasse magis ad literam, de Christo ut homine intelligi potest, cujus oratio absoluta & efficax semper exaudita est, ut ibi D. Thom. recte exponit. Quod vero sequitur, *sed propter populum, qui circumstat, dixi*, &c. optime intelligi potest (sicut D. Th. in art. 3. exposuit quoddam dictum Hilarii) de gratiarum actione externa, & publica voce facta: hujusmodi enim oratio, & gratiarum actio propter nostram præcipue edificationem, & exemplum facta est.

Ad Damasc. respondetur, non negare veritatem orationis Christi, sed necessitatem simpliciter, sicut alios Patres. Unde non absolute dicit, Christum simulasse, sed habuisse se ad modum simulantis, quia orando occultabat potentiam suam, sicut cum interrogabat, occultabat suam scientiam, & cum admirabatur similiter: tamen sicut vere admirabatur & vere interrogabat, ita etiam vere orabat, & orando impetrabat.

Oratio  
quomodo  
Christo  
necessaria  
fuerit.



*Utrum Christus Dominus nunc in cælo existens, vere ac proprie pro nobis oret.*

**D**UOBUS modis (ut est doctrina D. Th. in 4. dist. 45. q. 3. art. 3. & super cap. 7. ad Hebr.) intelligi potest Christum Dominum in cælo existentem pro nobis orare, primo oratione expressa petendo nobis divinæ pietatis subsidium. Secundo oratione tantum interpretativa, per sua merita, quæ divino conspectui præsentia sunt, & exhibendo etiam se ipsum præsentem, & cicatrices vulnorum, quæ pro nobis sustinuit, re ipsa ostendendo.

Quomodo  
Christus  
pro nobis  
oret in  
cælo.

Quod ergo Christus Dominus altero ex his duobus modis, saltem posteriori, pro nobis interpellat, & oret, indubitatum est inter catholicos, sic enim dicit Paul. ad Hebr. 9. Christum Jesum introisse in ipsum cælum ut appareat nunc vultui Dei pro nobis, & cap. 12. dicit Christi sanguinem melius loqui, & clamare ad Deum, quam Abel, & in eo saltem sensu verum est, quod Joan. ait 1. Canon. c. 1. *advocatum habemus ad Patrem*, nam licet vox, *Paracletus*, interdum non intercessorem, sed consolatorem significet, ut Joan. 14. *Alium paracletum dabit vobis*, id est, consolatorem, exhortatorem, aut doctorem, hæc enim omnia illa voce significari possunt, & conveniunt in personam Spiritus sancti, & possunt etiam in Christum convenire, ut recte docent Cyril. lib. 9. in Joan. c. 44. August. lib. contra sermonem Arianor. c. 19. & 20. nihilominus tamen in illo loco Joan. 2. obsecratorem, vel intercessorem significat, hæc enim est maxime propria significatio illius vocis, & sola illa Joannis intentioni quadrat, excitat enim, & animat peccatores, quoniam advocatum habent apud Patrem Jesum Christum justum. Et licet possit per metaphoram accommodari Christo, ut Deus est, eo modo, quo ad Rom. 8. dicitur Spiritus sanctus orare pro nobis, quia facit nos orare, ut indicat Nazia. orat. 36. n. 55. tamen literalis sensus est de Christo homine, ut constat ex proprietate vocum, & ex subjunctis verbis, *Et ipse est propitiatio pro peccatis nostris*, ut August. ibi exponit tract. 1. & D. Thom. super Joan. 14. & Cyril. lib. 11. in Joan. c. 9. & 19. & Concilium Francoford. colum. 6. dicens. *Advocatus est, qui pro me judicem interpellat, qui causam necessitatis meæ, propria tuitione defendat*. Unde ad Rom. 8. dicitur *interpellare pro nobis*, & ad Hebr. 7. *Semper vivens ad interpellandum pro vobis*.

Difficultas vero superest, an non solum interpretative, sed etiam expresse petendo, & rogando, pro nobis in cælo oret. Multi enim contendunt minime convenire hoc genus orationis in Christum ad dexteram Patris sedentem. Quam sententiam constantissime defendit Rupert. lib. 9. de divin. officiis c. 3. & in eam videntur inclinare Chryl. hom. 15. in ad Romanos, & 13. in ad Hebr. quem Theophyl. imitatur ad Heb. 7. & ad Rom. 8. qui dicunt, ipsam præsentiam Christi apud Patrem, & amorem ferventem, quo nos prosequitur, & quem Pater optime cognoscit, esse magnam interpellationem pro nobis, & hoc modo Christum esse advocatum nostrum, non quia denuo petat, vel oret, sed quia præsentia sua placat judicem, & causam nostram adjuvat. Neque videtur multum ab hac sententia distare Nazian. dicta orat. 36. n. 53. & 54. dicens: *Unus mediator Dei & hominum, homo Jesus Christus, intercedit enim nunc quoque ut homo pro mea salute, quoniam cum eo corpore est, quod assumpsit, & infra, Advocatum habemus Jesum, non se nostra causa ad Patris pedes advolventem, servilique modo objicientem, procul sit ista servilis sane suspicio, spirituque indigna, neque enim Patris est hoc exposcere, aut Filii pati, nec de Deo hoc cogitare pium, atque æquum est*. Et Beda 1. Joan. 2. *Unigenito filio*, inquit, *pro homine interpellare est, apud coeternum Patrem se ipsum demonstrare, eique pro humana natura rogasse, est eandem naturam in divinitatis sue celsitudine suscepisse*. Interpellat ergo pro nobis Dominus, non voce, sed miseratione, quia quod damnare in electis noluit, suscipiendo servavit, & D. Th. infra q. 57. art. 6. hanc interpellationem explicans dicit, *Ipsa representatio sui ex natura humana, quam in cælum intulit, est quedam interpellatio pro nobis*, & in primam Canonicam Joannis c. 2. inquit, Christum, in cælo placare iram Patris, representando Patri naturam humanam cicatricibus signatam, & ita sua merita allegantem, non nostra, & infra inquit, *Triplitem esse intercessionem*

*Christi pro nobis, primo ante passionem devota oratione, secundo in Cruce sanguinis effusione, tertio post Ascensionem, cicatricum representatione, & paulo post refert verba Bernardi, quæ statim afferemus. Denique Concil. Francoford. supra ita exponit hanc interpellationem dicens, Quia carnem, quam pro nobis assumpsit, Patri semper manifestat, ad cujus dexteram sedet, &c. Hanc sententiam fundat Rupert. in verbis illis Joan. 16. ubi loquens Christus de statu gloriæ suæ inquit, In illo die in nomine meo petetis, & non dico vobis, quia ego rogabo Patrem de vobis, &c. Et confirmatur, quia si Christus nunc orat pro nobis, ergo possumus illum rogare ut pro nobis oret, consequens autem adeo absurdum existimat Rupert. ut non censeat esse Catholicum qui hoc modo orat, quia videtur male de Christi divinitate & maiestate sentire, & quia contra consuetudinem totius Ecclesiæ orat, & quia ipse Christus Joan. 16. docuit nos orare Patrem per se ipsum dicens, Si quid petieritis Patrem in nomine meo, dabit vobis, & Joan. 14. eodem modo docuit orare ad se ipsum dicens, Si quid petieritis me in nomine meo, hoc faciam, nunquam tamen docuit orare ipsum, ut pro nobis oret, quin potius dicendo, Hoc faciam, ostendit se jam non indigere oratione, sed usu potestatis suæ. Et hinc potest formari ratio, quia jam Christo data est omnis potestas in cælo, & in terra, & plenus illius potestatis usus, ergo jam non indiget oratione ad impetrandum. Nec vero ad merendum, vel satisfaciendum, quia (ut supra vidimus) jam consummavit sua merita, & satisfactiones, non est ergo, quod pro nobis oret.*

Nihilominus & Scripturis, & pietati magis consentaneum videtur, sentire Christum, non solum, tacita, seu interpretativa insinuatione, sed aperta, & expressa voluntatis suæ representatione, ac manifestatione pro nobis in cælo orare. Hæc est sententia D. Thom. in 4. d. 15. q. 4. art. 6. q. 2. ad 1. & super ad Rom. 8. lect. 7. ubi duplicem interpellationem Christi distinguit, aliam per orationem, aliam per representationem suæ humanitatis, & expressius, lect. 4. super ad Hebr. 7. *Interpellat*, inquit, *pro nobis, primo humanitatem suam, quam pro nobis assumpsit, representando: item sanctissima anima suæ desiderium, quod de salute nostra habuit, exprimendo*. Et 1. Joan. 2. dicit Christum in cælo existentem placare Patrem representando naturam suam, cicatricibus signatam, & allegando sua merita, & intercedendo ex officio suo. Eandem sententiam tenet Bonavent. tomo 1. opusc. opuscul. 39. de vita Christi, c. 98. de ascensione. Abulen. q. 142. in Matth. c. 14. & Cardinalis Toletus super c. 16. Joan. annot. 35. non solum hanc sententiam sequitur, sed contrariam dicit esse improbabilem. Et probatur primo ex omnibus Scripturarum testimoniis supra citatis, quæ hoc sensu proprius exponuntur, & intelliguntur. Deinde Joann. 14. dicit ipse Christus, *Ego rogabo Patrem, & alium Paracletum dabit vobis*, nam licet Rupert. contendat, Christum loqui de statu viæ, tamen, si planus contextus consideretur, revera loquitur de statu post suam Resurrectionem, & Ascensionem: consolatur enim discipulos, & adhortatur, ut bono animo ferant discessum suum, quia apud Patrem existens rogaturus erat Patrem, ut alium Paracletum ad eos mitteret, & ex illismet verbis Christi, Joan. 16. *In illa die non dico vobis quod rogabo Patrem*, idem colligi potest, quia ut indicavit Cyril. lib. 11. in Joan. c. 9. ita exponi potest, *In illo die, non solum exaudiemini in nomine meo petentes, quia ego rogabo Patrem, sed etiam, quia ipse Pater amat vos*. Vel, ut exposuit Hilarius lib. 6. de Trinit. quia Christus non dixit se non rogaturum, sed dixit, *Et non dico vobis, quia ego rogabo Patrem*, subindicans, se quidem rogaturum, tamen ut intelligant quantum a Patre discipuli sui amantur, se nolle suam intercessionem commemorare, sed eximiam Patris erga nos charitatem.

Secundo probatur ex Patribus. Cyprianus epist. 8. alias lib. 4. epist. 4. inter alia, *Habemus*, inquit, *advocatum, & deprecatorem Jesum Dominum Deum nostrum*. August. præfatio. in Psalm. 85. *Oratur*, inquit, *in forma Dei, orat in forma servi, orat pro nobis, orat in nobis, & oratur a nobis, ut sacerdos noster orat pro nobis, orat in nobis ut caput nostrum, oratur a nobis ut Deus, oramus ad illum, per illum, in illo, & dicimus cum illo, & dicit nobiscum*. Et in fine ejusdem præfationis dixit, Christum & alios martyres interpellare pro nobis, quam interpellationem dicit esse

Christus  
in cæli  
expresso  
pro ho-  
minibus  
orat.



esse misericordiae opus, & tunc cessaturam, cum cessaverit miseria nostra: certum est autem ex eodem August. lib. de cura pro mortuis agenda cap. 16. martyres, & sanctos orare proprie pro nobis. Idem August. præfatio. ad enarr. 2. in Psal. 29. expresse dicit, Christum etiam post Resurrectionem per humanitatem suam pro nobis orare. Præterea Ambros. super ad Rom. 8. dicit: *Christum semper agere causas nostras apud Patrem, cujus postulatio contemni non potest, quia in dextera Dei est*, & infra dixit ita nunc interpellare pro nobis, sicut rogavit pro Petro, ne deficeret fides ejus. Et lib. de Isaac, & anima c. 8. post medium, *Ipse*, inquit, *sit vox nostra, per quam loquamur ad Patrem*. Bernard. etiam in sermone de Nativit. Virg. *Exaudiet*, inquit, *Matrem filius, & filium Pater*. Præterea Justin. Mart. q. 105. ad orthodoxos: *Si superatis*, inquit, *Resurrectione infirmitatibus carnis, ut Pontifex confessionis nostræ Deum pro nobis interpellat, nonne magis, cum adhuc subjaceret infirmitati carnis, &c.* In quibus verbis rationem non contemnendam indicat, nam Christus est æternus Pontifex, & ideo, quoad nos indigemus, semper pro nobis munus Pontificis exercet, modo statui suo accommodato: pertinet autem ad Pontificem pro suis subditis orare, ut ex Paulo ad Hebr. 5. docuit D. Thom. q. seq. art. 4. ad 1. Multa enim in hanc sententiam congerit Origen. homil. 7. super Levit. qui interdum per exaggerationem loquitur. Ultimo probatur rationibus. Prima, quia oratio non dedecet Christum eo, quod Deus est, nam est etiam homo, aliàs neque in hac vita unquam orasset: nec quia Beatus est, aliàs neque alii Beati orarent, quod nunc omnino falsum esse suppono; oratio ergo nullam includit imperfectionem repugnantem aut divinitati, aut beatitudini Christi: ergo non est, cur non oret. Secundo, nam oratio est cultus religionis Deo debitus, Christus autem in cœlo Deū religione colit, adoratur, laudatur, & gratias agit; cur ergo non etiam postulet? Tertio, quia in omni statu operatur pro salute hominum quidquid commode potest; potest autem in statu patriæ orare & impetrare, quia hæc non repugnant cum illo statu. Quarto denique nos habemus accessum ad Patrem per Christum, ut ad Hebr. 4. dicitur, non tantum quia in nomine ipsius petimus, sed etiam (ut supra indicavit Ambros.) quia per ipsum nostras orationes offerimus, & ipse, ut exaudiantur, obtinet.

Ad fundamenta contrariæ sententiæ. Primum ad Patres, Rupert. quidem videtur fuisse illius sententiæ, quam non probamus. Vel exponi fortasse posset, distinguendo duplicem orationem juxta doctrinam supra datam disp. 39. sect. 3. alteram, qua aliquis denuo impetrat, vel petit denuo merendo id, quod petit: alteram, qua petit exigendo jus sibi debitum. Christus ergo in via oravit priori modo, posteriori autem in patria: fortasse ergo Rupert. solum negare voluit priorem modum orandi, qui statui beatitudinis consentaneus non est. Et ad eundem modum exponi possunt Chrysost. Theophyl. Beda, & alii ibi citati, qui explicarunt hanc orationem Christi per representationem suæ carnis, & humanitatis, non quia intelligenda sit (ut ita dicam) per solam objectivam præsentiam sine ullo actu, nam ille modus valde imperfectus est: sed quia Christus per proprium actum repræsentat Patri carnem suam, & cicatrices suorum vulnerum, & (ut D. Thom. dixit) *allegat sua merita*, ut propterea hominibus beneficiat. Et fortasse Nazianz. hoc sensu negavit, Christum nunc fundere servilem, & supplicem orationem: quamvis etiam indicet, Christum non ita nunc orare, ut habitu, & figura corporis, & quasi per externa signa, se supplicem, & subiectum ostendat. Quod in via faciebat flectendo genua, Luc. 22. procidendo super terram, Marc. 14. hic enim modus veluti servilis orationis non est consentaneus statui patriæ: non est tamen incredibile, ibi non solum mente, sed etiam corpore Christum orare, quia & voce Deum laudat, & cultum religionis illi præbet.

Ad primam confirmationem, in qua petitur, an possimus Christum orare, ut pro nobis oret, D. Thom. in 4. loco supra citato simpliciter docet, non esse dicendum: *Christe, ora pro nobis*, sed, *Audi nos, vel miserere nostri*, tum ad vitandum errorem Arii, & Nestorii, tum quia oratio simpliciter dirigitur ad personam, quæ est divinum suppositum, cujus non est petere, sed donare: tum præterea addi potest, quia in orationibus, Ecclesiæ con-

Suarez Tom. XVI.

suetudo servanda est: tum etiam, quia quando aliquam personam alloquimur, & præsertim si aliquid ab illa postulamus, illam alloquimur, modo, aut titulo magis honorifico, & ideo Christum simpliciter adoramus, latria & non hyperdulia: & hoc absolute verum est, præcipue in oratione publica. Si quis autem sciat rationes distinguere, & considerare Christum ut hominem in cœlo orantem, & pro nobis sua merita Patri repræsentantem, non erit illicitum, neque indecorum ab illo postulare, ut suæ orationis nos participes efficiat, & efficacem suorum meritorum applicationem nobis obtineat. Item, ut orationem nostram suæ jungat, & Patri offerat, ut Ambros. & August. clare docuerunt.

Ad ultimam confirmationem jam explicatum est, propter quas causas Christus oret, ut enim D. Th. docet in hac qu. & supra q. 14. art. 4. ad 3. licet Christus ut homo suo modo omnia possit, tamen dependenter a Deo, atque adeo servato ordine, & modo divinæ dispositionis: ille autem est, ut petendo, & honorando Deum, & merita sua nobis applicet, & virtutem suam exequatur.

## Q U Æ S T I O XXII.

De sacerdotio Christi, in sex articulos divisa.

**D**Einde considerandum est de sacerdotio Christi. Et circa hoc quaeruntur sex.

Primo, utrum conveniat Christo, esse sacerdotem.

Secundo, de hostia hujus sacerdotis.

Tertio, de effectu hujus sacerdotii.

Quarto, utrum effectus sacerdotii ejus pertineat ad ipsum, vel solum ad alios.

Quinto, de eternitate sacerdotii ejus.

Sexto, utrum debeat dici sacerdos secundum ordinem Melchisedech.

## A R T I C U L U S I.

a Utrum Christo conveniat esse sacerdotem.

**A**D primum sic proceditur. Videtur, quod Christo non conveniat esse sacerdotem. Sacerdos enim est minor Angelo: unde dicitur Zachar. 3. *Ostendit mihi Deus sacerdotem magnum stantem coram Angelo Domini. Sed Christus est major Angelis: secundum illud Hebr. 1. Tanto melior Angelis effectus, quanto differemus præ illis nomen hereditavit. Ergo Christo non convenit esse sacerdotem.*

2 Præterea. Ea, quæ fuerunt in veteri Testamento, fuerunt figura Christi, secundum illud Coloss. 2. *Quæ sunt umbra futurorum, corpus autem Christi. Sed Christus non traxit carnis originem ex sacerdotibus veteris Legis, dicit enim Apostolus ad Hebr. 7. Manifestum est, quod ex Juda ortus sit Dominus noster, in qua tribu nihil de sacerdotibus Moyses locutus est. Ergo Christo non convenit esse sacerdotem.*

3 Præterea. In veteri lege, quæ est figura Christi, non fuit idem legislator & sacerdos: unde dicit Dominus ad Moysen legislatorem Exod. 28. *Applica Aaron fratrem tuum, ut sacerdotio fungatur mihi. Christus autem est legislator novæ legis, secundum illud Hierem. 31. Dabo legem meam in cordibus eorum. Ergo Christo non convenit esse sacerdotem.*

Sed contra est, quod dicitur Hebr. 4. *Habemus Pontificem, qui penetravit cælos, Jesum Filium Dei.*

b Respondeo dicendum, quod proprie officium sacerdotis est, esse mediatorem inter Deum & populum: in quantum, scilicet, divina populo tradit (unde dicitur sacerdos, quasi sacra datus) secundum illud Malach. 2. *Legem requirunt ex ore ejus, scilicet, sacerdotis: Et iterum. Et in quantum preces populi Deo offert, & pro eorum peccatis Deo aliquantulum satisfacit. Unde Apost. dicit ad Hebr. 5. Omnis Pontifex ex hominibus assumptus, pro hominibus constituitur in his, quæ sunt ad Deum, ut offerat dona & sacrificia pro peccatis. Hoc autem maxime convenit Christo: nam per ipsum divina dona hominibus sunt collata: secundum illud, 2. Petr. 1. *Per quem, scilicet Christum, maxima & pretiosa nobis promissa donavit, ut per hoc efficiamini divinæ consortes naturæ. Ipse etiam humanum genus Deo reconciliavit: secundum illud Coloss. 1.**

P p

le



In ipso, scilicet Christo, complacuit, omnem plenitudinem inhabitare, & per eum reconciliare omnia. Unde Christo maxime convenit esse sacerdotem.

c Ad primum ergo dicendum, quod potestas hierarchica convenit quidem Angelis, in quantum & ipsi sunt medii inter Deum & hominem, ut patet per Dionys. \* in lib. Cœl. hier. ita quod sacerdotes, in quantum est medius inter Deum & populum, Angeli nomen habet: secundum illud Malach. 2. Angelus Domini exercituum est Christus autem major Angelis fuit non solum secundum divinitatem: sed etiam secundum humanitatem, in quantum habuit plenitudinem gratiæ, & gloriæ. Unde etiam excellentiori modo hierarchica, seu sacerdotalem potestatem præ Angelis habuit: ita etiam quod ipsi Angeli fuerunt ministri sacerdotii eius: secundum illud Matth. 4. Accesserunt Angeli, & ministrabant ei: secundum tamen passibilitatem carnis, modico ab Angelis minoratus est; ut Apostolus dicit Heb. 2. Et secundum hoc, conformis fuit hominibus viatoribus in sacerdotio constitutis.

d Ad secundum dicendum, quod sicut Damasc. \* dicit in 3. lib. quod in omnibus est simile, idem utique erit, & non exemplum. Quia igitur sacerdotium veteris legis erat figura sacerdotii Christi, noluit Christus nasci de stirpe figuralem sacerdotum, ut ostenderetur non esse omnino idem sacerdotium, sed differre, sicut verum a figurali.

Ad tertium dicendum, quod sicut supra dictum est, alii homines particulatim habent quasdam gratias, sed Christus tanquam omnium caput habet perfectionem omnium gratiarum. Et ideo quantum ad alios pertinet, alius est Legislator, & alius Sacerdos, & alius Rex: sed hæc omnia concurrunt in Christo tanquam in fonte omnium gratiarum. Unde dicitur Isa. 33. Dominus iudex noster, Dominus legislator noster, Dominus Rex noster; ipse venit & salvabit nos.

#### COMMENTARIUS.

Doctrina D. Thom. in hoc artic. est, Christum esse vere, & proprie sacerdotem, quod ex actibus propriis sacerdotalis muneris, quos Christus Dominus perfectissime exercuit, satis dilucide probat, unde non indiget maiori expositione.

d Solum notanda sunt solutiones ad 2. & 3. nam in priori significat, Christum non duxisse originem ex stirpe sacerdotum legalium, quod infra suo loco examinandum est. Nunc intelligatur de origine per lineam masculinam, seu paternam beatæ Virginis. nam secundum aliquam lineam maternam Virginis, ortus aliquo modo fuit ex Levitica tribu. In solutione vero ad 3. recte docet D. Thom. Christum non tantum esse sacerdotem, sed etiam Regem, & Legislatorem. Quod infra propria disputatione explicandum erit.

#### ARTICULUS II.

Utrum Christus simul fuerit sacerdos & hostia.

Ad secundum sic proceditur. Videtur, quod ipse Christus non fuerit simul sacerdos & hostia: sacerdotis enim est hostiam occidere. Sed Christus non se ipsum occidit. Ergo ipse nec fuit simul sacerdos & hostia.

2 Præterea. Sacerdotium Christi magis est simile sacerdotio Iudeorum, quod erat a Deo institutum, quam sacerdotio Gentilium, quo demones colebantur. In veteri autem lege nunquam homo in sacrificium offerebatur, quod maxime reprehenditur in sacrificiis Gentilium: secundum illud Psalm. 105. Effuderunt sanguinem innocentem, sanguinem filiorum suorum, & filiarum suarum, quas sacrificaverunt sculptilibus Chanaan. Ergo in sacerdotio Christi non debuit esse homo Christus hostia.

3 Præterea. Omnis hostia ex hoc quod Deo offertur, Deo sanctificatur. Sed ipsa Christi humanitas a principio fuit sanctificata, & Deo conjuncta. Ergo non convenienter potest dici, quod Christus, secundum quod homo, fuerit hostia.

Sed contra est, quod Apost. dicit ad Ephes. 5. Christus dilexit nos, & tradidit semetipsum pro nobis oblationem & hostiam Deo in odorem suavitatis.

a Respondeo dicendum, quod sicut August. \* dicit in 10. de Civit. Dei, omne sacrificium visibile, invisibile sacrificii sacramentum, id est, sacrum signum est. Invisibile autem sacrificium est, quo homo Deo spiritum suum

offert: secundum illud Psalm. 50. Sacrificium Deo spiritus contribulatus. Et ideo omne illud, quod Deo exhibetur, ad hoc, quod spiritus hominis feratur in Deum, potest dici sacrificium.

Indiget igitur homo sacrificio propter tria. Uno quidem modo ad remissionem peccati, per quod a Deo avertitur: & ideo Apostol. dicit ad Hebr. 5. quod ad sacerdotem pertinet, ut offerat dona & sacrificia pro peccatis. Secundo, ut homo in statu gratiæ conservetur, semper Deo inherens, in quo ejus pax & salus consistit. Unde & in veteri lege immolabatur hostia pacifica pro offerentium salute: ut habetur Levit. 3. Tertio ad hoc, quod spiritus hominis perfecte Deo uniatur: quod maxime erit in gloria. Unde & in veteri lege offerebatur holocaustum quasi totum incensum: ut dicitur Levit. 1. Hæc autem per humanitatem Christi nobis provenerunt. Nam primo quidem nostra peccata deleta sunt: secundum illud Rom. 4. traditus est propter delicta nostra. Secundo, gratiam nos salvantem per ipsum accepimus: secundum illud Hebr. 5. Factus est omnibus obtemperantibus sibi, causa salutis æternæ. Tertio per ipsum perfectionem gloriæ adepti sumus. Hebr. 10. Habemus fiduciam per sanguinem ejus in introitum Sanctorum, scilicet in gloriam cœlestem. Et ideo ipse Christus in quantum homo, non solum fuit sacerdos, sed etiam hostia perfecta, simul existens hostia pro peccato, & hostia pacifica, & holocaustum.

Ad primum ergo dicendum, quod Christus non se occidit, sed se ipsum voluntarie morti exposuit, secundum illud Isaie. 53. Oblatus est, quia ipse voluit: & ideo dicitur se ipsum obtulisse.

b Ad secundum dicendum, quod hominis Christi occiso potest ad duplicem voluntatem comparari. Uno modo ad voluntatem occidentium. Et sic non habet rationem hostiæ: non enim dicuntur occisores Christi, hostiam Deo obtulisse, sed graviter deliquisse. Et hujus peccati similitudinem gerebant impia Gentilium sacrificia, quibus homines idolis immolabant. Alio modo potest considerari occiso Christi per comparationem ad voluntatem patientis, qui voluntarie se obtulit passioni. Et ex hac parte habet rationem hostiæ, in qua non convenit cum sacrificiis Gentilium.

Ad tertium dicitur, quod sanctitas humanitatis Christi a principio non impedit, quin ipsa met humana natura, cum in passione oblata est Deo, sanctificata novo modo fuerit, scilicet ut hostia ætternaliter tunc exhibita. Adquisivit enim ætternalem hostiæ sanctificationem tunc ex antiqua charitate & gratia unionis sanctificante eamdem absolute.

Hic articulus meditatione potius indiget, quam expositione. De re autem ipsa nonnihil postea dicemus.

#### ARTICULUS III.

Utrum effectus sacerdotii Christi sit expiatio peccatorum.

Ad tertium sic proceditur. Videtur, quod effectus sacerdotii Christi non sit expiatio peccatorum. Solius enim Dei est peccata delere, secundum illud Isaie. 43. Ego sum qui deleo iniquitates tuas propter me. Sed Christus non est sacerdos, secundum quod Deus, sed secundum quod homo. Ergo sacerdotium Christi non est expiativum peccatorum.

2 Præterea. Apostol. dicit Hebr. 10. quod hostiæ veteris Testamenti non poterant perfectos facere: alioquin cessasset offerri, eo quod nullam haberent conscientiam peccati cultores sufficienter semel mundati, sed in ipsis commemoratio peccatorum per singulos annos fit. Sed similiter sub sacerdotio Christi fit commemoratio peccatorum, cum dicitur, Dimitte nobis debita nostra. Matth. 6. offertur etiam continue sacrificium in Ecclesia: unde & ibidem dicitur, Panem nostrum quotidianum da nobis hodie. Ergo per sacerdotium Christi non expiantur peccata.

3 Præterea. In veteri lege maxime immolabatur hircus pro peccato principis, vel capra pro peccato alicujus de populo, vel vitulus pro peccato sacerdotis, ut patet Levitic. 4. Sed Christus nulli horum comparatur, sed agno, secundum illud Hierem. 11. Ego quasi agnus mansuetus, qui portatur ad victimam. Ergo videtur quod ejus sacerdotium non sit expiativum peccatorum.

Sed

Cap. 6.  
Ecc hier.  
par. 3. a  
med.

Lib. 3.  
orth. fid.  
ca. 6. c. 1.  
fin.

C. 8. art. 4.  
& al. is  
eiusdem  
q.

151.  
Infr. q. 84.  
a. 7. &  
41. opul.  
ca. 18.  
co. 6.

Lib. 10. c.  
5. tom. 5.



*Sed contra est, quod Apostol. dicit Heb. 9. Sanguis Christi, qui per Spiritum sanctum se ipsum obtulit immaculatum Deo, emundabit conscientiam nostram ab operibus mortuis, ad serviendum Deo viventi. Opera autem mortua dicuntur peccata. Ergo sacerdotium Christi habet virtutem emendandi peccata.*

*[R]espondeo dicendum, quod ad peccatorum perfectam emundationem duo requiruntur, secundum quod duo sunt in peccato, scilicet macula culpa, & reatus poenae: Macula quidem culpa deletur per gratiam, qua cor peccatoris convertitur in Deum: reatus autem poenae totaliter tollitur per hoc, quod homo Deo satisfacit. Utrumque autem horum efficit sacerdotium Christi. Nam virtute ipsius, gratia nobis datur, qua cor ad nosra convertuntur ad Deum: secundum illud Roman. 3. Justificati gratis per gratiam ipsius, per redemptionem, qua est in Christo Jesu, quem proposuit Deus propitiatores per fidem in sanguine ipsius. Ipse etiam pro nobis plenarie satisfecit, in quantum ipse languores nostros tulit, & dolores nostros ipse portavit. Unde patet, quod Christi sacerdotium habet plenam vim expiandi peccata.*

*Ad primum ergo dicendum, quod licet Christus non fuerit sacerdos secundum quod Deus, sed secundum quod homo: unus tamen & idem fuit sacerdos & Deus. Unde in Synod. Ephes. legitur. Si quis Pontificem, & Apostolum nostrum factum dicit, non ipsum ex Deo Verbum, quando factum est caro, & se undum nos homo, sed tanquam alterum, praeter eum, eorum hominem ex muliere, anathema sit. Et ideo in quantum ejus humanitas operabatur in virtute divinitatis, illud sacrificium erat efficacissimum ad delenda peccata. Propter quod Augustin. dicit in 4. de Trin. \* Ut quoniam quatuor considerantur in omni sacrificio, cui offeratur, a quo offeratur, quid offeratur, pro quibus offeratur: idem ipse unus verusque mediator, per sacrificium pacis reconcilians nos Deo, unum cum illo maneret, cui offerebatur: unum in se faceret, pro quibus offerebatur: unus ipse esset, qui offerebat, & quod offerebat.*

*Ad secundum dicendum, quod peccata non commemorantur in nova lege, propter inefficaciam sacerdotii Christi, quasi per ipsum non sufficienter expiantur peccata: sed commemorantur quantum ad illos, qui vel ejus sacrificii nolunt esse participes (sicut sunt infideles) pro quorum peccatis oramus, ut convertantur: vel etiam quantum ad illos, qui post conversionem hujus sacrificii, ab eo deviant, qualitercumque peccando. Sacrificium autem quod quotidie in Ecclesia offertur, non est aliud a sacrificio, quod ipse Christus obtulit, sed ejus commemoratio: unde August. dicit in 10. de Civit. \* Dei. Sacerdos ipse Christus offerens, ipse & oblatio: cujus rei sacramentum, quotidianum esse voluit Ecclesia sacrificium.*

*Ad tertium dicendum, quod sicut Origen. \* dicit super Joan. Licet diversa animalia in veteri lege offerrentur, quotidianum tamen sacrificium, quod offerebatur mane & vespere, erat agnus: ut habetur Num. 28. Unde significabatur, quod oblatio agni veri, id est, Christi, esset sacrificium consummativum omnium aliorum. Et ideo Joan. 1. dicitur: Ecce agnus Dei, qui tollit peccata mundi.*

#### COMMENTARIUS.

**R**ESTE advertit Cajet. non querere D. Thom. an expiatio peccatorum sit adaequatus, seu unicus effectus sacerdotii Christi, sed quia hic videtur esse praecipuus effectus, ad quem hoc sacerdotium ejusque sacrificium ordinatum est, & ideo de hoc specialiter questionem movere, & definire, sacerdotium Christi efficere remissionem peccatorum perfectam, tam quoad maculam culpae, quam quoad reatum poenae. Quae doctrina re ipsa coincidit cum ea, quae supra tractata est de merito, & satisfactione Christi, & ideo nihil illi addendum superest. Quae vero Cajet. circa solutionem ad primum notat de physica efficientia humanitatis Christi circa creationem, vel infusionem gratiae, non multum ad rem pertinent: nam D. Thom. hic non agit de hac efficacia sacrificii Christi, sed de valore, & sufficientia ejus ad perfecte satisfaciendum, & delendum peccatum; & ad hoc propositum dicit in solutione ad primum, quamvis Christus non fuerit sacerdos secundum quod Deus, sed secundum quod homo: tamen quia idem homo, qui est sacerdos, est etiam Deus, inde habere sacrificium ejus infinitum valorem, & efficaciam ad delendum peccatum, quia valor sacrificii ex dignitate personae sumptus est, ut late in q. 1. art. 2. tractatum est.

Suarez Tom. XVI.

*b* Solutio ad secundum est valde notanda: in qua D. Thom. ait sacrificium Eucharistiae non esse aliud a sacrificio, quod Christus obtulit, sed esse ejus commemorationem, & sacramentum seu sacrum signum. Non est enim sensus, incruentum sacrificium non esse verum sacrificium, sed tantum signum sacrificii cruenti: utrumque enim vere est, & sacrificium, & memoriale: dicitur autem esse unum, & idem cum sacrificio cruento, quantum ad rem oblatam, & quantum ad principalem offerentem, & quantum ad virtutem & valorem: differunt tamen in modo, & proxima actione offerendi, & sacrificandi, & in ratione representantis, & representati, & quia per unum applicatur satisfactio, quae per alterum effecta est. Sed de hac re latius in propria materia.

#### ARTICULUS IV.

*Utrum effectus sacerdotii Christi non solum ad alios pertinuerit, sed etiam ad se ipsum.*

**A**D quartum sic proceditur. Videtur, quod effectus sacerdotii Christi non solum pertinuerit ad alios, sed etiam ad ipsum. Ad officium enim sacerdotis pertinet pro populo orare: secundum illud 2. Machab. 1. Orationem faciebant sacerdotes, dum consummaretur sacrificium. Sed Christus non solum pro aliis oravit, sed etiam pro se ipso: secundum quod supra dictum est, \* sicut expresse dicitur Hebr. 5. quod in diebus carnis suae, preces supplicationesque ad Deum, qui possit illum saluum facere a morte, cum clamore valido & lachrymis obtulit. Ergo sacerdotium Christi effectum habuit non solum in aliis, sed etiam in se ipso.

*2* Praeterea. Christus sacrificium obtulit se ipsum in sua passione. Sed per passionem suam non solum aliis meruit, sed etiam sibi: ut supra habitum est: \* Ergo sacerdotium Christi non solum habuit effectum in aliis, sed etiam in se ipso.

*3* Praeterea. Sacerdotium veteris legis fuit figura sacerdotii Christi. Sed sacerdos veteris legis non solum pro aliis, sed etiam pro se ipso sacrificium offerebat. Dicitur enim Levit. 16. quod Pontifex ingreditur Sanctuarium, ut roget pro se, & pro domo sua, & pro universo caetu filiorum Israel. Ergo etiam sacerdotium Christi non solum in aliis, sed in se ipso effectum habuit.

*Sed contra est, quod in Ephesina \* Synodo legitur: Si quis dicit, Christum pro se obtinisse oblationem, & non magis pro nobis solum (non enim indignum sacrificio, qui peccatum nescit) anathema sit. Sed in sacrificio offerendo, potissimum sacerdotis consistit officium. Ergo sacerdotium Christi non habuit effectum in ipso Christo.*

*a* Respondeo dicendum, quod sicut dictum est \*, sacerdos constituitur medius inter Deum, & populum. Ille autem indiget medio ad Deum, qui per se ipsum accedere ad Deum non potest, & talis sacerdoti subijciatur, effectum sacerdotii participans. Hoc autem Christo non competit: dicit enim Apostol. ad Hebr. 7. Accedens per semetipsum ad Deum, semper vivens ad interpellandum pro nobis. Et ideo Christo non convenit effectum sacerdotii in se suscipere, sed potius ipsum aliis communicare. Primum enim agens in quolibet genere, ita est influens, quod non est recipiens in genere illo: sicut sol illuminat, sed non illuminatur: & ignis calefacit, sed non calefit. Christus autem est fons totius sacerdotii: nam sacerdos legalis erat figura ipsius: sacerdos autem nova legis in persona ipsius operatur: secundum illud 2. ad Cor. 2. Nam & ego quod donavi, si quid donavi, propter vos in persona Christi. Et ideo non competit Christo effectum sacerdotii recipere.

*Ad primum ergo dicendum, quod oratio & si conveniat sacerdotibus, non tamen est eorum officio propria. Nulli enim convenit & pro se & pro aliis orare, secundum illud Jacobi ult. Orate pro invicem, ut salvemini. Et sic posset dici, quod oratio qua Christus pro se oravit non erat actus sacerdotii ejus. Sed hac responsio videtur excludi per hoc, quod Apostolus Hebr. 5. cum dixisset: Tu es sacerdos in aeternum secundum ordinem Melchisedech, subdit. Qui in diebus carnis suae preces, &c. ut supra \*. Et ita videtur, quod oratio, qua Christus oravit, ad ejus sacerdotium pertineat. Et ideo oportet dicere, quod alii sacerdotes effectum sacerdotii sui participant: non in quantum sacerdotes, sed in quantum peccatores, ut infra dice-*

P p 2 tur,

In Synod.  
1. Ephes.  
cui prae-  
fuit Cyr-  
illus.

Lib. 4. c. 14  
cui fin. to  
3. Lib. 10.  
de civit.  
Dei o. 20.  
in med.  
tom. 5.  
dup. illud.

Joan. 1. Ec-  
ce agnus  
Dei, tol-  
lor qui  
munda-  
bitis pro-  
dit anno  
domini  
1555. ex  
Officina  
Caroli.  
Guillart.  
Parisi.

133.  
4. 11. 4. q. 1.  
art. 3. q. 9.

Q. 21. a. 3.

O. 19. a. 2.  
& 4.

Canone  
10. Co. c.  
1. Eph. 5.  
cui prae-  
fuit Cyril-  
lus. 1.  
Concil.

In arg. 1.



rum, Christus autem, simpliciter loquendo, peccatum non habuit. Habuit autem similitudinem peccati in Carne: ut dicitur Rom. 8. Et ideo non simpliciter dicendum est, quod ipse effectum sacerdotii participaverit, sed secundum quid, scilicet secundum passibilitatem carnis. Unde significanter dicit: qui possit illum salvum facere a morte.

Ad secundum dicendum, quod in oblatione sacrificii cuiuscumque sacerdotis, duo possunt considerari, scilicet ipsum sacrificium oblatum, & devotio offerentis. Proprius autem effectus sacerdotii est id, quod sequitur ex sacrificio. Christus autem consecutus est per suam passionem, gloriam resurrectionis, non quasi ex vi sacrificii, quod offertur per modum satisfactionis: sed ex ipsa devotione, qua secundum charitatem humiliter passionem sustinuit.

Ad tertium dicendum, quod figura non potest adequare veritatem. Unde sacerdos figuralis veteris legis non poterat ad hanc perfectionem pertingere, ut sacrificio satisfactorio non indigeret: sed Christus non indiguit: unde non est similis ratio de utroque. Et hoc est, quod Apostolus dicit: Lex homines constituit sacerdotes, infirmitatem habentes: sermo autem iurisjurandi, qui post legem est, Filium in aeternum perfectum.

### COMMENTARIUS.

Hanc quaestionem movet D. Thom. de eodem effectu, de quo in præcedenti articulo tractaverat, ut patet ex consequentia, & ordine articulorum, & ex toto discursu hujus articuli. Et in hoc sensu optima, & facilis est ejus responsio, scilicet sacerdotium Christi non ordinari ad ipsum Christum. Et ratio fundamentalis est, quia ipse fuit innocens, impollutus, & segregatus a peccatoribus, & ideo propter se non indiguit sacerdotio expiante peccatum, & hoc modo definitur in Concil. Ephes. Christum non indiguisse sacrificio, quia peccatum nescivit. Addit vero D. Thom. in solutione ad primum, quatenus Christus assumpsit carnem passibilem, similem carni peccati, secundum quid participasse effectum sui sacrificii, immortalitatem, & gloriam sui corporis per illud comparando. Et in solutione ad secundum addit, Christo non profuisse suum sacrificium ex vi sua, seu quatenus per modum satisfactionis oblatum est: tamen ex devotione offerentis per modum meriti profuisse ad gloriam sui corporis obtinendam. Quæ doctrina coincidit cum illa, quam supra agentes de merito tradidimus, ubi ostendimus, Christum non esse mortuum pro seipso, quamvis moriendo pro hominibus, simul gloriam sui corporis meruerit. Unde non oportet hoc loco plura addere, sed considerare dumtaxat sermonem hic esse de satisfactione pro peccatis, & de sacrificio propitiatorio, quomodo clarum est, non pertinuisse ad Christum; secus vero est, si loquamur de sacrificio laudis, & satisfactione, seu gratiarum actione pro beneficiis humanæ naturæ collatis; sic enim eodem sacrificio, quo Christus pro nostris peccatis satisfacit, gratias egit, seu satisfecit pro beneficiis acceptis, debitumque Deo cultum latræ obtulit. De qua re multa etiam tractata sunt q. 1. art. 2.

### ARTICULUS V.

*Utrum Christi sacerdotium permaneat in aeternum.*

124.  
Art. 1. q.  
cor. & q. 6.  
3. ad 5. cor.  
& 1. 2. q.  
106. art. 4.  
& 3. d. 22.  
q. 1. ad 4.  
\* art. præc.

Ad quintum sic procedit. Videtur, quod sacerdotium Christi non permaneat in aeternum. Quia (ut dictum est \*) illi soli effectus sacerdotii indigent, qui habent infirmitatem peccati, quæ per sacerdotis sacrificium expiari potest. Sed hoc non erit in aeternum: quia in Sanctis nulla erit infirmitas, secundum illud Isai. 60. Populus tuus omnes iusti. Peccatorum autem infirmitas in expiabilis erit: quia in inferno nulla est redemptio. Ergo sacerdotium Christi frustra remaneret in aeternum.

2. Præterea sacerdotium Christi præcipue manifestatum est in ejus passione, & morte: quando per proprium sanguinem introiit in Sancta: ut dicitur Hebr. 9. Sed passio & mors Christi non erit in aeternum: secundum illud Rom. 6. Christus resurgens a mortuis, jam non moritur. Ergo sacerdotium Christi non erit in aeternum.

3. Præterea. Christus est sacerdos non secundum quod Deus, sed secundum quod homo. Sed Christus quandoque

non fuit homo, scilicet in triduo mortis. Ergo sacerdotium Christi, non est in aeternum.

Sed contra est, quod dicitur in Psalm. 109. Tu es sacerdos in aeternum.

b Respondeo dicendum, quod in officio sacerdotis duo possunt considerari. Primo quidem ipsa oblatio sacrificii. Secundo, ipsa sacrificii consummatio. Quæ quidem consistit in hoc, quod illi, pro quibus sacrificium offertur, finem sacrificii consequuntur. Finis autem sacrificii, quod Christus obtulit, non fuerunt bona temporalia, sed æterna, quæ per ejus mortem adipiscimur (unde dicitur Hebr. 9. quod Christus est assistens Pontifex futurorum bonorum) ratione cuius Christi sacerdotium dicitur esse æternum.

Et hæc quidem consummatio sacrificii Christi præfigurabatur in hoc ipso, quod Pontifex legalis semel in anno cum sanguine hirci, & vituli intrabat in Sancta sanctorum: ut dicit Levitic. 16. cum tamen hircum & vitulum non immolaret in Sanctis sanctorum, sed extra. Et similiter Christus in Sancta sanctorum, id est, in ipsum cælum intravit, & nobis viam paravit intrandi, per virtutem sanguinis sui, quem pro nobis in terra effudit.

Ad primum ergo dicendum, quod Sancti, qui erunt in patria, non indigent ulterius expiari per sacerdotium Christi, sed expiati jam indigent consummari per ipsum Christum, a quo gloria eorum dependet. Unde dicitur Apoc. 21. quod claritas Dei illuminat illam, scilicet civitatem Sanctorum, & lucerna ejus est agnus.

Ad secundum dicendum, quod licet passio & mors Christi de cætero non sint iteranda, tamen virtus illius hostiæ semel oblate permanet in aeternum: quia, ut dicitur ad Hebr. 10. una oblatione consummavit in aeternum significatos. Et per hoc patet etiam responsio ad tertium. Unitas autem hujus oblationis figurabatur in lege, per quod semel in anno legalis Pontifex cum solenni oblatione sanguinis intrabat in Sancta: ut dicitur Levit. 16. Sed deficiebat figura a veritate in hoc, quod illa hostia non habebat sempiternam virtutem: & ideo annuatim illæ hostiæ reiterabantur.

### COMMENTARIUS.

Hæc quaestio movetur a D. Thom. propter versiculum illum Psalm. 109. Tu es sacerdos in aeternum. Sensus autem quaestionis esse videtur, an actus, vel effectus hujus sacerdotii sit æternus, dignitas enim, quæ in Christo esse intelligitur, non est dubium quin æterna sit, sicut & ipse Christus Deus, & homo in æternum manebit.

b Respondet autem D. Thom. non actum, sed effectum hujus sacerdotii fore æternum, hoc est enim quod ait, esse æternum quoad consummationem, non quoad oblationem. Oblatio enim cruenta meritoria, & satisfactoria in morte Christi perfecta, & absoluta est; oblatio autem incruenta repræsentans cruentam, & applicans effectum ejus usque ad finem mundi durabit, sed ibi finietur: ut Concil. Trident. docuit sess. 22. c. 2. at vero effectus hujus sacrificii, qui est gratia & gloria, perpetuo durabit. Addit etiam potest, orationem & impetrationem, quæ etiam est actus, & effectus hujus sacerdotii, duraturam tantum esse usque ad finem mundi; tamen orationem per modum gratiarum actionis, iteratamque oblationem, per quandam recordationem, & internum affectum in divinum cultum, & satisfactionem pro susceptis beneficiis perpetuo esse duraturam, quia est actus valde perfectus, & non pendet ex temporis successione, neque aliquam imperfectionem supponit, quæ perfectissimo, ac perpetuo statui beatitudinis repugnet.

### ARTICULUS VI.

*Utrum sacerdotium Christi fuerit secundum ordinem Melchisedech.*

Ad sextum sic proceditur. Videtur, quod sacerdotium Christi non fuerit secundum ordinem Melchisedech. Christus enim est fons totius sacerdotii, tanquam principalis sacerdos. Sed illud, quod est principale, non sequitur ordinem alterius, sed alia sequuntur ordinem ipsius. Ergo Christus non debet dici sacerdos secundum ordinem Melchisedech.

2. Præterea. Sacerdotium veteris legis, propinquius fuit

Y35.  
Inf. q. 61.  
art. 3. ad 3.  
& 4. d. 8. q.  
1. art. 1. q. 3.



fuit sacerdotio Christi, quam sacerdotium quod fuit ante legem. Sed sacramenta tanto expressius significabant Christum, quanto propinquiora fuerunt Christo: ut patet ex his, quæ in secunda parte dicta\* sunt. Ergo sacerdotium Christi magis debet denominari secundum sacerdotium legale, quam secundum sacerdotium Melchisedech, quod fuit ante legem.

3 Præterea. Heb. 7. dicitur, quod est Rex pacis, sine patre, sine matre, sine genealogia, neque numerum dierum, neque finem vitæ habens. Quæ quidem conveniunt soli Filio Dei. Ergo non debet dici Christus sacerdos secundum ordinem Melchisedech, tanquam cuiusdam alterius, sed secundum ordinem sui ipsius.

Sed contra est, quod dicitur in Psal. 109. Tu es sacerdos in æternum secundum ordinem Melchisedech.

Respondendo dicendum, quod sicut supra dictum est, \* legale sacerdotium fuit figura sacerdotii Christi: non quidem quasi adequans veritatem, sed multum ab ea deficiens. Tum quia sacerdotium legale non mundabat peccata: tum etiam, quia non erat æternum, sicut sacerdotium Christi. Ipsa autem excellentia sacerdotii Christi ad sacerdotium Leviticum fuit figurata in sacerdotio Melchisedech, qui ab Abraham decimas sumpsit, in cuius lumbis decimatus est quodammodo ipse sacerdos legalis. Et ideo sacerdotium Christi dicitur esse secundum ordinem Melchisedech, propter excellentiam veri sacerdotii ad figurale sacerdotium legis.

Ad primum ergo dicendum, quod Christus non dicitur esse secundum ordinem Melchisedech, quasi principalioris sacerdotis, sed quasi præfigurantis excellentiam sacerdotii Christi ad sacerdotium Leviticum.

Ad secundum dicendum, quod in sacerdotio Christi duo possunt considerari, scilicet ipsa oblatio Christi, & participatio ejus. Quantum ad ipsam oblationem, expressus figurabat sacerdotium Christi sacerdotium legale per sanguinis effusionem, quam sacerdotium Melchisedech, in quo sanguis non effundebatur, sed quantum ad participationem huius sacrificii, & ejus effectum (in quo præcipue attenditur excellentia sacerdotii Christi ad sacerdotium legale) expressus præfigurabatur per sacerdotium Melchisedech, qui offerebat panem & vinum, significantia (ut Aug.\* dicit) Ecclesiasticam unitatem, quam constituit participatio sacrificii Christi. Unde etiam in nova lege verum Christi sacrificium communicatur fidelibus sub specie panis & vini.

Ad tertium dicendum, quod Melchisedech, dictus est sine patre, & sine matre, & sine genealogia, & quod non habet initium dierum neque finem: non quia ista non habuerit, sed quia in Scriptura sacra ista de eo non leguntur. Et per hoc ipsum (ut Apostolus ibidem dicit) assimilatus est Filio Dei: qui in terris est sine patre, & in cælis sine matre, & sine genealogia: secundum illud Isai. 53. Generationem ejus quis enarrabit? & secundum divinitatem neque principium, neque finem habet dierum.

## COMMENTARIUS.

Uo docet D. Thom. quamvis unum tantum interroget. Affirmat enim, Christum esse sacerdotem secundum ordinem Melchisedech, & negat fuisse secundum Leviticum ordinem. Utrumque vero fusius in sequenti disputatione tractandum est, ubi simul literam hujus artic. explicabimus.

## DISPUTATIO XLVI.

In quatuor Sectiones distributa.

De summo Christi sacerdotio, & Pontificatu.

Quamvis D. Thom. solum de sacerdotali Christi dignitate in hac quæst. ex professo disputaverit, docuit tamen obiter, illum simul, & sacerdotem esse, & legislatorem, & regem, & ideo de his tribus dignitatibus Christi sigillatim disputandum nobis erit, quamquam (ut mihi quidem videtur) munus legislatoris non omnino ab aliis duobus separetur, si in perfecto gradu, & dignitate existant; ad regem enim pertinet potestas legislativa suæ dignitati proportionata, & similiter ad summum pontificem, & sacerdotem, servata etiam proportionem: quamvis enim non omnis sacerdos possit ferre leges, supremum autem pontificem, & in eo ordine perfectam potestatem habentem, hoc munere fungi posse ne-

Suarez. Tom. XVI.

cesse est. Dicemus ergo primo de supremo Christi sacerdotio. Secundo de potestate excellentiæ illi ut summo Pontifici communicata. Tertio, de Christi regno & temporali dominio. Quoniam vero de effectu sacerdotii Christi, qui idem est cum effectu meriti & satisfactionis ejus, satis in superioribus disputatum est, ideo de hæc re nihil amplius dicemus, sed solum de vera ejus ratione, & excellentia.

## SECTIO I.

An Christus vere & proprie fuerit sacerdos.

Respondendo, Christum Dominum esse vere & proprie sacerdotem. Est de fide, quam ex professo probat Paul. in Epist. ad Heb. a c. 5. usque ad 10. & definitur in Conci. Ephes. can. 10. & in Trident. ses. 22. can. 1. & 2. Ratione declaratur optime a D. Thom. ex illo Pauli ad Hebr. 5. Omnis pontifex ex hominibus assumptus, pro hominibus constituitur in iis, quæ sunt ad Deum, ut offerat dona, & sacrificia pro peccatis. Quæ verba propriam definitionem sacerdotis continere videntur, & singula perfectissime in Christum conveniunt, ut facile constare potest, singula intuenso, & applicando. Ut vero hæc ratio clarius percipiat, advertendum primo est, sacerdotem dicere habitudinem ad sacrificium tanquam ad actum maxime proprium & quasi adequatum, quamvis enim sacerdos alias etiam functiones sacras exerceat, omnes tamen quodammodo ad sacrificium referuntur. Unde licet aliquis habeat potestatem exercendi aliquid sacrum, non tamen est plene, & consummate sacerdos, donec potestatem habeat sacrificium offerendi. Quod satis patet ex communi usu hujus vocis, & ex citatis verbis Pauli, & ex iis, quæ statim subjungit. Necessè habent sacerdotes pro suis delictis prius hostias offerre, deinde pro populi. Hinc Justin. Dialog. cum Tryphon. dicit: Deum non accipere sacrificium, nisi a sacerdotibus. Et August. Epist. 49. q. 3. hæc tria: Templum, sacrificium, sacerdos, ponit, ut sese consequentia. Idem apertius lib. 22. de Civit. c. 10. Secundo advertendum est ex August. lib. 10. de Civit. cap. 6. sacrificium interdum sumi generatim pro omni actione, quæ in laudem Dei offertur, sive interna sit, sive externa. Quæ acceptio minus propria est, & quasi metaphorica, illique respondet similis acceptio sacerdotii, hoc enim modo omnes veri cultores Dei sacerdotes interdum appellantur, ut 1. Petri 2. Et ipsi tanquam lapides vivi superedificamini domus spirituales, sacerdotii sanctum, offerre spirituales hostias, acceptabiles Deo per Jesum Christum; & infra: Vos autem genus electum, regale sacerdotium, gens sancta, &c. Et Apocal. 5. Fecisti nos Deo regnum, & sacerdotes. Proprie tamen sacrificium est oblatio exterior, & sacra, quæ Deo offertur, vel tanquam supremus quidam cultus Deo debitus in recognitionem supremi domini ejus, vel in gratiarum actionem, vel in satisfactionem pro peccatis, eorumque expiationem: oportet autem hanc oblationem esse sacram, ita ut circa illam aliquid sacrum exerceatur, per aliquam immutationem rei oblata, ut per hoc sacrificium a simplici oblatione distinguatur, ut Gregor. docuit, & refertur in cap. Multi 1. q. 1. & latius D. Th. in 2. 2. q. 85. a. 3. & infra in materia de Eucharistia latius trademus. Advertit autem tertio D. Th. in citato loco hujusmodi sacrificium interdum esse posse privatum, quod unusquisque sua sponte offerre potest, dummodo & positiva lege prohibitum non sit, & convenienti modo fiat. Aliud vero est publicum & commune sacrificium, publica & communi lege institutum, ut nomine totius populi Deo offeratur, & hoc est propriissime sacrificium, quod omnes hac voce significari intelligunt, sacerdos autem est proprius huius sacrificii minister, & ideo ad illum dicit propriam habitudinem. Et ideo dixit Paul. sacerdotem esse debere personam aliquam ex hominibus assumptam, ut hoc publico, & communi officio inter Deum, & homines fungatur. Ex quibus omnibus concluditur ratio intenta, nam Christus Dominus unus ex hominibus assumptus est, seu electus & constitutus a Deo, pro hominibus in iis, quæ sunt ad Deum, id est, ad reconciliandum homines cum Deo, & sanctificandum illos, seipsum, & vitam suam pro illis Deo offerendo: Sanctam oblationem, & hostiam in odorem suavitatis. Unde in nocte cenæ seipsum obtulit Deo Patri, Eucharistiæ sacrificium simul & offerens, & instituens,

Christus vere, ac proprie Sacerdos.

Sacrificii ratio in quo consistat.

Verus sacerdos qualis.



ut Concil. Trident. supra docuit, illudque ut supremus pontifex, & sacerdos quotidie in Ecclesia offert *sacerdotium ministerio*, ut idem Concil. c. 2. dicit cum Aug. lib. 10. de Civit. c. 20. & Cypria. lib. 1. ep. 3. Irenæ. lib. 4. contra. hæres. 3. 2. & sequentibus. Denique in ara crucis seipsum obtulit in sacrificium pro humano genere, ut tota epistola ad Heb. Paul. tractat, & idem Concil. Trident. supra docet, & D. Th. hic, & infra, q. 48. art. 3. & optime August. lib. 4. de Trinit. c. 14. & lib. 1. cont. adversar. Leg. & Prophet. c. 18. & in id Psalm. 98. *Moses, & Aaron in sacerdotibus ejus, & id Psalm. 64. Impietatibus nostris tu propitiaberis, tu inquit, sacerdos, tu victima, tu oblator, tu oblatio.*

**Dubium.** Sed circa hoc ultimum rogabit aliquis, quomodo Christus sacrificaverit seipsum tamquam verus sacerdos, cum neque se ipsum interfecerit, neque aliquid sacrum circa se in ara crucis exercuerit. Respondetur, vere & proprie Christum sacrificasse seipsum in cruce, sicut ipse Joan. 17. testatus est: *Pro eis ego sanctifico meipsum*, id est, in sacrificium & hostiam offero, ut Cyril. Chrysost. Rupert. S. Th. & omnes exponunt: non est autem necesse ipsam hostiæ maculationem, & quidquid circa illam sit, propria physica actione a sacerdote fieri: sed satis est, quod sub morali aliqua consideratione a sacerdote assumatur, & in sacrificium offeratur. Sic igitur Christus, licet non se se occiderit, voluntarie tamen mortem suscepit, & illam in sacrificium Deo obtulit, quo & pro peccatis nostris satisfaceret, & internum affectum suum devotionis, & reverentiæ ad Deum manifestaret, & ita utebatur bene malitia occidentium ipsum, & quem illi inique interficiebant, ipse pie, ac religiose immolabat.

**Objeccio.** Dices. Ergo omnes martyres dici possunt sacerdotes & seipsum in sacrificium offerentes. **Responsio.** Quidam respondent, Christum non solum permisisse, & obtulisse mortem suam, sed etiam active fuisse causam illius, ei cooperando per animam suam ut instrumentum Verbi. Sed hoc cum grano salis suscipiendum est, est enim in rigore falsum; nullo enim modo dici potest, Christum seipsum occidisse: occidisset autem, si active concurrisset ad mortem suam. Sensus ergo verus est, quem Cajet. ientaculo tertio indicavit, aliter mortem fuisse voluntariam martyribus, & aliter Christo, illis solum per modum acceptionis, Christo etiam per modum oblationis, quia illi nec poterant tyrannos impedire, ne tormentis eos afficerent, neque poterant in ipsis tormentis vitam suam tueri, & conservare; Christus autem utrumque habuit in voluntate sua, & potestate: potuit enim Judæorum vires infringere, ut satis Joan. 18. ostendit, cum ad verbum ejus omnes abierunt retrorsum, & ceciderunt in terram. Poterat etiam facere, ut instrumentum Verbi, ne ulla passionis instrumenta possent corpus suum lædere. Ac denique poterat vitam suam retinere, & conservare, ut supra disput. 3. 2. late tractatum est. Et propterea peculiari modo dicitur posuisse animam suam, & neminem eam sibi abstulisse, Joan. 10. *Propterea me diligit Pater, quia ego pono animam meam, nemo tollit eam a me, sed ego pono eam a meipso.* Propter hanc ergo differentiam oblatio mortis Christi habet rationem sacrificii, non vero aliorum martyrum. Et præterea, quia alii martyres non sunt a Deo constituti, ut se Deo offerrent in satisfactionem pro omnibus, sicut fuit Christus, nec sanguis eorum fuit pretium redemptionis, sicut fuit sanguis Christi. Unde eleganter Leo Pap. epist. 83. c. 4. *Dicant, inquit, quo sanguine sunt redempti: dicant, quo sacrificio reconciliati: quis est, qui tradidit semetipsum pro nobis oblationem, & hostiam Deo in odorem suavitatis: aut quod unquam sacrificium sacratius fuit, quam quod verus pontifex altaris crucis per immolationem sue carnis imposuit. Quamvis enim multorum Sanctorum in conspectu Domini pretiosa mors fuit, nullius tamen infontis occisio propitiatio fuit mundi.*

## SECTIO II.

*Utrum Christus, Deus homo, sit sacerdos in quantum Deus, vel in quantum homo, atque adeo an idem sit sacerdos, & victima.*

**D**ubium hoc fit sacerdos propter nonnullos ex hæreticis hujus temporis, qui (ut refert Robertus Bellarminus lib. 5. de Christo mediatore c. 3.) ita distinguunt inter Christum sacerdotem, & victimam, ut sacerdotem dicant esse Deum, vel divinitatem: victimam vero homi-

nem seu humanam naturam. Unde inferunt, Christum non esse mediatorem ut hominem, sed ut Deum. Qui error antiquior est, nam, ut refert Euseb. lib. 10. de Demonstratione. c. 1. & ex illo Turrian. in Scholiis ad Clementem, lib. 8. Const. 1. c. 46. Arius dicit, Verbum ut pontificem corpus humanum instar agni de nostro grege sumpsisse. Hujus erroris nullum verisimile assertur fundamentum, quod mihi hoc loco proponendum videatur.

Dicendum igitur breviter est, ipsum Deum Verbum ac Filium factum esse pro nobis sacerdotem, & pontificem, & pro nobis obtulisse sacrificium. Hoc est certum de fide, definitum in Concil. Ephes. can. 10. & fundatur in vera idiomatum communicatione. Unde Act. 20. dicitur Deus *suo sanguine adquisivisse Ecclesiam*, & 2. ad Cor. 5. ait Paul. *Deus in Christo, mundum reconcilians sibi.* Ipse ergo Deus Verbum nos redemit, & pro nobis sanguinem fudit: ipse ergo est sacerdos noster. Res est clara, de qua legi potest Cyril. epist. ad Nestor. & in defension. 10. anathematismi, & Athanas. lib. de human. Verbi.

Dicendum secundo est, Deum seu Verbum non nisi in humanitate, seu ratione humanitatis potuisse esse sacerdotem, & per illam munus illud exercuisse, quamquam efficacia, & excellentia illius sacerdotii ex dignitate divini suppositi manaverit. Tota hæc conclusio est clara, ac fere per se evidens, quia Deus ut Deus non habet superiorem, cui sacrificium offerat, aut apud quem intercedat: ergo ut Deus non potest esse sacerdos, neque per ipsam divinam naturam, seu voluntatem, potest orare, aut sacrificium offerre: ad hoc ergo necessaria illi fuit natura humana. Et ad hoc confirmandum valent omnia, quibus supra q. 1. art. 2. & tota q. 19. probavimus, formale principium meriti, & satisfactionis esse humanitatem, & ad hoc fuisse necessariam Incarnationem, ut Deus haberet naturam, per quam posset mereri, & satisfacere, & ad hoc confirmandum multa ex Patribus adduximus, quibus simul probavimus, necessarium etiam fuisse divinum suppositum, ut valorem, & efficaciam merito, & satisfactioni tribueret: illud ergo idem suppositum necessarium fuit, ut hic sacerdos esset potens, & efficax ad offerendum sacrificium, quod omni ex parte Deo satisfaceret.

Et hinc colligitur, nullo modo dici posse Christum ut Deum esse sacerdotem, sed ut hominem, vel ut Deum hominem. Hoc constat ex iis, quæ de communicatione idiomatum dicta sunt, nam prædicatum, quod non convenit Christo ratione divinitatis, seu ut subsistenti in sola divina natura, non potest dici de Christo cum reduplicatione, seu determinatione divinitatis, sed humanitatis, quia illa reduplicatio designat naturam, in qua, seu per quam tale prædicatum illi convenit. Unde recte Ambr. lib. 3. de fid. c. 5. *Idem, inquit, Sacerdos idem & hostia, sacerdotium tamen, & sacrificium, humana conditionis officium est;* & subdit postea; *Nemo igitur, ubi ordinem cernit humane conditionis, ibi jus divinitatis adscribat:* Et August. l. 1. de confen. Evang. c. 3. *Secundum hominem, inquit, Christus & rex, & sacerdos effectus est, ut esset ad interpellandum pro nobis mediator Dei, & hominum homo Christus Jesus.* Et Fulgent. de fid. ad Petr. c. 2. *Solus, inquit, sacerdos, sacrificium, & templum, & hæc omnia Deus, secundum rationem servi.* Idem Cyril. supra. Potest autem etiam dici Christus sacerdos in quantum Deus homo eo modo, quo supra diximus, posse dici mereri, & satisfacere in quantum Deum hominem, ita tamen ut intelligatur sacerdotium esse proprietatem conveniens Christo, mediante humana natura, a supposito autem divino habere efficaciam, & excellentiam tale sacerdotium, ut satis explicatum est. Sed objiciet aliquis Cyrillum Hierosol. cat. 10. dicentem: *Christum habere sacerdotium immutabile, quod nec tempore cæpit, nec successorem alium habebit sacerdotii:* ergo ante Incarnationem, quæ in tempore cæpit, erat Christus Sacerdos: ergo ut Deus. Respondetur primo non incepisse in tempore in ordine ad Deum, seu secundum divinam præordinationem, nam statim subdit: *Sed ante secula a Patre.* Vel certe intelligit non fuisse sacerdotem unctum oleo temporali, sed æterno, scilicet, divinitate ipsa, vel non accepisse in tempore personalem dignitatem, ratione cujus tale habet sacerdotium. Quomodo dixit Clemens dicto lib. 8. c. 46. Christum esse naturam sacerdotem, quia naturalem habet ad hoc dignitatem & excellentiam, requirit tamen unionem.

Verbum  
ratione  
humani-  
tatis sa-  
cerdos  
fuit.



Ultimo dicendum est, eundem Christum esse victimam, & hostiam sacrificii, atque adeo idem dici posse de Verbo, & Deo, non tamen cum reduplicatione, ut Deus est. Hæc omnia docuit hic D. Thom. art. 2. & 1.2.q. 102. art. 3. ad 8. Et sunt certa de fide, quia non sola humanitas fuit pro nobis oblata, sed Christus & Deus, sicut Deus fuit pro nobis mortuus, & pro nobis fudit sanguinem suum, unde Paul. ad Ephe. 5. de Christo loquens, inquit: *Tradidit semetipsum pro nobis oblationem, & hostiam Deo in odorem suavitatis*. Et eodem modo loquitur ad Heb. 9. & 10. fuit ergo ipse Christus hostia, & sacrificium, Christus autem non est sola humanitas, non ergo sola humanitas fuit hostia, & sacrificium, sed Deus ipse in humanitate subsistens, non quidem in quantum Deus, sed in quantum homo, quia divinitas non potest esse ratio, per quam Christo convenit in sacrificium offerri, nam potius est ratio, secundum quam illi sacrificium offertur. Quæ omnia clara sunt, & sine difficultate. Circa quæ videri potest August. lib. 4. de Trin. c. 14. l. 10. de Civit. c. 22. & lib. quæst. in Iudicum c. 54. D. Th. hic a. 2. & 1.2.q. 102. a. 3.

## SECTIO III.

*Utrum sacerdotium Christi fuerit ejusdem rationis cum sacerdotio legis naturæ, veteris, aut novæ.*

**R**atio difficultatis esse potest, quia Christus dicitur: *Sacerdos secundum ordinem Melchisedech*. Sacerdotium autem Melchisedech fuit sacerdotium legis naturæ; ergo sacerdotium Christi fuit ejusdem rationis cum sacerdotio illius legis. Aliunde autem videtur, quod Christus fuerit sacerdos legalis, quia interdum illorum sacerdotum munera exercuisse videtur, ut Mat. 21. ubi ejecit ementes, & vendentes de templo, quasi usus potestate sacerdotum. Et Luc. 4. ingressus synagogam Nazareth, surrexit ad legendum, & datus est ei liber Isaïæ, quod non licebat cuilibet laico: videtur ergo id fecisse quasi ex proprio munere, & tanquam existens in ordine sacerdotali. Unde August. lib. 1. de pec. merit. c. 27. dicit, tunc, Christum usum fuisse munere lectoris. Denique alia ratione apparet, sacerdotium Christi fuisse ejusdem rationis, cum sacerdotio legis novæ, quia ordinatum est ad sacrificium ejusdem rationis offerendum, & ad eundem principalem effectum, qui est remissio peccatorum, & animarum sanctificatio.

Dico primo. Christi sacerdotium non fuit omnino ejusdem rationis cum sacerdotio in lege nova ab ipso instituto, sed longe altioris, & perfectioris. Conclusio hæc videtur certa, & colligitur ex D. Th. infra q. 63. art. 3. & 5. ubi dicit, characterem, atque adeo sacerdotium legis novæ esse participationem quandam derivatam a sacerdotio Christi. Ex quo sumitur argumentum, nam Christi sacerdotium comparatur ad sacerdotium legis novæ, ut universalis causa ad particularem, vel sicut causa principalis ad instrumentalem: ergo est longe altioris rationis ab illo. Deinde ex effectibus & potestate sacerdotali hoc aperte constat, nam sacerdotium legis novæ, habet potestatem alligatæ sacramentis, nec potest aliquis consecrare, vel sanctificare, nisi quod a Christo institutum est & verbis ab ipso præscriptis (loquendo de consecratione, & sanctificatione perfecta) at vero sacerdotium Christi non fuit alligatum sacramentis, imo ab ipso sacramenta manarunt, unde potuit sine sacramentis, effectus sacramentorum conferre. Præterea sacerdotium Christi tale fuit, ut ordinatum sit ad offerendum sacrificium non solum incruentum, sed etiam cruentum, habens ex vi ipsius proximi offerentis valorem, & virtutem ad sanctificandos illos, pro quibus oblatum est: sacerdotes autem, qui sunt ministri legis novæ solum possunt offerre sacrificium ut ministri Christi, & in virtute ejus, & ordinatum ad applicandum merita, & satisfactiones ejus. Denique sacerdotium hoc legis novæ per determinatam quandam consecrationem, seu ordinationem conficitur, & quodammodo in impressione cujusdam realis characteris consistit: Christus autem non fuit ordinatus sacerdos per aliquā extrinsecam ordinationem, vel consecrationem: sed ex vi suæ originis, & hypostaticæ unionis, & divinæ ordinationis hanc dignitatem habuit: est ergo longe alterius rationis.

Unde obiter intelligitur, quod omnes Theologi in 4. dist. 4. docent, hoc sacerdotium Christi non ponere in ejus

Suarez Tom. XVI.

humanitate aliquam realem qualitatem, seu characterem, ut docet etiam D. Th. dicta q. 63. art. 5. sed solum dignitatem, & potestatem convenientem illi ratione unionis, per quam ejus humanitas, seu potius hic homo Christus est altissimo ac perfectissimo modo quasi designatus, & segregatus ab aliis hominibus, & potens ad intercedendum, & offerendum pro illis dignissimum sacrificium, ad sanctificandum illos; hæc autem dignitas, & potestas partim includit dignitatem capitis, partim potestatem perfecte merendi, & satisfaciendi pro aliis, partim vim effectricem gratiæ, partim denique divinam ordinationem, qua constitutus est Christus, ut esset mediator Dei & hominum: quæ omnia in superioribus fere explicata sunt, & non nihil de mediatore addemus infra q. 26.

Dico secundo. Sacerdotium Christi non fuit legale, seu ejusdem rationis cum sacerdotio legis veteris, unde neque ipse Christus fuit sacerdos secundum ordinem Aaron, neque origine, aut successione, neque Dei, aut hominum electione. Ita docet Paul. ad Heb. 7. 8. & 9. ubi in primis docet Christum fuisse sacerdotem altioris ordinis, quia Aaronicum sacerdotium erat imperfectum, temporale, & juxta mandatum legis carnalis, quæ nec justificare poterat, nec perfectum facere servientem: Christi autem sacerdotium fuit perfectum, æternum, & secundum mandatum vitæ insolubilis. Deinde probat, Christum non fuisse sacerdotem legalem, quia ex Juda ortus est Dominus noster, in qua tribu nihil de sacerdotibus Moyse locutus est. Quæ ratio optime probat Christum non fuisse sacerdotem veteris legis, origine, & successione, quia non descendebat ex tribu Levi secundum paternam lineam. Primo quidem in re ipsa, quia non fuit genitus ab homine. Secundo, in existimatione, quia putabatur filius Joseph de domo David. Tertio, quia etiam beata Virgo per lineam suam paternam descendebat de tribu Juda, ut ex Paulo supra colligitur, & infra latius ostendetur. Et quamvis fortasse juxta aliquam maternam successionem B. Virginis habuerit cognitionem aliquam cum tribu Levi, illud tamen non sufficiebat ad sacerdotale munus quod Leviticæ tribui, & familiæ Aaron reservatum erat, ut constat Exod. 29. & Levit. 8. & 1. Reg. 2. unde Rex Ozias, qui erat de tribu Juda, quamvis secundum maternam lineam descenderet ex tribu Levi, graviter a Deo percussus est, quoniam sacerdotale munus ausus est usurpare, & adolere incensum, 2. Paralip. 6. Et ratio clara est, quia illæ duæ tribus regia & sacerdotalis, a principio fuerunt permixtæ, & conjunctæ matrimonii, ut constat Exod. 6. & 4. Reg. 11. oportuit ergo distinguere successiones earum per paternas lineas: alias statim fuissent confusæ, & nullus esset de tribu Juda, qui non posset esse sacerdos, quod aperte falsum est. Constat igitur, Christum non fuisse sacerdotem legalem origine, aut successione. Et hinc facile colligitur neque hominum electione fuisse ad hoc munus assumptum: quia tunc homines non eligerant ad hujusmodi sacerdotium, nisi eos, qui veluti jure hæreditario erant capaces illius. Quod vero nec Deus illum ad hoc munus elegerit, certissimum est, quia neque traditione, aut Scriptura hoc habetur, sed potius contrarium, nec ad dignitatem, & perfectionem Christi hoc pertinebat, quia (ut inquit Augustin. lib. 83. quæst. in 61. & super illud verbum Psalm. 109. *Tu es sacerdos in æternum*) sacerdotium illud erat imperfectum, temporale, & per sacerdotium Christi abolendum, & ideo non oportuit Christum in illo ordine sacerdotum constitui. Et hoc confirmant, & a fortiori convincunt omnia, quæ in prima conclusione adducta sunt.

Hic vero observatione dignum est, Waldensem tom. 1. de sacramentis c. 116. n. 6. motum nescio qua historia Suidæ, verbo (Jesús) & ratione dubitandi in principio hujus sect. posita, asseruisse, Christum electione sacerdotem fuisse constitutum inter Levitas in gradu & ordine Lectorum. Sed hæc sententia plusquam falsa & Apostolo Paulo contraria mihi videtur, & historia illa Suidæ fabula potius Judaica, quam historia existimanda est, quia Christus Dominus, neque ex stirpe Aaron, neque ex tota tribu Levi secundum paternam lineam descendit, ut explicatum est. Et ideo neque ad sacerdotium, neque ad ullum gradum Levitarum eligi potuit. Neque ex eo, quod Christus in Synagoga Isaïam interpretatus est, argumentum aliquod ad hanc rem sumi potest, Actorum enim 13. quiddam simile legimus fecisse Paulum, qui nec sacerdos

Sacerdotium Christi non legale, nec secundum ordinem Aaron fuit.

Comparatio sacerdotii Christi cum sacerdotio legis novæ.



cerdos fuit, nec de ~~tribu~~ Levi, sed Benjamin, signum ergo est id licuisse viris doctis in lege, etiam si Levitæ non essent. Quod vero Christus ejecit vendentes, & ementes de templo, non id fecit, ut sacerdos legalis, sed ut Propheta, zelum Dei habens, & excellentiorem potestatem. Et ideo Matth. 21. & Joan. 2. a Phariseis interrogabatur, in qua potestate id faceret.

Quale fuerit sacerdoti in lege naturæ;

Dico tertio Sacerdotium Christi non fuit omnino ejusdem rationis cum sacerdotio legis naturæ, sed multo altioris, & perfectioris. Advertendum est, sicut in lege naturæ fuit aliquod sacrificiorum genus, quo ritu publico, & solenni colebatur Deus, ita etiam fuisse aliquod genus sacerdotii, quia (ut diximus) hæc duo veluti correlativa sunt, sacerdos & sacrificium, tamen, sicut in illo statu non fuerunt sacramenta, aut sacrificia ab ipso Deo determinata, sed humano arbitrio determinabantur: ita nec modus, aut consecratio sacerdotum erat a Deo præscriptus, sed solum ex hominum electione, aut deputazione, aliqui assumebantur ad offerendum Deo sacrificia, & intercedendum pro populo. Et Hieronymo teste, ac Ruperto, & aliis, quos statim in sequenti sect. citabimus, omnes primogeniti ex stirpe Noe procedentes, deputati erant eo tempore, ut sacerdotum munere fungerentur; & ita intelligendum est, quod dixit Anaclet. Pap. epist. 2. decretal. sacerdotium sumpsisse initium ab Aaron. *Quia licet aliqui, inquit, prius legantur sacrificium obtulisse, ut Melchisedech, & Abraham, hi tamen spontanea voluntate, non tamen sacerdotali auctoritate hoc fecerunt.* Intelligendum enim hoc est, de sacerdotio specialiter a Deo instituto, quod speciali aliqua cæremonia a Deo determinata confertur, atque adeo de peculiari auctoritate, & potestate a Deo ipso collata, hoc enim sacerdotii genus, verum est ab Aaron incepisse. Nihilominus tamen certum est antea fuisse sacerdotes, quales explicuimus, nam de Melchisedech ait Paul. ad Hebr. 7. fuisse, *sacerdotem Dei altissimi*. Qui tamen multo tempore Aaron præcessit. Quod necessario intelligendum est de illo sacerdotio, quod in usu erat tempore legis naturæ, ut indicavit Ambros. epist. 82. ante medium & Chrys. hom. 3. 5. in Genes. Ex his ergo evidenter concluditur assertio posita, quia sacerdotium Christi altioris ordinis est, & altiozem habet originem, quam sacerdotium Melchisedech: ordinatum etiam est ad offerendum sacrificium multo altioris ordinis, & rationis: habet etiam potestatem excellentiorem, & effectus potest efficere, qui nullo modo poterant cadere sub sacerdotio in lege naturæ: ergo sacerdotium Christi infinita quadam ratione superavit legis naturæ sacerdotium. Et confirmatur, quia sacerdotium legis novæ multo perfectius est, quam sacerdotium legis naturæ, quia sacrificium, & potestas ejus multo perfectiora sunt, ut per se constat, & tamen hoc sacerdotium est inferius sacerdotio Christi, & participatio ejus; ergo multo magis excedit sacerdotium Christi, sacerdotium legis naturæ.

Ex quibus colligitur primo, sacerdotium Christi esse ejusdem eminentioris, & altioris ordinis, habens in illo genere infinitam quandam dignitatem ratione personæ: unde possibile non est, tale genus sacerdotii eodem modo, & cum eadem perfectione alicui puræ creaturæ communicari, sicut in superioribus de dignitate capitis diximus, est enim eadem ratio. Ex quo etiam constat triplex illud genus sacerdotii legis naturæ, veteris & novæ, quod puris hominibus communicatur, inferioris ordinis esse a sacerdotio Christi: quamvis omnia illa ad Christum aliquo modo referantur, & aliquam similitudinem cum illius sacrificio habeant: sacrificium enim legis naturæ in hoc habuit proportionem quandam cum sacerdotio Christi, quod primogenitis concedebatur, qui Christum representabant, qui primogenitus est omnis creaturæ: obtinebatur enim sine externa unctione, aut visibili cæremonia, sicut Christus illud obtinuit, interdum etiam in externa specie rei oblata in sacrificio similitudinem habuit cum sacrificio Christi, ut de Melchisedech statim dicemus. At vero sacerdotium legis veteris similitudinem habuit cum sacerdotio Christi, quia illius fuit umbra, & figura, præsertim quoad sacrificium cruentum, quod Christus obtulit & quoad sanctificationem nostram, quod suo sanguine perfecit: sic enim per sacerdotium illud, legalis sanctificatio per sanguinem fiebat, ut in epistola ad Heb. late tractat Apostolus. Sacerdotium autem legis novæ simile est sacerdotio Christi in potestate

offerendi in sacrificium eandem rem quam ipse obtulit, & in potestate conferendi veram sanctitatem, & remissionem peccatorum: unde, quo hæc similitudo major est, eo hoc sacerdotium excedit in perfectione antiqua sacerdotia. Quanto enim lex gratiæ est perfectior lege naturæ, & veteri, & quantum veritas superat figuram, tanto hoc sacerdotium reliqua antecedit. Unde tandem fit, etiam si sacerdotium particulare Melchisedech, cum sacerdotio legis novæ comparatur, inferius esse ac minus perfectum, ut patet, tum ex sacrificio oblato, tum ex potestate utriusque sacerdotii. Unde si comparatur, cum sacerdotio ipsiusmet Christi, invenietur tanto inferius, quanto Melchisedech inferior est Christo, ut ex sequenti sectione magis constabit, ubi solvemus ultimam rationem dubitandi in principio hujus sect. positam, reliquis enim satisfactum jam est,

#### SECTIO IV.

*Utrum Christus sit sacerdos secundum ordinem Melchisedech.*

Ad explicandam quæstionem hanc oportet prius supponere, quis fuerit hic Melchisedech, & quale fuerit sacerdotium ejus, quodve sacrificium Deo obtulerit,

Circa primum variis modis erratum est, tam circa naturam, quam circa personam Melchisedech. Quidam enim hæretici negarunt, illum fuisse verum aliquem hominem, sed aliquam spiritualem virtutem, quæ assumpto corpore Abrahæ apparuit Genes. 14. Quorum fundamentum esse potuit, quia Paul. ad Heb. 7. eum fuisse dicit, *sine patre, sine matre, & sine genealogia*. Quæ non videntur vero homini posse convenire, & quia ibidem Paulus addit, *neque initium, neque finem dierum habuisse*. Ideo addiderunt etiam isti, illum fuisse personam aliquam divinam, quæ sola neque initium, neque finem habet. Et quia ibidem dicitur Melchisedech, *assimilatus Filio Dei*, dixerunt aliqui ex iis hæreticis, non fuisse personam Filii Dei, sed Spiritus sancti. Quæ tota sententia habetur nomine Augustini. in q. 109. veter. testam. cum tamen sine dubio Augustini non sit, ipse enim lib. de hæresib. inter hæreses hanc refert, & est num. 34. cujus hæresis auctor fuit Hierax, ut Epiphan. refert hæ. 67. qui etiam in 55. refert nonnullos hæreticos dixisse Melchisedech fuisse quamdam virtutem majorem Filio Dei, quia non trahit originem ab aliquo patre, sicut Filii Dei, & quia inter dignitates Christi recensetur, quod fuerit assimilatus Melchisedech in ordine sacerdotii. Alii vero dixerunt fuisse ipsam personam Filii Dei, quæ in veteri Testamento sæpe apparere solebat in humana specie, & dicitur apparuisse Abrahæ Gen. 14. & representasse Dei Filium, se ipsum oblaturum aliquando in sacrificium in vera humana natura, & ideo dici: *Assimilatus Filio Dei, & sine patre, & sine matre, &c.* Alii tandem dixerunt fuisse aliquem angelum in assumpto corpore humano, quia si esset verus ac purus homo, non potuisset esse major Abraham, quia eo tempore nullus homo erat in mundo, aut Deo charior, aut majoris dignitatis, & excellentiæ, quam Abraham. Et hujus sententiæ fuerunt Origen. Didymus, & alii, ut Hieron. refert tom. 3. epist. 126. ad Evagrium.

Hæresis de orig. Melchis.

Veritas tamen catholica duo docet, primum, Melchisedech fuisse verum hominem. Secundum, fuisse purum hominem. Primum docent Epiphan. August. & Hieron. locis citatis. Idem August. lib. 16. de Civit. c. 22. Ambros. lib. 5. de fide, c. 3. & alii statim citandi: & colligitur aperte ex historia Genes. c. 14. ubi dicitur Melchisedech *Rex Salem, & sacerdos Dei altissimi, & exivisse obviam Abrahæ, & obtulisse panem, & vinum, & accepisse decimas ab Abraham*. Quæ non possunt (servata historiæ veritate) nisi in verum hominem convenire. Contra fidem enim historiæ est, metaphorice, & improprie illam interpretari, præsertim sine necessitate, & contra communem Patrum expositionem, & sensum. Secundum vero ex hoc primo sequitur, quia secundum veram fidem humana natura neque ante, neque post Incarnationem Filii Dei, alicui personæ divinæ est hypostatice unita. Cum ergo Melchisedech fuerit verus homo, & tanto ante Christi Incarnationem extiterit, certum est nullam esse divinam personam fuisse. Et eadem ratione constat non fuisse angelum: quia neque in persona angelica facta est, imo

Melchis. verus, & purus homo.

Sacerdotium Christi excellentius sacerdotio legis naturæ;

Comparatio sacerdotii Christi cum sacerdotio legis naturæ, veteris, & novæ, & ipsorum inter se.



neque fieri potest hypostatica unio: fuit ergo persona pure humana.

Quis autem ille fuerit, non mirum si ignoretur, cum Paulus, *sine patre, sine matre, & sine genealogia*, illum fuisse dixerit. Multi tamen ex catholicis scriptoribus existimarunt illum esse hominem Gentilem ex Cananæis ortum, virum iustum, & sanctum, regem Jerusalem (quæ prius Salem postea Iebus, tandem Jerusalem dicta est) & sacerdotem Dei altissimi: quantum enim ex Genalibus ortus esset, fidelis tamen erat, & verum Deum colebat, sicut Job fecisse legimus. Ita senserunt Irenæus, Hippolytus, Euseb. Cæsariens. & Emisen. quos cum aliis refert Hierony. in dicta epistola ad Evagrium, quos secutus est Epiph. supra, & Theodoret. q. 63. in Genes. Theophyl. & OEcumen. ad Heb. cap. 3.

Aliorum vero sententia ex traditione Hebræorum sumpta est, Melchisedech fuisse Sem primogenitum Noe, & unum ex progenitoribus Abraham. Quæ sententia placuit Hieronymo, citato loco, & lib. de qu. seu tradition. Hebræi. in Genes. & eam secutus est Isidor. lib. de vita, & morte Prophetarum, c. 5. & Rupert. Abbas lib. 5. de Trin. & operibus ejus in Genes. c. 12. Abulens. Lippom. Glossa, & Lyra Genes. 14. Quod si hæc sententia vera est, stare non potest, quod Ignatius epist. 9. ad Philadelphios docet, Melchisedech fuisse virginem, constat enim, Sem filios genuisse. Quod vero Epiph. objicit Sem eo tempore fuisse jam mortuum, ex falsa chronologia processit; constat enim ex Scriptura Sem supervixisse, Abraham 35. annis, nam Sem vixit 600. annis, 98. ante diluvium, & 52. post diluvium, Genes. 11. Abraham vero natus est 292. post diluvium, ut facile constat ex eodem cap. 11. Genes. unde fit consequens, natum esse Abraham 39. anno vitæ Sem, vixit autem 175. annis, Genes. 25. fuit ergo Sem superstes Abraham annos 35.

**Objeçtio.** At enim dicit aliquis, Sem habuit patrem, & matrem, & initium, & finem dierum tam re ipsa, quam narratione, & historia Scripturæ sacræ, at Paulus negat Melchisedech omnia hæc habuisse; ergo. Respondetur, primum non intelligit Paulus Melchisedech revera caruisse parentibus, nam sicut verus, & purus homo fuit, ita communi aliorum hominum more ortus est, & vitæ initium habuit, & finem. Dicitur ergo his caruisse, quod nihil illorum Scriptura de illo memorat, cum tamen hæc soleat diligenter commemorare, præsertim cum insignium personarum mentionem facit, & maxime, quia cum Scriptura sacra non sine mysterio hæc prætermiserit, sed in figuram Christi, Paulus respiciens ad ipsam figuram, & ut eam explicaret, cum his omnibus carere dixit, non absolute, ut talis homo erat, sed ut in sacra Scriptura de eo fit mentio, nam ut sic est figura Christi. Et ita cessat

**Objeçtio.** quæ nomine Augustini proponitur in illa q. 109. veteris, & novi Testam. quia aliorum etiam fit mentio in Scriptura, quorum parentes, & genealogia in ea non narratur, & tamen non propterea dicuntur iis carere. Respondetur enim (quidquid de aliis sit) in nullo tamen ita factum esse in significationem, & repræsentationem Christi; qui matre caruit, ut Deus, & patre ut homo, ut Paul. significavit, & exposuerunt Chrysost. hom. 12. ad Hebr. Nazianz. orat. 38. in princip. Ambros. dicta epist. 82. Addit præterea Epiph. Melchisedech dici, *sine genealogia*, in genere sacerdotii, quia scilicet non jure hæreditario, nec per successionem carnis sacerdotium habuit, imo neque ex parentum doctrina, aut exemplo, quia ex gentilibus parentibus ortus creditur, quos etiam Epiph. nominat, nescio ex qua traditione, & patrem dicit vocatum esse Eraclam, matrem vero Astaroth, seu Asteriam, sed hæc admodum incerta sunt. Supponendo vero Melchisedech eundem fuisse, qui Sem, addendum est, licet nomine Sem, genealogia ejus narretur in Scriptura, tamen sub nomine Melchisedech, & regis, ac sacerdotis, sub qua Christum figurabat (ut infra dicemus) nullibi ejus historia narratur, sed raptim, & quasi obiter introducit, nulla prius, vel posterius facta illius mentione; nec parentum, nec factorum ejus, neque initii, aut finis illius usque ad David: qui eodem fere modo illius meminit Psalm. 109. qui de Christo exponitur Matth. 22. & subindicavit illum Christi figuram fuisse, donec tandem Paul. ad Hebr. 7. mysterium declaravit.

**Objeçtio.** Secundo loco videndum est, quale fuerit Melchisedech sacerdotium, nam, an sacerdos fuerit, non reliquit

Melchisedech sacerdotium quale.

dubitandi locum Paulus ad Hebræos cap. 7. Suppositis autem iis, quæ præcedenti sectione dicta sunt, nihil fere hic addendum occurrit. Dicendum est enim cum Ambros. Chrysostom. & aliis supra citatis fuisse sacerdotem eo modo, & genere sacerdotii, quod tempore legis naturæ in usu erat: neque enim visibili aliqua cæremonia consecratus fuit, nec singularem aliquam potestatem, aut dignitatem a Deo obtinuit, ut ex Anacleto Pap. dicta epist. 2. decretali, aperte colligitur, & ex Scriptura sacra aut ex aliqua alia historia, aut traditione nihil aliud cum fundamento affirmari potest, quamquam verisimile sit, ex peculiari Dei instinctu, & inspiratione, motum esse Melchisedech ad offerendum Deo certum genus sacrificii, quod jam explicabimus, ut enim supra dicebam, in lege naturæ non erant a Deo determinata sacrificia, sed homines suo arbitrio, vel fortasse etiam communi aliqua consuetudine pro diversitate regionum illa determinabant. Quod ergo alii faciebant humano arbitrio, potuit Melchisedech facere divino instinctu, sicut Abraham interdum obtulit sacrificium ex singulari Dei revelatione Genes. 15. quod licet certum non sit, fiet tamen probabile ex iis, quæ dicemus.

Tertio loco explicandum est, quale fuerit sacrificium, quod Melchisedech obtulit. Catholici enim dicunt illum obtulisse sacrificium panis & vini: hæretici autem negant ex Scriptura sacra quidquam colligi posse de hoc sacrificio Melchisedech, quia nec Paulus illius mentionem facit, nec ex loco Genes. 14. aliquid colligi potest: quia ibi non obtulit Melchisedech sacrificium Deo ex pane & vino, sed tantum protulit panem, & vinum in refectionem eorum, qui ex prælio fatigati veniebant, sic enim etiam vulgata lectio habet. *Melchisedech Rex Salem proferens panem, & vinum*, id est, secum afferens, ut illa daret Abrahamo, & locis ejus, *benedixit ei, &c.* Quam expositionem videtur indicare Chrysostomus in Genes. & sentit etiam Cajet. favet Joseph. lib. 1. antiquit. c. 18. dicens Melchisedech Abraham convivio exceperit. Unde consequenter negant hæretici in illo facto Melchisedech intercessisse mysticam figuram, vel significationem sacram incruenti sacrificii Eucharistici a Christo oblatis, & instituti, quia solum fuit humanum quoddam convivium, & beneficentiæ opus. Quibus non parum videtur favere Paulus ad Hebr. 7. qui cum accurate explicet omnia illa, in quibus Melchisedech videtur præfigurasse Christum, de hac similitudine in ritu sacrificandi nihil omnino dixit: quæ tamen, si fuisset, potissimum explicanda erat, cum esset omnium maxima.

Nihilominus constans, & certa veritas est, & Melchisedech illo facto adumbrasse Eucharistiæ sacramentum, & sacrificium, & protulisse panem, & vinum non solum in corporalem refectionem, sed in religiosum cultum: & sacrificium, quod Deo obtulit in gratiarum actionem pro victoria Abraham. Ita sentiunt Patres fere omnes antiqui, qui inde colligunt, ordinarium modum & ritum sacrificandi Melchisedech fuisse per oblationem panis & vini. Quod primum probari potest ex illa particula causali, quæ interponitur in loco Genes. sic enim dicitur. *Melchisedech proferens panem, & vinum (erat enim sacerdos Dei altissimi) benedixit ei, &c.* Quæ causalis inepta esset, nisi illa oblatio panis, & vini esset sacra, & ad munus sacerdotis spectans. Respondent, illam causalem non esse conjungendam cum antecedentibus, sed cum sequentibus verbis, ut reddatur causa, non cur panem protulerit, sed cur ei benedixit. Sed hoc est vim inferre literæ, quia (ut ex omni usu rectæ locutionis constat) particula, *enim*, in hujusmodi genere narrationis, non reddit causam rei narrandæ, sed jam narratæ, ut ad Eph. 5. ait Paulus: *Ut filii lucis ambulate*. Et statim subdit: *Fructus enim lucis est in omni bonitate*. Et in illo capite sunt multa exempla similia, & passim in Scriptura, & de se res est manifesta. Adde etiam, ad benedicendum non oportuisse esse sacerdotem, nam parentes, aut seniores benedicere possunt.

Difficilius tamen eludi potest hæc litera respondendo in Græcis, & Hebræis exemplaribus non haberi particulam causalem, *enim*, sed copulativam, & ut est in Hebræo: vel, *autem*, ut est in Græco apud Septuaginta. Nobis vero Vulgata lectio sufficiat ad fidem faciendam, nam particula illa, quæ apud Hebræos est copulativa, sæpe æquivalet causali, ut notat Sanctes Pagninus lib. 1. Institut. cap. 24. & ideo merito Interpres Vulgatus verum

Sacrificiū Melchisedech typus Eucharistiæ.



sensum affecutus, ut ambiguitatem tolleret, particulam causalem posuit, quia propter nullam aliam causam ibi interposita fuit mentio sacerdotii Melchisedech, nisi ut redderetur causa actionis, quam tunc exercuit. Quod secundo probatur veterum expositione, & testimoniis. Clemens Alexand. 4. Stromatum circa finem dicit, Melchisedech *panem sacrificatum Deo, obtulisse Abrahamo in refectionem*. Quo vero non satis explicat, an ille panis fuerit antea sacrificatus, vel ibi coram Abraham, quidquid vero horum dicatur, non multum ad presentem questionem refert. Epiphani. hæref. 55. dicit *Abrahamo obtulisse decimas sacerdoti in præputio sacra celebranti*. Theodoret. q. 63. in Genes. inquit: *Melchisedech dedisse Abraham panes, & vinum, prout moris erat Deo omnium talia offerre, animadvertibat enim, & in hoc typum patet fieri*. Damasc. lib. 4. de fide c. 14. dicit, *mensam illam, nostram adumbrasse*. Idem fere Euseb. lib. 5. demonstrat. Evang. c. 2. & 3. Et Cæsarius hom. 5. de Paschate, tom. 7. Bibliot. sanct. & hoc magis sentit Chrysost. hom. 25. in Genes. dicens, *illum panem, & vinum fuisse figuram Eucharistiae*. Idem Eucher. ibi. Ex latinis Cyprian. lib. 2. epist. 3. & serm. de Cœna Domini, dicit, *in oblatione Melchisedech figuratam esse incruentam Christi oblationem, & Ambrosius ad Hebr. c. 5. dicit, Scripturam semel tantum fecisse mentionem oblationis Melchisedech ad significandam perfectionem sacrificii Christi, qui una oblatione consummavit sanctificatos*. In nullo autem loco fit ejus mentio nisi Genes. 14. Et lib. qui de iis initiantur c. 8. dicit Melchisedech obtulisse quæ *Abraham veneratus accepit*, per verbum illud, *veneratus*, satis declarans illam oblationem fuisse sacram: similia habet lib. 4. de sacrament. c. 3. in lib. autem 1. de Abraham c. 3. dicit, *Abraham sacrificasse Deo Genes. 14. intelligi autem debet sacrificasse per Melchisedech, sic enim ipse exposuisse videtur lib. 3. de fide c. 5. dicens, illum Melchisedech, per quem Abraham hostias Deo obtulit, non angelum utique, secundum Judaica ludibria intellexit Ecclesia, sed virum sanctum, ac sacerdotem Dei, typum gerentem Domini, &c.* In eadem sententia est Hieronym. in citata epist. ad Evag. & 1. t. ep. 17. ad Marcel. ut commigret Bethleem, & Matth. 26. & habetur in cap. Accipite, de consecrat. dist. 2. Augustinus etiam lib. 1. contra adversar. leg. & prophet. c. 20. & lib. 16. de Civit. c. 22. dicit, *ibi primum apparuisse sacrificium, quod a Christianis offertur Deo toto orbe terrarum*. Idem fere lib. 17. c. 17. & conc. 1. in Psal. 33. & exponens illa verba. Psal. 109. *Tu es sacerdos in æternum*. Ubi Cassiodor. & alii antiqui expositores. Idem Isidor. lib. 7. Etymolog. c. 6. & lib. Allegoriar. circa princip. Ac denique in Concil. Aquisgranensi tempore Pipini celebrato, lib. 1. c. 17. & 18. dicit: *Melchisedech in eo facti typum gessisse Christi*. Et expressius Tridentinum sess. 22. c. 1. *Christus, inquit, sacerdotem secundum ordinem Melchisedech, se in æternum constitutum declarans, corpus, & sanguinem suum sub speciebus panis, & vini Deo Patri obtulit*. Quibus verbis satis significavit Concilium obtulisse Melchisedech sacrificium, quod figura fuit incruenti sacrificii, a Christo oblato; hac enim ratione Christus offerendo tale sacrificium declaravit se esse illum sacerdotem æternum, in Melchisedech figuratum & propterea in Canone Missæ dicitur. *Et quod tibi obtulit summus tuus sacerdos Melchisedech sanctum sacrificium, immaculatam hostiam*. Et in officio de Eucharistia canit Ecclesia. *Sacerdos in æternum Christus Dominus secundum ordinem Melchisedech panem & vinum obtulit*. Denique etiam antiquos Hebræos ita intellexisse locum Genes. & oblationem Melchisedech, referunt Galatinus lib. 10. de arcanis cathol. verit. cap. 4. 5. & 7. Genebrar. in chronograph. in 3. ætate pag. 13. in tom. 5. Bibliot. sanct. Rabbi Samuel lib. de adventu Mef. c. 19. sic inquit: *Melchisedech sacrificium Deo instituit in pane, & vino, ex quibus communicavit Abraham amicis Dei, aperte significans simul fuisse illum panem, figuram nostri sacrificii & sacramenti*. Quomodo etiam dixit Rabbi Moyles citatus a dictis auctoribus: *Melchisedech convivio exceperit Abrahamum ebello revertentem, pane, & vino de ritu gentis solenniter primum oblato*. Etenim cum Abraham tunc victor rediret, & spolia inimicorum secum traxit, conjectare possumus, non ad modum indignum fuisse tunc pane, & vino ad solam corporalem refectionem: sed fuisse illam aliquam religionem caremoniam in gra-

tiarum actionem. Alia denique conjectura esse potest, quia cum sacerdotium Melchisedech, & ordo illius adeo sit celebris in Scriptura sacra, non est verisimile, ritum illius sacerdotii nullibi esse indicatum.

His positis veniamus jam ad propositam questionem de Christi sacerdotio secundum ordinem Melchisedech. In qua breviter dicendum est primo, Christum esse sacerdotem in æternum secundum ordinem Melchisedech. Hoc est de fide ex testimonio Psal. 109. quem de se exponit Christus Matth. 22. quia in primis illis verbis. *Dixit Dominus Domino meo*. David introducit Patrem æternum ad Filium, seu Messiam & Christum loquentem, nullum enim alium, David vocasset dominum suum, neque alicui homini, nisi esset naturalis Filius, diceret Pater: *Sede a dextris meis*, &c. ut ponderavit Paul. ad Heb. 2. & inferius similiter introducit Patrem dicentem Filio, *Ex utero ante Luciferum genuit te*. Statim vero mutata persona, David inquit: *Juravit Dominus, & non poenitebit eum, tu es sacerdos in æternum, secundum ordinem Melchisedech*. Nullius enim regnum, vel sacerdotium æternum esse potest, nisi solius Christi. Unde facile convincuntur Hebræi, qui de Abraham vel David Psalmum hunc interpretantur, in neutrum enim eorum convenire possunt omnia, quæ de Domino ad quem Dominus locutus est, in hoc Psalmo dicuntur. Addendum vero est, sacerdotem in eo testimonio proprie sumi, hæretici enim, & nonnulli ex Hebræis dicunt solum significare Regem, aut Principem: sæpe enim in Scriptura vox hæc in hac significatione sumitur, 2. Regum 8. Filii David: *Sacerdotes* dicuntur, id est, viri principes, ut constat ex simili loco 1. Paralip. 18. neque enim esse poterant proprii sacerdotes, cum non essent de tribu Levi. Vel certe dicunt significare cultorem Dei, quod etiam significare solet illa vox, ut Exod. 19. *eritis mihi in regnum sacerdotale*. Sed in primis, neutra harum significationum propria est, sed translata, & ideo non est ad illas recurrendum, quando litera non cogit, sed proprietas est tenenda verborum: alias nullum certum sensum in Scriptura habere possemus. Præsertim, quod nulla earum significationum quadrat cum loco Genes. 14. ad quem alludit David in dictis verbis. Quod enim ibi non significet, regem, constat, tum quia jam fuerat dictus, *Rex*, & postea dicitur: *Sacerdos*, sunt ergo duo distinctæ: tum etiam quia non ita commode exponi potest *Rex Dei altissimi*, sicut, *sacerdos Dei altissimi*, nisi recurrendo ad alios metaphoricis sensus, ut *Rex Dei*, dicatur, id est, Rex magnus, Rex insignis, sicut Genes. 23. Abraham dicitur, *Princeps Dei*. Neque etiam significare potest solum cultorem Dei, quia hæc non fuisset sufficiens ratio aut oblato sacrificii, aut excellentioris dignitatis, propter quam, & benedixit Abraham, & ab illo decimas recepit tanquam major: cum tamen Abraham etiam esset eximius cultor Dei. Præterea verbum illud David: *Tu es sacerdos in æternum secundum ordinem Melchisedech*, satis aperte indicat sermonem esse de vero, ac proprio ordine sacerdotali. Denique Paul. ad Heb. 7. ita intellexit, & omnes Patres supra citati ita exponunt.

Dico secundo. Christus dicitur sacerdos secundum ordinem Melchisedech, in ratione representati, & representantis. Explicatur, non enim potest dici sacerdos secundum illum ordinem, quia habuerit sacerdotium formaliter ejusdem rationis, hoc enim falsum esse, supra ostensum est: nec quia sacerdotium Christi fuerit participatum, vel institutum a Melchisedech, cum sacerdotium Christi fuerit multo excellentius, & altioris ordinis, & originis: dicitur ergo Christus sacerdos, quodam excellentissimo genere sacerdotii æterni, cujus typum, & singularem figuram gessit Melchisedech, & hac ratione dicitur Christus sacerdos secundum illum ordinem. Ita colligitur ex citatis Patribus, & ex Paulo ad Heb. 7. qui hac ratione dixit Melchisedech fuisse assimilatum Filio Dei quia fuit figura ejus, explicat autem Paulus multa, in quibus Melchisedech figuravit Christum. Primum in nominis notatione, dicitur enim *Melchisedech*, id est: *Rex justitiæ*. Solus enim Christus est verus justitiæ rex, & essentialiter ut Deus, & secundario in quantum homo, quia *judicabit populum in justitia*, ut dicitur Psalm. 71. & quia per cum facta est justitia, ut ibidem dicitur, ex perfecta enim justitia Deo satisfecit. Secundo ex notatione officii, dicitur enim *Rex Salem*, id est, *Rex pacis*, Christus enim

Christus  
quomodo  
sacerdos  
secundum  
ordinem  
Melchise-  
dech.



est vera pax nostra, nam *per sanguinem suum pacificavit quæ in cælis, & in terra sunt*, ad Ephes. 2. & ad Coloss. 1. & Rex cælestis Jerusalem, ubi est vera pax, Psalm. 147. Tertio, quia Melchisedech introducit, *Sine patre, & sine matre*, ad significandum Christi divinitatem, & humanitatem, quia in quantum Deus mater, in quantum homo vero, patre caret, ut supra cum Nazianz. Chryso. & aliis Patribus exposuimus. Quarto similiter introducit Melchisedech, *neque initium dierum, neque finem vite habens*, quia in Scriptura, neque initium, neque finis commemoratur, neque quod aliquis illi in sacerdotio successerit, quo significata est æternitas sacerdotii Christi, cui aliud non successit, sed perpetuum manet, ut supra circa litteram D. Thom. explicatum est. Quinto excellentius fore sacerdotium Christi, quam legale in eo præfiguratum est, quod Melchisedech benedixit Abraham: *Sine ulla vero contradictione*, inquit Paul. *qui minor est, a majori benedicitur*; e converso autem Abraham obtulit decimas Melchisedech tanquam superiori, in Abrahamo autem decimata est tribus Levi, quæ in illius lumbis continebatur.

Ubi observandum primo est, Christum non fuisse decimatum, quia non continebatur in lumbis Abraham, secundum rationem seminalem, sed tantum *secundum corruptam substantiam*, ut August. loquitur lib. 10. Genes. ad lit. c. 20. & D. Thom. infra q. 31. art. 8. Secundo est observandum, litteram Genes. videri posse ambiguum (ut Hier. supra notavit) sic enim habet: *At vero Melchisedech rex Salem proferens panem, & vinum &c.* & postea subdit: *Et dedit ei decimas ex omnibus*, non explicat autem uter alteri dederit. Propter quod nonnulli ex Hebræis contendunt potius Melchisedech dedisse decimas suæ substantiæ Abrahamo, quia hoc magis videtur sonare ordo, & contextus literæ. Sed nihilominus certum est Abraham dedisse decimas Melchisedech ex omnibus spoliis, quæ ex hostibus reportabat, primum quod ita exponat Paul. ad Heb. 7. qui tamen cum Hebræis scriberet, non eis exponeret Scripturam, nisi juxta receptum apud antiquos Hebræos sensum. Secundo quamquam D. Hier. supra dicat, etiam apud Septuaginta ambiguum esse litteram, tamen prout nunc reperitur in Bibliis Complutensibus, nulla est ambiguitas, sic enim habent: *Et dedit ei Abraham decimas ex omnibus*, quod etiam aperte dixit Joseph. lib. 1. antiquit. cap. 18. his verbis: *Abraham vero dante ei decimas spoliiorum, munus accepit.* Tertio ex ipsa littera potest variis modis colligi: tum, quia absolute dicat, *ex omnibus*, videtur plane referre res aliquas, de quibus facta fuerat mentio, non dixerat autem Melchisedech attulisse res aliquas, ex quibus decimas solveret, de Abrahamo autem dixerat, reduxisse omnem substantiam Sodomorum, & Loth fratris sui, & hostium: ad hæc ergo spolia fit relatio, cum dicitur dedisse omnium decimas: tum etiam, quia prædicatur Melchisedech fuisse sacerdotem: non est autem sacerdotis dare, sed recipere decimas. Denique cum David dicat Christum fuisse sacerdotem *secundum ordinem Melchisedech*, constat illum fuisse superiorem & majorem, atque adeo illi datas esse decimas.

Dices. Abraham erat sacerdos legis naturæ, quandoquidem esset primogenitus, ut colligitur ex Genesis 11. sed omnes primogeniti ex stirpe Noe erant eo tempore sacerdotes (ut supra cum Hieronymo diximus); erat ergo sacerdos: unde & sæpe legimus, ipsum obtulisse sacrificium; ergo in dignitate sacerdotali erat æqualis Melchisedech, cur ergo illum ut superiorem veneratus est? Respondeo primum, quia erat sacerdos, & primogenitor ejus, & credibile est in Ecclesia, quæ semper una fuit, servatum etiam tunc esse quendam modum ordinis Hierarchici, atque ita seniori, & antiquissimo sacerdotem ac primogenitum Noe, fuisse veluti sacerdotem summum, quem omnes ut superiorem suspiciebant. Deinde credibile est, Abraham agnovisse figuram, & mysterium, & in Melchisedech Christum ipsum fuisse veneratum, illumque, scilicet Melchisedech, recognovisse ut majorem, non solum propter id, quod erat, sed maxime propter id, quod repræsentabat.

Sexto fuit similitudo hæc, seu figura posita in oblatione panis & vini, per quam & Deo gratias egit, & milites e via fessos recreavit, post victoriam de inimicis partam, quæ fuit figura sacrificii incruenti corporis Christi sub speciebus panis, & vini, quod & Deo offertur, & fidelibus

Christi militibus post partam de peccatis victoriam in alimentum spirituale cedit. Et ita sicut conditionibus personæ suæ præfiguravit Melchisedech Christi personam: ita sua oblatione Christi sacrificium adumbravit: nam cum præcipuus actus sacerdotis sit sacrificium, non fuisset perfecta sacerdotii repræsentatio, nisi simul ipsius sacrificii figura intercessisset.

Ad interrogationem vero, quæ supra objiciebatur, cum Paulus hujus ultimæ similitudinis non meminerit, respondendum est, Apostolum non sumpsisse munus explicandi omnia, quibus Melchisedech Christum figuravit, sed solum persuadendi sacerdotium Christi esse perfectius Aaronico: & illud esse æternum, hoc temporale, & per illud auferendum. Et ad hoc probandum usus est figura Melchisedech, ac propterea tantum in illa ponderavit, quæ ad hanc æternitatem, & excellentiam sacerdotii Christi significandum referre videbantur; quia igitur similitudo in ritu sacrificandi nihil ad hoc pertinebat, illam prætermittendam censuit, præsertim (inquit Hieron.) *ne daretur sanctum canibus*, scribebat enim ad Hebræos nondum fortasse credentes, & ideo noluit interponere sermonem de sacramento Eucharistiæ creditu difficillimo, ne fortasse sine necessitate, & opportunitate tot mysteria eis proponendo, illos obrueret. Unde & ipsemet præmiserat grandem esse de Christo sermonem, & eos, ad quos scribebat, esse imbecilles ad audiendum. Adde, unum ex signis, quo Paulus ibi ostendit sacerdotium Christi excellere Aaronicum, esse, quia multa sacrificia legalia non potuerunt perfectam sanctitatem conferre: *Christus autem una oblatione consummavit sanctificationem*; hoc autem discrimen maxime cernitur in sacrificio cruento, & ideo non oportuit tunc mentionem facere sacrificii incruenti, quod sæpius in Ecclesia offertur, quamquam illius iterata oblatio nihil derogat perfectioni sacrificii incruenti, quia in re oblata idem est sacrificium, quod diverso modo offerendi iteratur, non ut aliquid virtutis ipsi sacrificio accrescat, sed ut illius efficacia nobis applicetur.

Una sola superest objectio, quia si Christus dicitur *sacerdos secundum ordinem Melchisedech*, solum propter repræsentationem, eadem ratione poterit dici sacerdos secundum ordinem Aaron, quia per legale sacerdotium, Christi sacerdotium, & per sacrificia legalia, sacrificium Christi cruentum repræsentata sunt, ut constat ex Paulo ad Heb. 9. & 13. Respondetur, negando consequentiam, quia non sufficit quæcumque præfiguratio, vel repræsentatio, ut Christus dicatur esse sacerdos secundum illum ordinem: primo, quia quod ad rem ipsam spectat (ut supra dictum est) non potest quis dici sacerdos secundum ordinem Aaron, nisi sit de stirpe ejus, & cæremoniis in ea lege statutis ordinatus, quæ non possunt in Christum convenire. Deinde, quod ad repræsentationem attinet, sacerdotium Aaron erat imperfectum, & temporale, & præfiguravit Christum secundum statum vitæ passibilis: at vero Melchisedech fuit typus Christi secundum omnes perfectiones sacerdotii ejus, unde sacrificia legalia tantum figurabant cruentum sacrificium Christi, per quod erant consummanda, & abolenda, sacrificium vero Melchisedech præfiguravit sacrificium Christi, eo modo, quo in æternum erat duraturum, vel in Ecclesia militante, in qua semper Christus est principale offerens, & erit quamdiu mundus durabit. Propter quod dici potest *sacerdos in æternum*, seu *in seculum*, ut habet littera Hebræa. Vel certe, quia etiam in Ecclesia triumphante per æternam commemorationem, & gratiarum actionem officium sacerdotis exercebit. Quocirca, sicut lex scripta legem gratiæ præfiguravit, quia tamen imperfecta fuit, & per legem gratiæ abolita, non potest lex gratiæ dici esse secundum ritum legis veteris: ita quamvis sacerdotium legale Christum figura verit, tamen quia imperfectum fuit, & per Christum abrogatum, non potest dici Christus sacerdos secundum illum ordinem: at vero lex naturalis non fuit abrogata per Christum, sed confirmata, aucta, & perfecta. Et ita sacerdotium etiam Melchisedech, quatenus erat legis naturæ, non fuit proprie per Christum ablatum, sed ad perfectiorem modum elevatum: quæ tamen perfectio tota in illo tempore præfigurata fuit, & ideo optime dicitur Christus sacerdos secundum illum ordinem, quia in se habuit, quidquid perfectionis in illo fuit, tam formaliter, quam repræsentative.

Melchisedech figura Christi, quomodo.

Dubium.

Respons.

Dubium.

Respons.

Objectio.

Respons.

Objectio.







eis prudentia, iustitia, bonitate, ac potentia antecellit.

Et hinc sequitur secundo, hanc potestatem excellentiæ esse propriam, & singularem ipsius Christi, sicut enim sacerdotium ejus singulare est, & omnibus aliis superius: ita etiam potestas, quæ illud consecuta est, singularis est, & suprema, & ideo potestas excellentiæ appellata est. Unde & actus hujus potestatis a solo Christo fieri potuerunt; solus enim ipse potuit Ecclesiam condere, instituire sacramenta, potestatem dare ad remittenda peccata, & tribunal erigere, in quo peccata in foro animæ dijudicarentur: solus etiam potuit eo modo quo vellet, absque certis verbis vel signis sanctificare animas, & peccata remittere, ut supra quæst. 13. late tractatum est. Quo circa quamvis vicario, & ministris suis, quandam participationem hujus potestatis Christus reliquerit, nemini tamen æqualem potestatem communicavit: sed certa ratione, & modo ab ipso præscripto, quem nullus præter ipsum mutare potest: unde cæteri, ut vicarii, seu ministri ejus operantur, ut Paul. dixit ad Ephes. 4. & ipse præcipue in omnibus operatur, ut Augustinus colligit ex illo Joan. *Hic est, qui baptizat*: ac denique in nomine, & virtute ejus sanctificantur sacramenta, & remittuntur peccata, juxta illud 1. ad Cor. 1. *Nunquid in nomine Pauli baptizati estis?* itaque sicut nullum est caput Ecclesiæ, qualis Christus est, ita nulli data est potestas influendi, & regendi Ecclesiam æqualis potestati Christi.

Quod si inquiras, an hæc potestas saltem communicari potuerit puræ creaturæ. Responsio hujus petenda est ex iis, quæ de gratia capitis diximus: est enim eadem: quoad illos namque effectus, qui non includunt intrinsece respectum ad gratiam unionis, communicari potuit puræ creaturæ, ut ad sanctificandum homines, ad regendum illos, & instituenda sacramenta, ut suo loco dicitur, & similia. At vero quoad aliquos effectus, præsertim morales, qui requirunt necessario personam divinam operantem, ut est sanctificare justos ex perfecta iustitia, & ad perfectam æqualitatem pro illis satisfacere. Item quoad modum obtinendi hanc potestatem, tamquam sibi propriam & connaturalem, non potuit communicari puræ creaturæ, ut per se constat.

Ultimo interrogare potest aliquis, quo tempore communicata fuerit Christo homini hæc potestas. Respondetur breviter potestatem ipsam a primo instanti conceptionis fuisse illi datam, nam ex tunc incepit esse sacerdos, & mediator Dei, & hominum, & statim incepit sacrificium Patri pro hominibus offerre, tota enim Christi vita fuit veluti quoddam continuatum sacrificium quod in utero Virginis inchoatum est, & in cruce consummatum: unde (ut supra vidimus) ab illo primo instanti mereri cœpit hominibus, & pro illis satisfacere, & paulo post per hanc potestatem Joannem sanctificavit, & Elisabeth Spiritu sancto replevit, & Zachariæ donum prophetiæ tribuit, & matrem suam auctiori gratia, & majori prophetiæ dono cumulavit. Denique cum hæc potestas ratione unionis debita esset, neque ulla esset ratio, vel impedimentum, quod ab illa obtinenda retardaret, statim communicata est: usus vero ejus in discursu vitæ pro temporum opportunitate demonstratus est: plenior vero & integra manifestatio ejus, post resurrectionem apparuit, ut multi Patres docent, exponentes in hunc sensum verba illa: *Data est mihi omnis potestas in cælo, & in terra.*

## SECTIO II.

*Utrum Christus ut summus Sacerdos habuerit potestatem ad ferendas leges.*

IN hoc dubio duo errores extremi cavendi sunt. Alter fuit Pelagianorum, Petri Abialardi, & aliorum hæreticorum, qui Christo negarunt proprium munus redemptoris, & sanctificatoris nostri, solumque illi tribuebant officium doctoris, & ad summum legislatoris. Contra quos hæreticos satis in superioribus dictum est. Alter est multorum Lutheranorum, qui ita tribuunt Christo officium redemptoris, & sanctificatoris nostri, ut fere munus legislatoris negent: dicunt enim legem gratiæ esse legem libertatis, nihilque in ea Christus præcepisse, quod ad salutem necessarium sit, præter solam fidem. Contra quos hæreticos ex professo in materia de legibus, de fide,

& de gratia, differendum est. Nunc breviter, quantum præsens locus postulat, ostendendum est, Christum & potestatem, & usum ferendarum legum, & spiritualium præceptorum assumpsisse.

Dico ergo primo, Christum Dominum habuisse potestatem jurisdictionis spiritualis ad ferendas leges, quibus homines obligaret. Est de fide definita in Concilio Tridentino, sess. 6. can. 21. ubi definitur Christum non solum nobis esse datum in redemptorem, sed etiam in legislatorem, cui pareamus. Et probatur ex sacra Scripturæ promissionibus Psalm. 2. *Ego autem constitutus sum Rex ab eo*; & infra: *Reges eos in virga ferrea*, id est, *inflexibili iustitia*, ut exponit August. Hilarius autem advertit verbum Græcum *ποικίλω*, idem significare, quod pastorem more gubernare, quod inter homines idem est, quod regere per doctrinam, & legem, quæ ibi per *virgam* significatur, & quia solidissima, & inflexibilis est, *ferrea* dicitur, de qua Psalm. 44. *Virga directionis seu aquitatis, virga regni tui*, unde Isai. 33. de Christo dicitur, *Dominus Rex noster, Dominus legislator noster*, & Jerem. 31. *Dabo legem meam in cordibus eorum*, quæ Matth. 11. *jugum suave* dicitur, ut exponit Cyril. Alexand. lib. 2. ad Regin. sub titulo: *Quod Christus sit Deus*, ex *Matthæo*, unde etiam constat hæc veritas ex usu hujus potestatis, nam Joan. 13. dicit ipse Christus: *Mandatum meum do vobis*, & c. 14. *Si diligitis me, mandata mea servate*, & qui habet mandata mea, & servat ea, ille est, qui diligit me, & c. 15. *Si præcepta mea servaveritis, manebitis in dilectione mea*, & Matth. ult. inquit: *Docentes eos servare omnia quæcumque mandavi vobis*. Idem constat ex illis comminationibus: *Nisi quis renatus fuerit*, Joan. 3. *Et nisi inducaveritis carnem filii hominis*, Joan. 6. quæ præceptum necessario involvunt. Ratio vero est, tum, quia totum hoc debitum est majestati, & regiæ ac sacerdotali dignitati Christi, quia verus Rex habet potestatem ferendi leges, atque adeo & obligandi: tum etiam, quia ad finem illius sacerdotii, & ad salutem, & bonum nostrum erat hoc etiam necessarium.

Dices. Joan. 1. dicitur *Lex data per Moysen, gratia autem, & veritas per Christum*, indicatur ergo Christum non fuisse legislatorem, sicut Moysen. Respondet August. toto lib. de Spirit & lit. unumquodque denominari ab eo, quod in illo præcipuum est, lex autem Moysis fuit tantum lex, præcipiebat enim, & non juvabat, & ideo nomen legis retinuit: lex vero Christi & præcipit, & juvat, imo pauca præcipit, & plurimum gratiæ confert, vel potius, prout ab ipso Christo immediate lata est, nihil præcipit, nisi quod ad gratiam augendam conferre potest, quia in lege nova Christus nulla alia præcepta posuit, nisi fidei, & sacramentorum. Et ideo hæc lex, gratiæ nomen obtinuit, & *jugum suave* vocatur, & a Paulo ad Rom. 8. dicitur: *Lex spiritus vitæ in Christo Jesu, qua liberat a lege peccati, & mortis*. Adde, legem veterem non esse datam a Moyse ut auctore, sed a Deo per Moysen: Christus vero fuit auctor legis gratiæ, quæ per ipsum facta est.

Dico secundo. Hæc potestas legislativa fuit in Christo cum singulari quadam excellentia, cum qua nulli creaturæ communicata est. Est certa, & probatur, & explicatur variis modis, primo ab origine, quia hæc potestas in illo fuit quodammodo divina, erat enim potestas Dei, & a propria dignitate personali manavit. Propter quod jus per hanc potestatem constitutum, simpliciter divinum est, quia licet proxime per humanitatem datum sit, tamen ab ipso Deo immediate datum est, & per divinam potestatem, & juxta divinæ voluntatis beneplacitum, unde Deuteron. 18. ait Moyses de Christo loquens: *Prophetam de gente tua, & de fratribus tuis sicut me, suscitabit tibi Dominus Deus tuus, ipsum audies*, & infra, *Prophetam suscitabo eis de medio fratrum suorum similem tui, & ponam verba mea in ore ejus, loqueturque ad eos omnia, quæ præcepero illi, qui autem verba ejus, quæ loquetur in nomine meo, audire noluerit, ego ultor existam*. Secundo ex perfectione, & excellentia præceptorum, quæ per hanc potestatem imposita sunt, omnia enim ad internum bonum animæ pertinent, & ad majorem cognitionem Dei, majoremque cum illo conjunctionem, ut latius in materia de sacramentis ostendendum est: de quibus nunc sufficit dictum illud August. lib. 19. contra Faust. c. 13. *nobis data esse sacramenta, seu præcepta virtute majora, utilitate meliora, actu faciliora, numero pau-*

Christus  
legislator  
mundi.

Objeſſio.

Respons.

Differen-  
tia inter  
legem  
Christi &  
Moysis.

Potestas  
Christi  
legislativa  
nulli  
creaturæ  
commu-  
nicata.

Potestas  
excellen-  
tiæ pro-  
pria Chri-  
sti, nec al-  
teri omni-  
no commu-  
nicabi-  
lis.

Dubium.  
Respons.

Dubium.  
Respons.

Potestas  
excellen-  
tiæ quan-  
do Chri-  
sto data.



*pauciora, tanquam iustitia fieri revelata, & in libertatem vocatis filiis Dei.* Tertio per hanc potestatem potuit abrogari lex vetus, etiam si a Deo data esset, non solum, quia cum Christus esset finis legis, ut dicitur ad Rom. 12. postquam per ipsum completa est, veluti ipse sua evanuit, sed etiam quia, ut dicitur ad Heb. 7. *Translatio sacerdotio necesse est, ut legis translatio fiat.* De quo videtur August. toto illo lib. 19. contra Faust. præsertim a cap. 7. Quarto potestas hæc fuit amplissima in universum orbem, juxta illud: *Dabo tibi gentes hereditatem tuam, & possessionem tuam terminos terræ,* Psalm. 2. & ideo Marc. ult. ipse præcepit Apostolis: *Euntes in mundum universum prædicate, &c.* & Matt. ult. dixerat, *Data est mihi omnis potestas in cælo, & in terra.* Quocirca, sicut gratia Christi omnibus communicatur, & Ecclesia ejus Catholica est, & universalis, de se omnes complectens, ita & jurisdictio amplissima est, & lex ejus ad quaslibet personas extenditur, & ad actus tam internos, quam externos, & ad omnium virtutum materias, & ad omnes effectus supremæ potestatis, quales sunt dispensare, abrogare, & similes: est enim perfectissima potestas, & divina. Quinto denique (ut ex præcedent. sect. patet) non solum potuit Christus per hanc potestatem leges condere, sed etiam potuit Vicario suo hanc potestatem impartiri, quam illi communicavit: non quidem cum æquali perfectione, tamen cum tota illa, quæ ad perfecte regendam Ecclesiam necessaria fuit, ut latius in proprio loco ostendendum est.

Potestas  
Christi  
legisla-  
ria excel-  
lentissima.

## DISPUTATIO XLVIII.

In duas Sectiones distributa.

De temporali regno Christi Domini.

**D**isputatio hæc commode præcedentibus adjungitur, quia D. Thomas in art. 1. Christum Regem, sacerdotem, & legislatorem fuisse docuit, & Melchisedech Rex simul & sacerdos existens utramque dignitatem in Christo præfiguravit; ut ergo utraque dignitas perfecte maneat explicata, duo a nobis in hac disputatione præstanda sunt. Primum enim videndum est in particulari de regno Judæorum, an ad Christum pertinuerit aliquo proprio, & humano titulo. Deinde de universali regno, & dominio totius orbis breviter dicendum erit.

## SECTIO I.

Utrum Christus hereditario jure temporale regnum Judæorum obtinuerit.

**I**n hac re fuit sententia Armachani lib. 4. de quaestio- nib. Armenor. c. 15. & 16. dicentis B. Virginem habuisse jus hereditarium ad regnum Judæorum, quia linea recta descendebat ex familia David, & deficiente viro, foemina in hereditate succedebat, Numer. 27. & 39. neque enim est, cur ab hac generali lege excipiat regina hereditas, cum neque in tota lege cautum sit, neque foemina sit incapax regni, ut per se manifestum est; cum ergo parentes Virginis ex stirpe regia directe descenderint, & alium filium non habuerint, ad Virginem devoluta est hereditas, & jus, quod ipsi ad regnum habebant; ergo, cum Christus fuerit unicus filius Virginis, in illum transfundendum fuit hoc jus. Quam sententiam confirmat nonnullis Scripturæ testimoniis, Mich. 5. *Et tu Bethleem terra Juda, nequaquam minima es in principibus Juda, ex te enim orietur dux, qui regat populum meum Israel,* & Jerem. 23. *Suscitabo David germen justum, & regnabit Rex, & sapiens erit, &c.* & aliis similibus, quibus supra probavimus Christum esse Regem. Confirmat secundo, quia pueri Hebræorum cantabant Christo: *Benedictus Rex, qui venit in nomine Domini. Benedictum quod venit regnum patris nostri David,* Marc. 11. Luc. 19. quas voces Christus non cohibuit, sed potius probavit, sicut Pilato interroganti, Matth. 27. *Tues Rex Judæorum?* quamvis ipse de regno temporali interrogaret, Christum annuendo respondit: *Tu dicis,* unde Matth. 17. Petro dixit Christus, se esse liberum ab obligatione solvendi tributum, tanquam filium Regis, ad quem regnum pertinebat. Ultimo confirmari potest ex 1. Mach. 14. ubi cum senatus, & principes Judæorum Simonem

Machabæum, ejusque successores, in ducem & principem sacerdotum elegissent, ut perpetuo ea dignitas in illa familia duraret, exceptionem addiderunt: *Donec surgat Propheta fidelis,* ille scilicet Propheta, de quo Moyses prædixerat: *Prophetam sicut me, &c.* Deuteron. 18. id est, usque ad adventum Messiae, quia certo credebant Messiam futurum esse verum Regem, & heredem illius regni. Addit tamen hic auctor, quamvis Christus jure suo potuerit hoc regnum obtinere: illud tamen repudiasset, ac omnino renuntiasset, paupertatem præferentem temporali regno: & ita inquit hoc jus non solum non minuire perfectionem Christi, sed potius ad eam magis demonstrandam conferre, quia ea bona temporalia, quæ multis titulis habere poterat, contempsit.

Dicendum nihilominus est primo, certum esse, Christum non fuisse de facto Regem temporalem Judæorum. Hoc certum est, ut constat ex toto discursu Evangelii, & ex Joan. 6. ubi cum eum vellent facere Regem, abscondit se. Hoc etiam constat, quia ipso vivente fuerunt alii Reges Judæorum, si non jure, saltem facto, unde colligitur, ipsum non habuisse usum, seu actuale regimen temporale illius regni. Quod vero neque proprium dominium aut proprietatem habuerit, patet; quia neque per electionem hominum habuit, ut per se conitat, neque jure hereditario, quia illud non habuit, ut statim dicam: tum, quia licet illud habiturus fuisset, tamen vivente matre, in illa dominium, & proprietatem permansisset.

Dico secundo: Christus Dominus nullum jus humanum, seu hereditarium habuit ad temporale regnum Judæorum, ratione carnalis originis ex familia David. Hæc est sententia communis, pro qua multa congerit ex Patribus Vualden. lib. 2. doctrinal. fid. antiquit. cap. 76. & 77. & eandem defendunt Victoria, Scot. & alii sect. sequenti referendi. Et probatur primo, quia existimare, regnum in sacra Scriptura Messiae promissum, futurum fuisse temporale, Judaicum redolet sensum, ad quem excludendum Scriptura fere semper variis modis ostendit regnum illud esse spirituale, & ad bonum animæ perti- nens, & non contineri intra terminos Judææ, sed per universum mundum extendi, & non fuisse futurum super carnales Israelitas, sed super spirituales filios Abraham secundum fidem, ut in epist. ad Romam. latius Paulus prosequitur, & optime August. demonstrat lib. 17. de Civit. cap. 6. 7. & sequentib. tract. 51. in Joan. & ex adductis in præcedenti quaest. satis constat. Denique Scriptura non dicit habiturum jus ad regnum, sed vere regnaturum, & futurum Regem, quæ non possunt vera esse de illo temporali regno: non ergo de illo Scriptura loquitur. Secundo probatur ratione in Scriptura fundata, quia regnum David jam prius cesserat, & successio fuerat interrupta, ut constat ex Jerem. 22. ubi de Jechonia dicitur: *Non erit de semine ejus, qui sedeat super solium David, & potestatem habeat ultra in Juda,* ubi advertit Hier. hoc esse intelligendum de folio David quantum ad temporale regnum, nam quantum ad spirituale & æternum, Christus postea sedit in throno David, sicut Angelus Mariæ prædixit Luc. 1. Quod etiam notavit Ambros. lib. 3. super Lucam. De qua re multa diximus supra disp. 1. hujus materiæ tractantes locum illum Genes. 49. *Non auferetur sceptrum de Juda.* Et confirmari potest hæc ratio ex loco illo 1. Machabæ. 14. ubi cum jam Regnum Judæorum cessasset, & Ducatus etiam extinctus esset, seu translatus a tribu Juda totus Judæorum populus ex communi consensu constituit sibi ducem, & summum sacerdotem Simonem Machabæum, ut in eo, & posteritate ejus ea dignitas perpetuo maneret. Cum ergo translata esset omnino dignitas regia a domo Juda, non potuit legitima successione, & hereditario jure ad Virginem pervenire. Nec vero, quia ibi additur conditio illa: *Donec surgat Propheta fidelis,* inde colligi potest, nato Christo statim ad illam translatum esse hoc jus: primo, quia vel hoc esset propter successionem, vel propter populi consensum. Primum dici non potest; quia ut ostensum est, jam antea extinctum fuerat Regnum Judæorum: nec secundum, tum quia non constat, ibi esse sermonem specialiter de Messia, sed de quocumque propheta fidei, qui Dei voluntatem manifestaret: tum etiam, quia licet tunc consenserint conferendo principatu Machabæis usque ad tempus Messiae, non tamen inde fit, ex tunc transfuisse jus, vel dominium in Messiam, ita ut in suo adventu statim sine

Christus non habuit jus hereditarium ad regnum temporale Judæorum.



alio populi consensu regnum temporale acciperet, præsertim cum ipsi postea Judæi acclamaverint: *Non habemus Regem nisi Casarem, & Noli scribere, Rex Judæorum, sed quia ipse dixit, Rex sum Judæorum*. Tum denique, quia etiam ille principatus Machabæorum fuit extinctus ante Christi adventum. Ultimo probatur, quia nullo modo constat, nec probari potest, B. Virginem recta linea descendisse a David per Salomonem, & per omnes successores ejus primogenitos: quin potius probabilius est, paternam lineam Virginis fuisse a David per Nathan, ut infra ostendemus. Quod vero quidam dicunt, Joseph descendisse per Salomonem, & ad illum pertinuisse regnum, & jure adoptionis translatum esse ad Filium, hoc (inquam) voluntarium est, quia præter rationem secundam supra factam, quæ contra hoc æque procedit, non constat Josephum fuisse in illa linea primogenitum, seu primum successorem omnium primogenitorum præcedentium, præterquam quod jus regni non potest transferri per solam adoptionem, in præjudicium legitimi successoris. Adde, incertum esse Christum fuisse filium adoptivum Joseph, sed solum putativum. Fundamenta contrariæ sententiæ ex dictis expedita sunt, neque oportet aliquid addere, quia difficultatem non habent.

## SECTIO II.

*Utrum Christus Dominus habuerit dominium universale, & directum super universum orbem.*

**N**on versatur quæstio de Christo ut Deo, de cujus supremo, & universalissimo dominio nulla est controversia. Tractamus ergo de Christo ut homine, de quo illud etiam indubitatum apud omnes est, ratione spiritualis regni & potestatis, consequenter habuisse jus, & potestatem utendi omnibus temporalibus rebus in ordine ad spirituales finem, & salutem animarum. Quia sicut potestas, & regna ex finibus præcipue distinguuntur, ut Aristoteles docet lib. 3. Politic. c. 14. ita in ordine ad suum finem unaquæque potestas vim & efficaciam habet circa omnia inferiora, quæ possunt finem illum impedire, vel convenienter promovere, quia alias potestas esset imperfecta, & diminuta. Cum ergo temporalia omnia ad spiritualia referantur, illisque subordinentur, omnia illa, ut ordinem habent ad hunc finem, subijci possunt huic spirituali potestati Christi: unde saltem hac ratione necesse est verum esse, quod Christus dixit: *Data est mihi omnis potestas in cælo, & in terra*. Et ab effectu confirmatur, nam sicut ab hac spirituali potestate Christi derivata est suprema potestas spiritualis, quam Vicarius ejus habet in terris, ita ab eadem duxit originem potestas, quam idem summus Pontifex habet super omnia temporalia regna indirecte, & in ordine ad spirituales finem, ut in proprio loco latius ostendendum est. Denique multi arbitrantur ad usum hujus potestatis pertinuisse, quod ad Verbum Christi arefacta est scilicet, Matthæi 21. & quod ejecerit ementes, & vendentes de templo Joan. 2. Versatur ergo quæstio de dominio directo.

Prima sententia negat, Christum Dominum habuisse aliquod dominium directum rerum omnium. Ita tenuit Abulen. q. 30. in illud Matth. 21. *Ecce Rex tuus venit tibi*. Waldens. lib. 2. doctrin. fid. antiq. c. 76. & 77. Victor. relect. 1. de potestate Eccles. q. 5. quæ est, an potestas spiritualis sit supra civilem, num. 15. Sot. lib. 4. de justit. qu. 4. art. 1. Et in eadem sententiam inclinat Armachan. lib. 4. contra Armen. c. 12. & Burgen. in scrutinio Scripturarum p. 1. dist. 7. & sequentibus. Huic autem sententiæ addidit Marfil. Patavinus hæreticus, Christum non solum non habuisse potestatem directam super Reges temporales: sed potius fuisse illis subiectum, & obligatum ad solvenda tributa. Quæ errorem damnavit Joannes XXII. in Extravag. Licet juste, ut refert Turrecrem. lib. 4. summ. Eccles. 2. part. c. 37. pugnat enim cum dignitate, & divinitate personæ Christi, & cum verbis ejus Matthæi 17. *Ergo liberi sunt filii*. Omisso ergo hoc errore, de quo supra quæst. 20. satis egimus, fundamentum hujus sententiæ primum sumitur ex omnibus illis sacra Scripturæ locis, quibus supra ostendimus regnum Christi esse spirituale: ex eisdem enim colligi videtur non esse temporale: sunt verba optima Zachar. 9. *Exulta satis filia Sion, jubila Jerusalem, ecce Rex tuus venit tibi justus, &*

*salvator, & ipse pauper, sedens super asinam, &c.* ideo enim illa duo conjunxisse videtur, Regem, & pauperem, ut regnum illud non temporale, sed spirituale esse significaret: propter quod dixisse videtur ipse Christus: *Regnum meum non est de hoc mundo*. Secundo, quia Christus docuit contemnere temporalia regna, & divitias; ergo neque ad exemplum, neque ad finem redemptionis Christus erat utile hoc dominium, unde neque illo unquam usus est, neque potestate ulla, seu jurisdictione temporalis: unde Luc. 12. homini petenti ab ipso: *Magister dic fratri meo, ut dividat mecum hereditatem*, ipse respondit: *Homo quis me constituit judicem, aut divisorem inter vos?* Tertio denique, quia si Christus habuisset directum dominium, & potestatem super omnia regna mundi, reliquisset Vicario suo, quia cum illo communicavit omnem suam potestatem: consequens autem est falsum.

Secunda sententia affirmat, Christum habuisse absolutum, & directum dominium, & potestatem super omnia regna temporalia, per quam posset illa regere, moderari, aut mutare suo arbitrio. Hæc est sententia D. Thomæ, lib. 1. de regimine principum c. 22. & sequentibus, eandem tenet D. Antoni. 3. part. tit. 3. cap. 2. & Almain. lib. de potestate Eccles. cap. 8. Turrecrem. lib. 2. summæ Eccles. cap. 116. Navar. in cap. Novit. de judiciis, notab. 3. num. 8. & seq. & num. 130.

Pro solutione advertendum est unum esse supremum dominium, quod soli Deo convenit in quantum Deus est, & incommunicabile fuit humanitati Christi: tum quia etiam ipsa sub hoc dominium cadit: tum etiam propter independentiam, quam includit, est enim hoc dominium independens ab omni superiori voluntate, & directe cadit in res omnes, etiam prout conservantur in esse. Aliud vero est dominium, quasi extreme ab hoc distans, & infimi ordinis, ut est dominium humanum, quod magna ex parte in voluntate humana fundamentum habet: ad quod revocatur jurisdictio, seu potestas temporalis, quæ ab hominibus etiam introducta est ad tuendam Rempublicam, & in justitia, ac pace conservandam, & hac ratione in hac quæstione de dominio, & regno, quod in quadam potestate & jurisdictione consistit, indifferenter loquimur. Inter hæc vero duo dominia, intelligi potest aliud medium, quod quidem dominium creatum sit, sub divino existens, & ab illo pendens, & in creata voluntate, & libertate fundatum, excellens tamen, ac superans omnia dominia, & regna humana. Primum in origine, ut si a Deo manet, & non ab hominibus. Deinde in ejus firmitate, & stabilitate, ut si non sit caducum, sed stabile, & æternum. Tertio in materia, seu objecto, ut si ad res omnes creatas se extendat, etiam ad Angelos, & ad omnem usum tam naturalem, quam supernaturalem. Hoc autem genus domini medii possibile esse, non videtur posse dubitari, quia nullam in se repugnantiam involvit, & Deus, qui est supremus omnium Dominus, potest sui domini participationem, prout voluerit, communicare.

Dico ergo primo. Quamvis Christus Dominus inter dum habuerit aliquarum rerum humanum & temporale dominium, non tamen assumpsit hujusmodi dominium, vel potestatem in toto orbe, neque in aliquo regno temporali. Prior pars satis probatur ex definitione Joannis XXII. in Extravag. Cum inter nonnullos, de verb. significat. de illa enim latius agemus tractantes de vita Christi, quæstione 40. Nunc enim solum supposita est, quia in illa insinuat secundam conclusionem: si enim definit Pontifex Christum habuisse paucarum rerum dominium, sentit non habuisse illud in toto orbe. Et hoc confirmant illa testimonia, quibus docetur Christum fuisse pauperem, perfecta enim Evangelica paupertas consistit in abdicatione rerum temporalium, non tam quoad usum, quam quoad potestatem & dominium.

Dices, hæc ad summum procedere de tempore vitæ mortalis Christi Domini. Respondetur ita esse, & proposito sufficere, nam in vita immortalis, & gloriosa caducum, & temporale dominium, nec necessarium est, nec illi statui accommodatum, unde multo certius est etiam post resurrectionem non assumpsisse Christum hujusmodi dominium. Et confirmatur, quia hoc dominium originem habet ab hominibus: Christus autem nullo humano titulo illud habuit, ut per se est manifestum, iis adjunctis quæ sect. præcedent. dicta sunt. Dices habuisse

Dominii  
quæ  
plex.

Obje  
Respo.



huisse hoc dominium immediate infusum per accidens a Deo. Sed hoc sine ullo fundamento dicitur, ut bene probant argumenta prioris sententiæ, quia hoc dominium, neque ad perfectionem Christi pertinet, neque ad aliquem usum Christus illo indiguit, unde recte Ambros. lib. 7. in Lucam, explicans verba illa: *Quis me constituit iudicem inter vos? Merito, inquit, terrestria declinat, quæ propter cælestia venerat, & avaritæ tollendæ præbet exemplum.*

Dico secundo, habuisse Christum Dominum per se, & directe excellens quoddam dominium, & potestatem in res omnes creatas, & super omnes omnium hominum & angelorum actiones. Probatur primo ex Scriptura, & Patribus, Apocal. 1. dicitur Christus *Princeps Regum terræ*, & c. 19. *Habet in femore*, id est, in humanitate (ut glossa, & alii exponunt) *Rex Regum, & Dominus dominantium.* Actor. 10. *Annuncians pacem per Jesum Christum, hic est omnium dominus*, ubi manifeste sermo est de Christo ut homine. Unde ad Hebr. 2. de Christo exponitur illud Psalm. 8. *Omnia subiecisti sub pedibus ejus, constituisti eum super opera manuum tuarum*, & 1. ad Cor. 15. *Omnia subiecta sunt ei. præter eum qui subiecit ei omnia.* Denique Matth. ult. *Data est mihi omnis potestas in cælo, & in terra*, qui autem dixit omnem potestatem, nullam exclusit, quæ in hominem cadere posset. Faciunt etiam verba illa Joan. 18. *Regnum meum non est de hoc mundo*, ubi Christus, & se Regem fatetur, & negat se regnum habere ad modum Regum temporalium, & optime de hoc regno, & dominio intelligitur, & non solum de potestate, & regno spirituali: quia Christus eminenter habet omnem potestatem, & dominium, quod habent Reges temporales, & ideo non solum in ordine ad finem spiritualement, sed etiam directe, & per se est Rex omnium. Unde Cyril. lib. 12. in Joan. cap. 10. hæc verba exponens ait. *Regem se esse non negat: sed regni Cæsaris se non esse hostem ostendit, quia ejus Regnum terrenum non est, sed cæli, & terræ, cæterarumque rerum omnium.* Similia habet cap. 12. & Chrysost. hom. 82. in Joan. & Augustinus tract. 14. inquit. *Erat quidem Rex, non talis, qualis ab hominibus fit, sed talis, ut homines Reges faceret:* tractat. 115. ponderat, non dixisse Christum: *Regnum meum non est hic, seu in hoc mundo, sed non est hinc, nec de hoc mundo.* Et in eodem sensu intelligi possunt verba Gregor. hom. 8. in Evangelia, ubi cum dixisset, Christum natum esse in via, ad indicandum quod in alieno nascebatur, subdit: *Alienum dico, non secundum potestatem, sed secundum naturam, nam secundum potestatem in propria venit*, ubi non solum distinguit divinitatem ab humanitate, sed in ipsa etiam humanitate distinguit naturalem conditionem a potestate, quam ratione unionis habuit, ratione cujus etiam dici potest venisse in propria. Nec videntur hæc omnia satis explicari de indirecta potestate, quæ non est facultas absolute & simpliciter, sed limitata ad spiritualement finem, & quasi sub conditione, si usus temporalium rerum ad illum finem fuerit necessarius: at vero in citatis testimoniis videtur tribui Christo absolutum dominium, & potestas simpliciter. Quod ita explicatur, & confirmatur, quia si Christus solum haberet potestatem indirectam, non posset Angelis, verbigratia, præcipere, nisi quod ad salutem hominum esset necessarium: neque posset uti re aliena ad faciendum miraculum, si commode posset alio modo id efficere: indignum autem videtur, hæc & similia de Christi potestate sentire. Confirmatur secundo, quia hæc potestas indirecta, non est distincta a potestate spirituali, quæ cum sacerdotio Christi conjuncta est, unde neque regnum mere spirituale, distinctum aliquid est ab ipso sacerdotio: at vero Scriptura tribuit Christo dignitatem sacerdotis, & regit tanquam distinctas, ut ex Augustino constat tract. 13. in Joan. Unde & Melchisedech, qui figura fuit Christi, utramque potestatem habuit directam, & distinctam. Ultima, & propria ratio est, quia Christus est Filius naturalis, & hæres universorum, ut ad Hebr. 1. dicitur: ergo ratione unionis debetur illi hoc dominium & potestas, quæ suo etiam modo, ratione redemptionis, & infiniti meriti deberi potuit, quia hæc potestas ad quandam exaltationem nominis Christi pertinet, ut in nomine Jesu omne genu flectatur, ad Philippen. 2.

Christus  
secundum  
nomen  
dominus.

posterius placet, quia, *in hoc mortuus est & resurrexit, ut vivorum, & mortuorum dominetur*, ad Rom. 14. Aliis verius videtur primum, quia ante resurrectionem novit Christus omnia dedisse sibi Patrem in manus, ut dicit Joan. 13. debebatur enim hæc dignitas Christo ratione unionis, & ideo statim data est, quia ejus carentia, neque ad nostram redemptionem necessaria erat, neque ad exemplum paupertatis: satis enim fuit privari dominio terreno, & externo splendore, & abundantia temporalium rerum, in his enim versatur humana paupertas: privari autem sua potestate excellentiæ, non fuit magis necessarium, quam privari potestate faciendi miracula, multum enim conjuncta est hæc potestas, cum illo excellenti dominio. Quamquam ergo fuerit egenus in usu, & humana proprietate temporalium rerum, ut dicitur 2. ad Corinth. 8. dives nihilominus fuit altiori genere potestatis: sicut etiam, licet exterius se subdiderit, & interdum tributum solverit, nihilominus liber fuit, & immunis ab omni tributo, & subjectione humana, hoc enim debitum illi erat ratione unionis, neque oportuit, aut decuit hac dignitate privari. Et hæc posterior sententia mihi magis placet, si in rigore loquamur de proprietate, & potestate excellentiæ, nam si loquamur de quodam absoluto & perfecto usu, & quasi de possessione hujus regni & domini, atque adeo de manifestatione ejus, hæc post resurrectionem plene ac perfecte obtenta sunt.

Respons.

Fundamenta prioris sententiæ probant primam conclusionem, & si contra hanc secundam fiant, ex dictis soluta sunt, præsertim primum & secundum. Circa tertium vero male quidam intulerunt, summum Pontificem habere dominium temporale totius orbis, quod nullum habet fundamentum, quia Christus non communicavit Vicario suo omnem potestatem excellentiæ. Alii intulerunt a primo instanti conceptionis Christi omnes Reges privatos fuisse suis regnis quoad dominium, & proprietatem: quod vanum est, & sine fundamento, quia hoc excellens dominium, cum sit superioris ordinis, non excludit privata dominio, sicut neque excludit dominium Dei. Unde recte Augustinus dicto tractat. 115. in Joan. dicit, Christum in illo verbo: *Regnum meum non est de hoc mundo*, tacite dixisse ad omnes Reges terræ, *Nolite timere, non impedio dominationem vestram*, & Ecclesia canit: *Non eripit mortalia, qui regna dat cælestia.* Aliqui denique hæretici intulerunt omnes Reges terræ esse Vicarios Christi hominis, & tam in spiritualibus, quam in temporalibus ejus vices habere. Hoc autem secundum hæreticum est, ut ex materia de fide constat: primum vero in rigore est falsum, ut satis ex dictis constat. Quocirca cum D. Thom. in dicto lib. de regim. Princip. dicit Augustum Cæsarem fuisse *Christi Vicarium* ab illius nativitate, exponendus est. Nam quia Christus erat superior Augusto, & potuisset illius imperium occupare, si vellet, ideo dici potest ex tunc imperasse ex quadam liberalitate Christi, & hoc sensu dicitur Vicarius ejus, non quia proprio dominio, & potestate privatus fuerit; sic Sancti interdum dicunt, divites esse *æconomos Dei*, largo quodam modo, qui dominium divitiarum non excludit.

Solutio  
ad argu.

## QUÆSTIO XXIII.

De adoptione Christi, in quatuor articulos divisa.

**D**einde considerandum est, an adoptio Christo conveniat. Et circa hoc queruntur quatuor.

Primo, utrum Deo conveniat adoptare filios.

Secundo, utrum hoc conveniat soli Deo Patri.

Tertio, utrum sit proprium hominum adoptari in filios Dei.

Quarto, utrum Christus possit dici filius adoptivus.

**I**n tribus primis articulis hujus questionis disputat D. Thom. in communi, & generatim de divina adoptione, ut inde in quarto articulo concludat, quomodo de adoptione Christi sentiendum sit. Et ideo tres primos articulos breviter expediemus, res enim, quæ in illis tractari possunt, ad materiam de gratia & justificatione spectant, circa quartum vero articulum longiore disputatione instituemus.

Dubium.

Quæres, an habuerit Christus hoc dominium in vita mortali, vel solum post resurrectionem. Quibusdam hoc



Utrum Deo conveniat filios adoptare.

**A**D primum sic proceditur. Videtur, quod Deo non conveniat filios adoptare. Nullus enim adoptat nisi extraneam personam in filium, secundum quod Jurista dicunt. Sed nulla persona est extranea a Deo, qui est omnium creator. Ergo videtur, quod Deo non conveniat adoptare.

2. Præterea. Adoptio videtur esse introducta in defectum filiationis naturalis. Sed in Deo invenitur naturalis filiationis: ut in prima Parte habitum est\*. Ergo non convenit Deo filios adoptare.

3. Præterea. Ad hoc aliquis adoptatur, ut in hereditate adoptantis succedat. Sed in hereditate Dei non videtur aliquis posse succedere: quia ipse nunquam decedet. Ergo Deo non convenit adoptare.

Sed contra est, quod dicitur Ephes. 1. Prædestinavit nos in adoptionem filiorum Dei. Sed prædestinatio Dei non est irrita. Ergo Deus aliquos sibi adoptat in filios.

b Respondeo dicendum, quod aliquis homo adoptat alium sibi in filium, in quantum ex sua bonitate admittit eum ad participationem sue hereditatis. Deus autem est infinite bonitatis, ex qua contingit, quod ad participationem bonorum suorum suas creaturas admittit, & præcipue rationales creaturas: quæ in quantum sunt ad imaginem Dei factæ, sunt capaces beatitudinis divine. Quæ quidem consistit in fruitione Dei: per quam etiam ipse Deus beatus est, & per se ipsum dives, in quantum scilicet se ipso fruatur. Hoc autem dicitur hereditas alicujus, ex quo ipse est dives. Et ideo in quantum Deus ex sua bonitate admittit homines ad beatitudinis hereditatem, dicitur eos adoptare. Hoc autem plus habet adoptio divina, quam humana: quia Deus hominem quem adoptat, idoneum facit per gratiæ munus ad hereditatem cælestem percipiendam. Homo autem non facit idoneum eum, quem adoptat, sed potius eum jam idoneum eligit adoptando.

c Ad primum ergo dicendum, quod homo in sua natura consideratus, non est extraneus a Deo, quantum ad bona naturalia, quæ recipit, est tamen extraneus, quantum ad bona gratiæ & gloriæ, & secundum hoc adoptatur.

Ad secundum dicendum, quod hominis est operari ad supplendam suam indigentiam: non autem Dei, cui convenit operari ad communicandam suæ perfectionis abundantiam. Et ideo sicut per actum creationis communicatur bonitas divina omnibus creaturis, secundum quandam similitudinem, ita per actum adoptionis communicatur similitudo naturalis filiationis hominibus, secundum illud Rom. 8. Quos præse. vii conformes fieri imaginis Filii sui.

Ad tertium dicendum, quod bona spiritalia possunt simul a pluribus possideri, non autem bona corporalia. Et ideo hereditatem corporalem nullus potest percipere, nisi succedens decedenti: hereditatem autem spirituales simul omnes ex integro accipiunt sine detrimento Patris semper viventis. Quamvis posset dici, quod Deus decedit, secundum quod est in nobis per fidem, & incipiet in nobis esse per speciem: sicut glossa dicit Rom. 8. super illud. Si filii, & hæredes.

## COMENTARIUS.

**A**Doptionis nomen, ut D. Thomas hic insinuat, & clarius dixit in 3. dist. 10. q. 2. a. 1. q. 1. & Durand. ibi q. 2. ab humanis ad divina translatus est, quia licet res hoc nomine significata in adoptione divina perfectiori, & excellentiori modo inveniat, tamen locutio ipsa prius in humana adoptione usurpata est. Potest autem adoptio humana ita describi, ex D. Tho. hic, ut sit gratuita assumptio, seu acceptatio ad hereditatem, personæ extraneæ, seu ex vi suæ originis non habentis jus ad ipsam. Unde variæ conditiones ad hanc adoptionem requisitæ assignari solent a jurisperitis. Prima est, ut persona, quæ adoptatur, extranea sit, id est, non habens a natura illum modum juris, seu conditionis ad quam adoptatur; si enim adoptatur in filium, necesse est, ut non sit filius naturalis, vel si adoptatur in nepotem, ut illo gradu careat. Interdum vero potest nepos adoptari in filium, & tunc quodammodo dicitur non esse persona extranea quæ adoptatur, ut in §. Sed hodie, Instituta de adoptionibus: formaliter tamen in sensu dicto semper est persona extranea, quæ adoptatur, id est, carens gradu conjunctionis.

Suarez. Tom. XVI.

nis, ad quem adoptatur, quia filiatio adoptiva naturali opponitur, ut constat ex lege 1. ff. de adoptionibus.

Secunda conditio est, ut jus filii, seu assumptio ad hereditatem gratis fiat, nam si detur titulo oneroso, non erit adoptio, sed venditio, vel alius similis contractus. Et has duas condiciones posuit Concil. Francofordienfe, col. 4. ubi sic inquit: *Adoptivus non dicitur, nisi qui est alienus, & adoptio non datur ex debito, sed ex indulgentia.*

Tertia conditio est, ut is, qui adoptatur, consentiat, & velit adoptari, unde & quedam adoptionis species, *adrogatio*, dicitur, quia is, qui adoptat, interrogatur, an velit assumere alium in filium, & is, qui adoptatur, an id fieri patiat, ut habetur in lege 2. ff. de adoptionibus: dicitur autem hæc adrogatio, quando is, qui adoptatur, est sui juris. Nam si sit sub patria potestate, tunc retinet nomen adoptionis, & requirit consensum utriusque, scilicet adoptandi, & ejus sub cujus potestate est, ut colligitur ex lege, in adoptionibus ff. eodem tit. Quod si nondum ratione utatur adoptandus, sufficit consensus parentis, vel tutoris in cujus potestate est, ex lege. Etiam infantem, ff. eodem, & lege, Impuberem, C. eodem tit. Et ratio hujus conditionis est, quia hæc adoptio est veluti quidam humanus contractus, & ideo oportet ut voluntarius sit. Alię conditiones, quæ in humana adoptione interveniunt, accidentariæ sunt ad rationem adoptionis, ut circa solutiones argumentorum commodius explicabimus.

b Ex hac ergo communi ratione seu definitione adoptionis recte colligit D. Th. adoptare aliquos sibi in filios, recte Deo attribui, quia ex bonitate sua aliquas creaturas ad participationem suæ æternæ beatitudinis assumit: hæc enim supernaturalis beatitudo merito *hereditas Dei* dicitur, quia sicut in hominibus divitiæ alicujus dicuntur hereditas ejus, ita beatitudo, qua Deus dives est, dici potest hereditas ipsius. Respectu autem hujus hereditatis persona creata extranea reputatur, quia ex vi suæ naturæ, & originis nullum jus ad illam habet, quia nullo modo est naturæ debita. Ad hanc etiam hereditatem nullus, qui ratione uti possit, assumitur, nisi eo consentiente, & volente, omnium enim adultorum adoptio, per propriam eorum dispositionem, & consensum fit: in infantibus vero Deus, qui eorum est auctor & pater, eorum consensum supplet, vel certe per Ecclesiam consentiunt, vel per caput suum, qui est Christus. Merito ergo gratuita acceptatio, qua Deus admittit personam creatam ad hanc hereditatem, adoptio vocatur, in illa enim perfecte inveniuntur tres conditiones supra positæ, ut ex dictis satis manifestum est. Unde etiam intelligitur, hanc divinam adoptionem non metaphorice tantum (ut quidam existimarunt) sed vere, ac proprie adoptionem esse, ita enim Scriptura loquitur ad Rom. 8. ad Galat. 4. & ad Ephes. 1. & potest cum proprietate intelligi. Et ratio facta id ostendit, quia propriæ, & quasi essentielles conditiones adoptionis in hac divina inveniuntur, & non nullæ aliæ, in quibus differt adoptio divina ab humana, non pertinent ad veritatem, & proprietatem adoptionis ut sic, sed constituunt fortasse diversas species adoptionis, inter quas perfectior est divina, quam humana, ut jam explicabo. Nec D. Thom. aut Durand. in 3. dist. 10. contrarium docent, illi enim nunquam dixerunt, adoptionem divinam tantum metaphorice esse adoptionem, ut quidam illis attribuunt: sed dixerunt (ut in principio notavimus) nomen adoptionis translatus esse ab humanis ad divina, intelligi autem debet translatus non per metaphoram, sed propter similitudinem, & univocam convenientiam.

Unde ulterius colligitur, hanc Dei adoptionem nihil aliud esse, quam ipsammet rationalis creaturæ justificationem, ut docet Augustinus epist. 120. c. 4. & lib. 3. contra Faust. c. 3. est enim justificatio, & voluntaria regeneratio in spem vivam, ut sumitur ex 1. Petr. 1. Jacob. 1. & ad Tit. 3. ideo Joan. 1. iustificati dicuntur, *nati ex Deo*, & omnibus dicitur *Data potestas filios Dei fieri*, nimirum per fidem vivam, sic enim ait Joan. *Dedit eis potestatem filios Dei fieri, iis qui credunt in nomine ejus*, ita scilicet, ut consequantur justificationem. Unde ad Rom. 8. ait Paul. *Accepistis spiritum adoptionis filiarum*, & ad Ephes. 1. *Prædestinavit nos in adoptionem filiorum per Jesum Christum*, quam adoptionem explicans subdit: *Gratificavit nos in dilecto filio suo*. Et ratio est, quia homo iustificatus habet jus ad divinam hereditatem; est

Qq

ergo

Adoptio  
quid sit.Adoptio-  
nis natu-  
ra, & c. n-  
ditiones.Glos. ex  
din. ibid.136.  
3. d. 10. q. 2.  
2. l. q. 1. &  
4. contra  
2. 17. 80.1. p. q. 31.  
2. 11.



ergo filius, non naturalis; ergo adoptivus, quam adoptionem in ipsa justificatione suscepit.

Differen-  
tia inter  
adoptio-  
nem divi-  
nam, &  
humanā.

Et hinc intelligitur prima differentia, quam D. Thomas hic posuit inter divinam adoptionem, & humanam, nam humana fit per solam extrinsecam acceptationem, & per eam non confertur aliquod esse internum, in quo fundetur jus, vel proportio ad hæreditatem: at vero in divina adoptione filius accipit inhærentem iustitiam, & gratiam, per quam fit particeps divinæ naturæ 1. Pet. 3. & ideo Joan. 1. Cano. c. 3. inquit. *Videte, qualem charitatem dedit nobis Deus, ut filii Dei nominemur, & simus.* Et hinc sequitur secunda differentia, quia adoptio humana formaliter fit per acceptationem, qua confertur jus ad hæreditatem, quia ante hoc jus nullum esse communicatur ei, qui adoptatur, neque aliquod aliud bonum proprium filii. At vero adoptio divina formaliter non fit per extrinsecam acceptationem ad gloriam, sed per internam infusionem illius doni, ratione cujus illa acceptatio debita est. Imo, etiam si præter extrinsecam acceptationem distinguamus in illo dono esse divinum, quod formaliter confertur jus ad gloriam, quod in eo fundatur, non per hoc jus, sed per gratiam ut dat illud esse, efficiuntur filii quoad proprium ejus fundamentum & quoad substantiam filii, ut sic dicam, quæ consistit in hoc, quod quis habet a patre esse illi simile; quod in hac filiatione datur per gratiam, quatenus est divinitas quædam per participationem. Atque hinc colligi potest tertia differentia, quia humana adoptio nullam habet rationem generationis physicæ ac realis, quia fit per solam extrinsecam acceptationem: at divina adoptio quandam rationem generationis & nativitatis participat, ut ex Sacre scripturæ testimoniis paulo ante citatis constat, quia in ea confertur re ipsa intrinsecum quoddam esse, quod tamen quia non est ipsum esse naturale Dei, non facit filios Dei naturales, tamen quia est per participationem gratuitam divinæ naturæ, ad quam consequitur jus ad hæreditatem, facit filios adoptivos. Ex his denique oritur quartum discrimen, quia ex adoptione humana non resultat relatio realis, sed rationis tantum: quia in sola extrinseca denominatione fundatur, ex adoptione autem divina resultat relatio filiationis realis fundata in reali, & intrinseca justificatione, quæ est vera generatio, in similitudinem divinæ naturæ, imperfectam quidem & accidentalem, realem tamen. Quæ duæ differentiæ optime ostendunt, hanc adoptionem esse perfectioris ordinis, quamvis propriam rationem adoptionis non transcendat, ut latius disputat. seq. sect. 4. dicitur.

c In solutionibus argumentorum ponit D. Thomas alias tres differentias inter has adoptiones. Prima est in solutione ad primum, quia in adoptione humana persona, quæ adoptatur, non procedit in suo esse reali ab adoptante, at vero in divina necesse est, ut saltem per creationem persona ipsa, quæ adoptatur, a Deo procedat, & pendeat. Quæ differentia accidentaria est ad rationem adoptionis, per se enim & formaliter satis est, quod ratione creationis non habeat homo jus ad supernaturalem hæreditatem, ad quam postea adoptatur: hac enim ratione respectu illius censetur persona extranea, sicut nepos aliquo modo procedit ab avo saltem per accidens, & mediate, tamen quia ratione hujus processionis non habet proprium jus filii, potest ad illud adoptari.

d Secunda habetur in solutione ad secundum, quia inter homines adoptio introducta est ex defectu, vel indigentia naturalis filii: at vero divina adoptio, non propter indigentiam, sed ex infinita perfectione, & bonitate introducta est, ut similitudo filii naturalis filiis adoptivis communicetur, & in hunc modum explicat D. Th. illud ad Romanos 8. *Quos præscivit, & prædestinavit conformes fieri imagini Filii sui*, de quo testimonio plura a nobis in superioribus dicta sunt.

Hic vero annotare libet quandam conditionem, quam aliqui ad adoptionem divinam requirunt, nimirum quod in natura divina sit aliquis filius naturalis, tum ut eum adoptivi filii imitentur, tum etiam quia in humana adoptione exigat solet, quod adoptans sit ex se aptus ad generandum, quia adoptio naturam imitatur, ut ait textus in §. Majorem. Institut. de adoptionibus. Ex quo principio ibi definitur, adoptantem debere esse majorem natu adoptato, ita ut plena pubertate, id est, 14. annis, vel, ut alia lectio habet, octodecim, illum precedat. Et ex eo-

dem principio dicitur in §. Sed & illud, eodem titulo, *eos, qui ita nati sunt, ut generare non possint, scilicet castratos, adoptare non posse.* Hinc ergo in præsentia quidam meditantur, Deum adoptare posse, quia verum & naturalem filium generare potuit, quem imitantur adoptati, juxta illud ad Romanos 8. *Quos prædestinavit conformes fieri imagini filii ejus.* At subinde ajunt, si Deus generare ad intra non posset, fore ut nec adoptare filios potuisset. Quod si objicias, sequi, nec Verbum, nec Spiritum sanctum posse adoptare; quia nec generare possunt, respondebunt negando illationem, quia in eis eadem est potentia, quæ est in Patre, licet, prout est in eis, non possit in actum generationis prodire: itaque satis esse dicitur, quod in Deo possit esse generatio. Et confirmari hoc potest, quia angelus ideo non potest filios adoptare, quia nec potest generare.

Sed hic modus loquendi, licet sit probabilis, non est tamen necessarius; nam in primis in humana adoptione civiles leges, nec semper, neque simpliciter illam conditionem requirunt: nam in §. Sed & illud. Institut. de adoptionibus generalis regula statuitur, eos adoptare posse, qui generare non possunt: & si in aliquo casu oppositum statuitur, exceptio fit ex hac generali regula propter aliquam specialem rationem ad imperfectionem pertinentem, ut est in eo, qui est minoris ætatis, aut qui ex utero matris eunuchus est natus, quia in his videtur esse quædam improprio ex defectu proveniens. At vero, licet in Deo non esset generatio ad intra, esset in eo summa perfectio & proportio, quia respiceret homines non solum ut duratione anterior, sed etiam ut perfectissimus ad operandum, & ut principium eorum, potens eos ad superiorem participationem suorum bonorum acceptare, & speciali affectu naturam suam, & beatitudinem communicare illis, in quo ratio divinæ adoptionis consistit. Nam, ut talis adoptio imitaretur naturam, satis esset, quod talis filiatio imitaretur filiationem naturalem secundum specificam rationem suam, etiam si non imitaretur illam in divina natura. Unde angelus non ea solum ratione non potest filios adoptare, quia generare non potest, sed etiam quia non potest alicui conferre suæ naturæ participationem, aut propriorum bonorum suorum conferre communicationem: si enim hoc posset, revera etiam dici posset adoptare imitando non filium suum naturalem, sed simpliciter & absolute naturalem filium secundum specificam rationem consideratum. Denique non est necesse, ut divina adoptio sit in omnibus similis humanæ adoptioni. Nam etiam homo non potest adoptare alium, nisi sit illi similis in specifica natura, quia nec inferiora animalia adoptionis capacia sunt, nec inferior natura potest superiorem adoptare. Deus autem ut aliquem adoptet, solum requirit in eo, ut in gradu intellectuali secum conveniat, quia nec inferiorem creaturam adoptare potest, quia non est capax hæreditatis ejus, nec participationis divinæ naturæ, eo quod non sit ad imaginem ejus. Nec personam sibi æqualem adoptare potest, quia persona extranea esse non potest. Illa ergo ratio æqualitatis, vel similitudinis specificæ non est per se in adoptione necessaria, licet in hominibus inveniatur propter specialem eorum conditionem, vel imperfectionem.

e Tertia differentia in solutione ad tertium est, quia adoptio humana ad hoc ordinatur, ut filius succedat patri in hæreditate, de ratione autem successionis est, ut altero decedente, seu deferente hæreditatem, alius accedat, seu acquirat illam: at vero adoptio divina non ordinatur ad successionem, sed ad communicationem, vel participationem ejusdem hæreditatis: *Est enim hæc spiritualis hæreditas*, inquit Augustinus tract. 2. in Joan. *quæ non fit angusta, si multi eam possederint: illi ipsi certe illo ipso possidente, fiunt hæreditas ipsius, & ille vicissim fit hæreditas ipsorum.* Neque vero hoc repugnat cum veritate, & proprietate adoptionis, sed indicat potius infinitum esse illud bonum, ad quod homines adoptantur.

## ARTICULUS II.

*Utrum adoptare conveniat toti Trinitati.*

**A**d secundū sic proceditur. Videtur, quod adoptare non conveniat toti Trinitati. Adoptatio enim dicitur in divinis

137.  
3. d. 10. q. 2.  
art. 1. q. 2.  
& 3.



vinis ad similitudinem rerum humanarum. Sed in rebus humanis soli illi convenit adoptare, qui potest filios generare: quod in divinis convenit soli Patri. Ergo in divinis solus Pater potest adoptare.

2 Præterea. Homines per adoptionem efficiuntur fratres Christi: secundum illud Rom. 8. Ut sit ipse primogenitus in multis fratribus. Fratres autem dicuntur, qui sunt filii unius patris. Unde & Dominus dicit Joannis vigesimo. Ascendo ad Patrem meum, & Patrem vestrum, Ergo solus Pater Christi habet filios adoptivos.

3 Præterea. Galat. quarto dicitur. Misit Deus Filium suum, ut adoptionem filiorum Dei reciperemus: quoniam autem estis filii Dei, misit Deus spiritum filii sui in corda vestra, clamantem, Abba, pater. Ergo ejus est adoptare, cujus est Filius, & Spiritum sanctum habere. Sed hoc est solius personæ Patris. Ergo adoptare convenit soli personæ Patris.

Sed contra. Ejus est adoptare nos in filios, quem nos patrem possumus nominare, unde dicitur Rom. 8. Accepistis Spiritum adoptionis filiorum, in quo clamamus, Abba, pater. Sed cum Deo dicimus, Pater noster, hoc pertinet ad totam Trinitatem, sicut & cætera nomina, quæ dicuntur de Deo relative ad creaturam, ut in Prima parte habitum est\*. Ergo adoptare convenit toti Trinitati.

Respondeo dicendum, quod hæc est differentia inter filium Dei adoptivum & naturalem, quod filius Dei naturalis est genitus, non factus: filius autem adoptivus est factus, secundum illud Joan. 1. Dedit eis potestatem filios Dei fieri. Dicitur tamen quandoque filius adoptivus esse genitus propter spirituales regenerationem: quæ est gratuita, non naturalis. unde dicitur Jacob. 1. Voluntarie genuit nos verbo veritatis. Quamvis autem generare in divinis sit proprium personæ Patris, tamen facere quemcumque effectum in creaturis, est commune toti Trinitati propter unitatem naturæ: quia ubi est una natura, oportet quod sit una virtus & una operatio. Unde Dominus dicit Joan. 5. Quacumque Pater facit, hæc & Filius similiter facit. Et ideo adoptare homines in filios Dei, convenit toti Trinitati.

Ad primum ergo dicendum, quod omnes personæ humana non sunt unius naturæ secundum numerum, ut oporteat unam esse omnium operationem tantum & unum effectum: sicut accidit in divinis. Et ideo quantum ad hoc, non potuit attendi similitudo utrobique.

Ad secundum dicendum, quod nos per adoptionem efficiuntur fratres Christi, quasi eundem patrem habentes cum ipso: qui tamen alio modo est Pater Christi, & alio modo est pater noster. Unde signanter Dominus Joannis 20. seorsum dixit, Patrem meum: & seorsum dixit, Patrem vestrum: est enim Pater Christi, naturaliter generando: quod est proprium sibi. Est autem Pater noster voluntarie aliquid faciendo, quod est commune sibi & Filio & Spiritui sancto. Et ideo Christus non est filius totius Trinitatis, sicut nos.

Ad tertium dicendum, quod sicut dictum est\*, filiatione adoptiva est quedam similitudo filiationis eterne: sicut omnia, quæ in tempore facta sunt, similitudines quedam sunt eorum, quæ ab eterno fuerunt. Assimilatur autem homo splendori eterni filii, per gratiam claritatem, quæ attribuitur Spiritui sancto. Et ideo adoptatio licet sit communis toti Trinitati, appropriatur tamen Patri ut auctori, Filio ut exemplari, Spiritui sancto ut imprimenti in nobis hujus similitudinem exemplaris.

#### COMMENTARIUS.

Hic articulus non indiget expositione, constat enim hanc adoptionem esse opus Dei ad extra, & ideo commune esse omnibus personis divinis, ut bene D. Th. docet, quia omnia opera ad extra indivisa sunt. Neque in hoc occurrit nova difficultas. Solutiones vero argumentorum D. Thomæ notandæ valde sunt. In prima enim ponit aliam differentiam inter adoptionem divinam, & humanam, quod in humana solus ille potest adoptare, qui potest generare, at vero in divina, adoptant Filius, & Spiritus sanctus, etiam si generare non possint. Hæc tamen differentia videri potest non habere multum fundamentum in jure civili, nam secundum illud, etiam adoptare possunt, qui generare non possunt, §. Sed & illud, Instituta de adoptionibus, lege 2. ff. eodem, quia vero hæc impotentia generandi in personis humanis est per accidens, & non ex propria conditione ipsius naturæ:

Suarez Tom. XVI.

in divinis autem per se, & ex propria perfectione ipsius naturæ provenit, ut sola prima persona possit generare: ideo D. Th. etiam in hoc voluit differentiam assignare inter divinas, & humanas personas. Nam in omnibus divinis personis est una individua natura infinita, quæ per unam tantum generationem communicari potest, & ideo in illa tantum esse potest unus filius naturalis: at vero in hominibus multiplicantur naturæ cum personis, & ideo per se loquendo quælibet posset generare. Reliqua in litera clara sunt.

#### ARTICULUS III.

Utrum adoptari sit proprium rationalis creature.

Ad tertium sic proceditur. Videtur, quod adoptari non sit proprium rationalis creature. Non enim dicitur Deus, pater creaturæ rationalis, nisi per adoptionem. Dicitur autem pater creaturæ etiam irrationalis: secundum illud Job. 38. Quis est pluvie pater, & stillas roris quis genuit? Ergo adoptari non est proprium rationalis creature.

2 Præterea, per adoptionem dicuntur aliqui filii Dei. Sed esse filios Dei, in Scriptura proprie videtur attribui Angelis, secundum illud Job. 1. Quodam autem die cum assisterent Filii Dei coram Domino. Ergo non est proprium creaturæ rationalis adoptari.

3 Præterea, quod est proprium alicui naturæ, convenit omnibus habentibus naturam illam: sicut risibile convenit omnibus hominibus. Sed adoptari non convenit omni rationali naturæ. Ergo adoptari non est proprium rationalis creature.

Sed contra est, quod filii adoptati sunt heredes Dei, ut patet Rom. 8. Sed talis hereditas convenit soli rationali creaturæ. Ergo proprium est creaturæ rationalis adoptari.

b Respondeo dicendum, quod sicut dictum est\*, filiatione adoptionis est quedam similitudo filiationis naturalis. Filius autem Dei naturaliter procedit a Patre, ut verbum intellectuale, unum cum ipso Patre existens. Huic ergo Verbo tripliciter potest aliquid assimilare. Uno quidem modo secundum rationem formæ, non autem secundum intellectualitytatem ipsius, sicut forma domus exterius constituta assimilatur verbo mentali artificis, secundum speciem formæ, non autem secundum intelligibilitatem, quia forma domus in materia non est intelligibilis, sicut erat in mente artificis. Et hoc modo Verbo eterno assimilatur quælibet creatura, cum sit facta per Verbum. Secundo modo assimilatur creatura Verbo, non solum quantum ad rationem formæ, sed etiam quantum ad intellectualitytatem ipsius: sicut etiam scientia, quæ fit in mente discipuli, assimilatur verbo, quod est in mente Magistri. Et hoc modo creatura rationalis etiam secundum suam naturam assimilatur Verbo Dei. Tercio modo assimilatur creatura Verbo Dei eterno, secundum unitatem, quam habet ad Patrem, quod quidem fit per gratiam & charitatem: unde Dominus orat, Joan. 17. Sint unum in nobis, sicut & nos unum sumus. Et talis assimilatio perficit rationem adoptionis, quia sic assimilatis debetur hereditas eterna. Unde manifestum est, quod adoptari convenit soli creaturæ rationali, non tamen omni, sed solum habenti charitatem, quæ est diffusa in cordibus nostris, per Spiritum sanctum, ut dicitur Roman. 5. Et ideo Roman. 8. Spiritus sanctus dicitur spiritus adoptionis filiorum.

Ad primum ergo dicendum, quod Deus dicitur pater creaturæ irrationalis, non proprie per adoptionem, sed per creationem, secundum primam participationem similitudinis.

c Ad secundum dicendum, quod Angeli dicuntur filii Dei, filiatione adoptionis: non quia ipsis primo conveniat, sed quia ipsi primo adoptionem filiorum receperunt.

Ad tertium dicendum, quod adoptio non est proprium consequens naturam, sed consequens gratiam, cujus natura rationalis est capax. Et ideo non oportet, quod omni rationali creaturæ conveniat, sed quod omnis rationalis creatura sit capax adoptionis.

#### COMMENTARIUS.

Titulus hujus articuli potest de capacitate, & de actu intelligi, & duo in se includit, scilicet, an omnis rationalis creatura sit capax adoptionis, & an sola illa, & non alia hanc habeat capacitatem. Et hæc omnia comprehendit D. Th. in titulo, & brevissime expedit in dis-



scursu articuli. Sub rationali autem creatura comprehendit etiam intellectualem, ut constet ex argumento 2. cum solutione.

*b* Dicit ergo primo, creaturam irrationalem non esse capacem adoptionis, quod est clarum, & certum, quia sola rationalis est capax divinæ beatitudinis, & fruitionis, ut ex 1. par. q. 12. & ex 1. 2. q. 3. constat. Ex quo infert in solut. ad primum, quando creatura insensibilis vocatur in Scriptura interdum nomine filii, ut Job. 38. *Quis est pluvie pater?* locutionem esse metaphoricam eo modo, quo creatio dici potest generatio: & creator, seu auctor alicujus rei, lata significatione dici potest genitor, quo genere locutionis, etiam peccatores possunt interdum vocari filii ratione creationis, ut notavit Irenæus lib. 4. contra hæres. c. 79. ita exponens locum Isai. 62. *Si biberint filii alieni, &c.* unde Deuteroni. 32. *Hæcine reddis Domino populo stulte & insipiens, nonne ipse est Pater tuus, qui possedit te, & fecit, & creavit te?* Considerandum vero est, hanc qualemcumque imperfectam, & metaphoricam filiationem, quæ est ratione creationis, non esse adoptivam, sed connaturalem, ratione illius qualiscumque similitudinis ad Deum, quam unaquæque res creata habet ratione creationis. Unde etiam fit, hoc ipsum genus filiationis tanto in rationali creatura esse perfectius, quanto ipsa ex vi suæ creationis similior est Deo in ipso gradu intellectuali, ut optime D. Thom. in articulo explicat.

Secundo dicit D. Thom. omnem creaturam rationalem de se capacem esse filiationis adoptivæ, quod intelligit de persona creata rationalis naturæ, & sic est manifesta conclusio, quia supernaturalis beatitudo, & gratia, nulli personæ creatæ connaturalis est, aut esse potest, ut ex 1. par. q. 12. supponitur. Per gratiam vero qualibet creatura hujusmodi potest ad participationem illius beatitudinis elevari, ut ex eodem loco manifestum est. Et eleganter tractat August. in lib. soliloqu. cap. 8.

Tertio dicit, non omnem creaturam rationalem sed eam tantum, quæ per gratiam & charitatem justificata est, actu habere hanc divinam adoptionem. Quod est etiam evidens ex dictis in art. 1. ostendimus enim, hanc adoptionem fieri per ipsam justificationem. Communiter ergo hæc omnibus qui justificantur, & non aliis.

*c* Ex qua resolutione infert D. Thom. in solut. ad 2. etiam angelos sanctos esse Filios Dei adoptivos, sic enim Job. 1. & 2. vocantur *filii Dei*, non sunt autem filii naturales, de hac enim filiatione loquens Paul. ad Heb. 1. dixit: *Cui ceteris angelorum dixit aliquando, Filius meus es tu?* ergo adoptivi. Et ratio facta etiam hoc convincit, quam optime indicavit Athanas. or. 2. cont. Arian. satis post medium dicens: *Quod secundum naturam ex aliquo gignitur, id vera ejus progenies censendum est, qui vero ex virtute, & gratia nomen solummodo filiorum obtinent, non natura, sed gratia jus liberorum habent.* Et post pauca sentit, hoc jus filiationis (quam adoptionem ibidem vocat) per Verbum Dei omnibus communicatum esse, tam qui in terris, quam qui in cælis filii Dei effecti, & nuncupati sunt. Nec refert, quod Chrysost. hom. 22. in Genes. dicat, in Scriptura nunquam angelos vocatos esse filios Dei, constat enim ex citatis testimoniis Job, ita interdum esse appellatos: & quamvis in Scriptura nunquam hoc nomen illis esset tributum, non referret, quia satis esset rem ipsam in Scriptura doceri: docet autem Scriptura homines esse futuros similes angelis, Mat. 22. & angelos videre faciem Dei, Matth. 18. atque adeo esse participes divinæ hereditatis, quod est esse filios adoptivos. Secundo sequitur, etiam Adam in statu innocentie fuisse filium Dei adoptivum, quia fuit creatus in gratia, & secundum præsentem iustitiam illius status habuit verum, & proprium jus ad æternam hereditatem. Nec refert, quod postea illud amiserit, quia adoptivus filius perdere potest filiationem, & jus per adoptionem acquisitum. Neque etiam refert, quod a principio gratiam simul cum natura suscepit, quia non est de ratione hujus divinæ adoptionis, ut is, qui adoptatur, prius aliquo tempore gratia caruerit, vel fuerit in peccato: ut videntur sensisse Magister sent. in 3. d. 10. & Alensis 3. p. q. 10. mem. 4. in fine, quia hoc accidentarium est. Nam licet Deus in eo instanti, in quo creatus fuit, illum justificet, concurrunt in illa justificatione omnes tres conditiones, quas supra diximus esse ad veram adoptionem requisitas. Et confirmatur, quia alius nec angeli essent filii adoptivi, neque beata Virgo.

Tertio sequitur, omnes homines, qui ante Christi adventum fuerunt iusti, & sancti, fuisse filios adoptivos Dei. Hoc aperte sequitur ex dicto principio, quia justificatio ipsa est adoptio; sed illi antiqui patres vere fuerunt iusti, & sancti, ut constat ex tota Scriptura veteri, & ex Paulo epist. ad Rom. c. 2. 3. & 4. ad Hebr. 11. & passim: fuerunt ergo vere, ac proprie filii adoptivi. Et ita loquitur Chrysost. homil. 22. in Genes. de Patribus, qui in lege naturæ extiterunt, exponens illa verba Genes. 6. *Videntes filii Dei filias hominum.* De Patribus autem veteris Testamenti est aperta sententia Pauli ad Gal. 4. ubi comparat Patres veteris Testamenti filio hæredi sub cura tutorum esistenti, & ad Rom. 9. *Quorum est, inquit, adoptio.* Et in Testamento tam veteri, quam novo sunt frequentissima testimonia, in quibus Judæi vocantur, *filii Dei, & filii regni*, ut notarunt Cyprian. in expositione orat. domin. & Athanas. dicta orat. 2. contra Arianos, & in serm. de Pass. & cruce Dom. fere in fine, & Cyril. lib. 1. in Joan. cap. 14. Chrysost. hom. 13. in Joan. & hom. 14. super ad Rom. & August. lib. 3. contra duas epist. Pelag. c. 4.

Dubitat autem Cyril. supra, si adoptio filiorum Dei communis fuit Patribus veteris Testamenti nobiscum, cur per Christi adventum dicatur specialiter *data potestas hominibus, ut possint filii Dei fieri*, Joan. 1. & ad Gal. 4. dicatur venisse Christus: *Ut adoptionem filiorum Dei reciperemus*: Et respondet, antiquorum Patrum adoptionem solum fuisse figuram, & typum veræ adoptionis nobis conferendam per Christum, & eandem doctrinam habet late Chrysost. in citatis locis. Est tamen accurate explicanda, nam sicut in illis Patribus fuit vera iustitia ejusdem speciei, & perfectionis essentialis cum nostra, ita etiam fuit vera adoptio, nec de hoc potest aliquis Catholicus dubitare. Tamen est differentia, quod illi Patres, ut bene August. notavit, ex vi legis veteris non habebant veram iustitiam, & adoptionem, & hoc modo illa legalis adoptio, & iustitia, erat figura veræ iustitiæ per Christum dandæ, quam etiam illi consequebantur per vivam fidem ejusdem Christi venturi, & ut sic magis ad legem novam, quam ad veterem pertinebant. Deinde illi antiqui iusti, licet vere essent filii, tamen non habebant statum filiorum, sed servorum, quia erant sub lege, & spiritu timoris ducebantur, unde erant tanquam parvulus: *Qui quamdiu sub actoribus, & tutoribus est, nihil differt a servo.* Denique pro illo statu carebant perfectione gloriæ, unde non poterant adire perfectam hereditatem, donec Christus veniret. Erat ergo illa adoptio vera, sed imperfecta: & hoc senserunt citati Patres, Cyril. & Chrysost. Et propter has etiam causas merito dicitur adoptio filiorum data per Christum, & ad hunc finem ipsum venisse: tum quia illam et adoptio antiquorum Patrum per ipsum data est: tum etiam quia per eum a iugo, & servitute legis liberati sumus: *Et statum filiorum accepimus, & spiritum adoptionis, in quo clamamus, Abba pater*: tum denique, quia per ipsum aperta est janua regni cælestis, in quo hæc adoptio erit plene consummata, & perfecta. Propter quod Paul. ad Rom. 8. dicit: *Nos adhuc gemere expectantes adoptionem filiorum Dei*, non quia nondum sumus filii, si iusti sumus, sed quia nondum consummatam perfectionem hujus adoptionis adepti sumus: sicut autem status adoptionis evangelicæ comparatur ad statum patris, ita suo modo status adoptionis, quæ erat sub priori testamento, expectabat, & desiderabat perfectionem, & statum legis novæ, quam omnem perfectionem Christus nobis attulit, & ideo merito venisse dicitur: *Ut per eum, adoptionem filiorum reciperemus.* Et ex his facile colligitur concordia omnium Scripturarum, & Sanctorum, qui de hac materia loquuntur. Neque occurrit nova difficultas, quæ nostra expositione indigeat. Nam licet hoc loco soleant plura argumenta multiplicari, nullum tamen occurrit, quod difficultatem ingerere possit. Quantum vero lex Evangelica superet in gratiæ perfectione legem veterem, non est in hoc loco tractandum, sed in 1. 2. q. 107. ubi de hac comparatione D. Thom. disp. Interim videri possunt Chrysost. & Aug. citatis locis, qui de eadem re copiose differunt.

Quarto sequitur ex dicto principio, omnes homines iustos, etiam si sint præcisi, esse filios Dei adoptivos: e contrario vero omnes, qui sunt in peccato mortali, vel originali, etiam si prædestinati sint, pro eo tempore, quo gratia carent, non esse filios adoptivos. Hoc etiam certum est,

Patres antiqui quomodo filii Dei adoptivi.

Adoptio filiorum Dei quomodo per Christum data.

Homines iusti omnes sunt filii Dei adoptivi.

Adam in statu innocentie filius Dei adoptivus.



est, & colligitur ex omnibus illis Scripturis, quibus supra probavimus, hanc adoptionem in ipsa justificatione conferri. Et ratione patet facile utraque pars, quia posito fundamento & termino resultat relatio in supposito capaci illius, sed licet homo sit præscitus, tamen quando iustificatur, veram iustitiam, & gratiam recipit, & efficitur vivum Christi membrum, quod est de fide certum, ut constet ex materia de gratia & de Ecclesia: ergo pro tunc est vere particeps divinæ naturæ, & acceptus ad gloriam, quia habet gratiam, quæ est pignus hereditatis æternæ: ergo resultat in illo relatio filiationis adoptivæ, quia habet in se fundamentum talis relationis, & terminus deesse non potest. Unde Paul. ad Rom. 8. generalem regulam statuit, *Quicumque spiritu Dei aguntur, hi sunt filii Dei*. Et confirmatur, nam cum filiatio adoptiva non sit intrinseca, & connaturalis, sed adventitia, non est de ratione illius, ut immutabilis sit; ergo, quamvis Deus præsciat hominē amissurum hanc filiationem, tamen quamdiu gratiam habet, vere est filius adoptivus. Sicut vere est homo sapiens, quamdiu sapientiam habet, licet Deus prævideat fore, ut illam amittat, & stultus efficiatur: & inter homines vere est filius adoptivus, qui re ipsa nunc acceptus est ad hereditatem, licet postea contingat propter suam demerita & hereditate, & adoptione privari. Et proportionali ratione demonstratur alia pars, quia non posito fundamento non resultat relatio; sed in homine carente gratia, quantumvis prædestinatus sit, non est fundamentum huius relationis. Quia (ut diximus) hæc relatio realis est, & fundamentum ejus est aliquid intrinsecum, & inhærens, & non sola prædestinatio, quæ est actus Dei extrinsece tantum denominans prædestinatum. Confirmatur, & explicatur a simili, nam licet homo habeat voluntatem & propositum adoptandi alium in filium, tamen quamdiu re ipsa illum non adoptavit, non potest dici filius adoptivus; ergo simili modo, &c.

Præsciti, quamdiu iusti filii Dei adoptivi.

Circa hoc autem graviter lapsus est Gabr. in 3. dist. 10. ubi negat præscitos esse filios adoptivos, quia non sunt per voluntatem Dei ad hæreditatem præordinati. Sed est plusquam falsa sententia, & in virtute damnata in Concilio Constantien. sess. 8. & 15. ubi contra Joan. Hus definit, præscitos posse aliquando esse iustos, & viva membra Ecclesiæ. Et e contrario prædestinatum, si in peccato mortali sit, pro tunc non esse filium Dei, sed filium iræ. Unde 1. Joan. 1. generaliter dicitur, *Qui facit peccatum, ex diabolo est*; & e contrario, *Omnis, qui natus est ex Deo, peccatum non facit, quonia semen ipsius in eo manet*; & infra subdit, *In hoc manifesti sunt filii Dei, & filii diaboli*.

Ad fundamentum autem Gabrielis respondetur reprobum non esse ordinatum ad hereditatem per voluntatem absolutam, qua illum Deus elegerit ad gloriam, sed per voluntatem antecedentem dandi gloriam: cum qua conjuncta fuit voluntas efficax dandi gratiam, & jus ad gloriam pro aliquo tempore: nam hoc est satis, ut pro illo sit filius, & hæres. Quia revera, si in eo statu decederet, re ipsa consequeretur hereditatem, juxta illud 2. ad Timot. 2. ubi postquam Paul. de prædestinatis, & reprobis, & de vasis aureis, & fictilibus locutus est, concludit. *Si quis ergo emundaverit se ab istis, erit vas in honorem sanctificationum, & utile Domino*; & ideo 1. ad Cor. 10. admonet iustum, dicens. *Qui stat, videat ne cadat*; & Apocal. 3. *Tene quod habes, ut nemo accipiat coronam tuam*. E contrario vero licet prædestinatus sit electus, & præordinatus ad gloriam per absolutam Dei voluntatem tamen non est vere filius, donec effectum illius voluntatis recipiat, saltem quoad iustificantem gratiam: sicut non dicitur esse creatura, donec actu creetur, quamvis ab æterno habuerit Deus voluntatem creandi illam.

## ARTICULUS IV.

*Utrum Christus, secundum quod homo, sit Filius Dei adoptivus.*

**A**D quartum sic procedit. Videtur, quod Christus, secundum quod homo, sit Filius Dei adoptivus. Dicit enim Hilarius\* de Christo loquens, Potestatis dignitas non admittitur, dum carnis humanitas adoptatur. Ergo Christus, secundum quod homo, est filius adoptivus.

2. Præterea. Augustinus\* dicit in lib. de prædestin. Sanctorum, quod ea gratia sit ab initio fidei homo qui-

Suarez Tom. XVI.

cumque Christianus, quia gratia homo ille ab initio suo factus est Christianus. Sed a. ii. homines sunt Christiani per gratiam adoptionis. Ergo & ille homo est Christianus per adoptionem, & ita videtur esse filius adoptivus.

3. Præterea. Christus secundum quod homo est servus. Sed dignius est esse filium adoptivum, quam servum. Ergo multo magis Christus, secundum quod homo, est filius adoptivus.

Sed contra est, quod Ambrosius\* dicit in libro de incarnatione. Adoptivum filium, non dicimus filium esse naturæ, sed eum dicimus naturæ esse filium, qui verus est filius. Christus autem est verus & naturalis Dei filius, secundum illud. 1. Joan. ult. Ut simus in vero filio ejus Jesu Christo; ergo secundum quod homo, non est filius adoptivus.

Respondeo dicendum, quod filiatio proprie convenit hypostasi, vel personæ, non autem naturæ: unde & in prima parte dictum est\*, quod filiatio est proprietas personalis. In Christo autem non est alia persona vel hypostasis, quam increata, cui convenit esse filium per naturam. Dictum est autem supra, quod filiatio adoptionis est participata similitudo filiationis naturalis. Non autem recipitur, aliquid dici participative, quod per se dicitur. Et ideo Christus, qui est Filius Dei naturalis, nullo modo potest dici filius adoptivus. Secundum autem illos, qui ponunt in Christo duas personas, vel duas hypostasies, seu duo supposita, nihil rationabiliter prohiberet Christum hominem dici filium adoptivum.

Ad primum ergo dicendum, quod sicut filiatio non proprie convenit naturæ, ita nec adoptio. Et ideo cum dicitur, quod carnis humanitas adoptatur, impropria est locutio. Et accipitur ibi adoptatio pro unione humane naturæ ad personam filii.

Ad secundum dicendum, quod similitudo illa August. est intelligenda, quantum ad principium: quia scilicet, sicut sine meritis quilibet homo habet, ut sit Christianus, ita iste homo sine meritis habuit, ut esset Christus. Est tamen differentia, quantum ad terminum: quia scilicet Christus per gratiam unionis est filius naturalis, alius autem per gratiam habitalem est filius adoptivus. Gratia autem habitualis in Christo non facit de non filio filium adoptivum, sed est quidam effectus filiationis naturalis in anima Christi, secundum illud Joan. 1. Vidimus gloriam ejus quasi Unigeniti a Patre, plenum gratiæ & veritatis.

Ad tertium dicendum, quod esse creaturam & etiam servitum, vel subiectio ad Deum, non solum respicit personam, sed etiam naturam: quod non potest dici de filiatione. Et ideo non est similis ratio.

## COMMENTARIUS.

**R**esponsio D. Thom. est, cum Christus sit filius Dei naturalis, nullo modo dici posse filium adoptivum. Quæ assertio, & ratio, qua D. Thom. illam probat, difficultatem habent, quæ prolixiori expositione indiget, quam sequenti disputatione trademus.

## DISPUTATIO XLIX.

In duas Sectiones distributa.

*De filiatione Christi in ordine ad Deum.*

**Q**UOD Christus Dominus, ut est Verbum Patris, sit filius Dei naturalis, ut articulum fidei supponimus, contra Arianos hæreticos. Unde sequitur contra Nestor. & alios, qui duas personas in Christo posuerunt, absolute, & simpliciter Christum hominem esse filium Dei naturalem per communicationem idiomatum, juxta illud 1. Joan. 5. *Scimus, quoniam Filius Dei venit, & dedit nobis sensum, ut cognoscamus verum Deum, & simus in vero Filio ejus, hic est verus Deus*. Et idem colligit Adrianus P. in Ep. ad Episcop. Hispan. & Concilio Francof. ex variis locis Scripturæ, in quibus Christus dicitur proprius filius Dei, Matth. 16. *Tu es Christus Filius Dei vivi*, Luc. 1. *Hic erit magnus, & filius Altissimi vocabitur*. Ideoque & quod nascetur ex te sanctum, vocabitur Filius Dei, & ad Rom. 8. *Proprio Filio suo non perevit*. Et ideo notant, Christum singulariter loqui de Patre suo Joan. 5. *Pater meus usque modo operatur*. Joan. 10. *Pater meus, quod dedit mihi, majus omnibus est*. Joan. 17. *Pater clarifica Filium tuum*. Joan. 20. *Ascendo ad Patrem meum, & Patrem vestrum*. Hac distinctione indicans, aliter esse Patrem suum, aliter nostrum. Unde etiam advertunt

Q 9 3

nun-

19 art. 2.  
ad 1.  
Lib. 2. de  
Trinitate.  
am. ca.  
15. ante  
med. 10. 7.

In lib. de  
invar.  
dom. sag.  
cap. 8. in  
fin. 10. 21.

1. P. 9. 33.  
art. 2. & 3.  
art. 6. ad  
in corpo.  
& laus  
10. citatis

135.  
Inf. 32.  
art. 3. q. 43  
art. 1. col.  
2 & 3. d.  
10. q. 2. ar.  
2. q. 3 & 4.  
cont. c. 4.  
& veri. q.



nunquam communi affectu dixisse nobiscum: *Pater noster*, sed, *Pater vester*, vel, *Pater meus*, ut patet Matth. 5. 6. & 7. Denique ad hoc probandum congerunt varia Sanctorum testimonia, quæ non oportet referre, quia suppositis, quæ de una persona Christi, & de communicatione idiomatum dicta sunt, nulla in hoc est difficultas. His ergo suppositis, duo in hac disputatione examinanda supersunt. Primum, an filiatio divina conveniat Christo homini, non solum per communicationem idiomatum, sed etiam formaliter, in quantum homo est: & deinde, qualis sit ista filiatio.

### SECTIO I.

*An Christus, in quantum homo, vere, ac proprie possit dici Filius Dei.*

**R**atio dubii est primo, quia Christus in quantum homo non est Deus, ut supra q. 16. dictum est: ergo in quantum homo non est filius Dei, quia filius Dei est Deus. Secundo, quia, si in quantum homo est Filius Dei: ergo in quantum homo habet relationem filiationis ad Deum; sed omnis relatio, quam Christus in quantum homo habet ad Deum, refertur ad totam Trinitatem: ergo Christus in quantum homo erit Filius totius Trinitatis, atque adeo Spiritus sancti, & Verbi, quod est absurdissimum. Minor probatur, quia Christus in quantum homo est effectus totius Trinitatis. Tercio, quia Christus in quantum homo non est filius Dei naturalis, quia non procedit a Patre per æternam generationem in quantum homo. Neque est filius adoptivus, quia non est persona extranea: ergo non est filius.

Propter hæc argumenta nonnulli existimant, licet certum, ac de fide sit, dicere Christum simpliciter, & absolute loquendo esse Filium Dei, tamen cum illa determinatione, *in quantum homo*, id non posse vere affirmari. Sed hæc sententia est sine dubio falsa. Unde ad explicandam veritatem advertendum est primum, filiationem ad Deum variis modis accipi posse; primo propriissime pro filiatione naturali, ac personali, qua constituitur secunda persona Trinitatis, certum autem est, Christum ut hominem non referri ad Deum hæc filiatione. Secundo, impropriissime, & valde analogice pro relatione creaturæ ad Deum, prout dicitur Deus pluriæ pater, & de hac etiam non agimus, quomodo enim Christus ut homo sit creatura, supra explicatum est. Tercio pro filiatione fundata in gratia habituali, quæ in puris hominibus est filiatio adoptiva. Quarto, pro filiatione, si quæ esse potest fundata in gratia unionis, & de his duabus hoc loco disputamus, & præsertim de ultima. Secundo est advertendum, illam particulam, *in quantum*, posse reduplicative & specificative teneri, hic autem non sumi priori modo: tum quia certum est humanitatem non esse rationem, & causam, ob quam Christus est Filius Dei, quia ex reduplicativa propositione licet universalem inferre: consequens autem falsum esse constat, quia non agimus de Filio Dei sub ea latissima, & metaphorica significatione, qua omnis creatura, & præsertim rationalis, potest dici filius Dei: sed agimus de altiori filiatione divina, quæ includit communicationem ejusdem beatitudinis, & divinæ hæreditatis. Sumitur ergo illud, *in quantum*, specificative, ut sensus sit, an Christus in humanitate subsistens habeat in humanitate ipsa habitudinem aliquam, seu relationem filii ad Deum.

Dico ergo primo. Christus in quantum homo est Filius Dei. Hæc conclusio sumitur ex D. Th. & auctoribus citandis conclusione sequenti. Et primo colligi potest ex Adriano P. & Concilio Francof. locis citatis: ex professo enim probare videntur Christum non solum secundum divinitatem, sed etiam secundum humanitatem esse Filium Dei naturalem; ergo multo magis docebunt esse Filium Dei. Unde Adrianus ponderans verbum illud ad Rom. 8. *Proprio filio suo non pepercit, sed pro nobis omnibus tradidit illum*, inquit: *Scimus, quia non est traditus secundum divinitatem, sed secundum id, quod verus homo erat, illum nimirum, qui traditus est, hominem ipsum, Apostolus proprium Dei filium protestatur*: & inferius exponens similiter illud Matth. 3. & 17. *Hic est filius meus dilectus*, inquit: *super quem descendit Spiritus sanctus in specie columbe, super Deum, & an super hominem?* & in-

tra; *Secundum id, quod homo est, Spiritum sanctum super se venientem suscepit: de eo ergo hominis filio, super quem Spiritus sanctus descendit, licet unus sit Dei & hominis Filius, vox Patris intonat, dicens. Hic est Filius meus dilectus, in quo mihi bene complacui. Si secundum divinitatem dixisset, nequaquam diceret, in quo mihi bene complacui, sed tantummodo, in quo mihi bene placui; dum ergo dicit complacui, totam simul Trinitatem comprehendit, quia in homine Christo tota complacuit Trinitas. Animadvertite, quia nihil vobis restat, ut secundum divinitatem tantummodo credatis dixisse Patrem, Hic est Filius meus dilectus, sed potius secundum humanitatem, super quem Spiritus sanctus dicitur descendisse. Alia multa similia habentur tam in illa epistola, quam in alia totius Concilii. Sed hæc omnia, ut verum fatear, non admodum cogunt, quia ut infra sect. 3. ostendamus, fere in omnibus similibus locutionibus hujus Concilii, illa particula, *in quantum homo*, seu, *secundum humanitatem*, non designat formaliter naturam humanam, seu personam humanam, ut sic, sed solum suppositum Verbi sub natura humana subsistens, ita ut sensus solum sit, illud ipsum suppositum in natura humana subsistens esse Filium Dei naturalem, & neque esse aliud suppositum illius humanæ naturæ, præter Filium Dei naturalem, neque suppositum illud desisse esse Filium Dei naturalem, propter unionem cum humana natura. Denique intendunt, hunc hominem Christum non denominatione tantum, sed vere, ac proprie esse Filium Dei naturalem, quo sensu dixit D. Thomas supra q. 16. a. 11. hanc locutionem esse veram: *Christus secundum quod homo est Deus*. Et eodem modo certum est, Christum in quantum hominem esse Filium Dei per essentiam & naturalem. Propter hanc ergo expositionem non sumitur ab his testimoniis argumentum efficax: potest tamen sumi probabile, vel quia alius sensus probabilis est, vel quia multa, saltem obiter, dicuntur in illo Concilio, quibus hoc ipsum indicatur, ut in sequentibus videbimus latius. Secundo probari potest conclusio, quia in Scriptura sacra, unio hypostatica dici solet generatio, & Christus ut homo dicitur singulariter a Deo genitus: ergo ut homo est speciali ratione Dei filius. Patet consequentia, quia generationi respondet filiatio in rebus viventibus, & perfectis. Antecedens patet ex illo: *Generationem ejus quis enarrabit?* Isaia 53. quod, licet aliis modis exponi possit, tamen de mysterio Incarnationis exponitur a multis Patribus, ut citavi supra disp. 3. sect. 1. Similiter facit illud Psalm. 2. *Dominus dixit ad me, Filius meus es tu, ego hodie genui te*. Quod licet alios etiam sensus habeat, tamen de hoc mysterio intelligitur ab Augst. lib. de Trinit. & unit. De c. 11. & aliis, quos sequent. tomo referam, disp. 45. sect. 1. Hinc Christus, ut homo loquens, Deum singulari modo appellat Patrem suum, Joan. 20. *Ascendo ad Patrem meum & Patrem vestrum*. Ubi licet de Patre proprie, id est, de prima persona Trinitatis loquatur, ut aperte exponit Adrianus dicta epist. & Cyrillus cum Concilio Alexand. ep. 10. & Athanasius lib. de Incarn. Christi, & Damascen. lib. 4. de fid. c. 8. nihilominus & Christus homo est, qui loquitur, & ut homo loqui videtur, ut verbum, *ascendo*, & relativum, *meum*, satis indicare videntur. Denique facit, quod sæpe Patres dicunt: *Christum ut Deum, esse unigenitum Dei, ut hominem vero esse primogenitum in multis fratribus*, ut dicitur ad Rom. 8. seu *primogenitum omnis creaturæ*, ut dicitur ad Coloss. 1. & exponitur in Concilio Sardicensi, in epist. ad omnes fideles, & Hierony. & Anselmo ibi, & optime a Cyril. Alexand. lib. de fide ad Theodosium, & lib. 1. de fide ad Regin. in ostensione, quod Christus sit Deus, ex Epist. ad Hebræos. Ubi de Christo ut homine interpretari videtur illud ad Hebr. 1. *Locutus est nobis in Filio, quem constituit heredem universorum*. Hoc enim proprie in Christum ut hominem convenire videtur, quia ut Deus non constituitur hæres, sed natura sua est Dominus omnium simul cum Patre. Et hinc tertio formatur ratio, quia Christus in quantum homo, seu in humanitate sua, est particeps divinæ beatitudinis, seu hæreditatis; ergo in ipsa humanitate habet jus ad hæreditatem illam; ergo secundum illam humanitatem est filius multo perfectior, & excellentior quam alii. Et confirmatur, quia homines justis vocantur filii Dei, & hæres; ergo multo magis Christus etiam ut homo, nam ipse est primarius*



rius hæres, alii vero ejus cohæredes, ut ad Rom. 8. dicitur.

Unde tandem confirmatur, quia si gratia accidentalis homines constituit filios, cur non magis gratia unionis constituet Christum ut hominem Dei filium? Ubi optime accommodantur illa ejusdem Domini verba, Joan. 10. *Si illos dixit Deus, ad quos sermo Dei factus est, quem Pater sanctificavit, & misit in mundum, vos dicitis, Quia blasphemias, quia dixi, Filius Dei sum.* Illa enim verba de sanctificatione Christi ut hominis, per unionem humanitatis ad verbum intelligunt Athanas. Chryf. Hilar. quos ibi refert Cardinalis Toletus. Ergo ratione illius sanctificationis vere dicitur filius, etiam ut homo.

Ex his infero, & dico secundo. Proprium fundamentum hujus relationis, seu filiationis divinæ, quæ convenit Christo ut homini, est ipsa gratia unionis. Hanc conclusionem colligo ex D. Thom. in hoc art. 4. ad secundum, & ex Magist. & Bonavent. & aliis Doctoribus 3. dist. 10. eique favent Adrianus Papa, & Concil. Francoford. locis citatis. Et ratione probatur ex iis, quæ supra q. 7. de sanctificatione Christi per gratiam unionis dicta sunt. Sicut enim ille homo, etiam in quantum homo, id est, in humanitate ipsa, est sanctus, & summe gratus Deo, ita ex vi ejusdem unionis habet jus proprium, & intrinsecum ad divinam hæreditatem in ipsa humanitate suscipiendam; ergo ex vi illius est etiam filius Dei. Et ex solutionibus argumentorum hæc veritas magis explicabitur, & confirmabitur.

**Obje. 3io.** Objici tamen potest, quia gratia unionis non potest esse fundamentum alicujus relationis realis, sed relatio filiationis divinæ oportet, ut sit realis, ut supra dictum est de filiatione adoptiva, & magis verum esse oportet de filiatione naturali. Respondetur, hanc relationem filiationis fundatam in gratia unionis non esse realem, sed rationis (ut argumentum recte probat) hæc enim filiatio, cum conveniat Christo homini, in quantum homo est, seu in humanitate ipsa, temporalis est, conveniens Christo, solum ex eo tempore, ex quo homo est, illius autem fundamentum est persona Verbi hypostatice unita humanitati, & formaliter illam sanctificans, & præbens huic homini, ut sic, jus ad divinam beatitudinem: & ideo non potest esse relatio realis, quia relatio immediate recipitur in proximo fundamento, at vero persona divina non est capax relationis realis, adventitiæ, & temporalis. Unde sicut esse sanctum, & gratum per gratiam unionis, non addit humanitati physicam entitatem præter ipsam personam divinam unitam sed morale dignitatem: ita etiam esse Filium Dei hoc modo, non addit realem entitatem, seu relationem præter gratiam unionis, sed explicat illam et dignitatem sub alia relatione rationis, quæ explicat jus, quod ille homo habet ex vi unionis ad æternam beatitudinem, ratione cujus vere dicitur esse debita, & connaturalis illi.

**Obje. 4io.** Sed inferet aliquis, hac ratione ipsam humanitatem posse dici filiam Dei, sicut potest dici grata, aut beata, aut sancta: & fortasse non deerunt, qui cum Scotò sentiant, hoc non esse inconveniens. Verius tamen negatur sequela, juxta communem modum loquendi Philosophorum, quem observare oportet, relatio enim filiationis non denominat naturam, sed suppositum, quod est ultimus generationis terminus: unde sicut operationes tribuuntur supposito, & non naturæ, quamvis per naturam, seu in natura conveniant supposito: ita etiam esse hæredem, seu habere jus ad hæreditatem, est propria denominatio suppositi, non naturæ, & idem est de relatione filii. Item quia per unionem non fuit producta humanitas, sed assumpta, productus autem fuit Christus ut homo: est autem filius, qui producit, non vero natura, quæ assumitur, seu unitur.

**Dubium.** Sed quæres tandem, an ratione gratiæ habitualis possit etiam dici Christus in quantum homo Filius Dei. Videtur enim ex dictis sequi, ita esse affirmandum, tum quia licet Christus fuerit sanctificatus per gratiam unionis: tamen etiam per habituales habuit veram sanctificationem, & proportionem, & jus ad supernaturalem hæreditatem, & beatitudinem: ergo etiam ratione gratiæ habitualis potest dici filius Dei, non minus, quam alii iusti: tum etiam, quia secundum eam gratiam fuit suo modo spiritualiter genitus, sicut sunt alii Sancti: ergo ad eam generationem consecuta est filiationis relatio. Unde ficit Christus ut homo dicitur filius Virginis, propter hu-

Suarez Tom. XVI.

manam generationem ex illa: ita dici poterit filius Dei, propter spirituales generationem ex illo per gratiam habituales. Aliunde vero obstat videtur, quia hoc videtur aliquo modo sapere errorem Nestorii, quia dicebat Christum esse filium per gratiam accidentalem. Sed hoc argumentum parvi momenti est, quia Nestorius non tam errabat in asserenda filiatione per gratiam habituales, quam negando veram gratiam unionis, & filiationem naturalem. Difficiliora videntur, quæ in principio proposita sunt, sed illa etiam statim dissolvuntur.

Nihilominus tamen dicendum est, hic posse esse questionem de re, vel de denominatione, & modo loquendi. Quoad rem, existimo animam Christi accepisse gratiam habituales per actionem propriam distinctam ab actione unionis & ejusdem rationis cum actione, qua gratia producitur in quacumque anima, vel angelo: quia terminus est ejusdem rationis, & modus productionis similiter. Nam licet dicatur illa gratia habitualis debita Christo ratione unionis, tamen physice non manavit, seu resultavit ex ipsa personalitate Verbi unita humanitati, quæ per se, & ut sic activa non est, sed per propriam actionem fuit effecta, ut supra q. 7. late probatum est. Illud autem debitum tantum est quoddam morale jus, quatenus consentaneum est, & naturæ rei proportionatum, ut habenti priorem gratiam, scilicet unionis, posterior, seu habitualis conferatur. Et hinc fit, ex hac actione, qua producta fuit gratia habitualis in Christi anima, resultasse in Christo ut homine relationem ad Deum fundatam in ipsa gratia, quæ sit velut relatio effectus ad causam, ejusdem rationis cum relatione ad Deum, quæ resultat in homine iusto ex vi illius actionis, per quam iustus fit. Nam sicut gratia habitualis in Christo, & in nobis est ejusdem rationis, ita & hæc actio, & relatio, quæ per illam resultat. Neque enim huic relationi obstat potest personalitas increata, quia licet de relatione resultante ex humana Christi generationi substantiali, adhuc sub iudice sit, an possit esse realis, nec ne, propter incapacitatem personæ, tamen de relationibus, quæ consequuntur actiones, passionibus, aut formas accidentales, nemo unquam dubitavit, quin potuerint in Christo esse reales, si in aliis hominibus tales sunt: quia hæc non attingunt ipsum suppositum substantiale secundum se, sed tantum mediante natura, sicut & alia accidentia, in quibus ipsa fundantur. Unde non videtur dubium, quin relatio similitudinis fundata in albedine fuerit realis in Christo, sicut in aliis hominibus, & similiter relatio patientis, cum patiebatur, vel calefiebat, &c. ergo idem erit de relatione fundata in gratia habituali, quæ res apertius constabit seq. explicando rationem D. Thom. Adde tamen nihilominus, quamvis hæc relatio in aliis hominibus habet rationem filiationis, tamen in Christo non proprie recipere hanc denominationem, & ideo non proprie posse dici Christum ut hominem Filium Dei ratione gratiæ habitualis, sed unionis tantum. Ratio hujus est, quia filiatio proprie significat relationem resultantem ex aliqua actione, qua per se primo producit, qui filius nominatur, vel ex non filio efficitur: sic enim inter homines filiatio naturalis consequitur physicam generationem, qua per se primo filius producit: filiatio autem adoptiva consequitur actionem moralem, qua adoptatur in filium is, qui filius nominatur. At vero gratia habitualis Christi & supponit illum esse filium Dei per gratiā unionis, & licet physice fiat per propriam actionem, tamen, cum illa gratia collata sit ratione gratiæ unionis, non censetur per se primo fieri, sed veluti consequi aliam formam, & ideo relatio inde resultans non potest proprie filiatio nominari.

Ad argumenta in principio posita, ad primum respondetur ex supra dictis, verum esse, Christum ut hominem non posse dici Filium Dei proprie per essentiam, & æternam generationem, sicut est filius Dei, in quantum est Deus, sumendo proprie, formaliter, & specificative particulam illam, *in quantum*, ut supra explicatum est, & docuerunt expresse D. Thom. & Cajet. qu. sequ. art. 2. ad 1. & facile convinci potest, quia Christus ut Deus est filius naturalis per æternam generationem, & naturæ æqualitatem, & identitatem: at vero ut homo non habet hanc æqualitatem cum Patre, sed est minor illo, neque ut homo procedit a Patre per æternam generationem. Præterea Christus ut Deus fruitur beatitudine per

Q q 4

essen-

Respons.

Christus ut homo non dicitur proprie filius Dei ratione gratiæ habitualis.

Responsio ad argum. 2.

Christus in quantum homo non modo sit Filius Dei.



essentiam, non tamen ut homo, quia ut sic non videt Deum per increatam visionem, sed illius participationem creatam suscipit. Denique argumentum factum hoc convincit, quia Christus ut homo non est Deus, ergo neque filius Dei in hoc sensu. Nihilominus tamen alia ratione dicimus, Christum ut hominem esse filium Dei per gratiam unionis: quia per illam effectum est, ut ipsa humanitas vere ac proprie sit substantialis natura ipsius filii Dei naturalis, atque adeo ut huic homini debeatur etiam in sua humanitate divina hereditas, & beatitudo, & consequenter, ut etiam in quantum homo sit filius, & hæres. Hæc ergo relatio distincta est a relatione filiationis æternæ, distinctamque habet rationem fundandi, scilicet gratiam unionis, distinctamque terminum, ut latius explicabatur sect. seq. In hoc ergo sensu ad argumentum primum negatur consequentia, quia non dicimus Christum ut hominem esse filium Dei eo modo, quo Verbum est Deus per essentiam, sed eo modo, quo in quantum homo est hæres universorum, ratione gratiæ unionis: de qua re dicetur late sect. seq. & ibi etiam 3. argum. dissolvitur.

## SECTIO II.

*An Christus in quantum homo sit Filius Dei naturalis, an adoptivus.*

**D**UO hic possunt & solent inquiri, unum, an Christus simpliciter, aliud, an cum determinatione, in quantum homo, possit dici filius Dei adoptivus. Sed quia, exclusa posteriori locutione, a fortiori excludetur prior, & quia id est certum, ut dicam sect. seq. & specialem difficultatem non habet, ideo satis erit posteriori modo questionem tractare. In qua Durand. in 3. dist. 4. q. 1. & Bassolis ibi art. 2. simpliciter concedunt, Christum ut hominem esse filium Dei adoptivum, eamque sententiam censuit probabilem Richar. dist. 10. q. 1. licet in contrariam magis inclinet. Quo fere modo procedit Scotus ibi tam in Scriptis, quam in Reportatis. Alenis autem 3. p. q. 8. memb. 3. a. 4. concedit, Christum ut hominem esse filium Dei per creationem & per gratiam: negat tamen esse filium adoptivum. Sed de filiatione omnino metaphorica, quæ est per solam creationem, nihil est quod dicamus, quia illa coincidit cum relatione creaturæ, quæ non est proprie filiatio: & eo modo, quo est, seu appellatur filiatio, constat non esse adoptivam, sed connaturalem humanitati. Quæstio ergo est de filiatione per gratiam, & de hac loquitur Durand. Cujus fundamentum est, quia gratia Christi est ejusdem rationis cum nostra, sed nos sumus filii adoptivi ratione hujus gratiæ; ergo & Christus in quantum homo. Et confirmatur illo argumento tertio, relicto in sect. præcedenti, quia Christus in quantum homo non est filius naturalis, quia ut sic non est ab æterno genitus; erit ergo adoptivus.

Dicendum tamen est, Christum Dominum in quantum hominem non posse dici filium adoptivum, sed naturalem Dei. Ita docet D. Th. hic, & infra q. 33. art. 3. & q. 43. a. 1. & l. 4. contra gent. c. 4. Magist. in 3. d. 4. & d. 10. ubi plura refert Sanctorum testimonia: ibique ceteri Scholastici illum sequuntur. Bonav. Albert. Tho. de Arg. Gab. Major. Palud. d. 4. a. 3. ibidem Capreol. q. unic. a. 3. ad arg. cont. 3. concl. Probatur ex Scriptura, & Patribus, quorum testimonia ex parte citantur in dicto Concilio, ubi inter alia adducitur illud Matth. 16. *Tues Christus Filius Dei vivi*, & illud Joan. 20. *Ascendo ad Patrem meum, & Patrem vestrum*. Ubi (ut supra adnotavimus) loquitur Christus in quantum homo, nihilominus non vocat Patrem nostrum, sed distinguit: *Patrem meum, & Patrem vestrum*: ut indicet, se non esse filium adoptivum, sicut nos. Et cetera testimonia in principio disputationis citata eodem modo accommodari possunt, præsertim illud ad Hebr. 1. *Tanto melior angelis effectus, quanto differentius præ illis nomen hereditavit*. Ubi loquitur de Christo non tantum ut Deo, sed etiam ut homine, & de nomine filii: cum ergo angeli sint filii adoptivi, altiori modo Christus ut homo dicitur filius. Præterea Chrysost. seu auctor Imperfecti in Matth. hom. 40. explicans verbum illud, *Reverebuntur Filium meum*, animadvertit, Prophetas ante Christum missos filios fuisse adoptivos, Christum vero vocari proprium filium, ut Paul. dixit ad Rom. 8. Unde Ambros. lib. 1. de fid. c. 9. *Nos, inquit, filii per adoptionem, ille per naturam*. Idem lib. de Incar-

nat. dom. sacram. c. 8. August. ep. 120. c. 4. & lib. contra Secundinum Manichæum c. 5. & lib. 3. contra Faust. c. 3. ubi illa ratione utitur; quod filius adoptivus prius est, quam sit filius, quam infra tractabimus, & lib. 1. de consensu Evangelist. c. 3. dicit, Paulum fuisse usum nomine adoptionis, ut inter Christum; & nos distinctionem poneret. Idem docet Irenæus lib. contra hæres. c. 21. in verbis illis: *Propter hoc enim Verbum Dei homo, & qui Filius Dei est, filius hominis factus est, commissus Verbo Dei, ut adoptionem percipiens fiat Filius Dei*. Ubi Evarientius intellexit, Irenæum sensisse contrarium, scilicet Christum juxta humanam naturam adoptione evasisse filium Dei, unde ipse illum pie interpretatur, ut per adoptionem gratiam unionis intelligat. Ego vero aliter locum Irenæi interpretandum existimo, ut *adoptio*, non ad ipsum Christum, sed ad nos referatur. Quod (ut opinor) facile probabitur consideranti sincere & attente totum Irenæi contextum. Paulo enim superius tractans illa verba: *Ego Dixi, Dii estis, & filii altissimi omnes: vos autem sicut homines moriemini*, ait, *Ad eos dicit, qui non recipiunt munus adoptionis, sed continentur incarnationem; & infra; Ingrati existentes Verbo Dei, quod incarnatum est, propter ipsos, & subdit, Propter hoc enim Verbum Dei, homo, & qui Filius Dei, filius hominis factus est, commissus Verbo Dei, ut adoptionem percipiens, fiat Filius Dei. Non enim poteramus aliter incorruptelam & immortalitatem accipere, usque ad illud, ut filiorum adoptionem perciperemus*. In quibus verbis primum considerandum est, non solum non vocare Irenæum incarnationem nomine adoptionis, quin potius illas distinguere, cum dicit, eos, qui incarnationem negant, non percipere adoptionem, quia *ingrati sunt Verbo, quod incarnatum est propter ipsos*. Deinde ponderanda est illa causalis nota, *propter hoc enim, &c.* cum enim dixisset, Verbum fuisse incarnatum propter nos, id est, ut nos consequamur adoptionem filiorum, causam hujus reddit dicens. *Propter hoc enim qui Filius Dei est, Filius hominis factus est*: cum ergo concludit, *ut adoptionem percipiens, fiat Filius Dei*, non est sensus, Filium Dei factum esse hominem, ut ipsemet Christus adoptionem percipiens, sed indefinite ut is, qui adoptionem recipit (quicumque ille sit) fiat Filius Dei, hoc enim sensu causalis hæc consonat propositioni immediate præcedenti, cui adjungitur: & verba ipsa optime patiuntur hunc sensum, sine ulla extorsione aut difficultate; in alio vero sensu causalis illa non recte conjungitur cum præcedentibus, & continet sensum per se absurdissimum, tum quia nullus unquam dixit, Verbum fuisse incarnatum, ut Christus ipse adoptione fieret Filius Dei, sed ut alios homines faceret Filios Dei, ut plane idem Irenæus ibidem intendit; tum etiam quia illa locutio ad Christum relata continet sensum erroneum, quia neque humanitas Christi est facta Filius Dei per adoptionem, etiam si nomine adoptionis incarnationem intelligamus, sed est unita Filio Dei; neque etiam hic homo Christus factus est Filius Dei, sed potius Filius Dei factus est Christus, ut patet ex dictis supra q. 16. Tertio constat idem sensus ex verbis sequentibus: cum enim dixisset, Filium Dei factum esse filium hominis, ut qui percipit adoptionem fiat Filius Dei, subdit aliam causalem; non enim poteramus aliter immortalitatem accipere, nisi prius immortalitas fieret quod & nos, ut adoptionem filiorum perciperemus: ergo, sicut in hac ratione & causa reddenda, loquitur de adoptione nostra, non Christi, ita etiam in proxime præcedente, ad quam hæc refertur.

Non omittam autem advertere, hæc & similia testimonia, quæ ex sacra Scriptura & Patribus ad hanc sententiam probandam adduci solent, non eam satis convincere in sensu a nobis intento, sed solum in eo, quo Christus homo, & ut homo ex parte suppositi, sed potius ut hic homo, dicitur Deus, & Filius Dei naturalis, ut ex dicendis in hac, & sequenti sectione constabit. Adducuntur autem hæc testimonia, ut ostendatur, Patres non agnovisse in Christo aliam filiationem, nisi naturalem, atque adeo vel, ut hominem, non esse dicendum filium Dei, vel dicendum esse Filium naturalem, & non adoptivum.

Ad probandum hanc veritatem D. Thom. hac utitur ratione in præsentis articulo. Persona Christi est naturalis Filius Dei; ergo Christus non potest esse filius adoptivus. Probatur consequentia: quia filiatio convenit personæ, non autem naturæ; & ideo, si de illa dicitur filiatio

Christus in quantum homo non potest dici filius adoptivus.



simpliciter, & per se, non potest de eadem dici filiatio per participationem: *Quia non recipitur* (inquit) *aliquid dici participative, quod per se dicitur*: Quæ ratio optime probat, Christum absolute, & simpliciter non posse dici filium adoptivum, sed naturalem, quod est certissimum, non tamen videtur convincere posita determinatione, *in quantum homo*, non posse adoptivum appellari, quia hoc modo optime recipitur aliquid cum aliqua determinatione dici participative, quod simpliciter per se dicitur, ut Christus simpliciter est ens per essentiam, quia est Deus: & tamen Christus in quantum homo recte dicitur ens per participationem, quia ut sic est creatura. Idem ergo erit in filiatione per se, seu naturali, & per participationem, seu adoptiva. Neque ad hoc videtur referre, quod filiatio sit proprietas personæ, nam etiam Christus ut homo est persona humana, scilicet ex persona divina, & humanitate composita (ut supra explicatum est) ergo ut sic erit capax relationis filiationis divine per participationem; ergo & adoptionis. Nec modo disputo, an hæc relatio sit rationis, vel realis, hæc enim controversia hoc loco necessaria non est, quia non pendet ex illa veritas conclusionis, quidquid aliqui D. Thom. expositores conentur. Quia non est de ratione adoptionis, ut includat relationem realem, & deinde, quia (ut supra dicebam) non omnis realis relatio repunit Christo, quia non oportet, ut inhæreat ipsi personæ secundum se, sed solum mediante natura, ita tamen, ut denominet personam: & hoc modo non videtur inconveniens, ut eadem persona, quæ simpliciter denominatur filius per se, & perfectissime, in quantum homo denominetur secundum quid, & per participationem: sicut idem Christus absolute est beatus per essentiam, & in quantum homo est beatus per participationem.

Ut ergo huic rationi D. Thom. vim, & efficaciam tribuamus, addamus rationem aliam, qua Adrianus Papa, & Concil. Francoford. utuntur, & esse debet proprium fundamentum hujus veritatis: nam de ratione adoptionis est, ut extranea persona acceptetur liberaliter ad hæreditatem: sed nihil horum habet locum in Christo etiam ut homine. Nam primo Christus ut homo non est persona extranea; quia non est alia persona à persona Filii Dei naturalis, quia etiam si sumatur Christus, ut est persona composita, intrinsece includit filiationem Dei naturalem, per quam constituitur in esse hujus personæ, & ideo sub nulla ratione potest dici, neque intelligi, neque induratione temporis, neque in aliquo signo naturæ, quod sit persona aliena, seu extranea à divina filiatione, & ideo ex hoc principio non est capax adoptionis. Neque etiam ex alio, quia hic homo Christus non acceptatur ad divinam hæreditatem suscipiendam in humanitate sua acceptatione mere extrinseca, & omnino liberali, sed acceptatione quasi intrinseca, & connaturali, ac debita ratione unionis; ergo ex omni capite est incapax adoptionis.

Respondent aliqui, hac ratione, ad summum, probari Christum simpliciter non posse vere dici filium adoptivum, non vero cum determinatione in quantum homo, quia humanitas ex se extranea est. Unde confirmatur, nam saltem hac ratione non probatur, humanitatem non esse adoptatam: ergo nec, quod Christus secundum illam non sit adoptatus. Respondetur ad priorem objectionem negando assumptum, ad probationem (quod humanitas secundum se est extranea) dicitur, id nihil referre, quia ratio non assumit, ad adoptionem requiri quod natura sit extranea, sed quod persona sit extranea; idque probare non oportet, quia ex ipso nomine adoptionis, & ex conditionibus ejus supra explicatis & probatis in Commentariis articulorum D. Thomæ, probatum ac declaratum est. Quantumvis autem natura extranea sit, non reddit extraneam personam assumentem, quod recte indicavit Adrianus illis verbis: *Quæsi alienus aliquando a Patre fuerit, aut per carnis, extraneus ab eo factus, assumptionem.* Quin potius per assumptionem ipsa humanitas facta est quodammodo propria, & filiationis naturalis ita est illi intime & substantialiter conjuncta, ut composita persona inde resultans, etiam ut talis est, non possit extranea censeri; imo illa ut sic ex propriis, & ab intrinseco jura habeat ad divinum hæreditatem etiam in assumpta natura, non ratione illius, sed ratione personæ, cui utitur: ergo ex eadem radice provenit quod hic

homo, etiam ut homo non possit filius esse adoptivus, quantumvis assumpta natura secundum se considerata extranea esse videatur. Ad posteriorem, objectionem quidquid sit de antecedente, de quo statim dicam, nego consequentiam, quia Christus, ut homo, & humanitas, non sunt omnino idem ut per se constat, quia Christus addita etiam illa determinatione includit suppositum, quod non includit humanitas: unde ille dici potest filius, non autem humanitas: nunc vero non disputamus de humanitate, de qua statim dicturi sumus, sed de Christo ut homine: & ideo nil refert quod ratio facta de humanitate non convincat: neque enim necesse est omnia simul & eadem ratione probari. Neque argumentum a Christo ut homine ad humanitatem, neque e contrarium ab humanitate ad Christum ut hominem, est formale: non enim sequitur: humanitas est unita: ergo Christus ut homo est unitus; nec sequitur; humanitati est facta gratia: ergo Christo ut homini est facta gratia, ut saepe est in superioribus dictum: nam vero ratione materiae teneat in adoptione illa consecutio, infra declarabo: ubi etiam ostendam, rationem hanc, servata proportionem, etiam in humanitate habere locum, ut ab illa excludatur adoptio.

Ex hac vero ratione explicata, quæ non solum ef-  
ficax & fundamentalis est, sed in re etiã unica, ut existi-  
mo, colligo in primis, quo sensu procedere hoc loco possit  
ratio D. Thom. ut recte probet. Quod enim ait, filiatio-  
nem esse personæ proprietatem, non est sensus, filiatio-  
nem inesse soli supposito (ut quidam ejus expositores fal-  
so contendunt) & non etiã naturæ, maxime quando illa  
natura non est intrinseca & essentialis tali supposito: in  
hoc enim sensu propositio illa, nec in Theologia, neque  
in Philosophia habet aliquod fundamentum, neque veri-  
tatem habere potest, quia non solum Verbum secundum  
se est persona, sed etiã prout conjunctum humanitati,  
ita ut hoc compositum, vera persona substantialis sit. quæ  
ut composita est, intinsece includit hanc naturam as-  
sumptam & hanc personam seu subsistentiam: ergo licet  
filiatio sit proprietas personæ, poterit per se primo con-  
venire huic personæ compositæ ut sic: ergo poterit esse  
non tantum in persona secundum se, sed etiã in natura,  
vel potius in composito ex utraque, sicut etiã generari  
aut concipi convenit personæ potius quam naturæ, quæ-  
vis non persona secundum se concipiatur, sed persona  
composita ex subsistentia & natura: & ideo relatio filii,  
quam Christus habet ad matrem, licet personæ conve-  
niat, non tamen verbo secundum se, ita ut illi soli imme-  
diate insit, aut in esse concipiatur: esset enim falsa con-  
ceptio, nam, sicut Verbum secundum se non generatur  
ex matre, sed ratione humanæ naturæ, seu compositum  
ex Verbo & humanitate, ita neque Verbum secundum se  
refertur, sed ut componit unam personam cum humani-  
tate: ergo nec Verbo secundum se inest relatio filiationis  
ad matrem, sed media humanitate, vel quatenus cum il-  
la componit unam personam. Idem ergo erit de filiatio-  
ne ad Deum, qua Christus ut homo dicitur filius Dei:  
nam hæc etiã non convenit Verbo secundum se, nec  
proxime fundatur in æterna generatione, sed in gratia  
unionis facta humanitati. Dicitur ergo filiatio conve-  
nire personæ, tum quia illam proprie denominat, tum quia  
vel illi secundum se convenit, si sit simplicissima perso-  
na; vel non inest naturæ nisi ut subsistenti, & determina-  
tæ in aliqua persona, si sit persona composita, ut latius  
declaramus in seq. tomo q. 35.

Ex hac autem propositione sic intellecta, colligitur ulterius, quantum ad præsentem quæstionem attinet, filiationem ad Deum, quæ Christo ut homini convenit non convenire humanitati proprie & secundum se, sed per se primo convenire huic personæ compositæ, seu Verbo ut subsistenti in humanitate, seu humanitati ut sustentatæ a Verbo. Unde tandem concludatur, illam filiationem non posse habere proprietatem repugnantem dignitati Verbi, cum illud maxime respiciat, licet non nudum, sed vestitum humanitate, & in illo proxime fundetur, licet non secundum se, sed ut communicato humanitati. Ad hanc autem dignitatem Verbi spectat, ut nullo modo possit censei extranea vel aliena persona, non solum in propria natura, verum etiam nec in aliena, quam per assumptionem suam fecit; & faciendo suam, intrinsece & per se fecit illi debitam divinam hæreditatem, per se ipsum deificando talem naturam; ac propterea filiatione talis

Responſio.

Discursus  
S. Thomæ  
de clara-  
tione.



ialis personæ etiam in assumpta natura, non potest esse adoptivas, quæ alienam & extraneam personam respicit, & negationem connaturalis filiationis includit.

Et hoc sensu accommodari in præsentem debet aliud principium D. Th. scilicet, *Non recipitur, aliquid dici participative, quod per se dicitur*: est enim hoc maxime verum, quando prædicatum per participationem dictum includit imperfectionem intrinsece repugnantem ei, quod est per se tale, eamque imperfectionem postulat in persona secundum se: ut non potest dici Christus, etiam ut homo, persona creata, aut finita propter dictam causam: huiusmodi autem est filiatio adoptiva, eo quod alienam & extraneam personam requirat, & ideo non potest Christo attribui, etiam ut homini. Existimo ergo, discursum hunc in hoc sensu esse efficacem, & esse admodum conformem intentioni D. Thom. nec posse alia via & modo vim & efficaciam habere. Nam quod aliqui ajunt, fundari in hoc, quod eidem supposito duplex filiatio convenire non potest, improbabile est: nam, si absolute intelligatur, plane est falsum & contra eundem D. Th. infra. q. 3. art. 5. ut patet in filiatione divina & humana ejusdem Christi: imo in ipsa relatione filii naturalis idem constat, ut amplius infra patebit. Si vero non absolute, sed de duplici relatione reali intelligatur, est impertinens: nihil enim refert ad filiationem adoptivā: sufficit enim quod sit relatio rationis: imo ad aliquam filiationem naturalem id sufficit, ut jam dicam. Non ergo ex sola unitate suppositi excludit D. Th. duplicem illam filiationem, sed ex speciali imperfectione & negatione, quam filiatio adoptiva includit, prout a nobis declaratum est.

Aliorum  
explicatio.

Alii vero addunt, quod, licet relatio filiationis possit convenire supposito, mediante natura assumpta, non tamen relatio filiationis divinæ fundata in gratia sanctificationis, quia gratia est tanquam nova natura adveniens quæ existenti supposito, & ab humanitate distincta: ergo si aliqua relatio filiationis ex tali gratia resultaret, non posset convenire Verbo media humanitate: ergo debet convenire ipsi Verbo immediate & secundum se, quod repugnat. Prima consequentia declaratur, quia quando eidem supposito conveniunt duæ naturæ, & una præsupponitur in ipso & alia de novo ei unitur per novam actionem vel generationem, si aliqua relatio filiationis inde resultat, non potest convenire tali supposito media natura, quæ in eo supponebatur, sed media illa quæ de novo ei advenit, ut si angelus fieret homo, & nasceretur ex muliere, filiatio non posset ei convenire media natura angelica, quæ in eo supponebatur, sed media humana, quæ illi de novo advenit. Sic ergo, cum humanitas & gratia sint quasi duæ naturæ, & humanitas supponatur in persona Verbi relatio filiationis, quæ ex gratia resultaret, non posset illi convenire media humanitate. Sed hæc ratio inefficax est, quia illud principium, in quo fundatur, verum habet in naturis, quæ non sunt per se subordinate, ita ut una non jungatur supposito, mediante alia, sed utraque immediate, ut sunt natura humana & angelica in dicto exemplo, vel si utraque uniretur Verbo: at vero gratia & humanitas non sunt huiusmodi, nam gratia non potest uni supposito nisi mediante humanitate: imo neque immediatus neque alia ratione est in Verbo, nisi quia est in humanitate conjuncta Verbo: ergo quamvis ex infusione talis gratiæ resultaret aliqua relatio, illa non conveniret Verbo secundum se, sed media humanitate ut gratia affecta: ergo ex hac parte non repugnaret esse talis relatio.

Respondent, quod, licet gratia ut accidens est, non possit esse in verbo, nisi media humanitate, tamen quatenus habet quandam modum formæ substantialis, quia confert subjecto, in quo recipitur, divinæ naturæ participationem, ut sic immediate refertur ad suppositum; & ideo etiam in Christo sub ea ratione immediate refertur ad suppositum Verbi: relatio autem filiationis adoptivæ consequitur gratiam sub hac posteriori ratione & non sub priori; & ideo in Christo esse aut resultare non potest, quia oporteret, immediate convenire supposito secundum se. Sed non est probabilior hic discursus, quam præcedens. Primo quidem, quia illa duplex consideratio gratiæ est conficta, quia non tractamus nisi de hac gratia in specie, qua nunc sanctificamur, & filii Dei efficitur; hæc autem essentialiter est accidens, & essentialiter supponit naturam intellectualem creatam, in qua recipiatur. Imo hoc ipso quod hæc gratia est participatio divinæ naturæ,

& quodammodo ejusdem seu divini ordinis, ita essentialiter postulat esse accidens, ut non possit esse substantialis natura. Secundo, quia illa forma gratiæ, quatenus sanctificat, & quodammodo Deificat, habet supremam rationem formæ, quæ in ea considerari potest, sive vocetur accidentalis, sive aliquo modo substantialis, & tamen ut sic non potest esse in Christo, nisi media humanitate: ergo etiam si inde resultaret relatio, non conveniret Verbo, nisi media humanitate. Tertio, etiam si totus ille discursus admittatur, non potest ex eo concludi, illam relationem immediate convenire Verbo secundum se sed mediante ipsamet gratia; nam omnis relatio filiationis de novo conveniens supposito convenit illi media natura, quæ de novo illi advenit, ut patet in exemplo de angelo supra posito, & in filiatione humana Verbi Dei, sed in præsentem gratia ut est quædam natura habens (ut ipsi ajunt) modum substantiæ de novo advenit Verbo: ergo, licet inde resultet relatio, illa non convenit immediate Verbo, sed mediante ipsamet gratia. Et quia gratia ratione suæ entitatis accidentalis non potest conjungi Verbo nisi media humanitate, vel alia natura intellectuali, ideo nec fundare potest illam relationem, nisi prout inhæret eidem naturæ.

Confirmatur ac declaratur, nam, si fingamus (quod aliqui putant esse possibile) dari gratiam creatam substantialem, seu, quod idem est, dari substantiam supernaturalem natura sua gratam, eamque assumi a Verbo, tunc, si quæ relatio filiationis ad Deum resultaret ex illa unionem ratione talis naturæ, non conveniret Verbo immediate & secundum se, sed media tali natura: ergo, etiam si nunc in Christo resultet relatio, ratione gratiæ habitualis, illa non convenit Verbo, nisi mediante gratia, eo modo, quo de facto est, id est, prout illi conjungitur media humanitate: seu (quod idem est) media humanitate ut tali gratia affecta. Consequentia est evidens a paritate rationis, nam sicut in prædicto casu illa supernaturalis natura substantialis esset grata duplici titulo, scilicet, & per se ratione suæ naturæ, & ratione unionis, ita humanitas nunc est grata hoc duplici titulo, & gratia, quæ nunc est accidentalis, non conjungitur huic supposito, nisi prout gratificat hanc naturam. Antecedens autem est evidens, quia tunc illa natura per se & ex vi sua non conjungitur supposito, mediante alia natura, sed immediate: ergo relatio inde resultans non conveniret supposito, nisi mediante tali natura, sicut nunc relatio filiationis humanæ non convenit Verbo, nisi mediante humanitate; & relatio filiationis metaphoricæ creaturæ ad Deum non convenit Christo ut homini, nisi mediante humanitate. Igitur ex hac parte non repugnat, huiusmodi relationem resultare ex infusione gratiæ in humana Christi natura: & hac ratione dixi sectione præcedente, secundum rem eandem relationem ad Deum convenire Christo homini, ut sanctificato per gratiam accidentalem, quæ convenit aliis hominibus iustis, tamen in Christo non habere rationem filiationis, quia infusio gratiæ accidentalis respectu Christi non habet rationem spiritualis generationis, sed productionis cujusdam proprietatis consequentis priori & substantialem sanctificationem. Neque, si esset filiatio, esset filiatio adoptiva, sed potius naturalis, non quidem perfectissima, & per essentiam, sed per participationem, nihilominus tamen in suo gradu naturalis, & non adoptiva, quia gratia est Christo homini connaturalis sicut supra dicebam, si daretur substantia supernaturalis, per se grata, futuram filium Dei tam perfecte vel perfecte, quam sint nunc iustificati per gratiam, ut per se constat; & tamen in eo gradu non esset adoptivus sed naturalis Dei filius, quia non conveniret illi per donum aliquod gratis superadditum naturæ, sed per se & ex natura sua. Sicut nunc filiatio illa metaphorica, qua angelus per naturam, vel quælibet alia creatura dicitur filius Dei ratione creationis, non est filiatio adoptiva sed naturalis in suo ordine. Quocirca (prosequendo hypotheseos supra factam) si fingeremus, Verbum assumere substantialem naturam supernaturalem, personæ compositæ inde resultans, ut esset talis substantia, esset Filius Dei, non tantum ob gratiam unionis, sed etiam per conditionem propriam talis naturæ, quam per se primo haberet ex vi suæ productionis, & non tantum ratione unionis, tamen sub utraque ratione esset filius naturalis, & non adoptivus, quia utraque filiatio oriretur ex principio in-



trinfeco substantiali & connaturali. Necessario ergo reducenda est ratio D. Thomæ, ut sit efficax, ad illud principium supra positum, & ad imperfectionem propriam & quasi specificam, seu negationem quam dicit filiatio adoptiva, ratione cuius repugnat eidem convenire, cui convenit filiatio naturalis.

Aliæ rationes examinantur. Prima refellitur.

Secundo infero ex dictis, quam vim habeant rationes aliæ, quæ ad propositam sententiam probandam ab aliis Theologis afferri solent: omnes enim, aut efficaces non sunt, aut ad eam quam proposuimus revocantur. Prima est eorum qui putant, de ratione filii adoptivi esse, ut prius tempore sit, quam sit filius. Quod videntur sensisse Magister & Alensis citati in com. art. Sed ibi ostendi, eam conditionem non esse necessariam.

Secunda declaratur & defenditur.

Secunda ratio, quæ præcedentem limitat, est, quia saltem necesse est, ut is, qui est filius adoptivus, prius natura sit quam sit filius: sed hoc non convenit Christo: ergo. Ita Richardus. Sed objicit Scotus, quia humanitas Christi etiam prius natura extitit, quam esset grata Deo, seu accepta ad hæreditatem Dei. Richardus respondet, humanitatem illam prius natura fuisse gratam, quam Verbo unitam, & ita Christum in nullo signo naturæ prius fuisse compositum ex humanitate, quam fuerit gratus & filius. Sed hoc non recte dictum est, tum quia supponit falsum, quia gratia habitualis non antecessit ordine naturæ unionem, sed potius subsecuta est; tum etiam quia (ut recte urget Scotus) ipsa humanitas prius natura extitit, quam illa gratia fuerit affecta: imo, si qua via posset humanitas Christi censeretur adoptata, id esset, recipiendo prius natura gratiam habitualement ex solo Dei beneplacito, & non ex vi unionis. Nos enim ideo adoptamur, quia hoc modo per habitualement gratiam sanctificamur. Unde Scotus argumento pressus nihil respondet, sed ait: *Quære solutionem*; & aliquibus insolubile argumentum illud visum est contra prædictam rationem.

Ego vero existimo, rationem illam, bene intellectam, efficacem esse, & ex illa quam superius proposuimus manifeste sequi, & ita in dicto Concilio Francoford. sæpe insinuari. Nam hoc ipso, quod persona, quæ adoptatur in filium, est extranea, necessario fit, ut prius saltem natura sit, quam sit filius adoptivus, quia adoptio additur illi ad modum accidentis extrinsecus illi advenientis, & ideo supponit subiectum circa quod fiat: & hoc modo est certa major propositio in dicta ratione sumpta. Quam insinuat Paulinus in dicto libro Sacrosyllabo col. 7. dicens. *Hoc ideo proposuimus, ut patenter daretur intelligi, eum dici adoptatum. qui nondum prius fuerat proprius filius adoptivus.* Hanc autem conditionem ex eo infert, quod filius adoptivus dicitur abusive & non essentialiter de eo, qui erat alienus generatione, nihilque ei ab adoptante debebatur, sed gratis ex indulgentia in filium admissus est. Minor etiam certissima est, quia in primis in ea non est sermo de humanitate, sed de Christo ut homine: unde instantia, quæ fit de humanitate, quod secundum se prius natura sit, quam sit grata, non est ad rem, quia ut sæpe dixi, aliud est humanitas, aliud Christus ut homo; & licet humanitas prius natura sit, quam sit grata, non tamen Christus etiam ut homo. Unde ulterius nihil obest, quod gratia habitualis posterius natura insit humanitati, quam ipsa sit, imo & quam sit unita; quia cum in ratione illa subsumitur, Christum non prius natura esse hominem, quam filium, non intelligimus esse filium per gratiam habitualement, sed per gratiam unionis, quæ potentior est ad constituendum filium naturalem, quam sit gratia habitualis ad constituendum filium adoptivum, ut ostensum est.

Atque ita constat, unde sit evidens dicta propositio subsumpta, quia Christus non prius natura est hic homo, quam gratia unionis ejus humanitati facta sit, nam per ipsammet gratiam unionis hic homo confurgit: ergo non prius etiam natura, est hic homo, quam sit Filius Dei. Sicut enim homo purus non prius natura est gratus, quam sit Filius Dei adoptivus, ita Christus ut hic homo non prius natura est constitutus per gratiam unionis, quam sit Filius Dei naturalis. Est enim considerandum, cum dicitur, filius naturalis non prius natura esse, quam sit filius, intelligi quantum ad formam illam, per quam filius constituitur, non quantum ad relationem secundum esse in ratione filii: hoc enim modo, etiam in humanis filius est prius natura secundum suum esse absolutum,

quam referatur ad patrem. Et in filio adoptio Dei prius natura intelligitur affici gratia infusa, ut est forma absoluta, quam quod ab illa resultet relatio, quidquid illa sit: solumque in divinis contingit, filium non prius natura constitui, quam referri, quia primo & per se constituitur proprietate relativa. Cum ergo dicitur filius adoptivus prius natura existere, quam sit filius, intelligitur non solum quantum ad relationem filii, sed quantum ad formam illam sive intrinsecam, sive extrinsecam, per quam adoptatur: & e contrario, cum dicitur filius naturalis non prius natura existere, quam sit filius, intelligitur quantum ad formam, qua constituitur in illo esse, ad quod consequitur, vel resultat relatio filii. Et hoc modo non prius natura Christus est hic homo, quam sit sanctus per ipsam unionem, & filius, etiam in quantum homo.

Quod si urgeas, quia ipsamet gratia unionis prius natura est in ratione subsistentiæ, & quasi formæ completæ quandam substantiam, quam in ratione formæ sanctificantis Respondeo primo, hanc proprie non esse prioritatem naturæ, sed rationis tantum, præscindens ea, quæ in re nullo modo sunt divisa, sed tantum virtualiter seu eminenter: ubi autem non est distinctio ex natura rei, nec ordo realis secundum naturæ prioritatem esse potest. Secundo, etiam si mens præscindat, ipsa subsistentia divina ex se & intrinsece intelligitur esse forma sanctificans formaliter per se ipsam & inseparabiliter, ita ut licet concipiatur a nobis ille effectus tanquam secundarius, non tamen ut extrinsecus vel adventitius; & ideo hic homo Christus ut per illam formam constitutus, non extrinsecus sit filius, sed intrinsecus & ex vi suæ constitutionis personalis; & hoc est esse filium naturalem. Quapropter instantia de gratia habituali, quia scilicet Christus homo prius natura est, quam habeat hanc gratiam, nihil obstat rationi factæ, quia, ut dixi, Christus non constituitur filius per hac gratiam; quamvis constitueretur, adhuc secundum illam non esset filius adoptivus, quia non extrinsecus omnino advenit, sed est connaturalis Christo, non quidem ut necessario manans ab unionem; id enim necessarium non est, sed ut proveniens ab aliqua forma intrinseca, & connaturali ipsi Christo, & non ex mera liberalitate, neque ex quacumque congruentia, sed ex quodam debito connaturalis, & intrinsecæ proportionis, adeo ut esset miraculum, & quasi portentum quoddam & monstrum, sine gratia habituali relinquere humanitatem Verbo unitam; qui modus connaturalitatis adoptioni repugnat.

Et juxta hanc interpretationem amplianda est major propositio in prædicta ratione assumpta, scilicet, filium adoptivum prius natura existere, quam adoptetur, non solum formaliter, sed etiam radicaliter, id est prius natura existere, quam in se habeat aliquam formam, ratione cuius illi sit intrinsece debitum & connaturale, ut illi talis filiatio conferatur. Quo sensu verissima est illa propositio ex prædicto fundamento, quod filius adoptivus est persona extranea, & ex se omnino aliena a filiatione: si autem ex se haberet unde illi esset debita & connaturalis, non esset revera extranea respectu talis formæ & filiationis: sic igitur Christus ut hic homo sub nulla ratione prius natura existit non filius, & ideo non potest in posteriori signo naturæ per gratiam adoptari in filium. Denique si argumenti vis procedat de humanitate ipsa, quia illa revera prius natura existit, quam sit grata, tam per gratiam habitualement, quam per gratiam unionis, & quam illi sit debita alterutra ex his gratiis; fortasse, qui docent, humanitatem trahi ad existendum per ipsam gratiam unionis formaliter, consequenter negarent assumptum; quia non prius natura est, quam sit unita, & consequenter nec prius natura est, quam sit grata & deificata per unionem. Ego vero concedo, prius natura existere, quam sit grata; sed hæcenus non dixi ad adoptionem sufficere, quod aliquis prius natura existat, quam sit acceptus, vel adoptatus: sed dixi, hoc requiri: unde, licet hoc humanitati conveniat, non sequitur adoptari, quia id non satis est ad adoptionem. Deinde ex illo principio ad summum potest inferri humanitatem Christi non esse filiam naturalem Dei, quod verissimum est, non solum quia est incapax filiationis, eo quod non sit persona sed tantum natura; verum etiam quia de se est extranea, & prius natura existit, quam sit natura filii Dei. Ex hoc vero quod non sit filia naturalis Dei, vel (ut proprius



dicam) quod non sit essentia naturalis Deo, non sequitur esse adoptatam, non solum quia adoptari non proprie convenit naturæ, sed personæ; sed maxime, quia inter illa duo, scilicet, adoptari, & esse illo modo naturalem, potest dari medium, ut statim dicam.

Tertia ratio ex-  
posita exponitur.

Tertia ratio ex præcedente formari potest, quia si Christus, ut homo, est filius adoptivus Dei, vel id est per gratiam habitualement, vel per gratiam unionis: neutrum dici potest: ergo. Major evidens est, quia omnis adoptatio, etiam humana, fit per aliquam gratiam, ut gratia dicit benevolentiam & gratuitam voluntatem; divina autem, quæ perfectissima est, includit etiam aliquam gratiam intrinsicam adoptato, ab illa Dei voluntate manantem, ut in Commentariis articulorum declaratum est, & infra iterum dicam: hæc autem gratia non potest alia excogitari, vel saltem non est a Deo hæcenus communicata, nisi vel accidentaliter creata sanctificans, vel substantialiter increata & unionis. Minor quoad priorem partem de gratia habituali probata sufficienter est, quia gratia habitualis supponit in Christo debitum ejus, estque illi connaturalis. Item supponit jam filium per gratiam unionis, & ideo non facit filium, juxta dicta sectione præcedente; & ideo nec filium adoptivum facere potest. Quoad aliam partem de gratia unionis probabitur latius sectione seq. ubi ostendam, gratiam unionis non esse adoptionem. Nunc breviter declaratur, quia adoptio non producit (unitatem) seu non constituit personam, quæ per illam adoptatur, sed advenit illi jam alias genitæ: sed gratia unionis constituit Christum ut hominem: ergo non potest per illam adoptari.

Si quis autem recte consideret, tota hæc ratio nititur in priori: ideo enim per gratiam habitualement non adoptatur Christus ut homo, quia non est extraneum suppositum vel subjectum respectu gratiæ, sed quasi proprium & connaturale modo supra explicato questione septima, vel (quod idem est) quia supponit filium, qui non potest esse extraneus, nec iterum adoptione filius fieri: gratia autem unionis ideo non potest esse adoptio respectu Christi, quia non respicit illum ut personam extraneam, cui adveniat, sed potius respicit illum ut personam intrinsicè per illam resultantem.

Quarta ratio ex-  
posita exponitur.

Quarta ratio adduci solet, quia adoptio non facit inter adoptantem & adoptatum unionem secundum rem, sed secundum affectum tantum: unio autem hypostatica fecit in Christo non tantum conjunctionem affectus, sed etiam ut humanitas in eadem persona cum divina natura conveniret: atque adeo ut Deus & homo una esset persona: ergo hic homo Christus etiam ut homo non est adoptatus, nam, ut dixit Concilium Francoford. dicta epistola *Unitas personæ, quæ est in Dei Filio & filio Virginis, adoptionis tollit injuriam*. Quæ quidem ratio directe & immediate procedit de humanitate Christi; & ideo illam ex professio tractabimus sectione sequente, non enim difficultate caret. Applicata vero ad Christum ut hominem in primis supponit illud principium in prima principali ratione positum, quod adoptio versari debet circa personam extraneam, eam liberaliter ac gratuito acceptando ad hæreditatem. Imò, si recte consideremus, illa unio secundum affectum nihil aliud est, quam hæc liberalis acceptatio, ut in humana adoptione constat, in divina autem aliori modo est intelligenda, ut sequenti sectione exponam. Ideo autem hæc conjunctio per liberalem acceptationem necessario intercedere debet, quia persona, quæ adoptatur, aliena est, & ex se extranea semper manet respectu hæreditatis; & ideo oportet, ut ex gratuita benevolentia ad illam admittatur. Deinde, hæc ratio immediate solum probat, Christum ut hominem non esse adoptatum ad esse personæ filii Dei, quia, quantumvis sumatur Christus ut homo, est una persona cum filio Dei: non vero probat illa ratio per se sumpta, Christum ut hominem non esse adoptatum ad æternam beatitudinem, quia, si supponeremus, non obstante unitate personæ Christi Dei & hominis, Christum ut hominem neque esse beatum, neque habere intrinsicè aliquod jus ad hæreditatem illam, utpote si fingamus, nullo modo esse illi debitam ratione unionis, tunc revera non repugnaret hæc adoptio ad illam hæreditatem cum unitate personæ Dei hominis, quia licet quoad unitatem personæ esset realis unio, & non tantum affectiva inter humanam & divinam naturam, & personalis

unitas inter Deum & hominem: tamen quantum ad acceptandum Christum ut hominem ad beatitudinem, esset inter Deum & Christum ut sic unio tantum affectiva, quia neque Christus ut homo ex se haberet jus ad illam hæreditatem, ut supponitur, neque ad illam admittetur, nisi per extrinsecam Dei benevolentiam, & infusionem accidentalium donorum, quo modo alii homines adoptantur.

Ut ergo ratio probet necessario addendum est illud fundamentale principium, quod Christus, etiam ut homo, non est persona extranea respectu hæreditatis æternæ; quia si talis esset, quamvis aliqui haberet realem unionem vel unitatem cum Deo, posset ad illam hæreditatem adoptari. Sicut in adoptione humana, etiam si nepos sit sanguine conjunctus avo, adoptari potest ad hæreditatem ut filius, quatenus sub tali ratione extraneus est, & ab illa hæreditate alienus. Unde fit, ut non obstante conjunctione sanguinis vel alia reali unione, possit adungi alia unio affectiva respectu hæreditatis, quæ, si non sit debita, nec cum priori unione ex natura rei necessario conjuncta, veram habeat rationem adoptionis. Igitur non potest hæc ratio esse efficax sine prima, eique adjungendum est hoc principium, quod jus ad æternam hæreditatem necessario consequitur in assumpta natura ex hypostatica unione, sine quo non video, quomodo possit efficaci ratione a Christo ut homine excludi filiatio adoptiva. Nam quod quidam ajunt, etiam si gratia, & gloria non essent Christo debita ratione unionis, non posse ratione illarum adoptari, vel filium esse adoptivum, quia gratia (inquiunt) est perfectio humanitatis, filiatio vero pertinet ad suppositum secundum se. Hoc (inquam) non est consequenter dictum, & ratio illa satis est in superioribus impugnata; imò est ostensum, beatitudinem æternam, cum in operatione consistat, & jus ad illam, non minus pertinere ad suppositum quam filiationem, utrumque autem mediante natura ut gratia affecta. Item posita illa hypothesi, Christus ut homo non esset filius per gratiam unionis, quia non esset hæres ex vi illius; ergo indigeret benevolentia extrinseca, & per solam illam, seu gratiam ab illa manentem haberet jus ad beatitudinem: hoc autem est esse filium adoptivum.

Quinta ratio addi solet in hunc modum, nam humanitas Christi non est adoptata: ergo nec Christus ut homo est adoptatus, & consequenter nec filius adoptivus. Antecedens probabitur ex professio infra sect. 4. consequentia vero probatur, quia, sicut Christus non potest dici homo, nisi ratione naturæ humanæ, ita nec potest dici adoptatus, nisi ratione naturæ adoptatæ. Hæc vero ratio proprie & in rigore sumpta, efficax non est, quia vel consequentia non est formalis, vel plane in tota ratione petitur principium, nisi aliqua via ad fundamentum a nobis positum reducat. Cum enim sumitur, humanitatem non esse adoptatam, aut est sensus non esse id, quod proprie adoptatum est, aut non esse rationem, quæ mediante Christo ut homo adoptatur, vel (ut ita dicam) non esse coadoptatam cum Christo ut homine. Primus sensus videtur esse propriissimus illius antecedentis, quod in eodem sensu verissimum est, ut citato loco ostendam; tamen consequentia non recte inferitur, quia etiam in puro homine humanitas non adoptatur, neque a Deo, neque ab homine: & in universum (ut dicta sect. 4. ostendam) humanitas non est capax adoptionis, donec personata sit: & tunc jam non est ipsa quæ adoptatur, sed homo, quamvis per ipsam seu in ipsa adoptetur; & illa etiam possit aliquo modo dici coadoptari, quando homo adoptatur. Quod si hoc etiam modo antecedens illius rationis intelligatur juxta posteriore sensum supra positum, est quidem illud etiam in eo sensu verum, sed inutile ad probandam conclusionem intentam; nam, vel supponit illam, vel ex illa probandum est. Si enim humanitas Christi adoptari non potuit concomitanter (ut sic dicam), ideo est, quia Christus ut homo adoptari non potuit, nam humanitas non coadoptatur, nisi cum homo adoptatur. Et similiter, si Christus non fuit in humanitate adoptatus, id non potuit ex humanitate provenire, nam ipsa, quantum est de se, adoptabilis est, ut quo (ut sic dicam). Quod si in Christo non potuit eam rationem exercere, est ratione personæ, quæ omnem naturam sibi personaliter conjunctam, reddit incapacem adoptionis. Hoc tamen non aliunde habet, nisi quia non est persona

Quinta ratio ex-  
posita exponitur.



extranea aut aliena non solum secundum se, sed etiam unita cuicumque naturæ. Nec solum quoad esse substantiale & personale, sed etiam quoad divinam hæreditatem, ut participabilem in assumpta natura. Hoc enim, ut dixit, semper addere oportet, ut concludatur intentum; quia aliàs ad summum probabitur, Christum ut hominem non esse adoptatum ad esse personale Verbi, de quo fere nulla est inter Catholicos controversia, sed de adoptione ad hæreditatem æternam. Unde, licet demus, humanitatem non esse adoptatam ad unionem hypostaticam, adhuc superest quæstio, an Christus ut subsistens in ipsa, sit adoptatus ad hæreditatem æternam.

Sextam rationem nonnulli viri docti addunt, quia filiatio adoptiva dicit respectum ad totam Trinitatem: sed Christus, in quantum homo, non potest dici filius Trinitatis: ergo nec potest dici filius adoptivus. Major constat ex D. Thoma hic art. 2. ubi probat, adoptare filios esse opus totius Trinitatis. Et est per se manifestum, quia est opus ad extra. Minor probatur, quia aliàs Christus in quantum homo esset filius Spiritus sancti, & filius sui ipsius, quod est contra Concilium Toletanum, & Augustinum. Sed hæc ratio, si efficax esset, non solum probaret Christum ut hominem non esse filium adoptivum, sed etiam nullo modo esse aut vocari posse filium Dei, nec naturalem, neque ulla alia ratione, quod esse falsum probant omnia adducta in hac & præcedente sectione, & ipsimet, qui ea ratione utuntur, concedunt, Christum ut hominem esse filium Dei naturalem ob gratiam unionis, in quo, vel non consequenter loquuntur, vel (quod potius existimo) non loquuntur de Christo ut homine eo sensu quo nos loquimur, scilicet designando formaliter humanitatem ut id in quo convenit Christo talis relatio, sed designando tantum suppositum actu humanitati unitum. Sed si in hoc posteriori sensu loquuntur, sine causa ipsimet negant esse de fide, Christum ut hominem non esse adoptivum, sed naturalem filium, nam oppositum est aperta hæresis Nestoriana & Felicianæ damnata in Conc. Francof. ut dicā sect. seq. Igitur loquendo in priori sensu de Christo ut homine, ut loquimur, quacumque ratione dicatur esse filius Dei, five naturalis, five adoptivus, five per gratiam, necessario dicendum est, sub ea ratione non dicere relationem ad solam primam personam Trinitatis, sed ad Deum ut Deum, & consequenter ad tres personas ut sunt unus Deus. Probatur, quia Christus ut homo non est filius ex vi generationis æternæ ut sic, sed ex eo, quod filiatio quam habuit per generationem æternam communicata est & unita humanitati, nam ex eo factum est, ut hic homo in ipsa humanitate sit sanctus ex vi unionis, & habens jus ad hæreditatem Dei in ipsa humanitate participandam, sed quod illa relatio filiationis æternæ communicata sit & unita humanitati, est opus totius Trinitatis; ergo relatio filiationis, quæ hinc proxime resultat, & ad Trinitatem ut est unus Deus ad extra operans.

Et confirmatur ac declaratur, quia Christus ut homo non est genitus ab æterno, sed factus in tempore: ergo, si aliqua relatio filiationis in eo ut sic resultat, non est æterna, sed temporalis: omnis autem temporalis relatio ad Deum, fundata in actione, est ad totam Trinitatem ut est unus Deus, quia omnis actio, & effectus ad extra, communis est. Tandem Christus ut homo habet beatitudinem a tota Trinitate: ergo ab eadem habet jus ad illam hæreditatem prout intelligitur prius natura esse, quam esse beatus: sed ratione hujus dicitur filius in quantum homo, vel saltem a posteriori inde recte colligimus esse filium: ergo sub ea ratione relatio filii est ad illum, a quo effectivè habet hoc jus, seu radicem ejus, quæ est hypostatica unio. Denique hoc etiam confirmant & per suadent, quæ superiori sect. dicta sunt in solutione ad 1.

Imo aliqui putant, hoc esse definitum ab Adriano Papa, eumque hoc modo exposuisse illa verba Marth. 3. & 17. *Hic est Filius meus dilectus, &c.* dicta scilicet esse, non tantum a prima persona, sed a tota Trinitate, ad Christum ut hominem: sed quamvis Adrianus Papa ex illo verbo *Complacuit* colligat, totam Trinitatem comprehendendi, quia in homine Christo tota complacuit Trinitas, non tamen dicit dictum illud referri ad totam Trinitatem, nec loquitur de Christo ut homine eo sensu, quo nos loquimur, sed in alio supra declarato, scilicet ex parte suppositi, unde non est hæc mens definitionis ejus: quæ

omnia in sequente sectione latius declarabuntur. Possunt autem probabiliter ad hoc suadendum induci verba Christi Domini, Joan. 20. *Ascendo ad Patrem meum, & patrem vestrum, Deum meum, & Deum vestrum*, juxta expositionem insinuatam sect. præced. Nam, licet probabile sit, Christum loqui ad Patrem primam Trinitatis personam, tamen certum videtur loqui de se ipso ut homine; alioqui non vocaret Deum suum. Sicut ergo esse Deum Christi ut hominis non convenit soli primæ personæ, sed huic Deo, & omnibus tribus personis quatenus sunt unus Deus: ita illa appellatio & relatio Patris, quæ tribuitur primæ personæ respectu Christi ut hominis, non est propria ejus, sed conveniens Deo ut sic, licet specialiter ei approprietur, & attribuitur propter specialem auctoritatem originis, quam habet respectu Christi etiam ut Deus est. Sic enim sæpe Christus in Evangelio, loquens ad Patrem per respectum ad seipsum ut hominem, ei attribuit, quod commune habet cum cæteris personis, ut est illud Joan. 14. *Sicut mandatum dedit mihi Pater, sic facio*, & sæpe aliàs. Scio, Ambrosium lib. 10. in Luc. & lib. 1. de fid. ad Gratianum, cap. 6. aliter hunc locum intellexisse, dicit enim, in verbo illo, *ad Patrem meum*, loqui Christum ut Deum, in illo autem: *Deum meum*, loqui Christum ut hominem. Quæ expositio est etiam probabilis, & facile sustineri potest: sed alia non est cur rejiciatur, quandoquidem uterque respectus potest in Christum, ut hominem convenire, & Christus eo loco, eodem tenore verborum de se ipso sub utroque respectu loquitur. Denique quatenus Christus ut homo est creatura, & aliquid non ab æterno genitum, sed in tempore factum a Patre, illum vocat Deum suum, sicut & est Deus noster quatenus nos creavit: ergo idem Christus ut homo, quatenus a Deo est sanctificatus per gratiam unionis, & per illam habet jus ad gloriam, potest vocare Deum, patrem suum multo altiori & eminentiori ratione, quam nos, quatenus sumus ab illo sanctificati. Hæc ergo relatio non est ad solam personam Patris, sed ad Deum ut sic, & ad tres personas ut sunt unus Deus.

Neque in hac veritate, quod ad rem attinet, potest esse difficultas alicujus momenti: nam Concilium Toletanum, & D. August. in sensu longe diverso loquuntur: Concilium enim Toletan. XI. in confes. fidei expresse loquitur de Christo quoad generationem humanam; sic enim ait: *Non tamen Spiritus sanctus pater credendus est filii pro eo, quod Maria, eodem Spiritu sancto obumbrante, concepit*. Et eodem sensu locutus est Augult. præsertim in Enchir. c. 38. sic enim ait: *Nunquid ideo dicturi sumus, patrem hominis Christi esse Spiritum sanctum, ut Deus Pater Verbum genuerit, Spiritus sanctus hominem, ex qua utraque substantia Christus unus esset, & Dei Patris filius secundum Verbum, & Spiritus sancti filius secundum hominem, quod quasi eum Spiritus sanctus tanquam Pater ejus ex matre Virgine genuisset. Quis hoc dicere audebit*. Et c. 39. reddit rationem dicens: *Non quicquid de aliquare nascitur, continuo ejusdem rei filius nuncupatur*. Quod variis exemplis confirmat, & est per se satis clarum, quia non omnis causa efficiens, pater proprie appellatur: quamvis ergo Spiritui sancto attribuitur efficientia Christi ut hominis quoad conceptionem mirabilem ex matre, non tamen ea ratione potest Spiritus sanctus pater Christi vocari, quia non illam effecit per modum naturalis generationis, sed alio superiori & altiori modo. De filiatione ergo & paternitate humana loquuntur hi Patres, non de filiatione divina, quæ fundatur in gratia unionis, & speciali sanctificatione ab ea proveniente, de qua non meminerunt. Verum est, in lib. 2. de Trin. cap. 10. generalius locutum esse Augustinum: probat enim, vocem illam: *Tu es filius meus dilectus*, non nisi de Patre posse accipi, quia *Jesus Spiritus sancti filius, aut etiam suus filius credi, aut intelligi non potest*. Et similiter probat, Christum non potuisse dicere illa verba: *Pater clarifica filium tuum*, nisi Deo Patri tantum, non Spiritui Sancto, cujus non est filius. Nam ut illa ratio sit efficax, & expositio necessaria, necesse est intelligi de omni filiatione Christi ut hominis ad Deum.

Quapropter addo, quod, licet in re Christus ut homo habeat hanc filiationem, tamen in modo loquendi, non potest simpliciter & absolute dici filius suus seu Verbi, quia in hujusmodi locutione absolute dicta denotatur distinctio personarum: unde qui sic loquitur, Christum dividit,



vidit, sicut supra etiam dicebamus ob hanc causam Christum non posse dici absolute sibi subditum, aut Deum sui ipsius, quamvis certum sit, ut hominem esse & dici posse sibi subditum ut Deo. Respectu autem Spiritus sancti, quamvis cesset prædictum inconueniens, cum inter Christum & Spiritum sanctum sit distinctio personarum, nihilominus simpliciter non est ita loquendum, Christus est filius Spiritus sancti, *ne duos Christi patres videamur asserere*, ut Concilium Tolet. XI. cit. loco dixit, id est, ne secundum divinitatē videamur asserere, Spiritum sanctum esse patrem Christi: nam filiatio Christi simpliciter & absolute dicta, & præsertim si addatur filiatio naturalis, est ipsa filiatio æterna, prout habet effect per æternam generationem. Et ob eandem causam, etiam cum illa determinatione, in quantum homo, non est dicendus Christus filius sui aut Spiritus sancti, nisi etiam ex parte prædicati addatur determinatio secundum gratiam unionis, & maxime, quia in illa reduplicatione, in quantum homo, magis indicatur generatio corporalis, quam spiritalis per gratiam unionis. Atque hinc a fortiori constat, Christum non posse dici absolute filium Trinitatis, quia Trinitas tres personas comprehendit, unde si Filii & Spiritus Sancti non potest dici filius, nec Trinitatis poterit. At vero respectu Dei absolute optime dici potest Christus connaturalis filius, tam simpliciter, quam in quantum homo, & siue intelligatur ratione æternæ generationis, siue ratione unionis, quia nomen Dei est de se indifferens ad personam Patris, & Filii, vel Spiritus sancti, sicut etiam absolute dici potest Christus habere Deum, quia distinctio in ea locutione inclusa sufficiens saluatur in persona Patris: est autem prudens consilium, quando in subiecto ponitur Christus cum illa determinatione, *in quantum homo*, addere etiam in prædicato, esse filium Dei naturalem per gratiam unionis, ut omnis æquivocatio & erroris suspicio auferatur.

Obiectio  
nes contra  
superiorem  
rationem  
ad hoc  
conferunt.

Sed obijciat tandem aliquis, quod hæc filiatio Christi ut hominis ad Deum, prout a nobis explicata est, improprie dicatur filiatio naturalis, cum vix nomen filiationis mereatur. Primo, quia filius naturalis non est, nisi qui per naturalem generationem naturam accipit a Patre; sed Christus ut homo, nec per naturalem generationem procedit a Deo, ut supra de humana ejus conceptione dicebamus, & de ipsa unionem hypostatica constat, non posse dici naturalem generationem, vel per eam accipere vel participare Christum ut hominem naturam divinam: ergo non potest dici naturalis filiatio, quæ per hanc unionem convenit. Secundo magis distat hæc filiatio a vera & propria filiatione naturali, quam distat ab adoptiva; sed propter differentiam, quam habet ab adoptiva, negatur esse adoptiva: ergo ob eandem causam negandum est esse naturalem. Consequentia patet a paritate rationis. Major autem probatur, quia magis distat beatitudo animæ Christi ab essentiali beatitudine divinitatis, quam a beatitudine cujusvis puræ creaturæ, id est, magis ab illa exceditur, quam ipsa reliquas superet. Et similiter jus, quod Christus ut homo habet ad hæreditatem, multo est inferioris rationis respectu juris, quod habet in quantum Deus, quam sit jus filii adoptivi respectu juris Christi ut hominis: talis autem est filiatio, quale est hoc jus. Quocirca, sicut inter gratiam creatam sanctificantem, & divinitatem per essentiam inventa est sanctificatio quædam media; quæ est per gratiam unionis, ita non est inconueniens inveniri filiationem medium, quæ nec sit adoptiva, nec naturalis, sed dicatur per gratiam unionis. Tertio, quia aliàs sequitur inesse Christo duas filiationes naturales ad Deum & tertiā ad Matrem, quod, ut judicetur absurdum, satis est esse inauditum: duas autem tantum hæcenus audivimus in Christo nativitates: unam ex Patre, & alteram ex Matre, & duas tantum filiationes naturales, unam ad Deum, alteram ad hominem. Unde hic urgere possumus argumentum ab auctoritate negativa, quo Concilium Francofordiense probat, Christum non esse dicendum filium adoptivum, quia nunquam in Scriptura sacra sic appellatur, cum tamen de filiatione ejus frequens fiat mentio: sed similiter nunquam vocatur filius naturalis in sensu a nobis exposito, sed solum ratione æternæ generationis, & respectu primæ personæ Trinitatis: imo ipsummet Concilium Francoford. quod expressius tractavit de hac filiatione Christi ut hominis, nunquam eo modo, quo nos, illam explicuit, sed tantum

Secunda.

Tertia.

ex parte suppositi, quod per generationem æternam a Patre procedit: ergo non solum falsum, sed & periculosum videtur, alium modum filiationis naturalis in Christo ut homine introducere. Quarto, quia aliàs si persona Patris vel Spiritus sancti incarnata esset, vere dici posset filius Dei naturalis, in quantum homo, quod non est minus inauditum & absurdum: sequela patet, quia in illo homine fuisset idem fundamentum filiationis naturalis, scilicet gratia unionis. Et confirmo tandem, quia etiam videtur sequi, Virginem Mariam dicendam esse filiam Dei naturalem, quia gratia sanctificans non est illi omnino gratis data, sed ex quodam debito ratione divinæ maternitatis, sicut Christo dicitur data ex debito gratiæ unionis.

Hæc argumenta ostendunt quidem, sententiam a nobis expositam non esse omnino certam, neque rem ad fidem pertinentem, ut latius dicam sectione sequente: non tamen admodum urgent contra illius veritatem, magisque impugnant locutionem seu vocem *naturalis*, quam rem ipsam. Imo, si quid concluderent, non solum probarent, Christum ut hominem non esse filium naturalem Dei, sed omnino non esse filium Dei. Quod tamen nemo Catholicus aut prudens negare audebit, ut satis videtur sectione præcedente probatum. Igitur ad primum, quod attinet ad nomen filii, quamvis secundum physicam & rigorosam proprietatem solum dicatur de eo, qui ex vi originis in natura vivente similis est principio a quo procedit, certum est tamen, secundum quandam analogiam, & proportionem extendi ad significandum eum, qui jus filii imitatur aut participat in ordine ad hæreditatem paternam. Quæ ratio filiationis tanto erit perfectior, quanto hoc jus fuerit excellentius, & maxime si conjunctum fuerit cum vera & reali processione ejus, qui filius nominatur, ab eo, cujus dicitur filius. Faciemur igitur, Christum ut hominem in eo sensu, quo loquimur, scilicet, formaliter specificando naturam humanam non dici filium Dei cum eo rigore & proprietate, quo dicitur filius secundum naturam divinam, quia in quantum homo est minor Patre, unde non est ei æqualis, nec in natura similis: dicitur ergo filius secundum analogiam rationem, quia per ipsammet filiationem naturalem, etiam in quantum homo, sanctificatur, & jus habet ad divinam hæreditatem, etiam in humanitate, seu per humanitatem obtinendam, quæ ratio filiationis, licet non sit tam propria & perfecta, sicut est ipsa filiatio æterna secundum se est tamen perfectior, quam sit filiatio hominum & angelorum per gratiam iustificantem, ut satis ex sectione præcedente constat.

Quod autem spectat ad denominationem *naturalis filii*, constat ex philosophia posse multis modis *naturalis* dici, atque ita posse in eo termino laborari in æquivoco; inter alias vero acceptiones una & satis Theologica est, qua *naturale* dicitur id, quod est a natura congenitum, & maxime quando, id est, ex vi conceptionis seu productionis, & ab aliquo principio intrinseco, quomodo verissime dicitur Christus etiam ut homo, naturaliter sanctus, juxta verbum Angeli, Luc. *Quod ex te nascetur Sanctum, vocabitur filius Dei*. De qua acceptione & aliis dictum est supra q. 2. art. 12. Hoc ergo modo recte dicitur Christus ut homo filius Dei naturalis per gratiam unionis, non solum, quia a principio suæ conceptionis habuit hanc filiationem, id enim ad proprietatem locutionis non sufficit (alias etiam B. Virgo esset filia Dei naturalis, & angeli similiter) sed quia ita habuit a principio, ut & ipsa unionis gratia intrinseca illi fuerit, quia per illam, quasi formaliter, constituitur hic homo Christus, ut Christus est, & rursus quia ex vi ejusdem unionis habet illam sanctificationem & illud jus ad hæreditatem æternam, a quibus filius denominatur. Ad primam ergo objectionem absolute potest negari major propositio, si in sensu inclusivo intelligatur, scilicet non esse alium modum naturalis filiationis præter eum, qui est per naturalem generationem. Si vero sit sensus non exclusivus, sed indefinitus, sic neganda est consequentia, quia argumentum procedit ex puris particularibus. Denique si sensus sit, illum modum filiationis, qui est per naturalem generationem, & communicationem ejusdem omnino nature, esse potissimum, & comparisonem illius, quemlibet alium esse improprium & analogum, sic concedo, Christum ut hominem

Responsio.

Ad primum.



nem non esse filium naturalem illo perfectissimo modo.\*

Quod si urgeat aliquis, nam, si illa filiatio non est omnino perfecta, erit per participationem, & consequenter, juxta rationem D. Th. hic, non minus repugnabat Christo ut homini, quam filiatio adoptiva, quia repugnat, aliquid dici de eodem per essentiam, & per participationem. Respondetur in primis, quod ad rem attinet, non esse æqualem rationem, quia adoptio, ut dixi, includit negationem omnis filiationis naturalis: filiatio autem naturalis per gratiam unionis, non excludit ab eadem persona filiationem naturalem per generationem æternam, sed solum excludit illam secundum talem naturam. Quod vero attinet ad vim rationis D. Thom. jam supra explicui, illud principium non posse universaliter intelligi de quacumque ratione participata, sed de illa, quæ includit specialem negationem repugnantem unioni hypostaticæ, seu supposito increato secundum se. Adde vero deinde ad rem magis explicandam, dupliciter posse esse aliquam filiationem divinam per participationem: uno modo, quia forma, vel quasi forma, in qua proxime fundatur talis filiatio, est entitas participata & creata, & hoc modo filiatio adoptiva est per participationem, & ideo repugnat personæ increatæ sub quacumque ratione consideretur: & filiatio naturalis, de qua nunc agimus, non est hoc modo per participationem, sed per gratiam unionis, quæ quantum ad aliquid increata est, ut suo loco diximus. Alio ergo modo dici potest filiatio per participationem non quantum ad formam, in qua proxime fundatur, quia illa increata est, sed quantum ad modum recipiendi (ut sic dicam) sanctificationem, & jus ad hæreditatem æternam a tali forma, qui est medio aliquo modo unionis creato, & participato: & hujusmodi filiatio per participationem non repugnat convenire simul cum perfectissima filiatione per essentiam in eadem persona, secundum diversas naturas: quia neque includit aliquid repugnans increatæ personæ, neque excludit unionem hypostaticam, immo illam intrinsece excludit.

**Ad secundum.** Ex his facilis est responsio ad secundum; in rigore enim solum probat, hanc filiationem & non esse naturalem in eo sensu, quo filiatio per essentiam seu per naturalem generationem talis dicitur, & posse etiam hanc filiationem vocari per gratiam unionis, non vero inde sequitur non vocari proprie naturalem secundum aliam rationem & considerationem, nam & ipsa gratia unionis, naturalis dicitur, gratia quidem respectu humanitatis, cui gratis conceditur, naturalis vero respectu Christi, qui in suis intrinsecis principiis, quibus constituitur, illam includit. Ut vero argumentum illud clarius quoad omnia dissolvatur, declaranda magis est illa proportio inter hanc filiationem naturalem per gratiam unionis comparatam ad filiationem naturalem per essentiam, & filiationem adoptivam, inter quas medium quodammodo locum tenet, quatenus hanc superat & ab illa superatur. Comparari ergo possunt vel in forma ipsa, quæ est proximum filiationis, & juris hæreditarii fundamentum: vel in jure ipso, & modo obtinendi, vel participandi hæreditatem: quoad hoc ergo posterius majorem quidem affinitatem habet hæc filiatio per gratiam unionis cum filiatione adoptiva, quam cum filiatione per essentiam; ut argumentum propositum convincit: at vero quoad illud prius multo major est propinquitas hujus filiationis ad filiationem per essentiam, quam ad adoptivam, quia proxima ratio ejus est ipsamet filiatio increata, quamvis non secundum se, sed ut humanitati unita: & quia ratio & modus filiationis ut dici possit naturalis, maxime sumitur ex forma, in qua fundatur, & ex intrinseca connexionione vel unionem aut identitate, quem talis forma habet cum persona, cui talis filiatio convenit, ideo hæc filiatio merito naturalis dicitur, & nullo modo adoptiva: quia forma illa, totaque ejus dignitas, connaturalis est tali personæ, & nullo modo per adoptionem seu intrinsecam benevolentiam ei convenit.

**Ad Tertium.** Ad tertium respondetur, filiationes naturales proprias, ac fundatas in propriis nativitatibus & generationibus tantum esse duas in Christo Domino, scilicet, humanam & divinam, & has esse, de quibus Sancti communiter loquuntur, nullum tamen esse inconveniens præter has considerare in Christo aliam filiationem per gratiam unionis, quæ secundum aliam considerationem,

naturalis etiam dicitur, ut explicuimus. Ut hoc autem amplius declaretur, & argumento etiam ab auctoritate negativa clarius satisfiat, adverto, dupliciter nos loqui posse de his filiationibus: uno modo quantum ad ipsum respectum prædicamentalem, seu quasi prædicamentalem, qui dici solet, *esse ad*, & secundum hanc rationem nulum est inconveniens admittere in Christo tres respectus, unum realem ad Patrem, quem habet in quantum Deus genitus est, alium, quem ut homo genitus habet ad matrem, sive ille rationis sit, sive realis, alium quem ut homo sanctificatus per gratiam unionis & hæres vitæ æternæ habet ad Deum sanctificatorem suum, qui tres respectus possunt nomine filiationis naturalis nuncupari, ut de duobus primis per se constat, & de tertio satis a nobis declaratum est. Hæc vero consideratio nimis est philosophica & Scholastica, multumque habet de nostræ rationis præcisione ac consideratione, præsertim si aliquis ex his respectibus tantum rationis sit, ut revera esse diximus: & propter hanc causam raro aut nunquam invenitur hæc trimembris divisio, præsertim apud sacros auctores. Alio modo possumus loqui de his filiationibus, quam ad formas, & origines seu productiones, in quibus fundantur, seu ad quas consequuntur prædicti respectus, & hoc modo in re tantum sunt duæ filiationes naturales in Christo, & duæ generationes secundum duas naturas, ex quibus constat, quamvis secundum rationem & præcisionem nostram, una earum possit dupliciter considerari, ut inde confurgat triplex ille respectus supra declaratus.

Sic ergo filiatio naturalis in Christo secundum rem una eademque est, tamen illam et, ut constituit personam in natura divina subsistentem & ab æterno genitam a Patre, est filiatio naturalis per essentiam: ut vero quasi formaliter sanctificat naturam humanam sibi unitam, reddique hunc hominem hæredem divinæ hæreditatis, in ipsa etiam humana natura ut sic fundat alium respectum filiationis naturalis: & hoc modo filiatio ipsa naturalis secundum rem sumpta, ratione & munere distinguitur a nobis, licet in se una sit, in filiatione autem humana non est hæc duplex consideratio: & ideo omni ratione una tantum est. E contrario vero accidit in productione seu origine, nam origo æterna Filii Dei a Patre, & re & consideratione una tantum est, quantum ad præsens spectat: productio autem Christi, ut homo est, quamvis in re sit una, duplicem tamen habet considerationem: in illa enim productione non tantum consideratur effectio seu formatio humanitatis, sed præcipue unitio totius humanitatis ad Verbum, per quam hic homo Christus resultat: hæc ergo actio dupliciter considerari potest, primo, quatenus præcise terminatur ad hoc, ut Deus ex muliere concipiatur, & fiat homo: & ut sic fundat relationem filiationis humanæ in ordine ad matrem, vel relationem effectus ad causam in ordine ad Deum efficientem. Secundo potest illa actio considerari, ut per eammet sanctificatur humanitas, & confertur huic homini jus ad divinam hæreditatem. Sicut enim in superioribus dicebamus, personam Verbi ut terminantem dependentiam naturæ humanæ in subsistendo, distingui ratione a se ipsa, ut est forma sanctificans humanitatem, ita etiam actio eadem quatenus est productiva hujus hominis in ratione cujusdam personæ subsistentis in natura humana, ratione distinguitur a se ipsa, quatenus est actualis hujus hominis sanctificatio. Et sub hac posteriori ratione fundat alium respectum filiationis naturalis, quem Christum ut hominem ad Deum habere dicimus. Atque ita constat, quomodo in Christo secundum rem tantum sit duplex filiatio, & duplex origo, & quomodo secundum rationem & considerationem nostram triplex distinguatur. Constat etiam cur Sancti in communi loquendi modo duplicis tantum filiationis & nativitatis Christi meminerint, quia loquuntur secundum rem, & non secundum considerationem & præcisionem nostram. Constat denique, cur agentes de filiatione Christi naturali semper eam explicent per respectum originis, æqualitatis, ac perfectæ similitudinis ad Patrem ex vi æternæ generationis, adjunctes ei humanitatem hypostatice unitam, quia secundum rem vere non est in Christo alia filiatio, & sanctitas ac jus ad divinam hæreditatem; quod in humanitate potest intelligi, ab hac filiatione quasi formaliter provenit, media unionem, & totum fundatur



in infinita dignitate illius filiationis, & ab illa omnino inseparabilis est sanctificatio humanitatis, supposita ejus unione, & ideo totus hic respectus filii naturalis, quem Christus sub utraque natura subsistens habet ad Deum, per modum unius communiter declaratur, & unus fere cum alio confunditur, non tantum propter unitatem personæ, nam hoc modo etiam filius hominis, & filius Dei, unus tantum est filius, nec propter solam similitudinem vocis, nam hæc etiam non sufficeret, sed propter unitatem & identitatem formæ sanctificantis Christum ut hominem cum ipsamet filiatione naturali & per essentiam Christi ut Dei.

Ad quartum, quidam gravis auctor referens opinionem quorundam Theologorum asserentium, si Spiritus S. assumeret humanitatem, eum ut hominem fore filium Dei per gratiam habitualement, dicit sibi vehementer displicere, quia neque esset (inquit) filius naturalis, neque adoptivus: & hanc posteriorem partem late probat: priorem autem dicit esse manifestam, quia habitualis gratia non sufficit filium Dei naturalem constituere eum, qui aliàs ex vi generationis æternæ filius Dei naturalis non est. Sed, quamvis multi & graves Theologi asserant, in eo casu Spiritum S. (& idem semper de persona Patris intelligatur) ut hominem, fore filium Dei, neminem tamen me legisse memini asserentem fore filium Dei adoptivum, magis quam Christum ut hominem. Neque argumentum quartum, in cuius solutione versamur, hoc infert, sed fore filium Dei naturalem. Quapropter in illa negatione filii adoptivi omnes convenimus propter rationes omnes de Christo factas, quarum summa est, quia vel esset filius per gratiam unionis, & hæc non facit filium adoptivum sed naturalem, ut satis probatum est, nam quoad hæc eadem est ratio de unione hypostatica terminata ad Spiritum sanctum, vel ad filium, quia non est minus sancta persona Spiritus sancti, & sufficiens ad sanctificandam naturam sibi unitam, quam persona Filii: neque minus esset illi homini connaturalis ac debita hæreditas æterna, seu jus ad illam ob dignitatem personæ, quam fuerit nunc debita Verbo incarnato ut sic: non ergo posset tunc Spiritus sanctus ut homo dici filius adoptivus ob gratiam unionis. Neque etiam ob gratiam habitualement, propter rationem tactam, quia talis gratia & supponeret illum hominem cui adveniret, jam sanctificatum per gratiam unionis, & ratione illius habentem jus ad gloriam: & consequenter etiam habentem perfectiorem rationem filii, quam ipsa posset conferre. Item esset ab intrinseco debita, unde non adveniret personæ extraneæ, aut solo affectu conjunctæ Deo conferenti gratiam, sed quæ personaliter esset ipsemet Deus. Itaque quoad hoc eadem est ratio de qualibet divina persona incarnata.

Atque hinc consequenter sequitur, in eo casu Spiritum sanctum, ut hominem, non fore filium Dei per gratiam habitualement; neque aliquem etiam legi, qui oppositum dixerit aut docuerit, non quidem propter eam rationem, quod hæc gratia non faciat filium Dei naturalem eum, qui aliàs ex vi generationis æternæ filius Dei naturalis non est: sed ob eam potius causam, quod hæc gratia etiam ipsum Christum ut hominem non facit filium Dei naturalem, etiam si ipse aliàs ex vi generationis æternæ sit filius Dei naturalis: ergo eadem vel majori ratione non posset constituere Spiritum sanctum ut hominem, filium Dei naturalem: ostensum est autem neque adoptivum posse constituere; relinquatur ergo, Spiritum sanctum ut hominem, nullo modo fuisse constituendum filium per talem gratiam. Ratio autem generalis est tacta sect. præced. quia cuicumque personæ divinæ incarnatæ gratia habitualis non confertur per modum novæ generationis, sed per modum proprietatis concomitantis priorem & excellentiorem gratiam. Unde etiam fit, ut in tali persona illa gratia non conferat primum & radicale jus ad hæreditatem. Et ideo nec constituit filium adoptivum, nec omnino filium: quia, sicut gratiæ habituali non est essentiale constituere filium adoptivum, nisi supposita persona extranea, seu (quod idem est) supposita negatione connaturalis debiti, aut altioris conjunctionis cum Deo, quam possit per ipsam gratiam & gloriam fieri: ita non est essentiale huic gratiæ, quod faciat filium, nisi supposita simili negatione, quæ necessaria, ut ipsa detur per modum propriæ ac per se generationis, & ut conferat primum & radicale jus ad gloriam,

Difficultas ergo tacta in illo quarto argumento non versatur de gratia habituali, sed de gratia unionis; & de hac ego olim asserui, in eo casu Spiritum sanctum ut hominem cum eadem veritate & proprietate esse dicendum filium Dei naturalem per gratiam unionis, quia id nunc dicitur de Christo ut homine in sensu hæcenus tractato. Quam sententiam aliis multis perdoctis placuisse video, & in ea persistendum censeo, quidquid nonnulli alii obmurmurent. Nam ratio insinuata videtur mihi convincens, nam Spiritus sanctus ut homo esset æque sanctus ac Christus ex vi unionis, & haberet æquale jus ad divinam hæreditatem: nam & persona ipsa est æqualis sanctitatis & dignitatis, & ex parte unionis hypostaticæ, ut suppono, non potest esse inæqualitas: sed Christus ut homo non est filius Dei naturalis per gratiam unionis, nisi ob prædictum jus in tali sanctificatione fundatum: ergo propter eandem rationem Spiritus sanctus ut homo esset filius naturalis per gratiam unionis. Dicent fortasse, Christum ut hominem non esse filium naturalem ob eam præcisam causam, sed quia illa sanctificatio & jus ad gloriam provenit a filiatione naturali & per essentiam, ut conjuncta humanitati. Sed contra hoc urget argumentum factum, quia æque digna & perfecta est personalitas Spiritus sancti: nam quod illa personalitas sit Filii, vel Spiritus sancti, materiale valde est. Nam Christus ut homo non denominatur filius naturalis a filiatione divina tanquam a forma formaliter referente Christum ut hominem ad Patrem, sed solum ut a subsistentia terminante dependentiam naturæ humanæ, & consequenter sanctificantem illam, & dante huic homini jus ad æternam hæreditatem: sed totum æque præstat quælibet personalitas divina: ergo quod illa sit filiatio, paternitas, vel processio, nihil refert ad præsentem effectum seu denominationem. Major est evidens, tum quia ostensum est, Christum ut hominem non referri speciali relatione filii ad Patrem æternum; tum etiam, quia illa æterna filiatio non potest informare hominem ut homo est, nec ipsum ad alium referre: ergo neque filium hoc modo denominare: tum denique quia aliàs, si Pater assumeret carnem, etiam ut homo referretur per paternitatem ad filium, & in quantum homo diceretur pater naturalis Filii Dei, quod est plane falsum. Sequela autem est evidens a paritate rationis. Et confirmatur hæc ratio, nam Spiritus sanctus ut homo, esset hæres divinæ hæreditatis: ergo esset filius; & non adoptivus; ergo naturalis per gratiam unionis, Antecedens constat ex dictis, quia haberet jus intrinsecum & connaturale ad divinam hæreditatem: consequentia vero a simili sumi potest ex illo Pauli: *Si filius & hæres*: est enim proprium filiorum Dei, esse hæres bonorum ipsius. Respondet enim illa hæreditas juri filiationis tanquam proprio & adæquato principio.

Sed respondere potest aliquis, in eo casu fore divinam beatitudinem connaturalem ac debitam Spiritui sancto ut homini, non tamen per modum hæreditatis, sed per modum cujusdam connaturalis proprietatis seu actionis: sicut scientia infusa vel alia similis perfectio potest dici connaturalis Christo non per modum hæreditatis, sed tanquam proprietas quædam. Et potest a simili apte explicari, nam ipsamet persona Spiritus sancti ut Deus est habet a Patre & Filio, sicut substantiam suam, ita & beatitudinem per essentiam, & tamen non habet illam per modum hæreditatis, sicut nec substantiam habet per modum generationis, & ideo non est filius: ergo non immerito idem dici potest de illo ut homine. Idemque majori ratione dici posset de Patre, si homo fieret, quia ut Deus est, multo minus habet illam beatitudinem ut hæreditatem. Hæc responsio est quidem apparens, sed in primis fere revocat controversiam ad quæstionem de nomine, nam quod nos præcipue intendimus, est, in eo casu Spiritum sanctum ut hominem habere intrinsecum jus ad illam beatitudinem. Deinde, cur affirmatur de Christo ut homine, quod habeat hoc jus ad illam beatitudinem tamquam ad hæreditatem, & negatur de Spiritu sancto, cum in reus utriusque sit æque perfectum, & in æquali dignitate, & simili actione fundatum? Nam quod Christus ut homo sit hæres, non inde formaliter habet, quod in quantum Deus hæres est, nam & hoc ipsum in rigore & proprietate non est verum, quia hæres videtur includere aliquam imperfectionem, nam significat potius jus ad hæreditatem, quam plenum dominium vel natural-



## S E C T I O III.

*An sit de fide, vel quogradu certitudinis tenendum sit, Christum in quantum hominem, seu secundum humanitatem, non esse filium Dei adoptivum, sed naturalem.*

lem possessionem & proprietatem illius. Dei autem Filius potius est genitus ut supremus Dominus, quam ut hæres, imo ut per se essentialiter Beatus, potius quam ut habens jus ad beatitudinem. Et, quicquid de hoc sit, non videtur referre ut in quantum homo sit hæres, sed hoc pendet ex jure quod habet in quantum homo, & ex modo, quo illud habet, & in hoc eadem videtur esse ratio de persona Spiritus sancti, si homo fieret: consistit autem ratio in hoc, quod ex vi illius actionis divinæ, qua fieret homo per unionem carnis ad ipsum, haberet hoc jus ad bona ipsius Dei, a quo talis actio & unio fieret. Et confirmatur ratione supra de Christo facta, nam homo per gratiam habet jus ad divinam beatitudinem ut ad hæreditatem: ergo multo magis Spiritus sanctus ut homo haberet hoc jus per gratiam unionis. Maxime quia ad ipsammet gratiam habitualement habet connaturale jus: ergo & ad gloriam, sub quacumque ratione potest gratiæ correspondere: ergo etiam sub ratione hæreditatis. Respondetur ergo ad quartum argumentum, quod ad rem attinet, verum esse, Spiritum sanctum ut hominem in eo casu fore filium Dei naturalem filiatione naturali, quæ est per gratiam unionis, prout eam in Christo ut homine explicuimus, & recte attigit Albert. in 3. dist. 10. art. 13. Nec potest aptius nomen inveniri, quo declaretur naturalis sanctificatio, & connaturale jus ad divinam beatitudinem, quæ haberet Spiritus sanctus ut homo ex vi illius originis, quam ut homo haberet a Deo ut efficiente ejus incarnationem, neque contra hoc occurrit difficultas alicujus momenti. Quod vero attinet ad modum loquendi, oportet caute loqui, & sufficientem explicationem adhibere, ne tribuendo Spiritui sancto nomen filii, videamur personas confundere: quod facile vitabitur adjungendo illud additum, *per gratiam unionis*.

Non est tamen simile de Virgine Matre, ut in ultima confirmatione inferebatur, tum quia per maternitatem non fit realis unio & personalis cum Deo: unde non tollitur, quin illa persona secundum se maneat extranea, tum etiam quia illa gratia non est ita debita & connaturalis ratione divinæ maternitatis, sicut ratione hypostaticæ unionis. Tum denique quia illa ratio antecessit ut dispositio congrua & decens ad maternitatem divinam, & per illam ut sic adoptata est B. Virgo in filiam perfectissimam, ut posset esse condigna mater.

Tandem ex his responsum satis est fundamento Durandi: dicendum enim est in primis, ut ex dictis facile constat, gratiam unionis communicatam humanitati Christi, esse alterius rationis a gratia filiorum adoptivorum, & ideo non constituere Christum hominem filium adoptivum, sed potius naturalem, quia personæ sic constitutæ intrinseca & connaturalis est talis gratia, & ratione illius est etiam illi intrinsecum, & connaturale jus ad æternam hæreditatem. Unde secundo dicitur, licet gratia habitualis sit in Christo & nobis ejusdem rationis, tamen modum habendi illam non esse eundem; & ideo licet nos per hanc gratiam constituamur filii adoptivi, quia non supponimur filii, sed extraneæ personæ, & per talem gratiam omnino liberaliter acceptamur: Christus tamen per illam gratiam non proprie constituitur filius, quia jam supponitur, & gratia illa est quasi proprietas consequens filiationem. Imo licet daremus aliquo modo denominari filium ab illa gratia, & relatione illam consequente: non tamen etiam sub hac ratione dicendus esset filius adoptivus, sed naturalis, quia (ut supra quæstione 7. dixi) etiam gratia fuit Christo connaturalis, non adventitia, & extranea: ergo & relatio, quæ in illa fundatur. Unde sicut idem calor igni est naturalis, & aquæ violentus: ita eadem relatio, quæ in nobis est filiatio adoptiva, in Christo non potest hanc rationem induere, ut recte hic D. Thom. ad secundum dixit, quod tandem etiam docuit Scot. in 3. d. 10. quamvis non satis connaturalitatem illius gratiæ explicuerit, nec rationem filiationis, quam Christus in quantum homo habet ex vi solius gratiæ unionis.

Ad confirmationem, & tertium argumentum in præced. section. relictum, sufficienter jam responsum est.

Argumentum  
talem  
tamen  
affir-  
mantis.  
Primum.

Ratio dubitandi est, quia illa propositio, etiam cum determinatione, Christus, in quantum homo, est filius adoptivus, videtur damnata in prædicto Concilio Francoford. est ergo illa propositio hæretica, & contraria de fide, nam, ut supponimus, illius Concilii auctoritas sufficiens est ad certam fidem nobis faciendam, nani licet Nationale fuerit trecentorum Episcoporum, tamen intercessit Summi Pontificis auctoritas, non tantum per Legatos, sed etiam per instructionem, quæ ejusdem veritatis definitionem, & virtualement Concilii confirmationem continebat. Et, quamvis per aliquos annos latuerit illa definitio, non potest tamen dubitari, quin facta fuerit, ut ex historiis constat, & consequenter etiam est certum, nobis esse sufficienter propositum, præsertim hoc tempore, in quo illud Concilium repertum est, & cæteris adjunctum, & in omnibus receptum. Antecedens probatur primo ex sensu contrarii erroris, contra quem facta est illa definitio. Elipandus enim, ut ex quadam ejus antiqua confessione refertur, non negabat unam in Christo personam, quam esse verbum ipsum divinum & Filium Dei naturalem fatebatur: aiebat, tamen *illum fuisse simul Dei & hominis filium, adoptivum humanitate, non adoptivum divinitate*. Unde non alio sensu asseruisse videtur Christum ut hominem esse filium adoptivum, nisi in eo, quem Durand. admittit, nā confitendo in Christo unam personam in duabus naturis, non potest alius modus adoptionis in eo excogitari. Imo nec simpliciter videtur asseruisse Christum esse filium adoptivum, sed cum illa adjectione, *in humanitate*: & ita referunt ejus errorem auctores antiqui, ut patet ex Jona Aureliano. Adone, & Aimonio, locis infra citandis, qui ajunt, Felicem docuisse, Christum secundum humanitatem fuisse adoptivum. Et nihilominus Patres Concilii Francoford. illam sententiam, ut ab Elipando asseriebatur, damnant ut hæreticam: ergo.

Secundo probatur ex verbis ejusdem Concilii, nam in primis Adrianus P. in ep. quæ ibidem refertur, dum damnasset sententiam & modum loquendi Elipandi, quæ vocat *perfidia verborum stramina*, subdit; *Hoc Catholica Ecclesia nunquam credidit, nunquam docuit, nunquam male credentibus assensum præbuit*. Et subdit. *Quod si secundum eorum callidam tergiversationem cuncta, quæ protulimus, ad divinitatem tantummodo Filii Dei referenda opinantur, dicant, ubi unquam communi affectu dixerit nobiscum, Pater noster: Scit enim (inquit) pater vester quid vobis opus sit, non dicit, Pater noster, quasi nobiscum adoptatus per gratiam*. In quibus verbis clare satis distinguit Christum ut Deum, & ut hominem, & negat, etiam ut hominem esse adoptatum per gratiam. Et infra adducens illud ad Rom. 8. *Proprio Filio suo non pepercit, sed pro nobis omnibus tradidit illum*, ponderat, secundum id dici proprium filium & non adoptivum, secundum quod pro nobis traditus est: traditus est autem in quantum homo. Unde concludit Adrian. *Sicut peccata nostra non tolleretur, si ipse peccatum haberet, ita adoptionis gratiam non tribueret, si ipse propter hominem, quem assumpsit sine sorde peccati, necessarium egerit, ut gratiam adoptionis acciperet*. Similia multa, tam in illa epistola, quam in cæteris partibus illius Concilii leguntur. Specialiter vero in libro Sacrosyllabo ponderatur in illis verbis Petri Matth. 16. *Tu es Christus Filius Dei vivi*, quod nomen *Christus* non est nomen solius divinitatis, sed hominis Dei, qui non tantum ut Deus, sed ut in humanitate unctus, dicitur Filius Dei. Denique omnia testimonia, quibus supra ex illo Concilio probavimus Christum ut hominem esse Filium Dei naturalem, probant, in eo esse definitum, Christum non posse dici filium adoptivum, etiam cum illa reduplicatione seu determinatione, *in quantum homo*: quia sæpe in eodem Concilio, & specialiter in ep. ad episc. Hispaniæ dicitur, filiationem adoptivam, & naturalem non posse eidem convenire, quia adoptiva includit negationem naturalis: si ergo Christo, etiam cum illa specificatione, *ut homini*, convenit filiatio naturalis, non potest adoptiva convenire.

Tertio possumus hoc confirmare ratione sumpta ex eodem Concilio, nam filiatio adoptiva & naturalis

Tertium.

R r

distin-



distinguunt personas, cum una sit extranea, & alia propria, sed distinguere personas in Christo est hæreticum: ergo etiam illi attribuire filiationem adoptivam, hæreticum est. In contrarium autem est, quia multi & graves Theologi, etiam post Concil. Francof. vel opinati sunt, Christum posse dici filium adoptivum, aut simpliciter, aut cum determinatione, *in quantum homo*: vel certe iudicarunt id esse probabile, & nullus ex antiquis damnavit ut hæreticam sententiam tribuentem Christo ut homini adoptionem, eo sensu quo Durand. tribuit, ut patet ex Alensi, D. Th. & multo magis ex Scoto, Richardo & alijs. Quod si quis dicat, hos auctores ignorasse definitionem Concil. Francof. cum nullam ejus mentionem fecerint, id certe verisimile non est, nam licet credi possit, eos non vidisse acta ipsius Concilij, quæ usque ad nostra fere tempora latuerunt, tamen vix credi potest, non legisse historias, quæ frequenter mentionem faciunt Felicianæ hæresis, cujus defensor & quasi protector fuit Elipandus, & damnationis ejus factæ tempore Adriani Papæ, congregato Concilio Francof. & inter Scholasticos Palu. in 3. d. 4. q. 1. hujus definitionis meminit, & nihilominus contrariam opinionem non damnat.

2. *Opinio.* In hac re varii sunt inter juniores dicendi modi. Primus est, hanc propositionem, Christum esse filium adoptivum, absolute esse hæreticam, non tam propter definitionem Concilij Francoford. quam propter antiquas definitiones Concilij Ephesini, & aliorum contra Nestorium, & communem traditionem Patrum in Scriptura fundatam, ut visum est sect. præced. De illa vero propositione cum determinatione Christus in quantum homo est filius adoptivus, negant esse hæreticam, quia neque ex præcedente sequitur, ut ex alijs similibus constat, & ex doctrina tradita supra q. 16. ubi contra Gabrielem & alios in 3. dist. 10. & 11. ostendimus, non omnem propositionem veram cum determinatione, esse veram sine illa. Neque etiam illa propositio cum illa determinatione negata est aut damnata ab antiquis Patribus vel Concilijs, imo Hilarius & Marius Victorinus citati sect. præced. illi favent. Quod vero spectat ad Concilium Francoford. quidam concedunt sane, illam propositionem in eo sensu, quo ab Scholasticis disputatur, & a Durando admittitur, damnatam esse in actis illius Concilij, prout nunc habentur, negant tamen id sufficere, ut hæretica censeatur, propter duo. Primo, quia non satis constat, illud, quod nos habemus, esse verum Concilium Francoford. quia ut sit certum, aliquod esse verum Concilium, debet constare, aut Pontificia auctoritate, aut sufficienti Ecclesiæ traditione: hætenus autem nullus Pontificum nobis proposuit hoc concilium, quod nos habemus, continere veram & incorruptam definitionem, quæ in illo Concilio facta est, aut hanc epistolam, quam nomine Adriani legimus, esse illam, quam Adrianus Papa decrevit, integram & incorruptam. Traditio etiam nulla est sufficiens, quia hæc acta diu latuerunt, & nuper inventa sunt, Laurentij Surri diligentia, viri quidem pii & docti, sed qui falli potuit, præbendo fidem alicui falsæ & supposititiæ inscriptioni. Auget autem incertitudinem, quia (quod sane mirum est) non docet, ubi hæc scripta invenerit, aut quibus certis signis sibi persuaferit, nullum in eo codice, quem invenit, fuisse mendacium aut fictionem admittam. Accedunt etiam aliæ conjecturæ, quas infra indicabo, ob quas multi viri docti & pii, adhuc formidant de illius codicis sinceritate ac puritate. Secundo ajunt, etiam si certo constaret de veritate ipsius Concilij, non sufficere ejus auctoritatem ad notam hæresis, licet sufficiat ad notam maximæ temeritatis, vel etiam erroris, quia neque est Concilium generale, sed vel Provinciale, vel certe Nationale plurium provinciarum, propter quod fortasse Paludan. Generale illud vocat, sed proprie non fuit, quia non fuerunt ex omni Ecclesia ad illud congregati, nec convocati Episcopi, sed tantum ex Gallia, Germania, & Italia, ut constat ex historiis, quas infra commemorabo. Rursus neque constat tale Concilium fuisse a summo Pontifice confirmatum, sine qua confirmatione Provinciale Concilium non sufficit ad certam fidem faciendam. Alii vero etiam illius Concilij auctoritatem admittant, negant, id damnasse prædictam propositionem cum illa determinatione in eo sensu, in quo Durand. & Scholastici loquuti sunt, sed in alio longe diverso, quem infra tractabo.

3. *Opinio.* Secunda opinio affirmat, non solum illam propositio-

nem simpliciter prolatam, Christus est filius adoptivus, sed etiam cum determinatione in quantum homo, vel secundum humanitatem esse hæreticam, & contrariam, nimirum Christum sub utraque ratione esse filium naturalem, esse de fide certam. Fundamentum est. Primo, quia Concilium Francoford. utramque damnat, ut in argumentis in principio propositis visum est: est autem in illo Concilio sufficiens auctoritas ad certam fidem faciendam ob auctoritatem Pontificis Adriani idem definiientis, quæ illi Concilio adjuncta est. Secundo, quia non est major ratio de una illarum propositionum, quam de alia, tum quia illa determinatio huic propositioni adjuncta non potest esse conditio diminuens, designans solam humanitatem, quia filiatio non est proprietas, quæ possit humanitati convenire, sed supposito tantum: ergo per illam determinationem solum designatur natura, in qua convenit supposito talis proprietas: propositio autem, quæ est vera cum determinatione hoc modo sumpta, etiam sine illa erit vera, ut patet in hac, Christus in quantum homo est filius Virginis; recte enim sequitur, simpliciter esse filium Virginis, quia non fit argumentum a secundo quid ad simpliciter, sed a particulari ad indefinitum. Tum etiam, quia si prior propositio damnatur, est, quia filiatio adoptiva includit personam extraneam & alienam. Unde, cum Christo tribuitur filiationem adoptiva, significatur esse persona creata: sed non est minus hæreticum attribuire Christo ut homini personam creatam, quam Christo simpliciter: ergo.

Tertia sententia esse potest, neutram ex illis propositionibus esse simpliciter hæreticam, licet falsæ sint, & improbabilis, tanto vero evidentius, quanto hujusmodi proprietas Verbo aut Christo sine ulla determinatione attribuitur. Fundamentum hujus sententiæ sumendum est partim ex ratione in contrarium in principio proposita, partim ex fundamento primæ sententiæ, quatenus negat, Concil. Francoford. aut hoc damnasse, aut sufficere ad certam fidem faciendam, partim ex fundamento secundæ sententiæ, quatenus probat parem esse rationem utriusque locutionis, sine determinatione, aut cum illa. Ad decisionem hujus questionis dicam prius quid sentiendum esse censeam de sensu erroris Elipandi. Deinde de Concilio Francofordiensi aliqua præmittenda erunt, Deinde de re proposita dicetur.

Circa primum advertendum est, in hujusmodi locutione posse esse errorem, vel ex pravo sensu, erroneoque iudicio circa mysterium incarnationis, vel solum ex errore circa adoptionem, quid proprie sit, quidve proprie illa voce significetur. Prior error est proprie circa rem ad Christianam fidem pertinentem, posterior vero potius pertinet ad materiam civilem & politicam, magisque spectare videtur ad ignorantiam significationis vocis, quam ad errorem in iudicio alicujus rei. Unde primus error est sine dubio longe major, quamvis secundus prout versari potest in materia fidei periculosus sit & cavendus, quia ex verbis inordinate prolatis incurritur hæresis. Priori modo errarunt Nestorius, Photinus, Arius, & similes, qui Christum appellarunt filium adoptivum, eo quod existimarent, aut Verbum non esse verum Deum, aut Christum ut hominem esse purum hominem, & non nisi accidentaliter esse conjunctum Filio Dei naturali. Posteriori modo erravit Durandus, & si qui alij Theologi senserunt, Christum posse dici filium adoptivum, quamvis sit unum & idem suppositum divinum in naturâ divinâ & humana subsistens, quia non existimaverunt, filiationem adoptivam includere negationem filiationis naturalis in ipso supposito, sed tantum in natura; vel certe, quia non putarunt, gratiam unionis hypostaticæ contineri extra latitudinem seu definitionem adoptionis, cum mere gratis & ex sola dilectione communicetur illi naturæ, quæ ex se aliena erat & extranea respectu tanti beneficii; & ideo censuerunt, illam naturam posse dici adoptatam, & consequenter credere poterunt, subsistentem in tali natura ut sic esse filium adoptivum, eo quod in natura adoptata subsistat, media ejus adoptione, sicut dicitur filius humanus vel hominis, eo quod in natura humana subsistat, media humana conceptione.

Nonnulli ergo existimant, Elipandum, non priori, sed tantum hoc posteriori modo errasse. Quod colligunt primo ex verbis ipsius Elipandi, sumptis ex quadam ejus confessione, quam reperiri dicunt in Bibliotheca Toletana

3. *Opinio.*

Sensus erroris Elipandi.



tana in quodam libro a Beato & Heterio contra Elipandum scripto, in qua confessione Elipandus fatetur: *Verbum, pro salute humani generis, Deitate exinanita, hominem factum, circumcissum, baptizatum, &c.* quibus verbis veram hypostaticam unionem confitetur. Unde inferius disertis verbis unam Christi personam fatetur dicens: *Homo interior in una eademque Dei & hominis persona deglomeratus, atque carnis indumento indutus.* Unde tandem concludit, *simul esse Dei & hominis filium, adoptivum humanitate, & non adoptivum divinitate:* ergo non erravit Elipandus in mysterio incarnationis, sed male tantum utendo nomine adoptionis. Secundo fit hoc verisimile, tum ex his, quæ legimus in epistola Adriani, & toto Concilio Francoford. ubi multa contra Elipandi errorem afferuntur, non ad probandam unitatem personæ Christi, sed potius ad colligendum ex hac unitate, non posse adoptionem illi convenire. Itaque si Elipandus fuisset Nestorianus, facillimum fuisset illum convincere, tum antiquis definitionibus contra Nestorium, tum Scripturæ testimoniis, quibus demonstratur, tantum esse in Christo unam personam; at vero Concilium non ita procedit, sed potius ex unitate personæ Christi, quam Elipandus non negabat, & ex proprietatibus & vera definitione adoptionis, quas Elipandus ignorasse videtur, colligit, non posse Christo convenire adoptionem; & ad hoc tandem inconveniens deducit, quod si Christus adoptivus censetur, in duos filios dividendus sit: supponit ergo, Elipandum in posteriori tantum sensu suum errorem asseruisse. Et confirmatur, nam si Elipandus fuisset Nestorianus, non tam aperte & constanter ausus fuisset errorem suum defendere, ut ad Carolum Magnum, Principem valde Catholicum, & maximum Ecclesiæ defensionem, scripserit, ut Concilium congregari faceret, in quo ejus doctrina approbaretur, ut colligitur ex Epistola ejusdem Caroli ad Elipandum & alios Episcopos Hispaniæ, quæ in eodem Concilio Francofordiensi refertur. Cum enim in Ecclesia, præsertim Latina, funditus jam esset everfus Nestorii error, quo modo a Concilio & Episcopis Latinis sperare poterat Elipandus suæ doctrinæ confirmationem, si eadem esset cum Nestoriano errore?

Sed nihilominus contrariam sententiam exitimo vevriorem, nimirum Elipandum non tantum errasse in voce adoptionis, sed in re ipsa, & mysterio Incarnationis, atque adeo, quod ad rem attinet, in errorem Nestorii incidisse, quamvis verbis id non concederet, sed fortasse negaret, vel ex ignorantia, vel ut errorem suum tegeret. Hoc probo primo ex antiquis auctoribus & historiis, nā Jonas Aurelianus ejusdem fere temporis auctor in lib. 1. de cultu imaginum, in principio sic ait: *Emerfit ex Hispania tempore sanctæ memoriæ piissimi atque invictissimi Augusti quidam Felix nomine, actu infelix, Urgelitanensis civitatis Episcopus, qui, juncto suo scelerratissimo errori Eliphanto Toletana urbis Episcopo, secundum humanitatem non esse proprium Filium Dei, sed adoptivum, predicare ausus est: & hac virulenta doctrina uterque Hispaniam magna ex parte infecit:* & infra subdit. *Milites Christi invictissimis armis muniti, ejus insanam doctrinam propulsaverunt: ejusdem namque Principis jussu in unum coacti, adhibita etiam sanctæ Romanæ Ecclesiæ auctoritate, eundem Felicem damnarunt, imo cum auctore sui erroris Nestorio, quem imitatus est, perpetuo anathemati manciparunt.* Deinde Siebertus in suo chronico, anno 793. sic inquit: *Felicianæ hæresis condemnatur, & in præsentia Adriani Papæ ab ipso Felice auctore abdicatur. Hæc hæresis asserbat, Filium Dei in divina natura verum Deum esse, in humana vero nuncupativum. Item in divina natura verum esse filium Dei, in humana vero adoptivum, unam personam Dei & hominis dividens in duas personas, scilicet, veri filii & adoptivi.* Quam sententiam secutus est etiam Antonin. 2. part. hist. tit. 14. c. 1. §. 6. Et Paul. Æmil. lib. 2. prope finem, & Naucler. generat. 27. Similiter Gallisardus Arelat. in sua Chronographia anni 816. sub Carolo Magno dicit damnatum fuisse Elipandum in Concilio Francoford. qui personam Christi in duas dividebat. Et Præteolus in Elencho hæres. verbo Felix II. eandem sententiam sequens proprius dixit, Elipandum posuisse in Christo duas hypostasies. Denique eandem sententiam secutus est Franciscus Fevardentius in addition, ad libros Alphonsi de Castro contra hæreses, verbo Christus, hæresi 3. Sander. lib. 7.

Suarez Tom. XVI.

de Usib. Monarch. anno 772. ex aliis vero auctoribus, qui hujus erroris mentionem fecerunt (sunt autem illi innumeri) nullus alium sensum hujus erroris aut explicat aut insinuat, sed omnes vel simpliciter appellant Felicianam hæresim, asserentem, Christum esse filium Deo adoptivum, & non proprium ac verum, vel prædicto modo eam interpretantur.

Secundo, hinc fit conjectura, Felicem & Elipandum non errasse, abutendo tantum nomine adoptionis, aut sequendo aliquam ex his opinionibus, quas postea Scholastici ut probabiles in Scholas invexerunt, & permultos annos, prius quam acta Concilii Francoford. iterum in lucem prodirent, ut probabiles tractaverunt, vel etiā secuti sunt. Qui enim credibile est, eandem opinionem in Felice tā publice & acerbe fuisse in universa Ecclesia damnatam ut hæreticam, ipsumque Romæ coram Summo Pontifice coactum fuisse eam retractare, ut historiæ produnt, quam postea Durandus in eadem Romana Ecclesia publice tradidit & scriptis mandavit, eamque in eo damnatam non fuisse, sed ut scholasticam opinionem esse receptam?

Tertio ex variis locis ejusdem Concilii Francoford. id conjectare possumus: nam in primis Adrianus in sua epistola, col. 5. ei attribuit, quod Christum *adoptivum filium quasi purum hominem calamitati humane subiectum*, docerent. Quibus verbis plane significat, Felicem asseruisse Christum eodem modo esse filium adoptivum, quo nos sumus; atque adeo purum hominem. Et in lib. Sacrosyllabo, col. 3. sic dicitur: *Hæresim veterinosam illustrium virorum calcibus mirabiliter conculcatam, Catholicaque falce olim funditus detruncatam, spinosa moluntur redi viva radice suscitare de stirpe.* Quod plane dicit Concilium propter Nestorianam hæresim, quam Felix suscitabat. Unde inferius col. 8. inquit: *Non duo filii, alius Dei, alius hominis, ut sicut illi, errando, æstimaunt, adoptivus sit hominis filius, & sine adoptione Dei filius.* Ac denique hac ratione infra col. 12. Felicem & Elipandum vocat, *veterinosa fœce perfidei pollutos*. Præterea in ep. ad Episc. Hisp. co. 2. dicitur: *Invenimus in libelli vestri principio scriptum, quod vos posuistis, consistemus & credimus; Deum Dei filium, ante omnia tempora sive initio ex Patre genitum, coeternum & consubstantialem, non adoptione, sed genere.* Item post pauca in eodem loco legebatur: *Consistimus & credimus, eum factum ex muliere, factum sub lege, non genere esse Filium Dei, sed adoptione, non natura, sed gratia.* Et col. 4. *Quia hominem Christum verum Dei Patris filium esse, negastis, vobis defensor esse noluit;* & inferius col. 15. *Nonne olim eadem hæresis vestra in Nestorio ab universali Sanctæ Ecclesiæ refutata est etiam & damnata;* & addit; *Quapropter forte illum anathematizare noluitis, dum alios, Bonosum scilicet, Arium & Sabellium, Manicheumque, qui prave de Filio Dei senserunt, in epistola vestra anathematizastis.* In his enim omnibus factis insinuat, Felicem & Elipandum errasse circa veritatem ipsius mysterii Incarnationis, & in Nestorianam hæresim vel aperte, vel simulate incidisse.

Neque enim satis est dicere, eis attribui Nestorianum errorem, non quia illum docerent, sed quia aliquid docebant, ex quo ille error sequebatur. Nam, si illi omnino faterentur unionem naturarum secundum subsistentiam unam, & solum ex abusu, vel mala intelligentia nominis adoptionis, Christo ut homini filiatione adoptivam tribuissent, non tam evidenter ex eorum doctrina error Nestorii inferretur, ut ea solum de causa illis posset attribui. Exitimo ergo, Felicianam hæresim in hoc positam fuisse, quod credidit, Christum hominem eodem prorsus modo fuisse filium adoptivum, quo sunt alii homines justi: ita, quamvis in eo filiationis genere singularem haberit excellentiam & dignitatem, non tamen transcendit illud genus adoptionis, quo nos per gratiam adoptamur, neque aliter homo ille Christus fuerit conjunctus filio Dei naturali, quam hoc genere adoptionis. Hoc enim esse videtur, quod ex epistola Elipandi ad Carolum refertur dicta epistola Concilii Francoford. ad Episcopos Hispan. col. 5. *Ex Patre unigenitum sine adoptione, primogenitum vero in fine temporis, verum hominem absumendo de Virgine carnis adoptione, unigenitum in natura, primogenitum in adoptione & gratia:* quibus verbis plane docet, hominem illum assumptum fuisse adoptione. Quod vero illa adoptio fuerit tanquam puri hominis, & ejusdem rationis cum nostra, non obscure insinuat in epistola Concilii Fran-

R r 2 cofor-



cofordienſis ad præſules Hiſpaniæ col. 7. ubi reſertur, Elipandum in ſua Epiſtola expoſuiſſe illud 1. Joan. 3. *Similes ei erimus*, id eſt: *Similes in carnis adoptione, non ſimiles in divinitate*. Idem colligi poteſt ex illa confeſſione Elipandi, quæ in libro Gothico Beati, & Heterii legitur, ubi ſic ait. *Quia, ſi conformes ſunt omnes Sancti huic filio ſecundum gratiam, & cum adoptivo adoptivi, & cum advocato advocati, & cum Chriſto Chriſti, & cum parvulo parvuli, & cum ſervulo ſervuli*: ubi plane videtur nos Chriſto exæquare in adoptione, imo illo tam indigno loquendi modo de Chriſto nihil amplius quam de puro homine ſentire videtur: maxime, quod ibidem ei tribuit ignorantiam his verbis: *Quem* (ſcilicet hominem Chriſtum) *nonnulla actionis ſue myſteria nescire voluit*. Hoc autem eſt manifeſtum ſignum, quod de Chriſto ut de puro homine ſentiret; juxta doctrinam Damasceni lib. 3, de fide c. 21. & 22.

Nec me movet, quod in eadem confeſſione videtur unam in Chriſto ponere perſonam, nam, ut recte dixit D. Thomas, ſupra q. 2. art. 6. *Si fiat vis in nomine perſonæ, etiam Neſtorius utebatur unitate perſonæ, propter unitatem dignitatis & honoris*: unde etiam VI. Synodus definiat anathema eum, qui dicit, *unam perſonam ſecundum dignitatem, & honorem & adorationem, ſicut Theodorus & Neſtorius inſanientes conſcripſerunt*. Potuit ergo ſimiliter Elipandus hac calliditate ponere unitatem perſonæ. Et fane illa verba, quibus utitur: *In una eademque Dei & hominis perſona deglomeratus, & carnis indumento indutus*, non plus indicant, quam unionem accidentalem. Quod etiam colligitur ex verbis Elipandi, quæ in dicta epiſt. Concilii Francof. ad Episcopos Hiſpaniæ col. 9. referuntur, quibus appellabat Chriſtum, *hominem Deiſicum & Deum humanatum*, quibus reſpondens Concilium, ait: *Una perſona Deus & homo, non homo Deiſicus, & humanatus Deus*: nam, licet in rigore vere dicatur, *Deus humanatus*, eſto dici non poſſit *homo Deiſicus aut Deiſicatus*, juxta dicta ſupra q. 16. tamen Concilium noluit illam locutionem admittere prout ab Elipando proferbatur, quia ſignificabat, Deum non vere ac proprie eſſe hominem, ſed denominatione & appellatione quadam. Quapropter non eſt ſine animadverſione prætereundum, quod ſæpe in Concilio Francofordienſi, & in hiſtoriis diſtincte reſertur, Elipandum aſſeruiſſe, Chriſtum eſſe filium Dei *nuncupative, non vere: adoptione, non proprietate*: ſentiebatur enim, illum hominem Chriſtum vocari filium Dei ſolum denominatione quadam (hæc enim eſt vis illius vocis, *nuncupative*) quæ ſumi poterat ex illa deglomeratione, ſeu accidentali unione: qua ratione etiam Neſtorius fatebatur, Deo tribui prædicationem humanam, & homini divinam. Unde idem Concilium Francoford. in prædicta epiſtola ad Episcopos Hiſpaniæ non longe a ſine, utriuſque erroris ſenſum his verbis aperte explicare mihi videtur: adducit enim Cyrillum in epiſtola ad Eulogium dicentem. *Neſtorius in ſuis expoſitionibus ſimulat ſe dicere unum filium & unum Dominum, ſed reſert filiationem ad ſolum Dei verbum*. Et paulo poſt. *Dicendo enim, quia propterea Deus Verbum Chriſtus nominatur, quia habet copulationem ad Chriſtum, quomodo non apertum eſt duos dicere Chriſtos, ſi Chriſtus ad Chriſtum habet conjunctionem, tanquam alter ad alterum*; & addit concilium: *Videtur enim Neſtorius dicere copulationem, quod vos dicitis adoptionem*.

Ex hijs ergo ſatis reſponſum eſt ad principale fundamentum prioris ſententiæ, quod in confeſſione ipſius Elipandi nitebatur. Quibus addendum eſt, hanc confeſſionem, quæ adducitur ex libro illo Beati, revera non eſſe eandem cum ea, quam Elipandus miſit in Epiſtola ad Carolum, quæ in Concilio Francofordienſi lecta eſt, multa enim ex illa epiſtola expreſſe reſeruntur in dicto Concilio, quæ in hac confeſſione non continentur, ut ex dictis conſtare poteſt, & latius ex ipſo Concilio, ex quo conſtat, confeſſionem ad Concilium miſſam clariorem & ampliorem fuiſſe, & per illam, alteram eſſe explicandam, & non e contrario: liquet autem ex hijs quæ adduximus, multa in dicto Concilio & dici & referri, quibus ſufficienter indicatur, qualem adoptionem Felix Chriſto attribuerit, & quomodo re ipſa in errorem Neſtorii inciderit. Imo etiam ſæpe inſinuatur, Felicem dixiſſe, Chriſtum prius fuiſſe ſervum natura & conditione, & poſtea fuiſſe adoptatum tali adoptione, qualis eſt illa,

qua nos ex ſervis & inimicis amici efficiuntur: ſic enim legitur in dicta Epiſtola Concilii ad Episcopos Hiſpaniæ, col. 15. *Adoptivus ſiquidem non habet aliam ſignificationem, niſi ut Jeſus Chriſtus non ſit proprius Filius Dei, neque ex Virgine ei in filium genitus, ſed nescio ex quo ſervo adoptatus in filietatem, ut vos dicitis*.

Ex quo ulterius animadverto, verum quidem videri, Elipandum & Felicem, non diſertis verbis fuiſſe profeſſos errorem Neſtorii, neque expreſſe nominariſſe duas hypotheſes, aut duo ſuppoſita, vel unionem accidentalem, ſed tantum uſos fuiſſe nomine adoptionis vel nuncupationis, quam ita declarabant, ut plane in re nihil aliud, quam Neſtorius, ſentirent, quia neque eam a noſtra adoptione diſtinguebant, nec majorem unionem inter humanitatem & Verbum agnoſcebant: neque illam ſoli humanitati, ſed cuidam homini attribuebant, quem ſervum & priorem tali unione ſeu adoptione eſſe dicebant. Atque hinc facile reſpondetur ad alias conjecturas: fateamur enim, Elipandum non aperte fuiſſe profeſſum errorem Neſtorii: ideoque aſum fuiſſe judicium & approbationem Concilii poſtulare, aut enim quid ad ſuum errorem conſequeretur non intelligebat (quod credibile eſt) aut (quæ ſolet eſſe hæreticorum audacia) ſperabat fore, ut ea ſimulatione alios deciperet. Et eandem ob cauſam Concilium non ſolum uſum eſt testimoniis & definitionibus contra Neſtorium factis, ad Felicem & Elipandum confundendos, ſed etiam illis declarare ſtudit, quomodo in re nihil aliud, quam Neſtorius, dicerent. Negari autem non poteſt, quin magna ex parte non aliter conſutetur hic error in illo Concilio, niſi probando unitatem perſonæ, & ſubſiſtentiam in Chriſto, ut patet præcipue ex epiſt. ad Episcopos Hiſp. a col. 6. Sed hoc ſententiæ noſtræ nil obſtat, ut magis ex ſequenti puncto conſtabit, in quo ſenſum definitionis Concilii explicabimus.

Circa ſecundam partem de Concilio Francofordienſi duo deſiderari poſſunt. Unum eſt, auctoritas ejus quanta ſit. Aliud eſt, quis ſit ſenſus definitionis ejus. De Concilio autem ipſo dupliciter loqui poſſumus. Uno modo, absolute & quaſi abſtracte de illo Concilio ſecundum ſe. Alio modo, prout nunc nobis proponitur in tertio tomq Conciliorum in libro & epiſtolis ſupra citatis. Primum igitur dubitari non poteſt, quin contra Felicianam hæreſim tale Concilium congregatum ſit, & in eo fuerit illa hæreſis damnata: de hoc enim ſufficientiſſimam traditionem habemus, ex omnibus fere auctoribus, qui de geſtis Francorum, aut Hiſpanorum, aut de univerſali temporum chronographia ſcripſerunt, ut patet ex Jona Aurelianiſi lib. 1. de cultu imaginum, qui locum, in quo Concilium celebratum eſt, tacuit, ſicut & Paulus Æmilii lib. 2. de geſtis Francorum ad finem. Sabellicus vero Ænead. 8. lib. 8. ſolum nominat Franconiam Germaniæ regionem, nullamque mentionem facit præſentis erroris in eo Concilio damnati: *Damnata eſt* (inquiens) *Felicianæ hæreſis de abolendis Sanctorum imaginibus*, de quo poſtea dicemus. Herman. Contract. in Chron. ann. 794. ſolum dicit, Carolus Synodum magnam congregat. Tamen & Concilii & loci Francofordienſis, & damnatæ hæreſis de Chriſti adoptione meminerunt Aſo & Sigebertus & Abbas Uſpergenſis in Chron. ann. 793. Regno an. 794. Blond. Ænead. 2. l. 1. Platin. in Adriani vita, Anton. 2. par. Hiſt. tit. 14. c. 1. §. 6. Aimonius lib. 4. de geſtis Francorum. c. 83. & ex recentioribus quam plurimi. Ac denique ita eſt hoc communi conſenſu totius Eccleſiæ receptum, ut nec debeat nec poſſit in dubium revocari.

Deinde mihi non eſt dubium, quin definitio in illo Concilio facta & prout facta eſt, habuerit vim & auctoritatem ſtabiliendi certam fidem. Unde, ſi ſufficienter conſtet, definitionem illam, legitimam, & prout ab ipſo Concilio manavit, ad nos perveniſſe, nobiſque eſſe ſufficienter propositam, non dubito, quin obliget ad credendum de fide, quod per eam definitum eſt, eo ſenſu, quo eſt definitum. Ratio eſt, quia, licet illud Concilium generale non fuerit, interceſſit tamen in illo Romanæ Eccleſiæ auctoritas, ut Jonas Aurelianiſis ſuperius ait, non ſolum per Legatos Pontificis, quos etiam Ado nominat Theophylactum & Stephanum, verum etiam per ſpecialem ejus approbationem vel potius inſtructionem per decretalem epiſtolam, in qua errorem illum damnandum, & fidei doctrinam definiendam declaravit: imo reſerunt prædicti auctores, ante Concilium Francofordienſe

Auctoritas Francofordienſis ſynodi quanta.

damna-



damnatum fuisse Felicem in Concilio quodam Reginensi seu Ratisponensi Provinciali, diligentia Caroli Magni ad compescendum Felicem ex sola provincia Bavariæ brevi tempore congregatum: & ibi coactum fuisse Felicem, Romam adire, & coram Adriano Papa in Ecclesia S. Petri suam hæresim retractasse. Postea vero subsecutum est Concilium Francofordiense, nam, cum Elipandus apud Carolum instaret (quantum ex epistola Caroli ad ipsum colligi potest) ut in pleniori Concilio res discuteretur, Carolus ad maiorem Ecclesiæ pacem, & ut Elipandus, & qui ei in Hispania adhæserant, facilius ad veram doctrinam fidei reducerentur, ab Adriano Papa obtinuit, ut Concilium Francofordiense congregaretur, in quo Legati ejus adessent, quos verisimile est, epistolam illam secum attulisse, (cujus meminit idem Carolus in sua Epistola ad Episcopos Hispaniæ) in qua quid in hac re tenendum esset, declaravit: ergo, quamvis non certo constet, illud Concilium post suam celebrationem ac definitionem confirmatum esse a pontifice, tamen satis certo constat, definitionem ejus fuisse conformem definitioni Pontificis, & juxta ejus intentionem ac voluntatem: & hoc satis est, ut illa definitio sit sufficiens & infallibilis regula fidei, si de illa satis constet, sufficienterque nobis propoſita sit.

Ultimo, quod attinet ad hanc definitionem, prout nunc legitur in tertio tomo Conciliorum sub titulo Concilii Francofordiensis, valde temerarium ac periculosum existimarem ab illa dissentire, & epistolam illam Adriani, & reliquas partes illius Concilii, ut supposititias, aut apocryphas, vel mendosas rejicere: non possum tamen simpliciter dicere, in eis nunc esse infallibilem fidei auctoritatem. Hanc posteriorem partem assero propter rationes dubitandi superius positas, & præsertim, quia adhuc ignoro, & apud neminem hætenus legere potui, ex quo loco vel exemplari sumptum fuerit hoc Concilium, prout nunc nobis traditum est, ut certo mihi constare possit, in illo integram & incorruptam contineri doctrinam ac definitionem a vero Concilio Francofordiensi juxta mentem Adriani Papæ traditam. Dices, hac ratione posse in dubium revocari omnia Concilia, etiam Generalia, præsertim antiquiora, quia fortasse prout nunc habentur, non sunt incorrupta, vel non sunt eadem, quæ celebrata fuerunt. Respondetur negando sequelam, sunt enim in Conciliis multa, quæ vel in totum, vel ex parte adhuc sunt incertæ auctoritatis, propter varias causas, quæ nunc persequi longum esset; multa tamen etiam sunt, quæ infallibilem habent auctoritatem quoad definitiones suas, quia a principio sufficienter universæ Ecclesiæ innotuere, & perpetua traditione in ea observatæ sunt: neque a Catholicis unquam est in dubium revocatum, quin illa doctrina & definitio, quæ sub nomine talis Concilii in Ecclesia Catholica legitur, ea vere sit, quæ in tali Concilio a principio fuit tradita. At vero Concilium Francofordiense, prout suo tempore scriptum fuit, in Ecclesia latuit usque ad annum 1567. in quo opera Laurentii Surii in lucem editum est: & ideo mirum non est, quod tam brevi tempore tantam sibi auctoritatem conciliare non potuerit: maxime, cum non constet, ubi fuerit inventum. Dices ulterius, si certissimum est, Felicianam hæresim ab Adriano I. & Concilio Francofordiensi damnatam, & in his, quæ nunc habemus, scriptis sub nomine Adriani I. & Concilii Francofordiensi nihil aliud continetur, quam illius hæresis damnatio, quid est, cur non sit æque certum, hoc, quod nunc habemus, esse verum Concilium Francofordiense. ac est certum tale Concilium fuisse congregatum, talemque doctrinam tradidisse? Respondetur, magnum discrimen inter hæc versari, nam, cum adhuc incertum sit qualis fuerit hæresis Felicianæ, quamvis in communi constet, illam fuisse damnatam in Concilio Francofordiensi, si nullum extaret illius Concilii scriptum, æque incertum esset, quæ fuerit illius Concilii definitio. Item, quia, licet in communi constet, factam esse illius Concilii definitionem, tamen si in particulari non constet, hoc scriptum editum esse in illo Concilio, non tenebimur ex illo scripto colligere mentem Concilii, neque illi eam fidem & reverentiā adhibere, quæ vero Concilio debetur: itaque magna differentia inter illa duo versatur, multumque refert in particulari scire aut credere, hoc ipsum opus esse illudmet, quod a Patribus illius Concilii editum est.

Dices tandem, Si totum id, quod in eo Concilio constat, *SNAREZ* Tom. XVI.

tinetur & refertur, est consentaneum his, quæ de Concilio Francofordiensi historiæ referunt, & in eo nihil est, quod ad causam fidei stabiliendam non conferat, & pietatem ac veram doctrinam foveat, qua ratione in dubium verti potest, hanc esse veram epistolam decretalem Adriani Papæ, verumque Concilium Francofordiense? Respondetur, hinc recte probari priorem partem nostræ assertionis, nimirum, licet hoc non sufficiat ad certitudinem fidei faciendam, sufficere tamen ut temerarium sit & periculosum, hoc negare. Præsertim, quia postquam illud Concilium in lucem prodit, aliisque adjunctum est, magno Catholicorum consensu ab omnibus est receptum, nullusque scriptor illud negare ausus est. Accedit, quod si hæc detur licentia, poterit quis revocare in dubiū omnia Concilia, quæ Laurentius Surius in lucem edidit antea non edita: hoc autem valde absurdum est, & pias aures offendit. Deinde proficitur Surius (vir pius, doctus, & omni fide dignus) in epistolis ad Philippum Regem Catholicum & ad lectorem, se nihil Conciliis aut numero Conciliorum addere, quod ex vetustissimis exemplaribus manuscriptis, & ex gravibus & Catholicis bibliothecis non excerptis: ergo idem necessario credendum est de hac Synodo Francofordiensi. Nemo ergo suspicari sine magna temeritate potest, hoc Concilium Francofordiense, prout nunc habetur, denuo confictum esse, cum ex veteri exemplari ab homine tanta fide digno dicatur transcriptum. Neque etiam est ulla occasio suspicandi, olim fuisse simili fraude ab aliquo confictum, quia neque est hujus rei vel minimum indicium, neque de ullo viro Catholico id credi potest: quod autem ab hæretico compositum non sit, evidentissimū est, quia nihil est in eo opere, quod sanam doctrinam non contineat, & pietatem redolet.

Sunt tamen pauca, quæ obijci possunt contra hujus Concilii auctoritatem, quibus satisfacere oportet. Primum est, quod totius Concilii stylus, tam in epist. Adriani Papæ, quam in epist. totius Concilii, & in lib. Sacrosyllabonimis videtur acer ac rigidus, quod videtur esse alienum a Pontificia & paterna lenitate, & Conciliorum consuetudine. Et difficultatem auget, quod non solum in doctrinam, sed etiam in personas invehuntur, cum tamen Felix (quantum ex historiis supra citatis colligi potest) jam eo tempore errorem suum coram Pontifice retractasset, Elipandus autem non fuisset omnino pertinax, sed enixe Concilii judicium efflagitasset, eique parendi voluntatē ostendisset, ut ex epist. Caroli non obscure colligitur. Et (quod maxime mirandum est) cum solus Felix & Elipandus, & pauci fortasse alii errassent, universam Hispaniam, omnesque ejus Episcopos acriter reprehendunt ut hæresi infectos. Sic adeo ut ob eam causam dicant, traditos fuisse Hispanos in Sarracenorum potestatem, quod in Christum injurii fuissent, cum tamen ex historiis constet, longe ante Elipandum, Hispaniam in Sarracenorum potestatem venisse. Unde eruditissimus Gaspar Loayſa in Collectione Conciliorum Hispaniæ, in commentario de primatu Ecclesiæ Toletanæ, quem ad decretum Gundemari addidit, inter Urbanum Archiepiscopum Toletanum, quo Pontifice Toletum a Sarracenis oppugnatum, dolo captum est, quatuor Episcopos numerat ante Elipandum, videlicet, Cixillam, Petrum Pulchrum, Sunicredum, Concordium, cui successit Elipandus, de quo inferius sic scribit: *Usus frequenti Maurorum commercio, cum longe abesset ab illorum temporum felicitate, in quibus Ecclesiastica sinceraque doctrina vigeat, parumque accurate in sacris literis versatus esset, in hæresim de adoptione Christi Servatoris nostri arroganter & ignoranter impegit.* Quomodo ergo verum esse potest, quod Concilium Francofordiense ait, ob culpam hujus erroris Hispaniam esse Sarracenorum potestati traditam.

Secundo ac præcipue multos movet, quod in eodem Concilio epistola ad Episcopos Hispaniæ Eugenius, Ildefonsus, & Julianus, sanctissimi & doctissimi Toletanæ Ecclesiæ Archiepiscopi indigne ac irreverenter tractari videntur, tanquam vulgares homines, qui male de Christo sensissent: cum enim Elipandus eos in suæ sententiæ confirmationem adduxisset, nihil aliud Concilium respondet, nisi: *Quæ ex parentum vestrorum dictis posuistis, ut manifestum sit, quales habeatis parentes.* Et infra. *Melius est testimonio Dei Patris credere de suo filio, quam Ildefonso vestri, qui tales vobis composuit preces in Missarum solenniis, quales universalis & sancta Dei non habet Ecclesia:*

Objectiones contra auctoritatem Synodi Francofordiensi.



*clesia: nec vos in illis exaudiri putamus, & si Ildefonsus vester in orationibus suis Christum adoptivum nominavit, noster vero Gregorius Pontifex Romana Sedis, & clarissimus toto orbe doctor in suis orationibus semper unigenitum nominare non dubitavit.* In quibus verbis aperte videtur Concilium admittere, eos Patres male de Christo sensisse. Imo quod ait: *Ut notum sit omnibus, unde vos traditi sitis in manus infidelium*, non tam propter lapsum Felicis & Elipandi, quam propter errorem parentum, a quibus ipsi hoc didicerunt, dicere videtur, simul enim illa duo conjungit: *Ut manifestum sit quales habeatis parentes, & ut notum sit omnibus, unde vos traditi sitis in manus infidelium.* Et quod prius objiciebamus ex historiis, hoc ipsum exigere videtur: totum autem hoc est contra gravitatem, auctoritatemque illius concilii.

Tertio objicere possumus, quia illud Concilium quibusdam utitur testimoniis & rationibus ad suam sententiam comprobendam, quæ non videntur magnâ habere efficaciam, & a Theologis facile dissolvuntur. nam testimonia omnia, quæ adducit, solum probant, Christum simpliciter esse naturalem Dei filium, eundemque in humanitate subsistere, atque adeo hunc hominem simpliciter esse filium naturalem Dei. Quæ omnia a Catholicis admittuntur, quamvis aliqui ipsorum putent, non repugnare, quin simul secundum humanitatem sit adoptivus, cuius oppositum illis testimoniis convinci non potest. Rationes autem, quæ sumuntur ex natura vel proprietate adoptionis, sunt mere humanæ & probabiles, quæ ad certam fidem faciendam non possunt sufficere.

Ad primæ  
objectionem.

Sed hæc omnia nil derogant hujus Concilii auctoritati. Et prima quidem objectio mihi non parum confirmat, quod supra dicebam de sensu Felicianæ hæresis, quod nimirum non fuerit res adeo lubrica & obscura, ut Catholicis, & doctis Theologis, postea videri potuerit opinio probabilis, & in omnibus Academiis & scholis Catholicis per tot annos ut talis tractari & disputari: alioqui non tam acri reprehensione dignus fuisset Elipandus. Erravit ergo in re manifesta in fide, & longe antea in Ecclesia definita, solumque in verbis aut modo explicandi a Nestoriana hæresi discrepavit: & ideo illo acri reprehensione modo compendens fuit: maxime cum summam quandam auctoritatem, etiam in doctrina tradenda, sibi in Hispania usurpare vellet, ut ex his, quæ ad Fidelem Abbatem contra Beatum, & Heterium scripsit, constat: quæ referuntur in Hispaniæ historiis, & in dicto lib. Heterii. Imo ad Carolum Magnum etiam tanta libertate & auctoritate scripsit, ut ipse Carolus ad Elipandum de ipsius literis ita referri perit: *In quâ nâ aliquâ serie literarum non satis nobis elucebat, an quos ex auctoritate magisterii nos vestra docere disposuistis, an ex humilitatis discipulatu nostra discere desideratis.* Ob hanc ergo causam merito Episcopi Catholici, & præsertim summus Pontifex Adrianus magna libertate & auctoritate respondit, ipsumque errorē & auctores ejus increpant. Nec tamen Adrianus Pontificis lenitatis oblitus est, nam in fine Epistolæ ita concludit: *Elizant namque, quæ volunt, vitam aut mortem, benedictionem aut maledictionem: optamus namque, & infinitam Domini clementiam precamur, ut, relictis erroris anfractibus, ad viam, quæ ducit ad æternam vitam, fidei passibus Christo re deam pertrahente, &c.* Et similia fere habentur in fine epistolæ totius Concilii, in qua fatemur nonnulla esse per exaggerationem, & amplificationem dicta, præsertim cum sermo fieri videtur ad omnes Hispaniæ Episcopos, ac si omnes essent illa hæresi infecti. Sed id & non refert ad fidei & dogmatum veritatem: & ex quodam ardenti fidei zelo procedebat, intusendo potius ad effectum & fidem Elipandi & Felicis, qui omnes in suam sententiam adducere conati fuerant, quam ad effectum. Et fortasse multi fuerant hujusmodi errore infecti, & Concilium in hoc imitatus est morem Scripturæ sacræ, in qua sæpe propter quorundam peccata ita populus reprehenditur, ac si omnes essent illorum participes, neque unus innocens aut justus relictus fuisset. Quod vero Hispaniæ ruina huic peccato in ea epistola attribuitur, tactum etiam est ad delictum exaggerandum, non est autem necesse intelligi de principio & initio illius calamitatis, qua Hispania in Saracenorum manus pervenit, sed de continuatione illius afflictionis & servitutis.

Et juxta hæc satisfaciendum est secundæ difficultati, in qua, si verba Concilii, ut simpliciter sonant, absque alia

interpretatione sumantur, videntur plane Patres illius Concilii ignorasse, quanta fuisset sanctitas & doctrina illorum Præsulū, Eugenii, Ildefonsi, & Juliani: & ideo eorum auctoritatē contempsisse, nihilque aliud respondere curasse. Adde vero ulterius, non oportere verba illa sumere absolute ut sonant, sed quasi sub conditione, quod licet ita esset, in causa fidei non esset auctoritas illorum Patrum cum Ecclesiæ & Romani pontificis auctoritatē comparanda. Oportuitque ita respondere, tum quia Elipandus tantum videbatur suæ sedi tribuere, & suorum antecessorum auctoritati, ut eam vellet cæteris præferre, aut saltē comparare: tum etiam quia, cum illæ preces, quas allegabat Elipandus, privatæ essent, nec possent a Concilio examinari, an vere vel falso adducerentur, noluit Concilium eorum allegationem ut falso impositam rejicere, sicut in Augustino, Hilario, & aliis Patribus fecerat: & ideo illo modo respondet, scilicet, quidquid illi Patres dixerint, non esse in hac causa eorum auctoritati standum. Ad eum fortasse modum, quo Paulus ad Galat. 1. dixit: *Licet nos, aut angelus de cælo evangelizet vobis, præterquam quod evangelizavimus vobis, anathema sit.* Si autē aliquis inquirat, quid credendum sit de horum Patrum dictis, quæ Elipandus in sua epistola allegabat, respondendum est, in primis tales orationes non reperiri in aliquo antiquo Missali Toletanæ Ecclesiæ. Deinde si aliquando fuerint, prout ibi referuntur, non esse verisimile ab illis Patribus fuisse compositas. Tandem credibile est ab Elipando non sana & integra fide fuisse adductas. Quod enim in aliorum Patrum testimoniis referendis fecisse in illo Concilio convictus est, credi facile potest de his, quorum scripta ad manus nostras non pervenerunt. Potuit enim facile aut illas preces confingere, aut certe in eis unam vocem in aliam commutare, ut nomen *adoptivi hominis* ponendo loco nominis *dilecti* aut *grati*, vel alicujus similis. Neque ab hac ententia Concil. Francoford. absuit, nam in fine illius Epistolæ sic ait: *Inculcatis iterum, iterumque replicastis vos Patribus consona ponere testimonia: sed, ut probavimus, longe aliter vos illorum intelligitis dicta, quam illi ipsi intellexerunt, quæ hæc ipsa testimonia libris inseriebant: & invenimus sicut & ante præfati sumus, certissime vos illorum sanctissimam scripta heretice pravitatis veneno infecisse, & interseruisse verba, quæ nusquam in eorum legimus libris. Nisi forte vestri magistri ita sensissent, quorum nomina Sanctæ, & universali Dei Ecclesiæ ignota putamus hæc usque remansisse, si hujus erroris schisma per vos eamundo non immotisset:* subjungit vero statim: *Desinite fratres, vestros per aures populi Christiani diffamare parentes, & vosmet ipsos a sancta Dei dividere Ecclesia:* quasi dicat, Videte ne falso illis hoc crimen imponatis sicut & cæteris.

Tertia objectio explicari satis non potest, nisi prius Concilii sensum & mentem exponamus. Qui ergo existimant, errorem Felicis fuisse eundem, quem postea Durandus & alii Scholastici ut probabilem opinionem introduxerunt, consequenter ajunt, sensum Concilii esse, damnare ut hæreticam, opinionem Durandi. De probationibus autē, quæ in toto illo Concilio afferuntur, dicunt, in primis non esse necessarium esse æque certas ac est ipsa definitio Concilii: hoc enim in cæteris etiam Conciliis observatum est ab omnibus Catholicis, qui de auctoritate Conciliorum scriperunt. Addunt deinde, quamvis testimonia Patrum & Scripturæ immediate non demonstrent illius erroris falsitatem, tamen, vere ac recte explicata voce & proprietate adoptionis, necessario ex eis inferri, neque simpliciter, neque in natura assumpta posse convenire in eum, qui Filius Dei naturalis sit: & hoc satis fuisse, ut potuerit Concilium eam sententiam ut hæreticam damnare. Supposito tamen sensu prædicti erroris, quæ nos explicavimus, aliter etiam sensus Concilii, & definitio ejus ac doctrina explicanda a nobis est. Sicut ergo Concilium per se ac directe intendit, Felicianam hæresim damnare, ita etiā per se ac directe solum definit Christum non esse filium adoptivum eo proprio & imperfecto genere adoptionis, quo nos sumus filii adoptivi: seu (quod idem est) definit, unionē vel conjunctionem inter Christum & Filium Dei naturalem non esse per adoptionem, qualis est nostra, nec per solam nuncupationem seu denominationem, sed per verā unitatem subsistentiæ & hypostasis utriusque naturæ humanæ & divinæ: & hinc etiā definit, hunc hominem Christum subsistentē in natura humana esse filium Dei naturalem, & non esse prius servum, quam filium, neque esse prius hunc homi-

Ad tertiam  
Sententiam  
definitionis  
concilii  
Francof.  
aperitur.

Ad secundam  
objectionem.



hominem, quam filium naturalem. Et quidem, quod hæc in eo Concilio tradantur tanquam dogmata fidei, non eget probatione, nam est per se patens & notum legenti illud.

Quod autem nihil aliud de fide sit ex vi definitionis illius Concilii, probatur primo, quia sensus definitionis ex sensu erroris, qui damnari intenditur, colligendus est: sed sensus erroris Feliciani in hoc consistebat, quod poneret adoptionem Christi hominis similem nostræ, distinguendo illum a filio Dei naturali, & nullam aliam maiorem conjunctionem inter Christum, & filium Dei naturalem ponendo, nisi solum quoad nuncupationem & denominationem: ergo solum dogma contrarium est, quod per se definitur in Concilio: nam in Conciliis, præcipue ubi non fit præcisa definitio per breves canones, vel decreta, sed per longum & continuum doctrinæ contextum, non omnia, quæ dicuntur, sunt de fide, sed sola definitio intenta, nisi aliud in ipso Concilio expresse declaratur.

Secundo id patet ex objectione proposita, nam testimonia Scripturæ & Sanctorum, quæ in toto illo Concilio adducuntur, definitionem Concilii in hoc sensu, & nihil aliud in rigore probant, nisi quod hic homo Christus, vere realiter, ac omnino proprie est filius Dei naturalis, ut patet ex illis locis: *Qui proprio filio suo non pepercit*. Ad Rom. 8. *Hic est filius meus dilectus*, Matth. 3. & 17. *Tu es Christus filius Dei vivi* Matth. 16. ex quibus & similibus nihil aliud inferitur, nisi eundem revera esse filium Dei naturalem, qui est homo Christus pro nobis traditus. Ex his autem testimoniis non ita clare & evidenter sequitur, Christum ut hominem, specificando, & designando naturam, esse filium Dei naturalem, ut ad fidei definitionem sufficiens fundamentum videatur. Sicut etiam dicitur in Scriptura, Christum esse Deum, *qui nos redemit sanguine suo*, Act. 20. ex quo optime sequitur, unum & eundem esse, qui est verus Deus, & habet carnem & sanguinem, quem pro nobis fundat: non tamen sequitur, quod in quantum habet carnem, seu in quantum est homo, sit verus Deus, sumpta illa particula *in quantum* in prædicto sensu designante naturam, ut docuit D. Th. sup. q. 16. art. 11. Atque idem dici potest de testimoniis Sanctorum, quæ in eodem Concilio adducuntur, ut facile constabit legenti, & in superioribus questionibus tactum etiam est, & quia revera Sancti nihil aliud docent, quam quod in Scriptura aperte continetur. Quamvis autem necessarium non sit, omnia & singula testimonia, quæ in Conciliis adducuntur, esse efficacia, quod autem omnia etiam simul sumpta inefficacia sint, quodque Concilium plus definiat, quam in Scriptura contineatur, quando præcipuum fundamentum definitionis est ipsa Scriptura, magnum est inconveniens.

Nec satis est dicere, adjuncto rationis discursu id colligi ex Scripturis, & hoc sufficere, ut possit Concilium suam definitionem adungere, hoc enim verum est, quando ratio est tam aperta, ut manifeste convincat suppositis his, quæ Scriptura docet. Rationes autem, quæ in hoc Concilio fiunt, in prædicto etiam sensu evidenter convincunt, in alio vero sunt quidem optimæ, non tamen ita aperte convincentes, nam sumunt aliqua principia, quæ in illo sensu revelata non sunt, nec omnino evidentia, ut in superioribus tactum est, & in postrema parte hujus sectionis iterum attingetur. Et prætermisissis aliis rationibus, nunc brevier pondero illam, quæ tam Adrianus, quam Concilium utitur. Quia, si Christus esset adoptivus, non potuisset nobis condigne mereri gratiam adoptionis: hæc quidem ratio recte probat contra eos, qui Christo homini solum tribuunt filiationem adoptivam ejusdem rationis cum nostra; contra eos vero, qui illi ut homini, vel humanitati ejus, tribuunt adoptionem alterius rationis & ordinis, non ita vincit, quia dicitur per gratiam adoptionis alterius rationis, quæ naturalem filiationem, & increatam personam non excludat, non repugnare perfectissime mereri aliis inferiorem adoptionem. Unde hæc ipsa ratio mihi declarat, Felicem posuisse in Christo idem genus adoptionis cum nostra, & non damnari directe ab his Patribus: alioqui æquivoce uterentur nomine adoptionis, vel non recte ab una ad alteram argumentarentur. Quocirca etiam ex discursu & ratiocinatione Concilii hic sensus colligitur. Quod si interdum aliquid amplius obiter Concilium insinuat, vel ex rationibus ejus aliquid amplius colligi potest, non est

Suarez Tom. XVI.

neceesse id esse de fide, cum ad directam intentionem & definitionem non pertineat. Atque ita satisfactum est tertiæ objectioni, & declarata est definitio Concilii. Quam expositionem magis in postrema parte hujus sectionis confirmabimus ac defendemus.

Tertio loco dicendum superest de re proposita, quid nimirum de fide tenendum sit, quidve ut hæreticum damnandum, quid denique sub opinionem cadere possit, & in quo gradu. Quod ut clarius fiat, distinguamus in præsentibus propositiones affirmatas a negantibus, præcipue illas, in quibus affirmatur, Christum esse filium Dei naturalem, vel simpliciter, vel cum determinatione, *in quantum homo*, & illas, in quibus negamus, Christum esse filium Dei adoptivum, vel absolute, vel cum eadē determinatione, nam licet juxta veram doctrinam hæc posteriores sequantur ex prioribus proportionate sumptis, tamen hoc non satis est ad faciendam certitudinē fidei, nisi hoc ipsum sit de fide, vel saltem omnino evidens, si late loquamur de certitudine fidei, ut includit certitudinem Theologicam.

Dico ergo primo. Hæc propositio, Christus est filius Dei naturalis, est simpliciter de fide. Hæc non indiget probatione, quia eadem est ratio de illa, Christus est verus Deus, & Verbum Dei, &c. Videantur dicta in principio hujus materiæ, disp. 2. & q. 16. & in præcedentibus sect. hujus disputationis. Hæc denique est una pars definitionis Concilii Francoford. ut ex dictis patet. Quæ in illo optimis sacræ Scripturæ testimoniis probatur.

Dico secundo. Hæc propositio, Christus in quantum homo est filius Dei naturalis, in aliquo sensu est de fide certa, nimirum, si dictio, *in quantum*, non accipiatur ratione naturæ, sed ratione suppositi, juxta D. Th. doctrinam supra q. 16. art. 11. nam in ea significatione sensus propositionis est, Christum, quatenus est suppositum naturæ humanæ, esse filium Dei naturalem, quia neque illa natura humana habet aliud suppositum præter filium Dei naturalem, neque illud suppositum ex eo, quod in natura humana subsistat, desit esse filius Dei naturalis. Hoc autem sensu supposito, manifestum est illam propositionem esse de fide certam, quia de fide est, & Verbum esse filium naturalem Dei, & illud esse unicum suppositum naturæ humanæ Christi, quod, ut in humanitate subsistit, suam retinet filiationem naturalem. Imo existimo, hanc esse alteram & potissimam partem definitionis Concilii Francofordienis, nam, licet D. Th. citato articulo dicat, particulam, *in quantum*, magis proprie designare naturam, quam suppositum, idque fortasse in dialectico rigore verum sit, nihilominus in communi usu loquendi & scribendi de hoc mysterio, sumitur ad designandum suppositum, seu id quod subsistit in humanitate, & in hoc sensu existimo esse locutos Felicem & Elipandum, quando agebant, Christum ut hominem, seu in humanitate, vel secundum humanitatem, aut secundum carnem (hæc enim omnia apud illos idem sunt) esse adoptivum. Non enim subtiliter distinguebant naturam a supposito, & illam designabant, sed absolute indicabant hunc hominem Christum: & illum ut sic, id est, ut dicit totum hominem subsistentem in hac humana natura vocabant filium adoptivum. Concilium autem in contrario sensu docet ac definit, hunc hominem Christum esse filium naturalem: & ut amplius declaret, in eo homine non esse aliud suppositum præter naturalem filium Dei, addit interduum particulam, *in quantum homo*, quia nimirum, etiam si loquamur de hoc homine, ut est suppositum humanitate constans, ille ipse est filius Dei naturalis: & hoc sensu esse sumendas fere omnes reduplicaciones similes, quæ in illo Concilio leguntur, ex rationibus, quibus sensum ejus confirmavimus, constare potest, & amplius ex conclusione sequente.

Dico ergo tertio. Hæc propositio, Christus, in quantum homo, est filius Dei naturalis, accipiendo, *in quantum*, prout naturam designat, non est de fide, sed in uno sensu est falsa, in alio autem licet sit vera, est tamen sub opinione. Declaratur & probatur, nam filius necessario dicit relationem ad patrem; cum ergo dicitur Christus in quantum homo filius naturalis Dei Patris, aut Deus Pater sumitur ibi personaliter & proprie pro prima persona Trinitatis ut producente filium per æternam generationem; & sic falsum est, Christum in quantum hominem esse filium Dei naturalem, quia, ut sect. 1. dicebam, neque est genitus ab æterno Patre ut proprie & personaliter



producēte Filium suum ab æterno, neque habet majorem influxum in Christum in quantum hominem, quam aliæ personæ. Aut, cum dicitur Christus ut homo filius Dei naturalis, illa relatio respicit Deum ut extra operantem, atque adeo totam Trinitatem quatenus univit hanc humanitatem Verbo Dei, eamque uniendo composuit hunc hominem, per se & ex vi talis actionis seu unionis sanctum & hæredem divinæ beatitudinis in ipsamet humanitate. Et in hoc sensu verissime quidem dicitur Christus ut homo, filius Dei naturalis: sed non potest hoc esse de fide. Neque est verisimile, Concilium Francofordiense in hac Theologica subtilitate hoc definivisse. Primo quidem, quia oportuisset, ut hoc sufficienter & distincte satis declararet, quod certe non fecit. Quod si ex dictis ejus sumi potest aliquod probabile argumentum, vel etiam interdum ipsius verba aliquid simile indicant, id non satis est, ut certam fidem faciat, ut sæpe dixi. Secundo quia nullum erat sufficiens fundamentum ad tale fidei dogma constituendum, ut ex paulo ante dictis de sensu Concilii constare potest. Et amplius declaratur, nam, licet sit de fide, humanitatem esse substantialiter unitam filio Dei naturali: non tamen est de fide ita fuisse sanctificatam ex vi illius unionis, ut habeat intrinsecum jus ad supernaturalem beatitudinem, quæ est divina hæreditas: nam multi Theologi opinantur, si Deus assumpsisset illam humanitatem sine gratia habituali, non fore illi debitam supernaturalem beatitudinem: imo neque habere sanctitatem, quæ ad meritum beatitudinis sufficiat, quod, licet sit falsum & improbabile, non tamen est hæreticum: ubi enim est contrarium aperte definitum aut traditum? Rursus etiam si concedatur, humanitatem ex vi unionis ita sanctificari, ut huic homini acquiratur intrinsecum, & radicale jus ad æternam hæreditatem, per suam humanitatem obtinendam, tamen non est de fide, ad rationem filii naturalis hoc sufficere: nam posset aliquis contendere, filium naturalem dici non posse, nisi ob identitatem, vel similitudinem naturæ, quam Christus, in quantum homo, non habet: neque in eo censeretur hæreticus, cum oppositum non sit definitum, neque ex definitis aperte colligatur, imo illud videatur consentaneum his, quæ a sanctis Patribus in materia de Trinitate dici solent, ad probandam veram divinitatem Verbi divini ex eo quod est filius Dei naturalis: quia propria filiatione naturalis requirit eandem naturam cum generante. Quod autem præter hunc sit alius modus filiationis naturalis, nullibi est de fide definitum. Quin potius sunt plus Theologi, apud quos male audiat (quamvis immerito) talis modus filiationis Dei naturalis: quia omnino recusant admittere in Christo duplicem modum filiationis naturalis secundum diversas naturas. Adeo ut potius negent, Christum ut hominem esse filium Dei, quam admittant esse filium naturalem, nam etiam fugiunt concedere Christum ut hominem esse filium Spiritus sancti, quod tamen, juxta illam sententiam vere intellectam & seclusa æquivocatione verborum, concedendum est, cum hæc filiatio dicatur non respicere primam personam ut sic, nec fundari proxime in emanatione ad intra, sed in operatione ad extra, quæ omnia probabiliter disputantur a gravissimis Theologis, non ignorantibus definitionem Concilii Francofordiensis, sed eam attente legentibus ac meditantibus, & pro certo habentibus, illam propositionem non esse in eo Concilio definitam: non ergo est de fide.

Unum solum est, quod ex illo Concilio objici potest contra hanc assertionem, nam Adrianus Papa in sua epistola adducens in confirmationem suæ sententiæ locum illum Matth. 3. & 17. *Hic est Filius meus dilectus, in quo mihi bene complacui*: dicit, illa verba esse dicta a tota Trinitate, cum tamen certissimum sit, & ibi etiam doceatur a Pontifice, sermonem ibi esse de filio naturali: ergo ex sententia Pontificis tota Trinitas vocat ibi Christum ut hominem: *Filium suum naturalem*. Verba Adriani sunt: *Patris testimonio de filio perhibentis non creditis, qui dixit, Hic est filius meus dilectus*. Declarans autem, de quo illa verba dicta sint, scilicet, de eo, in quem Spiritus sanctus descendit, id est, Christo ut homine, ait: *Devenim filius secundum id quod Deus est, Sanctum Spiritum cum Patre nunquam a se recedente inenarrabili modo mittit, & secundum id quod homo est super se venientem suscepit: de eo ergo, id est, de hominis filio vox*

*illa intonuit*. Statim vero declarans, quis illa verba protulerit, inquit. *Si secundum divinitatem dixisset, nunquam diceret, in quo mihi bene complacui, sed tantum in quo mihi bene placui, sed dum dicit, Complacui, totam simul Trinitatem comprehendit, quia in homine Christo tota complacuit Trinitas*: igitur ex vi illius verbi, *complacui*, quod videtur includere consortium multorum, & ex eo quod de Christo homine est sermo, colligit Pontifex, Trinitatem esse, quæ ibi loquitur: ergo Christus ut homo est filius naturalis Trinitatis ex sententia Pontificis.

Responderi potest primo, etiam si Pontifex hoc modo locum illum interpretetur, non facere certam fidem, quia non est necessarium, ut omnia testimonia, quæ in Concilio, vel epistolis decretalibus afferuntur & exponuntur, in sensu certo & indubitato afferantur. Est ergo ille sensus probabilis, non tamen certus: & ideo non facit certitudinem fidei. Hæc vero responsio, quamvis quoad testimonium Scripturæ ferri possit, tamen quoad definitionem Pontificis nostræ intentioni non satisfacit, quia Pontifex adducit illud testimonium ad suam definitionem confirmandam: ergo, si confirmatio sit certa, si probabilis tantum, tamen necessario ex ea colligitur, mentem Adriani fuisse definire, Christum ut hominem esse filium naturalem totius Trinitatis. Respondetur ergo negando, testimonium illud afferri aut exponi ab Adriano in prædicto sensu. Quod probō primo, quia non est verisimile, adduxisse Pontificem ad confirmandam fidem, testimonium Scripturæ in sensu, non solum incerto, sed etiam contrario omnibus Doctoribus: constat autem, omnes, tam veteres, quam recentiores intellexisse locum illum de sola persona Patris, ut D. Thomas inferiorius q. 38. a. 8. & q. 45. a. 4. ex professo declarat, & in sequent. in Com. illius a. 8. & disp. 27. sect. 2. plures Patres adducemus in ejus rei confirmationem, scilicet August. Ambros. Hieron. Cyprian. Hilar. Fulgent. Chrysost. & alios. Quibus addi possunt notanda verba August. 2. de Trinit. c. 10. dicentis: *Ibi cogimur non nisi Patris personam accipere, ubi dictum est, Hic est filius meus dilectus. Neque enim Jesus etiam Spiritus sancti filius, aut etiam suus filius, credi aut intelligi potest*: & Athanasius serm. 3. cont. Arian. versus finem, generalem regulam constituit: *Ista omnia, Unigenitus, & Filius, & Verbum, & Sapientia ad Patrem referuntur, ibique suam proprietatem habent*: & singula confirmat propriis Scripturæ testimoniis, inter quæ profert hoc de quo modo agimus: *Hic est filius meus dilectus*, & illud: *Tu es Christus filius Dei vivi*: & in epistola de Synodi Nicænæ decretis contra Arianam hæresim, circa medium: *Ideo (inquit) Filius & Unigenitus dicitur, & solus dumtaxat in sinu Patris, eumque solum ex se genitum esse Pater declarat, cum inquit, Hic est filius meus dilectus, in quo mihi complacui*: & alii Patres disputantes contra Arianos hoc maxime testimonio utuntur ad divinitatem Filii, & processionem ab æterno Patre probandam. Et tractantes de baptismo, docent, personarum Trinitatem fuisse in Christi baptismo manifestatam, Spiritum sanctum per speciem columbæ, Filium per humanitatem, Patrem in ea voce, qua testimonium filio suo reddidit, ut fufius in 3. tomo in materia de baptismo declarabimus. Unde ecclesia tam in festivitate Transfigurationis, quam in festo Epiphaniæ, Patrem intelligit verbis illis loquentem. *Hunc & Prophetis testibus* (ait in hymno Transfigurationis) *lisdemque signatoribus, Testatur & Pater subet, Ipsum audire & credere*: & in primo Responsorio Epiphaniæ: *Hodie, inquit, in Jordane baptizato Domino aperti sunt cæli, & sicut columba super eum Spiritus mansit, & vox Patris intonuit, Hic est filius meus dilectus*. Et infra in tertio Responsorio: *Paterna vox audita est, Hic est filius meus dilectus*. Imo ipsummet Concilium Francofordens. in libro Sacrosyllabo, col. 5. sic dicit: *Vox Patris intonuit dices, Hic est Filius meus*. Et infra. *Mox paterna vox fulgidam per nubem discurrens intonuit, discrevitque, qui essent servi per gratiā, & per adoptionē filii: & qui verus ac proprius filius*. Denique ipsemet Apostolus Petrus in 2. epist. c. 1. de persona Patris videtur plane exponere locum illum, dicens: *Accipiens a Deo Patre honorem, &c.* Neque enim dici potest, ibi sumi Patrem essentialiter, quia aperte ponitur ad determinandam personam, quæ filio suo gloriam & claritatem contulit: ergo non est verisimile, Pontificem usum esse contra hæreticos expo-



expositione singulari, & tantæ auctoritati repugnante.

Secundo id aperte ostendo ex verbis ipsius Pontificis, nam in eorum initio sic inquit: *Patris testimonio de Filio perhibentis non creditis?* ubi evidenter sumit Patris nomen pro prima persona, distinguens illam a persona Filii & Spiritus sancti. Inferius autem nihil dicit his prioribus verbis contrarium, imo iterum repetit: *Vox Patris intonuit, Hic est filius meus dilectus*: cum vero subiungit: *Sed, cum dicit, Complacui, totam simul Trinitatem comprehendit*, non est sensus, quod comprehendat Trinitatem tanquam loquentem & dicentem: *Hic est filius meus*, sed tanquam complacentem in Christo, ut patet ex causali subiuncta, *quia in homine Christo tota complacuit Trinitas*. Sicut, si duo de aliqua imagine ita loquantur, ut alter dicat: mihi valde placet hæc imago: & alter subiungat, ego etiam in illa complaceo, quamvis hic posterior solus proferat hæc ultima verba, tamen in eis alium connotat seu comprehendit secum complacentem. Ad hunc ergo modum ait Pontifex, Patrem, dicendo, *Complacui*, in eo verbo cæteras personas indicasse & comprehendisse ut in Christo placentes. Ex hac autem subtili illius verbi ponderatione non infert Adrianus, Patrem vocare Christum ut hominem filium suum dilectum in prædicto sensu, id est, quantum ad humanam naturam, sed solum in alio sensu, scilicet, quantum ad suppositum, non quomodo cumque, sed ut actu & vere subsistentem in utraque natura. Et ex hoc sensu intelligendum est, quod ait, ibi non esse sermonem de Christo secundum divinitatem (subintellige, solam & præcisam ab humanitate) id est, non esse sermonem de illo, qui in sola divinitate subsistat, sed simul in humanitate, quique simul sit Dei, homini/que filius, ut idem Pontifex dicit. Et in hoc sensu & in nullo alio est optimum argumentum Adriani: nam ea, quæ ibi dicuntur, de uno & eodem dicuntur, & tamen non omnia conveniunt ei secundum divinitatem, quale est, quod in eum Spiritus sanctus descenderit, & quod in eo Pater complacuit: ergo idem ipse, de quo hæc dicuntur, est ipsemet filius Dei naturalis, non solum ut subsistens in divinitate, sed etiam ut subsistens in humanitate ratione suppositi, ut dictum est. Tertio, cum in superioribus ostensum sit, hanc propositionem absolute prolatam: *Christus, ut homo, est Filius naturalis Trinitatis*, falsam esse, quia indicat, Christum ut hominem esse personam distinctam a tota Trinitate, qua verisimilitudine dici potest, Adrianum Pontificem, vel in eo sensu fuisse simpliciter locutum, vel, quod incredibile est, illam propositionem definivisse, & juxta illam prædictum testimonium declarasse? Igitur ex illo testimonio & argumento Adriani non potest inferri esse ab eo definitam illam propositionem, Christus in quantum homo, est filius Dei naturalis, in sensu tertiæ conclusionis, in quo a Theologis disputatur, sed tantum in sensu secundæ assertionis, in quo a solis hæreticis negatur.

Sed urgebit aliquis, quia adhuc juxta hanc interpretationem non est firmum argumentum Pontificis, totum enim fundatur in ponderatione illius verbi, *complacui*, quod tamen nullum habet singulare mysterium, neque ex vi suæ significationis dicit respectum ad alios simul placentes, ut ex usu Latinorum constat, & evidentius ex verbo græco illi respondente, *Εὐδοκῶ*, quod nihil aliud significat, quam beneplacitum habere ad aliquem: estque hoc verbum peculiare divinis literis ad declarandum hunc singularem & maximum effectum ad aliquem. Ac deinde, licet daremus, verbum illud significare aliorum consortium in tali affectu & beneplacito, cur non posset æternus Pater id dicere de suo filio secundum divinitatem? nam etiam Spiritus sanctus in illo complacet, & Filius ipse sibi ipsi placet, etiam si neque a se, neque ab Spiritu sancto procedat, quod non refert, quia illud verbum non significat consortium in origine seu productione, sed tantum in affectu, ut, si inter homines Pater simul cum amicis bonum affectum habeat ad filium, in omni proprietate & rigore dicere potest, in te complaceo, quia alios consortes in illo affectu habet, quamvis non sint consortes in munere & relatione patris. Respondetur primum, hic habere locum solutionem supra indicatam, scilicet, non oportere omnia & singula, quæ ad definitionem confirmandam afferuntur, esse efficacia: aliqua enim afferri possunt ad maiorem doctrinæ abundantiam & ornatum, & ad maiorem ac subtiliorem verborum Scri-

pturæ ponderationem, quæ optima est, quando & veritati fidei consonat, & præ se fert elegantiam, quæ omnia reperiuntur in illa expositione dicto modo intellecta. Deinde addi potest, satis esse, quod ex toto illo testimonio sufficienter probetur intentum, quamvis singulorum verborum ponderatio non sit omnino convincens. Itaque, quod ibi sit sermo de Christo homine, & quod ille ut in humanitate subsistens sit filius Dei naturalis, manifeste probatur ex illo testimonio, quia Spiritus sanctus non descendit in Christum, nisi ut subsistentem in humanitate. Hinc vero sumpsit occasionem Adrianus ponderandi verbum complacendi, quod peculiariter videatur ad humanitatem referri: nam Spiritus sanctus, descendendo in specie columbæ, satis ostendit suum singularem affectum in Christum: cum ergo ait Pater, se etiam in illo complacere, optime illud Patris beneplacitum ad Christum ut hominem cum consortio aliarum personarum refertur.

Dico quarto. Hæc propositio, Christus est filius Dei adoptivus, duplicem habet sensum hæreticum, & nullum habet proprium, in quo verificari possit: unde simpliciter hæretica censenda est. Declaratur, nam tribus modis fingi potest, Christum hominem esse filium Dei adoptivum: primo ex parte Verbi, scilicet existimando, Verbum secundum se non esse filium Dei naturalem, sed esse creaturam, quæ, ut sit filius Dei, adoptione indiget, & hoc pertinet ad hæresim Arianam, & fortasse hoc sensu Bonosus, & sequaces dixerunt, Christum esse filium Dei adoptivum, quorum hæresis antiquior est Felice & Elipando, ejus enim meminit Isidorus lib. 8. Originum cap. 5. Et in eodem sensu damnat Concil. Tolet. XI. in confess. fidei, illam propositionem, Verbum est filius Dei adoptivus, & similiter damnant illam Patres, quando disputant contra Arium, ut in superioribus citatum est, & addi possunt Hilar. lib. 3. & 6. de Trinit. Athan. ferm. 4. cont. Arian. August. in Enchirid. c. 38. & seq. Beda in c. 7. Joan. Secundo modo fingi potest Christus, filius adoptivus ex parte hominis, quia nimirum non sola humanitas, sed etiam hic homo Christus ut sic tantum est servus & creatura, & adoptione indiget ut fiat filius Dei, & per solam illam factus est filius Dei, & hoc modo errantur Felix & Elipandus, & ante ipsos Nestorius & sequaces quoad rem ipsam, quamvis non constet, illis verbis usos fuisse: unde in hoc sensu est etiam hæretica illa propositio, & in eo proprie damnatur in Concil. Francoford. & sufficienter convincitur testimoniis Scripturæ, & Sanctorum, quæ in eo adducuntur. Tertio modo existimari potest Christus adoptivus ratione totius compositi ex humanitate & subsistentia Verbi, nam ut sic est Christus una persona composita, ut supra ostensum est, quæ persona composita est capax filiationis: hoc enim modo hic homo Christus vere ac proprie dicitur filius Virginis, & supra sectione prima ostensum est, Christum etiam ut hominem esse filium Dei ratione gratiæ unionis. In hoc ergo sensu falsa etiam est illa propositio: nam, ut ostendimus sectione secunda, etiam hæc filiationi Christi ut hominis ad Deum non est adoptiva, sed naturalis: ergo neque ob hanc filiationem potest verificari illa propositio, Christus est filius adoptivus: ergo nullum habet sensum verum, & alioqui habet duplicem sensum hæreticum: ergo simpliciter hæretica censenda est. Dices, quamvis falsum sit, filiationem Christi ut hominis ad Deum esse adoptivam, tamen hætenus id non est ut hæreticum damnatum, ut in superioribus ostendimus: ergo in hoc sensu, & ratione hujus filiationis non erit hæreticum affirmare absolute, Christum esse filium Dei adoptivum, sed erit subopinio, quamvis sit falsum. Respondetur, illam propositionem formaliter & in propriis terminis, negari sæpe in Concil. & a Patribus, qui, tam de verbo Dei, quam de Christo loquentes, non solum affirmant esse filium naturalem, sed etiam negant esse adoptivum, ut patet ex Leone IX. in epist. 3. ad Petrum episc. Antioche. Inno. III. in c. In quadam. de celebr. Missar. & maxime ex Aug. tract. 2. 21. & 83. in Joan. & li. contr. Secundinum Manich. c. 5. & de Ecclesiast. dogma. c. 2. & reliquis supra cit. & alios quos refert Concil. Francoford. cujus aliqua etiam verba infra referam. Hoc ergo satis esse debet, ut illa propositio rejicienda sit ut hæretica. Ratio autem est, quia illa propositio ex vi & proprietate verborum, non tantum non est affirmativa, sed virtualiter negativa, quia filius adoptivus simpliciter non dicitur nisi



nisi qui naturalis non est: hæc enim negatio est fundamentum vel conditio prærequisita ad adoptionem, ut sæpe dicitur in prædicto Concil. Francoford. & constat ex ipsamet voce, & ex prima ratione & institutione adoptionis: est enim introducta, ut is, qui caret naturalibus filiis, loco illorum aliquem sibi in filium adscribat. Erit ergo illa propositio hæretica, ratione negationis, quam simpliciter prolata includit. Sed hinc ulterius fit, ut etiam ipsa affirmatio simpliciter prolata sit falsa & hæretica, quia tribuit filiationem adoptivam ei, cui secundum fidem non convenit. Christus enim simpliciter positus a parte subjecti stat pro divino supposito: illi ergo attribuitur in illa propositione filiatio adoptiva, & ab eodem removetur simpliciter filiatio naturalis. Sic Concil. Francof. in lib. Sacrosyllab. col. 7. *In Dei Filium non cadit nomen adoptionis, quia semper verus filius & post assumptum hominem veri filii vocabulum non amisit, qui nunquam verus desit esse filius:* & Hilar. d. lib. 6. de Trinit. *Nunquid etiam nunc adoptionis in eo erit nuncupatio, in quo proprietatis est nomen.* Legantur supra dicta q. 16. ar. 9. & disp. 35. sect. 4. nam postquam declarata res est, in usu verborum servandæ sunt regulæ supra datæ de communicatione idiomatum, nam ex illis tota hæc res pendet, supposita significatione terminorum. Unde, quamvis verum censeam, illam propositionem, simpliciter dictam, esse hæreticam, id tamen non tam est ob definitionem Conc. Francof. quam ob propriam significationem & suppositionem terminorum, sive Christo ut homini conveniat filiatio adoptiva, sive non, ad eum modum quo censetur hæc propositio facere sensum hæreticum, Christus incepit esse, quia includit negationem repugnantem supposito secundum se, quamvis cum addito, Christus homo inceperit esse.

Quinta  
assertio.

Dices quinto. Hæc propositio, Christus, in quantum homo, est filius adoptivus, sumpta illa determinatione ratione suppositi huius humanæ naturæ, est hæretica: & in hoc sensu damnatur in Conc. Francoford. Prior pars est evidens, quia eo sensu significatur, suppositum huius humanitatis non esse filium Dei naturalem, quod est hæreticum. Posterior pars probata est satis in superioribus.

Sexta  
assertio.

Unde dico sexto. Hæc propositio, Christus in quantum homo est filius adoptivus, licet falsa sit, non tamen est hæretica: censenda tamen est improbabilis. Prima pars de falsitate, probata est sect. præced. Secunda sufficienter etiā probata est declarando definitionem Conc. Francof. nam ante illud Concilium, propositio illa nullibi damnata est, nec falsitas ejus ex revelatis evidenter colligitur, sed pendet ex aliquibus principiis naturalibus seu moralibus, quæ non sunt ita evidentiæ. Rursus post illud Concilium, quamdiu ejus definitio ignorata est, non est etiam illa propositio ut hæresis damnata, sed ut opinio inter Theologos habita est: nunc autem, quamvis Concilium illud non ignoretur, tamen adhuc definitio illius non est ita clare repugnans illi propositioni, ut possit eam reddere hæreticam; imo (ut ego probabilius esse censeo) intentio & definitio Concilii non fuit, de illa propositione in eo sensu tractare aut eam dampnare: ergo nullum est fundamentum, ex quo possit hæretica censeri. Denique non solum antiqui, sed etiam moderni Theologi ita sentiunt de illa propositione. Unde Palac. 3. d. 10. disp. 1. solum ait, proprie non esse admittendam locutionem illam. Dices eandem esse rationem de hac propositione & de altera Christus est filius adoptivus, imo unam ex altera inferri, quia determinatio non est conditio diminuens aut assignans solam humanitatē. Respondetur, negando assumptum, quia illa determinatio adjuncta ex parte subjecti determinat illud, ut non supponat pro persona Verbi absolute & secundum se, seu materialiter, ut ajunt, sed formaliter pro persona composita, ut composita est ex Verbo & humanitate: non est autem ita clare repugnans fidei attribuire filiationem adoptivam personæ compositæ ut sic, sicut attribuire illam personæ Verbi simpliciter & absolute. Unde etiam fit (quod maxime ad rem spectat) ut, addita determinatione, negatio filiationis naturalis inclusa in filiatione adoptiva non referatur ad personam Christi & Verbi absolute, sed ad personam ut compositam, seu quatenus hic homo est: non est autem de fide, Christum ut hunc hominem esse filium naturalem, ut ostensum est: ergo neque alia propositio tribuens Christo adoptionem cum il-

la determinatione potest esse hæretica ratione negationis inclusæ; non est ergo eadem ratio de illa propositione simpliciter prolata & cum determinatione.

Dices. Si hæc vera sunt, non solum probare, illam propositionem non esse hæreticam, sed etiam non esse improbabilem, nec aliqua censura dignam; si enim damnata a Concil. Francoford. non est, eandem probabilitatem retinet, quam habuit antequam illud Concilium in lucem prodiret. Imo, si ex illa non sequitur altera propositio absoluta, Christus est adoptivus, probabilior censenda erit, quia solum includit negationem filiationis naturalis secundum extraneam naturam, quæ negatio non repugnat, imo optime esse potest cum filiatione naturali secundum aliam naturam intrinsecam & propriam. Respondetur ad priorem partem, propositionem illam (ut ego existimo) etiam secluso Francof. Concilio semper fuisse parum & fere nihil probabilem, quia, licet unus aut alter Theologorum ea docuerit, reliquorum omnium & graviorum consensus illi repugnavit, propter gravissimas rationes supra tactas, cum tamen opinio Durandi nullo satis probabili principio nitatur, sed aut necessario supponat, Christum ut hominem non esse gratum & sanctum ex vi unionis, neque illi esse connaturalem gratiam & jus ad gloriam, vel certe male declarat rationem adoptionis, quæ ex institutione ejus usus & sapientum sumenda est. Addo deinde, illam opinionem jam nunc esse longe improbabiliorem, quam antea. Primo quidem, quia, licet non constet, definitione Conc. Francof. esse damnatam, tamen non est hoc adeo certum, quin possit aliquo modo in dubium revocari, & saltem obiter constat multa in eo Concilio dici, ex quibus vehementer illa opinio impugnatur. Accedit, quod ob dictas causas, & quia illa locutio non est a Patribus usitata, neque illorum locutionibus conformis, sed magis accedens ad modum loquendi hæreticorum, ab omnibus modernis scriptoribus, & doctioribus Theologis rejicitur. Merito ergo valde protervus ac fortasse temerarius censeri deberet, qui nunc illam doceret. Neque enim omnis opinio, quam aliqui Theologi aliquando sine temeritate docuerunt, in eodem semper gradu probabilitatis, vel opinionis perseverat, ut per se notum est. Ad posteriorem partem respondetur, illam propositionem cum illa determinatione, *in quantum homo*, non esse falsam solum quia ex illa sequatur alia absoluta & sine determinatione, Christus est filius adoptivus, nam re vera immediate ac formaliter non sequitur, quævis mediate & ratione materia tandem inferri possit valde probabiliter; sed est falsa, quia includit negationem filiationis naturalis, quæ tamen falso negatur de Christo etiam ut homine, ut ex prædicto constat. Item etiam, quia attribuit Christo ut homini proprietatem repugnantem ineffabili unioni, & compositioni secundum subsistentiam humanitatis ad Verbum. Tamen, quia hæc repugnantia non est tam clara, ut ex principiis certis evidenter inferatur, ideo non damnatur illa propositio ut hæretica vel erronea: rejicitur tamen ut improbabilis (præter causas dictas) quia principia, ex quibus illa repugnantia inferitur, vel sunt per se satis manifesta, si sint philosophica, vel, si sint Theologica, sunt ita certa, ut non possint sine temeritate negari, ut ex rationibus sectione præcedente factis satis constat.

¶ Ad rationes dubitandi in principio propositas fere in superioribus responsum est, nam duo priora argumenta procedunt ex quadam æquivocatione, quæ latet in illa particula, *in quantum homo*, vel *secundum humanitatem*, quæ, ut diximus, sumi potest, vel formaliter ad designandam naturam, vel ex parte suppositi ad designandum suppositum talis naturæ, quatenus eidem naturæ conjunctum est: in testimoniis autem adductis non sumitur priori modo, sed hoc posteriori, ut ex variis auctoribus, & ex verbis ipsius Concilii, & rationibus ostendimus. Tertium vero argumentum recte concludit, ex sententia Durandi posse tandem deduci errorem distinguendum personas, in Christo, tamen, quia hæc deductio non est ita evidens quin fundetur in aliquibus principiis non omnino certis aut evidentibus, ideo non damnatur illa opinio ut hæretica, vel erronea.

Obiecta  
non respon-  
detur.

Rationibus dubi-  
tandi satis-  
factis.

#### S E C T I O IV.

*Utrum Christi humanitas possit dici adoptata.*

**H**Actenus diximus de Christo, tam simpliciter sumpto, quam cum determinatione, *secundum humanita-*

Doctri-  
neris



Difficul-  
tatis cau-  
sa.

*nitatem*, nunc dicendum superest de humanitate ipsa, nam, licet aliqui hanc questionem confundant cum altera de Christo ut homine, tamen revera est diversa, sicut humanitas ipsa quid distinctum est a Christo ut homine, nec decisio unius ex altera formaliter sequitur, ut in sect. 2. tactum est. Est igitur hic specialis ratio dubitandi, quia humanitas est natura extranea respectu Verbi, & ex sola Dei dilectione & liberalitate ordinata est, ut Verbo conjungeretur: neque enim ea gratia ullo modo ei debita erat, unde prius etiam natura extitit, quam ei talis gratia conferretur: ergo huiusmodi gratia vel acceptatio ad illam revera habet rationem adoptionis respectu humanitatis. Probatur consequentia, quia, cum humanitas non sit persona, sed natura tantum, adoptanda est ut natura, non ut persona: ergo conditiones adoptionis in illa inveniri debent ut in natura, non ut in persona: ergo satis est quod sit extranea, & præexistens, & gratis dilecta, ut est quædam natura. Et confirmatur testimonio Hilarii l. 2. de Trin. post medium dicentis: *Potestatis dignitas non amittitur, dum carnis humilitas adoptatur*; & Marii Victorini l. 1. contra Arium, ubi tractans verba Marthæ Joan. i. 1. *Quoniam tu es Christus Filius Dei, qui in hunc mundum venisti*, ait: *Non sic Filius quemadmodum nos: nos enim adoptione filii, ille natura, etiam quædam adoptione Filius est Christus, sed secundum carnem*: quod potest recte intelligi de adoptione ipsius carnis seu humanitatis. In contrarium autem est, quia si humanitas esset adoptata, etiam ratione illius Christus dici potuit adoptatus, tanquam in natura adoptata subsistens.

Aliquorū  
opinio,

In hac re Theologi quidam existimant, relationem aut denominationem filii non esse propriam suppositi, sed posse etiam naturæ convenire, quando illa realiter præcedit, vel sanctificatur, probabile existimant, humanitatem Christi non solum adoptatam sed etiam filiam adoptivam Dei denominari posse, & hic modus dicendi potest sumi ex Scotto in 3. d. 10. quamvis non clare illum doceat, nec definendo, sed ut probabilem tantum. Alii vero, qui melius sentiunt, relationem & nomen filii supposito tantum & non naturæ attribui, negant quidem, humanitatem esse filiam adoptivam, quidam vero eorum concedunt nihilominus, humanitatem esse adoptatam, quia ex gratia Dei præordinata est ad participationem hæreditatis æternæ. Atque ita opinantur Gabriel & Almain in 3. d. 10. ubi Major idem sentiens addit, concedi posse, Christum habere adoptionem secundum humanitatem, quia per hoc nihil aliud significatur, quam quod habet humanitatem adoptatam. Nonnulli vero ex Junioribus existimant, illam propositionem non solum falsam esse, sed etiam hæreticam, quia ex illa sequitur, Christum ut hominem esse filium adoptivum, quod in Concilio Francoford. putant esse damnatum, & quia in eodem Concilio expresse id negatur, & carnis assumptio contra adoptionem distinguitur. Unde in libro Sacrosyllabo circa principium sic dicitur: *De Beata Virgine inenarrabiliter sumpsit, non adoptavit carnem*.

Adoptio-  
nis co-  
gnoen-  
Christi  
humani-  
tati rep-  
gnans.

Dico primo. Humanitas Christi, nec proprie, nec vere dici potest adoptata. Ita D. Thom. hic art. 4. ad 1. & est communis sententia. Et quidem, si spectemus primam originem & rationem adoptionis, pro ut inter homines introduci potuit & esse in usu, manifestum est, adoptionem non versari circa naturam ut naturam, sed circa personam: ergo ex vi proprietatis huius vocis in sua primæva significatione non potest dici natura ut sic adoptari, sed coadoptari cum persona: quod de humanitate Christi dici non potest, quia cum persona nec secundum se, neque ut humana fuerit adoptata, neque humanitas ipsa coadoptari potuit: & hoc quidem satis est, quoad vocis proprietatem. Quod vero ad rem ipsam & ad falsitatem pertinet, declaratur in hunc modum; nam vel humanitas Christi adoptata est ad habituales gratias, vel ad hæreditatem æternam, vel ad gratiam unionis. Præter hæc enim nihil aliud excogitari potest. Sed ad nullum horum adoptata est: ergo non fuit adoptata. Prima pars minoris, quæ est de gratia habituali, probatur primo, quia neque nos adoptamur proprie ad gratiam habituales, sed potius per gratiam habituales adoptamur ad vitam, seu hæreditatem æternam. Non enim dicitur aliquis adoptari ad aliud, nisi quando recipit jus ad illud tanquam ad hæreditatem filii; & ideo prædestinatus eo tempore, quo est in peccato mortali, nondum est adoptatus,

De ado-  
ptione ad  
habituales  
gratias  
probatur.

quia licet sit præordinatus ad vitam æternam, tamen nondum acquisivit jus ad illam secundum præsentem iustitiam: quia ergo nos non adquirimus unquam jus ad gratiam, sed illam gratis accipimus, & per illam habemus jus ad gloriam, ideo non dicimur proprie adoptari ad gratiam, sed per gratiam ad gloriam: idem ergo erit in Christi humanitate. Dices non procedere in illa rationem factam, quia illa per unionem hypostaticam acquisivit jus ad gratiam. Respondetur, nos loqui de humanitate, prout ordinæ naturæ antecessit unionem, nam, si unio supponatur, jus, quod ad illam sequitur, non pertinet per se ad humanitatem, sed ad Christum, qui ex unione resultavit: unde, si respectu Christi illud jus non est adoptionis, sed conaturalitatis, nec respectu humanitatis unitæ esse poterit. Unde argumentor secundo in hunc modum, quia humanitati prius natura communicatur gratia unionis, quam gratia creata, nam hæc datur ut proprietas consequens unionem, ut in superioribus ostensum est: ergo, si unio non est adoptio, neque gratia habitualis data est humanitati Christi ratione adoptionis: ostendemus autem statim, unionem non esse adoptionem: ergo nulla ratione dici potest illa humanitas adoptata ad gratiam habituales.

Atque eisdem rationibus ostendi potest non esse adoptatam illam humanitatem ad gloriam seu hæreditatem æternam; nam, vel ad illam adoptaretur per gratiam habituales, vel per gratiam unionis. Primum dici non potest, quia gratia habitualis non est data illi humanitati per modum adoptionis, id est, ex primaria quasi generatione, & benevolentia mere gratuita, & tanquam naturæ omnino extraneæ, sed per actionem quasi consequentem unionem, & ex quodam debito illius, & tanquam naturæ jam deificatæ, & factæ quodammodo divinæ, & quasi propriæ verbi per unionem: ergo non ordinatur illa humanitas ad beatitudinem tanquam ad illam adoptata per huiusmodi gratiam. Secundum probatur, quia gratia unionis est altioris ordinis & rationis, quam sit gloria ipsa: ergo non potest illa esse adoptio ad gloriam. Sed hoc fortioribus rationibus statim ostendetur. Nunc confirmatur primo hæc pars ad hominem contra Gabrielem, quod non videatur consequenter loqui: nam, si humanitas Christi adoptatur, quatenus ad beatitudinem ordinatur, cur non dicetur etiam filia adoptiva? Nam non minus est proprium suppositi operari, quam generari: ergo tam erit proprium suppositi ordinari ad vitam æternam, quæ in operatione consistit, quam esse filium, quod est, esse cuiusdam generationis terminum: ergo si hoc non obstant humanitas adoptari dicitur, dicetur etiam filia, vel e converso, si non est filia, ut revera non est, neque ipsa proprie ordinatur ad vitam, sed Christus ut subsistens in ipsa: illa vero quasi coordinatur cum Christo (ut sic dicam). Si ergo respectu ipsius Christi ut hominis talis ordinatio ad vitam non est adoptio, quia est ex debito unionis & consequens illam, nec respectu humanitatis ejus esse poterit. Unde confirmatur secundo, cur enim negat, Christum ut hominem esse adoptatum, si humanitas ejus adoptata est? cū verius ac proprius Christus ut homo præordinetur ad beatitudinem, quam humanitas ejus. Vel ergo id non satis est ad adoptionem, & ita neque humanitas eo titulo erit adoptata, vel si id satis est, ipse etiam Christus ut homo dicendus erit adoptatus, & filius adoptivus, cum sit suppositum. Quod si dicat, respectu Christi ut hominis illam ordinationem ad vitam non esse adoptionem, quia non est ex mera gratia & benevolentia extrinseca, sed quodam modo ab intrinseco ex debito propriæ personæ. Contra hoc est, quia eadem ratio de humanitate procedit, quia non est per se primo ordinata ad vitam, sed ad esse personale filii Dei, ex quo consecutum est debitum habendi beatitudinem, & ordinatio in illam ratione talis debiti: ergo non magis potest illa ordinatio habere rationem adoptionis respectu humanitatis, quam respectu Christi ut hominis. Superest, ut ultimum membrum probemus, scilicet, non posse humanitatem dici adoptatam ad gratiam unionis. Et quidem, si in rigore sistamus in illa forma loquendi, cum per adoptionem acquiratur jus filii ad hæreditatem, ad quam quis adoptatur, non poterit dici humanitas adoptari ad unionem, quia nullam priorem gratiam recipit, qua jus, vel proportionem, aut dispositionem aliquam ad talem unionem acquirat. Sed non est necesse in hac forma loquen-

Idem ostenditur de adoptione ad æternam hæreditatem.

Idem de adoptione ad gratiam unionis.



quendi vim facere, nam dici facile potest sufficere extrinsecam Dei ordinationem, quia illa humanitas gratis dilecta seu acceptata est, ut a primo instante suae conceptionis Verbo uniretur, sicut humana adoptio fit per solam intrinsecam ordinationem & acceptationem. Vel dici etiam potest, illam locutionem esse intransitive sumendam, & ad modum causae & effectus formalis, ita ut dicatur humanitas adoptata ad esse personale filii Dei per gratiam unionis, tanquam per formale vinculum, quo ipsa unitur Dei Filio. Ad rem ergo, omisso loquendi modo, unionem illam neque esse adoptionem, neque ex adoptione, probari potest hoc modo: quia adoptio solo affectu conjungit adoptatum adoptanti; sed unio illa non conjungit humanitatem Verbo solo affectu, sed re ipsa: erga illa non est adoptio. Minor de fide certa est, ut patet ex dictis supra q. 2. ubi ostendimus esse unitam substantia-liter Verbo. Major probatur ex conditionibus, & natura adoptionis supra explicatis: ex quibus constat, adoptionem esse mere gratuitam ex benevolentia adoptantis. Unde in dicto Concilio Francoford. in lib. Sacrosyllabo col. 7. adnotat Paulinus, hoc ipsum indicari in ipso nomine adoptionis. *Nam adoptio, inquit, ex affectione ducit vocabuli sui originem*, quia is, qui adoptat, quasi optas habere filium, cum proprium & naturalem non habeat, ex affectu, & benevolentia acceptat alienum, suumque facit, non re, sed affectione tantum. Unde in epistola ejusdem Concilii ad Episcopos Hispaniae versus finem: *Quid est, dicitur, adoptio, nisi charitatis copulatio, qua pater adoptione sibi copulat filium, quam proprium non habet*.

Sed haec ratio, licet respectu personae Christi ut subsistenti in humanitate, eo sensu, quo de illa loquitur Concilium Francoford. sit efficax, quia filiatio Christi nullo modo manet ex dilectione, non enim est filius quia dilectus, sed potius dilectus quia filius, quo modo intelligitur illud, *Hic est filius meus dilectus*, ut sequenti tomo latius declarabo. Nihilominus respectu humanitatis non apparet efficax ratio, neque ex firmo principio procedens, nisi recte exponatur, aliquidque ei addatur. Declaratur, quia licet sit verum, adoptionem oriri non ex natura, sed ex benevolentia & affectu, non tamen est verum sistere in sola benevolentia & affectu, nam potest efficere realem unionem, seu ad illam terminari. Quamvis enim humana adoptio voluntate fiat, & sola extrinseca illius denominatione consummetur, quia imperfecta est, tamen adoptio divina non consistit solum in extrinseca benevolentia, & acceptatione Dei, sed facit realem mutationem in adoptato, illique communicat suam naturam, & divinitatem secundum intrinsecam quandam ejus participationem, juxta illud: *Magna & pretiosa nobis promissa donavit, ut divina efficiamur consortes naturae*. Per hanc autem participationem naturae divinae non solum affectu conjungimur Deo, sed re ipsa efficiamur illi similes, nec solum extrinsece ordinamur ad hereditatem Dei, sed intrinsece habemus naturam, cui illa hereditas debetur: ergo divina adoptio, licet ex affectu & benevolentia Dei gratuita oriatur, tamen non est sola denominatio ab illa, sed est vera & realis assimilatio, sed conjunctio adoptati ad adoptantem: ergo ex hac parte non repugnat, humanitatem Christi esse adoptatam, quia ex solo affectu & gratuita benevolentia Dei ordinata fuit ad unionem, quamvis ille effectus terminatus fuerit ad realem immutationem, veramque unionem cum filio Dei.

Hoc autem constituto explicandum superest, si realis infusio gratiae creata est adoptio, cur etiam realis unio naturae creatae non sit adoptio? Sicut enim infusio gratiae est supra naturam personae creata, ita & haec unio, est supra naturam humanitatis: & sicut illa infusio ex benevolentia fit ad personam ex se extraneam respectu gratiae, ita haec unio ex benevolentia fit in humanitate ex se extranea respectu talis unionis, & sicut, facta hac unione, ex vi ejus talis natura deificata manet, illique propter eam causam debetur hereditas, ita, facta gratiae infusione, ex vi ejus homo manet sanctificatus, eique debetur hereditas intrinseco connaturalitatis debito: ergo ex illa ratione non potest colligi sufficiens differentia, ob quam humanitatis assumptio non sit adoptio. Addendum ergo est: etiam si haec omnes similitudines versari inter gratiam unionis & infusionem gratiae creatae: nihilominus tamen magnam quandam differentiam inter has gratias intercedere, ratione cujus una est gratia adoptio-

nis, & non alia. Quo etiam fit, ut, licet omnis adoptio divina sit gratia ex gratuita Dei benevolentia proveniens, non tamen e converso omnis gratia communicata ex gratuita benevolentia Dei sit adoptio. Differentia autem inter has gratias est, quia una est gratia accidentaliter, altera substantialiter, una creata, altera increata, una per communicationem cujusdam participationis divini esse, altera per communicationem veram & realem ipsiusmet divinae personae.

Ex hac autem differentia, quae satis nota est ex superioribus, optime colligitur ratio, cur, licet gratia habitualiter sit gratia adoptionis, non tamen gratia unionis: nam adoptio non facit substantialem unionem inter adoptatum & adoptantem, sed accidentalem tantum, gratia autem unionis facit substantialem unionem; non est ergo adoptio, sed aliquid majus adoptione. Vel aliter, per adoptionem non communicat adoptans adoptato suum proprium naturale esse, quod in se habet: per gratiam autem unionis communicat Deus naturae assumptae suum proprium esse personale: deus. Item aliter declaratur, nam inter homines pater non adoptat suum filium naturalem, etiam si ex amore & desiderio illius cum generet, quia communicat illi suammet naturam, quamvis non eandem numero, sed eandem specie communicet: ergo, si per impossibile, posset ex affectu communicare naturae alterius a se non geniti suammet personam eandem numero, non posset dici adoptare illam naturam, sed altiori quodam vinculo illam facere suam, & quodammodo magis sibi conjunctam, quam sit filius naturalis suo patri, quando solum est inter eos identitas specifica. Præterea declaratur aliter, nam, si quis posset sua efficaci voluntate & affectu alienam substantiam suo corpori substantialiter unire, non diceretur adoptare illam, quia illud vinculum multo est altioris ordinis & rationis: sed similiter per hanc unionem magis unitur humanitas ipsi Deo, quam pars corporis ipsi toti uniatur; & similiter, si anima posset efficacia suae voluntatis unire sibi corpus, & media ea unione illud facere consors suarum operationum, non diceretur illud adoptare. Denique per solam adoptionem non communicatur filiatio naturalis: per hanc vero unionem communicatur ipsamet filiatio naturalis Dei per se ipsam, & non tantum per aliquam sui participationem: ergo illa unio non potest dici adoptio. Unde hic etiam accommodari potest ratio, quam hic D. Th. tetigit, quod adoptio dicit habitudinem ad filiationem participatam: haec autem unio non dicit talem habitudinem, sed potius ad ipsam filiationem naturalem, cui substantialiter copulat naturam assumptam. Potest etiam ad hoc revocari illa ratio, quod adoptio ex sua ratione postulat versari circa personam, & non circa naturam tantum, haec autem gratia unionis versatur circa naturam, & proprie fit naturae, non personae, ut in superioribus ostensum est. Major probari potest (præter supra dicta contra Gabrielem) quia adoptio, ut dixi, solum facit accidentalem unionem, inter adoptatum & adoptantem, & ideo supponit inter eos personalem distinctionem, & versatur circa personam.

Ob has ergo causas merito distinguitur gratia unionis a gratia adoptionis, ut eleganter tetigit D. Th. hic art. 4. præsertim in solutione ad secundum, ubi unico fere verbo attingit totam hanc doctrinam, scilicet, quod gratia unionis & habitualis conveniunt in principio, scilicet, quia sunt ex affectu gratuito Dei, differunt autem in termino, quia per unum confertur filiatio naturalis, & ipsum esse personale Dei, per aliam vero tantum quædam illius participatio. Et eandem tetigit ex Scholasticis antiquioribus Albertus Magnus in 3. d. 10. art. 13. ubi recte notat, dupliciter contingere habere filiationem per se seu naturalem, uno modo per actum naturae, quo modo filius æternus habet a Patre: *alio modo* (inquit) *per identitatem & per unionem ad illum, qui per naturam habet*: & hoc posteriori modo ait communicari humanitati filiationem divinam per gratiam unionis, & ideo non esse adoptionem, sed longe superiorem gratiam. Et ex modernis eandem differentiam tetigit Palacios in 3. d. 10. disp. unica, dubio 1. ubi ait, Christi humanitatem non esse adoptatam, quia non habet esse participatum, sed ipsum esse personale Dei, eamque differentiam significavit Augustinus lib. de Trin. & unit. Dei c. 11. t. 4. dicens: *Sunt isti filii gratia, ille natura, quia in istis participatio di-*

Union  
gratia  
quæ  
non sit  
adoptio.



*vinitatis, in illo plenitudo:* quamvis enim eo loco, de filio secundum divinitatem loquatur: potest tamen ex illis verbis sumi non leve argumentum a simili. Denique hanc ipsam differentiam indicavit sæpe Concilium Francos. in verbis in principio citatis in ratione dubitandi, & in multis aliis, quæ occurrent facile attente legenti.

*Instantia.*

Sed instabit aliquis, nam si rationes factæ efficaciter probant, gratiam unionis non esse adoptionem, propter eam excellentiam, in qua superet gratiam habitualement, similibus rationibus probari poterit, infusionem gratiæ habitualis non esse adoptionem propriæ & in rigore, sed aliquid majus adoptionem propter excellentiâ, in qua superat humanam adoptionem. Primum enim humana adoptio, ut dicebamus, in solo affectu & benevolentia adoptantis consistit, & in illa & per illam formaliter perficitur, quia nullo modo est generatio, nec realis communicatio naturæ adoptantis respectu adoptati, & ideo etiam a jurisperitis existimatur tanquam quædam fictio juris, quia per illam habetur ut filius, qui revera filius non est: at vero justificatio non est solus affectus extrinsecus Dei, quamvis ab illo procedat, sed est quædam divina generatio vera, realis, ac physica, quamvis accidentaliter: & per eam Deus communicat suam naturam, licet non ad æqualitatem, sed secundum quandam participationem. Addi etiam potest, per hanc actionem non solum communicare Deum sua bona, creatura, sed etiam se ipsum, vel quatenus iustus datur ipsamet persona Spiritus sancti speciali modo, vel quatenus ipsamet essentia divina unitur Beatis in patria. In quibus omnibus multum superat justificatio hæc filiorum Dei adoptionem humanam, & longe alterius rationis est: ergo, vel ob hanc causam negandum est illam esse propriam & formalem adoptionem, sed aliquid eminentius; vel si, hac differentia non obstante, dicitur justificatio manere intra rationem adoptionis, quia non pervenit ad excellentiam veræ & naturalis generationis Filii Dei, licet sit quædam excellentior adoptio, eadem ratione dicitur gratia unionis esse quædam altior & eminentior adoptio, quam sit non solum humana, sed etiam divina per gratiam creatam, non transcendere vero rationem adoptionis, qui etiam non pertingit ad perfectionem propriæ & naturalis generationis filii Dei, neque confert jus ad beatitudinem per essentiam, sed solum ad participationem ejus.

*Reprobatur.*

Respondetur, hoc argumento moveri potuisse, qui gratiam unionis, adoptionem appellarunt, quod lato & improprio modo dictum esse, etiam Gabriel ipse confessus est. Nos vero negamus proportionem & paritatem rationis, nam in justificatione servatur propriæ ac formaliter id, quod est de ratione adoptionis, nempe quod sit gratuita quædam assumptio seu acceptatio ad hæreditatem personæ extraneæ concessa, id est, quæ ex se nullum jus ad talem hæreditatem habebat; quæ omnia formaliter reperiuntur in puræ creaturæ rationalis justificatione. Quod autem in illa intercedat infusio supernaturalium donorum, & participatio quædam intrinseca naturæ Dei adoptantis, provenit ex duplici notanda differentia, inter adoptionem humanam, & divinam. Prior est ex parte adoptantis, nam homo adoptans habet inefficacem voluntatem ad hoc, ut suo amore ac benevolentia intrinsece immutet, ac perficiat eum, quem adoptat. Dei autem adoptantis voluntas est potentissima, ut constituat objectum suo amoris proportionatum, & ut intrinsece perficiat eum, quem singulariter diligit, dum eum adoptat. Posterior vero differentia declarat necessitatem hujus immutationis ex parte hominis adoptati. Nam in humana adoptione supponitur perfecta similitudo in natura inter adoptantem & adoptatum; solumque deest naturalis origo unius ab alio: hæreditas etiam, ad quam homo adoptatur, est ejusdem ordinis (ut sic dicam) nam ad similem hæreditatem potest homo habere naturale jus: quod deest homini, qui adoptatur, non ob excellentiam hæreditatis, neque ex defectu perfectionis ipsius hominis, sed tantum ex defectu originis: at vero secus est in divina adoptione, nam inter hominem qui adoptatur, & Deum qui adoptat, supponitur quidem origo, non tamen perfecta similitudo in natura, sed solum secundum quandam analogam convenientiam in gradu intellectuali. Hæreditas etiam illa, ad quam homo a Deo adoptatur, est superioris ordinis, & non est connaturalis ipsi homini, non tantum ex defectu originis, sed etiam ob ex-

cellentiam ipsius hæreditatis, & imperfectionem ipsius hominis. Unde ad naturalem beatitudinem homo non adoptatur, sed habet ad illam naturale jus, tam ex vi suæ perfectionis, quam ex vi suæ originis, secundum quam rationem non dicitur filius adoptivus, sed vel non attingit rationem filii, quia illa beatitudo naturalis non est propriæ divinæ hæreditas, vel imperfectissimo modo dicitur filius naturalis per creationem: ob hanc ergo causam necessarium fuit, divinam adoptionem fieri per participationem quandam divinæ naturæ filii adoptivis infusam, ut per eam similitudo in natura, quæ deerat, perficeretur quoad fieri posset inter creaturam & Deum, saltem in eo gradu, in quo pertingere posset creatura ad fruendum Deo in se ipso, in quo maxime divina hæreditas & beatitudo posita est. Quia vero hæc participata similitudo, & hæreditas illi respondens, quamvis fiat per dona intrinsece infusa, semper est supra debitum personæ creatæ cui conceditur, & non efficit cum Deo substantialem unionem, sed accidentalem, ideo non transcendit rationem adoptionis, sed perfectiorem quandam illius speciem & rationem sortitur. Et hac etiam ratione dicitur hæc adoptio consistere, aut perfici unionem secundum affectum, non quia excludat realem participationem naturæ Dei adoptantis, sed quia tota illa ordinatur, ut possit homo esse proportionatus ad fruendum Deo, & ad contrahendum cum ipso proprium & perfectum vinculum amicitiae, & fieri unus spiritus cum ipso secundum affectum. At vero longe alia est excellentia unionis hypostaticæ, quæ non fit per unionem accidentalem, nec per participationem tantum, sed per communicationem ipsiusmet personæ divinæ; & ideo nullam habet formalem similitudinem, vel convenientiam cum adoptione, sed est gratia omnino alterius ordinis, ut declaratum est.

*Illatio.*

Ex his infero, & dico secundo, hanc propositionem; *humanitas non est adoptata*; in quodam sensu esse de fide, simpliciter tamen, & in omni sensu, non esse de fide, quamvis jam satis certa esse videatur. Declaro singula, nam si adoptio propriè sumatur pro unionem cum Deo per accidentalem gratiam, & sensus sit exclusivus, humanitatem scilicet Christi ita fuisse adoptatam, ut non habeat cum Deo aliud majus vinculum, sic est hæreticum tribuere adoptionem humanitati Christi, quomodo de adoptione ejus locutus est Nestorius, & (ut ego existimo) Felix & Elipandus. Si autem, vel sensus non sit exclusivus, sed tantum indefinitus, vel certe si quis mordicus contendat, adoptionis vocabulum & rationem posse extendi ad omne donum gratiæ liberaliter communicatum, ad quod jus ad participatam beatitudinem consequatur, sic non pertinet ad materiam fidei, neque est hæreticum adoptionem tribuere humanitati Christi, etiam si falsum sit. Primo quidem, quia illi humanitati data est gratia habitualis simul cum gratia unionis, & adhuc sub opinione positum est, an prius natura data fuerit gratia habitualis quam unionis: ergo, quia utramque gratiam admiserit in humanitate Christi, non erit hæreticus, etiam si dicat esse adoptatam per gratiam habitualement, licet simul habuerit aliud majus vinculum cum Deo, quia nulli principio fidei repugnabit: ergo simpliciter appellare eam adoptatam propter dictum sensum, non est hæresis: quia illa verba non præ se ferunt exclusivum sensum, sed indefinitum tantum.

Quod si quis dicat, adoptionem in sua proprietate includere negationem ætioris vinculi, & substantialis unionis. Respondetur, propterea illum sensum esse falsum, non tamen esse hæreticum, quia illud principium, nec definitum de fide est, neque est tam evidens, ut sufficiat ad certam fidem faciendam. Secundo ob eandem causam, si quis vocet humanitatem adoptatam propter ipsammet gratiam unionis, non quidem existimans, gratiam unionis non esse altioris rationis, aut non facere majus vinculum cum Deo, quam gratiam habitualement, sed existimans, convenire has duas gratias in ratione divini doni gratuiti, ad quod consequitur jus ad participationem hæreditatis æternæ, & nomen adoptionis convenire huic rationi communi, & omnibus sub illa contentis, non est cur in eo sensu hæreticus censetur: & ideo licet impropria sit locutio, ut hic dixit D. Th. ad 1. & falsa, ut discursus a nobis factus ostendit, non tamen est hæretica, quia neque proxime repugnat alicui principio fidei, neque mediante aliquo principio evidente, ut objectiones

nes



nes in contrarium factæ satis declarant: nec denique est in se ipsa formaliter damnata, aut contraria definita in aliquo Concilio: maxime enim in Francofordiensi; sed in eo non, ut ex his, quæ de illius sensu supra diximus, constare potest, & in solutionibus argumentorum breviter iterum attingemus.

Ad rationem ergo dubitandi in principio positam negatur consequentia, quia non omnis gratia gratuito collata habere potest rationem adoptionis, neque natura ut natura adoptari potest; non quia non possit gratis diligi, & ordine naturæ præexistere & extranea esse; sed quia natura ut sic non potest nisi ad substantialem unionem assumi, nam alias supponeretur subsistens in propria persona, & ita jam non naturæ sed personæ fieret gratia. Ad Hilarium respondet D. Th. & communiter Scholastici, improprie vocasse adoptionem carnis gratiam unionis. Alexander autem Alesh. 3. p. q. 10. memb. 4. ait id dictum esse propter humanitatem in specie consideratam, non in individuo prout est in Christo: quod posset intelligi ad eum modum, quo Paulus ait, nos confurrexisse in Christo, & confedisse in cœlestibus. Sed hoc non solum est improprium, verum etiam omnino contra mentem Hilarii. Alii conjectant, mendosam esse litteram Hilarii; & ubi legitur, *adoptatur*, legendum esse, *adoratur*. Dixerat enim paulo ante: *Ad sunt Magi, involutum pannis adorant: per Magos cunarum sordes adorantur, vagitus per angelorum divina gaudia honorantur*. Et infra: *Aliud intelligitur, aliud videtur, infans vagit, laudantes angeli audiuntur, panni sordent, Deus adoratur, ita potestatis dignitas non amittitur, dum carnis humilitas adoratur*; sic enim optime quadrat ratio, ostendit enim, maiestatem Christi non esse imminutam inter vagitus, &c. quandoquidem in ipsis adoratur. Et hæc lectio habetur in editione Parisiensi, anni 1544. Juxta quam lectionem, illa particula, *dum carnis humilitas adoratur*, non est casualiter sumenda, dignitas enim Verbi sub carne latentis non ideo amissa non est, quia adoratur, sed ideo adoratur, quia amissa non est: non potest ergo illa particula reddere causam, sed signum, ut sensus sit, *dum adoratur*, id est, siquidem adoratur. Et solum videri potest durum in hac lectione, quia illa particula in communi usu, & latina proprietate non videtur illam significationem habere, est tamen nihilominus probabilis lectio & responsio. Sed non est alia contemnenda, quam habent recentiores codices, eamque esse antiquam & communem, constat ex D. Th. & Scholasticis. Et potest reddere satis germanum sensum. Docet enim eo loco Hilarius, Verbi maiestatem non fuisse imminutam ob assumptionem nostræ naturæ, idque concludit ex his, quæ in Christi nativitate acciderunt: nam infantulus in præsepe positus ab angelis prædicatur & laudatur, adoratur a Magis. Unde concludit, ex humilitate carnis Verbo conjunctæ non fuisse Verbi maiestatem & potentiam amissam: & hoc est, quod ait: *Ita potestatis dignitas non amittitur, dum*, id est, quando, seu ex eo quod, *carnis humilitas adoptatur*, id est, assumitur. Hæc ergo verba Hilarii juxta hanc lectionem, & alia Marii Victorini declarant, quod diximus habere gratiam unionis respectu humanitatis aliquas proprietates & conditiones, in quibus cum adoptione convenit, ratione quarum per translationem & metaphoram solet interdum adoptio vocari: præsertim ad significandum, humanitatem gratis esse amatam, & assumptam e Verbo: in qua metaphora in eo sensu sumpta nullus est error, sed nobis cavenda est, tum quia, ut ostendimus, vere & proprie illa non est adoptio, tum etiam quia metaphora illa rarissime est usitata, & potest esse occasio erroris. Et hoc solum probat testimonium Concilii Francoford. ibi in contrarium citatum: distinguitur enim assumptio ab adoptione proprie sumpta, de qua hæretici loquebantur, contra quos Concilium illud loquitur, ut in superioribus visum est.

## QUESTIO XXIV.

De prædestinatione Christi in quatuor articulos divisa.

**D**Einde considerandum est de prædestinatione Christi. Et circa hoc quaruntur quatuor.

Primo, *utrum Christus sit prædestinatus.*

Secundo, *utrum sit prædestinatus secundum quod homo,*

*Tertio, utrum ejus prædestinatio sit exemplar nostra prædestinationis.*

*Quarto, utrum sit causa prædestinationis nostre.*

**S**upponenda sunt hoc loco, quæ de prædestinatione in communi 1. p. q. 23. doceri solent, & abstinendo ab aliis opinionibus, certum est prædestinationem vel supponere, vel includere actum intellectus, & voluntatis, supponit enim voluntatem efficacem Dei, & dicit rationem mediorum, per quæ voluntas illa implenda est. Unde quia voluntas est quasi radix totius prædestinationis, de illa semper loquemur, & in ea explicabimus doctrinam hanc de prædestinatione Christi.

## ARTICULUS I.

*Utrum Christo conveniat prædestinatum esse.*

**A**D primum sic proceditur. Videtur, quod Christo non conveniat prædestinatum esse. Terminus enim prædestinationis videtur esse adoptio filiorum, secundum illud Ephes. 1. *prædestinavit nos in adoptionem filiorum*. Sed Christo non convenit esse filium adoptivum, ut dictum est. Ergo Christo non convenit prædestinatum esse.

2. Præterea. In Christo duo est considerare, scilicet naturam humanam & personam. Sed non potest dici, quod Christus sit prædestinatus ratione humana nature, quia hæc est falsa, humana natura est filius Dei. Similiter etiam neque ratione personæ, quia illa persona non habet ex gratia quod sit Filius Dei, sed ex natura; prædestinatio autem est eorum quæ sunt ex gratia: ut in 1. parte dictum est. Ergo Christus non est prædestinatus Filius Dei.

3. Præterea. Sicut illud quod est factum non semper fuit, ita & illud quod est prædestinatum: eo quod prædestinatio anteceffionem quandam importat. Sed quia Christus semper fuit Deus & filius Dei, non proprie dicitur quod homo ille sit factus filius Dei. Ergo pari ratione non debet dici, quod Christus prædestinatus sit filius Dei.

Sed contra est, quod Apostolus dicit Rom. 1. de Christo loquens. *Qui prædestinatus est filius Dei in virtute*. Respondeo dicendum, quod sicut patet ex his, quæ in prima parte dicta sunt, prædestinatio proprie accepta est quadam divina præordinatio ab æterno de his, quæ per gratiam Dei sunt fienda in tempore. Est autem hoc in tempore factum per gratiam unionis a Deo, ut homo esset Deus & Deus esset homo. Nec potest dici, quod Deus ab æterno non præordinaverit hoc se facturum in tempore: quia sequeretur, quod divine menti aliquid de novo accideret. Et ideo oportet dicere, quod ipsa unio naturarum in persona Christi cadat sub æterna Dei prædestinatione: & ratione hujus Christi dicitur esse prædestinatus.

Ad primum ergo dicendum, quod Apost. ibi loquitur de prædestinatione, quæ nos prædestinatur, ut simus filii adoptivi. Sicut autem Christus singulari modo præ aliis est Dei filius naturalis: ita quodam singulari modo est prædestinatus.

Ad secundum dicendum, quod sicut dicitur in Glo. 1. Rom. 1. *quidam dixerunt prædestinationem intelligendam esse de natura, non de persona: quia scilicet humana natura facta est hæc gratia, ut uniretur filio Dei in unitate persona*. Sed secundum hoc, locutio Apostoli est impropria propter duo. Primo quidem ratione communi. Non enim dicimus, naturam alicujus prædestinari, sed ipsum suppositum: quia prædestinari est dirigi in salutem, quod quidem est suppositi agentis propter beatitudinis finem. Secundo ratione speciali: quia esse Filium Dei non convenit humana nature: est enim hæc falsa, *humana natura est filius Dei*: nisi forte quis velit sic exponere extantam expositionem. Qui prædestinatus est filius Dei in virtute, id est, prædestinatus est, ut humana natura uniretur filio Dei in persona. Relinquitur ergo, quod prædestinatio attribuitur persone Christi: non quidem secundum se, vel secundum quod subsistit in divina natura, sed secundum quod subsistit in humana natura. Unde cum dixisset Apostolus, *Qui factus est ei ex semine David secundum carnem*, subiunxit, *Qui prædestinatus est Filius Dei in virtute*, ut daret intelligere, quod secundum hoc quod est factus ex semine David secundum carnem, est prædestinatus filius Dei in virtute. Quamvis enim sit naturale illi personæ secundum se consideratæ, quod sit filius Dei in virtute: non tamen est ei naturale secundum humanam naturam, secundum quam hoc sibi convenit per gratiam unionis.

Ad

Rationi  
dubitando  
satisfit.

140.  
1. d. 40. q. 2  
con. fin. &  
ad 5. & 3.  
d. 7. q. 1. 2.  
2. q. 2. & 1.  
3. 1. 2. 3.  
& 4. con. t.  
cap. 9. ad  
2. & Ro. 1.  
li. 3. col. 3.  
q. præced.  
ali. 4.

1. p. q. 23.  
art. 5.

P. p. q. 23.  
art. 1. & 4.

Glof ord.  
super illud,  
Qui prædesti-  
natus est  
filius Dei.



Ad Rom.  
1. super  
illud ver-  
bum  
Paul. to 1.

*Ad tertium dicendum, quod Origenes super Epist. ad Roman. dicit hanc esse literam Apost. Qui predestinatus est filius Dei in virtute, ita quod non designetur aliqua antecessio: & sic nihil habet difficultatis. Alii vero antecessionem, quæ designatur in hoc participio, predestinatus, referunt, non ad id quod est esse filium Dei, sed ad ejus manifestationem, secundum illum consuetum modum loquendi in Scripturis, quo res dicuntur fieri, quando innotescunt, ut sit sensus, quod Christus predestinatus est manifestari Filius Dei. Sed sic non proprie predestinatio accipitur: nam aliquis dicitur proprie predestinari secundum quod dirigitur in finem beatitudinis: beatitudo autem Christi non dependet ex nostra cognitione. Et ideo melius dicendum est, quod illa antecessio, quam importat hoc participium predestinatus, non refertur ad personam secundum se ipsam, sed ratione humane nature: quia scilicet persona illa, etsi ab æterno fuerit Filius Dei, hoc tamen non fuit semper, quod subsistens in natura humana fuerit Filius Dei. Unde Augustinus dicit in libro de predestinatione Sanctorum. Predestinatus est Jesus, ut qui futurus erat secundum carnem filius David, esset tamen in virtute Filius Dei. Et est considerandum, quod licet hoc participium predestinatus, importet antecessionem, sicut & hoc participium factus: aliter tamen & aliter. Nam fieri pertinet ad ipsam rem, secundum quod in se est: predestinari autem pertinet ad aliquem, secundum quod est in apprehensione alicujus præordinantis. Id autem quod subest alicui formæ & nature secundum rem, potest apprehendi, vel prout est sub forma illa, vel etiam absolute. Et quia absolute non convenit personæ Christi, quod inceperit esse Filius Dei, convenit autem ei, secundum quod intelligitur vel apprehenditur ut in natura humana existens (quia scilicet hoc aliquando incepit esse, quod in natura humana existens esset Filius Dei) ideo magis est hoc vera, Christus est predestinatus Filius Dei, quam ista, Christus est factus Filius Dei.*

## COMMENTARIUS.

**C**irca titulum, & ad intelligenda omnia, quæ disputanda sunt, observare oportet, dupliciter aliquem posse dici predestinatum. Primo præcise non explicando terminum, ad quem predestinatus est. Secundo addendo, & explicando illum terminum, ut si dicas, Christum esse predestinatum, vel esse predestinatum ut sit Filius Dei naturalis. Unde tria in hac locutione considerari possunt. Primum est actus Dei prædestinantis. Secundum est res quæ prædestinata dicitur, quæ solet esse objectum prædestinationis, & res ad quam prædestinatur, quæ terminus prædestinationis appellatur: & actus quidem prædestinationis supponit cognitionem objecti, & termini prædestinationis, quatenus possibilia sunt; præcedit autem ea, quatenus futura sunt, quia per ipsum actum prædestinationis ad existendum ordinantur. Inter objectum etiam & terminum (si distincta sint) quidam ordo reperitur, nam objectum supponitur termino per modum subiecti, ordinatur autem ad terminum tanquam ad finem & tanquam ad suam perfectionem, aut alio simili modo. In hoc ergo titulo præsentis articuli, D. Thom. priori modo questionem proponit de prædestinatione Christi præcise, non explicato termino ejus. Et eodem modo illam definit, quamquam obiter in solutione ad secundum & tertium, nonnihil de termino attingat. Et ex his satis intelligi potest litera totius articuli, quæ per se clara est. De re autem ipsa statim latius disputandum erit.

## ARTICULUS II.

*Utrum hac sit falsa, Christus secundum quod homo, est predestinatus esse Filius Dei.*

141.  
3. d. 10. q.  
1. art. 1. q.  
3. & 4.  
contra  
ca. 9. ad 2.

**A**d secundum sic proceditur videtur, quod hac sit falsa, Christus secundum quod homo, est predestinatus esse Filius Dei. Hoc enim est unusquisque secundum aliquod tempus, quod est predestinatus esse, eo quod prædestinatio Dei non fallitur. Si ergo Christus, secundum quod homo, est predestinatus esse Filius Dei, videtur sequi quod sit Filius Dei secundum quod homo. Hoc autem est falsum: ergo & primum.

2. Præterea illud, quod convenit Christo secundum quod homo, convenit cuilibet homini, eo quod ipse est unus speciei cum aliis hominibus. Si ergo Christus, secundum

quod homo, est predestinatus esse Filius Dei, sequeretur, quod cuilibet homini hoc conveniat. Hoc autem est falsum; ergo & primum.

3. Præterea. Hoc ab æterno prædestinatur, quod est aliquando sciendum in tempore. Sed magis hæc est vera, Filius Dei factus est homo, quam ista: Homo factus est Filius Dei: ut supra habitum est. \* Ergo magis hæc est vera, Christus secundum quod est Filius Dei, prædestinatus est esse homo, quam e converso. Christus, secundum quod est homo, est predestinatus esse Filius Dei.

Sed contra est, quod August. dicit in lib. de predestin. Sanct. Ipsum Dominum glorie, in quantum homo factus est Dei Filius, predestinatum esse dicimus. Cap. in med. 10. 7.

b Respondeo dicendum, quod in prædestinatione duo possunt considerari. Unum quidem ex parte ipsius prædestinationis eterne, & secundum hoc importat antecessionem quandam respectu ejus quod sub prædestinatione cadit. Alio modo potest considerari secundum effectum temporalem: qui quidem est aliquod gratuitum Dei donum. Dicendum est ergo, quod secundum utrumque istorum attribuitur prædestinatio Christo, ratione solius humane nature. Nam humana natura non semper fuit Verbo unita: & ei etiam hoc per gratiam est collatum, ut Filio Dei in persona uniretur. Et ideo solum ratione humane nature prædestinatio competit Christo unde August. dicit in lib. de præd. Sanct. prædestinata est ista humana natura tanta & tam celsa, & summa subvectio, ut quo attolleretur alius, non haberet. Hoc autem dicimus convenire alicui, secundum quod homo, quod ei convenit ratione humane nature. Et ideo dicendum est, quod Christus secundum quod homo, est predestinatus esse Filius Dei.

Ad primum ergo dicendum, quod cum dicitur, Christus secundum quod homo, est predestinatus esse Filius Dei, hæc determinatio, secundum quod homo, potest referri ad actum significatum per participium dupliciter. Uno modo ex parte ejus, quod materialiter cadit sub prædestinatione: & hoc modo est falsa. Est enim sensus, quod prædestinatum sit, ut Christus secundum quod homo, sit Filius Dei: & in hoc sensu procedit objectio. Alio modo potest referri ad ipsam propriam rationem actus: prout scilicet prædestinatio importat in sui ratione antecessionem, & effectum gratuitum. Et hoc modo convenit Christo ratione humane nature: ut dictum est. \* Et secundum hoc dicitur prædestinatus, secundum quod homo.

Ad secundum dicendum, quod aliquis potest convenire alicui homini ratione humane nature dupliciter. Uno modo sic, quod humana natura sit causa illius, sicut esse risibile convenit Sorti ratione humane nature, ex cuius principii causatur. Et hoc modo prædestinari non convenit nec Christo nec alteri homini ratione humane nature, & in hoc sensu procedit objectio. Alio modo dicitur convenire aliquid alicui ratione humane nature, cuius humana natura est susceptiva, & sic dicimus Christum esse prædestinatum ratione humane nature: quia prædestinatio refertur ad exaltationem humane nature in ipso, ut dictum est. \*

Ad tertium dicendum, quod sicut August. dicit in lib. de prædest. Sanct. Ipsa est illa ineffabiliter facta hominis a Deo Verbo susceptio singularis: ut Filius Dei & hominis simul, & filius hominis propter susceptum hominem, & Filius Dei propter suscipientem unigenitum Deum veraciter & proprie diceretur. Et ideo quia illa susceptio sub prædestinatione cadit, tanquam gratuita, utrumque potest dici, scilicet, quod & Filius Dei prædestinatus sit esse homo, & filius hominis prædestinatus sit esse Filius Dei. Quia tamen gratia non est facta Filio Dei, ut esset homo, sed potius humane nature, ut Filio Dei uniretur: magis proprie potest dici, quod Christus secundum quod homo, est predestinatus esse Filius Dei, quam quod Christus secundum quod Filius Dei, sit prædestinatus esse homo.

## COMMENTARIUS.

**I**nquit hic D. Thomas terminum hujus prædestinationis, & questionem intelligit de Filio Dei naturali propriissime, & personaliter, eo modo, quo hic homo Christus est Filius Dei naturalis per æternam generationem: ita ut sensus sit, an Christus in quantum homo sit prædestinatus fore ipsum Verbum Dei, quem sensum satis explicuit D. Thom. in argumento 1. cum solutione.

b Respondet autem in corpore, illam locutionem non esse falsam, sed veram, Christus in quantum homo est præ-

Quæst. 16.  
art. 6. & 7.

Cap. 15.  
fol. med.  
om. 7.

In corp. art.

In corp.  
art. 3. d. 7.  
1. 3. art. 1.  
& art. 3. q.  
2.  
\* Cap. 15.  
a med. 10. 7.



prædestinatus esse Filius Dei, quia hoc convenit illi ratione humanæ naturæ, cui in tempore gratio unionis facta est, quæ ab æterno fuerat prædestinata, & per eam effectum est, ut hic homo esset Filius Dei naturalis. Non explicat autem D. Thom. an hæc locutio tantum sit vera cum illo addito, *in quantum homo*, vel an etiam simpliciter dici possit, Christus est prædestinatus esse Filius Dei: indicat tamen, solum cum illo addito veram esse propositionem illam, dum inquit, solum ratione humanæ naturæ, prædestinationem competere Christo. Sed hoc statim latius disputandum est. Ubi etiam explicabuntur solutiones ad 1. & 3. Solutio vero ad 2. facilis est.

## ARTICULUS III.

*Utrum prædestinatio Christi sit nostra prædestinationis exemplar.*

**A**D tertium sic proceditur. Videtur, quod prædestinatio Christi non sit exemplar nostræ prædestinationis: exemplar enim præexistit exemplato. Nihil autem præexistit æterno. Cum igitur prædestinatio nostra sit æterna, videtur, quod prædestinatio Christi non sit exemplar nostræ prædestinationis.

2. Præterea. Exemplar ducit in cognitionem exemplati. Sed non oportuit, quod Deus duceretur in cognitionem nostræ prædestinationis ex aliquo alio, cum dicatur Rom. 8. Quos præcivit, hos prædestinavit. Ergo prædestinatio Christi non est exemplar nostræ prædestinationis.

3. Præterea. Exemplar est conforme exemplato. Sed alterius rationis videtur esse prædestinatio Christi, quam prædestinatio nostra: quia nos prædestinamur in filios adoptionis: Christus autem est prædestinatus Filius Dei in virtute, ut dicitur Roman. 1. Ergo eius prædestinatio non est exemplar nostræ prædestinationis.

Sed contra est, quod August. dicit in lib. de præd. Sanct.

\* Est præclarissimum lumen prædestinationis & gratia ipse Salvator, ipse Mediator Dei & hominum, homo Christus Jesus. Dicitur autem lumen prædestinationis & gratia, in quantum per eius prædestinationem & gratiam manifestatur nostræ prædestinatio: quod videtur ad rationem exemplaris pertinere. Ergo prædestinatio Christi est exemplar nostræ prædestinationis.

a. Respondendo dicendum, quod prædestinatio dupliciter potest considerari. Uno modo secundum ipsum actum prædestinantis: & sic prædestinatio Christi non potest dici exemplar nostræ prædestinationis: uno enim modo & eodem actu æterno prædestinavit Deus nos & Christum. Alio modo potest prædestinatio considerari secundum illud, ad quod aliquis prædestinatur: quod est prædestinationis terminus & effectus. Et secundum hoc prædestinatio Christi est exemplar nostræ prædestinationis, & hoc dupliciter. Primo quidem quantum ad bonum, ad quod prædestinamur. Ipse enim est prædestinatus ad hoc, quod esset Dei Filius naturalis: nos autem prædestinamur ad filiationem adoptionis, quæ est quadam participata similitudo filiationis naturalis. Unde dicitur Roman. 8. Quos præcivit & prædestinavit conformes fieri imaginis filii sui. Alio modo quantum ad modum consequendi istud bonum, quod est per gratiam, quod quidem in Christo est manifestissimum: quia natura humana in Christo nullis suis præcedentibus meritis est unita Filio Dei. Et de plenitudine gratiæ ejus nos omnes accepimus: ut dicitur Joan. 1.

Ad primum ergo dicendum, quod illa ratio procedit ex parte illius actus prædestinantis. Et similiter dicendum ad secundum.

Ad tertium dicendum, quod non est necessarium, quod exemplatum exemplari quantum ad omnia conformetur, sed sufficit quod exemplatum aliquantulum imitetur suum exemplar.

## COMMENTARIUS.

**A**ffirmat D. Thom. cum August. lib. de prædest. cap. 15. & de bono perseverantiæ cap. ult. cui consentiunt ceteri Theologi in 3. dist. 10. ubi Albert. dub. ult. Durand. q. 2. Palud. q. 3. Bonav. dist. 1. ar. 1. q. 1. & Alenf. 3. par. q. 3. memb. 5. & in superioribus satis declarata est hæc D. Thom. conclusio, disp. 5. sect. 2. Neque hoc loco oportet plura addere, quia res est facilis.

## ARTICULUS IV.

*Utrum prædestinatio Christi sit causa nostra prædestinationis.*

**A**D quartum sic proceditur. Videtur, quod prædestinatio Christi non sit causa nostræ prædestinationis: æternum enim non habet causam. Sed prædestinatio nostra est æterna. Ergo prædestinatio Christi non est causa nostræ prædestinationis.

2. Præterea. Illud, quod dependet ex simplici Dei voluntate, non habet aliam causam nisi Dei voluntatem. Sed prædestinatio nostra ex simplici voluntate Dei dependet. Dicitur enim Ephes. 1. prædestinati secundum propositum ejus, qui omnia operatur secundum consilium voluntatis sue. Ergo prædestinatio Christi non est causa nostræ prædestinationis.

3. Præterea. Remota causa, removetur effectus. Sed remota prædestinatione Christi, non removetur nostræ prædestinatio: quia etiam si Filius Dei non incarnaretur, erat alius modus possibilis nostræ salutis, ut August. dicit in lib. de Trinitat. Prædestinatio ergo Christi non est causa nostræ prædestinationis.

Sed contra est, quod dicitur Ephes. 1. Prædestinavit nos in adoptionem filiorum per Jesum Christum.

a. Respondendo dicendum, quod si consideretur prædestinatio secundum ipsum prædestinationis actum, prædestinatio Christi non est causa nostræ prædestinationis: cum uno & eodem actu Deus prædestinaverit ipsum & nos. Si autem consideretur prædestinatio secundum terminum prædestinationis, sic prædestinatio Christi est causa nostræ prædestinationis. Sic enim Deus præordinavit nostram salutem ab æterno prædestinando, ut per Jesum Christum compleretur. Sub prædestinatione enim æterna non solum cadit id, quod est sciendum in tempore, sed etiam modus & ordo, secundum quem est complendum in tempore.

Ad primum ergo & secundum dicendum, quod rationes ille procedunt de prædestinatione secundum prædestinantis actum.

Ad tertium dicendum, quod si Christus non fuisset incarnandus, Deus præordinasset homines salvari per aliam causam: sed quia præordinavit incarnationem Christi, simul cum hoc prædestinavit, ut esset nostræ salutis causa.

## COMMENTARIUS.

**H**ic articulus etiam est in superioribus explicatus, nam de duplici genere causæ potest hæc questio intelligi, finali & meritoria, & de finali diximus in disp. 5. sect. 2. Christum esse causam finalem nostræ prædestinationis, quod ex modo loquendi Scripturæ, Conciliorum, & Patrum ostendimus. De causa autem meritoria in disp. 41. dum esset sermo de Christi merito, fuse satis disputatum est.

## DISPUTATIO L.

In quatuor sectiones distributa.

*De modo loquendi circa prædestinationem Christi.*

**P**ropono disputationem hanc sub hoc titulo, quia de prædestinatione Christi quoad rem ipsam nulla mihi superest disputatio, his suppositis quæ in disp. 5. tradita sunt. Unum enim certa fide indubitatum est, scilicet substantialem unionem duarum naturarum, divinæ & humanæ in una persona Filii Dei, fuisse ab æterno prædestinatam a Deo: ut recte hic D. Th. art. 1. docuit, & colligitur ex Paulo 1. ad Corint. 2. dicente: Loquimur Dei sapientiam in mysterio, quæ abscondita est, quam prædestinavit Deus ante secula in gloriam nostram: & ideo ad Ephes. 1. hoc mysterium vocat Sacramentum voluntatis Dei, & c. 3. vocat Sacramentum absconditum a seculis in Deo. Et ratio clara est, quia prædestinatio, quamvis ad omnes effectus divinæ voluntatis accommodari possit, ex usu tamen Theologorum potissimum esse dicitur in operibus gratiæ, & gloriæ: sed hæc unio est maximum opus divinæ gratiæ, quod Deus absoluta & efficaci voluntate ab æterno voluit, ut in tempore fieret; ergo ab æterno fuit hoc opus prædestinatum & præordinatum a Deo. In quo autem signo rationis nostro modo intelligendi præordinatum fuerit, & propter quam præcipue rationem, & quem gradum vel rationem causa teneat inter alia divina opera, in citato loco fuse explicatum est.



Solum ergo superest, ut dicamus de variis locutionibus, quibus hæc eadem res explicari potest, vel loquendo de Christo, seu de hoc homine, aut de Verbo, seu divino supposito, aut de humana natura, vel in ordine ad prædestinationem præcise dictam, vel cum relatione ad aliquem certum terminum, de quibus sigillatim dicendum est.

## S E C T I O I.

*An simpliciter verum sit, Christum, aut Filium Dei ab æterno esse prædestinatum.*

**N**onnulli Theologi negant ita nobis esse simpliciter loquendum. Et ratio reddi potest, quia quod non potest absolute dici de Filio Dei, nec de Christo potest simpliciter dici: sed Verbum, vel Filius Dei non potest simpliciter dici prædestinatus: quia hæc vox, *prædestinatus*, prout est in usu Theologorum, quando de aliquo absolute dicitur, significat illum per divinam voluntatem esse ab æterno ordinatum ad aliquod esse divinum, seu ad suam beatitudinem: hoc autem dici non potest de Filio Dei, qui suam beatitudinem non habet ex prædestinatione, sed per æternam generationem.

Dico primo. Christus in quantum homo est ab æterno prædestinatus. Est communis & certa conclusio. Et probatur facile, quia Christus in quantum homo ab æterno est a Deo dilectus, & ordinatus ad perfectissima dona gratiæ, & gloriæ, quæ illi ut homini ab æterno præparata sunt: propriissime ergo & perfectissime potest dici prædestinatus, multo magis quam alii homines electi. Et confirmatur, quia Christus in quantum homo est Filius Dei naturalis ratione gratiæ unionis; sicut ergo hæc unio ab æterno prædestinata est, ita & Christus ut homo est prædestinatus.

Christus  
ab æterno  
prædesti-  
natus.

Dico secundo. Christus Dominus absolute, & sine alia determinatione in subiecto vel prædicato posita, vere ac proprie dici potest prædestinatus. Hæc est mens D. Thom. hic in art. 1. & aliorum Theologorum in 3. dist. 7. A lens. 3. par. qu. 3. & est fere aperta sententia August. de prædestinatione. Sanct. c. 15. & de bono perseverant. c. ult. & tract. 105. in Joan. & colligitur ex Petr. 1. Canon. c. 1. ubi hoc sensu vocat Christum: *Agnus immaculatus, præcognitum quidem ante mundi constitutionem, manifestatum autem novissimis temporibus*: & ex Paul. 1. ad Cor. 2. ubi loquens de sapientia incarnata, *quam nemo principum huius sæculi cognovit*, dicit, eam prædestinasse Deum, *ante tempora secularia*, ut ibi Chrysost. & alii exponunt: unde Concil. Tolet. XI. sic de Christo loquens, inquit: *Per hoc quod de Maria Virgine natus est, & prædestinatus esse credendus est*. Ratione probatur, quia Christus significat quid subsistens in duabus naturis divina, & humana; sed hoc ipsum, ut Christus subsistat in duabus naturis, prædestinatum est ab æterno; ergo & Christus simpliciter dici potest ab æterno prædestinatus. Secundo Christus simpliciter dicitur glorificatus, exaltatus, &c. cur ergo non poterit dici prædestinatus, cum omnia hæc predicata dicantur de Christo ratione assumptæ naturæ? Tertio, cum aliquis dicitur prædestinatus simpliciter, vel intelligi potest ratione beatitudinis, ad quam est electus, & ordinatus, vel ratione existentiae, quia scilicet ordinatus est, ut sit in rerum natura; sed Christus maxime est electus ad beatitudinem, & ordinatus est, ut subsistat in duabus naturis, quod est esse Christum, ut dictum est; ergo.

Dices. Subsistere in duabus naturis, pertinet quasi ad Objectio. ipsam Christi constitutionem, & compositionem; sed quæ pertinent ad constitutionem rei, non cadunt sub prædestinationem ejus, ut notavit D. Thom. lectione 3. super ad Rom. 1. ergo. Respondetur. Quando compositio, vel constitutio rei est mere naturalis, illa non proprie cadit sub prædestinationem tanquam terminus ejus, quia prædestinatio, ut nunc loquimur, respicit supernaturalia bona: at vero in Christo ipsa met illius constitutio, & quasi compositio non est mere naturalis, & ideo vere ac proprie prædestinata est, & ab illa potest Christus simpliciter prædestinatus denominari.

Dico tertio. Verbum, seu Filius Dei non potest simpliciter dici prædestinatus proprie loquendo. Hanc conclusionem pono propter rationem dubitandi in principio positam, & est communis Theologorum in 3. dist. 7. Bonav. Richard. Durand. & Palud. quia licet Verbum aliquid in humanitate habeat ex divina prædestinatione. *Snarez* Tom. XVI.

ne, non tamen ex illa habet ea, quæ pertinent ad esse simpliciter, vel beatitudinem simpliciter ipsius Verbi, sicut per illam locutionem absolute dictam significatur. Unde ex principiis Dialecticæ potest assignari differentia inter has propositiones: *Verbum, aut Christus est prædestinatus*, nam prædestinatio cum significet actum animæ, applicat suum significatum subiecto formaliter sumpto; unde, cum de Christo dicitur, cadit in ipsum, ut subsistens est in duabus naturis, quia ut sic, vere est prædestinatus; cum vero dicitur de Filio Dei, videtur illi tribui secundum se, & ideo in rigore non est vera locutio, nisi addatur determinatio, *in quantum homo*.

Dico quarto. Cum relatione ad aliquem terminum dici potest Verbum, seu Filius Dei esse prædestinatus ab æterno, ut in tempore fiat homo. Ita docet D. Thom. hic art. 2. ad secundum, A lens. Scot. & alii supra citati. Et ratio est, quia designando illum terminum satis explicatur, Verbum non simpliciter adesse, vel ad beatitudinem Verbi, sed secundum quid esse prædestinatum, ut sit homo, sicut etiam dici potest præordinatum, ut uniatur humanitati. Et confirmatur, nam proprie dicitur Verbum factum homo; ergo & prædestinatum ut sit homo.

Sed contra, quia nomen prædestinationis significat Objectio. prædestinatum, esse ordinatum ad aliquod beneficium, vel gratiam suscipiendam; respectu autem Verbi non est beneficium, aut gratia, quod fiat homo. Propter hoc Durandus dixit, illam locutionem in rigore esse falsam, D. Thom. vero solum dixit esse minus propriam. Unde respondetur in rigore ad veritatem illius locutionis non esse necessarium, ut gratia fiat ei, qui denominatur prædestinatus, sed satis esse, ut ex gratia, quæ alteri facienda prædestinatur, alius quasi per denominationem extrinsecam prædestinatus ad talem terminum dicatur. Quod exemplo accommodate declaratur, nam Verbum dicitur factum caro, non per mutationem in ipso factam, sed per mutationem humanitatis, ex qua resultat in Verbo talis denominatio: sic igitur poterit Verbum dici prædestinatum ut fiat homo, non quia ex vi prædestinationis sit illi aliqua gratia conferenda, sed humanitati, vel huic homini, quatenus objectum est hujus prædestinationis, ut jam explicabimus. Et ideo merito dixit D. Thom. illam locutionem esse minus propriam, quia in illa ponitur Verbum, ut objectum hujus prædestinationis, cum tamen non Verbum secundum se, sed ut est Christus, seu hic homo, habeat rationem talis objecti, ut in sequenti sectione dicetur.

Respond.

## S E C T I O II.

*An dici possit Christus prædestinatus ut sit Filius Dei naturalis.*

**F**undamentum hujus quæstionis sumptum est a Theologis ex verbis Pauli ad Rom. 1. *Paulus, servus Jesu Christi, vocatus Apostolus, segregatus in Evangelium Dei, quod ante promiserat per Prophetas suos in Scripturis sanctis de Filio suo: qui factus est ei ex semine David secundum carnem: qui prædestinatus est Filius Dei in virtute secundum Spiritum sanctificationis ex resurrectione mortuorum Jesu Christi Domini nostri*: & ideo hæc verba Pauli prius diligenter explicanda sunt, & deinde scholastica controversia terminanda.

Locus  
Pauli ad  
Rom. 1.

Est igitur prima Sanctorum Græcorum expositio, 1. Expositio. qui non de Christi prædestinatione, sed de ejus manifestatione hunc locum intelligunt, non enim legunt, *qui prædestinatus est*, sed *qui declaratus est*. Græca enim exemplaria non habent hoc loco verbum *προορίζω* quo solet Paulus prædestinandi actum significare: ut constat ad Roman. 8. & 1. ad Cor. 2. ad Eph. 1. sed habet verbum *ὁρίζω*, quod per verbum declarandi optime verti potest, id enim proprie significat, & optime quadrat contextui, & reddit facilem, ac expeditum sensum, videlicet, licet Christus sit factus secundum carnem, tamen declaratum esse Filium Dei: primo in virtute patranda miracula: secundo in spiritu sanctificandi homines per doctrinam, per imperium efficax, per meritum & satisfactionem suam, denique per virtutem mittendi Spiritum sanctum: tertio per suam resurrectionem ex mortuis. Ita legunt, & exponunt Chrys. Theophyl. & Theod. & alii Græci expositores ad Rom. 1. Cyril. lib. 1. de fide ad Regin. Damasc. lib. 4. de Fide c. 19. Quæ sane expositio satis

S f

pro-



probabilis est, supposita præsertim illa lectione, seu significatione vocis. Non tamen nobis est relinquenda vulgata lectio, sed omnino retinenda. Primo propter illius auctoritatem. Secundo, quia antiqui Patres Latini ita legunt, & de propria prædestinatione verbum illud interpretantur. Ambros. Hieron. Anselm. ibi. August. lib. 12. de Trinitate c. 6. & de prædest. Sanct. c. 15. de bono perseverant. c. ult. & tract. 105. in Joan. Hilar. lib. 7. de Trinit. Irenæ. (si inter Latinos numerandus est) lib. 3. contra hæres. cap. 18. & 32. Tertio, quia verbum *ὁρίζω* propriissime significat *animos statuere, proponere, seu definire*, ut Actor. 2. ubi ait Petrus *hunc definito consilio, &c.* Græca lectio habet *ὁρίσμεν βέβαιον*, & c. 17. *definiens statuta tempora*, Græce *ῥέπουσι*. Unde Tertul. contra Praxean legit in hoc loco Pauli ad Rom. 1. *Qui definitus est*. Et eodem modo videtur legisse, & interpretatus esse Origen. lib. 1. super ad Roman. ubi licet differentiam constituat inter verbum *desino* & *prædesino*: tamen relata ad actum mentis divinæ, idem prorsus significant, quia ea, quæ Deus fieri definit, etiam prædefinit, cum ejus definitio semper antecedit, est enim æterna, res autem definita in tempore sit. Unde Dionys. c. 5. de divin. nom. circa finem *Divinas*, inquit *voluntates, eorum quæ sunt definitivas, prædestinationes Theologia vocat*.

3. Expof. Retenta igitur vulgata lectione, est secunda lectio & expositio, quæ affirmat, participium *prædestinatus* non ex parte prædicati, sed ex parte subjecti constituendum esse; ita ut non dicatur Christus prædestinatus esse Filius Dei, sed potius ille, qui est factus, & prædestinatus secundum carnem, dicatur esse Filius Dei. Juxta quam lectionem & expositionem Christus in eo loco appellatur prædestinatus absolute: non tamen explicatur terminus, ad quem prædestinatus est: nam licet ille prædestinatus dicatur esse Filius Dei, non tamen dicitur hoc esse Filii Dei, esse terminum illius prædestinationis. Hanc expositionem refert hic Cajetan. ex Origen. & non improbat, sed potius ita refert ut approbare videatur. Sed non placet. Primo, quia est contra omnium Patrum, ac expositorum lectionem, ac sensum. Secundo, quia non quadrat contextui; sed illi potius vim infert, ut clarius patet ex textu Græco, qui ad literam translatus sic habet: *De Filio suo facto ex semine David secundum carnem, definito Filio Dei in virtute*: ex quo contextu clare satis constat, illud participium *definito*, seu *prædestinato*, adjective, non substantive teneri, atque adeo non habere rationem subjecti, sed prædicati; sicut & participium illud, *factus*, præsertim cum eodem modo dicatur, *qui prædestinatus est*, sicut, *qui factus est*. Denique nisi participium illud, *prædestinatus*, conjungatur cum verbis sequentibus, vix possunt commode explicari, ut ex sequentibus magis constabit. Concludamus igitur, in hoc loco dici Christum ut hominem esse prædestinatum Filium Dei, seu ut esset Filius Dei: quo autem sensu hoc dicatur non eodem modo ab omnibus exponitur.

3. Expof. Est ergo tertia expositio, quæ hanc prædestinationem refert ad humanitatem, quæ prædestinata dicitur, ut sit unita Filio Dei: ita Aymo, & Hugo in Paulum. Sed quid sit de re ipsa, seu de prædestinatione humanitatis, de qua infra dicam, tamen (ut recte D. Th. hic art. 1. ad 2. dixit) hæc expositio nullo modo potest verbis Pauli accommodari. Tum quia evidenter constare potest ex ipso contextu objectum hujus prædestinationis esse Filium Dei, vel Christum ut hominem, illum enim refert relativum illud, *qui*: tum etiam, quia dicitur prædestinatus, ut sit Filius Dei; at vero humanitas neque est Filius Dei, neque prædestinata est ut sit Filius Dei.

4. Expof. Est igitur quarta expositio, Christum, vel Filium Dei, dici prædestinatum, non tamen absolute, & simpliciter, ut sit Filius Dei, sed ut esset *in virtute secundum spiritum sanctificationis*, id est, ut ad nos descenderet cum potestate, & efficacia ad sanctificandos homines *ex resurrectione mortuorum*, id est, moriendo, & resurgendo pro hominibus, quia *mortuus est propter delicta nostra, & resurrexit propter justificationem nostram*. Vel, secundum *Spiritum sanctificationis*, quem ex mortuis resurgendo ad nos venit, non enim fuit *Spiritus datus, donec Jesus fuit glorificatus*: vel denique, quia prædestinatus est, ut nos sanctificaret sanctificatione perfecta, & consummata, qualem habebunt Sancti, quando in Christo ex mortuis resurgent. Hanc expositionem indicavit Cyril. dicto lib.

1. ad Reg. & placuit Augustino in expositioe inchoata epistolæ ad Roman. quem sequitur Titelm. in eandem epistolam collat. 1. & Cajet. ibid. Et est sane probabilis, nam illud relativum, *qui prædestinatus est*, aperte videtur referre ipsum Filium Dei, de quo sermo præcesserat, quia sicut dicitur, *qui factus est*, ita dicitur, *qui prædestinatus est*, sed in priori parte refertur Filius Dei; ergo & in posteriori. Unde sicut in priori additur illa particula *secundum carnem*, ad limitandum & explicandum terminum illius effectiois: ita in posteriori additur illa particula, *secundum Spiritum sanctificationis*, ad indicandum, & limitandum terminum illius prædestinationis: Filius enim Dei cum sit æternus, & per se beatus, non potest simpliciter dici prædestinatus, ut supra etiam diximus, sed prædestinatus est, ut assumeret humanitatem, in qua virtutem, ac potestatem haberet sanctificandi homines. Denique hoc maxime quadrat cū textu Græco, qui non habet relativum *qui*, sed per adjectiva dicitur hoc modo facto, *secundum carnem, prædestinato Filio Dei in virtute secundum Spiritum sanctificationis*. Solum potest contra hanc expositionem objici, quia propria, & perfecta ratio prædestinationis refertur ad illud bonum, quod excellentius est in prædestinato, & ideo in puris creaturis prædestinatio dicitur in ordine ad beatitudinem, quia hoc est perfectissimum bonum earum: at vero respectu Christi Domini, esse sanctificatorem hominum, non est excellentius bonum ejus: majus enim est, esse Filium Dei; ergo. Sed hæc obiectio non est magni momenti: tum quia non est necesse Paulum loqui de perfectissimo termino prædestinationis: tum etiam, quia si ipse Filius Dei est objectum talis prædestinationis, ut dicta expositio supponit, non poterit tam proprie dici prædestinatus, ut sit Filius Dei, quam ut sit homo habens virtutem ad sanctificandos homines. Sit igitur hæc expositio probabilis.

5. Expof. Quinta tamen expositio est, ut Christus dicatur prædestinatus esse Filius Dei, non quidem filius naturalis, qualis est per æternam generationem, sed ex resurrectione mortuorum, nam sicut Ps. 2. loquitur Pater ad Filium, dicens: *Filius meus es tu: ego hodie genui te*, quod dictum esse ratione resurrectionis exponit Paul. Actor. 13. ita dici potest Christus *prædestinatus Filius Dei ex resurrectione mortuorum*: est enim resurrectio veluti generatio quædam, propter quod etiam ad Ephes. 1. vocatur Christus *primogenitus ex mortuis*. Quæ expositio non displicet August. in citata expositione inchoata, & eam indicat Hieron. super ad Rom. 1. & clarius docent Anselm. & Primas. Mihi tamen non admodum placet: primo, quia Paulus aperte loquitur de Filio Dei naturali per æternam generationem, cum inquit, *de Filio suo, qui factus est ei ex semine David secundum carnem*; ergo eodem modo loquitur de Filio Dei, cum subdit, *qui prædestinatus est Filius Dei*, alias in eodem brevi contextu æquivoce uteretur illa voce: quod sine causa evidenti admittendum non videtur. Deinde, quia juxta hanc expositionem oportet conjungere illa verba, *qui prædestinatus est Filius Dei*, cum illis, *ex resurrectione mortuorum*, prætermittis intermediis, scilicet, *in virtute secundum Spiritum sanctificationis*: quæ tamen constructio duriuscula est: propter quod (ut dixi) non omnino placet, quamvis non sit contemnenda hæc interpretatio, præsertim si alias non excludat.

6. Expof. Sexto ergo exponitur, Christum dici esse prædestinatum Filium Dei verum, ac naturalem, non quia sit prædestinatus, ut sit, sed ut cognoscatur esse Filius Dei, juxta usitatam phrasim Scripturæ, qua interdum dicitur tunc aliquid fieri, cum manifestatur, ut Apocalyp. 5. dicitur, *dignus est agnus qui occisus est, accipere divinitatem*, non in re, hoc enim non cecidit sub meritum, sed in aliorum cognitione & manifestatione. Ad hunc ergo modum, dici potest prædestinatus Filius Dei, non ut filiationem in re ipsa accipiat, sed illius cognitionem, & manifestationem, quæ facta est per virtutem miraculorum, per Spiritum sanctificationis, & resurrectionem Christi ex mortuis. Quæ expositio eadem est cum expositione Græcorum, & ad eam accommodat verba vulgatæ editionis, illamque amplectuntur Ambrosius, & Gloss. ordinaria, & ex scholasticis, Durand. & Palud. Et est probabilis, foliūque illud obitare potest, quia minus proprie interpretatur verba Pauli, cum tamen omnis verborum proprietates servanda sit, quoad fieri possit.



7. Expo-  
sit. & pro-  
pria.

Ultimo ergo exponitur hic locus cum omni verbo-  
rum proprietate, ut ille idem homo, qui factus dicitur se-  
cundum carnem, dicatur prædestinatus ab æterno, ut in  
tempore vere, ac proprie sit Filius Dei naturalis. Hæc est  
expositio Augustini locis in principio citatis: quam indi-  
cat etiam Bernardus l. 5. de consideratione circa finem,  
dicens: *Divinitas hominem illum, qui prædestinatus est  
Filius Dei, sibi copulavit*: & eam approbant Beda, &  
glossa interlinealis, & Lyra. Chart. & Adamus in Paul.  
& ibidem D. Thomas & hic, & in 3. d. 7. ubi Magister, &  
fere alii scholastici eamdem sequuntur, Bonav. art. 2. q. 3.  
Richard. a. 2. q. 3. Scotus q. 3. A. lenis 3. p. q. 3. memb. 2. &  
3. Marfil. q. 7. a. 1. Ad quam sententiam exponendam duo  
agenda sunt. Primo enim explicare oportet, quo sensu  
illa locutio vera ac propria esse possit. Deinde quomodo  
accommodari possit ad litteram, seu verba D. Pauli.

Tota vero difficultas in explicanda hac locutione,  
*Christus est prædestinatus Filius Dei*, in hoc posita est,  
quia objectum prædestinationis non debet includere ter-  
minum ejusdem prædestinationis, ut homo dicitur præ-  
destinatus ad gloriam, quia gloria non includitur in con-  
ceptu hominis: at vero non dicitur prædestinatus, ut ha-  
beat animam rationalem, quia homo ut sic includit hu-  
jusmodi animam: Christus autem Dominus in suo con-  
ceptu includit divinum suppositum Filii Dei; ergo nullo  
modo potest dici prædestinatus, ut sit Filius Dei natu-  
ralis. Propter similem enim rationem negavimus supra q.  
16. Christum, vel hominem factum esse Deum, vel Fi-  
lium Dei, quia scilicet Christus, vel hic homo, includit  
divinum suppositum; ergo eadem ratione negandum est  
esse prædestinatum Filium Dei. Unde Durand. dist. 7. q. 3.  
quem ibidem Palud. q. etiam 3. & alii sequuntur, negat  
illam propositionem esse veram in sensu rigoroso, sed  
explicandam esse in sensu improprio: ita ut participium  
illud *prædestinatus* cadat in totam propositionem. Sicut  
superius dicebamus de hoc, *homo factus est Deus*, quia  
factum est ut verum sit, hominem esse Deum, eodem  
enim modo prædestinatum est hunc hominem esse Fi-  
lium Dei, prædestinando scilicet ipsam unionem huma-  
nitatis ad Deum.

Alii vero dicunt proprium sensum illius locutionis es-  
se, Verbum Incarnatum ut sic prædestinatum esse, ut exi-  
stens in humanitate sit Filius Dei naturalis. Ita Cajeta-  
nus hic, qui addit objectum hujus prædestinationis esse  
Verbum incarnatum, ut abstrahit a vera, & substantiali  
Incarnatione, & a ficta Incarnatione, quam hæretici fin-  
gunt; terminum vero hujus prædestinationis dicit esse,  
Verbum substantialiter incarnatum. Sed hæc mihi non  
probantur: tum quia illud objectum talis prædestinati-  
onis est gratis confectum, & præter mentem Pauli, & D.  
Th. tam etiam, quia terminus illius prædestinationis re-  
vera non est hominem esse Filium Dei, sed potius est,  
Deum esse verum hominem per veram, & substantialem  
Incarnationem: tum denique quia in illo objecto hujus  
prædestinationis includitur ipse Filius Dei; ergo non præ-  
destinatur, ut sit Filius Dei, sed potius, ut sit verus homo.  
Et eadem ratione etiam non satisfacit, quod alii dicunt,  
sequentes fere eundem sensum, videlicet objectum hujus  
prædestinationis esse Filium Dei, & humanitatem, qua-  
tenus præintelliguntur unioni, terminum vero esse Fi-  
lium Dei ad hoc prædestinatum, ut sub humanitate exi-  
stens sit Filius Dei. Contra hoc enim procedit eodem  
modo ratio facta: quia in illo objecto semper supponitur  
includi Filium Dei, & ideo non potest vere, ac proprie per-  
tinere ad terminum ejusdem prædestinationis. Quod aperte  
confirmatur, quia quod Filius Dei sub humanitate exi-  
stens sit Filius Dei, non habet ex prædestinatione, sed ex  
natura sua: habet quidem ex prædestinatione, quod sub  
humanitate existat, quod autem sub illa retineat filiationem  
divinam, hoc veluti naturale est. Sicut, licet homo ex præ-  
destinatione habeat quod beatus sit, tamen quod sub bea-  
titudine, seu beatus existens sit etiam homo, hoc non est  
proprie ex prædestinatione, neque ad terminum ejus per-  
tinet. Unde non dicitur aliquis vere, & proprie prædesti-  
nari, ut sub beatitudine sit homo, sed e converso, prædesti-  
natur homo, ut beatus sit. Sic ergo Verbum divinum simul  
cum humanitate præconceptum ante unionem, prædesti-  
nari dici poterit, ut sub humanitate existat: non tamen  
proprie, ut sit Filius Dei, loquendo propriissime de Fi-  
lio Dei per æternam generationem, ut nunc loquimur.

Suarez Tom. XVI.

Quocirca verus, ac proprius sensus hujus locutionis  
est, Christum, ut est hic homo, prædestinatum esse, ut sit  
Filius Dei naturalis. Cujus prædestinationis objectum est  
hic homo ut sic, in cuius proprio conceptu non includi-  
tur suppositum Filii Dei, sed solum id, quod subsistit in  
hac humanitate: quia (ut supra q. 3. dictum est) de ra-  
tione hujus hominis non est hoc suppositum, sed solum  
subsistens in hac humanitate ut sic. Terminus autem hu-  
jus prædestinationis est esse Filii Dei, quia suppositum Filii  
Dei non includitur in prædicto objecto, seu cōceptu hujus  
hominis. Præconcepitur igitur hic homo ut sic prius ra-  
tione, quam concipiatur esse Filius Dei, & per divinam  
prædestinationem ordinatur, ut sit ipsemet Filius Dei  
naturalis, quæ est suprema dignitas hujus hominis, quam  
ex sua ratione, & proprio conceptu non habet, sed ex  
gratia, & ordinatione divina: ab æterno enim decrevit  
Deus, ut subsistens in hac humanitate esset ipse Filius  
Dei naturalis. Et hic ordo rationis sufficit ad hanc præ-  
destinationem intelligendam, quia non oportet, ut obje-  
ctum prædestinationis in re ipsa prius natura existat,  
quam habeat illud esse, seu formam quæ est terminus  
prædestinationis: sed satis est, ut in ratione sua formali,  
& conceptu veluti objectivo sit prius, quia prædestinatio  
est actus mentis includens decretum divinæ voluntatis,  
ut dictum est.

Et hinc facile solvitur difficultas in principio tacta,  
quia in conceptu hujus hominis ut sic, non includitur di-  
vinum suppositum. Quod si urgeas, quia a parte rei con-  
venit huic homini, ut sit Filius Dei naturalis per natu-  
ram, & ideo non posse ad hoc prædestinari. Responderetur,  
in hoc homine a parte rei existente, posse considerari id  
quod requirit in quantum hic homo est, & id quod habet  
ratione talis subsistentiæ. Si hoc posteriori modo conside-  
retur, ex se habet, quod sit Filius Dei naturalis: tamen  
consideratus priori modo hoc habet ex prædestinatione,  
& per gratiam unionis huic humanitati factam. Quod fa-  
tis est, ut hic homo ut sic dici possit prædestinatus Filius  
Dei, quia (ut præcedenti sectione dicebam) licet præde-  
stinatio sit ad opus gratiæ: non tamen oportet, ut gratia  
fiat illi, qui prædestinatus denominatur, secundum  
omnem rationem, qua sic denominatur: sed satis est, ut  
gratia fiat naturæ, ut inde possit denominatio in suppo-  
situm, seu individuum talis naturæ redundare.

Ex quo colligitur primo differentia inter has duas  
propositiones: *Christus in quantum homo, est prædestina-  
tus Filius Dei naturalis*, Et, *Hic homo factus est Filius  
Dei naturalis*: nam fieri dicit realem actionem transeun-  
tem, quæ in re ipsa supponit illud subiectum, vel suppo-  
situm, quod dicitur fieri tale, & quia in re non potest exi-  
stere tale subiectum, videlicet hic homo, nisi in determi-  
nato supposito, ideo in rigore illa propositio: *Hic homo  
factus est Deus*, falsa est, qui in re ipsa nec ordine temporis,  
nec naturæ supponitur aliquis homo, qui fiat Deus,  
ut supra q. 16. late dictum est. At vero prædestinatio est  
actus mentis, quæ præcindere potest ea, quæ in re con-  
iuncta sunt, & præcise concipere hunc hominem ut subsi-  
stentem in hac humanitate abstrahendo ab hoc, vel illo  
subsistente, & ordinare, ut sit tale subsistens, scilicet Filius  
Dei: & ideo illa propositio est in rigore vera, quia ex vi  
verbi *prædestinandi*, non supponitur aliquod suppositum  
subsistens in hac humanitate, præter suppositum Filii  
Dei. Unde, ut hæc prædestinatio in re ipsa mandetur exe-  
cutioni, non oportet, ut hic homo fiat Deus, sed satis est,  
ut Filius Dei fiat homo, nam hinc consequenter fit, ut hic  
homo sit Filius Dei naturalis, seu ut subsistens in hac hu-  
manitate sit suppositum Filii Dei, quod prædestinatum  
erat. Et hic est sensus apertus D. Thomæ, hic art. 1. ad 3.  
quem Cajetanus non recte exponit, affirmans etiam il-  
lam propositionem esse veram: *Christus est factus Filius  
Dei*, quod aperte est contra doctrinam D. Thom. indi-  
cta q. 1. & contra rationem jam explicatam.

Secundo colligo ex dictis, Verbum divinum, seu Fi-  
lium Dei non posse absolute, & simpliciter dici prædesti-  
natum Filium Dei naturalem. Hoc bene notavit A. lenis  
supra dicta qu. 3. Et ratio, quæ ex dictis colligitur, clara  
est, quia illa locutio significat Verbum divinum, seu Fi-  
lium Dei esse objectum hujus prædestinationis: conse-  
quens autem falsum est, quia potius hoc objectum præ-  
scinditur saltem in conceptione mentis a Filio Dei. Et  
confirmatur, quia prædestinari ad esse Filii Dei, non

Christus  
quomodo  
sit præde-  
stinatus  
Filius  
Dei.



convenit Verbo secundum se, ut ex Fide constat. Nec per communicationem idiomatum, quia prædestinari ad esse Filii Dei dicitur de hoc homine, ut supponitur saltem in conceptione mentis, ante unionem humanitatis ad Verbum; ergo in hoc prædicato non potest esse communicatio idiomatum, quod ex sequenti illatione evidentius fiet. Quapropter cum D. Thom. interdum dicit, Verbum, aut Filium ratione humanitatis, seu ut subsistit in humanitate, esse prædestinatum Filium Dei, non intelligit ipsam personam absolute includi in objecto talis prædestinationis, vel simpliciter ita denominari: sed solum quatenus præcisa ratio subsistentis in hac humanitate in ea consideratur, quæ de se indifferens est, & abstrahit a supposito Filii Dei naturalis.

Tertio sequitur ex dictis, Christum non esse dicendum simpliciter, & absolute prædestinatum ad esse Filii Dei, sed solum cum illo addito, *in quantum homo*. Ita colligitur ex D. Th. in his articulis. Et ratio est, quia Christus supponit pro ipso supposito Filii Dei, & significat compositum ex duabus naturis in una persona, quæ per se, & natura sua est Filius Dei naturalis, & non ex prædestinatione: ergo Christus simpliciter loquendo, non potest esse objectum hujus prædestinationis, cum in se intrinsece includat terminum ejus: at vero addendo illam determinationem, *in quantum homo*, seu *in quantum hic homo*, præscinditur, & specificatur, seu designatur propria ratio hujus hominis, ita ut in hoc objecto formaliter non includatur persona Filii Dei.

**Obiectio.** Sed contra, nam in re ipsa Christus ut homo non est Filius Dei naturalis, eo modo, qui nunc loquimur; ergo neque in quantum homo prædestinatus est ut sit Filius Dei naturalis, quia quod prædestinatur, ita futurum est in re, sicut prædestinatum est. Respondetur cum D. Th. art. 2. ad primum, esse æquivocationem in hoc sophismate, cum enim dicitur: *Christus in quantum homo, est prædestinatus Filius Dei*, illa particula, *in quantum*, non designat in re prædestinata rationem, secundum quam illi convenit esse Filium Dei naturalem: sed designat conditionem requisitam ex parte prædestinantis, secundum quam hic homo præcise ac formaliter conceptus potest prædestinari ad esse Filii Dei naturalis; non igitur prædestinatur Christus, ut in quantum homo sit Filius Dei naturalis, in quo sensu argumentum procedit: sed Christus præcise conceptus ut hic homo prædestinatur ut sit Filius Dei naturalis. Ad formam ergo argumenti negatur consequentia, nam licet res prædestinata habere debeat illud esse, seu formam illam, ad quam prædestinatur: non tamen oportet, ut in se sit eodem modo, quod est in mente prædestinantis, sicut necesse est rem vere cognitam talem esse, qualis cognoscitur: non tamen oportet, ut habeat in se modum, quem habet in cognoscente.

Ultimo facile accommodatur hæc locutio, & expositio ad verba Pauli, ut enim D. Thomas hic art. 1. ad 2. notavit, prius præmisit Paulus: *Qui factus est ei ex semine David secundum carnem*, & deinde subiungit: *Qui prædestinatus est Filius Dei*, ubi relativum illud *qui*, refert Christum secundum eandem conditionem, seu determinationem, secundum quam factus denominatur, scilicet in quantum hominem, & ut sic dicitur prædestinatus Filius Dei. Additur vero: *In virtute*, id est, in potentia, & maiestate veri Filii Dei, vel alio modo: *In virtute secundum spiritum sanctificationis*, id est, ut haberet virtutem ad sanctificandos homines, ita ut in hoc verbo explicetur non proprius, & intrinsecus terminus illius prædestinationis, sed ratio, & finis ejus. Propterea enim hic homo Christus prædestinatus est Filius Dei, ut esset potens ad sanctificandos homines per mortem, & resurrectionem suam, seu usque ad sanctificationem perfectam, & consummatam, qualis erit in iis, qui in ipso resurgent.

### SECTIO III.

*Utrum Christus possit dici prædestinatus ad gloriam, vel alia supernaturalia dona gratiæ.*

**P**rima sententia est quorundam discipulorum D. Th. qui negant eam locutionem esse veram, ac propriam in rigore sermonis, quia prædestinatio simpliciter esse dicitur ad id, quod est supremum, & præcipuum in

prædestinato: sed in Christo suprema ejus dignitas non est beatitudo, sed naturalis filiatio Dei; non ergo proprie dicitur prædestinatus ad beatitudinem, sed solum ad esse Filii Dei naturalis. Et confirmatur primo, quia nullus dicitur prædestinari ad id, quod est sibi connaturale, sicut non dicitur homo prædestinari ad naturalem beatitudinem, quia hæc vox (ut diximus) ad opera gratiæ accommodata est: sed visio beata est connaturalis Christo: ergo non proprie dicitur ad illam prædestinari. Confirmatur secundo, quia nemo dicitur proprie prædestinari ad id quod est veluti proprietas consequens primum terminum suæ prædestinationis, ut non dicuntur homines prædestinari ad gloriam corporis, sed animæ: sed in Christo gloria, & cætera dona sunt proprietates consequentes filiationem divinam, ad quam Christus ut homo prædestinatus est: ergo.

Aliorum vero sententia est, Christum proprie dici posse prædestinatum ad gloriam, & alia supernaturalia dona suscipienda. Ita sentiunt Scotus & Durandus in 3. distinctione 17. Et probabile fundamentum esse potest, quia Deus ab æterno, & ante omnia merita prævisa, absoluta & efficaci voluntate decrevit, ut Christus æterna ejus beatitudine, & gloria frueretur, & illi præparavit gratiam, & gloriam, & alia supernaturalia beneficia; ergo recte potest dici ad hæc omnia prædestinatus. Tum quia teste Augustino, prædestinatio nihil aliud est, quam præparatio gratiæ, & gloriæ, & beneficiorum Dei: tum etiam, quia licet hæc dona aliquo modo sint conjuncta cum unionem hypostaticam, tamen in se supernaturalia sunt, & non resultant quasi physice ex gratia unionis, sed speciali Dei actione, & influxu conferri debent; ergo necesse etiam est, ut specialis Dei voluntate sint ab æterno prædefinita, & ordinata: cur ergo non denominabitur Christus prædestinatus ad hæc bona suscipienda? Et confirmatur, quia homines non solum dicuntur prædestinati ad visionem beatam, sed etiam ut Deo fruantur, & in eo delectentur, quamvis delectatio sit aliquid consequens visionem. Possunt etiam dici prædestinati, non solum ad gloriam animæ, sed etiam ad gloriam corporis. Quin potius Christus prædestinatus dicitur ad gloriam, quam resurgendo habuit, sic enim exponit Augustinus tract. 105. in Joan. verba illa c. 17. *Clarifica me, Pater, claritate quam habui, priusquam mundus fieret apud te*; petebat enim gloriam resurrectionis suæ, quam dicit habuisse apud Deum ante mundi creationem secundum prædestinationem, ut Augustinus ait, Qui etiam lib. de prædestinatione Sanct. c. 15. dicit Christum fuisse prædestinatum ut sit caput nostrum: & hoc etiam supponunt Anselm. Ambr. & alii sancti supra citati in 4. & 5. expositione testimonii Pauli ad Rom. 1.

Hæc dissensio ex parte esse potest de re, & ex parte de modo loquendi. Si enim intelligatur Christus primario, ac per se prædestinatus ad beatitudinem animæ, & hac ratione ejus animam, & humanitatem esse ordinatam ad unionem hypostaticam, quem sensum Durandus, & Scotus, indicant, sic erit dissensio de re, & eorum sententia falsa est, & omnino improbanda, tum quia procedit ex falso fundamento, scilicet visionem beatam esse majus bonum, quam hypostaticam unionem. Tum etiam, quia ad beatitudinem proprie non ordinatur nisi suppositum, vel persona, non autem natura, quia operatio proprie tribuitur personæ, non naturæ: Christi autem persona non potuit per prædestinationem ordinari ad beatitudinem, nisi in assumptam naturam, illa ergo ordinatio ad beatitudinem supponit in Christo prædestinationem unionis hypostaticæ, atque adeo prædestinationem hujus hominis ut sic, ad esse Filii Dei naturalis. Hæc ergo est propria, & singularis prædestinatio Christi, quæ & dignitate, & ratione seu intentione prima est, & ad eam cætera bona consequuntur. Hoc ergo vero sensu supposito, solum de modo loquendi potest esse controversia, an Christus possit dici prædestinatus ad beatitudinem, nec ne: nam in re certum est, ex vi illius voluntatis, qua Deus voluit unionem hypostaticam fieri in humanitate Christi, consequenter voluisse sanctificari per divinitatem ipsam, & esse Filium Dei naturalem per gratiam unionis, & habere in sua humanitate jus ad beatitudinem supernaturalem, & alia dona: & consequenter etiam voluisse hunc hominem esse beatum, & habere claritatem gloriæ, & exaltationem nominis, & alias similes dignitates,

Christus quomodo dici possit prædestinatus ad beatitudinem, & alia dona gratiæ.



tes, ac denique ordinasse rationem omnium mediorum, per quæ Christus hæc omnia bona in tempore erat consecuturus. Cum igitur hæc in re certa sint, solum de modo loquendi potest esse controversia, an Christus possit denominari prædestinatus ad beatitudinem vel aliquam dignitatem, quæ in ipso est secundaria, & minus principalis, quod non video cur negandum sit, cum necessarium non sit semper in prædestinatione explicare præcipuum, & primum terminum ejus, & cum Sancti, Augu. & alii citati ita loquantur. Imo & Scriptura sacra, Acto. enim 10. ubi Latina lectio habet: *Ipse est, qui constitutus est a Deo iudex vivorum & mortuorum*, Græce est verbum *ἀπορίμενος*, quod significat prædestinatus. Potest igitur Christus dici prædestinatus ad hæc omnia, quia tota, & perfecta prædestinatio illius, hæc omnia includit, filiationem, scilicet, divinam tanquam primariam formam, seu terminum, gloriam vero, & alias dignitates tanquam proprietates consequentes, & ad illius consummatam perfectionem pertinentes, & ita aliter dicitur Christus prædestinatus ad beatitudinem, quam alii homines: quia in aliis beatitudo est veluti primarius terminus prædestinationis, in Christo vero est secundarius, & proprietas consequens, & ideo prædestinatio Christi singularis est, & inter omnes excellit.

## SECTIO IV.

*An humanitas Christi possit dici prædestinata vel simpliciter, vel ad aliquem terminum.*

**R**atio dubitandi est, quia D. Thom. hic art. 1. ad 2. negat naturam prædestinari, sed suppositum, quia prædestinari, inquit, est dirigi in salutem, quod quidem est suppositi agentis propter beatitudinis finem. In contrarium vero est, quia ibidem D. Thom. in 3. d. 10. quæ 3. quæstionum. 1. eam locutionem admittit, quam sententiam ibidem amplectitur Bonavent. art. 1. quæst. 1. & Alenf. 3. par. q. 3. memb. 1. & Durand. & Scot. dist. 7. q. 3.

Sed in quæstione de nomine breviter dicendum videtur, aliud esse loqui de prædestinatione ad beatitudinem, aliud vero de prædestinatione ad unionem hypostaticam: prior prædestinatio non tribuitur proprie naturæ, sed supposito, & hoc optime concludit ratio D. Th. quia beatitudo in operatione consistit, & operari est suppositi, si proprie loquamur. At vero loquendo de prædestinatione ad unionem hypostaticam, vere ac satis proprie dici potest humanitas prædestinata ad hanc unionem, primo quidem, quia ita loquuntur graves Theologi citati, imo & Aug. de prædestinat. Sancti. c. 15. cum ait: *Prædestinata est ista humane nature tanta subiectio, ut quo attolleretur, altius non haberetur*; & eodem modo loquuntur Aymo, & Hugo Cardinal. supra sect. 2. in 3. expositione citati. Secundo, quia hic cessat ratio facta, unio enim proprie convenit naturæ, non personæ, & ad unionem non assumitur, vel movetur per operationem propriam, sed potius mota seu assumpta ab alio: ergo prædestinatio ad unionem non potest proprie denominare personam, sed naturam. Et confirmatur, quia hæc unio prædestinata est a Deo ab æterno, ut supra cum D. Th. probatum est: ergo aliquid potest proprie dici prædestinatum ad hanc unionem, quia unio non est mere absoluta, sed respicit unibilia; ergo sicut Verbum dicitur prædestinatum uniri Verbo. Imo hoc modo facile, & expedite explicatur hoc mysterium, nam revera, quod primo Deus decrevit, nihil aliud fuit, quam humanitatem uniri. Unde argumentor tertio, quia gratia unionis in tempore humanitati confertur, & ad illam suscipiendam ab æterno ordinata, seu prædestinata est, non in alio, seu per aliud, sicut pars potest dici ordinari cum toto ad aliquod bonum, sed in se, & per se, quia gratia per se primo illi sit; ergo optime potest denominari prædestinata ad hanc unionem. Immerito ergo Medina hoc loco scribit in hæc verba. Est etiam quidam novitius Theologus, qui affirmat prædestinationem ad beatitudinem esse quidem personæ, sed quod prædestinatio ad unionem hypostaticam non est personæ, sed naturæ, quæ assumpta est ad unionem hypostaticam. Sed isti non intelligunt quæ loquuntur. Hæc ille, qui si antiquos Theologos consulisset, sententiam hanc non attribuisse alicui novitio Theologo, neque eos credo dicere esse locutos quæ nesciebant. Præsertim

Suarez Tom. XVI.

cum distinctio illa expresse sit S. Thom. in citato loco. Et quod valde admiror, ipsemet statim docet, recte, & vere dici naturam humanam esse prædestinatam, quod nec recte, nec proprie dici potest de prædestinatione ad beatitudinem, ut optime D. Th. docuit: intelligendum ergo necessario est de prædestinatione ad unionem hypostaticam, ut ipse statim declarat. Cur ergo aliis imponit, eos non intelligere quæ loquuntur, cum vera loquantur, ipso etiam approbante? Quin potius addo juxta mentem D. Thom. hic, humanitatem non esse dicendam simpliciter prædestinatam, sed solum cum illo addito, *ad unionem hypostaticam*, quia prædestinatio absolute dicta, juxta communem usum hujus vocis, absolute inquam dicta supposito tribuitur, non naturæ, proprie enim divina providentia versatur circa supposita, vel personas, quas gubernat: circa naturas vero, non nisi ratione supposito- rum, & ideo prædestinatio, quæ est pars hujus providentiæ, absolute dicta, refertur ad suppositum. Item quia prædestinatio aliorum hominum vel Angelorum absolute dicta refertur ad beatitudinem, ad quam humanitas non fuit proprie prædestinata, prædestinatio autem Christi immediate, & per se terminata est ad ipsum Christum, & ideo simpliciter, & absolute Christus est prædestinatus. Humanitas vero quamvis per eandem prædestinationem ordinata sit ad unionem hypostaticam, non tamen fuit simpliciter prædestinata, sed (ut ita dicam) com prædestinata: & ideo non debet denominari prædestinata, nisi adjungendo terminum talis prædestinationis, quo explicetur, illam esse prædestinatam per modum naturæ, & non per modum suppositi.

## QUESTIO XXV.

De adoratione Christi, in sex articulos divisa.

**D**Einde considerandum est de his, quæ pertinent ad Christum in comparatione ad nos. Et primo de adoratione Christi, quæ scilicet nos eum adoramus. Secundo de hoc quod est Mediator noster ad Deum.

Et circa primum quaruntur sex.

Primo, utrum una & eadem adoratione sit adoranda divinitas Christi & ejus humanitas.

Secundo, utrum caro Christi sit adoranda adoratio- ne latræ.

Tertio, utrum adoratio latræ sit exhibenda imagi- ni Christi.

Quarto, utrum sit exhibenda cruce Christi.

Quinto, utrum sit exhibenda matri ejus.

Sexto, de adoratione reliquiarum Sanctorum.

**Q**uamquam actus adorationis in genere sumptus ad totam Trinitatem, & ad Christum Deum hominem, & suo modo ad Sanctos, & ad res alias, de quibus in sequentibus dicemus, terminari possit, seu referri, & ideo hæc materia non videatur hujus loci propria, sed ad tractatum de virtutibus pertinere, ubi de religione agitur, cujus actus est adoratio, ut constat ex 2. 2. q. 81. & 84. auctores tamen omnes, qui doctrinam de hoc mysterio tradiderunt, simul de adoratione Christi disputant, quia hæretici, sicut in explicando hoc mysterio Incarnationis errant, ita de adoratione Christo debita male senserunt. Propter quod etiam Concilia, quæ veritatem hujus mysterii definierunt, simul errores damnant circa Christi adorationem, & veram simul de adoratione doctrinam docent. Propter hanc ergo causam D. Thom. cum aliis Theologis in tertio distinct. 9. de adoratione hoc loco disseruit: quam nos fusius persequemur, ut melius tota de adoratione doctrina comprehendi possit, & complere, ac perfecte tradi: & nonnulla principio necessario petenda erunt ex citato loco 2. 2. sine quibus fieri non potest, ut doctrina hæc recte intelligatur.

## ARTICULUS I.

*Utrum una & eadem adoratione sit adoranda divinitas Christi, & ejus humanitas.*

**A**D primum sic proceditur. Videtur, quod non eadem adoratione adoranda sit humanitas Christi, & ejus divinitas. Divinitas enim Christi est adoranda adoratione quæ est communis Patri, & Filio: unde dicitur Joannis

144.  
Infra q. 58  
a. 3. ca. 5. n.  
& ad 1. Et  
3. d. 9. q. 1.  
a. 2. q. 1. &



nis 5. Omnes honorificent Filium, sicut honorificant Patrem. Sed humanitas Christi non est communis ei & Patri. Ergo non eadem adoratione adoranda est humanitas Christi & ejus divinitas.

2. Præterea. Honor est proprie premium virtutis, ut Philosophus dicit in 4. Ethicorum\*. Meretur autem virtus suum premium per actum. Cum igitur in Christo sit alia operatio divina & humane nature (ut supra habitum est\*). videtur, quod alio honore sit veneranda humanitas Christi, & alio ejus divinitas.

3. Præterea. Anima Christi si non esset Verbo unita, esset veneranda proprie excellentiam sapientie & gratie, quam habet. Sed nihil dignitatis est ei subiectum per hoc quod est unita Verbo. Ergo natura humana in Christo est quadam propria adoratione veneranda, præter venerationem, quæ exhibetur divinitati ipsius.

Sed contra est, quod in capitulis quinte Synodi sic legitur. \* Si quis in duabus naturis adorari dicit Christum (ex quo due adorationes introducuntur) sed non una adoratione Deum Verbum incarnatum cum propria ipsius carne adoratur, sicut ab initio Dei Ecclesie traditum est, talis anathema sit.

Respondendo dicendum, quod in eo, qui honoratur, duo possumus considerare, scilicet eum, cui honor exhibetur, & causam honoris. Proprie autem honor exhibetur toti rei subsistenti: non enim dicimus, quod manus hominis honoratur, sed quod homo honoratur. Et si quandoque contingat, quod dicatur honorari manus vel pes alicujus, hoc non dicitur ea ratione, quod huiusmodi partes secundum se honorentur: sed quia in istis partibus honoratur totum, per quem etiam modum aliquis homo potest honorari in aliquo exteriori, puta in veste, aut in imagine, aut in nuntio. Causa autem honoris est id, ex quo ille, qui honoratur, habet aliquam excellentiam. Nam honor est reverentia alicui exhibita propter sui excellentiam, ut in secunda parte dictum est\*. Et ideo si in uno homine sunt plures cause honoris (puta prælatio, scientia, & virtus) erit quidem illius hominis unus honor ex parte ejus, qui honoratur, plures tamen secundum causas honoris: homo enim est, qui honoratur, & propter scientiam & propter virtutem. Sic ergo cum in Christo sit tantum una persona divina & humane nature, & etiam una hypostasis, & unum suppositum, est quidem ejus una adoratio & unus honor ex parte ejus, qui adoratur. Sed ex parte cause, qua honoratur, possunt dici esse plures adorationes, ut scilicet alio honore honoretur propter sapientiam increatam, & alio propter sapientiam creatam. Si autem poneretur in Christo plures persone seu hypostases, sequeretur, quod simpliciter essent plures adorationes. Et hoc est, quod in Synodi reprobat. Dicitur enim in Capitulis Cyrilli\*. Si quis audet dicere assumptum hominem coadorari oportere Deo Verbo, quasi alterum alteri, & non potius una adoratione honorificat Emanuele, secundum quod factum est caro Verbum, anathema sit.

Ad primum ergo dicendum, quod in Trinitate sunt tres qui honorantur, sed est una causa honoris. In mysterio autem Incarnationis est e converso. Et ideo alio modo est unus honor Trinitatis, & alio modo est unus honor Christi.

Ad secundum dicendum, quod operatio non est, quæ honoratur, sed est ratio honoris. Et ideo per hoc, quod in Christo sunt due operationes, non ostenditur quod sint due adorationes, sed quod sint due adorationis causa.

Ad tertium dicendum, quod anima Christi, si non esset unita Dei Verbo, esset id, quod est principalissimum in homine illo: & ideo sibi precipue deberetur honor, quia homo est id, quod est potissimum in eo. Sed quia anima Christi est unita persone digniori, illi persone precipue debetur honor, cui anima Christi. Nec per hoc tamen diminuitur dignitas anime Christi, sed augetur, ut etiam supra dictum est\*.

## ARTICULUS II.

Utrum humanitas Christi adoranda sit adoratione latræ.

Ad secundum sic proceditur. Videtur, quod humanitas Christi non sit adoranda adoratione latræ. Quia super Psal. 98. Adorate scabellum pedum ejus, quoniam sanctum est, dicit Glossa. Caro a Verbo Dei assumpta, sine impietate adoratur a nobis: quia nemo carnem ejus puri-

tualiter manducat, nisi prius adoret: non illa dico adoratione, quæ latræ est, quæ Creatori debetur. Caro autem Christi est pars humanitatis. Ergo humanitas Christi non est adoranda adoratione latræ.

2. Præterea; cultus latræ nulli creaturæ debetur: ex hoc enim reprobantur Gentiles, quod coluerunt & servierunt creaturæ: ut dicitur Rom. 1. Sed humanitas Christi est creatura. Ergo non est adoranda adoratione latræ.

3. Præterea. Adoratio latræ debetur Deo in recognitionem maximi dominii: secundum illud Deuter. 6. Dominum Deum tuum adorabis, & illi soli servies. Sed Christus, secundum quod est homo, est minor Patre. Ergo humanitas ejus non est adoratione latræ adoranda.

Sed contra est, quod Damascenus dicit in 3. lib. Adoratur autem caro Christi incarnato Verbo Deo, non propter seipsum, sed propter unitum ei secundum hypostasim Verbum Dei. Et super illud Psalm. 98. Adorate scabellum pedum ejus, dicit Glossa\*. Qui adoratur corpus Christi, non terram intuetur, sed illum potius, cujus scabellum est, cujus in honore scabellum adoratur. Sed Verbum incarnatum adoratur adoratione latræ. Ergo & corpus ejus, sive ejus humanitas.

Respondendo dicendum, quod sicut supra dictum est\*, honor adorationis proprie debetur hypostasi subsistenti, tamen ratio honoris potest esse aliquid non subsistens propter quod honoratur persona, cui illud inest. Adoratio igitur humanitatis Christi dupliciter potest intelligi. Uno modo ut sit ejus sicut rei adorata: & sic adorare carnem Christi nihil est aliud quam adorare verbum Dei incarnatum, sicut adorare vestem regis nihil est aliud quam adorare Regem vestitum. Et secundum hoc adoratio humanitatis Christi est adoratio latræ. Alio modo potest intelligi adoratio humanitatis Christi, quæ sit ratione humanitatis Christi perfectæ omni munere gratiarum, & sic adoratio humanitatis Christi non est adoratio latræ, sed adoratio dulciæ. Ita scilicet, quod una & eadem persona Christi adorentur adoratione latræ, propter suam divinitatem, & adoratione dulciæ propter perfectionem humanitatis.

Nec hoc conveniens: quia ipsi Deo Patri debetur honor latræ propter deitatem, & honor dulciæ propter dominium, quo gubernat creaturam. Unde super illud Psal. 7. Dominus Deus meus in te speravi, dicit Glossa\*. Dominus omnium, per potentiam, cui debetur dulciæ: Deus omnium per creationem, cui debetur latræ.

Ad primum ergo dicendum, quod Glossa\*. illa non est sic intelligenda, quasi seorsum adoratur caro Christi ab ejus divinitate: hoc enim posset contingere solum hoc modo, si esset alia hypostasis Dei & hominis. Sed quia, ut Damascenus\* dicit, si dividas subtilibus\* intelligenis quod videtur, ab eo quod intelligitur, in adorabilis est ut creatura, scilicet adoratione latræ. Et tunc sic intellecta, ut separata a Deo Verbo, deberetur sibi adoratio dulciæ: non cujuscumque (puta, quæ communiter exhibetur aliis creaturis) sed cujusdam excellentioris, quam hyperdulciæ vocant.

Et per hoc etiam patet responsio ad Secundum & Tertium: quia adoratio latræ non exhibetur humanitati Christi ratione sui ipsius, sed ratione divinitatis, cui unitur, secundum quam Christum non est minor Patre.

Quæ circa expositionem horum articulorum notari possent, melius in seq. disput. tradentur.

## DISPUTATIO LI.

In tres sectiones distributa.

### De adoratione Christo ut Deo debita.

Quoniam Christus, Deus & homo est, antequam doceamus, quæ adoratione adorandus sit, oportet nonnulla de divina, & humana adoratione dicere, seu de illa, quæ Deo debetur, & quæ hominibus communicari potest. Prius tamen, quid adoratio sit, & quotuplex, quibus ve nominibus significari soleat, declarare necesse est.

## SECTIO I.

Quid sit adoratio, & cujus virtutis actus sit.

Adoratio, inquit Damascenus orat. 1. de imaginibus prope ab initio, est submissio, & humilatio-

Lib. 4. orthod. fid. c. 3. circ. prin.

Psalm. 98. Est Augu. ibid. to. 8.

Ar. præc.

Psalm. 7. Glos. interlinealis, ibid.

Citata in argum. 2o

Lib. 5. c. 3. circ. prin. \*Epiphanius id est, con- gitationibus seu mentis concepi-

d. 19. a. 14. & ver. q. 29. art. 4. ad 4.

q. 3. tom. 5.

q. 19. art. 1.

In Conc. 3. Constant. quod est 5. generale, canon. 9.

2. 2. q. 103. art. 1.

Habet r in Conc. 1. Ephes. canon. 8.

q. 2. art. 2. ad 3.

145. 3. d. 9. q. 1. & q. 4 ad 1. Glos. ord. ibi ex Augu. ibid. tom. 8.



*nis nota*; & orat. 3. *Est*, inquit, *animi cedentis, submissi atque humilis significatio*, quæ descriptio ex vocis significatione, & communi omnium hominum usu sumpta est: significat ergo adoratio actum, quo unus alteri se submittit, vel illum honorat in recognitionem excellentiæ ejus. Ad quod amplius explicandum oportet has voces distinguere, & earum proprias significationes, scilicet, *honorare, revereri, venerari, colere, laudare, & glorificare*, hæc enim omnia ad adorationem pertinere possunt, & multum cum illa, & inter se conveniunt, quamvis nonnihil etiam differant. Honor ergo, ut ex August. colligitur lib. contra sermonem Arianorum c. 23. latius patet, quam adoratio: *Honorat enim*, inquit, *omnis qui adoratur, non autem adoratur omnis qui honoratur*, nam honor potest esse ad æqualem juxta illud ad Rom. 12. *Honore invicem prevenientes*, adoratio vero respicit alium, ut excellentem, & superiorem, unde recte D. Th. 2. 2. q. 103. ar. 1. & 2. inquit honorem esse signum excellentiæ, vel virtutis, sive absolute consideretur, sive per comparisonem ad honorantem, sive ad alios: habet autem rationem adorationis quando est signum excellentiæ per comparisonem ad honorantem, qui scilicet honorat alium tanquam superiorem, cui se submittit. Comparantur ergo hæc duo per modum generis, & speciei, quia honor ut sic tantum est quoddam signum bonitatis ejus, qui honoratur, ut indicavit Arist. lib. 4. Et hic c. 3. & l. 8. c. 8. & ibi clarius D. Th. explicuit lect. 8. adoratio vero includit honorem, & addit submissionem & recognitionem excellentiæ ejus qui adoratur, respectu adorantis, ut Damasc. dixit. Quocirca cum D. Th. hic art. 1. adorationem videtur cum honore confundere, loquitur juxta subjectam materiam, quia adoratio quidam honor est, & eodem modo accipiendum est, quod dixit Anast. Episc. Theopoleos in VII. Synod. act. 4. adorationem esse, *Emphasim honoris*, id est symbolum, ut ibidem paulo inferius Tharastius declaravit. Est autem, *emphasim*, si vim verbi attendamus, non quodcumque signum, sed quo plus significatur, quam aperte dicatur, seu exprimitur, & ita illa voce indicatum videtur, adorationem esse symbolum honoris, quo insignis, & superior excellentia indicatur. Hoc etiam spectat, quod Ari. l. 2. magnorum moral. cap. 1. dixit, *Glorie cupidum eminentiam affectare*; lib. autem 1. Rhetoric. c. 5. dicit, *Honorem esse existimationis benefactio indicium*, quæ non videtur ad æquata definitio honoris, sed cujusdam speciei illius notioris, & magis usitata, quæ ad adorationem pertinet, statim vero subdit: *Honorantur maxime atque merito, quia beneficia contulerunt, deinde qui conferre queunt*: ad hoc autem posterius membrum possunt omnes studiosi, vel in dignitate constituti revocari, & hoc modo potest illa definitio facile ad omnes honores adaptari.

Veneratio & cultus quid.

Hæc autem, quæ de honore dicta sunt, eodem fere modo de cultu, & veneratione intelligi possunt, quia hæc duæ voces, idem fere quod honor significare videntur, *colere* enim, *venerari* & *honorare*, Latine fere æquivalent, unde fit, ut eandem habitudinem seu rationem respectu adorationis habeant. Est enim adoratio quædam veneratio, & quidam cultus, addit vero prædictam submissionem, & recognitionem alterius ut superioris: unde August. lib. 10. de Civit. cap. 4. circa fin. cum dixisset, de hominibus dici posse, quod sunt colendi, & venerandi, subdit: *Si autem eis multum addideris, & adorandi*.

Eodem fere modo de laude, & gloria loquendum est, laus enim est quædam species honoris, ut Arist. dixit 1. Rhetoric. c. 5. quamquam enim idem Arist. 1. Ethic. c. 12. & D. Th. 2. 2. q. 103. art. 1. ad 3. dicant: *Honorari ea, quæ per se bona sunt, laudari vero, quæ ad aliud sunt utilia*, non est tamen intelligendum, laudem solum circa utilia versari, sed ad illa extendi, alioqui enim certum est etiam ea, quæ per se maxime bona sunt, maxime posse laudibus extolli, sic enim & Sanctos, & Deum ipsum laudamus. Hæc ergo laus honor quidam est, & si cum debita submissione, & recognitione fiat, rationem adorationis habet. Gloria vero idem fere est, quod honorifica laus, addit enim effectum quendam, quem laus efficit in aliis, scilicet bonam existimationem de re laudata. *Est enim gloria, claracum laude notitia*, ut August. eam definit l. 83. quæ. q. 31. unde glorificare aliquem nihil aliud est, quam cum ita laudare, ut apud alios bona ejus existimatio inde oriatur.

Isus, & gloria quid sint.

Revereri denique in propria, & rigorosa significatione vocis, genus quoddam timoris significat, ut S. Thom.

Summ. Tom. XVI.

dixit 2. 2. q. 19. a. 9. & 81. a. 2. ad 1. & 103. a. 1. ad 1. & in 3. d. 9. q. 1. art. 1. ad 3. & ibi Bonavent. art. 2. q. 1. Jam vero translata est hæc vox (ut iidem Sancti docent) ad signandum non solum timorem, sed honorem, seu adorationem, quam inferior reddit superiori in signum excellentiæ, seu majestatis ejus, sive quia hæc adoratio sæpe eo timore procedit, ut quando Jacob adoravit Esau, & filii ejus fratrem suum Joseph: sive quia ipsemet timor est testimonium quoddam excellentiæ alterius, & ex voluntate colendi illum sæpe concipitur, ut optime dixit D. Th. citato loco. Unde Tharastius Constantinopolitan. Episcopus, in Epistola ad Constantin. & Iren. quæ habetur in fine VII. Synodi, adorationem inquit, venerationem & timorem significare. Ex his igitur satis constat prædictarum vocum significatio; eis tamen in sequentibus disputationibus indifferenter utemur, sicut alii auctores, & præsertim VII. Synodus, & Damasc. eas frequentius usurpant: quia supposita materia, in qua versamur, in idem fere omnia recidunt.

Reverentia quid sit.

Ex hac autem vocis significatione colligitur primo, adorationem esse quendam actum virtutis, quæ ad alterum ordinatur; est enim actus honorandi alterum, se illi tanquam superiori, & excellentiori submittendo. Qui actus, ut per se constat, honestus, & consentaneus rationi esse potest, si circa debitum objectum versetur: sicut enim unicuique reddere jus suum studiosum est, ita & unicuique reddere cultum illi debitum juxta conditionem suam: & hoc modo nunc de adoratione loquimur. Unde etiam fit, hunc actum ad justitiam pertinere, nomine justitiæ utendo, prout sub illa comprehenduntur virtutes omnes, quæ ad alterum ordinantur, sive sit ipsa propria justitia commutativa, aut distributiva, sive religio, pietas, observantia, aut aliæ similes, quæ dicuntur partes potentiales justitiæ: cum enim adoratio ad alterum tendat, necesse est, ut ad illud genus virtutis pertineat, cujus munus est operationes circa alterum moderari. Unde sicut inter prædictas virtutes justitiæ, quædam versatur circa Deum, quæ dicitur religio, aliæ vero versantur circa homines, quæ variæ sunt, juxta varias conjunctiones, vel secundum diversas rationes debiti, quæ inter homines esse possunt, ita & adoratio potest, vel circa Deum versari, qui propter summam excellentiam suam maxime dignus est reverentia, & honore, & hæc adoratio actus erit religionis, ad quam pertinet cultus Dei & honestas, quæ in illo reperitur: potest etiam versari adoratio circa homines excellentes, & sic ad inferiores aliquas virtutes pertinere, ut magis in sequentibus explicabimus.

Adoratio quid sit, cujus sit virtutis actus.

Secundo colligitur ex dictis, sicut justitia virtus est ad voluntatem pertinens (ut ex 2. 2. nunc suppono) ita & adorationem, actum esse ejusdem potentie, quia virtus, & proprius actus ejus in eadem facultate resident. Ad hujus autem actus majorem explicationem advertendum est, cum versetur circa alterum, cui rationabilem honorem tribuit, necessario supponere in intellectu bonam existimationem de illius excellentia, cui adoratio exhibenda est. Propter quod quidam existimarunt adorationem esse actum intellectus, quam sententiam indicat Gab. in 3. d. 9. q. unica in princ. & eandem tribuunt quidam D. Th. sed nunquam hoc docuit. Neque est verisimile, si formaliter loquamur; illa enim bona existimatio supponitur veræ adorationi: ex illa enim existimatione oritur prudens judicium dictans aliquem esse colendum, seu honorandum, post quod sequitur voluntas honorandi; ergo non potest adoratio in illa intellectuali existimatione consistere, quatenus prædictam voluntatem antecedat. Unde fieri potest, ut aliquis habeat veram cognitionem de excellentia alterius, quem tamen debito modo nec colat, neque adoret, ut patet etiam respectu Dei, si quis habeat veram illius fidem, & ipsum adorare, & religione colere nolit: non ergo consistit adoratio in illa veluti speculativa cognitione alienæ excellentiæ, sed (ut ita dicam) in practica recognitione, & voluntaria submissione. Quamquam ergo adoratio supponat actum intellectus, tamen per voluntatem perficitur, & ideo D. Thom. 2. 2. q. 84. art. 2. dicit adorationem Dei maxime consistere, *in interiori affectu, & devotione*: dixerat autem q. 82. art. 1. devotionem esse actum voluntatis. Sed elegantius hoc dixit Lactant. lib. 4. divi. institut. cap. 4. in hæc verba: *Non potest neque religio a sapientia separari, nec sapientia a religione secerari: quia idem Deus & intel-*

Adoratio actus voluntatis supponens actum intellectus.



*religi debet, quod est sapientia, & honorari, quod est religionis, sed sapientia præcedit, religio sequitur.*

Observandum vero ulterius est, in ipsomet actu adorationis distinguere posse actum ipsum a voluntate elicitum, quo aliquis vult alterum adorare, & actum veluti imperatum, quo adoratur, & colitur; voluntas enim colendi aliquam personam non versatur proxime, & immediate circa personam ipsam, sed circa cultum exhibendum tali personæ, qui semper consistit in aliqua actione, qua significatur, & recognoscitur excellentia alterius. Et quamvis ex utroque actu veluti componatur unus actus moralis tanquam ex actu interno, & externo, qui totus potest dici integræ adoratio moralis, tamen eos inter se distinguendo, unus est veluti internus, alius quasi externus: unus proprie elicitus, alius potius imperatus: unus denique est veluti affectus adorationis, alius quasi effectus, seu adoratio ipsa: hoc enim nomen magis videtur impositum actui externo, quam interno. Propter quod D. Thom. 2.2.q.84. adorationem Dei posuit inter externos actus latriæ, quamvis exterior actus rationem adorationis non habeat, nisi ut est sub interiori, seu ut manat a prædicto affectu, nam si ab illo non oriatur, non est adoratio, sed irritio potius, seu fictio quædam.

Tertio tandem intelligitur ex dictis, quod sit objectum adorationis; si enim loquamur de proprio actu elicitum a voluntate & a virtute ejus, scilicet a religione, vel alia simili, duplex objectum habere intelligitur: aliud vocatur objectum quod, seu materia, circa quam proxime versatur ipsa virtus, & interior actus ejus, & hujusmodi est cultus alteri exhibendus. Aliud dicitur objectum cui, scilicet persona, cui adoratio exhibetur. Exemplum hujus est in iustitia, & qualibet alia virtute, quæ versatur circa operationes, quæ ad alium referuntur. Et hinc obiter intelligitur ratio, propter quam virtus religionis, qua Deum adoramus, non est virtus Theologica, scilicet, quia non versatur circa Deum ipsum ut materiam proximam, sed solum ut objectum, cui cultum exhibet, circa quem tamen cultum ut in proxima materia versatur. At vero si loquamur de tota adoratione, & cultu voluntario, proximum objectum illius est persona, seu res adorabilis. In qua duo distinguere oportet; aliud est res adorata, quæ dici potest materia adorationis, aliud est ratio propter quam adoratur, quæ semper est aliqua excellentia, vel dignitas, propter quam secundum rectam rationem res illa digna est adoratione. Cum enim per adorationis actum aliquis recognoscat alterum ut excellentiorem, & superiorem, cui se submittit, necesse est, ut ex parte personæ adoratæ aliqua dignitas, vel excellentia sit hujus adorationis fundamentum: alioqui non poterit esse prudens, & honesta adoratio.

Unde obiter etiam intelligitur, quomodo hic actus distinguendus sit ab actu humilitatis; videntur enim esse valde similes, & si solum in specie externa considerentur, possent facile confundi, distinguuntur tamen in propriis honestatibus, & motivis, quæ semper in actibus virtutum maxime observanda sunt. Humilitas enim moderatur affectum honoris, & sub hac ratione interdum exercet exteriores actus submissionis, & alios similes: adoratio vero proprie reddit alteri honorem illi debitum ratione suæ dignitatis, vel excellentiæ: sicut pecuniæ largitio, si fiat solum propter moderandum affectum pecuniarum, est actus liberalitatis, si propter solvendum debitum, est actus iustitiæ.

## SECTIO II.

*Utrum vera, & propria Dei adoratio in sola actione exteriori, & corporali consistat.*

Constat quæstionem propositam non posse intelligi de affectu adorationis: ille enim est actus elicitus a voluntate, ut ex dictis se præcedit. satis constat, neque in hoc est aliqua controversia inter auctores. Intelligitur ergo quæstio de immediato objecto, seu quasi materia, circa quam versatur affectus adorationis: de objecto (inquam) non cui exhibetur adoratio, sed quod est ipsamet adoratio, quam alteri volumus tribuere. Sensus ergo quæstionis est, an hæc adoratio, quam volumus exhibere Deo, per solos actus exteriores & corporales exercetur & exhibetur, atque ita in eis consistat. In qua

quæstione supponitur, posse adorationem externis actibus exhiberi, quod etiam respectu Dei certum de fide est contra nonnullos hæreticos, qui negarunt, Deum eo quod sit spiritus, actibus corporis esse adorandum, ut ostenditur latius 2.2.q.81.art.7. & q.83.art.12. & q.84.art.2. quia, cum Deus sit auctor corporis, etiam corpore colendus est: & ita in Scriptura sacra innumera sunt hujus corporeæ adorationis non solum sanctorum exempla, sed etiam Dei præcepta, & ex his, quæ dicemus, hoc a fortiori constabit. De hac igitur parte non est inter Catholicos controversia.

De interna igitur adoratione duo possunt excogitari modi dicendi extreme contrarii. Prior est, nullam esse adorationem mere internam & spirituales, sed corporalem tantum, qualis est illa, quæ fit genuflexionibus, inclinatione capitis, & aliis similibus signis. Tribuitur hæc sententia Bonavent. in 3.d.9.art.2. q.3. & 4. qui tamen obscure loquitur, nam docet quidem virtutem moralem latriæ solum versari circa actus exteriores adorationis: quia latria servitutem significat, servitus autem proprie respicit actum exteriorem. Addit vero subinde, latriam, ut dicit cultum divinum, non esse tantum in actibus externis, sed maxime in internis: & in solutionibus argumentorum ait: *Sicut est cultus interior, & exterior, sic est adoratio exterior, & interior. Adorare interius est tota mente in Deum tendere, sicut dicit Rabanus: adorare exterius est, aliquam reverentiam corporaliter exhibere.* Videtur ergo Bonaventuræ sententia in hoc consistere, quod adoratio in genere non consistit in solis actionibus externis, sed etiam in internis: adoratio vero prout dirigitur, seu elicitur ab speciali virtute morali, quæ est religio, vel sub religione contenta, sic solum consistit in exterioribus actionibus & eodem sensu videtur eandem sententiam sequi Almainus ibi q. 1. & Marfil. in 3.q.8.art.1. præsertim ad 3. Citatur pro eadem sententia Durandus in 3.d.9.q.1. Sed ex illis potius potest sumi oppositum, ut statim dicam. Illam vero sententiam insinuat Major eadem d.q.1. dicit enim, objectum latriæ interioris esse honorem & cultum exteriorem Dei, quem postea declarat exemplis in solis actionibus corporalibus, quæ tamen potuit adhibere ut clariora, non quod alia excludat. Potest autem hæc sententia probari primo ex D. Th. 2.2.q.84. in titulo quæstionis, qui est: *De exterioribus actibus latriæ.* Inter quos primum locum tribuit adorationi: est ergo adoratio actus exterior juxta sententiam D. Thomæ. Nec potest dici, ibi sumere D. Thomam actum interiorem late, ut distinguitur ab actu elicitum a voluntate, tum quia in q.83. orationem ponit inter actus interiores religionis: constat autem in doctrina D. Thomæ orationem non esse actum elicitum a voluntate, sed ab intellectu, si mentalis sit, vel ab ore, si sit vocalis. Ubi considerare licet, D. Thom. appellasse orationem actum interiorem, quia potest in intellectu consummari, etiam si possit aliquando exterius proferri: ergo ponens adorationem inter actus exteriores, sentit non posse interius neque in voluntate, neque in intellectu consummari, sed sola exteriori actione. Tum etiam id patet ex verbis, quæ D. Thom. statim subiungit, dicens: *Et primo de adoratione, per quam aliquis suum corpus ad Deum venerandum exhibet.* Non exhibemus autem corpora nostra ad venerandum Deum, nisi per actiones externas & corporeas. Neque D. Thom. alicubi de alio genere adorationis disseruit. Secundo probatur ex Damasceno orat. 1. de Imaginibus pag. 5. ubi definit adorationem esse submissionis & honoris notam; & orat. 3. fol. 7. ait: *adorationem esse timoris, & desiderii, & honoris signum, & animi submissi atque humilis argumentum.* Et in idem fere recidit, quod ait Anastasius in VII. Synodo act. 4. *Adorationem esse honoris alicui exhibiti emphasim,* id est, expressionem, seu significationem, quia nota aut emphasim honoris non est, nisi aliquod signum externum, per quod indicamus affectum submissionis erga alium: adoratio igitur solum est in actibus externis, quibus hoc significamus.

Tertio, quia nullus est actus interior, v.g. erga Deum, qui possit esse actus adorationis, nam vel est actus intellectus, vel voluntatis. In intellectu esse non potest, quia in illo solum est actus fidei, qui habet propriam honestatem distinctam ab adoratione: & idem est de omnibus donis intellectus, qui comitantur fidem, & multo magis

de

Adorationis objectum sit, quod sit.

Religio cur non sit virtus Theologica.

Actus adorationis, & humilitatis quomodo differant.

Sensus quæstionis.

Prima opinio.



de prudentia infusa, maxime cum illa non versetur circa Deum, sed in universum dicitur de agendis ex regulis supernaturalibus. Oratio vero, quæ in intellectu esse potest, quamvis sit actus religionis, distinctus tamen est ab adoratione, licet sæpe habeat adorationem conjunctam. Sicut legimus Matth. 20. *Accessit ad eum mater filiorum Zebedæi adorans & petens.* Aliud ergo est adorare, aliud petere, quod est orare. De actibus voluntatis similis inductio fieri potest, nam, si non versantur circa Deum, non possunt esse adorationes ejus: si autem versantur circa Deum, erunt aut actus charitatis, aut spei, aut obedientiæ, vel alterius similis: ergo non erunt actus adorationis proprie, ut ad religionem pertinet: alioqui confunderetur religio cum aliis virtutibus. Et confirmatur primo, nam, si in aliquo ex his actibus posset esse propria adoratio, eadem ratione quolibet actu virtutis posset adoratio exerceri: quia quilibet actus virtutis placet Deo, & potest in eum ut in ultimum finem referri, atque adeo ad ejus honorem & gloriam ordinari, juxta illud: *Omnia in gloriam Dei facite.* Est autem ridiculum dicere eleemosynam esse actum adorationis, & sic de aliis. Confirmatur secundo, quia vitium adorationi divinæ oppositum nunquam reperitur in solo actu interiori, nam, si sit in intellectu, erit hæresis, si in voluntate erit aut odium, aut desperatio, aut aliquid hujusmodi: contra adorationem vero nunquam est, nisi per ordinem ad actum exteriorum, ut est in voluntate dandi alteri, quam Deo, divinum honorem, aut exhibendi Deo notam inferioris honoris.

Secunda  
opinio.

Secunda opinio esse potest, adorationem non solum sine actione externa posse reperiri, verum etiam consummari posse in solo actu pure interiori, id est, elicito tantum a voluntate. Hanc opinionem indicat Scotus in 3. dist. 9. q. 1. ubi distinguit actum patriæ internum & externum: & hunc dicit esse signum illius, illum vero consistere in hoc, quod homo in corde suo extollit divinam bonitatem tanquam summam respectu suæ bonitatis, & a qua ipse homo habet, quidquid boni habet: & hunc interiorem actum ait Scotus habere pro objecto solum Deum, ut summum bonum, & summum Dominum: quamquam non declarat, an sit actus intellectus, an voluntatis. Nec videtur ab hac sententia alienus D. Thom. 2. 2. q. 84. art. 1. ad 1. ubi ait, ea, quæ exterius aguntur circa Deum, esse signa interioris reverentiæ. Et ex hoc ipso principio sumendum est fundamentum hujus sententiæ. Nam adoratio exterior vel ficta est, vel supponit interiorem, eamque exprimit, atque significat: ergo non potest vera adoratio in solo exteriori actu consistere. Et confirmatur declarando, qualis possit esse hujusmodi actus. Nam, quando homo vult exhibere Deo signa externa submissionis, multo magis vult habere Deum ut superiorem & Dominum, & subesse illi: ergo hic idem actus voluntatis est maxima & perfecta Dei adoratio. Nam si quis illum habeat, quamvis nullam ejus externam significationem exhibeat, in spiritu & veritate colit Deum ac reveretur.

Ut explicem veram sententiam, suppono ex 1. 2. exteriorem actum interdum appellari omnem illum, qui ab alio actu prioris voluntatis imperatus est, sive per exteriora membra, sive per intellectum, imo etiam si per voluntatem ipsam exerceatur, aliquando vero stricte sumi pro actu, qui per exteriora membra exercetur: unde e contrario actus etiam interior in duplici acceptione posita sumi potest, ut per se constat. In præsentem ergo stricte loquimur de actu exteriori humano, qui per membra corporis exercetur, obiter tamen dicemus de omni actu interiori & exteriori respectu voluntatis, & respectu illius actus, qui proxime elicitur ab ea virtute voluntatis, qua Deus adoramus.

Prima  
affectio.

Dico primo. In actu mere interno & spirituali potest reperiri vera & propriissima Dei adoratio, non minus, quam oratio. Hæc assertio est communis Theologorum cum Magistro in 3. dist. 9. ubi omnes distinguunt duplicem adorationem, internam & externam. Quæ distinctio duplicem potest habere sensum. Unus est, ut ipse affectus seu voluntas adorandi vocetur adoratio interna, ut præcendit ab ipso cultu seu exercitio ejus, qui comparatione illius voluntatis dicitur adoratio externa. Sed non est hæc divisio usitata in hoc sensu: nec nos nunc agimus de sola illa voluntate adorandi, quæ præcise sumpta potius est propositum adorandi, quam ipsa adoratio: sicut desiderium, vel voluntas petendi non est oratio, sed pro-

positum orandi. Alio ergo modo dicitur adoratio interna cultus, qui spirituali actione mentis perficitur, & consummatur; & ita distinguitur a cultu, qui exhibetur per corpus vel res corporeas & hoc modo adhibent Theologi etiam partitionem, & cultum externum per signa externa & sensibilia exerceri dicunt, quæ numeravit Aristot. 1. Rhet. c. 5. dicens: *Honoris partes sunt sacra, memorations, decantationes carminum, aut solute orationis ad laudem recitatio, premia, delubra, primi confessus, sepulchra, publici ritus, inclinari, loco cedere, munera deferre, &c.* quæ omnia possunt, servata proportionem, ad cultum adorationis adaptari. Interiorem autem cultum dicunt Theologi exerceri actibus intellectus & voluntatis: & præsertim actibus fidei, spei, & charitatis. Nam licet hi actus, ut sunt eliciti a suis virtutibus habeant suas specificas & proprias honestates, tamen quatenus assumuntur, ut quidam actus accommodati ad exhibendum Deo honorem ut supremo domino, induunt rationem adorationis & cultus, & ut sic sunt actus imperati a religione, & proxima objecta, seu materia, circa quam versatur voluntas adorandi Deum. Hæc est sine dubio sententia D. Thomæ 2. 2. q. 84. art. 2. ubi inquit, an adoratio importet actum corporalem, & respondet ex Damasceno, duplicem esse adorationem, scilicet spirituales, quæ consistit in interiori mentis devotione, & corporalem, quæ consistit in exteriori corporis humilitatione: & in solutione ad secundum in hoc comparat adorationem cum oratione, quia, sicut oratio principaliter existit in mente, secundario autem verbis exprimitur, ita adoratio principaliter in interiori Dei reverentia consistit, secundario autem in quibusdam corporalibus humilitatis signis. Atque eadem proportionem dicit q. 85. art. 2. sacrificium externum esse signum interioris sacrificii, quo anima seipsam offert Deo. Rursus q. 103. art. 1. inquit, honorem quoad homines non deferri nisi per signa exteriora, qualia sunt illa, quæ supra ex Aristotele numeravimus: homines enim, cum non cognoscant internos actus, nisi per exteriora signa, non possunt se mutuo honorare, nisi signis externis, quia honoratio nihil aliud est, quam testificatio de excellentia alicujus. At vero apud Deum, qui inspector est cordium (ait D. Th.) honor ipsius potest consistere in solo interiori motu cordis, dum scilicet aliquis recogitat Dei excellentiam, sc. recognoscens illam, & per hoc, quantum est ex se, illam testificans. Hujusmodi autem honor respectu Dei habet veram rationem adorationis: nam licet honor absolute dictus latius pateat, quam adoratio, ut scilicet superiori dictum est, tamen honor, qui deferretur alicui superiori, & in recognitionem excellentiæ ejus, & servitutis, vel subjectionis illi debita, vera est adoratio, & de hoc honore Dei ibi agit D. Thom. Denique idem D. Thom. in 3. d. 9. q. 1. art. 1. q. 3. ait Deum coli fide, spe, & charitate: idque duobus modis exponit. Prior est, quia dictæ virtutes ordinant ad cultum, quod clarius dixit 2. 2. q. 81. art. 5. ad 1. quia suo imperio causant actum religionis, quæ operatur quædam in ordine ad Deum: & hæc expositio non est ad rem nostram. Posterior expositio est, illis virtutibus coli Deum, quia actus earum materialiter assumuntur in cultum Dei: & hoc est, quod asserimus: estque hæc posterior expositio conformior Augustino, qui auctor fuit illius sententiæ: *Christianam religionem maxime colere Deum fide, spe, & charitate*, in Ench. c. 3. & 6. & 12. de Trin. c. 14. & 10. de Civit. c. 9. Atque eodem sensu hanc doctrinam amplectuntur Albertus d. 9. art. 1. ad 5. Richard. art. 1. q. 3. ad 3. Palud. q. 1. art. 2. Thom. de Argent. art. 1. Gabr. art. 2. & in canonem lect. 50. Alexand. Alen. 3. p. q. 30. memb. 1. art. 3. Henric. quodl. 10. q. 6. Wald. de sacram. cap. 117. Cordub. lib. 1. q. 5. Aiala de Tradit. p. 3. confid. 7. c. 1. Bellarm. l. 1. de cultu Sanct. c. 12.

Et probatur primo ex Scriptura, Psal. 95. *Et adorent eum omnes angeli ejus.* Et ad Hebr. 1. *Et, cum iterum introducit eum in orbem terræ, dicit, & adorent eum omnes angeli ejus.* Et Apocal. 7. *Omnes angeli stabant in circuitu Throni, & ceciderunt, & adoraverunt.* Item 2. Esdr. 9. *Exercitus cæli te adorat.* Et Ecclesia in præfatione dicit: *Per quem Majestatem tuam laudant angeli, adorant Dominationes, tremunt Potestates, cæli, cælorumque virtutes, ac beata Seraphim, &c.* ubi alludit ad visionem Isaïæ cap. 6. ubi vidit Dominum sedentem super solium excelsum & elevatum, & Seraphim stabant super

Prima  
probatio  
ex scri-  
ptura, &  
ex ange-  
lorum  
adoratio-  
ne.



*super illud, sex alæ uni, & sex alæ alteri, duabus velabant faciem ejus, & duabus pedes ejus, & duabus velabant, & clamabant alter ad alterum, & dicebant, Sanctus, Sanctus, Sanctus, Dominus exercituum, plena est omnis terra majestatis gloriæ ejus.* Similia testimonia sunt apud Daniele c. 3. & 7. Ex quibus conficitur argumentum, nam in angelis est vera & propria adoratio, ut ex dictis locis constat; sed adoratio non potest ab angelis exerceri per actus corporeos: ergo adoratio ex se non consistit in solo actu externo & corporali. Dicit aliquis, id verum esse, quia requirit affectum internum. Sed hoc nullius momenti est ad prædicta testimonia explicanda, hoc enim ex eis efficere contendimus, affectum internum adorandi non versari proxime circa solum actum externum, & corporalem, aliàs talis actus non posset proprie angelis attribui, sicut non potest eis tribui temperantia, castitas, & similes. Nisi qui fortasse dicat non esse eandem omnino rationem de adoratione, quia saltem per corpus assumptum potest angelus eam exercere. Qui autem sic responderit, necesse est fingat, non posse angelos adorare Deum, nisi assumendo corpora. Quod & per se est improbable & incredibile, & alienum ab intentione & sensu Scripturæ in citatis locis, & a sensu Ecclesiæ, cum dicit, Dominationes adorare Deum in cælo. Unde Chrys. hom. 1. de illis verbis Isaïæ 6. *Vidi Dominum, &c.* annotat, incorporeas virtutes non indigere corporibus ad adorandum Deum, sed ita describi a Propheta, ut illarum adorationem posset hominibus explicare. Et Dionys. cap. 13. de cæl. Hier. satis post medium eandem visionem tractans: *Aperiebatur (inquit) illi per hæc, altissimorum spirituum vis multa peragrans, multaque prospiciens, sacraque illorum, ac plena horrore veneratio.*

Atque hinc facile excluditur evasio, si quis responderet, in illis locis esse sermonem non de adoratione propria prout est actus religionis, sed late prout omnis actio virtutis, quatenus Deo placet, & apta est in ipsum referri ut ultimum finem, est quidam Dei honor vel cultus. Nam hæc responsio in primis est contra proprietatem verborum Scripturæ, quæ omnino retinenda est & servanda, præsertim ubi nec necessitas, neque auctoritas ulla cogit sensum proprium deferere. Quod ita in præsentia declaro, nam, cum Scriptura dicit: *Et adorent eum omnes angeli Deus*, quem actum virtutis circa Deum postulat ab angelis? nunquid amorem vel obedientiam? Certe, si nihil aliud postularet, potius diceret, & ament eum, vel obediant illi omnes angeli ejus. Cui enim sine ulla causa & fundamento dicendum est, adorationem pro amore vel obedientia posuisse? Nam, si ita licet exponere, nihil firmum & certum ex Scriptura colligi poterit. Accedit, quod si testimonia ipsa sigillatim considerentur, plane constabit esse sermonem de proprio actu religionis, qui est adoratio. Nam Psal. 96. proxime ante illa verba dicitur: *Confundantur omnes, qui adorant simulacra; & qui gloriantur in simulacris*, & subditur: *Adorate cum omnes angeli ejus*: falsæ igitur adorationi idolorum opponit veram Dei adorationem. Et hoc significavit Basil. ibi in Scholio dicens: *Ubi ostendit confundendos eos, qui simulacra adorant, subostendit etiam innumerabiles esse myriades Deum nostrum adorantes*: & August. in exposit. *Discant (inquit) Pagani adorare Deum, angelos volunt adorare, angelos imitentur, & illud adorent, qui ab angelis adorantur*. Intelligunt ergo hi Patres illa verba de propria adoratione. Sicut etiam Athanas. Cyril. Ambros. quos refert Claud. de Sanct. Repert. 9. de Euchar. c. 3. Qui expendunt, ex illis verbis probasse Paul. ad Heb. 1. Christi divinitatem; quia angeli præcipiuntur cum adorare propria & perfecta latriæ adoratione: Quis ergo audebit interpretari: *Adorent eum*, id est, ament eum?

Præterea in dicto loco Isaïæ manifeste describuntur actus religiosæ adorationis & reverentiæ, quod etiam Ecclesia in dictis verbis præfationis satis significat. Unde Chrysostomus dicta homilia 1. *Velabant (inquit) faciem suam, suam religionem & reverentiam significantia, quam habent erga Dominum. Velabant pedes suos, id est, inexplicabilem erga conditorem reverentiam exhibere student, multaque anxietatem, tum ipso habitu, tum voce, tum aspectu, tum denique ipsa statione.* Et deinde id late declarat, adhibito exemplo servi coram Domino ex-

stentis, & omnia signa reverentiæ exhibentis: & concludit: *Hoc & ab illis incorporeis virtutibus fit; cum enim plurimam habeant erga conditorem reverentiam, hanc undequaque conantur præstare.* Eadem est sententia Dionysii in cit. cap. 13. de Cœlest. Hierach.

Aliter respondere quis posset, esse quidem ibi sermonem de vero & proprio actu religionis, tamen illum actum in angelis non esse alium, nisi laudationem Dei, quæ interdum solet adoratio appellari, cum tamen in rigore adoratio proprie sumpta a laude distinguatur. Unde in eo loco Isaïæ 6. statim subiungitur: *Plena erat omnis terra gloriæ ejus.* Est autem gloria, Clara cum laude notitia. Illa ergo angelorum adoratio nihil aliud est, quam divina laus; & ita exponunt ibi Cyrillus & Basilus. Sed hæc responsio non infirmat, sed confirmat potius vim testimoniorum. Primo, quia laus divina genus quoddam adorationis est, si per eam quis divinam excellentiam, suamque ad illam submissionem profiteatur; unde, etiam si corporali voce ex eodem motivo fiat, ut fieri potest a nobis, solum materialiter differt ab illa adoratione, quæ per actiones corporis exhibetur. Nam sicut mentis significatio verbis facta, vel nutibus ac gestibus, formaliter ejusdem rationis, & ejusdem veritatis vel falsitatis est, & eundem effectum habere potest, ita significatio interioris reverentiæ verbis aut actionibus facta ejusdem honestatis & virtutis est. Potest igitur saltem hoc genus adorationis esse merum internum, & spirituale: & ideo Scriptura utrumque tribuit angelis, scilicet laudem & adorationem, & in utroque servat proprietatem. Secundo, declaratur hoc amplius, quia in laude duplex habitudo considerari potest. Una est ad eum qui laudatur; alia est ad eos, coram quibus laudatur. Hæc posterior potest quidem in angelis sicut in hominibus reperiri, juxta illud Isaïæ 6. *Clamabant alter ad alterum, Sanctus, Sanctus, &c.* ubi Hieronymus: *Invicem se ad Domini laudes cohortantur.* Sed, quamvis hæc posterior habitudo possibilis sit & honesta, non est tamen simpliciter necessaria, sed ad solum Deum laus referri potest, etiam si ab alio non percipiat. Et sic etiam potest angelus laudare Deum mente sua, etiam si aliis non loquatur: nam hæc locutio accidentaliter est & extrinseca divinæ laudi: quæ interius facta consistere potest in recognitione divinæ majestatis, ejusque consideratione & interna confessione coram ipsa: ergo in tali actu vera ratio adorationis reperitur.

Tertio hoc declaro ex alio testimonio clarissimo, ut opinor ad propositam veritatem confirmandam, ad Philip. 2. *In nomine Jesu omne genuflectatur, cœlestium, terrestrium, & infernorum, &c.* ubi, juxta omnium sententia & expositionem, genuflectere positum est pro eo, quod est reverentiam exhibere seu adorare: & hoc ad literam significat, quamvis vox ex parte metaphorica sit. Docet ergo Paulus, quod, sicut in hominibus est genuflexio materialis, ita in spiritibus cœlestibus & infernalibus est spiritualis genuflexio, id est, aliquis modus seu actus ad veram ac propriam adorationem exhibendam. Quocirca, sicut ex illis verbis Pauli 1. ad Corinth. 13. *Si linguis hominum loquar & angelorum, recte colligunt Theologi, præter locutionem humanam & materialem dari spirituales & internas; ita ex eo, quod Paulus ait esse genuflexionem in angelis & hominibus, recte evidenter colligimus, præter adorationem, quæ signis corporis exhibetur, esse spirituales adorationem, quæ internis actibus, seu nutibus, quidquid illi sint, exhibetur. Imo etiam in spiritualibus videtur Paulus adorationem a laudatione, vel recognitione distinguere, nam subdit: *Et omnis lingua confiteatur, &c.* id est, tam angelica, quam humana, nam pro eisdem distributio fit, cum dicitur: *Omnis lingua*, pro quibus facta fuerat in illo verbo: *Omne genu*, ut omnes exponunt. Unde D. Thom. ibi ait, in bonis angelis illam esse confessionem laudis, in malis vero esse coactam, quæ fit per recognitionem Dei, qua, vel invitati, credunt & contremiscunt.*

Poterit tandem respondere aliquis, his argumentis recte probari, esse in angelis adorationem spirituales, non tamen inde inferri esse posse in hominibus, qui corporales sunt. Sicut etiam locutio in angelis est spiritualis, in hominibus vero non potest esse nisi corporalis. Sed hæc responsio in primis per se est probabilis, nam homo cum angelis convenit in spiritu & mente, & suos actus exercet interiores intellectus & voluntatis, quamvis in genere



entis minus perfectos, & ita potest eos ordinare in Deum sicut angeli, & formaliter loquendo, potest ex eadem honestate seu intentione cultus divini interior operari: ergo quoad hoc est eadem ratio de hominibus, quæ de angelis. Item ex eisdem testimoniis, præsertim ex loco Pauli, constat, in anima separata posse esse veram adorationem Dei: ergo idem erit in conjuncta, quia quoad hoc etiam eadem ratio intercedit, nec dependentia a phantasmatibus obstat, quia, cum agimus de adoratione pure interna & spiritali hominum, non excludimus cooperationem phantasie, sed actiones exteriores corporis. Sicut, cum dicitur esse in homine oratio pure mentalis, non excluditur cooperatio phantasie, sed lingue. Præterea, si fundamentum contrariæ sententiæ, quod in tertia ratione supra est explicatum, alicujus momenti esset, æque procederet in angelis, nam idem dilemma, eademque enumeratio actuum intellectus & voluntatis in angelis fieri potest, quæ ibi fit in hominibus: ergo vel ratio illa idem probat de angelis, vel nihil probat in hominibus.

Tandem adjungere possumus testimonium, in quo in specie est sermo de hominibus, Joan. 4. *Veri adoratores adorabunt Patrem in spiritu & veritate: nam & Pater tales querit, qui adorent eum, Spiritus est Deus, & eos qui adorant eum, in spiritu & veritate oportet adorare.* Nam, licet ex vi horum verborum non excludatur actio corporalis, potest enim esse adoratio exterior, & nihilominus in spiritu & veritate fieri, si fiat ex vera estimatione de Deo, & rebus divinis, & ex Spiritus sancti illuminatione & directione, nihilominus tamen ex illis verbis recte colligimus, ad veram Dei adorationem non esse simpliciter necessariam actionem corporis, sed posse solo spiritu perfici. Primo ex Christi ratione: *Spiritus est Deus, & eos qui adorant eum, in spiritu & veritate oportet adorare*; illa enim ratio non solum probat ad Deum adorandum esse necessarium spiritum, sed etiam sufficere, si desit corpus, vel actio corporis, nam Deus est solus spiritus: ergo in solo spiritu potest adorari: quamvis etiam possit adorari corpore moto & gubernato ab spiritu. Et quidem mirabile est posse spiritum subicere corpus suum ad Deum adorandum, & non posse seipsum subicere & submittere ad eundem Deum adorandum, cum sit purissimus spiritus. Atque hinc probari secundo hoc potest ex ipsis verbis Christi, quod adoratio Dei esse debet *in spiritu & veritate*; quia tam veritas, quam actio spiritus, potest esse in solo spiritu: ergo in eo esse potest adoratio in spiritu & veritate. Tertio tandem ex communi Sanctorum expositione: dicunt enim Deum adorari in spiritu & veritate, quando virtutum actibus, præsertim fidei, spei, & charitatis, colitur, ut patet ex Chrysost. & Cyrillo supra Joan. Hilario 2. de Trinit. Ambrosio lib. 3. de Spirit. S. c. 13. Athanasio q. 59. ad Antiochum. Nec dicere possumus, hos patres loqui improprie aut large de adoratione, & non prout significat speciale munus religionis, nisi velimus fateri, eos recessisse a proprio & literali sensu verborum Christi, quæ de propria adoratione necessario intelligenda sunt. Nam Samaritana de illa moverat quæstionem, nam illam exercebant Judæi in monte Sion, Samaritani vero in monte Garizim. Est ergo hæc veritas, ut existimo, valde cõformis Scripturis sacris.

Atque hinc etiam constat sumptam esse veritatem hanc ex communi Patrum doctrina, præsertim Augustini, cujus egregia sunt illa verba lib. 10. de Civit. c. 4. *Ei sacrificamus hostiam humilitatis, & laudis in ara cordis igne fervida charitatis.* His addo Damasc. lib. 4. de fide c. 13. dicentem: *Quia ex visibili simul & invisibili natura consistimus, duplici quoque proinde adorationis genere illum rerum omnium parentem & architectum afficiamus, quemadmodum videlicet, & mente & corporis labiis psallimus, &c.* Ergo, ex sententia Damasceni, non tantum solo corpore, sed etiam solo spiritu, possumus Deum adorare. Nec potest exponi de adoratione impropria, aut large sumpta; constat enim ex titulo & intentione capituli, de propria adoratione esse sermonem. Neque etiam posset aliter spirituales adorationem a corporali distinguere, nisi per spirituales intelligendo eam, quæ in solo spiritu consummatur, cum nulla sit vera adoratio, quæ solo corpore consistere possit. Unde expresse illam partitionem comparat cum divisione orationis in mentalem & vocalem. Atque hinc Clichtovæus ibi, corporalem adorationem dicit esse illam, quæ fit genuflexione, ma-

num ad cælum protensione, &c. spirituales autem, quæ fit animi affectu, & ad Deum erectione, sublevatione atque devotione. Et hanc dicit docuisse Christum Samaritanam, Joan. 4.

Ultimo adjungere possumus rationes. Prima & a priori fit, quia, sicut virtus religionis, existens in voluntate, utitur membris corporis per aliquem motum eorum ad adorandum Deum, ita potest uti ipsis facultatibus animæ, mediis aliquibus actibus earum ad idem munus adorandi Deum: ergo affectus adorationis potest immediate cadere in aliquem actum animæ, sicut in actum corporis, tanquam in proximam materiam & objectum suum: ergo potest vera ratio adorationis reperiri in actu animæ, sicut in actu corporis. Major sic ostenditur, nam in primis certum est, virtutem unam posse imperare actus aliarum virtutum etiam Theologicarum in ordine ad suum finem seu motivum, quando illi sunt proportionati & accommodati: sic poenitentia medio affectu satisfaciendi Deo movet charitatem ad amandum ipsum, & propter ipsum dilectum, detestandum peccatum, quia hic actus est illi fini, & motivo proportionatus: sic etiam religio castitatem offert in cultum Dei, dum vovet illam, quia est medium accommodatum, ut totus homo possit divino cultui dicari. Ex hoc ergo capite non repugnabit, religionem uti actu alterius virtutis ad colendum Deum, ex eo scilicet, quod sint virtutes distinctæ specie, quia, licet hoc obstat, ut actus unius possit ab alia elici, non tamen ut possit imperari, & consequenter possit actus unius esse materia, circa quam actus alterius versatur. Sic ergo affectus adorationis, qui est actus a religione elicitus, versari poterit circa actum fidei, vel charitatis, aut similes, non sub propriis rationibus illarum virtutum, sed solum ut sunt materia, & quasi instrumenta apta ad colendum Deum. Et confirmatur, nam voluntas potest motum pedis vel manus ad hunc finem ordinare; ergo etiam motus intellectus vel voluntatis. Nam, quod in actu corporis per se sumpto non sit aliqua ratio virtutis, in actu autem intellectus vel voluntatis sit aliqua ratio virtutis intellectualis, vel affectivæ, Theologalis, vel moralis, non impedit, imo juvare potest ad illum finem, ut jam dicam.

Solum superest probandum, in actu interiori posse esse sufficientem proportionem ad eum finem: hoc autem facile demonstratur in hunc modum. Nam actus exterior induit rationem adorationis, quatenus est nota vel signum submissionis, & honoris, ut Damascenus dixit: non est autem nota seu signum naturaliter significans, sed ex impositione, ut per se notum est: inde enim fit, ut actiones externæ ex se sint indifferentes quoad cultum, & interdum Deo, interdum vero hominibus accommodentur: & quædam nationes his utantur, aliæ vero aliis: est ergo talis significatio ex impositione; quæ impositio aliquando fit auctoritate publica, si communis & publica sit nota honoris, aliquando propria voluntate, & intentione operantis, ut, quando unusquisque suis actionibus privatim utitur, prout vult, ad Deum adorandum. Solum præexigitur ex parte actionis proportio aliqua, ut ad talem significationem accommodata sit: quod commune est omnibus signis ad placitum, quæ prudenti aliqua ratione imponuntur, quod etiam de vocibus docent Dialectici in libris de interpretatione, sed est maxime verum de his signis, quæ in actione consistunt, ut de sacramentis docent Theologi. Hæc autem omnia melius & perfectius reperiri possunt in actu interiori, quam in exteriori: nam in primis, cum Deus sit supremus spiritus & intueatur corda, non oportet, ut nota vel signum submissionis sensibile sit. Præsertim, cum hoc signum non ad id referatur, ut animus operantis in alterius notitiam deveniat, quia nec Deus tali signo indiget ad cognitionem, neque etiam ipse operans; aliorum vero notitia neque est necessaria, nec per se intenta ex vi adorationis. Sed ordinatur ad exercendam aliquam operem ipsam subjectionem & submissionem, quæ in affectu habetur, & ad ipsum affectum magis excitandum. Potest ergo hoc fieri spirituali actu seu signo, sicut corporali. Rursus, cum hæc impositio, seu accommodatio, non semper sit publica, sed uniuscujusque voluntate possit fieri, ex hac parte non repugnat etiam spirituali actui. Præterea, cum homo non solum corpus, sed etiam spiritum Deo submittere debeat, sicut illud facit corporali nota, ita hoc poterit spirituali perficere. Denique proportio illa quasi fundamen-



mentalis, quæ in signo ad placitum præsupponi debet, multo major certe reperitur in actu spirituali ad significandam submissionem spiritus, quam in qualibet genuflexione, vel etiam prostratione corporis ad illud submitendum. Probat, nam per actum fidei, v.g. captivat homo intellectum in obsequium Dei: est ergo talis actus ex se valde proportionatus, ut sit nota animi submissi ad Deum. Simile est de actu amoris, quia illo non quomodocumque diligimus Deum, sed ut supremum principium, & ultimum finem nostrum, cui nos totos dicamus & consecramus. Propter quod dixit de tali actu Augustinus lib. 10. de Civit. cap. 4. *Hic est Deiculus & vera religio, hæc tantum Deo debita servitus*. Est ergo in his & similibus actibus maxima proportio, ut possint assumi tanquam notæ spiritualis submissionis & subjectionis ad Deum: ergo potest in eis vera ratio adorationis reperiri.

Secundo a simili possumus argumentum fumere ab oratione, nam, si potest esse oratio pure mentalis, cur non poterit etiam esse adoratio? Sicut enim mente possumus affectum nostrum, seu desiderium Deo manifestare, ad eum loquendo, ita etiam possumus ipsi manifestare affectum nos ipsos ei subijciendi, nam hunc affectum possumus verbis & actionibus corporis exprimere & manifestare Deo: ergo etiam possumus verbis mentis. Sed illa manifestatio facta per signa corporea, sive illa sint verba, sive actiones, habet rationem adorationis: ergo etiam facta per verba mentalia. Et confirmatur, nam ipsa met oratio potest ex affectu adorationis oriri, & veram rationem adorationis habere. Oratio enim & adoratio plane differunt secundum rationes formales, & interdum etiam re ipsa: est enim aliqua adoratio, quæ non est petitio, ut genuflexio, & aliqua petitio intelligi potest, quæ non sit adoratio, ut inter homines constat. Interdum vero eadem actio potest esse & oratio, & adoratio. Oratio quidem, in quantum est petitio alicujus rei, quam a Deo obtinere desideramus. Adoratio vero, in quantum ipsa met petitionem assumimus, ut notam submissionis, & reverentiam ad Deum. Unde, si oratio præcise consideretur, quatenus procedit ex affectu obtinendi rem postulata, ut sic non est actus religionis, sed erit, vel virtus spei, vel alterius, ad quam pertinere potest affectus illius boni, quod postulat, ut, si quis castitatem postulet ex affectu illius, nullum aliud motivum respiciens. Imo interdum nullius erit virtutis actus, sed potius vitii, ut si quis ex aliquo inordinato affectu a Deo petat aliquid indecorum & inhonestum. Ut ergo oratio ad religionem pertineat, oportet ut honesta sit, & in honorem Dei fiat, seu ad exhibendam Deo reverentiam, ut expresse docuit D. Th. 2. 2. q. 83. art. 3. exhibere autem reverentiam, & adorare, idem sunt: ergo oratio, ut est actus religionis, est adoratio quædam seu honoratio Dei ut supremi, & omnipotentis Domini, ut etiam Cajetanus in illo articulo notavit, quod saltem concludit, orationem, ut ad religionem pertinet, includere rationem cultus, & honoris Dei. Hinc vero ulterius efficitur, etiam posse assumi ut notam submissionis, & adorationis, etiam si strictissime sumatur, quia in eo maxime se ostendit homo inferiorem & subiectum. Unde Cajetanus supra recte considerat, per mentis petitionem subijcere nos id, quod est nobilissimum in nobis ad honorandum Deum. *Et sic orando* (inquit) *offerimus & sacrificamus mentem Deo, sicut genuflexendo, genua offerimus & sacrificamus Deo, ipsis ad Dei honorem utendo*. Quam doctrinam sumpsit ex D. Thom. ibidem præsertim solut. ad tertium, ut idem Cajetan. notat. Et eadem significat Durand. in 3. dist. 9. q. 1. num. 7. ubi ait, actum latræ procedere ex electione, qua quis eligit exhibere Deo aliquem cultum, sive exhibendo Deo sacrificia, sive genuflexiones, sive orationes vocales, sive mentales.

Tertio a posteriori seu ab incommodis; duo enim ex illa sententia sequuntur, quæ mihi maxima esse videntur. Unum est, non posse hominem adorare Deum, si omnino non possit membra corporis exteriora movere. Quod est contra praxim omnium spiritualium virorum; & contra rationem; cur enim spiritualis animus ita dependebit a corpore in perfectissimo actu virtutis? Neque enim satis est dicere, posse hominem tunc habere affectum adorationis: quia desiderare adorationem non est adorare, nisi re ipsa exhibeatur. Secundum inconveniens est, quia sequitur, inter angelos non posse esse virtutem

observantiæ, neque mutuum honorem, quod plane est incredibile, quia suam constituunt rempublicam, & civilem societatem: & ideo conveniens ordo postulat, ut mutuum honorem possint invicem deferre; & uniuscujusque dignitatem & gradum recognoscere. Sequela probatur, quia si non est adoratio mere spiritualis respectu supremi principis, neque etiam erit respectu inferiorum principum, neque etiam honoratio respectu æqualium: nam eadem est ratio in his omnibus, cum omnia fiant exhibendo notam honoris proportionati excellentiæ ejus, cui exhibetur.

Atque ex his fere declaratum est, quisnam possit esse hic actus adorationis, qui corpore non exercetur, explicuimus enim consistere in actu fidei, spei, charitatis, & orationis, quatenus hi actus sumi possunt ut notæ submissionis & honoris. Sed aliquid aliud addendum superest, quia per hoc actus solos non satis hæc spiritualis adoratio explicatur. Primo quidem, quia in puris naturalibus esset religio & adoratio Dei, non solum corpore, sed etiam mente pura, tam in angelis, quam in hominibus, vel animabus separatis, & de facto ita exercetur ab animabus infantium in limbo existentibus, quæ nec fidem habent, nec spem, nec charitatem, neque aliquid fortasse a Deo petunt. Deinde, Beati non habent fidem, & tamen intellectu adorare possunt Deum: & licet nunc petant, tamen post diem judicii oratio cessabit, non autem adoratio. Rursus non sperant, & licet ament, amore tamen necessario, qui propterea non potest ex affectu adorationis proficisci. Igitur, præter dictos actus, necesse est adjungere alios, quibus possit hæc interna adoratio exerceri. Itaque in intellectu proprius & accommodatissimus actus ad hanc adorationem esse videtur cognitio & recogitatio divinæ excellentiæ & submissionis creaturæ ad Deum: nam, dum homo, ex affectu honorandi Deum, & submittendi se illi, hoc secum recogitat, cum actum assumit ut notam sui submissi animi ad Deum; & ita illo actu ipsum adorat: & hic actus locum habet, sive illa recogitatio fiat per fidem, sive per naturalem cognitionem veri Dei, sive per aliquam cognitionem evidentem infusam, ut in anima Christi, & Beatis extra beatificam visionem, nam illa, eo quod libera non sit, non videtur ad hoc munus accommodata. Atque in hoc actu constituere videntur interiorem reverentiam Henr. & Palud. locis citatis, dum ajunt revereri aliquid esse, bonum ejus magnum reputare.

Rursus in voluntate, præter actum amoris liberum (qui etiam in Beatis esse potest præter necessarium, ut est probabilior opinio) potest intelligi alius actus ad adorandum aptissimus, qui a Theologis *timor reverentialis* appellatur, & de illo frequentius intelligunt illud Psal. 118. *Timor Domini sanctus permanet in seculum seculi*. De quo etiam intelligi potest illud Job. 26. *Columnæ contremiscunt, & pavent ad nutum ejus*, unde Ecclesia assumpsit illud: *Tremunt potestates*. De quo timore quid sit diximus superius q. 7. & ex ibi dictis constat esse aptissimum, ut assumatur tanquam nota animi submissi ad Deum. Unde frequenter Scholastici dicunt, sic timere Deum esse, ipsum Deum revereri, ut patet ex D. Th. 1. 2. q. 67. a. 4. ad 2. & 2. 2. q. 19. a. 11. & q. 81. a. 2. ad 1. & q. 131. a. 2. ad 1. & in 3. d. 34. q. 1. a. 3. ubi Magister & alii Theologi idem sentiunt, & Alenf. 3. p. q. 5. mem. 2. a. 1. §. 3. & q. 66. mem. Altifod. 3. p. sum. tract. 8. c. de timore fil. q. 3. & sumitur ex August. tract. 85. in Joan. & tract. 9. in 1. Canon. Joa. & ex Greg. 17. Moral. c. 15. & ex aliis Patribus supra q. 7. citatis.

Præter hos actus potest intelligi alius in voluntate, quo homo vult subesse Deo, & complacere in hoc, quod est esse subiectum Deo, & habere ipsum ut supremum dominum. Qui actus, secundum diversa motiva, potest ad diversas virtutes pertinere: nam, si respiciat illam subjectionem in ordine ad reddendum Deo obedientiæ debitum, erit actus obedientiæ; si vero respiciat illam subjectionem ut convenientem suo statui & conditioni seu humilitati, sic erit actus humilitatis, quæ moderatur affectum excellentiæ, & continet hominem, ut in gradu suo sitat, & excellentiorem & majorem non appetat inordinate. Si vero tendat in illam subjectionem, ut se totum confeceret divino obsequio & cultui, sic est actus elicitus a religione: hic est enim proprius actus devotionis, ut D. Th. docet 2. 2. q. 82. art. 1. & 2. ubi ait, devotionem esse spe-



specialem actum voluntatis, quo homo se Deo devovet, ut ei se totaliter subdat, & tradat ad ea, quæ pertinent ad Dei famulatum, quod ad religionem pertinet. Si vero fiat in pura simplici complacentia servitutis & subjectionis ad Deum, est etiam actus religionis, qui ad devotionem reducitur. Cum enim homo vere sit servus Dei, dum hoc secum recogitat & recognoscit, potest in hoc complacere & gaudere. Atque hic actus videtur esse proprius actus patriæ maxime internæ, & posteriori modo conceptus videtur quasi affectus simplex servitutis ad Deum: priori autem modo est voluntas efficax exercendi opera illius servitutis, seu exhibendi sese ut Dei servum: unde ex se & prout directe tendit in tale objectum, non tam est adoratio, quam affectus adorationis, vel virtualis, vel formalis, vel in speciali, vel saltem sub generali ratione divini famulatus, qui adorationem etiam comprehendit: si vero consideretur ille actus voluntatis, quatenus ipsemet voluntarie exercetur, & hac ratione in se ipsum reflectitur (sive hæc reflexio per eundem, sive per diversum actum fiat, nil enim nunc refert) sic ille actus, quatenus sic volutus est, potest veram rationem adorationis habere, nam potest quis velle, eum actum exercere, ut per illum se submittat, & exhibeat quandam notam & significationem suæ submissionis ad Deum: atque adeo ut per ipsummet actum Deum honoret ac revereatur. Atque hoc modo dixit D. Th. 2. 2. q. 84. a. 2. spirituales adorationem consistere in interiori mentis devotione, quia hæc adoratio est maxime interna & spiritualis, & ab illa omnis alia vera adoratio proficiscitur.

Ultimo ex dictis intelligitur, quid de opinionibus in principio recitatis sentiendum sit. Prior enim opinio falsa est, & contra communem Theologorum, paucis exceptis, qui obscure satis locuti sunt. Posterior autem sententia potest habere veritatem, si recte explicetur. Modus enim ille explicandi ex Scoto ibi relatus ambiguus esse potest, nam, si intelligat, interiorum actum patriæ esse actum ut voluntatis elicitem a religione, & habere pro objecto solum Deum ut summum bonum, non est vera sententia, quia virtus religionis per actum a se elicitem non attingit immediate Deum in se, alioqui esset Theologalis virtus, sed versatur circa cultum Dei: & ita semper respicit ut proximam materiam aliquid creatum, quamvis in ordine ad Deum, ut notavit D. Th. 2. 2. q. 81. art. 5. Unde actus ille, quem ponit Scotus, quo homo in corde suo extollit divinam bonitatem ut summam, &c. intelligi potest fieri per iudicium, vel æstimationem intellectus, & sic est elicitem a fide, vel alio habitu intellectus; aut potest intelligi fieri per affectum, seu appetitionem voluntatis, & sic pertinet ad charitatem elicitive, quia nihil aliud est, quam velle bonitatem Dei ut summe amabilem propter se, vel ut ultimum finem, & primum principium omnium. Vel potest etiam pertinere ad spem, si bonum illud homo sibi concupiscat præ omnibus bonis, & omnibus his modis non potest ille actus elici a religione, sed ad summum imperari. Quod si talis actus non sumitur, ut attingit immediate & directe excellentem Dei bonitatem, quam homo iudicio vel affectu extollit, sed ut ulterius procedit ad subjectionem hominis respectu Dei, jam ille actus non habet pro objecto solum Deum, ut Scotus dicit, sed aliquid etiam creatum in ordine ad excellentiam Dei. Si vero non intelligat Scotus hunc actum interioris adorationis, quo homo in corde suo extollit Deum, esse elicitem a religione, sed imperatum, sic verum est, adorationem internam posse in tali actu consistere, quamvis non in solo illo; quia ille actus, quo homo extollit Deum in suo corde, sive iudicio, sive affectu, potest commodissime exerceri ut nota submissionis & reverentiæ debita Deo, quamvis præter illam possint esse alia, ut a nobis explicatum est. Neque est incongruens, ut religio per actum a se imperatum immediate attingat Deum, quia inde non fit, quod sit virtus Theologica, quia per actum a se elicitem non attingit Deum, sed per actum alium, quem imperat, & hic est, qui immediate attingit Deum. Sic enim etiam poenitentia imperare potest actum, qui immediate feratur in Deum, scilicet amorem super omnia: & ipsa religio, quæ est in voluntate, imperat orationem seu petitionem intellectus, quæ potest immediate cadere in Deum, non solum quia a Deo petimus; id enim non satis esset; sed etiam quia possumus a Deo petere ipsum Deum,

qui est merces nostra magna nimis, quam speramus.

Reliqua, quæ in illa opinione dicuntur, nobis non sunt contraria, sed nostram potius sententiam confirmant. Solum adverto, ad orationem exteriorum seu corporalem semper quidem supponere intentionem vere adorandi, non tamen semper supponere propriam adorationem interiorum, nisi forte materialiter (ut sic dicam) non tamen semper formaliter: supponit enim æstimationem excellentiæ & affectum honorandi alium juxta qualitatem seu dignitatem ejus, aliàs non erit adoratio, sed fictio, vel potius inhonoratio: & hoc saltem modo adoratio exterior est signum interioris reverentiæ, quia est signum hujus æstimationis & affectus. Non est tamen necesse, ut adoratio exterior semper supponat formalem intentionem interiorum adorandi, quia ille affectus potest immediate cadere in actum exteriorum, & tunc æstimatio excellentiæ, quæ supponitur ad illum affectum, ut sic non habet rationem adorationis, cum non procedat ex intentione adorandi, sed ad illam potius supponatur. Verumtamen, quia de se apta est, ut ad interiorum adorandum possit referri & ordinari, ideo quasi in actu exercitoi seu materialiter dici potest adoratio. Atque hoc modo semper adoratio exterior est signum interioris, vel formalis, si ad illam etiam feratur intentio adorantis, vel saltem materialis, ut declaratum est.

Ad fundamenta prioris sententiæ, quod ad D. Thom. attinet, satis ostensum est, illum non in solis exterioribus actibus, sed maxime in interioribus, veram adorationem constituere. Neque in illo titulo quæst. 84. 2. 2. oppositum insinuat, cum in art. 2. ejusdem quæstionis veram sententiam doceat. Solum ergo colligitur ex illo titulo, esse aliquam adorationem exteriorum, quæ per actus corporis exerceatur, de qua specialiter tractare voluit D. Th. in illa quæstione. Unde, quod statim proponit agere de adoratione, per quam aliquis suum corpus ad Deum venerandum exhibet, non est ita intelligendum, ac si per illa verba adorationem adæquate descriperit, sed ita, ut illa verba contineant differentiam contrahentem adorationem ad solam corporalem, de qua ibi peculiariter agere volebat. Unde in virtute potius ibi significat, quandam esse adorationem, per quam aliquis exhibet suum spiritum ad honorandum Deum, & aliam, per quam exhibet corpus suum. Falsum autem est, D. Th. nunquam de priori adoratione differuisse, nam q. 81. art. 8. & q. 82. art. 1. & 2. & q. 84. art. 2. satis illam docuit, & declaravit.

Ad secundum concedimus, adorationem esse submissionis & honoris notam, negamus tamen esse necessarium, ut illa sit nota sensibilis & externa. Neque hoc Damascenus unquam dixit, ostendimus autem, etiam posse esse actus interiores & mentales, quibus nostri animi submissionem ad Deum significemus.

Unde ad tertium negamus assumptum, scilicet, nulum esse interiorum actum, qui rationem adorationis induere possit. Et ad inductionem ibi factam satis responsum est, declarando, quomodo per actus intellectus & voluntatis, imperatos, vel elicitos a religione, possit interior adoratio exerceri. Unde ad primam confirmationem in primis posset in rigore negari sequela: quamvis enim dicamus, per aliquos actus internos virtutum posse adorari Deum, non inde consequitur ex vi illationis omnes actus virtutum posse ad Deum adorandum imperari, quidam enim possunt esse magis proportionati, & accommodati ad illum finem, quam alii. Sicut, licet adoretur Deus per actus externos, non ideo per omnes adorari potest, nam in aliquo est proportio ad eam significationem, & non in alio, ut v.g. genuflexio est accommodata ad significandam submissionem & humilitatem, deambulatio vero non item. Sic ergo in intellectu fides, v.g. est proportionata ad significandam submissionem animi, & tamen prudentia, vel ars non habet illam proportionem: & in voluntate similiter amor ultimi finis, quia respicit illum ut summum bonum ut supremum respectu amantis, potest esse accommodata nota submissionis: amor vero proximi, ut illum respicit, non potest esse nota submissionis, quia tendit in illum ut æqualem.

Unde dicitur secundo omnem actum virtutis tam internum quam externum, in quo fuerit proportio aliqua ad significandam animi submissionem, posse esse objectum & materiam, circa quam proxime versetur interior affectus adorationis, sive in tali actu sit alia honestas ad



ad aliam virtutem spectans, sive non: quia, ut probavimus, concōmitantia (ut sic dicam) alterius honestatis non potest impedire, quo minus actus sumatur ut nota honoris, si aliunde proportionem habeat. Quod in actibus etiam exterioribus cernere licet: nam, verbi gratia, proprii corporis castigatio ex se habet honestatem pœnitentiæ, & nihilominus rationem adorationis induere potest, si efficiatur ad subjiciendum Deo corpus proprium in ejus venerationem: & e contrario genuflexio, quæ est nota adorationis, potest esse actus pœnitentiæ propter pœnalitatem, quam habet adjunctam. Et similiter tunso pectoris, quam omnes ponunt ut notam adorationis, esse etiam potest pœnitentiæ signum, vel etiam humilitatis, si eo animo fiat. Quod ergo in exterioribus actibus experimur, potest facile in actu interiori intelligi, nam idem actus, qui ex se seu ex objecto suo est actus fidei, v.g. potest habere proportionem, ut exhibeatur tanquam nota submissionis, servitutis, vel humilitatis.

Unde hinc potius sumi potest confirmatio doctrinæ traditæ, quia non repugnat, actum unius virtutis habere proportionem vel utilitatem, ut possit alteri virtuti deservire, & ea ratione ab ipsa imperari, & esse materiam, circa quam ipsa versetur: sed non repugnat dari actum interiorem proportionatum, ut sit nota humilitatis respectu Dei: quis enim neget posse humilitatem interius exerceri, non solum quantum ad affectum, sed etiam quantum ad usum, & actuale exercitium humilitatis? ergo neque repugnat dari actum interiorem habentem sufficientem proportionem, ut sit nota adorationis. Omne enim signum humilitatis respectu Dei potest etiam esse signum adorationis, si ex proprio & accommodato motivo exhibeatur juxta dicta sēct. præcedente.

Quæret autem aliquis, an in omnibus virtutum actibus, tam internis, quam externis, reperiatur hæc aptitudo seu proportio, ut possint assumi, tanquam notæ divinæ adorationis. Quidam enim simpliciter affirmant. Imo videtur esse sententia D. Thomæ in 3. dist. 9. q. 1. art. 1. quæstion. 2. ubi ait, quod licet latría in se sit specialis virtus, quia habet specialem rationem objecti & actus, scilicet, ut exhibeatur aliquid Deo in recognitionem servitutis, potest tamen dici generalis, quantum ad hoc quod utitur actibus aliarum virtutum materialiter sub prædicta ratione proprii objecti. Ubi, cum indifferenter hoc tribuat aliis virtutibus, videtur sentire, hoc esse commune omnibus. Quod amplius videtur colligi ex solutione ad tertium, ubi ait, actus aliarum virtutum, secundum quod in gloriam Dei fiunt, sic materialiter assumi a latría. Et eandem fere doctrinam habet 2. 2. quæst. 108. art. 4. ad primum & secundum, & in art. 1. ad primum, ita explicat illud Jacobi 1. *Religio munda & immaculata, consistat in pupillis*, &c. Ex quibus verbis colligi etiam potest ratio hujus sententiæ, nam omnis actus virtutis, hoc ipso, quod honestus est, potest cedere in Dei honorem ac gloriam: sed religio respicit Deum ut supreme honorabilem: ergo potest sub hac ratione versari circa quemlibet actum virtutis imperando illum.

Est ergo hæc sententia satis probabilis. Erit autem verisimilior, si in hunc modum explicetur. Aliud est enim loqui de cultu Dei in communi: aliud de proprio cultu adorationis. Cultus enim Dei priori modo sumptus comprehendit omnem actum honorandi Deum, sive in voto, sive in juramento, sive in oratione, &c. adoratio vero Dei specialiter dicitur cultus servitutis seu submissionis debitæ ac proportionatæ divinæ excellentiæ. Loquendo igitur de cultu priori modo est verum posse religionem referre in Dei honorem & gloriam quemlibet actum virtutis, juxta illud Pauli 1. Corinth. 10. *Omnia in gloriam Dei facite*. In qua relatione non considerantur virtutum opera solum ut Deo placeant, sic enim illa relatio potius pertinet ad charitatem, vel obedientiam: sed considerantur ut in honorem Dei cedunt, & sic ea referre ad religionem spectat. Neque ad hoc oportet spectare aliam proportionem præter honestatem, secundum quam sunt speciali modo participationes divinæ voluntatis, ejusque bonitatis, quam prædicant & declarant proprio quodam, & singulari modo, & ideo sunt in illum specialiter referribilia, & ab Augustino interdum vocantur sacrificia lib. 10. de Civitat. cap. 6. Et confirmatur, nam propter hanc causam quilibet actus virtutis, qui meliorem non impediat, potest per votum Deo offerri, cum tamen votum

sit actus religionis. Neque enim satis est, si quis respondeat, per votum fieri actum materiam religionis, quia sit debitum Deo, & ad religionem pertinet perolvere Deo debita; nam in voto non solum ad religionem spectat, implere actum jam promissum, sed etiam ipsum promittere est actus religionis: ante promissionem autem non erat opus debitum: ergo ante tale debitum est in ipso opere aliqua proportio, ut possit esse materia actus religionis: ergo, sicut est talis materia respectu actus promissionis, ita esse potest respectu imperii seu voluntariæ relationis in honorem & cultum Dei, & hæc sine dubio est sententia D. Th. citatis locis, & in hac etiam generali significatione solet interdum sumi adorationis nomen.

At vero, si loquamur strictius de adoratione pro significatione servitutis ad Deum, sic non videtur quilibet actus virtutis ita aptus seu proportionatus ad adorandum Deum, quod non solum est verum de actibus internis, sed etiam de externis: quia hujusmodi adoratio, ut diximus, fit per actum externum seu imperatum, tanquam per signum ad placitum: de cujus ratione est, ut proportionem habeat cum significatione, ad quam imponitur: hæc autem proportio ad hanc subjectionem & submissionem significandam non reperitur in quolibet actu exteriori, etiam si aliàs honestus sit, ut per se notum videtur in solutione debiti, in actu eutrapeliæ, & similibus. Atque hinc fit, ut interdum actus, qui per se non spectat ad aliam virtutem, aptior sit ad Deum adorandum, quam actus alterius virtutis, ut prosternere se, deosculari terram, aptius est ad Deum adorandum, quam temperate comedere, & sic de aliis. Imo addit D. Thomas in tertio, ubi supra, has actus, qui non sunt proprie alicujus virtutis elicitive, esse maxime proprios actus latriæ, & in 2. 2. quæstione 81. articulo primo, ad primum, hos vocat actus elicitos, *sicut sunt* (inquit) *sacrificare, adorare, &c.* quod intelligendum est moraliter & respectu habitus virtutis, nam physice, & respectu potentiarum, etiam isti actus sunt imperati a voluntate: non enim elicit voluntas genuflexionem, sed imperat, seu movet proximam facultatem. Unde nec religio, quæ est dispositio voluntatis, potest illum actum physice elicere, sed imperare. Proxime ergo elicit affectum adorationis, & mediante illo, imperat actum alterius potentie, per quam fit adoratio. Quod si interdum adoratio fiat per alium actum ipsius voluntatis, sub ea ratione imperatus est, licet alioqui sit elicitus a voluntate. Quando vero talis actus, etiam si sit alterius potentie, ex se non pertinet ad aliam virtutem, dicitur elicitus a religione, quia immediate oritur ex affectu ejus, nulla alia virtute interveniente. Quomodo etiam oratio, quæ est in intellectu, dici solet elicita a religione. Et eodem modo dicit D. Thom. citato loco, sacrificium esse actum elicitem a religione, & idem dicit de adoratione. Ubi videtur adorationis nomen adhuc strictius sumpsisse non solum pro illo actu reverentie, qui ex se non habet aliam honestatem priorem honestate cultus religionis, & adorationis: nam hoc modo etiam sacrificium est quadam adoratio, & in Scriptura ita sæpe appellatur, ut alibi latius tradit: sed sumit pro adoratione illa, quæ tantum fit aliqua actione hominis, quæ nec circa materiam exteriorum versatur, sed circa ipsammet hominis membra, vel potentias, nec ex se habet aliam priorem honestatem. Actus enim, qui habet aliam propriam speciem virtutis, quamvis per extrinsecam relationem, & imperium ad munus adorationis assumatur, non amittit propriam speciem virtutis, a qua simpliciter denominatur, licet, ut subest imperio religionis, vera sit adoratio.

Ad secundam confirmationem, quæ sumebatur ex vitio contrario adorationi, absolute loquendo falsum est, quod in illa assumitur, in solo actu interiori non posse consummari malitiam adorationi Deo debitæ contrariam: nam, sicut non repugnat, interiori actui fidei conjugi honestatem adorationis, ita non repugnabit, interiori actui infidelitatis, vel hæresis conjugi malitiam sacrilegii, & sic de aliis, si eadem proportio observetur, nimirum, quod ille actus ex tali intentione, vel imperio fiat, quod ad malitiam illam communicandam sufficiat. Actus enim hæresis, v.g. vel odii Dei, ex se habet propriam malitiam inseparabilem, quacunque intentione, vel animo fiat: potest vero superbiæ, iræ, aut alterius si-



milis vitii malitiam participare, si ex ejus imperio, & relatione fiat. Sic ergo in actu hæresis potest reperiri malitia contraria honestæ adorationi, si quis talem actum exerceat intentione colendi Deum, aut intentione tribuendi alteri, quam Deo, honorem soli Deo debitum; ut si quis existimet ad excellentiam Dei pertinere, ut una tantum in eo sit persona, & eam fidem exerceat, & secum recogitet, animo exaltandi intra se divinam excellentiam, erit non solum hæreticus, sed etiam sacrilegus. Rursus, si quis credat esse alium omnipotentem præter unum Deum, seu primum auctorem alicujus beneficii; & ea ratione illi interius gratias agat, vel supplex deprecetur, ut omnipotentem, vel supremum auctorem, peccabit interius, non solum contra fidem, sed etiam contra honorem Deo debitum, quod peccatum, licet ab infidelitate ducat originem, diversum tamen ab illa est. Idem reperiri potest in odio Dei: nam, si quis illud exerceat, animo inferendi Deo injuriam, seu privandi illum honore ei debito, in illo actu præter malitiam odii est malitia sacrilegii interius consummati, & sic possunt in aliis exempla adhiberi, & interdum etiam potest intelligi hæc malitia quasi per defectum, ut si quis nolit firmum, & certum assensum rebus fidei adhibere, sed solum formidolosum, ac dubium, & illum actum velit exhibere, ut sufficientem notam honoris Deo debiti, erit non solum hæreticus, sed etiam sacrilegus, quia Deum facit creaturis æqualem. Ex quibus, & similibus exemplis potest argumentum factum in contrarium retorqueri, nam si injuria, & inhonoratio divina potest interius consummari, cur non etiam poterit adoratio? Dixi autem, necessarium esse ad consummandam interius hanc malitiam, ut intentio cultus intercedat, quia media tali intentione communicanda est malitia, eo quod opposita bonitas non sit intrinseca actui, sed ex imperio, & relatione extrinseca proveniens: tunc enim malitia opposita, cum non in sola omissione, sed in commissione consistat, non potest, nisi per contrarium imperium, seu intentionem, communicari, quod non solum actibus internis, sed etiam externis commune est. Si enim exercere actum externum humilitatis, per se non habet honestatem religionis, potest tamen illam habere, si ex peculiari intentione, & imperio fiat. Unde e contrario exercere externum actum superbiæ in propriam exaltationem per se non habet malitiam sacrilegii adorationi Dei contrariam; si tamen fieret intentione usurpandi sibi divinum honorem, haberet illam: & ratio generalis est, quia contraria bonitas non est debita illi actui secundum se, sed tantum, ut tali imperio, vel intentioni subest.

## SECTIO III.

## Quotuplex sit adoratio.

Præter communem, & generalem rationem adorationis a nobis explicatam, oportet, ut ea, quæ de Deo, & hominibus dicenda sunt, intelligi possint, nonnullas adorationis partitiones præmittere, & tam singularum vocum communio rem usum, & significationem, quam proprias singularum rerum rationes diligenter exponere. Et imprimis omitto divisionem adorationis in fictam, & veram, quia hæc omnia jam a nobis explicata sunt, & nunc de vera adoratione agimus, ficta enim neque adorationis nomen meretur. Omitto etiam divisionem in honestam, & superstitiosam adorationem, quia de honesta tractamus, qua explicata constabit, quæ nam superstitiosa sit, & præter objecti dignitatem.

Primo, ergo dividi solet adoratio in internam, & externam. In qua divisione distingui potest actus voluntatis volentis cultum ab ipso cultu, qui per illum exhibetur, ita ut ille dicatur interior adoratio, hic exterior: in quo sensu adoratio exterior dicitur non solum, quæ fit per membra corporis, & sensibus obijci potest, sed etiam quilibet actus interior, etiam si sit intellectus, vel ipsius voluntatis, quatenus sub prædictum actum voluntatis cadit, & ab illo imperatur: cultus enim, & adoratio non solum externis, sed etiam internis actibus exhiberi potest, ut statim dicam: unde non est hic proprius, & usitatus sensus hujus divisionis, quia non voluntas colendi, sed ipse cultus adoratio vocatur. Et hæc distinguitur in

internam, & externam. Externus cultus dicitur, qui per signa externa, & sensibilia fit, cujus varias partes numerat Aristot. 1. Rhetoric. cap. 5. *Honoris*, inquit, *partes sunt, sacra, memorationes, decantationes carminum, aut soluta orationis ad laudem recitatio, premia, delubra, vel primi confessus, sepulchra, imagines, publici ritus, adhuc etiam barbara, ut inclinari, loco cedere, munera quoque, &c.* quæ omnia solum materialiter differre possunt, si ejusdem excellentiæ testimonia existant, & ad eam significandam referantur. Interioris autem cultus Aristoteles non meminit, quia de cultu, & honore, qui inter homines exhibetur, sermonem facit, non enim possunt homines se mutuo colere, nisi externo cultu, quia non intuentur cor, nec cognoscunt interius actus, nisi per exteriora signa: unde cum adoratio sit quædam testificatio, & recognitio excellentiæ alteri manifestata, non potest ab homine exhiberi homini, nisi per exteriores actus. Interior igitur cultus dicitur, qui per interiores actus mentis, scilicet intellectus, & voluntatis exhibetur, qui maxime ad Deum refertur, qui summus spiritus est, & interiores actus mentis videt: extendi autem etiam potest ad creatos spiritus beatos, quatenus interiores actus ad illos relatos cognoscere possunt, ut infra declarabitur. Et hoc modo dixit August. in Ench. cap. 3. & 6. & lib. 12. de Trinit. cap. 14. *Christianam religionem maxime colere Deum Fide, Spe, & Charitate*: quod dupliciter potest intelligi, primo, quia ex Fide, Spe, & Charitate movetur homo ad colendum Deum vero religionis cultu, ut D. Thom. exposuit 2. 2. quæst. 81. art. 5. ad 1. vel e contrario, quia ipsa virtus religionis ordinat, & refert actus illarum virtutum, ut per illos Deum colat, ut idem D. Thom. exposuit in 3. dist. 9. q. 1. art. 1. quæst. 1. ad 1. Quamquam enim religio sit specialis virtus, quia speciale habet objectum (ut supra explicatum est) utitur tamen actibus aliarum virtutum, ut per illos cultum Deo exhibeat, & hoc modo potest etiam uti actibus Fidei, Spei, & Charitatis, quia licet perfectiores sint, hoc tamen non obstat, quominus possint ad finem religionis ordinari. Hi ergo actus proprie pertinent ad cultum internum, & ad eundem etiam spectare potest interior reverentia, seu timor, (ut supra dicebam) detestatio peccati, mentalis oratio, & similes actus, si ex voluntate colendi Deum proficiantur. Legatur de hac distinctione D. Thom. 2. 2. quæst. 84. art. 2. & quæst. 103. art. 1.

Quæri autem hic solet, quænam istarum adorationum sit propria adoratio, an interior, vel exterior? In quo breviter dicendum est, si comparemus adorationes tam internam, quam externam, posteriori modo sumptas ad ipsam voluntatem adorandi, neutram earum habere veram rationem adorationis, nisi prout subest tali voluntati procedenti ex tali judicio, & estimatione rei, qualis per adorationem indicatur. Quia si omnino deesset voluntas, non solum non haberet rationem adorationis, sed neque actionis humanæ: si autem deesset veritas, seu conformitas cum estimatione rei, non esset vera adoratio, sed fictio adorationis, & irritio, ut dictum est: unde, ut sit adoratio honesta, de qua nunc agimus, oportet, ut ex voluntate honesta procedat. At vero e contrario, sola voluntas adorandi, si in nullum actum adorationis prodeat, potest dici interna adoratio, vel magis proprie, adorationis propositum, sicut sola voluntas occidendi potest dici homicidium internum, non tamen simpliciter homicidium, quia hæc vox externum actum humanum significat. Comparando autem adorationes, internam, & externam posteriori modo explicatas inter se, quatenus, unaquæque earum conjuncta est cum suo actu voluntatis, sic utraque est adoratio, & perfecta in sua specie, licet una possit esse alia perfectior, sicut oratio vocalis, & mentalis in ratione orationis comparari possunt.

Secundo dividi solet adoratio ex parte objecti, & excellentiæ rei adoratæ, in latriam, & duliā, & hyperduliā. In qua divisione, primum explicanda est nominum ratio, & impositio, *λατρεύω* enim Græce, idem est, quod Latine, *reverereor*, aut *colo*, *δουλέω*, vero, idem est quod *servio*, unde hæc duo verba apud Græcos frequenter pro eodem accipiuntur, ut tam Deo, quam creaturis communia sint. Quo fit, ut tam in Græca, quam in Latina lingua (& idem est de Hebræa) nullum sit nomen, quod ex propria, & primæva significatione sua, singulari Dei cultum, aut honorem creaturis debitum specialiter

Adorationis divisio in internam, & externam.

Divisio adorationis in latriam, duliā, & hyperduliā.



liter significet: nisi fortasse componendo vocem ex ipso nomine Dei, ut est in Græco vox θεοσίβια, cui nulla est similis Latina. Nomina enim *adorationis cultus, servitutis*, & similia eis communia sunt, quamvis interdum, quasi per antonomasiam ad significandum singularem Dei cultum usurpentur, ut in sequentibus frequenter videbimus explicando varias locutiones Patrum, quæ ex hac nominum ambiguitate ortæ sunt. Quod certe est valde considerandum, & memoriæ mandandum. Ad hanc ergo ambiguitatem tollendam schola Theologorum communia nomina ad significandas adorationis species accommodavit, & *latrîam* appellavit singularem, & excellentem adorationem, quæ Deo propter summam ejus excellentiam debetur. Cujus accommodationis fortasse ratio fuit, quia (ut Phavorinus dicit in Lexico) ipsa vox Græca vehementiam quandam timoris significat, aut certe, quia apud Sanctos Patres fere semper hac voce, adoratio Deo propria significata est: ut patet ex VII. Synod. fere tota, & August. lib. 10. de Civit. cap. 1. & lib. 1. de Trinit. cap. 6. & lib. 20. contra Faust. cap. 21. & q. 61. in Gen. ubi advertit, propterea falsorum deorum cultum *idololatriam* fuisse appellatam, quia *latrîa* proprium cultum vero Deo debitum significat, & eodem modo utitur hac voce Damasc. orat. de imagin. Tharaf. in dicta epist. ad Constant. & Irenem, qui notat in illis verbis Deuter. 6. & Matth. 4. *illi soli servies*, Græce esse verbum λατρεύω, & ideo addi particulam, *soli*: verbum, autem προσκυρῆν, seu *adorare*, commune esse, & ideo cum dicitur, *Deum tuum adorabis*, non addi *solum*, ideo notat Anastasius Episc. in act. 4. VII. Synodi, & notaverat August. dict. q. 61. in Genes. De eadem re videri potest Basil. exponens 1. cap. Esai. & alii de hac materia scribentes. Nomine autem *dulia* significatus est honor, vel cultus, qui creaturis excellentibus dari potest, nam quia certum est hos cultus esse diversos in re ipsa (ut jam dicemus) oportuit etiam diversis nominibus significari, ut secure, & sine suspitione erroris loqui possemus; & licet nomen *dulia* uno modo significet propriam servitutem, & subjectionem humanam, ut constat ex D. Thom. 2. 2. q. 103. art. 3. & 4. & in 3. d. 9. q. 2. art. 1. ad 1. & Durand. lib. q. 3. proprie tamen, ut nunc illo utimur, significat sanctorum cultum: sicut enim nomen *latrîe* Deo, ita nomen *dulia* Sanctis accommodatum est. Significabat enim *dulia* communem servitutem, ut notavit Beda lib. 1. in Luc. in fine: & ideo accommodata est hæc vox inferiori cultui, seu adorationi, quæ sanctis datur: licet Ayala in 3. part. de tradit. considerat. 7. dubitet, an hujusmodi officium debuerit *dulia* appellari, quia veneratio, quæ communiter exhibetur sanctis, non est in signum servitutis. Sed non est quod dubitemus, quia hæc vox non propriam tantum, & vilem servitutem, sed etiam honorariam subjectionem significat, quomodo dixit Paul. ad Galat. 5. *Per charitatem servite invicem*, ubi Græce habetur verbum δαδετε, quod notavit August. lib. 1. de Trinit. cap. 6. qui egregie ferm. 7. ad frat. in eremo, ait: *Quando dulum damus prelati, & sanctis, Deo vero latrîam reservamus, tunc dare nos quæ sunt Cæsaris, Cæsari, & quæ sunt Dei, Deo*. Ex his ergo, quæ de significatione vocum dicta sunt, constat ratio, & sensus prædictæ divisionis; cum enim adoratio alicui exhibeatur propter excellentiam ejus, pro diversitate excellentiæ erit etiam adoratio diversa: quia ergo excellentia alia est increata, alia vero creata, adoratio, quæ exhibetur propter increatam excellentiam *latrîa* dicitur: quæ vero propter creatam, generali nomine dicitur *dulia*, præsertim quando illa excellentia est gloriæ, vel sanctitatis creatæ. Quod si illa sanctitas sit singulari ratione excellens, adoratio illi respondens *hyperdulia* vocatur. Quæ omnia constant ex usu Theolog. in 3. distin. 9. & D. Thom. hic, & 2. 2. q. 103. art. 3. & 4. Advertit autem Scotus ibi, quæst. unica cum Bonavent. art. 2. q. 1. has voces *latrîa*, & *dulia*, non solum actibus, sed etiam habitibus tribui, frequentius tamen significare actus, & hoc modo illis nunc utimur, quamvis multa ex iis, quæ dicemus, possint notione servata de habitibus intelligi. Ex his vero constat, adorationem nomine commune esse Deo, & creaturis, ut evidenter constat ex Scripturæ usu Gen. 23. & 42. & in finitibus aliis locis: unus vero pro multis sufficit 1. Paralip. 29. *Incensaverunt, inquit, se & adoraverunt Deum, & deinde Regem*.

Quæri vero hic potest, sicut in præcedenti divisione; an hæc duæ adorationes univoce, vel tantum analogice; in ratione adorationis convenient. Quod dubium non invenio a Theologis tractatum, quia revera parvi momenti est, ac fere de nomine: Petrus tamen Bergomensis in tabula, seu concordantiis D. Th. verbo adoratio n. 3. sic inquit: *Ex mente D. Tho. adoratio exhibita Deo, & creaturæ, non dicitur univoce, sed analogice*, & profert tria loca. Primus est in 2. 2. q. 84. art. 1. ad 1. ubi solum dicit excellentiam Dei non communicari creaturæ secundum æqualitatem, sed secundum quandam participationem, & ideo aliam venerationem Deo, aliam vero excellentibus tribui creaturis. Secundus locus est in 2. 2. q. 94. art. 1. ad 2. ubi non comparat *latrîam* cum *dulia*, sed cum *idololatriâ*, quas dicit univoce convenire in ratione cultus, qui per actum humanum exhibetur, quamvis in ratione virtutis, & religionis, *idololatria* æquivoce dicatur religio, seu *latrîa*.

Tertius locus est in 3. distin. 9. q. 1. art. 2. quæstion. 7. ubi similiter non comparat *latrîam*, nisi cum *idololatriâ*. Potest vero hæc sententia suaderi, quia excellentia, vel dominium Dei, & creaturarum non univoce, sed analogice tantum conveniunt in ratione excellentiæ, vel dominii; ergo & cultus exhibitus propter has excellentias solum analogice possunt in ratione adorationis convenire. Et hanc sententiam tenet Bonav. in 3. distin. 9. art. 2. ad 4. ubi inquit, sicut *Dominus* dicitur analogice de Deo, & creaturæ, & *dulia* in communi sumptam, prout abstracta ab adoratione Deo, & creaturæ debita, analogice dicitur. Et favent Sancti, qui interdum loquentes de adoratione simpliciter, negant illam esse exhibendam creaturæ, utentes illa voce quasi analogica, ut convenit principali analogato, seu divino cultui. Potest etiam confirmari ex Arist. lib. 2. magnor. moral. c. 1. 1. dicente, amicitiam propter jucundum, vel utile solum analogice esse amicitiam, si cum ea, quæ est propter honestum, conferatur.

Nihilominus contrarius loquendi modus mihi videtur probabilior, qui satis colligitur ex D. Thom. citata q. 94. ex 2. 2. art. 1. ad 2. ubi dicit, *latrîam*, & *idololatriam* in ratione actus humani ad cultum pertinentis univoce convenire, sicut solutio tributi (inquit) univoce dicitur, si ve tribuatur vero Regi, si ve falso. Sic ergo adoratio, de qua loquimur, sumpta sub ratione communi actus humani ordinati ad honestum, & rationabilem cultum alterius, univoce dicitur, si ve talis cultus ad Deum, si ve ad creaturam referatur. Et confirmatur manifestis exemplis, nam fides univoce dicitur de divina, & humana, quamvis altera divina, & increata, altera humana, & creata auctoritate nitatur. Amor etiam Dei, & amor proximi univoce in ratione amoris conveniunt, quamvis amor Dei sit propter bonitatem increatam, & amor proximi propter creatam. De hoc enim amore sermonem habeo. Præterea oratio, quæ ad Deum, & ad sanctos fit, sine dubio conveniunt univoce in ratione communi orationis, cum tamen oratio ad quandam etiam cultum pertineat. Deinde explicatur ratio, quia actus voluntatis, a quibus adoratio proficitur, & habet esse humanum, seu morale adorationis, univoce conveniunt in ratione actus humani, & liberi, & in ratione virtutis, seu actus honesti, & solum differunt in specificis differentiis, quæ per se constituunt illos in hac, vel illa specie virtutis: ergo solum conveniunt univoce in genere, & differunt specie, & nulla ratio analogiæ inter eos intercedit; ergo idem est dicendum de adoratione secundum genericam rationem suam, & de universis illius speciebus. Sicut etiam habitus ipsi univoce conveniunt in ratione virtutis, & differunt specificis differentiis, quæ in suo ordine absolutæ sunt, & perfectæ, quamvis una sit alia perfectior. Tandem (ut rationem in contrarium dissolvamus) objecta actuum, vel habituum, non per se, & intrinsece illos constituunt, sed habitudo ad objectum est hujusmodi actibus, vel habitibus intrinseca. Unde fit, ut licet unum objectum increatum sit, aliud vero creatum, & ideo in suo esse univoce non convenient: nihilominus habitudines ad illa, quæ creatæ sunt, & actus, ac habitus, qui illas includunt, possint univoce rationem aliquam participare, præsertim quia interdum habitus, vel potentia, quæ in se omnino una est, potest objectum respicere, quod secundum analogiam tantum unum est, ut in intellectu, & voluntate videre licet. Solum in usu

*Latrîa, & dulia univoce convenient in ratione adorationis.*



nominum est observandum, aliud esse loqui de nominibus significantibus rationes communes, & abstractas, in quibus procedunt omnia, quæ diximus, tale enim nomen est, *adoratio*, talisque est ratio, quam per se primo significat. Aliud vero est loqui de nominibus significantibus rationes específicas, in quibus contingit, ut nomen unius speciei per attributionem, & analogiam tribuatur alteri, ut cum homo dicitur leo: sic enim fortasse dici potest sub ratione cultus religiosi adorationem dulciæ esse analogice cultum, si cum latria conferatur, quia religio proprie, & per se significat specialem virtutem ad colendum Deum institutam, sicut e contrario interdum indicat D. Thom. religionem dici pietatem, vel dulciam per quandam quasi analogiam, qua nomina creaturarum transferuntur ad Deum secundum quandam excellentiam, ut loquitur D. Thom. 2. 2. q. 101. a. 3. ad 2. & 103. a. 3. ad 1.

Adorationis divi-  
visio in  
absolutam,  
& respectivam.

Tertio principaliter dividi potest adoratio in absolutam, & respectivam, sicut enim potest voluntas rem aliquam amare, vel per se, quia in se bona est, quæ potest dici absoluta dilectio: vel propter aliud ad quod est utilis, quæ potest dici dilectio respectiva, seu electio: ita potest velle rem aliquam adorare, vel propter se, seu propter intrinsecam excellentiam, quam habet, & hæc dicitur adoratio absoluta, vel propter aliud, seu propter excellentiam, quæ est in aliqua persona, ad quam talis res aliquam habitudinem habet, vel conjunctionem, & hæc dicitur adoratio respectiva. Priori modo tantum est adorabilis res intellectualis, quia sola illa est capax honoris, & excellentiæ propter se honorabilis, seu adorabilis, ut virtutis, sanctitatis, dominii, &c. Præsertim, quia cum homo sit naturæ intellectualis, non potest prudenter, honeste, ac juxta dignitatem suam se alteri rei submittere propter ejus dignitatem, nisi sit ejusdem, vel excellentioris naturæ, & excellentiam aliquam, vel dignitatem habeat, naturæ intellectuali convenientem. Posteriori autem modo adorabiles sunt res inferioris ordinis, quia cum non propter se, sed propter alicujus rei dignitatem, & excellentiam colantur, honor illis exhibitus non in illis sit, sed in ipsas personas, propter quas adorantur, redundat. Quæ omnia fusius in sequentibus disputationibus explicanda sunt. Neque oportet iterum hic morose discutere, an hæc divisio univoca sit, vel analoga, nam de re fere dialectica satis dictum est, & quæ in præcedenti divisione sunt dicta, facile possunt hic accommodari. Isti enim actus morales in communibus rationibus univoce conveniunt, quamvis sub nominibus significantibus speciales aliquas perfectiones, possint interdum per translationem, seu analogiam denominari. Quæ omnia notanda sunt, multum enim conferent ad ea intelligenda, quæ in disputationibus sequentibus tractabimus.

## SECTIO IV.

*Quomodo Christus ut Deus adorandus sit.*

Quæstio hæc de tota Trinitate, & de singulis personis, quatenus sunt unus Deus, versari potest, cum enim de fide certum sit, Christum esse verum Deum, unumque, ac eundem cum Patre, ac Spiritu S. consequens sit, eandem, quæ Deo, & cæteris personis, adorationem illi esse debitam: agamus igitur simpliciter de Deo, inde enim, quid de Christo, ut Deo dicendum sit, facile constabit.

Adoratio  
Dei deo-  
ta singu-  
laris, &  
nulli crea-  
turæ com-  
municabi-  
li.

Principio igitur Deum esse adoratione dignum, per se notum est, neque probatione indiget, cum nomine Dei rem summe excellentem significemus. Unde etiam sit, sicut excellentia Dei singularis est, & omnes creaturas superans, ita cultum, & venerationem illi debitam singularem esse, omnique creaturæ incommunicabilem per se, & absolute: quod totum de fide est, ut constat Matth. 4. Deuter. 9. & 10. *Dominum Deum tuum adorabis, & illi soli servies*, ubi Græce est verbum λατρεύουσας, quo singularis Dei cultus significatur, ut dictum est, & notarunt August. lib. 3. cont. Maxim. c. 23. & Anastas. Episc. VII. Synod. act. 4. post medium. Et de hac Dei adoratione loquitur Paul. 1. ad Timot. 1. cum dicit: *Soli Deo honor, & gloria*, & ad Rom. 1. *Cum cognovissent Deum, non sicut Deum glorificaverunt*. Et in eandem rem multa congeruntur ex patribus in VII. Synod. act. 7. & quæ supra adduximus de nomine latriæ hoc confirmant. Ratione præterea confirmari potest, quia divina majestas, & po-

Suarez Tom. XVI.

testas, prout in ipso est, nulli creaturæ communicari potest. Propter quod vera de Deo existimatio alteri communicabilis non est, sed adoratio divina ex tali existimatione procedit, & in propria Dei excellentia nititur, & ideo singularis est, & illius propria. Sicut etiam singularis fides, & amor illi debentur, quia proprie, & excellenti quodam modo verax, & bonus existit.

Duo vero occurrunt circa veritatem hanc explicanda. Primum est, an hæc adoratio latriæ, prout in Deum ipsum singulariter convenit, sit unius rationis, vel plurium. Et ratio dubitandi esse potest, quia Damasc. orat. 3. de imaginib. fol. 5. quinque distinguit titulos, propter quos Deus latria coli potest. Primus est supremum dominium Dei. Secundus suprema gloria, & sanctitas. Tertius maxima beneficentia erga homines. Quartus quoniam ab illo speramus omne bonum. Quintus denique quia illum offendimus. Quinimo possemus hoc modo plures alias, ac pene infinitas rationes colendi Deum ratione distinguere, nimirum, quia est sapiens, quia iustus, quia misericors, &c. Nam propter hæc singula attributa dignus est summo honore. Nec refert, quod attributa hæc non re ipsa, sed sola nostra ratione distinguantur, hoc enim ad distinguendas virtutes sufficit, sicut charitas, & fides virtutes distinctæ sunt, quia altera divina bonitate, altera veritate nititur, quamquam in Deo bonitas, & veritas sola ratione discernantur. Et eodem fere modo charitas, & spes inter se distinguuntur, quia altera in Deum, prout est bonus in se, tendit; altera, prout est bonum nostrum: sic igitur adorationes distingui poterunt. Et confirmatur ex August. q. 94. in Exod. dicente, *Deo ut latriam, ut Domino vero dulciam deberi*, quod hic retulit D. Th. ex glossa in Psal. 7. at vero dulcia, & latria diversæ adorationes sunt. Confirmat denique ex S. Th. in 1. 2. q. 102. art. 3. ad 3. ubi tria sacrificiorum genera, quæ Deo offeruntur, distinguit. Unum est holocaustum, quod offertur Deo, ut in se est supremæ majestatis, & excellentiæ; aliud est hostia pacifica, quæ respicit Deum ut supremum benefactorem: tertium denique est hostia pro peccato, quæ offertur Deo, ut Salvatori. Unde Scot. in 3. d. 9. obiter indicat quæstionem, an hæc tres rationes Dei ut sic, Creatoris, & Salvatoris, species adorationum distinguant: an posteriores duæ ad latriam pertineant, quia videntur, quodammodo esse rationes creaturæ, & extrinsecæ Deo. Propria vero latria in excellentia increata, & intrinsecæ Deo fundari debet. Et nihil definit.

Nihilominus dicendum est, unam & eandem esse virtutem, quæ propter has omnes rationes Deum colit, & adoratur, quæ communis est Theologorum sententia in 3. d. 9. præcipue D. Thom. q. 1. art. 3. Alenf. 3. part. q. 30. memb. 1. art. 3. §. 2. & 3. Gabr. lect. 49. in can. Quod ita ostendit D. Thom. 2. 2. q. 81. art. 3. ad 1. & q. 84. art. 1. ad 2. latria datur Deo, ut est primum principium, & pater omnium Malach. 1. *Sie ego pater, ubi est honor meus*? Sed in ratione primi principii omnia divina attributa continentur, ex quibus unica, & simplicissima excellentia divina per quandam ineffabilem identitatem veluti resultat; ergo virtus religionis una est, quæ hanc Dei excellentiam respicit, ut formale objectum, & fundamentum cultus, quem Deo exhibet. Cui rationi addi potest, idem omnino esse, si Deus in ratione Salvatoris, vel prout in se est, supremæ majestatis, consideretur: quia sub quacunque harum rationum omnia divina attributa formaliter includit. Quod si divinam essentiam a suis attributis ratione distinguamus, id nihil obstat, quia eadem virtus, quæ naturam divinam propter suam eminentiam veneratur, consequenter etiam in illa colit perfectionem omnem, quæ ex natura rei cum illa conjuncta est, aut nostro intelligendi modo ab illa manat. Sicut virtus, quæ honorat hominem, quia homo est, eundem etiam, quia intellectum, ut voluntatem habet, honorabit.

Sed quid est dicendum de actibus? Multi enim dubitant, propter rationes in principio factas, & quia nihil obstat, quominus idem habitus plures, ac differentes actus eliciat, sicut eadem potentia diversorum actuum, & habituum est capax. Qui modus dicendi fortasse non est improbabilis. Contrariam tamen sententiam, sicut communiorem, ita & probabilior existimo. Itaque omnes illi actus in ratione divini cultus, & latriæ ejusdem speciei esse videntur. Et ratio reddi potest primo, quia nulla divina perfectio est sufficiens latriæ funda-

T t men-

Dubium.

Respons.

Una, & eadem virtus religionis, etiam propter diversos titulos Deum adoratur, & colitur.

Dubium.

Respons.



mentum; nisi prout simpliciter infinita est, & increata; ergo licet nostris conceptibus hæc attributa distinguamus, tamen nullum eorum est ratio exhibendi Deo cultum latriæ, nisi prout includit reliqua, & in se, & in apprehensione nostra saltem implicita, & confusa, nimirum quatenus in quolibet eorum increatam, & infinitam excellentiam, ipsique Deo propriam, & singularem spectamus. Exemplum hujus rei esse potest charitas, quæ, si Deum diligit super omnia actu supernaturali, & infuso, actus ejusdem rationis erit, sive tendat in Deum explicite consideratum, ut infinite bonum, sive infinite sapientem, aut potentem, &c. Quia revera amor semper fundatur in infinita Dei bonitate, & perfectione, quæ omnia hæc includit, & est propria, & adæquata ratio talis amoris: quamvis modus concipiendi ex parte nostra diversus sit, qui in ipsis conceptibus efficit diversitatem, quia speciebus intelligibilibus, & mediis, quibus intellectus ad concipiendum utitur, commensuratur: at vero actus voluntatis non inde distinguuntur, quando ratio, quæ in objecto concipitur, & voluntatem movet, ejusdem rationis existit.

Ex quo infero dubium non esse, quin honor datus Deo titulo Creatoris, vel Salvatoris vera latria sit, & ad religionem pertineat; quidquid enim sit de differentia specifica actuum, quæ in quæstionem verti potest, tamen de veritate latriæ nulla dubitatio, vel incertitudo admitti debet: quia totus hic honor est singularis, ac proprius Dei, sicut & excellentia ipsa; est ergo latria. Deinde si attente res consideretur, non fundatur in ratione creata, sed in excellentia increata. Quod ita declaro, quia in titulo Creatoris duo expectari possunt; alterum est creatum bonum, quod in creatura ponitur: alterum est potestas, quam Deus retinet in creaturam suam, quæ revera est dominium supremum, & excellens Dei: honor igitur non datur Deo propter bonum, quod in creatura posuit, ita ut hoc sit proximum motivum adorandi: sed propter dominium, & potestatem, quam in se habet. Quæ potestas increata est, ad singularem Dei excellentiam spectans; pertinet ergo dictus honor ad veram, & perfectam latriam. Et eadem ratio est, si Deus sub ratione Salvatoris, aut Benefactoris consideretur.

Quod si fortasse aliquis specialiter inquirat, quid sit dicendum de actu gratitudinis, seu de singulari debito, & obligatione, quæ ad gratias Deo agendas pro beneficiis susceptis ex eisdem resultat, & in eisdem quamvis creata sint versatur, ea referendo in benefactorem Deum, & pro illis gratias ei agendo. Unde proxime ea respicit, ut materiam circa quam versatur. Respondetur, hunc actum diversum sine dubio esse posse ab eo, de quo agimus, sicut enim orare actus esse potest ab adoratione diversus: ita & gratias agere, quamvis in eandem virtutem religionis omnes referantur, ut latius tractat D. Th. 2.2. q. 83. a. 17. & q. 106. a. 1. ad 1. posset vero ipsamet gratiarum actio sumi in notam adorationis, sicut de oratione diximus sect. 1. Et idem dicendum est de satisfactione, quæ pro peccatis in Deum commissis illi offertur: est enim ex se actus hic ab illo cultu, de quo nunc agimus, valde diversus, ut latius in materia de penitentia tractandum est.

Ad rationem ergo dubitandi in principio positam respondetur, distinctionem rationis inter attributa divina non semper sufficere ad virtutes, vel earum actus distinguendos, nisi vel diversus modus operandi nostrarum potentiarum ad distinctionem efficiendam concurrat, ut in amore, & cognitione videre licet; vel certe in diversa habitudine, seu ratione, quæ in talibus attributis consideratur, honestas veluti genere diversa reperiatur, ut contingit in charitate, & spe, quarum prior ad amorem amicitie, posterior vero ad amorem concupiscentiæ pertinet: in præsentia vero nulla ratio hujus distinctionis reperitur.

Ad primam confirmationem respondeo, duliā, prout Deo ut supremo Domino accommodatur, revera latriam esse: vocari vero ab August. duliā, tum ut indicet omnem rationem veræ adorationis in cultu Deo debito eminenter contineri, ut insinuat D. Thom. 2.2. q. 103. art. 3. ad 1. tum etiam, quia sicut nomen domini aliquo modo commune est Deo, & creaturæ: ita & nomen duliæ, cujus ratio in dominio fundatur, commune est utrique, quamvis nomen latriæ soli divinæ adorationi tributum sit, ut diximus. Ita D. Thom. in 3. d. 9. q. 2. art. 1. ad 1. sed urgebis, ex hac responsione sequi, latriam, & du-

liam prout Deo attribuantur non esse adorationes speciei diversas, sed eandem conceptibus vel nominibus generis, & speciei, conceptam vel nominatam: consequens est contra D. Thom. artic. 2. ubi hoc exemplo probat distinctionem latriæ, & duliæ respectu Christi secundum diversas rationes. Respondetur D. Thomam non uti illo exemplo, ut efficaci probatione, sed solum ut per quandam proportionem rem declaret, ut Cajetan. insinuat. Nam sicut in Deo propter rationes adorandi nostra solum conceptione, & ratione distinctas, duo etiam conceptus, & denominationes adorationis distinguuntur: ita in Christo, propter duas rationes adorandi re distinctas, poterunt duæ adorationes specie distingui.

Ad 2. confirmat. patet responsio ex dictis, nam si illa tria genera sacrificiorum ad divinum cultum proxime referantur, poterunt quidem in materia, vel actu exteriori differre, non tamen in interiori actu, seu ratione formali cultus: si vero unum referatur ad Dei adorationem, & testimonium divinæ excellentiæ, aliud in gratiarum actionem offeratur, aliud denique in satisfactionem pro peccato, poterunt in interiori actu habere diversitatem, etiam si exterior fortasse interdum idem sit.

Secundo loco explicandum est, quænam sit hæc adratio soli Deo debita, & creaturæ incommunicabilis, tam interna, quam externa. In qua re notanda est differentia inter actus internos, & externos. Interni enim, quoniam Deum ipsum, ut proprium suum objectum attingunt, vel repræsentant, idcirco ex se, & natura sua tales esse possunt, ut ad solius Dei cultum referri valeant, hujusmodi sunt actus fidei divinæ, actus spei, charitatis, poenitentiae, & alii similes. Actus vero exteriores non sunt ita ex se determinati, quin tam ad venerandum Deum, quam ad honorandam creaturam exerceri possint, quod notavit August. d. lib. 10. de Civit. cap. 4. Greg. Nyssen. citatus a D. Th. in catena circa illa verba Luc. 22. *Positis genibus orabat*, ubi sic inquit; *Quia humana natura nihil habet Deo condignum; ideo honorifica signa, quæ invicem exhibemus, transsumpsimus ad obsequium incomparabilis naturæ.* Quo fit, ut distinctio latriæ soli Deo debitæ ab adoratione creaturæ in his externis actibus potissimum ex interiori intentione pendeat, ut Leon-  
tius tradidit in VII. Synod. act. 4. circa finem.

Secundo spectari etiam debet usus, interdum enim actus de se indifferens usurpatus est, & ad solum divinum cultum, vel semper vel plurimum accommodatus: ut nonnulli censent de pectoris percussione, quia est signum petendi veniam peccatorum, quæ a solo Deo expectanda est. Et idem aliqui existimant de hoc verbo, *Miserere nostri*, quia in Litanis solum ad divinas personas hoc modo Ecclesia loquitur. Sed hæc non sunt certa, nec semper vera, quia & verba illa possunt in alio sensu proferri, ut per se manifestum est, & infra etiam dicetur: & ab homine potest etiam venia postulari de injuria in illum commissa, & hæc animi submissio posset eodem exteriori signo indicari. Potissimum ergo in his signis externis attendenda est præter intentionem internam, publica impositio, nam si hæc signa sufficienti auctoritate, & potestate ad significandum Deum, & cultum ejus, sunt imposita, solum ad divinum cultum usurpari possunt: & si creaturis communicetur talis cultus, erit idololatria, saltem exterior, si non ex animo, neque ex falsa æstimatione fiat. Hæc autem impositio in vocibus notior est, nomen enim Dei proprie sumptum, aut nomen Creatoris, & similia solum verum Deum, & perfectionem ejus significant, & ideo, si ad creaturam, & laudem ejus deputentur, idololatria est. At vero in aliis actionibus, sacrificium in proprium Dei cultum maxime institutum est, teste August. 8. de Civit. cap. 27. & lib. 10. cap. 19. & lib. 20. contra Faust. cap. 21. & Theodor. lib. 8. ad Græcos, D. Th. 2.2. q. 84. & 85. Propter quod Exod. 22. dicitur. *Immolans, vel sacrificans nisi Domino soli, eradicabitur*; & propterea monuit Angelus Manue Judic. 13. *Si vis holocaustum facere, offer illud Domino.* Et hunc fuisse gentium omnium sensum, & consuetudinem, non obscure indicantur Laodiceni Act. 14. qui cum errarent, Paulū & Barnabā Deos esse existimantes, eis statim sacrificiū offerre tentarunt. Est enim sacrificium actio quædam, qua res aliqua in Dei honorem mactatur, vel consecratur in recognitionem, & testimonium supremi domini, & majestatis divinæ. Hanc vero significationem (ut bene August. notavit) ab im-

Anton. de Cordub. lib. 1. Theolog. sic. quæstionum q. 5. dub. 3.

Dubium.

Respons.

Responsio ad argumenta.

Leontius, Corduba sup. dub. 6 & Wal. 3. tom. de Sacramentalibus c. 117. n. 4.

Quinam cultus soli Deo sit debitus.



impositione habet, non a natura, occiso enim vituli de se non significat Deum esse auctorem vitæ, & mortis, unde remota impositione non continet divinum cultum: tamen postquam imposita est, jam habet rationem sacrificii, & divino cultui contrarium esset illam alteri offerre. Et ad hunc modum in lege Evangelica, cultus sacramentorum adorationem patriæ continet, & maxime nostrum incruentum sacrificium, in quo Deus ipse est, qui offertur: & ideo natura, & dignitas talis rei oblatæ postulat, ut soli Deo offeratur, quamvis hæc ipsa oblatio, & sacrificium ex institutione ortum habeat.

Ex quo tandem colligit August. sacerdotes, templa, delubra, altaria, aras, per se primo soli Deo dicari posse, hæc enim omnia, cum ad sacrificium referantur, patriæ cultum continent. Quomodo autem interdum templa, & alia hujusmodi ad honorem Sanctorum ordinantur, in sequentibus explicabimus. Dices: esto sacrificium soli Deo offerendum sit, tamen sacrificium non est adoratio, sed actus religionis distinctus, ut sumitur ex D. Thom. 2. 2. q. 84. & 85. ergo inde non habemus aliquam adorationem externam soli Deo dicatam. Respondetur, licet non omnis adoratio sit sacrificium, tamen sacrificium essentialiter esse adorationem, quia offertur in signum subjectionis, & honoris debiti supremo Domino, ut D. Th. d. q. 84. art. 1. tradit, & art. 3. ait, Sacrificium inde habere laudem, quod in divinam reverentiam sit, idem autem est divina reverentia, quod adoratio. Unde in Scriptura verbum adorandi pro verbo sacrificandi ponitur, Gen. 23. *Postquam adoraverimus, revertensur ad vos.* Ubi Abraham loquitur, quando ibat ad sacrificandum filium. Et ita etiam multi intelligunt illud Joan. 4. *Patres nostri in monte hoc adoraverunt*, &c. Nil ergo obstat, quod D. Th. in 2. 2. prius de adoratione in q. 84. postea de Sacrificio in 85. differuerit, nam communior est adoratio, quæ quoad signa externa peculiari modo per sacrificium exercetur, & ideo oportuit propria quæstione illud explicare. Non inficior, solere interdum nomen adorationis applicari ad alias actiones adorandi, quæ neque sunt sacrificia, neque habent alia peculiaria nomina, sicut nomen commune solet interdum accommodari uni rei singulari, vel specificæ, quomodo videtur voce usus D. Thom. 2. 2. q. 81. art. 1. ad 1. Sed tamen id solum spectat ad usum vocis, tamen res ipsa, & ratio adorationis propriissimæ in sacrificium convenit, solumque in signo externo, seu materialiter, ab aliis actibus propriæ ac divinæ adorationis differt in esse virtutis, & cultus, quod est etiam notandum ad intelligendam vim plurium vocum aliarum, in hac materia occurrentium.

## DISPUTATIO LII.

In tres Sectiones distributa.

*De adoratione Sanctis hominibus, vel Angelis exhibenda.*

**D**UO breviter in hac disputatione tractanda sunt. Primum utrum adoratio sanctorum licita sit. Secundum qualis illa sit, vel esse debeat. Loquimur autem de sanctis vita functis, quos supponimus beatos esse, & cum Christo regnare, ut in 1. 2. quæst. 4. latius probatum est. Quamvis vero oratio, seu petitio quendam cultum contineat, quia vero hic solum in communi de adoratione agimus, ideo quæstionem de sanctorum invocatione in præsentem remitteremus in 2. 2. q. 83. attingemus vero nonnulla inferius de Beatissima Virgine disputantes.

## SECTIO I.

*Utrum Sancti, & beati Angeli, vel homines sint adorandi.*

**F**UIT antiqua hæresis, quæ simpliciter negavit Sanctis esse adorationem tribuendam, cujus præcipuus auctor dicitur fuisse quidam Eustathius Sebastianus Episcopus, quamquam Nicephorus lib. 9. histor. cap. 16. & 45. & Socrates lib. 2. cap. 33. ejus errores referentes, hujus mentionem non fecerunt. In Concilio tamen Gangrensi, quod adversus illum congregatum est, licet non expresse asseratur, indicatur tamen, illum fuisse in hoc errore versatum, nam canon. 20. ita definitur. *Si quis sancto-*

*rum memorias contemnendas putaverit, anathema sit.* Fuit autem multo antiquior hæc error, illum enim in Gnosticis reprehendit Irenæus lib. 3. cap. 20. & eundem fuisse secutum Eunomium, & Porphyrium refert Lindanus dialog. 2. & postea ipsum secutus est Vigilantius teste Hier. ac deinde Wiccheleph teste Walden. lib. 3. de sacramentalibus titul. 13. Ac denique Lutherus, Calvinus, Zuinglius, ut ex Prateolo constat, & fere reliqui recentiores hæretici hanc hæresim excitarunt. Nec solum hæretici, sed etiam Gentiles Christianis objiciebant, quod martyres tanquam Deos colerent, ut est apud Euseb. lib. 8. hist. cap. 6. & Cyril. qui hoc de Juliano apostata refert, lib. 6. contra illum post med. respondens; *Nos non adorare sanctos, ut Deos, sed honorare, ut primarios viros.* Idem indicat de hoc Juliano Nazianzen. orat. 3. quæ est 1. contra illum a num. 27. & orat. 10. prope ab initio. Idem nobis objecit Maximus Grammaticus apud August. epist. 43. & Faustus Manichæus apud eundem lib. 20. contra Faustum cap. 21. cujus illa sunt verba; *Idola veritatis in Martyres, quos votis simulibus colitis.* Quin etiam Judæos Sanctorum adorationem, tanquam idololatriæ vitium in Christianis damnasæ, auctor est Euseb. lib. 4. histor. cap. 15. ubi de more colendi Martyres nonnulla refert. Denique etiam Mahometum idem nobis imposuisse, ideoque omnem Sanctorum cultum prohibuisse, Prateol. refert verbo Mahometus num. 7. Fundamenta hujus erroris varia sunt, quæ mox videbimus: unum tamen videtur esse præcipuum, & omnibus commune, quia Sancti nec adorari possunt cultu religioso (hic enim soli Deo debetur), nec cultu, seu honore civili, & humano, quia hic honor non datur hominibus absentibus, præsertim mortuis, qui nec vitam politicam nobiscum agunt, nec fortasse, quid operemur, agnoscunt.

Dicendum tamen est, sanctos Angelos, & homines dignos esse honore, & ideo a nobis esse colendos, & adorandos. Hæc est veritas fidei definita a Felice I. cum Concilio Romano in sua epist. 2. Decretal. & in Concilio Gangrensi supra citato, & in VII. Synod. frequenter, ac tandem in Trident. Sess. 25. & habet fundamentum in Scriptura sacra, in qua legimus sæpe justos, & prudentes homines adorasse sanctos Angelos, & homines viventes, ac mortuos, ratione sanctitatis. Sic Genesis 18. & 19. Abraham, & Loth, adoraverunt Angelos, & Josue 5. *Apparuit ei Angelus in specie viri habens in manu gladium, cui dixit Josue, Nosce es, an adversarius meus? & ille; Nequaquam, sed princeps sum exercitus Domini: continuo cecidit Josue pronus in terram, & adoravit.* Simili modo Judicum 13. Manue, & uxor ejus, cum vidissent, & cognovissent, eum, qui locutus eis fuerat, fuisse Angelum, *Proni ceciderunt in terram, & Numer. 22. Balaam, pronus in terram adoravit Angelum.* 1. Regum 28. Saul adoravit Samuelem, cum ei post mortem suam apparuit, qui non est ab eo reprehensus, & 3. Regum 18. Abdias adoravit Eliam, quia sanctus erat, & Propheta Domini, & simili modo filii prophetarum adoraverunt Elifæum, quia spiritum Eliæ in eum requievissæ intellexerunt 4. Reg. 2. Tertio accedit communis doctrina, & traditio Sanctorum, Cyril. Irenæus, Nazianzen. August. & aliorum, quos in principio hujus sectionis retuli, & plura videri possunt in August. epist. 44. & Damasc. lib. 4. de fid. c. 16. & in concionibus de Sanctis passim hoc docent, & in sequenti sectione, & infra de reliquiis, & imaginibus disputantes, plura Sanctorum testimonia indicabimus. Quarto ratione, quia honor debetur virtuti, teste Aristot. 1. Ethic. cap. 5. & lib. 4. cap. 3. & ideo Christus Joan. 12. iusto promittit; *Honorificabit eum Pater meus*, id est, honore afficiet, vel honorari faciet unde 1. Reg. 2. *Qui honorificavit me, glorificabo eum*, & Psal. 138. *Nimis honorificati sunt amici tui Deus*, ac denique Paul. ad Rom. 2. *Gloria, & honor omni operanti bonum*; ergo Sanctis debetur honor; ergo a nobis exhibendus illis est hujusmodi honor. Probatur hæc ultima consequentia, quia quod mortui sint, & nobiscum non degant, non illos reddit minore honore dignos, cum sint in feliciore, & securiori statu, atque sanctiorem vitam agant, & cum Christo regnent. Et quamvis corporali absint præsentia, tamen spiritu, ac mente, quodammodo præsentia sunt, quatenus, omnia, quæ ad eorum statum pertinent, cognoscunt, & nostrarum rerum curam gerunt, pro nobis orando, & intercedendo. Adde etiam, Philosophos

Hæresis adorationem sanctis ne gantium.

Sancti digni cultu, & adoratione.



agnovisse, viros probos, etiam post mortem esse honore dignos, ut ex Platone, & aliis refert Euseb. lib. 13. de præparat. Evang. c. 6. & 7. Denique possumus loqui cum Sanctis, & ad illos orationes fundere, ut suppono ex 2. 2. q. 83. & attingam infra in disputationibus de Beata Virgine, & satis constat ex usu Litanæ, quem Gregorius tempore cujusdam pestis induxit, ut refert Walfridus Strabo lib. de rebus ecclesiast. cap. 28. & legitur in lib. 1. vitæ ejus cap. 42. quem usum adhuc Ecclesia retinet, & varia Concilia probarunt, ut constat ex Toletano V. & VI. cap. 1. & 2. Brachar. II. cap. 9. & Gerundens. cap. 3. & aliis, cur ergo non cherentur etiam a nobis adorandi, & colendi?

**Objeçtio.** Sed obijciuntur nonnulla Scripturarum exempla. Esther enim 3. Mardochæus noluit adorare Amam, cuius facti rationem reddens c. 13. sic inquit: *Tu nosti, quia non pro superbia, & contumelia, aut gloria cupiditate hoc fecerim, sed timui, ne honorem Dei mei ad hominem transferrem, & ut neminem adorarem excepto Deo meo.* Secundo Apoc. 19. & 22. cum Joannes vellet adorare Angelum, ille prohibuit dicens, *Deum adora.* Tertio Act. 10. cum Cornelius vellet adorare Petrum, ipse similiter vetuit, subjungens; *Surge, & ego ipse homo sum.* Quarto propter hanc causam sancti sæpe negant, creaturam aut sanctos esse adorandos. Unde in VI. Synod. post sess. 18. c. 7. sic dicitur: *Solo Deo creatore suo adorato, invocato Sanctos, ut pro se intercedere apud majestatem divinam dignentur;* & Athan. serm. 3. contra Arianos fol. 8. *Creatura, inquit, creaturam non adorat;* & D. Hieron. tom. 2. epist. 53. ad Riparium contra Vigilantium, inquit: *Nos autem non Angelos, non Archangelos, non Cherubim, non Seraphim, & omne nomen, quod nominatur, & in presenti seculo, & in futuro, colimus & adoramus, ne serviamus creature potius, quam creatori.* Et ad eundem modum loquitur lib. contra Vigilant. *Quis Martyres adoravit? Quis hominem putavit Deum?* Damasc. orat. 1. de imagin. in princ. & lib. 4. de fide cap. 3. ubi omnem rem conditam negat esse adorabilem, & Justin. Mart. Apolog. 2. pro Christianis. aliquantulum a principio, Epiphani. hæres. 79. & August. epist. 44. in fine, & super Psalm. 96. circa illa verba, *Confundantur omnes, qui adorant sculptilia,* & lib. de vera relig. cap. 55. ubi specialiter dicit, neminem esse adorandum religionis causa, nisi solum Deum.

**Responsio**  
ad objec-  
tiones.

Civilis,  
& exte-  
nus ho-  
nor prin-  
cipi ut  
jore natu-  
rali d. bi-  
tus.

Ad primum respondetur, difficultatem illius loci communem esse hæreticis nobiscum, videtur enim illo exemplo Mardochæi probari civilem, & externum honorem, qui a principibus, & regibus exigitur, non posse illis honeste tribui, hunc enim honorem, & non alium exigebat Aman. Certum est autem, ipsis etiam hæreticis fatentibus, hoc esse falsum, & contra rationem naturalem, & contra Scripturam, in qua hujusmodi actio, & honesta judicatur, & adorationis nomine sæpe appellatur: ut Genes. 23. cum Abraham adoravit filios Heth. & 3. Regum 1. Natham Propheta adoravit David. Unde additio quedam ad Glossam ordinariam dicit Mardochæum non religionis causa, sed inimicitiarum, & odii, noluisse adorare Aman. Sed hæc sententia est omnino falsa, & repugnans verbis citatis ipsius Mardochæi, de quibus jam dubitare non licet, præsertim post Concil. Trident. ex cujus definitione sess. 4. constat, partem illam cap. 13. esse sacram Scripturam.

D. Thom. ergo 2. 2. q. 84. art. 1. ad 1. respondet Mardochæum noluisse dare Aman adorationem latriæ, quam esse communem expositionem Hebræorum dicit Lyra ibi, & videtur aperte colligi ex Mardochæi verbis. Non caret tamen difficultate, quoniam Aman non latriæ adorationem, sed solum illum honorem, qui supremis principibus exhiberi solet, postulare videbatur. Et difficultatem augeat, quia ut ex sacro textu constat, non ipse Aman, sed Rex præceperat eum ab omnibus adorari: non est autem verisimile Regem præcepisse, ut major adoratio Aman, quam sibi tribueretur, sibi autem non postulabat divinos honores, neque enim sacra Scriptura hoc refert, nec legimus Mardochæum, vel Esther negasse Regi ulitatem, & communem adorationem: Quin potius in variis illius libri locis contrariū nō obscure significatur.

Mardo-  
chæus  
ad rare  
aman cur  
recusavit.

Cajetan. exponens D. Th. dicit fuisse morem Judæorum, soli Deo flectere utrumque genu, quod ex 3. Reg. 8. colligit, ubi satis obscure in Salomonis adoratione hoc indicatur. Conjectat deinde, hoc adorationis genus fuisse a Mardochæo negatum ipsi Aman, quia cum de hac re

accusaretur, respondit se Judæum esse, ac si diceret ad religionem Judæorum pertinere, talem adorationem homini non tribuere. Denique sub dubio relinquit Cajetan. an pensatis omnibus circumstantiis, quæ tunc occurrebant, prudenter se gesserit Mardochæus. Potuisset enim fortasse in aliena regione connivere, & consuetum morem adorandi principes exterius servare, debitam existimationem, ac intentionem interius retinendo. Quoniam vero Scriptura sacra factum Mardochæi probare videtur, credendum est Mardochæum prudenter egisse, & ne adoratio illa in divini honoris diminutionem, aut in suæ religionis contemptum, vel in aliorum scandalum cederet, merito tempisse.

Ad secundum, August. q. 61. in Genes. dicit talem apparuisse angelum, ut Deus existimari potuerit, seu Christus, & ideo prohibitum fuisse Joannem, ne illi adorationem latriæ tribueret, non ex aliquo errore circa adorationem ipsam, sed circa personam. Idem habet lib. 20. contra Faust. cap. 21. Nec displicet D. Th. 2. 2. q. 84. art. 1. ad 1. verisimilius tamen videtur Joannem nullam falsam existimationem habuisse, neque latriæ adorationem exhibere voluisse. Præsertim cum admonitus c. 19. iterum id contenderit in c. 22. Solum ergo exterius exhibere voluit angelo summam quandam adorationem debita intentione, & existimatione interius servata; Angelus autem eam adorationem admittere recusavit, Joannemque prohibuit, non quia male ageret, sed vel ex quadam urbanitate, vel ex singulari reverentia assumptæ humanitatis, ut dicunt Rupert. lib. 10. in Apocal. Ansel. & Bed. cap. 19. Bonav. in 3. dist. 9. art. 1. q. 15. vel denique, ut indicaret, consultius esse summam adorationem, & submisionem etiam externam summo Deo reservare. Exemplum hujus rei petere possumus ex VIII. Synod. cap. 14. ubi dicitur non debere Episcopos ante genua principum secularium ad eos adorandos procumbere, quamvis cum omni modestia illos debeant honorare.

Angelus  
ab Evan-  
gelista  
Joanne  
adorari  
cur recu-  
savit.

Ad tertium, Hieronymus contra Vigilantium suspicatur, Cornelium tunc temporis in fide non satis instructum, divinum aliquid in Petro suspexisse. Sed verisimilius est, quod Chrys. hom. 23. in Acta dicit, & Cornelium recte fecisse Petrum honorando, & adorando, & Petrum modeste etiā, & humaniter egisse adorationem recusando.

Adora-  
tionis no-  
meo quo-  
modo in  
Scriptura  
usurpari  
solum.

Ad quartum jam supra præcedenti disputatione ostensum est, adorationis nomen de se commune esse, & abstrahere a latriæ, & dulia. Unde fit, in rigore tribui posse honori hominibus exhibito, ut ex usu Scripture satis constat, cujus varia testimonia citavimus, & similia sunt Genes. 33. 43. 1. Reg. 20. & 25. & sæpe alias, ut videre etiam licet in VII. Synod. act. 1. & 2. & 4. ubi varii Patres citantur, & hæc vocatur, *Honoraria adoratio.* Unde August. serm. 15. de Sanctis in fine inquit: *Beatissimum Petrum piscatorem adorant gentium multitudine credentium,* & 10. de Civit. cap. 4. dicit: *Homines esse colendos, & honorandos, & si multum eis addatur, etiam adorandos;* Interdum vero utuntur Patres hac voce simpliciter dicta, ad significandam per antonomasiam supremam adorationem latriæ. Et hoc modo loquuntur in citatis locis, ut manifeste constat, non solum ex aliis locis, sed etiam ex eisdem: ita enim negant esse adorandos Sanctos ut fateantur esse colendos, & invocandos, ad eum modum, quo Paul. ad Timot. 1. dicit: *Soli Deo honor, & gloria,* cum tamen ad Rom. dicat: *Gloria & honor omni operanti bonum.*

## SECTIO II.

*Quæ adoratio, & propter quam causam  
Sanctis tribuenda sit.*

**T**Res divisiones adorationis supra posuimus, scilicet internam, & externam, latriam & dulam, absolutam & respectivam. Quartam vero addere possumus propter hæreticos sect. præced. citatos, distinguentes cultum in religiosum, & politicum. Sed de hac postrema sect. seq. dicemus. De duabus autem primis, nulla occurrit explicanda difficultas, quia certum est Sanctos & interiori, & exteriori cultu honorari posse. Sunt enim spiritus, qui in Deo ipso vident, quæ ad eos pertinent, & ideo spiritualibus mentis actibus coli possunt, sicut & orari, & invocari: nos vero quia corporales sumus, etiam corporis actibus possumus nostrum affectum externum indicare, & ideo externis etiam actibus possumus illos adorare, ut Sanctorum omnium, & totius Ecclesiæ usus

Sancti  
adorari  
quomodo  
possint.



usus satis demonstrat: ut etiam in seq. sect. dicemus, & latius infra de imaginibus, & de reliquiis disputando. Deinde certum etiam est, hanc adorationem, quam Sanctis tribuendam dicimus, non esse illam summam, quæ soli Deo debetur, & latria nominatur. Quod simpliciter est de fide certum, ut satis constat ex dictis disput. præced. & in fine præced. sect. Et ratio est clara, quia excellentia Sanctorum longe inferior est quam divina.

Ut tamen hoc melius intelligatur, oportet de tertia illa divisione nonnihil dicere, simulque explicare, quæ sit proxima ratio, seu excellentia, propter quam Sancti a nobis adorantur, an scilicet sit aliqua excellentia creata, vel potius ipsamet excellentia increata Dei. Et ratio dubitandi est, quia Sancti sæpe hoc posteriori modo hanc Sanctorum adorationem explicare videntur, ut patet ex VII. Synod. act. 4. post med. ubi sic Leontius loquitur: *Sanctos veneramus, ut amicos Dei, & honorem, qui Sanctis impenditur, in Deum recurrit, & qui Martyres colit, Deum ipsum colit.* Quæ verba ab omnibus Patribus Concilii suscipiuntur. Sic Athan. lib. de Virginit. circa finem: *Si homo, inquit, iustus ades tuas intraverit, cum timore, & tremore occurrens illi, adorabis humi ad pedes illius, non enim eum, sed Deum adorabis, qui illum mittit.* Et Basil. orat. in 40. Martyres. *Honor, inquit, quem bonis confervis exhibemus, benevolentia erga communem Dominum significationem de se præbet.* Damasc. lib. 4. c. 16. *Is honor, inquit, qui probis confervis habetur, benevoli erga communem Dominum animi argumentum est; illi sane Dei promptuaria, & pura domicilia extiterunt; & infra: Quid igitur afferri potest, quin animatis Dei templis, & vivis Dei tabernaculis honor sit adhibendus?* Significat ergo adorari Sanctos, ut templa Dei viva, atque adeo Deum esse proximam rationem adorandi illos. Unde Hier. dicta epist. ad Riparium: *Honoremus, inquit, servos, ut eorum honor redundet ad Dominum.* Et Ambr. serm. 6. in fine: *Qui quis honorat Martyres, honorat & Christum.* Ex quibus consequens fieri videtur, hanc Sanctorum adorationem tantum esse respectivam, utpote in extrinseca Dei excellentia fundatam, atque adeo ad eandem religionis virtutem pertinere, posseque latriam appellari. Sicut amor, quo diligitur proximus propter Deum, respectivus dici potest, & ex charitate proficiscitur.

Dicendum nihilominus est, propriam & usitatam adorationem, qua Sancti a nobis adorantur, esse absolutam, in creata, & intrinseca, atque supernaturali excellentia illorum proxime fundatam. Hæc est communis Theologorum sententia, quæ ex D. Th. hic art. 3. ad 3. & art. 5. colligitur, & aliis doctoribus in 3. d. 9. ubi Bonavent. art. 1. q. 5. & ex Adriano P. in epist. ad Constant. & Irenem, ubi inquit, *Sanctos a nobis venerari, & coli, quod servi Dei sint, & apud Deum pro nobis intercedant.* Unde concludit: *Decet eos honor, & veneratio propter iustitiam eorum;* quæ epistola habetur in VII. Synod. act. 2. sic etiam Euseb. lib. 10. de præpar. c. 7. ait nos venerari Sanctos, *Ut vera pietatis milites, Deique amicos,* quibus verbis intrinseca, & creata sanctitas ipsorum Sanctorum indicatur, & ad eundem modum loquuntur Damasc. Theodoret. August. & alii Sancti supra citati. Ratione vero facile idem probatur, quia gratia, & gloria Sanctorum creatum quid est, ipsis Sanctis intrinsece inhærens, ipsosque in excellenti gradu perfectionis, & sanctitatis constituens: ergo ratione hujus excellentiæ sunt Sancti digni propria adoratione, quæ absoluta dicitur, quia non in relatione ad aliquid extrinsecum, sed in propria, & interna perfectione fundatur, ut explicatum est. Et hæc est adoratio, quam nomine dulci significari diximus, distinguere a latria, quia in excellentia inferioris perfectionis proxime fundatur.

Ex quo intelligitur, quæ sit mens sanctorum Patrum, quos in ratione dubitandi adduxi, nam quia hæc excellentia Sanctorum nihil aliud est, quam participatio quædam divinæ naturæ, quodam modo ad divinum ordinem pertinens, atque ad Dei gloriam ex natura sua tendens; ideo honor, qui beatis datur propter hanc sanctitatem, totus dicitur in Deum referri: non quia ipsa excellentia increata Dei sit proxima ratio, quæ ad hanc adorationem movet: sed quia in eam tandem terminatur, & refunditur, ad eum modum, quo Christus Dominus dixit Matth. 10. *Qui recipit vos, me recipit,* hoc enim exemplo Athanas. & Hieronym. utuntur.

Suarez Tom. XVI.

Addere vero ulterius possumus, si Sancti præcise considerentur, ut templa, in quibus singulari modo Deus habitat, seu prout sunt ad imaginem Dei creati, & per gratiam reformati, & quasi ad vivum depicti, hoc quidem modo posse adorari adoratione respectiva in Dei excellentia proxime fundata: ita ut sicut ratio eligendi medium est finis, ita ratio adorandi templum vivum Dei, sit Deus. De quo modo adorationis eodem modo loquendum erit, quo de adoratione reliquiarum, vel imaginum, quam inferius explicabimus. Recte tamen advertunt D. Thom. & Bonavent. quamvis hic modus adorationis possibilis sit, regulariter tamen non esse usurpandum, tum ad vitandum periculum erroris; tum etiam, quia cum Sancti sint per se adorabiles, proprius eorum honor in eorum virtute, & sanctitate fundari debet: cum enim aliquid propter extrinsecam rationem adoratur, honor magis pertinet ad personam, propter quam tribuitur, quam ad rem, in quam terminatur, ut sæpius in sequentibus dicemus.

### SECTIO III.

Utrum cultus Sanctorum dici possit ad religionem pertinere.

Hæc quaestio proponitur propter hæreticos, qui nullum honorem, vel cultum agnoscunt, nisi vel divinum, qui ad latriam pertinet, vel mere humanum, & politicum. Quoniam vero hic potest esse dissensio, vel in re Theologica, vel in Speculativa, & Metaphysica, vel in modo loquendi, omnia distincte tradenda sunt.

Primo certum sit, adorationem hanc, quæ Sanctis datur propter excellentiam supernaturalem, esse perfectiorem, & distinctam in specie ab adoratione, seu honore civili, qui hominibus propter dignitatem, vel potestatem humanam dari solet. Patet, quia virtutes, & earum actus ex objectis distinguuntur; sed excellentia est quasi formale objectum adorationis: sicut ergo excellentia Sanctorum cum Christo regnantium altioris ordinis est, quam omnis humana dignitas, vel potentia, ita & adoratio illis debita est perfectior, & specie distincta: non potest ergo hæc adoratio dici civilis, vel politica, neque omnino humana in dicto sensu, sed quasi divina per participationem. Nam sicut Sancti dicuntur Dii per participationem, ita & honor illis debitus potest eandem denominationem suscipere.

Secundo certum sit, hunc cultum Sanctorum valde conjunctum esse cum cultu divino, & rebus sacris, & ad religionem & cultum Dei spectantibus perfici. Probatum aperte ex traditione Ecclesiæ, quæ Sanctos colere consuevit, primo dicando Deo in eorum memoriam, & honorem, dies sacros, qui licet primario ad cultum Dei destinantur, tamen in honorem Sanctorum redundant. Ita docet Tertul. lib. de corona militis in principio, & Nazianz. orat. 18. quæ est de S. Cypriano inter multa alia, quæ dicit de honore Sanctorum, annuis honoribus festum illi Sancto celebrari solitum refert. Et orat. 6. coram Gregor. Nysseno multa habet similia. Cyprianus epist. 34. alias lib. 4. epist. 5. *Quoties, inquit, dies Martyrum, & passiones anniversaria commemoratione celebramus, &c.* Et Clemens lib. 4. constit. cap. 39. ejusdem consuetudinis meminit, quam etiam indicavit Concil. Laodic. dicens, *Memorias Martyrum non celebrari in quadagesima,* & habetur capitulo Non licet 33. q. 4. & Concil. Toletan. 3. cap. 23. præcipitur, ut festa Sanctorum religiosi operibus celebrentur, habetur capit. Irreligiosa de consecrat. distin. 3. & eorundem festorum sit mentio in cap. Conquestus, extra de feriis.

Secundo honorat Sanctos Ecclesia templis Deo dicatis, quamquam enim hæc primario ad Deum referantur, cui in illis sacrificium offertur, & ut sic templa, vel altaria dicantur, secundo vero in memoriam aliquorum Sanctorum, vel ad eorum reliquias honorifice servandas instituta sunt, & ut sic vocari solent, *Basilica*, seu *Memoriae martyrum*; & Chrysost. homil. 28. ad populum, *Domos regias, oratorias ades, & Martyrum monumenta*, appellat. Unde Damasc. lib. 4. cap. 16. *An non, inquit, honorandi sunt, qui totius humani generis patronos se prostentur? Honorandi quidem, & ita certe, ut in eorum nomine templa Deo extruamus, dona offeramus, earum memorias colamus, atque in eis spiritualiter oblectemur.* Et hanc fuisse perpetuam,

Sancti quomodo adoratio ne respectiva possint adorari.

Adoratio Sanctis exhibita non est civilis, sed quodammodo divina.

Sanctorum cultus est divinus cultus valde conjunctus.

Consuetudo Basilicas, & templi dicandi in Sanctorum memoriis.

Adoratio sanctorum absoluta, & in propria eorum excellentia fundata.

Honor sanctis exhibitus curia Deum refertur.



& Apostolicam traditionem, constat ex Epiph. hær. 69. Ambros. lib. 1. epist. 5. August. lib. 1. de Civit. cap. 1. Gregor. 2. dialog. cap. 8. & lib. 3. cap. 14. & Leone I. ferm. 1. de B. Petro, & Paulo, ac denique ex VII. Synod. act. 6. tom. 1. Quam consuetudinem auctam, & illustratam potissimum fuisse a temporibus Sylvestri, & Constantini vulgare est, tum ex iis, quæ in 1. tom. Concil. de Sylvestro, & Constantino referuntur, tum ex omnibus Ecclesiasticis historiis, tum etiam ex antiquis monumentis, quæ oculis cernuntur, quæ tam multa sunt, totque miraculis confirmata, ut ex errore aliquo, vel falsa traditione, opinionem, quæ de illis habetur, profectam esse incredibile sit. Unde Concil. Carthag. V. cap. 14. modum erigendi hæc Ecclesias, & Sanctorum titulos instituendi præscribit. Concilium item Cabilon. cap. ult. quanta reverentia hæc loca sacra tractanda sint, docet. Illud denique, quod Nazianz. orat. 3. quæ est prima contra Julian. memoriæ prodidit, animadversione dignum est, quod ut jucundius fiat, illius verbis referendum censui, habens enim sermonem de tempore, quo Gallus & Julianus, diversis quidem studiis, eadem tamen religionis signa præbebant, sic inquit. *Jam sumptuosissimis quoque Martyrum monumentis, & votivorum donorum munificentis, omnibusque aliis rebus, quibus divinus timor insignitur, sapientie studium, Christi que amorem declarabant: aliter quidem vere, & serio pietatem profitens, aliter autem tempus redimens, ac sub mansuetudinis specie, atque obtentu, morum pravitatem occultans. Quod quidem ex eo conjicere licebit, neque enim miraculum, quod tunc accidit, silentio præterire queam, utpote memoria in primis dignum, atque ejusmodi, ut impiorum multis documento esse possit. Martyribus (ut diximus) ambo laborabant, munificentiaque, & liberalitate præclare inter se contendebant, tum multarum manuum opera, tum multis impensis ad eam sacram extrucentes. Verum, quoniam non pari voluntate, animiq; instituto in hoc opus incumbabant, idcirco, neque in eundem finem, labor utriusque progrediebatur. Etenim alterius hoc est fratris natu majoris, opus perficiebatur, atque ex ratione procedebat, Deo videlicet munus illud libenter admittente, velut Abelis sacrificium, recte & oblatum, & divinum: atque hæc oblatio veluti quedam primogeniti consecratio erat. Alterius autem munus, non secus ac Cain sacrificium, Deus martyrum repudiabat. Itaque ille quidem laborabat, sed terra, quod elaboratum fuerat, excutiebatur. Ille vehementius adhuc obnitebatur: hæc hominis ægra pietate præditi fundamenta capere detrectabat, tanquam terremotum eum, quem ipse scelus allaturum erat clamans, ac per impiissimi hominis dedecus, martyres honore afficiens. Tertio coluntur Sancti ab Ecclesia jejuniis, vigiliis, peregrinationibus, & aliis id genus actionibus, ut late Hier. opus. contra Vigilant. & Leo P. conc. de feriis 4. temporū, & plura congerit Alanus dial. 3. a princ. & c. 21. & alia dicemus agentes de reliquiis Sanctorum.*

Tertio hinc (quod ad modum loquendi spectat) merito hic cultus Sanctorum sacer, & religiosus dicitur: ut enim eleganter dicit Damasc. cit. loc. *Quibus rebus Deus colitur, eisdem servi ejus oblectantur, quapropter Psalmis, Hymnis, & canticis spiritualibus Sanctos colimus:* quia ergo hic cultus in religiosis actionibus, & ad pietatem pertinentibus positus est, merito religiosus dicitur. Secundo quia (ut ex sanctis Patribus præcedenti sect. citatis colligitur) hic cultus Sanctorum ita est cum divino conjunctus, ut ab illo oriatur, & imperetur, a quo propterea religiosus nominari potest. Tertio, quia ad spirituale bonum animæ valde confert, tum per se, quia devotione excitat, & auget in nobis circa res sacras: tum etiam beneficium divina per Sanctorum intercessionem nobis impetrando. Propter quod dixit Greg. Nazianz. in quodam carmine de virtute: *Meminisse martyrum solum (ut reor) affert salutem.* Quarto denique, quia hic cultus in pura, & perfecta sanctitate fundatur: sanctitas vero religioni proxima est: potest ergo hic cultus dici religiosus saltem per quandam participationem, ut supra dicebamus.

At enim dicit aliquis: Adoratio Sanctorum beatorum ejusdem rationis est cum adoratione, quæ exhibetur homini iusto, & sancto inter nos viventi, ut aperte docet Adrianus P. epist. supra citata, dicens. *Qualis est hic adorationis honor Sanctorum? Profecto non alius, quam is, quo nos invicem proficimur salutantes alterutrum per adorationem, & directionem;* unde Hier. in vita Paulæ refert,

illam, cum Sanctos Eremitas inviseret, solitam esse ad eorum pedes devolvī, ac si in singulis Christum adoraret. Et ratione ostendi potest, quia gratia, & sanctitas, quæ potissimum est hujus adorationis fundamentum, ejusdem rationis est in utrisque: ergo & adoratio ejusdem rationis erit: sola enim differentia in statu beatitudinis non videtur ad distinguendas adorationes sufficiens, quia præcipua ratio hujus adorationis est participatio divinæ naturæ, quæ per gratiam fit, quæ ejusdem rationis est in viatore, & beato; ergo & honor, qui illis datur, ejusdem est rationis: sed honor qui datur sanctis viris, eo quod sancti sunt, non videtur dici posse cultus religiosus, neque in his rebus consistere, quibus nos Sanctos coli diximus: ergo neque Sanctorum cultus religiosus censendus erit.

Respondetur verum esse hæc adorationes ad eandem virtutem pertinere, ut rationes factæ probant: dico tamen etiam posse dici religiosum honorem eum, qui vivo homini tribuitur solum intuitu sanctitatis, & supernaturalium donorum, quia ex vera fide, & religione proficiscitur, sicut quando honoramus Pontificem, quia est Vicarius Christi, vel Prophetam, aut Evangelicum prædicatorem, quia verba Dei loquitur, ex religione, & fide illum veneramur: unde Athan. supra citatus in lib. de Virginit. de sanctis, qui inter nos vivunt, loquitur, cum dicit: *Si homo justus ades tuas intraverit, adorabis humi ad pedes illius: Deum enim, qui illum mittit, adorabis.* Et August. 20. contra Faust. c. 21. sic inquit: *Colimus martyres eo cultu dilectionis, & societatis, quo & in hac vita coluntur sancti homines Dei, quorum cor ad talem pro Evangelica veritate passionem paratum esse sentimus.* Addit vero subinde: *Sed illos tanto devotius, quanto securius. post incerta omnia superata, quanto etiam fidentiori laude predicamus, tam in vita feliciore viatores, quam in ista adhuc usque pugnantes?* Quibus posterioribus verbis optime indicavit Augu. quamvis species hujus adorationis eadem sit: tamen sicut status beatorum perfectior est tum in charitate, quia sunt impeccabiles, & omnino securi; tum in cognitione, quia Deum clare, ac manifeste intuentur; tum in potestate, quia cum Christo regnant; tum in gradu honoris, quia cum ipso sedent in throno ejus, ut dicitur Apocal. 3. ita perfectioribus actibus, & rebus coli debere. Atque hinc fit, ut aliis signis, & certioribus testimoniis utamur ad honorandos Sanctos, qui jam vitam cum morte commutarunt, quæ eos qui adhuc in humanis degunt: quin potius, etiam inter ipsos mortuos, longe magnum discrimen collocamus, eos enim qui ab Ecclesia canonizati sunt, publico cultu, & solenni ritu colimus, & certâ, ac infallibilem existimationem de eorum sanctitate habemus: alios vero non canonizatos non licet publico cultu, qui nomine totius Ecclesiæ fit, venerari, id enim cap. 1. & 2. de feriis prohibuit: est si tamen aliquo modo certam, quamvis humanam fidem, de eorum felicitate habeamus, eos privatim venerari possumus, & orare.

Quarto in dubium verti potest, an hic cultus possit dici religiosus, quia ab eadem virtute religionis, qua Deum colimus, elicitus sit: quod pendet ex dubio metaphysico, an virtus, qua colimus Sanctos, sit distinctus habitus a religione. Et ratio dubitandi esse potest, quia habitus, quo diligimus Deum & Sanctos, est unus & idem, scilicet charitas, quæ una est, quamvis diligat Deum, quia est bonus per essentiam, & Sanctos, quia sunt Dii per participationem; ergo idem de religione censendum erit. Responderi potest ex D. Th. 2. 2. q. 103. a. 3. ad 2. negando consequentiâ, quia proxima, & tota ratio diligendi proximum est ipse Deus, & bonitas ejus: *Non enim, inquit, per charitatem diligimus in proximo nisi Deum, & ideo eadem charitas est, qua diligitur Deus, & proximus: at vero, cum sit alia ratio serviendi Deo, & homini, aut honorandi utrumque, non est eadem virtus latvia, & dulia.* Sed cõtra, quia sicut alicujus amoris proximi proxima ratio esse potest divina bonitas: ita etiam alicujus adorationis Sanctorum proxima ratio esse potest divina excellentia, ut supra ostensam est, ubi etiam diximus hujusmodi actum ab eadem virtute, qua Deus colitur, manare, quamvis frequentius non exerceatur circa res, quæ per se sunt adorabiles. Rursus, sicut adorantur Sancti alio actu propter intrinsecam sanctitatem supernaturalem creatam, ita propter eandem possunt supernaturaliter amari, & in cõparatione istorum actuum tota difficultas consistit: nam etiâ hic actus amoris ab eadem charitate elicatur, qua Deus super omnia diligitur,



tur; ergo eadem ratione ille actus adorationis a virtute religionis procedet. Et confirmatur, quia virtus inclinans ad colendam principalem excellentiam alicujus ordinis, consequenter inclinatur ad omnes participationes ejusdem ordinis, quia hæc ita sunt inter se conjuncta, ut vix possint seungi. Unde fit, ut fere eisdem actibus externis primario colatur Deus, & secundario Sancti, ut in superioribus fufe satis explicatum est.

Circa hanc difficultatem Marsil. in 3. q. 8. art. 1. sentit, habitum latriæ, & dulciæ esse unum, & eundem. Quæ sententia plane probabilis est, eique fidem faciunt rationes factæ: nam quas Marsilius adducit, parum aut nihil concludunt, quas ea de causa omittendas duxi, tum etiam, ne plus iusto in re hac immorarer. Verior tamen est communior sententia, quæ habitus istarum virtutum inter se distinguit, quam tradit aperte D. Thom. 2. 2. q. 81. ubi solum Deum constituit religionis objectum, & q. 102. & 103. ponit alias virtutes ad homines colendos, & differentiam semper constituit inter adorationem, & amorem: idem docet Bonavent. in 3. dist. 9. art. 2. q. 4. ubi cæteri doctores, & fere recentiores Theologi, quid de hac materia scripserunt, rem hanc ut certam, atque exploratam supponunt. Ratio vero est, quia adoratio per se primo tendit ad excellentiam ut sic, quapropter ubi tanta est diversitas excellentiæ, quanta est inter Deum, & creaturam, adorationes, & virtutes, quæ sunt earum principia, diversas esse necesse est. Quæ ratio in solutione propositæ difficultatis magis explicabitur.

Ad rationem ergo dubitandi supra positam primo negari potest, dilectionis actum, quo amatur proximus propter virtutem, vel sanctitatem creatam, quæ in ipso inhaeret, etiam si supernaturalis sit, a propria virtute charitatis elici, sed a virtute infusa amicitiae humanæ, quæ non est virtus theologica, sed moralis. Cujus solutionis fundamentum probabile quidem est, sed non potest hoc loco satis examinari, ut res postulare videbatur, neque oportet, ne in messem alienam manum mittamus: id vero sine hac sufficienti discussione affirmari, aut approbari nequaquam judico expedire, præsertim cum D. Th. qui in tribus locis 2. 2. hanc difficultatem tetigit, differentiam inter amorem, & adorationem collocare conatus sit. Primum locum jam attigimus. Secundus est in q. 25. art. 1. ad 2. ubi sic inquit. *Amor respicit bonum in communi, honor vero proprium bonum honorati, defertur enim alicui in testimonium propriæ virtutis; & ideo diversa quantitas bonitatis diversorum non causat diversitatem specificam in amore, dum modo referantur ad aliquod unum bonum commune: sed honor diversificatur secundum propria bona singulorum.* Tertius locus est in q. 81. art. 4. ad 3. ubi hoc magis explicans dicit: *Objectum amoris est bonum: objectum autem honoris, vel reverentiæ est aliquid excellens: bonitas autem Dei communicatur creature, non autem excellentia bonitatis ejus. Et ideo charitas, qua diligitur Deus, non est virtus distincta a charitate, qua diligitur proximus. Religio autem, qua honoratur Deus, distinguitur a virtutibus, quibus honoratur proximus.* In quibus solutionibus illud semper manet obscurum, quia servata eadem proportionem, eadem ratio diversitatis, vel unitatis apparet in utraque virtute, quia sicut amor in communi tendit in bonum in communi, ita honor in communi refertur ad excellentiam in communi: & sicut talis honor, scilicet latria, respicit talem excellentiam, nimirum increatam, ita talis amor, videlicet super omnia, respicit talem bonitatem per essentiam. Rursus sicut communicatur homini participatio divinæ bonitatis: ita etiam communicatur participatio divinæ excellentiæ, & sicut non communicatur creaturæ divinæ excellentia, prout in se est: ita nec communicatur divina bonitas per essentiam, & ideo sicut non potest creatura latria coli, ita nec super omnia amari. In quo ergo consistit differentia illorum inter se?

Fateor rem esse obscuram, & difficilem. Duo tamen dici posse videtur, in quibus & res ipsa, & mens D. Tho. fortasse consistit. Alterum sumitur ex communi ratione amoris, & adorationis: amor enim respicit objectum sub ratione quasi absoluta: adoratio vero sub respectiva ratione per comparisonem ad honorantem, id est, amor tendit in bonitatem objecti secundum se: adoratio vero in excellentiam alterius, quatenus aliquo modo excedit ipsum adorantem. Atque hinc fit, ut licet Deus habet

Suarez Tom. XVI.

singularem respectum superioris, incommunicabilem creaturæ: ita religio illum specialiter respiciat, non prout potest cum creatura convenienter aliquam habere, sed prout singulariter illam excedit: at vero amor non respicit singulari modo hunc excessum, sed bonitatem, & communicationem ejus. Cujus signum est, quod amor non tantum est ad alium, sed ad seipsum, unde Deus ad se charitatem habet, cujus participatio est charitas nostra, non tamen habet religionem, qua se veneretur. Hujus rei ratio est, quia potest suam bonitatem respicere sub ratione absoluta, non tamen sub ratione respectiva superioris, seu excellentis.

Ex hinc oritur altera differentia (quam etiam colligo ex D. Thom. 2. 2. q. 102. art. 2. ad 3.) quod religio per se est ad alterum, & ideo per se respicit jus alterius, & rationem debiti: jus autem divinum, propter quod a nobis colendus est, & adorandus, excellentius est, & altioris ordinis, quam omne jus creaturæ, quia in excellentia infinita, & supremo quodam dominio incommunicabili creaturæ fundatur, & ideo virtus, quæ hoc debitum Deo persolvit, singularis est, & distincta ab omnibus virtutibus, quæ jura seu debita creaturarum respiciunt. Secus vero est in amore, qui nec per se ad alterum tendit, neque in illo ratio debiti consideratur. Cujus signum etiam est, quia propter hanc causam, licet eadem charitate diligamus nos ipsos, parentes, & alios proximos; tamen in ordine ad honorem exhibendum diversæ sunt virtutes, pietatis ad parentes, observantiæ ad principes, dulciæ strictæ sumptæ ad dominos, ad seipsum autem nulla est virtus exhibens honorem.

Ex his ergo satis constat, cur distinguendus sit habitus dulciæ Sanctorum ab habitu religionis seu latriæ, & cur hæc distinctio clarior, & certior in adoratione sit, quam in amore. Unde tamen concluditur, hunc cultum Sanctorum non dici religiosum, quod a religione elicitus sit, sed propter alias causas supra enumeratas.

## DISPUTATIO LIII.

In duas sectiones distributa.

*De adoratione Christo, ejusque humanitati debita.*

POSTquam de adoratione Dei, & Sanctorum hominum sermonem instituimus, facile erit adorationem Christo Domino debitam explicare. Possumus autem loqui vel de Christo, vel de humanitate ejus. Et de Christo quidem, vel simpliciter, vel in quantum est homo. De his igitur sigillatim dicendum est. Explicabimus autem simul, & unitatem, & qualitatem, seu speciem adorationis, hæc enim duo a D. Thom. in his articulis tractata sunt.

## SECTIO I.

*An Christus Deus homo adorandus sit perfecta adoratione latriæ.*

IN hac sectione breviter jacenda sunt fidei fundamenta, ut postea possimus ea, quæ nonnullam dubitationem habent, inquirere.

Primo ergo certum est hunc hominem Christum in divina, & humana natura subsistentem, adorandum esse illa perfectissima adoratione latriæ, qua tota Trinitas, & singulæ personæ divinæ adorantur. Hoc esse de fide constat ex Scripturis, Conciliis, & Patribus. Christus enim de se loquens dicit Joan. 5. *Ut omnes honorificent Filium, sicut honorificant Patrem.* Et Paul. ad Rom. 14. de Christo exponit illud Isai. 45. *Mihi curvabitur omne genu,* quod de adoratione latriæ soli Deo debita dictum esse constat. Et eodem sensu ad Philip. 2. dicit: *In nomine Jesu omne genu flectatur.* Et Thomas adorans Christum Joan. 20. dixit: *Dominus meus, & Deus meus.* Et eadem fide cæcus a Christo illuminatus, procidens adoravit eum, Joan. 9. ut ponderavit Cyrill. Alexand. lib. de recta fide ad Theodof. circa finem, adjungens illud ad Hebr. 1. *Et cum iterum introducit Primogenitum in orbem terra dicit, Et adorent eum omnes Angeli ejus:* & de eodem cultus genere intelligunt Patres adorationem a Magis Christo exhibitam, Matth. 2. ut suis mysticis muneribus ipsi satis professi sunt. Denique Apoc. 5. & 22. hoc modo ado-



rant Sancti omnes agnum occisum, atque illi, & sedenti in throno simul cantatur ab omnibus, *Benedictio, & honor, & potestas, in secula seculorum*. Definatur denique hæc veritas in Conc. Ephes. canon. 8. & in epistola Conc. Alexand. ibi recepta, & in V. Synod. collat. 8. canon. 9. & VII. Synod. aët. 6. tom. 5. versus finem, ubi ex Athanasio in epist. ad Eupfichium, hæc verba referuntur: *Caro, postquam facta fuit Regis tegumentum, cum ipso Rege ejusdem sit dignitatis, quamquam natura non fuerit talis*. Et alia similia referuntur in edicto Justiniani Imperatoris ad Joannem Papam Secundum. Et in sequentibus plura afferemus. Ratione probatur, quia Verbum divinum, seu Christus in quantum Deus hac adoratione colendus est, ut supra ostendimus, quia est verus Deus, & æqualis Patri. Unde August. lib. 1. de Trinit. c. 6. Athanasius, & alii Patres scribentes contra Arianos, ex hac adoratione, quam ex Scripturis constat Filio Dei deberi, quasi a signo, seu posteriori concludunt, ipsum esse verum Deum: sed Verbum assumendo carnem non se sua dignitate privavit, ergo etiam Verbo in carnato, seu Christo homini Deo, eadem adoratio debetur, sicut Rex, etiam si vilioribus vestibus indutus sit, honore Regio tractandus est.

Ex hoc principio sequitur aliud etiam de fide certum, scilicet hunc hominem Christum una, & eadem adoratione latriæ adorari, qua adoratur Deus. Potest autem hæc assertio duplicem habere sensum; prior est, hanc unam adorationem per communicationem saltem idiomatum communem esse Deo, & homini, & hic sensus est certus, & clarus, ac in primis definitus contra Nestorium in citatis locis. Cum enim Nestorius secundum subsistentiam distingueret Christum a Verbo, consequenter negabat, Christum adorari eadem adoratione qua Verbum, sed quodammodo coadorari propter accidentariam unionem. Concilia vero negant coadorari, & definiunt per se, ac vere adorari, quia sicut non distinguitur personaliter a Verbo, ita nec potest adoratione seungi. Ex hoc vero sensu solum habetur, hunc hominem quoad suppositum ipsum adorari hac adoratione, non vero, quod hæc adoratio aliquo modo comprehendat humanitatem ipsam, ut, si Rex sit peccator, qui adorat Regem, adorat peccatorem quoad suppositum ipsum, adoratio tamen non extenditur ullo modo, nec redundat in ipsum peccatum. Posterior ergo sensus hujus assertionis esse potest, hac una adoratione latriæ ita adorari Deum hominem, ut in ipsam etiam humanitatem redundet adoratio. Et hic sensus difficilior est, quia obscurum explicatu est, quomodo humanitas, cum etiam post unionem sit creatura, adorari ullo modo possit eadem adoratione perfectæ latriæ, qua Verbum adoratur. Sed de hac difficultate commodius, ac fulius dicemus sectione sequenti.

### SECTIO II.

*Utrum Christus in quantum homo adoretur adoratione latriæ, ita ut eadem adoratione colatur humanitas.*

**R**atio dubitandi, quia humanitas Christi non potest adorari latria, sicut divinitas; ergo Christus in quantum homo non adoratur latria. Antecedens patet: quia licet humanitas sit unita Verbo, nunquam tamen est æqualis in excellentia, & dignitate ipsi divinx naturæ; ergo neque æquali adoratione colenda est. Et confirmatur primo, quia Christus ut homo, non est Deus, nec finis ultimus, nec supremum bonum nostrum, & ideo ut sic non est diligendus super omnia; ergo eadem ratione, neque est latria adorandus: est enim eadem ratio, nam latriæ actus, verbi gratia, sacrificium, procedit ex hac existimatione, quod is, cui offertur, est finis ultimus, & primum principium rerum omnium, loquor enim de latria perfectæ, & absoluta, non de respectiva, & imperfecta. Confirmatur secundo, & explicatur. Angelus enim verbi gratia, ante Incarnationem adorabat Verbum latria, & nunc etiam adoratur, interrogo igitur, an eodem omnino actu nunc adoratur, quo antea, nec ne? nam si est idem; ergo illa adoratio non communicatur carni, quia actus finitus, si in se non est mutatus, neque auctus, non potest uno tempore plura objecta attingere, quam alio. Si autem actus non est omnino idem, oportet, ut vel sit actus distinctus, vel ut aliquod augmentum, seu additio facta sit tali actui: quidquid vero illud sit, quod additum

est, non potest esse ejusdem perfectionis in ratione latriæ, quia (ut dictum est) non procedit ex tam perfecta existimatione humanitatis assumptæ, quanta est ipsiusmer divinitatis, quia humanitas unita inferior est divinitate; ergo proprie, & formaliter loquendo, Christus ut homo non adoratur perfectæ latria.

Ut respondeamus huic quæstioni, oportet distinguere duplicem sensum ejus: nam illa particula, *in quantum*, potest & reduplicative, & specificative sumi; & priori modo inquiritur causa, & ratio hujus adorationis latriæ, an scilicet possit esse ipsa humanitas includendo in humanitate dona supernaturalia, & gratias in illa existentes: nam de sola, ac nuda natura præcise sumpta, per se notum est non posse esse rationem hujus adorationis. Posteriori autem modo inquiritur tantum, an humanitas sit saltem res adorata prædicta adoratione. Unde distinguere etiam oportet rem adoratam, quæ dici potest materia, circa quam versatur adoratio, & rationem adorandi, quæ (ut diximus) est aliqua excellentia interdum intrinseca, interdum vero extrinseca, ut in adoratione respectiva, quæ fit per habitudinem ad aliud. Inter quos modos est differentia, quia quando excellentia est intrinseca, & veluti pars rei adoratæ, simul esse potest ratio adorandi, & res adorata: recte enim fieri potest, ut idem sit, quod est, & quo est, præsertim in simplicibus: at vero quando ratio est extrinseca, non oportet, ut semper sit proprie adorationis materia. Rursus in ipsa adorationis materia oportet distinguere id, quod per se primo adoratur, & id, quod in alio coadoratur. Primo enim, ac per se adoratur persona, ut D. Th. dixit, quod verum est de propria, & absoluta adoratione, non vero de omni respectiva, per quam interdum materia adorationis est tantum imago, vel reliquiæ, vel aliquid hujusmodi, & non persona. Ut ergo generaliter loquamur, dici potest primaria materia adorationis illud, ad quod per se primo dirigitur, seu in quo primario sistit intentio adorantis. Coadorantur vero, quæ illi rei, seu personæ conjuncta sunt, ut partes in toto: quæ vero nullo ex his modis adorationem terminant, non possunt dici adorari, nisi omnino abusive, ut art. 3. patebit. Unde etiam intelligitur, aliud esse adorari hoc propter illud, aliud adorari hoc in illo. Primum enim rationem formalem indicat, secundum vero ad materiam pertinet, quatenus unum in alio adoratur, ut partes in toto, purpure in Imperatore: quod etiam variis modis accidit, nam ordine intentionis per se adoratur totum vel persona, & partes, seu vestes in illa, vel cum illa: ordine tamen executionis interdum adoratur totum in parte, seu veste, ut cum adoro personam osculando manum, aut vestimenti fimbriam. Quæ varietas non distinguit species adorationis, quia hujusmodi species ex primario motivo, seu intentione sumenda est, sicuti supra diximus.

Secundo oportet notare varios loquendi modos Theologorum, nam fere omnes conveniunt, affirmando, Christum ut hominem specificative loquendo, & humanitatem ejus aliquo modo adorari latria, hæc est enim mens D. Tho. hic, hoc enim sensu dixit art. 1. *Utramque Christi naturam ex parte personæ una adoratione coli*, sentiens, illam adorationem complecti aliquo modo utramque naturam, propter unionem in eadem persona: unde art. 2. concludit, carnem unitam Verbo, illa adoratione latriæ, qua Verbum incarnatum colitur, adorari; & in eadem sententia est Magister in 3. dist. 9. & ibi Bonavent. art. 1. q. 1. Richard. art. 2. q. 1. Scot. q. unic. §. De tertio, Palud. q. 1. circa finem. Durandus, Gabriel, & reliqui, Marfilus q. 8. art. 2. Alenf. 3. p. q. 30. memb. 2. Waldens. qui hoc putat ad fidei dogmata pertinere, to. 3. de sacrament. cap. 1. 19. In modo autem explicandi hanc sententiam est nonnulla diversitas. Durandus enim supra q. 2. dicit, humanitatem Christi solum per accedens adorari latria, qui fortasse in re non multum differt a reliquis: modus tamen loquendi singularis est, & vitandus. Gabriel vero supra, & lect. 49. & 50. in canonem, distinguit duplicem latriam: aliam simpliciter, seu absolutam, quam negat communicari ullo modo humanitati: aliam vero secundum quid, & respectivam, quam concedit ad humanitatem terminari. Quia vero hæc sententia videtur dictis Sanctorum contraria, ideo alii eandem fere rem aliis verbis explicant. Distinguentes duplicem latriam, superiorem, quam negant tribuendam esse humanitati, & inferiorem, qua adoratur hic homo Christus



propter gratiam unionis, & consequenter adoratur etiam hæc humanitas propter divinitatem illi unitam. Hanc vero duplicem latriam, quamquam specie differre dicant, nihilominus asserunt simpliciter, & univoce in ratione latriæ convenire, nam utraque manat ab eadem virtute religionis, & utraque in excellentia increata fundatur, licet diverso modo: altera enim respicit excellentiam divinam secundum se; altera ut conjunctam humanitati, illamque sanctificantem. Quod satis quidem est, ut una sit alia perfectior, non vero, at aliqua earum improprie tantum, vel analogice sit latria. Quocirca, quando Concilia, & Sancti dicunt humanitatem adorari una latria cum Verbo, intelligendi sunt juxta sententiam hanc, non de omni, sed de aliqua latria, neque de summa, sed de aliqua minus perfecta, quamvis vera, & propria. Hæc sententia est fortasse probabilis, tamen (ut existimo) proprio & vero sensui Conciliorum, & Sanctorum non satisfacit.

Dico ergo primo, eadem suprema adoratione, qua adoratur Verbum incarnatum, ita etiam adoratur hic homo Christus, ut simul coadoretur ejus humanitas. Et hoc sensu dici potest illa adoratione adorari Christus etiam ut homo specificative. Hanc existimo esse mentem D. Thom. hic, & sanctorum Patrum, qui ex unione substantiali, qua caro est unita Verbo ad componendam unam personam, effectum esse dicunt, ut eadem adoratione, qua adoratur persona, coadoretur caro ejus, unde aperte videntur loqui de perfecta latria, & de adoratione, quæ in humanitatem aliquo modo redundat. Sic Damascenus lib. 3. c. 8. & lib. 4. c. 3. dicit, carnem per se esse inadorabilem, ut Verbo autem conjunctam, simul eadem adoratione coli: *Non enim, inquit, carnem nudam adoramus, sed carnem Dei, id est, incarnatum Verbum.* Idem repetit oratione prima de imaginibus, in principio; & rationem reddit, quia caro idem effecta est cum Verbo, quantum scilicet ad personam attinet. Hinc Chrysost. hom. 5. super epist. ad Hebræos: *Re vera, inquit, magnum, & admirabile, & stupore plenum est, carnem nostram sursum sedere, & adorari ab Angelis, & Archangelis:* & hom. 3. de Christo secundum carnem exponit verba illa: *Et adorent cum omnibus Angelis ejus, quæ ab omnibus de perfecta latria intelliguntur.* Idem colligitur ex Ambrosio lib. 3. de Spiritu S. c. 19. versus finem, ubi adducit illa verba ad Philip. 2. *Dedit illi nomen, quod est super omne nomen, ut in nomine Jesu omne genuflectatur;* nomen enim Jesus humanitatem formaliter significat. Latius vero hoc docet lib. 2. de Spiritu S. c. 12. lib. de Incarn. Dom. sacram. cap. 7. August. ser. 58. de Verbis Dom. cum dixisset, Si Filius non esset natura Deus, non fore colendum, vel adorandum ut Deum, sic ex persona hæreticorum replicat. *Quid? quod carnem ejus, quam creaturam esse non negas, simul cum divinitate adoras, atque ei non minus, quam divinitati deservis?* Respondet: *ego Dominicam carnem, imo perfectam in Christo humanitatem propterea adoro, quod a divinitate suscepta, atque deitati unita est, ut non alium, atque alium, sed unum, eundemque Deum, & hominem Dei Filium confitear, &c.* & Psal. 98. de Christo exponit illa verba: *Adorate scabellum pedum ejus, per scabellum humanitatem intelligens, quem ibi Cassiodorus imitatur.* Denique Epiph. in Anchorato circa medium, humanitatem dicit coadorari Verbo Dei: & in 7. Synodo, act. 6. circa finem dicitur: Cum adoratur Christus, non separari humanitatem a divinitate, sed utramque ut unum adorari latria. Favet tandem Concil. Trid. sess. 13. c. 5. & can. 6. definiens, Eucharistiæ sacramentum, propter divinitatis, & humanitatis Christi præsentiam adorari latria. Exempla etiam ex Scripturis supra adducta hoc confirmant, quando enim Thomas adoravit Christum, dicens: *Dominus meus, & Deus meus,* vel etiam quando Magi eundem adoraverunt, sine ullo dubio perfectam, & summam latriam exhibuerunt, ut Concilium etiam Tridentinum significat, & tamen illo actu non adorantur solam divinam naturam, sed etiam humanam, circa quam exercebatur adoratio. Nam licet ipsa divina persona per se primo adoraretur, & primaria intentio in illam tenderet, & consequenter in humanitatem: tamen ordine executionis (ut ita dicam) circa ipsam humanitatem proxime versabatur adoratio. Et ad hoc valet exemplum, quo Augustinus dicto sermone utitur, quia purpura, qua Rex est indutus, simul cum illo adora-

tur, eadem adoratione Regia, quæ in suo ordine summa est respectu talis personæ. Et sicut etiam adoramus Summum Pontificem deosculando pedem, & calceum ejus, quo actu coadoramus ipsum calceum, sic igitur, qui adorat Christum ut Deum hominem deosculando pedes ejus, eadem adoratione colit humanitatem ejus. Hoc vero exemplum intelligendum est ablatis imperfectionibus: quod non satis consideravit Durandus, & ideo minus caute locutus est: purpura enim tantum accidentaliter unitur personæ Regis, & ideo dici potest solum per accedens coadorari: at vero humanitas per se unitur Verbo, Christus enim vere est unus per se ex divinitate & humanitate compositus, & ideo illa perfecta latria, qua Christus colitur, per se coadoratur humanitas ejus. Unde accommodatius exemplum esse potest in anima, & corpore, nam eadem adoratione dulciæ, qua adoratur homo sanctus propter sanctitatem animæ in hærentem, per se coadoratur corpus, quod tali animæ per se unitum est: unde eadem adoratione, qua nunc adoratur anima sancti Petri, adorabitur post resurrectionem totum compositum, & coadorabitur corpus propter unionem. Sic igitur, cum persona Christi ex utraque natura constans, sit tam per se, & vere una sicut quilibet homo, una adoratione adorabitur, qua per se primo ipsa persona, concomitanter vero, & quasi per se secundo humana natura tali personæ unita honore, & veneratione afficietur. Et hæc est propria ratio a priori hujus conclusionis, quam Concilia, & Patres citati indicant. Et Cyrillus lib. 1. de Fide ad Regin. hoc sensu dixit: *In Christo non esse unam naturam, que adoratur, & aliam, que non adoratur, sed unam Verbi naturam incarnatam, adorabilem cum carne sua una adoratione:* quorum verborum sensus esse videtur in Christo unam esse naturam per se adorabilem, scilicet divinitatem, cui humanitas ita conjuncta est, ut simul cum illa, & eadem adoratione adoretur. Unde (quod ad modum loquendi attinet) advertendum est in Patribus, & Conciliis aliud esse loqui de Christo, & aliud de humanitate Christi: Christus enim, quia significat personam, non potest dici coadorari Deo, sed adorari ut Deus: quia verbum coadorandi adjunctum personæ, indicat distinctionem unius ab alia: at vero loquendo de humanitate, recte dicitur coadorari Deo, quia ipsa non est Deus, sed Deo per se conjuncta.

Neque contra hanc conclusionem sic expositam urget ratio in principio facta, quia de ratione latriæ solum est, ut persona adorata sit verus Deus: non vero est necesse, ut quicquid coadoratur, sit etiam Deus; satis est enim, si personæ Dei conjunctum sit, quia licet hæc summa adoratio ad naturam assumptam etiam aliquo modo pertineat, non tamen æque principaliter, ac pertinet ad ipsam personam per se primo adoratam, & ad propriam & connaturalem ejus naturam. Quod recte declaratur exemplo hominis supra posito, quando enim homo adoratur dulciæ, simul coadoratur corpus ejus, quamquam nec corpus sit homo, nec tantam excellentiam habeat, quantum habet homo, vel anima ejus; sed sufficit conjunctio ad animam, ut adoratio totius in illud redundet. Et per hæc etiam patet solutio ad primam confirmationem, & in exemplo sacrificii, quod ibi adducitur, magis declaratur: sacrificium enim (ut supra diximus) summam, & perfectam latriam continet, & Christo offertur, non quidem ratione humanitatis, quia excellentia per sacrificium significata non convenit Christo ratione humanitatis, sed divinitatis. Propter quod dixit August. lib. 10. de Civit. c. 10. *Christus, cum in forma Dei sacrificium simul cum Patre sumat; tamen in forma servi, sacrificium maluit esse, quam sumere, ne vel hac occasione quisquam existimaret, cuilibet esse sacrificandum creaturæ:* nihilominus tamen, licet hic honor sacrificii humanitati per se primo non deferatur, cum tamen simpliciter offertur huic homini Christo, in ejus humanitatem redundat.

Ad secundam confirmationem respondetur, hanc adorationem relatam ex intentione operantis ad Verbum incarnatum, ex parte materialis objecti aliquo modo differre ab adoratione Verbi secundum se; non vero inde fit, illam adorationem non esse summam, vel esse alterius rationis. Sicut adoratio dulciæ, quæ datur animæ separatæ, vel toti composito, ex parte materialis objecti diversitatem habet: formaliter tamen eadem est: quia excellentia, & res primario adorata non variatur essentia.

Respondit  
ad argum.



trialiter, sed solum est aliqua varietas in adjunctis, quæ non satis est ad formalem distinctionem adorationis, cum formale objectum, & materiale primarium idem maneat. Præsertim cum reliqua non distincta intentione, & quasi actu formali, sed veluti implicite, & concomitanter adorentur.

Dico secundo. Si Christus ut homo præcise adoretur propter dignitatem, & excellentiam, quam ejus humanitas habet ex vi unionis, illa adoratio non erit perfecta latría, sed inferior. Hanc conclusionem probant rationes in principio factæ, & quæ in explicanda Gabrielis, & aliorum sententia diximus. Et declaratur ulterius: quod enim Christus sub hac ratione adorari possit, per se notum videtur, quia sub hac ratione habet majorem excellentiam, & dignitatem, quam sit omnis creata excellentia: ergo propter hanc dignitatem non solum est adoratione dignus, sed etiam majori, & excellentiori, quam sint omnes Sancti propter sanctitatem suam. Quod vero hæc adoratio non sit tam excellens, quam sit illa latría, quæ debetur Deo secundum se, probatur, quia minor est excellentia gratiæ unionis in ipsa humanitate, quam sit excellentia divinitatis secundum se, sicut supra etiam dicebamus, rationem filiationis, quæ convenit Christo ut homini, seu in humanitate sua, per gratiam unionis, & ex tempore, esse inferioris rationis, quam sit filiatio increata, quæ illi ut Deo convenit per generationem æternam.

**Dubium.** Sed quæret aliquis, qualis sit hæc adoratio, & quomodo appellanda sit, & quomodo differat a superiori adoratione, qua diximus simul cum Verbo humanitatem coadorari: vix enim videntur posse distingui, cum utroque modo adoretur humanitas ratione unionis. Respondetur

**Respons.** magnam esse differentiam. Primo in ratione formali, & motivo adorationis, nam in priori motivum est dignitas Verbi secundum se, in posteriori vero motivum est dignitas, quam humanitas habet ex unione ad Verbum. Deinde in priori objectum per se primo adoratum est persona secundum divinitatem suam, humanitas vero concomitanter, & quasi implicite: at vero in posteriori objectum per se primo adoratum est hic homo, ut compositum ex humanitate, & ut in illa habet excellentiam super omnes homines. Denique in priori adoratur Christus ut æqualis Patri, in posteriori vero, ut minor Patre. Nihilominus tamen videntur hi duo actus inter se convenire, quod ab eadem virtute religionis eliciuntur, quia fundamentum hujus secundi actus est gratia unionis, quæ, licet ex parte humanitatis sit aliquid creatum, tamen ex parte Verbi, ad quod terminatur, quiddam increatum est, scilicet Verbum per se unitum humanitati, quam per se sanctificat, & ideo reddit hunc hominem singulariter excellentem, & dicto modo adorabilem. Eadem ergo virtus, quæ inclinatur ad colendum Verbum secundum se, inclinatur etiam ad colendum omne illud, quod per unionem ad Verbum sanctificatur, ut latius in sequentibus explicabimus. Unde sub hac ratione potest hæc adoratio latría vocari, sicut opinio supra citata dicebat: vel certe (si modo magis usitato loquendum est) vocabitur potius hyperdulia: est enim hæc adoratio (ut diximus) ratione, & perfectione differens a propria latría, quæ sola nomine latriæ absolute dictæ significari solet, nomen autem hyperdulæ usurpari potest ad significandam omnem excellentem adorationem a perfecta latría diversam, illique inferiorem.

Dico tertio. Christus in quantum homo adorari potest propter excellentem gratiam, & sanctitatem creatam suæ humanitati inhaerentem, hæc tamen adoratio inferior est, & proprie hyperdulia dicitur. Conclusio hæc est D. Thom. hic, & omnium, & explicari potest sicut præcedens, Sancti enim sunt adorabiles propter gratiam, & gloriam creatam; ergo multo magis Christus. Rursus hæc adoratio non fundatur in excellentia increata; ergo non est latría. Imo hic videtur concludi hanc adorationem esse ejusdem rationis specificæ cum dulia, quæ datur Sanctis, quamvis in illa specie summam quandam excellentiam habeat: quia gratia, & gloria Christi ita comparatur ad Sanctorum gratiam, & gloriam, adorationes autem eam proportionem inter se servant, quam excellentiam.

**Obiectio.** Dicitur: quamvis gratia secundum se considerata sint ejusdem rationis, tamen gratia in Christo est proprietas

connaturalis, quæ est singularis excellentia. Respondetur, in primis dici posse hunc respectum non tam significare singularem excellentiam, quam conjunctionem ad aliam superiorem gratiam, seu excellentiam & ideo non oportere, ut illi respondeat singularis adoratio, sed ut ipsamet adoratio proportionata tali gratiæ cum alia superiori adoratione conjuncta sit, & ab illa possit imperari. Secundo, & magis ad rem dicitur, si gratia creata Christi consideretur quatenus per conjunctionem ad gratiam unionis, infinitam quandam dignitatem habet, hac ratione illi respondere singularem adorationem ad latriam spectantem, prout in secunda conclusione tractatum est, quia talis adoratio non fundatur solum in gratia creata, sed in gratia unionis. Sicut opera Christi, quamvis secundum se habeant bonitatem ejusdem rationis cum nostris, spectata tamen ut specialiter sanctificata per unionem, singularem & excellentiorem honorem merentur.

Et hinc obiter intelligitur, quæ adoratio debeatur Christo homini titulo Redemptoris. Wicleff enim dixit, hoc solo titulo deberi Christo adorationem latriæ, etiam si non esset Deus, quia nos redimendo emit nos, sibi que servos effecit. Quod improbat Waldens. lib. 1. doctrinal. fid. antiq. c. 24. & merito, si de perfecta & absoluta latría loquatur, quia (ut bene Scot. in 3. d. 9. notavit) Christus non est Redemptor ut prima causa simpliciter, sed solum ut prima in genere meriti, & satisfactionis, quæ solum est prima secundum quid, & alteri superiori causæ subordinata: at vero perfecta latría solum debetur primæ causæ simpliciter. Denique dignitas Redemptoris, prout convenit Christo ut homini, inferior est dignitate Dei secundum se; non potest ergo esse ratio æqualis adorationis.

Cujus ergo adorationis causa erit? neque enim negare possumus hunc titulum sufficientem esse alicujus adorationis causam, est enim sine dubio magna excellentia Redemptoris, & singularia virtutis opera, ac specialia beneficia hominibus facta includit, propter quæ omnia aliquis singularis honor Christo debetur. Respondetur, ita quidem esse, & adorationem hanc, licet perfecta latría non sit, ad illam tamen latriam revocari, quæ propter gratiam unionis debita est, quia tota Redemptoris dignitas ex illo principio manavit. Unde sicut idem adorationis seu duliæ modus debetur alicui propter sanctitatem creatam, & propter virtutis opera ab illa procedentia: ita eadem adoratio debetur Christo, ut homini ratione unionis, & ratione perfectæ redemptionis ex rigore iustitiæ. Quocirca, si Christus fuisset purus homo, & imperfecte nos redemisset, non deberetur illi ea adoratio, quæ titulo redemptionis nunc debita est, sed alia inferioris ordinis, quæ dignitatem gratiæ creatæ, & efficacitatem ejus non transcederet.

Una vero superest difficultas, quia Concilia definiunt, Christum una tantum adoratione esse adorandum, nos autem cum D. Th. plures modos adorandi Christum possibiles posuimus. Respondetur primum, Concilia non docere, Christum quacumque ratione spectatum una tantum specie cultus adorabilem esse, quin potius quinta Synodus collat. 8. canon. 9. sicut definit unam Christi adorationem ratione unius personæ, ita negat ratione naturæ, quia hoc esset confundere naturas. Quando ergo tradunt unam adorationem Christi, solum docent, in Christo non ita esse dividendas adorationes, ut una ad Christum, alia ad Verbum pertinere putetur, hoc enim ad errorem Nestorii pertinet: & ideo recte dicunt una, & eadem adoratione adorari, quoniam, qua adoratione adoratur Verbum, adoratur Christus, & e converso, quia est unus & idem, & ideo omnis adoratio ad unum & eundem pertinet, & ideo una est: quod aliis verbis D. Th. dixit: *Adorationem Christi esse unam ex parte rei adorata, licet possit esse multiplex ex rationibus adorandi*. Ex quo fit, sicut quando adoratur Christus adoratione latriæ, coadoratur humana natura propter divinam; ita si adoretur adoratione hyperdulæ, coadorari divinam naturam, licet ratio adorandi sit humana, seu dignitas ejus. Nihil enim obstat, quo minus id, quod excellentius est, si solum concomitanter, & propter conjunctionem cum inferiori natura adoretur, inferiori aliqua adoratione coli possit, quia ratio adorandi inferior est, & adoratio cum illa ratione, in qua nititur, commensuratur. Sicut inter homines, si idem sit Imperator, & Dux, si tan-

Respons.

Dubium.

Respons.



si tantum ut Dux, ducali honore adoretur, quodammodo simul coadoratur materialiter imperatoria dignitas, inferiori adoratione.

Secundo dicitur, quamvis hæc adorationes Christi ex rationibus adorandi speculative recte distinguantur: practice tamen, ac moraliter semper esse Christum perfectissima adoratione patriæ colendum, quia unusquisque simpliciter adorari debet perfectissimo honore ratione suæ supremæ excellentiæ sibi debito, sicut Rex semper tractatur regio honore, non Ducis, aut Comitis. Observavit autem hoc loco Cajet. præsertim id observandum esse in publica, & communi Ecclesiæ adoratione, nam in interiori, & privata, quæ solum inter hominem & Christum intercedit, si quis recte sciat distinguere rationes adorandi, poterit interdum uti aliqua ex dictis adorationibus suo arbitrio, & devotione: homines enim externa vident, & de exterioribus judicant, Christus autem Dominus intuetur cor & intentionem cognoscit.

**Dubium.** Sed quæret tandem aliquis, cum Christus sit perfecte unus, ex duplici constans natura, cur non intelligamus unam esse illius excellentiam, ex utraque natura resultantem, atque hoc modo unam tantum esse adorationem illi adæquatam, tam ex parte personæ, quam ex parte naturæ? Respondetur rationem esse facilem ex iis, quæ D. Th. tradit, quia licet persona sit id, quod adoratur, ratio tamen adorandi est natura, seu excellentia ejus; in Christo autem ex duabus naturis non fit una, & ideo neque in illo est una beatitudo, neque una tantum gratia, vel sapientia: & propter eandem causam non est in Christo una tantum excellentia, vel ratio adorandi. Neque enim fieri potest, ut ex multis illis rationibus una componatur, quæ sit veluti fundamentum unius mixtæ, & compositæ adorationis, quia unaquæque earum est completa, & integra in suo genere, & diversi ordinis ab alia, & quælibet per se sumpta reddit totum adorabile, specie adorationis sibi accommodata: & ideo quot sunt rationes adorandi, tot debentur adorationes. Sicut e contrario personæ divinæ, licet distinctæ sint, unica tamen adoratione sunt adorabiles, quia excellentia simpliciter, & ratio adorationis unica est in omnibus illis, ut recte hic dixit D. Th. & 2.2.q.81.art.3. ad 1. & in 3.d.9.art.1.q.3. ad 1.

## SECTIO III.

*Verum Humanitas præcisa a Verbo possit adorari, & qua adoratione.*

Titulus  
quæstio-  
nis decla-  
ratur.

**D**uplex potest esse sensus hujus quæstionis: prior est de humanitate, quæ re ipsa unita est Verbo, & perseverante unione, an scilicet, non obitante illa unione, possit sub aliqua consideratione adorari adoratione, videlicet ad ipsam solam, ut a Verbo præcisam terminata. Alter sensus est hypotheticus, si hæc humanitas, quæ nunc est unita Verbo, separaretur ab illo, an esset adorabilis. Alia vero quæstio etiam ex hypothesi, scilicet, si antea extitisset, quam esset unita, an esset adorabilis, non habet locum, quia tunc pro eo tempore, quo non fuisset unita, eadem ratio esset de illa, quæ de aliis puris hominibus. Quæstio ergo proposita præcipue intelligitur in priori sensu; breviter tamen expediemus illam etiam in posteriori, ad finem sectionis.

Prima itaque sententia docet, humanitatem unitam Verbo, vel nullo modo, vel non decenter, posse coli sine Verbo. Quæ sententia, & fere ejus fundamentum in hunc modum explicari potest. Nam vel hæc humanitas adoranda est propter deificationem, quam habet ex unione, vel propter sanctificationem, quam habet ex gratia & donis creatis. Priori modo recte quidem adorabitur, sed non adorabitur præcisa a Verbo, nec nisi adorato Verbo, atque adeo eadem adoratione, qua ipsum Verbum adorabile est: quia humanitas deificatur & sanctificatur hoc modo per ipsum Verbum, seu divinitatem sibi unitam, ut supra q. 7. visum est: ita ut ipsa deitas sit veluti causa formalis talis sanctificationis: ergo, si humanitas adoratur propter hunc effectum quasi formalem, ad illum terminatur adoratio: ergo & ad formam ipsam, quæ est deitas. Quomodo enim potest actus terminari ad effectum formalem, quin terminetur ad formam? Igitur sub hac ratione non potest humanitas adorari nisi adorata divinitate. Si vero consideretur humanitas, ut sanctificata

Prima  
opinio.  
Functa-  
necotum.

per gratiam creatam, posset quidem hoc titulo solo adorari, si esset separata a Verbo, tamen, postquam conjuncta est, non potest illo solo ac præciso titulo decenter adorari, vel quia, cum non sit suppositum, non est adorabilis, quia adoratio per se tendit ad rem, prout a parte rei existit, & ita tendit ad suppositum. Vel certe, quia, quando res est adorabilis superiori titulo & ob majorem excellentiam, non decet, illam privare excellentiori adoratione, & solum inferiori illam venerari. Cum ergo humanitas Christi, prout nunc existit, habeat excellentiorem sanctificationem, quam sit illa creata, & ob illam sit digna altiori adoratione, non decet eam colere inferiori adoratione, & ob solam excellentiam pure creatam. Sicut injuriam faceret Regi, qui prætermisso regali titulo & honore, eum ut Ducem seu Comitem tractaret, eo quod simul Rex, & Dux, ac Comes existat.

Referuntur pro hac sententia ex Scholasticis Bonav. in 3.d.9.a.1.q.1. Albert. a.9. Richard. a.2.q.1. & Major q.1. ad 4. cont. 4. concl. Sed hi auctores solum possunt pro hac opinione referri, quia non satis expresse docent contrariam, dum disputant de adoratione humanitatis Christi. Nam Bonaventura distinguens varios modos considerationis, & adorationis humanitatis Christi, unum esse ait, quo consideratur ut pars secundum se, & non ut unita. Et hoc modo ait, non deberi illi adorationem patriæ, sed dulciæ inferiori vero dicit, Quia caro Christi nunquam est separata a Verbo, ideo semper considerandam esse ut conjunctam, semperque esse adorandam patriæ, licet humanitati per se consideratæ non debeatur nisi dulciæ. Non tamen negat posse sic considerari, nec dicit esse per se vel intrinsece malum sic considerari, & adorari. Albertus autem distinguit similiter plures modos, inquit: *Tertio consideratur vane, secundum solum intellectum denudata a deitate, & sic adoranda est hyperdulia*, ubi quod ait, *vane*, non significat indecenter, aut omnino otiose id fieri: alioquin non diceret, sic consideratam esse adorandam hyperdulia, neque quoad hoc approbaret opinionem id afferentem, quod statim facit: intelligere ergo videtur idem quod præcise, & non plene, prout in re est. Richardus vero, & Major, nihil ad rem præsentem dicunt, & potius favere possunt contrariæ sententiæ, ut infra ostendam. Citantur præterea pro hac sententia Clichtovæus lib.2. de Euch. c.10.n.5. & 6. Cather. opus. de adorat. imag. col.4. Walden. tom.3.c.119. ad finem, Claud. de Sainctes repert.9. de Euch. c.3. Sed hi auctores, si attente legantur, non disputant de puncto quæstionis speculativo, quem nunc tractamus, sed declarant adorationem humanitatis, quæ, moraliter loquendo, & practice est in usu, aliqua etiam interdum attingunt, in quibus favent contrariæ sententiæ, ut mox videbimus. Denique (quod caput est) afferuntur pro hac sententia pluræ Conciliorum & Sanctorum Patrum testimonia, quæ infra commodius proponemus, ut verum eorum sensum aperiāmus.

Contraria sententia est frequentior inter Scholasticos: omnes enim, qui distincte in propriis terminis hanc quæstionem attigerunt de adoratione humanitatis Christi præcisæ, & in abstracto conceptæ, definiunt posse adorari, quamvis non perfectæ patriæ. Ita sentit D. Th. hic art.2. præsertim in solut. ad 1. ubi afferens verba Damasceni lib.4.c.3. *Caro ipsius suapte quidem natura, si subtili quadam cogitatione id, quod in oculos incurrit, ab eo, quod animo tantum ac ratione intelligitur, distinxeris, haudquaquam adoranda est, utpote condita*; addit D. Th. *scilicet adoratione patriæ*: & subiungit; *Et tunc sic intellecta, ut separata a Dei Verbo, deberetur sibi adoratio dulciæ, non cuiuscumque, sed cuiusdam excellentioris, quam hyperdulia vocant*. Atque ita tenent etiam Cajet. & alii moderni expositores D. Th. & Palud. in 3.d.9.q.2. ubi etiam idem sentit Scotus q.1. §. Quantum ad istum artic. & clarius in solut. ad 1. Durand. q.3. Almain. q.1. concl.4. latius & expressius quam cæteri Gabr. q.1. art.2. & super can. lect. 50. Cordub. l.1.q.5. dub.3. Henric. quodlib.10.q.6. Picus Mirandul. in Apol. q.3. Canisius lib.5. de B. Virgine c.15. & hæc sententia vera mihi videtur.

Ut igitur hæc opinio declaretur, & probetur, suppono, sine ullo errore vel deceptione in fide, & sine illa injuria, vel morali malitia, posse Christi humanitatem cogitatione præcindi a persona Verbi, id quod aperte sentit Damasc. cit. loco, & omnes Scholastici supponunt; & con-

Quæ pro  
fuerit  
quæ au-  
ctores af-  
ferant  
primæ  
opinonis  
patroni.

Secunda  
opinio,  
quæ ab  
auctore  
approba-  
tur.



§. Physic.  
next. 18.  
Humani-  
tas Chri-  
sti potest  
a Verbo  
cogitatu  
fideliter præ-  
scindi.

& constat ex illo Aristotelis: *Abstrahentium non est mendacium*, abstractione scilicet præcisiva. Unde, quamvis erraret in fide, qui ita conciperet humanitatem Christi sine Verbo, ut etiam divideret, negando illam esse unitam Verbo, tamen qui illam præcisè concipit, nimirum, de illa tanquam de quadam natura cogitans, & de Verbo tunc non considerans, neque etiam concipiens in illa aliquam personā, nihil cogitat falsum aut concipit, quamvis non plene & adæquate rem concipiat; sic igitur nulla est falsitas, vel deceptio in hac præcisione. Quod vero neque ulla malitia in eo actu sit, per se notum videtur, quia sic cogitare de Christi humanitate, vel anima, non est contra fidem, ut dixi, neque est contra charitatem, vel reverentiam Christo debitam, quia non semper tenemur ex charitate, vel religione de illo cogitare: ergo licebit interdum considerare humanitatem ejus secundum ea, quæ illi præcisè conveniunt. Cui enim in hoc fit injuria? Non Verbo, quia, ut dixi, non tenemur semper de illo cogitare. Non humanitati ipsi, quandoquidem vere concipitur secundum ea, quæ illi conveniunt, & ad ejus perfectionem, & excellentiam pertinent, quamvis non concipiatur secundum omnia, neque fortasse secundum supremam excellentiam ejus, quia neque ad hoc etiam semper tenemur; sicut cogitantes de Deo, non male facimus præscindendo naturam a personis, vel unum attributum ab alio, nec semper de illo attributo cogitamus, quod secundum rationem formalem suam, majorem dicit perfectionem.

Sic præ-  
cisè potest  
de facto  
ac de ju-  
re, adora-  
tione præ-  
scindi.

His addo, neque esse impossibile, neque per se malum adorare humanitatem Christi sic præcisè conceptam & cogitatam. Prior pars de possibili, per se nota videtur, tum quia nulla ostendi potest repugnantia, tum ex ipso usu, nam certe doctores, qui hanc adorationem docuerunt, eam experti sunt, sicut me etiam fateor eam experiri, neque melius existimo cognosci posse, quam exercendo ipsam. Tum præterea, quia dum intellectus sic concipit humanitatem, concipit illam ut habentem animam rationalem, & potest etiam concipere, ut habentem gratiam, & ut videntem Deum, ut postea dicam: ergo concipit illam, ut rem veneratione dignam, atque adeo ut sufficiens objectum alicujus adorationis. Supposito autem objecto, ex parte hominis non deest facultas adorandi, ut per se notum est: est ergo possibilis hæc adoratio.

Prima ob-  
jectio sol-  
vitur.

Dicunt aliqui humanitatem sic conceptam non concipi ut existentem, nam existit existentia Verbi, & in illa sic præcisè concepta non clauditur existentia Verbi: ergo ut sic non est adorabilis, quia non est adorabilis, nisi res existens. Respondetur in primis falsum esse assumptum, ut patet ex supra dictis q. 17. Deinde, etiam qui sentiunt, humanitatem existere sola existentia Verbi, negabunt fortasse existentiam esse intrinsece necessariam in objecto adorabili, dicentque sufficere essentiam actualem & excellentem. Vel etiam dicere poterunt, concipi humanitatem ut existentem, præscindendo a particulari existentia qua existit. Dicit ulterius aliquis ex D. Th. hic, solum suppositum esse adorabile, quia adoratio per se tendit in rem subsistentem; sed humanitas ut sic concepta non est subsistens: ergo ut sic non est adorabilis. Respondetur, assumptionem intelligendam esse de adoratione omnino absoluta & completa: hæc enim proprie ac per se primo terminatur ad suppositum. At vero aliqua adoratio, vel respectiva, vel incompleta ut sic dicam, potest terminari ad naturam, vel ad partem, si illa præcisè concipiatur sub aliqua dignitatis ratione: nam tunc etiam, quoad modum concipiendi apprehenditur per modum totius & quasi per se tantis, non quod in ipso objecto apprehendatur per se existentia: esset enim falsa apprehensio: sed quod in modo solitarie apprehendatur ad modum rei per se tantis: hoc ergo satis est, ut tale objectum sit adorabile, si aliqui sufficientem habeat excellentiam & dignitatem.

Item se-  
cunda.

Jam vero, supposita hujus actus possibilitate, quod per se malus non sit, ac proinde sit possibilis, non tantum factum, sed etiam jure probatur, quia talis adoratio neque est prohibita jure positivo divino, aut humano, nec jure naturali: ergo non est mala. Antecedens quoad primam partem probatur primo, quia nullibi est scripta talis prohibitio: neque etiam traditione constat: & quidem de divino jure res est manifesta. De Ecclesiastico vero dubita-

re quis posset, vel propter Concilia supra citata, quæ dicunt Christum hominem una adoratione, qua Verbum, esse adorandum, quæ est perfecta latría; vel propter usum Ecclesiæ, quæ non consuevit ita adorare Christi humanitatem, sed Christum Deum hominem unica adoratione. Verumtamen ex his nulla prohibitio colligi potest, nam, ut statim latius dicam, Concilia nunquam locuta sunt de humanitate Christi, ut abstracte & præcisè concepta, sed de Christo homine: & adhuc de illo nullum jus positivum statuunt, sed tantum declarant doctrinam fidei, scilicet, quænam adoratio Christi ex mysterio incarnationis consequatur. Ex usu autem Ecclesiæ, ut in simili Cajet. hic notavit, ad summum colligi potest, publico ritu adorationem dirigendam esse ad Christum Deum hominem, quando scilicet ipsa interior intentio, vel factis, aut verbis sufficienter exterius & publice manifestatur: de privato autem modo adorandi, nihil peculiare Ecclesiæ statuit; neque solo usu ad consuetudinem introduci poterit, quia hic usus potest esse varius & multiplex, quia, cum sit privatus, non constat cæteris, quid unusquisque secreto faciat. Igitur ex positiva lege sublata pensandum hoc est, supposito lumine, & principiis fidei. At ex his nulla potest colligi intrinseca malitia in tali actu; cujus sufficiens argumentum est, quod doctissimi Theologi, pii, ac sancti illam non invenerunt. Deinde inquiri, quænam sit hæc deformitas, aut contra quam virtutem sit. Maxime enim excogitari potest contra religionem seu observantiam, nam de cæteris virtutibus nulla potest esse suspicio: sed non est contra religionem, quia neque ex parte objecti: ostensum est enim habere sufficientem excellentiam, ob quam sit dignum aliqua adoratione. Neque ex parte subjecti adorantis, ut per se constat, quia est homo, qui infinitis titulis debet Christo, & humanitati ejus, omnem reverentiam consentaneam dignitati ipsius. Neque etiam ex modo, quia in hoc potest homo observare convenientem mensuram, & adorandi rationem juxta ea, quæ statim dicemus: ergo ex nullo capite potest reperiri aliqua deformitas.

Et declaratur præterea, quia, si in eo actu est malitia contra religionem, vel est per excessum: & hoc non est necessarium, ut per se constat, quia potest homo non plus adorare illam humanitatem, quam par sit. Vel est per defectum. Et hic potest intelligi, aut respectu Verbi, aut respectu ipsiusmet humanitatis. Neutro autem respectu intervenit necessario defectus privativus, ut sic dicam, sed tantum negativus, qui nullam infert malitiam: ergo. Declaratur minor, nam respectu Verbi solum potest defectus in hoc constitui, quod per illam adorationem non per se primo adoratur. At vero hæc negatio non semper est contra aliquod affirmativum præceptum, quia absolute non semper tenetur homo, Verbum, aut Christum adorare. Neque etiam ex suppositione, quod velit humanitatem ejus adorare: hæc enim obligatio neque ex intrinseca rei natura nascitur, neque ostendi potest præceptum unde oriatur. Et hac ratione dixi, hunc defectum esse negativum, non privativum, quia non est contra debitum, vel obligationem exercendi majorem, vel perfectiorem adorationem. Eademque ratio est respectu humanitatis: non enim potest in ordine ad illam committi defectus, nisi quia non perfectissimo modo adoratur: hoc autem non est per se malum, quia non semper urget obligatio exercendi perfectissimam adorationem: unde licet minus perfecta tribuatur, dummodo non sit indecens, neque aliena ab aliqua excellentia in objecto adorato inventa, non erit privativus defectus, sed mere negativus.

Unde ulterius ostendi potest, hunc modum adorandi humanitatem Christi, non solum non esse malum vel prohibitum, sed etiam esse melius sic adorare, quam omnino adorationem prætermittere, supposita præcisè consideratione, & cogitatione humanitatis vel animæ Christi, quam supra ostendimus esse possibilem, & non malam, neque indecentem. Itaque si quis actu cogitet de Christo, & absoluta dignitate personæ ejus, non est, cur adorando sistat in humanitate ejus, neque convenienter ita adoraret, imo vix potest, si recte sentiat de unitate personæ Christi in utraque natura: dum tamen abstracte & præcisè considerat humanitatem Christi, & dignitatem ejus, durante hac sola cognitione, non potest personam ipsam in se & per se adorare, quia non potest adoratio referri in objectum non cogitatum: refertur enim per

Humani-  
tati Chri-  
sti a Ver-  
bo præci-  
sè conce-  
pæ An-  
dreas  
defertur  
honor,  
quam præ-  
termitti-  
tur.

affec-



affectum, & affectus non tendit in incognitum. Igitur, stante illa consideratione, vel omnino ab adoratione cessandum est, vel adoratio ad humanitatem, prout præcise cogitatur, referenda est: melius autem est hoc modo adorare, quam omnino non adorare: quod videtur per se manifestum. Primo ex ratione facta, quia ille actus ex objecto est bonus, & nullam habet malam circumstantiam. Secundo, quia per illum actum aliquis honor tribuitur Christi humanitati, & nullus major aufertur, quamvis actu non tribuatur: aliud est enim auferre, quod denotat negationem maioris adorationis; aliud vero est actu non tribuere, quod solam præcisionem, seu carentiam exercitii significat: & ideo illud esset malum, hoc autem non semper. Denique ipso usu constat, dum quis præcise considerat animam Christi, ut beatissimam, & frequentem Deo longe excellentiori modo, quam omnes creaturas, statuit in corde suo venerari illam, seque illi libenter submittere, & hoc per se conciliat maiorem devotionem, & religionem, quam si illa cogitatio in sola consideratione sistat sine ullo cultu. Et declarari etiam potest a simili, nam, stante illa consideratione potest homo amare illam animam vel humanitatem, & cæteris paribus melius faciet amando: quam si in sola arida cogitatione sistat, quamvis illo amore per se ac formaliter non amet Verbum, sed humanitatem vel animam propter bonitatem, quam in ea considerat. Idem ergo erit, proportionem servata, de adoratione.

Adoratio  
humani-  
tati Chri-  
sti præcise  
exhibita,  
inferior  
latria  
summa.

Tertio ex his manifeste concluditur, adorationem hanc, terminatam ad humanitatem sic conceptam, non posse esse supremam ac perfectissimam latriam: ita docent omnes scholastici supra citati, & est sententia Damasceni. l. 4. de fide c. 3. exponente hic D. Th. a. 2. ad 1. & idem sumitur ex aliis Patribus, qui passim asserunt humanitatem non adorari latria perfecta, nisi quatenus coadoratur Verbo una eademque adoratione, qua colitur Verbum, quia illi substantialiter conjuncta est, ut videre licet apud August. ser. 58. de verb. Dom. & Athanas. orat. 5. cont. Arian. & alios, quos Claudius de Sanct. supra congerit. Et ratio est, quia humanitas præcise concepta non est Deus, nec divina natura: ergo, cum talis adoratio in ipsa ut sic concepta sistat, non potest esse suprema latria, quæ soli Deo tribuenda est: & hoc magis ex sequent. constabit.

Qualis sit  
huiusmo-  
di adora-  
tio.

Superest enim declarandum, qualis sit hæc adoratio, si perfecta latria non est, nam D. Th. dicta solutione ad primum dicit esse hyperdulam, alii vero præsertim Gabriel & Corduba significant esse latriam minus perfectam. Advertendum ergo ulterius est, humanitatem Christi dupliciter posse cogitari & præcindi abstractione illa præcisiva, quam supra declaravimus. Primo recogitando in illa sanctitatem & beatitudinem creatam, omnino præcindendo seu non cogitando de unione. Secundo cogitando, & considerando in illa singularem sanctificationem & dignitatem, quam habet ex unione ad Verbum. Quamvis enim hæc dignitas conveniat illi ratione Verbi, nihilominus potest in illa abstracte concepta considerari tanquam excellentia quædam, & dignitas ipsius: præsertim cum ipsa unio modus creatus sit humanitatem afficiens, eamque sanctificans, & in excellenti quadam dignitate constituens. Omitto considerationem aliam ejusdem humanitatis, qua posset amplius abstrahi, & ab utraque excellentia gratiæ, tam unionis, quam habituales, præcindi, & in sola suæ naturæ perfectione ac dignitate considerari, non quod hæc cogitatio & præcisio impossibilis sit, sed quod ad nullum genus religiosi & supernaturalis cultus, de quo nunc agimus, sufficiat, sed ad summum, ad illud observantiæ genus, quo humanam naturam honorare possumus: eo quod ad imaginem Dei creata sit, de quo eadem erit proportionalis ratio, quæ de quocumque alio genere cultus.

Quando  
Christi  
humani-  
tas hy-  
perdulia  
adoratur.

Quarto igitur dicendum est, si in humanitate Christi sola creata dona gratiæ considerentur, & propter illa præcise adoretur, talem adorationem essentialiter esse duliam, tamen, quia in eo genere perfectissima est, hyperdulam appellari. Hoc, ut minimum, docet D. Th. hic, & consentiunt reliqui Theologi supra citati. Et est consequenter evidens ex dictis præcedente lect. & ex illo principio, quod talis est adoratio, qualis excellentia in qua fundatur: sed gratia & cætera dona creata sunt ejusdem rationis in humanitate Christi & in cæteris, quamvis in illa sint excellentiora intensive seu individualiter:

ergo eandem proportionem servat adoratio in eis fundata. Dices. Illam et dona creata animæ Christi habent in ea specialem dignitatem, ob quam dicuntur habere quandam infinitatem in esse gratiæ. Respondetur, illam dignitatem vel infinitatem convenire his donis creatis ex unionem ad Verbum, nunc autem in hoc genere adorationis considerari præcise & secundum se abstrahendo ab unionem, & ideo illam dignitatem non immutare seu variare hanc adorationem, quia non in illa dignitate vel infinitate fundatur, sed præcise in excellentia & perfectione, quam gratia creata, vel beatitudo Christi habent in propria ratione.

Quando  
colatur  
latria.

Ultimo dicendum. Si humanitas Christi abstracte & præcise concepta ut natura est, adoretur, ut adorari potest, propter dignitatem unionis, adoranda est adoratione latriæ, non primaria & eximia, sed secundaria & minus perfecta, quæ diversa etiam est ab hyperdulia præcedente conclusione explicata, quamvis interdum soleat ea voce appellari in ea significatione, qua omnis adoratio minor suprema latria & major communi adoratione Sanctorum solet hyperdulia vocari. Probatur conclusio sigillatim quoad singulas partes; & primam quidem negativam, scilicet, quod, hoc titulo præcise considerato, non debeat humanitati suprema latria, præter Gabrielem, Cordubam, & alios auctores supra citatos ex his, qui in contrarium referuntur, clare docet Claudius de Sanct. dicta repet. 9. de Euchar. c. 3. ubi inter titulos, quos ponit, adorandi carnem & animam Christi ultimus est. *Quia maximam cum divinitate ineunt societatem*, quibus verbis unionem hypostaticam describit, & subdit; *Propter priores causas Christo homini, animæ, & carni ejus unica cum filio Dei dispensatur latria, propter unicam suppositum filii Dei latriæ fundamentum, quod omnibus assumptis sit commune; propter ultimam vero allatam causam, si non latria, saltem hyperdulia postulat; quoniam, quamvis natura humana in divina existentia & persona hæreat, non transit tamen in esse divinum & naturam divinam, ut Deus dicatur, & colatur.* Unde facile probatur ratione hæc pars, quia, licet humanitas per unionem effecta sit natura Verbi Dei, non est tamen effecta natura divina, neque est tantæ majestatis & excellentiæ, quantæ est illa, quantumvis affecta unionem seu sub relationem unionis consideretur: ergo adoratio debita humanitati, hoc titulo seu ratione gratiæ unionis, non est suprema latria: patet consequentia, quia adoratio proportionatur excellentiæ, in qua fundatur: sed hæc adoratio non fundatur in excellentia simpliciter suprema: ergo neque ipsa est suprema latria. Et confirmatur ratione supra indicata, nam filiatio naturalis, quæ convenit Christo ut homini ratione gratiæ unionis, minus excellens est, quam filiatio naturalis, quæ convenit illi ut Deo ratione æternæ generationis: ergo similiter significatio humanitatis per gratiam unionis longe minor est, quam sanctificatio per essentiam, quam Verbum seu natura divina per se habet: ergo adoratio debita humanitati, etiam ratione sanctificationis per gratiam unionis, longe minor est, quam adoratio divinitatis per seipsam.

Rursus quod possit Christi humanitas hoc præciso modo concipi, & alia minori adoratione hoc titulo coli, & facto & jure, facile ostendi potest, applicando rationes factas in duabus primis assertionibus; nam hæc præcisa consideratio humanitatis non involvit aliquam repugnantiam, maxime in nostra cognitione abstractiva & imperfecta, qua possumus rem etiam indivisibilem consideratione partiri, nedum res in seipsis distinctas. Unde hoc modo possumus, etiam ipsam naturam divinam præcisam a Verbo, & aliis personis considerare: ergo multo magis poterimus sic abstrahere naturam humanam, etiam si in ea unionem consideremus, quia etiam ipsa unio est res a Verbo distincta, quamvis ad illud dicat habitudinem, quod non obstat, ut statim declarabo, neque in hac præcisione intervenit deceptio, cum abstrahentium non sit mendacium. Posita vero hac consideratione illius humanitatis, quod secundum eam merito adorari possit, patet discursu supra facto, quia in illo objecto est sufficiens dignitas, & nulla obstat prohibitio, neque aliunde aliqua deformitas necessario adjungitur. Et declaratur illo divinitatis exemplo, nam divinitas præcise & abstracte concepta adoranda est, quia in illa est sufficiens excellentia, ob quam adoretur, etiam si a relationibus præ-



præcindatur: ergo idem erit de humanitate, proportionē servata. Intercedit enim differentia, primum in hoc quod divinitas, quantumvis abstrahatur a personis, est per se digna suprema adoratione latriæ, quia ex se, & non a relationibus habet infinitam, & supremam excellentiam: humanitas vero præcise considerata, quantumvis sancta & unita apprehendatur, non habet tantam excellentiam, neque est digna tanta adoratione: tamen, sicut aliquam excellentiam retinet, ita digna est proportionali adoratione. Deinde est alia differentia, quod divinitas, ut summe excellens, potest non solum abstrahi a relationibus, sed etiam ab ordine ad illas, & apprehendi, ut natura per se subsistens, & per se summe sancta & excellens: at vero humanitas Christi, si concipiatur, ut sanctificata per gratiam unionis, licet possit in abstracto concipi, ut præcisa a Verbo, non tamen potest abstrahi ab ordine seu habitudine ad Verbum, quia ipsa unio intrinsece includit hanc habitudinem.

**Obiectio.** Sed hinc insurgit difficultas contra hanc partem, quia hæc habitudo seu relatio transcendentalis non aptitudinalis, ut sic dicam, sed actualis est, quia non est aptitudinis ad unionem: hæc enim non sanctificat, & communis est omni humanitati, sed est actualis unionis: actualis autem unio non potest ita abstrahi a termino, quin illum actu includat. Et confirmatur, nam impossibile est concipere effectum formalem, non includendo formam: ergo impossibile est concipere humanitatem ut sanctam, quin in eo conceptu includatur forma, qua sanctificatur: hæc autem forma illam sanctificans hoc genere sanctificationis est ipsa divinitas, quæ propterea dicitur a Sanctis Patribus esse oleum seu unctio humanitatis, ut supra vidimus q. 7, ergo necesse est, in humanitate concepta ut sic sancta, includi divinitatem: & consequenter necesse etiam est, per illam adorationem, qua adoratur humanitas ut sic sancta, adorari etiam divinitatem. Respondetur ad priorem partem, verum esse hanc habitudinem esse actualis unionis, quæ necesse est in re esse conjunctam suo termino: & hoc modo est verum non posse in re abstrahi seu separari a termino. Verum etiam est, non posse unionem seu formam ut unitam concipi, quin aliquo modo concipiatur terminus, nihilominus tamen verum etiam est, posse unionem & formam ut unitam concipi tanquam rem distinctam a termino, & non includentem ipsum intrinsece & in recto, ut ajunt, sed in obliquo, & tanquam additum, sicut includitur terminus in conceptu cuiuscunque entis respectivi: & hoc modo concedendum est, humanitatem Christi ut unitam, & sanctificatam gratia unionis, concipi quidem in abstracto, atque ita in illo obiectivo conceptu, quasi directo, non includi intrinsece Verbum, includi tamen indirecte, & tanquam additum, quia est terminus, quem respicit illa unio. Quod ita declaratur, & confirmatur, nam, conceptus humanitatis Christi, etiam ut sic sanctificatus alius est a conceptu ipsiusmet Christi, quia humanitas ut sic non concipitur ut persona, sed ut forma unitæ personæ, neque ut composita ex duplici natura, sed ut natura actu componens unam personam cum alia natura: ergo non ita includitur in illo conceptu persona Verbi, aut divinitas, sicut includitur in conceptu Christi, ut intrinsece componens seu constituens illum. Quod in cæteris etiam formis & compositis videre licet; nam in conceptu animæ ut unitæ materiæ, aliter includitur materia, quam in conceptu humanitatis, quia aliud est anima, etiam ut unita, quam humanitas; sicut etiam albedo ut actu inherens aliud est, quam album; & quamvis ut inherens concipitur, adhuc in abstracto concipitur, & non totum concretum seu compositum: sic ergo potest concipi humanitas in abstracto, quamvis ut affecta unione concipiatur.

Unde ad alteram partem facile responderi potest formam intrinsece sanctificantem humanitatem, esse unionem, quæ ipsi adhæret, & in conceptu ejus ut sic sanctificata intrinsece includitur: Verbum autem in hoc sensu non intrinsece sanctificare humanitatem per modum formæ intrinsece, sed quasi extrinsece, id est, tanquam terminum unionis: & hoc satis esset ad satisfaciendum argumento: dicitur enim Verbum esse unctio humanitatis, quia terminat unionem ejus. Potest autem ulterius in hunc modum declarari, nam hæc sanctificatio vel excellentia unionis considerari potest, vel in ordine ad Christum, ut est hic homo Deus; & sic intrinsece inclu-

dit personam Verbi, ex qua, & ex humanitate componitur: vel considerari potest respectu humanitatis; & sic non includitur Verbum intrinsece in illa, etiam ut affecta unione, sed respicitur solum ut terminus unionis: igitur eodem modo concurrit Verbum ad sanctificationem humanitatis tanquam extrinseca forma ejus, unio vero tanquam intrinseca. Et declaratur præterea, nam hæc sanctificatio humanitatis Christi, aut consideratur tanquam aliquid physicum adhærens humanitati, aut solum per modum cuiusdam dignitatis moralis, quomodo etiam ipsa gratia creata animæ Christi habet ex unione infinitatem quandam dignitatis moralis, ut q. 7. declaratum est. Priori modo sanctificatio est formaliter proxime ab unione, quæ in ipsa humanitate concipitur, etiam si abstracta, & præcisa a Verbo concipitur, nunc præter unionem aliquid aliud reale & physicum in tali humanitate intelligitur, quod possit formaliter huiusmodi sanctificationem conferre. Posteriori autem modo admitti potest hanc sanctificationem esse a Verbo, ut a forma sanctificante; in his tamen affectibus moralibus non oportet, formam intrinsece includi in re ut tali dignitate seu moralitate affecta: sed satis est, quod sit veluti forma extrinseca, ex cuius contactu, vel unione, vel alio simili respectu res intelligitur manere affecta tali dignitate, ut in aliis effectibus moralibus videre licet, & in sequentibus, tractando de adoratione imaginum & reliquiarum, sæpe dicemus.

Atque ex responsione ad hanc difficultatem colligi **Illatio.** potest ratio alterius partis in præcedente conclusione positæ, scilicet, hanc adorationem, quam dicimus posse tribui humanitati præcise sumptæ ratione unionis, quamvis suprema latria non sit, tamen ad eandem virtutem pertinere, & hac ratione secundariam latriam posse appellari: hæc enim vox *latria* interdum significat actum, interdum habitum, a quo talis actus procedit, nempe virtutem religionis: unde e converso omnis etiam actus a tali virtute procedens dicitur continere cultum latriæ, quod si sit propria adoratio, simili denominatione dicitur adoratio latriæ. Simpliciter tamen loquendo, & quasi per antonomasiam actus adorationis latriæ dicitur ille, qui procedit ex apprehensione supremæ maiestatis, & excellentiæ in re, quæ adoranda est, & servitutis illi debitæ; & est quædam protestatio seu significatio illius: & hic est frequentior usus hujus vocis apud Patres, & maxime in VII. Synod. Adoratio autem minus perfecta, si aliquo modo in prædicta excellentia fundetur, & ideo ab eodem habitu virtutis nascatur, ea ratione dici poterit latria non simpliciter, sed secundum quid: & hoc sensu appellatur secundaria seu minus perfecta. Quod igitur huiusmodi sit hæc adoratio humanitatis Christi, patet ex difficultate proxime tractata, quia dignitas, propter quam hoc modo adoratur humanitas, talis est, ut ipsam divinam personam aliquo modo includat, saltem ut terminum unionis, a quo sumitur præcipua æstimatio & valor tantæ dignitatis, tanquam a forma, saltem extrinseca: ergo eadem virtus religionis, quæ inclinatur ad venerandam ipsam divinam personam propter se, inclinatur etiam ad venerandam Christi humanitatem, etiam præcise conceptam, ob dignitatem, quam ex unione habet, quia fundamentum præcipuum illius dignitatis est ipsum Verbum: ergo hoc sensu recte dicitur illa adoratio secundaria latria. Quod vero ad nomen hyperdulæ pertinet, nihil difficultatis habet, quæ ad rem pertineat, sed solum ad usum terminorum: nam si vox dulæ sumatur in ea communi significatione, ad quam est frequentiori usu theologorum accommodata, scilicet ut significet eam virtutem, qua Sanctos colimus, propter eorum creatam sanctitatem, & *hyperdulia* solum dicat excellentiam vel perfectionem intra latitudinem illius virtutis, sic non potest hæc adoratio, de qua nunc agimus, *hyperdulia* vocari, quia revera est species distincta, & ad altiore virtutem pertinet. Quia vero *latria* absolute dicta significat supremam & perfectissimam latriam, *dulia* vero accommodata est ad significandam communem quasi infimam adorationem Sanctorum, & nulla est alia simplex vox, quæ mediam (ut ita dicam) adorationem significet, eam scilicet, quæ aliquid addit supra communem duliam, & inferior est perfectæ latriæ, ideo vox illa interdum accommodatur ad huiusmodi adorationem significandam, quæcumque illa sit: hoc ergo sensu recte potest hæc adoratio hyperdulia



lia vocari, etiam si latria secundaria sit, & ad religionem spectet.

Exemplis  
res tota  
elucida-  
tur.

Ultimo confirmo hanc partem, & fere totam doctrinam hac sectione traditam, adhibitis duobus exemplis, quæ ad rem explicandam mihi videntur aptissima. Unum est de amore, nam si quis humanitatem Christi præcise & abstracte consideret, modo explicato in superioribus, contemplando illam solum ut quandam naturam rationalem, sanctissimam & purissimam, & summa quadam dignitate præditam, &c. potest ad illam affici, eamque supernaturaliter amare, quia amor erit rectissimus, etiam si illo non ametur persona Verbi, sed sola ejus humanitas, quia & ipsa est revera in se amabilis, & nullum est præceptum, quod obliget ad amandum semper Verbum, quoties illa amatur. Ille autem amor, quamvis sit ex charitate, tamen non attingit illam singularem excellentiam amoris super omnia, quo Deus amandus est, qui proportionate respondet summæ latriæ, sed infra illum est quidam amor excedens omnem amorem alterius creaturæ: ergo ad eumdem modum possumus per actum adorationis versari circa Christi humanitatem. Secundum exemplum est de laude, nam qui eodem modo considerat illam sanctam humanitatem, potest eam laudibus extollere non directe laudando Verbum, sed exaggerando gratias illi humanitati concessas, quæ laudatio, quamvis sit supra laudem omnis alterius creaturæ, nunquam tamen attingit supremam laudationem divinam, quæ ad latriam Dei spectat, nunquam enim laudabimus illam humanitatem quod infinita sit, aut creatrix rerum: ergo eadem proportionem de adoratione sentiendum est. Respondent aliqui, aliam esse rationem adorationis, aliam laudis, nam adoratio exhibet notam submissionis attendendo ad excellentiam rei adoratæ, & ideo ut digne fiat, semper debet attendi summa excellentia, sive sola, sive cum aliis simul consideretur: laus vero solum est prædicatio quædam dignitatis alterius, in qua non semper necesse est, summam perfectionem rei commemorare, neque omnes simul, sed in qualibet potest versari laudatio. Hæc vero differentia primum sine fundamento posita atque excogitata est, quia per se loquendo, & apud Deum nihil est, quod obliget ad adorandam rem propter summam excellentiā, quam in re habet, sed propter illam, quæ actu in ea consideratur: & aliunde nec tenemur semper considerare summam, neque etiam tenemur abstinere ab omni adoratione, quodcumque de suprema Dei dignitate non cogitamus, sed de aliqua inferiori. Deinde quæ est ratio, cur hoc sit necessarium in adoratione, & non in laudatione? Non enim ob aliam causam in laudatione id licet, nisi quia is, qui laudat rem ob inferiorem, non negat seu excludit majorem perfectionem, sed præcindit tantum, & vel non potest, vel non tenetur, omnia simul proferre, nec semper id, quod maximum est. Quod autem laudans profert lingua, adorans significat gestu vel actione aliqua. Ergo similiter, quamvis exhibeat signum minoris excellentiæ, non excludit majorem, sed præcindit: & vel non potest, vel saltem non tenetur semper exhibere signum supremæ dignitatis. Eo vel maxime quod ipsa laudatio, si ex conveniente affectu & intentione fiat, potest veram rationem adorationis habere: nam esse potest accommodatissima nota submissionis, ut quando quis divinam excellentiam extollit, animo se illi submittendi, & quasi exhibendi tributum, quod creatura debet creatori: ergo, sicut potest laudari humanitas Christi, ita potest ipsa laudatione adorari.

Denique, quidquid sit de illa differentia, ea nihil obstat ultimæ assertioni propositæ, nam in adoratione, quæ in illa explicatur, revera adoratur Christi humanitas propter summam excellentiam, quam habet, nempe propter gratiam unionis, qua nulla est alia major in illa humanitate: nam Verbum seu divinitas non est, proprie loquendo, excellentia humanitatis ipsius, sed Christi Dei hominis, a quo humanitas distinguitur, sicut natura componens a persona composita: summa ergo excellentia illius humanitatis est ipsa unio, & sanctificatio seu Deificatio, quæ non est Deitas ipsa, sed effectus ejus, in qua ipsa non includitur, nisi ut causa formalis extrinseca, ut declaratum est. At vero illa adoratione, quam appellavimus secundariam latriam, adoratur humanitas Christi propter hanc dignitatem, sicut de eadem laudari potest: ergo illa differentia non recte hic accommodatur. Unde

potest obiter notari, aliud esse adorari humanitatem propter summam ejus excellentiam, quod in eo actu fit, aliud vero esse adorari supremo modo, vel supremo actu, quo adorari potest, quod eo actu non fit: altiori enim actu & modo colitur, quando coadoratur Verbo per supremam latriam: quia, sicut optimum illi est esse substantialiter conjunctam Verbo, ita summus illius honos est coadorari Verbo suprema latria, quæ non in sola dignitate humanitatis, sed in excellentia ipsius personæ directe & per se primo fundatur.

Sed hinc insurgunt duæ objectiones. Prior est, quia repugnantia involvitur, cum dicitur humanitas adorari propter summam excellentiam, quam habet, & non adorari perfectæ latriæ: quia illa summa dignitas includit Verbum, saltem modo superius explicato: ergo adoratio, quæ in illa dignitate fundatur, fundatur in dignitate Verbi, & comprehendit Verbum ipsum: ergo est perfectæ latriæ. Et confirmatur, quia virtus religionis non colligit nisi Deum, neque exercet actum nisi perfectæ latriæ; sed dictum est, hanc adorationem elici a virtute religionis: ergo. Secunda difficultas est, quia sequitur ex dictis posse nos preces fundere ad humanitatem Christi, ut præcisam a Verbo, quia eadem videtur esse ratio orationis, quæ est adorationis. Unde ulterius fit, tali oratione non esse honorandam humanitatem cultu latriæ, sed inferiori, id est, non esse petendum ab humanitate Christi, ut nos sanctificet, vel alia dona gratiæ conferat, sed ut pro nobis intercedat: hoc autem alienum est ab Ecclesiæ consuetudine.

Ad priorem difficultatem respondetur, negando assumptum, & ad probationem dicitur, hanc adorationem proxime fundari in unione, & deificatione humanitatis, in Verbo tamen sicut in termino unionis, & tanquam in forma extrinseca deificante humanitatem. Atque hoc sensu conceditur hanc adorationem comprehendere Verbum & divinitatem, ut rationem adorandi, nego tamen inde sequi, illam adorationem esse perfectam latriam, quia eadem divinitas, quæ ut per se & essentialiter sancta est digna summa latria, ut deificans assumptam naturam non facit illam dignam summa latria, quia non facit illam æqualem sibi. Hæc ergo ratio, quamvis hæc adoratio fundetur suo modo in dignitate Verbi, non est latria summa, quia non fundatur in illa ut intrinsece & essentialiter dignificante Verbum, sed ut media unione sanctificante humanitatem: qui modus sanctificationis longe inferior est a sanctificatione per essentiam ipsius Verbi. Unde, quod dicitur, hanc adorationem completi Verbum & divinitatem, dupliciter potest intelligi. Uno modo ut completatur Verbum, ut rem adoratam directe & ut quod, & sic est falsum. Alio modo, ut completatur Verbum ut rationem adorandi non intrinsecam, sed quasi extrinsecam: & hoc sensu verum est. Neque id est contra nostram sententiam, nam, cum dicimus, hanc adorationem terminari præcise ad humanitatem, loquimur de re adorata, quæ appellari solet materia adorationis, non vero excludimus rationem adorandi, in qua potest Verbum comprehendere, si adoratio sit ratione unionis hypostaticæ.

Dices. Quomodo potest Verbum esse ratio adorandi, quin etiam sit res adorata? Respondeo, hanc difficultatem esse communem omnibus adorationibus respectivis, & quia clarius apparet in adoratione imaginum, ideo infra explicabitur latius. Nunc breviter dicitur, frequens esse in actibus intellectus & voluntatis, qui versantur circa aliqua objecta propter rationes extrinsecas, ut directe attingant objecta materialia, ut sunt sub formalibus, quamvis ipsæ rationes formales non eodem modo attingantur. Sicut electio versatur circa medium volendo illud propter finem, quamvis non versetur illo modo circa finem. Et hoc est, quod Cajet. hic notavit art. 1. scilicet aliud esse adorari ut rem adoratam, aliud ut causam adorationis: nam illud est adorari directe & expresse, hoc vero solum indirecte, & quasi implicite. Nam aliquid directe adorari est terminare passive actum adorationis, terminatur autem ille actus ad rem adoratam, non ad rationem adorandi. Et hoc est quod alii dicunt, terminari hanc adorationem ad materiale objectum, seu humanitatem ut quod, ad rationem vero adorandi ut quo; ut quando adoratur homo propter gratiam vel charitatem quam habet, non proprie adoratur ipsa gratia vel justitia

Obiectio  
duplex.

Utriusque  
enodatio.

Adorandi  
ratio non  
in quovis  
actu direc-  
te attingi-  
tur, sic  
ut nec in  
habitum  
aliorum  
adibus  
formales  
rationes.



tia tanquam res per se adorata, sed tanquam ratio adorandi: sic ergo intelligendum est in præfenti.

Nec refert, quod divinitas aut Verbum secundum se sit res per se digna adoratione, & objectum adorabile ut quod, quod non habet gratia, vel alia similis forma; nam licet divinitas secundum se talis sit, tamen in hac adoratione non spectatur ut talis, sed præcise ut forma extrinseca deificans humanitatem, & ut ratio adorandi illam: mens enim hominis potest facile unam rationem ab alia præscindere, & secundum illam operari. Quod si quis contendat non posse hanc adorationem referri ad Verbum, & in ejus excellentia niti aliquo modo, quin redundet in honorem, & adorationem ipsius Verbi, non multum cum eo contendendum est, quia potest esse dissensio in verbis magis quam in re. Moraliter enim loquendo verum est, redundare hanc adorationem in honorem Verbi, illud tamen magis est propter virtutem, quam propter formalem & directam adorationem. Sicut amor medii dicitur amor finis, & amor proximi, amor Dei, non formalis, sed virtualis. Denique aliis verbis dici potest, hoc actu non colit Verbum in recto, tanquam principale objectum, tamen adorari in obliquo, quia adoratur humanitas ut natura Verbi. Dices, hoc satis esse, ut illa sit suprema latria, quia quacumque ratione adoretur Verbum, suprema adoratio illi debetur. Respondetur, negando sequelam; Verbo enim tantum debetur suprema latria quando secundum se, & in se, ac propter se adoratur, non vero, quando tantum secundum quid, & ut ratio extrinseca adorandi aliud, ut latius constabit in disputationibus de imaginibus, & de reliquiis. Et ibidem etiam dicitur de confirmatione huic primæ difficultati adjuncta: ostendemus enim, virtutem religionis non solum elicere primum actum latriæ, quo colit Deum propter se, sed etiam plures secundarios, quibus colit res Deo specialiter sacratas & sanctificatas, propter ipsum Deum, non tantum ut finem ultimum, sed ut proximam adorandi rationem juxta ea, quæ in super. disp. tacta sunt.

Ad secundam objectionem quidam admittunt totum id, quod in argumento inferitur, scilicet, posse nos orare ad humanitatem Christi præcise consideratam, petendo ab illa non ut a supremo & principali auctore, sed ut ab organo conjunctissimo principali auctori: atque ita in hoc genere orationis non tribui humanitati cultum latriæ supremæ, sed inferioris. Ad usum vero Ecclesiæ respondent, Ecclesiam in publicis precibus non uti hoc modo deprecationis ad humanitatem Christi, tum ad vitandam occasionem erroris, tum quia alter modus orandi ad Christum, ut ad Deum hominem, melior est simpliciter. Non tamen reprobare Ecclesiam alium modum orandi ad Christi humanitatem, si absque scandalo, vel errore, aut periculo erroris fiat. Et hæc sententia tribuitur Cajetano Cordubæ, & Canisio. Imo quidam Theologi, qui aliàs negant humanitatem Christi posse præcise adorari, admittunt posse hoc modo exorari: quia per orationem non adoratur, sed tantum ab ea postulatur, ut aliquid faciat; potest autem ipsa aliquid facere per se, & ut præcisa a Verbo, scilicet deprecari & intercedere pro nobis: ergo. Sed hoc ultimum in primis repugnantiam mihi involvere videtur pro subiecta materia: nam, licet oratio ex ratione sua adorationem non includat, tamen potest esse optima, & accommodatissima nota adorationis, ut supra probavimus: unde cum nos oramus sanctos, ipsam et orationem exhibemus notam sanctitatis eorum, & amicitiae, quam habent cum Deo: ipsa ergo oratione possumus illos colere & adorare. Idem ergo erit circa Christi humanitatem. Præterquam quod, concessa adoratione, a paritate orationis inde arguuntur, efficax adoratione.

Deinde, falsum esse censeo, quod in illa ultima sententia dicitur, posse nos orare humanitatem Christi, quia potest ipsa postulare pro nobis, & intercedere per se sola, quod non facit Verbum, nisi per communicationem idiomatum. Nam ex hac doctrina sequitur, humanitatem solam, vel nunc esse, vel in via fuisse mediatricem pro nobis, qui est error hæreticorum hujus temporis, ut videbimus q. seq. art. 2. Sequela probatur, tum quia unus actus mediatoris seu intercessoris est precari. Tum etiam, quia, si humanitas per se sola intercedit pro nobis, etiam per se sola merebitur, satisfaciet, &c. nam est eadem ratio horum omnium: est ergo talis illa sententia, non solum quia actiones non sunt naturarum, sed suppositorum, petere

autem ac precari est aliquid agere; verum etiam quia oratio Christi non habet a sola humanitate eam vim & efficaciam, quam ad impetrandum habet vel habuit, sed a Verbo, nec potest ab illa humanitate alia ratio aut proficisci, aut peti, nisi disjungatur a Verbo.

Quapropter contrario prorsus modo censeo dicendum, etiam si humanitas adorari possit præcise, non tamen sic posse orari. Et ita ad objectionem positam nego sequelam; & ratio discriminis est, quia respectu adorationis solum se habet humanitas veluti passive ut objectum & materia circa quam actus animæ versantur: & quia anima suis actibus potest præscindere, quæ in re conjunctissima sunt, ideo potest adoratio ad humanitatem præcise dirigi, & non ad Verbum tanquam ad objectum primario adoratum: at vero oratio respicit eum ad quem funditur, ut in re ipsa potentem operari, quia per orationem petimus ab alio, ut aliquid nobis conferat vel pro nobis faciat: quia ergo humanitas in re nihil potest facere, nec mereri, nec satisfacere, nec petere, nisi Verbum per ipsam operetur, ideo nihil potest ab humanitate præcise sumpta postulari. Nec contrarium docent Cajetanus & alii auctores supra citati: quando enim ajunt posse nos orare ad Christum, ut pro nobis intercedat, non loquuntur de humanitate Christi, sed de Christo ut homine, de quo est verissima illa doctrina juxta dicta sectione præcedenti; & qui inter hæc duo non distinguunt, in magnam occasionem errandi incidunt; est enim Christus ut homo mediator & Redemptor noster, non autem humanitas ipsa. Unde operationes merendi, petendi, & similes, licet Verbo tribuantur per communicationem idiomatum, tamen huic homini Christo tribuuntur ut proprio principio operanti: soli autem humanitati nullo modo, nisi ut rationi agendi. Imo, si in illis operationibus, non solum entitas physica, sed etiam moralis valor & dignitas consideretur, petere etiam sunt a Verbo, licet media humanitate. Quo modo in superioribus dicebamus, redemisse nos Christum, non ut hominem tantum, sed ut Deum hominem.

Ex dictis satisfactum est fundamento hujus sententiæ, quod in principio insinuavimus, illam proponendo: & tam in hac, quam in præcedente sectione sæpius inculcatum est. Videndum solum superest, quid ex Conciliis & Patribus contra doctrinam traditam, & communiter a Theologis receptam afferatur. Præcipuum illud est, quod in anathem. 8. Cyrilli dicitur. *Si quis audet dicere, assumptum hominem una cum Deo Verbo adorandum, & glorificandum, & Deum tanquam alterum cum altero appellandum esse: illud enim particula, cum, perperno, si adiungatur, intelligere cogit: & non magis una adoratione Emmanuelem honorat: & unam illi glorificationem, sicuti verbum caro factum est, adaptat, anathema sit.* In hac definitione sermo est de humanitate, ut patet ex illo verbo: *hominem assumptum*, non enim est assumpta persona, sed sola humanitas, quæ nomine hominis sæpe a Patribus significatur. Juxta hanc ergo interpretationem damnatur ibi hæc locutio; *humanitas adoratur cum Deo Verbo*: damnatur item hæc; *humanitas & Verbum sunt adorabilia tanquam alterum & alterum*, supple, objectum adorabile. At vero, si humanitas præcisa a Verbo adorabilis esset, illa esset alterum objectum adorabile a Verbo; & uno modo esset per se adorabilis, alio autem modo cum Verbo, quæ omnia repugnare videntur illi definitioni. Unde Cyrillus in defensione illius anathematismi damnat dicentes, humanitatem & Verbum posse dividi in duos adorandos: & Concilio V. Constantinop. collat. 8. can. 9. damnantur, qui introducunt duas adorationes separatim Verbo, & separatim homini. Quæ tamen videntur necessario introduci juxta prædictam doctrinam. Et confirmatur primo ex VII. Synod. aet. 6. tom. 6. ubi refertur, Constantinopolitanam Synodum falso *Septimam* nominatam damnasse imaginem Christi hominis, quia per illam picturam dividitur humanitas a divinitate, eo quod divinitas depingi non possit, sed sola humanitas: & Concilium respondet: *Non dividi, sicut qui hominem depingit (ait) non inanimatum depingit*: ergo sentit Concilium, etiam cogitatione non posse dividi humanitatem a Verbo, alioqui, si cogitatione posset dividi, posset etiam depingi separata a Verbo. Unde Theodorus Ierolymit. in epist. quæ refertur aet. 3. ejusdem Concilii circa finem: *Adoramus (inquit) Christi imaginem, quæ admodum facies ejus vila est, non tamen a Deitate separata*;

Humanitas Christi quæ adorari præcise potest, non item orari.

Contrariæ sententiæ fundamentum satisfactum.

Preces ad humanitatem Christi præcise conceptæ an fundi possint.



tam. Absit, ut ita sentiamus, cum ab ipsa prima conceptione cum Deitate unita sit.

Confirmatur secundo, nam ex nostra sententia sequitur, hanc locutionem esse veram; humanitas adoratur propter Verbum, præsertim illo ultimo genere adorationis, quo diximus, posse humanitatem præcise adorari ratione unionis, & adorato Verbo ut quo, non proprie ut quod per se primo adoratur, consequens est contra id, quod dicitur in ep. 10. Cyrilli, quæ est Concilii Alexandrini: *Recusamus & hoc, ut de Christo quisquam dicat, propter eum, qui hominem induit, eum, qui indutus est, veneror, propter invisibilem adoro visibilem.*

Tandem afferuntur testimonia Patrum asserentium, Verbum & carnem non dividi, aut separari in adoratione, quos in duabus præcedentibus sectionibus late citavimus: præsertim favere videtur, quod Damascenus ait l. 4 de fide, c. 2. *Verbum incarnatum in eodem dignitatis honore sedere cum Patre, in eadem nimirum gloria ascita ipsius carne: una etenim eademque cum sua carne adoratione ab omnibus rebus conditis afficitur;* & c. 3. addit, humanitatem, si cogitatione secernatur a Verbo, non esse adorandam, ut conjunctam vero eadem, qua ipsum, adoratione coli. Adhibetque exemplum. Sicut lignum simplex natura sua tale non est, ut adiri non possit & contrectari, si tamen igne inflammetur, æque contrectari non potest ac ipse ignis, non ex se, sed ratione ignis adjuncti: ergo sicut non potest quis recedere ab igne concepto in ligno vel ferro, quin recedat a ligno, neque e converso potest accedere ad lignum, quin accedat ad ignem, ita non potest quis adorare humanitatem, quin adorare divinitatem. Item facit, quod Cyril. dict. anath. 8. ait, unam esse sedem, seu confidentiam humanitatis & Verbi: & ideo unam esse utriusque adorationem. Si autem sola humanitas diversa adoratione adorari posset, alteram per se haberet sedem gloriæ, quam Verbum. Præterea assertur Athanasius in epist. ad Adelph. contra Arian. aliquantulum a principio, ubi sic inquit: *Nec istiusmodi corpus seorsum discriminatum a Verbo adoratione prosequimur, neque Verbum adoraturi, Verbum a carne longe seponimus, &c.* & Ambros. de Incarn. Dom. sacram. c. 7. *Nunquid cum divinitatem ejus adoramus, Christum dividimus? Nunquid cum in eo imaginem Dei crucemque veneramus, dividimus eum?* Apertius Aug. in id Pf. 49. *Adorate scabellum pedum ejus, quoniam sanctum est, per scabellum, humanitatem Christi intelligens sic concludit. Et: cum adoras illum, ne cogitatione remaneas in carne, & ab spiritu non vivificeris.* Tandem Theod. ad Eph. 1. tractans illa verba: *Secundum operationem virtutis ejus.* sic ait: *Quod autem assumpta ex nobis natura ejusdem honoris cum eo, qui sumpsit, sit particeps ut nulla videatur adorationis esse differentia, omne miraculum superat.*

His testimoniis non solum respondendum est, sed etiam ostendendum, extra causam, quam Patres tractabant afferri. Primi ergo testimonii ex anathem. 8. ab eodem Cyrillo petenda est interpretatio, qui in defensione ejusdem anathematismi ad Orientales in fine ita concludit: *Igitur factus est anathematismus contra eos, qui modis omnibus dividunt Emmanuelem in hominem proprie & Deum Verbum: nobis enim unum & eundem Theologorum sermo predicabit, sacrarumque literarum in adulterata cognitio.* Et in exposit. anathem. dict. in Conc. Eph. ab eodem Cyrillo, his verbis illum exponit: *Siquis igitur adorari eum tanquam hominem una cum altero præter ipsum existente, videlicet Dei Patris Verbo, dicit, & non secundum veram unionem in unum Christum & Dominum conjunctum una adoratione honorat, iuste virtutis anathematismi hujus subijciatur.* Ex his ergo constat primo, ibi tantum esse sermonem contra Nestorium, qui ita dividebat Christum in duas personas, ut negaret posse una propria adoratione adorari, nisi tantum per accedens unam personam cum altera conjungendo. Secundo constat, falsum esse, hominem, in eo anathematismo pro humanitate sumi, nam Nestorius, cujus sententia ibi damnatur, non hominem, id est, naturam humanam, sed personam humanam dicebat esse assumptam, quia non ponebat assumptionem substantialem, sed accidentalem. Unde revera Cyrillus ibi non admittit hominem assumptum, sed ad damnandam sententiam hæreticam, eam opponit eisdem verbis, quibus hæretici illam asserbant. Hoc, quod per se clarum erat, declaravit ipse Cyril-

Suarez. Tom. XVI.

lus in defensione ejusdem anathematismi ad Evoptium, dicens. Non nos hominem assumptum esse dicimus a Deo Verbo, & copulatum illi secundum habitudinem quandam, quæ extrinsecus intelligatur, sed hominem cum factum esse definimus: & hanc ob causam excidisse a pietate dogmatum eos, qui audent dicere assumptum hominem adorandum cum Filio & Deo ut alterum cum altero.

Tertio constat ex his, hanc locutionem: Humanitas adoratur cum Verbo, seu, coadoratur Verbo, non esse damnatam in illo anathematismo. Probatur, quia ut dictum est, ibi non est sermo de humanitate, sed de hoc homine Christo, de quo longe diversa est ratio: & ideo ex una definitione non licet colligere aliam. Sed quæres, an illa propositio vera sit, vel falsa. Aliqui Theologi illam dampnant, quia, licet in verbis illius anathematismi non comprehendatur, comprehenditur tamen sub ratione ejus, scilicet: *Quia particula cum quoties adjungitur, denotat divisionem & separationem inter ea, quibus adjungitur.*

Mihi tamen videtur illa locutio in omni proprietate & rigore vera, humanitas adoratur cum Verbo, seu coadoratur Verbo, quod etiam hic Medina notavit. Et sumitur ex eodem Cyrillo in eodem l. A. Pol. ad Orient. ubi respondens Orientalibus illi obijcientibus, quod alio loco scripsisset, *Filium cum sua carne sedere ad dextram Patris;* & in anathematismo negaverit, filium cum homine adorari, dicit in hunc modum: *Et enim, quando ab una persona & natura, hoc est, substantia una, examinatur sermo ea ex quibus est, hoc est, naturaliter constat, assertur cum, hoc est, cum: servavit etiam sic per significationem, quod unum sint secundum compositionem, & non inter duo distincte discernit: quando autem ante distinctis substantiis in duo, & ad hoc quod oporteat seorsum alteram intelligi & proprie, si cum, vel per cum (supple dixeris) tunc eorum vel etiam plurium, & non unius secundum compositionem, factam manifestationem dicimus.* In quibus verbis declarat Cyrillus particulam cum non indicare accidentalem conjunctionem, & substantialem divisionem, nisi quando adjungitur terminis significantibus personas, vel res subsistentes; & ideo merito damnat illam propositionem, Christus coadoratur Verbo, vel homo assumptus adoratur cum Deo. At vero quando illa particula interponitur naturæ & personæ, aut partibus componentibus totum, licet significet aliquam distinctionem, non tamen excludere substantialem unionem & compositionem. Et adhibet exemplum Cyrillus, dicens: *Ut, exempli gratia, si dicerem forte, cohonorari animam hominis cum suo corpore, qui honor certe fieret a quipiam erga unum hominem, qui est ex utrisque; vel si quis diceret, animam cum suo corpore esse unum animal, non propterea in duos homines unum dividit: videtur autem potius non ignorare ea ex quibus sit, hoc est compositum sit naturaliter.*

Dicunt aliqui, Cyrillum, non simpliciter admittere illam locutionem, sed adjuncto illo relativo, sua, vel alia dictione simili, quæ denotet substantialem unionem; sicut enim ait, animam cohonorari cum suo corpore; & Filium cum propria carne confidere Patri. Sed Cyrillus non facit vim in illo pronomine vel relativo, sed in significatione particulae cum, quæ accommodatur extremis quibus adjungitur. Unde, si extrema significantur ut supposita, etiam si addas, homo cum suo Deo, vel Deus cum suo homine, erit falsa locutio. E contrario vero, si extrema sint partes, vel suppositum & natura, etiam si non addatur pronomen, vel relativum suus, vel sua, vera erit locutio. Et ratio est, quia particula cum ex se societatem, & conjunctionem significat, ut Latini ajunt; & ideo, si extrema ex se non sunt suppositaliter distincta, non significat talem distinctionem in eis, sed potius apta est conjunctionem substantialem significare: & quavis hæc expressius significari videatur, quando additur relativum sua vel simile, tamen, etiam si non addatur, illa significatio non excluditur, neque alius falsus sensus indicatur: imo etiam addendo prædictum relativum, adhuc potest significari unio accidentalis, ut patet in exemplo posito, Petrus cum suo servo, vir cum sua uxore, &c. honorantur, vel Imperator cum sua veste adoratur: ergo de se est indifferens significatio, accommodatur autem extremis: idem ergo est de particula cum, etiam si sola ponatur. Et ita Augustinus sermone 58. de verbis

Propositio hæc, humanitas Christi Verbo coadoratur, an damnata, an saltem falsa.

Responsio.

Disputatio objectio.



Domini sicut admittit hanc propositionem, diadema Regis simul cum Rege adoratur: ita & hanc, carnem Christi simul cum divinitate adoramus. Et Epiphanius in Anchorat. *Adoratur* (inquit) *Rex, coadoratur autem cum ipso etiam purpura, quam gestat.* Et eodem modo explicat adorari Verbum, & coadorari humanitatem. Et Damascenus l. 3. c. 8. agens de Christo, inquit: *Cui unam candemque adorationem cum Patre & Spiritu sancto, ac cum immaculata ipsius carne adhibemus.* Similiter apud Cyrillum ex Athanasio legimus, l. 1. de Fide ad Reginas, circa principium: *Confitemur unam naturam Dei Verbi incarnatam, & adorabilem cum carne sua una adoratione.* Est igitur illa locutio satis propria & frequens apud Patres.

Illatio.

Quarto infero ex prædicta expositione, in eo anathematismo octavo nihil definitum aut damnatum esse de hac locutione. Verbum & humanitas sunt duo objecta adorabilia, aut sunt adorabilia tanquam alterum cum altero. Probat, quia, ut ostensum est, ibi non est sermo de humanitate, sed de homine: dicere autem, Christum hominem esse alterum a Verbo, est plane hæreticum; & ideo merito damnatur illa propositio, in qua hæc alteritas (ut sic dicam) significatur: nam cum Christus & Verbum sint unus, non possunt esse alter & alter, ut supra questione decima septima, visum est. At vero humanitas eo modo, quo est ens, est alterum ens a Verbo, & altera natura a deitate Verbi: & ideo ea, quæ de homine dicuntur, non necessario ad humanitatem extenduntur. In illo ergo decreto nihil de adoratione humanitatis, ut distinctæ a Verbo dicitur.

Quæstio respondetur.

Quæri vero hic potest, sicut in præcedente puncto, an illa locutio in rigore vera sit, vel falsa. Et respondeo breviter, simpliciter non esse admittendam, sed negandam potius, nam in rigore impropria est & falsa, quia humanitas Christi non est per se ens, sed est quasi pars seu natura componens Christum: & ideo Christus, & humanitas ejus non possunt simpliciter dici duo objecta adorabilia, sicut B. Virgo & anima vel corpus ejus non sunt plura objecta adorabilia, quia anima & corpus componunt unum objectum adæquatum & completum propriæ adorationis, quamvis mens humana possit præscindere, & circa unam vel alteram partem præcise versari. Eo vel maxime, quod adoratio simpliciter & propriissime dicta dirigitur ad personam, cujus proprium est habere excellentiam, potentiam, & dominium, in quibus adoratio fundatur: & ideo, ubi non sunt duæ personæ, non possunt simpliciter admitti duo objecta adorabilia, sed ex se unum est, etiam si mens possit quasi in partes illud dividere. Quo etiam fit, multo minus dici posse adorari humanitatem cum Verbo, tanquam alterum cum altero, nam alter & alter proprie non dicuntur, nisi de personis, seu suppositis. Et in hoc sensu loquitur aperte Cyrillus in cit. loc. Tandem propter eandem rationem non sunt absolute concedendæ duæ adorationes humanitatis & Verbi, seu Christi, etiam si humanitas dicto præciso modo possit adorari: nam proprie & ex se petit adorari simul cum Verbo, & una atque eadem adoratione, qua Verbum; & quando mente præscinditur, illa adoratio est veluti incompleta, & quasi pars alterius, sicut humanitas ipsa incompletum objectum est; & ideo sicut pars & totum non sunt duo simpliciter, ita neque illæ sunt duæ adorationes simpliciter, sed solum secundum quid; sicut Christus, & humanitas ejus, non sunt duo simpliciter, sed secundum quid. Quamquæ, ut dixi, quando Concilia loquuntur de una adoratione Christi Dei & hominis, solum tractant de propria & completa adoratione, quæ ad personam refertur, de qua quomodo una sit, dictum est sect. præc. An vero, præter hanc completam adorationem possit humanitas præcise concepta, quasi incomplete adorari, & an hæc adoratio sit aliquo modo distincta ab illa, nihil Concilia tractant, quia ad dogmata fidei non pertinebat. Et per hæc satis responsum est ad ea, quæ ex Conc. V. Constant. & ex Cyrillo in fine illius argumenti adducuntur.

Ad primam confirmationem ex VII. Synodo respondetur ex superius dictis, aliud esse dividere, aliud esse præscindere seu præcise abstrahere. Nam dividere idem est, quod separare, & negando abstrahere unum ab alio; præscindere autem solum est considerare unum non considerando aliud. Hæretici ergo, qui dicebant, per imaginem Salvatoris representantem eum ut hominem di-

vidi humanitatem a divinitate, loquebantur proprie de divisione negativa; volebant enim ex vi talis imaginis representari Christum ut purum hominem, ut causam invenirent ad reiiciendam talem imaginem. Et hoc modo recte dicit Concilium, per huiusmodi imaginem non dividi humanitatem a Verbo, sicut non dividitur corpus ab anima, quando homo secundum figuram corporis in imagine representatur: & in hoc sensu, etiam si ad mentis cogitationem hoc extendatur, verum est non posse dividi humanitatem a divinitate, id est, ut separata cogitari, negando videlicet, eam esse unitam Verbo. Secus vero est de abstractione præcise, in qua nullum est mendacium. Neque oportet in hoc figuram sensibilem conceptioni mentis æquiparare, quia multo subtilior est cogitatio mentis, quæ potest etiam indivisibilia dividere: nihilominus nonnulla est similitudo, nam etiam per imaginem sensibilem Christi hominis representatur expresse humanitas ejus, non vero divinitas. Unde, licet non representetur humanitas separata seu divisa a divinitate, dici tamen potest representari præcise, quatenus imago ita est similis humanitati, ut non sit similis divinitati, quamquam, supposita fide, representata illa humanitate, implicite nobis representetur conjuncta divinitati, quia credimus ita existere, semperque existisse. Quamvis autem hoc in re ita sit, potest mens nostra non semper id cogitare, sed unum ab alio præscindere.

Ad secundam confirmationem concedo, hanc locutionem esse verissimam, humanitas adoratur propter Verbum, quia in ea nihil aliud significatur, quam Verbum esse rationem adorandi humanitatem, quod est verissimum, non solum in hoc improprio & imperfecto modo adorandi, quo humanitas in abstracto colitur, sed etiam in illa perfectissima adoratione, qua, dum Christum & Verbum adoramus, ipsius coadoramus humanitatem: nam tota ratio, ob quam adoratio illa redundat in humanitatem, est Verbum, cui conjuncta est: sic Damasc. l. 4. c. 3. *Caro* (inquit) *suapte quidem natura minime adoranda est, verum in incarnato Deo Verbo adoratur, non quidem vi sua, sed ob Deum Verbum, personaliter ipsi copulatum:* & id declarat exemplo ferri igniti, quod tangere non audeamus, non propter se, sed propter conceptum ignem. Idem sumitur ex aliis Patribus sect. præc. citatis. Neque contra hoc quicquam obstat verba citata ex ep. 10. Cyrilli, nam, ut sæpe dixi, ibi non est sermo de humanitate, sed de homine, qui sit alter a Verbo, & quo Verbum indutum fuerit, quod fieri non potuisset, nisi accidentali unionem & denominationem. Et ratio, quam statim Cyrillus subiungit, hoc satis declarat, nimirum, quia qui hoc modo loquitur, hominem a Deo dividit.

Superest, ut respondeamus ad testimonia Sanctorum.

Ad Damasc. respondetur, verissimum esse, Verbum Incarnatum in eadem esse gloria cum Patre, & carnem ejus ad participationem ejusdem sedis esse subvectam, & ideo una adoratione coli cum ipso, quando Verbum ipsum incarnatum adoratur: hoc autem nil impedit, quominus possit humanitas cogitatione præscindi, ut ipsemet Damasc. ibidem fatetur, dicens: *Si subtili cogitatione id, quod in oculos incurrit, ab eo, quod animo tantum ac ratione intelligitur, distinxerit:* non enim hanc conditionalem posuit ut constantem ex hypothesi impossibili, sed plane ut possibilem ex mentis acumine. Ideo enim addidit illud, *subtili cogitatione*, nam si de re impossibile, aut quæ de facto nunquam fiat, loqueretur, dicere posset, si re ipsa humanitatem a Verbo separaveris. Quod vero addit, humanitatem sic cogitatam non esse adorabilem, recte a D. Th. expositum est de absoluta & perfecta latría. Exemplum vero ferri igniti, quo Damasc. utitur, non esse ita materialiter intelligendum, ut animi motus in omnibus existimandi sint similes, vel proportionati motibus corporis. Quamvis ergo motu corporis non possit, quis accedere vel recedere ab ignito ferro, quin ab igne recedat, cogitatione tamen recte potest unum ab alio fecernere, & ad unum sine alio accedere: & proprietates, quas unumquodque ex se sine alio habet, vel quas participat ex consortio alterius, præcise considerare. Cum ergo adoratio actibus mentis fiat, & tendat in rem prout cogitatur, quamvis humanitas Christi sit igne divinitatis ignita, cogitari potest, vel secundum se, vel secundum dignitatem, quam habet ex unionem ad divinitatem, non cogitata divina perso-

Patrum testimonia expquntur.



na, vel natura secundum se seu tanquam objectum, circa quod per se primo versetur cogitatio, sed solum ut forma extrinseca, seu terminus unionis humanitatis.

Ad Cyrillum respondetur, humanitatem proprie ac per se non habere sedem distinctam a persona cuius est, nam sedere ad personam per se pertinet, sicut regnare & dominari, & habere alios titulos dignitatis & potentiae, qui per illam sedem intelligantur; tamen, licet humanitas per se non habeat sedem, in illam redundat illius sedis dignitas & participatio quædam, secundum quam potest præcise concipi, & coli. Ex quo non fit, humanitatem habere distinctam sedem, sed potius sequitur, humanitatem per se non habere sedem, neque ita illi in abstracto considerata convenire totam maiestatem personæ fedentis, sicut ipsi personæ vel divinæ naturæ. Quod si quis inferat, hinc sequi, humanitatem non adorari, quia adorari solum est equi, qui in throno, seu dignitate sedet, respondetur, hoc esse verum de propriissima & completa adoratione, de qua Cyrillus eo loco agebat: incomplete tamen ac minus proprie ex præcisione mentis ac cogitationis humanæ non repugnat, humanitatem in abstracto consideratam adorari.

Atque hinc facile respondetur ad Athanasium; solum enim docere intendit contra Nestorianos, corpus Christi & Verbum eadem adoratione completa & integra coli, & non esse adoranda tanquam re ipsa separata, & personaliter disjuncta, non vero excludit Athanasius, quin præcisione mentis possit unumquodque secundum propria concipi. Cuius argumentum manifestum sumitur ex illis verbis: *Neque Verbum adoraturi, Verbum a carne longe seponimus*. Nam secundum præcisionem mentis clarum est, posse nos Verbum præcise concipere & adorare: ergo, cum ait: *Verbum non longe seponimus*, loquitur de abstractione negativa, & de separatione in re ipsa: ergo eodem sensu intelligendus est, cum dicit e contrario, corpus non separari a Verbo. Atque idem plane est sensus Ambrosii, nam dividere Christum, ut supra dixi, non est præciscere, sed negare unitatem personæ: hoc autem modo non dividit Christum, qui humanitatem ejus præcise cogitat & adoratur, sed solum distinguit naturas: dicit autem paulo inferius idem Ambrosius: Non divido Christum, cum carnis ejus, divinitatisque distingo substantiam.

Ad Augustinum respondetur, eodem sensu loqui, quo ceteros Patres: cum ergo ait, Adorando Christum non esse de sola carne cogitandum, sensus est non esse de Christo cogitandum tanquam de puro homine; de quo nihil possit altius ac excellentius cogitari, quam sit caro seu humanitas; qui autem de Christo cogitat excellentiam, quam habet in humanitate, etiam si aliam excellentiam non consideret, dummodo non excludat, non remanet in carne, quia vere credit divinitatem ejus, etiam si de ea actu non cogitet. Præsertim, quia aliud est loqui de Christo, prout Augustinus loquitur, aliud de humanitate, de qua nos nunc agimus: Christus enim semper cogitandus est Deus, humanitas vero non potest cogitari Deus. Unde, si ob hanc solam causam dicatur aliquis sistere in carne, quia cogitans humanitatem non apprehendit illam ut Deum, neque ut divinam & increatam naturam, non male facit neque errat; imo contrarium cogitando valde erraret: immerito tamen diceret huiusmodi homo remanere in carne, si cogitet illam humanitatem non ut divinam, sed ut deificatam naturam, aut divino Spiritu excellenti modo sanctificatam.

Ad Theodoretum respondetur, ibi loqui de illa adoratione, qua humanitas cum Verbo, & in Verbo, simul adoratur, quod merito dicit esse magnum miraculum, quia fundatur in admirabili hypostatica unionem. De alio vero modo adorationis per mentis præcisionem nullum ibi sermonem habet, & sicut talem modum non docet, ita neque excludit.

**Objeçtio.** Dices, esto verum sit, prædictos Patres non habuisse sermonem de hoc adorationis modo, neque illum aperte exclusisse, tamen, cum semper meminerint unius adorationis perfectissimæ & excellentissimæ latriæ Verbi incarnati & humanitatis ejus, hoc ipso videntur omnem aliam excludere; non est ergo sine auctoritate Patrum introducenda. Respondetur, in primis falsum esse, eos virtute vel implicite negasse hunc modum adorationis, quia expressam mentionem illius non fecerunt, cum in

Suarez. Tom. XVI.

hoc modo nihil contineatur contrarium doctrinæ ipsorum, sed potius ex ea colligi possit, cum doceant, naturas ipsas, sicut manserunt distinctas, ita etiam esse diversæ dignitatis & excellentiæ. Addiditque aperte Damascenus, cogitatione secerni posse. Deinde, quod Patres non fecerint expressam mentionem hujus adorationis, occasio fuit, quia cum hæreticis disputabant, contra quos nihil deserviebat hic adorationis modus, vel etiam, quia loquebantur, de adoratione, quæ regulariter ac publice est in usu Ecclesiæ. Satis ergo est, quod D. Tho. & scholastici omnes hos modos adorationis distinxerint & declaraverint. Et ex dicendis inferius de adoratione imaginum constabit magis hic adorationis modus.

Ultimo definitur facile ex dictis, quid dicendum esset de humanitate Christi, si re ipsa separaretur a Verbo. Refert enim Waldensis l. 1. doctr. fid. antiqu. art. 3. c. 44. Wicleffum dixisse, humanitatem in eo casu esse adorandam latria: intelligebat autem de latria suprema, & absoluta, ut patet ex illis verbis Waldensis: *Adoratione illa, qua Scriptura dicit, Dominum Deum tuum adorabis, & illi soli servies*. Quo sensu est plane falsa & erronea sententia. Et in sensu contrario dixerunt Aug. serm. 59. de ver. Dom. & Epiphan. in Ancor. humanitatem, si esset separata, non fore adorandam, suprema scilicet, & absoluta adoratione. Nihilominus aliqua inferiori adoratione coli posset talis humanitas: nam, si retineret eadem dona creata gratiæ, proprie & absolute adoraretur hyperdulia, ut per se clarum est, cum vero jam non esset unita, non posset ratione unionis actualis adorari. An vero propter unionem præcedentem esset aliquo modo adorabilis, dicemus commodius infra de adoratione reliquarum disputando. Sed objici potest, nam licet humanitas separaretur a Verbo, maneret in illa dignitas redemptoris, ratione cuius mereretur adorationem latriæ. Respondetur, esse redemptorem proprie convenire personæ, non naturæ; persona autem, quæ tunc illa humanitate subsisteret, non esset redemptor, sed solum haberet in se naturam, quæ in Verbo fuit principium proximum seu organum redemptionis: hæc autem dignitas, ut bene notavit Scotus in 3. dist. 9. non est fundamentum sufficiens adorationis latriæ, sed solum hyperduliæ: beneficium enim redemptionis, vel potius vis & potestas redimendi, solum in principali auctore esse potest sufficiens ratio adorationis latriæ: quia solum illa excellentia est in eo ordine suprema & infinita.

### ARTICULUS III.

*Utrum Imago Christi sit adoranda adoratione latriæ.*

**A**d tertium sic proceditur. Videtur, quod imago Christi non sit adoranda adoratione latriæ. Dicitur enim Exod. 20. *Non facies tibi sculptile, neque omnem similitudinem. Sed nulla adoratio est facienda contra Dei præceptum. Ergo imago Christi non est adoranda adoratione latriæ.*

2. Præterea, Operibus Gentilium non debemus communicare, ut Apost. dicit Ephes. 5. *Sed Gentiles de hoc præcipue inculpabantur, quod commutaverunt gloriam incorruptibilis Dei in similitudinem imaginis corruptibilis hominis, ut dicitur Rom. 1. Ergo imago Christi non est adoranda adoratione latriæ.*

3. Præterea, Christo debetur adoratio latriæ ratione divinitatis, non ratione humanitatis. Sed imagini divinitatis ejus, quæ est animæ rationali impressa, non debetur adoratio latriæ. Ergo multo minus imagini corporali, quæ repræsentat humanitatem ipsius.

4. Præterea: Nihil videtur esse in cultu divino faciendum, nisi quod est a Deo institutum: unde Apostolus 1. ad Corinth. 11. *traditurus doctrinam de sacrificio Ecclesiæ, dicit: Ego accepi a Domino quod & tradidi vobis. Sed nulla traditio in Scriptura invenitur de adorandis imaginibus. Ergo imago Christi non est adoranda adoratione latriæ.*

Sed contra est, quod Damasc. inducit Basilium dicentem\*, *Imaginis honor prototypum pervenit, id est exemplar. Sed ipsum exemplar, scilicet Christus, est adorandus adoratione latriæ. Ergo & ejus imago.*

Respondeo dicendum, quod sicut Philosophus dicit in libro\* de Memoria & reminiscencia: duplex est motus animæ in imaginem. Unus quidem in ipsam imaginem, secundum quod res quedam est, alio modo in imaginem,

Christi humanitas ab ipso in re se jundia, quo cultu venerabilis existet.

Instantie sit satis.

146.  
2. a. q. 81.  
2.1 ad 3.  
& q. 49. 2.  
2. ad 2. & t.  
inf. ar. 14.  
corp. & 2.  
5. 2.1 2. &  
3. d. 9. q. 1.  
2.2 q. 2.

Li. 4. c. 17.  
non longe a prin.

Cap. 2.  
circa  
med. to. 2.



in quantum est imago alterius. Et inter hos duos motus est hæc differentia: quia primus motus, quo quis movetur in imaginem, ut est res quedam, est alius a motu, qui est in rem: secundus autem motus, qui est in imaginem, in quantum est imago, est unus & idem cum illo, qui est in rem. Sic ergo dicendum est, quod imagini Christi in quantum est res quedam (puta lignum sculptum vel pictum) nulla reverentia exhibetur: quia reverentia non nisi rationali naturæ debetur. Relinquitur ergo quod exhibetur ei reverentia solum in quantum est imago, & sic sequitur, quod eadem reverentia exhibetur imagini Christi. & ipsi Christo. Cum ergo Christus adoretur adoratione patriæ, consequens est quod ejus imago sit adoratione patriæ adoranda.

Ad primum ergo dicendum, quod non prohibetur illo præcepto facere quamcunque sculpturam vel similitudinem, sed facere ad adorandum. Unde subdit: Non adorabis ea, neque coles. Quia, sicut dictum est, idem est motus in imaginem & in rem, eo modo prohibetur adoratio imaginis, quo prohibetur adoratio rei, cujus imago est. Unde ibi intelligitur prohiberi adoratio imaginum, quas Gentiles faciebant in venerationem deorum suorum, id est demonum. Et ideo præmittitur. Non habebis deos alienos coram me. Ipsi autem vero Deo, cum sit incorporeus, nulla imago corporalis poterat poni: quia, ut Damascenus dicit\*, insipientia summa est & impietatis, figurare quod est divinum. Sed quia in novo Testamento Deus factus est homo, potest in sui imagine corporali adorari.

Ad secundum dicendum, quod Apostolus prohibet operibus infructuosus Gentilium communicare, communicare autem utilibus eorum operibus Apostolus non prohibet. Adoratio autem imaginum est inter infructuosa opera computanda quantum ad duo. Primo quidem quantum ad hoc, quod quidam eorum adorabant ipsas imagines ut res quasdam, credentes in eis esse aliquid numinis propter responsa, quæ demones in eis dabant, & alios huiusmodi effectus mirabiles. Secundo, propter res quarum erant imagines, stantebant enim huiusmodi imagines aliquibus creaturis, quas in eis veneratione patriæ venerabantur. Nos autem adoramus adoratione patriæ imaginem Christi, qui est verus Deus, non propter ipsam imaginem, sed propter rem cujus imago est, sicut dictum est.\*

Ad tertium dicendum, quod creature rationali debetur reverentia propter se ipsam: & ideo si creature rationali, in qua est imago Dei, exhiberetur adoratio patriæ, posset esse erroris occasio, ut scilicet motus adorantis sisteret in homine, in quantum est res quedam, & non referretur in Deum cujus est imago. Quod non potest contingere de imagine sculpta vel picta in materia sensibili.

Ad quartum dicendum, quod Apostoli familiari instinctu Spiritus S. quedam Ecclesiis tradiderunt servanda, quæ non reliquerunt in scriptis sed in observatione Ecclesiæ per successionem fidelium. Unde ipse Apostolus dicit 2. ad Thess. 2. State, & tenete traditiones, quas didicistis, sive per sermonem, scilicet ore prolatum, sive per epistolam, scilicet scripto transmissam. Et inter huiusmodi traditiones est imaginum Christi adoratio. Unde & beatus Lucas dicitur depinxisse Christi imaginem, quæ Romæ habetur.

#### COMMENTARIUS.

Quæ D. Th. docet tam in corp. art. quam in singulis solutionibus argument. proluxa disputatione, & examinatione indigent, & ideo rem ipsam tractantes, commodius mentem, & literam D. Th. explicabimus.

#### DISPUTATIO LIV.

In septem sectiones distributa.

##### De usu, & adoratione imaginum.

ET si D. Tho. de solius Christi imagine quæstionem proponat: tamen quia eadem fere difficultas de omnibus imaginibus Dei, & sanctorum versatur, omniumque cognitio commodius simul tradetur, ideo de omnibus exacte disputandum est. De quibus primum generatim videbimus, an retinendæ sint imagines, deinde quæ reverentia, & cultu tractandæ, ubi etiam obiter attingemus nonnulla de cultu aliis signis, & rebus sacris debito.

Utrum liceat, & expediat Ecclesiæ, Christi, & Sanctorum hominum imaginibus uti.

OMnes fere infideles, Christi Ecclesiam calumniati sunt, eo quod hominum imaginibus utatur, & præfertim, quod ad ornatum templorum, vel rerum sacrarum, ut vestium, vasorum, & similium, eas fieri, seu depingi permittat. Hæc fuit consuetudo non tantum hæreticorum, sed etiam Hebræorum, & Saracenorum, ut colligitur ex multis, quæ in VII. Synod. act. 4. & 5. referuntur; Nicephorus tamen l. 16. hist. c. 27. quendam hæreticum vocatum Renajam dicit fuisse primum, qui vocem illam evomuit, Christi & eorum, qui illi placere, imagines venerandas non esse. Ex Imperatoribus, primus omnium Philippicus imagines Sanctorum e parietibus sanctæ Sophiæ ignominia causa abradi jussit, cui Constantinus Papa restitit (ut Platina refert); sed ille non tam erravit in doctrina de imaginibus, quam in alijs dogmatibus fidei: nec tam ex errore, quam ex odio, imagines non omnino sanctorum, sed illorum Patrum, qui sextæ Synodo interfuerant, delevit. Legatur Paul. Diaconus lib. 18. in addit. Eutropii, & li. etiam 21. Jam vero Leo III. dictus Isaurus, a quibusdam Judæis deceptus, hunc errorem vehementissime auxit, nam & imagines e templis deponi aut deleri præcepit, & igni tradi, & fideles, qui ei contradicere ausi sunt, interfecit, ut referunt Paulus diaconus, & Zonaras in vita ipsius, & Cedrenus in compendio historiæ, & Sanderus l. 7. de visib. Monar. hæresi 130. & Plat. in Greg. II. refert, illum Leoni restitisse, & Greg. III. illum excommunicasse, & Imperio privasse: & hanc fuisse primam occasionem, propter quam a Græcis Imperatoribus Latina Ecclesia defecit. In eodem errore perstitit Constantinus V. dictus Copronymus Leonis filius, qui etiam Nestorianus fuit, ut ex eisdem historiis constat, qui conciliabulum Constantinopolitanum contra imagines congregavit. Retinuit postea eundem errorem Leo IV. quo mortuo Irene uxor ejus, & Constantinus VI. ejus filius Catholicam Ecclesiam defenderunt, & eorum tempore Adrianus I. congregavit VII. Synodum II. Nicenam pro imaginum defensione. Ille vero Constantinus grandior factus, repudiata Nicæna Synodo, errori Iconomachorum adhæsit. Ante quos omnes Imperatores Julianus Apostata imaginem Christi confregit, & Christianis, quod imagines ut idola, adorarent, objecit, & Cyril. Alexandrin. lib. 6. contra illum circa med. & Sozomen. lib. 5. histor. cap. 20. testantur. Postea vero hunc errorem secutus est Felix, ut docet Concil. Senonen. Decret. fidei cap. 14. & ejus discipulus Claudius Taurinensis Episcopus, ut refert Jonas Aurelian. libris de cultu imaginum, quos contra illum scripsit. Postea Wicleff eundem errorem amplexus est, ut late Walden. tractat to. 3. de sacramental. c. 50. & seqq. qui in Concil. Constantiensi sess. 15. damnatus est. Denique Lutherus, Calvinus, Zuñglius, Carolstadius, & reliqui hujus temporis heretici vehementer contra imagines invehuntur, ut referunt Præte. sub eorum nominibus, Lindanus in suo Debit. dial. 2. Cochleus in actis Lutheri, & Sanderus l. de typica imaginum adoratione. Fundamenta hujus erroris postea proponemus, & varios modos, quibus hic error explicari, & affirmari potest, declarabimus.

Advertendum est ergo, imagines variis modis, & propter diversas causas depingi posse, primo propter historiam, ut videlicet, sicut verbis, vel scriptis facta antiquorum in memoriam revocantur, ita etiam per imagines, seu picturas oculis quasi cernenda proponantur. Secundo possunt imagines depingi, quæ simpliciter personas aliquas representent, idque vel propter ornatum tantum, vel propter voluntatem, sicut depinguntur figure animalium, vel aliarum rerum inferiorum, vel propter recordationem, & amorem rei representatæ, vel denique propter aliquem cultum, & venerationem.

Dico igitur primo, usum imaginum non esse prohibitum, sed potius per se loquendo licitum esse, & honestum, & ideo merito in Catholica Ecclesia retineri. Hæc conclusio est fidei, & fundamentum habet in nonnullis sacris Scripturæ locis, quos melius secutio. sequenti tractabimus. Nunc potissimum probatur usu, & traditione Ecclesiæ, quam ab ipso Christo Domino originem duxisse

Icone  
mac h  
is.

Lib. 4. c.  
25. ante  
med.

In corp.  
art.

Imagin  
usus ho  
actus.



Salvato-  
ris imagi-  
nes.

constat. Primo enim ipse sue faciei imaginem linteo impressam reliquit, quæ Romæ adhuc servatur, & ostenditur, ut habet antiqua traditio. Secundo similiter reliquit sui corporis delineamenta impressa in syndone, in qua involutus jacuit in sepulchro, & Taurini servari & demonstrari dicitur. Tertio, misit effigiem suam Abagaro regi Edessæ, ut testantur Stephanus, & Adrianus Pontifices apud Ivonem 4. patt. sui decreti c. 83. & habetur etiam in lib. Adriani de imaginibus non longe a princ. in 3. tomo Conciliorum, & eandem historiam refert Damasc. lib. 4. de fide c. 17. & orat. 1. de imaginibus circa finem; & Evagrius lib. 4. hist. c. 26. addit, ob præsentiam illius imaginis, civitatem Edessæ sæpe fuisse incendio liberatam. Idem refert Nicephor. lib. 2. hist. cap. 17. subjungens, eodem tempore reges Persarum, Christi, & ejus matris imagines accepisse. Referunt etiam hanc imaginem postea fuisse Constantinopolim translata, ejusque translationis festum anniversaria Græcorum solennitate celebrari 16. Augusti, ut patet ex Calendario Græco, seu menologio; quod latinum fecit Genebrar. & habetur to. 4. Bibliot. sanct. Quarto, est vetus historia de imagine Christi Domini crucifixi a Nicodemo depicta, quam postea Judæi contumeliis affecerunt, & lancea transfixerunt, & ab illa sanguis profluxit, quo multorum corpora, & mentes sanatae sunt, teste Athanas. vel sub nomine ejus, aliquo antiquo auctore, ser. de Passione imaginis Domini, quam historiam VII. Syn. act. 4. & citat, & approbat. Quinto, habetur etiam antiqua traditio, mulierem illam, quam Christus a fluxu sanguinis liberavit, in memoriam tantibeneficii, imaginem, seu statuam Salvatoris Cæsareæ erexisse, quod refert Eus. l. 7. hist. c. 14. ubi addit, juxta illam imaginem nasci solitam herbam, quæ cum primum fimbriam imaginis attingebat, similem morbum curabat. Quam historiam recipit etiam dicta VII. Syn. act. 4. in ep. Germani Patriarchæ Constantin. circa fin. ejusdem meminit Niceph. l. 6. hist. c. 15. & Damasc. orat. 3. de imaginibus circa medium, & Theophyl. Matth. 9. Indicat autem Ambr. l. de Salomone c. 5. mulierem illam fuisse Martham, quod ex Eusebio colligi non potest, solum enim dicit ex illa civitate Cæsareæ fuisse oriundam & pro foribus domus suæ illam statuam æneam posuisse. Sexto est vulgaris traditio, ejus hic D. Th. ad 4. meminit, de imaginibus Christi, & Virginis, a B. Luca depictis, in quarum memoriam, & venerationem amplissima, & antiquissima monumēta constructa sunt, quæ adhuc oculis cernuntur. Harum imaginum fecit mentionem Niceph. l. 2. hist. c. 43. & l. 6. c. 16. & l. 14. c. 2. & Simon Metaph. in vita S. Lucæ. Septimo, habemus ex antiquis historiis Sylvestrum P. imagines Petri, & Pauli, quas apud se habebat, Constantino Imperatori ostendisse, quibus ille cognovit eosdem esse, qui sibi in visione apparuerant. Ita refert Niceph. l. 7. hist. c. 33. & in edicto Constantini, quod 1. to. Conciliorum habetur, ubi etiam dicitur eosdem Sylvestrum & Constantinum variis edificatis templis in eis multas imagines posuisse, quos sequentes Pontifices imitati sunt, ut ex Damaso, Platina, & aliis, qui vitas Pontificum scripserunt, constat. Meminit etiam Eus. l. 1. hist. c. ult. & l. 7. c. 14. imaginum Petri & Pauli, quibus fere a principio Ecclesia Romana usa est.

Octavo colligi potest hæc eadem traditio ex antiquorum Patrum scriptis, Dionysii, Athanas. Basil. Chrysost. & aliorum, quorum testimonia in VII. Synod. act. 3. 4. & 5. magna ex parte referuntur. Plura etiam congestit Damascen. orat. 1. & 3. de imaginibus, qui etiam l. 4. de fide c. 16. *Statuas, inquit, sanctorum erigimus, & visibiles imagines.* Et August. l. 10. confess. c. 34. reprehendit picturas, quando in eis non servatur usus necessarius, & pia significatio, & lib. 1. de consensu Evangelist. c. 10. satis significat suo tempore fuisse in usu imagines Petri & Pauli, & l. 20. contra Faust. c. 73. idem habet de imagine Abraham filium sacrificare volentis, & lib. 5. contra Julian. similia docet de imaginibus Adæ & Evæ, Gregorius lib. 9. epist. 9. reprehendit Serenum Episcop. quod imagines confregisset, quamquam id non tam ex errore, quam ex zelo indiscreto fecisse significet. Plura Patrum testimonia in sequentibus adducemus.

Ultimo argumentor ratione, quia vel usus harum imaginum est malus intrinsece, & ex natura sua, vel quia prohibitus speciali lege positiva divina, aut humana, vel denique, quia scandalum, seu periculum idololatriæ

Suarez Tom. XVI.

inducere potest. Nihil autem horum dici potest. Primum enim est plane falsum, quia usus imaginum absolute, & simpliciter non est intrinsece malus; ergo nec usus imaginum Sanctorum hominum; probatur consequentia, quia si in aliquarum imaginum usu potest honestas, & utilitas inveniri, maxime in iis, quæ Sanctos repræsentant: tum quia tanto imagines sunt digniores, quanto exemplaria utiliora sunt, & honestiora: tum etiam propter varias utilitates, quæ in iis imaginibus inveniuntur, quas statim referemus. Antecedens vero probatur, quia si usus imaginum omnium esset intrinsece malus, ipsa etiam ars pingendi esset omnino mala, quia nunquam habere posset bonum usum; consequens est evidenter falsum, nam Deus ipse interdum hanc artem approbavit, & infudit, ut ex 3. l. & 35. c. Exodi colligitur. Deinde in objecto hujus artis nulla est intrinseca deformitas, & potest non solum ad ornatum, sed etiam ad convenientes usus humanæ vitæ conferre, cur ergo erit omnino mala? Præterea Deus res omnes fecit aliquo modo ad sui imitationem, & præsertim hominem, quem ad sui imaginem condidit; est ergo ars imaginum effectrix, quædam imitatio seu participatio artis divinæ. Unde ergo habet, ut sit per se mala? Præterea, in antiquo etiam templo variæ figuræ & imagines depictæ sunt, ut patet ex 3. Regum 6. 7. & 8. 2. Paral. 3. & nunquam accusatus est Salomon, quod in hoc male egerit. Denique omnis nostra cognitio representatione quadam, & veluti quibusdam imaginibus perficitur, unde exteriores imagines multum illi deservire possunt; non sunt ergo per se malæ. Secundum membrum facile etiam refellitur, quod enim nulla sit humana lex, quæ imagines prohibeat, per se notum est. Quod etiam nulla sit talis lex divina specialiter in lege Evangelica lata, constat, quia neque in toto novo Testamento scripta est, neque ex traditione, aut usu Ecclesiæ colligi potest, cum potius contraria consuetudo, & traditio manifesta sit, ut diximus. Nec denique ex veteri Testamento afferri potest hujusmodi lex, tum quia revera nulla fuit talis lex, quæ omnes omnino imagines prohiberet: tum etiam quia, & si fuisset talis lex, non esset moralis, quia non prohiberet rem naturæ suæ bonis moribus contrariam, ut ostensum est, sed esset ceremonialis, & ita jam cessasset, & vim obligandi non haberet. Quæ omnia in sequentibus latius explicabimus. Tertium caput falsum etiam esse ostenditur primo, quia simili ratione probaretur, solem, lunam, stellas, & alias nobiles creaturas ob usum hominum malas esse, quia potissima idololatria occasio ab illis sumpta est. Secundo, quia hoc periculum in Ecclesia Catholica moraliter nullum est, in qua & vera unius Dei cognitio, & Sanctorum hominum existimatio Christianis omnibus nota est. Quare probabiliter timeri non potest, ne Sanctorum picturæ, aut Dii, aut per se honore dignæ censeantur. Quod si fortasse interdum nonnulla subrepat ignorantia, ad pastores Ecclesiæ pertinet illam diligenter remove, non vero eam ob causam, universam Ecclesiam imaginum decore, & utilitate privare: majora enim incommoda, & crassior ignorantia inde oriri posset, nam (ut jam dicam) imagines & indoctos docent, & omnium memoriam, & devotionem excitant. Relinquitur ergo, hunc imaginum usum nullo ex capite malum, aut prohibitum esse.

Dicendum ergo secundo est, hunc imaginum usum propter varios honestos fines in Ecclesia introductum esse. Primo quidem ad instruendam rudem, atque indoctam plebem, ut eleganter Damasc. loco supra citato dixit: *Solent enim* (ut recte dixit Greg. Nyss. orat. de sancto Theodoro) *etiam figura tacens in pariete loqui, maximeque prodesse;* & ut inquit Chrys. hom. 33. in Jo: *Mens familiarium rerum imagine concepta, magis suscitatur, & tanquam in pictura, rem ipsam magis amplectitur;* & Greg. dicta in ep. 9. *Quod legentibus, inquit, scriptura, hoc præstat idiotis pictura.* Quapropter sicut historia honesta est & Ecclesiæ necessaria: ita & sanctorum imaginum usus, omnes enim historiæ utilitates ad imagines accommodari possunt facile constat. Secundo hujusmodi imagines quædam sunt fidei, & amoris testimonia, & omnium virtutum fomentum, profitemur enim credere mysteria, quæ depingimus, excitamur deinde ad petenda Sanctorum subsidia: signa etiam amoris exhibemus, dum quos diligimus, quoad possumus, cupimus habere præsentem, ut Chrysost. dixit hom. 35. in Matth. Excitamus præterea

Ars imaginum effectrix, honesta est.

Imaginum usus quod sit utilis.



ad memoriam beneficiorum Dei, & gratiarum actionem, ut dixit Greg. l. 7. ep. 53. Denique, visis Sanctorum imaginibus, eorum vita, & exempla in memoriam revocantur, atque hoc modo ad eorum imitationem, & omnium virtutum exercitium invitamur, ut Damascen. l. 4. c. 17. notavit. Tertio harum imaginum usus, honor est ipsorum Sanctorum; omnes enim nationes, quasi dictante natura, hoc signo honoris usæ sunt, erigendo statuas, vel imagines insignium virorum in eorum excellentiæ, & virtutis testimonium, ut disp. præced. ex Arist. notavimus, & tradit etiam Plin. l. 3. hist. c. 2. & in Codice habetur de statu, & imaginibus insignium personarum & privilegiis illis concessis. Hunc autem morem utpote honestum, & rectæ rationi consentaneum, si in vera sanctitate, veraque rerum existimatione fundatus sit, Ecclesia retinuit, ut ex citata traditione constat, & ex VII. Synod. act. 2. 4. & 6. Basil. hom. de 40. marty. in princ. & epist. 49. aliàs 40. Chrysost. hom. 2. & 3. ad pop. Euseb. l. 7. hist. c. 14. Niceph. l. 6. c. 16. qui ita intelligendi sunt, cum dicunt, imaginum usum ex gentium consuetudine esse introductum, non quidem eorum imitando errores, sed potius corrigendo.

Imagines  
sanctorum,  
honestæ  
templorum  
ornamenta.

Et ex his sequitur, non solum licere depingere imagines historiam continentes, sed etiam simplices picturas, seu imagines, ipsas solas personas representantes, traditio enim, & testimonia Sanctorum, quæ adduximus, æque de utrisque procedunt: & rationes, seu utilitates imaginum, quas notavimus, utrisque imaginibus communes sunt, ut per se facile constare potest.

Secundo sequitur, has Sanctorum imagines & honeste, & convenienter in templis, & rebus sacris collocari: hoc enim etiam probat in primis citata traditio, ostendimus enim, Sylvestrum & Constantinum, & alios Pontifices, Christi, & sanctorum imaginibus templa ornasse. Et Nicephor. l. 10. c. 30. refert, illam Christi imaginem, quam diximus Cæsaræ fuisse erectam a muliere, quæ sanguinis fluxu laborabat, postea fuisse a Christianis in Ecclesiam translata, & honoratiori loco positam, & l. 14. c. 2. refert Pulcheriam Augustam, Constantinopoli templum insigne adificasse, & in eo imaginem Virginis, quam Lucas Evangelista in tabula depictam reliquit, posuisse, & ex aliis Sanctis Patribus, quos citavimus, & ex VII. Synodo, id manifeste colligitur. Ratio etiam supra facta idem convincit, quia imagines inter alias causas eriguntur in honorem, & cultum Sanctorum; ergo merito collocantur in templis, ac locis Deo in honorem sanctorum dicatis. Deinde, quia nullum esse potest templorum ornamentum, magis accomdatum. Denique quia nihil turpe, aut contra rationem in hoc facto ostendi potest. Unde sect. seq. ostendemus, iussu ipsius Dei, aliquas imagines in veteri templo, & in illius sacris vasis fuisse depictas. Plura ex veteribus Patribus ad hæc omnia confirmanda, quæ de imaginibus diximus, præter multa alia, quæ in VII. Synod. & in orationib. Damasceni, & in libris Jonæ Aureliani, de imaginibus continentur, videri possunt in Alano Copo dial. 4. & 5. Sander. l. de imag. Fevardentio in scholiis Irenæi, l. 1. c. 25. Pamel. in scholiis Tertulliani in apolog. n. 184.

**Objeçio.** Sed objicitur primo, quia Scriptura sacra Exod. 20. Deuteronom. 4. & 5. usum imaginum omnino prohibet, quod præceptum ita semper fuit ab Hebræis intellectum, & servatum, ut Burgenfis super Exodum refert. Unde constat ex veteribus historiis, Judæos, postquam e Gentilibus regibus gubernari cœperunt, constantissime illis restitisse, ne aliquam imaginem Jerosolymam afferrent, ut videre licet in Iosepho lib. 17. antiquit. c. 8. & lib. 18. c. 3. & 4. & lib. 2. de bello Judaico c. 8. Secundo objiciunt Concilium Constantinopolitan. V. quod imaginum usum damnavit, & VI. Synodum canone 100. & Concil. Elibertinum, canone 36. prohibentia picturas. Tertio objiciunt Epiphanium in epist. ad Joan. Jerosolymitanum, ubi ipse refert, cum ingressus quandam Ecclesiam, imaginem velo depictam vidisset, illud statim scidisse, quod talis pictura contra divinum præceptum existeret. Quarto, quia hujusmodi imagines in templo præsertim collocatæ, infirmos facile possunt decipere, ut eas vivere, & spiritum habere existiment, ut August. epist. 49. & super Plal. 113. incantant.

Respons.  
ad obj. c.

Ad primum dicitur latius sect. seq. Nunc breviter respondetur, illis locis non prohiberi omnes imagines ab-

solute, & simpliciter: constat enim Exod. 25. præcepisse Deum imaginem Cherubim poni super arcam, & Num. 21. fieri serpentem æneum, & 3. lib. Reg. 6. & 2. Paralip. 3. juxta propitiatorij, positus est Cherubim, & in parietibus templi ad ejus ornatum fuerunt depictæ aliæ imagines, ut ex citatis locis notavit VII. Synod. act. 4. in principio. Ex illis igitur testimoniis ad summum colligi potest, fuisse in lege veteri prohibitas imagines Dei: quod quomodo intelligendum sit, seq. sect. dicitur.

Ad secundum, quod ad Concilium illud Constantinopolitanum attinet, respondetur illud non fuisse legitimum, cum neque auctoritate Pontificis congregatum, neque confirmatum fuerit. Deinde non fuit universale, quia non solum totus Occidens, sed etiam præcipui Patriarchæ, & Episcopi Orientales in illo defuerunt, unde Leo IX. epist. ad Michaellem c. 22. *nefandam Synodum* eam appellat & illius acta in VII. Synodo act. 6. sigillatim damnata sunt. Quam VII. Synodum, seu II. Nicænam, universalem, legitimamque fuisse constat, quia auctoritate Adriani primi, tercentum, & quinquaginta Patres ad illam convenerunt, & sub ejus obedientia, ac præsentibus ejus Legatis processit, ac denique ab eodem, & a Leone III. confirmata est, ut ex Photio, Psello, & Platina constat, & ex Ivone 4. part. sui decreti. c. 147.

Ad illum vero Canonem sextæ Synodi, qui inter Trullanos ponitur, quidquid de illorum Canonum auctoritate sit, respondetur male citari, quia non prohibet Sanctorum imagines, sed picturas (hæc enim sunt verba Canonis) *Quæ oculos præstringunt, & mentem corrumpunt, & ad turpium voluptatum movent in eandem*. Quo modo Concilium etiam Tridentin. sess. 25. sancte monuit, in sacro imaginum usu omnem superstitionem, omnemque lasciviam esse vitandam, ita ut procaci venustate imagines non pingantur, neque ornentur.

Difficilius explicatur decretum Concilii Elibertini, quod quia provinciale fuit, & paucorum Episcoporum, Cano lib. 5. de locis c. 4. non dubitavit concedere, illud errasse. Alii autem respondent, illud Concilium solum prohibuisse proprias imagines Dei. Alii dicunt prohibuisse, ne imagines ritu Gentilico adorentur, & depingantur. Sed hæc omnia sine fundamento dicuntur, verba enim illius Canonis, quæ in 1. to. Concil. & de consecrat. dist. 4. cap. Placuit, & in decreto Ivon. 3. par. cap. 40. habentur, hæc sunt: *Placuit in Ecclesiis picturas esse non debere, ne quod colitur, & adoratur, in parietibus depingatur*. Ex quibus verbis non obscure colligitur, ibi non prohiberi imagines simpliciter, sed ne in parietibus Ecclesiarum depingerentur. Quæ lex potuit eo tempore expedire fuit enim illud Concilium circa tempora Concilii Nicæni, quando idololatria adhuc vigeat, unde facile accidere poterat, ut imagines Sanctorum in parietibus depictæ ab infidelibus irreverenter tractarentur. Ita respondet Alanus dialog. 5. c. 16. Sander. lib. 2. c. 4. Ayala lib. de traditionib. 3. par. c. de antiquit. imagin. qui aliam rationem illius decreti subjungit, scilicet, quia imagines in parietibus depictæ facile deformantur, quia vero hoc incommodum diligentia evitari potest, & antiqua illa necessitas jam cessavit, ideo decretum illud usu abrogatum est, & in VII. Synod. hujusmodi imagines parietibus depictæ admittuntur.

Ad tertium de illo Epiphanii testimonio varia a Doctoribus dicta sunt. Castro l. 8. contra hæres. verbo imago, quamvis Epiphanium ab hæresi excuset, quod non pertinacia animi, nec contra Ecclesiæ definitionem, quæ tunc esset, ita fuerit opinatus, concedit tamen eum in illo errore fuisse versatum. Non est tamen satis considerate locutus. Waldens. to. 3. de sacrament. lib. c. 157. non minus incaute dicit Epiph. motum fuisse zelo, non secundum scientiam, Damasc. vero orat. 1. de imagi. quem Jonas Aurelia. lib. 1. imitatur, primum dicit, etiam si Epiphanius in eam sententiam incidisset, non esse audiendum contra cæterorum Patrum auctoritatem. Secundo addit (& hæc est vera responsio) partem illam extremam illius epist. non esse Epiphanii, sed ab aliquo hæretico suppositam, cujus rei varias conjecturas congerit Alan. supra c. 20. tres vero, aut quatuor sunt potissimæ. Prima est, quod in VII. Synod. act. 6. duo testimonia Epiphani. afferuntur, quibus abutebantur hæretici, qui convicti sunt illa falso confinxisse, & Epiphanio imposuisse: si autem in hac epistola Epiphanii hæc pars eo tempore le-



geretur, certe hæretici illam maxime urgerent. Signum est ergo eam partem non fuisse ab Epiphanio scriptam, sed postea ab hæreticis impositam. Hanc enim esse hæreticorum consuetudinem constat ex eadem VII. Syn. act. 3. 8. ubi Macharius confessus est se mutasse testimonia Sanctorum, & Adrianus in responsione ad Carolum ostendit hæreticos corrupisse epistolas Cyrilli ad Succellum, & similia videri possunt in Euseb. lib. 4. hist. c. 25 Athan. epist. ad Serapionem; Nicolao etiam Papa epist. ad Leonem. Secundo ex contextu epistolæ hoc non obscure colligitur, nam pars illa, in qua hæc fabula continetur, extrema est totius epistolæ, quæ incipit ab illo. *Præterea auidivi quosdam &c.* antequam particula epistolæ est absoluta, & completa, ut patet ex ultima clausula: *Deus autem pacis det vobis juxta suam clementiam, ut conteratur Satanas &c.* Tercio Greg. l. 9. ep. 9. reprehendens Serenum dicit, nullum antiquorum Patrum ausum esse imagines confringere, neque de ullo hoc esse scriptum. 4. Constat ex Chrys. Basil. Athan. Greg. Nazianz. & Nyl. & aliis Patribus Epiphanio æqualibus, ea ætate usum imaginum in Ecclesia Græca, & universo Oriente frequentissimum fuisse. Qui ergo verisimile est, novum & inusitatum Epiphanio visum esse? aut si hoc contra Scripturam esse credidit (ut ibi dicitur) quomodo cæteros errores, atque hæreses impugnans, nunquam hunc usum reprehendit? Adde tandem in illa epistola non satis explicari, cujus fuerit figura in illo linteo depicta, nec dicitur fuisse alicujus sancti: unde fortasse contingere potuit, ut fuerit alicujus hominis prophani, quod notavit Marianus Victor in scholiis ad hanc epistolam, quæ habetur tom. 2. operum D. Hieronym. epist. 60.

Ad quartum jam responsum est, nullum scandalum creari fidelibus in Catholica Ecclesia ex imaginum usu, quia omnes norunt non ideo proponi, ut per se adorerentur, ac si in se aliquid divinum, aut viventem spiritum habeant, sed solum in memoriam, & venerationem sanctorum, quos repræsentant. Augustinus autem ibi citatus loquitur de simulacris & idolis gentium, ut ex contextu, & illius intentione facile patet.

## SECTIO II.

*Utrum liceat uti Dei, & Angelorum imaginibus.*

**I**n quæstione hac non solum cum hæreticis, sed etiam cum nonnullis Catholicis nobis disputandum est: non enim desunt, qui negent expedire usum imaginum spiritualium rerum, præsertim Dei, & Trinitatis. Quam sententiam inter scholasticos defendit Durand. in 3. dist. 9. q. 2. ad 4. ubi fatuum esse dicit imagines Trinitatis facere, aut venerari. Idem Abulens. 4. c. Deuter. q. 5. & Ayalá supra. Cui opinioni videntur Patres interdum non parum favere, quorum dicta statim exponemus. Fundamentum potissimum illorum est, quia Deus (& idem est de angelis) non habet figuram, cum corporeus non sit; ergo non potest depingi, aut corporali imagine repræsentari. Unde Isa. 40. dicitur: *Cui similem fecistis Deum, aut quam imaginem ponetis ei?* & infra: *Cui assimilastis me, & adequastis, dicit Sanctus?* & c. 46. *Cui assimilastis me, & adequastis, & comparastis me, & fecistis similem?*

Observandum vero est, duobus modis posse imaginem Dei depingi, vel ad repræsentandum illum, prout in se est per propriam, ac formalem similitudinem: vel solum ad repræsentandum secundum quandam metaphoram aut proportionem, seu sub aliqua specie, in qua interdum in Scriptura sacra apparuisse dicitur.

Dicendum est ergo. Primo, non est absolute, & simpliciter reprehendendum usum imaginum Dei, & angelorum, sed potius retineri posse, & expedire, si prudenter fiat. Hæc est communis Theologorum sententia, & quidem (quod ad angelos attinet) aperte traditur in VII. Synod. act. 2. & 5. quamvis ratio, quæ ibi subjungitur, scilicet, quia angeli corporei sunt, non sit probanda, quia nec verum assumit, neque a tota Synodo directe approbata, sed solum est recitata ex quadam epistola Joannis Thessalonicensis: postea vero Tharastius dixit: *Ostendit autem Pater, quod & angelos depingere oporteat, quando circumscripti possunt, & ut homines apparuerunt, sacra Synodus dixit, etiam Domine.* Quo verbo, propositionem ipsam approbat, non utramque rationem: quamvis etiam

necessarium non sit omnes rationes Conciliorum solidas esse. Et probari præterea potest, quia (ut supra dicebamus) Cherubim jussu Dei depicti sunt in antiquo templo, & in Scriptura sacra sæpe inducuntur angeli sub formis rerum sensibilium: quas optime explicat Dionys. ca. 13. & 15. de cœlest. hierarch. & indicat, suo sæculo usum fuisse in Ecclesia depingendi angelos in ea specie, in qua leguntur in Scriptura apparuisse. Quod his verbis clarius dixit Nazian. orat. 23. in principio: *Angelicus est vestitus candor, & splendor, cum corporea forma pinguntur, ad designandam naturalem eorum puritatem.* Et ex actis Constantini, & Sylvestri constat, angelorum imagines in Ecclesiis, quas ædificaverunt, posuisse.

Ex his vero ad imagines Dei gradum faciendo, eodem fere modo illarum usus comprobari potest: non est enim dubium, quin in Ecclesia Catholica permissus sit: nunquam autem Romana Ecclesia illum generaliter admitteret, si honestus non esset: quin potius VII. Synod. act. 5. circa med. Spiritus sancti imaginem sub specie columbæ approbat, quam antiquissimum esse constat ex V. Synodo act. 1. in supplicatione clericorum, & monachorum Antiochiæ ad Joan. Patriarch. contra Severum, qui præsumperat, columbas aureas, & argenteas in formam Spiritus sancti super divia lavacra, & altaria appensas sibi appropriare, dicens, non oportere Spiritum sanctum in specie columbæ nominare. Refert etiam Amphiloehius, Basilium Magnum Eucharistiam in hujusmodi columbis afferre solitum esse. Sexta etiam Synod. can. 82. approbat imaginem Christi sub figura agni. Quanquam enim Angelus, Sylv. Armil. & alii Summistæ, & Bartholomæus Miranda in summa Conciliorum intellexerint, illo canone hujusmodi imaginem prohiberi: vera tamen intelligentia illius canonis est, quod potius hanc imaginem admittat, quamvis non in ea tantum specie, sed in propria etiam specie Christum depingi præcipiat. Hic enim sensus, & contentaneus est verbis canonis, si attente legatur, & traditus est ab Adriano I. in epist. ad Tharastium, quæ habetur in VII. Synod. act. 10. & a Tharasio in epist. ad Antiochenos, & Alexandrinos in act. 3. ejusdem Synod. & ab eadem Synodo act. 4. ante med. Et hinc sumitur argumentum, a simili, nam est eadem ratio de hac metaphorica imagine Christi, & de imaginibus Dei, quas etiam metaphoricæ esse oportet. Et ideo Concil. Trid. sess. 25. dixit admonendum esse populum, non ideo depingi imagines Dei, quia corporeus sit, in quibus verbis supponit, has imagines esse depingendas. Ratio vero hujus conclusionis ex sequenti cõstabit.

Dico ergo secundo: Non posse depingi imagines, quæ formaliter ac proprie repræsentent Deum, sed solum metaphoricæ, & per quandam analogiam. Prior pars est certa de fide: unde Damasc. lib. 3. c. 17. hoc sensu dixit extremae dementiæ esse velle depingere Deum: ut ipsemet explicuit orat. 1. de Imaginib. referens Dionysium & Greg. Nazian. Et similia habet Clemens Alexand. lib. 1. Stromat. circa principium, & lib. 6. circa finem. Et in eodem sensu Theodorus Patriarch. Jerosolymitanus in epistola Synodali, quæ habetur VII. Synod. act. 3. dicit: *Invisibilis est divinitas, nec depingi, nec figurari se permittit.* Et fere eodem modo loquitur Gregor. Pap. ep. ad Germanum, & Germanus epist. 1. ad Joan. & in epist. ad Thom. in eadem Synodo act. 4. Ac denique idem docere voluit Aug. lib. 4. de Civit. c. 21. cum ex sententia Varronis dicit, naturali lumine cognosci, Deum sine simulacro esse colendum: per simulacrum enim intelligit imaginem, quæ propriam Dei formam referre existimetur: vel fortasse intelligit idolum, ut infra dicemus. Ratio vero hujus partis manifesta est, quia cum Deus non habeat figuram corpoream, non potest per corpoream imaginem repræsentari. Quæ ratio eque in angelis procedit, quamvis non pari certitudine. Certius enim est Deum esse incorporeum, quam angelos, quamvis hoc etiam indubie verum sit. Altera vero pars de imagine metaphorica, ex præcedenti conclusione constat, nam si imago Dei possibilis, & licita est, & non propria, ergo metaphorica. Præterea metaphorica imago Christi hominis depingi potest, cur non etiam Dei: Et confirmatur, quia sacra Scriptura sæpe loquitur de Deo per metaphoram, nominibus rerum sensibilium, quia nos solum per analogiam ad res sensibiles illum concipimus; & ideo etiam Deus sæpe apparuit sub forma sensibili, Verbum enim factum est homo, &

Imago Dei non potest esse, nisi metaphorica.

Dei, & Angelorum imagines licite, & religiose in usu habentur.



Spiritus sanctus apparuit sub specie columbæ, Jo. 1. & Pater sub specie senis Dan. 7. ut exponit Aug. lib. 2. de Trin. cap. ult. & Genes. 18. Trinitas representata est, quando Abraham tres vidit, & unum adoravit, ut eodem lib. 2. Aug. exponit c. 11. ergo eadem ratione potest Deus metaphorice depingi: sicut depinguntur etiam quatuor Evangelistæ sub speciebus quatuor animalium, sub quibus in Scriptura sacra representantur, vel sicut virtutes etiam solent metaphorice depingi. Denique in his imaginibus omnes utilitates in præcedenti sect. numeratæ inveniuntur. Nam in primis sæpe sunt necessariae ad historiam aliquam depingendam; deinde per se sumptæ excitant Dei memoriam, fidem & devotionem, & per se nullam malitiam, neque ullum incommodum conjunctum habent; ergo si non desit sufficiens populi instructio, & convenienti modo hujusmodi imagines depingantur, utilis & honestus erit illarum usus. Plura legi possunt apud Waldens. tom. 3. de sacramentalib. cap. 150. & seqq. & Catherin. opusculo de imaginib. & alios auctores supra citatos. Ex hoc tamen bene colligit Cajet. hoc loco, has imagines Dei non esse ad libitum depingendas, neque privata cujusque intentione, aut inventione introducendas, sed juxta modum in Ecclesiam receptum, vel ut in Scriptura, & in formis, quibus Deus apparuit, fundamentum habeant. Et ideo etiam dicunt Sancti, ut D. Tho. hic ad primum notat, ante Incarnationem, vel nullas, vel raras fuisse inter fideles imagines Dei, quia nondum Deus apparuerat in forma humana, neque in alia, in qua com mode depingi posset.

Objeçtio.

Sed objicitur præceptum illud Exod. 20. Deuter. 4. & 5. *Non facies tibi sculptile*, ibi enim saltem imagines Dei videntur prohiberi. Confirmari potest ex Lactantio lib. 2. de origine erroris c. 2. ubi inter alias hac ratione utitur: *Imaginum ratio idcirco ab hominibus inventa est, ut possit eorum memoria retineri, qui fuerunt vel morte subtrahiti, vel absentia separati: sed Deus non moritur, & ejus spiritus ac lumen ubique diffusum, abesse nunquam potest.* Semper ergo superflua est ejus imago. Ad principale argumentum Damascenus dicta orat. 1. uno modo respondet, verum esse illo præcepto fuisse prohibitas Hebræis omnes imagines Dei, ut omnino ab idololatriæ periculo abstraherentur, ut indicavit etiam Eleazarus inter Hebræos peritissimus apud Euseb. lib. 8. de præparat. Evang. cap. 3. Juxta hanc vero responsionem, quam Catherinus supra sequitur, dicendum est, præceptum illud partim esse morale, quatenus idololatriam prohibet, quæ per se mala est: partim ceremoniale, quatenus simpliciter prohibet omnem usum imaginum Dei, non quia per se malus sit, sed quia ita expediebat illi populo propter illius ignorantiam, ne Deum esse corporeum existimaret, neve ad idololatriam, ad quam ex gentium consuetudine valde propensus erat, delaberetur, præsertim cum gratia minus perfecta, & minus explicata fide frueretur. Unde Deut. 4. dicitur: *Non vidistis aliquam similitudinem, ne forte decepti faciatis vobis sculptam similitudinem, &c.* Et 4. Reg. 18. Ezechias confregit serpentem æneum, quia superstitiose illo utebantur Filii Israel. Quoad hanc ergo partem ceremonialem cessavit præceptum illud, & ita Damasc. illud cum præcepto circumcisionis cõparat. Hæc vero responsio in primis difficultatem patitur, quia juxta communem Sanctorum expositionem omnia præcepta Decalogi, præter tertium quoad determinationem de observatione sabbathi, moralia sunt, non ceremonialia, ut docet Iren. l. 4. contra hæres. c. 31. & 32. & August. l. 19. contra Faust. c. 18. in specie loquens de primo præcepto, & ep. 190. c. 12. ex hoc principio cõcludit, omnia hæc præcepta præter illud de observatione Sabbathi sine ulla figurata locutione a nobis observari. Et idem docet Clem. Alexand. orat. exhortat. ad Gent. fol. 2. de eodem primo præcepto in particulari loquens. Deinde totum illud, quod his verbis continetur: *Non habebis Deos alienos coram me, non facies tibi sculptile, neque omnem similitudinem, quæ est in cælo de super & quæ in terra deorsum, neque eorum quæ sunt in aquis sub terra, non adorabis ea, neque coles.* Totum, inquam, hoc est unum & idem præceptum, nam si essent plura præcepta Decalogi, non essent tantum decem, sed undecim vel duodecim, contra Scripturam Exod. 31. Deut. 4. Et ita illud esse unum præceptum docet August. supra & q. 71. in Exod. & Clem. Alexandr. lib. 6.

strom, & est communis sententia: ergo toto illo precepto idololatria, & multitudo falforum Deorum prohibetur.

Respondetur ergo, non vetari imagines absolute, sed idola, & Deos manibus fabricatos, quibus vero Deo relicto, latræ cultus impenditur. Unde Levit. 26. clarius dicitur: *Non facietis vobis idolum & sculptile, nec titulos erigitis, neque insigne lapidem ponetis in terra vestra, ut adoretis eum: ego enim sum Deus vester.* Et ite c. 18. dixerat Deus: *Ego Dominus Deus vester, juxta consuetudinem terræ Egypti, in qua habitastis, non facietis &c.* Et subdit c. 19. *Nolite converti ad idola, nec Deos confabiles facietis vobis.* Et ad hunc modum ubicunque explicatur hoc præceptum, significatur, subitaniam ejus esse, ut nullus præterquam verus Deus colatur, & adoretur ut Deus. Ita exponit Aug. supra dicens, hoc præceptum esse, idola non colere. Indicat Cyprian. l. 3. ad Quirinum c. 59 & l. de exhortat. ad martyres c. 1. & Tertul. l. 2. contra Marcionem circa finem. Clarius Damasc. l. 4. de Fide c. 13. & D. Th. hic ad 1. ubi ita exponit omnia illa verba: *Non habebis Deos alienos*, scilicet fide, id est, non credes illos esse Deos: & ideo non facies sculptilia, id est, alium Deorum imagines: & eodem sensu concluditur, *neque adorabis ea*, quam particulam amplius in sequenti sect. explicabimus. Et inde clarius constabit differentia inter imaginem, & idolum, & hujus præcepti perfecta intelligentia.

Ad Lactantium & rationem ejus respondetur in primis, rationem nullius esse momenti, quia licet Deus sit ubique præsens, non tamen videtur a nobis, & ideo utilis potest esse imago, quæ illius memoriam excitet. Ad verba autem, seu intentionem Lactantii respondetur, eum loqui contra idola gentium, sicut loquitur Scriptura non contra imagines factas ad representandum Deum verum, quæ gentibus, contra quas scribit, usui non fuerunt.

#### SECTIO III.

Utrum Imagines Christi & Sanctorum sint adorandæ.

Hæretici, qui omnino imaginum usum abstulerunt, multo magis earum adorationem illicitam esse censuerunt, non tamen omnes in eo fuerunt extremo errore, nam quidam eorum, etiam tempore VII. Synodi, admittebant imagines quoad aliquem usum præsertim ob memoriam & recordationem prototyporum, non tamen permittebant, aliquam venerationem vel adorationem eis tribui. Hoc colligitur ex multis locis VII. Synodi, præsertim act. 6. circa finem: & ex Scripto Adriani ad Carol. Magn. præsertim c. 50. ubi referuntur hæretici asserentes cum Gregorio, imagines non esse infringendas, contententes tamen esse sententiam ejusdem Gregorii non esse adorandas. Et in hoc etiam errore versantur nonnulli Lutherani hoc tempore, qui etiam in templis illas admittunt, non tamen ad cultum, sed ad ornatum. Calvinistæ vero nolunt eas in templis admittere, ut omnem occasionem vel apparentiam cultus auferant.

Hanc sententiam nullus Catholicorum simpliciter probavit, imò omnes absolute docent, imagines esse adorandas; quidam tamen ita explicant hanc adorationem, ut re ipsa vel parum discrepent a superiori sententia, vel nimium illi favere videantur. Durandus enim in 3. d. 9. q. 2. aperte docet, imagines non adorari nisi improprie & abusive, quia ad præsentiam earum fit rememoratio exemplarium, quæ tunc adorantur in præsentia imaginum, ac si præsentia realiter essent; & ideo dicuntur adorari imagines. Unde in num. 8. & 14. generalem regulam statuit, rem inanimatam, quæ non est subjectum susceptivum sanctitatis, non posse esse secundum se terminum adorationis. Unde concludit, cruci Christi non deberi aliquem honorem, nisi in quantum reducit in memoriam Christi: & tunc (ait) solum adoratur prædicto modo, scilicet, quod ad præsentiam ejus adoratur Christus, & circa illam exercentur illæ actiones vel signa honoris, quæ exhiberentur ipsi Christo, si præsens esset. Quia tamen sentit, illas actiones non fieri ullo modo in honorem seu venerationem ipsius imaginis, ideo dicit, ob hanc causam improprie dici imagines adorari, & solum ita loqui, quia ita loquuntur plures. Hujus sententia fuit etiam Holkot in l. Sapient. lect. 157. & Picus Mirand. in Apol. q. 3. qui inter alios refert pro hac sententia Henricum quodl. 10. qu. 6. ubi dicit imaginem non adorari nisi per accidens cum prototipo. Sed illa vox *per accidens* æquivoca est, & ideo non satis constat de mente hujus auctoris. Magis favent huic opinioni Petrus Cluniac. ep. 2. cont. Petrob. c. de

Respon-  
sio.

Varie eñ,  
tra ima-  
ginum a-  
doratio-  
nem hæc  
reles.

Durandi  
sententia.



c. de vener. Crucis sub finem, & Jonas Aurelian. l. de cultu imag. a princ. inuatur etiam Castro Verbo Adoratio, in illis verbis: *Denique adoratio ipsa, et si coram cruce sit, mens tamen nostra ad id solum fertur, quod crux ipsa representat, Dei scilicet Filium olim in cruce pendentem.* Citari etiam solet Alexand. Alenf. 3. p. qu. 30. art. ult. sed illius alia est sententia, ut infra videbimus. Ab hac opinione Durandi quidam moderni verbis discrepare videntur, dum simpliciter docent, imagines vere, & proprie adorari, tamen ita hoc declarat, ut re ipsa idem sentiant: Ajunt enim non aliter, neque alia ratione adorari imagines, nisi quia coram eis & circa illas exhibentur externa signa honoris, ut genuflexio, deosculatio, inclinatio, vel apertio capitis, & similia, affectus tamen interior (ajunt) quatenus est affectus honorandi, seu exhibendi signum reverentiae & servitutis, nullo modo dirigitur ad imaginem, sed solum ad prototypon, tanquam ad unicum adorationis objectum. Ita plane sentit Dieghus Pava lib. 9. orthodoxarum explicationum per totum, praefertim §. de Imaginibus, versic. At Kemnitius, ubi inter alia sic scribit: *Quamquam, si corporis motus, externamque, venerationem spectes, imago ipsa colatur, animus certe, qui pietatis, religionisque imaginem intuetur, sed totus in re quam refert, positus est.* Unde infert, non pugnantia dicere, qui se imaginem adorare affirmaverit & negaverit, nam adoratur corpore, animum vero in solum exemplar defixum habet. Favent interdum Waldensis, Turrian. & alii sequente sect. citandi.

Fundamentum hujus opinionis est, quia res inanimata non est alio modo capax adorationis vel honoris, cum non percipiat signum honoris, quod circa illam exercetur, de quo fundamento plura in sect. 5. Quod si obicias, quia haeretici, qui admittunt imagines propter solum recordationem, non negant, in earum praesentia posse sola exemplaria adorari, eisque signa submissionis exhiberi, respondent, verum quidem esse eos non negasse exemplarium venerationem, negasse tamen, signa honoris ullo modo esse imaginibus exhibenda, etiam sola actione exteriori; & in hoc tantum discrepare a Catholicis, & propterea fuisse damnatos. Quod si urgeas, hoc modo exhibere signa externa coram imaginibus sine intentione interna adorandi, non esse adorationem; respondent interdum, hoc negando, quia, licet non sit summa adoratio, nonnulla adoratio est; interdum vero, Patres VII. Synodi non multum curasse, an illa exterior nota sit dicenda adoratio, sed in hoc solum intendisse, ut docerent, imagines cum aliquo signo exteriori reverentiae & submissionis esse tractandas.

Altera tamen sententia est, imagines vere ac proprie adorari, saltem ut materiale objectum adorationis, vel totale, vel saltem partiale. Haec est sententia D. Tho. in hoc articulo, ut etiam auctores contrariae sententiae, praefertim Durandus, & Picus Mirandulan. intellexerunt. Et Cajetanus hic, & alii discipuli & expositores D. Tho. qui opinionem Durandi ut parum fidei consentaneam rejiciunt, idem sentiunt. Atque haec opinio mihi maxime probatur: & ideo partim in hac sectione, partim in duabus sequentibus, ex professo confirmanda est, declaranda, & defendenda.

Dico ergo primo, absolute & simpliciter fatendum esse, imagines esse adorandas, & honorifice tractandas. Haec assertio est de fide: & praefertim fundatur in traditione & definitione Ecclesiae, ut statim ostendemus. Habet tamen nonnullum in Scripturis fundamentum: nam ex Scriptura habemus res creatas, etiam inanimes, si Deo sacratae sint, adorandas esse; ergo eadem ratione adorandae erunt imagines, quae personas sanctas & sacras representant: nam hoc ipso res quaedam sacrae sunt. Antecedens patet ex illo Ps. 98. *Adorate scabellum pedum ejus, quoniam sanctum est*, ubi nomine scabelli, mystice quidem potest humanitas, aut crux Christi intelligi, ut Augustinus & Hieronymus exponunt: proprie tamen & ad litteram intelligitur, vel propitiatorium, ut vult Janse- nius, vel arca testamenti, ut alii exponunt, & recte confirmat Bellar. lib. 1. de Sanct. beatitud. c. 13. Aliqui vero, ut Basilii & Vatablus cum Chaldaica Pharafrasi nomine scabelli totum templum intelligunt. Quae expositio, quamvis per se sumpta nihil nobis obstaret, quia etiam templum est res creata & inanimata, tamen ab eis inventa est, ut illa verba ad improprium sensum detor-

queant, ut mox videbimus: & nullum habet in Scriptura fundamentum, tum quia nunquam vox scabelli in Scriptura reperitur ad significandum templum, reperitur autem ad significandam arcam foederis 1. Paral. 28. *Cogitavi, ut edificarem domum, in qua requiesceret arca foederis Domini & scabellum pedum Dei nostri*; tum etiam quia metaphora scabelli templo non potest recte accommodari, optime vera quadrat in arcam: nam, ut dicitur 2. Reg. 9. Deus sedebat super eam in Cherubim, id est, in propitiatorio, quod super arcam erat in manibus Cherubim: & ideo arca erat quasi scabellum Dei. Alii vero per scabellum, terram intelligunt, quoniam hac metaphora solet in Scriptura terra significari, Isaia. 66. Matth. 5. Sed licet de aliis locis hoc verum sit, tamen praesenti non recte accommodatur, ut patet tum ex illa ratione subjuncta: *Quoniam sanctum est*: hoc enim de terra absolute dici non potuit: tum quia ex ipso contextu constat esse sermonem de peculiari ritu, & adoratione Judaeorum. Unde in principio Psalmi dicitur Deus sedere super Cherubim, & additur: *Dominus in Sion magnus, & infra: Judicium & justitiam in Jacob tu fecisti, & deinde subiungitur: Exaltate Dominum Deum nostrum, & adorate scabellum pedum ejus*, & additur rursus exemplum Moysi, & Aaron, qui fuerunt in Sacerdotibus ejus, & Deum colebant; & arcam etiam testamenti venerabantur; tum denique quia terra proprie non adoratur, si nulla alia specialis ratio sanctificationis ei adjungatur, ut inferius videbimus.

Sed dici tandem potest, ibi non praecipitur, adorari scabellum ipsum, sed Deum in scabello, seu in templo, ut Vatablus exposuit, Basilium imitatus, quomodo etiam potest Deus in terra adorari, juxta illud, *Nolite jurare per caelum, quia thronus Dei est, neque per terram, quia scabellum est pedum ejus*: Matth. 5. Cui expositioni favent similia verba Ps. 131. *Adorabimus in loco, ubi steterunt pedes ejus*, cum tamen in Hebraeo etiam habeatur vox significans scabellum pedum ejus, Favet denique lectio Graeca ejusdem Ps. 98. quae in ratione illa *Quoniam sanctum est*, non habet genus neutrum, sed masculinum, *Quoniam sanctus est*, & ita etiam vertit Hieronymus juxta veritatem Hebraicam, Vatablus & alii. Non ergo scabellum, sed Deus adorari praecipitur, quoniam sanctus est. Et hanc expositionem amplectuntur haeretici hujus temporis, & approbare deberent Catholici, qui dicunt proprie adorari Christum in imagine, non tamen imaginem ipsam, nisi abusive & improprie. Recte tamen expendit Bellarminus supra, interpretationem hanc non quadrare juxta proprietatem linguae Hebraicae: nam littera Lamed praepositur verbo adorandi, quae non denotat locum, in quo fit adoratio, sed personam, vel rem, cui adoratio tribuitur, ut Genes. 25. *Adoravit Abraham populum terrae*, in Hebraeo dicta littera praepositur: & Latine proprie vertitur: *Adoravit ad populum terrae*, ita ut praepositio *ad* denotet terminum adorationis, quae tamen Latine non proprie additur, & ideo etiam in dicto loco Psalmi praetermissa est. Unde Paraphrastes Chaldaicus ad eam vim explicandam, per dativum vertit: *Incurvate vos scabello pedum ejus*: Non ergo ad solum Deum, sed etiam ad ipsum scabellum adoratio exhibenda, & dirigenda praecipitur.

Quod etiam ex usu illius temporis satis confirmatur, nam cum magna reverentia tractabatur arca Testamenti: & tantum a Sacerdotibus vel Levitis tangi poterat. Unde, qui irreverenter eam tetigerunt, vel etiam aspexerunt, graviter puniti sunt, quae omnia constant ex Deut. 10. Jos. 3. 1. Reg. 6. 2. Reg. 6. Quapropter eodem modo exponenda sunt alia verba citata ex Ps. 131. ita ut per illa verba, *adorabimus in loco*, non significetur locus, ubi fit adoratio, sed locus, in quo erant pedes Dei, id est arca Testamenti, ad quam etiam fiebat adoratio. Unde ibi etiam in Hebraeo habetur, ut vertit Hieronymus, *Adoremus scabellum pedum ejus*. Unde post illa verba proxime subditur: *Surge Domine in requiem tuam, tu & arca sanctificationis tuae*. Igitur etiam ipsa arca in veneratione habebatur. Nec refert, quod ratio illa in neutro vel masculino verti possit: *Quoniam sanctum est*, vel: *Quoniam sanctus est*, vox enim Hebraea ambigua est, & ad Deum, vel scabellum referri potest: eundem tamen reddit sensum: nam scabellum Dei adorari praecipitur, vel quia ipsum sanctum est, ut Latinus vertit, vel quia Deus san-

Quid no-  
mine sca-  
belli pe-  
dum Dei  
in scri-  
ptura si-  
gnificetur.

Obje-ctio.

Aliorum  
sententia.

Prima as-  
sertio.

Ex Scri-  
ptura  
colligi-  
tur.



Aut est, ut Græcus vertit. Quamquam enim scabellum seu arca Dei adoraretur, tamen tota ratio adorandi illam erat Deus, quod nos etiam de imaginibus dicimus, ut infra explicabimus. Idemque est de cæteris rebus sacris.

Unde in VII. Synodo act. 3. in epistola Theodori Patriarchæ Jerosolym. quam tota Synodus probavit, non solum arca Testamenti, sed etiam mensa, propitiatorium, totumque tabernaculum, adorata esse dicuntur a filiis Israel. Et Damasc. l. 4. de fid. c. 17. ait, Mosaicum populum tabernaculum illud adorasse, eo quod cœlestium rerum imaginem gerebat. Et Hier. ep. 130. ad Marcellam de Ephod. dicit, vestes sacerdotales, & alias res sacras (quas *divina sacramenta* vocat) in magna veneratione fuisse habitas. Et similiter Aug. l. 3. de doctr. Christ. c. 9. & l. 3. de Trinit. c. 10. ait, res illas sacras propter sacram significationem merito fuisse in veneratione & honore habitas, & idem dicit de vasis sacris concion. 2. in Psalm. 113. Sicut ergo huiusmodi res, licet inanimes, censentur aliquo modo sacra, & sancta, ac adoranda, quia divino cultui dicata sunt, ita imagines, quia repræsentant personas sacras, colendæ sunt, quia propter hanc beatitudinem, etiam ipsæ deputantur inter res sacras, ut D. Thom. 2. 2. q. 99. art. 3. recte docuit.

Secundo principaliter probatur hæc veritas ex definitione Ecclesiæ, quæ præcipue tradita est in VII. Synodo generali, Act. 7. & in discursu totius Synodi multa ex historiis Ecclesiasticis, Sanctis Patribus referuntur, ex quibus concluditur, hanc esse Apostolicam traditionem. Leguntur etiam in illa Synodo epist. Adriani P. & aliorum Episcoporum, ex quibus constat, universam Ecclesiam Græcam & Latinam in hac veritate conspirasse. Et huius Synodi definitio refertur in Concilio Florentino sess. 5. & ab omnibus recipitur. Et antea tradita fuerat hæc veritas in VII. Synod. can. 82. & in Conciliis Romanis sub Greg. III. & Steph. III. prout in eorum gestis & in alijs historiis refertur, & insinuat ab Adriano Papa in Scripto de Imaginibus ad Carolum. Item colligitur hæc veritas ex can. 73. Trullano, & ex VIII. Synod. can. 3. Ac tandem definita est in Concil. Trid. sess. 25. Ex Sanctis Patribus nunc alia non refero, quia sufficienter in VII. Synodo afferuntur, quæ in præcedentibus sectionibus a nobis adducta sunt: & alia opportuniore loco in sequentibus sectionibus afferemus.

Tertio habetur hæc veritas ex communi usu & traditione Ecclesiæ, quam in sect. 1. satis indicavimus: nam fere ubicunque fit mentio harum imaginum, fit etiam de veneratione illis debita, & statim plura referemus. Nunc illud maxime hanc traditionem confirmat, quod Deus variis miraculis per imagines factis hunc cultum sibi placitum esse testatus est. Neque enim Deus suis divinis operibus, & beneficiis singularibus, quæ cultoribus imaginum contulit, rem turpem, aut superstitiosam approbasset: neque horum miraculorum veritas potest, nisi valde impudenter negari, cum a gravissimis auctoribus, & historiographis referantur, ut videre licet in VII. Synod. Act. 4. & 5. Damasc. orat. 1. & 3. de Imag. Athanas. lib. de Pass. imag. Dom. & Evag. lib. 4. histor. c. 26. & alijs. Neque etiam oportet plura hic in speciali referre.

Solum illud attingam, quod de religioso quodam refertur: qui cum vehementi dæmonis tentatione vexaretur, illaque liberari cuperet, ei dæmon apparuit, & a tentando se cessaturum promisit, si religiosus consuetudinem adorandi imaginem B. Virginis omittere sponderet; quod ipse omnino negavit, eoq; modo facilius & constantius tentationem superavit. Ita refertur in Prato Spirit. c. 45. & a VII. Syn. & Damasc. loc. cit. approbatur.

Ultimo probatur ratione, quæ honor imaginis in prototypum redundat, ut in VII. Synodo sæpe dicitur ex Basil. lib. de Spirit. Sanct. c. 18 & Ambros. serm. 10. in Ps. 118. & videtur esse principium quasi lumine naturæ per se notum, ad honorem alicujus personæ pertinere, ut non solum in se, sed etiam in imagine honoretur. Unde colligunt sæpe Patres, hominem, hoc ipso, quod est ad imaginem Dei, esse honore dignum, ut videre est apud Aug. ep. 113. Cyrill. Jerosolym. catech. 12. Hinc etiam antiqua consuetudo obviat, ut imagines Imperatorum honorifice tractentur, quæ etiam Christianos semper in vasis satis colligitur ex fraude Juliani, quam refert Nazianz. orat. 3. quæ est prima contra Julian. post quodam; Fecit enim ille, ut prope suam imaginem idola

falsorum Deorum poneretur, ut Christiani suam imaginem venerantes, idola colere viderentur. Et ex eodem principio contumelia vel injuria illata imagini, ad personam repræsentatam pertinere censetur. Nota est historia Theodosii de vindicta, quam in Antiochenos exercuit propter dejectam, & contumeliose tractatam Imperatricis imaginem, ut est apud Ambros. orat. de morte Theodosii. & Chrysost. hom. 2. & 3. ad popul. & Niceph. lib. 13. histor. cap. 34. ergo,

Et confirmari potest, nam res sancte veneratione dignæ sunt: sed imagines ex relatione, quam habent ad personas sanctas, quas repræsentant, aliquo modo sanctæ sunt: ergo ea ratione venerandæ seu adorandæ sunt. Major constat, quia sanctitas est præcipuum fundamentum adorationis, & honoris. Minor vero constat, tum ex modo loquendi Scripturæ, in qua res inanimatæ ex relatione ad munera sacra, vel ad sacras personas, sanctæ dicuntur; & ea ratione veneratione dignæ censentur, Exod. 3. *Solve calcamenta de pedibus tuis: locus enim, in quo stas, terra sancta est.* Et c. 12. Dies festi, sancti & venerabiles dicuntur: & vestes sacerdotales, sanctæ dicuntur cap. 28. Tum etiam, quia, ut notavit August. l. 2. de peccat. merit. & remiss. c. 26. & serm. 14. de verbis Apostoli, sanctificatio non unius modi est, nam quædam est intrinseca & propria, per veram ac internam sanctitatis susceptionem, alia vero est per aliquam habitudinem ad veram sanctitatem, quo modo etiam sacramenta dicuntur sancta, & utrique sanctitati seu sanctificationi sua proportionata veneratio respondet. Quæ ratione dixit Conc. Trident. sess. 3. c. 7. ad omnes sanctas functiones sancte & reverenter esse accedendum: eadem autem ratio est de omni re sancta. Quod vero imagines rerum sacrarum in hoc ordine collocentur constat, tum ex communi & recepta Ecclesiæ appellatione: sic enim appellantur, sanctæ imagines, frequenter in VII. Synodo & alijs Patribus: & communi usu Ecclesiæ, & sic discernuntur non solum ab idolis, sed etiam a prophanis imaginibus. Tum ex citato testimonio D. Th. 2. 2. qu. 99. a. 3. ubi inter res sacras, quibus sanctitas attribuitur, eo quod divino cultui dicata sunt, imagines numerat. Tum denique a paritate rationis, quia non minus sufficiens est hæc habitudo imaginis ad huiusmodi effectum, quam habitudo loci, vel alia similis. Unde etiam Scriptura *sacra* appellatur, propter sacram significationem, 2. ad Tim. 3. ergo similiter imago.

Ex hac conclusione & ratione colligitur primo, hanc adorationem imaginum prout ad illas terminatur respectivam esse, & non absolutam. Probatur ex dictis, quia solum adorantur propter excellentiam, & sanctitatem eorum, quos repræsentant, cum enim imagines res inanimatæ sint, non possunt in se habere excellentiam, propter quam adorentur: ergo tota ratio adorandi illas, est excellentia prototypi: ita ergo adoratio earum non est absoluta, sed respectiva, id est, propter habitudinem ad extrinsecam excellentiam.

Dices. In se habet imago figuram, & similitudinem alterius: ergo in se habet rationem, propter quam adoretur, sicut interdum amatur imago propter figuram, quam in se habet. Respondetur, negando consequentiam, nam illa eadem forma & figura adorabilis non est, nisi propter habitudinem ad excellentiam prototypi. Quod illomet exemplo amoris declaratur, nam, si quis amet imaginem solum quia ejus pulchritudine, & coloribus delectatur, ille non amat imaginem propter prototypum, sed propter se: unde cum illo amore imaginis posset simul esse odium rei repræsentatæ. Hoc autem modo non potest prudenter adorari imago, quia ut sic non habet excellentiam aliquam honore dignam, licet habeat aliquam amabilem bonitatem. At vero, si quis amet imaginem, solum ut faciat sibi aliquo modo præsentem rem, quam repræsentat, tunc, licet amet ipsam figuram, tota tamen ratio amandi est res repræsentata. Sic ergo dicendum est de honore, quia imagines non possunt alio modo honeste adorari.

Secundo inferitur ex dictis, hunc cultum imaginum sacrum religiosum esse & proportionatum sanctitati personarum, quas imagines repræsentant: nam cultus in sanctitate fundatus, religiosus est: huiusmodi autem est cultus imaginum, sicut & cultus aliarum rerum sacrarum, juxta illud: *Adorate scabellum pedum ejus, quoniam* *san-*

Ex Ecclesiasticis de eisdem veritatibus colligitur.

Idem ex Ecclesiæ traditione.

Miraculū pro adoratione imaginis B. Virginis.

Objectio.

Responsio.

Corol.



*sanctum est.* Quæ assertio amplius in seqq. declarabitur.

Imagines  
respecti-  
ve sed  
proprie  
non abu-  
sive ado-  
rande.

Secundo principaliter asserendum est, imagines non abusive tantum & improprie, sed vere ac proprie esse adorandas, quamvis respective. Sub his terminis pauci ex antiquis Theologis conclusionem hanc proposuerunt, aut declararunt. Sed moderni contra Durandum dicunt, ejus sententiam, quæ huic conclusioni contraria est, periculosam esse ac temerariam, & hæresim sapere. Ita Medina hic, qui refert, Victoriam asseruisse illam esse hæreticam. Et ita est hæc conclusio communiter recepta a posterioribus Theologis, quos infra sect. 5. commemorabo. Ex antiquioribus vero docuit eam expressius Gabriel in 3. d. 9. & super Canonem lect. 49. & Paludan. in 3. d. 9. q. 1. art. 3. ubi in primis ait, imaginem vere adorari, licet solum propter exemplar: & infra dicit quippiam valde notandum, scilicet esse absurdum principium, nihil irrationale esse adorandum in se, quia licet non propter se, tamen in se adorari potest & debet; & ponit exemplum in instrumentis passionis, de quibus ait: *Non solum veneramur Crucifixum in eis, sed etiam ipsa in se ipsis propter Crucifixum*; hoc ergo est, quod nos de imaginibus dicimus. Et idem sentit Major eadem d. 9. q. 1. dum declarat, imaginem vere esse adorationis objectum. Est tamen & in hoc auctore, & in aliis notandum, interdum ita loqui, ut dicant, imaginem per accidens adorari, intelligunt autem, per aliud, seu ratione alterius adorari, non vero ipsam adorationem non vere ac proprie dirigi ad imaginem, ut ipsimet declarant.

Probat ergo assertio posita primo in genere ex definitionibus Conciliorum & Patrum: simpliciter enim nobis tradunt imagines esse a nobis adorandas, & sub anathemate hoc definitur in Act. 17. VII. Synodi: at vero si improprie & abusive tantum adorari deberent, potius esset simpliciter neganda, quam affirmanda talis adoratio: nam impropria, & abusiva adoratio revera non est adoratio, & immerito damnarentur, ut hæretici, qui admittentes imagines, quod alios usus, solum earum adorationem respuebant, & negabant: nam si adoratio vere non terminatur ad imagines, & ideo, solum abutendo seu improprie utendo verbo adorandi, dici possunt adorari; ergo vere ac proprie utendo vocibus, atque adeo simpliciter loquendo, merito negari potest, eas esse adorandas.

Ratione hoc confirmatur, declarando rem ipsam nam vel imago vere & in re ipsa est objectum adorationis saltem materiale, totale, vel parziale, aut neutro modo est objectum. Si primum dicatur, id est quod intendimus, nam objectum, quod est materia, circa quam actus animæ versatur, proprie a tali actu denominatur. Sic enim proprie credi dicitur veritas illa, circa quam actus fidei versatur, & amari res illa, ad quam amor terminatur, sive propter se, sive propter aliud ametur. Sic ergo proprie dicitur adorari res illa, ad quam ut ad objectum & materiam adoratio dirigitur, sive propter se, sive propter aliud adoretur; quem modum adorationis latius in duabus sectionibus sequentibus declarabimus. Si autem dicatur, imaginem nullo ex dictis modis esse objectum adorationis, non solum sequitur, ipsam abusive adorari, ut alii dicunt, sed etiam plane sequitur, vere ac simpliciter loquendo, illam non adorari. Probat, quia neque est objectum formale adorationis, ut per se constat, quandoquidem adoratio non fit ratione illius, sed prototypi: neque etiam est objectum materiale, ut dicitur; ergo nullo modo est res, quæ adoratur: ergo nec vere adorari dici potest: nam hæc denominatio vere non cadit nisi in objectum, neque aliam habitudinem denotat. Et confirmatur, nam, si non est imago objectum adorationis, cur dicitur, vel abusive adorari? Dicitur ex Durando & Pico Mirand. dici adorari, solum quia ad præsentiam imaginum adorantur prototypa, quæ per imagines ad memoriam revocantur. Sed hoc revera nihil aliud est quam dicere, imagines esse occasiones vel signa excitantia hominem ad adorandum prototypa, non vero esse res, quæ adorantur, licet vulgo ita existimentur: & ita plane sentit Durandus, illam locutionem solum admittens, quia ita loquuntur plures, non quia revera ita sit. Quo fit, ut ex hujus sententia proprius & rigorosius loquerentur hæretici, quam Catholici, & sane consequenter loquitur, nam qui, visa pulchra specie creaturæ, animo insurgit ad considerationem creatoris, & illum laudat ac diligit, non potest vere dici diligere aut laudare creaturam, etiam si

præsentia creaturæ excitaverit amorem creatoris: ergo idem erit de adoratione imaginum, si tantum in earum præsentia adorantur prototypa, quia tunc imagines non deserviunt nisi ut occasiones vel signa excitantia memoriam. Hinc merito in VII. Syn. act. 6. gravissime reprehenduntur, qui dicebant, imagines retinendas esse propter memoriam, non propter adorationem, quod in re fere dicunt, qui solam abusivam adorationem imaginum in prædicto sensu admittunt: quia, si tantum adorantur prototypa in præsentia imaginum: ergo imagines solum memoriam deserviunt, ut eis visis, prototypa per recordationem adorentur. Neque est verisimile, illos hæreticos, qui dicebant, imagines retinendas esse solum ob memoriam prototyporum, negasse, in earum præsentia posse adorari exemplaria, cum id nulla apparenti ratione fundari possit: nam, si exemplaria ipsa per se sunt digna adoratione, quid ob stare potest præsentia imaginis, quominus adorari possint. Hinc rursus in eadem VII. Synodo frequenter dicitur, imagines esse adorandas, non tamen latria summæ & perfectæ: & est sermo, non tantum de imaginibus Sanctorum, sed etiam de cruce & de imagine Christi: at vero, si imago tantum abusive adoranda esset in prædicto sensu, perfectissima latria esset adoranda, quia per recordationem & in præsentia imaginis Christi perfectissima latria adoratur Christus: ergo. Concilium negans, imaginem tali adoratione coli, negat abusive coli, seu (quod idem est) negat, talem adorationem ex eo præcise, quod terminetur ad prototypon ut ad rem adoratam, dici posse adorationem imaginis; & e contrario, docens, imaginem adorari alia inferiori adoratione, consequenter docet, non abusive tantum, sed proprie adorari. Unde in eadem Synodo act. 3. non solum dicitur adorari exemplar in imagine, sed etiam adorari imago propter exemplar. In quo dicendi modo satis significatur, imaginem esse rem adoratam propter exemplar tanquam propter rationem adorandi. Quod etiam significavit ibi Leontius act. 4. dicens: *Imaginem adorans, non materiam, aut colores, sed inanimatum Christi characterem adorans*.

Tertio dicendum est, non solas actiones externas adorationis circa imagines esse exercendas, sed etiam interiorem intentionem cultus, & adorationis ad eas esse dirigendam. Hæc assertio est contra ultimum modum explicandi priorem Catholicorum sententiam, quem solis verbis ab opinione Durandi differre dixi. Nam Durand. etiam concedit actiones externas cultus circa imagines exerceri, sed quia existimavit intentionem cultus ad sola exemplaria dirigi, negavit illam esse propriam imaginum adorationem; alii vero contendunt esse simpliciter ac proprie adorationem, in quo (ut opinor) minus consequenter quam Durand. loquuntur, & ideo eorum opinio probabilior non est. Prima ergo ratio conclusionis est, quia sola exterior actio sine intentione colendi non est adoratio, nisi fortasse ficta vel apparens: est enim intentio, quasi anima & vita adorationis, quæ illi dat esse in ratione adorationis. Unde fit, ut eadem actio externa ex diversa intentione, diversam rationem adorationis recipiat, ut in principio hujus materiæ notavimus. Propter quod recte dixit Leontius in dial. cont. Jud. in act. 4. VII. Syn. citatus: *in omni adoratione intentionem ipsam requiri & expectari*, seu spectari & considerari debere: ubi ergo nulla est intentio cultus & honoris, nulla est vera adoratio. Respondent, ad hanc adorationem satis esse, quod procedat ex simplici affectu exhibendi imagini signum illud, aut notam honoris, quamvis non procedat ex intentione honorandi vel colendi ipsam, sed tantum rem in illa representatam, quia adoratio in externa actione principaliter consistit, unde sicut vere dicimus deosculari imagines, genua eis flectere, caput aperire, & similia, ita dicemur simpliciter, & proprie illas adorare, quia volumus tales actiones circa illas exercere, etiam si intentio cultus ad illas non feratur. Sed hoc non recte dictum est, quia ut ex Damasc. & Anast. supra retulimus, adoratio est signum, seu emphasis honoris, quod, ut recte declaratur, respective intelligendum est, scilicet, esse signum honoris, quæ exhibetur illi rei, quæ adorari dicitur: nam ut per se constat, adoratio non est signum alieni honoris, sed proprii ejus, qui adoratur. At vero signum honoris, quod circa imaginem exercetur, si non procedit ex intentione honorandi imaginem, sed solum prototypon, non est honor

Respon.



nor imaginis, neque est signum honoris illi exhibitum: ergo neque est adoratio imaginis. Minor patet, quia honor ut Arist. dixit, est in honorante, & ideo omnino pendet ex intentione honorantis: ergo cum tantum aliquis honorat, quem honorare vult, & intendit: ergo, si osculando imaginem Christi, ego non intendo honorare ipsam imaginem, sed solum Christum, revera non honoro imaginem, sed tantum Christum: ergo neq; adoro. Patet hæc ultima consequentia, tum a paritate rationis, tum etiam quia adoratio, & honoratio, vel convertuntur, si respectu superioris cum debita proportionem sumantur, vel certe honor est superior ad adorationem, quia omnis adoratio est honor, quamvis non omnis honor sit adoratio, dicente August. lib. cont. ser. Arian. cap. 23. *Honorat omnis qui adorat, non tamen adorat omnis qui honorat.*

Atque hinc secundo probari potest conclusio ex variis locutionibus VII. Synodi, in quibus non obscure indicatur, adorationem exhiberi imaginibus ex intentione adorandi ipsas, & non tantum exemplaria in ipsis representata. Primo quidem, quia adoratio imaginum honoraria, seu honorifica dicitur, & imagines ipsæ honorabiles, ac venerandæ. Unde in act. 7. in ep. totius Synodi ad omnes Ecclesias, sic dicitur: *honorabiliter adoramus*, scilicet imagines. Quid autem esse potest, honorabiliter adorare, nisi ex animo & intentione colendi ipsas, & honorandi, adorare. Deinde quia act. 6. in fin. dicitur: *Non indignas habemus imagines honore, salutatione & veneratione, debitamque illis venerationem, & adorationem dare debemus.* Si ergo imagines sunt dignæ honore, illis exhibendus est ex intentione colendi ipsas: alioqui non eis datur adoratio, sed alteri in ipsis, circa ipsas, vel occasione earum: sicut oratio non fit ad imaginem, sed ad exemplar coram imagine. Et in eadem act. 6. to. 4. in principio, ait Epiphanius de typo crucis: *Apud nos honorabilis existit: & act. 1. ait Basil. in sua confess. Honorifice veneror venerandas imagines. suscipio, & amplector, honoremque debitum eis exhibeo;* & act. 2. ait Adrian. in epist. *Ex animi desiderio eas veneramus;* & inferius Tharastius: *Hæc desiderio nostro adoramus, ut in nomine Christi, Deiparæ, & sanctorum factas.* Et inferius Euthym. Episc. Sardeniæ: *Ego (inquit) lectis Beatiss. Papæ veteris Romæ literis syncre & irrepugnabiliter inhæreo;* & infra: *Ob eam causam venerandas imagines ex toto corde cum debito honore, & salvatoria adoratione suscipio;* & infra ait Elias Episc. Cretens. *Juxta sanctiss. Papæ Adriani literas confiteor, & teneo venerandas & sacras imagines, nunquam seponens, sed perfecte adorans.* Quomodo autem dici potest perfecte adorare, qui solum externum actum exhibet, non vero ex intentione colendi. Denique Conc. Trid. sess. 25. de imaginibus dixit: *eis debitum honorem & venerationem esse impertiendam:* ostendimus autem, non posse verum honorem appellari, si desit intentio honorandi.

Unde argumentor tertio, nam velle genua flectere, vel aliud simile signum externum honoris exhibere coram imagine, aut est velle adorare illam, aut non. Si primum dicatur, & conceditur nobis, quod intendimus, nimirum, intentionem adorandi imaginem esse necessariam, ut vere ac proprie dicatur adorari imago: & aliunde non proceditur consequenter, nam, si ipsamet voluntas exhibendi signum honoris intrinsece est intentio cultus, male & sine causa distinguitur inter simplicem voluntatem exhibendi signum honoris, & intentionem cultus. Quod si hæc duo distinguuntur, ut revera distinguere possunt, dici non potest, voluntatem flectendi genua, vel exhibendi aliud simile signum, esse, vel intrinsece includere voluntatem adorandi. Aliud est ergo, formaliter & moraliter loquendo, velle genua flectere coram aliqua, & velle illam adorare, quia illud prius solum est quasi materialiter exercere illud, quod est signum honoris. hoc autem posterius est velle exhibere illud tanquam signum honoris. Quod si illa voluntas exhibendi signum honoris coram imagine solum cadit in illud signum, ut materialis quædam actio est, non vero formaliter ut est signum adorationis, non potest talis signi exhibitio respectu imaginis, dici vere ac proprie imaginis adoratio aut cultus, quia adoratio dicitur humanam & voluntariam actionem, procedentem ex voluntate adorandi. Unde, licet demus, adorationem hanc per exteriorem actionem consummari, tamen exterior actio conclusa voluntate adorandi non potest vere ac proprie adoratio appellari, quia, ut o-

stensum est, adoratio est quidam honor, honor autem exhiberi non potest sine intentione honorandi. Et hac ratione qui exterius exhibet idolo signum honoris sine intentione colendi, non vere honorat, vel adorat idolum, sed simulat se adorare. Unde non proprie committit proprium & perfectum idololatriæ peccatum, sed simulationis idololatriæ. Quod si non solum sine voluntate adorandi, sed etiam sine voluntate simulandi adorationem, talem actionem quispiam exerceret, non solum non adoraret, sed neque etiam adorationem simularet. Quomodo multi exponunt factum Naaman Syri 4. Reg. 5. ut vide- licet in Abulen. lib. q. 25. Tota ergo ratio adorationis ex voluntate adorandi pendet, nec vera adoratio sine intentione cultus intelligi potest.

Nec satisfaciet, si quis respondeat, verum quidem esse nullam adorationem veram exerceri posse nisi ex intentione cultus, non tamen esse necessarium, ut adoratio & intentio cultus ad idem referantur: sic ergo adoratio imaginis procedit ex intentione colendi exemplar: & hoc satis est, ut possit esse vera adoratio imaginis, quamvis non procedat ex intentione colendi ipsam imaginem. Hoc (inquam) satisfacere non potest, quia, sicut vera adoratio ut sic essentialiter ac formaliter requirit intentionem adorandi, ita adoratio hujus vel illius rei essentialiter requirit proportionalem intentionem adorandi talem rem: est enim eadem proportionalis ratio. Item quia adoratio ex propria ratione dicit actionem, quæ ad alterum refertur: ergo ut sit vera adoratio alicujus, necesse est, ut sub ea ratione ad illum voluntarie referatur. Item, quia honor unius non potest vere dici honor alterius rei distinctæ, nisi in illam aliquo modo refundatur, seu ab illa participetur: sed imago est res distincta ab exemplari: ergo non potest honor exemplaris dici honor imaginis, nisi in illam aliquo modo refundatur: ergo sub ea ratione potest & debet intendi, ut sit vera adoratio imaginis. Tandem declaratur ex exemplo, nam, si quis ex mera intentione humiliandi seu submittendi se Deo, terram deosculatur, vere ac proprie non adorat terram, sed solum Deum, quia tantum materialiter exercet actionem illam circa terram ex intentione cultus solius Dei: ergo, ut actio habeat rationem veræ adorationis respectu illius rei, circa quam proxime exercetur, non sufficit simplex voluntas exercendi talē actionē circa talem rem ex intentione cultus circa aliam, sed necesse est, ut intentio cultus se extendat ad omnem rem, quæ proprie adorari dicitur.

Ultimo possunt ad hanc assertionem confirmandam applicari omnia, quæ in confirmationem primæ assertionis adduximus: nam illa probant, adorationem dirigi posse ad rem etiam inanimatam, quatenus per aliquam sanctificationem aliqua veneratione digna efficitur, juxta illud: *Adorate scabellum pedum ejus, quoniam sanctum est:* imago autem, ut recte dixit Epiphanius in VII. Synod. act. 6. to. 3. & 1. per sacram representationem absque alia precatione venerabilis existit, & quandam sanctificationem accipit: ergo ad illam potest adoratio & intentio adorationis aliquo modo referri. De qua ratione & de tota hujus assertionis confirmatione dicemus plura in duabus sectionibus sequentibus, ubi etiam latius satisfaciemus fundamento contrariæ sententiæ. Nunc brevis dicitur, falsum esse, rem inanimatam esse omnino incapacem vel ineptam, ut ad illam intentio cultus referatur: quando ille cultus non est absolutus sed respectivus, & propter excellentiam extrinsecam tribuitur. Neque etiam est necesse, ut res, quæ adoratur, percipere possit honorem, qui ei tribuitur; neque etiam est de ratione adorationis, ut hac intentione tribuatur sed solum quod unaquæque res juxta capacitatem suam reverenter tractetur, & quia ipsa signa externa testimonium præbeant illius religiosæ existimationis, quæ de unaquaque re habetur, vel haberi debet. Sic enim de imaginibus existimationem habemus, non vulgarem, qualem habemus de aliis rebus prophanis. Et hanc existimationem indicare volumus, quando eas reverenter tractamus. Atque hoc modo intentionem cultus & honoris ad eas dirigere possumus. Et hoc videtur explicasse Tharastius in act. 4. VII. Synodi, ubi, cum ex lib. Maximi Abbatis hæc verba relata essent: *Venerandam crucem, & imaginem Dei Salvatoris nostri Jesu Christi, necnon Domina nostra Deiparæ salutarum, Constantinus Cypri Episcopus exposuit, verbum salutarum* possum esse pro verbo ad rationem; Thar-

Eva sic  
refutatur.



raſius vero addit: *Animadvertendum hoc verbum*, ſalutarunt, quod & nos reverenda acceptione facere debemus.

Unde etiam obiter conſtat, falſum omnino eſſe Patres VII. Synodi non multum curaffe, an cultus exhibendus imaginibus nomine adorationis, vel alio ſignificetur: quanquam enim illi Patres non curaverint, an illa actio poſſit aliis nominibus declarari, id eſt, non hoc excluſerunt, ſed amiſerint potius, ſcilicet nomine ſalutationis, honoris, venerationis, & ſimilibus, ut videre licet in citatis locis, & in Brevi demonſtrat. de imaginib. quæ ex Epiphania habetur act. 6. in fine, & in ep. Tharaſii ad Imperatores, quæ habetur act. 7. tamen multum curavit, ut nomen adorationis huic cultui non negetur, ſed potius vere ac proprie tribui credatur.

Unde ſub hac voce ſæpius ſub anathemate definitur, imagines eſſe adorandas; & alia voces ita explicantur, ut voci adorationis æquivalent, & illam includant, ut apertiffime conſtat ex act. 7. in definitione fidei, & in epiſtolis ad Imperatores & ad omnes ſacerdotes. Quapropter Theſaurus act. 4. poſt teſtimonium Anaſtaſii Epiſc. Theopoleos, quod adoratio ſit emphafiſ ſeu ſymbolum honoris, ſubdit: *Tanquam hypocriſis redarguendos eſſe omnes qui imagines ſe venerari conſentunt, adorationem autem recuſant.* Et Epiphanius in fine act. 6. in demonſt. pro imagin. *Semiprobos, & falſo veros* appellat eos, qui imagines ob recordationem admittunt, & ſalutationem earum recuſant, & ſtatim declarat, per ſalutationem, adorationem intelligi. Et ad hoc confirmandum Tharaſ. in ep. ad Imper. act. 7. inter alia adducit, quod de Phariſæis Dominus dixit Matth. 23. *Amant primos accubitus in menſis, & ſalutationes in foro*, & declarat, ſalutationem hoc loco a Domino appellari adorationem, & ſubdit verba notanda in favorem ultimæ aſſertionis, & contra oppoſitam ſententiam: *Phariſæi* (inquit) *glorioſo animo præditi, & ſeipſos juſtos exiſtimantes, ab omnibus adorari ſtudebant non enim ore oculari petebant, fuiſſet enim hoc imilitatis ſignum, & haudquaquam Phariſæi ſupercilii.* Igitur ſalutatio, quæ eſt adoratio, non conſiſtit in ſolo actu, vel ſigno externo, etiam voluntarie exhibitio, niſi procedat ex vera intentione cultus, & reverentiæ; & hæc eſt adoratio propria, quæ imaginibus etiam exhibenda decernitur.

Objeſtio hæreticorum contra præſentatas aſſertiones.

Contra doctrinam vero hiſ aſſertionibus explicatam multa obijciuntur tum a Catholicis, tum etiam ab hæreticis, quæ in ſeq. ſection. præſertim 4. 5. & 8. a nobis tractanda ſunt. Nunc ſolum libet proponere argumentum, quod hæretici hujus temporis magnificiunt, ex definitione Conc. Francofordienſis, in quo dicunt II. Synod. Nicenam damnatam ac reprobataſ eſſe, eo quod imaginum adorationem approbaſſet; ipſum verum Francoford. Concil. imagines retinendas quidem, non vero adorandas, indicaffe. Hanc autem illius Concilii definitionem probant primo ex actis ejus, quæ nuper ipſi in lucem ediderunt. Secundo ex hiſtoriis, quæ definitionem hanc Conc. Francoford. referunt, ut patet ex Annonio in annalib. Francor. ann. 794. & Abbat. Uſperg. in Chro. ann. 793. & aliis. Tercio ex lib. Carolin. contra imagin. in quibus docetur, imagines, quamvis retinendæ ſint, non tamen propter adorationem; illos autem libros ajunt editos a Carolo Magno, & Patribus Francoford. Concilii oblatos, & ab eis ſuſceptos & approbatos. De hoc argumento multa hiſ temporibus ſcripta ſunt a Catholicis, non quia difficile ſit, quod ad doctrinam fidei ſpectat, ſed quia veritas hiſtoriæ, quæ in eo attingitur, & difficile poteſt ex antiquis ſcriptoribus erui, & novis hæreticorum inventis, & mendaciis involuta magis & obſcurior effecta eſt. Primo igitur breviter reſpondere poſſemus, quidquid ſit de iis, quæ in argumento ſumuntur, non eſſe auctoritatem Concilii Francoford. cum auctoritate VII. Synodi, neque teſtimonium Caroli cum teſtimonio Adriani Papæ comparanda. Fuit enim Synodus Nicæna Oecumenica & a Summo Pontifice probata, Concilium autem Francoford. Generale non fuit, & ſi quicquam contra imagines docuit, non fuit in hac parte ab Eccleſia approbatum, cum Adrianus Papa VII. Synodum confirmaverit, & contra imaginum impugnatores ſcripſerit. Et ſimili ratione, quamvis conſtaret, Imperatorem Carolum contra imagines ſcripſiſſe, nihil veritati Catholicæ derogaret, quia imperatoria auctoritas non multum refert ad doctrinam fidei ſtabiliendam, ſed definitio fidei ad ſummum Pontificem ſpectat.

Qualiter ſatis fieri poſſit objectioni.

Hoc ergo ſuppoſito, circa hiſtoriam Concilii Francoford. quoad hanc partem etiam inter Catholicos ſcriptores hujus temporis diſſenſio eſt. Concedunt enim ſere omnes Concil. Francoford. de imaginibus tractaſſe ac definiſſe aliquid, nam hoc hiſtoriæ referunt; quid vero illud fuerit, non eodem modo declarant, quia neque in hiſtoriis ſatis declaratum, neque pars illa ejus Concilii in qua de imaginibus actum eſt, extat. Dicunt ergo quidam, Concilium Francoford. damnaſſe quidem Nicenam Synodum, & quoad hanc partem erraſſe, non tamen in doctrina fidei, ſed ſolum in factis, quia non ſatis perfectam habuit definitionem Synodi Nicenæ. Ita ſenſit Genebr. l. 3. Chronogr. ann. 794. & Bellar. l. 2. de imaginibus c. 14. qui in modo declarandi ſuam ſententiam verbis diſſerre videntur, quamvis in re ſortaſſe idem ſentiant. Genebrardus ſimpliciter concedit, in Concilio Francoford. prohibitaſ fuiſſe imaginum adorationem, ideoque Nicenam Synodum damnaſſe, quia exiſtimavit, illam hujusmodi adorationem imaginum approbaſſe; quam revera (inquit Genebrardus) non probavit. Unde concludit, illud Concilium non erraſſe in doctrina, ſcilicet reprobandis imaginum adorationem, ſed in factis, quia non ſatis perfectam habuit Nicenæ Synodi ſententiam: nam contra eam (inquit) ſic dimicarunt (Patres Concilii Francoford.) ac ſi ad ſtatuendam imaginum adorationem ſimpliciter incubuiſſet, cum potius de retinendis imaginib. ſanxiſſet, & egiſſet adverſus Conſtantinopolitanam VII. Pſeudoſynodum, quæ de illis conſtringendis, & omnino tollendis paulo ante canones tulerat. Alioqui hæc cum illa idem plane judicavit ac ſenſit. Quæ verba, ut jacent, mihi valde diſplicent; tum quia in eis admittit hic auctor ſimpliciter & absolute, imagines quidem eſſe retinendas, non tamen adorandas, quod eſt plane falſum, ut ex dictis in hac ſectione conſtat. Loquor autem de illis verbis ut jacent, quia in eis de adoratione ſimpliciter & absolute eſt ſermo. Quod ſi ſortaſſe Genebrardus per antonomafiaſ de ſumma adoratione & absolute latria, quæ divinitati ſoli debetur, locutus eſt, debuiffet hoc exponere, præſertim, cum illa ſententia de retinendis & non adorandis imaginibus ſub hiſ eiſdem terminis fuerit in Nicænâ Synodo reprobatâ. Unde multo magis mihi diſplicent verba, quæ ſtatim ſubjungit, in quibus de libris Carolinis ſic ait: *Paſſim inculcant retinendas eſſe imagines in ornamentum Eccleſiæ & memoriam rerum geſtarum; ſequè dumtaxat armant adverſus neſcio quam præſentam imaginum adorationem, quam nec Nicæna ipſa agnovit.* In quibus verbis plane ſentit VII. Synodum non magis docuiſſe imaginum adorationem, quam Pſeudocarolum, ſeu Eli. Phil. in libris illis Carolinis, quos tanti faciunt hæretici hujus temporis, Catholici vero prorfus rejiciunt, & Adrianus Papa ex profeſſo impugnavit. Aliter ergo declaravit hanc ſententiam Bellar. concedit enim Synodum Francoford. damnaſſe Nicenam, atque in hoc erraſſe, non tamen in doctrina, ſed in factis: idque ex duplici errore ſeu falſa exiſtimatione, quam de Nicænâ Synodo habuerunt Patres Synodi Francoford. exiſtimarunt enim in primis, Nicenam Synodum non fuiſſe auctoritate ſummi Pontificis congregatâ, & confirmatâ: deinde exiſtimarunt, in illa fuiſſe definitum imagines eſſe adorandas ſuprema ac perfecta adoratione. latriæ æque ac Deum ipſum, & hoc ipſi reprobarunt.

Verumtamen hæc ſententia mihi plane eſt incredibilis: nam ex hiſtoriis, quæ referunt acta illius Concilii, conſtat in eo ad fuiſſe Legatos Summi Pontificis Adriani, quos Ado in Chron. Theophylaſtum & Stephanum nominat: ergo fieri non potuit, ut totum illud Concilium ignoraverit, qua auctoritate VII. Synodus congregata fuerit, & quid in ea fuerit definitum: nam cum hæc Synodus paulo antea ſub eodem Pontifice acta eſſet, non potuerunt Legati ejusdem Pontificis illius auctoritatem & doctrinam ignorare: ergo, etiam ſi falſi rumores ſparſi eſſent de illa VII. Synodo, ut Genebrardus neſcio quo fundamento affirmat, potuiſſent Patres Concilii Francoford. a Legatis ſummi Pontificis inſtrui, & ipſiſ etiam ſcriptis VII. Synodi doceri. Imo, cum res eſſet adeo celebris & publica in univerſa Eccleſia, fieri non potuit, quin in univerſa Gallia, & Germania, nota eſſet VII. Synodi congregatio, & quod Pontificia auctoritate facta eſſet, & quid Adrianus Papa de illa, atque de ejus doctrina ſentiret. Accedit, quod error ille adorandi imagines, ut De-

Quid circa imaginem Concilii Francoford. ſcriptorum varia placita.

Improbatur.



os, potius est error Gentilium, quam aliquorum hæreticorum, vel eorum, qui fidem Christi profiteantur: ergo nulla ratione credibile est, existimasse Patres Francof. Concilii in eum errorem incidisse, aut propter solos rumores falsos id temere credidisse. Præsertim, cum nulla tunc esset in Ecclesia illius erroris suspicio, & credendum sit, pios & Catholicos Episc. nullo pravo affectu ductos fuisse, ut errorem illum aliis Patribus VII. Synod. attribuerent, aut eorum sententiam in deteriorem partem interpretarentur, quod hæretici interdum facere solent.

**Secundum placitum.** Alii ergo, cum defendere non possint, Francof. Concilium ex falsa informatione in facto errasse: & alioquin negare non audeant, illud contradixisse VII. Synod. & damnasse illam, propter historias, quæ hoc referunt, non verentur concedere, Concilium Francof. in hac parte errasse: nam Provinciale fuit, & errare potuit. Sed hunc dicendi modum apud nullum Catholicum inuenio, solumque hæretici hujus temporis hoc affirmant, qui non dicunt, illud errasse, sed emendasse potius, & correxisse VII. Synodum, quæ in hac parte erraverat. Cum tamen certum sit, Nicæni Concilii definitionem legitimam fuisse, non potuerunt Patres Concilii Francof. ab illa dissentire, sine manifesta hæresi: est autem incredibile eos pertinaciter, & hæretice in hac parte errasse incidendo in errorem Iconomachorum. Primo, quia in actibus illius Concilii, quæ nunc extant, sæpe profitentur, se procedere sub obedientia Rom. Pontif. & specialiter in libro Sacrosyllabo sub finem, dum sententiam contra hæreticos profertur, subjungunt hæc verba. *Reservato per omnia juris privilegio summi Pontificis Domini, & Patris nostri Adriani prima Sedis Beatissimi Papæ.* Sæpe etiam in eo Concilio profitentur illi Patres se sequi Majorum traditiones, & ab eorum vestigiis non discedere: & specialiter Carolus Magnus, qui illi Concilio interfuit, in epist. ad Episcopos Hispaniæ ait, se in primis consuluisse Apostolicæ sedis Pontificem, quid de causa in illo Concilio tractata sentiret: & inferius hæc verba subjungit: *Apostolica sedis, & antiquis ab initio nascentis Ecclesiæ non & Catholicis traditionibus ipsi a mentis intentione, tota cordis alacritate conjungar.* Ergo non est verisimile Patres Concilii Francof. coram Legatis Summi Pontificis, & coram illo Catholico Principe, Adriano Papæ, & VII. Synod. ab illo confirmatæ resistisse. Accedit, quod, si Conc. Francof. Iconomachorum errorem probasset, certe ante nostra tempora aliquis illius erroris sectator ejus auctoritate muniti studisset, quod tamen nullus fecit, maxime cum paulo post Carolum Magnum in eadem Gallia exortus fuerit Claudius Taurinensis, qui errorem illum in occidentalem Ecclesiam introducere voluit, qui sane non parum juvari posse auctoritate occidentalis plenarii Concilii in eadem provincia nuper celebrati, si errorem illum confirmasset. At vero neque Claudius in suum favorem illud adduxit, neque Jonas Aurelianensis, qui contra illum eodem tempore scripsit, & illius fundamenta confutavit, quicquam de Concilio Francof. respondit, aut quoad hanc partem scripsit. Est ergo falso impositus hic error Concilio Francof. Adde ultimo, quamvis non repugnet, Provinciale Concilium errare in doctrina fidei, tamen, si contingat errare ex pertinacia, & hæresi, nunquam solere Ecclesiæ hujusmodi Concilia quoad partem aliquam approbare, & ut Catholica recipere. At vero Concilium Francof. receptum est ab Ecclesia, & probatum ut verè Catholicum, quoad eam partem, quæ est de filiatione Christi naturali, ut supra vidimus: ergo non est verisimile fuisse hæreticos Patres illius Concilii: alioquin deblafaret summus Pontifex Adrianus, illos hæreticos declarare, eorumque definitionem confutare, sicut contra librum Pseudocarolinum eodem tempore scripsit.

**Tertium placitum.** Sit ergo tertia responsio, Concilium Francof. definiisse potius veritatem de adoratione imaginum, & Nicænæ Synodo consensisse. Ita docuerunt hoc tempore Alanus dialog. 4. c. 18. & 19. & dialog. 5. c. 12. & 13. Sander. lib. 2. de Imaginib. c. 5. & lib. 7. de visib. Monach. n. 713. & SURIUS in 3. to. Conciliorum in Præfat. ad Concil. Francof. Et potest hoc confirmari auctoritate Concil. Senoniensis in decretis fidei c. 14. ubi sic ait: *Carolus Magnus Francorum Rex Christianissimus Francoford. conventu ejusdem erroris suppressit insaniam*, scil. Iconomachorum. Præterea Platina in vita Adriani, sic ait. *Biennio post Theophylactus, & Stephanus Episcopi insignes Adriani nomi-*

*ne Francorum, & Germanorum Synodum habuere, in qua & Synodus (quam Septimam Græci appellabant) & hæresis Felicianæ de tollendis imaginibus abrogata est.* Idem fere dicit Paulus Æmilii lib. 2. de gestis Francorum, prope finem: ait enim Concil. Francof. egisse contra hæreticos damnantes imagines. Et imaginibus (inquit) *sanos bonos servatus est.* Idem dicit Blondus decade 2. lib. 1. Sa-bellius lib. 8. Æne. ad 8. Naclerus in Cronolog. vol. 2. gener. 27. Gallifardus Arelaten. in Chronogr. ann. 816. Imo refert Alanus d. c. 19. hæreticum quendam Anselmum Riiid affirmasse Nicænæ synodum Constantinop. Pseudosynodum de abolendis imaginibus, tanquam hæreticam exécrasse, idemque fecisse Adrianum Papam, & Carolum Regem Francofordiæ.

Sed quid dicemus ad historiographos referentes Synodum Francof. damnasse VII. Græcorum Synodum? Respondent Alanus, Sanderus, & Surius, per VII. Synodum non intelligere historiographos II. Nicænæ, sed pseudosynodum Constantinopolitanam, quæ sub Constantino Copronymo, ab Iconomachis celebrata est, quam universalis, & VII. Synodum ipsi appellant, ut refert Zonaras in vita Constantini, & constat ex II. Synodo Nicænæ act. 7. ubi tota illa Synodus ex professo impugnatur, & refellitur, & neque universalis, neque vera Synodus fuisse demonstratur, sed prophana, & adulterina, quia neque habuit cooperarium, ut ibi dicitur, *Romanum Papam, neque illius Sacerdotes, neque per Vicarios, neque per Provinciales literas, quemadmodum fieri in Synodis debet: Neque concordantes sibi habuit orientis Patriarchas, &c.* Dicunt ergo prædicti auctores, historiographos loqui de VII. Pseudosynodo, cum referunt, Francof. Concilium quandam Synodum Græcorum damnasse. Hæc verò responsio ex verbis ipsorum historiographorum magnam difficultatem patitur, nam apertis verbis designare videntur Nicænæ Synodum. Nam in primis auctor librorum, quæ Carolo attribuntur, in præfatione asseverat, Græcorum Synodum, quam de adorandis imaginibus fecerunt, in medium Synodi (scilicet Francofordiensis) aliam esse, atque damnatam: Synodus autem Græcorum pro adorandis imaginibus non fuit Constantinopolitana, sed Nicænæ. Secundo Hincmarus Rhemenfis libro contra Jandinensem, ut refert Alanus, seu contra Laudunensem, ut refert Bellarminus c. 20. aperte dicit, illam Synodum Nicænæ esse habitam, & in generali Synodo in Francia habita tempore Caroli Magni fuisse penitus abdicatam. Hæc autem Synodus in Francia non potuit esse alia nisi Francofordiensis. Tertio Aimoinus lib. 4. de gestis Francorum c. 85. dicit, illam Synodum Græcorum, quæ in Francof. abdicata est, congregatam esse sub Irene, & Constantino filio ejus: illa vero Synodus fuit Nicænæ, nam altera pseudosynodus Constantinop. multo prius fuerat congregata sub Copronymo: & idem dicit Abbas Urspergensis in Chron. ann. 793. Quarto Regino lib. 2. ann. 794. dicit, Synodum Græcorum, quam pro adorandis imaginibus fecerant, rejectam esse a Pontificibus, utique Concilii Francof. Et similiter Aventinus in historia Boiorum scribit, acta Græcorum de adorandis imaginibus recisa esse. Quinto Ado in Chron. ann. 792. sic ait. *Sed Pseudosynodus, quam VII. Græci appellant pro adorandis imaginibus abdicata penitus.*

Propter hæc respondent alii, fatendo, in his omnibus historiis sermonem esse de II. Synodo Nicænæ, falsum tamen esse, quod referunt, scilicet Nicænæ Synodum a Francofordiensi fuisse damnatam: occasionem autem erroris fuisse ajunt, quia posteriores historiographi citati fuerunt Germani, & longe posteriores, quam Francof. Concilium: unde & de Synodo Nicænæ, aut parvam, aut nullam habuerunt notitiam, eo quod inter Græcos acta esset, & Græci scriptores nihil fere tunc de illa scripserunt. De Concilio autem Francof. cujus acta omnia multo tempore latuerunt, & quoad hanc partem de imaginibus adhuc non constat scripta fuisse, non potuerunt habere notitiam, nisi ex prioribus scriptoribus. Inter priores autem scriptores nullus facit mentionem hujus partis, præter Pseudocarolum, & Hincmarum. Hos ergo posteriores secuti sunt. Ex his vero duobus Hincmarus videtur deceptus occasione libri Carolini: nam de hoc libro videtur loqui Hincmarus cum loco supra citato scribit hæc verba. *De cuius destructione non modicum volumus, quod in Palatio adolecentulus legit, ab eodem Impera-*

Objectioni contra tertium placitum, qualiter illius auctores respondant.

Aliis præfatæ objectionis solutio.



*peratore Romam est per Episcopos missum.* Constat autem ex scripto Adriani ad Carolum pro imaginibus, Carolum misisse ad Adrianum librum illum, qui eo tempore fuit contra imagines & contra Synodum Nicænam in Francia compositus, & Carolo dicatus. De hoc ergo loqui videtur Hincmarus, & ab illo deceptus fuisse, ut existimaverit Synodum Nicænam in Francoford. fuisse datam: nam existimavit, librum illum in Francoford. Synodo fuisse compositum, vel saltem recognitum, & probatum. Totum ergo hujus erroris fundamentum ad auctorem libri Carolini, & ad verba citata ex præfatione ejus revocatur: illa autem nullius sunt auctoritatis. Primo quidem, quia verba illius præfationis, prout a nostris auctoribus referuntur (illa enim in proprio originali videre non licuit) sic habent. *Allata est in medium* (scilicet in Synodo Francofordiæ) *questio de nova Græcorum Synodo, &c.* Non constat autem, an illa parenthesis sit ab ipsomet auctore posita, an vero ab aliis auctoribus, qui dum ea verba referunt, ita illa intelligunt, & exponunt. Deinde, quia licet illa verba sint apposita ab eodem auctore, nullius est auctoritatis, non solum, quia ab hæreticis creditur liber ille conscriptus, verum etiam, quia falsum testimonium manifeste imponit Synodo Nicænae, nimirum, quod imaginibus Sanctorum ita ut Deificæ Trinitati servitium & adorationem impendendam decrevit. Igitur, quanquam prædicti auctores omnes referant, Francofordiense Concilium damnasse Nicænum II. non est illis fides habenda. Quod si objicias, saltem Hincmarum & posteriores auctores Catholicos esse, & bene de adoratione imaginum sensisse, ut omnes fatentur, ut ex aliis eorum locis Bellarminus & alii probant, & ideo non esse verisimile, eos male sensisse de Synodo Nicæna, prout in locis citatis dicto modo intellectis aperte declarant: Respondendum est, eos errasse in facto, non in fide, quia non fuerunt satis instructi de auctoritate Synodi Nicænae, & de doctrina ejus: unde crediderunt, definiisse imagines esse adorandas ut Deos: & de hac adoratione sunt locuti, cum asseruerunt, Francofordiense Concilium, eam detestatum fuisse.

**Improbatur tertium placium.** Tota hæc sententia infirmis nititur conjecturis, & testimonio, quæ sibi ipsis non constant: nam in primis, ut incipiamus a præfatione Eli. Phil. in qua totus discursus superioris responsionis præcipue fundatur, nulla fides ei adhiberi potest: nec verisimile est, reliquos omnes historicos illi soli fuisse innixos. Primo quidem, quia auctores præcedentis opinionis dubitant, an in illa Præfatione, ut est in suo originali, Francof. Concil. nominetur: & probabilius credunt, parenthesis illam, in qua Francoford. Concilij fit mentio, fuisse ab aliis interpositam. Quod si hoc verum est, neque Hincmarus, neque alii historici potuerunt ex hac præfatione sumere illam sententiam de damnatione Synodi Nicænae in Francofordiensi, sed ad summum, in aliquo conventiculo imperitorum, & hæreticorum hominum, a quibus fortasse liber ille editus est. Unde sumitur secunda conjectura; nam omnium recte sentientium judicio liber ille non fuit a Carolo Magno editus, sed ab aliquo vel aliquibus hæreticis, qui illum, vel occulte vel palam Carolo obtulerunt: Carolus autem illum ad Pontificem Adrianum misit, qui in Scripto ad Carolum de imaginibus librum illum ex professo confutavit. Quæ omnia late probant Alanus supra & Bellarm. dict. lib. 2. c. 15. ergo non est verisimile, Hincmarum, virum Catholicum & doctum, ex sola illius libri auctoritate factum illud Concilio Francoford. attribuisse. Tertio, quamvis ille liber tempore Caroli editus fuerit, tamen de præfatione, quæ nunc ei præfigitur, merito Alanus, & Surius dubitant, an sit antiqua, vel nuper ab aliquo hæretico edita & supposita, vel saltem corrupta: nam, qui præfatur, vel ficto, vel elementito nomine, *Eli. Phil.* se nominat, ut se ipsum occultet, quod statim suspicionem alicujus deceptionis generat, præsertim in re adeo lubrica, & ex se suspecta. Et præterea, quantum ex his, quæ Alanus c. 18. refert, conjectare possum, ipse Eli. Phil. se alium a Carolo esse ostendit: nam ex professo in eadem præfatione ostendere conatur Carolum fuisse illorum librorum auctorem, re prius deliberata cum Episcopis Concilii Francofordien. fuit ergo auctor illius Præfationis Eli. Phil. non Carolus: & illa præfatio non fuit edita tempore Caroli Magni: ergo nihil probabile de illa credi potest, nisi quod ab eodem sit edita, a quo denuo

liber ille inventus, vel typis mandatus ante quadraginta quatuor annos solummodo. Et ut minimum, improbabile sit, Hincmarum, & alios antiquos historiographos ab illa præfatione sententiam suam hausisse. Quarto obstat (quod Surius notavit) quia auctor præfationis dicit, Synodum illam, quæ a Francofordiensi damnata est, Constantinopoli fuisse celebratam: hæc enim ejus verba referuntur: *Allata est in medio questio de nova Græcorum Synodo, quam de adorandis imaginibus, Constantinopoli fecerunt:* ex quo verbo colligi potest, eum non de Nicæna, sed de Constantinopolitana synodo loqui: vel certe, cum dicat, in illa Synodo actum esse de adorandis imaginibus: cumque etiam dicat (ut Bellar. refert) Constantinopolim sitam esse in Bythinia, colligitur, hominem illum prorsus fuisse imperitum, nullaque fide dignum: aut certe inferri potest, eum ex aliqua traditione aut fama credidisse quandam Constantinopolitanam synodum rejectam esse in Francofordiensi, ignorasse vero, quid in ea actum fuerit, & ex errore id addidisse.

Ex his etiam constat, quam sit infirmum testimonium Hincmari, ut credamus, eum testatum esse, Concilium Francof. damnasse Synodum Nicænam, ex sola auctoritate præfationis libri Carolini, cum verisimilius sit, Hincmarum talem præfationem non vidisse. Unde Alanus supra merito fidem non habet huic testimonio, nec credit esse Hincmari, quia nec liber ille Hincmari, unde sumptum dicitur, extat, neque ad nos pervenit, nisi ex relatione Illyrici hæretici, cui nullam fidem adhibemus, neque scimus, unde fragmentum illud decerpserit, præsertim cum Trithemius inter opera Hincmari illum non numeret. Deinde in illismet verbis multa sunt falsa, & inter se pugnantia, vel parum probabilia. Primum, quod asserit, in quadam VII. Synodo Græcorum, quosdam dixisse imagines esse confringendas, alios vero esse adorandas, nam hoc non in una Synodo, sed in diversis accidit: & ita videtur utramque Synodum confundere, nam utramque illam partem dicit, non sano intellectu esse ibi definitam. Deinde, quod ait, Synodum Nicænam sine auctoritate Papæ fuisse habitam, & Romam missam. Rursus, quod ait Romanum Papam illam Synodum Nicænam ad se missam, & in Franciam directam, ut ibi (sicut indicat) examinaretur, vel corrigeretur, est per se improbabile, & ab omni vera historia alienum. Denique quod ibi dicitur de volumine contra Nicænam Synodum edito, & ab Imperatore Romam misso per quosdam Episcopos, non consonat cum eo, quod Adrianus refert, Carolum misisse ad se librum per Engilbertum Abbatem.

Denique de aliis historicis necessario est omnibus fatendum, aliquem errorem in eorum scriptis contineri, nam in primis Aimoinus, quem Abbas Ursperg. secutus est, expresse dicit, Synodum Francofurti damnatam, Constantinopoli congregatam fuisse, cur ergo interpretabimur eos de Nicæna loqui? Dices, quia addunt: *Sub Constantinio & Iren.* Respondet Alanus, illos libros quoad hanc particulam ab aliquo Iconomacho fuisse corruptos. Verum, quia hoc probari non potest, nec fieri satis verisimile, dicam potius, Aimoinum errasse, ignorantem, quo tempore Constantinopolitana Pseudosynodus congregata fuisset. Deinde Regino, quem Aventinus imitatur, illam Synodum vocat *Pseudosynodum Græcorum*, quo nomine appellata est ab omnibus Catholicis illa Synodus Constantinopolitana VII. nam Nicæna, nec Pseudosynod. appellari potuit, cum verissima fuerit, nec Græcorum tantum, cum universalis fuerit, & Summi Pontificis auctoritate coacta, cujus contrarium de illa Synodo ibi indicatur. Dices, quomodo ergo dicit Regino, illam Synodum fuisse factam, *pro adorandis imaginibus*. Respondet Alanus, legendum esse *pro non adorandis*: & particulam *non*, vel incuria vel malitia fuisse sublatam. Sed est difficilis responsio, cum id probari non possit. Libentius dicerem, ignorasse illos auctores, quid in Conciliis Græcorum tractatum ac definitum fuerit, sicut de Nicæna Synodo prior opinio dicebat: nec sine fundamento, quia illa Pseudosynodus Constantinopolitana nunquam est in Latinum conversa, quod nobis constat: & Synodus etiam Nicæna post longa tempora Latinitate est donata: & ex historiis illorum temporum nihil fere certum scire potuerunt de his, quæ in illis Synodis tractata sunt.

Ad verba Adonis Alanus acute respondet, verba illa, *pro*

De posterioribus scriptoribus feratur eorum.



*pro adorandis imaginibus*, non esse conjungenda cum, præcedentibus, sed cum subsequētib; interposito comate hoc modo: *Pseudosynodus, quam Septimam Græci appellant, pro adorandis imaginibus abdicata penitus*, id est, in defensionem adorationis imaginum, penitus abdicata est. Qui sensus est quidem satis consentaneus verbis ipsis; imo vix aliter commode construi possunt, quia nulla Synodus appellata est: *Septima pro adorandis imaginibus*. Quod si hic sensus verus est, fortasse Regino verbis Adonis fuit deceptus, nam vel æquales scire, vel Regino junior fuit: floruit enim Regino an. 910. teste Trithemio, & tamen Ado texit historiam usque ad an. 877. fuit ergo Ado, vel antiquior, vel, ut minimum equalis: fieri non potuit, ut Regino verbis Adonis non satis intellectis deceptus fuerit, & ab eis occasionem errandi sumperint Abbas Uspergensis & Joannes Aventinus, qui absq; controversia sunt longe recentiores. Imo & de Aimoino, vel Annonio idem dici potest, si fortasse ille est, quem sub nomine *Anthonii monachi* refert Trithemius scripsisse de rebus Francorum an. 990. Quod si hic sensus non probatur, potius dicendum est (sicut de aliis) ignorasse Adonem, quid tractatum sit in pseudosynodo Constantinopolitana, falsoque existimasse, in ea esse definitum, imaginibus esse perfectam patriam tribuendam, quam nomine pseudosynodi Græcorum, Nicænam Synod. intellexisse.

Ex his ergo omnibus, saltem concluditur evidenter, nullum ex historiis posse sumi firmum argumentum, quo existimetur, Concilium Francofordien. contra veram imaginum adorationem, aut contra Synodum Nicænam aliquid definivisse. Ostendimus item manifestis indicibus & rationibus, non potuisse Concilium Francof. si in eo de causa imaginum actum est, aut sententiam Adriani Papæ, & Nicæni Concilii veram definitionem & auctoritatem ignorare, vel ab eis sciens & prudens dissentire supposita reverentia, quam ex ejus actis, quæ extant, scimus Sedi Apostolicæ detulisse. Relinquitur ergo, necessario fatendum esse, vel historicos errasse, vel aliqua ex parte corruptos esse eorum codices, vel certe non de vera, sed de falso nominata Septima Synodo locutos fuisse. Et quidem de testimonio Præfationis Carolinæ, & testimonio Hincmari, nulla omnino est habenda ratio: illius quidem, quoniam est ignoti auctoris, & suspecti, & quia non constat, quo tempore aut loco scripta sit, aut edita, vel inventa, & quia aperta continet mendacia, & falsa testimonia, quæ Nicæni Synodo imponit: hujus vero, quia non constat, tale testimonium esse Hincmari, nisi ex relatione hominis hæretici, & hostis imaginum: & quia ea ipsa, quæ in illo testimonio referuntur, parum sunt verisimilia, & aliis certis historiis consentanea. De reliquis vero auctoribus, cum negare non possumus, errorem aliquem in eorum libris reperiri, omnino enervatur in hac parte eorum auctoritas. Propter quod possit aliquis libere negare, quicquam actum esse de imaginibus in Concilio Francoford. neque pro illis, neque contra illas, quia neque extant acta illius Concilii quo ad hanc partem, neque ullus auctor Catholicus ea se vidisse, refert: nam quæ hæretici isto tempore sub hoc nomine divulgant, ab eis plane conficta sunt: unde neque exemplar designant, ex quo illa transfulerint, neque locum, in quo hæcenus detulerint, ipsique invenerint. Neque etiam ad verbum describunt acta Concilii, sicut in aliis Conciliis fit, & sicut nos habemus eam partem hujus Concilii, quæ est de filiatione adoptiva Christi.

Denique Jonas Aurelianensis, qui paulo post Carolum Magnum floruit, & contra Claudium Taurinensem in defensionem imaginum ad Claudium Calvum scripsit: in initio illius operis mentionem faciens Concilii Francof. solum dicit, in eo damnatum esse errorem Felicis de filiatione Christi adoptiva, nullam mentionem faciens, quod causa imaginum illo Concilio acta fuerit, & Walfridus Strabo in lib. de reb. Eccl. c. 8. mentionem faciens erroris Græcorum circa imagines, dicit damnatum esse in Concilio Romano sub Gregorio III. & subdit: *Ipsa denique querela Græcorum, temporibus bonæ memoriæ Ludovici Imperatoris, in Franciam perlata, ejusdem principis providentiâ scriptis Synodalicis est confutata*. De Concilio autem Francof. nullam mentionem facit, cum tamen Walfridus ejusdem fere ætatis auctor fuerit. Non ergo caret hic modus dicendi probabili conjectura.

Quia tamen tot historie, quæ mentionem faciunt

Concilii Francoford. referunt aliquid de imaginibus in eo actum esse, suspicari cogunt, aliquod habuisse hujus rei fundamentum, & saltem traditione vel fama publica ad eorum aures pervenisse, qui hoc scribere cœperunt, Adonis nimirum, vel Aimoini, aut Reginonis. Quare credibile est, Adrianum Papam, cum Legatos suos ad Concilium Francof. mitteret, per illos etiam misisse acta Concilii Nicæni, quod illo eodem tempore finitum fuerat, ut definitio illius toti occidenti innotesceret. Atque ita fieri facile potuit, ut in Concilio Francofor. nihil de novo de imaginibus ageretur, vel scriberetur, præter acceptionem Concilii Nicæni, & confessionem illorum Patrum in damnanda pseudosynodo Constantinopolitana; & hoc fortasse est, quod Ado brevibus verbis referre voluit juxta sensum supra traditum: eadem est aliorum sententia, quamvis circa res alias vel circumstantias pertinentes ad illam pseudosynodum Constantinop. errorem aliquem ex ignoratione historiæ miscuerint. Quem errorem posteriores historici, ut vidimus, emendarunt, partim ratione, & certa conjectura ducti, partim quia de Nicæna Synodo, clariorem notitiam adepti sunt. Sic igitur in re tam incerta merito Concilium Senon. eam partem ut probabilior elegit, quæ ait, Concilium Francof. Nicæno II. consensisse.

#### SECTIO IV.

*An imagines eadem adoratione, qua exemplaria adorari possint.*

Thomas quæstionem hanc in particulari movit de imagine Christi, & adoratione latræ. Est autem eadem proportionalis ratio, & quæstio de imaginibus Sanctorum, & adoratione dulciæ, & in universum de omni imagine, & adoratione suo exemplari debita, & ideo generalius est a nobis hæc quæstio proposita, ut omnia comprehendamus. Deinde, ut opinionum diversitas intelligatur, advertendum est, tribus modis intelligi posse, fieri adorationem ad imaginem, seu in præsentia imaginis. Primo, dirigendo totam mentis intentionem ad exemplar in imagine repræsentatum tanquam ad objectum propriè per se, & ex corde adoratum, & non ad imaginem. Secundo, dirigendo adorationem tam ad exemplar repræsentatum, quam ad imaginem, in qua repræsentatur, ex utroque mente & animo conficiendo unum objectum adæquatum, ad quod per se terminetur, & sit adæquata materia, circa quam versetur adoratio ex intentione adorantis. Tertio, dirigendo adorationem ad solam imaginem tanquam ad materiam seu rem per se adoratam, ad exemplar vero, solum, ut ad rationem adorandi: aliud est enim adorari per se, & aliud adorari propter se: sicut & amari nam medium per se, seu in se amatur, quamvis non propter se, sed propter finem; & in superiori sectione ostendimus, imaginem per se & propriè adorari, quamvis respectivè & propter exemplar: & in hac tertia consideratione hoc præciso modo adorari intelligitur. De primo ergo adorandi modo nulla controversia est, quin sit possibilis: quis enim dubitare potest, quin præsentata imagine Crucifixi, possim ego personam Christi recordari, & ad eum tota mentis intentione recurrere, dirigendo in illum subjectionem & actionem meam, & non ad imaginem, sed tantum uti illa tanquam medio, & occasione excitante ad adorandum Christum. Cum ergo hic modus non involvat repugnantiam, neque indecentiam, & alioqui homo sit liber, non est dubium quin possit hunc modum, adorationis exercere, & facto, & jure. Solum potest circa hunc modum dubitari, an talis adoratio vere ac propriè dici possit imaginis adoratio, nec ne, sed solius prototypi. Sed hoc (ut opinor) satis discussum est section. præcedenti, ubi ostendimus, talem adorationem nec simpliciter, neque vere dici posse imaginis adorationem. De aliis autem duobus modis certum est, si illi sunt possibiles, illis vere ac propriè adorari imagines: an vero possibiles sint, illud est in controversia; & hæc est, quæ a nobis nunc tractatur: & in hac sectione agimus de secundo modo, in sequenti vero dicemus de tertio.

Principio igitur omnes auctores, qui existimant, imagines non esse propriè & per se adorabiles, neque totam materiam adorationis, neque ut parrem ejus, sed solum abusi-

Prima opinio.

Confessionem  
ex omnibus  
bus ad  
ductis.



abusive, & improprie, seu solum specietenus, consequenter negant, imaginem Christi proprie adorari eadem adoratione, qua Christum, & sic de cæteris, quamvis abusive & improprie id dici possit: & hæc fuit opinio Holkot, Durandi, & Mirandulani, & aliorum, quos sect. præced. citavimus: & multi ex his, quos referemus, præsertim Bonavent. Marfil. & Major, eidem opinioni favent. Et in eadem sententia sunt, velint, nolint, illi moderni, qui solum actionem externam, non autem intentionem adorandi dicunt circa imaginem versari: quantumvis enim verbis proclamant, se sequi D. Thomam dicentem, imaginem eadem adoratione coli qua prototypum, tamen revera illi contradicunt, & in rigore negant, imaginem eadem adoratione adorari, cum in rigore & veritate negent adorari: quia, si non adoratur, neque eadem adoratione adoratur: sed solum dicere possunt, non adorari alia adoratione, & illa, qua adoratur prototypum, videri adorari, re tamen vera non adorari, quia actio externa non est adoratio, nisi ut informatur interna, seu intentione adorandi, ut supra late deductum est, & in sequentibus sæpe inculcabitur.

Alii vero auctores, quamvis fateantur, imagines posse proprie ac per se adorari, negant tamen, posse adorari eadem adoratione, qua prototypum, quia putant, non posse adorari secundo modo supra declarato, sed tantum tertio, qui distinctus est a primo, & actionem seu adorationem distinctæ rationis requirit, nam adoratio primi modi est tantum absoluta, & in solum exemplar per se & propter se terminatur. Ac denique non est vera adoratio imaginis; at vero adoratio postremi modi est vere ac proprie adoratio imaginis, non tamen propter se, sed propter exemplar: unde est adoratio mere respectiva, qua non proprie ac formaliter adoratur exemplar ut quod, sed tantum ut quo: sunt ergo adorationes distinctæ, atque ita fit, imaginem, & exemplar, nunquam adorari vere ac proprie etiam adoratione. Hanc opinionem sic expositam videtur mihi docuisse Gabriel in 3. dict. 9. & super canonem lect. 49. quamquam non constanter loquatur, & velit in modo loquendi cum omnibus convenire. Primum enim simpliciter asserit, imaginem adorari eadem adoratione qua prototypum: postea vero dicit, hoc esse intelligendum de eadem adoratione externa, non de interna: eadem enim genuflexione colitur Christus, & ejus imago, non tamen ex eadem existimatione; aliud enim significare volumus per illam actionem in imagine, aliud in Christo. Hoc vero non satis est, quia, ut dixi, actio externa per sese neque est adoratio, neque latria, neque dulia: ergo neque unitas actionis externæ satis est, ut imago & prototypum una adoratione adorari dicantur. Neque imago Christi dici poterit adorari eadem latria qua Christus propter solum actionem externam, cum actio externa ex se nec latria sit, nec dulia, sed juxta intentionem adorantis: aliàs sancti possent dici eadem adoratione seu latria coli, qua Christus, quia eadem exterior actio oculatus potest circa illos exerceri. Unde addit ulterius Gabriel, etiam adorationem internam seu affectum adorandi imaginem, & prototypum, esse aliquo modo unum, vel realiter, quod probabile esse censet, vel saltem habitudine & analogia, nam uterque pertinet ad adorationem latriæ, v. g. si de Christo, & ejus imagine sit sermo, aut dulia, si de sanctis loquamur, quia in eadem excellentia uterque fundatur, diverso tamen modo, quia ad exemplar terminatur ut ad habens illam excellentiam, ad imaginem vero solum propter respectum vel habitudinem ad illam excellentiam; & ideo, licet utraque sit latria, tamen altera est simpliciter, altera secundum quid: atque ita fit illam adorationem esse tantum secundum quid unam, plures autem simpliciter. Et hanc opinionem in re sequitur Corduba l. 1. quæst. Theol. q. 5. dub. 4. art. 2. opin. 3. ubi etiam opin. 2. refert, Joannem Medinam asserentem adorationem imaginis esse inferiorem adoratione prototypi: unde existimo solum in voce differre, quando unam vocat latriam, alteram dulia, respectu Christi & imaginis ejus: nam, ut in superioribus tetigi, omnis adoratio, quæ non est perfecta & suprema latria, vocatur ab aliquibus dulia, vel interdum hyperdulia: unde respectu alicujus sancti & imaginis ejus non potuerunt illa verba accommodari, sed necesse erit dicere exemplar adorari superiori dulia, imaginem vero inferiori, seu illud absoluta dulia, hanc vero respectu.

Suarez Tom. XVI.

Alia tantum. Atque in hanc etiam sententiam coincidit opinio Catherini opusc. de ador. imag. concl. 6. & 7. & Martini de Ayala de Tradition. p. 3. c. de cultu imag. citari etiam solet pro hac sententia Henricus quodl. 10. q. 6. sed, ut supra dixi, æquivoco loquitur. Et nonnulli etiam ex Thomistis hanc opinionem in re secuti sunt, quamvis in modo loquendi propter D. Thom. dicant, imaginem & prototypum una adoratione coli: intelligunt autem de una adoratione non quoad actum internum vel externum, sed quoad habitum, quia unica & eadem virtus, quæ inclinatur ad adorandum prototypum propter se, inclinatur ad adorandam imaginem propter ipsum: sicut possunt dici Deus & proximus una charitate diligi. Qui modus dicendi in se est probabilis, tamen non satisfacit intentioni D. Thomæ: nam plane loquitur de actu, ut patet ex articulo, & ex fundamento, quo utitur, quod infra videbimus.

Hæc opinio fundatur primo auctoritate, nam in VII. Synodo sæpe dicitur, imaginem Christi non adorari latria, sicut adoratur ipse Christus, sed quadam minori veneraria, seu honoraria adoratione. Ita habetur in act. 2. post epist. Adriani, & act. 3. in abjuracione Basilii Ancyran, quam Concilium approbat, & sæpe in act. 4. & 6. & tandem in 7. in definitione fidei: & in epistolis Tarasii & totius Concilii, in quibus locis necesse est esse sermonem de imagine ut imago est, quia ut res quædam materialis est, nec latria, neque alia minori adoratione digna est, & tamen ibi plane distinguitur adoratio imaginis ab adoratione exemplaris, & inferior esse dicitur. Unde multi putant, si D. Thomas hanc definitionem Concilii legisset, aliter de imaginum adoratione locutum fuisse. Quod autem illam non viderit, magnum argumentum est, quod in tanta hac materia nullam illius Concilii mentionem fecerit: & causa esse potuit, quia fortasse eo tempore nondum erat in Latinum translatus.

Secundo fundatur ratione, quia imago, quantumvis ut imago consideretur, est res distincta ab exemplari, & non est tantæ excellentiæ, quantæ illud: imago enim Christi non est Christus, neque Deus. Responderi potest ex Cajetano, imaginem ut imaginem esse Christum ipsum quoad rationem formalem & materialem terminandi adorationem: nam adoratio terminatur ad Christum in imagine. Sed contra objicitur ex Durando supra, nam quantumvis reduplicetur, *imago, ut imago*, semper est res a Christo distincta, & inferior illo, imo & inanimata: ergo nunquam potest adorari ut Christus: & consequenter neque eadem adoratione qua Christus. Secundo, hæc propositio est absolute falsa, imago Christi est Christus, sicut est simpliciter falsum, quod homo pictus sit homo: ergo etiam est falsum, imaginem Christi adorari posse eodem cultu, quo Christum. Nec refert, quod quidam ajunt, imaginem esse Christum in esse repræsentativo, quia hoc est dicere secundum quid tantum esse Christum, nam illud esse repræsentativum diminutum est, præsertim si ad verum esse Christi comparetur: ergo si imago secundum illud esse diminutum aliquo modo adorabilis est, non potest illa adoratio esse æqualis, cum debeat esse proportionata rei, quæ adoratur. Quod etiam confirmat ratio supra tacta, quia adoratio, quæ debetur imagini, ut imago est, est respectiva tantum: adoratio autem exemplaris est absoluta: non ergo est una simpliciter, sed tantum habitudine quadam.

Neque etiam satisfacit, quod dici solet, cum adoratur imago, adorari Christum, seu exemplar in ipsa: & ideo eadem adoratione coli. Contra hoc enim objicit superius Picus Mirandul. nam, cum adoratur Christus in imagine, vel solus Christus est totum objectum talis adorationis: & sic verum est, illam adorationem esse eandem cum illa, qua adorari potest Christus absque imagine, per illam tamen non adoratur imago, quia solum adoratur adorationis objectum. Vel objectum talis adorationis est totum hoc, Christus & imago ejus: & sic sequitur, imaginem esse partem illius objecti: & consequenter sequitur, rem creatam, saltem partialiter esse objectum adorationis latriæ, quod dicere (ait Mirandulanus) videtur male catholicum.

Altera sententia est, imaginem adorari posse & debere eadem adoratione cum exemplari. Hæc est sententia D. Thomæ hic, quam Cajetanus sequitur & alii Thomistæ hic in 3. dist. 9. ubi Paludanus q. 1. a. 3. & Capreolus q. unica.

Tertia sententia.



unica. Ferrar. 3. contra Gentes c. 120. ad finem, qui dicitur declaratur, imaginem esse partem objecti, circa quod talis adoratio versatur. Idem omnino docet Antonin. 3. p. tit. 12. c. 9. §. 4. Soto 1.2. de iust. q. 4. a. 2. in fine. Alii etiam antiqui Theologi fere omnes sunt in hac sententia in 3. dist. 9. Albertus a. 4. ubi ait, adorare imaginem ut sic, esse per intellectum, & intentionem adorationis duci in eum, cuius est imago. Idem fere Richardus a. 2. q. 2. D. Bonaventura a. 1. q. 2. & 3. ubi inter alia ait: *Qui adorat Christi imaginem, Christum adoratur, non imaginem.* Item Major ibi q. 1. Almainus q. 1. concl. 5. Marfilius in 3. q. 8. a. 2. dub. 1. Aletius 3. p. q. 30. memb. 3. a. 3. §. 1. Idem tenet Waldensis tom. 3. de sacra. c. 119. & c. 156. n. 6. & 7. Turrian. lib. 1. pro canon. Apost. c. 25. & adducit Nicephorum Patriarcham Constant. Sanderus l. 2. de imag. c. ult. Albert. Pighius l. 8. cont. Erasim. non longe a principio, & Turrecrem. in c. Venerab. de Conf. d. 3. Atque hæc sententia probabilior est, magisq; consentanea usui Ecclesie.

Conclus.

Dicendum est ergo, fieri recte posse, ut prototypum in imagine, & imago propter prototypum, uno actu interiori, & exteriori, adoretur. Hac conclusione existimo recte explicari mentem D. Th. quam Capreolus assecutus est loco citato, quem secutus videtur Ferrar. supra; neque alius fortasse fuit secutus Cajet. licet obscurius illum explicaverit, & sano modo intelligendus sit, cum dicit, adorationem hanc formaliter, & materialiter ad exemplar, & non ad imaginem terminari; est enim hoc verum de primario & per se termino qui adoratur, non tamen excludendus est secundarius, qui veluti per accidens & concomitanter adoratur. Prius autem quam conclusionem probemus, explicemus amplius hunc adorationis modum; imago enim quamvis in se revera non contineat prototypum secundum proprium esse reale illius, continet tamen in esse, quod vocant, repræsentativo: unde fit, ut homo, qui ex sensibilibus objectis movetur, proposita huiusmodi imagine, statim ac veluti conjunctim cum imagine ipsum exemplar apprehendat, ac si revera in illa adesset, & per modum utrumque simul concipiat: ea igitur posita apprehensione animus adorantis uno adorationis motu primario in exemplar, concomitanter vero in imaginem fertur, quam deosculando Christum ipsum adoratur: non per deceptionem, quia non iudicat imaginem esse Christum, sed per simplicem ac vivam repræsentationem exemplaris in imagine, ac si adesset. Hic autem adorationis modus probatur, primo ex VII. Synod. act. 4. ubi ex Basilio contra Sabellium, & Athanasio ser. 4. cont. Arian. in hunc modum dicitur: *Qui adoratur imaginem, in ea ipsum Regem adoratur.* Ex quo dicto Joannes legatus Orientis, approbantibus aliis Patribus, colligit in hæc verba. *Unde B. Pater indicavit, non esse duas adorationes, sed unam imaginis, & primi exemplaris; & infra: Christiani imagines Christi, & Martyrum tenentes, & osculantes, animo videmur nobis Christum ipsum aut Martyres amplecti.* Similia habentur act. 6. tom. 4. act. 7. circa finem. Nec aliud videtur sentire & Con. Trid. Sess. 25. dicens: *Per imagines, quas osculamur, & coram quibus procumbimus, Christum adoramus, & Sanctos veneramur;* Ubi verbum; *Adoramus*, latrariam, verbum autem, *veneramur*, dulciam significare videtur: & utraque adoratio dicitur fieri, *per imaginem*, sicut adoratur princeps per vestem, aut calceum, quando hæc osculando personam adoramus.

Secundo ex Patribus, Basil. 1. de Spiritu S. c. 18. *Rex*, inquit, *dicitur Regis imago, & non duo Reges, neque imperium scinditur, neque gloria dividitur, quia sicut potestas est una, ita & glorificatio est una.* Origenes hom. 1. in Genesim. *Qui videt imaginem alicujus, videt eum, cuius imago est.* Damasc. l. 4. de Fide c. 12. *Adoramus crucem, non quod materiam colamus, sed figuram, ut qua Christus designetur; & infra: Quocirca nobis faciendum est, ut crucis signum adoremus, ubi enim signum fuerit, illic quoque & ipse erit.* Tandem Nicephor. Constantinop. in dial. Orthodoxus, qui est de imaginibus, introducit hæreticum interrogantem, ubi sit scriptum de adoranda imagine Christi. Et respondet; *Ubi scriptum est adorandum esse Christum, siquidem inseparabilis est a prototypo effigies ejus, cum sint unum, non natura, sed habitudine; & infra dicit, imaginem habere cum prototypo communione nominis, honoris & adorationis, non æqualiter, sed respectu.* Citat denique Athanas. dicentem: *Qui ima-*

*ginem aspicit, in ea Regem aspicit.* Tercio ratione, quia hic modus adorationis possibilis est (ut satis explicatum, & probatum videtur), & est rationi consentaneus, nihilque habet inordinatum, quia intentio, voluntas, & estimatio, quæ adorationem discernit, rectissima est, quia per se primo tendit in Christum, in imaginem vero concomitanter, & propter ipsum; ergo hæc adoratio honesta est, & rectæ rationi consentanea. Et confirmatur, quia supra ostensum est, quamvis creatura non possit per se primo adorari latrariam, posse tamen coadorari, sicut humanitas Christi coadoratur Verbo, & purpura Regis coadoratur honore regio.

Dices, hoc habere locum in iis, quæ aliquo modo unum constituunt cum persona adorata, imago autem non facit unam cum exemplari. Sed hoc nihil obstat, quia imago, & exemplar sunt unum habitudine, & apprehensione; exemplar enim in imagine repræsentatum, adoratur quidem in suo vero esse, quasi denominato tamen, & vestito imagine, & ita per modum unius objecti, & ipsum per imaginem, & imago cum ipso, uno motu adorantur. Sed urget Gabr. quia licet exterius unus motus appareat, interius tamen revera sunt duo, quia alia est estimatio Christi, alia imaginis; ille enim, ut Deus, hæc, ut imago Dei adoratur; unde in voluntate etiam erunt actus diversi, aut si fortasse aliter unus est, ratione tamen formali distinguuntur. Respondetur, quod ad intellectum attinet, quamvis possit interdum exemplar, & imaginem distinctis conceptibus, & per modum plurium rerum concipere, tamen etiam potest per modum unius objecti apprehendere prototypum, v. g. Christum in imagine: & hic modus concipiendi intervenit in hoc adorationis modo, qui non solum doctis, sed etiam indoctis fidelibus communis, & vulgaris esse videtur. Unde fit etiam, ut sicut unico corporis motu, ita etiam unico voluntatis actu homo feratur ad colendum illud objectum: neque oportet in tali actu rationes formales distinguere, quia ratio formalis objecti ejus una est, licet in materiali objecto sit aliqua diversitas, sicut in adoratione Christi, & humanitatis, Regis, & purpuræ, sæpe explicatum est.

Ex hac conclusione, ut res distinctius explicetur, infero primo, in hoc genere adorationis & per hunc actum directe ac primario adorari Christum seu personam in imagine repræsentatam ob propriam excellentiam, quam in se habet. Ita declarant hanc adorationem prædicti auctores & manifeste sumitur ex citatis Patribus, statim referendis, & aperte vincitur fundamento prioris sententiæ, quia hæc adoratio est perfecta latraria, v. g. ergo necesse est, ut ad personam dignam tali adoratione directe terminetur, quia talis adoratio incommunicabilis est alteri. Item per hanc adorationem non solum proficitur homo id, quod adoratur, repræsentare Deum, sed etiam esse Deum, & redemptorem vel supremum dominum suum, alias non esset vera & suprema latraria; hæc autem professio, seu significatio, vera non esset, nisi talis adoratio ad personam repræsentatam, directe ac primario tenderet: & hoc declarat Ecclesia, quando adorando crucem ita ad illam loquitur, sicut ad Christum.

*O Crux ave spes unica  
Hoc passionis tempore  
Auge piis iustitiam,  
Reisque dona veniam.*

Præterea hoc declarat fundamentum, quo D. Th. hic utitur ex illo axioma Aristotelis lib. de memor. & reminif. *Idem est motus in imaginem, & in id, cuius est imago.* Unde infert, motum adorationis imaginis, ut imago est, in exemplar terminari, quod Patres ajunt, honorem imaginis ad prototypum tendere: si ergo hic motus, seu honor, sit perfectus in illo ordine, necesse est, ut ad exemplar terminetur tanquam ad rem per se primo ac principaliter adoratam.

Secundo infero, per hanc adorationem adorari etiam imaginem, non solum actu externo, qui ad adorationem non sufficit, sed etiam interiori motu & intentione adorantis, atque non ita abusive tantum, sed vere ac proprie. Hæc est in primis mens D. Th. aliàs non satis explicuisset aliquam veram adorationem imaginis, quia non declarat alium modum adorandi illam: & hoc declaravit Paludanus, dicens, vere adorari imaginem, & in se, licet non propter se, sed propter exemplar, & eodem actu, quo

exem-

Imago in se continet prototypum in esse re-præsentativo.

Objectio.

Responsio.

Objectio.

Responsio.

1. Illatio.

2. Illatio.



exemplar: & in hoc æquiparat adorationem imaginis adorationi specierum altaris, & reliquiarum: & hoc declaravit Capreolus dicens, Christum & imaginem esse unum totale objectum talis adorationis, quod etiam dixit Ferrar. Hoc etiam probant testimonia Conciliorum adducta, adjunctis his, quæ sect. præc. diximus: nam simpliciter docent, imagines esse adorandas, quod de vera & propria adoratione intelligendum esse ostendimus: & rursus declarant, adorationem imaginum potissimum fieri adorando exemplaria in imaginibus, seu per imagines exemplaria: ergo sentiunt, talem adorationem non ad exemplaria nuda (ut ita dicam) vestita imaginibus: & consequenter ad imagines ut conjunctas exemplariis terminari. Ad quod confirmandum ponderari possunt verba definitionis VII. Synodi act. 7. *Qui adorat imaginem, in ea quoque adorat descriptum argumentum*: vim enim quandam & energiam habet illa conjunctio & particula *quoque*, qua denotatur, non solum adorari unum in alio, quasi in præsentia alterius, sed etiam unum cum alio, ita ut utrumque vere adoretur. Quapropter ad intelligendos auctores cavenda est æquivocatio terminorum: interdum enim dicunt, hac adoratione imaginem per se, seu in se adorari, ut declarent, non esse abusivam tantum, sed veram & propriam; interdum vero dicunt, illam adorari concomitanter, ut declarent, non esse ipsam objectum, quod per se primo adoratur, sed coadorari tantum primario objecto: & in eodem sensu dicunt interdum, adorari per accidens, ut patet ex Capreol. supra: & fortasse eodem sensu locutus est Henricus quodl. 10. q. 6. nam apud Philosophos per accidens moveri seu denominari dicuntur, quæ concomitanter, vel tanquam partes, vel tanquam accidentia moventur, licet in se vere afficiantur motu, quod maxime est in usu, quando unum alteri accidentaliter conjungitur, ut in superioribus tactum est. Ad tollendam ergo vocis æquivocationem dicimus, imaginem vere ac proprie adorari seu coadorari suo exemplari, & hoc modo una adoratione cum ipso colli. Tertio infero, totam rationem hujus adorationis esse excellentiam prototypi, quæ & ipsum, & imaginem ejus adoratione dignam reddit: exemplar videlicet per se, & propter se; imaginem vero propter exemplar. Hæc etiam est certa veritas, quam illis verbis declaravit Concilium Trident. sess. 25. dicens: *Imaginibus debitum honorem, & venerationem impertientiam, non quod credatur inesse aliqua in iis divinitas, propter quam sint colende, sed quoniam honores, qui eis exhibentur, referuntur ad prototypa, quæ representant*. Et hoc etiam convincunt fundamenta eorum, qui negant imagines proprie adorari: nam saltem probant, non adorari propter excellentiam, quæ in ipsis sit: & hoc sensu ostendimus supra, omnem adorationem imaginum esse respectivam.

3. Illatio.

4. Illatio.

Quarto inferitur, hanc adorationem imaginis Christi, v. g. proprie esse latrariam ex habitudine ad objectum primum, seu personam, quæ per se primo adoratur, nam ex habitudine ad illam, & ad excellentiam ejus prout in ipsa est, habet, quod sit perfecta & summa adoratio: quam vox *latraria* supposito usu in rigore significat. Quia tamen ille actus, qui unus est, & indivisibilis, terminatur simul ad imaginem cum prototypo, ideo vere dicitur talis imago vere adorari adoratione latrariæ, sicut humanitas Christi vere dicitur adorari latraria, qua adoratur Christus, quamvis illa adoratio non habeat, quod sit latraria ex humanitate, sed ex persona ipsius Christi, quod statim magis declarabitur in solut. argum.

Satis sit  
fundamē-  
tis in con-  
trarium.

Ad primum ergo fundamentum contrariæ sententiæ ex auctoritate VII. Synodi uno verbo responderi posset, in illis locis non loqui Concilium de hac adoratione, qua imagines coadorantur cum prototypo, ut imagines sunt, sed quia ipsæ solæ adorantur, ut res quædam sacræ sunt: illa enim adoratio inferior est, ut sequenti sectione constabit. Ne tamen cogamur illam sententiam & expositionem postea tractandam accommodare omnibus locis illius Concilii, possumus secundo respondere ex paulo antea dictis, quamvis imago adoretur eodem actu latrariæ, quo adoratur prototypon, tamen illum eundem actum esse latrariam perfectam prout terminatur ad prototypon, prout vero terminatur ad imaginem non esse perfectam latrariam, sed habere vim & rationem inferioris adorationis. Non quod hæc duæ rationes in illo actu secundum rem, seu ex natura rei distinguantur, sed tantum habi-

Suares. Tom. XVI.

tudine & præcissione mentis: sæpe enim contingit, eandem indivisibilem actionem respicere diversos terminos, & præcise conceptam per habitudinem ad unum vel alterum habere diversam rationem seu denominationem: sic eadem actio, prout est a Deo, est concursus primæ causæ, prout vero est a causa secunda, est efficientia ejus: sic etiam, licet beatus eadem indivisibili visione videat Deum, & creaturas in Deo, nihilominus illa visio est beatitudo prout terminatur ad Deum, non vero prout terminatur ad creaturas; & similiter, juxta probabilem opinionem, quod possunt Deus & proximus diligere eodem indivisibili actu, talis actus, prout terminatur ad Deum, est amor super omnia, non vero prout terminatur ad proximum. Sic ergo, quamvis idem motus adorationis tendat ad prototypon in imagine, & ad imaginem propter prototypon, nihilominus ille actus respectu prototypi est proprie latraria, quia illud respicit ut objectum summe excellens & per se adorabile, respectu vero imaginis non erit tam perfecta adoratio, sed inferior veneratio, quia illo eodem actu non adoratur ut summum objectum, sed ut aliquid ad illud pertinens, coadoratur illi. Quæ responsio magis in sequente sectione declarabitur. Ex illa vero intelligitur, in re nullam esse diversitatem inter sententiam Concilii, & D. Thomæ: nam D. Thomas solum consideravit unitatem motus seu actionis, & ideo dixit, eandem adoratione latrariæ, qua colitur Christus, adorari imaginem ejus, quod verum est, quia est unus indivisibilis actus: hanc autem unitatem adorationis non prætermisit Concilium, ut vidimus: quia tamen illam et unica actione aliter adoratur exemplar, & aliter imago, illud per se primo & propter se, hæc concomitanter & propter aliud, ideo adorationem illam sub nomine latrariæ simpliciter dictæ retulit ad solum exemplar, respectu vero imaginis dicit esse inferiorem adorationem.

Objectio.

Dices. Ergo, saltem quoad modum loquendi non est simpliciter asserendum, imaginem Christi esse adorandam latraria: tum quia Concilium non ita loquitur, sed potius id negat; tum etiam quia illa adoratio, prout terminatur ad imaginem, non est latraria: tum denique quia Sancti frequenter cum exclusione dicunt, solum Deum adorari latraria. Respondetur, cum res jam constet, in usu vocum prudentia opus esse, ne possit sermo, aut audientes in errorem inducere, aut scandalum aliquod gignere; & ideo attendenda est consuetudo & apprehensio, seu existimatio eorum, coram quibus est sermo: nam in diversis sensibus utrumque potest affirmari, vel negari, & utrumque loquendi modus habet fundamentum in Conciliis & usu Ecclesiæ. Et ideo inter sapientes recte loqui possumus, ut D. Th. loquitur, imaginem Christi adorari latraria, quia in re ipsa unicus est actus latrariæ, quo ipsa cum exemplari colitur: & quia in hoc modo loquendi non significatur, adorationem illam habere perfectionem latrariæ ex respectu ad imaginem, aut in imagine sistere, quatenus vere latraria est, quod solum negavit Concilium, sed significatur, adorationem latrariæ completi adorationem imaginis, quod verum est; sicut absolute verum est, Beatos videre creaturas visione beatifica, in quo non significatur, illam visionem esse beatificam ex habitudine ad creaturas, sed solum visionem ipsam beatificam ad creaturas extendi. Unde, cum exclusive dicitur solus Deus adorari latraria, tantum excluditur alia persona, ad quam possit per se primo illa adoratio terminari, non vero excluduntur concomitantia; sicut cum solus Rex dicitur adorari honore regio, non excluduntur purpura & alia, quæ coadorari solent: sic ergo in præsentī non excluditur imago, quæ cum suo exemplari coadoratur: nam revera usitatissimus modus illam adorandi hujusmodi est, qui, quamvis a Theologis subtiliter explicetur, a rudi tamen & indocta plebe facilius exercetur. At vero pro concione ad plebem oportet cautissime & disertissime loqui, ut omnis erroris & idololatriæ occasio vitetur: & ideo satis erit docere populum, imagines non propter se, sed propter personas, quas representant, in honore haberi, & in ipsis imaginibus personas ipsas adorari absque subtiliori discussione.

Propter hæc verba, & hanc responsionem, attribuit mihi quidam modernus auctor, quod scriperim, non esse predicandum populo, imaginem Christi esse adorandam latraria; & quod asseruerim D. Th. non fuisse id concessurum, si VII. Synodum legisset. Sed neutrum

Hic se se  
auctor ab  
objectio-  
ne vendi-  
cat.



horum ex hæcenus dictis colligi potest. Ecquidē de D. Th. ego valde probabile existimo, ipsum nō vidisse VII. Synodum, cum ejus mentionem non fecerit. Quod si vidisset, non mutasset quidem sententiam, nec fortasse loquendi modum, cum simpliciter verus sit, exposuisset tamen VII. Synodum, suamque sententiam cum modo loquendi illius conciliaffer. Quod vero ad concionandum coram plebe pertinet, non negamus, veritatem hanc prædicandam esse populo quantum ad ædificationem ejus pertinere potest, sed tamen quia materia est lubrica & obscura, & in ea non solum sunt variae Theologorum sententiæ, sed errores etiam misceri possunt, ideo dicimus coram plebe caute & discrete esse loquendum, & potius esse rem ipsam explicandam sub communibus terminis, qui a plebe concipi possint, quam sub terminis scholasticis, qui vix intelligi valeant.

Ad aliud fundamentum ex ratione sumptum, jam responsum est, illo argumento recte concludi, imaginem per se solum non posse adorari illo cultu, qui exemplari secundum se debetur, non tamen probari, non posse coadorari simpli cum exemplari illo eodem cultu, quo adoratur exemplar. Et quoad hoc nihil refert, quod imago sit res distincta & inferior prototypo, aut quod esse representativum secundum se sit inferioris rationis, quam verum esse representativum: nam ob hanc causam ipsa imago inferiori quodam modo participat illam adorationem, seu ab illa attingitur: nam, licet adoratio una sit, non est necesse, ut æqualiter cadat in omnia, quæ per illa coadorantur; sicut eadem adoratione, qua sanctus homo colitur, adorantur corpus & anima, non tamen æque, sed magis anima quam corpus: sic ergo imago adoratur quidem una adoratione cum prototypo, non tamen æque ac prototypo. Atque hoc ipsum & nihil aliud probat confirmatio ibidem adjuncta, quod adoratio imaginis respectiva est, quod verum esse censeo, etiam de illa adoratione, qua simul cum exemplari imago adoratur, quia imago nullo modo est adorabilis propter se, sed solum propter extrinsecam excellentiam. Neque inde necessario fit, adorationem imaginis esse distinctam ab illa, qua directe adoratur exemplar, quia non repugnat eandem adorationem esse respectivam, & absolutam respectu diversorum: non enim dicitur formaliter absoluta & respectiva propter habitudinem ad aliquem terminum, sic enim omnis adoratio potest dici respectiva, quia respicit objectum adoratum & excellentiam, propter quam adoratur: sed ex parte objecti adorati, quod potest esse vel absolute & in se excellens, vel solum respiciens excellentiam, quæ est in alio: dicitur absoluta adoratio, prout respicit objectum prioris rationis, respectiva vero, ut cadit in objectum, quod solum adoratur propter extrinsecam excellentiam: fieri autem potest, ut totum aliquod objectum adoretur ratione unius excellentiæ, quæ non æque inest omnibus partibus talis objecti, sed in una sit per se, in aliis tantum habitudine quadam; & talis adoratio respectu unius quasi partialis objecti dicetur absoluta, & respectu alterius respectiva.

Unde ad ultimam objectionem, quæ directe procedit contra superiorem doctrinam, respondetur, non solum Christum esse objectum talis adorationis, sed etiam imaginem sub illo objecto comprehendi. Cum autem ex hoc inferitur, aliquam creaturam esse saltem partiale objectum adorationis latriæ, respondetur distinguendo consequens: aut enim intelligitur de objecto per se primo adorato, aut de objecto coadorato: de priori negatur sequela, ut ex dictis facile patet, de posteriori autem conceditur, quia, ut supra diximus, illa dictio exclusiva non excludit concomitantia. Neque est contra divinam reverentiam, imo est maxime consentaneum illi, ut cum ipso Deo adorentur quæ illi conjuncta sunt per habitudinem ad ipsum: quomodo, servata proportionem, in superioribus dicebamus, humanitatem Christi adorari latria, quia conjuncta est Verbo, quod dignum est tali adoratione; quamquam humanitas, si præcise consideretur, non æque participet illam adorationem, ac ipsa persona vel divinitas Verbi, quia semper manet creatura; sic ergo non repugnat creaturam adorari seu coadorari latria.

Sed objicis, ergo eadem ratione poterit sacrificium imagini Christi offerri, saltem concomitanter seu simul cum Christo, quod est plane falsum: sequela patet, quia, si non posset imagini sacrificium offerri, maxime quia

continet cultum latriæ: at hoc nullum est inconveniens, quia dictum est, posse imaginem coadorari latria. Atque idem argumentum fieri potest de cultu orationis, & similibus. Respondetur, negando sequelam, nam, ut sumi potest ex doctrina Scoti in 3. dist. 9. §. ult. sunt quidam actus, qui præcise respiciunt personam intelligentem, ut talis est, per quos solum coluntur personæ ad quas diriguntur, non autem imagines, nec vestes, nec similia. Hinc Trident. Concilium sess. 25. cum dixisset, imagines esse adorandas, adjunxit non quod ab eis sit aliquid petendum, vel quod fiducia in imaginibus sit figenda, nam petitio & fiducia sunt ex illis actibus, qui præcise respiciunt personam intelligentem. Unde, si aliquando videtur ad imaginem fundi oratio, ut in illis verbis Ecclesiæ. *O Crux spes unica, auge piis justitiam, &c.* figuratus est sermo, nam oratio fit ad Crucifixum; qui nomine crucis invocatur, methonymice nominando continens pro contento: quo etiam fit, ut simul aliquis honor ipsi cruci tribuatur, nam licet oratio, ut est petitio, proprie & vere non fiat, nisi ad exemplar, tamen ut est honor quidam potest talibus verbis vel signis fieri coram aliqua imagine, ut simul intelligatur imago honorari, cultus enim vel adoratio latius patet, & extenditur ad omnem rem, cui homo venerationem aliquam exhibet. Quod declaratur exemplo, nam cum aliquis accedens ad Pontificem, genua flectens, & pedem deosculans petit aliquid, petitio ad solum personam dirigitur, adoratio vero etiam ad vestem & calceum Pontificis terminatur. Atque eodem modo loquendum est de sacrificio, refertur enim ad divinam personam in recognitionem supremi dominii, & ideo sacrificium ut sic non potest cum imaginibus communicari, ut contra quosdam antiquos hæreticos docuerunt Iren. lib. 1. c. 24. Epiph. hæ. 27. 29. & 79. August. hæ. 7. Non repugnat autem, ut actiones & cæremoniæ, quæ inter sacrificandum fiunt, in honorem imaginum redundent: ad eum modum, quo in VII. Synodo act. 7. dicitur, merito nos oblationibus suffutium & luminarium ad imagines reverenter accedere.

## S E C T I O V.

*Utrum imago adorari possit, non adorato directe exemplari.*

SUPponimus id, quod est inter Catholicos certum & extra controversiam imagines non posse adorari, nisi propter excellentiam exemplaris, nam in eis nihil est, propter quod ipsæ sint adoratione dignæ; & hoc significavit Concilium Trid. cum, agens de adorandis imaginibus, dixit: *Non quod credatur inesse aliqua in iis divinitas, vel virtus, propter quam sint colenda.* Quia vero duobus modis intelligi potest exemplar esse rationem adorandi imaginem: uno modo tanquam rem per se primo adoratam illam et adorationem, qua adoratur imago, seu (ut dici solet) tanquam primum objectum quod, quem modum adorationis hæcenus tractavimus: alio modo tantum ut rationem adorandi seu ut objectum quo, & non ut rem formaliter ac directe adoratam, ideo nunc inquirimus, an hic modus adorationis, qui excogitari potest, possit etiam licite & honeste exerceri.

Prima sententia est, hunc adorationis modum esse superfluum & illicitum. Quam sub his terminis non invenio apud antiquos Theologos, necesse tamen est, ut ita opinentur omnes illi, qui negant, imagines proprie adorari, etiam cum prototypo, sed tantum abusive, vel improprie, seu rememorative: nam, cum inficiuntur, adorationem posse terminari ad imaginem in se ipsam, afferantque solum dici adorari, quia coram illa, vel circa illam adoratur exemplar, ut unicum objectum quod adoratur, consequens est, ut, cessante hac directa adoratione exemplaris, nulla possit manere imaginis adoratio, cum jam nec vera esse possit, neque abusiva. Hac ergo ratione tribui potest hæc opinio Holkoth, Durando, & Piço Mirandul. Simili modo Platina, & alii, qui fingunt, solam externam actionem adorationis versari circa imaginem, non vero intentionem cultus & adorationis, necesse est doceant, non existente tali intentione adorationis circa exemplar, non posse adorationem circa imaginem exerceri, saltem honeste & rationabili modo. Nam, si fingamus, aliquem deosculari imaginem absque ulla prorsus intentione cultus, tam exemplaris, quam

Prima  
sententia.

Ultima  
objectionis  
solutio.

Sacrificiū  
imagini  
offerri  
non po-  
test, &  
quare.



imaginis, tantum ex simplici affectu osculandi vel genuflectendi, vix potest talis actio humana censeretur, aut, si humana sit, erit vana, & otiosa, nisi sit etiam ficta & fallax: si vero id fiat ex intentione cultus circa imaginem, repugnat juxta hanc sententiam rectæ rationi, & ita censetur superstitiosa adoratio. Atque hoc modo defendunt mordicus hanc sententiam quidam moderni Theologi, tanta verborum exaggeratione, ut non solum superstitiosum, sed etiam stultum appellent talem adorationis modum, in quo rationalis creatura se subijcit creaturæ irrationali, illiusque servam se exhibet. Ex aliis vero doctoribus, qui imaginem dicunt adorari cum prototypo, ita tamen ut ipsa etiam proprie adoretur, illi videntur huic sententiæ favere, qui nullum alium modum adorandi imaginem declarant, nisi per eandem adorationem cum prototypo. Et hoc modo videntur favere huic opinioni D. Thomas & fere omnes Thomistæ, maxime Capreolus in 3. d. q. in solut. ad 3. cont. 2. concl. & idem sentit D. Bonaventura ibi, nam cum in rebus aliis sacris talem modum cultus admittere videatur, de imaginibus id negat. A lensis vero, Richardus, & alii eodem modo favent, quo D. Thomas, quorum auctoritas, licet in hac parte, negativa tantum videatur, scilicet, quia talis actionis mentionem non fecerunt, tamen si rationes eorum spectentur, videntur non solum tacere, sed etiam excludere & negare hunc adorationis modum. Atque idem argumentandi modus sumi potest ex Conciliis & Patribus.

Rationes  
pro sen-  
tentia  
proposi-  
ta.

Probatur ergo primo hæc sententia, nam Concilia cum docent, vel definiunt, imagines esse adorandas, totam rationem & modum hujus adorationis in eo ponunt, quod exemplaria in eis adorantur, seu quod earum adoratio transit ad exemplaria: ergo absque hac transiitione (ut sic dicam) nulla est recta imaginis adoratio: fit autem transitus ad exemplar, quando in illud dirigitur adoratio tanquam in objectum primario adoratum: tunc enim vere dicitur in imagine adorari. Antecedens patet ex Concilio Trid. sess. 25. ubi, cum dixisset, imagines esse adorandas, non propter aliquod numen, quod in se habeant, subdit: *Sed quoniam honores, qui eis exhibentur, referuntur ad prototypa, quæ illæ representant*: & declarans amplius hanc relationem subiungit: *Ita ut per imagines, quas osculamur, & coram quibus procumbimus, Christum adoremus, & Sanctos, quorum illæ similitudinem gerunt*. Quæ definitio, cum sit doctrinalis, habet vim universalis propositionis, id est, omnem honestam adorationem imaginis esse hujusmodi, & consequenter excluditur omnis alia adoratio, per quam exemplar dicto modo non adoretur. Et (quod amplius est) statim hoc modo declarat superiorum Conciliorum definitiones, dicens: *Id, quod Conciliorum, præsertim vero II. Nicenæ Synodi, decretis, contra imaginum oppugnatores est sancitum*. Quocirca in eodem sensu accipienda est definitio VII. Synodi act. 7. in definit. fidei: ubi cum dixisset, venerandas imagines retinendas esse, subdit Concilium: *Quo scilicet per hanc imaginum picturam inspectionem omnes, qui contemplantur, ad prototyporum memoriam & recordationem, & desiderium veniant, illisque (id est imaginibus) salutatione & honorariam adorationem exhibeant, non, secundum fidem nostram, veram latriam*; & infra, hunc honorem declarans, subdit: *Imaginis enim honor in prototypum resultat, & qui adorat imaginem, in ea adorat quoque descriptum argumentum*. Ubi ponderanda est illa conjunctio, seu particula, quoque, nam, sicut ex illa superius colligebamus, quando adoratur prototypum, co-adorari imaginem, ita hic recte colligi potest, quoties adoratur imago, in ea adorari descriptum argumentum, id est, exemplar. Huc etiam accedit doctrina Concilii Senonensis in decretis fidei c. 14. quæ sic habet: *Neque, dum Catholicus quispiam Sanctam Christi veneratur imaginem, aliquid numen illi subesse putat, aut quasi Deum colit, sed ob recordationem filii Dei, ut in ejus amore calefcat, cujus imaginem videre desiderat*. Et nos quidem, non quasi ante divinitatem, ante imaginem prosternimur, sed illum adoramus, quem per imaginem, aut passum, aut in throno sedentem recordamur. Difficilius loquitur Concilium Moguntinum c. 41. dicens: *Pastores nostri populum accurate moneant, imagines non ad id proponi, ut adoremus aut colamus eas (scilicet per se solas & absque exemplaribus)*. Sed ut quod adorare aut colere, aut quare

Suarez Tom. XVI.

verum utiliter meminisse debemus, per imagines recordemur.

Secundo afferuntur pro hac sententia varia Patrum testimonia, quorum verba referre prolixum esset & inutile, tum quia potissima eorum in VII. Synodo referuntur, & ex parte allata sunt a nobis sect. præc. tum etiam, quia in re nil aliud continent, quam quod in verbis Concilii Trid. & in definitione VII. Synodi continetur, scilicet, quod in imaginibus exemplaria adoramus, non in tabulis & coloribus honorem constituentes, sed illorum predicantes gloriam, quos imagines referunt, ut ait Adrianus P. in epist. ad Constantinum & Irenem, relata in secundo actu VII. Synodi, ubi aliis testimoniis & rationibus hoc confirmat. Et in actu tertio similia habet Theodorus Patriarch. Jerosol. ubi adducit testimonium Basilii supra tractatum; & act. 4. est egregium testimonium Germani Patriarchæ Constant. Et hoc etiam confirmat, quod sæpe ab his Patribus dicitur imaginibus exhiberi honorem per recordationem & memoriam exemplarium, nimirum quia honor ipsorum non potest secerni, quando imagines coluntur, ut videre licet in citatis locis, & in verbis Epiphani, quæ act. 6. t. 2. habentur, & referuntur in c. Venerab. de cons. dist. 3. ubi in summa dicitur, licet in recordationem & memoriam prototyporum honorifice adorentur imagines, non tamen ob id illis latria exhibetur. Rursus est frequens alia locutio, quæ hoc magis declarare videtur, scilicet imaginum adorationem non contineri intra ipsas, sed ad eos transire, quos repræsentant. Sic loquitur Photius Patriarcha in libris de VII. Synodis circa VII. cujus illa sunt verba notanda; *Neque enim in illis (scilicet imaginibus) consistimus, honoremque & adorationem concludimus, neque ad alios diversos & varios fines distrahimur, sed per diversum & singularem ipsorum cultum & adorationem, quæ cernitur, sacra, convenientique, ac minime divisa ratione animos nostros ad invisibilem illam, singularemque unicam divinitatem dirigimus*. Et Basilus citatus sect. præc. ideo dicit, imaginis & Imperatoris unam esse adorationem, & non dividi imperium, quia imaginis honor ad exemplar transit. Quod etiam dixit Damascenus l. 4. de fide c. 17. & l. 4. c. 12. & orat. 1. & 3. de imaginibus: & hoc postremo loco citans Athanasium addit, exclusionem seu negationem alterius adorationis, dicens. *Quemadmodum Jacob cum esset e vita discessurus, fastigium virga Joseph adoravit, non virgam ipsam honoratus, sed eum, qui virgam tenebat, ita nos Christiani non alia ratione imagines colimus, nisi quemadmodum etiam cum filios nostros & patres osculamur, ut animi nostri desiderium indicemus*. Sic etiam Leontius Dialog. 5. cit. in VII. Synodo act. 4. *Manifestum est (inquit) quod Jacob lignum non adoravit, sed per lignum Joseph, quemadmodum nos per crucem Christum*: Eadem est sententia August. l. 3. de doctr. Christ. c. 9. ubi in universum loquens de signis sacris ait, veros Dei cultores non debere in eis sistere, sed ad signata transire. Et Gregorius lib. 7. epist. 53. & 109. simpliciter explicat hanc adorationem imaginis per recordationem, ita ut tota ad prototypum tendat: & hoc sensu l. 9. ep. 9. negat, adorandas esse imagines, scilicet nisi in eis Deus aut Sancti adorentur, & eodem modo loquitur Hieron. Dan. 3.

Tertio argumentor ratione, applicando illam, quæ D. Th. hic usus est: idem est motus in imaginem, & in id, cujus est imago, ex quo principio D. Th. hic colligit. Dupliciter potest considerari imago. Uno modo, ut res quædam, & ut sic, alius est motus in ipsam, quam in rem repræsentatam, sub hac tamen ratione non est imago digna aliqua adoratione, cum sit res inanimata: alio modo consideratur imago formaliter ut imago est, id est, ut refert in actu exercito ipsum exemplar. & sub hac tantum ratione adoratur: at vero sub hac consideratione non solum potest esse unus atque idem motus adorationis imaginis, & prototypi, sed etiam necesse est, ut sit unus: quia non potest imago considerari ut relata ad prototypum, quin adoratio, quæ in illam ut sic tendit, terminetur ad prototypum. Secundo imago est res inanimata: ergo non est adorabilis sola sine exemplari. Probatur consequentia, quia res inanimata non est capax honoris, neque adorationis per se sola sine consortio alicujus rei rationalis, tum quia honor referri debet ad rem intelligentem, alioqui vanus est; tum quia adoratio non potest rationabiliter tribui nisi superiori alicui, ut superior est: res autem irrationalis per se sola semper est inferior homine.



Dices; rem irrationalem solum non esse propter se adorabilem, nihilominus tamen adorari posse propter extrinsecam excellentiam. Sed contra hoc obstant duo. Primum est, quia vel illa extrinseca excellentia confert imagini aliquam dignitatem, qua faciat eam homine superiorem, vel non confert. Primum dici non potest absque stulto errore. Si autem dicatur secundum: ergo illa extrinseca excellentia nihil confert, ut imago per se solum digne possit ab homine adorari. Quomodo enim potest fieri, ut homo sese submittat & serviat rei inanimatæ propter extrinsecam excellentiam? Secundum est, quia, vel excellentia prototypi est tantum remota ratio adorandi imaginem, & sic oportebit, aliquam aliam propinquam rationem in ipsa imagine querere; vel est proxima ratio, & sic necesse est, ut per illum actum per se primo ac principaliter ipsum exemplar adoretur, quia non potest esse proxima ratio adorandi, nisi in quantum ipsum est, quod præcipue ac primario adoretur.

Atque hinc sumitur confirmatio supra tacta, quia, si rectam intentionem adorantis spectemus, illa revera non est adorandi imaginem, sed exercendi circa illam talem actionem externam, ut hoc modo per ipsam exemplar adoret: ergo seclusa adoratione exemplaris, nulla relinquitur honesta ratio adorandi imaginem, seu (quod idem est) serviendi rei inanimatæ.

Tertia ratio sit, quia adoratio est actus religionis: religio autem non potest exercere actus suos circa res mere irrationales, sed necesse est, ut ad aliquam rem rationalem omnem suum actum præcipue dirigat: ergo idem est de actu adorationis: ergo non potest illum exercere circa imaginem inanimatam, nisi principaliter eum dirigat in rationalem exemplar per imaginem representatum. Minor declaratur (cætera enim satis nota sunt) quia religio est pars potentialis iustitiæ, cum qua in eo convenit, quod ad alterum ordinatur, & suo modo ei debitum reddit; sicut ergo iustitia non ordinat actus suos, nec reddit debitum, nisi personæ rationis capaci, cui faciat æqualitatem, & contractum aliquem ineat, vel debitum solvat: hæc enim sunt munera iustitiæ, quæ circa rem irrationalem intelligi non possunt: ita etiam religio semper operatur circa alterum, qui sit rationalis persona: ergo hoc ipsum necesse est in imaginum adoratione servari, ita ut, qui decenter tractat imaginem, vel quovis modo eam veneratur, totum hoc faciat, ut rei in illa representatæ debitum cultum seu observantiam præstet: alioqui non exercet actum religionis vel dulciæ.

Quarta ratio sumi potest a contrario, nam qui irreverenter tractat imaginem, primo ac per se non peccat in imaginem, sed in personam representatam: ergo idem dicendum est de adoratione: nam oppositorum eadem ratio est. Totumque argumentum, tam antecedens, quam illatio, sumitur ex Adriano Papa in scripto imaginum cap. 8. & ex Athanasio citato in 4. act. VII. Synodi, & Damasceno dicta orat. 3. de imaginibus.

Secunda sententia. Secunda sententia est, licet verum sit, imagines non posse adorari nisi propter exemplar, nihilominus in se ac proprie adorari posse non adorato directe ut quod ipso exemplari. Hanc sententiam tenent in primis omnes auctores, qui negant, imagines posse adorari proprie eadem adoratione, qua adoratur exemplar; & alios docent, imagines adorari proprie aliquo cultu tam externo, quam interno, seu ex speciali intentione cultus illis accommodati. Ita opinantur Catherinus & Ayala, Gabriel etiam, quem Corduba sequitur, magis in hanc partem inclinat: censet enim probabile, adorationem imaginis posse fieri eodem actu interno, quo per se primo ac proprie adoratur prototypum, tamen etiam existimat probabile, vel probabilius, adorationem imaginis externam procedere ex diverso actu interno. Ex quo manifeste infertur (quamvis ipse aperte non declaret) posse unum actum internum separari ab alio, & adorationem imaginis exerceri ex illo actu interno, qui ad illam dirigitur, quamvis simul non exerceatur alia intentio directe, ac per se colendi prototypum: non enim habent per se necessariam dependentiam aut connexionem, ut magis infra constabit. Ex auctoribus vero, qui admittunt, posse imagines adorari cum prototypis, tenent nihilominus posse sine illis ad eundem cultum adorari, Sanderus l. 2. de imag. c. ult. & Albertus Pighius l. 8. cont. Erasmus, & Bellarm. l. 2. de imaginib. c. 21. & 25. ex antiquioribus vero scho-

lasticis nihil certum in hac re colligi potest, uno vel altero excepto: nam verba eorum æquivoca sunt, ut ex dicendis constabit, multum vero favent omnes, qui dicunt, imaginem esse verum objectum adorationis, quamvis partiale, ut Capreol. & Ferra. & Major, qui etiam admittit adorationem respectivam imaginis. Palud. etiam dicens, esse absurdum principium, nihil irrationale esse adorandum in se, destruit totum fundamentum contrariæ sententiæ. Atque hæc opinio vera est, & tam certa, quam est certum imagines non abusive tantum & improprie, sed vere ac proprie adorari. Et, quia de huius posterioris propositionis veritate, ac fundamento, satis a nobis dictum est in sect. 3. hic solum curabimus demonstrare huius illationis necessitatem: quam existimo adeo esse evidentem, ut qui sinistre senserit de sententia Durandi asserentis, imaginem tantum abusive adorari, aut de sententia aliorum (quæ in re eadem est) dicentium, circa imagines versari tantum actionem externam adorationis, non tamen ad eas dirigi ullo modo intentionem cultus, non possit negare aliquam adorationem imaginis esse possibilem, & licitam, quæ ipsum exemplar non comprehendat tanquam objectum per se primo adoratum. Duo igitur ex prædicto fundamento a nobis ostendenda sunt. Primum, hoc genus adorationis esse possibile. Secundum, esse licitum.

Primum probatur ex generali modo operandi nostræ voluntatis, & intellectus: nam potest quælibet ex his facultatibus tendere in aliquod materiale objectum propter aliud ut quo seu ut formale, etiam si actu non tendat in illam rem, quæ est formale objectum, tanquam in rem seu materiam, circa quam proprie versatur, quæ solet dici objectum quod: ergo etiam in præsentī intentio adorandi potest versari circa imaginem ut objectum quod, seu rem adoratam propter exemplar ut rationem adorandi, quamvis directe non intendat adorare ipsum exemplar, ut rem directe adoratam. Antecedens probatur primo exemplis, tum in intellectu, nam fidelis assentitur veritatibus fidei, nixus divino testimonio & veritati infallibili ejus ut rationi formali, quamvis eo actu, quo credit rem revelatam, non credat, vel Deum esse primam veritatem infallibilem, vel Deum hoc revelasse. Idem dicunt Dialectici de actu scientiæ, qui nititur præmissis ut rationi assentiendi, quamvis non feratur directe in ipsas præmissas tanquam in objectum scitum seu judicatum per illum actum; tum etiam in actibus voluntatis, ut in amore, quo amatur una res propter aliam ut propter rationem amandi extrinsecam, qualis est aliquis amor, quo amatur proximus propter Deum; item in pura electione medii propter extrinsecum finem, quæ directe non versatur circa finem, ipsum volendo, sed tantum in obliquo ipsum respicit tanquam rationem volendi media; sic ergo contingere potest in adoratione imaginis propter exemplar. Nec refert, differentias veluti materiales assignare inter hunc actum, & ceteros, v.g. inter electionem medii, & voluntatem adorandi imaginem: non enim contendimus, hunc actum esse in omnibus ejusdem rationis cum cæteris, aut esse propriam electionem, sed argumentamur a paritate rationis, ut sicut in electione vel aliis actibus potest esse motus voluntatis in unam rem propter aliam, etiam si directe non tendat in id, quod est ratio tendendi in aliud, tanquam in objectum quod, sed solum quasi oblique ut in rationem tendendi, ita id possit accidere in actu adorationis imaginis: nulla enim ratio hætenus reddita est, cur hoc magis in adorationis actu repugnet, quam in cæteris, præsertim cum non agamus nunc de potestate morali, id est, an liceat, vel non liceat, sed simpliciter de potestate sic operandi. Quin potius in absoluta adoratione existimant multi id accidere: nam, cum adoratur Rex propter dignitatem Regiam, persona est, quæ per se, & ut quod, adoratur: Regia autem dignitas non proprie est quod adoratur, sed est qua Rex adoratur, seu ratio adorandi: quod si fortasse talis dignitas coadoratur cum persona, quia est intrinseca ratio adorandi in extrinseca ratione, etiam illud non erit necessarium, sed satis erit, quod indirecte & oblique adoretur.

Secundo potest probari ratione illud antecedens assumptum, quia voluntas tendit in suum objectum propter propositum per intellectum; sed potest intellectus actu cogitare & proponere unam rem ut amabilem, vel

Approba-  
tur secun-  
da senten-  
tia.



vel honorabilem, ratione alterius, ad quam habet habitudinem, non considerando rem illam, quæ est terminus talis habitudinis, ut per se amabilem vel honorabilem: nam prior consideratio non pendet intrinsece ex hac posteriori: nam, licet fortasse virtute, vel quasi in habitu illam supponat, vel includat, non tamen semper requirit illam formalem & expressam considerationem, ut licet homo apprehendat proximum ut amabilem propter Deum, non oportet, ut actu & formaliter consideret Deum esse amabilem propter se, aut quantum vel quomodo amandus sit, sed satis est, quod virtute & implicite illud includat: ergo & voluntas potest tendere directe in eam rem, quæ propter aliam amabilis, vel honorabilis judicatur, non tendendo directe in alteram, quæ est terminus illius habitudinis, sed tantum oblique ut in rationem tendendi in aliam, ut in exemplo posito de amore potest voluntas ex charitate amare proximum ut quid Dei est, ac propter Deum, non amando tunc directe & formaliter Deum ut objectum per se & super omnia amatum: sic ergo in actu adorationis, prout a voluntate proficiscitur, accidere potest, si semel supponamus posse intellectum repræsentare unam rem & honorabilem propter extrinsecam excellentiam alterius, ad quam dicit habitudinem, sive id possit vere judicare, sive tantum ex errore, ut postea videbimus.

Tandem hoc ipsum declaratur ex illo principio, quod imago proprie adorari potest simul cum exemplari per se primo adorato, nam in illo adorandi modo, necesse est, ut intercedat cogitatio de ipso exemplari ut propter se digno veneratione, & simul de imagine ut colenda propter exemplar, ita ut, & illud in ipsa, ac per ipsam, & ipsa propter illud, per modum unius adoranda apprehendantur: quia, nisi huiusmodi objecti propositio antecedit, non potest voluntas vere ac proprie tendere in totum illud: sed nihil repugnat, ut intellectus consideratione præscindat illud objectum, vel ex libertate hominis, vel (quod frequentius accidit) ex naturali inadvertentia, seu quia occurrit aliquid excitans ad unius considerationem & non alterius: simili ergo modo poterit voluntas moveri in objectum, prout consideratum est. Atque hunc modum apprehensionis vel imaginum, vel aliarum rerum sacrarum, satis (ut opinor) ipsa experientia ostendit: visa enim imagine, etiam si illam apprehendamus ut rem sacram & reverenter tractandam, non tamen semper statim cogitamus explicite ac formaliter de Christo v.g. in ea repræsentato, ac de excellentia vel divinitate ejus, propter quam summe venerandus est: est ergo ex parte intellectus non solum possibilis, sed etiam facilis ad intelligendum hic modus considerationis: erit ergo etiam ex parte voluntatis possibilis talis adorationis modus: nam supposita objecti propositione & voluntatis libertate, nulla ratio cogitari potest, propter quam talis actus impossibilis sit.

Imago  
mente a  
prototy-  
po præci-  
sa honeste  
adoratur,  
ipso non  
adorato.

Superest, ut alteram partem probemus, scilicet hunc actum esse rectum & honestum: hoc autem probatur primo ex illo eodem principio, scilicet imaginem cum prototypo posse licite adorari proprie & in se: nam, quando adoratur, non adorato directe prototypo, nec existimatur digna majori veneratione, nec re ipsa afficitur majori honore, quam cum adoratur simul cum prototypo, imo quodammodo minus colitur priori modo, quia in re actus adorationis, qui exercetur, minus perfectus est: ergo, si adoratio conjuncta (sit sic dicam) licita est, etiam altera disjuncta erit licita. Et confirmatur, nam utraque nititur in excellentia prototypi, propter quem adoratur imago; & hinc habet, quod licita sit. Quod vero cum illa conjungatur adoratio directa exemplaris, materiale quid est, & per accidens in ordine ad honestatem adorationis imaginis, si alioqui fieri potest, ut exemplar sit ratio adorandi, etiam si non sit objectum, quod per se primo adoratur, quod fieri posse ostendimus. Secundo argumentor, quia in illo adorandi modo nihil assignari potest, quo talis adoratio illicita sit, aut contra rectam rationem, & aliunde habet ille actus objectum honestum & rationi consentaneum: ergo erit talis actio honesta & licita. Antecedens declaratur, nam in ea actione duo considerari possunt, scilicet id quod fit, & id quod omittitur: fit enim honor imagini propter exemplar, & omittitur directa exemplaris adoratio, ut proprii objecti adorari ut quod: sed illud primum per se loquen-

do non est malum, sed potius bonum & rationi consentaneum, quia imago vere est honorabilis propter exemplar, ut VII. Synodus sæpe docet, & supra retulimus; sed per illum actum hoc modo adoratur: neque exhibetur illi major honor, quam sit ille, quo ipsa est digna; neque propter aliam rationem, quam sit illa, quæ in tali re inveniri potest; neque demum ibi miscetur aliqua superstitio, aut falsæ existimationis significatio: quia per illam adorationis notam non significatur, imaginem habere in se excellentiam, ob quam sit digna absoluta adoratione, sed solum habere respectum ad excellentiam alterius, ratione cujus adorabilis est: ergo nihil positive fit per eam actionem, ob quod possit turpis aut irrationabilis existimari.

Deinde, quod in hoc genere adorationis omittitur, seu potius non fit, neque in se malum semper est, neque ut circumstantia talis actus: ergo neque ex hoc capite erit talis adoratio mala. Antecedens quoad priorem partem declaratur, quia non semper tenemur exercere actum adorationis Dei aut alicujus Sancti: nam præceptum adorationis, cum sit affirmativum, non obligat pro semper: sed tunc in eo modo adorandi nihil aliud omittitur, nisi directa exemplaris adoratio: ergo ratione sui illa omisio non semper est mala, vel contra rationem. Altera vero pars antecedentis, scilicet, quod neque ut circumstantia talis actionis illa carentia mala sit, probatur, quia nullum potest excogitari præceptum, vel negativum prohibens talem circumstantiam, vel affirmativum præcipientem, ut quotiescumque adoratur imago propter exemplar, adoretur etiam exemplar directe & in se, tanquam objectum quod: hoc enim præceptum neque ex sola ratione naturali ostendi potest, cum satis declaratum sit, posse unam adorationem ab altera præscindi, & in utraque reperiri honestam causam, & rationem adorandi sine conjunctione actuali alterius. Denique illa directa adoratio exemplaris non est necessaria, ut adoratio imaginis habeat debitum finem ultimum seu remotum, quia ex se tendit in Dei seu prototypi honorem: neque etiam est necessaria, ut habeat debitum finem proximum, quia sine illa habet talis actus debitum objectum formale, & materiale, ut probatum est: finis autem proximus nihil aliud est, quam debitum objectum actionis. Ergo ex solis principiis rationis naturalis colligi non potest præceptum obligans ad hanc circumstantiam. Nec vero fingi potest, hoc præceptum jure positivo additum esse, cum nec scriptum, nec traditum ostendi possit, nec consuetudine introductum. Quin potius (quod hanc veritatem maxime confirmat) frequenter tractamus imagines, aut alias res sacras peculiari quadam veneratione ac reverentia, etiam si res in illis repræsentatas directe & per se non veneremur.

Tertio argumentor in hunc modum: nam ex duplici fundamento existimari potest hic modus adorationis illicitus; prius est generale, quia nulla res inanimata proprie & in se adorari potest, ita ut interior affectus adorationis ad illam tendat, quantumvis sacra & sancta sit; aliud fundamentum esse potest speciale imaginum: nam, licet aliæ res inanimatæ, quatenus sunt aliquo modo sacre, adorari interdum possint, juxta illud: *Adorate scabellum pedum ejus, quoniam sanctum est*, imagines vero, ut res quædam sunt, nullam habent sanctificationem, sed solum referunt prototypa: & ideo non sunt adorabiles, nisi ut imagines sunt, id est, ut actu referunt prototypa, quæ in ipsis principaliter adorantur. Neutrum autem ex his fundamentis firmum est. Et de primo quidem non immerito dixit Paludanus loco supra citato, esse absurdum principium, nihil irrationale esse adorandum in se: nam, ut vidimus in superioribus, sacra Scriptura jubet has res adorare: *Adorate scabellum pedum ejus*; & eodem modo loquuntur Sancti: *Præsepe adora*, dixit Nazianzenus, & alia similia in superioribus adduximus: præsertim ex VII. Synodo, ubi sapissime dicuntur hæ res *adorabiles*, & honorabiles, & earum adoratio comparatur cum adoratione sacrarum vestium, calicis, libri Evangeliorum, & similium rerum. Quæ comparatio fit in VIII. Synodo, canone 3. non potest autem vere ac proprie dici aliquid esse adorabile, aut vere ac proprie adorari, nisi in se adoretur, non solum actu externo, sed etiam ex interiori intentione adorationis & cultus, ut etiam est in superioribus ostensum: ergo



omnino falsum principium est, rem inanimatam non esse in se adorabilem. Ratio vero est, quam insinuavit Paludanus, quia, licet res inanimata non sit adorabilis propter se, ut omnes Theologi docent, & est per se notum, est tamen adorabilis in se propter aliud: hæc enim duo non repugnant, cum in altero objectum materiale, in altero formale significetur; sicut esse potest veritas in se credibilis, non tamen propter se, sed propter aliud, & medium esse potest in se amabile, licet non propter se, sed propter aliud: sæpe ergo objectum formale extrinsecum est materiale: atque ad hunc modum, licet res inanimata non sit adorabilis ratione sui, potest tamen esse adorabilis ratione alterius: & tunc effectus adorationis terminatur ad ipsam, ut in se vere adoratam, quod in tertio tom. de vasis, & aliis rebus sacris latius ostensuri sumus: ergo ex hoc capite non repugnat, imaginem, eo quod res inanimata sit, adorari prædicto modo, non adorato prototypo ut objecto, quod adoratur, sed solum ut ratione adorandi, sic enim frequentius adorantur vasa, & aliæ res sacre inanimatæ, ut ex ipso usu constat; & citato tom. 3. disp. 81. sect. 8. latius dicturi sumus.

Aliud fundamentum seu principium illius sententiæ, quatenus in hoc distinguit inter imagines, & alias res sacras inanimatas, pugnat aperte cum doctrina VII. & VIII. Synod. qua imaginum adoratio aliarum rerum sacrarum adorationi æquiparatur: repugnat etiam cum doctrina D. Th. 2.2. q. 99. a. 3. ubi inter res sacras, quæ veneratione dignæ sunt, numerat imagines cum reliquiis, & vasis consecratis: repugnat etiam rationi, quæ ex eodem D. Th. ibi art. 1. sumitur. *Nam res sacra efficitur ex eo quod ad divinum cultum ordinatur: nam, sicut ex eo quod aliquid ordinatur in finem bonum, sortitur rationem boni, ita etiam ex hoc quod aliquid deputatur ad cultum Dei, efficitur quoddam divinum, & sic ei quadam reverentia debetur, quæ refertur in Deum*, Sed imagines hoc ipso, quod ad Deum, vel Sanctos repræsentandos deputatæ sunt, sunt divino cultui vel Sanctorum dicatæ: ergo habent dignitatem, & sanctificationem rerum sacrarum; & tanquam res sacre adorabiles sunt. Dicunt vero aliqui, hoc esse verum de quibusdam imaginibus, quæ speciali benedictione, consecratione, vel sacra unctione, in Ecclesia sanctificari consueverunt. Cui sententiæ favere videtur Adrianus P. in scripto de imaginibus c. 39. ubi respondens hæreticis, qui Tharasium & VII. Synodum reprehendebant, quod imagines sacris vasis æquiparaverint, inquit, falsum esse, quod hæretici agebant, imagines non sanctificari per aliquam sacram orationem: *Quia usus*, (inquit) *S. nostre Catholica, & Apostolica Romana Ecclesia fuit & est. Quando sacre imagines, vel historia pinguntur, prius sacro chrismate unguuntur, & tunc a fidelibus venerantur*. Sed hæc limitatio non est in universum necessaria; nam, licet possint imagines hoc cæremonialiter modo (ut ita dicam) sanctificari, tamen hoc simpliciter necessarium non est, ut tanquam res sacre habeantur & colantur, sed satis est, ut Dei, vel sanctorum cultui deputentur, ut ex ratione & doctrina D. Th. citata constat: deputantur autem ex hoc, quod ad illos repræsentandos instituuntur & assumuntur, ut Epiphanius significavit in VII. Synodo act. 6. t. 4. in principio, ubi sic inquit; *Typus salutaris crucis, sive sacra precatio, sive dedicatio, apud nos honorabilis existit, satisfacit enim nobis figura*. Ex quibus ultimis verbis colligitur generalis ratio, nam propria sanctificatio imaginis non consistit in aliqua benedictione vel unctione, sed in repræsentatione personæ sacre, ad quam habet respectum ex hoc præcise, quod illius similitudinem gerit, & vice illius substituitur, ut Anastasius in eadem VII. Synodo, act. 4. significavit. Unde ex vi huius repræsentationis, & institutionis, habet imago aptitudinem ad illos sacros usus, ad quos conferre potest: ergo hoc satis est, ut, tanquam res sacra, venerabilis existat: & ideo VII. Synodus non de benedictis, aut unctis imaginibus, sed simpliciter de imaginibus ait, esse veneratione dignas: & sæpe exempla adhibet de imaginibus nulla speciali cæremonia sacris, vel de cerea imagine, qua utebatur Chrysostomus, & de imagine a Nicodemo depicta, & similibus: imagines enim ad Deum vel Sanctos repræsentandos dicatæ, hoc ipso inter res sacras inanimatas computandæ sunt: & ideo non minus sunt adorationis capaces, quam aliæ res similes Deo consecratæ.

Atque hinc potest ultimo hæc sententiæ confirmari auctoritate, præsertim VII. Synodi, in qua frequentissime dicitur, imaginibus deberi venerariam adorationem, qualis debetur rebus sacris, non tamen latrariam, ut patet in act. 2. post epist. Adriani, & sæpissime in 3. 4. & 6. ac denique in septima in ipsamet fidei definitione, quæ definitio est accommodata proportionem intelligenda: nam mens Concilii est, imaginis non deberi adorationem omnino æqualem illi, quæ debetur exemplari. Unde respectu imaginis Christi intelligitur de latraria propria, ut verba sonant, respectu vero imaginum Sanctorum, intelligitur etiam de dulia, quæ ipsis Sanctis debetur: igitur ex doctrina Concilii adoratio imaginis, prout ad ipsam terminatur, inferior est adoratione exemplaris: illa autem inferior adoratio imaginis non potest esse alia, nisi illa, quæ est mere respectiva, & nititur in excellentia exemplaris tanquam in ratione adorandi, versatur autem circa imaginem ut in rem propter aliud adoratam. Duobus autem modis supra insinuatæ eludi potest hoc testimonium. Prior est, quod adoratio imaginis dicatur inferior, quia interna intentio cultus non cadit in ipsam, sed sola actio exterior circa illam versatur ex intentione colendi exemplar. Sed hæc responsio, ut supra ostendimus, falsam introducit doctrinam, multumque derogat imaginum venerationi: nam ex ea non solum sequitur, imagines minus coli, quam exemplaria, sed etiam sequitur, illas non coli, sed sola exemplaria, quia, sicut adoratio exterior, nisi ex intentione cultus procedat, non est vera, sed ficta adoratio, si absolute consideretur, ita etiam respectiva non potest exterior actio esse vera adoratio alicujus rei, si nullo modo ex intentione colendi illam, sed aliam, procedat: multoque minus dici potest honoraria adoratio ejusdem rei, si non ex intentione adorandi illam procedat: cum tamen dicta VII. Synodus dictam inferiorem adorationem, honorariam imaginis adorationem appellet; quæ omnia in superioribus latius perpendimus.

Alia responsio est, appellare Concilium inferiorem illam imaginis adorationem, quia, licet, procedat ex intentione colendi exemplar in imagine & per imaginem, tamen illamet intentio inferiori modo attingit imaginem, quam exemplar, etiamsi utrumque directe attingat, & ut objectum, quod adoratur. Atque ita fit, ut Concilium non doceat, imagines posse adorari aliqua inferiori adoratione, quæ in re ipsa non colatur principaliter, directe, & ut quod, ipsum exemplar. Sed quamquam hæc expositio improbari non possit, ut etiam in superioribus diximus; & ideo convinci etiam non possit, Concilium formaliter & expresse sententiam nostram definivisse, nihilominus tamen ex doctrina Concilii, etiam sic exposita, per consequentiam satis probabilem inferre possumus quod intendimus. Nam, si imagines vere ac proprie adorari possunt aliqua intentione cultus, quæ ad illas terminatur, & ut sic inferior est intentione adorandi exemplar propter se ipsum: ergo illa intentio concepta sub illa præcisa ratione inferioris adorationis, non attingit exemplar in recto & ut quod, sed in obliquo tantum & ut quo: ergo, sicut illa adoratio a nobis mente præcinditur, & concipitur ut inferior, ita etiam potest re ipsa exerceri sola, & sine concomitantia vel identitate perfectioris adorationis, quæ ad exemplar in recto, & ut quod, terminetur. Hæc ultima consequentia (reliqua enim omnia clara sunt) probata, ut existimo, sufficienter est, illis rationibus, quibus ostendimus, hunc modum adorationis inferioris, non solum cogitatione, sed etiam re ipsa, præcise a superiori, & esse possibilem, & esse honestum. Et ex solutionibus argumentorum contrariæ sententiæ id etiam evidenter constabit. Et confirmatur ex verbis D. Thom. 2.2. q. 99. art. 1. dicentis. *Ex hoc quod aliquid deputatur ad cultum Dei, efficitur quoddam divinum, & sic ei quadam reverentia debetur, quæ refertur in Deum*. Et inferius art. 3. in hoc ordine ponit imagines & earum venerationem. Satis autem significat D. Thomas in prædictis verbis, illam reverentiam, quæ his rebus sacris debetur, referri quidem in Deum, non tamen esse eandem, neque tantam, quanta est illa, quæ ipsi Deo propter se debetur. Unde particula illa *quædam reverentia*, diminutus esse videtur, seu distinguens hanc reverentiam ab illa, quæ ipsi Deo secundum se debetur: & eandem vim habet illa particula, *quæ refertur in Deum*,

Ultima  
nostra  
sententiæ  
confirmatio.

Item 2.  
prototy-  
po præci-  
sa imago  
adoretur,  
eadem  
quæ res  
aliæ sacre  
inanimatæ  
adoratio-  
ne colan-  
tur.

Quorum-  
dam ex-  
ceptio.

Improbatur.



*Deum*, & illa, quæ est in art. 3. scilicet, *in quibus* (rebus videlicet sacris, vel reliquiis) *persona Sanctorum quodammodo venerantur*, id est, ut ratio venerandi tales res. Et confirmatur, nam propter hoc in d. art. 3. distinguit sacrilegium, quod fit irreverenter tractando vasa sacra, aut imagines, ab illo, quod fit contra ipsas personas sacras, & dicit illud prius esse minus grave; ergo similiter sentit, reverentiam illam esse distinctam, & inferiorem.

Dicit fortasse aliquis, his rationibus, & testimoniis recte probari, posse imaginibus aliquam reverentiam, vel venerationem exhiberi, etiam si tali actu exemplar directe, & ut quod non adoretur: illam tamen reverentiam imaginis non esse adorationem. Hunc modum dicendi insinuat Bonaven. in 3. dist. 9. art. 2. q. 4. ubi distinguit duplicem honorem, unum venerationis, alium adorationis: hunc posteriorem dicit tantum posse tribui rei rationali, sicut & orationem: nam adoratio (inquit) quædam oratio est ad aliquem ordinata; nam adorare idem est, quod ad aliud orare; priorem autem modum venerarii honoris dicit posse tribui creaturæ irrationali, quia solum exhibetur in signum alicujus nobilitatis, vel dignitatis, quæ non requirit cognitionem: negat tamen hunc honorem esse adorationem: & loquitur de adoratione reliquiarum, vel aliarum rerum sacrarum: nam imaginibus etiam hunc honorem venerationis negare videtur: sed solum illis concedit adorationem, quæ in exemplar directe referatur; tamen juxta doctrinam superius traditam, cum imagines inter res sacras computentur, si distinctio illa bona est, etiam in cultu imaginum locum habebit. Verumtamen illa distinctio primum sine fundamento data est, quia nulla est ratio, cur adoratio omnis ad solam intellectualem naturam referri possit, magis quam veneratio, neque est verum, omnem adorationem esse orationem: nam, quidquid sit de etymologia vocis *adoratio*, quam alii a verbo orandi, alii a nomine *ador*, quod frumentum sacrificiis destinatum significat, desumunt, tamen impositio vocis non est facta ad significandam orationem ut sic, seu sacrificium ut tale est, sed ad significandum in genere quodlibet signum reverentiæ, vel submissionis alicui rei exhibitæ; ergo licet oratio, ut oratio possit solum ad naturam rationalem dirigi, adoratio tamen latius patet, & æque extendi, seu communicari potest, ac veneratio, seu reverentia. Accedit, ac maxime urget, quod illa distinctio expresse reprobata est in VII. Synod. nam in Act. 4. cum relatum esset dictum Anastasii Episcopi Theopoleos: *Quid aliud est, quam honoris alicui exhibiti veluti emphasis, adoratio?* ex hac sententia ita colligit Tharastius: *Omnes igitur, qui sacras imagines venerari consueverunt, adorationem autem recusant, a sancto Patre tanquam hypocrisis redarguuntur*. Si ergo rationes factæ probant, reverentiam, & venerationem aliquam exhiberi posse imaginibus, etiam dum in eis non colitur directe exemplar tanquam objectum quod, etiam probant, simili modo adorari posse imagines.

Consecrationem.

Atque hinc infero primo, hunc actum, quo adoratur imago isto modo, distinctum esse ab illo actu, quo imago coadoratur prototypo, quod per se primo eodem actu adoratur. Probat facile ex differentia objectorum: nam actus habentes objecta diversa distinctos esse necesse est: distinguuntur enim ex objectis: nam, cum ratio talium actuum consistat in habitudine ad objecta, non potest habitudo esse eadem, si objectum, ad quod terminatur, diversum sit; neque actus potest esse idem, si distinctam habet habitudinem ad distinctum objectum: sed hi actus habent objecta diversa; nam unus primario tendit in exemplar, ut in objectum quod, in imaginem vero concomitanter tanquam in partem objecti, vel aliquid simile: alius vero actus non tendit directe in exemplar tanquam in objectum quod, sed solum in imaginem, exemplar vero solum oblique attingit, ut objectum quo: ergo sunt actus distincti inter se: est autem sermo de actibus internis, nam exteriorum actum constat posse esse unum, qui ex sola diversa intentione potest diversam rationem adorationis participare. Et confirmatur primo, nam actus adorationis, qui ita tendit in Christum, verbi gratia, ut nullo modo versetur circa imaginem ejus, distinctus est ab eo, quo adoratur Christus in sua imagine, & ipsa imago simul coadoratur, ut in superioribus dictum est: ergo majori ratione alii actus, de quibus agi-

mus, distincti sunt. Confirmatur secundo, nam ille actus, quo directe, ac formaliter adoratur Christus in imagine, coadorata imagine, est vera, & perfecta latría; alius vero actus, quo sola imago directe, & ut tota materia adorationis colitur, Christus vero solum indirecte, & ut ratio adorandi, non est latría simpliciter loquendo, sed inferior quædam veneratio, ut ex VII. Synodo ostendimus, & est certissimum, quia perfecta latría non potest communicari creaturæ, ut rei per se primo adoratæ, ut ex dictis in superioribus constat: sunt ergo illi actus distincti.

An vero hi actus sint specie diversi, vel tantum numero, item an dicendi sunt distincti tantum in esse naturæ, vel etiam in esse moris, non multum ad præsens institutum refert, nam ad explicandum modum hujus adorationis satis nobis est, hos actus esse re ipsa distinctos, & distincto modo respicere ipsum exemplar, sive hic modus sufficiat ad distinctionem specificam, sive non. Quibusdam autem videtur non sufficere ad specificam diversitatem, quia illa diversitas in objecto est tantum materialis, nam formalis ratio attingendi in utroque actu est eadem, scilicet dignitas, & excellentia exemplaris, sicut etiam actus, quo solum exemplar in se colitur, absque imagine, & quo colitur in imagine, & cum imagine, re ipsa, & in individuo distinctus est, non tamen in specie. Aliis autem videtur illa differentia sufficiens ad specificam diversitatem, quia, licet excellentia prototypi, in qua formaliter nititur utraque adoratio, sit eadem, tamen aliter est in persona representata, aliter vero participatur in imagine: in illa enim est vere, ac formaliter, in hac vero tantum habitudine quadam: unde illam reddit simpliciter excellentem, & dignam perfectæ, & absoluta adoratione in tali ordine, hanc vero solum secundum quid reddit excellentem, & dignam adoratione respectiva: ergo hoc satis est ad specificam actuum diversitatem. Atque hoc etiam confirmat id, quod ex VII. Synod. dicebamus, unam ex his adorationibus esse perfectam latriam; alteram vero minime, sed inferiorem. Unde Damasc. orat. 1. de Imag. *Adoratio* (inquit) *est submissionis, & honoris nota, atque hujus duplex est ratio; altera enim est, quam Deo, qui natura solus adorandus est, latríaque dicitur; altera, quam propter ipsum Deum exhibemus, vel amicis, & servis ejus, vel quibuslibet Dei locis, vel templis ejus, vel principibus a Deo constitutis*. Quo loco videtur aperte constituere specificam diversitatem inter adorationem Dei, & rerum sacrarum, quæ Deo dicatæ sunt, inter quas, ut diximus, computantur imagines: verba enim illa; *atque hujus* (adorationis scilicet) *duplex est ratio*, specificam rationem indicant: & in aliis etiam exemplis, quæ adhibet, manifesta est specifica diversitas. Atque ex hoc etiam loco Damasceni licet obiter colligere, hanc adorationem rerum sacrarum, ut templi, & calicis, &c. non terminari directe ad Deum, ut objectum per se primo adoratum: alioquin non distingueret illam a propria latría, qua adoratur ipse Deus. Unde non est eadem ratio de distinctione adorationis directæ ipsius exemplaris vel solius, vel cum imagine, quia hæc differentia plane est accidentaria, & in solo materiali objecto secundarie: nam primarium idem est, cum eadem excellentia propriæ, ac intrinsece: at vero in aliis actibus est discrimen in objecto directo, & per se primo adorato, & in modo habendi, seu participandi excellentiam, propter quam adoratur, qui modus refunditur in objectum formale talium actuum. Quapropter probabilissimum est, reperiri specificam diversitatem inter hos actus.

Atque hinc etiam constat, hos actus differre in esse naturæ, quia esse specificum est esse naturale talium actuum, id est, quo constituuntur in sua physica entitate, & idem esse est quo respiciunt objecta sua. Quod vero petebatur de distinctione in esse moris, potest esse ambiguum ex vocis æquivocatione, nam per esse moris intelligitur bonitas moralis talium actuum, unde necesse est ita distingui in bonitate intrinseca, sicut distinguuntur in suo esse: nam in actibus internis voluntatis ex se, & ex objecto intrinsece bonis, moralis bonitas vel nihil aliud est, quam illud esse virtutis, quod talis actus habet a suo objecto secundum suam propriam speciem, quod etiam est ipsum esse naturale ejus, quo in tali specie entis, & qualitatis constituitur; vel certe, si bonitas moralis aliquid dicit præter hoc esse, illud est proportionatum ipsi esse, & intrinsece consequens

Adoratio imaginis ut partialis objecti comparatur prototypo, & adoratio imaginis solius propter prototypum, specie diversa.



sequens illud: & ideo æque erit distinctum; ut v.g. si ponamus, bonitatem addere conformitatem ad rationem, vel ad appetitum rectum, vel ad legem, hæc etiam invenitur diversa in illis diversis actibus, nam aliter est debita Deo adoratio, quam imagini ejus. Nihilominus tamen quamvis hæc diversitas sit in ipso esse naturali, & morali talium actuum, quodammodo dici possunt habere quandam unitatem moralem, quatenus unus ex alio consequitur, & per utrumque tenditur ad completam Dei adorationem tam in se, quam in sua imagine, vel in qualibet alia re sacra. Sicut electio pura in re quidem distinctus actus est ab intentione, & distinctam habet bonitatem, imo & distinctum meritum, & nihilominus dici possunt complere moraliter unum actum, quia complent unam tendentiam, & unum perfectum motum in finem. In hoc ergo sensu dici possunt illi actus habere unitatem in esse moris, ita ut illa determinatio, *in esse moris*, cadat potius in unitatem inventam inter tales actus, quæ est quasi collectiva, vel respectiva, quâ in aliquo esse intrinseco, quod sit idem vel ejusdem rationis in utroque actu.

Addendum vero ulterius est, hujusmodi actum adorationis circa imaginem, ad eundem habitum virtutis pertinere, ad quem pertinet alter actus, quo adoratur ipsum exemplar in se, & propter se: sub qua consideratione dici possunt illi actus habere unitatem quandam in ordine ad habitum. Ratio est, quia uterque illorum actuum fundatur in una, & eadem excellentia prototypi, pertinet autem ad eandem virtutem, quæ primario inclinat ad honorandam personam excellentem, consequenter etiam inclinare ad reverenter tractandam imaginem talis personæ; & ideo, licet actus sint diversi, principium tamen & radix utriusque, qualis est habitus, idem est. Sicut supra dicebamus de actu, quo adoratur humanitas Christi præcise concepta, propter hypostaticam unionem: & idem est de intentione, & electione, nam virtus, quæ inclinat ad intendendum aliquem finem honestum, inclinat etiam ad eligenda media, quibus est obtinendus. Et eadem ratione, juxta sententiam gravioribus Theologis probatam, & divinis literis, ac Patribus consentaneam, eadem virtus charitatis, quæ diligit Deum propter se, diligit proximum propter Deum. Ita ergo eadem virtus colit exemplar propter se, & imaginem propter exemplar: nam, ut dixit VIII. Synodus can. 3. *Propter honorem, qui ad principia ipsa refertur, etiam derivative imagines honorantur, & adorantur, ut Sanctorum Evangeliorum sacer liber, atque typus pretiose Crucis.*

Dices. Ergo hæc adoratio, quatenus versatur circa imaginem Dei, erit actus elicitus a propria virtute religionis: erit ergo latria: nam latria, & religio idem sunt, ut tenet D. Thom. 2. 2. q. 84. art. 4. Respondetur, hoc solum posse ad modum loquendi pertinere. Vox enim *latria* interdum sumitur pro habitu religionis, ut apud D. Thom. supra; interdum vero pro actu quodam speciali illius virtutis, continente supremam reverentiam, & recognitionem supremæ excellentiæ absolute, & simpliciter, ut constat ex VII. Synodo, ubi sæpe appellatur hæc latria, *quæ fit in spiritu, & veritate*. In hoc ergo posteriori sensu, in quo Concilium loquitur, non sequitur, illum actum esse adorationem latriæ, quia idem habitus potest habere actus magis, & minus perfectos. Juxta priorem autem significationem concedi potest, illum actum esse adorationem latriæ, non quod ipsa adoratio sit latria, sed quod sit a religione, seu latria, id est, elicita seu effecta ab habitu latriæ. Et juxta hunc loquendi modum dicendum est, actum latriæ esse varios, & diversarum rationum, & unum esse alio perfectiorem: & hoc significarunt doctores, qui hanc adorationem vocarunt latriam inferiorem, seu secundum quid: alii autem vocarunt illum actum, *dulia*, non ea speciali significatione, qua adoratio Sanctis debita, & fundata in creata excellentia, vocatur *dulia*, sed ea significatione, qua omnis adoratio, quæ non attingit perfectionem supremam, & propriæ latriæ, *dulia* solet appellari, ut in superioribus explicuimus, tractando de adoratione humanitatis Christi. Et, quoniam VII. Synodus latriam simpliciter non vocat, nisi supremum illum cultum, qui divinitati debetur, ideo simpliciter non est a nobis hæc adoratio appellanda latria, nisi cum explicatione vel limitatione. Et eodem modo philosophandum est de simili adoratione imaginum Sanctorum in ordine ad virtutem duliæ,

Supere est respondeamus fundamentis contrariæ sententiæ. Ad primum ex locutionibus Conciliorum desumptum respondetur, in Conciliis has locutiones reperiri, imagines honorari, & adorari, propter exemplar: adorationem imaginis referri ad exemplar: per imagines, & in imaginibus, adorari exemplaria: adorationem imaginis esse adorationem exemplaris: & alias similes, quæ eundem sensum reddunt; & his declaratis, facile intelligentur. Omnes ergo hæc locutiones verificari possunt in utroque modo adorandi imagines in hac, & præcedente sectione explicato. Et, quoniam de priori modo declarato sect. præced. nunc non est controversia, de hoc posteriori manifestum in primis est, in illo adorari imaginem propter exemplar, quia illud *propter* in rigore nihil aliud indicat, nisi rationem, ob quam imago adoratur, quam constat esse exemplar, etiam in hoc modo adorandi, ut satis explicatum est, imo, si modus loquendi Conciliorum attendatur, illud *propter* non dicit semper rationem proximam adorandi, sed interdum etiam remotam, nam etiam dicunt, Sanctos adorari propter Deum, ut statim referemus, cum tamen proxime non adoremus Sanctos propter Deum, sed propter justitiam eorum, ut dixit Adrianus Papa in epist. lecta in VII. Synod. act. 2. prope finem: quia vero in imaginibus non est intrinseca excellentia, propter quam honorantur, ideo, cum dicuntur adorari propter exemplar, ratio proxima talis adorationis significatur. Rursus hinc fit, totam hanc adorationem imaginis ad exemplar referri, quia moralis actus potissimum refertur ad rationem, & motivum, in quo proxime fundatur, quæ relatio non est intelligenda tanquam medii ad finem, sed tanquam materiæ ad formam, seu objecti materialis ad formale: sicut actus fidei, licet fortasse versetur circa veritatem creatam, ut materiam creditam, refertur ad veritatem increatam, ut rationem credendi: & amor proximi ex charitate propter Deum, ad ipsum Deum eodem modo refertur: hoc ergo modo recte intelliguntur Concilia, cum dicunt, adorationem imaginis referri ad exemplar. Quamquam interdum etiam abstractius loquantur de quacunque relatione, sive formali, sive virtuali, sive in rationem proximam, sive remotam, ut statim referemus, & constat ex Damasc. lib. 4. de fide c. 17. dicente, Beate Virgini, & aliorum Sanctorum honorem ad Deum referri, quod etiam affirmat Ambros. serm. 6. afferens illud Luc. 10. (ut ipse legit) *Qui vos honorat, me honorat*, & Hieron. epist. 53. afferens illud Matth. 10. *Qui vos recipit, me recipit*.

Unde etiam fit, tertiam propositionem optime in hoc adorationis modo verificari, nimirum, dum adoratur imago, in ea, & per eam adorari exemplar: non enim necesse est, hoc intelligi de adoratione (ut ita dicam) formali, & proprii objecti adorati ut quod, sed de virtuali, & de proximo motivo adorandi, ad quod totus honor transit: sicut qui proximum amat propter Deum, dici potest in proximo amare Deum: imo non solum in proximo motivo, sed etiam in fine remoto locum habet hæc locutio. Sic enim dixit Christus Matt. 25. *Quamdiu fecistis uni ex his fratribus meis minimis, mihi fecistis*: & in actu adorationis ita etiam loquuntur Sancti citati, & Basilii orat. in Sanctos 40. Martyres: imo & in VII. Synodo hic modus loquendi sæpe recipitur, ut ex Leonatio in dialogo relato in act. 4. *Qui martyrem colit, Deum ipsum colit*, & simili modo loquitur German. in epist. ad Joan. ibi recitata. Quæ locutiones diverso quidem modo dicuntur de Sanctis, ac imaginibus, ut supra disput. 52. sect. 2. declaratum est: afferuntur autem a nobis, ut explicemus, ad veritatem illius locutionis non requiri, ut res, quæ in alia adorari dicitur, sit formale, & proprium objectum proxime adoratum ut quod, sed satis esse, ut sit proxima, & tota ratio adorandi: nam, si sufficit, quod sit finis ultimus, aut quod remote tantum in ipsum honor derivetur, multo magis sufficiet, quod sit tota ratio, totumque adorationis fundamentum. Unde VII. Synod. in defin. fid. hæc duo simul conjunxit. *Imaginis honor in prototypum resultat, & qui adorat imaginem, in ea quoque adoratur descriptum argumentum*. Nam, si vis illius verbi *resultat*, expendatur, non significat proprium, & formale objectum, in quod proxime tendit adoratio, sed aliud aliud, in quo ex proximo objecto derivatur adoratio. Eodem ergo modo verificari poterunt posteriora verba, quod in imagine adoretur exemplar. Ac tandem

hinc

Fundamentis contrariæ sententiæ destruuntur.

Primum ex definitionibus Concilii.

Idem habitus exemplaris, & imaginis, propter ipsam adorationem inclinatur.

Proponitur obiectio.

Solvitur obiectio.



hinc plane fit, hanc ipsam adorationem imaginis, quam in hac sectione declaravimus, posse dici adorationem exemplaris, quia eo modo, quo in ea, & per eam adoratur exemplar in imagine, illa est adoratio imaginis, non ut objecti quod, seu materialis, sed ut objecti quo, seu formalis, & ut rei, in quam transit, & resultat omnis hæc veneratio. Atque ita etiam fit, ut una semper sit imaginis, & exemplaris adoratio, non quod hæc adoratio uno tantum modo, vel uno tantum genere actus perficiatur, id enim non est necesse, neque ex Patribus, aut Conciliis fumi potest, sed quod, quodcumque adoratur imago, illo eodem actu adoretur aliquo modo exemplar, sive in recto, & ut objectum quod, sive in obliquo, & ut ratio adorandi; sicut in simili supra dicebamus, tractantes de unica Christi Dei, & hominis adoratione. Et fere in exemplo simili hoc insinuavit D. Thom. 2.2. q. 103. art. 3. ad 3, ubi agens de adoratione hominis, quatenus per naturam est ad imaginem Dei, dicit, quamvis non semper referatur, seu terminetur actu in Deum, semper tamen redundare aliquo modo in illum, atque ita motum in imaginem semper esse aliquo modo in rem, cuius est imago. Juxta hanc ergo interpretationem facillimum est omnia verba Conciliorum, quæ ibi referuntur, ad hunc modum adorationis in hac sectione declaratum, accommodare.

Dubita-  
tio.

Querret tamen aliquis, quis revera sit sensus Conciliorum, quia nec potest esse multiplex, & æquivocus (ut sic dicam) præsertim in definitionibus fidei, neque est verisimile, tantum intendisse hunc posteriorem modum adorandi imagines docere; tum quia alias alter modus sine fundamento Conciliorum affereretur; tum maxime, quia plura testimonia Patrum, quæ in VII. Synodo afferuntur, plane declarant priorem modum directe adorandi exemplaria in imaginibus, definitio autem totius Concilii facta est juxta sensum, & traditionem Patrum in eodem adductam: tum denique, quia verba citata, in omni rigore, & proprietate magis indicant superiorem modum adorationis, quam hunc posteriorem. Si autem dicamus, Concilia fuisse locuta de priori adoratione, relinquuntur hæc nostra sententia non solum absque fundamento, sed etiam virtute reprobata per generales definitiones, ut in illa prima objectione tactum est.

Declara-  
tur.

Respondetur, unum esse, quod præcipue intendunt docere Concilia, nempe imagines esse vere, ac proprie honorandas, & adorandas ratione exemplarium; hoc enim est, quod primo statuunt in definitionibus suis: & in hoc directe damnant Iconomachorum hæresim. Unde consequenter ajunt, imaginum adorationem referri ad exemplaria; & hæc in illis honorari. Quomodo autem hæc adoratio exerceatur, & an fiat uno tantum modo vel pluribus, & an exemplar, & imago semper directe adorentur, & ut objectum quod, an vero interdum solum se habeant, ut objectum materiale, & formale, de his nihil definiunt Concilia, sed Theologorum disputationibus hæc relinquunt, quia non pertinent ad dogmata fidei, sed sub opinionem cadunt. Quia vero hic cultus imaginum variis modis exerceri potest, ideo plura etiam dicuntur de hac adoratione præsertim in VII. Synodo, quæ interdum unum adorationis modum, interdum alium declarant. Atque ex his satis declarata videtur doctrina Conciliorum.

Primum  
notatu  
dignum.

Ut tamen tota hæc materia magis intelligatur, duo advertenda sunt, quæ ad intelligendas etiam nonnullas Patrum sententias deservient. Primum est, imaginem dupliciter considerari posse; primo, ut imago est in actu exercito, (ut Cajetanus loquitur) id est, ut actu exercet munus imaginis, quod est repræsentare prototypum: secundo considerari potest imago, ut res quædam sacra est; ita ut non consideretur imago solum, ut talis res naturalis vel artificialis est, lignea, aut aurea, bene vel male depicta aut fabricata: nam hæc sola præcisa consideratio nullum adorationis genus fundare potest, neque sufficit, ut res illa sacra censeatur: consideranda est ergo imago, ut cultui divino dicata, & in honorem Dei vel sanctorum instituta. Unde, in hoc secundo modo, etiam consideratur imago, ut imago est, non quidem in actu exercito, id est, quod actu exercet munus repræsentandi intellectui hominis exemplar, sed tantum specificative, seu relative, quia consideratur imago, ut est quædam res habens relationem ad tale exemplar, a quo participat quandam significationem, & quasi consecrationem, sal-

tem per extrinsecam denominationem. Secundo animadvertendum est, quotiescunque imago sumitur in actu exercito in ordine ad adorationem, ita constitui vice exemplaris, ut actu illud revocet in memoriam, & proponat, ut objectum principaliter adorandum; & tunc adoratio, quæ exercetur, directe ac principaliter terminatur ad exemplar, ad imaginem vero concomitanter, & tanquam ad materiam proximam, in qua exemplar adoratur: & hic modus adorationis exercetur, quotiescunque signa, aut verba, quibus adoratio fit, talia sunt, vel tali modo fiunt, ut absolutam adorationem contineant, & ad rem viventem, & per se dignam veneratione referri videantur. At vero aliquando imago non ita apprehenditur, ut actu repræsentet exemplar tanquam objectum per se adoratione dignum, sed ut solum concipiatur tanquam res quædam sacra, & ad usum religiosum instituta, & ideo reverenter tractanda, sive hoc fiat per confusam conceptionem rei sacræ, & religiosæ, sicut apprehenditur calix, aut vestis sacra, quæ non semper sub propriis rationibus, & muneribus concipiuntur, ut reverenter tractentur, sed tantum sub conceptu rei sacræ; sive concipiatur sub conceptu talis rei sacræ, quæ ob repræsentationem talis personæ cum debita veneratione tractari debet, in quo conceptu necesse est, aliquo modo concipi etiam exemplar, non tamen in recto tanquam objectum adorandum, sed in obliquo tanquam formam extrinsecam, quasi sanctificantem imaginem, & reddendam illam veneratione dignam. Priori ergo modo dici potest imago perfecte exercere munus imaginis; & ideo adoratio, quæ illi muneri seu conceptioni respondet, dici solet proprie adoratio imaginis, ut imago est. Posteriori autem modo quamvis etiam revera imago ipsa concipiatur, & adoretur, dicitur tamen adorari, ut res sacra est, vel ut distinguatur hic modus adorationis a priori, vel quia ille modus similis, seu proportionalis est in quibuslibet rebus sacris.

Doctores igitur, tum sacri, tum etiam scholastici, tractantes de imaginum adoratione, frequenter loquuntur de imagine, ut actu exercet munus imaginis, & consequenter declarant, quomodo circa illam exerceatur idem actus adorationis, qui circa personam rationalem exerceri potest, & debet. Ideo autem de imagine sub hac consideratione frequentius loquuntur, quia illa est magis propria imagini, ut suum munus exercet: alia enim consideratio communis est omnibus rebus sacris. Item quia in illo actu potissimum apparet difficultas, quomodo possit circa imaginem inanimatam exerceri, cum propriam, & absolutam latriam, vel dulam contineat: ac denique, quia hæc consideratio imaginis alteram non excludit, sed potius illam in se quodammodo complectitur, ut totum continet partem; nam, ut supra dictum est, quando sic adoratur imago, ut imago, quamvis directe, ac primario adoretur prototypum, tamen etiam ipsa imago coadoratur, & circa illam versatur non solum externa actio, sed etiam intentio cultus, quæ ut ad imaginem spectat, inferioris adorationis rationem habet, quam ut fertur ad exemplar: atque ita in illa adoratione virtute, & eminenter continetur illa adoratio, quæ potest imagini tribui, ut talis res sacra est, quod satis insinuarunt Concilia, quando adorationem imaginis, inferiorem vocarunt.

Ex his ergo facillimum erit, testimonia citata, & omnia similia verba expendere, ac intelligere: nam Concil. Trident. primum, ac generatim docuit, imaginibus debitum honorem, ac venerationem esse impertiendam; quod verum est, sive imagines, ut imagines, sive ut res sacræ, sumantur. Deinde vero declarat, qualis sit hæc adoratio, prout ad imagines spectat, dicens esse respectivam in ordine ad exemplar, & ratione illius, quod etiam est verum, non solum de adoratione, quæ præcise tribuitur imagini, ut res sacra est, sed etiam de illa, qua adoratur imago, ut actu exercens munus imaginis: nam etiam illa, qua ex parte imaginem attingit, fit ratione exemplaris, & ad illud refertur. Postea vero declarat Concilium, quomodo hæc imaginis adoratio in illa non sistat, sed ad exemplar transeat, quod potest quidem verificari de utroque modo adorationis: Concilium autem videtur voluisse declarare in illis ultimis verbis formalissimam, ac perfectissimam adorationem imaginis, ut imago est, non quia necesse sit, ut, quotiescunque reverenter tractatur imago, ut res sacra est, circa illam talis modus adorationis

Secundū.

Explica-  
tur Conc.  
Trident.  
testimonium.



nis exerceatur, seu quia imago, ut imago, capax est huius adorationis, & explicare oportuit, quomodo talis adoratio honeste circa imaginem exerceatur, quia non tantum in ipsam, sed in Christum, aut sanctos directe tendit. Vel etiam possunt illa verba ad utramque adorationem proportionate accommodari, nam quando imagines osculamur, vel coram eis caput aperimus, tantum ut res quædam sacræ sunt, sicut osculamur librum Evangeliorum, aut vestem sacram, Christum, & sanctos veneramur in obliquo, ut sic dicam, seu in virtute, quatenus in eis est tota ratio sic venerandi imagines: quando vero coram imaginibus caput aperimus, & procumbimus, illo modo continet, tunc in eis Christum, & Sanctos adoramus tantquam primaria objecta, ad quæ tendit adoratio, & servitutis affectus.

Testimo-  
niis Conc.  
Nicæni  
declara-  
tur.

De verbis autem Concil. Nicæni nihil addere oportet, nam eundem habent sensum, ut Concil. Trident. indicavit; & in superioribus satis declaratum est. Solum est considerandum, cum Concilium ait, imagines Christi, & sanctorum dedicandas, & habendas esse, quo per earum inspectionem omnes, qui contemplantur, ad prototyporum memoriam, & recordationem, & desiderium veniant, illisque salutationem, & honorariam adorationem exhibeant, non esse sensum, imagines ita esse propter recordationem prototyporum, ut ipsa tantum prototypa in memoriam revocata adorentur, nam particula *illisque*, non refert prototypa, sed imagines, ut patet ex subjunctis verbis, *non secundum fidem nostram, veram latræ*: nam, si sermo esset de prototypo non excluderetur latræ in imagine Christi, v.g. in sequentibus verbis id magis explicatur, ut perspicuum satis est. Est ergo sensus, imagines propter hunc finem præcipue institutas esse, ut repræsentent, & in memoriam revocent prototypa; & hoc modo adorationi eorum deserviant: ex quo factum est, ut ipsæ etiam sint dignæ adoratione, quamvis minori, & inferiori, sive hæc illis tribuatur simul cum prototypis, sive interdum separatim modo superius explicato. Quocirca, quamvis finis imaginum sit recordatio prototyporum, non tamen necesse est, ut semper, & quotiescunque homo illas videt, hunc finem, seu actum exequantur: nam, licet ipsæ, quantum est ex se, ad hanc recordationem moveant, potest tamen homo non semper, aut non eodem modo talem repræsentationem attendere, & considerare, ut in superioribus declaratum est.

Senonen-  
sis Conc.  
testimo-  
nium ex-  
ponitur.

Atque ex his etiam constat sensus verborum Concilii Senonensis, quæ parum differunt a verbis Concil. Trident. & ita eundem sensum habent. Videtur autem illud Concilium potissimum declarasse adorationem imaginis, ut imago est in actu exercito, propter rationes supra tactas, non tamen excludit adorationem imaginis, ut rei sacræ, quæ & in altera continetur, & ad illam etiam possunt omnia illa verba Concilii applicari cum debita proportionem, ut dictum est. Verba autem Concil. Moguntini explicatione indigent: nam quatenus in eis dicitur, imagines non ad id proponi, ut adoremus, vel colamus eas, videntur contraria verbis definitionis VII. Synodi. Duobus ergo modis exponi possunt; primo, de adoratione absoluta, & quæ in ipsis sistat, propter aliquod numen, quod in ipsis sit, ut alia Concilia dixerunt; de hac ergo adoratione recte dicit Concilium non proponi imagines, ut sic adorentur: non tamen voluit excludere adorationem respectivam, quæ necessario concomitatur, hoc ipso, quod imagines institutæ sunt, ut per eas prototypa veneremur. Unde secundo dici potest, si loquamur de proprio fine, propter quem imagines instituuntur, & proponuntur, per se non proponi, ut ipsæ adorentur; sed ut per illas exemplarium recordemur, eaque veneremur; & hoc est, quod illud Concilium docuit; tamen hinc consequenter factum est, ut ipsæmet imagines sacræ sint, & venerabiles, & aliqua adoratione dignæ, quæ interdum potest ipsis exhiberi, etiam si actu non exerceant perfecte illum finem, propter quem sunt institutæ, quod in illo Concilio non negatur, quamvis non declaretur.

Patrum  
testimo-  
nia in ob-  
scurum  
adducta  
exponun-  
tur.

Ad secundum fundamentum ex testimoniis Patrum nihil fere addere oportet: nā prior locutio: *Quod in imaginibus exemplaria adoramus, non in tabulis, & coloribus honorem confluentes, sed eorum gloriam prædicantes, quos imagines referant*, verissima est, & locum habet tam in adoratione imaginum, ut exercent munus imaginum, quam in res sacræ sunt. Ac denique in hijs, & sancti-

bus verbis solum intendunt Patres, imaginem non coli propter numen, quod in ea sit, sed propter excellentiam exemplaris, quod in omni adorationis modo verissimum est. Altera etiam locutio; *imaginibus per recordationem exemplarium honorem exhiberi, ideoque honorem imaginis non posse ab honore exemplaris secerni*, declarata jam est: simulque est expolitum, quo sensu verum habeat, etiam quando imago tantum ut res sacra adoratur. Nam, sicut illa etiam adoratio in excellentia prototypi fundatur, ita fit per recordationem ejus, vel ut rei directe adorata, vel saltem, ut rationis adorandij; & hoc modo in dicto cap. Venerabiles de consecr. d. 3. imagines venerabiles dicuntur, non quia Christiani eas, ut deos adorent, sed quia ad memoriam, & recordationem primitivorum venerantur eas, & adorant. Et Photius in eodem loco ibi citato ait in VII. Synod. definitum esse *sacras Sanctorum omnium imagines pro ratione sanctitatis, & excellentie exemplarium colendas, & adorandas esse*. Quocirca, cum in aliquibus testimoniis ibi citatis negatur, imagines esse adorandas, intelligendum est de adoratione latræ, seu absoluta, & propter se ipsas, seu propter numen, & excellentiam, quæ in ipsis sit. Intendunt enim Patres, quando ita loquuntur, excludere eorum errorem, qui more Gentilium imagines ut deos adorabant: non enim defuerunt hæretici, qui ita fenserint, ut ex Damasceno constat lib. de hæres. in fine, eosque *Christianocategoros* vocat; contra quos loqui etiam videtur August. lib. 1. de Mor. Eccl. c. 34. & epist. 119. c. 11. Vel etiam intendunt, Iconomachis respondere, eorumque imperitiam arguere, quod fidelibus imponerent, quod imagines, ut deos adorarent, ut clare & diserte declaravit VII. Synod. præsertim act. 6. & Damasc. orat. 1. de imag. & Jonas Aurelianus lib. 1. de imaginibus circa medium.

Ad rationes respondetur. Circa primam communiter distingui solet duplex tantum consideratio imaginis, scilicet ut est res quædam, & ut est imago, & exercet munus imaginis, & sub priori ratione nullo modo adorari, sub posteriori autem simul cum prototypo adorari dicitur, seu eadem adoratione, qua prototypon. Ita fere D. Th. hoc art. 2. & Albert. Richard. Capreol. & alii locis citatis. Advertit tamen Cajetanus sub priori membro, quo consideratur imago, ut res quædam est, non solum comprehendendi materiam imaginis, ut aurum, vel lignum, sed etiam formam, seu figuram, imo relationem imaginis ad exemplar, sive realis sit, sive rationis: nam secundum hæc omnia potest terminare motum distinctum, qui in ipsa maneat, & non transeat ad exemplar, tam in consideratione intellectus, quam in motionem affectus, nam potest quis complacere in imagine secundum totam rationem formalem ejus, non complacendo in exemplari: imo cum amore imaginis potest esse odium, vel displicentia exemplaris.

Sed in hac doctrina, quantum ad præsentem materiam spectat, plures difficultates occurrunt. Prima est, cur in illa partitione auctores omiserint tertiam considerationem imaginis, ut res sacra est: sic enim nec consideratur solum, ut res est, vel pictura, sed ut est pictura sanctificata, & consecrata. Neque etiam consideratur, ut exercens officium imaginis, id est, ut ducens in proprium conceptum exemplaris. Secundo est difficultas, quomodo accommodetur ad hanc materiam principium illud ex Aristotele lib. de Memor. & reminisc. desumptum; idem est motus in imaginem, & in id, cujus est imago; nam Aristoteles revera non loquitur de motu in imaginem, ut in objectum, sed de motu mentis per intentionalem imaginem in objectum: tractat enim ibi de motu, vel actu memoriæ, quo per phantasma in memoria conservatum rei absentis, & prius cognitæ recordamur: & declarat, quomodo interdum representatio phantasmatis non causet memoriam, sed simplicem cognitionem, interdum vero memoriam efficiat: & rationem ait esse, quia, sicut animal in tabella depictum dupliciter considerari potest, uno modo absolute, & secundum se, ac si esset animal quoddam: alio modo, ut relatum ad id, quod repræsentat tantquam imago ejus: ita phantasma considerari potest, vel ut in se est, quasi quædam pictura (sive id fiat per directam, sive per reflexam cognitionem) & ut sic causat cognitionem simplicem, vel ut est imago repræsentans rem prius cognitam, & ut sic causat memoriam. Atque ex hac ultima consideratione sumptum videtur illud princi-

Rationes  
in opposi-  
tum di-  
stinguuntur.  
Prima  
quomodo  
ab aliqui-  
bus.

Dubia nō  
nulla cir-  
ca præse-  
dentem  
solutionem  
erunt.

Secundū.



pium, quod idem est motus in imaginem, & in id cuius est imago, cum tamen revera ille motus memorie non sit in ipsum phantasma, ut objectum, sed potius sit motus in solam rem per ipsum phantasma, tanquam per imaginem representatam, quia in illa memorie recordatione, quæ per phantasma fit, phantasma nullo modo concurrat, ut objectum quod, sed ut ratio, seu forma, quæ tenditur in rem, quæ in memoriam revocatur, & est totum objectum illius recordationis: in hoc autem sensu, non applicatur commode illud principium præsentis instituto, alioquin inferendum esset, motum adorationis, qui per imaginem transit ad rem imaginatam, ita esse unum, ut nullo modo feratur in imaginem, ut in objectum, sed illa solum deserviat, tanquam forma revocans in memoriam exemplar, ut in illud solum motus adorationis tendat. Hinc tertio difficile etiam est explicare, quomodo in præsentis materia idem motus tendat in imaginem, & exemplar tanquam in objectum: in illa enim materia, in qua Aristoteles loquutus est, ideo una est actio, quæ tendit ad phantasma, seu imaginem intentionalem, & ad rem representatam, quia non tendit in utrumque, ut in objectum, sed phantasma ipsum attingit, ut actum productum, quo mediante tenditur in rem representatam, ut in objectum. At vero in præsentis necesse est, ut ille motus attingat imaginem, & exemplar tanquam objectum, quod nec de motu cogitationis verum videtur, quia imago, & exemplar cogitantur, ut res diversæ, quibus diversi conceptus correspondent, nec de affectu adorationis propter eandem causam.

Has difficultates proposui, ut ostenderem, primam illam rationem, si quid difficultatis habet, communem vere esse in omni sententia, & eadem facilitate explicari, vel applicari principium illud ad hanc adorationem imaginis pure respectivam, quæ ad alteram adorationem imaginis cum exemplari directe adorato. Primum igitur concedendum est, præter considerationem imaginis pure materialem, ut res quædam est sic fabricata, vel depicta talibus coloribus, figura, &c. & considerationem imaginis, ut exercet munus imaginis, id est, ut facit præsentem personam representatam, & in illam ducit tanquam in objectum quod, dari considerationem imaginis, ut talis res sacra est, quod ex dictis satis probatum relinquitur, & ex VII. Synodo, quæ sæpe imagines rebus sacris annuerat, & eam venerationem eis attribuit, quam sententiam expressit etiam D. Thom. in 2. 2. loco supra citato, quamvis hoc loco non tam aperte eam declaraverit. Unde juxta Ecclesiæ usum, quamvis imagines ejusdem personæ in priori ratione representandi æquales sint, tamen quatenus considerantur, ut res quædam sacra, potest una aliam excedere, si pluribus titulis, & modis sacra censeatur, ut si Deus per illam miracula operetur, aut si peculiari ritu Ecclesiæ benedicta sit, aut consecrata, aut si non solum, ut imago, sed etiam, ut reliquia habeatur, ut est, v. g. imago B. Virginis a S. Luca depicta, aut figura Christi in sudario, vel linteo, quo faciem terfit, relicta, aut imago, quam ab Abagarum misit. Quod ergo D. Th. & doctores in hac materia hanc considerationem non distinxerint, fortasse causa fuit, quæ supra tacta est, quia hæc ratio communis est cæteris rebus sacris, & quia explicata propria, & difficiliore adoratione imaginis cum exemplari, alia implicite exposita censebatur. Vel certe dici potest, sub illo membro considerationis imaginis, ut imago est, comprehendisse omnem considerationem imaginis, quæ conjuncte cum exemplari consideratur, si ve exemplar simul concipiatur, ut id quod præcipue adoratur, si ve tantum, ut ratio adorandi: & hoc satis significavit Cajetanus dicens, quod imago tunc terminat motum, ut res, quando ratione sui, si ve materialiter, si ve formaliter terminat: tunc vero exercet actum imaginis, quando ratio ejus actus est exemplar, id est, ratio adorandi illam, ut statim declarat. Unde subdit, motum adorationis vere, & proprie terminari ad imaginem, quamvis non ratione sui, sed ratione exemplaris: quare, quod inferius ait, non exhiberi adorationem imagini, ne sibi sit contrarius, & in apertum errorem labatur, intelligendum est, non exhiberi adorationem imagini ex se, seu propter se: nam eodem sensu inquit adorari imaginem non secundum se, sed secundum aliud in ipsa, quod est ratio adorandi ipsam. Quotiescunque ergo consideratur imago, ita ut tota ratio adorandi illam sit prototypum,

formaliter ut imago consideratur; imo hoc est, quod per se, ac formaliter requiritur ad considerationem imaginis, ut imago est, & adorabilis: quod vero ulterius cum imagine concipiatur exemplar, ut objectum quod adoratur, pertinet ad perfectiorem, magisque ad completum usum, seu exercitium imaginis.

Atque hinc fit, etiam sub hac ratione, seu consideratione, esse eundem motum adorationis in imaginem, & in rem cuius est imago, quia, ut explicando testimonia dixi, etiam hoc modo adoratur aliquantulum exemplar in imagine, cum imago ipsa propter exemplar adoretur. Neque est difficile (quod in tertio puncto supra tangebatur) unitatem hujus motus in hoc modo adorationis declarare, tam in cogitatione, quam in affectu, nam cum imago sub hac ratione respective concipiatur, & ut res quædam sacra ratione exemplaris, idem motus cogitationis tendit in imaginem in recto, & in exemplar quasi in obliquo, seu adæquate tendit in imaginem, ut sanctam ratione exemplaris: & eodem modo intentio cultus, & reverentia tendit in ipsam, ut quod, & in exemplar, ut quo. Quocirca, quod Cajetanus ait, imaginem, ut res quædam est, includere non tantum materiam, & figuram, sed etiam relationem, & hoc modo non esse necessario eundem motum in imaginem, & in rem imaginatam, quamvis de materia imaginis, & de figura verum sit, tamen de relatione non ita videtur, saltem quoad motum cogitationis, quia non potest concipi imago sub formali relatione imaginis, quin talis conceptus aliquo modo ad exemplar terminetur: de motu autem affectus distinguere oportet, nam imago sub illo respectu potest placere propter solam pulchritudinem, vel perfectionem artis, quæ in ea relucet, & tunc verum est, talem motum non terminari ad exemplar, neque ad imaginem, ut imaginem, sed tunc revera ratio talis motus non est simpliciter respectiva, cum non accipiat rationem suam a termino, seu exemplari. Unde aliter potest placere ille respectus imaginis propter suum terminum, & tunc est proprie motus in imaginem, ut imago est, nec potest talis motus a re imaginata omnino separari, quod in amore est manifestum, nam, si quis amet imaginem solum, quia est talis personæ, cujus memoriam, & affectum nata est excitare, certe ille est virtualis amor exemplaris, cum in illo fundetur tanquam in ratione amandi, nec potest talis affectus cum odio ipsius exemplaris consistere. Idem ergo est de motu adorationis, qui sub simili ratione ad imaginem terminatur.

Ex illo ergo principio attributo Aristoteli nihil potest contra nostram sententiam colligi, cum satis commode declaretur, etiam in hoc modo adorationis, eundem esse motum in imaginem, & in rem cuius est imago. In omni autem sententia fatendum est, motum in imaginem, & in rem imaginatam non semper eodem modo terminari ad utramque: nam in motu memorie, de quo Aristoteles loquitur, motus terminatur ad imaginem tantum, ut quo, & ad rem imaginatam, ut quod; in motu vero adorationis, qui per imaginem rectam tendit in prototypum, non solum prototypum adoratur, ut quod, sed etiam imago, alioquin per talem motum non vere adoraretur imago, ut supra probatum est, & declaratum, quo modo ille motus sit unus; non tantum exterior, sed etiam interior, tum in affectu, tum etiam cogitatione; in respectiva vero adoratione imaginis, ut rei sacre, idem motus adorationis tendit in imaginem, ut quod, & in prototypum, ut quod. Igitur principium illud solum est abstracte sumendum, quod motus in imaginem, ut sic, est aliquo modo motus in rem imaginatam, modus autem, quo attingit utramque, non semper est idem, sed juxta capacitatem materie declarandum est, & hoc significavit D. Thom. in 2. 2. quæst. 103. art. 3. ad 3. cum dixit, motum in imaginem quodammodo esse etiam motum in rem imaginatam, atque ita satisfactum est omnibus difficultatibus propositis.

Ad secundam rationem recte ibi responsum est rem irrationalem non esse adorabilem propter se ipsam. Quo sensu dicunt sæpe Patres, adorationem attributam rei irrationali non contineri, seu claudi intra ipsam: nihilominus dicendum est, rem irrationalem vere esse adorabilem propter aliam intellectualem, ita enim absolute loquuntur Patres VII. Synodi. Unde, ut talis adoratio rei irrationalis honesta sit, & conformis rationi, satis est, quod

Qualiter in omni adoratione imaginis idem sit in piam, qui in exemplar motus.

Qui debet intelligi Aristotelis pronuntium.

Secundæ rationis principium dilu- tio.

Tertium.

Triplex imaginis consideratio.

Ecclesiæ usus cur obtineat, ut uni ejusdem personæ imaginem major deferatur honor quam alteri. Celebris B. Virginis imago a D. Luca depicta. Christi imago ab ipso ad Abagarum missa.



quod tota nitatur in excellentia alicujus rei rationalis . Quod vero illa adoratione simul colatur eadem res intellectualis tanquam objectum , quod directe adoratur, nulla ratione probatur esse necessarium ad honestatem actionis, quia, quando honor est respectivus, non est necesse, ut res illa, quæ est veluti materia adorationis, percipiat honorem sibi exhibitum, sed satis est, quod ille, propter quem exhibetur, illum percipere possit: quia honor non ea intentione exhibetur hujusmodi rebus, ut ipsæ illum percipiant, sed solum, ut convenienti, & reverenti modo tractentur, juxta existimationem, quæ de illis haberi debet: atque adeo, ut hæc ipsa existimatio ipsismet actionibus significetur, & ostendatur: significatio autem hæc, sicut non fit propter imaginem, quæ adoratur, ita neque fit ad ipsam, id est, ut ipsa percipiat animum, & intentionem adorantis, sed hoc modo ordinatur significatio ad eum, propter quem fit adoratio, vel certe etiam ad alios, qui adorationem videt.

Ad replicam autem ibi factam contra hanc responsionem aliqui concedunt esse in imagine aliquam dignitatem, ob quam coli possit, & debeat, nimirum consecratio aliqua, vel dedicatio divino cultui, seu similitudo ad personam sacram; hæc enim in ipsa imagine est, & videtur esse aliquid sacrum, quod denominat rem aliquo modo sacram, & sanctam & consequenter adoratione dignam, juxta illud: *Adorate scabellum pedum ejus, quoniam sanctum est.* Sed nihilominus dicendum est, quod etiam Conc. significant, in imagine non esse formaliter, & intrinsece excellentiam aliquam, propter quam fit adoranda, quia, licet in ea sit figura, vel etiam relatio ad exemplar, tamē hoc totum non constituit illam adoratione dignam, sed solum exemplar, quatenus ut forma extrinseca, & terminus habitudinis imaginis ad ipsum, illam sanctificat, & venerabilem reddit. Cum autem objicitur, extrinsecam excellentiam non posse efficere, ut homo rationaliter serviat, aut se submittat rei irrationali, Respondetur, quod si hæc ratio quicquam valeret, etiam probaret, imaginem non esse adorandam ex propria, & vera intentione cultus, etiam cum prototypo, quia etiam tunc homo, saltem ex parte, serviret creaturæ irrationali propter extrinsecam causam. Vel si illud est licitum, licebit etiam, illum modum servitutis exhibere imagini, propter exemplar quamvis precise (ut ita dicam) & separatim exerceatur. Unde, qui hac ratione utuntur, omnem veram imaginis adorationem evertere intendunt. Dicendum est ergo, nullum esse inconveniens, quod homo aliquo modo se submittat rei irrationali, non propter ipsam, sed propter exemplar, quod repræsentat, quia hoc non est servire creaturæ propter se ipsam, sed propter Deum, quod est servire Deo in ipsa. Unde per tale officium adorationis homo non ita se submittit imagini, ut prostetur, se inferiorem illa, sed solum proficitur imaginem pertinere, seu esse aliquid ejus, qui superior, & excellentior est: ideoque dignam esse, quæ ab homine reverenter tractetur. Ad alteram vero objectionem jam responsum est excellentiam prototypi esse proximam rationem adorandi imaginem: inde autem non fit, quotiescunque adoratur imago, necessario adorari exemplar, ut objectum quod primario adoratur, nam, ut ostendimus, fieri potest in actu intellectus, & voluntatis, ut ratio formalis, in qua fundatur, non attingatur directe, & ut quod per talem actum, sed tantum oblique, & ut quo.

Ad confirmationem secundæ rationis, falsum omnino est, intentionem rite adorantis non esse adorare imaginē, sed solum exercere circa illam actionem, qua adoratur prototypum, nam inde fieret, imaginem nunquam vere adorari, quod falsissimum est; fieret etiam imaginem nō magis esse adorabilem, quam sit terra, quam osculando, potest quis Deum adorare, per illam actionem submissionis sui animi ad Deum proficundo. Nec desunt moderni Theologi, qui in rigore ita esse fateantur, solumque in usu ajunt esse nonnullam differentiam, quia imago est jam dicata ad exercendum circa illam adorationem Dei, terra vero non est ad hoc munus specialiter deputata, licet ex hominis libertate, & peculiari affectu possit ad id munus assumi. Sed revera consequens illud alienum est a sensu Conciliorum, & Sanctorum dicentium, imagines, & res alias sacras esse vero honore, & veneratione dignas, quod de terra dici non potest, quantumvis de osculatione ejus, quis utatur ad colendum Deum, neq; ullus recte sen-

tiens dicet, per eum actum vere, ac proprie adorari terrā, cum tamē imago vere, ac proprie adoretur, ut ostendimus.

Ad tertiam rationem concedo, hanc adorationem imaginis Christi esse actum religionis, quia non oportet, ut religio omnem suum actum expresse, ac formaliter dirigat ad rem intellectualem, ut ad objectum quod, sed satis est, ut ratione illius rem irrationalem reverenter tractet, in quo virtualiter exhibetur rei intellectuali debitus cultus, quamvis in expressa, & formali intentione hoc non habeatur. Atque idem in iustitia reperitur, nam, licet proprium ejus munus sit reddere jus suum alicui personæ rationali, tamen non in omni actu suo hoc ita formaliter, & expresse intendit, ut respiciat illammet personam, tanquam objectum quod, seu circa quod operatur, sed interdum exercendo actum circa rem irrationalem, vel inanimatam ratione stipendii, vel mercedis, virtualiter reddit jus suum domino, & idem manifeste in iniustitia contingit, quod lædendo rem inanimatam fit contra jus debitum personæ rationali, quamvis hoc directe non intendatur.

Unde ad quartam rationem respondetur, potius confirmare nostrā sententiam, nam irreverentia facta imagini, quamvis virtute transeat in exemplar, tamen nō semper procedit ex formali, ac expressa intentione, quæ attingat ipsum exemplar, ut objectum quod, intendendo scilicet illi injuriam, & irreverentiam inferre. Duplīter ergo potest aliquis irreverenter tractare imaginem, vel rem sacram, uno modo ex conceptu ipsiusmet personæ repræsentatæ, directe intendendo illius injuriam, & quasi vice illius illam circa imaginem exercendo, quomodo aliquando Judei verberibus affecerunt, ac lancea percusserunt imaginem Christi crucifixi, de quo extat hitoria apud Athanasium, & VII. Synodo; & hæc irreverentia opponitur priori adorationi imaginis, ut imago est, explicatæ scet. præced. Alio modo potest irreverenter tractari imago solum ex injuria, vel irreverentia circa res sacras, vel certe ex errore, si quis existimet, imaginem non esse honorandam, etiam si exemplar adoretur, & hoc sacrilegium respondet, seu opponitur adorationi respectivæ, quæ ipsi imaginibus debetur. Unde, sicut hæc adoratio inferior est illa, ita hoc sacrilegium tanto inferius est illo, quanto intentio virtualis minor est, quam formalis, & indirecta, quam directa; vel quanto sacrilegium contra personas sacras majus est, quam contra imagines, vel res sacras, ut docuit D. Thom. 2. 2. q. 99. art. 3.

#### S E C T I O VI.

*Utrum hæc adoratio imaginum, etiam in imaginibus Dei, & aliis sacris signis locum habeat.*

**R**atio dubitandi esse potest, quia imago Dei, ut Deus est, seu Trinitatis (de hujusmodi enim imagine loquimur) solum metaphoricè repræsentat, & ideo minus apta esse videtur, ut in ea adoretur prototypum propria adoratione sibi debita, quam propria imago, quæ per formalem similitudinem repræsentat. Et confirmatur primo, quia aliās homo, prout est ad imaginem Dei, adorari posset lætria, imo & quælibet creatura, prout est vestigium Dei. Et confirmatur secundo, quia aliās etiam nomina sacra Dei, ut Christi, possent similiter adorari, quia non minus repræsentant, aut in memoriam revocant personas, quas significant, quam hujusmodi imagines metaphoricæ sua exemplaria.

Respondetur, in primis certum esse, has imagines postquam ad repræsentandum institutæ sunt, sacras esse, atque adeo in veneratione habendas, quod plane colligitur ex VII. Synodo, quæ eodem modo loquitur de imaginibus Angelorum, & aliorum Sanctorum, cum tamen illæ etiam per metaphoram repræsentent. Et idem confirmat VI. Synod. & usus Ecclesiæ, quæ imaginem Christi sub specie agni in veneratione habet, quidquid Sylvest. dicat verbo, Imago. Et ratio est, quia etiam illæ imagines habitudinem habent ad personas sacras, & religiose institutæ sunt: unde earum veneratio ad honorem prototyporum pertinet. Observare autem oportet, quia hæc imagines non repræsentant naturaliter; ideo in illis maxime necessariam esse impositionem, & propterea moraliter loquendo oportere, ut publica auctoritas interveniat, quæ hujusmodi imagines ad talem usum imponat. Quod fortasse indicare voluit Cajet. hoc loco, cum dicit adorationem harum imaginum non esse malam, oportere tamen, ut publica auctoritate fiat, & in hoc illam com-

Tertia principia-  
lis ratio-  
nis solu-  
tio.

Quarta ratio in  
eiusdem  
adversores  
retundit-  
ur.

Irratio-  
nali cre-  
aturæ  
qualiter  
se possit  
submitte-  
re ratio-  
nabili.

Adoratio  
excellen-  
tis perso-  
næ parti-  
ter circa  
terram, ac  
imaginem  
exerceri  
valet, at  
terratunc  
non ado-  
ratur, sed  
ejus ima-  
go, &  
quæra.

Imagines,  
ut c. lan-  
tur, quo-  
modo pu-  
blica au-  
ctoritate  
& imposi-  
tione in-  
digeant.



comparat eum occisione hominis, quamquam exemplum non videatur in omnibus accommodatum: quia occisio hominis per se nude sumpta, non est honesta, nisi veluti per accidens, propter necessitatem defensionis, aut iustæ poenæ: hæc vero adoratio per se est utilis, & honesta, quamvis objectum requirat debite propositum; & ideo necesse sit, ut imago sufficienti auctoritate sit ad representandum proposita. Et hinc etiam oritur, ut aliqua signa sacra, quæ aliquando propter divinam impositionem veneratione digna fuerunt, jam non sint colenda, nec veneranda, quia jam impositio cessavit, & consequenter significatio, & representatio, & huiusmodi sunt sacramenta vetera, serpens æneus, & similia.

Secundo addendum est has imagines coli posse illo duplici modo in aliis imaginibus explicato. Nam in primis, ut res quædam sacræ sunt, honoraria veneratio illis exhibetur, ut Concil. Nicæn. dixit; deinde (ut notavit Walden. dicto tom. de Sacramental. cap. 156.) quamvis representatio harum imaginum minus propria sit, tamen supposita impositione, habent sufficientem representationem, satisque expressam, ut in ipsis, & per ipsas fiat adoratio, quæ per se primo referatur ad prototypum, & concomitanter circa ipsas versetur. Ex quo fundamento ratio dubitandi in principio posita expedita relinquitur.

Respons.  
ad argu-  
ment.

Circa confirmationem, D. Thom. hic ad tertium plane sentit, non esse intrinsece malum adorare hominem, prout ad imaginem Dei est, seu potius in illo adorare Deum cultu latræ. Quam sententiam bene explicat Cajetan. 2. 2. q. 102. art. 3. ad 3. & Walden. supra c. 154. qui nonnulla circa illam cõgerit. Et indicatur etiam a Greg. Nyssæn. lib. de creat. hom. cap. 4. & Cyrillo Jerofol. Catech. 12. Ratio vero eadem est, quæ de aliis imaginibus. Addunt vero prædicti auctores, raro, vel nunquam expedire uti hac adoratione, quia cum homo sit per se, & propter se adorabilis humano quodam, & inferiori honore, si sub aliqua ratione coleretur adoratione divina, præter suspicionem, & scandalum, posset interdum esse occasio, vel periculum transferendi ad hominem per se absolute divinum honorem, quod sacrilegum est: hoc autem periculum cessat in imaginibus inanimis. Adde præterea, licet homo creatus sit ad imaginem Dei, tamen ex sola ratione imaginis, & naturali representatione non referre Deum, ut Deus est, seu quoad attributa propria Dei, sed solum quoad communia intellectuali naturæ, & cum aliis non sit etiam hæc imago imposita ad representandum Deum, secundum ea, quæ illi sunt propria, ideo non videtur esse sufficiens ratio utendi hac imagine ad hunc adorationis modum, quamvis secluso scandalo, & periculo, & in homine spiritali, ac bene instructo non possit intrinsece malus existimari.

Et hinc constat, quid dicendum sit de inferioribus creaturis, quæ multo minus representant Deum, quam homo; & ideo multo minus possunt sic adorari, licet quia sunt effectus Dei, in quibus ipse est intime præsens, in illis posset Deus tanquam in sua sede adorari, ad eum modum, quo dicitur Matth. 5. *Nolite jurare, neque per cælum, quia thronus Dei est, neque per terram, quia scabellum est pedum ejus, &c.* Hic tamen adorationis modus valde spiritalis est, & subtilis.

Objeçtio. Et ex his solvitur obiter objectio, quæ contra conclusionem fieri posset. Sequi enim ex illa videtur agnum verum, vel solem adorari posse, quia metaphorice representant Christum, quod tamen irridet Augu. conc. 3. in Psal. 113. exponens illa verba: *Sol cognovit occasum suum.* Negatur ergo consequentia, tum propter periculum: tū etiam, quia res illæ non sunt impositæ ad representandum Christum, neque ex natura sua illum representant.

Ad secundam confirmationem de nominibus sacris, quidam existimant illis non deberi ullam adorationem propriam, quia tantum habent implicitam significationem ex impositione, & instituta non sunt, ut suppleant vicem rei representatæ, & in utroque differunt ab imaginibus, quæ & expressius significant, & ex institutione locum gerunt personarum, quas representant. Ita sentit Dom. Soto lib. 2. de just. q. 4. art. 2. Cordub. d. lib. 1. q. 5. dub. 4. art. 2. ad 1. confirm. 7. arg. Addunt tamen hi auctores abusive, & improprie honorari hæc nomina, quia excitant memoriam personarum, quæ auditis huiusmodi nominibus statim honorantur, & hoc modo fideles audito nomine Jesu caput aperiunt, juxta illud ad Philip. 2.

*In nomine Jesu omne genuflectatur.* Hæc tamen sententia mihi non probatur. Censeo itaque in primis, sacra nomina præsertim nomen Jesu, non tantum abusive, sed etiam proprie, & in se adorandum esse propter eum, quem significat. Probatur, primum ex dicto loco Pauli, & usu Ecclesiæ, quia hoc modo proprius, magisque juxta communem fidelium sensum intelligitur. Unde Iren. lib. 4. contra hæres. 36. *Nomen, inquit, Jesu per universum mundum glorificatur in Ecclesia.* Et illud statim cum imagine comparat. Idemque sentit D. Thom. opusc. 60. art. 6. ubi multa in honorem hujus nominis egregie congerit. Idem Abulen. in c. 20. Exod. q. 6. & 7. 2. lib. Evangeliorum adorandum dicitur in VII. Synod. ergo, & nomen Jesu scriptum adorandum erit, nihil enim illo dignius est in toto Evangeliorum libro, ergo & nomen Jesu voce prolutum eodem modo adorandum erit, ut enim dicitur VIII. Synod. can. 3. *Quæ in syllabis sermo, hæc & Scriptura prædicat, & commendat.* Tertio, ratione ex his verbis canonis desumpta, quia ratio hujus adorationis, tam respectu scripturæ, quam vocis, est res significata; quod vero res ipsa significans sit vox vel scriptura, materiale quid est; ergo non impedit rationem adorationis. Et confir. quia hoc nomen est res quædam sacra, & ad usum religiosum suo modo destinata; ergo vel hoc titulo est adoratione dignum. Denique irreverentia huic nomini facta culpa est religioni repugnans; ergo e contrario hæc virtus inclinat ad honorem aliquem tali nomini exhibendum.

Adoratio  
propria  
nominibus  
sacris  
debita.

Addo vero huiusmodi adorationem his nominibus sacris debitam, potissimum esse respectivam illam, & venerariam adorationem, quam supra late explicuimus, quamque VII. & VIII. Synod. literis sacris tribuendam esse docuerunt. Illa enim prior, qua adoratur persona, vix potest his nominibus accommodari: tum, quia tantum implicite, & per solam impositionem significant: tum, quia cum nomen transeunt voce proferatur, difficile potest apprehendi, ut conjunctum cum persona, seu persona in ipso, ut in illo, & per illud adoretur, ipsumque nomen eadem adoratione coadoretur, quanquam neque hic modus adorationis impossibilis videatur, ut ex dictis facile intelligi potest.

Adoratio  
sacris no-  
minibus  
debita re-  
spectiva  
est.

## SECTIO VII.

*Utrum hæc adoratio imaginum non solum honesta sit, sed etiam sub præceptum cadat.*

IN hac adoratione duo considerari possunt, scilicet usus, vel modus ejus, unde primo quæri potest, an sit præceptum exercendi hanc adorationem, seu utendi illa. Deinde, an modus talis adorationis cadat sub præceptum. Potest autem esse sermo de præcepto naturali, vel positivo, divino, vel ecclesiastico.

Dico ergo primo. Absolute, & simpliciter non esse ullum præceptum naturale, vel divinum, utendi imaginibus, & consequenter neque adorandi illas. Probatur, quia neque in Scriptura sacra tale præceptum continetur, neque ex sola traditione colligi potest esse aliquam legem divinam, hunc usum præcipientem, ut ex dictis facile constare potest. Nam licet ostenderimus Christum factum suo hanc consuetudinem probasse, non tamen præcepisse, neque etiam sola naturali ratione potest hoc præceptum demonstrari. Quia licet teneamur, Deum, & sanctos colere, tamē ex sola naturali ratione, ad certum modum cultus externi non obligamur; & ideo nulla est naturalis lex, qua cogamur illos per imagines colere, & consequenter nec imaginibus, aut earum cultu, & veneratione uti.

Ufus, seu  
adoratio  
imaginū  
non est ex  
præcepto  
naturali.

Dico secundo. Ex more, & consuetudine Ecclesiæ esse aliquo modo præceptum sacrum imaginum usum. Explicatur, nam in primis templa, & altaria ornari debent imaginibus, neque aliter possunt sine scandalo, & gravi irreverentia, supposita fidelium existimatione, & consuetudine, in eis munera sacra peragi. Deinde, quilibet fidelis male, & superstitiose ageret, si ex industria ab usu imaginum abstineret: quia si hoc faceret, judicans illum esse malum, hæreticus esset: si vere id faceret, judicans id esse convenientius, vel ad spiritualem profectum utilius, certe superstitiosus esset, & vix posset non generare scandalum, & erroris suspicionem, præsertim cum hic usus tam frequens sit universæ Ecclesiæ, nec partes debeant a corpore diffidere. Deinde interdum posset obligare hoc præceptum, ubi ad honorem religionis, seu fidei confessio-

Consue-  
tudo Ec-  
clesiæ cir-  
ca imagi-  
num usum  
instat  
præcepti.



nem existimaretur necessarium: absolute tamen, & simpliciter, non invenio in hac re præceptum affirmativum, quod singulos fideles obliget. Unde, si quis ex negligentia, vel avaritia nunquam imaginibus privatim uteretur, ex hoc capite speciale peccatum non committeret.

Dico tertio. Supposito sacrarum imaginum usu, duplex circa illarum cultum ex natura rei præceptum oriri. Alterum est negativum non inferendi illis injuriam, aut irreverentiam, quod per se clarum est ex supra tractatis, & hoc præceptum ex suo genere sub mortali peccato obligat, cum materia ejus gravis sit, & ad religionem spectet. Alterum est affirmativum tribuendi his imaginibus debitum cultum, sed hoc tantum obligat pro temporibus necessariis juxta morem affirmativi præcepti. Hæc autem necessitas solum esse potest, vel si fidem confiteri oportet per hujusmodi actum, vel si cum cæteris fidelibus publica adoratio facienda sit, vel denique si aliqua alia actio circa imaginem exercenda sit, quæ reverentiam requirat.

Dico quarto. Esse naturale, & divinum præceptum servandi modum debitum circa hanc imaginum adorationem. Abstinentum est enim ab omni supersticioso cultu, neque alius modus adorationis illis tribuendus, quam sit earum institutioni, seu naturæ consentaneus, aliàs actio in idololatriæ vitium facile deflecteret.

#### SECTIO VIII.

*Quantum inter hac imaginum adorationem, & idolorum cultum intersit.*

**E**xplicata vera imaginum adoratione, operæ premium erit exponere, quam longe distet, a falso idolorum cultu, ut omni ex parte infidelium, & hæreticorum objectionibus satisfaciamus. Illi enim (ut refert Gregor. P. epist. ad German. Constantin. quæ habetur in VII. Synod. act. 4.) non putant excusari Ecclesiam ab idololatriæ vitio adorando imagines, etiamsi illas propter extrinsecam excellentiam prototypi adorare se dicat. Nam etiam gentes dicebant, se adorare idola, ut eorum hominum, vel spirituum imagines, quos in honore habebant, non tamen idcirco ab idololatriæ peccato excusantur. Assumptum patet ex Euseb. lib. 8. de præpar. Evang. c. 3. dicente: *Adorant idola, ut imagines eorum, qui non nihil ad vitam contulere;* & lib. 3. c. 3. multa ex Porphy. & aliis in eandem sententiam refert. Et in eadem est Athanas. lib. contra idola gentium, & Lactan. lib. 1. divin. instit. c. 15. & lib. 2. c. 2. Cypr. lib. de idolor. vanitate circa princip. & August. conc. 2. in Psal. 113. exponens illa verba, *Simulacra gentium argentum, & aurum,* & in epist. 43. Hinc Olympius Sophista gentilis apud Niceph. lib. 12. hist. c. 25. & Sozomen. lib. 7. hist. cap. 15. ad consolandum gentiles focios suos, quorum idola Christiani confregerant, inquit: *Simulacra erant ex materia corruptioni obnoxia; ideo comminui potuerunt, quæ vero in eis erant cælestes potestates, in cælum evolarunt.* Confirm. nam per se videtur incredibile, homines in tantam cæcitate incidisse, ut ligna, & lapides propter se adoratione digna esse crederent. colebant ergo hæc propter rationem extrinsecam non sine idololatriæ vitio. Cujus rei exemplum ex c. 21. Exodi sumere possumus, ubi Hebræi adorantes vitulum aureum, non illum propter se, sed Deum in illo adorasse videntur, unde & Aaron dicebat: *Solemnitas Domini est,* & tamen magnum idololatriæ peccatum commiserunt. Similiter Judic. 17. Michas dicebat: *Sanctificavi hoc argumentum Domino,* quibus verbis significat, exivisse imaginem Deo, & nihilominus ejus cultus idololatriæ accusatur.

Respondetur, tantum abesse imagines nostras ab idolis, ut potius ad illorum destructionem ab Apostolis erectæ sint, ut erudire notarunt Turrian. lib. 1. pro canonibus Apost. cap. 25. & Evarden. super 1. lib. Irenæ. cap. 24 qui referunt Apostolicum canonem in hæc verba. *Non debent servari decedi circa idola, sed loco eorum inconsecratis veri Dei simul, & hominis, servorumque ejus, manibus efformatas imagines contra idola, & Judeos erigere.*

Ut autem hæc differentia evidentius constet, supponendum in primis est, tunc proprie committi idololatriæ vitium, quando adoratio soli Deo debita ei, qui verus Deus non est, communicatur, ut D. Thom. docet 2. 2. q. 94. art. 1. & ex supra dictis hic art. 1. & 2. constare potest. Unde fit, ad idololatriæ vitium spectare: erigere Deo imaginem, ut propriam ejus naturam, sicut est, repræsen-

tet. Et similiter illam sub tali existimatione adorare, vel eum, qui in illa repræsentatur, tanquam verum Deum, idololatria est, cum ille verus Deus esse non possit. Quod recte notavit German. Constantin. in epist. ad Thomam, relata in dicta VII. Synod. act. 4. & indicat August. epist. 119. cap. 11. Sic etiam servata proportionem potest vocari idolodulia, si quid adoretur cultu religioso Sanctis debito, quod tali adoratione dignum non est. Vel si illi sub hac intentione simulacrum erigatur, ut si demon in se, vel in simulacro colatur, etiamsi non divino honore, sed illo, qui sanctorum angelorum proprius est, adoretur.

Secundo explicandi sunt varii modi, quibus Gentes in hoc vitio errant, vel errare potuerunt. Primo enim, aut profus ignorabant unum Deum, cui supremam adorationem tribuerent, vel certe, si modo aliquo illum cognoscebant, non sicut Deum glorificabant, ut dicitur ad Rom. 1. Unde factum est, ut supremum latræ cultum inter multos dividerent, ut late tractat August. lib. 8. de civit. cap. 14. & lib. 20. contra Faust. cap. 19. Lactan. lib. 1. divin. instit. a cap. 5. & Orig. lib. 6. contra Celsum circa princip. Hæc autem divini cultus partitio, seu communicatio variis modis accidit. Primum enim quidam homines insignes, & potentes existimati sunt dii, illisque sacrificia offerebantur, & sub hac existimatione erigebantur simulacra, ut late ostendit Lactan. supra 8. Tertul. in apolog. c. 11. & 12. & lib. de idolol. & Euseb. lib. 3. de præparat. c. 7. August. lib. 8. de civit. c. 26. *Tanta, inquit, cæcitate in montes offendent, ut non attendant in omnibus literis Paganorum, aut non inveniri, aut vix inveniri Deos, qui non homines fuerint, omnibus vero studeant honores exhibere divinos, quasi nihil humanitatis habuerint.* Neque homines solum mortuos, sed interdum etiam vivos, ut Euseb. supra notat, ut Deos interdum adorabant, ut ex Daniele 2. colligitur, ubi in hoc sensu Hieronym. (quem supra citavimus) inquit, simulacrum, seu statuum Imperatoris, non esse ulla ratione hoc modo adorandum.

Secundo quasdam mundi partes, vel causas, cælos, solem, ignem, & similia, quæ Sapient. 13. & 14. referuntur, ut Deos adorabant, eisque hac ratione simulacra erigebant, vel propter exteriorem formam, quæ oculis patebat, vel certe propter latentem quandam virtutem, quam ibi ineffe existimabant. Ut tradit Euseb. lib. 3. de præpar. cap. 2. & 3. & August. lib. 20. contra Faustum cap. 5. & 19 & lib. 4. de Civit. cap. 10. & lib. 7. cap. 5. ubi ex Varrone refert antiquos fecisse simulacra, ut per ea mundi animam, seu partes ejus conspicerent: ideoque frequentius in forma humana ea confinxisse, ut Deos hominibus similes esse significarent. Quocirca sæpe fingebantur idola, veluti receptacula quædam superiorum virtutum, quæ illis conjungi putabantur, & in eis responsa dabant, quibus exteriores effectus, & beneficia accepta referebant. Unde August. conc. 2. in Psal. 113. inquit: *Sine vivo aliquo habitatore esse non putant.* Quod variis Philosophorum testimoniis ostendit lib. 8. de Civit. cap. 23. & 24. & lib. 10. cap. 10. & epist. 49. q. 3. Euseb. lib. 8. de præparat. cap. 6. Et propter hanc causam Scriptura sacra nunc vocat idola lapides, & ligna, nunc vero demones; Psalm. 95. *Omnes dii gentium demonia,* Deuter. 32. *Immolaverunt demoniis, & non Deo, diis, quos ignorabant.* 1. ad Cor. 10. *Fugite ab idolorum cultura;* & subdit infra; *Que immolant gentes, demoniis immolant.* Unde tandem co devenirent, ut ipsamet sensibiles statuas Deos putarent, sive illas cum spiritibus inhabitatas per modum unius apprehenderent, sive nihil inter eas, & superiores virtutes distinguerent, sed quod videbatur, absolute adorarent. Et ideo in Scriptura sacra sæpe admonentur nihil divinitatis, vel virtutis esse posse in rebus manu factis. Paul. act. 19. *Quia non sunt dii, qui manibus fiunt.* Unde August. lib. 3. de doct. Christi. c. 6. & 7. omnem idololatriam ad duo capita revocat, quia vel simulacra ipsa manu facta, ut Deos habebant, vel si aliqui eorum ea, ut signa interpretari conabantur, ad creaturam colendam referebant. Idem fere quæst. 116. in Genes. Euseb. lib. 5. de præparat. cap. 15. Neque est hoc creditu difficile supposita ignorantia per peccatum originale contracta, & per diuturnam consuetudinem, falsaque traditiones postmodum aucta. Præsertim cum in illis temporibus lumen fidei, & gratiæ, parce communicaretur hominibus, ex quibus multi sunt adeo tardi, & parum instructi, ut vix, quid nemine Dei significetur, concipiant.

Tertia

Suppositio  
imagine  
num usu  
duplex  
præceptum  
oritur.

Idolodulia.

Error  
idololatriæ  
unde  
ortus.

Variis  
modis  
antiquæ  
idololatriæ  
cultura.

Imaginum  
usus  
contra  
idololatriam  
erigere.

Idololatriæ  
quid.



Tertio constat, Hebræos, quandoque in Scriptura peccati idololatriæ redarguuntur, imitatos fuisse supra dictos ritus gentium, ut constat ex historia Jeroboam, qui vitulos aureos erexit 3. Reg. 12. ubi c. 18. Elias ostendit omnes illos, quos Israelitæ tunc colebant, fuisse falsos Deos, similes diis gentium, eorumque cultum esse contrarium cultui veri Dei. Et idem constat ex reprehensionibus Isaia. 46. Jerem. 2. Deuteron. 31. *Deum, qui te genuit, dereliquisti, & oblitus es Domini creatoris tui; & infra, Immolaverunt demoniis & non Deo.* Ubi sermo est de adoratione vituli, in qua Hebræi Egyptios imitati sunt, ut Augu. notat. lib. 18 de Civit. cap. 5.

Quantum inter ima-  
ginem sa-  
crarum, i-  
dolorumq;  
cultu in-  
terit.

Quarto ex his facile intelligitur, quantum distet adoratio nostrarum imaginum ab idolorum cultura. Ecclesia enim solum eas imagines in veneratione habet, quæ personas adoratione dignas repræsentant. Deinde non absolute, & propter se eas adorat, sed totum earum honorem aliquo modo ad prototypa refert. Ad hæc, illas ex vera fide, & estimatione depingit, res corporeas ab spiritualibus distinguendo, unamquamque juxta capacitatem ejus repræsentando. Ac denique unamquamque rem in suo gradu, & ordine, & juxta modum suum veneratur, omnia in unius Dei cultum, & supremum honorem referendo, ut autem in simili dixit Augustinus lib. 3. de doct. Christi. c. 6. ille cultus, qui videtur esse sub rebus, aut signis corporalibus, ac temporalibus, si ad unius Dei cultum referatur, longe a gentium more, & superstitione distat. Et similia possunt sumi ex eodem lib. 20. contra Faust. c. 13. & ex Germano, & Leontio, in act. 4. VII. Synod. At vero Gentiles & erigebant statuas, seu imagines dæmonibus, aut pravis hominibus, & eas, vel creaturas in illis repræsentatas propter se colebant tanquam suprema numina, primasque causas aliquorum saltem effectuum seu temporalium bonorum. Credebant etiam omnes illos, quos ut Deos colebant, esse corporeos, & per propriam similitudinem per eas imagines repræsentari, quibus nihilominus divinos honores & sacrificia offerebant: distat igitur in infinitum eorum error ab Ecclesiæ catholicæ veritate. Unde sancti Patres vigilantissime relliterunt hæreticis, quandoque ritus gentiles cum imaginum usu, & adoratione miscere cœperunt, ut ex Irenæo, Epiph. Aug. locis supra citatis constat, qui Carpocratem, & Gnosticos reprehendunt, quod monstrosas Sanctorum imagines cum prophanis simulachris conjungerent, illisque sacrificia offerrent.

**Objecio.** Sed urgent hæretici, quia licet in hac adoratione bene illa utendo, manifestetur idololatriæ usus non intercedat, tamen fieri non potest, ut omnino videtur, præsertim in rudi, & ignorant vulgo. Unde fit, ut ita imagines adoret, ac si audirent, & sentirent, & divinum quid haberent. Cu usignum est, quia illas orant, & propinquius accedere cupiunt, ut audiantur, vel videantur. Putant etiam unam imaginem habere majorem potestatem, vel excellentiam, & ideo libentius illam adeunt. Respondetur ex dictis in superioribus, si quod fortasse in hac adoratione potest inesse periculum, vera doctrina, ac populi instructione, non falsis erroribus præcavendo esse. Unde negamus in Ecclesiæ Catholica supposita vera ejus fide, & doctrina esse hoc periculum, quod morale, & commune sit. Quod si interdum ex incuria pastorum, vel ex defectu doctrinæ in aliquibus sit ignorantia, vel superstitio, id est per accidens, neque obeam causam universa Ecclesia tanta utilitate privanda est. Signa vero, quæ in contrarium obijciuntur, nullius momenti sunt. Orat enim populus coram imaginibus, quia (ut supra dicebamus) in eis prototypa apprehendunt, & venerantur, cupiunt vero ad illas accedere, ut magis ad devotionem excitentur, & commodius illas venerentur. Magis vero ad quasdam, quam ad alias afficiuntur, quia vel propter antiquitatem, vel propter artificis sanctitatem, vel propter similes circumstantias majorem devotionem excitant, aut denique, quia interdum placet Deo per aliquam imaginem, seu ad præsentiam ejus majora beneficia conferre. Non est igitur, cur hæretici temere judicent superstitiose fieri, quæ ex vera fide, & devotione facta esse, facile interpretari possunt.

**Responso.** Ultimo ex dictis facile intelligitur, quantum imagines sacræ ab idolis differant, meritoque in VII. Synod. act. 7. circa fidem præceptum esse, ne idolorum nomine imagines appellentur. Ut enim notavit Orig. hom. 8. in Suarez Tom. XVI.

Differetia  
inter ima-  
gines, &  
idola.

Exod. & Theodoret. q. 28. in Exod. *Idolum* falsam imaginem significat, quæ vel repræsentat, quod non est, vel quale non est, id est, ut sanctum, quod sanctum non est: & ideo 1. ad Cor. 8. idolum dicitur, nihil esse in mundo, quia non repræsentat aliquid, quod vere ita sit, & propterea Ose. 7. exponente Hier. dicitur de idololatriis, quod *Operati sunt mendacium*, id est, *idolum*, quia sicut simulachrum contrarium est Deo, ita idolum veritati. Et propterea etiam Jerem. 2. idolum, *Vanitas* dicitur, eodem Hieron. exponente in illis verbis, *Ambulaverunt post vanitatem, & vani facti sunt*; & Abac. 1. *Sculptibile, & conflatile*, imagines falsæ dicuntur. At vero imago propria, & vera refertur ad aliquod verum exemplar, ut enim inquit Naz. orat. 36. quæ est 4. de Theolog. n. 83 *Imaginis natura est, ut exemplar suum imitando referat*; & August. in expol. inchoata Genes. ad liter. c. 16. *Imago*, inquit, *Tunc est, quando de aliquo exprimitur, similis ei, cujus imago est*; & Damasc. orat. 2. de imag. dicit, *Imaginem esse typum prototypi, quem exprimit, & declarat*; & eodem fere modo loquitur Adrian P. in sua responsione, & alii Patres in Conc. Nicen. 2. Quocirca, quamvis nomen imaginis interdum generice sumi soleat, & tribui etiam idolis, & simulacris, ut videre licet in Tertul. l. de idol. Lactan. & aliis supra citatis, in Scriptura tamen sacra nomen imaginis absolute dictum in bonam partem frequentius sumitur, ut constat Gen. 1. & 9. Sap. 7. 1 ad Cor. 11. & sæpe alias: at vero nomen idoli semper in malam partem sumitur, Lev. 19. *Nolite convertere ad idola.*

Ad eundem modum utendum est nominibus, *Sculptilium, & simulacrorum*, ut nostris imaginibus illa non tribuamus, falsitatem enim, & deceptionem includunt, & in Scriptura fere semper idola significant, & ideo Act. 15. præcipitur Christianis abstinere, a *contaminatione simulacrorum*, & c. 21. inquit Paul. *Intuens simulacra vestra, Pl. 103. dicitur, simulacra gentium argenteum, & aurum.* Ubi eodem modo August. loquitur concio. 2. Hieronym. locis citatis, Lactan. lib. 6. cap. 13.

Nec refert hoc loco inquirere, an idolum, & imago in aliqua ratione univoce convenient, id enim impertinens est. Quamvis enim in ratione picturæ seu figuræ, aut rei artificiosæ convenire possint, tamen in ordine ad cultum, ad vitium vel virtutem nihil habent commune, quæ sola consideratio ad præsentem materiam spectat.

## ARTICULUS IV.

Utrum crux Christi sit adoranda adoratione latrice.

**A**D quartum sic proceditur. Videtur, quod crux Christi non sit adoranda adoratione latrice. Nullus enim pius filius veneratur contumeliæ patris sui: puta flagellum quo flagellatus esset, vel lignum, in quo fuisset suspensus: sed magis illud abhorreret. Christus autem in ligno crucis opprobriosisimam mortem passus est, secundum illud Sapient. 2. *Morte turpissima condemnemus eum. Ergo non debemus crucem venerari, sed magis abhorrere.*

2. Præterea. Humanitas Christi adoratione latrice adoratur, in quantum est unita filio Dei in persona. Quod de cruce dici non potest. Ergo crux Christi non est adoranda adoratione latrice.

3. Præterea. Sicut crux Christi fuit instrumentum passionis ejus & mortis, ita etiam & multa alia (puta clavi, corona, & lancea) quibus tamen non exhibemus latrice cultum. Ergo videtur, quod crux Christi non sit adoratione latrice adoranda.

Sed contra est, quod illi exhibemus latrice cultum, in quo ponimus spem salutis. Sed in cruce Christi ponimus spem salutis: cantat enim Ecclesia, *O crux ave spes unica* hoc passionis tempore, auge piis justitiam, rei que dona veni. Ergo Crux Christi est adoranda adoratione latrice.

Resp. dicendum, quod sicut supra dictum est, honor seu reverentia non debetur nisi rationali naturæ: creature autem insensibili non debetur honor, vel reverentia nisi ratione rationalis naturæ. Et hoc dupliciter. Uno modo, in quantum repræsentat rationalem naturam: alio modo, in quantum ei quocumque modo conjungitur. Primo modo considerant homines venerari Regis imaginem: secundo modum ejus vestimentum. Utrumque autem venerantur homines eadē veneratione, quæ venerantur et Regem. Si ergo loquamur de ipsa cruce, in qua Christus crucifixus est, u-

147.  
2. 2. q. 101.  
art. 4. ad 3.  
& 3. d. 9.  
q. 1. art. 2.  
q. 2. art. 4.

In Domi-  
nica de  
passione  
Domini  
in Hym.  
art. præ-  
ad 3. art. 5.



troque modo est a nobis veneranda: uno scilicet modo in quantum representat nobis figuram Christi extendi in ea: alio modo ex contactu ad membra Christi. & ex hoc quod ejus sanguine est perfusa. Unde utroque modo adoratur eadem adoratione cum Christo, scilicet adoratione latræ. Et propter hoc etiam crucem alloquimur, & deprecamur quasi ipsum crucifixum. Si vero loquamur de effigie crucis Christi in quacunque alia materia (puta lapidis vel ligni, argenti vel auri) sic veneramur crucem tantum, ut imaginem Christi, quam veneramur adoratione latræ:

art. præc. ut supra dictum est.

Ad primum ergo dicendum, quod in cruce Christi quantum ad intentionem vel opinionem infidelium consideratur opprobrium Christi: sed quantum ad effectum nostra salutis consideratur virtus divina ipsius, qua de hostibus triumphavit, secundum illud Coloss. 2. Ipsum tulit de medio affigens illud cruci, & spolians principatus & potestates, traduxit confidenter palam, triumphans illos in semetipso. Et ideo dicit Apostolus 1. ad Corinthios 1. Verbum crucis perentibus quidem stultitia est: his autem, qui salvi sunt, id est nobis, virtus Dei est.

Ad secundum dicendum, quod crux Christi, licet non fuerit unita Verbo Dei in persona, fuit tamen ei unita aliquo alio modo, scilicet per representationem, & contactum. Et hac sola ratione exhibetur ei reverentia.

1.4. c. 12.  
genc. med.

Ad tertium dicendum, quod quantum ad rationem contactus membrorum Christi, adoramus non solum crucem, sed etiam omnia, quæ sunt Christi. Unde Damascenus \* dicit in 4. libro pretiosum lignum ut sanctificatum tactu sancti corporis & sanguinis, decenter adorandum, clavos, indumenta, lanceam, & sacra ejus tabernacula, quæ sunt præsepel, spelunca, & hujusmodi. Ista tamen non representant imaginem Christi, sicut crux, quæ dicitur signum filii hominis, quod apparebit in cælo: ut dicitur Matth. 24. Ideoque mulieribus dixit Angelus, Jesum queritis Nazarenum crucifixum, non dixit lanceatum, sed crucifixum. Et inde est, quod crucem Christi veneramur in quacunque materia, non autem imaginem clavorum, vel quorumcunque hujusmodi.

#### COMMENTARIUS.

Respondet D. Tho. crucem tam ratione contactus, quam ratione representationis adorandam esse latræ. Cujus responsionis posterior pars in superiori disputatione fere explicata est: prior vero ex iis pendet, quæ circa a. 6. dicenda sunt, & ideo hanc disputationem de cruce in ultimam hujus questionis partem differemus. In litera vero D. Th. (quoniam reliqua clara sunt) illud solum advertendum est, cum inquit nos alloqui, & deprecari crucem tanquam ipsum crucifixum, non esse sensum proprie, & in rigore, orationem fundi ad crucem (ut in superioribus explicatum reliquimus) sed fundi ad Christum in cruce representatum, & apprehensum, ex quo tanquam ex signo recte colligit D. Th. crucem eadem adoratione cum Christo adorari, quia in illa adoratur Christus, ac si præfens adestet.

#### ARTICULUS V.

Utrum mater Christi sit adoranda adoratione latræ.

148.  
2.2. q. 10.  
2.1.4.2. Et  
3. d. 9 q. 1.  
2.2. q. 3.

Ad quintum sic proceditur. Videtur, quod mater Dei sit adoranda adoratione latræ. Videtur enim idem honor esse exhibendus matri Regis, & Regi. Unde dicitur: 2. Reg. 2. quod positus est thronus matri Regis, quæ sedit ad dexteram ejus. Et August. dicit in serm. de Assumptione: Thronum Dei, & thalamum Domini cæli atque tabernaculum Christi dignum est ibi esse, ubi est ipse. Sed Christus adoratur adoratione latræ; ergo & mater ejus.

2. Præterea, Damasc. \* dicit in 4. lib. quod honor matris refertur ad filium. Sed Filius adoratur adoratione latræ: ergo & Mater.

3. Præterea, Conjunctior est Christo mater ejus, quam crux. Sed crux adoratur adoratione latræ; ergo & mater Christi est adoranda adoratione latræ.

Sed contra est quod mater Dei est pura creatura. Non ergo ei debetur adoratio latræ.

Respondeo dicendum, quod quia latræ soli Deo debetur, nulli creatura debetur latræ, prout creaturam secundum se veneramur. Licet autem creatura insensibilis non sint capaces venerationis secundum seipsas: creatura tamen rationalis est capax venerationis secundum seipsam

In 1. de ass.  
sumptione B. Mar-  
iæ c. 6.  
circumquid.  
p. 9 l. 4.  
15 post  
med.

& ideo nulli pure creatura rationali debetur cultus latræ. Cum igitur Beata Virgo sit pura creatura rationalis, non debetur ei adoratio latræ: sed solum veneratio dulci eminentius tamen quam cæteris creaturis, in quantum ipsa est mater Dei. Et ideo dicitur, quod debetur ei non qualiscunque dulcia, sed hyperdulcia.

Ad primum ergo dicendum, quod matri Regis non debetur equalis honor honoris, qui debetur Regi: debetur tamen ei quidam honor consimilis, ratione cujusdam excellentie. Et hoc significant auctoritates \* inducæ.

In a. g. 1.

Ad secundum dicendum, quod honor matris refertur ad filium, quia ipsa mater est propter filium adoranda. Non tamen eo modo quo honor imaginis, quia ipsa imago prout in se consideratur, ut res quedam, nullo modo est veneranda.

Ad tertium dicendum, quod crux non est capax venerationis prout in se consideratur, ut dictum est: \* sed Beata Virgo secundum seipsam est venerationis capax. Et ideo non est similis ratio.

art. præc.

#### COMMENTARIUS.

Quod ad mentem D. Th. attinet, ipse in hoc articulo (ut aperte patet ex corpore ejus) solum agit de adoratione absoluta, quæ per se, & propter propriam excellentiam alicui tribuitur, fortasse, quia supponit rationalem personam non esse alio modo adorandam, non quia sit omnino incapax adorationis respectivæ, sed quia cum sit capax propriæ venerationis, ea uti oportet, & non alia, ut in solut. ad 3. indicatur. Hoc igitur sensu supposito clara est responsio ejus, B. scilicet Virginem non latræ, sed dulcia, vel potius hyperdulcia adorandam esse. Et solutiones etiam argumentorum supposito eodem sensu nullam habent difficultatem. Disputatio vero fusior de hac materia tradetur commodius infra, postquam de dignitate, & excellentia gratiæ, & gloriæ Beatissimæ Virginis disputaverimus: cum enim fundamentum hujus cultus sit excellentia Virginis, & potestas, hujus cognitio illius intelligentiam supponit. Ibi ergo tam de adoratione, quam de oratione ad Virginem exhibenda commodius differemus. Sicut etiam de adoratione Eucharistiæ in propria illius materia tractandum est.

#### ARTICULUS VI.

Utrum reliquie Sanctorum sint adoranda.

Ad sextum sic proceditur. Videtur, quod SS. reliquie nullo modo sint adoranda: Non enim est aliquid faciendum, quod possit esse occasio erroris. Sed adorare mortuorum reliquias, videtur ad errorem Gentilium pertinere, qui mortuis hominibus honorificentiam impendebant. Ergo non sunt Sanctorum reliquie adoranda.

2. Præterea, Stultum videtur rem insensibilem venerari. Sed Sanctorum reliquie sunt insensibilia corpora. Ergo stultum est eas venerari.

3. Præterea Corpus mortuum non est ejusdem speciei cum corpore vivo: & per consequens non videtur esse numero idem. Ergo videtur, quod post mortem alicujus Sancti corpus ejus non sit adorandum.

Sed contra est, quod dicitur in lib. de Eccles. dogmatibus: \* Sanctorum corpora, & præcipue beatorum Martyrum reliquias, ac si Christi membra, sincerissime honoranda, scilicet credimus. Et postea subditur. Si quis contra hanc sententiam velit esse, non Christianus, sed Euphrosinianus & Vigilantianus creditur.

Respondeo dicendum, quod sicut August. dicit in lib. de Civit. Dei. \* Si paterna vestis & annulus, ac si quid est hujusmodi, tanto charius est posteris, quanto erga parentes est major affectus, nullo modo ipsa spernenda sunt corpora, quæ utique multo familiarius atque conjunctius, quam quilibet indumentum agestamus, hæc enim ad ipsam naturam hominis pertinent. Ex quo patet, quod qui habet affectum ad aliquem, etiam ea, quæ de ipso post mortem relinquuntur, veneratur: non solum corpus, aut partes corporis ejus, sed etiam aliqua exteriora, puta vestes, & similia. Manifestum est autem, quod Sanctos, Dei in veneratione habere debemus, tanquam membra Christi, Dei filios, & amicos, & nostros intercessores. Et ideo eorum reliquias qualescunque honore congruo in eorum memoriam venerari debemus, & præcipue eorum corpora, quæ fuerunt templa & organa Spiritus sancti in eis habitantis & operantis, & sunt corpori Christi configuranda per gloriosam Resurrectionem. Unde & ipse Deus hujusmodi reli-

149.  
2.2. q. 96.  
2.4.3.

c. 73. in  
princ. hæc  
betur in  
ter opera  
August.  
tom 3.

1.1. c. 1  
tom 5.



quias convenienter honorat, in eorum presentia miracula faciendo.

In ep. ad Vigilant. non procul a princ. 1.3. incipit e. pist. Accepit primum literis vultu. 3. habetur non procul a princ.

Ad primum ergo dicendum, quod hec fuit ratio Vigilantii, cuius verba introducit Hier. \*in lib. quem contra eum scribit, dicentis, Propter ritum Gentilium videmus sub pretextu religionis introductum, pulvisculum nescio quē in modico vasculo, pretioso linteamine circumdatum osculantes adorant. Contra quem Hieron. in ep. ad Riparium. \*Nos non dico Martyrum reliquias, sed nec Solem, nec Lunam, nec Angelos adoramus scilicet adoratione latria, honoramus autem reliquias Martyrum, ut eum, cuius sunt Martyres, adoremus: honoramus servos, ut honor servorum redundet ad Dominum: Sic ergo honorando reliquias Sanctorum, non incidimus in errorem Gentilium qui cultum latriæ mortuis hominibus exhibebant.

Ad secundum dicendum: quod corpus illud insensibile non adoramus propter seipsum, sed propter animam, quæ fuit ei unita, quæ nunc fruitur Deo: & propter Deum, cuius fuerunt ministri.

Ad tertium dicendum, quod corpus mortuum alicuius Sancti non est idem numero quod primo fuit dum viveret propter diversitatem formæ, quæ est anima: est tamen idem identitate materiæ, quæ est iterum sue formæ unnienda.

Litera D. Th. & per se clara est, & in sequenti disputatione amplius illustrabitur.

## DISPUTATIO LV.

In duas sectiones distributa.

## De reliquiarum cultu &amp; veneratione.

In hac disputatione omnia illa, quæ de imaginib. tractata sunt, sigillatim quæri & investigari possent. Tamen quia ratio doctrinæ similis est, & eadem fere proportionem applicari potest, ideo brevius doctrinam de reliquiarum cultu complectemur, illius honestatem, & modum, seu naturam, & speciem explicando. Nomine autem reliquiarum non tantum Sanctorum corpora, vel eorum partes, sed etiam vestes, & alia similia, quibus ipsi specialiter usi sunt, comprehendimus.

## SECTIO I.

Utrum Sanctorum reliquie in veneratione, & honore habende sint.

Hæretici negant reliquias Sanctorum adorandas esse, vel a fidelibus custodiendas, & conservandas. Cuius hæresis auctor fertur esse Vigilantius. Sed illum in hoc errore fuisse discipulum Eunomii, refert Hier. ep. ad Riparium, & l. contra Vigilant. dicit etiam eum fuisse imitatum Judæos, & Samaritanos, qui humana cadavera abominantur. Sed & ante Eunomium Gnosticos contempnissse Martyres, non tam eorum reliquias quam martyria despicientes, refert Iren. l. 3. c. 20. & Tertul. in Scorpiaco. In hoc eodem errore versatus est postea Constant. IV. seu Copronymus, ut ex Suid. refert Prateol. & postea Joann. Wicl. ut refert Waldenf. tom. 3. de sacramentalib. c. 164. ac denique Luther. Calvin. Zuñgl. & alii novi hæretici ut refert Lindan. dialog. 2. Hofius in confes. c. 58. Alan. dial. 3. c. 12. & sequentibus.

Dicendum vero est reliquias Sanctorum merito a fidelibus conservari, & cum magna reverentia, & veneratione tractari. Hæc veritas non solum de fide certa est, sed etiam videtur lumine naturali evidens supposita, quam de sanctis habemus, existimatione, & primo indicatur in Script. sac. Genes. enim 50. & Exod. 13. legimus ossa Jacob, & Joseph, cum magno honore esse conservata & sepultura tradita. Et Deuter. ult. creduntur angeli sepelivisse corpus Moysis, ut ex antiqua traditione exponit Epiph. har. 9. circa finem, & Act. 8. curaverunt Stephanum viri timorati, & fecerunt planctum magnum super eum.

Secundo hoc maxime probatur ex universalis Ecclesiæ traditione, & consensu, quem sic demonstro. Nam in primis de usu Ecclesiæ Romanæ antiquissimo constat ex Cornel. P. ep. 1. ubi tractat de translatione corporum Petri, & Pauli suo tempore facta a Catacumbis ad ea loca, in quibus martyria sunt passi: & Greg. l. 3. ep. 30. (quæ pro veneratione reliquiarum attente legenda est) earum

dem reliquiarum Petri, & Pauli meminit, & quomodo ab eo tempore, quo passi sunt, magna cum veneratione servatæ fuerint, & l. 5. ep. 50. mittit partem harum reliquiarum Reginæ Francorum, monens, ut debito honore tractentur. Hieron. etiam contra Vigilant. refert summos Pontifices solitos esse super reliquias SS. Apostolorum Deo sacrificium offerre: & coram eis semper fuisse luminaria accensa, constat ex Greg. 3. dialog. c. 24. Chrys. ho. 32. ad Rom. circa finem, civitatem illam magnificat, quod in ea reliquie Apostolorum conditæ sunt, & corpori Pauli circumvolvi exoptat. Secundo de Ecclesia Constantinopolitana. Ad eam etiam translata sunt summo cum honore reliquie SS. Andree, Lucæ, & Timothei, tempore Constantini Magni, teste Hieron. contra Vigilant. postea reliquie S. Pauli Episcopi, & martyris tempore Theodosii senioris, ut refertur l. 9. tripart. c. 17. Et corpus S. Joannis Chrysostomi, tempore Theodosii junioris l. 10. tripart. c. 26. Theodoret. l. 5. hist. c. 3. Niceph. l. 14. c. 43. refert etiam idem Chrys. hom. 66. ad popul. Constantinum Magnum magni honoris gratia juxta fores templi, in quo Apostolorum reliquie servabantur, a filiis suis fuisse sepultum. Et ibidem inquit reliquias Sanctorum non solum Romæ, sed etiam Constantinopoli magna coli pietate. Tertio de Antiochena Ecclesia, Corpus S. Ignatii, in magna veneratione ibi habitum esse refert Evag. l. 1. c. 16. Idem de S. Meletio, Sozomenus l. 10. c. 12. & de S. Babila Rufinus l. 1. c. 35. ubi refert dæmones ad ejus præsentiam obmutuisse, neque in idolis suis amplius responsa dedisse: & in hujus sancti honorem integrum librum Chrysostomus compoluit. Quarto in Alexandrina Ecclesia caput Joannis Baptistæ cum summo honore servavit Athanas. ut Rufinus. refert l. 2. c. 28. in Jerosolymitana, sedes, seu cathedra S. Jacobi honorifice conservata est, teste Euseb. l. 7. c. 15. Niceph. l. 6. cap. 16. in Smyrnenfi, corpus S. Polycarpi, auctore eodem Euseb. l. 4. c. 15. & Niceph. l. 3. c. 35. in Hispania reliquie S. Jacobi, singulari Dei providentia conditæ sunt, & non solum ab incolis, sed ab universis fidelibus religionis causa eo venientibus adorantur, ut ex antiquissima & vulgatissima traditione constat. Et simili veneratione corpora S. Dionysii, Martini, Hilarii, & alia pene innumera Gallicana Ecclesia semper venerata est. De Mediolanensi legi potest Ambr. epist. ult. ad Sororem, & ferm. 91. & 92. ubi de inventione SS. Gervasii, & Protasii, Nazarii, & Celsi historiam refert. Et alia similia congerit Hieron. contra Vigilant.

Tertio confirmat hanc traditionem communis Patrum consensus, qui partim ex dictis hic, partim ex iis, quæ art. 1. pro veneratione Sanctis debita adduximus, satis constare posset. Sed præterea Clemens Romanus lib. 6. Constit. c. 30. Eorum, inquit, qui Deo vivunt, nec reliquie sine honore manent. Justin. Martyr. quæst. 28. a Christianis proposita corpora & sepulcra Martyrum dicit virtutem habere, & adversos dæmones, & ad sanandos morbos, qui arte medicinæ curari non possunt. Nazianzen. orat. 3. quæ est prima contra Julianum §. Non victimas, de Sanctis loquens, inquit. Quorum vel sola corpora idem possunt, quod anima sancta, siue tangantur, siue honorentur, quorum vel sola sanguinis gutta, atque exigua passionis signa idem possunt, quod corpora. Basiliius Psalm. 115. circa illa verba, Pretiosa in conspectu Domini. In lege, inquit, veteri morticina habentur abominabiles: nunc contra si mors cuiuspiam irrogatur pro Christi nomine, pretiosa censentur reliquie ejus: tunc, si quis tangeret cadaver, immundus erat: nunc martyris ossa quisquis attigerit, ob gratiam corpori insidentem fit quadantenus sanctificationis particeps. Tertullianus l. 2. ad uxorem dicit solitos esse fideles reptare in carceres ad osculanda vincula martyrum. Alia legi possunt in August. ep. 42. & ferm. 11. de Sanctis, Cyprianus l. 3. ep. 6. alias ep. 37.

Quarto variis signis, & miraculis per sanctorum reliquias tanquam per divina organa effectis, earum adorationem approbavit Deus Nam 4. Regum 13. ossa Elisæi suscitavit mortuum. Actione 19. iudaria vel semicinctia Pauli ad infirmos deferantur: Et recedebant ab eis languores, & spiritus nequam egrediebantur. Quin etiam umbra Petri liberabat homines ab infirmitatibus suis. Multaque alia referuntur in VII. Synodo & apud Augustin. l. 22. de Civit. c. 8. de miraculis per reliquias S. Stephani, & aliorum effectis, & ep. 137. eleganter disputat,

Ecclesiæ Constantinopol. reliquias devotione.

Antiochena Ecclesiæ devotio erga Sanctorum reliquias.

Reliquias Sanctorum veneratio dubia.

Veneratio Ecclesiæ Romanæ circa reliquias SS.



cur Deus per unius sancti reliquias potius, quam alterius, miracula interdum operetur. Gregorius Turon. l. de gloria Mart. c. 3. agit de reliquiis S. Andreæ, earumque miraculis, & de oleo, quod ab illis manabat. Et similia frequenter leguntur in ecclesiasticis historiis. Huc etiam pertinet, quod Deus sæpe occultas SS. reliquias per revelationem manifestavit, ut in honore haberentur, ut legimus de S. Marcellino, Gervasio, Protasio, & aliis.

Quinto propter hæc tandem definita est hæc veritas a Felice I. cum Conc. Rom. ep. 2. decretali, in VII. Synod. act. 1. in confessione catholica Theodosii, & Basilii Ancyrani, ubi dicitur hanc esse traditionem Apostolicam, & act. 3. ep. Theodo. in fine, optimis rationibus probatur. Habentur etiam multa actio. 4. & 7. can. 7. præcipitur, ut Ecclesiæ non consecrentur sine reliquiis Sanctorum, Quod in Conc. Carthag. V. e. 14. fuerat institutum. Habetur cap. Placuit, de consecrat. d. 1. In Lateran. etiam sub Innoc. III. c. 62. præcipitur, ut reliquæ extra capfam non ostendantur, neque exponantur venales, & ut denuo inventæ non adorentur, nisi prius a Roman. Pont. fuerint approbatæ, de quo infra. In Concil. item Mogun. ca. 51. præcipitur, ne transferantur de loco ad locum sine licentia Episcopi cap. Corpora, de consec. dist. 1. Item in Bracharen. III. c. 5. docetur, quia reverentia portandæ sint in publicis solennitatibus, & pompis. Denique Trid. Sess. 25. de cr. 2. hoc gravissime definit.

Sexto, & ultimo ratione, quia corpora SS. fuerunt templa animarum sanctarum, & futura sunt consortio æternæ beatitudinis, in qua erunt in perpetuo honore. Deinde illas conservare, & retinere, est signum amoris erga sanctos, & excitant eundem amorem, & devotionem ad illos. Tertio majorem cum illis habent conjunctionem, quam imagines, & suo modo magis illos repræsentant; ergo propter excellentiam Sanctorum, & habitudinem ad illam sunt reliquæ honore dignæ. Quæ rationes latius tractantur in VII. Synod. act. 4. & 7. ab August. l. 1. de civit. c. 13. & Damasceno l. 4. c. 16.

**Obje. dic.** Sed contra; nam Lucæ 11. dixit Dominus Judæis: *Va vobis, qui ædificatis monumenta prophetarum.* Ergo similia verba dici possunt de nobis. Unde ibidem & Matthæ. 23. comparat Christus Phariseos sepulcris dealbatis, quæ interiorius sunt plena ossibus mortuorum, indicans hujusmodi ossa esse immunda, & nullius venerationis posse esse digna. Secundo Concil. Eliberti. can. 34. vetat ad sepulcra martyrum cereos accendere. Tertio in Sanctorum reliquiis non manet nisi materia prima, præsertim in cadaveribus eorum, & ad summum juxta probabilem opinionem manet eadem quantitas cum aliquibus accidentibus: sed hæc non sunt satis, ut adorari possint, quia alias, etiam si convertantur in terram, aut in vermes, essent adorandæ, quia manet eadem quantitas.

**Respond.** Ad primum, ut illa Christi verba intelligantur, attendenda sunt, quæ sequuntur, sic enim ait: *Va vobis, qui ædificatis sepulcra Prophetarum, patres autem vestri occiderunt illos. Profecto testificamini, quia eorum operibus consentitis.* Quæ ultima verba difficilia sunt: nam qui ædificat sepulcrum homini occiso, non ideo videtur occidenti consentire, sed potius pietatem, & misericordiam circa occisum ostendere. Nicodemus enim, & Joseph ab Arimathia, qui Christo mortuo sepulcrum pararunt, non ideo neci ejus confecerunt. Dicit ergo potest duplici causa posse aliquem ædificare sepulcrum hominis occisi. Primo, ut misericordiam vel honorem circa mortuum exerceat. Secundo in memoriâ, & quasi in monumentum egregii operis ab interfessore patrati: qui ergo hoc posteriori modo ædificat sepulcrum, aperte testificatur, se consentire operibus interfectoris. Hoc ergo modo videntur Pharisei ædificasse sepulcra Prophetarum, & ideo merito a Christo reprehenduntur: ejus vero reprehensio ad reliquiarum adoratores nullo modo pertinet. Ita videtur interpretari Chrys. hom. 75 in Mat. dicens. *Menti eorum, qui ædificant sepulcra, aperte letrabit: nō enim, ut honorarent occisos, sed ut suorum vires ostenderent, ne tanti facinorosi audacia memoria caderet, sepulcra ædificant.* Sed difficile est asserere Phariseos hac intentione ædificasse sepulcra Prophetarum, quos justos, & sanctos esse existimabant, & in ipsis fuisse interfectos: unde Mat. 23. aperte dicit Christus: *Ædificatis sepulcra Prophetarum, & ornatis monumenta justorum, & dicitis. Si fuissetis in diebus Patrum nostrorum, non essemus socii eorum in sanguine Prophetarum.*

Dicendum ergo est, Christum hoc modo illos reprehendisse, quia licet expresse hoc non intenderent, facto tamen ipso ita se gerebant, ac si hoc intenderent. Cum enim persequerentur vivos Prophetas, imo & dominum Prophetarum, licet dicerent se ædificare monumenta in honorem Prophetarum mortuorum, satis convincebantur non animo religioso, sed ex hypocrisis ædificasse illa sepulcra: atque adeo ita se gessisse, ac si approbare vellent facta parentum suorum. Ita exposuit Chrys. his verbis. *Non quia ædificant, nec quia patres accusant: Va illis dixit, sed quoniam ita dicentes, & facientes, patres suos condemnare audebant, cum ipsi peccata committerent.* Et in Imperfecto, hom. 45. latius prosequitur eandem expositionem. Quam indicat etiam Hier. Matth. 23. & Hilar. can. 23. Matth. optime Amb. l. 17. in Luc. inquit: *Ædificando sepulcra Prophetarum, patrum suorum facta damabant: emulando etiam paterna scelera, in se ipsos sententiam retorquebant: non ergo ædificatio, sed emulatio loco criminis æstimatur.* Idem Aug. l. 2. contra advers. leg. & proph. c. 5. Quod vero Christus comparaverit Phariseos sepulcris dealbatis plenis ossibus mortuorum, nihil facit ad causam, illa enim metaphoræ solum voluit Christus Phariseorum hypocrisim indicare: non tamen propterea significavit omnia ossa mortuorum esse immunda, & non posse interdum esse veneratione digna, ut notavit Cyril. Alexand. l. 10. contra Julian. in princ.

Ad secundum ex Conc. Eliberti. notanda est ratio, quæ in illo canone subjungitur, sic enim dicitur: *Cereis per diem placuit in cæmeterio non incendi, inquietandi enim Sanctorum spiritus non sunt.* Hujus enim rationis obscuritas occasionem quibusdam præbuit dicendi, per Sanctorum spiritus, non mortuorum animas intelligi, quia si beatæ sint, si in Purgatorio existant, nihil cereis accensis perturbari possunt. Nec enim verisimile est Patres illius Concilii tam crassa ignorantia laborasse, ut sanctas animas nostris actibus perturbari putarent. Loqui ergo videntur de viventibus fidelibus ad sepulcra mortuorum accedentibus, quorum spiritus, seu mentes, ea cæremonia eo tempore perturbabantur, seu scandalū patiebantur propter aliquam specialem occasionem eo tempore occurrentem: eo quod videretur aliquid commune habere cum ritibus Gentilium. Solebant enim illi ad sepulcra defunctorum faces accendere, ut colligitur ex Sveton. in Tiberio, c. 98. aut certe, quia inducebantur in errorem putantes, animas martyrum inde juvari.

Sed veriori, & clariori sensu per *Sanctorum spiritus*, mortuorum animas intelligimus, quæ non proprie dicuntur perturbari, sed metaphorice, quatenus eis displicet, quando homines aliquid superstitiosum in earum levamen, vel honorem fieri vident. Quomodo dixit Ambr. l. 2. ep. 8. loquens de quadam defuncta: *Non esse mæstificandam lacrymis: sed orationibus juvandam.* Et juxta hanc expositionem dicendum est eam cæremoniam tunc fuisse prohibitam, quia fortasse aliquid de errore Gentilium irreperat, & accensis facibus, ritibus superstitiosis Sanctorum animæ invocabantur: & fortasse hac ratione dictum est non debere Sanctorum spiritus inquietari, sicut 1. Reg. 28. dixit anima Samuelis. *Quare inquietasti me?* Qui etiam loquendi modus apud Ethnicos erat, qui incantationibus dicebant inquietari animas defunctorum, seu sollicitari, ut significat Plinius l. 28. cap. 2. Cessante ergo omni superstitione, omnique illius occasione, & periculo, certum est cæremoniam illam non esse malam, sed potius honestam, & religiosam; ordinatur enim in divinum honorem, & ad excitandos animos fidelium ad devotionem, & spem gloriæ, & æternæ vitæ futuræ, ut late tractat Hier. ep. ad Ripar. & l. contra Vigilantium. Exemplum hujus est apud Aug. l. 1. de morib. Eccles. c. 34 ubi reprehendit eos, qui ad sepulcra martyrum epulas deferunt. Reprehendit enim excessum, & superstitionem, ut patet ex illis verbis: *Luxuriosissime super mortuos bibentes, & epulas cadaveribus præbentes.* Nam quod recta fide, & intentione id factum honestum sit, idem August. declarat. l. 6. confes. c. 21. l. 8. de civit. c. 27.

De 3. argumento multa speculatur Henricus quodl. 10. q. 6. exitimo tamen non tam metaphysice, quam moraliter expediendum esse: nam (ut statim dicam) quod in reliquiis manet, solum adorator propter habitudinem ad personam, ejus reliquæ fuerunt. Hæc autem habitudo non est res physica, nec relatio realis, sed ratio-



tionis seu moralis quædam dignitas, quæ tam diu durare censetur, quamdiu res illa sub tali forma, figura, & accidentibus conservatur, ita ut humano, & morali modo res existimetur esse eadem, quæ ad talem Sanctum pertinet, seu qua ille usus est. Hic autem status durare censetur, quamdiu res in ea dispositione conservatur, quam habuit, quando a tali persona separata, vel relicta fuit, vel saltem, quamdiu non multum est ab illo statu mutata, in quo adorabilis est, quia retinet prædictam habitudinem, & in esse reliquæ (ut ita dicam) conservatur. At vero, postquam multæ transmutationes intercedunt, censetur huiusmodi res prædictam habitudinem amittere, & statum, seu rationem reliquiarum perdere, & idcirco adorabiles non sunt. Præsertim, quia quando ad eum statum deveniunt, nulla potest esse certitudo, & sæpe earum rerum veneratio indecentiam præ se ferret, quæ tamen in omni religioso cultu maxime cavenda est.

## SECTIO II.

*Quæ adoratio Sanctorum reliquiis tribuenda sit.*

**I**N hac dubitatione nihil fere novi addendum occurrit; eadem enim doctrina, quæ de adoratione imaginum data est, servata proportionem est ad reliquias accommodanda. Supponendum est ergo reliquias esse adorabiles illo duplici modo supra explicato. Primo per se seu solitarie, tanquam materiam totam adorationis. Secundo ut conjunctas cum personis, quarum fuerunt reliquæ, ita ut persona ipsa per se primo adoretur in reliquiis, seu per reliquias, quæ simul coadorantur.

Dicendum est ergo primo, eadem adoratione, qua adoratur persona, posse interdum reliquias ejus coadorari. Ita docuit Damasc. or. 3. de cultu imag. & colligitur ex VII. Synod. act. 4. ubi ex Leontio hæc verba referuntur. *Quædam modum filii peregrinante patre, ingenti amore ex animo erga eum affectu, quidquid in illius domo viderint, sive baculum, sive sedem, cum lacrymis amplectantur non illa honorantes, sed patrem desiderantes, & venerantes, sic nos Christum, & reliquos Sanctos colimus, &c.* Ex quibus verbis ratio conclusionis sumitur. Nam licet reliquæ re ipsa separatæ sint a personis, quarum fuerunt reliquæ, mente tamen possunt ut conjunctæ apprehendi: ergo sicut vestis, verbi gratia, S. Francisci, si esset revera conjuncta personæ ejus, posset cum illa unica actione adorari: ita & nunc quamvis re ipsa disjuncta sit, potest conjungere, & per modum unius ad colendum proponere eas res, quæ licet sejunctæ sint, habitudinem tamen inter se retinent.

Adoratio  
reliquiarum  
Sanctorum  
debita  
qualis

Secundo dicitur, quando reliquæ seorsum, & per se adorantur, adorationem illam esse respectivam & inferiorem, & consequenter esse diversum actum ab illo, quo persona propter se adoratur, quamvis ad eundem habitum pertineat. Tota conclusio est facilis ex supra dictis de imaginibus. Nam totus hic cultus fundatur in excellentia, & sanctitate illius personæ, cujus reliquæ sunt. Cum enim ipsæ sint res vitæ, & ratione carentes, propter se adorationem non potest esse absoluta, sed respectiva, & consequenter distincta saltem quoad actum ab absoluta ejusdem personæ adoratione: non tamen quoad habitum, quia excellentia, in qua uterque actus nritur, & quam per se primo respicit habitus, eadem est, sicut de imaginibus diximus.

Cultus  
reliquiarum  
quoad  
religiosum  
cultum

Et hinc consequenter infertur, hunc cultum reliquiarum esse religiosum, & ad pietatem pertinentem, ad modum de imaginibus explicatum. Quia totus fundatur in eadem sanctitate, & ad idem bonum animæ refertur. Unde per actiones, & res sacras tribuitur, ut sunt templa, altaria, peregrinationes, & similia. Unde Hieron. in c. 40. Ezechiel. de se ipso refert, cum esset puer, & Romæ versaretur, valde fuisse sollicitum in sepulchris Apostolorum & Martyrum visitandis, diebus præsertim dominicis, & festivis. Et Constantinus (ut Ruffin. refert l. 3. hist. c. 33.) ante Martyrum, & Apostolorum thecas jacebat cilio prostratus. Hinc etiam Chrysostomus hom. 66. ad populum circa finem inquit. *Christi servorum sepulcra regis aulis sunt clariora, non adificiorum magnitudine, licet in hoc etiam superent: sed (quod multo maius est) convenientium studio.* Hinc denique reliquiarum contemptus in injuriarum Sanctorum redundat, propter

Suarez. Tom. XVI.

quod etiam earum venditio sacrilega, & simoniaca censeatur, cap. Cum ex eo, de reliquiis, & veneratione Sanctorum, & tradunt Jurisperiti in c. Quisquis, 17. q. 4.

Reliquiarum  
venditio  
simoniaca.  
Dubium.

Sed quæret aliquis hoc loco, an huiusmodi reliquæ absolute adorandæ sint, vel tantum sub conditione. Et ratio dubii est, quia plurimum sunt incertæ, unde si absolute adorentur, periculum est, ne falsæ pro veris adorentur: ad vitandum ergo periculum oportet conditionem apponere. Exemplo confirmari hoc potest, nam, cum alicui per modum revelationis, species Christi Domini ostenditur, non debet illam absolute adorare, sed solum sub conditione, ne exponat se periculo pro Christo adorandi Sathanam transfiguratum in angelum lucis; ergo similiter, &c. Respondetur, distinctione, & prudentia opus esse. Aliud est enim loqui de publico & solenni ritu seu honore reliquiarum, aliud de privato ex singulari devotione alicujus personæ. Ut enim aliquæ reliquæ publicæ ab universa Ecclesia colantur, primo necesse est, ut de sanctitate personæ, vel per universalem Ecclesiæ consensum, seu traditionem, vel per summum Pontificis canonizationem constet. Deinde oportet, ut publica auctoritate reliquæ proponantur ut veræ, & ad talem personam pertinentes: hæc autem auctoritas est apud summum Pontificem, & Episcopos, qui sufficientem diligentiam ante approbationem adhibere tenentur. Et quamvis harum reliquiarum non sit æqualis certitudo (aliæ enim sunt antiquiores aliis) tamen supposita dicta approbatione, absolute adorari possunt absque explicita conditione, tum quia in rebus humanis non est major certitudo requirenda, & periculum formalis erroris, ut ita dicam, nullum est, cum in ratione formali adorandi non possit esse error, in qua ratione virtute continetur conditio errorem excludens: tum etiam, quia si interdum materialiter erretur, nulla erit culpa, cum bona fide, & prudenti modo procedatur. Et pie credendum est, non permissurum Deum huiusmodi errorem, in hoc publico cultu. Quod si interdum videtur intercedere aliquis error, non tam est in substantia rei adoratæ, quam in aliqua conditione. Ut verbi gratia corpus ejusdem Sancti interdum in diversis locis esse existimatur, & in eis sollemniter honoratur: id tamen accidere potuit, vel quia in utroque loco est aliqua pars illius corporis, & a parte totum nominatum est. Ait enim Theodoret. lib. 8. ad Græcos, nullibi fere reperiri integrum alicujus Sancti corpus propter fidelium devotionem. Vel certe causa interdum esse potuit, quia Sancti fuerunt ejusdem nominis, & successu temporis utriusque reliquæ ejusdem personæ existimatae sunt, & propter nominis ambiguitatem, illi attributæ, qui majoris habetur gloria, & sanctitatis. Quod in capite Joannis Baptistæ suspicor accidisse. In diversis enim Ecclesiis esse dicitur: qui tamen error non tam est in substantia, quam in conditione rei adoratæ, satis est enim, ut sine errore certum sit illas esse alicujus Sancti reliquias.

Reliquiarum  
Sanctorum  
quoad  
absolutam  
& si-  
ne condi-  
tione a-  
dorari  
possint.

At vero, ut reliquæ privatim coli possint, sufficit privatam etiam testimonium virorum fide dignorum, vel alia ratio, aut conjectura ita probabilis, ut sufficiens sit ad prudens judicium ferendum. Neque enim in hoc actu major certitudo exigenda est, quam ad aliarum virtutum actus exercendos, & ideo tunc etiam non oportet conditionem aliquam explicare, quia proprie nullo est periculum erroris, ut explicatum est. Quando vero res est dubia, & incerta, tunc quidem abstinendum est a cultu, non tamen reliquæ conculcandæ sunt, & contemnendæ, sed separatim custodiendæ. Et per hæc patet responsio ad rationem dubitandi.

Ad exemplum vero respondetur, frequentius verum esse, quod in eo sumitur, ut docet Bonavent. in 3. d. 9. a. 1. q. 6. Marfil. qu. 8. a. 2. dub. 5. Quia veritas personæ, quæ in revelatione apparere videtur, difficilius cognoscitur, & ideo moraliter loquendo res est valde incerta, & quoad hoc non est simile illud exemplum. Si tamen bona fide aliquis procedat, & sufficientem faciat diligentiam ad discernendos spiritus, & tandem prudenter judicet revelationem esse a bono spiritu, potest simpliciter adorare sine periculo erroris, tum quia bona fide, & prudenter operatur: tum etiam, quia formaliter tota adoratio tendit ad personam vere sanctam: ad formam vero, seu speciem apparentem, solum

Y y 3 qua-

Constat  
tamen  
ergo, San-  
ctorum  
reliquias  
pietas  
qualis.



quatenus vel illa persona est, vel illam repræsentat.

**Dubium.** Ultimo tandem quæri potest, an liceat reliquias, quæ privatim possidentur, devotionis gratia secum ferre. Angelus enim verbo Reliquiæ negat argumento Capituli, Corpora, de consecr. dist. 1. ubi præcipitur, ut reliquæ de loco ad locum non transferantur sine Episcopi licentia. Cui addere possumus Conc. Brachar. tertium cap. 5. ubi reprehendit Episcopos, qui in solennitatibus martyrum ad Ecclesiam progressuri reliquias collo suo imponebāt. Respondetur tamen sine ulla dubitatione illud esse licitum, & pium, ut D. Tho. docet 2. 2. q. 96. a. 4. ad 3. Anton. 3. par. tit. 12. c. 8. Sylvest. & Armil. verbo Reliquiæ, & Navar. in Sum. ca. 11. n. 35. & piorum usus hoc satis confirmat. Ratio vero est, quia hoc non est per se malum, cum ex devotione fiat propter venerationem Sanctorum, & utilitatem fidelium, & nullam indecentiam, vel malitiā per se conjunctam habeat. Neque etiam est malum quia prohibitum. Nulla est enim lex Ecclesiastica, quæ hoc vetet. In illo enim capite Corpora, non est sermo de hac re, sed de translatione reliquiarum, ut per se constat. Concilium autem Bracharense reprehendit Episcopos, qui propter majorem fastum, & hominum gloriam id faciebant, ut super humeros Levitarum in sellulis portarentur. Unde infra subdit. *Quod si Episcopus reliquias per se deportare elegerit, non ipse a diaconibus in sellula vehatur, sed una cum populis progrediatur.*

Respon.  
Sancti  
reliquias  
privatim  
possellas  
secum de  
votionis  
gratia  
portare  
licitum,  
& pium

## DISPUTATIO LVI.

In tres sectiones distributa.

De usu & adoratione Crucis.

**Q**UONIAM D. Thom. de cruce specialiter differuit, ideo disputationem hanc superioribus adjungimus, quamvis ejus doctrina eadem fere futura sit. Eam tamen in ultimum locum reservavimus, quia duplex potest esse crucis consideratio. Prima quatenus est reliquia Christi, ejus tactu & sanguine consecrata, quæ solum habet locum in ea cruce, in qua Christus pependit, & in omnibus ejus partibus, etiam si in figura crucis non sint, extendi autem potest ad clavos, columnam, sepulcrum, & alias Christi reliquias. Secunda consideratio est per modum imaginis, quæ potissimum locum habet in omni cruce, quæ ex permanenti materia conficitur. Addi vero potest, tertia consideratio crucis, per modum ceremoniæ cujusdam, ut quando motu, seu actione successiva nos ipsos, seu res alias signo crucis, veluti quadam successiva imagine signamus, seu sanctificamus. De his igitur breviter dicendum est.

## SECTIO I.

An lignum crucis, in quo Christus pependit, sit adorandum latria.

**O**MISSIS hæreticorum sententiis, qui de cruce Christi nihil aliud, quam de cæteris reliquiis opinantur, dicendum est primo, lignum crucis, in qua Christus pependit, adorandum esse, idemque de spinis, clavis, aliisque reliquiis Christi sentiendum esse. Conclusio est de fide, ut ex supra dictis satis constat tanto evidentius, quanto plures sunt, majoresque causæ ad has reliquias venerandas. Primo, quia eis armis vicimus demones, nostramque salutem comparavimus in Christo, ut notavit Origen. hom. 8. in Josue, ad hanc rem accommodans illud ad Coloss. 1. *Pacificans per sanguinem crucis ejus, quæ in cælis & quæ in terra sunt*, & c. 2. *Spolians principatus*, usque ad illud, *affigens illud cruci*, & ad Eph. 2. *Ut reconciliet ambos in uno corpore Deo per crucem*. Secundo quia hæc crux fuit veluti sacrum altare, in quo Christus eruentum sacrificium obtulit, ut significatur ad Hebr. 7. Fuit etiam via, per quam Christus incedens, ad suam exaltationem pervenit, ut Jo. 3. & 12. & ad Philip. 2. significatur. Denique tactu carnis, & sanguinis Christi consecrata fuit. Unde Damasc. l. 4. c. 12. *Hoc lignum, inquit, venerandum, & ex tactu sancti corporis, & sanguinis sanctificatum, optima jure adorari debet, clavisque item, & lancea, & indumentum, ac præsepe; & ad crucem accommodat illud Ps. 131. Adorabimus in loco, ubi steterunt pedes ejus. Nam crucem ibi intelligi, argumentum, inquit, est id, quod sequitur, Surge Domine in requiem tuam: Comes enim crucis est Resurrectio.* Hieron. 1. 10. epist. 17. ad Marcell. ut migret in Jerusalem, nomine Paulæ, & Euloch circa med. *Venerabantur, inquit, Judæi propitiatorium: non ac tibi venerabilius videtur sepulcrum Christi: quod quotiescunque ingredimur, jacere in sindone cernimus Salvatorem.* Habet etiam multa ep. 13. ad Paulinum de institutione monachorum. Et in epitaphio Paulæ laudat illam, quod præsepe adoraverit. Quod etiam se fecisse affirmat apolog. 3. contra Ruffin. Idem docet Cyrill. Jerosol. ep. quadam ad Constantinum Imperat. & catech. 10. & 13. dicit totum mundum repletum fuisse particulis illius crucis ob devotionem. Chrysostom. hom. quod Christus sit Deus t. 5. *Tanta, inquit, veneratione lignum illud habetur, ut qui parum ex illo habere possunt, auro includant, & cervicibus imponant.* Idem de Inventione crucis homil. 84. in Joan. Gregor. l. 7. ep. 126. ad Reccaredum Hispaniæ regem crucem mittit auream particulam crucis lignæ includentem. Confirmant denique miracula per crucem facta: nunc sufficiant, quæ in inventione, & exaltatione crucis acciderunt. De quibus lege Ruffin. l. 1. cap. 7. & 8. Nicephor. l. 8. cap. 29. & Sever. Sulpit. l. 2. sacræ histor. post med. 1. tom. bibliot. sanct. Simonem Metaphr. in vita Helenæ.

Cruci, a  
liisque  
passionis  
Christi  
in signi  
bus ad  
ratio de  
b ta

*runt pedes ejus. Nam crucem ibi intelligi, argumentum, inquit, est id, quod sequitur, Surge Domine in requiem tuam: Comes enim crucis est Resurrectio.* Hieron. 1. 10. epist. 17. ad Marcell. ut migret in Jerusalem, nomine Paulæ, & Euloch circa med. *Venerabantur, inquit, Judæi propitiatorium: non ac tibi venerabilius videtur sepulcrum Christi: quod quotiescunque ingredimur, jacere in sindone cernimus Salvatorem.* Habet etiam multa ep. 13. ad Paulinum de institutione monachorum. Et in epitaphio Paulæ laudat illam, quod præsepe adoraverit. Quod etiam se fecisse affirmat apolog. 3. contra Ruffin. Idem docet Cyrill. Jerosol. ep. quadam ad Constantinum Imperat. & catech. 10. & 13. dicit totum mundum repletum fuisse particulis illius crucis ob devotionem. Chrysostom. hom. quod Christus sit Deus t. 5. *Tanta, inquit, veneratione lignum illud habetur, ut qui parum ex illo habere possunt, auro includant, & cervicibus imponant.* Idem de Inventione crucis homil. 84. in Joan. Gregor. l. 7. ep. 126. ad Reccaredum Hispaniæ regem crucem mittit auream particulam crucis lignæ includentem. Confirmant denique miracula per crucem facta: nunc sufficiant, quæ in inventione, & exaltatione crucis acciderunt. De quibus lege Ruffin. l. 1. cap. 7. & 8. Nicephor. l. 8. cap. 29. & Sever. Sulpit. l. 2. sacræ histor. post med. 1. tom. bibliot. sanct. Simonem Metaphr. in vita Helenæ.

Sed contra primo, quia filius, qui patrem amat, non solum non adorat, sed nec etiam libenter videt patibulum, aut gladium, quo pater interfectus, aut supplicio affectus fuit. Secundo solus contactus non est sufficiens adorationis fundamentum, aliā terra, aſina, imo & sacri-lega manus, quæ Christum percussit, adoranda esset. Adde etiam omnia, quæ Christus vidit, quia sicut videri est extrinseca denominatio: ita & tangi. Tertiō, esto adorari posset crux, quando Christus in ea actu pendebat: non vero separatione facta. Inquit enim August. serm. 58. de verbis Dom. *Purpuram conjunctam regi simul cum ipso adoro: si vero separetur, jam non meretur honorem regis.*

Argumentum primum recte dissolvit D. Thom. ar. 4. ad 1. Non enim adoramus crucem, ut illa usi sunt Judæi ad injuriam, & pœnam Christo inferendam, sed ut ab illo sanctificata est, eique gloriam, & exaltationem attulit, & eodem modo pius, & fidelis filius veneratur gladium, quo pater suus, non ut malefactor, sed ut innocens martyr occisus est, & per mortem ad æternam gloriam translatus.

Ad secundum respondetur, primo contactum Christi per se quidem sufficientem rationem adorationis esse: sæpe tamen non expedire uti hac adoratione, vel quia nō decet, vel quia res adoranda valde incerta est, vel cum aliis rebus necessario conjuncta, quæ ad communes usus humanos deputatæ sunt, præsertim vero manus illius, qui Christum percussit, adoranda non fuit, sed execranda, non solum quia tactus ille, ut fuit actio talis personæ, gravissimum peccatum fuit, sed etiam, quia erat membrum iniquissimæ personæ. Unde cum persona sit, quæ per se primo adoratur, non debuit pars illa adorari, ne in talem personam veneratio redundaret. Denique non est eadem ratio de alia extrinseca denominatione, quæ realem conjunctionem non requirit, ut est videre, quia ex illa nulla propria moralis habitudo resultat, neque illa res efficitur aliquo modo quasi propria Christi. In contactu vero, aliqua realis conjunctio intercedit, & quidam usus ad proprias actiones, & passionēs, & ideo non est similis ratio.

Ad tertium patebit ex solutione sequentis dubii, Dubitari enim potest de qualitate, & specie hujus adorationis. Nonnulli enim illam vocant, *Hyperdulam*. Ita loquitur D. Thom. in 3. dist. 9. q. 1. a. 2. quæstion. 4. Marfil. q. 8. a. 2. Henri. quodlib. 10. q. 6. Alii dicunt esse latriam perfectam, qua Christus ipse colitur. Ita loquitur D. Th. hic, quem omnes discipuli ejus sequuntur, & Anto. Cordubens. qui alios refert dicto lib. 1. q. Theol. q. 105.

Dicendum vero est, distinctionem supra in genere datam de reliquiis, ad crucem & alias Christi reliquias esse applicandam. Itaque si lignum crucis adoretur, ut mente, & cogitatione conjunctum ipsi Christo, adorandum est perfecto actu latriæ, qui per se primo ad Christum, concomitanter vero, & quasi per accidens ad lignum terminatur: & hoc modo locutus est D. Th. hic, & D. Hier. supra

Objecio.

Respon.

Dubium.

Respon.  
Adoratio  
crucis  
Christi  
debita  
qualis.



supra citatus dicens: *Quotiescunque sepulcrum Christi ingredimur, jacere in sindone cernimus Salvatorem*. Si vero hæc reliquæ adorentur ut tota materia adorationis, adoratio quidem erit respectiva propter excellentiam Christi: minus tamen perfecta, quam sit illa, quæ Christo propter se debetur. Et ita intelligitur dictum August. supra citatum. Et hanc fortasse vocavit D. Th. *Hyperduliam*. Quamquam revera ab eodem habitu procedat, quo Christus ipse colitur, juxta generale doctrinam supra traditam. Et hac fere distinctione quamvis diversis verbis utuntur Bonav. d. 9. a. 1. q. 4. & Richar. a. 2. q. 3.

Et juxta eandem optime intelligitur locus Ambrosii orat. de obitu Theodosii. ubi inter multa alia notatu digna, quæ de crucis adoratione tractat agens de Helena Constantinensi matre, sic inquit: *Invenit titulum, regem adoravit, non lignum, quia hic gentilis est error: sed adoravit illum, qui pendit in ligno*. Ubi loquitur de perfecta adoratione latræ, & absoluta, & de re per se primo adorata: non vero negat crucem concomitanter, vel respectively adorari posse. Unde infra subdit. *Sapiens Helena, quæ crucem in capite regum levavit, ut crux in regibus adoretur: Non insolentia ista, sed pietas est, cum deferuntur sacra redemptioni, & infra. Ecce & clavus in honore est, ferropedum ejus Reges inclinantur*.

## SECTIO II.

*Utrum crucis imago retinenda sit, & adoranda.*

**R**atio dubitandi esse potest, quia crux non repræsentat aliquam personam sacram, sed solum eam crucem, in qua Christus pendit; ergo non est in ea sufficiens ratio, ob quam adoretur. Aliæ etiam clavus, vel flagellum & similia adorari possent, quatenus repræsentant alias res similes, quibus Christus supplicio affectus est: imo quælibet ligni particula, quatenus repræsentare potest similem partem veræ crucis Christi, adoranda est. Propter hanc fortasse causam, præter hæreticos supra citatos, Ægidius Hispanus negavit crucem esse adorandam, qui propter hunc & alios errores Hispani damnatus est.

Dicendum est ergo, usum crucis per modum imaginis Christi crucifixi, quam Catholica Ecclesia semper tenuit, honestum, & religiosum esse. Hæc veritas de fide est, definita in VI. Syn. can. 73. VII. Syn. act. 7. VIII. Syn. can. 3. Quæ potissimum apostolica traditione fundata est, de qua legi potest Leo P. ser. 8. de passione, Iren. l. 1. contra hæres. c. 24. Tertul. in apolog. c. 16. Chrysost. ser. 1. & 2. de ador. crucis: optime Ambro. ser. 56. *Sicut navis*, inquit, *sine arbore, ita Ecclesia sine cruce stare non potest*, & infr. *Ubi signum crucis erigitur, statim & diaboli iniquitas effugatur*. Unde factum est, ut cum alicubi Evangelium de novo prædicatur, primum signum introductæ fidei, & expulsi idololatricæ, sit crucis erectio. Quod & nostris temporibus observari videmus, & tempore etiam Constantini Magni singulari Dei providentia factum legimus. Statim enim, ac Constantinus fidem accepit, Romanorum vexillum in Christianorum crucem mutavit, ut Nazian. refert orat. 3. n. 27. & Euf. l. 1. de vita Constantini. Sozomen. l. 1. hist. c. 4. Nicephor. l. 7. c. 37. 47. & 49. Adunt etiam Euseb. supra l. 9. hist. c. 9. & 10. & Niceph. supra l. 8. c. 3. idem signum crucis Constantino in cælo apparuisse, eumque securum de victoria contra Maxentium reddidisse, ideoque illud in fronte sua posuisse. Nec dissimile est, quod Prosper refert accidisse Arcadio Imperatori lib. de prædictionibus & promissionibus Dei p. 1. c. 34. ubi inquit propter hanc causam Arcadium aureos nummos cruce signari præcepisse. Confirmatur hæc traditio. Quia constat ex historiis, ante mille ducentos annos, fuisse in Ecclesia consuetudinem deferendi in publicis processionibus crucem argenteam inter cereos accensos. Quam consuetudinem defendit Cyril. l. 6. contra Juli. circa princ. & referunt Soz. l. 8. c. 18. & Socr. l. 6. c. 8. Denique ante Passionem Christi data sunt signa, & figuræ crucis ejus, non solum in Scriptura sacra, ut per se constat, & late congerit Jonas Aurelianus. l. 1. de Imagin. in fine, & l. 2. in princip. sed etiam inter Ethnicos, ut de Ægyptiis referunt Nicephor. l. 12. hist. c. 26. & Ruffin. l. 2. c. 29. quid ergo mirum, quod Ecclesia Catholica imaginem crucis semper retineat? Præsertim cum Matth. 24. de die Judicii legamus in eo appariturum signum filii

Crucis erectio si  
gnum expulsi ido-  
latricæ.

Crucis dignitas &  
veneratio

hominis, id est, crucem, ut Christi vexillum ab omnibus adorandum, ut exponit Chrysost. hom. 87. apud Matth. Qui dicit futuram illam crucem sole splendidiorem, obscuratur enim sol, & crux apparet. Quæ fuit etiam sententia Damasceni l. 4. de fide c. 12. & 17. & or. 1. de imagin. August. serm. 130. de temp. circa finem, Hippolyti orat. de consummatione mundi tom. 7. biblioth. Hieron. & aliorum, quos refert Waldens. t. 3. de sacramental. c. 158. ubi ex Chrysost. homil. de cruce, & latrone, dicit illam crucem, quæ in die Judicii apparebit, futuram esse illam eandem, in qua Christus pendit, quod pium est, sed incertum.

Ex quibus satis constat, hoc crucis signum merito in Ecclesia adorari, est enim res sacra, & ad divinum cultum spectans. Propter quod merito Sedulius cecinit: *Neve quis ignoret speciem crucis esse colendam*. Et Rupert. Abb. lib. 6. de divin. Offic. c. 9. & 21. *Adoramus* (inquit) *crucem fidei præsidium, pacis vexillum*. Unde quod ad modum adorationis attinet, nulla difficultas est, quin per modum rei sacræ ad honorem Christi pertinentis, coli possit adoratione respectiva & secundaria, sicut de aliis rebus sacris, & imaginibus explicatum est. Deinde si in ipsa cruce imago Christi depicta, seu affixa sit, non est dubium, quin adorari possit cultu latræ, vel potius coadorari simul cum ipso Christo. Denique etiam si nulla alia hominis figura, sed tantum crucis in illa appareat, eodem modo & respectu adorari potest. Quia hujusmodi crux etiam per se sola repræsentat non solum aliam crucem, sed etiam Christum ipsum per modum crucis extensum. Et in hoc (ut ad rationem dubitandi in principio positam respondeamus) magna differentia est inter crucem, & clavum, lanceam, &c. quia sola crux est figura ipsius Christi, & ideo imago crucis, quæ etiam est imago Christi, adorabilis est, non vero imago clavi, aut lanceæ, ut D. Thom. hic art. 4. ad 3. docuit. Et Athanas. seu auctor quæst. ad Antiochum quæst. 16. ubi aliam rationem indicat, scilicet, quia crux facile ostendi potest adorari propter figuram, non propter materiam. Quia si duæ partes ejus separantur, non adorantur. Quod tamen in lancea, aut clavo, non tamen facile constat. Quæ ratio non magni ponderis esse videtur.

Adoratio crucis qualis

Ex differentia vero, quam D. Th. posuit, oritur alia, quæ ad rem maxime pertinet: nam inter Christianos propria figura crucis semper habet usum sacrum, & religiosum: clavus autem, & lancea, & aliæ res similes ordinarie non ad significandum, sed ad humanos usus assumentur. Unde fit, si hæc interdum depingantur ad Passionem Christi repræsentandam, veneratione digna esse posse, quia habent sacrum usum, & rationem imaginis sacræ. Quando autem hoc modo repræsentant, ex circumstantiis, & modo imaginis colligendum est.

Differentia quoad cultum inter crucem & reliqua passionis Christi insignia.

Ex quibus etiam colligitur superstitiose errasse Armenos, qui crucem non adorabant, nisi prius in ea clavum infingerent, eamque baptizarent, & postea alterum lignum ab altero separarent, & separatim adorarent. Hoc enim totum superstitiosum est. Quia neque clavi, neque baptismus, necessaria sunt ad rationem imaginis, & si separes unum lignum ab alio, jam non manet ratio imaginis. De quo vide Euthy. 2. p. Panopl. tit. 20. circa med. & S. Nicon. in lib. de religione Armenor. tom. 1. Bibliot. sanct. & plura apud Alan. dialog. 4. præcipue c. 11. ubi explicat legem Theodosii, qui prohibuit, ne crux depingeretur in pavimento.

Armenorum in crucis cultu superstitio.

## SECTIO III.

*Utrum liceat uti signo crucis in modum ceremonie sacræ.*

**R**espondetur, hoc crucis signum, ejusque usum multis rationibus religiosum esse, fidelibusque utilissimum. Hæc est certa veritas fidei, quam universalis Ecclesiæ consensus, & ratio fide illustrata evidenter ostendit. Primo enim usus signi crucis quædam est Christianæ fidei professio. Unde Aug. Pl. 141. exponens illa verba, *In via hac, qua ambulabam: Usque adeo, inquit, de cruce non erubescam, ut non occulto loco, sed in fronte eam ponam: insultet ille crucifixo Christo, videam ego in frontibus Regum crucem Christi*. Proferimus ergo hoc signo, Christi crucem amplecti, & illius virtute sanctificari, muniri, & de-

In crucis signo, & uti quædam utilitas, & religio.



fendi. Secundo, hinc factum est, ut in omnium sacramentorum administratione, signum crucis adhibeatur; ut Dionys. tradit c. 4. 5. & 6. de Ecclesiastica Hierarch. & August. ferm. 181. de tempore cap. 3.

Tertio virtutem habet contra daemones, ut Chrysost. tradit hom. 21. ad Popul. *Crucem*, inquit, *fronti imprimere, sic enim nec ipse diabolus ledere poterit.* Idem hom. 55. Matt. unde Hier. ep. 1. ad Eliod. *Intus*, inquit, *est hostis, expedit rudentes, vela suspendite, crux antennæ figatur in frontibus.* Et Lactant. l. 4. de vera sapientia c. 27. dicit, hoc signum terrori esse daemonibus, eosque de corporibus oblesorum fugare. Unde Nazian orat. 3. n. 19. & Niceph. l. 10. hist. c. 3. refert, cum Julianus apostata quibusdam daemonum terroribus afficeretur, ex veteri consuetudine contra suam perfidiam, & voluntatem, signo crucis se signasse, daemonesque fugavisse. Ex quo intelligi potest hanc crucis efficacitatem, non in sola devotione, & merito operantis, sed potissimum in divina ordinatione propter meritum Christi, ejusque honorem fundatam esse. Compelluntur enim divino imperio hoc signum revereri, & ad illius præsentiam contremiscere, nec solum fugiunt, quia illud odio habent, ut Gentiles obiciebant apud Lactant. loco cit. sed potius ideo odio habent, quia virtutem ejus sentiunt, ut eleganter docuit Aug. l. 83. q. 79. Ubi de sacramentis, & signis sacris Christianorum in genere loquens inquit: *Nec mirum est, quod hæc signa valent, cum ab eis* (id est a malis Christianis) *adhibentur: quando etiam, cum usurpantur ab extraneis, qui omnino suum nomen ad istam militiam non dederunt, propter honorem tamen excellentissimi Imperatoris valent.*

Crucis signum terroris daemones.

Crux Christi armatura fidelium.

Eadem ratione, & modo valet hoc signum crucis ad impetrandum aliquid a Deo. In cujus figuram Moyses oratio tunc a Deo populū victoriam impetrabat, quando in crucis figura manus ad cælum levabat. Ita enim interpretantur locum Exod. 17. Naz. orat. 6. coram Greg. Nyss. Prospil. de prædicationibus & promissionibus Dei, par. 1. c. ult. Aug. in orat. de quinque hæresibus c. 2. Chrys. orat. 2. ex decem Græcis, quæ nondum Latine factæ sunt. Unde S. Martialis. ep. ad Burdeg. l. 10. r. Bibl. sanct. *Crucem*, inquit, *semper mente, ore, & signo tenete, crux enim Domini armatura nostra est.*

Quinto hinc factum est, ut ex bonorum omnium fidelium consuetudine, signum crucis ad suas actiones præmittant. Sic Cyrill. Jerosol. catech. 4. & 13. *In omni negotio, comedens, bibens etiam signa te in fronte.* Hier. ep. 22. ad Eustoch. de custodia Virginitat. *Ad omnem actum, ad omnem incessum manus pingat crucem.* Similia habet Tert. l. de Corona militis c. 4. Orig. l. 3. in Job. col. 12. dicit: *Cibum & potum signo crucis esse benedicenda.* Hanc denique inter traditiones non scriptas refert Basil. lib. de Spirit. S. c. 27. & Anastas. Nicæn. lib. 4. sacra Script. q. 89. tom. 6. Biblio. eamque contra Julianum defendit Cyrill. lib. 6. circa principium.

Sexto denique reperiri possunt in hoc signo omnes imaginum utilitates, conservat enim passionis Christi memoriam, fiduciam indicat, est grati animi significatio, & ostendit, qui illo utitur, se in cruce Christi gloriari. Et eadem est de cæteris utilitatibus ratio: Ex quibus facile intelligitur, hoc signum esse venerabile, & adoratione dignum, habet enim usum, & significationem sacram. Nec refert, quod in materia, seu actione transeunti constituitur, quia sola diversitas materiæ, quando figura, & significatio est eadem, adorationem non impedit. Unde modus hujus adorationis juxta ea, quæ de imaginibus, & de nominibus sacris diximus, explicandus est.

## QUÆSTIO XXVI.

De eo, quod Christus Mediator Dei & hominum dicitur, in duos articulos divisa.

**D**Einde considerandum est de hoc, quod dicitur Christus Dei & hominum mediator. Et circa hoc quaeruntur duo.

Primo utrum esse mediatorem Dei & hominum, sit proprium Christo.

Secundo, utrum hoc conveniat ei secundum humanam naturam.

Hanc quæst. addidit hoc loco D. Th. solum, ut hanc mediatoris appellationem explicaret. Breviter

autem eam expedit, quia licet nomen mediator sit: res tamen, quæ per illud significatur, non est alia ab illis, quæ in superioribus explicata sunt. Et ideo de re hac specialem disputationem non instituemus, sed solum D. Th. litteram explicando, propriam hujus vocis significationem, & usum ostendemus.

## ARTICULUS I.

Utrum esse mediatorem Dei & hominum, sit proprium Christo.

**A**d primum sic proceditur. Videtur, quod esse mediator Dei, & hominum, non sit proprium Christo. Sicut enim sacerdos, ita & Propheta videtur esse mediator inter Deum & homines, secundum illud Deut. 5. Ego illo tempore sequester fui, & medius inter Deum & vos. Sed esse Prophetam, & Sacerdotem, non est proprium Christo. Ergo nec esse mediatorem.

2. Præterea. Illud quod convenit Angelis bonis & malis, non potest dici esse proprium Christo. Sed esse medium inter Deum & homines convenit Angelis bonis, ut Dion. dicit, 4. c. de Div. nom. \*convenit etiam Angelis malis, id est, daemones habent enim quædam communia cum Deo, scilicet, immortalitatem, quædam cum hominibus, scilicet, quod sunt animi passivi, & per consequens miseri: ut patet per August. in 9. de Civit. Dei. Ergo esse mediatorem Dei, & hominum non est proprium Christo.

3. Præterea. Ad officium mediatoris pertinet interpellare ad unum eorum inter quos est mediator pro altero. Sed Spiritus S. sicut dicitur Rom. 8. Interpellat pro nobis ad Deum gemitibus inenarrabilibus. Ergo Spiritus S. est mediator inter Deum & homines. Non ergo est proprium Christo.

Sed contra est, quod dicitur 1. ad Timoth. 2. Unus est mediator Dei & hominum, homo Jesus Christus.

b Respondeo dicendum, quod ad mediatoris officium proprie pertinet, conjungere & unire eos inter quos est mediator. Nam extrema uniuntur in medio. Unire autem homines Deo perfecte quidem convenit Christo, per quem homines sunt reconciliati Deo, secundum illud 2. ad Cor. 5. Deus erat in Christo mundum reconcilians sibi. Et ideo solus Christus est perfectus Dei & hominum mediator, in quantum per suam mortem humanum genus Deo reconciliavit. Unde cum Apostolus dixisset Mediator Dei & hominum homo Christus Jesus, subiungit, Qui dedit semetipsum redemptionem pro omnibus. Nihil tamen prohibet aliquos alios secundum quid dici mediatores inter Deum & homines: prout scilicet comparantur ad unionem hominum cum Deo dispositive, vel ministerialiter.

Ad primum ergo dicendum, quod propheta & Sacerdotes veteris Testamenti, dicitur sunt mediatores inter Deum & homines dispositive, & ministerialiter, in quantum scilicet prænucciabant, & præfigurabant verum, & perfectum Dei, & hominum mediatorem, Sacerdotes vero novi Testamenti possunt dici mediatores Dei & hominum, in quantum sunt ministri veri Mediatoris, vice ipsius salutaria sacramenta hominibus exhibentes.

Ad secundum dicendum, quod Angeli boni, ut August. dicit in 9. de Civ. Dei, \* non recte possunt dici mediatores inter Deum & homines. Cum enim utrumque habeant commune cum Deo, & beatitudinem, & immortalitatem, nihil autem horum cum hominibus miseriis, & mortalibus, quomodo non potius remoti sunt ab hominibus, Deoque conjuncti, quam inter utrosque medii constituti. Dion. \* tamen dicit eos esse medios, quia secundum gradum naturæ sunt infra Deum, & supra homines constituti: & mediatoris officium exercent, non quod principaliter, & perfecte, sed ministerialiter, & dispositive. Unde Matt. 4. dicitur, quod acceperunt Angeli, & ministrabant ei, scil. Christo, Daemones autem habent communem cum Deo immortalitatem, cum hominibus autem miseriam, ad hoc enim se interponit medium demon immortalis & miser, ut ad immortalitatem beatam transire non sinat, sed perducat ad miseriam mortalem. Unde est sicut malus medius, qui separat amicos. Christus autem habuit communem cum Deo beatitudinem, cum hominibus mortalitatem, & ideo ad hoc se interposuit medium, ut mortalitate transacta, & ex mortuis faceret immortales (quod in resurgendo monstravit) & ex miseriis beatos, unde nunquam ipse decessit. Et ideo ipse est bonus mediator, qui reconciliat inimicos.

Ad tertium dicendum, quod Spiritus S. cum sit per omnia

110.  
3. d. 9. a. 8  
4. 5. Ec  
puf 3. ap.  
22. l. 6  
puf. 60. c.  
18. Et Gal.  
5. l. 7.  
in fin.

C. 5. non  
mediu  
recula  
pinc.

Lib. 9. c. 8.  
tom. 5.

Lib. 9. &  
14. c. 15. a  
medio  
tom 5.

Loco ci-  
tato in  
arg.



Q. 10. 1. 1.  
Implicite  
habetur  
in glos.  
ord. ibi.

*nia Deo equalis, non potest dici medius, vel mediator inter Deum & homines, sed solus Christus, qui licet secundum divinitatem equalis sit Patri, tamen secundum humanitatem minor est Patre, ut supra dictum est. Unde super illud ad Galat. 3. Christus est mediator, dicit Gloss. Non pater, nec Spiritus S. Dicitur autem Spiritus S. interpellare pro nobis, quia ipse interpellare nos facit.*

## COMMENTARIUS.

**D**uo in hoc titulo continentur. alterum est, an Christus sit mediator; alterum, an præter illum sint alii mediatores. Indicat autem S. Thom. distinctionem mediatoris, scilicet perfective, & dispositive seu ministerialiter. Et respondet, solum Christum esse mediatorem perfectum, seu perfective; præter eum vero, esse alios ministros, qui dispositive, seu imperfecte, & per quamdam participationem dici possunt mediatores.

**P**ro cuius doctrinæ intelligentia advertendum est, nomen mediatoris in propria significatione, qua D. Th. hic usus est, esse nomen non substantiæ, sed muneris & officii. Proprie enim mediator dicitur, qui inter duas personas intercedit, ut eas aliquo modo conjungat, vel in aliquo pacto, aut negotio consentientes efficiat. Interdum vero usurpatur nomen mediatoris ad significandum substantiale medium, seu vinculum inter duas, & extreme distantes substantias. Et hoc modo dici potest Christus substantialis mediator Dei, & hominum, quia in eo humana, & divina natura substantialiter conjunctæ sunt: ut loquitur Chrysostomus hom. 7. in 1. ep. ad Timotheum. & Ambrosius in eadem epistola c. 2. exponens illa verba: *Unus Deus, unus mediator Dei, & hominum, homo Christus Jesus*. Et ad eundem modum Augustinus 1. 9. de Civitate c. 15. dicit Christum fuisse medium, non solum ratione substantiæ, quia fuit Deus, & homo; sed etiam ratione status, quia simul beatus, & mortalis fuit. Unde ibidem subdit, bonos Angelos non esse medios inter nos, & Deum, quia immortales sunt, & beati; Angelos autem malos quodammodo esse medios, quia immortales sunt, in quo cum Deo conveniunt, & miseri, ac penitus subiecti, in quo nobiscum aliquo modo communicant. Quanquam alia ratione considerando, & ampliando hanc mediatoris, seu potius medii significationem, Angeli beati etiam dici possunt mediatores inter nos, & Deum, quia natura inferiores sunt eo, nobis autem superiores, & cum illo communem habent naturam spiritus, & incorruptionis, nobiscum vero rationem creaturæ indigentis divina gratia, & influxu, ut hic D. Th. ad 2. docuit exponens Dionysium 4. c. de divin. nomin.

Omissa vero hac substantiæ mediatione, quæ impropria est, munus mediatoris (si generatim loquamur) latissime patet: proprie tamen sic significat eum, qui inter personas dissidentes intercedit, ut eas inter se conciliet. Quod variis modis fieri potest, scilicet rogando, intercedendo, conditiones seu leges amicitiae proponendo, ac denique satisfaciendo parti læsæ, & ipsam reconciliationem, & amicitiam perficiendo.

Ex quibus intelligitur primo, solum Christum esse perfectum mediatorem inter Deum, & homines. Dissidebant enim inter se, & tota natura humana erat Deo invisa, & inimica; ipse vero pro i. la Deo satisfecit, & quantum in ipso est, inimicitias abstulit, amicitiamque perfecit; & hic est sensus Pauli 1. Tim. 2. dicentis, Christum esse unicum mediatorem Dei, & hominum: ut recte D. Th. hic exponit, & idem intendunt Chrysostomus & Ambrosius. & alii expostores in illum locum. Quamquam, quia ad exercendum hoc perfecto modo mediatoris munus necessarium fuit humanam, & divinam naturam in se substantialiter copulare, ideo utramque rationem mediatoris, scilicet substantiæ, & officio d. Patres inter se conjungunt, & alteram ex altera pendere docent. Et eodem fere modo loquitur Augustinus cit. loco, & Fulgentius de Fide ad Pet. c. 2. & Cyrillus dial. 1. de Trin. non longe a principio, clarius 1. 12. Thesaur. c. 10. Epiphanius in Ancor. Hilar. 1. 9. de Trin. in princip.

Unde etiam constat hanc rationem, vel munus mediatoris idem omnino esse in presenti materia cum munere Redemptoris, quod in Christum perfectissime convenire, ipsiusque proprium esse, supra satis ostensum est: cum de Christi satisfactione, & merito ageremus. Et ideo plura hoc loco addere non est necesse. Et ad hoc munus etiam mediatoris spectant, quæ de Christi oratione, & pro nobis intercessione diximus. Nam in hoc etiam perfectissimam rationem mediatoris habuit: *Accedit enim*

*per semetipsum ad Deum ad interpellandum pro nobis*. Huc denique spectant, quæ de illius sacerdotio, & potestate ad ferendas leges diximus. Nam quatenus summus sacerdos est, pro hominibus est constitutus in iis, quæ sunt ad Deum, quatenus vero est legislator, proposuit nobis conditiones pacis, & fœderis, ac media necessaria, ut amicitiam cum Deo ineamus: propter quod Malac. 3. dicitur *Angelus testamenti*. Et ad Heb. 9. & 12. *Mediator novi testamenti* appellatur.

Secundo colligitur ex dictis, quanquam hæc perfecta ratio mediatoris Christi sit propria, quamdam tamē participationem ejus, seu mysterium tam Angelis, quam hominibus communicari. Et hoc modo alios etiam posse mediatores appellari. Nam sicut Christus est *lux vera, quæ illuminat omnem hominem* & nihilominus ipse dixit discipulis suis: *vos estis lux mundi*; & sicut ille est pastor bonus & verus magister, & tamen alios constituit Doctores, & Pastores: ita ipse est mediator perfectus, & nihilominus alios vult esse mediatores, vel ut Paulus vocat *adiutores*. 1. Cor. 3. Hoc igitur modo Angeli sancti dici possunt mediatores inter nos, & Deum. Primo quidem, quia pro nobis orant, nostrasque orationes Deo offerunt. Secundo, quia nos custodiunt, & a malo avertunt, & ad bonum aliquo modo disponunt, ut constat ex c. Tobiae 12. Daniel. 10. Ps. 90. Zach. 1. Matth. 18. Apo. 8. & ita loquitur Dion. 4. c. de divin. nomin. Deinde Sancti etiam beati, & cum Christo regnantes, possunt aliquo modo dici mediatores nostri, quia pro nobis orant, & intercedunt, nostrasque orationes Deo representant, juxta illud Apo. 5. *Habentes phialas aureas, plenas odorum mentis, quæ sunt orationes Sanctorum*. De qua re, quoniam propriam disputationem requirit, alius erit commodior dicendi locus.

Solum est hic observanda differentia inter Christum, & alios Dei deprecatores. Nam ipse per seipsum accedit, alii per ipsum, ejusque merito nixi, & fundati: *quia nemo venit ad Patrem nisi per me ipsum*. Jo. 4. nec petere debet, nisi in nomine ejus, Jo. 17. Et propterea dixit Bernardus in ser. super illa verba: *Signum magnum apparuit in cælo*, esse Virginem mediatricem, ad mediatorem ipsum. Denique sacerdotes, & ministri Christi, dici possunt aliquo modo mediatores, quia intercedunt inter Deum & populum, & homines disponunt, eisque applicant Christi redemptionem tanquam mysteriorum Dei dispensatores, & hoc modo Moyses dicitur *medius inter Deum & populum*, Deu. 5. ut hic exponit D. Th. ad 1. & eodem modo dicitur ad Gal. 3. *Lex data per Angelos in manu mediatoris*, scilicet Moysis, ut sentit Cyrillus Alex. 1. 13. Theoph. c. 10. indicat. Greg. Naz. orat. 6. coram Greg. Nyss. Et juxta hæc interpretandus est Augustinus 2. l. contra Parmen. c. 8. ubi negat Paulum, vel Apostolos esse mediatores, sed solum Christum. Intelligit enim de mediatore perfecto: non excludit tamen ministros, qui dum pro Christo legatione funguntur, ut homines Deo reconcilient. 2. ad Cor. 5. secundarii seu ministeriales mediatores dici possunt, ut diserte docuit Cyrillus Alex. 1. 12. Theoph. c. 10. Et ex his locutiones etiam argumentorum relinquuntur expositæ.

## ARTICULUS II.

*Utrum Christus secundum quod homo, sit mediator Dei & hominum.*

**A**d secundum sic proceditur. Videtur, quod Christus non sit mediator Dei, & hominum, secundum quod homo. Dicit enim Augustinus in lib. cont. Felicianum: *Una est Christi persona, ne sit non unus Christus, non una substantia, nec mediatoris dispensatione submotæ, aut Dei tantum dicatur, aut hominis filius; sed non est Dei & hominis filius secundum quod homo, sed simul secundum quod Deus & homo. Ergo neque dicendum est, quod sit mediator Dei & hominum solum secundum quod homo.*

2. Præterea, sicut Christus in quantum est Deus convenit cum Patre & Spiritu Sancto, ita in quantum est homo convenit cum hominibus. Sed propter hoc, quod in quantum est Deus, convenit cum Patre & Spiritu Sancto, non potest dici mediator, in quantum est Deus: quia super illud 1. ad Timotheum. 2. *Mediator Dei & hominum*, &c. dicit Glossa. *In quantum est Verbum non medius est: quia æqualis est Deo, & Deus apud Deum, & simul unus Deus*. Ergo etiam in quantum est homo, potest dici mediator pro-

pro-



propter convenientiam, quam cum hominibus habet.

3. Præterea, Christus dicitur mediator in quantum reconciliavit nos Deo: quod quidem fecit auferendo peccatum, quod nos separabat a Deo. Sed auferre peccatum convenit Christo non in quantum est homo, sed in quantum est Deus. Ergo Christus in quantum est homo, non est mediator, sed in quantum est Deus.

Sed contra est, quod Aug. dicit in l. 9. de Civ. Dei. Non ob hoc mediator est Christus, quia est Verbum: maxime quippe immortale, & maxime beatū Verbum longe est a mortalibus miseris: sed mediator est secundū quod homo,

a Respondeo dicendum, quod in mediatore duo possumus considerare. Primo quidem rationem mediū: secundo officium conjungendi. Est autem de ratione mediū, quod distet ab utroque extremorum: conjungit autem mediator per hoc, quod ea, quæ unius sunt, defert ad alterum. Neutrū autē horum potest convenire Christo, secundū quod Deus, sed solum secundum quod homo. Nam secundum quod Deus, non differt a Patre & Spiritu S. in natura & potestate dominii. Nec etiam Pater, & Spiritus S. aliquid habent, quod non sit filii: ut sic possit id, quod est Patris vel Spiritus S. quasi quod est aliorum, ad alios deferre. Sed utrumque convenit ei, in quantum est homo: quia secundum quod est homo, distat & a Deo in natura, & ab hominibus in dignitate & gratia & glorie. In quantum etiam est homo, convenit ei conjungere homines Deo, præcepta, & dona Dei, hominibus exhibendo, & pro hominibus Deo satisfaciendo, & interpellando. Et ideo verissime dicitur mediator, secundum quod homo.

b Ad primum ergo dicendum, quod si subtrahatur divinitas a Christo, subtrahetur per consequens ab eo singularis plenitudo gratiarum, quæ convenit ei, in quantum est unigenitus a Patre: ut dicitur Jo. 2. Ex qua quidem plenitudine habet, ut sit super omnes homines constitutus, & propinquius ad Deum accedens.

Ad secundum dicendum, quod Christus secundum quod Deus, est per omnia æqualis Patri: sed etiam in humana natura excedit alios homines. Et ideo secundum quod homo, potest esse mediator, non autem secundum quod Deus.

Ad tertium dicendum, quod licet auctoritative peccatum auferre conveniat Christo secundum quod est Deus, tamen satisfacere pro peccato humani generis convenit ei secundum quod est homo. Et secundum hoc dicitur Dei & hominum mediator.

#### COMENTARIUS.

Respondet D. Th. Christum non posse dici mediatorem ut Deum, sed ut hominem, quod satis dilucide in art. probat. In cujus expositione plura hoc loco dicere non oportet, nisi corrigendi essent hæretici hujus temporis, qui imperite satis de Christo mediatore loquuntur. Quidam enim ex eis affirmant humanitatem fuisse mediatricem. Alii divinitati, vel Christo, ut Deo hoc munus tribuunt: ut referunt Canis. l. 1. de corruptel. verb. Dei in proemio, & Robert. Bell. to. 1. contr. l. 1. de Christo mediatore, ubi fufe contra hos hæreticos disputat. Si tamen præ oculis habeantur principia supra posita qu. 16. de communicatione idiomatum, non oportebit hoc loco immorari, sed veras propositiones colligere, quæ ex dictis principiis facile elici possunt.

Primo ergo dicendum est, hunc hominem Christum esse mediatorem Dei, & hominum. Hæc est de fide, ut patet ex d. art. præc. & habetur expresse 1. ad Tim. 2.

Secundo, hinc sequitur absolute, & simpliciter concedi posse, & debere Verbum, & Deum esse mediatorem Dei, & hominum: quia quod absolute dicitur de homine Christo, dicitur per communicationem idiomatum de Verbo & Deo præsertim, ubi nihil est, quod repugnet, ut revera contingit in hoc prædicato, Mediator. Denique Verbum & Deus absolute dicitur Redemptor, & Pontifex noster, & pro nobis suum sanguinem effudisse, ut in superioribus sæpe dictum est, & satis expresse habetur Act. 22. 1. ad Cor. 2. ad Philip. 2.

Tertio dicendum est, eum, qui est mediator, & exercuit opera mediatoris, esse Deum hominem, ita ut principium quod talium operum sit Deus, seu hic homo, formale autem principium quo exercuit opera mediatoris, sit humanitas. Hæc est mens D. Th. hic & omnium Theol. in 3.

dist. 19. & Aug. locis statim citandis. Et probatur facile prior pars, nam in Christo tantum est una persona divina, quæ est Deus & homo, sed esse mediatorem est proprium munus personæ, quia illius est operari tanquam principium quod. Deinde supra variis locis, præsertim q. 1. art. 2. late ostensum est, non potuisse Christum esse perfectum Redemptorem, & satisfactorem, nisi esset divina persona, a qua valor satisfactionis, & perfecta iustitia originē traxit; sed hoc idem est munus perfecti mediatoris; ergo, Altera vero pars probatur præter rationem D. Th. quia actiones mediatoris, quæ sunt mereri, satisfacere, sacrificium offerre, interpellare, dicunt habitudinem ad personam superioris naturæ, & voluntatis: ergo formale principium talium operationum non potest esse divinitas, ut in superioribus etiam ostensum est: ergo formale principium, per quod convenit Christo munus mediatoris, non potest esse divinitas, sed humanitas.

Quarto, consequenter fit, neque divinitatem, neque humanitatem in abstracto posse dici mediatorem seu mediatricem. Probatur, quia neque divinitas, neque humanitas meretur, nec satisfacit. Item neutra illarum supponit pro persona, quæ est Deus & homo: humanitas præterea per se non est sufficiens ad munus mediatoris, quia per se non potest satisfacere Deo de rigore iustitiæ, cum ex vi suæ significationis dignitatem personæ divinæ non includat: divinitas vero nec proprie est principium quod, nec quo operum mediatoris: ergo in rigore, & proprietate sermonis non potest dici mediator.

Quinto, Deus, aut Verbum, in quantum Deus non potest dici mediator, ut recte hic D. Th. docet cum Aug. l. 1. de conf. c. 43. & ser. 11. de verbis Apostoli, & l. 2. de gratia Christ. c. 28. Quibus locis ad hoc comprobandum ponderat, ideo Paul. 1. ad Tim. 2. dixisse: *Unus mediator Dei, & hominum homo Christus Jesus*, ut indicaret Christum non Deum, sed ut hominem esse mediatorem. Et ratio ex dictis est aperta: nam quæ conveniunt Christo per humanam naturam, non possunt dici de Christo, aut Deo cum reduplicatione, seu determinatione divinitatis, quia hæc ipsa reduplicatio contrarium significat, scilicet, tale prædicatum in divinitate, seu per divinitatem ut per formam Christo convenire, ut in dicta q. 16. ostensum est.

Sexto hinc concluditur, Christum ut hominem, vel ut hunc hominem, includendo hoc suppositum in humanitate subsistens, esse mediatorem. Quod ex dictis satis constat.

b Indicat autem D. Th. in solut. ad 1. breve dubium, scilicet an concedi possit, Christum in quantum Deum hominem, esse mediatorem. Et non respondet in forma, sed solum ait, cum Christus in quantum homo dicitur esse mediator, non excludi consortium divinitatis ab humana natura, quia alias excluderetur gratia unionis, ratione cujus humanitas habuit, ut potuerit esse principium operationum mediatoris. Ex hac vero doctrina colligitur propositionem illam habere convenientem sensum, & esse concedendam. Quia non est sensus illius, divinitatem, & humanitatem esse formale principium harum operationum, sed dignitatem Dei, & naturam hominis necessariam fuisse, simulque convenisse ad munus, & opera perfecti mediatoris: unamquamque tamen modo sibi proportionato, naturam ut formale principium satisfactionis, & meriti: personam vero ut radicem, & fontem infiniti valoris, & dignitatis talis satisfactionis, & meriti in perfecto mediatore necessari. Quo sensu dixit Aug. hom. de ovibus c. 12. in to. 9. *Mediator Dei & hominum, quia Deus cum Patre, homo cum hominibus, non mediator homo præter deitatem, non mediator Deus præter humanitatem: divinitas sine humanitate non est mediatrice, neque humanitas sine divinitate, sed inter humanitatem solam, & divinitatem solam, mediatrice est humana divinitas, & divina humanitas*. Quæ posteriora verba minus propria sunt, & per priora sunt explicanda, abstractis enim vocibus, pro concretis utitur. Et propter eandem causam dixit Leo Papa: *Si non esset Deus, non afferret remedium, &c.* Quæ cum multis aliis late supra tractavimus q. 1. art. 2. Hæc igitur de Incarnatione ad incarnati Verbi, & augustissimæ matris ejus gloriam dicta sint.

Dubium.  
Respons.



# INDEX LOCORUM SACRÆ SCRIPTURÆ,

Quæ hic explicantur, cum brevi ipsorum ex Commentatore  
desumpta expositione.

*Primus numerus caput, secundus versum capituli designat. Numerus vero prior  
fini adhibitus paginam, posterior columnam indicat.*

## Genesis.

1. 1. **I**n principio creavit Helohim, id est, dii &c. *Sanctissime Trinitatis mysterium nomine plurali designatur.* 2.2
6. 12. Omnis quippe caro, scilicet, omnis homo, corruerat viam suam. 11.2
14. 18. Melchisedech proferens panem, &c. illo facto obumbravit Eucharistie sacramentum, nec solum in refectioem corporalem panem & vinum obtulit, sed in sacrificium gratiarum ætinnis pro victoria Abrabæ: & defenditur vulgata lectio. 601.2
15. 14. Et subiicient eos servituti, & affligent eos quadringentis annis: significat omnia quadringentis annis terminanda. 105.1
22. 5. Postquam adoraverimus, revertemur ad vos, id est, postquam sacrificium obtulerimus. 659.1
23. 6. Princeps Dei, id est, Rex magnus & insignis. 602.2
28. 21. Si fuerit Dominus meus mecum, &c. Erit mihi Dominus in Deum, id est, ipsum colam & venerabor ut Dominum: nullus enim ita recognoscere potest Deum, quin etiam ipsum ut Dominum profiteatur, seque servum ejus. 576.1
29. 28. Et hebdomada transacta, Rachel duxit uxorem: loquitur de annorum hebdomada. 7.2
49. 8. Juda te laudabunt fratres tui, & adorent te filii patris tui: sermo est de Christo, & non de alio. 3.2
49. 10. Non auferetur sceptrum de Juda, nec dux de femore ejus, donec veniat, qui mittendus est, & ipse erit expectatio Gentium: Hæc prophetia fuse explicatur ad demonstrandum, Christum jam venisse. Duo autem hic prædicuntur, unum implicite, nempe regnum in domo David futurum: alterum explicite, nempe illud ab eo auferendum in Messie adventu. 3.1

## Exodus.

14. Ego sum qui sum, qui est, misit me ad vos, hoc nomen Dei maxime proprium esse demonstratur. 233.1
3. 5. Locus in quo stas, terra sancta est, non intrinsece, sed relatione ad aliquid sanctum, quod in ea erat. 682.1
12. 40. Habitatio filiorum Israel, qua manserunt in Ægypto, fuit quadringentorum triginta annorum, non est sensus omnes illos annos tractos fuisse in Ægypto, sed ibi fuisse completos. 148.1
19. 6. Eritis mihi in regnum sacerdotale, id est, in regnum coelens me. 602.2

## Leviticus.

17. 11. Quia anima carnis est in sanguine, id est, vita pendet ex sanguine. 287.1

## Deuteronomium.

4. & 58. Non facies tibi sculptile, non esse præceptum vitandi imagines absolute, sed idola & deos manibus fabricatos ostenditur. 680.1
9. & 10. Dominum Deum tuum adorabis, vera adoratione latræ, & illi soli servies, talem adorationem exhibendo: quæ nulli creaturæ est communicabilis. 657.1
14. 10. Ultra non audiam vocem Domini mei, & ignem hunc maximum amplius non videbo, &c. significat Deum non esse locuturum ut antea, sed humana voce per humanitatem assumptam, atque ita Propheta ille Deus & homo futurus erat. 17.1
14. 18. Prophetam de gente tua, & de fratribus tuis suscitabit Deus sicut me. Hic Propheta est Christus, Moysi quidem in natura & officio similis, sed non in omnibus aliis conditionibus, ibidem, & 605.2
- ibidem. Prophetam de gente tua &c. de Christo, qui vere & proprie Propheta fuit juxta propriam prophetiam rationem, exponitur. 328.1

17. 8. Si difficile aut ambiguum apud te judicium esse perpereris, ascende ad locum quem elegerit Dominus. Locus iste erat supremus quidam senatus, & Concilium sacerdotale, quod ab Hebræis Sanhedrim dicitur. 5.2
37. 17. Deum qui te genuit, dereliquisti, & oblitus es Domini creatoris tui: & infra: Immolaverunt dæmoniis, & non Deo, de adoratione vituli sermo est, in qua Hebræi Ægyptios imitati sunt. 705.1
32. 6. Nonne ipse est pater tuus? &c. de paternitate quasi metaphorica in ipsa creatione fundata, ad quam adoptiva filiatione non consequitur. 612.1

## Libri Regum.

1. 13. 1. Filius unius anni erat Saul, cum regnare coepisset quoad animi candorem, & duobus annis regnavit, sancte & iuste. 149.1
28. 15. Quare inquietasti me? alludit ad loquendi modum antiquorum, qui animas mortuorum superstitionis incantationibus inquietari dicebant. 708.2
27. 14. Ego ero illi in Patrem, & ipse erit mihi in filium. Hoc interpretatur Paulus de filiatione naturali Christi Domini. 17.2
1. 12. 13. Peccavi Domino: Quibus verbis David suam contritionem declaravit, cum vero Propheta subiunxit. Dominus quoque transtulit peccatum tuum a te, de remissione culpæ aperte locutus est. 84.2
3. 12. 21. Et non remansit nisi tribus Juda tantummodo, integra videlicet, quia tribus Benjamin ex parte secuta est Jeroboam. 6.1

## Paralipomenon.

2. 36. In qua parte domus erat seniorum Concilium, id est, Sanhedrim.
1. 29. Inclina verunt se & adoraverunt Deum, & deinde Regem: Adoratio enim ut sic Deo & creaturis est communis. 656.1

## Esther.

13. 14. Ut neminem adorarem excepto Deo meo, adoratio nempe scilicet latræ. 660. 1. vide etiam verbum Mardocheus.

## Job.

6. 2. Utinam appenderentur peccata mea, quibus iram merui, & calamitas, quam patror, in statera, quasi arena maris hæc gravior appareret: Loquitur de Christo, cujus mors longe majoris valoris in esse satisfactionis fuit, quam omnium hominum peccata in esse offensa. 34.2
11. 7. Forsitan vestigia Dei comprehendes, & usque ad perfectum, omnipotentem reperies: opera divina providentie, incomprehensibilia esse insinuat. 371.2
26. 11. Columnæ cœli (id est Beati) contremiscunt & pavent ad nutum ejus, timore quidem reverentiali. 652.2
36. 17. Causa tua tanquam impii judicata est, causam iudiciumque recipies, verba hæc de omnibus iustis injusta patientibus D. Gregorius intelligit, sed D. Thomas recte illa Christo accommodat. 544.2
38. 28. Quis est pluvie pater, id est, creator. 612.1

## Liber Psalmorum.

2. 6. Ego autem constitutus sum Rex ab eo super Sion, Rex est Christus, sed regnum ejus spirituale est, unde subditur, prædicant præceptum ejus. 604.2
7. Dominus dixit ad me, Filius meus es tu, utique verus, & naturalis. 17. 2. Ego hodie genui te, æterna scilicet generatione. ibi. d. Apprehendite disciplinam: Hebraice, Osculamini filium, id est, adorate eum. Ego hodie genui te, de generatione temporali exponitur. 614.2
7. Postula a me, & dabo tibi gentes hæreditatem tuam, id est humanum genus, in quod ratione satisfactionis, quasi in hære-



- hereditatem Christus ius quoddam acquisivit. Quibus verbis pactum etiam indicatur inter Deum, & Christum ut hominem ad redemptionem, 69.2. Qualiter vero hac postulatio ad hanc hereditatem impetrandam necessaria fuerit, ostenditur. 591.2
9. Reges eos in virga ferrea, id est in inflexibili iustitia. 605.2
- 8.6. Minuisti eum, hominem in tota sua specie paulo minus ab angelis, sed gloria & honore coronasti eum, & constituisti eum super opera manuum tuarum, scilicet in Christo: omnia subiecisti sub pedibus eius: quod de Christo explicat Paulus, per quem hac dignitas in totum humanum genus dimanavit. 135. 1. Ratione etiam potestatis excellentie hoc idem de Christo verificari ostenditur. 608.1
- 15.10. Nec dabis sanctum tuum videre corruptionem, sermo est de corruptione corporis jam mortui, quae in Christi corpore locum non habuit. 432.1
- 18.10. Timor Domini sanctus permanet in seculum seculi, de timore reverentia exponitur. 652.2
- 21.2. Longe a salute mea verba delictorum meorum. Loquitur Christus ex persona membrorum suorum, vel ut habet Hebraea veritas, verba vagitus mei, ut sit sensus, verba quibus ad te clamo, longe sunt ab impetrandae salute mea. Sed prior lectio antefertur, & varie exponitur. 457.2
21. In te projectus sum ex utero: Christus ab utero Deum vidit. 359.1
- 31.5. Dixi: Confitebor adversum me in iustitiam meam Domino. Confessionem intelligit interiorem per contritionem. Et tu remisisti impietatem peccati mei: ex quo colligitur distinctio inter contritionem & remissionem peccati, cum hac subsequatur illam. 82.1
- 39.7. Aures autem perfecisti mihi. Verba sunt Christi Domini, quando, Patre iubente, causam hominis suscepit. 30.1
39. In capite libri scriptum est de me, ut faciam voluntatem tuam, &c. Insinuant praeceptum Christo impositum de hominum redemptione. 568.2
- 44.3. Speciosus forma prae filiis hominum, ex hoc loco singularis in Christo pulchritudo, etiam quantum ad corpus fuisse demonstratur. 452.2
8. Sedes tua Deus in seculum seculi, virga aequitatis, virga regni tui. Dilexisti iustitiam, & odisti iniquitatem, propterea unxit te Deus Deus tuus, & cetera. Hac cum uni & eidem convenient, significant Christum Deum futurum & hominem, ut explicat Paulus. 15.2. Virga aequitatis, virga regni tui, id est, potestas regia temporalis. 4.2 & 22.1.2. Latere exponitur hic versus: & tandem illa unctio de gratia habituali Christi intelligitur. 312.1. Unctio hac exponitur esse unio hypostatica: & explicatur illud propterea tantum dicere ordinem causae finalis, non meritoria respectu unionis hypostaticae.
- 45.1.1. Dedit vocem suam, & mota est terra, id est, Deus prodigia edidit, ob quae homines admirati sunt. 12.2
- 50.14. Redde mihi laeticiam salutaris tui: Putavit David peccatum suum dignum tali poena, ut propter illud de suo semine Christus non veniret. 227.2
- 95.1.1. Commoveatur a facie eius universa terra, id est, admirantur homines coram illo. 12.2
- 98.5. Adorate scabellum pedum eius, quoniam sanctum est. Non solum Deus in scabellum, sed & scabellum ipsum adorari praecipitur, in quo vel humanitas Christi, vel eius Crux intelligitur. 681.1
- 103.4. Simulachra gentium argentum & aurum, id est, idola gentium. 705.2
- 109.1. Dixit Dominus Domino meo, sede a dextris meis. Quae verba interpretatur Christus docens, in illis significatam esse divinitatem suam. 16.1
3. Ex utero ante luciferum genui te, id est, Christus ab utero matris caelestis rore gratiae perfusus est. 313.2
- 126.3. Ecce hereditas, Domini filii merces, id est, ipsa hereditas sanctorum, est merces Christi & meritorum eius. 552.2
131. Adorabimus in loco, ubi steterunt pedes eius, de cruce exponitur. 710.1
- Proverbiorum.
- 8.22. Dominus possedit me in initio viarum suarum, vel, ut legunt Septuaginta, Dominus creavit me. Qui locus a pluribus Patribus declaratur de Christi humanitate, quam Deus omnium creaturarum primam creare decrevit. 120.2
23. Ab aeterno ordinata sum, & ex antiquis antequam terra fieret, vult Sapientiam, sapientiam incarnationem latere ab antiquitate & origine in aeterno Dei consilio, in quo ipsa fuit initium viarum Dei. 121.1
- 12.21. Non contristabit iustum, quicquid ei acciderit, quia scilicet ex nullo eventuratio eius perturbatur. 471.1
- 28.13. Qui confessus fuerit, & reliquerit ea, misericordiam consequetur, de confessione interiori, quae fit per contritionem. 83.1
- Ecclesiastes.
- 9.10. Quodcumque facere potest manus tua, instanter operare, quia neque opus, nec ratio, nec scientia crit apud inferos: loquitur de opere meritorio, & de scientia & sapientia, prout illi deserviunt. 535.1
- Sapientiae liber.
- 11.24. Misereris omnium, quia omnia potes, & dissimulas peccata hominum propter poenitentiam, ubi particula propter, non dicit causam formalem, sed dispositivam ex parte hominis, & motivam ex parte Dei ad talem dissimulationem, hoc est remissionem seu condonationem. Vel aliter, & melius, juxta Gracos, Dissimulas, hoc est, patienter fers, nec statim punis peccata hominum, ut des illis locum poenitentiae. 83.1
- Ecclesiasticus.
- 18.19. Ante iudicium, quod scilicet in morte fit, para iustitiam tibi, intende bonis & iustis operibus. 535.1. Et ibidem: Ne verearis usque ad mortem iustificari, id est in iustitia crescere, & addit: usque ad mortem, quia ipsa est merendi terminus.
- 24.34. Posuit David puero suo excitare Regem ex ipso fortissimum, & in throno honoris sedentem in sempiternum; de nullo alio praterquam de Christo hac verba intelligi possunt. 121.1
- 29.20. Gratiam fidei iustioris ne obliviscaris, id est, Christi, qui pro nobis se Deo Patri ad mortem usque obligavit. 30.1
- Isaias.
- 6.1. Vidi Dominum sedentem, &c. Omnia quae subsequuntur, veros actus religiose reverentiae, veraque adorationis important, ab angelis per actus internos Deo ipsi exhibita. 650.1
- 8.4. Antequam sciat puer vocare patrem, id est, antequam fiat homo & habeat patrem. 353. 2. vel antequam sciret scientia experimentalis. ibid.
- 9.4. Virgam humeri eius, & sceptrum exactoris eius superasti, his vocibus regia potestas significatur. 4.2
6. Parvulus natus est nobis, & filius datus est nobis, &c. Hic locus ad probandam Christi divinitatem inducitur. 16.1. Factus est principatus super humerum eius, &c. & infra. Super regnum eius sedebit, ut confirmet illud, & corroboret in iudicio & iustitia, de Christi regno, quod his ultimis verbis spirituale esse ostenditur. 604.2
- 10.22. Consummatio abbreviata inundabit iustitiam, id est, plena salvatio sub Christo futura. 318.1
- 11.2. Requiescet super eum Spiritus Domini, spiritus sapientiae & intellectus: de donis gratiae habitualis hic locus exponitur. 312.1. & de donis Spiritus Sancti Christo callariis. 324.1 Itaque sensus est, in eodem momento, in quo B. Virgo peperit concipiendo filium Dei, requiescet super eum Spiritus Domini. 313.2
- 35.4. Deus ipse veniet, & salvabit nos, tunc aperientur oculi caecorum, loquitur de vero Deo, quem Messiam futurum esse aperti signis, quae ille operaturus erat, demonstrat. 16.1
- 40.2. Completa est malitia eius, dimissa est iniquitas eius, suscepit de manu Domini duplicia pro omnibus peccatis suis, ubi sermo est de Christo, qui nobis magis profuit, quam peccatum nocuit. 32.2
- 41.23. Mihi, id est Christo, curvabitur omne genu, vera adoratione laetia. 663.2
- 42.1. Ecce servus meus, suscipiam eum, de Christo homine exponitur in omni rigore sermonis, & qualiter dici possit Dei servus, declaratur. 660.2
4. Non erit tristis, neque turbulentus, juxta Septuaginta, Splendebit, & non conteretur, quod de Christo dictum est, quia licet occisus fuerit, non tamen fuit contritus, sed per resurrectionem splenduit. Juxta vulgarem editionem significatur, tristitiam ei non dominaturam, nec pacem & tranquillitatem ejus immutaturam. 470.2
- 45.15. Vere es Deus absconditus, Deus Israel salvator, ubi aeternus Pater loquitur ad Christum, indeque ejus divinitas comprobatur. 16.1
- 52.6. Ego ipse qui loquebar, ecce adsum, id est, ille, qui antea per Prophetas loquebatur, per incarnationem apparuit. 16.2
- 53.2. Non est species ei neque decor. Hoc dictum est, vel quia plenitudo divinitatis sub mortali corpore occulta batur, vel quia corporis pulchritudo per passionem & tormenta quasi abolita.



- bolica fuit.* 452.2  
 7. Oblatus est, quia ipse voluit, *siquidem non necessitate, sed voluntate crucem subiit.* 508.2  
 8. Generationem ejus quis enarrabit? *De generatione Christi temporali exponitur.* 21.2  
 10. Si posuerit pro peccato animam suam, videbit semen longævum, & voluntas Domini in manu ejus dirigetur, pro eo quod laboravit anima ejus, videbit, & saturabitur. *Ubi continetur pactum seu promissio Dei ad Christum, se accepturum ejus opera pro redemptione hominum.* 60. Et voluntas Dei in manu ejus dirigetur, id est, ut quidquid Deus disposuit, illius virtutibus impleatur. 548.2  
 53. 4. Dedi te in lucem gentium, ducem ac præceptorem populis. *Quæ nomina de Messia per antonomasiam dicuntur.* 7.1  
 61. 1. Spiritus Domini super me, eo quod unxerit me, *unctione nimirum hypostatica unionis.* 309.2

Jeremiæ.

1. 5. Prophetam in gentibus dedi te, *de Christo loquitur, qui Propheta gentium fuit.* 328.1  
 2. 5. Ambulaverunt post vanitatem. *id est post idola, quæ cum rei quæ non est, vel qualis non est, imagines sint, optimo jure vanitas dicuntur.* *Ex Hieronymo.* 705.2  
 14. 8. Quare quasi colonus futurus es in terra, & quasi viator declinans ad manendum? *De Deo loquitur, qui colonus & viator dicitur, quia populum suum deducebat. Vel de Christo, quem significat peregrinum in terra, & parvo tempore terræ usum hospitio.* 474.2  
 8. 8. Si poenitentiam egerit gens illa a malo suo, agam & ego poenitentiam super malo quod cogitavi, ut facerem ei. *Loquitur de remissione pænæ temporalis, & æternæ.* 83.1  
 22. 30. Non erit de semine ejus, Jechonia scilicet, vir, qui sedeat super folium David, & potestatem habeat ultra in Juda, *de folio David quantum ad temporale regnum cum Hieronymo exponitur.* 606.2  
 23. 6. Hoc est nomen, quod vocabunt eum, Dominus Justus noster. *Loquitur de Messia, quem nomine tetragrammaton vocat, ac proinde verissimum Deum.* 16.2  
 27. 7. Et servient ei omnes gentes, & filio ejus, & filio filii ejus, *tantum valet ac si dictum esset, filiis ejus.* 150.2  
 31. 22. Femina circumdabit virum, *Virgo Christum, qui vir dicitur non ætate, sed sapientia.* 353.2. *In Scripturis per antonomasiam appellatur vir, qui videt Deum.* 358.2  
 12. 19. Magnus consilio & incomprehensibilis cogitatu. *Quia ejus consilia altissima sunt, & in suis cogitationibus est incomprehensibilis.* 371.2

Baruch.

1. 38. Hic est Deus noster, &c. Post hæc in terris visus est, & cum hominibus conversatus est. *Prophetia hæc in nullum aliumpotest convenire, quam in Christum, qui Deus ante secula, homo inter homines est versatus.* 16.2

Ezechielis.

33. 16. Omnia peccata ejus, quæ peccavit, non imputabuntur ei, *remissionem culpæ cum pænâ æternâ vocat non imputationem.* 83.1  
 34. 23. Suscitabo super eas pastorem unum, servum meum David. *De Christo in omni rigore sermonis exponitur, & qualiter dici possit Dei servus, declaratur.* 574.2  
 Danielis.  
 2. 44. In diebus autem regnorum illorum, suscitabit Deus celi regnum, &c. *Hoc regnum est spirituale regnum Christi in statua Nabuchodonosor, & parvo lapide abscisso præfiguratum, de quo cicitur, quod in æternum non dissipabitur.* 604.2  
 3. 6. Aspiciebam, & ecce quasi filius hominis, & infra: & dedit ei potestatem, & honorem, & regnum, *de Christo ut homine, & de potestate excellentiæ sibi propter unionem communicata exponitur.* 604.2  
 9. 24. Septuaginta hebdomadæ abbreviatæ sunt super populum tuum, & super urbem sanctam tuam, ut consummetur prævaricandum, & finem accipiat peccatum. *Fuse declaratur ad ostendendum ex ea prophetia Christum jam venisse, & nulli alii nisi Christo vero Messia accommodari posse demonstratur.* 6.2. & seq.  
 25. Et ungetur Sanctus sanctorum, *id est, tali unctione ungetur, quæ non solum sanctum, sed Sanctum sanctorum constituat.* 309.2

Oseæ.

7. 1. Operati sunt mendacium, *id est, idolum, quia sicut mendacium contrarium est Deo, ita idolum veritati.* 705.2

Michææ.

5. 2. Ex te mihi egredietur dux, qui sit dominator in Israel, & egressus ejus ab initio, a diebus æternitatis. *Loquitur de Christo secundum humanitatem in Bethlehem natus, secundum divinitatem æternam.* 17.1

Abachuc.

3. 2. In medio annorum notum facies, in medio annorum vivifica illud, *hoc ad incarnationem accommodatur, quæ neque in mundi principio, neque in fine fieri debuit, sed in medio quasi mundi tempore.* 152.2

Aggai.

2. 7. Adhuc unum modicum est, & ego commovebo cælum & terram, & mare, & aridam, & movebo omnes gentes: & veniet desideratus gentibus. *Hic locus fuse exponitur ad ostendendum ex eo Christum jam venisse.* 11.2. *Messiamque brevi & in templum venturum, ibi prædicitur; ibidem.*

Zachariæ.

1. 2. Ille jam septuagesimus annus est, *non dicit affirmando, sed interrogando, significans septuagesimum a captivitate annum jam diu præterisse.* 150.1  
 2. 8. Hæc dicit Dominus exercituum, Post gloriam misit me ad gentes, quæ expoliaverunt vos, &c. & scies quia Dominus exercituum misit me ad te, *Dominus exercituum missus dicitur a Domino: apertus locus de divinitate Messie.* 16.2  
 3. 8. Adducam servum meum Orientem, &c. *de Christo omni rigore sermonis exponitur: & qualiter dici possit servus Dei declaratur.* 574.2  
 12. 10. Effundam super domum David spiritum gratiæ & precum, & aspicient ad me, quem confixerunt, *verus Deus, qui promisit se daturum spiritum suum, dicit se crucifigendum.* 17.1

Malachiæ.

3. 1. Et statim veniet ad templum sanctum suum dominator, quem vos quæritis, & Angelus testamenti, quem vos vultis, *ubi Messia ingressus in templum prædicitur.* 11.1. *Christum esse angelum testamenti exponitur, quatenus per legem suam proposuit nobis condiciones pacis ad Deum.*  
 4. 5. Ecce ego mittam vobis Eliam prophetam, antequam veniat dies Domini magnus & horribilis, quod intelligendum est contra Judæos de ultimo judicii die. 14.1

Machabæorum.

1. 14. 41. Conenserunt, eum esse ducem donec surgat Propheta fidelis, *ille scilicet, de quo Moyses dixerat, Prophetam de gente tua, &c. id est, usque ad adventum Messie, vel loquitur de quocunque Propheta fidei, qui voluntatem Dei manifestaret.* 606.2

## EX NOVO TESTAMENTO.

Matthæi Evangelium.

3. 17. Hic filius meus dilectus, in quo mihi bene complacui: *Solius Patris sunt verba hæc, qui in Christo homine sibi complacet, eumque, quia filium diligit, non quia diligit, efficit filium.* 632.1  
 4. 10. Dominum Deum tuum adorabis, & illi soli servies, & infra. Non tentabis Dominum Deum tuum. *Hæc verba de se generalia, Christus sibi appropriando, se ipsum ut hominem proficitur servum Dei, quem suum dominum vocat.* 576.2  
 5. 17. Non veni solvere legem, sed adimplere, quia, licet non illi obnoxius, eam quidem perfecte servavit. *Vel quia quidquid legi perfectionis deerat, ipse addidit.* 570.1  
 8. 1. Domine si vis, potes me mundare. *Non dixit, oraveris, sed Si vis, ejus arbitrio & potestati omnia committens, quod Christus ipse & assensione & operatione confirmavit dicens, Volo: mundare.* 412.1  
 11. 11. Ite & nunciate Joanni, quæ audistis & vidistis: Cæci vident, claudi ambulant. *Id est, ego sum Messias, Prophetiæ omnes implete sunt.* 13.1  
 25. Confiteor tibi Pater Domine cæli & terræ, *His verbis appellans Christus Patrem Dominum, se ipsum ut hominem servum confiteri videtur.* 575.1  
 16. 16. Tu es Christus, scilicet Messias, filius Dei vivi. 3.1  
 17. Caro & sanguis non revelavit tibi, *id est, Natura humana secundum se.* 136.1  
 17. 26. Ergo liberi sunt filii, *de Christo exponitur, & non fuisse subjectum regibus temporalibus, ex illo ostenditur.* 569.2  
 20. 28.



20. 28. Filius hominis non venit ministrari, sed ministrare, &c. Loquitur Christus de adventu suo in carne possibili, statique viatoris. 135.2
25. 40. Quandiu fecistis uni ex his fratribus meis minimis, mihi fecistis. Hac locutio vera est, etiam si Christus solum fuerit remotus finis talis operis. 698.2
26. 38. Pater, si possibile est, transeat a me calix iste: hac verba intelliguntur de tristitia voluntatis. 520.1. solumque naturalem affectum ostendunt, & conformitatem ad divinam voluntatem.
26. Pater mi, si non potest hic calix transire nisi bibam illum, &c. Dicit non posse, quia iure non poterat. 571.2
27. 46. Deus Deus meus ut quid dereliquisti me? non ex desperatione Christus hac verba protulit, sed indicando se omni consolatione in inferiori portione privatum, particula autem ut quid non est dubitantis, sed dolentis. 459.2
28. 18. Data est mihi omnis potestas in cælo & in terra. De potestate excellentia Christo ut homini ratione unionis in primo conceptionis instanti communicata, & pro temporum commoditate demonstrata, & post resurrectionem plane, & perfecte exercita, explicatur, 604.1. unde etiam, 400.2
- Marci,
13. 20. Nisi abbreviaffet Dominus dies illos, id est, paucos esse fecisset. 8.2
31. De die autem illa nemo scit, neque angeli in cælo, neque Filius nisi solus Pater. Varie hic locus exponitur. 362.2. verus sensus est, Christum negasse se scire, quia veluti sub secreto illud sciebat, & non ad dicendum aliis. ib.2. Pater autem scit, ut saltem homini Christo revelaret. ibid.
14. 33. Cepit pavere & tedere. Hoc maxime de timore sensibili intelligitur. 471.2. Idem de timore voluntatis. 521.1
- Lucæ.
10. 35. Spiritus sanctus superveniet in te, & virtus Altissimi obumbrabit tibi, admirabilis Christi conceptionis Spiritus sanctus auctor prædicitur. Ideoque & quod nascetur ex te sanctum, quia nimirum ex vi talis conceptionis, sanctus est sanctitate unde quaque perfecta, & conaturali. Vocabitur filius Dei, verus, & naturalis. 309.2
2. 53. Jesus proficiebat sapientia, ætate, & gratia apud Deum, & homines. Non secundum habitum sapientie & gratie, sed secundum effectus. 334.1
3. 6. Et videbit omnis caro, id est, omnis homo, salutare Dei. 2.2
4. 8. Domine Deum tuum adorabis, &c. generalis regula, qua Christus ipse comprehenditur, 590.2
7. 16. Accipit autem omnes timor & magnificabant Deum. Timor hic non significat fugam alicuius mali, sed reverentiam ad Christum conceptum. 325.2
7. 47. Remittuntur ei peccata multa quoniam dilexit multum: remissio dilectionem consequitur tanquam ab illis formaliter distincta. 82.2
11. 14. Væ vobis qui edificatis sepulchra prophetarum, patres autem vestri occiderunt illos, profecto testificamini, quia eorum operi consentitis. Quia licet expresse Prophetarum mortui non consentirent sepulchra Prophetis edificando (poterant enim id ex bono sine facere majores tamen suos opere imitantes in persecutione presentium Prophetarum, & ipsius Christi, magis videbantur sepulchra edificare in memoriam egregii operis, ab interfessore patrati, quam ob misericordiam & honorem interfecti. 708.1
22. 43. Apparuit i li Angelus de cælo confortans eum. Confortare est Christi firmitudinem prædicare, vel proponere rationes quæ possent tristitiam ejus lenire. 400.2
23. 42. Memento mei Domine, cum veneris in regnum tuum: Spirituale Christi regnum latro cognovit, qui non temporale commodum, sed spirituale sua oratione postulabat. 604.2
34. Hodie mecum eris in paradiso. Ex hac promissione Patres colligunt, animam Christi fuisse in statu beaifico, & impassibili. 544.1
24. 26. Nonne oportuit pati Christum, & ita intrare in gloriam suam? de gloria resurrectionis loquitur, ad eamque dicit sibi per passionis meritum viam parasse. 359.2
- Joannis.
1. 1. Verbum erat apud Deum, & Deus erat Verbum, Christus ex hoc loco verus Deus probatur contra Erasmus, 13.1
12. Dedit eis potestatem filios Dei fieri, id est, consequendi justificationem, per quam filii adoptivi Dei constituuntur, 609.2
14. Verbum caro factum est, id est, Deus factus est homo, vel carnem sibi in unitate personæ copulavit. suæque substantia univit. 15.1. 167.2
- Vidimus gloriam ejus, gloriam quasi unigeniti a Patre, plenum gratiæ & veritatis: De Christo exponitur, qui se manifestavit vere unigenitum Patris, ostendendo gloriam & gratiam, quam ex vi unionis in omni plenitudine habuit, tanquam proprietatem ab unionem manantem. Redarguunturque Cajetanus & Erasmus, illud plenum gratiæ ad Joannem referentes. 162.1. 215.2. & veritatis, id est, scientia. 353.2
16. Et de plenitudine ejus omnes accepimus, id est, quicquid boni ad salutem conferens accipimus, tam nos, quam omnes homines justi & angeli, id nobis ex Christi plenitudine provenit: & gratiam pro gratia, id est, secundam pro prima. 548.2
17. Lex per Moysen data est, gratia & veritas per Jesum Christum facta est. Lex Moysis, lex dicitur, quia præcipit, & non juvat: lex Christi gratia, quia cum paucis præcipiat, plurimum gratiæ confert. 605.2
18. Deum nemo vidit unquam, unigenitus qui est in sinu Patris, ipse enarravit, per humanitatem scilicet in qua antea id cognoverat. 358.1
11. Propheta es tu ille scilicet, quem Moyses venturum prædixit. 328.1
2. 11. Hoc fecit initium signorum Jesus, solum significat fuisse primum publicum miraculum, quo cepit Christus gloriam suam manifestare, non autem inde constat, hoc fuisse primum opus miraculosum. 410.2
20. Quadraginta & sex annis ædificatum est templum, loquitur de templo secundo, quamvis illud ab Herode ædificatum sit. 12.2
9. 11. Quia quod scimus, loquimur, & quod vidimus, testamur, loquitur de se ut homine, quem omnia scientem esse significat. 358.2
13. Et nemo ascendit in cælum, nisi qui descendit de cælo, Filius hominis qui est in cælo, dicitur Christum ascendisse secundum humanitatem, & esse in cælo, non ascensu corporeo, sed visione beata. ib.
14. Non enim ad mensuram dat Deus Spiritum. Exponitur de divina natura, quam dedit Deus Filio per æternam generationem, vel de gratia unionis, vel habituali. 332.2
20. Patres nostri in monte hoc adorant, id est, sacrificium obtulerunt. 658.2
22. Vos adoratis quod nescitis, nos adoramus quod scimus, scilicet ipsam hac regulam Christus comprehendit. 590.2
23. Veri adoratores adorabunt Patrem in spiritu & veritate, licet ex vi horum verborum corporalis adoratio non excludatur, recte tamen ex illis colligitur, in solo actu interno veram adorationis rationem posse salvari. 651.1
26. Ego sum, scilicet Messias, qui loquor tecum. 3.1
54. Cibus meus est, ut faciam voluntatem Patris mei, id est, ut sanctificationem nostram operaretur, ut sibi eret a Patre præceptum. 571.1
17. Pater meus usque modo operatur, & ego operor, id est, Omnia cum Patre feci & facio: Quapropter non subdolegi. ibid.
21. Sicut Pater suscitavit mortuos, & vivificat, sic & Filius quos vult, vivificat. Hac de Christo non solum ut Deo, sed ut homine possunt intelligi. 411.1
23. Ut omnes honorificent Filium, id est Christum, sicut honorificant Patrem, eandem adorationem patrie ei exhibendo. 663.2
8. 35. Servus non manet in domo in æternum, filius autem, &c. de servo servitute servili, non de filiali, intelligendum: hac enim in æternum manet in domo Domini. 579.1
9. 4. Venit nox quando nemo potest operari, per noctem meritem intelligit, postquam nec ipse etiam Christus meritorie potest operari. 535.2
10. 17. Propterea me diligit Pater, quia ego pono animam meam, ut iterum sumam eam. Loquitur de morte, & resurrectione sua: de illa ut medio cuius habebat præceptum, de hac ut de fine tantum, sibi quidem non præcepto. 588.1
18. Nemo tollit eam a me, sed ego pono a meipso. Differentiam inter Christi mortem, & martyrum explicat: hac enim illis tantum fuit voluntaria per modum acceptionis, Christo vero etiam per modum oblationis. 598.1
19. Hoc mandatum accepi a Patre meo. De proprio præcepto exponitur. 571.1
31. Si illos dixit Deos, ad quos sermo Domini factus est, quem Pa-



- Pater sanctificavit, & misit in mundum, vos dicitis, quia blasphematis, quia dixi, Filius Dei sum. *De sanctificatione Christi ut hominis per unionem humanitatis ad Verbum, cum Chrysostomo & aliis Patribus exponitur.* 615.1
31. Quem Pater sanctificavit: Non ut Deum solum, sed ut hominem etiam. 275. Porro Christum sanctificasse & misisse dicitur Pater, quia ipsa missio fuit humanitatis sanctificatio. 309.2
- 11.42. Ego autem sciebam, quia semper me audit, de Christo ut homine, cuius absoluta & efficax oratio semper exaudita est explicatur. 591.2
- 12.26. Honorificabit eum Pater meus, id est, honore afficiet. 659.2
27. Anima mea turbata est, de rationali anime parte intelligitur. 521.1
- 13.3. Sciens quia omnia dedit ei Pater in manus, id est, quod hominum omnium salus, institutio & gubernatio ei commissæ erat. 604.2
- 14.11. Ego sum via, veritas, & vita: nemo venit ad Patrem nisi per me: hoc tam de angelis, quam de hominibus merito intelligitur. Qui nisi Christi merito nixi gloriam non consequuntur, 561.2
31. Sicut mandatum dedit mihi Pater, sic facio. Patri specialiter tribuit, quod est illi cum reliquis Trinitatis personis commune. 571.1. Et de proprio præcepto exponitur. ibid.
- 15.4. Sicut palme non potest ferre fructum a semetipso, nisi manserit in vite, &c. id est, sicut palme non potest crescere sine influxu viuis, sic nec iustus sine influxu meritorum Christi. 551.2
10. Patris mei præcepta servavi. Exponit cum omni proprietate. 571.2
15. Jam non dicam vos servos, servitute servili ex timore orta: bene tamen filiali ex charitate & reverentia ex Augustino. 570.2. vel aliter, licet de facto servi suis prædicta servitute, non tamen vos servos dicam, vel ut cum servis vobiscum agam. ibid.
- 17.5. Clarifica me Pater claritate quam habui, priusquam mundus fieret apud te, gloriam resurrectionis sue petit, ad quam antequam mundus fieret, fuerat prædestinatus, ex Augustino. 644.2
19. Pro his ego sanctifico me ipsum, id est, in sacrificium & hostiam offero. 598.2
23. Dilexisti eos, sicut, pro quia, me dilexisti, ideo nos diliget Pater, quia filium suum diligit. 557.2
- 18.31. Nobis non licet interficere quemquam. Per legem licebat, sed potestas hæc ab eis erat ablata. 5.2
36. Regnum meum non est de hoc mundo, id est, non est terrenum & habens carnalem originem, sed cæleste, & a Deo ipso manans. 264.2
37. Ego in hoc natus sum, & ad hoc veni in mundum, ut testimonium perhibeam veritati, id est, ut veram beatitudinem, & optimam viam ad illam comparandam homines doceam. 24.1
- 20.17. Ascendo ad Patrem meum, & patrem vestrum. Hæc distinctione indicat Christus, aliter esse Deum Patrem suum naturali scilicet paternitate, aliter nostrum per adoptionem tantum. 673.2. Et licet de prima persona Trinitatis loquatur, tamen ipse de se ut homine loquitur. 374.2. vel forte loquitur cum omnibus tribus personis quatenus sunt unus Deus. 621.1. Deum meum, & Deum vestrum. His verbis se Christus Dei servum proficitur, perinde enim esse, cum Deum suum, ac dominum suum vocare, multis ostenditur. 583.1
- 20.28. Dominus meus & Deus meus, veram adorationem laudis Thomas his verbis exhibuit Christo. 663.2
- Actorum.
- 3.19. Pœnitementini & convertimini, ut deleantur peccata vestra, particula, ut, satis indicat distinctionem inter pœnitentiam & deletionem peccati, ut inter dispositionem, & formam. 82.2
- 4.22. Neque enim est aliud nomen sub cælo datum, in quo oporteat nos salvos fieri, supposita scilicet voluntate & ordinatione divina. 25.2
- 7.6. Semen tuum peregrinum erit in terra aliena, & male tractabunt eos annis quadringentis. Et ad Galatas 3. Quæ post quadringentos & triginta annos facta est lex. Duo hi loci conciliantur: atque adeo illi anni, quibus in Egypto mansisse Israelita dicuntur in utroque loco, vel ab egressu Abrahæ, vel a nativitate Isaac inchoandi esse perhibentur. 148.1. 149.1
- 10.38. Quomodo unxit eum Deus Spiritus sancto, id est, excellenti gratia unionis. Quoniam Deus erat cum illo, per intimam scilicet & substantialem unionem. 309.2
- 15.20. A contamination simulachrorum, &c. 21. Intuens simulachra vestra, id est, idola. 705.1
- 20.28. Acquisivit Ecclesiam sanguine suo, de Deo dicitur per communicationem idiomatum. 598.2
- Ad Romanos.
- 1.2. De filio suo, qui factus est ei ex semine David secundum carnem, variè adducuntur expositiones, sed planus sensus est, Filius Dei factus est homo ex Maria virgine. 488.2
4. Qui prædestinatus est Filius Dei, laudè tractatur hic locus. 642.1. & cum Augustino & D. Thoma de Christo, ut homine exponitur, ita ut ille ipse, qui factus est ei ex semine David secundum carnem, sit, qui in quantum homo non rationem formalem, sed conditionem reduplicando, seu ut hic homo, hoc est, subsistens in hac humanitate, præscindendo a divina suppositualitate & prius ratione quam illa subsistere intelligeretur, prædestinatus est, per actum divinæ mentis, ut sit Filius Dei naturalis, quod media unionem recepit. In virtute secundum spiritum sanctificationis, id est, ut taliter prædestinatus haberet virtutem ad sanctificandos homines, quod licet fuerit finis hujus prædestinationis, non autem ejus terminus. ibid.2
21. Cum cognovissent Deum, non sicut Deum glorificaverunt hoc est, vera adoratione laudis, Deo soli debita, non illum solum coluerunt. 571.2
- 3.20. Non justificabitur omnis caro, id est, omnis homo. 2.2
- 4.25. Qui traditus est propter delicta nostra, ut pro eis satisfaceret, eorumque omnium remissionem quoad sufficientiam mereretur. Et resurrexit propter justificationem nostram, ut scilicet meritum ejus nobis posset applicari. 134.1
- 5.15. Sed non sicut delictum, ita & donum: super abundantiam satisfactionis Christi respectu pœnæ debite peccatis hominum, ex hoc loco ostendit. 32.2
19. Sicut per unius inobedientiam, &c. ita per unius obedientiam, &c. De vera obedientia Christi præstita præcepto moriendi pro nobis exponitur. 571.2
- 6.23. Gratia Dei vita æterna, in radice, scilicet & semine. 546.2
- 8.15. Acceperitis spiritum adoptionis filiorum, id est, justificati estis. 609.2
34. Quicumque spiritu Dei aguntur, id est, gratiam habent, hi sunt filii Dei, adoptivi scilicet. 613.1
18. Non sunt condignæ passionibus hujus temporis ad futuram gloriam, quæ revelabitur in nobis, condignitate scilicet & proportionem physica & entitativa. 44.2
23. Adhuc gemimus spectantes adoptionem filiorum Dei: Non quia jam non simus filii adoptivi si iusti sumus, sed quia nondum consummatam perfectionem hujus adoptionis habemus. 612.2
29. Quos præscivit & prædestinavit, conformes fieri imagini filii sui, ut sit ipse primogenitus in multis fratribus, exponitur de filio ut Deo, sed melius de eo ut homine: sic enim est primogenitus, & cui omnes electi erunt conformes in gloria. 122.1
- 9.28. Verbum enim consummans & abbrevians in æquitate, id est, Verbum in redemptione abbreviatum non solum salutem, sed justitiam attulit. 33.2
- 11.6. Si autem gratia, non ex operibus: alioqui gratia jam non est gratia. Ex hoc loco probatur, id, quod datur a Deo ex operibus, dari ex justitia, & non tantum ex fidelitate. 61.1
- 13.7. Reddite omnibus debita: cui timorem, timorem, id est, reverentiam erga ipsum conceptam. 323.1
- Ex Prima ad Corinthios.
- 1.13. Nunquid in nomine Pauli baptizati estis? Quia in solo Christi nomine baptizati sumus, probat Paulus ejus sola virtute nobis remitti peccata. 605.1
- 2.7. Loquimur Dei Sapientiam in mysterio, quæ abscondita est, id est, incarnationem quæ ratione naturali cognosci non potest. 21.2
- 3.22. Omnia enim vestra sunt, vos autem Christi, omnia sunt electorum ratione finis, quia propter eos creata sunt, & propter Christum tam electi, quam omnia alia tanquam propter finem proximum. 123.1. Christus vero Dei, Christus Dei esse dicitur, quia Deus in suum honorem fecit Christum, unde sub Dei dominio continetur. ibid.
- 7.37. Qui statuit in corde suo, non habens necessitatem, eam, scilicet quam præceptum inducit, potestatem autem ha-



- habens suæ voluntatis, eligendi nempe id quod consulitur . 568.2
- 12.27. Vos estis corpus Christi & membra de membro, id est, per ministerium alterius membri, scilicet ipsius Pauli, vel ex parte, ut Græci sonant. Vel vos estis corpus Christi & membra ad invicem. 348.1
- 13.8. Sive Prophetiæ evacuabuntur, id est, donum interpretationis scripturæ. 329.1
- 15.28. Cum autem subiecta fuerint illi omnia, tunc ipse filius subiectus erit illi, non solum quoad propriam humanitatem, ut modo, sed in omnibus membris suis. 566.1
47. Primus homo de terra terrenus, secundus homo de cælo cælestis, vel quia cælestem vitam duxit, vel propter gloriam, quam a principio habuit, vel ratione divini suppositi. 283.2

Ex secunda ad Corinthios.

- 2.11. Plus omnibus laboravi, quia scilicet gentibus prædica- vi. 14.1
- 2.16. Et si cognovimus secundum carnem Christum, sed jam non novimus. Vel loquitur de se pro tempore, quo Christum non sequebatur, vel de conditione carnis passibilis, in qua cognovimus Christum dum hic viveret. Sed etiam non novi- mus. 283.1
19. Deus erat in Christo mundum reconcilians sibi. Ex vi com- municationis idiomatum, ipsimet Deo tribuitur mundi recon- ciliatio, quæ est opus Christi: innuiturque Christum sibi ipsi tunc sanctissime Trinitati nos reconciliasse. 598.2
21. Eum qui non noverat peccatum, pro nobis peccatum fecit, ut nos efficeremur iustitia Dei in ipso. Hoc dicit; nostra for- malis iustitia datur nobis, non ex debito nostra iustitia, sed ex iustitia Dei debita Christo. Non ergo hoc dicit, quia, cum iustificamur, non nobis infundatur vera & formalis iustitia, aut quod per extrinsecam iustitiam Dei, aut Christi iustifi- cemur, sed quia hæc formalis iustitia datur nobis ex iustitia in meritis Christi fundata. 535.2
- 6.2. Ecce nunc tempus acceptabile, ecce nunc dies salutis: Tempus hoc est præsens vita, quæ cum transierit, operandi, & merendi tempus auferetur. 535.2

Ex Epistola ad Galatas.

- 3.19. Donec veniret semen, id est Christus. 570.2. Ordinata per angelos in manu mediatoris, id est, Moysis, qui inter Deum & populum intermedium, & quodammodo mediator fuit. ibid.
- 5.13. Per charitatem servite invicem, id est, invicem honora- te. 656.1

Ex Epistola ad Ephesios.

- 1.3. Qui benedixit nos omni benedictione spirituali in cæle- stibus, significat omnes effectus gratiæ nobis datos esse propter Christum, nec nisi ipso medio, posse nos a Deo benedicci. 122.2 vide etiam. 557.2. ubi de dilectione qua efficaciter vult dile- ctis conferre gloriam, exponitur.
4. & 5. Elegit nos in ipso ante mundi constitutionem, & infra. Secundum propositum voluntatis suæ, id est, licet Deus ele- ctionem illam fecerit in Christi gloriam, & propter ejus me- rita, tamen quod hi potius, quam illi electi fuerint, consi- lium fuit divine voluntatis. Et ibidem. Qui prædestinavit nos per Jesum Christum, id est, ut per ipsum iustificaremur, quod explicans subdit, gratificavit nos in dilecto filio suo. 609.2
- Instaurare omnia in Christo, quia humana natura assumpta, omnia quodammodo instauravit, vel univit, & nobilitavit. 562.1
- In quo etiam nos sorte vocati sumus: Quia electio non fuit ex ullis meritis, nomine fortis usus est, & sic loquitur de actu efficaci divine voluntatis, quo elegit prædestinatos, non quia futuri erant sancti, sed ut essent sancti. 557.1
- 2.2. Et ipsum, scilicet Christum ut hominem, dedit caput supra omnem ecclesiam, tam militantem, quam triumphantem. 346.1
- 2.10. Creati in Christo in operibus bonis. Totum negotium gratiæ & iustificationis peccatoris, quia ex nullo ejus merito, aut opere initium sumit, quedam moralis creatio dicitur, quæ tota Christi meritis tribuitur. 548.2
- 4.8. Ascendens in altum dedit dona hominibus, hæc dona sunt merita nostra quibus ad summam beatitudinem pervenimus. 552.1
10. Qui ascendit super omnes cælos ut adimpleret om- nia, reicitur commentum ubique rariorum: & exp- nitur, ut suam peregrinationem concluderet, & termi- naret. 456.1

12. In adificationem corporis Christi, id est ad rectam Eccle- siæ gubernationem & profectum. 604.1
5. 32. Sacramentum hoc magnum est: ego autem dico in Christo & in Ecclesia: Significat, verbis Ade quæ præse- rant, prædictum fuisse mysterium conjunctionis Christi cum Ecclesia. 104.1

Ex epistola ad Philipenses.

- 2.6. Qui cum in forma Dei esset, id est, cum in divina natura subsisteret, non rapinam arbitratus est esse se æqualem Deo, sed semetipsum exinanivit, non quidem amittendo formam Dei, sed formam servi accipiens, id est naturam huma- nam. 165.1
7. In similitudinem hominum factus, & habitu inventus ut homo, humana enim natura Christi assimilatur vestimento: ita enim Verbum per illam, sicut homo per vestimentum vi- detur. 162.1. Vel melius, Christus, cum esset Deus, in speciei, forma, & figura hominis, inventus est. ibid.
9. Factus obediens, &c. exponitur de perfecta obedientia præsti- ta præcepto redemptionis hominum. 571.2. propter quod & Deus exaltavit illum, dictio propter, veram causam merito- riam importat. 544.1. In nomine Jesu omne genuflectatur, cælestium, terrestrium, & infernorum, id est, reverentia seu adoratio exhibeatur. 599.1. Et omnis lingua confiteatur, id est, tam angelica quam humana: pro eisdem enim distributio fit, pro quibus facta fuerat in illo verbo, Omne genu- 650.2

Ex prima ad Colossenses.

- 1.15. Qui est imago Dei invisibilis, quatenus Deus, & primoge- nitur omnis creaturæ, quatenus homo, non quidem tempe- re, sed honore. 121.1
- Quoniam in ipso condita sunt universa, & ipse est ante om- nes: exponitur de Christo homine, qui in omnibus primatum habet in æterno Dei consilio. ibid.
18. Et ipse caput corporis Ecclesiæ, de Christo etiam in quan- tum homo. 346.1
24. Adimpleo ea, quæ defunt passioni Christi in carne mea pro corpore ejus, quod est ecclesia, loquitur de applicati ne quoad efficaciam satisfactionis Christi circa corpus Ecclesiæ, ad quam Paulus laborando cooperabatur. 100.1
- 2.9. In Christo inhabitat omnis plenitudo divinitatis corpo- ralis, id est divina natura unita est non solum anima, sed & corpori Christi. Vel, vere & non per figuras. Vel quia ex Verbo & humana natura corporea, una substantia corporea constat. 296.2

Ex Prima ad Timotheum.

- 1.17. Soli Deo honor & gloria illa scilicet, quæ per latram da- tur, quæ soli Deo est communicabilis. 657.1
- 1.2. Unus mediator Dei & hominum, homo Christus Jesus, quia ipse solus perfecte hoc munus obit. 714.2

Ex epistola ad Hebræos.

- 1.2. Quem constituit hæredem universorum: Hoc proprie com- petit Christo ut homini, quia aut Deus non constituitur heres, sed natura sua est dominus omnium. 121.1
- Locutus est nobis in filio, de Christo ut homine cum Cyrill. & aliis Patribus exponitur. 614.2
4. Tanto melior angelis effectus, quanto differentius præ il- lis nomen hæreditavit, de Christo ut homine exponitur, quia cum filius Dei naturalis sit, differentius nomen hære- ditavit præ angelis, qui solum sunt filii adoptivi. 616.1. Cui enim angelorum dixit aliquando, filius meus es tu? filiatione scilicet naturali; adoptiva enim bene potuit dice- re. 612.1
5. Et adorent eum, id est Christum, omnes angeli ejus, de vera adoratione interna exponitur, illi in primo instanti conce- ptionis exhibenda. 647.2
- 2.9. Eum autem, qui modico quam angeli, minoratus est, vi- demus Jesum propter passionem mortis gloria, & honore coronatum: Ubi indicatur illam exaltationem humanitatis supra omnes angelos, ante omne meritum esse: at vero gloriam & honorem, quem postea per passionem Christus adeptus est, ex merito fuisse. 218.1
10. Decebat eum propter quem omnia, &c. per passionem consummari: vel potius, consummare. Mors enim Christi decens fuit, tum quia non ex necessitate, tum quia per eam non manet dedecus peccati sine decore iustitiæ. 28.2. Eum qui multos filios in gloriam adduxerat, scilicet secundum divinam prædestinationem, auctorem salutis eorum, id est, Christum, per passionem consummare, quoniam prævisq ho- minum peccato, in eorum remedium, Christi passio ordinata est. 129.2



11. Qui sanctificat, & qui sanctificantur, ex uno omnes, *Nempe Deo: maxime si legatur: Qui sanctificat, & qui sanctificatur, ut sensus sit, Christus qui sanctificat, & qui sanctificatur, est ex Deo. 563.1 sed retenta Vulgarisatione, Qui sanctificat, & qui sanctificantur, dicuntur esse ex uno Deo, ex uno conditore, ex uno aeterno Patre, licet diverso modo, ille ut naturalis filius, reliqui ut adoptivi. ibid.*
14. Quia pueri communicaverunt carni, & sanguini, & ipse similiter participavit eidem, ut per mortem destrueret eum, qui habebat mortis imperium, *explicatur, & adducitur ad probandum Christi incarnationis in carne passibili unicam causam esse nostram redemptionem. 136.1 vide item. 286.1*
16. Nusquam enim angelos apprehendit, sed semen Abraham apprehendit, *utrumque possibile ponitur, sed gratia Dei tribuitur, quod in hoc homines praeulerit. 560.2*
- 5.7. Qui in diebus carnis suae, &c. *passibili, scilicet. 2.2* Et quidem, cum esset filius Dei, exauditus est pro sua reverentia. *Vult ostendere, magis ejus reverentiae, quam gratiae, exauditionis effectum tribuendam. 550.1*
8. Didicit ex his, quae passus est obedientiam. *Non quia de novo virtutem obedientiae didicerit, sed quia illam novo modo exercuit, & expertus est. 403.2* Et consummatus factus est omnibus, obtemperantibus sibi causa salutis aeternae. *Christus, licet omnium universalis sit redemptor, speciali tamen modo est causa efficax salutis eorum, quos sibi facit obedientes. 550.1*
- 7.14. In qua Tribu, *scilicet Juda, nihil de sacerdotibus Moyses locutus est. Id est, ad Tribum Juda sacerdotium non pertinuit. 4.2*
9. & 11. Mediator novi Testamenti, *de Christo exponitur, quia ipse solus perfecto modo hoc munus exercuit. 713.1*
- 10.5. Ideo ingrediens in mundum dicit, hostiam & oblationem noluisti, corpus autem adaptaisti mihi. *Ingressus est Christus in mundum, quando homo factus est, ex quo tempore factus est potens ad redimendum genus humanum. 293.2*
12. Christus unam pro peccatis offerens hostiam in sempiternum

num sedet ad dexteram Dei, de cetero spectans donec ponatur, &c. *significat, Christum illa oblatione totum negotium suum, & meritum consummasse, jam vero solum expectare possessionem, & executionem. 536.1*

Ex Epistola prima Petri.

- 2.5. Et ipsi tanquam lapides vivi superaedificamini domus spirituales, sacerdotium sanctum, & *infra.*
- vers. 6. Vos autem genus electum, regale sacerdotium. *Ad populum loquitur, & omnes Dei cultores, latiori quadam significatione sacerdotes appellat. 597.2*
24. Qui peccata nostra, *id est poenas peccatis debitas, in corpore suo pertulit super lignum. Quo loco probatur, Christum sufficienter satisfecisse pro poenis peccatis debitis. 31.2*

Ex Epistola prima Joannis.

- 1.8. Si dixerimus, quia peccata non habemus, &c. *loquitur de venialibus. 98.1*
9. Si confiteamur peccata nostra, fidelis est, & justus, ut remittat nobis, *exponitur de venialibus, pro quibus justus ex justitia satisfacit. ibid.*
32. Videte qualem charitatem dedit nobis Pater, ut filii Dei, &c. *id est gratiam, a qua habemus filios Dei denominari. 610.1*

Ex Apocalypsi.

- 5.10. Fecisti nos Deo nostro regnum, & sacerdotes, *late sumitur vox sacerdotes, prout omnes Dei cultores comprehendit. 590.1*
12. Dignus est agnus qui occisus est, accipere virtutem & divinitatem, *id est, manifestationem divinitatis, vel ut ab omnibus cognoscatur, & honoretur tanquam Deus. 221.2*
79. Omnes Angeli stabant in circuitu throni, & ceciderunt, & adoraverunt, *vera quidem adoratione, quae in solo interiori actu optime salvatur. 649.2*
12. & 22. Deum adora. *Non recusat Angelus, quia adorari non potuisset, sed ex quadam urbanitate, vel reverentia humanitatis assumpta. 660.1*
- 19.17. Habet in femore suo scriptum, *id est, in humanitate. 608.1*

F I N I S ;



# I N D E X R E R U M , QUÆ HOC VOLUMINE CONTINENTUR.

*Prior numerus paginam indicat , posterior columnam .*

## A

### *Aaron .*

**A** Aaron quomodo sacerdotium incepisse dicatur , cum ante illum sacerdotes aliqui fuerint . pag. 600. col. 1  
Aaronis sacerdotium non æque Christi repræsentat , ac repræsentat sacerdotium Melchisedech . 603.2  
Abraham meruit , saltem de congruo , ut ex eo Christus descenderet . 226.2

### *Accidentia .*

Accidentia assumi non possunt ad unionem hypostaticam , 278.1  
Accidens separatum , quamvis per se sit , non subsistit , neque assumi potest . *ibid.*  
Accidentales formas media humanitate assumpsit Verbum in sua hypostasi . 288.2 Non tamen immediate secundum hypostasim . *ibid.*  
Accidentia habent propriam existentiam accidentalem . 289.1  
Accidentia assumpta sunt per substantiam tanquam per medium . 306.1  
Accidens neque est medium quod , neque medium quo , ad assumptionem naturæ . 307.1  
Accidens non est dispositio ad unionem . *ibid.*  
Accidens separatum non est capax majoris intensiōis , quam inhærens . 335.2  
Accidentia humanitatis Christi habent quandam infinitatem : & , an omnia sint ita infinita , ac ipsius virtutes . 338.1  
Accidentia alicujus subjecti non possunt comprehendi , nisi ab eo , a quo subjectum comprehenditur . 370.2  
Acephali hæretici in Christo unam naturam permissione conflatam posuerunt : & unde sic dicti sint . 164.1

### *Actus , Actus Dei , Actiones Christi , Actus Christi , Agens .*

Actus Christi non componitur ex actu voluntatis humanæ & divinæ , nec physice , nec moraliter . 35.2  
Asserentes , ex tali compositione sumi valorem in actibus redarguuntur . *ibid.*  
Actus uterque , scilicet voluntatis divinæ & humanæ , per se habet suam propriam libertatem . *ibid.* Quamvis daretur unio moralis inter tales actus , impertinens esset ad valorem infinitum illorum . 36.1  
Actiones quomodo dicantur esse suppositorum . 36.2 Et singularium . 52.1  
Actus humani Christi non habent immediatam unionem ad Verbum . 38.1  
Actiones vel passiones Christi externæ a voluntate illius imperatæ non habent infinitum meritum , nisi per denominationem extrinsecam ab actibus voluntatis . *ibid.*  
Habebant tamen in se , ac formaliter infinitum valorem in ratione satisfactionis . *ibid.*  
Actuum Christi dignitas infinita sumenda est ex unione personali , quam habent cum Christo . 39.1  
Actus valorem physicum habet a principio agendi , moralem vero ab ipsa persona operante immediate . 39.2  
Actio Christi , quamvis physice finita sit , est moraliter infinita . 41.2  
Actus valor ad satisfactionem , & meritum , est quid distinctum a reali ipsius bonitate . 42.1  
Actus tendere potest ad objectum infinitum per habitudinem realiter finitam . *ibid.*  
Actiones Christi , & ejus satisfactionem , ea ratione qua infinitatem habebant , esse sub dominio Dei negantes improbantur . 66.1  
Actus procedens a gratia , cur possit habere valorem meriti ad consequendum gratiam , & gloriam , & non ad satisfaciendum Deo pro injuria illi facta . 75.1  
Actus peccatoris , quantumvis bonus , & supernaturalis , non est per se sufficiens ad expellendam culpam . 85.1

Actus , ut est præcise a libero arbitrio , non potest esse ultima dispositio ad remissionem peccati . 86.1  
In actu nostro nihil est , quod non fiat a nobis . 86.2  
Per actus nos perfectius inhærere Deo , quam per habitus , quomodo sit intelligendum . 88.1  
Actum eundem esse satisfactorium , & meritorium simul non repugnat . 94.2  
Actus hominis justus nullus est , qui de potentia absoluta esse non possit cum veniali culpa habituali . 99.1  
Actus amoris non habet formalem oppositionem cum actu peccati venialis . *ibid.*  
In actibus divinæ voluntatis , quamvis æternis , quomodo sit aliquid prius , & posterius . 109.1 In re ipsa nullus est ordo prioris , & posterioris , sed in virtute , & secundum rationem . *ibid.* 2 Unde hic ordo sumendus . *ibid.*  
Actuum divinæ voluntatis duplex consideratio . 116.1  
Inter actus creatos , & divinos differentia , ob quam unus , & idem actus divinus , potest terminari ad unum vel plura objecta , non vero creatus . 118.1  
Actionem aliquam unire duo extrema tribus modis intelligi potest . 179.2  
Actio vitalis , & immanens cur necessario petat esse a potentia , cujus est actus . 352.2  
Actus liberi , & mysteria gratiæ a nullo homine , vel angelo naturaliter cognosci possunt . 382.2  
Actus liberos existentes Christus cognovit per scientiam infusam . 383.1  
Actus liberi præsentis , quomodo occultari , vel revelari possint . *ibid.*  
Actio necessario supponit in causa vim agendi . 419.1  
Actus secundus essentialiter supponit primum . *ibid.*  
Actio , ut actio , dicit transcendentalem habitudinem ad causam agentem . *ibid.*  
Actionis terminus necessario debet præhaberi aliquo modo in principio , tam principali , quam instrumentali . 426.2  
Actus supernaturales quoad substantiam dantur . 428.2  
Actus supernaturales , etiam secundum quod supernaturales , procedunt a nostris potentiis . *ibid.*  
Actus per quid formaliter constituatur in ratione vitalis , & liberi . 437.1  
Actio qua gratia fit medio instrumento distincta est ab actione , quæ est a Deo absque ullo instrumento . 440.1  
Actio , quæ per instrumentum a Deo miraculose fit , diversa est ab ea , quam solus Deus facit , non tantum numero , sed etiam specie . *ibid.*  
Actionem specificari a principio , in quo sensu sit verum . *ibid.*  
Actiones & passiones Christi omnes fuerunt nobis salutares , & propter nostrum bonum aliquo modo factæ . 444.1  
Non est tamen verisimile , omnes illas per se , ac proprie effective concurrere ad productionem gratiæ , quæ in nobis fit . *ibid.*  
Actio Christi vel passio , quæ præterit , non potest esse instrumentum actionis supernaturalis . 443.2  
Actus delectationis , seu voluptatis sensibilis in Christo fuit . 868.1  
Actus Christi ut viatoris , quo modo fuerint liberi . 516.1  
Actus omnes Christi Deus in particulari prædefinivit absoluta voluntate . *ibid.*  
Actus suos cum Christus videbat a Deo prædefinitos , non ideo videbat se teneri ad illos ex præcepto faciendos . *ibid.*  
Actus non præcepti , licet sint a Deo prædefiniti , non ideo sunt sub obligatione . *ibid.* 2  
Actus efficaces voluntatis in Christo fuerunt perfectissime . 521.1  
Actus inefficaces in Christo fuisse demonstratur . *ibid.*  
Actus inefficaces in Christi voluntate fuerunt , ut natura est . *ibid.*  
Quod quis sit varie explicatur . *ibid.* 2  
Actus contrarii non possunt esse simul in eodem , si vere contrarii sint . 522.2



Actus efficaces voluntatis Christi semper fuerunt conformes voluntati divinæ. *ibid.* 2

Actum efficacem non conformem divinæ voluntati, qualiter Christus habere potuerit. 520.2

Actu inefficaci voluntas Christi interdum voluit, quod absolute, & simpliciter Deus nolebat: semper tamen huiusmodi actus erat conformis divinæ voluntati. 524.1

Inter actus voluntatis Christi quomodo nulla fuerit repugnantia. *ibid.*

Actus creatus liber nullus est immutabilis. 532.2

Actus idem numero extendi non potest ad plura objecta per compositionem, & unionem realium partium distinctarum. 533.1

Actus creatus non potest idem ex necessitate terminari ad Deum, libere vero ad proximos. *ibid.* 2

Actus Christi, prout erant ab illius humana voluntate, non cadebant sub meritum ejusdem Christi. 542.1

Actus hi, quantum ad valorem infinitum, quem habebant ex conjunctione ad Verbum, non cadebant proxime sub merito Christi. *ibid.*

In actu interiori solo reperiri potest malitia adorationi contraria, & qualiter. 655.2

Vide Opera, Meritum, Voluntas.

*Adam.*

Adæ peccatum cur pluribus communicetur, quam gratia Christi. 48.2

Adamo peccante, quomodo fieri potuit, ut omnes homines in eo peccaverint. 70.2

Adæ peccatum infinitum est ratione extensionis, & multiplicationis. 72.1

Adæ mysterium incarnationis revelatum est ante lapsum, sed non ipsius causa. 104.1

Adam fuit primus vates, qui de Christo prophetavit. 104.2

Adam ante peccatum per fidem incarnationis gratiam obtinuit. *ibid.*

Adam quomodo mysterium crucis agnoverit. 105.1

Adam non fuit præsciens sui casus. *ibid.*

Adam non cognovit in particulari omnia, quæ Patres ex ipsius verbis colligunt. *ibid.* 2

Adæ electio ad gloriam anteceffit in Deo permissionem peccati ejus. 123.2 Imo & voluntatem dandi gratiam, & justitiam, in qua creatus est. *ibid.*

Adæ peccatum fuit occasio passibilitatis, & mortalitatis in carne Christi. 127.1

Adam licet non peccasset, an Deus carnem assumeret. 139.1

Adam si non esset peccaturus, in justitia originali crearetur, & essent generationes hominum. *ibid.*

Adam non peccante, ejus posterum non erant habituri carnem passibilem. 139.2

Adæ posterum peccare potuissent in statu innocentiae. 144.2

Adæ ipsam singularem naturam cur Verbum assumere non debuerit. 281.2

Adam cur non dicendus sit homo cœlestis ratione suæ productionis. 283.2

Adæ infusæ fuerunt omnes virtutes ab instanti creationis. 323.1

Inter Adæ peccatum, & Christi gratiam quanta sit differentia. 344.2

Adam etiam in statu innocentiae fuit membrum Christi, atque adeo Christus illius caput. 346.2

Adæ intellectus inter humanos perfectissimus, excepto Christi. 351.2

Adam in statu innocentiae multarum rerum scientiam habuit, quas pro eo statu experiri non potuit. 404.1

Adamo infusæ sunt species ad scientiam, & non ad experientiam. *ibid.* 2

Adam meruit sibi, & suis posteris odium, & inimicitiam. 531.1

Adæ in statu innocentiae ex meritis Christi prævisis data est gratia, & justitia. 547.2

Adam filius adoptivus Dei in statu innocentiae. 612.1

*Admiratio.*

Admiratio vere & proprie fuit in Christo. 473.1

Admiratio aliquid in cognitione requirit, & aliquid in appetitu ponit. *ibid.*

Admirationis varii sunt modi, quot, & qui. *ibid.* 2

Admiratio in Deo locum non habet. *ibid.*

Admirationis qui modi fuerint in Christo. *ibid.*

Admirationis quomodo in appetitu sensitivo locum habere possit. *ibid.*

*Suarez Tom. XVI.*

*Adoptio, Adoptio divina, Adoptivi filii.*

Adoptionis natura, & conditiones. 609.1

Adoptionis nomen ab humanis ad divina per univocam convenientiam translatum. *ibid.*

Adoptare alios in filios, qualiter Deo conveniat. *ibid.* 2

Adoptio Dei nihil aliud quam creaturæ rationalis justificatio est. *ibid.* & quomodo in eo adoptionis conditiones serventur. 637.1 & qualiter adoptionis terminum non transcendat. *ibid.*

Inter humanam, & divinam adoptionem duæ notandæ differentiae. 637.1

Adoptio humana per solam extrinsecam acceptionem fit, scilicet divina, per quam filius inhaerentem accipit justitiam. 638.2

Adoptionem humanam sola relatio rationis consequitur, divinam vero realis, & vera. 610.2

Adoptioni accidentale est, quod persona, quæ adoptatur, processerit in suo esse reali ab adoptante. *ibid.*

Ad adoptionem non requiritur, adoptantem posse habere filium naturalem, quem adoptati imitentur. *ibid.*

Adoptare filios cur non possit Angelus. *ibid.*

Ad adoptionem nec necessaria est convenientia in natura specifica, nec in personis æqualitas, nec ordo ad paternam successionem in hereditate. *ibid.*

Adoptionis creatura irrationalis est incapax. 612.1

Adoptionem divinam sola illa creata persona participat, quæ per gratiam justificata est. *ibid.* 2

Adoptio filiorum Dei, quomodo per Christum data. *ibid.*

Adoptio circa personam, non circa naturam versatur. 635.1

Nos, cum adoptamur, non ad gratiam, sed ad æternam hereditatem adoptari dicimur. *ibid.*

Adoptio non est unio Verbi cum humanitate. 636.1 & quomodo in hoc ab infusione accidentalis gratiæ differat. *ibid.*

Adoptio omnis divina est gratia ex gratuita benevolentia proveniens, non e converso. *ibid.*

Adoptio non habet locum in homine respectu naturalis beatitudinis. 637.1

Vide Filius, & filiatio.

*Adoratio.*

Adorationis nomen ad quid significandum impositum. 697.1

Adoratio qualiter ab honore differat. 647.1

Adoratio est actus honorandi alterum, se illi ut superiori submittendo. *ibid.* 2

Adorationis actus quomodo ad justitiam pertineat. *ibid.*

Adoratio ad Deum terminata actus est religionis, quæ vero ad homines, aliarum virtutum. *ibid.*

Adoratio est formaliter actus voluntatis, supponens actum intellectus, bonam scilicet existimationem alterius. *ibid.*

De ratione adorationis non est, quod res adorata percipere possit honorem, qui ei tribuitur. 684.2

In adoratione duplex actus distinguendus, unus internus a voluntate elicitus, alter externus, & imperatus, cui magis adorationis nomen convenit. 648.7

Adorationis actus a voluntate elicitus objectum, quod est cultus, objectum vero cui, persona quæ adoratur. *ibid.*

Totus autem actus adorationis objectum est ipsa persona, seu res adorabilis. *ibid.*

Adorationis actus, qualiter ab actu humilitatis differat. *ibid.*

Adorationem Dei veram, & propriissimam in actu mere interno, & spiritali reperiri posse, ex Scriptura ostenditur. 649.2

Ratione probatur. 651.2

Adorandi ratio non in quovis adorationis actu directe attingitur. 672.1

Adorationis affectus, qui est actus a voluntate elicitus, versari potest circa actus fidei, & spei, aliarumque virtutum, ut in materia circa quam. 651.2

Adoratio & oratio, licet penes rationes formales differant, interdum possunt in eadem actione convenire. 652.1

Adorationis actus tam intellectus, quam voluntatis, varii numerantur. *ibid.* 2

Adoratio exterior semper supponit affectum adorandi, non vero interiorem adorationem. 653.1

Adoratio exterior qualiter interioris reverentiæ signum. *ibid.* 2

Adorationis materia, circa quam esse potest omnis actus virtutis, tam internus, quam externus, si in eo fuerit proportio



- ad significandam animi submissionem. 654.1 Hanc autem proportionem non habent omnes actus virtutum respectu adorationis strictè sumptæ, bene tamen cultus Dei in communi. *ibid.*
- Adorari directe aliquid quid sit. 671.2
- Adorationis nomen in rigore tribui potest cultui hominibus exhibito. 660.2
- Adoratio vera alicujus, necessario referenda est ad ipsum propria intentione. 684.2 Nec sufficit solus actus externus, 689.1
- Adoratio exterior sola inter homines reperitur. 655.2
- Adoratio alia interior, alia exterior, & quid utraque. *ibid.* 1 per totam. Quælibet ex his vera adoratio in sua specie, & una quandoque perfectior est alia. *ibid.* 2
- Adoratio in latrîam, duliam, & hyperdulam dividitur. *ibid.*
- Adoratio univoce dicitur de latrîa, & dulia. 656.1 sæpe tamen nomen unius ex his speciebus analogice tribuitur alteri, 657.1
- Adorandi ratio, & res adorata eadem res esse potest. 664.2
- Adoratio alia absoluta, quæ soli rei intellectuali propter se datur, alia respectiva, qua adorantur res inferiores propter alterius rei dignitatem, & excellentiam cui conjunguntur. 657.1
- Adoratio propria respectiva nominibus sacris debetur. 686.2
- Adoratio eadem potest simul esse absoluta, & respectiva, respectu diverforum objectorum materialium. 692.1
- Adoratio rerum sacrarum non proprie terminatur ad Deum, ut objectum quod, per se primo adoratum. 697.2
- Adoratio Deo debita.*
- Adoratio Deo debita singularis est, & nulli creaturæ communicabilis. 657.1
- Adoratio, qua Deus adoratur, ejusdem speciei atomæ est in ratione latrîæ in omnibus actibus, quantumvis diversæ sint rationis. 650.1
- Adorationis actus non sunt gratiarum actio pro beneficiis, & satisfactio, quæ Deo pro peccatis offertur. *ibid.* 2
- Adorationis actus exterior soli Deo debitus, quinam. *ibid.*
- Adoratio Christi.*
- Adoratione latrîæ, qua tota Trinitas adoratur, adorandus est hic homo Christus in humana, ac divina natura subsistens. 663.2
- Adoratur Christus una, eademque adoratione, qua Deus. 664.1
- Qua simul etiam adoratur ejus humanitas. 665.1 licet non æque principaliter ad illam pertineat, ac ad ipsam personam. *ibid.* 2
- Adoratio hæc quamvis in materiali objecto differat ab adoratione Verbi secundum se, essentialiter autem eadem est cum illa. *ibid.* Christus ut homo præcise, propter dignitatem, quam habet ejus humanitas ex vi unionis, non adoratur perfecta latrîa. 666.1
- Adorari potest Christus propter eximiam sanctitatem creatam animæ suæ, adoratione hyperdulæ. *ibid.*
- Adoratio, quæ debetur Christo qua redemptor, est ejusdem speciei cum ea, quæ humanitati ratione unionis tribuitur. *ibid.* 2
- Cum adoratur Christus hyperdulia illa, coadoratur divinitas. 667.1
- Quomodo una tantum adoratione Christus adoretur. *ibid.*
- Cur in Christo non intelligamus unicam tantum excellentiam ex utraque natura resultantem, cui unica, eademque adoratio ex parte naturæ debeatur. *ibid.*
- Adoratio humanitatis Christi.*
- Adorari potest humanitas Christi, ut a Verbo præcisa per intellectum. *ibid.* 2 Quinimo sic conceptæ studiosius deferatur honos, quam prætermittitur. 668.2
- Adoratio hæc inferior est summa latrîa. 669.1
- Adoratio hæc propter sola dona creata ex specie sua est dulia, & in Christi humanitate propter maximam perfectionem hyperdulia dicitur. *ibid.* 2 Propter dignitatem vero unionis, erit latrîa inferior, vel hyperdulia omnino diversa. *ibid.*
- Adoratio, qua humanitas præcisa a Verbo colitur, dici potest redundare in honorem Verbi, quin sit perfecta latrîa. 672.1
- Adorari potest Christi humanitas a Verbo præcisa, non tamen orari. *ibid.*
- Adoratur Christi humanitas cum Verbo, aut coadoratur Verbo, propositio nec damnata, nec falsa. 673.2 Hæc vero, Verbum & humanitas sunt duo objecta adorabilia, est simpliciter falsa. 674.1
- Adorationes duas esse, quarum una ad Verbum, alia ad humanitatem, ut præcisam, terminetur, non est absolute admitendum, sed cum addito, unam completam, & aliam incompletam. *ibid.*
- Hæc propositio, *Humanitas adoratur propter Verbum*, verissima. *ibid.* 2
- Aliqua sanctorum Patrum de hac re testimonia exponuntur. *ibid.*
- Adoranda esset humanitas hyperdulia, etiamsi relinqueretur a Verbo. 675.1
- Adoratio Sanctorum.*
- Adorandos esse Sanctos, qui hæretici negaverint. 659.1
- Adorandi, & colendi sancti angeli, & homines. *ibid.* 2
- Adoratione interna, & externa, duliæ tamen. 660.2
- Adoratio hæc absoluta est, & increata, & supernaturali eorum excellentia proxime fundatur. *ibid.*
- Adoratione respectiva possunt etiam adorari, & quomodo. 661.2
- Adoratio hæc cum Sanctis exhibetur, cur in Deum referri dicitur. *ibid.*
- Adoratio hæc Sanctis exhibita non est civilis, sed religiosa, cultuique divino valde conjuncta. *ibid.*
- Adorantur Sancti ex eadem virtute, qua homines iusti viatores, perfectiori tamen modo. 662.2
- Adoratio Dei, & Sanctorum qualiter ab eorundem amore differat, exponuntur. 663.1
- Adoratione eadem, qua sanctus adoratur, propter sanctitatem animæ inhaerentem, coadoratur & corpus. 665.2
- Adoratio imaginum, Vide Verbum Imago.*
- Ætas.*
- Ætates mundi sex: & quantum quæque illarum duraverit. 147.1.2
- Ætas post Christum cur novissima hora dicatur. 152.1
- Æternitas.*
- Æternitas sine existentia, nec mente concipi, nec fingi potest. 233.1
- Æternitas Dei una est, sicut & existentia absoluta. 234.1
- Æternitates tres relativæ in Deo dici non debent, sicut tres durationes: & cur. 236.2
- Alexander Magnus in templo Jerosolymitano hostias immolavit, non vera pietate, sed falsa vanitate. 11.2
- Amor.*
- Amor ex se est unitivus. 24.1
- Amor est causa amoris. *ibid.* Atque etiam similitudo. *ibid.*
- Amor divinus efficax non tam supponit, quam constituit objectum dilectionis, per donum illud, quod amando confert. 309.2
- Amor sensibilis in Christo fuit: & in Beatis etiam reperitur. 468.1
- Amor Dei efficax includit formalem, vel virtutalem voluntatem placendi Deo in omnibus, & faciendi quicquid ad retinendam amicitiam divinam fuerit necessarium. 514.2
- Amor in Christo duplex, alter consequens scientiam beatam, alter infusam. 515.2
- Amor Dei, quem Christi anima habuit, consequens scientiam infusam, fuit liber. 516.1
- Vide Caritas, Dilectio, Electio.*
- Angelus bonus, & malus, Angelica natura.*
- Angelorum naturam Deus non reparavit, sicut humanam: quia illa tota non corrui, & propter alias rationes. 27.1
- Angeli sancti fuerunt electi ante permissionem alicujus peccati, & permissio peccati malorum fuit effectus electionis bonorum. 123.2
- Angeli peccaverunt, eo quod noluerunt se Christo submittere, & humiliter ferre, naturam humanam illis fuisse prælatam. 133.2
- Angelo si uniretur humanitas, cur hoc sine ipsius mutatione non fieret, sicut in Verbo. 199.2
- Angeli in corporibus apparentes, eis non fuerunt uniti hypostatice. 266.1
- Angelica natura cura Verbo assumpta non fuerit. 266.1
- Angelorum peccatum an ex natura sua irreparabile. 267.2
- Angelica natura est simpliciter assumptibilis, humana vero pluribus rationibus. *ibid.*
- Angelica natura non est abstracta a singularibus, sed individua ac singularis. 270.2
- Angelicam naturam a Verbo non esse assumptibilem qui dixerint: & cur. 265.1 eam tamen assumi potuisse dicendum est. *ibid.*
- In angelis, & in rebus spiritualibus, suppositum a natura distinguitur, *ibid.*
- Ange-



Angelorum caput Christus est, & in eos influit gratiam. 343.1  
 Angeli obediunt Christo, & sunt ministri ejus. 347.1  
 Angeli sancti parum post creationem suam acceperunt gloriam, in secundo, vel in tertio instanti. 359.2  
 Angelorum caput ab ipsa conceptione Christus, quem ipsi iussi sunt statim adorare. *ibid.*  
 Angeli diem iudicii ignorant. 363.2  
 Angelus superior naturaliter non comprehenditur ab inferiori. 369.2  
 Angeli habent scientiam sibi connaturalem. 368.1  
 Angeli semper sunt in aliquo actu secundo. 391.1  
 In Angelis non requiruntur habitus ad scientias. 397.2  
 Angelorum illuminatio fit per spirituales locutionem, per quam superior inferiorem docet. 407.1  
 Angeli evidenter cognoverunt, miracula Christi vera esse. 409.2  
 Angelus, si assumeret hypostatice naturam humanam, & per eam peccaret, non ideo propriæ ejus voluntati culpa adscriberetur, quod secus in Deo contingit: & cur. 462.1  
 Angelorum gratiæ, & gloriæ causa meritoria Christus est. 561.1  
 Angeli dono Dei per gratiam, & fidem Christi salvati fuerunt. *ibid.*  
 Angeli, & homines conveniunt in uno genere gratiæ, & sunt membra unius corporis Ecclesiæ, cujus Christus est caput. 562.2  
 Angelorum gratiæ causa finalis, exemplaris & meritoria Christus est. *ibid.*  
 Angeli in via habuerunt fidem Christi Domini. *ibid.*  
 Angeli de his mysteriis habent scientiam matutinam, de quibus habuerunt cognitionem vespertinam. *ibid.*  
 Angelis cur ante adventum Christi janua cœlestis patuit, non autem hominibus. 564.1  
 Pro Angelis Christus propriè loquendo non est mortuus. *ibid.*  
 Neque pro eis satisfecit. *ibid.* Neque est eorum redemptor. *ibid.*  
 Angeli sancti sunt filii adoptivi Dei. Angelos posse vere, & propriè Deum adorare ex variis scripturæ locis ostenditur. 649.2

*Anima, Anima Christi.*

Anima Christi si separaretur a Verbo, posset conservare omnes habitus infusos, quos habet illi unita. 496.1  
 Animas justas non posse satis pati in futura vita pro reatu peccatorum temporalis, si Deus vellet toto rigore justitiæ uti, sed posse illas perpetuo beatitudine privare, falsum est. 109.1  
 Anima Christi magis a Deo diligitur, quam omnes prædestinati. 133.2  
 Anima fit per distinctam, & separabilem actionem ab ea, qua fit ejus subsistentia. 182.2  
 Anima Christi distincta actione creatur, & Verbo unitur. 183.1  
 Anima Christi effectio est vera creatio ejusdem rationis essentialis, & specificæ cum ea, qua producit qualibet alia anima. *ibid.*  
 Anima Christi prius natura extitit, quam assumpta fuerit a Verbo. 183.2  
 Anima Christi quomodo pendeat a Verbo. *ibid.*  
 Anima rationalis prius natura existit, quam subsistat. *ibid.*  
 Anima Christi prius natura subsistit, quam accidentaliter perficiatur. 212.1  
 Anima Christi non meruit suam assumptionem, seu unionem. 218.1  
 Animam rationalem Christum non habuisse, qui hæretici negaverint. 281.2  
 Animam rationalem ejusdem speciei cum cæteris Christus assumpsit. 282.1  
 Anima quomodo sit Verbo Dei propinquior, quam caro. 289.2  
 Anima est ratio, & finis, propter quem corpus est assumptum. 290.1  
 Anima est medium congruitatis ad assumendum corpus. *ibid.*  
 Anima rationalis, ut confert gradum sentiendi, vocatur anima, ut gradum rationalem, spiritus, & intellectus. 291.1  
 Animas omnes a principio creatas esse, Origenis est error, qui redarguitur. 294.2  
 Anima Christi non prius tempore creata fuit, quam corpori unita contra Origenem. *ibid.*  
 Anima Christi non prius tempore fuit unita corpori, quam Verbo, vel e converso. 295.1  
 Anima unita est Verbo prius natura quam corpori ordine executionis. 297.1

Anima humana in corpore subsistit. 298.1 Et qua ratione possit simul subsistere, & informare corpus. *ibid.*  
 Anima ordine intentionis prius natura assumpta est, quam caro. 300.1  
 Anima variis modis existimari potest fuisse medium ad assumendam carnem. *ibid.* Non tamen fuit vinculum uniens ipsam ad Verbum. 301.1 Neque ita fuit medium, ut ad illam sit unio immediate terminata, ac corpus autem mediate. *ibid.*  
 Animam assumptam fuisse medio spiritu quomodo sit intelligendum. *ibid.*  
 Anima secundum se est ratio assumendi materiam, non ordinem ipsius materiæ ad animam. 302.1  
 Animam assumptam esse medio corpore quomodo sit intelligendum. *ibid.*  
 Anima, & caro inter se prius natura assumptæ, at vero ut unitæ inter se, media humanitate assumptæ fuerunt. 305.2  
 Anima Christi per essentiam non est divina, & indiget gratia, ut talis fiat. 318.1  
 Anima Christi habuit donum gratiæ habitualis. 312.1 Quod de fide certum esse probatur. *ibid.* Et ab instanti suæ creationis. 314.1  
 Anima Christi Verbo unita, ut viatrix indiget gratia excitante ad supernaturales actus: accommodata tamen statui, in quo est constituta. 317.1  
 Anima Verbo unita etiam indiget speciali auxilio excitante, & adjuvante ad servanda præcepta, & vitandum omne malum. *ibid.*  
 Anima Christi nihil eorum nescivit, quæ in aliqua temporis differentia existentiam habitura sunt. 354.2  
 Anima Christi etiam eo tempore, quo fuit conjuncta corpori mortali habuit scientiam beatam. 457.1 Et a primo instante suæ creationis. *ibid.* Et contrarium erroneum, & hæresi proximum ostenditur. *ibid.*  
 Anima Christi cognoscit cogitationes, etiam earum quæ judex futura non est. 364.2  
 Anima Christi quomodo infinita individua substantialia per modum simplicis intelligentiæ videre possit. 365.1  
 Anima Christi divinam essentiam comprehendere non potest. 371.2  
 Animam Christi videre omnia, quæ Deo possibile sunt, qui dixerint. *ibid.* Eam alii omnia in habitu scire, quæ sunt in Deo opinantur, non vero in actu secundo. 372.1  
 Anima Christi non videt actum in Verbo omnia, quæ absolute in potentia Dei continentur. 373.1  
 Anima Christi, neque in actu primo, seu habitu, videt omnia possibile in Deo. 377.1  
 Anima Christi videt in Verbo aliqua ex possibilibus, quæ nunquam erunt. *ibid.*  
 Anima Christi videt simul, & in actu secundo omnia, quæ Deus videt scientia visionis. 378.1  
 Anima Christi data est visio non ex meritis, sed quanta per merita convenienter comparari possit. *ibid.*  
 Anima Christi, licet comprehendat objecta creata, quæ per scientiam visionis videntur, non tamē comprehendit scientiam visionis Dei, neque ejus potentiam. 379.1  
 Anima Christi videt in Verbo infinita. 2 sed non infinita categorematice. 380.1  
 Anima Christi potuit semper a principio creationis suæ esse in actuali usu scientiæ infusæ. 391.1  
 Anima Christi, licet informaret corpus, erat tamen beata, & ideo ita dominabatur corpori, ut in spiritualibus suis actibus ab illo non impediretur. *ibid.*  
 Anima Christi semper fuisse in aliquo actu secundo scientiæ infusæ verisimile est. *ibid.* Non tamen semper in uno, & eodem actu permansit. *ibid.*  
 Anima Christi non poterat elevari ad eliciendos simul plures actus scientiæ infusæ modo connaturali, secus de potentia Dei absoluta. 392.1  
 Anima Christi simul cognoscere potuit plura uno actu scientiæ infusæ. *ibid.*  
 Anima Christi quomodo potuerit applicare hanc scientiam potius ad hunc actum, quam ad illum. *ibid.*  
 Anima Christi nunquam usa est scientia infusa discurrendo, aut componendo. 391.1  
 Anima per conjunctionem ad corpus gloriosum, non impeditur, quo minus perfecte noscat omnia, quæ novit separata. 392.2  
 Anima Christi in statu viæ potuit intueri omnes substantias separatas, prout in se ipsis sunt, eo naturali modo, quo ab anima separata cognosci possunt. *ibid.*



- Anima Christi in corpore corruptibili potuit habere cognitionem intellectivam naturalem sine conversione ad phantasmata. 293.1
- Anima Christi a principio suæ conceptionis habuit perfectos & per accidens infusos habitus scientiarum, & virtutum intellectualium, cum speciebus ad earum usum necessariis. *ibid.* 2
- Anima Christi quomodo rationales creaturas illuminet. 407.1
- Anima Christi habuit virtutem ad omnes mutationes miraculosas, excepta annihilatione. *ibid.*
- Anima Christi, qua ratione actus suos supernaturales operetur. 414.1
- Anima Christi non potest efficere gratiam, ut principale agens in alios. *ibid.*
- Anima Christi nec mortificata peccato, nec damnatione punita fuit. 459.1
- Anima Christi non fuit sanctificata per dispositionem, quæ se ipsam ad gratiam præparaverit. 541.2
- Anima Christi statim post mortem fuit impassibilis. *ibid.*
- Anima Christi in triduo mortis non fuit in statu viatricis. *ibid.*
- Anima separata non est in statu satisfaciendi, sed satisfatiendi. 542.1
- Anima purgata non indiget nova applicatione meritorum Christi ad ingrediendum beatitudinem. 553.1
- In anima separata est vera, & propria adoratio. 651.1
- Vide intellectus, voluntas, scientia.
- Annus, Annus incarnationis.*
- Anni solares, & lunares quomodo differant. 78.1
- Annus solaris naturalis est, lunaris vero artificialis. *ibid.*
- Annis solaribus Hebræi utebantur. *ibid.*
- Anni qui in Scriptura computantur, solares sunt. *ibid.*
- Annum Græci, & Romani solarem faciunt, quem illi ab Ægyptiis, hi ab Hebræis acceperunt. 78.2
- Anni Regum Historiæ sacræ omnes integri, & quid in hac difficultate respondendum sit. 149.1
- Annus inchoatus tamquam imperfectus in Scriptura omittitur. *ibid.*
- Quo anno ab orbe condito Christus fuerit incarnatus. 147.1
- Varie circa hoc sententiæ. 147.2 Fuit a creatione mundi, quatermillesimo plus minusve. 150.2
- Annus incarnationis juxta computationem Græcorum fuit olympiade centesima nonagesima quarta. *ibid.*
- Annus incarnationis fuit anno quadragesimo primo Augusti Cæsaris juxta computationem Romanorum. *ibid.*
- Antichristus.*
- Antichristus dæmon futurus non est, nec Deus, etiam si posset, id faceret ad tam pravam finem. 195.1
- Antichristus propter malitiæ perfectionem omnium malorum caput dicitur. 350.1
- Apollinaris error divinitatem conversam fuisse in humanitatem. 87.1
- Appetitus, Appetitus Christi.*
- Appetitus duo in homine, quorum si inferior peccaverit, superiori tribuitur, si potuit impedire. 462.1
- Appetitus sensitivus verus in Christo fuit. 465.2 Ejusque veri, & proprii actus in Christo fuerunt. *ibid.* Non vero absque consensu rationis, & voluntatis, quem nunquam prævenire potuerunt. *ibid.*
- Appetitus hujus actus, an fuerint in Christo perfecti expositivo consensu, & motione voluntatis: an vero interdum fuerint prævisi, & permitti. 466.1
- Appetitus sensitivus Christi, & refugiebat, & appetebat mortem. 467.2
- Appetitus sensitivus Christi fuit aliquo modo conformis divine voluntati circa objecta repugnantia ex motione portio- nis superioris. 518.1
- Vide concupiscentia, sensualitas, Fomes, Voluntas.
- Assumptio, Assumere, Assumptibilis.*
- Assumptibilis duobus modis aliqua natura dicitur, & quibus. 267.1
- Quod assumitur, supponitur assumptioni.* 218.2
- Assumi non possunt partes metaphysicæ, & cur. 277.1
- Assumptibilis est materia prima sine forma: & natura integra & completa. *ibid.*
- Assumptibilis est forma substantialis separata a materia. *ibid.*
- Assumi non potest pars integralis sine aliis partibus. *ibid.* 2
- Assumi non potest forma accidentalis ad unionem hypostati- cani 278.1
- Assumpta potest dici, utraque pars prius ordine executionis quam alia in suo genere: simpliciter tamen assumptio cor- poris videtur antecedere. 300.1
- Assumpta est prius substantia, quam adveniat ei aliquid acci- dens. 289.2 etiam si tale duratione præcesserit in materia. *ibid.*
- Assumere Deum naturam, quæ in proprio supposito fuerit pec- cato subjecta, non est impossibile. 463.2 Tunc tamen non esset verum, dicere Deum aliquando peccasse. *ibid.*
- Ars.*
- Ars factibile in Christo fuit. 359.2
- Ars effectiva imaginum honesta est. 677.2
- Attributa.*
- Attributa personalia Patris, & Spiritus sancti non prædi- cantur de Christo. 478.2
- Attributa divina dicuntur de Christo, sed non cum reduplica- tione, ut homo. 479.1
- Attributa quædam Christo conveniunt ratione utriusque naturæ. 480.1
- Attributa creaturarum conveniunt Christo, quando non inclu- dunt suppositum creatum, & ex nihilo productum. 490.2
- Attributa divinitatis, sive in concreto, sive in abstracto non possunt de humanitate prædicari. 477.1
- Attributa Dei simpliciter prædicantur de Christo, & de homi- ne substantiali prædicatione vera, & propria. 478.2
- Attributa divinitatis, & ipsa divinitas non possunt prædicari de Christo denominative. 479.1
- Attributa divinitatis qua ratione humanitati Christi inter- dum communicari possunt. 477.1
- Attributa humanitatis, neque in concreto, neque in abstracto de divinitate prædicari possunt. *ibid.*
- Attritio.*
- Attritio nullum amorem requirit etiam imperfectum. 80.1
- Attritio, quæ de se non est sufficiens dispositio ad justificatio- nem, in sacramento propter Christi meritum acceptatur, ut sufficiens. 549.2
- Audacia Christi.*
- Audacia appetitus quomodo in Christo fuerit. 468.2
- Audacia perfectissime in Christo fuit. 520.1
- Auxilium.*
- Auxilium omne gratiæ excitantis, & adjuvantis, usque ad ju- stificationem datur nobis ex meritis Christi. 548.1
- Auxilia gratiæ omnia, quæ hominibus justificatis conferun- tur, sunt ex meritis Christi. 551.1
- Auxilia gratiæ extraordinaria, & uberiora, quæ interdum ho- mini iusto conferuntur, ex meritis Christi dantur. *ibid.*
- B**
- Babylon.*
- Babylonicæ captivitates tres fuerunt. 149.2
- Babylonicæ captivitatis septuaginta anni, unde inchoentur. *ibid.*
- Quando finiantur. *ibid.*
- Babylonis Reges captivitatis tempore quot fuerunt. 150.2
- Beatus, Beatitudo.*
- Beatitudo dicitur dari, ut merces, & corona justitiæ. 60.2
- Beati vident in Deo omnia, quæ formaliter sunt in ipso. 367.1
- Beatus videns Deum potest videre in eo creaturas, quæ in eo continentur eminenter: non effective solum, sed forma- liter. 372.1
- Beati in Deo, visa una creatura, non necessario vident omnes. *ibid.*
- Beati in Deo videt creaturas non solum secundum illud esse, quod in Deo habent, sed secundum esse proprium. 373.1
- Beatus videt in Verbo omnia, quæ ad statum suum pertinent. 378.1
- Beatitudinis perfectio est commensuranda uniuscujusque me- ritis. *ibid.* 2
- Beatus in patria amat Deum necessario, non tamen quoad omnem modum possibilem ipsi charitati. 517.1
- In Beatis qui sunt omnino extra viam possunt esse actus ineffi- caces procedentes a voluntate, ut natura est. 521.1
- Beatitudo non manet sine fruitione. 522.2
- Beatus non necessario de omnibus gaudet, quæ in Deo videt. 522.1
- Beati semper habent voluntatem conformem divinæ volun- tati. 523.1
- Beatorum animæ, licet careant gloria corporis, sunt extra sta- tum viæ & meriti. 529.2
- Vide felicitas, Visio.



*Bonum.*

Quomodo ad boni rationem pertineat seipsum communicare. 18.2

Bonum se communicare in omni genere causarum dicitur, 19.1

Bonum qua ratione sui diffusivum esse dicatur. *ibid.*

Bonum maxime amabile nobis etiam ratione concupiscentiæ est Deus. 320.2

Bonitas moralis in actibus voluntatis quid. 698.1

Cæsarum Galli, ac Juliani fratrum pietas erga sanctos, studia- que longe divisa. 642.1

In calice cur plus vini quam aquæ fundatur. 32.2

*Calvinus hæreticus.*

Calvini error, carnem Christi prius fuisse conceptam, quam as- sumptam, 205.1

Calvinus Christo peccatum imposuit. 459.1

Calvinus hæreticus damnatus, quod libertatem arbitrii oppo- sitam necessitati negaverit. 508.2

Calvinus negat, Christum sibi aliquid meruisse. 543.2

*Caput. Caput Christus.*

Caput Ecclesiæ Christus. 342.1

Caput nostrum quomodo sit Christus quantum ad corpus. *ibid.*

Caput beatorum, & viatorum omnium, sed non damnatorum Christus est. 343.1

Caput infidelium qua ratione Christus sit. *ibid.*

Caput damnatorum qua ratione Christus non sit. *ibid.*

Capitis influentia quomodo Christo sit propria. 345.2

Capita Ecclesiæ quomodo alii nuncupari possint. *ibid.*

Capitis potestas in corpus mysticum quam multa contineat. *ibid.*

Capitis dignitas non est distincta a dignitate redemptoris, & Sanctificatoris. 348.1

*Caro.*

Caro Scripturæ more totum hominem significat. 2.2

Carnis nomen, & sanguinis corruptionem indicat usu Ecclesiæ & Patrum. 140.2

Caro Christi quomodo per unionem hypostaticam fuerit san- ctificata. 310.2

*Carolus.*

Carolus Magnus in Concilio Francofordiensi erroris Icono- machorum suppressit insaniam. 687.1

Carolo Magno libri contra imagines falso impositi sunt, & multo magis eorum præfatio. *ibid.*

*Causa.*

Causa motiva quomodo ab impulsiva differat, 131.1

Ad quod genus causæ revocetur terminatio humanitatis a Verbo. 199.1

Causa etiam instrumentalis non potest in actum secundum prodire, nisi prius in actu primo constituatur. 421.2

Causa non constituitur in actu primo ad agendum per solam denominationem extrinsecam. 422.1 Duplex modus con- stituendi causam in actu primo, & qui sint: & differentia illorum. *ibid.*

Causa quomodo possit constitui in actu primo per virtutem sibi extrinsecam. 414.2

Causa inferior perficitur in ratione causæ ex conjunctione, & subordinatione ad superiorem, absque superaddita entitate, quando in ea supponitur aliqua virtus, qua possit esse causa. 925.2

Secus, quando nulla supponitur, vel ex tali conjun- ctione illi non tribuitur intrinsece. *ibid.*

*Charitas, Charitas Christi.*

Charitatis actus tantam bonitatem in se habet, quantam malitiam actus peccati, loquendo de bonitate, & malitia intrinseca actui. 74.2 secus de valore ad satisfaciendum. 698.1

Charitatem infusam esse animæ Christi de fide est. 312.2

Charitas est donum permanens per modum habitus. *ibid.*

Charitas Christi, & aliæ virtutes ejus morales habent in suo genere infinitatem. 338.1

Charitas actualis Christi, alia viatoris, alia comprehen- soris, illa meruit, non hæc. 532.1 Illa fuit libera non hæc. *ibid.* Differuntque specie, vel numero tantum. *ibid.*

Charitatis proximi actus in Christo potuit esse meritorius. *ibid.*

Vide Amor, Dilectio.

*Christus Deus, & Dominus.*

Christus omnis gratiæ, & meriti fons: secundum quod est Deus felicitatis nostræ pars præcipua. 2. De eo qui est nostræ speciei individuum cur scientia instituat. *ibid.*

Cur sanctus sanctorum dicatur, & nemo alius præter ip- sum. 7.1 Per ejus adventum antiquæ prophetiæ impletæ, & novæ cessarunt. *ibid.* Cur *Desideratus cunctis genti- bus*, etiam si ab eis non esset cognitus, a Propheta dictus sit. 11.2

Christus quando venit in templum, implevit illud gloria, juxta Aggæi prophetiam. 12.1 In ejus adventu quot, & quanta prodigia evenierit, ob quæ *cælum & terra mota*, ab eodem dicuntur. *ibid.*

Christo nascente tres soles apparuerunt. 12.2

Christum verum Messiam jam venisse variis testimoniis, & signis comprobatur. 13.2 De Christo multa metaphori- ce dicta, ad literam intelligentes Judæi errarunt. 14.1

Sicut etiam errant duplicem ejus adventum non distin- guentes. *ibid.*

Christum verum hominem esse ostenditur. *ibid.*

Christum verum Deum qui, & quot hæretici negaverint. 15.1

Christum verum Deum esse variis locis Scriptura probatur, *ibid.*

Christum innocentem pro nocentibus mori opus fuit summæ misericordiæ, & non justitiæ nostræ. 30.1

Christum redemptorem corporum, non animarum infideles credentes redarguuntur. *ibid.*

Christus non solum pro hominibus post ipsum futuris, sed etiam pro præcedentibus mortuus est. *ibid.*

Christus sufficienter tam pro originali peccato, quam pro uni- versis hominum peccatis satisfecit. 31.1 Ea ratione nos redemisse, & emisse dicitur. *ibid.*

Christus non solum pro peccatis quoad culpam, sed etiam pro poenis eisdem debitis sufficienter satisfecit. *ibid.*

Christus liberavit nos a potestate dæmonis, & quare. *ibid.*

Christus januam regni cœlestis antea clausam propterea ape- ruisse dicitur. 32.1 & mortem superasse, non ut eam non subiremus, sed ut in ea non permaneremus. *ibid.*

Christus nobis multo plus profuit, quam Adam nocuit. *ibid.*

Christus, absolute loquendo, ut Deus homo satisfecit. 33.1

Christus non solum Deo, sed etiam hominibus, & peccatoribus, se subdidit. *ibid.*

Christus plura operatur secundum intensionem, & perfectio- nem in hominibus, quam peccatum Adæ, licet non secu- dum extensionem. 48.2 Cur existente Christi redemptione tam copiosa, & infinita tam pauci homines salventur. *ib.*

Christus non communicat membro suo virtutem ad satisfaciendū modo sibi proprio, sed alio illi proportionato. 101.1

Christus exhibuisse sufficiens remedium ad deletionem om- nium peccatorum, est intelligendum de hominibus, & non de angelis. 108.1

Christus non minus principaliter venit propter Adam, quam propter alios. *ibid.*

Christus pro poena damni quas poenas sustinuerit. 109.1

Christus qua ratione dicatur esse causa finalis nostræ gratiæ, & justitiæ. 120.2

Christus Deus, homo factus est, ut esset caput & finis divino- rum operum. 122.1

Christus unigenitus ut Deus, ut primogenitus ut homo. *ib.*

Christus ut homo est finis propter quem, & in cujus honorem Deus omnia creavit. 123.1

In Christi gloriam cedit quidquid hominibus collatum est gratiæ, & gloriæ. *ibid.*

Christi immortalitas est exemplar nostræ immortalitatis, sed nostra mortalitas est exemplum mortalitatis Christi. 128.1

Christus de factō incarnatus est propter redimendos homines non tantum ab originali, sed etiam ab aliis actualibus. 140.1

Christus qualis fuisset durante innocentia statu. *ibid.*

Christus venit principaliter ad tollendum peccatum tam ori- ginale, quam actuale, sed principalius ad tollendum origi- nale. 133.2

Christus non venisset passibilis ad redimendos homines in sta- tu naturæ integræ peccantes. 144.2

Christus singulos homines ita dilexit, ut pro eis singulis mori paratus fuerit. *ibid.*

Christus venit peccatores omnes salvos facere quoad sufficien- tiam, non quoad efficaciam. 146.1



- Christum hominem existere ante omnes creaturas cur necesse non fuerit. *ibid.*
- Christus natus est vigesima quinta Decembris anno quadragesimo secundo Imperii Augusti Cæsaris. 151.1
- Inter Christi compositionem ex Verbo, & natura humana, & nostram ex corpore, & anima quid intersit. 154.2
- Christum non habuisse animam rationalem hæresis semper fuit. 160.2
- Christus nullo modo instrumentum divinitatis dici potest, sed ejus humanitas, & cur. 163.1
- Circa utramque Christi naturam errores varii. *ibid.*
- In Christo post incarnationem duæ permanserunt naturæ integræ, & inconfusæ. 164.1
- In Christo una est tantum persona in duabus naturis subsistens. 167.2
- Christus vere, & proprie dicitur Deus, & homo. 168.1. est una hypostasis, seu suppositum unum. *ibid.*
- Christus est persona composita. 169.2
- Hæc compositio proxime intercedit inter subsistentiam Verbi & humanitatem. *ibid.* & consequenter est compositio ex duabus naturis. 170.1
- Christus plus includit, quam Verbum. 171.2
- Christus quomodo distinguitur a Verbo. *ibid.*
- In Christo, non esse alium & alium, esse tamen aliud & aliud, quomodo intelligendum. 173.1
- Christum esse personam compositam rectius dicitur, quam Verbum compositum. *ibid.*
- Christus quomodo dicatur, quid creatum. 174.1
- Christo nihil deest, ut sit perfectus homo, quam ejus humanitas propria subsistentia careat. 196.1
- Christi Dei, & hominis major est unitas, quam numeralis. 201.2
- In Christo est unitas naturæ humanæ, non personæ creatæ. 202.1
- Christus, ut includit totum id, quod est, non est minor Patre, secus ut constituitur per humanitatem. 204.1
- Christo homini qua ratione gratia unionis sit connaturalis. 209.1
- Christus exaltationem suæ humanitatis non meruit, sed gloriam & honorem, quem post passionem assecutus est. 218.1
- Christus non est meriti capax, nisi ut Deus homo. 219.2
- Christus non potuit mereri prædestinationem incarnationis. *ibid.*
- Christus de potentia absoluta mereri potuit suam incarnationem. 220.1. Non tamen de facto meruit. *ibid.*
- Christus non meruit ea, quæ suam incarnationem antecesserunt, nisi talia fuerint, quæ ad homines sanctificandos pertinerint. 221.2
- Christum non meruisse continuationem incarnationis, neque ut partes, quæ per nutritionem ei accedebant, a Verbo sustentarentur, probabile est. 222.1 Tamen contrarium, ut probabilius asseritur. 221.2
- Christus fundamentum omnis meriti, & bonæ operationis. 226.1
- Christus habens naturam divinam, & humanam, cur sit unum. 242.2
- Christus constituitur sua humanitate homo, divinitate vero Deus, relatione vero, & subsistentia, persona. 248.1
- Christus ut subsistens est persona relativa, ut vero est individuum naturæ humanæ, est quid absolutum. 255.2
- Christus naturæ humanæ est univoce homo nobiscum, non ratione personæ. *ibid.*
- Christus est unus homo specie cum aliis hominibus. 263.1
- Christus quamvis habeat duas naturas substantiales, simpliciter est una substantia. 264.1
- Christus assumpsit corpus, & animam inter se unita ad componendam humanitatem. 283.2
- Christus ex tribus naturis, carne, anima, & divinitate compositus dici potest. 284.1
- Inter Christi, & nostram originem diversitas est, quia caro nostra prius concipitur, quam animetur, non autem Christi. 293.1
- Christus ab initio suæ conceptionis fuit gratus Deo, sanctus & innocens. 308.2
- Christus ut homo formaliter ex vi suæ gratiæ unionis fuit absolute & simpliciter sanctus, & Deo gratus. 309.1
- Christus eo oleo spiritali fuit formaliter sanctificatus, quo fuit unctus, & a quo nomen Christi accepit. *ibid.*
- Christus ut homo non indiguit gratia creata, ut esset gratus Deo, & sanctus simpliciter. 311.1
- Christus est subjectum convenientissimum gratiæ habitualis, non vero proportionatum, & illi connaturale. 316.1
- Christus in omni statu ab intrinseco est impeccabilis. 318.1
- Christo necessarium fuit, & debitum speciale auxilium ad non peccandum, & negari ei non potuit. *ibid.*
- Christus licet non habuerit habitum fidei, habuit tamen habitum, quo voluntas bene disponitur ad obediendum fidei. 319.2
- In Christo non fuit potentia peccandi, quamvis in eo fuerit liberum arbitrium. 321.2
- Christus a principio habuit omnem perfectionem unioni debitam, cujus carentia redemptioni necessaria non erat. 322.2
- Christus in instanti conceptionis tam perfectus in sanctitate, & scientia fuit, ut nunc est. 323.1
- In Christo fuit cognitio intuitiva supernaturalium mysteriorum fidei, & abstractiva. 322.3
- Christus vere, & proprie fuit Propheta. 328.1
- Christus finis omnium Prophetarum. *ibid.*
- Christus plenus gratia fuit ut fons, Maria ut aquæductus, cæteri, ut rivuli. 340.2
- Christus quomodo sit caput nostrum, quantum ad corpus. 342.1
- Christus proprie est caput Ecclesiæ, aliarum vero rerum dominus. 347.2
- Christus membrum corporis Ecclesiæ dici non potest. *ibid.*
- Christus simpliciter loquendo ignorantiam non habuit, sed plenitudinem scientiæ. 354.2
- Christum decuit similem esse hominibus in natura passibili, sed non in culpa, vel defectibus qui culpæ sunt conjuncti. *ibid.*
- Christi sensus nunquam falli potuerunt. *ibid.*
- Christus quomodo opinionem nullam habuit. *ibid.*
- Christus de potentia absoluta falli, errare non potuit. 355.1
- Christus habuit omnem scientiam, quæ secundum potentiam ordinariam a Deo communicatur alicui intellectui creato. 377.2
- Christus non per sua merita, sed altiori titulo beatitudinem habuit. 378.2
- Christus habuit perfectam prudentiam commensuratum potestati excellentiæ, & supremo dominio, quod habuit ut homo. 382.1
- Christus scientia infusa, altiori lumine & modo cognovit singularia, quam possint ab angelo vel homine naturaliter cognosci. *ibid.*
- Christus potissimum de cogitationibus liberis judicaturus est. 383.1
- Christus *brachium Domini* dicitur, quia per eum est miracula operatus. 412.1
- Christo Deo aliter tribuuntur passionibus humanitatis, quam Christo homini divinitatis actiones. *ibid.*
- Christus est fons gratiæ in genere causæ meritoriarum, non efficientis physicæ. 414.2
- Christus per quamcunque actionem, & passionem suam eo tempore quo illa existeret, potuit, vel gratiam, vel alios effectus supernaturales efficere. 443.2
- Christus cur animæ defectus non assumpserit, sicut corporis. 449.1
- Christus reliquit mundum, etiam si in Eucharistia manserit. 455.1
- Christus vere nobis est absens, & præsens. *ibid.*
- Christus ubique est homo, quomodo hæc propositio sit falsa, vel vera. 456.1
- Christus vere fuit localiter motus. *ibid.*
- Christus non potuit mentiri, quia est ipsa veritas. 460.2
- Christus accepit statum innocentiam, & gloriæ perfectionem excepto corpore impassibili. 466.1
- Christus seu hic homo est Deitas, propositio hæc admitti potest. 478.1
- De Christo partes ejus integrales prædicari non possunt. *ibid.*
- Christus est humanitas, & divinitas simul sumptæ, qualis sit propositio. *ibid.*
- Christus non dicitur, homo deifer, sed Deus carnifer. 479.1
- seu potius dicendus, ferens humanitatem. *ibid.*
- Christus non potest dici homo deificatus. *ibid.*
- De Christo contraria, ut corporeus, & incorporeus, mortalis & immortalis, dici possunt. *ibid.*
- De Christo quædam dicuntur, quæ de Verbo dici non possunt, & qualia sint. 481.1
- Christus, & Jesus, tam per se, & essentialiter est homo, ac Petrus. 482.1
- Chri-



Christus qua ratione dici possit humana persona vel non. 483.1  
 Christus cur homo Dominicus dici non possit. 484.2  
 Christus factus est homo, vera est propositio ratione suppositi. 487.1  
 Christus non incepit esse, in rigore vera est propositio. 492.1  
 Christus incepit esse Deus, falsa est propositio. *ibid.*  
 Christus secundum quod homo, est creatura, quo modo sit vera vel falsa propositio. *ibid.* 2  
 Christus simpliciter non est creatura. 493.1  
 Christus secundum quod homo, est Deus, magis est neganda, quam affirmanda. *ibid.* 2  
 Christus in quantum homo est persona humana, propositio est vera. 494.2  
 Christus est unus, etiam si prædicatum unus masculine sumatur. 495.2  
 Christus est unum simpliciter, quamvis prædicatum unum neutro genere sumatur. *ibid.*  
 Christus non potest dici aliud & aliud. 496.1  
 In Christo, licet sit aliud, & aliud, propositio tamen Christus est aliud & aliud, neganda est. *ibid.* 2  
 Christus est totus homo, & totus Deus, propositiones veræ sunt. Totus Christus est homo, & Totus Christus est Deus, non item. *ibid.*  
 Inter Christum & confirmatos in gratia, quæ sit differentia in ordine ad impeccabilitatem. 514.1  
 Christus voluit efficaciter quidquid Deus voluit ipsum velle & prout Deus voluit. 522.2  
 Christum habuisse actum contrarium voluntati divinæ impossibile, supposita ejus scientia. 523.1  
 Christus in ipsa morte obtinuit plenum jus & perfectum ad omnia præmia, quæ secundum legem ordinariam mereri poterat. 535.2  
 Christus magis vult & amat gloriam suam, quam nostram. 539.2  
 Christus non est intelligendus in cognitione procedere ab imperfecto ad perfectum. 540.2  
 Christus non solum ut caput in membra conjuncta influxum habet, sed etiam in separata. 549.2  
 Christus sanctificator angelorum, justificator & glorificator recte dicitur, non autem redemptor. 565.1  
 De Christo multa cum hoc addito in quantum homo, prædicantur, quæ simpliciter de ipso dici non possunt. 587.2  
 Christus non potius natura est homo vel hic homo, quam filius Dei. 620.1  
 Christus ut homo si esset persona extranea respectu æternæ hæreditatis, posset ad illam adoptari quantumvis ejus natura esset unita Verbo. *ibid.*  
 Christus ut homo est filius Dei, filiatione consequente gratiam unionis, quæ non est tantum ad primam Trinitatis personam, sed ad omnes, ut sunt unus Deus. 621.2. In modo tamen loquendi, non potest simpliciter dici filius suus, seu Verbi. Nec Spiritus Sancti, nec Trinitatis. 622.1  
 Christus toto fere indice continetur, quare quæ hic non habentur, in propriis ipsorum locis querenda sunt.  
 Cognitio. Cognoscere.  
 Cognitio intuitiva & abstractiva, quomodo possit esse idem actus respectu diversarum rerum. 392.2  
 Cognosci eadem res potest altiori & inferiori modo, sub diversis luminibus. 381.2  
 Cognitio quidditativa Dei non potest esse nisi intuitiva. 387.2  
 Cognoscere Deum futura peccata in determinatione suæ divinæ voluntatis, improbable, & a divina bonitate alienum est. 383.2  
 Cognoscit Deus non tantum futura, sed quæ nunquam erunt, *ibid.*  
 Cognoscere creaturas per propriam cognoscentis essentiam, Dei proprium est. 390.1  
 Quando cognoscitur Deus per effectum, duo conceptus formantur, unus Dei, alter effectus. *ibid.* 2  
 Vide scientia.  
 Communicatio. Communicatio idiomatum.  
 Communicationis modus, quis omnibus præstet. 19.1  
 Communicatio in divinis personis invenitur. *ibid.*  
 Communicatio maxima Dei creaturis fit per incarnationem. *ibid.* 2  
 Communicatio hæc Dei infinitam potentiam ostendit. *ibid.*  
 Communicatio hæc Deo imperfectionem non attulit. *ibid.*  
 Communicat se ita Verbum humanæ naturæ, ut vere & substantialiter illi copuletur. *ibid.*  
 Communicationis modus multiplex. 239.1. Incommunica-

cabilitas quid sit. 243.1. Modi ejus. 239.1  
 Communicatio idiomatum qualis futura esset, si tres personæ divinæ assumerent unam naturam humanam. 257.2  
 Communicatio idiomatum esset inter naturas assumptas, si eas persona divina assumeret. 258.2  
 Communicatio idiomatum non est inter supposita ejusdem naturæ. 463.2  
 Communicatio idiomatum propriè est ejusdem suppositi existentis in pluribus naturis. *ibid.*  
 Communicatio idiomatum est proprietatum seu attributorum inter Deum & hominem mutua prædicatio. 475.1  
 In communicatione idiomatum hæretici & Scholastici quidam turpiter errarunt. *ibid.* Refelluntur. *ibid.* 2  
 Communicatio idiomatum vera & propria consecuta est ex mysterio incarnationis inter Deum & hominem. *ibid.* In quo consistat. 476.1  
 Communicatio hæc indicat potius veram & realem unionem, in qua mysterium hoc positum est. 477.1  
 Communicatio idiomatum non sumitur a proprietatibus divinitatis. 486.1  
 Per communicationem idiomatum dici non potest Verbum mutari ratione unionis. *ibid.* An vero ratione aliarum mutationum, quæ sunt in humanitate post unionem. 456.2  
 Per communicationem idiomatum Deum peccare posse absurdissime dicitur, quod est contra Durandum. 461.2  
 Vide attributa.  
 Comprehensio. Comprehendere.  
 Comprehensio duo significat, & quæ illa sint. 361.2. & latius. 366.2. Aliæ acceptiones referuntur, & confutantur. *ibid.*  
 Ad comprehensionis strictam rationem non requiritur summa claritas, & summa intensiva perfectio in cognitione. 367.1  
 Comprehensio intellectualis necessario requirit cognitionem claram evidentem & certam cum debita proportionem ad objectum. *ibid.* 2. Tantam claritatem requirit quanta sufficiat ad cognoscendam veritatem objecti prout in se est. *ibid.* 2. Tantamque perfectionem intensivam, quanta necesse sit ad exacte cognoscendas & penetrandas in objecto cognito omnes habitudines & connexiones, quas ex natura sua habet & habere potest. *ibid.* 1  
 Ad comprehensionem alicujus creaturæ non requiritur, quod cognoscatur talis creatura secundum suam obedientialem potentiam. 368.1  
 Comprehensio est cognitio sufficiens ad cognoscendum quidquid formaliter & eminenter est in objecto. *ibid.* 2  
 Comprehensio non requirit, ut sit tanta perfectio in cognitione in esse entis, quanta in re cognita. *ibid.* Neque ut sit absolute & simpliciter perfectissima cognitio, quæ de tali objecto esse potest. *ibid.*  
 Ad comprehendendum Deum intensive nulla cognitio potest esse sufficiens, nisi ea, quæ est connaturalis & adæquata ipsi Deo in perfectione intensiva. 369.2  
 Comprehenditur tunc aliquid, quando ita videtur, ut nihil eorum, quæ in ipso sunt, videntem lateat. 373.1  
 Comprehensio omnium, quæ in Deo sunt eminenter, etiam sine infinita intensione & claritate impossibilis est. *ibid.* 2  
 Comprehendi non posset Deus a Christo, etiam si ille per scientiam insulam omnes effectus possibiles cognosceret. 378.2  
 Comprehendi non potest Deus per dona gratiæ. 370.1  
 Compositio. Compositio Christi.  
 Compositio nulla est inter actus humanæ & divinæ voluntatis Christi. 35.2  
 Compositio quotuplex sit substantialis, 185.1. & seq. Est quadruplex. *ibid.*  
 Compositio non necessario requirit partes. 159.1  
 Quæ sit compositio in unionem hypostatica. *ibid.* Et ex quibus. *ibid.* 2. latius. 171.2  
 Compositio hæc non solum est unius cum alio, sed etiam unius ex multis. 171.1  
 Compositio in re nulla potest esse unius cum alio, quin sit etiam compositio unius ex his. *ibid.* 2  
 Afferentes in hac compositione Verbi & humanitatis non intrinsece includi humanam naturam, sed solum extrinsece, valde errarunt. 171.1  
 Compositum resultans ex hac compositione est persona, non alia a persona Verbi, a quo distinguitur aliquo modo. *ibid.* 2  
 Compositum resultans ex unionem humanitatis ad Verbum, licet temporale sit & factum, non tamen persona temporalis aut facta dici potest. 173.1  
 In



In compositione hae totum compositum non est perfectius intensive suo componente. *ibid.*

Quid sit de ratione compositi ut sic. *ibid.*

Compositum ex Verbo & humanitate est quid creatura. 174.1  
compositio ex partibus integralibus qualis. *ibid.*

#### Concilium.

Concilii Niceni II. locus difficilis declaratur super adoratione imaginum. 700.1

Concilium Francofordiense legitimum esse defenditur. 628.2  
Et auctoritatem habuisse ad stabiliendam certam fidem. 629.1

Concilio Francofordiensi prout in tertio tomo Conciliorum habetur, licet non possit infallibilis auctoritas tribui, esset tamen valde temerarium ab illo dissentire, & apocryphum reputare. 634.2

Concilium Francofordiense a variis calumniis acriter vindicatur. 629.2. & aliis seq.

Concilii Francofordiensis sensus definitionis de filiatione Christi aperitur. 630.2. Ejusdem mens de Christi servitute perpenditur. 581.1

Concilium Francoford. definivit veritatem fidei de imaginum adoratione, & Nicenæ Synodæ consensit. 691.2. Nec contra hoc posse sumi firmum argumentum ex historiis, ostenditur. *ibid.*

Concilii Elibertini canon exponitur, erga reliquiarum venerationem. 709.1

Concilii Senonensis testimonium adducitur circa adorationem imaginum. 700.1

Concilii Moguntini difficilis locus de eodem argumento elucidatur. *ibid.*

Concilii Tridentini locus expenditur sess. 6. c. 7. ubi sic inquit. *Hanc dispositionem justificatio ipsa consequitur, &c.* & probatur contra aliquos loqui de perfecta dispositione. 78.2

Concilii Trident. canon. 3. sess. 6. exponitur, qui sic habet. *Si quis dixerit, sine preveniente Spiritus sancti inspiratione, atque adeo sine ejus adjutorio hominem credere, sperare, & diligere, aut peccare posse sicut oportet, ut justificationis gratia conferatur, anathema sit*, ubi Concilium loquitur de dilectione perfecta, quam prærequirit ut dispositionem ad justificationem. 79.1

Concilii Trident. sess. 5. cap. 1. expenditur, ubi definit *Adam transgrediendo mandatum Dei, justitiam & sanctitatem, in qua constitutus fuerat, amisisse*. Ex quo habetur justitiam & sanctitatem esse omnino idem. 80.2

Concilii Trident. sess. 6. c. 7. locus exponitur, qui habet, sanctificationem & justificationem includere remissionem peccati. Ex quo colligitur, contritionem, quæ disponit ad justificationem, disponere etiam ad remissionem peccati. 81.2

Ejusdem Concilii sess. 14. c. 4. ad eandem rem alius locus adducitur, ubi, agens de contritione, dicit, fuisse omni tempore necessariam ad impetrandam veniam peccatorum, & preparare hominem ad eorundem remissionem. Docet ergo, contritionem non esse tantum dispositionem ad habitalem gratiam & justitiam, sed etiam ad remissionem peccati. *ibid.*

Idem locus latius exponitur ad probandum, remissionem peccati esse opus gratiæ distinctum a contritione. 82.2

Concilii Tridentini sess. 6. c. 8. locus diligenter exponitur, ubi docetur, remissionem peccati, & justificationem non esse idem. 173.1

Concilii Trident. sess. 6. c. 8. expenditur locus, ubi docetur remissionem peccati esse donum omnino gratis datum a Deo & non ex operibus. 92.1

Concilii Tridentini locus exponitur, de modo adorationis imaginum. 699.2

#### Concupiscentia.

Concupiscentiæ repugnantiam non sentire proprium fuit Christi, sed communicatum B. Virgini. 467.2

Concupiscentiæ sanctæ seu honestæ actus in Christo fuit. 468.1

#### Constantinus Imperator.

Constantini Magni erga sanctorum reliquias pietas qualis. 709.1

Constantinus statim ac fidem accepit, Romanorum vexillum in Crucem Christi mutavit. 711.1

#### Contactus Christi.

Qualis sufficit ut reddat rem adorabilem. 687.2

Contactus Christi per se est sufficiens causa adorationis, sed non semper expedit ea uti. *ibid.*

#### Contritio.

Contritio est ultima dispositio ad gratiam & justitiam. 76.1

& latius.

Contritione posita in homine statim ab illo expellitur peccatum. 78.2

Contritionem ita expellere peccatum, sicut lux expellit tenebras, est quorundam opinio. 76.1

Contritio perfecta est ultima dispositio ad remissionem peccati. 77.2

Contritionis formalis effectus non est remissio peccati. 78.1

Contritio nullo modo est satisfactio ad æqualitatem pro peccato. 85.2

Contritio, ut est dispositio ad primam gratiam, & remissionem peccati, procedit ab homine nondum grato, nec libero a peccato secundum ordinem naturæ. 93.1

Contritio est satisfactio imperfecta pro peccato. 94.2

Contritio vel dilectio Dei est opus maxime proportionatum ad satisfaciendum ex iustitia & ad æqualitatem pro peccatis venialibus. 96.2

Contritio qua ratione sit dispositio moralis ad gratiam. 98.1

Juxta contritionis mensuram infunditur gratia, & fit peccati remissio. 213.1 *ibid.*

#### Conveniens.

Conveniens late sumptum idem est quod bonum. 18.1

Conveniens Deo idem est quod bonitati ejus consentaneum. *ibid.*

Quomodo non fuerit conveniens, Deum fieri leonem. *ibid.*

Conveniens nihil potest esse Deo propter ipsius commoditatem. *ibid.*

Conveniens duobus modis sumitur, & quibus. *ibid.*

#### Corpus Christi, Corpus humanum.

##### Corpus.

Corpus Christi in triduo mansit sine anima, ei tamen hypostatice Verbum fuit unitum. 275.2

Corpori Christi in illo triduo unitum est Verbum ratione materiæ, non ratione formæ. 276.2

Corpus Christi non fuit confectum ex materia seu substantia cœlesti. *ibid.*

Corpus Christi fuisse phantasticum qui hæretici dixerint. 282.2

Corpus verum Verbum divinum assumpsisse, & humanum, ac ejusdem materiæ cum nostro, probatur. *ibid.*

Corpora esse mala ex natura sua Manichæorum error fuit. 283.1

Corpus integrum & omnibus suis partibus constans Verbum assumpsit. 284.1. Cujus omnes partes secundum hypostasim immediate Verbum assumpsit. *ibid.*

Corporis quædam partes informantur anima rationali, & quædam non. *ibid.*

Corpus Christi eodem tempore fuit formatum & animatum. 292.2

Corpus Christi non fuit prius tempore unitum Verbo, quam anima. 293.1. Nec prius Verbo, quam anima. 295.1

Corpus Christi cur sine anima mansit unitum Verbo in triduo, & non in conceptione. *ibid.* 2. per totam.

Corpus seu caro Christi assumpta est mediante anima. 300.2. id est ratione animæ & in ordine ad animam. 301.1

Corpus humanum sanctificari dicitur, quando redditur aptum ad opera sanctitatis. 311.2

Corpus Christi per externos actus habilis reddi potuit ad externos labores perferendos. 323.1

Corpori Christi gloria fuit debita a principio conceptionis, sed dilata est propter salutem nostram. 359.2

Corpus duo loca replere potest, & duo corpora in uno loco esse possunt. 416.2

Corporis defectus quos Christus assumpsit, qui. 448.1

Corpus passibile, licet humanum, Christum assumpsisse hæretici quidam negaverunt. 451.2. Alii, corpus grave. *ibid.*

Corpus passibile Christum assumere expediens fuit. *ibid.*

Corpori Christi claritas communicata est in transfiguratione, quæ est dos corporis gloriosi, sicut, dum ambularet super aquas, agilitas. 452.1

Corporis defectus, qui sunt veluti naturales proprietates corporis passibilis, Verbum assumpsit. *ibid.*

Corpus humanum perfectum & bene dispositum juxta conditionem suam, Verbum assumpsit. *ibid.*

Corpus Christi habuit optimum temperamentum. *ibid.* & perfectam corporis pulchritudinem, quam in corpore humano & virili esse decebat. *ibid.*

Corpus Christi futurum est veluti objectum beatitudinis corporis nostri. 453.1

Corpori humano non repugnat usque ad mortem absque agitudine pervenire. *ibid.*

Cor-



Corpus Christi naturæ legibus non paruisse, sententia hæretica, in quo sensu. 454.1

Corpus Christi esse ubique est hæresis nostri temporis. *ibid.*

Corpus Christi fuit & est loco circumscriptum. *ibid.*

Corpus Christi solum est in cælo & in Eucharistia. 456.1

#### *Creatura. Creatio. Creare.*

Creaturæ omnes per incarnationem quoddam beneficium acceperunt. 24.2

Creatio animæ Christi, & unio ejus ad Verbum, distinctæ sunt actiones. 182.2

Creatura non potest concurrere ad mysterium incarnationis, tanquam causa principalis. 209.2

Creatura nulla potest sua virtute ordinem rerum immutare. *ibid.*

Creatura potuit assumi ut instrumentum ad efficiendam incarnationem. 210.1

Creaturam ullam præter Virginem de facto ad hoc mysterium concurrisse per modum instrumenti dicere erroneum est. *ibid.*

Creatura a Deo differt quod non sit suum esse, sicut ille. 233.2

Creaturæ a Deo manant prout unus est. 234.1

Creaturam irrationalem Deo uniri hypostatice non repugnat, non est tamen congruum. 267.2. Non tamen est semper indecens. *ibid.*

Inter creaturam & Deum quale medium reperiatur. 290.1

Creatio ex naturali sua efficacia habet ut terminetur ad rem subsistentem nisi præveniatur. 298.1

Creaturam esse infinitam tam in essentia, quam in quantitate vel intensione repugnat. 336.2

Creaturam ita esse capacem gratiæ usque ad certum gradum ut de potentia absoluta majorem non possit recipere falsum. 339.2

Creaturarum omnium caput Christus dici potest. 347.2

Creatura virtute naturali potest comprehendere naturalem perfectionem & potestatem alterius, non autem capacitatem obedientialem. 368.1. Potest tamen id virtute supernaturali. *ibid.*

Creaturæ videntur in Deo, quia Deus cognitus est ratio cognoscendi illas. 372.1

Creaturæ communicari potest modus videndi futura per supremam scientiam creatam, non per inferiorem. 384.1

Creare se ipsum nullus omnino potest. 405.2

In creaturis potentia obedientialis activa & passiva reperitur. 416.2

Creatura non dicitur vere elevari ad esse cum creatur. 424.1

Ad creaturæ debitam subordinationem & subjectionem ad Deum spectat, ut in se habeat fundamentum per quod possit obedire Deo ad effectus supernaturales. 427.1

Creatura præcise considerata secundum eam entitatem quam habet per suam creationem, est subiecta suo creatori absque eo quod ab illa intelligatur dimanare aliqua virtus vel modus, a quo habeat talem subjectionem. 430.2

Creatura agens per potentiam obedientialem, agit ut instrumentum, & non ut causa principalis. 436.1

Creaturam esse posse instrumentum creationis, late disputatur. 447.1. Et concluditur. *ibid.*

Creaturæ, quales nos sumus, qualiter a Christo differant. 490.2

Creatura esse potest objectiva ratio alicujus decreti liberi voluntatis divinæ. 553.2

#### *Crux Christi vera, & picta.*

Cruci, aliisque passionis Christi insignibus, adoratio debita. 710.1

In crucis laudem multa. 712.1

Cruci Christi debita adoratio qualis. 711.1

Crucis usus, quem Catholica Ecclesia semper tenuit, honestus & religiosus. *ibid.*

Crucis erectio signum expulsiæ idololatriæ. *ibid.*

Inter Crucem & reliqua passionis Christi instrumenta quoad cultum differentia. *ibid.*

In crucis cultu Armenorum superstitio. *ibid.*

Signi Crucis usus quædam fidei professio. *ibid.* Virtutem habet contra demones non in sola devotione & merito operantis, sed in divina ordinatione, propter Christi merita, fundatam. 712.1

Signi crucis usus valet etiam ad impetrandum aliquid a Deo. *ibid.*

Crucis signum quam laudabiliter Christi fideles ad suas actiones præmittant. *ibid.*

Crucis signum habet omnes utilitates, quas imagines, & de ejus adoratione eo modo quo de adoratione imaginum, fa-

crorumque nominum sentiendum est. *ibid.*

Cultus, & veneratio, idem fere quod honor significant, & eodem se habent ad adorationem. 647.1

Videlatria. Dulia. Adoratio. Religio.

#### *D*

#### *Dæmon.*

Dæmon non potuit naturali virtute incarnationem cognoscere. 23.1

Dæmon in peccatorem potestatem habet, quia ipsum punire & in infernum deducere potest. 21.2

Dæmon mundi imperio per idololatriam potiebatur, quod ei per Christum ablatum est. *ibid.*

Dæmon malorum hominum est caput. 348.1

Dæmonem imitantur quidam ex suggestionem, quidam propria sponte. 349.1

#### *Damnati.*

Damnati nullum ex meritis Christi fructum recipiunt. 343.1

Damnatum viator in intensione & multitudine malitiæ superare potest. 350.1

#### *Debitor. Debitum.*

Debitor Deus esse potest non simpliciter, sed ex suppositione promissionis, vel alicujus pacti. 60.2

Debitum ut sic importat ordinem exigentiæ vel necessitatis. 61.2

Debitorum in solidum ejusdem rei cui plures esse possint, non autem domini. 67.2

Debitor solvens uno titulo justitiæ, etiam alio titulo debitor solvere potest. 69.1

Debitor justitiæ si multiplicentur, augetur res ipsa quæ debetur. *ibid.*

Debitor connaturalitatis adjungi potest debitor justitiæ. 222.2

#### *Defectus.*

Defectus eos Christus tantum assumpsit, qui ad finem incarnationis utiles esse poterant. 451. Qui fuerint. 453.1

Defectus hi respectu naturæ humanæ elevatæ ad unionem sunt privationes. 451.1

Defectus naturales Christus necessitate quadam patiebatur, & quomodo. 454.1

Nihilominus voluntarii fuerunt Christo, etiam secundum voluntatem humanam. *ibid.*

Defectus animæ qui sint, & quomodo in Christo locum habere potuerint. 457.2

#### *Dependentia.*

Dependentia duplex modus. 182.2. differentia inter hos duos modos. 182.1

Dependentia humanitatis a Verbo quid sit, & an distinguatur ab unionem hypostatice. 193.2

#### *Deus. Deitas.*

Deus plus homini concedit, quam ipse petat. 7.1

Deus se communicat modo perfectissimo ad intra. 19.1

Deus beatis sese communicat modo minus perfecto, quam in unionem hypostatice. *ibid.*

Deus & humana natura proportionem habent, ut ex eis una persona constituatur. *ibid.*

In Deo non est potentia obedientialis, sed quidquid in eo est, est naturale. 20.2

Deus in omnibus suis operibus est liber, etiam in opere redemptionis. 27.1

Deus duobus modis redimere hominem potuit, ex misericordia, & ex justitia. 28.1

Deus nec mutari nec mendax esse potest. *ibid.* potuisset salva utraque perfectione hominem gratis a culpa liberare. *ibid.*

Dei offensi placandi diversa ratio esse debet, a ratione qua homo offensus placatur. *ibid.*

Deus in rebus finitis, quacumque facta, potest facere meliorem, excepto opere redemptionis. 29.2

Deus in rebus omnibus non facit quod convenientissimum est absolute. 30.1. Facit tamen omnia convenientissime ad finem ad finem intentum. 30.1

Deus cur noster redemptor esse debuerit, etiam si purus homo ex Dei acceptione nos redimere potuisset. 31.1

Deo nullus pro beneficiis acceptis æquivalens reddere potest, sed persona increata Christus, & pro beneficiis acceptis condignas gratias, & pro hominum offensis sanctificationem condignam offerre potuit. 34.1

Deus potest præmiare totum quod Christus potuit mereri. 47.2

Deus de potentia absoluta potuit non acceptare satisfactionem Christi. 56.1

Deus, posita promissione & pacto debuit ex justitiæ obligationem acceptare Christi satisfactionem. 60.2



- Deus obligatur ex iustitia ad solvendum præmium meritis iustorum. *ibid.* Quomodo possit esse debitor ex promissione. 61.1.
- Deus proprie & vere exercet actum iudicii, cum bonis premium tribuit pro meritis. 62.1
- Deus solvit debita ex iustitia distributiva, *ibid.*
- Deus ut Deus non est principium valoris satisfactionis Christi, sed Deus quatenus alienam naturam sustentat. 67.1
- Deos plures intelligere quæ maxime ratione sit impossibile. *ibid.*
- Deus posset de potentia absoluta conservare habitus physicos gratiæ & charitatis in homine peccante mortaliter. 89.2.
- imo & peccatori denuo infundere prædictos habitus. *ibid.*
- Deum non denegare gratiam facienti quod in se est, quomodo sit intelligendum. 93.1
- Quæ ex Dei voluntate proveniunt super omne debitum creature, sola revelatione innotescunt. 102.1
- Deus an prius voluerit res esse in esse nature, quam in esse gratiæ, & gloriæ. 109.2
- Deus sæpe ordinat res in extrinsecos fines. 113.2. Nihilque in eis necessario imprimit. 114.1
- Deus denominatur ordinans aut volens aliquid extra se, non ob extrinsecam mutationem quæ in objecto fiat, sed ab intrinseca notatione, quæ in Deo est. *ibid.* Quomodo hæc denominatio intelligi possit in Deo absque reali additione intrinseca, unum est ex divinis mysteriis, quod humana ratione declarari nequit. *ibid.* 2
- Deus eodem actu secundum rem vult finem ut exequendum per illa determinata media, per quæ in re ipsa illum exequitur. 116.1
- Deus rem ut futuram non potest cognoscere, nisi prius videat suam voluntatem eam ordinantem aut permittentem. 118.2
- Deus in primo signo, & in prima voluntate, quæ voluit unionem hypostaticam, voluit illam determinate in tali persona, & in natura. 123.1
- Deus non prius circa universales rationes versatur, & deinde circa particulares. *ibid.* 2
- Deus non prius secundum rationem ordinavit ad gloriam homines in communi, & postea hos in particulari, 124.1
- Deus non prius voluit Christum venire passibilem & mortalem, quam voluerit permittere peccatum. 127.2
- Deus, quia prævidit peccatum futurum, ideo voluit carnem Christi esse passibilem. 129.1. Non vero, quia Deus voluit carnem Christi esse passibilem, ideo peccatum permisit. 128.2
- Deus cur & quomodo personam suam naturæ humanæ communicare decreverit. 138.2
- In Deum nihil potest converti per omnimodam mutationem seu transubstantiationem. 154.1
- Deitas non potest esse forma corporis, neque spiritus. *ibid.* 2
- Deus est ens simplicissimum, pluresque in se habet unitas perfectiones, quæ in nobis divise sunt. 156.2
- Dei nomen supponit pro essentia nisi ex adjuncto determinetur, ut supponat pro persona, 238.1
- Deus ut prædicatur de tribus personis est quid subsistens commune illis, *ibid.*
- In Deo nihil est absolutum & essentiale, quod per summam identitatem non sit communicabile tribus personis. 240.1
- Deus ex vi suæ absolutæ existentiae habet subsistere. *ibid.*
- In Deo quidquid essentiale est, est idem numero in tribus personis. 241.1
- Deitas ex vi suæ absolutæ subsistentiæ non est persona. *ibid.*
- Et cur. 246.1
- Hic Deus ex vi solius individui conceptus non requirit subsistentiam communem absolutam. 245.2
- Hic Deus sicut existens, ita & subsistens intelligitur, abstractis per intellectum subsistentiis relativis. 246.1
- In hoc Deo possunt præintelligi actus essentialis non notiones, *ibid.*
- Deus est speciali modo, ubi specialiter operatur. 251.1
- Deus per subsistentiam absolutam potest assumere naturam creatam. 260.1
- Si hic Deus naturam humanam assumpsisset, quomodo hic homo esset persona. *ibid.* 2
- Deus intra se habet omnem perfectionem sibi connaturalem, & infinitam vim communicandi se creaturis. 263.2
- Deus quot & quanta possit facere supra naturæ ordinem. 265.1
- Deus non assumpsit hominem. 269.1
- Deum esse incomprehensibilem creatæ cognitione, de fide certum est. 370.1
- Deus quæ ratione dicatur invisibilis. 371.2
- Deus videndo seipsum, videt omnia quæ in ipso sunt, & potest participationem illius scientiæ creaturæ communicare. 372.1
- Deus & creaturæ quomodo eodem actu videntur. *ibid.* 2
- Deus continet creaturas eminenter tanquam perfecta causa earum. *ibid.* 1
- Deus eo perfectius videtur, quo plures effectus in eo videntur, cæteris paribus. 373.1
- Deus quomodo loquatur. 384.2
- Deus, cum loquitur, quomodo possit ostendere evidenter se esse qui loquitur, non manifestando clare se ipsum. 385.1
- Deus solus est causa principalis gratiæ. 414.1
- Dei substantialis virtus seu quæ in Deo existit non coniungitur per se ipsam formaliter, & intrinsece instrumento suo in ordine ad operationem. 423.1
- Dei imperium etsi efficacissimum sit, supponit tamen vel confert creaturæ potentiam præstandi id, quod imperatur. 425.1
- Deo secundum se nihil est supernaturale, bene tamen per comparisonem ad creaturas. 441.1
- Deus ut auctor naturalis præparat res ut sint apta instrumenta, ut supernaturalis vero utitur illis. 436.1
- Deus non potest operari nisi ubi est. 441.2. Hoc autem habet ex sua immensitate & infinita perfectione. 442.1
- Deus ita est ubique, ut substantia ejus infinite diffusa sit. 455.2
- Deus sine legis obligatione natura sua ad bonum determinatur, nec potest ab eo quod bonum est deviare. 462.1
- Deitas est homo, non dicitur, proprie, & cur. 477.2. Neque e converso. 478.1
- Deitas generat, falsa est propositio. 477.2
- Deitas est incarnata, vera est propositio. *ibid.*
- Deus & deitas, licet idem sint, in ratione significandi & supponendi distinguuntur. *ibid.*
- Deus est homo, propositio est verissima, sed in ea exponenda multi errant. 481.2. In qua propositione nomen Deus suppono pro persona Verbi. *ibid.* An sit in materia naturali vel contingente. 483.1
- Deus supponit pro determinato supposito juxta exigentiam prædicati. 481.2
- Deus factus est homo, vera est propositio, eo quod natura humana vere incepit esse in supposito divino. 486.2
- Deus factus est hic homo, tam propria est locutio, quam vera. *ibid.* 2. In qua propositione hic homo non designat suppositum, sed humanam naturam subsistentem. 487.1
- Deus non voluit, ut Christus nos redimeret, quia Christus id prius humana voluntate voluerit, sed potius e contra. 509.2
- Deus potest absoluta & efficaci voluntate sua prædefinire actum liberum in particulari. 511.1
- Deum prædefinivisse actus omnes supernaturales, præsertim electorum hominum in particulari verisimile est. 512.2
- Deus magis amat gloriam animæ Christi, quam omnium hominum & angelorum. 540.1
- Dei major liberalitas est dare nobis Christi merita & satisfactionem, & propterea nobis poenam remittere, quam eandem poenam nobis gratis condonare. 560.1
- Dei omne beneficium, quod non sit ipsemet Christus, omnique benevolentia circa homines, fundatur in Christi meritis. 558.1
- Deus per Christum voluit dare electis omnia media creata & efficacia, quibus salventur, & cæteris auxilia, quibus salvari possint. 559.1
- Ad Deum multa in hoc indice pertinent, ut Pater, Verbum, Spiritus, Sancta Trinitas. *Dilectio.*
- Dilectio Dei super omnia necessaria est ad obtinendam remissionem peccati extra sacramentum. 78.2
- Dilectio Dei absolute dicta, charitatis dilectionem significat. 79.1
- Dilectionis actus non concurrit ad remissionem peccati ut causa formalis, sed ut dispositio. 87.2
- Dilectionis actus perfecte convertit animam ad Deum conversione actuali, & sic formaliter expellit peccatum actuale. 88.2
- Non vero conversione habituali opposita peccato habituali. 89.1
- Vide Caritas, Contritio, Amor, Discretio spirituum.
- In Christo fuit, & quæ illa fuerit, 329.1
- Dispo.



*Dispositio.*

- Dispositio ad unionem hypostaticam*, cum qua illa habeat naturalem connexionem, dari non potest. 211.1  
 Neque est aliqua dispositio ita necessaria, ut ad unionem necessario supponatur. *ibid.*  
*Dispositio ut ornamentum humanitatis vel animæ* Verbo uniendæ a quibusdam Theologis statuitur. 212.1. sed revera nulla est, neque in corpore, neque in tota humanitate. *ibid.*  
*Dispositiones cur ad unionem necessariæ non fuerint.* *ibid.* 2  
*Dispositionis physicæ essentia in quo consistat, & in quo a dispositione morali differat.* 214.1  
*Dispositio moralis quæ sit.* 215.1  
*Dispositio ut vera sit, necesse est, ut ex se præsupponi possit secundum existentiam ad id, ad quod disponit.* *ibid.*  
*Dispositio supernaturalis & libera, ad effectum supernaturalem, meretur illum saltem de congruo.* 225.2  
*Dispositio ad gratiam in Christo non fuit præparans, sed consequens, & ornans.* 541.2

*Dominium Dei, Dominium Christi.*

- Dominium Dei non minuitur per hoc, quod creatura acquirat jus ad rem, quam Deus exhibere tenetur.* 64.1  
*Dominium absolutum Deus habuit omnium actionum Christi, tam secundum esse physicum, quam morale.* 68.1  
*Dominium rerum omnium Christus ut homo habuit, sed dependenter.* 67.2. Christus ut homo per voluntatem creatam fuit Dominus omnium suorum meritorum, & actionum, tam secundum esse physicum, quam morale. 68.1  
*Dominium temporale & humanum, licet Christus aliquarum rerum habuerit, non tamen simile habuit in totum orbem.* 607.2  
*Dominium altioris ordinis per se & directe in res omnes, & earum actiones Christus habuit.* 608.1. non tantum post resurrectionem, sed & in vita mortali. *ibid.*  
*Dominium hoc, cum sit excellentioris ordinis, non excludit privata dominia.* *ibid.* 2

*Dona Spiritus Sancti.*

- Dona Spiritus sancti generaliter sunt omnia dona gratiæ, sed specialiter sunt habitus, quibus homo bene disponitur ad operandum ex peculiari & extraordinaria motione Spiritus sancti.* 324.1  
*Dona hæc sunt septem, quatuor pertinent ad intellectum, tria ad voluntatem, & quæ illa.* *ibid.*  
*Dona Spiritus sancti in Christo simpliciter fuerunt.* *ibid.*  
*Dona scientiæ & intellectus sunt a scientia beata & infusa distincta.* *ibid.*  
*Dona concomitantur gratiam, & manent in patria.* *ibid.*  
*Donum consilii in Christo quomodo fuerit.* *ibid.* 2  
*Donum sapientiæ & intellectus nullam imperfectionem in Christo includunt.* *ibid.*  
*Dona pertinentia ad voluntatem in Christo fuerunt perfectissima.* 325.1  
*Donum movet hominem ad operandum præter ordinarias regulas rationis, tam naturales, quam supernaturales.* *ibid.*  
*Donum pietatis versatur circa materiam religionis, & cultus, qui perfectissimus manet in beatis.* *ibid.*  
*Donum timoris fuit in Christo, & est in beatis, & contrarium est hæresis Abailardi.* *ibid.* 2

*Dolor.*

- Dolor sensibilis formaliter consistit in quodam actu appetitus, quo veluti contristatur, & fugit corporis læsionem.* 469.1  
*Dolorem fuisse in Christo de fide est.* *ibid.*

*Dulia.*

- Dulia est cultus, qui creaturis excellentibus dari potest.* 656.1  
*Duliæ habitus ab habitu religionis seu latriæ specie differt.* 663.1  
*Dulia prout Deo ut supremo domino accommodatur, vere est latria.* 658.2

*Vide, Adoratio. Latria.**Durations.*

- Relativæ tres sunt in Deo.* 236.2

*E**Ecclesia.*

- Ecclesia, cujus caput Christus esse dicitur, quænam sit.* 346.1  
*Ecclesia ex angelis & hominibus, veluti una spiritalis respublica constituitur.* 347.1

*Effectus.*

- Effectus causæ formalis non potest variari etiam de potentia absoluta, ipsa invariata manente.* 214.2

- Effectus autem in genere efficientis variari potest.* *ibid.*  
*Per effectus Deus tanto perfectius cognoscitur, quanto perfectiores sunt, & perfectius cognoscuntur.* 387.1  
*Effectus causæ secundæ prius natura creari a solo Deo, deinde fieri a creatura absurdum.* 447.2  
*Effectus per aliqua formam constitutus concipi non potest, quin in illo talis forma includitur.* 498.2

*Electio.*

- Electio ad gloriam præcedit merita in intentione, sed subsequitur in executione.* 110.1  
*Electio ad gloriam prior ratione est in Deo ipsa prædestinatione seu ratione mediorum.* 123.2  
*Electionem Dei increatam & æternam non posse cadere sub medium in quo sensu habeat verum.* 217.2  
*Electionem suam B. Virgo ut esset mater Dei, & Joannes Baptista ut esset præcursor, & majores Christi ut tales essent, non meruerunt.* 225.2  
*Elegit Deus ad gloriam, vel gratiam, aut fidem, hos potius quam illos ex sola sua voluntate, & nihilominus concessit omnibus per Christum necessaria media, quibus gratiam consequerentur.* 549.1  
*Electio horum præ illis non ex meritis Christi est, sed ex libertate divinæ voluntatis.* 557.2  
*Electio circa præterita, quæ jam non sunt, in hominis potestatem non cadit.* *ibid.*  
*Electio in quo a prædestinatione distinguatur.* *ibid.*

*Vide Prædestinatio.**Elipandus.*

- Elipandi error de Christi servitute qui fuerit.* 583.1  
*Elipandus non tantum in voce adoptionis, sed in re ipsa incarnationisque mysterio erravit.* 627.1  
*Elipandus, licet non disertis verbis Nestorii errorem fuerit professus, in eo tamen fuit.* 628.2  
*Epiphanius a calumnia erroris circa imaginum usum vindicatur.* 678.2

*Essentia, esse, ens.*

- Essentia divina quo modo sit forma intellectus creati.* 154.2  
*Ens quomodo in creatum & in increatum dividatur.* 164.2  
*Essentia & existentia in rebus creatis in re non distinguuntur.* 195.2  
*Esse unum existentia absolutum, & essentiale, & commune tribus personis esse in Deo, est certum.* 233.1  
*Esse est quodammodo Deo proprium, nihilque magis est illi contrarium, quam non esse.* *ibid.*  
*Esse seu existere in Deo est perfectio simpliciter.* 234.1  
*Essentia Dei, licet præscindi possit a relationibus, non tamen ab existentia.* *ibid.*  
*Essentia divina & relatio sunt una entitas, sed ratione distinguuntur.* 235.2  
*Esse unum simpliciter est in Deo, triplex autem non nisi relativum.* *ibid.*  
*Esse essentiale est de intrinseco conceptu relationum divinarum.* 236.1  
*Essentias tres esse in Deo est quorundam sententia: sed hic modus loquendi ut omnino falsus & erroneus vitandus est.* *ibid.*  
*Essentias tres, etiam relativæ, esse in Deo negandum est.* *ibid.* 2  
*Essentia re quid.* *ibid.*  
*Essentia est radix totius substantiæ relativæ, sed non formalis ratio.* 243.1  
*Essentia in æterna generatione quomodo sit principium generandi.* 253.2  
*Esse subsistentiæ non est propter operari, sed esse naturæ.* 276.1  
*Essentia divina supplet vicem speciei, non quia vere informat, sed solum quia intime adest intellectui, & cum eo concurrat ad visionem sui.* 353.1  
*Essentia creata intrinsece constituitur in esse entitatis actualis non per habitudinem ad existentiam, sed intrinsece per existentiam.* 498.2  
*Essentia non comparatur ad existentiam per modum subjecti, neque per modum principii effectivi.* *ibid.*  
*Natura creata in essentia sua conservari non potest, simulque privari sua existentia.* 501.1  
*Essentia creaturæ, ut abstrahit ab actuali existentia, solum significat rem possibilem, quæ ut sic nihil actu est.* *ibid.* 2  
*Esse in Christo tantum est unum, perfectum, substantiale, & completum.* 503.1  
*Esse Christi non est unum per omnimodam simplicitatem, sed per*



per admirabilem compositionem & substantialem unionem. *ibid.*

### *Eucharistia.*

- Eucharistia vere continet corpus Christi. 165.2  
Eucharistia, quando corrumpitur, quomodo accidentia transeant in aliam materiam. 197.1  
In Eucharistia Christus datur secundum realem præsentiam, & non secundum unionem personalem, sed accidentalem. 205.2  
In Eucharistia unio hypostatica iterum fit per verba consecrationis. 211.1  
Eucharistiæ mysterium, in quo unio hypostatica iterum atque iterum renovatur, Christus meruit. 223.1  
In Eucharistia an speciali modo Pater & Spiritus sanctus contineantur. 250.2  
In Eucharistia, licet idem corpus constituatur sub diversis speciebus, non tamen idem est modus existendi. 262.2  
In Eucharistia Verbum æque divinum est per concomitantiam sub speciebus panis & vini. 286.2  
Eucharistiæ mysterium per scientiam infusam a Christo cognosci potuit & comprehendendi. 387.1  
Eucharistiæ mysterium per ubiuitatem destruitur. 455.2

### *Existencia.*

- Existencia non potest proprie pendere a subsistentia, sed potius e converso. 181.1  
Existencia actualis potest conservari sine subsistentia, ut in Incarnatione factum est. 196.2  
Existencia est conditio magis necessaria ad agendum, quam subsistentia. 219.1  
Existencia est illud esse, quo res habet, ut sit aliquid in actu, seu actualis entitas distincta ab ente in potentia. 132.2  
Existere per se, seu per se existendi in rebus creatis non convenit naturæ formaliter per seipsam, seu per existentiam suam, sed per aliquid reale distinctum. 239.2  
Modus existendi per se perfectio simpliciter simplex est in Deo. 340.2  
Existencia absoluta in Deo vere est subsistentia. 341.1  
Existere aliquam entitatem per existentiam vel entitatem realiter a se distinctam impossibile est. 260.1  
Existencia & esse quomodo differant. 498.1  
Existencia humanitatis Christi est incompleta. *ibid.* 2  
Existencia ablata nihil manet in re quod assumi possit. 502.1

Vide, Essentia, Esse.

### F

### *Fides. Fides in Christo.*

- Fidei nostra mysteria, etsi supra rationem sint, non tamen contra. 211.1  
Fides in Christum explicita ante lapsum homini fuit necessaria. 104.2  
Fides prout est virtus Theologica, in Christo non fuit. 319.1  
Fides prout est virtus moralis & fidelitatem significat, in Christo fuit perfectissima. *ibid.*  
Ad fidem duo actus concurrunt intellectus & voluntatis. *ibid.* 2  
Fidei nostræ certitudo in eo maxime fundatur, quod Christus habuerit infallibilem cognitionem. 354.1  
De essentia Fidei est, ut nitatur divina auctoritate credita, & non evidentem cognita. 384.2

### *Filiatio, Filius.*

- Filius quare potius debuerit incarnari, quam Pater & Spiritus sanctus. 249.2  
Filius assumpsit humanitatem in eo quod ei proprium est, non in eo quod commune Sanctissimæ Trinitati. 252.1  
Fili adoptivi Dei omnes, qui præcesserunt Christi adventum fuerunt. 612.2  
Fili adoptivi sunt omnes iusti, etiam si præciti sint, secus qui in peccato mortali vel originali sunt, etiam si sint prædestinati. *ibid.* 2  
Filiatio ad Deum quibus modis accipi possit. 614.1  
Filiatio qualiter dicenda sit proprietas personæ & non naturæ. 617.2  
Filiatio divina participata duplex, adoptiva & naturalis. 622.2  
Filius Dei Christus in quantum homo. 614.2. qualiter. 616.1  
Filiationis huius fundamentum est ipsa gratia unionis. 615.1  
Filiatio hæc in Christo tantum est relatio rationis, nec aliquid reale supra unionis gratiam superaddit. *ibid.*  
Humanitas Christi nullatenus dici potest filia. *ibid.*  
Filius Dei adoptivus Christus in quantum homo dici non potest sed naturalis. 616.1. Non tamen in eo rigore, quo ra-

tione æternæ generationis naturalis filius dicitur. 622.2  
Filiatio hæc Christi ut hominis nullatenus competit humanitati propriæ & secundum se, sed per se primo competit huic personæ compositæ. 617.2

Si filiatio aliqua consequeretur in Christo ad infusionem gratiæ habitualis, non esset adoptiva, sed potius naturalis. 618.2

Nulla filiatio Christo convenit ratione gratiæ habitualis. 615.2

Filiatio naturalis Christi, & ea, quam habet ratione æternæ generationis, & filiatio adoptiva, inter se comparantur. 623.2

Filiationes Christi, licet tantum in re sint duæ, tamen tres ratione nostra distinguuntur propter naturalis filiationis eminentiam, & qualiter. *ibid.* Spiritus sanctus si assumeret humanitatem, esset in quantum homo, filius Dei naturalis. 624.1

Hæc propositio *Christus est filius Dei naturalis*, est simpliciter de fide, sicut hæc, *Christus in quantum homo est filius Dei naturalis*, designando suppositum. 631.2. si vero naturam designet, in uno sensu est falsa, in alio autem vera, licet sub opinione. *ibid.*

Hæc propositio, *Christus est filius adoptionis*, simpliciter est hæretica. 623.2. & etiam si addatur, *in quantum homo* designando suppositum. Imò etiam si naturam designet, falsa est, non tamen hæretica. 634.1

### *Finis.*

Finis intentio an in Deo supponat scientiam mediorum, varia Theologorum placita. 111.1

Omnis intentio finis supponit scientiam mediorum saltem ut possibilem seu sufficientem, non vero ut futurorum. *ibid.*

Finis intentio efficax supponit in Deo scientiam mediorum efficaciam & futurorum saltem conditionatam. *ibid.*

Finis non pendet a medio, tanquam a ratione propter quam finis intendatur, sed solum pendet ab illo quoad executionem. *ibid.* 2

Finis intentio includit in virtute volitionem mediorum. *ibid.* Utilitas medii ad finem debet aliquo modo supponi in medio. 113.1

Finis intentio an ita sit prior ratione in Deo, quam electio, ut ab hac non pendeat. 115.2

Finis intentionem ratione esse priorem electione mediorum aliud est, quam esse omnino independentem ab illa. 116.1

Finis intentionem esse simul eum electione mediorum quod sensu sit verum. *ibid.*

Finis intentio est prior in Deo electione mediorum, in quantum finis est ratio volendi media & non e converso. *ibid.*

### *Felix.*

Fœlicis hæresis fuit, Christum esse filium Dei adoptivum. 167.1

Fœlix, licet non disertis verbis Nestorii errorem fuerit professus, illum tamen in re habuit. 628.1

### *Fœlicitas.*

Fœlicitas hominis quo modo incarnationis beneficio complenda fuit. 24.2

Fœlicitas seu gloria æterna in sui radice gratis datur. 92.1

Vide, Beatitudo, Visio.

### *Fomes.*

Fomes consistit in resistantia sensualis appetitus ad rationem. 428.1

Fomes potest in actu primo & secundo considerari, & quid sit. *ibid.*

Fomes peccati in Christo locum non habuit. *ibid.* Neque in actu secundo. 466.2. Neque in actu primo. 467.2

Fomes ut extingueretur in statu innocentiae necessaria fuit aliqua perfectio, vel specialis Dei providentia. 428.2

Fomes esse qualitatem quandam morbidam quidam, sed improbabiliter, opinantur. 466.2. Et quid sit. *ibid.*

Fomitis motus sine peccato esse possunt, sed sunt indecentes & turpes. 467.1

Fomitis motus Christus pari non debuit, etiam ut nobis exemplum tentationum superandarum præberet. *ibid.*

Fomes etiam quoad actum primum in Christo non fuit, nec esse potuit etiam de potentia absoluta. *ibid.* 2

Fomes per quid in Christo extinctus sit. *ibid.*

### *Forma. Formalis causa.*

Forma non actuatur nisi subiectum sibi proportionatum. 154.2

Formalis causæ effectus sine causa formali cur non sit. *ibid.*

Formæ, quæ in abstracto non prædicantur de se invicem, in con-



concreto non prædicantur nisi propter conjunctionem in eodem supposito. 168.1

Forma substantialis separata a materia uniri potest hypostatice Verbo. 276.2

Formæ, quæ educuntur de potentia materiæ, non prius sunt a Deo solo, quam sint per actionem, quæ concurret cum causa secunda ad earum educationem. 447.2

Forte particula, cum in Scriptura divina coniungitur cum divinæ scientiæ promissione, non indicat incertitudinem, sed aliquod mysterium. 85.1

*Futura contingentia.*

Futura contingentia propriissime ex liberis actibus pendent. 382.2

Futura contingentia cognoscere, licet proprium Dei sit, per lumen tamen supernaturale a creatura cognosci possunt. 383.1

Futura contingentia cognoscere, ad consummatum Prophetiæ donum, & munus doctoris perfecte exercendum, necessarium. *ibid.*

Futura contingentia quomodo Christus cognoverit, per modum intuitivæ cognitionis. *ibid.* 2

Futurorum omnium cognitio in determinationem divinæ voluntatis revocanda non est. *ibid.*

Futuram rem esse, nihil reale ponit in re possibili, quod sit repræsentabile per aliquam imaginem objectivam. 384.1

Futura contingentia per scientiam infusam Christi abstractive cognosci potuerunt. *ibid.* 2

G

*Gloria.*

Gloriam corporis nemo mereri potest sine gloria animæ, nisi hanc prius habeat. 629.2

Vide Gratia, Visio, Beatitudo, Fœlicitas, Lumen Gloriæ.

*Gratia habitualis, Gratia unionis.*

Gratia habitualis & unionis, quomodo differant in influxu actuum, ab illis proficiscentium. 39.1

Gratia, quæ supponitur iustitiæ, in tantum diminuit perfectionem ejus, in quantum est quædam virtualis remissio debiti, gratis facta. 74.2

Gratiam infinitam persona finita habere non potest. 75.1

Gratia habitualis est causa formalis remissionis peccati. 87.2

Differentia, quæ est inter gratiam habitualement, & actum contritionis, & dilectionis Dei supernaturalis in ordine ad justificationem. *ibid.*

Gratia habitualis simpliciter est perfectior quocumque actu supernaturali. 88.1

Gratia habitualis est primaria quædam participatio divinæ naturæ. *ibid.*

Gratia & habitus infusi ordine naturæ in nullo genere causæ antecedunt contritionem, quæ est dispositio ad illos. 89.1

Gratia habitualis de potentia absoluta posset esse in eodem subiecto cum peccato. *ibid.* 2. non vero ex natura rei. 90.1

Gratia prima non solum excitans, sed etiam sanctificans & habitualis datur gratis. 92.2

Gratiæ augmentum non gratis sed ex meritis tribuitur. *ibid.* 1

Sine gratia divina nihil homo potest facere, quod ad vitam æternam conferat. 97.2

Gratia sanctificans est fundamentum totius iustitiæ, meriti, & satisfactionis apud Deum. *ibid.*

Gratiæ connaturale est, ut per opera sua possit expellere peccata venialia. 100.1. & consequenter est ei debitum debito connaturalitatis, ut opera ejus acceptentur in satisfactionem pro culpis venialibus. *ibid.*

Gratia in ordine rerum est altioris ordinis, quam ipsa anima. 205.1

Gratia unionis non est in genere gratiæ habitualis: sed in superiori. *ibid.*

Gratia dicitur, & ipsa Dei voluntas gratis aliquid dantis, & ipsum gratuitum Dei donum. *ibid.* 2

Gratia unionis proprie est unio substantialis, & potest dici de ipsa Verbi persona. 208.1

Gratia unionis non potest dici naturalis homini Christo tanquam proveniens ex propriis humanæ naturæ. *ibid.* 2

Neque etiam est naturalis Christo, prout naturale est idem quod debitum: quomodo gratia habitualis illi est naturalis. *ibid.*

Gratia unionis potest dici naturalis, non absolute sed respective. 209.1

Gratia habitualis non est dispositio ad unionem hypostaticam

necessario requisita.

Gratia habituali nulla est excellentior qualitas, nec magis ornans animam. 211.2

Gratia habitualis Christi non est gratia adoptionis. *ibid.* 212.2

Gratiam habitualement esse physicam vel moralem dispositionem ad unionem hypostaticam omnino implicat. 214.1

Gratia habitualis ex vi suæ specificæ naturæ non ordinatur ad gratiam unionis, sed ad visionem beatam, qua consecuta, dicitur consummata. *ibid.*

Gratia habitualis Christi ordinata est a Deo ad unionem hypostaticam, non ut ad finem, qui per eam acquiritur, sed ut ad finem, cui interviert. 215.2

Gratiam habitualement esse instrumentum physicum ad efficiendam unionem hypostaticam, absolute non implicat, secus si simul eidem naturæ utraque gratia conferatur. 216.1

Gratia habitualis, ex natura sua non requirit gratiam unionis, tamen gratia unionis postulat gratiam habitualement ut propriam sibi debitam. *ibid.*

Gratiæ prima cur sub meritum cadere non dicatur. 221.1

Gratia & liberum arbitriū in medio se jungi non debent. 227.2

Gratia est participatio divinæ naturæ, cui respondet participatio divinæ operationis. 276.1

Gratia in Christo, & ipsius naturam perficit, & est principium perficiendi alios. 307.2

Gratia habitualis in Christo fuit propter tria. *ibid.*

Gratia est aliquid inhaerens in anima, quæ in actualement & habitualement distinguitur. 308.2

Gratia unionis talis est, ut nullam admittat secum peccati maculam. 310.1

Gratia unionis præcise non confert omnem iustitiæ & sanctitatis perfectionem extensivam. 311.1

Gratia habitualis non fuit necessaria Christo ut esset gratus, & Deo sanctus simpliciter. *ibid.* 2. nec ad merendum. 329.2. fuit tamen illi necessaria ad consummatam perfectionem extensivam, seu statum sanctitatis. 311.2. Et ad operandum connaturali modo. 529.2

Gratiam esse quid permanens de fide est. 313.1

Gratia hæc in Christo & in nobis ejusdem rationis est. *ibid.*

Gratia habitualis data est animæ Christi simul cum gratia unionis, est tamen posterior quam illa, ordine naturæ. *ibid.* 2

Gratia Christo facta est naturalis ratione unionis. *ibid.*

Gratia habitualis non manat a Verbo, aut ab unionem physica dimanatione, aut per veram efficientiam, sed immediate datur a Deo. 314.2

Gratia habitualis terminata est in Christo ad certum gradum non ex natura rei, sed ex divina providentia. 315.2

Gratia secundum habitudinem sibi connaturalem ac physicam non respicit Christum, ut subiectum maxime proportionatum, ac connaturale sibi. *ibid.* Est tamen in illo tanquam in subiecto sibi convenientissimo. *ibid.*

Gratia adjuvans tam necessaria fuit animæ Christi ad supernaturales effectus, quam nobis. 316.2

Gratiæ gratis datæ sunt actus, qui supra naturam sunt, & divina virtute fiunt in confirmationem fidei, & aliorum profectum. 327.2. earum divisio. *ibid.*

Gratias omnes gratis datas, quæ alijs hominibus communicantur, Christus habuit. 329.1

Gratiæ gratis datæ fuerunt in Christo permanenter & per modum actus. *ibid.* 2

Gratiæ plenitudinem Christus habuit. 330.2. Estque illi propria absolute loquendo. 338.2

Gratia operans significat motionem & auxilium Dei, quo primo movetur homo, ut se disponat ad justificationem. 330.2

Gratia unionis quomodo sit infinita. 332.1

Gratiam habitualement in pura creatura dari æqualem seu æque intensam, ac fuit in Christo, non implicat. 333.1. de potentia tamen ordinaria ad gradum gratiæ Christi, nullus unquam hominum, vel angelorum potuit, vel poterit pervenire. *ibid.*

Gratia habitualis in Christo est finita in entitate sua, & intentione, quam in subiecto habet. 335.1

Gratia nulla finita de se est plene adæquata dignitati Christi. *ibid.* 2

Gratia habitualis non tantum ratione modi unionis, sed maxime ratione Verbi uniti confertur humanitati Christi. *ibid.*

Gratia Christi ex eo non fuit infinita, quia impossibile est qualitatem creatam esse infinitam. 336.1. Nam si possibilis esset, data Christo fuisset. 335.2

Gratia Christi secundum quandam rationem & dignitatem dici potest infinita ex conjunctione ad Verbum. 337.2

Gratia hinc habet ut sit proximū principium infiniti meriti. *ibid.*

Gra-



- Gratia Christi intensive non potest augeri sub ea ratione qua infinita est. 338.1. extensive tamen augeri potest. *ibid.*  
 Gratia plenitudo in quo consistat. *ibid.*  
 Gratia nulli subiecto creato est naturalis. 340.1  
 Gratia quomodo in infinitum augeri possit. *ibid.*  
 Gratia est forma cui connaturalis est visio beatifica. *ibid.*  
 Gratia Christi in intentione & mente divina fuit prior omni alia. 342.1  
 Gratia capitis & personalis in Christo eadem, 344.2  
 Gratia influxus in Christo duplex. 348.1  
 Gratia capitis est principium merendi aliis. *ibid.*  
 Gratia unionis, & gratia habitualis potest dici gratia capitis, sed diversa ratione. *ibid.*  
 Gratia capitis Christo ita propria est, ut cum eadem perfectione nulli purae creaturae communicari possit. *ibid.*  
 Gratia qua ratione specialiter participatio divinae naturae datur. 385.2  
 Gratiae omnes & supernaturalia dona, quae in Ecclesia conferuntur, per Christi humanitatem tanquam per instrumentum conferri, satis pie & probabiliter credi potest. 411.1  
 Gratia solus Deus potest esse causa principalis & quare. 407.1  
 Gratia hominum quomodo sit participatio gratiae Christi. 414.1  
 Gratia Patrum antiquorum an a Christi humanitate dependere coeperit dubitatur: & resolvitur negative. 443.1  
 Gratia unionis sicut per opera non comparatur, ita nec corrumpi potest sicut gratia habitualis. *ibid.*  
 Ex gratia habituali opera Christi valorem & condignitatem habuerunt ad meritum. 529.2  
 Gratiam habitualement Christus mereri potuisset, si eam aliquo tempore non habuisset. 537.1  
 Gratia est in essentia animae, & comparatur ad alios habitus infusos, ut forma principalis ad suas potentias. 540.2  
 Gratia sanctificationis respectu nostri datur gratis, respectu Christi datur nobis iustitia. 546.2  
 Gratia augmentum, & gloriae, & omnes actus, quibus illam meremur, sunt ex meritis Christi. 551.2  
 Gratia qua Deus vult dona sua esse merita nostra, propter merita Christi nobis confertur. *ibid.*  
 Gratia habitualis non potest uniri divino supposito nisi media humanitate. 618.1  
 Gratia unionis communicata Christo alterius rationis est a gratia filiorum adoptivorum. 625.1  
 Vide, Meritum, Liberum arbitrium Praedestinatio.
- H
- Habitus. Habitus in Christo.*  
 Habitus intellectuales quid sint in Christo. 555.2  
 Habitus scientiae duo includit, & quae sunt illa. 593.1  
 Inter habitum & lumen infusum nulla est distinctio in scientia infusa, 594.2  
 Habitus fidei non requirit lumen a se distinctum. *ibid.*  
 Habitus per se infusus datus est Christo, elevans intellectum ejus ad actus scientiae infusae. 596.1  
 Habitus non est necessarius angelo ad actus scientiae praeter species. *ibid.*  
 Habitus non sunt tot, quot species intelligibiles. *ibid.*  
 Habitus operativus non est productivus alterius, sed activus. 414.1  
 Inter habitus vitiosos & reatum poenae quae sit differentia ob quam indecens fuerit Deum assumere naturam illis obnoxiam, & non huic. 464.1  
 Habitus cur possint inter se univoce convenire, quamvis obiecta ipsorum vel actuum analogice tantum conveniant. 656.2  
 Haereticis ex verbis inordinate prolatis incurritur. 482.1  
 De haereticis vide in propriis ipsorum nominibus.
- Hebdomada.
- Hebdomada nomine in Scriptura quid intelligendum. 7.2  
 Hebdomadae, de quibus Daniel loquitur, componebantur ex annis solaribus non lunaribus. 8.1. Aequales & continuae fuerunt. *ibid.*  
 Quando initium habuerint. *ibid.* & quando finem. 9.2
- Hilaris.
- Hilaris non putavit in Christo nullum dolorem fuisse. 469.1. explicantur ejus dicta, quibus ille videtur in Christo dolorem negare. *ibid.*  
 Non negat in Christo fuisse dolorem, sed naturam doloris, id est dolori suo merito subjectam. *ibid.*
- Homo, Homo purus.
- Ex hominis lapsu orta maxima necessitas incarnationis. 26.2  
 Homo purus quantumvis sanctus, non potuisset plene & perfecte pro homini peccato satisfacere. *ibid.*  
 Hominis redemptio liberum est Dei opus. 27.1
- Hominem redimi servato iustitiae rigore, non fuit necessarium, sed convenientissimum. 28.1  
 Homo per peccatum quasi venditus est, & sub daemonis potestate constitutus. 31.2  
 Homines plures esse salvandos in statu naturae lapsae, quam in statu innocentiae incertum. 49.1. Qua via possit sustineri declaratur. *ibid.*  
 Probabilius, tot fore salvandos in statu naturae lapsae, quot in statu innocentiae. *ibid.*  
 Homo quantumvis naturali servitute sit Dei servus, est tamen capax proprii dominii. 63.1  
 Humanum genus, sicut offendit in uno individuo naturae suae, ita satisfacit per aliud. 65.1  
 Homo purus ex perfecta iustitia non potest Deo satisfacere. 72.2  
 Hominis puri opera non habent valorem sufficientem ad satisfactionem omnino aequalem. *ibid.* Et unde hoc oritur. 74.2  
 Homo purus minus potest pro se satisfacere, quam pro aliis. 75.2  
 Homo nihil potest operari, quod apud Deum condignum valorem ad meritum vel satisfactionem habeat, nisi fuerit vivum membrum Christi. 100.2  
 Homo satisfacit ut membrum Christi, quando satisfacit per gratiam propter Christum acceptam. *ibid.*  
 Homo si non peccasset, gratiam & immortalitatem per fidem Christi habuisset. 138.1  
 Quod si homo non peccasset, Deus non fieret homo, quo sensu sit verum. 139.1. Et quo falsum. *ibid.*  
 Homo quando non potuit mereri incarnationem de condigno. 223.2  
 Homo caelestis cur Christus dicatur, & homo terrenus Adam. 198.2  
 Homo pure viator interdum elevari potest ad intelligendum sine phantasmatis. 391.1  
 Homo, cum non habet gratiam, neque alia supernaturalia dona, quomodo dici potest elevatus ad supernaturalem finem. 424.2  
 Homo de Christo & nobis univoce dicitur. 482.1  
 Homo factus est Deus, propositio ista rursus explicatur, & varii illius sensus declarantur. *ibid.*  
 Homo genitus est Deus, vera est propositio, quia hic homo per generationem habet, ut sit Deus, *ibid.*  
 Homo cepit esse, demonstrato Christo, dici non potest. 491.2  
 Homo quomodo ut imago Dei adorari possit. 703.1  
 Vide satisfactio. Meritum.
- Honor.
- Honor eo major est, quo a majori persona exhibetur. 33.1  
 Honor quid sit, & qualiter se habeat ad adorationem. 647.1  
 Honorari potest Deus solo interiori motu cordis. 649.2  
 Honor civilis & externus Principibus jure naturali debetur. 660.1
- Humanitas, Humanitas Christi.
- Humanitas unita tribus personis non esset *Sanctior*, neque venerabilior, quam sit nunc uni tantum conjuncta. 47.1  
 Humanitas Christi non prius fuit praevisa ut existens in essentia naturae, quam praedestinata ad unionem hypostaticam. 1102.  
 Humanitas & ejus subsistentia fiunt per actiones aliquo modo in re distinctas & separabiles. 182.2  
 Humanitas Christi distincta actione formatur, & Verbo copulatur. 183.1  
 Humanitatis Christi conceptio quoad modum fuit supernaturalis, quoad substantiam vero naturalis. *ibid.* unio autem ad Verbum omnino supernaturalis. *ibid.*  
 Humanitas Christi prius natura existit, quam assumatur a Verbo. *ibid.*  
 Humanitas Christi si dimitteretur a Verbo, non desineret esse simpliciter, sed subsisteret in propria. *ibid.*  
 Humanitas non advenit Verbo accidentaliter, nec Verbum humanitati nisi substantialiter. 184.2  
 Humanitas est subiectum & non fundamentum relationis ad Verbum. 192.1  
 In humanitate Christi fuit aliqua existentia creata substantialis, sed incompleta. 195.2  
 Humanitas a Verbo dependet in subsistendo, quomodo non pendet a Patre, vel Spiritu sancto. 196.1  
 Humanitas non manet violenter in Verbo, & cur. 198.1  
 Humanitas Christi habet naturalem capacitatem ad propriam subsistentiam, sed non appetitum. *ibid.*  
 Humanitas quomodo sit in Verbo. *ibid.*  
 Humanitati ratione unionis debetur major honor, quam cuilibet personae creatae. 204.2  
 Humanitas Christi ex vi suae productionis non habet gratiam unionis nisi concomitanter. 208.2
- Huma-



- Humanitas Christi, vel anima non meruit, nec mereri potuit electionem suam seu prædestinationem ad unionem hypostaticam.** 217.1
- Humanitas Christi non est capax meriti.** *ibid.* 2
- Humanitas Christi seu anima non meruit suam assumptionem etiam de potentia absoluta.** 218.1
- Humanitas Christi prius natura quam assumatur a Verbo, qualiter dici possit per se existens.** 239.2
- Humanitas natura sua non est capax subsistentiæ communicabilis, bene tamen per potentiam obedientialem.** 261.2
- Humana natura secundum dignitatem & secundum necessitatem fuit a Verbo maxime assumptibilis.** 267.2
- Humanitas ita Verbo unita est, ut ubicumque sit, illi unita sit.** 268.2
- Humanitas in duobus locis existens quod in uno habeat personalitatem propriam, & in alio illa careat, & existat in Verbo, non implicat.** *ibid.* secus in eodem loco. *ibid.*
- Humanitatem aliunde quam ex stirpe Adæ Verbum potuisset assumere.** 275.1
- Humanitas a Verbo assumpta est unica, individua, & singularis.** 281.2
- Humanitas hæc non de novo creata est, sed ex stirpe Adæ concessa.** *ibid.*
- Humanitas Christi non prius tempore existit, quam sit unita Verbo.** 293.2
- Humanitas ut est quædam natura integra & totalis, assumptibilis est propria, & adæquata assumptione.** 305.1
- Humanitatem Christi unctam esse divinitate, Scripturæ more idem est ac esse sanctificatam.** 309.2
- Humanitas non potest assumi in puris naturalibus, id est nec grata, nec ingrata Deo.** 311.1
- Humana natura a Verbo assumi non nisi in statu naturæ integræ.** 317.2
- Humanitas Christi ex vi solius unionis ad Verbum non est facta potentior physice ad operandum, quam ex natura sua esset.** 409.1
- Humanitas Christi organum fuit divinitatis.** 412.1
- Humanitas Christi non fuit principale principium ad efficienda miracula, sed solum instrumentale.** 413.1. & eodem modo se habet respectu productionis gratiæ. 414.1
- Humanitas Christi per solam unionem ad Verbum non constituitur in actu primo ad operandum supernaturaliter.** 423.1
- Humanitas Christi operari potest miraculose, ubi non est localiter præsens.** 442.1
- Humanitas Christi non potuit efficienter operari, antequam existeret, instrumentaliter physice.** *ibid.* 2
- Humanitati Christi an fuerit communicata potestas creandi, vel an aliquando ea usa fuerit.** 446.2
- Humanitas Christi ad quod miraculorum genus assumpta fuerit.** 448.1
- Humanitas Christi neque æterna, neque immensa dici potest.** 455.2
- Humanitas Christi potuit toti mundo fieri præsens.** *ibid.* 2. non est ita de facto. *ibid.*
- Humanitas mutans locum secum fert unionem ad Verbum, & ita mutata humanitate nulla sit in Verbo mutatio.** 456.2
- Humanitas Christi per unionem ad Verbum facta est impecabilis.** 460.1
- Humanitas Christi, ex quo incepit esse Verbo unita, habuit unicam invariata existentiam.** 501.1
- Humanitatem Christi carere scientia beata & infusa, de absoluta Dei potentia non repugnat.** 524.1
- Humanitas considerata ut præcisa a Verbo & amari, & laudari potest.** 670.2
- Summa excellentia, propter quam est adorabilis humanitas, est gratia unionis.** 671.1
- Humores omnes immediate fuisse Verbo unitos, auctores tradunt, & probabilius est.** 288.1. Cur excrementa ab Aristotele vocentur. *ibid.*
- Hypostasis.**
- Hypostasis Græce, idem quod suppositum Latine.** 168.2
- Hypostasis vox imposita est ad significandam personam.** 241.2
- Idololatria. Idolum. Idolodulia.**
- Idololatriæ nomine cur salforum Deorum cultus significetur.** 656.1
- Idolum falsam imaginem significat, quæ vel repræsentat quod non est, vel quale non est.** 705.1
- Idoli nomen in scriptura semper in malam partem sumitur.** *ib.* 2
- Idololatria tunc proprie committitur, cum adoratio soli Deo debita ei, qui Deus non est, communicatur.** 707.2
- Suarez Tom. XVI.
- Erigere Deo imaginem, ut propriam ejus naturam, sicut est, repræsentet, idololatria.** *ibid.*
- Error idololatriæ unde ortus.** *ibid.*
- Varii modi antiquæ idolorum culturæ.** 708.1
- Idolodulia est, aliquid honorare adoratione sanctis debita tali adoratione indignum.** 707.2
- Idolorum usus qualiter ab imagine differat, vide verbū Imago.**
- Jesus.**
- Jesus est homo, propositio est propriissime in materia naturali, & cur** 483.2
- Humanitatem formaliter significat.** 665.1
- Jesu nomini specialis adoratio debetur.** 703.2. eaque respectiva. *ibid.*
- Imago, Imago Dei, Christi, & Angelorum.**
- Imaginum sanctorum usum qui hæretici detestati.** 676.2. variæ causæ ob quas imagines depingi possunt. *ibid.*
- Imago in se continet prototypum in esse repræsentativo.** 690.1
- Imaginum usus licitus & honestus.** 676.2. & propter varios & honestos fines in Ecclesia introductus. 677.2
- Imagines Sanctorum congrua, & honesta templorum ornamenta.** 678.1
- Non solum licet depingere imagines historiarum continentes, sed simplices picturas.** *ibid.*
- Dei & Angelorum imagines licite & religiose in usu habentur.** 679.1. non tamen possunt esse nisi metaphoricæ. *ibid.* 2
- Si semel tamen ad repræsentandum instituantur, sacræ sunt & honorandæ.** 702.2
- Non possunt ad libitum depingi, sed juxta Ecclesiæ usum in forma, in qua aliquando apparuerunt.** 680.1
- Variæ contra imaginum adorationem hæreses.** *ibid.* 2
- Imagines Sanctorum adorandas, honorificeque tractandas, ex Sacra scriptura probatur.** 681.1. Ex Ecclesiæ definitione. 682.1. Ex communi usu & traditione. *ibid.* Ratione ostenditur. *ibid.*
- Miraculum pro adoratione imaginis B. Virginis factum.** *ibid.*
- Ut colantur quali publica impositione & auctoritate indigeant.** 702.2
- Ex relatione, quam habent ad res sanctas, quas repræsentant, quodammodo sanctæ dicuntur.** 682.2
- Imaginum adoratio prout ad illas terminatur, respectiva.** *ibid.*
- non autem abusiva, vel impropria, qualis esset, si adorari dicerentur ex eo solum, quia ad præsentiam earum prototypa adorantur.** *ibid.*
- Non solum actionibus externis adorandæ, sed & aliqua interior adorationis intentio, sine qua vera adoratio consistere non potest, in eas dirigenda.** 683.2
- Variæ ad hoc VII. Synodi loca ponderantur.** 684.1
- Adoratio ad præsentiam imaginum tripliciter fieri potest.** 683.2
- Ex præsentia imaginis sumpta occasione potest prototypum adorari non adorata imagine.** *ibid.*
- Et prototypum imagine, & imago propter prototypum uno eodemque actu interiori & exteriori possunt adorari.** 690.1
- Qua adoratione res repræsentata in imagine propter intrinsicam suam excellentiam primario adoratur.** *ibid.* 2
- Tota ratio adorationis imaginum est excellentia prototypi.** 691.1
- Adoratio qua imago simul cum portotipo coadoratur, respectiva est prout ad imaginem terminatur.** 692.1
- Imagines licet non possint adorari nisi propter exemplar, possunt tamē in se & proprie adorari, non adorato directe & ut quod exemplari.** 694.1
- Qui modus adorationis rectus est & honestus.** *ibid.* 2
- Cum hoc modo imago adoratur, eadem, qua res aliæ sacræ inanimæ, adoratione colitur.** 696.2
- Idem habitus ad exemplaris & imaginis propter ipsum adorationem inclinatur.** 698.1
- An hæc imaginis adoratio ut ab exemplari præcisa dicenda sit latraria.** *ibid.*
- Tota hæc adoratio imaginis quantumvis præcisa in exemplar refertur, & qua relatione.** *ibid.* 2
- Variæ dicta Conciliorum qualiter cum hoc modo adorationis stare possint, ostenditur.** 698.1.2
- Patrum etiam testimonia explicantur.** 700.1
- Imago ut in actu exercitio considerata semper proponit exemplar ut objectum primario adorandum, cum quo ipsa coadoratur: secus si tantum prout res quædam sacra concipiatur.** 699.2
- Cur ejusdem personæ uni imagini major deferatur honos, quam alteri.** 701.1
- A a a Qua-



Qualiter in omni imaginum adoratione idem motus sit in istam, qui in exemplar. *ibid.* 2  
 Adoratio Dei vel Christi pariter circa terram & imaginem exerceri valet: at terra tunc non adoratur, secus imago & quare. 702.1  
 Irreverentia facta imagini ex contemptu exemplaris multo major, quam facta ex sola irreverentia erga res sacras. *ibid.* 2  
 Dei & angelorum imagines quamvis metaphoricae, eodem duplici modo cultus, quo reliquae imagines, adorandae. 703.1  
 Usus & adoratio imaginum non est in praecepto naturali, nec divino. *ibid.*  
 Consuetudo tamen Ecclesiae circa imaginum usum est instar praecepti, & quando obliget. *ibid.*  
 Supposito sacrarum imaginum usu duplex de earum adoratione ex ipsa rerum natura praeceptum oritur, affirmativum unum, negativum aliud. *ibid.* 2  
 Imaginum usus contra idolorum cultum inventus. 704.1  
 Quantum inter imaginum adorationem & idolorum cultum interfit, & inter imagines & idola. 705.1  
 Imagines nostrae, neque idola, neque simulacra, neque sculptilia nominanda. *ibid.* 2  
 Imaginis sanctificatio non consistit in unctione, vel benedictione aliqua, sed in representatione personae sacrae. 696.1  
 Imagini sacrificium offerri non potest, neque ad eam nisi figurato sermone preces fundi. 548.1  
 Quomodo per imaginem Christi ut hominis humanitas a divinitate non dividatur, ut contendunt haeretici. 673.1  
 Quas sui ipsius imagines Salvator ipse reliquit, quarum unam, dum viveret, ad Abagarum, ad alium regem Persiae aliam misit. 676.2  
 Imaginis Christi crucifixi a Nicodemo depictae historia a VII. Synodo approbata. 677.1  
 Imago seu statua Salvatoris Caesarea erecta a muliere a sanguinis fluxu sanata. *ibid.*  
 Imago Christi sub figura agni VI. Synodo, canone 82, approbatur. 679.2  
 Imaginis Christi adoratio, qua Christus primario adoratur, coadoratur imago, vera latría est, quamvis idem ipse actus, ut ratione nostra intelligitur terminari ad prototypum, sit perfecta latría, ut vero ad imaginem, imperfecta tantum. 692.1  
*Incarnatio.*  
 Incarnationis mysterii tractatio totius Theologiae praestantissima, excepto Trinitatis mysterio. 1.2  
 Huius mysterii quanta difficultas. *ibid.*  
 Incarnatio omnibus gratiae & creationis operibus excellentior. 2.1  
 Incarnationis consideratio triplicem Theologiae totius considerationem complectitur. 1.2  
 Incarnationis vox non refugienda: optime enim hoc mysterium ex ignobiliore parte assumpta exprimit. 2.2  
 Incarnationis nomen fundamentum habet in sacra Scriptura. *ib.*  
 Incarnatio Deo maxime conveniens ad ejus bonitatem ostendendam. 18.1  
 Incarnatio secundum Augustinum est supremum exemplar gratiae. *ibid.* 2  
 Per illam se perfectissime communicavit. 19.1  
 Ut mutatio est, creaturae convenit, Deo autem ut communicatio boni infiniti. 20.2  
 Nulla ratione impossibilis probari potest, nec possibilis demonstrari, licet supposita fide, variis exemplis & conjecturis ratione naturali verisimilis ostendatur. 21.1  
 Qualiter hoc mysterium in Dei visione cognoscatur. 22.2  
 Incarnationem factam esse unum ex potissimis fundamentis nostrae fidei. *ibid.* Non tamen potest evidenter probari contra infideles. 23.1  
 An potuerit ex aliquo effectu cognosci. *ibid.*  
 Quomodo & cognosci & praedici potuerit a nonnullis gentilibus. *ibid.*  
 Incarnationis opus & Deo ipsi & humanae naturae maxime conveniens. *ibid.* 2  
 Est quasi complementum & perfectio universi: & qualiter ex illa ad omnes creaturas redundet dignitas. 24.1  
 Rationes, quae incarnationem convenientem probat, vim etiam habent in statu naturae integrae. 26.1  
 Fuit, supposita Dei voluntate, ad hominis salutem necessaria, non tamen simpliciter ad hominis reparationem, ex cuius lapsu maxima ejus necessitas orta. *ibid.* 2  
 Patres, qui eam necessariam dicunt, quomodo intelligendi. 27.1  
 Fuisse medium convenientissimum omnium possibilem ad redemptionem nostram multis ostenditur. 29.2

Incarnatio unius divinae personae esset praemium adaequatum uni actui meritorio Christi, intensivè, non extensivè. 47.1  
 Incarnationis causam esse peccatum non ubique Scriptura tradit, cur vero illi frequentius attribuat. 102.2  
 Incarnatio ab Adam cognita fuit, & praehunciat. 104.1  
 Incarnationis causam fuisse peccatum ex Patribus, effectibus, & conjecturis ostenditur. *ibid.*  
 Non omnes rationes, ob quas Incarnatio facta est in persona Verbi, ortae sunt ex hominis lapsu. 124.1  
 Incarnationis voluntas praecessit voluntatem permittendi peccatum simpliciter & in genere causae finalis. 126.1  
 Praecessit item voluntatem dandi gratiam Adae. *ibid.*  
 Item praescientiam absolutam peccati originalis. *ibid.* Posterior tamen fuit, quam scientia conditionata illius. *ibid.*  
 Incarnatio & passio in eo differunt, quod incarnatio per se amabilis sit, passio vero non. 128.1  
 Incarnationis adaequatum motivum & sufficiens, non fuit unicuique tantum, sed plura totalia & per se sufficientia, & quae fuerint. 131.1. In quo hoc habeat fundamentum. 133.2  
 Incarnationis mysterium per se amabilius est, quam sint angeli & homines, non solum in esse naturae, sed etiam in esse gratiae. 131.1  
 Sola hominum redemptio sufficiens ratio fuit, ut propter eam solam Deus vellet incarnationem. *ibid.*  
 Unde constet incarnationis motiva fuisse de facto plura. *ibid.*  
 Quare incarnatio dicatur esse facta ob nostram redemptionem. 135.2  
 Incarnationis solam causam esse remedium peccati, Sancti dicentes explicantur. 132.2  
 Incarnationis prima causa fuit excellentia ipsius mysterii, & alia bona, quae ipsum consequuntur absque remedio peccati, secunda redemptio nostra etiam quoad substantiam ipsius mysterii. 133.1  
 Qualiter haec inter se cohæreant, optimo exemplo declaratur. 134.1  
 Quod nam ex his motivis fuerit praecipuum, & efficacius, tam respectu divinae voluntatis, quam nostri utpote divinae charitatem erga nos magis ostendens & commendans. *ib.* 2  
 Modus loquendi Scripturae de fine incarnationis explicatur. 135.1  
 Unica & adaequata ratio incarnationis Christi in carne passibili, nostra redemptio. *ibid.* 1. ex Scriptura ostenditur. *ibid.*  
 Incarnationem fieri necessarium fuit, posito primo decreto voluntatis divinae in sensu composito. 138.2  
 Incarnatio quomodo non fuisset, si peccatum non fuit. 139.1  
 Incarnationem futuram etiam si homo non peccaret, quomodo verum. 143.2  
 Praesens decretum de incarnatione, licet praecedat permissionem peccati, habet tamen supposita scientia conditionata necessariam connexionem cum illa. 142.2  
 Utrum saltem ex alio decreto incarnatio fieret, cessante peccato. 143.2  
 Facta est circa quater millesimum mundi annum. 191.2  
 Licet convenienter tot saeculis dilata, non tamen debuit in finem mundi differri. 152.1  
 Incarnationis terminus duplex, terminans & resultans. 163.1  
 Est actio realem terminum producens. *ibid.*  
 Ejus terminus adaequatus est Deus homo, hoc est, substantialis seu individua quaedam substantia. *ibid.*  
 Incarnatio est unio vera & realis, ineffabilisque Christi Dei hominis compositio. 178.2  
 Incarnatio in re aliquo modo includit actionem productivam humanitatis: proprie tamen & in rigore actio unitiva est, non productiva alicujus ex extremis. 182.2  
 Est substantialis unio per modum compositionis ex natura, & supposito, accidentalis nequaquam, neque ex partibus materialibus, metaphysicis, physicis, aut ex ente & essentia. 213.1.  
 Incarnationis descriptiva definitio. 184.2  
 In Incarnatione quae & quot interveniant. 186.1  
 Incarnatio, ut actio, toti Trinitati communis. *ibid.* 2  
 Per incarnationem mutari humanam naturam necesse est. 187.1. Quae mutatio neque in qualitate, neque in relatione consistit. *ibid.*  
 Terminus formalis seu quod incarnationis est unio hypostatica in humanitate facta. 189.1  
 Terminus a quo incarnationis est carentia termini ad quam, unionis scilicet in humanitate, ut actio enim non habet terminum a quo positivum. 190.2  
 Sufficit hanc carentiam antecedere prioritate naturae, ut sit terminus a quo incarnationis. 191.1  
 Incarnationis causa efficiens principalis Sanctissima Trinitas, nulla



- nulla creatura, etiam instrumentaliter concurrente. 20.1  
 Licet soli divinæ misericordiæ hoc beneficium tribuatur, qua-  
 liter potuerit cadere sub meritum. 220.1  
 Incarnationem suam Christus non meruit, neque ejus circum-  
 stantiam. *ibid.* 2  
 Nullus hominum eam de condigno meruit, nec potuit a pura  
 creatura sic mereri. 223.1  
 Incarnationis prædestinatio, qualiter de potentia absoluta sub  
 puri hominis meritum cadere possit. 225.1  
 Incarnationem meruerunt antiqui Patres quoad executio-  
 nem, & quoad aliquas circumstantias. 226.1. & qualiter  
 hoc meritum ad illam necessarium. *ibid.*  
 Incarnationem in Persona Patris & Filii factam esse quidam  
 hæretici somniarunt. 249. Cur potius in secunda persona  
 facta. *ibid.*  
 An possit una persona sine alia incarnari, disputatur. *ibid.* 2  
 Per incarnationem divina natura fuit unita humanitati in  
 persona Verbi. 250.1  
 Incarnatio qua ratione a Christo per scientiam infusam cogni-  
 ta fuerit. 386.1  
     Vide unio, persona, substantia.  
     *Infans. Infans Christus.*  
 Infans in utero materno potest dici membrum Christi. 346.2  
 Infantibus in gratia decedentibus debetur gloria ex iustitia fun-  
 data in merito Christi. 547.1  
 Infantium efficax vocatio est ipse baptisumus. 549.2  
 Infantem baptizari ante mortem specialis gratia ob Christum  
 data. *ibid.*  
 Infans Christus non habuit impedimentum usus rationis sicut  
 alii parvuli. 402.2. Operabatur tamen vere ut infans,  
 quamvis potuisset operari ut vir. 404.2  
     *Injuria.*  
 Eo est gravior, quo dignior persona offensa, & offendens vi-  
 lior. 32.2  
 Ex injuria illata duplex oritur obligatio in injuriante, passiva  
 una, activa alia. 57.2  
 Injuria facta in bonis superioris ordinis non potest bonis or-  
 dinis inferioris compenari. 75.1  
     *Instrumentum.*  
 Quomodo differat a causa principali. 210.1  
 Instrumentalis virtus in divinis instrumentis non est qualitas  
 superaddita, nec per motum aliquem physicum in actu pri-  
 mo constituuntur. 419.2  
 Non possunt sine aliqua virtute activa, per solam extrinsecam  
 elevationem physice causare. 421.2  
 Nec per solam denominationem extrinsecam, aut subordinati-  
 onem ad Deum, si in eis nulla potentia supponatur, in  
 actu primo constitui possunt. 422.1  
 Supernaturalis instrumenti elevatio quid sit, & quæ includat.  
 424.1  
 Instrumenta non eleantur ad agendum secundum quod ha-  
 bent potentiam passivam. *ibid.* 2  
 Instrumentum non agere virtute propria, sed principalis agen-  
 tis, quo sensu verum. 422.2  
 Auxilium quo eleantur supernaturalia instrumenta, non est  
 in ipsis tota ratio agendi. 434.2  
 Ad instrumenti rationem, nec quod procedat a causa principa-  
 li, nec quod ab illa recipiat aliquid prævium ad actionem,  
 necessarium est. 435.2  
 In quo vera instrumenti physici essentia consistat. 436.1  
 Supernaturalia instrumenta, cum non limitentur ad agendum  
 per contactum, operari possunt, ubi non sunt. 442.1  
 Instrumentum vere & realiter agit, & ideo in eo requiritur  
 actuale esse, reque operari potest non existens. 443.2  
 Instrumentorum naturæ vel artis tria genera. 444.2  
 Ad quod ex his generibus instrumenta divina reducuntur. *ibid.*  
 Non est necessaria in illis prævia actio propria & connatu-  
 ralis ipsis, ut attingant effectum principalis agentis. *ibid.* 2  
 Nec attingunt dispositionem aliquam, ex vi cujus principalis  
 effectus resultet. *ibid.*  
     *Intellectus.*  
 Intellectus quomodo idem sit cum anima, vel diversus. 291.2  
 Non concurrat ad visionem beatificam, nisi juxta mensuram  
 auxilii & formæ, per quam elevatur. 337.1  
 Intellectum creatum habuisse Christum de fide est. 351.1. qui  
 est in naturali perfectione inferior angelico, perfectior omni  
 humano creato, non possibili. *ibid.* 2  
 In intellectu Christi fuit actus creatus intelligendi, tam natu-  
 ralis, quam supernaturalis. 352.1  
 Omnis actus intellectus Christi fuit verus, certus, & evidens,  
     *Summæ Tom. XVI.*
- scientiæque opinionem autem vel humanam fidem ex se  
 fallibilem non habuit. *ibid.*  
 In intellectu Christi error cadere, aut in sermone mendacium,  
 non potuit, etiam de potentia absoluta. 355.1  
 In intellectu Christi fuerunt habitus naturales. *ib.* & infusi. *ib.*  
 Intellectio, quæ fuerit sufficiens ad penetrandum objectum  
 exacte ex parte ejus, erit sufficiens ad ejusdem comprehen-  
 sionem. 379.2  
 Intellectus duas res simul cognoscere potest, & quomodo.  
 372.2  
 Intellectus & species intelligibiles quomodo concurrant ad  
 intellectionem. 394.1  
 Intellectionem, ut est actio vitalis, procedere ab intellectu, &  
 ut est representatio objecti, procedere ab specie, quo sensu  
 verum. *ibid.*  
 Intellectus in ordine ad naturales actus intelligendi de se habet  
 vim activam, ex parte potentie requisitam, in ordine tamen  
 ad supernaturales, nec partialem habet connaturalem. *ibid.*  
 Intellectus animæ Christi non habet sufficientem virtutem  
 activam naturalem ad actus scientiæ infusæ requisitam, nec  
 ad illos elevatur per solas species infusas. *ibid.*  
 Intellectus agens animæ Christi licet præditæ scientia infusa  
 rerum naturalium, otiosus non fuit. 404.2  
     *Ira. Ira in Christo.*  
 Ira in Christo esse potuit. 474.1  
 Ira est effectus tristitiæ, seu passio composita ex tristitia & ap-  
 petitu vindictæ. *ibid.*  
     *Juda Tribus.*  
 Nullum habuit in Judæos dominium ante Davidem. 3.2  
 Propter Messiam cæteris est prælata. *ibid.*  
 Qualiter usque ad Christum regiam potestatem obtinuerit. 4.2  
 Ad illam sacerdotium nunquam pertinuit. *ibid.*  
 Cur sola dicatur secuta Roboam, & non tribus Benjamin. 6.1  
 Quia Christo frui vel nescivit, vel noluit, sua dignitate priva-  
 ta est. *ibid.*  
 Ante adventum Christi semper aliis Tribubus prælata. 9.1  
     *Judei.*  
 Judæorum capita a transmigratione adhuc circa Babylonem  
 principatum habere fabulosum est. 3.2  
 Potestas, quam usque ad Herodem habuerant, ab ipso abla-  
 ta est eis. 5.2  
 Judæi redeundi e Babylone in patriam facultas, quando &  
 quoties data. 9.1  
 Templum aliud spectantes, Salomonico gloriosius, insaniunt.  
 13.1. Eorum conatus in alio templo extruendo vanus. *ibid.*  
 Nullam aliam ob causam exultant, nisi ob Christi cædem. *ib.* 2  
 Qualem expectent Messiam, ut propterea Christum Domi-  
 num respuant. *ibid.*  
 Multa de Messie adventu dicta metaphorice, ad corticem li-  
 teræ intelligentes, errant. 4.1. Item circa duplicem Christi  
 adventum, quem unum fingunt. *ibid.*  
 Judæorum aliqui duos jam fingunt Messias. *ibid.*  
     *Julianus Apostata.*  
 Imaginem Christi confregit, & Christianis quod idola adora-  
 rent, objecit. 676.2  
 Signo crucis ex consuetudine contra suam perfidiam se si-  
 gnans, dæmones fugavit. 711.2  
     *Justitia, justitia Christi & Dei.*  
 Proprie est ad alterum. 50.1  
 Inter Patrem & filium non intercedere, quomodo intelligen-  
 dum. 51.1  
 Justitia unius personæ ad seipsam secundum diversas naturas  
 esse potest. 52.1  
 Ibi esse potest ubi injuria. *ibid.* 2  
 Commutativa inter servum & dominum in humanis triplici  
 ex capite esse nequit: secus inter Christum & Deum. 53.1  
 Ad justitiæ actum exercendum quid necessarium. *ibid.*  
 Ut inter duos intercedat, non est necesse, ut uterque ex motivo  
 formalis justitiæ operetur, neque ut ratio vel obligatio justitiæ  
 sit in utroque reciproca seu ejusdem omnino rationis. *ib.* 2  
 Inter Deum & homines perfectissima justitia. *ibid.*  
 Justitia in Christo non fuit distinctæ speciei a nostra. 54.2  
 Justitiæ obligatio non cadit in Deum nisi ex suppositione ali-  
 cujus pacti. 56.1  
 Duplex est in Deo, generalis & specialis, & quid utraque. *ibid.*  
 Justitia Dei generalis non est speciale attributum, sed omnia  
 comprehendit. *ibid.* 2  
 Distributiva est formaliter in Deo, commutativa eminenter  
 tantum. 62.2  
 Distributiva ex propria ratione pactum requirit. *ibid.*  
     A a a 2 Non



- Non nisi ex promissione sub conditione operis æquivalentis, iustitiæ debitum oritur in Deo. 63.1  
 Iustitiæ inter servum & dominum intercedere non repugnat. *ibid.*  
 Jus creaturæ ad rem nec minuit perfectum Dei dominium, nec imperfectionem aliquam in eo ponit. 64.1  
 Iustitia non attendit æqualitatem inter personas, sed inter datum & acceptum. *ibid.* 2

*Justificatio.*

- Fuit per propriam & perfectam contritionem, tanquam per ultimam dispositionem. 79.2  
 Idem est quod sanctificatio. 80.2  
 Iustificatio est translatio ab statu peccati in statum gratiæ. *ib.*  
 Iustificatio includit remissionem peccatorum, & infusionem gratiæ habitualis, unde eadem est ad remissionem, quæ ad justificationem, dispositio. 81.2  
 Non tamen est prorsus idem justificatio cum remissione peccati, quia plus justificatio includit, quam remissio præcise sumpta. 87.1  
 In justificatione peccatoris non intercedit vera & propria iustitia ex parte Dei, sed semper est opus misericordiæ. 92.2

## L

*Latria.*

- Adoratio soli Deo debita latria dicitur. 656.1  
 Interdum actum, interdum habitum significat. 670.2  
 Quæ dicatur perfecta latria, quæ vero secundaria. *ibid.*  
 Nulla creatura potest esse objectum per se primo adorationis latriæ, tamen secundario per illam coadorari potest. 692.2  
 Distinctio latriæ soli Deo debitæ in externis actibus, potissimum ex interiori intentione pendet. 658.2

## Vide Adoratio. Cultus.

*Laus.*

- Quædam species honoris est. 647.1  
 Laus divina, per quam quis Dei excellentiam & suam ad illam summisionem proficitur, genus quoddam adorationis est. 650.2

*Lex, Legislator.*

- Legem nemo potest imponere, nisi qui potestatem habet coactivam. 568.2  
 Lex divina duplex, naturalis, & positiva, & hæc rursus in generalem & specialem dividitur. 569.2  
 Lege naturali obligari, est quasi proprietas consequens humanam naturam. *ibid.*  
 Legislatores quandoque legibus a se conditis obligantur. 570.1  
 Lex vetus solum eos obligabat, qui per seminalem rationem ab Abrahamo descendebant, vel se illi sponte subdebant. *ibid.*  
 Legislatoris potestas in Christo a regia potestate & sacerdotali non distinguitur. 597.1  
 Lex gratiæ est perfectior lege naturæ, & veteri, & eodem modo ejus sacrificium. 600.2  
 Lex Scripta, licet legem novam repræsentaverit, non tamen dici potest lex nova esse secundum ritum veteris. 603.2

*Liberalitas.*

- Liberalitas maxime conveniens ei qui bonus est, & fere soli Deo propria. 19.1  
 Liberalitas Dei magis elucet in eo, quod hominem ex rigore iustitiæ redemit, quam si gratis ipsi condonaret omnia. 28.1  
*Liberum arbitrium, Christi, Nostrum, libertas.*  
 Liberum arbitrium ex hoc potissimum principio Patres colligunt, quod simus capaces præcepti & obedientiæ, præmii, & meriti. 462.2  
 In hoc consistit, ut non solum a coactione, sed a necessitate etiam sit immune. 508.2  
 Quomodo fuerit in Christo, etiam si fuerit impeccabilis. 514.1  
 Libertas perit ex suppositione, qua posita necessario actus sequitur, si suppositio libera non est. 509.2  
 Ut aliqua suppositio tollat libertatem, necessarium est, ut aliquo efficaci, & veluti physico modo determet voluntatem ad talem actum. 511.1  
 Libertatem non tollit divinæ voluntatis decretum, quod humanum antecedit, etiam si illo posito infallibile sit, hanc consensuram, vel operaturam. *ibid.*  
 Libertatis exercendæ modus ita est intrinsecus voluntati, ut non possit rationabili præcepto impediri. 547.2  
 Libertas requiritur ad meritum ex intrinseca natura & essentia meriti. 530.1

*Litania.*

- Ufus a Papa Gregorio tempore cuiusdā pestis introductus. 67.1  
*Lumen. Lumen gloriæ. Lumen scientiæ.*  
 Lumengloriæ cur sit ad visionem beatam necessarium. 396.1

- Per lumen gloriæ quid Theologi intelligant. *ibid.*  
 Habet conjunctam essentiam divinam per modum speciei seu objecti actu intelligibilis. 541.2  
 Lumengloriæ fit in animabus beatis, per Christi humanitatem. 410.2  
 Lumen scientiæ infusæ est unus tantum habitus seu simplex qualitas. 397.1  
 Lumen scientiæ infusæ esse idem cum lumine gloriæ probabile: oppositum probabilius. 398.1  
 Lumen, quo illuminantur colores, inhæret corpori colorato, quoad extrinsecam superficiem. 256.1  
 In lumine ita esse virtutem activam ad producendas species, ut colores nullam habeant, error in philosophia. *ibid.*

## M

*Machabei.*

- Fuerunt ex Tribu Juda juxta maternam originem, non autem juxta paternam. 4.2

*Maria.*

- Maria Virgo vere concepit Deum, quia ejus conceptio in eodem instanti fuit ad Verbum terminata, quo humanitas Christi Verbo unita est. 183.1  
 Non fuit ita sanctificata per conceptionem, sicut humanitas per unionem. 205.2  
 An effective attigerit unionem hypostaticam. Pars affirmativa pia & probabilis, non tamen necessaria. 210.2  
 Mariæ consensus angelo præstitus, fuit medium ad executionem incarnationis. 227.2  
 Fuit Maria realis ac physica causa Christi Dei hominis. *ibid.*  
 Digne fuit disposita ut esset mater Dei. *ibid.*  
 Consecuta est hanc dispositionem partim ex divina gratia, partim per opera sua & merita de condigno. *ibid.*  
 Ejusdem prærogativæ, partim divinitus concessæ, partim ab ea comparatæ, quibus eam dignitatem adeptæ est. 230.1  
 Non meruit de condigno esse mater Dei. *ibid.* & qua certitudine hoc tenendum. 231.1. Potuit de potentia absoluta hoc mereri de condigno, non merendo ipsam incarnationem. *ib.*  
 Maria Virgo non meruit etiam de congruo, ut eligeretur in Dei matrem. 231.2  
 Mariæ operibus defuit promissio & pactum, & connaturalis proportio cum divina maternitate. *ibid.* 1  
 Mariam non elegit Deus in matrem, quia virgo futura, sed elegit ut esset virgo, quia matrem decebat. *ibid.* 2  
 Consentiens angelo plus meruit, quam omnes angeli & homines sancti omnibus suis actibus. *ibid.*  
 Supposita Dei ordinatione ex nulla alia scæmina potuit Deus ita congruenter carnem assumere. *ibid.*  
 Non fuit electa in Dei matrem ex prævisis meritis, sed in executione meruit illam dignitatem per sua opera. 232.1. Veredicitur & est mater Verbi. 502.1  
 Non est adoranda adoratione latriæ, sed hyperdulæ. 706.2  
 Cur non dicatur naturalis Dei filia, licet dignitati Matris connaturaliter debita fuerit gratia. 625.1

*Materia.*

- Materia prima assumi potest sine forma, atque adeo sine natura integra atque completa. 277.1  
 Habet suum actum entitativum, & sine forma conservari potest. *ib.*  
 Materia est propter formam, & si aliquo modo subsistit, solum est ut subjectum formæ. 290.2  
 Prius natura habet esse a causa prima, quam informetur forma. 293.2  
 Prius natura est subsistens, quam uniatur formæ. 299.1  
 Materia Christi in triduo fuit unita Verbo. *ibid.* 2

*Mardocheus.*

- Adorare Aman cur recusaverit. 660.1

*Matrimonium.*

- Fuisset sacramentum in statu innocentia. 138.2

*Mediator.*

- Inter Deum, id est, sanctissimam Trinitatem & homines Christus est mediator. 51.2. & solus ipse perfectus mediator. 713.1  
 Mediatoris nomen muneris est, non substantiæ. 712.1  
 Usurpatur interdum ad significandum substantiale medium inter duas extreme distantes naturas. *ibid.*  
 Angeli beati qualiter dici possint mediatores inter nos & Deum. 713.2  
 Mediatoris munus ad quid se extendat. *ibid.*  
 Mediatoris munus idem in Christo cum munere redemptoris. *ibid.*  
 Quædam hujus muneris participatio tam in angelis, quam in sanctis hominibus reperitur. 713.1. imo & in sacerdotibus. *ibid.*



Absolute concedi potest tam Verbum, quam Deum, esse mediatorum Dei & hominum. 714.1. secus reduplicando, in quantum Deus aut Verbum. *ibid.* 4.2  
Deus homo mediator ut quod, ut quo vero ipsa humanitas. *ibid.*  
Nec humanitas Christi, neque ejus divinitas, mediatrices dici possunt. *ibid.*  
Concedi debet, Christum in quantum Deum hominem esse mediatorem. *ibid.*

*Melchisedech.*

De persona Melchisedech varia hæreticorum placita. 600.2  
Fuit verus & purus homo. *ibid.* Nimirum fuit Sem primogenitus Noe. 601.1  
Cur a Paulo vocetur sine patre & sine matre. *ibid.* Ipsius sacerdotium quale. *ibid.*  
Panem & vinum obtulit in sacrificium, quo facto Eucharistiæ sacramentum obumbravit. *ibid.* 2  
Melchisedech in multis figura Christi. 602.2  
Non dedit decimas Abraham, sed Abraham ipsi. 603.1  
Fuit non solum sacerdos, sed & supremus sacerdos. *ibid.*  
Ejus sacerdotium non tam fuit per Christum ablatum, quam ad perfectiorem statum elevatum. *ibid.* 2

*Meritum, mereri, meritum Christi.*

Plures significationes hujus vocis. 232.1  
Meritum non distinguitur realiter a quantitate meriti, & quomodo hæc mutuo se habeant. 40.2  
Ut sit æquale præmiis non requiritur æqualitas physica inter res, quæ sunt meritum & præmium, sed sufficit æqualitas proportionis. 44.2  
Christus sufficiens fuit ad merendum de condigno unionem hypostaticam, & determinationem liberam voluntatis divinæ ad aliquem effectum. *ibid.* Imo hoc posterius potest cadere sub meritum puræ creaturæ. *ibid.*  
Increatum bonum quatenus in se est absolute, sub nullius meritum cadere potest, secus quatenus libere communicabile. *ibid.*  
Meritum in quo differat a satisfactione. 64.2  
Meritum de congruo quomodo reperitur in contritione. 96.2  
Meritum necessario est ante præmium, saltè prioritate nature. 218.1. interdum vero solum antecedit in præscientia. 584.2  
Meritoria causa participat aliquo modo rationem causæ efficientis saltem moralis. 217.2. & cum finali in quo conveniat. 220.1  
Meriti principium cadere sub meritum est impossibile: quod late explicatur. 220.1  
Merita futura quomodo esse possint causa præmii ante collati. *ibid.*  
Meruit Christus continuationem incarnationis & partium per nutritionem accedentium assumptionem. 222.1. & ut unio hypostatica iterum atque iterum poneretur in Eucharistia. 223.1  
Mereri alteri de condigno primam gratiam non potest purus homo. *ibid.*  
Meritum qua ratione ab impetratione differat. 224.2  
Meritum de condigno quid requirat. 223.2  
Meritum de congruo non est sine gratia Dei & Christi: fundatur enim in illa. 227.1  
Meriti de condigno & congruo essentia, & differentia ab invicem. 226.1  
Actus meritorius debet esse liber, honestus, proportionatus & condignus præmio. 529.1  
Hæc conditiones ad meritum in operibus Christi qualiter fuerint. *ibid.*  
Persona quæ meretur, debet esse grata, & viatrix. 530.1  
Meriti valor non solum ex honestate actus, sed ex sanctitate personæ operantis pendet. 529.2  
Ad meritum de justitia necessario requiritur pactum ex parte Dei sub conditione operis. *ibid.* quæ nihil ei derogat. 531.1  
Meritum est actus, cui merces ex justitia in prædicta promissione fundata debetur. 530.2. Estque formaliter in actibus a voluntate elicitis, in imperatis vero solum per extrinsecam denominationem. 531.2  
In animabus purgatorii & beatis non reperitur. 535.1  
Omne meritum de condigno fundatur in cognitione supernaturali. 540.2  
Meritum beatitudinis non esse simul cum ipsa beatitudine qualiter intelligatur. 541.1  
Meritum ad genus causæ dispositivæ revocatur. *ibid.*  
Sub meritum id cadit, quod Deus conferre, & non conferre potest. 542.1  
Ad merendum aliquid non est necesse, ut homo ex propria intentione ordinet opus ad tale præmium. 543.1

Suares Tom. XVI.

Merita nostra sunt dona Dei, & Christi, diversa tamen ratione, 551.2  
Meritum unius non potest esse meritum alterius, quamvis uni possit dari præmium ob meritum alterius. *ibid.*  
Meritum non potest in suo genere allicere voluntatē, si solum ut possibile, vel ut futurū sub conditione præcognoscatur. 558.2  
Christus potuit de potentia absoluta non mereri, secus de ordinaria. 531.2

*Meritum Christi.*

Meritum Christi imo & quilibet ejus actus fuit sufficiens ad quodlibet præmium creatum, & increatum, divisivè, imo & collectivè sumptum. 43.2. & 45.2  
Mereri potuit Christus per diversos actus omnia præmia infinita, collectivè sumpta. 44.1  
Mereri potuit uno actu totum, quod pluribus, & actu remisso totum quod intenso. *ibid.*  
Non potuit Christus mereri aliquid impossibile. 47.2  
Meritum Christi ut est in actu, semper refertur ad finitum præmium. *ibid.*  
Meruit Christus angelis gratiam & gloriam, quibus remissionem culpæ aut penæ non meruit. 45.2  
Plus meruit Christus toto vitæ tempore, quam unico instante. 43.1  
Non tamen plusquam Deus possit præmiare. 47.2  
Meruit Christus per actum amoris Dei a charitate elicitum, & a beatifico distinctum. 532.1. & per actum charitatis proximorum, reliquosque tam virtutum infusarum, quam liberæ voluntatis. *ibid.* 2  
Mereri potuit præmium supernaturale naturalibus actibus, & quomodo. *ibid.*  
Sola unio hypostatica sufficeret illi ad merendum de condigno. 534.1  
Incepit mereri intrinsece a primo instante incarnationis. 625.1  
Quod usque ad instantem mortis, qui fuit terminus meriti ejus, continuavit. *ibid.*  
Potuit mereri suam gratiam & gloriam in instante suæ conceptionis per opus prius natura antecedens, sed de facto non meruit. 537.2. nec lumen gloriæ, nec alios habitus infusos. *ibid.*  
Non potuit mereri primum suum actum meritorium, nec necessaria ad illū. 542.1. Nec suos actus ut ab illius humana voluntate procedebant, nec infinitum valorē quem ab unione habebant. *ibid.* Nec suam impeccabilitatem, aut habitus scientiarum & virtutum moralium acquisitarum, nec naturalia bona, per se loquendo. 543.1  
Nec titulum supremi dominii, qui proprius est Dei, sed quem in humanitate assumpsit, nec dominium radicale, quod habuit ab instanti suæ conceptionis. 545.1  
Meruit omnes actus supernaturales, quos post primum meritum habuit, quatenus sunt dona Dei. 542.2. & gloriam, resurrectionem, & dotes sui corporis gloriosi, triumphum ascensionis, & exaltationem sui nominis, testimonio quæ de ejus divinitate sunt in Evangelio, dominium in universum orbem. 543.2. judicariam etiam potestatem. 545.1  
Hominibus omnibus meruit remissionem omnium peccatorum, & gratiam & gloriam quoad sufficientiam, non quoad efficaciam, & prædestinatis prædestinationem. 554.2  
Aliquibus etiam specialia dona, quibus infallibiliter merita applicarentur. 550.1. Omnibus autem adultis dispositiones omnes ad gratiam. 549.1. & remissionem penæ temporalis, etiam quæ datur per satisfactiones hominum. 552.2  
Merita Christi duobus modis nobis applicantur. 547.1  
 Applicatio eorum per sacramenta ex meritis Christi. 549.2  
Nullum meritum fuisse Christo, quod non spectaverit ad nostram redemptionem, quo sensu verum. 547.2  
Hæc merita solum in præscientia Dei antecesserunt gratiam antiquorum Patrum. 547.2  
Christi meritum qualiter influat in nostra, explicatur. 552.1  
Christi meritum & nostra satisfactio quomodo inter se concurrant sine alterius imperfectione vel redundantia. *ibid.* 2  
Merita Christi respondentia actibus amoris Dei & proximi, prævisa fuere ante electionem prædestinatorum. 559.1  
Angelis gratia & gloria data est propter merita Christi prævisa. 560.2

*Messias.*

Quid, & unde, & cur sic dicatur, & cur a Jacob, *Siloth* nominetur. 3.1. & 2  
Messiæ veri appellatio qualis sit. 7.1. Jam venisse (quod omnibus Christianis compertum est) ex sacra Scriptura demonstratur contra Judæos, a fol. 2.1



- Cunctis gentibus desideratus.* 11.2  
*Qualis promissus, & qualia bona orbi attulerit.* 14.1  
*Messiam temporalem regem adhuc sperant Judæi.* 13.2  
*Verum Deum, & hominem futurum ex sacra Scriptura ostenditur.* 14.2. & seq.
- Miracula, Miracula Christi.*  
*Miraculum est opus insolitum & supra vires naturæ.* 410.1  
*Miracula Christus per humanitatem operatus.* 409.2  
*Eis debuit suam fidem confirmare: & qua ratione incarnationem esse factam ostendant. 23.1. Ea ut vera tam angeli boni quam mali evidenter cognoverunt: potuerunt etiam evidenter homines cognoscere qui viderunt: qui autem non viderunt, quomodo.* 409.2  
*Miraculorum virtus in Christo fuit permanenter per modum habitus a primo instanti incarnationis, ut proprietates unionem consequens. 410.1. quam nunquam deinde amisit, imo etiam post ascensionem habet usum ejus, ibid.*  
*Hæc virtus non est qualitas, motus, vel aliquid aliud humanitati superadditum, sed potentia obedientialis activa. 414.2*  
*Objectum hujus potestatis quale.* 448.1  
*Ad effectus loco distantes hæc virtus extenditur.* 442.2  
*Humanitas est effectrix miraculorum, estque eadem operatio ejus ut instrumenti, & Dei ut principalis agentis.* 411.2  
*Miracula semper Christus operatus est per aliquam actionem humanitatis,* 446.1  
*Non habuit potestatem ad omnia miracula possibilea.* 515.1
- Modus.*  
*In quo formaliter ratio modi consistat,* 265.1  
*Differentia inter modum rei & rem.* 189.1  
*Non potest suppleri per realitatem distinctam, nec modificare rem aliam etiam de potentia Dei absoluta.* 200.1  
*Non potest localiter a re separari.* 265.2  
*Modus spiritualis ex extrinseca ratione dicere potest ordinem ad rem materiale.* 440.2  
*Supponit ordine naturæ rem cujus est modus, præsertim si sit extraneus.* 499.2
- Monarchia.*  
*Romanorum quando cœpit.* 10.1  
*Græcorum quot annis duraverit. ibid. Quot monarchia Persarum.* ibid.2
- Morbus, & morbus in Christo.*  
*Morbus in quo consistat.* 453.2  
*Christus morbum non assumpsit, nec in illum incidit: potuisset tamen incidere, si ad summam usque ætatem perveniret. ib.*
- Mors.*  
*Mortem Deum non fecisse qualiter intelligendum.* 127.2  
*Mortem Adæ, & posterorum ejus non prius Deus vidit quam peccatum.* 128.1  
*Christus per mortem suam (quam quoad omnes circumstantias prædefinitam verisimiliter est) sibi aliquid meruit, tamen non dicitur pro se mortuus.* 564.2  
*Mors poena peccati.* 128.1
- Moyse.*  
*Quo sensu Dei & hominum mediator.* 713.2
- Mundi.*  
*Duratio per sex ætates in universum distribui solet.* 147.2.  
*quid unaquæque duraverit.* ibid.
- N*
- Natura, Natura divina, Humana.*  
*Naturæ ordo & gratiæ quomodo differant.* 226.1  
*Natura unde dicatur, & quid sit.* 153.2  
*Naturæ qualiter conveniat per se existere.* 239.2  
*Natura, & res naturales, quot modis dicantur.* 208.2  
*Cum duæ naturæ uniuntur in unica subsistentia personali ex eis resultat una persona.* 159.2  
*Natura substantialis, licet naturaliter esse non possit sine subsistentia, non tamen ab illa nisi ut a consequente conditione pendet.* 181.2  
*Natura dicitur constituere personam constitutione essentiali, non personali.* 248.1  
*Si eadem a tribus divinis personis assumeretur, necessario essent tres uniones.* 262.1  
*Communis natura assumi non potest, sicut nec subsistens, nisi propria personalitate privetur.* 270.2  
*Una natura de alia in abstracto prædicari non potest.* 477.1  
*Natura creata potest esse simul in pluribus personis extrinsecis: secus in una propria & alia extranea.* 273.2  
*Natura divina existit per se esse absolutum, in quo nihil est quod illam reddat incommunicabilem. 234.2. a sua suppositivitate ratione tantum distinguitur.* 500.1
- Cur tribus relationibus terminetur.* 329.2  
*Non est genita, sed per generationem accepta.* 248.2  
*Subtractis per intellectum proprietatibus personalibus potuit Deus ex vi suæ subsistentiæ naturam creatam assumere, secus si non subsisteret.* 254.2.  
*Natura divina ex sua ratione postulat tria supposita, & qualiter in illis simul sit.* 261.2  
*Nullatenus potest informare intellectum creatum, licet ei possit uniri per modum speciei intelligibilis.* 344.1  
*Naturam divinam esse incarnatam qui Patres dixerunt.* 248.2  
*Naturam humanam Deum assumere convenientissimè.* 29.2  
*Per peccatum facta est apta materia, ut in ea Deus justitiam suam simul cum misericordia patefaceret.* 103.2  
*Inter naturam humanam & divinam Christi, nulla intervenit relatio realis unionis. 190.2. bene tamen rationis.* ibid.  
*Utriusque naturæ proprietates manserunt in Christo distincte.* 477.1  
*Naturam irrationalem uniri hypostatice Deo non implicat, secus ipsum videre.* 275.2  
*Licet non sit in illa extrinseca congruentia ad hanc unionem, non est tamen in ejus assumptione indecentia.* 276.2
- Nestorius.*  
*Nestorii error qui fuerit.* 162.2  
*Nestorii sequaces qui fuerint.* 166.2  
*Terminum incarnationis substantiā esse negare debuit.* 163.1  
*Ejus error ex professo confutatur.* 166.1  
*Qualiter in Christo unam tantum voluntatem posuerit.* 505.1
- Nomen.*  
*Nomina nova novis rebus imponenda.* 2.2  
*Nomina abstracta significant in Scriptura perfectionem rei, cui attribuuntur.* 65.2  
*Novati error qui fuerit.* 85.2
- O*
- Obedientia, & religio est ad alterum, sicut & justitia.* 52.1
- Oblatio.*  
*Oblatio Christi ut ab ipso procedebat, habebat infinitum valorem simpliciter, non ut procedebat a B. Virgine vel sacerdote.* 41.2  
*Oblatio Christi non fuit infinita simpliciter in ratione pretii ex sola re oblata.* 41.1
- Omnipotentia.*  
*Omnipotentia Dei simpliciter nec fuit communicata, nec potuit communicari humanitati Christi, & qualiter Patres de hoc loquentes intelligendi,* 408.2  
*Ad omnipotentiam Dei duo requiruntur, & quæ illa.* 409.1  
*Ad omnipotentiam Dei pertinet, ut possit uti creatura sua ad omnem effectum non involventem contradictionem.* 222.2  
*Deus formaliter est activus per omnipotentiam suam.* 421.1
- Opus, Operatio Christi.*  
*Opus sanctioris personæ, cæteris paribus, majoris valoris.* 38.2  
*Operis dignitas major est a persona operante, quam ab ea ad quam dirigitur.* 39.1  
*Ad opus satisfactorium non est necesse, ut alter acceptet, vel acceptare teneatur.* 59.2  
*Opera bona moralia, meritoria sunt de condigno supernaturalis gloriæ.* 397.1  
*Quo modo sit intelligendū re esse propter suam operationem.* 88.1  
*Opera bona moralia hominis in puris naturalibus, licet habeant proportionem cum naturali beatitudine, sed non propriam rationem meriti.* 530.2  
*Operari illi tribuitur cui simpliciter tribuitur esse.* 52.1  
*Opera Christi sunt infiniti valoris, ad merendum & satisfaciendum. 34.2. Non tamen quia a voluntate divina proficiscebantur. 35.1. neque a personalitate, vel ut per se ipsam influente immediate in ipsum actum. 37.1. vel ut ratione ad divinitatem præcisa,* 67.1  
*Nec quia physice uniantur Verbo divino. 37.2. neque ab aliqua creata virtute speciali. 54.2. sed ex parte personæ præcise, ut operans est, & unionis mediate ad ipsam, nec non materiæ circa quam versabantur.* 38.1  
*In operibus Christi non est compositio ex actu voluntatis humanæ divinæ.* 35.2  
*In ratione meriti, satisfactionis & sacrificii magnum valorem habuerunt ex re oblata, non tamen infinitum, licet ipsa infinita sit.* 40.1  
*Inæqualia fuere in propria bonitate intrinseca, æqualia in valore utpote infinita.* 43.1  
*Sufficerent ad solvendum omne debitum, etiam si infinitis titulis deberetur: & ad merendam incarnationem.* 220.1  
*Operationem unam in Christo reperiri tribus modis intelligi potest.* 526.2
- Omnis*



- Omnis operatio humanitatis Christi fuit humana.** 526.1  
**Operatio humana una tantum in Christo dupliciter intelligi potest.** 527.2  
**Operationes, quæ in nobis sunt naturales, sunt etiam naturales in Christo, licet ejus voluntati subiectæ.** *ibid.*  
**Opera Christi ordinata sunt ad satisfaciendum pro nobis, sed non sine nobis.** 32.1  
**In Christo cur sint duæ operationes, & unum tantum esse.** 304.1  
*Oratio, Oratio Christi.*  
**Oratio ut est actus religionis est quardam adoratio.** 652.1  
**Est actus inferioris deprecantis auxilium superioris.** 588.1  
**Generali significatione omnem actum interiorem, quo anima elevatur in Deum significat: quidque magis stricte.** 591.1  
**Oratio mentalis dicit aliquid pertinet ad intellectum, & aliquid ad voluntatem.** *ibid.*  
**Nō solū pro bono cōmuni, sed pro particulari fūdi potest.** 590.1  
**Qualiter Christū orare possumus ut pro nobis oret in celo.** 593.1  
**Habet efficaciam ex Christo, non minus quam meritum, nec sine ejus gratia potest aliquid impetrare.** 235.1  
**Si Christus esset tantum Deus, orare non posset.** 588.2  
**Christus per contemplationem beatam oravit,** *ibid.*  
**Fuit illa necessaria mētalis orat. propter se: vocalis secus.** 589.2  
**Omnis oratio Christi ex absoluta voluntate profecta, exaudita est, non quæ ex velleitate.** 590.2  
**Quæ Christus sciebat non futura, nunquam absolute orando a Deo petiit.** 588.2  
**Christus simpliciter non indiguit oratione, ut quæcunque vellet fierent: secus ex dispositione providentiæ.** 591.2  
**Christus non in omni sua oratione sui est oblitus.** 545.1  
**In celo semper pro nobis interpretative orat, imo interdum aperta, & expressa voluntatis suæ representatione.** 592.2  
*Ordo.*  
**Ordo naturæ supponitur ordini gratiæ, non tamen res omnes utriusque ordinis inter se hunc ordinem servant.** 109.2  
**Ordo gratiæ supponit naturā in executione, nō in intentione.** *ib.*  
**Ordo prioris, & posterioris in intellectu divino, & voluntate unde sumendus.** 110.2  
**Unde inter scientiam visionis, & voluntatem Dei** 120.2  
**Unde inter res, quarum prioritatis in Deo non est fundamentum.** 112.1  
**Ordo duplex: intentionis, & executionis, & qualiter in divina voluntate distinguantur.** 114.2  
**Ordo prioris & posterioris in scientia visionis.** 119.1  
**Ordo unionis hypostaticæ non supponit ordinem gratiæ, & qualiter ad utrumque se habeat ordo naturæ.** 126.1  
**Ordo naturæ solum est inter causam, & effectum.** 297.1  

**P**  
*Passio Christi.*  
**Quare illi specialiter tribuatur nostra redemptio.** 28.1  
**Non omnes species passionum Christus assumpsit.** *ibid.*  
**Passiones sensibiles fuerunt in Christo, seclis imperfectionibus, unde melius *propassiones* dicuntur.** 468.1  
**ad undecim capita revocantur.** 468.1  
**Christus qua ratione passiones superasse dicatur,** 467.1  
*Pater æternus.*  
**Pater æternus non nisi unam personam generare potest.** 263.2  
**Est unum principium Filii, & Spiritus sancti, quamvis habeat plures relationes.** 264.1  
*Patres antiqui.*  
**Patribus antiquis propter merita Christi prævisa datum est quidquid gratiæ, & meriti habuere.** 227.2  
**Non meruerunt de cōdigno incarnationē, nec executionē: hanc vero meruere de congruo, circumstantiasq; aliquas.** 226.1  
**Imo & merita Christi, & aliquos effectus generales ipsorum: & passionem ejus, & mortem.** 229.1  
**Quo sensu redemptionem meruerint.** 228.2  
**Non potuerunt mereri incarnationis prædestinationem: potuerunt tamen illam mereri de potentia absoluta simpliciter loquendo.** 224.2  
*Peccatum.*  
**Peccati malitia est minor bonitate Dei.** 33.2  
**Propria ratio peccati ex injuria facta Deo sumitur.** 32.2  
**Per illud offenduntur omnes tres personæ.** 66.2  
**Actus peccati quomodo sub dominium Dei cadat, & in ejus injuriam cedat.** 68.2  
**Non habet infinitatem simpliciter ex persona offensa, sed tantum secundum quid. Unde major malitia est in uno peccato quam in alio.** 72.2  
**73.1**  
**Quæ sit forma præcipua expellens peccatum, & qualiter hæc expulso a favore extrinseco Dei, gratiaque habituali pendeat.** 89.2  
**Peccati macula, aut non distinguitur a culpa habituali, aut est privatio gratiæ.** 85.1  
**Peccatum actuale est majus intensive originali, extensive secus. Mortale gravius originali, sed non veniale.** 108.2  
**Peccatum aliquod actuale totam naturam inficit.** 144.1  
**Propter peccata actualia, si veniale nō præcessisset, ex vi presentis decreti Christus non assumeret carnem passibilem.** *ibid.* 2  
**Peccata membrorum Christi non possunt dici Christi quoad commissionem.** 459.2  
**Peccatū permittit in alio, potest esse bonū, secus in seipso.** 462.1  
**Multa venialia non æquivalent uni mortali.** 75.1  
*Peccatum veniale.*  
**Peccatum veniale non est proprie contra Deum, neque ab eo avertit, & analogice tantum est offensa, cui temporalis tantum pœna debetur.** 98.1  
**Reparari potest ab homine justo, per intrinsecam gratiā.** *ibid.*  
**Non potest quis propter veniale gratia, aut gloria privari, vel in perpetuum puniri per se.** 100.1  
*Peccatum Originale.*  
**Peccatū originale simpliciter est majus malū, quā actuale.** 108.2  
**Semper consequitur ex aliquo actuali.** 108.1  
**Qualiter inficiat totam naturam, & sit radix omnium actualium.** *ibid.* 2  
**Quomodo pœnam sensus mereatur.** *ibid.*  
**Anima prius natura informat corpus quā illo inficiatur.** 462.2  
**In Christo esse non potuit, nec proprie fuit in Adamo.** *ibid.*  
**Christus maxime venit propter originale tollendum, & propter ipsum solum venisset.** 144.1  
**Originalis permissio, & præscientia posterior fuit electione hominum ad gloriam, & voluntate incarnationis.** 123.2  
**Peccatorem, quantum est in se, velle Deum destruere quomodo intelligendum.** 74.1  
**Injuriam infert Deo, & in extrinsecis bonis eum lædit.** 75.2  
*Peccator.*  
**Peccator nō a se formaliter expellit peccatū per cōtritionē.** 85.1  
**In peccatoris confessione non est valor æquivalens ad satisfactionem, etiam ex gratia Dei.** 87.1  
**Potest tamen imperfecte satisfacere.** 96.2  
*Pelagius,*  
**Pelagii error qui,** 85.2  
**Pelagiani gratiæ Dei hostes male de Christo sentiebant.** 30.2  
*Perfectio.*  
**Simpliciter simplex, quæ nam sit.** 240.2  
**Est de ratione entis infiniti simpliciter,** *ibid.* & communis tribus personis divinis. 234.1  
**Alia perfectio relativa est in una persona Trinitatis, quæ non in alia absoluta secus.** 243.2  
**Nulla perfectio divina prout in Deo est, potest per se ipsam uniri creaturæ, nisi subsistentia.** 353.1  
**Perfectio accidentaliter ad substantiale, & intrinsecum complementum dispositio esse non potest.** 216.1  
**Perfectiones in corpore humano duplices sunt, debita aliæ, aliæ indebitæ.** 451.1  
*Perseverantia.*  
**Non cadit sub meritum de condigno: bene tamen sub meritum de congruo.** 228.1  
**Perseverantiæ donum est effectus meritorum Christi.** 551.1  
**Potissimus effectus est, & complementū prædestinationis.** *ibid.*  
*Persona, Persona Divina, Persona Christi.*  
**Persona addit ad hypostasim, quod sit in natura rationali.** 158.1  
**Persona creata constituitur in ratione personæ per id per quod constituitur in ratione per se existentis.** 239.2  
**Quæ incommunicabilitas necessaria ad constitutionē personæ.** *ib.*  
**Persona est incommunicabilis aliis personis, nō naturis.** 247.2  
**Propriissime competit illi naturam assumere.** 247.1  
**Persona creata ut persona, non est assumptibilis.** 271.2  
**Tribus modis dici potest assumi.** 268.2  
**Personalitas relativa aliam relativam secum compatitur, non absolutam.** 273.2  
**Personæ dignitas semper confert valorē operi, & qualiter.** 37.1  
**Aliter auget bonitatē intrinsecam actus, aliter valorē.** 42.1  
**Personæ unitas major numerali.** 115.2  
**Divinæ personæ, quamvis in una essentia uniantur, nihil unum componunt.** 170.2  
**Personæ divinæ unitas in se major est unitate trium personarum.** 201.1  
**Non multiplicantur, nec distinguuntur in esse Dei.** 235.2  
**Personis divinis tripliciter potest aliquid convenire.** 236.1  
**Sunt tres subsistentes, etiam substantivæ.** 242.2 & tres subsistentiæ. 343.1  
**Divina**



- Divina persona, quid significet, quidque in illa sit incommuni-  
cabile. 242.2
- Inter constitutionem divine persone, & creatę, discriminę. 244.1
- Tres persone sunt hic Deus, seu individuum Deitatis, una  
substantia, unum subsistens. 245.2
- Necessario ubi una est, est alia. 251.2
- In solo relativo distinguuntur. 253.1
- In eadem natura communicare possunt, imo & assumere eandę  
naturam, & propriis substantiis eam terminare, secus in ea-  
dem persona. 281.2 Quod si de facto assumerent unam na-  
turam humanam, essent unus homo: Quod si quęlibet assu-  
meret distinctam naturam, essent tres homines. 263.1
- Sola persona increata potest alienam naturam terminare, &  
quare. 265.1
- Concilia, quę docent tres personas esse unam substantiam in  
Deo, significant esse in Deo absolutam subsistentiam. 241.1
- Eadę humanitate a tribus personis assumpta, non esset majoris  
valoris actus ab illis elicited, quā est modo actus Christi. 46.2
- D. Petrus.*
- Non meruit de condigno Ecclesię principatum, suscepit ta-  
men convenientem gratiam ad munus pastoris, 145.1
- Pœna, & Pœnalitas.*
- Pœna æterna, etiam damni, simpliciter non est æqualis culpę  
mortali. 75.1
- Pœna æterna non remittitur, nisi culpa remittatur. 85.1
- Pœna temporalis pro qua iustus satisfacit, ex operibus remit-  
titur. 94.2
- Pœnæ temporalis reatum manere in natura assumpta a Verbo,  
quę ante assumptionē peccasset, implicat, secus eterne. 463.2
- Pœnalitates hujus vitę cur Christus assumere debuit, non al-  
terius. 449.1
- Nec has assumere fuit omnino necessarium, *ibid.*
- Pœnitentia.*
- Significat retractationem proprię voluntatis, quę in Christo  
locum non habuit: licet habuerit Christus habitum pœni-  
tentię. 55.1
- Qualis habitus sit: & qua ratione pars iustitię, *ibid.*
- Imperfecte tantum satisfacit pro peccato. 96.1
- Pontifex Summus.*
- Pontificis summi decisioni potius standum, quam communi  
Patrum sententię. 579.1
- Pontifex summus non habet dominium temporale directum  
rerum omnium. 608.2
- Potentia.*
- Potentia ut non dicatur frustra esse quid requirat, 404.2
- Potentia physica activa, quę sit. 411.1
- Potentia activa non denominat potentem, nisi id cui inest, quę  
denominatio intrinseca est. 422.2
- Potentis animę præcise consideratis aliqua vis activa inest ad  
supernaturales actus. 424.2 Quę non est naturalis, sed obei-  
dientialis. 429.1 Per illam concurrunt, ut supernaturalia  
instrumenta vitalia, & aliquando libera, sive cum habitu,  
sive cum auxilio extrinseco. 509.2
- Quomodo, & per quos actus potentia specificentur. 441.1
- Potentia naturalis nullatenus specificatur per supernaturales  
actus, 934.2
- Potentia obedientialis.*
- Potentia obedientialis, quid, 417.1
- Duplex est, & quę illa. 357.1
- Solum est respectu creatoris. 413.2
- Potentia obedientialis activa, sicut passiva, in omnibus crea-  
turis. 418.1
- Licet innata non constituit simpliciter potentem. 417.1
- Potentis obedientialis activa, quę necessitas. 426.2
- Possibilis obedientialis, & tam necessaria, quā passiva. 427.1
- Dari probatur auctoritate Patrum. 429.1
- Quo differat a potentia naturali. *ibid.* 2
- Tam activa quam passiva aliquo modo est naturalis, non ta-  
men simpliciter. 432.2
- Obedientialis passiva, positiva, & realis potentia. 428.1
- Potentię obedientialis vox attributa rebus inanimatis, ali-  
quid metaphorę involvit. *ibid.*
- Nullatenus distinguitur ab ipsa re, cui inest, neque est ab illa  
separabilis. 430.2
- Non per se primo ordinatur ad id agendum, vel recipiendum,  
ad quod est potentia, neque ad illud dicit ordinem transcendē-  
tem, nec sumit ab eo speciem: eandem enim habet quā  
res ipsa. *ibid.* Etque materialis vel spiritalis, substantialis  
vel accidentalis, naturalis vel supernaturalis, prout ejus qua-  
si subiectum fuerit. 434.2 nec infinite perfecta. 441.2
- Qualiter in ea inchoetur supernaturalis ordo, & ipsa suo actu  
proportionetur. 432.2
- Activa non necessario requirit naturalem activitatem in re,  
cujus est potentia. *ibid.*
- In ratione potentię, neque est supernaturalis, nec naturalis,  
sed obedientialis, & quare. 534.2
- Non agit, nisi juxta mensuram auxilii, vel habitus, quo eleva-  
tur. 435.2
- Est in ratione instrumenti infinita intensive, & potest in inten-  
siores, & intensiores effectum in infinitum. 440.2
- Cur in relationibus divinis non reperiatur. 441.2
- In unaquaque creatura tantum est una secundum rem, licet  
possit per nostros conceptus multiplex in ordine ad varios  
effectus distingui. 438.1
- Potentia obedientialis, quam intelliguntur habere res ante-  
quam fiant, in sola non repugnantia consistit. 428.1
- Potestas, Potestas Christi.*
- Potestas regendi Ecclesię creaturis communicata est in suo  
genere propria, & principalis, influendi vero gratiam, in-  
strumentaria tantum. 345.2
- Habuit Christus in quantum summus sacerdos, supernaturalē  
quandam excellentię potestatem in universam Ecclesiā. 407.1
- Potestas excellentię Christi in quo consistat. *ibid.*
- Potestatem regiam, & legislativam in omnem mundum ha-  
buit, verumque spirituale regnum. 604.1
- Nulli creaturę hæc Christi potestas est communicabilis. 605.1
- Eam habuit a primo incarnationis instanti. *ibid.*
- Præceptum, Christo impositum Præceptum.*
- Quid significet, quidque de ejus essentia. 568.1
- Nec comminatio, nec coactio de ratione præcepti. 569.1
- Ejus transgressio, vel libera omisso semper prava. *ibid.*
- Negativa, & affirmativa præcepta qualiter obligent. 517.2
- Præceptū quid extrinsecum est, solū ex parte objecti movens. *ib.*
- Efficat actum necessarium ad honestatem morum, & debitam  
conjunctionem cum ultimo fine. 568.1
- Non datur de necessariis. 515.2 Inter præceptum, & prædes-  
tinationem differentia in ordine ad libertatem. 512.2
- Christus fuit capax præcepti, & qualis. 569.1
- Præceptum Christo impositum quomodo ipsius libertati non  
deroget. 512.2
- Probabile est non habuisse Christum potentiam physicam  
transgrediendi præcepta negativa, quod non est ita in af-  
firmativis. *ibid.*
- Probabile est habuisse præceptum determinans omnes circum-  
stantias. 512.1
- Si Christus voluntarie, etiam per puram omissionem, non im-  
pleret præceptum, peccaret. 513.1
- Non habuit Christus præceptum amandi Deum. 515.2 Ha-  
buit tamen redimendi genus humanum per passionem, &  
mortem suam. 517.1 & quale fuerit. 572.2
- Prædestinatio, Prædestinatio Christi.*
- Proprie tribuitur supposito. 645.2
- Dupliciter aliquid prædestinari dicitur. 639.2
- Tria in cujuscvis prædestinatione consideranda. *ibid.*
- Inter objectū, & terminū prædestinationis mutuus est ordo. *ib.*
- Supponit scientiā futurorum conditionatā, non absolutā. 103.2
- Quid prædestinatio apud D. Thom. 104.1
- Prædestinatio & glorificatio quomodo pēdeat ex meritis. 115.2
- Verfatur circa res singulares cum circumstantiis earum. 127.1
- Prædestinationis ordo ex Paulo ad Hebræos secundo declara-  
tur. 119.1 Idem ipsum late explicatur. 555.1
- Prædestinatio qualiter sub merito cadere possit. 553.2
- Nemo illam mereri potest, nisi mereatur omnes effectus ejus.  
554.1
- Christus in quantum homo, ab æterno prædestinatus, imo &  
unio cum humana natura. 640.2
- Christus simpliciter dici potest prædestinatus, quod de filio Dei  
non dicitur, nisi cum relatione ad aliquem terminum. 641.1
- Christus, licet non factus, prædestinatus tamen filius Dei natu-  
ralis, quomodo, Verbum non item. 643.1 & 2
- Primario prædestinatus ad unionem hypostaticam, secundario  
ad beatitudinem, & alia dona gratiæ. 644.2
- Christus primus prædestinatus, licet cum ipso alii prædestinati  
fuerint, & quomodo. 122.1
- An peccati prævisionem prædestinatus incarnandus, salvator,  
iustificator & glorificator, redemptor etiam nonnisi in po-  
tentia. 127.1 Admissio tamen quod etiam in actu, non fit,  
Verbum deficiente peccato, non incarnandum. 139.2
- In primo signo rationis, quo Christus est prædestinatus, non est  
completa tota ratio prædestinationis, 141.1
- Chri-



Christus causa exēplaris & finalis prædestinationis aliorū. 124.1  
*Prædestinatus.*  
 Prædestinatorum electio præcessit in Deo permissionem peccati. 129.2  
 Nullus prædestinatus mereri potuit totam suam prædestinationem. 127.1  
 Prædestinatis non datur gratia propter merita, sed ut illa habeant. 217.2  
 Causa salutis prædestinatorum incarnatio, non vero medium. 560.1  
 Prædicatum includens imperfectionem repugnantem ei, quod est per se tale, nō potest de ipso dici per participationē. 617.2  
 Princeps interdum suis legibus obligatur. 560.2  
*Prioritas, & Prius.*  
 Prioritas rei, vel rationis, latius patet quā indepēdētia. 116.1  
 Prioritas naturæ, & ea a qua aliquid non convertitur subsistendi consequentia, diversæ. *ibid.*  
*Prophetia.*  
 Ante Christum plurimæ, post ipsum nullæ, omnes enim per ipsum, & in ipso impletæ. 7.1  
 Sæpe effectus explicat prophetiam. 8.2  
 Quid sit, & in quo a fide distinguatur. 328.2  
 Unde ejus perfectio sumenda. *ibid.*  
 Propheta vere fuit Christus, & plusquam Propheta. 329.1  
 Habuit prophetiæ donum permanentem, *ibid.*  
*Prudentia.*  
 Auriga est aliarum virtutum, in practica cognitione consistens. 402.2  
 Fuit in Anima Christi ab instante suæ creationis. *ibid.*  
*Pulchritudo.*  
 Ex quibus confurgat. 709.1  
 Cum modestia conjuncta quemcunque maxime ornat. 453.1  
 Fuit perfectissimo modo in Christo, 452.2  
 Q  
*Qualitas.*  
 Qualitas nulla creata esse potest causa principalis miraculorū, imo nec natura sua ad illa efficienda instrumentum. 413.2  
 Qualitas corporea non potest efficere naturali vi sua formas spirituales. 420.1 Nec spiritualis habet naturalem proportionem, aut habitudinem ad corpus, *ibid.*  
 R  
*Regnum temporale Christi.*  
 Christus non fuit rex temporalis Judæorum, nec habuit aliquod jus ad illud. 606.2  
 Habuit in universum orbē dominiū temporale indirectū. 607.1  
*Relatio, Relatio divina.*  
 Relationis existentia nihil aliud est, quam actualis entitas relationis. 237.2  
 Relatio divina, licet unum constituat cum essentia, non tamen per illum essentia existit. 240.1  
 Dicit perfectionē infinitā in suo genere, nō tamē simpliciter. *ib.*  
 Includit subsistentiam relativam. 253.2  
 Non sunt de conceptu essentiali essentiae, bene tamen essentia de conceptu ipsarum. 67.1  
 Cur terminare possint unionem hypostaticam, non visionem beatificam. 250.1  
 Relationes accidentales habent inesse divinæ subsistere. 243.1  
 Relationis humanitatis ad Verbum, quod fundamentū. 191.1  
 Relatio unionis alia est a relatione unitatis. 192.1  
 Relatio similitudinis, vel æqualitatis inter divinas personas rationis est. *ibid.*  
 Qui relationes prædicamentales admittit, realem ex parte humanitatis ad Verbum admittat necesse est. *ibid.*  
 Relatio realis creata habet distinctam existentiam ab existentia subiecti. *ibid.*  
 Relatio non potest esse subsistendi ratio. 159.1  
 Relationes inter Deum, & creaturas quales sint. 177.1  
*Religio.*  
 Etsi erga Deum versetur, cur non virtus Theologica. 648.1  
 Semper respicit aliquid creatum, ut proximā materiā. 653.1  
 Actus aliarum virtutū a religione, in quantum assumuntur ad exhibendū Deo honorē, induunt rationē adorationis. 649.2  
 Eadem est virtus religionis, quæ etiam propter diversos titulos Deum adorat, & colit. 657.2  
 Omnis actus a religione procedens, dicitur continere cultum latræ. 670.2 Non tamen est necesse, quod semper dirigatur in rem intellectualem. 702.2  
 Non solū impletio, sed & ipsa emissio voti, est actus relig. 654.2  
*Reliquia Sanctorum.*  
 Eis veneratio debita. 707.1

Veneratio Ecclesiæ Romanæ, & aliarū, erga sãctorū reliquias. *ib.*  
 Varia miracula earum virtute facta. 708.1  
 Solum adorantur propter moralem dignitatem, quam ex habitudine ad personas, quarum fuere, participant. 709.1  
 Ut conjuncte personis, & eadē qua ipse adoratione coli possunt. *ibid.* Imo, & seorsum adoratione inferiori, & respectiva. *ibid.*  
 Hic reliquiarum cultus qualiter religiosus. *ibid.*  
 Earum venditio simoniaca. *ibid.*  
 Ut reliquæ aliquæ publice ab Ecclesia colantur, quid necessarium. *ibid.* Quid, ut private. *ibid.*  
 Quomodo absolute, & sine conditione adorari possint. *ibid.*  
 Corpus ejusdem sancti cur in duobus locis esse aliquando existimetur. *ibid.*  
 Sanctorum reliquias privatim possessas secum devotionis gratia portare licitum, ac pium. 710.1  
*Remissio peccati.*  
 Ad obtinendam remissionem peccati extra sacramentum, necessaria est dilectio Dei super omnia. 79.1  
 Fit per aliquam formam inhærentem, nec de facto confertur, nisi per infusionem gratiæ, & justitiæ. 88.2. Possunt tamen de potentia absoluta ab invicem separari. 89.2  
 Absolute loquendo gratis datur, etsi peccator imperfecte satisfaciatur. 92.1  
 Non est a Christo, ut operante per voluntatem humanam, sed a solo Deo. 414.2  
 Remissio pœnæ in purgatorio, si per indulgentias, vel per vivorum satisfactiones fiat, ex meritis Christi est, secus si per condignam satisfactionem. 543.1  
 S  
*Sacerdos, Sacerdotium, Christus Sacerdos.*  
 Dicit essentialē ordinem ad sacrificiū oblationem, vel ad actum sibi maxime proprium. 597.1  
 Sacerdotis munus quod. 603.2  
 Qui sacerdotes, & quale sacerdotium in lege naturæ. 604.1  
 Christus vere & proprie sacerdos. 597.2 Non ut Deus, sed ut homo, vel ut Deus homo. *ibid.*  
 Seipsum in sacrificium obtulit, & qualiter hæc oblatio ab oblatione Martyrii differat. 598.1  
 Quo pacto sacerdos, & victima dicendus. 599.1  
 Christi sacerdotium diversæ, & longe perfectioris rationis, quam sacerdotium legis novæ, veteris, & naturæ, quæ sacerdotia invicem comparantur. 600.1  
 Dicit solam potestatem, & dignitatem convenientem naturæ ratione unionis, characterem, vel aliam qualitatem nullam ponit. *ibid.* In suo vero genere importat infinitam quandam dignitatem. *ibid.*  
 Christus sacerdos in æternum secundum ordinem Melchisedech, in ratione representati, & representantis. 602.1  
 Non tamen secundum ordinem Aaron. 603.2  
*Sacramenta.*  
 Qua ratione ex latere Christi profluxerint. 536.2  
 Organa sunt, per quæ merita Christi nobis applicantur. 551.1  
 Quivis sacramentorū effectus præmiū est meritorū Christi. *ib.*  
 In lege Evangelica cultus sacramentorum adorationem latræ continet. 599.1  
*Sacrificium.*  
 Variæ hujus nominis acceptiones. 597.2  
 Quod proprie sacrificium dicatur. *ibid.*  
 Solius Dei proprium. 659.1 Christo enim ratione humanitatis non offertur. 665.2  
 Est essentialiter adoratio. 659.2  
 Sacrificia, quæ inter se essentialiter distinguuntur, si a religione imperentur, solum materialiter differunt, in ratione divini cultus. 658.2  
*Sanctificatio, & Sanctus.*  
 Sanctificationis nomine quid intelligendum. 276.1  
 Sanctum, justum, & gratum Deo esse quā vim includat. 309.1  
 Christi sanctificatio duo dicit. 311.1  
*Sanguis, Sanguis Christi.*  
 Non est pars corporis humani, neque informatur anima. 284.2  
 Sanguinis officia in animali. 287.1  
 Futurus est in corporibus resurgentium. 277.2  
 Sanguinem assumpsit Verbum, & propter quas rationes. 285.2  
 Totus sanguis, qui fuit in Christo, etiam in passione effusus, unitus fuit verbo. 286.2  
 Vna ejus gutta sufficiens pretium nostræ redemptionis, & qualiter. 34.2  
 Habuit infinitum valorem, & unde. 285.2  
 Non necessario in resurrectione assumpsit omnem sanguinem, quem habuit in vita. 287.2  
 San-



*Sanhedrin.*

Sanhedrim concilium Hebræorum quale, & unde duxit originem. 5.2 In eo primarii iudices fuere ex Tribu Juda. 6.2 Extinctum est ab Herode. *ibid.*

*Satisfactio.*

In quo formaliter consistat. 68.2  
In quo a restitutione differat. 50.2 In quo a merito. 64.2  
Conditiones ad satisfactionem requisitæ. *ibid.* satisfactionis acceptatio quid, & ad quid necessaria. 57.2  
Acceptatio Dei necessaria est in omni satisfactione ipsi facta. 58.2 Qualiter vero cum aliis satisficit, requiratur. 59.2  
Satisfaciendi duplex modus. 57.2  
Satisfactio pro peccato fit proprie a Deo, ut Deus. 52.2  
Nec inter æquales fieri, neq; ab ipso offendente necesse est. 64.2  
Qualiter non fundetur in gratia offensi. 65.2  
Qualiter fieri ex bonis creditoris, vel ab illo acceptis non deroget rationi iustitiæ. 66.2  
Qualiter fieri debeat ex bonis alias indebitis. 69.1  
Satisfactio puræ creaturæ unde habeat non posse adæquari, nec ex iustitia reddere æquale pro offensa. 70.2  
Ad satisfactionem major valor requiritur quam ad meritum. 90.1  
Viribus naturæ non potest homo satisfacere pro veniali, licet ex gratia possit, non tamen ex rigore iustitiæ, nec tamen exacte, ut Christus. 97.2  
Satisfactionem nostram fundari in meritis Christi quid sit. 200.2  
& qualiter satisfactio Christi nostra dici possit. 201.1  
Non satisfacimus ex rigore iustitiæ, licet debeat ex iustitia acceptari nostra satisfactio. *ibid.*  
Satisfactionis valor qualiter ex dignitate personæ sumatur. 33.1  
Valor satisfactionis Christi infinitus ex infinita persona desumptus. 35.1

*Scientia, Scientia Dei, & Christi.*

De singularibus ut de Deo, & Christo dari potest. 2.1  
Scientiæ objectum duplex, materiale, & formale. 381.1  
Per inventionem comparata, ab ea, quæ per doctrinam, qualiter differat. 401.2  
Scientia simplicis intelligentiæ, & visionis unde distinguatur. 110.2  
Scientia visionis, & conditionata quid sint, & quomodo distinguantur. 193.2  
Conditionata fuit in Deo ante omnem operationem voluntatis, 126.2  
omnemque actum ad prædestinationem pertinentem. 554.2  
Nō præcognoscitur per eam peccatum, antequam sit commissum. 130.1  
Non vocatur simpliciter præscientia futurorum. 104.1  
Ad scientiam simplicis intelligentiæ pertinet, & quam necessaria. 110.2  
Scientia conditionata meritorum non est ratio eligendi prædestinatos, sed tantum conditio. 111.2  
Potuit eam Deus communicare animæ Christi. 380.2 sub merito autem non potuit cadere. 554.2  
Eam D. Thomas admittit. 146.1  
Omnis scientia futurorum contingentium habet in se ipsa indifferentiam quandam ex parte objectorum, sine reali variatione sui. 142.1  
Scientia infusa dupliciter dici potest, idem quod indita. 357.1  
Tripliciter infunditur. 390.1  
Non est discursiva, estque una simplex qualitas. 392.1  
Quid quod habitum addat. 398.1  
Varios, & multiplices actus habet. 391.2  
Christi anima per hæc creatam scientiam nihil scivit. 352.1  
Christus habuit scientiam connaturalem animæ humanæ, & quam. 359.2  
Beata, & naturalis in Christi anima quæ, & quanta. *ibid.*  
Habuit item infusam habitualem, ab illis distinctam, ab instanti suæ creationis. 360.1 Quin cum acquisita confundatur. 401.2 Et in quo ab ea differat. 381.2  
Que, ut terminatur ad res naturales, perfectior est angelica. *ib.*  
Processit a Deo solum, ut auctore gratiæ. 382.1  
Quo differat a scientia angelorum in effectibus cognoscendis. 387.1  
Qualiter ea uti Christus potuerit cum conversione ad phantasmata. 393.1  
Juxta capacitatem obedientialem est illi infusa. 394.1  
Per eam cognoscit omnes res naturales, quas angeli per species inditas. 381.2 & singularia, intuendo eorum existentias. *ibid.* 2 Cogitationes cordium. 383.1  
Futura contingentia. *ibid.* res item præteritas. 385.1 Omnes creatas supernaturales, per proprias species, in proprio genere. *ibid.* Deum ipsum quoad unitatem & attributa essentialia. 387.1 Imo & mysterium Trinitatis quantum ad an est, & perfectius quam per fidem cognoscatur. *ibid.* Non omnes autem effectus possibiles, cognovisse probabilis est. *ibid.*

Scientia beata animæ Christi ejusdem speciei, longe tamen perfectior visione aliorum beatorum. 366.1  
Potuit ei perfectior de potentia absoluta communicari. 378.1  
Non impedit actum scientiæ infusæ. 390.2  
Scientia acquisita animæ Christi ejusdem rationis cum connaturali animæ humanæ. 400.2  
Ea cognovit res omnes materiales & immateriales, substantias & accidentia. 401.1  
Scientia tota naturalis animæ Christi a principio creationis indita. 402.1  
Scientia experimentalis dupliciter in Christo, nō tamē a principio creationis animæ, sed discursu temporis in ea profecit. 403.2  
Scientiam visionis habuit Christus respectu suorum actuum quin ejus libertati derogat. 517.1

*Sceptrum.*

Sceptrum apud Hebræos regiam potestatem designat. 4.2  
Quomodo manserit in Tribu Juda. *ibid.*

*Scriptura.*

Scripturæ cū agunt de rebus nostræ fidei, & regulatiter, in omni proprietate intelligendæ dum absurdum non sequitur. 51.1  
Scriptura comprehendit omnem regulam infallibilis fidei. 103.1  
Modus loquendi Scripturæ de fine & motivo incarnationis explicatur. Cur raro explicat rationes consilii & voluntatis divinæ. 135.1

*Servitus, & Christus servitus.*

Servitus alia naturalis, alia per peccatum contracta. 581.2  
Servitutis relatio in positiva habitudine consistit. 578.2  
Relatio servitutis ad Deum in quo fundetur. *ibid.* 1  
Negatio communicationis in bonis nō est necessaria ad servitutem, nec omnimoda carētia juris ad bona domini: sed qualis. *ib.* 2  
Servitus aliquid addit supra obediētiæ subjectionem, & quid. 585.1  
Servitus ad homines per adoptivā filiationem excluditur, quæ vero ad Deū, etiam cum naturali filiatione cōpatitur. 586.2  
Denominatio servi maxime a denominatione creaturæ differt. 587.1

*Christi servitus.*

Christus ut homo est, & appellari propriè potest servus Dei. 574.2 Ostenditur ex testamento veteri. 583.1 ex novo. *ibid.* ex Patribus. 577.1  
Qua certitudine tenendum. 580.2  
Varia loca Sanctorum, specialiter Damasceni de hoc exponuntur. 584.2  
Christus in quantum homo, bene dicitur servus sui ipsius, sine tali addito implicito vel explicito, nec sui, nec Dei, nec Patris, aut Spiritus sancti. *ibid.*

*Sermo.*

Sermo scientiæ & sapientiæ, quæ gratia sit, & quomodo Christo convenerit. 329.2  
Idem de sermonum interpretatione ostenditur. 330.1

*Species.*

Necessaria est ad cognitionem intuitivam. 382.1  
Soli requiritur, ut efficiat tanquā instrumentū intellectus. 353.1  
Eadem infusa sufficit representare naturam cum omnibus individuis: imo & infinitas species sub uno genere. 382.2  
Species infusa Christo qualiter representaverint sanctissimam Trinitatem. 388.1  
Species infusa Christo, nō una, sed plures sunt, & universales connaturalibus intellectui humano, imo & angelico. 393.2  
Per illas infinita representantur. 394.1  
Species, quæ scientiæ, & quæ experimento deserviunt, in quo differant. 404.1

*Spes, Spes in Christo.*

Spei objectum quale. 320.1  
Christus nō habuit actū spei de animæ beatitudine, secus de gloria corporis, qui actus propriè a virtute spei elicitur. *ibid.*  
Qualiter maneat in beatis. *ibid.* 2  
Spei appetitus fuit in Christo, sicut desperatio sensibilis. 468.2  
Esse potest cum certitudine mali futuri. 472.1

*Spiratio activa.*

Spiratio activa non constituit personam. 243.2  
Non est accidens, licet adveniat personis constitutis. 237.2

*Spiritus Sanctus.*

Spiritus sanctus movens quantum conferat ad meritum. 74.2  
Nunquam dicitur minor Patre. 166.1  
Vide Pater æternus.

*Subiectio, Subiectio Christi.*

Subjectionis nomen quid importet. 566.1  
Legi Dei æternæ, seu naturali Christus fuit subiectus, nulli alii positivæ, licet id non repugnaverit. 569.2  
Minor Patre non potest dici, nisi in quantum homo, subiectus vero



vero sic . 567.1 Non autem dicitur subjectus sibi, vel Verbo nisi cum addito . 572.2

*Substantia.*

Substantiam supernaturalem dari quâ ratione repugnet. 43.1.1 Si Deus uniretur hypostatice substantiâ supernaturali, tale suppositum duplici titulo esset filius Dei naturalis, nullo adoptivus. 619

*Subsistentia.*

Subsistentiâ nomen quid significet. 238.1  
Est modus per se existendi. 240.1  
Subsistentia, suppositivitas & personalitas idē in creaturis. 239.2  
Subsistentia absoluta quid. 240.1  
Subsistentia ut sic, & multo minus Verbi, principium operandi non est, sed terminus naturæ. 37.1  
Subsistentia Verbi adæquate, & convertibiliter est idem cum Verbo. *ibid.* Non est prior existentia propriæ naturæ, nec se habent ut potentia, & actus. 180.2 Est tamen modus existentia. 181.1 Non attingitur immediate ab aliquo agente, sed ex ipsa natura resultat, per actionem distinctam, & separabilem a productiva naturæ. 182.2 Non pertinet ad cōplēmētū humanæ naturæ, nec hominis ut homo est. 195.2  
Subsistentia propria & modus unionis non opponuntur. 198.1  
In Deo est una absoluta, quæ formaliter est perfectio simpliciter. 199.1  
Subsistentia Verbi, cum non sit modus, qualiter vere cum creata natura componat. 199.2  
Subsistentia aliquo modo causat accidentales perfectiones, unde in substantiis, & accidentibus omnibus supponitur, & in Christi anima prius fuit unio ad illam, quam aliqua accidentaliter perfectio. 212.2 Estque conditio requisita ad accidentium sustentationem. 305.2 Absoluta incommunicabilis non est in Deo. 240.1 secus communicabilis, quæ cum tribus relativis quibuscum stare potest, in ipsisque includitur intime, quaternarium numerum nō conficit. 243.1  
Qui negant in Deo communem subsistentiam, hypostasim intelligunt. 241.2 Cur tres subsistentias potius quam tria esse, in Deo asseramus. 243.1  
Subsistentia relativa dat esse per se incommunicabiliter Divine personæ quam constituit, non naturæ, aut huic Deo. 244.2  
Uterior terminus qualiter subsistentiæ repugnet. 245.1  
Subsistentia & relatio qualiter in Deo idem. 260.1  
Communicari potest, non communicata persona. *ibid.*  
Subsistentia creata cur per increatam suppleri possit, non creata intellectio per increatam. 353.1  
Subsistentia seu personalitas naturæ creatæ non est de ejus essentia. 500.2 Ab humanitate Christi separari potuit manente propria existentia. 502.1

*Suppositum.*

Quid significet. 186.2 Quid supra naturam addat. 156.1  
Suppositi unitas major quam naturæ ex materia, & forma compositæ. 203.1 Creatum alienam naturam hypostatice nequit sustinere. 264.1  
Suppositum & persona in Christo idem. 168.2  
Re unum, sed in duplex per conceptus partibile. *ibid.*

## T

*Templum.*

Posterius priori in structura ignobilius, ob Christi Domini præsentiam illustrius redditum. 12.1 Illud in priori adventu Christus ingressus, non in posteriori. *ibid.*  
Ab Herode secundum templum constructum est. *ibid.*  
Templum in Jerusalem sub Cyro inchoatum, & altare erectum. 150.1 Consuetudo dicendi templa Sanctis quam antiqua & laudabilis. 661.2

*Terminus.*

Termini a quo & ad quem incarnationis, vide Incarnatio.

*Theologia.*

Theologia tripliciter Deum considerat, in se, in creaturis, ut finem ultimum. 1.2 Consideratio de incarnatione ad Theologum quibus modis attineat. 2.1  
Theologia quomodo vitam, & mortem Christi tractet. *ibid.*

*D. Thomas.*

D. Thomas præclarus itineris Theologici dux. 1.2  
Mens D. Thom. de interiori adoratione perpenditur. 650.1

*Timor, Timor in Christo.*

Timoris donum in Christo & beatis. 325.2  
Timoris varii modi. *ibid.*  
Timor reverentialis & castus quid, & qualiter in Christo. *ibid.*  
De ratione timoris, quæ fuga. 472.1  
Timoris actus dupliciter haberi potest. *ibid.*  
Timuit Christus malum, quod est in morte. *ibid.*

Malum facile, sed non honeste vitabile, potest esse timoris obiectum. *ibid.*

*Trinitas.*

Trinitatis mysterium in quo consistat. 240.1 Nostræ fidei est fundamentum. 232.2 Altius mysterium incarnatione. 22.1  
Trinitatis personæ sunt idem in natura majori unitate, quam qua hypostatice uniuntur, licet ipsæ non uniantur. 170.2  
Trinitatis opera ad extra indivisa. 209.2  
Est causa efficiens principalis gratiæ. *ibid.* Nomen qui est, convenit Trinitati ratione unius existentia. 233.1  
Trinitas non habet propriam efficientiam supra personam Verbi. 210.1 Trinitas non est incarnata. 249.2 Est tamen speciali modo in humanitate. 251.1  
Trinitas est infinita simpliciter, & quælibet ejus persona: & unde. 240.2 In Trinitate non multiplicantur concreta, nisi multiplicatis formis. 242.2  
Unaquæque persona est Deus, & omnes tres unus tantum Deus. 269.1 Non tamen omnes tres unum simpliciter. 495.2  
Trinitatis mysterium omnibus occultum: incarnationis etiam notum ipsi soli Trinitati. 362.1  
Prædicata quæ conveniunt Deo ab æterno communia sunt toti Trinitati, secus quæ per naturam assumptam. 483.2

*Tristitia, Tristitia in Christo.*

Tristitiæ obiectum quod. 470.2 In Christo tristitia fuit ratione sui & aliorum in utraque portione voluntatis. *ibid.*  
Tristitia & gaudium simul in Christo fuerunt, & qualiter, miraculose tamen. 522.2

## V

*Ubiquitarii.*

Ubiquetariorum error, & absurda, & falsa fundamenta. 454.2  
Hujusmodi ubiquitatem repugnare rei creatæ ostenditur. 455.1  
Alius error Ubiquetariorum de idiomatum communicatione refellitur. *ibid.* Veneratio & cultus idem fere quod honor significant, & eodem modo se habent ad adorationem. 646.2

*Verbum divinum.*

Verbum per incarnationem sine suæ potentia diminutione, vel augmento factum est potens ad redimendum hominem. 26.2 Per se ipsum & secundum totam suam infinitatem est unitum humanitati. 39.2  
Verbum in se persona simplex est, Verbum incarnatum composita. 158.2  
Verbum, vel divinitas pars Christi dici non potest. 159.2  
Verbum cur in antiquis apparitionibus singulariter repræsentatum fuerit. 168.1  
Verbi causalitas ad extra etiam in humanitatem, est tantum effectiva & communis omnibus divinis personis. 181.1  
Inter Verbum & naturam humanam est proportio, non naturalis, sed obediencialis. 199.2  
Cur ex his fiat unum per se, non ex substantia & accidente. *ibid.*  
Verbum quomodo magis sit in Patre, quam humanitas in Verbo. 202.1 Verbi sola persona ex divinis incarnata est, & naturam humanam assumpsit. 249.1  
Cur inter alias ipsam incarnari convenientius. *ibid.*  
Primo & per se terminat humanitatem per proprietatem relativam. 252.1 Si plures assumeret humanitates, diceretur unus homo, non plures. 263.2  
Verbum si dimitteret humanitatem, & eam Pater assumeret, esset idem homo, licet non eadem persona. 264.1  
Licet ex se infinitam sanctificationem conferre posset, tamen unicuique confert juxta modum suum. 311.1  
Verbum unitum ut sic, non habet ratione unionis specialem influxum physicum in actiones humanitatis. 409.1  
*Verbum factus est Deus*, propositio falsa est, etiam per communicationem idiomatum. 487.1 Verbum per communicationem idiomatum, creatura dici non potest. 491.1  
Verbum vere generatum & natum ex Virgine dicitur. 502.2  
Vide Christum, Filium, Incarnatio, Assumptio.

*Virtus, Virtus Christi.*

Virtus heroica a communi in quo differat. 311.2  
Virtutes morales duplices sunt, per se infusæ, & acquisitæ. 320.1  
Omnes in beatis manent. 322.1  
Una aliarum actus imperare potest, etiam Theologicarum. 651.2  
Virtus creata in Christo nulla est, quæ non possit esse in pura creatura. 55.1 Virtutes quæ nullam imperfectionem continent, simpliciter Christus habuit in gradu heroico. 318.2  
Virtutes omnes morales animæ Christi in suæ creationis instanti infusæ sunt, sine imperfectionibus, quæ peccatum supponunt. 321.1  
Morales ex suo genere acquisitas Christus habere potuit. 322.1



- Habuit illas infusas sine ullo imperfectionis genere ab instante conceptionis.** *ibid.*
- Virga apud Hebraeos regiam potestatem significat.** 4.2  
*Visio beata.*
- In quo excedat unionem hypostaticam. 205.2
- Non potest esse infinita ex parte creaturæ, & cur. 337.2
- Est ratio cognoscendi creaturas, cum in Deo videntur. 372.2
- Una creatura in Deo visa, non necessario omnes videntur. *ibid.*
- Visio omnium effectuum possibilium non est infinita extensiva.** 374.2 Nec necessario intensiva. 291.1
- Non extenditur ad plura objecta per aliquod augmentum, quod in se recipiat. 374.2
- Per eandem indivisibilem entitatem tantæ, vel tantæ perfectionis, repræsentatur Deus, & hæc vel illa creaturæ. 290.2
- Unde proveniat in visione repræsentari plures, vel pauciores creaturas. 291.1
- Visio creata omnium possibilium in Deo impossibilis. *ibid.* 2
- Ad hoc requiri infinitam visionem qualiter verum. 292.1
- Visione finita videt Christus infinita in Verbo. 380.1
- Visio beata non est similitudo objectiva, sed ratio cognoscendi, potestque videri non viso Deo. 386.1
- Ungues, dentes, & capillos assumptos fuisse secundum hypostasim, probabilius. 288.1
- Unio, Unio hypostatica.*
- Conveniens fuit Dei bonitati. 19.2 Non debuit communicari multis. 20.1 Ex parte humanitatis finitum quid. 39.2
- Uniri in persona est ita personæ alicui uniri, ut novam personam non constituat, distinctam ab ea, cui fit unio. 156.1
- Cur in persona, & non in natura facta sit. *ibid.* 2
- Unio secundum substantiā demonstratur esse substantialis. 168.1
- Unionem factā esse in hypostasi est eam talem esse, ut ex ea resultet una hypostasis Christi duplici natura subsistens. 163.2
- Unionis terminus non fuit natura ex divinitate, & humanitate conflata. 165.1 Resultans ex unione, fuit compositum ex natura creata, & persona increata. 173.2
- Unio hypostatica est relatio inter has duas naturas secundum, quod conveniunt in una persona. 175.1
- Unio, assumptio, humanatio, & incarnatio quomodo differant. *ibid.*
- Unio humanitatis ad Verbum non est creatio. 183.1
- Est tamen creationis quasi complementum. 298.1
- Per unionem factus est in humanitate quidam substantialis modus, qui necessario deberet esse, si ea a Verbo separaretur. 188.1
- Unio humanitatis ad Verbum est omnino idem cum dependentia a Verbo. 192.2 Nihil reale ponit in Verbo. 215.1
- Magis perfecit creatā naturā, quam propria subsistentia. 217.1
- Omni unione major, & perfectissimum opus gratia. 202.2
- Ab unione per gratiam, & beatificā in quo differat. 205.1
- Simplex dicenda supernaturalis, magis quam gratia, & visio beata. *ibid.* & qualiter alia re supernaturali. 397.1
- Cum sit ipsa gratia quomodo facta per gratiam. 206.1
- Unio omnis creaturæ ad Deum est accidentalis, præterquam in Christo. 251.2 Hypostatica non est facta ad subsistentiam essentialē. 252.1
- Nequit tamen intelligi sine aliqua subsistentia. 260.1 & primo ac per se ad illam terminatur. 275.2
- Nulla facta est præterquam in Verbo. 266.1 Ex partialibus modis unionis corporis, & animæ spirituali hoc, & materiali illo constat. 302.2 Ipsa non unitur hypostatice, sed est ratio qua aliud unitur. 303.2 Non tantum in anima & corpore, sed in ipsa humanitate composita facta est. 304.1
- Solum confert dignitatem personalem, non pulchritudinem quam gratia habitualis. 311.1 Non est principium physicum a quo habitualis gratia physice dimanet. 314.2 Elevat, & nobilitat quidquid illi conjungitur, juxta cujusvis capacitatem. 337.2
- Nec confundit naturas, nec proprietates earum. 353.2
- Formaliter & per se ipsam non constituit humanitatem in actu primo ad aliquid supernaturale, etiam per modum instrumenti. 354.1 Ubique est, eadem est. 457.2
- Cur amitti non possit, sicut habitualis. 463.1
- Nec dici potest adoptio. 636.1 & quomodo in hoc ab infusione gratiæ accidentalis differat. *ibid.*
- Unionis vox quid significet. 175.1 Quot modis fieri queat. 177.2
- Unio realis non potest fieri, nisi ad actualem entitatem, in qua intrinsece includitur existentia. 181.1
- Unio substantialis est conjunctio duarum rerum substantialium, per quam resultat una substantia composita. 184.2
- Unio substantialis cur duas personas esse non possit. 186.1
- Unio naturæ cum supposito substantialis est, cui non repugnat existentia creata ipsius naturæ. 532.2
- Univerſum.*
- Univerſi perfectio ex triplici rerum ordine, naturæ, gratiæ, & unionis hypostaticæ constat. 103.1
- Qui horum ordinum magis ad universi perfectionem necessarius. *ibid.*
- Univerſi creatio, & gubernatio eo tendit, ut numerus prædestinatorum impleatur. 123.2
- Voluntas, Christi, Divina.*
- Voluntas cessat cessante omni ratione volendi, non vero cessante una si plures movebant. 102.1
- Voluntas libera diligere potest simul id quod magis, & minus perfectum est, & medium minus fini conjunctum eligere. 112.2
- Voluntas potest ad idem objectum ex pluribus totalibus motivis ferri. 130.2
- Differentia inter rationem motivam & impulsivam voluntatis. 137.1
- Voluntatis motivum quot modis primum dici potest. 130.2
- Voluntas antecedens æquivalet conditionatæ; & ideo, non impleta conditione, potest non habere effectum. 140.2
- Voluntarium dupliciter dicitur. 454.1
- Voluntas dupliciter dicitur libera, vel a coactione, vel a necessitate. 507.2
- Voluntatem licet Deus cogere non possit, potest tamen duobus modis necessitare, & quibus. 509.2
- Potest Deus ita regere aliquam voluntatem, ut semper infallibiliter consentiat, quamvis libere. 511.1
- Voluntas superioris quando habeat vim legis. 516.1
- Voluntatem aliquam esse conformem alteri variis modis accidit, sed duobus potissimum, & quibus. 519.1
- In voluntate ut natura est distingui potest pars superior & inferior. 520.2
- Voluntas apud Deum, quo sensu reputet pro facto. 75.2
- Est principium omnium operū Dei in quocumque ordine. 110.2
- In voluntate divina illud est prius ratione, quod est finis alterius; & posterius, quod est propter aliud. 112.2
- Voluntas, qua Deus vult finem, & media, ratione distinguitur. *ibid.* 1
- In ea unum prius cadit, quam aliud, & quomodo. *ibid.* 2
- Quomodo possint res in divina voluntate habere aliam habitudinem finis & mediorum, quam in natura sua habeant. *ibid.*
- Ad ejus perfectionem pertinet, ut eminentiori modo possit quidquid humana, dummodo imperfectionem non includat. 114.1
- Potest libere velle objecta creata sine sui mutatione. *ibid.*
- Non immediate facit mutationes in creaturis, sed solum applicat ad illas potentiam executivam. *ibid.* 2
- Voluntas intentionis, & executionis ratione distinguuntur in Deo. *ibid.*
- Eadem voluntas Dei potest manere circa unum objectum sine aliis, ad quæ modo terminatur. 117.1
- Nihil reale addit illi libera determinatio ejusdem, sed solum respectum rationis. *ibid.*
- Quomodo seclusa omni imperfectione possit habere motivum primum origine. 130.2
- Ita est communis tribus personis, ut sit etiam cujusque propria. 462.2
- Voluntati divinæ debet conformari humana, non e contra. 557.1
- Voluntas Christi in regendo appetitum quomodo se habuerit. 466.1
- Voluntas humana creata in Christo fuit. 507.1
- Qui in Christo posuerunt voluntatem unam, Monothelitæ fuerunt. 505.1
- Licet secundum aliquam rationem tristiari potuerit, non tamen gaudio carere. 470.2
- Voluntatum contrarietas in Christo non fuit. 519.1
- Voluntates Christi quomodo non fuerint contrariæ, & qualiter in efficacia differant. 523.2
- Inter voluntatem Christi humanam, qua vult efficaciter quidquid Deus vult, & Beatorum idem volentium, quæ sit dissimilitudo. 524.1
- Quando voluntas Christi etiam humana absolute & efficaciter aliquid volebat, semper implebatur: desiderium autem & inefficax voluntas non idem. *ibid.*







